

续通志 (清) 高宗 敕撰

● 凡例

钦定续通志凡例二十则

一通志本仿史记之例而成书故有本纪有列传有谱以当表有略以当志其二十略叙事皆至唐而止纪传及谱则讫于隋自序谓唐书

五代史皆本朝大臣所修微臣所不敢议也今续纂纪传应自唐始略则自五代至明史记传则成于本朝我皇上以大公至正之心彰善瘅恶笔削维严具有全书垂训万世无庸更为节录

一本纪列传通志多全录旧史之文唐宋而下卷帙浩繁今所续纂务在勿冗勿漏其事之无关法戒人之无足重轻者槩从芟汰至正史而外若资治通鉴若纲目若纪事本末及传记文集碑版闲有可补正史之阙而纠正其谬者仍广为搜罗依类增辑并仿司马光通鉴考异之例将考正异同分注本条下以资参考

一金史于本纪之前有世纪所以溯祖宗积累之功明一王受命之始然开基大略未有不详之本纪者今采附帝纪其世纪补所列追尊三宗照元史改入宗室传以符郑志体例若辽史所载西辽余泽未泯犹存一线未可遽付湮没谨附录本纪之后

一列传名目各史不同班马以后妃为外戚范蔚宗则为皇后纪通志皆不从而从三国晋史之例别为后妃传其它外戚传金史曰世戚孝友传宋史曰孝义独行传唐宋辽史皆曰卓行循吏传辽史曰能吏旧唐书元史皆曰良吏艺术传诸史皆曰方技儒林传唐书元史皆曰儒学文苑传唐书金史皆曰文艺辽史曰文学又元史儒学传合儒林文苑为一皆名异而实同今悉依通志之名以昭画一

一列传次第各史互异唐书列外戚于列女之后列隐逸于循吏之前宋史列方技于列女之后列外戚于方技之后今依郑氏原书之序首宗室次列传次外戚次忠义孝友独行循吏酷吏次孔氏后裔次儒林文苑隐逸次宦者艺术佞幸次列女次载记次贰臣奸臣叛臣逆臣次四夷

一列传各史中分并互异如五代史家人传今析入后妃宗室传死节死事今并入忠义传伶官并入佞幸一行传析入隐逸孝友宋史道学传并入儒林元史儒学传析入儒林文苑元史释老传并入艺术唐书宋史公主传附缀后妃均依郑志门类以从其朔

一皇太子皇子诸王例入宗室传其追尊帝号者旧史俱不为区别魏收以景穆入帝纪后人讥之郑志统列宗室体例较严但其门有史

分而志合者有史阙而志补者有史系之列传而志入宗室者自唐而下互有异同今悉依例汇辑于以传系事之中仍不失以表系世之意

一通志所载名目凡诸史不立此传者皆从列传采取以类相从如史记不立隐逸传则采伯夷四皓诸人补之三国志不立忠义传则取典韦诸人入之史记无方技之名而以司马季主扁鹊仓公传移入艺术后汉书无孝友之名而以毛义江革诸人移入孝友是也今续通志即循此例如元史之伯勒格台六人入宗室传托音色辰等三人补外戚传宋史之周三臣入忠义五代史之马重续赵延义入艺术唐之张昌宗张易之入佞幸均依类改辑其有本无专传而无可补入者仍从其阙

一郑志有孔子列传今考自唐以后孔氏历有袭封我朝于明史特立衍圣公传表章圣裔甚盛典也兹采唐以下史传参之阙里文献考诸书分列嫡嗣支庶按次汇辑为孔氏后裔传

一郑志有年谱异姓世家二门皆仿于史记按史记年表即本纪中详着之文故班史以后不袭其体无妨阙如五代宋史虽各有世家其所载南唐吴越前后蜀南北汉诸国皆系偏隅分据非封建诸侯比也郑志本晋书之例于前凉西凉以及后梁萧氏别称载记体例最精今统归载记不复更列世家之目又郑志有游侠刺客滑稽货殖四门亦本史记唐以后无可载并宜从阙

一列传未备名目应为增修国史刵立贰臣传出自睿裁于旌别淑慝之中寓扶植纲常之义允昭褒贬之至公实为古今之通义今亦恪遵圣训于前代别立此门较诸原书体例实详且核焉至唐书之奸臣叛臣逆臣传皆唐以前诸史所无而其目实不可易今悉考核事迹增立奸臣叛臣逆臣三门列于贰臣之后

一有一人而两史并为立传者如裴矩李密王世充已见隋书而唐书亦载之王伦宇文虚中张邦昌刘豫宋金两史俱有传张特立金元两史俱有传亦有一史之内一人而重传者有父子兄弟分传而彼此互复者名不胜数均删并折衷以归一是

一续纂诸略自五代始礼乐器服职官选举之属皆与史志相表里今采取正史各志按代续编而郑志食货刑法灾祥诸略于唐事亦多未备并采新旧唐书诸志以补其阙

一辽金元三朝氏族未有专书今详加搜辑如辽之三耶律氏二审密氏金之白号黑号诸姓元之蒙古七十二族色目三十一一种备着于篇

一辽金元三朝文字史家所录未有志书法之书故六书鲜有征据契丹国志称辽

太祖以隶书之半增损作字金则有女真大字女真小字今皆不传元蒙古字之制见于著述者有陶宗仪书史会要所载蒙古字母朱伯颜所载蒙古字韵其中讹误相沿不一而足我皇上钦定同文韵统综以国书于蒙古字音字体无不赅备详见皇朝通志六书兹就三朝史册所见者撮其大略以次叙述

一郑志天文略祇载丹元子步天歌而不详推步之法七音略祇用字母内转外转诸图而不详合声切音之法今续纂各为详载

一郑志艺文略止载羣书目录未具撰人爵里撰述之家有姓名同而著书复同者如颜师古称两京房皆治易之类每易混淆今所续纂谨遵钦定四库全书例以著录存目分编于各书之下备载撰人姓名凡宋代诸书已登郑志者不复列入其总类仍依郑志为十二门每门细目则以四库全书为准

一图谱略郑志首索象原学明用三篇以辨其源流次自周秦迄于北宋分辨记有记无二篇以考其存佚但樵局于见闻周秦图谱至宋鲜有存者故记有篇祇总为一门而记无篇多至二十六门我皇上稽古右文图书大备又复搜罗海内藏书亲加厘定自南宋而下图谱孰有孰无了如指掌今于记有记无中各区为经学史乘天文地理政典学术艺事物类八门各门之下再为分晰名目断自淳熙至于明季博采史志旁及画谱书目按类增辑若夫文人游艺涉笔成图与夫私家谱牒偶见存留者无裨实学槩不缀录

一金石略郑志所录原本欧阳修赵明诚诸家著录粗具撰人姓氏而于碑碣所在大半未详盖限于方域搜罗未广亦时地为之也我朝幅员辽阔车书大同周秦钟鼎汉唐铭刻往往有晦于古而显于今者今所续纂即依郑志图谱之例以今有今无分载取唐以前郑志所未着者为一卷五代以下为二卷分掇撰书姓氏建立年岁与现存之地详确考核其散佚难稽者另为一卷至前人著录之误兼为辨证焉

一昆虫草木略郑志分为八门已称详赡然郭注陆疏亦多未尽所谓通鸟兽之情状察草木之精神者代有著述不厌搜罗今所续纂于郑志未载者则补其遗已载者兼正其误庶于诸经注疏足资考证

● 职名

三通馆总裁

经筵日讲起居注官大学士兼翰林院掌院学士（臣）嵇璜

经筵讲官吏部尚书管理国子监事务（臣）刘 墉

兵部尚书（臣）王杰

经筵讲官户部尚书管理顺天府府尹事务（臣）曹文埴

纂修兼总校官

日讲起居注官翰林院侍讲学士（臣）曹仁虎

翰林院侍讲（臣）蔡廷衡

翰林院编修（臣）祝德麟

武英殿纂修翰林院编修（臣）陈嗣龙

翰林院编修（臣）黄瀛元

翰林院编修（臣）陈昌齐

翰林院编修（臣）翟槐

纂修兼校对官

日讲起居注官翰林院侍讲学士（臣）陆伯焜

署日讲起居注官翰林院侍讲学士（臣）吴璈

翰林院侍讲（臣）陈万青

翰林院编修（臣）励守谦

翰林院编修（臣）秦泉

翰林院编修（臣）李潢

翰林院编修（臣）余集

翰林院编修革职留任（臣）汪鏞

翰林院编修（臣）王春煦

翰林院编修（臣）徐如澍

翰林院编修（臣）戴均元

翰林院编修（臣）周琼

翰林院编修（臣）吴锡麒

翰林院编修（臣）程昌期

翰林院编修（臣）甘立猷

翰林院编修（臣）刘汝暮

翰林院编修（臣）秦承业

翰林院编修（臣）俞廷楡

翰林院编修（臣）王受

翰林院编修（臣）卢荫溥

翰林院编修（臣）万承风

翰林院编修（臣）茹棻

翰林院编修（臣）邵瑛

文渊阁检阅内阁中书（臣）顾宗泰

翰林院庶吉士（臣）陈万全

翰林院庶吉士（臣）王锡奎

翰林院庶吉士（臣）贺贤智

翰林院庶吉士（臣）温汝适

翰林院庶吉士（臣）崔景仪

翰林院庶吉士（臣）李骥元

翰林院庶吉士（臣）朱依炆

翰林院庶吉士（臣）程嘉谟

原任翰林院侍讲候补主事（臣）庄承籛

原任翰林院庶吉士（臣）郑应元

满纂修官

理藩院主事（臣）巴达尔呼

工部笔帖式候补小京官（臣）龄椿

候补笔帖式（臣）嵩年

内阁贴写中书（臣）明达

提调官

内阁侍读（臣）西精额

文渊阁校理武英殿提调翰林院检讨（臣）彭元琬

收掌官

翰林院笔帖式（臣）库蒙额

翰林院笔帖式（臣）鹤麟

武英殿修书处刊刻续三通诸（臣）职名

总裁

和硕仪亲王（臣）永璇

经筵讲官太子太傅领侍卫内大臣大学士世袭轻车都尉（臣）庆桂

经筵日讲起居注官太子太傅大学士兼翰林院掌院学士（臣）朱珪

总理

经筵日讲起居注官太子少保协办大学士户部尚书兼翰林院掌院学士世袭云

骑尉（臣）戴衢亨

经筵讲官工部左侍郎兼左翼总兵官（臣）英和

经筵讲官工部左侍郎提督安徽学政（臣）玉麟

步军统领（臣）文宝

提调

内阁学士兼礼部侍郎（臣）汪滋畹

詹事府詹事提督山东学政（臣）王宗诚

文渊阁校理咸安宫总裁教习庶吉士翰林院编修（臣）吴云

翰林院编修（臣）李振翥

校对

翰林院编修（臣）吴裕德

文渊阁校理翰林院检讨（臣）赵未彤

文渊阁校理翰林院检讨（臣）张锦枝

日讲起居注官教习庶吉士左春坊左庶子（臣）吴鼐

翰林院编修（臣）俞恒润

国史馆提调翰林院检讨（臣）张鳞

翰林院编修（臣）王泽

国史馆纂修翰林院编修（臣）吴熙曾

翰林院编修（臣）杜堉

翰林院编修（臣）朱琦

翰林院编修（臣）章道鸿

翰林院编修（臣）黄中杰

翰林院编修（臣）张元宰

翰林院编修（臣）何应杰

翰林院编修（臣）龚守正

翰林院编修（臣）卓秉恬

翰林院庶吉士（臣）徐松

翰林院庶吉士（臣）姚元之

翰林院庶吉士（臣）邵葆锺

翰林院庶吉士（臣）和桂

翰林院庶吉士（臣）觉罗宝兴

翰林院庶吉士（臣）谢崧

翰林院庶吉士（臣）翟锦观

翰林院庶吉士（臣）张聪贤

翰林院庶吉士（臣）程家督

翰林院庶吉士（臣）蒋诗

翰林院庶吉士（臣）何彤然

翰林院庶吉士（臣）刘谦

翰林院庶吉士（臣）穆章阿

翰林院编修（臣）朱澄

翰林院编修（臣）席煜
副榜贡生候选州同（臣）邓百海
举人候选知县（臣）邵翔
副榜贡生候选复设教谕（臣）胡宗瑗
拔贡生（臣）鹿维宁
拔贡生（臣）何隆起
拔贡生（臣）张方覲
举人（臣）鲍文逵
副榜贡生候选盐大使（臣）萧树芳
副榜贡生候选直隶州州判（臣）汪誠
拔贡生（臣）童珖起
优贡生（臣）乔普
拔贡生（臣）苏平世
拔贡生（（臣））姚步莱
监造
内务府郎中兼佐领（臣）长申
内务府员外郎兼佐领（臣）克蒙额
正监造员外郎（臣）六十五
副监造副内管领（臣）永清
委署主事（臣）经文
六品衔库掌（臣）和兴
掌稿笔帖式（臣）玉广
库掌（臣）善元
库掌（臣）光裕
委署库掌（臣）崇文

●总目

（臣）等谨案钦定续通志六百四十卷乾隆三十二年奉敕纂其纪传自唐始诸略自五代始因郑樵旧目参考同异斟酌损益之有郑志所无而增补者有郑志所有而删并者各于本门小序详述端委窃惟作史之要贵于体例精严褒贬至当为天下后世纲常名教之准我皇上御批通鉴辑览出以独断衡以大公为前代史论所未有御制全韵诗举历代帝王得失炯鉴据事直书诚皆千古定评足为万世法戒谨于各卷内备载御批兼以全韵诗注意依次节叙若夫尊师重道教化之原皇上于明史命立衍圣公传所以表章圣裔也今则于通志立孔氏后

裔传事君致身伦纪之大皇上于国史别编贰臣所以树臣道之大防为古今之通义今则于通志依例立贰臣传其奸臣叛臣逆臣名本唐书义昭鉄钺并为增辑以正彝伦此皆郑志所无而增补者郑志有年谱有异姓世家有游侠刺客滑稽货殖诸传或并或删不妨从阙至其氏族以下二十略樵虽殫见洽闻搜罗未尽盖综核名物博采为难我朝稽古右文图书大备近复广搜海内藏书编罗四库取资既富考据易精兹所续纂如艺文则以著录存目分编于各书之下图谱则以记有记无统列八门皆本四库全书以资讨索他如周秦钟鼎汉唐铭刻散布海宇方域限之樵之阙略亦时地为之也我朝鸿图式廓车书大同虽在流沙万里之外如汉裴岑唐姜行本纪功之碑并在巴里坤为自来好古者所未得见今官吏往来皆得手摩其文又况直省之采求者哉兹所续金石略补唐以前者十之三记有者十之五记无者十之二洵乎郑樵所不能望见者也昆虫草木羽翼注疏不可以朝代限今考之全书统为采掇即食货刑法灾祥诸略于唐事未备者亦采新旧唐书增之并以补郑志之阙焉凡兹义类悉本睿裁较之樵书实更精核自本纪后妃传而外为略二十为传二十有二都六百四十卷乾隆五十年十月恭校上

总纂官左都御史（臣）纪昀

大理寺卿（臣）陆锡熊

●钦定续通志卷一 唐纪一

（臣）等谨案自班固已后断代为史而会通之义不着宋臣郑樵作通志乃始搜纂缀辑上下数千载综其行事粲然成一家之言厥功伟矣顾以唐书五代史为本朝大臣所修不敢轻议故纪传断限逮隋而止今（臣）等奉命续纂是书爰始有唐以迄于元君臣流别纪传羣分大率皆取衷于郑氏然郑氏论次本纪三皇已降闲采羣言两汉而还全钞旧史良以规模粗定亟于成书参考异同有所未暇亦以马班陈范史家巨手辞本简严无可更易故耳至若刘昫唐书薛居正五代史大抵冗蔓无法而本纪为尤欧阳修新修二史裁断取舍仰师春秋顾其中亦或失之太简且多与传不合降而宋辽金元卷帙浩繁芜累滋甚临文证事未易得所折衷且夫史有文质辞有详略当其各自为书原属不相沿袭今既荟萃成编不得不裁定义类以着一书之通体故凡一王受命其祖宗之积累皆采附帝纪而如金史之前列世纪后列世纪补者无取也一时诏令有关于当日之治忽者闲收存一二其或蹈常袭故多饰俚句与直书口语者不录也日食必书而星变地震之属别详于灾祥之略君举必书而视疾临丧之属自具于诸臣之传辅臣元老拜罢必书而庶官之

迁秩不期其备雄藩重镇移徙必书而节使之遥领或
从其略朝贡聘问非素所难致者一书而南北朝之使命往来必识也恩泽赦宥非出自
旷典者不书而灾荒岁之给复振恤必着也其它凡所
采录皆综其略而挈其要据事直书词无予夺漏者补之讹者正之又其中或纪传各出
且有与他史互异者仍旁搜博考以归画一必其说本
相悬无可强合则亦详为夹注用示传疑惟诸书纪载月日往往不符事迹既非径庭讨
论亦滋琐屑兹则闲为标识余或阙如定着本纪凡七
十卷要以词的义该例明事备一洗原纪之疵纇而归于简核以蕲有当于事增文省之
义云尔

唐纪 【一】

高祖

○高祖

高祖皇帝姓李氏讳渊字叔德陇西成纪人七世祖暠当晋末据焮煌以自王是为
凉武昭王暠生歆为沮渠蒙逊所灭歆生重耳仕魏为
弘农太守重耳生熙为金门镇将戍于武川因留家焉熙生天赐 【旧唐书作天锡】
为幢主天赐生虎西魏时赐姓大野氏官至太尉与周
文帝及太保李弼等皆为柱国当时号八柱国家周闵帝受魏禅虎已卒乃追录其佐命
功封唐国公谥曰襄襄公生昞袭封唐公安州总管柱
国大将军卒谥曰仁高祖仁公子也七岁袭封唐公隋文帝独孤皇后高祖之从母也以
故文帝与高祖相亲爱文帝相周复高祖姓李氏以为
千牛备身事隋为谯陇二州刺史大业中历岐州刺史荥阳楼烦二郡太守召为殿内少
监卫尉少卿炀帝征辽东遣高祖督运粮于怀远镇杨
玄感反其兄弟从征辽者皆逃归高祖先觉以闻炀帝遽班师以高祖为弘化留守以御
玄感诏关右诸郡兵皆受节度高祖体有三乳性豁达
宽仁容众无贵贱咸得其欢心是时隋政荒天下大乱高祖既践历中外结纳豪杰之士
士多款附之者炀帝多以猜忌杀戮大臣尝有诏征高
祖高祖遇疾不时谒高祖有甥王氏在后宫炀帝问之王氏对以疾炀帝曰可得死否高
祖闻之益惧因纵酒纳赂以自晦十一年拜山西河东
慰抚大使击龙门贼母端儿又击绛州贼敬盘陀柴保昌所向克捷 【旧书不载击绛州
贼新书祇言击柴保昌而无敬盘陀今据隋书樊子
盖传增辑】 突厥犯塞高祖与马邑太守王仁恭击之隋兵少不敌高祖选精骑二千为
游军居处饮食随水草如突厥而射猎驰骋示以闲暇
别选善射者伏为奇兵虜见高祖疑不敢战高祖乘而击之突厥败走十三年拜太原留
守击高阳历山飞贼甄翟儿于西河破之是时炀帝南

游江都天下盗起高祖子世民知隋必亡阴结豪杰招纳亡命与晋阳令刘文静等谋举大事计已决而高祖未之知欲以情告惧不见听高祖过裴寂饮酒酒酣从容寂具以世民所谋告之高祖大惊寂曰正为宫人奉公事发当诛故急而出此先是高祖留守太原领晋阳宫监而裴寂为副监寂高祖所善客也世民阴与寂谋寂因选晋阳宫人私侍高祖及是寂以为言世民因亦入白其事高祖初欲不许已而许之然未有以发会突厥数犯边高祖兵出无功炀帝遣使者执高祖诣江都高祖大惧世民曰事急矣可举事已而炀帝复驰使者赦止高祖其事遂已是时刘武周起马邑林士弘起豫章刘元进起晋安皆称皇帝朱粲起南阳号楚帝李子通起海陵号楚王邵江海据岐州号新平王薛举起金城号西秦霸王郭子和起榆林号永乐王窦建德起河闲号长乐王王须拔起恒定号漫天王汪华起新安杜伏威起淮南皆号吴王李密起巩号魏公王德仁起邺号太公左才相起齐郡号博山公罗艺据幽州左难当据泾冯盎据高罗皆号总管梁师都据朔方号大丞相孟海公据曹州号录事周文举据淮阳号柳叶军高开道据北平张长恣据五原周洮据上洛杨士林据山南徐圆朗据兖州杨仲达据豫州张善相据伊汝王要汉据汴州时德叟据尉氏李义满据平陵綦公顺据青莱淳于难据文登徐师顺据任城蒋弘度据东海王薄据齐郡蒋善合据郟州田留安据章邱张青特据济北臧君相据海州殷恭邃据舒州周法明据永安苗海潮据永嘉梅知岩据宣城邓文进据广州俚酋杨世略据循潮冉安昌据巴东宁长真据郁林其别号诸盗往往屯聚山泽而刘武周攻汾阳宫高祖乃集将吏告曰吾为留守而贼据离宫纵贼不诛罪当死然出兵必待报今江都隔远后期奈何将吏皆曰国家之利可专者公也高祖曰善乃募兵旬日闲得众一万副留守虎贲郎将王威虎牙郎将高君雅见兵大集疑有变谋因祷雨晋祠以图高祖高祖觉之乃阴为备五月甲子高祖及威君雅视事开阳府司马刘政会 【刘政会传作鹰扬司马】 告威君雅反即座上执之丙寅突厥犯边高祖令军中曰人告威君雅召突厥今其果然遂杀之以起兵遣刘文静使突厥约连和六月己卯传檄诸郡称义兵开大将军府置三军以子建成为陇西公左领军大都督左军隶焉世民为焜煌公右领军大都督右军隶焉元吉为姑臧公中军隶焉裴寂为长史刘文静为司马石艾县长殷开山为掾 【殷开山传作太谷长】 刘政会为属长孙顺德王长谐刘弘基窦琮为统军开仓库赈穷乏七月壬子高祖杖白旗誓众于野有兵三万以元吉为太原留守癸丑发太原甲寅遣将张纶徇下离石龙泉文城三郡丙辰

次灵石营于贾胡堡隋虎牙郎将宋老生屯于霍邑以拒义师丙寅隋鹰扬府司马李轨起武威号大凉王八月辛巳败宋老生于霍邑丙戌下临汾郡辛卯克绛郡癸巳次龙门突厥遣其将率兵五百人马二千匹与刘文静来会隋骁卫大将军屈突通守河东绝津梁壬寅冯翊贼孙华土门贼白玄度皆具舟以来逆九月戊午高祖领太尉加置僚佐以少牢祀河乃济甲子次长春宫丙寅陇西公建成司马刘文静屯永丰仓兼守潼关焯煌公世民自渭北徇三辅所至皆下高祖从父弟神通起兵于鄠柴氏妇高祖女也亦起兵于司竹皆与世民会郿贼邱师利李仲文盩厔贼何潘仁向善思宜君贼刘炆等皆来降因略定鄠杜壬申高祖次冯翊乙亥焯煌公世民屯阿城陇西公建成自新丰趋霸上丙子高祖率大军自下邳而西所经过行宫苑籞悉罢之出宫女还其家十月辛巳次长乐宫有众二十万隋留守刑部尚书卫文升等奉代王侑守京城高祖遣使谕之不报乃围之下令曰犯隋七庙及宗室者罪三族丙申隋罗山令萧铣自号梁公十一月丙辰克京城命主符郎宋公弼收图籍约法十二条杀人劫盗背军叛者死癸亥遥尊炀帝为太上皇立代王为皇帝大赦改元义宁甲子高祖入京师至朝堂望阙而拜隋帝授高祖假黄钺使持节大都督内外诸军事大丞相录尚书事进封唐王以武德殿为丞相府下教曰令视事于虔化门十二月癸未隋帝赠唐襄公为景王仁公为元王夫人窦氏为唐国妃谥曰穆以建成为唐国世子世民为唐国内史徙封秦国公元吉为齐国公丞相府置长史司录以下官

【置丞相府官属创业起居注在十一月】 赵郡公孝恭徇山南甲辰云阳令詹俊徇巴蜀河池太守萧瑀以郡降二年正月丁未隋帝诏唐王剑履上殿入朝不趋赞拜不名加前后羽葆鼓吹戊午周洮降戊辰世子建成为左元帅秦国公世民为右元帅徇地东都二月己卯太常卿郑元璫定樊邓使者马元规徇荆襄三月己酉齐国公元吉为太原道行军元帅乙卯世民徙封赵国公丙辰隋右屯卫将军宇文文化及弑太上皇于江都立秦王浩为皇帝吴兴郡守沈法兴据丹阳自称江南道总管乐安人卢祖尚据光州自称刺史戊辰隋帝进唐王位相国总百揆备九锡唐国置丞相等官立四庙四月己卯张长恣降辛巳停竹使符班银菟符五月乙巳隋帝命唐王冕十有二旒建天子旌旗出警入蹕甲寅王德仁降戊午隋帝逊于位以刑部尚书萧造司农少卿裴之隐奉皇帝玺绶于唐王三让百寮上表劝进乃受改大兴殿为太极殿甲子即皇帝位于太极殿命萧造兼太尉告于南郊大赦改隋义宁二年为唐武德元年赐百官爵一级义师所过给复三年其余给复一年改郡为州太

守为刺史隋东都留守元文都左武卫大将军王世充立越王侗为皇帝壬申命裴寂等修律令六月甲戌赵国公世民为尚书令裴寂为尚书右仆射知政事刘文静为纳言隋民部尚书萧瑀丞相府司录参军窦威为内史令废隋大业律令颁新格己卯追谥皇高祖曰宣简公皇曾祖曰懿王皇祖曰景皇帝庙号太祖祖妣梁氏曰景烈皇后皇考曰元皇帝庙号世祖妣独孤氏曰元贞皇后妃窦氏曰穆皇后备法驾迎宣简公已下神主祔于太庙庚辰立世子建成为皇太子封世民为秦王元吉齐王癸未薛举寇泾州命秦王世民为西讨元帅刘文静为司马太仆卿字文明达招慰山东乙酉奉隋帝为酈国公诏前隋蔡王智积等子孙皆选用之癸巳禁言符瑞者辛丑窦威薨黄门侍郎陈叔达判纳言将作大匠窦抗兼纳言秋七月壬子刘文静及薛举战于泾州败绩乙卯郭子和降庚申废隋离宫八月壬申刘文静除名戊寅约功臣恕死罪辛巳薛举死子仁果复僭称帝 【按新旧纪暨薛举传皆作仁杲房玄龄高祖实录先作仁杲后作仁果太宗实录吴兢太宗勋史革命记焦璐唐朝年代记陈岳唐统记皆作仁果】 壬午李轨降甲申岩州刺史王德仁杀招慰使字文明达以反己丑秦王世民为西讨元帅讨薛二果庚子赠隋太常卿高颀上柱国酈国公上柱国贺若弼杞国公司隶大夫薛道衡上开府临河县公刑部尚书宇文■〈弓弓文〉上开府平昌县公左翊卫将军董纯柱国狄道公右骁卫将军李金才上柱国申国公左光禄大夫李敏柱国观国公诸遭隋枉杀而子孙被流者皆还之九月乙巳亲虑囚徒甲寅秦州总管窦轨及薛仁果战败绩辛未追谥隋太上皇为炀帝字文化及杀秦王浩自称皇帝冬十月壬申朔日有食之己卯李密降壬午朱粲陷邓州刺史吕子臧死之乙酉邵江海降癸巳诏行傅仁均所造戊寅历辛丑大阅是月窦抗罢十一月窦建德败王须拔于幽州须拔亡入于突厥乙巳凉王李轨反戊申禁献侏儒短节小马庠牛异兽奇禽己酉秦王世民大破薛仁果于浅水原执之陇右平癸丑行军总管赵慈景攻蒲州隋刺史尧君素拒战执慈景癸亥秦王世民俘薛仁果以献诏颁五十三条格十二月壬申世民为太尉丙子蒲州人杀尧君素立其将王行本辛巳郑元璠及朱粲战于商州败之乙酉如周氏陂丁亥至自周氏陂庚子光禄卿李密反伏诛是岁高开道陷渔阳号燕王

二年春正月甲子陈叔达兼纳言丙寅张善相降己巳杨士林降二月乙酉初定租庸调法令文武官遭父母丧者听去职甲午赦并浩介石四州贾胡堡以北系囚闰月 【按新唐书纪闰之例前月有事可考者祇书闰月此年

二月乙酉初定租庸调法闰月窦建德陷邢州是也
前月无事可书则书闰某月高宗显庆二年闰正月壬寅如洛阳宫是也今自五代以下一皆仿此例书之】 窦建德陷邢州执总管陈君宾辛丑
窦建德杀宇文文化及于聊城朱粲降壬寅皇太子及秦王世民裴寂巡于畿县乙巳御史大夫段确劳朱粲于菊潭己酉李密旧将徐世绩以黎阳之众及河南十郡降庚戌微行察风俗左屯卫将军何潘仁及山贼张子惠战于司竹死之丁巳虑囚庚申骁骑将军赵钦王娑罗及山贼战于整屋死之丁卯王世充陷殷州陟州刺史李育德死之三月甲戌王薄降庚辰蒋弘度徐师顺降丁亥窦建德陷赵州丁酉李义满降夏四月
月綦公顺降庚子并州总管齐王元吉及刘武周战于榆次败绩辛丑朱粲杀段确以反乙巳王世充废越王侗自称皇帝癸亥陷伊州执总管张善相五月己卯鄴国公薨 【新书系八月丁酉】 庚辰凉州将安修仁执李轨以降癸未曲赦凉甘瓜鄴肃会兰河廓九州岛六月王世充杀越王侗戊戌立周公孔子庙于国子监庚子窦建德陷沧州丁未刘武周陷介州癸亥裴寂为晋州道行军总管以讨之离石胡刘季贞叛陷石州刺史王俭死之秋七月壬申徐圆朗降置十二军分隶关内诸府 【新书在元年九月】 八月甲子窦建德陷洺州执总管袁子干九月辛未杀户部尚书刘文静 【旧书在十月】 李子通自称皇帝沈法兴自称梁王丁丑杜伏威降裴寂及刘武周战于介州败绩右武卫大将军姜宝谊死之庚辰窦建德陷相州总管吕珉死之辛巳刘武周陷并州庚寅窦建德陷赵州执总管张志昂梁师都寇延州鄴州刺史梁礼死之冬十月己亥罗艺降乙卯如华阴壬戌刘武周寇晋州永安王孝基及工部尚书独孤怀恩陝州总管于筠内史侍郎唐俭讨之是月夏县人吕崇茂反秦王世民讨刘武周十一月丙子窦建德陷黎州 【按革命记黎阳陷在十月而新旧书俱在十一月丙子本之实录盖以奏到之日言也】 执淮安王神通总管李世绩十二月丙申猎于华山永安王孝基及刘武周战于下邳败绩 【按旧书云永安王孝基工部尚书独孤怀恩总管于筠为刘武周将宋金刚掩袭并没焉与新书详略不同然其所云为刘武周将宋金刚掩袭者非宋金刚也吕崇茂求救于金刚金刚遣其将尉迟敬德协助之也战于下邳者非下邳也乃夏县也永安王传云夏县人吕崇茂杀县令以应贼孝基等攻之会尉迟敬德与崇茂夹攻官兵孝基及筠等皆被执刘武周传云永安王孝基等进取夏县不能克军于城南崇茂与尉迟敬德袭破孝基营四将俱没二传所载俱同又夏县属解州括地志云安邑故城是武周所寇止于汾晋未尝自河而南至下邳也

又四将俱没而旧书则遗唐俭新书仅云孝基均有脱
误 又案刘世让传云从永安王讨吕崇茂于夏县军败为贼所获更可知被执者不止
四将而下邽之当为夏县益足证矣】

三年春正月己巳猎于渭滨戊寅王行本降辛巳如蒲州癸巳至自蒲州二月庚子
如华阴甲寅独孤怀恩谋反伏诛辛酉检校隰州总管
刘师善谋反伏诛三月庚午 【旧书作己卯然上有辛酉下有甲戌中间不得有己卯也
今从新书】 改纳言为侍中内史令为中书令甲戌
中书侍郎封德彝兼中书令乙酉刘季真降夏四月壬寅至自华阴甲寅秦王世民及宋
金刚战于雀鼠谷败之辛酉王世充陷邓州总管雷四
郎死之壬戌秦王世民及刘武周战于洺州败之武周亡入于突厥并州平五月壬午秦
王世民屠夏县六月丙申赦晋隰潞并四州癸卯诏隋
帝及其宗室柩在江都者为营窆置陵庙丙午虑囚封子元景为赵王元昌鲁王元亨鄴
王己酉出宫女五百人赐东征将士有功者甲寅显州
长史田瓚杀行台尚书令杨士林叛附于王世充乙卯瘞州县暴骨秋七月壬戌秦王世
民讨王世充甲戌皇太子屯于蒲州以备突厥丙戌梁
师都导突厥稽胡寇边行军总管段德操败之八月庚子虑囚甲辰时德劼降九月癸酉
田瓚降己丑给复陕鼎熊谷四州二年冬十月戊申高
开道降己酉杨仲达降十二月己酉瓜州刺史贺拔行威反

四年春正月丁卯窦建德行台尚书令胡太恩以大安镇来降辛巳皇太子伐稽胡
二月窦建德陷曹州执孟海公己丑车骑将军董阿兴
反于陇州伏诛乙巳太常少卿李仲文谋反伏诛丙午虑囚丁巳赦代州总管府石岭之
北三月庚申虑囚乙酉窦建德陷管州刺史郭志安死
之夏四月壬寅齐王元吉及王世充战于东都败绩行军总管卢君谔死之戊申突厥寇
并州执汉阳郡王瓌太常卿郑元璠左骁骑卫大将军
长孙顺德甲寅封子元方为周王元礼郑王元嘉宋王元则荆王元茂赵王 【新旧书本
纪皆云元茂越王按高祖诸子传周王元方武德四
年始王与郑宋荆滕四王同封除康王元礼始王郑韩王元嘉始王宋彭思王元则初王
荆郑惠王元懿始王滕与本纪所书即是一事吴缜纠
谬据此谓元茂越王当作元懿滕王为是】 丁巳左武卫将军王君廓败张青特执之五
月壬戌秦王世民败窦建德于虎牢执之河北悉平乙
丑赦山东为建德所诬误者戊辰王世充降河南平庚午周法明降六月庚寅赦河南为
王世充所诬误者戊戌蒋善合降庚子营州人石世则
执其总管晋文衍叛附于靺鞨乙卯臧君相降秋七月甲子秦王世民俘王世充以献丙
寅窦建德伏诛流王世充于蜀 【谨案通鉴辑览

御批世充建德僭窃相同而世充尚余篡弑之罪乃一赦与一诛轻重倒置矣】 丁卯大赦给复天下一年陕鼎函虢虞芮豳七州二年废五铢钱行开元通宝钱甲戌刘黑闥反贝州辛巳戴州刺史孟噉鬼反伏诛八月丙戌朔日有食之丁亥皇太子安抚北境丁酉刘黑闥陷郟县魏州刺史权威贝州刺史戴元祥死之癸卯突厥寇代州 【按突厥寇代州旧书不载于纪新书于纪则云执行军总管王孝基突厥传则云败行军总管永安王孝基又永安王孝基传云武德二年刘武周寇太原孝基为尉迟敬德吕崇茂所败被执谋亡归为贼所害似不应四年复为突厥所执也新纪误】 丁未刘黑闥陷历亭屯卫将军王行敏死之辛亥深州人崔元逊杀其刺史裴晞叛附于刘黑闥兖州总管徐圆朗反九月卢祖尚降乙卯淳于难降甲子汪华降冬十月己丑秦王世民为天策上将领司徒齐王元吉为司空庚寅刘黑闥陷瀛州执刺史卢士叟又陷观州癸卯毛州人董澄明杀其刺史赵元恺乙巳夔州总管赵郡王孝恭败萧铣于江陵执之荆州平闰月乙卯如稷州己未幸旧墅壬戌猎于好畤乙丑猎于九嵎丁卯猎于仲山戊辰猎于清水谷遂幸三原辛未如周氏陂壬申至自周氏陂十一月甲申有事于南郊庚寅李子通降丙申子通谋反伏诛壬寅刘黑闥陷定州总管李玄通死之庚戌杞州人周文举杀其刺史王孝矩叛附于黑闥蔚州总管高开道反十二月乙卯黑闥陷冀州总管曲棱死之甲子左武侯将军李世绩及黑闥战于宋州 【考异云旧地理志武德四年置宗州于宗城县宋字当作宗】 败绩丁卯秦王世民齐王元吉讨黑闥己巳黑闥陷邢州庚午陷魏州魏管潘道毅死之辛未陷业州 【考异云实录作莘州新书作业州按地理志无业州必莘州也十道志开皇十六年于莘县置莘州】 壬申徙封元嘉喜为徐王

五年春正月乙酉刘黑闥陷相州刺史房晃死之丙戌殷恭邃降丁亥济州别驾刘伯通执其刺史窦务本叛附于徐圆朗庚寅东盐州治中王才艺杀其刺史田华叛附于刘黑闥丙申相州人杀其刺史独孤彻以其州叛附于黑闥 【按正月乙酉刘黑已陷相州此云相州人杀独孤彻以附黑闥州名疑误实录作禄州人按地理志无禄州实录亦误】 己酉杨世略刘元进降二月王要汉降己巳秦王世民克邢州丁丑刘黑闥陷洺州总管罗士信死之戊寅汴州总管王要汉败徐圆朗于杞州执周文举三月戊戌谭州刺史李义满杀齐州都督王薄丁未秦王世民及刘黑闥战于洺水败之尽复所陷州县黑闥亡入突厥高开道反寇易州刺史慕容孝干死之夏四月冉安昌降己未宁长真降戊辰释

流罪以下获麦壬申代州总管李大恩及突厥战死之戊寅邓文进降五月田留安降庚寅瓜州人王干杀贺拔行威以降乙巳赐荆州今岁田租六月辛亥刘黑闥与突厥寇山东车骑将军元韶为瓜州道行军总管以备突厥癸丑吐谷浑寇洮旭迭三州岷州总管李长卿败之乙卯淮安王神通讨徐圆朗秋七月甲申作弘义宫甲午淮阳王道玄为河北道行军总管讨刘黑闥贝州人董该以定州叛附于黑闥丙申突厥杀刘武周于白道迁州人邓士政反执其刺史李敬昂丁酉冯盎降岭表悉定八月辛亥葬隋炀帝 【考异云实录武德三年六月癸卯已有诏葬隋帝及子孙此又云葬隋炀帝盖三年李子通犹据江都虽有是诏不果行也】 甲寅吐谷浑寇岷州益州道行台左仆射窦轨败之乙卯突厥寇边庚申皇太子出豳州道秦王世民出秦州道以御突厥己巳吐谷浑陷洮州并州总管襄邑王神符及突厥战于汾东败之戊寅突厥陷大震关九月癸巳灵州总管杨师道败之于三观山丙申洪州总管宇文歆又败之于崇冈壬寅定州总管双士洛骠骑将军魏道仁又败之于恒山之阳丙午领军将军安兴贵又败之于甘州刘黑闥陷瀛州刺史马匡武死之东盐州人马君德以其州叛附于黑闥冬十月己酉齐王元吉讨黑闥癸丑贝州刺史许善护及黑闥战于郟县死之甲寅观州刺史刘君会叛附于黑闥乙丑淮阳王道玄及黑闥战于下博死之己巳林士弘降十一月庚辰刘黑闥陷沧州甲申皇太子讨黑闥丙申如宜州癸卯猎于富平北原十二月丙辰猎于万寿原戊午刘黑闥陷恒州刺史王公政死之庚申至自万寿原壬申皇太子及刘黑闥战于魏州败之甲戌又败之于毛州

六年春正月己卯黑闥将葛德威 【刘黑闥传作诸葛德威】 执黑闥以降山东平壬午嵩州人王摩娑反骠骑将军卫彦讨之庚寅徐圆朗陷泗州二月刘黑闥伏诛 【旧书作皇太子斩刘黑闥于魏州在五年十二月】 庚戌幸温汤壬子猎于骊山甲寅至自温汤丙寅行军总管李世绩败徐圆朗执之 【按旧书徐圆朗传云太宗平黑闥进师曹州遣淮安王神通及李世绩攻圆朗是平徐圆朗应在六年二月应迟至七年也旧纪误又按新旧书徐圆朗传皆云圆朗穷蹙夜遁为野人所杀新书纪云执之亦误】 三月苗海潮梅知岩左难当降乙巳洪州总管张善安反夏四月己酉吐蕃陷芳州己未以故第为通义宫祭元皇帝元贞皇后于旧寝赦京城系囚赐从官帛辛酉张善安陷孙州执总管王戎丁卯南州刺史庞孝泰反陷南越州壬申封子元璿为蜀王 【吴缙曰高祖诸子二十二人本传并无名元璿者按霍王元轨传云武德六年始王蜀与豳汉二王同封后徙吴与此高纪所书封徙皆同又贞观十年徙王霍

今以纪考之武德六年王蜀及八年徙封吴者皆名元
璿而贞观十年徙封霍者则名元轨岂初名元璿后改为元轨欤似传漏载其改名一事
矣抑止名元轨而高纪误以为元璿欤 又云按旧书
纪武德六年虽不载元轨初封蜀王等事然八年亦书云十一月改封蜀王元轨为吴王
其名止是元轨不是元璿已与新书不同由是观之疑
新书之有误也】元庆汉王癸酉裴寂为尚书左仆射萧瑀为右仆射封德彝为中书令
吏部尚书杨恭仁兼中书令检校凉州诸军事五月庚
寅吐谷浑党项寇河州刺史卢士良败之癸卯高开道以奚寇幽州长史王说败之六月
丁卯突厥寇朔州总管高满政败之曲赦朔州七月丙
子沙州别驾窦伏明反杀其总管贺若怀廓己亥皇太子屯于北边秦王世民屯于并州
以备突厥八月壬子淮南道行台左仆射辅公祐反乙
丑赵郡王孝恭讨之九月壬辰秦王世民为江州道行军元帅丙申渝州人张大智反冬
十月丙午杀广州都督刘世让戊申降死罪流以下原
之己未如华阴张大智降庚申猎于白鹿原壬戌右虞候率杜士远杀高满政以朔州反
丁卯突厥请和十一月壬午张善安袭杀黄州总管周
法明丁亥如华阴 【此如华阴旧书无之前此十月如华阴而不言至自华阴疑有漏或
此系衍文】辛卯猎于沙苑丁酉猎于伏龙原十二
月壬寅朔日有食之癸卯张善安降甲寅至自华阴
七年春正月庚寅邹州人邓同颖杀其刺史李士衡二月丁巳释奠于国学己未渔
阳部将张金树杀高开道以降三月初定官制戊戌赵
郡王孝恭败辅公祐执之丹阳平己亥孝恭杀越州都督阚棱夏四月庚子大赦班新律
令初定均田租庸调法 【谨案通鉴辑览 御批
均田盖仿井田遗意然每丁各给一顷生齿繁衍时地将何出且岁造计帐予夺纷更徒
滋扰耳宜乎法创不久寻即废格也】给复江州道二
年杨越一年五月丙戌作仁智宫于宜君县六月辛丑如仁智宫壬戌庆州都督杨文干
反秋七月己巳突厥寇朔州总管秦武通败之癸酉庆
州人杀杨文干以降甲午至自仁智宫闰月己未秦王世民齐王元吉屯于豳州以备突
厥八月戊辰突厥寇并州己巳吐谷浑寇鄯州骠骑将
军彭武杰死之戊寅突厥寇绥州刺史刘大俱败之壬辰突厥请和丁酉裴寂使于突厥
冬十月丁卯如庆善宫辛未猎于鄂南癸酉幸终南山
丙子谒楼观老子祠庚寅猎于围川十二月丁卯如龙跃宫戊辰猎于高陵庚午至自高
陵太子詹事裴矩检校侍中
八年春二月癸未虑囚夏四月甲申如鄂猎于甘谷作太和宫丙戌至自鄂六月甲
子如太和宫秋七月丙午至自太和宫丁巳秦王世民

屯于蒲州以备突厥 【按旧书六月突厥寇定州命皇太子往豳州秦王往并州以备突厥与柳芳唐历同新书只言七月秦王屯蒲州则本

之高祖实录也】 八月壬申并州行军总管张瑾及突厥战于太谷败绩郢州都督张德政死之执行军长史温彦博甲申任城郡王道宗及突

厥战于灵州败之丁亥突厥请和冬十月辛巳如周氏陂猎于北原壬午如龙跃宫十一月辛卯如宜州猎于西原裴矩罢庚子讲武于同官天

策府司马宇文士及权检校侍中辛丑徙封元璠为吴王元庆陈王癸卯秦王世民为中书令齐王元吉为侍中癸丑猎于华池北原十二月辛

酉至自华池庚辰猎于鸣犊泉辛巳至自鸣犊泉

九年春正月甲寅裴寂为司空二月庚申齐王元吉为司徒三月庚寅幸昆明池习水战壬辰至自昆明池丙午如周氏陂乙卯至自周氏

陂丁巳突厥寇凉州都督长乐郡王幼良败之夏四月辛巳废浮屠老子法六月庚申秦王世民杀皇太子建成齐王元吉 【 御制全韵

诗注云司马光云高祖所以有天下皆太宗之功隐太子以庸劣居其右地嫌势逼必不相容乡使高祖有文王之明隐太子有泰伯之贤太宗

有子臧之节则乱何自而生哉其论为允当惜唐高祖当日见不及此徒拘立嫡以长之说遂使衅起家庭而致太宗之失德也】 大赦复浮屠

老子法癸亥立秦王世民为皇太子听政赐为父后者袭勋爵免民逋租宿赋庚辰幽州都督庐江王瑗反伏诛癸未赦幽州管内为瑗所诬误

者秋七月辛卯杨恭仁罢太子右庶子高士廉为侍中左庶子房玄龄为中书令萧瑀为尚书左仆射癸巳宇文士及为中书令封德彝为尚书

右仆射八月丙辰突厥请和壬戌吐谷浑请和癸亥诏传位于皇太子甲子皇太子即皇帝位贞观三年太上皇徙居太安宫九年五月崩于垂

拱前殿年七十 【新书作七十一沈炳震曰自周天利元年丙戌至贞观九年乙未止七十当从旧书】 谥曰大武庙号高祖陵曰献陵上元

元年改谥神尧皇帝天宝八载谥神尧大圣皇帝十三载增谥神尧大圣大光孝皇帝

高祖武德九年

钦定续通志卷 【一】

●钦定续通志卷二 唐纪二

唐纪 【二】

太宗

○太宗

太宗皇帝讳世民高祖次子也母曰太穆顺圣皇后窦氏生而不惊方四岁有书生自言善相谒高祖曰公贵人也然必有贵子及见太宗

曰龙凤之姿天日之表其年及冠必能济世安民高祖因采其语名之曰世民大业中突厥围炆帝于雁门炆帝以木系诏书投汾水而下募兵赴援太宗时年十六往应募隶屯卫将军云定兴谓定兴曰突厥敢围吾天子者以为无援故也今宜先后吾军为数十里昼则幡旗相续夜则钲鼓相应彼必谓救兵云集则可不击而走之不然彼众我寡使悉军来战胜负未可知也定兴从之师至崞县突厥候骑见军来不绝告曰救兵大至矣遂解围而遁高祖击魏刀儿深入贼阵太宗以轻骑突围拔高祖于万众之中又奋击大破之时年十八太宗为人聪明英武临机果断不拘小节是时天下已乱盗贼蜂起太宗知隋必亡乃推财养士结纳豪杰长孙顺德刘弘基等皆因事亡命匿之与晋阳令刘文静尤善文静坐李密事系狱太宗夜就狱中见之与图大事时百姓避贼多入城城中数万人文静为令久知其豪杰因其部署计已定乃因裴寂告高祖高祖已起兵建大将军府太宗乃率兵徇西河克之拜右领军大都督右三军皆隶焉封焯煌郡公大军西上将至霍邑隋将宋老生率精兵二万屯霍邑会久雨粮尽高祖与裴寂议且还太原以图后举太宗曰本兴大义以救苍生宜直入咸阳号令天下今还守一城之地此为贼耳何以自全高祖不纳促令引发太宗哭于军门高祖大惊召问之对曰还则众散于前敌乘于后死亡须臾是以悲耳高祖乃曰起事者汝也今成败惟汝时左军已先返即与陇西公建成分追之夜半太宗失道入山谷闲弃其马步而及左军与俱还高祖乃将而前迟明至霍邑宋老生不出太宗数骑薄其城举鞭指麾若将围之者老生怒出兵背城而阵高祖与建成合阵于城东太宗及柴绍阵于城南老生麾兵疾进先薄高祖而建成坠马老生乘之高祖与建成军咸却太宗自南原驰下峻坂断其军为二而出其阵后老生败走遂斩之进至河东关中豪杰争走赴义太宗请进师入关取永丰仓粟以振穷乏收羣盗以图京师高祖称善太宗以前军济河先定渭北三辅吏民及诸豪猾诣军门请自效者日以千计扶老携幼满于麾下收纳英俊以备僚列远近闻者咸自托焉师次于泾阳击胡贼刘鹞子破之大军攻长安太宗屯金城坊攻其西北遂克之高祖辅政为光禄大夫唐国内史改封秦国公辞举攻扶风太宗击败之追斩万余级遂略地至于陇坻义宁元年十二月为右元帅总兵十万攻东都将旋师设三伏于三王陵败隋将段达兵万余人因于宜阳新安置熊谷二州戍之而还徙封赵国公高祖受禅为尚书令右翊卫大将军进封秦王加授雍州牧辞举寇泾州太宗为西讨元帅屯于高塘城【殷开山传作折塘辞举及仁果传作高塘吴缜曰高塘折塘皆

城名高墟属盩州安平县折墟属泾州安定县地既近而名相类故易于舛误 折墟杜佑作析墟】 已而举死其子仁果率其众求战太宗按兵不动久之仁果粮尽其将牟君才梁胡郎求降太宗曰可矣乃遣行军总管梁实栅浅水原以诱之仁果将宗罗喉并军击实太宗遣将军庞玉救之玉军几不能支太宗率兵出其后奋击之罗喉败走太宗率左右二千余骑追奔直趣其城已而大军继至四面围之仁果乃出降师还高祖令李密驰传劳之于豳州密见太宗不敢仰视退而叹曰真英主也凯旋献捷于太庙拜太尉使持节陕东道大行台尚书令镇长春宫关东兵马并受节度寻加左武侯大将军梁州总管是时刘武周据并州宋金刚陷涪州 【新书作沧州旧书作涪州吴缜曰地理志涪州本绛州冀城县武德元年置四年废时刘武周方作乱河东绛涪正其境也若沧州则太远矣刘武周独孤怀恩尉迟敬德传俱作涪州】 王行本据蒲州而吕崇茂反于夏县高祖惧诏诸将弃河以守关西 【新书作关中误今依旧书改正 胡三省曰关西谓蒲津关以西也】 太宗以为不可表言太原王业所基国之根本河东殷实京邑所资若举而弃之臣窃愤恨愿假精兵三万必可破贼高祖于是悉发关中兵以益之武德二年十一月太宗率众趣龙门关履冰而渡进兵柏壁与贼将宋金刚相持而永安王孝基败于夏县太宗遣殷开山秦叔宝邀贼于美良川大破之悉虏其众复归柏壁于是诸将咸请战太宗曰金刚悬军深入精兵骁将皆在于此武周据太原倚金刚为捍蔽军无蓄积利在速战我闭营蓄锐以挫其锋粮尽计穷自当遁走三年三月金刚果以馁走太宗追之一日夜驰一百里宿于雀鼠谷之西原军士皆饥太宗不食者二日行至浩州乃得食而金刚将尉迟敬德寻相等皆来降刘武周惧奔于突厥于是并汾悉平高祖遣使即军中拜太宗益州道行台尚书令七月总率诸军攻王世充于洛邑师次谷州世充率精兵三万阵于慈涧太宗以轻骑挑之时众寡不敌陷于重围左右咸惧太宗命左右先归独留后殿世充骁将单雄信以数百骑夹道来逼几为所败太宗左右射之无不应弦而倒获其大将燕颀世充乃拔慈涧之镇归于东都太宗遣行军总管史万宝自宜阳据龙门刘德威自太行东围河内王君廓自洛口断其饷道又遣黄君汉夜从孝水下舟师袭回洛城克之黄河以南莫不响应城堡相次来降大军进屯邙山九月太宗以五百骑先观战地卒与世充万余人相遇会战复破之斩首三千余级获大将陈智略世充仅以身免其所署筠州总管杨庆驰使请降遣李世绩率师出轘辕道安抚其众荥汴洧豫等州相继来降世充乃求救于窦建德四年二月

竇建德以兵十余万援世充至于酸枣萧瑀屈突通封德彝皆以腹背受敌恐非万全请退师谷州以观之太宗曰世充粮尽内外离心我当不劳攻击坐收其敝建德新破孟海公将骄卒惰吾当进据虎牢扼其襟要贼若冒险争锋我破之必矣如其不战旬日闲世充当自溃若不速进贼入虎牢诸城新附必不能守二贼并力将若之何通又请解围就险以候其变太宗不许于是留通辅齐王元吉以围世充亲率步骑三千五百人趣虎牢建德自荥阳西上筑垒板渚太宗屯虎牢相持二十余日谍者曰建德视官军刍尽牧马河北因将袭虎牢太宗知其谋遂牧马河北以诱之诘朝建德果悉众而至陈兵泛水世充将郭士衡阵于其南绵亘数里诸将大惧太宗将数骑升高邛以望之谓诸将曰贼起山东未见大敌今度险而器是无政令逼城而阵有轻我心我按兵不出彼乃气衰阵久卒饥必将自退追而击之无不克矣吾与公等约必以午时后破之建德列阵自辰至午兵士饥倦皆坐列又争饮水逡巡敛退太宗曰可击矣亲率轻骑追而诱之众继至建德回师而阵未及整列太宗先登击之所向皆靡俄而众军合战器尘四起太宗率史大奈程■〈齿尧〉金秦叔宝宇文歆等挥幡而入突出其阵后张唐旗帜建德将士顾见之大溃追奔三十里斩首三千余级虏其众五万生擒建德于阵乃将建德至洛阳城下以示世充世充大惧率其官属二千余人诣军门请降山东悉平太宗入据宫城令萧瑀窦轨等封守府库一无所取令记室房玄龄收隋图籍于是诛其同恶段达等五十余人枉被囚禁者悉释之非罪诛戮者祭而诛之大飨将士班赐有差高祖令尚书左仆射裴寂劳于军中六月凯旋太宗披金甲陈铁骑一万甲士三万人前后部鼓吹俘二伪主及隋氏乘輿御物献于太庙高祖大悦行饮至礼以飨焉高祖以太宗功高古官号不足以称乃加号天策上将领司徒陕东道大行台尚书令位在王公上增邑二万户通前三万户赐金辂一乘衮冕之服白璧一双黄金六千斤前后部鼓吹及九部之乐班剑四十人于时海内渐平太宗乃锐意经籍开文学馆以待四方之士以行台司勋郎中杜如晦等十有八人为学士更直阁下与之讨论经义或夜分而罢五年正月讨刘黑闥于洺州败之黑闥走突厥悉虏其众时徐圆朗阻兵徐兗回师讨平之于是河济江淮诸郡邑皆平十月加左右十二卫大将军七年突厥寇边太宗与遇于幽州从百骑与其可汗语乃盟而去八年进位中书令初高祖起太原非其本意而事出太宗及取天下破宋金刚王世充竇建德等太宗功益高而高祖屡许以为太子建成惧废与齐王元吉谋害太宗未发九年六月太宗以兵入玄武门杀太子建成及

齐王元吉 【谨案通鉴辑览 御批玄武门之事昔人聚讼纷纷惟我 圣祖断

以高祖不能早定大计优游致祸太宗不能善全骨

肉相残固由其谋之未臧匪独其所遭之不幸为万世不刊定论书曰一人元良万邦以贞高祖既不早见及此传曰行一不义圣人不为太宗

岂能无深疾斯言也哉】高祖大惊乃以太宗为皇太子八月癸亥高祖传位于皇太子甲子太宗即皇帝位于东宫显德殿遗裴寂告于南郊

大赦武德以来流人还之赐文武百官勋爵免关内及蒲芮虞泰陕鼎六州二岁租给复天下一年民八十以上赐粟帛百岁加版级癸酉放掖

庭宫女三千余人甲戌突厥寇涇州乙亥进寇武功丙子立妃长孙氏为皇后己卯突厥寇高陵癸未进至便桥乙酉及突厥颉利盟于便桥九

月壬子禁私家妖神淫祀占卜非龟易五兆者冬十月丙辰朔日有食之癸亥立中山郡王承干为皇太子庚辰萧瑀陈叔达罢十一月庚寅降

宗室郡王非有功者爵为公 【按旧书淮安王神通传云于时宗室率以属疏降爵为郡公新书本纪俱作县公者误也今据吴缜纠谬删县

字】十二月癸酉虑囚是岁进封子长沙郡王恪为汉王宜阳郡王佑楚王

贞观元年春正月乙酉改元辛丑燕郡王李艺反于涇州伏诛三月癸巳皇后亲蚕丙午诏齐仆射崔季舒黄门侍郎郭遵尚书右丞封孝

琰以极言蒙难季舒子刚遵子云孝琰子君遵并及淫刑宜免内侍量才别叙闰月癸丑朔日有食之夏四月癸巳凉州都督长乐郡王幼良有

罪伏诛五月癸丑敕中书令侍中朝堂受讼辞有陈事者悉上封六月辛丑封德彝薨甲辰太子少师萧瑀为尚书左仆射是夏山东旱免今岁

租秋七月壬子吏部尚书长孙无忌为尚书右仆射八月宇文士及检校凉州都督戊戌贬高士廉为安州大都督九月庚戌朔日有食之辛酉

遣使诸州行损田振问下户御史大夫杜淹检校吏部尚书参议朝政宇文士及罢辛未幽州都督王君廓奔于突厥冬十月丁酉以岁饥减膳

十二月壬午萧瑀罢戊申利州都督李孝常右卫将军刘德裕谋反伏诛

二年春正月辛亥长孙无忌罢兵部尚书杜如晦检校侍中总监东宫兵马事癸丑吐谷浑寇岷州都督李道彦败之丁巳徙封恪为蜀王

泰越王佑燕王庚午刑部尚书李靖检校中书令二月丙戌鞞鞞内属三月戊申朔日有食之壬子命中书门下五品以上及尚书议决死罪壬

戌李靖为关内道行军大总管以备薛延陀己巳遣巡关内诸州出金宝赎饥民鬻子者还之庚午以旱蝗责躬大赦癸酉雨夏四月己卯瘞隋

人暴骸初诏天下并置义仓壬寅朔方人梁洛仁杀梁师都以降六月庚寅子治生赐是日生子者粟辛卯辰州刺史裴虔通以弑隋炀帝削爵

流驩州秋七月戊申莱州刺史牛方裕绛州刺史薛世良广州长史唐奉义虎牙郎将高元礼以宇文化及之党皆除名徙边八月甲戌省冤狱于朝堂辛丑立二王后是月河南河北大霜人饥九月丁未简出掖庭宫人前后所出三千余人【谨按通鉴辑览 御批太宗即位已放宫女三千矣今又放三千果尔其淹留永巷者又复何限白居易诗怨女三千放出宫乃词臣揄扬溢美之言唐史不知其失实而书之此不足以美太宗而适足以诬太宗耳何可为训】冬十月庚辰杜淹薨戊子杀瀛州刺史卢祖尚十一月辛酉有事于南郊十二月壬辰黄门侍郎王珪守侍中

三年春正月丙午以旱避正殿戊午享于太庙癸亥耕藉田辛未裴寂罢二月戊寅房玄龄为尚书左仆射杜如晦为右仆射尚书右丞魏征为秘书监参预朝政三月己酉虑囚夏四月乙亥太上皇徙居于大安宫甲午始御太极殿戊戌赐孝义之家粟五斛八斗以上二斛九十以上三斛百岁加绢二匹六月戊寅以旱虑囚遣使慰抚关内诸州壬午诏文武官言事秋八月己巳朔日有食之丁亥李靖为定襄道行军大总管九月丁巳华州刺史柴绍为胜州道行军总管冬十一月庚申并州都督李世绩为通漠道行军总管华州刺史柴绍为金河道行军总管任城王道宗为大同道行军总管幽州都督卫孝节为恒安道行军总管营州都督薛万淑为畅武道行军总管以伐突厥十二月癸未杜如晦罢闰月癸丑为死兵者立浮屠祠辛酉虑囚是岁中国人归自塞外及开四夷为州县者百二十余万人

四年春正月丁卯朔日有食之二月己亥幸温汤甲辰李靖及突厥战于阴山败之丙午至自温汤甲寅大赦赐酺五日御史大夫温彦博为中书令王珪为侍中民部尚书戴胄检校吏部尚书参预朝政太常卿萧瑀为御史大夫与宰臣参议朝政丁巳以旱诏公卿言事三月甲申杜如晦薨甲午李靖俘突厥颉利可汗以献夏四月戊戌西北君长请上号为天可汗六月乙卯发卒治洛阳宫秋七月甲子朔日有食之癸酉萧瑀罢甲戌太上皇不豫废朝辛卯疾愈赐都督刺史文武官及民年八十以上孝子表门闾者有差八月甲寅李靖为尚书右仆射九月庚午瘞长城南隋人暴骨己卯如陇州壬午禁刍牧于古明君贤臣烈士之墓者冬十月壬辰赦岐陇二州免今岁租赋降咸阳始平武功死罪以下辛卯猎于贵泉谷甲辰猎于鱼龙川乙卯免武功今岁租赋十一月壬戌右卫大将军侯君集为兵部尚书参议朝政甲子至自陇州戊寅除鞭背刑十二月甲辰猎于鹿苑乙巳至自鹿苑辛亥淮安王神通薨是岁天下断死罪者二

十九人

五年春正月癸酉猎于昆明池丙子至自昆明池癸未朝集使请封禅不许二月己酉封弟元裕为郅王元名譙王灵夔魏王元祥许王元晓密王庚戌封子愔为梁王贞汉王恽郟王治晋王慎申王噐江王简代王夏四月以金帛赎还中国人没突厥者秋八月甲辰遣使诣高丽祭隋人战亡者戊申杀大理丞张蕴古冬十一月丙子有事于南郊十二月丁亥诏决死刑京师五覆奏诸州三覆奏其日尚食毋进酒肉壬寅幸温汤癸卯猎于骊山赐新丰高年帛戊申至自温汤癸丑赦关内

六年春正月乙卯朔日有食之侯酉静州山獠反右武卫将军李子和败之三月侯君集罢戊辰如九成宫丁丑降雍岐豳三州死罪以下赐民八十以上粟帛夏五月魏征检校侍中秋七月己巳诏天下行乡饮酒九月己酉幸庆善宫冬十月侯君集起复乙卯至自庆善宫十二月辛未虑囚纵死罪者归其家仍敕天下死囚皆纵遣使至期来诣京师是岁诸羌内属者三十万人

七年春正月戊子斥宇文化及党人之子孙勿齿辛丑赐京师酺三日二月丁卯雨土三月戊子王珪罢庚寅魏征为侍中癸巳直太史李淳风铸浑天黄道仪夏五月癸未如九成宫六月辛亥戴胄薨秋八月辛未东西洞獠寇边右屯卫大将军张士贵为龚州道行军总管以讨之以山东河南大水遣使振之九月纵囚来归凡三百人皆赦之 【谨案 御制续欧阳修纵囚论太宗好名之事不一而足而莫过于纵囚之特甚太宗多术人也意彼时必有以密示司理期三百人以必来而必免苟其不来必大索天下而诛之且及其父母妻子夫三百人者原在此域中也其敢不来以冀幸免而不来以累及其父母妻子乎史官无识未求其详而载之反为盛德之感有识者观之实不值一噓之儿戏耳而欧氏犹以为可偶一为之予以为即偶一为之亦不可】 冬十月庚申至自九成宫十一月丁丑颁新定五经壬辰开府仪同三司长孙无忌为司空十二月甲寅幸芙蓉园丙辰猎于少陵原戊午至自少陵原

八年春正月辛丑张士贵及獠战败之壬寅遣使循省天下二月乙巳皇太子加元服丙午降死罪以下赐五品以上子为父后者爵一级酺三日三月庚辰如九成宫夏五月辛未朔日有食之吐谷浑寇凉州六月左骁卫大将军段志玄为西海道行军总管左骁卫将军樊兴为赤水道行军总管以伐之秋七月山东河南淮南大水遣使振恤冬十月作永安宫辛丑段志玄击吐谷浑大破之甲子至自九成宫十一月辛未李靖罢己丑吐谷浑寇凉州执行人鸿胪丞赵德楷十二月辛丑特进李靖为西海道行

军大总管侯君集为积石道行军总管任城王道宗为鄯善道行军总管胶东公道彦为赤水道行军总管凉州都督李大亮为且末道行军总管利州刺史高甑生为盐泽道行军总管以伐吐谷浑

【吐谷浑传在九年新旧纪俱在八年】 丁卯从太上皇阅武于城西

九年春正月党项羌叛二月长孙无忌罢三月庚辰洮州羌杀刺史孔长秀附于吐谷浑壬午大赦乙酉高甑生及羌人战败之夏闰四月

丙寅 【旧书作丁卯】 朔日有食之任城王道宗败吐谷浑于库山五月长孙无忌起复庚子太上皇崩皇太子听政壬子李靖及吐谷浑战

大败之秋七月庚子盐泽道行军副总管刘德敏及羌人战败之冬十月庚寅葬高祖皇帝于献陵十一月壬戌特进萧瑀参豫朝政

十年春正月甲午帝复亲听政壬子左仆射房玄龄侍中魏征上梁陈齐周隋五代史癸丑徙封元景为荆王元昌汉王元礼徐王元嘉韩

王 【元嘉传贞观九年徙封韩】 元则彭王元懿郑王元轨霍王元凤虢王元庆道王灵夔燕王恪吴王泰魏王佑齐王愔蜀王恽蒋王贞越

王慎纪王三月癸丑出诸王为都督夏六月壬申温彦博为尚书右仆射太常卿杨师道为侍中魏征罢为特进知门下省事参议朝章国典己

卯皇后崩冬十一月庚寅 【通鉴作庚午考旧书次年正月则此当作庚寅为是】 葬文德皇后于昭陵十二月萧瑀罢庚辰虑囚

十一年春正月丁亥徙封元裕为邓王元名舒王庚子颁新律令于天下作飞仙宫 【旧书仙作山下同】 甲寅房玄龄进所修五礼乙

卯免雍州今岁租赋二月丁巳营九峻山为陵赐功臣密戚陪茔地及秘器甲子如洛阳宫乙丑给民百岁以上侍五人壬午猎于鹿台岭三月

丙戌朔日有食之癸卯降洛州囚徒免一岁租调辛亥猎于广成泽癸丑如洛阳宫夏六月甲寅温彦博薨丁巳幸明德宫己未以诸王为世封

刺史 【谨案通鉴辑览 御批唐室之衰由方镇跋扈不驯得自专世袭故耳太宗令元景等世袭刺史雌行之踰年旋即停罢然已有以

开其端矣】 戊辰以功臣为世封刺史己巳徙封元祥为江王秋七月癸未大雨水谷洛溢乙未诏百官言事丁酉还洛阳宫壬寅废明德宫及

飞仙宫之玄圃院给遭水者丙午给亳州老子庙兖州孔子庙户各二十以奉享复凉武昭王近墓户二十以守卫九月丁亥河溢坏陕州河北

县毁河阳中潭幸白司马坂以观之赐濒河遭水家粟帛冬十月癸丑赐先朝谋臣武将及亲戚亡者茔陪献陵十一月辛卯如怀州乙未猎于

济源麦山丙午还洛阳宫以故荆州都督武士彠女为才人十二月春正月乙未吏部尚书高士廉等上氏族志二月乙卯发洛阳宫癸亥如河

北县观底柱甲子巫州獠反夔州都督齐善行败之乙丑次陕州丁卯至柳谷观盐池庚午至蒲州甲戌如长春宫免朝邑今岁租赋降囚罪乙亥猎于河滨戊寅赠隋尧君素蒲州刺史闰月庚辰朔日有食之丙戌至自洛阳宫秋七月癸酉高士廉为尚书右仆射八月壬寅吐蕃寇松州侯君集为当弥道行军大总管率三总管兵以伐之九月辛亥阔水道行军总管牛进达及吐蕃战于松州败之冬十月己卯猎于始平赐高年粟帛乙未至自始平钩州山獠反贵州都督张宝德败之十一月己巳明州山獠反交州都督李道彦败之十二月辛巳壁州山獠反右武侯将军上官怀仁讨之

十三年春正月乙巳谒献陵赦三原县及行从大辟罪免县今岁租赋丁未至自献陵王珪薨二月丙子【新书作庚子】 停世封刺史夏四月戊寅如九成宫甲申中郎将阿史那结社率反伏诛五月甲寅以旱避正殿诏五品以上言事减膳罢役理囚振乏乃雨六月丙申封弟元嬰为滕王秋八月辛未朔日有食之冬十月甲申至自九成宫十一月辛亥杨师道为中书令戊辰尚书左丞刘洎为黄门侍郎参知政事十二月壬申侯君集为交河道行军大总管以伐高昌乙亥封子福为赵王壬辰猎于咸阳癸巳至于咸阳诏洛相幽徐齐并秦蒲等州并置常平仓

十四年春正月庚子有司读时令甲寅幸魏王泰第赦雍州长安县免延康里今岁租赋二月丁丑亲释奠于国学赐学官高第生帛赦大理万年县系囚壬午幸温汤辛卯至自温汤乙未诏求梁皇侃褚仲都周熊安生沉重陈沈文阿周弘正张机隋何妥刘焯刘炫之后三月罗窦二州獠反广州总管党仁弘败之夏五月壬寅徙封灵夔为鲁王秋八月庚午作襄城宫癸酉侯君集兄高昌以其地为西州置安西都护府九月癸卯赦高昌部及士卒父子犯死替犯流大功犯徒小功縶麻犯杖皆原之冬闰十月乙未如同州甲辰猎于尧山庚戌至自同州十一月甲子有事于南郊十二月丁酉侯君集俘高昌王以献赐酺三日癸卯猎于樊川乙巳至自樊川

十五年春正月辛巳如洛阳宫次温汤卫士崔卿刁文懿谋反伏诛三月戊辰如襄城宫庚午罢襄城宫分赐百官夏四月辛卯诏以来岁二月有事于泰山乙未免洛州今岁租还户故给复者加给一年赐民八十以上者惇独鰥寡疾病不能自存者米二斛虑囚丙辰诏停封泰山避正殿减膳秋七月丙寅宥周隋名臣及忠烈子孙贞观以后流配者冬十月辛卯猎于伊阙壬辰如洛阳宫十一月癸酉辞延陀寇边兵部尚

书李世绩为朔州道行军总管右卫大将军李大亮为灵州道行军总管凉州都督李袭
誉为凉州道行军总管以伐之十二月戊子至自洛阳
宫庚子命三品以上嫡子事东宫辛丑虑囚甲辰李世绩及薛延陀战于诺真水败之乙
巳赠战亡将士官三转

十六年春正月乙丑遣使安抚西州戊辰募戍西州者前犯流死亡匿听自首以应
募辛未徙天下死罪囚实西州中书舍人岑文本为中
书侍郎专典机密夏六月辛卯诏复隐王建成曰隐太子改封海陵刺王元吉曰巢刺王
秋七月戊午长孙无忌为司徒房玄龄为司空冬十一
月丙辰猎于武功辛酉使祭隋文帝陵壬戌猎于岐山之阳甲子赐所过六县高年孤疾
毡衾粟帛遂猎骊山乙巳至自温汤

十七年春正月戊辰魏征薨代州都督刘兰谋反伏诛二月己亥虑囚戊申图功臣
于凌烟阁三月壬子禁送终违令式者丙辰齐王佑反
李世绩讨之甲子以早遣使覆囚决狱乙丑齐王佑伏诛给复齐州一年夏四月乙酉废
皇太子为庶人汉王元昌侯君集等伏诛丙戌立晋王
治为皇太子太子太保李世绩为太子詹事同中书门下三品庚寅谢承干之过于太庙
癸巳降封魏王泰为东莱郡王六月己卯朔日有食之
壬辰 【旧书作壬午】 改葬隋恭帝甲午以早避正殿减膳诏京官五品以上言事丁
酉高士廉同中书门下三品平章政事闰月丁巳诏皇
太子典左右屯营兵丙子徙封泰为顺阳郡王秋七月丁酉房玄龄罢八月庚戌工部尚
书张亮为刑部尚书参豫朝政冬十月丁未建诸州邸
于京城丁巳房玄龄起复十一月己卯有事于南郊壬午赐酺三日以凉州获瑞石曲赦
凉州并虑京城及诸州系囚多所原宥十二月庚申幸
温汤庚午至自温汤

十八年春正月乙未如锤官城庚子如鄂壬寅幸温汤二月己酉如零口乙卯至自
零口丁巳给复突厥高昌部人隶诸州者二年夏四月
辛亥如九成宫秋七月甲午营州都督张俭率幽营兵及契丹奚以伐高丽八月壬子安
西都护郭孝恪为西州道行军总管以伐焉耆甲子至
自九成宫丁卯刘洎为侍中岑文本为中书令中书侍郎马周守中书令九月黄门侍郎
褚遂良参豫朝政辛卯郭孝恪及焉耆战败之执其王
突骑支送行在所冬十月辛丑朔日有食之癸卯宴雍州父老于上林苑赐粟帛甲寅如
洛阳宫己巳猎于天池十一月戊寅虑囚庚辰遣使巡
问郑汝怀泽四州高年宴赐之甲午张壤为平壤道行军大总管李世绩马周为辽东道
行军大总管 【李世绩马周为行军大总管宰相表
误作十一月甲子以十月辛丑朔推之十一月不应有甲子也】 率十六总管兵以伐高

丽十二月壬寅庶人承干卒 【常山王承干传云卒

于贞观十九年】 戊子李思摩部落叛

十九年春二月庚戌帝自将诸军发洛阳以伐高丽癸丑射虎于武德北山乙卯诏皇太子监国于定州申国公高士廉摄太子太傅与侍中刘洎中书令马周太子少詹事张行成右庶子高季辅五人同掌机务丁巳赐所过高年鰥寡粟帛赠比干太师谥忠烈三月丁丑次定州壬辰车驾发定州长孙无忌摄侍中吏部尚书杨师道摄中书令夏四月癸卯誓师于幽州大飨军丁未岑文本薨癸亥李世绩克盖牟城五月己巳平壤道行军总管程名振克沙卑城庚午次辽泽瘞隋人战亡者乙亥辽东道行军总管张君义有罪伏诛丁丑车驾渡辽水军于马首山甲申克辽东城六月丁酉克白岩城己未大败高丽于安市城东南山左武卫将军王君愕死之辛酉赐酺三日秋七月壬申葬死事官加爵四级以一子袭九月癸未班师冬十月丙午次营州以大牢祭死事者丙辰皇太子迎谒于临渝关戊午次汉武台刻石纪功十一月癸酉大飨军于幽州癸未平壤道行军总管张文干有罪伏诛丙戌次定州丁亥贬杨师道为工部尚书十二月戊申次并州己未辞延陀寇夏州左领军大将军执失思力败之庚申杀刘洎

二十年春正月辛未夏州都督乔师望及辞延陀战败之丁丑遣使二十二人以六条黜陟于天下庚辰赦并州起义时编户给复三年后附者一年二月甲午从伐高丽无功者皆赐勋一转乙未发并州庚申赐所过高年鰥寡粟三月己巳至自高丽庚午不豫皇太子听政己丑张亮谋反伏诛闰月癸巳朔日有食之夏六月乙亥江夏郡王道宗李世绩伐辞延陀秋七月辛亥疾愈李世绩及辞延陀战败之八月甲子封孙忠为陈王己巳如灵州庚辰次涇州赐高年鰥寡粟帛丙戌踰陇山关次瓦亭观牧马丁亥许陪陵者子孙从葬九月辛卯遣使巡察岭南甲辰铁勒诸部请上号为可汗冬十月贬萧瑀为商州刺史丙戌至自灵州十一月己丑诏祭祀表疏藩客兵马宿卫行鱼契给驿授五品以上官及除解决死罪皆以闻余并取皇太子处分

二十一年春正月壬辰高士廉薨丁酉诏以来岁二月有事于泰山甲寅以铁勒诸部为州县赐京师酺三日虑囚降死罪以下二月丁丑皇太子释菜于太学三月戊子左武卫大将军牛进达为青邱道行军大总管李世绩为辽东道行军大总管率三总管以伐高丽夏四月乙丑作翠微宫五月戊子幸翠微宫壬辰命百司决事于皇太子庚戌李世绩克南苏木底城六月丁丑遣使于铁勒诸部购中国人陷没者秋七月

乙未牛进达克石城丙申作玉华宫庚戌至自翠微宫八月壬戌诏以河北大水停封泰山九月丁酉封子明为曹王冬十月癸丑褚遂良罢十一月癸卯进封泰为濮王十二月戊寅左骁卫大将军契苾何力为昆邱道行军大总管率三总管兵以伐龟兹

二十二年春正月庚寅马周薨戊戌幸温汤己亥中书舍人崔仁师为中书侍郎参知机务丙午右 【新书作左今据薛万彻及高丽传改正】 武卫大将军薛万彻为青邱道行军大总管以伐高丽长孙无忌检校中书令知尚书门下省事戊申至自温汤二月褚遂良起复乙卯见京城父老劳之蠲今年半租畿县三之一丁卯诏度辽水有功未酬勋而犯罪者与成官同乙亥幸玉华宫己卯猎于华原崔仁师除名流连州三月丁亥赦宜君给复县人自玉华宫苑中迁者三年夏四月丁巳松州蛮叛右武侯将军梁建方败之六月丙寅遣张行成存问河北从军者家令州县为营农癸酉萧瑀薨丙子薛万彻及高丽战于泊灼城 【新纪及高丽传皆云泊灼城而薛万彻传作泊灼吴缜曰地理志载贾耽考边州入四夷之路营州西北路有泊城登州东北路有泊灼口似泊灼是也】 败之秋七月壬辰杀华州刺史李君羨癸卯房玄龄薨八月己酉朔日有食之辛未执失思力伐薛延陀余部于金山九月庚辰昆邱道行军总管阿史那社尔及薛延陀余部处月虎密战败之己亥褚遂良为中书令壬寅眉邛雅三州獠反茂州都督张士贵讨之冬十月癸丑至自玉华宫己巳阿史那社尔及龟兹战败之十二月辛未降长安万年徒罪以下闰月癸巳虑囚

二十三年春正月辛亥阿史那社尔俘龟兹王以献三月己未自去冬旱至是始雨辛酉大赦丁卯不豫命皇太子听政于金液门夏四月己亥幸翠微宫五月戊午贬李世绩为迭州都督己巳皇帝崩于含风殿年五十二 【新书作五十三考太宗生于隋开皇十八年戊午至是年己酉得五十二年今据旧书作二】 庚午奉大行御马舆还京师礼部尚书于志宁为侍中太子少詹事张行成兼侍中高季辅兼中书令壬申发丧谥曰文庙号太宗陵曰昭陵上元元年改谥文武圣皇帝天宝八载谥文武大圣皇帝十三载增谥文武大圣大广孝皇帝

太宗贞观二十三年

钦定续通志卷二

●钦定续通志卷三 唐纪三

唐纪 【三】

高宗

○高宗

高宗皇帝讳治太宗第九子也母曰文德皇后长孙氏始封晋王贞观七年遥领并州都督寻拜右武侯大将军十七年太子承干废而魏王泰次当立亦以罪黜乃立晋王为皇太子太宗尝命皇太子游观习射太子辞以非所好愿得奉至尊居膝下太宗大喜乃营寝殿侧为别院使太子居之太宗每视朝皇太子常侍观决庶政或令参议太宗数称其善二十三年太宗有疾诏皇太子听政于金掖门四月从幸翠微宫太宗崩以羽檄发六府甲士四千卫皇太子入于京师六月甲戌即皇帝位于柩前大赦赐文武官勋一转民八十以上粟帛给复雍州及比岁供军所一年癸未长孙无忌为太尉癸巳检校洛州刺史李绩为开府仪同三司参掌机密秋八月庚辰遣使存问河东给复二年庚寅葬太宗皇帝于昭陵九月甲寅荆王元景为司徒吴王恪为司空乙卯李绩为尚书左仆射同中书门下三品冬十一月左翊卫郎将高偁伐突厥

永徽元年春正月辛丑朔改元丙午立妃王氏为皇后张行成为侍中二月辛卯封子孝为许王上金■〈木巳〉王素节雍王夏六月高偁及突厥战于金山败之庚辰诏五品以上言事秋七月辛酉以旱虑囚八月戊辰给五品以上解官充侍者半禄加赐帛庚午降死罪以下九月癸卯高偁俘突厥车鼻可汗献于昭陵冬十月戊辰李绩罢左仆射十一月己未贬褚遂良为同州刺史十二月庚午琰州獠寇边梓州都督谢万岁死之【胡三省曰梓州当作牂州】是岁雍绛同等九州岛旱蝗齐定等十六州水

二年春正月戊戌诏遭虫水处发义仓振之雍同二州各遣使存问乙巳黄门侍郎宇文节中书侍郎柳奭同中书门下三品乙卯瑶池都督阿史那贺鲁叛夏六月辛酉襄邑王神符薨秋七月丁未贺鲁寇庭州左武卫大将军梁建方右骁卫大将军契苾何力为弓月道行军总管以伐之八月己巳高季辅为侍中于志宁为尚书左仆射张行成为右仆射同中书门下三品己卯白水蛮寇边左领军将军赵孝祖为郎州道行军总管以伐之九月癸卯以同州苦泉牧地赐贫民闰月辛未颁新定律例格式冬十一月辛酉有事于南郊癸酉禁进犬马鹰鹞是月宾州义州蛮寇边桂州都督刘伯英败之赵孝祖及白水蛮战于罗什候山败之十二月壬子处月朱邪孤注杀招慰使单道惠叛附于贺鲁

三年春正月癸亥梁建方及处月战于牢山败之甲子以旱避正殿减膳降囚罪徒以下原之己巳褚遂良为吏部尚书同中书门下三品丙子享于太庙丁亥耕藉田三月辛巳宇文节为侍中柳奭守中书令夏四月庚寅赵孝

祖及白水蛮战败之是月兵部侍郎韩瑗为黄门侍郎
向中书门下三品五月庚申求齐侍中崔季舒给事黄门侍郎裴泽隋仪同三司豆卢毓
御史中丞游楚客子孙官之秋七月丁巳立陈王忠为
皇太子大赦赐五品以上子为父后者勋一转民酺三日九月丙辰求周司沐大夫裴融
尚书左丞封孝琰子孙官之是月中书侍郎来济同中
书门下三品冬十二月癸巳濮王泰薨

四年春二月甲申驸马都尉房遗爱薛万彻柴令武高阳巴陵公主谋反伏诛杀荆
王元景吴王恪乙酉流宇文节于桂州戊子废蜀王愔
为庶人已亥徐王元礼为司徒李绩为司空三月壬子颁五经正义每年明经令依此考
试夏四月壬寅以旱虑囚遣使决天下狱减殿中太仆
马粟诏文武官言事甲辰避正殿减膳秋九月壬戌张行成薨 【旧书壬戌作壬寅】
甲戌褚遂良为尚书右仆射冬十月庚子幸温汤甲辰
赦新丰乙巳至自温汤戊申睦州女子陈硕真反婺州刺史崔义玄讨之十一月庚戌陈
硕真伏诛癸丑兵部尚书崔敦礼为侍中丁巳柳奭为
中书令十二月庚子高季辅薨

五年春正月丙寅以旱诏文武官朝集使言事三月戊午如万年宫乙丑次凤泉汤
辛未赦岐州及所过徒罪以下夏六月癸亥柳奭罢秋
八月己未诏免麟游岐阳今岁课役岐州及供顿县半岁九月丁酉至自万年宫冬十月
癸卯筑京师罗郭起观于九门

六年春正月壬申谒昭陵赦醴泉及行从免县今岁租调陵所宿卫进爵一级令丞
加一阶癸酉以少牢祭陪葬者甲戌至自昭陵庚寅封
子弘为代王贤潞王二月乙巳皇太子加元服降死罪以下赐酺三日五品以上为父后
者勋一转乙丑营州都督程名振左卫中郎将苏定方
伐高丽夏五月壬午及高丽战于贵端水败之 【旧书在三月今从新书】 癸未左屯
卫大将军程知节为葱山道行军大总管以伐贺鲁壬
辰韩瑗为侍中来济为中书令秋七月乙酉崔敦礼为中书令是月中书舍人李义府为
中书侍郎参知政事九月庚午贬褚遂良为潭州都督
乙酉洛水溢冬十月齐州黄河溢己酉废皇后王氏为庶人乙卯立昭仪武氏为皇后 【
新书作宸妃武氏考异曰立武后诏书犹云昭仪武
氏然则未尝为宸妃也今从会要】 丁巳大赦赐民八十以上粟帛十一月己巳皇后见
于太庙戊子停诸州贡珠癸巳诏禁吏酷法及为隐名
书者是冬皇后杀王庶人

显庆元年春正月辛未废皇太子为梁王立代王弘为皇太子壬申大赦改元赐五
品以上子为父后者勋一转大酺三日八十以上粟帛

二月辛亥赠武士彠为司徒封周国公三月辛巳皇后亲蚕丙戌户部侍郎杜正伦为黄门侍郎同中书门下三品夏四月壬寅诏五品以上老疾不以罪者同致仕壬子矩州人谢无零反伏诛秋七月癸未崔敦礼为太子少师同中书门下三品八月丙申崔敦礼薨辛丑程知节及贺鲁部歌逻禄处月战于榆幕谷败之【旧书作榆幕谷】九月庚辰括州海溢癸未程知节及贺鲁战于恒笃城败之【旧书作恒笃城】冬十一月乙丑以子显生赐京官朝集使勋一转是岁龟兹大将羯猎颠附于贺鲁左屯卫大将军杨胄伐之

二年春闰正月壬寅如洛阳宫庚戌右屯卫将军苏定方为伊丽道行军总管以伐贺鲁二月癸亥降洛州囚罪徒以下原之免民一岁租调赐百岁以上毡裘粟帛庚午封子显为周王壬申徙封素节为郟王三月戊申禁舅姑拜公主父母拜王妃癸丑李义府兼中书令夏五月丙申幸明德宫始隔日视事秋七月丁亥还洛阳宫八月丁卯贬韩瑗为振州刺史来济为台州刺史辛未卫尉卿许敬宗为侍中九月庚寅杜正伦兼中书令冬十一月【旧书此年十一月无事而以十一月之事俱系十月通鉴因之然鉴于十二月着乙卯口则十月中不应有戊戌甲辰乙巳壬子等日自当从新书作十一月为是】戊戌如许州甲辰遣使虑所过州县囚乙巳猎于潢南壬子讲武于新郑赦郑州免一岁租赋赐八十以上粟帛其尝事高祖任佐使者以名闻十二月乙卯还洛阳宫丁巳苏定方败贺鲁于金牙山执之丁卯以洛阳宫为东都周王显为洛州牧

三年春正月戊子长孙无忌等修新礼成诏颁行之戊申杨胄及龟兹羯猎颠战于泥师城大破之以其地为龟兹都督府二月甲戌至自东都戊寅虑囚夏六月壬子程名振及高丽战于赤峰镇败之冬十一月乙酉贬杜正伦为横州刺史李义府普州刺史戊子许敬宗权检校中书令甲午苏定方俘贺鲁献于昭陵戊戌许敬宗为中书令大理卿辛茂将兼侍中甲辰鄂国公尉迟敬德薨

四年春三月壬午昆陵都护阿史那弥射及西突厥真珠叶护战于双河败之夏四月丙辰于志宁为太子太师同中书门下三品乙丑黄门侍郎许圜师同中书门下三品【旧书许圜师传二年同中书门下三品新书宰相表亦在四年与纪同】戊辰流长孙无忌于黔州于志宁罢【旧书罢于志宁在丙戌流长孙无忌在戊戌考上四月有丙辰下五月有己卯则四月中不得有丙戊戌也此从新书】五月己卯许圜师为中书侍郎同中书门下三品丙申兵部尚书任雅相度支尚书卢承庆参知政事

戊戌杀凉州都督长史赵持满秋七月己丑以旱避正殿壬辰虑囚八月壬子李义府为吏部尚书同中书门下三品冬十月丙午皇太子加元服大赦赐五品以上子孙为父祖后者勋一转大酺三日闰月戊寅如东都皇太子监国辛巳诏所过供顿免今岁租赋之半赐民八十以上毡衾粟帛十一月丙午许圜师为左散骑常侍检校侍中戊午辛茂将薨癸亥贺鲁部悉结阙俟斤都曼寇边左骁卫大将军苏定方为安抚大使以伐之卢承庆同中书门下三品苏定方与都曼战于马头川败之都曼降

五年春正月癸卯苏定方俘都曼以献甲子如并州己巳次长平赐父老布帛二月丙戌赦并州及所过州县令所司致祭义旗初尝任五品以上葬并州者佐命功臣子孙及大将军府僚佐以下今见存者赐阶级有差民年八十以上版授刺史县令赐酺三日甲午祠旧宅三月丙午皇后宴亲族邻里于朝堂会命妇于内殿赐从官五品以上并州长史司马勋一转妇人八十以上版授郡君赐毡衾粟帛己酉讲武于城西辛亥左武卫大将军苏定方为神邱道行军大总管【新书作神兵道下同】新罗王金春秋为嵎夷道行军总管率三将军及新罗兵以伐百济夏四月癸巳至东都五月辛丑作八关宫戊辰定襄都督阿史德枢宾为沙砖道行军总管以伐契丹六月庚午朔日有食之秋七月乙巳废梁王忠为庶人丁卯卢承庆罢八月庚辰苏定方及百济战败之百济王请降以其地置熊津都督府壬午左武卫大将军郑仁泰及悉结拔也固仆骨同罗战败之癸未赦神邱道大总管以下军士及其家赐民酺三日冬十月初令皇后决百司奏事【谨按通鉴辑览 御批壺内稍与外事尚不免司晨之索况尽委以政柄乎自来女宠为患虽褒姒不至若此之甚发明谓唐室之祸高宗自祸之立论诚当盖自隔日视事以后积怠生疲遂至不振履霜坚冰其所由来渐矣】十一月戊戌苏定方俘百济王以献甲寅如许州十二月辛未猎于安乐川己卯还东都壬午左骁卫大将军契苾何力为溟江道行军大总管苏定方为辽东道行军大总管左骁卫将军刘伯英为平壤道行军大总管以伐高丽阿史德枢宾及奚契丹战败之

龙朔元年春正月乙卯募河南北淮南六十七州兵四万四千余人诣平壤镂方行营戊午鸿胪卿萧嗣业为扶余道行军总管以伐高丽益绵等州皆言龙见二月乙未改元赦洛州夏四月庚辰任雅相为溟江道行军总管契苾何力为辽东道行军总管苏定方为平壤道行军总管萧嗣业为扶余道行军总管右骁卫将军程名振为镂方道行军总管左骁卫将军庞

孝泰为沃沮道行军总管率三十五军以伐高丽甲午晦日有食之秋八月甲戌苏定方及高丽战于溟江败之【通鉴作七月甲戌然鉴于九月书癸巳朔则甲戌当在八月】九月癸卯及皇后

幸李绩许圜师第壬子徙封贤为沛王冬十月丁卯猎于陆浑戊辰猎于非山癸酉如东都郑仁泰为铁勒道行军大总管萧嗣业为仙■〈山

上𠂔下〉道行军大总管左骁卫大将军阿史那忠为长岑道行军大总管以伐铁勒

二年春二月甲子大易官名甲戌任雅相薨戊寅庞孝泰及高丽战于蛇水死之三月庚寅郑仁泰及铁勒战于天山败之甲午车驾发东

都夏四月庚申至自东都辛巳作蓬莱宫六月癸亥禁宗戚献纂组雕镂秋七月戊子以子旭轮生满月大赦赐酺三日右威卫将军孙仁师为

熊津道行军总管以伐百济戊戌李义府罢八月壬寅许敬宗为太子少师同东西台三品九月丁丑李义府起复冬十月丁酉幸温汤皇太子

监国丁未至自温汤庚戌西台侍郎上官仪同东西台三品十一月辛未许圜师罢【考异曰旧纪十一月辛未圜师下狱新纪十一月辛未

圜师贬虔州据实录辛未免官久之贬虔州旧纪贬虔州在三年二月新纪误】癸酉封子旭轮为殷王是岁右卫将军苏海政为■〈风日〉

海道行军总管以伐龟兹海政杀昆陵都督阿史那弥射

三年春正月乙丑李义府为右相二月减百官一月俸赋雍同等十五州民钱以作蓬莱宫乙亥杀驸马都尉韦正矩庚戌虑囚夏四月戊

子流李义府于儋州丙午蓬莱宫含元殿成五月壬午柳州蛮叛冀州都督长史刘伯英以岭南兵伐之六月吐蕃攻吐谷浑凉州都督郑仁泰

为青海道行军大总管以救之秋八月戊申诏百寮言事九月戊午孙仁师及百济战于白江败之冬十月辛巳诏皇太子五日一至光顺门监

诸司奏事小事决之十一月绛州麟见含元殿前麟趾见十二月庚子诏改明年元降京师雍州诸县死罪以下壬寅安西都护高贤为行军总

管以伐弓月

麟德元年春二月戊子如福昌宫癸卯如万年宫夏四月丙午郇公孝协以赃赐死五月丙寅以旱避正殿秋七月丁未诏以三年正月有

事于泰山八月己卯幸旧第降万年县死罪以下壬午至自万年宫丁亥司列太常伯刘祥道兼右相大司宪窦德玄为司元太常伯检校左相

冬十二月丙戌杀上官仪戊子杀庶人忠刘祥道罢太子右中护乐彦玮西台侍郎孙处约同知军国政事

二年春二月壬午如东都三月甲寅司戎太常伯姜恪同东西台三品戊午遣使虑京师诸司及雍洛二州囚东都干元殿成闰月癸酉日

有食之疏勒弓月吐蕃攻于阗西州都督崔智辩【考异曰实录作西川都督此时未有西川必西州也】左武卫将军曹继叔救之夏四月

丙午赦桂广黔三都督府丙寅讲武于邙山之阳戊辰左侍极陆敦信检校右相孙处约乐彦玮罢五月辛卯颁李淳风所造麟德历冬十月壬

戌带方州刺史刘仁轨为大司宪兼知政事丁卯如泰山大有年

干封元年春正月戊辰朔车驾至泰山是日视祀昊天上帝己巳升山行封禅之礼庚午禅于社首以皇后为亚献【顾炎武曰旧唐书

以朔日祭天于山明日登封又明日禅社首次序甚明新书改云戊辰封于泰山庚午禅于社首是祭天封山二事并为一事而系于戊辰之曰

文虽简而事不核矣】壬申大赦改元赐文武官阶勋爵民年八十以上版授下州刺史司马县令妇人郡县君七十以上至八十赐古爵一级

民酺七日女子百户牛酒免所过今年租赋给复齐州一年半兖州二年辛卯幸曲阜祀孔子赠太师二月己未如亳州祀老子追号太上玄元

皇帝县人宗姓给复一年夏四月甲辰至自亳州庚戌陆敦信罢五月庚寅铸干封泉宝钱【旧书此庚寅日上属四月然四月已有甲辰不

得又有庚寅明是漏书五月也此从通鉴】六月壬寅高丽泉男生请内附右骁卫大将军契苾何力为辽东安抚大使率兵援之左金吾卫将

军庞同善营州都督高偁为辽东道行军总管左武卫将军薛仁贵左监门卫将军李谨行为后援秋七月乙丑徙封旭轮为豫王庚午刘仁轨

兼右相八月辛丑窦德玄薨丁未杀始州刺史武惟良淄州刺史武怀运九月庞同善及高丽战败之冬十二月己酉李绩为辽东道行台大总

管率六总管兵以伐高丽

一年春正月丁丑以旱避正殿减膳虑囚癸未罢干封泉宝钱夏六月乙卯西台侍郎杨武戴至德东台侍郎李安期司烈少常伯赵仁本

同东西台三品东台舍人张文瓘参知政事秋七月己卯以旱避正殿减膳遣使虑囚八月己丑朔日有食之辛亥李安期罢九月庚申以饵药

皇太子监国辛未李绩及高丽战于新城败之是岁岭南洞獠陷琼州

总章元年春正月刘仁轨为辽东道副大总管兼安抚大使涇江道行军总管二月丁巳皇太子释奠于国学【旧书在二月癸未新书

礼志又在三月】戊寅如九成宫壬午李绩败高丽克扶余南苏木底苍岩城三月庚寅大赦改元夏四月丙辰以星变避正殿减膳撤乐诏内

外官言事庚申以太原元从西府功臣为二等其子孙授阶爵有差辛巳杨武薨秋八月癸酉至自九成宫九月癸巳李绩败高丽王高藏执之

高丽悉平以其地为安东都护府冬十二月丁巳李绩俘高藏以献丁卯有事于南郊甲

戊姜恪检校左相司平太常伯阎立本守右相

二年春二月辛酉右肃机李敬玄为西台侍郎张文瓘为东台侍郎同东西台三品三月丙戌东台侍郎郝处俊同东西台三品癸巳皇后

亲蚕夏四月己酉如九成宫六月戊申朔日有食之括州大风雨海水溢冀州大水并遣使振给秋七月癸巳左卫大将军契苾何力为乌海道

【旧书作驾海道】行军大总管以援吐谷浑剑南益泸等一十九州岛旱遣使存问振贷之九月壬寅如岐州乙巳赦岐州赐高年粟帛冬十

月丁巳至自岐州十一月丁亥徙封旭轮为冀王改名轮十二月戊申李绩薨

咸亨元年春正月丁丑刘仁轨罢二月戊申虑囚三月甲戌朔大赦改元壬辰许敬宗罢夏四月癸卯吐蕃陷西域十八州及龟兹拨换城

罢安西四镇己酉李敬玄罢辛亥右威卫大将军薛仁贵为逻娑道行军大总管以伐吐蕃庚午如九成宫高丽酋长钳牟岑叛寇边左监门卫

大将军高偁为东州道行军总管右领军卫大将军李谨行为燕山道行军总管以伐之六月壬寅朔日有食之秋七月甲戌以雍华蒲同四州

旱遣使虑囚灭中御诸厩马戊子李敬玄起复薛仁贵及吐蕃战于大非川败绩八月庚戌以谷贵禁酒丁巳至自九成宫丙寅以旱避正殿减

膳九月丁丑给复雍华同岐邠陇六州一年闰月癸卯皇后以旱请避位甲寅姜恪为凉州道行军大总管以伐吐蕃冬十月癸酉大雪庚辰诏

文武官言事乙未赵仁本罢十二月庚寅诏官名皆复旧

二年春正月乙巳如东都皇太子监国二月辛未遣使存问诸州夏六月癸巳以旱虑囚冬十月丙子求明礼乐之士十一月甲午朔日有

食之庚戌如许州遣使存问所过疾老鳏寡虑囚十二月癸酉猎于昆阳丙戌如东都是岁姜恪为侍中 【按新书云阎立本为中书令考立

本于总章元年守右相即中书令也咸亨二年又云为中书令事属重出宰相表亦然又按阎立本传咸亨元年官复旧名改中书令卒安得二

年方为中书令乎今删】

三年春正月辛丑姚州蛮寇边太子右卫副率梁积寿为姚州道行军总管以伐之二月己卯姜恪薨夏四月壬申校旗于洛水之阴秋九

月癸卯徙封贤为雍王 【按旧书新书皆云十月己未皇太子监国按上咸亨二年正月乙巳如东都皇太子监国至下十一月甲辰始书至

自东都则自去年至此皆皇太子监国也此处例不应复书今删】冬十一月戊子朔日有食之甲辰至自东都十二月金紫光禄大夫致仕刘

仁轨为太子左庶子同中书门下三品

四年夏四月丙子如九成宫闰五月丁卯燕山道总管李谨行击破高丽叛者于瓠

卢河秋七月婺州大水八月辛丑以不豫诏皇太子听
诸司启事冬十一月壬午阎立本薨乙未以皇太子纳妃赦岐州赐酺三日乙巳至自九成宫

上元元年春二月壬午刘仁轨为鸡林道行军大总管以伐新罗三月辛亥朔日有食之己巳皇后亲蚕秋八月壬辰皇帝称天皇皇后称
天后追尊六代祖宣简公为宣皇帝妣张氏曰宣庄皇后五代祖懿王为光皇帝妣贾氏曰光懿皇后增高祖太宗及后谥大赦改元赐酺三日
九月癸丑追复长孙无忌官爵冬十一月丙午如东都已酉猎于华山曲武原十二月癸未蒋王恹自杀

二年春正月己未给复雍同华岐陇五州一年辛未吐蕃请和二月刘仁轨及新罗战于七重城败之三月丁巳天后亲蚕夏四月辛巳天后杀周王显妃赵氏丙戌以旱避正殿减膳彻乐诏百官言事己亥天后杀皇太子五月戊申追号皇太子为孝敬皇帝【胡三省曰帝子谥皇帝始此】六月戊寅立雍王贤为皇太子大赦秋七月辛亥杞王上金免官削封邑八月庚寅葬孝敬皇帝于恭陵丁酉诏妇人为宫官者岁一见其亲庚子张文瓘为侍中郝处俊为中书令刘仁轨为尚书左仆射戴至德为右仆射

仪凤元年春正月壬戌徙封轮为相王丁卯纳州獠寇边二月丁亥如汝州温汤遣使虑免汝州轻系三月癸卯黄门侍郎来恒中书侍郎薛元超同中书门下三品甲辰如东都免汝州今岁半租赐民八十以上帛闰月己巳吐蕃寇鄯廓河芳四州左监门卫中郎将令狐智通伐之乙酉周王显为洮河道行军元帅领左卫大将军刘审礼等十二总管相王轮为凉州道行军元帅领契苾何力等军以伐吐蕃夏四月戊申至自东都甲寅中书侍郎李义琰同中书门下三品戊午如九成宫六月癸亥黄门侍郎高智周同中书门下三品秋七月乙未吐蕃寇迭州八月庚子以星变避正殿减膳彻乐损食粟马虑囚诏文武官言事甲子停南北中尚梨园作坊减少府杂匠是月青州海溢冬十月乙未至自九成宫丙午降封郇王素节鄱阳郡王十一月壬申大赦改元庚寅李敬玄为中书令十二月戊午遣使分道巡抚二年春正月乙亥耕藉田夏四月太子左庶子张大安同中书门下三品河南河北旱遣使振给五月吐蕃寇扶州秋八月辛亥刘仁轨为洮河军镇守使冬十月壬辰徙封显为英王更名哲【旧书在八月】十二月乙卯募关内河东诸州猛士以伐吐蕃是岁西突厥及吐蕃并寇安西

三年春正月辛酉百官四夷朝天于光顺门【谨按通鉴辑览 御批天子在

而百官四夷独朝其后岂复知有天子耶易比之上

六曰比之无首孔子以为无所容高宗之谓矣】 丙子李敬玄为洮河道行军大总管癸未遣使募河南河北猛士以伐吐蕃夏四月丁亥以旱避正殿虑囚戊申大赦改明年为通干元年五月壬戌如九成宫秋九月辛酉至自九成宫癸亥张文瓘薨丙寅李敬玄刘审礼及吐蕃战于青海败绩审礼死之冬十月丙申停剑南陇右岁贡闰十一月壬子来恒薨 【旧书闰在十月】 十二月癸丑罢通干号

调露元年春正月戊子如东都庚戌戴至德薨夏四月辛酉郝处俊为侍中五月丙戌皇太子监国戊戌作紫桂宫六月辛亥大赦改元吏部侍郎裴行俭伐西突厥秋九月壬午行俭败西突厥执其可汗都支冬十月突厥温傅奉职二部寇边单于大都护府长史萧嗣业伐之十一月戊寅高智周罢甲辰工部尚书裴行俭为定襄道行军大总管以伐突厥

永隆元年春二月癸丑如汝州温汤丁巳至少室山乙丑如东都三月裴行俭及突厥战于黑山败之夏四月乙丑如紫桂宫戊辰黄门侍郎裴炎崔知温中书侍郎王德真同中书门下三品秋七月己卯吐蕃寇河源辛巳李敬玄及吐蕃战于湟川败绩左武卫将军黑齿常之为河源军经畧大使突厥寇云州都督窦怀哲败之八月丁未如东都丁巳贬李敬玄为衡州刺史甲子废皇太子为庶人乙丑立英王哲为皇太子大赦改元赐酺三日己巳贬张大安为普州刺史九月甲申王德真罢冬十月壬寅降封曹王明为零陵郡王戊辰至自东都十一月壬申朔日有食之

开耀元年春正月乙亥突厥寇原庆二州命将军李知十王杲等分兵御之辛巳赐京官酺三日癸巳裴行俭为定襄道行军大总管以伐突厥己亥减殿中太仆马省诸方贡献免雍岐华同四州税二年河南河北调一年二月丙午皇太子释奠于国学三月辛卯郝处俊罢夏五月乙酉常州人刘龙子谋反伏诛丙戌定襄道副总管曹怀舜及突厥战于横水败绩己丑黑齿常之及吐蕃战于良非川败之六月壬子永嘉郡王晫有罪伏诛秋七月己丑以太平公主下嫁赦京师甲午刘仁轨罢左仆射闰月丁未裴炎为侍中崔知温薛元超守中书令庚戌以饵药皇太子监国庚申裴行俭及突厥战败之八月丁卯以河南河北大水遣使振乏绝室庐坏者给复一年溺死者赐物人三段九月壬戌裴行俭俘突厥温傅可汗阿史那伏念以献乙丑改元赦定襄军及诸道缘征官吏兵募冬十月丙寅朔日有食之 【旧书既书十月丙寅朔日食方书

乙丑改元又书丙寅斩阿史那伏念通鉴于内寅朔下方连书壬戌乙丑则又因旧书而

益之误也】十一月癸卯徙庶人贤于巴州

永淳元年春二月癸未以孙重照生满月大赦改元赐酺三日是月突厥车薄咽面寇边三月戊午立重照为皇太孙夏四月甲子朔日有食之丙寅如东都皇太子监国辛未裴行俭为金牙道行军大总管率三总管兵以伐突厥行俭未行而卒安西副都护王方翼及车薄咽面战于热海败之丁亥黄门侍郎郭待举兵部侍郎岑长倩秘书员外少监郭正一吏部侍郎魏玄同与中书门下同承受进止平章事五月乙卯洛水溢六月甲子突厥骨咄禄寇边岚州刺史王德茂死之是月大蝗秋七月作万泉宫己亥作奉天宫庚申零陵王明自杀九月吐蕃寇柘州骁卫郎将李孝逸伐之十月丙寅黄门侍郎刘齐贤同中书门下平章事吐蕃入寇河源军使娄师德击败之

弘道元年春正月甲午幸奉天宫二月庚午突厥寇定州刺史霍王元轨败之三月庚寅突厥寇单于都护府司马张行师死之庚子李义琰罢癸丑崔知温薨夏四月己未如东都壬申郭待举郭正一同中书门下平章事甲申绥州部落稽白铁余寇边右武卫将军程务挺败之五月乙巳突厥寇蔚州刺史李思俭死之秋七月甲辰徙封轮为豫王改名旦薛元超罢八月乙丑皇太子朝于东都皇太孙留守京师【旧书是日作己丑然上七月已有己丑则为连月有二己丑新书于是日作乙丑下九月又有乙丑是为连月有二乙丑今此从新书作乙丑而九月之乙丑则改从己丑】丁卯滹沱溢己巳河溢坏河阳城九月己丑以太平公主子生赦东都冬十月癸亥幸奉天宫十一月戊戌右武卫将军程务挺为单于道安抚大使以伐突厥辛丑皇太子监国丁未如东都戊申裴炎刘齐贤郭正一兼于东宫平章事十二月丁巳改元大赦是夕皇帝崩于贞观殿年五十六谥曰天皇大帝庙号高宗陵曰干陵天宝八载改谥天皇大圣皇帝十三载增谥天皇大圣大弘孝皇帝

高宗永徽六年显庆五年龙朔三年麟德干封总章各二年咸亨四年上元二年仪凤三年调露永隆开耀永淳弘道各一年凡三十四年

钦定续通志卷三

●钦定续通志卷四 唐纪四

唐纪【四】

中宗一

○中宗一【附则天武后】

（臣）等谨按唐史臣吴兢作则天本纪而新旧唐书因之新书于后妃中又别为武氏立传盖吴兢刘昫本用司马迁纪吕后之例而新

书则又用班固法也独沈既济援春秋书公在干侯之义请并天后于孝和纪中每于岁首必书孝和所在以统之书曰某年春正月皇帝在房陵太后行某事改某制纪称孝和而事迹太后名不失正礼不违常一时议者咸韪其论孙氏西斋录范祖禹唐鉴踵而有作正名定分其归一揆后之秉笔者可以得所据依矣今述唐纪以中宗嗣圣纪年而以光宅至长安年号侧注于下庶乎沈氏所谓名礼两得者至纪体谨严传文委备详畧互见以尽二十一年之行事无遗则犹是新书之意也

中宗皇帝讳显高宗第七子也母曰则天顺圣皇后武氏初封周王仪凤二年徙封英王改名哲永隆元年章怀太子废立为皇太子弘道元年十二月甲子即皇帝位先是高宗遗诏军国大务不决者兼取天后进止及即位尊后为皇太后皇太后临朝称制大赦赐九品以上勋官一级庚午韩王元嘉为太尉霍王元轨为司徒舒王元名为司空甲戌刘仁轨为尚书左仆射裴炎为中书令刘齐贤为侍中同中书门下三品戊寅郭待举魏玄同岑长倩同中书门下三品癸未郭正一罢

嗣圣元年 【二月睿宗文明元年九月太后光宅元年】 春正月癸未改元嗣圣立妃韦氏为皇后 【依通鉴增】 癸巳左散骑常侍韦弘敏为太府卿同中书门下三品二月戊午太后废皇帝为庐陵王幽之己未立豫王旦为皇帝妃刘氏为皇后立永平郡王成器为皇太子大赦改元为文明赐文武官五品以上爵一等九品以上勋两转老人版授官赐束帛职官五品以上举所知一人皇太后仍临朝称制庚申废皇太孙重照为庶人杀庶人贤于巴州 【考异曰杀庶人贤则天实录在二月旧本纪在三月】 甲子皇帝率羣臣上尊号于武成殿丁卯册皇帝丁丑太常卿王德真为侍中中书侍郎刘祜之同中书门下三品庚辰赠玉清观道士太中大夫王远知光禄大夫三月丁亥徙封上金为毕王素节葛王 【按上金高宗第三子素节高宗第四子俱于高宗永徽元年始封王嗣武后嫉上金母杨氏素节母萧淑妃因诬奏削上金素节王爵至是两次徙封卒杀之事详诸王列传】 夏四月丁巳滕王元婴薨辛酉徙封上金为泽王素节许王丁丑太后迁帝于均州 【按迁帝于均州之前新纪尚有四月癸酉迁房州一节顾炎武以为欧阳修博采而误今但载迁均州其先迁房州之误从删至后此嗣圣三年三月则始书云迁于房州】 闰五月甲子礼部尚书武承嗣为太常卿同中书门下三品秋七月戊午广州昆仑杀其都督路元叟乙丑突厥寇朔州左武卫大将军程务挺败之八月庚寅葬高宗皇帝于干陵丙午武承嗣罢九月甲寅太后大赦改元光宅旗帜尚白易内外官服青者以

碧大易官名 【详职官畧】 改东都为神都追尊老子母为先天太后丙辰左武卫大
将军程务挺为单于道安抚大使以备突厥己巳尊武
氏五代祖克己 【旧书外戚传五代祖名居常】 为鲁国公妣裴氏为鲁国夫人高祖
居常 【旧书外戚传高祖名克己】 为太尉北平
郡王妣刘氏为王妃曾祖俭为太尉金城郡王妣宋氏为王妃祖华为太尉太原郡王妣
赵氏为王妃考士夔为太师魏王妣杨氏为王妃丁丑
柳州司马李敬业举兵于扬州以讨乱贬韦弘敏为汾州刺史冬十月癸未楚州司马李
崇福以山阳安宜盐城三县归敬业甲申左玉钤卫太
将军梁郡公李孝逸为扬州道行军大总管左金吾卫大将军李知十为副率兵三十万
以拒李敬业丁亥左肃政台御史大夫蹇味道检校内
史同凤阁鸾台平章事壬辰李敬业克润州丙申杀裴炎追谥武氏五代祖鲁国公曰靖
高祖北平郡王曰恭肃曾祖金城郡王曰义康祖太原
郡王曰安成考魏王曰忠孝丁酉曲赦扬楚二州复敬业姓徐氏贬刘齐贤为辰州刺史
李景湛罢右史沈君谅著作郎崔察为正谏大夫同凤
阁鸾台平章事十一月辛亥左鹰扬卫大将军黑齿常之为江南道行军大总管庚申右
监门卫将军苏孝祥及徐敬业战于阿溪死之乙丑徐
敬业将王那相杀敬业降丁卯郭待举罢鸾台侍郎韦方质为凤阁侍郎同凤阁鸾台平
章事十二月戊子遣御史察风俗癸卯杀程务挺

二年 【太后垂拱元年】 春正月帝在均州 【按均州与房州地不相远而范祖
禹唐鉴于中宗嗣圣元年不叙迁均州一节是以嗣
圣二年正月不复着曰帝在均州今本新书纪既于嗣圣元年四月丁丑书迁于均州则
二年之春应依纲目书曰帝在均州所以纪其实也自
三月丙辰迁房州之后则每年岁首俱书房州矣】 丁未太后赦天下改元垂拱庚戌蹇
味道守内史戊辰刘仁轨薨二月乙巳春官尚书武承
嗣秋官尚书裴居道右肃政台御史大夫韦思谦同凤阁鸾台三品突厥寇边左玉钤卫
中郎将淳于处平为阳曲道行军总管以击之沈君谅
罢三月崔察罢丙辰太后迁帝于房州 【依唐鉴辑】 辛酉武承嗣罢辛未颁垂拱格
夏四月丙子贬蹇味道为青州刺史癸未淳于处平及
突厥战于忻州败绩五月丙午裴居道为纳言丁未流王德真于象州己酉冬官尚书苏
良嗣守纳言封王子成义 【实录作成美】 为恒王
【旧书在太后垂拱三年正月】 壬戌以旱虑囚壬申韦方质同凤阁鸾台三品六月天
官尚书韦待价同凤阁鸾台三品秋七月己酉文昌
左丞魏玄同为鸾台侍郎同凤阁鸾台三品冬十一月癸卯韦待价为燕然道行军大总
管以伐突厥

三年 【太后垂拱二年】 春正月帝在房州 【依唐鉴增】 辛酉皇太后诏复政皇帝固让皇太后依旧临朝称制大赦赐酺三日
内外官勋一转二月辛未朔日有食之三月戊申作铜匱夏四月庚辰岑长倩为内史五月丙午裴居道为内史六月辛未苏良嗣同凤阁鸾台
三品己卯韦思谦守纳言冬十月己巳 【五行志作九月己巳统纪在十二月】 有山出于新丰县改新丰为庆山赦囚给复一年赐酺三日
十二月免并州百姓庸调终其身

四年 【太后垂拱三年】 春二月帝在房州 【唐鉴不载今依纲目增】 闰月丁卯太后封王子隆基为楚王隆范卫王隆业赵王
二月己亥以旱避正殿减膳丙辰突厥寇昌平黑齿常之击之三月乙丑韦思谦罢夏四月辛丑追号孝敬皇帝妃裴氏曰哀皇后葬于恭陵癸
丑以旱虑囚命京官九品以上言事壬戌裴居道为纳言五月丙寅夏官侍郎张光辅为凤阁侍郎同凤阁鸾台平章事庚午杀刘祎之秋八月
壬子魏玄同兼检校纳言交趾人李嗣仙杀安南都护刘延佑据交州桂州司马曹玄静败之是月突厥寇朔州燕然道行军大总管黑齿常之
败之九月己卯虢州人杨初成自称郎将募人迎帝于房州 【依唐鉴辑】 不果见杀冬十月庚子右监门卫中郎将爨宝璧及突厥战败绩
十二月壬辰韦待价为安息道行军大总管安西大都护阎温古副之以击吐蕃是岁大饥

五年 【太后垂拱四年】 春正月帝在房州 【依唐鉴增】 甲子太后诏增七庙立高祖太宗高宗庙于神都作崇先庙于西京庚
午毁干元殿作明堂三月壬戌杀麟台少监周思茂夏四月戊戌杀太子通事舍人郝象贤五月庚申得宝图于洛水乙亥加尊号为圣母神皇
六月丁亥朔日有食之得瑞石于泛水秋七月丁巳大赦改宝图为天授圣图洛水为永昌洛水封其神为显圣侯加特进禁渔钓改嵩山为神
岳封其神为天中王太师使持节大都督赐酺五日八月丙午博州刺史琅邪郡王冲举兵讨乱遣左金吾卫大将军邱神绩拒之戊申冲死之
庚戌越王贞举兵于豫州以讨乱辛亥曲赦博州九月丙辰左豹韬卫大将军曲崇裕为中军大总管岑长倩为后军大总管以拒越王贞张光
辅为诸军节度削越王贞及琅邪郡王冲属籍改其姓为虺氏贞死之丙寅赦豫州杀韩王元嘉鲁王灵夔范阳郡王蔼黄国公譔东莞郡公融
及长乐公主皆改其姓为虺氏丁卯左肃政台御史大夫蹇味道夏官侍郎王本立同凤阁鸾台平章事冬十一月辛酉杀济州刺史薛顛及其
弟驸马都尉绍十二月乙酉杀霍王元轨江都郡王绪及殿中监裴承光己亥杀蹇味道

己酉拜洛受图辛亥明堂成改为万象神宫大赦

六年 【太后永昌元年】 春正月帝在房州 【依唐鉴辑】 乙卯太后享于万象神宫大赦改元永昌丁巳舒王元名为司徒戊午布政于万象神宫颁九条以训百官二月丁酉尊考魏忠孝王曰周忠孝太皇置崇先府官戊戌追谥妣杨氏曰周忠孝太后太原郡王曰周安成王妣赵氏为妃金城郡王曰魏义康王妃宋氏为王妃北平郡王曰赵肃恭王妃刘氏为王妃五代祖鲁国公曰太原靖王夫人裴氏为王妃三月甲子张光辅守纳言癸酉天官尚书武承嗣为纳言张光辅守内史夏四月甲辰杀汝南郡王玮鄱阳郡公譔广汉郡公谥汶山郡公綦零陵郡王俊广都郡公璿徙其家于嵩州己酉杀天官侍郎邓玄挺五月丙辰韦待价及吐蕃战于寅识迦河败绩白马寺僧怀义为新平道 【旧传作清平道】 行军大总管以击突厥秋七月丁巳流纪王慎于巴州改其姓为虺氏丙子流韦待价于绣州杀阎温古戊寅王本立同凤阁鸾台三品八月癸未薛怀义为新平道中军大总管以击突厥甲申杀张光辅洛州司马弓嗣业洛阳令弓嗣明陕西参军弓嗣古流人徐敬真辛丑杀陕州刺史郭正一丁未杀相州刺史弓志元蒲州刺史弓彭祖尚方监王令基九月庚戌杀恒山郡王承干之子厥闰月甲午杀魏玄同夏官侍郎崔讷戊申杀彭州刺史刘易从冬十月癸丑杀凉州都督李光谊丁巳杀陕州刺史刘延景戊午杀右武威卫大将军黑齿常之右鹰扬卫将军赵怀节己未杀嗣郑王璿丁卯春官尚书范履冰为凤阁侍郎邢文伟同凤阁鸾台平章事十一月庚辰太后大赦改元载初以十一月为正月十二月为腊月来岁正月为一月以周汉之后为二王后封舜禹汤之后为三恪隋同列国封其嗣乙未除唐宗室属籍十二月丙寅杀刘齐贤

七年 【周武氏天授元年】 春正月帝在房州 【依唐鉴增】 戊子王本立罢邢文伟为内史岑长倩武承嗣同凤阁鸾台三品凤阁侍郎武攸壹为纳言甲午流韦方质于儋州二月丁卯杀地官尚书王本立 【实录作地官尚书王本立薨御史台记本立为周兴所杀】三月乙酉以旱减膳丁亥苏良嗣薨五月戊子杀范履冰 【实录唐历在四月丁巳】己亥杀梁郡公孝逸六月戊申杀汴州刺史柳明肃秋七月辛巳流舒王元名于和州壬午杀豫章郡王亶丁亥杀泽王上金许王素节甲午赦永昌县癸卯杀太常丞苏践言八月辛亥杀许王素节之子璟曾江县令白令言甲寅杀裴居道壬戌杀将军阿史那惠右司郎中乔知之癸亥杀尚书右丞张行廉泰州刺史杜儒童甲子杀流人张

楚金戊辰杀流人元万顷苗神客辛未杀南安郡王颖邳国公昭及诸宗室李直李敞李然李勋李策李越李黯李元李英李志业李知言李元
贞九月乙亥杀巨鹿郡公晁麟台郎裴望及其弟琏壬午太后改国号曰周大赦改元天授加尊号曰圣神皇帝以豫王为皇嗣姓武氏永平王
为皇孙 【依唐鉴辑】 丙戌立武氏七庙于神都追尊周文王曰始祖文皇帝妣妣氏曰文定皇后尊平王少子武曰睿祖康皇帝妣姜氏曰
康惠皇后太原靖王曰严祖成皇帝妣曰成庄皇后赵肃恭王曰肃祖章敬皇帝妣曰章敬皇后魏义康王曰烈祖昭安皇帝妣曰昭安皇后周
安成王曰显祖文穆皇帝妣曰文穆皇后忠孝太皇曰太祖孝明高皇帝妣曰孝明高皇后追封伯父及兄弟之子为王堂兄为郡王兄子承嗣
为魏王三思为梁王从兄子懿宗等十二人皆为郡王诸姑姊妹为长公主及郡主司宾卿史务滋守纳言凤阁侍郎宗秦客检校内史给事中
傅游艺为鸾台侍郎同凤阁鸾台平章事令史务滋等十人分道存抚天下改内外官所佩鱼并作龟冬十月丁巳给复并州武兴县百姓子孙
相承如汉丰沛甲子贬宗秦客为遵化尉丁卯杀流人韦方质己巳杀许王素节之子瑛琪琬瓚瑒琛唐臣辛未贬邢文伟为珍州刺史置大
云寺改唐太庙为享德庙 【按书改唐太庙为享德庙唐统纪在正月甲戌实录旧纪俱在三月】 十一月 【周为正月】 甲戌改置社
稷旗帜尚赤戊寅杀雅州刺史刘行实及其弟渠州刺史行瑜尚衣奉御行感兄子左鹰扬卫将军虔通戊子武承嗣为文昌左相庚寅赐酺乙
未杀邱神绩左豹韬卫将军卫蒲山庚子杀史务滋十二月 【周为腊月】 己未始周腊

八年 【周武氏天授二年】 春正月 【周为一月】 帝在房州 【依唐鉴增】 夏四月壬寅朔日有食之丙午大赦五月丁亥岑
长倩为武威道行军大总管以击吐蕃六月庚戌左肃政台御史大夫格辅元为地官尚书鸾台侍郎乐思晦凤阁侍郎任知古同凤阁鸾台平
章事秋七月庚午徙关内雍同等七州户以实神都八月戊申武攸寔罢夏官尚书欧阳通为司礼卿兼判纳言事庚申杀右玉钤卫大将军张
虔勗九月乙亥杀岐州刺史云弘嗣壬辰杀傅游艺癸巳左羽林卫大将军武攸寔守纳言冬官侍郎裴行本洛州司马狄仁杰为地官侍郎同
凤阁鸾台平章事冬十月己酉杀岑长倩欧阳通格辅元壬戌杀乐思晦左卫将军李安静

九年 【周武氏如意元年再改长寿】 春正月帝在房州 【依唐鉴增】 戊辰夏官尚书杨执柔同凤阁鸾台平章事庚午贬任知

古为江夏令狄仁杰为彭泽令流裴行本于岭南乙亥杀右卫将军泉献诚庚辰司刑卿李游道为冬官尚书同凤阁鸾台平章事二月戊午秋官尚书袁智弘同凤阁鸾台平章事夏四月丙申朔日有食之大赦改元如意禁断天下屠杀五月洛水溢秋七月又溢八月甲戌河溢坏河阳县戊辰武承嗣武攸盩杨执柔罢秋官侍郎崔元综为鸾台侍郎夏官侍郎李昭德为凤阁侍郎权检校天官侍郎姚璿为文昌左丞检校地官侍郎李元素为文昌右丞营缮大匠王璇为夏官尚书司宾卿崔神基同凤阁鸾台平章事九月庚子赦天下改元长寿改用九月社赐酺七日癸卯以并州为北都癸丑流李游道袁智弘王璇崔神基李元素于岭南冬十月丙戌武威道行军总管王孝杰败吐蕃克四镇十二月杀豫王妃刘氏德妃窦氏降封皇孙成器为寿春郡王恒王成义衡阳郡王楚王隆基临淄郡王卫王隆范巴陵郡王赵王隆业彭城郡王

十年 【周武氏长寿二年】 春正月帝在房州 【依唐鉴增】 庚子夏官侍郎娄师德同凤阁鸾台平章事甲寅杀尚方监裴匪躬内常侍 【武后传作监门卫大将军】 范云仙三月己卯杀左卫员外大将军阿史那元庆白润府果毅薛大信夏五月乙未杀冬官尚书苏干相州刺史来同敏癸丑河溢棣州秋九月丁亥朔日有食之乙未加号金轮圣神皇帝大赦赐酺七日作七宝庚子追尊烈祖昭安皇帝曰浑元昭安皇帝显祖文穆皇帝曰立极文穆皇帝太祖孝明高皇帝曰无上孝明高皇帝辛丑姚璿罢 【宰相表在长寿元年九月】 文昌右丞韦巨源同凤阁鸾台平章事秋官侍郎陆元方为鸾台侍郎同凤阁鸾台平章事司宾卿豆卢钦望守内史冬十二月甲戌突厥默啜寇灵州右鹰扬卫大将军李多祚败之

十一年 【周武氏延载元年】 春正月帝在房州 【依唐鉴增】 甲午娄师德为河源积石怀远军营田大使二月庚午薛怀义为伐逆道 【旧书怀义传作伐北道】 行军大总管领十八将军以击默啜乙亥以旱虑囚己卯武威道大总管王孝杰及吐蕃战于冷泉败之三月甲申凤阁舍人苏味道为凤阁侍郎同凤阁鸾台平章事李昭德检校内史薛怀义为朔方道行军大总管击默啜昭德为朔方道行军长史味道为司马夏五月甲午加号越古金轮圣神皇帝大赦改元延载赐酺七日秋七月癸未嵩岳山人武什方为正谏大夫同凤阁鸾台平章事八月什方罢戊辰王孝杰为瀚海道行军总管己巳司宾少卿姚璿守纳言左肃政台御史大夫杨再思为鸾台侍郎洛州司马杜景佺检校凤阁侍郎同凤阁鸾台平章事戊寅流崔元综于振州九月壬午朔日有食之壬寅贬李

昭德为南宾尉冬十月壬申文昌右丞李元素为凤阁
侍郎右肃政台御史中丞周允元检校凤阁侍郎同凤阁鸾台平章事岭南獠寇边谷州
都督张玄遇为桂永等州经畧大使十一月辛巳加号
慈氏越古金轮圣神皇帝改元证圣大赦赐酺三日戊子贬豆卢钦望为赵州刺史韦巨
源鄜州刺史【旧纪傅新纪表皆作鄜州统纪作瀛
州实录唐历作麟州 吴缜曰天册万岁元年正月戊子贬韦巨源鄜州刺史纪传不同
推究其实则纪是而传误何以言之案地理志云麟州
开元十二年析胜州之连谷银城置且天册万岁元年岁在乙未而开元十二年岁在甲
子相距三十年是时既未有麟州则巨源何由贬为刺
史乎以此知其实鄜字而误为麟也 按胡三省云贞观五年置麟州属松州都督府十
六年开山洞置漆州属黔州都督府是麟州自为羈縻
州亦见唐地志而非关内道之麟州始置于开元中者也吴氏所考殊为未悉司马光通
鉴亦依实录唐历改鄜州为麟州】 杜景佺漆州刺史
苏味道集州刺史陆元方绥州刺史丙申万象神宫火丙午王孝杰为朔方行军总管以
击突厥

十二年【周武氏天册万岁元年】春正月帝在房州【依唐鉴增】二月己
酉朔日有食之壬子杀薛怀义甲子罢慈氏越古号
三月丙辰周允元薨夏四月戊寅建大周万国颂德天枢秋七月辛酉吐蕃寇临洮王孝
杰为肃边道行军大总管以击之九月甲寅祀南郊加
号天册金轮大圣皇帝大赦改元天册万岁以崇先庙为崇尊庙十二月甲戌如神岭甲
申封于神岳改元曰万岁登封大赦免今岁租税赐酺
十日丁亥禅于少室山给复洛州二年登封告成县三年癸巳复于神都

十三年【周武氏万岁通天元年】春正月帝在房州【依唐鉴增】甲寅娄
师德为肃边道行军副总管以击吐蕃己巳改崇尊
庙为太庙二月辛巳尊神岳天中王为神岳天中黄帝天灵妃为天中黄后三月壬寅王
孝杰娄师德及吐蕃战于素罗汗山败绩王孝杰免【
新旧纪皆不载今依宰相表增】丁巳复作明堂改曰通天宫大赦改元万岁通天赐酺
七日夏四月癸酉检校夏官侍郎孙元亨同凤阁鸾台
平章事庚子贬娄师德为原州都督府司马五月壬子契丹首领松漠都督李尽忠归诚
州刺史孙万荣陷营州杀都督赵文翊乙丑左鹰扬卫
将军曹仁师右金吾卫大将军张玄遇左威卫大将军李多祚司农少卿麻仁节等击之
秋七月辛亥春官尚书武三思为榆关道安抚大使纳
言姚璿为副以备契丹八月丁酉张玄遇曹仁师麻仁节等及契丹战于黄麈谷败绩执
玄遇仁节九月庚子同州刺史武攸宜为清边道行军

大总管以击契丹丁巳吐蕃寇凉州都督许钦明死之庚申并州长史王方庆为鸾台侍郎殿中监李道广同凤阁鸾台平章事冬十月辛卯契丹寇冀州刺史陆宝积死之甲午虑囚十一月壬戌杀李元素孙元亨洛州录事参军綦连耀箕州刺史刘思礼知天官侍郎石抱忠刘奇给事中周譔凤阁舍人王勳前泾州刺史王勔太子司议郎路敬享司门员外郎刘顺之右司员外郎宇文全志来庭县主簿柳璆癸亥突厥默啜寇胜州平狄军副使安道买败之甲子娄师德守凤阁侍郎同凤阁鸾台平章事

十四年【周武氏神功元年】春正月帝在房州【依唐鉴增】乙巳虑囚三月庚子王孝杰及孙万荣战于东硖石谷败绩孝杰死之戊申赦河南北夏四月戊辰置九鼎于通天宫癸酉前益州大都督府长史王及善为内史癸未右金吾卫大将军武懿宗为神邱道行军大总管及右豹韬卫将军何迦密以击契丹五月癸卯娄师德为清边道行军副大总管右武卫将军沙咤忠义为清边中道前军总管以击契丹六月丁卯杀监察御史李昭德司仆少卿来俊臣己卯尚方少监宗楚客同凤阁鸾台三品武承嗣三思并同凤阁鸾台三品辛卯娄师德安抚河北秋七月丁酉武承嗣武三思罢八月丙戌姚璿罢【考异曰新表庚子狄仁杰兼纳言武三思检校内史钦望为文昌右相同三品旧纪传及新纪皆无之此月无庚子仁杰三思除命在明年新表误重复】九月壬寅以契丹平大赦改元神功赐酺七日庚戌娄师德守纳言冬十月甲子给复徇忠立节二县一年闰月甲寅检校司刑卿幽州都督狄仁杰为鸾台侍郎司刑卿杜景佺为凤阁侍郎同凤阁鸾台平章事十一月甲子赦天下改元圣历丙寅宗楚客罢丁亥李道广罢

十五年【周武氏圣历元年】春三月癸丑遣职方员外郎徐彦伯往房陵召庐陵王【依统纪增】戊午帝至自房州【依唐鉴增】夏四月庚寅赦神都及河北辛丑娄师德为陇右诸军大使检校河西营田事秋七月辛未杜景佺罢八月突厥寇边戊子左豹韬卫将军阎知微降于突厥寇边甲午王方庆罢戊戌武承嗣卒庚子春官尚书武三思检校内史狄仁杰兼纳言司属卿武重规为天兵中道大总管沙咤忠义为天兵西道前军总管幽州都督张仁亶为天兵东道总管左羽林卫大将军李多祚右羽林卫大将军阎敬容为天兵西道后军总管以击突厥癸丑突厥寇蔚州乙卯寇定州刺史孙彦高死之九月甲子夏官尚书武攸亶同凤阁鸾台三品戊子突厥寇赵州长史唐波若降于突厥刺史高叡死之突厥寇相州沙咤忠义为河北道前军总管将军杨基副之李多祚为后军总管大将军富德信为奇兵总管以御之壬

申周武氏以帝为皇太子 【依纲目辑】 令依旧名显大赦赐酺五日甲戌 【唐历同实录作丙子】 皇太子为河北道行军元帅以击突厥戊寅狄仁杰为河北道行军副元帅检校纳言辛巳试天官侍郎苏味道为凤阁侍郎同凤阁鸾台平章事冬十月癸卯狄仁杰为河北道安抚大使夏官侍郎姚元崇麟台少监李峤同凤阁鸾台平章事阎知微自突厥复归族诛之十一月壬戌以豫王旦为相王 【依唐鉴辑】 十二月戊子左肃政台御史中丞吉顼为天官侍郎检校右肃政台御史中丞魏元忠为凤阁侍郎同凤阁鸾台平章事辛亥赐皇太子姓武氏大赦

十六年 【周武氏圣历二年】 春正月帝在东宫 【依唐鉴增按何焯曰帝在东宫文义有拟窃谓不然在均州房州则直曰均州房州在东宫则直曰东宫而已正所谓据事直书也】 庚申武攸亶罢二月己丑如缙氏辛卯如嵩阳三月甲戌以隋唐为二王后娄师德为纳言夏四月壬辰魏元忠检校并州大都督府长史天兵军大总管娄师德副之以备突厥辛丑娄师德为陇右诸军大使甲辰虑囚秋七月丙辰洛水溢八月庚子王及善为文昌左相同凤阁鸾台平章事太子宫尹豆卢钦望为文昌右相同凤阁鸾台三品杨再恩罢丁未试天官侍郎陆元方为鸾台侍郎同凤阁鸾台平章事娄师德薨戊申武三思为内史九月乙亥如福昌县曲赦庚辰王及善薨是秋黄河溢冬十月丁亥吐蕃首领赞婆来十一月戊午贬吉顼为琰川尉 【御史台记作安固尉】 壬申武三思罢十二月辛巳封皇太子之子重润为邵王庚寅陆元方罢 【宰相表失载】 司礼卿阿史那斛瑟罗为平西军大总管丁酉狄仁杰为内史庚子韦巨源为纳言乙巳如嵩山

十七年 【周武氏久视元年】 春正月帝在东宫 【依唐鉴增】 丁卯如汝州温汤戊寅作三阳宫二月乙亥豆卢钦望罢 【宰相表作二月乙未钦望罢太子宾客然前圣历元年表内已先有此语当因神功元年八月庚子复出之文而踵以滋复也】 三月癸丑夏官尚书唐奉一为天兵中军大总管以备突厥夏四月戊申如三阳宫五月己酉朔日有食之癸丑大赦改元久视罢天册金轮大圣号赐酺五日给复告成县一年秋闰七月己丑天官侍郎张锡为凤阁侍郎同凤阁鸾台平章事李峤罢丁酉吐蕃寇凉州陇右诸军州大使唐休璟败之于洪源谷壬寅禁隋杨素子孙并不任京官侍卫八月庚戌魏元忠为陇右诸军州大总管以击吐蕃庚申敛天下僧钱作大像九月辛丑狄仁杰薨冬十月辛亥魏元忠为萧关道行军大总管以备突厥甲寅复旧正朔改一月为正月仍

以岁首正月为十一月大赦丁巳韦巨源罢文昌右丞

韦安石为鸾台侍郎同凤阁鸾台平章事丁卯如新安陇涧山曲赦十二月甲寅突厥寇陇右戊午开屠禁诸祠祭令依旧用牲牢

十八年【周武氏大足元年又改长安】春正月帝在东宫【依唐鉴增】丁丑改元大足二月乙酉鸾台侍郎李怀远同凤阁鸾

台平章事三月丙申流张锡于循州夏四月丙午大赦癸丑姚元崇检校并州以北诸军州兵马五月乙亥如三阳宫丁丑魏元忠为灵武道行

军大总管以备突厥丙申天官侍郎顾琮同凤阁鸾台平章事六月庚申夏官侍郎李迥秀同凤阁鸾台平章事辛未赦告成县秋七月壬午苏

味道按察幽平等州兵马甲申李怀远罢九月壬申杀邵王重润及永泰郡主主壻武延基冬十月辛酉大赦天下改元为长安给复关内三年

赐酺三日丙寅魏元忠同凤阁鸾台三品【按新书纪十一月壬申武三思罢三思之罢已见嗣圣十六年十一月壬申此系重出依旧书纪

删】十一月戊寅改含元宫为大明宫

十九年【周武氏长安二年】春正月帝在东宫【依唐鉴增】突厥寇盐州三月丙戌李迥秀安置山东军马检校武骑兵庚寅

突厥寇并州雍州长史薛季昶持节山东防御大使以备之秋七月甲午突厥寇代州九月乙丑朔日有食之壬申突厥寇忻州己卯吐蕃请和

冬十月甲辰顾琮薨戊申吐蕃寇悉州茂州都督陈大慈败之甲寅姚元崇同凤阁鸾台平章事苏味道韦安石李迥秀同凤阁鸾台三品十一

月甲子相王旦为司徒戊子祀南郊大赦赐酺三日十二月甲午魏元忠为安东道安抚大使

二十年【周武氏长安三年】春正月帝在东宫【依唐鉴增】三月壬戌朔日有食之夏四月庚子相王旦罢吐蕃来求婚乙巳

以旱避正殿闰月庚午成均祭酒李峤同凤阁鸾台平章事己卯李峤知纳言事秋七月壬寅正谏大夫朱敬则同凤阁鸾台平章事九月庚寅

朔日有食之丁酉贬魏元忠为高要尉冬十月丙寅如神都十二月丙戌天下置关三十二十一年【周武氏长安四年】春正月帝在东宫【依唐鉴增】丁未作兴

泰宫于寿安县之万安山壬子天官侍郎韦嗣立为

凤阁侍郎同凤阁鸾台三品二月癸亥贬李迥秀为庐州刺史壬申朱敬则罢三月丁亥进封皇孙平恩郡王重福为谯王己亥夏官侍郎宗楚

客同凤阁鸾台平章事贬苏味道为坊州刺史夏四月壬戌韦安石知纳言事李峤知内史事丙子如兴泰宫赦寿安县给复一年六月辛酉姚

元之罢乙丑天官侍郎崔玄暉为鸾台侍郎同凤阁鸾台平章事丁丑李峤同凤阁鸾台

三品壬午相王府长史姚元之兼知夏官尚书同凤阁
鸾台三品秋七月丙戌左肃政台御史杨再思守内史甲午贬宗楚客为原州都督八月
庚申唐休璟兼幽营二州都督安东都护九月壬子姚
元之为灵武道行军大总管冬十月辛酉姚元之为灵武道安抚大使甲戌判秋官侍郎
张柬之同凤阁鸾台平章事壬午怀州刺史房融为正
谏大夫同凤阁鸾台平章事十一月丁亥天官侍郎韦承庆为凤阁侍郎同凤阁鸾台平
章事李峤罢十二月丙辰韦嗣立罢

钦定续通志卷四

●钦定续通志卷五 唐纪五

唐纪 【五】

中宗二 睿宗

○中宗二

神龙元年 【考异曰新纪长安五年正月壬午大赦甲辰太子监国改元按则天实录
神龙元年正月壬午朔大赦改元旧纪唐历统纪
会要皆同纪年通谱亦以神龙为武后年号中宗因之新纪误也】 春正月癸卯张柬之
崔玄暉及左羽林卫将军敬晖检校左羽林卫将军桓
彦范司刑少卿袁恕己左羽林卫将军李湛辞思行赵承恩右羽林卫将军杨元琰左羽
林卫大将军李多祚职方郎中崔泰之 【按新书尚
载有库部员外郎朱敬则吴缜曰按敬则传敬则当武后时已尝为相罢后为成均祭酒
冬官侍郎郑州刺史致仕且未尝为库部员外郎而本
传亦不言其同诛二张虽有与敬晖密议诛之之策然传亦止云晖卒用其策亦不言敬
则同与其事也疑此一名误载】 司刑评事冀仲甫检
校司农少卿兼知总监翟世言内直郎王同皎率左右羽林兵以讨乱张易之昌宗昌期
同休景雄伏诛甲辰皇太子监国命地官侍郎樊忱往
京师告庙陵 【按旧书监国下不复云改元新书监国下误云改元说见前】 丙午皇
帝复位大赦惟易之党与不在原限为周兴来俊臣所
枉陷者咸令雪免赐文武官阶爵民酺五日免今岁租赋给复房州三年放宫女三千人
相王旦为安国相王太尉同凤阁鸾台三品丁未徙太
后上阳宫戊申上太后号曰则天大圣皇帝庚戌张柬之袁恕己同凤阁鸾台三品崔玄
暉守内史敬晖为纳言桓彦范守纳言甲寅复国号唐
社稷宗庙陵寝郊祀行军旗帜服色天地日月寺宇台阁官名依永淳以前故事神都依
旧为东都北都为并州大都督府老君依旧为玄元皇
帝贬韦承庆为高要尉流房融于高州杨再思同中书门下三品姚元之罢甲子皇后韦
氏复位大赦赐酺三日复宗室死于周者官爵丙寅太

子宾客武三思为司空同中书门下三品贬譙王重福为濮州刺史丁卯右散骑常侍驸马都尉武攸暨为司徒辛未安国相王旦罢甲戌太子少詹事祝钦明同中书门下三品韦安石罢进封子义兴郡王重俊为卫王北海郡王重茂为温王丁丑武三思武攸暨罢三月甲申诏文明后破家者昭洗之还其子孙荫惟徐敬业一房不在免限乙丑袁恕己守中书令夏四月辛亥桓彦范为侍中袁恕己为中书令丁卯高要尉魏元忠为卫尉卿同中书门下平章事辛未敬晖为侍中甲戌魏元忠崔玄暉刑部尚书韦安石为吏部尚书太子右庶子李怀远为左散骑常侍凉州都督唐林璟为辅国大将军同中书门下三品乙亥张柬之为中书令五月壬午迁武氏神主于崇恩庙乙酉立太庙社稷于东都戊子复周隋二王后壬辰进封兄成纪郡王千里为成王甲午侍中敬晖封平阳郡王桓彦范扶阳郡王赐姓韦氏中书令张柬之汉阳郡王袁恕己南阳郡王特进崔玄暉博陵郡王并加授特进罢知政事韦安石兼检校中书令魏元忠兼侍中癸卯降梁王武三思为德静郡王定王武攸暨为乐寿郡王河内王武懿宗等并降为国公甲辰唐休璟为尚书左仆射特进豆卢钦望为尚书右仆射同中书门下三品六月壬子左骁卫大将军裴思谅为灵武道行军大总管以备突厥丁巳河北十七州大水癸亥韦安石为中书令魏元忠为侍中杨再思检校中书令豆卢钦望平章军国重事秋七月辛巳太子宾客韦巨源同中书门下三品甲辰洛水溢八月戊申给复河南洛阳二县一年壬戌追册妃赵氏为皇后乙亥上亲祔太祖献祖世祖高祖太宗高宗皇兄义京神主于太庙皇后见于庙丁丑幸洛城南门观鬪象九月壬午祀天地于明堂大赦赐文武官勋爵民酺三日癸巳韦巨源罢冬十月癸亥幸龙门乙丑猎于新安辛未魏元忠为中书令杨再思为侍中十一月戊寅上尊号曰应天皇帝皇后曰顺天皇后 【谨按通鉴辑览 御批此直仿高宗称天皇武后称天后故事明劝韦氏蹈辙矣幸灾乐祸自古无此下愚不移者】 壬午及皇后享于太庙大赦赐文武官阶勋爵民酺三日己丑幸洛城南门观泼寒胡戏壬寅武氏死 【谨遵辑览书法】 废崇恩庙

二年春正月戊戌吏部尚书李峤同中书门下三品中书侍郎于惟谦同中书门下平章事闰月丙午公主开府置官属乙卯以特进敬晖桓彦范袁恕己为滑洛豫刺史二月乙未礼部尚书韦巨源为刑部尚书同中书门下三品丙申遣十道巡察使三月甲辰韦安石罢户部尚书苏瓌守侍中戊申唐休璟罢庚戌杀光禄卿驸马都尉王同皎是月置员外官壬戌赠后父韦元贞太师益州都督夏四月甲戌又赠元贞为鄂

王后弟四人并赠郡王 【谨按洵浩洞泚皆韦后之弟非元贞之弟也旧书作元贞之弟误今改正】 己丑李怀远罢辛丑洛水溢六月戊寅

贬敬暉为崖州司马桓彦范泷州司马袁恕己夔州司马崔玄暉白州司马张柬之新州司马秋七月戊申立卫王重俊为皇太子丙寅魏元忠

为尚书右仆射兼中书令李峤守中书令辛未左散骑常侍致仕李怀远同中书门下三品流敬暉于琼州 【新纪作嘉州今依敬暉传改辑】

考异曰实录初云嘉州后云崖州新本纪作嘉州旧传作崖州今从新传】 桓彦范于瀼州袁恕已于环州崔玄暉于古州张柬之于泷州八

月丙子贬祝钦明为申州刺史九月戊午李怀远薨冬十月癸巳苏瓌为侍中戊戌至自东都十二月己卯灵武军大总管沙咤忠义及突厥战

于鸣沙败绩丙戌突厥寇边京师旱河北水减膳罢土木工苏瓌存抚河北丙申魏元忠为尚书左仆射

景龙元年春正月丙辰以旱虑囚二月丙戌复武氏庙陵置令丞守户如昭陵甲午褻德庙荣先陵置令丞夏四月庚寅赦雍州五月戊戌

右屯卫大将军张仁亶为朔方道行军大总管以备突厥丙午假鸿胪卿臧思言使于突厥死之以旱避正殿减膳六月丁卯朔日有食之戊子

吐蕃及姚州蛮寇边姚嵩道讨击使唐九征败之秋七月辛丑皇太子以羽林千骑兵诛武三思众溃死之 【按新书云皇太子以羽林千骑

兵诛武三思不克死之吴缜曰按节愍太子及武三思传其三思父子皆已为节愍所诛止是太子之众自溃故太子被害耳不得谓之诛三思

不克也当云以羽林千骑兵诛武三思已而众溃死之如此乃尽其实今依纠谬改辑】 壬戌李峤为中书令八月丙戌上尊号曰应天神龙皇

帝皇后曰顺天翊圣皇后魏元忠罢九月丁酉吏部侍郎萧至忠为黄门侍郎兵部尚书宗楚客左卫将军兼太府卿纪处讷中书门下三品于

惟谦罢庚子大赦改元赐文武官阶勋爵辛亥杨再思为中书令韦巨源纪处讷为侍中苏瓌罢 【考异曰新表九月辛亥苏瓌罢为行吏部

尚书按二年瓌请察正员官殿员者择员外官代之三年面折祝钦明请皇后亚献于时更为侍中表云今年罢误也】 冬十月戊寅杀习艺馆

内教苏安恒十二月乙丑朔日有食之

二年春二月庚寅帝以后服有庆云之瑞大赦天下进五品以上母妻封号二等无妻者授其女妇人八十以上版授郡县乡君三月丙子

朔方道大总管张仁亶筑受降城于河上夏四月癸未置修文馆学士秋七月癸巳朔方道行军大总管张仁亶同中书门下三品冬十一月庚

申西突厥寇边御史中丞冯嘉宾使于突厥死之己卯以安乐公主出降假皇后仗出于

禁中帝及后御安福楼观之礼毕大赦赐酺三日 【

按新旧纪皆云己卯景龙文馆记作庚辰盖礼成之明日也】 癸未安西都护牛师奖及西突厥战于火烧城死之是岁皇后妃主昭容卖官行墨敕斜封

三年春二月己丑及皇后幸玄武门观宫女拔河为宫市以嬉壬寅韦巨源为尚书左仆射杨再思为右仆射同中书门下三品壬子及皇后幸太常寺三月戊午宗楚客为中书令萧至忠守侍中太府卿韦嗣立守兵部尚书同中书门下三品中书侍郎兼检校吏部侍郎崔湜守兵部侍郎赵彦昭为中书侍郎同中书门下平章事戊寅礼部尚书韦温为太子少保同中书门下三品太常少卿郑愔守吏部侍郎同中书门下平章事夏五月丙戌贬崔湜为襄州刺史郑愔江州司马六月庚子以旱避正殿减膳撤乐诏括天下图籍壬寅虑囚癸卯杨再思薨秋七月丙辰西突厥娑葛降辛酉许妇人非缘夫子封者荫其子孙癸亥虑囚庚辰澧水溢八月乙酉李峤同中书门下三品特进韦安石为侍中壬辰有星孛于紫宫九月戊辰吏部尚书苏瓌为尚书左仆射同中书门下三品冬十一月乙丑有事于南郊以皇后为亚献大赦赐文武官阶爵入品者减考免关内今岁赋赐酺三日甲戌豆卢钦望薨十二月壬辰前宋国公致仕唐休璟为太子少师同中书门下三品甲午如新丰温汤甲辰赦新丰给复一年赐从官勋一转乙巳至自新丰

四年春正月丙寅及皇后微行以观灯遂幸萧至忠第丁卯微行以观灯幸韦安石长窻公主第己卯如始平送全城公主归吐蕃二月庚戌及后妃公主观三品以上拔河三月以河源九曲予吐蕃夏四月乙未幸隆庆池 【考异曰景龙文馆记以为其月十二日按长历是月壬午朔今从实录本纪】 五月辛酉封嗣虢王邕为汴王丁卯许州司兵参军燕钦融上书言皇后干预国政安乐公主武延秀宗楚客等同危宗社帝怒召钦融廷见扑杀之丁丑剡县地震六月安乐公主与后合谋进鸩壬午帝遇毒崩于神龙殿年五十五 【按中宗生于高宗显庆元年丙辰至景龙四年庚戌应以新纪年五十五为是旧纪作年五十误】 谥曰孝和皇帝庙号中宗陵曰定陵天宝十三载加谥大和大圣大昭孝皇帝

中宗嗣圣一年被废二十年神龙二年景龙四年凡二十七年

○睿宗

睿宗皇帝讳旦高宗第八子中宗母弟也始封殷王领冀州大都督单于大都护长而温恭好学通诂训工草隶书徙封豫王又封冀王初

名旭轮至是去旭字累迁右金吾卫大将军洛州牧徙封相王复封豫王改名旦武后废中宗立为皇帝其改国号周以为皇嗣居于东宫依旧名轮中宗自房州还复为皇太子武后封皇嗣为相王又改名旦授太子右卫率累迁右羽林卫大将军并州牧安北大都护诸道元帅中宗复位进号安国相王迁太尉知政事又立为皇太弟固辞不受

景云元年六月壬午韦皇后弑中宗矫诏立温王重茂为皇太子以刑部尚书裴谈工部尚书张锡同中书门下三品吏部尚书张嘉福中书侍郎岑羲吏部侍郎崔湜同中书门下平章事发诸府兵五万屯京师以韦温总知内外兵马甲申乃发丧又矫遗诏自立为皇太后皇太子即皇帝位以睿宗参谋政事大赦改元曰唐隆太后临朝摄政罢睿宗参谋政事以为太尉封雍王守礼为邠王寿春郡王成器宋王丁亥立温王妃陆氏为皇后壬辰纪处讷张嘉福岑羲持节巡抚关内河南北庚子临淄郡王隆基率万骑兵入北军讨乱诛韦氏安乐公主及韦巨源马秦客驸马都尉武延秀光禄少卿杨均辛丑睿宗奉少帝御安福门大赦赐文武官阶勋爵免天下岁租之半进封隆基为平王朝邑尉刘幽求为中书舍人苑总监锺绍京为中书侍郎参知机务壬寅绍京及黄门侍郎李日知同中书门下三品纪处讷韦温宗楚客将作大匠宗晋卿司农卿赵履温伏诛贬汴王邕为沁州刺史萧至忠许州刺史韦嗣立宋州刺史赵彦昭绛州刺史崔湜华州刺史癸卯平王隆基同中书门下三品锺绍京行中书令张嘉福伏诛王公百官表请睿宗即尊位甲辰安国相王即皇帝位于承天门大赦长流长任及流人未达者还之赐内外官阶爵复少帝为温王乙巳锺绍京罢丙午太常少卿薛稷为黄门侍郎参预机务丁未立平王隆基为皇太子复则天大圣皇后号曰天后戊申许州刺史姚元之为兵部尚书同中书门下三品韦嗣立萧至忠为中书令赵彦昭为中书侍郎崔湜为吏部侍郎同中书门下平章事秋七月庚戌进封衡阳郡王成义为申王巴陵郡王隆范岐王彭城郡王隆业薛王癸丑兵部尚书崔日用为黄门侍郎参预机务追谥雍王贤为章怀太子庶人重俊曰节愍太子复敬晖桓彦范崔玄暉张柬之袁恕己成王千里李多祚等官爵丁巳洛州长史宋璟检校吏部尚书同中书门下三品岑羲罢壬戌贬萧至忠为晋州刺史韦嗣立许州刺史赵彦昭宋州刺史张锡绛州刺史崔湜罢丙寅贬李峤为怀州刺史姚元之兼中书令苏瓌为尚书左仆射丁卯唐休璟张仁亶罢己巳大赦改元赐内外官及为父后者勋一转崔日用薛稷罢乙亥废崇恩庙昊陵顺陵追废皇后韦氏为庶人安乐公主为悖逆庶人八月庚寅谯王重福及汴州刺史郑愔反伏诛

癸巳罢墨敕斜封官贬裴谈为蒲州刺史九月辛未太子少师致仕唐休璟为朔方道行军大总管以备突厥冬十月乙未追号天后曰大天后癸卯出义宗于太庙十一月戊申姚元之为中书令己酉葬中宗皇帝于定陵壬子苏瓌韦安石罢宋王成器为尚书左仆射己巳宋王成器为司徒

二年春正月己未太仆卿郭元振中书侍郎张说同中书门下平章事甲子徙封重茂为襄王乙丑追册妃刘氏窦氏为皇后二月丁丑皇太子监国甲申贬姚元之为申州刺史宋璟楚州刺史丙戌太子少保韦安石为侍中刘幽求罢复墨敕斜封官三月癸丑作金仙玉真观夏四月甲申韦安石为中书令宋王成器罢辛卯李日知为侍中壬寅大赦赐文武官阶勋爵民酺三日甲辰作玄宗皇帝庙五月庚戌复昊陵顺陵置官属壬戌殿中监窦怀贞为左御史台大夫同中书门下平章事秋七月乙卯大赦赐酺三日丁巳皇太子释奠于国学庚午韦安石为尚书左仆射同中书门下三品九月乙亥窦怀贞为侍中【睿宗实录在乙卯太上皇实录在庚辰旧纪在己卯】冬十月甲辰吏部尚书刘幽求为侍中右散骑常侍魏知古太子詹事崔湜为中书侍郎同中书门下三品中书侍郎陆象先同中书门下平章事韦安石李日知郭元振窦怀贞张说罢十二月丁未作泼寒胡戏

延和元年【按旧书作景云三年新书作先天元年是年正月即改元太极不必复云景云八月改元先天系玄宗年号不得编作睿宗纪今以五月戊寅改元延和纪年】春正月辛未享于太庙辛巳有事于南郊戊子耕藉田己丑大赦改元曰太极赐内外官阶勋爵民酺五日版授九十以上州刺史八十以上上州司马辛卯幸安福门观酺三日夜【考异曰新纪表壬辰以陆象先同中书门下三品太上皇睿宗实录旧纪皆无之不知新书何据今不取】乙未户部尚书岑羲左御史台大夫窦怀贞同中书门下三品二月丁巳皇太子释奠于国学夏五月戊寅有事于北郊辛巳大赦改元延和赐内外官陪礼者勋一转民酺五日六月癸丑岑羲为侍中乙卯追号大天后为天后圣帝辛酉刑部尚书郭元振为朔方道行军大总管以伐突厥甲子幽州都督孙佺【旧书作孙儉】左武卫将军李楷洛左威卫将军周以悌及奚契丹战于冷陁山败绩秋七月辛未兵部尚书李迥秀为朔方道后军大总管乙亥窦怀贞为尚书右仆射平章事国重事己卯幸安福门观乐三日丙戌以旱减膳八月庚子立皇太子为皇帝自尊为太上皇五日一受朝于太极殿自称曰朕五品以上除授及大刑狱并自决之其处分事称诰

令皇帝每日受朝于武德殿自称曰予五品以下除授及重罪并令决之处分事称制敕壬寅追号天后圣帝为圣后甲辰大赦改元先天赐内外官及五品以上子为父后者勋爵民酺五日丁未立皇太子妃王氏为皇后戊申皇帝子许昌王嗣直改封郟王真定王嗣谦改封郢王己酉宋王成器为司徒庚戌窦怀贞为尚书左仆射刘幽求守尚书右仆射同中书门下三品魏知古为侍中崔湜检校中书令戊午流刘幽求于封州九月丁卯朔日有食之甲午封皇帝子嗣升为陕王冬十月辛卯猎于骊山十一月丁亥诰遣皇帝巡边甲午幽州都督宋璟为左军大总管并州长史薛讷为中军大总管兵部尚书郭元振为右军大总管

先天二年春正月乙亥吏部尚书萧至忠为中书令二月追作先天元年酺六日辛丑以雨霖避正殿减膳丙辰郭元振同中书门下三品秋七月甲子大赦乙丑诰归政于皇帝开元四年六月崩于百福殿年五十五谥曰大圣贞皇帝庙号睿宗陵曰桥陵天宝十三载增谥元真大圣大兴孝皇帝

睿宗景云一年 【此年即中宗景龙四年】 延和一年凡二年

钦定续通志卷五

●钦定续通志卷六 唐纪六

唐纪 【六】

玄宗一

○玄宗 【一】

玄宗皇帝讳隆基睿宗第三子也母曰昭成顺圣皇后窦氏性英武善骑射通音律历象之学垂拱三年封楚王长寿二年改封临淄郡王历右卫郎将尚辇奉御迁卫尉少卿兼潞州别驾景龙四年来朝京师遂留不遣庶人韦氏已弑中宗矫遣诏称制韦温宗楚客纪处讷等谋倾宗社以睿宗介弟之重先谋不利玄宗乃与太平公主子薛崇简尚衣奉御王崇晔公主府典签王师虔朝邑尉刘幽求苑总监钟绍京长上折冲麻嗣宗押万骑果毅葛福顺李仙凫道士冯处澄僧普润等定策讨之或请先启相王玄宗曰请而从是王与危事也不从则吾计失矣事成福归于王不成以身死之不累王也 【谨按通鉴辑览 御批胡寅以临淄不先白相王盖欲自为此论刻而无当相王仁柔本非唐高祖之比临淄默定大计不得不周详审慎观于事成归王不成不累王之语其于天理人心亦可谓光明正大矣】 乃夜率幽求等入苑中福顺仙凫以万骑兵攻玄武门斩羽林将军韦播高嵩以徇左万骑自左入右万骑自右入玄宗率总监羽林兵会两仪殿梓宫宿卫兵皆起应之遂诛

韦氏黎明驰谒睿宗谢不先启睿宗泣曰宗社赖汝以定不然吾且及难乃拜玄宗殿中
监同中书门下三品兼押左右万骑进封平王睿宗即位议立皇太子金曰除天下之祸者享天下之福拯天下之危者受天下之安平王有圣
德定天下又闻成器已下咸有推让宜膺主鬯以副羣心睿宗从之六月丁未立为皇太子有司择日备礼册命七月己巳睿宗御承天门皇太
子诣朝堂受册景云二年命皇太子监国听除六品已下官延和元年六月星官言帝座及前星有变睿宗曰传德避灾吾意决矣七月壬辰制
传位于皇太子太子惶惧驰进见涕泣固辞睿宗曰此吾所以答天戒也皇太子乃御武德殿视事先天元年【延和元年八月改元先天】
十月庚子享于太庙大赦

开元元年秋七月甲子尚书左仆射窦怀贞侍中岑羲中书令萧至忠崔湜雍州长
史李晋左羽林大将军常元楷右羽林将军李慈等与太平公主谋反伏诛乙丑睿宗下诏军国政刑一事已上并取皇帝处分大赦赐文武官
阶爵有差丁卯崔湜卢藏用除名长流岭表甲戌令毁天枢乙亥尚书左丞张说检校中书令庚辰陆象先罢【上二事旧书皆系癸丑与新书
异然癸丑又系癸酉之讹】己丑周孝明高皇帝依旧赠太原王去帝号孝明皇后称太原王妃昊陵顺陵并称太原王及妃墓八月壬辰刘
幽求为尚书右仆射知军国重事壬寅宋王成器为太尉申王成义为司徒邠王守礼为司空九月丁卯宋王成器罢庚午刘幽求同中书门下
三品燕国公张说为中书令冬十月姚嵩蛮寇姚州都督李蒙死之辛卯引见京畿县令己亥如温汤【旧书作甲申】癸卯讲武于骊山流
郭元振于新州斩给事中唐绍免新丰来岁税甲辰猎于渭川同州刺史姚元之为兵部尚书同中书门下三品乙巳至自温汤十一月乙丑刘
幽求兼侍中戊子羣臣上尊号曰开元神武皇帝【谨按通鉴辑览御批人君敕几图治惟当务实岂在崇尚虚名无论其献媚贡谀不可为训即以君上之尊而使臣下妄加称谓以为荣亦
复成何治体况尊号高宗以来弊政明皇方锐意维新顾于此仍循旧辙盖不待天宝改元己萌不克自持之几矣】十二月庚寅朔大赦改元
赐内外官勋改尚书左右仆射为左右丞相中书省为紫微省门下省为黄门省侍中为
监雍州为京兆府洛州为河南府甲午吐蕃请和己亥禁断泼寒胡戏壬寅姚崇兼紫微令癸丑刘幽求罢张说为相州刺史甲寅黄门侍郎卢
怀慎同紫微黄门平章事

二年春正月关中自去秋至于是月不雨壬午遣使振给求直谏宽系囚祠名山大
川甲申并州节度大使薛讷同紫微黄门三品总兵以

伐奚契丹二月突厥寇北庭都护府右骁卫将军郭虔瓘击败之己酉虑囚西突厥酋长都担叛三月己亥碛西节度使阿史那献擒斩之夏四

月辛未停诸陵供奉鹰犬五月辛亥魏知古罢六月丁巳开府仪同三司宋王成器为岐州刺史司徒申王成义为豳州刺史司空邠王守礼为

虢州刺史委务于上佐秋七月乙未禁采珠玉废锦坊内出珠玉锦绣服玩于正殿前焚之【谨按通鉴辑览 御批刘友益谓特书予之

未为切当明皇非直能斲雕为朴者不过博崇俭美名以饰观听耳 皇祖讥其矫激太甚观未几复遣使求珍翠奇宝前后判然不侔诚

不能揜其真伪矣】庚子薛讷及奚契丹战于滦河败绩讷等遁归减死除名为庶人丁未襄王重茂薨于梁州谥曰殇帝八月乙亥吐蕃寇临

洮军又寇兰州渭州掠羣牧起薛讷摄左羽林将军陇右防御使以御之九月庚寅作兴庆宫丁酉宴京师侍老于含元殿庭赐九十以上几杖

八十以上鸠杖妇人亦如之就赐于家太常卿岐王范为华州刺史秘书监薛王业为同州刺史戊申如温泉冬十月戊午至自温泉甲子薛讷

及吐蕃战于武阶败之【通鉴纲目并作武街胡三省曰水经注武街城在汉狄道县东白石山西北唐为武街驿与大来谷皆属临洮渭原

县界】丰安军使王海宾力战死之十二月乙丑封子嗣真为郾王嗣初鄂王嗣玄鄜王

三年春正月丁亥立郾王嗣谦为皇太子降死罪已下大酺三日癸卯卢怀慎检校黄门监二月辛酉赦囚非恶逆造伪者突厥十姓部落

及高丽莫离支文简都督跌思太等各率其众自突厥相继来降前后万余帐以河南地处之夏四月庚申右羽林大将军薛讷为源州镇军大

总管凉州都督杨执一副之左卫大将军郭虔瓘为朔州镇军大总管并州长史王峻副之以备突厥岐王范兼虢州刺史薛王业兼豳州刺史

【旧纪作豳州而传作豳州然豳与虢俱近畿之地自当从豳为是】五月丁未以旱虑囚戊申避正殿减膳六月山东诸州大蝗遣御史下

诸道捕之是岁有秋秋七月庚辰朔日有食之冬十月甲寅制选耆儒博学一人每日入内侍读以光禄卿马怀素为左散骑常侍褚无量并充

侍读辛酉鞬州蛮寇边右骁卫将军李玄道伐之壬戌薛讷为朔方道行军大总管太仆卿吕延祚灵州刺史杜宾客副之甲子如郾县之凤泉

汤十一月己卯至自凤泉汤乙酉如新丰之温汤丁亥相州妖贼崔子岳反伏诛甲午至自温汤

四年春正月丁亥宋王成器更名宪申王成义更名撝二月丙辰如新丰之温汤辛酉吐蕃寇松州廓州刺史盖思贤伐之丁卯至自温汤

癸酉松州都督孙仁献及吐蕃战败之以关中旱遣使祈雨于骊山夏六月癸亥太上皇

崩癸酉突厥可汗默啜为九姓拔曳固所杀斩其首送
京师是夏山东河南河北蝗虫大起遣使分捕之秋七月丁丑吐蕃请和丁酉洛水溢八
月辛未奚契丹降冬十月庚午葬睿宗皇帝于桥陵十
一月己卯卢怀慎罢 【按旧书不载卢怀慎罢而云辛丑黄门监兼吏部尚书卢怀慎卒
宰相表十一月己卯怀慎去官养疾通鉴云己卯卢
怀慎疾亟上表荐宋璟李杰李朝隐卢从愿上深纳之与新书同盖己卯乃罢官之日而
旧书卒于辛丑通鉴薨于乙未纲目不书卒日未知孰
是】 丁亥徙中宗神主于西庙丙申尚书左丞源干曜为黄门侍郎同紫微黄门平章事
十二月乙卯如新丰之温汤乙丑至自温汤闰月己亥
姚崇源干曜罢刑部尚书宋璟为吏部尚书兼黄门监紫微侍郎苏頲同紫微黄门平章
事

五年春正月癸卯太庙四室坏迁神主于太极殿帝素服避正殿辍朝五日己酉享
于太极殿辛亥如东都二月甲戌 【旧书于此日云
至自东都考明皇此行于六年十一月始还京师此当云至东都自字衍文今删去】 大
赦唯谋反大逆不在赦限给复河南一年免河南河北
遭水及蝗虫处今年租武德贞观以来勋臣子孙无位者访求其后奏闻有嘉遯幽栖养
高不仕者州牧各以名荐三月丙寅吐蕃请和夏四月
甲午毁则天拜洛受图坛及碑文并显圣侯庙五月丙辰诏公侯子孙袭封六月壬午巩
县暴雨连月山水泛滥泛水同日泛滥秋七月壬寅陇
右节度使郭知运及吐蕃战败之甲子复以明堂为干元殿九月壬寅复紫微省为中书
省黄门省为门下省黄门监为侍中冬十月丙子修太
庙成丁丑诏以故越王贞死非其罪封故许王男淋为嗣越王以继其后戊寅祔神主于
太庙十一月司徒兼邓州刺史申王撝兼虢州刺史

六年春正月辛丑突厥请和禁断天下诸州恶钱行二铢四分以上好钱不堪用者
并即销破覆铸迁孝敬皇帝神主于别庙太子少师兼
许州刺史岐王范兼郑州刺史二月甲戌礼币征嵩山隐士卢鸿 【考异曰旧传作卢鸿
一本纪新传皆作鸿按中岳真人刘君碑云卢鸿撰
今从之】 夏六月甲申灋水溢乙酉制以故侍中桓彦范敬暉中书令兼吏部尚书张柬
之特进崔玄暉中书令袁恕己配飨中宗庙庭故司空
苏瓌左丞相太子少保郴州刺史刘幽求配飨睿宗庙庭秋八月以旱虑囚冬十月癸亥
赐河南府及怀汝郑三州父老帛十一月辛卯至自东
都丙申享于太庙诏元皇帝己上三祖枝孙失官者各与五品京官内外三品以上有庙
者各赐物三十匹以备修祭服及俎豆赐文武官有差
免知顿及旁州供奉者租一年是月突厥执单于副都护张知运十二月以开府仪同三

司兼泽州刺史宋王宪为涇州刺史司徒兼虢州刺史

申王撝为隆州刺史太子少师兼郑州刺史岐王范为岐州刺史太子少保兼徽州刺史薛王业为虢州刺史

七年夏五月己丑朔日有食之帝素服彻乐减膳命中书门下虑囚六月戊辰吐蕃复请和秋八月辛卯敕自今五服并依丧服传文九月

甲戌徙封宋王宪为宁王冬十月辛卯如新丰之温汤癸卯至自温汤十一月乙亥皇太子诣国学行齿胄礼陪位官及学生赐物有差八年春

正月甲子朔皇太子加元服乙丑皇太子谒太庙丙寅会百官于太极殿赐物有差己卯宋璟苏頲罢京兆尹源干曜为黄门侍郎并州大都督

府长史张嘉贞为中书侍郎同中书门下平章事三月甲子免水旱州逋赋给复四镇行人家夏五月丁卯源干曜为侍中张嘉贞为中书令六

月庚寅洛瀍谷水溢【旧书作壬寅】秋九月突厥寇甘源等州凉州都督杨敬述与战败绩王峻检校幽州都督节度河北诸军大使黄门

侍郎韦抗为朔方道行军大总管以伐之甲子太子少师兼岐州刺史岐王范兼太子少傅太子少保兼虢州刺史薛王业为太保丙寅降京城

罪囚冬十月辛巳如长春宫壬午畋于下邳庚寅如新丰之温汤十一月乙卯至自温汤九年春正月议检括户口丙辰改蒲州为河中府置下都丙寅如新丰之温汤乙亥至自温汤二月丙戌突厥复请和丁亥免天下七年以

前逋赋以宇文融充检括户口使夏四月庚寅兰池胡康待宾叛攻陷六胡州王峻发陇右诸军及河东九姓伐之秋七月戊申罢中都依旧为

蒲州己酉王峻大破康待宾生擒之辛酉康待宾伏诛八月兰池胡康愿子复叛九月乙巳朔日有食之癸亥天兵军节度大使张说为兵部尚

书同中书门下三品冬十一月丙辰左散骑常侍元行冲上羣书四录二百卷庚午冬至大赦赐内外官阶爵唐隆先天实封功臣坐事免若死

者量加收赠民酺三日十二月乙酉如新丰之温汤壬辰至自温汤十年春正月丁巳如东都癸亥停天下公廩钱以税户钱充百官俸乙丑收内外官

职田给还逃户及贫下户欠丁田【旧书停公廩钱在乙丑收职田在戊申考戊申不应在乙丑之后此据通鉴改】夏四月己亥以张说兼朔方军节度大使五月伊汝水溢闰月张说如朔方军

巡边六月丁巳河决博棣二州己巳增太庙为九室迁中宗神主还太庙【按礼乐志亦在十年而旧书十一年四月复云迁祔中宗神主于

太庙事属重出新书于此月并不书增置九室事而于十一年五月云复中宗于太庙盖承旧书之讹也今依旧书仍辑于十年而旧书新书十

一年所载迁祔事皆削而不书】秋八月丙戌安南人梅叔鸾反骠骑将军兼内侍杨思

勦讨斩之丁亥遣户部尚书陆象先往汝许等州存抚
振给九月张说擒康愿子于木盘山诏徙河曲六州残胡五万余口于许汝唐邓仙豫等
州始空河南朔方千里之地己卯京兆人权梁山反伏
诛癸未吐蕃攻小勃律北庭节度使张孝嵩败之冬十月癸丑复以干元殿为明堂甲寅
如寿安之故兴泰宫猎于上宜川庚申还东都

十一年春正月丁卯降东都囚罪杖以下原之己巳如并州降所至囚罪徒以下原
之庚辰次潞州宴父老曲赦大辟罪己下给复五年辛
卯至并州置北都改并州为太原府给复一年下户三年元从户五年二月戊申还次晋
州己酉贬张嘉贞为幽州刺史壬子至汾阴祠后土赐
文武阶勋爵帛癸亥张说兼中书令三月庚午车驾还京师免所过今年税赦京城夏四
月癸亥张说正除中书令吏部尚书王峻为兵部尚书
同中书门下三品五月己丑王峻兼朔方军节度大使六月王峻如朔方军巡边秋八月
戊申追号宣皇帝曰献祖光皇帝曰懿祖始祔于太庙
之九室冬十月丁酉如新丰之温汤作温泉宫甲寅至自温泉十一月戊寅有事于南郊
大赦赐奉祠官阶勋亲王公主一子官赐高年粟帛孝
子顺孙终身弗事天下酺三日京城五日十二月甲午如凤泉汤庚申至自凤泉汤贬王
峻为蕲州刺史

十二年夏四月封故泽王上金男义珣为嗣泽王嗣许王瓘左授鄂州别驾癸卯嗣
江王祜降为信安郡王嗣蜀王禴为广汉郡王嗣密王
彻为濮阳郡王嗣曹王臻为济国公嗣赵王琚为中山郡王武阳郡王堪为泮国公祜等
并自神龙之后相继为王以瓘利泽王之封尽令归宗

改封焉秋七月己卯废皇后王氏为庶人后弟太子少保驸马都尉守一贬为潭州别驾

【旧书作泽州别驾此据通鉴改盖以路出蓝田知之】至蓝田赐死贬户部尚书张嘉贞为台州刺史冬十一月庚午如东都庚辰申王擢
薨五溪首领覃行璋反遣镇军大将军兼内侍杨思勳
讨平之闰十二月丙辰朔日有食之

十三年春正月戊子降死罪流己下原之遣使分道疏决囚徒二月戊午如龙门即
日还宫乙亥初置彍骑三月甲午皇太子嗣谦改名鸿
徙封郟王嗣直为庆王更名潭陕王嗣升为忠王更名浚鄆王嗣直为棣王更名治鄂王
嗣初为郎王更名涓鄆王嗣玄为荣王更名滉又封子
澹为光王濉仪王灃颍王泽永王清寿王洄延王沐盛王溢济王夏五月庚寅妖贼刘定
高等夜犯通洛门捕得伏诛秋九月丙戌敕母奏祥瑞
冬十月癸丑新造铜仪成辛酉如兖州庚午次濮州赐河南北五百里内父老帛十一月
丙戌至兖州庚寅封泰山辛卯禅于社首壬辰大赦赐

文武官阶勋爵致仕官一季禄公主嗣王郡县主一子官诸蕃酋长来会者一官免所过
一岁租兖州二岁天下酺七日丙申如孔子宅亲设奠
祭十二月己巳还东都是冬分吏部为十铨敕礼部尚书苏颋刑部尚书韦抗工部尚书
卢从愿等分掌选事

十四年春二月庚戌朔邕州獠梁大海等据宾横等州叛杨思勳讨平之【实录作
二月己酉】夏四月丁巳户部侍郎李元纁同中书
门下平章事庚申张说罢丁卯岐王范薨辛丑于定恒莫易沧等五州置军以备突厥六
月戊午以旱暴风雨命中外官言事秋七月癸未灋水
溢八月丙午河决魏州九月己丑碛西节度使杜暹同中书门下平章事冬十月庚申如
汝州广成汤己巳如东都十二月丁巳如寿安猎于方
秀州壬戌还东都

十五年春正月辛丑凉州都督王君■〈寔，大代兔〉及吐蕃战于青海败之夏
五月晋州大水癸酉以忠王浚为单于大都护朔方节
度大使诸子庆王潭等俱领州牧刺史都督节度大使大都护经畧使并不出合秋七月
戊寅冀州河溢庚寅鄜州之洛水溢【新书止言洛
水此据旧书盖旧书下又云水坏同州则当是鄜州之洛水也】己亥降都城囚徒以下
原之九月丙子吐蕃寇瓜州执刺史田元献闰月庚子
寇安西副大都护赵归贞击败之庚申回纥袭甘州王君■〈寔，大代兔〉死之朔方
节度使萧嵩兼判凉州事总兵以御吐蕃河北饥转江
淮米百万石赈之冬十月己卯至自东都十一月丁卯猎于城南十二月乙亥如温泉宫
丙戌至自温泉宫

十六年春正月春龙等州獠陈行范广州獠冯仁智何游鲁叛骠骑大将军杨思勳
讨平之壬寅赵归贞及吐蕃战于曲子城败之庚申许
徒以下囚保任营农三月辛丑免营农囚罪秋七月吐蕃寇瓜州刺史张守珪击败之乙
巳河西节度使萧嵩陇右节度使张志亮克吐蕃大莫
门城八月己巳张说进开元大衍厯辛卯萧嵩遣杜宾客击吐蕃于祁连城大破之九月
丙午以久雨降囚罪徒以下原之冬十月己卯如温泉
宫己丑至自温泉宫十一月癸巳萧嵩为兵部尚书同中书门下平章事十二月丁卯如
温泉宫丁丑至自温泉宫

十七年春二月丁卯嵩州都督张审素攻西南蛮克昆明城及盐城三月戊戌张守
珪及吐蕃战于大同军败之甲寅信安王祗攻拔吐蕃
石堡城夏四月癸亥令中书门下疏决大理京兆万年长安等狱囚徒天下囚死罪降等
流以下原之六月甲戌源干曜杜暹李元纁罢萧嵩兼
中书令户部侍郎宇文融为黄门侍郎兵部侍郎裴光庭为中书侍郎并同中书门下平

章事秋八月癸亥帝以降诞日燕百寮于花萼楼下百
寮表请以每年八月五日为千秋节令天下诸州燕乐休暇三日从之九月壬子贬宇文
融为汝州刺史又贬昭州平乐尉冬十月戊午朔日有
食之十一月庚申享于太庙丙申谒桥陵赦奉先县戊戌谒定陵己亥谒献陵壬寅谒昭
陵乙巳谒干陵戊申还宫大赦流移人并放还左降官
移近处免供顿县今岁租天下百姓今岁地租之半赐文武官阶爵十二月辛酉如温泉
宫乙丑校猎渭滨壬申至自温泉宫

十八年春正月辛卯裴光庭为侍中三月辛卯改定州县上中下户口之数依旧给
京官职田夏四月乙卯筑京城外郭乙丑裴光庭兼吏
部尚书五月奚契丹附于突厥六月庚申命左右丞相尚书及中书门下五品已上举才
堪边任及刺史者丙子忠王浚为河北道行军元帅御
史大夫李朝隐京兆尹裴佑先副之率十八总管以讨奚契丹壬午灋洛水溢闰月己丑
令范安及韩朝宗就二水源疏决之秋九月丁巳以忠
王浚兼河东道诸军元帅冬十月戊子吐蕃请和庚寅如岐州之凤泉汤癸卯至自凤泉
汤十一月丁卯如温泉宫丁丑至自温泉宫十二月戊
申尚书左丞相燕国公张说薨

十九年春正月壬戌开府仪同三司霍国公王毛仲贬灋州别驾中路赐死 【考异
曰实录十八年六月乙丑王毛仲贬灋州按唐历唐
统纪旧纪毛仲贬皆十九年正月今从之】 丙子亲耕于兴庆宫夏四月丙申令两京及
天下诸州立太公庙以张良配飨春秋仲月上戊日祭
之壬戌五岳各置老君庙秋八月辛巳降死罪徒已下原之冬十月丙申如东都是冬浚
苑内洛水

二十年春正月乙卯信安王祜为河东河北道行军副元帅率兵以伐奚契丹二月
甲戌朔日有食之 【通鉴作癸酉朔】 分命宰相录
京城狱击囚三月信安王祜及奚契丹战于幽州之白山败之夏五月癸卯敕寒食上墓
编入五礼戊申信安王祜献奚契丹之俘六月丁丑忠
王浚加司徒信安王祜加开府仪同三司秋八月辛未朔日有食之己卯户部尚书王峻
卒九月乙巳中书令萧嵩等奏上开元新礼一百五十
卷制行用之渤海靺鞨寇登州刺史韦俊死之左领军将军盖福顺发兵伐之冬十月壬
午如北都丙戌命巡幸所至有贤才未闻达者举之仍
令中书门下疏决囚徒辛卯至潞州之飞龙宫给复三年辛丑至北都癸丑曲赦北都给
复三年庚申如汾阴十一月庚午祠后土大赦左降官
量移近处赐文武官阶勋爵免供顿州今岁租大酺三日十二月壬申至自汾阴

二十一年春正月乙巳祔肃明皇后神主于庙毁仪坤庙丁巳如温泉宫癸亥至自

温泉宫三月乙巳裴光庭薨甲寅尚书右丞韩休为黄
门侍郎同中书门下平章事闰月幽州副总管郭英杰及契丹战于都山英杰死之夏四
月乙卯遣宣慰使黜陟官吏决系囚丁巳宁王宪为太
尉薛王业为司徒庆王潭为太子太师忠王浚为开府仪同三司棣王洽为太子少傅鄂
王涓为太子太保五月戊子以皇太子纳妃降死罪流
以下原之京文武官赐勋一转秋七月乙丑朔日有食之九月壬午封子沔为信王泚义
王濯陈王澄丰王湫恒王璇凉王滔深王冬十月庚戌
如温泉宫己未至自温泉宫十一月戊子尚书右丞相宋璟以年老请致仕许之十二月
丁未萧嵩韩休罢京兆尹裴耀卿为黄门侍郎前中书
侍郎张九龄起复旧官并同中书门下平章事是岁京师饥诏出太仓米二百万石给之
钦定续通志卷六

●钦定续通志卷七 唐纪七

唐纪 【七】

玄宗二

○玄宗二

开元二十二年春正月己巳如东都辛未遣太府卿严挺之户部侍郎裴宽于河南
存问振给乙酉怀卫邢相等州乏粮遣中书舍人裴敦
复巡问量给种子二月壬寅秦州地震给复压死者家一年三人已上者三年夏四月甲
辰降死罪以下甲寅北庭都护刘涣反伏诛五月戊子
裴耀卿为侍中中书侍郎张九龄为中书令黄门侍郎李林甫为礼部尚书同中书门下
平章事是夏帝于苑中种麦率皇太子已下躬自芟之

【谨按通鉴辑览 御批耕藉已足劝农事必伛偻自芟斯过甚矣且帝既云此所以
荐宗庙则当岁以为常不见其继此而行也子夏曰虽

小道必有可观致远恐泥盖谓此耳】六月壬辰幽州节度使张守珪俘奚契丹以献

【考异曰实录守珪大破林胡按会要契丹事二十二
年大破之盖实录以契丹即战国林胡故云然】张九龄充河南开稻田使冬十二月戊
子朔日有食之乙巳张守珪大破契丹斩其王屈烈及
其大臣可突干传首东都

二十三年春正月乙亥耕藉田 【旧书作己亥然前年十二月戊子朔则此不应是
己亥也兹从新书】大赦赐文武官及朝集采访使

阶爵其才有王霸之畧学究天人之际及堪将帅牧宰者令五品已上清官及刺史各举
一人赐酺三日秋七月丙子皇太子鸿改名瑛庆王直

以下十四王并改名封子琪为恒王璇凉王璿汴王 【按封皇子玘为义王珪为陈王珙
为丰王已见于二十一年九月旧书重出新书并不

载封琪璇璫事亦属脱误】八月戊子免鰥寡惸独今年地税之半冬十月戊申突骑施寇北庭及安西拨换城闰十一月壬午朔日有食之

【考异曰旧纪作十一月壬申朔按长历十一月壬子朔今从实录唐历】十二月乙亥册故蜀州司户杨元琰女为寿王瑁妃

二十四年春正月北庭都护盖嘉运击突骑施败之三月乙未移考功贡举于礼部夏五月丙午醴泉人刘志诚反伏诛秋七月辛丑李林甫为兵部尚书依旧知政事八月戊申加亲舅小功服舅母缙麻服堂舅袒免冬十月戊申车驾发东都甲子次华州降所过处系囚丁丑至自东都十一月壬寅裴耀卿张九龄罢李林甫兼中书令朔方军节度副大使牛仙客为工部尚书同中书门下三品十二月戊申庆王琮为司徒

二十五年春二月乙酉张守珪及契丹战于捺祿山败之辛卯河西节度副大使崔希逸及吐蕃战于青海败之夏四月辛酉杀监察御史周子谅乙丑废皇太子瑛及鄂王瑶光王琚为庶人皆杀之秋七月庚申封李林甫为晋国公牛仙客为豳国公九月壬申颁新定令式格及事类一百三十卷于天下冬十一月壬申如温泉宫乙酉至自温泉宫己丑开府仪同三司广平公宋璟薨十二月丙午惠妃武氏薨追谥为贞顺皇后葬于敬陵

二十六年春正月乙亥牛仙客为侍中丁丑迎气于东郊降死罪流以下原之以京兆府新开稻田给贫人赐百官勋绢天下州县每乡一学仍择师资令其教授诸乡贡每年令就国子监谒先师明经加口试内外八品已下及草泽有博学文辞之士各委本司本州岛闻荐壬辰李林甫兼陇右节度副大使二月乙卯牛仙客兼河东节度副大使三月癸未吐蕃寇河西崔希逸败之夏四月己亥朔始令有司读时令于宣政殿五月乙酉李林甫兼河西节度副大使六月庚子立忠王玙为皇太子秋七月己巳册皇太子大赦常赦所不原者咸赦除之赐文武官子为父后者勋一转民酺三日九月丙申朔日有食之庚子益州长史王昱及吐蕃战于安戎城败绩冬十月戊寅如温泉宫壬辰至自温泉宫

二十七年春正月壬寅荣王琬巡按陇右二月己巳羣臣上尊号曰开元圣文神武皇帝大赦免百姓今年租赐文武阶爵酺五日夏四月己丑牛仙客为兵部尚书兼侍中李林甫为吏部尚书依旧兼中书令总文武选事秋八月乙亥北庭都护盖嘉运击突骑施可汗吐火仙于碎叶城擒之壬午吐蕃寇边河西节度使萧炅败之甲申制追赠孔宣父为文宣王颜回为兗国公余十哲皆为侯后嗣褒圣侯改封为文宣公九月皇太子改名绍冬十月辛巳改修东都明堂丙戌如温泉宫十一月辛丑至自温泉宫

二十八年春正月癸巳如温泉宫庚子至自温泉宫三月丁亥朔日有食之壬子益州长史章仇兼琼败吐蕃克安戎城夏五月乙未太子少师韩休卒秋七月壬寅追尊宣皇帝陵名曰建初光皇帝陵名曰启运仍置官员九月庚寅封皇孙倓等十九人为郡王冬十月甲子如温泉宫以寿王妃杨氏为道士号太真辛巳至自温泉宫十一月牛仙客停兼朔方河东节度使

二十九年春正月癸巳如温泉宫庚子至自温泉宫立玄元皇帝庙秋七月乙亥北州刺史王斛斯为幽州节度使八月乙未幽州节度副使安禄山为营州都督充平卢军节度副使押两番渤海黑水四府经畧使冬十月丙申如温泉宫戊戌遣使分往诸道黜陟官吏十一月庚戌司空邠王守礼薨辛酉至自温泉宫辛未太尉宁王宪薨谥为让皇帝葬于惠陵十二月癸未吐蕃陷廓州达化县及振武军石堡城

天宝元年春正月丁未朔大赦改元常赦所不原者咸赦除之免百姓诸色逋税前资官及白身人有儒学博通文辞秀英及军谋武艺者具以名荐甲寅陈王府参军田同秀上言玄元皇帝降于丹凤门通衢告赐灵符在尹喜之故宅帝遣使就函谷故关尹喜台西发得之乃置玄元庙于太室坊辛未陕郡凿三门渠成二月丁亥羣臣上尊号曰开元天宝圣文神武皇帝辛卯享玄元皇帝于新庙甲午享于太庙丙申合祭天地于南郊大赦改侍中为左相中书令为右相东都为东京北都为北京天下诸州改为郡刺史为太守赐文武官阶爵庚子平卢节度副使安禄山进骠骑大将军秋七月癸卯朔日有食之辛未左相牛仙客薨八月丁丑刑部尚书李适之为左相壬辰右相李林甫加尚书左仆射李适之兼兵部尚书左仆射裴耀卿为尚书左仆射九月丙寅改玄元庙为太上玄元皇帝宫冬十月丁酉如温泉宫作长生殿成名曰集灵台以祀天神十一月己巳至自温泉宫十二月朔方节度使王忠嗣及奚契丹战于桑干河败之

二年春正月乙卯作升仙宫丙辰追尊玄元皇帝为大圣祖玄元皇帝三月壬子享于玄元宫追号大圣祖父周上御大夫敬曰先天太皇母益寿氏号先天太后尊咎繇曰明德皇帝凉武昭王曰兴圣皇帝江淮租庸等使韦坚引浚水开广济潭以聚运船丙寅帝幸广运楼以观之秋七月丙辰裴耀卿薨冬十月戊辰太子太保信安王祜卒戊寅如温泉宫十一月乙卯至自温泉宫 【考异曰旧纪十月戊寅幸温泉宫十一月乙卯还宫与实录同十二月戊申又幸温泉宫丙辰还宫实录无按十二月丙寅朔无戊申丙辰唐历十一月戊申幸温泉宫丙辰还宫又

与实录本纪不同今皆不取】

三载春正月丙申朔改年曰载赦见禁囚徒壬寅如温泉宫二月己巳至自温泉宫丁丑封让皇帝男琳为嗣宣王邠王守礼男承宣为嗣邠王让皇帝男璿为嗣申王惠宣太子男珍为嗣岐王■〈王员〉为嗣薛王庚寅皇太子绍改名亨三月己巳安禄山兼范阳节度使庚午武威郡上言番禾县天宝山有醴泉涌出岭石化为瑞麟远近贫乏者取以给食癸酉降死罪流已下原之秋八月丙午九姓拔悉密叶护攻杀突厥乌苏米施可汗来献其首冬十月癸巳如温泉宫十一月丁卯至自温泉宫十二月甲寅祠九宫贵神于东郊大赦纳女道士杨太真于宫中

四载春正月丙戌王忠嗣及突厥战于萨河内山败之秋八月壬寅册杨大真为贵妃九月陇右节度使皇甫惟明与吐蕃战于石堡城副将褚誨死之【按旧书作褚直廉直廉切即誨字也】冬十月丁酉如温泉宫十二月戊戌至自温泉宫

五载春正月癸酉刑部尚书韦坚贬括苍太守陇右节度使皇甫惟明贬播川太守以王忠嗣为河西陇右节度使兼朔方河东军事三月丙子遣使黜陟官吏夏四月庚寅李适之罢丁酉门下侍郎陈希烈同中书门下平章事五月壬子朔日有食之秋七月丙子韦坚为李林甫所构配流临封郡赐死坚妹皇太子妃听离太子少保李适之贬宜春太守到官饮药死八月户部侍郎郭虚己为御史大夫剑南节度使九月壬子刻石为李林甫陈希烈像于太清宫冬十月丁酉如温泉宫十一月己巳至自温泉宫十二月辛未杀赞善大夫杜有邻著作郎王曾左骁卫兵曹柳绩等

六载春正月辛巳杀北海太守李邕淄川太守裴敦复丁亥享于太庙戊子有事于南郊大赦于京城置三皇五帝庙其章怀节愍惠庄惠文惠宣等太子与隐太子懿德太子同为一庙三月甲辰陈希烈为左相秋七月乙酉以旱命宰相台寺府县虑囚冬十月戊申如温泉宫改为华清宫十一月乙亥杀户部侍郎杨慎矜及其兄少府少监慎余弟洛阳令慎名十二月癸亥至自华清宫

七载春三月乙酉大同殿柱产玉芝有神光照殿羣臣请加皇帝尊号曰开元天宝圣文神武应道许之夏四月辛丑以高力士为骠骑大将军五月壬午帝御兴庆宫受册徽号大赦免百姓来载租庸赐酺三日六月范阳节度使安禄山赐实封及铁券秋八月己亥朔改千秋节为天长节冬十月庚戌如华清宫封贵妃姊二人为韩国虢国夫人【按杨贵妃传封韩虢秦三国夫人国忠传亦同旧书无秦国新书不载】

十二月戊戌或言玄元皇帝见于华清宫之朝元阁乃改为降圣阁会昌县为昭应县会昌山为昭应山辛酉至自华清宫

八载夏四月杀咸寧太守赵奉璋李林甫陷之也六月大同殿又产玉芝陇右节度使哥舒翰攻吐蕃石堡城拔之闰月丙寅谒太清宫加上玄元皇帝尊号为圣祖大道玄元皇帝高祖太宗高宗中宗睿宗五帝皆加大圣皇帝之字太穆文德则天和思昭皇后皆加顺圣皇后之字羣臣上皇帝尊号曰开元天地大宝圣文武应道皇帝【按七载五月己上尊号曰开元天宝圣文武应道皇帝旧书新书并同至此复加二字而旧书于此仍前文而无所加应属脱误】大赦戊辰太子太师徐国公萧嵩薨冬十月丙寅如华清宫十一月丁巳幸御史中丞杨钊庄

九载春正月己亥至自华清宫丁巳诏以十一月封西岳三月辛亥西岳庙灾以久旱停封西岳夏五月庚寅虑囚乙卯安祿山进封东平郡王秋九月辛卯以商周汉为三恪废韩介鄴公冬十月庚申如华清宫十一月辛卯幸杨国忠亭子十二月乙亥至自华清宫

十载春正月壬辰朝献于太清宫癸巳享于太庙甲午有事于南郊大赦酺三日丁酉李林甫兼安北副大都护朔方节度使二月丁巳安祿山兼河东节度使夏四月壬午剑南节度使鲜于仲通及云南蛮合罗凤战于泸川大败大将王天运死之五月丁亥改诸卫幡旗绯色者为赤黄以符土运冬十月壬子如华清宫十一月乙未幸杨国忠宅丙午兵部侍郎兼御史中丞杨国忠兼领剑南节度使

十一载春正月丁亥至自华清宫二月庚午突厥寇边三月安祿山伐契丹其副阿布思叛归漠北祿山顿兵不进夏四月户部郎中王焯京兆人邢縡谋反伏诛丙戌杀御史大夫兼京兆尹王鉷以杨国忠兼京兆尹六月壬午杨国忠奏剑南兵败吐蕃于云南国忠又奏有凤皇见冬十月戊寅如华清宫十一月乙卯李林甫薨庚申杨国忠为右相兼文部尚书十二月甲申以平卢兵马使史思明兼北平太守充卢龙军使丁亥至自华清宫

十二载春二月癸未追削李林甫官爵夏五月己酉复魏周隋三恪陇右节度使哥舒翰伐吐蕃克洪济大莫门城秋八月戊戌哥舒翰封西平郡王冬十月戊寅如华清宫

十三载春正月己亥安祿山入朝加左仆射丙午至自华清宫二月壬申朝献于太清宫加上玄元皇帝号曰大圣祖高上大道金阙玄元天皇大帝癸酉享于太庙增祖宗谥甲戌羣臣上尊号曰开元天地大宝圣文武证道

孝德皇帝大赦左降官遭父母丧者听归赐内外官阶
爵民酺三日丁丑杨国忠为司空三月哥舒翰伐吐蕃败之复河源九曲夏五月北庭都
护程千里俘阿布思以献六月乙丑朔日有食之剑南
留后李宓及云南蛮战于西洱河死之【洪迈曰天宝十三载李宓击南诏粮尽引还蛮
追击之宓被擒全军皆没国忠隐其事更以捷闻此
通鉴所纪旧唐书云李宓粮尽军旋为所擒新书亦云败死于西洱河焉按高适有李宓
征蛮诗序云天宝十一载诏伐西南夷丞相杨公兼节
制之寄乃奏前云南太守李宓自交址击之往复数万里十二载四月至于长安君子是
以知庙堂使能而李公效节因赋是诗其畧曰饷道忽
已远县军垂欲穷野食掘田鼠晡餐兼爨僮收兵列亭候拓地弥西东归来长安道召见
甘泉宫其所述如此虽诗人所言未必皆实然当时明
赋其事不应虚言则宓盖归至长安未尝败死其年又非十三载也味掘鼠餐僮之语则
粮尽危急师非胜归明甚按高适所云在十二载或
者李宓于十二载先得生还至十三载复率兵伐蛮全军皆没而纪事者止据后事书之
欤】秋八月丙戌陈希烈罢文部侍郎韦见素为武部
尚书同中书门下平章事是秋霖雨人多乏食出太仓米一百万石贱粿以济之瀋洛水
溢冬十月乙酉如华清宫十二月戊午至自华清宫是
载户部计见管府三百二十一县一千五百三十八户九百六十一万九千二百五十四
口五千二百八十八万四百八十八

十四载春正月丙寅宴羣臣于勤政楼奏九部乐辛巳遣使宣慰河北夏四月安禄
山奏破奚契丹秋八月辛卯免百姓今载租庸壬辰虑
囚冬十月庚寅如华清宫十一月甲子范阳节度使安禄山率蕃汉之兵十余万自幽州
南向诣阙以诛杨国忠为名杀太原尹杨光翊庚午闻
于行在所壬申伊西节度使封常清为范阳平卢节度使以讨安禄山丙子至自华清宫
九原郡太守郭子仪为朔方军节度副大使右羽林军
大将军王承业为太原尹卫尉卿张介然为河南节度采访使右金吾大将军程千里为
上党郡长史并令讨贼丁丑以京兆牧荣王琬为东讨
元帅高仙芝副之十二月丁亥禄山陷灵昌郡渡河辛卯陷陈留郡执太守郭纳张介然
死之癸巳陷滎阳郡太守崔无谔死之丙申封常清及
安禄山战于罍子谷败绩丁酉禄山陷东京河南尹达奚珣叛降于禄山留守李愷中丞
卢弈判官蒋清死之高仙芝弃陕郡西保潼关常山太
守颜杲卿与长史袁履谦贾深等杀禄山将李钦凑执何千年高邈送于京师辛丑诏皇
太子统兵东讨以永王璘为山南节度使江陵长史源

洧副之颍王璩为剑南节度使蜀郡长史崔圆副之二王不出合丙午斩封常清高仙芝

于潼关以哥舒翰为兵马副元帅守潼关甲辰郭子仪及禄山将高秀岩战于河曲败之戊申荣王琬薨济南太守李随单父尉贾贲平原太守颜真卿饶阳太守卢全诚并起兵讨禄山

十五载春正月乙卯东平太守嗣吴王祗以兵讨安禄山其日禄山僭号于东京丙辰以李随为河南节度使庚申李光弼为河东节度使

壬戌安禄山陷恒山执颜杲卿袁履谦癸亥哥舒翰进尚书左仆射同中书门下平章事南阳太守鲁灵为南阳节度使乙丑安庆绪寇潼关哥

舒翰击败之丁丑真源令张巡以兵讨安禄山二月己亥李光弼郭子仪将兵东出井陘与禄山将史思明战大破之庚子贾贲战于雍邱死之

三月壬午以河东节度使李光弼为范阳节度使颜真卿克魏郡以真卿为河北采访使夏四月丙午赞善大夫来瑱为颍州太守兼招讨使五

月戊午鲁灵及禄山将武令珣战于潢水败绩贼寇南阳嗣虢王巨为河南节度使自蓝田出师救南阳六月癸未颜真卿及禄山将袁知泰战

于堂邑败之北海太守贺兰进明克信都丙戌哥舒翰及禄山将崔干佑战于灵宝西原败绩是日李光弼及忠思明战于嘉山大败之辛卯蕃

将火拔归仁执哥舒翰叛降于禄山遂陷潼关及河东华阴上洛郡甲午诏亲征乙未黎明出延秋门西行宰相杨国忠韦见素内侍高力士及

太子亲王妃主皇孙扈从其妃主皇孙之在外者皆委之而去丁酉次于马嵬杨国忠为禁军所杀贵妃杨氏赐死 【谨按通鉴辑览 御

批纲目书杨国忠及贵妃伏诛说者谓二人之罪宜诛书法所以正名定罪殊不知是时众叛亲离威柄不出玄宗且玄宗亦无诛之之意安得

谓之伏法惟据事直书则罪名既着而元礼嫉众劫君之恶亦自彰杜甫一生忠恳独于北征诗褒美元礼太过不可为训且彼时玄宗颠沛流

离杨氏又安能更为人患哉若谓宜诛则当于禄山未叛杨氏方盛之时舍身固争方可谓之忠臣元礼所为正韩愈所为又下石焉者在朋友

尚不可而况君臣乎若元礼者直乱臣贼子其去禄山盖一间耳】 以韦见素子京兆府司录谔为御史中丞充置顿使然未知所适军士或言

河陇或言灵武太原或言还京为便韦谔曰还京须有捍贼之备兵马未集恐非万全不如且幸扶风徐图所向上询于众咸以为然及行百姓

遮路乞留皇太子愿戮力破贼收复京城因留太子己亥次扶风郡军士各怀去就会益州贡春彩至上悉命置于庭召诸将谕之曰卿等多国

家功臣陈力久矣朕之优奖常亦不轻逆胡背恩事须回避甚知卿等不得别父母妻子朕亦不及亲辞九庙言发涕流又曰朕须幸蜀路险狭

人多恐难供承今有此彩卿等即宜分取各图去就朕自有子弟中官相随便与卿等诀

别众咸俯伏涕泣曰死生愿从陛下上曰去住任卿自
此悖乱之言稍息己亥禄山陷京师庚子以司勋郎中剑南节度留后崔圆为蜀郡长史
剑南节度副大使颖王璩为剑南节度大使监察御史
宋若思为御史中丞充置顿使韦谔充巡阁道使并令先发辛丑次陈仓壬寅次散关分
部下为六军颖王璩先行寿王瑁等分统六军前后左
右相次丙午次河池郡崔圆奏剑南岁稔民安储供无阙帝大悦授圆中书侍郎同中书
门下平章事蜀郡长史剑南节度如故秋七月甲子次
普安郡宪部侍郎房管自后至以为文部尚书同中书门下平章事丁卯诏以皇太子充
天下兵马元帅都统朔方河东河北平卢等节度使永
王璘江陵府大都督统山南东路黔中江南西路节度大使盛王琦广陵郡都督统江南
东路淮南河南等路节度大使丰王珙武威郡都督领
河西陇右安西北庭等路节度大使庚午次巴西郡以太守崔涣为门下侍郎同中书门
下平章事韦见素为左相庚辰车驾至蜀郡八月壬午
大赦皇太子即皇帝位于灵武癸巳以闻丁酉上用灵武册称上皇诏曰诰庚子上皇临
轩册肃宗遣韦见素房管使于灵武授册命明年九月
郭子仪收复两京十月肃宗遣中使啖廷瑶入蜀奉迎上皇丁卯上皇发蜀郡十一月丙
申次凤翔郡肃宗遣精骑三千至扶风迎卫十二月丙
午肃宗具法驾至咸阳望贤驿奉迎上皇御宫之南楼肃宗拜于楼下呜咽不自胜上皇
启行肃宗骑马前导丁未至京师御大明宫之含元殿
见百寮上皇亲自抚问人人感咽时太庙为贼所焚权移神主于大内长安殿上皇谒庙
请罪遂幸兴庆宫三载肃宗奉上尊号曰太上至道圣
皇帝上元元年七月徙居于西内之甘露殿元年建巳月甲寅崩于神龙殿年七十八 【
按上元二年九月去上元号改元诏十一月为岁首
至次年四月改元年为宝应元年诏以正月为岁首故新书云元年建巳月也而旧书云
上元二年四月崩于神龙殿玄宗生于垂拱元年是年
己酉至宝应元年壬寅年七十八旧书云上元二年似误】 谥曰至道大圣大明孝皇帝
庙号玄宗陵曰泰陵

玄宗开元二十九年天宝十五载凡四十四年

钦定续通志卷七

●钦定续通志卷八 唐纪八

唐纪 【八】

肃宗

○肃宗

肃宗皇帝讳亨玄宗第三子也母曰元献皇后杨氏初名嗣升封陕王开元四年为

安西大都护 【按旧书云二岁封陕王五岁拜安西大都护肃宗以景云二年生至开元四年当是六岁】 幼性仁孝玄宗尤爱之十五年徙封忠王改名浚 【玄宗纪在十三年】 为朔方节度大使单于大都护奚契丹寇边为河北道行军元帅信安王祗为副帅御史大夫李朝隐京兆尹裴奂先等八总管兵以伐之命百寮设次于光顺门与肃宗相见左丞相张说退谓学士孙逖韦述曰尝见太宗写真图忠王英姿颖发仪表非常雅类圣祖此社稷之福也朝隐等大破奚契丹于范阳北肃宗以遥统之功加司徒二十三年又更名玙二十五年皇太子瑛废死明年立为皇太子有司行册礼其仪有中严外办其服绛纱太子曰此天子礼也公卿议请改外办为外备绛纱衣为朱明服从之二十八年更名绍天宝十三载又更今名安禄山来朝太子识其有反相请以事诛之玄宗不听禄山反制太子监国仍遣总诸军进讨时禄山以诛杨国忠为名军民切齿于杨氏国忠惧与贵妃谋间其事乃不果行十五载六月玄宗避贼行至马嵬父老皆庶道请留玄宗为之按辔久之乃令太子于后宣慰父老父老因请留太子讨贼太子不可父老共拥太子马不得行太子乃使驰白玄宗玄宗曰天也乃分后军二千人及飞龙厩马从太子且谕将士曰太子仁孝可奉宗庙汝曹善辅佐之又谕太子曰汝勉勿以吾为念西北诸蕃吾抚之素厚汝必得其用太子南向号泣而已又使送更宫内人于太子且宣旨欲传位太子太子不受太子既留至渭北便桥桥已绝募水滨居民得三千余人从浅处涉后军多没者又遇潼关散卒误与之战死伤甚众时从者惟广平建宁二王及四军将士纔二千人自奉天而北夕次永寿百姓稍持牛酒来献新平太守薛羽保定太守徐毅闻贼且至皆弃郡走戊戌太子至新平时昼夜奔驰三百余里士众器械亡失过半所存之众不过一旅己亥至保定捕得羽毅斩之庚子至乌氏驿彭原太守李遵率兵奉迎仍进衣服粮糗至彭原又募得甲士四百率私马以助军辛丑至平凉得牧马数万匹兵始振戊申扶风民康景龙等杀贼所署宣慰使薛总陈仓令薛景仙克复扶风郡民间相传太子北收兵来取长安民日夜望之或时相惊曰太子大军至矣则皆走市里为空贼望见北方尘起辄惊欲走京辅豪杰往往杀贼官吏遥应官军诛而复起贼不能制太子在平凉朔方留后杜鸿渐魏少游崔漪裴冕李涵等迎太子治兵于朔方庚戌次丰宁见大河之险欲保丰宁会天大风乃回趋灵武七月辛酉裴冕等请太子即皇帝位甲子皇太子即皇帝位于灵武 【谨按通鉴辑览 御批马嵬之命肃宗固再三辞逊矣兹灵武之自行即位出于何典且灵武距剑南纔两月

程不闻驰一介奏告故范祖禹直斥为乘危叛父持议
严且正矣】 尊皇帝曰上皇天帝遣使奏其事于上皇大赦改元至德赐文武官阶爵以
御史中丞裴冕为中书侍郎同中书门下平章事河西
兵马使周泌为河西节度使陇右兵马使彭元晖为陇右节度使前蒲州刺史吕崇贲为
关内节度使丁卯禄山害霍国长公主永王妃侯莫陈
氏义王妃阎氏陈王妃韦氏信王妃任氏驸马杨朮等八十余人于崇仁之街甲戌禄山
寇扶风太守薛景仙败之贼党同罗部五千余人自西
出降朔方军己卯京兆尹崔光远长安令苏震等率官吏犬呼于西市杀贼数千人来赴
行在诏改扶风为凤翔郡八月壬午朔方节度使郭子
仪范阳节度使李光弼破贼于常山郡之嘉山帝以治兵收京城诏子仪等旋师子仪光
弼率所统步骑五万至屯河北以子仪为兵部尚书依
前灵州大都督府长史光弼为户部尚书兼太原尹北京留守同中书门下平章事 【按
考异嘉山之捷在六月旧纪八月壬午乃拜官日因
言己前事耳】 回纥吐蕃遣使继至请助国讨贼是日上皇在成都大赦癸巳上所奉表
达成都丁酉上皇遣使奉册赴灵武九月壬辰帝如彭
原封故邠王守礼男承寀为炖煌王令使回纥和亲丙子至顺化韦见素房管崔涣等自
蜀赉上册书及传国宝等至十月辛巳朔日有食之癸
未军兴用不足始鬻爵度僧尼以房管为兵马元帅令收复两京兵部尚书王思礼副之
分为三军杨希文刘贵哲李光进等各将一军其众五
万辛丑管与禄山将安守忠战于陈涛斜败绩再战又败杨希文刘贵哲等降于贼管亦
奔还平原太守颜真卿以食尽援绝弃城渡河于是河
北郡县尽陷于贼十一月戊午回纥引军来赴难与郭子仪同破贼党同罗部三千余众
于河上诏崔涣巡抚江南补授官吏十二月戊子以王
思礼为关内节度使给复彭原二载以秦州都督郭英义为凤翔太守谏议大夫高适为
淮南节度使安禄山陷颍川执太守薛愿长史庞坚甲
辰永王璘擅以舟师下广陵 【按新书在十月通鉴云十二月甲辰永王璘擅引兵东巡
沿江而下军容甚盛然犹未露割据之谋吴郡太守
李希言平牒璘诘其擅兵东下之意璘怒遣其将浑惟明袭吴郡季广琛袭广陵璘进至
当涂希言遣其将元景曜及丹徒太守阎敬之将兵拒
之璘击斩敬之以徇与旧书同新书玄宗纪亦在十二月甲辰肃宗纪在十月误】

二载春正月庚戌朔帝在彭原受朝贺是日通表入蜀贺上皇永王璘陷鄱阳郡上
皇以宪部尚书李麟同中书门下平章事遣崔圆奉诰
赴彭原乙卯安禄山为其子庆绪所杀甲子如保定丙寅河西兵马使孟庭伦杀其节度
使周泌以叛判官崔偁讨诛之是日蜀郡健儿贾秀等

反将军席元庆等讨诛之二月戊子次于凤翔李光弼及安庆绪之众战于太原败之郭子仪大破崔干佑于潼关收河东郡永王璘伏诛三月辛酉韦见素裴冕罢以前宪部尚书苗晋卿为左相癸酉以久雨诏疏理刑狱夏四月戊寅以郭子仪为司空兼副元帅统诸节度李光弼为司徒五月癸丑郭子仪及庆绪将安守忠战于清渠败绩子仪退保武功丁巳房管罢以谏议大夫张镐为中书侍郎同中书门下平章事武部侍郎杜鸿渐为河西节度使甲子郭子仪以失律让司空秋七月庚戌蜀郡军士郭千仞反节度使李岷讨诛之丁巳安庆绪陷陕郡八月甲申崔涣罢张镐兼河南节度使灵昌太守许叔冀奔于彭城癸巳大阅闰月丁卯广平王傲为天下兵马元帅郭子仪副之辛未安庆绪将寇凤翔崔光远及行军司马王伯伦判官李椿率众攻中渭桥杀贼守桥者千人乘胜至苑门贼有先屯武功者闻之烧营而遁与官军遇战于苑北伯伦死之九月丁丑庆绪陷上党执节度使程千里炖煌王承霖自回纥使还拜宗正卿纳回纥公主为妃回纥封为叶护持四节与回纥叶护太子率兵助国讨贼丁亥元帅广平王统朔方安西回纥南蛮大食之众二十万东讨贼壬寅与贼将安守忠李归仁等战于香积寺大败之贼帅张通儒等弃京城走癸卯复京师甲辰捷书至行在即日告捷于上皇遣尚书左仆射裴冕启告郊庙社稷冬十月乙巳朔以崔光远为京兆尹癸丑贼将尹子奇陷睢阳张巡姚闾许远死之贼悉众保陕郡广平王与战于陕西之新店大败庚申安庆绪走奔河北壬戌广平王入东京癸亥帝自凤翔还京遣太子太师韦见素迎上皇于蜀郡给复凤翔五载丙寅至望贤宫东京捷书至丁卯入长安士庶涕泣拜忭曰不图复见吾君帝亦为之感恻九庙为贼所焚帝素服哭于庙三日入居大明宫回纥叶护自东京还便辞还蕃封叶护为忠义王约每年送绢二万匹十一月丙子张镐率四镇伊西北庭行营兵马使李嗣业等克复河南郡县庚子作九庙神主告享于长乐殿十二月丙午上皇至自蜀郡百寮班于含元殿庭上皇御殿左相苗晋卿率百官称贺礼毕上皇诣长乐殿诣九庙神主即日幸兴庆宫帝请归东宫上皇遣高力士再三慰譬而止甲寅苗晋卿为中书侍郎同中书门下平章事戊午帝下制大赦凡蜀郡灵武元从功臣太子太师豳国公韦见素内侍齐国公高力士右龙武大将军陈元礼等加实封右仆射裴冕冀国公殿中监李辅国成国公宗正卿李遵郑国公兼封邑广平王傲进封楚王左仆射朔方节度使郭子仪加司徒进封代国公兵马使仆固怀恩封丰国公右金吾将军李嗣业封虢国公司徒兼太原尹李光弼蓟国公关内节度使王思礼霍国公淮

南节度使来瑱颍国公南阳太守鲁炅岐国公并加实封京兆尹崔光远邺国公开府李光进范阳郡公左相苗晋卿为侍中封韩国公宪部尚书平章事李麟褒国公中书侍郎崔圆为中书令赵国公侍郎张镐南阳县公其李愷卢奕颜杲卿袁履谦许远张巡张介然蒋清庞坚等即与追赠访其子孙厚以官爵赐文武官阶爵民酺五日进封子南阳郡王系赵王新城郡王仪彭城王颍川郡王僖兖王东阳郡王佺泾王横封襄王倕杞王召兴王偲召王侗定王 【按肃宗诸子传越王系玄宗末年王南阳郡至德二载十二月进王赵干元三年徙王越泾王佺始王东阳进王泾襄王横至德二载与杞王倕召王偲兴王召定王侗同封旧书进封南阳王杰为赵王佺为始封不着东阳郡倕封襄王偲封杞王又无襄王横多有脱误】 甲子上皇御宣政殿授帝传国玺帝于殿下涕泣而受之乙丑贼将伪范阳节度使史思明与伪河东节度使高秀岩以其兵降庚午斩贼官达奚珣等一十八人赐陈希烈等七人自尽前大理卿张均特免死配合流合浦郡

干元元年正月戊寅上皇御宣政殿册皇帝尊号曰光天文武大圣孝感皇帝 【从旧纪纂辑】 帝以徽号中有大圣二字上表固让不允乙酉出宫女三千人庚寅大阅庚子册良娣张氏为淑妃二月癸卯贼将能元皓以淄清降以元皓为河北招讨使乙巳上上皇册号曰太上至道圣皇天帝丁未大赦改元复以载为年成都灵武扈从三品以上与一子官五品以下一子出身六品以下叙进之免陷贼州三岁税三月甲戌徙封俶为成王戊寅立淑妃张氏为皇后夏四月癸卯以嗣虢王巨为东京留守河南尹充京畿采访处置使辛亥祔神主于太庙甲寅朝享于太庙有事于南郊乙卯大赦史思明杀范阳节度副使乌承恩以反五月戊子张镐罢庚寅立成王俶为皇太子乙未崔圆李麟罢太常卿王玙为中书侍郎同中书门下平章事六月己酉初置太一神坛于圆邱东命宰相王玙摄行祠事秋七月丙戌初铸新钱文曰干元重宝用一当十八月壬寅以青徐等五州节度使季广琛兼许州刺史河南节度使崔光远兼汴州刺史青州刺史许叔冀兼滑州刺史兖青滑六州节度使 【考异曰按青州岂可属两节度又广琛先为荆州长史今年五月为右常侍九月讨安庆绪时实录称郑蔡节度使汾阳家传称淮西荆澧旧纪称荆未尝镇青徐实录于此称青徐恐误也】 甲辰加郭子仪中书令河东节度使李光弼侍中关内节度使王思礼兵部尚书九月庚午右羽林大将军赵泚为蒲同虢三州节度使贝州刺史能元皓为齐兖郓等州防御使庚寅郭子仪李光弼王思礼及淮西节度使鲁炅兴平

军节度使李旻滑濮节度使许叔冀平卢兵马使董秦北庭行营节度使李嗣业郑蔡节度使季广琛合兵讨安庆绪于相州以宦官鱼朝恩为观军容使【谨按通鉴辑览 御批易言师贞丈人吉列镇在军无帅何以敌忾肃宗即以郭李元勋难相统摄何难使子仪光弼分道进取乃专委宦者反居二人之土輿尸失律理固不爽九节度相州之溃又谁咎耶】癸巳大食波斯寇广州冬十月乙未以濮州刺史张方须为广州都督五府节度使郭子仪奏破贼十万余于卫州获庆绪之弟庆和进收卫州十一月壬申王思礼及安庆绪战于相州败之丁丑郭子仪收魏州十二月癸卯以河南节度使崔光远为魏州刺史甲辰以升州刺史韦黄裳为浙西节度使庚戌以户部尚书李峘充淮南浙西节度使王师围相州庆绪食尽求救于史思明思明率众来援丁卯思明复陷魏州

二年春正月己巳朔羣臣上尊号曰开元大圣光天文武孝感皇帝是日史思明自称燕王于魏州丁丑祠九宫贵神戊寅耕藉田己丑以御史中丞崔寓都统浙江淮南节度处置使丙申李嗣业卒于行营二月庚子以太子少师崔圆充东京留守判尚书省事壬戌遣侍中苗晋卿王玙虑囚三月己巳皇后亲蚕壬申相州行营九节度之师溃于滏水郭子仪断河阳桥以余众保东京史思明杀安庆绪以卫尉卿荔非元礼为怀州刺史权镇西北庭行营节度使滑州刺史许叔冀充滑汴曹宋等州节度使郢州刺史尚衡为徐州刺史充亳颍等州节度使甲午兵部侍郎吕諲同中书门下平章事乙未苗晋卿王玙罢京兆尹李岷为吏部尚书礼部侍郎李揆为中书侍郎及户部侍郎第五琦并同中书门下平章事丙申以郭子仪为东畿山东河东等道节度防御兵马元帅权东京留守判尚书省事以河西节度副使来瑱为虢华节度潼关防御团练等使夏四月庚子王思礼及史思明战于直千岭败之壬寅诏减常膳及服御文武五品己上正官各举贤良方正直言极谏一人两省官十日一上封事甲辰以邓州刺史鲁炆为郑州刺史充陈郑颖亳节度使徐州刺史尚衡为青淄密登莱沂海等州节度使商州刺史兴平军节度使李旻兼豫许汝等州节度使乙巳史思明僭号于魏州癸亥以久旱徙市雩祈雨五月辛巳贬李岷为蜀州刺史六月乙未以右仆射裴冕为成都尹持节充剑南节度副大使饶州刺史颜真卿为浙江西道节度使明州刺史吕延之为浙江东道节度使以右羽林大将军彭元曜为陈郑申光寿等州节度使秋七月乙丑朔礼部尚书韦陟充东京留守太子少傅充国公李麟卒辛巳以赵王系为天下兵马元帅李光弼副之丁亥以潞沁节度使王思礼兼太原尹充北京留守河东节度副大使刑部尚书王玙为蒲

同绛三州节度使辛卯吕諲罢八月乙巳襄州偏将康楚元反逐刺史王政副元帅李光弼兼幽州大都督府长史河北节度等使九月甲子张嘉延陷荆州戊辰新铸大钱文如开元重宝而重其轮用一当五十丁亥以太子少保崔光远充荆襄招讨使右羽林大将军王仲升充申安沔等州节度使右羽林将军李抱真为郑陈颍亳四州节度使庚寅史思明陷东京及齐汝郑滑等州冬十月乙巳李光弼及史思明战于河阳败之壬戌吕諲起复十一月庚午贬第五琦为忠州刺史十二月乙巳康楚元伏诛史思明寇陕州神策将军卫伯玉败之甲寅以御史大夫史翊为山南东道节度使

上元元年春正月辛巳李光弼进位太尉兼中书令余如故以杭州刺史侯令仪为浙江西道节度兼江甯军使戊子朔方节度使郭子仪兼邠甯鄜坊两道节度使二月癸巳以右丞崔寓为蒲同晋绛等州节度使庚戌第五琦除名长流夷州癸丑以太子少保崔光远为凤翔尹秦陇节度使三月壬申京兆尹李若幽为成都尹剑南节度使夏四月甲午李光弼奏破贼于河阳戊申襄州部将张惟瑾反杀其节度使史翊戊午以右丞萧华为河中尹蒲同晋绛等州节度使己未以来瑱为山南东道节度使庚申以右羽林大将军郭英义为陕西节度潼关防御使闰月甲子制彭王仪充河西节度大使兖王僖北庭节度大使泾王侔陇右节度大使杞王倓陕西节度大使兴王凤翔节度大使蜀王傀邠甯节度大使并不出合【考证曰肃宗诸子无名傀封蜀王者疑召王僖之误按代宗诸子传蜀王遯大历十四年始王考通鉴大历十四年五月德宗即位立王弟傀为蜀王建中二年十一月蜀王傀更名遂三年正月蜀王遂更名遯则蜀王傀乃代宗之子且在大历年始封此时安得有蜀王傀旧书之误无疑又按肃宗纪召王僖不言为邠甯节度彭王仪传云史思明陷河洛羣臣请以诸王临统方镇兵遥相维压于是诏仪充河西节度兖王北庭泾王陇右杞王陕西兴王凤翔并为大使亦不言召王僖为邠甯节度考证亦误】丁卯太原尹王思礼进司空甲戌徙封赵王系为越王己卯大赦改元赐文武官爵追封太公望为武成王张惟瑾降五月丙午太子太傅苗晋卿为侍中壬子吕諲罢癸丑以河南尹刘晏为户部侍郎勾当度支铸钱盐铁等使六月乙丑诏先铸重棱钱一当五十宜减当三十开元宜一当十李光弼及史思明战于怀州败之秋七月丁未上皇自兴庆宫徙居西内丙辰开府高力士配流巫州内侍王承恩播州魏悦溱州左龙武大将军陈元礼致仕八月丁丑以太子宾客吕諲为荆澧朗硤忠五州节度使己卯以将作监王昂为河中尹晋绛等州节度

使冬十月壬申以庐州刺史赵良弼为浙江东道节度使青州刺史殷仲卿为淄沂沧德棣等州节度使甲申以兵部侍郎尚衡为青登等州节度使十一月甲午扬州长史刘展反陷润州升州十二月庚辰以右羽林大将军李鼎为凤翔尹兴凤陇等州节度使是岁吐蕃陷廓州

二年春正月辛卯温州刺史季广琛为浙江西道节度使甲寅降死罪流己下原之乙卯刘展伏诛二月己未党项寇宝鸡入散关陷凤州刺史萧■（卜曳）死之凤翔尹李鼎败之癸亥以凤翔尹崔光远为成都尹剑南节度使太子詹事崔圆为淮南节度使戊寅李光弼及史思明战于北邙败绩思明陷河阳癸未贬李揆为袁州长史以前河中尹萧华为中书侍郎同平章事三月甲午史朝义寇陕州卫伯玉击败之戊戌史思明为其子朝义所杀李光弼以失律让太尉中书令许之授侍中河中尹晋绛等州节度观察使夏四月乙卯嗣岐王珍得罪废为庶人于溱州安置【按旧书在四月乙亥朔据本年正月丁亥朔则四月朔不应是乙亥今从通鉴作乙卯】己未以吏部侍郎裴遵庆为黄门侍郎同中书门下平章事青州刺史尚衡兖州刺史能元皓并奏破贼壬午梓州刺史段子璋反陷遂州刺史嗣虢王巨死之五月甲午史朝义将令狐彰以滑州降授御史中丞依前滑魏德贝相六州节度使【胡三省曰滑卫相贝魏博六州按旧书脱卫州胡三省注增卫博二州而无德州考方镇表是年置滑卫节度治滑州领州六滑卫相魏德贝寻以德州隶淄沂节度而增领博州故胡注无德州也】乙未剑南节度使崔光远克东川段子璋伏诛庚子进李光弼太尉兼侍中充河南副元帅都统河南淮南山南东五道行营节度使镇临淮北京留守王思礼卒辛丑以鸿胪卿管崇嗣为太原尹北京留守河东节度副大使六月己卯以凤翔尹李鼎为陇右节度营田等使秋七月癸未朔日有食之八月辛巳以李若幽充朔方镇西北庭陈郑等州节度使赐名国贞九月壬寅大赦去干元大圣光天文武孝感之号其年号但称元年去上元之号以十一月为岁首月以斗所建辰为名元年建子月丙午卫伯玉及史朝义战于永宁败之己酉朝献于太清宫庚戌享于太庙建五月辛亥有事于南郊己未朱瑱及史朝义战于汝州败之乙亥侯希逸及朝义将李怀仙战于范阳败之宝应元年建寅月丙戌盗发敬陵惠陵甲辰李光弼克许州戊申史朝义陷营州建卯月辛亥大赦赐文武官阶爵以京兆府为上都河南府为东都凤翔府为西都江陵府为南都太原府为北都壬子羌浑奴刺寇梁州癸丑河东军乱杀其节度使邓景山乙丑河中军乱杀李国贞及其节度使荔非元礼建辰月甲午奴刺寇梁州戊申

萧华罢以户部侍郎元载同中书门下平章事建巳月壬子楚州刺史崔旉献定国宝玉十三枚甲寅圣皇天帝崩帝自仲春不豫闻上皇登遐疾转剧乙丑诏太子监国大赦改元年为宝应元年复以正月为岁首余月并依常数丙寅帝崩于长生殿年五十二谥曰文明武德大圣大宣孝皇帝庙号肃宗陵曰建陵

肃宗至德一载 【至德元载即玄宗天宝十五载】 干元二年上元二年宝应一年凡六年

钦定续通志卷八

●钦定续通志卷九 唐纪九

唐纪 【九】

代宗

○代宗

代宗皇帝讳豫肃宗长子也母曰章敬皇后吴氏玄宗诸孙百余人代宗最长聪明宽厚喜愠不形于色而好学强记初名俶封广平郡王禄山陷京师代宗从肃宗搜兵灵武以为兵马元帅时朝廷草创兵力寡弱代宗推心示信招怀流散比至彭原兵众数万及肃宗回幸凤翔房管郭子仪继战不利贼锋方锐屡来寇袭代宗选求勇干频挫其锋及兴师进讨回纥叶护王子率兵入助勇寇诸蕃代宗优接之与结为兄弟乃以李嗣业为前军郭子仪为中军王思礼为后军屯于香积寺贼众十万阵于其北而别伏精骑于阵东欲袭官军之后朔方兵马使仆固怀恩引回纥兵就击之翦灭殆尽而李嗣业又与回纥出贼阵后与官军夹击之贼遂大溃贼将之守长安者闻败弃城走遂复京城乃留思礼屯于苑中代宗率大军以东贼将严庄拒于陕州代宗率子仪等与战于州西大败之安庆绪奔于河北遂复东都肃宗还京师进封楚王干元元年三月徙封成王四月立为皇太子乃更名豫 【新书初太子生之岁豫州献嘉禾于是以为祥更今名】 宝庆元年四月肃宗寝疾诏皇太子监国及肃宗疾笃张皇后恶李辅国欲与太子诛之太子不可后乃与越王系谋以肃宗命召太子入宫程元振得其谋以告辅国止太子无入即勒兵入宫杀系及兖王僩而幽皇后于别殿是夕肃宗崩元振等迎太子见羣臣于九仙门明日发丧己巳即皇帝位于柩前甲戌以子奉节郡王适为天下兵马元帅郭子仪罢副元帅乙亥进封适为鲁王兵部尚书判元帅行军闲厰等使李辅国进号尚父飞龙闲厰副使程元振为右监门将军五月壬午以李辅国为司空兼中书令余如故 【按新纪及宰相表皆不言兼中书令李辅国传云尊为尚父又册进司空兼

中书令新纪表脱误又按旧书作五月己卯朔新书作五月壬午通鉴不同今从新书】
丙戌嗣鲁王宇改封邹王李光弼进封临淮王庚寅追
尊母为皇太后丙申李光弼及史朝义战于宋州败之改干元大小钱并一当以一户部
侍郎同中书门下平章事元载充度支韩运使 【按
肃宗本纪宝应元年建辰月载已同平章事矣此乃充转运使耳旧纪误仍以同平章事
作新衔今据考证改】 丁酉大赦赐文武官阶爵刺史
予一子官子为父后者勋一转免民诸色逋赋进封子益昌郡王邈为郑王延庆王迴韩
王追复庶人王氏为皇后瑛瑤琚皆复其封号棣王琰
永王璘并为昭雪六月辛亥追废皇后张氏越王系兗王僩皆为庶人已未罢尚父李辅
国判元帅行军及兵部尚书闲厩等使辛酉以辅国为
博陆王罢中书令秋七月辛巳观军容使鱼朝恩封冯翊郡开国公宦官程元振为镇军
大将军保定郡开国公乙酉杀襄州刺史裴茂 【按
来瑱传作裴茂通鉴亦同旧书作裴义新书作裴茂疑误今从来瑱传改正】 八月辛未
台州袁晁反陷台州连陷浙东州县乙亥徙封适为雍
王 【按德宗纪在八月旧书作九月丁丑误】 九月丁丑以山南东道节度使来瑱为
兵部尚书同中书门下平章事节度如故程元振进封
邠国公丙申右仆射山陵使裴冕贬施州刺史回纥来请助讨贼冬十月辛酉诏天下兵
马元帅雍王适统河东朔方及诸道行营回纥兵十余
万讨史朝义会军于陕州加朔方行营节度使大宁郡王仆固怀恩同中书门下平章事
壬戌盗杀李辅国癸酉雍王适克怀州甲戌与史朝义
战于横水大败之乙亥雍王克东都十一月丁亥朝义将薛嵩以相卫洛邢四州降丁酉
张忠志以赵定深恒易五州降十二月庚戌太子太师
邠国公韦见素薨辛未仆固怀恩为尚书左仆射兼中书令灵州大都督府长史河北副
元帅 【按怀恩传雍王以元帅为中书拜怀恩同中
书门下平章事为之副通鉴亦云加左仆射兼中书令新书皆不载疑脱误新书通鉴皆
在十一月己亥旧书在十二月辛未】 吐蕃陷临洮秦
成渭等州

广德元年春正月癸未以国子祭酒刘晏为吏部尚书同中书门下平章事度支诸
使如故甲申史朝义自杀 【按考异云诸军围朝义
于莫州已在去年十一月末而河洛春秋云围城四十日仆固怀恩旧传亦云攻守月余
然则朝义之殆必在今年正月明矣诸书皆云朝义此
年正月被杀实录误在宝应元年十一月旧纪因之又脱十一月字今从新书】 其将李
怀仙以幽州降田承嗣以魏州降壬寅削来瑱官爵长
流播州寻赐死闰月戊申以史朝义降将张忠志为检校礼部尚书清河郡王充成德军

节度使赐姓名李宝臣薛嵩为检校刑部尚书相卫等
州节度使李怀仙检校兵部尚书兼侍中武威郡王幽州节度使田承嗣检校户部尚书
鴈门郡王魏博等州都防御使三月甲辰山南东道兵
马使梁崇义杀大将李昭据城自固乃授崇义山南东道节度使辛酉葬玄宗皇帝于泰
陵庚午葬肃宗皇帝于建陵夏四月庚辰河南副元帅
李光弼奏生擒袁晁浙东州县悉平六月癸未以陈郑泽潞节度使李抱玉检校司空封
武威郡王河中节度使王昂检校刑部尚书封■〈云
卩〉国公同华节度使李怀让检校工部尚书同日入省甲午同华节度使李怀让为程
元振所构自杀秋七月壬寅羣臣上尊号曰宝应元圣
文武孝皇帝壬子大赦改元免民逋负户三丁免其一庸调给复河北三年以雍王适兼
尚书令仆固怀恩加太保给功臣铁券藏名于太庙图
形于凌烟阁丁巳仆固瑒充朔方行营节度使是月吐蕃寇河陇入大震关陷兰廓河鄯
洮岷等州八月仆固怀恩反于汾州九月壬寅遣裴遵
庆慰抚之乙丑泾州刺史高晖叛附于吐蕃冬十月辛未高晖引吐蕃犯京畿寇奉天武
功盩厔等县自司竹园渡渭循南山而东壬申雍王适
为关内兵马元帅郭子仪副之癸酉渭北行营兵马使吕日将及吐蕃战于盩厔败之乙
亥又战败绩丙子帝如陝州丰王珙有罪伏诛戊寅吐
蕃入京师立广武王承宏为皇帝辛巳车驾至陝州郭子仪在商州会六军使张知节乌
崇福长孙全绪等率兵继至旧将王甫招京城少年击
鼓于朱雀街吐蕃震慑奔溃庚寅子仪复京城壬辰以元载判元帅行军司马癸巳以郭
子仪为西京留守高晖闻吐蕃溃东走至潼关守将李
伯越擒杀之十一月辛丑削程元振官爵放归田里壬寅广州市舶使吕太一反逐其节
度使张休十二月庚午帝至自陝州乙未苗晋卿裴遵
庆罢宗正卿李岷为黄门侍郎同中书门下平章事丙申放承宏于华州吐蕃陷松州维
州

二年春正月癸卯尚书右丞颜真卿为刑部尚书充朔方宣慰使癸亥刘晏李岷罢
右散骑常侍王缙为黄门侍郎太常卿杜鸿渐为兵部
侍郎同中书门下平章事罢度支使以户部侍郎第五琦专判度支及诸道盐铁转运铸
钱等使郭子仪兼河东副元帅河中观察等使二月己
巳立雍王适为皇太子【新旧书德宗纪皆在二月新书代宗纪在正月】癸酉帝朝
献于太清宫甲戌享于太庙乙亥有事于南郊己丑大
赦赐内外官阶爵三月辛丑给复河南府二年夏四月癸未制仆固怀恩前任灵州大都
督府长史单于镇北副元帅朔方节度使宜并停其太
保兼中书令大宁郡王如故秋七月己酉李光弼薨八月丁卯王缙为侍中持节都统河

南淮南山南东道节度行营事进封太原郡公壬申王
缙罢侍中癸巳王缙兼领东京留守九月丙午河东节度使辛云京检校尚书右仆射同
中书门下平章事太原尹北京留守郭子仪加太尉充
北道邠宁泾原河西以东通和吐蕃及朔方招抚使陈郑泽潞节度使李抱玉进位司徒
充南道通和吐蕃使凤翔秦陇临洮以东观察使子仪
让太尉许之己未剑南节度使严武及吐蕃战于当狗城败之冬十月丙寅仆固怀恩引
吐蕃寇邠州节度使白孝德闭城拒守丁卯寇奉天京
师戒严辛未朔方兵马使郭晞及吐蕃战于邠州西败之严武奏克吐蕃盐川城十一月
乙酉吐蕃溃走京师解严河西节度使杨志烈及仆固
怀恩战于灵州败绩

永泰元年春正月癸巳朔大赦改元戊申李抱玉兼凤翔陇右节度使兼南道通和
吐蕃凤翔秦陇临洮以东观察处置等使仍命四镇行
营节度使马璘为副和吐蕃使二月戊寅党项羌寇富平焚定陵寝殿三月丙午李抱玉
让司徒改授左仆射同平章事庚戌吐蕃请和宰臣元
载杜鸿渐与吐蕃使盟于兴唐寺夏四月戊子太保致仕苗晋卿薨庚寅剑南节度使检
校吏部尚书严武卒五月癸丑以尚书右仆射定襄郡
王郭英义为成都尹充剑南节度使秋七月辛卯淄青兵马使李怀玉逐其节度使侯希
逸以郑王邈为平卢淄青节度大使令怀玉权知留后
事九月仆固怀恩诱回纥吐蕃党项奴刺寇边怀恩死于灵州己酉郭子仪自河中至进
屯泾阳李忠臣屯东渭桥李光进屯云阳马璘郝庭玉
屯便桥骆奉仙李伯越屯整屋李抱玉屯凤翔周智光屯同州杜冕屯坊州帝亲率六军
屯苑内丁巳同华节度使周智光及吐蕃战于澄城败
之智光入鄜州杀其刺史张麟遂焚坊州冬十月己未吐蕃至邠州与回纥入寇辛酉寇
奉天癸亥寇同州丁卯回纥请降癸酉郭子仪及吐蕃
战于灵台败之京师解严闰月辛卯李怀光克灵州丙午封朔方大将孙守亮等九人为
异姓王李国臣等十三人为同姓王丁未百官请纳职
田充军费戊申进封渭北节度使李光进为武威郡王以邢部侍郎路嗣恭检校工部尚
书朔方节度使充关内副元帅剑南西山兵马使崔旰
反寇成都邛州柏茂林泸州杨子琳剑南李昌巖皆起兵讨旰蜀中乱十一月宰臣河南
都统王缙请减诸道军资钱四十万贯修洛阳宫从之

大历元年春二月丁亥朔释奠于国学乙未贬刑部尚书颜真卿为峡州员外别驾
壬子杜鸿渐兼成都尹充山南西道剑南东川等道副
元帅癸丑以山南西道节度使张献诚兼充剑南东川节度使邛州刺史柏茂林充邛南
防御使剑南西山兵马使崔旰为茂州刺史充剑南西

山防御使三月癸未张献诚及崔旰战于梓州败绩夏六月戊戌以淮南节度使崔圆检校尚书右仆射秋八月壬寅以茂州刺史崔旰为成都尹剑南西川节度使邛州刺史柏茂林为邛南节度使癸卯鱼朝恩加内侍监判国子监事充鸿胪礼宾等使进封郑国公九月辛巳吐蕃陷原州冬十一月甲子大赦改元十二月癸卯周智光反杀前虢州刺史庞充

二年春正月丁巳郭子仪讨周智光甲子智光伏诛戊寅给复同华二州两年二月丙戌封华州牙将姚怀为感义郡王李延俊为承化郡王夏四月癸酉以工部侍郎徐浩为岭南节度使六月壬寅荆南节度使卫伯玉封城阳郡王秋七月戊申右散骑常侍于休烈为检校工部尚书知省事八月壬寅杀驸马都尉姜庆九月甲寅吐蕃寇灵州进寇邠州郭子仪屯于泾阳京师戒严是秋桂州山獠反冬十月戊寅路嗣恭及吐蕃战于灵州败之京师解严甲申减京官职田三分之一给军粮十一月庚申改黄门侍郎依旧为门下侍郎

三年春二月癸巳商州兵马使刘洽杀其刺史殷仲卿三月乙巳朔日有食之夏四月戊寅山南西道节度使张献诚以疾辞位以右羽林将军张献恭为山南西道节度使五月乙卯追谥故齐王倓为承天皇帝戊辰以剑南西川节度使崔旰检校工部尚书改名宁庚午以邛州刺史鲜于叔明为梓州刺史充剑南东川节度使六月壬辰幽州兵马使朱希彩杀其节度使李怀仙 【新书作壬寅系崔圆卒条下此依旧书】

庚子淮南节度使赵国公崔圆卒闰月己酉郭子仪加司徒庚申王缙兼幽州节度使以尚书右丞韦元甫为淮南节度使丁卯以幽州节度副使朱希彩知幽州留后秋七月泸州刺史杨子琳反陷成都剑南节度留后崔宽败之八月壬戌吐蕃寇灵州丁卯寇邠州京师戒严戊辰邠宁节度使马璘及吐蕃战败之庚午河东节度使太原尹同中书门下平章事辛云京卒王缙兼太原尹北都留守充河东节度使余官如故九月壬午吐蕃寇灵州朔方将白元光败之壬辰又败之于灵武京师解严冬十月乙未以京兆尹李勉为广州刺史充岭南节度使十一月丁亥朱希彩为幽州长史充幽州卢龙节度使十二月己酉以邠宁节度使马璘为泾原节度使移镇泾州泾原兵马使王章之谋反伏诛

四年春二月乙巳以泸州刺史杨子琳为峡州团练使 【旧书作陝州刺史此据通鉴改】 乙卯杜鸿渐罢副元帅三月遣御史税商钱甲戌免京兆今岁税庚寅江西团练使魏少游封赵国公六月丁酉以太子詹事臧希让检校工部尚书充渭北节度使以渭北节度使李光进为太子太保秋七月癸未降死罪流以下原之八月以久雨民困官出米二万石减榷以

惠贫民冬十一月甲戌吐蕃寇灵州朔方留后常谦光
败之乙亥杜鸿渐卒丙子左仆射裴冕同中书门下平章事充东都留守河南淮南淮西
山南东道副元帅十一月戊戌裴冕薨是岁广州人冯
崇道桂州人朱济时反容管经畧使王翊败之

五年春正月辛卯以陝州节度使皇甫温为凤翔节度使凤翔节度使李抱玉为河
西陇右山南西道副元帅壬辰河南尹张延赏充东都
留守罢河南等道副元帅以其兵属留守三月癸酉鱼朝恩有罪自杀夏四月庚子湖南
兵马使臧玠杀其团练使崔灌据潭州为乱澧州刺史
杨子琳道州刺史裴虬衡州刺史杨济讨之丁未封朱希彩高密郡王六月己未以彗星
灭赦天下见禁囚徒秋七月丁巳以浙东观察使薛兼
训为检校工部尚书太原尹北都留守充河东节度使九月丁丑吐蕃寇永寿

六年春二月壬寅李抱玉罢山南西道副元帅岭南蛮梁崇牵据容州三月王翊讨
平之夏四月己未泮州刺史杨子琳来朝赐名猷秋八
月乙卯淮南节度使韦元甫卒庚午以御史大夫张延赏为淮南节度使

七年春正月庚子以检校户部尚书路嗣恭为江西观察使二月甲寅兵部侍郎李
涵为浙西观察使夏五月乙未以旱大赦减膳彻乐是
秋卢龙将李怀瑗杀其节度使朱希彩冬十月辛未以权知幽州卢龙节度留后朱泚检
校左散骑常侍充幽州卢龙节度使丙子以太府卿吕
崇贲为岭南节度使十一月庚辰免巴蓬渠集壁充通开八州二岁租庸

八年春正月壬午昭义军节度使薛嵩卒甲辰诏京官三品已上及郎官御史岁举
刺史县令一人二月丁卯朱泚加检校户部尚书封怀
懿郡王【按旧书丁卯上有阙文正月丁丑朔则丁卯当在二月】壬申永平军节度
使令狐彰卒三月丙子以工部尚书李勉为永平军节
度使夏五月壬辰赦京师癸卯降天下死罪流已下原之秋八月己未吐蕃寇灵州郭子
仪与战于七级渠败之辛未幽州节度使朱泚遣弟滔
将精骑诣涇州防秋七月壬午循州刺史哥舒晃反杀岭南节度使吕崇贲戊子诏京官
五品已上各上封事冬十月癸卯加田承嗣同平章事
吐蕃寇涇州邠州丙寅朔方兵马使浑瑊与吐蕃战于宜禄败绩涇原节度使马璘复与
战于潘原败之十一月乙丑以江西观察使路嗣恭为
岭南节度使浙东观察使陈少游为淮南节度使

九年春正月壬寅汴宋节度使田神功卒二月辛未徐州军乱逐其刺史梁乘己丑
以田神玉权知汴宋留后夏四月壬辰大赦五月丙寅
加马璘尚书左仆射知省事秋八月戊寅以皇甫温为浙东观察使九月庚子幽州节度
使朱泚来朝乙未渭北节度使臧希让卒冬十一月庚

子以商州刺史李国清为陝州观察使十二月壬辰降京师死罪流已下原之

十年春正月丁酉昭义军兵马使裴志清逐其节度使薛■〈山上罅下〉叛附于田承嗣乙未朱泚请西征吐蕃以弟滔为幽州留后许

之戊申田承嗣反癸丑陷洺州二月乙丑陷卫州刺史薛雄死之辛未封子述睦王逾榔王连恩王邁鄜王迅随王【旧新书无据通鉴增】

造忻王暹韶王运嘉王遇端王遯循王通恭王达原王逸雅王丙子河阳军乱逐三城使常休明三月甲午陝州军乱逐其观察使李国清夏四

月癸未贬田承嗣为永州刺史仍诏河东成德幽州淄青淮西永平淮宋泽潞河阳诸道出师进讨给复昭义五州二年五月乙未魏博将霍荣

国以滋州降六月甲戌成德军节度使李宝臣及田承嗣战于冀州败之秋八月己丑田承嗣寇磁州九月壬寅降京师死罪流已下原之壬子

吐蕃寇临泾癸丑寇陇州丙辰李抱玉击败之丁巳马璘又败之于百里城冬十月辛酉朔日有食之甲子昭义军节度使李承昭及田承嗣战

于清水败之己丑尚书右仆射裴遵庆卒十一月丁酉魏博将吴希光以瀛州降丁未路嗣恭克广州哥舒晃伏诛

十一年春正月庚寅田承嗣降辛亥崔寔及吐蕃战败之二月癸亥荆南节度使卫伯玉卒夏四月己卯以前淮南节度使张延赏为江陵

尹荆南节度使汴州都虞侯李灵耀反五月癸巳以永平军节度使李勉充汴宋等八州节度观察留后秋七月庚寅田承嗣寇滑州李勉与战

败绩八月丙寅加幽州节度使朱泚同中书门下平章事甲申淮西节度使李忠臣河阳三城使马燧及李勉讨李灵耀九月乙丑李忠臣等及

李灵耀战于郑州败绩冬十月乙酉战于中牟败之又败之于西梁固田承嗣以兵援灵耀李忠臣逆击于匡城大败之甲寅灵耀伏诛十二月

丁亥加平卢淄青节度使饶阳郡王李正己成德军节度使陇西郡王李宝臣并检校司空同中书门下平章事庚寅泾原节度使检校尚书左

仆射知省事扶风郡王马璘卒丁酉以泾原节度副使张掖郡王段秀实权知河东节度留后昭义节度使李承昭称疾以泽潞行军司马李抱

玉权知磁邢兵马留后庚戌加淮南节度使西平郡王李忠臣检校司空同中书门下平章事仍兼汴州刺史

十二年春正月辛酉以段秀实为泾州本州岛团练使二月戊子以李正己之子纳为淄青节度留后三月乙卯河西陇右副元帅凉国公李

抱玉卒癸亥以太原少尹河南节度使行军司马权知河东留后鲍防为太原尹北都留守河东节度使庚午授田承嗣魏博节度使官并如故

辛巳元载有罪伏诛贬王缙括州刺史夏四月壬午太常卿杨綰为中书侍郎礼部侍郎

常袞为门下侍郎并同中书门下平章事赐田承嗣铁券癸巳诏谏官献封事勿限时丁酉吐蕃寇黎雅二州崔宁击败之五月甲戌以前安南都护张伯仪为岭南节度使秋七月己巳杨绾薨八月癸巳赐东川节度使鲜于叔明姓李氏九月辛酉以泾原节度副使段秀实为四镇北庭行营泾原郑棣等节度使庚午吐蕃寇防州十一月壬子山南西道节度使张献恭及吐蕃战于岷州败之冬二月丁亥崔宁及吐蕃战于西山败之庚子以朱泚兼陇右节度使权知河西泽潞行营兵马事

十三年春正月戊辰回纥寇并州鲍防与战于阳曲败绩二月庚辰代州刺史张光晟及回纥战于羊武谷败之夏四月甲辰吐蕃寇灵州常谦光击败之秋七月辛未吐蕃寇盐州庆州八月甲戌李宝臣请复姓张从之十四年春二月癸未魏博节度使田承嗣卒其兄子悦自称留后三月丁未汴宋将李希烈逐其节度使李忠臣自称留后辛酉以前容管经略使王翊为河中少尹知府事夏四月癸未张宝臣复请姓李从之五月癸卯帝有疾辛酉诏皇太子监国是夕皇帝崩于紫宸内殿遣诏皇太子柩前即位以郭子仪摄冢宰八月庚申羣臣上尊谥曰睿文孝武皇帝庙号代宗陵曰元陵

代宗广德二年永泰一年大历十四年凡十七年

钦定续通志卷九

●钦定续通志卷十 唐纪十

唐纪 【十】

德宗一

○德宗一

德宗皇帝讳适代宗长子也母曰睿贞皇后沈氏肃宗元年建丑月封奉节郡王代宗即位以为天下兵马元帅进封鲁王八月徙封雍王时史朝义据东都十月德宗会诸军屯于陕州诸将进击史朝义败之朝义走河北遂复东都十一月朝义死河北平进兼尚书令与功臣郭子仪等图形凌烟阁广德二年二月立为皇太子大历十四年五月癸亥以代宗遗诏即皇帝位于太极殿闰月壬申贬中书舍人崔佑甫为河南少尹甲戌贬常袞为河南少尹以河南少尹崔佑甫为门下侍郎同中书门下平章事【按旧书不言常袞先贬河南少尹新书不载贬崔佑甫及常袞再贬潮州刺史考崔佑甫传常袞劾佑甫请贬潮州刺史帝以为重改河南少尹时郭子仪朱泚俱以平章事当署尾袞如故事代署子仪泚入言佑甫不宜贬帝曰卿向何所言今云非耶二人对初不知帝怒以袞为罔上

即两换职以袞为河南少尹而拜佑甫门下侍郎同中书门下平章事常袞传奏贬佑甫为河南少尹帝怒使与佑甫换秩再贬潮州刺史新旧书互有脱略】丙子罢新罗渤海岁贡鹰鹞戊寅罢山南贡枇杷江南贡柑橘非供宗庙者辛巳罢邕府岁贡奴婢罢梨园乐工三百人及剑南岁贡春酒甲申郭子仪加号尚父兼太尉中书令余官如故以朔方都虞候李怀光为河中尹邠宁庆晋绛慈隰等州节度使以朔方右留后常谦光兼灵州大都督西受降城定远军天德盐夏丰等节度使以朔方左留后单于副都护浑瑊为单于大都护振武东军中二受降城镇北及绥银麟胜等军州节度营田使丙戌罢献祥瑞贡器饰金银者还之丁亥出宫人放舞象三十二于荆山之阳五坊鹰犬皆放之辛卯以河阳三城使马燧检校工部尚书兼太原尹北都留守河东节度使壬辰以河东节度留后鲍防为京畿观察使丙申兵部侍郎黎干以罪赐死以户部侍郎判度支韩滉为太常卿吏部尚书刘晏判度支盐铁转运等使初晏与滉分掌天才财赋至是晏都领之六月己亥朔大赦赐文武官阶爵加李正己司徒太子太傅崔宁李勉以本官同平章事庚子封子诵宣王谟舒王湛通王谅虔王详肃王谦资王乙巳封弟乃益王迅隋王遂蜀王丙午诏六品官每日二人待制癸丑诏罢扬州岁贡端午日江心所铸镜幽州麝香癸亥诏举可任刺史县令者秋七月戊辰朔日有食之庚午弛邕州金坑蔡辛卯罢榷酤八月甲辰以道州司马杨炎为门下侍郎怀州刺史乔琳为御史大夫同中书门下平章事乙巳还吐蕃俘冬十月丁酉吐蕃云南蛮寇茂扶文黎等州凤翔节度使朱泚金吾卫大将军曲环击败之己酉葬代宗皇帝于元陵戊午罢九成宫贡立兽炭炉襄州种蔗蒟工以沙苑豢猪三千头给贫民十一月辛未以鸿胪卿贾耽为山南西道节度使壬午乔琳罢癸巳加崔宁兼灵州大都督单于镇北大都护朔方节度使出镇坊州以荆南节度使兼江陵尹张延赏兼成都尹剑南西川节度使十二月乙卯立宣王诵为皇太子丙寅晦日有食之

建中元年春正月丁卯朔改元羣臣上尊号曰圣神文武皇帝己巳朝献于太清宫庚午享于太庙辛未有事于南郊大赦赐文武官阶爵子为父后者勋两转遣黜陟使于天下二月丙申初定两税法癸卯以泾原节度使段秀实为司农卿己酉贬尚书左仆射刘晏为忠州刺史癸丑昭义军节度留后李抱真为本道节度使三月甲戌以前司农卿庾准为江陵尹荆南节度使夏四月乙未泾原裨将刘文喜据城反伏诛六月甲子崔佑甫薨辛丑筑奉天城秋七月己丑赐忠州刺史刘晏死八月丁未加朱泚中

书令余官如故以舒王谔为泾原节度大使尚书右丞
孟皞为泾州刺史知留后丁巳遥尊母沈氏曰皇太后冬十月庚寅以睦王述为奉迎皇
太后使工部尚书乔琳副之

二年春正月戊辰成德军节度使李宝臣卒其子惟岳自称留后魏博节度使田悦
反神策都虞候李晟河东节度使马燧昭义军节度使
李抱真河阳节度副使李芑讨之以永平节度使李勉为汴滑等州河阳三城节度都统
二月乙未以御史中丞卢■〈木巳〉为御史大夫领
京畿观察使以桂管观察使李昌巖为江陵尹荆南节度使乙巳卢■〈木巳〉为门下
侍郎同中书门下平章事乙卯振武军乱杀其帅彭令
芳及监军刘惠光夏四月庚寅加梁崇义同中书门下平章事崇义不奉诏五月丙寅以
军兴增商税为十一六月癸巳淮宁军节度使李希烈
充汉南汉北诸道兵马招讨使封南平王以讨梁崇义庚子以浙江西道为镇海军加苏
州刺史韩滉检校礼部尚书充镇海军节度使浙江东
西道观察等使辛丑尚父中书令汾阳王郭子仪薨壬子以李芑为河阳三城怀州节度
使秋七月戊午朔伊西北庭节度使李元忠为北庭大
都护四镇节度留后郭昕为安西大都护四镇节度使庚申杨炎罢以前永平军节度使
张镒为中书侍郎同中书门下平章事司空淮阳王侯
希逸卒辛巳以邠宁节度使李怀光兼灵州大都督单于镇北大都护朔方节度使壬午
以幽州陇右节度使中书令朱泚为太尉田悦寇临洛
马燧等击败之八月辛卯平卢节度使司徒李正己卒其子纳自称留后壬子梁崇义伏
诛九月李惟岳将张孝忠以易定二州降辛酉以孝忠
为恒州刺史充成德军节度使壬戌加陈希烈同中书门下平章事癸亥路嗣恭卒甲子
以晋绛观察使李丞为山南节度使戊辰以杭州刺史
元全柔为黔中经略招讨兼观察等使十月戊申李纳将李洧以徐州降十一月辛酉李
纳寇徐州宣武节度使刘洽与战败之丁丑马燧及田
悦战于双岗败之甲申李纳将王涉以海州降十二月丁酉马万通以密州降以马燧为
魏博招讨使

三年春正月丙寅朱滔张孝忠及李惟岳战于束鹿败之辛未诏减常膳闰月乙未
李惟岳将康日知以赵州降甲辰成德军兵马使王武
俊杀李惟岳传首京师庚戌马燧及田悦战于洹水败之二月加朱滔检校司徒张孝忠
检校兵部尚书易定沧三州节度使以王武俊为恒冀
都团练观察使康日知为深赵都团练观察使三月戊戌田悦将田昂以洛州降以岭南
节度使张伯仪检校兵部尚书兼江陵尹荆南节度使
以容管经略使元琇为岭南节度使夏四月李纳将李士真以德棣二州降壬戌封朱滔

为通义郡王甲子借商钱戊寅张镒罢是月朱滔反陷
德棣二州五月辛卯朔方节度使李怀光率神策及朔方军讨田悦丁酉加马燧同平章
事李抱真检校右仆射李芑检校兵部尚书神策营招
讨使李晟右散骑常侍六月王武俊反辛巳朱滔王武俊以兵救田悦至魏州是日李怀
光兵亦至及马燧李抱真李芑等与战于连篋山败绩
秋七月癸巳停借商钱甲辰李勉检校司徒李希烈检校司空李怀光同平章事李芑封
开阳郡王八月辛酉以泾原节度留后姚令言为泾原
节度使九月丁亥初税商钱茶漆竹木冬十月辛亥以湖南观察使嗣曹王皋为江西节
度使丙辰以吏部侍郎关播为中书侍郎同中书门下
平章事李希烈反十一月己卯以淮南节度使贾耽检校工部尚书山南东道节度使以
兴凤团练使严震为山南西道节度使是月朱滔田悦
王武俊李纳各僭称王号丁丑李希烈自称天下都元帅太尉建兴王

四年春正月丁亥凤翔节度使张镒与吐蕃尚结赞同盟于清水庚寅李希烈陷汝
州执刺史李元平甲午遣颜真卿宣慰李希烈军戊戌
以龙武大将军哥舒曜为东都畿汝节度使率凤翔邠宁泾原等军讨希烈丙午福建观
察使常袞卒二月丁卯哥舒曜复汝州三月辛卯李希
烈寇鄂州刺史李谦败之丁酉张伯仪及李希烈战于安州败绩嗣曹王皋复蕲州夏四
月庚申以李勉为淮西招讨使哥舒曜副之张伯仪为
应援使贾耽嗣曹王皋副之丙子哥舒曜及李希烈战于颍桥败之五月乙未刘洽为淄
青兖郛招讨制置使六月庚戌税屋间架算除陌钱秋
七月甲午以李揆为吐蕃会盟使八月丁未李希烈寇襄城九月丙戌神策军行营兵马
使刘德信及李希烈战于沪涧败绩发泾原诸道兵救
襄城冬十月丁未泾原节度使姚令言反犯京师帝避贼西行戊申至奉天朱泚反自称
权知六军司农卿段秀实左骁卫将军刘海宾死之壬
子凤翔军乱杀其节度使张镒癸丑李希烈陷襄城宣武军兵马使高翼死之乙卯赐崔
懿死丁巳吏部尚书萧复刑部侍郎刘从一谏议大夫
姜公辅并以本官同中书门下平章事朱泚犯奉天禁军与战于城东败绩癸亥贼三面
攻城浑瑊力战御之将军吕希倩高重杰死焉十一月
乙亥以陇右节度判官陇州留后韦皋为陇州刺史奉义军节度使灵武留后杜希全盐
州刺史戴休颜夏州刺史时常春合兵援奉天至漠谷
为贼所败癸巳李怀光及朱泚战于鲁店败之神策将李晟自定州行营赴难军于渭桥
十二月壬戌贬卢■（木巳）为新州司马白志贞为
恩州司马赵赞为播州司马庚午李希烈陷汴州

兴元元年春正月癸酉朔帝在奉天行宫诏曰立政兴化必在推诚忘己济人不吝

改过朕嗣服丕构君临万邦失守宗祧越在草莽不念
率德诚莫追于既往永言思咎期有复于将来小子长于深宫之中暗于经国之务积习
易溺居安忘危不知稼穡之艰难不恤征戍之劳苦致
泽靡下究情不上通事既壅隔人怀疑阻犹昧省己遂用兴戎远近骚然众庶劳止力役
不息田莱多荒暴令峻于诛求疲民空于杼轴天谴于
上而朕不寤人怨于下而朕不知驯致乱阶变起都邑万品失序九庙震惊上累于祖宗
下负于蒸庶痛心腠面罪实在予赖天地降佑人祗协
谋蒋相极诚爪牙宣力羣盗斯屏皇维载张将宏远图必布新令自今以后中外书奏不
得言圣神文武之号可大赦天下改建中五年为兴元
元年李希烈田悦王武俊李纳咸以勋旧继守藩维朕抚驭乖方致其疑惧皆由上失其
道而下罹其灾一切并与洗涤复其爵位待之如初朱
滔以泚连坐路远必不同谋永念旧勋务存宏贷如能效顺亦与惟新朱泚反易天常盗
窃名器暴犯陵寝所不忍言获罪祖宗朕不敢赦除泚
外并从原宥应赴奉天并进收京城将士并赐名奉天定难功臣身有过犯减罪三等子
孙过犯减罪二等先税除陌闲架等钱竹木茶漆等税
并停遣使分往诸道宣谕关播罢 【旧书系在上年十二月癸酉然于今年正月朔亦书
癸酉知为误也】 丙戌以吏部侍郎卢翰为兵部侍
郎同平章事戊子萧复为山南荆湖淮南江西鄂岳浙江福建岭南等道宣慰使丙申以
山南东道行军司马樊泽为山南东道节度使以浑瑊
为行在都知兵马使康日知充奉诚军节度使二月甲子加李怀光太尉仍赐铁券怀光
反丁卯如梁州三月李怀光夺鄜坊京畿节度使李建
徽神策军兵马使杨惠元兵惠元死之癸酉魏博兵马使田绪杀其节度使田悦自称留
后以绪为魏博节度使丁亥加李晟兼京畿渭北鄜坊
丹延节度使神策行营兵马使尚可孤为神策京畿渭南商州节度招讨使壬辰至梁州
丁酉加宣武军节度使刘洽同平章事己亥浑瑊检校
左仆射同平章事充朔方节度使邠宁振武永平奉天行营副元帅授李怀光太子太保
其余官秩并罢夏四月壬寅以邠宁兵马使韩游瓌为
邠宁节度使癸卯以奉天行营兵马使戴休颜为奉天行营节度使甲辰李晟为京畿渭
北商华副元帅甲寅姜公辅罢加剑南节度使张延赏
同平章事泾原兵马使田希鉴杀其节度使冯河清自称留后甲子入蕃使左仆射李揆
卒于凤州乙丑浑瑊及朱泚将韩旻战于武功败之丙
寅加李纳平章事王武俊降五月丙子李抱真以王武俊及朱滔战于经城败之 【新旧
书俱作京城误兹据通鉴改】 壬辰尚可孤及朱泚
战于蓝田败之乙未李晟又败之于苑北戊戌又败之于白华复京师六月癸卯姚令言

伏诛甲辰朱泚伏诛己酉加李晟司徒兼中书令骆元光尚可孤检校左右仆射以泾州将田希鉴为泾原节度使癸丑以梁州为兴元府给复二年加浑瑊侍中韩游瓌检校左仆射戴休颜检校右仆射秋七月壬午至自兴元丁亥李怀光杀宣慰使孔巢父辛卯大赦赐文武官阶勋爵给复京兆府一年八月辛丑诏所司为赠太尉段秀实树碑立庙壬寅李希烈杀宣慰使颜真卿癸卯李晟为凤翔陇右泾原四镇北庭行营兵马副元帅马燧为晋绛慈隰行营兵马副元帅浑瑊为河中同陕虢行营兵马副元帅甲辰以金吾大将军杜希全为灵州大都督西受降城天德军灵盐丰夏节度营田等使以同绛节度使唐朝臣为鄜坊丹延等州节度使九月乙亥王武俊加检校司徒李抱真检校司空冬十月乙丑马燧复绛州闰月丁丑李晟至泾州诛其节度使田希鉴戊子李希烈将李澄以滑州降甲午以澄为汴滑节度使神策行营节度使尚可孤卒十一月癸卯宋亳节度使刘洽与曲环大破希烈之众于陈州戊午复汴州乙丑萧复罢十二月乙亥淮南节度使陈少游卒庚辰以邢部侍郎杜亚为淮南节度使

贞元元年春正月丁酉朔大赦改元罢榷酤壬戌以吉州长史卢■〈木巳〉为洋州别驾三月丁未李希烈陷邓州杀唐邓随招讨使黄金岳戊午加刘洽检校司空李纳司空夏四月乙丑徙封谊为舒王丁丑以江西节度使嗣曹王皋为江陵尹荆南节度使壬午浑瑊及李怀光战于长春宫败之丙戌马燧浑瑊为河中招抚使六月己丑朱滔卒涿州刺史刘怱自称留后辛卯以剑南西川节度使张延赏为中书侍郎同中书门下平章事左金吾卫大将军韦皋检校户部尚书兼成都尹剑南西川节度使戊子马燧及李怀光战于陶城败之秋七月丙午以镇海军浙江东西道节度使韩滉检校尚书左仆射同平章事江淮转运使壬子以刘怱为幽州卢龙节度使八月甲子以旱避正殿减膳甲戌李怀光伏诛丁丑给复河中同绛二州一年进马燧侍中浑瑊检校司空骆元光韩游瓌唐朝臣各赐实封与一子官张延赏罢戊子前河阳节度使开封郡王李芑卒九月辛亥刘从一罢庚申幽州节度使刘怱卒辛巳以权知幽州卢龙军府事刘济为幽州卢龙节度使冬十一月癸卯有事于南郊大赦赐奉天兴元扈从百官收京将士阶爵

二年春正月壬寅卢翰罢以散骑常侍刘滋给事中崔造中书舍人齐映同中书门下平章事二月癸亥山南东道节度使樊泽及李希烈战于泌水败之夏四月丙寅李希烈为其牙将陈仙奇所诛甲申以仙奇为淮西节度使丁未以东川兵马使王叔邕为剑南东川节度使五月

丁酉以伊西北庭节度留后杨袭古为北庭大都护伊西北庭节度使六月淮西兵马使吴少诚杀其节度使陈仙奇秋七月己酉以虔王谅为申光随蔡节度大使以淮西兵马使吴少诚为蔡州刺史知节度留后以陇右行营节度使曲环为陈许节度使戊午以鄜坊节度使唐朝臣为单于大都护振武绥银节度使八月丙戌吐蕃寇泾陇邠宁诸州九月丁酉义成军节度使武威王李澄卒以东都畿唐邓汝等防御观察使贾耽检校尚书右仆射兼义成军节度使乙巳吐蕃寇好畤李晟败之于汧阳辛亥寇凤翔李晟又败之冬十一月甲午立淑妃王氏为皇后丁酉后崩辛丑吐蕃陷盐州十二月丁巳以韩滉兼度支诸道盐铁转运使吐蕃陷夏州又陷银州

三年春正月壬寅尚书左仆射张延赏同中书门下平章事壬子以兵部侍郎柳浑同中书门下平章事刘滋罢贬齐映夔州刺史戊寅镇海军节度使平章事晋国公韩滉卒二月己卯骆元光克盐夏二州三月丁未李晟为太尉马燧罢副元帅夏五月丁亥以浑瑊为吐蕃清水会盟使兵部尚书崔汉衡副之丙午以岭南节度使杜佑为尚书右丞以容管经略使李复为岭南节度使闰月癸亥以荆南节度使嗣曹王皋为山南东道节度使以山南东道节度使樊泽为江陵尹荆南节度使辛未浑瑊及吐蕃盟于平凉为吐蕃所劫执副使崔汉衡杀判官韩弇六月丙戌以马燧为司徒罢其节度使以陕虢观察使李泌为中书侍郎平章事以左龙武将军李自良为太原尹河东节度使是月吐蕃驱盐夏二州居民焚州城而去秋七月丙辰以左羽林大将军韩潭为夏绥银等州节度使壬申赐骆元光姓名曰李元谅张延赏薨八月辛巳朔日有食之己丑柳浑罢九月丁巳吐蕃寇汧阳丙寅陷华亭又陷泾州之连云堡冬十月甲申吐蕃寇丰义韩游瓌败之乙酉寇长武城城使韩全义败之壬辰射生将韩钦绪谋反伏诛

钦定续通志卷十

●钦定续通志卷十一 唐纪十一

唐纪 【十一】

德宗二 顺宗

○德宗二

贞元四年春正月庚戌朔大赦予刺史一子官增户垦田者加阶壬戌以左龙武大将军王栖曜为鄜坊丹延节度使庚午宣武军行营节度使刘昌为泾原节度使壬申刘元佐为四镇北庭行营副元帅甲戌华州节度使李元谅为陇右节度使夏四月己亥福建兵乱逐其观察使

吴洗五月辛未以太子宾客吴凑为福建观察使吐蕃寇泾邠庆鄜等州六月己亥封子諲为邕王【考证曰旧书封皇子皇弟邕王諲等

七人为王按代宗诸子大历中尽封无至贞元中始王者新书诸王传是年封宪宗以下十三王则弟当作孙七人当作十四人 谨按大历十

四年德宗封子諲为虔王诸王传亦同惟文敬太子諲见爱于帝命为子至是封邕王旧书作邕王諲亦误】 秋七月庚戌以浑瑊为邠庆副

元帅以左金吾将军张献甫为邠节度使陈许防御兵马使韩全义充长武城及诸军行营节度使癸丑邠军乱都虞候杨朝晟讨平之八

月乙酉检校司徒汧国公李勉薨九月庚申吐蕃寇邠州张献甫击败之冬十一月横海军使沧州刺史程日华卒以其子怀直权知军州事【

新书纪及新书藩镇传俱在二年六月此据旧传及通鉴】

五年春正月甲辰朔日有食之乙卯诏以二月一日为中和节李泌请以其日令百官进农书司农献种稂之种王公戚里上春服土庶以

刀尺相问遗村社作中和酒祭句芒以祈年谷从之二月戊戌以程怀直为沧景观察使庚子大理卿董晋为门下侍郎御史中丞窦参为中书

侍郎同中书门下平章事三月甲辰李泌薨夏吐蕃寇长武城韩全义击败之秋九月丙午韦皋及吐蕃战于台登北谷败之遂克巂州冬十二

月壬申以陕虢观察使杜佑为淮南节度使

六年春正月诏出岐州无忧王寺佛骨迎置禁中二月乙亥遣使送还本寺夏闰四月乙卯诏常参官畿县令言事五月壬午以邠州刺史

范希朝为单于大都护麟胜节度使秋八月辛丑杀皇太子妃萧氏冬十一月庚午有事于南郊赐文武官阶爵降囚罪徒以下原之是岁吐蕃

陷北庭杨袭古奔于西州回纥诱而杀之安西由是阻绝

七年春正月庚辰以湖南观察使裴胄为江西观察使以常州刺史李衡为湖南观察使三月壬戌左龙武统军戴休颜卒癸未义武军节

度使张孝忠卒夏四月己未安南首领杜英翰反伏诛秋七月庚午以信州刺史郑叔则为福建观察使戊寅邕王諲为义武军节度使【諲

旧书作諲说见前】 以定州刺史张升云为留后庚辰以虔州刺史赵昌为安南都护经略招讨使冬十二月甲午以前福建观察使吴凑为陕

虢观察使

八年春三月乙丑山南东道节度使嗣曹王皋薨【旧书作二月乙丑然正月丙辰朔则二月不得有乙丑也当是三月】 庚午宣武军

节度使刘玄佐卒襄州军乱都将徐诚讨平之丙子以荆南节度使樊泽为山南东道节度使以江西观察使裴胄为江陵尹荆南节度使己卯

以吴凑为宣武军节度使夏四月吐蕃寇灵州庚寅以汴州长史刘士宁为宣武军节度使乙未贬窦参为郴州别驾以尚书左丞赵憬兵部侍郎陆贽同中书门下平章事壬子吐蕃寇灵州五月癸酉平卢节度使李纳卒其子师古自称留后六月吐蕃寇泾州秋八月乙丑以水灾遣使分道宣抚辛卯以李师古为平卢节度使九月丁巳韦皋及吐蕃战于维州败之乙亥以太子宾客薛珏为岭南节度使冬十一月壬子朔日有食之庚午山南西道节度使严震及吐蕃战于黑水堡败之

九年春正月癸卯初税茶二月庚戌以易定留守张升云为义武军节度使夏五月甲辰以义成军节度使贾耽为尚书右仆射尚书右丞卢迈同中书门下平章事以郑州刺史李融为义成军节度使丙午董晋罢秋八月庚戌李晟薨冬十一月乙酉有事于南郊大赦辛卯陇右节度使李元谅卒十二月丙辰宣武军乱逐其节度使刘士宁壬戌以通王谌为宣武军节度使以宣武节度副使李万荣为节度留后朔方灵盐节度使余姚郡王杜希全卒

十年春正月乙亥以虔王谅为朔方灵盐丰节度大使以朔方行军司马李栾为留后壬辰南诏蛮大破吐蕃于神川来献捷二月丙午以瀛州刺史刘潼为秦州刺史陇右经略军使乙丑义成军节度使李融卒三月乙亥以华州刺史李复为义成军节度使庚辰南诏蛮克吐蕃铁桥已东城垒一十六夏四月宣武军乱李万荣讨平之六月壬寅昭义军节度使义阳王李抱真卒诏以其将王延贵权知军事癸丑以祠部郎中袁滋为册南诏使丙寅韦皋击吐蕃克峨和城秋七月壬申以邕王諲为昭义军节度使王延贵为节度留后赐名虔休洺州刺史元谊据州以叛钦州蛮反八月陷钦横浚贵等州九月戊戌定州张升云改名茂昭冬十月王虔休及元谊战于鸡泽败之十二月壬戌贬陆贽为太子宾客

十一年春正月丙申以邕管经略使王锬为岭南节度使夏四月壬戌贬陆贽为忠州别驾丙寅奚寇平州刘济与战于青都山败之五月庚午以旱命有司虑囚丁丑以李万荣为宣武军节度使王虔休为昭义军节度使李栾为朔方灵盐丰夏四州受降定远城天德军节度使甲申河东节度使李自良卒癸巳以通王谌为河东节度使河东行军司马李悦为节度留后北都副留守秋八月辛亥马燧薨九月横海军兵马使程怀信逐其兄程怀直自称留后冬十月丁丑以虔王谅为横海军节度大使以程怀信为留后

十二年春正月庚子元谊奔魏州命田绪安抚之乙丑加浑瑊王武俊中书令 【旧

书作成德军节度使检校司徒兼侍中浑瑊然未尝
镇成德也故考证或云当作河中殊不知成德节度使乃王武俊官号旧书于此自多脱
落也兹据通鉴正之】 严震田绪韦皋并同中书门下
平章事于是方镇皆叙进兼官三月乙巳以户部侍郎裴延龄为户部尚书夏四月庚午
魏博节度使田绪卒其子季安自称留后五月丙申邠
宁节度使张献甫卒甲辰以邠宁都虞候杨朝晟为邠宁庆节度使秋七月乙未以东都
留守董晋兼宣武军节度使时李万荣病诸将推其子
乃为兵马使已又逐乃汴州乱故命董晋帅之是日万荣卒八月己未朔日有食之 【旧
书作辛未朔通鉴作乙未是年正月甲午朔则八月
朔当以己未为是兹从新书】 己巳以田季安为魏博节度使丙戌赵憬薨九月壬子吐
蕃寇庆州冬十月甲戌谏议大夫崔损给事中赵宗儒
并同中书门下平章事

十三年春正月壬寅吐蕃请和帝不许夏四月以旱虑囚壬戌雩于兴庆宫庚午义
成军节度使李复卒己卯以大理卿于頔为陕虢观察
使庚辰以陕虢观察使姚南仲为义成军节度使五月壬寅吐蕃寇嵩州曹高仕击败之
秋九月己丑卢迈罢冬十月淮西吴少诚擅开刁沟入
汝诏止之不从

十四年春正月庚寅放自八年至十一年两税及榷酒钱在百姓腹内者三月丙申
右神策行营节度凤翔陇右观察使凤翔尹邢君牙卒
以右神策将军张昌为凤翔尹右神策行营节度凤翔陇右节度使仍改名敬则夏闰五
月庚申以左神策行营节度韩全义为盐夏绥银节度
使六月乙巳以旱出太仓粟振贷秋七月壬申赵宗儒罢以工部侍郎郑余庆为中书侍
郎同平章事九月己酉山南东道节度使樊泽卒乙卯
以同州刺史崔宗为陕虢观察水陆转运使以浙东观察李若初为浙西观察及诸道盐
铁转运使又以常州刺史裴肃为浙东观察使丙辰以
陕虢观察使于頔为山南东道节度使冬十月癸酉以谷贵出太仓粟减价粿之庚子韩
全义奏破吐蕃于盐州十二月癸酉出东都含嘉仓粟
粿之明州将栗辍杀刺史卢云以反

十五年春正月丁丑宣武军节度使董晋卒乙酉以行军司马陆长源为宣武军节
度使以常州刺史李錡为浙西观察及诸道盐铁转运
使是日汴州军乱杀陆长源及节度判官孟叔度宋州刺史刘逸准自称留后庚辰浙东
观察使裴肃讨栗辍擒斩之己丑以刘逸准为宣武军
节度使仍赐名全谅三月甲寅吴少诚反寇唐州守将张嘉瑜死之戊午昭义军节度使
王虔休卒戊辰以河阳三城节度使李元为昭义军节

度使以河阳节度押衙衡济为河阳三城怀州节度使夏六月癸巳山南西道节度使严震卒秋七月乙巳以兴州刺史严砺为兴元尹山南西道节度使八月乙未吴少诚掠临颖丙申陈许节度使曲环卒丁酉以洋州刺史韦士宗为黔中观察使九月乙巳陈许节度留后上官浚及吴少诚战于临颖败绩丙午以上官浚为陈许节度使【旧书是年八月书壬申朔而下书辛酉知中间于丙午上漏书九月也新书有九月乙巳而上官浚及吴少诚战于临颖并丙午少诚寇许州各条上接四月乙未中间又无五月至八月则是年本纪两书均有脱载今依通鉴詮次之然通鉴于八月先纪曲环死此下起乙未迄辛酉而亦无九月是通鉴仍有脱漏也】吴少诚寇许州浚击败之庚戌宣武军节度使刘全谅卒兵马使韩宏自称留后丙辰削吴少诚官爵令宣武河阳郑滑东都汝成德幽州青淄魏博易定泽潞河东淮南徐泗山南东西鄂岳诸道进军讨之辛酉以韩宏为宣武军节度使冬十一月丁未山南东道节度使于頔及吴少诚战于吴房败之上官浚又败之于柴篱辛亥安黄节度使伊慎又败之于钟山十二月庚午寿州刺史王宗又败之于秋栅浑瑊薨乙未诸道军自溃于小浍水

十六年春正月乙巳恒冀易定陈许河阳四镇及吴少诚战败绩二月乙酉以左神策行营银夏节度使韩全义为蔡州行营招讨使上官浚副之夏四月丁亥黔中宴设将傅近逐其观察使韦士宗【按新书作吴士宗考旧书上年八月以洋州刺史韦士宗为黔中观察使通鉴亦同新书疑误今从旧书作韦士宗】辛卯以义成军行军司马卢羣为义成军节度使五月庚戌韩全义及吴少诚战于浍水南败绩壬子徐泗濠节度使张建封卒其子愔自称知军事六月丙午加郢州李师古淮南杜佑同平章事以佑兼领徐泗濠节度使张愔起复知徐州留后秋七月丁巳伊慎及吴少诚战于申州败之己未韦皋克吐蕃末恭城丙寅韩全义及吴少诚战于五楼败绩八月韦皋克吐蕃颺城九月癸卯义成军节度使卢羣卒戊辰左丞李光素为义成军节度使庚戌贬郑余庆为郴州司马癸丑吴少诚进逼浍水韩全义退保陈州诸军散还本道陈许将孟元阳及吴少诚战败之庚申以太常卿齐抗为中书侍郎同中书门下平章事癸亥以虔王谅为徐州节度使张愔为留后冬十月辛未杀通州别驾崔河图吴少诚引兵归蔡州上表待罪戊子诏雪吴少诚复其官爵己丑河东节度使太原尹北都留守李悦卒甲午以河东行军司马郑僖为太原尹河东节度使

十七年春正月甲寅韩全义自蔡州行营还诏仍镇华州二月乙巳韦皋及吐蕃战

于鹿危山败之夏五月壬戌朔日有食之乙酉邠宁节度使杨朝晟卒丙戌以工部侍郎赵植为岭南节度使六月戊戌以定平兵马使李朝寀为朔方邠宁庆节度使己亥浙西观察使李錡杀上封事人崔善贞己酉以邠宁兵马使高固为邠宁庆节度使丁巳成德军节度使王武俊卒其子士真自称留后秋七月戊寅吐蕃寇盐州辛巳王士真起复授恒州成德军节度使己丑吐蕃陷麟州刺史郭锋死之八月戊午以河东行军司马严绶为太原尹河东节度使九月壬戌韦皋奏大破吐蕃于雅州冬十月庚子加韦皋检校司徒中书令封南康郡王十一月辛未宰相贾耽上海内华夷图及古今郡国县道四夷述四十卷十二月庚戌淮南节度使杜佑进通典凡九门共二百卷

十八年春正月庚辰以常州刺史贾全为浙东观察使三月癸未以剑南东川行军司马李康为剑南东川节度使丙戌以河中行军司马郑元为河中尹河中绛节度使东都留守王翊卒夏六月癸巳以吏部尚书顾少连为东都留守东都畿汝防御使秋七月乙亥罢正衙奏事庚辰赐蔡申光三州帛五万段米十万石盐三千石八月壬寅以邕管经略使徐中为岭南节度使甲辰以岭南节度掌书记张正元为邕管经略使九月乙卯以太常少卿杨凭为湖南观察使冬十月丁亥以邢部尚书王锬为淮南节度副使兼行军司马己酉鄜坊丹延节度使王栖曜卒十一月丙辰以同州刺史刘公济为鄜坊丹延节度使

十九年春二月丙申以桂管留后韦武为桂管观察使己亥安南将王季元逐其经略使裴泰兵马使赵均讨斩之三月壬子淮南节度使杜佑检校司空同中书门下平章事以淮南行军司马王锬为淮南节度使夏五月辛亥湖南节度使裴胄卒己未以荆南行军司马裴筠为荆南节度使【旧书作乙未然上有辛亥下有甲子则当是己未也】甲子四镇北庭行军泾原节度使刘昌卒甲戌以泾原节度留后段佑为四镇北庭行军泾原节度使六月陈许节度使上官浚卒甲辰以陈许行军司马刘昌裔为陈许节度使秋七月己未齐抗罢冬闰十月庚戌盐州将李庭俊反左神策兵马使李兴干讨杀之丁巳崔损薨十一月戊寅以李兴干为盐州刺史得专奏事不隶夏州十二月戊午以振武行军司马阎巨源为单于大都护振武麟胜节度使庚申以太常卿高郢为中书侍郎吏部侍郎郑珣瑜为门下侍郎同中书门下平章事

二十年春正月丙申天德军防御团练使丰州刺史李景略卒以其判官任简迪代之己亥以鄜坊丹延节度使刘公济为工部尚书以其行军司马裴玢代之三月己亥以国子祭酒赵昌为安南都护本管经略使昭义节度使

李万荣卒秋八月己未以昭义兵马使卢从史为昭义
军节度使

二十一年 【八月顺宗改元永贞】 春正月辛未朔帝御含元殿是日不豫癸巳
帝崩于会灵殿年六十四谥曰神武孝文皇帝庙号德
宗陵曰崇陵

德宗建中四年兴元一年贞元二十一年凡二十六年

○顺宗

顺宗皇帝讳诵德宗长子也母曰昭德皇后王氏始封宣城郡王大历十四年六月
进封宣王十二月立为皇太子为人宽仁喜学艺善隶
书礼重师傅见辄先拜从德宗幸奉天常执弓矢居左右郃国公主以蛊事得罪太子妃
公主女也德宗疑之几废者屡矣赖李泌保护得无废
后侍宴鱼藻宫张水嬉彩舰宫人为棹歌众乐间发德宗驩甚顾太子曰今日何如太子
诵诗好乐无荒为对及裴延龄韦渠牟用事世皆畏其
为相太子每候颜色陈其不可故二人者卒不得用贞元二十年太子病风且瘖二十一
年正月朔旦德宗御含元殿即日不豫诸王亲戚皆入
侍惟太子卧病不能来德宗悲伤涕泣疾日益甚癸巳德宗崩丙申太子即皇帝位于太
极殿二月癸卯朝羣臣于紫宸门辛亥以吏部侍郎韦
执谊为尚书右丞同中书门下平章事壬子淄青李师古乘国丧举兵寇滑州甲子大赦
罢宫市民百岁已上版授下州刺史郡君九十已上版
授上佐县君乙丑罢盐铁使月进三月庚午放后宫三百人癸酉放后宫及教坊女妓六
百人戊寅加韦皋检校太尉李师古刘济检校司空张
茂昭司徒戊子吴少诚兼同平章事王士真王锷田季安皆检校司空癸巳立广陵郡主
纯为皇太子夏四月壬寅封弟谔为钦王誠珍王进封
子建康郡王经郟王洋川郡王纬均王临淮郡王纵淑王宏农郡王纾莒王汉东郡王稠
密王晋陵郡王总郇王高平郡王约邵王云安郡王结
宋王宣城郡王绡集王德阳郡王絳冀王河东郡王绮和王封子绚为衡王纁会王绾福
王紘抚王緄岳王绅袁王纶桂王緝翼王戊申以册皇
太子降死罪以下赐文武官子为父后者勋两转五月己巳以右金吾卫大将军范希朝
为右神策统军充左右神策京西诸城镇行营兵马使
秋七月辛卯横海军节度使程怀信卒其子执恭自称留后癸巳执恭起复为横海军节
度使乙未皇太子权句当军国政事太常卿杜黄裳为
门下侍郎左金吾卫大将军袁滋为中书侍郎同中书门下平章事郑珣瑜高郢罢八月
庚子立皇太子为皇帝自称曰太上皇辛丑改贞元二
十一年为永贞元年降死罪以下立良娣王氏为太上皇后元和元年正月皇帝率羣臣

上尊号曰应干圣寿太上皇是月崩于咸宜殿年四十六
谥曰至德大圣大安孝皇帝庙号顺宗陵曰丰陵大中三年增谥至德宏道大圣大安
孝皇帝

顺宗永贞一年 【即德宗贞元二十一年正月即位八月传位宪宗】

钦定续通志卷十一

●钦定续通志卷十二 唐纪十二

唐纪 【十二】

宪宗

○宪宗

宪宗皇帝讳纯顺宗长子也母曰庄宪皇后王氏贞元四年封广陵郡王顺宗即位册为皇太子永贞元年八月内禅诏立为皇帝乙巳即皇帝位于太极殿丁未始听政庚戌罢献祥瑞癸丑剑南西川节度使韦皋卒行军司马刘辟自称留后己未以袁滋为剑南东西两川山南西道安抚大使辛酉太上皇诰册良娣王氏为太上皇后癸亥以尚书左丞郑余庆同中书门下平章事九月己巳罢教坊乐工正员官辛未河阳三城节度使元韶卒癸酉以陈州刺史孟元阳为河阳三城孟怀节度使丙子以亢旱振申光蔡米十万石陈许五万石冬十月丁酉为曾太皇太后沈氏发哀贾耽薨戊戌袁滋罢己酉葬德宗皇帝于崇陵十一月壬申贬韦执谊为崖州司马袁滋为吉州刺史夏绥银节度留后杨惠琳反以左骁卫将军李演为夏绥银节度使壬午吏部尚书郑珣瑜卒十二月甲辰襄阳于頔加平章事己酉以刘辟为剑南西川节度使壬子以右谏议大夫韦丹为剑南东川节度使壬戌中书舍人郑絪为中书侍郎同中书门下平章事

元和元年春正月丁卯大赦改元赐文武官阶勋爵民高年者米帛羊酒辛未以鄂岳沔观察使韩皋为鄂岳蕲安黄节度使壬午成德军节度使王士真同中书门下平章事癸未以左神策长武城兵马使高崇文充神策行营节度使甲申太上皇崩于兴庆宫戊子兴元严砺东川李康率师会高崇文及神策兵马使李元奕以讨刘辟刘辟陷梓州执李康辛卯羣臣请听政二月严砺克剑州癸丑田季安加平章事三月丙子高崇文克梓州丁丑诏削刘辟官爵辛巳杨惠琳伏诛壬辰以高崇文为剑南东川节度使夏四月壬寅以前安南经略使赵昌为岭南节度使 【按旧书在三月三月乙丑朔则壬寅当是四月】 丁未杜佑为司徒平章事如故戊申以陇右经略使刘潼为保义军节度使赈浙东米十万石初令尚书省六品以上职事官太子师傅宾客詹事王府傅等每日两人待制五

月壬申贬李康为雷州司马以横海军留后程执恭为横海军节度使庚辰郑余庆罢辛卯尊母为皇太后六月癸巳朔降死罪以下赐百姓有父母祖父母年八九十以上者粟帛有差丁酉高崇文及刘辟战于鹿头关败之加刘济侍中李师古检校司徒癸卯高崇文克汉州闰月壬戌李师古卒其弟师道自称留后秋七月壬寅葬顺宗皇帝于丰陵癸丑高崇文及刘辟战于玄武败之八月癸亥以左卫大将军李愿为夏绥银节度使丁卯进封平原郡王奩为邓王同安王宽泮王延安王宥遂王彭城王察深王高密王寰洋王文安王寮绛王审为建王己巳以建王审为平卢淄青节度使以李师道充节度留后九月丙午严砺及刘辟战于神泉败之辛亥高崇文克成都冬十月丙寅以高崇文检校司空兼成都尹充剑南西川节度使改封南平郡王【按旧书此处脱十月字九月辛卯朔则不应有丙寅通鉴亦作十月丙寅】戊戌以严砺为剑南东川节度使以将作监柳晟兼兴元尹山南西道节度使庚辰以袁滋为义成军节度使壬午以李师道为平卢淄青节度使戊子刘辟伏诛十一月戊申以武宁军节度使张愔为工部尚书东都留守王绍为武宁军节度使丙辰以内常侍吐突承璀为神策护军中尉

二年春正月辛卯有事于南郊大赦赐文武官勋爵乙巳杜黄裳罢己酉以御史中丞武元衡为门下侍郎中书舍人李吉甫为中书侍郎同中书门下平章事二月庚午司天造新厯成诏题为元和观象厯夏四月甲子以右金吾卫大将军范希朝为朔方灵盐节度使六月辛巳以京兆尹李墉为凤翔尹凤翔陇右节度使秋八月辛巳封杜黄裳为邠国公于頔为燕国公冬十月己酉以李锜为左仆射以御史大夫李元素为镇海军浙西节度使庚申李锜反杀判官王澹大将赵琦壬戌诏李锜在身官爵并削夺乙丑以淮南节度使王锬充诸道行营招讨使率汴徐鄂淮南宣歙之师讨之丁卯武元衡罢癸酉镇海兵马使张子良执李锜以献十一月甲申李锜伏诛十二月丙寅以高崇文检校司空同平章事为邠宁庆节度使京西诸军都纪己卯史官李吉甫撰元和国计簿总计天下方镇凡四十八管州府二百九十五县一千四百五十三户二百四十四万二百五十四其凤翔鄜坊邠宁振武泾原银夏灵盐河东易定魏博镇冀范阳沧景淮西淄青十五道凡七十一州不申户口每岁赋入倚办止于浙江东西宣歙淮南江西鄂岳福建湖南等八道合四十九州岛一百四十四万户成书十卷

三年春正月癸巳羣臣上尊号曰睿圣文武皇帝大赦罢诸道进奉钱二月丙申李吉甫进封赵国公己丑以武昌军节度使韩皋为镇海

军节度使癸丑以鄜坊节度使裴玢为兴元府山南西道节度使丙子以右金吾卫大將軍路恕为鄜坊节度使三月庚子以定平镇兵马使朱士明为四镇北庭泾原节度使夏四月乙亥以岭南节度使赵昌为江陵尹荆南节度使户部侍郎杨于陵为岭南节度使六月丁丑沙陀突厥七百人携其亲属归镇武节度使范希朝乃授其大首领曷勒河波阴山府都督秋七月辛巳朔日有食之九月庚寅以山南东道节度使于頔为司空同中书门下平章事以右仆射裴均同平章事充山南东道节度使加韩宏同平章事丙申以户部侍郎裴垍为中书侍郎同中书门下平章事戊戌李吉甫罢以淮南节度使王锬检校司徒河南尹河中晋绛慈隰节度使河中节度使检校司空同平章事邠国公杜黄裳卒

四年春正月壬午免山南东道淮南江西浙东湖南荆南今岁税二月丁卯郑綱罢以给事中李藩为门下侍郎同中书门下平章事三月乙酉成德军节度使王士真卒其子承宗自称留后闰月丁卯立邓王寔为皇太子夏六月丁丑以河东节度使李墉为刑部尚书充诸道盐铁转运使以灵盐节度使范希朝为太原尹北都留守河东节度使以右卫上将军王泌为灵盐节度使秋七月癸亥吐蕃请和八月丙申环王寇安南都护张舟败之癸卯赠太师裴冕配享代宗庙庭太师李晟太尉段秀实配享德宗庙庭九月庚戌王承宗起复充成德军节度使以德州刺史薛昌朝充保信军节度使丁卯邠宁节度使检校司空同平章事高崇文卒冬十月癸酉以右羽林统军阎巨源为邠宁庆节度使辛巳王承宗反执薛昌朝癸未诏削承宗官爵以吐突承璀为镇州行营招讨处置等使戊子改为镇州行营招讨宣慰使癸巳以册储降死罪以下赐文武官子为父后者勋两转【按旧书是月以册储肆赦新书闰三月丁卯立皇太子考惠昭太子传册礼用孟夏雨不克改用孟秋亦雨冬十月克行礼盖制下在闰月至是始受册成礼耳】十一月癸卯以浙西旱出米二万石振之己巳彰义军节度使吴少诚卒其弟少阳自称留后

五年春正月己巳左神策大将军郾定进与王承宗战死之三月癸丑以郑綱为岭南节度使己未以遂王宥为彰义军节度使吴少阳为节度留后夏四月丁亥范希朝张茂昭及王承宗战于木刀沟败之壬申以昭义兵马使乌重胤为河阳三城节度使以河阳节度使孟元阳为昭义军节度使戊戌贬前昭义节度使卢从史为驩州司马秋七月丁未赦王承宗加幽州刘济中书令魏博田季安司徒淄青李师道仆射乙卯幽州节度使刘济卒其子总自称留后九月己亥吐突承璀自行营还复为左军中尉

辛亥降为军器使以程文干为左军中尉壬戌刘总起
复充幽州卢龙军节度使丙寅以太常卿权德舆为礼部尚书同中书门下平章事冬十月张茂昭以易定二州归于有司义武军将杨伯玉张
佐元反并伏诛壬辰以任迪简为义武军节度使甲午以前义武军节度使张茂昭检校
太尉兼中书令河中尹充河中晋绛慈隰节度使十一
月庚戌以前河中节度使王锬检校司空兼太子太傅太原尹北都留守河东节度使以
代州刺史阿跌光进为单于大都护振武麟胜节度使
庚申裴垍罢十二月癸酉以礼部尚书李墉为淮南节度使

六年春正月丙申以吴少阳为彰义军节度使庚申以淮南节度使李吉甫为中书
侍郎同中书门下平章事二月壬申李藩罢丙子河中
节度使张茂昭卒癸巳以陕虢观察使张宏靖为河中尹晋绛慈等州节度使三月乙未
以河南尹郗士美为昭义军节度使丁未以检校右仆
射严绶为江陵尹荆南节度使夏四月庚午以户部侍郎李夷简为山南东道节度使五
月庚子以左金吾卫将军李惟简为凤翔尹陇右节度
使丙午前山南东道节度使裴均卒壬子赐阿跌光进姓李氏秋七月癸巳尚书右仆射
致仕高郢卒八月乙丑以天德军防御使张煦为夏绥
银节度使冬十月以前夏州节度使李愿为武宁军节度使十一月癸巳华州刺史李藩
卒十二月己丑以户部侍郎李绛为中书侍郎同中书
门下平章事

七年春正月己巳以刑部尚书赵宗儒为兴元尹山南西道节度使癸酉振武河溢
毁东受降城二月壬辰以京畿旱出粟三十万石振之
其元和六年所贷粟并放免三月庚午敕诸司虑囚夏四月癸巳诏民田种桑六月癸巳
杜佑罢秋七月乙亥立遂王宥为皇太子改名恒八月
戊戌魏博节度使田季安卒其子怀谏自称知军府事辛亥以左龙武大将军薛平为义
成军节度使冬十月乙未魏博军举其衙将田兴知军
州事甲辰以魏博兵马使田兴为魏博节度使庚戌泮王宽改名恽深王察改名惊洋王
寰改名忻绛王寮改名悟建王密改名恪田兴以魏博
六州归于有司十一月辛酉给复六州百姓一年兼赦其管内系囚辛未太保致仕杜佑
卒

八年春正月辛未权德舆罢癸未以山南东道节度使李夷简为成都尹剑南西川
节度使以户部尚书袁滋为山南东道节度使二月辛
卯田兴改名弘正丁酉贬于頔为恩王傅三月甲子以剑南西川节度使武元衡为门下
侍郎同中书门下平章事夏六月丙戌以东都留守韩
皋为忠武军节度使辛丑出宫人秋七月丁卯以李光进为灵武节度使冬十月庚寅以

湖南观察使柳公绰为岳鄂沔蕲安黄观察使戊戌以神策普润镇使苏光荣为四镇北庭行军泾原节度使十二月丙戌以桂管观察使马总为岭南节度使庚寅振武军乱逐其帅李进贤诏以夏绥节度使张煦为振武节度使丙午以金吾卫将军田进为夏绥银节度使滑州薛平魏博田宏正于黎阳界开古黄河道以纾水患

九年春正月乙亥张煦入振武军讨作乱者诛之二月癸卯李绛罢三月辛酉以郑余庆为兴元山南西道节度使夏四月庚寅诏太师咸寧王浑瑊配享德宗庙庭五月癸酉以旱免京畿夏税六月庚辰以义武军节度副使浑镐为义武军节度使壬寅河中节度使张宏靖为刑部尚书同中书门下平章事秋七月乙未以御史大夫赵宗儒为河中尹河中晋绛节度使闰八月丙辰彰义军节度使吴少阳卒其子元济自称知军事【旧纪在九月】辛酉以乌重胤为怀汝河阳节度使徙治汝州己巳加田宏正检校右仆射九月丙戌以袁滋为江陵尹荆南节度使严绶为山南东道节度使吴元济反屠舞阳焚叶县戊戌加河东节度使王锬检校司空同平章事冬十月丙午李吉甫薨壬戌以忠武军节度副使李光颜为忠武军节度使甲子以山南东道节度使严绶充申光蔡招抚使督忠武河阳诸道兵讨吴元济戊辰以尚书左丞吕元膺为东都留守十一月甲午以御史中丞胡证为振武军节度使丁酉太子太傅范希朝卒戊戌以中书舍人裴度为御史中丞以左金吾大将军郭钊为邠寧节度使十二月戊辰以尚书右丞韦贯之同中书门下平章事

十年春正月乙酉加宣武军节度使韩宏为司徒己亥削吴元济官爵命宣武等十六道进军讨之二月甲辰严绶及吴元济战于磁邱败绩【胡三省曰磁邱当作慈邱县属唐州取县界慈邱山为名】壬戌河东将刘辅杀丰州刺史燕重旰伏诛己巳以羽林将军李汇为泾原节度使三月庚子李光颜及吴元济战于临颖败之夏四月甲辰又败之于南顿辛亥盗焚河阴转运院五月辛巳御史中丞裴度兼刑部侍郎丙申李光颜大破吴元济于洄曲六月癸卯盗杀武元衡京师大索庚戌神策军士以盗名上乃捕得张晏等八人诛之乙丑以御史中丞裴度为中书侍郎同中书门下平章事秋七月庚午灵武节度使李光进卒辛未以神策军长武城使杜叔良为朔方灵盐节度使甲戌以王承宗有罪绝其朝贡丙戌泾原节度使李汇卒以将作监王潜为四镇北庭泾原节度使八月己亥朔日有食之丁未李师道将訾嘉珍于东都作乱吕元膺捕得之乙丑李光颜及吴元济战于时曲败绩九月癸酉以韩宏充淮西行营兵马都统冬十月庚子析山南东道为两节度以户部侍郎

李迺为襄州刺史充襄复郢均房节度使以右羽林将军高霞寓为唐州刺史充唐随邓节度使刑部尚书权德舆奏请行用新定敕格三十卷

十一月壬申李光颜乌重胤及吴元济战于小浍河败之乙亥以山南东道节度使严绶为太子少保丁丑李文通又败吴元济于固始戊寅盗

焚献陵寝宫诏发振武兵二千会义武军以讨王承宗十二月甲辰李愿及李师道战于平阴败之乙丑河东节度使王镔卒

十一年春正月己巳张宏靖罢乙亥刘总及王承宗战于武强败之癸未削王承宗官爵令河东及河北道诸镇加兵进讨甲申盗断建陵

门戟四十七竿二月乙巳以中书舍人李逢吉为门下侍郎同中书门下平章事三月庚午皇太后崩夏四月庚子李光颜乌重胤及吴元济战

于凌云栅败之乙卯刘总及王承宗战于深州败之五月丁卯宥州军乱逐其刺史骆怡夏绶节度使田缙讨平之六月甲辰高霞寓及吴元济

战于铁城败绩秋七月丁丑贬高霞寓为归州刺史以河南尹郑权为山南东道节度使以荆南节度使袁滋为彰义军节度使权以唐州为理

所以华州刺史裴武为江陵尹荆南节度使戊寅以随州刺史杨旻为唐州刺史充行营都知兵马使壬午韩宏及吴元济战于郾城败之八月

壬寅韦贯之罢己未昭义军节度使郗士美及王承宗战于柏乡败之九月乙酉李光颜乌重胤奏拔凌云栅冬十月丁巳以刑部尚书权德舆

为兴元尹山南西道节度使十一月丙寅加刘总同平章事李师道请降加检校司空【旧书是年不书十一月以次年正月辛酉朔推之则

丙寅非十月也今据通鉴辑】辛巳命内常侍梁守谦监淮西行营诸军辛卯李文通奏败吴元济于固始十二月丙午以易州刺史陈楚为义

武军节度使丁未以翰林学士王涯为中书侍郎同中书门下平章事甲寅以闲厩宫苑使李愬检校左散骑常侍充唐随邓节度使己未西原

蛮陷岩州

十二年春正月癸未贬义武军节度使浑镐为循州刺史甲申贬唐邓节度使袁滋为抚州刺史三月壬戌郗士美及王承宗战于柏乡败

绩戊辰赐程执恭名权癸未吴元济将吴秀琳以文城降于李愬夏四月辛卯李光颜及吴元济战于郾城败之五月丙子罢河北行营专讨淮

蔡庚辰李愬奏败吴元济于吴房获其将李佑【旧书五月作庚寅朔此据通鉴改丙子庚辰皆系五月】秋七月庚戌以国子祭酒孔戣为

岭南节度使丙辰以裴度为门下侍郎同平章事使持节蔡州诸军事充彰义军节度使仍充淮西宣慰招讨处置使以户部侍郎崔羣为中书

侍郎同中书门下平章事以刑部侍郎马总充淮西行营诸军宣慰副使八月庚申以河

南尹辛秘为昭义军节度使癸亥李光颜乌重胤及吴元济战于贾店败绩九月丁未李逢吉罢甲寅李愬及吴元济战于吴房败之冬十月癸酉克蔡州【考异曰按十月戊午朔韩愈平淮西碑云壬申愬用所得贼将自文城因天大雪疾驰百二十里即十五日也又曰用夜半到蔡破其门取元济以献即十六日实录己卯执元济乃奏到日也】甲戌以淮南节度使李墉为门下侍郎同中书门下平章事以左丞卫次公为淮南节度使甲申给复淮西二年十一月丙戌吴元济伏诛以李愬检校尚书左仆射充山南东道节度使加宣武军节度使韩宏兼侍中忠武军节度使李光颜河阳节度使乌重胤并检校司空以宣武军都虞候韩公武检校左散骑常侍鄜坊丹延节度使戊申以马总为彰义军节度留后十二月壬戌以彰义军节度使门下侍郎同平章事裴度守本官赐上柱国晋国公以蔡州留后马总为彰义军节度使澶州颍陈许节度使

十三年春正月乙酉朔大赦免元和二年以前逋负赐高年米帛羊酒辛亥以礼部尚书王播为成都尹剑南西川节度使三月戊戌以御史大夫李夷简为门下侍郎同中书门下平章事李墉罢己酉横海军节度使程权以沧景二州归于有司夏四月甲寅王承宗献德棣二州庚辰诏复承宗官爵以华州刺史郑权为横海军节度使五月丙申以李光颜为义武军节度使【旧书作丙辰然上有乙酉乙未又六月癸丑朔则不当是丙辰也兹据通鉴改】马总为忠武军节度使戊戌以李愬为凤翔尹凤翔陇右节度使丙午以户部侍郎孟简为山南东道节度使六月癸丑朔日有食之丁丑以程权为邠州节度使秋七月癸未以新除凤翔节度使李愬为武宁军节度使甲申以田宏正检校司空乙酉削李师道官爵令宣武魏博义成武宁横海等道进军讨之辛丑李夷简罢庚戌以左仆射郑余庆为凤翔陇右节度使八月壬子王涯罢戊午以尚书右丞崔从为兴元尹山南西道节度使戊寅前山南西道节度使权德舆卒九月甲申以左卫将军高霞寓为单于大都护振武麟胜节度使甲辰以户部侍郎皇甫铸充诸道盐铁转运使程异为工部侍郎并同中书门下平章事冬十月甲寅吐蕃寇宥州壬戌灵武节度使杜叔良击败之癸亥前淮南节度使卫次公卒丙子以左金吾卫大将军薛平为义成军节度使以义成军节度使李光颜为忠武军节度使十一月丁亥以山人柳泌为台州刺史以求药【谨按通鉴辑览御批大乱甫戢而亟亟求仙服药盖由志满意盈遂尔一蹶不振而穆宗且甘蹈覆辙而不悟非所谓贻谋不臧者乎】壬寅以河阳节度使乌重胤为横海军节度使

丁未以华州刺史令狐楚为河阳三城怀孟节度使十二月庚戌遣使迎佛骨于凤翔

十四年春正月壬辰李愬克鱼台佛骨至京师癸巳贬刑部侍郎韩愈为潮州刺史丙申田宏正败李师道于东阿丙午又败之于阳谷二月壬戌田宏正奏淄青兵马使刘悟斩李师道并男二人首请降庚午以刘悟为义成军节度使封彭城郡王癸酉田宏正加检校司徒同中书门下平章事三月己丑以义成军节度使薛平为平卢军节度使以淄青四面行营供军使王遂为沂海兖密等州都团练观察等使夏四月戊午以刑部尚书李愿为凤翔尹充凤翔陇右节度使辛未程异薨丙子裴度罢 【谨按通鉴辑览 御批晋武平吴赞成者独有杜预而山涛则云吴平之后方劳圣虑其言可谓知要宪宗倚任裴度河南北得以摧陷廓清可谓有为之主既而傅异并进度且不安其位中兴之业自亏一篑于此可见处成功之难】 五月庚辰以楚州刺史李听为夏绥银宥节度使丙戌以河东节度使张宏靖为吏部尚书以忠武军节度使李光颜为邠宁庆节度使庚寅以工部尚书郗士美为忠武军节度使秋七月戊寅韩宏以汴宋亳颍四州归于有司宏朝于京师己丑羣臣上尊号曰元和圣文神武法天应道皇帝大赦免京畿今年秋税赐文武官阶勋爵遣黜陟使于天下辛卯沂海将王弁杀其观察使王遂自称留后丁酉以河阳三城节度使令狐楚为中书侍郎同中书门下平章事癸卯以前黔中观察使魏义通为河阳三城怀孟节度使八月己酉韩宏守司徒兼中书令癸丑以吏部尚书张宏靖为宣武军节度使戊午王承宗进位检校左仆射九月戊寅王弁伏诛癸未以国子祭酒李逊为忠武军节度使冬十月壬戌安南军乱杀其都护李象古是月吐蕃寇盐州十一月辛卯灵武大将史奉敬破吐蕃于盐州十二月乙卯崔羣罢

十五年春正月庚子以少府监韩瓘为鄜坊丹延节度使宦者陈宏志等反皇帝崩 【按旧书云时以暴崩皆言内官陈宏志弑逆史氏讳而不书范祖禹曰陈宏志弑宪宗而穆宗不讨贼故旧史于宪宗疑以传疑其后文宗谋诛宦者本讨元和之乱宣宗追怨穆宗以为预谋穷治逆党诛之殆尽其子孙皆以为弑无疑矣故正其事曰为陈宏志所弑】 年四十三谥曰圣神章武孝皇帝庙号宪宗陵曰景陵

宪宗元和十五年

钦定续通志卷十二

●钦定续通志卷十三 唐纪十三

唐纪 【十三】

穆宗

敬宗

○穆宗

穆宗皇帝讳恒宪宗第三子也母曰懿安皇后郭氏初名宥封建安郡王进封遂王领彰义军节度使元和七年册为皇太子改今名 【
吴缜曰按宪宗纪元和元年进封子延安郡王宥为遂王即穆宗也延安建安字有误元和七年立遂王宥为皇太子十五年皇太子即皇帝位
以上穆宗之为皇太子也其名宥也及本纪则讳恒新史又不载改名年月盖新史凡诸帝在潜之日诸事多所简略不复详述然既为一朝之
史凡人主或皇太子之名岂细故哉今乃削而不着使览者莫见本末则难免阙文之讥也自后文武宣懿僖昭六帝在藩与本纪所载之讳皆
不同又不见所改年月其失皆与穆纪同也】 十五年正月庚子宪宗崩陈宏志杀吐突承璀及泮王恽闰月丙午皇太子即皇帝位于太极殿
丁未贬皇甫镈为崖州司户参军戊申始听政辛亥以御史中丞萧俛翰林学士段文昌为中书侍郎同中书门下平章事诏山人柳泌轻怀左
道上惑先朝僧大通医方不精药术皆妄付京兆府决杖处死丁巳以剑南东川节度使李逢吉为山南东道节度使以吏部侍郎王涯为剑南
东川节度使丙寅以右神策大将军张维清为单于大都护充振武麟胜节度使乙卯尊母贵妃郭氏为皇太后二月丁丑大赦赐文武官阶爵
高年粟帛二王后三恪文宣公嗣王公主县主武德配享及第一等功臣家予一子官放没掖庭者宣制毕于丹凤门观百戏丁亥如左神策军
观角抵及杂戏甲午以桂管观察使裴行立为安南都护充本管经略使乙未以太仆卿杜式方为桂管观察使吐蕃寇灵州三月癸卯朔赠皇
太后父郭暖太傅母虢国大长公主赠齐国大长公主乙巳杜叔良及吐蕃战败之夏五月癸卯以国用不足诏两税盐酒茶税及户部阙官除
陌等钱兼诸道杂税合送上都及留州留使诸道支用诸司使职掌人课料等钱并每贯除旧垫陌外量抽五十文庚申葬宪宗皇帝于景陵六
月丁丑韩宏罢戊寅以金吾将军李佑为夏绥银宥节度使代李听以听为朔方灵盐节度使己卯放京兆府今岁青苗钱壬辰停五月敕应给
用钱每贯所抽五十文仍出内库钱付度支给用癸巳皇太后移居兴庆宫皇帝与六宫侍从大合宴于南内至右军颁赐中尉等有差自是凡
三日一至左右军及宸晖九仙等门观角抵杂戏秋七月丙午罢诞日受贺之礼甲寅御新成永安殿观百戏乙卯如安国寺观孟兰盆壬戌盛
饰安国慈恩千福开业章敬寺纵吐蕃使者观之丙寅以新成永安殿与中官贵主密宴以乐之嫔妃皆预丁卯令狐楚罢八月癸酉太子少傅

李墉卒甲戌安南都护杜仲武讨其叛将杨清诛之乙亥赐教坊钱五千贯充利息本钱壬辰如鱼藻池发神策兵二千浚鱼藻池戊戌以崔植为中书侍郎同中书门下平章事九月辛丑大合乐于鱼藻宫观竞渡戊申以重阳节曲宴郭钊兄弟贵戚主婿等于宣和殿戊午加裴度守司空门下侍郎同平章事李光颜李愬并同中书门下平章事李愬充昭义军节度泽潞磁邢洺观察处置等使丙寅以御史大夫崔羣为武宁军节度使将作监崔能为岭南节度使冬十月庚辰王承宗卒其弟承元以镇赵深冀四州归于有司壬午吐蕃寇泾州右神策中尉梁守谦为左右神策京西京北行营都监以御之乙酉以田宏正检校司徒兼中书令镇州大都督府长史成德军节度镇冀深赵观察处置等使以镇冀深赵观察度支使王承元为义成军节度使以李愬为魏博节度使以刘悟为昭义军节度使以左金吾将军田布为河阳三城怀孟节度使丙戌吐蕃遁十一月癸卯赦镇赵深冀四州死罪以下己未帝由复道出城如华清宫癸亥检校司徒兼太子少师郑余庆卒十二月庚辰猎于城南壬午击鞠于右神策军甲申猎于苑北己丑皇甫镈卒

长庆元年春正月己亥朔朝献于太清宫庚子皇于太庙辛丑有事于南郊大赦改元赐文武官阶勋爵陪位白身人勋两转癸卯以田布为四镇北庭行营泾原节度使以刑部尚书兼司农卿郭钊为河阳三城怀孟节度使以泾原节度使王潜为江陵尹荆南节度使乙巳鄜坊节度使韩瓘改名充壬戌萧俛罢二月乙亥观乐于麟德殿丙子观神策诸军杂伎己卯刘总以卢龙军八州归于有司壬午段文昌罢翰林学士杜元颖同中书门下平章事以剑南西川节度使王播为刑部尚书充盐铁转运使乙酉天平军节度使马总奏当道见管军士三万三千五百人从去年正月己后情愿居农者放逃亡者不捕辛卯宴羣臣于麟德殿三月辛亥王播奏加江淮盐估每■〈豆斗〉五十文兼旧三百文癸丑以幽州卢龙军节度使检校司空同平章事刘总为检校司徒兼侍中天平军节度使以宣武军节度使张宏靖检校司空同平章事兼幽州卢龙军节度使以凤翔节度使李愿检校司空充宣武军节度使以邠宁节度使李光颜为凤翔尹依前检校司空平章事充凤翔陇右节度使以右卫大将军高霞寓为邠宁节度使丁巳赦卢龙军八州死罪以下百姓给复一年戊午封弟憬为鄜王悦琼王恂沔王怿婺王愔茂王怡光王协淄王憺衢王■〈丩充〉澶王子湛为景王涵江王湊漳王溶安王灋颖王甲子刘总奏请为僧赐号大觉总是夜遁去夏四月丙子以前天平军节度使马总复为天平节度使丁丑覆试礼部所取进士贬礼部侍郎钱徽为江

州刺史中书舍人李宗闵为剑州刺史右补阙杨汝士
为开江令辛亥造百尺楼于宫中壬子王播奏加茶榷五十文兼旧一百五十文六月辛
未吐蕃寇青塞堡盐州刺史李文悦败之秋七月甲辰
卢龙军兵马使朱克融囚其节度使张宏靖以反壬子羣臣上尊号曰文武孝德皇帝大
赦赐文武官阶勋爵庚申以刘悟为幽州卢龙军节度
使壬戌成德军兵马使王廷凑杀其节度使田宏正以反八月辛未以左金吾将军杨元
卿为四镇北庭行军泾原节度使壬申朱克融陷莫州
癸酉王廷凑陷冀州刺史王进岌死之乙亥以前泾原节度使田布起复检校工部尚书
兼魏州大都督府长史充魏博节度使丙子瀛州兵乱
执其观察使卢士玫叛附于幽州王廷凑寇深州丁丑诏魏博横海昭义河东义武诸军
讨之己卯以深州刺史牛元翼为深冀节度使己丑以
裴度为幽镇招抚使癸巳王廷凑寇深州围之九月乙巳相州兵乱杀其刺史邢楚吐蕃
请和壬子朱克融掠易州涑水遂城满城癸酉田布奏
出师赴贝州行营冬十月丙寅以王播为中书侍郎同中书门下平章事依前充盐铁转
运使以裴度充镇州四面行营都招讨使左领军卫大
将军杜叔良充深冀诸道行营节度使戊辰以牛元翼为成德军节度使丁丑朱克融寇
蔚州戊寅王廷凑寇贝州己卯易州刺史柳公济及朱
克融战于白石岭败之庚辰横海军节度使乌重胤及王廷凑战于饶阳败之丙戌以杜
叔良为横海军节度使乌重胤授检校司徒兴元尹山
南西道节度使戊子太子少保李愬卒十一月甲午裴度奏破王廷凑之兵于会星镇丙
申朱克融寇定州节度使陈楚败之辛酉淄青牙将马
延崐谋逆节度使薛平讨斩之 【考异曰据实录作马延崐旧传作马狼儿河南记作马
士端今从实录】 十二月丙寅以前容州经略使留
后严公素为容管经略使庚午杜叔良及王廷凑战于博野败绩丁丑陈楚及朱克融战
于望都败之戊寅以李光颜为忠武军节度使仍兼深
冀行营节度使以李迺为凤翔节度使辛巳以神策副使杨承和为深冀行营都监押乙
酉赦朱克融以为幽州卢龙军节度使乙丑陈楚及朱
克融战于莫州败之

二年春正月丁酉朱克融陷弓高庚子魏博军溃于南宫节度使田布自杀兵马使
史宪诚自称留后己酉以宪诚为魏博节度使庚戌以
德州刺史王日简为横海军节度使壬子贬杜叔良为归州刺史甲寅以工部尚书崔俊
为凤翔尹凤翔陇右节度使庚子以兗沂密观察使曹
华为节度使以天德军防御使李进诚为朔方灵盐定远城等州节度使以晋州刺史李
崱为天德军丰州东西受降城都防御使二月甲子赦

王廷凑仍授成德军节度使丙寅以牛元翼为山南东道节度使癸酉以鄜坊丹节度使韩充为义成军节度使甲戌王日简赐姓名李全略辛巳崔植罢以工部侍郎元稹同中书门下平章事癸未以李光颜为横海军节度使兼忠武军节度深冀行营并如故以李全略为德棣等州节度使丙戌以兵部郎中知制诰冯宿检校左庶子充山南东道节度副使权知襄州军府事丁亥以河东节度使裴度守司徒平章事充东都留守以前灵武节度使李昕为太原尹北都留守河东节度使三月乙巳武宁军节度副使王智兴逐其节度使崔羣丙午加朱克融王廷凑并检校工部尚书壬子以新授东都留守裴度为淮南节度使丁巳以左丞崔从为鄜坊节度使以王承元为凤翔陇右节度使戊午以裴度同中书门下平章事王播为淮南节度使依前兼诸道盐铁转运使己未以王智兴为武宁军节度使以李全略复为沧州节度使仍合沧景德棣领之李光颜还许州夏四月辛酉朔日有食之壬戌王廷凑陷深州五月壬寅邕州刺史李元宗叛奔于黄洞蛮六月癸亥宣武军乱逐其节度使李愿牙将李■〈宀介〉自称留后甲子裴度元稹罢以兵部尚书李逢吉为门下侍郎同中书门下平章事丁卯以易州刺史柳公济为义武军节度使壬申吐蕃寇灵州秋七月丙午贬李愿为随州刺史以郑滑节度使韩充为宣武军节度使汴宋亳颍观察等使郑滑如故戊申李■〈宀介〉陷宋州丙辰兖海节度使曹华及李■〈宀介〉战于宋州败之丁巳李光颜又败之于尉氏八月戊辰以左仆射韩皋为东都留守以东都留守陈楚为河阳怀节度使丙子李■〈宀介〉伏诛癸未以前东都留守李绛为潼关防御镇国军等使以曹华为义成军节度使以宋州刺史高承简为兖海沂密等州节度使九月戊子镇海军将王国清谋反观察使窦易直讨平之李全略杀德州刺史王稷以军乱闻壬子太子少师李夷简卒癸丑以前河阳节度使郭钊为河中尹兼河中绛隰等州节度使冬十月壬戌韩宏守司徒兼中书戊辰以乌重胤为天平军节度使己卯帝由复道如咸阳止于善因佛寺施僧钱百万因猎于咸阳闰月戊子以韦绶为兴元尹山南西道节度使壬辰右骁卫大将军韩公武卒甲寅以江淮诸州旱损诏取常平义仓粟减价粿之十一月庚午皇太后幸华清宫癸酉帝如华清宫迎皇太后遂猎于骊山庚辰帝与内官击鞠于禁中得疾十二月丁亥放五坊鹰隼毁猎具司徒中书令韩宏卒癸巳立景王湛为皇太子甲午内出绢二百匹振两市癯残穷人己未敕在京诸司疏放系囚己酉以前天平军节度使马总检校左仆射守户部尚书癸丑降死罪以下赐文武常参及州府长官子为父后者

勋两转宗子诸亲一转是岁初行宣明历

三年春三月壬戌以御史中丞牛僧孺为户部侍郎同中书门下平章事夏四月甲午陆州獠反五月山南东道节度使牛元翼卒秋七月丙寅黄洞蛮陷钦州八月郑滑节度使曹华卒检校尚书右仆射户部尚书马总卒兴元节度使韦绶卒帝由复道幸兴庆宫至通化门赐山僧绢二百匹邕管奏破黄洞蛮九月壬子朔日有食之丙辰加刘悟同平章事冬十月己丑杜元颖罢十一月帝御通化门观作毗沙门神因赐绢五百匹

四年春正月辛亥朔降死罪以下减流人一岁赐文武官及宗子贺正使阶勋爵诏百官言事帝饵金石之药处士张皋上疏切谏帝悦召之求皋不获辛未诏皇太子监国壬申帝崩于寝殿年三十谥曰睿圣文惠孝皇帝庙号穆宗陵曰光陵

穆宗长庆四年

○敬宗

敬宗皇帝讳湛穆宗长子也母曰恭僖皇后王氏长庆元年封鄂王徙封景王二年十二月穆宗因击鞠暴得疾自是人不得闻帝起居宰相屡乞入见不报裴度三上疏请立太子而翰林学士两省官相次皆以为言居数日穆宗疾少间乃御绳床见羣臣宰相李逢吉请立景王为皇太子四年正月穆宗崩丙子皇太子即皇帝位于太极殿二月辛巳朔始听政辛卯放没掖庭及先配内园宫人已亥尊皇太后为太皇太后辛丑帝始御紫宸殿既退如飞龙院厚赐内官以米贵出太仓粟于两市贱糶之乙巳尊母王妃为皇太后丁未御中和殿击球赐教坊乐官绫绢三千五百匹戊申击球于飞龙院己酉大合乐于中和殿三月壬子大赦免京畿青苗钱减宫禁经费罢常贡之外有进献者庚午赐内教坊钱万缗以备游幸甲戌夏州节度使李佑奏于塞外筑乌延宥州临塞阴河陶子等五城以备吐蕃又以党项为盗于芦子关北木瓜岭筑垒以扼其冲乙亥如教坊赐伶官绫三千五百匹夏四月丙申染坊匠张韶反帝如左神策军韶伏诛丁酉帝还宫五月乙卯以吏部侍郎李程户部侍郎判度支窦易直同中书门下平章事癸亥以盐州刺史傅良弼为夏州节度使六月己卯以左神策大将康日全为鄜坊节度使辛巳以霖雨命疏决京城囚壬辰以左金吾卫大将军李愿检校司空兼河中尹河中绛隰等州节度使丙申山南西道节度使裴度加同中书门下平章事加陈许节度使李光颜守司徒癸卯太保张宏靖卒秋七月辛酉疏灵州特进渠置营田八月中官李文德谋反伏诛乙巳宣武军节度使韩充

卒九月庚戌以河南尹令狐楚为宣武军节度使戊午加朱克融检校司空己巳浙西淮南各进宣索银妆奁三具冬十月庚子岭南节度使郑权卒壬寅以鄂岳观察使崔植为岭南节度使十一月戊午黄洞蛮反与环王合陷陆州刺史葛维死之庚申葬穆宗皇帝于光陵十二月庚寅加乌重胤同平章事丁酉进封牛僧孺奇章郡公李程彭原郡公窦易直晋阳郡公

宝历元年春正月辛亥有事于南郊大赦改元内官殴鄂县令于丹凤楼下乙卯牛僧孺罢三月乙巳以兵部尚书郭钊为剑南东川节度使壬子宴羣臣于三殿夏四月甲戌宰相凉国公李逢吉进封郑国公以右神策大将军康志睦为平卢军节度使癸巳羣臣上尊号曰文武大圣广孝皇帝大赦死罪以下无轻重咸赦除之赐文武官阶爵五月庚戌如鱼藻宫观竞渡庚午以右金吾将军李文悦为天德军防御使六月己丑河中节度使检校司空李愿卒乙未以户部尚书薛平检校司空河中尹河中节度使秋七月癸卯以忠武军节度使李光颜为太原尹北京留守以河东节度使王沛为忠武军节度使甲辰盐铁使王播进羨余绢一百万匹癸丑以右金吾卫大将军张茂宗为兖海沂密节度使己未诏王播造竞渡船进之闰月壬辰以前河东节度使李昕为义成军节度使八月戊午遣中使往湖南江南等道及天台山采药以道士刘从政为光禄少卿九月壬午昭义节度使刘悟卒其子从谏自称留后冬十一月丙申封子普为晋王十二月辛丑以晋王普为昭义军节度副大使刘从谏起复充昭义节度留后甲子以左仆射李绛为太子少师分司东都戊辰敕委度支往河东振武灵夏等州市耕牛分给畿内百姓

二年春正月甲戌发神策六军穿池于禁中二月丁未以山南西道节度使裴度守司空同中书门下平章事丁卯以礼部尚书王涯为山南西道节度使三月戊寅如鱼藻宫观竞渡夏四月戊戌横海军节度使李全略卒其子同捷反壬寅以右金吾卫大将军高承简为邠宁庆节度使丙午王廷凑检校司空戊申以刘从谏为昭义节度副大使知节度事丙辰右金吾卫大将军高霞寓卒五月甲戌以泾原节度杨原卿为河阳三城怀州节度使以金吾卫大将军李佑为泾原节度使戊寅如鱼藻宫观竞渡庚辰幽州军乱杀其节度使朱克融克融子延嗣自称留后癸未遣中使押山人杜景先往淮南及江南岭南诸州求访异人甲午赐兴唐观道士刘从政修院钱二万贯六月辛酉观渔于凝碧池癸亥以旱命诸司疏理系囚甲子观驴鞠角抵于三殿秋七月乙亥河中进方士八人癸巳以鄂县羨陂隶尚食禁民渔八月丙申以裴度判度支丙午观竞渡于新池九月甲戌大合宴于宣和殿陈百戏三日而罢戊寅河东节度使李光

颜卒出内库钱募方士卢龙军兵马使李再义杀朱延嗣自称留后壬午李程罢冬十月乙亥以李再义充卢龙军节度副大使知节度事仍赐名载义十一月壬申以户部尚书胡证为岭南节度使甲申李逢吉罢己丑禁朝官及方镇置私白身十二月辛丑帝夜猎还宫与中官刘克明田务成许文端打球军将苏佐明王嘉宪石定宽等二十八人饮酒帝方酣入室更衣殿上烛忽灭刘克明等谋反帝崩于室内时年十八谥曰睿武昭愍孝皇帝庙号敬宗陵曰庄陵

敬宗宝历二年

钦定续通志卷十三

●钦定续通志卷十四 唐纪十四

唐纪 【十四】

文宗 武宗

○文宗

文宗皇帝讳昂穆宗第二子也母曰贞献皇后萧氏初名涵长庆元年封江王宝历二年十二月敬宗崩刘克明等矫诏以绛王悟勾当军国事壬寅内枢密使王守澄中尉梁守谦等率禁军讨贼诛之并杀绛王乃迎文宗于江邸癸卯见羣臣于紫宸外庑下教处分军国事以裴度摄冢宰羣臣三上表劝进乙巳皇帝即位于宣政殿更名昂丙午赴西宫成服丁未宰臣百寮上表请听政三表许之道士纪处玄杨冲虚伎术人李元戢王信等并配流岭南戊申尊母为皇太后己酉放凤翔淮南所进女乐二十四人庚戌以韦处厚为中书侍郎同中书门下平章事丁巳为绛王举哀废朝三日庚申出宫女三千人省教坊乐工技术冗员千二百七十人纵五坊鹰犬停贡纂组雕镂金筐宝饰床榻停诸司新加衣粮御马坊场及近岁别贮钱谷所占陂田悉归有司太和元年春二月乙巳大赦改元诏免京兆今岁夏税之半赐九庙陪位者子孙及立功将士阶爵有差三月壬戌右军中尉梁守谦致仕以枢密使王守澄代之夏四月己未忠武军节度使王沛卒庚申以太仆卿高瑀为忠武军节度使五月丙子以乌重胤为横海军节度使以前横海节度副使李同捷为兖海沂密等州节度使加史宪诚同平章事六月癸巳以淮南节度使兼诸道盐铁转运使王播为尚书左仆射同中书门下平章事依前充诸道盐铁转运使御史大夫段文昌为淮南节度使甲寅以旱降京畿死罪以下秋七月癸酉葬敬宗皇帝于庄陵李同捷反八月庚子削李同捷官爵命乌重胤王智兴史宪诚李载义李昕等各帅本军讨之复以张茂宗为兖海沂密节度使辛丑邠宁节度使高崇简卒壬寅以刑部尚书柳公绰为邠

懿节度使九月癸亥以左神策将军何文哲为鄜坊丹
延节度使甲戌以左神策大将军李泳为单于都护充振武麟胜节度使丙戌以谏议大
夫萧裕为桂管观察使冬十一月丙寅乌重胤卒庚辰
以保义军节度使李寰为横海军节度使十二月庚戌以王智兴为沧州行营招讨使加
同平章事

二年春三月己卯王智兴攻棣州焚其三门夏四月壬午以邕管经略使王茂元为
容管经略使六月辛巳以灵武节度使李进诚为邠宁
节度使以天德军使李文悦为灵武节度使秋七月辛丑史宪诚及李同捷战于平原败
之【旧书无此一条新书有之而于八月辛巳又复
载之今去彼存此】王廷凑反八月壬申义武军节度使柳公济与战于新乐败之己卯
刘从谏败之于临城癸未又败之于昭庆九月丁亥王
智兴拔棣州以李寰为夏州节度使甲午削王廷凑官爵命诸军讨之以前夏州节度使
傅良弼为横海军节度使庚戌安南军乱逐其都护韩
约冬十月庚申史宪诚克平原【新书作史宪诚及李同捷战于平原败之而于下戊寅
又载其语今据通鉴改辑】辛未以江西观察使李
宪为岭南节度使癸酉竇易直罢以李逢吉为宣武军节度使十一月乙酉以右金吾卫
大将军李佑为横海节度使壬辰给复棣州一年十二
月乙丑魏博行营兵马使开志沼反【考异曰实录或作于志沼或作开志沼或作元志
绍旧纪作元志绍新纪传作开志沼今从之 胡三
省曰开苦坚反开渠之反二音皆姓也】壬申韦处厚薨戊寅以翰林学士路随为中书
侍郎同中书门下平章事

三年春正月开志沼与王廷凑合兵掠贝州史宪诚告难诏沧州行营兵赴之庚子
李昕击败之志沼奔镇州甲辰以太常卿李绛检校司
空兼兴元尹山南西道节度使己酉以前山南西道节度使王涯为太常卿二月辛亥以
兵部尚书崔羣为荆南节度使三月乙酉罢教坊日直
乐人壬辰义武军节度使柳公济卒乙巳以太原兵马使傅毅为义武军节度使义武军
不受其兵马使张璠自称节度使戊申以璠为节度使
夏四月戊辰李佑克德州李同捷降乙亥沧德宣慰使柏耆斩之于将陵五月庚寅加李
载义同平章事辛卯给复横海军四州一年丙申横海
军节度使李佑卒以泾原节度使李岫为齐德等州节度使改名有裕丁酉以前义武军
节度使傅毅为横海军节度使辛丑以右金吾卫大将
军张惟清检校司空充泾原节度使以左金吾卫大将军刘遵古为邠宁节度使六月辛
亥以魏博节度使史宪诚检校司徒兼侍中为河中尹
充河中晋绛节度使以义成军节度使李昕兼魏博节度使以魏博节度副使史孝章为

相卫节度使甲戌魏博军乱杀其节度使史宪诚兵马
使河进滔自称留后秋七月李昕至魏州进滔出兵击之昕大败走归滑州乙未岭南节
度使李宪卒丁酉以京兆尹崔护为岭南节度使八月
壬子诏以何进滔为魏博节度使复以相卫澶三州归之癸丑以卫尉卿殷侑为齐德沧
节度使辛酉以旱免京畿九县今岁租壬申赦王廷凑
复其官爵甲戌以吏部侍郎李宗闵同中书门下平章事九月壬辰以兵部侍郎李德裕
检校户部尚书兼义成军节度使冬十一月甲午有事
于南郊大赦禁献难成非常之物焚丝布繅绫机杼乙巳以王智兴守太傅进封雁门郡
王云南蛮寇嵩邛二州十二月丁未癸鄂岳襄邓陈许
等道兵伐之以剑南东川节度使郭钊为西川节度使仍权东川事庚戌云南蛮寇成都
府己未以右领军大将军董重质为神策西川行营节
度使蛮寇梓州壬戌寇蜀州乙丑以东都留守令狐楚为天平军节度使己巳郭钊奏蛮
兵退辛未以太子少师李昕为邠宁节度使

四年春正月丙戌以左神策大将军邱直方为鄜坊节度使戊子封子永为鲁王辛
卯以武昌军节度使牛僧孺为兵部尚书同中书门下
平章事癸巳以前邠宁节度使刘遵古为剑南东川节度使甲午王播薨辛丑以尚书左
丞元稹为武昌军节度使二月乙卯兴元军乱杀其节
度使李绛庚申以左丞温造为兴元节度使辛未夏州节度使李寰卒壬申以董重质为
夏绥银宥节度使三月乙亥以河东节度使李程检校
左仆射同平章事兼河中尹晋绛慈隰等州节度使以刑部尚书柳公绰为太原尹北都
留守河东节度使丁丑以前河中节度使薛平为太子
太保癸卯以淮南节度使段文昌检校尚书左仆射同中书门下平章事兼江陵尹荆南
节度使前太子宾客崔从为淮南节度使夏四月丁未
奚寇边李载义击败之五月丁丑以旱命京城诸司虑囚六月丁未以守司徒门下侍郎
平章事裴度为司徒平章军国重事秋七月癸未以尚
书右丞宋申锡同中书门下平章事八月戊辰幸梨园亭会昌殿奏新乐九月壬午以裴
度充山南东道节度使冬十月戊申以东都留守崔元
略为义成军节度使以李德裕为成都尹剑南西川节度使甲寅以前剑南西川节度使
郭钊为太常卿十一月癸巳以左丞康承宣为兖海沂
密等州节度使十二月己酉崔元略卒壬子以左金吾卫大将军段嶷为义成军节度使
闰月壬申太常卿郭钊卒

五年春正月庚申幽州军乱逐其节度使李载义兵马使杨志诚自称留后载义赴
京师二月壬辰以为守太保同中书门下平章事丙申
以桂管观察使李谅为岭南节度使三月庚子贬宋申锡为太子右庶子癸卯降封漳王

奏为巢县公再贬宋申锡为开州司马夏四月巳丑以李载义为山南西道节度使杨志诚为幽州卢龙节度使六月戊寅以霖雨诏诸司虑囚秋八月庚午武昌军节度使元稹卒壬申以河阳三城节度使杨元卿为宣武军节度使以李逢吉检校司徒充东都留守以温造为河阳三城怀州节度使九月李德裕奏收复吐蕃所陷维州冬十月戊寅蛮寇嵩州十一月己未以王承元检校司空充平卢军节度使癸亥以尚书左仆射窦易直检校司空为凤翔陇右节度使

六年春正月壬子降死罪以下甲寅司徒薛平卒二月甲子以前义昌军节度使殷侑为天平军节度使以令狐楚为太原尹北都留守河东节度使戊寅以苏湖二州水发米二十二万石振之三月辛丑以王智兴兼侍中充忠武军节度使以李昕为武宁军节度使以金吾卫大将军孟友亮为邠宁节度使辛酉以前忠武军节度使高瑀为武宁军节度使夏四月戊寅以新除武宁军节度使李昕为太子太保五月甲辰西川修邛崃关城又移嵩州于台登城丁巳以盐州刺史王晏平为灵盐节度使庚申给疫死者棺十岁以下不能自存者粮秋七月癸丑以李文悦为兖海沂密节度使己未以户部尚书判度支王起为河中晋慈隰节度使八月辛酉吏部尚书崔羣卒九月庚寅淄青初定两税额五州一十九万三千九百八十九贯自此淄青始有上供壬子以右金吾卫将军史孝章为鄜坊丹延节度使冬十月甲子立鲁王永为皇太子【按旧书十月皆在十月甲子新书作十一月甲子十二月有乙丑则十一月不应有甲子当是十月也】壬午以左金吾卫将军李昌言为夏绥银宥节度使十一月丁未淮南节度使崔从卒乙卯以荆南节度使段文昌为剑南西川节度使十二月乙丑牛僧孺罢丁未以前西川节度使李德裕为兵部尚书【此据旧书然旧书是月己未朔历乙丑戊辰乙亥不得又有丁未疑有误也】

七年春正月壬辰罢吴蜀冬贡新茶甲午加刘从谏同平章事乙亥以太府卿崔珙为岭南节度使【此据旧书然乙亥不应在甲午之下又旧书上年十二月己未朔则此正月当是己丑朔而书乙丑且若是己丑朔则是月中不得又有乙亥疑俱有误】壬子振京兆府粟十万石河南府河中府绛州各七万石同华陕虢晋等州各十万石甲寅以新除岭南节度使崔珙为武宁军节度使右金吾卫将军王茂元为岭南节度使二月丙戌以兵部尚书李德裕同中书门下平章事三月辛卯杨志诚执春衣使边奉鸾及送奚契丹使尹士恭己亥岭南节度使李谅卒癸卯以京兆尹杜惊为凤翔陇右节度使夏四月癸亥前凤翔节度使检校司空窦易

直卒五月丁酉以李昕为凤翔陇右节度使六月乙巳以李载义为太原尹北都留守河东节度使乙亥李宗闵罢己卯以右神策将军李用为邠宁节度使秋七月丁亥以右龙武统军康志睦为四镇北庭行军泾原节度使壬寅以尚书右仆射诸道盐铁转运使王涯同中书门下平章事领使如故乙巳以左丞杨嗣复为剑南东川节度使己酉以旱命诸司虑囚癸丑以左仆射李程检校司空兼宣武军节度使甲寅以旱徙市宋申锡卒诏许归葬闰月乙卯以旱避正殿减膳彻乐出宫女千人纵五坊鹰犬停修造事非急务者八月庚寅降死罪以下赐文武及诸州府长官子为父后者勋两转戊申以刑部尚书高瑀为忠武军节度使九月甲寅以前忠武军节度使王智兴为河中尹河中晋绛慈隰节度使冬十一月己卯以左神策长武城使朱叔夜为泾原节度使十二月癸卯天平军节度使王承元卒丁未以河南尹严休复为平卢军节度使

八年春正月壬午朔日有食之庚寅以疾愈降囚罪放税赋移流人三年庚午以裴度充东都留守依前守司徒兼侍中丙子以华州刺史崔戎为兖海观察使夏四月丙戌诏答罪毋鞭背六月甲午以旱诏诸司虑囚丙申以前凤翔节度使杜惊为忠武军节度使秋九月庚申右军中尉王守澄宣召郑注对于浴室门赐锦彩银器冬十月辛巳幽州军乱逐其节度使杨志诚兵马使史元中自称留后庚寅以山南西道节度使李宗闵为中书侍郎同中书门下平章事壬辰召国子四门助教李仲言对于思正殿赐绯甲午李德裕罢以李仲言为翰林侍讲学士丙午以新除兴元节度使李德裕为兵部尚书十一月辛亥以左金吾卫大将军萧洪为河阳三城节度使癸丑以礼部尚书王源中为山南西道节度使成德军节度使王廷凑卒军中奉其子元逵为留后乙亥以李德裕检校右仆射充镇海军节度使丙子李仲言请改名训十二月己卯以昭义节度使郑注为太仆卿降京畿死罪以下癸未以通王为幽州卢龙节度使以史元忠为留后 【此通王当是德宗子通王湛然旧书不书其名恐有误】

九年春正月乙卯以王元逵为成德军节度使太常卿陈承宣为天平军节度使癸亥巢县公湊薨追封齐王壬申司徒李逢吉卒二月甲申以司农卿王彦威为平卢军节度使三月丙辰以史元忠为卢龙节度使丁巳剑南节度使段文昌卒庚申以杨嗣复为成都尹西川节度使乙丑以岁饥赐魏博六州粟五万石陈许郓曹濮等州各二万石夏四月丙戌以桂管观察使李从易为岭南节度使以李德裕为太子宾客分司东都丙申路随罢戊戌以新浙西观察使贾餗为中书侍郎同中书门下平章事庚子

贬李德裕为袁州长史五月戊辰以尚书左丞王璠为户部尚书判度支辛未王涯册拜司空癸酉以河中节度使王智兴为宣武军节度使六月乙亥以前宣武军节度使李程为河中节度使丁亥以左神策大将军刘沔为泾原节度使壬辰贬李宗闵为明州刺史秋七月辛亥以御史大夫李固言为门下侍郎同中书门下平章事壬戌镇海军节度使路随卒戊辰以刑部尚书殷侑为天平军节度使以吉州刺史裴泰为邕管经略使八月甲戌以户部侍郎李翱为山南东道节度使丁丑以太仆卿郑注为工部尚书充翰林侍讲学士鄜坊节度使史孝章为义成军节度使甲申以左神策大将军赵儋为鄜坊节度使九月乙卯以泾原节度使刘沔为振武麟胜节度使庚申以凤翔节度使李听为忠武军节度使癸卯杀陈宏志丁卯李固言罢以翰林侍讲学士工部尚书郑注检校右仆射充凤翔陇右节度使戊辰以右军中尉王守澄为左右神策观军容使兼十二卫统军己巳以御史中丞舒元舆为刑部侍郎翰林学士李训为礼部侍郎并同中书门下平章事壬申以刑部郎中兼侍御史知杂李孝本权知御史中丞冬十月乙亥杜惊复为陈许节度使李听为太子太保分司王涯献榷茶之利以涯为榷茶使以吏部尚书令狐楚为左仆射以刑部尚书郑覃为右仆射辛巳杀王守澄癸未以前广州节度使王茂元为泾原节度使己亥以前河阳节度使萧洪为鄜坊节度使庚子裴度进位中书令余如故十一月乙巳杀武宁军监军使王守涓丙午以大理卿郭行余为邠宁节度使丁巳以户部尚书判度支王璠为太原尹北都留守河东节度使戊午以京兆尹李石为户部侍郎判度支以京兆少尹罗立言权知府事己未以太府卿韩约为左金吾卫大将军壬戌李训及王璠郭行余郑注罗立言李孝本韩约等谋诛中官不克训奔于凤翔甲子以尚书右仆射郑覃同中书门下平章事乙丑以户部侍郎李石同中书门下平章事左神策军中尉仇士良捕杀李训王涯贾餗舒元舆李孝本罗立言王璠郭行余凤翔少尹魏逢皆族诛丁卯以左神策大将军陈君奕为凤翔节度使戊辰凤翔监军使张仲清杀其节度使郑注己巳仇士良杀韩约十二月壬申杀左金吾卫将军李贞素翰林学士顾师邕丙子以刑部尚书王源中为天平军节度使丁丑降京师死罪以下

开成元年正月辛丑朔日有食之 【按旧书云丙辰望日有蚀之厯法日食在朔月食在望望安得有日食旧书误】 大赦改元免太和五年以前逋负京畿今岁税赐文武官阶爵丁未以银州刺史刘源为夏绥银宥节度使二月昭义军节度使刘从谏表请王涯等罪名丙申加

从谏检校司徒夏四月癸酉以亳州刺史裴宏泰为义成军节度使甲午以山南西道节度使李固言为门下侍郎同中书门下平章事以左仆射令狐楚为山南西道节度使闰五月甲申以河中节度使李程为左仆射判太常卿事乙酉以李昕为河中节度使巳丑以神策大将军魏仲卿为朔方灵盐节度使六月癸亥以河南尹李绅为宣武军节度使秋七月辛未以左金吾卫将军傅毅为鄜坊节度使癸酉宣武军节度使王智兴卒辛卯以刑部尚书殷侑为山南东道节度使甲午以金吾卫大将军陈君赏为平卢军节度使九月庚辰诏复宋申锡官爵冬十二月丙申以京兆尹薛元赏为武宁军节度使庚戌以华州刺史卢钧为岭南节度使癸丑以兵部侍郎杨汝士为剑南东川节度使

二年春三月丙寅以彗星见减膳壬申素服避正殿彻乐降死罪流以下原之纵五坊鹰犬禁京畿采捕甲戌以左仆射李程为山南东道节度使己丑以金吾大将军李直臣为邠宁节度使夏四月戊戌以工部侍郎陈夷行同中书门下平章事庚申太原节度使李载义卒五月乙丑以东都留守裴度为太原尹北都留守河东节度使丙寅以浙西观察使李德裕为淮南节度使辛未以前淮南节度使牛僧孺检校司空东都留守六月丙午河阳军乱逐其节度使李泳戊申以左金吾卫将军李执方为河阳三城怀州节度使秋七月乙亥以久旱徙市闭坊门乙酉以蝗旱诏诸司虑囚八月庚戌封敬宗皇帝子休复为梁王执中襄王言扬■〈木巳〉王成美陈王封子宗俭为蒋王【■〈木巳〉王旧纪作汜王传又作纪王此从新书】冬十月癸卯宰臣判国子祭酒郑覃进石壁九经一百六十卷刊碑列于太学戊申李固言罢十一月壬戌以太子宾客分司东都殷侑为忠武军节度使丁丑兴元节度使令狐楚卒丁亥以刑部尚书郑澣为山南西道节度使

三年春正月甲子盗击李石诏大索京城丁卯追赠齐王湊为怀懿太子戊辰以诸道盐铁转运使户部尚书杨嗣复户部侍郎李珣并同中书门下平章事【此日新旧书及通鉴皆作戊申然上有下卯下有丙子则非戊申可知此据宰相表】丙子李石罢夏五月乙亥禁诸道奏祥瑞其朝享宫庙及元日受朝所奏皆停秋七月甲子以卫尉卿王彦威为忠武军节度使右金吾卫大将军史孝章为邠宁节度使九月壬戌移太子于少阳院杀太子宫人左右数十人辛未义武军节度使张璠卒其子元益自称留后壬申以易州刺史李仲迁为义武军节度使冬十月乙酉李仲迁至定州不得入壬辰以右金吾卫将军高霞寓为夏绥银宥节度使庚子皇太子暴薨乙巳以左金吾将军郭昉为邠宁庆节

度使十一月壬戌降死罪以下以沧州节度使李彦佐为郓曹濮节度使以德州刺史刘约为义昌军节度使丁卯张元益去定州壬申以蔡州刺史韩威为义武军节度使十二月辛丑以河东节度使裴度守司徒中书令以兵部侍郎狄兼谟为河东节度使

四年春闰正月甲申以吏部侍郎郑肃为河中晋绛慈隰等州节度使丙申以前河中节度使李昕为太子太保二月辛酉以吏部侍郎归融为山南西道节度使三月丙戌司徒中书令裴度薨 【裴度之死新纪不书而传系之开成三年考白居易有和裴令公三月上巳日游太原龙泉忆去岁襖洛之作是开成三年诗则度实以四年死新传以为三年误也宰相表载度于三年十二月为中书令却又不误兹据旧书又旧纪是日系丙申兹则改从通鉴云】 夏四月壬子以右羽林统军李昌言为鄜坊节度使五月丙申郑覃陈夷行罢丙午邠宁节度使郭旼卒六月辛亥以长武城使符彻为邠宁节度使秋七月壬寅以河南尹韦长为平卢军节度使甲辰以太常卿崔郸同中书门下平章事八月癸亥以左仆射牛僧孺检校司空同平章事充山南东道节度使九月甲辰以京兆尹郑复为剑南东川节度使冬十月丙寅立陈王成美为皇太子丁丑太子太保李昕卒十一月己亥曲赦京城系囚

五年春正月戊寅帝不豫己卯左右神策军护军中尉鱼弘志仇士良立颍王灏为皇太弟权勾当军国事废皇太子成美复为陈王辛巳皇帝崩于太和殿年三十三谥曰元圣昭献皇帝庙号文宗陵曰章陵

文宗太和九年开成五年凡十四年

○武宗

武宗皇帝讳炎穆宗第五子也母曰宣懿皇后韦氏始封颍王本名灏累加开府仪同三司检校吏部尚书开成五年正月文宗疾甚宰相李珣杨嗣复面奉旨以皇太子监国两军中尉仇士良鱼弘志以太子之立功不归己乃言太子幼有疾更议所立遂矫诏迎颍王于十六宅立为太弟辛巳即皇帝位于柩前杨嗣复摄冢宰癸未杀陈王成美安王溶及贤妃杨氏甲午追尊穆宗妃韦氏为皇太后二月乙卯大赦庚申开府右军中尉仇士良封楚国公左军中尉鱼弘志封韩国公夏五月己卯杨嗣复罢以刑部尚书崔珙同中书门下平章事 【旧书在二月此据新书及通鉴】 秋八月壬戌葬文宗皇帝于章陵庚午李珣罢义武军乱逐其节度使陈君赏君赏讨诛之九月甲戌以淮南节度使李德裕为吏部尚书同中书门下平章事寻兼门下侍郎以宣武军节度使李绅为淮南节度使召道士赵归真等入禁中于三殿修金篆道场帝亲受

法箴冬十月魏博节度使何进滔卒其子重霸自称留后

会昌元年春正月辛巳有事于南郊大赦改元三月甲戌以御史大夫陈夷行为门下侍郎同中书门下平章事【旧书在开成五年七月此据新书及通鉴】夏六月以何重霸为天雄军节度使仍赐名重顺秋九月癸巳卢龙军将陈行泰杀其节度使史元忠自称留后闰月牙将张绛杀行泰自称主军务雄武军使张仲武起兵讨绛冬十月以仲武知卢龙后仲武寻克幽州【考异曰旧纪十月幽州雄武军使张绛言行泰惨虐请以镇军加讨许之是月诛行泰以绛知兵马事二年正月以绛知留后仍赐名仲武以两人为一人误也】十一月癸亥崔郸罢

二年春正月以张仲武为卢龙节度使己亥李德裕进位司空回鹘寇天德及振武军二月丙寅太子太师萧俛卒丁丑以淮南节度使李绅为中书侍郎同中书门下平章事【旧书纪传俱在元年】三月以振武节度使刘沔为太原尹北京留守河东节度使夏四月丁亥羣臣上尊号曰仁圣文武至神大孝皇帝大赦赐文武官阶勋爵五月丙申回鹘唃没斯降太子太师郑覃卒六月陈夷行罢秋七月以尚书左丞李让夷为中书侍郎同中书门下平章事八月回鹘寇大同川九月诏发河东卢龙振武之师以刘沔为回鹘南面招抚使张仲武为回鹘东面招抚使李思忠为河西党项都将西南面招抚使冬十月封子峴为益王岐兖王十一月猎于白鹿原十二月丙戌封子峰为德王嵯为昌王

三年春正月庚子天德军行营副使石雄及回鹘战于黑山败之二月庚申朔日有食之甲戌崔珙罢夏四月乙丑昭义军节度使刘从谏卒其弟之子稹自称留后丁亥以忠武节度使王茂元为河阳节度使邠宁节度使王宰为忠武节度使五月辛丑削刘从谏及刘稹官爵以成德军节度使王元逵为泽潞北面招讨使魏博节度使何宏敬为泽潞东面招讨使与刘沔王茂元河中节度使陈夷行合兵进讨壬寅以翰林学士承旨崔铉为中书侍郎同中书门下平章事以武宁军节度使李彦佐为晋绛行营诸军节度招讨使六月辛酉李德裕为司徒秋七月以山南东道节度使卢钧为昭义军节度兼招抚使庚子免河东今岁秋税九月辛卯以王宰兼河阳行营攻讨使河阳节度使王茂元卒戊申以河南尹敬昕为河阳节度使庚戌以晋绛行营节度副使石雄为行营节度使冬十月己巳石雄及刘稹战于乌岭败之以河东节度使刘沔检校司空为义成军节度使以荆南节度使李石检校司空平章事兼太原尹北都留守河东节度使党项寇盐州以前武宁军节度使李颜佐为朔方灵盐节度使十一月党项寇邠宁以兖王岐为灵夏六道元帅安抚党项大使御史

中丞李回副之安南军乱逐其经略使武浑十二月丁巳王宰克天井关

四年春正月乙酉河东将杨弁逐其节度使李石壬子监军使吕义忠讨平之二月甲寅朔日有食之丁巳以河中节度使崔元式为太原尹北都留守河东节度使辛酉杨弁伏诛三月戊寅以刘沔为河阳节度使夏四月以左仆射王起同平章事充山南西道节度使六月追削左军中尉仇士良官爵己未令中书门下御史台虑囚秋闰七月壬戌李绅罢以汝南节度使检校司空杜惊为尚书右仆射兼中书侍郎同中书门下平章事仍判度支充盐铁转运等使【杜惊入相通鉴从实录在七月甲辰今从新书】丙子昭义军将裴问及邢州刺史崔嘏洺州刺史王钊磁州刺史安玉以城降八月乙未昭义军将郭谊杀刘稹以降进封何宏敬卢江郡公王元逵检校司空进封太原郡公戊戌给复昭义军五州一岁免太原河阳及怀陕晋绛四州秋税戊申李德裕为太尉进封魏国公河东节度使陈夷行卒九月以石雄为河中尹河中晋绛慈隰等州节度使以王宰检校司空为太原尹北都留守河东节度使党项寇边以子愕为开府仪同三司朔方军节度使冬十月如鄠县十二月猎于云阳

五年春正月己酉朔羣臣上尊号曰仁圣文武章天成功神德明道大孝皇帝辛亥有事于南郊大赦赐文武官阶勋爵文宣公二王三恪予一子出身作望仙台于南郊庚申义安皇太后崩夏五月壬戌杜惊崔铉罢以户部侍郎李回为中书侍郎同中书门下平章事秋七月丙午朔日有食之敕并省天下佛寺以山南东道节度使郑肃检校尚书右仆射同中书门下平章事八月壬午大毁佛寺复僧尼为民冬十月以衡山道士刘玄静为银青光禄大夫乙亥作昭武庙于虎牢关十二月如咸阳

六月春正月癸酉以旱降京城死罪以下免今岁夏税庚辰以夏州节度使米暨为东北道招讨党项使壬辰以邠宁节度使高承恭为西南面招讨党项使三月壬戌帝不豫改御名曰炎帝药发不能言左神策护军中尉马元贄立光王怡为皇太叔权句当军国政事甲子皇帝崩于大明宫年三十三谥曰至道昭肃孝皇帝庙号武宗陵曰端陵

武宗会昌六年

钦定续通志卷十四

●钦定续通志卷十五 唐纪十五

唐纪【十五】

宣宗

懿宗

○宣宗

宣宗皇帝讳忱宪宗第十三子也母曰孝明皇后郑氏长庆元年封光王始名怡会昌六年三月武宗疾笃宰相请见不许诸宦官密于禁中定策立宣宗为皇太叔更名忱丁卯即皇帝位帝幼时宫中皆以为不慧太和以后益自晦匿羣居游处未尝发言文宗每如十六宅宴集好诱其言以为戏笑谓之光叔及是哀戚满容裁决庶务咸当于理人始知其有隐德焉夏四月辛未尊母郑氏为皇太后丙子李德裕罢杖杀道士赵归真等流轩辕集于岭南以成德军节度使王元逵检校太保山南西道节度使王起魏博节度使何宏敬淮南节度使李绅并检校司空剑南西川节度使崔郸检校尚书右仆射同中书门下平章事并如故五月乙巳大赦以翰林学士承旨兵部侍郎白敏中同中书门下平章事辛酉封子温为郢王泾雅王滋蕲王沂庆王【案诸王传雅王泾大中元年始王新书载于此年疑误又按旧书此年无雍王湊而大中元年复不载封雅王事又夔王作蕲王均有脱误】秋七月李让夷罢淮南节度使李绅卒八月壬申葬武宗皇帝于端陵九月郑肃罢以兵部侍郎判度支卢商为中书侍郎同中书门下平章事以荆南节度使李德裕为东都留守冬十月甲申帝授三洞法箓于道士刘玄静【此据通鉴辑旧书于五月书诛刘玄静盖因杖杀赵归真等致误也】十一月以江西观察使周墀为义成军节度使十二月戊辰朔日有食之

大中元年春正月甲寅有事于南郊大赦改元复左降官死者官爵赐文武官阶勋父老帛文宣王及二王后三恪予一子官二月丁卯封弟惕为彭王惲棣王封子泽为濮王润鄂王以李德裕为太子少保分司东都癸未以早避正殿减膳彻乐出宫女纵鹰隼止营缮理京师系囚三月卢商罢以刑部尚书判度支崔元式为门下侍郎翰林学士承旨户部侍郎韦琮为中书侍郎并同中书门下平章事闰月大复所废佛寺夏四月己酉皇太后萧氏崩五月张仲武及奚北部落战败之吐蕃寇河西王宰以代北诸军击败之秋八月丙申李回罢冬十二月戊午贬李德裕为潮州司马

二年春正月甲子羣臣上尊号曰圣敬文思和武光孝皇帝大赦赐文武官阶勋爵宗子房未仕者予一人出身西川节度使李回责授湖南观察使桂管防御观察使郑亚贬循州刺史追夺李绅告身夏五月己未朔日有食之崔元式罢以兵部侍郎判度支周墀刑部侍郎盐铁转运使马植并同中书门下平章事己卯太皇太后郭氏暴崩秋七月己巳续图功臣于凌烟阁九月再贬李德裕为崖州司户冬十一月韦琮罢

三年春正月丙寅泾原节度使康季荣奏吐蕃以秦原安乐三州及石门等七关归于有司 【考异曰实录泾原节度使康季荣奏吐蕃宰相论恐热杀东道节度使奉表以三州七关来降献祖纪年录亦云杀东道节度使奉表国史叙论恐热事甚详至五年五月始来降此际未降也又不云杀东道节度使且恐热若以三州七关来降朝廷必官赏之何故但赏边将而不及恐热盖三州七关以吐蕃国乱自来降唐朝廷遣诸道应接之非恐热帅以来实录误耳】 诏灵武节度使朱叔明邠宁节度使张景绪各出本道兵应接之以太常卿封敖为兴元尹山南西道节度使三月乙卯诏待制官与刑法官谏官次对马植罢夏四月乙酉周墀罢以御史大夫崔铉为中书侍郎兵部侍郎判户部事魏扶并同中书门下平章事卢龙节度使张仲武卒其子直方自称留后五月武宁军乱逐其节度使李廓以义成军节度使卢宏止为武宁军节度使讨平之六月戊申以张直方为卢龙节度使康季荣奏收复原州及石门驿藏木峡制胜六盘石峡等六关秋七月丁巳朱叔明复安乐州甲子张君绪取萧关甲戌凤翔节度使李玘复秦州诏于萧关置武州改安乐州为威州八月己丑帝御延喜门楼抚慰河陇老幼没蕃复归者共赐绢十五万匹诏募百姓垦辟秦威原三州及七关土田五年不租税凤翊邠宁灵武泾原四镇将士能于镇戍之地营田者官给牛及粮种其三州七关镇戍之卒皆倍给衣粮仍二年一代剑南西川沿边没蕃州郡亦令量力收复冬十月西川节度使杜惊奏收复维州十二月甲戌以克复河湟追谥顺宗曰至德弘道大圣大安孝皇帝宪宗曰昭文章武大圣至神孝皇帝 【谨案通鉴辑览 御批唐自肃代以后河西陇右尽没吐蕃及是虽因蕃乱请降版籍徙隶强藩而田税未归司计则所云克者亦虚有其名而已】 己未崖州司户参军李德裕卒于贬所 【以上二条俱据旧书但旧书不系日此据通鉴系之然通鉴是月为闰十一月而甲戌己未相距四十五日是年又无十二月事当有误】 山南西道节度使郑涯奏收复扶州

四年春正月庚辰朔大赦夏四月壬申以霖雨诏京师关辅虑系囚免度支盐铁户部逋负六月戊申魏扶薨以户部尚书判度支崔龟从同中书门下平章事八月卢龙军乱逐其节度使张直方兵马使张允伸自称留后 【考异曰实录九月幽州大将表请押衙张允伸知留后事旧书允伸传曰大中四年戎帅周琳寝疾表允伸为留后朝廷可其奏案新书张允伸传直方出奔以都知兵马使为众立为留后天子报可无周琳为留后事故新书于三年十二月不载周琳为留后于此月亦不言允伸为周琳

表荐也】 九月以河阳三城节度使李拭为太原尹北

都留守河东节度使冬十月辛未以翰林学士承旨令狐綯为兵部侍郎同中书门下平章事十一月党项寇邠宁十二月以李拭及凤翔节度

使李业并兼招讨党项使 【新书李业作李安业】

五年春二月以右谏议大夫李福为夏绥节度使三月以白敏中为司空充招讨党项行营都统制置等使兼邠宁节度使夏四月敏中及

党项战败之党项平辛未给复邠宁鄜坊等道灵夏盐三州五岁五月以李拭为凤翔节度使李业为太原尹北都留守河东节度使六月封子

润为鄂王秋七月宰相监修国史崔龟从续成柳芳唐历二十二卷上之八月南山党项降冬十月沙州人张义潮以瓜沙伊肃鄯甘河西兰岷

廓十一州归于有司以义潮为瓜沙伊等州节度使 【考异曰唐年补录旧纪义潮降在五年八月献祖纪年录及新纪在十月案实录五年

二月壬戌天德军奏沙州刺史张义潮安景旻及部落使阎英达等上表请以沙州降十月义潮遣弟义泽以本道瓜沙伊肃等十一州地图户

籍来献河陇陷没百余年至是悉复故地十一月建沙州为归义军以张义潮为节度使河沙等十一州观察营田处置等使新书三州七关降

之明年沙州首领张义潮奉十一州地图以献擢义潮沙州防御使俄号归义军遂为节度使参考诸书盖二月义潮使者始以得沙州来告除

防御使十月又遣义泽以十一州图籍来上除节度使也新传云三州降之明年误也】

戊辰以户部侍郎魏謩同中书门下平章事白敏中罢

都统十一月崔龟从罢以沙州置归义军以张义潮为节度使十二月盗斫景陵门戟

六年春正月戊辰以陇州防御使薛逵为天雄军使兼秦成阶经畧使夏四月甲辰以白敏中为剑南西川节度使六月癸酉以刑部侍郎

毕誠为邠宁节度使闰月庚子以太子少师卢钧为河东节度使徙李业为义成军节度使秋七月丙辰李珣卒八月甲子以礼部尚书诸道盐

铁转运等使裴休同中书门下平章事九月獠寇昌资二州

七年春正月戊申有事于南郊大赦夏五月左卫率府仓曹张戣集律令格式为刑法统类上之冬十月尚书左仆射崔铉进续会要四十

卷

八年春正月丙戌朔日有食之二月南蛮进犀牛还之三月以旱虑囚夏五月以户部侍郎翰林学士承旨苏涤为江陵尹荆南节度使秋

八月以司农卿郑助为夏绥银宥等州节度使九月封子洽为怀王洵昭王汶康王

九年春正月甲申成德军节度使王元逵卒其子绍鼎自称留后二月甲戌崔铉罢三月以吏部侍郎郑涯为义武军节度使夏闰四月辛

丑禁岭外民鬻男女者五月丙寅以王绍鼎为成德军节度使秋七月浙东军乱逐其观察使李纳以旱遣使巡抚淮南减上供馈运免逋负发粟振之丙辰以尚书左仆射崔铉为淮南节度使庚申罢淮南宣歙浙西冬至元日常贡以代下户租税九月以昭义军节度使郑澗为太原尹北都留守河东节度使乙亥贬李讷为朗州刺史监军王宗景杖四十仍诏自后戎臣失律并监军坐之 【谨案通鉴辑览 御批监军理不应设直撤之可耳乃不惩掣肘之弊而转定失律并坐之条是欲去其权而反加之权也非抱薪救火而何】 冬十一月以河南尹刘瑑为宣武军节度使

十年春正月丁巳以御史大夫郑朗为工部尚书同中书门下平章事秋七月封子灌为卫王冬十月以毕诚为昭义军节度使桂管观察使令狐楚卒戊子裴休罢十一月壬辰以户部侍郎崔慎由为工部尚书同中书门下平章事

十一年春正月丙辰以京兆尹韦澳为河阳三城节度使以剑南西川节度使白敏中为江陵尹荆南节度使二月以夏绥银宥节度使郑助为邠益庆节度使以右金吾卫将军田在宾为夏绥银宥节度使辛巳魏謩罢夏四月以凤翔节度使裴识为忠武军节度使以吏部侍郎卢懿为凤翔尹凤翔陇右节度使壬申以右千牛卫大将军宋涯为安南邕管宣慰使五月容管军乱逐其经略使王球六月癸巳以涯为容管经畧使甲午封子灊为广王秋七月庚子以兵部侍郎判度支萧邺同中书门下平章事八月成德军节度使王绍鼎卒其弟绍懿自称留后以昭王洎为成德军节度大使以王绍懿为成德军副使留后以义武军节度使郑涯为宣武军节度使以四镇北庭行军泾原渭武节度使卢简求为义武军节度使以盐州刺史陆耽为泾原节度使九月以秦州刺史李承勋为四镇北庭泾原渭武节度使以礼部侍郎杜审权为陕虢都防御观察使辛酉以太子太师卢钧为检校司空同中书门下平章事兴元尹山南西道节度使冬十月壬申郑朗罢遣中使迎道士轩辕集于罗浮山以王绍懿为成德军节度使十一月太子少师郑朗卒十二月以毕诚为太原尹北都留守河东节度使以太子少保分司东都裴休为昭义军节度使以刑部尚书蒋系为凤翔尹凤翔陇右节度使

十二年春正月以康王傅分司王式为安南都护经畧使轩辕集至京师帝召入禁中留之月余坚求还山以福州刺史杨发为岭南东道节度使戊午以户部侍郎刘瑑同中书门下平章事二月甲子朔废穆宗忌日停光陵朝拜及守陵宫人戊辰崔慎由罢三月盐州监军使杨元

价杀其刺史刘皋夏四月庚子岭南军乱逐其节度使杨发戊申以兵部侍郎夏侯孜同中书门下平章事五月丙寅刘瑑薨庚辰湖南军乱逐其观察使韩琮辛巳以李承勋为岭南节度使讨乱军平之六月江西军乱逐其节度使郑宪秋七月丙寅宣州都将康全泰逐其观察使郑熏八月以崔铉兼宣歙观察使冬十月康全泰伏诛以光禄卿韦宙为江西观察使讨乱者诛之十二月甲寅以兵部侍郎蒋伸同中书门下平章事太子少保魏謩卒

十三年春正月戊午朔大赦免度支户部逋负放宫人夏四月以左金吾大将军田牟为武宁军节度使五月帝不豫秋八月壬辰立郢王温为皇太子癸巳皇帝崩于咸宜殿年五十谥曰圣武献文孝皇帝加谥元圣至明成武献文睿知章仁神聪懿道大孝皇帝庙号宣宗陵曰贞陵

宣宗大中十三年

○懿宗

懿宗皇帝讳漼宣宗长子也母曰元昭皇后鼂氏会昌六年五月封郢王本名温宣宗爱夔王滋欲立为皇太子以非次故久不决大中十三年宣宗饵道士虞紫芝及山人王乐药疽发于背八月疾甚宰相及朝士皆不得见宣宗密以夔王滋属内枢密使王归长马公儒宣徽南院使王居方等而左神策护军中尉王宗实副使丁元实排闥直入至寝殿则宣宗已崩东首环泣矣宗实叱归长等责以矫诏乃遣使迎郢王壬辰下诏立郢王为皇太子权勾当军国政事更名漼收归长公儒居方皆杀之癸巳宣遗诏以令狐綯摄冢宰丙申皇太子即皇帝位癸卯尊皇太后为太皇太后以王宗实为骠骑大将军虞紫芝王乐及医官李元伯皆伏诛九月庚申追尊鼂昭容为皇太后冬十月辛卯大赦赐文武官阶勋爵耆老粟帛以昭义军节度使裴休为太原尹北都留守河东节度使以河中节度使毕诚为宣武军节度使十一月戊午萧邺罢十二月甲申以翰林学士承旨杜审权同中书门下平章事丁酉令狐綯罢以荆南节度使白敏中为司徒门下侍郎同中书门下平章事是岁云南蛮陷播州

咸通元年春正月浙东人裘甫反观察使郑祗德战于剡西败绩二月丙申葬宣宗皇帝于贞陵三月辛亥以前安南都护王式为浙东观察使秋七月壬寅王式讨裘甫平之封宪宗子沔为信王八月己卯裘甫伏诛以裴休为凤翔尹凤翔陇右节度使以凤翔节度使卢简求为太原尹北都留守河东节度使冬十月安南都护李鄠复播州丁亥追复李德裕官爵己亥

夏侯孜罢以户部尚书毕誠同中书门下平章事十一

月丁丑有事于南郊大赦改元十二月戊申云南蛮寇安南癸亥福丁绾为司空

二年春正月诏发邕管及邻道兵救安南二月白敏中罢尚书左仆射判度支杜悰兼门下侍郎同中书门下平章事福王绾薨夏六月癸

丑以盐州防御使王宽为安南经略招讨使秋七月蛮陷邕州八月以中书舍人卫洙为义成军节度使九月蛮寇嵩州遣神策将军康承训率禁军及江西河南之兵援之

三年春正月庚午朔羣臣上尊号曰睿文明圣孝德皇帝大赦是月蒋伸罢【宰相表系己酉日己酉当在庚午之前考通鉴正月作庚

寅朔则是月不妨有己酉然于四月系己亥朔似正月又当是庚午朔也】二月庚子杜悰为司空以湖南观察使蔡袭为安南经略招讨使三

月戊寅张义潮克凉州夏四月己亥诏于两街四寺各置戒坛度人五月分岭南为东西道以邕管经略使郑愚为岭南东道节度观察处置等

使将军宋戎为岭南西道节度使【案通鉴云蔡京奏请分岭南为两节度使从之以韦宙为东道节度使以蔡京为西道节度使京为政苛

惨遂为军士所逐以观察使郑愚为岭南西道节度使至四年七月以宋戎为经略使新书于三年九月亦云岭南西道军乱逐其节度使蔡京

则郑愚宋戎此时尚未为节度使郑愚宋戎蔡京皆无传可考惟韦宙传云迁岭南节度使南诏陷交趾抚兵积备以干闻旧书云郑愚宋戎为

节度使误】秋七月武宁军乱逐其节度使温璋以浙东观察使王式为武宁军节度使讨诛之以前西川节度使夏侯孜为门下侍郎同中书

门下平章事九月岭南西道军乱逐其节度使蔡京以户部侍郎李晦为兴元尹山南西道节度使冬十月丙申封子佺为魏王佖凉王佶蜀王

杜悰为司徒十一月封顺宗子緝为蕲王宪宗子■（丕 贲）为荣王蛮寇安南诏发荆南湖南两道兵援之降囚罪免徐州秋税

四年春正月庚午有事于南郊大赦云南蛮陷安南蔡袭死之庚辰抚王紘为司空以昭义军节度使刘潼为太原尹北都留守河东节度

使二月谒十六陵【考异云拜十六陵非一日可了而旧史无还宫之日唐年补录云二月庚子一日拜十六陵尤难信也】以左散骑常侍

李荀为义成军节度使三月以户部侍郎李蟠为昭义军节度使夏四月毕誠罢以康承训为岭南西道节度使五月戊辰以翰林学士承旨杨

收同中书门下平章事戊子杜审权罢闰六月杜悰罢以兵部侍郎曹确同中书门下平章事秋七月辛卯朔日有食之免安南户税丁钱二岁

弛廉州珠池禁八月以兵部尚书毕誠为河中尹晋绛慈隰节度使加张允伸检校司徒

冬十二月蛮寇西川乙酉昭义军乱杀其节度使沈询

五年春正月以京兆尹李蟪为昭义军节度使讨乱者诛之蛮寇嵩州二月己巳以刑部尚书李福同平章事充成都尹剑南西川节度使

【旧书此作牛丛又云徐州处置观察防御使语似不伦考牛丛传以干符中为西川节度使新书亦云咸通未拜西川节度使而李福传则云

蛮侵蜀拜西川节度使同平章事则通鉴于此作李福者是也惟鉴作刑部尚书与新传作户部者不同】三月蛮寇嵩州康承训与战大败更

以捷闻加检校右仆射夏四月以兵部侍郎萧寘同中书门下平章事五月丁酉诏瘞邕嵩州死事者召募官健三千人赴邕管防戍事寘之后

替还秋八月夏侯孜为司空以康承训为右武卫大将军分司以容管经略使张茵为岭南西道节度使寻以骁卫将军高骈为安南都护本管

经略招讨使【旧书在四月新书在四年二月此据通鉴】冬十月贞陵隧陷十一月乙酉以大同军防御使卢简方为义昌军节度使戊戌

夏侯孜罢壬寅以翰林学士承旨路岩同中书门下平章事

六年春正月丁未以河东节度使孔温裕为天平军节度使丁巳始以懿安皇后配享宪宗庙三月萧寘薨夏四月以前剑南东川节度使

高璩为兵部侍郎同中书门下平章事五月以右金吾大将军李宴元为朔方节度使高骈及云南蛮战于邕州败之六月庚戌高璩薨以御史

大夫徐商为兵部侍郎同中书门下平章事秋七月封子侃为郢王俨为普王【新旧书皆不载普王此据通鉴辑】九月以吏部侍郎萧仿

为义成军节度使冬十二月壬子太皇太后郑氏崩

七年春正月戊申免河南府同华陕虢四州一岁税湖南岳州桂邕容三管夏秋税之半三月戊寅以刘潼为剑南西川节度使成德军节

度使王绍懿卒其兄子景崇自称留后加张允伸兼太保平章事进封燕国公以吏部侍郎郑从谠为太原尹北都留守河东节度使闰三月吐

蕃寇邠窳秋八月王景崇起复充成德军节度观察留后冬十月张义潮遣其将拓跋怀光入廓州擒吐蕃大将论恐热斩之传首京师是月高

骈克安南十一月壬子大赦免咸通三年逋负赐文武官阶勋爵十二月以王景崇为成德军节度使

八年夏五月丙辰以不豫降囚罪出宫人纵鹰鹞禁延庆端午节献女口杨收罢【新书在七年据传云收自四年入相凡五年则当在

是年兹从旧书】秋七月甲子以兵部侍郎于憬同中书门下平章事冬十一月辛丑以疾愈赐民痼疾及战伤者帛

九年春正月丙申以吏部侍郎李蔚为宣武军节度使加张允伸检校太傅秋七月

武宁军节度粮料判官庞勋反于桂州劫库兵北还九月戊戌以山南东道节度使卢耽为西川节度使冬十月庚午庞勋陷宿州丁丑陷徐州观察使崔彦曾判官焦潞李税温延皓崔蕴韦廷义死之十一月陷濠州刺史卢望回死之以右金吾大将军康承训为义成军节度使徐州行营都招讨使神武大将军王晏权为北面招讨使羽林将军戴可归为南面招讨使十二月庞勋陷滁州刺史高锡望死之又陷和州戴可师与战于都梁败绩死之王晏权兵屡败以泰宁军节度使曹翔代之可师死以前天雄军节度使马举代之【此从新书考方镇表沂海节度赐号泰宁军在昭宗干宁四年通鉴系之僖宗干符三年而此已称泰宁军非也又天雄此时为秦州军号马举盖前为秦州军使而通鉴于曹翔为招讨下不言马举招讨即缀前天雄军节度使何全皞之文夫全皞之继镇魏博当在十年乃新书及通鉴均系之七年又未他徙此何以有天雄节度使之称知通鉴尤误也】

十年春二月杀驩州流人杨收及镇南军节度使严譔三月辛未徙封侃为威王夏四月康承训及庞勋战于柳子寨败之六月以神策将军宋威为西北面招讨使癸卯徐商罢以翰林学士承旨刘瞻同中书门下平章事秋七月庞勋伏诛冬十月戊戌免徐宿濠泗等州三岁税役以徐州南面招讨使权知淮南节度使马举为检校司空兼淮南节度使徐州东南面招讨使曹翔为徐泗濠团练防御等使以康承训为河东节度使同平章事以泗州刺史杜慆为义成军节度使以沙陀三部落使朱邪赤心为大同军节度使赐姓名李国昌魏博节度使何弘敬卒其子全皞自称留后【新书及通鉴俱在七年此据旧书】十二月云南蛮寇嵩州又寇嘉州以蜀王佶为成都尹剑南西川节度使不出合以卢耽知节度事何全皞起复检校司空同平章事魏博节度使

十一年春正月甲寅朔羣臣上尊号曰睿文英武明德至仁大圣广孝皇帝大赦以尚书右仆射杜审权为检校司徒河中尹晋絳慈隰节度使辛酉贬康承训为蜀王傅分司东都再贬恩州司马以河阳三城节度使崔彦昭为太原尹北都留守河东节度使癸酉云南蛮寇成都二月甲申西川节度副使王建立与战于城北死之甲午东川节度使颜庆复败之于新都乙未宋威以忠武军至又大败之庚子蛮兵遁去三月曹确罢夏四月丙午以翰林学士承旨韦保衡同中书门下平章事秋八月魏博军乱杀其节度使何全皞其将韩君雄自称留后九月庚戌以君雄为魏博留后丙辰刘瞻罢冬十月癸卯以西川留后吴行鲁为节度使十一月辛亥以礼部尚书王铎同中书门下平章事以吏部侍郎郑

从说为宣武军节度使以李蔚为淮南节度使

十二年春正月卢龙节度使张允伸病请以子简会为节度副大使权知兵马事许之以韩君雄为魏博节度使夏四月癸卯路岩罢五月

庚申虑囚帝如安国寺赐讲经僧沉香高座秋七月以兵部尚书卢耽同平章事充山南东道节度使冬十月以兵部侍郎刘邺为礼部尚书同

中书门下平章事十二月以郑从说为岭南东道节度使

十三年春正月幽州卢龙军节度使张允伸卒二月牙将张公素夺其留后张简会军政自称留后丁巳于琮罢以刑部侍郎赵隐为户部

侍郎同中书门下平章事夏四月封子保为吉王杰寿王倚睦王五月乙亥杀国子司业韦殷裕以天德军防御使段文楚为云州大同军防御

使六月以张公素为卢龙军节度使秋八月归义军节度使张义潮卒以沙州长使曹义金为归义军节度使冬十月王铎为司徒韦保衡为司

空十二月徙振武军节度使李国昌为大同军防御使国昌子克用杀云州防御使段文楚据云州自称防御留后诏以太仆卿卢简方为大同

军防御使【案新书李克用杀段文楚寇遮虏军在僖宗干符五年二月而沙陀传又在干符三年与纪互异考欧阳修五代史李国昌恃功

益横恣懿宗患之十三年徙国昌云州刺史大同军防御使国昌称疾拒命子克用杀段文楚据云州自称留后唐以卢简方为振武节度使会

幽并兵讨之简方行至凤州军溃由是沙陀侵掠代北为边患矣明年僖宗即位以李钧为灵武节度使以招辑之拜克用大同军防御使居久

之国昌出击党项既为赫连铎袭破振武克用自云州往迎国昌而云州人闭关拒之国昌父子无所归因掠蔚朔得兵三千国昌入保蔚州克

用还据新城僖宗乃拜铎大同军使李钧代北招讨使以讨沙陀干符五年沙陀破遮虏军又破岢岚军而唐兵数败沙陀由此益炽与旧书正

同又案旧书咸通十三年克用既杀段文楚诏卢简方招论之国昌不奉诏自是沙陀侵掠代北诸军镇新书于咸通十四年正月亦云沙陀寇

代北则杀段文楚当在十三年十二月也今从旧书备载于此而沙陀寇遮虏军则仍依新书载于干符五年】 追谥宣宗为元圣至明成武献

文睿知章仁神聪懿道大孝皇帝

十四年春正月沙陀寇代北辛未使卢简方招谕之国昌不奉命诏太原节度使崔彦昭幽州节度使张公素以师讨之三月以新除大同

军使卢简方为单于大都护振武节度使简方行至岚州卒癸巳迎佛骨于凤翔夏四月壬寅佛骨至京师迎入禁中三日出置安国崇化寺大

赦降中外系囚五月丁亥西川节度使路岩兼中书令云南蛮寇西川又寇黔南经略使

秦匡谋弃城走六月乙未敕斩之王铎罢秋七月帝不
豫戊寅疾大渐庚辰立普王俨为皇太子权句当军国政事辛巳皇帝崩于咸宜殿年四
十一岁谥曰睿文昭圣恭惠孝皇帝庙号懿宗陵曰简
陵

懿宗咸通十四年

钦定续通志卷十五

●钦定续通志卷十六 唐纪十六

唐纪 【十六】

僖宗

○僖宗

僖宗皇帝讳儂懿宗第五子也母曰惠安皇后王氏初封普王名俨咸通十四年七
月懿宗疾大渐左军中尉刘行深右军中尉韩文约定
计立普王为皇太子更名儂辛巳懿宗崩皇太子即皇帝位于柩前时年十二以韦保衡
摄冢宰刘行深韩文约居中执政并封国公八月丁未
追尊母王氏为皇太后乙卯韦保衡进司徒九月贬韦保衡为贺州刺史加路岩兼侍中
王景崇中书令韩君雄张公素天平军节度使高骈并
同平章事君雄仍赐名允中冬十月乙未以尚书左仆射萧仿为中书侍郎同中书门下
平章事再贬韦保衡为澄迈令寻赐死癸卯大赦十一
月戊辰以路岩为荆南节度使尚书右仆射萧邺同平章事充河东节度使太子少傅于
琮为山南东道节度使十二月以佛骨还凤翔贬路岩
为新州刺史

干符元年春二月甲午葬懿宗皇帝于简陵癸丑降死罪以下赵隐罢以华州刺史
裴坦为中书侍郎同中书门下平章事三月以京兆尹
窦滸为太原尹北都留守河东节度使以河东节度使崔彦昭为兵部侍郎充诸道盐铁
转运使夏四月辛卯以旱虑囚五月乙未裴坦薨以刑
部尚书刘瞻为中书侍郎同中书门下平章事以岭南东道节度使郑从谠为刑部尚书
吏部侍郎韦荷为岭南东道节度使秋七月以礼部侍
郎裴瓚为湖南观察使八月辛未刘瞻薨以兵部侍郎判度支崔彦昭为中书侍郎同中
书门下平章事右谏议大夫崔胤为给事中冬十月刘
邺罢以吏部侍郎郑畋为兵部侍郎翰林学士承旨户部侍郎卢携同中书门下平章事
十一月庚寅改元羣臣上尊号曰圣神聪睿仁哲孝皇
帝以萧仿为司空魏博节度使韩允中卒其子简自称留后以宣慰沙陀六州部落检校
兵部尚书李钧为灵武节度使云南蛮寇西川黎州刺
史黄景复击败之蛮复寇大渡河景复与战败绩十二月党项回鹘寇天德军徐州盗起

州县不能禁诏兖郛等道出兵讨之蛮陷黎州又寇雅
州西川节度使牛丛豫焚城外民居诏发河西河东山南西道东川兵援之仍命天平军
节度使高骈诣西川制置其事【旧书高骈为西川
节度使在四月此据通鉴大约旧书自文宗以下丛杂脱误而年月更多舛互此并据新
书及通鉴辑之附识于此】骈奏勒回所发左右神策
长武镇鄜坊河东援兵诏止勒回河东兵以韩简为魏博留后商州民乱逐其刺史王枢
以李诰为商州刺史捕斩之右军中尉韩文约以疾致
仕是岁濮州人王仙芝反

二年春正月丙戌以高骈为西川节度使蛮引去辛卯有事于南郊大赦赐文武官
阶勋爵文宣王及二王后三恪一子官以知内枢密田
令孜为右军中尉高骈及云南蛮战大渡河败之蛮请和三月以韩简为魏博节度使夏
四月浙西突阵将王郢反陷苏州常州又转掠二浙及
福建加王景崇兼侍中以吏部侍郎张昺为京兆尹东川点检兵马使吴行鲁为剑南东
川节度使以东川节度使崔充为河南尹以河南尹李
晦为福建都团练观察使五月以太傅分司令狐绀同平章事充凤翔陇右节度使进封
赵国公萧仿薨六月王仙芝及其党尚君长攻陷濮州
及曹州天平军节度使薛崇出兵击之为贼所败宛句人黄巢亦聚众应之以吏部尚书
李蔚为中书侍郎同中书门下平章事卢龙军将李茂
勋逐其节度使张公素自称留后秋七月以蝗避正殿减膳以大理卿蔡行为丰州刺史
天德军防御使京兆尹张昺为天平军节度使八月以
李茂勋为卢龙节度使冬十月昭义军将刘广逐其节度使高湜自为留后以左金吾大
将军曹翔为昭义军节度使以前大同军使李瑄为天
德军丰州西城中城都防御使十一月诏淮南忠武宣武义成天平五军节度使及监军
使讨捕羣盗十二月王仙芝陷沂州以平卢节度使宋
威为诸道行营招讨使河南镇所遣讨贼都将并取处分

三年春正月诏福建江西湖南诸道观察刺使皆训练士卒又令天下乡村各置弓
刀鼓板以备寇盗以左金吾卫大将军齐克让为兖沂
海等州节度使二月丙子以旱降死罪以下三月葬暴骸卢龙军节度使李茂勋立其子
可举为留后自请致仕诏茂勋以左仆射致仕以寿王
杰为幽州经略卢龙等军观察押奚契丹等使李可举为节度留后夏四月原州军乱逐
其刺史史怀五月庚子以旱虑囚免浙东西今岁税以
李可举为卢龙节度使六月乙丑以抚王紘为太尉寻薨秋七月以前岩州刺史高杰为
左骁卫将军充沿海水军都知兵马使以讨王郢镇海
军节度使裴璩及王郢战败之加韩简同平章事宋威及王仙芝战于沂州城下大破之

八月仙芝陷阳翟郟城诏忠武节度使崔安潜发兵击之以左散骑常侍曾元裕为招讨副使守东都又诏山南东道节度使李福守汝邓要路仙芝进逼汝州诏邠宁节度使李侃凤翔节度使令狐绹守陕州潼关九月乙亥朔日有食之丙子王仙芝陷汝州执其刺史王镣乙酉诏赦王仙芝尚君长罪仙芝陷阳武攻郑州昭义监军判官雷殷符击败之以太府卿李峯为义成军节度使冬十月王仙芝尚君长攻邓州复攻郢州皆陷之王郢请降以为右率府率十二月王仙芝陷申光庐寿舒通等州平庐义昌军戍安南还至桂州逐其观察使李瓚以右谏议大夫张禹谩为桂州观察使王仙芝寇蕲州

四年春正月丁丑降死罪以下二等流人死者听收葬以崔彦昭为司空王郢诱执温州刺史鲁实昭以右龙武大将军宗皓为江南诸道招讨使其先征诸道兵外更发忠武宣武感化三道兵益之二月郢寇明州又陷台州王仙芝陷鄂州黄巢陷郢州节度使薛崇死之闰月崔彦昭罢以宣武军节度使王铎检校司徒兼门下侍郎同中书门下平章事王郢伏诛三月黄巢陷沂州夏四月壬寅朔日有食之陕州军乱逐其观察使崔碣五月庚戌以给事中杨损为陕虢观察使讨首乱者诛之以彗见避正殿减膳六月以王铎为司徒江西贼柳彦璋陷江州执刺史陶祥以汝州防御使李钧为昭义军节度使幽州李可举请以本军讨沙陀三部落从之秋七月黄巢王仙芝合寇宋州八月陷安州乙卯陷随州执刺史崔休征李福遣其子将兵救随州死之盐州军乱逐其刺史王承颜沙陀寇云朔二州冬十月邠宁节度使李侃讨盐州乱者平之河东军乱逐其节度使刘侔以京兆尹窦璟为河东宣尉制置使黄巢寇蕲黄曾元裕击败之十一月己酉以窦璟为河东节度使尚君长降宋威劫杀之黄巢陷匡城遂陷濮州江州刺史刘秉仁擒柳彦璋斩之王仙芝寇荆南

五年春正月丁酉陷江陵外郛李福自襄阳驰救王仙芝引去壬寅曾元裕与战于申州败之罢宋威招讨使以元裕代之颍州刺史张自勉为副使庚戌以高骈为荆南节度使兼盐铁转通使二月沙陀陷庶虜军曾元裕及王仙芝战于黄梅斩之尚君长之弟尚让率余众归于黄巢其别将王重隐陷饶州刺史颜标死之江西贼徐唐莒陷洪州加李福同平章事黄巢陷濮州转寇河南三月羣盗陷朗州岳州黄巢自滑州掠宋汴以张自勉充东南面行营招讨使黄巢自滑州掠寇叶阳翟复引兵渡江陷虔吉饶信等州湖南军乱逐其观察使崔瑾夏四月以李国昌为大同军节度使饶州将彭令璋复饶州徐唐莒伏诛五月丁酉郑畋卢携罢以翰林学士承旨户部侍郎豆卢瑑为兵部侍郎吏部侍郎崔

流为户部侍郎并同中书门下平章事李国昌不受命寇盩厔及岢岚军六月以前昭义军节度使曹翔为河东节度使以高骈为镇海节度使沙陀寇沂州八月陷岢岚军黄巢寇宣州遂由浙东寇福建诸州九月宋威卒辛丑以曾元裕领平卢节度使壬寅曹翔卒李蔚罢以吏部尚书郑从谠为中书侍郎同中书门下平章事以户部尚书李都同平章事充河东节度使冬十月诏李钧李可举与吐谷浑酋长赫连铎等合兵讨沙陀十一月以河东宣慰使崔季康为太原尹北都留守河东节度使代北行营招讨使沙陀寇石州庚戌崔秀康救之十二月甲戌黄巢陷福州庚辰崔季康李钧及沙陀李克用战于洪谷败绩钧死之 【新书在广明元年八月作昭义军乱杀其节度使李钧】

六年春正月高骈遣兵分道击黄巢屡破之降其将秦彦毕师铎李罕之等巢遂趋广南二月辛未河东军乱杀其节度使崔季康辛巳以陕虢观察使高浚为昭义军节度使以邠宁节度使李侁为太原尹北都留守河东节度使三月天平军节度使张勣卒其将崔君裕权知州事淄州刺史曹全晷讨诛之夏四月庚申朔日有食之以王铎守司徒充荆南节度使南面行营招讨都统五月以泰宁军节度使李系为副都统兼湖南观察使秋八月以检校司空东都留守李蔚检校司徒同平章事兼太原尹北都留守河东节度使九月黄巢陷广州岭南节度使李迢死之冬十月以高骈检校司徒同平章事充淮南节度使江淮盐铁转运江南行营招讨等使进封燕国公以泾原节度使周宝为镇海节度使以山南东道行军司马刘巨容为节度使癸未黄巢陷潭州闰月陷泮州刺史李绚死之进逼江陵王铎趋襄阳江陵守将刘汉宏大掠江陵己丑李蔚卒十一月戊午以河东行军司马康传圭为河东节度使以定州制置使王处存为义武军节度使黄巢趋襄阳刘巨容与江西招讨使曹全晷合击于荆门败之罢全晷招讨使以泰宁都将段彦谟代之黄巢复寇鄂州转掠饶信池宣歙黄等州十二月贬王铎为太子宾客分司东都以兵部尚书卢携为门下侍郎同中书门下平章事太子宾客郑畋为凤翔节度使是年朗州贼周岳陷衡州逐其刺史徐颢荆南将雷满陷朗州刺史崔勣死之石门蛮向瓌陷泮州权知州事吕自牧死之桂阳贼陈彦谦陷郴州刺史董岳死之

广明元年春正月乙卯朔改元免岭南荆湖河中河东税赋十之四戊寅荆南监军杨复光与段彦谟杀其守将宋浩以常滋为节度留后淮南将张滂及黄巢战于大云仓败之二月沙陀逼太原陷大谷河东军乱杀其节度使康传圭壬子以郑从谠检校司空充河东节度使代北

行营招讨使三月庚午以左金吾大将军陈敬瑄为四川节度使辛未以旱避正殿减膳以高骈为诸道行营都统夏四月丁酉以太仆卿李琢为蔚朔等州招讨都统壬寅张潏克饶州以李琢为蔚朔节度使仍充都统汝州防御使诸葛爽为招讨副使以神策军将杨师立为剑南东川节度使牛勣为山南西道节度使工部侍郎郑绍业为荆南节度使五月丁巳以诸葛爽为振武节度使泰陵军将刘汉宏反张潏及黄巢战于信州死之六月黄巢陷睦婺宣三州刘汉宏寇申光二州秋七月黄巢陷滁和二州辛酉以曹全晷为天平军节度使东面副都统刘汉宏请降戊辰以为宿州刺史李可举及李国昌战于药儿岭大败之国昌与克用奔于达靺九月忠武军将周岌杀其节度使薛能牙将秦宗权自称权知蔡州事冬十月以诸葛爽为夏绥节度使黄巢陷申州十一月河东将王重荣逐其节度使李都甲寅以刘汉宏为浙东观察使诏郑从谏以本道兵会诸葛爽及代州刺史朱玫南讨黄巢辛酉以王重荣为河东留守黄巢陷汝州壬戌如左神策军阅武以护军中尉田令孜为诸道兵马都指挥制置招讨使忠武军监军杨复光副之丁卯东都留守刘允章叛附于黄巢东都陷壬申巢陷虢州以神策军将罗元杲为河阳节度使以周岌为忠武军节度使田令孜为汝洛晋绛同华都统十二月庚辰泰宁节度使齐克让及黄巢战于潼关败绩壬午巢陷潼关塞粮料使王师会死之把截使兵马先锋张承范脱身走巢入华州河中王重荣叛附于巢癸未以巢为天平军节度使甲申贬卢携为太子宾客分司东都以翰林学士承旨王徽为户部侍郎户部侍郎裴澈为工部侍郎同中书门下平章事帝与诸王妃主数百骑自金光门西出丙戌左金吾卫大将军张直方等叛附于黄巢巢遂陷京师辛卯车驾次凤翔丙申诸葛爽叛附于巢丁酉车驾至兴元诏诸道各出全军收复京师黄巢僭称尊号豆卢瑑崔沆左仆射于琮右仆射刘邺太子少师裴谏御史中丞赵蒙刑部侍郎李溥京兆尹李汤将作监郑綦库部郎中郑系及广德公主死之王处存以兵入援王重荣去贼复归引兵营于渭北

中和元年春正月车驾发兴元加牛勣同平章事壬申以工部侍郎判度支萧遘同平章事丁丑车驾至成都二月己卯以太子少师王铎守司徒同中书门下平章事加高骈京城四面都统郑从谏侍中依前行营招讨使三月辛亥黄巢将朱温陷邓州壬子加陈敬瑄同平章事辛酉以郑畋为京城四面诸军行营都统听以墨敕除官黄巢寇凤翔畋与战于龙尾坡败之王徽罢诸葛爽奉表自归以为河阳节度使甲子郑畋传檄天下藩镇合兵讨贼诏召李克用于达靺夏四月以宥州刺史拓跋思恭权知夏

绥节度使 【思恭欧阳修五代史作思敬陈后山谈

从云拓拔思恭思敬兄弟也而五代史误作一人今考旧唐书旧五代史宋史及通鉴其与破黄巢者皆作石拔思恭或作李思恭而拓跋思敬

在欧史又见于前蜀世家为武定节度使文苑英华亦载有张元晏授李思敬武定军节度使制文据欧史李仁福传思敬卒于干宁二年固不

应至天复二年而思敬尚在洋州也又考五代史纂误所录李仁福传文凡今之作思敬者俱作思恭且意洋州之思敬为其族人则疑吴氏时

史文本是思恭而后人以宋讳敬字展转改写遂误混两人为一人也】 黄巢将王玫据邠州通塞镇将朱玫起兵诛之泾原节度使程宗楚朔

方节度使唐弘夫及黄巢战于咸阳败之壬午巢遁丁亥复入京师宗楚弘夫死之以王重荣为河中节度使五月甲子李克用掠太原振武节

度使契苾璋败之王重荣高浚克华州六月辛卯邠宁节度副使朱玫及黄巢战于兴平败绩戊戌郑畋为司空同中书门下平章事都统如故

鄆贼鍾季文陷明州秋七月丁巳大赦改元庚申以翰林学士承旨兵部侍郎韦昭度同中书门下平章事丙寅神策军将郭祺反伏诛辛未田

令孜杀左拾遗孟昭图以王处存为东南面行营招讨使朱玫为邠宁节度使八月感化军将时溥逐其节度使支详自称留后高浚及黄巢战

于石桥败绩巢复陷华州九月辛酉封子震为建王临海贼杜雄陷台州昭义军将成麟杀其节度使高浚己巳孟方立杀成麟自称留后永嘉

贼朱褒陷温州冬十月凤翔行军司马李昌言逐其节度使郑畋十一月以昌言为凤翔节度行营招讨使郑畋裴澈罢遂昌贼卢约陷处州十

二月以时溥为感化军节度使是岁霍邱镇使王绪反陷寿州光州

二年春正月辛亥以王铎为诸道行营都都统权知义成军节度使承制封拜太子少师崔安潜副之高骈罢都统辛未以王处存拓跋思

恭鄆延节度使李孝章为京城东南北面都统以右神策观军容使西门思恭为行营都监杨复光为南面行营都监二月黄巢陷同州己卯以

太子少傅郑畋为司空同中书门下平章事召赴行在以李昌言为京城西面都统朱玫为河南都统诸谷防遏使 【胡三省曰朱玫时镇邠

宁安得出关东统河南诸镇此河南盖自龙门河东至蒲津一带大河南岸也】 三月邛州蛮阡能反李克用陷蔚州夏五月加高骈兼侍中罢

盐铁转运使六月以泾原留后张钧为节度使以朱玫为京城西北面行营都统西川部将杨行迁及阡能战于干溪败绩秋七月己巳以抚州

刺史鍾传为江西观察使以保大军留后东方逵为节度使京城东北面行营都统拓跋思恭为京城四面都统闰月加韩简兼侍中八月以兵

部侍郎郑绍业同平章事兼荆南节度使刘汉宏寇浙西杭州刺史董昌遣兵马使钱鏐击败之韩简陷孟州九月丙戌黄巢将朱温以同州降以为金吾右卫大将军河中行营招讨副使赐名全忠岭南西道军乱逐其节度使张从训平卢军将王敬武逐其节度使安师儒自称留后冬十月岚州刺史汤羣叛附沙陀韩简寇郢州曹全晷拒之败死部将崔用自称留后十一月荆南军乱牙将陈儒自称留后丙子汤羣伏诛王铎以墨敕召李克用赴难克用以兵趋河中十二月以克用为雁门节度使庚戌王景崇卒以其子镠为成德军留后是岁孟方立迁其军于邢州南城贼危全讽陷抚州危仔倡陷信州卢州将杨行密逐其刺史郎幼复和州刺史秦彦逐宣歙观察使窦滂

三年春正月乙亥以李克用为京城东北面行营都统王铎罢二月壬子李克用合河东义武忠武军与尚让战于梁田陂败之魏博军乱杀其节度使韩简其将乐彦桢自称留后【考异曰旧传简攻河阳为诸葛爽所败单骑奔迴忧愤疽发背而卒时中和元年十一月也新传亦同今从实录】己未以建王震为太保三月壬申李克用王重荣及尚让战于零口败之己丑以朱全忠为宣武军节度使癸巳李克用克华州夏四月甲辰及黄巢战于渭桥大败之巢遁去丙午复京师五月以郑畋为司徒以郑从谏为司空同中书门下平章事以李克用检校司空同平章事太原尹北都留守以河东节度使王处存检校司徒王重荣检校司空俱同平章事余如故朱全忠检校司空朱玫东方逵俱同平章事王铎检校太师中书令进封晋国公杨复光加开府仪同三司淮南将张怀陷复州奉国军节度使秦宗权叛附于黄巢秋七月以朱全忠为东北面都招讨使郑畋罢以兵部尚书裴澈同中书门下平章事以王镠为成德军节度使乐彦桢为魏博节度使赐陈敬瑄铁券八月甲辰以前振武军节度使李国昌为代北节度使以湖南观察使闵勛为钦化军节度使【时升湖南为钦化军】黄巢秦宗权寇陈州淮南将韩师德陷岳州九月以时溥为东面兵马都统冬十月全椒贼许勛陷滁州李克用取潞州李国昌卒十一月壬申剑南西川行军司马高仁厚及阡能战于邛州败之十二月忠武军将鹿晏宏陷兴元逐其节度使牛勛自称留后【旧书牛勛作牛蔚新书五代史俱作牛丛考丛与蔚俱牛僧孺子新书丛传不言镇兴元蔚传惟言为山南西道节度使以吴行鲁代还亦不言为鹿晏宏等所逐也此从新纪作勛然宦者传则又作琐云】是岁天平军将曹存实克郢州

四年春正月以鹿晏宏为兴元留后婺州将王镇执其刺史黄碣二月镇伏诛浦阳

镇将蒋瓌陷婺州舒州贼吴迥逐其刺史高瀛三月甲子杨师立反以陈敬瑄为西川东川山南西道都指挥招讨使前杭州刺史路审中陷鄂州夏五月辛酉朱全忠及黄巢战败之辛未李克用及巢战于宛句又败之癸酉以高仁厚为剑南东川节度使讨杨师立壬午福建团练使陈岩逐其观察使郑镒自称留后六月壬辰杨师立伏诛以高仁厚为东川节度使乙卯赦剑南三川瘞京城骸骨秋七月壬午黄巢伏诛加李克用阶特进封陇西郡王八月克用请以弟克修为昭义军节度使由是昭义分为二镇九月己未加朱全忠同平章事鹿晏宏反冬十月以萧遘为司空十一月鹿晏宏陷许多杀节度使周岌自称留后以义成军节度使王铎为义昌军节度使【时横海军更号义昌军】十二月甲午荆南行军司马张瓌逐其节度使陈儒自称留后盗杀王铎于漳南是岁濮州刺史朱宣逐天平军节度使曹存实自称留后武昌军将杜洪陷岳州以凤翔留后李昌符为凤翔节度使

光启元年春正月己卯车驾发成都庚辰荆南军将成纳陷归州是月王绪陷汀漳二州南康贼卢光稠陷虔州秦宗构寇颍州亳州朱全忠与战于焦夷败之三月丁卯至自成都己巳大赦改元以时溥为蔡州四面行营兵马都统讨秦宗权李可举攻易州以萧遘为司徒韦昭度为司空闰月秦宗权寇荆南以朱全忠为西北面行营都统夏四月吴迥伏诛秦宗权陷襄州山南东道节度使刘巨容奔于成都武当贼冯行袭陷均州以田令孜为左右神策十军使五月羣臣上尊号曰至德光烈皇帝六月卢龙军将李全忠杀其节度使李可举目称留后壬戌秦宗权陷东都秋七月义昌军乱逐其节度使杨全玫牙将卢彦威自称留后以保銓都将曹诚检校太保充义昌军节度使八月光州贼王潮执王绪甲寅杀右补阙常浚乐彦禎杀洺州刺史马爽九月王重荣以河中拒命诏朱玫讨之冬十月癸丑朱全忠及秦宗权战于双邱败绩十一月李克用叛合于王重荣重荣攻同州刺史郭璋死之十二月癸酉朱玫及王重荣李克用战于沙苑败绩乙亥克用进逼京师丙子帝如凤翔

二年春正月辛巳朔李克用还军河中表请大驾还宫仍数田令孜之罪戊子田令孜劫帝如兴元癸巳朱玫反以兵追逼乘舆帝发宝鸡以杨晟为感义军节度使李昌符叛合于朱玫军驾入散关二月辛亥以田令孜为西川监军以前东都留守郑从谏为太傅三月壬午山南西道节度使石君涉弃镇奔凤翔合于朱玫遂州刺史郑君雄陷汉州丙申车驾至兴元戊戌以翰林学士承旨兵部尚书杜让能刑部尚书孔纬并为兵部侍郎同中书门下平章事保銓都将李鋌杨守亮等败朱玫军于凤州夏四月

壬子朱玫李昌言奉嗣襄王熿权监军国事玫自为大丞相兼左右神策十军使以熿入于京师五月庚辰熿僭即皇帝位遣户部侍郎杨涉宣谕江淮吏部侍郎夏侯潭宣谕河北诸藩镇多受其伪署惟义武宣武河东河中拒不受【案新书四月朱玫以襄王熿入于京师十月自立为皇帝十二月伏诛考熿传不着月日第云熿即伪位凡九月败新纪与传不合旧纪自四月监军国事至十二月熿败凡九月也】六月己酉以扈跸都将杨守亮为金商节度使淮西将黄皓杀钦化节度使闵頊衡州刺史周岳陷潭州自称节度使朱玫将王行瑜率邠宁河西之师屯凤州保塞都将李鋌李茂贞陈佩等拒之于大唐峯秋七月戊寅秦宗权陷许州杀鹿宴宏以杨守亮检校司徒充山南东道节度使王行瑜寇兴州守亮击败之八月王潮陷泉州卢龙节度使李全忠卒其子匡威自称留后九月戊寅王行瑜陷兴凤二州杨守亮败邠军于凤州冬十月义成军乱逐其节度使安师儒师儒奔汴州朱全忠杀之遂攻滑州据之以全忠兼领义成军节度使丙辰董昌攻越州刘汉宏奔台州是月河阳节度使诸葛爽卒其子仲方自称留后神策行营先锋使满存克兴凤二州武宁军将张雄陷苏州十一月庚子秦宗权陷郑州十二月壬子台州刺史杜雄执刘汉宏降于董昌昌自称浙东观察使丙辰朱玫伏诛丁巳襄王熿伏诛秦宗权陷孟州诸葛仲方奔汴州是岁天平军将朱瑾逐泰宁军节度使齐克让自称留后杜洪陷鄂州自称武昌军节度留后

三年春正月乙亥以邠州都将王行瑜为邠宁庆节度使保塞都将李鋌检校司空充黔中节度使扈跸都头李茂贞为武定军节度使杨守宗为金商节度使保塞都将陈佩为宣歙观察使右卫大将军顾彦朗为东川节度使二月戊辰削田令孜官爵三月癸未萧遘裴澈郑昌图以罪伏诛壬辰车驾至凤翔郑从谏罢以韦昭度为司空癸巳镇海军将刘浩逐其节度使周贺自称留后夏四月甲辰六合镇遏使徐约陷苏州逐其刺史张雄甲子淮南兵马使毕师铎陷扬州执其节度使高骈五月甲戌宣歙观察使秦彦入于扬州癸未秦宗权陷郑州六月河阳将李罕之入于孟州张全义入于东都已酉李昌符复反庚戌犯大安门不克出奔陇州以李茂贞为陇州招讨使丁巳护国军将常行儒杀其节度使王重荣重荣兄重盈自称留后秋七月丁亥降死罪以下李昌符伏诛以李茂贞检校司空同平章事充凤翔节度使八月以韦昭度为太保壬子朱全忠取曹州九月以户部侍郎张璇为兵部侍郎同中书门下平章事秦彦杀高骈冬十月丁未朱全忠取濮州甲申封子升为益王

杭州刺史钱鏐取常州是月秦宗权将孙儒寇扬州十一月壬申庐州刺史杨行密入于扬州十二月癸巳淮西将赵德諲陷江陵杀荆南节度使张瓌饶州刺史陈儒取衢州上蔡贼冯德章陷蕲州

文德元年春正月孙儒杀秦彦毕师铎癸亥以朱全忠为蔡州四面行营都统【考异曰编遗录二月丙戌奉唐帝正月二十五日制命授蔡州四面行营都统则丙戌乃全忠受诏之日实录薛居正五代史皆云丙戌因此而误也旧纪五月丁酉朔制以全忠为蔡州都统月日尤误】二月魏博军乱杀其节度使乐彦祯其将罗弘信自称留后乙亥帝不豫己丑至自凤翔庚寅谒太庙大赦改元韦昭度孔纬杜让能并赐号持危启运保义功臣左右神策十军观军容使杨复恭进封魏国公赐号忠贞启圣定国功臣李罕之攻绛州又攻晋州张全义袭河阳入之遂兼领河阳节度使三月戊戌朔日有食之壬寅帝疾甚立寿王杰为皇太弟句当军国事癸卯皇帝崩于武德殿年二十七谥曰惠圣恭定孝皇帝庙号僖宗陵曰靖陵

僖宗干符六年广明一年中和四年光启三年文德一年凡十五年

钦定续通志卷十六

●钦定续通志卷十七 唐纪十七

唐纪【十七】

昭宗一

○昭宗【一】

昭皇帝讳晔懿宗第七子僖宗同母弟也【新书作母曰恭宪皇太后王氏后妃传惠安皇后生僖宗而恭宪皇后自生昭宗旧书后妃传有惠安无恭宪而昭宗追上尊号亦云加惠安为恭宪则祇是一人今从之】始封寿王名杰干符三年授开府仪同三司领幽州大都督幽州卢龙等军节度押奚契丹管内观察处置等使僖宗遇乱再出奔寿王握兵符侍左右尤见倚信文德元年三月僖宗疾大渐羣臣以吉王长欲立之观军容使杨复恭率兵迎寿王于六王宅入居少阳院立为皇太弟改名敏乙巳即皇帝位于柩前韦昭度摄冢宰帝体貌明粹有英气喜文学以僖宗威令不振朝廷日卑有恢复前烈之志尊礼大臣号令天下践阼之始中外皆忻忻焉朱全忠败魏军于内黄李克用攻河阳夏四月庚午追尊帝母惠安太后曰恭宪以韦昭度为中书令孔纬为司空壬午孙儒陷扬州自称淮南节度使复攻宣州朱全忠遣其将救河阳河东军引去以丁会为河阳留后张全义复为河南尹成纳陷江陵自称留后辛卯朱全忠及秦宗权战于蔡州败之五月壬寅赵德諲以襄州

降以德誨为忠义军节度使蔡州四面行营副都统李茂贞加检校侍中六月阆州防御使王建陷汉州遂寇成都征陈敬瑄为龙武统军以韦昭度检校司徒门下侍郎平章事充剑南西川节度两川招抚制置使秋七月李罕之引河东兵攻河阳丁会击却之以凤州防御使满存为节度使同平章事以魏博留后罗弘信为节度使八月戊辰朱全忠克蔡州南城冬十月孟方立袭辽州李克修击败之辛卯葬僖宗皇帝于靖陵陈敬瑄拒命十一月朱全忠及时溥战于吴康镇败之全忠取宿州丙申秦宗权陷许州辛酉奉国军将申丛执秦宗权十二月丁亥以韦昭度为行营招讨使永平军节度使王建充行营都指挥使讨陈敬瑄 【时以邛州置永平军】 山南西道节度使杨守厚陷夔州

龙纪元年春正月癸巳朔大赦改元以翰林学士承旨兵部侍郎刘崇望同中书门下平章事宣武军将郭璠杀其留后申丛自称留后二月己丑秦宗权伏诛三月以孔纬为司徒杜让能为司空丙申钱鏐取苏州加蔡州节度使赵犛同平章事充忠武军节度使夏四月壬戌以朱全忠为检校太尉中书令进封东平王六月李克用取磁洛二州邢磁洛节度使孟方立卒其弟迁自称留后李克用进攻邢州杨行密攻宣州取之杀宣歙观察使赵锽诏以行密为宣歙观察使庐州刺史蔡侔叛附于孙儒冬十月己卯平卢军节度使王敬武卒其子师范自称留后以太子少师崔安潜检校太傅兼侍中充平卢军节度使王师范杀棣州刺史张蟾 【案张蟾之败旧书在大顺二年二月 又案新书于此等争杀之事例云某陷某州某官死之意谓合春秋之法其实当藩镇吞噬之时一彼一此惟力是视失守殒命本无节烈之可言即如此张蟾之事第以青帅已死子又甚少覬覦建节力屈就毙初非有忠君奉国之心他如克用全忠等争城争地类多得自攘夺者而新书例以寇若陷书之此正如刘知几所谓以此而拟春秋貌同心异者也兹故曰拔曰取曰杀皆据事直书而着其说于此】 杨行密取常州杀其刺史杜棱钱鏐取润州十一月己酉有事于南郊帝更名曰晔大赦十二月壬申眉州刺史山行章叛附于王建壬午孙儒陷常州及润州以孔纬为太保杜让能为司徒

大顺元年春正月戊子朔羣臣上尊号曰圣文睿德光武弘孝皇帝大赦改元李克用克邢州孟迁降之壬寅简州将杜有迁执其刺史员虔嵩叛附于王建二月丁巳率百官料钱修国学己未资州将侯元绰执其刺史杨戡叛附于王建乙丑加朱全忠守中书令朱全忠将庞师古及孙儒战于陵亭败绩三月戊申昭义节度使李克修卒李克用表其弟克恭知留后事

夏四月丙辰李克用将安金俊攻云州防御使赫连铎求援于幽州李匡威以兵赴之战于蔚州河东军大败宿州将张筠逐其刺史张绍光附于时溥溥军于殽山全忠击败之乙丑蜀州刺史任从海与王建战于邛州败绩丙寅嘉州刺史朱实叛附于王建丙子戎州人文武坚执其刺史谢承恩叛附于王建五月削李克用官爵属籍以张浚为河东行营都招讨宣慰制置使京兆尹孙揆副之镇国军节度使韩建为北面行营招讨都虞候兼供军粮料使朱全忠为南面招讨使王镕为东面招讨使李匡威为北面招讨使赫连铎副之以讨李克用 【谨案通鉴辑览御批克用固非始终忠于唐室之人然既有兴复功岂宜首议削除况尔时朝命本不能致讨特欲藉力三镇徒快其并吞私计耳然使克用果灭则三镇益强仍为国患矧克用又未易即灭而徒授之口实卒之一战不胜转不得不屈体调停使诸藩效尤胁制是直甘心沥鸩自毙范祖禹死疾庸医之喻犹不足尽之】 壬寅昭义军乱杀其节度使李克恭将其安居受自称留后附于朱全忠壬子都招讨使张浚率神策诸军五十二都及邠宁鄜夏师合五万人发京师癸丑剑南东川节度使顾彦朗卒其弟彦晖自称留后削李罕之官爵六月以孙揆为昭义军节度使仍充招讨副使辛酉雅州将谢从本杀其刺史张承简叛附于王建辛未以朱全忠兼领宣义军节度使充河东东面行营招讨使以沧州刺史卢彦威为义昌军节度使河东将安知建以邢洛磁三州叛附于朱全忠秋七月官军至阴地关朱全忠将葛从周入潞州以从周权充兵马留后戊申李克用袭执昭义军节度使孙揆揆死之杨行密取润州八月孙儒复夺取之钱鏐杀苏州刺史杜儒休杨行密取苏州九月李克用取潞州杨行密取润常二州闰月孙儒复取常州进围苏州壬戌邛州将任可知杀其刺史毛湘冬十月癸未蜀州将李行周逐其刺史徐公铄附于王建加邠宁节度使王行瑜侍中佑国军节度使张全义同平章事 【时于东都置佑国军】 韩建袭河东军于赵城败绩李克用取邢洛磁三州十一月丁卯李匡威取蔚州张浚及李克用战于阴地败绩孙儒取苏州十二月李克用取晋州朱全忠击魏博取黎阳临河淇门卫县庚午尚书右仆射王徽卒

二年春正月丙辰朱全忠及罗弘信战于内黄败之弘信与和全忠军还庚申孔纬张浚罢以翰林学士承旨崔昭纬为兵部侍郎御史中丞徐彦若为户部侍郎并同中书门下平章事复李克用检校太师太原尹北都留守河东节度观察处置等使再贬太保荆南节度使孔纬为均州刺史鄂岳观察使张浚为连州刺史甘露镇使陈可言取常州钱鏐取苏州二月加

李克用守中书令再贬张浚绣州司户复李罕之官爵
乙巳赦陈敬瑄丁未诏王建罢兵不受命三月辛亥以王师范为平卢节度使李克用表
以李存孝为邢洺磁节度使夏四月甲申以星变大赦
避正殿减膳彻乐赐两军金帛赎所略男女还其家民年八十以上及废疾不能自存者
长吏存恤访武德功臣子孙庚子韦昭度以王建知剑
南西川节度留后兼行营招讨使昭度归京师癸卯王建攻成都以武安军节度使周岳
为岭南西道节度使【时改钦化军为武安军】李
克用攻云州五月孙儒取滁和二州六月杨行密复夺取之丙午封子佑为德王【案吴
缜曰昭宗诸子德王名裕不名佑也况干宁四年立
为皇太子时名裕即可见此误也考旧书光化三年刘季述幽帝东宫矫诏命太子即皇
帝位明年昭宗反正制皇太子裕降为德王改名佑吴
缜云不名佑者误也但新书于始封时名佑立皇太子时名裕纪传皆不载改名始末是
其阙略耳】秋七月李克用克云州表其将石善友为
大同防御使孙儒焚扬州以逃八月朱全忠攻宿州入其郛辛丑王建克成都执陈敬瑄
九月乙卯六军十二卫观军容使左神策军中尉杨复
恭以上将军致仕冬十月壬午朱全忠取宿州癸未以王建为剑南西川节度使杨复恭
谋反命天威都督李顺节神策军使李守节攻讨之玉
山军使杨守信拒战军溃复恭奔兴元复恭假子山南西道节度使杨守亮武定军节度
使杨守忠龙剑节度使杨守贞绵州刺史杨守厚同举
兵反十一月己未曹州将郭铢杀其刺史郭词附于朱全忠辛未全忠取寿州十二月乙
酉朱全忠将丁会及朱瑾战于金乡败之戊子杀李顺
节以顾彦晖为剑南东川节度使

景福元年春正月己未朱全忠逐河阳节度使赵克裕以张全义兼领河阳节度使
丙寅大赦改元王镕李匡威合兵攻尧山李克用败之
二月刘崇望罢以李茂贞为山南西道招讨使甲申朱全忠攻郢州天平军节度使朱宣
败之三月以户部尚书郑延昌为中书侍郎同中书门
下平章事乙巳杨行密取楚州又取常州杀陈可言丙辰杨守忠守贞等攻梓州丙寅福
建观察使陈岩卒其将范晖自称留后庚午泉州刺史
王潮攻福州夏四月西川将李简击杨守忠等败之辛巳以杜让能为太尉乙酉以钱镠
为武胜军防御使【旧书在龙纪元年七月考方镇
表龙纪元年置杭州防御使景福元年赐杭州防御使号武胜军意钱镠当龙纪时已为
防御使而赐军号后则为武胜军防御也旧书盖误而
以武胜军为武威军更误矣】加王行瑜兼中书令六月杨行密及孙儒战于扬州擒斩
之秋七月己巳李茂贞攻凤州感义军节度使满存奔

于兴元茂贞进攻兴洋二州皆取之八月壬申攻兴元杨守亮及满存奔阆州以杨行密为淮南节度使同平章事丙戌降京畿关辅囚罪免淮南浙西宣州逋负李茂贞以其子继密知兴元府事九月加成纳同平章事冬十月淮南将蔡侔以庐州河东将李存幸以邢州皆附于朱全忠十一月辛丑武宁军将张燧张谏以濠泗二州附于朱全忠乙巳朱全忠取濮州孙儒将王坛攻婺州取之十二月壬午王建击杨守亮于阆州破之

二年春正月时溥攻宿州刺史郭言战死以李茂贞为山南西道兼武定军节度使以徐彦若同平章事充凤翔节度使茂贞不受命二月杨行密取常州加王建同平章事李克用攻邢州辛巳及王镕战于叱日岭败之朱全忠败朱瑾兵于徐州李匡威败李克用兵于元氏克用还攻邢州三月辛酉卢龙军兵马留后李匡筹逐其兄匡威自称节度留后夏四月乙亥王建杀陈敬瑄及田令孜丁亥王镕杀李匡威【考异曰实录杀匡威在五月恐约奏到旧纪六月乙卯幽州李匡威谋害王镕恒州三军攻匡威杀之旧传唐太祖纪年录皆云五月新纪四月丁亥案匡筹奏云四月十九日是月己巳朔十九日丁亥也】戊子朱全忠徐州时溥自焚死朱全忠以宋州刺史张廷范知感化军留后五月庚子王潮破福州杀范晖自称留后闰月以钱镠为苏杭观察使以扈跸都头曹诚为黔中节度使耀德都头李鋌为镇海军节度使宣威都头孙惟晟为荆南节度使六月以捧日都头陈佩为岭南东道节度使并同平章事秋七月王镕救邢州李克用与战于平山败之壬申进攻镇州镕请助攻邢州克用合镕兵进屯任县丁亥杨行密取庐州杀蔡侔加天雄军节度使李茂庄同平章事【时以秦州为天雄军】八月丙申以嗣覃王嗣周为京西路招讨使神策大将军李鐔副之以讨李茂贞杨行密取歙州九月丙寅以钱镠为镇海军节度浙江西道观察处置等使移军额于杭州乙亥覃王率禁军三万送徐彦若赴镇壬午及李茂贞王行瑜战于兴平败绩李茂贞进逼京师甲申杀观军容使西门君遂内枢密使李周潼段诩茂贞陈兵临皋驿贬太尉平章事晋国公杜让能为梧州刺史壬辰以东都留守韦昭度为司徒御史中丞崔胤为户部侍郎并同中书门下平章事升州刺史冯弘铎以州附于杨行密冬十月乙未杀杜让能及户部侍郎杜弘徽十一月以李茂贞守中书令进封秦王兼兴元尹山南西道节度使赐王行瑜号尚父仍赐铁券以徐彦若为御史大夫以泉州刺史王潮为福建观察使十二月以韦昭度为太傅邵州刺史邓处讷攻潭州克之杀周岳处讷自称留后是岁建州刺史徐归范汀州刺史鍾

全慕并附于王潮

干宁元年春正月乙丑朔大赦改元李茂贞以兵来朝以李光筹为卢龙节度使二月以右散骑常侍郑綮为礼部侍郎同中书门下平章事以邓处讷为武安军节度使彰义军节度使张钧卒其兄鐸自称留后朱全忠及朱宣朱瑾战于东阿败之三月甲申李克用克邢州执李存孝杀之克用以马师素权知邢洺团练使夏五月孙儒将刘建锋袭潭州杀邓处讷自称留后王建克彭州杀威戎节度使杨晟辛卯郑延昌罢武冈指挥使蒋勋取邵州六月壬辰李克用克云州杀赫连铎甲午以张廷范为感化军节度使戊午以翰林学士承旨礼部尚书李磻为户部侍郎同中书门下平章事庚申磻罢以徐彦若为中书侍郎同中书门下平章事秋七月李茂贞克阆州杨复恭杨守亮杨守信出走以雨霖避正殿减膳郑綮罢杨守厚卒其将常再荣以绵州附于王建八月杨复恭杨守亮杨守信走至干元韩建捕献之伏诛癸巳减京畿兴元洋金商等州赋役九月庚申李克用杀其昭义军节度使康君立【新书作李克用陷潞州昭义军节度使康君立死之案君立本克用将克用以君立攻取潞州即令镇之则潞州久为克用所据此以李存孝之死杀君立而新书乃以陷潞州及死之为文殊失事实】冬十月封子栩为棣王禊虔王禛沂王禛遂王十一月李克用取武州以张鐸为彰义军节度使十二月李克用取新州壬子及李匡筹战于居庸大败之甲寅匡筹奔沧州卢彦威杀之丙辰克用取幽州是冬杨行密取黄州

二年春正月己巳以给事中陆希声为户部侍郎同中书门下平章事壬申护国军节度使王重荣卒其子珂自称留后二月乙未以太子太傅李磻为户部侍郎同中书门下平章事李克用表刘仁恭为卢龙军兵马留后三月崔胤李磻罢以户部侍郎王抟为中书侍郎同中书门下平章事加王镕兼侍中杨行密取濠州浙东节度使董昌僭号建年钱鏐请以本军讨之夏四月陆希声韦昭度罢朱瑾及朱全忠战于高梧败绩庚寅杨行密取寿州又袭涟水军取之戊戌以刘建锋为武康军节度使五月削董昌官爵甲子李茂贞王行瑜韩建等各以兵犯京师杀太保致仕韦昭度太子少师李磻是月李克用克绛州杀其刺史王瑶六月庚寅以钱鏐为浙江东道招讨使壬辰以太子宾客孔纬为吏部尚书守司空门下侍郎同中书门下平章事秋七月丙辰李克用以兵屯河中戊午匡国军节度使王行约奔于京师庚申神策军护军中尉骆全瓘刘景宣指挥使王行实李继鹏反帝闻乱登承天门楼遣诸王率禁兵御之捧日都头李筠以本军于楼前侍卫李继鹏率凤翔兵攻筠帝乃

下楼与亲王公主内人出启夏门趣南山宿莎城镇以薛王知柔权知中书事及置顿使壬戌李克用入同州徐彦若王抟崔昭纬至莎城甲子帝次石门镇遣知枢密院刘光裕薛王知柔还京师制置守卫宫禁丙寅李克用遣使奉表问起居丁卯帝遣中使赉诏诣克用军令与王珂各起兵赴新平又诏张鐸以泾原兵控扼凤翔以前护国军节度使崔胤为中书侍郎同中书门下平章事壬午李克用发河中八月己丑至渭桥癸巳败邠宁军于梨园擒其将王令陶以献又诏保大军节度使李思孝以本军进讨丁酉削王行瑜官爵以李克用为邠宁四面行营都招讨使定难军节度使李思谏充北面招讨使彰义军节度使张鐸充西面招讨使护国军节度留后王珂充行营粮料使李茂贞斩李继鹏传首行在诏赦茂贞罪辛丑改授李克用邠宁四面行营都统又以河中都监袁季贞充邠宁四面行营兵马都监押辛亥帝至自石门壬子崔昭纬罢以王珂检校司空充护国军节度使幽州兵马留后刘仁恭检校司空充卢龙军节度使丙辰以徐彦若为司空与王抟崔胤并赐号扶危匡国致理功臣癸亥孔纬薨以前昭义军节度使李罕之为邠宁四面副都统冬十月丙戌贬右仆射崔昭纬为梧州司马李克用及王行瑜战于梨园败之庚寅王行约焚宁州以逃克用奏以匡国军节度使苏文建为静难军节度使癸卯朱全忠围兖州义武军节度使王处存卒其子郃自称留后以京兆尹孙偓为户部侍郎同中书门下平章事李克用攻龙泉寨李茂贞救之李罕之击败茂贞十一月丁巳李克用入邠州王行瑜伏诛朱全忠败秦宁军于巨野丁丑王建取利州李克用旋军渭北加苏文建同平章事十二月癸未赦京师复大顺以来削夺官爵非其罪者甲申李克用进封晋王改赐忠贞平难功臣阆州防御使李继雍蓬州刺史费存渠州刺史陈璠附于王建乙未加李罕之兼侍中丙申王建攻梓州戊戌通州刺史李彦昭附于王建辛亥李克用旋师太原李茂贞以其将胡敬璋为河西节度使加钱鏐兼侍中安州防御使宣晟袭桂州杀静江军节度使周元静晟自称知军府事

三年春正月癸丑王建取龙州以户部尚书兼京兆尹嗣薛王知柔检校司徒充清海军节度使闰月丁亥兼州刺史周雄附于王建李克用遣兵救兖郓军于莘魏博节度使罗弘信击败之二月壬子以通王滋为开府仪同三司判侍卫诸军事三月以天雄留后李继徽为节度使保大军节度使李思孝致仕以其弟思敬为保大留后朱全忠伐郓州败其兵于马颊夏四月壬子武安军乱杀其节度使刘建锋其将马殷自称兵马留后滑州河溢朱全忠因决为二渠李克用攻魏州五月董昌去帝号复称节度

使辛巳赐崔昭纬自尽癸未杨行密取苏州又取光州
庚寅成纳取黔州甲午钱鏐攻越州乙未克之己亥董昌伏诛加钱鏐检校太尉中书令
朱全忠救魏州六月与李克用战于洹水败之克用引
军还庚戌李茂贞犯京师嗣延王戒丕率禁军御之丙寅及茂贞战于娄馆败绩秋七月
壬辰茂贞进逼京师诸王率禁军奉车驾以如太原癸
巳次渭北韩建表请驻华州以建为京畿都指挥安抚制置催促诸道纲运等使甲午次
富平韩建来朝乙未次下邳丙申至华州以府署为行
宫乙巳崔胤罢丙午以翰林学士承旨陆扆为户部侍郎同中书门下平章事八月癸丑
以王建为凤翔四面行营招讨使甲寅王抟罢以钱鏐
权领浙江东道军州事乙丑以国子毛诗博士朱朴为左谏议大夫同中书门下平章事
九月己卯朱全忠张全义表请建都洛阳庚辰以王潮
为威武军节度使【时升福建观察使为威武军】乙未以武安军节度使崔胤为中
书侍郎翰林学士承旨崔远为兵部侍郎并同中书门
下平章事丁酉贬陆扆为硤州刺史己亥以孙偓为凤翔四面行营都统静难军节度使
李思谏副之李思敬为保大军节度使以韩建检校太
尉兼中书令充修复宫阙京畿制置催促诸道纲运等使李克用及朱全忠战于宗城败
之冬十月壬子加孙偓为凤翔行营节度招讨使丁巳
以韩建权知京兆尹兼把截使戊午以威胜军节度使王搏为吏部尚书同中书门下平
章事李茂贞上表请罪仍献助修京阙钱师遂不行以
钱鏐为镇海威胜两军节度使李克用及罗弘信战于白龙潭败之王珂同平章事十一
月戊子忠国军节度使李师悦卒其子继徽自称留后
【时以湖州置忠国军】

四年春正月甲申韩建以兵围行宫勒诸王归十六宅散遣所领军士其甲兵并归
收掌杀扈跸都将李筠丙申朱全忠克郢州天平军节
度使朱宣出走追获之朱全忠以庞师古为天平军留后己亥孙偓罢都统以李思谏为
宁塞军节度使二月戊申朱全忠克兖州泰宁军节度
使朱瑾奔于淮南朱全忠以葛从周为泰宁军留后全忠又取沂海密三州保义军节度
使王珙攻河中韩建杀太子詹事马道殷将作监许岩
士以杨行密为江南诸道行营都统癸丑王建取泸州己未立德王佑为皇太子更名裕
大赦享于行庙辛酉王建取渝州乙亥孙偓朱朴罢【
宰相表作己亥是年正月丁丑朔二月丙午朔则二月不应有己亥兹据通鉴】三月丙
子朱全忠表朱友裕为天平留后庞师古为武宁留后
宣武军将杨师厚败王珂兵于猗氏河东将李嗣昭败王珙兵于猗氏又败之于张店以
苏文建为昭武军节度使夏四月以同州防御使李继

塘为匡国军节度使五月壬午朱全忠取黄州执其刺史瞿章 【新书纪误作瞿璋】
六月甲寅贬王建为南州刺史乙卯以李茂贞为西川
节度使嗣覃王嗣周为凤翔节度使茂贞不受命嗣周及茂贞战于奉天败绩秋七月加
成汭兼侍中以李继徽为静难军节度使庚寅钱鏐取
苏州八月韩建杀通王滋仪王韶王彭王惕嗣韩王嗣陈王嗣覃王嗣周嗣延王戒丕嗣
丹王允睦王济王 【新书无睦王济王旧书只八王
有睦济而无覃延丹兹依唐书纠缪所列又新书仪王作沂王裡纠缪亦同考昭宗子沂
王裡于天顺二年为朱全忠所杀则此合从旧纪作仪
王也】 九月癸酉王建围梓州李克用伐幽州辛巳攻安塞军刘仁恭击败之钱鏐取湖
州以彰义军节度使张璠为凤翔西北行营招讨使李
思谏副之以讨李茂贞削茂贞官爵复其姓名为宋文通复以王建为西川节度使同平
章事加义武节度使王郜同平章事李继塘弃同州奔
于凤翔冬十月以韩建充匡国军节度使壬子遂州刺史侯绍乙卯合州刺史王仁威并
附于王建庚申王建克梓州东川节度使顾彦晖自杀
王建以邛州刺史王宗滌为东川留后甲子封子秘为景王祚为辉王祺为祁王 【旧书
在二月又有祜封雅王祥封琼王之文考诸王传雅
王琼王于光化元年封不在是年又旧书祁王祺作祿雅王正作祜考祜封端王在天佑
元年非雅王也 又案唐诸王封国大率系地为号光
化二年始于殽山置辉州而此已有辉王岂特取美名而不以地系者欤】 加张璠同平
章事十一月癸酉杨行密及朱全忠战于清口败之丁
巳钱鏐取台州朱全忠奏以检校司空泰宁军留后葛从周为泰宁军节度使颍州刺史
王敬瑄为武宁军节度使十二月丁未威武军节度使
王潮卒其弟审知自称留后贬右拾遗张道古为施州司户
光化元年春正月以徐彦若为司徒加王师范同平章事以兵部尚书刘崇望同平
章事充剑南东川节度使以昭信防御使冯行袭为节
度使以韩建为修宫阙使二月赦李茂贞复其姓名官爵三月己丑以王审知为威武留
后以朱全忠兼领宣义天平军节度使以马殷为武安
留后卢龙节度使刘仁恭袭沧州卢彦威出走仁恭以其子守文为义昌军留后夏四月
丁未朱全忠及李克用战于巨鹿加王珂兼侍中丙寅
立淑妃何氏为皇后丁卯朱全忠拔洺州杀其刺史邢善益五月己巳朔大赦辛未朱全
忠拔邢州杀其刺史袁奉韬以葛从周为邢洺磁留后
以武定节度使李继密为山南西道节度使刘崇望还为兵部尚书以王宗滌为东川留
后马殷取邵衡永三州六月以濠州刺史赵瑫为忠武
军节度使秋七月加武贞军节度使雷满同平章事镇南军节度使锺传兼侍中丙申朱

全忠取唐州又取随州八月庚戌改华州为兴德府戊午朱全忠取邓州己未车驾发华州壬戌至自华州甲子大赦改元九月戊辰以韩建守太傅中书令充兴德尹封颍川郡王赐铁券建辞王爵改封许国公加王镕兼中书令罗弘信加侍中进封临清郡王甲申钱鏐取苏州冬十月罗弘信卒其子绍威自称留后癸卯以王审知为威武军节度使张全义加侍中以王宗涤为东川节度使朱全忠杀安州刺史武瑜十一月甲寅封子祜为雅王祥为琼王以罗绍威为魏博节度使衢州刺史陈岌附于杨行密十二月癸未潞州节度使薛志勤卒泽州刺史李罕之袭潞州取之附于朱全忠全忠表罕之为昭义军节度使李克用取泽州

二年春正月乙未给复绵剑二州二年丁未兵部尚书陆扈为兵部侍郎同中书门下平章事崔胤罢李罕之取沁州刘仁恭拔贝州屠之进攻魏州二月朱全忠取蔡州三月朱全忠救魏州丁未及刘仁恭战于内黄大败之己未朱全忠取泽州夏五月李克用攻潞州朱全忠击败之六月以李罕之为河阳三城节度使以河阳节度使丁会为昭义军节度使丁丑李罕之卒保义军乱杀其节度王珙其将李璠自称留后秋七月壬辰海州戍将陈汉宾以州附杨行密马殷取道州八月李克用取泽潞怀三州冬十一月徐彦若为太保王搏为司空马殷取郴连二州辛丑保义军将朱简杀李璠自称留后附于朱全忠十二月加罗绍威同平章事

三年春二月庚申加王建兼中书令壬申加王审知同平章事壬午以吏部尚书崔胤充清海军节度使夏四月戊午朱全忠罗绍威合兵攻沧州辛未皇后及皇太子谒九庙六月丁巳朱全忠表以朱简为保义军节度留后仍改名友谦丁卯以崔胤为尚书左仆射兼门下侍郎同中书门下平章事王抟罢再贬崖州司户寻赐死秋七月以昭义留后孟迁为节度使兵部尚书刘崇望卒戊申以雷满检校太保封冯翊郡王武泰军节度使赵崇封天水县开国子乙卯以王建兼剑南东川武信军两道都指挥制置等使忠义军节度使赵匡凝检校太师兼中书令八月己巳以前归义军节度副使张承奉为归义节度使庚辰李克用攻洺州克之葛从周邀击于青山口大败之从周进攻镇州壬午成汭检校太师中书令甲申以崔胤为开府仪同三司进封魏国公九月朱全忠取洺州钱鏐取婺州衢州刺史陈岌附于钱鏐乙巳徐彦若罢丙午崔远罢戊申以刑部尚书裴贲为中书侍郎同中书门下平章事甲寅朱全忠克瀛州冬十月丙辰克景州辛酉克莫州辛巳克祁州癸未以朱友谦为保义军节度使甲申朱全忠克定州义武军节度使王郜奔于太原十一月庚寅左右

神策军中尉刘季述王仲先内枢密使王彦范薛齐偓作乱皇帝居于少阳院辛卯季述等以皇太子裕为皇帝奉皇帝为太上皇皇后为太上皇后杀睦王倚十二月戊辰朱全忠自定州还汴州遣使与崔胤谋讨贼

钦定续通志卷十七

●钦定续通志卷十八 唐纪十八

唐纪 【十八】

昭宗二 宣帝

○昭宗二

天复元年春正月乙酉神策军将孙德昭董彦弼周承诲以兵讨乱皇帝复于位刘季述王仲先王彦范薛齐偓伏诛黜皇太子为德王丙戌以孙德昭同平章事充静海军节度使赐姓名李继昭丁亥崔胤进位司空己丑朱全忠械送程岩至京师伏诛庚寅以周承诲为岭南西道节度使赐姓名李继海董彦弼为邕远军节度使赐姓李并同平章事与李继昭俱留宿卫癸巳进朱全忠爵东平王加李茂贞尚书令兼侍中进爵岐王戊申朱全忠取绛州壬子取晋州二月甲寅朔以旱避正殿减膳李克用取泽州己未朱全忠攻河中戊辰执护国军节度使王珂寻杀之全忠以张存敬为河中留后辛未封全忠为梁王以翰林学士户部侍郎王溥为中书侍郎吏部侍郎裴枢为户部侍郎同中书门下平章事加刘仁恭罗绍威并兼侍中三月辛亥朱全忠取沁州壬子取泽州进攻潞州降其节度使孟迁夏四月丁巳取辽州己未拔承天军甲戌帝享于太庙丙子大赦改元武德贞观功臣子孙叙进之予酈公介公后一子官免畿内光化以来逋负朱全忠攻太原李克用与战于洞涡败之全忠乃还五月癸卯以朱全忠为宣武宣义天平护国四镇节度使己酉加钱鏐守侍中张全义兼中书令六月李克用取隰慈二州闰月以孟迁为河阳三城节度使以河阳节度使丁会为昭义军节度使秋八月杨行密攻杭州冬十月戊戌朱全忠称兵向阙钱鏐败杨行密之兵于青山戊申朱全忠至河中十一月己酉凤翔宿卫军使李继筠勒兵阙下诸军大掠朱全忠至同州匡国留后司马邺降之壬子左神策军中尉韩全海劫帝如凤翔是夕次鄂县韩建以华州附于朱全忠癸丑李茂贞迎车驾于田家砦丁巳朱全忠以韩建为忠武军节度使赵翊为匡国军节度使以前商州刺史李存权知华州辛酉以兵部侍郎卢光启权句中书事壬戌车驾至凤翔癸亥李茂贞及朱全忠战于武功败绩丁卯以卢光启为右谏议大夫参知机务戊辰朱全忠至凤翔军于城东辛未移兵趣邠州甲

戊崔胤裴枢罢乙亥朱全忠攻邠州丁丑静难军节度使李继徽降之复其姓名曰杨崇本十二月戊戌全忠攻整屋屠之清海军节度使徐彦若卒表以行军司马刘隐为留后戎昭节度使冯行袭杀中使之征兵江淮者武贞军节度使雷满卒子彦威自称留后

二年春正月癸丑朱全忠屯三原李克用遣其将李嗣昭周德威攻慈隰晋等州丁卯以给事中严龟为岐汴和协使二月戊寅朱全忠还军河中李嗣昭攻慈隰下之进逼晋绛乙未朱全忠将氏叔琮败河东兵于蒲县盗发简陵王建取利州三月戊午氏叔琮击李嗣昭军败之复取慈隰二州进攻太原丁卯叔琮引兵还李克用复取慈隰二州以金吾将军李俨为江淮宣谕使以杨行密为东面行营都统中书令吴王以讨朱全忠加马殷同平章事夏四月辛丑回鹘请发兵赴难卢光启罢杨行密取升州五月己未朱全忠发河中趣凤翔李茂贞与全忠将康怀英战于武功败绩庚午韦贻范罢钱鏐进爵越王六月丙子以中书舍人苏检为工部侍郎同中书门下平章事甲申李茂贞及朱全忠战于虢县败绩丙戌朱全忠拔凤州丁亥进逼凤翔秋七月甲辰朱全忠拔成州乙巳拔陇州复攻秦州不克八月己亥韦贻范起复保大军节度使李茂勋帅师救凤翔朱全忠击走之辛丑王建攻兴元山南西道节度使王万宏降之以王宗涤为山南西道节度使九月戊申李茂贞及朱全忠战于槐林败绩武定军节度使拓拔思恭以洋州附于王建癸亥以李茂贞为凤翔静难武定昭武四镇节度使冬十月王建取兴州丁亥朱全忠表迎车驾己丑以诏赐全忠十一月癸卯李茂勋复以兵援凤翔朱全忠遣兵袭鄜坊壬子入坊州甲寅入鄜州以李暉权知军府事李茂勋遁去丙辰韦贻范薨十二月李茂勋遣使请降于朱全忠更名周彝是岁卢光稠攻岭南取韶州

三年春正月丙午王师范取兖州戊申杀左右神策军中尉韩全诲张彦宏内枢密使袁易简周敬容及李继筠李继诲李彦弼辛亥以翰林学士姚洎为汴岐和协使壬子以工部侍郎崔胤为司空兼门下侍郎同中书门下平章事甲子车驾出凤翔如朱全忠军是夕攻岐山己巳至自凤翔哭于太庙大赦庚午崔胤及朱全忠杀中官七百余人辛未以胤兼判六军十二卫事二月壬申诏停在凤翔一切所除官甲戌贬陆扈为沂王传分司东都丙子王溥罢朱全忠杀苏检吏部侍郎卢光启戊寅赐朱全忠回天再造竭忠守正功臣降京师河中凤翔府同邠鄜三州死罪以下己卯以辉王祚为诸道兵马都元帅庚辰朱全忠为太尉中书令副之以崔胤为司徒裴枢为清海军节度使壬辰以朱友裕为镇

国军节度使乙未以朱友伦为左军宿卫都指挥使戊戌朱全忠归镇以裴枢为门下侍郎同中书门下平章事三月朱全忠攻青州夏四月己卯以朱全忠判元帅府事王师范求援于淮南乙未杨行密遣其将王景仁赴之又遣别将攻宿州全忠遣康怀英救之淮南兵引还五月壬子成汭及杨行密战于君山败死雷彦威袭江陵陷之以颍州刺史朱友恭检校司空充武宁军节度使王景仁合莱州刺史王师海兵攻密州拔之六月乙亥朱全忠取登州丙子王师范王景仁及朱友宁战于石楼败之友宁战死秋七月朱全忠至临朐王师范与战败绩全忠复取密州八月庚辰加王建守司徒进爵蜀王九月癸卯朱全忠将杨师厚及王师范战于临朐败之杨行密杀奉国军节度使朱延寿辛亥朱全忠拔棣州杀其刺史邵播戊午王师范降于朱全忠冬十月杨行密攻润州朱全忠取兖州以康怀英为泰宁军节度使朱友伦死朱全忠以其兄子友谅代典宿卫忠义军将赵匡明袭江陵陷之自称留后王建取忠万施三州甲戌取夔州十二月裴贽罢杨行密克宣州杀宁国军节度使田頔辛巳以礼部尚书独孤损为兵部侍郎同中书门下平章事丙申朱全忠杀尚书左仆射张浚

天佑元年春正月乙巳崔胤罢以裴枢判左三军事充盐铁转运使独孤损判右三军事兼判度支以兵部尚书崔远为中书侍郎翰林学士左拾遗柳璨为右谏议大夫并同平章事己酉朱全忠杀太子少傅崔胤及京兆尹郑元规威远军使陈班戊午全忠迁唐都于洛阳壬戌车驾发长安二月乙亥次陕州丙子朱全忠自河中来朝甲申封子祜为端王祁丰王福和王禧登王佑嘉王三月丁未以朱全忠兼判左右神策及六军诸卫事全忠奏以长安为佑国军以韩建为节度使以郑州刺史刘知俊为匡国军节度使丁巳帝遣间使如河东淮南西川告急夏四月全忠趣驾东行闰月丁酉车驾发陕州壬寅全忠逆于新安杀医官使阎佑之司天监王墀内都知韦周晋国夫人可证等甲辰至自西都享于太庙乙巳大赦改元诏讨李茂贞杨崇本戊申以蒋玄晖为宣徽南院使兼枢密使王殷为宣徽北院使兼皇城使张延范为金吾将军充街使以韦震为河南尹兼六军诸卫副使又征武宁军节度使朱友恭为左龙武统军保大军节度使氏叔琮为右龙武统军癸丑以张全义为天平军节度使乙卯以朱全忠为宣武宣义护国忠武四镇节度使钱鏐更封吴王罗绍威进爵邲王五月以陕州为兴唐府丙寅加河阳节度使张汉瑜同平章事辛未朱全忠还镇六月李茂贞杨崇本王建传檄合兵以讨朱全忠全忠以镇国军节度使朱友裕为行营都统保大军节度

使刘鄩屯兵同州秋七月朱全忠以兵屯河中庚寅建凌烟阁图画朱全忠八月壬寅全忠令朱友恭氏叔琮蒋玄晖以兵入宫至寝殿是夕皇帝崩年三十八谥曰圣穆景文孝皇帝庙号昭宗明年改谥曰恭灵庄闵庙号襄宗后唐同光初复故谥号陵曰和陵

昭宗龙纪一年大顺二年景福二年干宁四年光化三年天复三年天佑一年凡十六年

○宣帝

昭宣帝讳柷昭宗第九子也母曰积善太后何氏始封辉王名祚天复三年拜开府仪同三司充诸道兵马元帅朱全忠已弑昭宗矫诏立

为皇太子改名柷监国军事天佑元年八月丙午皇太子即皇帝位于柩前己酉追削昭仪李渐荣河东夫人裴贞一为悖逆庶人以龙武牙官

史太为棣州刺史以酬其弑逆之功庚戌羣臣上表请听政乙丑皇帝见羣臣于崇勋殿西廊下衢州刺史陈璋睦州刺史陈询并以州附杨行

密九月己巳以裴枢充大行皇帝山陵礼仪使独孤损充山陵使兵部侍郎李燕充鹵簿使韦震充桥道使宗正卿李克勤充按行使庚午尊皇

后曰皇太后辛巳以权河南尹张廷范充山陵桥道使并兼充顿递应按等使冬十月辛卯朔日有食之癸巳朱全忠自河中来朝甲午复检校

太保左龙武统军朱友恭姓名贬李彦威为崖州司户贬检校司徒右龙武统军氏叔琮为白州司户【旧书作贝州司户今考其谪词云谪

掾遐方若贝州在河北道不可谓之遐方也兹依通鉴】寻赐自尽是日全忠归镇丙申复以朱全忠为宣武宣义护国天平四镇节度使张全

义为河南尹充忠武军节度使判六军诸卫事朱友裕卒于行营十一月杨行密攻光州又攻鄂州朱全忠率师救之行密乃还是岁虔州刺史

卢光稠卒其将李图自称知州事【五代史记卢光稠卒于梁开平五年而通鉴又在开平四年皆与此异】以刘隐为清海军节度使

天佑二年【新旧纪但书二年今依通鉴加天佑号按嗣君践祚踰年改元正也昭宣帝畏朱全忠不敢改元止以先君旧号纪岁月

然其来亦有所自如代宗之广德改于肃宗宝应之二年七月文宗之太和改于敬宗宝历之三年二月懿宗之咸通改于宣宗大中之十四年

十一月虽俱只在即位之次年然其久者乃至历十六月始改则亦无怪昭宣帝之因仍而蒙以终世矣】春正月杨行密克润州杀安仁义丁

丑盗焚干陵下宫朱全忠攻寿州不克二月辛卯还师壬辰以前保大军节度使刘鄩为金吾卫大将军充右街使兵马指挥使朱汉宾为右羽

林统军以李振为平卢军留后杨行密克鄂州杀杜洪戊戌朱全忠杀德王裕棣王栩虔

王禊沂王禊遂王禊景王秘祁王祺雅王正琼王祥 【
新书无沂王雅王旧书昭宗十子传亦作杀德王以下六王帝纪则云九王而不书其名
兹据通鉴书之又新纪德王名作禊考昭宗子名皆从
示似当作禊为是然昭宗子别有颍王禊新书亦惟此作禊其余皆作裕也】 己酉葬昭
宗皇帝于和陵三月庚午以前平卢节度使王师范为
河阳三城节度使甲子裴枢罢戊寅独孤损罢以礼部侍郎张文蔚为中书侍郎同中书
门下平章事甲申崔远罢以吏部侍郎杨涉为中书侍
郎同中书门下平章事加刘隐同平章事夏四月壬辰以检校司徒和王傅张廷范为太
常卿乙未以旱避正殿减膳丙午以前棣州刺史刘仁
遇检校司空充泰宁军节度使辛亥降京畿死罪以下给复山陵役者一年五月癸酉贬
新除静海军节度使独孤损为棣州刺史尚书左仆射
裴枢登州刺史右仆射崔远莱州刺史乙亥贬吏部尚书陆扈为濮州司户工部尚书王
溥为淄州司户庚辰贬检校司徒守太保致仕赵崇为
曹州司户兵部侍郎王赞为濮州司户辛巳再贬裴枢为陇州司户独孤损为琼州司户
崔远为白州司户王建取金州昭信军节度使冯行袭
奔均州六月行袭复取金州杨行密克婺州戊子朱全忠杀裴枢独孤损崔远陆扈王溥
赵崇王赞及朝士贬官者三十余人己丑贬司空致仕
裴赞为青州司户寻杀之壬辰敕诸道管内有新除官官前资朝官敕到三日内督遣赴
阙秋七月卜郊辛酉赐全忠迎銮纪功碑癸亥贬太子
宾客柳逊为曹州司马岳州刺史邓进忠以州附于马殷八月乙未削赵匡凝官爵遣武
宁军节度使杨师厚率师击之己亥朱全忠自以亲军
赴之处州刺史卢约取温州杨师厚收唐邓复郢随均房等州九月甲子赵匡凝出兵阵
于汉滨师厚击败之傅其城下匡凝出走遂克襄州丙
寅封弟禊为颍王祐蔡王 【新书帝纪及诸王传祐俱作佑通鉴亦同考昭宗子德王裕
本名佑且天佑元年又见嘉王佑而此蔡王复名佑
乃事之必不然者兹据宗室世系表辑】 丁卯荆南节度使赵匡明弃城走其将王建武
以荆州降于朱全忠全忠以贺瓌为荆南留后以杨师
厚为山南东道节度使己巳改武成王庙为武明王乙酉改卜郊冬十月丙戌以朱全忠
充诸道兵马元帅别开幕府以全忠家讳改金州昭信
军为戎昭军 【谨按通鉴辑览 御批改军号以避逆臣家讳可谓冠履倒置庸懦若
此安得不为天下所轻唐室凌夷至是盖亦无足论
矣】 甲午议驳昭宗谥号丁未改题神主癸丑改成德军为武顺军自余县名有信字成
字犯朱全忠祖父名者并改之十一月庚午三卜郊庚
辰淮南节度使杨行密卒以其子渥为节度副大使东面诸道行营都统兼侍中弘农郡

王辛巳以朱全忠为相国总百揆进封魏王加九锡十二月全忠辞魏王九锡之命丁酉杀蒋玄晖及丰德库使应瑒尚食使朱建武庚子省枢密及宣徽南院使独置宣徽使一员以王殷为之赵殷衡为副使癸卯以柳璨为司空戊申朱全忠弑皇太后于积善宫又杀宫人阿秋阿虔己酉敕以太后丧废朝三日收所上皇太后宝册追废为庶人遣官告郊庙庚戌敕罢来年上辛谒郊庙礼癸丑贬柳璨为登州刺史太常卿张廷范为莱州司户甲寅斩璨于上东门外车裂张廷范于都市

三年春正月乙卯朱全忠以四镇之师会河北诸军屯于深州壬戌淮南将王茂章以宣歙二州附于钱镠钱镠取睦州以茂章为镇东节度副使己巳魏博节度使罗绍威杀其衙内亲军八千人庚午朱全忠自内黄入于魏州二月杨渥取岳州癸巳王建取归州三月戊寅以朱全忠领诸道盐铁转运使判度支户部事充三司都制置使夏四月癸未朔日有食之镇南军节度使锺傅卒其子匡时自称留后魏博牙将史仁遇作乱据高唐朱全忠讨平之李克用攻邢州不克刘守文攻贝州又攻冀州朱全忠击走之六月以京兆尹佑国军节度使韩建为平卢节度使以平卢节度使王重师为京兆尹秋七月杨渥取饶州己未朱全忠自魏州归大梁八月甲辰全忠复以兵攻沧州钱镠克衢州九月杨渥克洪州执锺匡时杨崇本攻夏州匡国军节度使刘知俊击败之擒坊州刺史刘彦晖是月以霖雨禁于都门冬十月丙戌王建立行台于蜀承制封拜李克用攻潞州以救沧州戊戌杨崇本及刘知俊战于美原败绩十一月刘知俊康怀英攻郾延等州克之加知俊同平章事以怀英为保义军节度使忠国军节度使高彦卒其子丰自称留后十二月钱镠以王茂章领盩厔国军节度使闰月戊辰昭义军节度使丁会以泽潞降于李克用克用以李嗣昭为昭义留后甲戌朱全忠引军还

四年春正月壬寅朱全忠至大梁御史大夫薛贻矩赍诏往劳之二月壬子诏宰相帅百官齐诣元帅府劝进三月朱全忠以亳州刺史李思安为北路行军都统以击幽州夏四月己酉刘守光囚其父仁恭自称卢龙节度使戊午钱镠取温州甲子皇帝逊位于朱全忠全忠废帝为济阴王迁于曹州明年二月癸亥帝遇弑年十七谥曰哀皇帝以王礼葬于济阴县之定陶乡后唐明宗时就故陵置园邑追谥曰昭宣光烈孝皇帝陵曰温陵

昭宣帝天佑 【仍昭宗年号】 三年

右唐二十帝合二百九

钦定续通志卷十八

●钦定续通志卷十九 后梁纪

太祖 末帝

○太祖

太祖皇帝姓朱氏讳晃宋州砀山午沟里人也本名温其父诚以五经教授乡里生三子曰全昱曰存曰温诚卒三子贫不能为生与其母佣食萧县人刘崇家全昱无他材能然为人颇长者存温勇有力而温尤凶悍唐僖宗干符中黄巢起曹濮存温亡入贼中存从巢攻岭南战死而温以功补队长巢陷京师以温为东南面行营先锋使温攻南阳拔之巢以温为同州防御使遂攻陷同州是时天子在蜀诸节镇会兵讨贼而王重荣屯河中与温相持重荣屡攻温温辄败温惧数请益兵于巢巢中尉孟楷抑而不通温客谢瞳说温曰黄家起于草莽幸唐衰乱直投其隙而取之尔非有功德兴王之业也今天子在蜀诸镇之兵日集以谋兴复是唐德未厌于天下也且将军力战于外而庸人制之于内此章邯所以背秦而归楚也温以为然乃杀其监军严实自归于河中因王重荣以降都统王铎承制拜温左金吾卫大将军河中行营招讨副使天子赐温名全忠中和三年三月拜全忠汴州刺史宣武军节度使四月诸镇兵破巢复京师巢走蓝田七月丁卯全忠归于宣武是岁黄巢出蓝田关陷蔡州节度使秦宗权叛附于巢遂围陈州武宁军节度使时溥为东南面行营兵马都统会东诸镇兵以救陈陈州刺史赵犇亦乞兵于全忠溥虽为都统而不亲兵四年全忠乃自将救犇率诸镇兵击败巢将黄邺尚让等犇以全忠为德始附属焉是时河东李克用下兵太行渡河出洛阳与东兵会击巢巢已败去全忠及克用追败之于郾城巢走中牟又败之于王满巢走封邱又大败之巢挺身东走至泰山狼虎谷为时溥追兵所杀九月天子以全忠为检校司徒同中书门下平章事封沛郡侯光启二年三月进爵王义成军乱逐其节度使安师儒推牙将张骠为留后师儒来奔杀之遣朱珍李唐宾陷滑州以胡真为留后十二月封吴兴郡王 【此条新旧史同若新旧唐书及通鉴则皆无其文疑有悞】 自黄巢啜秦宗权称帝陷陕洛怀孟唐许汝郑诸州遣其将秦贤卢瑋张晁攻汴贤军板桥晁军北郊瑋军万胜环汴为三十六栅王顾兵少不敢出 【始称名既而称爵称帝渐也爵至王而后称着其逼君】 乃遣朱珍募兵于东方而求救于兖郛三年春珍得兵万人马数百匹以归乃击贤板桥拔其四栅又击瑋万胜瑋败投水死宗权闻瑋等败乃自将精兵数千栅于北郊五月泰宁军节度使朱瑾天平军节度使

朱宣以兵来援王置酒军中中席王阳起如厕以轻兵出北门袭晁而乐声不辍晁不意兵之至也兖郓之兵又从而合击遂大败之斩首二万余级宗权与晁夜走过郑屠其城而去宗权至蔡复遣张晁攻汴王闻晁复来登封禅寺后冈望晁兵过遣朱珍蹶之戒曰晁见吾兵必止望其止当远返毋与之鬪也已而晁见珍在后果止珍即驰还王令珍引兵蔽大林而自率精骑出其东伏大冢闲晁止而食食毕拔旗帜驰击珍珍兵小却王引伏兵横出断晁军为三而击之晁大败脱身走宗权怒斩晁而河阳陕洛之兵为宗权守者闻蔡精兵皆已歼于汴因各溃去故诸葛爽将李罕之取河阳张全义取洛阳以来附十月天子使来赐王纪功碑朱宣朱瑾以兵助汴已破宗权东归王移檄兖郓诬其诱汴亡卒以东乃发兵攻之取其曹州遂遣朱珍攻郓州大败而还朱宣复取曹州 【此条新旧史俱无之考下昭宗大顺二年有曹州来降之文则知朱宣当有复取曹州之事兹据新唐书朱宣传及通鉴辑览】 十二月天子使来赐王铁券及德政碑淮南节度使高骈死杨行密入扬州天子以王兼淮南节使王乃表行密为副使以行军司马李璠为留后璠之扬州时溥于道袭之不克进而还 【新史作璠之扬州行密不纳据旧史云至淮上为徐戎所扼是李璠未尝得至扬州也】 文德元年正月王如淮南至宋州而还是时秦宗权陷襄州以赵德諲为节度使德諲叛于宗权以来附 【德諲降梁旧史及新旧唐书皆在五月此因宗权陷襄州而终言之】 天子因以王为蔡州四面行营都统以德諲为副三月僖宗崩天雄军乱囚其节度使乐彦祯其子相州刺史从训攻魏使来乞兵遣朱珍以兵往助从训攻魏而魏军杀彦祯从训亦战死魏人立罗弘信珍乃还张全义取河阳逐李罕之罕之奔于河东李克用遣兵围河阳全义来求救遣丁会牛存节救之击败河东兵于沅河五月行营讨蔡州围之百余日不克时时溥已为东南面都统又以王统行营而溥犹称都统王乃上书论溥讨蔡无功而不落都统且欲激怒溥以起兵端初高骈死淮南乱楚州刺史刘瓚来奔纳之及王兵攻蔡不克还欲攻徐乃遣朱珍将兵数千以东声言送瓚还楚州溥怒论已又闻珍以兵来果出兵拒之珍与战于吴康大败之取其丰萧二县遂攻宿州下之珍屯萧县别遣庞师古攻徐州龙纪元年正月师古败溥于吕梁淮西牙将申丛执秦宗权折其足将檻送京师别将郭璠杀丛篡宗权以来献王遣行军司马李璠献俘于京师表郭璠淮西留后三月天子封王为东平王七月朱珍杀李唐宾王如萧县执珍杀之遂攻徐州冬大雨水不能屯军而旋初秦宗权遣其弟宗衡掠淮南是岁宗衡为其将孙儒所杀儒

攻杨行密于扬州淮南大乱行密走宣州儒遂入扬州大顺元年春遣庞师古攻孙儒于淮南大败而还四月宿州将张筠以宿州复归于时溥王自将攻之不克初李克用败黄巢追之于冤胸旋军过汴王邀克用置酒上源驿夜以兵攻之克用仅免讼其事于京师天子知曲在汴而和解之至是宰相张浚私与汴交王厚之以赂浚为汴力请伐河东五月以浚为太原四面行营都统王为东南面招讨使然王不亲兵以兵三千属浚而已浚屯于阴地河东叛将冯霸杀潞州守将李克恭来降遣葛从周入潞州李克用遣康君立攻之从周走河阳九月王如河阳十月天子以王兼宣义军节度使遂如滑州假道于魏以攻河东且责其军需亦所以怒魏为兵端也魏人果以谓非兵所当出而辞以粮乏皆不许于是攻魏十一月张浚之师大败于阴地二年正月王及魏人战于内黄大败之屠故元城罗弘信来送款十月克宿州十一月曹州将郭绍宾杀其刺史郭饶来降【新唐书郭绍宾作郭铖郭饶作郭词】十二月丁未败朱瑾于金乡景福元年二月攻郓州朱友裕败于斗门王军后至又败而还冬友裕取濮州【按纪前于光启三年十月言取濮州以后不言复取徧考新旧唐书及通鉴皆无其文惟旧五代纪于景福元年二月云时朱宣尚在濮州新史朱友裕传亦有是语知朱宣于斗门再胜之时当复取濮州而传略之也】遂攻徐州二年四月庞师古克徐州杀时溥王如徐州以师古为留后遂克兖郓干宁元年二月王及朱宣战于渔山大败之二年八月又败宣于梁山十一月又败之于巨野兖郓求救于河东李克用发兵救之假道于魏人而魏人击之克用怒大举攻魏罗弘信来求救遣葛从周救魏是岁李克用封晋王三年五月战于洹水擒克用子落落送于魏杀之七月凤翔李茂贞犯京师天子出居于华州王请以兵赴难天子优诏止之请迁都洛阳不许四年正月庞师古克郓州王如郓州以朱友裕为留后遂攻兖州朱瑾奔于淮南以葛从周为兖州留后九月大举攻淮南十月庞师古出清口葛从周出安丰王军屯于宿州十一月杨行密遣朱瑾击师古师古败死从周亟返兵至于溍河瑾又败之王惧驰归光化元年三月天子以王兼天平军节度使四月遣葛从周攻晋之山东取邢洺磁三州襄州赵匡凝自其父德諲时来附匡凝又与杨行密李克用通而其事泄七月遣氏叔琮康怀英攻匡凝取其唐随邓三州匡凝请和乃止十二月李罕之以潞州来降二年卢龙节度使刘仁恭攻魏魏博节度使罗绍威来求救王赴之败仁恭于内黄四月遣氏叔琮攻晋太原不克七月李克用取泽潞十一月保义军乱杀其节度使王珙推其牙将李璠为留后其将朱简杀璠来降

【新史朱友谦传作璠得逃去与纪不同盖新史记传俱本旧史而旧史记传故自异也】以简为保义军节度使三年四月遣葛从周攻刘仁恭之沧州取其德州及仁恭战于老鸦堤大败之八月晋取洺州王如洺州复取之是时镇定皆附于晋遂攻镇州破临城王镕来送款进攻定州王郃奔于晋其将王处直以定州降唐宦者刘季述作乱天子幽于东宫天复元年正月护驾都头孙德昭诛季述天子复立封王为梁王王遣张存敬攻王珂于河中出含山下晋绛二州王珂援绝请降三月大举攻晋氏叔琮出太行取泽潞葛从周张存敬侯言张归厚及镇定之兵皆会于太原围之不克遇雨而还五月天子以王兼河中尹护国军节度使六月晋取慈隰自刘季述等已诛宰相崔胤外与梁交欲假梁兵尽诛宦者而凤翔李茂贞邠宁王行瑜等各有挟天子以令诸侯之意皆遣子弟以精兵宿卫天子中尉韩全海等亦因恃以为助天子与胤计诛宦者全海等颇侦得之大惧日夜谋所以去胤之术胤知谋泄事急即矫称被密诏令王以兵入诛宦者十月王以宣武宣义天平护国兵七万至于河中取同州遂攻华州镇国军节度使韩建出降全海等闻王且至即以岐邠宿卫兵劫天子奔凤翔王乃上书言胤所以召之之意天子怒罢胤相诏梁兵还镇王引兵去攻邠州屯于三原静难军节度使杨崇本以邠宁庆衍四州降崔胤奔于华州二年春王还军河中晋攻晋绛遣朱友宁击之于蒲县败之取汾慈隰三州遂进围太原不克而还汾慈隰复入于晋四月友宁引兵西至兴平及李茂贞战于武功大败之六月王兵犯凤翔茂贞数出战辄败遂围之王朝服向城而泣曰臣但欲奉迎车驾还宫耳不与岐王角胜也十一月保大军节度使李周彝以兵救凤翔王遣孔勍袭鄜州虜周彝之族徙于河中周彝乃降是时岐兵屡败而围久城中食尽自天子至后宫皆冻馁三年正月茂贞杀韩全海等二十余人囊其首示梁军约出天子以相和解天子乃出幸梁军遣使者驰召崔胤胤托疾不至王使人戏胤曰吾未识天子惧其非是子来为我辨之天子还至兴平胤率百官奉迎王自为天子执辔且泣且行行十余里辞之乃止见者咸以为忠天子至自凤翔王与崔胤杀宦者七百余人二月天子赐王回天再造竭忠守正功臣以辉王祚为诸道兵马元帅王为副元帅王乃留兄子友伦为护驾指挥使以为天子卫王引兵东归天子餞于延喜楼赐杨柳枝五曲初梁兵已西平卢军节度使王师范遣其将刘鄩袭兖州据之王已还梁四月如郓州遣朱友宁攻青州师范败之于石楼友宁死九月杨师厚克棣州师范以青州降而鄩亦降友伦击鞠堕马死王怒谓崔胤杀之遣兄子友谅胤于京师 【

新纪友谅作友谦今据家人传】 其与友伦击鞠者皆杀之更以友谅代典宿卫自天子奔华州王请迁都洛阳天子虽不许而王命河南尹张全义修治洛阳宫以待天佑元年正月王引兵屯河中遣牙将寇彦卿如京师请迁都洛阳并徙长安居人以东天子行至陕州王朝于行在先如东都是时六军诸卫兵已散亡其从以东者惟小黄门十数人打球供奉内园小儿等二百余人行至谷水王悉杀而代之以谋乱闻由是天子左右皆梁人矣四月甲辰天子至自西都是时晋王李克用岐王李茂贞楚王赵匡凝蜀王王建吴王杨行密闻梁劫天子迁洛阳皆欲举兵讨梁王患之而杨崇本复附于岐六月王乃以兵如河中声言攻崇本遣朱友恭氏叔琮蒋玄晖等弑昭宗矫诏以辉王祚为嗣十月王朝于京师杀朱友恭氏叔琮十一月攻淮南取其光州攻寿州不克而旋二年二月遣蒋玄晖杀德王裕等九王于九曲池六月杀司空裴枢等百余人七月天子复使来赐王迎銮纪功碑王遣武宁节度使杨师厚攻襄州取其唐邓复郢随均房七州王如襄州军于汉北九月师厚破襄州山南东道节度使赵匡凝奔于淮南荆南留后赵匡明奔于蜀师厚取荆南遂出光州以攻寿州不克天子卜祀天于南郊王怒以为蒋玄晖等欲祈天以延唐祚天子惧改卜郊十一月辛己天子封王为魏王相国总百揆以宣武宣义天平护国天雄武顺佑国河阳义武昭义武宁保义忠义戎昭武定泰宁平卢匡国镇国荆南忠武二十一军为魏国 【新旧史戎昭俱作武昭考当时无此军额兹据通鉴】 备九锡王怒不受十二月天子以王为天下兵马元帅王益怒遣人告枢密使蒋玄晖与何太后有私杀玄晖而焚之遂弑太后于积善宫又杀宰相柳璨太常卿张廷范王子下诏以太后故停郊三年春魏博罗绍威谋杀其牙军来假兵以虞变王为发兵北攻刘仁恭之沧州兵过魏而绍威已杀牙将其兵之在外者果皆叛据贝卫澶博诸州王以兵悉讨平之遂攻沧州军于长芦刘仁恭求救于晋晋人取潞州王乃旋军开平元年春正月壬寅天子使御史大夫薛贻矩来劳军宰相张文蔚率百官劝进夏四月壬戌更名晁甲子王即皇帝位于汴州国号梁戊辰大赦 【帝曾祖讳茂琳旧纪是年六月司天监上言请改日辰内戊字为武字避讳也今纪凡日辰俱仍作戊字此正如唐纪日辰之丙字俱不作景字也若洪迈谓温父名诚以戊类成字故司天监诏之者误矣】 改唐天佑四年为开平元年封唐主为济阴王迁置曹州以兵镪之升汴州为开封府建为东都以唐东都为西都废京兆府为雍州赐东都酺一日契丹阿保机遣使者来五月丁丑朔以唐相张文蔚杨涉为门下侍郎御史大夫薛贻矩为中

书侍郎同中书门下平章事乙酉封兄全昱为广王子友文博王友珪郢王友谦翼王友璋福王友贞均王友徽建王兄子友谅衡王友能惠王友海邵王甲午改枢密院为崇政院太府卿敬翔为使是月潞州行营都指挥使李思安及晋人战败绩六月甲寅以平卢节度使韩建守司徒同中书门下平章事秋七月己亥追尊祖考为皇帝妣为皇后皇高祖黯谥曰宣元庙号肃祖祖妣范氏谥曰宣僖曾祖茂琳谥曰光献庙号敬祖祖妣杨氏谥曰光孝祖信谥曰昭武庙号宪祖祖妣刘氏谥曰昭懿考诚谥曰文穆庙号烈祖妣王氏谥曰文惠九月括马冬十月己未讲武于繁台十一月壬寅赦亡命背军髡黥刑徒

二年春正月癸酉朔引见诸道贡举人己亥卜郊于西都二月癸亥弑济阴王 【新史此事在正月己亥之下而不系日考旧唐书哀帝纪作二月二十二日新唐书纪亦作二月通鉴作二月癸亥癸亥即二月二十二日也今从之】 辛未契丹遣使者来三月壬申朔如西都丙子如怀州丁丑如泽州戊寅封鸿胪卿李崧介国公为二王后壬午以匡国军节度使刘知俊为潞州行营招讨使癸巳改卜郊张文蔚薨夏四月癸卯杨涉罢以吏部侍郎于兢为中书侍郎翰林学士承旨工部侍郎张策为刑部侍郎并同中书门下平章事 【新纪作翰林学士承旨礼部侍郎张策考梁以讳改承旨为奉旨而六臣传礼部作工部今改辑】 壬子至泽州五月己丑潞州行营都虞候康怀英及晋人战于夹城败绩戊戌立唐三庙契丹遣使者来六月壬寅以忠武军节度使刘知俊为西路行营招讨使以伐岐 【是年五月改同州匡国军为忠武军此刘知俊仍为同州节度而非自同州招讨使也】 己酉杀金吾卫上将军王师范灭其族丙辰刘知俊及岐人战漠谷败之秋九月丁丑如陕州以博王友文留守东都冬十月丁未至自陕州十一月癸巳张策罢左仆射杨涉同中书门下平章事十二月己亥以介国公为三恪鄯国公莱国公为二王后

三年春正月甲戌如西都 【按世多以梁为都汴州其实不然考通鉴于开平二年云是岁帝将迁都洛阳三年春正月己巳迁太庙主于洛阳甲戌帝发大梁己卯至洛阳是梁此时寔自东都迁于西都也且不特此也旧史开平元年其建东都制云兴王之地受命之邦丰沛着启祚之美襄邓有建都之荣用壮鸿基且旌故里云云又干化元年二月壬戌诏曰东京旧邦久不巡幸宜以今月九日幸东都似是梁因乎唐制以洛阳为都特此袭位伊始未遽议迁且制置东方利于便近故并建汴都而郊禋大礼仍就西都行事厥后均王定乱赵岩赍传国宝至东

都请王即位于洛阳而王报之曰大梁国家创业之地何必洛阳可知洛阳自为上都而东都则止是唐东都之比故晋张昭远所奏亦仅云汴州在朱氏称制之年有京都之号则知此下干化二年所书四月己巳至自魏州戊寅如西都其内开封而外洛阳者语皆不合也】命然镫以祈福庚寅享于太庙辛卯有事于南郊大赦丙申羣臣上尊号曰睿文圣武广孝皇帝二月壬戌讲武于西杏园甲子延州高万兴叛于岐来降三月以万兴检校司徒为丹延等州安抚招讨等使甲戌如河中山南东道节度使杨师厚为潞州四面行营招讨使刘知俊取丹州夏四月丙午知俊克延鄜坊三州五月己卯至自河中杀佑国军节度使王重师六月庚戌刘知俊执佑国军节度使刘捍叛附于岐辛亥如陕州乙卯以冀王朱友谦为同州东面行营招讨使刘知俊奔于岐丹州军乱逐其刺史宋知诲秋七月商州军乱逐其刺史李稠乙丑克丹州乙亥至自陕州甲申襄州军乱杀其留后王班房州刺史杨虔叛附于蜀八月辛亥降死罪囚辛酉均州刺史张敬方克房州闰月癸酉契丹遣使者来己卯阅稼西苑九月壬寅行营招讨使左卫上将军陈晖克襄州丁未以保义军节度使王檀为潞州东面行营招讨使辛亥韩建杨涉罢以太常卿赵光逢为中书侍郎翰林学士奉旨工部侍郎杜晓为户部侍郎并同中书门下平章事辛酉李洪杨虔伏诛冬十一月甲午日南至告谢于南郊己酉搜访贤良镇国军节度使康怀英伐岐十二月怀英克盩厔三州及刘知俊战于升平败绩

四年春正月壬辰朔始用乐丁未讲武于榆林二月己丑阅稼于谷水秋八月丙寅如陕州河南尹张宗奭留守西都辛未以镇国军节度使杨师厚为西路行营招讨使以伐岐【新纪镇国作护国考杨师厚无镇河中事此时镇河中者为朱友谦而师厚则陕州节度也兹据通鉴】九月己丑至自陕州辛亥搜访贤良冬十一月己丑以盩厔国军节度使王景仁为北面行营招讨使以伐赵赵王王镕北平王王处直叛附于晋晋人救赵十二月癸酉颁律令格式

干化元年春正月丙戌朔日有食之丁亥王景仁及晋人战于柏乡败绩庚寅赦流罪以下求危言正谏癸巳宣义军节度使杨师厚为北面行营招讨使【新纪宣义作天雄考杨师厚于干化元年二月始以宣义节度屯魏州而其时天雄留后则罗周翰也兹据通鉴正之】夏四月壬申契丹遣使者来五月甲申朔大赦改元癸巳如张宗奭第秋八月甲子契丹陷平州戊辰阅稼于榆林戊寅大阅于兴安鞠场九月辛巳朔御文明殿入合庚子如魏州张宗奭留守西都冬十月以郢王友珪为控鹤指挥使

丙子大閼于魏东郊十一月高万兴取盐州壬辰至自魏州

二年春二月丁巳光禄卿卢毗使于蜀甲子如魏州张宗奭留守西都次白马杀左散骑常侍孙鹭右谏议大夫张衍兵部郎中张儁戊寅如贝州三月丙辰克枣强屠之丁未复如魏州夏四月己巳至自魏州【下书如西都则此至东都可知】戊寅如西都五月丁亥降死罪己下囚罢役徒禁屠及捕生是月薛贻矩薨帝不豫六月戊寅郢王友珪反皇帝崩于寝殿年六十一岁谥曰神武元圣孝皇帝庙号太祖陵曰宣陵

太祖开平四年【其元年即唐天佑四年】干化二年凡六年

○末帝

末帝讳瑱太祖第三子也母曰元贞皇后张氏初名友贞为人美容貌沈厚寡言雅好儒士太祖即位封均王为左天兴军使检校司空东京马步军都指挥使干化二年六月太祖遇弑友珪自立矫诏杀博王友文于东都以弑帝之罪归之以王为东京留守开封尹敬翔为中书侍郎同中书门下平章事户部尚书李振为崇政院使明年春正月友珪改元曰凤历二月驸马都尉赵岩至东都王私与之谋诛友珪遣马慎交之魏州见杨师厚计事师厚遣使至洛阳告左龙虎统军袁象先使讨贼是时怀州龙骧屯兵叛方捕索之王乃伪为友珪诏书发左右龙骧在东都者皆还洛阳因激怒之曰天子以怀州屯兵叛追汝等欲尽坑之诸将皆泣莫知所为王曰先皇帝经营王业三十余年今日尚为友珪所弑汝等安所逃死乎因出太祖画像示之而泣曰汝能趋洛阳擒逆贼则转祸为福矣众皆踊跃呼万岁请王为主王乃遣人趣象先等庚寅象先等以禁兵突入进讨友珪友珪死诸军掠都市杜晓见杀象先遣赵岩赍传国宝至东都请王入洛阳王报曰夷门太祖所以兴王业也国家藩镇多在东方命将出师利于便近何必洛阳乃即帝位于东都复称干化三年追废友珪为庶人复博王友文官爵三月丁未帝更名皞夏五月杨师厚克沧州秋九月甲辰以御史大夫姚洎为中书侍郎同中书门下平章事冬十二月晋人取幽州

四年春二月以感化军节度使康怀英为永平军节度使夏四月丁丑贬于兢为莱州司马秋八月以福王友璋为武宁军节度使前武宁军节度使蒋殷叛附于吴九月命天平军节度使牛存节讨之冬十月吴人救徐州存节击败之

贞明元年春正月存节克徐州三月丁卯赵光逢罢以平卢军节度使贺德伦为天

雄军节度使分其相澶卫州为昭德军以宣徽使张筠为节度使己丑天雄军乱贺德伦叛附于晋静难军留后李保衡以邠宁二州叛于岐来附夏六月庚寅朔晋王李存勖入于魏州遂取德州冬十月辛亥康王友孜反伏诛十一月乙丑改元【吴越备史云正月壬辰朔改元大赦与此不同】耀州温昭图叛于岐来附是岁更名瑱

二年春二月匡国军节度使王檀合河中陕同华诸镇兵袭晋阳不克而还三月镇南军节度使刘鄩及晋人战于故元城败绩奔于滑州晋人取卫州又攻惠州取之夏四月晋人取洺州捉生都将李霸反伏诛秋七月晋人取相州张筠奔于京师晋人攻邢州保义军节度使阎宝叛附于晋【新纪保义作安国考职方考邢州梁为保义军唐改安国此自梁言之不当云安国也】八月丁酉以太子太保致仕赵光逢为司空兼门下侍郎同中书门下平章事九月晋人取沧州顺昌军节度使戴思远奔于京师晋人克贝州守将张源德死之冬十月丁酉以中书侍郎郑珣同中书门下平章事【按是年新旧史皆有二月丙申杨涉罢之文考涉罢再相再罢纪传已多异同而此但书涉罢又不见其入相年月当是衍出也兹依通鉴删之】

三年夏四月辛卯右千牛卫大将军刘瓌使于契丹秋九月贬刘鄩为亳州团练使冬十二月以宣义军节度使贺瓌为北面行营招讨使己巳如西都卜郊晋人取杨刘

四年春正月不克郊己卯至自西都夏四月己酉以尚书吏部侍郎萧顷为中书侍郎同中书门下平章事己巳赵光逢罢冬十二月庚子朔贺瓌杀其将谢彦章孟审澄侯温裕癸亥瓌及晋人战于胡柳败绩是岁泰宁军节度使张守进叛附于晋以刘鄩为兖州安抚制置使以讨之

五年春正月晋军于德胜秋八月乙未以开封尹王瓌为北面行营招讨使冬十月刘鄩克兖州张守进伏诛十二月晋人取濮阳以天平军节度使霍彦威为北面行营招讨使

六年夏四月己亥降死罪以下囚乙巳尚书左丞李琪为中书侍郎同中书门下平章事护国军节度使朱友谦袭同州杀节度使程全晖叛附于晋【友谦传作逐程全晖与此不同】泰宁军节度使刘鄩讨之秋七月陈州妖贼母乙灰自称天子九月庚寅以供奉官郎公远为契丹欢好使冬十月母乙灰伏诛

龙德元年春镇州将张文礼杀其节度使王镕来乞师不许三月丁亥朔禁私度僧尼陈州刺史惠王友能反夏五月丙戌朔改元降流罪

已下秋赦友能降封房陵侯以天平军节度使戴思远为北面行营招讨使冬十月思远及晋人战于戚城败绩

二年春正月思远袭魏州取成安秋八月滑州兵马留后段凝克卫州执其刺史李存儒戴思远克淇门共城新乡

三年春三月昭义军节度使李继韬叛于晋来附夏四月晋王李存勖即皇帝位闰月壬寅唐袭郢州取之五月庚申以宣义军节度使王

彦章为北面行营招讨使取德胜南城秋八月征彦章还以段凝为北面行营招讨使先锋将康延孝叛降于唐冬十月甲戌王彦章攻郢州唐

人逆战于中都彦章败绩死之唐人取曹州盗窃传国宝奔于唐 【谨按通鉴辑览

御批秦玺久经煨烬不足置议向尝详论之至如宋

白之说玺当有二如李心传之说玺更当有三其真贋又何从而辨乃晋得之而存勖据为受命之符梁失之而欧阳修特书曰盗窃传国宝夫

存勖躁妄固无足责欧阳尚称有识者而亦斤斤于此何耶】 戊寅皇帝崩年三十六敬翔自杀梁亡

末帝干化二年 【仍太祖年号称三年四年】 贞明六年龙德三年凡十一年

右梁二帝合十六年

钦定续通志卷十九

●钦定续通志卷二十 后唐纪一

后唐纪 【一】

庄宗

○庄宗

庄宗皇帝讳存勖晋王李克用长子也其先本号朱邪盖出于西突厥至其后世别自号曰沙陀而以朱邪为姓唐德宗时有朱邪尽忠者

居于北庭之金满州贞元中吐蕃赞普攻陷北庭徙尽忠于甘州而役属之其后赞普为回鹘所败尽忠与其子执宜东走赞普怒追之及于石

门关尽忠战死执宜走归唐唐居之盐州以隶河西节度使范希朝希朝徙镇太原执宜从之居定襄神武川之新城其部落万骑皆骁勇善骑

射号沙陀军执宜死其子曰赤心懿宗咸通十年神策大将军康承训统十八将讨庞勋于徐州以朱邪赤心为太原行营招讨沙陀三部落军

使以从破勋功拜单于大都护振武军节度使赐姓名李国昌以之属籍沙陀素强而国昌恃功益横恣懿宗患之十三年徙国昌云州刺史大

同军防御使国昌称疾拒命而国昌子克用尤善骑射能仰中双鳧为云州守捉使国昌已拒命克用乃杀大同军防御使段文楚据云州自称

留后唐以太仆卿卢简方为振武节度使会幽并兵讨之简方行至岚州而卒军溃【新纪岚州作凤州考凤州非简方军行之地也兹据旧唐书改】由是沙陀侵掠代北数为边患明年僖宗即位以谓前河东节度使李业遇沙陀有恩而业已死乃以其子钧为灵武节度使宣慰沙陀六州三部落使以招辑之拜克用大同军防御使居久之国昌出击党项吐浑赫连铎袭破振武克用闻之自云州往迎国昌云州人亦闭关拒之国昌父子无所归因掠蔚朔闲得兵三千国昌入保蔚州克用还据新城僖宗乃拜铎大同军使以李钧为代北招讨使以讨沙陀干符五年沙陀破遮虏军又破岢岚军而唐兵数败沙陀由此益炽北据蔚朔南侵忻代岚石至于太谷焉广明元年招讨使李琢会幽州李可举云州赫连铎击沙陀克用与可举相拒于雄武军其叔父友金以蔚朔州降于琢克用闻之遽还可举追至药儿岭大败之琢军夹击又败之于蔚州沙陀大溃克用父子遂亡入达靼克用少骁勇军中号曰李鸦儿其一目眇及其贵也又号独眼龙其威名盖于代北克用在达靼久之郁郁不得志赫连铎又阴赂达靼使取之克用知之因时从羣豪射辄中皆服以为神黄巢陷京师中和元年代北起军使陈景思发沙陀先所降者兴吐浑安庆等万人赴京师行至绛州沙陀军乱大掠而还景思念沙陀足用顾非克用不可将乃以诏书召克用于达靼承制以为代州刺史雁门以北行营节度使克用率蕃汉万人出石岭关过太原节度使郑从谏闭城以备之薄致犒军钱米克用怒纵兵大掠而还二年十一月景思克用复以步骑万七千自岚石路赴京师克用独与数百骑过晋阳城下与从谏别从谏厚赠之三年正月至于河中进屯干坑巢党惊曰鸦儿军至矣二月败巢将黄邲于石堤谷三月又败赵章尚让于良田坡横尸三十里是时诸镇兵皆会长安大战渭桥贼败走入城克用乘胜追之自光泰门先入战望春宫升阳殿巢败南走出蓝田关京师平克用功第一天子拜克用检校司空同中书门下平章事河东节度使以国昌为雁门以北行营节度使十月国昌卒十一月遣其弟克修攻孟方立取其泽潞二州方立走山东以邢洛磁三州自别为昭义军黄巢南走至蔡州合于秦宗权遂攻陈州四年克用以兵五万救陈州出天井关假道河阳诸葛爽不许乃自河中渡河四月败尚让于太康又败黄邲于西华巢且走且战趣汴州朱全忠告急于克用巢至中牟临河欲渡而克用追及之贼众惊溃比至封邱又败之巢脱身走克用追之一日夜驰三百里至于冤胸不及而还过汴州休军封禅寺朱全忠固请克用入城飧之于上源驿夜酒罢克用醉卧伏兵发火起侍者郭景铎灭烛匿克用床

下以水沃其面而告以难克用始张目援弓而起会天大雨灭火克用得从者薛铁山贺回鹮等随电光縋尉氏门而出还军中七月至于太原
讼其事于京师请加兵于汴遣弟克修将兵万人屯于河中以俟朝命僖宗和解之用破黄巢功封克用陇西郡王光启元年河中王重荣与宦
者田令孜有隙徙重荣兖州以定州王处存为河中节度使诏克用以兵护处存之镇重荣使人给克用曰天子诏重荣俟克用至与处存共诛
之因伪为诏书示克用曰此朱全忠之谋也克用信之入上表请讨全忠僖宗不许克用大怒重荣既不肯徙僖宗遣邠州朱玫凤翔李昌符讨
之克用乃以兵助重荣败玫于沙苑遂逼京师天子出居于兴元克用退屯河中而朱玫亦反以兵追天子不及得襄王煊迫之称帝屯于凤翔
僖宗念独克用可讨玫而不能使也当被黄巢长安时天下兵马都监杨复恭与克用善乃遣谏议大夫刘崇望以诏书召克用且道复恭意使
进兵讨玫等克用许诺而未行昭宗龙纪元年孟方立死其弟迁立明年遣李存孝击破孟迁取邢洺磁三州乃遣安金俊攻赫连铎于云州幽
州李匡威救铎战于蔚州金俊大败于是匡威铎及朱全忠等皆请因其败伐之昭宗以克用破黄巢功高不可伐下其事台省四品官议议者
多言不可宰相张浚独以谓沙陀前逼僖宗幸兴元罪当诛失今不取后悔无及军容使杨复恭克用所善也亦极谏以为不可昭宗然之以诏
谕全忠等而浚持其议益坚昭宗不得已削克用属籍官爵以浚为太原四面行营招讨使韩建副之是时潞州将冯霸叛降于梁梁遣葛从周
入潞州昭宗以京兆尹孙揆为昭义军节度使克用遣李存孝执揆于长子谷取潞州十一月张浚出阴地关存孝等与战败之三战三败之浚
逃归克用遂大掠晋绛至于河中乃上表自诉其辞颇慢侮天子为之引咎优诏答之二年二月复拜克用河东节度使陇西郡王加检校太师
兼中书令四月攻赫连铎于云州围之百余日铎走吐浑八月大搜于太原出晋绛掠怀孟至于邢州遂攻王镒于镇州克用以十余骑渡滹沱
觐敌遇大雨平地水深数尺镇人袭之克用匿林中祷其马曰吾世有太原者马不嘶马偶不嘶以免前军李存孝取临城进攻元氏李匡威救
镒克用退军邢州景福元年王镒攻邢州李存信李嗣动等败之于尧山二月会王处存攻赵战于新市为镒所败八月李匡威攻云州以牵攻
赵之兵而克用潜入于云州返出击匡威匡威败走十月李存孝以邢州叛二年存孝求援于王镒克用出兵井陘击镒且以书招镒而急攻其
平山镒惧请和献帛五十万匹且出兵助攻邢州干化元年三月执存孝杀之冬遣李存审攻幽州李匡俦弃城走沧州见杀以刘仁恭为留后

二年河中王重荣卒其诸子珂珙争立克用请立珂而凤翔李茂贞邠宁王行瑜华州韩建请立琪昭宗初两难之乃以宰相崔胤为河中节度使既而许克用立珂茂贞等怒合三镇兵犯京师克用乃大举蕃汉兵南下三镇惧皆罢去六月克用攻绛州斩刺史王瑶珙弟助珙以争者也七月至于河中同州王行约奔于京师扬言曰沙陀十万至矣谋奉天子幸邠州茂贞假子阎圭时宿卫京师亦谋劫幸凤翔京师大乱昭宗出居于右门克用军留月余不进昭宗遣延王戒丕丹王允以兄事克用且告急八月克用进军渭桥拜邠宁四面行营都统昭宗还京师十一月克用攻邠州破之王行瑜走至庆州见杀克用还军云阳仍请讨茂贞昭宗慰谕之使与茂贞解仇以纾难赐号忠正平难功臣封晋王是时晋军久屯渭北或劝克用入朝克用意未决都押衙盖寓曰天子初还自外寝未安席若晋兵渡渭恐复惊扰都邑人臣尽忠勤王而已何必朝哉克用笑曰盖寓犹不信我况天下乎乃收军而还三年正月昭宗欲复以张浚为相克用曰此朱全忠之谋也乃上表曰若陛下朝以浚为相则臣暮至于阙廷京师大恐浚命遽止朱全忠数攻兖郓朱宣朱瑾来乞师克用遣李存信假道于魏以救之存信屯于莘县军士不戢罗弘信伏兵攻之存信败走洺州克用自将击魏战于洹水亡其子铁林指挥使落落六月破魏成安洹水临漳等县十月又败魏人于白龙潭进攻观音门全忠救至乃还四年刘仁恭叛克用以兵五万击之战于安塞大败光化元年朱全忠遣葛从周攻下邢洺磁三州克用遣周德威出青山口遇从周于张公桥德威大败冬潞州守将薛志勤卒李罕之入据潞州叛附于朱全忠遣李嗣昭讨之嗣昭取泽州二年全忠遣氏叔琮攻破承天军又破辽州至于榆次周德威败之于洞涡全忠将丁会攻泽州下之秋李嗣昭复取泽潞三年嗣昭败汴军于汴河复取洺州朱全忠自将围之嗣昭走至青山口遇汴伏兵嗣昭大败秋嗣昭取怀州是岁汴人攻镇定镇定皆绝晋以附于朱全忠天复元年全忠封梁王梁攻下晋绛河中执王珂以归克用既失三与国乃下意为书币聘梁以求和全忠以为晋弱可取乃曰晋虽请盟而书辞慢因大举击晋四月氏叔琮入天井张文敬八新口葛从周入土门王处直入飞狐侯言入阴地叔琮取泽潞其别将白奉国会王镕兵自井陘入破承天军辽州守将张鄂汾州守将李瑋皆迎降晋人大惧会天大雨霖梁兵多疾皆解去五月李存审复取汾州诛李瑋七月周德威李嗣昭取慈隰二年进攻晋绛大败于蒲县梁军乘胜破汾慈隰三州遂围太原克用大惧谋出奔云州又欲奔匈奴未决梁军大疫解去周德威复取汾慈隰三州四年梁迁天子

于洛阳改元曰天佑克用以谓劫天子以迁都者梁也天佑非唐号不可称乃仍称天复天复五年会契丹阿保机于云中约为兄弟六年梁攻燕沧州围之燕王刘仁恭来乞师克用恨仁恭反复欲不许其子存勳谏曰此吾复振之时也今天下之势归梁者十七八强如赵魏中山悉听命自河以北能为梁患者独我与仁恭耳若燕与梁合非我之福也夫为天下者不顾小怨且彼常困我而我急其难以德怀之是谓一举而两得此不可失之机也克用以为然乃为燕出兵攻破潞州梁乃解围去以李嗣昭为潞州留后七年梁兵十万攻潞州围以夹城遣周德威救潞州军于乱柳冬克用疾是岁梁灭唐克用复称天佑四年五年正月辛卯克用卒年五十三而存勳嗣为晋王初克用破孟方立于邢州还军上党置酒三垂冈伶人奏百年歌至于衰老之际声辞甚悲坐上皆凄怆时存勳在侧方五岁克用慨然捋须指而笑曰吾行老矣此奇儿也后二十年其能代我战于此乎存勳年十一从克用破王行瑜遣献捷于京师昭宗异其状貌赐以鸂鶒卮翡翠盘而抚其背曰儿有奇表后当富贵无忘予家及长善骑射胆勇过人稍习春秋通大义尤喜音声歌舞俳優之戏至是嗣位于太原叔父克宁杀都虞候李存质二月执克宁杀之且以先王之丧叔父之难告周德威德威自乱柳还军太原梁兵围潞州者闻晋有大丧德威军且去因颇懈王谓诸将曰梁人幸我大丧谓我少而新立无能为也宜乘其怠击之乃出兵趋上党行至三垂冈叹曰此先王置酒处也会天大雾昼暝兵行雾中攻其夹城破之梁军大败凯旋告庙九月蜀王王建岐王李茂贞及杨崇本攻梁大安晋亦遣周德威攻其晋州败梁军于神山六年刘知俊叛梁来乞师王自将至阴地关遣周德威攻晋州败梁军于蒙坑七年冬梁遣王景仁攻赵赵王王镒来乞师会王处直使者亦至欲共推王为盟主合兵攻梁乃发兵救赵八年正月败梁军于柏乡斩首二万级获其将校三百人马三千匹进攻邢州不下留兵围之去攻魏别遣周德威徇梁夏津高唐攻博州破东武朝城遂击黎阳临河淇门掠新乡其城燕王刘守光闻晋兵深入乃大治兵声言助晋王患之乃旋师七月会赵王王镒于承天军刘守光称帝于燕九年正月遣周德威会镇定以攻燕守光求救于梁梁军攻赵屠枣强李存审击走之八月朱友谦以河中叛于梁来降梁遣康怀英讨友谦复臣于梁而亦阴附于晋十年十月刘守光请降王如幽州守光背约不降攻破之十一年杀刘守光于太原用其父仁恭于雁门于是赵王王镒北平王王处直奉册推王为尚书令始建行台七月攻梁邢州战于张公桥败绩十二年魏州军乱贺德伦以魏博二州叛于梁来附王八

魏州行至永济诛其乱首张彦以其兵五百自卫号帐前银鎗军六月王兼领魏博节度使取德州七月取澶州刘鄩军于洹水王率百骑觐其营遇鄩伏兵围之数重决围而出亡七八骑八月梁复取澶州晋军与鄩对垒于莘晋军数挑战鄩闭壁不出十三年正月王留李存审于莘声言西归鄩即引兵击魏攻其城东王行至贝州返击之鄩大败追至于故元城又败之鄩走黎阳三月克卫州降其刺史米昭克磁州杀其刺史靳昭四月克洺州八月围邢州降其节度使阎宝梁张筠弃相州戴思远弃沧州而逃遂取二州而贝州人杀梁守将张源德以城降契丹寇蔚州执振武节度使李嗣本十四年契丹寇新州及幽州李嗣源击走之梁王彦章军于杨刘十二月王攻杨刘亲负刳以堙堑遂破之十五年正月梁晋相拒于杨刘彦章决河水以隔晋军六月渡水击彦章破其四寨八月大阅于魏合卢龙横海昭义安国及镇定之兵十万马万匹军于麻家渡王彦章军于行台十二月进军临濮梁军追之战于胡柳晋军大败周德威死之梁军暮休于土山晋军反击大败之遂军德胜为夹寨十六年正月王兼领卢龙军节度使十月广德胜北城十二月败梁王瓚军于河南十七年朱友谦袭同州梁遣刘鄩击友谦李存审败梁军于同州十八年正月魏州僧传真献唐受命宝一赵将张文礼弑其君镒来请命二月以文礼为镇州兵马留后三月河中节度使朱友谦昭义军节度使李嗣昭横海军节度使李存审义武军节度使王处直安国军节度使李嗣源镇州兵马留后张文礼领天平军节度使阎宝大同军节度使李存璋振武军节度使李存进匡国军节度使朱令德请王即皇帝位王三辞友谦等三请王曰予当思之八月遣赵王王镒故将符习及阎宝史建瑋等攻张文礼于镇州建瑋取赵州张文礼卒其子处瑾闭城拒守九月建瑋战死十月梁戴思远攻德胜北城李嗣源败之于戚城王处直叛附于契丹其子都幽处直以来附十二月契丹寇涿州遂寇定州十九年正月阎宝败于镇州以李嗣昭代之四月嗣昭战死以李存进代之八月梁取卫州九月存进败镇人于东垣存进战死十月李存审克镇州王兼领成德军节度使同光元年春三月李继韬以潞州叛附于梁夏四月巳巳晋王即皇帝位因唐国号大赦改元尊母晋国太夫人曹氏为皇太后以行台左丞相豆卢革为门下侍郎右丞相卢程为中书侍郎并同中书门下平章事使郭崇韬召义监军张居翰为枢密使以魏州为东京太原为西京镇州为北都下诏求贤良方正直言极谏闰月追尊祖考为皇帝妣为皇后曾祖执宜祖妣崔氏皆谥曰昭烈庙号懿祖祖国昌祖妣秦氏皆谥曰文景庙号献祖 【唐宣皇帝庙号

献祖光皇帝庙号懿祖后唐既承唐后而复尊其祖为懿祖献祖是议礼者之失也】考
谥曰武庙号太祖立庙于太原高祖太宗懿宗昭宗为
七庙壬寅李嗣源取郢州五月辛酉梁人取德胜南城六月及王彦章战于新垒败之是
月卢程罢秋八月梁人克泽州【唐末泽潞皆属晋
梁初已得泽州至此又属晋而梁克之中闲不见晋得泽州年月盖旧史阙不书五代之
乱战争攻取彼此得失不常多类此也】守将裴约死
之九月戊辰李嗣源及王彦章战于递坊败之冬十月辛未朔日有食之壬申如郢州以
袭梁甲戌取中都丁丑取曹州己卯灭梁丙戌贬郑珣
为莱州司户参军萧顿登州司户参军杀李振赵岩张汉杰朱珣灭其族己丑降死罪流
巴下原之十一月乙巳复北都为镇州太原为北都丙
辰复汴州为宣武军丁巳以尚书左丞赵光胤为中书侍郎礼部侍郎韦说同中书门下
平章事辛酉复永平军为西都甲子如洛京十二月庚
午朔至自汴州辛巳李继韬伏诛继韬之弟继达杀其兄继侁于潞州壬辰改于伊阙
二年春正月河南尹张全义及诸镇进暖殿物己酉求唐宦者遣使迎皇太后于晋
阳庚申加河阳辛酉至自河阳丁卯七庙神主至自太
原祔于太庙朝献于太微宫戊辰享于太庙二月己巳朔有事于南郊大赦癸酉羣臣上
尊号曰昭文睿武光孝皇帝癸未立魏国夫人刘氏为
皇后是月刑部尚书卢质上同光刑律统类三月庚戌赐从平汴州及入洛南郊立仗军
士等功臣号庚申以工部郎中李涂为长安按视诸陵
使潞州将杨立反夏五月壬寅以教坊使陈俊为景州刺史内园栽接使储德源为宪州
刺史丙寅李嗣源克潞州六月丙子杨立伏诛秋七月
己酉如雷山赛天神九月壬子置水于城门以禳荧惑甲寅幸郭崇韬第冬十一月癸卯
畋于伊阙命从官拜梁太祖墓【谨按通鉴辑览
御批庄宗藉始终为唐之名能灭朱梁乃方欲戮足旋公拜墓颠倒无据若或褫其魄
者尚何足观其后乎】丙午至自伊阙十二月庚午及
皇后幸张全义第
三年春正月庚子如东京毁即位坛为鞠场二月己巳聚鞠于新场乙亥射雁于王
莽河辛巳射雁于北郊乙酉射鸭于郭泊庚寅射雁于
北郊三月乙未寒食望祭于西郊庚申至自东京辛酉改东京为邺都以洛京为东都夏
四月癸亥朔日有食之乙亥及皇后幸郭从韬朱汉宾
第庚寅赵光胤薨五月丁酉皇太妃薨废朝五日六月辛未以宗正卿李纾为昭宗少帝
改卜园陵使括马秋七月壬寅皇太后崩八月癸未杀
河南县令罗贯九月庚子以魏王继岌为西川四面行营都统郭崇韬为招讨使以伐蜀
丁巳射雁于尖山冬十一月己酉蜀王衍降郭崇韬杀

王宗弼及其弟宗渥宗训灭其族十二月己卯畋于白沙癸未至自白沙闰月辛亥封弟存美为邕王存霸永王存礼薛王存渥申王存义睦王存确通王存纪雅王

四年春正月壬戌降死罪以下甲子魏王继岌杀郭崇韬及其二子于蜀 【新纪二子作三子兹据本传改】 庚辰杀睦王存义及护国军节度使李继麟灭其族丁亥杀李继麟之将史武薛敬容周唐殷杨师太王景来仁白奉国皆灭其族二月己丑以宣徽南院使李绍宏为枢密使癸巳邺都军将赵在礼反于贝州甲午畋于冷泉赵在礼陷邺都以归德军节度使李绍荣讨之丁酉西川行营指挥使康延孝反庚子邢州军将赵太反以武宁军节度使李绍真讨之甲寅以成德军节度使李嗣源讨赵在礼 【新旧纪是日俱作甲辰而此下及明宗纪凡三月所系日俱递差十日兹并据通鉴改正】 三月丁巳赵太伏诛李嗣源反博州守将翟建自称刺史乙丑西川副招讨使任圜讨康延孝擒之甲戌杀王衍灭其族乙亥如汴州壬申次蒙泽龙骧指挥使姚彦温以前锋军叛降于李嗣源嗣源入于汴州甲戌至自万胜从马直指挥使郭从谦反夏四月丁亥朔皇帝崩年四十三谥曰光圣神闵孝皇帝庙号庄宗陵曰雍陵

庄宗同光四年

钦定续通志卷二十

●钦定续通志卷二十一 后唐纪二

后唐纪 【二】

明宗 愍帝 废帝

○明宗

明宗皇帝世本代北无姓氏父电为鴈门部将生子邈佶烈以骑射事太祖为人质厚寡言执事恭谨太祖养以为子赐名嗣源梁之攻兖郓也太祖遣李存信将兵三万救兖郓存信留莘县不进使嗣源别以兵三千先击梁兵梁兵解去存信为罗弘信所袭败走嗣源独殿而还太祖以嗣源所将骑五百号横冲都光化三年李嗣昭攻梁邢洺出青山遇葛从周兵嗣昭大败走梁兵追之嗣源从间道后至谓嗣昭曰为公一战乃解鞍砺镞凭高为阵左右指画梁追兵望之莫测嗣源急呼曰吾取从周士卒可无动乃驰骑犯之出入奋击嗣昭继进梁兵解去嗣源身中四矢太祖解衣赐药以劳之由是李横冲名重四方梁晋相拒于柏乡梁龙骧军以赤白马为两阵旗帜铠仗皆如马色晋兵望之皆惧庄宗举锤以饮嗣源曰卿望梁家赤白马惧乎虽吾亦怯也嗣源笑曰有其表尔翌日归吾厓也庄宗大喜曰卿当以气吞之因引锤饮醕奋槌驰骑

犯其白马挟二裨将而还梁兵败以功拜代州刺史庄宗攻刘守光嗣源及李嗣昭将兵三万别出飞狐定山后取武勃儒三州庄宗已平魏州因徇下磁相拜相州刺史昭德军节度使徙镇安国契丹攻幽州庄宗遣嗣源与阎宝等击走之同光元年徙镇横海是时梁唐相拒于河上李继韬以潞州叛降梁庄宗有忧色召嗣源至帐下谓曰继韬以上党降梁而梁方急攻泽州吾出不意袭其郛州以断梁右臂可乎嗣源对曰夹河之兵久矣苟非出奇则大计不决臣请独当之乃以步骑五千自德胜趣郛州郛人无备遂袭破之即拜天平军节度使蕃汉马步军副都总管梁军攻破德胜南栅庄宗退保杨刘王彦章急攻郛州庄宗悉兵救之嗣源为前锋击败梁军追至中都擒彦章及梁监军张汉杰时段凝悉将梁兵屯河上庄宗未知所向诸将多言宜乘胜以取青齐嗣源曰彦章之败凝犹未知使其闻之迟疑定计亦须三日设若知吾所向亟发救兵须自白马南渡数万之众舟楫亦难猝办此去汴州不数百里前无险阻方阵而行信宿可至汴州已破段凝岂足顾哉会郭崇韬亦劝庄宗入汴庄宗以为然遣嗣源以千骑先至汴州攻封邱门王瓚开门降庄宗后至见嗣源大喜手揽其衣以头触之曰天下与尔共之进拜中书令二年庄宗祀天南郊赐铁券五月破杨立于潞州六月徙镇宣武兼蕃汉内外马步军总管冬契丹侵渔阳嗣源败之于涿州三年徙镇成德庄宗幸邺请朝行在不许贞简太后疾请入省又不许太后崩请赴山陵许之而契丹侵边乃止十二月遂朝于洛阳

天成元年 【实同光四年而书天成元年者大赦改元文见下可知庄宗纪自书同光四年各从其所称既曰改元不嫌二号也】 郭崇韬朱友谦皆以谗死嗣源以名位高亦见疑忌赵在礼反于魏李绍荣攻之不克大臣皆请遣嗣源讨贼庄宗不许羣臣屡请庄宗不得已遣之三月壬戌嗣源至魏营于城西南在礼登楼谢罪甲子军变嗣源入于魏与在礼合巳而出止魏县丁卯以其兵南行遣石敬瑭将三百骑为先锋嗣源行过相州掠小坊马二千匹以益军 【新纪相州作巨鹿在魏州之北嗣源自魏南行不得道出巨鹿也兹据康福传】 壬午入汴州四月丁亥庄宗遇弑己丑入洛阳甲午监国朝羣臣于兴圣宫乙未以中门使安重海为枢密使杀李绍荣及租庸使孔谦壬寅以左骁卫大將軍孔循为枢密使丙午始奠于西宫即皇帝位于柩前易斩纛以袞冕壬子魏王继岌薨甲寅大赦改元张居翰罢五月丙辰以太子宾客郑珣工部尚书任圜为中书侍郎并同中书门下平章事戊辰以赵在礼为义成军节度使六月丁酉汴州控鹤军乱指挥使张谏杀其权知州事高

逃己亥谏伏诛秋七月庚申安重诲杀殿直马延于御史台门契丹使者来己卯贬豆卢革为辰州刺史韦说叙州刺史甲申流革于陵州说于合州八月乙酉朔日有食之丁酉以象笏三十二赐百官之无笏者阅稼于冷泉宫己亥契丹寇边丁未平卢军节度使霍彦威杀其登州刺史王公俨甲寅以医官张志忠为太原少尹祔庄宗于太庙祧懿宗室九月己未幸至德宫及袁建丰第冬十月辛丑契丹使来告阿保机之丧废朝三日

二年春正月癸丑朔更名亶癸亥以端明殿学士兵部侍郎冯道太常卿崔协为中书侍郎并同中书门下平章事二月西川节度使孟知祥杀其兵马都监李严丙申赦京师囚以郭从谦为景州刺史既而杀之 【谨按通鉴辑览 御批春秋以赵盾不讨贼则直笔书之嗣源之于从谦抑亦甚矣方其入洛阳也军威甚盛于诛一从谦何有必迟之十月之久始诱而族之乎盖其初固无杀之之心久而审已度世知为清谦所不容姑藉此以塞谤耳不然何不直斥其弑逆之罪且先之以宠秩耶胡寅乃疑为畏其众而难图惜其不及时以取悦不但识事机亦实无当于南董之议也】 戊戌山南东道节度使刘训为南面招讨使以伐荆南三月卢台军乱杀其将乌震夏四月庚寅卢台军将龙晔等伏诛六月丙戌任圜罢庚子如白司马坡祭突厥神秋七月甲子随州刺史西方邺取夔忠万州癸酉杀豆卢革韦说八月己卯朔日有食之冬十月乙酉宣武军节度使朱守殷反马步军都指挥使马彦超死之己丑克汴州守殷自杀乙未杀太子少保致仕任圜辛丑释轻系囚是月传箭于霍彦威十一月乙亥契丹使者来十二月甲辰畋于东郊丙午追尊祖考为皇帝妣为皇后高祖聿谥曰孝恭庙号惠祖祖妣刘氏谥曰孝恭昭曾祖敖谥曰孝质庙号毅祖祖妣张氏谥曰孝质顺祖琰谥曰孝靖庙号烈祖祖妣何氏谥曰孝靖穆考电谥曰孝成庙号德祖妣刘氏谥曰孝成懿立庙于应州

三年春正月丁巳契丹陷平州 【通鉴注云元年冬卢文进来奔唐得平州至是复为契丹所陷四夷附录亦云契丹当庄宗明宗时攻陷营平二州考旧史刘守光传守光僭号之日契丹陷平州其年为晋之天佑八年又辽史太祖纪天赞二年正月克平州二月以平州卢龙军置节度使辽之天赞二月乃唐庄宗同光元年即四夷附录固已云自唐末幽蓟割据契丹因得出陷营平而于下方纪庄宗之末赵德钧镇幽州云云知契丹之陷平州实在明宗之前再考张希崇传云明宗时卢文进自平州亡归契丹以希崇代为平州节度使是文进归唐未尝挈平

州以来此正如张希崇代镇平州后亦率其麾下南归而平州之属契丹者如故也则明宗时不当复有契丹陷平州之事然新旧史通鉴皆同故仍之而着其略又如此】二月丁丑朔日有食之乙未孔循罢三月丁未朔御札求直言己未郑珣罢癸亥以成德军节度使王建立为尚书右仆射同中书门下平章事西方邺克归州戊辰以宣徽南院使范延光为枢密使夏四月戊寅延光罢义成军节度使王都反壬寅以归德军节度使王晏球为北面行营招讨使五月契丹将秃馁入于定州辛酉以右卫上将军赵敬怡为枢密使封回鹘可汗王仁裕为顺化可汗秋七月己未杀齐州防御使曹廷隐八月卢龙军节度使赵德钧执契丹首领惕隐赫邈庆州防御使窦廷琬反冬十月静难军节度使李敬周讨之十一月甲午王建立罢十二月李敬周克庆州窦廷琬伏诛

四年春正月癸卯王晏球克定州辛酉晏球献馘俘斩秃馁于市赵敬怡薨丁卯崔协薨庚午至自汴州三月丙戌杀从子从璨夏四月契丹寇云州癸丑契丹使撩括梅里来求秃馁杀之甲寅以端明殿学士兵部侍郎赵凤为门下侍郎同中书门下平章事五月乙酉追谥少帝曰昭宣光烈孝皇帝契丹寇云州六月降邺都依旧为府秋七月壬申杀右金吾卫上将军毛璋九月癸巳杀供奉官乌昭遇冬十二月辛丑杀西平县令李商

长兴元年春正月丁卯阅马于苑辛卯以宣徽南院使朱弘昭为大内留守二月乙巳以天雄军节度使石敬瑭为御营使癸丑朝献于太微宫甲寅享于太庙乙卯有事于南郊大赦改元三月庚寅立淑妃曹氏为皇后出上阳门观稼夏四月戊戌安重诲使河中衙内指挥使杨彦温逐其节度使从珂壬寅西京留守索自通侍卫步军指挥使药彦稠讨之辛亥自通执彦温杀之戊午羣臣上尊号曰圣明神武文德恭孝皇帝六月癸巳朔日有食之秋七月壬午访庄宗子孙瘞所八月乙未以忠武军节度使张延朗为三司使壬寅杀捧圣都挥使李行德大将张俭灭其族吐浑来附封子从荣为秦王戊申海州将王传极杀其刺史陈宣叛于吴来降丙辰封子从厚为宋王九月东川节度使董璋反甲申以成德军节度使范延光为枢密使丁亥以天雄军节度使石敬瑭为东川行营都招讨使冬十月丁酉始藏冰甲辰左骁卫大将军致仕张筠进助军粟乙巳董璋陷阆州杀节度使李仁矩指挥使姚洪死之孟知祥反十一月庚申朔秦王从荣受册谒太庙丙戌契丹东丹王突欲来奔十二月丁未二王后秘书丞鄴国公杨仁矩卒废朝一日癸丑安重诲讨董璋

二年春正月庚午董璋陷遂州武信军节度使夏鲁奇死之【新纪在四月兹据蜀

世家蓋紀誤以奏聞之日為城陷之日也】 二月己

丑石敬瑭燒營旋師辛丑安重海罷三月趙鳳罷丁亥以太常卿李愚為中書侍郎同中書門下平章事夏四月甲辰以宣徽北院使趙延壽為樞密使己酉以石敬瑭兼將軍諸衛副使乙卯以旱赦流罪以下閏五月丁酉殺太子太師致仕安重海及其妻張氏子崇質崇緒秋八月己未契丹使者來九月丁亥放五坊鷹隼冬十一月甲申朔日有食之辛丑旌棣州民邢釗門閭十二月甲寅除鐵禁初稅農具錢

三年春正月庚子契丹使者來二月己卯靜難軍節度使藥彥稠及黨項戰于牛兒谷敗之三月甲申契丹遣使者來夏五月己丑二王后詹事司直楊延紹襲封鄴國公丙午孟知祥攻董璋取綿州六月甲寅封王建為高麗國王大義軍使孟知祥殺董璋取東川達靺首領頡哥以族來附秋七月孟知祥復稱藩冬十一月丁亥以石敬瑭為北京留守河東節度使兼藩漢馬步總管

四年春正月庚寅以端明殿學士兵部侍郎劉昫為中書侍郎同中書門下平章事三月甲辰追冊晉國夫人夏氏為皇后夏五月戊寅封子從珂為潞王從益許王從子從溫兗王從璋洋王從敏涇王丙戌契丹使者來秋七月乙未回鶻獻白鶻命放之八月戊申大赦九月戊戌趙延壽罷以山南東道節度使朱弘昭為樞密使冬十月庚申范延光罷以三司使馮贇為樞密使壬申幸上和亭得疾 【新舊史及通鑑上和俱作士和惟吳縝纂誤引此及從榮傳俱作上和今據改】 十一月壬辰秦王從榮以兵入興聖宮不克伏誅乙未侍衛親軍都指揮使康義誠殺三司使孫岳戊戌皇帝崩于雍和殿年六十七謚曰聖德和武欽孝皇帝廟號明宗陵曰徽陵

明宗天成四年 【其元年即莊宗同光四年】 長興四年凡八年

○愍帝

愍皇帝諱從厚明宗第三子也 【新紀作第五子茲從舊紀及五代會要】 母曰昭懿皇后夏氏為人形質丰厚寡言好禮明宗以其貌類已特愛之天成二年以檢校司徒拜河南尹判六軍諸衛事加檢校太保同平章事從厚妃孔循女也安重海怒循以女妻從厚三年罷循樞密使出從厚為宣武軍節度使徙鎮河東長興元年封宋王徙鎮成德又徙天雄累加兼中書令四年十一月秦王從榮誅死明宗病甚遣宦者孟漢瓊召王于邺而明宗崩辛丑王至洛陽十二月癸卯朔始發喪于西宮皇帝即位于柩前羣臣見于東階復于喪位丙午成服于西宮庚戌登光政門樓存問軍民辛亥殺司衣王氏癸丑始聽政乙卯殺司儀康氏丁巳以馮道為

大行皇帝山陵使户部尚书韩彦恠为副中书舍人王延为判官礼部尚书王权为礼仪使兵部尚书李麟为鹵簿使御史中丞龙敏为仪仗使左仆射权判河南府卢质为桥道顿递使应顺元年春正月戊寅大赦改元用乐乙未朱弘昭冯赞献钱助作山陵闰月丙午尊皇后为皇太后甲寅尊王淑妃为太妃北京留守石敬瑭献银绢助作山陵二月己卯徙凤翔节度使潞王从珂为河东节度使庚寅视作山陵潞王从珂反辛卯以西京留守王思同为西面行营都部署静难军节度使药彦稠为副以讨从珂三月丙辰思同兵溃严卫指挥使尹晖羽林指挥使杨思权以其军叛降于从珂辛酉杀侍卫亲军马军都指挥使朱弘实癸亥以河阳三城节度使康义诚为凤翔行营都招讨使王思同为副思同奔归于京师不克死之丁卯京城巡检使安从进叛杀冯赞朱弘昭自杀从进传二人首于从珂戊辰帝如卫州

愍帝应顺一年

○废帝

废帝镇州平山人也本姓王氏其世微贱母魏氏少寡明宗为骑将过平山掠得之魏氏有子已十岁【新纪作十余岁此据家人传】明宗养以为子名曰从珂及长状貌雄伟谨信寡言而骁勇善战明宗甚爱之自晋与梁相拒于河上从珂常立战功庄宗呼其小字曰阿三不徒与我同年其敢战亦类我同光二年为卫州刺史突骑指挥使戍于石门明宗讨赵在礼自魏反兵而南从珂率戍兵自曲阳孟县驰出常山追赴之明宗之南也兵少既得从珂兵军声大振明宗入立拜河中节度使封潞王时明宗春秋已高王于诸子次最长枢密使安重诲恶之乃矫诏河中裨将杨彦温使图之王阅马于黄龙庄彦温即闭门拒之王止于虞乡以闻明宗召王还京师居之清化里第重诲数请以失守行法明宗不听后重诲见杀乃起王为左卫大将军西京留守长兴三年为凤翔节度使王子重吉自明宗时典禁兵为控鹤指挥使愍帝即位朱弘昭冯赞用事乃罢重吉兵职出为亳州团练使又徙王为北京留守不降制书而宣授又以李从璋为代初安重诲得罪罢河中以从璋为代而重诲见杀故王益自疑遂据城反愍帝遣王思同会诸镇兵讨之思同战败走诸镇兵皆溃

清泰元年三月丁巳王以兵东庚申次长安西京副留守刘遂雍迎降甲子次华州执药彦稠丙寅次灵宝河中安彦威同州安重霸陕州康思立皆来降丁卯次陕州康义诚以侍卫军迎降杀宣徽使孟汉琼愍帝出居于卫州夏四月壬申王入京师冯道率百官迎王于蒋桥王辞

不见入哭于西宫遂见羣臣道拜王答拜入居于至德宫癸酉以太后令降天子为鄂王命王监国乙亥皇帝即位丙子率河南民财以赏军丁丑借民房课五月以赏军戊寅弑鄂王磁州刺史宋令询死之【新纪作慈州兹据旧纪】乙酉大赦改元戊子杀康义诚及药彥稠丙申葬明宗皇帝于徽陵五月丙午以端明殿学士左谏议大夫韩昭胤为枢密使庄宅使刘延朗为枢密副使庚戌冯道罢以天雄军节度使范延光为枢密使甲寅赐劝进选人宗子官六月庚辰幸范延光及索自通第秋七月辛亥以太常卿卢文纪为中书侍郎同中书门下平章事丁巳立沛国夫人刘氏为皇后八月辛未以尚书左丞姚顛为中书侍郎同中书门下平章事许御署官选九月契丹寇边冬十月戊寅李愚刘昫罢十二月己亥以雄武军节度使张延朗为中书侍郎同中书门下平章事契丹寇云州庚寅如龙门

二年春正月甲戌范延光罢己丑追尊鲁国太夫人魏氏为皇太后三月辛丑以忠武军节度使赵延寿为枢密使夏四月癸未韩昭胤加中书侍郎同中书门下平章事辛卯宣徽南院使刘延皓为枢密使五月丙申契丹寇边六月癸未羣臣献添都马秋七月刘延皓罢九月己酉以刑部尚书房暠为枢密使冬十二月壬申韩昭胤罢

三年春正月丁未封子重美为雍王三月丙午以翰林学士马胤孙为中书侍郎同中书门下平章事夏五月辛卯以河东节度使石敬瑭为天平节度使戊戌敬瑭反丙午以建雄军节度使张敬达为太原四面兵马都部署义武军节度使杨光远副之戊申先锋指挥使安审信叛降于石敬瑭己酉振武戍将安重荣叛降于石敬瑭壬子天雄军将张令昭逐其节度使刘延皓六月癸亥以令昭权知天雄军事甲戌以宣武军节度使范延光为天雄军四面招讨使秋七月戊申克魏州壬子张令昭伏诛癸丑彰圣指挥使张万迪叛降于石敬瑭八月戊午契丹使者来九月甲辰张敬达及契丹战于太原败绩契丹围敬达于晋安戊申帝如河阳冬十月壬戌括马籍民为兵十一月戊子以卢龙军节度使赵德钧为行营都统丁酉契丹立石敬瑭为皇帝闰月甲子杨光远杀张敬达以其军叛降于契丹契丹以晋主南下丁丑帝至自河阳辛巳宫中火皇帝崩年五十三

废帝清泰三年【其元年即愍帝应顺元年】

右后唐四帝合十四年

钦定续通志卷二十一

●钦定续通志卷二十二 后晋纪

晋纪

高祖

出帝

○高祖

高祖皇帝其父臬捩鸡本出于西边自朱邪归唐从朱邪入居阴山其后晋王李克用起于云朔之间臬捩鸡以善骑射常从晋王征伐有功官至洺州刺史臬捩鸡生敬瑭其姓石氏不知其得姓之始也敬瑭为人沉厚寡言明宗爱之妻以女是为魏国公主由是常隶明宗帐下号左射军庄宗已得魏梁将刘鄩急攻清平庄宗驰救之兵未及阵为鄩所掩敬瑭以十余骑横槊驰击取之以旋庄宗拊其背而壮之手啖以酥啖酥北俗所重由是名动军中天佑十五年庄宗战于胡柳前锋周德威战死敬瑭以左射军从明宗复击败梁兵明宗战胡卢套杨村为梁兵所败敬瑭常脱明宗于危及从攻郢州复与废帝先登功多赵在礼之乱明宗讨之至魏而兵变明宗初欲自归于天子明已所以不反者敬瑭献计曰岂有上将与叛卒入贼城而他日得保无恙者乎且犹豫者兵家大忌不如速行愿得骑兵三百先攻汴州夷门天下之要害也得之可以成事明宗然之与之骁骑三百自白马渡河为前锋明宗遂入汴庄宗自洛后至不得入而兵皆溃去庄宗西还明宗以敬瑭为前锋趣汜水且收其散卒庄宗遇弑明宗入立拜敬瑭保义军节度使赐号竭忠建策兴复功臣兼六军诸卫副使在陕为政以廉闻是时诸侯多不奉法邓州陶玘亳州李邺皆以赃污论死明宗下诏书褒廉吏普州安崇阮洺州张万进耀州孙岳等以讽天下而以敬瑭为首天成二年从幸汴州为御营使拜宣武军节度使侍卫亲军马步军都指挥使六军副使如故改赐耀忠匡定保节功臣三年徙镇天雄充兴唐尹同平章事寻为东川行营都招讨使讨董璋不克而还复兼六军诸卫副使徙镇河阳三城未行而契丹吐浑突厥皆入寇是时秦王从荣统六军敬瑭疑其必及祸不欲为其副乃自请行及制出不落副使辄复辞行明宗数责大臣问谁可行者范延光赵延寿等卒以敬瑭为请乃拜河东节度使大同彰国振武威塞等军蕃汉马步军总管落六军副使乃行愍帝应顺元年加中书令二月徙镇成德三月废帝进逼京师愍帝急召敬瑭赴阙敬瑭至卫州而愍帝出奔遇敬瑭于道敬瑭杀帝从者百余人幽帝于卫州而去初敬瑭与废帝俱事明宗心不相悦及废帝即位不得已来朝而内颇自疑欲求归镇且难言之时敬瑭久病羸瘠乃益为炙灼满身太后及公主屡为之言帝亦见其多病不以为虞乃复以为河东节度使时契丹屡寇北边敬瑭将大军屯忻州而屯兵忽变拥敬瑭呼万岁敬瑭惧斩三十余人而后止

帝闻之益疑敬瑭 【依旧史及通鉴改辑】

天福元年正月徙敬瑭镇天平敬瑭大惧谓其将佐曰吾之再来河东也主上面许终身不除代今无故而迁是疑吾反也且太原地险而粟多吾当内檄诸镇外求援于契丹可乎桑维翰刘智远等共以为然乃上表论废帝非明宗子不当立请立许王从益为明宗嗣废帝下诏削夺敬瑭官爵命张敬达等讨之敬瑭求援于契丹九月契丹耶律德光将五万骑入自鴈门辛丑与张敬达战于晋阳敬达大败敬瑭夜出北门见德光约为父子十一月丁酉即皇帝位于太原国号晋以幽涿蓟檀顺瀛莫蔚朔云应新妫儒武寰州入于契丹己亥大赦改元以掌书记桑维翰为翰林学士礼部侍郎知枢密使事闰月丙寅以翰林学士承旨户部侍郎赵莹为门下侍郎桑维翰为中书侍郎并同中书门下平章事兼枢密使甲戌赵德钧及其子延寿叛于唐来降契丹鏖之以归己卯帝次河阳节度使苾从简叛于唐来降辛巳至自太原卢文纪姚顛罢甲申大赦杀张延朗刘延朗赦房暠十二月乙酉如河阳追降唐帝为庶人丁亥以司空冯道兼门下侍郎同中书门下平章事己丑曹州将石重立杀其刺史郑玩辛卯求直言癸巳成德军将秘琼逐其节度副使李彦珂同州裨将门铎杀其将杨汉宾庚子天平军节度使王建立杀其副使李彦赞

二年春正月乙卯日有食之 【实录作正月甲寅朔乙卯日食十国纪年蜀乙卯朔日食】 癸亥安远军节度使卢文进叛降于吴丁卯天雄军节度使范延光杀齐州防御使秘琼戊寅以兵部侍郎李崧为中书侍郎同中书门下平章事枢密使封唐宗室子为公及隋酈公为二王后以周介公备三恪三月丁酉契丹使者来诏辟荒田三月庚辰如汴州夏四月丁亥赦囚蠲民租赋赵莹使于契丹辛卯宣武军节度使杨光远进助国钱契丹使者来五月壬戌求直言丁丑追尊祖考为皇帝妣为皇后高祖璟谥曰孝安庙号靖祖祖妣秦氏谥曰孝安元曾祖彬谥曰孝简庙号肃祖祖妣安氏谥曰孝简恭祖昱谥曰孝平庙号睿祖祖妣来氏谥曰孝平献考绍雍谥曰孝元庙号献祖祖妣何氏谥曰孝元懿六月癸未契丹使者来范延光反丁酉传箭于义成军节度使符彦饶丁未以杨光远为魏州四面行营都部署东都巡检张从宾反留守判官李遇死之以奉国都指挥使侯益护圣都指挥使杜重威讨之从宾寇河阳杀皇子重信寇河南杀皇又重义 【新纪义作信信作义两相违舛兹据旧史及家人传正之】 秋七月从宾陷汜水关杀巡检使宋廷浩壬子右卫大将军尹晖叛伏诛右监门卫大将军娄继英叛附于张从宾

义成军乱杀戍将侍卫马步军都指挥使白奉进甲寅戍将奉国指挥使马万执符彦饶归于京师命杀之于赤冈乙卯以杨光远为魏州行营都招讨使辛酉杜重威克汜水关壬申杨光远克博州丙子安州屯防指挥使王晖杀其节度使周瓌【新纪作周环据李金全传改】右卫上将军李金全讨之八月丙申静难军节度使安叔干进添都马乙巳赦非死罪囚及张从宾符彦饶王晖余党九月禁丧葬用乐冬十月辛巳禁造甲兵

三年春二月戊戌诸镇皆进物以助国三月丁丑禁私造铜器秋七月辛酉以皇业钱作受命宝八月戊寅以冯道及左仆射刘昫为契丹册礼使壬午澶州刺史冯晖降丙戌许御署官选己丑蠲水旱民税辛丑归伶官于契丹九月己酉赦范延光己未归静鞭官刘守威金吾勘契官王殷司天鸡叫学生殷晖于契丹己巳赦魏州蠲民税是月以宣徽南院使刘处让为枢密使冬十月戊寅契丹使者来奉册曰英武明义皇帝庚辰升汴州为东京以洛阳为西京雍州为晋昌军戊子右金吾卫大将军马从斌使于契丹己未契丹使者来戊戌大赦十一月辛亥升广晋府为邺都壬戌除铸钱令十二月丙子封子重贵为郑王是岁契丹改国号曰辽【谨按通鉴辑览御批契丹之改辽与拓跋之称魏体例无二乃纲目于拓跋书魏契丹则不书辽盖由司马光以宋臣作通鉴其时不敢称辽以敌宋纲目遂仍其旧初非别有深文也乃刘友益尹起莘辈拘牵好异谓书魏所以进之书契丹所以外之抑知史家纪事当以春秋为法春秋前书荆后书楚非例以义起耶即以纲目言之东晋时如慕容之称燕苻姚之称秦以至武都河西虽弹丸蕞尔而列国之书法具在何所容其进退者腐儒曲说支离真所云烛笼添骨其明益障乌足与言传信之笔哉】

四年春正月盗发愍皇帝墓辛卯以澶州防御使张从恩为枢密副使旌深州民李自伦门闾三月丙辰颁调元历灵州戍将王彦忠以怀远城反己未彦忠降供奉官齐延祚杀之夏四月甲申废枢密使秋七月庚子朔日有食之丙申复禁铸钱闰月壬申桑维翰罢八月西戎寇泾州彰义军节度使张彦泽败之九月丁丑辽使者来癸未封李从益为郟国公以奉唐后冬十二月乙亥立唐高祖太宗庄宗明宗愍帝庙于西京戊子辽使者来吐蕃罢延族来附

五年春正月丁卯朔除民公私债三月除刴刑夏四月甲子辽使者来五月丙戌安远军节度使李金全叛附于唐六月癸卯唐将李承裕入于安州甲辰安远军节度使马全节及承裕战于城南败之丁巳克安州执李承裕杀

之秋八月丁酉阅稼于西郊己未西京留守杨光远杀

太子京师致仕范延光九月丁卯以翰林学士承旨户部侍郎和凝为中书侍郎同中书门下平章事己未阅稼于沙台冬十月丁未辽使者来

六年春正月丙寅吐谷浑背辽来奔不纳三月除民二年至四年以前税夏四月己未辽使者来秋八月壬辰如邺都开封尹郑王重贵留守东京以宣徽南院使张从恩为东京内外兵马都监壬寅大赦甲寅光禄卿张澄使于辽九月乙亥前安国军节度使杨彦询使于辽冬十月山南东道节度使安从进反十一月丁丑以西京留守高行周为襄州行营都部署以讨之十二月丙戌以郑王重贵为广晋尹徙封齐王行营先锋使郭海金及安从进战于唐州败之成德军节度使安重荣反以天平军节度使杜重威为镇州行营招讨使丙申辽使者来戊戌杜重威及安重荣战于宗城败之

七年春正月丁巳克镇州安重荣伏诛赦广晋庚午辽使者来三月归德军节度使安彦威塞决河于滑州夏五月乙巳尊皇太妃刘氏为皇太后六月乙丑皇帝崩于邺都之保昌殿年五十三谥曰圣文章武明德孝皇帝庙号高祖陵曰显陵

高祖天福七年 【其元年即后唐清泰三年】

○出帝

出帝讳重贵高祖兄子也父敬儒为唐庄宗骑将早卒高祖以重贵为子高祖六子五皆早死而重睿幼故重贵得立重贵少而谨厚善骑射高祖使博士王震教以礼记久之不能通大义谓震曰此非我家事也高祖为契丹所立将引而南谋以一子留守太原德光使尽出诸子择

之指重贵曰此眼大者可也遂拜金紫光禄大夫行太原尹北京留守知河东节度事天福二年拜左金吾卫上将军三年冬为开封尹封郑王

加太尉同中书门下平章事六年高祖幸邺留守东京己而为广晋尹徙封齐王七年六月乙丑高祖崩即位于柩前丁卯尊皇太后曰太皇太后皇后曰皇太后庚午使左骁卫将军石德超以御马二匹祭于相州之西山如京使李

仁廓使于辽 【按如京使官名也史别本京下有师字误今删】 辽使者来丙子以冯道为大行皇帝山陵使门下侍郎窦贞固为副太常卿

崔棣为礼仪使户部侍郎吕琦为鹵簿使御史中丞王易简为仪仗使己卯四方馆使宋崇节右金吾卫大将军梁言使于辽秋七月壬辰太皇太后刘氏崩辍朝三日丁酉使石德超扑马于相州之

西山庚子大赦甲辰辽使者来八月戊午高行周克襄州庚申天平军节度使景延广义

成军节度使李守贞彰德军节度使郭谨进钱粟助山

陵甲子辽使者来癸酉又遣使者来九月辛丑以李守贞为大行皇帝山陵都部署冬十月己未辽使者来十一月复遣使者来庚寅葬高祖皇帝于显陵己亥牛羊使董殷使于辽辛丑蠲高祖灵车所过民租之半十二月庚午北京留守刘知远进百头穹庐辽使者来辛未又遣使者来

八年春正月辽使者来二月壬子以景延广为御营使己未车驾发邺都赦广晋府囚庚申次澶州赦囚乙丑至自邺都庚午寒食望祭显陵于南庄焚御衣纸钱三月己卯赵莹罢以晋昌军节度使桑维翰为侍中辛丑引进使太府卿孟承诲使于辽夏四月戊申朔日有食之庚午董殷使于辽遣供奉官张福率威顺军捕蝗于陈州五月泰宁军节度使安审信捕蝗于中都丁亥追封皇伯敬儒为宋王 【按司马光通鉴及朱子纲目皆无追封皇伯敬儒为宋王之语此欧阳修特笔也欧阳修曰出帝立不以正臣其父而爵之以欺天下敬儒为出帝本生父从唐旧制亦无称皇伯之礼至于尊秦国夫人安氏为太妃此尤不经之甚者夫帝既为高祖后矣既伯其父而王之矣而复尊生母为皇太妃后世将以为谁之妃乎五代丧乱君臣罔识经权如周世宗令辟也而于柴守礼父子之间臣之以卿外之曰舅不能曲尽情理以至屈法全恩识者犹不能无讥焉若出帝者又何足与之言伦理也哉】 癸卯冯道罢甲辰以旱蝗大赦六月庚戌祭蝗千皋门癸亥遣供奉官帅奉国军捕蝗于京畿辛未括借民粟杀藏粟者秋七月丁酉射于南庄辽使者来甲辰遣供奉官李汉超帅奉国军捕蝗于京畿八月丁未募民捕蝗易以粟辛亥检民青苗九月戊寅尊秦国夫人安氏为皇太妃丁亥追册魏国夫人张氏为皇后 【张氏帝之元妃也新史于纪不书而家人传又不载其姓氏疏矣兹据旧史】 丙申幸大年庄及景延广第冬十月戊申立冯氏为皇后壬子畋于近郊如沙台丙寅辽使者来庚午括借民粟十一月己卯董殷使于辽甲申如八角闾马牧乙未辽使者来戊戌齐州刺史杨承祚奔于青州十二月癸丑给事中边光范登州刺史郭彦威使于辽平卢军节度使杨光远反淄州刺史翟进宗死之

开运元年春正月甲戌朔辽侵沧州己卯陷贝州庚辰归德军节度使高行周为北面行营都部署辽入鴈门侵代州辛巳殿直王班使于辽至于邺都不得进而复壬午以前静难军节度使李周留守东京景延广为御营使自将以御辽丙戌辽侵黎阳辛卯讲武于澶州赵延寿以辽人寇南乐 【旧书于晋纪凡辽人称兵伐晋者例书曰寇恭读通鉴辑览 御批彼时中国已瓜分瓦解不成正统而石晋得国之本又由于父事辽及重贵继立好事者顿以书臣为耻然称孙之表仍无虚日以是构祸即问

愚駮无识之人以祖寇孙有不听然而笑者哉是当用
两国互伐之文书侵以正其误诚为 折衷至当千古不易之通义也惟是赵延寿托
身于辽藉辽以残父母之邦则其丧心失计自有不可
得而揜者故于此仍书曰寇以着其恶】 甲午以刘知远为幽州道行营招讨使括马丙
申辽侵黎阳辛丑刘知远及辽伟王战于秀容败之博
州刺史周儒叛降于辽二月戊申前军都虞候李守贞及辽战于马家渡败之癸丑北面
行营都虞候马全节及辽战于北平败之三月癸酉又
败之于戚城辽师还己丑冀州刺史白从暉及辽战于衡水败之癸巳籍民为武定军夏
四月辽陷德州沿河巡检梁进败之取德州戊寅至自
澶州赦京师己未马全节及辽战于定丰败之辛酉率借民财五月戊寅李守贞讨杨光
远丁亥以邺都留守张从恩为贝州行营都部署辛卯
以李守贞为青州行营都部署六月克淄州丙午复置枢密使丁未以桑维翰为中书令
充枢密使秋七月辛未朔大赦改元己丑以太子太傅
刘昫守司空兼门下侍郎同中书门下平章事八月辛丑以刘知远为北面行营都统顺
德军节度使杜威为都招讨使戊辰旌项城民史仁诩
门闰九月庚午朔日有食之丙子辽侵遂城乐寿代州刺史白文珂及辽战于七里烽败
之冬十月庚戌以武宁军节度使赵在礼为北面行营
副都统邺都留守马全节为副招讨使十二月己亥朔射兔于皋门丁巳杨承勋囚其父
光远以降杀之闰月乙酉赦青州囚辽侵恒州

二年春正月辽陷泰州 【新纪作秦州兹据马全节传及五代会要改下同】 壬
子马全节及辽战于榆林两军皆溃戊午如南庄张从
恩留守东都辛酉以高行周为御营使辽师还二月己巳如黎阳横海军节度使田武为
东北面行营都部署以御辽丙子大阅于戚城丙戌阅
马于铁邱丙申以端明殿学士户部侍郎冯玉为户部尚书枢密使三月戊戌据陷祁州
刺史沈斌死之 【此事通鉴在二月然新旧史俱作
三月戊戌盖据奏到之日也】 丁未败于戚城庚戌马全节克泰州辛亥易州戍将孙方
谏及辽战于狼山败之甲寅杜威克满城乙卯克遂城
庚申杜威及辽战于阳城败之追奔至于卫村又败之夏四月戊寅劳旋于戚城己卯劳
旋于王莽河甲申至自澶州赦左右军囚庚寅大赏军
功五月丙申朔大赦丙午如南庄六月丁卯射于繁台 【纂误引此作射雁于繁台谓雁
字当是兔字盖前后皆作射兔而六月又非射雁时
也今各本并无雁字姑仍之】 幸杜威第秋八月甲子朔日有食之丙寅和凝罢以冯玉
为中书侍郎同中书门下平章事辛未阅马于茂泽陂
丁丑括马九月己亥阅马于万龙冈幸李守贞第冬十月戊寅射兔于砚台十一月己巳

射兔于皋门如沙台十二月丁丑畋于郊丁亥桑维翰

罢以开封尹赵莹为中书令李崧守侍中枢密使

三年春二月壬戌朔日有食之壬午射鸭于板桥如南庄夏六月孙方谏以狼山叛附于辽辽侵定州己丑以李守贞为行营都部署义成

军节度使皇甫遇为副秋九月辛丑行营马军排阵使张彦泽及辽战于新兴败之癸卯刘知远及辽战于朔州败之冬十月丁未以杜威为北

面行营都招讨使李守贞为兵马都监十一月永清军节度使梁汉璋及辽战于瀛州败绩【新纪永清作永静考是时无永静军兹据旧史

】辽侵镇定十二月己未杜威军于中渡壬戌奉国都指挥使王清及辽战于滹沱败绩死之杜威李守贞张彦泽以其军叛降于辽庚午射兔

于沙台壬申张彦泽犯京师杀开封尹桑维翰帝北行辽灭晋

出帝天福一年【仍高祖年号称八年】开运三年凡四年

右后晋二帝合十二年

钦定续通志卷二十二

●钦定续通志卷二十三 后汉纪

汉纪

高祖 隐帝

○高祖

高祖皇帝姓刘氏讳暠初名知远其先沙陀部人也其后世居于太原知远弱不好弄严重寡言面紫色目多白睛凜如也与晋高祖俱事

唐明宗为偏将明宗及梁人战德胜晋高祖马甲断梁兵几及之知远以所乘马授高祖复取高祖马殿而还高祖德之高祖留守北京以知远

为押衙潞王从珂反愍帝出奔高祖自镇州赴京师遇愍帝于卫州止传舍知远遣勇士石敢袖铁槌侍高祖以虞变高祖与愍帝议事未决左

右欲兵之知远拥高祖入室敢与左右格鬪而死高祖即以兵尽杀愍帝左右置帝传舍而去废帝入立高祖复镇河东已而有隙高祖将举兵

知远与桑维翰密为高祖谋画赞成之高祖即位于太原以知远为侍卫亲军都虞候领保义军节度使契丹耶律德光送高祖至潞州临决指

知远曰此都军甚操刺无大故勿弃之天福二年迁侍卫马步军都指挥使领忠武军节度使已而以杜重威代知远领忠武徙知远领归德知

远耻与重威同制杜门不出高祖怒欲罢其兵职宰相赵莹以为不可高祖乃遣端明殿学士和凝就第宣谕知远乃受命五年徙邺都留守九

月朝京师高祖幸其第六年拜河东节度使北京留守七年高祖崩出帝立与辽绝盟用兵北方以知远从高祖起太原有佐命勋位已高疑

其幸国家多故而有异志每优尊之拜中书令封太原王幽州道行营招讨使又拜北面行营都统开运二年封北平王三年加守太尉然王未尝出兵辽逼澶州别遣伟王攻鴈门王败之于秀容八月杀吐浑白承福等族取其货巨万良马数千四年正月德光入京师出帝北迁王遣牙将王峻奉表于德光德光呼之为儿赐以木拐一木拐辽法优礼大臣则赐之如中国几杖峻持拐归辽人望之皆辟道峻还为王言德光必不能有中国乃议建国二月戊辰河东行军司马张彦威等上笺劝进辛未皇帝即位于太原称天福十二年【天福晋高祖年号也天福止八年改元开运至此四年矣汉虽建国而未有国号又称晋年号舍开运追续天福为十二年初无义理但书其实尔】磁州贼首梁晖取相州来归武节都指挥使史弘肇取代州杀其刺史王晖晋州将药可侑杀其守将骆从朗及括钱使谏议大夫赵熙来归辛巳陕州留后赵晖潞州留后王守恩来归三月丙戌蠲河东杂税辛卯延州军乱逐其节度使周密壬辰丹州指挥使高彦询以其州来归壬寅德光北去以其将萧翰为宣武军节度使守汴州夏四月己未以右都押衙杨邠为枢密使蕃汉兵马都孔目官郭威权枢密副使辽陷相州杀梁晖癸亥立魏国夫人李氏为皇后甲子以河东节度判官苏逢吉观察推官苏禹珪并为中书侍郎同中书门下平章事乙丑侍卫亲军步军都指挥使史弘肇取潞州戊辰奉国指挥使武行德以河阳来归史弘肇取泽州丙子耶律德光卒于栾城其众入于镇州五月甲午以太原尹刘崇为北京留守丙申车驾发太原萧翰遯归以郇国公李从益知南朝军国事戊申次绛州刺史李从朗来归六月丙辰次洛阳【新纪作河阳此从旧纪】杀李从益及其母于京师甲子至于京师戊辰改国号汉赦罪人蠲民税是夏刘昫薨秋闰七月前天雄军节度使杜重威反【杜重威于晋出帝时避出帝名去重至汉而复之】庚午以天平军节度使高行周为邺都行营都部署以讨之【旧纪是年七月以宋州节度使高行周为邺都留守高行周传则云汉祖人汴代李守贞为天平节度使邺平授邺都留守与纪不同今依传及新纪】庚辰追尊祖考为皇帝妣为皇后高祖湍谥曰明元庙号文祖祖妣李氏谥曰明贞曾祖昂谥曰恭僖庙号德祖祖妣李氏谥曰恭惠祖僖谥曰昭宪庙号翼祖祖妣李氏谥曰昭穆考璵谥曰章圣庙号显祖妣安氏谥曰章懿以汉高皇帝为高祖光武皇帝为世祖皆不祧八月护圣指挥使白再荣逐辽人以镇州来归丙申安国军节度使薛怀让杀辽将刘铎入于邢州九月甲戌以吏部尚书窦贞固守司空兼门下侍郎翰林学士中书舍人李涛为中书侍郎并同中

书门下平章事庚辰帝北征冬十月甲申次韦城赦河北十一月壬寅杜重威降十二月癸巳至自邺都

干佑元年春正月己卯大赦改元己未更名暹丁丑皇帝崩于万岁殿年五十四谥曰睿文圣武昭肃孝皇帝庙号高祖陵曰睿陵

高祖天福一年 【仍晋高祖年号】 干佑一年凡二年

○隐帝

隐皇帝讳承佑高祖第二子也母曰昭圣皇后李氏高祖即位拜右卫上将军大内都点检魏王承训长而贤高祖爱之方属以为嗣而承训薨高祖悲哀疾剧乃以承佑属诸将相宰相苏逢吉曰皇子承佑未封王请亟封之未及封高祖崩秘不发丧杀杜重威

干佑元年二月辛巳封承佑周王是日皇帝即位于枢前壬辰右卫大将军凤翔巡检使王景崇及蜀人战于大散关败之癸巳大赦三月壬戌以窦贞固为大行皇帝山陵使吏部侍郎段希尧为副太常卿张昭为礼仪使兵部侍郎卢价为鹵簿使御史中丞边蔚为仪仗使丁丑李涛罢护国军节度使李守贞反陷潼关夏四月辛巳陕州兵马都监王玉克潼关壬午永兴军将赵思绾叛附于李守贞客省使王峻帅师屯于关西以柳邠为中书侍郎兼吏部尚书同中书门下平章事郭威为枢密使以镇宁军节度使郭从义为永兴军兵马都部署戊子保义军节度使白文珂为河中兵马都部署王峻为都监乙未以侍卫步军都指挥使尚洪迁为西面行营都虞候六月戊寅朔日有食之秋七月戊申彰德军节度使王继弘杀其判官张易庚申以郭威同中书门下平章事癸亥辽莫州刺史王彦徽来奔庚午杀成德军副使张鹏乙亥王景崇叛附于李守贞八月壬午郭威讨李守贞九月尚洪迁及赵思绾战败绩冬十一月甲寅杀太子太傅李崧灭其族壬申葬高祖皇帝于睿陵十二月己卯彰武军节度使高允权杀太子太师致仕刘景岩

二年 【按徐无党曰隐帝即位至此宜改元而不改元帝名承佑年号干佑举国臣民共称而不改避当时莫大之失或曰承天之佑礼运语也隐帝名当是祐字五代虽不知礼何至并此而昧之佑字传写误耳】 春正月乙巳朔大赦二月丙子蠲民纽配租夏五月李守贞之将周光逊降乙丑赵思绾降六月癸酉朔日有食之秋七月丁巳郭威杀华州留后赵思绾于京兆甲子克河中八月郭从义杀前永兴巡检乔守温丙戌郭威使来献俘冬十月辽人寇赵魏陷内邱羣臣进添都马己丑郭威及宣徽南院使王峻伐辽十一月辽师还三年春正月西面行营都部署赵晖克凤翔丙午郭威进添都马壬子赵晖献馘俘二月甲戌旌汝阴民曲温门

闰三月己酉寒食望祭于南御园夏四月壬午郭威以枢密使为天雄军节度使冬十一月甲子朔日有食之丙子杀杨邠及侍卫亲军都指挥使史弘肇三司使王章皆灭其族郭威反庚辰义成军节度使宋延渥叛附于威壬午威犯封邱泰宁军节度使慕容彦超军于七里店癸未劳军于北郊甲申劳军于刘子陂慕容彦超及郭威战败绩开封尹侯益叛降于威郭允明反乙酉皇帝崩苏逢吉自杀汉亡

隐帝干佑二年 【仍高祖年号】

右后汉二帝合四年

钦定续通志卷二十三

●钦定续通志卷二十四 后周纪

周纪

太祖 世宗 恭帝

○太祖

太祖皇帝姓郭氏讳威邢州尧山人也父简事晋为顺州刺史刘仁恭攻破顺州简见杀威少孤依潞州人常氏潞州留后李继韬募勇敢士为军卒威年十八以勇力应募为人负气好使酒继韬特奇之威尝游于市市有屠者常以勇服其市人威醉呼屠者使进几割肉割不如法叱之屠者披其腹示之曰尔勇者能杀我乎威即前取刀刺杀之一市皆惊威颇自如为吏所执继韬惜其勇阴纵之使亡己而复召置麾下其后庄宗灭梁继韬以叛诛死其麾下兵悉隶从马直威以通书算补为军吏好读阌外春秋略知兵法后为侍卫军吏汉高祖为侍卫亲军都虞候尤亲爱之高祖既历诸镇尝以威从契丹灭晋汉高祖起太原即皇帝位拜威枢密副使干佑元年正月高祖疾大渐以隐帝托威及史弘肇等隐帝即位拜威枢密使是岁三月河中李守贞永兴赵思绾凤翔王景崇相次反隐帝遣白文珂郭从义常思等分讨之久皆无功隐帝谓威曰吾欲烦公可乎威对曰臣不敢请亦不敢辞惟陛下命乃加威同中书门下平章事充西面军前招慰安抚使诸军皆受节度威居军中延见宾客褰衣博带及临阵行营幅巾短后与士卒无异上所赐予与诸将会射恣其所取其余悉以分赐士卒由是将士咸归心于威威至河中自栅其城东思栅其南文珂栅其西调五县十二万人筑连垒以护三栅诸将皆以谓守贞穷寇破在旦夕不宜劳人如此威不听已而守贞数出兵击连垒垒坏威辄补之守贞辄复出击每出必有亡失久之城中兵食俱尽威曰可矣乃治攻具为期日四面攻之破其罗城守贞与妻子自焚死而思绾景崇亦相次平隐帝劳威以玉带加检校太师兼侍中威辞曰臣事先帝见

功臣多矣未尝以玉带赐之且臣将兵在外凡镇安京
师供亿所须使军食不乏皆诸大臣居中者之力也臣安敢独膺此赐隐帝以威为贤于
是悉召杨邠史弘肇苏逢吉苏禹珪窦贞固王章等皆
赐以玉带威乃受又推功大臣请加爵赏于是加贞固司徒逢吉司空 【新纪作贞固司
空逢吉司徒兹据旧纪辑】 禹珪邠左右仆射已而
又曰此特汉廷亲近之臣耳诸宗室方镇外暨荆浙河南皆未及也由是滥赏遍于天下
是冬辽人寇边威以枢密使北伐至魏州辽师引去三
年二月师还四月拜威邠都留守天雄军节度使仍以枢密使之镇宰相苏逢吉以谓故
事枢密使无以藩镇领者与史弘肇等固争久之卒以
枢密使行仍诏河北诸州皆听威节度是时隐帝年少嬖幸浸用事将相不睦帝与李业
等谋已杀史弘肇等乃诏镇宁军节度使李弘义杀侍
卫步军指挥使王殷于澶州又诏侍卫马军指挥使郭崇杀威及宣徽使王峻于魏诏书
先至澶州弘义恐事不果反以诏书示殷殷即驰遣人
告威已而诏杀威峻使者亦驰骑至威匿诏书召枢密使院吏魏仁浦谋于卧内仁浦劝
威反教威倒用留守印更为诏书诏威诛诸将校以激
怒之将校皆愤然效用十一月丁丑威遂举兵渡河隐帝遣开封尹侯益保大军节度使
张彦超客省使阎晋卿等率兵拒威又遣内养鸞脱覘
威所向鸞脱为威所得威乃附脱奏请缚李业等送军中隐帝得威奏以示业等业等皆
言威反状已白乃悉诛威家属于京师庚辰威至滑州
义成军节度使宋延渥叛于汉来降壬午犯封邱甲申及泰宁军节度使慕容彦超战于
刘子陂彦超败奔于兖州隐帝方出劳军为乱兵所弑
丙戌威入京师纵火大掠戊子率百官朝太后于明德门请立嗣君太后下令文武百寮
六军将校议择贤明以承大统庚寅威率百官诣明德
明请立武宁军节度使赧为嗣遣太师冯道迎赧于徐州 【新纪武宁作泰宁然泰宁乃
兖州军号非徐州也兹据职方考】 辛卯请太后临
朝听政以王峻为枢密使翰林学士兵部侍郎范质为副使镇州邢州言有北寇十二月
甲午朔威以大军北征癸丑至澶州而旋王峻遣侍卫
马军都指挥使郭崇以骑兵七百逆刘赧于宋州杀之其将巩廷美杨温为赧守徐州戊
午威营于皋门汉宰相窦贞固苏禹珪来劝进庚申太
后制以威监国

广顺元年春正月丁卯帝即位大赦改元国号周己巳上汉太后尊号曰昭圣皇太
后戊寅汉北京留守刘崇自立于太原己卯以冯道为
中书令二月丁未辽使者来癸丑寒食望祭于蒲池丁巳尚书左丞田敏使于辽三月甲
戌武宁军节度使王彦超克徐州夏四月甲午立夫人

董氏为德妃五月辛未追尊祖考为皇帝妣为皇后高祖璟谥曰睿和庙号信祖祖妣张氏谥曰睿恭曾祖谥曰明宪庙号僖祖祖妣申氏谥曰明孝祖蕴谥曰翼顺庙号义祖祖妣韩氏谥曰翼敬考简谥曰章肃庙号庆祖妣王氏谥曰章德六月辛亥范质及户部侍郎判三司李谷并为中书侍郎同中书门下平章事窦贞固苏禹珪罢癸丑范质参知枢密院事丁巳以宣徽北院使翟光邺为枢密副使秋八月壬戌葬汉隐帝于颍陵冬十月丙午汉人来讨攻晋州十一月王峻及建雄军节度使王彦超拒之十二月慕容彦超反

二年春正月甲子以侍卫步军都指挥使曹英为兖州行营都部署唐人援兖州屯于洙阳徐州巡检使张令彬击败之二月庚寅府州防御使折德宸克岢岚军三月丁巳朔寒食望祭于郊戊辰以内客省使郑仁海为枢密副使翟光邺罢夏四月丙戌朔日有食之五月庚申东征李谷留守东都郑仁海为大内都点检癸亥次曹州赦流罪以下囚乙亥克兖州壬午赦兖州六月乙酉朔幸曲阜祠孔子庚子至自兖州秋九月庚午赦北边吏民毋得入辽境俘掠辽人寇冀州冬十一月癸酉减牛皮税十二月甲午前静难军节度使侯章进买宴银绢却之

三年春正月乙卯麟州刺史杨重训叛于汉来附乙丑罢户部营田务除租牛课二月甲子贬王峻为商州司马三月甲申封子荣为晋王丙戌郑仁海罢己丑以棣州团练使王仁镐为右卫大将军枢密副使夏四月敕诸道所属治圉圃秋七月辽卢台军使张藏英来奔九月作郊坛太庙于东都冬十月庚申以冯道为奉迎神主使十二月戊申四庙神主至自西京迎之于西郊祔于太庙帝不豫壬申杀天雄军节度使王殷乙亥享于太庙

显德元年春正月丙子朔有事于南郊大赦改元羣臣上尊号曰圣明文武仁德皇帝听蜀境通商戊寅罢邺都丙戌以镇宁军节度使郑仁海为枢密使壬辰端明殿学士户部侍郎王溥为中书侍郎同中书门下平章事王仁镐罢是日皇帝崩于滋德殿年五十一谥曰圣神文武

恭肃孝皇帝 【新旧纪俱作圣神恭肃文武兹据世宗纪】 庙号太祖陵曰嵩陵

太祖广顺三年显德一年凡四年

○世宗

世宗皇帝讳荣本姓柴氏邢州龙冈人也柴氏女适太祖是为圣穆皇后荣皇后兄守礼子幼从姑长太祖家太祖遂以为子太祖后稍贵荣亦壮而器貌英奇善骑射略通书史黄老性沉重寡言太祖绝爱之太祖为汉枢密使帝为左监门卫大将军太祖镇天雄以帝为天雄军牙

内都指挥使领贵州刺史干佑三年太祖自魏趣京师留帝守魏太祖即位拜澶州刺史镇宁军节度检校太傅同中书门下平章事帝素为枢密使王峻所忌广顺三年正月来朝不得留既而峻有罪诛三月以帝为开封尹封晋王是冬卜以来年正月朔旦有事于南郊而太祖遇疾不能视朝者久之

显德元年正月丙子郊仪而成礼即以王判内外兵马事加兼侍中壬辰太祖崩秘不发丧乙未宣遗制丙申皇帝即位于柩前以右监门卫大将军魏仁浦为枢密副使二月丁卯以冯道为大行皇帝山陵使太常卿田敏为礼仪使兵部尚书张昭为鹵簿使御史中丞张煦为仪仗使开封少尹权判府事王敏为桥道顿递使汉人攻潞州三月辛巳大赦癸未以郑仁海留守东京乙酉如潞州壬辰次泽州阅兵于北郊癸巳及刘旻战于高原败之追及于高平又败之丁酉帝至潞州己亥侍卫马军都指挥使樊爱能步军都指挥使何徽伏诛壬寅以天雄军节度使符彦卿为河东行营都部署夏四月乙卯葬太祖皇帝于嵩陵汾州防御使董彦颜叛于汉来附丙辰辽州刺史张汉超叛于汉来附辛酉取岚州宪州壬戌立卫国夫人符氏为皇后取石州沁州乙丑冯道薨庚午赦潞州流罪以下如太原忻州监军李勅杀其刺史赵皋叛于汉来附五月丙子代州守将郑处谦叛于汉来附辽师救汉丁酉符彦卿及辽人战于忻口败绩先锋都指挥使史彦超死之六月乙巳班师乙丑次新郑遂拜嵩陵庚午至自太原秋七月庚辰阅稼于南御庄癸巳以枢密院直学士工部侍郎景范为中书侍郎同中书门下平章事魏仁浦为枢密使冬十月甲辰杀左羽林大将军孟汉卿

二年春正月浚胡卢河二月庚子朔日有食之 【新旧史皆无此文此据通鉴辑】求直言夏五月辛未遣宣徽南院使向训凤翔节度使王景伐蜀甲戌大毁佛寺禁民亲无侍养而为僧尼及私自度者六月庚子虑囚秋九月丙寅颁铜禁闰月癸丑向训克秦州冬十月辛未取成州阶州十一月乙未以李谷为淮南道行营都部署以伐唐戊申王景克凤州十二月丙戌郑仁海薨

三年春正月戊戌增筑京城庚子诏亲征淮南以向训留守东京壬寅车驾发京师辛亥侍卫亲军都指挥使李重进及唐人战于正阳败之甲寅以重进为淮南道行营都招讨使二月丙寅如下蔡浮桥壬申克滁州甲戌唐主李景来求成不答壬午景使其臣锺谟来奉表丙戌取扬州辛卯取泰州三月庚子以内外马步军都军头袁彦为竹龙都部署是月取光州舒州常州夏四月常泰州复入于唐五月乙卯至自淮南

赦京师六月壬申赦淮南秋七月皇后崩扬光舒滁州复入于唐八月乙丑课民种禾及
韭戊辰端明殿学士王朴上显德钦天历诏自来岁行
之九月丙午以王朴为户部侍郎枢密副使冬十月癸酉李重进败唐兵于盛唐十一月
庚寅废诸祠不在祀典者乙巳杀李景之臣孙晟十二
月壬申以张永德为殿前都点检

四年春正月己丑朔赦非死罪囚二月甲戌王朴留守东京乙亥南征三月丁未克
寿州夏四月己巳至自寿州己卯放降卒八百归于蜀
癸未追册彭城郡夫人刘氏为皇后乙酉疏汴水五月丙申杀密州防御使侯希进秋八
月乙亥李谷罢以王朴为枢密使癸未蜀人来归我濮
州刺史胡立冬十月戊午设制举科己巳王朴留守东京以三司使张美为大内都点检
壬申南征十二月乙卯泗州守将范再遇叛于唐以其
州来降庚申濠州团练使郭廷谓以其州来降丁丑取泰州

五年春正月丁亥取海州壬辰取静海军丁未克楚州守将张彦卿郑昭业死之二
月甲寅取雄州丁卯如扬州癸酉如瓜州三月壬午如
泰州丁亥复如扬州辛卯如迎銮镇己亥李景请献庐舒蕲黄等州并鄂州所属汉阳汉
川二县【据陆游南唐书辑】于是江北悉平辛亥
李景来买宴浚汴口导河达于淮夏四月庚申祔五室神主于新庙壬申至自淮南五月
辛巳朔日有食之六月辛未放降卒四千六百于唐秋
七月乙酉遣水部员外郎韩彦卿市铜于高丽丙戌行大周刑统丁亥颁均田图冬十月
丁酉均河南河州民租【新纪作括民租兹据旧纪
】十一月庚戌作大周通礼正乐十二月丙戌罢州县课户俸户

六年春二月甲申导汴水入于蔡作律吕新法发粟贷淮南饥民三月己酉甘州回
鹞来献玉却之庚申王朴薨丙寅以宣徽南院使吴廷
祚留守东京癸酉停给铜鱼甲戌北征是月以吴廷祚为左骁卫上将军枢密使夏四月
壬辰取干盩军辛丑取益津关以为霸州癸卯取瓦桥
关以为雄州甲辰取莫州五月乙巳朔取瀛州丙午帝不豫壬子车驾南还甲戌至自雄
州六月癸未立皇后符氏封子宗训为梁王宗让燕国
公【新史宗让作宗谊据旧史改】己丑以范质王溥参知枢密院事魏仁浦同中书
门下平章事以忠武军节度使赵匡胤为殿前都点检
癸亥皇帝崩于滋德殿年三十九谥曰睿武孝文皇帝庙号世宗陵曰庆陵

世宗显德五年【仍太祖年号】

○恭帝

恭皇帝讳宗训世宗第四子也世宗即位大臣请封皇子为王世宗谦抑久之及北
取三关遇疾还京师始封帝为梁王时年七岁

显德六年六月癸巳世宗崩甲午宣遗诏皇帝即位于柩前癸卯以范质为大行皇帝山陵使翰林学士窦俨为礼仪使兵部尚书张昭为鹵簿使御史中丞边归谿为仪仗使宣徽南院使判开封府事咎居润为桥道顿递使秋七月壬戌以赵匡胤领归德军节度使李重进领淮南节度使侍卫亲军副都指挥使韩通领天平军节度使丙寅大赦八月壬午昭义军节度使李筠加检校太尉庚寅封弟熙让为曹王熙谨纪王熙海蘄王已亥加前司空李谷开府仪同三司九月丙寅左骁卫大将军戴交使于高丽冬十一月壬寅葬睿武孝文皇帝于庆陵

七年春正月辛丑朔镇州定州言有北寇赵匡胤以大军北征癸卯发京师甲辰匡胤返兵入京师韩通死之皇帝逊位于匡胤匡胤废帝为郑王宋开宝六年三月乙卯崩于房州谥曰恭皇帝陵曰顺陵

恭帝显德一年 【仍世宗年号称七年】

右后周三帝合十年

钦定续通志卷二十四

●钦定续通志卷二十五 宋纪一

宋纪

太祖

○太祖

太祖皇帝姓赵氏讳匡胤其先封赵城因以为氏汉京兆尹广汉居涿郡遂世为涿郡人高祖眇仕唐为县令曾祖珽历藩镇从事兼御史中丞祖敬历营蓟涿三州刺史敬生弘殷唐庄宗时典禁军汉干佑中以讨王景崇功【宋史作王景据五代史增辑】迁护圣都指挥使周显德中从征淮南平扬州加检校司徒封天水县男是为宣祖帝宣祖次子也母曰昭宪皇后杜氏帝容貌雄伟气度豁如周太祖以枢密使征李守贞太祖应募居帐下广顺初补东西班行首历开封府马直军使世宗即位以太祖典禁军从世宗战高平大败北汉兵还拜殿前都虞候领严州刺史从征淮南首败唐人于涡口唐将皇甫晖姚凤以众十五万塞清流关太祖引兵出山后晖等大惊退入滁州太祖追至城下晖请成列以决胜负太祖许之晖整阵出太祖拥马项直入手刃晖中脑并姚凤禽之遂克滁州时宣祖为马军副都指挥使率兵之半至城下传呼开门太祖曰父子虽至亲城门启闭王事也不敢奉命诘旦宣祖乃得入韩令坤下扬州南唐援兵大至令坤将弃城避之世宗命太祖将兵屯六合太祖下令曰扬州兵敢有过六合者断其足自是令坤始固守太祖寻败唐齐王景达于六合东进殿前都指挥使寻拜定国军节度使四

年从征寿春遂下寿州徙义成军节度使检校太保仍殿前都指挥使复从征濠泗为前锋时南唐设砦于十八里滩世宗方议以橐駝济师太祖独跃马截流先渡麾下骑随之遂破其砦乘胜攻泗州下之进拔楚州大败唐人于盩江口直抵南岸焚其营栅又破之于瓜步淮南平五年徙忠武军节度使六年从世宗北征为水陆都部署克瓦桥关降其守将姚内斌遂定莫州世宗在道阅文书于韦囊中得木版题云点检作天子异之时张永德为点检世宗不豫还京师即拜太祖检校太傅殿前都点检以代永德恭帝即位徙归德军节度使检校太尉七年春或告北汉结辽人入寇太祖出师御之次陈桥驿夜五鼓军士集驿门宣言策点检为天子迟明逼寝所太宗与赵普入帐中密白其事露刃列于庭有以黄衣加太祖身者众皆罗拜呼万岁 【谨按通鉴辑览 御批陈桥兵变论者疑宋祖实与其谋盖彼时匡义以手足之亲赵普以心腹之寄毅然部分复入帐中密白使非微窥宋祖隐微岂至若此且其受命而出因变而返遽行禅代绝无愧辞更足启后人訾议虽当时朝不易位市不易肆其后布武修文拨乱反正而其得国之不以道人岂能曲为原谅哉】 即掖太祖上马太祖谓诸将曰我有号令尔等能从乎皆下马曰唯命太祖曰太后主上吾所北面事者汝辈不得惊犯大臣皆我比肩朝廷府库及士庶之家不得侵掠违者吾不贷也诸将皆载拜肃队南行自仁和门入副都指挥使韩通谋御之散员都指挥使王彦升先入京逐通杀之太祖进登明德门令甲士归营遂退居点检公署有顷诸将拥宰相范质王溥魏仁浦至太祖呜咽流涕曰违负天地乃至于此质等未及对列校罗彦瓌等按剑厉齐曰我辈无主今日须得天子质等相顾逡巡降阶拜日晡班定翰林学士承旨陶谷出周恭帝禅位制书于袖中宣徽使引太祖就庭北面拜受已乃掖太祖升崇元殿即皇帝位是日迁恭帝及符后于西宫降封恭帝曰郑王而尊符后为周太后

建隆元年春正月乙巳大赦改元定有天下之号曰宋加恩中外及贬降流配者遣使徧告郡国戊申赠韩通中书令以礼收葬辛亥论翊戴功以周义成军节度使殿前都指挥使石守信为归德军节度使侍卫亲军马步军副都指挥使盩江军节度使侍卫亲军马军都指挥使高怀德为义成军节度使殿前副都检点 【宋史盩江军作江盩军考五代无江盩军兹据东都事略改下张光翰之盩江军同】 武信军节度使侍卫亲军步军都指挥使张令铎为镇安军节度使侍卫亲军马步军都虞候殿前都虞候王审琦为泰盩军节度使殿前都指挥使虎捷右厢都虞候张光翰为盩江军节度使侍卫亲军马军都指挥使龙捷右厢都指挥使赵彦

徽为武信军节度使侍卫亲军步军都指挥使其余领
军者并进爵乙卯遣使分振诸州丁巳命周宗正郭玘祀周陵庙仍以时祭享癸亥以周
天雄军节度使魏王符彦卿守太师雄武军节度使王
景守太保太原郡王定难军节度使守太傅西平王李彝殷守太尉荆南节度使高保融
守太傅余领节镇者并进爵甲子赐弟殿前都虞候匡
义名光义己巳立太庙成德军节度使郭崇报北汉及辽师竟不出二月乙亥尊母南阳
郡夫人杜氏为皇太后以周宰相范质依前守司徒兼
侍中王溥守司空兼门下侍郎魏仁浦为尚书右仆射兼中书侍郎并同中书门下平章
事枢密使吴廷祚同中书门下三品庚寅赐进士杨砺
等十九人及第出身【宋史无此条今据宏简录首着于此自后槩不复着】三月丙
辰南唐主李景吴越王钱俶遣使来贺壬戌定国运以
火德王色尚赤腊用戊癸亥命武胜军节度使宋延渥等率舟师巡江徽夏四月癸酉宴
俨上二舞十二乐曲名乐章丙戌浚蔡河癸巳周昭义
军节度使李筠拒命遣归德军节度使石守信讨之五月己亥朔日有食之庚子以昭化
军节度使慕容延钊彰德军节度使王全斌将兵出东
道会守信讨李筠壬寅宴俨上太庙舞曲名癸卯石守信败李筠于长平己酉西京作周
六庙成丁巳下诏亲征以枢密使吴延祚留守上都都
虞候光义为大内都点检命天平军节度使韩令坤将兵屯河阳己未发京师丁卯石守
信高怀德破李筠于泽州六月辛未拔泽州筠自焚死
甲申免泽州今岁租乙酉进攻潞州丁亥筠子守节以城降辛卯大赦录死事者子孙丁
夫给复三年甲午永安节度使折德宸破北汉于沙谷
砦秋七月戊申帝至自潞甲子遣工部侍郎艾颖拜嵩庆陵乙丑南唐遣使者来贺平泽
潞八月壬午以光义领泰宁军节度依前殿前都虞候
甲申立琅琊郡夫人王氏为皇后九月丙午追谥高祖曰文献皇帝庙号僖祖妣崔氏曰
文懿皇后曾祖曰惠元皇帝庙号顺祖妣桑氏曰惠明
皇后祖曰简恭皇帝庙号翼祖妣刘氏曰简穆皇后皇考曰武昭皇帝庙号宣祖己未周
淮南节度使李重进拒命遣石守信讨之冬十月乙酉
晋州兵马钤辖荆罕儒袭北汉汾州死之丁亥诏亲征扬州以光义为大内都部署吴延
祚权上都留守庚寅发京师十一月丁未攻扬州拔之
重进自焚死戊申命诸军习战舰于迎銮镇乙卯南唐主遣使来犒师庚申遣其子从镒
来朝十二月丁亥帝至自扬州辛卯泉州节度使留从
效称藩

二年春正月庚子占城国遣使者来壬寅幸造船务观习水战丁巳导蔡水入潞甲
子泽州刺史张崇诘坐党李重进弃市二月壬申疏五

丈河己丑定窃盗律夏四月癸巳朔日有食之壬寅诏郡国置前代帝王贤臣陵冢户己酉无棣男子赵遇诈称皇帝伏诛己未商河县令李瑶坐赃杖死庚申班私盐及私造酒曲律五月癸亥以皇太后疾赦杂犯死罪以下丙寅三佛齐国遣使者来丁丑以安邑解两池盐给徐宿郛济庚寅供奉官李继昭坐盗卖官船弃市六月甲午皇太后崩庚申释服秋七月壬申以光义为开封府尹光美行兴元尹八月壬寅诏诸大辟送所属州军决判甲辰南唐主李景卒子煜嗣遣使请追尊帝号许之己酉削易定节度使同平事事孙行友官辛亥女真国遣使者来永济主簿郭顓坐赃弃市庚申周世宗实录成九月甲子辽解利来降荆南节度使高保勳遣其弟保寅来朝冬十月癸巳南唐遣使来会皇太后葬戊戌禁边民盗塞外马十一月己巳如相国寺遂如国子监癸酉沙州节度使曹元忠瓜州团练使曹延继等遣使者来十二月壬申回鹘可汗景琼遣使者来乙未昭义军节度使李继勋败北汉军于辽州辛丑如新修河仓庚戌畋于近郊

三年春正月己巳振淮南饥甲戌广皇城诏郡国长吏劝民播种癸未如国子监二月丙辰复如国子监遂如迎春苑己亥更定窃盗律甲寅北汉寇潞州守将击走之三月己巳诏郡国犯大辟者刑部审覆丁亥命徙北汉降人于邢洺夏四月乙巳追册夫人贺氏为皇后五月甲子如相国寺祷雨遂如迎春苑乙亥开太行山运路癸未命使检诸州旱甲申诏均户役复如相国寺祷雨六月辛卯振宿州饥癸巳吴廷祚以雄武军节度使罢己亥减京畿河北死罪以下壬子蕃部尚波于等犯渭北知秦州高防击走之乙卯如迎春苑秋七月壬戌放南唐降卒归其国乙丑免舒州菰蒲新税丁卯索内外军不律者配沙门岛己卯北汉捉生指挥使路贵等来降辛巳遣从臣检河北旱八月癸巳蔡河务纲官王训等四人获罪坐以糠土杂军粮磔于市乙未诏凡行赌获荐者许告讦举书判拔萃科九月庚午吐蕃尚波于等归伏羌县地冬十月丙戌如太清观遂如造船务观习水战己亥如岳台命诸军习骑射复如玉津园辛丑以枢密副使赵普为枢密使辛亥畋于近郊十一月癸亥诏县令考课以户口增减为黜陟己卯畋于近郊壬午赐南唐建隆四年历十二月戊戌振蒲晋慈隰相卫六州饥庚子班捕盗令是岁周郑王出居房州

干德元年春正月定制以文臣知州县系以京衔乙卯发关西乡兵赴庆州丁巳修畿内河堤衡州刺史张文表叛庚申山南东道节度使慕容延钊讨之乙丑如造船务观造战船甲戌诏荆南发兵会讨张文表三月壬辰朗州

周保权将杨师璠擒文表杀之甲午慕容延钊入荆南
高继冲请归朝得州三县十七乙未克潭州辛亥振澧滑卫魏晋绛蒲孟八州饥三月癸酉班定新律戊寅慕容延钊攻岳州下之遂克朗州获
周保权以归湖南平得州十四监一县六十六夏四月甲申减荆南朗州澧州管内死罪乙酉遣使祭南岳丁亥如国子监遂如武成王庙宴射
于玉津园庚寅凿习战池辛卯建隆应天厯成癸卯辰锦叙等州归顺甲辰疏三门禁泾原邠庆等州补蕃人为边镇将乙巳如玉津园阅诸军
骑射丙午免湖南茶税禁陕州盐井辛亥贷澧州民种食五月庚午给荆南管内符印六月乙未诏荆南兵愿归农者听己酉命习水战于新池
秋七月丁巳安国军节度使王全斌等率师入太原境以俘来献己未诏民有疾而亲属遗去者罪之丁卯如新池观习水战己巳免荆南管内
夏税之半乙亥免朗州管内夏税己卯班复位刑统等书八月丁亥王全斌攻北汉乐平县降之丙申北汉静阳十八砦首领来降泉州陈洪进
遣使者来己亥辽幽州岐沟关使柴廷翰等来降丁卯宣徽南院使兼枢密副使李处耘责授淄州刺史戊寅北汉引辽人攻平晋遣洺州防御
使郭进等救之冬十月己亥畋于近郊丁未吴越国王进郊祀礼金银器币以万计十一月甲子有事于南郊大赦改元羣臣至尊号曰应天广
运仁圣文武至德皇帝丙寅南唐进贺南郊尊号银绢以万计乙亥畋于近郊十二月辛巳开封府尹光义兴元尹光美以下各益食邑赐号易
封进阶勋爵邑甲申皇后王氏崩己巳南唐主上表乞呼名不允

二年春正月辛巳谕郡国长吏劝农耕作癸未如迎春苑宴射甲申诏着四时听选式戊子范质王溥魏仁浦罢庚寅以赵普为门下侍郎
同中书门下平章事李崇矩为枢密使二月戊申北汉辽州刺史杜延韬以城来降癸丑振陕州饥导渼水入京庚午永安军节度使折德宸俘
北汉卫州刺史杨璘来献甲戌浚汴河三月辛巳如教船池赐水军将士衣有差还乙未北汉耀州团练使周审玉等来降丁酉遣使祈雨于五
岳夏四月丁未策贤良方正直言极谏科戊申振河中饥己酉免诸道今年夏税之无苗者乙丑始置参知政事以兵部侍郎辞居正吕余庆为
之己巳转粟振灵武饥六月己酉以光义为中书令光美同中书门下平章事子德昭贵州防御使秋七月辛巳如新池观习水战乙未如北郊
观稼辛丑太子太傅范质薨壬寅潘美等克郴州冬十月戊申周纪王熙谨薨十一月甲戌以忠武军节度使王全斌为西川行营前军兵马都
部署武信军节度崔彦进副之将步骑三万出凤州道窳江军节度使刘光义为西川行营前军兵马都部署枢密承旨曹彬副之将步骑二万

出归州道以伐蜀壬辰畋于近郊十二月戊申拔夔州丁巳蠲归峡二州秋税辛酉克兴州连拔石图等二十余砦辛未畋于北郊

三年春正月甲戌王全斌克剑门禽蜀枢密使王昭远等壬午拔利州乙酉蜀主孟昶降得州四十五县一百九十八蜀平癸巳刘光义克万施开忠四州丙申免蜀管内逋赋及夏税二月庚申王全斌杀蜀降兵二万七千人于成都三月癸酉诏置义仓是月两川盗起先锋都指挥使高彦晖死之诏所在攻讨夏四月癸丑职方员外郎李岳坐赃弃市五月乙亥遣开封尹光义劳孟昶于玉津园戊子大赦减死罪六月甲辰以孟昶为中书令秦国公庚戌孟昶薨秋七月珍州刺史田景迁内附八月戊戌诏籍郡国骁勇兵送阙下戊午殿直成德钧坐赃弃市九月己巳阅诸道兵以骑军为骁雄步军为雄武并隶亲军冬十月己未太子中舍王治坐受赃杀人弃市

四年春正月丁亥命丁德裕等率兵巡抚西川二月安国军节度使罗彦瓌等败北汉于寻阳甲子免西川今年夏税及诸征之半田不得耕者除之三月癸酉罢义仓夏四月壬子罢光州贡鹰鹞丁巳辽天德军节度使于延超来降五月甲戌光禄少卿郭玘坐赃弃市丁丑诏蜀郡敢有不省父母疾者罪之秋七月戊辰西南夷首领董髡等内附庚辰罢剑南蜀米麦征免华州今岁租给州县官奉户闰八月乙亥诏民能树艺开垦者不加征令佐能劝来者受赏冬十月辛酉命太常复二舞癸亥诏诸郡立古帝王陵庙置户有差

五年春正月甲寅王全斌等坐伐蜀黷货杀降全斌责崇义军节度使崔彦进责昭化军节度使王仁贍责右卫大将军丁巳赏伐蜀功曹彬刘光义等进爵有差二月庚申如造船务遂如城西观卫士骑射甲子以辞居正吕余庆并为吏部侍郎依前参知政事丙午以赵普为尚书左仆射兼门下侍郎同中书门下平章事李崇矩检校太傅丙辰北汉石盆砦招收指挥使阎章以砦来降夏五月乙巳赐京城贫民衣北汉鸿唐砦招收指挥使樊晖以砦降六月戊午朔日有食之辛巳如建隆观遂如飞龙院秋七月己酉免水旱灾户今岁租九月壬辰仓部员外郎陈郾坐赃弃市己酉于畋近郊十一月乙酉工部侍郎母守素坐居丧娶妾免供奉武仁海坐枉杀人弃市十二月赵普以母忧去位丙子起复

开宝元年春正月甲午增治京城振陕之集津绛之垣曲怀之武陟等县己亥北汉偏城砦招收指挥使任恩等来降三月庚寅班县令尉捕盗令夏五月丁未赐南唐米麦十万斛六月癸丑诏民田为霖雨河水坏者免今年夏税癸亥诏荆蜀民祖父母父母在者子孙不得别财异

居秋七月丙申如铁骑营北汉颍州砦主胡遇等来降丙午如铁骑营遂如玉津园北汉主刘钧卒养子继恩立八月乙卯按鹞于近郊还如相国寺戊午又按鹞于北郊还如飞龙院戊辰命昭义军节度使李继勋等征北汉【昭义宋史作昭化考昭化乃利州军名非潞州也兹据李继勋传改】九月辛巳禁钱出塞庚子李继勋败北汉于铜温河己酉北汉供奉官侯霸荣弑其主继恩继恩弟继元立冬十月己未败于近郊还如飞龙院十一月癸卯有事于南郊改元大赦十恶杀人官吏受赃者不原羣臣上尊号曰应天广运大圣神武明道至德仁孝皇帝

二年春二月乙卯以昭义军节度使李继勋为河东行营前军部署侍卫步军指挥使党进副之宣徽南院使曹彬为都监棣州防御使何继筠为石岭关部署建雄军节度使赵赞为汾州路部署以伐北汉命彰德军节度使韩仲赞为北面都部署彰义军节度使郭延义副之以防辽寇戊午下诏亲征己酉以开封尹光义为上都留守枢密副使沈义伦为大内部署判留司三司事甲子发京师乙亥驻潞州三月壬辰发潞州乙未李继勋败北汉军于太原城下戊戌驾至太原庚子观兵于城南筑长连城癸卯北汉史昭文以宪州来降乙巳壅汾水灌太原决晋祠水注之辛亥遣海州刺史孙方进率兵围汾州夏四月辽师救北汉己未何继筠败之于阳曲五月癸未韩仲赞又败之于定州北甲午北汉赵文度以岚州来降闰月壬子议班师己未迁河东民万户于山东壬戌师还六月癸巳至自太原曲赦京城囚秋七月丁巳如封禅寺诏镇深赵邢洺五州管内镇砦县悉城之冬十月戊子败于近郊庚寅散指挥都知杜延进等谋反伏诛十一月甲寅败于近郊

三年春正月辛酉诏民五千户举孝弟彰闻德行纯茂者一人奇才异行不拘此限仍为治装诣阙三月庚戌赐进士十五举以上司马补等一百六人并本科出身辛亥赐处士王昭素国子博士致仕夏四月辛未朔日有食之己亥罢河北诸州盐禁及郡国所贡非其土产者五月丁未禁京城民畜兵器秋七月乙巳立报水旱期式九月己亥以潭州防御使潘美为贵州道兵马行营都部署朗州团练使尹崇珂副之发十州兵会贺州以伐南汉甲辰诏周文成康三王秦始皇汉高文景武元成哀七帝后魏孝文西魏文帝后周太祖唐高祖太宗中宗肃宗代宗德顺文武宣懿僖昭诸帝凡二十七陵尝被盗发者所在有司备法服常服具棺槨重葬长吏致祭丁卯潘美等克富州十月庚辰克贺州十一月壬寅下诏桂二州乙巳减桂阳岁贡金额癸丑右领军卫将军石延祚坐赃弃市癸亥定州驻泊都监田钦祚败辽于遂城十二月壬申潘美等

克连州辛卯克韶州

四年春正月丙午罢诸道州县摄官丁未右千牛卫大将军桑进兴坐赃弃市癸丑潘美等取英州雄州二月丁亥南汉主刘鋹遣使以表来上己丑潘美克广州刘鋹出降广南平得州六十县二百十四辛卯大赦广南免二税其伪署官作旧三月丙申免广南买人男女为奴婢转佣利者夏四月己巳禁岭南商税盐曲如荆湖法癸未如开宝寺发厢军修前代陵寝之在秦者壬辰监察御史闾邱舜卿坐前盗用官钱弃市五月乙未朔御明德门受刘鋹俘释之诛其嬖臣龚澄枢李托薛崇誉等丁酉赏伐广南功潘美尹崇珂等进爵有差六月封刘鋹为恩赦侯乙酉罢贺州银场冬十月癸亥朔日有食之庚午太子洗马王元吉坐赃弃市辛巳除广南无名配斂甲申诏自十月后凡犯强窃盗者郊赦不原丙戌放广南民驱充军者十一月癸巳南唐主煜表乞去国号呼名许之己未有事于南郊大赦十恶故劫杀官吏受赃者不原壬戌蜀班内殿直四十人援御马直例乞赏诛之十二月癸亥朔赐南郊执事官器币有差己巳内外文武官递进勋爵益食邑【自后凡南郊成礼例有爵赏亦不备着】壬午畋于近郊

五年春正月乙巳罢襄州岁贡鱼二月丙子诏沿河十七州各置河堤判官庚寅以兵部侍郎刘熙古参知政事三月壬申如教船池习战乙酉殿中侍御史张穆坐赃弃市夏四月丙午遣使检视水灾田丙寅遣使如诸州捕虎五月丙寅罢岭南采珠媚川都卒为静江军辛未遣颍州团练使曹翰往濮州塞决河甲戌以霖雨出后宫五十余人六月丁酉诏淫雨河决沿河民田有为水害者有司以闻除其租秋七月己未右拾遗张恂坐赃弃市邕容等州獠反八月己亥广州行营都监朱宪大破獠贼于容州九月丁巳朔日有食之癸酉李崇矩罢为镇国军节度使冬十一月己未李继明药继清大破獠贼于英州癸亥禁僧道习天文地理庚辰以参知政事辞居正吕余庆兼淮湖岭蜀转运使十二月己亥畋于近郊

六年春二月丙午棣州兵马殿直傅延翰谋反伏诛丙申振曹州畿三月乙卯周郑王殂于房州帝素服发哀辍朝十日谥之曰恭帝命还葬庆陵之侧陵曰顺陵夏四月丙午黎州保塞蛮来归戊申诏修五代史五月庚申刘熙古罢己巳交州丁璉遣使贡方物如玉津园观刈麦辛巳杀右拾遗马适六月隰州巡检李谦溥拔北汉七砦庚戌诏参知政事与宰相分知印押班奏事秋七月丙辰减广南无名率钱八月乙酉罢成都府伪蜀嫁装税甲辰赵普罢为河阳三城节度使同平章事辛酉如都亭驿九月丁

卯吕余庆罢为尚书左丞己巳封光义为晋王兼侍中
德昭同中书门下平章事辞居正为门下侍郎沈义伦为中书侍郎同平章事石守信兼
侍中卢多逊为中书舍人参知政事壬申诏晋王光义
班宰相上冬十月丁亥如玉津园观稼甲辰特赦诸官吏奸赃十二月丙午前中书舍人
参知政事卢多逊起复视事行开宝通礼

七年春正月癸亥左舍遗秦亶太子中允吕鹄并坐赃宥死杖除名二月庚辰朔日
有食之乙巳太子中舍胡德冲坐隐官钱弃市夏四月
丙午遣使检岭南民田五月乙丑诏市二价者以枉法论丙寅如讲武池观习水战丙子
又如讲武池六月丙申振河中府饥秋七月壬子如讲
武池观习水战丙辰南丹州溪洞酋帅莫洪燕内附庚午太子中允李仁友坐不法弃市
八月丁亥谕吴越伐江南己丑如讲武池赐习水战军
士钱戊戌殿中丞赵象坐擅税除名甲辰如讲武池观习水战九月癸亥以宣徽南院使
义成军节度使曹彬为西南路行营马步军战棹都部
署山南东道节度使潘美为监颍州团练使曹翰为先锋都指挥使以伐江南丁卯以知
制造李穆为江南国信使冬十月甲申如迎春苑登汴
堤观战舰东下丙戌又如迎春苑登汴堤观诸军习战遂如东水门发战棹东下壬辰曹
彬等将舟师步骑发江陵水陆并进丁酉命吴越王钱
俶为升州东面行营招抚制置使己亥曹彬收下峡口闰月己酉克池州丁巳败江南军
于铜陵壬戌彬等拔芜湖当涂两县驻军采石癸亥诏
减湖南新制茶甲子辞居正等上五代史丁卯彬败江南军于采石十一月丁亥免蒲陕
晋绛同解六州逋赋关西诸州免其半己丑知汉阳军
李恕败江南水军于鄂甲午彬败江南军于新竹砦十二月己酉彬败江南军于白鹭洲
甲子吴越王帅师围常州寻拔利城砦丙寅彬败江南
军于新林港庚午北汉寇晋州守臣武守琦败之于洪洞壬申吴越王败江南军于常州
北界

八年春正月丙子知池州樊若水败江南军于州界田钦祚败江南军于溧水庚寅
曹彬拔升州城南水砦二月癸丑彬败江南军于白鹭
洲乙卯拔升州关城甲子知扬州侯涉败江南军于宣化镇三月庚寅彬败江南军于江
北己亥辽遣使者来议和知潞州药继能拔北汉鹰涧
堡夏四月乙巳如东水砦癸丑如郭亭驿阅新战船丁巳吴越王拔常州壬戌彬等败江
南军于秦淮北戊辰如玉津园观种稻遂如讲武池观
习水战庚午诏岭南盗贼汉十贯以上者死五月壬申朔吴越国王钱俶守太师尚书令
益食邑甲申江南盩远军及沿江砦并降乙酉诏武冈
长沙等十县民为贼卤掠者蠲其逋租仍给复一年六月丁未宋州观察判官崔绚录事

参军马德休并坐赃弃市秋七月辛未朔日有食之庚辰遣合门使郝崇信太常丞吕端使于辽癸未西天东印士王子穰结说啰来朝献甲申诏吴越王班师己亥山后两林鬼主怀化将军勿尼等来朝献八月乙卯如东水碓观鱼遂如北园辛酉诏权停今年贡举壬戌辽遣使者来九月壬申畋于近郊戊寅润州降冬十月己亥江南主遣使来乞缓师辛亥诏郡国令佐察民有孝悌力田奇材异行或文武可用者遣诣阙丁巳江南主贡银五万两绢五万匹乞缓师己未曹彬遣都虞侯刘遇破江南军于皖口十一月辛未江南主遣使再奉表乞缓师不报丙戌以校书郎宋准殿直邢文庆充贺辽正旦使乙未曹彬克升州李煜出降江南平凡得州十军三县一百八十二月庚子如惠民河观筑堰辛丑赦江南免一岁租兵戈所经二岁辛亥免开封府今年租十之三己未以恩赦侯刘鋹为彭城郡公甲子辽使来贺正旦丁卯吴越国王乞以长春节入朝许之

九年春正月辛未御明德门见李煜免其献俘壬申大赦减死罪一等乙亥封李煜为违命侯己卯江南昭武军节度使留后卢绛焚掠州县二月庚戌以曹彬为枢密使辛亥命德昭迎劳吴越国王于宋州辽使来贺长春节戊午以卢多逊为吏部侍郎仍参知政事己未吴越国王钱俶偕子惟浚等朝于崇德殿赐俶衣带鞍马以礼贤宅居之壬戌钱俶进贺平升州银绢等物甲子召晋王吴越国王并其子等射于苑中丁卯如礼贤宅赐俶金器及银绢三月己巳俶进助南郊银绢庚午赐俶剑履上殿诏书不名癸酉以皇子德芳为检校太保贵州防御使中书侍郎同平章事沈义伦为大内都部署右卫大将军王仁贍权判留司三司兼知开封府事丙子如西京己卯次巩县拜安陵庚辰赐河南府民今年田租之半奉陵户一年辛巳至洛阳辛卯如广化寺开无畏三藏塔夏四月庚子有事于圜丘大赦十恶故杀者不原贬降责免者量移叙用诸流配及逋穴悉放丙午驾发西京辛亥至自西京丁巳曹翰拔江州屠之益晋王食邑光美德昭并加开府仪同三司德芳益食邑辞居正沈义伦加光禄大夫枢密使曹彬宣徽北院使潘美加特进吴越国王钱俶益食邑内外文武官咸进阶封乙未着令旬假为休沐五月己巳如东水碓遂如飞龙院观鱼金水河甲戌杀卢绛庚辰如讲武池遂如玉津园观稼甲申以合门副使田守奇等充贺辽生辰使秋七月丁亥命修先代帝王及五岳四渎祠庙八月乙未吴越国王进射火箭军士己亥如新龙兴寺辛丑太子中允郭思齐坐赃弃市乙巳如等觉院遂如东筑院及控鹤营观习射又如开宝寺观藏经丁未遣侍卫马军都指挥使党进宣徽北院使潘

美伐北汉九月甲子如绫锦院庚午党进败北汉军于太原城北辛巳命忻代行营都监郭进迁山后诸州民庚寅如城南池亭遂如礼贤宅十月丁酉兵部监押马继恩攻河东四十余砦破之己亥如西教场庚子镇州巡检郭进焚河东寿阳县辛丑党进败北汉军于太原城北癸丑帝不豫是夕晋王光义入侍已而帝崩年五十谥曰英武圣文神德皇帝加谥启运立极英武睿文神德圣功至明大孝皇帝庙号太祖陵曰永昌陵

太祖建隆三年 【其元年即周显德七年】 干德五年开宝九年凡十七年
钦定续通志卷二十五

●钦定续通志卷二十六 宋纪二

宋纪 【二】

太宗

○太宗

太宗皇帝讳炅初名匡义改赐光义宣祖第三子太祖同母弟也帝幼不羣及长隆准龙颜望之知为大人工文业多艺能仕周至供奉官都知太祖自陈桥兵次为军士推戴帝与赵普之谋为多太祖即位以帝为殿前都虞候领睦州防御使寻领泰宁军节度使加同平章事行开封尹再加兼中书令封晋王开宝九年冬十月癸丑太祖崩帝遂即皇帝位乙卯大赦常赦所不原者咸除之庚申以弟廷美为开封尹兼中书令封齐王太祖子德昭为永兴军节度使兼使中封武功郡王德芳为山南西道节度使兴元尹同平章事薛居正加左仆射沈伦加右仆射卢多逊为中书侍郎曹彬仍枢密使并同平章事楚昭辅为枢密使潘美为宣徽南院使内外官进秩有差十一月甲子追册尹氏为淑德皇后越国夫人符氏为懿德皇后庚午诏诸州大索知天文术数人送阙下匿者论死乙亥以权知高丽国事王佑为高丽国王癸未如相国寺己丑遣著作郎冯正佐郎张玘告哀于辽十二月甲寅大赦改是岁为太平兴国元年 【按洪迈容斋续笔云嗣君绍统必踰年乃改元唐宣宗以叔继侄亦终会昌六年而改大中独我太宗以太祖开宝九年之十二月二十二日改为太平兴国元年去新岁纔八日耳意当时必有其说计岭蜀之远制书到时已是二年之春是时宰相失于不考故实致行之弗审使人君即位而无元年尤为不可也伏读 御制全韵诗云即位急改元已失厚道大彼洪迈身为宋臣故托于求其说而不得者而其实太宗之惭德已莫揜于千载之下矣】 命太祖子及齐王廷美子并称皇子戊午辽使来聘己未如讲武池遂如玉津园

二年春正月壬戌以大行在殡不视朝丙子如相国寺还御东华门观灯辛卯如讲武池置江南榷茶场三月甲午辽使来贺即位及正旦庚子帝改名炁壬寅大宴崇德殿不作乐乙巳如新凿池遂如讲武池宴射玉津园巴西禁江南诸州盐先通商处戊午如太平兴国寺遂如造船务还至建隆观三月巳卯以河阳节度使赵普为太子少保巳丑禁江南诸州铜许辽互市夏四月丁酉辽使来会葬乙卯葬太祖皇帝于永昌陵五月遣辛仲甫使于辽秋七月庚午诏诸藏库敢变权衡以取羨余者死闰月甲寅诏发潭州兵击梅山洞贼丁巳令支郡得专奏事八月乙丑平海军节度使陈洪进来朝九月乙未如弓箭院遂如新修三馆壬寅如新水碓遂如西御园宴射辛亥如讲武台大阅容州初贡珠丙辰狩于近郊丁巳吴越王上表乞呼名不允冬十月辛酉辽使来贺干明节丙子诏禁天文卜相等书私习者斩辛巳畋于近郊初榷酤十一月丁亥朔日有食之既甲午遣李洙等使于辽贺正旦

三年春正月甲午浚汾河庚子罢陈州蔡河舟算辛丑浚广济惠民及蔡河治黄河堤乙巳浚汴口三月乙酉贝州清河民田祚十世同居旌其门闾复其家辛丑监海门戍殿直武裕坐奸赃弃市壬寅泰州戎酋王泥猪寇八狼戍巡检刘崇让击败之巳酉吴越国王钱俶来朝壬子如开宝寺夏四月巳卯陈洪进献漳泉二州凡得县十四庚辰如城南观麦遂至玉津园宴射辛巳侍御史赵承嗣坐隐官钱弃市癸未以陈洪进为武宁军节度使同平章事钱俶乞罢所封吴越国王及解天下兵马大元帅并寝书诏不名之命求归国不许五月乙酉赦漳泉二州仍给复一年钱俶献其两浙诸州凡得州十三军一县八十六丁亥封钱俶为淮海国王其子惟浚徙淮南军节度使惟治徙镇国军节度使戊子赦两浙给复如漳泉癸巳遣李从吉等使于辽壬寅定难军节度使李克叟卒乙巳以其子继筠为定难军节度使六月戊午复给乘驿银牌壬午秦州清水监军田仁朗击西羌败之癸未诏太平兴国元年十月乙卯以来诸职官以赃致罪者会赦不叙永为定制秋七月壬辰右千牛卫上将军李煜卒追封吴王戊戌金乡县民李光袭十世同居诏旌其门壬子中书令史李知古坐受赇擅改邢部所定法杖杀之八月癸丑如南造船务遂至玉津园宴射丙辰诏两浙发淮海王缙麻以上亲及管内官吏赴阙癸酉詹事丞徐选坐赃杖杀之冬十月癸丑辽使来贺干明节辛酉复兖州曲阜县袭封文宣公家庚午畋于近郊十一月丙申合祀天地于圜丘大赦羣臣上尊号曰应运统天圣明文武皇帝丙午以郊祀加恩中外十二月乙丑如讲武台观机石连弩庚午畋于近郊戊寅辽使来贺正旦

四年春正月丁亥命太子中允张洎著作佐郎句中正使高丽告以伐汉遣官分督诸州军储输太原行营庚寅以宣徽南院使潘美为北路都招讨制置使分命河阳节度使崔彦进彰德军节度使李汉琼彰信军节度使刘遇桂州观察使曹翰侍卫马军都虞候米信步军都虞候田重进并为行营指挥使辛卯命云州观察使郭进为太原石岭关都部署以断燕蓟援师癸巳置签署枢密院事以石熙载为之癸卯新浑仪成二月壬子如国子监遂至玉津园宴射甲寅以齐王廷美子德恭为贵州防御使丙辰以中书侍郎尚书右仆射同平章事沈伦为东京留守兼判开封府事宜徽北院使王仁贍为大内都部署枢密承旨陈从信副之甲子帝发京师戊寅次澶州观鱼于河三月庚辰次镇州丁亥郭进破北汉西龙门砦乙未郭进大破辽援兵于关南乙巳夏州李继筠乞帅所部助讨北汉诏泉州送陈洪进亲属赴阙夏四月巳酉岚州行营与北汉兵战破之庚戌孟县降以石熙载为枢密副使辛酉以孟玄喆刘廷翰为兵马都钤辖崔翰总马步军并驻泊镇州壬戌帝发镇州折御卿克岢岚军乙丑克隆州巳巳折御卿克岚州庚午次太原驻蹕汾东行营辛未诏谕北汉主刘继元使降壬申夜帝如城西督诸将攻城五月癸未继元遣使纳款甲申继元降北汉平凡得州十县四十以祠部郎中刘保勋知太原府巳丑以继元为右卫上将军彭城郡公乙未送刘继元缙麻以上亲赴阙庚子发太原丁未次镇州六月甲寅以将伐幽蓟发京东河北诸州军储赴北面行营庚申帝复自将伐辽丁卯次东易州刺史刘宇以城降戊辰次涿州判官刘厚德以城降庚午次幽州城南驻蹕宝光寺辽军于城北帝率众击走之壬申命定国军节度使宋渥等四面分兵攻幽州以潘美知幽州行府事辽铁林厢主李札卢存以所部来降癸酉幽州神武厅直并乡兵四百人来降乙亥范阳民以牛酒犒师秋七月庚辰辽建雄军节度使知顺州刘廷素来降壬午知蓟州刘守恩来降癸未帝督诸军及辽师大战于高粱河败绩甲申班师乙巳帝至自范阳八月壬子西京留守石守信坐从征失律贬从信军节度使甲寅彰信军节度使刘遇贬宿州观察使癸亥命潘美屯河东三交口甲戌武功郡王德昭自杀丙午镇州都钤辖刘廷翰及辽师战于遂城西败之冬十月乙亥论平北汉功进封齐王廷美为秦王薛居正加司空沈伦加左仆射卢多逊加兵部尚书曹彬兼侍中白进超崔翰刘廷翰田重进米信并领诸军节度使楚昭辅崔彦进李汉琼并加检校太尉潘美加检校太师王仁贍加检校太傅石熙载加刑部侍郎文武从臣进秩有差十一月巳丑畋于近郊辛卯忻州奏与辽师战破之十二月丁卯畋于

近郊

五年春正月庚辰诏宣慰河东诸州三月巳丑左监门卫上将军刘鋹卒追封南越王癸巳宣徽南院使潘美败辽师于鴈门闰月丙午如水碓因观鱼庚午如讲武池观习楼船秋七月丁未以兰州团练使孙全兴等为部署出邕州廉州以讨交州九月癸卯交州黎桓遣使为丁璇上表求袭位壬戌畋于近郊冬十月戊寅大发兵屯关南及镇定州十一月庚子安南静海军节度行军司马权知州事丁璇上表求袭位不报丙午下诏征辽以秦王廷美为东京留守王仁贍为大内都部署陈从信副之壬子驾发京师癸丑以河阳三城节度使崔彦进为关南都部署戊午驻蹕大名府诸军及辽师战于莫州败绩十二月戊寅以保静军节度使刘遇威塞军节度使曹翰为幽州东西路部署庚辰发大名府因校猎乙酉帝至自大名府交州行营与贼战大破之

六年春三月巳酉兴元尹德芳薨壬戌孙全兴等破贼于白藤江口知邕州侯仁贵死之诏斩部署刘澄贾湜于军中征孙全兴下狱遂班师夏四月罢湖州织罗放女工五月巳未降死罪流以下原之平塞军与辽师战破之六月甲戌司空平章事薛居正薨秋九月乙未朔日有食之辛亥以赵普为司徒石熙载为枢密使壬子诏求直言冬十月甲申以侍卫马军都指挥使米信为定州都部署十一月丁酉监察御史张白坐知蔡州日假官钱余棗弃市辛亥祀天地于圜丘大赦羣臣上尊号曰应运统天睿文英武大圣至明广孝皇帝丁巳交州行营部署孙全兴弃市辛酉以枢密使楚昭辅为左骁卫上将十二月巳卯畋于近郊辛卯禁民私市近界部落马

七年春正月壬戌定輿服等差及婚取丧葬仪二月乙酉免庐州管内逋租三月癸巳朔日有食之乙未以秦王廷美为西京留守夏四月甲子以枢密直学士窦偁中书舍人郭贄并参知政事如京使柴禹锡为宣徽北院使兼枢密副使戊辰中书侍郎平章事卢多逊罢为兵部尚书丁丑西京留守秦王廷美罢归第流卢多逊于崖州庚辰左仆射平章事沈伦罢为工部尚书五月辛丑崔彦进败辽师于唐兴戊申虑囚巳酉夏州留后李继捧献其银夏绥宥四州辛亥潘美败辽师于雁门丙辰降封秦王廷美无涪陵县公安置房州以崇化副使阎彦进知房州监察御史袁廓通判军州事巳未府州破辽师于新泽砦六月乙亥遣使发李继捧纒麻巳上亲赴阙其弟继迁奔地斤泽秋七月甲子以子德崇为检校太保同平章事封卫王德明为检校太保同平章事封广平郡王乙卯左仆射沈伦致仕八月庚申太子太师王溥薨冬十月戊辰如金

明池观习水战巳卯左谏议大夫参知政事竦偁卒癸卯干元历成十一月巳酉以李继捧为彰德军节度使禁民丧葬作乐十二月戊午朔日有食之庚午蠲两浙诸州太平兴国六年以前逋租戊寅高丽国王佺卒其弟治遣使求袭位诏以治为高丽国王闰月戊子丰州与契丹战破之丙辰畋于近郊辛亥诏赦银夏等州常赦所不原者

八年春正月巳卯以东上合门使王显为宣徽南院使酒坊使弭德超为北院使并兼枢密副使二月戊子朔日有食之丁酉禁内属部落私市女口三月庚申以右谏议大夫宋琪为参知政事丰州奏破契丹降三千余帐癸酉如金明池观习水战甲申除福建诸州盐禁夏四月壬寅班外官戒谕辞壬子流枢密副使弭德超于琼州五月丁卯黎桓自称交州三使留后遣使来贡并上丁璇让表诏送璇母子赴阙不听丁亥流威塞军节度使曹翰于登州六月巳亥以王显为枢密生柴禹锡为宣徽南院使兼枢密副使巳酉兖州泰山父老及瑕邱等七县民诣阙请封禅秋七月辛未参政知事郭贄罢为秘书少监庚辰加宋琪吏部尚书以工部尚书李昉参知政事八月壬辰以大水释死罪以下庚戌以枢密使石熙载为右仆射辛亥增溢法冬十月巳酉封元佐楚王元佑陈王元休韩王元儁冀王元杰益王并检校太保同平章事司徒兼侍中赵普罢为武胜军节度使十一月壬子以参知政事宋琪李昉并同平章事癸丑除川峡民祖父母父母在别籍异财弃市律壬申以翰林学士李穆吕蒙正李至并参知政事枢密直学士张齐贤王沔并同签署枢密院事十二月壬午诏缓银夏等州民界外归业者给复三年

雍熙元年春正月戊午右仆射石熙载薨壬戌购逸书丁卯涪陵县公廷美薨追封涪陵王癸酉左谏议大夫参知政事李穆卒夏四月乙酉泰山父老诣阙请封禅戊子羣臣表请凡三上许之甲午如金明池观习水战遂至讲武台观射五月庚戌除江南盐禁辛亥如城南观刈麦六月丁亥诏求直言巳丑遣使按两浙淮南西川广南狱讼镇安军节度使守中书令石守信薨壬寅诏罢封泰山冬十月夏州言掩击李继迁获其母妻俘千四百余帐继迁走壬辰禁布帛不中度者十一月丁巳祀天地于圜丘大赦改元十二月庚辰徙淮海国王钱俶为汉南国王丁亥罢岭南采珠场壬辰立德妃李氏为皇后

二年春正月丙辰以德恭为左武卫大将军判济州封定安侯德隆为右武卫大将军判沂州封长灵侯右补阙刘蒙叟通判济州起居舍人韩俭通判沂州二月戊寅权交州留后黎桓遣使来贡乙未李继迁诱杀汝州团练使曹光实夏四月乙亥遣使振江南诸州及察官吏能否

戊寅遣忠武军节度使潘美屯三交河口巳丑殿前承旨王着坐赃弃市辛丑夏州行营破西蕃息利族五月甲子如城南观麦戊子复禁盐榷
酷秋八月癸酉遣使按两浙荆湖福建江南东西路淮南诸州狱仍察官吏勤惰九月丙午除十恶官吏犯赃谋故劫杀外降死罪流以下原之
蠲江浙诸州民逋租辛亥废楚王元佐为庶人巳巳禁海贾冬十月辛丑虑囚十一月壬午狩于近郊以所获献太庙着为令辛卯诏在官丁父母忧者并放离任十二月庚子朔日有食之丙辰门下侍郎同平章事宋琪罢

三年春正月辛未右武卫大将军长灵侯德隆薨以其弟德彝嗣侯仍知沂州庚寅北伐以天平军节度使曹彬为幽州道行营前军马步水陆都部署河阳三城节度使崔彦进副之侍卫马军都指挥使彰化军节度使米信为西北道都部署沙州观察使杜彦圭副之以其众出雄州侍卫步军都指挥使靖难军节度使田重进为定州路都部署出飞狐戊戌参知政事李至罢为礼部侍郎二月壬子以检校太师忠武军节度使潘美为云应朔等州都部署云州观察使杨业副之出雁门三月癸酉曹彬克固安丁丑田重进及契丹战于飞狐北破之潘美下寰州辛巳曹彬克涿州潘美围朔州降之癸未田重进又败辽人于飞狐北乙酉曹彬又败之于涿州南丁亥潘美克应州庚寅武宁军节度使同平章事岐国公陈洪进卒辛卯田重进攻飞狐其守将吕行德等举城降丙申进围灵邱其守将穆超以城降夏四月辛丑潘美克云州田重进战于飞狐北大破辽人壬寅曹彬米信战于新城东北又破之巳酉田重进再战飞狐北再破之乙卯重进至蔚州其牙校李存璋许彦钦执其监城使同州节度使耿绍忠以城降五月庚午曹彬之师大败于岐沟关退屯易州知幽州行府事刘保勋死之丙子召曹彬崔彦进米信归阙命田重进屯定州潘美还代州徙云应寰朔吏民及吐浑部族分置河东京西辽复陷寰州杨业死之六月戊戌朔日有食之甲辰以御史中丞辛仲甫为参知政事秋七月庚午贬曹彬为右骁卫上将军崔彦进为右武卫上将军米信为右屯卫上将军杜彦圭为均州团练使甲午诏陈王元佑改名元僖韩王元休改元侃冀王元儁改元份八月丁酉以王沔张宏并为枢密副使丁未振剑州饥辛亥降潘美为检校太保九月丙寅减两京诸州系囚罪赐所徙寰应蔚等州民米蠲升宣等十四州雍熙二年官所振贷戊寅赐北征军士阵亡者家三月粮冬十月甲辰以陈王元僖为开封尹庚辰诏以权静海军留后黎桓为本军节度使十一月丙戌如建隆观相国寺祈雪十二月巳亥田重进攻岐沟关下之壬寅辽人败刘廷让军于君子馆先锋将贺令图被执高阳关部署杨重进死之壬子建房州为保

康军以右卫上将军刘继元为节度使代州副部署卢
汉赞败辽人于土镫堡

四年春正月己卯遣使按西川岭南江浙等路刑狱丙戌诏应行营将士战败溃散
者并释不问蠲河北雍熙三年以前逋租敌所蹂践者
给复三年军所过二年余一年二月丙申以汉南国王钱俶为武胜军节度使徙封南阳
国王丁酉缮治河北诸州军城隍甲寅钱俶改封许王
夏四月癸巳以御史中丞赵昌言为右谏议大夫枢密副使丁未如金明池观水嬉遂习
射琼林苑五月丙寅遣使市诸道民马六月丁酉以右
骁卫上将军刘廷让为雄州都部署庚子定国军节度使崔翰复为高阳关兵马都部署
秋七月庚寅如讲武池观鱼冬十月丙午流雄州都部
署刘廷让于商州壬子左仆射致仕沈伦薨十一月庚辰诏以实数给百官俸十二月庚
戌畋于近郊

端拱元年春正月乙亥大赦改元癸未如玉津园习射二月丙申禁诸州献珍禽奇
兽己亥诏瀛州民为敌所侵暴者赐三年租复其役五
年庚子开封尹陈王元僖进封许王元侃襄王元份越王钱俶邓王中书门下平章事李
昉为尚书右仆射参知政事吕蒙正同中书门下平章
事枢密使王显加检校太傅给事中许国公赵普守太保兼侍中枢密副使王沔为参知
政事御史中丞张宏为枢密副使庚戌以子元偓为左
卫上将军徐国公元偁为右卫上将军泾国公三月甲戌贬枢密副使赵昌言为崇信军
行军司马癸未如玉津园习射夏五月辛未赐感德军
节度使李继捧姓赵氏名保忠壬申以保忠为定难军节度使闰月辛卯以洺州防御使
刘福为高阳关兵马都部署濮州防御使杨赞为贝州
兵马都部署六月丙辰右领军卫大将军陈廷山谋反伏诛秋七月丙午除西川诸州盐
禁辛亥以忠武军节度使潘美知镇州八月甲子以宣
徽南院使郭守文为镇州路都部署冬十月壬午以侍卫步军都指挥使戴兴为澶州都
部署癸未诏罢游猎放五坊所畜鹰犬十一月己丑郭
守文破辽人于唐河十二月辛未以夏州蕃落使李继迁为银州刺史充洛苑使

二年春正月壬辰以涪州观察使柴禹锡为澶州兵马部署癸巳诏议北伐二月壬
子令河北东西路招置营田三月诏平塞天威平定威
虜静戎保塞盩边等军祁易保定镇邢赵等州民除雍熙四年正月丙戌绍给复外更给
复二年霸代洺雄莫深等州平虜岢岚军更给复一年
癸亥作方田三月辛卯以高琼为并代都部署夏五月戊戌以旱虑囚遣使决诸道狱秋
七月甲申以知代州张齐贤为刑部侍郎枢密副使盐
铁使张逊为宣徽北院使签署枢密院使辛丑辽人犯威虜军崇仪使尹继伦击败之八

月丙辰大赦冬十月辛未以定难军节度使赵保忠同

平章事帝以灾异迭见下诏罪已十二月庚申令四方所上表祇称皇帝去尊号

淳化元年春正月戊寅朔减京畿系囚罪改元文武官并加勋阶爵邑除逋负受尊号二月丁未除江南两浙淮西岭南诸州渔禁夏四月

庚戌虑囚遣使分决诸道狱甲寅五溪蛮田汉权来附丙寅以殿前副都指挥使戴兴为镇州都部署五月甲午给致仕官半俸六月丙午罢中

元下元张灯秋七月赐开封陈留封邱酸枣鄆陵今年田租之半开封特给复一年八月乙巳毁左藏库金银库已巳禁川峡岭南湖南杀人祀

鬼免京兆长安八县今岁租十之六及舒州宿松等县鱼池税九月免沧单汝三州今岁租十之六冬十月以干郑二州河南寿安等十四州县

旱免今岁租十之四并蠲其税十一月免大名府管内今岁租十之七

二年春正月丙子遣商州团练使翟守素帅师援赵保忠于夏州已丑诏陕西诸州长吏招诱流亡复业者贷其粟仍给复二年二月癸丑

监察御史祖吉坐赃弃市乙丑斩夔州乱卒谢荣等百余人于市闰月辛未朔日有食之丁亥诏内外诸军除木枪弓弩矢外不得蓄他兵器夏

四月庚午罢端州贡砚辛巳以张齐贤陈恕并参知政事张逊兼枢密副使温仲舒寇准并为枢密副使五月已亥诏减两京诸州系囚罪六月

甲戌忠武军节度使同平章事潘美卒以张永德为并代都部署庚寅禁陕西缘边诸州阑出生口秋七月已亥诏陕西缘边诸州民鬻男女入

近界部落者官赎之李继迁奉表请降以为银州观察使赐国姓改名保吉九月丁酉户部侍郎参知政事王沔给事中参知政事陈恕并罢守

本官已亥中书侍郎平章事吕蒙正罢为吏部尚书以右仆射李昉参知政事张齐贤并同平章事翰林学士贾黄中李沆并为给事中参知政

事癸卯枢密使王显罢为崇信军节度使甲辰以张逊知枢密院事温仲舒寇准同知院事十一月乙巳罢京城内外力役土功十二月癸未保

康军节度使刘继元卒是岁女真表请伐辽人不许自是女真遂属于辽人

三年春正月乙丑朔日有食之三月乙未以赵普为太师封魏国公戊午以高丽宾贡进士四十人并为秘书省秘书郎遣还庚申如金明

池观水戏夏五月乙酉以旱遣使分决诸路狱六月戊寅虑囚庚寅以殿前都虞候王昭远为并代兵马都部署辛卯置常平仓秋七月已酉赵

普薨八月壬申召终南山隐士种放不至冬十一月已亥许王元僖薨甲申虑囚赵保忠贡鹞号海东青还之

四年春正月辛卯祀天地于圜丘大赦二月乙未朔日有食之癸亥废沿江榷税八务乙卯加高丽国王王治检校太师静海军节度使黎

桓封交趾郡王三月壬子诏权停贡举夏六月戊午诏中丞已下皆亲临鞫狱丙寅吏部侍郎平章事张齐贤罢为尚书左丞壬申宣徽北院使知枢密院事张逊贬右领军卫将军右谏议大夫同知院事寇准罢守本官以涪州观察使柴禹锡为宣徽北院使知枢密院事枢密直学士吕端参知政事刘昌言同知枢密院事戊寅初复给事中封驳秋八月丙辰朔日有食之冬十月庚午始分天下州县为十道辛未右仆射平章事李昉给事中参知政事贾黄中李沆左谏议大夫知枢密院事温仲舒并罢守本官以吏部尚书吕蒙正平章事翰林学士苏易简为给事中参知政事枢密都承旨赵镕为宣徽北院使枢密直学士向敏中为右谏议大夫并同知枢密院事丁丑以右谏议大夫赵昌言为给事中参知政事辛巳遣使按行畿县民田被水者蠲其租十二月戊申西川都巡检使张玘与王小波战于江原死之小波死众推其党李顺为帅

五年春正月戊午李顺陷汉州 【宋史汉州作濮州误兹据东都事畧】 己未陷彭州乙丑虑囚己巳李顺陷成都振宋亳陈颍州饥癸酉以侍卫马军都指挥使李继隆为河西行营都部署讨李继迁甲戌以昭宣使王继恩为两川招安使讨李顺辛巳除两京诸州淳化二年逋负二月乙未李顺攻剑州都监西京作坊副使上官正成都监军供奉官宿翰击破之丙午如南御庄观稼己酉以益王元杰为淮南镇江等军节度使徙封吴王辛亥诏除剑南东西川峡路淳化五年以前逋负三月乙亥赵保忠为赵保吉所袭奔还夏州指挥使赵元嗣执之以献李继隆帅师入夏州夏四月壬午除天下主吏逋负甲申削赵保吉所赐姓名辛卯虑囚戊戌降诸州免罪以下囚己亥王继恩败贼于绵州庚子复绵州内殿崇班曹习破贼于老溪复阆州绵州巡检使胡正远复巴州壬寅西川行营击贼于研石砦破之复剑州五月丁巳王继恩克成都擒李顺其党张余复攻陷嘉戎泸渝涪忠万开八州开州监军秦传序死之丙寅河西行营送赵保忠至阙下释其罪授右千牛卫上将军封宥罪侯己巳以少府监雷有终为谏议大夫知成都府庚午贼攻夔州陕路都大巡检白继赞夔州巡检使解守颺败之于西津口壬申右仆射李昉以司空致仕甲戌复利州兴元府洋州西县一岁丙子磔李顺党八人于凤翔市六月戊戌陕路行营破贼于广安军又破贼张罕于嘉陵江口又破于合州西方溪戊申以侍卫步军都指挥使高琼为镇州都部署贼攻陵州知州张旦击破之秋七月辛亥贼攻眉州乙亥李继迁遣使来贡八月甲午置宣政使以宦者昭宣使王继恩为之 【谨按通鉴辑览 御批内侍领兵仍唐弊政其后童贯梁师成之擅权实由此开其

端太宗虽不与宣徽之除而命之领兵已属乖舛作法于凉不能辞贻谋不善之责矣】
辛丑遣知益州张咏赴部得便宜从事癸卯以参知政事赵昌言为西川陝路招安马步军都部署寻诏昌言驻凤翔遣内侍押班卫绍钦往行营指挥军事峡路行营破贼帅张余复云安军李继迁使其弟奉表待罪九月庚戌户部尚书辛仲甫以太子少保致仕辛酉遣使分行宋亳陈颖泗寿邓蔡等州按行民田被水及种蒔不及者蠲其租壬申以襄王元侃为开封尹改封寿王大赦乙亥以左谏议大夫寇准参知政事戊寅卫绍钦破贼于学射山别将杨琼复蜀州曹习等又破贼于安国镇冬十月庚辰西州行营指挥使张麟杀其将王文寿以叛其众斩麟首以降乙未杨琼等复邛州十一月庚戌遣使谕李继迁赐以器币茶药衣服 【谨按通鉴辑览 御批赵普前此轻信李继捧纵其复归夏州已为失策兹复轻信李继迁受其伪降坐稽天讨以留世世边患盖姑息偷安实为宋代之失而养痍贻害诒谋不臧则自是役始之】 十二月戊寅朔日当食云阴不见辛巳命枢密直学士张鉴西京作坊副使冯守规安抚西川庚寅宿翰等引兵趋嘉州伪知州王文操以城降乙未秘书丞张枢坐知荣州降贼弃市

至道元年春正月戊申朔改元降京畿囚罪蠲诸州逋租及陕西诸州去年秋税之半癸亥辽人将韩德威诱党项勒浪嵬族自振武犯边永安军节度使折御卿击败之戊辰以翰林学士钱若水为右谏议大夫同知枢密院事枢密副使刘昌言罢为给事中甲戌李继迁遣使来贡二月戊戌以旱虑囚张余伏诛蠲襄唐均汝随邓归峡等州去年逋租振亳州房州光化军饥三月庚申诏求直言辛酉以会州观察使知清还军田绍斌为灵州兵马都部署夏四月癸未吏部尚书平章事吕蒙正罢为右仆射以参知政事吕端为户部侍郎平章事宣徽北院使知枢密院事柴禹锡罢为镇宁军节度使参知政事苏易简为礼部侍郎以翰林学士张洎为给事中参知政事甲申以宣徽北院使同知枢密院事赵镒知枢密院事乙酉辽人犯雄州知州何承矩击破之壬寅虑囚六月乙酉购求图书丙戌遣使谕李继迁授鄜州节度使继迁不奉诏秋七月丙寅除陈许等九州岛及光化军今年夏税八月壬辰诏立寿王元侃为皇太子改名恒兼判开封府大赦文武帝参官子为父后见任官者赐勋一转癸卯禁西北缘边州民与内属戎人昏娶九月庚午清远军言李继迁入寇冬十月乙丑陕西转运使郑文宝坐挠边责授蓝田县令十一月以峯州团练使上官正右谏议大夫雷有终并为西川招安使召王继恩归阙十二月辽人犯边折御卿率兵御之卒于师斩马步兵都军头

孙赞于军中庚辰新浑仪成

二年春正月辛亥祀天地于圜丘大赦二月壬申司空致仕李昉薨戊寅以越王元份为杭州大都督兼领越州吴王元杰为扬州大都督兼领寿州己卯以徐国公元偓为洪州都督镇南军节度使泾国元偁为鄂州都督武清军节度使庚辰以御史中丞李昌龄为给事中参知政事辛巳以吕蒙正为左仆射宋琪为右仆射乙未定任子官制夏四月甲戌命侍卫马军都指挥使李继隆为环庆等州都部署殿前都虞候范廷召副之讨李继迁五月癸卯继迁寇灵州六月戊戌黔州蛮寇盐井巡检使王惟节死之秋七月己亥以殿前都指挥使王超为夏绥麟府州都部署丙寅给事中参知政事寇准罢守本官戊辰蠲峡路诸州民去年逋租九月戊寅右仆射宋琪薨诏川峡诸州民家先藏军器者限百日送官匿者斩己卯夏州延州行营破李继迁于乌白池继迁遁甲申贬会州观察使环庆副都部署田绍斌为右监门卫率府副率安置虢州

三年春正月丙子以户部侍郎温仲舒礼部侍郎王化基并参知政事给事中李惟清同知枢密院事参知政事张洎罢为刑部侍郎辛卯以侍卫马步军都虞候傅潜为延州路都部署殿前都虞候王昭远为灵州路都部署二月丙申灵州行营破李继迁辛丑帝不豫甲辰降京畿死罪囚三月癸巳宣诏令皇太子柩前即位是日皇帝崩年五十九谥曰神功圣德文武皇帝庙号太宗陵曰永熙陵

太宗太平兴国八年 【其元年即太祖开宝九年】 雍熙四年端拱二年淳化五年至道年三凡二十二年

钦定续通志卷二十六

●钦定续通志卷二十七 宋纪三

宋纪 【三】

真宗

○真宗

真宗皇帝讳恒太宗第三子也母曰元德皇后李氏帝幼英睿与诸王嬉戏好作战阵之状自称元帅太祖爱之育于宫中尝登万岁殿升御榻坐太祖抚之曰汝得作天子否对曰由天命耳比就学一览成诵初名德昌后改元休复改元侃厯封韩王襄王寿王加检校太傅开封尹至道元年立为皇太子改今名仍判府事故事皇太子次在宰相上官僚称臣帝皆推让弗受见宾客李至李沆必先拜迎送降阶及门开封政务填委帝裁决轻重靡不称愜故京狱屡空三年三月癸巳太宗崩奉遗制即皇帝位于柩前夏四月乙未尊皇后为皇太后大赦常赦所不原

者咸除之癸卯门下侍郎兼兵部尚书平章事吕端加右仆射弟越王元份进封雍王吴王元杰进兗王并兼中书令徐国公元偓进彭城郡王泾国公元偁进安定郡王并同平章事元俨封曹国公侄阆州观察使惟吉为武信军节度使侍卫马步军都虞候傅潜殿前都指挥使王超侍卫马军都指挥使李继隆侍卫步军都指挥使高琼并领诸军节度使驸马都尉王承衍石堡吉魏咸信并为诸军节度使甲辰宣徽北院使知枢密院事赵镒加南院使左丞李至礼部侍郎李沆并参加政事丁未进中外官秩各一等五月丁卯诏求直言甲戌户部侍郎参知政事李昌龄责授忠武行军司马甲申放宫人给事岁久者丙戌以镇安军节度使李继隆同平章事丁亥立秦国夫人郭氏为皇后六月戊戌追复涪王廷美西京留守兼中书令秦王赠兄魏王德昭太傅岐王德芳大保辛丑诏罢献祥瑞甲辰复封兄元佐为楚王乙巳追册莒国夫人潘氏为皇后秋七月乙丑诏转运使更迭赴阙访以民事癸酉诏访孔子嫡孙甲申以殿前都虞候范廷召为定州驻泊都部署葛霸为镇州驻泊都部署王汉忠为高阳关行营都部署康保裔为并代州都部署八月丙申罢盐井役己亥以镇海军节度使曹彬为枢密使知枢密院赵镒为寿州观察使同知枢密院事李惟清为御史中丞户部侍郎向敏中给事中夏侯峤并为枢密院副使庚申西川广武卒刘盱逐巡检使韩景佑掠蜀汉等州招安使上官正钤辖马知节讨平之九月戊寅以孔子四十五世孙延世为曲阜县令袭封文宣公冬十月夏人寇灵州合河都部署杨琼击走之己酉葬太宗皇帝于永熙陵十一月丙寅降两京死罪以下一等十二月丙申追尊母贤妃李氏为皇太后辛丑诏诸路转运使口饬令长劝农甲辰以银州观察使赵保吉为定难军节度使

咸平元年春正月辛酉改元二月甲午以星变诏求直言避殿减膳乙未虑囚三月辛巳以赵保吉归顺遣使谕陕西纵绥银流民还乡仍家给米一斛夏四月壬寅赵保吉遣弟继瑗入谢己酉遣使按天下吏民逋负悉除之五月戊午朔日有食之丙辰以旱免开封二十五州军田租冬十月丙戌朔日有食之戊子吕端为太子太保户部尚书张齐贤参知政事李沆并平章事李至为武胜军节度使己丑参知政事温仲舒罢为礼部尚书枢密副使夏侯峤罢为户部侍郎翰林侍读学士以枢密副使向敏中为兵部侍郎参知政事翰林学士杨砺宋江湜并为枢密副使

二年春二月丙申以赵普配飨太祖庙庭诏羣臣迎养父母蠲天下逋负释系囚三月丙辰振江浙饥壬申以王汉中为泾原邠宁灵环都

部署闰月丁亥以久不雨诏天下系囚非十恶枉法及已杀人者死以下减一等庚寅罢有司营缮之不急者诏中外直言极谏夏五月丁亥严服用之制六月戊午曹彬薨秋七月甲申以傅潜为镇定高阳关行营都部署张昭允为钤辖给外任官职田已丑以横海军节度使王显为枢密使八月己卯羣臣上尊号曰崇文广武圣明仁孝皇帝九月庚辰朔日有食之癸卯如骐骥院镇定都部署奏败辽兵于廉良路冬十月壬子宜州执溪洞蛮酋三十余人诣阙诏释其罪遣还癸丑放澧州蛮界归业民租戊午置福建路惠民仓十一月丙戌祀天地于圜丘录功臣子孙之无禄者壬辰张齐贤加门下侍郎李沆加中书侍郎文武悉加恩有差乙未诏自将御边所次顿舍给用毋泛及州县以周莹为驾前军都部署石堡吉为行营先锋都部署己亥狩于近郊辛丑赐京城父老衣帛丙午以魏咸信为贝冀行营都部署己酉以李沆为东京留守十二月甲寅驾发京师戊午驻蹕澶州冀州奏败辽兵于城南壬戌至澶州登临河亭赐父老锦袍茶帛甲子次大名府辽人攻威虏军本军击败之杀其酋帅府州军入五合州拔黄太尉砮丁卯召见大名府父老劳赐之

三年春正月己卯朔驻蹕大名府诏并代都部署高琼等分屯冀州邢州癸未以葛霸为贝冀高阳关前军行营都部署契丹犯河间高阳关都部署康保裔死之乙酉流忠武军节度使傅潜于房州都钤辖张昭允于通州丁亥如紫极宫还登子城阅骑射高阳关贝冀路都部署范廷召等败辽人于莫州庚寅赦河北及淄齐州非持杖劫盗谋故杀枉法赃十恶至死者并释之录将吏死事者子孙民被焚掠者复其租罢缘边二十三州军榷酤甲午驾发大名府益州军作乱杀钤辖符昭寿逐知州牛冕等推都虞候王均为首以叛诏户部使雷有终为泸州观察使帅师会李惠等讨之庚子至自大名府二月癸亥以周莹为宣徽南院使王继英为北院使并知枢密院事王旦为给事中同知枢密院事乙丑以王显为定州路行营都部署王超为镇州路行营都部署丁卯雷有终等为王均所败退保汉州李惠死之戊辰虑囚三月戊寅朔日有食之夏四月庚戌吕端薨甲寅阅河北防城举人康克勤等击射丁巳以葛霸为邠宁环庆都部署壬申削前知益州牛冕西川转运使张适籍冕流儋州适为连州参军五月丁卯降天下死罪一等流以下释之十恶至死谋故劫杀坐赃枉法者论如律如玉津园观刈麦己丑如金明池观水嬉遂至琼林苑宴射六月丁卯以向敏中为河北河东宣抚使秋七月己亥以翰林侍读学士夏侯峤侍讲邢昺为江浙巡抚使冬十月甲辰雷有终复益州壬子削绵汉都巡检澄州刺史张思钧籍流封州己丑雷有终追斩王均于

富顺监诏原川峡路系囚死罪以下雷有终等进秩有差十一月戊寅均畿内田税壬午诏羣臣尽言无讳常参官转对如故事未预次对者听封事以闻丙申张齐贤罢为兵部尚书十二月戊申狩于近郊甲子辽人税木监使黄颢等率属内附

四年春正月甲戌朔降天下系囚甲申命枢密直学士冯拯陈尧叟详中外封事诏应益州军民因城乱杀伤劫盗除官吏外皆释不问二月癸丑决天下狱三月甲戌抚水州蛮酋蒙瑛等来纳兵器毒药箭誓不复犯边庚寅以左仆射吕蒙正兵部侍郎向敏中并平章事申中书侍郎平章事李沆加门下侍郎辛卯以参知政事王化基为工部尚书同知枢密院事王旦为工部侍郎参知政事枢密直学士冯拯陈尧叟并为右谏议大夫同知枢密院事夏四月丙午以葛霸为并代行营都部署壬子诏亲老无兼侍者特与近任己未以王钦若为左谏议大夫参知政事五月壬申降京畿系囚罪六月癸卯有司言减天下冗吏凡十九万五千余人丁巳减东川民田先为江水所害者租丁卯诏州县学校及聚徒讲诵之所并赐九经秋七月己卯边将言辽人将入寇以王显为镇定高阳关三路都部署王超副之王汉忠为都排阵使八月辛丑以张齐贤为泾原路安抚经畧使壬子如御龙营阅武艺遂观稼北郊宴射于含芳园九月李继迁陷清远军冬十月曹璨以蕃兵邀李继迁辎重于唐龙镇己未张斌破辽人于长城口十一月壬申知阶州窦玘献白鹰还之王显奏破契丹庚寅败于近郊十二月戊寅李继迁部族讹遇等来归壬午灵州河外砦主李琼等叛降西夏乙酉李继迁部族讹猪等率属来附庚寅振河北饥仍免其赋役

五年春正月壬寅李继迁部将卧浪已等内附壬戌环庆部署张凝击诸蕃破之二月己丑以王汉忠为邠宁环庆路都部署三月丁酉李继迁陷灵州知州裴济死之夏四月壬申赐陝西民挽送缘边刍粮者租之半壬午命三司岁较户口数丙戌赐深霸九州岛民租有差癸巳复雄州榷场五月壬寅知荣州褚德臻坐盗官银弃市乙巳蠲天下逋负丙午以王显为河阳三城节度使六月癸酉继迁围麟州曹璨请济师诏发并代石隰州兵援之乙亥以侍卫马军都虞候王超为定州路驻泊行营都部署己卯以宣徽南院使知枢密院事周莹为永清军节度使秋七月甲午朔日有食之壬戌辽人大林砦使王昭敏等来降西羌寇洪德砦守将击走之乙酉石隰部署言河西蕃族拽浪南山等四百人来归冬十月丁亥平章事向敏中罢为户部侍郎十一月壬辰复麟州租一岁壬寅祀天地于圜丘大赦己酉封子玄佑为信国公庚戌吕蒙正加司空

李沆加右仆射雍王元份守太傅兖王元杰守太保曹国公元伊同平章事

六年春二月戊寅如飞山雄武营观发机石连弩遂宴射潜龙园己卯以京东西淮南水灾遣使振之庚辰以西凉府六谷首领潘罗支为朔方军节度灵州西面都巡检使甲申蕃部叶市族啰埋等内附三月辛丑朔交州八州使黄庆集等来归绥州东山蕃部军使拽白等来归夏四月李继迁寇洪德砦蕃官庆香乱■〈者多〉庆等击走之辽寇望都副都部署王继忠陷于敌发河东兵援之五月癸丑削镇州副都部署李福籍流封州六月丁卯丰州瓦窑没剂如罗昧克等族击李继迁败之秋七月癸丑兖王元杰薨八月辛未原渭等州西蕃八部二十五族来归丙子赐环庆秋田经寇践伤及民被掠者粟米蠲棣州民租十之三冬十一月癸巳虑囚降死罪以下以苦寒令诸路休役兵己亥阅捧日军士十二月庚申遣使于西北劳赐将士甲子诏求直言李继迁攻西凉知府丁惟清没焉庚午以李继隆为山南东道节度使戊寅降天下死罪流以下释之

景德元年春正月丙戌朔大赦改元丁亥麟府路言辽言涅族拔黄三百余帐内属辛丑诏民间天象器物讖候禁书并纳所司匿不言者死石隰州言河西蕃部四十五族内附二月西凉府潘罗支集六谷蕃部合击李继迁败之继迁死罗支使来献捷三月威虜军守将破辽人于长城口柳谷川蕃部入寇麟府击败之己亥皇太后崩夏四月丙辰蠲澧州石门县租二岁丁卯以降暑休北边役兵五月甲申赐邢州民租之半六月洪德砦言继迁部将都尾等率属归附镇戎军言败戎人于石门川庚午洪德砦言蕃部罗泥天王本族诸首领各率属归附赵保忠卒秋七月癸未班用兵诛赏格丙戌李沆薨庚寅以翰林学士毕士安为吏部侍郎参知政事八月泾原部署击万子军主族帐败之己丑以毕士安寇准并平章事宣徽南院使王继英为枢密使同知枢密院事冯拯陈尧叟并佾署枢密院事丙子以保平军节度石保吉为武宁军节度同平章事九月癸未罢北面赏御剑内臣以剑属主将丁酉诏宰相议亲征辽人闰月乙卯诏河北吏民杀辽人者所至援之仍颁赏格癸酉沙台北平砦威虜军合击辽人破之乙亥以参知政事王钦若判天雄军府兼督部署辽军将达兰攻威虜顺安军三路都部署击败之又攻北平砦及保州复为州砦兵所败达兰与辽国主及其母并众攻定州丙子以天雄军都部署周莹为驾前贝冀路都部署侍卫马军都指挥使葛霸为驾前邢洺路都部署己卯高继祖败辽人于岢岚军冬十月癸未麟府路率部兵入朔州破大狼水砦乙未诏王超等兵赴行在丁酉诏魏能张

凝田敏屯定州癸卯以厮铎督为朔方军节度灵州西面巡检西凉府六谷大首领保莫州威虜岢岚军及北平砮击辽兵皆败之辽主遣使请和命合门祗候曹利用往答之丁未以雍王元份为东京留守十一月乙卯辽人攻瀛州知府李延渥败之己未又逼冀州知州王屿败之甲子猎于近郊丙寅遣使安集河北流民戊辰以山南东道节度同平章事李继隆为驾前东面排阵使武宁军节度同平章事石保吉为驾前西面排阵使庚午车驾北巡癸酉驻蹕韦城甲戌寒甚左右进貂帽毳裘却之曰臣下皆苦寒朕安用此哉辽兵至澶州北直犯前军达兰殪于阵丙子帝次澶州渡河如北砮御城北楼召诸将抚慰戊寅曹利用还十二月庚辰朔日有食之辽遣使者来讲和辛巳遣使安抚河北京东壬午如城南临河亭癸未如北砮又幸李继隆营诏谕两京以将班师甲申辽遣使来献御衣食物乙酉御行营南楼观河遂宴从官及辽国使丙戌遣使抚谕怀孟泽路郑滑等州放强壮归农遣监西京左藏库李继昌使辽师定和议戒诸将勿出兵邀其归路丁亥遣使安集河北流民瘞暴骸以合门祗候曹利用为东上合门使忠州刺史戊子如北砮劳军召李继隆石保吉宴射于行宫西亭壬辰赦河北诸州死罪以下民经蹂践者给复二年录死事者子孙癸巳以参知政事王旦权东京留守甲午车驾发澶州乙未辽遣使者以誓书来丁酉辽兵卒出塞戊戌至自澶州辛丑录辽人誓书颁河北河东诸州癸丑遣使抚问河北东西路官吏将卒访察功状甲辰改威虜诸军名戊申诏恤河北伤残

二年春正月庚戌朔以与辽人讲和大赦非故鬪杀放火强盗伪造符印犯赃官典十恶至死者悉除之壬子放河北诸州强壮归农仍市耕牛给之癸丑罢诸路行营合正定两路都部署为一乙卯罢北面部署钤辖都监使臣振河北饥遣使如德清军收瘞战没遗骸致祭罢江淮荆浙增榷酤钱甲子振河南饥戊辰以天平军节度使王超为崇信军节度使省河北戍兵十之五缘边三之一所在量军储馈给勿调民飞挽二月癸未李继隆卒甲午诏缘边得辽人马牛悉纵还之没蕃汉口归业者给资粮弛边民铁禁环州言羌人入寇击走之癸卯遣太子中允孙仅等使于辽国三月庚申禁边民入外境掠夺夏四月己亥葺河北城池癸卯以冯拯为参知政事甲辰以宁国军留后吴元宸为武胜军节度西羌寇环州击败之五月癸酉诏天下榷利勿增羨为额六月丁卯诏劝学辛卯以赵德明归款谕河西诸蕃各守疆界秋七月甲子诏复贤良方正能直言极谏等六科八月戊寅雍王元份薨丙戌有司上新定权衡法九月丁未以向敏中为鄜延路都部署辛未命近臣虑开封府系囚

壬辰诏荆湖溪峒民为蛮人所掠而归者勿限年月给还旧产冬十月乙酉毕士安薨丙戌遣职方郎中韩国华等使于契丹十一月丁巳祀天地于圜丘大赦癸亥寇准加中书侍郎兼工部尚书进封彭城王元偓为宁王安定王元偁为舒王曹国公元俨进封广陵王安定公惟吉加同平章事癸酉辽遣使来贺承天节十二月癸未以高琼为忠武军节度使葛霸为昭德军节度使辽遣使来贺明年正旦

三年春正月丁卯诏缘边归业民给复三年辛未置常平仓二月甲申以宋州为应天府戊戌寇准罢为刑部尚书以左丞参知政事王旦为工部尚书平章事己亥以王钦若陈尧叟并知枢密院事翰林学士赵安仁参知政事枢密都承旨韩崇训马知节并令署枢密院事三月辛亥免随州光化民所贷粮夏四月丙子如开宝寺遂至御龙直班院观教阅弓刀又如左骥驥院还至崇文院观图籍乙酉置河北缘边安抚使副都监于雄州壬辰命使巡抚益利梓夔福建诸路决狱及犒设将吏父老己亥遣使巡抚江浙路五月壬寅日当食不亏渭川妙娥族三千余帐内附六月丙申遣使振应天府水灾及瘞溺死者秋七月壬寅减鄜延戍兵庚戌以谓州镇戎军收获蕃部牛给内地耕民九月乙丑放西州约质人夏州赵德明奉表归款冬十月庚午以赵德明为定难军节度兼侍中封西平王十二月乙酉狩于近郊

四年春正月甲辰以陈尧叟为东京留守乙巳以丁谓为随驾三司使己未车驾发京师庚申次中牟县除逋负释系囚赐父老衣币凡所过如之二月己巳如西京遣使祭周六庙庚寅诏河南府置五代汉高祖庙辛卯车驾发西京甲午次郑州遣使祀中岳及周嵩懿二陵三月己亥至自西京癸丑赵德明遣使来谢廩给因贡駝马丁巳诏天下收瘞遗骸致祭夏四月辛巳皇后郭氏崩五月丙申朔日有食之闰月戊辰减剑陇等三十九州岛军岁贡物夔贺等二十七州军悉罢之秋七月甲戌宜州军校陈进杀知州刘永规等刦判官卢成均为首诏合门使曹利用等讨之辛巳以黎龙廷为静海军节度交址郡王赐名至忠八月辛亥赐文宣王四十六世孙圣佑同学究出身丁谓上景德会计录九月壬申赐畿县圣惠方冬十月甲午朔日当食不见曹利用擒卢成均于象州斩陈进乙巳考试进士新格甲寅诏宜柳象州怀远军死罪以下非十恶谋故鬪杀官吏犯枉法赃者并原之广南东西路杂犯死罪以下递减一等胁从受署者勿理蠲宜柳象州怀远军丁钱及夏秋租桂昭州秋租是岁大有年

大中祥符元年春正月乙丑天书见于左承天门帝及羣臣拜迎于朝元殿丁卯紫

云见戊辰大赦改元文武官加恩有差赐京师酺幽州
旱求市麦种夏州饥请易粟并许之戊寅蠲畿内所贷粮己卯诏以天书之应申徽在位
二月壬辰御干元门观酺赐父老千五百人衣服茶彩
丁酉分遣中使锡边臣宴三月甲戌兖州父老一千二百人诣阙请封禅丁卯兖州并诸
路进士等八百四十人诣阙请封禅壬午文武官兵民
蛮夷耆老僧道二万四千三百七十余人诣阙请封禅自是表凡五上夏四月甲午诏以
十月有事于泰山遣官告天地宗庙岳渎诸祠乙未以
知枢密院事王钦若参知政事赵安仁为泰山封禅经度制置使丙申以王旦为封禅大
礼使冯拯陈尧叟分掌礼仪使丙午作昭应宫曹济州
广济军耆老二千二百人诣阙请临幸五月壬戌王钦若言泰山醴泉出锡山苍龙见丙
子诏瘞汴蔡广济河流尸暴骸仍致祭癸未置天书仪
卫使副扶持使都监夹侍凡有大礼即命之甲申放后宫一百二十人六月乙未天书再
见于泰山醴泉北壬寅迎泰山天书于含芳园五色云
见庚戌曲赦兖州囚罪辛亥羣臣上尊号曰崇文广武仪天尊道宝应章感圣明仁孝皇
帝秋七月丙寅罢诸州所贡物非土地所宜者八月己
丑上太祖太宗尊谥庚寅诏东封道路军马毋犯民稼开封府毋治道役民乙巳黔州磨
嵯洛浦蛮首领龚行满等率族二千三百人内附己酉
王钦若献芝草八千余本九月戊午令有司勿奏大辟案岳州进三脊茅庚申以向敏中
权东京留守甲子奉天书告太庙悉陈诸州所上芝草
嘉禾瑞木于仗内乙亥如潜龙园宴射己卯以马知节为行营都部署庚辰赵安仁献五
色金玉丹紫芝八千七百余本乙酉亲习封禅仪于崇
德殿冬十月庚寅以巡幸置考制度使副凡巡幸则命之是夕五星顺行同色辛卯车驾
发京师扶侍使奉天书先道戊戌许郚齐等州长吏赴
泰山陪位辛丑驻蹕郚州神光起昊天玉册上丁未法驾入干符县奉高宫戊申王钦若
等献泰山芝草三万八千余本己酉五色云起岳顶辛
亥享昊天上帝于圜台陈天书于左以太祖太宗配命羣臣享五方帝诸神于山下傅呼
万岁振动山谷壬子禅社首如封祀仪紫气下覆黄光
如星绕天书匝纵四方所献珍禽奇兽还奉高宫日重轮五色云见作会真宫癸丑御朝
覲坛之寿昌殿受羣臣朝贺大赦天下常赦所不原者
咸赦除之文武官并进秩赐致仕官本品全奉一季两浙钱氏泉州陈氏近亲蜀孟氏湖
南马氏荆南高氏广南河东刘氏子孙未食禄者听叙
用赐天下酺三日泰山七里内禁樵采大宴穆清殿又宴近臣泰山父老于殿门赐父老
时服茶帛十一月戊午如曲阜县拜文宣王庙辛酉赐
诸蕃使袍笏丁丑帝至自泰山奉天书还宫壬午诏以正月三日为天庆节甲申命王旦

奉上太祖太宗谥册亲享太庙乙酉大宴含光殿十二月辛卯御干元殿受尊号辛丑王旦加中书侍郎兼刑部尚书楚王元佐加太傅宁王元偓为护国军节度使舒王元偁为平江镇江军节度使并兼侍中广陵王元俨进封荣王安定公惟吉为威德军节度使余进秩有差癸卯如上清宫景德开宝寺诏天下宫观陵庙名在地志功及生民者并加崇饰辽国遣使来贺是岁西凉府甘州三佛齐大食国西南蕃等来贺封禅诸路言岁稔米斗七八钱

二年春正月癸亥以封禅庆成赐宗室辅臣袭衣金带器币乙酉以陕西饥遣使巡抚二月壬辰诏立曲阜县孔子庙学舍甲辰蠲同华州民租戊申遣使祠太乙祀玄冥癸丑禁毁金宝塑浮屠像甲寅以丁谓为三司使三月丙辰日当食不见辛未赐京城酺夏四月己亥以丁谓为修昭应宫使丁未振陕西民饥六月甲午如昭应宫赐修宫使器币罢邕宜州岁贡药箭秋七月辛未以昭应宫为玉清昭应宫乙亥蠲京东徐济七州水灾田租九月戊午赐秦州被水民粟壬戌合镇定部署为一甲子命工部侍郎冯拯使于辽乙丑如潜龙园宴射丁丑振凤州水灾冬十月甲午诏天下置天庆观十二月辛丑丁谓上封禅朝觐祥瑞图刘承珪上天书仪仗图

三年春二月癸巳交州黎至忠卒大校李公蕴自称留后甲寅冬官正韩显符上新造铜候仪戊辰降东京畿内囚罪三月壬辰以李仲蕴为静海军节度使封交址郡王夏六月庚戌边臣言辽使来告余诏雄州余粟二万石振之河中府父老千余人请祀后土不许丙辰颁天下释奠先圣庙仪并祭器图秋七月丙申温仲舒卒辛丑文武官将校等三上表请祠汾阴后土八月丁未诏明年春有事于汾阴戊申以陈尧叟为祀汾阴经度制置使己酉王旦为祀汾阴大礼使王钦若为礼仪使庚戌诏汾阴路禁弋猎不得侵占民田如东封之制辛酉给还郢州民牧马军地甲子罢江淮和余降所在囚罪丁卯羣臣五表上尊号不许乙亥河中府父老千七百人来迎帝劳问之赐以缗帛九月华州言父老二千余人请幸西岳冬十月辛亥辽遣使者来河中民言获灵宝真文庚申丁谓等上大中祥符封禅记十一月己亥如太乙宫陕州黄河清十二月陕州黄河再清庚戌集贤校理晏殊献河清颂辛酉谒玉清昭应宫

四年春正月辛巳诏执事汾阴懈怠者罪勿原乙酉习祀后土仪丙申诏以六月六日天书再降日为天贶节丁酉奉天书发京师庚子次泛水陈尧叟献白鹿二月戊申华州献芝草东京狱空壬子遣近臣祠西岳癸丑次河中府丁巳黄云随天书辇次宝鼎县奉祇宫戊午登后圃

延庆亭己未潘泉涌有光如烛辛酉祀后土地祇是夜月重轮还奉祇宫紫气四塞如开
元寺作大窳宫大赦天下常赦不原者咸赦除之文武
官并迁秩赐天下酺三日大宴羣臣于穆清殿赐父老酒食衣帀作汾阴配飨铭河渚四
海赞乙丑观酺加号西岳壬申宴虢州父老于湖城行
宫三月甲戌次陕州召草泽魏野辞疾不至乙亥赐运船卒时服己卯次西京庚辰罢河
北缘边工役己丑御五凤楼观酺甲午发西京夏四月
甲辰朔驾至自汾阴丙辰大宴含光殿己未饒种放归终南甲子王旦加右仆射元佐为
大尉元偓进封相王丁卯许国公吕蒙正薨五月己未
加上五岳帝号作奉神述丁酉虑囚降死罪以下秋七月壬申除闽浙荆湖广南岁丁钱
己丑诏先蠲滨棣州水灾田租十之三今所输七分更
除其半除畚田租庚戌曲宴诸王宰相癸丑赐青州孤老惇独民帛丁巳诏文武官有言
刑政得失边防机事者并赐对乙丑刻御制大中祥符
颂于大承天祥符门九月丁丑涇原钤辖曹玮言笼竿川熟户蕃部以闲田输官请于要
害地募兵以居许之戊子如太乙宫祈晴辛卯以向敏
中等为五岳奉册使癸巳御干元殿发五岳册丁巳定江淮盐酒价

五年春二月丙寅诏官吏安抚滨棣州被水民三月庚戌王旦等并加特进功臣丁
未免滨棣民物入城市者税一年夏四月戊申以向敏
中为平章事壬子除通泰楚州盐亭户籍负丁额课盐五月丁亥免棣州民租十之三六
月癸亥赐邵武军被水者钱粟秋八月丙申朔日有食
之戊戌张齐贤以司空致仕己未作五岳观九月戊子以王钦若陈尧叟并为枢密使同
平章事丁谓为户部侍郎参知政事冬十月戊午帝于
延恩殿道场亲瞻九天司命天尊降己未大赦赐致仕官全俸闰月己巳上圣祖尊号辛
未告谢太庙壬申立先天降圣节乙亥诏上圣祖母懿
号加太庙六室尊谥丙子羣臣上尊号曰崇文广武感天尊道应真佑德上圣钦明仁孝
皇帝戊寅建景灵宫太极观于寿邱辛巳建安军铸圣
像龙见云中戊子御制配享乐章并二舞名文曰发祥流庆武曰降真观德十一月丙申
亲祀玉皇于朝元殿甲辰加王旦门下侍郎向敏中中
书侍郎楚王元佐太师相王元偓太傅舒王元偁太保文武官加恩有差置玉清昭应宫
使以王旦为之丁未作汴水发愿文乙卯罢献珍禽异
兽十二月甲子置景福殿使戊辰作景灵宫己卯知天雄军寇准奏狱空乙酉振泗州饥
丙戌诏天庆等节日民犯罪情轻者释之丁亥立德妃
刘氏为皇后

六年春正月癸巳朔上御朝元殿受朝司天监言五星同色戊申禁内臣出使预民
政己酉赐京师酺五日二月乙卯建安军铸玉皇圣祖

太祖太宗尊像成以丁谓为迎奉使夏五月丙午诏圣像所经降囚罪流以下释之乙卯
谒圣像奉安于玉清宫丁巳遣使奉告诸陵六月丁卯
寿州献紫茎金芝秋七月癸巳上清宫道场获龙于香合中癸卯诏天下勿税农器己酉
亳州官吏父老三千三百人诣阙请谒太清宫八月庚
申诏于来春亲诣亳州太清宫辛酉以丁谓为奉祀经度制置使丙寅禁太清宫五里内
樵采庚午加号太上老君混元上德皇帝置礼仪院冬
十月甲子亳州太清宫枯桧再生真源县菽麦再实癸酉谒玉清昭应宫十一月甲寅判
亳州丁谓献芝草三万七千本十二月戊午朔日有食
之庚申泾原钤辖曹瑋发兵讨原州界拔藏族破之己巳天书扶侍使赵安仁等上奉天
书车辂鼓吹仪仗壬申献天书于朝元殿遂告玉清昭
应宫及太庙乙亥如开宝寺上清宫己卯如太一宫

七年春正月辛丑虑囚壬寅车驾奉天书发京师丙午次奉元宫判亳州丁谓献白
鹿一芝九万五千本戊申王旦上混元上德皇帝册宝
己酉朝谒太清宫是夜月重轮曲赦亳州及车驾所经流以下罪减亳州岁赋十之二改
奉元宫为明道宫太史言含誉星见庚戌御均庆楼赐
酺三日壬子诏所过顿递侵民田者给复二年丙辰赦南京境内及京畿车驾所过流以
下罪二月庚申夏州赵德明遣使诣行阙朝贡辛酉至
自亳州丙寅诏天地坛非执事辄临者斩辛未飨太庙壬申恭谢天地大赦甲午加宰相
王旦向敏中楚王元佐相王元偓舒王元偁荣王元俨
枢密使同平章事乙未宴翔鸾阁辛丑振仪州饥夏四月己未赐淮南诸州民租十之二
癸亥河南府狱空有鳩巢其户生二雏甲子以归义军
留后曹贤顺为归义军节度使丙子舒王元偁薨五月壬辰以王旦为兖州景灵宫朝修
使乙未又为天书刻玉使泾原言叶施族大首领艳班
率族归顺六月乙亥枢密使王钦若罢为吏部尚书陈尧叟为户部尚书以寇准为枢密
使同平章事丙子复棣州归业民租三岁秋七月甲辰
以同州观察使王嗣宗内客省使曹利用并为枢密副使八月甲寅置景灵宫使以向敏
中为之乙卯除江淮两浙被灾民租九月丙戌含誉星
再见辛卯尊上玉皇圣号曰太上开天执符御历含真体道玉皇大天帝冬十一月乙酉
玉清昭应宫成减诸路囚罪己丑加王旦司空修宫使
壬辰御干元门观酺十二月乙丑朔日当食不亏己未作元符观辛酉加楚王元佐尚书
令相王元偓太尉荣王元俨兼中书令忠武军节度使
魏咸信同平章事余并进秩是岁夏州西凉府高丽女真来贡淮南江浙饥除其租天下
户九百五万五千七百二十九口二千一百九十七万
六千九百六十五

八年春正月壬午朔谒玉清昭应宫奉表告尊上玉皇大天帝圣号奉安天书于宝符阁还御崇德殿受贺大赦除十恶枉法赃及已杀人者咸除之文武官满三岁者有司考课以闻乙未皇女入道夏四月壬戌以寇准为武胜军节度使同平章事王钦若陈尧叟并为枢密使同平章事癸酉诏求直言五月壬午荣王元僎罢武信军节度使降封端王庚子放宫人一百八十四人六月己酉朔日有食之闰月己卯大赦天下七月戊午以王嗣宗为大同军节度使丙子如瑞圣园观稼宴射于水心殿冬十月乙巳王钦若上圣祖先天纪十二月辛酉相王元僎加兼中书令端王元僎进封彭王癸亥高丽使同东女真来贡十二月丁亥侍禁杨承吉使西蕃还以地理图进

九年春正月丙辰置会灵观使以丁谓为之三月辛酉以西蕃宗哥族李立尊为保顺军节度使夏四月庚寅周伯星见丙申赐天下酺振延州蕃族饥五月乙巳夏人寇庆州内属蕃部击走之乙卯毛尸等三族蕃官冯移埋率属来归丙辰降天下囚罪丁巳以向敏中为宫观庆成使六月戊寅如会灵观宴祝禧殿秋七月丁未增筑京师新城八月壬申知秦州曹玮言伏羌砦蕃部厮鸡波与宗哥族为乱以兵诛平之丙戌制玉皇圣号文以陈尧叟为右仆射九月甲辰以丁谓为平江军节度使丙午陈彭年王曾张知白并参知政事宗哥嘉勒斯赉蕃部马波叱腊鱼角蝉等寇羌伏砦曹玮击败之【宋史曹玮上衍丁谓二字今删】戊午禁诸路贡瑞物冬十月己卯王钦若表上翊圣保德真君传十一月会灵观甘露降丁未河西节度使石普坐妄言灾异除名流贺州

天禧元年春正月辛丑朔改元谒玉清昭应宫上玉皇大天帝宝册壬寅上圣祖宝册己酉上太庙谥册庚戌享六室辛亥谢天地于南郊大赦受册号乙亥宰相读天书于天安殿遂如玉清昭应宫作钦承宝训述示羣臣壬戌诏以四月旦日为天祥节丙寅命王旦为兖州太极观奉上册宝使二月壬申御正阳门观酺戊寅加王旦太保中书侍郎平章事向敏中吏部尚书楚王元佐领雍州牧相王元僎加尚书令兼中书令进封徐王彭王元僎加太保寿春王祜兼中书令王钦若加右仆射赵德明加太傅中外官加恩有差夏四月庚辰陈尧叟卒五月戊戌诏所在安恤流民戊申以王旦为太尉侍中五日一入中书旦辞不拜六月壬申降西京囚罪流以下释之父老年八十者赐茶帛除其课役戊寅除升州后湖租钱听民溉田乙酉免大食国蕃客税之半秋八月庚午以王钦若为左仆射兼中书侍郎平章事壬申向敏中加右仆射兼门下侍郎丙子诏京城禁围草地听民耕牧戊寅免牛税一年九月癸卯以参知政事王曾为礼

部侍郎李迪为参知政事马知节知枢密院事曹利用
任中正周起并为知枢密院事己酉王旦薨丁未教卫士骑射冬十月壬申谕诸州非时
灾沴不以闻者论罪己卯罢京东上贡物十一月壬寅
诏准浙荆湖治放生池禁渔采壬戌契丹使贺承天节十二月乙亥罢京师工役丁丑放
逋负释系囚辛卯诏陕西缘边鬻谷者勿算壬辰遣使
缘汴河收瘞流尸

二年春正月乙未真游殿芝草生壬寅振河北京东饥戊午王钦若上天禧大礼记
己未遣使谕京东官吏安抚饥民二月丁卯寿春王祜
加太保进封升王庚辰振京西饥三月丙辰先贷贫民粮种止勿收夏四月庚寅降天下
死罪一等流以下释之闰月癸卯以马知节为彰德军
留后丁未灵泉出京师作祥源观秋七月壬申以星变降天下流以下罪左降官羁管十
年以上者放还京师八月甲辰立子升王为皇太子大
赦宗室加恩羣臣赐勋一转壬子彭王元俨进封通王九月庚辰御干元门观酺冬十月
庚子召近臣观刈占城稻遂宴安福殿十二月辛丑以
张旻为武宁军节度使同平章事

三年春三月戊午朔日有食之夏五月辛未虑囚六月癸未浚淮南漕渠废三堰戊
戌以寇准为中书侍郎兼吏部尚书平章事丁谓为吏
部尚书参知政事秋七月壬申曹璨卒羣臣上尊号曰体元御极感天尊道应真宝运文
德武功上圣钦明仁孝皇帝八月丁亥大赦己亥庆州
亡去熟户委乞等来归庚戌遣使恤京东西河北水灾九月乙丑庆州骨咩大门等族内
附冬十一月己巳谒景灵宫庚午飨太庙辛未祀天地
于圜丘大赦丁丑御天安殿受尊号册十二月丙戌富州蛮酋向光泽表纳土诏却之辛
卯向敏中加左仆射中书侍郎兼礼部尚书平章事寇
准加右仆射通王元俨进封泾王曹利用丁谓并为枢密使百官加恩有差癸巳以任中
正周起并为枢密副使

四年春正月乙丑以华州观察使曹玮为镇国军留后全枢密院事丙寅开扬州运
河己巳如元符观二月帝不豫癸未遣使安抚淮南江
浙利州饥民辛丑发唐邓八州常平仓振贫民三月戊午贷淄州民牛粮甲子振蕃部粟
己亥振益梓饥己卯向敏中薨夏五月丁巳发粟振秦
陇六月丙申以寇准为太子太傅莱国公秋七月丙寅以李迪为吏部侍郎兼太子少傅
平章事冯拯为枢密使吏部尚书同平章事庚午以丁
谓为平章事曹利用同平章事癸酉入内副都知周怀政伏诛丁丑太子太傅寇准降授
太常卿翰林学士盛度枢密直学士王曙并罢职八月
永兴军都巡检使朱能杀中使以叛乙酉以任中正王曾并参知政事诏利夔路置常平

仓丙戌朱能自杀壬寅贬寇准为道州司马九月丁卯赦天下己巳遣使安抚永兴军壬戌赐京城酺冬十月壬午御正阳门观酺壬辰以王钦若为资政殿大学士甲辰减水灾州县秋租丙午召皇子宗室近臣玉宸殿观稻十一月丙寅丁谓加门下侍郎兼太子太傅李迪加中书侍郎兼尚书左丞依前少傅戊辰罢丁谓户部尚书迪为户部侍郎任中正王曾钱惟演并兼太子宾客张士逊林特并兼太子詹事晏殊为太子左庶子己巳诏谓赴中书视事如故甲午诏自今除军国大事皆委皇太子同宰相枢密使等参议行之以丁谓兼太子少师冯拯兼少傅曹利用兼少保辛未诏自今羣臣于长春殿起居余只日视朝于承明殿十二月乙酉皇太子亲政诏内臣传旨须覆奏己丑王钦若加司空丁酉以王钦若为山南东道节度使同平章事

五年春正月癸巳降天下死罪流以下释之乙未遣使抚京东水灾丁酉以张士逊为枢密副使己亥宴近臣于承明殿二月甲寅审刑院言天下无断狱丙寅赐天下酺庚午以孔子四十七世孙圣佑袭封文宣公三月辛巳御正阳门观酺辛丑以京东西水灾赐民租十之五壬寅加丁谓司空冯拯左仆射射利用右仆射任中正工部尚书夏五月乙亥虑囚降天下死罪秋七月甲戌朔日有食之戊寅新作景灵宫万寿殿九月戊寅嘉勒斯赉请降冬十月癸卯蠲京东西淮浙被灾民租壬子依汉唐故事五日一受朝遇庆会皇太子押班十一月戊子山南东道节度使王钦若擅赴阙降司农卿分司南京

干兴元年春正月辛未朔改元丁亥御东华门观灯戊戌蠲秀州水灾民租二月庚子大赦癸卯羣臣上尊号曰应天尊道钦明仁孝皇帝振苏湖秀州饥甲辰封丁谓晋国公冯拯魏国公曹利用韩国公庚辰振徐州贫民甲寅召对宰相于寝殿戊午帝大渐遗诏皇太子于枢前即位尊皇后为皇太后权处分军国事尊淑妃为皇太妃是日皇帝崩于延庆殿年五十五谥曰文明武定章圣元孝皇帝加谥膺符稽古神功让德文明武定章圣元孝皇帝庙号真宗陵曰永定陵

真宗咸平六年景德四年大中祥符九年天禧五年干兴一年凡二十五年
钦定续通志卷二十七

●钦定续通志卷二十八 宋纪四

宋纪 【四】

仁宗 【一】

○仁宗一

仁宗皇帝讳祜初名受益真宗第六子母李宸妃也章献皇后无子养为己子性仁

孝宽裕喜愠不形于色始封庆国公进寿春郡王兼中书令进封升王天禧二年立为皇太子干兴元年二月戊午真宗崩遗诏太子即皇帝位尊皇后为皇太后权处分军国事遣使告哀于辽己未大赦百官进秩一等庚申以丁谓为山陵使丙寅遣使以先帝遗物遗辽主进封泾王元俨为定王赐赞拜不名以丁谓为司徒尚书左仆射冯拯为司空枢密使尚书右仆射曹利用为尚书左仆射并兼侍中戊辰贬道州司马寇准为雷州司户参军户部侍郎李迪为衡州团练副使宣徽南院使曹玮为左卫大将军三月庚寅初御崇德殿太后设幄次于承明殿垂帘以见辅臣夏四月壬子遣使以即位告于辽人五月乙亥虑囚降死罪以下六月己酉命参知政事王曾按视山陵皇堂丁巳辽遣使来奠吊慰庚申入内侍省押班雷允恭伏诛丁谓罢为太子少保分司西京甲子改命冯拯为山陵使丙寅降参知政事任中正为太子宾客秋七月辛未冯拯加昭文馆大学士以王曾为中书侍郎同中书门下平章事集贤殿大学士吕夷简鲁宗道参知政事己亥遣使报谢于辽国丙子以枢密副使钱惟演为枢密使辛卯贬丁谓为崖州司户参军八月壬寅遣使贺契丹主及其妻生日正旦乙巳皇太后御承明殿垂帘决事冬十月壬寅辽遣使来贺即位己酉葬真宗皇帝于永定陵以天书从葬【谨按通鉴辑览 御批史臣以天书殉葬为是续纲目发明则以为非且谓当辟其伪焚其书诛其人夫天书妄诞本不足信事后止宜置之不论不议而已举而投畀炎火且又追戮奸邪岂非彰真宗之过于殒落之后而究无补于政化之得失哉】辛酉降东西京囚罪蠲山陵役户及灵驾所过民田租十一月丁卯朔钱惟演罢甲戌嘉勒斯赉埒克尊求内附壬午以张知白为枢密副使十二月壬戌辽遣使来贺明年正旦

天圣元年春正月丙寅朔改元庚午辽遣使来贺长宁节二月戊戌嘉勒斯赉岁一入贡丙子减西京囚罪辛卯司天监上崇天厯行淮南十三山扬贴射茶法夏五月甲子行陕西河北入中刍粮见钱法辛未虑囚甲戌命鲁宗道按视滑州决河庚寅议皇太后仪卫制同乘輿六月甲辰罢江宁府溧水县采丹砂秋七月壬申除戎泸州虚估税钱诏职田遇水旱蠲租如例辛巳蠲天下逋负八月丙申降天下囚罪废郢州东平马监以牧地赋民九月丙寅冯拯罢以王钦若为门下侍郎同中书门下平章事闰月甲午诏裁造院女工及营妇配南北作坊者戊戌寇准卒于雷州己亥冯拯卒丁未禁彭州九陇县采金冬十月辛酉徙陕西缘边军马屯内地十一月丁酉诏诸州配囚录具狱与地里上刑部详覆

禁两浙江南荆湖福建广南巫覡挟邪术害人者戊午置益州交子务是岁泾原咻迷卞杏家族内附

二年春二月庚午遣瘞汴口流尸夏四月辛酉诏三司岁市絀绢非土产者罢之乙酉录晋石氏后五月乙未虑囚六月壬申罢天庆天祺天祝先天降圣节宫观然灯秋八月己卯如国子监谒孔子遂如武成王庙冬十一月乙未朝飨玉清昭应景灵宫丙申飨太庙丁酉祠天地于圜丘大赦羣臣上尊号曰圣文睿武仁明孝德皇帝皇太后尊号曰应元崇德仁寿慈圣皇太后赐百官诸军加等乙巳立皇后郭氏

三年夏四月丁丑诏三馆缮书藏太清楼五月庚寅虑囚癸巳如御庄观刈麦赐织妇茶帛己亥赐隐士林逋粟帛六月癸酉环原州属羌叛环庆都监赵士隆等死之遣使者安抚陝西秋七月丙午诏边户为羌所扰者蠲租复役二年八月戊午以忠州盐井岁增课夔州奉节巫山县旧籍民为营田万州户有税者岁余其谷皆为民害诏悉除之辛未蠲陝西旱灾州军租九月乙巳诏司天监奏灾异据占书以闻冬十月辛酉以晏殊为枢密副使十一月己卯罢贴射茶法辛卯以襄州水蠲民租振晋絳陝解州饥戊申王钦若卒十二月癸丑以王会为门下侍郎张知白同中书门下平章事乙丑张旻为枢密使是岁环庆蕃部嵬逋等内附

四年春正月庚子泾原兵破康奴族二月甲寅诏吏犯赃至流按察官失举者并劾之庚午置西界和市场三月己亥鄜延蕃部首领曹守贵等内附夏四月壬子诏京东西河北淮南平谷价五月壬午诏大辟疑者奏讞有司毋辄举驳戊子虑囚闰月戊申减江淮岁漕米除舒州太湖等茶场逋钱辛亥复陝西永丰渠以通解盐六月辛卯以大水避正殿减常膳丁酉降天下囚罪蠲畿内京东西淮南河北被水民田租秋七月辛未减两川岁输锦绮易绫纱为绢以给边费八月丁亥筑泰州捍海堰己丑诏施州溪峒首领三年一至京师九月录周世宗从孙柴元亨为三班奉职辛未废襄唐州营田务以田赋民冬十月甲戌朔日有食之壬辰诏郎中以上致仕赐一子官

五年春正月壬寅朔帝率羣臣上皇太后寿于会庆殿遂御天安殿受朝己未晏殊罢戊辰以夏竦为枢密副使二月丙子振京东流民三月罢琼州岁贡瑇瑁龟皮紫贝夏五月辛亥虑囚癸亥楚王元佐薨六月甲戌祷雨于玉清昭应宫开宝寺丙子诏决畿内系囚癸未罢诸营造之不急者秋七月己亥振泰州水灾赐被溺家钱米丙辰塞滑州决河詔察京东被灾县吏不职者以闻九月庚戌阅龙卫神勇军习战冬十月辛未罢陝西青苗钱己丑颁新定五服敕十一月丁酉以陝西旱蝗减其租辛亥朝飨景

灵宫壬子飨太庙癸丑祀天地于圜丘大赦十二月丁

亥诏百官宗室受赂冒为亲属奏官者毋赦

六年春正月乙酉罢两川干元节岁贡织佛二月壬午张知白薨三月丙申朔日有食之壬子以张士逊同中书门下平章事癸丑以姜遵为枢密副使己未以范雍为枢密副使壬戌作西太一宫夏四月丁丑贷河北流民复业者种食复是年租赋癸未命官减三司岁额上供物降畿内囚死罪流以下释之罢诸土木工振河北流民过京师者五月乙未交址寇边六月丙寅罢戎泸诸州谷税钱秋八月乙丑诏免河北水灾州军秋税冬十月甲申除福州民逋官庄钱

七年春正月癸卯曹利用罢二月庚申鲁宗道卒丙辰张士逊罢以吕夷简同中书门下平章事集贤殿大学士丁卯以夏竦薛奎参知政事陈尧佐为枢密副使癸酉贬曹利用为崇信军节度副使房州安置未至自杀癸巳募民入粟以振河北闰月戊申禁京城刳造寺观壬子复制举六科增高蹈邱园沈沦草泽茂才异等科置书判拔萃科及试武举三月癸未诏百官转对极言时政阙失在外者实封以闻夏四月庚寅赦天下免河北被水民租赋辛卯南平王李公蕴卒以其子德政为交址郡王五月癸酉虑囚六月丁未大雷雨玉清昭应宫灾甲寅王曾罢秋七月癸亥以玉清昭应宫灾遣官告诸陵诏天下不复缮修八月丁亥朔日有食之罢天下职田官收其入均给之己丑以吕夷简为昭文馆大学士辛卯夏竦复为枢密副使陈尧佐王曙并参知政事冬十月壬寅阅虎翼武骑卒习战

八年春正月甲戌曹玮卒三月诏河北被水州县毋税牛夏五月甲寅赐信州龙虎山张干曜号澄素先生辛酉虑囚秋八月丙戌诏详定盐法九月乙丑姜遵卒己巳以赵稹为枢密副使冬十月丙申弛三京河中府颍许汝郑郛济卫晋绛虢亳宿等二十八州军盐禁十一月丙寅朝飨景灵宫丁卯飨太庙戊辰祀天地于圜丘大赦

九年春正月辛未减畿内民租二月癸巳复职田夏五月乙丑虑囚秋七月丙午辽遣使来告其主隆绪殂子宗真嗣立遣使祭奠吊慰及贺即位冬十一月丁亥弛两川矾禁是岁辽遣使来致其先帝遗物及谢吊祭女真晏端等百八十四人内附

明道元年春二月庚戌以张士逊同中书门下平章事丁卯以真宗顺容李氏为宸妃是日妃薨戊戌遣使录江淮系囚己亥除婺秀州丁身钱夏四月丙午虑囚五月癸酉遣使点检河北城池器甲密访官吏能否壬午废杭秀二州盐场秋七月丁酉王曙罢八月辛丑以晏殊为枢

密副使丙午晏殊参知政事甲寅以杨崇勋为枢密副使壬戌大内火延入殿癸亥移御延福宫甲子以吕夷简为修内使乙丑诏羣臣直言阙失丁卯大赦九月庚寅重作受命宝冬十一月甲戌以修大内成谢天地于大安殿谒太庙大赦改元百官进秩有差是日还宫壬辰延州言夏王赵德明卒癸巳以其子元昊为定难军节度使西平王十二月壬寅以杨崇勋为枢密使

二年春正月己卯振江淮饥二月乙巳皇太后服袞衣仪天冠飨太庙皇太妃亚献皇后终献是日上皇太后尊号曰应元齐圣显功崇德慈仁保寿皇太后丁未祀先农于东郊躬耕藉田大赦羣臣上尊号曰睿圣文武体天法道仁明孝德皇帝三月丁亥祈雨于会灵观上清宫景德开宝寺庚寅以皇太后不豫大赦甲午皇太后崩遗诏尊皇太妃为皇太后夏四月壬寅追尊宸妃李氏为皇太后至是帝始知为宸妃所生戊申听政于崇政殿西厢壬子诏臣僚宗戚命妇毋得以进献祈恩泽及缘亲戚通表章罢创修寺观自是帝始亲政癸丑还宋绶范仲淹丙辰黜内侍江德明等己未吕夷简张耆夏竦陈尧佐范雍赵稹晏殊罢以张士逊为昭文馆大学士李迪同中书门下平章事集贤殿大学士王随参知政事李谿为枢密副使王德用金书枢密院事五月癸酉诏中外勿辄言皇太后垂帘日事戊寅虑囚六月甲午朔日有食之壬寅录周世宗及高季兴李煜孟昶刘继元刘鋹后戊午减天下岁贡物秋七月丁丑增知耀州富平县事张龟年秩令再任以其治行风告天下戊子诏以蝗旱去尊号睿圣文武字仍令中外直言阙政八月甲午辽使来吊慰祭奠冬十月甲辰诏以两川岁贡绫锦罗绮纱以三之二易为絀绢供军须癸丑降东西京囚罪一等徒以下释之戊午张士逊杨崇勋罢以吕夷简为门下侍郎同中书门下平章事昭文馆大学士王曙为枢密使王德用为枢密副使宋绶参知政事蔡齐为枢密副使十一月癸亥薛奎罢增宗室奉乙丑追册美人张氏为皇后甲戌赠寇准为中书令十二月甲辰以京东饥出内藏绢二十万代其民岁输乙巳诏修周庙戊申出宫人二百乙卯废皇后郭氏为净妃玉京冲妙仙师居长宁宫丙辰出御史中丞孔道辅及谏官范仲淹仍诏台谏自今毋相率请对丁巳诏改明年元禁边臣增设堡砦

景佑元年春正月甲子振京东饥甲戌诏执政大臣议兵农可更制者以闻诏募民掘蝗种给粟米甲申淮南饥出内藏绢二十万代其民岁输庚寅诏停淮南上供一年二月乙未罢书判拔萃科辛丑诏礼部贡院诸科举人七举者不限年并许特奏名甲辰权减江淮漕米二百万

石戊申诏麟府州振蕃汉饥民三月壬午免诸路灾伤州军今年夏税癸未蠲解州畦户
逋盐之半夏五月辛酉出布十万端易钱余河北军储
丁卯禁民闲织锦刺绣为服饰罢西川岁贡织锦壬午虑囚六月壬辰交州民六百余人
内附庚子免畿内被灾民税之半乙亥毁天下无额寺
院壬午罢造玳瑁龟筒器秋七月己亥枢密使王曙加同平章事八月庚申薛奎卒癸亥
王曙卒庚子以王曾为枢密使辛未以星变大赦避正
殿减常膳壬辰诏净妃郭氏出居于外美人尚氏入道杨氏安置别宅冬十一月己丑立
曹氏为皇后

二年春二月戊辰李迪罢以王曾为门下侍郎同中书门下平章事集贤殿大学士
王随李谘知枢密院事蔡齐盛度参知政事王德用韩
亿同知枢密院事三月戊申出内库珠助经费夏四月庚午诏天下举知乐者五月甲午
獠寇雷化州诏桂广会兵讨之丙申虑囚庚子议太
祖太宗真宗庙并万世不迁南郊以太祖定配二宗迭配丙午降天下囚罪一等杖以下
释之丁未广西言镇宁州蛮入寇六月镇宁蛮请降秋
七月戊申废西京采柴务八月壬子诏轻强盗法甲戌如炮场阅习战九月壬寅按新乐
己酉命中丞杜衍等汰三司胥吏冬十一月戊子废后
郭氏薨癸巳朝飨景灵官甲午飨太庙奉慈庙乙未祀天地于圜丘大赦羣臣上尊号曰
景佑体天法道钦文聪武圣神孝德皇帝十二月壬子
加嘉勒斯賚为保顺军留后

三年春正月壬辰追复郭氏为皇后丁酉葬皇后郭氏二月丙辰命官较太常钟律
壬戌诏两制礼官详定京师士民服用居室之制丁卯
修陝西三白渠三月癸巳复商贾以见钱算请官茶法夏五月庚辰购求馆阁逸书丙申
虑囚丙戌天章阁待制范仲淹落职知饶州集贤校理
余靖馆阁校勘尹洙欧阳修并落职补外戒百官越职言事秋七月丁亥禁民间私写编
敕刑书辛丑降三京死罪一等徒以下释之八月己酉
班民闲冠服居室车马器用犯制之禁冬十二月丙寅李谘卒丁卯以王德用知枢密院
事章得象同知枢密院事

四年春正月壬午诏均诸州解额乙丑置赤帝像于宫中祈嗣夏四月甲子吕夷简
王曾朱绶蔡齐罢以王随为门下侍郎同中书门下平
章事昭文馆大学士陈尧佐同中书门下平章事集贤殿大学士盛度知枢密院事韩亿
程琳石中立参知政事王巖同知枢密院事五月庚戌
皇子生降死罪一等流以下释之是日皇子薨乙卯以旱遣使决三京系囚秋七月丁未
诏河东河北州郡密严边备冬十一月癸亥罢登莱买
金场

宝元元年春二月甲午安化蛮寇宜融州三月戊戌王随陈尧佐韩亿石中立罢以张士逊为门下侍郎同中书门下平章事昭文馆大学士章得象同中书门下平章事集贤殿大学士王巖李若谷并参知政事王博文陈执中同知枢密院事己亥发邵澧潭三州驻泊兵讨安化州蛮夏四月癸酉王博文卒己亥以张观同知枢密院事壬辰除宜融州夏税五月乙巳虑囚冬十月丙寅诏戒百官朋党十一月甲辰诏广西钤辖进兵讨安化蛮乙巳诏宜融州民尝从军役者免今年夏税运粮者免其半戊申朝飨景灵宫己酉飨太庙及奉慈庙庚戌祀天地于圜丘大赦改元羣臣上尊号曰宝元体天法道钦文聪武圣神孝德皇帝乙卯王曾薨十二月丙寅鄜延路赵元昊反甲戌禁边人与元昊互市己卯以泰宁军节度使知永兴军夏竦兼泾原秦凤路安抚使 【泰宁朱史作奉宁考宋无奉宁军兹据东都事略改】 振武军节度使知延州范雍兼鄜延环庆路安抚使

二年春正月己酉王随卒辛亥安化蛮平癸丑赵元昊表请称帝改元三月戊午赐陝西缘边军士缗钱夏四月癸亥以嘉勒斯賚子嘉沁莽嘉扎卜为团练使乙丑放宫女二百七十人壬申免昭州运粮死蛮寇者租徭有差丁亥募河东陝西民入粟实边五月癸巳诏近臣举方畧材武之士各二人癸卯命近臣同三司议节省浮费丙午遣使体量安抚陝西河东己酉虑囚壬子王德用罢以夏守赧知枢密院事六月壬戌诏省浮费自乘輿服御及宫掖所须俱从简约若吏兵禄赐毋槩裁减壬午削赵元昊官爵除属籍秋七月戊午以夏竦知泾州兼泾原秦凤路沿边经畧安抚使泾原路马步军都总管范雍兼鄜延环庆路沿边经畧安抚使鄜延路马步军都总管八月丁卯以筑策城嘉勒斯賚补本族军主甲戌皇子生丙子降三京囚罪一等徒以下释之九月乙卯出内库银易粟振益梓利夔路饥十月庚午赐麟府州及川陝军士缗钱甲申诏两川饥民出剑门关者勿禁十一月戊子出内库珠易缗钱余边储丁酉盛度程琳罢御史中丞孔道辅出知郢州壬寅以王巖知枢密院事宋庠参知政事

康定元年春正月丙辰朔日有食之是月元昊寇延州执鄜延环庆两路副都总管刘平鄜延副都总管石元孙诏陝西运使明镐募强壮备边二月丁亥以夏守赧为宣徽南院使陝西马步军都总管经畧安抚使诏潼关设守备壬辰夏守赧兼沿边招讨使出内藏缗钱赐戍边禁兵之家以知制诰韩琦安抚陝西甲午括畿内京东西淮南陝西马丙申诏诸路转运使提刑访知边事者以闻丁酉诏枢密院同宰臣议边事

辛丑出内藏缗钱付陝西市余军储丙午赦延州保安军流以下罪除寇所攻掠地今年夏租赐戍兵及战死者家钱是日改元去尊号宝元二字中外臣庶上封章言事丁未诏陝西量民力蠲所科刍粮癸丑降范雍为吏部侍郎知安州甲寅出内库珠偿民马直三月丙辰诏大臣条陝西攻守策癸亥命韩琦治陝西城池乙丑阅虎翼军习战辛未诏延州录战没军士子孙月给粮丁丑诏中外言阙政戊寅王黼陈执中张观罢以晏殊宋绶知枢密院事王貽永同知枢密院事诏按察官举才堪将帅者庚辰诏参知政事同议边事辛巳降天下囚罪一等徒以下释之赐京师河北陝西河东诸军缗钱蠲陝西夏税十之二減河东所科粟夏四月丙戌省陝西沿边堡砦甲午遣使籍陝西强壮军乙未辽使来贺干元节乙巳增补河北强壮军丙午鄜延路兵马都监黄德和坐弃军要斩五月壬戌张士逊致仕吕夷简为门下侍郎同中书门下平章事昭文馆大学士癸酉诏夏守贇进屯鄜州戊寅以夏竦为陝西马步军都总管兼招讨使是月元昊陷塞门砦兵马监押王继元死之又陷安远砦六月丁亥以夏守贇同知枢密院事甲午降三京囚罪一等徒以下释之壬寅遣使体量安抚京东西甲辰增置陝西河北河东京东西弓手秋七月乙丑遣使以讨元昊告于辽庚午阅诸军习战戊寅以子昕为忠正军节度使封寿国公八月戊申夏守贇罢以杜衍同知枢密院事辛亥诏范仲淹葛怀敏领兵驱逐塞门等砦蕃骑出境仍募弓箭手给地居之九月戊午李若谷罢以宋绶晁宗悫参知政事郑戩同知枢密院事戊辰以晏殊为枢密使王貽永杜衍郑戩并枢密副使甲戌诏使臣诸班诸军有武艺者自陈辛巳阅诸军习战是月元昊寇三川砦都巡检杨保吉死之又围师子定川堡遂陷干沟干河赵福三堡环庆路兵马副都总管任福攻白豹城破之冬十月乙未制铜木契传信牌甲辰录方畧士六十一人授官有差十二月癸未出内藏库绢助余军储丙戌诏以常平缗钱助余军储癸卯宋绶卒戊申铸当十钱权助边费

钦定续通志卷二十八

●钦定续通志卷二十九 宋纪五

宋纪 【五】

仁宗 【二】 英宗

○仁宗二

庆历元年春正月己未加嘉勒斯賚河西节度使是月元昊请和二月己亥寿国公昕薨是月元昊寇渭州环庆路马步军副都总管任福败于好水川死之夏四月甲申以资政殿学士陈执中同陝西马步军都总管兼经畧安抚

沿边招讨等使知永兴军诏夏竦仍判永兴军乙巳降
陝西囚罪一等流以下释之五月丁巳虑囚甲子出内藏缗钱助军费丁卯罢陝西经畧
安抚沿边招讨都监辛未宋庠郑戩罢以王举正参知
政事任中师任布为枢密副使诏夏竦屯军鄜州陈执中屯军泾州癸酉阅试卫士六月
壬辰诏陝西诸路总管司严边备毋辄入贼界秋七月
元昊寇麟府州八月戊寅诏鄜延部署以兵援之甲申河北置场市马乙巳募民闲材勇
者补神捷指挥是月元昊寇金明砦破盗远砦砦主王
世宣兵马监押王显死之元昊陷丰州知州王余庆兵马监押孙吉死之冬十月甲午罢
都部署分四路置使置陝西营田务己亥罢铜符木契
是月修河北城池十一月壬子置泾原路强壮弓箭手甲子朝飨景灵宫乙丑飨太庙奉
慈庙丙寅祀天地于圜丘大赦改元蠲陝西来年夏税
十之二及麟府民二年租弛京东八州盐禁十二月丁丑司天监上崇天万年历戊寅诏
陝西四路总管及转运使兼营田

二年春正月丁巳复京师榷盐法壬戌诏以京西闲田处内附蕃族无亲属者二月
乙未诏河北强壮刺手背为义勇军三月甲辰诏殿前
指挥使两省都知举武臣才堪为将者丁巳以杜衍宣抚河东辛酉晁宗慝罢己巳辽使
萧英刘六符来致书求割地夏四月戊寅令御史中丞
谏官同较三司用度罢其不急者庚辰遣知制诰富弼如辽为报使五月辛亥虑囚甲寅
诏三馆臣上封事及请对戊午建大名府为北京降河
北州军囚罪一等杖以下释之乙酉罢左藏库月进钱戊辰禁销金为服饰是月辽人兵
集幽州声言入寇诏河北京东皆为边备六月甲戌出
内藏银紬绢助边费丙申阅蕃落将士骑射戊戌诏减省南郊臣僚赐与秋七月丙午任
布罢戊午以吕夷简兼判枢密院事章得象兼枢密使
晏殊加平章事癸亥富弼再使于辽九月丙午吕夷简兼枢密使乙丑辽遣使耶律仁起
刘六符持誓书来闰月戊戌罢河北民闲科徭是月元
昊寇定川砦泾原路马步军副都总管葛怀敏死之冬十月庚戌赦陝西保捷军甲寅遣
使安抚泾原路丙辰知制诰梁适报使于契丹戊午发
定州禁军屯泾原庚申诏恤阵亡将校其妻无依者养之宫中丙寅辽遣使来再致誓书
报彻兵十一月辛巳复都部署兼招讨等使命韩琦范
仲淹庞籍分领之

三年春正月庚午封皇子曦为鄂王辛未曦薨丙子减陝西岁市木三之一辛巳诏
辅臣议蠲减天下赋役戊子诏录将校死王事而无子
孙者亲属癸巳元昊自名曩霄遣人来纳款称夏国三月壬申阅卫士武技戊子吕夷简
罢为司徒监修国史与议军国大事以章得象为昭文

馆大学士晏殊为集贤殿大学士并兼枢密使夏竦为枢密使贾昌朝参知政事夏四月戊戌如琼林苑阅骑士癸卯遣使封元昊为夏国主岁
赐茶绢甲辰以韩琦范仲淹为枢密副使乙酉诏夏竦还本镇以杜衍为枢密使甲子吕夷简罢议军国大事五月丁卯朔日有食之庚午虑囚
是月忻州地大震虎翼卒王伦叛七月辛未诏二府不限奏事常制得敷陈留对丙子王举正罢壬午罢陝西管内营田甲申命任中师宣抚河
东范仲淹宣抚陝西乙酉王伦伏诛八月丁未以范仲淹参知政事富弼为枢密副使癸丑以韩琦代范仲淹宣抚陝西九月丁卯诏辅臣对天
章阁戊辰吕夷简以太尉致仕乙亥任中师罢是月桂阳蛮寇边湖南提刑讨平之冬十月乙卯诏修兵书甲子筑水洛城是月光化军乱讨平
之十一月壬辰限职田十二月乙巳桂阳监猺贼复寇边

四年春正月乙亥荆王元俨薨二月丙辰出奉宸库银振陝西饥甲寅罢陝西四路马步军都总管经畧安抚招讨使复置随路都总管经
畧安抚招讨使三月辛未减广济河岁漕军储乙亥诏天下州县立学更定科举法甲申免衡道州桂阳监民经猺贼劫掠者赋役一岁夏四月
丁酉宜州蛮欧希范叛诏广西转运钤辖司发兵讨之五月庚午虑囚壬申如国子监谒孔子遂如武成王庙又至玉津园观种稻戊寅募人纳
粟振淮南饥丙戌曩霄遣使人复称臣六月壬子降天下囚罪一等以范仲淹宣抚陝西河东秋七月癸未辽人遣使者来告伐夏甲申夷人寇
三江砦涪井监官兵击走之八月辛卯命贾昌朝领天下农田范仲淹领刑法事甲午以富弼宣抚河北戊戌遣右正言余靖报使于辽国保州
云翼军杀官吏据城叛庚子命右正言田况按视保州听便宜行事九月辛酉保州平壬戌蠲保州民田遭蹂践者租戊辰吕夷简薨庚午晏殊
罢乙亥遣使安抚湖南甲申以杜衍同中书门下平章事兼枢密使集贤殿大学士贾昌朝为枢密使陈执中参知政事冬十月庚寅赐曩霄誓
陈尧佐薨丙申命范仲淹提举三馆秘阁缮校书籍癸丑桂阳蛮降十一月己巳戒朋党相讦及按察恣为苛刻文人肆言行怪者庚辰朝飨景
灵宫辛巳飨太庙奉慈庙壬午冬至祀天地于圜丘大赦十二月乙未封曩霄为夏国主

五年春正月甲戌罢河东陝西诸路招讨使丙子辽遣使来告伐夏师还庚辰遣知制诰余靖报使于辽国乙酉范仲淹富弼罢丙戌杜衍
罢以贾昌朝同中书门下平章事兼枢密使集贤殿大学士王貽永为枢密使宋庠参知政事吴育庞籍并为枢密副使二月壬辰曩霄初遣人
来贺正旦癸卯以久旱诏州县毋淹系刑狱辛亥祈雨于相国天清寺会灵祥源观癸丑桂阳监言唐和等复内寇三月辛酉韩琦罢甲子宜州

讨蛮贼欧希范平之甲申降陝西囚罪一等赐边兵缗钱蠲民去年逋负及租税之半麟
府州尝为羌所掠者其逋负租税如之丙戌罢入粟补
官夏四月丁亥朔日当食不见虑囚及遣使虑三京囚辛卯曩霄初遣人来贺干元节戊
申章得象罢以贾昌朝为昭文馆大学士陈执中同中
书门下平章事集贤殿大学士兼枢密使庚戌以吴育参知政事丁度为枢密副使六月
丁卯减益梓州上供绢岁三之一及红锦鹿胎之半冬
十月乙卯契丹使者来辛卯大赦辛未颁历于夏国庚辰罢宰臣兼枢密使

六年春正月戊申徙广南戍兵善地以避瘴毒二月戊寅诏陝西经畧安抚及转运
司议裁节诸费及所置官属无用者以闻三月辛巳朔
日有食之虑囚五月丙戌虑囚戊子减印州盐井岁课缗钱丙申诏陝西市蕃部马丁酉
京东人刘盩刘沔胡信谋反伏诛秋八月癸酉以吴育
为枢密副使丁度参知政事冬十月辛未诏发兵讨湖南獠十一月己卯遣官议夏国封
界癸未湖南獠寇英韶州辛丑败于东韩村免乘輿所
过及围内田租一岁

七年春正月丁亥诏河北所括马死者限二年偿之壬寅诏减连州民被獠害者来
年夏租三月壬午虑囚癸未诏天下有能言宽恤民力
之事者有司驿置以闻毁后苑龙船丁亥以旱罢大宴癸巳避正殿减常膳诏中外臣僚
上封事乙未贾昌朝罢以陈执中为昭文馆大学士夏
竦同中书门下平章事集贤殿大学士吴育为给事中归班文彦博为枢密副使罢出猎
丁酉以夏竦为枢密使文彦博参知政事高若讷为枢
密副使辛丑祈雨于西太一宫壬寅陈执中宋庠丁度以旱降官一等夏四月丁未谢雨
乙卯复执中庠度官五月己亥命翰林学士杨察蠲放
天下逋负辛丑诏西北二边有大事二府与两制以上杂议之六月乙巳诏禁畜猛兽害
人者辛酉诏天下知县非鞫狱毋得差遣秋七月甲申
降南京畿内囚罪一等徒以下释之赐民夏租之半除灾伤倚阁税及欠折官物非侵盗
者辛丑禁贡余物馈近臣八月乙丑析河北为四路各
置都总管冬十月壬子李迪薨十一月丙申朝享景灵宫丁酉享太庙奉慈庙戊戌祀天
地于圜丘大赦贝州宣毅卒王则据城反十二月庚戌
命枢密直学士明镐体量安抚河北

八年春正月丁丑以文彦博宣抚河北明镐副之闰月辛丑贝州平甲辰曲赦河北
免民田为兵所践者租改贝州为恩州戊申以文彦博
同中书门下平章事集贤殿大学士辛酉亲从官颜秀等四人夜入禁中谋为变捕杀之
丙寅磔王则于都市丁卯知贝州张得一坐降贼伏诛
二月夏国来告曩霄卒己卯赐瀛莫恩冀州缗钱赎还饥民所鬻子三月辛亥遣使体量

安抚陕西壬戌以霖雨虑囚夏四月己巳封曩霄子谅
祚为夏国主壬申丁度罢以明镐参知政事五月辛酉夏竦罢以宋庠为枢密使庞籍参
知政事六月戊辰诏近臣举文武材堪将帅者丙子河
决澶州商胡埽甲午明镐卒丙申章得象薨秋七月戊戌以河北水令州县募饥民为军
九月戊午诏以今年江淮漕米给河北州军冬十一月
壬戌出廩米减价济畿内贫民十二月乙丑以霖雨颁德音改明年元减天下囚罪一等
徒以下释之出内藏钱帛贸粟以济河北流民丁卯册
美人张氏为贵妃戊子遣使体量安抚利州路

皇佑元年春正月甲戌朔日有食之以河北饥罢上元张灯停作乐庚戌张士逊薨
己未以缗钱市谷种分给河北贫民辛酉诏台谏非朝
廷得失民闲利病毋风闻弹奏二月戊辰以河北疫遣使颁药辛未发禁军十指挥赴京
东西路备盗三月丁巳虑囚己未辽遣使来告伐夏庚
申翰林院学士钱明逸报使于辽国夏四月癸未梓州转运司言涪井监夷人平六月甲
子蠲河北复业民租赋二年秋八月壬戌陈执中罢以
文彦博为昭文馆大学士宋庠同中书门下平章事集贤殿大学士庞籍为枢密使高若
讷参知政事梁适为枢密副使九月乙巳广源州蛮侬
智高寇邕州诏江南福建等路发兵以备冬十一月诏振河北被灾民年八十以上及笃
病不能自存者人赐酒米辛丑诏民有冤贫不能诣阙
者听诉于监司以闻十二月遣入内供奉高怀政督捕邕州盗贼

二年春正月癸卯以岁饥罢上元观灯壬子命近臣同三司较天下财赋出入之数
二月甲申出内库绢付河北陕西河东路以备军赏三
月戊子朔诏季秋有事于明堂己丑以大庆殿为明堂诏明堂礼成羣臣毋上尊号庚子
辽遣使以伐夏师还来告遣翰林学士赵槩报使于辽
夏五月丁亥朔作明堂礼神玉己亥旌定州义民李能六月丁卯以自制黄钟五音五曲
并肄于太常庚午定选举县令法癸未虑囚癸亥出内
藏绢余军储九月丁亥阅雅乐己酉朝享景灵宫庚戌享太庙辛亥大享天地于明堂以
太祖太宗真宗配如圜丘大赦百官进秩一等冬十月
乙亥宴京畿父老于锡庆院闰十一月丁卯诏中书门下省两制及太常官详定大乐以
河北水诏蠲民租出内藏钱绢付本路使措置是岁
刍粮十二月甲申定三品以上家庙制涇原路生户都首领那龙阿男丁内附

三年春二月丙戌宰臣文彦博等进皇佑大享明堂记己亥复行河北沿边州军入
中粮草见钱法三月庚申宋庠罢以刘沆参知政事癸
酉侬智高表献驯象及金银却之夏五月庚戌以恩冀州旱诏长吏决系囚壬申置河渠
司丁丑虑囚六月丁亥无为军献芝草帝命姑免知军

茹孝标罪戒州郡自今勿复献秋七月丙辰以孔氏子孙复知仙源县事丙子减郴永州桂阳监丁身米八月丙戌遣使安抚京东淮南两浙荆湖江南饥民冬十月庚子文彦博罢以庞籍同中书门下平章事昭文馆大学士高若讷为枢密使梁适参知政事王尧臣为枢密副使十一月辛亥减漳州泉州兴化军丁米十二月庚辰新作浑仪

四年春正月己巳诏诸路贷民种乙亥塞大名府决河二月庚子蠲湖州民所贷官米三月丙辰蠲江南路所贷种粟辛酉虑囚夏四月广源州蛮侬智高反五月乙巳智高陷邕州遂陷横贵等八州围广州壬申命知桂州陈曙率兵讨之六月乙亥起前卫尉卿余靖为秘书监湖南安抚使知潭州前屯田员外郎直史馆杨旼体量安抚广南提举经制盗贼事庚辰改余靖为安南安抚使知桂州命同提点广东刑狱李枢与陈曙讨智高广东转运钤辖司发兵援之丁亥以狄青为枢密副使秋七月乙巳出内藏钱绢助河北军储丙午命余靖经制广南盗贼事壬戌智高引众去广州广东兵马钤辖张忠知英州苏缄邀战于白田忠死之甲子广东兵马钤辖蒋偕又败于路田八月辛卯命枢密直学士孙沔安抚湖南江西内侍押班石全斌副之九月丁巳命余靖提举广南兵甲经制贼盗事庚申广西兵马钤辖王正伦及智高战于昭州馆门驿死之智高入昭州庚午以狄青为宣徽南院使宣抚荆湖路提举广南经制贼盗事是月智高袭杀蒋偕于太平场冬十月丙子诏发鄜延环庆泾原路择蕃落广锐军赴广南行营丁丑智高入宾州复入邕州十一月壬寅朔日有食之戊午诏免江西湖南广南民供军须者今年租税十之三

五年春正月戊午狄青败智高于邕州智高遁甲子遣使抚问将校赐军士缗钱二月癸未狄青复为枢密副使甲申赦广南凡战没者给槽椽护送还家无主者葬祭之贼所过郡县免田租一年死事家科徭二年贡举人免解至礼部不预奏名者亦以名闻丙戌诏广西都监萧注等追捕智高丁亥减江西湖南囚罪一等徒以下释之丁壮馈运广南者减夏税之半仍免徭差一年夏四月甲午命刘沆梁适监议大乐五月乙巳诏辅臣凡有大政许复对后殿高若讷罢以狄青为枢密使丁未孙沔为枢密副使戊申诏转运使毋取羨余以助三司庚戌诏智高所至州无城垒若兵力不敌而弃城者奏裁壬子虑囚丁巳振邕州贫民米六月乙亥御紫宸殿按太安乐观祭器丙戌作集禧观成乙未诏河北荐饥转运使察州县长吏能招辑劳来者上其状不称职者举劾之秋七月乙巳免荆湖北路民因灾伤所贷常平仓米闰月戊辰诏广南民逃未

还者限一年归业仍复三岁壬申庞籍罢以陈执中同中书门下平章事略文馆大学士梁适同中书门下平章事集贤殿大学士乙亥诏武臣知州军须与僚属参议公事毋专决庚辰秦凤路言总管刘焕等破蕃部八月丁酉诏民诉灾伤而监司不受者听州军状闻冬十月丙申朔日有食之十一月丁卯朝享景灵宫戊辰享太庙奉慈庙己巳祀天地于圜丘大赦戊子放天下逋负十二月戊午诏转运官毋得进羨余

至和元年春正月癸酉贵妃张氏薨辍视朝七日禁京城乐一月丁丑追册为皇后赐谥温成辛卯虑囚减三京辅郡杂犯死罪一等徒以下释之二月壬戌孙沔罢以田况为枢密副使三月己巳王贻永罢以王德用为枢密使乙亥太史言日当食四月朔庚辰下德音改元减死罪一等流以下释之癸未易服避正殿减常膳乙酉劝富人纳粟振京西饥民夏四月庚午朔日有食之五月戊寅以河北流民稍复遣使安抚秋七月丁卯以程戡参知政事立温成园戊辰梁适罢己巳出御史马遵吕景初吴中复八月丙午以刘沆同中书门下平章事集贤殿大学士九月乙亥契丹使来告与夏平辛巳遣三司使王拱辰报使于契丹冬十月丙午温成皇后神主入庙戊午如城北炮场观发炮十一月甲子出太庙禘祫时享及温成皇后乐章肄于太常十二月癸丑诏内侍传宣令都知司札报被旨者覆奏是岁融州大邱洞杨光朝内附

二年春正月丁卯减畿内辅郡囚罪一等徒以下释之戊戌邕州言苏茂州蛮入寇诏广西发兵讨之丁亥晏殊薨二月壬辰汾州团练推官郭固上车战法三月丙子封孔子后为衍圣公是月以旱除畿内民逋刍及去秋逋税罢营缮诸役夏四月己亥辽遣使来贺干元节并求御容五月己未虑囚六月戊戌陈执中罢以文彦博同中书门下平章事昭文馆大学士刘沆监修国史富弼同中书门下平章事集贤殿大学士乙巳依智高母依氏弟智光子继宗继封伏诛秋八月戊子减畿内辅郡囚罪一等徒以下释之乙未置台谏章奏簿九月戊午辽遣使来告其国主宗真殂帝为发哀成服于内东门幕次遣使祭奠吊慰及贺其子洪基嗣位冬十月癸丑下溪州蛮彭仕羲入寇诏湖北路发兵捕之十一月乙卯交址来告李德政卒己未行并边见钱和余法十二月丁亥修六塔河庚子辽遣使来致其先帝遗物及谢吊祭是岁西界河讹等内附诏遣还龙赐州彭师党以其族来归

嘉佑元年春正月甲子大赦蠲被灾田租及倚阁税三月癸酉辽人遣使者来闰月癸未以王尧臣参知政事程戡为枢密副使夏四月壬子朔六塔河复决甲戌虑囚六月辛未免畿内京东西河北被水民田租戊寅遣使安抚

河北己卯诏羣臣实封言时政阙失秋七月乙酉命京
东西湖北监司分行水灾州军振饥蠲租丙戌赐河北流民米压溺死者赐其家钱有差
己丑出内藏银绢振贷河北乙巳贷被水灾民麦种是
月环州小遇族叛知州张揆讨平之八月庚戌朔日有食之癸亥狄青罢以韩琦为枢密
使乙亥减京城囚罪戊寅诏湖北招安彭仕羲九月辛
卯大赦改元十一月辛巳王德用罢贾昌朝为枢密使十二月壬子刘沆罢以曾公亮参
知政事是岁融桂州蛮杨克端等内附

二年春二月己酉夔路三里村夷人寇涪井监庚戌虑囚降死罪以下遣使录三
京辅郡系囚壬戌杜衍薨泮州罗城洞蛮入寇州兵击
走之癸酉王德用卒三月戊寅振河北被灾民乙未辽遣使来求御容戊戌遣张升报使
于辽国癸卯狄青卒是月礼部奏名进士诸科及第出
身八百七十七人亲试举人免黜落始此夏四月丁未遣使安抚河北洞蛮侂宗旦入寇
癸酉遣使安抚湖北五月庚辰管勾麟府军马公事郭
恩为夏人所袭死之六月戊午夏国主谅祚遣人来谢吊祭秋七月辛巳诏河北诸道总
管分遣兵官教阅所部军丁酉诏陕西河北诸路经畧
安抚举文武材堪将领者各一人八月庚申虑囚降死罪以下九月庚子辽人又遣使者
来求御容冬十月乙巳遣胡宿报使于辽国 【东都
事畧作张升奉御容使于契丹】 丙午班禄令

三年春正月戊戌凿永通河三月癸卯辽遣使来告其祖母哀遣使祭奠吊慰癸丑
虑囚降死罪以下夏四月甲子吴育卒五月甲午辽遣
使来致其祖母遗物六月丙午文彦博贾昌朝罢以富弼为昭文馆大学士韩琦同中书
门下平章事集贤殿大学士宋庠田况为枢密使张升
为枢密副使秋七月丙子遣使行视原武县民田振恤被水害者癸巳以夔州旱灾遣使
安抚八月己亥朔日有食之己未王尧臣卒庚申彭仕
羲降九月癸酉议罢榷茶法己丑契丹使来谢冬十月癸亥除河北坊郭客户干食盐钱
十一月癸酉议减冗费己丑置都水监罢三司河渠司
十二月己巳诏三司岁上天下税赋之数三岁一会亏赢以闻闰月丁丑诏裁定制科及
进士高第人恩数庚辰诏明年正旦日食其自丁亥避
正殿减常膳宴辽人使毋作乐壬午虑囚降三京死罪以下

四年春正月丙申朔日有食之二月己巳罢榷茶法庚午广南言交址寇钦州三月
戊戌命近臣同三司减定民闲科率夏四月癸酉封柴
氏后为崇义公给田千顷奉周主祀癸未陈执中薨壬辰虑囚降死罪以下五月壬子遣
官经界河北牧地余募民种艺六月丁丑诏转运司凡
邻州饥而闭糴者以违制论辛卯放宫女二百十四人秋七月丁未放宫女二百三十六

人冬十月壬申朝享景灵宫癸酉大袷于太庙大赦十一
月庚子汝南郡王允让薨

五年春二月壬戌虑囚三月癸巳刘沆薨夏四月癸未程戡罢以孙抃为枢密副使
丙戌命近臣同三司议均税五月己酉以王安石为三
司度支判官丁巳虑囚降死罪六月乙亥遣官分行天下访宽恤民力事秋七月癸巳邕
州言交址与申峒蛮合兵寇边都巡检宋仕尧拒战死
之诏发诸州兵讨捕戊戌翰林学士欧阳修上新唐书八月壬申诏求逸书庚辰置陝西
估马司冬十一月辛卯罢内臣寄迁法辛丑宋庠罢以
曾公亮为枢密使张升孙抃为参知政事欧阳修陈升之赵槩为枢密副使十二月己卯
苏茂州蛮寇邕州

六年春二月丙寅虑囚降死罪以下三月己亥富弼以母丧去位戊申给西京周庙
祭享器服夏四月庚辰陈升之罢以包拯为枢密副使
出谏官唐介赵抃御史范师道吕晦五月庚戌虑囚降死罪以下遣使录三京系囚六月
壬子朔日有食之丙子以司马光知谏院入对戊寅以
王安石知制诰秋七月丙戌遣使行视淮南江浙江灾量蠲其税戊子录昭宪皇太后孝
明孝惠孝章淑德皇后家子孙闰八月庚子以韩琦为
昭文馆大学士曾公亮同中书门下平章事集贤殿大学士张升为枢密使辛丑以胡宿
为枢密副使冬十月壬辰起复前右卫大将军岳州团
练使宗实为秦州防御使知宗正寺辞不受十一月己巳许夏国用汉衣冠十二月丙戌
复丰州

七年春正月辛未复命宗实为秦州防御使知宗正寺乙亥诏南郊以太祖配为定
制改温成皇后庙为祠殿二月己卯朔更江西盐法癸
酉虑囚命官录被水诸州系囚三月乙卯孙抃罢以赵槩参知政事吴奎为枢密副使五
月庚午包拯卒秋八月己卯诏以宗实为皇子癸未赐
名曙庚子以立皇子告天地宗庙诸陵九月乙巳朔以皇子为齐州防御使进封巨鹿郡
公己酉朝享景灵宫庚戌享太庙辛亥大享明堂奉真
宗配大赦冬十月乙亥皇子表辞所除官不允丙申诏内藏库三司出缗钱助余天下常
平仓

八年春二月癸未帝不豫甲申下德音降天下囚罪一等徒以下释之丙戌中书枢
密奏事于福宁殿之西阁三月戊申庞籍薨辛未皇帝
崩于福宁殿年五十四遗制皇子即皇帝位皇后为皇太后谥曰神文圣武明孝皇帝庙
号仁宗陵曰永昭陵

仁宗天圣九年明道二年景佑四年宝元二年康定一年庆历八年皇佑五年至和
二年嘉佑八年凡四十一年

○英宗

英宗皇帝讳曙濮安懿王允让第十三子也生四岁仁宗取入宫养之宝元二年皇子生帝乃归濮邸景佑三年赐名宗实授左监门卫率府累迁右羽林军大将军宜州刺史皇佑二年【东都事畧作元年】为右卫大将军岳州团练使仁宗春秋高皇子不育中外共以为忧大臣文彦博韩琦等屡请建储仁宗曰宗子已有可付者卿等其勿忧时帝方居濮王忧嘉佑六年十月起为秦州防御使知宗正寺帝以未终丧固辞不受七年八月复为岳州团练使旋立为皇子改今名帝力辞不获己乃入见于清居殿帝始就召戒其舍人曰谨守吾舍上有适嗣即归矣自是日再朝或入侍禁中迁齐州防御使巨鹿郡公八年三月辛巳仁宗崩夏四月壬申朔皇后传遗诏命帝即皇帝位于柩前帝御东楹见百官癸酉大赦文武官进爵一等遣王道恭告哀于辽时帝欲亮阴三年以韩琦摄冢宰琦不可乃止乙亥帝不豫遣韩贄等告即位于辽主丙子尊皇后曰皇太后壬午皇太后御小殿垂帘同听政宰臣覆奏事丁亥以子右千牛卫将军仲针为安州观察使光国公庚子立京兆郡君高氏为皇后五月戊午以富弼为枢密使戊辰初御延和殿以疾未平命宰臣祈福于天地宗庙社稷六月辛卯辽遣使来祭吊秋九月辛亥以光国公仲针为忠武军节度使同中书门下平章事淮阳郡王改名頊冬十月甲午葬仁宗皇帝于永昭陵十一月己酉减东西京囚罪一等免山陵役户及灵驾所过民租辛亥辽遣使来贺即位

治平元年春正月丁酉朔改元三月戊午虑囚夏四月癸未放宫女百三十五人五月戊申皇太后还政壬子诏皇太后称圣旨出入仪卫如章献太后故事闰月戊辰辅臣进爵一等六月己亥以淮阳王頊为颍王祁国公顒为保宁军节度使同中书门下平章事东阳郡王鄂国公顒为左卫上将军秋八月甲辰录周世宗后乙卯遣兵部员外郎吕海等充贺辽国太后生辰正旦使刑部郎中章岷等充贺辽国主生辰正旦使丙辰贬内侍都知任守忠为保信军节度副使蕲州安置丁巳以上供米振宿亳二州九月庚午诏夏国精择使人戒励毋紊彝章冬十一月乙亥科陕西户三丁之一刺以义勇军戊寅复内侍养子令十二月丙辰辽遣使来贺寿圣节及明年正旦吴奎罢以王畴为枢密副使是岁西蕃嘉沁子嘉且密整内附

二年春正月甲戌振蔡州饥二月癸卯王畴罢丁未虑囚三月己巳班明天历夏四月戊戌诏议崇奉濮安懿王典礼六月壬辰虑囚己酉诏尚书集三省御史台谏奉濮安懿王典礼甲寅罢尚书省集议令有司博求典故务在

合经遣使与辽人定疆界秋七月癸亥富弼罢丙寅诏
减乘舆服御丙子放宫女一百八十二人庚辰张升罢以文彦博为枢密使八月乙未以
雨水诏责躬乞言壬子以工部郎中蔡抗等充贺辽主
主生辰使侍御史赵鼎等充贺正旦使冬十一月庚午朝享景灵宫辛未享太庙壬申有事于南郊大赦辛巳加恩百官

三年春正月丙辰朔辽遣使来贺正旦戊午复使来贺寿圣节丁丑皇太后下书中
书门下封濮安懿王宜如前代故事王夫人王氏韩氏
任氏皇帝可称亲尊濮安懿王为皇王夫人为后辛巳诏臣民避濮安懿王讳以王子宗
懿为濮国公壬午黜御史吕诲范纯仁吕大防三月辛
酉黜谏官傅尧俞御史赵鼎赵瞻戊辰帝亲虑囚庚午以彗避正殿减膳辛未以黜吕诲
等诏内外癸酉以灾异责躬诏转运使察狱讼调役夫
利病以闻夏四月丙午诏有司察所部左道淫祀及贼杀善良不奉令者罪毋赦六月己
酉虑囚秋七月乙丑进濮王子孙及鲁王孙爵一等八
月庚午遣傅卞等贺辽主生辰张师颜等贺正旦九月壬子朔日有食之冬十月壬午朔
以仙游县君任氏坟域为园十一月戊午帝不豫祷于
大庆殿己未宰相始奏事辛酉降天下囚罪一等流以下释之十二月壬寅立颍王頊为
皇太子癸卯大赦赐文武官子为父后者勋一转辽使
来贺正旦及寿圣节是岁遣使以违约入寇责夏国谅祚献方物谢罪

四年春正月庚戌朔羣臣上尊号曰体干膺历文武圣孝皇帝降天下囚罪一等徒
以下释之辛亥蠲京师逋曲钱丁巳皇帝崩于福宁殿
年三十六谥曰宪文肃武宣孝皇帝加谥体干膺历隆功盛德宪文肃武睿圣宣孝皇帝
庙号英宗陵曰永厚陵

英宗治平四年

钦定续通志卷二十九

●钦定续通志卷三十 宋纪六

宋纪 【六】

神宗

○神宗

神宗皇帝讳頊英宗长子也母曰宣仁圣烈皇后高氏初名仲针授率府副率进右
千牛卫将军嘉佑八年侍英宗入居庆宁宫英宗即位
授安州观察使封安国公帝隆准龙颜好学问每日晏忘食侍讲王陶入侍帝率弟顥拜
之加忠武军节度使同中书门下平章事封淮阳郡王
改今名治平元年进封颍王三年十二月壬寅立为皇太子四年正月丁巳英宗崩帝即
皇帝位戊午大赦及常赦所不原者遣冯行己告哀于

辽己未尊皇太后曰太皇太后皇后曰皇太后以宰相韩琦为山陵使辛酉遣孙坦等告即位于辽以大行皇帝诏赐夏国主及西番嘉勒斯賚
丙寅以吴奎为枢密副使戊辰以韩琦守司空兼侍中曾公亮行门下侍郎兼吏部尚书进封英国公文彦博行尚书左仆射检校司徒兼中书
令富弼为武宁军节度使进封郑国公检校尚书左仆射欧阳修赵槩并加尚书左丞仍参知政事东平王允弼襄阳王允良并加守太保弟东
阳郡王顥进封昌王鄂国公顥进封乐安郡王羣臣进秩有差二月乙酉立向氏为皇后甲辰西蕃首领伊噶伯久凌诱番部三百余帐投夏国
捕斩之三月壬子昭庆军节度检校太傅曹佺加检校太尉兼侍中甲寅陕西宣抚使郭逵讨番部凌蒸等平之壬申欧阳修出知亳州癸酉以
吴奎参知政事乙亥允良薨闰月甲申夏国主谅祚遣使谢罪庚子诏求直言癸卯王安石出知江宁府夏四月丙寅虑囚吴奎出知青州遣使
循行陕西河北京东京西路体量安抚壬申奎复位罢州郡岁贡饮食果药六月己酉辽遣使来吊祭己未振河北流民辛未诏天下官吏有能
知徭役利病可议宽减者以闻秋八月戊午复西夏和市癸酉葬英宗皇帝于永厚陵九月丁丑诏减诸路逃田税额戊子减两京畿内郑孟州
囚罪一等民役山陵者蠲其赋辛卯徙封顥为岐王顥为高密郡王以富弼为尚书左仆射遣孙思恭等报谢于辽且贺生辰及正旦壬辰录周
世宗从曾孙贻廓为三班奉职甲午辽使来贺即位戊戌以王安石为翰林学士辛丑韩琦罢为司徒镇安武胜军节度使判相州吴奎陈升之
罢枢密副使吕公弼为枢密使张方平赵抃并参知政事邵亢为枢密副使壬寅以曾公亮为尚书左仆射文彦博为司空癸卯以权御史中丞
司马光为翰林学士冬十月丁未富弼罢判河阳甲寅制资治通鉴序赐司马光癸酉知青涧城种諤复绥州十一月戊寅诏求直言丙戌诏二
府各举所知乙未诏内外文武官各举有材德行能者十二月辛酉以来岁日食正旦自乙丑避殿减膳罢朝贺己巳辽使来贺正旦

熙宁元年春正月甲戌朔日有食之改元丁丑以旱减天下囚罪一等杖以下释之丁亥命宰臣曾公亮等极言阙失丙申赵槩罢知徐州
以三使司唐介参知政事二月壬戌贷河东饥民粟三月庚辰夏主谅祚卒遣使来告丙戌诏恤刑夏四月乙巳诏翰林学士王安石越次入对

【谨按 御制全韵诗云熙宁即位颇励精一用安石乱机定盖自用安石而纷纷变法腴民以病国则神宗直是不知治道其以为求治太速者犹鸶言矣】五月甲戌募饥民补厢军辛亥诏诸路兴水利丙寅命司马光滕甫裁定国用秋七月以陈升之知枢密院事给濮州雷泽县

尧陵守户壬辰遣御史中丞滕甫知制诰吴充安抚河北甲午减河北路囚罪一等丁酉诏河北安抚使募民入粟八月壬寅诏京东西路存恤河北流民乙卯诏河东及鄜延路募民入粟实边丁卯遣宗益等贺辽主生辰及正旦九月辛未进封太祖曾孙舒国公从式为安定郡王冬十月乙卯出奉宸库珠付河北买马戊辰禁销金服式十一月丙戌朔飨太庙丁亥祀天地于圜丘大赦羣臣进秩有差十二月庚戌赐夏国主秉常诏许纳塞门安远二砦归其绥州庚申以判汝州富弼为集禧观使诏乘驿赴阙甲子辽使来贺正旦

二年春二月己亥以富弼同中书门下平章事庚子以王安石参知政事乙巳以灾变避正殿减膳彻乐甲子陈升之王安石创制三司条例议行新法三月乙酉诏漕运盐铁等官各具财用利害以闻戊子秉常上誓表纳塞门安远二砦乞绥州许之乙未以旱虑囚夏四月戊戌省内外土木工壬寅辽使来贺同天节丁未唐介薨戊申富弼曾公亮以早上表待罪丁巳遣使察诸路农田水利赋役甲子免河北归业流民夏税五月己卯赐河北役兵特支钱癸未翰林学士郑獬出知杭州宣徽北院使王拱辰出判应天府知制诰钱公辅出知江甯府甲午减西京囚罪一等六月丁巳右谏议大夫御史中丞吕诲出知邓州以翰林学士吕公着为御史中丞秋七月乙丑朔日当食不见甲戌东平王允弼薨辛巳立淮浙江湖六路均输法壬午振恤被水州军仍蠲竹木税及酒税八月癸卯贬侍御史刘琦监处州盐酒务御史里行钱顛监衢州盐税乙巳殿中侍御史孙昌龄贬通判蕲州丙午同修起居注范纯仁罢同知谏院戊申夏国请从旧蕃仪许之己酉以范纯仁知河中府辛酉以秘书省著作佐郎程顛王子韶并为太子中允权监察御史里行九月丁卯立常平给敛法戊辰出内库缗钱余河北常平粟丁丑遣孙固等贺辽主生辰及正旦壬辰以秘书省著作佐郎吕惠卿为太子中允崇政殿说书冬十月丙申富弼罢为武甯军节度使判亳州曾公亮陈升之并同中书门下平章事十一月乙丑以韩绛制置三司条例己丑减天下囚罪一等徒以下释之闰月庚子浚御河壬子置交子务是月差官提举诸路常平广惠仓兼管勾农田水利差役事十二月戊子辽使来贺正旦

三年春正月癸丑录唐李氏周柴氏后乙卯诏诸路散青苗钱禁抑配戊午判尚书省张方平出知陈州二月壬申以翰林学士司马光为枢密副使凡九辞诏收还敕诰乙酉韩琦罢河北安抚使为大名府路安抚使三月丙申孙觉吕公着张戢程顛李常上书极言新法不听翰林学士兼知通进银台司范镇罢职守本官夏四月癸亥如金明池观水嬉宴射琼林苑丙

寅辽使来贺同天节丁卯给两浙转运使度僧牒募民
入粟戊辰御史中丞吕公着贬知颍州己卯赵抃出知杭州以韩绛参知政事监察御史
里行程颢罢知京西路同提点刑狱壬午贬右正言李
常通判滑州监察御史里行张戢知公安县王子韶知上元县癸未侍御史知杂事陈襄
罢为同修起居注程颢签书镇宁军节度判官公事前
秀州军事判官李定为太子中允监察御史襄行五月癸巳诏并边州郡毋给青苗钱甲
辰诏罢制置三司条例归中书六月丙戌知谏院胡宗
愈贬通判真州秋七月辛卯欧阳修徙知蔡州壬辰吕公弼罢枢密使以知太原府冯京
为枢密副使置潞州交子务八月丙寅以旱虑囚降死
罪以下振卫州饥仍蠲其租戊寅遣张景宪等贺辽主生辰及正旦己卯夏人犯大顺城
环庆路钤辖李信庆州东路都巡检刘甫监押种咏出
战败绩庆州巡检姚兕败夏人于荔原堡钤辖郭庆都监高敏死之九月乙未韩绛罢为
陝西宣抚使庚子曾公亮罢为司空兼侍中河阳三城
节度使辛丑以冯京参知政事翰林学士吴充为枢密副使司马光罢知永兴军冬十月
辛酉诏延州毋纳夏使丙子知庆州李复圭贬保静军
节度副使戊寅陈升之以母忧去位乙酉诏罢诸场务内侍监当十一月戊子振河北饥
民徙京西者壬辰蠲陝西蕃部贷粮甲辰夏人寇大顺
城都监燕达等击走之乙卯以韩绛兼河东宣抚使十二月己未诏立诸路更戍法乙丑
立保甲法丁卯以韩绛王安石并同中书门下平章事
王珪参知政事庚午夏人寇镇戎军三川砦巡检赵晋伏兵击败之戊寅初行免役法庚
辰命王安石提举编修三司令式壬午辽使来贺正旦

四年春正月己丑种谔袭夏兵于罗乌北大败之壬辰王安石请鬻天下广惠仓田
为三路及京东常平仓本从之乙未渝州夷李光吉叛
巡检李宗闵等战死命夔州路转运使孙构讨平之乙巳停括牧地庚戌罢永兴军买盐
钞场二月丁巳罢诗赋及明经诸科以经义论策试进
士辛酉诏治吏沮青苗法者戊辰诏振河北民乏食者壬申进封高密郡王顒为嘉王三
月丁亥夏人陷抚宁堡戊子庆州广锐卒叛讨平之辛
卯遣使察奉行新法不职者癸卯减河东陝西路囚罪一等徒以下释之民缘军事科役
者蠲其租丙午种谔责授汝州团练使潭州安置丁未
韩绛以本官知邓州辛亥录唐李氏后夏四月丙辰虑囚辛酉辽使来贺同天节癸亥罢
陝西交子法癸酉司马光权判西京留台种谔再贬贺
州别驾壬子遣使振恩冀等州仍蠲其税六月甲子欧阳修以太子少师致仕丙寅虑囚
甲戌富弼坐格青苗法徙判汝州秋七月甲午振两浙
水灾丁酉监察御史里行刘摯罢监衡州盐仓御史中丞杨缵贬知郑州八月癸丑遣使

体量陝西差役新法及民闲利害癸酉遣楚建中等贺
辽主生辰及正旦置洮河安抚司命王韶主之九月辛卯大享明堂以英宗配大赦百官
进秩有差冬十月壬子罢差役法十一月甲申诏蠲逋
租丁亥作中太乙宫壬寅开洪泽河达于淮十二月己未安定郡王从式薨甲子封越国
公世清为会稽郡王丙寅省诸路厢军丙子辽使来贺
正旦

五年春正月己亥置京城逻卒察谤议时政者二月以两浙水赐谷振之仍募民兴
水利壬戌诏罢陝西递运铜锡丙寅以知郑州吕公弼
为宣徽南院使判秦州龙图阁直学士蔡挺为枢密副使三月甲午李日尊卒子干德嗣
遣使吊赠戊戌富弼以司空致仕进封韩国公丙子以
内藏库钱置市易务夏四月乙卯辽使来贺同天节己未括闲田置弓箭手五月行保马
法六月壬子曾公亮以太傅致仕秋七月壬寅初以文
臣兼枢密都承旨闰月庚戌遣中书检正官章惇察访荆湖北路八月秦凤路沿边安抚
王韶复武胜军癸巳遣崔台符等贺辽主生辰及正旦
甲辰王韶破穆蒸于巩令城颁方田均税法冬十月戊戌置熙河路降秦凤囚罪一等十
一月癸丑河州首领辖乐等来降壬申分陝西为永兴
秦凤路仍置六路经畧司十二月壬午以陈升之为枢密使己亥辽使来贺正旦

六年春二月辛卯夏人寇秦州都巡检使刘惟吉败之王韶复河州壬寅以韩绛知
大名府三月丙辰以四月朔日当食自丁巳避殿减膳
降天下囚罪一等流以下释之 【谨按通鉴辑览 御批日食推测可知然自属天变
敬谨修政可也避殿减膳乃至一月得毋沽名太甚
至以阴云不见为德所感而君臣相贺益可鄙矣】 夏四月甲戌朔日食不见丁丑辽使
来贺同天节甲午定齐徐等州保甲秋七月乙巳诏京
西淮南两浙江西荆湖等六路各置铸钱监甲寅虑囚降死罪以下丁巳诏沿边吏杀熟
户以邀赏者戮之八月壬申朔遣贾昌衡等贺辽主生
辰及正旦甲申罢简州岁贡棉紬戊戌复比閭族党之法九月壬寅置两浙和余仓立斂
散法戊申诏兴水利戊午岷州首领穆尔琳沁以其城
降王韶入岷州冬十月辛未章惇平懿洽蛮辛巳以复熙河洮岷迭宕等州御紫宸殿受
羣臣贺甲申朝献景灵宫丙戌振两浙江淮饥壬辰行
折二钱丁酉遣使瘞熙河战骨十一月癸丑中太一宫成减天下囚罪一等流以下释之
乙卯亲祀太一宫十二月戊子诏录开封府囚丙申辽
使来贺正旦

七年春正月辛亥赏复岷洮等州功西京左藏库使桑湜等迁官有差乙卯封子浚
为永国公甲子熊本平泸州夷二月振河阳饥癸未诏

三月岁会天下财用出入之数乙未知河州景思立等与青宜结果庄战于踏白城败绩死之三月壬寅穆蒸果庄寇岷州高遵裕击走之虑囚减死罪一等杖以下释之癸卯以旱避殿减膳丙午遣使分行诸路募武士赴熙河罢两浙增额预置紬绢丙辰辽遣林牙萧禧来言河东疆界命太常少卿刘忱议之己未行方田法甲子遣使报聘于辽乙丑诏以灾异求直言夏四月癸酉以旱罢方田辽使来贺同天节乙亥王韶破西番于结河川己卯以高遵裕为岷州团练使乙酉王韶进筑科城与番兵战连破之穆蒸降丙戌王安石罢知江甯府以韩绛同中书门下平章事监修国史翰林学士吕惠卿参知政事丁酉诏王韶发穆蒸及其家赴阙辽遣枢密副使萧索议疆界于代州境上五月戊戌减熙河路囚罪一等流以下释之辛丑诏河州瘞番部暴骸秋七月癸亥诏河北两路捕蝗又诏开封淮南提点提举司检覆蝗旱振河北西路灾八月丁丑赐环庆安抚司度僧牒以募粟振汉蕃饥民遣张刍等贺辽主生辰及正旦辛卯诏免淮南开封府来年春夫除放邢洺等州秋税九月癸丑置京畿河北京东西路三十七将甲寅诏枢密使议边防冬十月壬申诏韩琦富弼文彦博曾公亮条代北事宜以闻戊寅诏浙西路提举司出米振常润州饥庚辰置三司会计司以韩绛提举辛巳以河北灾伤减州军文武官员癸巳以常平米于淮南西路易饥民所掘蝗种又振河北东路流民十一月己未祀天地于圜丘大赦十二月丙寅省熙河岷三州官百四十员己丑辽使来贺正旦是岁涪井长宁夷十郡及武都夷内附

八年春正月庚子蔡挺罢判南京留司御史台冯京罢知亳州辍江南东路上供米均给灾伤州军戊午诏所在流民愿归业者州县赍送之二月癸酉以王安石同中书门下平章事乙酉初行河北户马法丙戌停京畿土功七年三月丁酉振润州饥戊戌知河州鲜于师中乞置番学教番酋子弟庚子辽萧禧再来遣韩缜往河东会议癸丑以知制诰沈括报聘复振常润饥民夏四月丁卯辽使来贺同天节戊寅以吴充为枢密使闰月乙未陈升之罢为镇江军节度使判扬州广源州刘纪寇邕州归化州侂智会败之壬寅沈括上奉元历癸卯以宣徽北院使张方平判永兴军分秦凤路兵为四将五月辛酉虑囚降死罪一等杖以下释之甲子分环庆兵为四将甲申熙河路蕃官殿直顿埋谋叛诛己丑遣使振鄜延庆饥六月丙午酺汴水入蔡河以通漕己酉颁王安石诗书周礼义于学官辛亥以王安石为尚书左仆射兼门下侍郎戊午太师魏国公韩琦薨秋七月戊子分泾原兵为五将命韩缜如河东割地八月庚寅朔日当食阴云不见癸巳募民捕蝗苗损者偿之仍复其赋丙申遣

谢景温等贺辽主生辰及正旦减官户役钱之半诏发运司体量淮南江东两浙米价实存州县上供米余减直予民庚戌韩绛罢丁巳大阅冬十月庚寅吕惠卿罢知陈州己亥诏以灾异数见不御前殿减常膳求直言壬寅赦天下罢手实法十一月戊寅交址陷钦州壬午立陝西蕃丁法甲申交址陷廉州十二月丙申浚河壬寅以翰林学士元绛参知政事龙图阁直学士曾孝宽签书枢密院事辛亥以天章阁待制赵高为安南道招讨使嘉州防御使李宪副之以讨交址癸丑辽使来贺正旦甲寅熙河木宗域首领结彪谋叛熟羌嘉卜族策巴斩其首来献

九年春正月戊辰交址陷邕州知州苏缄死之己卯下溪州刺史彭师晏及天赐州来降庚辰遣使祭南岳南海告以南伐二月戊子以宣徽南院使郭逵为安南道招讨使罢李宪以赵高副之诏占城占腊合击交址己丑噶尔首领果庄寇五牟谷蕃官琳沁喇勤智等击破之三月恤钦廉邕三州死事家瘞暴骨果庄复入寇钤辖韩存宝败之庚辰以种谔知岷州夏四月辛卯辽使来贺同天节乙未以辽主母丧罢同天节上寿戊戌复广济河漕丙午遣王苑臣等吊慰于辽辛亥茂州夷寇边遣内副甲班王中正经制甲寅辽使以国母丧来告帝发哀承服辍视朝七日五月庚辰静州下首领董整白等来降六月己丑绵州都监王庆崔昭用刘珪左侍禁张义援茂州死之己亥虑囚降死罪一等杖以下释之秋七月丙辰朱崖军黎贼黄婴入寇诏广南西路严兵备之癸亥静州将杨文绪结蕃部谋叛王中正讨斩之八月戊子以文彦博守太保兼侍中行太原尹己丑遣程师孟等贺辽主生辰及正旦罢鬻祠庙钱丁酉禁北边民阑出谷粟九月戊午浚汴河丙寅诏罢都大制置河北河防水利司己卯辽遣使来谢诏恤岭南死事家表将士墓冬十月丙午王安石罢判江甯府以吴充监修国史王珪为集贤殿大学士并同中书门下平章事资政殿学士冯京知枢密院辛亥除沅州归明入户去年倚阁秋税十一月乙卯诏广南东路募入钱助军己卯洮东安抚司言包顺等破果庄兵于多移谷壬午果庄寇岷州知州种谔败之十二月丙戌安南伪观察使刘纪降癸卯郭逵败交址于富良江李干德诣军门降逵遂班师丁未辽使来贺正旦

十年春二月甲申以崇信军节度使宗旦同中书门下平章事己亥以王韶知洪州丙午赦广州囚罪一等徒以下释之以郭逵判潭州赵高知桂州己酉赦广南东路荆湖南路系囚余各降一等徒以下释之三月辛未虑囚降死罪一等杖以下释之壬申诏州县捕蝗夏四月乙酉辽使来贺同天节癸巳文州蕃入寇州兵击走之丁酉赐熙河路兵特支钱赐战死者帛

免夏秋税秋八月壬寅诏潭州置将及增武臣一员遣
苏颂等贺辽主生辰及正旦九月庚戌诏河决害民田所属州县疏浚仍蠲其税老幼疾
病者振之乙卯诏诸传宣内批面论事无法守并从中
书枢密覆奏其祈恩泽规免罪者劾之癸酉立义仓甲戌以宗朴兼侍中封濮阳郡王冬
十月戊害宗濮薨癸巳封昭化军节度使宗谊为濮国
公诏濮王子以次袭封奉祀十一月甲戌祀天地于圜丘大赦十二月壬午诏改明年元
丁亥封子侗为均国公辛丑辽使来贺正旦

元丰元年春正月乙卯以王安石为尚书左仆射舒国公集禧观使闰月辛巳以翰
林侍读学士吕公着兼端明殿大学士壬辰以枢密直
学士孙固同知枢密院事己亥太傅兼侍中曾公亮薨二月庚戌濮国公宗谊薨甲寅以
邕州观察使宗晖为淮康军节度使封濮国公三月辛
巳虑囚降死罪一等杖以下释之乙未御崇政殿阅诸军辰沅獠入寇州兵击走之夏四
月己酉辽使来贺同天节庚申诏除九经外余书不得
出界己丑封虢国公宗谔为豫章郡王戊辰塞漕村决河六月癸卯朔日有食之秋七月
癸酉命西上阅门使忠州团练使韩存宝经制泸州纳
溪夷己亥诏齐州豫备水灾八月癸卯西边将尼尔完谋反伏诛丁未蠲河北被水者租
甲寅遣黄履等贺辽主生辰及正旦戊午以韩绛为建
雄军节度使己巳诏滨棣沧三州被水民以常平粮贷之庚午诏青齐淄三州给流民食
九月乙酉以端明殿学士吕公着枢密直学士薛向并
同枢密院事冬十月辛亥韩存宝破泸夷后城十有三囤十一月癸巳辰州獠叛诏沅州
兵讨之己亥罢文武功臣号十二月辛亥虑囚降死罪
一等杖以下释之丙寅辽使来贺正旦

二年春正月乙亥罢岢岚火山军市马丙子诏立高丽交易法壬午以容州观察使
杨遂为宣远军节度使癸未诏知沅州谢麟督捕獠贼
二月乙卯以泸州夷乞弟犯边诏王光祖等讨之丙辰诏定解盐岁额乙丑振沧州饥三
月丙戌诏雄州两输户南徙者谕令复业庚寅疏汴洛
夏四月辛丑如金明池观水嬉晏射琼林苑甲辰辽使来贺同天节丁巳陈升之致仕己
未陈升之卒五月丙子顺州蛮叛峒兵讨平之庚辰诏
以濮安懿王三夫人并称王夫人祔濮园辛巳太子太师致仕赵槩上所集谏林甲申元
绛罢知亳州戊子御史中丞蔡确参知政事六月甲辰
广西捕斩侬智春执其妻子以献秋七月甲戌张方平以太子少师致仕庚辰以淮康军
节度使宗晖同中书门下平章事八月丙申夏人寇绥
德城都监李浦败之辛丑分泾原路兵为十一将遣李清臣等贺辽主生辰及正旦九月
癸未降顺昌军囚罪一等徒以下释之冬十月戊申交

址归所掠民诏以顺州赐之己酉太皇太后疾帝不视事庚戌罢朝谒景灵宫命辅臣禱于天地宗庙社稷减天下囚死罪一等流以下释之乙

卯太皇太后崩命王珪为山陵使十二月庚申辽使来贺正旦

三年春正月丙子降颍昌府囚罪一等徒以下释之二月丙午以翰林学士章惇参知政事三月乙丑吴充罢戊子降两京河阳囚罪一等

民缘山陵役者蠲其赋夏四月乙未观文殿大学士吴充薨丁酉封宗暉为濮阳郡王己亥辽使来贺同天节戊申乞弟寇戎州兵官王宣等战

没五月甲申复命韩存宝经制泸夷诏改都大提举导洛通汴司为都提举汴河堤岸司六月诏河北河东陝西路各选文武官一员提举义勇

保甲秋七月庚午河决澶州甲戌诏自今遇大礼罢上尊号丙戌以星变避殿减膳诏求直言八月癸丑遣王存等贺辽主生辰及正旦九月乙

亥正官名辛巳大飡明堂大赦癸未以薛向孙固并为枢密副使乙酉以王安石为特进改封荆国公丙戌进封岐王顥为雍王嘉王顥为曹王

加司空文彦博为太尉封曹佺为济阳郡王宗旦为华阴郡王冯京为枢密使薛向罢知颍州丁亥以吕公着为枢密副使闰九月乙卯加文彦

博河东永兴军节度使以富弼为司徒冬十一月己丑朔日当食不食十二月甲辰辽使来贺正旦

四年春正月乙未以步军都虞候林广代韩存宝经制泸夷辛亥冯京罢知河阳以孙固知枢密院龙图阁直学士韩缜同知枢密院事三

月癸卯章惇罢知蔡州甲辰以翰林学士张璪参知政事乙巳命官阅九军营陈法于京城南戊申大阅夏四月癸亥辽使来贺同天节己巳诏

罢南郊合祭天地自今亲祀北郊如南郊仪壬申虑囚山阴县主簿余行之谋反伏诛乙酉河决澶州小吴扫五月丁酉诏河东路提点刑狱刘

定专振被水民秋七月庚寅夏人囚其主秉常诏陝西河东路讨之甲辰韩存宝坐逗遛伏诛八月丙辰诏蠲河北东路灾伤州军今年料役钱

辛酉夏人寇临州堡诏董毡会兵伐之以金州刺史燕达为武康军节度使丁丑熙河经制李宪败夏人于西市新城庚辰又破之于女遮谷九

月李宪复兰州古城戊子兰州新附首领巴令谒等攻夏人于撒捕宗城败之庚戌夏人救米脂砦鄜延经畧副使种諤击破之辛亥又败之于

无定川冬十月丁巳米脂砦降庚申熙河兵及夏人战于女遮谷败之乙丑泾原兵及夏人战于磨陞隘败之己巳入银州庚午环庆行营经畧

使高遵裕复通远军种諤及夏人战于安定堡败之癸酉复韦州乙亥李宪败夏人于屈吴山丁丑曲珍与夏人战于蒲桃山败之戊寅种諤入

贡州辛巳泾原节制王中正入宥州十一月癸未朔日有食之丁亥诸军合攻灵州种諤

败夏人于黑水己丑李宪败夏人于啰逋川辛卯种谔

破石堡城辛丑师还十二月辛未林广破乞弟于纳江戊寅辽使来贺正旦

五年春正月庚子贬高遵裕为郢州团练副使本州岛安置乙巳作新浑仪浮漏辛亥诏再议西讨以熙河经制李宪为泾原熙河兰会安抚

制置使李浩权安抚副使二月癸亥华阴郡王宗旦薨丁卯封武昌军节度观察留后宗惠为江夏郡王癸酉降梓州路囚罪一等民缘军事役

者蠲其赋封董毡为武威郡王三月己亥以日当食避殿减膳降天下死罪一等流以下原之壬寅鄜延路副都总管曲珍败夏人于金汤四月壬

子朔日食不见丁巳辽使来贺同天节癸酉官制成以王珪为尚书左仆射兼门下侍郎蔡确为尚书右仆射兼中书侍郎甲戌大中大夫章惇

为门下侍郎张璪为中书侍郎翰林学士蒲宗孟为尚书左丞翰林学士王安礼为尚书右丞丁丑同知枢密院吕公着罢知定州五月辛巳朔

【宋元通鉴作五月壬午朔日食然四月朔已书日食必无五月连食之理明是误也】

行官制丁亥赏平蛮将士有差癸巳丰州卒张世矩

等作乱伏诛甲辰遣给事中徐禧治鄜延边事六月辛亥环庆经畧司与夏人战破之癸酉豫章郡王宗谔薨戊寅曲珍等败夏人于明堂川秋

七月辛巳知宜州王奇与蛮战败绩庚子以蔡京为起居郎同详定官制八月壬子封均国公侬为延安郡王辛未遣韩忠彦等贺辽主生辰及

正旦贬凤州团练使种谔为文州刺史九月丁亥夏人寇永乐曲珍与战不利裨将寇伟等死之己丑降京畿囚罪一等徒以下释之戊戌夏人

陷永乐给事徐禧内侍李舜举陝西转运判官李稷死之庚子安化蛮寇宜州王奇死之冬十月甲寅贬知延州沈括为均州团练副使随州安

置鄜延路副都总管曲珍降授皇城使癸酉知太原府资政殿大学士吕惠卿知单州十二月壬申辽使来贺正旦

六年春二月丁未夏人攻兰州钤辖王文郁击走之丙辰贬熙河经畧使李宪为经畧安抚都总管以王文郁为西上合门使知兰州副使

李浩为四方馆使三月辛卯夏人寇兰州丙申河东将薛义败夏人于葭芦岭戊戌以检校太尉王拱辰为武安军节度使麟州将郭忠诏等败

夏人于乜离抑部己亥河东将高永冀败夏人于真卿流部夏四月辛亥辽使来贺同天节甲子陇州团练使李浩败夏人于巴义溪五月庚寅

以旱虑囚甲午夏人寇兰州右侍禁韦定死之又寇麟州知州柴虎败之闰六月乙亥夏主秉常请修贡许之戊寅诏陝西河东毋辄出兵秋七

月丙辰以四后祔庙降京畿囚罪一等流以下原之孙固罢知河阳以同知枢密院韩缜知枢密院户部尚书安廉同知枢密院八月乙酉遣蔡

京等贺辽主生辰正旦辛卯蒲宗孟罢以王安礼为尚书左丞吏部尚书李清臣为尚书右丞九月癸卯朔日有食之冬十月癸酉秉常上表请复修职贡乞还旧疆癸巳会稽郡王世清薨十二月丙午祀昊天上帝于圜丘大赦甲辰文彦博以太师致仕乙卯以观文殿大学士韩绛为建雄军节度使

七年春正月丙午封洛州防御使世准为安定郡王癸丑夏人寇兰州李宪等击走之二月甲戌太师文彦博入觐癸未进封濮阳郡王宗暉为嗣濮王封宗晟为高密郡王宗绰建安郡王宗隐安康郡王宗瑗汉东郡王宗愈华原郡王三月辛丑赐文彦博宴于琼林苑庚申御崇政殿大阅夏四月乙亥辽使来贺同天节癸巳夏人寇延州安塞堡将吕真败之五月壬子虑囚降死罪一等杖以下释之六月丙子夏人寇德顺军巡检王友死之辛卯江夏郡王宗惠薨秋七月甲寅王安礼罢八月辛巳遣陈睦等贺辽主生辰及正旦九月乙丑夏人围定西城熙河将秦贵败之冬十月乙亥夏人寇熙河戊子诏分画交址界以六县二峒赐之乙未夏人寇静边砦泾原将彭孙败之十一月丁酉寇静边砦队将李贵死之甲辰夏国主秉常遣使来贡十二月戊辰端明殿学士司马光上资治通鉴辛卯辽使来贺正旦是岁河东饥河北水坏洺州庐舍蠲其税

八年春正月戊戌帝不豫甲辰大赦乙巳命辅臣祷景灵宫乙卯分遣羣臣祷于天地宗庙社稷二月癸巳帝疾甚迁御福宁殿三月甲午朔立延安郡王侂为皇太子赐名煦乙未大赦戊戌皇帝崩于福宁殿年三十八谥曰英文烈武圣孝皇帝加谥体元显道法古立宪帝德王功英文烈武钦仁圣孝皇帝庙号神宗陵曰永裕陵

神宗熙宁十年元丰八年凡十八年

钦定续通志卷三十

●钦定续通志卷三十一 宋纪七

宋纪 【七】

哲宗

○哲宗

哲宗皇帝讳煦神宗第六子也母曰钦圣后朱氏初名侂授检校太尉天平军节度使封均国公迁开府仪同三司彰武军节度使进封延平郡王元丰八年二月神宗寝疾宰相王珪等请立皇太子并请皇太后权同听政神宗许之三月甲午朔皇太后垂帘于福宁殿奉制立帝为皇太子戊戌神宗崩太子即皇帝位己亥大赦及常赦所不原者百官进秩有差遣使告

哀于辽庚子尊皇太后曰太皇太后皇后曰皇太后德妃朱氏曰皇太妃以王珪为山陵使甲寅帝同太皇太后听政己未赐叔雍王顥曹王顒赞拜不名诏边事稍重者枢密使与三省同议以进庚申进封尚书左仆射郇国公王珪为岐国公顥为扬王顒为荆王并加太保弟宁国公佖为遂宁郡王仪国公佖大宁郡王成国公侯咸宁郡王和国公似普宁郡王以高密郡王宗晟汉东郡王宗瑗华原郡王宗愈安康郡王宗隐建安郡王宗绰并为开府仪同三司太师潞国公文彦博为司徒济阳郡王曹佺为太保特进王安石为司空余秩有差夏四月辛未蠲元丰六年以前逋赋甲戌加李干德同中书门下平章事董毡检校太尉诏曰先皇帝临御十有九年建立政事以泽天下而有司奉行失当几于烦扰或苟且文具不能布宣实惠其申谕中外协心奉令以称先帝惠安元元之意丁丑召吕公着侍读谕枢密中书通议事都堂庚辰吕惠卿遣兵入西界破其六砦辛巳遣使以先帝遗留物遗辽及告即位丁亥复蠲旧年逋赋五月丙申诏百官言朝政阙失资政殿学士司马光过阙入见庚戌王珪薨改命蔡确为山陵使戊午以蔡确为尚书左仆射兼门下侍郎韩缜为尚书右仆射兼中书侍郎章惇知枢密院司马光为门下侍郎六月丁亥诏中外臣庶直言朝政阙失民闲疾苦秋七月戊戌以资政殿大学士吕公着为尚书左丞诏府界三路保甲罢团教丙午辽使来吊祭八月己巳镇江军节度使韩绛进开府仪同三司【东都事略于八月有丙子朔日食之文考宋史八月有乙丑己巳癸酉乙亥等日则朔日不当是丙子即辽史是年八月书有丁卯戊辰之日而亦不言日食知王偁误也】癸酉遣使贺辽主生辰及正旦九月己酉遣使报谢于辽冬十月甲子夏国遣使进助山陵马罢义仓己卯诏均宽民力有司废格者监司御史纠劾之乙酉葬神宗皇帝于永裕陵丙戌罢方田夏国主母卒遣使吊祭十一月辛丑减两京河阳囚罪一等杖以下释之民缘山林役者蠲其赋己酉辽使来贺即位十二月壬戌于闐进狮子却之辛未左仆射蔡确右仆射韩缜并迁秩加食邑扬王顥荆王顒并为太傅壬申章惇司马光等进秩有差甲戌罢后苑西作院乙酉辽使来贺正旦元佑元年春正月庚寅朔改元丙午虑囚减死罪以下二月辛酉以大名河决诏安抚使韩绛振之庚午禁边民与夏人为市辛未董毡卒以其子阿尔鲁为河西军节度使邈川首领闰月庚寅蔡确罢以司马光为尚书左仆射门下侍郎诏韩维吕大防孙永范纯仁详定役法壬辰以吕公着为门下侍郎丙午守尚书右丞李清臣为尚书左丞试吏部尚书吕大防为尚书右丞辛亥章惇罢乙卯以吏部尚书范纯仁同知枢

密院事丙辰罢诸州常平管勾官三月乙亥罢熙河兰会路经制财用司己卯复广济河
辇运辛巳诏民闲疾苦当议宽恤者监司具闻以程颐
为崇政殿说书夏四月己丑韩缜罢辛卯以诸路旱伤蠲其租壬辰以旱虑囚癸巳王安
石薨壬寅以吕公着为尚书右仆射兼中书侍郎文彦
博平章军国重事黜内侍李宪等辛亥扬王颢荆王颢并特授太尉五月丁巳以资政殿
大学士韩维为门下侍郎罢诸路重禄复熙宁前旧制
庚申夏人来贺即位壬午诏文彦博班宰相之上六月甲辰吕惠卿落职分司南京苏州
居住秋七月乙丑夏国主秉常卒八月辛卯诏常平依
旧法罢青苗钱壬辰封弟偲为祈国公九月丙辰司马光薨己未朝献景灵宫辛酉大享
明堂以神宗配大赦丁卯试中书舍人苏轼为翰林学
士知制造己卯张璪罢冬十月丙戌改衍圣公为奉圣公十一月戊午以尚书左丞吕大
防为中书侍郎御史中丞刘摯为尚书右丞庚辰蠲盐
井官溪钱

二年春正月乙丑封秉常子干顺为夏国主二月丁亥遣左司谏朱光庭使河北振
民被灾者诏施黔戎泸等州保甲监司免岁阅夏四月
丁亥果庄子节乌苏寇洮东戊子虑囚己丑诏太师文彦博十日一议事都堂辛卯以冬
夏旱曠避殿减膳丁酉四方牒诉上尚书者或冤抑不
得直令御史分察之丁未复制科戊申李清臣罢五月癸丑夏人围南川砦丁卯以刘摯
为尚书左丞兵部尚书王存为尚书右丞六月辛丑以
安焘知枢密院事秋七月辛亥韩绛以司空致仕夏人寇镇戎军诏府界三路教阅保甲
复课利场务亏额科罚丙辰罢诸州数外岁贡戊午辽
使来贺坤成节辛未韩维罢八月辛巳程颐罢经筵权同管勾西京国子监辛丑泾原言
夏人寇三川诸砦官军败之丁未岷州行营将种谊复
洮州九月己未夏人寇镇戎军冬十月辛卯减西京囚罪一等杖以下释之十一月丙子
虑囚十二月黜侍御史王岩叟知齐州

三年春正月庚戌复广惠仓壬申阿尔鲁奉表谢罪甲戌卢囚二月甲申罢修金明
池桥殿乙酉减囚罪一等徒以下释之工役权放一年
流民饥贫量与应副乙巳广东兵马监童政坐擅杀无辜伏诛三月丙辰韩绛薨乙亥夏
人寇德静砦将官张诚等败之夏四月戊寅令诸路郡
邑具役法利害以闻辛巳以吕公着为司空同平章事国事吕大防为尚书左仆射兼门
下侍郎范纯仁为尚书右仆射兼中书侍郎壬午以观
文殿学士孙固为门下侍郎刘摯为中书侍郎王存为尚书左丞御史中丞胡宗愈为尚
书右丞户部侍郎赵瞻签书枢密院事五月癸亥汉东
郡王宗瑗薨六月辛丑夏人寇塞门砦秋七月戊申荆王颢薨八月己卯进封扬王颢为

徐王丁酉渠阳蛮入寇辛丑降囚罪一等杖以下释之

九月庚申禁宗室联姻内臣家十二月丁酉渝州猎人寇小溪闰月癸卯朔颁元佑式甲辰范镇定铸律度量钟磬等以进令礼部太常参定是

岁天下上户部主户二百一十三万四千七百三十三丁二千八百五十三万三千九百三十四客户六百一十五万四千六百五十二丁三百六十二万九千八十三断大辟二千九百一十五人

四年春正月甲申以夏人通好诏边将毋生事二月甲辰吕公着薨三月己卯作浑天仪胡宗愈罢癸巳虑囚夏四月乙巳吕大防等以久

旱求罢不允丁未曹佺薨壬戌弛在京牧地与民五月辛巳贬观文殿学士蔡确为光禄卿丁亥复贬英州别驾安置新州六月甲辰范纯仁王

存罢丙午以赵瞻同知枢密院事户部尚书韩忠彦为尚书左丞翰林学士许将为尚书右丞秋七月丁丑辽使来贺坤成节庚辰安焘以母忧

去位九月己卯朝献景灵宫辛巳大飨明堂大赦百官加恩有差冬十一月癸未以孙固知枢密院事刘摯为门下侍郎吏部尚书傅尧俞为中

书侍郎十二月庚子辽使来贺兴龙节

五年春二月己亥夏人归永乐所掠吏士丁未减天下囚罪杖以下释之庚戌文彦博以太师充护国军山南西道节度等使致仕三月丙

寅赵瞻薨壬申以韩忠彦同知枢密院事翰林学士承旨苏颂为尚书左丞夏四月丙午孙固薨丁巳以旱避殿减膳辛酉以保宁军节度使冯

京为检校司空五月壬申诏差役法有未备者令王岩叟等具利害以闻六月辛丑虑囚七月乙酉夏人来议画界冬十二月辛卯许将罢安康

郡王宗隐薨

六年春二月辛卯以刘摯为尚书右仆射兼中书侍郎龙图阁待制王岩叟签书枢密院事癸巳以苏辙为尚书右丞夏四月夏人寇熙河

兰岷鄜延路五月己未朔日有食之六月壬辰虑囚秋七月己卯振两浙水灾八月辛卯诏御史台臣僚亲亡十年不葬许依条弹奏及令吏部

检察乙卯夏人寇怀远砦闰月壬戌饬陕西河东诸路备边甲申刑部侍郎彭汝砺改礼部侍郎九月丁亥夏人寇麟府二州壬辰诏州民为寇

所掠庐舍焚荡者给钱帛践稼者振之失牛者官贷市之壬子减天下囚罪一等杖以下释之冬十一月乙酉刘摯罢壬辰作元佑观天历尚书

右丞苏辙罢知绛州辛丑傅尧俞薨

七年春正月甲辰以辽贺正旦使耶律迪卒辍朝一日三月己亥虑囚夏四月己未立皇后孟氏五月丙午王岩叟罢知郑州六月辛酉以

吕大防为右光禄大夫苏颂为尚书右仆射兼中书侍郎韩忠彦知枢密院事苏辙为门

下侍郎翰林学士范百禄为中书侍郎翰林学士梁焘
为尚书左丞御史中丞郑雍为尚书右丞户部尚书刘奉世签书枢密院事戊辰浑天仪
象成秋七月庚戌宗室缙麻以上者禁析居八月丙辰
罢监酒税务增剩给赏法已未诏西边诸将严备毋轻出兵乙亥戒边将毋掎克军士前
陷交址将吏苏佐等自拔来归冬十月丁卯夏人寇环
州十一月辛卯朝献景灵宫壬辰飨太庙癸巳祀天地于圜丘大赦百官加恩有差民罹
亲丧者户以差等与免徭辛丑赐徐王顥剑履上殿十
二月辛亥阿尔鲁李干德加食邑实封

八年春正月甲申蔡确卒庚寅诏复范纯仁大中大夫二月壬子诏刑部不得分禁
系人数瘐死数多者申尚书省三月甲申苏颂罢辛卯
范百禄罢夏四月丁未夏人来谢罪愿以兰州易塞门砦不许癸丑诏恤刑五月己丑虑
囚辛卯监察御史董敦逸黄庆基以论苏轼苏辙罢为
湖北福建转运通判六月戊午梁焘罢秋七月丙子以观文殿大学士范纯仁为尚书右
仆射兼中书侍郎八月壬戌遣使按视京东西河南北
淮南水灾癸亥减京师囚罪一等徒以下释之戊辰大赦九月戊寅太皇太后崩庚辰遣
使告哀于辽甲申吕大防为山陵使冬十月戊辰徐王
顥乞解官终丧诏不允庚午复内侍刘瑗等六人十一月丙子始御垂拱殿十二月乙巳
范纯仁乞罢不允甲寅仿唐六典修官制丁巳辽使来
吊祭以章惇为资政殿学士吕惠卿为中大夫

绍圣元年春二月丁未以户部尚书李清臣为中书侍郎兵部尚书邓润甫为尚书
右丞己酉葬宣仁圣烈皇后于永厚陵癸亥减两京河
阳郑州囚罪一等民缘山陵役者蠲其赋三月壬申朔日有食之乙亥吕大防罢戊子以
徐王顥为太师徙封冀王癸巳振京东河北流民贷以
谷麦种仍蠲其租苏辙罢夏四月丙午以旱诏恤刑己酉诏中外决狱壬子苏轼出知英
州癸丑改元甲寅以王安石配飨神宗庙庭蔡确追复
右正议大夫庚申减四京囚罪一等杖以下释之壬戌以资政殿学士章惇为尚书左仆
射兼门下侍郎范纯仁罢丁卯诏诸路复元丰免役法
戊辰修国史蔡卞请重修神宗实录闰月壬申复提举常平官癸酉罢十科举士法丙申
命左仆射章惇提举修神宗国史五月辛亥刘奉世罢
乙丑邓润甫卒丁卯嗣濮王宗暉薨六月壬午封高密郡王宗晟为嗣濮王癸未以翰林
学士承旨曾布同知枢密院事甲申除进士引用王安
石字说之禁秋七月丁巳夺司马光吕公着赠谥王岩叟赠官贬吕大防为秘书监刘摯
为光禄卿苏辙为少府监并分司南京梁焘提举舒州
灵仙观戊午诏大臣朋党司马光以下各轻重议罚布告天下余悉不问议者亦勿复言

九月癸卯遣御史刘拯按河北水灾振饥民庚戌罢广

惠仓丁卯诏京东西河北振恤流民冬十一月己亥复八路差官法

二年春二月乙亥贬吕大防分司南京安州居住辛巳出内府钱帛助河北振饥三月己亥宗晟薨夏四月壬申封华容郡王宗愈为嗣濮

王秋八月壬申封彰信军节度使宗景为济阴郡王开府仪同三司甲申宗愈薨九月甲午以安定郡王宗綽为嗣濮王戊申加上神宗谥曰绍

天法古运德建功英文烈武钦仁圣孝皇帝己酉朝献景灵宫庚戌朝飨太庙辛亥大脩明堂大赦冬十月甲子郑雍罢以吏部尚书许将为尚

书左丞翰林学士蔡卞为尚书右丞辛巳进封冀王颢为楚王十一月乙未安燾罢知河南府丙辰赠蔡确为太师

三年春正月庚子韩忠彦罢知真定府戊午诏罢合祭闲因大礼之岁夏至日躬祭地祇北郊二月癸亥出元丰库缗钱于陕西河东余边

储癸酉罢富弼配飨神宗庙廷癸未诏封濮王子未王者三人宗楚为南阳郡王宗佑为景城郡王宗汉为东阳郡王乙酉宗綽薨丁亥夏人寇

义合砦三月癸巳围塞门砦己亥封宗楚为嗣濮王辛亥封大宁郡王佖为申王遂宁郡王佖端王丙辰虑囚秋七月甲寅令熙河立王韶庙八

月辛酉夏人寇宁顺砦壬戌日上有五色晕见己卯复置检法宫庚辰贬范祖禹为昭州别驾贺州安置刘安世新州别驾英州安置九月壬子

楚王颢薨乙卯废皇后孟氏冬十月壬戌夏人寇鄜延昭金明砦戊辰诏备边诸路相度城砦要害增严守备十一月丁未章惇上神宗实录

四年春正月庚寅以阿尔鲁子辖蒸袭河西军节度使邈川首领甲午泾原路钤辖王文振败夏人于没烟峡庚戌李清臣罢二月己未追

贬吕公着为建武军节度副使司马光为清远军节度副使王岩叟为雷州别驾夺赵瞻傅尧俞赠谥追韩维到任及孙固范百禄胡宗愈遗表

恩丙寅夏人寇绥德城己卯复元丰榷茶法癸未追贬吕大防为舒州团练使刘摯为鼎州团练副使苏辙为化州别驾梁燾为雷州别驾范纯

仁为安武军节度副使安置于循新雷化永五州刘奉世为光禄少卿分司南京黜韩维以下三十人轻重有差甲申降文彦博为太子少保闰

月壬寅以曾布知枢密院事许将为中书侍郎蔡卞为尚书左丞吏部尚书苏履为尚书右丞翰林学士林希同知枢密院事甲辰贬苏轼为琼

州别驾移昌化军安置范祖禹移宾州安置刘安世移高州安置三月壬戌夏人犯麟州神堂堡庚午夏人大至葭芦城知石州张构等击走之

甲戌如金明池辛巳西上合门使折克行破夏人于长波川壬午命官编类司马光等改废法度论奏事状夏四月己亥吕大防卒于虔州庚子

知保安军李沂伐夏破其洪州壬寅环庆钤辖张存入盐州师还夏人追之与战不利丁丑追贬王珪为万安军司户参军五月丁巳文彦博薨辛酉虑四京囚辛未韩缜薨丁丑贬韩维为崇信军节度副使六月癸未朔日有食之戊子宗楚薨乙巳以保宁军观察留后宗汉为开府仪同三司徒封安康郡王八月乙酉封湖州观察使世开为安定郡王丙戌鄜延将王愍复宥州戊戌封宗佑为嗣濮王九月壬子以星变避殿减膳求直言乙卯大赦冬十月戊戌宗景薨十一月癸酉贬刘奉世为隰州团练副使柳州安置丁丑诏放归田里程颐涪州编管十二月癸未刘摯卒

元符元年春正月丁酉宗佑薨戊午封宗汉为嗣濮王壬戌申王佖端王佶并加司空甲戌封咸宁郡王佖为莘王普宁郡王似为简王祈国公偲为永宁郡王夏四月庚辰世开薨丙戌章惇等进神宗帝纪梁焘卒于化州壬辰林希罢五月戊申朔御大庆殿受天授传国受命宝巳酉减囚罪一等徒以下释之六月戊寅朔改元丙戌遣官分诣鄜延泾原河东熙河按验所筑城砦甲午蔡京等上常平免役敕令秋七月庚午范祖禹移化州安置刘安世梅州安置王岩叟朱光庭诸子并勒停不叙九月庚戌秦观除名移雷州编管冬十月己亥夏人寇平夏城十一月壬戌朝献景灵宫癸亥朝飨太庙甲子祀昊天上帝于圜丘大赦是岁西蕃首领李额伊巴卓至吕承信等内附

二年春正月丁卯出内附金帛备陕西边储二月己卯诏许高丽国王遣士宾贡甲申夏人以国母卒遣使告哀且谢罪郟其使不纳戊子鄜延钤辖刘安败夏人于神堆三月丙辰辽遣使来为夏人请缓师丁巳秦凤经略司言吴名革率部族内附己巳以莘王佖为司空夏四月丁亥以旱减四京囚罪一等杖以下释之癸巳封永嘉郡王偲为睦王遣中书舍人郭知章报聘于辽五月癸亥曲赦陕西河东路减囚罪一等流以下释之乙丑进章惇官五等曾布三等许将蔡卞黄履皆二等秋七月乙巳以盛暑决中外系囚丁未放在京工役庚戌振河北水灾甲子知环州种朴获夏国监军额卜博啰丙寅洮西安抚使王瞻复邈川城西蕃首领钦彪阿成以城降八月癸酉章惇等进新修敕令式戊寅减诸路囚罪一等流以下释之乙酉赐熙河路缗钱抚纳部族丙申保宁军节度使吕惠卿特授检校司空九月庚子夏人来谢罪癸卯命御史点检三省枢密院依元丰旧制丁未立贤妃刘氏为皇后己未青唐酋隆赞以城降甲子除右正言邹浩名勒新州羈管己未越王茂薨冬十月甲寅日有食之既十一月壬辰诏河北黄河退滩地听民耕垦免租税三年

三年春正月辛未帝有疾不视朝戊寅大赦天下蠲民租己卯皇帝崩年二十五谥曰钦文睿武昭孝皇帝加谥宪元继道显德定功钦文睿武齐圣昭孝皇帝庙号哲宗陵曰永泰陵

哲宗元佑八年绍圣四年元符三年凡十五年

钦定续通志卷三十一

●钦定续通志卷三十二 宋纪八

宋纪 【八】

徽宗 【一】

○徽宗一

徽宗皇帝讳佶神宗第十一子也母曰钦慈皇后陈氏初授镇宁军节度使封宁国公哲宗即位封遂宁郡王徙平江镇江军节度使进封端王寻加司空改昭德彰信军节度元符三年正月己卯哲宗崩皇太后垂帘哭谓宰臣曰家国不幸大行皇帝无子天下事须早定章惇抗声曰在礼律当立母弟简王皇太后曰老身无子诸王皆神宗庶子申王长有目疾其次端王当立惇曰端王轻佻不可以为天下主知枢密院曾布叱之曰惇未尝与臣等商议如皇太后圣谕极当尚书左丞蔡卞中书门下侍郎许将相继曰合依圣旨皇太后又曰先帝尝言端王有福寿且仁孝于是惇默然乃召端王入即皇帝位于柩前皇太后权同处分军国事庚辰大赦及常赦所不原者百官进秩有差遣宋渊告哀于辽辛巳尊先帝后为元符皇后癸未追尊母贵仪陈氏为皇太妃甲申以章惇为山陵使丙戌以申王佖为太傅进封陈王赐赞拜不名戊子以章惇为特进封申国公己丑进封莘王佖为卫王守太保简王似为蔡王睦王偲为定王并守司徒二月丁未立顺国夫人王氏为皇后庚申以吏部尚书韩忠彦为门下侍郎资政殿大学士黄履为尚书右丞丙寅遣吴安宪朱孝孙以遗留物遗辽国主三月戊辰朔诏宰臣执政侍从官各举可任台谏者庚午遣韩治曹谱告即位于辽甲申以西蕃王隆赞为河西军节度使寻赐姓名曰赵怀德邈川首领辖蒸为怀远军节度使己丑以日当食减四京囚罪一等流以下赦之辛卯诏求直言癸巳以宁远军节度观察留后世雄为崇信军节度使封安定郡王夏四月丁酉朔日有食之己亥令监司分部决狱甲辰以韩忠彦为尚书右仆射兼中书侍郎礼部尚书李清臣为门下侍郎翰林学士蒋之奇同知枢密院事辛亥大赦悉除元符二年己前在官逋负丁巳诏范纯仁等复官宫观苏轼等徙内郡五月丙子复孟氏为元佑皇后乙酉蔡卞罢己丑追复文彦博王珪司马光吕公着吕大防刘摯等三十三人官辛卯还司马光等致仕遗表恩癸巳

以河北河东陕西饥诏帅臣计度振恤六月丙申辽遣使来吊祭秋七月丙寅奉皇太后诏罢同听政癸酉皇太后还政减天下囚罪一等流以下释之癸未遣陆佃李嗣徽报谢于辽罢管勾陕西京川路坑冶及江西广东湖北夔梓成都路管勾措置盐事官辛卯封子亶为韩国公八月辛丑出内库金帛余陕西军储壬寅葬哲宗皇帝于永泰陵丙午遣董敦逸贺辽主生辰吕仲甫贺正旦戊午以蔡王似为太保九月丙寅辽遣使来贺即位丁卯减两京河阳郑州囚罪一等民缘山陵役者蠲其赋辛未章惇罢丙子以陈王佖为太尉己丑复均给职田冬十月丙申蔡京出知永兴军贬章惇为武昌军节度副使丁酉以韩忠彦为尚书左仆射兼门下侍郎壬寅以曾布为尚书右仆射兼中书侍郎己未禁曲学偏见妄意改作以害国事者辛酉罢平准务十一月丁卯减端州囚罪一等徒以下释之庚午诏改明年元戊寅以观文殿学士安燾知枢密院事庚辰黄履罢辛卯以礼部尚书范纯礼为尚书左丞十二月甲午以皇太后不豫祷于宫观祠庙岳渎戊戌出廩粟减价以济民辛丑虑囚戊申减诸路囚罪一等流以下释之戊午辽使来贺正旦是岁出宫女六十九人

建中靖国元年春正月癸酉范纯仁薨甲戌皇太后崩遗诏追尊皇太妃陈氏为皇太后二月乙巳出内库及诸路常平钱备河北边储丁巳贬章惇为雷州司户参军三月乙丑辽使来告其主洪基殂子延禧嗣立遣谢文瓘上官均等往吊祭黄实贺即位丁丑以河西军节度使赵怀德知湟州壬午以日当食避殿减膳降天下囚罪一等流以下释之夏四月辛卯朔日食不见五月庚辰苏颂薨戊子减两京河阳郑州囚罪一等民缘山陵役者蠲其赋六月庚寅以韩国公亶为开府仪同三司封京兆郡王戊申封向宗回为永阳郡王向宗良永嘉郡王甲寅封吴王顥子孝騫为广陵郡王益王顥子孝参为信都郡王戊午范纯礼罢秋七月丙戌安燾罢丁亥以蒋之奇知枢密院事吏部尚书陆佃为尚书右丞端明殿学士章粲同知枢密院事九月己巳诏诸路转运提举司及诸州军讲求遗利及冗员浮费当裁损者详议以闻丙戌子恠卒冬十月乙未李清臣罢十一月庚申以陆佃为尚书左丞吏部尚书温益为尚书右丞壬戌以西蕃伊啰斡为西平军节度使邈川首领戊寅朝献景灵宫己卯飨太庙庚辰祀天地于圜丘大赦改明年元十二月壬辰赐陈王佖诏书不名己酉降西京囚罪一等徒以下释之是岁辽人来献遗留物

崇宁元年春二月丙戌以皇太妃疾虑囚甲午子亶改名烜以蔡确配飨哲宗庙庭

戊戌奉议郎赵谏谋反伏诛庚子封子焕为魏国公三月壬戌以定王偲为太保夏五月庚申韩忠彦罢庚午降复太子太保司马光为正议大夫太保文彦博为太子太保余各以差夺官丙子诏元佑诸臣各已削秩自今无所复问亦勿辄言己卯陆佃罢庚辰以许将为门下侍郎温益为中书侍郎翰林学士承旨蔡京为尚书左丞吏部尚书赵挺之为尚书右丞六月壬辰减西京河阳郑州囚罪一等民缘山陵役者蠲其赋癸丑诏仿唐六典修神宗所定官制闰月辛酉虑囚壬戌曾布罢壬午追贬李清臣为武安军节度副使秋七月戊子以蔡京为尚书右仆射兼中书侍郎己丑焚元佑法庚子章榘罢甲辰以雨水坏民庐舍诏开封府振恤压溺者八月乙卯子烜改名桓煥改名楷辛未置安济坊养民之贫病者仍令诸郡县并置丙子诸司马光等二十一人子弟毋得官京师己卯以赵挺之为尚书左丞翰林学士张商英为尚书右丞九月乙未诏中书籍元符三年臣僚章疏姓名为正上正中下三等邪上邪中邪下三等丁酉治臣僚议复元佑皇后及谋废元符皇后者罪降韩忠彦曾布官追贬李清臣为雷州司户参军黄履为祁州团练副使窜曾肇以下十七人已亥籍元佑及元符末宰相文彦博等侍从苏轼等余官秦观等内臣张士良等武臣王献可等凡百有二十人御书刻石端礼门庚子以元符末上书人锺世美以下四十一人为正等悉加旌擢范柔中以下五百余人为邪等降责有差时世美已卒诏赠官仍官其子一人壬寅贬曾布为武泰军节度使甲辰诏元符三年建中靖国元年责降臣僚已经牵复者其元责告命并缴纳尚书省冬十月癸亥蒋之奇罢戊辰诏责降宫观人不得同一州居住甲戌罢元佑皇后之号丙子罢刘奉世等二十七人祠禄戊寅以资政殿学士蔡卞知枢密院事十一月乙酉邵州言知溪洞徽州杨光衮内附戊申以子楷为开府仪同三司封高密郡王十二月癸丑论弃湟州罪贬韩忠彦为崇信军节度副使曾布为贺州别驾安焘为宁国军节度副使范纯礼分司南京丁丑诏诸邪说流行非先圣贤之书及元佑学术政事并勿施用是岁辰沅州獠入寇出宫女七十六人

二年春正月乙酉窜任伯雨陈瓘龚夬邹浩于岭南马涓等九人分贬诸州知荆南舒亶讨辰沅州獠平之壬辰温益卒乙巳以复荆湖疆土曲赦两路丁未以蔡京为尚书左仆射兼门下侍郎二月辛亥安化蛮入寇广西经略使程节败之壬子遣官相度湖南北獠地取其材植入供在京营造丙子置诸路茶场三月乙酉减西京囚罪一等诏党人子弟毋得擅到阙下癸卯赐礼部奏名进士及第出身其尝上书在正等者

升甲邪等者黜之夏四月丁卯诏毁吕公着司马光吕大防范纯仁刘摯范百禄梁焘王岩叟景灵西京绘像己巳以初谒景灵宫大赦乙亥诏毁刊行唐鉴并三苏秦黄等文集戊寅以赵挺之为中书侍郎张商英为尚书左丞户部尚书吴居厚为尚书右丞兵部尚书安惇同知枢密院事夺王珪赠谥追毁程颐出身文字其所著书令监司觉察五月癸巳以陈王佖为太师丙戌贬曾布为廉州司户参军己亥封子楫为楚国公丙午册元符皇后刘氏为太后六月壬子册王氏为皇后庚申诏元符末上书进士类多诋讪令州郡遣入新学一年能革心自新者许将来应举其不变者当屏之远方壬戌虑囚是月复湟州秋七月辛巳以复湟州进蔡京官三等蔡卞以下二等甲申减熙河兰会路囚罪一等流以下释之庚寅曾肇责授濮州团练副使乙巳诏责降人子弟毋得任在京及府界差遣八月丁未再论弃湟州罪贬韩忠彦为磁州团练副使安焘为祁州团练副使范纯礼为静江军节度副使削蒋之奇秩三等戊申张商英罢辛酉诏张商英入元佑党籍九月辛巳诏宗室不得与元佑奸党子孙为婚姻庚寅封子枢为吴国公诏上书邪等人知县以上资序并与外祠选人不得改官及为县令辛丑令天下监司长吏厅各立元佑奸党碑冬十一月庚辰以元佑学术政事聚徒传授者委监司举察必罚无赦是岁纂府蛮杨晟铜融州杨晟天邵州黄聪内附

三年春正月己卯安化蛮降辛巳诏上书邪等人毋得至京师甲午赐蔡京子攸进士出身甲辰铸九鼎二月丙午以刊定元丰役法不当黜钱遹以下九人丁未置漏泽园己酉诏王珪章惇别为一籍如元佑党壬子以楚国公楫为开府仪同三司封南阳郡王庚申令天下坑冶金银复尽输内藏三月辛巳置文绣院甲午跻钦成皇后神主于钦慈皇后之上夏四月乙巳以火灾降四京囚罪一等流以下原之乙卯复鄯州辛酉徙封楫为安乐郡王复廓州己巳曲赦陕西壬申楫薨五月己卯以复鄯廓进蔡京为守司空封嘉国公庚辰许将赵挺之吴居厚安惇蔡卞各转三官六月壬寅图熙宁元丰功臣于显谟阁癸卯以王安石配飨孔子庙【宋史作癸酉日然下有丙午壬子等日则合是癸卯也】戊午诏复位元佑元符党人及上书邪等者合为一籍通三百九人刻石朝堂余并出籍癸亥虑囚秋七月庚辰诏自今大礼不受尊号羣臣毋上表辛卯行方田法八月甲辰蔡京上神宗史丙午许将罢九月乙亥以赵挺之为门下侍郎吴居厚为中书侍郎翰林学士承旨张康国为尚书左丞刑部尚书邓洵武为尚书右丞冬十月戊午夏人入泾原围平夏城寇镇戎军庚申熙河兰会路经略安抚使王厚言河西军节度使赵

怀德等来降己巳立九庙复翼祖宣祖十一月丙戌封子■〈木巳〉为冀国公甲午朝献景灵宫乙未飨太庙丙申祀昊天上帝于圜丘大赦

十二月戊午赐陈王佖入朝不趋是岁出宫女六十二人广西黎洞杨晟免等内附

四年春正月丙申蔡卞罢丁酉秦凤藩落献邦潘迭三州以内侍童贯为熙河兰湟秦凤路经略安抚制置使二月甲寅以张康国知枢密

院事兵部尚书刘逵同知枢密院事吏部尚书何执中为尚书左丞乙卯班方田法庚申诏西边用兵诏纳羌人者与斩级同赏闰月己丑御端

门受赵怀德降授感德军节度使封安化郡王壬辰曲赦熙河兰湟路三月甲辰以赵挺之为尚书右仆射兼中书侍郎庚戌令吕惠卿致仕戊

午复银州丁卯■〈牛羊〉牝夜郎首领以地降是月夏人攻塞门砦夏四月辛未辽使来为夏人求还侵地及退兵戊寅夏人攻临宗砦辛巳

诏诸路走马承受毋得预军政及边事己丑夏人寇顺懿砦鄜延第二副将刘延庆击破之复攻湟州北蕃市城知州辛叔献等击却之五月戊

申除党人父兄子弟之禁壬子遣林摠报聘于辽辛酉命官分部决狱六月丙子复解池盐丁丑虑囚辛巳罢陕西河东力役甲申曲赦熙河陕

西河东京西路戊子赵挺之罢秋七月置四辅郡以颍昌府为南辅襄邑县为东辅郑州为西辅澶州为北辅甲寅诏夺元佑辅臣坟寺丁巳还

上书流人八月甲申奠九鼎于九成宫乙酉诣宫酌献辛卯赐新乐名大晟置府建官壬辰遣刘正夫使于辽九月己亥大赦乙巳诏元佑人贬

谪者以次徙近地惟不得至畿辅冬十一月戊戌安定郡王世雍薨己未章惇卒

五年春正月甲辰以吴居厚为门下侍郎刘逵为中书侍郎乙巳以星变避殿损膳求直言阙失毁元佑党人碑复谪者仕籍自今言者勿

复弹纠丁未大赦除党人一切之禁权罢方田戊申诏侍从官奏封事己酉罢诸州岁贡供奉物庚戌诏崇宁以来左降者各以存歿稍复其官

尽还诸徙者二月甲子诏监司条奏民闲疾苦丙寅蔡京罢为开府仪同三司中太一宫使以观文殿大学士赵挺之为特进尚书右仆射兼中

书侍郎三月丙申诏星变已消罢求直言辛丑封眉州防御使世福为安定郡王丙辰蔡王似薨夏四月丁丑免两浙水灾州郡夏租五月丁未

班纪元历辛亥封子栩为鲁国公六月壬申虑囚秋七月庚寅朔日当食不亏壬寅诏改明年元冬十月庚辰减开德府囚罪一等徒以下释之

十一月辛卯陈王佖薨十二月戊午朔日当食不亏羣臣称贺己未刘逵罢是岁广西黎洞韦晏闹等内附

大观元年春正月戊子朔大赦甲午以蔡京为尚书左仆射兼门下侍郎庚子甘露降于帝廂内羣臣称贺壬寅吴居厚罢戊申进封卫王

侯为魏王定王偲为邓王壬子以何执中为中书侍郎邓洵武为尚书左丞户部尚书梁子美为尚书右丞乙卯封仲损为南康郡王仲御为汝南郡王二月壬戌以向宗回为开府仪同三司徙封安康郡王甲子以黎洞纳土曲赦广西己卯复行方田三月丁酉赵挺之罢以何执中为门下侍郎邓洵武为中书侍郎梁子美为尚书左丞吏部尚书朱谔为右丞癸丑赵挺之卒夏五月己丑封子棫为扬国公朝散郎吴储承议郎吴侓坐与妖人张怀素谋反伏诛贬吕惠卿为祁州团练副使庚寅邓洵武罢甲午诏班新乐于天下安化蛮犯边遣兵赴广西讨之乙巳子构生六月己未以梁子美为中书侍郎乙亥朱谔卒丁丑虑囚秋七月戊子诏括天下漏丁八月乙卯曾布卒丁巳封子构为蜀国公庚申以户部尚书徐处仁为尚书右丞吏部尚书林摠同知枢密院事己巳减淮海吴楚二十六州囚罪一等流以下释之九月己酉朝献景灵宫庚戌飨太庙辛亥飨明堂大赦冬十月乙丑贬张商英为安化军节度副使闰月丙戌以林摠为尚书左丞资政殿学士郑居中同知枢密院事乙未诏守令以户口为殿最十一月壬子朔日有食之蔡京等以不及所当食分率羣臣称贺戊寅南丹州刺史莫公佺降徐处仁以母忧去位十二月庚寅以蔡京为太尉进何执中以下官二等是岁涪州夷骆世叶骆文贵内附

二年春正月壬子朔受八宝于大庆殿大赦百官进位一等蔡京表贺符瑞己未蔡京进太师加童贯节度使仍宣抚庚申进封魏王侯为燕王邓王偲为越王并为太尉京兆郡王桓为定王高密郡王楷为嘉王并为司空吴国公枢为建安郡王冀国公■〈木巳〉为文安郡王楚国公栩为安康郡王扬国公棫为济阳郡王蜀国公构为广平郡王并为开府仪同三司庚午徙封仲损为齐安郡王仲御为华阳郡王孝騫为晋康郡王孝参为豫章郡王并开府仪同三司封仲增为信安郡王仲忽为普安郡王仲癸为咸安郡王仲仆为同安郡王仲糜为淮安郡王戊寅徙封向宗回为汉东郡王向宗良为开府仪同三司仲损薨河东北盗起二月己亥以安德军节度使钱景臻为开府仪同三司三月庚申班金篆灵宝道场仪范于天下甲子封子材为魏国公乙亥封子模为镇国公夏四月甲辰复洮州五月庚戌朔日有食之辛亥虑囚以复洮州功赐蔡京玉带加童贯检校司空仍宣抚甲寅复诸路岁贡供奉物壬戌齐格王子臧征蒲格降复积石军戊辰诏官蔡京子孙一人进执政官一等秋八月丙申中书侍郎梁子美罢知郢州九月辛亥以林摠为中书侍郎吏部尚书余深为尚书左丞壬戌贬向宗回为太子少保致仕壬申封子植为吴国公癸酉皇后王氏崩削向宗回官爵丙子曲赦熙河兰湟秦凤永兴军路

是岁出宫女七十有七人涪夷任应举杨文贵湖南猺

杨再光内附

三年春正月己未减两京河阳郑州囚罪一等民缘园陵役者蠲其赋二月丙子播州杨文贵纳土以其地置遵义军丁丑韩忠彦致仕三月丙午立海商越界法壬申张康国卒夏四月戊寅林摠罢癸巳以郑居中知枢密院事吏部尚书管师仁同知枢密院事癸卯以余深为中书侍郎兵部尚书薛昂为尚书左丞工部尚书刘正夫为尚书右丞五月丙辰令辟雍宴用雅乐丁巳虑囚六月甲戌诏修乐书管师仁罢丁丑蔡京罢辛巳以何执中为特进尚书左仆射兼门下侍郎秋七月丁未诏谪籍人除元佑奸党及得罪宗庙外者余并录用八月乙酉封子朴为雍国公己丑嗣濮王宗汉薨甲午以仲增为开府仪同三司封嗣濮王己亥韩忠彦薨九月癸丑封子棣为徐国公冬十一月己巳蔡京进封楚国公致仕仍提举哲宗实录朝朔望是岁江淮荆浙福建旱秦凤阶成饥发粟振之仍蠲其租泸州夷王募弱内附

四年春正月辛酉诏士庶拜僧者论以大不恭二月庚午朔禁然顶炼臂刺血断指己丑以余深为门下侍郎资政殿学士张商英为中书侍郎户部尚书侯蒙同知枢密院事三月甲寅敕所在振恤流民癸亥诏罪废人稍加甄叙戊辰诏上书邪下等人今后改官升任并免检举夏四月己卯班乐尺于天下五月壬寅停僧牒三年丙辰以彗见避殿减膳令侍从官直言阙失戊午大赦甲子贬蔡京为太子少保丙寅余深罢六月乙亥以张商英为尚书右仆射兼中书侍郎壬辰复向宗回为开府仪同三司汉东郡王乙未虑囚丙申薛昂罢秋七月辛丑复罢方田戊申封子■（木喌）为冀国公八月乙亥以刘正夫为中书侍郎侯蒙为尚书左丞翰林学士承旨邓洵仁为尚书右丞庚辰以资政殿学士吴居厚为门下侍郎辛酉诏戒朋党以张阁知杭州兼领花石纲九月丙寅朔日有食之冬十月丁酉立贵妃郑氏为皇后郑居中罢戊戌以吴居厚知枢密院事十一月乙丑朔朝献景灵宫丙寅飨太庙丁卯祀昊天上帝于圜丘大赦改明年元是岁出宫女四百八十六人南丹州首领莫公晟内附

政和元年春正月壬申毁京师淫祠一千三十八区戊寅封子拱为定国公三月癸酉以吏部尚书王襄同知枢密院事夏四月丙辰虑囚立守令劝农黜陟法丁巳以淮南旱降囚罪一等徒以下释之五月癸亥诏四川羨余钱物归左藏库六月甲寅复蔡京为太子少师秋七月壬申以疾愈大赦八月乙未复蔡京为太子太师丁巳张商英罢九月戊寅王襄罢丁亥封

子棨为黄国公是月郑允中童贯使于辽以李良嗣来良嗣献取燕之策诏赐姓赵冬十月庚戌封昭化军节度使宗粹为信安郡王辛亥贬张商英为崇信军节度副使十一月丙子封子榛为福国公是岁出宫女八十人

二年春二月戊子蔡京复太师致仕赐第京师三月戊午定国公拱薨夏四月辛卯复行方田甲午宴蔡京等于太清楼乙巳以定国军节度使仲忽为开府仪同三司庚戌以何执中为司空壬子赐张商英自便五月癸亥虑囚丁卯封子椿为庆国公己巳蔡京落致仕三日一至都堂议事六月己丑以资政殿学士余深为门下侍郎秋七月壬申访天下遗书丙子置礼制局九月改官制冬十月乙巳得玉圭于民闲十一月戊寅受元圭于大庆殿大赦辛巳蔡京进封鲁国公以何执中为少傅太宰兼门下侍郎执政皆进秩十二月甲申行给地牧马法乙酉以郑居中为特进丙戌以武信军节度使童贯为太尉辛亥封子樞为卫国公是岁出宫女三百八十三人成都路夷人董舜咨董彦博内附

三年春正月己未以定王桓嘉王楷并为太保庚申以广平郡王构为检校太保甲子诏以天赐元圭遣官册告永裕永泰陵丙寅以燕王俣为太傅癸酉追封王安石为舒王子雱为临川伯配飨文宣王庙丁丑吴居厚罢以观文殿学士郑居中知枢密院事己卯以越王偲为太傅封子榘为韩国公二月辛卯崇恩太后暴崩甲午以辽及女真相持诏河北警边防三月壬子朔日有食之夏四月庚寅以复溱播等州降德音于梓夔路癸巳邓洵仁罢己酉以资政殿学士薛昂为尚书右丞庚戌班五礼新仪闰月庚午庆国公椿薨五月乙酉虑囚壬寅以复溱播州进执政官一等六月戊辰降两京河阳郑州囚罪一等民缘园陵役者蠲其赋秋七月甲申还王珪孙固赠谥追复韩忠彦曾布安焘李清臣黄履等官职八月甲戌以燕乐成进执政官一等丙子以何执中为少师冬十月乙丑阅新乐器于崇政殿出古器以示百官戊辰诏冬祀大礼及朝景灵宫并以道士百人执威仪前导冬十一月辛巳朝献景灵宫壬午飨太庙癸未祀昊天上帝于圜丘大赦乙酉以天神降诏告在位作天真降临示现记十二月癸丑诏天下访求道教仙经是岁出宫女二百七十有九人

四年春正月戊寅朔置道阶凡二十六等夏四月癸丑阅大学辟雍诸生雅乐五月丙戌始祭地于方泽以太祖配降德音于天下子机薨六月戊午虑囚秋七月戊寅焚苑东门所储毒药仍禁勿复贡九月己卯以安静军节度使王宪为开府仪同三司冬十一月丁丑封子挺为相国公十二月己酉以禁中神御殿成减天下囚罪一等是岁出宫女六十八人

五年春正月庚辰泸南晏州夷反梓州路转运使赵遹等讨平之二月乙巳立定王桓为皇太子甲寅大赦庚午以童贯领六路边事三月甲申追论至和嘉佑定策功封韩琦为魏郡王复文彦博官夏四月甲辰作葆真宫五月壬辰虑囚六月癸丑以修三山河桥降德音于河北京东京西路秋七月戊辰朔日有食之甲申以昭庆军节度使蔡卞为开府仪同三司丁亥封子槩为瀛国公八月嗣濮王仲增薨九月己卯封仲御为嗣濮王丙戌封子槱为惠国公冬十月癸卯以嵩山道人王仔昔为冲隐处士是岁出宫女五十人完颜阿古达即皇帝位更名旻国号大金【据金史增辑】

六年春正月戊子以泸南献捷转宰执一官以童贯宣抚陕西河北闰月丁未置道学二月丁亥诏增广天下举舍庚寅诏广京城夏四月乙丑会道士于上清宝箓宫辛未以何执中为太傅致仕朝朔望丙寅郟监司守臣进献庚寅诏蔡京三日一朝正公相位总治三省事五月庚子以郑居中为少保太宰兼门下侍郎刘正夫为特进少辛兼中书侍郎壬寅以保大军节度使邓洵武知枢密院事六月丙寅班中书官制格庚午虑囚秋七月辛亥以河阳三城节度使王荐为开府仪同三司壬子曲赦湖北八月壬戌戒北边帅臣毋生事壬午诏天下监司郡守搜访岩谷之士虽恢诡譎怪自晦者悉以名闻九月辛卯诣玉清和阳宫上太上开天执符御历含真体道昊天玉皇上帝徽号宝册丙申大赦令洞天福地修建宫观塑造圣像以西内成曲赦京西己未以童贯为开府仪同三司冬十一月丁酉朝献景灵宫戊戌飨太庙己亥祀昊天上帝于圜丘大赦庚子以礼部尚书白时中为尚书右丞辛丑魏公材薨戊申以侯蒙为中书侍郎薛昂为尚书左丞己未徙封卫国公榘为郟国公十二月戊寅以熙河进筑功成进执政一官乙酉奠九鼎于圜像徽调阁刘正夫为开府仪同三司致仕戊子以宗粹为开府仪同三司是岁出宫女六百人茂州夷王永寿内附

七年春正月庚子以殿前都指挥使高俅为太尉召道士林灵素于温州筑通真宫以处之【据东都事略增辑】甲子会道士二千余人于上清宝箓宫诏通真先生林灵素谕以帝君降灵事辛未改天宁万寿观为神霄玉清万寿宫乙亥如上清宝箓宫命林灵素讲道经三月庚寅赐高丽祭器乙未以童贯权领枢密院夏四月庚申帝讽道箓院上章册己为教主道君皇帝五月己丑如玉清和阳宫上承天效法厚德光大后土皇地祇徽号宝册辛丑祭地于方泽降德音于诸路癸卯改玉清和阳宫为玉清神霄宫六月戊午朔以明堂成进封蔡京为陈鲁国

公戊辰以嘉王楷为太傅己巳蔡京辞两国不拜诏官其亲属二人秋七月庚子诏八宝增定命宝八月郑居中以母忧去位九月辛卯大飨明堂大赦乙未刘正夫卒丁酉西蕃王子伊玛党蒸来降壬寅进宰执官一等甲辰以薛昂为特进冬十月乙卯朔初御明堂班朔布政戊寅侯蒙罢十一月庚寅命蔡京五日一赴都堂治事辛卯郑居中起复以余深为特进少宰兼中书侍郎白时中为中书侍郎丙申何执中卒十二月丁巳以薛昂为门下侍郎戊辰天神降于坤宁殿庚午以童贯领枢密院命户部侍郎孟揆作万岁山是岁出宫女六十八人

重和元年春正月甲申朔受定命宝于大庆殿戊子封孙谔为崇国公己丑大赦应元符末上书邪中等人依无过人例乙巳封侄有奔为和义郡王庚戌以翰林学士承旨王黼为尚书左丞三月戊辰增诸路酒价庚子遣武义大夫马政由海道使于女真约夹攻辽三月癸巳令嘉王楷赴廷对丙申以茂州蕃族平曲赦四川夏五月壬午朔日有食之乙酉诏诸路选漕臣一员提举本路神霄宫丁亥以林灵素为通真达灵元妙先生张虚白为通元冲妙先生壬辰班御制圣济经以青华帝君八月九日生辰为元成节庚戌敕两浙漕司以权添酒钱尽给御前工作六月己巳以淮西盗平曲赦庚子虑囚甲戌以西边献捷曲赦陕西河东路秋七月壬午以西师有功加蔡京恩官其一子郑居中为少傅余深为少保邓洵武为特进进执政官一等己酉遣使振济东南路水灾八月甲寅以童贯为太保辛酉诏班御注道德经癸酉封子椅为嘉国公九月辛巳大飨明堂壬午诏罢拘白地禁榷货增方田税添酒价取醋息河北加折耗米东南水灾强余等事己丑以岁当戌月当壬为元命降德音于天下庚寅薛昂罢以白时中为门下侍郎王黼为中书侍郎翰林学士承旨冯熙载为尚书左丞刑部尚书范致虚为尚书右丞壬辰禁州郡遏余及边将杀降以幸功赏者癸巳禁羣臣朋党辛丑郑居中罢诏视中大夫林灵素视中奉大夫张虚白并特授本品真官闰月庚申诏江淮荆浙闽广监司督贵州县还集流民丁卯进寺楷为郢王丙子诏周柴氏后巳封崇义公复立恭帝后以为宣义郎世世为国三恪冬十月甲辰置道官二十六等道职八等十一月己酉朔改元大赦

钦定续通志卷三十二

●钦定续通志卷三十三 宋纪九

宋纪 【九】

徽宗 【二】

钦宗

○徽宗二

宣和元年春正月壬子进封建安郡王枢为肃王文安郡王■〈木巳〉为景王并为太保乙卯诏佛改号大觉金僊余为僊人大士僧为德士寺为宫院为观改女冠为女道尼为女德丁巳金遣使来聘【谨按通鉴辑览御批是时宋政虽衰国体未损书法于来聘诸例自当仍从续纲目原文至靖康以后称侄称臣几与石晋事辽无异既自失其一统之尊岂可复拘内外之说则宋在所应贬改书正所以深戒建中立极者慎毋失其统也】遣赵有开报之至登州还戊午以余深为太宰兼门下侍郎王黼为特进少宰兼中书侍郎癸酉封子栋为温国公侄有恭为永宁郡王乙亥躬耕藉田二月庚辰改元戊戌以邓洵武为少保三月庚戌蔡京等进安州所得商六鼎己未以冯熙载为中书侍郎范致虚为尚书左丞翰林学士张邦昌为尚书右丞诏天下知宫观道士与监司郡县官以客礼相见童贯遣知熙州刘法攻统安城夏人击之法败歿夏人进围震武军甲子知登州宗泽坐建神霄宫不虔除名编管夏四月丙子朔日有食之庚寅童贯以鄜延环庆兵大破夏人平其三城己亥曲赦陕西河东路辛丑进辅臣官一等五月丙辰童贯败夏人于震武壬申班御制九星二十八宿朝元冠服图甲戌虑囚六月壬午诏西边武臣为经略使者改用文臣甲申诏封庄周为微妙元通真君列御寇为致虚观妙真君仍行册命配享混元皇帝己亥夏国遣使纳款诏六路罢兵秋七月甲寅以童贯为太傅封泾国公八月戊寅诏诸路未方田处并令方量均定租课丁酉以神霄宫成降德音于天下范致虚以母忧去位九月甲辰燕蔡京于保和新殿辛酉大飨明堂丁卯以淮康军节度使蔡攸为开府仪同三司冬十月甲戌以绍述熙丰政事书布告天下十一月癸丑朝献景灵宫甲寅飨太庙乙卯祀昊上帝于圜丘大赦甲子以东南诸路水灾令监司郡守悉心振救戊辰以张邦昌为尚书左丞翰林学士王安中为尚书右丞十二月甲戌诏京东路盗贼窃发令东西路提刑督捕之丙申编管正字曹辅于郴州

二年春正月癸亥追封蔡确为汝南郡王甲子罢道学二月乙亥遣赵良嗣使于金约攻辽唐恪罢庚辰以宁远军节度使梁子美为开府仪同三司戊子令所在贍给淮南流民谕还之夏六月癸酉诏开封府振济饥民戊寅蔡京致仕仍朝朔望辛巳诏自今有动改元丰法制者以大不恭论丁亥复寺院额秋七月壬子罢文臣起复丙寅封子穗为英国公九月壬寅金遣使者来乙巳复德士为僧辛亥大飨明堂丙辰遣马政使于金癸亥余深加少傅冬十月戊辰朔日有食之以河东节度使梁师成为太尉建德军清溪妖贼方腊反命谭稹讨之十一月己亥余深

罢仍以少傅授镇西军节度使知福州庚戌以王黼为少保太宰兼门下侍郎己未两浙都监蔡遵颜坦击方腊死之十二月丁亥改谭稹为两浙制置使以童贯为江淮荆浙宣抚使讨方腊己丑以少傅郑居中权领枢密院是月方腊陷建德又陷歙州东南将郭师中死之又陷杭州廉访使者赵约死之

三年春正月壬寅邓洵武卒戊午以安康郡王栩为太保进封济王镇国公模为开府仪同三司进封乐安郡王辛酉罢苏杭州应奉局及花石纲运乙丑罢西北兵更戍罢木石彩色等场务是月方腊陷婺州又陷衢州守臣彭汝方死之二月庚午罢方田甲戌诏招抚方腊癸巳大赦是月方腊陷处州淮南盗宋江等犯淮阳军又犯京东江北命知州张叔夜招降之夏四月甲戌清溪令陈光以贼发弃城伏诛庚寅忠州防御使辛兴宗擒方腊于清溪诏两浙江东被贼州县给复三年五月戊戌以郑居中领枢密院丙午金人再遣使来戊申以兴宁军节度使刘宗元为开府仪同三司癸亥安置御史中丞陈过庭于黄州闰月甲戌复应奉司命王黼及内侍梁师成领之戊寅虑囚秋七月丁卯振温处等八州戊子童贯等俘方腊以献八月甲辰曲赦两浙江东福建淮南路乙巳以童贯为太师谭稹加节度使九月丙寅以王黼为少傅郑居中为少师庚午进执政官一等辛未大飨明堂冬十月甲寅诏自今赃吏狱具论决勿贷童贯复领陕西两河宣抚十一月丁丑冯熙载罢以张邦昌为中书侍郎王安中为尚书左丞翰林学士承旨李邦彦为尚书右丞辛巳封子桐为仪国公壬午张商英卒十二月壬子进封广平郡王构为康王乐安郡王模为祁王并为太保

四年春正月丁卯以蔡攸为少保梁师成为开府仪同三司癸酉金破辽中京辽主北走二月丙午以吴国公植为开府仪同三司进封信都郡王三月丙子辽立燕王淳为帝金人来约夹攻命童贯为河北河东路宣抚使屯兵于边以应之且招谕幽燕夏五月壬戌以高俅为开府仪同三司丁卯封子柄为昌国公甲戌嗣濮王仲御薨乙亥以蔡攸为河北河东宣抚副使庚辰以常德军节度使谭稹为太尉童贯至雄州癸未辽人击败前军统制杨可世于兰沟甸乙酉封开府仪同三司江夏郡王仲爰为嗣濮王丙戌虑囚杨可世与辽战于白沟败绩丁亥辛兴宗败于范村六月己丑种师道退保雄州辽人追击之至城下帝闻兵败惧诏班师壬寅以王黼为少师是月辽燕王淳死萧干等立其妻萧氏秋七月壬午王黼以耶律淳死复命童贯蔡攸治兵以河阳三城节度使刘延庆为都统制甲申贬种师道为右卫将军致仕九月戊午朝散郎宋

昭上书谏北伐除名勒广南编管己未金使来议师期甲戌遣赵良嗣报聘于金己卯辽将郭药师等以涿易二州来降冬十月庚寅改燕京为燕山府涿易八州并赐名癸巳刘延庆与郭药师等统兵出雄州戊戌曲赦所复州县己亥耶律淳妻萧氏上表称臣纳款甲辰师次涿州己酉郭药师与高世宣杨可世等袭燕萧干援之药师等屡败癸丑以蔡攸为少傅判燕山府甲寅刘延庆自卢沟河烧营遁众军大溃十一月丙辰朔行新玺戊辰朝献景灵宫己巳飨太庙庚午祀昊上帝于圜丘大赦东南官吏缘寇盗贬责者次第移放上书邪上等人特与磨勘戊寅金人遣使来许山前六州以彰德军节度使郑详为太尉十二月丁亥郭药师败萧干于永清县戊子遣赵良嗣报聘千金庚寅以郭药师为武泰军节度使辛卯金人入燕萧氏出奔壬辰使来告捷丙申贬刘延庆为率府率安置筠州壬寅进封植为莘王是月万岁山成更名曰艮岳

五年春正月戊午金使来议所许六州代租钱己未遣赵良嗣报聘求西京等州辛酉以王安中为庆远军节度使河北河东燕山府路宣抚使知燕山府甲申录富弼后二月乙酉以李邦彦为尚书左丞翰林学士赵野为尚书右丞丁酉进封雍国公朴为华原郡王徐国公棣为高平郡王并开府仪同三司三月乙卯金再遣使者来己未遣卢益报聘夏四月癸巳金人遣使以誓书及燕京涿易檀顺景蓟州来归庚子童贯蔡攸入燕乙巳童贯奏抚定燕城庚戌曲赦河北河东燕云路是日班师五月己未以收复燕云赐王黼玉带庚申以王黼为太傅郑居中为太保进宰执官二等辛酉以王黼总治三省事癸亥童贯落节钺进封徐豫国公以蔡攸为少师癸酉祭地于方泽是月金人许归朔武蔚三州金主旻殂弟乌奇迈立六月乙酉郭药师加检校少傅丙戌辽将张觉以平州来附己丑仲爰薨丁酉以安国军节度使仲理为开府仪同三司进封嗣濮王己亥虑囚戊申郑居中卒辛亥以蔡攸领枢密院秋七月戊午以梁师成为少保己未童贯致仕起复谭稹为河北河东燕山府路宣抚使庚午太傅楚国公王黼等上尊号曰继天兴道敷文成武睿明皇帝不允禁元佑学术八月辛巳朔日当食不见辛丑命王安中作复燕云碑是月萧干寇燕山郭药师败之干寻为其下所杀传首京师九月辛酉大飨明堂冬十一月乙卯以郑绅为太师丁卯王安中谭稹并加检校少傅郭药师为太尉华原郡王朴薨是月金人取平州张觉走燕山王安中杀之函其首送于金十二月乙巳金人遣使告哀复遣使来贺正旦戊申以高平郡王棣为太保进封徐王是岁秦凤旱河北京东淮南饥遣官振济

六年春正月乙卯为金主辍朝戊寅遣连南夫如金吊祭二月丁亥以冀国公■〈

木喙〉为开府仪同三司进封河闲郡王韶州防御使
令荡为婺州观察使封安定郡王李邦彦以父忧去位三月己酉以钱景臻为少师金人
来索赵良嗣所许粮不与夏四月丁巳李邦彦起复五
月壬寅虑囚癸卯金人遣使来告嗣位六月壬子诏以收复燕云京东两河之民困于调
度令京西淮浙江湖四川闽广并纳免夫钱秋七月戊
子遣许亢宗使于金贺嗣位八月乙卯谭稹罢复以童贯领枢密院事壬戌以复燕云大
赦九月乙亥以白时中为特进太宰兼门下侍郎李邦
彦为少宰兼中书侍郎丁亥以赵野为尚书左丞翰林学士承旨宇文粹中为尚书右丞
开封尹蔡懋同知枢密院庚寅以金芝产于艮岳万寿
峰改名寿岳庚子金人遣使致其先主遗留物冬十月庚午诏有收藏苏轼黄庭坚之文
者并焚毁犯者以大不恭论十一月丙子王黼致仕乙
酉罢应奉司十二月甲辰以蔡京领讲议司诏百官遵行元丰法制癸亥蔡京落致仕领
三省事是岁河北山东盗起命内侍梁方平讨之

七年春正月癸酉朔诏赦两河京西流民为盗者仍给复一年是月金灭辽二月庚
戌诏京师运米五十万斛振燕山令工部侍郎孟揆亲
措置己巳进封广国公栻为南康郡王福国公榛为平阳郡王并开府仪同三司壬申京
东转运副使李孝昌招安羣盗张万仙等三月甲申知
海州钱伯言奏招降山东寇贾进等丙戌以惠国公栻为开府仪同三司进封建安郡王
夏四月丙辰降德音于京东河北路庚申蔡京复致仕
复州县免行钱戊辰诏行元丰官制五月壬午封子枏为润国公六月丙午封童贯为广
阳郡王戊申诏臣僚辄与内侍来往者论罪辛亥虑囚
己未以蔡攸为太保乙丑罢减六尚岁贡物秋七月庚午诏士庶毋以天王君圣为名字
乃以壬戌日辅臣焚香甲戌以河闲郡王■〈木喙〉
为太保进封沂王是月河东义胜军叛九月壬辰金人以擒辽主遣使来告是月河东言
金将纳罕至云中诏童贯复往宣抚冬十月戊午罢京
畿和余十一月乙亥遣使如金贺得辽主甲申朝献景灵宫乙酉飡太庙丙戌祀昊天上
帝于圜丘大赦庚寅以保静军节度使种师道为河东
河北路制置使十二月乙巳童贯自太原遁归京师己酉金将沃哩布纳罕分两道来侵
郭药师以燕山叛金人陷北边诸郡又陷忻代等州围
太原府太常少卿傅察奉使不屈死之丙辰罢浙江诸路花石纲延福宫西城租课及内
外制造局金兵犯中山府戊午以皇太子桓为开封牧
己未下诏罪己令中外直言极谏郡邑率师勤王募草泽异才有能出奇计及使疆外者
罢道官及大晟府行幸局暨诸局务以保和殿大学士
宇文虚中为河北东路宣谕使庚申以吴敏为门下侍郎诏内禅皇太子皇太子即皇帝

位尊帝为教主道君太上皇帝皇后为太上皇后退居
龙德宫靖康元年正月己巳如亳州遂如镇江府四月己亥还京师明年二月丁卯金人
胁帝北行绍兴五年四月甲子崩于五国城年五十四
江南遥上尊谥曰圣文仁德显孝皇帝加谥体神合道骏烈逊功圣文仁德宪慈显孝皇
帝庙号徽宗权攒于永佑陵

徽宗建中靖国二年崇宁五年大观四年政和七年重和一年宣和七年凡二十六年

○钦宗

钦宗皇帝谭桓徽宗长子也母曰恭显皇后王氏初名亶封韩国公进京兆郡王寻
更名烜旋又改今名进封定王政和三年加太保五年
二月乙巳立为皇太子宣和七年十二月戊午除开封牧庚申徽宗下诏禅位于太子趣
太子入禁中被以御服泣涕固辞因得疾又固辞不许
辛酉即皇帝位以少宰李邦彦为龙德宫使太保领枢密院事蔡攸门下侍郎吴敏副之
是时金人已分道入境壬戌大赦进百官秩一等赏诸
军立妃朱氏为皇后以太子詹事耿南仲签书枢密院事遣给事中李邺使于金告以内
禅且请修好诏非三省枢密院所得旨有司勿行甲子
沃哩布陷信德府纳罕围太原诏京东淮西两浙募兵入卫太学生陈东等上书数蔡京
童贯王黼梁师成李彦朱勔罪谓之六贼请诛之诏改
明年元

靖康元年春正月丁卯朔帝御垂拱殿受羣臣朝贺退诣龙德宫贺道君皇帝诏中
外臣庶实封言得失金人破相州戊辰破浚州威武军
节度使梁方平师溃河北河东路制置副使何灌退保滑州己巳灌师亦溃金人济河破
滑州帝下诏亲征以侍郎李纲为亲征行营使吴敏副
之以蔡攸为太上皇帝行宫使尚书左丞宇文粹中副之奉上皇东行以避敌诏自今除
授黜陟及恩数等事并参酌祖宗旧制罢内外官司局
所一百五处以门下侍郎吴敏知枢密院事吏部尚书李昉同知枢密院事贬太傅致仕
王黼为崇信军节度副使安置永州寻杀之赐安德军
承宣使李彦死并籍其家放盗远军节度使朱勔归田里庚午道君皇帝如亳州宰相欲
奉帝出襄邓李纲谏止之以纲为尚书右丞东京留守
辛未以李纲为亲征行营使侍卫亲军马军都指挥使曹曠副之太宰兼门下侍郎白时
中罢李邦彦为太宰兼门下侍郎守中书侍郎张邦昌
为少宰兼中书侍郎尚书左丞赵野为门下侍郎翰林学士承旨王孝迪为中书侍郎同
知枢密院事蔡懋为尚书左丞壬申金人济汴遣使督
诸道兵入援癸酉诏两省枢密院官制一遵元丰故事金人逼京师命尚书驾部员外郎

郑望之康州防御使高世则使其军诏从官举文武臣僚堪充将师有胆勇者是夜金人攻宣泽门李纲御之至旦始退甲戌金人遣吴孝民来议和命李梈使金军遂与金使萧三宝努耶律忠张愿恭偕来以吏部尚书唐恪同知枢密院事乙亥金人攻通津景阳等门武泰节度使何灌拒战死之丙子避正殿减常膳括借都城金银及倡优家财庚辰以张邦昌为计议使副康王构往金军为质以求成诏称金国加大字辛巳道君皇帝幸镇江以兵部尚书路允迪签书枢密院事金人陷阳武知县事蒋兴祖死之壬午封子谌为大宁郡王甲申都统制马忠以京西募兵至击金人于顺天门外败之乙酉路允迪使纳罕军于河东平阳府将刘嗣初以城叛丁亥靖难军节度使河北河东路制置使种师道督泾原秦凤兵入援以师道同知枢密院事为京畿河北河东宣抚使统四方勤王兵及前后军乙未贬少保淮南节度使梁师成为彰化军节度副使旋赐死二月丁酉朔都总制姚平仲夜袭金师不克而遁戊戌罢李纲以谢金人废亲征行营司金人复来议和庚子命驸马都尉曹晟使金军辛丑又命资政殿大学士宇文虚中知东上合门事王侁副之许割三镇地太学诸生陈东等及都民数万人伏阙上书请复用李纲及种师道乃复纲右丞充京城防御使壬寅除元佑党籍学术之禁禁伏阙上书废苑囿宫观可以与民者金人使王訥来癸卯以肃王枢为质于金以观文殿学士大名尹徐处仁为中书侍郎宇文虚中签书枢密院事蔡懋罢乙巳宇文虚中王侁复使金军康王及张邦昌至自金军金人遣韩光裔来告辞遂退师京师解严丙午以康王构为太傅静江奉宁军节度使戊申大赦诏自今庶事并遵用祖宗旧制凡蠹国害民之事一切寝罢己酉罢宰执兼神霄玉清万寿宫使诏用祖宗故事择武臣得军心者为同知签书枢密院边将有威望者为三衙庚戌李邦彦罢以张邦昌为太宰兼门下侍郎吴敏为少宰兼中书侍郎李纲知枢密院事耿南仲为尚书左丞李梈为尚书右丞辛亥宇文粹中罢知江宁府癸丑种师道罢为中太一宫使甲寅贬蔡京为秘书监分司南京童贯为左卫上将军池州居住蔡攸为太中大夫提举亳州明道宫纳罕攻太原不克分兵趣京师权威胜军李植以城降乙卯陷隆德府知府张确通判赵伯臻司录张彦通死之辛酉梁方平坐弃河津伏诛王孝迪罢以给事中王云侍卫亲军马军都指挥使曹晟使于金以镇洮军节度使中太一宫使种师道为河南河东路宣谕使保静军节度使前副都指挥使姚古为制置使丙寅下哀痛诏于陕西河东是月金人攻泽州之高平知州高世由往犒之乃去三月丁卯朔遣徽猷阁待制宋焕奉表道君皇帝行宫诏

侍从言事诏非三省枢密院所奉旨诸司不许奉行戊辰李昫罢为鸿庆宫使己巳张邦昌罢为中太一宫使徐处仁为太宰兼门下侍郎唐恪为中书侍郎翰林学士何■〈〈鹵，欠代义〉上木下〉为尚书右丞御史中丞许翰同知枢密院事庚午宇文虚中罢知青州癸酉以赵野为道君皇帝行宫奉迎使己卯以燕王侯越王偲为太师壬午诏金人叛盟深入其元主和议之李邦彦奉使许地之李昫李邕郑望之悉行罢黜诏太原中山河闲三镇保塞陵寝所在誓当固守于是以种师道为河北河东宣抚使姚古为河北制置使种师中副之癸未遣李纲迎道君皇帝于南京以徐处仁为礼仪使丙戌以知中山府詹度知太原府张孝绳知河闲府陈遘并为资政殿学士知泽州高世由直龙图阁庚寅以肃王枢为太傅姚古复隆德府辛卯复威胜军壬辰以太保景王■〈木巳〉济王栩为太傅甲午康王构为集庆建雄军节度使尚书户部侍郎钱盖为陕西制置使命陈东初品官赐同进士出身辞不拜籍朱勔家丙申贬蔡京为崇信军节度副使是春夏人取天德云内武州及河东八馆夏四月戊戌夏人陷镇威城摄知城事朱昭死之己亥迎太上皇帝入京壬寅朝于龙德宫癸卯立子谌为皇太子耿南仲为门下侍郎戊申置详议司于尚书省讨论祖宗法庚戌赵野罢壬子金使贾霆冉企弓来癸丑封太师沂国公郑绅为乐平郡王贬童贯为昭化军节度副使安置郴州减宰执俸三之一及支赐之半令吏部稽考庶官凡由杨戩李彦之公田王黼朱勔之应奉童贯西北之师孟昌龄河防之役夔蜀湖南之开疆关陕河东之改币及近习所引献颂特试之流所得爵赏悉夺之甲寅种师道加太尉同知枢密院事河北河东路宣抚使乙卯诏自今假日特坐百司毋得休务以平凉军节度使范讷为右金吾卫上将军丙辰诏有告奸人妄言金人复至以恐动居民者赏之戊午进封南康郡王栻为和王平阳郡王榛为信王壬戌诏亲擢台谏官宰执勿得荐举着为令追政和以来道官处士先生封赠奏补等敕书甲子东兵正将占沆与金人战于交成县死之乙丑诏三衙并诸路帅司各举谙练边事智勇过人并豪俊奇杰众所推服堪充统制将领者各五名贬蔡攸节度副使安置朱勔于循州五月丁卯诏天下有能以财谷佐军者有司以名闻以少傅镇西军节度余深为特进观文殿大学士戊辰罢王安石配享孔子庙庭庚午少傅安武军节度使钱景臻镇安军节度使开府仪同三司刘宗元并为左金吾卫上将军保信军节度使刘敷武成军节度使刘敏向德军节度使张焜岳阳军节度使王舜臣应道军节度使朱孝孙泸川军节度使钱忱并为右金吾卫上将军监察御史余应求坐

言事迎合大臣罢知卫州甲戌曲赦河北路乙亥申销
金禁丁丑诏以俭约先天下授监司郡县奉行所未及者凡十有六事姚古至威胜师溃
河东大震种师中与金人战于榆次死之己卯借外任
官职田一年开府仪同三司高俅卒辛巳损太官日进膳追削高俅官甲申罢详议司己
丑以河东经略安抚使张孝纯为检校少保武当军节
度使壬辰诏天下举习武艺兵书者乙未诏姚古援太原六月丙申朔诏谏官极论阙失
戊戌令中外举文武官才堪将帅者以李纲代种师道
为宣抚使往援太原辛丑以资政殿学士刘韜为宣抚副使陕西制置司都统制解潜为
制置副使壬寅封郟国公榷为安康郡王韩国公榷为
广平郡王并开府仪同三司癸卯以侍卫亲军马军副都指挥使镇西军承宣使王禀为
建武军节度使甲辰路允迪罢为醴泉观使乙巳左司
谏陈公辅以言事责监合州酒务癸丑虑囚辛酉承授内侍官熙河都统制焦安节坐不
法李纲斩之壬戌姚古坐拥兵逗遛贬为节度副使安
置广州秋七月乙丑除元符上书邪等之禁乙亥安置蔡京于儋州攸雷州童贯吉阳军
己卯免借河北河东陕西路职田乙酉诏蔡京子孙己
分窜远地遇赦不许量移是日京死于潭州丁亥令侍从官议改修宣仁圣烈皇后谤史
辛卯遣监察御史张澄诛童贯广西转运副使李升之
诛赵良嗣并窜其子孙于海南是月解潜与金人战于南关败绩刘韜自辽州引兵与金
人战败绩八月丙申复命种师道以宣抚使巡边召李
纲还庚子以星变避殿减膳令从臣具民闲疾苦以闻河东察访使张灏与金人战于文
水败绩辛丑诏求民之疾苦者十七事悉除之丁未沃
哩布复攻广信军保州不克遂攻真定戊申都统制张思正等夜袭金人于文水败之己
酉复战师溃思正奔汾州都统制折可求师溃于子夏
山金人乘胜攻太原复分道进军乙卯遣徽猷阁待制王云合门宣赞舍人马识远使于
金秘书著作佐郎刘岑太常博士李若水分使其军议
和戊午许翰罢知亳州己未太宰徐处仁罢知东平少宰吴敏罢知扬州以唐恪为少宰
兼中书侍郎何■〈〈鹵，欠代义〉上木下〉为中
书侍郎礼部尚书陈过庭为尚书右丞开封尹聂昌同知枢密院事御史中丞李回签书
枢密院事庚申遣王云使金军许以三镇赋税是月福
州军乱杀其知州事柳庭俊九月丙寅金人陷太原执安抚使张孝纯副都总管王禀通
判方笈等死之辛未贬吴敏为崇信军节度副使安置
涪州移蔡攸于万安军寻与弟修及朱勔皆赐死丁丑以礼部尚书王寓为尚书左丞戊
寅李纲罢知扬州壬午梟童贯首于都市丙戌建三京
及邓州为都总管府分总四道兵庚寅以知大名府赵野为北道都总管知河南府王襄

为西道都总管知邓州张叔夜为南道都总管知应天府胡直孺为东道都总管又罢李纲提举洞霄宫辛卯遣给事中黄鶚由海道使金议和是月夏人陷西安州冬十月癸巳贬李纲为保静军节度副使安置建昌军丁酉金人陷真定都钤辖刘靖死之戊戌金人使杨天吉王汭来庚子金人陷汾州知州张克戩兵马都监贾亶死之又攻平定军辛丑下哀痛诏命河北河东都路帅臣传檄所部得便宜行事甲辰诏用蔡京王黼童贯所荐人丙午集从官于尚书省议割三镇召种师道还丁未以礼部尚书冯澲知枢密院事己酉阅炮飞山营庚戌以范讷为盩厔军节度使河北河东路宣抚使辽故将小■〈革胡〉■〈革录〉陷麟州建盩厔知盩厔杨震死之壬子诏太常礼官集议金主尊号命尚书左丞王寓副康王使沃哩布军寓辞丙辰金人陷平阳府又陷威胜隆德泽州戊午贬王■〈宀禹〉为单州团练副使以冯澲代行庚申侍御史胡舜陟请援中山不省辛酉种师道薨十一月丙寅夏人陷怀德军知军事刘铨通判杜翊世死之籍谭稹家戊辰康王未至金军而还冯澲罢己巳集百官议三镇弃守癸酉右谏议大夫范宗尹以首议弃地罢金人至河外宣抚副使折彦质拒之甲戌师溃金人济河知河阳燕瑛西京留守王襄弃城遁乙亥命刑部尚书王云副康王使沃哩布军许割三镇奉袞冕车辂尊其主为皇叔且上尊号丙子金人渡河提刑许高兵溃于洛口金人来言欲尽得河北地京师戒严遣资政殿学士冯澲及李若水使纳罕军丁丑何■〈宀禹〉上木下〉罢以尚书左丞陈过庭为尚书侍郎兵部尚书孙傅为尚书右丞命成忠郎郭京领选六甲兵命签书枢密院事李回以万骑防河众溃而归是日塞京城门戊寅以康王构为安国安武军节度使壬午沃哩布使杨天吉王汭贝勒色勒默来命耿南仲使沃哩布军聂昌使纳罕军许画河为界康王至磁州州人杀王云王复还相州甲申尚书右丞孙傅同知枢密院事御史中丞曹辅签书枢密院事以京兆府路安抚使范致虚为陕西五路宣抚使令督勤王兵入援乙酉金军逼京城丁亥李回罢戊子金人攻通津门己丑南道总管张叔夜将兵勤王至玉津园以叔夜为延康殿学士沃哩布遣刘晏来庚寅帝如东壁劳军诏三省长官名悉依元丰旧制以领开封府何■〈宀禹〉上木下〉为门下侍郎闰月壬辰金人攻善利门唐恪罢以何■〈宀禹〉上木下〉为尚书左仆射兼中书侍郎刘鞥坐弃军降五官予祠癸巳京师大寒用日者言借土牛迎春知泽州高世由以城降于金都民杀东壁统制官辛亢宗罢民乘城代以保甲甲午帝被甲登城驿召李纲为资政殿大学士领开封府金

人破怀州知州霍安国通判林渊钤辖张彭年都监赵士訢张谏死之乙未金人入青城攻朝阳门冯澥与金人萧庆杨真诰来丙申帝如宣化门以张叔夜为资政殿学士金人执胡直孺又破拱州丁酉以冯澥为尚书左丞戊戌殿前副都指挥使王宗濬与金人力战于城下统制官高师旦死之庚子以张叔夜签书枢密院事金人攻宣化门辛丑金人攻南壁壬寅诏河北守臣尽起军民兵倍道入援癸卯金人攻南壁张叔夜范琼分兵袭之大溃奔还甲辰大雨雪金人破亳州遣闲使召诸道兵勤王乙巳大寒士卒噤战不能执兵有僵仆者帝徒跣祈晴时勤王兵不至金人攻城急丁未避正殿己酉遣冯澥曹辅与宗室仲温士■〈言布〉使金军请和命康王为天下兵马大元帅速领兵入卫辛亥金人来议和要亲王出盟壬子金人攻通津宣化门范琼以千人出战渡河冰裂兵多没者甲寅大风俄大雨雪连日夜不止乙卯金人复使刘晏来趣亲王宰相出盟丙辰郭京用六甲法尽令守御人下城大启宣化门出攻金人兵大败京引余兵遁金兵登城焚南熏诸门姚仲友死于乱兵统制官何庆言陈克礼中书舍人高振力战死之秦元领保甲斩关遁京城陷卫士入都亭驿执刘晏杀之丁巳奉道君皇帝懿德皇后入居延福宫命何■〈〈鹵，欠代义〉上木下〉及济王栩使金军辛酉帝如青城十二月壬戌朔帝在青城萧庆入居尚书省是日康王开大元帅府于相州癸亥帝至自青城甲子大索金帛丙寅遣陈过庭刘鞅使两河割地辛未定京师米价劝籴以振民癸酉斩行门指挥使蒋宣李福乙未康王如北京庚寅康王如东平

二年春正月辛卯朔命济王栩景王■〈木巳〉出贺金军金人亦遣使入贺壬辰金人趣召康王还遣聂昌耿南仲陈过庭出割两河地甲午诏两河民开门出降庚子金人索金银急何■〈〈鹵，欠代义〉上木下〉及吏部侍郎李若水劝帝亲至军中以太子监国而行乙巳籍梁师成家丙午刘鞅自经于金军太学生徐揆上书金帅请帝还阙金人取至军中死之是夜金人劫神卫营二月辛酉朔帝在青城丙寅金人墮南熏门路丁卯金人要上皇如青城尽取诸王孙入军中辛未金人逼上皇召皇后皇太子入青城李若水死之庚辰康王如济州癸未观文殿大学士唐恪自杀乙酉金人杀户部尚书梅执礼侍郎陈知质刑部侍郎程振给事中安扶三月辛卯朔帝在青城丁酉金人立张邦昌为楚帝合门宣赞舍人吴革死之丁巳金人胁上皇北行夏四月庚申朔金人以帝及皇后皇太子北行五月庚寅朔康王即泣于南京遥上尊号曰孝慈渊圣皇帝绍兴三十一年五月辛卯帝崩于五国城年六十四谥曰恭文顺德仁

孝皇帝庙号钦宗遥上陵名曰永献陵

钦宗靖康二年

右宋九主合一百六十七年

钦定续通志卷三十三

●钦定续通志卷三十四 宋纪十

宋纪 【十】

高宗 【一】

○高宗一

高宗皇帝讳构字德基徽宗第九子也母曰显仁皇后韦氏初授定武军节度使检校太尉封蜀国公旋封广平郡王又进封康王靖康元年正月金人逼京师军于城西北遣使入城邀亲王宰臣议和帝慷慨请行钦宗命少宰张邦昌为计议使与帝俱如金军金帅沃哩斡布留之不遣会姚平仲夜袭金营金帅召诸使者诘以违誓用兵之故邦昌恐惧涕泣帝不为动沃哩斡布异之请更以他王为质己而钦宗命肃王枢为质于金且许割三镇地帝始得还金兵退钦宗复遣给事中王云使金以租赋赎三镇地又以蜡书结辽降将耶律伊都为金人所得八月金帅纳罕复引兵深入破太原沃哩斡布破真定王云自金还言金人须帝至乃议和十一月钦宗复使帝如河北奉袞冕玉辂尊金主为伯上尊号十八字帝被命即发以门下侍郎耿南仲主和议请与俱乃以其子中书舍人延禧为参议官偕行帝至磁州守臣宗泽请曰肃王一去不返今彼又诡词以致大王其意可知且兵日迫复去何益请留磁勿行而磁人以云将挟帝入金遂执云杀之时纳罕沃哩斡布已率兵渡河相继围京师游兵日至磁州城下踪迹帝所在知相州汪伯彦以蜡书请帝还相州帝遂如相州闰月耿南仲驰至相州以面受钦宗旨谕帝令尽起河北兵入卫帝乃同南仲募兵勤王初朝廷闻金兵渡河议拜帝为元帅至是殿中侍御史胡唐老复申其议钦宗乃遣阁门祗候秦仔持蜡诏至相州拜帝为河北兵马大元帅知中山府陈亨伯为元帅汪伯彦宗泽副之十二月壬戌朔帝开大元帅府下令诸郡守与诸将议引兵渡河乙亥帝发相州丁丑次大名府宗泽以二千人先诸军至会得蜡诏以金人方议和令驻兵近甸毋轻动伯彦南仲请移军东平劝帝遣泽泽以万人进屯澶渊扬言帝在军中以惑金军泽自是不复参帅府谋议

建炎元年春正月癸巳帝至东平初京城被围久中外莫知帝处及是金人闻帝在澶渊遣甲士及中书舍人张澄来召帝宗泽命壮士射之澄乃遁伯彦等请帝如济州二月癸未次济州时帅府官军及羣盗来归者号百万人

分屯济濮诸州而诸路勤王兵不得进三月丁酉帝闻金人已留二帝于军中而立张邦昌为帝乃承制以宗泽为徽猷阁待制戊午以汪伯彦为显谟阁待制充元帅黄潜善为徽猷阁待制充副元帅夏四月二帝北迁癸亥邦昌尊元佑皇后为宋太后遣人至济州访帝上书自言从权济事及将避位之意帝复书与之而谕宗泽等以邦昌已受伪命义当诛讨然虑事出权宜未可轻动泽复书谓邦昌篡乱踪迹已无可疑宜早正天位兴复社稷门下侍郎吕好问亦以蜡书来言帝不自立恐有不当立而立者丁卯张邦昌遣吏部尚书谢克家以大宋受命之宝至济州帝恸哭受命遂趋应天是夕邦昌手书上延福宫太后尊号曰元佑皇后入居禁中以尚书左丞冯澥为奉迎使后遣兄子卫尉少卿孟忠厚持手书遗帝俾帝嗣统后权垂帘听政邦昌权尚书左仆射丁丑冯澥等至济州百官三上表劝进帝乃权听国事戊寅命宗泽勒兵分驻长垣韦城等县以备非常东道副总管朱胜非至济州宣抚司统制官韩世忠鄜延副总管刘光世西道都总管王襄各以兵来会癸未帝至应天府皇后诏有司备法驾仪仗乙酉张邦昌至伏地请死帝慰抚之五月庚寅朔帝登坛受命礼毕恸哭遥谢二帝即位于应天府治改元建炎大赦常赦所不原者咸赦除之命西京留守司修奉祖宗陵寝罢天下神霄宫及散青苗钱褒死节及歿于王事者并推恩奉使未还者禄其家一年臣僚因乱去官者限一月还任蠲在官欠负南京及元帅府常驻军州县夏税应募兵勤王人以兵付州县主兵官听赴行在中外臣庶直言民间疾苦虽诋讦亦不加罪命官犯罪更不取特旨裁断蔡京童贯朱勔李彦孟昌龄梁师成谭慎及其子孙更不收叙内外大臣限十日各举布衣有材略者一人余如故事以黄潜善为中书侍郎汪伯彦同知枢密院事是日元佑皇后在东京彻帘辛卯尊元佑皇后为元佑太后壬辰以张邦昌为太保奉国军节度使同安郡王五日一赴都堂参决大事以河东北宣抚使范讷为京城留守癸巳遥尊帝母韦贤妃为宣和皇后遥立嘉国夫人邢氏为皇后耿南仲罢甲午以李纲为尚书右仆射兼中书侍郎趋赴行在杨惟忠为建武军节度使主管殿前司公事乙未冯澥罢以兵部尚书吕好问为尚书右丞命中军统制马忠后军统制张涣率兵趣河间府追袭金人丙申以吕好问兼门下侍郎丁酉以黄潜善兼御营使汪伯彦副之真定府路副总管王渊为都统制鄜延路副总管刘光世提举一行事务戊午以资政殿学士路允迪为京城抚谕使龙图阁学士耿延禧副之己亥诏太学生陈东赴行在李纲至江甯诛叛卒周德等庚子诏以靖康大臣主和误国责李邦彦为建宁军节度副使浚州

安置徙吴敏柳州蔡懋英州李稅宇文虚中郑望之李邴皆以使金请割地并广南诸州安置丙午以诬谤宣仁圣烈皇后追贬蔡确蔡卞邢恕蔡懋官以保静军节度使姚古知河南府金人破河中府权府事郝仲连死之丁未徽宗至燕山府时宗泽上兴复大计为汪潜善所沮出泽知襄阳府丁巳诏成都京兆襄阳荆南江甯府邓扬二州并储粮修城以备巡幸遥授签书枢密院事张叔夜为观文殿大学士醴泉观使戊午右谏议大夫范宗尹罢遣太常少卿周望使河北军前通问二帝西道总管王襄北道总管赵野坐勤王稽缓责襄永州野邵州安置六月己未朔李纲入见以徽猷阁直学士徐秉哲为大金通问使秉哲辞庚申封靖康军节度使仲湜为嗣濮王御史中丞颜岐罢徐秉哲责官梅州安置癸亥以黄潜善为门下侍郎兼权中书侍郎贬张邦昌为招化军节度副使潭州安置及受伪命臣僚王时雍吴玠莫俦李擢孙覿并远州安置颜博文王绍以下论罪有差甲子以李纲兼御营使乙丑以龙神卫四厢都指挥使马忠为河北经制使措置民兵辛未大赦籍天下神霄宫钱谷充经费還元佑党籍及上书人恩数戊寅以汪伯彦知枢密院事遣宣义郎傅雱使河东军前通问二帝己卯置沿河沿淮沿江帅府十有九要郡三十九次要郡三十八东京留守范讷落节钺淄州居住庚辰以二帝未还禁州县用乐壬午以户部尚书张恂同知枢密院事兼提举措置户部财用癸未吕好问罢乙酉以宗泽为东京留守杜充为北京留守罢监司州郡职田丙戌诏陕西河北京东西路募兵更番入卫行在命京东西路造战车丁亥以张所为河北西路招抚使括买官民马劝出财助国戊子以钱盖为陕西经制使封赵怀恩为安化郡王因召五路兵赴行在秋七月己丑以枢密副都承旨王■〈王燮〉为河东经制使庚寅诏王渊刘光世统制官张俊乔仲福韩世忠分讨陈州军贼杜用京东贼李昱及黎驿鱼台溃兵皆平之辛卯籍东南诸州神霄宫及贍学钱助国用乙未以温州观察使范琼为定武军承宣使御营司同都统制戊戌钦宗至燕山府以忻州观察使张涣为河北制置使东都宣武卒杜林谋据成都叛伏诛辛丑复议吴玠莫俦等十一人罪并广南江湖诸州安置余递贬有差壬寅诏奉元佑太后如东南六宫及卫士家属从行朕当独留中原与金人决战以延康殿学士许翰为尚书右丞甲辰斩右谏议大夫宋齐愈丙午诏定议巡幸南阳以观文殿学士范致虚知邓州修城池缮宫室输钱谷以实之丁未遣官诣京师迎奉太庙神主赴行在己酉罢四道都总管以尚书虞部员外郎张浚为殿中侍御史庚戌征诸道兵期八日会行在丙辰徽宗自燕山密遣合门宣赞舍人曹勋以

手书至是月关中贼史斌犯兴州僭号称帝八月戊午
胜捷军校陈通作乱于杭州己未元佑太后发京师庚申以刘光世为奉国军节度使壬
戌以李纲为尚书左仆射兼门下侍郎黄潜善为右仆
射兼中书侍郎张焘兼御营副使癸亥命御营使副大阅五军庚午更号元佑太后为隆
佑太后辛未罢傅亮经制副使召赴行在壬申命御营
统制辛道宗讨陈通癸酉以耿南仲主和误国南雄州安置乙亥李纲罢丙子隆佑太后
发南京命侍卫马军都指挥使郭仲荀护卫如江甯兼
节制江淮荆浙闽广诸州制置东南盗贼丁丑以龙图阁直学士钱伯言知杭州节制两
浙淮东将兵及福建枪杖手讨陈通壬午杀上书太学
生陈东崇仁布衣欧阳澈乙酉遣兵部员外郎江端友等抚谕闽浙湖广江淮京东西诸
路及体访官吏贪廉军民利病许翰罢丁亥博州卒宫
仪作乱犯莱州九月己丑建州军校张员等作乱范琼捕斩李孝忠于复州壬辰以金人
攻河阳汜水军诏择日巡幸淮甸命淮浙沿海诸州增
修城壁招训民兵以备海道甲午命扬州守臣吕颐浩缮修城池宗泽往河北视师是夜
辛道宗兵溃于嘉兴县丁酉诏荆襄关陕江淮皆备巡
幸戊戌罢买马己亥以子雋为检校少保集庆军节度使封魏国公壬寅遣徽猷阁待制
孟忠厚迎奉太庙神主赴扬州以直秘阁王圭为招抚
判官代张所责所广南安置乙巳宗泽表请车驾还阙戊申河北招抚司都统制王彦渡
河击金人破之复新兴县己酉叛卒赵万入常州罢诸
路经制招抚使壬子赐张邦昌死诛王时雍癸丑诏有妄议阻南幸者斩乙卯王彦御金
军败绩其裨将岳飞收部曲自为一军赵万陷镇江府
是秋金人分兵破中山庆源府保莫邢洺冀磁绛相等州冬十月丁巳帝如淮甸戊午太
后至扬州己未罢诸路劝诱献纳钱物庚申罢诸路召
募溃兵忠义等人及寄居官擅集勤王兵者癸亥募羣盗能并灭贼众者官之甲子落李
纲观文殿大学士知秀州兼权浙西提点刑狱赵叔近
入杭州招抚陈通乙丑罢帅府要郡次要郡及新军水军丁卯以王渊为杭州制置盗贼
使己卯次楚州宝应县后军将孙琦等作乱庚辰命刘
光世讨镇江叛卒辛巳以光世为滁和濠州江甯府界招捉盗贼制置使御营统制官苗
傅为使司都统制癸未至扬州禁内侍统兵官相见丙
戌赵万等伏诛十一月戊子责李纲鄂州居住真定叛卒张遇入池州壬辰以三伦等为
金国通问使乙未以张焘为尚书左丞工部尚书颜岐
同知枢密院事丙申曲赦应天府亳宿扬泗楚州高邮军丙午以张焘为中书侍郎戊申
以颜岐为尚书左丞兼权门下侍郎御史中丞许景衡
为右丞刑部尚书郭三益同知枢密院事权密州赵野弃城遁军校杜彦追杀之金人破

河间府是月叛卒丁进围寿春府守臣康允之拒郤之
十二月辛酉王渊入杭州陈通伏诛王戎青州败将王定作乱杀帅臣曾孝序癸亥纳罕
攻汜水关西京留守孙昭远遣将拒之战歿昭远引兵
南遁丙寅张遇犯江州戊辰金人攻棣州守臣姜纲之拒却之甲戌金人破同州守臣郑
骧死之张遇犯黄州己卯金人破汝州入西京庚辰破
华州辛巳破潼关河东经制使王■（王燮）自同州引兵遁入蜀丁进诣宗泽降
二年春正月丙戌朔帝在扬州丁亥录两河流亡吏士给流民官田牛种戊子金人
破邓州安抚刘汲死之辛卯置行在榷货务壬辰金人
攻东京宗泽击却之乙未金人破永兴军前河东经制副使傅亮降之经略使唐重副总
管杨宗闵提举军马陈迪转运副使桑景询判官曾谓
提点刑狱郭忠孝经略司主管机宜文字王尚及其子建中死之东平府兵马钤辖孔彦
舟叛渡淮犯黄州丙申金人破均州丁酉破房州己亥
张遇焚真州庚子遣主客员外郎谢亮为陝西抚谕使兼宣谕使持诏赐夏国张遇陷镇
江府辛丑金人破郑州通判赵伯振死之癸卯金人破
潍州又破青州寻弃去己酉禁诸将引溃兵入蜀庚戌遣考功员外郎傅雱为淮东京东
西抚谕使辛亥王渊招张遇降之金人焚邓州是月以
中奉大夫刘豫知济南府金人破颍昌府守臣孙默死之经制司僚属王择仁复永兴军
金人破秦州经略使李复降之又攻熙河经略使张深
与战于新店败之二月丙辰金人再攻东京宗泽遣统制阎中立等拒之中立战死戊午
移耿南仲于临江军金人破唐州癸亥罢市易务甲子
金人攻滑州宗泽遣张撝救之战死乙丑泽遣判官范世延等表请还京河北赋杨进等
诣泽降壬申赦福州叛卒张员等癸酉金人破蔡州丙
子克淮甯府守臣向子诏死之丁丑遣王颉等充金国军前进问使戊寅责降知镇江府
赵子崧为单州团练副使南雄州安置庚申以王渊为
向德军节度使辛巳和州防御使马扩奔真定五马山聚兵得皇弟信王榛于民间奉之
总制诸砦三月辛卯金人陷中山府壬辰诏诸路安抚
使许便宜节制官吏丁酉纳罕焚西京去庚子河南统制官翟进复西京宗泽奏进为京
西北路安抚制置使己酉张员等复作乱本路提点刑
狱李芑讨捕之辛亥以范瓌权同主管侍卫步军司公事屯真州是月金人陷凤翔府又
攻泾原经略使曲端击败之石濠尉李彦仙复陝州夏
四月戊午禁州县责邻保代输逃户税役宗泽复滑州乙丑翟进以兵袭金帅乌舍于河
南败绩其子亮死之进及御营统制韩世忠京城都巡
检使丁进等又败于文家寺陇右都护张严及金人战于五里坡败绩死之丁卯金人入
洛州壬辰叛卒孙琦焚随州癸未入唐州信王榛遣马

扩来奏事是月以榛为河外兵马都元帅扩为元帅府马步军都总管五月乙酉许景衡
罢孙琦犯德安府戊子以翰林学士朱胜非为尚书右
丞甲午曲赦河北陕西京东路福建转运判官谢如意执张员等诛之丙申复命宇文虚
中为资政殿大学士充金国祈请使贼靳赛寇光山县
癸卯张恂薨甲辰金帅罗索破绛州己酉秀州卒徐明等作乱执守臣朱芾迎前守赵叔
近复领州事命御营中军统制张俊讨之癸丑罢借诸
路职田六月癸亥建州卒叶浓等作乱寇福州甲子虑囚乙丑张俊至秀州杀赵叔近执
徐明斩之甲戌叶浓陷福州是月以知延安府王庶节
制陕西六路军马泾原经略使曲端为节制司都统制永兴军经略使郭琰逐王择仁择
仁奔兴元秋七月甲申叶浓入宁德县复还建州命张
俊同两浙提点刑狱赵哲率兵讨之丙戌宗泽薨丁亥诏百官坐蔡京王黼拟授而废者
许自新复用乙未以郭仲荀为京城副留守甲辰以降
授北京留守杜充复枢密直学士为开封尹东京留守八月河北京东捉杀使李成叛辛
巳犯宿州九月甲申丁进叛复寇淮西癸巳金人破冀
州将官李政死之甲午金人再攻永兴军经略使郭琰弃城遁辛丑陕西节制司兵官贺
师范及金人战于八公原败绩死之丙午复所减京官
俸丁未东京留守统制官薛广及金人战于相州死之己酉郭三益薨是秋金将特哩袞
达兰破五马山砦信王榛不知所终马扩军败于北京
之清平冬十月戊午遣刘光世讨李成壬戌禁江浙闭余癸亥纳罕围濮州遣韩世忠范
琼及马扩分道援之甲子命孟忠厚奉隆佑太后如杭
州杨进复叛攻汝洛命翟进击之战于鸣皋山进败死之是月刘正彦击丁进降之十一
月辛巳提举嵩山崇福宫李纲责授单州团练副使万
安军安置刘光世及李成战于新息县成败走金人围陕州守臣李彦仙拒却之壬辰金
人破延安府权知府刘选总管马忠遁通判府事魏彦
明死之癸巳赵哲大破叶浓于建州浓请降复谋为变张俊禽斩之乙未金人破濮州又
破开德府守臣王棣死之以魏行可充金国军前通问
使庚子诣寿宁寺朝飨祖宗神主壬寅祀昊天上帝于圜丘以太祖配大赦金人克相州
守臣赵不试死之甲辰破德州兵马都监赵叔畎死之
是月节制陕西军马王庶为都统制曲端所拘夺其印金人攻晋宁军守臣徐徽言拒却
之知府州折可求以城降金人破淄州泾原兵马都监
吴玠袭史斌斩之滨州贼盖进陷棣州守臣姜刚之死之十二月乙卯太后至杭州扈从
统制苗傅以其军八千人驻奉国寺庚申金人攻东平
府京西路制置使权邦彦弃城去又攻济南府守臣刘豫以城降甲子金人攻大明府提
点刑狱郭永死之转运判官裴亿降又破袭庆府乙丑

破虢州己巳以黄潜善为尚书左仆射兼门下侍郎汪伯彦右仆射兼中书侍郎颜岐门下侍郎朱胜非中书侍郎兵部尚书卢益同知枢密院事辛未金人攻青州戊寅以礼部侍郎张浚兼御营参赞军事教习长兵是冬杜充决黄河自泗入淮以阻金兵

三年春正月庚辰朔帝在扬州以京西北路兵马钤辖翟兴为河南尹京西北路安抚制置兼招讨使京西贼贵仲正陷岳州甲申以资政殿学士路允迪签书枢密院事丁亥金人再破青州又破潍州焚之而去京东安抚刘洪道入青州己丑奉安西京会圣宫累朝御容于寿宁寺趣大金通问使李邺周望宋彦通吴德休等往军前辛卯陕州都统邵兴及金人战于潼关败之复虢州乙未杜充遣岳飞桑仲讨其叛将张用于城南其党王善救之飞等败绩庚子张用王善寇淮宁府守臣冯长宁却之丙午纳罕克徐州守臣王复及子倚死之御营平寇左将军韩世忠军溃于沐阳其将张遇死之世忠奔盐城金兵趣淮甸戊申至泗州二月庚戌朔始听士民从便避兵命刘正彦部兵卫皇子六宫如杭州江淮制置使刘光世师溃于淮上金人攻楚州守臣朱琳降辛亥金人破天长军壬子帝驰诣镇江府是日金兵过扬子桥癸丑游骑至瓜洲太常少卿季陵奉太庙神主以行失太祖神主王渊请幸杭州命留朱胜非守镇江以吏部尚书吕颐浩为资政殿大学士江淮制置使都巡检使刘光世为殿前都指挥使充行在五军制置使驻镇江府主管马军司杨惟忠节制江东军马驻江宁府是夕帝发镇江金人入真州丁巳金人攻泰州守臣曾班以城降丁进纵兵剽掠王渊诱诛之戊午命朱胜非节制平江府秀州控扼军马礼部侍郎张浚副之又命胜非兼御营副使留王渊守平江以忠训郎刘俊民为合门祗候使金军诏录用张邦昌亲属仍命俊民持邦昌贻金人约和书藁以行金人破沧州己未命吕颐浩往来经制长江以龙图阁待制知江州陈彦文为沿江措置使庚申次崇德县吕颐浩从行即拜同签书枢密院事江淮两浙制置使还屯京口又命御营中军统制张俊以兵八千守吴江吏部员外郎郑资之为沿江防托监察御史林之平为沿海防托募海舟守隘壬戌驻蹕杭州金人克晋宁军守臣徐徽言死之癸亥下诏罪己求直言省仪物膳羞出宫人之无职掌者乙丑降德音赦杂犯死罪以下放还士大夫被窜斥者惟李纲罪在不赦更不放还置江宁府榷货务都茶场戊辰金人焚扬州己巳黄潜善汪伯彦罢以户部尚书叶梦得为尚书左丞御史中丞张澄为右丞庚午分命浙西监司等官募土豪守千秋垂脚襄阳诸岭以扼宣常诸州险要金人去扬州辛未金人过高邮军守臣赵士瑗弃城走溃

兵宋进犯泰州守臣曾班遁 【按上已书泰州守臣曾班降金矣此云泰州守臣当是为金守泰州者其溃兵疑即高邮之兵而非金兵也】

壬申吕颐浩遣将陈彦渡江袭金余兵复扬州癸酉靳赛犯通州韩世忠小校李在叛据高邮甲戌黄潜善汪伯彦并落职乙亥召朱胜非赴行在留张浚驻平江丙子诏士民直言时政得失是月以王庶为陕西节制使知京兆府节制司都统制曲端为鄜延经略使知延安府三月庚辰以朱胜非为尚书右仆射兼中书侍郎辛巳叶梦得罢以卢益为尚书左丞未拜复罢为资政殿学士御营都统制王渊同签书枢密院事吕颐浩为江南东路安抚制置使知江甯府癸未扈从统制苗傅刘正彦叛勒兵向阙杀王渊及内侍康履等帝以傅为庆远军承宣使御营使司都统制正彦渭州观察使副都统制傅等迫帝逊位于皇子魏国公请隆佑太后垂帘同听政是夕帝移御显甯寺甲申尊帝为睿圣仁孝皇帝大赦以张澄兼中书侍郎韩世忠为御营使司提举一行事务前军统制张俊为秦凤副总管分其众隶诸军丁亥以东京留守杜充为资政殿大学士节制京东西路殿前副都指挥使东京副留守郭仲荀进昭化军节度使吕颐浩至江甯戊子以端明殿学士王孝迪为中书侍郎卢益为尚书左丞己丑改元明受张浚奏乞睿圣皇帝亲总要务庚寅以苗傅为武当军节度使刘正彦为武成军节度使刘光世为太尉淮南制置使范琼为庆远军节度湖北制置使杨惟忠加少保张浚为礼部尚书及吕颐浩并赴行在傅等以御营中军统制吴湛主管步军司黄潜善汪伯彦并分司衡永州居住以王孝迪卢益为大金国信使置行在都茶场金人破鄜州甲午吕颐浩率兵勤王乙未再贬黄潜善镇东军节度副使英州安置刘光世会吕颐浩于丹阳丙申韩世忠自盐城至平江戊戌赴行在辛丑傅等以世忠为定国军节度使张俊为武甯军节度使知凤翔府张浚责黄州团练副使郴州安置俊等皆不受壬寅卢益罢吕颐浩至平江水贼邵青入泗州癸卯太后诏睿圣皇帝宜称皇太弟天下兵马大元帅康王皇帝称皇太侄监国赐傅正彦铁券吕颐浩张浚传檄中外讨傅正彦乙巳太后诏睿圣皇帝处分兵马重事张俊率兵发平江刘光世继之丙午以张浚同知枢密院事翰林学士李邴御史中丞郑穀并同签书枢密院事吕颐浩张浚发平江丁未次吴江朱胜非召傅正彦至都堂议复辟傅等遂朝帝于睿圣宫金人克京东诸郡刘洪道弃青州去达兰以刘豫知东平府节制河南州郡赵立复徐州夏四月戊申朔太后下诏还政皇帝复大位尊太后为隆佑皇太后己酉诏访求太祖神主以苗傅为淮西制置使刘正彦副之庚戌复纪年建炎命张浚知

枢密院事苗傅刘正彦并检校少保吕颐浩张浚军次临平傅正彦夜遁辛亥皇太后撤帘傅犯富阳新城遣统制王德乔仲福追击之癸未朱胜非颜岐王孝迪张澄路允迪俱罢以吕颐浩为尚书右仆射兼中书侍郎李邴尚书右丞郑穀签书枢密院事甲寅以刘光世为太尉御营副使韩世忠为武胜军节度使御前左军都统制张俊为镇西军节度使御前右军都统制斩中军统制吴湛工部侍郎王世修于市乙卯大赦许中外直言丁巳禁内侍交通主兵官及借役禁兵干预朝政庚申诏尚书左右仆射并带同中书门下平章事改门下中书侍郎为参知政事省尚书左右丞以李邴参知政事苗傅犯衢州癸亥以给事中周望为江浙制置使丁卯帝发杭州留郑穀卫皇太后以韩世忠为江浙制置使及刘光世追讨傅正彦壬申立子魏国公莒为皇太子是月刘文舜寇濠州西北贼薛庆袭据高邮军五月戊寅朔帝次常州以张浚为宣抚处置使以川陝京西湖南北路隶之听便宜黜陟庚辰苗傅统领官张翼斩王钧甫马柔吉以降辛巳次镇江府癸未以翰林学士滕康同签书枢密院事乙酉至江甯府驻蹕神霄宫改府名建康起复朝散郎洪皓为大金通问使丁亥以徽猷阁直学士陈彦文提领水军措置江浙防托己丑韩世忠追讨傅正彦于浦城县获正彦傅遁走张浚抚谕薛庆于高邮为庆所留乙未浚罢以御营前军统制王■〈王燮〉为淮南招抚使己亥苗傅将江池杀苗翊以降傅走建阳县土豪詹标执之以献辛丑张浚还自高邮复命知枢密院事是月翟兴击杀杨进余党复推其徒刘可拒官军六月戊申东京留守杜充引兵赴行在命兼宣抚处置副使节制淮南京东西路己酉罢王安石配享神宗庙庭以司马光配王善攻淮甯府不克转寇宿州统领王冠败之乙卯以浙西安抚使康允之为制置使丙辰刘光世招安苗傅将韩隽戊午命江浙淮南引塘泺开畎浍以阻金兵庚申皇太后至建康府辛酉以久阴下诏罪己以带御器械李质权同主管殿前司乙丑以建康府路安抚使连南夫兼建康府宣徽太平等州制置使丁卯以赵鼎为右司谏癸酉以右司郎中刘焯止为沿江措置副使甲戌移御行宫乙亥诏谕中外以迫近防秋请太后率宗室迎奉神主如江表百官庶府非军旅之事者并令从行金人破磁州秋七月己卯虑囚辛巳苗傅刘正彦伏诛癸未进韩世忠检校少保武胜昭庆军节度使御营使司都统制范琼自洪州入朝以琼为御营使司提举一行事务后军统制辛企宗为都统制命学士院草夏国书大金国表本付张浚金人逼山东安抚使刘洪道弃潍州遁莱州守将张成举城降丁亥下范琼大理狱皇太子薨戊子郑穀薨己丑以资政殿大学士王

绉参知政事兵部尚书周望同签书枢密院事辛卯升杭州为临安府壬辰赐范琼死刘洪道复青州丁酉遣崔纵使于金军辛丑王■〈王燮〉与靳赛战败绩壬寅命李邴滕康权知三省枢密院事扈从太后如洪州以杜充同知枢密院事兼宣抚处置副使乙巳山东贼郭仲威陷淮阳军翟兴引兵入汝州与贼王俊战败之八月庚戌李邴罢壬子以吏部尚书刘瑄为端明殿学士权同知三省枢密院事甲寅王庶罢以徽猷阁直学士知庆阳府王似为陕西节制使刘文舜入舒州己未太后发建康丁卯遣杜时亮使于金军闰月丁丑以胡舜陟为沿江都制置使集英殿修撰王羲叔副之丁亥辅逵掠涟水军杀军使郝璘降于王■〈王燮〉己丑以吕颐浩守尚书左仆射杜充守右仆射并同中书门下平章事辛卯以杜充兼江淮宣抚使韩世忠为浙西制置使刘光世为江东宣抚使丁酉太后至洪州己亥减福建广南岁上供银三之一壬寅帝发建康复还浙西是月知济南府宫仪及金人战于密州兵溃守将李逵以密州降金靳赛诣刘光世降九月丙午朔日有食之辛亥次平江府壬子金人破单州兴仁府遂克南京守臣陵唐佐降之癸丑以周望为两浙荆湖等路宣抚使翰林学士张守同签书枢密院事丙辰遣张邵等充金国军前通问使金人破沂州却高丽入贡使张浚承制罢知潭州辛炳起复直龙图阁向子諲代之丁巳蠲诸路青苗积欠钱癸亥赐宿泗州都大提举使李成军绢二万匹成寻复叛己巳以知镇江府陈邦光为沿江都制置使庚午以工部侍郎汤东野知平江府兼浙西制置使甲戌金帅罗索攻长安经略使郭琰弃城遁河北贼郈琼围光州冬十月庚辰禁诸军擅入川陕癸未帝至杭州复如浙东庚寅渡浙江郭仲威诣周望降望以仲威为本司统制辛卯李成陷滁州杀守臣向子伋壬辰帝至越州戊戌初命东南八路岁收经制五项钱输行在金人破寿春府庚子破黄州守臣赵令■〈山上成下〉死之辛丑张浚以同主管川峡茶马赵开为随军转运使专总四川财赋金人自黄州济江刘光世引军遁知江州韩杞弃城去金人趋洪州是月京西贼刘满陷信阳军杀守臣赵士负盗入宿州杀通判盛修己十一月乙巳金人攻庐州守臣李会以城降丁未降杂犯死罪以下听李纲自便责仲正犯荆南兵马钤辖渠成与战斩之戊申金帅乌珠攻和州守臣李侔以城降通判唐璟死之己酉乌珠攻无为军守臣李知几弃城走壬子太后退保虔州江西制置使王子猷弃洪州走丁巳金人破临江军守臣吴将之遁戊午遣孙悟等充金国军前致书使金人攻洪州权知州事李积中以城降抚袁二州皆降淮贼刘忠犯蕲州韩世清逆战破之忠入舒州杀通判孙知微

庚申金人攻真州守臣向子恣弃城去辛酉太后至吉州壬戌金人攻建康府破溧水县尉潘振死之癸亥金人破太平州主管步军司阎勅自西京奉累朝御容至行在诏奉安于天庆观寻命勅节制淮西军马甲子杜充遣都统制陈淬岳飞等及金人战于马家渡王■〈王燮〉以军先遁淬败绩死之乙丑太后发吉州次太和县护卫统制杜彥及后军杨世雄率众叛犯永丰县知县事赵训之死之金人至太和县太后自万安陆行如虔州丁卯金人攻吉州守臣杨渊弃城走又破六安军己巳帝发越州庚午复还以周望同知枢密院事仍兼两浙宣抚使殿前都指挥使郭仲荀为副使右军都统制张俊为浙东制置使御史中丞范宗尹参知政事辛未乌珠入建康府守臣陈邦光及在籍户部尚书李昫迎降通判杨邦乂拒之杜充叛降于金【宋纪不载杜充降金而于四年二月书杜充罢是误以削充籍为罢也兹据充传增辑】癸酉帝如明州金人攻建昌军甲戌乌珠杀杨邦乂江淮宣抚司溃卒李选攻陷镇江淮西兵马都监王宗望以濠州降于金是月桑仲自唐州犯襄阳京西制置使程千秋出走仲据襄阳十二月丙子帝至明州丁丑江淮宣抚司准备将戚方叛犯镇江府杀守臣胡唐老辛巳金人破常州又破广德军壬午议航海避兵禁卒张宝等作乱吕颐浩擒斩之甲申张浚承制拜泾原经略使曲端为威武大将军宣抚处置使司都统制乙酉乌珠攻临安府守臣康允之弃城走钱塘县令朱晔死之己丑帝次定海县癸巳帝次昌国县乙未杜彥攻潭州又破洪州戊戌金人攻越州安抚使李邕以城降卫士唐琦死之郭仲荀奔温州庚子移幸温台癸卯黄潜善卒于英州

四年春正月甲辰朔御舟碇海中乙巳金人攻明州丙午帝次台州章安镇己酉遣使如处州问安太后庚戌金人再攻明州张俊引兵去浙东副总管张思政及刘洪道继遁癸丑贬郭仲荀汝州团练副使广州安置丁巳金帅罗索入陕州守臣李彦仙死之己未金人破明州进破定海辛酉帝发章安镇甲子泊温州港口乙丑以中书舍人李正民为两浙湖南江西抚谕使诣太后问安丁卯台州守臣晁公为弃城遁刘可为其党所杀复推刘超据荆门军戊辰滕康刘珏罢仍夺职辛未命臣僚条具措置之策驻蹕之所是月金人攻楚州守臣赵立拒之金人攻邠州曲端遣泾原路副总管吴玠败之于彭原金人破同州二月甲戌邠琼率众降于刘光世叛将傅选诣处州降乙亥奉安祖宗神御于福州复以卢益为资政殿学士李回端明殿学士并权知三省枢密院事金人破潭州将吏王■〈日东〉刘价赵聿之战死向子諲出走丙子金人自明州引兵还临安丙戌金人自临安退军命刘光世追之丁亥金人破东京权留守上官

悟走死庚寅帝次温州浙东防遏使傅崧卿入越州辛卯金人破秀州甲午知蔡州程昌寓弃城走鼎州民钟相作乱自称楚王丙申以金兵退肆赦成戌金人入平江钟相陷澧州湖北制置使傅雱招降孔彦舟以为湖南北捉杀使金人破醴州是月张浚自秦州引兵入援三月癸卯孔彦舟入鼎州金人去平江丁未谕两浙富民助米以备巡幸辛亥遣兵部员外郎冯康国等抚谕荆湖南北广南诸路壬子金人入常州守臣周杞弃城去甲寅遣卢益及御营都统制辛企宗奉迎太后东还丙辰金人攻终南县经略使郑恩死之辛酉御舟发温州御营前军将杨勅叛戊辰孔彦舟击钟相擒之己巳戚方陷广德军夏四月癸酉蠲江西州县被兵民夏税戊寅吴玠及金人战于邠州彭原店败绩部将杨晟死之己卯以观文殿学士朱胜非为江西湖南北宣抚使癸未帝驻越州甲申下诏亲征巡幸浙西韩世忠驻军扬子江要金人归路乌珠引军走建康乙酉戚方围宣州刘光世遣统制王德诱诛刘文舜于饶州丙申吕颐浩罢为镇南军节度使醴泉观使命三省枢密院同班奏事韩世忠及乌珠战于江中败绩乌珠渡江屯六合县戊戌振明州被兵民己亥以张浚为浙西江东制置使辛丑王德破妖贼王宗石于信州是月金人入江西者自荆门军北归五月甲辰以范宗尹为尚书右仆射兼御营使辛亥统领赤心队军马刘晏及戚方战于宣州败绩死之壬子金人焚建康府淮南宣抚司统制岳飞击走之癸丑以张守参知政事赵鼎签书枢密院事甲寅金人破定远县闾勅死之巨师古击戚方于宣州数败之方引去乙卯王綯罢丁巳杨勅犯婺州甲子周望罢寻分司衡州居住置京畿淮南湖北京东西路镇抚使是月刘超据荆南分兵犯峡州又合叛将彭筠犯复州淮西败将崔增陷焦湖水砦河东北经制使王俊复颖昌府六月辛未蠲绍兴府三县湖田米诏侍从台谏诸将集议驻蹕事宜杨勅犯处州癸酉遣统制陈思恭讨勅再贬周望昭化军节度副使连州安置甲戌罢御营司以范宗尹兼知枢密院事乙亥王■（王燮）遣统领林闰等追袭杨勅于东阳县败绩裨将李在死之丁丑以刘光世部兵为御前巡卫军光世为都统制杨勅等焚建州戚方犯湖州安吉县戊寅以知建康府权邦彦为淮南等路制置发运使滁濠镇抚使刘位为贼张文孝所杀命其子纲袭职辛巳虑囚甲申岳飞破戚方于广德军乙酉钟相将胡源引兵入慈利县执其党陈诚来降丙戌以吕颐浩为建康路安抚大使刘光世为两浙路安抚大使朱胜非为江州路安抚大使郭仲威为真扬州镇抚使戚方诣张俊降辛卯妖贼王宗石等伏诛壬辰权密州都巡检徐文率部兵泛海来归乙未郭仲威犯镇江府是月

乌珠自六合引兵趋陕西秋七月乙巳冯长宝复顺昌
府张浚罢曲端都统制丁未以刘光世为集庆军节度使开府仪同三司戊申以孔彦舟
为辰沅靖州镇抚使宣抚司统制官吕世存王俊复酆
州军将王辟叛陷归州钤辖田佑恭击败之己酉王辟犯房州守臣韦知几弃城走癸丑
崔增犯太平州守臣郭伟拒却之乙卯金人徙二帝自
韩州之五国城丁巳申命元佑党人子孙于州郡自陈尽还当得恩数韩世忠张俊并罢
庚申以岳飞为通泰州镇抚使乙酉复李邦彦以下十
九人官职听自便张浚贬曲端阶州居住丁卯金人立刘豫为帝国号齐己巳程昌寓禽
李合戎于松滋县是月张用据汉阳军沿江措置副使
李允文招降之八月辛未以礼部尚书谢克家参知政事壬申李成请降于江州张浚停
程千秋官文州编管丁丑以韩世忠为检校少师武成
感德军节度使张俊检校少保宝武昭庆军节度使庚辰太后至自虔州薛庆及金人战
于扬州城下死之癸未卢益罢张浚复永兴军再贬曲
端海州团练使万州安置甲申陈万信余党雷进作乱乙酉焚慈利石门二县以御营司
参议官王择仁权河东制置使山砦首领韦忠佺为都
统制宋用臣冯赛同都统制丙戌以李成为四川镇抚使戊子以饶信妖贼平赦二州徒
似下囚蠲民今年役钱辛卯杜湛渡江讨羣贼复石首
等五县壬辰盗入梅州杀守臣沈同之甲午金人破承州戊戌以桑仲为襄阳邓随郢州
镇抚使九月壬寅诏诸路决囚甲辰徽宗皇后郑氏崩
于五国城戊申刘豫僭位于北京乙卯桑仲陷均房州进犯白土关丙辰金人攻楚州赵
立死之丁巳赵霖复和州李成犯兴国军戊午荆襄贼
赵延寿犯德安府陈规拒却之己未金均房安抚使王彦及桑仲战于平丽县败之王辟
诣彦降辛酉李捧击范汝为于建州军溃金人攻扬州
统制靳赛逆战于港河败之金人破延安府及保安军癸亥张浚遣都统制刘锡统五路
兵及金将罗索战于富平县大败戊辰赵延寿焚郢州
金人破楚州镇抚使李彦先死之冬十月庚午张浚斩环庆经略使赵哲于邠州贬刘锡
合州安置浚退保秦州辛未秦桧自金营来归戊寅锤
相余党杨华围桃源县己卯马进犯江州癸字程昌■〈宀禹〉入鼎州击杨华破之丁
亥以李回同知枢密院事庚寅召张浚入援追复李邦
彦观文殿大学士辛卯虔州贼李敦仁及弟世雄破虔州石城县乙未岳飞破金人于承
州是月冯长宝弃城去寻以淮宝附刘豫江东贼张琪
犯建康府刘洪道招降之环庆路统制慕洧叛附于夏国泾原统制张中彦经略司干办
赵彬叛降于金刘忠据岳州平江县白面山王善余党
祝友作乱屯滁州龚家城十一月癸卯慕洧遂引金人围环州吕颐浩复南康军甲辰赵

鼎罢乙巳秦桧入见丙午岳飞弃泰州丁未以御史中丞富直柔签书枢密院事秦桧为礼部尚书吕颐浩会杨惟忠与马进战于南康军不利戊申颐浩遣巨师古救江州为进所败师古奔洪州金人破泾原经略使刘锜退屯瓦亭己酉以孔彦舟为湖南副总管丙辰金人破泰州丁巳通州守臣吕伸弃城去王彦攻桑仲于黄水破之房州平张浚以彦为金均房州镇抚使崔增犯池州刘洪道遣统制李贵击走之增诣吕颐浩降丙寅金房州贼郭希犯归州田佑恭击却之是月张浚退军兴州秦凤副总管吴玠收余兵保大散关东和尚原括借诸路寺观田租芦场三年十二月庚午安南请入贡却之辛未括饶信诸州钱粮凡江湖川广上借皆拘之丁丑马进分兵犯洪州乙丑李敦仁犯抚州崇仁县壬辰金人攻熙州总管刘惟辅击败之甲午再攻熙州惟辅军溃死之乙未以张俊为江南招讨使丁酉范汝为降是月张俊承制复海州团练副使曲端左武大夫兴州居住

绍兴元年春正月己亥朔帝在越州帅百官遥拜二帝改元释流以下囚复贤良方正直言极谏科蠲两浙夏税和买紬绢丝绵减福建路上供银三分之一戊申改命张俊为江淮路招讨使以吕颐浩为江东路安抚大使朱胜非江西路安抚大使马进陷江州己酉金人攻扬州又攻秦州吴玠击败之庚戌又攻西甯州守臣俱重迎降辛亥谢克家罢壬子张中孚以原州叛降于金癸丑曹成入汉阳军李允文招之成入鄂州复趋江西丁巳吕颐浩遣王■〈王燮〉崔增击贼于湖口大败之辛酉诏太祖创业垂统神宗诏封子孙一人为安定郡王世世勿绝今依故事举行金人再图环州是月张浚复曲端荣州刺史提举江州太平观闾州居住寻移恭州二月戊辰宜章县民李冬至二作乱犯英连韶郴诸州祝友降庚午李成党邵友犯筠州守臣王庭秀弃城去辛未犯临江军守臣康倬遁壬申初定岁祀天地社稷如奏告之礼丁丑鄜延将李永琦叛犯庆阳府己卯以辛企宗为福建制置使辛巳以秦桧参知政事三月戊戌吕颐浩遣崔增王■〈王燮〉击李成于湖口大败之壬寅禁诸路遏余丙午张俊杨沂中岳飞击马进大败之孔彦舟掠潭州趋衡州己酉李成犯饶州庚戌张俊杨沂中击马进于筠河败之复筠州辛亥男子崔绍祖诈称越王中子作乱甲寅罢诸州免行钱乙卯金人破阶州庚申刘超犯洋州统制杜湛拒之甲子张俊追马进至江州进战败遁去乙丑杨沂中赵密追击之又大败之振淮南京东西流民荆湖东路安抚使向子諲说降马友与共讨李冬至二平之夏四月庚午张琪复叛犯当涂县金将达兰渡淮屯宿迁县马乐湖乙亥刘光世复楚州阶州统领杜肇复阶

州马友引兵入潭州戊寅杜琪弃泮州刘超入据之己卯金涇原帅赵彬攻耀州淮贼寇宏犯濠州庚辰隆佑皇太后崩癸未桑仲陷邓州守将谭究弃城走河东招捉使王俊引兵来援仲执斩之乙酉为太后制朞年服是月京西贼李忠陷商州守臣杨伯孙弃城走吕颐浩遣统制阎皋通判建昌军蔡延世袭击李敦仁禽其弟世雄世臣五月丙辰蠲江西路被贼州县赋税丁酉诏吕颐浩朱胜非刘光世并兼淮南诸州宣抚使始夺李成官戊戌以张用为舒蕲镇抚使癸卯金人攻和尚原吴玠击败之刘光世遣统制王德袭扬州执郭仲威以献伏诛辛亥水军统制邵青叛围太平州赵彬及金人合兵围庆阳府守臣杨可升击却之甲寅命知南外宗正事令廕选年幼宗子将育于宫中庚申孔彦舟引众过潭州马友迎击大败之彦舟趋岳州犯鄂州壬戌刘光世招降邵青赵延寿据分宁县吕颐浩招降之是月张俊及李成战于黄梅县杀马进成遁归刘豫张用复叛寇江西岳飞招降之六月甲戌张琪犯余杭州又犯宣州庚辰湖贼杨华杨广犯鼎州程昌寓拒却之壬午权攢昭慈献烈皇后于越州张琪犯徽州守臣郭东弃城去琪入据之癸未李允文降丁亥崇安民廖公昭合范汝为余党熊志宁作乱志宁遂与建阳民丁朝佐合兵陷二县戊子虑囚己丑邵青犯江阴军之福山南安贼吴忠宋破坛刘洞天作乱庚寅江西提刑司讨诛之癸巳熙河统制关师古洮东安抚郭玠同讨熙州叛兵连败之甲午广贼邓庆龚富围南雄州蠲建剑汀州邵武军租秋七月乙未以马友权荆湖东路副总管统制潘逵后军将胡江等叛破玉山弋阳永丰三县戊戌吴锡复入邵州庚子以岳飞为神武右副军统制辛丑封伯右武卫大将军令话为安定郡王壬寅虔州贼陈炎作乱丙午刘光世遣乔仲福击邵青于常熟为所败达兰自宿迁归戊申韩世清复祁门县庚戌张俊执傅雱赴行在张浚以曲端属吏武臣康随提点刑狱辛酉张琪犯饶州阎皋击败之琪党姚兴降琪走徽州癸亥范宗尹罢是月珍州守臣李玠弃城去王彦数击败李忠赵彬来归张浚承制以彬为陕西转运使以涇原兵马都监李彦琪为本路副总管彦琪寻叛去八月丙寅以孔彦舟为蕲黄镇抚使丁卯以知潭州吴敏为荆湖东西广南路宣抚使张浚杀曲瑞于恭州狱张用至瑞昌归张浚浚以为本军统制癸酉复以汪伯彦为江东安抚大使乙亥吕颐浩遣将李铸复舒州丁丑祔昭慈献烈皇后神主于温州太庙戊寅张守罢以李回参知政事富直柔同知枢密院事庚辰杜湛及刘超战于彭山败绩辛巳超及杨华杨广合寇鼎州程昌禹击败之韩世清及张琪战败绩琪复入祁门县丁亥以秦桧为尚书右仆射同中书

门下平章事兼知枢密院事庚寅复李纲资政殿大学士辛卯蠲徽州被贼民夏税是月知鄂州曹成掠湖西犯沅州与知复州李宏合屯浏阳既而攻宏宏奔潭州九月甲午张琪党李捧犯宣州守臣李彦卿及韩世清击却之丙申斩李世臣己亥以资政殿学士叶梦得为江南东路安抚大使兼寿春等六州宣抚使庚子张琪复陷宣州辛亥合祭天地于明堂大赦录用元符末上书人子孙癸丑复以吕颐浩为尚书左仆射同中书门下平章事兼知枢密院事丁巳王彦破李忠于秦郊店忠奔归刘豫戊午落范宗尹观文殿学士己未初措置河南诸镇屯田以户部尚书孟庾为江东西湖东等路宣谕制置使辛酉诏有建策能还两宫者实封以闻有效者赏以王爵冬十月乙丑诏蔡京王黼门人实有才能者公举叙擢李回罢丙寅朱胜非分司江州居住己巳王德招邵青降之庚午以孟庾参知政事刘洪道召降李捧董旺癸酉金乌珠攻和尚原吴玠及弟璘击败之戊寅以张俊为太尉壬午初置见钱关子招人入中以给军食范汝为复叛入建州守臣王浚明弃城走甲申刘超降戊子崔绍祖伏诛己丑知承州王林禽张琪于楚州癸巳范汝为犯邵武军守臣吴必明统制李山拒之众溃退保光泽县关师古复秦州获郭振是月刘豫将王世冲寇庐州守臣王亨大破之斩世冲曹成及马友战于潭州成败还攸县王才将丁顺围濠州刘光世遣兵攻横涧山顺解围去十一月乙未叶梦得至建康招王才降之戊戌诏移蹕临安以孟庾为福建江西荆湖宣抚使神武左军都统制韩世忠副之己亥范汝为犯光泽县乙巳张琪伏诛庚戌富直柔罢丙辰程昌■〈宀禹〉遣杜湛击杨华败之己未杨华降辛酉以吏部侍郎李光节制临安府内外诸军壬戌曹成犯安仁县执安抚使向子諲进攻道州是月前知廓州李惟德以岷州来归十二月乙丑吴敏罢丙寅范汝为寇南剑州守臣张翬击破之乙亥辛企宗罢仍追三官丁丑蠲诸路在官积欠以岳飞为神武副军都统制曹成陷道州守臣向子恣弃城走戊寅以星变求直言遣驾部员外郎李愿抚谕川陕庚辰桑仲寇复州守臣祖通弃城去辛巳知海州薛安靖杀伪都巡检使王企中以城来归增诸路酒钱以备军费甲申知龙州范综统制雷仲复水洛城己丑起复陕西都统制吴玠为镇西军节度使是月刘豫遣将王彦充攻寿春府桑仲复寇金州王彦拒战于马郎岭大破之均州平蔡州褒信县弓手许约叛据光州阶州安抚孙注复洮州龚富等围剑州

二年春正月癸巳朔帝在绍兴府率百官遥拜二帝甲午诏复置贤良方正直言极谏科丙申韩世忠围建州丁酉蠲诸路元年逋税庚子

陕西叛将白常围岷州关师古击破之辛丑韩世忠拔建州范汝为自焚死余党悉平壬寅帝发绍兴丙午至临安癸丑以张俊为检校少保定国军节度使刘豫遣兵犯伊阳县翟兴及其将李恭合击败之曹成犯郴州永兴县己未修临安城辛酉杨勅复谋作乱江西副总管杨惟忠诱诛之二月甲子杨华复叛扰鼎澧潭三州丙寅命刘光世屯扬州经理淮东庚午以李纲为观文殿学士湖广宣抚使甲戌以吏部尚书李光为淮西招抚使王■〈王燮〉副之丁丑分崔增李捧邵青赵延寿李振单德忠徐文所部兵为七将名御前忠锐军隶步军司非枢密奉旨不许调遣减淮南营田岁租三之二俟三年复旧壬午程昌■〈宀禹〉遣杜湛攻贼周伦破之是月知商州董先叛附刘豫金人破庆阳府杨可升降之三月壬辰命襄邓镇抚使桑仲收复陷没诸郡再贬徐秉哲惠州吴开南雄州莫侔韶州并居住水贼翟进袭汉阳军杀守臣赵令戮李光执韩世清于宣州以归戊戌叶梦得罢以李光为江东安抚大使兼滁濠等六州宣抚使罢江淮发运司桑仲如郢州守将霍明杀之庚子金人攻方山原辛丑又攻陇安县吴璘等击却之淮南营田副使王实括闲田三万顷给六军耕种己酉以神武右军中部统制汤沂中为神武中军统制癸丑河南镇抚使翟兴为部将杨伟所杀庚申曹成寇贺州清水砦守臣刘全弃城去是月知寿春府陈卞及钤辖陈宝等复顺昌府寻引兵归为伪齐所逐并寿春失之夏四月甲子曹成陷贺州陈炎围循州焚龙川县庚午以翰林学士承旨翟汝文参知政事壬申释福建诸州杂犯死罪以下戊寅伪齐统领王资率兵来归乙酉李纲始拜命置司福州太平州军校陆德据城叛戊子以吕颐浩都督江淮荆浙诸军事庚寅刘豫徙居汴京是月王彦大破董先于马岭关复商州闰月乙未知池州王进讨陆德诛之丙申岳飞击破曹成于贺州辛丑韩世清伏诛丙午岳飞败曹成于桂岭县成走连州遣统制张宪追击破之成走郴州入邵州五月辛酉以兵部尚书权邦彦签书枢密院事癸亥吕颐浩出师甲子以霍明权襄邓随郢州镇抚使诏观察使已上各荐可备将帅者二人辛未选宗室子偁之子伯琮育于禁中丙子吕颐浩至常州前军将赵延寿叛于吕城镇丁丑犯金坛县杀知县胡思忠戊寅海州贼王山犯涟水军总领苏复副统制刘靖击败之甲申亲虑囚自是岁如之乙酉刘光世遣王德追赵延寿叛兵至建平县诛之丙戌置修政局命秦桧提举丁亥以中书门下省检正官仇愈为沿海制置使是月韩世忠至洪州招曹成降之六月庚寅李宏入潭州执马友杀之戊戌诏孟庾韩世忠班师岳飞屯驻江州庚子以刘光世为盩厔盩国军节度使韩世忠为太

尉移屯建康府辛丑以李横为襄郢镇抚使李道邓随镇抚使壬寅翟汝文罢孔彦舟叛降伪齐乙巳以权邦彦兼权参知政事戊申仇愈兼制置福建路甲寅召吕颐浩赴行在令参谋官傅崧卿权主管都督府事诏两浙江淮守臣抚东北流寓人乙卯韩世忠遣统制解元巨振入潭州执李宏以归秋七月辛酉悉蠲福建诸州被兵民田租己巳起复翟琮为河南府孟庾唐州镇抚使戊寅知庐州王亨复安丰寿奉县庚辰韩世忠击刘忠于岳州大破之八月壬辰以孟庾兼权同都督江淮荆浙诸军事甲午安定郡王令话薨戊戌命朱胜非提举醴泉观兼侍读口赴朝堂议事戊申江西统制傅枢讨平南雄贼张忠邓庆刘军一等甲寅秦桧罢九月戊午落秦桧职辛酉以星变大赦许中外臣民直言时政壬戌王伦自金还入见遣潘致尧等为金国军前通问使附茶药金币进两宫甲子以直徽猷阁郭伟为淮西巡抚使乙丑复以朱胜非为尚书右仆射同中书门下平章事兼知枢密院事戊辰司空山贼李通降癸酉以右朝请大夫吕源为浙东福建沿海制置使知建昌军朱芾击石陂贼余照禽斩之丙子复以郭仲荀为武泰军节度使辛巳以韩世忠为江南东西路宣抚使丙戌以知兴元府王似为川陕宣抚处置副使丁亥封右监门卫大将军荣州防御使令時为安定郡王是月韩世忠遣统制解元击刘忠于蕲阳大破之忠奔刘豫冬十月庚寅李勃伏诛甲辰潘致尧至楚州通判州事刘晏劫其礼币奔刘豫守臣柴春战死戊申以知平江府赵鼎为江东安抚大使是月颜孝恭招降石陂余贼李宝等十一月辛酉陈炎陷汀州武平县犯梅循二州辛未议将抚师江上召侍从官条具利害戊寅范汝为余党范忠掠龙泉县庚辰诏宣谕五使焚所至州县建炎以前已蠲税籍是月关师古败伪齐兵于抹邦山马友党步谅诣李纲降纲入潭州其党郝晷降王进吴锡禽王浚湖南盗贼悉平十二月己丑伪称荣德帝姬易氏伏诛范忠犯处州巨师古引兵入庐州执王亨送行在甲午李纲罢丁酉岳飞遣统领徐庆王贵讨禽萍乡贼高聚己亥以胡舜陟为庐寿等州镇抚使金人侵熙秦关师古击却之辛丑程昌■〈宀禹〉遣杜湛讨杨钦等败之甲辰罢张浚宣抚处置使仍知枢密院以知夔州卢法原为川陕宣抚处置副使及王似同治司事辛亥金人攻商州李横败伪齐兵复汝州甲寅命孟庾同都督江淮荆浙诸军事诏都督府总治江东西湖北浙西帅臣经画屯田是冬金人攻和尚原吴玠拔砦弃去虔贼谢达犯惠州

三年春正月丁巳朔帝在临安率百官遥拜二帝江西将李宗谅诱戍兵叛寇筠州统领赵进击却之翟琮入西京禽伪齐留守孟邦雄庚

申金人攻上津李横破颍顺军伪齐知军兰和降壬戌金人攻金州洵阳县以仇恂为福建两浙淮东路沿海制置使甲子李横复颍昌府金人破金州辛未李通为其徒王全所杀癸酉以汤东野为淮东安抚使乙亥以李横为襄阳府邓随郢州镇抚使丁丑登莱山砦统制范温率部兵泛海来归庚辰诏春秋望祭诸陵癸未诏民复业者视垦田多寡定租额赋役乙酉减淮浙蚕盐钱二月己丑权邦彦薨浙东贼彭友犯龙泉县辛卯李通余党刘德围舒州金人攻饶风关破之吴玠奔西县王彦奔达州己亥金帅萨里罕入兴元府经略使刘子羽焚其城走三泉县吴玠退屯仙人关庚子以宗子伯琮为和州防御使赐名瑗辛丑蠲广东诸州被贼民租乙巳翟琮遣统制李吉败伪齐兵于伊阳丁未王似始受宣抚副使之命戊申虔贼周十隆犯循梅汀州庚戌以李横为神武左军副统制京西招抚使改胡舜陟为淮西安抚使辛亥以工部尚书席益参知政事翰林学士徐俯签书枢密院事壬子王全犯庐州三月壬戌胡舜陟至庐州王全降甲子以赵鼎为江西安抚大使李横传檄诸军收复东京己巳金人遣兵援刘豫李横败走颍昌复陷壬午以韩世忠为淮南东路宣抚使李纲遣兵击李宗谅降之夏四月丁亥朱胜非去位伪齐知虢州董震及其统制董先来归以震权商虢陕州镇抚使己丑诏江东西湖北浙西募民佃荒田蠲三年租辛卯以刘光世为检校太傅江南东路宣抚使金人去兴元甲午伪齐知唐州胡安中来归丙申伪齐李成攻陷虢州丁未岳飞遣统领张宪王贵击彭友斩之刘忠为部下王林所杀传首行在辛亥徐文叛奔伪齐五月丙辰以翟琮为河南府孟汝郑州镇抚使董先为副使丁卯以韩肖胄等充金国军前通问使安化蛮犯边广西经略使许中击之戊辰杨沂中招降严州贼缪罗等庚午以岳州数被兵免今年税役乙亥以方与金议和禁边兵犯齐境丙子王彦复金州金兵弃均房去以吴玠为利州路阶成凤州制置使庚辰召张浚赴行在诏李横等收军还镇六月丁亥禁诸路招纳淮北人及中原军来归者戊子复元佑宰相吕大防官职赠谥庚寅降川陕死罪以下是月金人围方山原王似命吴玠救之秋七月甲子以久旱偿州县和市民物之直己巳诏减膳禁屠弛工役罢苛饶命诸路宪臣亲按部录囚辛未蠲绍兴二年和市絀帛乙亥朱胜非起复八月己丑诏岳飞赴行在己亥翟琮弃伊阳犇襄阳诏即屯驻之癸卯罢诸路输禁军阙额钱甲辰求直言九月戊午吕颐浩罢庚申川陕统领官吴胜败伪齐兵于黄堆砦丙寅以赵鼎为江西安抚制置大使甲戌伪齐寇徐宿二州乙亥以刘光世为江东淮西宣抚使置司池州韩世忠为镇江建康府淮南东路宣

抚使置司镇江府王■〈王燮〉为荆南府岳鄂潭鼎沔黄州汉阳军制置使置司鄂州
岳飞为江南西路舒蕲州制置使置司江州主管殿前
司郭仲荀知明州兼沿海制置使神武中军统制杨沂中兼权殿前司己卯吴胜克莲花
城冬十月庚寅加吴玠检校少保己亥禁州县擅增置
税场伪齐李成陷邓州辛丑南丹蛮莫公晟围观州焚宝积监杀知监陈烈壬寅伪齐兵
逼襄阳李横弃城奔荆南知随州李道亦弃城去甲辰
王■〈王燮〉讨湖贼战于鼎口不利伪齐陷郢州守臣李简弃城去统制石世达及杜
湛大破湖贼黄诚于龙阳洲十一月己未以右文殿修
撰王伦为都督府参议官癸亥崔增吴全遇湖贼于阳武口死之甲子韩肖胄等使还乙
丑禁沿淮诸砦兵擅侵齐境十二月己酉金元帅府遣
李永寿王翊来见

四年春正月辛亥朔帝在临安率百官遥拜二帝乙卯增淮浙路盐钞贴纳钱遣章
谊等为金国通问使己未程昌■〈宥禹〉遣杜湛王
渥攻杨太皮真砦破之己巳金人攻宕昌临江砦及花石峡庚午诏诸路将帅毋以两国
通使辄弛边备乙亥蠲循梅潮惠四州被兵民租戊寅
金人攻神垆砦法北岭至大散关己卯韩肖胄罢二月癸未席益罢乙酉以徐俯兼参知
政事丙戌禁川陕诸将招纳北军湖北叛兵檀成犯长
阳县解潜捕斩之羣盗田政自襄阳犯陕州己丑解潜遣统制王恪击斩之庚寅金人攻
两当县辛丑攻仙人关癸卯诏权以射殿为景灵宫四
时设位朝献三月辛亥吴玠率杨政吴璘等与金乌珠战于仙人关败之戊午以赵鼎参
知政事壬戌孟庾至行在罢都督府乙丑张浚以资政
殿大学士罢寻落职奉祠福州居住己巳蠲淮南州县租一年癸酉蠲兴元府洋州被兵
民税役二年丙子以王似为资政殿学士川陕宣抚使
卢法原为端明殿学士与吴玠并充副使关师古为熙河兰廓路安抚制置使夏四月庚
辰朔诏谕川陕官吏兵民以张浚失措当示远窜犹嘉
其所用吴玠等能御大敌止从薄责仍令宣抚司讲求谘访凡扰民拂众之事速厘革之
丙戌吴玠复凤秦陇州蠲淮南州军上供钱一年甲午
关师古叛以洮岷二州降伪齐丙午徐俯罢是月知寿春府罗兴叛降伪齐五月庚戌以
岳飞兼黄复二州汉阳军德安府制置使甲寅岳飞复
郢州斩伪齐守荆超甲子以孟庾兼权枢密院事丙寅李成弃襄阳去岳飞复取之金人
攻金州癸酉伪齐收李成余众益兵驻新野岳飞与别
将王万夹击大破之秋七月戊申朔曲赦虔州以吏部尚书胡从年签书枢密院事庚戌
以湖南安抚席益为安抚制置大使建昌军军卒修达
等作乱杀守臣刘滂江西制置使胡世将遣参谋侯恂统制邱贇讨之壬子命吴玠通信

夏国癸丑湖贼杨钦等破社木砦丙辰以吴玠为检校少师奉宁保静军节度使庚申复曲端赵哲官壬戌岳飞遣统制王贵张宪击败李成及金兵于邓州之西复邓州丙申侯恂引兵入建昌军执修达等斩之庚午王贵张宪破伪齐兵复唐州及信阳军襄汉悉平八月庚辰以赵鼎知枢密院事充川陕宣抚处置使湖贼夏诚等犯枝江县解潜击败之辛巳吴玠遣统领姚仲攻陇城县克之壬午降王■〈王燮〉为光州观察使戊子改命赵鼎都督川陕荆襄诸军事乙未遣魏良臣等充金国通问使丙申毁王安石舒王诰己亥周十隆出降复叛去犯汀循州壬寅王似罢以岳飞为清远军节度使湖北荆襄潭州制置使九月戊申减淮浙路盐钞所增贴纳钱壬子夏诚遣将李全功犯公安军解潜遣统制林闰等击斩之安定郡王令時薨辛酉合祭天地于明堂大赦蠲襄阳等六郡三年租庚午朱胜非罢金齐合兵自淮阳分道来侵壬申渡淮楚州守臣樊叙弃城去癸酉以赵鼎为尚书右仆射同中书门下平章事兼知枢密院事吏部尚书沈与求参知政事冬十月丙子朔定策亲征丁丑以孟庾为行宫留守己卯韩世忠自镇江复如扬州金人攻滁州以张浚为浙西江东宣抚使金人围亳州席益遣统制吴锡率兵讨猺贼杨再兴大破之壬午伪齐兵犯安丰县癸未复以张浚为资政殿学士提举万寿观兼侍读甲申复以王■〈王燮〉为建武军承宣使江西沿江制置使戊子韩世忠邀击金人于大仪镇又遣将董旼击之于天长县鸦口桥己丑金人攻承州又围濠州丙申命后宫自温州泛海如泉州金人破濠州守臣寇宏弃城走戊戌帝御舟发临安己亥韩世忠捷奏至壬寅帝次平江加赠陈东欧阳澈秘阁修撰落汪伯彦观文殿学士黄潜善更不追复乙巳仇愈遣将孙晖击金人于寿春复霍邱安丰二县是月借江浙坊场钱一界以备军费十一月庚戌蠲承楚泰州水砦民兵赋役十年壬子始下诏声刘豫罪吴玠遣统制杨从仪等击金人于腊家城癸丑金人入光州甲寅伪齐知光州许约破石额山砦遂据之乙卯韩世忠夜劫金人营于承州金人攻六合县丙辰掠全椒县三城湖丁巳以董旼赵康直总领淮东水砦戊午以胡松年兼权参知政事金人破滁州刘光世移军建康韩世忠移军镇江张浚移军常州己未复命张浚知枢密院事以其尽忠竭节诏谕中外癸亥刘光世遣统制王德击金人于滁州之桑根己巳刘光世遣统制王师晟等袭寿春府执伪齐知府王靖广贼区稠围韶州乐昌县钤辖韩京击斩之诏张浚视师江上十二月壬午以枢密都承旨马扩为江西沿江制置副使丙戌吴伦遣兵攻腊家城破之丁亥听两淮避兵民耕种所在闲田壬辰金齐兵逼庐州岳飞

遣统制徐庆牛皋援之刘光世亦遣统制靳赛战于慎
县张浚遣统制张宗颜系败伪齐兵于六合甲午程昌■〈宀禹〉遣杜湛彭筠合击杨
钦破之己亥以来年正旦日食下诏修阙政求直言庚
子金人退师

五年春正月乙巳朔日有食之帝在平江府己酉承州水砮统领仲谅复入楚州庚
戌张浚遣统领杨忠闵王进夹击金人于淮南岸辛亥
淮东统制崔德明袭金人兵于盱眙召张浚赴行在己未减淮南诸州杂犯死罪以下壬
戌以韩世忠为少保淮东宣抚使驻镇江刘光世少保
淮西宣抚使驻太平张俊开府仪同三司江东宣抚使驻建康甲子酈琼复光州庚午海
贼朱聪犯广州又犯泉州癸酉伪齐将马泰犯光州是
月金主晟殂旻之孙亶立二月丙子以岳飞为镇盩崇信军节度使丁丑帝发平江戊寅
遣权太常少卿张铎奉迎太庙神主于温州壬午帝至
临安丙戌以赵鼎为左仆射张浚右仆射并同中书门下平章事兼知枢密院事都督诸
路军马岳飞为荆湖南北襄阳府路制置使丁亥吴璘
杨政拔秦州己丑诏建太庙壬辰命张浚诣江上措置边防诏谕诸路宣抚制置司示以
专任之旨甲辰蠲湖南路上供三年是月伪齐将商元
寇信阳军守臣舒继明死之闰月丁未胡松年罢己酉留四川上供银帛就充军费乙卯
以孟庾沈与求并兼权枢密院事丁巳金萨里罕侵泰
州吴玠遣部将牛皓援之遇于瓦五谷战死癸亥海贼陈感犯雷州丁卯王■〈王燮〉
罢三月甲戌责授濠州团练使己卯以韩世忠兼镇江
府宣抚使刘光世兼太平州宣抚使壬午以都督府参议军事邵溥兼权川陕宣抚副使
夏四月壬子封周后柴叔夏为崇义公戊午奉安太庙
神主己未更免役保正长法甲子太上皇帝崩于五国城辛未以诸路税赋畸零增收钱
专充上供五月乙亥初谒太庙辛巳遣何鲜等奉使于
金通问二帝己丑以孟庾知枢密院事戊戌以贵州防御使瑗为保庆军节度使封建国
公庚子周十隆降辛丑命川陕访求元佑党人子孙六
月甲辰封武经大夫令缸为安定郡王湖贼杨钦全琮刘洗相继诣岳飞降癸丑以久旱
减膳祈祷禁诸路科率岳飞急攻湖贼水砮杨太赴水
死余党刘衡等悉降飞击夏诚斩之戊午减福建贡茶岁额之半丁卯免沿湖民前二年
逋租秋七月壬申以仇愈为沿海制置使甲戌免蕲州
上供及租税三年己卯孟庾罢以沈与求兼权枢密院事及措置财用壬午伪齐兵寇湖
阳县韩世忠复镇淮军丙申蠲湖南路上供米三年及
秋租之半八月癸丑蠲福建州军借拨常平钱米己未下诏示章惇蔡卞诋诬宣仁圣烈
皇后之罪追贬惇昭化军节度副使卞单州团练副使

子孙不许在朝丙寅以诸盗平减湖广江西二十二州杂犯死罪以下海贼朱聪降是月
伪齐陷光州九月壬午加岳飞检校少保伪齐寇固始
县统领华旺拒却之寻复光州甲午周十隆复叛犯汀州冬十月乙卯以席益为四川制
置大使李纲为浙西制置大使吕颐浩为湖南制置大
使澧州贼雷德进降乙丑伪齐寇涟水军韩世忠遣统制呼延通等击败之十一月戊寅
有事于南郊壬午出宫女三千人丙戌命张浚视师荆
襄川陕十二月己亥以岳飞为荆湖南北襄阳府路蕲黄州招讨使杨沂中权主管殿前
司并统神武中军

六年春正月辛未蠲贫民户帖钱之半无物产者悉除之癸酉命给事中中书舍人
甄别元佑党籍丁丑诏凡入粟补官者毋授亲民刑法
之职壬午赐宗子伯玖名璩为和州防御使己丑安定郡王令缸薨庚寅还预借坊场钱
辛卯诏监司帅臣慢令失职者令张浚黜陟以闻甲午
振江湖福建浙东饥二月辛亥诏张浚暂赴行在奏事甲寅以兵部尚书都督府参谋折
彦质签书枢密院事乙卯韩世忠攻宿迁县泮州贼伍
俊杀雷德进以降丙辰韩世忠围淮阳军辛酉金乌珠来救世忠引兵归楚州壬戌以折
彦质兼权参知政事癸亥沈与求罢李纲入见是月张
浚至江上会诸将议事命张浚进屯盱眙三月己巳以韩世忠为京东淮东路宣抚处置
使岳飞为京西湖北路宣抚副使辛未蠲旱伤州县民
积欠辛巳以枢密副都承旨马扩为沿海制置副使壬午金齐兵侵涟水军壬辰宽四川
灾伤州县户帖钱之半夏四月戊戌湖南贼黄旺犯桂
阳监甲辰伪齐陷唐州团练判官扈举臣推官张从之等死之岳飞以母丧去官丙午诏
起复刘光世遣副统制王师晟郦琼袭伪齐兵于刘龙
城破之甲子以韩世忠为横海武宁安化军节度使号扬武翊运功臣除商旅缗钱税丙
寅复行在官吏奉蠲东京民渡淮南商贩之税五月癸
未禁淮南州县收额外杂色租庚寅以刘光世为保静宁武宁国军节度使壬辰张浚为
崇信奉宁军节度使六月己酉求直言辛酉封集英殿
修撰令愿为安定郡王秋七月癸未诏张浚暂赴行在癸巳以郭浩为永兴军路经略宣
抚使是月刘光世复寿春府八月己亥范宗尹薨甲辰
诏谕将士将亲征岳飞遣统制牛皋破伪齐镇汝军禽其守薛亨乙巳命权殿前司解潜
等帅精兵扈从主管步军司边顺留兵守临安知临安
府梁汝嘉为巡幸随军都转运使丁未以秦桧为醴泉观使兼侍读行宫留守孟庾提举
万寿观兼侍读同留守戊申岳飞遣将杨再兴复西京
长水县己酉命秦桧孟庾权参决尚书省枢密院事庚戌蠲虔州残破诸县逋负梅州夏
秋两税辛亥奉神主发临安己未预借江浙民来年夏

税絀帛折米输官是月岳飞克蔡州九月丙寅帝发临安岳飞遣统制王贵郝晟董先复
虢州卢氏县癸酉帝次平江癸未权奉安神主于平江
能仁寺刘豫告急于金主不许豫命其子麟侄猊分道入寇冬十月丁酉刘麟寇淮西
张浚遣杨沂中张宗颜等分兵御之沂中遣统制王德
邴琼及贼将崔皋贾泽王遇战皆败之贼兵攻寿春府芍陂砦守臣孙晖拒战又败之壬
寅以梁汝嘉兼浙西淮东沿海制置使前护副军都统
制王彦副之甲辰刘猊犯定远县沂中进战大败之麟拔砦去孔彦舟亦解光州围癸丑
张浚杨沂中引兵攻寿春府不克十二月甲午降庐光
濠等死罪以下囚召秦桧赴行在戊戌韩世忠攻淮阳军壬寅赵鼎罢丙午折彦质罢丁
未加张俊少保改镇洮崇信奉宁军节度使杨沂中保
成军节度使殿前都虞候戊申命秦桧赴讲筵供职孟庾为行宫留守辛亥以资政殿学
士张守参知政事兼权枢密院事丙辰以吕颐浩为浙
西安抚制置大使判临安府丁巳以刘光世为护国镇安保安静军节度使
七年春正月癸亥朔帝在平江下诏移蹕建康蠲无为军税役一年丁卯张浚迁特
进己巳发米济京西陕西来归之民张浚入见丁丑解
潜罢以刘锜权主管马军司并殿前步军司公事癸未以翰林学士陈与义参知政事资
政殿学士沈与求同知枢密院事乙酉以张浚兼枢密
使丙戌西蕃三十八族首领赵继忠等来归丁亥以秦桧为枢密使何鲜范宁之至自金
始闻上皇及宁德皇后崩己丑帝成服二月癸巳朔日
有食之百官七上表请遵以日易月之制诏外朝勉从所请宫中仍行三年之丧庚子遣
土伦等使于金奉迎梓宫辛丑以日食求直言以久旱
命诸州虑囚丁巳以岳飞为太尉湖北京西宣抚使己未帝发平江三月己丑蠲驻蹕及
经从州县积年逋赋丁卯以吏部侍郎吕祉为兵部尚
书都督府参谋军事辛未帝至建康壬申诏尚书省常程事从参知政事分治癸酉减建
康流罪以下蠲建康府太平宣州逋赋及下户今年身
丁钱戊寅进沈与求知枢密院事己卯尊宣和皇后为皇太后庚辰以吕颐浩为少保兼
行宫留守孟庾罢甲申以刘光世为少师万寿观使夏
四月癸巳筑太庙于建康以临安府太庙为圣祖殿丁未岳飞乞解官持余服遂弃军去
诏不许庚戌以兵部侍郎兼都督府参议军事张宗元
权湖北京西宣抚判官监其军五月癸未以邴琼为行营左护军副都统制丙戌伪齐陷
随州六月乙巳沈与求薨秋七月甲戌嗣濮王仲湜薨
癸未以久旱命中外臣庶实封言事甲申蠲诸路民积年逋租乙酉诏即建康权正社稷
之位己丑诏诸路归业民垦田及八年始输全税八月
乙未以张俊为淮西宣抚使杨沂中为淮西制置使主管侍卫马军司刘锜副之命邴琼

率兵赴行在戊戌琼杀中书统制张景等执吕祉及赵康直赵不羣以叛奔刘豫壬寅酈琼引兵至淮杀祉及康直释不羣使还命张宗元往招之甲辰以赵鼎为万寿观使兼侍读九月壬申张浚罢甲戌落张浚观文殿大学士仍领宫祠丙子复以赵鼎为尚书左仆射同中书门下平章事兼枢密使戊寅蠲庐州寿春府民租一年己卯朝献圣祖于常朝殿庚辰朝飨太庙辛巳合祭天地于明堂大赦戊子禁诸路进羨余以刘锜知庐州兼淮西制置副使冬十月丁酉敕张浚安置岭表戊戌改永州居住伪齐犯泗州守臣刘纲击走之壬子统制呼延通王权等袭击金人于淮阳军闰月乙丑蠲江东路月桩钱振京西湖北饥民庚辰韩世忠引兵渡淮逆击金人于刘泠庄辛巳李纲罢癸未复汉阳军是月张俊弃盱眙十一月丁酉以知温州李光为江西安抚制置大使丁未金帅达兰乌珠入汴京执伪齐刘豫废为蜀王癸丑诏来春复幸浙西是月伪齐知临汝军崔虎诣岳飞降十二月丁卯祔徽宗皇帝显肃皇后神主于太庙庚午以解潜权主管马步军司命韩世忠屯楚州癸未王伦等使还入见言金人许还梓宫及皇太后又许还河南诸州丁亥复遣王伦等奉迎梓宫是冬吴玠遣裨将马希仲攻熙州郑宗李进攻巩州不克

钦定续通志卷三十四

●钦定续通志卷三十五 宋纪十一

宋纪 【十一】

高宗 【二】

○高宗二

绍兴八年春正月戊子朔帝在建康丙申减临安府夏税折输钱戊戌张守罢辛丑伪齐知寿州宋超率兵民来归蔡州提辖白安时执其守刘永寿来降诏以方议和好禁沿海州郡过淮招纳戊申以兵部侍郎胡世将为四川宣抚制置使二月戊午减建康府夏税折输钱蠲逋租和市科调庚申以吕颐浩为江东安抚制置大使兼行宫留守癸亥帝发建康戊寅帝至临安己卯以户部尚书章谊为江东安抚制置大使兼行宫留守吕颐浩为醴泉观使甲申减绍兴府和市绢三月己丑以知南外宗正事仲偁嗣濮王庚寅以礼部尚书刘大中参知政事兵部尚书王庶为枢密副使壬辰复以秦桧为尚书右仆射同中书门下平章事兼枢密使甲午陈与义罢己亥蠲农器及牛税以李天祚为静海军节度使交址郡王丁未蠲所过州县民积欠戊申蠲江西湖南诸州月桩钱夏四月庚申初置户部和余场于临安壬戌遣王庶巡视江淮边防五月丁未金使乌陵思谋石庆充与王伦等偕来戊申以资政殿学士叶梦得为江东宣抚制

置大使六月壬戌赐衍圣公孔玠衢州田五顷奉先圣祠事秋七月乙酉复命王伦及蓝公佐奉迎梓宫八月甲子蠲江东路月椿钱冬十月丁巳刘大中罢甲戌赵鼎罢丁丑金使张通古萧哲与王伦偕来十一月甲申以翰林学士承旨孙近参知政事丙戌遣大理寺丞薛惊朱斐诣广南路决滞狱戊戌王伦入见己亥复以伦为国信计议使庚子以孙近兼权同知枢密院事辛丑诏金国遣使入境欲朕屈己就和命侍从台谏详思条奏甲辰王庶罢辛亥除枢密院编修官胡铨名昭州编管壬子改差监广州都盐仓十二月甲寅以赵鼎为醴泉观使乙卯以宗正少卿冯楫为国信计议副使己未以吏部尚书李光参知政事甲戌以端明殿学士韩肖胄签书枢密院事乙亥命肖胄等为金国奉表报谢使丁丑诏金国使来尽割河南陕西故地通好于我许还梓宫及母兄亲族余无需索令尚书省榜谕庚辰帝不御殿命秦桧摄冢宰受书以进是月虚恨蛮犯嘉州忠镇砦是岁始定都于杭州

九年春正月壬午朔帝在临安【按前每年正月书帝在某府某州盖以时方播迁藉此以标进止而非如唐纪帝在房州之例谓仿春秋书法也自此定都于杭故于九年之春一书帝在临安后遂不复书矣】丙戌以金人通和大赦河南新复州军蠲其租三年役五年以王伦同签书枢密院事充奉护梓宫迎请皇太后交割地界使戊子遣判大宗正事士■〈亻襄〉兵部侍郎张焘诣河南修奉陵寝庚寅赐刘光世号和众辅国功臣张俊加少傅安民靖难功臣韩世忠为少师张浚复左宣奉大王壬辰加岳飞吴玠并开府仪同三司杨沂中太尉癸巳建皇太后宫甲午金宿州守臣赵荣来归丙申金主诏谕河南诸州以割地归我之意戊戌以王伦为东京留守郭仲荀为副户部侍郎梁汝嘉兼江淮荆浙闽广路经制使己亥以吴玠为四川宣抚使二月丁巳以郭仲荀为太尉东京同留守慕洧寇环州壬戌以李刚为湖南路安抚大使张浚知福州寻复资政殿大学士为福建路安抚大使三月丁亥以和州防御使璩为保大军节度使封崇国公丙申王伦受地于金得东西南三京寿春宿亳曹单州及陕西京西之地金乌珠还祁州辛丑以翰林学士楼照签书枢密院事丁未正伪齐所改州县名是春夏人陷府州夏四月庚戌吕颐浩薨辛亥命楼照宣谕陕西诸路癸丑落赵鼎奉国军节度使为特进仍知泉州以金陕西诸路节制使张中孚为检校少保国军节度使知永兴军节制陕西诸路军马甲子以观文殿学士孟庾为西京留守资政殿学士路允迪南京留守丙寅以孙近兼权同知枢密院事五月庚寅奉迎东京钦先孝思殿累朝御容赴临安六月庚戌皇后邢氏崩于五国城

辛亥夏国主干顺卒己巳吴玠薨癸酉泮州军事推官
韩絀坐上书论和议之失送循州编管乙亥以孟庾兼东京留守王伦自东京赴金国议
事楼照承制以杨政为熙河经略使吴璘为秦凤经略
使仍并听四川宣抚司节制郭浩为鄜延经略使同节制陕西军马秋七月甲申以文臣
为新复诸县令丙戌东京耆老李茂松寇璋等二百人
奉表称贺丁亥金人拘王伦于中山八月丙辰金国以达兰主和割地杀之壬戌蠲成都
潼川路岁输对余等米及水运钱乙丑给新法度牒紫
衣师号钱付陕西市军储庚午遣苏符等使金贺正旦九月己卯命鄜延秦凤熙河路招
纳蕃部熟户及陷没夏国军民丙戌封叔士■〈亻 裹
〉为齐安郡王冬十月王伦遣其副蓝公佐先归己未蠲阶成岷凤四州民税之半十一月
癸未嗣濮王仲偃薨十二月甲子李光罢

十年春正月丙戌遣莫将等充迎护梓宫奉迎两宫使辛卯李纲薨二月辛亥以刘
锜为东京副留守李显忠为南京副留守丁卯以孟庾
知开封府为东京留守仇愈知河南府西京留守三月丙申苏符自东京还丁酉命川陕
宣抚司军事不及待报者听随宜措置己亥以郭浩知
永兴军兼节制陕西诸路军马杨政徙知兴元府是月命胡世将与夏人议入贡夏人不
报夏四月壬申韩肖胄罢五月己卯金乌珠等分四道
来攻乙酉乌珠入东京留守孟庾以城降知兴仁府李师雄知淮宁府李正民及河南诸
州继降丙戌金人破拱州守臣王慥死之萨里罕自河
中趋永兴军陕西州县皆降丁亥金人破南京留守路允迪降己丑金人破西京留守李
利用弃城走癸巳知亳州王彦先叛降于金金人破永
兴军趋凤翔己亥命刘光世为三京招抚处置使庚子以吴璘同节制陕西诸路军马听
胡世将便宜黜陟处置军事辛丑金人攻凤翔府之石
壁砦吴璘遣统制姚仲等拒却之金人围耀州郭浩救之金兵解去壬寅金人围顺昌府
三路都统葛王裒以大军继至刘锜力战却之六月甲
辰以韩世忠张俊岳飞并兼河南北诸路招讨使乙巳刘锜遣将阎充击金人于顺昌之
李村丁未罢建康府行宫营缮戊申以刘锜为沿海制
置使己酉吴璘克扶风壬子乌珠帅孔彦舟郾琼赵荣等攻顺昌府刘锜率将士力战败
之乙卯乌珠还以知平江府梁汝嘉兼浙西沿海制置
使丙辰岳飞将牛皋击金人于京西己未郭浩复醴州壬戌诏诸司钱物量留经费外悉
发以贍军楼照以父丧去位甲子萨里罕攻青溪岭鄜
延经略使王彦击之萨里罕还屯凤翔命士■〈亻 裹〉主奉濮王祠事遣司农少卿李
若虚诣岳飞军谕指班师飞不听庚午以刘锜为武泰
军节度使侍卫马军都虞候是月金人围庆阳府岳飞与金人战于蔡州遂复蔡州闰月

癸酉张俊遣统制宋超击金兵于永城县甲戌削孟庾路允迪官金人攻泾州守臣曲汲弃城去经略使田晟救泾州甲申晟及金人再战于泾州金人引归凤翔乙酉降陕西杂犯死罪以下丙戌以胡世将为端明殿学士吴璘为镇西节度使杨政武当节度使郭浩奉国节度使王德攻金人于宿州降其守马秦丁亥释顺昌府流以下囚再复租二年己丑永兴军钤辖傅忠信击金人于华阴壬辰岳飞遣统制张宪击金将韩常于颍昌府遂复颍昌府丙申复淮宁府丁酉赵鼎分司兴化军居住岳飞遣统制郝晟等与金人战于郑州北复郑州李兴复汝州进复伊阳等八县李成遁去韩世忠遣统制王胜王权攻海州克之戊戌张俊率统制宋绍等及王德兵会于城父县遂复亳州己亥金人救海州王权等逆击之复怀仁县 【宋史怀仁作怀二据九域志改】庚子张俊弃亳州还寿春再贬赵鼎漳州居住又贬清远军节度副使潮州安置秋七月癸卯岳飞遣张应韩清入西京会李兴复永安军丙午以御史中丞王次翁参知政事己酉岳飞及乌珠战于郾城县庚戌曲赦海州永兴军统领辛镇及金人战于长安城下癸丑以杨沂中为淮北宣抚副使刘锜为判官甲寅岳飞遣统制杨再兴王兰等击金人于小商桥死之乙卯金人攻颍昌岳飞遣王贵姚政合兵击败之壬戌飞自郾城还军军溃颍昌蔡郑诸州皆复为金有乙丑增收州县头子钱为激赏费金人围淮宁府赵秉渊弃城走辛未金人攻盩厔县王俊逆战于东洛谷却之八月壬申黜张九成喻樾陈刚中凌景夏樊光远毛叔度元盥等七人乙亥韩世忠围淮阳军不克庚辰韩世忠袭郾琼等军于千秋湖陵破之壬午李成犯西京李兴击却之丁亥杨沂中自宿州夜袭柳子镇军溃金人屠宿州甲午川陕宣抚司统领王喜等击金人于沂阳县九月壬寅遣起居舍人李易谕韩世忠罢兵诸大帅皆还镇丁未杨政遣统制杨从仪夜袭金人于凤翔府戊申金人复入西京李兴弃城去庚戌合祀天地于明堂大赦戊辰以郭浩知金州节制陕西河东军马兼措置河东忠义军是秋知代州王忠植复石代等十一州冬十月癸酉复张浚观文殿大学士甲戌以王忠植为建宁军承宣使河东路经略安抚使庚辰金人攻庆阳府守臣宋万年以城降辛卯金人攻陕州吴琦击却之庚子金人袭洮州攻铁城堡统制孔文清惠逢击却之是月胡世将命王忠植救庆阳叛将赵惟清执之降于金忠植死之十一月丁未金将喀齐喀复攻陕州吴琦击却之又攻宝鸡县凤翔统制杨从仪却之壬子以令廕为保宁军节度使

十一年春正月癸卯杨从仪击金人于渭南丁巳金人破寿春府庚申金人渡淮丙

寅金人破庐州戊辰又破商州二月癸酉张俊遣王德
渡江屯和州金人退屯昭关知商州邵隆复商州乙亥金人复来争和州张俊拒之命韩
世忠以兵援淮西丙子趣岳飞会兵蕲黄王德等击金
人于含山县东己卯统制关师古李横复巢县癸未王德田师中等复含山县夺昭关刘
锜自东关击金人于青溪甲申李显忠遣统领崔皋击
金人于舒城丁亥杨沂中刘锜等败乌珠军于柘皋己丑乌珠亲率兵逆战于店步沂中
等又败遂复遂庐州是月虔吉州盗贼悉平三月癸卯
复张俊特进金人围濠州甲辰张俊杨沂中刘锜议班师丙午释淮西杂犯死罪以下丁
未金人破濠州钤辖邵青死之戊申张俊遣杨沂中王
德入濠州遇金伏兵败还己酉韩世忠至濠州不利而退辛亥岳飞次定远县还屯舒州
杨沂中归行在壬子金人渡淮北归癸丑张浚归建康
府丁巳刘锜归太平州甲子行营统制张彦及金人遇于汧阳之刘坊砦第八将张宏战
没夏四月己卯孙近罢辛巳以王次翁兼权同知枢密
院事韩世忠张俊岳飞相继入覲壬辰以世忠俊并为枢密使岳飞枢密副使乙未张浚请
以所部兵隶御前罢三宣抚司改统制官为御前统制
官各屯驻旧所丙申以广西经略使胡舜陟节度广东湖南兵趣讨骆科慕洧破新泉砦
又攻会州将官朱勇破之五月丁未遣张俊岳飞于楚
州巡视边防召刘光世赴行在庚申加杨沂中检校少保开府仪同三司六月乙亥加秦
桧特进尚书左仆射同中书门下平章事兼枢密使乙
丑明州僧王法恩等谋反伏诛壬辰刘光世罢为万寿观使秋七月庚子以翰林学士范
同参知政事以旱减膳祈祷遣官决滞狱出系囚丁未
加秦桧少保甲寅罢刘锜兵命知荆南府己未加张俊太傅是月命张俊复如镇江措置
军务留岳飞行在八月戊申立祚德庙于临安祀韩厥

【谨按通鉴辑览 御批宋之于盾衰亦犹唐之于李耳然李耳犹谬藉其有玄元圣祖之称至于盾衰不过列国一陪臣耳有何华胄之足炫且是时两宫未还陵寝未复顾沾沾于祚德庙以为追远报功其所以为荣即所以取辱焉耳】 甲戌罢岳飞癸巳胡世将起复九月鄂州前
军副统制王俊告副都统制张宪谋叛张俊收宪属吏以闻辛亥吴玠拔秦州壬子玠率
姚仲及金人战于丁刘圈杨政克陇州破岐下诸屯郭
浩复华州入陕州丙申以刘光远等充金国通问使吴玠及金人战于剡家湾大败之遂
围腊家城癸亥玠自腊家城受诏班师杨政郭浩皆引
军还乙丑邵隆复虢州郝晟禽骆科斩之冬十月丙寅金人破泗州遂破楚州戊辰杨政
及金人战于宝鸡县败之乙亥金乌珠遣制光远等还
戊寅下岳飞张宪大理狱壬午遣魏良臣王公亮为金国稟议使乙酉虚恨蛮主厯阶诣

嘉州降癸巳韩世忠罢为醴泉观使封福国公是月金人破濠州邵隆复陕州十一月己亥范同罢责李光为建宁军节度副使藤州安置辛丑金乌珠遣审议使萧毅邢具瞻与魏良臣等偕来丁未范同分司筠州居住壬子萧毅等入见始定议和盟誓乙卯以何铸签书枢密院事充金国报谢进誓表使庚申遣官告祭天地宗庙社稷辛酉以张浚为检校少傅崇信军节度使万寿观使是月与金国定和立盟书约以淮水中流为界割唐邓二州界之岁奉银二十五万两绢二十五万匹诏川陕宣抚司毋出兵生事招纳叛亡十二月丁卯责降徽猷阁待制刘洪道为濠州团练副使柳州安置乙亥乌珠遣何铸等如会窻见金主且趣割陕西余地遂命周聿莫将郑刚中分画京西唐邓陕西地界癸巳赐岳飞死于大理寺斩其子云及张宪于市家属徙广南官属于鹏等论罪有差

十二年春正月癸卯罢枢密行府庚申责孙近分司漳州居住二月丁丑加建国公瑗检校少保进封普安郡王己卯赐杨沂中名存中辛卯蠲广南东西路骆科所扰州县今年租癸巳金主许归梓宫及皇太后遣何铸等还夏四月甲子以孟忠厚为迎护梓宫礼仪使王次翁为奉迎两宫礼仪使丁卯皇太后偕梓宫发五国城辛巳皇后邢氏崩讣初至五月甲午以郑刚中为川陕宣抚副使乙未遣审诏远等贺金主生辰置准西京西陕西诸路榷场六月甲子命侍从台谏礼官杂议权奉攒宫戊辰以万俟卨为攒宫按行使辛未责王庶为向德军节度副使道州安置壬午金人归孟庾李正民甲申以吴玠为检校少师阶成岷凤四州经略使秋七月壬辰福州签判胡铨除名新州编管己亥以何铸兼权参知政事乙卯蠲广南湖北沿边州军免行钱八月辛酉乌珠使来求商州及和尚方山二原丙寅何铸罢甲戌以万俟卨参知政事充金国报谢使壬午皇太后至己丑徽宗及显肃懿节二后梓宫至是月郑刚中画陕西地界割商秦之半畀金存上津丰阳天水三县及陇西成纪余地弃和尚方山二原以大散关为界九月乙未以孟忠厚为枢密使充攒宫总护使壬寅大赦乙巳加秦桧太师封魏国公丙午金使刘筈完颜宗表等九人入见戊申以王次翁等充金国报谢使藏金国誓书于内侍省辛亥加张中孚开府仪同三司中彦靖海军节度使甲寅杖杀伪福国长公主李善静以金州郭浩为金房开达四州经略安抚使遣杨愿使于金贺正旦冬十月乙丑始听中外用乐丙寅权攒徽宗皇帝及显肃皇后于会稽永固陵懿节皇后祔乙亥以翰林学士陈克俊签书枢密院事权参知政事丁丑以皇太后回銮推恩进封秦桧为秦魏两国公辞不

拜庚辰责御史中丞何铸为秘书少监徽州居住甲申皇太后生辰上寿于慈宁宫十一月癸巳枢密使张浚罢进封清河郡王乙未加杨存中少保辛丑刘光世薨十二月癸酉以李显忠为保信军节度使御前选锋军统制王进为御前诸军都统制

十三年春二月乙亥蠲雷化等十州免行钱丙子造金象革木四辂庚辰立太学及科举试法乙酉建景灵宫奉安累朝神御三月巳亥造鹵簿仪仗乙巳建社稷坛丙午筑圜丘振淮南饥民仍禁遏余夏四月癸亥颁乡饮酒仪于郡国闰月己丑立贵妃吴氏为皇后庚戌杨政加检校少保壬子蠲诸路无名月椿钱乙卯王次翁罢五月甲子责张九成南安军居住六月壬寅程克俊罢以万俟卨兼权签书枢密院事庚戌金遣洪浩张邵朱弁来归秋七月甲子诏求遗书丙寅处州卒杨兴等谋乱伏诛壬申蠲浙西贫民逋负丁盐钱八月丙戌遣吏部侍郎江邈奉迎累朝神御于温州己亥遣郑朴等使金贺正旦王师心等贺金主生辰九月戊寅蠲淮南逋欠坊场钱及上供帛冬十月庚寅制浑天仪乙未奉安累朝帝后神御于景灵宫十一月庚申日南至合祀天地于圜丘太祖太宗并配大赦十二月癸未朔日食不见癸巳建秘书省丁酉增太学弟子员二百己酉金遣完颜煜等来贺明年正旦是月始颁来岁历于诸路监司守臣

十四年春正月丁巳遣罗汝楫等报谢于金二月癸巳蠲江浙诸路逋欠钱帛丙午万俟卨罢己酉以资政殿学士楼照签书枢密院事兼权参知政事加郭浩检校少保三月乙卯蠲江浙京湖积欠上供钱米丁卯避金太祖嫌名改岷州为西和州己巳如太学蠲汀漳泉建四州经贼所扰民赋役一年壬申解潜责授濠州团练副使南安军安置己卯诏举贤良夏四月甲申诏刑部及监司决滞讼丁亥初禁野史甲午金人来求淮北人之在南者诏愿还者听五月甲子楼照罢乙丑以御史中丞李文会签书枢密院事兼权参知政事己巳金始遣乌雅和等来贺天申节六月甲申蠲江浙州县酒税坊堤纲运仓库积年逋负孙近再夺三官移南安军居住丁亥加高世则少保乙未振江浙福建被水民庚子夺万俟卨三官归州居住秋七月戊午金人杀王伦于河闲府八月乙未遣林保使金贺正旦宋之才贺金主生辰九月辛酉以吴璘为利州西路安抚使杨政利州东路安抚使壬申赵鼎移吉阳军安置癸酉命临安府索蔡京子孙逮赴贬所遇赦永不量移冬十月甲午黜伊川程氏之学乙未加韦渊少师己亥永蠲永道郴三州桂阳监及茶陵县民身丁钱绢米麦十一月癸酉李光移琼州安置乙亥朱胜非薨十二月丁酉李文会罢寻责筠州居住庚子以御史中丞杨愿签书枢密院事兼参知政事癸卯金遣布

萨温等来贺明年正旦是月汀贼华齐寇漳州长泰县
安抚司遣兵讨之为所败将佐赵成等死之是岁四川宣抚司始取民户称提钱岁四十
万缗以备军费

十五年春正月丁未朔御大庆殿初行大朝会礼辛酉初置藉田夏四月丙子赐秦
桧第一区癸未以星变避殿减膳命监司郡守条上便
民事宜提刑巡行决狱丁亥大赦五月甲子金遣完颜宗尹等来贺天申节六月乙亥朔
日有食之乙酉加秦桧妻妇子孙官封秋七月蠲庐光
二州上供钱米一年丁卯免汀漳二州秋税及处州三县被水民絀绢鄂州旧额绢各一
年己巳蠲四川转运司积贷常平钱八月甲戌禁收折
帛令零钱止输实数乙亥蠲京西路请佃田租及州县场务税二年九月辛酉遣钱周林
使金贺正旦严抑贺金主生辰冬十月乙亥帝书一德
格天之阁赐秦桧仍就第赐宴丙子杨愿罢癸未以枢密都承旨李若谷签书枢密院事
兼权参知政事武冈军猛人杨再兴降庚寅以翰林学
士承旨秦熺为资政殿学士提举万寿观兼侍读恩数视执政癸巳蠲安丰军上供钱米
二年甲午以汪勃言折彦质党赵鼎柳州安置辛丑命
秦熺班签书枢密之下十一月丙辰郭浩卒丙寅全给秦桧岁赐公使钱万缗十二月丁
卯金遣富察说等来贺明年正旦

十六年春正月戊子增太学外舍生额至千人壬辰亲飨先农于东郊行藉田礼二
月辛丑割金州丰阳县洋州干佑县畀金人癸丑建秦
桧家庙三月辛卯造秦桧家庙祭器乙未增建太庙夏四月壬子禁州县预借民税及和
买钱五月丁亥金遣乌库哩海等来贺天申节秋七月
壬申张浚落节钺连州居住壬辰立秘书省献书赏格八月壬子遣边知白使金贺正旦
周执羔贺金主生辰九月甲戌命端明殿学士何铸等
为金国祈请使请国族冬十一月丙子合祀天地于圜丘大赦庚辰罢州县新刱税场十
二月辛酉金遣卢彦伦等来贺明年正旦

十七年春正月己巳命诸路收试中原流寓士人已卯禁监司郡守进羨余壬辰以
李若谷参知政事御史中丞何若签书枢密院事癸巳
进秦熺为资政殿大学士二月辛酉李若谷罢三月乙亥何若罢己卯以翰林学士段拂
参知政事乙酉改封秦桧为益国公戊子改命张俊为
静江宁武靖海军节度使韩世忠镇南武安宁国军节度使落李若谷资政殿学士江州
居住夏四月丙申蠲诸路免行钱三之一己亥以御史
中丞汪勃签书枢密院事己未诏赵鼎遇赦永不检举五月甲子诏举贤良己巳洪皓责
濠州团练副使英州安置辛巳金遣完颜卞等来贺天
申节六月戊午改命普安郡王瑗为常德军节度使恩平郡王璩武康军节度使秋七月

卅巳以徽猷阁待制知成都府李璆权四川宣抚使戊子以吴璘充御前诸军都统制兼知兴州八月癸卯赵鼎薨于吉阳军戊申遣沈该使金贺正旦詹大方贺金主生辰九月己巳减四川科率虚额钱乙亥蠲江南东西道诸州月椿钱丙子郑刚中罢丙戌减江浙诸州折帛钱冬十月辛卯朔日有食之己酉进杨存中为少傅十二月甲寅郑刚中落职桂阳监居住丙辰金遣完颜宗藩等来贺明年正旦

十八年春正月己巳如天竺寺遂如玉津园二月乙未段拂罢寻落职兴国军居住以汪勃兼权参知政事辛亥听赵鼎归葬三月戊寅罢汀州诸县上供银蠲茶铅本钱之半壬午以秦熺知枢密院事乙酉禁民私渡淮及招纳叛亡夏四月戊子朔日有食之庚子秦熺乞避父子共政以为观文殿学士提举万寿观兼侍读提举秘书省壬寅命熺恩礼视宰臣班次亚右仆射五月丙子金遣萧秉温等来贺天申节癸未李显忠降平海军承宣使台州居住甲申以李璆为四川安抚制置使秋八月丙申汪勃罢丁酉以工部尚书詹大方签书枢密院事兼权参知政事禁州县土民饰词举留官吏闰月庚申免江浙湖南今岁和余壬申遣王墨卿使金贺正旦陈诚之贺金主生辰甲申辛道宗降官房州羁管九月丙午詹大方薨冬十月丙辰以御史中丞余尧弼签书枢密院事兼权参知政事十一月己亥胡铨移吉阳军编管壬寅郑刚中责濠州团练副使复州安置辛亥振绍兴府饥十二月乙卯振明越秀润徽婺饶信诸州流民丙寅借给被灾农民春耕费丁卯命利路三都统措置营田以其租充减免对余之数戊辰蠲被灾下户积欠租庚辰金遣召守忠等来贺明年正旦

十九年春正月癸卯如天竺寺遂如玉津园三月癸未朔日有食之甲辰郑刚中移封州安置夏四月丙寅秘阁修撰张邵上秦桧在金代徽宗与纳罕书藁诏付史馆以邵为徽猷阁待制五月壬午蠲汀漳泉三州被贼所扰民田二税庚子金遣唐古德温等来贺天申节丁未减连英循惠新恩六州免行钱六月丁巳停茶陵县丞王庭珪官辰州编管秋九月戊申命绘秦桧像仍作赞赐之冬十月己未湖南副总管辛永宗停官肇庆府编管十一月壬辰合祀天地于圜丘大赦十二月丁巳金岐王亮弑其主亶自立己未诏无子女户得解举人太学生之独居者并免役丁丑金遣完颜究等来贺明年正旦

二十年春正月壬辰礫殿前司军士施全于市二月庚戌蠲静江府昭州上供折布钱三之一庚申免海外四州及泸叙二州长窳军经界三月庚辰金遣完颜思恭等来报即位癸未以余尧弼参知政事给事中巫伋签书枢密院事丙戌遣尧弼等贺金主即位戊子以秦熺为观文

殿大学士万寿观使丙申诏李光遇赦永不检举编管胡寅程瑀潘良贵张焘等庚子以巫伋兼权参知政事壬寅胡寅责果州团练副使新州安置夏四月壬子以没入官田悉归常平司禁募民佃种癸酉置力田科募江浙福建民耕两淮闲田是月信州妖贼黄曾等作乱陷贵溪县江西兵马钤辖李横等讨平之五月癸未秦桧上中兴圣统甲午金就遣完颜思恭等来贺天申节六月癸亥加秦熺少保秋八月甲辰量移张浚永州孙近虔州万俟卨沅州李若谷饶州李文会江州段拂南康军并居住辛酉遣陈诚之使金贺正旦王曦贺金主生辰冬十月秦桧有疾庚午命执政赴桧第议事十一月甲子桧始朝命肩輿入宫门二孙扶掖升殿不拜己巳金遣萧颐等来贺明年正旦

二十一年春正月癸未以两淮民复业未久宽其租庚子蠲平江府折帛钱三年二月壬戌遣巫伋等为金国祈请使请归渊圣皇帝及皇族癸亥以余尧弼兼签书枢密院事三月丁亥蠲江浙荆湖等路中户以下积年逋负夏五月戊午金遣刘长言等来贺天申节以吴璘杨政田师中并为太尉秋七月壬寅以集英殿修撰知衢州曹筠为四川安抚制置使辛亥罢柴米税八月壬申韩世忠薨诏进太师癸酉追封通义郡王乙亥加岳阳军节度使士樽开府仪同三司充万寿观使甲申遣陈夔使金贺正旦陈相贺金主生辰九月巫伋使还所请皆不许冬十月壬午进张俊为太师十一月庚戌余尧弼罢丁巳进义副尉刘允中坐指斥谤讟弃市十二月癸巳金遣富珠哩定方等来贺明年正旦

二十二年春三月丁酉以王庶二子之奇之荀谤毁朝政并除名之奇梅州之荀容州编管甲辰以直龙图阁叶三省监都作院王远通书赵鼎王庶力诋和议言涉谤讟三省落职筠州居住远除名高州编管夏四月丙子巫伋罢辛巳以御史中丞章夏签书枢密院事兼权参知政事五月癸丑金遣田秀颖等来贺天申节秋七月丁巳虔州军卒齐述杀殿前司统制吴进江西同统领马晟据州叛八月己卯遣鄂州都统制田师中发兵同江西安抚使张澄殿前司游奕军统制李耕讨述九月乙未又遣左翼军统制陈敏相继讨之癸丑章夏罢冬十月甲戌以御史中丞宋朴签书枢密院事兼权参知政事就命李耕知虔州十一月戊申合祀天地于圜丘大赦丁巳李耕入虔州尽诛叛兵虔州平十二月辛酉朔减夔州路及蒲江涪井两监盐钱戊子金遣张利用等来贺明年正旦

二十三年春正月癸卯进韦渊太傅己酉复以李显忠为盩厔军节度使二月癸亥如玉津园遂至延祥观庚午裔虔州军贼黄明等八人于都市三月丙午齐安郡王士■〈亻 裹〉薨于建州是春金主亮徙都燕京夏五月乙

已复以萧振为四川制置使辛亥金遣赫舍哩大雅等
来贺天申节秋七月戊戌命合州取綦崇浓草秦桧罢相制所受墨敕八月乙丑士擢薨
己卯赐秦桧建康府永丰圩田九月甲午振潼川被水
州县仍蠲其赋冬十月戊午遣吴■〈〈鹵，欠代义〉上木下〉使金贺正旦施巨贺
金主生辰戊辰宋朴罢壬申以右谏议大夫史才签书
枢密院事兼权参知政事十二月癸亥韦渊薨庚戌金遣蔡松年等来贺明年正旦

二十四年春正月辛未如延祥观二月丙午加吴益大尉三月壬申杨再兴复寇边
前军统制李道讨平之夏五月癸丑朔日有食之衢州
民俞八作乱围州城通判州事汪召锡拒却之遂掠严州寿昌县遣殿前司正将辛立讨
平之辛未金遣耶律安礼等来贺天申节六月癸巳史
才罢甲午以御史中丞魏师逊签书枢密院事兼权参知政事以主管侍卫马军司成关
为庆远军节度使秋七月癸丑张俊薨壬戌捐四川茶
马司羨余钱给军费甲子复落萧振职池州居住乙丑以总领财赋符行中为四川制置
使乙亥南丹州莫公晟及宜州界外诸蛮纳土内附八
月甲午罢温州市黄柑福州贡荔枝冬十月壬午蠲旱伤州县租戊子遣沈虚中使金贺
正旦张士襄贺金主生辰十一月乙丑魏师逊罢丁卯
以权吏部侍郎施巨参知政事郑仲熊签书枢密院事戊辰进秦熺少傅封嘉国公是月
以通判武冈军方畴通书胡铨除名永州编管十二月
乙巳金遣白彦恭等来贺明年正旦

二十五年春二月乙酉以镇江都统制刘宝为安庆军节度使建康都统制王权为
清远军节度使壬寅以通判常州沈长卿仁和县尉芮
煜作诗讥讪除名长卿化州煜武冈军编管夏四月乙酉施巨罢以郑仲熊兼权参知政
事己亥减广西路折米钱五月丁未朔日有食之戊申
减诸路免行钱癸丑前知泉州宗室令衿坐交结罪人汀州居住乙丑金遣李通等来贺
天申节六月庚辰郑仲熊罢辛巳以礼部侍郎汤思退
签书枢密院事兼权参知政事癸卯以言者追赞岳飞改岳州为纯州岳阳军为华容军
秋七月丙辰减四川绢估税斛盐酒等钱蠲州县积欠
诏四川营田有占民田者常平司按验给还甲戌封李天作为南平王八月丁丑申严诬
告加等法丙戌以吏部侍郎董德元参知政事蠲诸路
身丁地丁钱一年冬十月壬午遣王岷使金贺正旦郑柟贺金主生辰丙申进封秦桧建
康郡王熺为少师并致仕以汤思退兼权参知政事是
夕桧薨丁酉桧姻党户部侍郎兼知临安府曹泳停官新州安置朱敦儒薛仲邕王彦傅
杜思旦皆罢辛丑徙殿中侍御史徐嘉右政言张扶皆
出为他官十一月壬子以敷文阁直学士魏良臣参知政事癸亥合祀天地于圜丘大赦

乙丑复洪皓官释张祈狱封叔和州防御使右监门卫
大将军士儻为崇庆军节度使嗣濮王福建路提刑令詔为利州观察使安定郡王十二月
甲戌诏张浚折彦质万俟卨段拂听自便量移李光
郴州安置乙亥复以高为资政殿学士提举万寿观兼侍读戊寅郑亿年责建武军节度
副使南安军安置甲申召孟忠厚奉朝请命胡寅张九成等二十八人并令自便仍复其官乙酉董德元罢丙戌以刘锜知潭州甲午以敷文阁
待制沈该参知政事丙申复以萧振为四川制置使复
张浚折彦质赵汾叶三省王趯刘岑官移胡铨衡州己亥金遣耶律归一等来贺明年正
旦

二十六年春正月壬子省诸州税场以宽商贾甲子追复赵鼎孙近郑刚王汪藻旧
职丙寅曹泳吉阳军编管封伯令衿明州观察使安定
郡王戊辰除民事律蠲诸路积负及黄河竹索钱二月庚辰罢进奏院定本朝报乙酉进
士林东英州编管右朝奉郎林一飞责监高州盐税辛
卯魏良臣罢三月甲寅以边事已定罢宰相兼领枢密使丁巳诏两淮边民未复业者复
其租十年己未以万俟卨参知政事癸亥加吴璘开府
仪同三司乙丑以东平府进士梁勋伏阙上书言北事送千里外州军编管丙寅诏曰讲
和之策断自朕志秦桧但能赞朕而已岂以其存亡而
渝定议耶近者无知之辈鼓倡浮言以惑众听至有伪撰诏命召用旧臣抗章公交车妄
议边事朕甚骇之自今有此当重寘典宪丁卯蠲闽浙诸
州岁供军器所物料三之一减诸州工匠己巳募四川民佃淮南京西闲田并边复租十
年次边五年夏四月庚寅遣陈诚之等贺金主尊号礼
成五月壬寅以沈该为尚书左仆射万俟卨为右仆射是月靖康帝崩于金以汤思退知
枢密院事丙辰蠲楚州盱眙军民租十年己未金遣敬
嗣暉等来贺天申节六月丁丑以端明殿学士程克俊参知政事辛卯命史馆重修日历
秋七月壬寅蠲诸路丁绢一年丙午右奉议郎薛仲邕
连州编管丁未以星变避殿减膳八月己丑蠲建康府积欠内帑钱帛辛卯程克俊罢甲
午以吏部侍郎张纲参知政事九月乙巳以翰林学士
陈诚之同知枢密院事冬十月己巳诏许秦桧在位之日无辜被罪者自陈厘正甲午蠲
郴道永三州桂阳军民身丁米乙未王会移琼州编管
宋觐责梅州安置丁酉以张浚上书论用兵依旧永州居住辛丑遣李琳使金贺正旦葛
立方贺金主生辰闰月丙午罢廉州贡珠纵蚕丁自便
己酉命离军人愿归农者人给江淮湖广荒田百亩复其租税十年十二月甲子金遣梁
■〈石求〉等来贺明年正旦

二十七年春正月乙酉如延祥观二月庚子杨政卒戊午以御史中丞汤鹏举参知

政事癸亥加刘锜太尉三月丁亥诏焚交趾所贡翠羽于通衢仍禁宫人服用销金翠羽己丑减三川对余米夔路激赏绢两川绢估及茶司引息虚额钱辛卯万俟卨卒甲午除耕牛税五月癸未金遣耶律守素等来贺天申节六月戊申以汤思退为尚书右仆射同中书门下平章事庚戌复余深黄潜善并观文殿大学士秋七月乙亥以龙图阁学士李文会为四川安抚制置使八月乙未以汤鹏举知枢密院事九月癸酉张纲罢戊寅以吏部尚书陈康伯参知政事蠲淮南京西湖北积欠内藏钱帛冬十一月癸亥朔减福建盐钞钱乙丑遣孙道夫使金贺正旦辛巳遣刘章贺金主生辰丁亥汤鹏举罢戊子蠲庐州二税及上供钱米一年十二月甲午诏广南经略市舶司察蕃商假托入贡戊午金遣高思廉等来贺明年正旦

二十八年春正月己卯幸延祥观遂至玉津园壬午禁诸路税折纳增价乙巳以王纶荐授布衣郑樵迪功郎令缮所著通志以进二月丙申以陈诚之知枢密院事乙巳以工部侍郎王纶同知枢密院事三月辛酉朔日有食之戊子责秦桧党宋朴徽州居住沈虚中筠州居住夏四月辛亥严州遂安贼江大明寇衢州官军捕斩之五月金遣萧恭等来贺天申节六月甲寅增浙西江东淮东沙田芦场租课秋七月庚申立江西上供米纲赏格乙酉复鬻没官田八月己丑检放风水灾伤州县苗税仍振贷饥民九月庚辰以中书舍人王刚中为四川安抚制置使辛巳封叔建州观察使士鞬为昭化军节度使嗣濮王癸未蠲平江绍兴湖州被水民逋赋冬十月丁亥朔遣沈介使金贺正旦黄中贺金主生辰十一月己卯合祀天地于圜丘大赦十二月庚寅安定郡王令衿薨丁未复李光官放自便戊申蠲楚州归附民赋役五年壬子金遣苏保衡等来贺明年正旦

二十九年春二月丙辰朔以皇太后年八十诣慈宁殿行庆寿礼庚申浚平江二十六浦庚午振湖秀诸州饥民癸酉如延祥观遂至玉津园庚辰禁诸州科卖仓盐癸未蠲沙田芦场为风水所侵者租之半是月金国罢沿边榷场能泗州如旧二月丙戌亦罢沿边榷场存其在盱眙者加吴璘少保己丑禁海商假托风潮私往北界壬辰除临安府岁供修的司钱丁酉蠲四川折估余本积欠钱甲寅取具贬死臣僚姓名议加恩典三月丙子除州县积欠钱及中下户所欠官钱物丁丑诏侍从台谏帅臣监司岁举可任将帅者二人限命官子孙制田减父祖之半己卯除湖州平江绍兴流民公私逋负夏四月壬辰国子司业黄中自金使还言金人将徙居汴京五月甲寅罢鬻福建闪生沙田金遣王可道等来

贺天申节六月甲辰遣王纶等为金国奉表称谢使丁亥禁江淮私渡北人丙申陈诚之罢己亥以陈康伯兼枢密院事辛丑李光卒壬寅以主管步军司赵密为太尉己酉沈该罢闰月丁巳命江湖浙西五漕司增价余米赴沿江十郡自荆至常州以备振贷己未罢江浙淮东沙田芦场所增租课甲子落沈该观文殿大学士致仕罢福建安抚司官卖盐秋七月丁亥以权吏部尚书贺允中参知政事癸巳封权户部侍郎令諝为安定郡王己酉禁诸路抑买官田八月甲子募化人输米行在诸仓愿以茶盐矾钞等偿直者听丁卯除南雄英连三州经界复丁米旧额九月乙酉王纶使还入见言金国和好无他宰相汤思退等称贺甲午以汤思退为尚书左仆射陈康伯为右仆射并同中书门下平章事乙未以皇太后不豫大赦丙申为太后祈福蠲中下户所欠税赋及江浙蝗潦州县租丁酉减僧道免丁钱己亥蠲见监赃罚赏钱庚子皇太后韦氏崩癸卯遣周麟之等为金国奉表哀谢使冬十一月丁亥遣贺允中等为金国遗留国信使丙午权攢显仁皇后于永佑陵十二月辛未以王纶知枢密院事壬申减三省枢密院激赏库及诸书局岁用钱鼎州程昌■〈宀禹〉所增蔡州官兵衣粮钱四之一西和州官卖盐直之半蒋州上供经总制司无额钱如之丙子金遣施宜生等来贺明年正旦

三十年春正月丙申以吏部侍郎叶义问同知枢密院事丁酉罢钧容班乐工及甲库酒局壬寅募人垦淮南荒田二月甲寅罢夔州路榷茶乙卯金遣大怀忠等来吊祭戊午遣叶义问为金国报谢使癸酉立普安郡王瑗为皇子更名玮丙子进封建王三月辛巳免湖北京西宣抚司诸库未输钱癸未以淮东茶盐司钱充募民垦田费乙酉加吴益少保赵密开府仪同三司丙午加恩平郡王璩开府仪同三司判大宗正事始称皇侄夏四月己酉以孙愔为蕲州防御使愷贵州团练使惇荣州刺史丙辰以贺允中兼权同知枢密院事五月丙申金遣萧荣等来贺天申节壬寅落沈该致仕复观文殿大学士知明州丙午加吴益太尉六月庚午王纶罢辛未以江西广东湖南折帛经总制钱及江西米充江州军费秋七月戊戌以叶义问知枢密院翰林学士周麟之同知院事御史中丞朱倬参知政事八月丙子朔日有食之壬子贺允中使还言金人必叛盟宜为之备癸丑允中致仕甲寅复以四川经总制钱给总领所增招兵士壬申淮东总管许世安奏金主亮至汴京起重兵五十余万屯宿州泗州谋南下九月庚寅以带御器械李宝为浙西副总管提督海船驻平江冬十月丁未遣虞允文使金贺正旦徐度贺金主生辰壬戌以刘錡为镇江都统制荆南右军统制李道为都统制癸酉蠲舒和蕲黄四州民附种田租十

一月庚辰禁诸路折输职田租十二月乙巳汤思退罢

初行会子于东南海南黎贼王文满平癸丑命户部立经总制钱十年中数为定额丁卯金遣布萨权等来贺明年正旦

三十一年春正月甲戌朔日有食之丁亥免湖州增丁所输绢壬辰刘宝落节钺福建路居住己亥放张浚胡铨自便二月甲寅罢杨存中

殿前都指挥使进太傅为醴泉观使封同安郡王辛未秦熺卒三月壬午以兵部尚书杨椿参知政事丁亥夺秦熺赠官及遗表恩赏庚寅以陈

康伯为尚书左仆射朱倬右仆射并同中书门下平章事夏四月丁巳以久雨伤蚕麦盗贼间发命侍从台谏条上弭灾除盗之策出天申节银

加充户部余本辛未遣周麟之使金贺迁都壬申权减荆南上供钱银绢丝米之半招填禁军是月金主亮率文武羣臣如汝洛五月癸酉给两

淮民兵荒田己丑命沿淮州郡毋纳北人辛卯金遣高景山王全来贺天申节及求淮汉地且以钦宗皇帝讣闻甲午为钦宗皇帝发丧特诏持

斩衰三年乙未以吴璘为四川宣抚使仍命制置使王刚中同处置军事六月丁未出宫女三百九十人蠲临安府禁军关额钱五年己酉以御

史中丞汪澈为湖北京西宣谕使乙卯以刘锜为淮南江东西浙西制置使戊午命带御器械刘炎同提举措置沿淮盗贼庚申以步军司都统

制戚方提总江上诸军戊辰周麟之辞北行以枢密都承旨徐嘉代之秋七月戊子周麟之分司筠州居住辛卯振给淮南归正人壬辰徐嘉等

至盱眙金主亮亟遣还之是月金主亮徙都汴京命其臣刘萼由唐邓瞰荆襄张中彦王彦章据秦凤窥巴蜀苏保衡完颜郑嘉努由海道趋两

浙八月辛丑忠义人魏胜复海州李宝承制以胜知州事丙午蠲诸路逋欠经总制钱江浙等路上供米丁未蠲淮南京西湖北民秋税之半乙

卯刘锜引兵屯扬州遣统制王刚以兵五千屯宝应丁巳召田师中赴行在以吴拱为鄂州诸军都统制壬戌复以资政殿学士张焘知建康府

己巳起复成闵为湖北京西制置使节制两路军马九月庚午朔命大臣朝飨太庙辛未宗祀徽宗于明堂以配上帝大赦甲戌金人侵黄牛堡

守将李彦坚拒却之金兵遂扼大散关吴璘驻青野原遣将高松等援之庚辰以给事中黄祖舜同知枢密院事乙酉诏刘锜王权李显忠戚方

严备清河颍河涡河口丁亥成闵渡江屯应城县遣吴拱戍郢州博州民王友直聚兵大名自称河北安抚制置使以其徒王任为副遣军师冯

谷入奏事吴璘劫金人于桥头砦辛卯金使以书至楚州守臣以闻壬辰监盱眙军淮河渡夏俊复泗州癸巳金人攻通化军守将张超拒却之

吴璘遣将刘海复秦州乙未金人攻信阳军丙申吴璘遣将曹■（彡休）复洮州戊戌

刘锜发扬州诏以金人背盟降敕榜招谕中原军民己亥兰州汉军千户王弘杀其刺史温都乌密来降吴璘遣将潘青复陇州冬十月庚子朔诏将亲征魏胜攻沂州败还海州金人围之李宝以舟师至东海县金人解围去宝遂入海州辛丑金人自涡口渡淮癸卯以吴璘兼陕西河东招讨使刘锜兼京东河北东路招讨使成闵兼京西河北西路招讨使金人破蒋州李显忠遣统制孔福与金人战于大人洲乙巳金人复攻海州魏胜李宝击却之丁未命宣抚制置司传檄契丹西夏高丽渤海诸国及河北河东陕西京东河南诸路谕出师共讨金人是日金人立其东京留守葛王雍为皇帝改元大定己酉知筠州武巨招纳北界杜海等二万人来归庚戌知庐州龚涛弃城走辛亥金萧琦破滁州壬子以建王玮为镇南军节度使刘锜遣统制王刚等击金人于清河口吴拱遣侯俊郝敦书复唐州癸丑借江浙荆湖等路坊场净利钱以备赏军金人攻海州李宝力战拒之解围去甲寅金人攻樊城吴拱遣守将翟贵王进与战贵进俱死之金兵亦退金主亮以大军至庐州戚方遣张宝复蒋州乙卯以金人渝盟告于天地宗庙社稷命州县谕富民捐赀助国刘锜归扬州丙辰金主亮入庐州王权自昭关遁统制姚兴战死权退保和州金州都统制王彦遣统制任天锡复丰阳县丁巳武巨遣荀琛复邓州戊午任天锡复商洛县命吴璘趣出兵汉中叶义问督视江淮军马中书舍人虞允文参谋军事金人攻真州步军司统制邵宏渊迎战于胥浦桥败绩遂进攻扬州己未任天锡复商州庚申以杨存中为御营宿卫使赵撝复襄信县王权自和州遁归屯于东采石辛酉复汤思退观文殿大学士充醴泉观使兼侍读金人破和州壬戌刘锜退军瓜洲金人攻扬州淮东安抚使刘泽弃城奔泰州以户部侍郎刘岑为御营随军都转运使李显忠为御营先锋都统制屯芜湖主管步军司李捧为前军都统制赵撝复新蔡县癸亥金人入扬州甲子复张浚观文殿大学士判潭州吴璘遣统制吴挺向起等击金人于德顺军之治平砦赵撝复平兴县乙丑金人趋瓜洲刘锜遣统领员琦拒之于阜角林败之丙寅李宝击金舟师于胶西县之陈家岛刘锜还镇江府赵撝复蔡州金人攻秦州向起吴挺击却之丁卯叶义问至镇江武巨复虢州卢氏县任天锡复朱阳县戊辰殿中侍御史杜莘老出知遂宁府十一月己巳邵宏渊遣统领崔皋击金人于定山任天锡复虢州庚午通州守将萧邦弼弃城去辛未遣权吏部侍郎汪应辰诣浙东措置海道壬申以张浚判建康府召王权赴行在以李显忠代将邵宏渊为池州都统制金人攻瓜洲镇江中军统制刘泛败走权都统制李横亦遁金人奄至江上统制魏俊王方死

之金人游骑至无为军守臣韩髻弃城走癸酉淮宁府
民陈亨祖执同知完颜雅鲁以其城来归赵搏弃蔡州甲戌池州统制官崔定等复入无
为军乙亥金主亮临江期以翌日南渡丙子虞允文督
建康诸军统制官张振等以舟师拒金主亮于东采石郟之崔定复巢县任天锡复上津
商洛二县丁丑虞允文遣水军统制盛新以舟师击金
人于杨林河口又败之金主亮焚其舟而去戊寅王彦遣杨坚复栾川县己卯以汤思退
为行宫留守虚恨蛮犯嘉州笼蓬堡官军击之败绩副
将郑祥等死之庚辰金主亮引军趋淮东癸未吴璘自仙人原还兴州留姚仲节制军事
虞允文自采石率李捧军及戈船如镇江金主亮至扬
州乙酉刘泛死英州编管江州统制李贵忠义首领孟俊复顺昌府金州将邢进复华
州丙戌任天锡复陕州丁亥刘锜罢以御营宿卫中军
统制刘锐权镇江都统制戊子吴璘复力疾上仙人原己丑刘王权死琼州编管李宝泛
海南归金人复攻陕州任天锡击却之复攻襄阳统制
官李滕等拒却之复通化军庚寅王彦遣将杨坚党清复长水县癸巳以成闵为镇江都
统制淮东制置使京东西路河北东路淮北泗宿州招
讨使李显忠为淮西制置使京畿河北西路淮北寿亳州招讨使吴拱为湖北京西制置
使京西北路招讨使甲午武巨遣乡兵总辖杜隐等复
嵩州乙未金人破泰州是日金人弑其主亮于扬州龟山寺戊戌金都督府遣人诣镇江
军议和十二月己亥赵搏复蔡州王彦遣兵复福昌县
庚子金人侵汉南茨湖鄂州军士史俊击却之杨椿复庐州辛丑以李宝为靖海军节度
使浙西通泰海州沿海制置使京东东路招讨使王彦
遣阎玘复澠池癸卯命诸路招讨司率兵进讨互相应援沿江诸大帅条陈恢复事宜复
岳州旧名右军统领沙世坚入泰州甲辰均州统领咎
朝复邓州丙午淮东统制王选复楚州丁未杜隐等入河南府吴拱遣统领牛宏入汝州
戊申帝发临安庚戌金人渡淮北去壬子次平江罢督
视府癸丑淮东统制刘锐陈敏引兵入泗州鄂州统制杨钦以舟师击金人于洪泽镇乙
卯江北金兵尽去李显忠复入和州吴璘遣将复水洛
城金人复破汝州牛宏败走戊午次镇江府庚申吴璘拔治平砦王戌曲赦新复州军甲
子降淮南京西湖北杂犯死罪以下赏采石功进统制
张振时俊等官金潁寿二州巡检高显以寿春府来降是月金主知亮已死遂趋燕京

三十二年春正月戊辰朔日有食之帝在镇江己巳金人攻寿春府忠义将刘泰战
死金兵引去庚午发镇江府壬申至建康府壬午金人
复攻蔡州赵搏力战却之乙酉权知东平府耿京遣其将贾瑞赏书记辛弃疾来奏事己
丑金主遣其臣高忠建等来告嗣位以耿京为天平军

节度使知东平府丙申以杨存中为江淮荆襄路宣抚使虞允文副之旋改存中措置两淮二月戊戌罢借两浙江淮坊场净利钱以虞允文为兵部尚书川陕宣谕使庚子兴州统领惠逢等复河州振两淮饥民壬寅金人攻汝州守将王宣逆击之癸卯帝发建康惠逢复积石军又克来羌城丁未刘锜薨己酉王宣及金人再战于汝州庚戌金人全师来攻宣败绩弃去辛亥金人复攻顺昌府孟新拒却之寻亦弃去乙卯至临安府兴元都统制姚仲攻巩州不下退守甘谷城遂引兵围德顺军丙辰金人攻蔡州赵撙击却之乙丑王宣及右军副将汲靖击金人于确山县赵撙弃蔡州丙寅金人复取之姚仲遣副将赵铨攻下镇戎军金同知渭州秦弼及其子嵩来归王彦遣兵救陕州金兵引去丁卯吴玠遣将复永安军永宁福昌长水三县闰月癸酉金人破河州乙亥命杨存中李显忠固守新复州军量度进讨丙子姚仲遣将复原州癸未振淮南归正人金人攻虢州吴玠遣杨从仪等攻拔大散关分兵据和尚原金人走宝鸡辛卯杨椿罢壬辰姚仲攻顺德军击金人于瓦亭砦新店是月张安国等攻杀耿京李宝将王世隆攻安国执之以献三月壬寅更定金使入境接伴馆伴旧仪癸卯成闵遣统制杜彦救淮宁击金人于项城县乙巳加吴玠少傅王彦为保平军节度使戊申吴玠复德顺军又遣严忠取环州辛亥命兵部侍郎陈俊卿工部侍郎许尹经画两淮堡砦屯田癸丑金人围淮宁府守臣陈亨祖死之甲寅金人侵镇戎军丁巳遣洪迈等贺金主即位戊午忠义军统制知兰州王宏拔会州金人破淮宁府统领戴规死之辛酉金人攻原州夏四月癸酉蠲淮东残破州军上供银绢米麦及经总制钱一年蒙县民倪震率丁口数十来归甲戌募民耕淮东荒田蠲租徭七年戊寅以御史中丞汪澈参知政事金人围海州五月戊戌吴玠自河池如凤翔巡边壬寅姚仲及金人战于原州北岭败绩戊申复以杨存中为醴泉观使奉朝请罢御营宿卫司辛亥镇江都统制张子盖救海州举金人于石湫堰金人解去甲寅命张浚专一措置两淮事务兼节制淮东西沿江州郡军马乙卯知顺昌军孟昭率部曲来归己未吴玠遣将复熙州壬戌禁诸军互招逃亡加郑藻太尉振东北流民甲子诏立建王玮为皇太子更名昚加成闵太尉主管殿前司李显忠为太尉主管马军司籍诸州归正人愿为农者给官田复租十年六月丙寅吴玠次大幽岭檄召姚仲下河池狱以夔路安抚使李师颜代将其兵乙亥朱倬罢丙子诏皇太子即皇帝位帝称太上皇帝退处德寿宫皇后称太上皇后孝宗即位累上尊号曰光尧寿圣宪天体道性仁诚德经武纬文绍业兴统明谟盛烈太上皇帝淳熙十四年十月乙亥太上

皇帝崩于德寿殿年八十一谥曰圣神武文宪孝皇帝加谥受命中兴全功至德圣神武文昭仁宪孝皇帝庙号高宗攒于会稽之永思陵

高宗建炎四年绍兴三十二年凡三十六年

钦定续通志卷三十五

●钦定续通志卷三十六 宋纪十二

宋纪 【十二】

孝宗

○孝宗

孝宗皇帝讳昀字符永太祖七世孙也初太祖少子秦王德芳生英国公惟宪惟宪生新兴侯从郁从郁生华阴侯世将世将生庆国公令

諡令諡生子偁是为秀王帝秀王子也始名伯琮高宗自元懿太子薨未有后昭慈圣献皇后自江西还行在劝高宗立太祖后人为嗣仆射范

宗尹亦造膝以请高宗曰太祖以神武定天下子孙不得享之遭时多艰零落可悯朕若不法仁宗为天下计何以慰在天之灵而上虞丞娄寅

亮亦上书言昌陵之后寢同民庶艺祖在上莫肯顾歆此金人所以未悔祸也高宗大然之绍兴二年五月选帝育于禁中明年除和州防御使

赐名瑗旋改贵州五年授保庆军节度使封建国公历加检校少保进普安郡王十三年九月秀王歿于秀州解官行服已改常德军节度使三

十年二月立为皇子更名玮授宁国军节度使开府仪同三司进封建王制出中外大悦【谨按通鉴辑览 御批高宗择立孝宗为嗣当

时多谓付托得人盖以艺祖后不克享有天下人心颇有余憾一旦见昌陵之裔复继大统不觉溢美任情至以中兴事业推许孝宗则实过矣

孝宗虽承欢德寿乡学右文不过蒙偏安之业端处晏然而已中原侵地未能恢复尺寸而符离之役任用非人遂至一败不振所谓中兴者安

在也】明年改镇南军节度使先是金人渝盟高宗下诏亲征而两淮失守朝臣多陈退避之计帝请率师为前驱直讲史浩以疾在告闻之亟

入为帝言太子不宜将兵乃为草奏请卫从以共子职十二月遂扈蹕以行三十二年五月甲子立为皇太子改今名六月乙亥内降御札皇太

子可即皇帝位朕称太上皇帝丙子遣中使召帝入禁中面谕之帝推逊不受即趋侧殿门欲还东宫高宗勉谕再三乃止于是高宗出御紫宸

殿辅臣奏事毕高宗还宫百官移班殿门外拜诏毕复入班殿庭内侍掖帝至御榻前帝侧立不坐内侍扶掖之乃略就坐宰相率百僚称贺帝

遂兴辅臣升殿固请帝愀然曰君父之命出于独断然此大位惧不克当班退太上皇帝

即驾之德寿宫帝服袍履步出祥曦殿门冒雨掖辇以
行及宫门弗止上皇麾谢再三且令左右扶掖以还顾曰吾付托得人吾无憾矣左右皆
呼万岁是日诏有司议太上皇帝太上皇后尊号以闻
丁丑朝德寿宫戊寅大赦诏宰相率百官月两朝德寿宫己卯以即位告于天地宗庙社
稷庚辰诏五日一朝德寿宫甲申诏中外士庶陈时政
阙失丁亥诏以太上皇不许五日一朝自今月四朝复胡铨官知饶州甲午上太上皇帝
尊号曰光尧寿圣太上皇帝太上皇后曰寿圣太上皇
后乙未金人屠原州秋七月戊戌兴州中军统制吴玠复巩州癸卯以张浚为少傅江淮
宣抚使封魏国公甲辰以参知政事汪澈视师湖北京
西遣刘珙等使金告即位戊申以四川宣抚使吴玠兼陕西河东路宣抚招讨使追复岳
飞原官以礼改葬癸丑马军司中军统制赵撙忠义军
统领皇甫倜复光州甲寅诏淮南诸州存恤淮北来归之民权免税役丙辰以少保保康
军节度使吴玠为少傅太尉宣武军节度使吴玠为开
府仪同三司丁巳罢李宝措置海道壬戌以黄祖舜兼参知政事罢诸路圣节进奉蠲四
川积年逋负八月乙丑四川马军统制高师中与金人
战于摧沙败死丙寅吴玠与金人战于德顺军己巳以翰林学士史浩参知政事戊寅率
羣臣诣德寿宫奉上太上皇帝太上皇后尊号册宝丁
亥颁宽恤事十八条起居舍人洪迈知合门事张抡坐奉使辱命罢甲申吴玠击金人于
北山戊子追复李光资政殿学士赵鼎范冲并还合得
恩数九月甲午以子愔为少保永兴军节度使进封邓王愔为雄武军节度使开府仪同
三司进封庆王惇为镇洮军节度使开府仪同三司进
封恭王甲午金人攻德顺军东山堡中军将李庠战死丁酉川陕宣谕使虞允文罢辛亥
振淮东义兵及归正人以总领四川财赋军马钱粮王
之望为户部侍郎川陕宣谕使乙卯诏虞允文赴吴玠军议事辛酉以吴玠为少师冬十
月戊辰以岳阳军节度使居广开府仪同三司史浩兼
权知枢密院事己巳叶义问罢庚午以恩平郡王璩为少保壬午官岳飞孙六人甲申契
丹招讨萧哲伯来奔金人攻德顺城吴玠击走之复遣
兵追袭败归戊子以资政殿学士张焘同知枢密院事十一月庚子以萧哲伯为忠州团
练使乙巳金人攻水洛城戊申诏改明年为隆兴元年
辛亥免杨存中所献酒坊逋负钱辛酉史浩免权知枢密院事十一月乙丑诏宰臣复兼
枢密使金人攻陇城县官军拒却之丙寅诏弃德顺城
丁卯以陈康伯兼枢密使戊辰诏侍从台谏集议当今弊事仍命尽率其属极言无隐辛
未刘珙张说还自盱眙戊寅蠲四川赦前登带白契税
钱辛卯广西贼王宣破藤州守臣廖颀弃城遁

隆兴元年春正月壬辰朔羣臣朝于文德殿帝朝德寿官甲午四川宣抚司奉诏班师庚子以史浩为尚书右仆射同中书门下平章事兼枢密使张浚进枢密使都督江淮东西路军马二月壬戌以布衣李信为兵部员外郎赍蜡书往中原招豪杰之据有州郡者安庆军节度使士籛乞减奉赐之半以助军用戊辰宰执陈康伯等乞再减奉止存旧格之半许之己卯振两淮流民及山东归正忠义军癸未黄祖舜罢庚寅逐秦桧党人仍禁辄至行在三月壬辰金右副元帅赫舍哩志盍以书取侵地癸巳以张焘为参知政事御史中丞辛次膺同知枢密院事叶义问落端明殿学士饶州居住丁酉诏户部置局议节浮费己亥杨存中等乞减半奉如宰执例许之己酉张焘罢庚申以久雨命有司振灾伤察刑禁夏四月戊辰张浚入见议出师渡淮乙亥王之望罢壬午诏户部台谏议节浮费戊子张浚命邵宏渊帅师次盱眙乙丑又命李显忠帅师次定远是月金人拔环州守臣强霓及其弟震死之五月丁酉李显忠复灵璧县庚子复虹县金知泗州富察都木达及同知泗州大周仁降壬寅张浚渡江视师癸卯金右翼军都统萧琦降于李显忠甲辰显忠及邵宏渊击金人于宿州乙巳史浩罢丙午复宿州建康前军统领官王珙战死丁未以辛次膺为参知政事翰林学士承旨洪遵同知枢密院事督诸路开营田金赫舍哩志盍自睢阳引兵至宿州李显忠击却之壬子显忠与金人战于宿州不利是夜建康中军统制周宏及邵宏渊之子世雄殿前司统制官左士渊逃归癸丑进李显忠开府仪同三司淮南京畿京东河北招讨使邵宏渊检校少保盍远军节度使招讨副使金人攻宿州显忠击却之甲寅李显忠邵宏渊军大溃于符离乙卯下诏亲征丙辰以张浚兼都督荆襄军马张浚以刘宝为镇江诸军都统制六月庚申朔日有食之癸亥张浚乞致仕且请通好皆不许丁卯以观文殿大学士汤思退为醴泉观使兼侍读戊辰召虞允文以兵部侍郎周葵为参知政事汪澈落资政殿学士台州居住辛未罢李显忠军职壬申以太傅杨存中为御营使节制殿前司军马癸酉下诏罪己张浚降授特进仍前枢密使江淮东西路宣抚使官属各夺二官邵宏渊降武义大夫戊寅诏展巡幸之期辛次膺罢己卯李显忠责授清远军节度副使筠州安置辛巳命浙西副都总管李宝兼御营统制官措置浙西海道甲申以敷文阁学士虞允文为兵部尚书兼湖北京西宣谕使戊子放宫人三十人以萧琦为检校少保河北招抚使秋七月庚寅以虞允文为湖北京西制置使癸巳以汤思退为尚书右仆射同中书门下平章事兼枢密使李显忠再责授果州团练副使潭州安置乙未诏宿州弃军将佐夺官贬

窳有差乙巳以旱蝗星变诏侍从台谏两省官条上时政阙失戊午给还岳飞田宅八月丙寅张浚复都督江淮军马庚午以刘宝兼淮东招抚使丙子以飞蝗风水灾避殿减膳罢借诸路职田之令戊寅金赫舍哩志盗又以书求海泗唐邓四州之地及岁币丙戌遣淮西安抚使干办公事卢仲贤等赍书至金帅府戒勿许四州差减岁币仍命诸将毋遣兵人出境九月己酉杨存中罢冬十月丙子诏太上皇后教旨改称圣旨立贤妃夏氏为皇后十一月己丑卢仲贤自宿州以金都元帅布萨忠义遗三省枢密院书来庚子遣王之望等为金国通问使辛丑诏侍从台谏于后省集议讲和遣使礼数土贡四事丙午卢仲贤坐擅许金地下大理寺夺三官癸丑以胡昉杨由义为使金通问国信所审议官十二月己未陈康伯罢丁丑以汤思退为尚书左仆射张浚为右仆射并同中书门下平章事兼枢密使浚仍都督江淮东西路军马是岁以两浙大水旱蝗江东大水悉蠲其租

二年春正月辛卯诏增德寿宫车辇仪卫乙未及皇后朝德寿宫丙申命虞允文讨广西诸盗丙午金布萨忠义复以书来壬子振归正人二月辛未蠲秀州贫民逋租壬申容州妖贼李云作乱癸酉以王权为广西路都钤辖丙子诏饬将帅减文武官及百司吏郊赐之半丁丑李云伏诛乙酉胡昉自宿州还三月丙戌张浚视师于淮又诏王之望等以币还丁亥诏荆襄川陕帅臣严边备毋先事妄举卢仲贤除名械送郴州编管壬寅诏知光州皇甫倜毋招纳归正人庚戌以户部侍郎钱端礼为淮东宣谕使吏部侍郎王之望为淮西宣谕使壬子减高藤雷容四州杂犯死罪以下蠲夏秋税赋癸丑以王彦为建康诸军都统制兼淮西招抚使夏四月庚申张浚还朝甲子以李显忠侵欺官钱给还诸军丁丑张浚罢五月丙申诏吴璘母招纳归正人辛丑江西总管邵宏渊责授靖州团练副使南安军安置六月甲寅朔日有食之辛酉以淫雨诏州县理滞囚丁丑振江东两淮被水贫民秋七月乙酉以户部尚书韩仲通为湖北京西制置使丁亥洪遵罢己丑以周葵兼权知枢密院事己巳命海泗州彻戍戊申蠲淮东内库坊场钱一年庚戌洪遵落端明殿学士癸丑以江东浙西大水诏侍从台谏卿监郎官馆职陈阙失及当今急务八月甲寅朔以灾异避殿减膳戊午南丹州莫延稟为诸蛮所逐来归甲子以久雨决系囚庚辰以资政殿大学士贺允中为知枢密院事兼参知政事辛巳诏振淮东被水州县张浚薨壬午遣魏■〈木巳〉等为金国通问使九月辛丑以王之望为参知政事权刑部侍郎吴芾为给事中兼淮西宣谕使以久雨出内库金余米振贫癸卯命汤思退都督江淮东西路军马辞

不行乙巳复命杨存中为同都督钱端礼吴芾并为都督府参赞军事仍易国书以付魏■〈木巳〉冬十月甲寅魏■〈木巳〉至盱眙未得进丁卯贺允中罢为资政殿大学士致仕己巳以周葵兼权知枢密院事王之望兼同知枢密院事庚辰蠲京西湖北运粮所经州县秋税之半以靖海军节度使李宝为沿海驻扎御前水军都统制辛巳金人分道渡淮刘宝弃楚州遁十一月乙酉知楚州魏胜与金人战死之金人克楚州进陷濠州滁州戊子以金人侵扰诏郊祀改用明年命王之望同都督江淮军马汤恩退罢都督召陈康伯己丑王之望罢同都督庚寅命杨存中都督江淮军马辛卯汤思退罢寻落观文殿大学士永州居住未至而卒甲午禁太学生伏阙是日太学生张观等七十二人上书请斩汤思退王之望尹穡而用陈康伯胡铨等丙申遣国信所大通事王抃持周葵书如金帅府请正皇帝号为叔侄之国易岁贡为岁币减十万割商秦地归被俘人惟叛亡者不与以金人侵淮南诏避殿减膳丁酉诏择日视师戊戌以少保观文殿大学士陈康伯为尚书左仆射同中书门下平章事兼枢密使庚子遣兵部侍郎胡铨右谏议大夫尹穡分诣两浙措置海道壬寅诏侍从两省官日一至都堂议事有关台谏者亦听会议以显谟阁学士虞允中同签书枢密院事甲辰金人攻六合步军司统制崔皋击却之乙巳以钱端礼兼权参知政事丁未以显谟阁直学士沈介为沿江制置使命沿江诸州调保甲分守渡口闰月甲寅陈康伯入见丙辰周葵罢王抃得报书以归戊午萧琦卒壬戌罢胡铨尹穡丙寅召韩仲通以沈介为兵部尚书湖北京西制置使戊辰以金人且退诏督府择利击之王之望不可乙亥之望罢丙子以王抃为奉使金国通问国信所参议官持陈康伯报书以行丁丑金遣张恭愈来迓使者十二月辛卯以钱端礼为参知政事兼知枢密院事虞允文同知枢密院事兼权参知政事礼部尚书王刚中签书枢密院事丙申制应沿边被兵州军除逃遁官吏不赦外杂犯死罪情轻者减一等余并放遣遣洪适等贺金主生辰壬寅罢三衙江上荆襄诸军招军申辰遣沿海水军还屯己酉朝献景灵宫庚戌朝飨太庙

干道元年春正月辛亥朔合祀天地于圜丘大赦改元丁巳淮西安抚韩璘勒停贺州编管壬申诏两浙振流民癸酉蠲沿边残破州军官赋一年甲戌刘宝责果州团练副使琼州安置二月庚辰朔朝德寿宫从太上皇太上皇后如四圣观乙酉遣官检察两淮州县振济饥民庚子以杨存中为盩厔昭庆军节度使甲辰以久雨避殿减膳蠲两淮灾伤州县身丁钱绢决系囚丁未陈康伯薨三月庚申以虞允文为参知政事

兼同知枢密院事王刚中同知枢密院事命淮西湖北荆襄帅臣措置屯田复置榷场癸亥黄祖舜薨夏四月庚子金使完颜仲等来报聘五月庚戌以吴璘为太傅封新安郡王壬申蠲四川州县虚额钱吴璘改判兴元府丙子遣李若川等使金贺上尊号六月癸未王刚中薨丙戌以翰林学士洪适签书枢密院事辛卯以武经郎令德为安定郡王壬辰以淮安转运判官姚岳言境内飞蝗自死夺一官罢之壬寅蠲广东残破州县租秋七月甲寅借职田租二年以裨经费己巳蠲关外四州民今年租及湖南被贼州县夏税八月乙酉立子愔为皇太子丁亥虞允文罢戊子大赦己丑以洪适为参知政事兼权知枢密院事吏部侍郎叶颙签书枢密院事兼权参知政事癸巳钱端礼罢为资政殿大学士提举万寿观九月甲戌以端明殿学士汪澈知枢密院事洪适兼同知枢密院事冬十月己卯遣方慈等使金贺正旦丁酉金遣高衍等来贺会庆节乙巳淮北红巾贼踰淮劫掠辛未遣龙大渊抚谕两淮措置屯田督捕盗贼十二月戊寅以洪适为尚书右仆射同中书门下平章事兼枢密使汪澈为枢密使癸未遣王曦等贺金主生辰庚寅以叶颙为参知政事兼同知枢密院事壬寅金遣乌库哩忠弼等来贺明年正旦

二年春正月辛酉省六合戍兵以所垦田给还复业之民二月丁丑罢盱眙屯田振两浙江东饥戊寅如玉津园宴射遂至龙井三月辛未罢洪适右仆射癸酉以给事中权吏部尚书魏■〈木巳〉同知枢密院事兼权参知政事丁丑罢和余夏四月戊寅以久雨减大理三衙临安府及浙西州县杂犯死罪以下一等乙未汪澈罢五月戊申张焘薨庚戌叶颙罢以魏■〈木巳〉为参知政事右谏议大夫林安宅同知枢密院事兼权参知政事中书舍人蒋芾签书枢密院事六月庚辰擢孙挺为福州观察使荣国公摠为左千牛卫大将军秋七月甲寅以镇江都统制戚方为武当军节度使八月丁丑蠲淮南放归万弩手差役二年戊子以魏■〈木巳〉兼同知枢密院事蒋芾权参知政事甲午立中兴以来十三处战功格目乙未以吴璘复判兴州九月辛亥遣官按视温州水灾振贫民决系囚冬十月乙亥遣薛良朋等使金贺正旦己卯减饶州岁贡金三之一蠲诸路酒坊逋赋辛卯金遣魏子平等来贺会庆节十一月丙午杨存中薨己酉尽出内藏及南库银以易会子官司并以钱银支遣民间从便两淮总领所许自造会子鬻诸路营田十二月乙亥遣梁克家等贺金主生辰己卯以资政殿学士叶颙知枢密院事甲申以叶颙为尚书左仆射魏■〈木巳〉右仆射并同中书门下平章事兼枢密使蒋芾参知政事吏部尚书陈俊卿同知枢密院事兼权参知政事庚

寅诏宰相领兼制国用使参知政事同知国用事丙申金遣乌库哩元忠等来贺明年正旦

三年春二月癸酉出龙大渊为江东总管曾觐为淮西总管甲戌大渊改浙东觐改福建辛巳以端明殿学士虞允文知枢密院事三月甲辰从太上皇太上皇后如聚景园壬戌伯母秀王夫人张氏薨夏四月辛未蠲诸路州军逋负戊寅以吴璘知兴元府充利州路安抚使四川宣抚使五月甲寅吴璘薨庚申以四川制置使汪应辰主管宣抚使事移司利州六月己巳以汪应辰权节制利州路屯驻御前军马甲戌以虞允文为资政殿大学士四川宣抚使乙亥金遣使来取被俘人诏实俘在民间者还之军中及叛亡者不预戊寅复以虞允文为知枢密院事充宣抚使辛卯皇后夏氏崩振泉州水灾秋七月壬寅以皇太子疾减杂犯死罪以下乙巳皇太子薨闰月丁亥戚方落节钺信州居住八月甲寅以久雨命临安府决系囚丁巳蠲光濠庐三州寿春府赋一年戊午遣官分决滞狱壬戌以知建康府史正志兼沿江水军制置使冬十月丁酉遣唐瑑等使金贺正旦戊戌以嗣濮王士鞅为开府仪同三司乙卯金遣富察苏尔干等来贺会庆节十一月丙寅合祀天地于圜丘大赦癸酉叶颙魏■〈木巳〉罢以陈俊卿为参知政事翰林学士刘珙同知枢密院事丁丑以雷发非时诏台谏侍从两省官指陈阙失十二月己亥遣王澹贺金主生辰辛亥以吴益为太傅庚申金遣图克坦忠卫等来贺明年正旦

四年春正月壬午夺秦坝秦堪吴益郊恩荫补癸未雨雹甲申如天竺寺至玉津园二月甲午罢福建路卖钞盐蠲转运司岁发钞盐钱己亥以蒋芾为尚书右仆射同中书门下平章事兼枢密使兼制国用使观文殿大学士史浩为四川制置使浩辞不行乙巳赐王炎出身签书枢密院事三月庚午以敷文阁待制晁公武为四川安抚制置使夏四月丙辰礼部员外郎李焘上所著续通鉴长编自建隆至治平一百八卷是月振绵汉等州饥五月丙戌行干道新历丁亥以饶信二州建宁府饥民啸聚遣官措置振济是月西夏任敬德遣使至四川宣抚司约发兵攻西蕃六月戊戌蠲诸路逋负干道元年二月和市折帛杂色钱辛丑龙大渊卒戊午蒋芾罢秋七月壬戌以刘珙兼参知政事召建宁府布衣魏掞之赴行在丁亥以经总制余剩钱椿留印蜀州以备振济己丑以久雨虑囚减临安府三衙死罪以下是月西夏遣闲使来八月庚戌刘珙罢冬十月壬辰遣郑闻等使金贺正旦甲午禁归正人藏匿金人者庚子蒋芾起复尚书左仆射陈俊卿右仆射并同中书门下平章事兼枢密使兼制国用使甲辰大阅己酉金遣伊喇山图罕等来贺会庆节十一月壬戌遣知无为军

徐子寅措置楚州官田招集归正忠义人以耕乙亥诏

峡州布衣郭雍赴行在壬申蠲两淮归正人役五年癸未封岳阳军节度使居广为永阳郡王十二月丙申遣胡元质等贺金主生辰甲辰蒋芾

辞起复减两浙江东西路明年夏税和市之半甲寅金遣完颜仲仁等来贺明年正旦

五年春正月甲戌措置两淮屯田二月壬寅以给事中梁克家签书枢密院事甲辰以王炎参知政事兼同知枢密院事三月己巳蠲成都

府路民户岁输对余米脚钱乙亥以王炎为四川宣抚使仍参知政事夏四月壬辰以梁克家兼参知政事辛亥振衢婺饶信四州流民六月己

酉以虞允文为枢密使秋七月乙丑以曾觌为浙东总管八月甲申朔日有食之己丑以陈俊卿为尚书左仆射虞允文为尚书右仆射并同中

书门下平章事兼枢密使兼制国用使九月壬申命淮西安抚司参议官许子中措置淮西山水砦招集归正人垦官田冬十月乙酉遣汪大猷

等使金贺正旦戊子振温台二州被水贫民己亥命饶信二州岁量留上供米以备振糶癸卯金遣高德基等来贺会庆节十二月己丑遣司马

伋等贺金主生辰戊申金遣完颜毅等来贺明年正旦

六年春正月癸丑雅州沙平蛮寇边焚碉门砦四川制置使晁公武讨之不利庚午以奉国军承宣使知庐州郭振为武泰军节度使二月

辛卯王炎遣人约沙平蛮归部稍捐边税与之三月庚申从太上皇太上皇后如聚景园辛未复如聚景园戊寅以知绍兴府史浩为检校少傅

保宁军节度使夏五月己巳陈俊卿罢为观文殿大学士知福州罢行在至镇江征税所比近者十有三闰月戊子遣范成大等使金求陵寝地

且请更定受书礼辛卯责吏部侍郎陈良佑筠州居住癸巳以梁克家为参知政事兼同知枢密院事甲辰辛次膺薨秋九月辛丑沅州獠相讎

杀守臣孙叔杰击之不利獠进迫州城安抚司谕解之叔杰寻抵罪冬十月辛酉遣吕正己等使金贺正旦丁卯金遣耶律子敬等来贺会庆节

甲戌起居舍人赵雄请置局议恢复以雄为中书舍人十一月壬午合祀天地于圜丘大赦是月遣赵雄等贺金主生辰及请更受书之礼十二

月戊申大阅壬申金遣富察愿等来贺明年正旦

七年春正月丙子帝率羣臣奉上太上皇帝太上皇后尊号册宝于德寿宫二月癸丑立子惇为皇太子大赦以庆王恺为雄武保宁军节

度使判宁国府进封魏王丁卯太傅大宁郡王吴益薨三月乙亥赵雄至金金拒其请诏训习水军丙子立恭王夫人李氏为皇太子妃己卯起

复刘珙同知枢密院事以明州观察使知合门事兼枢密都承旨张说签书枢密院事戊子说罢为安庆军节度使提举万寿观夏四月壬戌从

太上皇太上皇后如聚景园丁亥刘珙起复同知枢密院事为荆襄宣抚使珙辞不拜庚寅金人葬钦宗于巩原秋七月庚子以王炎为枢密使四川宣抚使八月丙辰诏两淮民丁充民兵者本名丁钱勿输甲申从太上皇太上皇后如东园戊子安定郡王令德薨冬十月己酉遣莫蒙等使金贺正旦壬戌金遣乌凌阿天锡等来贺会庆节十二月丁未遣翟绂等贺金主生辰丙寅金遣完颜宗室等来贺明年正旦是岁湖南江东西路旱振之

八年春正月丁酉朝献景灵宫遂如天竺寺玉津园二月乙巳诏改尚书左右仆射同中书门下平章事为左右丞相戊申遣姚宪等使金贺上尊号附请受书之事辛亥以虞允文为左丞相梁克家为右丞相并兼枢密使癸丑以安庆军节度使张说吏部侍郎王之奇并签书枢密院事夏四月己酉出殿中侍御史萧之敏提点江东刑狱乙丑诏再蠲两淮二税一年六月庚子以武德郎令擅为金州观察使封安定郡王秋七月辛巳罢淮西屯田官兵募归正人耕佃九月乙亥诏王炎赴都堂治事戊寅以虞允文为少保武安军节度使四川宣抚使封雍国公己丑赐允文家庙祭器冬十月丁未遣冯樽等使金贺正旦丙辰金遣夹谷清臣等来贺会庆节罢借诸路职田十一月庚寅进检校少傅知福州史浩开府仪同三司十二月戊戌蠲两淮明年租赋甲辰诏京西归正人授田如两淮丁巳遣韩元吉等贺金主生辰辛酉金遣曹望之等来贺明年正旦

九年春正月辛未王之奇罢为淮南安抚使王炎罢为观文殿大学士提举洞霄克乙亥以张说同知枢密院事户部侍郎沈夏签书枢密院事戊寅以刑部尚书郑闻签书枢密院事闰月戊申以久雨命大理三衙临安府及两浙州县决系囚减杂犯死罪以下辛酉如天竺寺玉津园二月壬申蠲江西旱伤五州逋负米乙亥青羌奴儿结寇安静砦黎州推官黎商老战死三月甲午禁北界博易银绢戊申从太上皇帝太上皇后如聚景园夏五月壬辰朔日有食之己未以迪功郎朱熹屡诏不起特改宣教郎主管台州崇道观六月甲戌禁两淮荆襄四川诸州籍民户马秋七月壬寅青羌奴儿结降辛亥吐蕃弥羌畜列陷安静砦引兵深入黎州守臣诱邛部川蛮击却之九月庚子命盱眙军以受书礼移牒泗州示金生辰使金使不从冬十月甲子遣留正等使金贺正旦辛未梁克家罢为观文殿大学士知建宁府甲戌以曾怀为右丞相张说知枢密院事郑闻参知政事沈夏同知枢密院事庚辰金遣完颜襄等来贺会庆节丁亥襄等入辞别函申议受书之礼仍示虞允文速为边备十一

月戊戌合祀天地于圜丘大赦改明年元为淳熙十二月甲子沈夏罢乙丑以御史中丞姚宪签书枢密院事遣韩彦直等贺金主生辰乙亥以嗣濮王士鞅永阳郡王居广并为少保乙酉金遣完颜璋等来贺明年正旦

淳熙元年春正月乙未禁淮西诸关采伐林木庚子罢两淮将帅权摄官丙午禁两淮耕牛出境以交址入贡赐国名安南封南平王李天祚为安南国王二月癸酉虞允文薨丙申以郑闻为资政殿大学士四川宣抚使戊午如玉津园癸丑金遣梁肃等来计事夏四月戊辰从太上皇如聚景园壬申许桂阳军溪洞子弟入州学听读乙亥诏四川宣抚使教阅诸州将兵戊寅遣张子颜等使金报聘己卯以姚宪参知政事户部尚书叶衡签书枢密院事六月丙辰朔诏礼官讨论别建四祖庙正太祖东向位戊午以兴州都统制吴挺为定江军节度使戊寅曾怀罢癸未姚宪罢甲申落宪端明殿学士罢宫观以叶衡参知政事秋七月丁亥以郑闻参知政事以成都府路安抚使薛良朋为四川安抚制置使壬辰以曾怀为右丞相己酉责姚宪南康军居住八月己未张说罢为太尉提举隆兴府玉隆观以徽猷阁学士杨倓为昭庆军节度使签书枢密院事九月乙酉以曾觌开府仪同三司壬寅如玉津园宴射冬十月壬戌遣蔡洸使金贺正旦癸亥以积雨命中外决系囚丙寅郑闻薨乙亥金遣完颜让等来贺会庆节辛巳再蠲临安府民身丁钱三年壬午蠲郴州桂阳军借贷常平米十一月甲申朔日有食之戊戌以礼部侍郎龚茂良参知政事杨倓罢以叶衡兼权知枢密院事丙午曾怀罢戊申以叶衡为右丞相兼枢密使十二月丁巳以吏部尚书李彦颖签书枢密院事壬戌遣吴琚等贺金主生辰壬申金遣刘仲海等来贺明年正旦以资政殿学士知江陵府沈夏为四川宣抚使

二年春正月癸巳前宰相梁克家曾怀坐擅改堂除克家落观文殿学士怀降为观文殿学士三月丙申以太上皇寿七十诏礼官讨论庆寿典礼夏四月己巳如玉津园是月茶寇赖文政起湖北转入湖南江西官军数为所败命江州都统皇甫倬招之五月辛卯谕宰相以朝政阙失士民皆得献言庚子命鄂州都统李川调兵捕茶寇六月庚戌以沈夏同知枢密院事丁卯落蒋芾王炎观文殿大学士张说落节度使芾建昌衞炎袁州说抚州居住戊辰振湖南江西被寇州县是月茶寇自湖南犯广东秋八月丙辰江西总管贾和仲以捕寇失律除名贺州编管丁卯蠲湖南江西被寇州县租丁丑遣左司谏汤邦彦等使金申议九月乙酉振淮南水旱州县乙未叶衡罢丁未沈夏罢闰月丁巳以李彦颖参知政事翰林学士王淮签书枢密院事是月江西提刑辛弃疾诱赖文政杀之茶寇平冬

十月乙酉遣谢廓然等使金贺正旦戊戌金遣完颜禧
等来贺会庆节十一月戊申朔奉上太上皇帝太上皇后尊号册宝于德寿宫戊午提点
坑冶王揖进羨余却之十二月辛巳遣张宗元等贺金
主生辰甲午朝德寿宫行庆寿礼大赦甲辰金遣完颜迨等来贺明年正旦

三年春正月甲寅以常州旱宽其逋负之半振淮东饥仍贷贫民种乙丑振恤归正
人二月壬午蠲两淮教阅民兵夏税癸未以伯圭为安
德军节度使三月丙午朔日有食之癸亥如报恩寺遂至聚景园夏四月辛巳靖州瑶人
寇边遣兵讨捕之己丑责授叶衡安德军节度副使郴
州安置六月乙酉减四川酒课甲午以朱熹为秘书郎熹不就秋七月乙丑禁浙西围田
八月乙亥以王淮同知枢密院事礼部尚书赵雄签书
枢密院事庚辰太上皇诏立贵妃谢氏为皇后壬午以久雨命中外决系囚癸未遣阎苍
舒等使金贺正旦壬辰金遣富察通等来贺会庆节十
一月癸丑合祀天地于圜丘大赦庚午遣张子正等贺金主生辰十二月己丑黎州蛮寇
边官军失利蛮亦遁去戊戌金遣刘琬等来贺明年正
旦是岁京西湖北诸州兴元府金洋州早绍兴府台婺州水并振之

四年春正月戊申诏自今内外诸军岁一阅试庚申诏沿江诸军岁再习水战二月
乙亥如太学谒先圣遂如武学谒武成王庙监学官进
秩一等诸生推恩赐帛有差戊戌以新知荆南府胡元质为四川安抚制置使兼知成都
府三月乙巳以史浩为少保观文殿大学士醴泉观使
兼侍读进封永国公庚戌如玉津园宴射壬子贷随郢二州饥民米丙寅如聚景园夏五
月庚子如佑圣观罢四川和余六月丁丑龚茂良罢己
卯以王淮参知政事秋七月辛丑禁江上诸军盗易战马振襄阳饥民乙酉罢临川伯王
雱从祀癸丑龚茂良责授宁远军节度副使英州安置
甲寅申严四川入蕃茶禁八月辛巳禁耕牛过淮九月丁酉朔日有食之辛丑免宰执以
下会庆节进奉戊午阅蹴鞠于选德殿冬十月丙子以
久阴命中外决系囚遣钱良臣等使金贺正旦丁亥金遣完颜忠等来贺会庆节十一月
庚子以赵雄同知枢密院事癸亥遣赵思等贺金主生
辰十二月乙亥大阅辛巳蠲太平州民贷常平钱米壬辰金遣完颜炳等来贺明年正旦
是岁福州建宁府南剑州水并振之

五年春正月辛丑戒有司毋以程颐王安石之说取士二月庚寅威州蛮寇边三月
丁未李彦颖罢壬子以史浩为右丞相丁巳如玉津园
己未以王淮知枢密院事赵雄参知政事是春黎州蛮降夏四月乙丑诏叶衡任便居住
丙寅以礼部尚书范成大参知政事五月丁未禁诸路
州军进羨余六月乙亥范成大罢癸未诏京西湖北商人以牛马负茶出境者罪死以给

事中钱良臣签书枢密院事己丑罢诸州私置税场减
四川茶课庚寅蠲大理寺赃钱闰月戊戌罢兴州都统司营田官兵募民耕佃庚戌蠲秀
州民折帛钱秋七月甲子太尉提举万寿观李显忠薨
冬十月庚子遣宇文价等使金贺正旦辛亥金遣张九思等来贺会庆节戊午以孙右千
牛卫大将军扩为明州观察使封英国公十一月甲戌
史浩罢为少傅充醴泉观使兼侍读乙亥以钱良臣参知政事丁丑以赵雄为右丞相王
淮为枢密使十二月庚寅朔班新定荐举式辛卯远钱
冲之等贺金主生辰丁酉罢兴元都统司营田官兵募民耕佃丙辰金遣乌雅察等来贺
明年正旦

六年春正月戊辰振淮东饥民壬申蠲夔州路上供金银二月己丑如佑圣观三月
庚申如聚景园己巳郴州贼陈峒等破连道州桂阳军
诸县命湖南帅臣讨捕之辛未再振淮东饥民庚辰如玉津园夏五月庚午蠲四川盐课
乙亥郴寇平癸未给襄阳归正人田六月戊戌蠲郴州
运粮丁夫今年役钱之半辛亥广西妖贼李接破郁林州守臣李端卿弃城遁遂围化州
命经略司讨捕之端卿除名勒停梅州编管秋九月辛
未合祀天地于明堂大赦冬十月乙酉蠲连州被寇民租辛卯遣陈岷等使金贺正旦庚
子再蠲四川盐课辛丑蠲绍兴府逋赋乙巳金遣富察
鼎寿等来贺会庆节戊申广西妖贼平十一月癸未遣傅淇等贺金主生辰十二月丙戌
班重修淳熙敕令格式庚戌金遣耶律慥等来贺明年
正旦辛亥蠲临安府租徭一年

七年春正月甲子减广西诸州岁贾盐数庚辰蠲淮东民贷常平钱米二月己亥出
湖南椿积米振永邵郴三州乙巳封子栋为安定郡王
三月壬戌诏举贤良方正能直言极谏者庚午迎太上皇帝太上皇后宴翠寒堂丁丑再
蠲临安府民身丁钱三年诏谕州招补军籍之阙自今
岁以为常夏四月甲申如聚景园戊子除明州积欠诸司钱辛卯再免沿边归正人请占
官田赋役三年甲辰黎州五部落犯盘佗砦兵马都监
高晃与战败绩五月戊辰以吏部尚书周必大参知政事刑部尚书谢廓然签书枢密院
事袁州分宜县大水捐其税己卯申飭书坊擅刻书籍
之禁六月丙戌以特进观文殿大学士判建康府陈俊卿为少保壬辰五部落再犯黎州
制置司铃辖成光延与战败绩提点刑狱权州事折知
常弃城遁甲午制置司益兵往讨平之秋七月丁卯以旱决系囚八月癸未禁黎州官吏
市蕃商物九月壬申禁诸路遏余冬十月戊子遣叶宏
等使金贺正旦乙未黎州五部落进马乞降诏却马许其互市庚子金遣李侗等来贺会
庆节十一月癸丑诏边吏存恤江西过淮饥民丁巳禁

淮南诸司州郡抑配民酒辛酉蠲两淮州军二税一年癸亥黎州戍军伍进等作乱折知常遁去王去恶诱进等诛之癸酉遣盖经等贺金主生辰十二月丙申嗣濮王士鞅薨

八年春正月罢内侍兼兵职【据赵汝愚传增辑】三月戊戌除朱熹提举江西常平茶盐夏四月癸酉立郴州宜章桂阳军临武县学教峒民子弟五月辛卯以久雨减京畿及两浙囚罪以下贷贫民稻种钱壬寅以史浩为少卿六月己酉放殿前司平江府牧场二万亩听民渔采戊午除淳熙七年诸路旱伤检放钱米辛酉罢诸路坊场监官听民承买秋七月辛卯以不雨决系囚八月庚戌赵雄罢癸丑以王淮为右丞相兼枢密使甲寅以谢廓然同知枢密院事己未以观文殿大学士新四川制置使赵雄知泸州九月庚辰命诸路提举司贷民麦种辛巳钱良臣罢庚寅以谢廓然兼权参知政事冬十月己酉遣施师点等使金贺正旦甲子金遣完颜实等来贺会庆节诏灾伤州县谕民振粟十一月戊寅蠲富阳新城钱塘夏税丁酉遣燕世良贺金主生辰己亥振临安府及严州饥民辛丑募民振粟十二月癸卯以徽饶二州民流者众出南库钱付新浙东提举常平朱熹振粟辛亥蠲诸路旱伤州军明年身丁钱物甲子下朱熹社仓法于诸路戊辰金遣魏贞吉等来贺明年正旦是月广东安抚巩湘诱潮贼沈师诛之

九年春正月甲戌诏四孟朝献分用三日如在京故事丁丑命两淮戍兵岁一更庚寅贷江浙两淮旱伤州县民稻种戊辰四川制置司获叙州贼大波浪三月辛未如佑圣观振忠万恭涪四州癸未振镇江府壬辰遣使按视江南江浙振济甲午罢诸路寄招军兵三年就拣军子弟补其阙夏四月甲辰诏自今盗发所在帅守监司论罚平定有劳者议赏五月甲寅蠲犒赏库酒课钱汀漳二州民为沈师所扰者除其赋戊午谢廓然薨秋七月甲戌以江西常平义仓及桩管米付诸司预备振粟辛巳出南库钱付浙东提举朱熹备振粟壬辰以资政殿学士李彦颖参知政事八月己亥诏绍兴去岁已纳夏税应减者为今年之数九月己巳罢诸路科买军器物料三年庚午以王淮为左丞相梁克家为右丞相丙子以子彤为容州观察使封安定郡王辛巳大享明堂大赦乙酉以钱引赐泸州备振粟辛卯封伯圭为荥阳郡王以旱减恭合渠昌州今年酒课乙未禁蕃舶贩易金银着为令十月戊戌遣王藺等使金贺正旦辛亥塞四串沿边支径戊午金遣完颜宗回等来贺会庆节甲子蠲诸路旱伤州军淳熙七年八年逋赋十一月庚午振夔路饥丙戌遣贾选等贺金主生辰十二月癸亥金遣富珠哩正等来贺明年正旦

十年春正月丁丑以给事中施师点签书枢密院事甲申李彦颖罢丙戌以施师点兼权参知政事三月戊辰李焘上续资治通鉴长编六百八十七卷辛巳免四川和棗三年癸未如玉津园己丑除诈称灾伤籍产法夏四月丙申再蠲临安府民身丁钱三年己亥命湖南广西塞溪洞径路五月戊寅如聚景园辛卯诏疏襄阳水渠以渠旁地为屯田寻诏民间侵耕者就给之六月戊戌监察御史陈贾请禁伪学乙巳罢昭州岁贡金己未诏诸路监司帅臣岁举廉吏庚申严赃吏禁秋七月乙丑以不雨决系囚丙寅如明庆寺祷雨甲戌以夏秋旱曠避殿减膳令侍从台谏两省卿监郎官馆职各陈朝政阙失分命羣臣祷雨于天地宗庙社稷山川丁丑除灾伤州县淳熙八年欠税八月戊申以施师点参知政事兼同知枢密院事御史中丞黄洽参知政事庚戌以史浩为太保魏国公致仕九月丁丑如佑圣观壬午蠲诸州逋负内藏库钱乙酉遣余端礼等使金贺正旦冬十月乙未诏两浙义役从民便壬子金遣完颜方等来贺会庆节十一月壬戌朔日有食之甲戌如龙山大阅遂至玉津园闰月壬寅郟安南献象丁巳遣陈居仁等贺金主生辰十二月丙子朝德寿宫行太上皇后庆寿礼推恩如太上皇故事丁亥金遣完颜博勒和等来贺明年正旦

十一年春正月辛丑安化蛮蒙光渐等犯宜州思立砦广西兵马钤辖沙世坚讨擒之丙午诏江东西路诸监司义役差役从民便三月辛卯诏刑部御史台每季以仲月录囚徒癸巳命利路三都统吴挺郭钧彭杲密陈出师进取利害以备金人甲午以上津潮阳旱蠲其税辛丑罢秀州御马院庄归其地于民丁未禁淮民招温处州户口除职田官田八年逋租庚戌诏御试策有及军民利害者考官衰类以闻夏五月戊子蠲崇德等十六县民淳熙十年欠税甲寅出缗钱犒给四川久戍将士六月戊午诏诸道总领举偏裨可将帅者庚申以周必大为枢密使己卯诏诸州岁买稻种备农民之阙秋七月癸卯蠲减浙东败阙坊场酒课癸丑禁诸州遏余八月庚申遣章森使金贺正旦九月甲寅再减四川酒课冬十月乙丑遣王信等贺金主生辰丙子金遣张大节等来贺会庆节盱眙军言得金人牒以上京地寒来岁正旦生辰人使权止一年壬午诏诸以忠义立庙者两淮漕臣缮治之十一月壬寅禁福建民私有兵器甲寅令峡州岁时存问处士郭雍十二月己卯戒监司州县常赋外取民

十二年春正月己丑禁交址盐入省地壬辰四川制置使留正遣人诱青羌奴儿结杀之三月乙酉进孙扩为安庆军节度使封平阳郡王

辛卯禁习渤海乐癸丑除税场高等累赏法夏四月甲子如聚景园丙子谍言故辽达实林牙假道于夏以伐金密诏吴挺与留正议之己卯如玉津园六月壬戌除诸军逋欠营运钱秋八月癸亥以太上皇寿八十令有司议庆寿礼九月丙戌诏恤湖州台州被水之家庚寅遣王信等使金贺正旦丁丑诏诸路总领军帅漕臣守臣岁上屯田所收之数冬十一月壬辰遣章森等贺金主生辰辛丑合祀天地于圜丘大赦十二月庚戌朔帅羣臣奉上太上皇帝太上皇后尊号册宝于德寿宫推恩如绍兴三十三年故事甲子以知福州赵汝愚为四川制置使丙子金遣布萨守忠等来贺明年正旦

十三年春正月庚辰朔率羣臣诣德寿宫行庆寿礼大赦中外臣僚并理三年磨勘免贫民丁身钱之半优赐内外诸军癸巳以史浩为太傅陈俊卿为少傅嗣濮王士歆为少保三月甲辰如玉津园夏四月辛亥诏吴挺结约夏人戊辰再蠲四川和余军粮二年辛未如聚景园秋闰七月戊申以敷文阁学士留正签书枢密院事己酉施师点乞免兼同知枢密院事许之九月遣李献等使金贺正旦冬十月甲午金遣完颜娄等来贺会庆节十一月戊午诏四川制置司通知马政量收水渠民包占荒田租庚申遣张叔椿等贺金主生辰丙寅梁克家罢为观文殿大学士醴泉观使兼侍读十二月丙子思州田氏献纳所买黔州民省地诏偿其道辛巳减汀州盐价岁万缗甲午陈俊卿薨乙未振临安府城内外贫乏老疾之民戊戌大理寺狱空己亥金遣耶律子元等来贺明年正旦

十四年春正月癸亥出四川椿积米贷济金洋州及关外四州饥民二月丁亥以周必大为右丞相戊子以施师点知枢密院事三月甲子如玉津园夏六月丁亥梁克家薨己亥减两浙路囚罪一等秋七月辛丑罢户部上供殿最丙午诏羣臣陈时政阙失及当今急务己酉诏监司条上州县弊事民间疾苦辛亥避殿减膳彻乐癸丑命检正都司看详羣臣封事有可行者以闻戊辰雨命结舍看详监司所条弊事八月辛未赐度牒及米振绍兴府饥癸未以留正参知政事兼同知枢密院事九月癸卯太上皇帝不豫丙午遣万锺等使金贺正旦乙丑罢增收水渠民田租丙寅除官军秋负冬十月辛未以上太上皇帝不豫赦癸酉分遣羣臣祷于天地宗庙社稷乙亥太上皇帝崩于德寿宫遗诰太上皇后改称皇太后丙子以韦璞等为金告哀使戊寅以荥阳郡王伯圭为攒宫总护使翰林学士洪迈言大行皇帝庙号当称祖诏有司集议以闻辛巳诏曰大行太上皇帝奄弃至养朕当衰服三年羣臣自遵易月之令可令有司讨论仪制以闻甲申用礼官颜师鲁等言大行太上皇帝上继徽

宗正统庙号称宗乙酉百官五上表请帝还内听政丙戌诏俟过小祥勉从所请戊子帝衰经御素辇还内以颜师鲁等充金国遗留国信使己丑金遣田彦皋等来贺会庆节诏免入见却其书币甲午诣德寿宫自是七日皆如之十一月戊戌朔诣德寿宫自是朔望皆如之己亥大行太上皇帝大祥自是帝以白布巾袍御延和殿诣德寿宫衰经而杖如初诏皇太子惇参决庶务庚子皇太子三辞参决庶务不许辛巳诣德寿宫禫祭百官释服甲辰羣臣三上表请御殿听政诏俟过祔庙戊申遣胡晋臣等贺金主生辰辛亥冬至诣德寿宫戊午诏皇太子参决庶务于议事堂己未诏三日一朝德寿宫十二月庚午大理寺狱空癸巳金遣完颜崇安等来贺明年正旦见于垂拱殿之东楹素幄诏礼物毋入殿付之有司是岁两浙江西淮西福建旱振之

十五年春正月丁酉朔诣德寿宫几筵行礼戊戌皇太子初于决庶务于议事堂乙巳诏免诸州军会庆节进奉二年诏自今御内殿令皇太子侍立庚申施师点罢甲子以黄洽知枢密院事吏部尚书萧燧参知政事二月丁亥金遣富察克忠等来吊祭行礼于德寿殿次见帝于东楹之素幄癸巳遣京镗等使金报谢三月丙寅权攒高宗皇帝于永思陵夏四月壬申帝亲行奉迎虞王之礼自是七虞八虞九虞卒哭奉辞皆如之丙戌祔高宗神主于太庙诏曰朕比下令欲衰经三年羣臣屡请御殿易服故以布素视事内殿虽诏俟过祔庙勉从所请然稽诸典礼心实未安行之终制乃为近古宜体至意勿复有请己丑诏减临安绍兴府囚罪一等民缘攒宫役者蠲其赋庚寅皇太后令车驾一月四诣德寿宫如旧礼五月己亥王淮罢壬戌始御后殿诏岁出钱五万六千余缗减广东十二州折纳米价钱六月癸酉以新江西提点刑狱朱熹为兵部郎官熹以疾未就职侍郎林栗劾之诏熹仍赴江西熹力辞不赴秋八月甲子朔日有食之九月辛丑大飨明堂以太祖太宗配大赦己酉遣郑侨等使金贺正旦冬十月癸未金遣王克温等来贺会庆节十一月庚子遣何澹贺金主生辰十二月壬午以朱熹主管西太一宫兼崇政殿说书辞不至戊子金遣田彦皋来贺明年正旦

十六年春正月癸巳金主雍殂孙璟立甲午封孙柄为嘉国公丙申黄洽罢己亥以周必大为左丞相留正为右丞相萧燧兼权知枢密院事礼部尚书王兰参知政事刑部尚书葛邲同知枢密院事乙巳萧燧罢丙午皇太后移御慈福宫戊申以昭庆军承宣使郭师禹为保大军节度使辛亥罢淮西屯田己未更德寿宫为重华宫二月辛酉朔日有食之壬戌下诏传位于皇太子 【谨案 御制全韵诗注云史臣称孝

宗自外藩入继大统而能尽宫庭之孝又力行三年之丧谓其无愧庙号然高宗晏驾去及二年遂尔内禅惟以有病不得日至德寿宫为由云

欲不退休不可迹虽袭夫孝名心实怠于政事盖知恢复之难故为引避之计不顾祖宗之基业惟图一己之便安岂足语于为君之大体乎】

是日皇太子即皇帝位素服驾之重华宫辛未上尊号曰至尊寿皇圣帝皇后曰寿成皇后绍熙五年五月壬戌寿皇圣帝不豫六月戊戌崩于

重华殿年六十有八谥曰誓文神武成孝皇帝加谥绍统同道冠德昭功哲文神武明圣成孝皇帝庙号孝宗攒于永阜陵

孝宗隆兴二年干道九年淳熙十六年凡二十七年

钦定续通志卷三十六

●钦定续通志卷三十七 宋纪十三

宋纪 【十三】

光宗 宁宗

○光宗

光宗皇帝讳惇孝宗第三子也母曰成穆皇后郭氏初授右监门卫率府副率转荣州刺史孝宗即位进镇洮军节度使开府仪同三司封

恭王及庄文太子薨孝宗以帝英武类己欲立为太子而以其非次迟之干道六年七月太史奏木火合宿主册太子当有赦是时虞允文为相

因请蚤建储贰孝宗曰朕久有此意事亦素定但恐储位既正易即纵逸尔七年正月孝宗上两宫尊号册宝礼成丞相允文复以请孝宗曰朕

既立太子即当令亲王出镇外藩卿宜讨论前代典礼允文寻以闻二月癸丑乃立帝为皇太子旋命判临安府寻领尹事淳熙十四年十月高

宗崩十一月己亥孝宗手诏令皇太子参决庶务十五年二月戊戌帝始赴议事堂会丞相周必大乞去孝宗谕以内禅之意令呈诏草并密谕

参知政事留正十六年二月壬戌下诏传位于太子孝宗吉服御紫宸殿如绍兴三十二年受禅故事班退孝宗反丧服御后殿帝侍立寻登辇

同孝宗诣重华宫帝还内即上孝宗尊号曰至尊寿皇圣帝寿皇圣帝诏立帝元妃李氏为皇后甲子帝率羣臣朝于重华宫大赦百官进秩一

等优赐诸军蠲公私逋负诸路州县淳熙十四年以前税役丙寅帝率羣臣诣重华宫上尊号册宝庚午诏五日一朝重华宫辛未尊皇太后曰

寿圣皇太后壬申诏内外臣僚陈时政阙失四方献歌颂者勿受遣罗点等使金告即位癸酉诏戒敕将帅赐前宰执从官诏访以得失乙亥遣

诸葛廷瑞等使金吊祭丙子诏戒敕官吏己卯诏官吏赃罪显著者重罚毋贷二月壬辰以周必大为少保丙申遣沈揆等使金贺即位己亥进

封子扩为嘉王癸卯金遣王元德等来告哀戊申下诏自今月四朝垂华宫甲寅以史浩为太师伯圭为少师少保士歆为少傅昭庆军节度使士岷为少保戊午金遣张万公等来致遗留物夏四月丙寅有事于太庙丁卯诏四川应起经总制钱存留三年代输盐酒重额癸酉侄柄进封许国公戊寅金遣图克坦镒等来告即位丙戌有事于景灵宫五月甲午以王兰知枢密院事兼参知政事丙申周必大罢为观文殿大学士判潭州丁酉诏丞相以下月一朝重华宫戊戌罢周必大判潭州仍以旧官为醴泉观使闰月庚申免各路淳熙十四年以前私负十五年以后输息及本者亦蠲之壬戌以赵雄为宁武军节度使开府仪同三司进封卫国公仍判江陵府庚午诏罢卖浙西常平官田癸酉诏季秋有事于明堂以高宗配戊寅蠲各路第五等户身丁钱及临安第五等户和买绢各一年仍出钱振临安贫民乙酉御后殿虑囚六月癸卯诏自今臣僚奏请事涉改法者三省枢密院详具以闻秋七月戊辰遣谢深甫等贺金主生辰庚辰下诏恤刑八月丙申减两浙月桩等钱己亥王淮薨癸丑金遣温特赫肃等来贺即位九月癸亥完颜守真等来贺重明节减绍兴和买绢遣郭德麟等使金贺正旦冬十月壬寅蠲楚州高邮盱眙军民所负常平米甲寅大阅十一月庚午诏改明年为绍熙元年丁丑减江浙月桩钱十二月壬子金遣费摩余庆等来贺明年正旦

绍熙元年春正月丙辰朔帝率羣臣诣重华宫奉上寿圣皇太后至尊寿皇圣帝寿成皇后册宝壬申再蠲临安府民身丁钱三年二月辛亥殿中侍御史刘光祖言道学非程氏私言乞定是非别邪正从之三月庚午以久雨释杖以下囚夏四月乙酉诏两淮措置流民己丑以伯圭为太保嗣秀王五月乙卯赵雄坐所举以贿收降封益川郡公削食邑一千户六月丁亥遣邱密等贺金主生辰丙申以上供等钱偿广州放免身丁钱数甲午御后殿虑囚秋七月甲寅以葛邲参知政事给事中胡晋臣签书枢密院事乙卯以留正为左丞相王兰枢密院使己亥帝率羣臣上寿皇圣帝玉牒日厯于重华宫九月丁巳金遣王修等来贺重明节庚午遣苏山等使金贺正旦冬十月丙午诏内外军帅各荐所部有将才者十二月丙戌罢王兰枢密使戊子以葛邲知枢密院事胡晋臣参知政事兼同知枢密院事丙午金遣巴特古等来贺明年正旦戊申浦城盗张海作乱诏提点刑狱丰谊捕之

二年春正月庚戌朔命两淮行义仓法壬子诏尊高宗为万世不祧之庙辛酉金主母图克坦氏殂二月壬午遣宋之瑞等使金吊祭乙酉诏以阴阳失时雷雪交作令侍从台谏两省卿监郎官馆职各言时政阙失出米赈京城

贫民丁未金遣完颜亶等来告哀三月丁巳诏自今边
事令宰相与枢密院议仍同签书丙子出右司谏邓驿夏四月乙酉从寿皇圣帝寿成皇
后如聚景园六月庚辰遣赵雄等贺金主生辰秋八月
甲申宽两浙榷铁之禁九月壬子金遣完颜兗等来贺重明节召知福州赵汝愚为吏部
尚书癸亥遣黄申等使金贺正旦乙丑以久雨命大理
三衙临安府及两浙决系囚释杖以下冬十月庚辰减百官大礼赐物三之一十一月戊
申安定郡王子彤薨辛未有事于太庙皇后李氏杀皇
贵妃壬申合祭天地于圜丘大风雨不成礼而罢帝得疾罢称贺肆赦不御楼帝自是不
视朝十二月辛丑金遣完颜宗璧等来贺明年正旦是
岁建宁府汀州水阶成西和凤四州及淮东旱振之

三年春正月庚戌蠲秀州上供米岁蠲四川盐酒重额钱丁巳命夔路转运使通融
漕计余米以备凶荒壬戌罢文州民杂役二月丁酉申
严钱银过淮之禁闰月丙午禁郡县新作寺观甲寅以王藺为端明殿学士四川安抚制
置使藺辞不行三月辛巳帝疾稍愈始御延和殿听政
以子涛为安定郡王甲申罢雅州税场五乙酉留正乞去位不许庚寅宜州蛮寇边改知
郁州沙世坚知宜州以讨之夏四月甲寅振四川旱伤
郡县乙卯以户部侍郎邱密为焕章阁直学士四川安抚制置使戊午帝朝重华宫丁卯
蠲临安民元年二年逋赋五月帝有疾不视朝己亥蠲
四川水旱州县租六月辛丑朔下诏戒飭风俗禁奢侈与士为文浮靡吏苟且饰伪者以
杖礼部尚书陈騏同知枢密院事甲申遣钱之望等贺
金主生辰壬子虑囚戊午以伯圭为太师丙寅以太尉郭师禹为少保秋七月壬申监文
思院常良孙坐赃配海外益国公周必大坐缪举降蒙
阳郡公壬子泸州卒张信等作乱杀其帅张孝芳甲申信伏诛九月乙亥金遣布萨端等
来贺重明节戊子遣郑汝谐等使金贺正旦丙申劝两
淮民种桑冬十月辛亥帝诣重华宫十一月壬申振襄阳府被水贫民辛卯帝朝重华宫
皇后继至癸巳蠲湖南北京西江西州县月桩经总制
钱十二月丙午蠲归正人赋役三年辛亥以留正为少保乙丑金遣温都逊等来贺明年
正旦

四年春正月己巳朔帝朝重华宫辛卯蠲临安府民身丁钱三年二月丙寅贷淮西
民市牛钱振江陵饥民三月丙子帝朝重华宫皇后从
辛巳以葛邲为右丞相胡晋臣知枢密院事陈騏参知政事赵汝愚同知枢密院事辛卯
监察御史汪义端罢癸巳帝从寿皇圣帝寿成皇后如
聚景园夏四月己酉罢括卖四川沿边州县官田五月壬辰太尉利州安抚使吴挺卒六
月丙申留正出城待罪振江浙两淮荆湖被水贫民己

亥遣许及之等贺金主生辰壬寅诏市淮马充沿江诸军战骑戊申胡晋臣薨己酉御后殿虑囚癸丑蠲临安增民税钱秋七月丙子以不雨命诸路提刑决滞狱戊寅命临安府及三衙决系囚释杖以下壬午以赵汝愚知枢密院事吏部尚书余端礼同知枢密院事乙酉叙州夷没该落无等寇边遣兵讨平之八月丙申蠲绍兴丁盐茶租钱丁酉罢郡县卖没官田癸丑诏三省议振州县水旱戊午振江东浙西淮西旱伤贫民九月己巳金遣董师中等来贺重明节庚午重明节百官上寿侍从两省请帝朝重华宫不听壬午遣倪思等使金贺正旦戊子著作郎沈有开秘书郎彭龟年礼部侍郎倪思等咸上疏请朝重华宫冬十月壬子秘书省官请朝重华宫疏三上不报戊午太学生汪安仁等二百一十八人上书请朝重华宫皆不报己未丞相以下奏事重华宫庚申帝将朝重华宫复以疾不果丞相以下上疏自劾请罢政皆不报十一月戊寅帝朝重华宫遣右司郎官徐谊召留正于城外庚辰正复赴都堂视事癸未帝率羣臣奉上皇太后尊号册宝于慈福宫十二月戊戌帝朝重华宫壬寅右司谏章颖以地震请罢葛邲疏十余上不报庚戌赵雄薨以朱熹为湖南安抚使知潭州【据本传增】丁巳振江浙流民己未金遣完颜弼等来贺明年正旦

五年春正月癸亥朔帝御大庆殿受羣臣朝遂朝重华宫次诣慈福宫行庆寿礼推恩如淳熙十年故事癸酉寿皇圣帝不豫癸未葛邲罢丙戌宽绍兴府民租二月乙未赵汝愚余端礼以奏除西帅居家待罪戊戌以荆鄂诸军都统制张诏为成州团练使兴州诸军都统制庚戌禁湖南江西遏余夏四月甲午帝如玉津园皇后及后宫皆从乙未寿皇圣帝如东园丙申史浩薨己亥朝献于景灵宫壬寅以不雨命大理三衙临安府及两浙决系囚释杖以下甲辰侍从入对请朝重华宫己酉太学生程肖说等以帝未朝移书大臣帝期以癸丑日朝至期丞相以下入宫门俟日昃帝复以疾不果出侍从馆学官上疏乞罢黜居家待罪职事官请去待罪者百余人诏不许丙辰侍讲黄裳秘书少监孙逢吉等再上疏以请丁巳起居郎兼权中书舍人陈傅良请以亲王执政或近上宗戚一人充重华宫使台谏交章劾内侍陈源杨舜卿林亿年离闲两宫请罢逐之五月辛酉振州猺寇边甲子侍从入对未得见宰执诣重华宫问疾不及引陈傅良缴上告敕出城待罪丁卯以寿皇圣帝疾棘命丞相以下分祷天地宗庙社稷戊辰丞相留正等请帝侍疾正随帝至福宁殿不得命辛未丞相以下求退帝命皆退于是丞相以下出城待罪乙亥帝将朝重华宫复不果戊寅以寿皇圣帝疾赦权刑部尚书京镗入对请朝重华宫庚

辰丞相以下诣重华宫问疾癸未起居舍人彭龟年请朝重华宫甲申从官列奏以请嘉王府翊善黄裳讲读官沈有开彭龟年奏乞令嘉王诣重华宫问疾王至重华宫寿皇为之感动丙戌权户部侍郎袁说友入对请朝重华宫六月遣梁总等贺金主生辰戊戌夜寿皇圣帝崩遗诏改重华宫为慈福宫建寿成皇后殿于宫后以便定省先是丞相留正知枢密院事赵汝愚参知政事陈騏同知枢密院事余端礼闻寿皇圣帝大渐见帝于后殿力请帝朝重华宫嘉王亦泣以请不听至是丞相正等闻寿皇圣帝崩乃率百官听遣诏于重华宫己亥丞相以下请诣重华宫成礼庚子遣薛叔似等使金告哀辛丑丞相率百官拜表称就丧次成服壬寅寿皇大敛嘉王复入奏事诏候疾愈过宫行礼丞相以下请皇太后垂帘听政不许请代行祭奠礼许之仍有旨皇帝有疾听就内中成服乙巳募寿圣隆慈备福皇太后为太皇太后寿成皇后为皇太后乙卯遣林湜等使金致遗留物秋七月辛酉丞相留正称疾乞罢遂逃归甲子太皇太后以皇帝疾未能执丧命皇子嘉王即皇帝位尊皇帝为太上皇帝皇后为寿仁太上皇后移御泰安宫庆元元年十一月戊戌上尊号曰圣安寿仁太上皇帝六年八月庚寅太上皇帝不豫辛卯崩于寿康宫年五十有四谥曰宪仁圣哲慈孝皇帝加谥循道宪仁明功茂德温文顺武圣哲慈孝皇帝庙号光宗攒于永崇陵

光宗绍熙五年

○ 熈宗

熈宗皇帝讳扩光宗第二子也母曰慈懿皇后李氏初授右千牛卫大将军封英国公进封平阳郡王光宗受禅以帝为武熈军节度使封嘉王绍熙五年六月孝宗崩光宗以疾不能执丧丁未宰相留正请立帝为皇太子越六日奏三上光宗许之正拟旨以进而光宗手批付丞相云厯事岁久念欲退闲正得之大惧遂称疾辞去知枢密院事赵汝愚乃遣韩侂胄因内侍固请于太皇太后太皇太后令如御批奉行秋七月甲子汝愚出以旨谕帝帝固辞曰恐负不孝名汝愚曰天子当以安社稷定国家为孝今中外忧乱万一变生置太上皇何地众扶入素幄汝愚率同列再拜帝诣几筵殿哭尽哀须臾班定帝衰服出就重华殿东庑素幄即皇帝位百官起居讫乃入行禫祭礼诏建泰安宫以奉太上皇帝太上皇后汝愚即丧次请召还留正乙丑太皇太后令立崇国夫人韩氏为皇后丙寅大赦百官进秩一级优赏诸军诏五日一朝泰安宫百官月两朝丁卯侍御史张叔椿劾留正擅去相位以叔椿为吏部侍郎戊辰诏求直言遣郑湜使金告禅位己巳以赵汝愚兼参知政事庚午召秘

阁修撰知潭州朱熹诣行在乙亥以赵汝愚为右丞相参知政事陈騏知枢密院事余端礼参知政事仍兼同知枢密院事汝愚辞不拜庚辰率羣臣拜表于泰安宫辛巳以赵汝愚为枢密使保大军节度使郭师禹为攒宫总护使壬午内侍林亿年陈源杨舜卿并与宫观韩侂胄落阶官为汝州防御使癸未余端礼辞兼同知枢密院事甲申以兵部尚书罗点签书枢密院事八月己丑朔安定郡王子涛薨癸巳以朱熹为焕章阁待制兼侍读辛丑诏诸道举廉吏纠污吏壬寅诏经筵官开陈经旨救正阙失进封弟许国公柄为徐国公癸卯加嗣濮王士歆少师郭师禹少傅夏执中少保丁未命三省议振诸路州县水旱乙卯诏岁减广西盐额丙辰留正罢以观文殿大学士判建康府以赵汝愚为右丞相九月己巳命赵汝愚朝献景灵宫庚子命嗣秀王伯圭朝飨太庙是日罗点薨辛未合祭天地于明堂大赦壬申以刑部尚书京镗签书枢密院事冬十月己丑留正落观文殿大学士乙未诏以阴阳谬整令台谏侍从各疏朝政阙失以闻庚子以久雨命大理三衙临安府两浙州县决系囚释杖以下辛丑减两浙江东西路和市折帛钱蠲两浙路丁盐身丁钱一年甲辰趣后省看详应诏封事丙午却瑞庆节贺表壬子遣曾三复使金贺正旦乙丑遣林季友使金报谢戊辰金遣使求吊祭戊寅侍讲朱熹罢壬午诏改明年为庆元元年十一月丙午帝自重华宫还大内庚戌以宜州观察使韩侂胄兼枢密都承旨辛亥诏行孝宗三年丧制命礼官条具典礼以闻乙卯权攒孝宗皇帝于永阜陵十二月丁巳蔡民间妄言宫禁事乙丑御史中丞谢深甫劾陈傅良罢之己巳陈騏罢庚午以余端礼知枢密院事京镗参知政事郑侨同知枢密院事癸酉金遣使来贺即位丁丑减临安绍兴二府死罪以下囚民缘攒宫役者蠲其赋戊寅加郭师禹少师进封永宁郡王癸未金遣使来贺明年正旦是岁两浙淮南京东西路水旱振之仍蠲其赋

庆元元年春正月丁巳朔蠲两淮租税壬寅黎州蛮寇边官军击却之乙巳蠲台严湖三州贫民身丁折帛钱一年二月丁巳诏两淮诸州劝民垦荒田壬戌诏嗣秀王伯圭赞拜不名癸亥以久雨释大理三衙临安府两浙路杖以下囚戊寅赵汝愚罢为观文殿大学士知福州己卯以余端礼兼参知政事庚辰兵部侍郎章颖罢甲申赵汝愚与观宫三月丙戌朔日有食之甲寅国子祭酒李祥博士杨简罢夏四月丁巳太府寺丞吕祖俭送韶州安置己未以余端礼为右丞相京镗知枢密院事郑侨参知政事谢深甫签书枢密院事庚申太学生杨宏中等六人各送五百里外编管五月戊子吕祖俭改送吉州安置戊戌诏戒百官朋比辛亥减大理三衙

临安府杂犯死罪以下六月丁巳复留正观文殿大学士充醴泉观使己未遣汪义瑞贺金主生辰癸酉以韩侂胄为保宁军节度使提举万寿观秋七月壬辰加周必大少傅丁酉落赵汝愚观文殿大学士罢宫观八月己巳诏内外诸军主帅条奏武备边防之策以闻九月壬午朔蠲临安府水灾贫民租乙酉以久雨决系囚甲辰遣黄艾使金贺正旦己酉蠲台严湖三州被灾民丁绢冬十月戊辰金遣吴鼎枢来贺瑞庆节壬申封子恭为安定郡王十一月庚寅以徐国公柄为昭庆军节度使丙午责授赵汝愚宁远军节度副使永州安置丁未命宰执大阅十二月丙子以朱熹为焕章阁待制辞丁丑金遣赫舍哩正来贺明年正旦

二年春正月庚寅以余端礼为左丞相京镗为右丞相郑侨知枢密院事谢深甫参知政事御史中丞何澹同知枢密院事庚子赵汝愚卒于永州甲辰留正落观文殿大学士罢宫观二月辛未再蠲临安府民身丁钱三年四月己亥进封弟柄为吴兴郡王夏四月甲子余端礼罢壬申以何澹参知政事吏部尚书叶翥签书枢密院事五月辛巳以旱祷于天地宗庙社稷诏大理三衙临安府两浙州县决系囚乙酉申严狱囚瘐死之罚甲午减诸路和市折帛钱三年六月庚戌遣吴宗旦贺金主生辰诏谏臣无及伪学旧事【据宏简录增辑】秋七月癸未飨于太庙丙戌减诸路死罪囚释流以下戊子量徙流人吕祖俭等于内郡戊戌以韩侂胄为开府仪同三司万寿观使八月丙辰权住进拟伪学之党九月癸巳嗣濮王士歆薨丁酉遣张贵谟使金贺正旦冬十月戊申率羣臣奉上寿圣太皇太后寿成皇太后寿仁太上皇帝寿仁太上皇后尊号册宝于慈福寿康宫壬戌金遣张嗣来贺瑞庆节甲戌大阅十二月辛未完颜崇道来贺明年正旦是月落朱熹秘阁修撰罢宫观甯处士蔡元定于道州

三年春正月壬寅郑侨罢癸卯以谢深甫兼知枢密院事二月丁巳诏自今权臣伪学之党勿除在内差遣三月庚子禁浙西州军围田壬寅诏有司奏讞死罪不当者论如律夏四月丙午以不■〈禾去〉为嗣濮王壬子以旱祷于天地宗庙社稷闰六月乙亥遣卫泾贺金主生辰甲午诏留正分司西京邵州居住是夏广东大奚山岛民作乱秋八月辛卯知广州钱之望遣兵入大奚山擒岛民尽杀之甲午均诸路战田九月壬寅以四川旱诏蠲其租辛酉遣曾炎使金贺正旦是月诏监司帅守荐举改官勿用伪学之人冬十月丙戌金遣完颜愈来贺瑞庆节丙申以太皇太后不豫赦十一月辛丑太皇太后吴氏崩壬寅朝献景灵宫癸卯朝飨太庙甲

辰祀天地于圜丘大赦乙巳诏为大行太皇太后服期

丁未遣赵介使金告哀十二月丁巳以大行太皇太后攒官蠲绍兴府贫民明年身丁折帛绵绢乙未金遣鄂屯忠孝来贺明年正旦丁酉诏籍伪学姓名

四年春正月丙寅以叶翥同知枢密院事丁卯诏有司恤两浙江淮荆湖四川流民三月乙丑金遣乌凌阿天益来吊祭夏四月己丑蠲临安绍兴二府租有差是月遣汤硕使金报谢五月己亥加韩侂胄少傅己酉诏禁伪学六月己巳遣杨王休贺金主生辰秋七月辛酉叶翥罢八月丁卯朔以久雨决系囚丙子以谢深甫知枢密院事兼参知政事吏部尚书许及之同知枢密院事九月庚申遣马觉使金贺正旦冬十月甲子金遣孙铎来贺瑞庆节十二月丙戌再蠲临安府民身丁钱三年己丑金遣杨庭筠来贺明年正旦

五年春正月庚子停彭龟年曾三聘官二月乙酉责刘光祖房州居住夏五月壬辰朔新厯成赐名曰统天六月癸亥遣李大性贺金主生辰秋七月甲寅禁高丽日本商人博易铜钱八月丙戌诏减诸路流囚释杖以下推恩如庆寿故事丁亥进京镗等官一级九月庚寅加韩侂胄少师封平原郡王丙辰遣朱致知使金贺正旦冬十月庚申封郭师禹为广陵郡王丙子金遣布萨琦来贺瑞庆节十二月辛酉嗣濮王不■〈禾去〉薨甲申金遣范楫来贺明年正旦是岁饶信江抚严衢台七州建昌兴国军广东诸州水振之

六年春二月戊辰减诸路杂犯死罪以下闰月庚寅以京镗为左丞相谢深甫为右丞相何澹知枢密院事兼参知政事乙巳复留正少保观文殿大学士致仕辛亥以殿前副都指挥使吴曦为昭信军节度使三月甲子朱熹卒辛未从寿成惠慈皇太后如聚景园己卯安定郡王子恭薨夏四月己酉以不璽为嗣濮王五月丙辰以旱决中外系囚癸亥避正殿减膳丙寅诏大理三衙临安府及诸路阙雨州县释杖以下囚戊辰诏侍从台谏两省卿监郎官馆职疏陈阙失及当今急务辛未以久不雨诏中外陈朝廷过失及时政利害六月乙酉朔日有食之丁亥以太上皇后违豫赦戊子太上皇后李氏崩壬辰遣赵善义贺金主生辰吴玠使金告哀戊申许及之去位秋七月丁卯以御史中丞陈自强签书枢密院事八月庚寅以太上皇帝违豫赦辛卯太上皇帝崩甲午遣李寅仲使金告哀丁酉京镗薨九月甲子婺州布衣吕祖泰上书杖之仍配钦州牢城己巳命谢深甫朝献景灵宫庚午命嗣濮王不璽朝献太庙辛未合祭天地于明堂大赦丙子遣丁常任为金国遗留国信使冬十月丙

戌加韩侂胄太傅戊子遣林桷使金贺正旦十二月辛卯权攢光宗皇帝于永崇陵己亥金遣乌库哩谊来吊祭癸卯遣虞俦使金报谢诏改明年元乙巳蠲临安绍兴二府民缘攢宫役者租戊申金遣赫舍哩忠定来贺明年正旦己酉加吴曦太尉诏罢四川总领所所增关外四川营田租是岁建宁府徽严衢婺饶信南剑七州水建康府常润扬楚通泰和七州江阴军旱振之

嘉泰元年春正月丙子金遣完颜充来吊祭二月壬辰遣俞烈使金报谢癸巳少傅观文殿大学士致仕周必大降少保夏四月辛巳诏有司振临安府被火居民壬午下诏自责癸未避正殿减膳甲申命临安府察奸民纵火者治以军法辛卯龙州蕃部寇边遣官军讨之诏以风俗侈靡灾后官军营造务遵法制内出销金铺翠焚之通衢禁民无或服用五月戊申以旱祷于天地宗庙社稷诏大理三衙临安府两浙州县决系囚癸亥释诸路杖以下囚丁卯命有司举行宽恤之政十六条六月辛巳遣陈宗召贺金主生辰秋七月乙卯何澹罢丁巳以旱复祷于天地宗庙社稷壬戌释大理三衙临安府及诸路阙雨州县杖以下囚甲子以陈自强参知政事兼同知枢密院事张釜签书枢密院事丁卯复振被火贫民己巳以吴曦为兴州都统制兼知兴州八月甲申张釜罢以陈自强兼知枢密院事给事中张岩参知政事右谏议大夫程松同知枢密院事九月辛亥遣朝臣二人决浙西围田辛未遣李景和使金贺正旦冬十月甲申免瑞庆节诸道入贡丙戌以韩侂胄定策事迹付史馆甲午金遣图克坦怀忠来贺瑞庆节十一月庚申蠲潭州民旧输黄河铁缆钱十二月庚寅复免临安府民身丁钱三年癸卯金遣赫舍哩真来贺明年正旦是岁浙西江东两淮利州路旱振之仍蠲其赋

二年春正月癸亥以知合门事苏师旦兼枢密都承旨二月癸巳禁行私史夏五月甲辰朔日有食之六月丙子遣赵不艰贺金主生辰辛卯禁都民以火说相惊者秋七月辛亥封子覲为安定郡王癸亥以旱释诸路杖以下囚己巳命有司奉行宽恤之政七条庚午祷于天地宗庙社稷复行宽恤四事八月丙子以吏部尚书袁说友同知枢密院事九月丙寅嗣秀王伯圭薨冬十月戊子金遣完颜瑋来贺瑞庆节乙未遣鲁谊使金贺正旦是月追复朱熹焕章阁待制致仕十一月庚戌以陈自强知枢密院事前同知枢密院事许及之参知政事十二月甲戌帝率羣臣奉上寿成太皇太后尊号册宝于寿慈宫甲申立贵妃杨氏为皇后加韩侂胄太师庚寅大阅闰月乙卯以福州观察使曦为威武军节度使封卫国公丁卯金遣图克坦公弼来贺明年正旦是月复周必大少傅观文殿大学士是

岁建宁府福汀南剑泸四州水邵州旱振之

三年春正月庚辰谢深甫罢戊子龙州蕃部复寇边遣官军讨之甲午张岩罢丙申以陈自强兼知政事戊戌如太学遂至武学监学官进秩一级诸生推恩赐帛有差以袁说友参知政事权翰林学士知制诰傅伯焘签书枢密院事伯焘辞不拜二月乙巳以吏部尚书费士寅签书枢密院事三月丁丑以久雨诏大理三衙临安府决系囚乙酉如聚景园夏四月己亥朔日有食之五月戊寅以陈自强为右丞相许及之知枢密院事仍兼参知政事庚辰以旱诏大理三衙临安府释杖以下囚癸未命有司搜访旧闻修三朝正史以书来上者赏之是月以苏师旦为定江军承宣使六月壬寅遣刘甲贺金主生辰己酉减大理三衙临安府囚罪一等秋七月癸未禁江浙州县抑纳逃赋九月庚午袁说友罢遣张孝曾使金贺正旦冬十月庚子诏宥吕祖泰癸卯以费士寅参知政事华文阁学士知镇江府张孝伯同知枢密院事戊申龙州蕃部降壬子金遣完颜奕来贺瑞庆节十一月癸酉朝献景灵宫甲戌朝飨太庙乙亥祀天地于圜丘大赦己丑安定郡王子觐薨十二月辛酉下诏戒敕将帅掊克金遣通吉思忠来贺明年正旦是冬金国多难沿边聚粮增戍且禁襄阳榷场边衅之开盖自此始

四年春正月壬辰琼州西浮洞逃军作乱寇文昌县遣兵讨平之二月壬子蠲临安府逋负酒税三月丁卯临安大火迫太庙权奉神主于景灵宫己巳避正殿庚午命临安府振被火民辛未诏修太庙甲戌下诏罪己乙亥诏百官疏陈时政阙失夏四月甲辰许及之罢振江西水旱州县乙巳以费士寅兼知枢密院事张孝伯参知政事吏部尚书钱象祖赐出身同知枢密院事六月癸巳遣张嗣古贺金主生辰秋七月甲子以旱诏大理三衙临安府两浙及诸路决系囚戊辰禱于天地宗庙社稷己巳命诸路提刑从宜断疑狱蠲内外诸军逋负营运息钱辛未蠲两浙阙雨州县逋租八月癸丑蠲绍兴府攒宫所在民身丁钱绢绵盐丙辰除静江府昭州折布钱戊午张孝伯罢九月壬午遣邓友龙使金贺正旦冬十月庚子以资政殿大学士淮东安抚使张岩参知政事壬寅金遣完颜昌来贺瑞庆节十一月乙未朔诏两淮荆襄诸州值荒歉奏请不及者听先发廩以闻庚午封伯栩为安定郡王十二月癸巳诏总核内外财赋以陈自强兼国用使费士寅张岩同知国用事己亥诏改明年元壬寅禁州县挟私籍民产甲辰再蠲临安府民身丁钱三年乙卯金遣乌凌阿毅来贺明年正旦

开禧元年春二月癸巳夺徐安国三官癸卯诏国用司立考核财赋之法丙午蠲临

安府逋负酒税三月癸未费士寅罢夏四月戊子以钱象祖参知政事兼同知枢密院事吏部尚书刘德秀签书枢密院事辛卯以江陵副都统李奕为镇江都统皇甫斌为江陵副都统兼知襄阳府甲寅武学生华岳送建宁府编管乙亥以卫国公曦为皇子进封荣王甲申镇江都统戚拱遣忠义人朱裕结弓手李全焚涟水县是月金以边民侵掠及增边戍来责渝盟六月戊子罢广东税场八十一墟辛卯诏内外诸军密为行军之计戊戌命诸路安抚司教阅禁军己亥遣李壁贺金主生辰庚子进程松资政殿大学士为四川制置使辛丑淮东安抚郑挺坐擅纳北人牛真及劫涟水军夺二官罢壬子减大理三衙临安府囚罪一等秋七月庚申诏韩侂胄平章军国事立班丞相上三日一朝赴都堂治事命兴元都统司增招战兵丙寅以苏师旦为安远军节度使领合门事丁卯诏侍从两省台谏在外待制学士已上及内外文武官各举将帅边守一二人壬午诏诸路提刑提举司措置保甲癸未以韩侂胄兼国用使以旱诏大理三衙临安府两浙州县及诸路决系囚八月丙戌蠲两浙阙雨州县赃赏钱丁亥命湖北安抚司增招神劲军乙巳以殿前副都指挥使郭倪为镇江都统兼知扬州九月丁亥刘德秀罢庚子诏官吏犯赃追还所受如旧法丁未遣陈景俊使金贺正旦冬十月庚午金遣赫舍哩子仁来贺瑞庆节复置和州马监十一月乙酉置殿前司神武军五千人屯扬州庚午诏两淮京西监司帅守讲行宽恤之政增刺马军司弩手癸酉诏永除两浙身丁钱绢戊寅金遣赵之杰来贺明年正旦诏以正旦朝见著作郎朱质上书请斩金使不报是岁江浙福建二广诸州旱两淮京西湖北诸州水振之

二年春正月癸未朔蠲两浙路身丁絀绵辛丑更名国用司曰国用参计所是月雅州蛮高吟师寇边遣官军讨之二月乙卯以火灾避正殿彻乐丁巳以久雨诏大理三衙临安及诸路决系囚三月癸巳以程松为四川宣抚使吴曦为宣抚副使己亥从太皇太后如聚景园乙巳钱象祖罢以张岩兼知枢密院事丙午钱象祖夺二官信州居住己酉罢知处州徐邦宪夏四月己未雅州蛮作乱焚碉门砦庚申四川宣抚司调御前大军讨之甲子以薛叔似为兵部尚书湖北京西宣抚使邓友龙为御史中丞两淮宣抚使下纳粟补官之令戊辰以吴曦兼陕西河东路招抚使己巳调三衙兵增戍淮东庚午追夺秦桧王爵命礼官改谥乙亥以郭倪兼山东东路招抚使鄂州都统赵淳兼京西北路招抚使皇甫斌兼京西北路招抚副使丁丑吴曦献关外四州于金镇江都统制陈孝庆复泗州江州统制许进复新息县戊寅光州忠义人孙成复褒信

县五月辛巳陈孝庆复虹县吴兴郡王柄薨丙戌江州都统王大节引兵攻蔡州不克军大溃丁亥下诏伐金癸巳以伐金告于天地宗庙社稷
皇甫斌引兵攻唐州败绩兴元都统秦世辅出师至城固县军大乱甲午以池州副都统郭倬主管马军行司公事李汝翼会兵攻宿州败绩壬寅简荆襄两淮田卒以备战兵癸卯郭倬等还至蕲县金人追之倬执马军司总制田俊迈与金人六月壬子王大节除名袁州安置寻徙封州
癸丑建康都统李爽攻寿州败绩甲寅邓友龙罢以江南东路安抚使邱密为刑部尚书两淮宣抚乙卯雅州蛮高吟师出降杀之丁巳减大理三衙临安府囚罪一等释杖以下夺郭倬李汝翼二官辛酉夺皇甫斌三官甲子李爽罢丁卯曲赦泗州减杂犯死罪囚蠲其租三年建康副都统田琳复寿春府戊辰雅州蛮复寇边甲戌夺李爽三官汀州居住再夺皇甫斌五官南安军安置丙子夺邓友龙三官兴化军居住戊寅苏师旦罢是月命邱密至扬州部署诸将悉三衙江上军分守江淮要害金人封吴曦为蜀王秋七月辛巳夺苏师旦三官衡州住居仍籍其家罢皇
伤州军比较租赋一年壬午雅州蛮出降庚子苏师旦除名韶州安置癸卯以张岩知枢密院事礼部尚书李壁参知政事八月丙寅斩郭倬于镇江戊辰再夺李爽三官南雄州安置九月壬午金兵攻夺和尚原己丑朝献景灵宫庚寅朝飨太庙辛卯合祭天地于明堂大赦冬十月戊申诏内外军帅各举智勇可将帅者二人辛酉罢瑞庆节宴十一月庚辰命主管殿前司公事郭杲驻真州以援两淮辛巳金人破枣阳军甲申以邱密签书枢密院事督视江淮军马金人侵神马坡江陵副都统魏友谅突围趋襄阳乙酉赵淳焚樊城乙未避正殿减膳以湖广总领陈谦为湖北京西宣抚副使丙申金人去庐州丁酉金人攻旧岷州守将王喜遁戊戌金人围和州又破信阳军辛丑围襄阳壬寅破随州甲辰金人破真州乙巳金人破西和州是月濠州安丰军及边屯皆为金人所破十二月戊申金人围德安府庚戌金人破成州守臣辛樵之遁吴曦焚河池县退屯青野原辛亥释大理三衙临安府杖以下囚癸丑金人去和州甲寅金人攻六合县郭倪遣前军统制郭僕救之遇于胥浦桥大败倪弃扬州走丁巳金人破大散关癸亥魏友谅军溃于花泉丁卯金人攻七方关兴州中军正将李好义拒却之戊辰吴曦还兴州金人自淮南退师留一军据濠州己巳责授敦倪果州团练副使南康军安罢庚午辞叔似陈谦罢以京湖北路安副使吴猎为湖北京西宣抚使复两浙围田募两浙流民耕种甲戌以镇江副都统毕再遇为镇江都统权山东京东路招抚司公事乙亥四川宣抚使程松遁是岁蒙古特穆津称帝于哈那

河 【据元史增辑】

三年春正月丁丑朔邱密罢己卯以知枢密院事张岩督视江淮军马庚辰以陈自强兼枢密使癸未金人攻阶州庚寅诏建康府给淮民装钱遣归业辛卯吴曦招通判兴元府权大安军事杨震仲震仲不屈死之癸巳命两淮帅守监司招集流民甲午吴曦僭位于兴州甲辰夺池州都统陈孝庆三官罢二月壬子以金师退御正殿复膳甲寅削福建路总管兼延祥水军统制商荣官柳州安置己未罢程松四川宣抚使以成都府路安抚使杨辅为四川制置使沿江制置使叶适兼江淮制置使庚申以旱诏大理三衙临安府决系囚甲子振旱伤州县贫民命诸路提刑司从宜断疑狱丁卯罢江浙荆湖福建招军庚午金人去襄阳辛未以旱祷于天地宗庙社稷命有司举行宽恤之政八条蠲两淮被兵诸州今年租乙亥释两浙路杖以下囚四月宣抚副使司随军转运安丙及兴州中军正将李好义监四川总领所兴州合江仓杨巨源等共诛吴曦传首诣行在献于庙社并诛曦妻子家属徙岭南夺其父挺官迁吴璘子孙出蜀存其庙祀玠子孙免连坐三月丙子朔蠲两淮被兵州郡役钱丁丑斩伪四川都转运使徐景望于利州壬辰兴州将刘昌国引兵至阶州金人退去癸巳李好义复西和州丁酉金人去成州庚子以杨辅为四川宣抚使安丙为端明殿学士四川宣抚副使起居舍人许奕为四川宣谕使落程松资政殿大学士夺六官筠州安置忠义统领张翼复凤州辛丑曲赦四川减杂犯死罪以下壬寅责授程松顺昌军节度副使澧州安置夏四月戊申以吴猎兼四川宣谕使司癸丑两淮湖北京西被兵诸州减杂犯死罪以下蠲湖北京西诸郡今年租四川忠义人复大散关己未奉使金国通谢国信所参议官方信孺发行在庚申以兵部尚书宇文绍节知江陵府权湖北京西宣抚使丁卯以吴猎为四川制置使戊辰以资政殿学士钱象祖参知政事癸酉金人复破大散关甲戌赦西和阶成凤四川五月己丑以旱祷于天地宗庙社稷辛卯以太皇太后有疾赦是日崩四川宣抚副使司参赞军事杨巨源与金人战于长桥败绩戊戌诏四川宣抚使制置司分治兵民庚子以李好义为沔州副都统制辛丑好义袭秦州败绩六月己未李好义卒癸亥以林拱辰为金国通谢使遣富管使金告哀刘弥正贺金主生辰癸酉安丙杀其参议官杨巨源秋七月己卯以不侍为嗣濮王乙酉以灾伤下诏罪己九月丁丑诏诸路帅臣申儆边备壬午方信孺夺三官临江军居住辛卯以赵淳为殿前副都指挥使兼江淮制置使乙未张岩罢辛丑遣王柟持书赴金国都副元帅府冬十月乙巳减临安绍兴二府囚罪一等蠲民缘攒宫役者租十一

月甲戌韩侂胄罢平章军国事陈自强罢右丞相乙亥
礼部侍郎史弥远等诛韩侂胄于玉津园以钱象祖兼知枢密院事李壁兼同知枢密院
事以诛韩侂胄诏天下丁丑以夏震为福州观察使主
管殿前司公事夺陈自强三官永州居住戊寅责授苏师旦武泰军节度副使韶州安置
己卯斩之诏中外臣僚各具所见以闻辛巳再夺邓友
龙五官南雄州安置寻除名徙循州丙戌以御史中丞卫泾签书枢密院事兼参知政事
丁亥诏立皇子荣王曦为皇太子更名熈戊子郭倪除
名梅州安置郭倪除名连州安置仍籍其家夺李壁三官抚州居住癸巳夺张岩二官徽
州居住己亥大赦十二月癸卯以邱密为江淮制置大
使以许奕为金国通问使己酉落叶适宝文阁待制蠲两淮州军租一年庚戌夺许及之
二官泉州居住夺薛叔似二官福州居住再夺皇甫斌
五官英德府安置癸丑金人复破随州辛酉以钱象祖为右丞相兼枢密使卫泾及给事
中雷孝友并参知政事吏部尚书林大中签书枢密院
事乙未以礼部尚书史弥远同知枢密院事丁卯诏改明年元

嘉定元年春正月辛巳下诏求言壬午王柟还自河南持金人牒求韩侂胄首戊子
安定郡王伯栩薨壬辰以史弥远知枢密院事以许奕
为金国通谢使二月戊申追复赵汝愚资政殿大学士诏史官改绍熙以来韩侂胄事迹
壬子诏临安府振流民戊午责授程松果州团练副使
宾州安置是月郴州黑风峒寇罗世传作乱招降之三月戊子下诏戒飭内外复秦桧王
爵赠谥己丑王柟自军前再还行在辛卯梟韩侂胄首
于两淮夏四月戊午再责授陈自强复州团练副使雷州安置仍籍其家闰月癸未诏大
理三衙临安府及诸路阙雨州县决系囚释杖以下甲
申诏自今视事令皇太子侍立辛卯以旱祷于天地宗庙社稷癸巳减膳乙未蠲两浙阙
雨州县贫民逋租命大理三衙临安府两浙州县决系
囚丙子如太乙宫明庆寺祷雨丁酉以旱诏求言五月乙丑以飞蝗为灾减膳丁卯诏侍
从台谏疏奏阙政监司守令条上民间利害六月庚午
金人归大散关辛未金人归濠州乙亥卫泾罢丙子遣邹应龙贺金主生辰甲申林大中
薨乙酉以蝗祷于天地社稷丙戌诏侍从两省台谏举
沿边守臣辛卯以史弥远兼参知政事秋七月癸丑以邱密同知枢密院事八月戊辰朔
振贫民辛未邱密卒辛巳以礼部尚书娄机同知枢密
院事吏部尚书楼钥签书枢密院事甲午发米振江淮流民九月辛丑金使完颜侃乔宇
入见壬子出安边所钱命江淮制置大使司余米振饥
民己未以和议成谕天下甲子遣曾从龙使金贺正旦乙丑赦沿边诸州冬十月丙子以
钱象祖为左丞相史弥远为右丞相雷孝友知枢密院

事仍兼参知政事娄机参知政事楼钥同知枢密院事庚辰封伯祝为安定郡王辛巳蔡璉除名配赣州牢城癸未金遣使来贺瑞庆节十一月丙辰金主璟殂戊午史弥远去位十二月戊辰钱象祖罢戊寅改命曾从龙使金吊祭己卯黎州蛮畜卜寇边己丑遣宇文绍彭使金贺即位辛卯蠲两淮州军二税一年

二年春正月辛丑金遣费摩正来告哀丁巳以楼钥参知政事御史中丞章良能同知枢密院事吏部尚书宇文绍节签书枢密院事庚申金遣富察知刚来献遗留物二月己巳金遣使来告即位庚午黎州蛮寇边三月戊午禁两淮官吏私买民田辛酉罢漳泉福三州兴化军卖废寺田壬戌出内库钱为临安贫民棺槨费夏四月乙丑诏诸路监司督州县捕蝗戊辰江淮制置司言放庐濠二州忠义军归农五月丙申史弥远起复丁酉以旱诏诸路监司决系囚劾守令之贪残者戊戌借补武训郎罗日愿谋变伏诛辛丑申命州县捕蝗癸卯诏两淮荆襄守令以户口多寡为殿最乙卯释大理三衙临安府两浙州县杖以下囚除茶盐使钱己未以旱诏羣臣上封事庚申禱于天地宗庙社稷六月癸亥命浙西诸州谕民种麻豆毋督其租诏台省及诸路监司决滞狱己巳遣俞应符贺金主生辰乙酉复禱雨于天地宗庙社稷己丑命江西福建二广丰稔诸州余运以给临安仍偿其费辛卯京湖制置司言放诸州新军及忠义人归农秋七月癸巳命有司举行宽恤之政五条乙未诏荒歉州县七岁以下男女听异姓收养着为令己亥蠲信阳荆门汉阳军民赋壬寅命两淮转运司给诸州民麦种癸卯募民以振饥免役八月乙丑以安丙为四川制置大使己卯黎州蛮复寇边丙戌发米振两淮饥民九月己亥朝献景灵宫庚子朝享太庙辛丑合祭天地于明堂大赦己未遣费培使金贺正旦冬十月丁丑金遣使来贺瑞庆节己丑命两淮转运司给诸路民稻种减公私房廊白地钱什之三十一月辛卯沔州统制张林等谋作乱事觉贷死除名广南羁管甲午诏浙西监司募饥民修水利是月郴州黑风峒李元砺作乱连破吉郴诸县遣荆鄂江池四州军讨之十二月甲子四川制置大使司调官军讨黎州蛮败绩己巳赐朱熹谥曰文乙亥诏诸州毋余职田租丙戌金遣使来贺明年正旦是岁扬楚衡郴吉五州南安军盗起

三年春正月甲辰下诏招谕羣盗二月辛酉黎州蛮复寇边壬午以工部侍郎王居安知隆兴府督捕峒寇三月丁酉蠲都城及荒歉诸州民逋负己亥以湖南转运判官曹彦约知潭州督捕峒寇甲寅诛楚州渠贼胡海丙辰以久雨释两浙州县系囚夏四月癸亥李元砺犯南雄州

官军大败乙丑决临安系囚释杖以下戊辰出内库钱赐临安军民五月乙未淮东贼悉平诏宽恤残破州县乙巳命沿海诸州督捕海寇癸丑以久雨发米振贫民六月丁巳朔日有食之壬戌命有司举行宽恤之政十有九条癸亥遣黄中贺金主生辰是月池州副都统许俊江州副都统刘元鼎与李元砺战于江西屡败知潭州曹彦约又与贼战亦为所败秋七月辛卯申严围田增广之禁九月癸丑遣钱仲彪使金贺正旦冬十月壬申金遣使来贺瑞庆节十一月李元砺迫赣州南安军诏以重赏募人讨之十二月戊午娄机罢丙寅湖南贼罗世传缚李元砺以降峒寇悉平辛巳金遣使来贺明年正旦黎州蛮请降是岁临安绍兴二府严衢二州大水振之仍蠲其赋

四年春正月己丑叙州蛮攻嘉定府利店砦陷之甲辰以四川盐檐钱对减激赏缙一年二月乙卯李元砺伏诛壬戌罗世传复叛辛巳罢广西诸州牛税闰月辛亥诏诸路帅臣监司守令格朝廷振恤之令及盗发不即捕者重罪之三月丙子沔州将刘世雄等谋据仙人原作乱伏诛夏四月己丑以吴曦没官田租代除关外四州旱伤秋税六月丁亥遣金嵘贺金主生辰会金国有难不至而还减京畿囚罪一等释杖以下秋七月丙寅诏四川官吏尝受伪命者自今毋得叙用丁丑诏军兴以来爵赏冒滥者听自陈除其罪九月辛酉叙州蛮寇边乙亥罗世传为其党所杀丁丑遣程卓使金贺正旦诏附会开边得罪之人自今毋得叙用冬十月甲辰以金有难命江淮京湖四川制置司谨边备十一月乙酉朔日有食之十二月辛巳奉议郎张磁除名象州羁管乙巳金遣使来贺明年正旦是岁金有难贺生辰使不至

五年春正月己巳诏诸路通行两浙倍役法者为令三月庚戌四川制置司遣兵分道讨叙州蛮其酋米在请降戊辰以久雨诏大理三衙临安府两浙州县决系囚夏五月癸酉安南国王李龙翰卒以其子昊昂为安南国王诏州县见役人毋纳免役钱役满复输六月癸未遣傅诚贺金主生辰秋七月戊辰以雷雨毁太庙屋避正殿减膳九月辛未遣应武使金贺正旦冬十月辛巳诏诸路总领官岁举堪将帅者二三人安抚提刑举可备将材者各二人戊子金遣使来贺瑞庆节十一月庚申朝献景灵宫辛酉朝享太庙壬戌祀天地于圜丘大赦十二月丁丑再蠲濠州租税一年壬午诏蠲州县横增税额己亥金遣使来贺明年正旦

六年春正月庚申宇文绍节卒二月辛己诏宗室毋与胥吏通姻着为令三月癸亥楼钥罢夏四月丙子以章良能参知政事五月丁卯以旱命大理三衙临安府决系囚六月丁丑遣董居义贺金主生辰未至而还秋八月庚午

知思州田宗范谋作乱夔州路安抚司遣兵讨平之是月金人弑其主允济立升王珣九月甲辰蠲京湖诸州逋负闰月丙戌以金主新立命四川谨边备己丑诏湖北监司守令振旱伤丙申以雷发非时下罪己诏冬十月戊申遣真德秀贺金主即位不至而还庚戌遣李■〈直上土下〉使金贺正旦亦不至而还甲子金遣使来告即位十二月癸未虚恨蛮寇嘉定府之中镇砦十二月壬寅蠲琼州丁盐钱癸亥金遣使来贺明年正旦是岁两浙诸州大水振之

七年春正月丁卯四川制置司遣提举阜郊博马务何九龄及金人战于秦州败绩丁丑章良能薨壬午沔州都统王大才斩何九龄三月丁卯以安丙同知枢密院事成都府路安抚使董居谊为四川制置使庚辰金来督二年岁币戊子金人来止贺正旦使夏四月癸卯蠲福建沿海诸州贫民纳盐六月辛丑以旱命诸路州军祷雨甲辰诏诸路监司守臣遣决滞讼丙午蠲两浙路诸州赃赏钱壬子释大理三衙及两浙路杖以下囚秋七月甲子以左谏议大夫郑昭先签书枢密院事兼权参知政事乙亥金人来告迁于南京庚寅罢输金岁币是月夏人以书抵四川议夹攻金人不报八月癸巳罢关外四川所增方田税癸卯金使者复来督岁币戊申以安丙为观文殿学士知潭州九月壬戌朔日有食之丙戌以久雨释大理三衙临安府杖以下囚庚寅释两浙路杖以下囚除茶盐赏钱冬十月壬辰出内帑钱振临安府贫民十一月辛丑遣聂子述使金贺正旦丙戌命浙东监司发常平米振灾伤州县十二月丁巳金遣使来贺明年正旦是岁黎州蛮畜卜始降

八年春正月辛未命师禹嗣秀王己卯遣丁焞贺金主生辰二月丙午雷孝友罢壬子蠲平江等五郡逋负米释其系囚三月丙子蠲临安府茶盐赏钱释两浙诸州系囚癸未安定郡王伯祝薨丙戌释江淮阙雨州县杖以下囚夏四月乙未如太乙宫明庆寺祷雨辛丑避正殿减膳壬寅祷雨于天地宗庙社稷癸卯诏中外臣民直言时政得失乙巳减临安及诸路杂犯死罪以下囚五月甲申诏赃吏毋得减年参选着为令乙酉振临安府贫民是月蒙古破金燕京【据金史增辑】六月丙辰诏两浙江淮路民杂种粟麦麻豆有司毋收其赋田主毋责其租秋七月辛酉以郑昭先参知政事礼部尚书曾从龙签书枢密院事戊辰蠲两淮诸州今年秋税并极边五州明年夏税癸酉蠲临安绍兴二府贫民夏税丙子发米振江东饥民庚辰诏弟搆更名思正侄均更名贵和八月兰州盗程彦晖求内附四川制置使董居谊却之九月己巳朝献景灵宫庚午朝飨太庙辛未合祀天地于明堂大赦乙亥申严两浙围田之禁冬十月乙未命

六部各类赦书宽恤事下诸路监司推行壬寅金遣使
来贺瑞庆节十一月丙辰封伯泽为安定郡王癸亥遣施累使金贺正旦十二月辛亥金
遣使来贺明年正旦时蒙古南侵及淮汉真德秀上备
边五事

九年春正月乙亥遣留筠贺金主生辰三月甲申朔日有食之夏四月戊戌秦州人
唐进与其徒何进等引众来归四川制置使董居谊却
之六月戊申振浙西被水州县宽其租秋九月甲申诏两浙江东监司核州县被水最甚
者蠲其租冬十月丙寅金遣使来贺瑞庆节十一月庚
寅遣陈伯震使金贺正旦癸卯程彦晖攻巩州命利州副都统刘昌祖移驻西和州以备
之十二月乙亥金遣使来贺明年正旦

十年春正月庚子遣钱抚贺金主生辰夏四月丁未金人侵光州中渡镇执榷场官
盛允升杀之遂分兵攻樊城戊申鄂州江陵府副都统
王守中拒之金人分兵围枣阳光化军丙辰诏江淮制置使李珣京湖制置使赵方措置
调遣仍听便宜行事丁巳命四川制置使董居谊酌量
缓急便宜行事辛酉庐州钤辖王辛击金人于光山县之安昌砦五月辛巳以久雨释大
理三衙临安府杖以下囚蠲茶盐赏钱癸卯赵方请下
诏伐金遂传檄招论中原官吏军民六月戊午诏厉将士募京西忠义人进讨秋七月丙
子朔日有食之戊午以旱释诸路杖以下囚甲申雅州
蛮寇边焚碉门砦遣兵讨之丁亥嗣濮王不侁薨冬十月乙巳以久雨释大理三衙临安
府及两浙诸州杖以下囚癸酉蠲三衙江上诸军公私
逋负钱十一月甲申诏浙东提举司发米振给贫民十二月戊申以军兴募民纳粟补官
癸亥金凤翔副都统军完颜赞以步骑入四川戊辰迫
湫池堡己巳破天水军又破白环堡庚午迫黄牛堡统制刘雄弃大散关遁金人据之

十一年春正月壬午京东路忠义李全率众来归以全为京东路总管戊子金人围
阜郊堡壬辰利州将麻仲焚秦州永宁砦金人攻隔芽
关兴元都统李贵遁官军大溃二月甲辰金人焚大散关而去丙午金人破皂郊堡丁未
破湫池堡戊申金人围随州枣阳军游骑至汉上均州
守臣应谦之弃城走三月丁丑金人焚湫池堡而去戊子利州统制王逸等率忠义人复
皂郊堡辛卯忠义人攻秦州官军继进至赤谷口军大
溃癸巳金人复攻皂郊堡遂趋西和州是日镇江忠义统制彭惟诚等败于泗州丙申沔
州都统刘昌祖焚西和州遁守臣杨克家弃城去戊戌
金人入西和州夏四月甲辰刘昌祖焚成州遁守臣罗仲甲及阶州守城侯颐弃城去戊
午金人复攻大散关守将王立遁己巳金人攻黄牛堡
兴元都统吴政拒之癸亥政至大散关执王立斩之五月丁亥诏侍从台谏两省官集议

平戎御戎和戎三策六月辛酉诏湖州振恤被水贫民
秋七月辛卯蠲四川关外诸州税役甲午蠲光州战死兵民家税役九月己卯朝献景灵
宫庚辰朝享太庙辛巳合祭天地于明堂大赦辛卯安
定郡王伯浑薨丙申兴元都统吴政利州副都统张威各进三官刘昌祖夺五官韶州安
置冬十月丙午罗仲甲杨克家侯颐并夺三官仲甲常
德府克家道州颐抚州居住十一月壬申金人攻安丰军之黄口滩是月陕西人张羽来
归

十二年春正月戊辰以新利州路安抚使聂子述为四川制置使庚辰金人攻湫池
堡甲申攻白环堡戊子金人攻成州沔州都统张威自
西和州退守仙人原庚寅金人攻随州枣阳军又破信阳军之二砦辛卯金人攻西和州
又攻安丰军金人焚成州及河池守将张斌遁去癸巳
金人围安丰军及光州攻光化军破郧山县进逼均州甲午破凤州守臣雷云弃城去乙
未兴元都统吴政及金人战于黄牛堡死之金人乘胜
攻武休关二月戊戌金人破光山县壬寅围枣阳军京湖制置使赵方遣统制扈再兴救
之不克进而还癸卯金人破武休关兴元都统李贵遁
还利州路提刑权兴元府事赵希皆弃城去丁未金人破兴元府戊申金人攻枣阳军己
酉遣殿前司军防捍江面庚戌以曾从龙同知枢密院
事兼江淮宣抚使权吏部尚书任希夷签书枢密院事辛亥金人破大安军遂破洋州壬
子四川制置使董居谊自利州遁沔州都统张威遣统
制石宣等邀击金人于大安军金人遂去兴元府丙辰金人去洋州丁巳京湖制置使赵
方遣统制扈再兴等攻唐邓二州随州忠义统领刘世
兴等攻唐州甲子金人去枣阳军乙丑夏人复以书抵四川议夹攻金人利州路安抚丁
焞许之三月己巳以郑昭先知枢密院事曾从龙参知
政事癸酉金人复入洋州乙亥兴元军士权兴等作乱犯巴州守臣秦季樵弃城去鄂州
统制刘世荣会兵攻唐州丁亥权兴降甲午金人自盱
眙退师闰月壬戌诏抚谕四川官军忠义人癸亥兴元军士张福莫简等作乱以红巾为
号是春金人围安丰军滁濠光三州江淮制置使李珣
命池州都统武师道忠义军统制陈孝忠救之皆不克进金人遂分兵自光州侵黄州之
麻城自濠州侵和州之石碛自盱眙军侵滁州之全椒
来安及扬州之天长真州之六合游骑至东采石杨林渡京东总管李全自楚州忠义总
辖李先自涟水军来援金人乃解去夏四月庚午张福
入利州四川制置使聂子述遁杀总领财赋杨九鼎丁丑张福掠阆州丁亥掠果州癸巳
曾从龙罢以郑昭先兼参知政事崇信军节度使开府
仪同三司万寿观使安丙为四川宣抚使董居谊落职夺三官五月乙未张福逼遂宁府

潼川府路转运判官权府事程遇孙弃城遁丁酉减两
淮荆襄湖北利州路沿边诸州杂犯死罪以下仍蠲今年租己亥太学生何处恬等伏阙
上书请诛工部尚书胡榘张福入遂宁府焚其城戊午
入普州守臣张巳之弃城遁沔州都统张威引兵讨福癸未福请降丁亥嗣濮王不嫫薨
癸巳丁焞复以书约夏国共攻金秋七月丙申张福伏
诛庚子张威捕贼余众诛之癸亥李全引兵至齐州知州王赞以城降九月丙午以宝文
阁待制李大东为沿江制置使淮南转运判官赵善湘
为江淮制置使公事淮东提刑贾涉为江淮制置使公事兼节制京东河北路
军马十二月壬申京东节制司言复京东河北二府九
州四十县丁丑雅州蛮入卢山县己卯四川宣抚司遣兵取洮州召诸将议出师招谕中
原豪杰辛巳蛮焚碉门砦乙酉金人侵凤州之长桥丁
亥四川宣抚司命罢洮州之师己丑京湖制置司遣统制扈再兴等分道出境

十三年春正月丁酉扈再兴引兵攻邓州鄂州都统许国攻唐州不克而还金人攻
樊城赵方督诸将拒退之己亥雅州蛮复掠卢山县己
酉命不凌为嗣濮王戊午夏人复以书来议夹攻金三月丁巳黎州土丁叛遣兵讨之夏
四月庚申朔淮东制置贾涉招谕山东两淮豪杰五月
庚寅雅州蛮降六月加安丙少保丙子以李全为左武卫大将军秋七月戊戌以京东河
北诸州守臣空名官告付京东河北节制司以待豪杰
之来归者丙午以任希夷兼参知政事丙辰四川宣抚司招黎人土丁降之八月壬申安
丙遣夏人书定议夹攻金癸未四川宣抚司命利州统
制王仕信引兵赴熙巩州会夏人遂传檄招谕陕西五路官吏军民甲申复海州九月辛
卯夏人引兵围巩州且来趣师甲午王仕信引兵发宕
昌乙未四川宣抚司统制质俊李实发下城戊戌四川宣抚司命诸将分道进兵沔州都
统张威出天水利州副都统程信出长道兴元副都统
陈立出大散关兴元统制田胃为宣抚司帐前都统出子午谷金州副都统陈昱出上津
庚子质俊等克来远镇辛丑王仕信克盐川镇壬寅质
俊等进攻定边城乙巳程信王仕信与夏人合攻巩州不克庚戌金人攻阜郊堡沔州统
制董照等与战大败壬子程信及夏人攻巩州不克信
引兵趋秦州丙辰夏人自安远砦退师冬十月丁巳程信邀夏人共攻秦州夏人不从信
遂自伏羌城引还诸将皆罢兵戊寅程信以四川宣抚
司之命斩王仕信于西和州四川宣抚司以张威不进兵罢其军职十二月壬申连水忠
义军统辖石珪叛

十四年春正月丙戌朔释大理三衙临安两浙诸州杖以下囚二月戊辰金人围光
州己巳攻五关壬申金人治舟于团风弗克济遂围黄

州分兵破诸县又遣别将侵汉阳军丁丑李全弃泗州遁还甲申诏准东京湖诸路应援淮西沿江制置司防守江面棹殿前司职事冯榭将兵驻鄂州京东忠义都统李全将兵救蕲黄榭不果行三月丙戌鄂州副都统扈再兴引兵攻唐州丁亥金人破黄州淮西提刑知州事何大节走死庚寅李全自楚州引兵援淮西癸巳扈再兴引所部趋蕲州己亥金人破蕲州知州事李诚之死之癸丑金人退师扈再兴邀击之于天长镇夏四月戊辰金人渡淮而北李全追击之五月甲申朔日有食之六月以侄福州观察使贵和为皇子更名竑封祁国公乙亥以太祖十世孙与莒补秉义郎丙子降京畿囚罪一等秋七月辛丑以赵方为京湖制置大使贾涉为淮东制置使兼京东河北路节制使八月乙卯赐史弥远家庙任希夷罢壬戌以兵部尚书宣缜同知枢密院事给事中俞应符签书枢密院事甲子以秉义郎与莒为右监门卫大将军赐名贵诚戊寅以侄右监门卫大将军贵诚为果州团练使九月癸未立贵诚为沂靖惠王后己巳朝献景灵宫庚寅朝飨太庙辛卯合祀天地于明堂大赦冬十月癸丑京东河北节制司言复沧州诏以赵泽为河北东路钤辖知州事甲寅复以济州为济南府兖州为袭庆府丙寅夏人复以书来四川趣会兵十一月己亥安丙薨是月京东安抚张林叛十二月庚申郑昭先罢闰月辛巳朔以宣缜兼参知政事俞应符兼权参知政事戊申以殿前司同正将华岳等谋为变杀之是岁浙东江西福建诸路旱沔成阶利四州水振之

十五年春正月庚戌朔御大庆殿受恭膺天命之宝己未以受宝大赦文武官各进秩一级大犒诸军三月丁巳诏江西提举司振恤旱伤州县夏四月壬午蠲蕲州今年租五月甲寅诏监司虑囚州县匿囚者劾之丁巳进封祁国公竑为济国公壬戌知济南府种赆等攻张林于清州林遁去六月辛卯俞应符薨秋七月甲子诏江淮荆襄四川制置监司条画营田来上八月己卯命户部详议义役九月辛亥以宣缜参知政事给事中程卓同知枢密院事吏部尚书辞极赐出身签书枢密院事冬十一月戊午赦京东河北路十二月乙亥振临安府贫民丙子以雪寒释京畿及两浙诸州杖以下囚丁亥以李全为保宁军节度使右金吾卫上将军京东路镇抚副使

十六年春正月戊申诏命官犯赃毋免约法辛酉命淮东制置司振山东流民二月己丑嗣秀王师禹薨三月戊申张林所部邢德来归以为京东东路副总管丁卯振道州饥民夏六月丁酉程卓薨秋八月辛巳诏州县经界毋增绍兴税额九月庚子朔日有食之乙巳诏江淮诸司振被水贫民冬十一月辛亥以太平州大水振之十二月辛巳命淮东西总领及沿江被

水州募江西湖南民入米补官癸未嗣濮王不凌薨

十七年春正月戊戌朔诏补先圣裔孔元用为通直郎录程颐后癸亥命淮东西湖北路转运司提督营屯田二月癸巳蠲台州诸逋赋甲午振临安府贫民三月金人迫西和州寻引还夏四月辛卯振庐州饥民乙未赐李全彭义斌钱为犒赏战士费五月戊戌诏核实两淮京湖四川江上诸军之数六月壬辰大名府苏椿等与城来归诏悉补官即以其州授之秋七月丁酉朔命福建路监司振被水贫民辛亥命师岳嗣秀王八月丙戌帝不豫闰月乙未申严两浙诸州输苗过取之禁丁酉皇帝崩于福宁殿年五十七谥曰仁文哲武恭孝皇帝加谥法天备道统德茂功仁文哲武圣睿恭孝皇帝庙号宁宗攒于永茂陵

宁宗庆元六年嘉泰四年开禧三年嘉定十七年凡三十年

钦定续通志卷三十七

●钦定续通志卷三十八 宋纪十四

宋纪 【十四】

理宗

○理宗

理宗皇帝讳昀太祖十世孙也父荣王希躔初宁宗弟沂王无嗣以宗室子贵和为沂王后及景献太子薨宁宗立贵和为皇子改名竑而以帝嗣沂王赐名贵诚授邵州防御使嘉定十七年八月丙戌宁宗疾甚丞相史弥远称诏以贵诚为皇子改名昀授武泰军节度使封成国公

【宁宗纪及杨后传理宗立为皇子俱在宁宗崩之后】

闰月丁酉宁宗崩弥远白杨皇后称遗旨以子竑为开府仪同三司封济阳郡王判宁国府而以帝嗣皇帝位大赦尊皇后曰皇太后同听政进封竑为济王以醴泉观使就第癸亥诏宫中自服三年丧九月乙亥诏以傅伯成杨简柴中行并提举主管南京鸿庆宫己卯以先圣裔孔行可为迪功郎程秘朱着真德秀并兼侍读葛洪等兼侍讲辛卯祀明堂大赦冬十月己亥嗣秀王师岳薨十一月丁亥诏改明年为宝庆元年戊子以葛洪为端明殿学士同签书枢密院事十二月甲午免京城官私房赁地门税等钱是岁蒙古将史天倪败大名总制彭义斌于恩州 【据元史增辑】

二年春正月癸酉召布衣李心传赴阙三月癸酉以久雨诏大理寺三衙两浙运司临安府诸属县榷酒所凡赃赏等钱罪已决者一切勿征夏六月壬寅以孔子五十二代孙万春袭封衍圣公秋八月乙巳追降济王竑为巴陵县公辛亥卫泾薨

三年春正月辛亥朔上寿明皇太后尊号册宝于慈明殿壬子史弥远追二秩己巳
赠朱熹太师追封信国公夏五月壬子以岳珂为户部
侍郎依前淮东总领兼制置使蒙古灭夏以其主睨归六月戊申朔日有食之秋七月丁
酉诏振被水郡县其竹木等税勿复丙午史弥远乞归
田里不允冬十月甲子右监门卫大将军与奭授宜州观察使继沂王后仍改名贵谦甲
戌以赵范为江东提刑兼知池州节制防江水步军池
州都统司军马十一月辛巳有事于南郊大赦诏改明年元十二月壬申发廩振京城细
民蒙古兵破关外诸隘四川制置郑损弃三关是岁蒙
古主特穆津殂少子图类监国

宝庆元年春正月壬戌朔诏举贤良庚午湖州盗潘壬等谋立济王竑拥至州治竑
密遣人告于朝而率州兵诛贼史弥远矫旨赐竑死寻
贬为巴陵郡公丙戌济王竑讞闻特辍视朝甲午李全反焚楚州二月丙申以师弥为检
校少师嗣秀王三月癸酉葬宣宗皇帝于永茂陵夏四
月丁酉皇太后手书多病自今免垂帘听政辛亥振在京细民五月甲子诏内外文武大
小诸臣于国政有所见闻封章来上毋或有隐丙寅以
不熄为保康军承宣使嗣濮王六月丁未以史弥远为太师依前右丞相兼枢密使进封
魏国公弥远辞免太师是月彭义斌及蒙古战于赞皇
死之秋七月丁丑振滁州水灾八月甲寅以程颐四世孙源为籍田令 【谨按通鉴辑览

御批理宗在位甚久政无足纪后人或许其能
推崇理学尔时内外政纪要于此者多矣乃无一整饬徒慕虚名毫无实济则亦乌足称
道况祇褒赠已往之程朱而不用现在之真魏即所谓
推崇理学又与叶公之好龙何以异哉】 冬十月甲寅诏会稽攒宫所在税赋尽免折科
山阴县权免三年十一月癸亥以宣缜兼同知枢密院
事薛极参知政事葛洪签书枢密院事甲申魏了翁落职夺三秩靖州居住真德秀落职
罢祠

绍定元年春正月丙子朔上皇太后尊号夏六月壬寅朔日有食之冬十二月辛亥
以薛极知枢密院事兼参知政事葛洪参知政事袁韶
同知枢密院事郑清之端明殿学士签书枢密院事

二年春二月庚戌诏岁举廉吏或犯奸赃保任同坐三月辛卯诏郡县系囚多瘐死
具狱官姓名以闻黜之夏五月诏振成都潼川路旱灾
秋八月蒙古主乌达噶立冬十月壬戌振台州水灾除其租及茶盐酒酤诸杂税是岁蒙
古遣使来议夹攻金

三年春正月壬辰知枣阳军史嵩之以创置屯田进秩二月戊戌诏汀赣吉建昌蛮
獠所扰郡县复赋一年庚戌诏赵范起复依前知镇江

府节制防江水步并本州岛在砦军马赵葵起复依前知滁州节制本州岛屯戍军马闰月癸酉逃卒穆椿作乱捕得伏诛夏四月己卯漳州连城盗起五月甲寅检校少保李全授彰化保康军节度使开府仪同三司京东镇抚使依旧旧京东忠义诸军都统制秋七月丁酉以汀州宁化县曾氏妇御漳寇有功诏封恭人官其子九月辛丑祀明堂大赦冬十二月庚申李全叛壬戌淮东将王青力战死之乙丑以郑清之参知政事兼签书枢密院事乔行简端明殿学士同签书枢密院事诏史弥远十日一赴都堂治事丁卯册贵妃谢氏为皇后己卯慈明殿出缗钱犒诸军及振在京细民癸未上皇太后尊号册宝

四年春正月戊子皇太后年七十帝率羣臣行庆寿礼【宋纪作七十有五兹据杨后传改正】大赦史弥远以下进秩有差壬寅赵范赵葵等诛李全于新塘全妻杨氏率其子松寿奔金二月丙子起复孟珙从义郎京西路分枣阳军驻扎夏四月丁丑以郑清之兼同知枢密院事乔行简签书枢密院事赵善湘兵部尚书江淮制置大使知建康府依旧安抚使赵范权兵部侍郎淮东安抚副使知扬州兼江淮制司参议官赵葵换福州观察使右骁骑卫大将军淮东提刑知滁州兼大使司参议官六月己未魏了翁真德秀尤焞尤燾并叙复原官秋八月己未蒙古兵破武休入兴元攻仙人关遂入大散关破凤洋沔诸州略地至西水破城砦百四十【据元史增辑】九月丙戌夜临安火延及太庙帝素服眊朝减膳彻乐冬十月戊午太常少卿度正国史院编修官李心传言宗庙制未合古兹缘灾异宜更正之诏集议以闻甲子以余天锡为户部侍郎兼知临安府浙西安抚使癸酉蒙古破蜀口诸郡戊寅以李■〈直上土下〉为焕章阁直学士四川制置使知成都府赵彥呐直龙图阁四川安抚制置副使知兴元府利路安抚使十二月乙亥以史嵩之为大理少卿兼京湖制置副使是月金遣使来乞师且求粟制置使陈■〈目亥〉不许【据宏简录增辑】癸酉蒙古破蜀口诸郡【从元史增辑】

五年春正月己丑以孟珙为京西路兵马钤辖枣阳军驻扎壬辰史嵩之进大理卿权刑部侍郎京湖安抚制置使知襄阳府壬寅新作太庙成三月乙酉诏京城内外免征商三月夏四月丁卯起魏了翁以集英殿修撰知遂宁府五月戊戌诏齐民有罪监司守臣毋辄籍没其家秋七月丁酉以吴潜为太府少卿总领淮西财赋陈贵谊端明殿学士同签书枢密院事八月乙卯起真德秀为徽猷阁待制知泉州丁巳泗州路分刘虎副都统董琳焚断盱泗桥以遏金兵己未魏了翁以宝章阁待制潼川安抚使知泸州冬十月戊子以星变大赦金将以盱眙军来降十

二月辛巳皇太后不豫壬午大赦皇太后崩癸卯诏宫中自服三年丧是时与蒙古兵围汴京金主奔归德府寻奔蔡州蒙古再遣使议攻金史嵩之以邹伸之报谢

六年春正月己酉以少傅保宁军节度使嗣秀王师弥判大宗正事赵善湘光禄大夫江淮制置大使兼知建康府行宫留守夏五月庚戌孟珙破金武仙于顺阳邓州伊喇以城来降六月丁酉以史嵩之为刑部侍郎兼京湖安抚制置使兼知襄阳府秋七月孟珙复败武仙于马蹬山【马蹬山宋纪作浙江当是浙川之误兹据孟珙传辑】八月拔唐州九月壬寅朔日有食之辛亥祀于明堂大赦冬十月孟珙统襄阳之军合蒙古兵围金主于蔡州丙戌史弥远进太师左丞相兼枢密使鲁国公郑清之光禄大夫右丞相兼枢密使并加食邑丁亥以史弥远为保宁昭信军节度使充醴泉观使进封会稽郡王以薛极为枢密使乔行简参知政事兼同枢密院事陈贵谊参知政事兼签书枢密院事庚寅以显谟阁待制知福州真德秀兼福建安抚使乙未史弥远薨十一月丙午诏改明年元己未以魏了翁为华文阁待制知泸州潼川安抚使癸亥进赵葵兵部侍郎淮东制置使兼知扬州金完颜珊岱来乞粮且求约和不许十二月庚辰以薛极为观文殿大学士知绍兴府兼浙东安抚使甲申以吴潜为太府卿仍淮西总领财赋暂兼沿江制置知建康府

端平元年春正月庚子朔诏求直言辛丑赵范依前沿江制置副使权移司知黄州史嵩之权京湖安抚制置使兼知襄阳府陈韡华文阁待制仍知隆兴府江西安抚使丙午以赵范兼淮西制置副使任责防御戊申金主完颜守绪传位于宗室承麟己酉汴京破守绪自经死承麟为乱兵所杀金亡二月壬申以赵彥呐为四川安抚制置使兼知兴元府三月己酉以贾涉子似道为籍田令辛酉遣太常寺主簿朱杨祖等诣洛阳省谒八陵夏四月辛未遣朱复之诣陵相度修奉丙戌以灭金告太庙丁酉吴渊落右文殿修撰吴潜落秘阁修撰并放罢五月丙辰以赵范为两淮制置使节制军马兼沿江制置副使壬戌以崔与之为端明殿学士提举西京嵩山崇福宫陈韡权工部尚书知隆兴府江西安抚使建阳县盗起焚劫邵武麻沙长平六月壬申蠲漳泉兴化三州丁米钱戊寅以乔行简知枢密院事曾从龙参知政事郑性之签书枢密院事陈贵谊兼同知枢密院事己卯诏复故巴陵县公竑本身官爵诏殿司选精锐千人命统制娄拱统领杨辛讨建阳县盗秋八月癸酉诏河南新复郡县久废播种发米麦往济归附军民仍榜谕开封应天河南三京乙亥以赵范为京河关陕宣抚使知开封府东京留守赵葵京湖制置使知

应天府南京留守全子才关陕制置使知河南府西京留守蒙古攻洛阳监军徐敏子不能守而走赵葵全子才皆引师南还九月庚子赵范依旧京西湖北安抚制置大使知襄阳府壬寅削赵葵全子才各一秩冬十月乙卯真德秀进大学衍义辛卯陈贵谊薨十二月己卯蒙古使王楫来责败盟辛卯以邹伸之李复礼乔仕安刘溥往报谢

二年春正月诏议胡瑗孙明复邵雍欧阳修周敦颐司马光苏轼张载程颢程颐等十人从祀孔庙升孔伋十哲辛酉以御前盩厔军统制程芾为蒙古通好使从义郎王全副之寻以武功郎杜显为添差通好副使二月甲子朔日当食不亏三月乙巳以曾从龙兼同知枢密院事真德秀参知政事兼给事中兼侍读陈卓同签书枢密院事是春蒙古来侵夏四月戊子大阅五月甲辰真德秀薨庚戌以乔行简兼参知政事六月戊寅以郑清之为特进左丞相乔行简为右丞相并兼枢密使壬午以曾从龙知枢密院事兼参知政事崔与之参知政事郑性之同知枢密院事陈卓签书枢密院事秋七月庚申礼部尚书魏了翁上十事不报闰月丁亥全子才刘子澄并削二秩子才衡州子澄瑞州居住九月蒙古围襄阳徇襄邓诸州军冬十一月乙丑以曾从龙为枢密使督视江淮军马魏了翁同签书枢密院事督视京湖军马郑性之兼权参知政事十二月庚寅曾从龙辞枢密使以魏了翁兼督视江淮军马癸巳四川制置司遣将斩叛军首贼蒲世兴于万州甲辰曾从龙薨以余嵘同签书枢密院事

三年春正月己未朔以星行失度雷发非时罢天基节宴诏劝农桑壬申蒙古攻洪山张顺翁大成等击却之二月甲午攻江陵统制李复明与战死之壬寅诏侍从台谏给舍条具边防事宜甲辰魏了翁依旧端明殿学士签书枢密院事以史嵩之为淮西制置使兼副使三月襄阳军将王旻李伯渊叛降于蒙古制置使赵范削官三秩落龙图阁学士姑仍制置职任阶岷迭宕十八族降夏四月己酉魏了翁以资政殿学士知潭州癸丑下诏责已释京湖兴沔州军见系囚情理轻者五月甲申以赵葵为华文阁直学士淮东安抚制置使兼知扬州蒙古取随郢荆门军秋七月丁巳权徐州国安用战歿赠顺昌军节度使仍官其子丁卯以郑性之参知政事李鸣复签书枢密院事八月丙戌赵范更削两秩谪建宁令捍御自效九月辛未祀明堂大赦乙亥左丞相兼枢密使郑清之罢为观文殿大学士醴泉观使兼侍读右丞相兼枢密使乔行简罢为观文殿大学士醴泉观使兼侍读以崔与之为右丞相兼枢密使壬午骁卫大将军利州驻扎御前诸军统制曹友闻与蒙古大战于大安军阳

平关败绩死之冬十月壬寅蒙古破固始县淮西将吕文信杜林率溃兵以叛六安霍邱皆为所据丙午蒙古破文州守臣刘锐通判赵汝向死之蒙古遂入成都秦巩二十余州皆降十一月丙寅以乔行简为特进左丞相兼枢密使封肃国公蒙古围光州复犯江陵又侵真州知州邵岳击败之戊寅复成都府十二月戊戌以吴渊为户部侍郎淮东总领财赋兼知镇江府壬寅诏改明年元癸卯郑清之依旧观文殿大学士提举洞霄宫丁未宣缙薨

嘉熙元年春正月乙卯以魏了翁知福州兼福建安抚使辛酉以李■〈直上土下〉同知枢密院事四川宣抚使甲子诏两淮荆襄之民避地江阴镇江建甯太平池江兴国鄂岳江陵境内计口给米期十日竣事二月癸未以郑性之知枢密院事兼参知政事邹应龙端明殿学士签书枢密院事李宗勉同签书枢密院事李鸣复罢以资政殿学士知绍兴府乙酉葛洪薨癸卯诏以朱熹通鉴纲目下国子监并进经筵三月乙亥魏了翁薨以孟珙为忠州团练使知江陵府京西湖北安抚副使别之杰宝章阁待制知太平州夏四月壬午以李■〈直上土下〉同知枢密院事四川宣抚使知成都府丙申诏两淮策应军阵亡将校李仙王海李雄廖雷各赠官有差丙午诏夔路钤辖知恩州田兴隆独御蒙古兵于潼川特与官一转五月丙辰袁韶薨蒙古陷光州蕲州随州略地至黄州孟珙击败之六月癸巳以邹应龙为资政殿学士知庆元府沿海制置使丙午以吴潜为工部侍郎知庆元府兼沿海制置使知黄州兼淮西安抚使本路提刑李寿朋削三秩送建昌军居住秋七月己未枢密院言蒙古兵自光州信阳抵合淝制司参议官李曾伯庐州守臣赵胜都统王福俱有劳效诏曾伯等各转官是月蒙古侵安丰军知军杜杲与吕文德击走之八月癸巳以李鸣复参知政事李完勉签书枢密院事甲辰蜀鸡冠隘都统王宣与蒙古战死之总管吴桂弃所守走削三官勒停冬十二月戊寅朔日有食之是冬蒙古师还 【据元史增辑】

二年春正月辛酉史嵩之进端明殿学士视执政恩数赵葵刑部尚书制置并如旧余玠知招信军兼淮东制置司参议官孟珙远军承宣使依旧带御器械史嵩之端明殿学士依旧京湖安抚制置使兼沿江制置副使兼知鄂州召赴阙二月庚寅以史嵩之参知政事督视京西荆湖南北路江西军马置司鄂州戊戌蒙古使来癸卯以孟珙为京湖安抚制置副使置司松滋县三月己丑以将作监周次说为蒙古通好使庚申以史嵩之兼督视光蕲黄夔施州军马乙亥释四川被兵州军并转输劳役之所见禁囚情理轻者诏四川帅臣招集流民复业给与牛种

夏四月癸未以李■〈直上土下〉同签书枢密院事督视江淮京湖军马五月癸未以李鸣复知枢密院事李宗勉参知政事余天锡签书枢密院事丙戌诏崔与之提举洞霄宫任便居住李鸣复参知政事六月丙寅李■〈直上土下〉薨秋七月壬午以霖雨烈风避殿减膳彻乐令中外言阙失冬十月辛未复光州十二月丙午光州守臣董尧臣伏诛乙卯诏四川诸州县盐酒榷额自明年始更减免三年

三年春正月癸酉以乔行简为少傅平章军国重事封益国公李宗勉为左丞相兼枢密使史嵩之右丞相兼枢密使督视两淮四川京湖军马余天锡参知政事游侣同签书枢密院事二月丙午诏史嵩之依旧兼都督江西湖南军马丁卯又命嵩之都督江淮京湖四川军马三月辛未以吴潜为敷文阁直学士沿海制置使兼知庆元府甲戌以别之杰权兵部尚书依旧沿江制置安抚使兼都督行府参赞军事李曾伯兼都督行府参议官孟珙兼都督行府参谋官孟珙复信阳光化军夏四月辛丑蒙古复取成都遂取汉邛简眉阆蓬文诸州及遂宁重庆顺庆三府癸卯以吴渊权工部尚书沿江制置副使知江州五月戊寅以吴潜为兵部尚书制置使知镇江府秋七月庚午以董槐知江州兼都督行府参议官甲申以吴渊兼都督行府参赞军事八月戊戌朔以浙江潮患告天地宗庙社稷以游侣参知政事许应龙签书枢密院事林略同签书枢密院事九月辛巳祀于明堂大赦冬十月己未出祠牒百振处州民十一月丙子以范锺签书枢密院事十二月己未崔与之薨甲子孟珙复夔州

四年春正月蒙古将张柔统兵南下庚辰星变下诏罪己二月癸丑以孟珙为四川宣抚使知夔州节制归峡鼎澧州军马夏四月乙巳史嵩之进三秩依前右丞相兼枢密使彻都督局秋七月乙丑诏中外直言阙失九月乙丑余玠以克敌功进三秩直华文阁淮东提刑节制招信军屯戍军马冬十月癸巳诏改明年元丁巳以余玠节制应天府泗宿永海邳徐涟水屯戍军马十一月癸酉荆鄂都统制张顺以援安庆池州功与官两转十二月己未诏求直言闰月丙寅李宗勉薨以游侣知枢密院事兼参知政事范锺参知政事徐荣叟签书枢密院事庚午诏系囚情理轻者释之戊寅以吴潜为福建安抚使史宅之为浙东安抚使

淳佑元年春正月庚寅朔诏举文武才甲辰诏朕惟孔子之道自孟轲后不得其传至我朝周敦颐张载程颢程颐真见实践深探圣域千载绝学始有指归中兴以来又得朱熹精思明辨表里浑融使大学论孟中庸之书本末洞彻孔子之道益以大明于世其列诸从祀以示崇奖

之意寻以王安石为万世罪人不宜从祀孔子庙庭黜之戊申如太学谒孔子遂御崇化堂命祭酒曹夔讲礼记大学篇赐监学官秩诸生推恩锡帛有差制道统十三赞就赐国子监宣示诸生二月壬午乔行简薨夏四月丁丑以与芮为开府仪同三司万寿观使嗣荣王贵谦开府仪同三司嗣沂王辛巳以贾似道为太府少卿湖广总领财赋五月庚寅以少师保宁军节度使判宗正事嗣秀王师弥为太子少保奉国军节度使充万寿观使师贡为少师己亥诏沿江淮西制置使别之杰任责边防冬十月蒙古主乌达噶殂后鼐玛锦称制十一月己亥淮东提刑余玠以舟师解安丰之围十二月丁卯余天锡薨蒙古使者裕勒曼济至淮守将囚之

二年春二月甲戌以游侣知绍兴府浙东安抚使提举洞霄宫范锺知枢密院事兼参知政事徐荣叟参知政事赵葵同知枢密院事别之杰签书枢密院事三月戊子诏和州无为军安庆府并听沿江制置司节制诏今后州县官有罪诸帅司毋辄加杖责夏五月戊申知建宁府吴潜夺职罢新任己酉以赵葵为湖南安抚使知潭州六月丁巳以余玠为四川宣谕使事干机速许同制臣共议措置先后奏仍给金字符黄榜以备招抚丙寅以别之杰同知枢密院事兼权参知政事高定子签书枢密院事杜范同签书枢密院事秋八月丁卯蒙古攻真州淮东将邓淳李海等与战于扬州挾扒店却之九月庚辰朔日有食之辛卯祀于明堂大赦癸巳蒙古攻滁州及和州统领王温与战于天长县死之冬十月甲寅史嵩之进封永国公乙丑蒙古兵大入通州屠其城而去十一月己亥日南至雷屯交作诏避殿减膳求直言癸卯决中外系囚十二月癸亥蒙古攻叙州帐前都统杨大全等与战败绩死之丙寅以孟珙为检校少保依旧宣武军节度使京湖安抚制置大使夔路策应大使余玠权资政殿学士湖南安抚大使兼知潭州赵葵资政殿大学士福建安抚使知福州

三年春正月戊寅以高定子兼参知政事乙未以李曾伯为华文阁待制依旧淮东西制置使知扬州杜杲敷文阁学士依旧沿江制置使知建康府董槐秘阁修撰依旧沿江制置副使知江州主管江西安抚司事二月乙丑以吕文德为福州观察使侍卫马军副都指挥使总统两淮出战军马捍御边陲庚午以郢州推官黄从龙死节赠通直郎三月丁丑朔日有食之夏四月癸丑左武卫中郎将濠州措置捍御王烈合门宣赞淮西路钤王杰合门祇候江东路钤李季实奉使遇蒙古兵战死乙卯嘉定守臣程立之以固守功转一官丙辰安丰军统领陈友直以王家垵战功与官两转秋七月丁亥赠海州屯驻借补保义郎申政官壬辰蒙古破大安军忠义副总管杨世威拒却之诏就知大安军闰八月丁

丑四川总领余玠言知巴州向侁钤辖谭渊白土坪等战有功诏侁等十八人各官三转余转官有差九月壬申蠲高邮民耕荒田租

四年春正月壬寅朔诏边将毋擅兴暴掠虐杀无辜以慰中原遗黎之望以李鸣复参知政事杜范同知枢密院事刘伯正签书枢密院事余玠华文阁待制依旧四川安抚制置使知重庆府兼四川总领财赋李曾伯宝章阁直学士依旧淮东安抚制置使知扬州兼淮西制置使庚申以余玠兼四川屯田使二月癸酉出封椿库缙钱命两淮京湖四川收瘞频年交兵遗骸五月戊午蒙古围寿春府吕文德率守阙进勇副尉桂虎等力御之围始解乙丑前签书枢密院事邹应龙薨淮西提刑徐敏子削二秩江州居住夏六月庚午吕文德依旧侍卫马军副都指挥使兼淮西招抚使知濠州秋七月辛酉盗发永州东安县飞虎军正将吴龙统制郑存等讨捕之九月癸卯右丞相史嵩之以父病谒告诏范锺刘伯正暂领相事甲辰史弥忠卒诏史嵩之起复右丞相兼枢密使甲寅京湖制司言诸将李福等复申州蔡州西平县城壁及马家等砦己未将作监徐元杰上疏论史嵩之宜令其终丧举执政自代冬十月甲戌诏敦谕史嵩之赴阙嵩之辞不许十二月庚午以范锺为左丞相兼枢密使杜范为右丞相兼枢密使游侣知枢密院事刘伯正参知政事兼签书枢密院事诏许史嵩之终丧甲戌以赵葵同知枢密院事乙亥郑清之授少保依旧观文殿大学士醴泉观使兼侍读乃奉朝请进封卫国公

五年春正月丁酉朔诏更新庶政绥抚中原遗民乙卯以李性传签书枢密院事兼权参知政事二月甲戌吕文德复五河三月庚子诏严赃吏法夏四月丙戌杜范薨戊子蒙古攻江陵孟珙击败之权巴州何震之守城死于兵诏赠官三秩钤辖王云等袭邓州镇平县灵山与蒙古战于顺阳云及王宽王立田秀董亮董玉死之五月丁酉吕文福夏贵上战功诏贵官两转文福带行阁职六月丙戌工部侍郎徐元杰暴卒置诏狱秋七月癸巳朔日有食之辛丑诏监司守臣及沿江诸郡安集流民丁巳蒙古入裕州总制亢国用与战于墨山及大神山皆败之吕文德与蒙古战于五河隘口又战于濠州败之九月甲辰京湖将刘整等破镇平县路将武胜等四人死之整等略广阳焚列屯砦栅庐舍凡二十余所辛亥祀于明堂大赦是月蒙古破寿州冬十一月壬子蒙古兵分道入蜀权成都府冯有硕权汉州王骧权成都县杨兑权资州刘永权潼川府魏霨死之癸丑将领关贵统制白傅才复洋州还遇蒙古兵与战死之十二月己卯以游侣为右丞相兼枢密使郑清之为少师奉国军节度使依前醴泉观使兼侍读仍奉朝请以赵葵知枢密院事兼参知政事李性传同知枢密

院事陈鞬兼参知政事壬午太史奏来岁正旦日当食

诏以是月二十一日避殿减膳

六年春正月辛卯朔日有食之置国用所二月己巳范锺罢庚午以刘雄飞知寿春
节制屯田军马是春蒙古攻两淮统制汪怀忠击败之
夏四月甲戌以邱岳兼两淮屯田副使贾似道兼蕲黄屯田副使闰月辛卯李曾伯落职
予祠寻罢祠禄五月庚寅诏贾似道措置淮西山砦城
筑己卯诏诸镇募兵造舟置马帅臣务奖激将士以严边防六月壬子以陈鞬参知政事
兼同知枢密院事秋七月蒙古围寿春总管孙琦吕文
信夏贵等与战于龙堽败之九月戊辰以贾似道为敷文阁直学士京湖制置使知江陵
府兼夔路策应使癸酉孟珙薨冬十二月乙未史嵩之
以观文殿大学士永国公致仕是岁蒙古固玉克立政仍出鼐玛锦 【据元史增辑】

七年春二月庚寅淮安主簿周子谔自蒙古归擢授朝奉郎己亥贵妃贾氏薨三月
庚午蒙古攻泗州吕文德击败之夏四月庚子以王伯
大签书枢密院事吴潜同签书枢密院事辛丑以郑清之为太傅右丞相兼枢密院使封
越国公游侣罢为观文殿大学士醴泉观使兼侍读赵
葵为枢密使兼参知政事督视江淮京西湖北军马陈鞬知枢密院事湖南安抚大使知
潭州甲辰赵葵兼知建康府行宫留守江东安抚使应
军行调度并听便宜行事赵希塈礼部尚书督视行府参赞军事五月甲寅盩厔军统制
张忠戍浮山搏蒙古将溺水死壬申以吴潜兼权参知
政事乙亥以旱求直言六月丙申避正殿减膳诏中外臣民直陈过失秋七月乙丑吴潜
罢丁卯以别之杰参知政事郑棗同签书枢密院事己
卯吴潜依旧端明殿学士知福州福建安抚使八月甲申郑棗罢壬寅诏议荒政甲辰高
定子薨冬十二月辛巳李鸣复卒

八年春二月辛丑赵葵表去年泗州之役将士用命击退北兵陈奕谭涓玉王成等
又战涡河龟山俱有劳效诏推赏之甲戌诏先锋军统
制田智润泗州潮河坝之战父子俱死特与赠官三月蒙古固玉克殂卫拉海密什称制
夏六月戊戌以徐鹿卿为枢密使兼参知政事兼侍讲
秋七月辛亥以王伯大参知政事应■〈彳 繇〉同知枢密院事谢方叔签书枢密院事
史宅之同签书枢密院事赵与■资政殿学士依旧知
临安府浙西安抚使癸酉王伯大罢为资政殿学士知建宁府九月辛酉祀于明堂大赦
冬十月甲戌别之杰以资政殿大学士知绍兴府乙亥
应■〈彳 繇〉谢方叔并参知政事

九年春正月庚申以周世宗八世孙柴彦颖补承务郎袭封崇义公辛酉诏两淮京
湖沿江旷土军民从便耕种丁卯许应龙薨己巳范锺

薨辛未以官田给表忠观旌钱氏功德仍禁樵采闰二月甲辰以郑清之为太师左丞相兼枢密使进封魏国公赵葵为右丞相兼枢密使应■

〈彳 繇〉谢方叔并参知政事史宅之同知枢密院事郑清之辞太师三月癸未以贾似道为宝文阁学士京湖安抚制置大使乙酉以程元凤为江淮等路都大提点坑冶铸钱公事兼知饶州丁亥诏以四月朔日有食之十日避殿减膳彻乐夏四月壬寅朔日有食之五月甲午郑窳薨六月丙寅诏边郡各立庙一赐额曰褒忠凡没于王事忠节显著者并祠焉秋八月己酉以吴潜为资政殿学士知绍兴浙东安抚使冬十一月癸未应■ 〈彳 繇〉以资政殿学士知平江府十二月己亥以董槐兼侍读乙巳以吴潜同知枢密院事兼参知政事徐清叟签书枢密院事戊午史宅之薨

十年春三月癸未赵葵以观文殿大学士醴泉观使兼侍读奉朝请庚寅以贾似道为端明殿学士两淮制置大使淮东安抚使知扬州余玠龙图阁学士职任依旧李曾伯征猷阁学士京湖安抚制置使知江陵府夏五月丙寅以福州观察使善珊为保康军节度使嗣濮王吴渊资政殿学士依旧职任与执政恩数秋九月甲子以贾似道为淮西安抚使戊寅以严州水蠲其租冬十月丁酉诏郡邑闲有水患随处发义仓振之是月余玠出师至兴元无功而还十一月壬申赵葵授特进依旧观文殿大学士判潭州湖南安抚大使癸未以雷震非时自二十四日避正殿减膳

十一年春正月丁卯进封孟启为建安郡王仍改名孜己卯诏沿海沿江州郡申严水军之制二月庚子游侣罢三月丁卯少保保宁军节度使嗣濮王不擅薨戊寅以谢方叔知枢密院参知政事吴潜参知政事徐清叟同知枢密院事夏六月丙申以高达带遥郡刺史权知襄阳府管内安抚节制屯戍军马乙巳诏求遗书并山林之士有著述者许上进秋七月庚辰前签书枢密院事陈卓薨八月丁未命吕文福庐州驻扎御前诸军都统制九月辛未祀于明堂大赦冬十一月丙申京湖制司表都统高达等复襄樊甲辰郑清之以太傅保宁军节度使充醴泉观使封齐国公仍奉朝请庚戌清之薨甲寅以谢方叔为左丞相吴潜为右丞相乙卯以徐清叟参知政事兼同知枢密院事董槐端明殿学士签书枢密院事十二月己卯游侣薨是岁蒙古主孟克立以其弟呼必哩总治汉南 【据元史增辑】

十二年春正月癸巳武功大夫王坚以复兴元功转遥郡团练使癸丑诏宰执议立方田开沟浚自近圻始创置游击军水步各半二月乙

卯朔日有食之壬午复襄郢新复州县赋税三年蒙古攻随郢安复等州京西马步军副
总管马荣与战于严宝山癸未再战铜冶坪三月丁亥
又战于子陵大脊山屡败之丁未守三汉口诸将焚蒙古兵屯蓄断其浮梁夏四月戊辰
诏襄郢新复州郡耕屯为急命京阙措给牛种五月乙
巳盗起信州玉山县罢诸郡经界六月癸亥振衢信饥玉山寇平丙寅以严衢婺台处上
饶建宁南剑邵武大水遣使分行振恤仍除今年租秋
八月己巳振在京军民丁丑诏行会天历辛巳诏改明年元九月丁亥少师保康军节度
使嗣沂王贵谦薨冬十月癸丑以徐清叟参知政事董
槐同知枢密院事嗣濮王善珣薨戊午濮安懿王长孙善免授福州观察使嗣濮王壬申
诏襄樊已复其务措置屯田修渠堰十一月庚寅吴潜
罢戊戌以火灾避正殿减膳壬寅诏求直言

宝佑元年春正月庚寅朔以建安郡王孜为皇子改赐名禔授崇庆军节度使进封
永嘉郡王癸卯蒙古兵渡汉江屯万州入西柳关高达
与战于河关大败之追至鳖坑石碑港而还二月己酉朔日有食之三月丙申别之杰薨
夏五月甲午诏余玠赴阙乙未诏侍从台谏给舍制司
各举帅才二人六月庚戌四川制司言余玠疾革以玠为资政殿学士与执政恩数辛亥
以贾似道为资政殿大学士李曾伯端明殿学士任职
依旧庚申以余晦为司农卿四川宣谕使秋七月壬午王伯大薨庚寅振温台处三郡水
灾癸巳诏余玠以兴元归附之兵分隶本路都统务抚
存之甲午余玠卒庚子以董槐兼参知政事癸卯诏抚谕四川官吏军民八月丙辰以余
晦权刑部侍郎四川安抚制置使知重庆府兼四川总
领财赋冬十月丙午振京城军民十一月丙子诏奖谕守臣高达己丑贾似道献所获良
马赐诏褒嘉十二月庚申刘伯正薨

二年春正月乙亥蒙古城利州阆州利州统制吕达与战死之二月甲辰诏太常厘
正秦桧谥己酉以余晦兼四川屯田使三月壬午王善
使蒙古留七年来归戊子蠲江淮今年二税甲午城东海贾似道以图来上夏四月辛亥
给边兵耕种闲田乙丑以徐清叟知枢密院兼参知政
事董槐参知政事六月壬寅罢临安府临平镇税场甲辰蒙古入合州广安军王坚曹世
雄等击却之甲寅录余玠家财以李曾伯为资政殿学
士依旧节制四川丙辰王伯大罢丁巳以贾似道同知枢密院事任职依旧庚午诏余晦
赴阙闰月壬申以蒲择之暂权四川制置司事蒙古围
嘉定府甲戌帅守俞兴元用等力战却之以包恢提点浙西刑狱召捕获浦盐寇壬午以
李曾伯为四川宣抚使兼京湖制置大使进司夔路戊
戌蒙古兵去扬州秋七月以前蜀帅余玠家财犒蜀军蠲近边诸郡租三年诏贾似道开

阍以枢密行府为名壬戌复安西堡己巳获浦海寇平
八月己亥以前知阍州兼利西安抚王惟忠付大理狱九月辛亥祀于明堂大赦丙寅以
山阴萧山诸暨会稽四县水蠲其租冬十月癸酉皇子
褫进忠王甲午斩王惟忠于都市十二月庚午排保甲行自实法

三年春正月己未巴州捷至庚申起居郎牟子才请罢元夜张灯帝纳之二月己卯
复广陵堡城贾似道以图来上三月己酉诏沿边耕屯
课入登羨管屯田官推赏荆襄两淮及山砦如之庚戌邵武寇平癸丑诏自实法宜宽期
限监司守臣其严戢吏奸毋烦扰民以吴渊为观文殿
学士京湖制置使知江陵府夏四月乙酉以江万里知福州福建安抚使六月丙戌李全
子松寿葺旧海城窥海道贾似道击败之戊子洪天锡
劾内官卢允叔董宋臣疏不报秋七月癸丑以吕文德知鄂州节制鼎沔辰沅靖五州丙
辰谢方叔徐清叟罢八月乙丑以董槐为右丞相兼枢
密使程元凤签书枢密院事权参知政事蔡抗为端明殿学士同签书枢密院事徐清叟
资政殿学士提举玉隆万寿宫任便居住己巳以马光
祖兼节制和州无为安庆三郡屯田使丙子郑性之薨庚寅福建安抚江万里罢新命提
举武夷山冲佑观辛卯应■〈彳 繇〉薨冬十二月乙
丑嗣濮王善免薨

四年春正月乙未谢方叔夺职罢祠辛亥以吴渊为京湖制置使兼夔路策应使军
马急切便宜行事庚申蜀阍奏捷三月壬寅以少师嗣
荣王与芮为太傅夏四月癸未以程元凤参知政事蔡抗同知枢密院事贾似道参知政
事职任依旧李曾伯资政殿大学士福建安抚使吴潜
沿海制置使判庆元府五月甲辰罗氏鬼国遣使来言蒙古兵今屯大理国将大入边诏
以银万两约罗鬼为援丁未诏申严老鼠隘防戍襄樊
阍臣奏捷甲寅赐礼部进士文天祥以下六百一人及第出身有差六月甲戌朱禔孙以
太府寺簿知泸州兼潼川路安抚任责泸叙长宁边防
癸未董槐以观文殿大学士提举临安府洞霄宫诏程元凤蔡抗轮日判事军国重务取
旨秋七月甲寅知叙州史俊调舟师与蒙古战凡十三
合屡败之乙卯以程元凤为右丞相兼枢密使蔡抗参知政事张璠端明殿学士签书枢
密院事九月壬辰西南蕃吕告蛮目蛮名天等与乌苏
蛮合力为国御难诏各补承信郎冬十一月戊子荆襄阍臣以功状来上戊戌京湖继上
战功癸丑以张璠同知枢密院事丁大全端明殿学士
签书枢密院事马天骥端明殿学士同签书枢密院事参知政事蔡抗擅去国诏授职子
祠寻寢其命十二月庚申蒙古城枣阳乙丑以张璠兼
参知政事

五年春正月丁亥以赵葵为少保宣远军节度使京湖宣抚使判江陵府兼夔路策应大使进封卫国公贾似道进知枢密院事职任依旧
吴渊参知政事李曾伯荆湖南路安抚使兼知潭州辛亥吴渊薨二月戊午四川嘉定上战功以贾似道为两淮安抚使辛酉命赵葵兼湖广总
领财赋余晦淮西总领财赋夏四月丁卯蒙古攻襄阳安抚高达破之于白河己卯蒙古攻苦竹隘诏京湖调兵应援 【元史载在宪宗八年
十月则应在宋宝佑六年与此异】 闰月甲午蒙古兵趋安南诏徐敏子严防邕宜己酉以吕文德知靖州职任依旧五月戊寅诏京湖沿江海
道严备舟师防遏辛巳复剑门垒壬午夏贵正任吉州刺史带御器械镇江驻扎都统制知怀远军六月丁酉马天骥罢为端明殿学士提举临
安洞霄宫秋八月丙戌光化军奏捷庚子以张璠参知政事丁大全同知枢密院事兼权参知政事己酉史嵩之薨九月辛酉祀于明堂大赦冬
十月庚寅张璠薨丁酉以林存签书枢密院事十一月丙辰李曾伯兼节制广南任责边防十二月壬午李曾伯依旧资政殿学士湖广安抚使
兼广南制置使移司静江府

六年春正月辛亥以丁大全参知政事兼同知枢密院事林存兼权参知政事甲子蒙古主自将南侵由陇州入散关遣将分徇米仓沔州
海州 【据元史增辑】 癸酉罢李曾伯广西经略以广南制置大使兼知静江府甲戌诏枢密院编修官吕逢年诣蜀趣办缓急事宜二年辛
巳以马光祖为端明殿学士京湖制置使知江陵府兼夔路策应湖广总领财赋并屯田事三月戊辰以马光祖兼荆湖北路安抚使夏四月庚
辰朔以不雨避正殿减膳己亥褫沿江制置副使吕好问职乙巳程元凤以观文殿学士判福州寻提举洞霄宫丙午蒙古围襄樊高达击却之
丁未以丁大全为右丞相兼枢密使林存同知枢密院事五月癸丑诏怀远涟水相继奏捷夏贵官两转兼河南安抚使毛兴转右武大夫丁巳
蠲广西耕荒田者租三年后两年减其租之半丁卯嗣秀王师弥薨秋七月戊辰蜀郡刘整奏捷乙亥吕文德入播州八月蒙古主次剑门戊戌
诏上流锁江防御癸卯诏申倭船入界之禁九月壬子诏蜀广海道申严防遏戊辰安丰上战功冬十月蒙古主渡嘉陵江至涪州造浮梁济师
丁丑以俞兴为四川制置副使知嘉定府兼成都安抚副使戊子蒙古攻通泰州制置使张实死之庚寅广南刘雄飞奏横山之功辛卯诏常州
江阴镇江发米振淮上民十一月己酉林存罢以资政殿学士知建宁府癸丑颍州上战功诏追复余玠官蒙古攻鹅顶堡知军王仲出降王佐
死焉壬子以朱熠同知枢密院事兼权参知政事饶虎臣端明殿学士同签书枢密院事

贾似道枢密使两淮宣抚使丁卯东海失守诏贾似道以功自贖十二月戊寅诏改明年元庚辰蒙古兵渡马湖入蜀诏马光祖暂移司峡州六郡镇抚向士璧移司绍庆府以便策应癸未蒙古攻房州光祖士璧击败之是月蒙古下简隆雅诸州

开庆元年春正月己酉蒙古兵攻忠涪二州进迫夔州诏蒲择之马光祖战守调遣便宜行事丁卯贾似道以枢密使为京西湖南北四川宣抚大使都大提举两淮兵甲湖广总领知江陵府蒲择之攻成都不克蒙古攻渠州巴州又入宾象州又攻横州合州破利州隆庆顺庆诸郡阆蓬广安守将相继降又造浮梁于涪州戊辰以李庭芝权知扬州二月庚辰以赵与■为观文殿学士两淮安抚制置使兼知扬州乙酉出内库钱助边用丙戌以马光祖为资政殿学士沿江制置使江东安抚知建康府行宫留守己丑蠲建康太平盩国池州广德等处沙田租壬辰蠲涟水军制所收屯田租乙未发平巢仓米减直振在京民辛丑涪州报蒙古师还三月丁巳以吕文德为保康军节度使四川制置副使兼知重庆府夏四月丁丑以向士璧为湖北安抚副使知峡州兼归峡施珍南平军绍庆府镇抚使甲申诏守合州王坚婴城固守为蜀列城之冠特与厚赏丙申以吕文德兼四川总领财赋五月乙卯吕文德募人断涪州浮梁丁巳诏湖北诸郡去年旱潦饥疫令江陵常澧岳寿诸州发米振巢婺州大水发义仓米振之六月甲戌吕文德与蒙古将史天泽战于嘉陵江败绩辛巳以朱熠参知政事饶虎臣同知枢密院事戊戌诏申严海道防御己亥诏奖谕贾似道壬寅以李庭芝直宝谟阁湖北安抚副使兼知峡州秋七月癸亥蔡抗薨蒙古主孟克殂于军八月甲申以濠州统制张斌柘塘之战歿于王事赠官三转蒙古将自黄州渡江侵临江军知军陈元桂死之戊子吴潜以观文殿大学士判盩国府特进崇国公辛卯命吕又德兼湖北安抚使九月蒙古将围鄂州都统张胜死之又围潭州向士璧击却之己未嗣濮王善腾薨庚申以吴潜兼侍读奉朝请戴庆烜为端明殿学士签书枢密院事以北兵渡江下诏责己勉谕诸阆进兵壬戌出内府钱帛犒师赵葵进观文殿大学士封卫国公判庆元府沿海制置使命御史沈炎往沿江制置副司趣兵援鄂渚再出内库钱帛给备军赏己巳诏贾似道兼节制江西二广人马应援上流庚午合州围解以王坚为盩远军节度使依前左领军卫上将军兴元府驻扎御前诸军都统制兼知合州节制军马冬十月辛未丁大全罢以观文殿大学士判镇江府壬申以吴潜为左丞相兼枢密使进封相国公贾似道为右丞相兼枢密使进封茂国公宣抚大使等如旧癸酉命赵葵为江东

宣抚使马光祖移司江州应援鄂州史岩沿江制置副使移司寿昌军应援鄂州丁丑给还浙西提举常平司岁收上亭户沙地永勿复征庚辰
诏避正殿减膳彻乐又诏比者蜀道稍窳然干戈之余疮痍未复流离荡析其被兵无以自存者亟振之癸未丁大全落职罢新任丙戌以赵葵
为沿江江东宣抚使置司建康任责捍御癸巳向士璧权兵部侍郎湖南安抚使兼知潭州任责广西边防十一月壬寅以朱熠权知枢密院事
饶虎臣戴庆烜并参知政事癸卯吕文福带遥郡防御使河南招抚使知淮安军戊申求直言乙卯赵葵授少保观文殿大学士江东西宣抚使
进封益国公其饶信袁临抚吉隆兴官民兵并听节制调遣便宜行事闰月甲戌出内帑钱犒内外诸军丁丑以向士璧为湖南制置副使余职
仍旧甲申吕文德检校少保京西湖北安抚使兼制置使知鄂州兼侍卫马军都指挥使十二月己亥贾似道言鄂州围解诏论功行赏辛亥诏
改明年元壬子改封吴潜为许国公贾似道为肃国公
景定元年春正月丙子诏奖贾似道功二月丙午诏贾似道以缗钱三千万犒鄂州守城将士己酉进高达为盩江军承宣使右金吾卫上
将军吕文德赏赉有差高达迁湖北安抚副使知江陵府兼夔路策应使辛酉蒙古兵自大理由广南抵衡州向士璧刘雄飞逆战于道败之丙
寅蒙古侵分盩武盩二县河湖砦都监权巡检张兴宗死之三月戊辰朔日有食之庚午夏贵兼黄寿策应使总舟师乙亥蠲全岳永衡柳象瑞
兴国南康隆兴江州临江潭州诸被兵县开庆元年以前二税癸未贾似道奏蕪草坪大捷进军黄州乙酉鄂州统制张胜与蒙古战于汉阳死
之丙戌贾似道言自鄂趋黄与蒙古回军相遇屡有克捷诏孙虎臣范文虎张世杰以下各赐金帛夏四月戊戌侍御史沈炎劾吴潜奸谋叵测
请召贾似道正位鼎轴诏朱熠戴庆烜轮日判事大政则共议以闻己亥贾似道表言夏贵等战新生州进至白鹿矶皆身督战有功诏赴阙庚
子以王坚等为侍卫步军司都指挥使戊申以刘整知泸州兼潼川安抚副使己酉吴潜以观文殿大学士提举临安府洞霄宫癸丑进贾似道
少师进封卫国公朱熠知枢密院事兼参知政事□□□参知政事戴庆烜同知枢密院事兼参知政事皮龙荣端明殿学士签书枢密院事己
未以夏贵为保康军承宣使知淮安州兼淮东安抚副使京东招抚使癸亥以吕文德兼夔路策应使丙寅命马光祖兼淮西总领财赋是月蒙
古主呼必哩立命翰林郝经来告即位五月戊辰诏赵葵依旧少保两淮宣抚使判扬州进封鲁国公徐清叟观文殿大学士知建盩府饶虎臣
罢甲戌以吕文信白鹿矶死事赠盩远军承宣使庚辰戴庆烜卒癸未以皮龙荣兼权参

知政事沈炎端明殿学士同签书枢密院事马堃鄂州
都统制驻扎江陵府壬辰以姚希得为敷文阁待制知庆元府兼沿海制置使乙未李庭
芝起复秘阁修撰主管两淮安抚制置司公事兼知扬
州六月丁酉夏贵奏淮安战功庚子窜丁大全于南康军壬寅立子忠王禕为皇太子戊
申王埜卒秋七月乙丑侍御史何梦然劾丁大全吴潜
欺君无君之罪辛卯诏丁大全削三秩谪居南安军吴潜夺观文殿大学士罢祠削二秩
谪居建昌军八月壬寅以程元凤为淮浙发运使判平
江府九月癸酉守泸州刘整上战功辛巳祀于明堂大赦戊子李璿犯淮安 【李璿即李
松寿时已改名】 冬十月乙未诏申严边防戊申李
璿修南城诏淮阌调兵毁之壬子破李璿兵于涟水城下十二月甲寅吕文德上夔路战
功

二年春正月癸亥诏监司具劾赃吏率以半岁视多寡为殿最守臣助监司所不及
以一岁为殿最本路州无所劾而台谏论列监司守臣
皆以殿定罚有治状廉声者摭实以闻丁丑命皇太子谒拜孔子于太学乙卯福建安抚
使陈鞞以观文殿学士致仕以董槐判福州福建安抚
使乙酉诏封张栻为华阳伯吕祖谦开封伯从祀孔子庙庭是月蒙古将阿珠出师二月
丙申孙虎臣与蒙古战于邳州败之三月壬戌朔日有
食之夏四月乙未以皮龙荣参知政事沈炎同知枢密院事兼权参知政事何梦然签书
枢密院事俞兴保康军承宣使四川安抚制置使丙申
吕文德超授太尉京湖安抚制置屯田使夔路策应使兼知鄂州己亥诏申严江防壬寅
以吕文德兼湖广总领财赋乙巳马天骥以资政殿学
士知福州福建安抚使乙卯窜吴潜于循州丙辰窜丁大全于贵州五月癸亥贾似道请
祠禄不允庚午谢方叔叙复观文殿大学士致仕戊寅
以刘雄飞知夔州夔路安抚使乙酉王坚迁左金吾卫上将军湖北安抚使兼知江陵府
六月乙未诏霖雨为沴避正殿减膳彻乐辛亥以范文
虎为左领军卫大将军主管侍卫步军司兼马军司秋七月甲子守泸州刘整叛降于蒙
古参谋许彪孙死之辛未制置使蒲择之坐通叛贼罗
显窜万安军乙亥以厉文翁为资政殿学士沿海制置使知庆元府戊寅王惟忠家讼冤
诏夺谢方叔合得恩数丁大全责授新州团练使贵州
安置壬午陈鞞卒丙戌吴潜授化州团练使循州安置八月壬辰命韩宣兼常德辰沅澧
靖五郡镇抚使吕文德兼四川宣抚使丁酉夺向士璧
从官恩数穷其侵盗之罪乙巳以江万里为端明殿学士同签书枢密院事依执政恩数
九月辛酉以湖秀二州水灾诏申严荒政乙亥李庭芝
言李璿已遁蒙古使郝经久留真州帝趣与之赐赆冬十月癸巳吕文德言已复泸州外

堡拟即对江垒石为城以示持久之计从之甲申诏申
奖贾似道鄂州之功丙午以何梦然同知枢密院事兼参知政事十一月己未以刘雄飞
为和州防御使枢密副都承旨四川安抚制置使兼知
重庆府四川总领夔路转运使丁丑以马光祖提领户部财用兼知临安府浙西安抚使
十二月庚寅改窜蒲择之于南康军甲午以皮龙荣兼
权知枢密院事马光祖同知枢密院事兼太子宾客知临安府

三年春正月戊午朔【宋史作戊子朔误盖前年十一月己未朔是年二月丁亥朔
则此合是戊午朔也今改辑】诏百官尽言丁大全

吴潜党人并永不录用丁卯以善谘嗣濮王庚午赐贾似道第宅于集芳园给缗钱建家
庙甲戌贾似道以书诱蒙古总管张元李璫获书献之

【据元史增辑】二月丁亥振临安安吉嘉兴水灾以皮龙荣为资政殿大学士知潭州
湖南安抚使庚戌李璫以涟海三城来归并献山东

郡县授璫保信懿武军节度使督视京东河北等路军马封齐郡王复其父李全官爵三
月乙丑以孙附凤为端明殿学士签书枢密院事兼太

子宾客庚辰吕文福依旧职差知濠州兼淮西招抚使是月夏贵攻符离夏五月辛未以
马光祖知福州兼福建安抚使夏贵攻亳州又攻邳州

庚辰夏贵上蕲县战功六月戊子遣青阳梦炎率师援李璫庚寅以孙附凤兼权参知政
事杨栋端明殿学士同签书枢密院事兼太子宾客壬

辰吴潜没于循州己亥董槐以特进致仕癸丑诏应谪臣僚终于贬所者许令归葬是月
夏贵与蒙古战于滨州败绩秋七月壬戌董槐薨癸未

诏申诸路苛取苗米之禁八月蒙古侵虎谿山戊戌李璫败死诏诸郡严边防汪立信升
直敷文阁主管沿江制置司公事知江州主管江西安

抚司公事冬十月乙卯蠲四川制总州县盐酒榷额甲子以杨栋签书枢密院事兼权参
知政事兼太子宾客叶梦鼎端明殿学士同签书枢密

院事兼太子宾客甲戌归化州岑从毅纳土输赋献丁壮为王臣十一月壬辰夺丁大全
贵州团练使移置新州丙申徐清叟薨丁酉资阳砦主

万户小格及其子重嘉努来降戊戌以夏贵知庐州淮西安抚副使

四年春正月贾似道遣杨琳诱蒙古山主杨大渊南归琳被执为所害【据元史增
辑】二月甲寅蒙古攻嘉定府马堃与战败之丁巳

置官田所以刘良贵为提领陈豷为检阅戊寅蒙古遣使来问稽留郝经之故三月丁亥
以吕文德为懿武保康军节度使职任依旧刘雄飞枢

密都承旨四川安抚制置使兼知重庆府四川总领财赋夔路转运使丁酉以王坚知和
州兼管内安抚使吕恩望知濠州兼淮西招抚使庚子

以何梦然兼权知枢密院事夏四月丙寅官田所言知嘉兴县段浚知宜兴县叶哲佐买

公田不遵元制罢之六月庚申诏平江江阴安吉嘉兴
常州镇江六郡已买公田三百五十余万亩今秋成在迩其荆湖江西诸道仍旧和余丙
寅诏公田竣事转刘良贵两官陈豈廖邦杰泊六郡官
进秩有差秋七月吕文德于樊城置榷场 【据宏简录增辑】 九月辛卯祀于明堂大
赦甲午以何梦然知枢密院事兼参知政事杨栋兼权
参知政事叶梦鼎签书枢密院事冬十月己未诏发缗钱百四十万命浙西六郡置公田
庄甲子命张瑀兴元府驻札御前诸军都统制兼知合
州

五年春正月丁丑朔诏崇经术考德行三月辛巳王坚卒马光祖依旧观文殿学士
沿江制置使知建康府江东安抚使行宫留守夏四月
丁未以夏贵为枢密都承旨四川安抚制置使兼知重庆府四川总领夔路转运使辛亥
诏郡邑行乡饮酒礼乙丑何梦然马天骥罢己巳江万
里以资政殿学士知建宁府李曾伯以观文殿学士知庆元府沿海制置使五月庚辰何
梦然以资政殿大学士知建宁府辛卯以杨栋参知政
事叶梦鼎同知枢密院事兼权参知政事姚希得端明殿学士同签书枢密院事马天骥
提举洞霄宫六月丁未饶虎臣叙复资政殿学士依前
通奉大夫差遣如故甲寅加授李庭芝宝章阁直学士依旧任朱禕孙右文殿修撰知静
江府广西经略使汪立信秘阁修撰枢密副都承旨沿
江制置副使兼知江州江西安抚使秋七月丁丑以星变避正殿减膳诏中外直言阙失
乙未马天骥夺职罢祠九月乙未建宁府教授谢枋得
窜兴国军冬十月乙丑帝不豫丙寅大渐丁卯帝崩年六十一谥曰建道备德大功复兴
烈文仁武圣明安孝皇帝庙号理宗攒于永穆陵

理宗宝庆三年绍定六年端平三年嘉熙四年淳佑十二年宝佑六年开庆一年景
定五年凡四十年

钦定续通志卷三十八

●钦定续通志卷三十九 宋纪十五

宋纪 【十五】

度宗

○度宗

度宗皇帝讳禛父与芮嗣荣王理宗母弟也理宗在位岁久无子乃属意于帝初赐
名孟启授贵州刺史历庆远军节度使封益国公旋改
名孜进建安郡王宝佑元年立为皇子 【宋史作立为皇太子考理宗纪帝于宝佑元年
始立为皇子即此下云为节度为郡王为国王则断
非为皇太子以后事知太子系衍文今删】 改赐今名授崇庆军节度使开府仪同三司

进封永嘉郡王镇南遂安军节度使景定元年六月立
为皇太子理宗家教甚严鸡初鸣太子问安退即往会议所参决庶事已乃入讲堂讲官
以次讲经史将晡复至榻前起居率以为常理宗每问
所讲书答之是则赐坐赐茶否则为之反复剖析或继以怒明日须更覆讲五年十月丁
卯理宗崩遗诏太子于柩前即皇帝位戊辰尊皇后为
皇太后辛未大赦十一月丙戌帝初听政御后殿命马廷鸾留梦炎兼侍读李伯玉陈宗
礼范东叟兼侍讲何基徐几兼崇政殿说书诏求直言
又诏先朝旧臣赵葵谢方叔程元凤马光祖李曾伯各上言以匡不逮召江万里王爚洪
天锡汤汉等赴阙诏躬行三年丧复济王竑元赠少师
节度使追封镇王加封嗣荣王与芮武康宁江军节度使依前太师判宗正事诏抚劳边
防将士戊戌诏儒臣日侍经筵辅臣观讲十二月辛丑
诏改明年为咸淳元年壬寅戒赃吏绝贡羨余是岁两浙江东西湖南北广东西福建成
都京西潼川夔利路户五百六十九万六千九百八十
九口一千三百二万六千五百三十二大理寺奏大辟三十三人

咸淳元年春正月辛未朔日有食之丞相贾似道请为总护山陵使不允寻下诏奖
谕甲戌免临安征商三月二月庚申置籍中书记谏官
御史言事岁终以考成绩三月癸酉似道乞解机政不允甲申葬理宗皇帝于永穆陵夏
四月壬寅赏四川都统咎万寿云顶山金堂峡之功丁
未以寿崇节免临安官私房僦地钱戊申干会节如上免征再免在京征商三月自是祥
庆灾异寒暑皆免戊午贾似道特授太师己未如景灵
宫发米贍京城民叙夔路都统王胜等李市沙坪战功五月己巳追命史弥远为公忠翊
运定策元勋闰月乙巳以久雨减直糶米济京城民自
是米价高即发廩平糶以为常丁未发钱贍在京小民及殿前步马司军人自是行庆恤
灾或霪雨雪寒咸赐如上数以江万里参知政事王爚
同知枢密院事权参知政事马廷鸾端明殿学士签书枢密院事丁卯以故成都马步军
总管张顺歿于王事诏赠官五转秋七月壬戌督州县
严钱法禁民闲用牌帖癸亥禁在京置窠栅私系囚八月丁亥禁有司收民租掙克甲午
蒙古将阿珠帅大军至庐州及安庆诸路统制范胜统
领张林正将高兴副将孟兴逆战死之九月壬子命宰执访司马光苏轼朱熹后人量才
录用冬十月壬申减四川州县盐酒课始自景定四年
再免征三年乙亥减田契税钱什四

二年春正月癸丑以江万里为湖南安抚使兼知潭州二月戊寅免湖南漕司积年
运上峡米耗折逋直三月庚子赏夔路总管张喜等防
护开达军功戊申赐敕书奖谕吕文德夏四月乙丑洪天锡以显文阁待制知潭州兼湖

南安抚使五月癸丑诏节制将帅讨军实节浮费毋占
役兵致妨训练六月壬午振衢州饥秋八月甲申安南国遣使贺即位戊子蒙古入蕲州
黄州冬十一月乙卯少师致仕赵葵薨丁巳利东安抚
使知合州张珩复广安大梁城十二月丁丑申戡贪之令

三年春正月己丑朔有事于南郊大赦癸卯立妃全氏为皇后戊申帝诣太学谒孔子行释菜礼以颜渊曾参孔伋孟轲配享颛孙师升十
哲邵雍司马光升列从祀雍封新安伯祭酒陈宜中以下加恩有差乙丑诏贾似道进太
师平章军国重事一月三赴经筵三日一朝治事都堂
三月癸卯知房州李鉴及将校杜汝隆等以战龙光砦有功优与旌赏夏五月丁亥朔日
有食之六月壬戌加授吕文德少傅马光祖参知政事
李庭芝兵部尚书并职任仍旧秋七月壬辰权鄂州都统汪政焚光化城外积聚及攻真
阳有功诏予转官己酉权黎州张午招谕大青羌主归
八月辛酉遣步帅陈奕率马军舟师巡逻江防壬戌以边报警急诏吕文德等申严防遏
乙丑太师武康宣江军节度使嗣荣王与芮进封福王
王荣王祀事壬申以久雨命决滞狱九月乙未诏郡县收民租毋取赢违者论罪癸卯知
邕州总统谭渊等攻建水州禽其知州阿孱以下三百
余人冬十月庚申复开州十一月丙申故左丞相吴潜追复光禄大夫壬寅赏知房州李
鉴等均州武阳坝战功十二月丙辰吕文焕依旧带行
御器械知襄阳府兼京西安抚副使

四年春正月己丑蒙古于白河口万山鹿门山诸处兴筑城堡诏知郢州翟贵两淮
都统张世杰申严备御己酉印应雷改知庆元府兼沿
海制置使夏四月壬午以汤汉为福建安抚使丙申右正言黄镛言今守边急务非兵农
合一不可一曰屯田二曰民兵川蜀屯田为先民兵次
之淮襄民兵为先屯田次之此足食足兵良策也不报五月辛酉枢密都承旨高达再辞
侍卫都虞候以孙虎臣代之丙午贾似道乞骸骨不允
六月辛巳罢浙西诸州公田庄募民以耕输租减什三毋私相易违者以盗卖官田论秋
九月丁巳蒙古将阿珠攻樊城冬十月戊寅朔日有食
之己亥诏四川州县盐酒课自咸淳四年始再免征三年十一月丁巳以知江陵府陈奕
裨将周全王德等与蒙古战于西山南谷口田家山有
功各以等第推赏壬申行义役法十二月辛卯以夏贵为沿江制置副使兼知黄州戊戌
以汪立信知潭州兼湖南安抚使职任依旧乙巳诏赏
京湖总管张喜赵万等石门坂堰战功

五年春正月丁未以李庭芝为两淮安抚制置大使兼知扬州蒙古将阿珠入复州
及德安府京山壬子京湖策应司参谋呼延德领诸将

张喜等与蒙古战于蛮河癸亥叶梦鼎依前少保判福州福建安抚使封信国公以马廷鸾参知政事兼同知枢密院事甲戌以江万里参知政事三月丙午阿珠自白河以兵围樊城己未诏浙西六郡公田设官督租有差辛酉京湖都统张世杰率马步舟师援襄樊战于赤滩圃戊辰以江万里为左丞相马廷鸾为右丞相兼枢密使己巳以马光祖知枢密院事兼参知政事吴革沿江制置使夏四月丙子赏张世杰战功壬午知渠州张资上蓬州界白土神山蒲渡等处战功丙戌以安西都统张朝宝利东路安抚张珣水砦头战功推赏己丑刘雄飞依旧枢密都承旨知沅州兼常德澧辰沅靖五郡镇抚使五月己酉马光祖以观文殿学士提举洞霄宫乙卯程元凤薨壬戌以信阳军将娄安邦朱兴战千石畝吕文焕呼延德战福山杨青李忠战石湫俱有功推赏有差壬申京湖制司言故夔路安抚徐宗武没于王事诏于致仕恩外特官其一子六月庚辰以吕文福为复州团练使知濠州兼淮西安抚副使甲申皇子昱生秋七月己酉观文殿学士马光祖守本官致仕八月戊寅诏郡县收民租毋巧计取赢厚直折纳并犒襄樊将士九月辛酉祀于明堂大赦冬十月己丑吕文德进封崇国公十一月戊辰特授少师进封卫国公致仕十二月癸酉文德卒己卯以范文虎为殿前副都指挥使甲申犒襄郡等处水陆戍士戊子蒙古兵筑南新城夏贵与战败绩范文虎来援亦败阿珠进逼襄阳

六年春正月壬寅以李庭芝为京湖安抚制置使兼夔路策应使印应雷雨淮安抚制置使己酉以钱赐夔路策应司备赏给庚戌以高达为湖北安抚使知鄂州孙虎臣起复淮东安抚副使知淮安州戊辰以江万里为福建安抚使二月乙未夏贵攻万山堡为蒙古将张弘范所败丁酉吕文福为淮西安抚副使兼知芦州己亥朱禕孙权兵部尚书仍四川安抚制置总领夔路转运知重庆府三月庚子朔日有食之癸丑诏举廉吏癸亥立贛吉南安境要冲四砦联络御寇夏四月戊寅以文天祥兼崇政殿说书五月辛丑以吴革为沿江制置宣抚使五月蒙古攻嘉定及重庆府都统牛宣等与战于钓鱼山及马湖口两战皆败宣被执六月戊寅贾似道辞退疏十数上帝坚留之庚寅赐襄郢水陆屯戍将士秋七月复开州八月壬辰诏推排法虚加寡弱户田租害民为甚亟除其弊癸巳诏贾似道十日一朝九月庚戌以黄万石为沿海制置使丙寅范文虎援襄阳刘整逆战于灌子滩败之冬十月丁丑诏范文虎总统殿司两淮诸军往襄樊会合备御己卯诏台州发义仓并丰储仓米振水灾甲申以陈宗礼赵顺孙兼权参知政事闰月己酉以吉安州水免公田租乙亥夏贵攻

莒州十一月丁丑以嘉兴华亭两县水免公田及民田
租庚辰犒襄郢屯戍将士己丑都统张世杰领兵江防十二月蒙古筑万山城襄樊路绝
七年春正月封子昱为建国公诏戒贪吏辛未以诸暨县水免其租三月戊寅振和
州无为镇巢安庆诸州饥乙酉振平江府及吉州饥仍
减直振棗戊子发米往建德府济棗夏四月辛亥免广东提举司盐筭银甲寅礼部侍郎
陈宜中以显文阁待制知福州兼福建路安抚使五月
蒙古侵嘉定重庆泸州郡壬辰发米诣衢州振棗六月癸巳以韩震带行御器械知
江安州兼潼川东路安抚副使马瑄带行御器械知咸
淳府节制涪万州丙申振诸暨县被水民癸卯范文虎以舟师援襄阳阿珠逆击之文虎
败走【据元史增辑】癸丑以隆暑赐襄阳屯戍将
士戊午振绍兴府饥秋七月乙酉来兴国攻百丈山营败归八月壬辰朔日有食之甲午
遣京湖制置李庭芝诣郢州犒师九月己丑子■〈显
，去页〉生冬十月丙申少传嗣秀王与泽薨己未振殿前步马诸军贫乏及阵没孤遗
者十二月丙午命四川制司下渠洋开州宁西镇抚使
张朝宝勅司犒师己亥谢方叔叙复元官以惠国公致仕辛亥初置土籍是年蒙古改国
号曰元

八年春正月庚申诏崇俭自宫禁始自今珠翠销金不得服用辛未子昺生己丑汤
汉卒二月癸巳谢方叔卒前知台州赵子寅歿无所归
特赠直秘阁给田宅以旌廉吏丙午犒襄郢水陆战戍将士夏五月乙巳李庭芝援襄阳
移屯郢州遣民兵部辖张顺张贵将死士自上流直犯
重围张顺死之贵寻被执亦死六月丙申皮龙荣徙衡州丁酉以章鉴为端明殿学士同
签书枢密院事命京湖制司余米转输襄阳府乙巳以
家铉翁兼权知绍兴府浙东安抚提举司事辛亥罢广东运司银场癸丑命四川制司诣
湖北余运上峡入夔米秋八月丙戌朔日有食之丁未
振绍兴府六县被水民九月辛未祀于明堂贾似道乞罢政帝固留之大赦甲戌元师攻
开州又攻合州冬十月己亥减会稽余姚上虞诸暨萧
山五县田租丁未以章鉴兼权参知政事庚戌减钱塘仁和两县民田租什二会稽湖田
租什三诸暨湖田租尽除之十一月乙卯右丞相马廷
鸾以观文殿学士知饶州振殿前步马司诸军贫窶并阵没孤遗者己卯遣使如元师授
刘整为卢龙军节度使封燕郡王十二月甲寅以叶梦
鼎为少傅右丞相兼枢密使

九年春正月乙丑元师克樊城范天顺牛富死之癸未诏叙安岂统制金文彪朱文
广王文显盛全■〈彡戎〉河古河泉河珉河等处战
功二月丁未以夏贵检校少保庚戌吕文焕以襄阳府叛降于元三月庚申贾似道请出

督师诏不允刘整故吏罗鉴自北还上整书稟取江南
二策诏准东制司亟于清口筑城以备之庚午遣金吾卫上将军阮思聪由平江镇江及
黄州行视城池戊寅贾似道始奏襄阳失陷壬午建机
速房以革枢密院漏泄兵事稽违边报之弊贾似道累疏请督师诏勉留夏四月甲申以
汪立信权兵部尚书京湖安抚制置使知江陵府夔路
策应使湖广总领不许辞免仍给钱令开阡犒师辛卯以赵潛为淮西总领兼沿江制置
建康留守壬辰诏襄阳六年之守一旦而失军民离散
痛切朕心今年干会节其免集英殿宴以钱六十万给沿江制置赵潛江防捍御癸巳知
招信军陈岩乞祠禄诏曰乃者边吏弗戒致有襄难将
士频岁暴露边方荡析离居盡伤朕心尔阉臣专征方面宜身率诸将宣扬国威以赏戮
用命不用命尔守臣有土有民宜申儆国人保固封守
尔诸将尚迪果毅一乃心力各以其兵敌王所忤今朕多诰尔其悉听明训毋懈毋悞习
如故常功多有厚赏尔不克用劝罚固不得私也又如
中外小大臣僚有材识超卓明控御之宜怀攻守之略者密具以闻一如端拱二年制书
朕当虚心以听丁未以高达为盩江军节度使湖北安
抚使知峡州李庭芝辞赴阙诏与祠己酉以夏贵兼侍卫马军都指挥使庚戌诏汪立信
赏罚调用悉听便宜行事是月元主檄史天泽等乘机
进兵五月乙卯以黄万石权户部尚书兼知临安府浙西安抚使丙辰知庐州吕文福以
从兄文焕降元乞罢不允吕师夔亦五疏乞罢诏赴阙
戊寅孝感县丞关应庚上书言边防二十事诏授武当军节度推官京湖制司量材任使
庚辰布衣林椿年等上书言边防十数事诏诸人上书
凡请以丞相似道督师者不允余付机速房六月前四川宣抚司参议官张梦发诣贾似
道上书陈急三策似道不以闻下京湖制司审度可否
事竟不行左藏东库蹇材望上书言边事不报戊子京湖制司请给器械诏内军机库选
赐之仍给钱备修缮己丑给事中陈宜中乞正范文虎
不力援襄之罚诏文虎降一官依旧知安庆府闰月辛亥以殿前指挥使陈奕总统舟师
备鄂州黄州江防丙辰前临安府司法梁炎午陈攻守
之要五事不报命大理寺丞锺蜚英点视沿江堡隘兵船戊辰赏马湖蛮王汝作鹿巫蛮
王陶邱助官军捍御马湖功秋七月丁亥权绍兴府节
制紫城军义文荣鼎及将赵居敬等成都之役没于兵各追赠官秩仍官其子癸巳知达
州赵章知开州鲜汝忠知渠州张资等复洋州又复吴
胜堡戊戌张珏等复马鬃山八月癸丑权知均州徐鼎总管盛聪战房州胡师峪板仓乙
卯知房州李鉴调权竹山县王国材统制熊权总辖马
宗明战落马坪白羊山各以功论赏九月辛巳以章鉴签书枢密院事兼参知政事陈宜

中同签书枢密院事乙未以洪焘为浙东安抚使丙申以黄万石为湖南安抚使冬十月癸丑镇巢军和州太平州诸将查文等以射湖冈万岁岭后港及焦湖北岸战功咸赐爵赏丁丑两淮制置使印应雷进二秩致仕以李庭芝为两淮安抚制置使并给钱激犒备御十一月壬午封子■〈显，去页〉为嘉国公甲午以陈奕为沿江制置使知黄州吕文福知合门事分淮东西制置为两司以李庭芝为淮东安抚制置使仍兼淮西策应使乙未以夏贵为淮西安抚制置使兼知庐州仍给钱激犒备御李庭芝辞免淮西策应使不允知安丰军陈万以舟师进抵正阳城遇元兵击败之十二月甲寅夏贵攻正阳败还甲子以马廷鸾为浙东安抚使知绍兴府丁丑以旱涝免沿江制置使所辖四郡屯田租

十年春正月壬午城鄂州汉口堡权总制施忠部将熊伯明知泰州龚集以天长县东横山秦潼湖青蒲口等处战功推赏戊子江万里以观文殿大学士提举洞霄宫乙丑以留梦炎知潭州兼湖南安抚使庚寅城鄂州沌口西岸堡襄阳勇信中军钤辖吴信自吕文焕军来归诏赴阙丙申减江东沙圩租什之四是月贾似道母死归治丧即起复二月己酉以赵顺孙为福建安抚使三月己卯免郡县侵负义仓米夏四月乙卯子昺进封永国公诏赏沿江都统王达黄侯战黄连寺之功戊午以吕文福为常德辰沅澧靖五郡镇抚使知沅州辛酉诏赏光州守陈岩路分李全许彦德总管何成路钤仰子虎等牛市畷丁家庄战功乌苏蛮三诣云南军前纳款于元五月丁亥以高世杰为湖北安抚副使兼知岳州总统出戍军马六月戊午命寿春府措置边防秋七月癸未皇帝崩于福宁殿【宋史此处有遗诏太子■〈显，去页〉即皇帝位之语考帝■〈显，去页〉以嘉国公即位未曾立为太子也且其事已具帝■〈显，去页〉纪兹并删之】年三十五【据甲子会纪增辑】谥曰端文明武景孝皇帝庙号度宗攒于永绍陵

度宗咸淳十年

钦定续通志卷三十九

●钦定续通志卷四十 宋纪十六

宋纪【十六】

帝■〈显，去页〉【二王附】

○帝■〈显，去页〉二王附

帝■〈显，去页〉度宗皇帝子也母全皇后初授左卫上将军封嘉国公咸淳十年七月癸未度宗崩贾似道入宫议所立众以时方多难而建国公是年长欲立之似道主立嫡乃称遗诏奉帝即皇帝位于柩前年五岁谢太

后临朝称诏甲申以兄昱为保康军节度使进封吉王
弟昺保宁军节度使进封信王并开府仪同三司加食邑命平章贾似道依文彦博故事
独班起居丙戌尊皇太后日寿和圣福太皇太后皇后
曰皇太后戊子命临安府振赡细民辛卯以朱禩孙为京湖四川宣抚使兼知江陵府壬
寅诏抚三边将士命州郡举遗逸求直言除浙西安抚
司两浙转运司临安府见进赃赏钱八月甲辰诏乞言于老臣江万里叶梦鼎马廷鸾留
梦炎赵顺孙王爚甲寅太皇太后以老不能御正衙命
暂以慈元殿为后殿戊辰以全清夫为昭信军节度使谢堂检校少保谢屋保康军节度
使马廷鸾乞归诏趣之任九月丁丑王爚乞致仕诏不
允戊寅振余杭临安两县水灾己卯似道乞免答拜从之癸未元兵大会于襄阳丙戌分
道并进丁亥薄郢州戊子免被水州县今年田租丁酉
以天瑞节免征临安府公私房赁钱十日以金银符给夏贵激赏奇功壬寅复州副将翟
国荣与元兵战于烂泥湖死之冬十月丙午元兵破渠
州礼义城知州张资自杀癸丑广西经略司权参议官邢友龙击潮州漳州寇破之乙卯
令州县行义田义役丁巳元兵至郢州都统制张世杰
力战却之遂去由藤湖入汉戊午郢州副都统赵文义追之与战于金子湖死之壬戌以
钱给郢城屯戍将士甲子诏以明年为德佑元年乙丑
以章鉴同知枢密院事兼权参知政事陈宜中签书枢密院事兼权参知政事元兵徇沙
洋城京湖宣抚使遣总管王虎臣援之丙寅城破虎臣
与守隘官王大用皆被执元兵至新城戊辰总制黄顺出降己巳副总制仁盩出降都统
制边居义力战城陷死之知复州翟贵以城降十一月
癸酉以朱禩孙为京湖四川宣抚使丁丑命沿江制置使赵潛巡江策应仍赐钱激赏战
功戊寅马廷鸾力辞浙东安抚使诏依旧观文殿大学
士提举洞霄宫庚辰以陆秀夫为淮东安抚制置司参议官丙戌以王爚为左丞相章鉴
为右丞相并兼枢密院以张晏然兼京湖四川宣抚司
参议官甲午括邸第戚畹及御前寺观田令输租是月元人拔云安罗拱高阳诸城堡十
二月癸卯振建康府太平州池州避难民赐京湖及沿
江戍守将士甲辰以淮西四郡水旱免去年屯田未输之租丙午元兵次汉口遂入江丁
未提举兴国宫吕师夔募兵江州癸丑元兵攻阳逻堡
武定军都统制王达战死乙卯元兵渡青山矶丙辰都统程鹏飞与战不利都统高邦宪
被执元兵复攻夏贵于阳逻堡都统制刘成战死夏贵
遁归庐州朱禩孙至鄂州闻夏贵败夜奔江陵府己未权知汉阳军王义以城降吕文焕
以元兵攻鄂州庚申程鹏飞及权守张晏然以城降癸
亥诏似道都督诸路军马以步军指挥使孙虎臣总统诸军所辟官属皆先命后奏诏天

下勤王甲子起李芾为湖南提刑乙丑以高达为湖北制置使兼安抚知江陵府诏核贵戚释道田租以助边费庚午程鹏飞以元兵徇黄州知州陈奕叛降于元李庭芝以兵勤王辛未命州郡节制驻戍经从兵

德佑元年春正月癸酉元兵入黄州甲戌陈奕陷蕲州丁未知州管景模叛降于元戊寅诏出浙东邸第米减糶壬午葬度宗皇帝于永绍陵癸未贾似道以吕师夔权刑部尚书都督府参赞军事任中流调遣乙酉以陈宜中同知枢密院事兼参知政事吕师夔钱真孙遣人请降于蕲州丙戌元兵徇江州知安州陈严遁邳州降戊子知南康军叶阎遣人请降于江州贾似道出师知德安府来兴国叛降于元夔路安抚张起岩攻开州取之己丑知安庆府范文虎遣人以酒饌迎元师于江州乙未以孙虎臣为盩武军节度使戊戌赦京畿罪池州都统张林遣人请降于江州元兵入安庆范文虎降通判夏椅死之是月知达州鲜汝忠以城降元二月癸卯似道以宋京为都督府计议官使干元军甲辰以黄万石为江南西路制置使加湖北制置副使高达检校少保庚戌元兵入池州权守赵卯发死之乙卯五郡镇抚吕文福遣所部淮兵入卫丙辰诏劳贾似道命都督府岁举改官如史嵩之故事己未加张起岩福州观察使庚申孙虎臣与元兵战于丁家洲败绩似道虎臣奔扬州诸军尽溃翁应龙以都督府印奔还临安壬戌元兵徇饶州知州唐震死之故相江万里赴水死通判万道同以城降元沿江制置大使赵溍知镇江府洪起畏知盩国府赵与可知隆兴府吴益皆弃城遁知和州王喜以城降元建康都统翁福出迎元师甲子元兵至临江军知军鲍廉死之似道上书请迁都乙丑下公卿杂议王爚去位张世杰将兵入卫道饶州复攻取之其将谢元王海李旺袁恩吕再兴战死江西提刑文天祥起兵勤王丙寅以天祥为江西安抚副使知贛州趣入卫诏募兵以谢堂为两浙镇抚使谢至保盩军节度使全永坚谢屋并检校少保戊辰征两浙福建诸郡厢禁兵之半入卫湖南提刑李芾以兵勤王知江阴军郑■〈立需〉弃城遁知无为军刘权知太平州孟之縉皆以城降元己巳元兵攻嘉定九顶山都统侯兴战死以陈宜中知枢密院事兼参知政事曾渊子同知枢密院事两浙安抚制置大使兼知临安府文及翁签书枢密院事倪普同签书枢密院事召王爚为浙西江东宣抚招抚大使使居京师以备咨访遣元使人郝经等归庚午加夏贵开府仪同三司令以所部兵入卫令长吏给经过兵民钱米免一切征税应编配拘锁人除伪造关会势盗放火者悉纵之放免浙西公田逋米及诸处见监赃文武官

在谪籍者并放自便与叙复加张瑒远军节度使咎万寿保康军节度使张世杰和州
防御使令将兵入卫罢贾似道平章都督予祠招似道
溃兵辛未右丞相章鉴遁三月壬申朔诏复茶盐市舶法除似道诸不恤民之政以公田
给佃主率其租户为兵陈宜中杀殿前指挥使韩震震
所部兵叛攻嘉会门急发兵捕之皆散走癸酉都统徐旺荣迎元兵入建康府镇江统制
石祖忠请降于建康命浙西提刑司准备差遣刘经戍
吴江两浙转运司准备差遣罗林浙西安抚司参议官张濡戍独松关山阴县丞徐垓正
将郁天兴戍四安镇起赵淮为大府寺丞戍银树东坝
湖北安抚司计议官吴继明复通城县遣使召章鉴还朝甲戌以贾似道为醴泉观使元
兵至无锡知县阮应得出战死之乙亥诏谕吕文焕陈
奕范文虎使通和议息兵以王爚为左丞相兼枢密使丙子下诏罪己以陈宜中为特进
右丞相兼枢密使罢章鉴官予祠侍御史陈过请窜贾
似道并治其党人翁应龙等不俟报而去丁丑知滁州王应龙以城降元己卯杖翁应龙
刺配吉阳军命王爚陈宜中并都督诸路军马加吕文
福福州观察使壬午知常州赵与鉴遁常州陷甲申元兵至西海州安抚丁顺降乙酉知
东海州施居文乞降于西海州知平江府潜说友通判
胡玉林鎗以城降元加张世杰保康军承宣使总都督府诸军丙戌知广德军令狐槩以
城降元张世杰遣其将阎顺李存进军广德谢洪永进
军平江李山进军常州己丑滁人执王应龙归于扬州杀之加吕文福保康军承宣使趣
入卫文福杀使者入江州降于元庚寅左司谏潘文卿
右正言季可同知枢密院曾渊子两浙转运副使许自浙东安抚王霖龙相继遁去签书
枢密院文及翁同签书枢密院倪普讽台臣劾己章未
上亟出关遁知安东州孙嗣武以城降元辛卯命在京文武并转两官其畔官而遁者令
御史台觉察以闻阎顺战安吉县复取凤平张濡杀元
使者严忠范于独松关执廉希贤送临安 【谨案通鉴辑览 御批元兵既已渡江其
局固非乞和可了两军相对使行其闲乃行人甫入
境遽以兵刃相加实非情理所宜使宋度有良将劲卒可以制胜或者犹可今并无可自
恃者而冒昧横挑敌怒旋又思饵以甘言更与儿戏何
异元人岂肯为宋所愚谋国者错谬若此尚何所恃以图存】 壬辰元兵攻洞庭安抚使
高世杰降癸巳元人攻岳州总制孟之绍以城降常德
鼎沔诸州皆降乙未免安吉县今年夏田租丙申顾顺复广德军以陈合同签书枢密院
事戊戌赦边城降将罪能自拔归者录之复一州者予
知州复一县者予知县所部僚吏将卒及土豪立功者同赏罢章鉴祠官并夺宰辅恩数
曾渊子削两官夺执政恩数陈过陈坚徐卿孙各削两

官夺侍从恩数赵与鉴追两官罢之遇赦永不收叙罢许自王霖龙夏四月壬寅统制洪福复镇巢军乙巳元兵入广德知县王汝翼与寓居官赵时晦路分孟唐老与其二子死之丙午元兵破沙市城都统孟纪死之监镇司马梦求自经死戊申京湖宣抚朱禊孙湖北制置副使高达以江陵降元京湖北路相继皆陷张起岩保飞山己酉命刘师勇戍平江府壬子以高斯得签书枢密院事兼权参知政事总统张敏与元兵战于丰城死之乙卯以福王与芮为武康盩江军节度使判绍兴府丙辰王爚至令如文彦博故事自朝参起居外并免拜以枢密副使召夏贵提兵入卫丁巳总制霍祖胜复溧阳县乙未及翁倪普并削一官夺执政恩数潜说友削三官夺侍从恩数庚申令狐槩除名配郁林州牢城籍其家知金坛县李成大率义局官舍山县尉胡传心阳春主簿潘大同濠梁主簿潘大猷进士潘文孙潘应奎复金坛县镇江统制侯岩县尉赵嗣滨复以元兵攻之成大二子及大同等皆死成大被执死之壬戌元兵攻真州知州苗再成宗子赵孟锦与战于老鹳嘴败绩癸亥加知思州田谨贤知播州杨邦宪并复州团练使趣兵入卫丁卯加李庭芝参知政事戊辰诏宜兴溧阳民兵助战有功特免今年田租庚午元兵趣扬州都拨发官雷大震出战死是月常德鼎澧皆陷五月辛未朔命宰执曰赴朝堂治事以旌德县城守有功免其民今年田租癸酉元兵至盩国知县赵与■〈禾唐〉山战死之甲戌淮安总制李宗荣知庆远府仇子真将兵来勤王乙亥加苗再成濠州团练使赵孟锦扬州都统司计议官以洪福知镇巢军丁丑诏赵潛统军民船屯江阴刘师勇复常州戊寅淮东兵马铃辖阮克己将兵来勤王加左骁骑中郎将己卯诏与婺州处士何基王柏赠谥【谨按通鉴辑览御批是时宋之君臣救亡之不暇尚从容为崇儒重道之举此与宋襄临战谈古何异真可笑可哀耳】加张珣检校少保四川制置副使知重庆府辛巳加刘师勇濠州团练使辛卯贬潜说友南安军吴益汀州并籍其家罢李珣送婺州籍吕文焕孟之縉陈奕范文虎家甲午饶信州饥令民入粟补官丙申诏张世杰张彦阮克己仇子真四道出兵遣使告天地宗庙社稷诸陵宫观己亥劳军吴继明复蒲圻通城崇阳三县加带行带御器械权知鄂州令择险为寓六月庚子朔日有食之咎万寿以嘉定及三龟九顶紫云城降于元知叙州李演援嘉定战于羊雅江兵败被执辛丑太皇太后诏削尊号圣福字以应天戒命侍从官已上各举才堪文武者五人余各举三人虽在谪籍亦听举之己酉免广德军今年田租及诸郡县未纳纲解庚戌削章鉴一官放归田里曾渊子再削一官徙吉州诛翁应龙籍其家甲寅

留梦炎入朝王爚请相梦炎乞以经筵备顾问陈宜中请相梦炎乞祠诏以爚为平章军国重事一月两赴经筵五日一朝宜中左丞相兼枢密使都督诸路兵梦炎右丞相兼枢密使都督诸路兵乙卯诏求言知叙州郭汉杰以城降元丙辰疏决在京罪囚戊午知泸州梅应春以城降元己未以李庭芝知枢密院事兼参知政事庚申知富顺监王宗义以城降元丙寅扬州都统姜才袭元兵于扬子桥败绩秋七月庚午江西制置黄万石移治抚州诏还隆兴府辛未张世杰督诸军与元人战于焦山下败绩壬午以饶州被兵令免今年田租路钤刘用调兵入靖州和州康玉刼之通判张起岩杀玉复靖州癸未括内司局钱饷兵丙戌令权余公田庚寅谪贾似道为高州团练使贬循州籍其家余浙西邸第寺观田米十之三监司郡守避事不即到官者令御史台觉察以闻辛卯京学生刘九皋等上书劾陈宜中宜中径去遣使四辈召之不至谢堂乞罢两浙镇抚司不从张世杰乞济师不报壬辰下刘九皋等于临安狱罢王爚为醴泉观使癸巳以夏贵知扬州朱焕知庐州甲午遣使召陈宜中还朝乙未以陈文龙同签书枢密院事兼权参知政事戊戌遣使召宜中还朝八月己亥总制毛献忠将衢州兵入卫辛丑疏决临安府罪囚壬寅右正言徐直方遁加夏贵枢密副使两淮宣抚大使李芾湖南镇抚大使乙巳吴继明复平江县己酉拘阎贵妃集庆寺贾贵妃演福寺田还安边所庚戌刘师勇攻吕城破之丁巳遣使召陈宜中还朝加张世杰神龙卫四厢都指挥使总都督府诸兵戊午加刘师勇和州防御使甲子以文天祥为浙西江东制置使兼知平江府九月己巳陈宜中授观文殿大学士醴泉观使兼侍读辛未加田谨贤福州观察使杨邦宪利州观察使趣入卫己卯陈宜中乞任海防不允辛巳有事于明堂大赦丙戌命文天祥为都督府参赞官总三路兵会稽县尉郑虎臣诛贾似道于漳州元兵陷泰州知州孙虎臣死之庚寅免靖州今年田租乙未冬十月己亥加张世杰沿江招讨使刘师勇福州观察使总统出戍兵壬寅陈宜中至丁未以留梦炎为左丞相陈宜中为右丞相并兼枢密使都督城临安辛亥以张世杰为沿江制置副使兼知江阴军兼浙西策应使戊午领户部财用常楙中书舍人王应麟请立济王后壬戌元兵发建康癸亥张全尹玉麻士龙援常州士龙战死全奔五牧朱焕至庐州夏贵不纳复以焕为准东制置副使甲子尹玉兴元兵战于五牧死之张全遁丙寅趣赵潛赵与可郑

■〈立需〉所募兵诏中外官有习兵略者各以书来

上是月李世修以江阴降于元十一月丁卯铜关将贝宝胡岩起攻溧水死之庚午以陈文龙同知枢密院事兼权参知政事黄镛同签书枢密

院命诸制司各举才堪将帅者十人不限偏裨士卒不隶军中者许投匭自荐辛未起居舍人曾唯辞官不允径去戊寅元兵破广德军己卯破四安镇正将胡明等死之召文天祥入卫壬午元兵至隆兴府黄万石弃抚州遁转运判官刘盘以城降元癸未元兵破兴化县知县胡拱辰自杀元兵陷常州屠之知州姚訔通判陈照都统王安节皆死刘师勇奔平江乙酉礼部侍郎陈景行辞官不允径去丁亥独松关告急趣文天祥入卫戊子调民兵出守余杭钱塘己丑独松关破冯骥死之张濡遁通判平江府郑畴遁庚寅通判王矩之都统制王邦杰遣人迎降于常州辛卯元兵趋抚州都统密佑逆战于璧邪兵败死之癸巳以张世仔为浙西制置副使兼知平江府甲午权礼部尚书王应麟遁乙未左丞相留梦炎遁丙申遣使召梦炎还朝赐余杭武康长兴县民钱并免今年田租通判抚州施至道以城降元十二月丁酉诏许贾似道归葬庚子以吴坚签书枢密院事黄镛兼权参知政事遣柳岳奉书诣元军乞班师修好癸卯以陈文龙为参知政事兼权知枢密院事谢堂同知枢密院事甲辰嘉兴府告急给封樁库钱为兵备命赵兴振戍缙云县复季可官令如龙泉县募兵乙巳以陈景行为浙东安抚副使戍处州起方逢辰戍淳安县丙午追封吕文德为和义郡王丁未出安边封樁库金付浙东诸郡为兵备元兵入平江府起吴君棹为太府少卿提点临平民兵遣使召留梦炎王应麟皆不至戊申张世杰入卫加检校少保王爚薨乙酉括临安府州县马庚戌柳岳还癸丑遣宗正少卿陆秀夫刑部尚书夏士林兵部侍郎吕师孟使军前且敕吕文焕令通好罢兵己未方兴丁广赵文礼兵皆败归庚申以柳岳为工部侍郎洪儒震为右正言使如元祈请以文天祥为签书枢密院事黄万石叛降于元元兵破大洪山知随州朱端履降于元权吏部尚书丁应奎左侍郎徐宗仁遁癸亥遣使召留梦炎不至

二年春正月丁丑元兵陷潭州湖南安抚兼知州李芾死之郡人知衡州尹谷亦举家自焚帅司参议杨霆及幕属陈亿孙颜应焱等皆从芾死守将吴继明刘孝忠以城降于元元复陷宝庆通判曾如骥死之戊辰陆秀夫等自元军还【谨按通鉴辑览 御批是时敌兵深入临安已在掌握之中宋君臣即欲屈节图存元人安肯舍垂成之功遽为返旆乃始则抗请班师继则求封小国惟冀苟延残喘甘于含垢包羞而不顾徒辱其名而终归无益直当谥为至愚而已独惜陆秀夫后既有负海之节而此

时嘿无一言自奉称侄孙之约以往见巴延何哉】己巳嘉兴守刘汉杰以城降于元庚午同签书枢密院事黄镛参知政事陈文龙遁以谢堂

为两浙镇抚大使文天祥知临安府金永坚浙东抚谕
使辛未以吴坚为左丞相兼枢密使常霖参知政事曰午宣麻文班止六人诸关兵尽溃
遣监察御史刘岳奉表称臣上元主尊号岁奉银绢癸
酉左司谏陈孟虎监察御史孔应得遁甲戌元兵至瑞州知州姚岩弃城走乙亥以贾余
庆知临安府丙子命吉王昺信王昺出镇丁丑以夏士
林签书枢密院事己卯参知政事常霖遁三学生誓死不去特与放释褐出身以杨亮节
为福州观察使提举吉王府行事俞如珪为环卫官提
举信王府行事元兵入安吉州知州赵良淳自经死庚辰签书枢密院夏士林遁癸未进
封吉王昺为益王判福州福建安抚大使信王昺为广
王判泉州以留梦炎为江东西湖南北宣抚大使甲申元兵至皋亭山遣监察御史杨应
奎上传国玺进降表是夜丞相陈宜中遁张世杰苏刘
义刘师勇各以所部兵去乙酉元兵次临安以文天祥为右丞相兼枢密使都督丙戌命
同吴坚使如元军以家铉翁签书枢密院事贾余庆同
签书枢密院事知临安府戊子知建德军方回知婺州刘怡知处州梁椅知台州扬必大
皆叛降元是月知临江军滕岩瞻遁二月辛丑诏谕郡
县使降壬寅遣贾余庆吴坚谢堂刘岳家铉翁充祈请使三月丁丑帝北行五月丙申至
元都元主以帝为开府仪同三司封瀛国公是月陈宜
中等立益王昺于福州遥上帝尊号曰孝恭皇帝

○益王 广王

益王昺广王昺皆度宗庶子是初封吉王昺信王德佑二年正月文天祥尹临安请
以二王镇闽广不从泊元兵迫临安乃徙封昺为益王
判福州福建安抚大使昺为广王判泉州兼判南外宗正事以驸马都尉杨镇及杨亮节
俞如珪为提举镇等奉二王走婺州元帅巴延入临安
遣范文虎趣婺召镇令以王还镇得命即行曰我将就死于彼以缓追兵亮节等遂负王
徒步匿山中七曰其将张全以兵数十人追及之遂同
走温州陆秀夫苏刘义继至遣人召陈宜中于清澳张世杰于定海世杰以所部兵同至
温之江心寺奉是为天下兵马都元帅昺副之以秀王
与鞏为福建察访使兼安抚知西外宗正赵吉甫知南外宗正兼福建同提刑先入闽中
抚谕吏民太皇太后寻遣内侍召二王于温宜中等沈
之江中遂入闽时汀建诸州方欲从黄万石降闻二王至即闭城却使者万石将刘俊宋
彰周文英等亦多来归夏五月乙未朔宜中等乃奉昺
于福州即皇帝位改元景炎尊杨淑妃为太后同听政进封信王昺为卫王宜中为左丞
相兼都督李庭芝为右丞相陈文龙刘黻为参知政事
张世杰为枢密副使陆秀夫为签书枢密院事命吴浚赵溍傅卓李班翟国秀等分道出

兵改福州为安福府温州为瑞安府行郊祀礼大赦文
天祥自镇江亡归庚辰以为右丞相兼知枢密院事遣其将如江淮招豪杰并如温州募
兵广东经略使徐直谅遣梁雄飞请降于元军乃假雄
飞招讨使使徇广州既而直谅闻昷立命权通判李性道摧锋军将黄俊等拒雄飞于石
门俊与雄飞战而败奔广州直谅弃城遁六月丙子雄
飞入广州俊死之吴浚聚兵于广昌取南丰宜黄宁都三县翟国秀取秀山傅卓至衢信
诸县民多应之以文天祥为同都督秋七月丁酉开府
南剑州进取江西已而吴浚兵败于南丰翟国秀引还傅卓兵败降于元八月漳州乱命
陈文龙为闽广宣抚使以讨之甲戌秀王与罟围婺州
丙子闻元兵至遂解归以王积翁为福建提刑招捕使知南剑州备御上三郡黄恮为同
提刑招捕使知漳州备御下三郡张世杰遣兵助吴浚
与元兵战于兜零败绩奔宁都兴化石手军乱九月复以陈文龙知兴化军东莞人熊飞
守潮惠二州闻赵溍至即以兵攻梁雄飞于广州壬寅
雄飞遁熊飞遂复韶州壬子赵溍入广州是月元将吕师夔张荣实将兵趣梅岭冬十月
壬戌文天祥入江州赵溍遣曾逢龙熊飞御元兵于南
雄逢龙战死熊飞奔韶州元军围韶州守将刘自立以城降飞巷战兵败赴水死十一月
元兵至处州李珣以城降甲辰秀王与罟与元兵战于
瑞安观察使李世达死之与罟及其弟与虑子孟备监军赵由■〈王葛〉察访使林温
被执皆死元兵至建宁府守臣赵崇鑑被执知邵武军
赵时赏知南剑州王积翁皆弃城去乙巳益王入海癸丑元兵至福安州知州王刚中以
城降益王欲入泉州招蒲寿庚而寿庚有异志初寿庚
提举泉州舶司擅蕃舶利者三十年至是王舟至泉寿庚来谒请驻蹕张世杰不可或劝
世杰留寿庚则凡海舶可不令自随也世杰不从纵之
归继而舟不足乃掠其舟并没其费寿庚怒乃杀诸宗室从官及淮兵之在泉者而降于
元益王遂移潮州是月福兴化皆降元英德守臣凌弥
坚等亦降十二月辛酉赵溍弃广州遁乙丑吴浚走瑞金乙酉兴化军通判曹澄孙以城
降知军事陈文龙被执不屈死之益王舟次于惠州之
甲子门至元十四年 【谨按通鉴辑览 御批宋自建炎南渡已属偏安然德佑以前
尚有疆域可凭朝廷规模未失犹可比之东晋至临
安既破帝■〈显，去页〉见俘宗社成墟宋统遂绝则自丙子三月以后正统即当归
之于元若昷曷二王崎岖海岛虽诸臣徇国苦心而残
喘苟延流离失据不复成其为君且奉表乞降于元正与明唐桂二王之窜迹闽滇者无
畏朕近于国史传凡斥唐桂二王诸臣为伪者槩令更
正为明盖以其犹存一线虽不足称正统然谓之为伪实不可此万世之公论也今续纲

目于景炎祥兴仍用大书纪年则又阿徇不伦乖史笔之正即如元自顺帝北迁沙漠未尝无子孙继立苗裔屡传然既委弃中原编年者即不大书故号此正也则知昷昷之已失中原而仍大书故号之非正矣夫废兴嬗代其书法自有一定不可稍存偏袒之私因为改正书法而阐其大旨如此】正月元兵破汀关癸巳知循州刘兴降于元壬寅文天祥走漳州吴浚以汀州降元潮州梅州皆降二月元兵下广州广东诸郡皆降三月文天祥复梅州陈文龙从子瓚复兴化军夏四月文天祥复兴国县广东制置使张镇孙袭广州取之五月张世杰复潮州文天祥入会昌县淮民张德兴亦起兵杀太湖县丞王德容据司空山攻下黄州寿昌军六月辛酉文天祥取雩都已卯入兴国县秋七月取吉贛诸县围贛州衡山人赵璠抚州人何时起兵应之乙巳张世杰围泉州遣将高曰新复邵武军元将攻文天祥于兴国八月天祥与战败绩乃引兵即邹■〈彡 凤〉于永丰■〈彡 凤〉兵亦溃壬申文天祥又败于兴国己卯元兵破司空山张德兴败走甲申天祥至空坑兵溃遂挺身走循州九月元兵援泉州戊申益王舟次广州浅湾元兵入大庾岭又取邵武入福州冬十月甲辰破兴化军陈瓚死之进攻潮州又攻惠州十一月元将达春围广州庚寅张镇孙以城降元将刘深以舟师攻浅湾益王舟走秀山陈宜中入占城遂不反十二月丙子舟至井澳飓风大作舟败几溺益王惊悸成疾旬余兵士稍集死者过半丁丑刘深袭井澳益王走七州洋至元十五年春正月张世杰攻雷州不克己酉元兵克涪州二月破潮州知州马发死之三月文天祥取惠州广州都统凌震转运判官王道夫复广州益王欲往占城不果驻碙洲曾渊子至自雷州以为参知政事广西宣谕使夏四月戊辰益王殁于碙洲年十一称端宗皇帝庚午众立卫王昷为帝以陆秀夫为左丞相五月癸未朔改元祥兴乙酉升碙洲为翔龙县遣张应科王用取雷州应科三战不利用降于元六月丁巳应科再战死之知高州李象祖降于元己未卫王徙居新会厓山升广州为翔龙府己卯元将张弘范李恒趣厓山冬十一月癸巳琼州民执安抚赵与珞降于元闰月庚戌王道夫弃广州遁壬戌凌震遁癸亥元兵入广州十二月壬午王道夫攻广州兵败被执凌震兵继至亦败文天祥走海丰壬寅被执于五坡岭元兵破南安县守将李梓发死之至元十六年正月壬戌元将张弘范兵至厓山庚午李恒兵亦来会张世杰以舟师碇海中四周起楼如城堞居王于中元兵攻之舰坚不动二月戊寅世杰部将陈宝降己卯都统张达夜袭元军营亡失甚众癸未元兵急攻之世杰殊死战已而军溃翟国秀及团练使刘俊等解甲降世杰乃与苏

刘义断维夺港而去陆秀夫负卫王投海中溺死年九

岁后宫及诸臣多从死者杨太后亦赴海死世杰葬之海滨已而世杰亦自溺死宋遂亡

帝■〈显，去页〉德佑二年益王昷广王昺共三年

右宋十六帝合三百二十年

钦定续通志卷四十

●钦定续通志卷四十一 辽纪一

辽纪【一】

太祖 太宗

○太祖

太祖皇帝姓耶律氏讳亿字安巴坚小字多尔济契丹德呼勒部实喇伊色哩乡耶律密拉人也其先出自炎帝世为审吉国其后有奇善

者徙潢河之滨传至雅里始立制度置官属刻木为契穴地为穴让苏尔威而不肯自立雅里生必塔必塔生海兰海兰生努尔苏是为肃祖肃

祖生萨喇达尝与黄室韦挑战矢贯数札是为懿祖懿祖生伊德实始教民稼穡善畜牧国以殷富是为元祖元祖生萨勒题始置铁冶教民鼓

铸是为德祖世为契丹约尼氏之额尔奇木执其政柄太祖德祖长子也生三月能行既长身長九尺关弓三百斤为塔玛霞实呼时小黄室韦

不附太祖以计降之伐扬阿及乌尔古六奚必实霞诸部克之国人号额珍实呼唐天复元年岁辛酉哈陶津汗立以太祖为本部额尔奇木专

征讨连破室韦于厥及奚帅锡尔格授大德呼勒府额尔奇木明年七月以兵伐河东河北攻下九郡明年九月复攻下河东怀远等军略蓟北

而还先是德祖俘奚七千户徙饶乐之清河至是创为奚德呼勒部分十三县拜太祖裕悦总知军国事明年九月讨黑车子室韦唐卢龙军节

度使刘仁恭发兵拒之太祖伏劲兵歼其众乘胜大破室韦明年七月复讨黑车子室韦唐河东节度使李克用遣使请和七月太祖以骑兵七

万会克用于云州【通鉴在梁开平元年是太祖即位之元年此据五代史纪第五代史及契丹国志并云以兵三十万本史兵卫志亦同

而此则云七万为互异也】约为兄弟遂进兵击刘仁恭拔数州徙其民以归明年二月复击刘仁恭还袭山北奚破之唐宣武军节度使朱全

忠遣使来聘十一月遣使讨奚霫诸部之未附者悉破降之十二月哈陶津汗殂羣臣奉遗命请立太祖太祖三让从之

元年春正月庚寅即皇帝位尊母萧氏为皇太后立皇后萧氏羣臣上尊号曰天皇帝后曰地皇后庚子诏皇族承约尼氏九帐为十帐二

月戊午以从弟达勒达为德呼勒府额尔奇木是月征黑车子室韦降其八部夏四月唐

梁王朱全忠废其主寻弑之自立为帝国号梁遣使来

告五月丁丑布呼点呼使于梁梁遣使者来秋七月乙酉唐平州刺史刘守奇率其众来降置之平卢城冬十月乙巳讨黑车子室韦破之

二年春正月癸酉朔御正殿受百官及诸国使者朝辛巳始置特哩袞典族属以弟萨喇为之唐晋王李克用卒子存勗袭遣使吊慰二月

遣使如梁夏五月癸酉萨喇讨乌丸黑车子室韦遣使如梁冬十月己亥筑长城于镇东海口遣轻兵取托欢叛入室韦者

三年春正月如辽东二月丁酉朔梁遣使者来三月沧州刘守文为弟守光所攻遣人来乞兵命弟锡里素额尔奇木萧达鲁以兵会守文

于北淖口进击守光破之守光溃夏五月甲申置羊城于炭山北以通市易秋八月遣使如梁冬十月己巳遣鹰军讨黑车子室韦破之

四年秋七月戊子朔以后兄萧达鲁为北府宰相后族为相自此始冬十月乌满山奚库济及扎噜特超默特等叛讨平之

五年春正月【辽史于此纪日食兹已具五代纪故不录以后均列入五代及宋纪其辽史不复着】丙申帝亲征西部奚遂分兵讨东

部奚悉平之于是尽有奚霫之地三月次滦河刻石纪功复略地蓟州夏四月壬申遣人使梁五月弟埒克特尔格伊德实安图谋反安图妻讷

默库以告帝与诸弟刑牲告天地为誓而赦其罪出埒克为德呼勒部额尔奇木封讷默库为晋国夫人秋八月甲子幽州刘守光僭号称燕冬

十一月壬午遣人使梁

六年春二月戊午亲征刘守光三月至自幽州夏四月梁郢王友珪弑其父自立秋七月丙午亲征珠巴克降之命弟埒克分兵攻平州埒

克破平州还冬十月戊寅复与特尔格伊德实安图等反甲申遣使如梁壬辰帝次北阿鲁山埒克等以兵阻道帝南趋十七滦是日燔柴翼日

次七渡河埒克等遣人谢罪

七年春正月晋王李存勗拔幽州擒刘守光以归甲寅次赤水城埒克等乞降帝素服慰遣之二月梁均王友贞讨友珪杀之乃嗣位三月

癸丑次芦水达喇安图拥千余骑至遂拘之以所部分隶诸军而埒克引其众至伊苏济勒淀具天子旗鼓将自立闻车驾且至掠居民北走帝

以兵追之伊德实径趋行宫焚辎重庐帐其党珊苏库复劫西楼帝至土河尽以先所获资畜分赐将士留伊勒希巴珠勒呼总政务夏四月戊

寅北追埒克己卯至达抢淀选轻骑追及之于布札尔河尽获其辎重生口先遣室韦及托欢酋长巴尔特哩袞等五人分兵伏其前路命北宰

相萧达鲁为先锋进击之埒克逆战众溃而走追至柴河伏发合击遂大败之帝次札都

河五月甲寅北宰相达鲁擒埒克尼噜古阿巴于榆河
壬戌送诣行在丙寅至库哩以青牛白马祭天地六月辛巳至榆岭以实喇县人纒古非法残民磔之甲申登都庵山狱官聂呼擅造大校诛之
壬辰次狼河击裕库呼尽获其众庚子次阿敦滦以养子纳喇苏附诸弟以叛杀之其余党各以轻重论刑命额尔奇木尼噜古自投崖死秋七月次乌林河观鱼 【据游幸表增辑自后凡据表增入者概不复注】 八月己卯幸龙眉宫九月壬戌帝发自西楼冬十月庚午驻赤崖十一月祠木叶山还次扎古山省风俗见高年议朝政定吉凶仪十二月戊子燔柴于莲花泮

八年春正月甲辰以赫噜为德呼勒部额尔奇木呼哩为特哩衮裕库呼部人执逆党来献杖杀其首恶布呼余并原释之有司所鞫逆党三百余人狱既具帝赐之宴一日明日乃以轻重论刑首恶埒克次达喇帝不忍寘以法杖而释之以伊德实安图为埒克所使皆释之以前裕悦哈达拉子嘉哩埒克妻实喇勒济实预逆谋皆绞杀之伊德实妻聂埒从安图妻讷默库尝有忠告并免死秋七月丙申有司上诸帐族与谋逆者三百余人皆弃市

九年春正月乌尔古部叛讨平之夏六月幽州军校齐行本举其族及部曲来降诏授检校尚书左仆射赐名乌云数日复叛去幽州节度使周德威纳之乃议南征是月射野马于漠北冬十月戊申钓鱼于鸭绿江吴越王遣使来贡

神册元年春二月丙申羣臣及诸属国上尊号曰大圣大明天皇帝后曰应天大明地皇后大赦建元神册国号曰契丹三月丙辰以德呼勒部额尔奇木赫噜为阿勒达尔裕悦百僚进秩颁赉有差赐酺三日立子倍为皇太子夏四月乙酉朔晋幽州节度使卢国用来降以为幽州兵马留后 【按此时晋幽州节度使为周德威观此纪上年及下年俱有幽帅周德威可见况此卢国用者新旧五代史及通鉴皆无其人疑此及天显元年所书皆因卢文进致误也】 甲辰梁遣使者来六月庚寅吴越王遣使来贡秋七月壬申亲征突厥托欢党项小蕃沙陀诸部皆平之八月拔朔州擒其节度使李嗣本勒石纪功于奇冢南冬十一月攻蔚新武妫儒五州自代北至河曲踰阴山尽有其地遂改武州为归化州妫州为汗州置西南面招讨使十二月收山北八军

二年春二月晋新州裨将卢文进杀其节度使李存矩来降遂攻新州下之三月辛亥进攻幽州周德威以兵逆战于居庸关之西大破之以后弟阿古齐为统军舒噜为先锋东出关略燕赵不见敌而还己未裕库呼叛命舒噜讨之夏四月壬午围幽州不克辛卯梁遣使来六月乙

已以暑潦班师留赫噜卢国用守之埒克与其子赛音伯哩叛入幽州秋八月李存勗遣李嗣源等救幽州赫噜等以兵少而还

三年春正月丙申以弟安图为大内特哩袞命攻云州及西南诸部二月癸亥城皇都梁遣使来聘晋吴越渤海高丽回鹘准布党项及幽镇定魏潞等州各遣使者来夏四月乙巳达喇复谋叛诛其妻尼噜古而赦达喇【辽史以尼噜袞为伊德实之妻兹据宏简录改编】五月乙亥诏建孔子庙秋七月乙酉裕悦赫噜薨冬十二月庚子朔如辽阳故城辛丑北府宰相萧达鲁薨戊午以裕悦赫噜弟裕勒沁为德呼勒部额尔奇木萧阿古齐为北府宰相

四年春正月丙申射虎于东山二月丙寅修辽阳故城以漠民渤海户实之改为东平郡夏五月庚辰至自东平郡秋八月丁酉谒孔子庙九月征乌尔古部道闻皇太后不豫一日驰六百里还侍太后病闲复还军中冬十月丙午次乌尔古部命皇太子将先锋军进击破之自是举部来附

五年春正月乙丑始制契丹大字夏五月丙寅吴越王遣使来贡庚辰有龙见于伊喇山阳水上帝射获之藏其骨于内府闰六月丁卯以弟苏为特哩袞康默记为伊勒希巴秋八月己未朔党项诸部叛辛未亲征九月己丑朔梁遣使者来壬寅大字成诏颁行之皇太子率德呼勒部额尔奇木裕勒沁等略地云内天德冬十月辛未攻天德癸酉天德军节度使宋瑶出降更其军曰应天甲戌班师宋瑶复叛丙子旋师攻之擒宋瑶徙其民于阴山南十二月己未师还

六年春正月丙午以弟苏为南府宰相迪里为特哩袞宗室为南府宰相自此始夏五月丙戌朔诏定法律正班爵丙申诏画前代直臣像为招谏图及诏长吏以四孟月询民利病冬十月癸丑朔晋新州防御使王郁以所部山北兵马来附丙子帝率大军入居庸关十一月癸卯下古北口丁未分兵略檀顺安远三河良乡望都潞满城遂城等城俘其民徙内地十二月庚申皇太子率王郁略地定州康默记攻长芦癸亥围涿州破其郭癸酉刺史李嗣弼以城降乙亥李存勗引兵趋望都托辉以五千骑围之李嗣昭来救大军不利引归存勗至幽州遣骑来蹙大军反击悉擒之己卯还次檀州幽人来袭击走之徙檀顺民于东涿州

天赞元年春二月庚申复徇幽蓟地癸酉改元赦军前殊死以下夏四月甲寅攻蓟州戊午拔之擒其刺史胡琼以卢国用尼噜古典军民事壬戌大飨军士癸亥李存勗围镇州张文礼使求援命郎君迪里将军康末但赴之击败河东兵杀其将李嗣昭辛未攻石城拔之六月遣鹰

军击西南诸部冬十月甲子以萧希达为北府宰相分德呼勒部为二院实讷齐为北院额尔奇木乌苏为南院额尔奇木诏分北达室额为二

部立两节度使以统之十一月壬寅命子耀库济为天下兵马大元帅略地蓟北

二年春正月丙申耀库济克平州获其刺史赵思温裨将张崇二月如平州甲子以平州为卢龙军三月戊寅军于箭筈山讨叛奚呼逊获

之置奚托辉部以布伦权总其事夏四月己酉梁遣使来癸丑耀库济攻幽州德呼勒部额尔奇木迪里徇山西地庚申耀库济军幽州东节度

使符存审出战败之闰月庚辰耀库济抵镇州壬午拔曲阳丙戌下北平是月晋王李存勖即皇帝位国号唐五月戊午耀库济师还癸亥大飨

军士赏赉有差秋七月前北府宰相萧阿古齐及王郁徇地燕赵冬十月唐灭梁

三年春正月遣兵略地燕南夏五月丙午以特里袞迪里为南院额尔奇木是月徙蓟州民实辽州地渤海杀其刺史张秀实而掠其民六

月乙酉大举征托欢党项准布等部诏皇太子监国大元帅耀库济从行秋七月辛亥哈喇等击索欢纳山东部族破之八月乙酉至乌尔古山

甲午次古单于国登阿勒坦音德尔山九月丙申朔次古回鹘城勒石纪功猎于乌都温山观鱼乌尔古河庚子拜日于蹕林丙午遣骑攻准布

南府宰相苏南院额尔奇木迪里略地西南乙卯苏等献俘丁巳凿金水河取乌山石鞞致潢河木叶山甲子诏礮丕勒阿汗故碑以契丹突厥

汉字纪其功是月破呼穆苏山诸蕃部次伊德实山以赤牛青马祭天地冬十月丙寅猎于约罗山丁卯军于巴尔斯山遣兵踰流沙拔浮图城

尽取西鄙诸部十一月乙未朔获甘州回鹘都督必里克遣使谕其主乌穆珠汗射虎于乌兰实呼山十二月攻蔚州

四年春二月丙寅耀库济略党项丁卯皇后遣康末怛问起居进御服酒膳乙亥萧阿古齐略燕赵还进牙旗兵仗辛卯耀库济献党项俘

三月丙申飨军于水精山夏四月甲子南攻小蕃下之五月甲寅清暑于室韦北陁秋九月癸巳至自西征冬十月丁卯唐以灭梁来告即遣使

报聘十一月丁酉如安国寺饭僧赦京师囚纵五坊鹰鹞十二月乙亥诏亲征渤海大誾譔皇后皇太子大元帅耀库济皆从闰月壬辰祠木叶

山壬寅以青牛白马祭天地于乌山己酉次色克山丁巳次商岭夜围扶余府

天显元年春正月庚申拔扶余城诛其守将丙寅命特里袞安图前北府宰相萧阿古齐等将万骑为先锋遇譔譔老相兵破之是夜围忽

汗城辛未譔譔出降帝优礼而释之丁丑譔譔复叛攻其城破之譔譔请罪马前诏以兵卫之出城祭告天地二月庚寅安边鄯颿南海定理等

府及诸道节度刺史来朝俱慰遣之壬辰以青牛白马祭天地大赦改元以平渤海遣使

报唐甲午如忽污城阅府库物赐从臣有差以奚部长
布伦王郁回鹘新罗吐蕃党项室韦沙陀乌尔古等从征有功优加赏赉丙午改渤海国
为东丹忽汗城为天福册皇太子倍为人皇王以主之
赦其国内殊死以下三月戊午遣额尔奇木康默记左仆射韩延徽攻长岭府甲子祭天
丁卯幸人皇王宫己巳安边郑颀定理三府叛遣安图
讨平之癸未宴东丹国僚佐颁赐有差乙酉班师以大譴譟举族行夏四月丁亥朔次伞
子山是月唐成德军节度使李嗣源反伶人郭存谦弑
其主存勗嗣源遂袭位五月辛酉南海定理二府复叛耀库济讨平之六月丙午次慎州
唐遣使以国哀告秋七月丙辰铁州刺史卫钧反乙丑
耀库济讨平之卢龙行军司马张崇叛奔唐甲戌次扶余府帝不豫辛巳帝崩年五十五
谥曰大圣大明神烈天皇帝庙号太祖陵曰祖陵

太祖始建元九年神册六年天赞四年天显一年凡二十年

○太宗

太宗皇帝讳德光德谨小字耀库济太祖第二子也母曰淳钦皇后萧氏天赞元年
授天下兵马大元帅寻诏统六军南徇地下平州破箭
筈山呼逊奚诸部及从太祖破伊奇哩诸部定河坝党项下山西诸镇取回鹘单于城东
平渤海破达罗克部所向皆有功

天显元年七月太祖崩皇后摄军国事八月甲午奉梓宫西迁壬寅太宗自元帅行
营奔赴行在乙巳人皇王倍继至九月壬戌南府宰相
苏薨丁卯梓宫至皇都冬十月卢龙军节度使卢国用叛奔唐十一月丙寅杀南院额尔
奇木耶律迪里郎君耶律毕老等

二年秋八月丁酉葬太祖皇帝于祖陵置祖州天城军节度使以奉陵寝冬十一月
壬戌太宗即皇帝位初淳钦皇后爱太宗欲立之而以
人皇王长恐国人不从故太祖崩已逾年后称制摄事至是召人皇王与帝俱乘马立帐
前谓诸酋长曰二子吾皆爱之莫知所立汝曹择可立
者执其辔诸人揣知后意争执帝辔灌跃曰愿事元帅后乃曰此众意所欲吾安敢违之
帝遂立为天皇帝而人皇王复归东丹 【据契丹国
志及通鉴改辑】 戊辰帝还都羣臣上尊号曰嗣圣皇帝大赦有司请改元不许十二月
庚辰尊皇太后为太皇太后皇后为应天皇太后立妃
萧氏为皇后己丑祀天地庚寅遣使谕诸国辛卯阅羣牧于近郊

三年春正月庚午以王郁为兴国军节度使守中书令二月如长深三月乙卯东搜
癸亥猎于羣■〈羊历〉山乙丑猎松山唐义武军节
度使王都遣人以定州来归且使乞援命奚图哩塔拉以兵赴之四月戊寅东巡丙申猎
于三山塔拉败唐将王晏球于定州唐兵大集塔拉请

益师辛丑命特哩衮尼鲁衮都统察喇赴之五月丙午猎于索啰山丁卯命林牙图鲁卜讨乌尔古部乙巳女真来贡六月己卯行色克色哩礼秋七月壬子王都奏塔拉兵败死之尼鲁古察喇等数十人被执庚午有事于太祖庙八月庚辰建应天皇太后诞圣碑于仪坤州九月己卯图鲁卜遣人献乌尔古俘己丑幸人皇王倍第庚寅遣使如唐辛卯再幸人皇王第冬十一月辛丑帝自将伐唐十二月癸卯祭天地甲寅次杏塌唐遣使至遂班师诏耶律伊济迁东丹民以实东平升东平郡为南京

四年春正月己卯如瓜塌猎于潢河三月甲午望祀羣神夏四月甲寅如天城军谒祖陵辛酉人皇王来朝癸亥录囚五月戊子射柳于太祖行宫癸巳行色克色哩礼六月丙午图鲁卜献乌尔古俘己酉西巡己未猎近山癸亥驻蹕凉陁秋七月庚辰曲赦系囚甲午祠太祖而东八月癸卯幸人皇王第九月庚午如南京戊寅祠木叶山己卯行再生礼癸巳至南京冬十月壬寅幸人皇王第甲辰阅军籍庚戌大阅六军甲子以弟鲁呼帅师趣云中讨郡县之未附者十一月丙寅朔以出师告天地壬申告出师于太祖行宫甲申观渔于三义口十二月戊午至自南京

五年春正月庚午鲁呼拔寰州二月癸卯鲁呼还自云中丙午以先所俘渤海户赐之辛酉召羣臣议军国事三月鲁呼请赦宗室锡里郎君以罪系狱者从之乙亥册弟鲁呼为寿昌皇太子兼天下兵马大元帅壬午以龙化州节度使刘居言同中书门下平章事庚寅驾发南京夏四月乙未诏人皇王先赴祖陵丙辰会谒祖陵人皇王归国六月己亥射柳于行在乙卯如■〈彡公〉柳湖丁巳拜太祖御容于明殿秋八月丙午如九层台九月庚辰诏置人皇王仪卫丁亥至自九层台冬十月癸卯建太祖圣功碑于舒伊旺尼珠瑋温十一月戊寅东丹奏人皇王浮海奔于唐

六年春正月甲子西南边将以慕化哈噶斯国人来丁卯如南京三月丁亥人皇王妃萧氏率其国僚属来见夏四月己酉唐遣使者来是月置中台省于南京五月乙丑祠木叶山乙亥至自南京闰月庚寅射柳于近郊六月壬申如凉陁秋七月己酉命将士南略壬子荐时果于太祖庙东巡九月甲午修京城冬十一月乙酉唐遣使者来十二月丙辰遣人以诏赐唐卢龙军节度使赵德钧

七年春正月己亥唐遣使者来癸卯遣使如唐戊申祠木叶山二月壬申伊喇迪里使吴越还吴越王钱鏐遣使从献宝器复遣使报之三四月丁未遣使诸国夏四月甲戌唐遣使者来致人皇王倍书六月戊辰御制太祖建国碑秋七月辛巳朔赐中外官吏物有差癸未赐高年布帛

丙戌召羣臣耆老议政壬辰唐遣使者来癸巳使复至壬寅唐卢龙军节度使赵德钧遣人进时果丁未荐新于太祖庙八月壬戌捕鹅于■〈洺公〉柳湖冬十月乙卯唐遣使者来己巳遣使如云中十一月丁亥遣使问呼哩国己丑唐蔚州刺史张彦超以城来降以为大同军节度使十二月丁巳西狩驻蹕平地松林

八年春正月庚子命鲁呼及左威卫上将军色克率兵伐党项三月辛卯鲁呼讨党项还宴劳之丙申唐遣使请罢征党项兵帝以战捷报之夏四月戊午党项来贡五月己丑猎于独牛山戊戌如■〈洺公〉柳湖秋七月戊寅行纳后礼冬十月丙午至自■〈洺公〉柳湖辛亥唐遣使者来己未遣使如唐十一月辛丑太皇太后崩遣使告哀于唐及人皇王倍是月唐主嗣源殂子从厚立

九年春正月癸酉渔于土河闰月戊午唐使来告哀遣使吊祭壬戌东幸二月壬申祠木叶山夏四月唐潞王李从珂弑其主自立人皇王倍自唐上书请讨之五月甲辰如■〈洺公〉柳湖六月辛未唐李从厚遣谢吊祭使至阙秋八月壬午自将南伐九月乙卯次云州丁巳拔河阴冬十月丁亥略地灵邱十一月辛丑围武州之阳城壬寅降之癸卯斡齐尔城降籍所俘丁壮为兵十二月驻蹕百湖之西南

十年春正月戊申皇后崩于行在二月辛巳宰相尼嚕古谋南奔事觉执之夏四月吐谷浑酋长推勒伊德率众内附丙戌皇太后父族及母前夫之族二帐并为国舅以萧默色为尚父领之己丑录囚五月丙申攻新州及振武癸丑以锡里王庭鹞为龙化州节度使六月辛未如频布里淀秋七月乙卯猎于南赤山冬十二月庚辰如金瓶砾遣伊喇华格科尔罗和啰木萨噶等捉生敌境

十一年春正月钓鱼于土河庚申如潢河夏五月戊戌清暑■〈洺公〉柳湖秋七月丙申唐河东节度使石敬瑭为其主所讨遣使告急遂许兴师八月己未遣使如河东报师期庚午帝自将南行九月丁酉入雁门戊戌次忻州祀天地己亥次太原庚子及唐将张敬达战于太原大败之敬达走保晋安寨额尔奇木达鲁与战死之敬瑭率其属见帝执手抚慰之癸卯围晋安甲辰以达鲁子图勒琿嗣为额尔奇木冬十月甲子封敬瑭为晋王幸其府敬瑭与妻李氏亲捧觞上寿十一月丁酉册敬瑭为大晋皇帝闰月甲子唐将杨光远安审琦杀其帅敬达以降帝闻敬达至死不变谓左右曰凡为人臣当如此也命以礼葬之丙寅祀天地以告成功初围晋安分遣精骑守要害以绝援兵唐王所遣赵延寿范延广赵德钧等皆逗遛不敢进至是闻敬达死各遁归帝命皇太子以轻骑驰击之降

其众辛未帝次团柏谷赵德钧父子以其众来降次潞州议班师与晋帝约为父子命德勒宾将五千骑送之南行临别谓之曰朕当留此候汝入洛乃还也辛巳敬瑭至河阳唐主李从珂遣人杀人皇王倍乃举族自焚诏收唐士卒战歿者瘞之汾水上以为京观晋帝命桑维翰为文纪帝功德十二月乙酉遣近侍塔鲁存问晋帝戊子遣使驰奏皇太后及报诸道师还庚寅发太原辛卯闻晋帝入洛遣郎君济勒岱抚问壬辰次细河阅降将赵德钧父子兵马庚戌如应州癸丑唐大同彰国振武三节度使迎见留之不遣

十二年春正月丙辰次堆子口唐大同军节度判官吴峦闭城拒守遣崔廷勋围之晋帝召峦还遣使请解围许之【辽史作帝亲至城下谕降峦误也观下会同七年吴峦守贞州事可见今据五代史改辑】壬戌祀天地丙寅皇太后遣侍卫实鲁趣行是夕率轻骑先进丁丑告功太祖行宫戊寅朝于皇太后二月癸卯晋遣唐所掠郎君埒克文班吏萧岱尔还朝三月庚申晋遣使来贡丁卯晋天雄军节度使范延广请内附不纳己巳遣郎君达里库穆尔德呼使晋壬午晋使来见夏四月如平地松林观潢水源五月甲寅如频布里淀六月甲申晋遣户部尚书聂延祚等请上尊号及归鴈门以北与幽蓟之地仍岁贡帛三十万疋秋七月辛亥诏诸部治兵甲癸丑如怀州谒奉陵甲子晋遣使来告范延广反庚午遣耶律尼固呼使晋议军事八月癸未晋遣使复请上尊号不许庚寅晋及太原刘知远南唐李昇各遣使来贡庚子晋遣使以都汴及范延广降来告九月庚申遣珠勒呼使晋及南唐辛未遣使如高丽铁骊冬十月庚辰晋使来贺皇太后永宁节十一月己未遣使求医于晋十二月甲申东幸祠木叶山

会同元年春正月戊申朔晋遣使来贺戊辰遣使如晋二月丁酉猎于松山戊戌如辽河东三月癸酉东幸夏四月戊寅朔如南京乙酉如温泉己丑还宫己亥西南边大详袞耶律罗卜科奏党项捷五月甲寅晋复遣使请上尊号许之六月辛卯南唐来贡癸巳诏建日月四时堂图画古帝王事于两庑秋七月癸亥遣使赐晋马丁卯遣呼喇岱使于晋摩哩拉呼使南唐戊辰遣中台省右相耶律苏兰格使晋临海军节度使赵思温副之册晋帝为英武明义皇帝九月晋遣守司空冯道左散骑常侍韦勋来上皇太后尊号左仆射刘昫右谏议大夫卢重上皇帝尊号冬十月壬寅晋遣使来谢册礼是日复有使进独峯駝及名马十一月壬子皇太后御开皇殿冯道韦勋册上尊号曰广德至仁昭烈崇简应天皇太后甲子行再生柴册礼丙寅皇帝御宣政殿刘昫卢重册上尊号曰睿文神武法天

启运明德章信至道广敬昭孝嗣圣皇帝大赦改元建国号曰大辽【辽史此语系之大同元年其实大同元年以晋百官言中外皆愿戴皇帝故改旧号为辽而辽之建号则自在此时也今并据五代史及契丹国志改辑】是月晋复遣赵莹奉表来贺以幽蓟瀛莫涿檀顺妫儒新武云应朔寰蔚十六州并图籍来献于是诏以皇都为上京府曰临潢升幽州为南京南京为东京改新州为奉圣州武州为归化州更定官制十二月戊戌通果阿巴等使于晋制加晋冯道守太傅刘昫守太保余官各有差

二年春正月乙巳以受晋册遣使报南唐高丽戊申晋遣金吾卫大将军马从斌考功郎中刘知新来贡珍币丙辰晋遣使谢免沿边四州钱币二月猎于盘山癸巳谒太祖庙赐在京吏民物及内外羣臣官赏有差丁酉加兼侍中左金吾卫上将军王郞检校太尉三月畋于襄潭丁巳封子舒噜为寿安王雅斯哈为太平王己巳大赉百姓夏四月乙亥如木叶山五月乙巳南唐遣使来贡六月驻蹕频布里淀秋七月戊申晋遣使进犀带是月猎于炭山闰月癸未伊实大王坐赋调不均捩而释之并罢南北府民上供及诸赋役非旧制者乙酉遣迪里赐晋乌尔古良马八月乙丑晋遣使贡岁币九月己卯遣使如晋冬十二月庚子钓鱼于土河

三年春正月戊子吴越王遣使来贡壬辰遣陪謁阿巴使晋致生辰礼晋以并镇忻代之吐谷浑来归二月己亥奚王鲁古鼐率六节度使朝贡庚子乌尔古遣使献伏鹿国俘三月戊辰遣使如晋己巳如南京丙子罗卜科上党项俘获数癸未猎于水门庚寅诏扈从扰民者从军律甲午如蓟州乙未晋及南唐各遣使来覲夏四月庚子至燕备法驾入自拱辰门御元和殿行入合礼壬寅遣使如晋乙巳幸留守赵延寿别墅丙午晋遣宣徽使杨端王眺等来问起居丙辰晋遣使进茶药癸亥晋遣使贺端午五月庚辰晋遣使进弓矢甲申遣子天德及检校司徒邸用和使晋戊子阅骑兵于南郊六月丙申阅步卒庚子晋遣使来见壬寅驾发燕京癸丑次奉圣州甲寅劳军士秋七月己巳猎于哈达拉山己卯以镇州安重荣叛晋诏征南将军柳严边备辛卯晋遣使请行南郊礼许之八月壬寅遣使如南唐南唐遣使求青毡帐赐之丙辰诏以伊奇哩河庐胸河之近地给赐南院鄂津图噜伊逊巴勒北院乌纳哈喇三锡林人为农田九月壬午边将奏破吐谷浑丙戌晋遣使贡名马戊子吴越王遣使来贡冬十月辛丑遣克朝使吴越鲁库使南唐庚申晋遣使贡布及请亲祠南岳从之十一月己巳南唐遣使奉蜡丸书言晋密事丁丑诏有司教民播种纺绩十二月甲午燔柴丙申遣使如晋丙辰诏契丹人授汉官者从汉

仪听与汉人婚姻是冬驻蹕于伞淀

四年春正月壬戌以伊实彭布突厥三部鰥寡不能自存者官为之配丙子南唐遣使来贡庚辰纳喇威二部伊实彭布突厥三部并献党项俘二月甲辰晋遣使进香药丁巳诏编始祖奇善汗事迹己未晋杨彦询来贡且言镇州安重荣跋扈状是月晋镇州安重荣执辽使者伊喇三月癸酉晋以祀南郊遣使来谢主黄金夏四月己卯晋遣使进樱桃五月庚辰吐谷浑额尔奇木苏等叛入晋遣德呼往谕晋及太原守臣六月辛卯振武军将赵崇逐其节度使耶律华喇以朔州叛附于晋丙午命宣徽使尼古察讨之秋七月癸亥南唐遣使奉蜡丸书壬申晋遣使进水晶砚八月癸巳南唐奉蜡丸书庚子晋遣使进犀弓竹矢吴越王遣使奉蜡丸书九月丁丑如归化州冬十月癸卯吴越王遣使来贡十一月丙寅晋以讨安重荣来告庚午吐谷浑请降遣使抚谕之十二月戊子晋遣使来告山南节度使安从进反庚寅南唐遣使奉蜡丸书戊戌晋遣王升鸾来贡戊申晋以败安重荣来告遂遣杨彦询归辛亥晋遣使乞罢戍兵诏特哩衮硕格班师甲寅攻拔朔州

五年春正月戊午诏求直言命政事令僧隐等以契丹户分屯南边戊辰晋函安重荣首来献癸酉遣使如晋是月晋以朔州平遣使来贺遂遣客省使耶律华格使晋并致生辰礼二月壬辰以明王温代裕悦新为西南路招讨使以讨吐谷浑甲午如南京遣使如晋索吐谷浑叛者三月乙卯朔晋遣齐州防御使宋晖业【据五代史作光邺辽史盖以避讳改之】翰林茶酒使张言来问起居丙子晋遣使进射柳鞍马六月癸丑朔晋齐王重贵遣使来贡乙丑晋主敬瑭殂子重贵立戊辰晋遣使来告哀辍朝七日庚午遣使如晋吊祭秋七月庚寅晋遣金吾卫大将军梁言判四方馆事朱崇节来谢其书称孙不称臣遣客省使乔荣让之丁未晋遣使以祖母哀来告八月戊辰诏河东节度使刘知远送叛臣乌尔古指挥使由燕京赴阙癸酉遣天城军节度使萧拜牲如晋吊祭九月壬辰遣使贺晋帝嗣位冬十月己巳遣将军默赫特伐党项十二月癸亥晋遣使来谢是冬驻蹕赤城

六年春二月乙卯晋遣使进先帝遗物辛酉晋遣使请居汴从之三月己卯朔吴越王遣使来贡戊子南唐遣使奉蜡丸书丁未晋帝至汴遣使来谢夏五月己亥遣使如晋致生辰礼六月晋遣使贡金秋八月丁未晋复贡金己未如奉圣州晋遣其子延煦来朝冬十二月丁未如南京议伐晋命赵延寿赵延昭安图嘉哩等由沧恒易定分道而进大军继之是岁杨彦昭请移镇奈泺及新镇从之

七年春正月甲戌朔赵延寿延昭率前锋五万骑次任邱丙子安图入鴈门围忻州代州己卯赵延寿围贝州州将邵珂开门纳降刺史吴峦投井死己丑次元城以延寿为魏博等州节度使封魏王率所部屯南乐丙申攻黎阳辛丑晋遣使来修旧好诏割河北诸州及遣桑维翰景延广来议二月甲辰攻博州刺史周儒以城降师自马家口济河满达营于河东攻郢州围晋别将于戚城晋主自将来拒满达分兵屯河西遇晋兵与战不利辛亥晋定难军节度使李彝殷自麟州来侵三月癸酉及晋兵战于澶渊大败之壬午留赵延昭守贝州徙所俘户于内地夏四月癸丑还次南京辛未如凉陞五月癸酉耶律巴哩岱奏破德州擒其刺史尹居藩秋七月己卯晋平卢军节度使杨光远遣人奉蜡丸书辛卯晋遣张晖奉表乞和是月晋袭飞狐大同军节度使耶律恭噶击败之九月庚午北幸冬十月壬戌天授节诸国来贺惟晋不至十一月壬申诏征诸道兵以闰月朔会于温榆河北十二月癸卯南伐甲子次古北口闰月己巳朔阅诸道兵于温榆河己卯围恒州下其九县

八年春正月庚子分兵攻邢洺磁三州二月围魏州晋将杜重威率兵救之戊子晋将折从阮陷胜州【辽史胜州作滕州误也兹据通鉴改辑】三月戊戌师拔祁州杀其刺史沈斌庚戌杜重威攻泰州戊子赵延寿率前锋薄之己未重威遁去追至阳城大败之癸亥围晋兵于白团卫村晋将符彦卿等乘风奋击大兵不利帝遂旋师晋亦退保定州夏四月甲申还次南京杖将士战不力者癸巳如凉陞六月晋兵袭高阳戍将击走之秋七月乙卯猎于平地松林晋遣孟守中奉表请和仍以前事答之八月己巳诏侍卫萧苏色阅羣牧于北陞九月辛酉还上京冬十月辛未祠木叶山十二月乙丑云州节度使耶律恭噶获晋谍者

九年春三月己亥吐谷浑遣军校苏呼献生口千户授苏呼检校司空夏四月辛酉朔吐谷浑白可久来附是月如凉陞五月庚戌晋易州戍将孙方简请内附秋七月辛亥诏征诸道兵其故伤禾稼者以军法论八月帝自将南伐九月壬辰阅诸道兵于渔阳是月赵延寿与晋将张彦泽战于定州败之十一月戊子进围镇州丙申候骑报晋兵至遣精兵断河桥晋兵退保武强南院大王达年将军高模翰分兵由瀛州闲道以进晋将梁汉璋率众来拒与战大败之汉璋死杜重威张彦泽引兵据中渡桥赵延寿等数败之斩其将王清【辽史此下有宋彦筠堕水死之文考五代史册府元龟俱云彦筠退走通鉴谓彦筠浮水得免陶缶五代史补后汉干佑中筠实为郑州节度使知辽史误也今不取】重威等退保中渡寨义武军节度使李殷以城来降遂进兵夹滹沱而营去中渡寨三里分

兵围之十二月丙寅杜重威李守贞张彦泽等率所部二十万众来降投重威守太傅邺都留守守贞天平军节度使余各领旧职命御史大夫嘉哩监军富珠哩及张彦泽持诏入汴且召桑维翰景延广帝留兵守魏自率大军而南壬申晋帝石重贵与其母李氏奉表请罪张彦泽杀桑维翰给言自经死诏收葬之甲戌彦泽迁重贵及其母若妻于开封府署壬午帝次赤冈重贵举族出封邱门橐索牵羊以待帝命改馆于封禅寺晋百官俯伏待罪命领职如故将军康祥执景延广来献诏以牙筹数其罪繫送上都延广于道自杀

大同元年春正月丁亥朔备法驾入汴御崇元殿受百官贺戊子以枢密副使刘敏权知开封府杀秦继旻李彦绅及郑州防御使杨承勋以其弟承信为平卢军节度使己丑杀张彦泽于开封市辛卯降重贵为崇禄大夫检校太尉封负义侯癸巳以张砺为平章事晋李崧为枢密使冯道为太傅和凝为翰林学士赵莹为太子太保刘昫守太保冯玉为太子少保癸卯遣赵莹冯玉李彦韬将三百骑送负义侯及其母妻子弟于黄龙府安置二月丁巳朔帝服通天冠绛纱袍登正殿设乐悬仪卫于庭 【谨按通鉴辑览 御批辽当国势强盛时经略中原所过摧枯拉朽几于大业可成乃甫入大梁即袭用通天绛纱寻复呼仗入阁赭袍从事捐淳庞而徇浮誉非开勑所宜抑且背本不祥天道厌之宜其未及旋轅遽撓多故也其后金元皆惑迂生改正易服之说蔑弃旧章亡不旋踵读史者可不戒诸】 下制改晋国为大辽大赦改元升镇州为中京以赵延寿为大丞相兼政事令枢密使中京留守赐百官将士爵赏有差辛未晋河东节度使刘知远自立为帝国号汉诏以耿崇美为昭义军节度使高唐英为昭德军节度使崔廷勋为河阳军节度使三月丙戌朔以萧翰为宣武军节度使赐将吏爵赏有差壬寅诏晋诸司僚吏嫔御宦寺方技百工图籍历象石经铜人明堂刻漏太常乐谱诸宫县鹵簿法物及铠仗悉送上京磁州帅梁晖以相州降汉己酉命高唐英讨之夏四月丙辰朔车驾发汴州以冯道李崧和凝李澣徐台符张砺等从行戊辰次高邑帝不豫丁丑崩于栾城年四十六谥曰孝武皇帝重熙三十一年增谥孝武惠文皇帝庙号太宗陵曰怀陵

太宗天显十一年 【仍太祖年号】 会同九年大同一年凡二十一年

钦定续通志卷四十一

●钦定续通志卷四十二 辽纪二

辽纪 【二】

世宗

穆宗

景宗

○世宗

世宗皇帝讳阮小字乌裕义宗皇帝长子也母曰柔贞皇后萧氏义宗自东丹奔唐后母子仍留东丹帝长而仪观丰伟太宗爱之如子会同九年从伐晋大同元年二月封永康王四月丁丑太宗崩于栾城戊寅梓宫次中京诸将奉永康王即皇帝位于柩前甲申次定州命天德硕格嘉哩等护梓宫先赴上京太后闻帝自立遣鲁呼率兵拒之六月甲寅朔次南京五院额尔奇木安图详袞刘格请为前锋至泰德泉遇鲁呼军与战败之秋闰七月次潢河太后及鲁呼整兵拒之于横渡相持数日各罢兵趋上京既而迁太后于祖州诛司徒华沙及春博哩八月壬午朔尊母萧氏为皇太后以太后族拉珠萨哈廉为国舅帐立详袞以总焉以崇德宫户分赐翼戴功臣癸未始置北院枢密使以安图为之九月壬子朔葬太宗皇帝于怀陵丁卯行柴册礼羣臣上尊号曰天授皇帝大赦改大同元年为天禄元年【契丹国志云以明年为天禄元年与辽史异】追谥皇考曰让国皇帝以安图主东丹国封明王察克为泰宁王以刘格为特哩袞高勋为南院枢密使

二年春正月天德萧翰刘格瑄都等谋反事觉诛天德杖萧翰迁刘格于边瑄都使哈噶斯国汉主刘知远殂子承佑立夏四月庚辰朔南唐遣使来慰且贺兼奉蜡丸书议攻汉是月如辽阳冬十月壬午南京留守魏王赵延寿薨以中台省右相德呼为南京留守封燕王十一月驻蹕彰武南

三年春正月萧翰及公主阿布哩谋反伏诛庚申肆赦二月迁故晋主重贵于建州夏六月戊寅以敞史耶律古尔锦为北院大王秋九月

辛丑朔诏羣臣议南伐冬十月遣将攻贝州徇地邳都南宫堂阳杀深州刺史史万山

四年春三月戊戌朔南唐遣使来贺南征捷秋九月乙丑朔如山西冬十月自将南伐攻安平内邱束鹿等县下之是岁册皇后萧氏

五年春正月癸亥朔如百泉湖汉郭威弑其主自立国号周遣朱宪来告即遣使致良马汉北京留守刘崇自立于太原二月周遣姚汉英华昭允来以书辞抗礼留之夏五月壬戌朔太子太傅赵莹薨命归葬于汴六月辛卯朔刘崇为周所攻遣使乞援且求封册遣燕王德呼枢密使高勋册为大汉神武皇帝南唐遣使来是夏清暑百泉岭秋七月汉遣使来谢册礼且请兵九月庚申朔自将南伐壬戌次归化州尚和山癸亥祭让国皇帝于行宫羣臣皆醉察克反帝崩年三十四谥曰孝和皇帝统和二十六年加谥孝和庄宪皇帝庙号世宗陵曰显陵

世宗天禄五年【其元年即太宗大同元年】

○穆宗

穆宗皇帝讳璟小字舒噜太宗长子也母曰靖安皇后萧氏会同二年封寿安王天禄五年九月癸亥世宗遇害逆臣察克等伏诛丁卯寿

安王即皇帝位羣臣上尊号曰天顺皇帝改元应历戊辰如南京是月遣刘承训告哀于汉冬十月遣兵会汉攻周晋州不克十一月汉周南唐

各遣使来吊乙亥诏朝会依太宗皇帝故事用汉礼十二月甲辰汉遣使献弓矢鞍马

二年春正月戊午南唐遣使奉蜡丸书及进犀兕甲壬戌太尉和尔郭勒济谋逆伏诛三月癸亥南唐遣使奉蜡丸书丁卯复遣使来贡甲

申以耶律塔拉为南院大王夏五月壬午南唐遣使来贡六月壬辰国舅政事令萧默赫特宣政殿学士李澣等谋南奔事觉诏暴其罪乙未祭

天地壬寅汉为周所侵遣使来求援命中台省右相高模翰赴之丁未以乳媪之兄吓噜世为阿克苏锡林额尔奇木秋七月乙亥政事令隆科

林牙迪里侍中绅图郎君哈里等谋反伏诛八月己丑默赫特伏诛杖李澣而释之九月戊午诏以平察克日用白黑羊玄酒祭天岁以为常壬

戌猎于炭山祭天是月攻周冀州冬十月甲申朔汉遣使进葡萄酒十一月己卯日南至始用旧制行拜日礼十二月癸未朔高模翰及汉兵围

晋州甲辰猎于近郊祀天地辛亥明王安图薨

三年春闰正月壬午汉以高模翰却周军遣使来谢二月甲子太保迪里修易州城镇州以兵来挑战却之三月庚辰朔南唐遣使来贡因

附书于汉诏达之庚寅如应州击鞠丁酉汉遣使进球衣及马庚子观渔于神德湖夏五月壬寅汉遣使者来言石晋树先帝圣德神功碑为周

人所毁请再刻许之六月丁卯应天皇太后崩秋七月不视朝八月壬子以生日释囚己未汉遣使求援九月庚子汉遣使贡药冬十月鲁呼子

完郎君扎干迪里谋反事觉辞连太平王雅斯哈林牙华格郎君锡伦等皆执之十一月辛丑汉遣使者来是冬驻蹕奉圣州免南京今岁租

四年春正月己丑华格扎干等伏诛释完及雅斯哈是月周主威殂养子晋王柴荣立二月丙午朔周攻汉命政事令耶律达鲁援之丙辰

汉遣使进茶药如南京夏五月乙亥忻代二州叛于汉遣南院大王搭拉助达鲁讨之丁酉搭拉败周将符彦卿于忻口秋七月乙酉归汉民被

掠者九月丙申汉为周人所侵遣使来告冬十一月彰国军师度使萧迪里太保许从赞奏忻代二州捷十二月庚午汉遣使来贡是冬驻蹕杏

■ 〈山后〉

五年春二月庚申汉遣使请上尊号不许壬戌如襄潭夏四月己酉周侵汉汉遣使求援癸丑命郎君萧哈里世为北府宰相秋九月庚辰

汉主有疾遣使来告冬十月庚寅南唐遣使来贡十一月乙未汉主崇殂子承钧遣使来告且求嗣立遣使吊祭遂封册之十二月辛巳汉遣使来议军事

六年夏六月甲子汉遣使来议军事秋七月不视朝是岁南唐为周所侵遣使浮海来求援留其使者不遣

七年春二月辛酉南唐遣使奉蜡丸书辛未驻蹕潢河夏四月戊午朔还上京辛巳杀女巫锡库初锡库上延年药方用男子胆和之不数年杀人无数至是觉其妄射杀之五月辛卯汉遣使来贡六月丙辰周南唐各遣使者来八月己未周使者来是秋不听政冬十月庚申猎于七鹰山十二月辛巳还上京

八年春二月乙丑驻蹕潢河夏四月甲寅南京留守萧思温攻下■〈?公〉边州县遣人劳之五月周陷容城县秋七月猎于伊喇山迄于九月射鹿诸山不视朝冬十一月辛酉汉以周人来侵遣使告急乙丑使再至十二月庚辰又至

九年春正月戊辰驻蹕潢河夏四月丙戌周人来侵戊戌以萧思温为兵马都总管击之是月周拔益津瓦桥淤口三关五月乙巳朔陷瀛莫二州癸亥如南京辛未周兵退猎于鹿塌南林六月戊寅复容城县庚辰西幸如怀州猎于白鹰山是月周主荣殂子宗训立秋七月发南京军戍范阳射鹿于凤皇门九月遣使如南唐冬十二月戊寅还上京庚辰壬子迪里前宣徽使哈斯及萧达尔罕等谋反事觉系之辛巳祀天地祖考告逆党事败丙申召羣臣议时政

十年春正月周殿前都点检赵匡胤废周自立建国号宋夏五月壬子汉以潞州归附来告六月庚申汉以宋兵围石州【宋史作泽州下同】来告遣大同军节度使阿拉及萧思温率兵援之秋七月乙亥宋陷石州汉以潞州复叛遣使来告辛酉政事令耶律寿远太保绰卜鄂博等谋反伏诛以酒脯祀天地于黑山八月如秋山幸怀州庚午以镇茵石狻猊击杀近侍古格冬十月丙子鲁呼子喜隐谋反辞连鲁呼下狱死十一月哈斯狱中上书陈便宜

十一年春二月丙寅释喜隐辛亥司徒乌埒济子特尔格诬告其父谋反杖而释之丙辰萧思温奏老人星见乞行赦宥闰月甲子如潢河夏四月射鹿不视朝五月乙亥司天王白李正等进历六月甲午赦

十二年春正月甲戌夜观灯二月己丑以御史大夫萧和斯为北院枢密使夏五月庚午以旱命左右以水相沃祷雨六月甲午祠木叶山及潢河秋如黑山赤山射鹿

十三年春正月自丁巳画夜酣饮者九日癸酉杀兽人哈里二月庚寅汉遣使来告巡边乞张声援壬辰如潢河三月癸丑朔杀鹿人默尔奇梟其首以示掌鹿者夏四月壬寅猎于潢河六月癸未杖杀近侍误伤獐者甲申杀獐人哈玛尔壬辰诏诸路录囚秋七月辛亥朔汉以宋侵来告八月甲申以生日纵五坊鹰鹞戊戌幸近山呼鹿射之九月庚戌朔以青牛白马祭天地饮于野次终夕乃罢辛亥以酒脯祭天地复终夜酣饮冬十月丙申汉以宋侵来告十一月庚午猎饮于虞人之家凡四日十二月戊子射野鹿赐虞人物有差庚寅杀彘人和卓

十四年春正月戊寅朔奉安神纛戊戌汉驰使告有宋难二月壬子诏西南面招讨使搭拉以兵援之癸亥如潢河戊辰支解鹿人摩多哈喇等七人于野封土识其地己巳如老林东泝壬申汉以败宋兵来告夏四月丁巳汉以击退宋军遣使来谢五月射舐麕鹿于白鹰山至于泱旬六月丙午朔猎于玉山竟月秋七月壬辰以酒脯祀黑山八月乙巳如磴子岭射鹿戊申以生日值天赦不受贺曲赦京师囚乙卯录囚九月黄室韦叛冬十月丙辰以掌鹿舒苏代斡里为扎萨克辖所隶死罪以下得专之十一月壬午日南至宴饮达旦自是昼寝夜饮杀近侍辖鲁十二月丙午以黑兔祭神乌尔古叛详袞僧隐与战败绩死之库果济败黄室韦降其众

十五年春正月己卯以枢密使伊勒希为行军都统虎军详袞齐苏为行军都监合诸部兵讨乌尔古二月帝东幸甲寅以获鸭除鹰坊刺面腰斩之刑复其徭役是月乌尔古杀其长苏尔台以降已而复叛三月癸酉手刺近侍栋尔丁丑大黃室韦伊聂济叛癸未五坊人四十户叛入乌尔古癸巳虞人色勒迪以侦鹅失期杀之夏四月乙巳小黃室韦叛伊勒希齐苏等击之为所败乙卯以托里代伊勒希为都统农古为监军率轻骑进讨仍令塔玛锡济尔持诏招谕之五月伊勒希与战于柴河不利甲申室韦长伊聂济亡入迪里秋七月甲戌乌尔古至河德泝遣额尔奇木华喇伊勒希巴察实击之丁丑乌尔古掠上京北榆林峪遣林牙萧斡讨之庚辰伊勒希等与乌尔古战不利冬十月丁未察实与乌尔古战败之十二月甲辰以近侍喜格私归杀其妻丁未杀近侍苏噜克驻蹕黑山平淀

十六年春正月丁卯朔被酒不受贺甲申微行市中赐酒家银绢乙酉杀近侍白海等三月己巳东幸庚午获鸭甲申获鹅皆饮达旦五月甲申以岁旱泛舟于池祷雨复舍舟立于水中六月丙申赐白海家银绢秋七月壬午谕有司凡行幸之所高立标帜令民勿犯违者以死论八月丁酉汉遣使贡金器铠甲闰月乙丑观野鹿入驯鹿羣立马饮至晡九月庚子以重九宴饮至壬子乃罢己未杀狼人纽斡哩十月庚辰汉主

有母丧遣使赙吊十二月甲子幸酒人伯勒格家复幸殿前都点检耶律伊勒哈家宴饮连日赏赐无算左右多授官者戊辰汉遣使来贡是冬驻蹕黑山平淀

十七年春正月庚寅朔林牙萧斡郎君耶律贤适讨乌尔古还授贤适右皮室详袞乙卯伊勒希巴古格献乌尔古俘夏四月戊辰杀鹰人达鲁丙子射柳祈雨复以水沃羣臣五月辛卯杀鹿人扎喀壬辰北府宰相萧哈里薨六月己未支解雉人寿格盩古又杀鹿人四十四人是夏驻蹕裹潭秋九月自丙戌朔猎于黑山赤山至于月终冬十月乙丑杀酒人索纽十一月辛卯杀近侍廷寿壬辰杀豕人额伯哩赫噜珠噜准讷呼库壬寅杀鹿人唐古直格萨喇十二月辛未手杀饗人哈里复禽之是冬驻蹕黑河平淀

十八年春正月乙酉朔宴于宫中不受贺己亥观灯于市命羣臣亦市酒纵饮三夕二月乙卯幸五坊使锡沙哩家宴饮达旦如裹潭三月甲申如潢河乙酉获鸳鸯祭天地庚戌杀鹞人呼图哩近侍华格及监囚哈里仍剉哈里之尸夏四月癸丑杀彘人察尔吉五月丁亥重五以被酒不受贺壬辰获鹅于硕格水野饮终夜丁酉与政事令萧巴雅尔南京留守高勋太师珠克刘承训等酣饮连日夜己亥杀鹿人佛德呼克陶罕扎卜库舒古盩察布点克特达勒等六月丙辰杀彘人托诺己未为殿前都点检伊勒哈置神帐曲赦京畿囚是夏清暑裹潭秋七月辛丑汉主承钩殂子继元立来告且乞师遣使吊祭【按五代史宋史契丹国志承钩殂继恩实嗣六十日被弑弟继元立辽史不书继恩盖汉与辽使问久绝继元始复结援遣使告立史因据事书之】九月戊子杀详袞巴兰伊喇罕都等四人己丑登小山祭天地戊戌以宋欲袭河东喻西南面都统南院大王特烈豫为之备甲辰以伊勒哈兼政事令纽欢为近侍女真详袞嘉们为本部额尔奇木是秋猎于西京诸山冬十月辛亥宋围太原以塔拉为兵马总管发诸道兵救之十一月癸卯冬至被酒不受贺十二月丁丑杀酒人塔喇噶是冬驻蹕黑山东川

十九年春正月己卯朔宴宫中不受贺己丑立春被酒命殿前都点检伊勒哈代行击土牛礼甲午与羣臣为叶格戏戊戌于醉中骤加左右官乙巳诏太尉华格醉中处事有乖酒解可覆奏自立春饮至月终不听政三月甲寅汉刘继元嗣立遣使乞封册辛酉遣韩知范册继元为皇帝癸亥杀前导穆济伊喇剉其尸甲子汉遣使进白麋己巳如怀州猎获熊获饮方醉驰还行宫是夜近侍霄格盩人华格庖人锡袞等六人反帝崩年三十九谥曰孝安敬正皇帝庙号穆宗附葬怀陵

穆宗应历十九年 【其元年即世宗天禄五年】

○景宗

景宗皇帝讳贤字贤窳小字明扈世宗第二子也母曰怀节皇后萧氏察克之变帝甫四岁穆宗即位养帝于永兴宫既长穆宗酗酒怠政帝一日与韩匡嗣语及时事耶律贤适止之帝矍然悟不复言应历十九年二月己巳穆宗于怀州遇弑帝率飞龙使尼哩侍中萧思温南院枢密使高勋以甲骑千人驰赴之黎明至行在羣臣劝进遂即皇帝位于枢前羣臣上尊号曰天赞皇帝大赦改元保窳以殿前都点检耶律伊勒哈右皮室详袞萧乌埒济宿卫不严斩之三月丙戌入上京以萧思温为北院枢密使太平王雅斯哈亡入沙陀己丑伊勒希巴诺木欢以阴附雅斯哈伏诛癸巳雅斯哈入朝甲午以萧思温兼北府宰相己亥封高勋为秦王夏四月戊申朔进封太平王雅斯哈为齐王改封赵王喜隐为宋王封隆先为平王舒吴王道隐蜀王必舒越王迪里冀王完卫王五月戊寅立妃萧氏为皇后秋七月丙子朔射柳祈雨壬寅汉遣使来贺冬十月如襄潭十一月甲辰朔行柴册礼祠木叶山驻蹕鹤谷乙巳萧思温封魏王北院大王乌哲加裕悦

二年春正月丁未如潢河夏四月如东京致奠于让国皇帝及世宗庙五月癸丑西幸乙卯次盘道岭盗杀北院枢密使萧思温六月还上京秋七月以右皮室详袞贤适为北院枢密使九月辛丑得国舅萧哈济及哈里杀萧思温状皆伏诛冬十一月攻宋定州不克十二月庚午汉遣使来贡

三年春正月甲寅右伊勒希巴希达献德呼勒俘庚申置登闻鼓院辛酉南京统军使魏国公韩匡美封邺王二月癸酉东幸壬午遣多和使阿尔斯兰回鹘己丑以青牛白马祭天地三月丁未以飞龙使尼哩为契丹行宫都部署夏四月丁卯世宗妃卓琳及普格以行厌魅赐死己卯祠木叶山行再生礼丙戌至自东幸六月丙子汉遣使问起居自是继月而至秋七月辛丑以贤适为西北路招讨使八月甲戌如秋山猎于平地松林又猎于辽河之源九月乙巳以潜邸给使者为塔玛部置官主之壬子如归化州猎于呼图哩巴山甲寅如南京冬十月己巳以黑白羊祀神癸未汉遣使来贡是月驻蹕富瑚坂十一月庚子牐胸河裕悦扬尼哩等率其众来附十二月癸酉以青牛白马祭天地是冬驻蹕金川

四年春二月癸亥汉以皇子生遣使来贺闰月戊申齐王雅斯哈薨是夏驻蹕冰井秋七月如云州冬十月丁亥朔如南京十二月甲午诏内外官上封事

五年春正月甲子特哩袞休格伐党项破之汉遣使来贡庚午御五凤楼观灯二月壬辰越王必舒献党项俘戊申以青牛白马祭天地辛亥如新城三月乙卯朔复如新城追封皇后祖瑚穆哩为韩王赠伯瑚鲁古兼政事令盩古齐兼侍中夏五月癸亥乌哲薨辛未女直侵边杀都监达里塔伊喇鄂啰罗六月庚寅女直宰相及额尔奇木来朝丙申汉遣人以宋事来告秋七月庚辰以保大军节度使耶律萨勒迪为中台省左相是月驻蹕燕子城冬十月丁酉如南京十一月辛亥朔获应历逆党近侍霄格华格锡袞等诛之十二月戊戌汉将改元遣使禀命是月如归化州

六年春正月癸未如南京三月宋遣使约和以涿州刺史耶律昌珠加侍中兴宋议和夏四月宋王喜隐坐谋反废是月幸冰井秋七月丁未朔合门使卓库加检校太尉兼御史大夫庚申猎于平地松林冬十月乙亥朔还上京十二月戊子以沙门昭敏为三京诸道僧尼都总管加兼侍中

七年春正月甲戌朔宋遣使来贺壬寅望祠木叶山如扎兰淀二月癸亥汉鴈门节度使刘继文来朝丙寅以青牛白马祭天地三月壬午耶律苏色等献党项俘夏四月遣郎君舒苏使宋己酉祠木叶山辛亥射柳祈雨如频布里淀清暑六月遣使册汉主为大汉英武皇帝秋七月黄龙府卫将燕颇杀都监张琚以叛遣敞史耶律雅木丕勒讨之九月败燕颇于治河遣其弟安图追之燕颇走保乌舍城安图乃还是秋至自频布里淀冬十月钓鱼土河

八年春正月癸酉宋遣使来聘二月如金瓶砾三月辛未遣使廉问四方鳏寡孤独及贫乏失职者赈之夏六月以西南面招讨使耶律色珍为北院大王秋七月丙寅盩王扎穆妻安扎伏诛扎穆高勋等除名辛未宋使来贺天清节八月癸卯汉遣使者来丁未如秋山己酉汉以宋事来告是月女直侵贵德州东境九月辛未东京统军使察喇详袞古奏女直袭归州五寨壬午汉以为宋所侵遣使求援命南府宰相耶律沙冀王迪里赴之戊子汉以宋师厌境遣使来告冬十月辛丑汉以退宋师来谢如长冻十一月丙子宋主匡胤殂其弟炅自立遣使来告辛卯遣郎君旺禄塔玛讷默库等使宋吊慰十二月壬寅遣萧哲库马哲如宋贺即位丁未汉以宋军复至掠其军储来告且乞粮为助戊午诏南京复礼部贡院

九年春正月如鹿蛄二月庚子宋遣使致其先帝遗物甲寅以青牛白马祭天地三月癸亥耶律沙迪里献援汉所获宋俘戊辰以粟十二

万斛助汉夏四月遣使如宋会葬五月庚午汉遣使来谢且以宋事来告六月丙辰以宋王喜隐为西南面招讨使秋七月甲子宋遣使来聘壬申汉以宋侵来告丙子遣使以战马助汉八月汉遣使进葡萄酒冬十月甲子耶律沙以党项降酋克酬摩约来见丁卯以克酬为司徒摩约为太保如老翁川乙酉汉复遣使以宋事来告十一月癸卯祠木叶山乙巳遣太保塔喇噶等使宋乙卯汉复遣使以宋事来告十二月戊辰猎于近郊以所获祭天

十年春正月癸丑如长泺夏四月丁卯西幸五月癸卯赐尼哩死诛高勋六月己未驻蹕■（彳公）柳湖秋九月癸未平王隆先子辰格谋害其父车裂之是冬驻蹕金川

二年春正月丙子封子隆绪为梁王隆庆恒王丁亥以特哩袞休格为北院大王前枢密使贤适封西平郡王二月戊辰如清河三月丁亥西南面招讨副使耶律旺禄太尉华格遣人献党项俘是月如南京复西幸遣兵攻雁门不利夏四月庚辰祈雨戊子清暑于燕子城六月己亥喜隐复谋反囚于祖州秋七月戊午旺禄等献党项俘八月戊戌东幸冬十月辛未命巫祠天地及兵神辛巳以将南伐祭旗鼓癸未次南京庚寅次固安以青牛白马祭天地己亥围瓦桥关十一月庚子朔宋人来袭图鲁卜部节度使萧翰及四捷军详袞耶律赫德击却之壬寅休格败宋兵于瓦桥东再战再败之戊申又败之于水南追至莫州己酉复败之丙辰班师乙丑还次南京十二月庚午朔休格拜裕悦大飨军士如富瑚坂

干亨元年春正月乙酉遣塔玛长寿使宋问兴师伐汉之故二月丁卯汉以宋兵压境遣使乞援以南府宰相耶律沙为都统冀王迪里为监军赴之又命南院大王色珍以所部从枢密副使穆济督之三月辛巳苏色遣人以别部华格等降纳之丙戌汉遣使谢抚谕军民诏北院大王希达伊实王萨哈勒等以兵戍燕己丑汉使告宋兵入境诏左千牛卫大将军韩侗大同军节度使耶律善布以本路兵援之丁酉耶律沙等与宋战于白马岭败绩冀王迪里及图鲁卜部节度使图敏黄皮室详袞唐古皆死之夏四月辛亥汉以行军事宜来奏卢俊自代州驰状告急五月己卯宋兵攻河东汉与战不利刘继文卢俊来奔六月刘继元降宋汉亡甲子封刘继文为彭城郡王卢俊同政事门下平章事宋人来侵丁卯北院大王希达统军使萧托果伊实王萨哈勒击之战于沙河败绩己巳宋人围南京丁丑诏谕耶律沙及希达托果等军中事宜秋七月癸未沙等及宋兵战于高粱河大败之八月如冰井乙丑耶律沙等献宋俘九月己卯以

燕王韩匡嗣为都统南府宰相耶律沙为监军特哩衮休格南院大王色珍权奚王穆济等各率其所部兵南伐仍命大同军节度使善布领山西兵分道以进冬十月乙丑韩匡嗣与宋兵战于满城败绩辛未太保舒苏与宋兵战于火山败之辛丑日南至大赦改元十二月乙卯燕王韩匡嗣遥授晋昌军节度使降封秦王壬戌以蜀王道隐为南京留守徙封荆王是冬驻蹕南京

三年春二月丙子东幸己丑复如南京三月以秦王韩匡嗣为西南面招讨使夏四月如羊城泺五月丙午上京汉军乱劫立喜隐不克立其子留礼寿上京留守楚实勒擒之秋七月甲子留礼寿伏诛八月猎于炭山冬十月如富瑚坂十一月辛亥加楚实勒同政事门下平章事是月以南院枢密使郭袭为武定军节度使十二月以辽兴军节度使韩德让为南院枢密使

四年春正月己亥如华林天柱夏四月自将南伐至满城战不利守太尉奚斡里死之五月班师清暑于燕子城秋七月壬辰赐喜隐死八月如西京九月庚子如云州甲辰猎于尚和山帝不豫壬子次焦山帝崩年三十五谥曰孝成皇帝重熙二十一年加谥孝成康靖皇帝庙号景宗陵曰干陵

景宗保宁十年 【其元年即穆宗应历十九年】 干亨四年凡十四年

钦定续通志卷四十二

●钦定续通志卷四十三 辽纪三

辽纪 【三】

圣宗 【一】

○圣宗一

圣宗皇帝讳隆绪小字文殊努景宗长子也母曰睿智皇后萧氏干亨二年封梁王四年九月壬子景宗崩癸丑即皇帝位于柩前时年十二皇后奉遗诏摄政冬十月己未朔帝始临朝辛酉羣臣上尊号曰昭圣皇帝尊皇后为皇太后大赦以南院大王巴古济总领山西诸州事北院大王裕悦休格为南面行军都统奚王和硕鼐副之同政事门下平章事萧道宁领本部军驻南京乙丑如显州十二月戊午命耶律苏色讨准布辛酉宋使来议和诏以无书却之辛未南面招讨使秦王韩匡嗣薨

统和元年春正月乙丑以遗诏复封札穆为宁王戊辰以威乌库哩部节度使耶律乌克同政事门下平章事甲戌荆王道隐薨丙子以休格为南京留守仍赐南面行营总管印总边事辛巳苏色献准布俘甲申党项侵边西南面招讨使韩德威击破之乙酉诏苏色与达罕讨党项

诸部二月戊子禁所在官吏军民不得无故聚众私语及冒禁夜行违者坐之甲午葬景宗皇帝于干陵以近幸朗掌饮伶人塔鲁为殉帝与皇太后因为书附上大行丙申皇太后诣陵置奠命绘近臣于御容殿辛丑南京统军使耶律善补奏宋边七十余村来附诏抚存之苏色奏讨党项捷戊申以特哩袞华格为北院大王吉琳为南府宰相辛亥幸圣山遂谒三陵三月己未次独山辛酉以大父帐太尉耶律赫勒讷为特哩袞甲子驻蹕辽河之平淀辛巳以国舅同平章事萧道宁为辽兴军节度使仍赐号忠亮佐理功臣壬午以青牛白马祭天地夏四月丙戌朔如东京以枢密副使耶律穆济兼侍中为东京留守丙申南幸诏赐西南路招讨使达罕剑得专杀壬子如徽州以耶律庆朗为信州节度使五月壬戌西南路招讨请益兵讨西突厥诸部诏北王府耶律普努宁以达巴德呼勒二部兵赴之庚午耶律善补招亡入宋者得千余户归国辛未次永州丙子以青牛白马祭天地戊寅如木叶山六月乙酉朔党项酋长执额尔奇木子乌延等内附丙戌还上京己丑驸马都尉卢俊与公主不协诏离之出俊为兴国军节度使辛卯有事于太庙甲午帝率羣臣上皇太后尊号曰承天皇帝太后羣臣上皇帝尊号曰天辅皇帝大赦改元复国号曰大契丹 【据契丹国志增辑】 文武官各进爵丁未以枢密副使耶律色珍守司徒秋七月甲寅朔皇太后听政乙卯帝亲录囚辛酉行再生礼丙子韩德威上党项俘辛巳赏西南面有功将士八月戊子西巡癸巳帝与皇太后如怀州己亥猎于赤山乙巳诏裕悦休格提点元城壬子韩德威表请伐党项之复叛者诏许之九月癸丑朔以东京平州旱蝗诏赈之丙辰以南京秋霖害稼权停关征以通山西余易壬戌还上京丙子如老翁川冬十月癸巳苏色奏德呼勒部及叛蕃来降乙未诏每岁诸节度使贡献如契丹宫例止进鞍马丁酉以吴王舒为上京留守行临潢尹事帝将征高丽阅东京留守耶律穆济所总兵马丙午命宣徽使兼侍中布琳林牙克特等将兵东讨十一月壬子朔观渔于塔玛泮癸丑应州获宋谍磔于市十二月壬午朔如显州甲午东幸己亥皇太后观渔于玉盆湾辛丑观渔于浚渊甲辰敕诸刑辟已结正决遣而有冤者听诣台诉是夕然万鱼灯于双溪

二年春正月甲子如长泺二月丙申东路行军宣徽使萧布琳奏讨女真捷庚子奉皇太后观猎于饶乐川乙巳赐五国威伊济节度使耶律威乌克剑得便宜行事丁未韩德威献所袭河东俘三月猎于山榆甸夏四月丁亥宣徽使同平章事耶律普宁都监萧勤德献征女真捷授普宁兼政事令勤德神武卫大将军庚寅皇太后临决滞狱壬辰以宣徽南院使刘承规

为承德军节度使崇德宫都部署保义军节度使张德筠为宣徽北院使五月乙卯祠木叶山丁丑驻蹕沿柳河六月己卯朔皇太后决狱至月终秋七月癸丑皇太后行再生礼八月辛卯女真珠卜奇萨里等八族举众内附是月如鹅山猎于岭右九月戊申朔驻蹕土河冬十月丁丑朔以归化州刺史耶律普窳为彰德军节度使右武卫大将军韩倬为彭国军节度使兼侍卫亲军兵马都指挥使十一月苏色等讨准布杀其酋长达尔罕十二月辛丑以翰林学士承旨马得臣为宣政殿学士耶律佛德为南京统军使耶律瑶升为大内特哩袞大仁靖为东京中台省右平章事

三年春正月丙午如长泺丁巳以翰林学士邢抱朴为尚书礼部侍郎知制诰左拾遗知制诰刘景吏部郎中知制诰牛藏用并政事舍人二月丙子朔以牛藏用知枢密直学士三月乙巳朔免纳喇威二部户役夏四月乙亥朔祠木叶山壬午以凤州刺史赵匡符为保静军节度使癸未以左监门卫大将军王庭勗为奉先军节度使彰武军节度使韩德凝为崇义军节度使五月壬子还上京癸酉以国舅萧道窳同平章事知潼州军州事六月甲戌如柏坡皇太后亲决滞狱乙亥以归义军节度使王希严为兴国军节度使秋七月甲辰朔以将征高丽诏诸道缮兵甲寅东幸丙寅驻蹕土河丁卯遣使阅东京诸军兵器及东征道路以平章事萧道窳为昭德军节度使武定军节度使守司空兼政事令郭袭为天平军节度使大同军节度使守太子太师兼政事令刘延构为义成军节度使八月癸酉以辽泽沮洳罢征高丽命枢密使耶律色珍为都统驸马都尉萧恒德为监军以讨女真丁丑次橐城庚辰至显州辛巳如干州观新宫甲申命南北面臣僚分巡山陵林木及令干显二州上所部里社之数辛丑西幸闰九月癸酉命邢抱朴勾检显陵丙子行次海上辛巳诏谕东征将帅乘水涸进讨丙申女真宰相哲伯埒来贡戊戌驻蹕东古山冬十一月辛卯以韩德让兼政事令癸巳禁行在市易布帛不中尺度者

四年春正月甲戌观渔于土河林牙耶律穆尔古彰德军节度使萧达林上东征俘获丙子枢密使耶律色珍林牙勤德等上讨女真所获甲午如长泺二月壬寅以四番都统军李继忠为检校司徒上柱国癸卯西夏李继迁叛于宋来降以为定难军节度使银夏绥宥等州观察处置等使特进检校太师都督夏州诸军事西番酋帅斡尼奇伊为保大军节度使鄜坊等州观察处置等使丙寅行次纽斡哩井三月甲戌宋将曹彬崔彦进米信由雄州道田重进由飞狐道潘美杨继业由雁门道来侵岐沟涿州固安新城皆陷诏宣徽使布琳驰赴燕南与休格议军事

分遣使者征诸部兵益休格以击之复遣东京留守耶律穆济以大军继进赐剑专杀乙亥以亲征告陵庙山川丙子统军使耶律佛德败宋师于固安庚辰寰州刺史赵彦章以城叛附于宋辛巳宋兵入涿州义顺军节度副使赵希赞以朔州叛附于宋壬午诏林牙勤德以兵守平州之海岸癸未师及田重进战于飞狐不利冀州防御使大鹏翼康州刺史马顼【马顼辽史作马赞兹据文献通考改】马军指挥使何万通死之丁亥以北院枢密使耶律色珍为山西兵马都统北院宣徽使布琳为南征都统以副休格彰国军节度使艾正以应州叛附于宋辛卯武定军马步军都指挥使郢州防御使吕行德等以飞狐叛附于宋癸巳赐林牙穆尔古旗鼓及剑率禁军骁锐以助休格丙申步军都指挥使穆超以灵邱叛附于宋夏四月己亥朔次南京庚子特哩袞瑶升西南面招讨使韩德威以捷闻辛丑宋潘美陷云州壬寅遣穆济穆尔古勤德等领偏师助休格癸卯休格以捷闻诏勤德还军诏侍中穆济统诸军赴行在所本布部节度使和勒敦黄皮室详袞嘉哩等各上所获兵甲又诏两部突骑赴蔚州以助达林横帐郎君老君努率诸郎君巡徼居庸之北将军华格统平州兵马横帐郎君努兄为黄皮室都监郎君伊里为北府都监各以步兵赴蔚州以助色珍庚戌以色珍为诸路兵马都统达林兵副部署托色都监以代善布韩德威癸丑宋将曹彬米信北渡拒马河乙卯休格等击败之蔚州左右都押衙李存璋许彦钦等杀节度使萧卓琳执监城使铜州节度使耶律绍忠【耶律绍忠辽史作耿绍忠兹据太平治迹统类改】以城叛附于宋丙辰复涿州告天地戊午帝次沙沽河之北淀召林牙勤德议军事己未休格布琳来朝辛酉大军次固安壬戌围固安城破之五月庚午师及曹彬米信战于岐沟关大败之追至拒马河癸酉师还次新城甲戌以军捷遣使分谕诸路京镇己卯次固安南以青牛白马祭天地庚辰遣详袞巴雅尔率兵赴应朔二州界与特哩袞瑶升招讨韩德威等御宋兵在山西之未退者壬午还次南京癸未色珍奏复蔚州乘胜攻下灵邱飞狐丙戌御元和殿大宴从军将校封休格为宋国王加布琳筹筵普努筵及诸有功将校爵赏有差丁亥发南京诏休格备兵储粟以待大举南征戊子宋复围蔚州色珍击破之六月戊戌朔诏韩德威赴阙加统军使佛德检校太师甲辰诏休格遣炮手西助色珍甲寅色珍奏复寰州戊午如凉陞癸亥以节度使韩布格翰林学士邢抱朴等充云州宣谕招抚使秋七月丙子色珍奏复朔州擒宋将杨继业宋云应诸州守将皆弃城遁辛巳以捷告天地八月己未复山西今岁租赋癸亥加色珍守太保九月甲戌次黑河丁丑次河

阳北辛巳纳皇后萧氏丙戌次儒州以将南征遣皮室详袞托迪郎君伊喇先赴本军缮甲兵己丑召北大王普努窳赴行在所甲午皇太后行再生礼冬十月丁酉复行再生礼为帝祭神祈福命新州节度使布克达哩选人分道巡检山西四川甲辰出居庸关庚戌分遣伊喇沿边侦候辛亥命皇族庐帐驻东京延芳淀壬子诏以敕榜谕拒马河南六州乙卯如南京戊午复南院部民今岁租赋十一月庚午以政事令韩德让守司徒壬申以古北松亭榆关征税不法遣使鞫之女真请以兵从征许之癸酉御正殿大劳南征将校丙子南伐次狭底塌皇太后亲阅辘重兵甲丁丑以休格为先锋都统辛巳诏以北大王普努窳居奉圣州其山西五州公事与节度使布克达哩共裁决之乙酉置诸部监勒所部各守营伍丙戌遣穆尔古萧继远沿边巡徼丁亥以青牛白马祭天地壬辰至唐兴县时宋军屯滹沱桥北选将射之进焚其桥癸巳涉沙河卓特部节度使罗卜科都监耶律■〈耳兮〉与宋战于泰州不利乙未以御盞郎君华格权卓特部节度使横帐郎君佛哩为都监代罗卜科命彰德军节度使萧达林将军托色略地东路十二月己亥休格败宋师于望都壬寅营于滹沱北诏休格以骑军绝宋兵毋令入邢州命太师旺禄谨侦候甲辰诏南大王与休格合势进讨宰相安窳及宋将刘延让李敬源战于莫州败之乙巳擒宋将贺令图杨重进等国舅详袞塔喇噶宫使萧达哩死之丁未筑京观击杨团城下之诏禁侵掠己酉次神榆村诏上杨团城粟麦兵甲之数辛亥以黑白二牲祭天地癸丑拔冯母镇丙辰邢州降丁巳拔深州李继迁款塞请婚许之

五年春正月乙丑破容城县丁卯攻文安下之戊寅帝还南京己卯大赉将士壬辰如华林天柱二月甲午至自天柱三月癸亥朔如长春宫赏花钓鱼丁丑以伊喇嘉哩侦候有功命入御盞郎君班祗侯夏四月癸巳朔如南京丁酉帝率羣臣上皇太后尊号曰睿德神略应运启化承天皇太后羣臣上帝尊号曰至德广孝昭圣天辅皇帝戊戌诏有司条上勋旧等第加恩癸丑清暑于水井七月猎于平地松林九月丙戌如南京是冬驻蹕南京

六年春正月庚申如华林天柱二月甲寅大同军节度使同平章政事刘京致仕三月癸未李继迁遣使来贡夏四月乙未如南京五月癸亥南府宰相耶律沙薨闰月甲寅停威伊济部岁贡貂鼠青鼠皮六月乙丑谕诸道备南征攻城器具秋七月丙戌观市己亥遣南面招讨韩德威讨河湟诸蕃违命者己酉驻蹕洛河壬子加韩德威开府仪同三司兼政事令门下平章事东京留守兼侍中漆水郡王耶律穆济为大同军

节度使癸丑增置涿州驿传丙辰以青牛白马祭天地八月戊午休格与巴雅尔纽勒琿败宋兵于易州庚申如黎园温汤癸亥以将伐宋遣使祭木叶山丁丑西北路管押详袞舒僧格以伐哲琳珠噜二部上所俘获以大同军今岁霜旱乏食增价折粟以利贫民丁酉皇太后幸韩德让帐厚加赏赉九月戊戌如南京己亥有事于太宗庙以唐元德为奉陵军节度使癸卯南伐庚戌攻涿州破之宋师退色珍巴雅尔等追击大败之冬十月戊午攻沙堆驿破之己巳以黑白羊祭天地丙子筹窳奏破狼山捷辛巳复奏败宋师于益津关癸未进军长城口宋定州将李兴以兵逆战休格击败之十一月甲申诏诸军备攻具庚寅驻长城口督大军四面进攻宋师溃帝与德让邀击之大获辛卯围满城甲午拔之戊戌攻下祁州己亥拔新乐庚子破小狼山砦丁未宋师出益津关国舅郎君图卜威详袞实格击走之十二月丙辰畋于沙河是月大军驻宋境是岁诏开贡举

七年春正月癸未朔班师戊子宋鸡壁砦守将郭荣率众来降诏屯南京庚寅次长城口壬辰李继迁与兄继捧有怨乞与通好帝知其非诚不许癸巳谕诸军趣易州己亥禁部从伐民桑枝癸卯攻易州甲辰破之迁其军民于燕京乙巳如易州抚谕士庶丙午以青牛白马祭天地诏谕三京诸道辛亥还次南京六军解严二月壬子朔帝御元和殿受百官贺乙卯大飨军士爵赏有差枢密使韩德让封楚国王驸马都尉萧窳远同政事门下平章事是日如长春宫甲子诏南征所俘有亲属分隶诸帐者给官钱赎之使相从乙丑赏南征女真军使东还甲戌诏云州租赋止输本道三月壬午朔遣使祭木叶山禁刍牧伤禾稼李继迁遣使来贡丁亥诏易州筑京观己丑免云州逋赋丙申诏开奇峰路通易州市戊戌以王子帐耶律襄之女封义成公主下嫁李继迁是春驻蹕延芳淀夏四月甲寅还京以御史大夫乌尔古领伊实大王甲子谏议大夫马得臣以帝好击球上疏切谏帝嘉纳之丁卯吐浑和珍回鹘安进吐蕃都图等自宋来归丙子以锡里军耶律杳为常袞己卯驻蹕儒州龙泉庚辰遣宣徽使布琳等分道备宋以约尼副使崆果啰为锡里伊喇详袞五月辛卯猎于桑干河六月辛酉诏燕乐密云二县荒地许民耕种免赋役十年乙亥出诸畜赐边部贫民是月休格巴雅尔破宋兵于秦州秋七月癸巳遣兵南征甲午以达勒巴纳喇威三部各四人益东北路来人婆里德丁酉劳南征将士冬十一月甲寅钓鱼于沈子泺癸亥猎于好草岭

八年春正月辛巳如台湖庚寅诏决滞狱庚子如沈子泺三月丁丑李继迁遣使来贡乙酉城杏塌以宋俘实之是月如盘山猎于西科绰

山夏四月庚午以岁旱诸部艰食賑之五月戊子以宋降卒分隶诸军丙申清暑呼图哩巴山诏括民田六月丙午以北面林牙穆尔古为北院大王秋八月乙卯以黑白羊祭天地九月乙亥北女真四部请内附壬辰李继迁献宋俘冬十月丙午以败宋师复遣使来告是月驻蹕大王州十一月庚寅以吐谷浑民饥賑之十二月癸卯李继迁遣使者来庚戌遣使封李继迁为夏国王

九年春正月庚辰如台湖乙酉枢密使监修国史室昉等进实录辛卯免三京诸道租税仍罢括田二月丙午夏国遣使告伐宋捷丁未以涿州刺史耶律旺禄为特哩袞闰月壬申遣翰林承旨邢抱朴等分决诸道滞狱三月庚子朔賑室韦乌尔古诸部戊申复遣库部员外郎马守琪等分决诸道滞狱甲子如南京夏四月乙亥夏国王李继迁遣使来谢封册丙戌清暑于炭山秋七月癸卯通括户口乙巳诏诸道举才行察贪酷抚高年禁奢僭有歿于王事者官其子孙己未夏国以复綏银二州遣使来告是月猎于盘道岭及炭山九月己酉驻蹕庙城冬十月壬申夏国遣使来上宋所授敕命丁丑定难军节度使李继捧来附授推忠效顺启圣定难功臣开府仪同三司检校太师兼侍中封西平王十一月

己亥以青牛白马祭天地十二月夏国王李继迁潜附于宋遣招讨使韩德威持诏諭之十年春正月丙午如台湖二月壬午免云州今岁租赋辛卯给复云州流民三月丙辰如炭山夏五月癸巳复朔州流民三年八月癸亥观稼仍遣使分阅苗稼九月癸卯如五台山金河寺冬十月壬申夏国来贡十二月庚辰猎于儒州东川拜天是月以东京留守萧恒德等伐高丽

十一年春正月如延芳淀三月丙午出内帑钱赐南京统军司军高丽王治奉表请罪诏取女真鸭绿江东数百里地赐之夏四月如炭山清暑秋八月如秋山冬十月甲申朔驻蹕富瑚坂

十二年春正月甲寅以同政事门下平章事耶律实埒为特哩袞诏复行在五十里内租乙卯如延芳淀戊午蠲宜州赋调庚申郎君耶律必舒等谋叛伏诛壬戌以南院大王耶律景为上京留守封漆水郡王二月甲申免南京被水户租赋甲午免诸部岁输羊及关征三月戊午如南京丙寅遣使抚諭高丽壬申如长春宫夏四月辛卯如南京五月戊午如炭山清暑六月庚子录囚秋七月甲寅遣使视诸道禾稼辛酉以南院枢密使室昉为中京留守加尚父戊辰观获庚午诏契丹人犯十恶者依汉律己卯以翰林承旨邢抱朴参知政事八月庚辰朔皇太妃领西北路乌尔古等部兵及永兴宫分军抚定西边以萧达林督其军事乙酉宋遣使约和不许戊子以国舅帐克萧图格为伊勒希巴丁酉录囚杂

犯死罪以下释之是月猎于东山九月辛酉猎于汗州西山乙巳诏定均税法十一月戊申朔行再生礼诏诸部所俘宋人有官吏儒生抱器能者诸道军勇健者具以名闻庚戌诏郡邑贡明经茂材异等甲寅诏南京决滞狱十二月甲申赐南京统军司贫户耕牛戊子高丽进妓乐却之癸巳女真以宋人浮海致赂及乌色叛来告丁未如南京猎于顺州西甸

十三年春正月壬子如延芳淀丁巳增泰州遂城等县赋庚申诏诸道劝农庚午如长春宫是月攻府州战于子汭河不利三月癸丑夏国来贡夏四月己卯邢抱朴以母忧去官起复丙戌诏诸道民户应历以来胁从为部曲者仍籍州县甲午如炭山清暑是月攻雄州不克六月丁丑诏减前岁括田租赋丙戌诏许昌平怀柔等县人垦业荒地秋七月丁巳乌色乌哲图渤海雅木不勒等侵铁骊遣奚王和硕鼐等讨之八月丙子夏国遣使进马九月戊午赐南京太学水碓庄一区是月如大王川冬十月乙亥置义仓戊子乌色归款十一月辛酉遣使册王治为高丽国王戊辰高丽遣童子十人来学本国语十二月辛巳夏国以败宋人来告

十四年春正月己酉渔于潞河丁巳蠲三京及诸州赋丙寅夏国来贡三月壬寅高丽王治表乞为婚许之庚戌高丽复遣童子十人来学本国语甲寅韩德威奏讨党项捷甲子诏安集朔州流民夏四月庚寅如炭山清暑己亥凿大安山取刘守光所藏钱是月削奚王和硕鼐东京留守萧恒德等五人官五月癸卯遣邢抱朴决南京滞狱六月辛未如炭山清暑冬十月戊午乌哲图乞内附十一月甲戌诏诸军官毋非时畋猎妨农十二月甲寅减南京道新定税法如南京

十五年春正月庚午如延芳淀丙子以河西党项叛诏韩德威讨之庚辰诏诸道劝民种树癸未乌色长武周来降己丑诏南京决滞囚乙未免流民税二月丙申朔如长春宫戊戌劝丕勒部富民出钱以贍贫民丙午夏国来贡丙辰韩德威奏破党项捷丁巳诏民耕种丕勒部旷地三月戊辰募民耕滦州荒地免其租赋十年己巳夏国以破宋师来告己卯封夏国王李继迁为西平王壬午免南京逋税及义仓粟甲申河西党项乞内附癸巳宋主炅殂子恒嗣位甲午皇太妃献西边捷夏四月乙未罢奚王部岁贡麇戊戌录囚壬寅发义仓粟赈南京诸县己酉如南京己未如炭山清暑五月己巳诏平州决滞狱是月德呼勒八部杀详袞以叛萧达林追击之六月壬子夏国遣使来谢封册秋七月辛未禁吐谷浑别部鬻马于宋辛卯诏南京决狱讼八月丁酉猎于平地松林九月丙寅罢东边戍卒戊子萧达林奏讨准布捷冬十月壬辰朔驻蹕山罢奚王诸部贡物戊戌弛东京道鱼冻之禁辛酉录囚十一月壬戌朔录囚丙戌如显

州是月高丽王治薨十二月乙巳钓鱼子土河己酉驻

蹕驩山壬子夏国来贡甲寅遣使祭高丽王治诏其侄权知国事丙辰录囚

钦定续通志卷四十三

●钦定续通志卷四十四 辽纪四

辽纪 【四】

圣宗 【二】

○圣宗二

统和十六年春正月乙丑如长泺二月庚子夏国来贡丙午以监门卫上将军耶律实呼为中台省左相夏四月癸卯振崇德宫所隶被水州县丁未罢民输官俸己酉祈雨乙卯如木叶山五月丁卯祠木叶山告来岁南伐乙酉迁上京六月清暑于炭山秋七月丁巳朔录囚八月丁亥朔东幸九月丁巳朔驻蹕得胜口冬十一月遣使册高丽国王诵十二月丙戌宋王休格薨进封弟恒王隆庆为梁王南京留守郑王隆佑为吴王

十七年春正月乙卯朔如长春宫夏四月如炭山清暑秋七月以伐宋诏谕诸道九月庚辰朔如南京己亥南伐北院枢密使魏王耶律色珍薨以韩德让兼知北院枢密使事冬十月癸酉攻遂城不克遣萧继远攻狼山镇石砦破之次瀛州与宋师战擒其将康昭裔宋顺 【案康昭裔宋史通鉴俱作康保裔实战死优诏赠恤录其子孙辽史谓被擒嗣且以为昭顺节度使恐非一人宋史契丹国志俱载于明年则更误矣

】 进攻乐寿拔之复与宋师战于遂城败之

十八年春正月还次南京诏诸军各还本道二月如延芳淀夏四月己未驻蹕清泉淀五月丁酉清暑于炭山六月准布特彻布率部众来附秋七月驻蹕汤泉九月乙亥朔驻蹕黑河冬十一月甲戌朔授李继迁子德昭朔方军节度使

十九年春正月辛巳以祗候郎君班详袞观音为奚六部大王二月猎于崖头川三月乙亥夏国来贡乙酉西南面招讨司奏党项捷壬辰皇后萧氏以罪降为贵妃夏五月癸酉清暑于炭山丙戌册萧氏为齐天皇后庚寅以伊喇详袞耶律仁努为伊实大王辛卯以青牛白马祭天地六月乙巳以宋将康昭裔为昭顺军节度使戊午夏国奏下宋恒怀庆三州秋七月丙戌以南京统军使耶律诺观为南府宰相九月戊子驻蹕昌平庚寅西南面招讨司奏讨吐谷浑捷辛卯如南京冬十月己亥南伐壬寅次盐沟吴王隆佑徙封楚王留守京师壬子以青牛白马祭天地甲寅及宋师战于遂城败之 【按宋史书遂城之战谓败在契丹盖两国各讳其败也

【庚申以黑白羊祭天地丙寅次满城以泥淖班师

十一月丙子宋兵出淤口益津关来侵侦候玛虞人珠克击败之己卯观渔于儒门冻闰月己未减关市税十二月庚辰免南京平州租税

二十年春正月庚子如延芳淀诏安抚西南面向化诸部甲寅夏国来贡二月丁丑女真遣其子来朝三月甲寅遣北府宰相萧继远等南伐壬戌驻蹕鸳鸯泺夏四月丙寅文班太保达里塔败宋师于梁门甲戌南京统军使萧达林破宋师于泰州五月乙卯如炭山清暑六月夏国遣使来告下灵州秋七月丁酉以邢抱朴为南院枢密使辛丑高丽遣使来贡本国地里图八月猎于平地松林冬十二月奚王府五帐六节度献七金山土河川地

二十一年春正月如鸳鸯泺三月壬辰诏修日历官毋书细事夏四月耶律诺观萧达林获宋将王继忠于望都五月庚寅朔清暑于炭山丁巳西平王李继迁薨其子德昭遣使来告六月己卯遣西上合门使丁振如夏吊慰乙酉准布特里克率诸部来降秋七月甲寅以奚王府监军耶律舒噜为南院大王九月己亥夏国李德昭遣使来谢癸丑如女河汤泉冬十月丁巳驻蹕七渡河戊辰以楚王隆佑为西南面招讨使十一月壬辰故裕悦耶律休格之子道士努果济等谋叛伏诛丙申通括南院部民十二月癸未罢三京诸道贡

二十二年春正月丁亥如鸳鸯泺二月丙寅南院枢密使邢抱朴薨三月己丑罢番部贺千龄节及冬至重五贡夏五月清暑于炭山秋七月甲申遣使封夏国李德昭为西平王八月丙子驻蹕犬牙山九月己丑以南伐谕高丽丙午如南京丁未致祭于太宗庙以北院大王穆尔古太尉老君努监北南王府兵庚戌以楚王隆佑留守京师闰月己未南伐癸亥次固安甲子以青牛白马祭天地丙寅及宋师战于唐兴大败之

丁卯萧达林及宋师战于遂城又败之【按宋史是年闰九月契丹攻顺安军北平砦保州定州又围岢岚军皆不利辄引去寇准所谓狃我也契丹国志续通鉴共同据辽史则所向皆捷恐两国各讳其败也】

庚午军于望都冬十月乙酉以黑白羊祭天地丙戌攻瀛州不克甲午下祁州以酒脯祭天地己酉西平王李德昭遣使谢封册十一月癸亥军马都指挥使耶律科里击宋师于洺州败之甲子东京留守萧巴雅尔获宋魏府官吏田逢吉等以献庚午攻德清军破之壬申次澶渊萧达林出按地以中伤死乙亥破通利军丁丑宋崇仪副使曹利用来约和遣飞龙使韩■（木巳）持书报之十二月癸未宋复遣曹利用来以监门卫大将军姚柬之报之戊子宋使李继昌来约和愿岁输银十万两编二

十万匹许之即遣合门使丁振持书报聘己丑诸军解严是月班师赐大丞相齐王韩德昌姓耶律徙王晋 【二十八年赐名隆运】

二十三年春正月戊午还次南京庚申大飨将卒爵赏有差二月丙戌复置榷场于振武军丁巳夏国遣使来告下宋青城辛酉以特里袞

华格为南院大王行军都监老君努为特里袞乙丑振党项部夏四月己亥党项来侵五月戊申朔宋遣使来贺皇太后生辰乙卯以金帛赐阵

亡将士家丙寅高丽以与宋和遣使来贺六月壬辰清暑于炭山秋七月辛酉以青牛白马祭天地九月甲戌遣太尉阿里太傅杨鲁贺宋主生

辰冬十月甲午驻蹕七渡河癸卯宋使以岁币始至十一月戊申帝遣太保和卓颁给使韩简太后遣太师博诺政事舍人高正使宋贺正旦辛

亥观渔于桑干河 【按游幸表是年纪猎凡十一而二十四年以后至二十六年皆缺悉有脱误未足传信兹不揉桑干河其十一之一也】

丁巳诏大丞相耶律德昌出宫籍属于横帐十二月丙申宋遣使来贺千龄节丁酉复遣使来贺正旦

二十四年春正月如鸳鸯泺夏五月壬寅朔如炭山清暑幽皇太妃固窳于怀州因夫人伊兰于南京余党皆生瘞之秋七月辛丑朔南幸

九月如南京冬十月庚午朔帝率羣臣上皇太后尊号曰睿德神略应运启化承天皇太后羣臣上皇帝尊号曰至德广孝昭圣天辅皇帝大赦

二十五年春正月建中京二月如鸳鸯泺夏四月清暑于炭山六月皇太妃固窳赐死于幽所秋九月西北路招讨使萧托云讨准布破之

冬十月丙申驻蹕中京十二月己酉振饶州饥民

二十六年春二月如长泺夏四月辛卯朔祠木叶山五月庚申朔还上京辛未驻蹕怀州秋七月增太祖太宗让国皇帝世宗谥仍谥皇太

弟鲁呼曰钦顺皇帝冬十月戊子朔如中京十二月萧托云奏讨甘州回鹘降其王伊嚅勒

二十七年春正月钓鱼于土河猎于瑞鹿原夏四月丙戌朔驻蹕中京营建宫室八月甲申北幸十一月壬子朔行柴册礼十二月乙西南

幸戊子肆赦辛卯皇太后崩于行宫壬辰遣使报哀于宋夏高丽戊申如中京

二十八年春正月辛亥朔不受贺二月丙戌宋遣使吊祭是月遣左龙虎卫上将军萧和卓馈大行皇太后遗物于宋仍遣临海军节度使

萧实喇左领军卫上将军张崇济谢宋吊祭三月宋高丽遣使来会葬夏五月己卯朔如中京辛卯清暑于七金山乙巳西北路招讨使萧托云

奏伐甘州回鹘攻破肃州丙午高丽西京留守康肇弑其主诵立诵从兄询诏诸道缮兵东征秋八月戊申振平州饥辛亥如中京丁卯自将伐

高丽遣使报宋以楚王隆佑留守京师北府宰相驸马都尉萧巴雅尔为都统北面林牙索诺木为都监九月乙酉遣使册西平王李德昭为夏国王辛卯遣枢密直学士高正引进使韩■〈木巳〉宣问高丽王询冬十月丙午朔女真进马万匹乞从征高丽许之高丽奉表乞罢师不许十一月乙酉大军渡鸭绿江康肇拒战败之退保铜州丙戌右皮室详袞耶律达鲁与肇战擒之及其副将李立戊子铜霍贵窰等州皆降辛卯王询遣使上表请朝许之以政事舍人马保佑为开京留守安州团练使旺布为副留守遣伊林将兵一千送之壬辰开京守将卓思正杀辽使者韩喜孙等领兵出拒保佑等还伊林遂以兵击之思正败奔西京围之五日驻蹕城西高丽礼部郎中渤海托实来降庚子遣巴雅尔博诺等攻开京遇高丽兵败之王询弃城遁去遂焚开京

二十九年春正月乙亥朔班师所降诸城复叛己丑次鸭绿江己亥次东京三月己卯大丞相晋王耶律隆运薨庚辰以楚王隆佑权知北院枢密使事枢密直学士高正为北院枢密副使庚寅南京平州水振之己亥以北院大王耶律舒噜为北院枢密使封韩王北院郎君耶律世良为北院大王前三司使刘慎行参知政事兼知南院枢密使事夏四月清暑于隆科塌五月乙未以刘慎行为南院枢密使南府宰相邢抱质知南院枢密使事六月乙卯韩王耶律舒噜薨丙辰以南院大王华格为北院枢密使丁巳诏西北路招讨使驸马都尉萧托云安抚西鄙置准布诸部枢密使是秋猎于平地松林冬十月庚子驻蹕广平淀十一月庚午朔如显州十二月庚子复如广平淀

开泰元年春正月己巳朔宋遣使来贺甲申驻蹕王子院丙戌望祠木叶山戊子猎于玛哈拉林庚寅祠木叶山二月壬子驻蹕瑞鹿原三月乙亥如苇冻丁亥楚王隆佑徙封齐留守东京夏四月庚子高丽遣使乞称臣如旧诏王询亲朝壬寅夏国遣使进马辛酉以前孟父房详袞萧佛努为佐伊勒希巴五月戊辰朔还上京乙亥以邢抱质为大同军节度使六月驻蹕上京秋七月丙子以耶律遂贞为辽兴军节度使遂正北院宣徽使张昭莹南院宣徽使耶律受益上京副留守寇卿彰德军节度使命耶律释绅努李操充贺宋国生辰信使副萧尼古齐泰贺宋正旦使副八月己未高丽王询奉表称病不能朝诏复取六州地是月齐国隆佑薨冬十月辛亥如中京十一月甲午朔羣臣上尊号曰弘文宣武尊道至德崇仁广孝聪睿昭圣神赞天辅皇帝大赦改元覃恩中外癸卯前辽州录事张庭美六世同居仪坤州刘兴胤四世同居各给复三年甲辰七部太师阿勒达杀本部节度使巴罕以叛准布执阿勒达以献十二月丙寅奉迁

南京诸帝石像于中京观德殿景宗及宣献皇后于上
京五鸾殿壬申振奉圣州饥民庚辰赐秦晋王隆庆铁券甲申诏诸道饥民质男女者日
计佣钱折价尽还之归州言居民未习文字请设学许
之始征贵德龙化仪坤双辽同祖七州商

二年春正月癸巳朔邢抱质加开府仪同三司守司空兼侍中王继忠中京留守驸
马萧绍宗加检校太师耶律琨加正事令封幽王丁未
如瑞鹿原封北院枢密使耶律华格为幽王己未录囚乌尔古德呼勒叛右皮室详袞延
寿讨之二月壬午遣北院枢密副使高正按诸道狱是
月猎于阿里冻夏四月丙子如缅山五月辛卯朔命华格等西讨六月辛酉朔遣中丞耶
律资忠使高丽取六州旧地秋七月命诸军市马丁酉
以特哩袞耶律迪里为南府宰相太尉武格为特哩袞癸卯钓鱼于曲沟戊申以敦睦宫
子钱振贫民己酉华格等破准布酋长乌巴之众封皇
子宗训为大内特哩袞八月壬戌遣引进使李延弘赐夏国王李德昭及义成公主车马
冬十月己未朔畋于麋井之北命耶律阿延等使宋贺
生辰辛酉驻蹕长冻十一月甲午录囚癸丑削枢密使幽王华格官封出为大同军节度
使十二月甲子以北院大王耶律世良为北院枢密使
封岐王牛嶙为彰德军节度使萧孝穆为西北路招讨使

三年春正月己丑录囚乙未如浑河丙午畋于潢河滨壬子帝及皇后猎于瑞鹿原
二月戊午诏增枢密使以下月俸甲子遣上京副留守
耶律资忠复使高丽取六州旧地夏四月戊午诏南京管内毋淹刑狱以妨农务癸亥乌
尔古叛丙子以西北路招讨都监萧孝穆为北府宰相
五月乙酉朔清暑于缅山六月乙亥合巴哩伊实二国舅为一帐以伊实伊勒希巴萧迪
里为详袞以总之甲申封呼图克为广平郡王是夏诏
国舅详袞萧迪里东京留守耶律托实等讨高丽【按续通鉴是年迪里东伐高丽与女
真设奇邀击契丹大败而还史不书讳之也】秋七
月乙酉如平地松林八月甲寅朔如沙岭九月丁酉八部德呼勒杀其详袞刷以叛诏南
府宰相耶律乌拉噶招抚之壬子耶律世良遣使献德
呼勒俘冬十月甲寅朔如中京丙子以旗鼓伊喇详袞特哩袞为奚六部大王

四年春正月乙酉如瑞鹿原丙戌诏耶律世良再伐达里塔丁酉猎于马兰淀壬寅
东征二月壬子朔如萨堤冻夏四月癸丑以林牙建福
为北院大王丙寅哈斯罕部请括女真王苏扎纳户旧无籍者赋役从之枢密使贯盍大
破八部达里塔耶律世良等上破准布俘戊辰驻蹕沿
柳湖壬申耶律世良讨乌尔古破之复进讨达里塔至清泥塌值伊济之众以内徙遂叛
世良勒兵渡哈喇河进击之其将绷果遁去获其余众

并迁达里塔所获实默里部民城胪胸河上以居之五月辛巳命北府宰相刘晟为都统
【刘晟高丽传作刘慎行】 枢密使耶律世良为副
殿前都点检萧库哩为都监以伐高丽晟以致缓师期追还仍命世良库哩总兵进讨以
耶律德政为辽兴军节度使萧年古哩天城军节度使
六月庚戌以上京留守耶律巴格为北院枢密副使秋七月如秋山自八月射鹿至于九
月复自癸丑至于辛酉连猎于有柏碎石太保响应松
山诸山丙子以旗鼓伊喇详袞特哩袞为六部奚王冬十月驻蹕塔喇噶冻十一月庚申
诏汰东京僧命上京中京泊诸宫选精兵以备东征十
二月南巡海徽还如显州

五年春正月丁未北幸庚戌耶律世良萧库哩与高丽战于郭州西破之乙卯师次
南海军耶律世良薨于军癸酉驻蹕雪林二月辛巳如
萨堤泺庚寅以前东京统军使耶律哈瑠为右伊勒希巴三月辛酉诸道奏狱空诏进阶
赐物丙寅以前北院大王耶律敬温为额珍尼果齐哈
辛未党项库克来降夏四月乙亥振招州民戊寅以佐伊勒希巴萧和卓为北院枢密使
赫勒讷为副使庚辰清暑于孤树淀五月甲子削尚书
萧姬隐官丁卯以耿元吉为户部使六月遣政事舍人吴克昌按霸州刑狱秋七月甲辰
猎于赤山八月丙子如怀州有事于诸陵戊寅还上京
九月癸卯猎于松山乙丑驻蹕杏塌冬十月甲午封秦晋王隆庆长子察克中山郡王次
子苏克乐安郡王十一月丁巳以北面林牙萧威乌克
为国舅详袞十二月乙酉秦晋王隆庆薨丁酉宋遣使来贺千龄节

六年春正月癸卯如锥子河二月丁丑诏国舅帐详袞萧威乌克将本部兵东征高
丽其国舅司事以都监摄之庚辰以南面林牙聂赫为
南院大王三月乙巳如显州夏四月辛卯封隆庆少子谢嘉努为长沙郡王以枢密使漆
水郡王耶律制心权知诸行宫都部署事壬辰禁命妇
再醮丙申如凉陞五月戊戌朔以枢密使萧和卓为都统汉人行宫都部署王继忠为副
殿前都点检萧库哩为都监以伐高丽翌日赐和卓剑
得专杀丙午录囚甲寅以南京统军使萧惠为右伊勒希巴乙卯祠木叶山如潢河乙丑
驻蹕九层台六月戊辰朔赐德妃萧氏死秋七月辛亥
如秋山遣礼部尚书刘京等分路按察刑狱九月庚子还上京以皇子舒苏生大赦丁未
以驸马萧珽节度使华格知制诰仇正已杨佶充贺宋
生辰正旦使副乙卯萧和卓等攻高丽兴化军不克而还冬十月丁卯以南京路饥挽云
应朔弘等州粟振之辛未猎于铍子河庚寅驻蹕达哩
山十二月丁卯帝轻骑还上京戊子宋遣使来贺千龄节翌日又使来贺正旦

七年春正月甲辰如达哩山二月乙丑朔如浑河三月辛丑定东北伊埒图博和哩

鄂罗木富珠哩铁骠等五部岁贡丙午乌尔古部节度
使萧布达讨迪里灭之是月如三树冻夏四月丙寅振川饶二州饥辛未振中京贫乏癸
酉禁匿名书壬辰以三司使吕德郁为枢密副使闰月
壬子以萧进忠为彰武军节度使兼五州制置五月丙寅封子宗真为梁王宗元永清军
节度使宗简右卫大将军宗愿左骁卫大将军宗伟右
卫大将军侄宗范昭义军节度使宗熙镇国军节度使宗亮绛州节度使宗弼濮州观察
使宗奕曹州防御使宗显宗萧皆防御使以张俭守司
徒兼政事令六月丙午行大射柳之礼庚申以耶律留寔吴守达使宋贺生辰萧噶济马
贻谋贺正旦加平章萧弘义开府仪同三司尚父兼政
事令秋九月庚申佛窳国奏乌里国数见侵掠赐诏谕之庚午录囚括马给东征军是月
驻蹕土河川冬十月壬寅以顺义军节度使石用中为
汉人行宫都部署丙辰以东平王萧巴雅尔为都统殿前都点检萧实喇为副统东京留
守耶律巴噶为都监伐高丽十一月壬戌以北府宰相
刘慎行为彰武军节度使庚辰禁服用明金缕金贴金戍子如中京十二月丁酉宋遣使
贺千龄节是月萧巴雅尔等与高丽战于茶陀二河败
绩约尼帐详袞阿克达客省使卓库渤海详袞高清明天云军详袞哈里等死之

八年春正月宋遣使来贺壬戌建景宗庙于中京封沙州节度使曹顺为炖煌郡王
是月如浑河二月丁未以前南院枢密使韩制心 【
按韩制心辽史有传本纪误合二字为■〈制上心下〉今改正】 为中京留守汉人行
宫都部署王继忠南院枢密使三月己未以契丹弘义
宫使霍实为兴圣宫都部署前云阿南部节度使崆郭啰积庆宫都部署左祗候郎君耶
律罕四捷军都监壬午阅飞龙院马是月猎于云林石
底水夏四月戊子朔如缅山五月壬申以驸马萧克忠为长窳军节度使乙亥迁窳州渤
海户于辽土二河之间是月猎于桦山等地 【据游
幸表是月纪猎凡四】 六月戊子录征高丽战歿将校子弟己丑以左伊勒希巴萧嘉哩
为西南面招讨使御史大夫萧伊济为伊勒希巴己亥
特哩袞耶律哈噶为南府宰相南面林牙耶律哈瑠为特哩袞癸卯弛达巴山猿岭采木
之禁秋七月己未征高丽战歿诸将诏益封其妻庚申
以东北路详袞耶律都木达为北院大王戊辰观稼庚午观市曲赦市中系囚以解窳马
翼充贺宋生辰使副是月如秋山八月庚寅遣郎君赫
伯舍等率诸部兵会大军讨高丽九月己巳以石用中参知政事宋遣使来贺千龄节壬
申录囚甲戌复录囚壬午驻蹕土河川冬十月乙酉诏
诸道事无巨细已断者每三月一次条奏戊子遣耶律继崇郑玄瑕贺宋正旦癸巳诏横
帐三房不得与卑小帐族为婚癸卯以前北院大王建

福为额珍尼果齐哈十二月辛卯驻蹕中京乙巳以广平王宗业为中京留守大定尹韩制心为特哩衮辛亥高丽王询遣使乞贡方物诏许之

九年春正月宋遣使来贺二月如鸳鸯泺猎于马孟山夏五月庚午高丽王询表请称藩纳贡归所留王人珠埒哩辛未遣使释王询罪并

允其请癸酉以耶律宗教检校太傅宗诲启圣军节度使刘晟太子太傅仍赐保节功臣秋七月甲寅遣使赐炖煌郡王曹顺衣物以察喇耿元

吉哈济宋璋为来年贺宋生辰正旦使副八月猎于固尔班等山 【据游幸表是月纪猎凡七】 九月戊午以驸马萧绍宗平章事括诸道汉

民马赐东征军以伊勒希巴延窳为兵马副都部署总兵东征是月驻蹕金鉞泺猎于松山黑山宋遣使来贺千龄节冬十月戊寅以聂呬为奚

王都监托多罗为北王府锡里军详衮辛丑如中京十一月丁巳以漆水郡王韩制心为南京留守析津尹兵马都总管己未以伊勒希巴萧孝

顺为南面诸行宫都部署加左仆射十二月丁亥禁僧燃身炼指戊子诏中京建太祖庙制度祭器皆从古制乙巳诏来年冬行大册礼

太平元年春正月丁丑朔宋遣使来贺如浑河二月乙卯如钹河壬戌猎于高祁林夏四月乙卯录囚是月清暑于緬山秋七月乙亥遣古

哩取石晋所上玉玺于中京辛巳如沙岭是月猎于潢河九月如中京冬十月戊申录囚壬子宋遣使来贺千龄节及来岁正旦即遣萧善程翥

报聘己未以萨满嘉哩为都点检耶律罗汉努左皮室详衮桑古右皮室详衮庚申如通天观辛酉复如通天观十一月癸未羣臣上尊号曰睿

文英武遵道至德崇仁广孝功成治定昭圣神赞天辅皇帝大赦改元中外官进级有差宋遣使来聘甲申立梁王宗真为太子

二年春正月如纳水钓鱼二月辛丑朔驻蹕鱼儿泺三月甲戌如长春州丁丑宋使来告宋主恒殂子祜嗣位遣都点检耶律升音等充宋

祭奠使副林牙萧日新观察冯延休充宋后吊慰使副戊寅遣金吾耶律锡林引进姚居信充宋主吊慰使副戊子为宋主饭三京僧夏四月如

緬山清暑五月庚辰铁骊遣使献乌色十六户六月乙未宋使来馈其先帝遗物秋七月己卯以耶律信窳为奉陵军节度使高丽国参知政事

王同显静海军节度使耶律遂忠长窳军节度使耿延毅昭德军节度使高守贞河西军节度使九月癸巳遣尚书升音韩格贺宋主即位壬寅

耶律纒古韩王充贺宋太后生日使副耶律仙窳史克忠充贺宋正旦使副是月驻蹕和尔郭斯淀冬十月辛亥至上京曲赦畿内囚十一月丙

戌宋遣使来谢十二月辛丑高丽王询薨遣使册其子钦为高丽国王甲寅宋遣使来贺千龄节

三年春正月丙寅朔如纳水钓鱼以升音为平章事乙亥以萧台德为南王府都监林牙耶律信奘西北路招讨都监二月丙申以丁振为武信军节度使改封兰陵郡王戊申以东平王萧巴雅尔为西南面都招讨进封幽王是月驻蹕鱼儿泺夏四月以耶律守奘为都点检五月清暑于緬山六月戊申以南院宣徽使刘涇参知政事萧孝恭东京统军兼沿边巡检使戊午以萧璉为左伊勒希巴萧琳为详袞秋七月戊寅以南院宰相耶律哈噶为上京留守封漆水郡王丁亥赐緬山名曰永安是月猎于赤山闰月壬辰以萧伯达韩绍雍充贺宋正旦使副唐古特程昭文贺宋生辰使副冬十月庚辰宋遣使来贺千龄节及顺天节东征统帅霞哩详袞格纳林牙果济等分军自摩穆克岭及鼓山岭入不见敌而还是月驻蹕辽河十一月辛卯朔以侄宗范为归德军节度使北院宰相萧孝穆南京留守封燕王韩制心南院大王十二月壬戌以宗范为平章事封三韩郡王己卯封子重元为秦王

四年春正月庚寅朔宋遣使来贺如鸭子河二月己未猎于塔鲁河诏改鸭子河曰混同江塔鲁河曰长春河夏四月癸酉右丞相马保忠之子世弘使于岭表至平地松林为盗所杀特赠昭信军节度使五月清暑于永安山六月【据朔改增】己未南院大王韩制心薨戊辰以刘慎行为顺义军节度使甲戌以中山王察克为保静军节度使乐安王苏克广德军节度使萧嘉哩彰德军节度使庚辰以辽兴军节度使周王呼图克为临海军节度使漆水郡王迪里南院大王秋七月如秋山八月丙辰以驸马萧必塔为都点检九月以驸马萧绍宗为武定军节度使耶律宗福安国军节度使冬十月驻蹕辽河宋使来贺千龄节十二月以萧从政为归义军节度使康筠监门卫充贺宋正旦使副

五年春正月乙酉如混同江二月戊午禁服用明金及金线绮国亲当服者奏而后用是月如鱼儿泺三月壬辰以左丞相张俭为武定军节度使同政事门下平章事郑弘节临潢少尹刘慎行辽兴军节度使武定军节度使萧必塔契丹行宫都部署枢密副使杨又玄吏部尚书参知政事兼枢密使是月如长春河夏五月清暑于永安山以耶律晨为武定军节度使张俭彰信军节度使李可举顺义军节度使秋七月猎于平地松林九月驻蹕南京己亥以萧迪里李绍琪充贺宋太后生辰使副耶律守奘刘四端充贺宋主生辰使副冬十月辛未宋遣使来贺顺天节十一月辛丑以左祗候郎君详袞萧罗罗为右伊勒希巴十二月丁巳以汉人行宫都部署萧孝先为上京留守侄长沙王谢嘉努匡义军节度使耶律仁举兴国军节度使甲子以萧守奘为点检侍卫亲军马步军乙丑北院枢密

使萧和卓薨十二月戊辰以北府宰相萧布库为北院枢密使己巳遣萧谐李琪充贺宋正旦使副庚午以参知政事刘京为顺义军节度使乙亥宋遣使来贺千龄节丁丑禁工匠不得销毁金银器

六年春正月己卯朔宋遣使来贺庚辰如鸳鸯泺二月己酉以密喇济同知枢密院黄翩为兵马都部署达噶济副之霍实为都监引军城混同江苏默河之间黄翩徇地女真界得降户二百七十戊午以国舅帐萧瑠实图噜库领西北路十二班军奚王府锡里军己巳以南京水遣使振之三月戊寅以大同军节度使张俭为南院枢密使左丞相兼政事令是月准布来侵西北路招讨使萧惠破之夏四月丁未以武定军节度使耶律海古勒为特哩袞丙寅如永安山五月辛卯以东京统军使萧纛古为契丹行宫都部署癸卯遣西北路招讨使萧惠将兵伐甘州回鹘秋七月戊申猎于黑岭八月萧惠攻甘州不克自是准布诸部皆叛辽军与战皆为所败监军尼鲁古国舅帐太保哈布尔死之诏遣特哩袞耶律鸿观林牙华格等将兵讨之九月驻蹕辽河泚冬十月庚辰遣使问夏国与宋交战之故辛巳以前南院大王济鲁古为乌尔古德呼勒都详袞庚寅以萧孝顺萧绍宗兼侍中驸马萧绍业平章政事前南院大王和多果沁同知上京留守安格通化州节度使乙丑宋遣使来贺顺天节十二月庚辰哈斯罕部乞建旗鼓许之辛巳诏北面诸部廉察州县及锡林密拉之官戊戌遣杜防萧蕴充贺宋生辰使副庚子驻蹕辽河

七年春正月壬寅朔宋遣使来贺如混同江辛亥以女真伯埒为特哩袞佛们为页穆部太师夏四月乙未猎于黑岭五月清暑永安山六月禁诸屯田擅货官粟癸巳诏萧惠再讨准布秋七月己亥朔诏更定法令九月驻蹕辽河冬十一月宋遣使来贺千龄节及顺天节乙未以匡义军节度使中山王察克为保宁军节度使长沙王释迦努为广德军节度使癸亥以三韩王钦为启圣军节度使甲子以左千牛卫上将军耶律古裕为北院大王十二月丁卯遣耶律苏页王永锡充贺宋太后生辰萧苏色马保永充贺正旦使副癸酉以金吾萧噶噜为奚锡里军详袞

八年春正月己亥如混同江庚申党项侵边甲子诏州县长吏劝农三月驻蹕长春河夏五月清暑于永安山六月以韩窳刘湘充贺宋太后生辰使副秋七月丁酉以约尼帐郎君辰格为西北路巡检与萧锡林同管二招讨地以南院大王耶律迪里为上京留守戊戌猎于平地松林九月壬辰朔以渤海宰相罗汉权东京统军使壬子如中京赐北迪里部节度使耶律延寿旗鼓癸丑准布别部长呼兰来降乙卯准布长绰果来降冬十月宋遣使来贺顺天节十一月丙申以耶律求翰为北院大王十二月辛酉

朔以约尼太尉色佛呼为天云军详衮壬申以前北院
大王耶律留室为双州节度使康筠崇德宫都部署色实永兴宫都部署埒富宜州节度
使丁亥宋遣使来贺千龄节及来岁正旦

九年春正月自中京二月戊辰如乌林河夏五月清暑于永安山六月戊子以长
沙王谢嘉努为广德军节度使乐安王苏克匡义军节
度使中山王察克保定军节度使进封潞王豫章王特布长宁军节度使以耶律思忠耶
律荷耶律曷约尼色佛呼陈邈韩绍一韩知白张震充
贺宋两宫生辰及来岁正旦使副秋七月戊午朔如黑岭八月己丑东京锡里军详衮大
延琳囚留守驸马都尉萧孝先及南阳公主杀户部使
韩绍勋副使王嘉四捷军都指挥使萧佛德僭称尊号副留守王道平踰城走至行在告
变诏征诸道兵以时进讨延琳分兵西攻藩州不克冬
十月丙戌朔以南京留守燕王萧孝穆为都统国舅详衮萧必塔为副统奚六部大王萧
博诺为都监以讨之十一月丙寅以渚州节度副使张
杰为节度使超授保州戍将夏行美平章事壬申以驸马刘四端权知宣徽南院事十二
月丁未宋遣使来贺千龄节以耶律育吴克荷萧可观
赵利用充贺宋生辰使副耶律元吉崔闰萧昭古奚振充贺正旦使副

十年春正月己卯朔宋遣使来贺二月如龙化州夏四月以耶律行平为广平军节
度使夏行美为中顺军节度使五月戊申清暑于柏坡
秋七月壬午诏来岁行贡举法八月丙午延琳将杨详世擒延琳以降渤海平冬十月驻
蹕长宁淀十一月辛亥燕王萧孝穆以东征将士凯还
翌日以燕王孝穆为东平王东京留守国舅详衮驸马都尉萧必塔封兰陵郡王奚王博
诺加侍中以权燕京留守兼侍中萧惠为燕京统军使
前统军威乌克大将军节度使宰相兼枢密使马保忠权知燕京留守奚王府都监萧阿
克展东京统军使十二月乙巳宋遣使来贺千龄节漆
水郡王耶律迪里加尚父乌尔古部节度使萧布达为伊实部大王尚书左仆射萧琳为
临海军节度使

十一年春正月己酉如混同江二月如长春河三月帝不豫夏六月丁丑朔驻蹕大
福河之北己卯帝崩于行宫年六十一谥曰文武大孝
宣皇帝庙号圣宗陵曰庆陵

圣宗统和二十九年开泰九年太平十一年凡四十九年

钦定续通志卷四十四

●钦定续通志卷四十五 辽纪五

辽纪 【五】

兴宗

道宗

○兴宗

兴宗皇帝讳宗真字雅布济小字济古尔圣宗长子也母曰钦哀皇后萧氏帝善骑射好儒术通音律初封梁王太平元年册为皇太子判北南院枢密使事十一年六月己卯圣宗崩太子即皇帝位于柩前壬午尊母萧氏为太后甲申遣使告哀于宋及夏高丽辛卯大赦改元景福辛丑驸马萧哲伯埒萧必塔赐死杀围场都太师女真珠格尔右祗候郎君详袞萧雅鲁等七人迁齐天皇后于上京秋七月丙午朔皇太后率皇族大临于太平殿高丽遣使吊慰帝与晋王萧布库等饮博夜分乃罢丁未袭鞠戊申以耶律罕巴为左伊勒希巴特穆尔左祗候郎君详袞横帐郎君乐古权右祗候郎君详袞己酉以耶律哲鲁为伊济迪里都详袞果巴为右皮室详袞庚戌振薊州饥甲寅录囚乙卯以比岁丰稔罢给东京统军司粮丁巳以萧阿克展为东京留守辛未录囚九月戊申躬视庆陵辛亥宋遣使来致祭慰两宫及贺即位贺皇太后册礼甲戌遣御史中丞耶律燾司农卿张确详袞耶律励四方馆使高维翰使宋谢吊慰冬十月戊寅吕德懋薨癸未杀哲伯埒党弥勒努观音努等丙戌遣工部尚书高德顺崇禄卿李可封致先帝遗物于宋以右领军卫上将军耶律逊少府监马惮充皇太后谢宋使右监门卫上将军耶律元载引进使魏永充皇帝谢宋使戊戌以萧格赵为果耶律郁马保业充来岁贺宋正旦使闰月辛酉阅新造铠甲丁卯振黄龙府饥民十一月甲午葬圣宗皇帝于庆陵乙未祭天地丙申谒庆陵十二月癸丑至自庆陵皇太后听政是岁以兴平公主下嫁夏国王李德昭子元昊

重熙元年春正月壬申朔皇太后御正殿受帝与羣臣朝宋遣使来贺乙亥宋使来贺永寿节丁丑如雪林二月大搜三月壬申朔以尚父漆水郡王迪里复为特哩袞是春皇太后弑齐天皇后于上京夏四月乙巳清暑于巴纳登秋七月猎于平地松林以萧达溥王英秀萧麓张素羽充来岁贺宋正旦生辰使八月丙午驻蹕拉河源冬十月己酉帝如中京十一月己卯帝率羣臣上皇太后尊号曰法天应运仁德章圣皇太后羣臣上皇帝尊号曰文武仁圣昭孝皇帝大赦改元癸未夏国王李德昭薨册其子元昊为夏国王十二月庚戌宋遣使来贺来岁正旦以北大王耶律求翰同平章事

二年春正月庚辰东幸宋使来告母后刘氏哀又使来馈母后遗物即遣延昌宫使耶律寿盩给事中知制诰李奎充祭奠使天德军节度使耶律卿盩大理卿和道亨河西军节度使耶律嵩引进使马世卿充两宫吊慰使秋七月甲子朔以耶律楚高升耶律迪王惟允充两宫贺宋

生辰使副以耶律师古刘五常充贺宋来岁正旦使副八月丁酉如温泉宫乙卯遣使阅诸路禾稼冬十一月甲申宋遣使来谢慰奠十二月乙未又遣使来贺应圣节己酉禁夏国使私市金铁甲寅宋遣使来贺永寿节及来岁正旦庚申以北府宰相萧孝先为枢密使

三年春正月丁卯宋使章频卒命近侍护丧以归辛卯如春水二月壬辰以北院枢密使萧布库为东京留守夏四月甲寅振伊玛齐部【部族表在元年四月】五月庚申清暑于沿柳湖是月皇太后还政于帝躬守庆陵【按通鉴及契丹国志实迁之庆州后传亦载其事非讳之也】六月己亥以萧布库为南院枢密使秋七月戊子朔帝始亲政以耶律庶征刘六符耶律睦薄可久充贺宋来岁正旦使副壬辰如秋山冬十月己未驻蹕中会川十二月宋遣使来贺来岁正旦及永寿节

四年春正月庚寅如伊玛齐里三月乙酉朔立皇后萧氏夏四月甲寅朔如凉陞五月庚子清暑于散水源六月癸丑朔以耶律信吕士宗萧袞郭揆充贺宋生辰及来岁正旦使副秋七月壬午朔猎于黑岭九月己酉驻蹕长窰淀冬十月如王子城十一月壬午改南京总管府为元帅府乙酉行柴册礼于白岭大赦加尚父耶律信窰政事令耶律求翰耆宿赞翊功臣十二月癸丑诏诸军炮弩弓箭手以时阅习庚申宋遣使来贺永寿节及正旦

五年春正月甲申如鱼儿泺夏四月庚申以潞王察克为南府宰相崇德宫使耶律玛嚕为特哩袞丁卯颁新定条制己巳帝与大臣分朋击鞠五月甲午南幸丁未如呼图哩巴山清暑秋七月辛丑录囚九月癸巳猎于黄花山冬十月丁未如南京辛亥曲赦析津府囚壬子始御试进士宋遣使来贺永寿节甲子幸礼部贡院以耶律祥张素民耶律甫王泽充贺宋生辰正旦使副

六年春正月丁丑西幸三月戊寅以秦王萧孝穆为北院枢密使徙封吴王晋王萧孝先为南京留守夏四月猎于野狐岭闰月猎于龙门县西山五月己酉清暑于炭山以耶律罕巴为北院大王萧巴噶左伊勒希巴王子郎君详袞布古德林牙签北面事耶律尼格同签点检司甲寅录囚丙辰以耶律信窰为西南路招讨使癸亥以上京留守耶律呼图克昆为南大王平章事萧扎拉纳上京留守侍中管窰行宫都部署耶律普努窰乌尔古达鲁特都详袞甲子以上京留守耶律鸿观为北院大王六月壬申朔以善窰为殿前都点检护卫太保耶律和卓兼长窰宫使萧额鲁哩耶律乌拉噶耶律和尚萧罕嘉努萧特哩萧求翰为各宫都部署己卯祀天地丙申以北院大王浩善为南京统军使秋七月壬寅

以皇弟重元生子曲赦死罪以下癸卯如秋山八月己卯罢伊济等五国酋帅以契丹节度使一员领之冬十月癸酉驻蹕石宝冈十一月辛亥以契丹行宫都部署萧惠为南院枢密使壬子以管窰为南院枢密使萧缜古诸行宫都部署耶律纽斡哩知南面行宫副部署萧额鲁哩左祗候郎君详袞耶律和卓右祗候郎君详袞封子洪基为梁王十二月以杨佖为忠顺军节度使遣耶律斡秦鉴耶律德崔继芳贺宋生辰及正旦

七年春正月戊戌朔宋使来贺正旦及永寿节辛丑如混同江二月庚午如春州乙亥驻蹕东川壬午幸五坊阅鹰鹞乙酉遣使于庆州问皇太后安三月壬寅如蒲河淀甲寅录囚夏四月己卯猎于白马塌甲申射兔于新淀井乙未猎于金山秋七月甲辰录囚戊申如黑岭九月丁未驻蹕平淀冬十月甲子朔渡辽河丙寅驻蹕白马淀壬申录囚十一月癸巳朔以耶律元方张泥韩至德萧傅充贺宋生辰正旦使副【按长编元方作九方张泥作张渥至德作志德萧傅作萧溥】庚申录囚十二月己巳以太弟重元判北南院枢密使事北府宰相赛音巴窰再任兼知东京留守事耶律窰温南府宰相察噶扎大内特哩袞伊实已帐萧翰干州节度使刘六符参知政事王子帐冠格王子郎君详袞吹綱大王平州节度使宰臣张克恭守司空宰臣韩绍芳加侍中特哩袞耶律玛嚕北院宣徽使傅父耶律吉逊南府宰相癸未宋使来贺永寿节丁亥录囚南面侍御准格尔诈取女真贡物罪死帝以有吏能黥而流之

八年春正月壬辰朔宋遣使来贺丙申如混同江观鱼戊戌振丕勒部庚戌义鱼于实默里河丁巳禁朔州鬻羊于宋二月丙子驻蹕长春河夏六月乙丑诏括户口秋七月丁巳谒庆陵迎皇太后还京冬十月驻蹕东京十一月戊申皇太后行再生礼大赦闰十二月壬辰宋使来贺永寿节

九年春正月丙辰朔宋遣使来贺庚申如混同江二月驻蹕鱼儿泺三月辛未以应圣节大赦夏五月乙卯朔清暑于永安山六月射柳祈雨秋七月癸酉宋遣使以伐夏来报遣枢密使杜防报聘丁丑如秋山冬十月癸未驻蹕中会川十一月甲子女真侵边发黄龙府铁骊军拒之宋使来贺应圣节十二月辛卯以萧迪刘三嘏耶律元方王惟吉耶律庶忠孙文昭萧绍筠秦德昌充贺宋生辰及来岁正旦使副

十年春正月辛亥朔宋遣使来贺甲子复遣使来贺永寿节二月庚辰朔诏博啰满达部归哈斯罕户之没入者使复业夏四月诏罢修鸭渌江浮梁及汉兵屯戍之役六月戊寅以萧窰耶律坦崔禹称马世良耶律仁先刘六符充贺宋生辰使副耶律庶成赵成耶律烈张旦充来岁

贺宋正旦使副秋八月射虎于医巫闾山【据游幸表增辑】九月庚申皇太后射获熊帝进酒为寿癸亥猎于马盂山丙寅夏国献宋俘冬十月庚寅以女真太师塔雅克为哈斯罕都大王壬辰以皇子生肆赦甲午如中京庚子以驸马都尉萧呼哩为国舅详袞是月猎于烽台山【据游幸表增辑】十二月丙子朔宋遣使来贺应圣节乙未置塔卓卜酋长以和塔拉为平章事遣萧英刘六符使于宋庚寅宋使来贺永寿节及来岁正旦丁酉议伐宋诏谕诸道

十一年春正月戊申奉迎皇太后于内殿庚戌遣南院宣徽使萧特默翰林学士刘六符使于宋取晋阳及瓦桥以南十县地且问兴师伐夏及沿边疏浚水泽增益兵戎之故二月壬寅如鸳鸯泺夏四月甲戌朔颁南征赏罚令六月乙亥宋遣富弼张茂实奉书来聘以书答之秋八月丙申宋复遣富弼张茂实奉书来聘以增岁币银绢以书答之九月壬寅遣北院枢密副使耶律仁先汉人行宫副部署刘六符使宋约和闰月辛卯仁先刘金符还进宋誓书宋遣梁适报使【据宋史增辑】是月如南京冬十一月丁亥羣臣加上尊号曰聪文圣武英略神功睿哲仁孝皇帝册皇后萧氏曰贞懿宣慈崇圣皇后大赦梁王洪基进封燕王是月遣使如宋报彻兵【据宋史增辑】十二月甲辰封太弟重元子尼嚕古为安定王辛亥诏蠲预备伐宋诸部租一年壬子以吐浑党项多鬻马夏国诏谨边防己未宋遣使来贺正旦及永寿节

十二年春正月辛未遣同知析津府事耶律迪里枢密院都承旨王惟吉谕夏国与宋和壬申以吴王萧孝穆为南院枢密使北府宰相萧孝忠北院枢密使封楚王韩王萧惠北府宰相同知元帅府事罕巴南院大王耶律喇实东京留守北院枢密副使耶律仁先同知东京留守事北面林牙萧格北院枢密副使甲戌如武清寨苇淀二月壬寅禁关南汉民弓矢己酉夏国以加尊号遣使来贺甲寅耶律迪里等使还奏夏国罢兵即遣使报宋三月辛卯如南京夏五月乙未诏复定礼制是月如山西六月甲子以吴王萧孝穆为北院枢密使徙封齐王秋七月丙寅朔北院枢密使萧孝忠薨特释系囚庚寅夏国遣使请伐宋不许八月辛丑燕王洪基加尚书令知北南院枢密使事进封燕赵国王戊午以前西北路招讨使萧塔喇噶为右伊勒希巴庚申裕悦耶律鸿观薨九月猎于伊喇永安诸山冬十月丁酉驻蹕中会川己亥北院枢密使萧孝穆薨庚子诏诸路上重囚遣官详讞辛亥以参知政事韩绍芳为广德军节度使三司使刘六符长宁军节度使壬子以夏人侵党项遣使让之甲子以北府宰相萧惠为北院枢密使幽王遂哥为特哩袞特哩袞达嚕噶封漆水郡王西北

路招讨使枢密副使萧阿拉同知北院宣徽事十一月

丁亥复上京民租税

十三年春正月戊辰如混同江辛未猎于乌尔袞冈二月庚戌如鱼儿泺丙辰以参知政事杜防为南府宰相三月丁亥以宣政殿学士杨佖参知政事夏四月己酉遣东京留守耶律浩善知黄龙府事耶律乌鲁斯将兵攻博罗满达部甲寅党项等部叛附夏国丙辰山西部族节度使库哩以五部叛入于夏五月壬戌朔西南面招讨都监罗汉努与党项战不利招讨使萧布达四捷军详袞张佛努死之李元昊来援叛党戊辰征诸道兵讨元昊六月甲午准布酋长乌巴遣其子执元昊所遣使乌页改来请以兵助战许之驻蹕永安山以将伐夏遣延昌宫使耶律高嘉努告宋丁未录囚秋七月庚午行再生礼庚辰夏国遣使来朝羈之八月丁巳夏国复遣使来笞之九月戊辰宋以亲征夏国遣使致赆壬午会大军于九十九泉以太弟重元北院枢密使韩王萧惠将先锋兵西征冬十月庚寅祭天地丁酉李元昊上表谢罪己亥元昊乞收叛党以献辛亥元昊遣使进方物壬子军于河曲元昊亲率党项三部来诏诘其罪癸丑督数路兵袭之驸马都尉萧呼图克为夏人所执丁巳元昊遣使以先被执者来归诏亦还其使是月猎于阴山十一月甲子班师丁卯改云州为西京十二月己丑如西京戊戌以北院枢密副使耶律迪里为右伊勒希巴戊申萧呼图克自夏来归

十四年春正月庚申以侍中萧锡喇为南院统军使封辽西王庚午如鸳鸯泺壬午以金吾卫大将军达噜噶为伊实大王遣使如宋 【据宋史增辑】 二月庚子驻蹕萨喇泺三月己卯宋以伐夏师还遣使来贺夏闰五月癸丑清暑于永安山秋七月戊申驻蹕中会川九月猎于平川冬十月甲子望祀木叶山是月遣使如宋 【据宋史增辑】 十一月甲辰以同知北院宣徽事萧阿拉为北府宰相十二月癸亥决滞狱

十五年春正月乙酉如混同江二月乙卯如长春河丙寅博啰满达界海兰河户来附三月乙酉以应圣节减死罪徒以下原之夏四月戊午罢约尼帐戍军壬戌以北女真详袞萧噶噜为奚六部大王甲子清暑于永安山甲戌博啰满达海兰河百八十户来附六月癸丑以西京留守耶律玛鲁为汉人行宫都部署参知政事杨佖为武定军节度使甲戌西北路招讨使耶律达噜噶坐赃免官秋七月戊子观获乙未以北院宣徽使埒富为左伊勒希巴前南府宰相耶律吉逊为东北路详袞丙申籍诸路军丁酉如秋山辛丑禁扈从践民田丁未女真部长扎穆率众来附八月癸丑高丽王钦薨冬十月己酉驻蹕中会川十一月丁亥以南院枢密使萧孝

友为北府宰相契丹行宫都部署耶律仁先南院大王
北府宰相萧格同知北院枢密使事知伊勒希巴事耶律信先汉人行宫都部署左伊勒
希巴埒富特哩袞汉人行宫都部署耶律迪里左伊勒
希巴己亥括渤海部军马乙巳振南京贫民十二月壬申曲赦徒以下罪

十六年春正月己卯如混同江二月庚申如鱼儿泺三月丁亥如黑水泺夏四月乙
巳朔皇太后不豫帝驰往视疾丙午复如黑水泺丁卯
肆赦六月戊申清暑于永安山戊午诏士庶言事秋七月辛卯如庆州自是月至于九月
日射猎于楚布沟实喇锡伦石塔诸山冬十月辛亥如
中京丙辰定公主行妇礼于舅姑仪十一月戊寅祠木叶山己丑如中京朝皇太后十二
月乙卯以太后疾愈减杂犯死罪徒以下免庚申以南
府宰相杜防为武定军节度使

十七年春正月丁亥如春水闰月癸丑射虎于哈尔吉二月辛巳振袞彻木袞部
是月诏士庶言国家利便奴婢所见许白其主不得自
陈夏国王李元昊薨其子谅祚遣使来告即遣永兴宫使耶律纽斡哩右护卫太保耶律
辖鲁将作少监王全慰奠三月癸卯以同知南京留守
事肃塔喇噶为左伊勒希巴知右伊勒希巴事唐古为右伊勒希巴丙午夏国李谅祚遣
使上其父元昊遗物丁卯铁不得国使来乞以本部军
助攻夏国不许夏四月辛未武定军节度使杜防复为南府宰相甲申博啰满达部大王
佛窳以造舟人来献秋七月丁未裕悦玛摩约之子布
格及伯哩八部额尔奇木和费延等内附甲寅录囚减杂犯死罪八月丙戌复南京贫户
租税戊子以殿前都点检耶律义先为行军都部署中
顺军节度使夏行美副部署东北面详袞耶律珠展为监军伐富珠哩酋托多罗冬十月
甲申南院大王耶律罕巴薨甲午驻蹕都尔嘉十一月
乙未遣使括马丁巳赐太弟重元金券封皇子和隆鄂为越王阿林许王忠顺军节度使
谢嘉努陈王西京留守特布汉王特哩袞埒富辽西郡
王行宫都部署布古德柳城郡王奉陵军节度使海古勒饶乐郡王安定郡王尼噜古进
封楚王

十八年春正月戊戌留夏国贺正使不遣己亥遣北院枢密副使萧惟信以伐夏告
宋辛丑录囚丙午如鸳鸯泺丙辰猎于拜塔山耶律义
先奏富珠哩捷二月乙酉耶律义先等执托多罗以献三月壬子以燕赵王洪基疾愈赦
杂犯死罪以下丁巳乌尔古遣使送款夏四月癸酉以
南府宰相耶律果实为南京统军使五月甲辰五国酋长各率其部来附六月壬戌以韩
王萧惠为河南道行军都统赵王萧孝友汉王特布副
之乙丑录囚丙寅行十二神燹礼己巳宋以伐夏遣使致贐辛巳夏国使来贡留之不遣

丁亥行再生礼秋七月戊戌亲征八月辛酉渡河夏人遁乃还九月丁未萧惠等为夏人所败冬十月北道行军都统耶律达噜噶率准布诸军至贺兰山获李元昊妻及其官僚家属遇夏人来战殪之乌尔古德呼勒部都详袞萧慈实努南克耶律斡里死焉十二月己卯录囚

十九年春正月庚寅僧惠鉴加检校太尉庚子耶律达噜噶复封漆水郡王辛丑遣使问罪于夏国壬寅如鱼儿泺二月丁亥夏将旺布威赫伊特凌结等来攻金肃城南面林牙耶律高嘉努等破之杀威赫伊特凌结三月戊戌殿前都点检萧达勒达与夏人战于三角川败之癸卯命西南招讨使萧博诺北院大王伊逊林牙萧萨满等帅师伐夏以行宫都部署布古德监战甲辰遣同知北院枢密使萧格按军边城以为声援己酉驻蹕息鸡淀是月遣使以伐夏师还告宋宋遣使报聘 【据宋史增辑】 夏四月丙寅如鱼儿泺五月己丑如凉陞癸巳萧博诺等入夏境俘掠而还丁酉夏国旺布来降六月庚午如庆州甲戌宋遣使来贺伐夏捷秋七月壬辰驻蹕科里巴延癸巳以燕赵王洪基领北南枢密使戊戌录囚戊申以左伊勒希巴萧唐古为北院枢密副使壬子猎于哈尔吉九月壬寅夏人侵边达噜噶遣将击败之冬十月庚午还上京辛未夏国王李谅祚母遣使乞依旧称藩壬申释临潢府役徒甲戌如中会川十一月庚戌录囚壬子以南府宰相韩知白为武定军节度使枢密副使杨绩为长宁军节度使是月猎于布延山闰月乙卯以汉王特布为中京留守辛未以同知北院枢密使事萧格为南院枢密使北院大王耶律仁先知北院枢密使事封吴王 【北院大王纪作南院大王吴王纪作宋王并误兹据本传改】 十二月丁亥以北府宰相赵王萧孝友为东京留守东京留守塔喇噶为北府宰相南院枢密使潞王察克为南院大王庚戌韩王萧惠徙封魏王致仕壬子夏国李谅祚遣使上表乞依旧臣属

二十年春正月戊戌 【据朔考正月无戊戌日兹姑仍之】 驻蹕混同江二月甲申遣前北院都监萧友括等使夏国索党项叛户己丑如苍耳泺三月壬子朔如黑水夏五月癸丑萧友括等使夏还李谅祚母表乞如党项权进马驼牛羊物己巳夏国遣使求唐隆镇及乞罢所建城邑以诏答之六月丙戌诏以所获李元昊妻及前后所俘夏人安置苏川以伐夏所获物遣使遗宋秋七月如秋山九月诏更定条制驻蹕中会川冬十月己卯括诸道军籍十一月庚申以特哩袞都监萧穆噜为左伊勒希巴甲子命东京留守司总领户部内省事十二月乙酉皇太后行再生礼肆赦

二十一年春正月辛亥如混同江二月如鱼儿泺夏四月癸未以国舅详袞萧阿拉为西北路招讨使封西平王六月丙子驻蹕永安山是月遣使诣五国诸部捕海东青鹞秋七月戊申祀天地壬子追尊太祖之祖为简献皇帝庙号玄祖太祖之考为宣简皇帝庙号德祖以燕赵王洪基为天下兵马大元帅知特哩袞事甲子如秋山戊辰以南院枢密使萧格为北院枢密使封吴王辛未如庆州八月戊子太尉乌哲薨冬十月戊寅驻蹕中会川丁亥夏国李谅祚遣使乞弛边备戊子如显懿二州甲午辽兴军节度使萧实喇封郑王南院大王潞王察克为南院枢密使封越王戊戌射虎于南萨哈巴十一月甲子次中会川丙寅录囚十二月戊戌以北府宰相塔喇噶为南京统军使郑王实喇北府宰相契丹行宫都部署耶律义先特哩袞

二十二年春正月乙巳如混同江二月丙子回鹘阿尔斯兰为邻国所侵遣使求援庚辰如春水三月癸亥李谅祚以赐诏许降遣使来谢丙寅如黑水泺夏四月戊子猎于鹤淀六月壬申驻蹕呼哩山秋七月庚申如黑岭九月壬辰夏国李谅祚遣使进降表甲午遣南面林牙高嘉努等奉诏抚谕之是月驻蹕额尔袞坡冬十二月丙申朔诏回鹘部副使以契丹人充庚子以应圣节曲赦徒以下罪

二十三年春正月己巳如混同江癸酉猎于双子淀壬辰如春水甲午猎于盘直坡夏四月癸丑猎于和济格尔五月己巳李谅祚乞进马駝诏岁贡之庚寅驻蹕永安山六月丙申如庆州秋七月己巳夏国李谅祚遣使来求婚甲戌如秋山己卯诏八房族巾幘冬十月丁酉驻蹕中京戊戌幸新建秘书监辛丑有事于祖庙癸丑以开泰寺铸银佛像曲赦在京囚丙子李谅祚遣使进誓表十一月壬申帝率羣臣上皇太后尊号曰仁慈圣善钦孝广德安静贞纯懿和宽厚崇觉仪天皇太后大赦内外官进级有差癸未录囚甲申羣臣上皇帝尊号曰钦天奉道佑世兴厯武定文成圣神仁孝皇帝册皇后萧氏曰贞懿慈和文惠孝敬广爱崇圣皇后十二月戊申如中会川

二十四年春正月癸亥如混同江辛巳宋遣使来贺二月己丑朔召宋使钓鱼赋诗癸巳如长春河三月癸未以太弟重元生子曲赦行在及长春镇北二州徒以下罪夏五月驻蹕南崖秋七月壬午如秋山次南崖之北峪帝不豫八月戊子大赦己丑帝崩于行宫年四十谥曰神圣孝章皇帝庙号兴宗

兴宗景福一年 【即圣宗太平十一年】 重熙二十四年凡二十五年

○道宗

道宗皇帝讳洪基字纳琳小字察喇兴宗皇帝长子也母曰仁懿皇后萧氏初封梁王重熙十一年进封燕国总领中丞司事明年总北南院枢密使事加尚书令进封燕赵国王二十一年为天下兵马大元帅知特哩衮事预朝政二十四年八月丁亥兴宗疾大渐召帝谕以治国之要己丑兴宗崩即皇帝位于柩前壬辰以皇太弟重元为皇太叔免汉拜不名癸巳遣使报哀于宋及夏高丽甲午遣重元安抚南京军民戊戌以遗诏命西北路招讨使西平王萧阿拉为北府宰相仍权知南院枢密使事北府宰相萧实喇为武定军节度使辛丑改元清宁大赦九月乙丑赐内外官爵赏有差庚午尊皇太后为太皇太后辛未遣左伊勒希巴萧穆噜翰林学士韩运以先帝遗物遗宋癸酉遣使以即位报宋丙子尊皇后为皇太后以上京留守宿国王辰类为南京留守壬午遣使赐高丽夏国先帝遗物冬十月丁亥以吴王仁先同知南京留守事陈王图伯特为南府宰相进封吴王壬寅以顺义军节度使实神努为南院大王十一月甲子葬兴宗皇帝于庆陵宋及高丽遣使来会丙寅以南院大王海古勒为中京留守北府宰相西平王萧阿拉进封韩王壬申次怀州有事于太宗穆宗庙甲戌谒祖陵戊寅冬至有事于太祖景宗兴宗庙十二月丙戌诏内外官秩满各言事仍转谕所部无贵贱老幼皆直言无讳戊子册妃萧氏为皇后进封弟越王和啰噶为鲁王许王阿林为陈王楚王尼噜古徙封吴王甲午以枢密副使姚景行为参知政事翰林学士吴湛为枢密副使参知政事同知枢密院事韩绍文为上京留守丙申宋遣使来贺即位戊戌诏设学养士颁五经传疏于学官癸卯以知涿州杨绩参知政事兼同知枢密院事庚戌以圣宗在时生辰赦上京囚

二年春正月丙辰诏州郡官决囚如部族例是月如鱼儿泺二月乙酉以左伊勒希巴萧穆噜知西南面招讨都监事三月丁巳以应圣节曲赦百里内囚是月遣使如宋【据宋史增辑】闰月己亥始行东京所铸钱乙巳以南京狱空进留守以下官夏六月丁巳诏宰相举才能之士戊午命有司籍军补边戌丁丑以南院枢密使赵王察克为上京留守同知南京留守事吴王仁先为南院枢密使乙酉遣使分道平赋税缮戎器劝农桑禁盗贼八月辛未如秋山九月庚子如中京冬十月丙子如中会川十一月戊戌以知左伊勒希巴事耶律华哩为伊勒希巴北院大王耶律仙童知黄龙府事甲辰羣臣上尊号曰天佑皇帝后曰懿德皇后大赦乙巳以皇太叔重元为天下兵马大元帅徙封赵王察克为魏王鲁王和啰噶为宋王陈王阿林为秦王吴王尼噜古进封楚王百官进秩有差十二月戊申以韩王萧阿拉为北院枢密使徙封陈王【

据阿拉传增辑】东京留守宿王辰类北府宰相宋王和啰噶上京留守秦王阿林知中丞司事甲寅上皇太后尊号曰慈懿仁和文惠孝敬广爱宗天皇太后

三年春正月庚辰如混同江二月己未如大鱼泺三月辛巳以楚王尼噜古为武定军节度使夏四月丙辰清暑于永安山五月己亥如庆陵六月辛未以魏王察克为特哩袞知枢密院事萧唐古南府宰相魏王特布东京留守秋七月乙酉如秋山九月庚子如中会川冬十一月丙子以左伊勒希巴萧穆鲁为契丹行宫都部署十二月庚戌禁职官于部内假贷贸易戊辰太皇太后不豫曲赦行在五百里内囚己巳太皇太后崩是岁再遣使如宋写宋主御容【据宋史增辑】

四年春正月壬申朔遣使报哀于宋夏如混同江钓鱼癸酉宋遣使奉宋主绘像来二月丙午诏伊勒希巴诸路鞫死罪仍令别州县覆案称冤者即具奏庚戌如鱼儿泺三月戊寅募天德镇武东胜等处勇捷者籍为军甲午肆赦夏四月丁卯宋遣使吊祭五月乙酉如永安山清暑是月遣使致太后遗物于宋【据宋史增辑】六月乙丑以北院枢密使郑王萧格为南院枢密使徙封楚王南院枢密使吴王仁先为北院枢密使秋七月壬午猎于黑岭九月遣使如宋【据宋史增辑】冬十月戊戌朔以同知东京留守事海古勒为南院大王保安军节度使希达为奚六部大王十一月癸酉行再生及柴册礼庚寅大赦以吴王仁先为南京兵马副元帅徙封隋王丙戌祠木叶山十二月辛丑弛塔纳水獭裘之禁辛亥以南院枢密使楚王萧格复为北院枢密使闰月己巳赐皇太叔金券

五年春如春州夏六月甲子朔驻蹕纳克泺己丑以南院枢密使萧阿苏为北府宰相枢密副使耶律伊逊南院枢密使特哩袞察克辽兴军节度使鲁王谢嘉努武定军节度使东京留守吴王特布西京留守秋七月丁酉以乌尔古德呼勒详袞萧穆噜为左伊勒希巴冬十月壬子朔如南京十一月禁猎十二月壬戌以北院林牙奚玛噜为右伊勒希巴

六年春如鸳鸯泺夏五月己酉驻蹕纳克泺六月戊午以东北路女真详袞高嘉努为特哩袞壬戌遣使录囚丙寅中京置国子监命以时祭先圣先师癸未以隋王仁先为北院大王冬十月甲子驻蹕藕丝淀

七年春三月庚戌如春州以耶律伊逊知北院枢密使事夏五月丙戌清暑于永安山辛亥杀东京留守陈王萧阿拉六月甲子以萧穆噜为顺义军节度使戊辰行再生礼丁丑以楚王尼噜古知南院枢密使事秋九月丁丑驻蹕藕丝淀冬十一月壬午以知黄龙府事耶律阿勒扎为南院大王【本传南院作北院】

八年春正月癸丑如混同江二月驻蹕纳克冻三月戊申楚王萧格致仕进封郑王夏五月武都温特哩袞图图尔噶等乞岁贡马駝六月丙子朔驻蹕图古勒辛丑以右伊勒希巴奚玛嚕为奚六部大王秋七月甲子射熊于爱实拉冬十月甲戌朔驻蹕都尔嘉十二月庚辰以知北院枢密使事萧特古斯为北院枢密使癸未如西京戊子以皇太后行再生礼曲赦西京囚

九年春正月辛亥如鸳鸯泺辛未禁民鬻铜三月辛未宋主禛殂以侄曙为子嗣位遣使来告【据宋史增辑】夏五月丙午以隋王仁先为南院枢密使徙封许王是月清暑于赫呼苏六月遣使如宋祭吊【据宋史增辑】秋七月丙辰如太子山戊午皇太叔重元与其子楚王尼嚕古及陈王辰祿同知北院枢密使事萧呼图克卫王特布等反南院枢密使许王仁先知北枢密院事赵王耶律伊逊等御之庚申重元伏诛壬戌以仁先为北院枢密使进封宋王加尚父耶律伊逊南院枢密使罕嘉努殿前都点检封荆王耶律良以密告变授汉人行宫都部署戊辰以黑白羊祭天八月庚午朔遣使安抚南京吏民冬十月庚午以六院部太保耶律和卓知南院大王事是月驻蹕藕丝淀十一月辛丑以南院宣徽使萧玖格为北府宰相是遣使如宋贺即位【据宋史增辑】

十年春正月己亥北幸二月禁南京民决水种粳稻秋七月壬申诏决诸路囚辛巳禁僧尼私诣行在是月猎于赤山九月壬寅如怀州冬十月壬辰朔驻蹕中京戊午禁民私刊印文字十一月甲子定吏民衣服之制丁丑诏求干文阁所阙经籍命儒臣校讎庚辰以彰国军节度使韩色实为特哩袞诏南京不得私造御用彩段私货铁十二月癸巳以北院大王萧乌尔古纳为契丹行宫都部署是岁遣耶律烈萧禧等使于宋宋遣使来贺生辰及正旦【按此后宋辽使命往来辽史多阙而不载兹据宋史增辑其在专使犹可因事系月而凡泛使类于年终补之谨识于此】

咸雍元年春正月辛酉朔羣臣上尊号曰圣文神武全功大略广智聪仁睿孝天佑皇帝改元大赦立梁王浚为皇太子内外官赐级有差甲子如鱼儿泺三月丁亥以知兴中府事杨绩知枢密院事夏四月辛卯以知枢密院事张嗣复知兴中府事庚子清暑于图古勒六月宋使来议疆事【据宋史增辑】秋七月如黑岭九月乙亥驻蹕藕丝淀丁丑以左伊勒希巴纒古为孟父房详袞冬十月丁亥朔如医巫闾山十二月甲午以辽王仁先为南京留守徙封晋王辛亥以南京留守萧惟信为左伊勒希巴是岁遣耶律仲达萧惟辅等使于宋宋遣使来贺生辰及

正旦

二年春正月丁巳如混同江宋贺正使王严卒以礼送还癸未如山榆淀是月复改国号曰辽【据宋史增辑】二月甲午以武定军节度使姚景行为南院枢密使三月辛巳以东北路详袞耶律韩福努为北院大王夏五月乙亥驻蹕图古勒辛巳以户部使刘洸为枢密副使秋七月癸丑朔以西北路招讨使萧珠展为北府宰相左伊勒希巴萧惟信南院枢密使姚景行罢庚申录囚辛酉景行复前职丁卯如藕丝淀以岁旱遣使振山后贫民九月壬子以参知政事韩孚为枢密副使冬十二月壬午以知枢密院事杨绩为南院枢密使枢密副使刘洸参知政事戊子僧守志加守司徒丁酉以西京留守和卓为南院大王辛丑以萧珠展为武定军节度使是岁萧靖等使于宋宋遣使来贺生辰及正旦

三年春正月辛亥如混同江三月癸亥宋主曙殂子頊嗣位遣使告哀即遣右护卫太保萧托卜嘉翰林学士陈觉等吊祭闰月辛卯驻蹕春州北淀乙巳以萧乌尔古纳为北府宰相夏五月壬辰驻蹕纳克冻六月庚戌宋遣使馈其先帝遗物辛亥宋以即位遣使来报即遣知黄龙府事萧托古斯中书舍人马铉往贺壬戌南府宰相韩王萧唐古罢壬申以广德军节度使耶律瑞努为南府宰相度支使赵徽参知政事秋七月如赤山九月癸卯如南京是月宋遣使来报谢且贺生辰及正旦【据宋史增辑】冬十二月丁未以参知政事刘洸为枢密副使东北路详袞果巴南院大王枢密直学士张孝杰参知政事己酉以张孝杰同知枢密院事丁巳行再生礼赦死罪以下是月夏国王李谅祚薨是岁遣萧杰等贺宋正旦

四年春正月丙子如鸳鸯泺丁亥猎于炭山辛卯振西京饥民二月甲辰朔诏元帅府募军壬子夏国王李谅祚子秉常遣使告哀丁卯北幸三月丙子遣使如夏国吊祭甲申振应州饥民夏五月丙戌驻蹕图古勒六月丙寅以北院林牙耶律卓克算为北院大王右伊勒希巴萧素飒中京留守秋七月丙子猎于黑岭九月己亥驻蹕藕丝淀冬十月辛亥曲赦南京徒以下囚复永清武清安次固安新城归义容城诸县一岁租戊辰册李秉常为夏国王是岁遣耶律公质等使于宋宋遣使来贺生辰及正旦

五年春三月准布叛以晋王仁先为西北路招讨使讨之夏六月己亥驻蹕图古勒壬戌以南院枢密使萧惟信知北院枢密使事秋九月戊辰仁先奏准布捷冬十月己亥驻蹕藕丝淀十一月丁丑五国阿里部叛命萧素飒讨之闰月己未僧志福加守司徒十二月甲子行皇太子再生礼减诸路徒以下罪是岁遣耶律昌萧惟禧等使于宋宋遣使来贺生辰及正旦

六年春正月甲午如千鹅泺夏五月甲辰清暑于图古勒甲寅设贤良科六月乙酉以特哩衮耶律伯为中京留守秋七月辛亥猎于和罗努克特八月丙子耶律伯薨九月庚戌如藕丝淀冬十月壬申西北路招讨使擒准布酋长来献十一月乙卯禁鬻生熟铁于回鹘准布等界十二月戊午加圆释法钧二僧并守司空己未以坤宁节赦徒罪以下是岁遣耶律宽萧遵道等使于宋宋遣使来贺生辰及正旦

七年春正月戊子如混同江二月丙寅以南院枢密使姚景行知兴中府事三月己酉如黑水夏四月癸酉如纳克泺乙亥禁布帛短狭不中尺度者六月癸未南院大王果巴罢秋七月甲申朔以东北路详衮哈尔吉为南院大王西南面招讨使实德努为奚六部大王己丑遣使按五京囚庚子如藕丝淀八月辛巳置佛骨于招仙浮图罢猎禁屠杀冬十月己卯如医巫闾山壬戌以南府宰相耶律瑞努为南京统军使十一月戊子免南京流民租己丑振饶州饥民十二月壬子以契丹行宫都部署耶律呼图克知北院枢密使事知北院枢密使事萧惟信为南府宰相兼契丹行宫都部署丁巳汉人行宫都部署李仲禧北院宣徽使刘霁枢密副使王观都承旨杨兴功各赐国姓是岁遣萧广耶律纪等使于宋宋遣使来贺生辰及正旦

八年春正月癸未乌尔古德呼勒部详衮耶律超等奏北边捷甲申如鱼儿泺二月戊辰以岁饥复武安州租税振恩蔚顺惠等州民夏四月壬子振义饶二州民丁巳驻蹕图埒实己卯清暑于图古勒五月壬午晋王仁先薨六月甲寅振易州贫民己未振中京甲子振中兴府甲戌封北府宰相杨绩为赵王枢密副使耶律观参知政事兼知南院枢密使事秋七月己卯庆州靳文高八世同居诏赐爵丙申振饶州饥民丁酉如黑岭闰月辛未射熊于羖羊山九月甲子驻蹕藕丝淀冬十月己丑参知政事耶律观罢十一月庚戌复祖州税十二月戊辰汉人行宫都部署耶律仲禧封韩国公以枢密副使参知政事赵徽为武定军节度使枢密副使柴德滋参知政事汉人行宫副部署耶律大悲努为都部署同知南院枢密使事萧罕嘉努知左伊勒希巴事丁丑以坤宁节大赦是岁遣耶律适萧瑜等使于宋宋遣使来贺生辰及正旦

九年春正月丁未如双泺夏四月壬辰如旺国崖秋七月甲辰猎于大熊山戊申八锡林德呼勒人杀其节度使以叛己酉诏威乌尔古部军分讨之丙寅南京奏归义涑水两县蝗飞入宋境八月丙申以耶律仲禧为南院枢密使九月癸卯驻蹕都尔嘉冬十月如阴山遂如西京十一月戊午复行幸所过租一岁甲子南院大王哈尔吉罢十二月辛未以知北院枢密使

事耶律伊逊为中京留守南院宣徽使耶律萨喇为南院大王是岁置耶律窳耶律洞等使于宋宋遣使来贺生辰及正旦

十年春正月乙卯如鸳鸯泺二月癸未蠲平州复业民租赋三月甲子如图古勒以耶律超为北院大王是月遣林牙萧禧使于宋议河东疆地宋使来报聘【据宋史增辑】夏四月辛未以奚人达嚕三世同居赐官旌之丁酉复遣枢密副使萧素与宋议疆地于代州【据宋史增辑】五月丙寅录囚六月壬申诏臣庶言得失秋七月丙辰如秋山九月庚戌如东京癸亥祠木叶山冬十月丁卯驻蹕藕丝淀十二月辛巳改明年元大赦是岁遣耶律永窳耶律窳等使于宋宋遣使来贺生辰及正旦

太康元年春正月乙未如混同江壬寅振云州饥二月乙酉驻蹕大鱼泺丁亥以鹰坊使耶律扬鲁为工部尚书三月复遣萧禧如宋议疆事宋遣使来报聘【据宋史增辑】夏四月丙子振平州饥乙酉如犊山闰月丙午振平滦二州饥六月癸巳以兴圣宫使奚谢嘉努知奚六部大王事癸卯遣使案诸路囚以特哩袞大悲努为始平军节度使参知政事柴德滋武定军节度使丙辰诏皇太子总领朝政以武定军节度使赵徽为南府宰相枢密副使杨遵勗参知政事秋七月辛酉朔猎于平地松林丙寅振南京贫民是月宋遣使割地以分水岭为界【据续通鉴纲目增辑】九月乙亥驻蹕藕丝淀己卯以南京饥复其租税一岁仍出钱粟振之冬十月西北路酋长希斯吹丹双宽等来降十一月辛酉皇后被诬赐死杀伶人赵惟一高长命十二月己丑以南京统军使耶律瑞努为特哩袞汉人行宫都部署耶律霖枢密副使同知东京留守事萧道拉伊勒希巴庚寅赐张孝杰国姓壬辰以西京留守萧雅嚕为左伊勒希巴是岁遣耶律景熙耶律世通等使于宋宋遣使来贺生辰及正旦

二年春正月己未如春水庚辰驻蹕双泺二月戊子振黄龙府饥癸丑复南京路租税一岁三月辛酉皇太后崩壬戌遣殿前副点检耶律辖呼报哀于宋丁卯大赦戊寅以皇太后遗物遣使遣宋夏六月戊子宋及高丽夏国各遣使吊祭己亥驻蹕图古勒壬寅以北院枢密使魏王耶律伊逊为中京留守丁未册皇后萧氏封其父祗候郎君必呼哩为赵王叔西北路招讨使额哩页辽西郡王汉人行宫都部署驸马都尉锡默柳城郡王参知政事杨遵勗知南院枢密使事北院枢密副使萧苏色知北院枢密使事汉人行宫都部署刘洗参知政事己酉南府宰相赵徽罢秋七月戊辰如秋山癸酉锡默薨九月戊午以南京蝗复明岁租税己卯驻蹕藕丝淀冬十月戊戌中京留守魏王耶律伊逊复为北院枢

密使十二月己丑以左伊勒希巴萧托卜嘉为南院统军使是岁遣耶律庶几耶律连等使于宋宋遣使来贺生辰及正旦

三年春正月癸丑如混同江乙卯省诸道贡金帛及停所输尚方银二月壬午朔东北路统军使萧罕嘉努加尚父封吴王己丑如鱼儿泺
夏四月乙酉泛舟黑龙江五月乙巳驻蹕犊山乙亥耶律伊逊奏右护卫太保察喇等告北院枢密使萧苏色等八人谋立皇太子帝以无状不治出苏色等补外萨巴等徙于边丙子以西北路招讨使辽西王萧额哩页为北府宰相兼知契丹行宫都部署事戊寅诏告谋逆事者重加官赏六月己卯朔耶律伊逊令牌印郎君萧额都温诬首尝预苏色等谋籍其姓名以告即命伊逊等鞫治杖皇太子囚之宫中辛巳杀宿直言德埒哩等三人壬午杀宣徽使托卜嘉等二人癸未杀始平军节度使萨喇等十人又遣使杀上京留守苏色及萨巴等六人乙酉杀耶律托卜嘉及其弟辰类丙戌废皇太子为庶人囚之上京杀东京留守同知耶律和勒博辛卯杀苏色等诸子戊申遣使按五京诸道狱是月避暑于永安山秋七月辛亥牌印郎君额都温授驸马都尉始平军节度使壬子以知北院枢密副使萧罕嘉努为汉人行宫都部署乙丑如秋山八月庚寅萧罕嘉努薨冬十月辛丑驻蹕藕丝淀十一月耶律伊逊遣盗杀故太子浚于上京闰十二月戊午以北府宰相辽西王萧额哩贡知北院枢密使事左伊勒希巴耶律雅克为契丹行宫都部署丙寅预行正旦礼是岁遣萧仪耶律孝淳等使于宋宋遣使来贺生辰及正旦

四年春正月庚辰如春水甲午振东京饥二月乙丑驻蹕扫获野戊辰以东路统军使耶律旺玖为特哩袞夏四月辛亥高丽遣使乞赐鸭渌江以东地不许五月丙戌驻蹕散水原六月猎于黑岭秋八月癸卯诏有司决滞狱九月乙未驻蹕藕丝淀冬十月癸卯以参知政事刘仲为保静军节度使十一月丁亥禁士庶服用锦绣日月山龙之文庚寅以南院枢密使耶律仲禧为广德军节度使辛卯锦州民张宝四世同居命其诸子三班院祇候十二月丁卯以北院枢密副使耶律霖知北院枢密使事是岁遣耶律仲懿耶律隆等使于宋宋遣使来贺生辰及正旦

五年春正月壬申如混同江癸酉赐宰相耶律孝杰名仁杰乙亥如山榆淀三月辛未以宰相仁杰获头鹅加侍中壬辰以北院枢密使魏王耶律伊逊知南院大王事加裕悦知北院枢密使事耶律霖为北院枢密使北院枢密副使耶律德勒岱知北院枢密使事左伊勒希巴耶律世迁同知北院枢密使事夏四月己未如纳克泺五月丁亥以契丹行宫都部署耶律雅克为南府宰相北面林牙耶律永懿为伊勒希巴同知

南院枢密使事萧托卜嘉及殿前副点检驸马都尉萧绰哈并封兰陵郡王是月猎白石山六月丁巳以北府宰相辽西王萧额哩页为西北路招讨使己未遣使录囚秋七月己卯猎于夹山九月壬午禁扈从扰民冬十月己亥驻蹕都尔嘉壬子诏惟皇子仍一字王余并削降丁己振平州贫民己未以赵王杨绩为辽西郡王魏王耶律伊逊降封混同郡王吴王萧罕嘉努以兰陵郡王致仕十一月丁丑召沙门守道开坛于内殿癸未复南京流民差役三岁被火之家租税一岁十二月乙卯如西京戊午行再生礼赦杂犯死罪以下是岁遣萧晟萧窳等使于宋宋遣使来贺生辰及正旦

六年春正月癸酉如鸳鸯泺辛卯以耶律伊逊知兴中府事三月庚寅封孙延禧为梁王以忠顺军节度使耶律佛德南院大王耶律仲禧南院枢密使户部使陈毅并参知政事夏四月乙卯猎于炭山五月壬申免平州复业民租赋一岁庚寅以旱祷雨命左右以水相沃六月戊戌驻蹕约克泺戊申以度支使王绩参知政事秋七月戊辰观市甲申猎于沙岭九月壬寅祠木叶山己酉驻蹕藕丝淀冬十月丁卯以耶律仁杰为武定军节度使庚午参知政事刘诰罢癸酉以陈毅为汉人行宫都部署王绩同知枢密院事十二月甲子以耶律德勒岱为孟父详袞乙丑以萧托卜嘉为北府宰相耶律世迁知北院枢密使事耶律慎思同知北院枢密使事庚午复西京流民租赋一岁甲戌减民赋丁亥豫行正旦礼戊子如混同江是岁遣耶律永芳萧伟等使于宋宋遣使来贺生辰及正旦

七年春二月甲子如鱼儿泺夏五月壬子驻蹕岭西甲寅以萧托卜嘉兼殿前都点检萧绰哈为汉人行宫都部署兼知枢密院事六月丁卯以翰林学士王言敷参知政事封北院宣徽使石笃漆水郡王秋七月戊子如秋山八月丁卯射鹿赤山加围场使尼格为静江军节度使九月戊子次怀州辛卯次祖州乙巳驻蹕藕丝淀冬十月戊辰以特哩袞旺玖为南院大王伊勒希巴奚绰奇为彰国军节度使十一月乙酉诏岁出官钱振诸宫分及边戍贫户十二月丁卯削武定军节度使耶律仁桀爵辛未囚知兴中府事耶律伊逊于莱州是岁遣耶律佑萧福全等使于宋宋遣使来贺生辰及正旦

八年春正月甲申如混同江二月戊午如山榆淀辛酉诏北南院官凡给驿者必先奏闻己巳夏国获宋将张天一遣使来献壬申以耶律佛德为南府宰相兼知北院枢密使雅克为特哩袞萧托卜嘉兼知契丹行宫都部署事三月庚戌黄龙府女真部长钟鼐率部民内附是月诏行柁黍所定升斗夏四月壬戌以耶律仁迁为上京留守六月辛亥驻蹕纳克泺丁巳以

耶律佛德为北院枢密使耶律超格南府宰相刘筠南院枢密使萧托卜嘉兼知北院枢密使事王绩汉人行宫都部署萧绰哈国舅详袞丙子以耶律慎思知右伊勒希巴事秋七月甲午如秋山九月丁未驻蹕藕丝淀冬十一月壬午以伊实大王萧哈噶为南院宣徽使权知奚六部大王事图罕为本部大王十二月癸丑乌尔古德呼勒统军使耶律玛古为北院大王庚申降皇后为惠妃出居干陵是岁遣耶律永瑞耶律仪等使于宋宋遣使来贺生辰及正旦

九年春正月辛巳如春水夏五月如黑岭六月己未驻蹕散水原甲子以耶律阿苏为契丹行宫都部署耶律慎思北院枢密副使庚午诏诸路检括脱户罪至死者原之闰月丁丑以汉人行宫副部署罕努为南院大王戊寅追谥庶人浚为昭怀太子己丑以知兴中府事邢熙年为汉人行宫都部署汉人行宫都部署王绩为南院枢密副使秋七月乙巳猎于马尾山癸亥禁外官部内贷钱取息及使者馆于民家八月高丽王徽薨九月己酉射熊于白石山加围场使尼格左金吾卫大将军己巳以高丽王徽子三韩国公勋权知国事冬十月己卯南院枢密使刘筠薨壬辰耶律伊逊伏诛十一月丙午进封梁王延禧为燕王大赦以南院宣徽使萧哈噶为南府宰相三司使王经参知政事兼知枢密事十二月丁亥以邢熙年知南院枢密使事辛卯以王言敷为汉人行宫都部署高丽三韩公王勋薨是岁遣萧固等使于宋宋遣使来贺生辰及正旦

十年春正月辛丑朔如春水戊辰如山榆淀二月庚午朔蒙古国遣使来聘夏五月壬戌驻蹕散水原六月壬辰禁毁制钱为器秋七月甲辰如黑岭九月癸亥驻蹕藕丝淀冬十二月改明年元赦杂犯死罪以下是岁遣萧浹耶律襄等使于宋宋遣使来贺生辰及正旦

钦定续通志卷四十五

●钦定续通志卷四十六 辽纪六

辽纪 【六】

道宗 【二】

天祚皇帝

耶律达实

○道宗二

大安元年春正月丁酉如混同江癸卯以王绩知南院枢密使事邢熙年为中京留守戊申以枢密直学士杜公谓参知政事二月辛未如山榆淀夏四月乙酉宋主頊殂子煦嗣位使来告哀辛卯西幸六月戊辰驻蹕图古勒壬申以王绩为南府宰相萧托卜嘉兼知南院枢密使事丁丑遣使吊祭于宋戊寅宋遣使来馈其先帝遗物秋七月乙巳遣使贺宋主即位戊午猎于赤山八月丁卯如庆州冬十月癸亥驻蹕好草淀

甲申以萧托卜嘉为南院枢密使十一月丁酉以南女真详袞萧伯哩为北府宰相辛亥史臣进太祖以下七帝实录丙辰遣使册三韩国公王
勋子运为高丽国王十二月甲戌宋使来谢吊祭遣萧睦使于宋贺明年正旦 【是后宋贺生辰正旦使宋史亦多失载】

二年春正月辛卯如混同江二月癸酉驻蹕山榆淀夏四月戊戌北幸五月丁巳以牧马蕃息进羣牧官阶乙亥驻蹕纳克冻戊寅宰相梁颖出知兴中府事六月丁亥朔以左伊勒希巴耶律坦为特哩袞知枢密院事耶律额特呼兼知左伊勒希巴事癸卯遣使按诸路狱甲辰以同知南京留守事耶律纳延知右伊勒希巴事戊申以契丹行宫都部署耶律阿苏兼知北院大王事秋七月丁巳惠妃母燕国夫人锡库以厌魅事觉伏诛子兰陵郡王萧绰哈除名置边郡戊午猎于沙岭乙酉振辽州贫民九月庚午还上京壬申振上京中京贫民冬十月乙酉朔以枢密副使窦景庸知枢密院事丁亥夏国王李秉常薨遣使诏其子干顺知国事十一月甲戌为燕王延禧行再生礼曲赦上京囚癸未振干显成懿四州贫民十二月辛卯以兰陵郡王萧托卜嘉为南院枢密使

三年春正月乙卯如鱼儿泺甲戌振南京贫民仍复其租赋二月丙戌振中京饥甲辰除安泊逃户征偿法三月己未复锦州贫民租一岁甲戌复上京贫民租如锦州夏四月戊子赐中京贫民帛及免诸路贡输之半丙申赐威乌兰古部贫民帛庚子如凉陁甲辰南府宰相王绩薨乙巳振义州及诸路流民秋七月丙辰猎于黑岭丁丑秦越王阿林薨九月乙丑驻蹕锡里济冬十月庚辰以参知政事王经为三司使壬辰罢节度使以下官进珍玩十一月甲寅以特哩袞耶律坦同知南京留守事辽兴军节度使耶律旺玖为南府宰相十二月己卯以枢密直学士吕嗣立参知政事是岁遣萧德崇使于宋

四年春正月庚戌如混同江庚午免上京逋逃及贫户税赋丁丑曲赦西京役徒二月己丑如鱼儿泺甲午曲赦春州役徒终身者皆五岁免己亥如春州赦泰州役徒三月乙丑免高丽岁贡己巳振上京及平锦来三州饥夏四月己卯振苏吉复录铁五州贫民并免其租税甲申振庆州贫民乙酉减诸路常贡服御物丁酉立入粟补官法癸卯西幸五月乙丑振祖州贫民丁巳诏凡役徒终身者五岁皆免己未振春州贫民六月庚辰驻蹕散水原丁亥命燕王延禧知中丞司事同知南院枢密使事耶律聂呼知右伊勒希巴事知右伊勒希巴事耶律纳延同知南院枢密使事庚寅北院枢密使耶律佛德罢秋七月戊申曲赦奉圣州役徒丙辰遣使册李干顺为夏国王庚申如秋山己巳禁钱出境冬十月丁

丑猎于辽水之滨己卯驻蹕藕丝淀癸未免百姓所贷官粟己丑知北院枢密使事耶律阿苏封漆水郡王癸巳以伊实大王耶律迪哩知西北路招讨使事权知西北路招讨使事萧休格知伊实大王事壬寅诏诸部长官亲鞫狱讼十二月戊寅南府宰相耶律旺玖罢癸未以孟父详袞耶律慎思为中京留守闰月癸卯朔豫行正旦礼丙午如混同江

五年春正月癸未如鱼儿泺夏四月甲辰以知奚六部大王事尼格为本部大王壬子猎于北山五月丁亥驻蹕齐老岭己亥以同知南院枢密使事耶律纳延知右伊勒希巴事左祗候郎君班详袞耶律聂呼知北院大王事六月壬戌以参知政事王言敷枢密副使为前枢密副使贾士勋参知政事秋七月庚午猎于沙岭九月壬辰驻蹕藕丝淀冬十月乙巳诏复行旧法令庚申以辽兴军节度使哈噶为伊实大王冬十一月丁卯朔以燕王延禧生子大赦是岁遣萧寅等使于宋

六年春正月如混同江二月辛丑驻蹕双山夏四月庚子以同知南院枢密使事耶律托多知左伊勒希巴事五月壬辰驻蹕散水源六月甲寅遣使决五京囚秋七月丙子如黑岭冬十月丁酉驻蹕藕丝淀十一月己巳以南府宰相竦景庸为武定军节度使

七年春正月壬戌如混同江二月己亥驻蹕鱼儿泺壬寅诏给渭州贫民耕牛布绢三月丙辰驻蹕黑龙江夏四月丙寅以汉人行宫副部署耶律古裕知伊实大王事六月甲午驻蹕齐老岭癸卯以权知东京留守萧托辉为契丹行宫都部署秋八月壬寅谒庆陵九月丙申还上京乙亥日本国来贡冬十月辛巳以燕王延禧为天下兵马大元帅总南北院枢密使事十一月庚子如藕丝淀甲子望祀木叶山是岁遣耶律迪使于宋

八年春正月乙酉如山榆淀三月己亥驻蹕图埒实淀丁未曲赦中京蔚州役徒夏四月丁丑猎于西山提克德酋长呼喇济来附五月甲辰驻蹕齐老岭秋七月丁亥猎于沙岭九月乙巳驻蹕藕丝淀冬十月庚戌朔遣使如宋丙辰振西北路饥辛酉准布默古斯杀金吾特古斯以叛遣奚六部图哩耶律果桑发诸蕃部兵讨之壬申南府宰相王经薨戊寅以左伊勒希巴耶律聂呼为彰圣军节度使十一月戊子以枢密副使王是敦兼知枢密院事权参知政事汉人行宫都部署奚和哩布知奚六部大王事丁酉振通州饥民戊申北院大王赫噜薨

九年春正月庚辰如混同江二月猎于图古哩克默古斯来侵三月西北路招讨使耶律和啰木萨克讨之与战不利夏四月癸酉猎于西山六月丁未朔驻蹕散水源庚申以辽兴军节度使荣格为南院大王知左伊勒希巴事

耶律托多为左伊勒希巴秋七月辛卯如黑岭八月猎于满雅都山九月癸卯振西北路贫民冬十月庚戌默古斯伪降既而乘虚来袭西北路招讨使托卜嘉死之准布乌库哩叛达勒达博索摩并寇倒塌岭壬子籍诸路兵癸丑以南院大王特默同知南京留守事命郑嘉努率兵援倒塌岭甲寅驻蹕藕丝淀以左伊勒希巴耶律托多围场都管萨巴并为西北路行军都监乙卯诏以马三千给乌尔古部丙辰准布长希达掠西路羣牧丁巳振西北路贫民己未以燕王延禧生子肆赦壬戌以枢密直学士赵廷睦参知政事兼同知南院枢密使事癸亥乌尔古德呼勒统军使萧休格奏讨准布等部捷甲子宋遣使告其母后曹氏哀即遣使吊祭十一月辛巳特默等奏讨准布捷十二月丙辰宋遣使来馈其母后遗物

十年春正月如春木戊子乌尔古济等来降达勒达博索摩二部来侵四捷军都监特默死之二月丙午西南面招讨司奏讨博索摩捷癸丑巴雅尔布琳通古和克布格等来降达勒达来侵三月山北路副部署萧阿鲁岱奏讨达勒达捷夏四月壬寅朔提克德敏达苏鲁克都等各率所部来附甲辰驻蹕春州北平淀丙午乌尔古部节度使耶律辰嘉努奏讨察察哩捷庚戌以知北院枢密使事耶律额特埒为都统伊勒希巴耶律托多为副统龙虎卫上将军耶律呼哩为都监讨默古斯辛亥休格奏巴哩巴入部来侵袭破之己巳除玉田密云流民租赋一年闰月庚子赐西北路贫民钱达勒达博索摩二部来降五月甲辰驻蹕齐老岭甲寅括马戊午德呼勒等部来侵招讨司以兵击破之敦睦宫太师耶律爱努及其子死之辛酉以知国舅详袞事萧阿里同领西北路行军事六月辛未宋遣使来谢吊祭乙酉乌尔古德呼勒统军使休格以罪除名己亥禁边民与蕃部为婚是夏高丽国王运薨其子昱使来告即遣使赙赠秋七月庚子朔猎于赤山是月准布等寇倒塌岭东北路统军使耶律实鲁击走之九月己未以南院大王特默为南院枢密使甲子德呼勒诸酋来降是月额特埒破默古斯冬十月丙子驻蹕藕丝淀癸巳西北路统军司获准布长博硕科富鲁等以献十一月乙巳提克德通古准布迪哩等来降达勒达及博索摩等复来侵山北路副部署阿鲁岱击败之十二月甲戌以参知政事赵廷睦兼同知枢密院事枢密副使王师儒参知政事兼同知枢密院事乙酉诏改明年元减杂犯死罪以下仍除贫民租赋戊子西北路统军司奏讨默古斯捷

寿隆元年春正月己亥如混同江庚戌博索摩来侵萧阿鲁岱等击破之乙卯振奉圣州贫民二月戊辰赐左右二皮室贫民钱乙亥驻蹕

鱼儿泺三月丙午赐东北路贫民绢夏四月丁卯额特埒奏讨尼都格尔捷五月乙未朔以左伊勒希巴耶律托多为特哩袞南京宣徽使耶律特默为北院大王丁巳驻蹕特哩岭六月己巳以知奚六部大王事和勒博为本部大王权参知政事赵孝严为汉人行宫都部署秋七月癸卯猎于沙岭甲寅额特埒奏讨默古斯捷九月甲寅祠木叶山冬十月甲子驻蹕藕丝淀甲戌以北面林牙耶律大悲努为右伊勒希巴癸未以参知政事王师儒为枢密副使汉人行宫都部署赵孝严参知政事十一月己亥以都统额特埒为西北路招讨使封漆水郡王十二月癸亥朔以知北院枢密使事耶律阿苏为北院枢密使

二年春正月甲午如春水癸卯西南面招讨司讨博索摩破之乙卯驻蹕锡讷苏辛酉给乌尔古德呼勒威乌尔古部贫民牛二月癸亥振达玛琳巴克部是月女真伐赫舍哩部阿苏大败之阿苏来奔【据续通鉴纲目增辑】夏四月己卯振西北边军六月辛酉驻蹕萨拉纳秋七月丙午猎于赤山九月丙午徙乌尔古德呼勒部于乌纳水以扼北边之冲冬十月戊辰驻蹕藕丝淀十二月己未额特埒讨默尔吉破之壬戌南府宰相耶律都勒斡致仕癸亥以萧托卜嘉为北府宰相耶律大悲努殿前都点检乙亥夏国献宋俘

三年春正月丁亥如春水癸卯驻蹕双山二月甲辰朔以南京水遣使振之丙午准布长穆色克尼穆尔古长托果斯默尔吉长呼喇巴等请复旧地贡方物许之高丽王昱薨夏四月南府宰相赵廷睦出知兴中府事以参知政事牛温舒兼同知枢密院事五月癸亥额特埒讨准布破之己巳驻蹕萨拉纳六月甲申诏罢诸路驰驿贡新辛丑遣使如宋讽与夏和庚戌以契丹行宫都部署耶律乌页为南院大王秋七月庚子朔猎于黑岭八月己亥博啰满达部长率其民来归九月壬申驻蹕藕丝淀丁丑以武定军节度使梁浚为汉人行宫都部署戊寅额特埒奏讨默尔吉捷冬十月庚戌以西北路招讨使额特埒为南府宰相十一月己未以中京留守韩资让知枢密院事同知南院枢密使事萧药师努知右伊勒希巴丁丑西北路统军司奏讨默尔吉捷

四年春正月壬子如鱼儿泺辛未宋使馈锦绮三月庚午如春州夏五月癸酉纳延奏北边捷甲辰驻蹕萨拉纳六月戊寅朔夏国为宋所攻遣使求援丁酉以辽兴军节度使聂埒为特哩袞以耶律果桑为南京统军使甲午以参知政事牛温舒兼知中京留守事秋七月戊午如黑岭冬十月乙亥朔驻蹕藕丝淀己卯以南府宰相额特埒兼契丹行宫都部署十一月乙巳朔遣知右伊勒希巴事萧药师努枢密直学士耶律

使宋讽与夏和 【宋史作签书枢密院事萧德崇】 辛酉夏复遣使求援十二月壬辰为燕王延禧行再生礼曲赦三百里内囚

五年春正月乙巳如鱼儿泺己酉诏夏国王李干顺伐博索摩等部夏五月戊辰以南府宰相额特埒兼西北路招讨使禁军都统己巳驻蹕沿柳湖六月甲申以奚六部大王和勒博为契丹行宫都部署知右伊勒希巴事萧药师努南面林牙兼知契丹行宫都部署事己亥以兴圣宫使耶律赫牙努为右伊勒希巴秋七月辛亥如达哩库山闰九月丙子驻蹕都尔嘉冬十月己亥朔高丽王颛遣使乞封册丁巳额特埒奏讨尼都格尔捷丙寅以同知南京留守事萧达勒达知北院枢密使事丁卯宋遣使来聘戊辰振辽州饥仍免今岁租赋十一月甲戌振南北二处十二月甲子以参知政事赵孝严为汉人行宫都部署汉人行宫都部署梁援为辽兴军节度使

六年春正月癸酉南院大王耶律乌页薨壬午太师致仕托海起为奚六部大王丁亥如春水辛卯额特埒执默古斯来献丙申诏问民疾苦二月丁未以乌尔古部节度使辰嘉努为南院大王己酉磔默古斯于市癸丑出绢赐五院贫民辛酉宋主煦殂弟佶嗣位遣使来告即日遣使吊祭三月甲申弛朔州山林之禁夏四月癸卯如炭山五月壬午乌尔古部讨察察哩破之乙酉汉人行宫都部署赵孝严薨丙午驻蹕纳克泺辛卯宋遣使馈其先帝遗物乙未以东京留守和啰木萨噶为特哩袞南院宣徽使萧常格为汉人行宫都部署六月庚子遣使贺宋主即位辛丑宰相郑颛出知兴中府事韩资让为崇义军节度使御史中丞韩君义为广顺军节度使戊午遣使决五京滞狱己未以辽兴军节度使梁援为枢密副使秋七月庚午如沙岭壬申尼都格尔诸部寇西北路八月额特埒击败之九月癸巳祠木叶山戊子驻蹕藕丝淀冬十月甲寅以平州饥复租赋一年十一月壬寅以天德军民田世荣三世同居诏官之戊子夏国王李干顺请尚公主十二月己亥以知右伊勒希巴事赫嘉努为北面林牙诏燕王延禧拟注大将军以下官宋遣使来谢是岁封高丽国王颛为三韩国公宋遣使来贺生辰正旦

七年春正月癸亥如混同江甲戌帝崩于行宫年七十谥曰仁圣大孝文皇帝庙号道宗

道宗清宁十年 【其元年即兴宗重熙二十四年】 咸雍十年太康十年大安十年寿隆七年凡四十七年

○天祚皇帝

天祚皇帝讳延禧字延宝小字阿果道宗之孙父顺宗为皇太子为耶律伊逊构死

道宗后悔之谥为昭怀太子帝初封梁王加守太尉兼中书令后进封燕国王总北南院枢密使事君尚书令为天下兵马大元帅寿隆七年正月甲戌道宗崩帝奉遗诏即皇帝位于柩前羣臣上尊号曰天祚皇帝二月壬辰朔改元干统大赦诏前为耶律伊逊所诬陷者并复其官爵籍没者出之流放者还之乙未遣使告哀于宋及西夏高丽乙巳以北府宰相萧乌纳为辽兴军节度使加守太傅夏六月庚寅朔如庆州甲午宋遣使来吊祭戊戌以南府宰相额特埒兼南院枢密使壬寅以宋魏王和啰噶为天下兵马大元帅乙巳进封北平王淳为郑王丁未北院枢密使耶律阿苏加裕悦辛亥葬道宗皇帝于庆陵秋八月甲寅谒庆陵九月壬申谒怀陵乙亥驻蹕藕丝淀冬十月壬辰谒干陵甲辰上皇考昭怀太子谥曰大孝顺圣皇帝庙号顺宗皇妣曰贞顺皇后十二月戊子以枢密副使张琳知枢密院事翰林学士张奉珪参知政事兼同知枢密院事癸巳宋遣使来贺是岁生女真部节度使英格死传于兄之子武雅淑淑死其弟阿古达袭

二年春正月如混同江二月辛卯如春州夏四月辛亥诛伊逊党属徙其子孙于边发伊逊德勒岱之墓剖棺戮尸五月乙丑额特埒献尼都格尔等部捷六月壬辰驻蹕散水原丙午夏国王李干顺复遣使请尚公主丁未南院大王辰嘉努罢壬子夏为宋所攻遣使求援闰月庚寅策贤良秋七月猎于黑岭准布来侵额特埒等击败之冬十月乙卯萧哈里叛北面林牙赫嘉努捕之萧哈里亡入拜珠水阿克展部丙寅以南府宰相耶律额特埒为北院枢密使参知政事牛温舒知南院枢密使事十一月壬寅以上京留守耶律慎思为北院枢密副使

三年春正月辛巳如混同江女真函萧哈里首遣使来献戊申如春州夏五月乙巳清暑于齐老岭六月辛酉夏国王李干顺复请尚公主秋七月猎于额鲁哩山冬十月甲辰如中京庚申夏国复遣使求援己巳有事于观德殿十一月丙申羣臣上尊号曰惠文智武圣孝天祚皇帝大赦以宋魏王和啰噶为皇太叔梁王塔鲁进封燕王郑王淳为东京留守进封越王百官各进一阶丁酉以特哩袞耶律和罗木萨噶为南院大王乙巳谒太祖庙追尊太祖之高祖曰昭烈皇帝庙号肃祖曾祖曰庄敬皇帝号懿祖十二月戊申如藕丝淀

四年春正月戊子如鱼儿泺庚寅猎于木岭癸卯燕王塔鲁薨夏六月甲辰驻蹕旺国崖甲寅夏国遣使求援秋七月庚辰猎于南山癸未以西北路招讨使萧德勒岱北院枢密副使耶律慎思并知北院枢密使事辛卯以同知南院枢密使事萧迪哩为西北路招讨使冬十月己未

如南京十一月乙亥御迎月楼赐贫民钱十二月辛丑以张琳为南府宰相

五年春正月乙亥夏国遣使求援且乞伐宋庚寅以辽兴军节度使萧常格为北府宰相丁酉遣枢密直学士高端礼【宋史及契丹国志俱作萧良】等讽宋罢伐夏兵二月癸卯微行视民疾苦丙午如鸳鸯泺三月壬申以宗女南仙封成安公主下嫁夏国王李干顺夏四月甲申射虎于炭山五月癸卯清暑于南崖壬子宋遣使报聘六月甲戌夏国遣使来谢及贡方物己丑如哈尔吉秋九月辛亥驻蹕藕丝淀冬十一月戊戌禁商贾之家应进士举丙辰高丽三韩国公王禹薨子侯遣使来告十二月己巳夏国复遣使求援癸酉宋遣使来议与夏约和

六年春正月辛丑遣知北院枢密使萧德勒岱知南院枢密使事牛温舒使宋讽归所侵夏地夏五月清暑于散水原六月辛巳夏国遣使来谢秋七月甲午如黑岭庚子猎于鹿角山八月猎于赛音布拉克山冬十月己亥宋遣使以与夏通好来告庚辰以皇太叔南京留守和啰噶特哩袞东京留守越王淳为南府宰相十一月乙未以谢嘉努为南院大王玛勒努为奚六部大王丙申行柴册礼戊戌大赦以和啰噶为义和仁圣皇太叔越王淳进封魏王封子额噜温为晋王实纳埒为饶乐郡王甲辰祠木叶山十二月己巳封耶律俨为漆水郡王余官进爵有差

七年春正月钓鱼混同江二月驻蹕大鱼泺夏六月次散水原秋七月如黑岭冬十月猎于医巫闾山

八年春正月如春州夏四月丙申封高丽王侯为三韩国公五月清暑于散水原六月壬辰西北路招讨使萧迪里率诸蕃来朝丙申射柳祈雨壬寅夏国王李干顺以成安公主生子遣使来告丁未如黑岭秋八月猎于柏山

九年春正月丙午朔如混同江二月如春州三月戊午夏国以宋不归地遣使来告夏六月乙亥清暑于特哩岭秋七月甲寅猎于哈尔吉冬十月癸酉望祀木叶山丁丑免今岁租赋

十年春正月辛丑预行立春礼如混同江二月庚午朔驻蹕大鱼泺夏四月丙戌预行再生礼癸巳猎于北山六月甲戌清暑于玉邱秋七月壬戌皇太叔和啰噶薨冬十月驻蹕藕丝淀十二月己酉改明年元

天庆元年春正月钓鱼于混同江二月如春州夏五月清暑于散水原秋七月猎冬十月驻蹕藕丝淀是岁宋遣郑允中童贯来贺生辰【据续通鉴纲目增辑】

二年春正月己未朔如鸭子河丁酉如春州钓鱼于混同江夏四月如斧柯水六月庚寅清暑于南崖秋七月乙丑猎于南山九月阿古达称兵并傍近部族女真卓克算阿固齐拒之咸州详袞司以闻诏诘责之冬十月辛亥高

丽三韩国公王侯以母死来告即遣使致祭是月驻蹕

奉圣州十一月乙卯如南京

三年春正月丙寅赐南京贫民钱丁卯如大鱼泺丙子猎于狗牙山三月籍诸道户徙达哩库山围场地居民于别土阿古达率五百骑突至咸州赴详袞司与卓克算等面折庭下阿古达不屈送所司问状一夕遁去自是召不复至秋七月如秋山九月驻蹕藕丝淀冬十一月甲午以三司使虞融知南院枢密使事西南面招讨使萧乐古为南府宰相十二月甲寅以枢密直学士马人望参知政事丙辰知枢密院耶律俨薨

四年春正月如春州女真使来索赫舍哩部人阿苏夏五月清暑于散水原秋七月女真复遣使侍卫爱实布问境上多建城堡之故发浑河北诸军益东北路统军司阿古达以尼楚赫伊埒罗索栋摩等为帅集女真诸部兵攻盩江州时帝在庆州射鹿遣海州刺史高仙寿统渤海军以援萧托卜嘉遇女真与战于盩江东败绩八月驻蹕藕丝淀冬十月壬寅以守司空萧嗣先为东北路都统静江军节度使萧托卜嘉为副发契丹奚军中京禁兵土豪及别选诸路武勇以虞候崔公义为都押官控鹤指挥邢颖为副引军屯出河店女真掩击之萧嗣先军溃崔公义邢颖耶律佛哩萧噶克实等死之十一月壬辰都统萧迪哩等败于沃棱泺东辛丑以西北路招讨使耶律鄂尔多为行军都统副点检萧伊实同知南院枢密使事耶律章努副之十二月咸宾祥三州及铁骊乌色皆叛附女真【属国表作三年】伊实以兵援宾州南军诸将实喇塔喇等往援咸州并为女真所败

五年春正月下诏亲征遣僧嘉努持书约和阿古达不从都统耶律鄂尔多等与战于达哩库城败绩二月饶州渤海古裕等反三月以萧色佛埒等讨之遣耶律章嘉努等赍书使女真夏四月癸丑萧色佛埒等为渤海古裕所败以南面副部署萧托斯和为都统赴之五月托斯和及古裕战败绩六月己亥朔清暑特哩岭癸丑以亲征谕诸道丙辰托斯和招获古裕等癸丑以特哩袞耶律摩哩为北院大王是月遣萧色埒使女真见留秋七月辛未宋遣使致助军银绢丙子猎于岭东是月都统鄂尔多等与女真战于白马泺败绩八月甲子罢猎趋军中免鄂尔多等官丙寅以围场使鄂博为中军都统耶律章嘉努为都监率番汉兵十万萧奉先为御营都统诸行营都部署耶律章努为副以精兵三万为先锋余分五部为正军贵族子弟千人为硬军扈从百司为护卫军北出骆駝口以都点检萧呼塔噶为都统枢密直学士柴谊为副将汉步骑三万南出江盩州自长春州分道而进九月丁卯朔女真攻黄龙府下之己巳知北院枢

密使萧德勒岱出为西南面招讨使帝亲征女真将尼雅满乌珠等以书来求战乙巳耶律章努反奔上京谋立魏王淳淳间道诣广平淀待罪章努率麾下掠庆晓怀祖等州结渤海羣盗趋广平淀犯行宫顺国女真阿固齐与战败之章努诈为使者欲奔女真为逻者所获缚送行在伏诛冬十一月遣驸马萧特默林牙萧察喇等将骑兵五万步卒四十万亲军七十万至駝门十二月乙巳耶律章嘉努叛戊申帝亲战于和卜多冈败绩女真乘胜取渤海辽阳等五十四州 【据大金国志增辑】 己未锦州刺史耶律珠展叛应章嘉努庚申以北面林牙耶律玛古讨之癸亥以北院宣徽使萧罕嘉努知北院枢密使事南院宣徽使萧特默为汉人行宫都部署是岁宋贺生辰使至留两月不见而还 【据文献行通考辑】

六年春正月丙寅朔东京人杀留守萧保先户部使大公鼎与副留守高清明捕斩之裨将渤海高永昌僭号称隆基元年遣萧伊实高兴顺招之不从 【金史在闰月与此稍异】 闰月乙亥遣萧罕嘉努讨之戊午贵德州守将耶律伊都以广州渤海叛附于永昌二月戊辰侍御司徒托卜嘉等讨章嘉努战于祖州败绩乙酉遣汉人行宫都部署萧特默率诸将讨章嘉努戊子章嘉努攻陷高州三月东面行军副统绰哈等擒中京贼侯槩于川州夏四月戊辰亲征章嘉努癸酉败之甲戌诛叛党饶州渤海平丙子赏平贼将士有差而萧罕嘉努张琳等复为贼所败五月清暑于散水原女真攻下涪州复陷东京擒高永昌东京州县皆降之六月乙丑籍诸路兵有杂畜十头以上者皆从军庚辰魏王淳进封秦晋王为都元帅上京留守萧托卜嘉为契丹行宫都部署兼副元帅丁亥以知北院枢密使事萧罕嘉努为上京留守秋七月猎于秋山春州渤海二千余户叛东北路统军使勒兵追之尽俘以还八月乌尔古部叛遣中丞耶律托卜嘉等招之冬十月庚辰乌尔古部来降十一月东面行军副统玛古等攻哈斯罕败绩十二月乙亥封庶人萧氏为太皇太妃辛巳削副统耶律玛古官

七年春正月甲寅减厩马粟分给诸局是月女真攻春州东北面诸军不战自溃农古皮室四部及渤海人皆降之复下泰州二月涿水县贼董庞儿聚众万余西京留守萧伊实南京统军都监扎拉与战于易水破之三月复破之于奉圣州夏五月庚寅东北面行军诸将聂呬赫噜尼格锡库等弃市乙巳诏围场隙地纵百姓樵采六月辛巳以同知枢密院事额哩页为北院大王秋七月癸卯猎于秋山八月丙寅猎于锡锡纳琳山命都元帅秦晋王赴沿边会四路兵马防秋九月置怨军八营屯卫州蒺藜山丁

酉猎于鞞子山冬十月乙卯朔至中京十二月丙寅都元帅秦晋王淳与女真战于蒺藜山败绩女真遂拔显州庚午下诏自责癸酉遣使诸路募兵丁丑以西京留守萧伊实为北府宰相东北路行军都统哈玛尔知奚六部大王事是岁女真阿古达即皇帝位建元天辅国号金仍遣使议和以求封册

八年春正月如鸳鸯泺丁亥遣耶律努克等使金议和庚寅保安军节度使张崇以双州二百户降于金东路诸州盗起掠民以充食二月耶律努克还自金三月甲午复遣努克使金夏四月辛酉以西南面招讨使萧德勒岱为北院枢密使五月壬午努克以金书来戊戌复遣努克使金金遣呼图克与努克持书报如前约六月丁卯遣努克等赉宋夏高丽书诏表牒至金通祺双辽四州民八百余户降于金秋七月猎于秋山金复遣呼图克来议和八月庚午遣努克托迪使金议册礼九月金遣努克还闰月丙寅遣努克复使金萧博和哩等十九人各率户降于金冬十月努克托迪持金书来龙化州张应古等四人率其众降金十一月副元帅萧托卜嘉薨十二月甲申议定册礼遣努克使金宁昌军节度使刘宏以懿州户三千降金时山前诸路大饥干显宜锦兴中等路斗粟直数缗民削榆皮食之既而人相食

九年春正月金遣乌凌阿赞谟持书来迎册二月至鸳鸯泺贼张萨巴僭称尊号南面军帅伊都讨擒之三月丁未朔遣知伊勒希巴事萧实讷埒等册金主为东怀国皇帝夏五月准布布率齐等叛执招讨使耶律鄂尔多都监萧锡里岱死之秋七月猎于南山金复遣乌凌阿赞谟来责册文无兄事之语不言大金而云东怀且语涉轻侮如依前书所定然后可从杨询卿罗子韦率众降金八月以赵王实讷埒为西京留守九月至西京复遣实讷埒杨立忠先持册稟使金冬十月甲戌朔耶律辰图努等二十余人谋反伏诛是月遣使送乌凌阿赞谟持书以还

十年春二月如鸳鸯泺金复遣乌凌阿赞谟持书及册文副本以来仍责乞兵于高丽三月己酉民有羣马者十取其一以给军庚申以金人所定大圣二字与先世称号同复遣实讷埒往议金主怒遂绝之夏四月猎于呼图哩巴山五月金主亲攻上京克外郭留守托卜嘉率众皆降祖怀庆等州皆陷【据文献通考辑但通考载在明年则悞】六月乙酉以北府宰相萧伊实为上京留守知盐铁内省两司东北统军司事秋猎于沙岭冬复至西京

保大元年春正月丁酉朔改元大赦枢密使萧奉先诬驸马萧昱及伊都等谋立晋王昱及达哈拉等伏诛晋王母文妃亦赐死伊都大惧

率千余骑叛入金帝遣知奚王府事萧锡默北府宰相萧德恭大详袞耶律特哩袞归州观察使萧和尚努四军太师萧斡将所部兵追之及诸
闾山县诸将纵之而还给曰不及奉先劝骤加爵赏以结众心乃以萧锡默为奚王萧德恭试中书门下平章事兼判上京留守事耶律特哩袞
为龙虎卫上将军萧和尚努金吾卫上将军萧斡镇国大将军二月如鸳鸯泺夏五月至赫呀苏秋七月猎于炭山九月至南京冬十一月癸亥
以西京留守赵王实讷埒为特哩袞

二年春正月乙亥金克中京进下泽州帝出居庸关至鸳鸯泺闻伊都引金人奄至赐晋王死耶律萨巴等皆伏诛金人逼行宫帝如云中
遗传国玺于桑干河二月甲午以知北院大王事耶律玛古汉人行宫都部署萧特默并为都统大和宫使耶律布达副之将兵屯鸳鸯泺己亥
金师败奚王哈玛尔于北安州遂降其城三月辛酉帝趋白水泺乙丑羣牧使穆喇斡降于金丙寅帝至努库特仓闻金兵将近乘轻骑入夹山
左右执萧奉先父子缚送于金金人斩其长子昂奉先及其次子昱送金主辽军夺以归遂并赐死逐枢密使萧德勒岱以托卜嘉典警卫丁卯
以北院枢密副使萧曾孝努知北院枢密使事同知北院枢密使事萧扎拉为左伊勒希巴戊辰同知殿前点检事耶律果巴率卫士降金己巳
侦人萧和尚牌印郎君耶律希肆为金师所获癸酉以诸局百工多亡凡扈从不限吏民皆官之燕京留守宰相张琳李处温等谋立秦晋王淳
淳再三辞不获已从之以处温守太尉左企弓守司徒曹勇义知枢密院事虞仲文参知政事张琳守太师李处能直枢密院余并授官有差大
赦自称天锡皇帝改元建福降封天祚帝为湘阴王遂据有燕云平及上京辽西六路天祚所有沙漠已北西南西北路两都招讨府诸番部族
而已夏四月辛卯西南面招讨使耶律佛腾降于金云内窰边东胜等州皆降阿苏为金兵所擒金已取西京沙漠以南部族皆降帝遂遁于额
苏抡五月甲戌都统玛古收集散亡会于额勒锦丙子以玛古知北院枢密使事兼都统六月淳病卒众立其妻萧氏为皇太后主军国事奉遗
命迎立天祚次子秦王定为帝太后遂称制改元德兴赐李处温死裔其子奭而磔之玛克实以兵来援金人败之洪灰水夏国援兵亦为金所
败秋七月丁巳德呀勒部皮室叛乌尔古部节度使耶律唐古讨平之乙丑上京谋巴克实率二千户降于金辛未夏国遣使来问起居八月戊
戌帝与金师战于石辇驿败绩都统萧特默及其侄沙古被执辛丑会军于欢塔察拉金兵追之急弃辎重以遁九月德呀勒部叛都统玛古克
之将军郭药师等以涿易二州来降于宋冬十月金兵攻蔚州降之是月宋师袭燕萧斡

击败之十一月帝率卫兵屯于罗克绥秦晋王妻萧德妃五上表于金求立秦王不许以劲兵守居庸金兵临关戍卒溃德妃出古北口趋天德军十二月金抚定南京左企弓等皆降帝遂由萨里关出居四部族详袞之家

三年春正月丁巳奚王萧斡僭号称天复元年命都统玛古讨之甲子辽兴军节度副使张毅以平州降于金庚辰宜锦干显成川豪懿等州相继皆降上京卢彦纶叛二月乙酉朔兴中府降于金来州归德军节度使田颢权隰州刺史杜师回迁州刺史高永昌权闰州刺史张成皆籍所管户降于金丙戌诛萧德妃降淳为庶人尽释其党癸巳兴中宜州复城守三月驻蹕于云内州南夏四月甲申朔知北院枢密使萧僧孝努为诸道大都督丙申金兵至居庸关擒耶律达实戊戌金兵围辘重于青冢硬寨太保特默额窃梁王雅里以遁秦王许王诸妃公主从臣皆陷没丙午金兵邀战于白水冻赵王实讷埒萧道窳皆被执帝遣牌印郎君摩勒斡送兔钮金印伪降遂西遁云内驸马都尉瑞诺尔诣金降五月乙卯夏国王李干顺遣请使临其国庚申将军耶律迪里等夜劫梁王雅里奔西北部立为帝改元神厯辛酉渡河止于金肃军北萧斡为众所杀六月遣使册李干顺为夏国皇帝秋七月耶律达实自金来归冬十月复渡河东还居图噜卜部梁王雅里卒耶律珠拉继之十一月图烈为众所杀

四年春正月帝趋都统玛古军金人来攻弃营北遁玛古被执玛克实来迎赆马駝羊又率部人防卫至乌尔古德呼勒部以都点检萧伊实知北院枢密使事封玛克实为神裕越王特默格降于金二月耶律约苏等谋叛伏诛夏五月金人驱燕民东徙平州张毅召左企弓等杀之仍称保大三年画天祚象朝夕谒事必告而后行六月榜谕燕人复业秋七月金袭平州毅奔于宋帝既得林牙耶律达实兵归又得阴山室韦玛克实兵再谋出兵复收燕云达实林牙九谏不从达实杀伊实及博勒和置南北面官属自立为王率所部西去帝遂率诸军出夹山下渔阳岭取天德东胜盩边云内等州南下武州遇金人与战奄遏下水师溃直趋山阴八月国舅详袞萧卜托嘉笔砚祗候察喇降金是月金主阿古达死九月建州降于金冬十月纳图噜卜部人额尔克之妻阿克以额尔克为本部节度使扎古雅率众降于金金攻兴中府降之十一月从行军乱北护卫太保珠展舍利详袞额布埒等击败之十二月置二总管府

五年春正月辛巳党项小呼噜遣人请临其地戊子趋天德过沙漠金兵忽至帝徒步出走近侍进珠帽却之乘张仁贵马得脱至天德己

丑遇雪无御寒具珠展以貂裘帽进途次绝粮珠展进麩与枣珠展辈惟啮冰雪以济饥过天德将宿民家给以侦骑其家知之叩马首跪而大恸潜宿其家数日嘉其忠遥授以节度使遂趋党项以小呼噜为西南面招讨使总知军事仍赐其子及诸校爵赏有差二月至应州新城东六十里为金将完颜罗索等所获八月癸卯至金丙午降封海滨王以疾终年五十四葬于广宁府闾阳县干陵傍天祚帝干统十年【其元年即道宗寿隆七年】天庆十年保大五年凡二十五年

西辽附录【按辽史天祚帝纪末附载北辽西辽事考耶律淳与雅里达实之立均在天祚未亡之时有君而复君之于名义皆无足取惟是天祚既亡而达实尚艰难立国寡母弱子继绪迭承几九十年而后绝亦所以延辽国之一线谨仍旧史附录于后至淳与雅里则无异于篡逆之徒且其事又多详天祚纪中故不别者】

○耶律达实

耶律达实者世号西辽达实字重德太祖之八代孙也通辽汉字善骑射登天庆五年进士第擢翰林应奉寻升承旨辽以翰林为林牙故称达实林牙历泰祥二州刺史辽兴军节度使保大二年金兵日逼天祚播越达实与诸大臣立秦晋王淳为帝淳死复立其妻萧德妃为太后以守燕及金兵至萧德妃走天祚天祚诛德妃而责达实曰我在汝何敢立淳达实曰陛下以全国之势不能一拒敌弃国远遁使黎民涂炭即立十淳皆太祖子孙岂不胜乞命于他人耶天祚无以答赐酒食赦其罪达实终不自安遂杀萧伊实博勒和自立为王率铁骑二百宵遁北行三日过黑水达勒达详袞崇乌鲁献马駝羊若干西至哈屯城驻北庭都护府会威武崇德会蕃新大林紫河駝等七州及大黄室韦德呼勒昂吉喇特察察哩约喜布古德尼勒塔喇贵达玛勒默尔吉和卓乌库哩准布博克硕宽唐古呼穆苏希达济勒贝十八部王众得精兵万余置官吏立排甲具器仗明年二月甲午以青牛白马祭天地祖宗整旅而西假道回鹘回鹘王毕哩克迎至邸大宴三日献马駝羊愿质子孙为附庸送至境外所过敌者胜之降者安之兵行万里归者数国获駝马牛羊财物不可胜计军势日盛至塔什千西域诸国举兵十万号呼喇伞来拒战大败之驻军塔什千凡九十日回回国王来降贡方物西至奇尔玛勒羣臣上表劝进遂以乙巳岁二月五日即皇帝位【辽史乙巳作甲辰兹据甲子会纪改】号噶尔汗复上汉尊号曰天佑皇帝改元延庆册元妃萧氏为昭德皇后自萧额哩埒等四十九人并加祖父封爵有差延庆三年班师东归马行二十日得善地遂建立都城号呼逊鄂尔多改延庆为康国元

年三月以六院司大王萧额哩埒为兵马都元帅德呼勒部前同知枢密院事萧托伦布副之察察哩部图噜耶律雅克为都部署护卫耶律特尔格为都监率七万骑东征以青牛白马祭天树旗以誓众行万余里无所得牛马多死勒兵而还达实曰皇天勿顺数也康国十年卒在位二十年庙号德宗子伊哩年幼遗命以皇后权知国事后名达布延号感天皇后称制改元咸清在位凡七年子伊哩即位改元绍兴籍民十八岁以上得八万四千五百余户在位十三年卒庙号仁宗子幼遗诏以妹博克实宽权国称制改元崇福号承天太后在位十四年仁宗次子珠勒呼即位改元天禧在位三十四年时以秋出猎奈曼王库楚呼伏兵擒之而据其位自天祚帝为金所执达实建号沙漠之外凡四世七十六年库楚埒袭辽衣冠尊珠勒呼为太上皇朝夕问起居以待终焉珠勒呼死辽乃绝

钦定续通志卷四十六

●钦定续通志卷四十七 金纪一

金纪

太祖 太宗

○太祖

太祖皇帝姓完颜氏讳旻本讳阿古达父世祖讳和哩布母翼简皇后纳喇氏其先出靺鞨氏号勿吉勿吉古肃慎地也勿吉有七部唐初有黑水靺鞨粟米靺鞨其五部无闻黑水靺鞨东濒海南接高丽五代时附属契丹其在南者系契丹籍号熟女真其在北者不系契丹籍号生女真生女真地有混同江长白山混同江亦名黑龙江所谓白山黑水也始祖讳哈富从高丽来居完颜部布尔罕水之涯部众信服之生子德帝乌噜德帝生子安帝巴哈安帝生子献祖绥赫献祖徙居海古勒水耕垦树艺始筑室有栋宇之制自此遂定居于安春水之侧生子昭祖舒噜昭祖始立条教约束部众及耀武于青岭白山而势乃寔强辽主官以特哩衮【按金史世纪载昭祖时尚未有文字不知岁月晦朔年寿莫得而考而叙始祖乃云初从高丽来年已六十余其叙明懿皇后亦云部有贤女年六十而未嫁似相矛盾兹节其紧要者补附太祖本纪内余槩删不录】生子景祖乌古廋景祖稍役属诸部诸部多听命来归辽主以为生女真节度使称都太师自是有官属渐立纪纲据其山川险要以计谋不使辽兵入境得知其道里辽主尝欲刻印与之使系籍不从以厚贖易邻铁为甲冑兵势大振时鄂敏水富察部特克绅特布水完颜部图们水温特赫部舍音水完颜部相继来附卒年五十四子世祖和哩布及肃宗

颇拉淑穆宗额噜温世祖生康宗乌雅舒及太祖自世
祖肃宗穆宗康宗相继为节度使削平诸部康宗卒太祖嗣节度使位初辽道宗时有五
色云气屡出东方大若二千斛困仓之状司天孔致和
窃谓人曰其下当生异人建非常之事咸雍四年戊申七月一日太祖生世祖与拉必玛
察战于野鹊水被四创疾困坐太祖于膝抚之曰此儿
长大吾复何忧太祖举止端重少即善射一日辽使坐府中见太祖手持弓矢使射羣鸟
三发皆中辽使矍然曰奇男子也太祖尝宴赫舍哩部
南望高阜使众射之皆不能至太祖一发过之踰三百二十步后立射碑以志焉太祖尝
遇壮士托云乘骏马持枪来刺太祖不及备舅氏和尔
和驰出其间击托云枪折刺中其马托云仅得免又尝遇敌兵追急独行隘巷中失道追
者益急值高岸与人等马一跃而过追者乃还世祖寝
疾太祖以事如辽统军司将行世祖戒之曰汝速了此事五年未半而归则我犹及见汝
也太祖往见和啰木萨噶统军既毕事前世祖没一日
还至家世祖见太祖来所请事皆如志喜甚执太祖手抱其颈而抚之世祖疾革谓穆宗
曰乌雅舒柔善惟此子足了契丹事世祖已擒拉必玛
察尚据哲克依水肃宗使太祖先取玛察家属康宗至哲克依水围之太祖会军亲获玛
察献馘于辽辽命太祖为详袞久之以偏师伐尼玛哈
部伯赫布尔噶等乃以等通额为乡导沿刷水夜行袭之虏其妻子初温都部巴图杀唐
古部巴噶穆宗命太祖伐之乃与乌库哩部兵沿屯水
过摩琳乡追及巴图于额斯瑋山北泆之间杀之萨哈以都统伐埒克们图瑋合实图美
伐达萨塔萨哈与将佐议或欲先平边地部落城堡或
欲径攻埒克城议不能决愿得太祖至军中穆宗以甲士七十命太祖将以往们图瑋在
穆噜密斯罕城下实图美未到土人欲执们图瑋以与
敌使来告急遇太祖于实都甸太祖曰国兵尽在此矣使敌先得志于们图瑋后虽种诛
之何益乃分甲士四十与之自以三十人诣萨哈军及
至夜急攻之迟明破其众还攻乌塔城遣普嘉努招卓多卓多乃降穆宗将伐萧哈里募
兵得千余人女真兵未尝满千至是太祖勇气百倍曰
有此甲兵何事不可图也哈里来战与辽兵合因止辽人自为战渤海留守以甲赠太祖
太祖不受曰被彼甲而战战胜是因彼成功也穆宗令
诸部不得擅置信牌驰驿讯事号令自此始一皆自太祖启之康宗七年岁不登民多流
莩强者转而为盗罕都等欲重其法太祖曰以财杀人
不可财者人所致也遂减其法为征偿三倍民间多逋负卖妻子不能偿太祖曰骨肉之
爱人心所同愿停三年勿征自是远近归心焉太祖既
袭位辽使阿息保来曰何以不告丧太祖曰有丧不能吊而乃以为罪乎赫舍哩阿苏既

奔辽 【按金史世纪穆宗伐阿苏阿苏奔诉于辽而城破遂留于辽自后康宗尝责辽以不遣阿苏太祖又遣实古纳等往索之是阿苏之留辽久矣辽史云天庆四年阿苏来奔金太祖遣人来索考天庆五年即金收国元年则天庆四年去穆宗有十余年之远辽史恐有误载】 初辽每岁遣使市名鹰海东青于海上道出境内使者征索无艺公私厌苦之康宗尝以不遣阿苏为言稍拒其使者太祖遣宗室实古纳完颜尼楚赫往索阿苏实古纳等还具言辽主骄肆废弛之状于是召官僚耆旧以伐辽告之使备冲要建城堡修戎器以听命辽使节度使尼格来问状曰汝等有异志乎 【按辽史载天庆元年辽主渔于混同江生女真部长阿古达率其弟乌奇迈等来朝辽主以其跋扈疑有异志大金国志载天庆四年辽主如混同江疑阿古达欲杀之金史载穆宗袭节度使位时朝辽主于渔所于太祖本纪不言有朝辽主事至太祖将伐辽辽乃使使以有异志来问状亦非朝辽主而见疑也诸书各异附识于此】 太祖曰设险自守又何问哉辽复遣阿息保来诘之太祖曰我小国也事大国不敢废礼大国德泽不施而逋逃是主以此字小能无望乎若以阿苏与我请事朝贡苟不获已岂能束手受制也阿息保还辽人命统军萧托卜嘉调诸军于宁江州太祖闻之使富卦喇复索阿苏实观其形势富卦喇还言辽兵多不知其数太祖曰彼初调兵岂能遽集如此复遣华沙布往还言惟四院统军司与宁江州军及渤海八百人耳太祖曰果如吾言乃谓诸将佐曰辽人知我将举兵集诸路军拒我必先发制之众皆曰善乃入见宣靖皇后告以伐辽事即奉后率诸将出门举觞东向以辽人荒肆不归阿苏并已用兵之意祷于皇天后土祷毕号令诸部达噜噶部色尔衮来告曰闻举兵伐辽我部谁从太祖曰与汝邻境固当从我若畏辽人自往就之九月太祖将攻宁江州督诸路兵会于拉林水得二千五百人以辽之罪申告于天地传梃而誓将至辽界先使宗干督士卒夷堑既度遇渤海军来攻左翼众少却辽兵直犯中军会耶律色实坠马辽人前救太祖射救者毙之复射中色实宗干与数骑陷辽军中太祖救之免胄战或自旁射太祖太祖还射之一矢而毙谓将士曰尽敌而止众从之勇气百倍辽军大奔相蹂践死者过半萨哈在别路使人来贺且请称帝太祖曰一战而胜遂称大号何示人浅也进军宁江州辽统军司以闻时辽主射鹿于庆州遣海州刺史高仙寿应援 【按辽主略不介意惟遣一刺史应援此正其致败之由金史失载兹据续通鉴纲目补纂以戒先几之失】 诸军填堑攻城宁江人自东门出温特赫额图瑋邀击尽殪之十月朔克其城获防御使大药师努阴纵之使

招谕辽人铁骊部来送款次拉林城以俘获赐将士召
渤海梁福额特埒使之伪亡去招谕其乡人曰女真渤海本同一家我兴师伐罪不滥及
无辜也使完颜罗索招谕系辽籍女真师还命诸路以
三百户为穆昆十穆昆为明安十一月辽都统萧嘉哩副都统托卜嘉将步骑十万 【按
珠赫店之役金史载十一月辽都统萧嘉哩副都统
托卜嘉将步骑十万而辽史载十月发契丹奚军三千中京禁兵及上豪二千别选诸路
合万余人命都统萧嘉哩副都统托卜嘉将之与金史
异续通鉴纲目载十一月发契丹奚军二千中京禁兵七千以萧嗣先为都统托卜嘉副
之又与辽史异大金国志载发奚契丹兵五千人兵溃
复召宰相张琳付兵十万分四路悉为女真攻陷又与诸书互异而据续通鉴纲目尤足
见轻敌致败之失】 会于鸭子河北太祖自将击之未
至会夜方就枕若有扶其首者三太祖寤曰神警我也即鸣鼓举燧而行黎明及河辽兵
方坏陵道选壮士击走之大军继进遂登岸甲士三千
七百至者纔三之一俄与敌遇于珠赫店会大风起尘埃蔽天乘风势击之辽兵溃逐至
沃棱泺杀获首虏及车马甲兵不可胜计辽人尝言女
真兵若满万则不可敌至是始满万云斡鲁败辽兵斩托卜嘉富呼等攻宾州富察攻祥
州拔之铁骊王和勒博以所部降乌楞古败辽军于咸
州西斩统军罗索完颜罗索克咸州 【按辽史云天庆三年三月阿古达率五百骑突至
咸州四年举兵攻盩江州考金史太祖攻盩江州前
无以五百骑至咸州事及克盩江州后乌楞古败辽兵于咸州完颜罗索克咸州亦非太
祖亲至也辽史又云天庆元年女真部长阿古达来朝
四年攻盩江州据此则太祖为节度使四年而后称帝考金史康宗于癸巳岁崩太祖袭
位至岁乙未以羣臣劝进乃称尊号是为节度使止二
年也续通鉴纲目不载攻咸州事其袭位年月与金史且辽史则因误记而失事实尔】
是月乌奇迈萨哈希卜苏率官属诸将劝进愿以新岁
元日恭上尊号太祖不许阿里罕普嘉努宗翰等进曰今大功已建若不称号无以系天
下心太祖曰吾将思之

收国元年 【恭读 御制全韵诗题金太祖云白山黑水本灵区勿吉七部原同
俗东方云气生异人端重善射炳智烛以此诸部渐
归附素衣朱襖从于沃适值辽政渐不纲混同迎战似神告女真满万不可敌至是其言
验如卜建国称帝遂号金败辽达噜穷追逐一百廿年
帝业开天相抑亦由人勛按金太祖初生时即有五色云气之瑞固由天相然英谟叡略
算无遗策知人善任人乐为用故辽宋之事虽成于天
会间而规模实自此始诚如 圣论所定也谨录于此】 春正月壬申朔羣臣奉上尊

号是日即皇帝位帝曰辽以兵铁为号取其坚也兵铁虽坚终亦变坏惟金不变坏金之色白于是国号大金色尚白改元收国丙子帝自将攻黄龙府辽遣都统耶律鄂尔多左副统萧伊苏右副统耶律章努都监萧色佛呼骑二十万步卒七万拒之帝率兵次宁江州西辽使僧嘉努来议和国书斥帝名且使为属国庚子进师逼达噜噶城帝登高望辽兵若连云灌木状顾谓左右曰辽兵心贰而情怯虽多不足畏也遂趋高阜为阵宗雄以右翼先驰辽左军左军却左翼出其阵后辽右军皆力战罗索尼楚赫冲其中坚凡九陷阵宗翰以中军助之帝使宗干往为疑兵宗雄已得利击辽右军辽兵遂败乘胜追蹶至其营会日暮围之黎明辽军溃围出逐北至阿噜冈辽步卒尽殪师还夏四月辽耶律章努来致书帝以书辞慢侮留其副遣章努回报书亦如之五月甲戌拜天射柳故事五月五日七月十五日九月九日拜天射柳岁以为常六月己亥朔辽耶律章努复以国书来犹斥帝名帝亦斥辽主名以复之且谕之使降秋七月戊辰以弟乌奇迈为安班贝勒国相萨哈为古伦贝勒希卜苏为爱满贝勒弟舍音为古音贝勒辽使萨哈以书来留之不遣九百奚营来降八月戊戌帝亲征黄龙府次混同江无舟使一人道前乘赭白马径涉曰视吾鞭所指而行诸军随之水及马腹后使舟人测其渡处深不得其底九月遂克黄龙府遣萨喇还遂班师癸巳以萨哈为古伦乌赫哩贝勒阿里罕为古伦英实贝勒冬十一月辽主自将七十万至图们驸马萧特默林牙萧扎拉等将骑五万步四十万至沃棱冻帝自将御之十二月己亥行次约罗诸将曰辽兵众其锋未易当吾军远来人马疲乏宜驻于此深沟高垒以待之从之遣都古尔讷尼楚赫镇达噜噶丁未获辽督饷者知辽主以章努叛西还二日矣诸将曰今辽主既还可乘怠追击之帝曰敌来不迎战去而追之欲以此为勇耶众皆悚愧愿自効帝复曰诚欲追敌约费以往无事餽馈若破敌何求不得众皆奋跃追及辽主于呼岱巴冈兵止二万帝曰彼众我寡兵不可分视其中军最坚辽主必在焉败其中军可以得志使右翼先战兵数交左翼合而攻之辽兵大溃金师驰之横出其中辽兵败绩死者相属百余里所获不可胜计萧特默等焚营遁去遂班师瓜尔佳萨哈取开州博勒和下德邻城萨里罕降

二年春正月戊子诏四方来降者加优恤诸部官民已降或为军所俘获逃遁而还者勿以为罪官其部长使从其居处闰月高永昌据东京叛辽夏四月乙丑以斡鲁统内外诸军讨高永昌华沙布等被害五月斡鲁等败永昌托卜嘉擒永昌以献戮之东京州县及南路系辽女真

皆降诏除辽法省税赋置明安穆昆以斡鲁为南路都统德特贝勒额图珙破辽兵六万于昭苏城秋九月始制金牌冬十二月庚申朔诏明年改元天辅

天辅元年 【按大金国志云太祖在位六年以天辅元年为称帝之始考宏简录载太祖珠赫店战胜后于次年开国建元收国与金史同续通鉴纲目亦于宋政和五年书女真完颜阿古达称帝国号金建元收国则大金国志明系脱误而天辅实改元之始非称帝之始也】 春正月舍音取泰州夏四月辽秦晋国王耶律聂呼来伐都古尔讷罗索博勒和将兵二万会咸州路都统乌楞古击之五月丁巳诏自收宁江州以后同姓为婚者杖而离之秋七月戊申以完颜沃棱知东京事冬十二月甲子乌楞古等败耶律聂呼兵于蒺藜山拔显州干懿豪徽成川惠等州皆降是月宋使登州防御使马政以国书来 【按诸帝纪内数见之典如诸国聘问往来与夫春水秋山禘享谒陵祈雨劝农之类岁以为常兹俱于初见处书之后不复叙其或因行常典而别有关要则虽屡见必书以存其事实】 其略曰日出之分实生圣人窃闻征辽屡破勅敌若克辽之后五代时陷入契丹汉地愿畀下邑 【按金史载宋使登州防御使马政以国书来是宋先通好也宋史载金使李善庆来是金先通好也宋史又载遣赵有开马政报聘不至而复是未至金国也金史载马政书来则是已至也考宋以得辽人李良嗣献取燕之谋欲藉金以成夹攻之势而金初无所资于宋则金不应先为通好自以金史为正但所载宋书仅有乞地之语未及夹攻岂宋之始愿并欲不劳而获耶今各仍其原文而所谓开端之迹兆祸之基亦因可见】

二年春正月庚寅辽双州节度使张崇降使索多如宋报聘约夹攻 【按续通鉴纲目载金遣李善庆索多以礼物来修好诏蔡京等谕以夹攻之意未言索多来约夹攻是欲夹攻者本系宋人启贪见而昧祸机故不顾与契丹数百年之好若金则兵力自足胜辽何藉夹攻乃金史并未载宋来约夹攻而但载使索多如宋约其夹攻恐系沿误今仍原文而附识之】 所请之地得者有之二月癸丑朔辽使耶律努格等来议和辛酉贝勒都古尔讷罗索来见帝以辽主近在中京而敢辄来皆杖之和勒博双宽等劾奏咸州都统乌楞古命阁格代为都统而鞫治之乌楞古坐降穆昆三月壬辰辽使耶律努格以国书来庚子以罗索为万户镇黄龙府夏五月丙申命呼图克昆如辽六月甲寅诏有司禁民凌虐典雇良人及倍取赎直者甲戌辽通祺双辽等州八百余户来归命分置诸部择膏腴之地处之秋七月癸未诏博啰水路完颜珠勒呼渤海

大嘉努等六穆昆之民可具其登耗以闻呼图克昆还自辽耶律努格复以国书来丙申呼图克昆如辽辽户二百来归处之泰州诏遣阿里库理嘉努德勒岱招谕未降者仍诏色埒等其降附新民善为存抚八月呼图克昆还自辽耶律努格托迪复以国书来九月戊子诏选善属文者以为国书诏令闰月庚戌朔以降将霍石韩庆和为千户九百奚部萧实伊逊北部额里页汉人王六儿王伯龙契丹特默高从佑等各率众来降辽耶律努格以国书来冬十月癸未以龙化州降者张应古刘仲良为千户乙未以降者李孝功渤海二哥为千户十二月甲辰遣贝勒珠卜以定辽地谕高丽耶律努格以国书来辽懿州节度使刘宏以户三千并执辽候人来降以为千户

三年春正月甲寅东京人为质者永吉等五人结众叛事觉伏诛诏继有犯者并如之三月耶律努格以国书来夏五月壬戌诏与辽和其兵兴以前诸部民有犯罪流窜亡入于辽者明谕诸路千户穆昆徧与询访其官称名氏地里具录以上六月辛卯辽遣太傅实讷埒等奉册玺来命摘册文不合者数事复之索多还自宋宋使马政及其子宏来聘索多受宋团练使帝怒杖而夺之宋使还复遣贝勒色埒赫噜等如宋秋七月辛亥辽人杨询卿罗子韦各率众来降命各以所部为穆昆八月己丑颁女真字九月以辽册礼使失期诏诸军过江屯驻冬十一月实讷埒等复以国书来

四年春二月色埒赫噜还自宋宋使赵良嗣王晖来议燕京西京地三月甲辰帝以辽人和议无成惟饰虚辞以为缓师之计乃议进讨辛酉诏咸州路都统司以兵会于浑河辽实讷埒以国书来夏四月乙未帝自将伐辽以辽使实讷埒宋使赵良嗣等从行五月甲辰次浑河西使宗雄先趋上京遣降者马乙持诏谕城中上京拒守帝谓实讷埒赵良嗣等曰汝可观我用兵以下去就帝亲临城督将士诸军鼓噪而进自旦及巳栋摩以麾下先登克其外城留守托卜嘉以城降赵良嗣等奉觞为寿称万岁是日赦上京官民诏谕辽副统伊都壬戌次沃赫河宗干言地远时暑军马罢乏若深入敌境粮馈乏绝恐有后艰帝乃班师命分兵攻庆州秋七月癸卯至自伐辽冬十月戊辰朔日有食之十一月东京留守司乞本京官民质子增数番代帝不许曰诸质子已各受田庐若复番代则往来动摇可并仍旧十二月宋复使马政来请西京之地

五年春二月分诸路明安穆昆之民万户屯泰州以博勒和统之赐耕牛夏四月乙丑朔宗翰请伐辽诏诸路预戒军事五月辽都统耶律伊都等诣咸州降闰月辛巳古伦乌赫哩贝勒普嘉努为温贝勒诏乌奇迈贰国政以舍

音为乌赫哩贝勒普嘉努为温贝勒宗翰为伊拉齐贝勒秋七月庚辰诏议亲征以连雨罢冬十一月辛丑以杲为内外诸军都统帅师伐辽以显宗翰宗干宗望宗盘等副之甲辰诏诸军见可而进无淹师期事有从权毋须申禀若克中京所得礼乐仪仗图书文籍并先次津发赴阙

六年春正月乙亥都统杲取中京遂下泽州二月庚寅朔日有食之己亥宗翰等败辽奚王锡默于北安壬寅都统杲遣使奏捷命分遣将士招降山前诸部宗翰驻北安遣希尹等略地获辽护卫耶律实讷埒知辽主猎鸳鸯泺杀其子晋王众益离心遂报都统杲进兵袭之三月杲出青岭宗翰出瓢岭追辽主于鸳鸯泺辽主奔西京宗翰复追至白水泺不及获其货宝壬申西京降希尹追辽主于伊实部不及乙亥西京复叛是月辽秦晋国王耶律聂呼即位于燕夏四月复取西京壬辰遣图克坦乌济高庆裔于宋戊戌都统杲自西京趋白水泺遣耶律坦招徕西南诸部西至夏栋摩罗索招降天德云内懿边东胜等州获阿苏而还时山西城邑诸部虽降人心未固辽主保阴山耶律聂呼在燕京都统杲遣宗望入奏请帝临军五月辛酉宗望来奏捷耶律聂呼遣使请罢兵戊寅使杨勉以书谕聂呼使之降六月戊子朔帝亲征辽发自上京乌奇迈监国是月耶律聂呼卒秋七月甲子诏诸将无得远迎以废军务壬午希尹以阿苏见杖而释之八月己丑次鸳鸯泺都统杲率官属来见癸巳帝追辽主于大鱼泺显宗望追及辽主于石辇铎与战败之辽主遁己亥次居延北辛丑中京将完颜琿楚败契丹奚汉六万于高州贝勒玛奇死之显宗望追辽主于谿勒哲图不及九月庚申次草泺栋摩平中京部族之先叛者及招抚沿海郡县节度使耶律慎思领诸部入内地归化奉圣二州降冬十月丙戌蔚州降每获一州下诏存恤赦罪免逋以安反侧十二月帝伐燕京戊子次居庸关庚寅辽统军都监高陆等来送款帝至燕京入自南门使尼楚赫罗索陈于城上帝乃次于城南辽知枢密院左企弓虞仲文枢密使曹勇义副使张彦忠参知政事康公弼佖书刘彦宗奉表降辛卯辽百官诣军门叩头请罪诏一切释之壬辰帝御德胜殿羣臣称贺甲午命左企弓等抚定燕京诸州县辽萧妃与官属数人遁去诏发兵追之黄龙府叛宗辅讨平之

七年春正月丁巳辽奚王和勒博僭称帝甲子辽平州节度使时立爱降壬申诏招谕和勒博癸酉以时立爱言招抚诸部己卯宋使来议燕京西京地庚辰宜锦干显成川豪懿等州皆降甲申诏诸将无纵军士动扰新附人民以废农业二月乙酉朔命萨巴招谕兴中府降之辽来隰迁润四州皆降壬辰诏谕逃散未降之民存恤迁户毋辄骚动癸巳诏显咸东京诸路

关津无禁民往来宋使赵良嗣来请加岁币以代燕税

【按宋以岁币输辽百余年未尝形其匱乏至于会金攻辽造衅失计及后加币代税借括许约而所费转多诚如通鉴辑览 御批辽币虽废金币旋加失算之中更为失算而危亡之患即因之以兴也谨录于此】 及议画疆与遣使贺正旦生辰置榷场交易并计议西京等事乙巳诏都统杲录用新附之民有材能者戊申诏与宋燕京六州之地癸丑大赦是月改平州为南京以张觉为留守三月戊午以都统杲等言召耶律玛展伊都乌合道拉等责以谋叛命杖道拉七十余并释之宋使卢益赵良嗣马宏以国书来夏四月丁亥遣斡鲁宗望袭辽主于阴山壬辰复书于宋辽兵复犯奉圣州林牙达实壁龙门东二十五里都统斡鲁闻之遣卓哩罗索马和尚等率兵讨之生获达实悉降其众癸巳诏自今军事若皆中覆不无留滞应此路事务申都统司余皆取决枢密院命实古讷博勒和监护长胜军及燕京豪族工匠由松亭关徙之内地己亥次儒州斡鲁宗望等袭辽权六院司喀勒扎于白水泺获之其宗属秦王许王等降闻辽主留辎重青冢遣宗望罗索尼楚赫等追袭及之宗望追及辽主决战大败之获其子赵王实讷埒及传国玺五月甲寅南京留守张觉据城叛丙寅次野狐岭己巳次拉林泺受俘诏曰辽主孳虽自作尝居大位伶仃去国深所不忍如招之肯来尽付戚属并宗族勿去輿帐善存抚之其实讷埒以下及诸官吏并释其罪且加抚慰奚路都统达兰攻苏库卓琳托纽所部十三岩皆平之又遣奚马和尚攻萨必达嚕噶并五院司诸部执其节度使里和勒博为其下所杀六月壬午朔次鸳鸯泺是日栋摩败张觉于营州丙申帝不豫将还上京命宗翰为都统昱与斡鲁副之驻兵云中以备边己酉次鄂都山驿召安班贝勒乌奇迈秋八月辛巳朔日有食之乙未次浑河北安班贝勒乌奇迈率宗室百官上谒戊申帝崩于布图泺西行宫 【宋史作五月】 年五十六九月癸丑梓宫至土京谥曰武元皇帝加谥应干兴运昭德定功睿神庄孝仁明大圣武元皇帝庙号太祖陵曰睿陵

太祖收国二年天辅七年在位九年

○太宗

太宗皇帝讳晟本讳乌奇迈世祖第四子太祖母弟也初为穆宗养子收国元年十月命为安班贝勒太祖征伐常居守天辅七年六月太祖次鸳鸯泺有疾至鄂都山驿召帝赴行在诏曰今辽主尽丧其师奔于夏国辽官多啰约索等劫其子聂呼而立之已留宗翰等措画朕亲巡已久功亦大就所获州郡正须绥抚是用还都八月中旬可至春州汝率内戚迎我若至

豹子崖尤善八月乙未会于浑河北戊申太祖崩九月乙卯葬太祖于宫城西古伦贝勒杲郅王昂宗峻宗干率宗亲百官请正帝位不许固请亦不许宗干率诸弟以赭袍被体寘玺怀中丙辰即皇帝位【恭读御制全韵讨题金太宗云天辅草创天会继灭辽北朝归掌握南征徽钦就拘縶高宗称侄惭不觉其势颇可成一统未乘时实失商榷武功既昭修以文劝农议礼并制乐传位熙宗继太祖大公量更人难学按金太宗朝以舍音宗干知国政以宗翰宗望总戎事武功文德克成经国规模而传位熙宗使太祖世嗣不失正绪可谓行其所难诚如圣制所谓大公难学也谨录于此】己未告祀天地丙寅大赦改天辅七年为天会元年癸酉发粟赈降人之徙于上京者戊寅诏诸明安赋米给户口在内地匮乏者冬十月壬辰诏以空名宣头百道给西南西北两路都统宗翰以便宜从事十一月命宗望问栋摩罪以其讨张觉败绩也诏谕南京割武朔二州入于宋【按宋史作朔武蔚三州又系太祖所割为天辅七年五月时事俱与此异】贝勒鄂勒博及巴喇伞破走伊实布达于归化己巳徙迁润来隰四州之民于浑州庚午宗望及张觉战于南京大败之张觉奔宋【按金史太祖本纪载张觉五月据城叛是时尚未奔宋也太祖本纪载十一月张觉战败奔宋而宋史载五月太祖殂六月张觉以平州来附失事之实】城中人执其父及二子以献戮之军中壬申张忠嗣张敦固以南京降复叛己卯诏女真人先有附于辽今复虏获者悉从其所欲居而复之其奴婢部曲昔虽逃背今能复归者并听为民十二月辛巳蠲民间贷息诏以咸州以南苏复州以北年谷不登其应输南京军粮免之甲午又诏比闻民间乏食至有鬻其子者其听以丁力等者赎之是日以杲为安班贝勒宗干为古伦贝勒遣李靖如宋告哀

二年春正月庚戌朔以们图珲为阿斯罕贝勒参议或政戊午诏赎同姓人自鬻及典质者癸亥以东京比岁不登诏减田租市租之半甲戌宗翰宗望请勿割山西郡县与宋帝曰是违先帝之命也其速与之夏国奉表称藩以下寨以北阴山以南伊实伊喇部图噜冻西之地与之丙子贻宋书索俘虏叛亡丁丑始自京师至南京每五十里置驿二月诏有盗发辽诸陵者罪死庚寅诏命给宗翰马七百匹田种千石米七千石以赈新附之民乙巳诏谕南京官僚小大之事必关白军帅无得专达朝廷丙午宗翰乞济师诏有司选精兵五千给之丁未命宗望凡南京留守及诸阙员可选勋贤有人望者就注拟之具姓名官阶以闻三月己酉朔命宗望以宋岁币银绢分赐有功将士宗望请选良吏招抚迁润

来隰之民保山砦者又以南京反复凡攻取之计乞与知枢密院事刘彦宗裁决之辛未夏国王李干顺遣使上誓表闰月戊申朔赐夏国誓诏辛巳命置驿上京春泰之间己丑乌库哩达鲁特两部来降以宗翰言罢割山西诸镇与宋舍音袭约尼扎古雅走之获其妻孥羣从及豪族贝勒琿楚等破奚七岩而抚之夏四月己酉以宗翰经略西夏且赏其破辽之功赈上京路西北路降者及新徙岭东之人戊午以实古纳所筑上京新城名会平州乙亥诏赎上京路新迁宁江州户口卖身者六百余人宋遣使来吊丧以高卓佛和等充遗留国信使高兴辅刘兴嗣等充告即位国信使如宋五月癸未诏新降之民诉讼者众今方农时或失田业可俟农隙听决乙巳海兰路军帅完颜呼噜古等言往者岁捕海狗海东青鸦鹘于高丽之境近以二舟往高丽乃尽杀二舟之人帝曰以小故起战争甚非所宜今后非奉命毋辄往栋摩克南京杀都统张敦固秋七月壬午皇子宗峻薨壬辰和硕台言高丽纳吾叛亡增其边备必有异图诏以毋先犯彼或侵略与之从事乙未乌琿部及诸营叛以斋贝勒昱等讨平之八月乙巳朔以贝勒乌哲讷等为贺宋生辰使丁巳六部都统达兰击走扎古雅杀其队将克尔叟博斯呼等又破降骆駝山金源兴中诸军诏增给银牌十冬十月甲辰朔夏国遣使谢誓诏甲子诏发宁江州粟赈泰州民被秋潦者约尼扎古雅率众来降兴中府降丙寅诏有司运米五万石于广宁以给南京润州戍卒命栋摩益兵以备高丽戊辰斡鲁奏辽托卜嘉来奔言耶律达实自称为王辽主从者不过四千户有步骑万余欲趋天德驻伊都谷诏酌事宜毋辄专行十一月癸未栋摩下宜州杀节度使韩庆民癸卯诏以米五万石给达兰实古纳

三年春正月戊子韩资正加尚书左仆射为诸宫都部署二月壬戌罗索奏获辽主诏以赴京丁卯以巴噶城地分授所徙乌库哩德呼纳二部及契丹民三月乙亥阿斯罕贝勒们图琿薨丙子赈奚契丹新附之民辛巳建干元殿斡鲁献传国玺以玛克实来附请授印绶是日赐完颜罗索铁券夏六月庚申以获辽主遣李用和【宋史作李孝和】等充告庆使如宋秋七月壬申禁内外官宗室毋私役百姓八月癸卯斡鲁以辽主至京师甲辰告于太祖庙丙午辽主延禧入见降封海滨王壬子诏有司拣阅善射勇建之士以备宋九月癸巳瓜尔佳萨哈有罪伏诛以图克坦乌里代之冬十月甲辰诏诸将伐宋【按金史天会三年十月诏诸将伐宋而宋史乃云七月河东言聂赫至云中考聂赫在天会二年四月诏经略西夏及是奉诏伐宋则宋人安得以七月至云中先知其意在于宋也弘简录所载与此同宋史有失事实】以杲兼领都

元帅宗翰兼左副元帅完颜希尹为元帅右监军耶律伊都为元帅右都监自西京入太原达兰为六部路都统舍音副之宗望为南京路都统栋摩副之刘彦宗领汉军都统自南京入燕山诏建太祖庙于西京召页噜教授女真字丁巳以栋摩为南京路都统素赫副之宗望为栋摩刘彦宗两军监战壬戌诏曰今大有年无储蓄则何以备饥谨其令牛一具赋粟一石每穆昆为一廩贮之宋易州戍将韩民毅以军降处之蔚州十一月辛卯以张忠嗣权签南京中书枢密院事十二月庚子宗翰下朔州甲辰宗望诸军及宋郭药师张企徽刘舜仁战于白河大破之药师降燕山州县悉平戊申宗翰克代州乙卯中山降丙辰宗望破宋师于真定戊午宗翰围太原伊都破宋河东陕西援兵于汾河北甲子宗望克信德府

四年春正月丁卯朔始朝日戊辰宗弼取汤阴大臭攻下浚州达呼布取黎阳己巳诸军渡河庚午取滑州宗望使吴孝民等入汴问宋取首谋平山叛人张觉及帅臣童贯等宋太上皇帝出奔癸酉诸军围汴甲戌宋使李昫来谢罪且请修好宗望许之戊寅宋增岁币以康王构少宰张邦昌为质誓书称侄大宋皇帝伯大金皇帝癸未诸军解围二月丁酉朔宋将姚平仲以兵四十万夜袭宗望营败之己亥复进师围汴宋使宇文虚中以书来许割太原中山河间三镇地改以肃王枢为质遣康王构归师还壬子以滑浚二州与宋宗翰定威胜军攻下降德府丁巳次泽州海滨王家奴诬其主欲亡去诏诛之三月癸未尼楚赫围太原宗翰还西京夏四月癸卯宗望使宗弼来奏捷乙丑耿守忠等大败宋人于西都谷五月辛未宋种师中以兵出井陘癸酉完颜和尼败之斩师中于阵是日巴尔斯败宋姚古军于隆州谷六月丙申朔高丽国王王楷奉表称藩庚申以宗望为右副元帅秋七月丙寅遣高伯淑等宣谕高丽壬申命大臭以所领渤海军八明安为万户萧仲恭使宋还上宋帝与耶律伊都蜡书八月庚子诏左副元帅宗翰右副元帅宗望伐宋诸将分道出师所至以城降癸丑宗望发保州九月丙寅宗翰克太原执经略使张孝纯己巳复以南京为平州辛未宗望破宋种师闵军于井陘取天威军克真定杀其守李邈冬十一月甲子宗翰自太原趋汴丙寅宗望自真定趋汴戊辰宗翰下威胜军癸酉萨喇达破天井关乙亥宗翰克隆德府和尼渡孟津西京永安军郑州皆降庚辰宗翰克泽州宗望诸军渡河临河大名二县德清军开德府皆下丙戌克怀州是日宗望至汴闰月壬辰朔宋出兵拒战宗望等击败之癸巳宗翰至汴丙辰克汴城辛酉宋主桓出居青城十二月癸亥宋主桓降是日归于汴城庚辰诏所在长吏敦劝农功

五年春正月癸巳宗翰宗望使使以宋降表来上乙未知枢密院事刘彦宗上表请复立赵氏不听丁巳回鹘哈喇汗遣使入贡二月丙寅诏降宋二帝为庶人三月丁酉立宋少宰张邦昌为大楚皇帝割地赐夏国夏四月乙酉克陕西取虢州丙戌以达兰为元帅左监军栋摩为元帅左都监宗翰宗望以宋二帝归初宋主桓降宋将范琼逼上皇皇后皇太子及诸王如青城至是俱北归【按金史载宗翰宗望以宋二帝归而未载皇后皇太子等似于后所载归宋之丧及海陵诛宋宗室数十人诸事毫无原委而宋史乃云金人逼入青城不称范琼逼如金军又失乱臣贼子春秋必诛之道兹谨遵御批通鉴辑览书法补纂】诏哈斯罕诸部与新附人民其在降附之后同姓为婚者离之五月庚寅朔宋康王构即位于归德宋主以张邦昌为太保久之赐死【按宋史康王即位以张邦昌为太保诏称知几达变动在社稷久之以李纲言其僭逆赐死潭州恭读通鉴辑览御批宋高宗于张邦昌非惟不较其僭逆之迹且阴德其拥戴之功其终从窜放特因李纲执持大义知公论所在不得已而行之此真推见隐微万古不易之谕也金史于康王即位下即云宋杀张邦昌于事理殊未清晰今据宋史改叙】罗索降解绛慈隰石河中岢岚宁化保德火山诸城达兰徇地山东下密州达呼下单州广信军降六月庚申诏曰自河之北今既分画宜抚其民毋肆俘掠庚辰右副元帅宗望汉国王宗杰继薨秋七月甲午赐宗翰券书八月丙戌以宗辅为右副元帅诏河北河东郡县职员多阙宜开贡举取士以安新民其南北进士各以所业试之九月丁未诏以内地诸路每耕牛一具赋粟五斗以备歉岁辛亥赐完颜希伊尼楚赫券书栋摩取河间大败宋兵于莫州雄州降达兰克祁州永宁军保州顺安军皆降冬十月宋二帝自燕徙居于中京十二月丙寅右副元帅宗辅伐宋徇地淄青乌凌阿托云败宋将李成于淄州赵州降阿里库徇地浚州败宋兵遂取滑州乙亥西南路都统斡鲁薨

六年春正月丙戌朔宗弼破宋郑宗孟于青州尼楚赫诸军所至克降甲寅宋将马括兵次乐安宗辅击败之闻宋主在维扬以农时还师宗弼败宋兵于河上二月以所克洛阳襄阳颖昌汝郑均房唐邓陈蔡诸处之民迁于河北宗翰复遣罗索攻下京兆同华河中凤翔诸处宋经制副使傅亮以兵降【按宋史河东经制副使傅亮以兵降载在正月金史擒经制使傅亮载在二月经制使经制副使以擒以降二月正月彼此俱异考宗翰破京兆府永兴军时经略使唐重等皆死而傅亮不闻与其难若金史以擒书似兵败见执于傅亮之罪隐而未彰宋史云以

兵降得事之实今据改】三月壬辰命实古纳籍完颜慎思所领诸部及未置明安穆昆户来上己酉达兰下恩州夏五月戊戌伊逊特古斯以本部来附六月己未诏求祖宗遗事达兰遣兵徇下磁州信德府秋七月乙巳宋主遣使奉表请和诏进兵伐之以故宋主父子赴上京八月乙卯罗索败宋兵于华州额特埒破敌于渭水遂取下邽丁丑以故宋主父子素服见太祖庙遂入见于干元殿封其父为昏德公子重昏侯是日告于太祖庙以州郡职员名称及俸给因革诏中外九月辛丑胜额等屡败宋兵乙丑取丹州【按金史载天会六年九月胜额等屡败宋兵取丹州而弘简录载天会三年十二月胜额以三百骑遇中山戍兵三万力战死之彼此互异】冬十月戊寅徙昏德公重昏侯于韩州庚辰宗翰宗辅会于濮伐宋十一月庚寅富察罗索取延安府壬辰赈伊兰路乙未取濮州绥德军降罗索再攻晋宁军十二月丙辰宗弼取开德府丁卯宗辅克大名府呼沙呼败宋兵于巩

七年春正月辛巳吴国王栋摩薨甲午以韩企先同中书门下平章事知枢密院事二月戊辰宋麟府路安抚使折可求以麟府丰三州降【按金史天会七年二月戊辰未麟府路安抚使折可求以麟府丰三州降己巳罗索破晋宁军擒其守徐徽言使降将折可求谕之降宋史于十一月攻晋宁下载徐徽言拒却之知府州折可求以城降月日既与此异而折可求知府州亦非为麟府路安抚使所载俱不同今仍原文而附议之】己巳罗索等破晋宁军其守徐徽言据子城拒战庚午率众溃围走擒之命降将折可求谕之降徽言与其将孙昂及士卒皆不屈乃杀之甲戌诏禁辽代山陵樵采三月壬寅诏军兴以来良人被驱掠者听其父母夫妻子赎之夏四月富察罗索取鄜坊二州五月乙卯巴尔斯等袭宋主于扬州秋九月丙午朔日有食之庚午宗弼败宋兵于睢阳辛未降其城是月曹州降冬十月丙子朔京兆府降丁丑巩州降丁酉阿里当堪大臭破宋师于寿春己亥宋安抚使马世元以城降甲辰庐州降十一月丙辰宗弼取和州壬戌渡江败宋副元帅杜充军于江宁丁卯克江宁十二月丙戌宗弼取湖州丁亥克杭州遣将追宋主于明州越州降戊戌阿里富埒瑋败宋兵于东关遂济曹娥江壬寅败宋兵于高桥宋主入于海

八年春正月丁巳以韩企先为尚书左仆射兼侍中己未阿里富埒瑋克明州执其守臣赵伯谔庚申阿里布色哩页下太平顺昌及濠州是月宋副元帅杜充以其众降二月乙亥宗弼还自杭州庚寅取秀州戊戌取平江汴京乱三月丁卯达达哩平之宗弼及宋韩世忠战于镇江

不利夏四月丙申复战于江甯败之诸军渡江是日阿里布战于拓皋己亥周企战于寿春辛丑罗索战于淳化皆胜之遂克邠州五月癸卯禁私度僧尼及继父继母之男女无相嫁娶戊申诏签河北河东军赎其家属之流寓河南而被俘掠为奴婢者六月壬申遣耶律喀勒扎萧必拉哩等十人分治新附州镇癸酉诏以昏德公六女为宗妇秋七月以皇子右副元帅宗辅经略陕西丁卯帝如南京温汤徙昏德公重昏侯于呼尔哈路九月戊申立刘豫为大齐皇帝世修子礼都大名府辛酉安班贝勒都元帅杲鼐癸亥宗辅等败宋张浚军于富平耀州降乙丑凤翔府降冬十月乙亥帝至自东京甲申以铁骊图噜拉同中书门下平章事诏辽宋官上本国诰命等第换授十一月甲辰宗辅下泾州渭原二州降宋泾原路统制张中孚知镇戎军李彦琦以众降马武等击宋吴玠军于陇州十二月丁丑完颜罗索薨乙酉宗辅败宋刘维辅军壬辰熙州降

九年春正月戊申给海兰路诸穆昆田癸丑以时立爰为侍中知枢密院张忠嗣为宣政殿大学士知三司使事宗弼阿里布抚定巩洮河乐西甯兰廓积石等州泾原熙河两路皆平夏四月己卯诏新徙戍边户有典质亲属奴婢者官为赎之户计其口少者以官奴婢益之使户为四口又乏耕牛者给以官牛别委官劝督田作其续迁戍户在中路者姑止之五月丙午分遣使者诸路劝农六月壬辰赐昏德公重昏侯时服各两袭秋九月己酉和州回鹘执耶律达实之党萨巴德埒托多来献冬十月萨里罕攻下庆阳慕洧以环州降宗弼与宋吴玠战于和尚原不利十一月己未迁赵氏疏属于上京以陕西地赐齐

十年春正月壬子诏士庶之族赋役均之二月庚午赈上京路戍边明安民夏四月庚午以太祖孙亶为安班贝勒皇子宗盘为古伦乌赫哩贝勒宗干为古伦左贝勒左副元帅宗翰为古伦右贝勒兼都元帅右副元帅宗辅为左副元帅庚寅以鸭绿混同江暴涨命赈徙戍边户闰月辛卯分遣呼沙呼等十二人阅诸路丁壮调赴军秋七月甲午赈泰州路戍边户帝如中京九月耶律伊都谋反出奔其党萧高陆伏诛萧特默格自杀冬十月壬寅大赦帝如兴中府十一月癸未萨里罕请取剑外十三州从之部族节度使特古斯捕斩伊都及其诸子函首来献十二月庚子萨里罕克金州帝至自兴中府

十一年春正月丁卯萨里罕败吴玠于饶峰关戊辰取洋州甲戌入兴元府二月己亥元帅府言承诏赈军士请自元帅以下有禄者出钱助给之诏毋取于臣下悉从官给秋八月戊子赵■〈木号〉诬告其父昏德公谋反伏诛【按沂王■〈木号〉以诬告其父被诛真乱臣

贼子之尤然流离至此尚忍而为之诚如通鉴辑览 御批责其家教人心徽钦无所逃其罪也谨识于此】 戊戌诏曰比以军旅未定尝命帅府择人授官今并从朝廷选注冬十一月丙寅赈伊兰路宗弼克和尚原十二月癸未赈海兰路

十二年春正月甲子初改定制度诏中外丙寅如东京二月丁酉萨里罕败宋吴玠军于固镇夏四月至自东京六月甲午以阿里口为元帅右都监

十三年春正月丙午朔日有食之己巳帝崩于明德宫年六十一谥曰文烈皇帝加谥体元应运世德昭功哲惠仁圣文烈皇帝陵曰恭陵

太宗天会十三年

钦定续通志卷四十七

●钦定续通志卷四十八 金纪二

金纪 【二】

熙宗 海陵

○熙宗

熙宗皇帝讳亶本讳哈喇太祖孙景宣皇帝子母富察氏天会十年宗翰宗辅希尹入朝与宗干议以自杲薨后安班贝勒虚位已久哈喇先帝嫡孙当立相与请于太宗者再三乃从之四月庚午诏定为储嗣十三年正月己巳太宗崩庚午即皇帝位二月乙巳追谥太祖后唐古氏曰圣穆皇后费摩氏曰光懿皇后辛酉改葬太祖于和陵三月庚辰谥大行皇帝曰文烈庙号太宗乙酉葬太宗于和陵甲午以宗翰为太保领三省事封晋国王夏四月丙寅昏德公赵佶薨遣使致祭及赙赠五月甲申左副元帅宗辅薨秋九月壬申追尊皇考丰王为景宣皇帝庙号徽宗皇妣富察氏为惠昭皇后戊寅尊太祖后赫舍哩氏太宗后唐古氏皆为太皇太后冬十一月以宗盘为太师乙亥初颁历己卯以完颜希尹为尚书左丞相兼侍中太子少保高庆裔为左丞萧庆为右丞十二月癸亥以京西鹿围赐农民

天会十四年春正月己巳朔帝朝太皇太后于两宫丁丑太皇太后赫舍哩氏崩三月壬午以太保宗翰太师宗盘太傅宗翰并领三省事秋八月丙辰追尊九代祖以下曰皇帝皇后始祖曰景元皇帝庙号始祖后曰明懿皇后德帝曰德皇帝后曰思皇后安帝曰安皇帝后曰节皇后献祖曰定昭皇帝庙号献祖后曰恭靖皇后昭祖曰成襄皇帝庙号昭祖后图克坦氏曰威顺皇后景祖曰惠桓皇帝庙号景祖后唐古氏曰

昭肃皇后世祖曰圣肃皇帝庙号世祖后纳喇氏曰翼简皇后肃宗曰穆宪皇帝庙号肃宗后富察氏曰靖宣皇后穆宗曰章顺孝平皇帝庙号穆宗后乌库哩氏曰贞惠皇后康宗曰献敏恭简皇帝庙号康宗后唐古氏曰敬僖皇后【按金史熙宗天会十四年追尊九代帝后而未载谥号以已见于世纪及后妃传也兹既删去世纪而后妃传又始自太祖圣穆皇后故补载九代谥号于此】定始祖景祖世祖太祖太宗庙皆不祧

十五年春正月癸亥朔帝朝太皇太后于明德宫夏六月庚戌尚书左丞高庆裔转运使刘思有罪伏诛秋七月辛巳太保领三省事晋国王宗翰薨冬十月乙卯以达兰为左副元帅封鲁国王宗弼右副元帅封藩王知枢密院事兼侍中时立爱致仕十一月丙午废齐国降封刘豫为蜀王置行台尚书省于汴十二月癸未诏改明年为天眷元年大赦命韩昉耶律绍文等编修国史以勛为尚书左丞同中书门下平章事徙蜀王刘豫于临潢府

天眷元年春正月戊子朔帝朝明德宫颁女真小字二月壬戌帝如约罗春水乙丑幸天开殿己巳诏罢拉林水混同江护遼地与民耕牧三月庚寅以禁苑隙地分给百姓夏四月丁卯命少府监卢彦伦营建宫室止从俭素壬午朝享于天元殿五月己亥诏以经义词赋两科取士六月戊午帝至自天开殿秋七月壬寅左丞相希尹罢八月甲寅朔颁行官制【按大金国志载天会十三年五月改定官制与此年月并异考金史百官志仅载熙宗定官制而未详年月今仍本纪原文】己卯以河南地与宋以右司侍郎张通古等使江南以京师为上京府曰会宁旧上京为北京九月乙未诏百官诰命女真契丹汉人各用本字渤海同汉人丁酉改燕京枢密院为行台尚书省甲辰以奕为平章政事冬十月甲寅朔以李德固为参知政事己巳始禁亲王以下佩刀入宫辛未定封国制癸酉以宗隽为尚书左丞相兼侍中封陈王十一月丙辰以康宗以上画像毕奠献于天元殿十二月癸亥新宫成丁丑立贵妃费摩氏为皇后

二年春正月以宗隽为太保领三省事进封兗国王完颜希尹复为尚书左丞相兼侍中二月乙未帝如天开殿三月丙辰命百官详定制夏四月甲戌百官朝参初用朝服己卯宋遣使谢河南地五月乙巳帝至自天开殿六月己酉朔初御冠服秋七月辛巳宗盘宗隽谋反伏诛丙戌以宗弼为都元帅进封越国王己丑以达兰为行台左丞相杜充为行台右丞相萧宝耶律晖行台平章政事甲午咸州详袞沂王晕坐与宗盘谋反伏诛辛丑以宗干为太师领三省如故进封梁宋国王八月辛亥复诛反者达

兰及翼王呼兰等九月戊寅朔降封太宗诸子丙申初
居新宫立太祖原庙于庆元宫壬寅宋遣王伦等乞归父丧及母韦氏等拘伦不遣冬十
二月豫国公昱薨

三年春正月以宗弼领行台尚书省事夏四月乙巳朔温都思忠廉问诸路得廉吏
杜遵晦等百二十四人各进一阶贪吏张轸等二十一
人皆罢之癸丑蜀国公完颜尼楚赫薨五月诏复取河南陕西地 【按大金国志载达兰
废伪齐乃议以河南陕西地归宋时乌珠不能力争
及达兰诛乌珠得政决欲败盟天眷三年五月诏复取河南陕西地盖从乌珠之请也】
宗弼以兵自黎阳趋汴 【按续通鉴纲目载乌珠以
兵自黎阳趋汴萨里罕出河中趋陕西是分两道进兵也与此正同大金国志载分四道
南征乌珠命聂哱贝勒出山东萨里罕侵陕右李成侵
河南自率精兵十余万趋汴是别出聂哱李成二军矣宋史亦载金人败盟乌珠等分四
道来攻附考】 萨里罕出河中趋陕西六月诏使决西
京囚秋七月癸卯朔日有食之乙卯宗弼奏河南陕西捷 【按金史载天眷三年七月宗
弼遣奏河南陕西捷八月诏抚谕陕西五路又载九
月宗弼来朝十二月上言宋将岳飞张俊韩世忠率师渡江诏命击之考续通鉴纲目及
大金国志与宋史所载宗弼一军已捷河南而萨里罕
自河中渡河克永兴军后至凤翔为姚仲所败攻泾州为田晟所败是陕西犹未告捷至
乌珠与刘锜战败于顺昌遂还汴京亦无九月入朝之
事又案宋史载七月乌珠与宋岳飞战于郾城大金国志载乌珠自顺昌败后及秋再提
兵与岳飞战至朱仙镇飞得班师诏而还则岳飞亦无
至十二月乃渡江之事且是时两国之兵无日不战又何俟上书而诏命击之恐金史不
无误载】 丁卯诏文武官五品以上致仕给俸禄之半
八月辛巳诏抚谕陕西五路九月戊申帝至燕京己酉亲飨太祖庙癸亥杀左丞相完颜
希尹等冬十一月癸丑以孔子四十九代孙璠袭封衍
圣公癸亥以萧仲恭为尚书右丞昂为平章政事十二月己亥以阿里布为左副元帅萨
里罕为右副元帅

皇统元年春正月庚戌羣臣上尊号初御袞冕谢太庙大赦改元己未夏国请置榷
场许之二月宗弼克庐州乙酉改封海滨王耶律延禧
为豫王追封昏德公赵佶为天水郡王 【按昏德公已薨于天会十三年四月此处不得
统云改封考续通鉴纲目载宋高宗绍兴十一年金
追封昏德公为天水郡王封重昏侯为天水郡公即金皇统元年也兹据改】 封重昏侯
赵桓为天水郡公戊午帝亲祭孔子庙北面再拜退谓
侍臣曰孔子虽无位其道可尊万世景仰可不致敬乎夏四月丙子以韩昉参知政事辛

已宗弼请伐江南从之五月己酉太师领三省事梁宋
国王宗干薨六月甲午纪王宗强薨秋七月癸卯以景宣皇帝忌辰命尚食彻肉丙午以
宗弼为尚书左丞相兼侍中九月戊申诏赐鳏寡孤独
不能自存者人绢二匹絮三斤宗弼伐宋渡淮以书让宋宋复书乞罢兵宗弼以便宜画
淮为界冬十二月天水郡公赵桓乞本品俸诏赙济之

二年春二月甲戌赈熙河路辛卯宋使曹勋来许岁币银绢二十五万两匹画淮为
界世世子孙永守誓言壬辰以皇子生赦中外 【金
史皇子济安生在是年二月大金国志则在三年六月】 三月丙午以宗弼为太傅丙辰
遣左宣徽使刘箬以袞冕圭册册宋康王为帝归宋帝
母韦氏及天水郡王并妻郑氏宋帝故妻邢氏丧于江南戊午立子济安为皇太子丙寅
以臣宋告中外秋七月丁酉赐宗弼金券八月丁卯诏
归宋使朱弁张邵洪皓 【大金国志作三年六月】 复太宗子呼噜为王赈陕西冬十
一月甲寅平章政事漆水郡王昂薨追封郢王 【按
昂本传载皇统二年封郢王是岁薨此云追封郢王所载互异】 十二月甲申皇太子济
安薨

三年春三月辛卯以勛为平章政事宗宪为尚书左丞丁酉太皇太后唐古氏崩己
酉封子道济为魏王夏五月甲申初立太庙社稷冬十
二月癸未朔日有食之

四年春正月己未以宋使王伦为平州转运使既受命复辞诛之夏六月辛巳朔日
有食之秋七月庚午建原庙于东京八月癸未杀魏王
道济九月乙酉帝如东京壬子畋于沙河冬十月乙卯遣使祭辽主陵十一月赎陕西蒲
解汝蔡等处流民典雇为奴婢者

五年夏六月乙亥朔日有食之冬十月辛卯增谥太祖十二月戊申增谥始祖以下
十帝及太宗徽宗

六年春正月壬申封太祖诸孙为王庚寅以边地赐夏国壬辰如春水三月壬申以
阿里布为行台右丞相夏四月庚子朔以宗固为太保
右丞相兼中书令戊午行台右丞相阿里布薨五月辛卯以刘箬为行台右丞相六月杀
宇文虚中及高士谈是岁遣钮祜禄罕努招耶律达实
被害

七年春正月癸未以西京鹿囿为民田夏四月戊午宴于便殿杀户部尚书宗礼六
月丁酉杀横海军节度使田穀左司郎中奚毅翰林待
制邢具瞻及王植高凤廷王效赵益兴龚夷鉴等秋九月太保右丞相宗固薨以都元帅
宗弼为太师领三省事都元帅行台尚书省事如故迁
改平章政事勛及秘书监萧肄等职冬十一月癸酉以布萨达斡为御史大夫癸未以宗

宪为行台平章政事同判大宗正事亮为尚书左丞十二月戊午以秉德为参知政事

八年夏四月戊子朔日有食之辛丑遣参知政事秉德等廉察官吏六月乙卯以萧仲恭为行台左丞相亮为平章政事唐古辩为尚书左丞秋七月乙亥以阿噶岱为御史大夫戊寅以唐古辩奉职不仅杖之八月庚子迁尚书左丞相勳等职闰月丙寅太庙成九月丙申以禀为尚书左丞冬十月辛酉太师领三省事都元帅越国王宗弼薨【据大金国志作皇统七年】十一月左丞相宗贤等言州郡长吏当并用本国

人帝曰四海之内皆朕臣子若分别待之岂能致一自今本国及诸色人量才通用之辛丑以宗贤为左副元帅亮为尚书左丞相兼侍中秉德为平章政事庚戌宗贤复为太保左丞相左副元帅如故十二月乙卯以萧仲恭为太傅领三省事亮为尚书右丞相乙亥以宗贤为太师领三省事兼都元帅

九年春正月戊戌以勳为太师领三省事充为尚书左丞相亮兼都元帅壬寅左丞相充薨丙午以亮为左丞相宗本为尚书右丞相宗敏为都元帅宗贤为左副元帅兼西京留守己酉宗贤复为太保领三省事二月甲寅唐古辩复为尚书左丞禀为行台平章政事三月癸未朔日有食之辛丑以宗本为尚书右丞相兼中书令亮为太保领三省事夏五月戊子以天变肆赦杀草诏翰林学士张钧是日曲赦上京囚庚寅出亮领行台尚书省事戊申杀宿直将军萧荣秋八月以刘箐为司空行台右丞相如故杖平章政事秉德杀左司郎中萨哈九月丙申以亮复为平章政事戊戌以宗本为太保领三省事宗敏领行台尚书省事秉德为尚书左丞相刘箐为平章政事庚子以宗甫为参知政事冬十月乙丑杀北京留守胙王元及弟安武军节度使扎拉左卫将军塔斯大赦癸酉以翰林学士京为御史大夫十一月癸未杀皇后费摩氏召胙王妃萨满入宫戊子杀故邓王子阿兰达兰癸巳帝猎于和罗温图瑋遣使杀德妃乌库哩氏及瓜尔佳氏张氏十二月己酉朔帝至自猎所丙辰杀妃费摩氏于寝殿丁巳平章政事亮与驸马唐古辩寝殿实达尔大兴国护卫十人长呼图额呼楚克等作乱帝崩年三十一亮降帝为东昏王大定初追谥曰武灵皇帝加谥弘基纘武庄靖孝成皇帝庙号熙宗陵曰思陵

熙宗天会二年【仍太宗年号】天眷三年皇统九年凡十四年

○废帝海陵

废帝海陵庶人亮字符功本名都古尔讷辽王宗幹第二子也母大氏初为奉国上将军赴梁王宗弼军前任使以为行军万户迁骠骑上

将军皇统四年加龙虎卫上将军为中京留守迁光禄大夫为人僿急多猜忌残忍任数初熙宗以太祖嫡孙嗣位亮意以为宗干太祖长子而已亦太祖孙遂怀觊觎七年拜尚书右丞八年拜右丞相九年正月兼都元帅熙宗使实达尔大兴国赐亮生日悼后附赐礼物熙宗不悦杖兴国追其赐物亮由此不自安三月拜太保领三省事益邀求人誉引用势望子孙结其欢心学士张钧草诏忤旨熙宗问谁使为之左丞相宗贤以太保对熙宗不悦遂出领行台尚书省事至良乡召还亮大恐既至复为平章政事由是益危迫熙宗尝以事杖唐古辩及秉德二人怀怨望乃与大理卿乌达同谋废立令乌达以所谋告亮【按金史载辩与秉德以事被杖而辩与乌达谋废立未载秉德与谋又载乌达先以所谋告亮是辩亦不与知而为乌达私意也下载他日亮问辩若举大事云云是所问者非以谋来告之人未免突然考弘简录载秉德辩与乌达三人同谋废立令乌达先告亮于事理较合今改辑】他日亮问辩若举大事谁可立者辩以胙王常胜对问其次以邓王子阿兰对亮谓阿兰属疏安得立辩曰公岂有意邪亮曰果不得已舍我其谁遂旦夕相与密谋护卫将军塔斯疑之以告悼后曰辩等每相聚语窃疑之后以告熙宗熙宗召辩曰尔与亮谋何事将如我何杖之会河南兵士孙进自称皇弟熙宗有弟常胜扎拉亮乘此构之熙宗使塔斯鞫之无状亮以塔斯鞫不以实俱杀之护卫十人长布萨呼图旧受宗干恩图克坦额呼楚克与亮姻家大兴国给事寝殿夜从主者取符钥归家以为常兴国尝以李老僧属亮得为尚书省令史故使李老僧结兴国为内应十二月丁巳布萨呼图额呼楚克当夜直兴国尝以钥启门纳亮及秉德辩乌达图克坦贞李老僧等入至寝殿遂弑熙宗秉德等奉海陵坐【按金史于此云秉德等未有所属考上文辩与亮问答既有公岂有意及舍我其谁之语则其意久属于亮且至熙宗寝殿之时亮身与俱是固显为首谋何云秉德等未有所属乃俟呼图决议也前后未免矛盾弘简录直载秉德等奉亮坐罗拜称万岁深合情实今改辑】罗拜称万岁诈以熙宗欲议立后召大臣遂杀曹国王宗敏左丞相宗贤是日以秉德为左丞相兼侍中左副元帅辩为右丞相兼中书令乌达为平章政事呼图为左副点检额呼楚克为右副点检贞为左卫将军兴国为广宁尹太师领三省事勛等进爵增秩大赦改元为天德元年甲子召秉德辩乌达呼图额呼楚克兴国六人赐誓券【按兴国为广宁尹赐誓券后金史无所载而大金国志载兴国别名为梁汉臣天德二年七月除右丞相凡海陵迁燕营汴伐宋皆汉臣先启其谋又据续通鉴纲目载海陵南侵败于

采石斩梁汉臣率其众趋扬州是兴国至正隆末乃被诛也】 丙寅以刘麟为参知政事
乙亥追谥皇考太师宪古弘道文昭武烈章考睿明皇
帝庙号德宗

二年春正月以萧裕为秘书监癸巳尊嫡母图克坦氏及母大氏皆为皇太后名图
克坦氏宫曰永寿大氏宫曰永宁乙巳诏以七事布中
外励官守务农时慎刑罚扬侧陋恤穷民节财用审才实帝每饰情貌以御臣下取军士
粝饭食之以敝衾覆衣辄服补缀令记注官见之二月
戊申朔封子元寿为崇王戊辰羣臣上尊号曰法天膺运睿武宣文大明圣孝皇帝三月
丙戌以弟兗为司徒兼都元帅夏四月戊午杀太傅领
三省事宗本尚书左丞相唐古辩判大宗正府事宗美遣使杀领行台尚书省事秉德东
京留守宗懿北京留守卞及太宗子孙七十余人周王
宗翰子孙三十余人诸宗室五十余人司徒兗左丞宗义及秘书监萧裕等屡加迁改有
差宋夏高丽各遣使贺即位及受尊号秋九月甲午立
惠妃图克坦氏为皇后冬十月辛未杀太皇太妃萧氏及其子任王威赫使使杀行台左
丞相左副元帅萨里罕于汴并杀平章政事宗义前工
部尚书穆里延御史大夫宗安皆夷其族以魏王威泰之孙呼尔察好修饰亦族之十一
月以图克坦恭为平章政事张浩为尚书右丞张通古
为尚书左丞戊子以十二事戒约官吏帝每与近臣燕语辄引古昔贤君以自况显贵大
臣使进直言十二月癸卯朔诏去羣臣所上尊号癸丑
立太祖射碑于赫舍哩部中帝及皇后致奠于碑下己未罢行台尚书省改都元帅府为
枢密院以兗为枢密使昂为枢密副使

三年春正月丁亥初造镫山于宫中甲午初置国子监谓御史大夫赵资福曰汝等
多徇私情未闻有所弹劾朕甚不取自今百官有不法
者必当举劾无惮权贵乙未帝猎于近郊二月丁巳还宫三月诏广燕城建宫室夏四月
丙午诏迁都燕京辛酉有司图上燕城营建制度阴阳
五姓所宜诏无拘泥丙寅罢岁贡鹰隼及皇统闲苑中所养禽兽沂州男子吴真犯法当
死有司以其母老疾无侍为请命官与养济着为令闰
月辛未朔命尚书右丞张浩调选燕京丙子命大官常膳惟进鱼肉旧贡鹅鸭等悉罢之
归德军节度使阿里布以撤官舍材木构私第赐死戊
戌诏朝官称疾不治事者尚书省令监察御史与太医同诊视无实者坐之五月纳所杀
诸宗室之妻于宫中六月丙子杀太府监完颜富鲁宋
遣巫伋等祈请山陵 【按金史载宋遣使祈请山陵未载充祈请使人姓名考宋史绍兴
二十一年二月遣巫伋等为金国祈请使是为巫伋
等无疑然止载请归渊圣皇帝及皇族增加帝号等事未言请山陵据续通鉴纲目亦止

载其请迎靖康帝被海陵诘问仍唯唯而退未载其复
请山陵惟大金国志载海陵问祈请何事伋首言乞修奉陵寝及迎靖康帝归是山陵固
属兼请而金史止载其祈请山陵余俱不载盖以请迎
靖康一闻海陵不知归后何处顿放之诘遂唯唯而退是其请本非诚心伏读通鉴辑览
御批高宗事讎忘亲有所弗顾作史者因不予以
请迎靖康而仅载其请山陵也谨录识之】 不许冬十月杀兰子山明安萧拱十二月杖
寿盩县主苏尼是岁子崇王元寿薨

四年春正月羣臣请立皇太子从之戊戌初定东宫官属立捕盗赏格癸亥朝谒世
祖太祖太宗德宗陵甲子还宫二月丁卯立子光英为
皇太子甲戌如燕京夏四月丙寅朔诏今岁河南北选人并赴中京铨注六月戊寅权超
泰部明安纳延伏诛秋七月命崇义军节度使乌达之
妻唐古定格杀其夫而纳之九月甲午次中京杀太府少监刘景十月壬戌朔使使奉迁
太庙神主于中京杀太祖长公主乌噜杖罢其夫平章
政事图克坦恭封其侍婢呼达为国夫人冬十一月戊戌以李德固为平章政事辛丑买
珠于乌尔古德呼勒部及扶余路禁百姓私相贸易仍
调两路民夫采珠戊申以前平章政事图克坦恭为司徒十二月甲子斩妄人敲僊于中
中市庚寅太尉领三省事枢密使充薨

贞元元年春正月辛卯朔帝在中京不视朝诏有司受宋高丽夏回纥贡献丙午以
中京留守高楨为御史大夫二月庚申帝自中京如燕
京三月辛亥帝至燕京初备法驾甲寅亲选良家子百三十余人充后宫乙卯以迁都诏
中外改元改燕京为中都府曰大兴汴京为南京中京
为北京司徒图克坦恭以下各迁改有差夏四月戊寅永甯皇太后崩五月辛卯杀弟西
京留守博恰西京兵马完颜穆喇干编修官圆福努通
进伯特六月乙丑以耶律恕为参知政事秋七月戊子朔征先所赐朝官京城隙地冬十
月丙子命内外官闻大功以上丧止给当日假父母丧
给假三日十一月瑶池殿成庚戌以昂为左丞相布萨思恭为枢密使十二月戊午赐贵
妃唐古定格家奴孙梅进士及第辛未封所纳皇叔曹
国王宗敏妃阿兰为昭妃丙子贵妃唐古定格坐奸赐死闰月乙酉朔杀护卫特默格癸
巳定社稷制度癸卯以图克坦恭为太师领三省事如
故命西京路统军达兰西北路招讨萧怀忠临潢府总管马和尚乌尔古德呼勒司招讨
舍音等北巡

二年春正月庚申尚书右丞相萧裕等谋反伏诛二月甲申朔迁改平章政事张浩
以下有差三月丙戌幸大兴府遣荐含桃于衍庆宫夏
五月癸丑朔日有食之丁丑太原尹图克坦额呼楚克伏诛复命其子珠苏尔乘传焚其

骨擲水中秋八月丙午以昂去衣杖具弟妇命杖之九

月己未常武殿击鞠令百姓纵观辛酉以萧曠为参知政事冬十月庚辰朔杀广宁尹韩王亨

三年春正月辛酉以大臭为太傅领三省事二月壬午罢张中孚迁改左丞相昂等有差三月壬子杖左丞相张浩平章政事张暉及僧法

宝乙卯命以大房山云峰寺为山陵建行宫其麓夏五月丁未朔日有食之癸丑南京大内火乙卯命判大宗正事京等如上京奉迁太祖太宗

梓宫丙寅如大房山营山陵六月丙戌登宝昌门观角抵百姓纵观乙未命右丞相布萨思恭大宗正丞哈布尔如上京奉迁德宗梓宫及迎永

寿宫皇太后秋七月辛酉如大房山杖提举营造官耶律安礼等乙亥还宫八月甲申启土赐役夫人绢一匹甲午遣平章政事萧玉迎祭祖宗

梓宫于广宁乙未增置教坊人数九月戊申平章政事张暉迎祭梓宫于宗州丁卯帝亲迎梓宫及皇太后于沙流河庚午猎亲射麋以荐梓宫

壬申至自沙流河冬十月丙子皇太后至中都己卯梓宫至中都十一月戊申山陵礼成甲寅诏内外大小职官覃迁一重贞元四年租税并与

放免军士久于屯戍不经替换者人赐绢三匹银三两丁卯奉安神主于太庙羣臣称贺十二月乙未帝朝太后于寿康宫

正隆元年春正月己酉羣臣奉上尊号帝自九月废朝常数月不出有急奏召左右司郎中省于卧内庚戌始视朝乙丑观角抵戏罢中书

门下省以温都思忠为尚书令昂为太保布萨思恭为太尉枢密使左丞刘萼右丞萧曠罢蔡松年为尚书右丞枢密副使萧怀忠罢耶律安礼

为枢密副使平章政事萧玉为右丞相平章政事张暉罢不置平章政事官二月癸酉朔改元大赦庚辰御宣华门观迎佛赐诸寺僧银绢辛巳

改定内外诸司印记庚子谒山陵辛丑还都三月壬寅朔始定正隆官制并朝参等格夏五月辛亥修容安氏合女御为妖所凭舞噪宫中命杀

之六月庚辰天水郡公赵桓薨丙戌以蔡松年为左丞耶律安礼为右丞驸马都尉乌库哩当堪为枢密副使秋七月己酉命太保昂如上京奉

迁始祖以下梓宫八月丁丑如大房山行视山陵冬十月乙酉葬始祖以下十帝于大房山丁酉还宫闰月己亥朔山陵礼成羣臣称贺庚寅杖

右丞相萧玉等

二年春正月帝朝太后于寿康宫 【按弘简录载正隆二年正月帝朝太后盖海陵饰情为孝礼貌颇勤自贞元三年十月迎至寿康宫

十二月朝太后后不应至正隆四年始再朝也金史于正隆二年缺载今补辑】 庚寅命韩锡同知宣徽院事以不谢杖之夺所授官二月癸卯

改定亲王以下封爵等第命置局造取存亡诰身存者二品之上死者一品参酌削降公私文书但有王爵字者皆立限毁抹虽坟墓碑志并发而毁之夏四月戊戌追降景宣皇帝为辽王秋八月癸卯始置登闻院诏尚书省凡事理有不当者许投状类奏览讫付御史台鞫问甲寅罢上京留守司九月戊子罢护驾车置龙翔虎步军罢尚书省文资令史出为外官冬十月壬寅命会灵府毁旧宫殿诸大族第宅及储庆寺仍夷其址而耕种之丁未禁卖古器入他境乙卯初铸铜钱十二月己亥以赫舍哩良弼为参知政事

三年春正月宋贺正使孙道夫陛辞帝命敬嗣晖谕责宋以事上国不诚及纳匿叛亡沿边修备诸事【按弘简录载宋使陛辞海陵谕责之云云考是年九月迁中都屯军明安于南京营建南京宫室次年造战船调诸路军谕宰臣以伐宋事则迁汴伐宋久蓄此心于宋使陛辞而责之盖先示之以怒也金史失载今补辑】丙寅子舒苏鄂博死杀太医副使谢友正及乳母等夏四月丙辰以北京留守张暉为枢密副使秋七月庚申封子广阳为滕王寻薨甲申迁改右丞相萧玉等职九月辛巳迁中都屯军一明安于南京遣吏部尚书李惇等分地安置冬十一月癸亥诏有司勤政安民癸未诏左丞相张浩参知政事敬嗣晖营建南京宫室时运一木费至千万以五百人牵一车宫成饰以黄金五采闲之金属飞空乱如霰雪计一殿已巨亿万成而复毁务极华丽十二月乙卯以张暉为尚书左丞归德尹致仕高昭和硕起为枢密副使

四年春正月丙辰朔帝朝太后于寿康宫庚申更定私相越境法并论死辛酉罢凤翔唐邓颖蔡巩洮胶西诸榷场置场泗州二月己丑以许霖为御史大夫丁未修中都城造战船于通州诏谕宰臣以伐宋事调诸路明安穆昆军年二十以上五十以下者皆籍之虽亲老丁多亦不许留侍三月丙辰朔遣兵部尚书萧恭经尽夏国边界遣使分诣诸道总管府督造兵器夏四月庚戌诏诸路旧贮军器并致于中都时方建宫室于南京又中都与四方所造军器材用皆赋于民箭翎一尺至千钱百姓椎牛以供筋革至于乌鹊狗彘无不被害者辛亥张暉许霖罢以图克坦贞为枢密副使秋八月诏诸路调马以户口为差计五十六万余匹富室有至六十匹者仍令户自养饲以俟冬十月观造船于通州赐尚书右丞赫舍哩良弼枢密副使图克坦贞佩刀入宫十二月太医使祈宰上书谏伐宋杀之

五年春二月甲戌遣引进使高植刑部郎中海古勒分道监视所获盗贼并凌迟处死或锯灼去皮截手足仍戒屯戍千户穆昆等后有获

者并处死总管府官亦决罚三月辛巳东海县民张旺徐元等反遣都水监徐文等率舟师九百浮海讨之谕以朕意不在一邑将试舟师耳庚子以萧玉为御史大夫司徒如故赫舍哩良弼为左丞致仕刘长言起为右丞夏四月庚戌昭妃富察阿里库有罪赐死甲寅宿州防御使耶律翼使宋失体杖二百除名六月徐文等破贼张旺徐元东海平秋七月癸卯遣使签诸路汉军八月辛亥命榷货务并印造钞引库起赴南京己巳以图克坦永年为枢密副使辛未谒山陵九月己卯还宫冬十月庚午遣护卫完颜布琳等二十四人督捕山东河东河北中都盗贼十一月乙酉命亲军司以所掌付大兴府置左右骁骑都副指挥使隶点检司步军都指挥使隶宣徽院十二月戊辰禁朝官饮酒犯者死三国人使燕饮者罪

六年春正月丁丑判太宗正图克坦贞益都尹京安武军节度使爽金吾卫上将军阿苏饮酒以近属故杖贞七十余皆杖百壬午以萧玉为大兴尹赫舍哩志寔为枢密副使癸丑命参知政事李通谕宋使徐度等曰朕昔从梁王军乐南京风土常欲巡幸今营缮将毕功期以二月末先往河南帝王巡守自古有之以淮右多隙地欲校猎其闲从兵不踰万人祖宗陵庙在此不能久留汝等归告汝主令有司宣谕朕意使淮南之民无怀疑惧庚子诏自中都至河南府所过州县调从猎骑士二千辛丑杀富察阿固岱女彻辰二月乙巳杖卫王襄之妃及左宣徽使许霖甲寅以李通为尚书右丞庚申征诸道兵及诸路水手得三万人运战船癸亥发中都丙寅次安肃州三月己卯改河南北邙山为太平山称旧名者以违制论丁亥将至获嘉有男子上书言事斩之癸巳次河南府诏内地诸明安赴山后牧马俟秋并发弟兖之妻乌雅氏有罪赐死诛其弟南京兵马副都指挥使实讷夏四月丁未诏百官先赴南京治事尚书省枢密院太宗正府劝农司太府少府皆从行吏户兵刑部四方馆都水监大理司官各留一员以签书枢密院事高景山右司员外郎王全等为贺宋生日使【按是时海陵意欲南侵乃使王全至宋授辞诋责以激宋怒考王全本宋人直呼故主之名悖逆固甚而高宗不敢害之已早为海陵所料则其庸懦委靡全无人心诚如通鉴辑览御批罔知自厉不能出人掌握也谨录识之】戊申诏汝州百五十里内州县量遣商贾赴温汤置市诏有司移问宋人蔡颖寿诸州对境创置堡戍者庚戌发河南府契丹本布伏道左自陈破东海贼有功为李惟忠所抑立命斩之丁卯次温汤诫扈从毋辄过汝水遣使征诸道兵五月契丹诸部反六月癸卯命枢密使布萨思恭西京留守萧怀忠将兵讨之帝自汝州如南京壬

戊次南京近郊左丞相张浩率百官迎谒癸亥备法驾
入南京秋七月丁亥左丞相张浩等迁改有差己丑赐从驾从行从军及千户穆昆钱帛
大括天下骡马杀亡辽耶律氏宋赵氏凡百三十余人
八月壬寅单州贼杜奎据城叛遣都点检耶律湛右骁骑副都指挥使大盘讨之以白彦
恭赫舍哩志完颜古云唐古布古德等讨契丹癸丑
以谏伐宋弑皇太后图克坦氏于宁德宫并杀侍婢等十余人癸亥杀右将军萧图喇护
卫十人长鄂勒博族枢密使布萨思恭北京留守萧曠
西京留守萧怀忠杖尚书令张浩左丞相萧玉甲子封所幸太后侍婢高福娘为郾国夫
人九月庚午朔以昂为枢密使太保如故戊子杀前寿
州刺史摩啰欢庚寅大名府贼王九据城叛众至数万所至盗贼蜂起大者连城邑小者
保山泽或以十数骑张旗帜而行官军莫敢近帝又恶
闻盗贼事言者辄罪之帝自将三十二总管兵伐宋【按金史载海陵自将三十二总管
伐宋而大金国志载有细军五千人为亲军未载三
十二总管至海陵军中遇弑据金史云完颜元宜等逆谋而大金国志作耶律劝农彼此
互异】进自寿春以昂为左领军大都督李通副之赫
舍哩良弼为右领军大都督乌雅富埒瑋副之图克坦贞为左监军图克坦永年为右监
军许霖为左都监富察鄂伦为右都监召诸将授方略
谕母淹延岁月又命苏保衡为浙东道水军都统制郑嘉副之由海道径趋临安刘萼为
汉南道行营兵马都统制布萨乌哲副之进自蔡州图
克坦喀齐喀为西蜀道行营兵马都统制张中彦副之由凤翔取散关驻军以俟后命武
胜武平武捷三军为前锋图克坦贞别将兵二万入淮
阴甲午帝发南京诏皇后及太子光英居守尚书令张浩左丞相萧玉参知政事敬嗣晖
留治省事时将士自军中亡归者相属于道哈斯罕明
安福寿东京穆昆金住等始授甲于大名即举部亡归从者众至万余皆公言于路曰我
辈今往东京立新天子矣冬十月乙巳东京留守曹国
公乌禄即位于辽阳下诏数海陵罪数十事丁未大军渡淮刘萼取通化军蒋州信阳军
图克坦贞败宋将王权于盱眙进取扬州前锋军至段
寨宋戍兵皆遁去败宋兵于蔚子桥及巢县至和州王权夜以兵来袭击却之癸亥帝次
和州图克坦喀齐喀驻散关十一月庚午帝始闻曹国
公东京即位事以完颜元宜为浙西道兵马都统制郭安国副之帝驻军江北遣武平总
管阿林渡江至南岸失利帝还和州遂进兵扬州甲午
会舟师于瓜洲渡期以明日渡江乙未浙西兵马都统制完颜元宜等反帝遇弑崩年四
十大定二年降封为海陵郡王谥曰炆后降为海陵庶
人

海陵天德四年贞元三年正隆六年凡十三年

钦定续通志卷四十八

●钦定续通志卷四十九 金纪三

金纪 【三】

世宗

○世宗

世宗皇帝讳雍本讳乌禄又名褒太祖孙睿宗子也母曰贞懿皇后李氏帝性仁孝沈静明达善骑射国人推为第一每出猎耆老皆随而观之皇统初封葛王厯授东京留守进封赵王正隆二年例降封郑国公进封韩国三年再任留守徙封曹国六年五月居贞懿皇后丧是时海陵南伐天下骚动多有反者咸平府穆昆瓜里攻陷韩州据咸平将犯东京八月起复帝为东京留守博索路兵四百来会讨瓜里复得城中子弟愿为兵者数百人帝乃益造兵仗饰器甲以舅李石主留务大谋发众会海陵使博索路总管完颜默音来讨贼以兵属之九月至东京副留守高存福其女在海陵后宫海陵使存福伺帝起居适以造兵器余材造甲数十存福以白海陵遂与推官李彦隆托为击球谋不利存福家人以其谋来告乃止不住帝尝有疾海陵使近习来观动静又使摩啰欢图淮北诸王帝忧之及讨瓜里还至清河遇故吏禄锦自南来具言海陵弑其母及兄子塔纳阿里布枢密使布萨呼图等又曰且遣人来害宗室兄弟矣帝益惧李石劝帝早图之于是以议备贼事召官属会清安寺彦隆存福至于座上执而杀之十月辛丑南征万户完颜福寿高忠建卢万嘉努等自山东率兵二万完颜默音自长安率兵五千皆来附丙午官属诸军劝进帝固让良久于是亲告于太祖庙还御宣政殿即皇帝位 【恭读 御制全韵诗题金世宗云劝进协人心即符天命吉以久典外郡民艰故所悉分疆息兵戈休养筹勤恤戒奢崇以俭去文归于质其最可称者毋忘旧为棘詎祇一代然万世胥应述按金自太祖以来用兵无宁岁及海陵无道国内骚然赖世宗之贤勤求治理遂致乂安而南北通好两国之民并受其福至其不忘国俗屡以祖宗为训实堪为万世法 圣制所称真令金世宗之贤百世下犹可想见也谨录识之】 以完颜默音为右副元帅高忠建元帅左监军完颜福寿右监军卢万嘉努显德军节度使丁未大赦改元大定下诏暴海陵罪恶已酉飡将士赐官赏各有差仍给复三年尚书省奏请以从军来者补诸局司承应人及官吏阙员帝曰旧人南征者即还何以处之必不可阙者量用新人可也辛亥以通吉义为参知政事以完颜古云为左副元帅丁巳

出内府金银器物贍军吏壬戌以晏为左丞相癸亥诏谕南京太傅尚书令张浩甲子张玄素上谒诏遣伊喇札巴招契丹诸部为乱者以实图美为元帅右都监十一月己巳朔以晏兼都元帅辛未以李石为参知政事己卯诏调民闲马充军用事毕还主死者给价阿苏璋杀同知中都留守事萨勒札阿苏自称中都留守璋自称同知留守事使厚嘉努等来上表贺辛巳诏幸中都凡宫殿张设毋得增置毋役一夫以扰百姓但谨围禁严出八而已癸未遣左都监乌哲库右都监实图美广益尹布萨欢塔讨契丹诸部甲申追尊皇考幽王为皇帝谥简肃庙号睿宗皇妣富察氏曰钦慈皇后李氏曰贞懿皇后羣臣上尊号乙酉追复东昏王帝号谥武灵庙号闵宗封子萨喇勒为许王呼塔噶为楚王戊子辞谒太祖庙及贞懿皇后园寝己丑如中都次小口使中都留守宗宪先往壬辰次梁鱼务白彦敬与赫舍哩志益以所统军数来上安武军节度使爽来归乙未完颜元宜等弑海陵于扬州先是左司郎中鄂博库白海陵以帝在东京即位改元事海陵拊髀叹曰我固欲灭宋后改元大定兹非天命乎出其书示之即预志改元事也丙申次义州丁酉宋人破陕州防御使折可直降同知防御使事李柔立死之十二月丁巳至中都戊午谒太祖庙己未御贞元殿受羣臣朝壬戌诏军士自东京扈从至京师者复三年同知河闲尹高昌福上书陈便宜帝览之再三诏内外大小职官陈便宜丙寅诏完颜古云规措南边及陕南等路事

二年春正月戊辰朔日有食之庚午帝谓宰相曰进贤退不肖宰相之职也有才能高于己者或惧其分权往往不肯引置同列朕甚不取卿等毋以此为心以致仕翟永固为尚书左丞布萨忠义为右丞都统色克副统完颜布呼坐擅易置中都官吏色克除名布呼削两阶罢之辛未御太和殿宴百官宗戚命妇赐赉有差壬申敕御史台检察六部文移稽留及失当者举劾之乙亥如大房山丙子献飧山陵礼毕欲猎左丞相晏谏曰边事未宁不宜游幸遂还宫因谕晏等曰朕常慕古之帝王虚心受谏卿等有言即言毋緘默以自便辛巳克实等谋反伏诛是日赐扈从明安穆昆甲士下至伊勒希有差赐赉河南将士以前劝农使伊喇元宜为御史大夫赈赐山东百姓粟帛无妻者具姓名以闻庚寅行纳粟补官法遣右副元帅完颜默音率师讨萧斡罕壬辰帝谓宰执曰朕即位来可行之事甚多近日全无敷奏朕深居九重正赖卿等赞襄各思所长以闻又言卿等当参民闲利害及时事之可否以时敷奏不可公余辄从自便优游而已命河北山东陕西等路征南步军并放还家咸平济州军三万入屯京师丙申以完颜思敬与阿林督北边将士二月己亥起大颖为秘书

丞庚子诏梁球等安抚山东百姓招谕盗贼或避贼及
避徭役在他所者并令归业务农有罪并与原免初帝遣辽阳主簿舒穆鲁伊德东京曲
院都监伊喇布格招契丹叛人为白彦敬赫舍哩志宁
所害癸卯并赠镇国上将军令其家各食五品俸仍收录其子甲辰以张浩为太师尚书
令如故伊喇元宜为平章政事辛亥定世袭明安穆昆
迁授格癸亥诏降萧玉敬嗣晖许霖等官放归田里甲寅复用进士为尚书省令史丙辰
舒穆鲁珠德勒等败宋兵于寿安县丁巳富察世杰取
陕州甲子诏都元帅瑄都开府山东经略边事泽州刺史特默格及妻高福娘伏诛闰月
甲戌帝谓宰相曰自今奏事勿有所隐朕于可行者未
尝不从又言臣民上书者多敕尚书省详阅而不即具奏天下将谓朕徒受其言而不行
也其亟条具以闻庚寅诏伊喇元宜泰州路规措边事
三月己亥图克坦喀齐喀败宋将吴璘于德顺州乙巳免南京正隆丁夫贷役钱辛亥以
廉平诫谕中外官吏癸亥诏河南陕西山东良民被虏
为贼者厘正之夏四月辛未降废帝亮为海陵郡王乙亥诏减御膳及宫中食物之半夏
国遣使来贺即位并贺万春节癸未夏使朝辞乞互市
从之己丑以左丞相晏为太尉壬辰下诏征契丹仍谕将士毋得杀已降除奴婢以已虏
为定其亲属使各还其家仍官为赎之五月丁酉朔以
哈斯罕节度使白彦敬为御史大夫戊戌遣高忠建会北征将帅讨契丹己亥以赫舍哩
志宁为元帅右监军右副元帅完颜默音元帅右监军
完颜福寿坐逗留罢之壬寅立楚王允迪为皇太子丁巳费摩阿拉等败宋兵于华州六
月庚午以布萨忠义经略契丹诏出内府金银给征契
丹军用戊寅诏守御居庸关古北口石门关讥察契丹奸细捕获者加官赏庚辰宋遣使
贺即位戊子以赫舍哩良弼为尚书右丞右副元帅庚
寅布萨忠义大败鞑罕于诺尔岭西陷泉获其弟诺尔壬辰以完颜思敬为元帅右都监
秋七月丁酉复取原州丙午宋主传位于子昚丁巳率
宾军士珠勒呼等诬完颜默音子色克寄书其父谋反帝览书曰诬也讯之果诬珠勒呼
伏诛壬戌诏发济州会宁府军在京师者以五千人赴
北京都统府陕西都统璋败宋将吴璘于张义堡八月乙丑朔实默伯穆昆徐列等降左
监军高忠建破奚于栲栳山及招降旁近奚六营有不
降者攻破之壬申万户温特赫阿鲁岱与奚战于古北口不利诏完颜默音等御之癸酉
帝谓宰臣曰百姓犹上书言事卿等位居机要略无献
替可乎夫听断狱讼簿书期会何人不能唐虞之圣犹务兼览博照乃能成治正隆专任
独见故取败亡朕早夜孜孜冀闻说论卿等宜体朕意
诏凡上书言事或为有司所抑许进表以闻丁丑免亲属在宫籍者诏完颜思敬以所部

军与大军会讨斡罕乙酉诏石琚等廉察河北东路丁亥诏御史台曰卿等所劾惟诸局行移稽缓耳此细事也自三公以下官僚善恶邪正当审察之契丹老和尚降辛卯罢诸关征税九月甲午朔完颜默音擒奚明安和卓图克坦喀齐喀大败宋将吴璘于德顺州乙未诏赫舍哩良弼以便宜招抚奚契丹之叛者庚子完颜思敬获契丹斡罕余众悉平壬子以完颜思敬为右副元帅戊午诏思敬经略南边癸亥图克坦喀齐喀等败宋兵于德顺州宗尹复取汝州冬十月丁卯以完颜古云为平章政事戊辰如山陵丙戌以布萨忠义为尚书右丞相赫舍哩志壹为左副元帅戊子改葬睿宗皇帝于景陵大赦己丑诏赫舍哩志壹经略南边壬辰富察世杰持嘉乌苏噶克败宋兵于德顺州十一月癸巳朔诏布萨忠义伐宋丁酉第职官廉能污滥不职各为三等而黜陟之十二月乙酉遣刘仲渊等廉察东京北京等路

三年春正月壬子遣乌居仁赏劳河南军士癸丑复取德顺州二月甲子诏杨伯雄等廉问山西路庚午帝谓宰相曰滦州饥民流散逐食甚可矜恤移于山西富民贍济仍于道路计口给食壬申诏抚谕陕西庚辰太保都元帅瑄都薨丙戌赵景元以乱言伏诛三月丙申中都以南八路蝗诏尚书省遣官捕之壬寅诏魏子平等九人分诣诸路明安穆昆劝农及廉问诏临潢汉民逐食于会宁府济信等州庚戌诏免去年租税夏四月丁卯以李石为御史大夫丁丑诏吏犯赃罪虽赦不叙乙酉赈山西路明安穆昆贫民给六十日粮是月取商虢环州宋所侵一十六州至是皆复五月乙未以重五幸广乐园射柳命皇太子亲王百官皆射胜者赐物有差帝复御常武殿赐宴击球自是岁以为常丙申宋人攻破灵璧虹县己亥罢河南山东陕西统军司置都统副统以完颜守道从皇太子谕以卿任执政所责非轻自今毋从行辛丑以布萨忠义兼都元帅癸卯河南路都统奚托卜嘉叛入于宋丙午宋人攻破宿州辛亥更定出征军逃亡法尚书省请籍军帝以四方甫定民意稍苏而复签军非长策不听赫舍哩志壹复取宿州乙卯中都蝗诏完颜守道按问大兴府捕蝗官六月庚申朔日有食之丙子诏以正隆之末济州路逃回军士为中都官军所邀杀者官为收葬己卯观稼于近郊秋七月庚戌以太子太师宗宪为平章政事以孔总袭封衍圣公八月庚午诏曰祖宗时有劳效未曾迁赏者可奏闻甲戌诏完颜守道招抚契丹余党戊寅诏罢契丹明安穆昆命诸官员年老者许存马一二匹余并括买入官敕唐古德温重九出猎国朝旧俗今扈从军二千能无扰民可严为约束仍以钱万贯分赐之乙酉如大房山丁亥荐享于睿陵戊子还宫九月丁酉

秋猎以重九拜天于北郊丙午诏刘仲诲等廉问车驾所经州县乙卯还宫冬十月甲子大享于太庙癸酉冬猎十一月戊申诏求仕官辄入权要之门追一官仍降除以请求有所馈献及受之者具状奏裁庚戌百官请上尊号不允诏中都平州及饥荒地并经契丹剽掠有质卖妻子者官为收赎癸丑罢贡金线段匹甲寅以赫舍哩良弼为左丞石琚为参知政事十二月丁丑腊猎于近郊以所获荐山陵自是岁以为常诏流民未复业增限招诱辛巳以苏保衡为尚书右丞

四年春正月【按大金国志载大定四年正月诏造总计录盖世宗承海陵疲敝之后虑或有诏赐赈粟等事而仓廩不给故造此总计录以稽察出入多寡为长久之计也】戊子罢路府州元日及万春节贡献丁酉如安州春水壬寅至安州大雪诏扈从人舍民家者人日支钱一百与其主乙巳尚书省奏徐州民曹珪讨贼江志而子弼亦在贼民并杀之法当补二官叙杂班帝以所奏未当进一官正班用之辛亥获头鹅使荐山陵二月丁巳免安州今年赋役及保塞县御城边吴二村凡扈从人尝止其家者亦复一年辛酉猎于高阳之北庚午还都庚辰以北京粟价踊贵诏免今年课甲三月丙戌朔诏免北京岁课缎匹一年壬寅羣臣复请上尊号不允夏四月甲戌出宫女二十一人五月旱敕有司审冤狱禁宫中音乐放球场役夫乙巳诏王竞祷雨于北岳己酉命石琚等于北郊望祭祷雨壬子雨斡罕余党富色克伏诛六月甲寅朔日有食之甲子以雨足命有司祭谢岳镇海渎于北郊庚午初定祭五岳四渎礼辛未观稼于近郊庚辰诏陕西元帅府议入蜀利害以闻秋七月壬辰故卫王襄妃及其子和尚以妖妄伏诛庚子以赫舍哩良弼为平章政事八月甲寅朔以元帅府前请收复旧疆诏秋凉进发赫舍哩志盍再以书贻宋索地及岁币【按续通鉴纲目载宋隆兴元年三月金以书来求海泗唐邓商州之地及岁币八月复以书来求地宋史所载亦同今补辑】戊午以完颜守道为尚书左丞唐古安礼为参知政事壬申帝谓宰臣曰卿每奏皆常事凡治国安民及朝政不便于民者未尝及也如此则宰相之任谁不能之己卯如大房山辛巳致祭于山陵九月癸未朔还都乙酉帝谓宰臣曰势力之家亲识诉讼请属道达官吏每屈法徇情宜一切禁止又言北京懿州临潢等路尝经契丹寇掠平薊二州近复蝗旱百姓艰食有冒鬻为奴者可出内库物赎之乙未幸鹰房主者以鹰隼置内省堂上帝痛责其人俾置他所冬十月己卯命张弘信等二十四人分检诸路物力十一月乙酉图克坦克盍败宋兵取楚州己丑封子永功为郑王乙未诏进师伐宋十二月丁亥高景山取商州是岁大有年断死罪十

有七人

五年春正月乙卯诏泰州临潢接境设边堡七十驻兵万三千己未宋通问使魏杞等以国书来【按大金国志载魏杞通问在大定四年八月考宋史亦载隆兴二年八月遣魏杞等为金国通问使即大定四年事也续通鉴纲目所载年月亦与二书同而惟金史载在大定五年正月盖四年八月魏杞以书未如式未得进故金史缺之及是始至宋史亦载干道元年正月始召通问使魏杞等至燕山正与此合】书不称大称侄宋皇帝称名再拜奉书于叔大金皇帝岁币二十万辛未命有司旱蝗水溢之处与免租赋癸酉命元帅府以六万人留戍余并放归以宋国岁币悉赏诸军二月壬午以完颜仲等为宋报问使壬寅罢纳粟补官令三月壬申羣臣奉上尊号夏四月癸卯西京留守寿王京谋反狱成特免死杖之除名岚州安置丁未布萨忠义还自军五月壬子赫舍哩志窳以召入见丁巳以布萨忠义为尚书左丞相赫舍哩志窳为平章政事还军癸酉罢山东路都统府以其军各隶总管府秋七月戊申朔罢陕西都统府复置统军司于京兆徙元帅府于河中八月己卯乌凌阿萨喇以与宋将李世辅交通伏诛癸巳宋使来贺尊号九月丁未以吏部尚书高衍等为贺宋生辰使冬十一月丙午朔帝谓宰臣曰朕在位日浅未能徧识臣下贤否全赖卿等尽公举荐今六品以下殊乏人材何以副朕求贤之意癸丑幸东官癸亥立诸路地土等第税法

六年春正月丙午朔宋使来贺正旦庚午敕有司宫中张设毋以涂金为饰二月丁亥尚书左丞相兼都元帅沂国公布萨忠义薨三月甲寅帝如西京庚午朝谒太祖庙壬申击球百姓纵观夏五月戊申幸华严寺观故辽诸帝铜像诏主僧谨视之壬子诏云中大同县及警巡院给复一年壬戌诏将幸银山诸扈从军士赐钱五万贯有敢损苗稼者并偿之六月丙戌发自西京庚子猎于银山秋九月辛丑朔至自西京泽州刺史刘德裕等以盗用官钱伏诛冬十月甲申朝享于太庙诏免雄莫等州今年租十一月癸丑帝谓宰臣曰朝官当慎选其人庶可激励其余若不当则启觊觎之心卿等必知人才优劣举实才用之十二月甲戌诏有司每月朔望及上七日毋奏刑名丙申以赫舍哩良弼为尚书右丞相赫舍哩志窳为枢密使

七年春正月壬子帝服袞冕御大安殿受尊号册宝礼癸丑大赦庚申以图克坦喀齐喀为枢密副使二月丙申以石琚为尚书右丞夏四月戊辰朔日有食之壬辰以李石为司徒五月丙午大兴府狱空诏赐钱三百贯为宴乐之用以劳之甲寅以诺延温都乌达为参知政事秋七

月戊申禁服用金线其织卖者皆抵罪闰月丁卯观稼于近郊戊辰永中进封许王永功封随王甲戌诏遣伊喇子敬经略北边壬午观稼于近郊戊子观稼于北郊八月己未如大房山壬戌致祭睿陵九月乙丑朔还宫己巳右三部检法官韩赞以捕蝗受赂除名诏吏人但犯赃罪虽会赦非特旨不叙乙酉秋猎庚寅次保州诏王天祺察访所经过州县官冬十月乙未朔帝谓侍臣曰近闻朕所幸郡邑曾宴寝堂宇后皆避之此甚无谓令仍旧居止戊申还都丁巳帝谓宰臣曰近闻蠡州同知伊喇延寿在官污滥询其出身乃正隆时鹰房子如鹰房厨人之类可典城牧民邪自今如此局分不得授以临民职任以孟浩为参知政事辛酉敕有司于东宫凉楼前增建殿位孟浩谏罢之十一月乙丑朔帝谓宰臣曰闻县令多非其人其令吏部察其善恶明加黜陟十二月戊戌肇州防御使富察通朝辞赐金带谕之曰卿虽有才然用心多诈朕左右须忠实人故命卿补外赐卿金带者答卿服劳之久也又顾谓左宣徽使敬嗣晖曰如卿不可谓无才所欠者纯实耳是岁断死囚二十人

八年春正月 【按大金国志载大定八年诏增榷场在蔡泗唐邓等处宋亦于光州等处置场考金大定八年即宋干道四年也宋史并未载置场事惟于干道元年三月载复置榷场亦未云置在光州诸处宋干道元年在金大定五年不在八年而金史五年八年俱缺载】 乙丑帝谓宰臣曰朕治天下方与卿等共之事有不可各当面陈以辅朕之不逮慎毋阿顺取容卿等致位公相正行道扬名之时苟或偷安自便虽为今日之幸后世以为何如羣臣皆称万岁辛未谓伊喇子敬等曰昔唐虞之时未有华饰汉惟孝文务为纯俭朕于宫室惟恐过度其或兴修即捐宫人岁费以充之今亦不复营建矣如宴饮之事近惟太子生日及岁元上元中秋饮之亦未尝至醉至于佛法尤所未信如梁武帝之舍身辽道宗之赐爵其惑深矣庚辰行皇太子册礼二月甲午朔制子为改嫁母服丧三年帝谕敬嗣晖曰凡为人臣上欲要君之恩下欲于民之誉必亏忠节卿宜戒之三月丁丑命护卫亲军非直日不得带刀入宫夏四月丙午诏曰马者军旅所用牛者农耕之资杀牛有禁马亦何殊其令禁之戊申击球常武殿司天马贵中谏曰陛下为天下主系社稷之重又春秋高 【按大定十七年世宗谓宰臣曰朕今年五十有五是大定八年为四十六岁金史载击球常武殿马贵中以陛下春秋高为谏恐系八年以后事误载在前也】 围猎击球危事也宜悉罢之帝曰朕以示习武耳五月甲子诏户工两部自今宫中之饰并勿用黄金庚寅改旺国崖曰静宁山和尔和东川曰金莲川秋七月甲子制盗羣牧马者死

戊辰帝谓完颜思敬等曰朕思得贤士寤寐不忘自今朝臣出外令体访廉能职官及草莱之士可助治者以闻甲戌秋猎己卯次三义口帝谕点检司曰沿路禾稼甚佳其扈从人少有蹂践则当汝罪九月辛酉帝谕石琚等曰闻蔚州采地葦役夫数百千人朕所用几何而扰动如此自今差役凡称御前者皆须禀奏仍令附册庚午帝幸东宫癸酉帝谕宰臣曰卿等举用人材凡己所知识必使他人举奏朕甚不喜如果贤何必以亲疏为避忌也以魏子平为参知政事辛巳帝谓御史大夫李石曰台宪固在分别邪正然内外百司岂遂无人惟见卿等劾人之罪不闻举善自今宜令监察御史分别刺举善恶以闻左卫将军大盘以事就鞫盘妹为宝林盘属内侍僧儿言之宝林宝林以闻命杖僧儿出盘为陇州防御使冬十月乙未命涿州刺史兼提点山陵每以朔望致祭命图画功臣于太祖庙帝谓宰臣曰海陵时修起居注不任直臣故所书多不实可访求得实详而录之参政孟浩进曰良史直笔君举必书自古帝王不自观史意正在此辛亥诏罢复州岁贡鹿筋十二月戊子朔遣伊喇安等招谕准布

九年春正月辛酉帝与敬嗣晖伊喇子敬论古今事因曰亡辽日屠食羊三百亦岂能尽用徒伤生耳朕每当食常思贫民饥馁又曰海陵以张仲轲为谏议何以得闻忠言朕与大臣论议一事非正不言卿等不以正对岂人臣之道也庚午诏诸州县和余毋得抑配百姓戊寅契丹爱实拉等谋叛伏诛二月庚寅制妄言边关兵马者徒二年庚子以中都等路水免税以曹单二州被水尤甚给复一年甲寅诏女真人与诸色人公事相关只就女真理问三月丁卯以尚书省定网捕走兽法或至徒帝曰是重禽兽而轻民命也自今有犯可杖而释之诏伊喇道廉问山东河南辛巳以大名路诸明安民户艰食遣使发仓廩减价出之夏四月己丑诏宰臣宣谕百官朕观在位之臣初入仕时竞求声誉以取爵位亦既显达即缄默苟容为自安计朕甚不取癸巳遣富察乌珙等分诣河北诸路劝明安穆昆农五月戊辰尚书省奏越王随王二府有所兴造应发役夫帝曰二王府各有引从人力又奴婢甚多何得更役百姓尔等但以例为请海陵横役无度可尽为例邪自今在都浮役久为例者仍旧余并官给佣直重者奏闻六月戊戌以久旱命宫中毋用扇庚子雨秋七月乙卯朔罢东北路采珠壬申观稼于近郊九月罢皇太子月料岁给钱五万贯帝谓台臣曰比间朝官内有揽中官物以规货利者皆对曰不知帝曰朕尚知之而汝不知汝将安用冬十月辛丑以赫舍哩良弼为左丞相赫舍哩志寔为右丞相丙午大飨于太庙十一月己未以完颜守道为平章政

事石琚为左丞孟浩为右丞十二月丙戌诏赈临潢等路诸明安民以图克坦喀齐喀为平章政事丙午制职官犯公罪在官已承伏者虽去官犹谕

十年春正月甲子命宫中元宵无得张镫甲戌以李石为太尉尚书令二月甲午安化军节度使图克坦子温副使老君努以赃罪伏诛戊申帝谓近臣曰诸护卫后皆治民之官其教以读书三月壬子朔宋使来贺生辰帝命护卫善射者押赐宋使射宴射中有不及宋使者帝曰护卫十年出为五品职官每三日上直役亦轻矣岂徒令饱食安卧而已弓矢不习将焉用之庚午帝谓参政宗叙曰卿为河南统军时言黄河堤埽利害甚合朕意朕每念百姓差调官吏互为奸弊不早计料临期星火率敛所费倍蓰为害非细卿既参朝政当革弊择利行之又谕左丞石琚曰女真人径居达要不知闾阎疾苦汝等自丞簿至是民闲何事不知凡有利害宜悉敷陈夏五月乙卯如柳河川闰月宋遣使来祈请陵寝庚辰夏国任得敬胁王李仁孝使上表请中分其国帝问宰臣李石石琚等言事系彼国请许之帝曰有国之主岂肯无故分国与人此必由权臣逼夺朕为四海主宁容此邪若彼不能自正则当以兵诛之不可许也乃却其贡物并赐仁孝以诏得敬始惧【按夏人以分国请命金史原文仅载帝曰彼劫于权臣耳诏不许据续通鉴纲目所载较为详晰惟有若彼不能自正则当以兵诛之一言俾任得敬遍夺奸谋为之顿挫而世宗刚正之气昭然可见矣兹补辑】秋七月壬午秋猎敕扈从人纵畜牧蹂践禾稼者杖之仍偿其直八月己未至自柳河川壬申遣参知政事宗叙北巡冬十月甲寅如霸州冬猎乙丑帝谓大臣曰比因巡猎闻固安县令高昌裔不职已令罢之霸州司候成奉先奉职谨恪可进一阶除固安令辛未帝谓宰臣曰朕凡论事有未能深究其利害者卿等宜悉心论列无为面从而退有后言十一月宋遣使来贺生辰别函书请陵寝【按续通鉴纲目载是年闰五月宋遣起居郎范成大为金国祈请使又载十一月宋遣中书舍人赵雄如金考宋史所载亦同盖范成大以求陵寝地及更受书礼奉使赵雄以贺生辰奉使而别函书请陵寝虽于事均无成要非岁以为常诸贺生辰正旦泛使之类金史本纪俱缺载兹补辑】十二月丙寅帝谓宰臣曰比体中不佳有妨朝事今观所奏事皆依条格殊无一利国之事若一朝行一事岁计有余则其利溥矣

十一年春正月丁丑封子永升为徐王永蹈为滕王永济为薛王壬午诏职官年七十以上致仕者不拘官品并给俸禄之半丙申命赈南

京屯田明安被水灾者戊戌尚书省奏汾阳军节度副使牛信昌生日受馈献法当夺官帝曰尚书省枢密院生日馈献不少仅劾小官岂正天下之道自今宰执枢密馈献亦宜罢去帝谓宰臣曰往岁清暑山西以近路无畜牧之地命民五里外乃得耕垦今闻民皆去之他所甚可矜悯其命依旧耕种事有类此卿等宜即告朕三月辛巳命有司以天水郡公旅榘依一品礼葬于巩洛之原夏四月丁未大理卿李昌图以廉问图克坦贞舒穆噜阿玛拉受赃不法既得罪状不即黜罢杖之四十高丽国王晁弟皓废其主自立诈称让国遣使以表来上五月辛卯诏遣吏部侍郎靖使高丽问故六月己酉诏诸路常贡数内同州沙苑羊非急用徒劳民尔自今罢之朕居深宫劳民之事岂能尽知似此当具以闻戊午观稼于近郊秋八月癸卯朔诏朝臣曰朕尝谕汝等国家利便治体遗阙皆可直言外路官民亦尝言事汝等终无一语凡政事所行岂能皆当自今直言得失毋有所隐乙巳帝谓宰臣曰随朝之官自谓历一考则当得某职两考则当得某职第务因循碌碌而已自今以外路官与内除者察其公勤则升用之但苟简于事不须任满便以本品出之赏罚不明岂能勤勉庚戌帝谓宰臣曰五品以下阙员甚多而难于得人卿等曾无一言见举者欲画久安之计兴百姓之利而无良辅佐所行皆寻常事耳虽日日视朝何益之有卿等宜勉思之冬十月甲寅帝谓宰臣曰卿等凡有奏朕何尝不从自今朕旨虽出宜审而行有未便者即奏改之或在下位有言尚书省所行未便者亦当改之丙寅赫舍哩良弼进睿宗实录戊辰帝谓宰臣曰衍庆宫图画功臣已命增为二十人如丞相韩企先自本朝兴国以来宪章法度多出其手至于关决大政但与大臣谋议终不使外人知觉汉人宰相前后无比若褒显之亦足示劝慎无遗之十一月戊寅帝幸东宫谓皇太子曰朕为汝措天下当无复有经营之事汝惟无忘祖宗纯厚之风以勤修道德为孝明信赏罚为治而已如辽之海滨王以国人爱其子嫉而杀之此何理也子为众爱愈为美事所为若此安有不亡唐太宗谓高宗曰尔于李绩无恩今以事出之我死宜即授以仆射彼必致死力矣君人者焉用伪为受恩于父安有忘报于子者乎朕御臣下惟以诚实耳丙戌朝享于太庙丁亥有事于圜丘石琚奏其礼帝曰祭天在诚不在仪仗之盛前朝汉人惟务整肃此自奉耳非敬天也【据史纬补辑】大赦羣臣奉上尊号十二月丙辰参知政事敬嗣晖薨辛酉进封越王永中为赵王随王永功曹王湍王永成幽王徐王永升虞王滕王永蹈徐王薛王永济滕王乙丑赵王永中曹王永功俱授明安仍命永功亲治事以习为政

钦定续通志卷四十九

●钦定续通志卷五十 金纪四

金纪 【四】

世宗 【二】

○世宗二

大定十二年春正月戊寅诏有司凡陈言文字皆国政利害自今言有可行以其本封送秘书监当行者录副付所司丙申以水旱免中都西京南京河北河东山西陕西去年租税二月壬寅帝谕诸王府长史曰朕选汝等欲劝导诸王使之为善如诸王所为未善当力陈之尚或不从则具某日行某事以奏丙午尚书省奏清强官同知城阳军事山和尚等暗察明访皆着政声诏进官旌赏速议升除庚戌帝如顺州春水癸丑还都丙辰诏自今官长不法其僚佐不能纠正又不上言者并坐之三月乙亥诏赃污之官已被廉问若仍旧职必复害民其遣使诸道即日罢之癸巳以前西北路招讨使伊喇道为参知政事丁酉北京曹贵等谋反伏诛夏四月丁巳纳哈塔齐锦等谋反伏诛癸亥诏宰臣曰诸府少尹多阙员当选进士虽资叙未至而有政声者擢用之乙丑荆王文以赃罪夺爵降授德州防御使丙寅尚书右丞相赫舍哩志寔薨丁卯准布来贡五月癸酉帝如百花川甲戌命赈山东东路和伦明安民饥丁丑次珠卜奇久旱而雨戊寅观稼禁扈从蹂践民田癸未谕宰臣曰朕每次舍凡秣马之具皆假于民闲多亡失不还其主此弹压官不职可择人代之所过即令询问但亡失民闲什物并偿其直乙酉诏给西北路人户牛六月甲寅如金莲川秋九月丙子至自金莲川丁亥鄜州李方等谋反伏诛冬十月丙辰以德州防御使文贲产赐其兄之子耀珠且论其母文之罪汝等皆当连坐念宋王有大功于国故置不问仍以家产赐汝子十一月甲戌帝谓宰臣曰宗室中有不任官事者朕欲授以散官量予廩禄未知前代何如石琚曰陶唐之亲九族周家之内睦九族见于诗书皆帝王美事也曹国公主之家奴犯事宛平令刘彦弼杖之主怒辱彦弼帝闻之深责公主又以台臣徇势畏忌不敢言夺俸一月以陕西统军使璋为御史大夫戊子帝屏侍臣与宰臣议事记注官亦退帝曰史官记人君善恶朕之言动及与卿等所议皆当与知其于记录无或有隐可以朕意谕之十二月丁酉诏遣官及护卫二十人分路选年二十以上四十以下有门地才行及善射者充护卫不得过百人冀州民王琼等以谋反伏诛德州防御使文以谋反伏诛辛丑出宫女二十余人辛亥禁审录官以宴饮废公务诏金银坑冶听民开采毋得收税以图克坦克寔为枢密副使

十三年春正月癸酉尚书省奏南客车俊等因榷场贸易误犯边界罪当死帝曰本非故意可免罪发还毋令彼国知之恐复治其罪诏有司严禁州县坊里为民害者闰月壬子诏太子詹事曰东宫官属尤当选用正人如行检不修及不称职者具以名闻洛阳县贼攻卢氏县杀县令李庭才亡入于宋三月乙卯帝谓宰臣曰会窰乃国家兴王之地自海陵迁都永安女真人寢忘旧风朕曩时见女真风俗迄今不忘今之燕饮音乐皆习汉风盖以备礼也非朕心所好东宫不知女真风俗第以朕故尚存之恐异时一变此风非长久之计甚欲一至会窰使子孙得见旧俗庶几习效之谕太子詹事刘仲海曰太子生于富贵易入于侈惟当导以淳俭朕自即位以来服御器物往往仍旧卿以此意谕之夏四月己巳定出继子所继财产与本家财产通数均分授洺州孝子刘政太子掌饮丞乙亥帝御睿思殿命歌者歌女真词顾谓皇太子及诸王曰朕思先朝所行之事未尝暂忘故时听此词亦欲令汝辈知之汝辈自幼惟习汉人风俗不知女真纯实之风至于文字语言或不通晓是忘本也汝辈当体朕意至于子孙当遵朕教诫也辛巳更定盗祭物法五月壬辰朔日有食之戊戌禁女真人毋得译为汉姓邓州民范三毆杀人当死而亲老无侍帝曰在丑不争谓之孝孝然后能养斯人以一朝之忿忘身及亲可论如法其亲官与养济秋七月庚子复以会窰府为上京庚戌罢岁课雉尾八月丁卯以赵王永中为枢密使诏赐诸明安穆昆廉能三等官赏冬十月丙子以前南京留守唐古安礼为尚书右丞十一月帝谓宰臣曰外路正五品职事多阙员苟有贤能用能不次壬子吏部尚书梁肃请禁奴婢服罗绮帝曰近已禁服明金行之以渐可也且教化之行当自贵近始朕宫中服御常自节约近民闲风俗比正隆时间稍淳俭卿等当更务从俭素使民知所效

十四年春正月壬戌以大兴尹璋使宋有罪杖之戊寅诏免去年被水旱百姓租税三月甲午帝谓大臣曰海陵纯尚吏事当时宰执止以案牒为功卿等当思经济之术不可狃于故常也又徧谕明安穆昆之民今后不许杀生祈祭若遇节辰及祭天日许得饮会自二月一日至八月终并禁绝饮燕亦不许赴会他所恐妨农功虽闲月有犯痛饮者抵罪又命应卫士有不闲女真语者并勒习学仍自后不得汉语甲辰帝更名雍夏四月乙丑帝谕宰臣曰闻愚民祈福多建佛寺虽已条禁尚多犯者宜申约束无令徒费财用戊辰有事于太庙以皇太子摄行事乙亥帝御垂拱殿顾谓皇太子及亲王曰人之行莫大于孝弟孝弟无不蒙天佑汝等宜尽孝于父母友于兄弟自古兄弟之际多因妻妾离闲以至

相违妻者外属耳可比兄弟之亲乎若妇言是听而兄弟相违甚非理也汝等当以朕言常铭于心五月甲午如金莲川秋九月丁亥还都癸卯帝谓侍臣曰朕自在潜邸以至于今于亲属旧知未尝欺心有徇近御史台奏枢密使永中致书河南统军使完颜仲托以卖马朕知而不问是自欺其心也夙夜负愧甚于抱疾冬十月乙卯朔诏图画功臣二十人于衍庆宫圣武殿左右庑【按图画功臣增为二十人已见大定十一年纪中此又诏图功臣二十人盖因请增定十五人谥号而申纪之非复出也】十一月甲申朔日有食之戊戌召尚食局使谕之曰大官之食皆民脂膏日者品味太多不可徧举徒为虚费自今止进可口者数品而已十二月戊寅以完颜守道为右丞相图克坦克盩为平章政事

十五年春正月【按金史原文于正月下载阙字今无可采补姑仍其旧】秋七月丙午展盘与所部喀喇贝欢等内附八月宋遣汤邦彦来申议陵寝【按续通鉴纲目载宋淳熙二年八月以左司汤邦彦为金国申让使即世宗大定十五年也宋史所载亦同又载邦彦至金引见金主不能措一辞而还宋史亦载淳熙三年四月丁酉汤邦彦奉使无状流新州编管是邦彦固已充使至金矣金史失载今据补辑】九月辛卯高丽西京留守赵位宠叛其君请以慈悲岭以西鸭绿江以东四十余城内附不纳闰月乙酉朔定应禁弓箭鎗刀路分惟品官家奴客旅等许带弓箭帝谓左丞相良弼曰今之在官者须职位称愜所望始加勉力其或稍不如意则止以度日为务是岂忠臣之道邪又曰武灵时领省秉德左丞相言皆有能名然为政不务远图止以苛刻为事若克实等在会盩时一月之闲杖杀二十人罪皆不至于死海陵为人此辈尚欲以术数要之以至卖直取死得为能乎甲戌诏年老任从政者其佐择壮者参用冬十一月乙卯帝幸东宫皇姑梁国公主请赦伊喇摩多之子杀妻罪帝谓宰臣曰公主妇人不识典法罪尚可恕摩多请托至此岂可贷宥不许

十六年春正月甲寅诏免去年被水旱路分租税甲子诏宗属未附玉牒者并与编□丙寅帝谓亲王宰执曰经籍之兴其来久矣学者既能诵之必须行之苟不能行诵之何益女真旧风最为纯直虽不知书然其祭天地敬亲戚尊耆老接宾客信朋友礼意款曲皆出自然其善处与古书所载无异汝辈当习学之旧风不可忘也三月丙午朔日有食之戊午帝御广仁殿皇太子亲王侍膳帝训之曰大凡资用当务节省如其有余可周亲戚勿妄费也因举所御服曰服此已三年未尝更换尚尔完好汝等宜识之夏四月丙戌诏京府设学养士定宗室宰相子程试等第戊子制商贾载以舟车不得用马以东京留守崇尹为枢密副使秋七月壬子夏津

县令伊喇算卓坐赃伏诛九月己酉谕赫舍哩良弼曰
西边自来不备储蓄其令所在和余以为缓急之备又谕以海陵非理杀戮臣下甚可哀
悯其博勒准等遗骸仰逐处访求官为收葬冬十月丙
申诏谕宰执曰诸王小字未尝以女真语命之今皆当更易卿等择名以上十一月壬寅
朔河北东路富珠哩色色以穆昆让其兄子富色里帝
贤而从之令仍加色色恩赏庚申以张汝弼为参知政事甲子以钮祜禄罕努死节录其
子尚和为尚辇局直长十二月壬申朔诏诸科人出身
四十年方注县令年岁太远今后仕及三十二年别无曾犯赃染追夺便与县令丙子诏
诸流移人老病者官与养济帝谕宰臣曰凡已经奏断
事岂无未当者卿等但奏闻朕当改正之庚寅定榷场香茶罪赏法

十七年春正月丙午有司奏高丽所进玉带未真帝曰小国无能辨识者误以为玉
耳且人不易物惟德其物若复却之岂礼体邪戊申诏
于衍庆宫圣武殿西建世祖神御殿东建太宗睿宗神御殿诏西北路招讨司契丹民户
其不与叛乱及放良奴隶可徙乌库哩实垒部令及春
耕作乌都温部图卜图呼鲁雅凌默色请入献许之庚戌诏吏部考功郎详考诸大臣家
劳绩应赐功臣号者即以闻不许子孙自陈壬子帝谓
宰臣曰宗室中有年高而无官称者其先皆有功于国朕欲稍加以官使有名位可称丁
巳诏朝官嫁娶给假三日不须申告壬戌诏海陵时大
臣无辜被戮家属籍没者并释为良辽豫王宋天水郡王被害子孙各为安葬三月辛亥
诏免河北等十路去年被旱蝗租税赈东京博索哈斯
罕三路乙丑尚书省奏三路之粟不能周给帝曰朕尝语卿等遇丰年即广余以备凶歉
卿等皆言天下仓廩盈溢今欲赈济乃云不给自古帝
王皆以蓄积为国家长计朕之积粟岂欲独用之邪今既不给可于邻道取之以济自今
预备当以为常夏四月甲戌制世袭明安穆昆若出仕
者虽年未及六十欲令子孙袭者听戊寅谕宰臣曰郡县之官虽以罪解一二岁后亦须
再用明安穆昆皆太祖创业之际于国勤劳有功之人
其世袭之官不宜以小罪夺免五月定皇家袒免以上亲燕飧班次并从唐制癸卯幸姚
村淀阅七品以下官及宗室子诸局承应人射柳赏有
差六月己卯谓宰臣曰朕年老矣恐因一时喜怒处置有所不当卿等即宜执奏毋为面
从成朕之失乙未以英王爽之子色埒为忠顺军节度
副使爽入谢帝曰朕以卿疾故特任卿子所冀卿因喜而愈也欲即加峻授恐色埒年幼
未闲政务汝当训之使有善可观更当升擢秋七月壬
子尚书省奏岁以羊三万赐西北路戍兵帝问如何运致宰臣不能对帝曰卿等勿谓细
事非帝王所宜问以卿等于国家之事未尝用心故问

之耳八月己巳观稼于近郊壬申以监察御史体察东北路官吏辄受讼牒为不称职笞之五十庚辰帝谓宰臣曰今之在官者同僚所见事虽当理亦以为非意谓从之恐人谓政非己出朕甚恶之今观大理寺所断虽制有正条理不能行者别具情见朕惟取其所长夫为人之理他人之善者从之则可谓善矣壬午帝谓宰臣曰今在下僚岂无人材但在上者不为汲引恶其材胜己故耳丙戌帝谓赫舍哩邈曰台臣纠察吏治之能否务去其扰民且冀其得贤也今所至辄受讼牒听其妄告使为政者如何则可也九月丁酉朔日有食之辛丑封子永德为薛王冬十月己巳夏国进百头帐诏于境上却之诏以羊十万付乌库哩实垒部牧之收其滋息以予贫民丁丑制诸明安父任别职子须年二十五以上方许承袭辛巳帝谓宰臣曰今在位不闻荐贤何也昔狄仁杰起自下僚力扶唐祚仁杰虽贤非娄师德何以自荐乎又曰近观上封章者殊无大利害古之谏者既忠于国亦以求名今之谏者为利而已如户部尚书曹望之济南尹梁肃皆上书言事盖觊觎执政耳其于国政竟何所补达官如此况余人乎昔海陵南伐太医使祁宰极谏至戮于市此本朝以来一人而已今监察御史田忠孺尝上书言事当升擢以励其余十一月庚戌帝谓宰臣曰朕常恐重敛以困吾民自今诸路差科之烦细者亦具以闻以石琚为平章政事十二月戊辰以渤海旧俗婚娶必先攘窃禁之壬申以唐古安礼为左丞富察通为右丞帝谓宰执曰朕今年五十有五宜及朕之康强凡国家政事之未完法令之未一者修举之

十八年春正月庚戌修起居注伊喇杰上书请毋屏人议事如史官亦不与闻无由纪录帝以问石琚唐古安礼对曰古者天子置史官于左右言动必书所以儆戒人君庶几有所畏也庚申诏免中都河北河东山东河南陕西等路前年被灾租税壬戌如春水二月丙寅朔次管庄丙子次华港己丑还宫三月乙巳命戍边女真人遇祭祀婚嫁节辰许自造酒丁未帝谓宰执曰县令之职最为亲民当得贤材用之迺来犯法者众殊不闻有能者比在春水见石城玉田两县令皆年老苟禄而已畿甸尚尔远县可知石琚对曰良乡令焦旭庆都令李伯达皆能吏可任帝曰审如卿言可擢用之己酉禁民闲无得创兴寺观献州人殷小二等谋反伏诛夏四月己巳帝谓宰臣曰朕巡幸所至必令体访官吏臧否向经玉田知主簿舒穆鲁杳乃能吏也可授本县令闰六月辛丑命赈西南西北两招讨司民及乌库哩实垒部转户饥秋七月丙子帝谓宰臣曰职官始犯赃罪容有错误至于再犯是无改过之心自今再犯不以赃数多寡并除名核罪八月丙辰以完颜守道为左丞相石琚为右丞相

九月癸酉以唐古安礼为平章政事乙亥以富察通为左丞伊喇道为右丞钮祜禄噶达尔为参知政事冬十月庚寅朔陕州防御使舒穆鲁锦嘉努以罪除名甲午御史中丞刘仲海侍御史李瑜坐失纠察大长公主事各削官一阶十一月庚申朔尚书省奏拟额尔克为刺史帝曰额尔克年幼于事未练授佐贰官可也郡守系千里休戚安可不择人而私其亲邪若以亲亲之恩赐与虽厚无害于政使之治郡而非其才一境何赖焉丙子尚书省奏崇信县令石安节买车材于部民三日不偿其直当削官一阶解职帝因言凡在官者但当取其贪污与清白之尤者数人黜陟之则人自知惩劝矣夫朝廷之政太宽则人不知惧太猛则小玷亦将不免于罪惟当用中典耳曹王府文学赵承元尝坐与王婢奸杖百五十除名已而复用帝责宰臣曰近问赵承元何故再任卿等言曹王尝遣人言其才能干敏故再任之官爵拟注虽由卿辈予夺之权当出于朕曹王之言尚从之假皇太子有所谕则其从可知矣卿等公受请属可乎丙戌以吏部尚书乌库哩元忠为御史大夫十二月庚戌封孙乌达布温国公玛达格金源郡王承庆道国公壬子羣臣奉上大金受命万世之宝

十九年春二月乙卯免去年被水旱民田租税三月乙丑尚书省奏亏课院务官颜葵等六十八人各合削官一阶帝曰以承荫人典榷沽此辽法也法弊则当更张唐宋法有可行者则行之己巳帝与宰臣论史事且曰朕观前史多溢美大抵史书载事贵实不必浮辞谄谀也辛未帝谓宰臣曰奸邪之臣欲有规求往往私其党与不肯明言托以他事阳不与而阴力为之地又观古之奸人当国家建储之时恐其聪明不利于己往往中以阴事破坏其议惟择昏懦者立之冀他日可弄权为利如晋武欲立其弟而奸臣沮之竟立惠帝以致丧乱此明验也丁丑帝谓宰臣曰朕观前代人臣将谏于朝与父母妻子诀示以必死同列目覩其死亦不顾身又为之谏此尽忠于国者人所难能也己卯制纠弹之官知有犯法而不举者减犯人罪一等科之帝谓宰臣曰人多奉释老以徼福朕蚤年亦颇惑之旋悟其非且上天立君使之治民若盘乐怠忽欲以侥幸祈福难矣果能爱养下民上当天心福必报之夏四月己丑朔诏賑西南路招讨司所部民六月戊子朔诏更定制条秋七月辛未有司奏拟赵王之子应用人从帝不许谓宰相曰儿辈尚幼若奉承太过使侈心滋大卒难节抑诸儿入侍当语笑娱乐之际朕必渊默莅之庶知朕教戒之意常畏惧而寡过也八月戊戌以宋大观钱当五用冬十月辛卯西南路招讨使扎克丹以赃罪伏诛辛亥制知情服内成亲者虽自首仍依律坐之十一月壬戌改葬昭德皇后大赦

二十年春正月戊午定试令史格壬戌命岁以钱五千贯造随朝百官节酒及冰烛药炭视品秩给之己巳如春水丙子如石城县行宫丁丑以玉田县行宫之地偏林为御林大淀泺为长春淀二月丁未还都三月己未诏有犯罪被问之官虽遇赦不得复职乙丑以新定明安穆昆诏免中都等路去年租税辛巳以图克坦克噶为尚书右丞相乌库哩元忠为平章政事夏四月丁亥定冒荫罪己亥制宗室及外戚并一品命妇衣服听用明金乙巳帝谓宰臣曰女真官多谓朕食用太俭夫一食多费岂为美事况朕年高不欲屠宰物命贵为天子能自节约亦不恶也朕服御或旧常使澣濯至于破碎方始更易向时帐幕常用涂金为饰今则不尔但令足用何必事纷华也秋九月丙子布沙堪羣牧罗和谋叛伏诛冬十月庚辰朔更定铨注县令丞簿格诏西北路招讨司每进马駝鷹鹞等辄率斂部内自今并罢之壬午帝谓宰臣曰近闻山后之地皆为亲王公主权势之家所占转租于民皆由卿等之不察卿等当尽心勤事毋令朕察及细微也诏徙约啰河伊玛河两明安于大名东平等路安置戊戌帝谓宰臣曰凡人在下位欲冀升进勉为公廉贤不肖何由知之及其致位通显观其施为方见本心如招讨扎克丹初任定州同知继为都司未尝少有私徇所至皆有清名及为招讨不固守人心险于山川诚难知也壬寅帝谓宰臣曰朕览资治通鉴编次累代废兴甚有鉴戒司马光用心如此古之良史无以加也校书郎毛麾朕屡问以事善于应对真该博老儒可除太常职事以备讨论甲辰以襄为御史大夫十一月癸酉以襄为尚书右丞乙亥帝谓宰臣曰郡守选人资考虽未及廉能者则升用之以励其余又谓海陵用人但一言合意便升用之一言之失便责罚之自古用人咸试以事若止以奏对之闲安能知人贤否朕之取人众所与者用之不以独见为是也十二月癸卯特授袭封衍圣公孔总兖州曲阜令封爵如故

钦定续通志卷五十

●钦定续通志卷五十一 金纪五

金纪 【五】

世宗 【三】

○世宗三

大定二十一年春正月壬子以夏国请诏复绥德军榷场仍许就馆市易帝闻山东大名等路民骄纵奢侈不事耕稼诏遣阅实计口授地必令自耕地有余而力不赡者方许招人租佃仍禁农时饮酒丙辰追贬海陵炆王亮为庶人甲子如春水丙子次永清县契丹人伊喇额哩页

者妻之子六妾之子四妻死其六子庐墓下更宿守之妾之子皆曰是嫡母也亦更宿焉
三岁如一诏赐钱五百贯以为孝子之劝二月庚子还
都乙巳以元妃李氏之丧致祭兴德宫过市肆不闻人声帝谓宰臣曰岂以妃故禁之耶
细民曰作而食若禁之是废其生计也其勿禁仍令所
过街衢门肆不必障毁三月帝闻蓟平滦等州民乏食命有司发粟棗之贫不能食者贷
之以监察御史舒穆鲁元礼郑大卿 【弘简录作郑
达卿】 不纠举各笞四十前所遣官皆论罪辽州民宋忠恩州民邹明等乱言伏诛帝谓
宰臣曰近闻宗州节度使阿索美行事多不法通州刺
史完颜守能既与招讨职事犹不守廉达官贵要多行非理监察未尝举劾阿都齐羣牧
副使布萨纳延取部人二球杖至细事也乃便劾奏谓
之称职可乎今监察职事修举者与迁擢不称者大则降罚小则决责仍不许去官闰月
辛卯渔阳令瓜尔佳伊勒哈司候判官刘居渐以被命
赈贷止给富户各削三官通州刺史郭邦杰夺俸三月乙未帝谓宰臣曰朕观自古人君
多进用谗谄若汉明帝尚为所惑朕虽不及古之明君
然近习谗言未尝入耳至于宰辅之臣亦未尝偏用一人私议也癸卯以完颜守道为太
尉尚书令富察通为平章政事襄为左丞张汝弼为右
丞梁肃为参知政事夏四月戊申以图克坦喀噶为左丞相唐古安礼为右丞相增筑泰
州临潢府等路边堡及屋宇庚戌奉安昭祖以下三祖
三宗御容于衍庆宫行亲祀礼帝谕宰臣曰朕之言行岂能无过常欲人直谏而无肯言
者使其言果善朕从而行之又何难也五月戊子西北
路招讨使完颜守能以赃罪杖一百除名秋七月己亥以图克坦克噶为枢密使辛丑以
完颜守道复为左丞相太尉如故

二十二年春三月丁丑申敕西北路招讨司勒明安穆昆官督部人习武备甲申谕
今岁行幸山后所用人夫并以官钱和雇癸巳诏颁重
修制条以张汝霖为御史大夫夏四月乙卯行监临院务官食直法诏削明肃尊号秋七
月辛巳宰臣奏事时帝少违豫宰臣请退帝使终其奏
九月己丑以同知东京留守司事裔在任专恣失上下之分谪授复州刺史乙未额哩页
扎拉孙绍先韩仲英等以受商赂纵禁物出界皆处死
冬十月辛丑徙河间宗室于平州庚戌禘享于太庙十一月丙子东京留守图克坦贞以
与海陵逆谋伏诛妻永平县主子慎思并赐死甲申玉
田县令伊喇查坐赃伏诛十二月辛酉立强取诸部羊马法

二十三年春正月庚午诏有司但获强盗迹状既明赏随给之壬午如春水诏夹道
三十里内被役之民与免今年租税仍给佣直甲午大
邦基伏诛二月乙巳还都戊申以张汝弼摄太尉致祭于至圣文宣王庙庚戌以张仲愈

为参知政事帝览御史台所进察州县官罪皆细碎事
又止录其恶而不举其善诏并察善恶以闻三月丙子初制宣命之宝金玉各一涉县人
陈圆以乱言伏诛壬戌敕有司为民祷雨是夕雨夏五
月庚午县令达春额哲等十人以不任职罢归甲戌命应部除官尝以罪罢而再叙者遣
使按其治迹如有善状方许授以县令六月壬子右司
郎中段珪卒帝曰是人甚明正可用如知登闻检院巨构每事但委顺而已燕人自古忠
直者鲜辽至从辽宋至从宋本朝至则从本朝其俗诡
随虽屡经迁变而未尝残破者凡以此也南人劲挺敢言直谏者多甚可尚也又曰昨夕
苦暑朕通宵不寐因念小民比屋卑隘何以安处秋七
月御史大夫张汝霖坐失纠举降授棣州防御使八月乙未观稼于东郊以女真字孝经
千部付点检司分赐护卫亲军乙巳括定明安穆昆户
口田土牛具以程辉为参知政事九月帝欲女真人知仁义道德命译五经颁行之冬十
一月壬戌朔曰有食之壬申以崇尹为平章政事闰月
甲午帝谓宰臣曰帝王之政固以宽慈为德然如梁武帝专务宽慈以至纪纲大坏朕尝
思之赏罚不滥即是宽政也余复何为以襄为平章政
事张汝弼为左丞钮祜禄噶达尔为右丞张汝霖为参知政事戊午帝谓宰臣曰女真进
士可依汉进士补省令史夫儒者操行清洁以吏出身
者自幼贪墨习以成性至为官不能迁改政道兴废实由于此庚申尚书省左司员外郎
徐伟奏事帝谓宰臣曰斯人纯而干右司郎中郭邦杰
直而颇躁又曰庶人亮自以不道恐上京宗室起而图之故不问疏近并徙之南京岂非
以汉光武宋康王之疏庶得继大统故过虑若此然何
其谬也十二月丁亥以乌库哩元忠复为尚书右丞相

二十四年春二月癸酉帝曰朕将往上京念本朝风俗重端午节比及端午到上京
则燕劳乡闾宗室父老三月甲午帝将如上京尚书省
进守国宝帝召皇太子授之因谕之曰上京祖宗兴王之地欲与诸王一到或留三二年
以汝守国社稷任重宜知畏慎常时观汝甚谨今日能
纾朕忧乃见汝心孝也皇太子再三辞让以不谙政务乞备扈从帝曰政事无甚难但用
心公正毋纳谗邪久之自熟皇太子流涕左右皆感动
皇太子乃受宝壬寅遂如上京宰执以下奉辞于通州帝谓宰执曰卿辈皆故老宜悉心
辅皇太子以副朕意又谓枢密使图克坦克密曰朕巡
省之后脱或有事卿必亲之毋忽细微大难图也又顾六部官曰朕闻省部文字多以小
不合而驳之苟求自便致累岁不能结绝朕甚恶之自
今可行则行可罢则罢毋使在下有滞留之叹时诸王皆从以赵王永中留辅太子夏四
月丙寅次东京丁卯朝谒孝宁宫给复东京百里内夏

秋税租一年在城随关年七十者补一官曲赦百里内犯徒二年以下罪五月巳丑至上京居于光兴宫庚寅朝谒于庆元宫戊戌宴于皇武殿帝谓宗戚曰朕思故乡积有日矣今既至此可极欢饮君臣同之赐诸王妃主宰执百官命妇各有差宗戚皆沾醉起舞竟日乃罢六月辛酉幸阿勒楚喀水临漪亭壬戌阅马于绿野淀秋七月己未帝谓宰臣曰天子巡狩当举善罚恶凡士民之孝弟姻睦者举而用之其无行之人则教戒之不悛者加惩罚丙午猎于巴延淀八月乙亥诏免上京今年市税冬十月丁卯猎于近郊十一月辛卯还宫甲午诏有司报谕宋与高丽夏国上京天寒地远正旦生日并不须遣使

二十五年春正月丁亥宴妃嫔亲王公主宗室品官于光德殿与坐者千七百余人赏赉有差二月癸酉东平尹乌库哩思列坐怨望杀之

【按宋史载淳熙十二年三月故辽林牙达实假道夏人以伐金即大定二十五年三月也金史缺载】夏四月癸亥幸皇武殿击球许士民纵观甲子诏于率宾呼尔哈两路明安下选三十穆昆为三明安移置于刷达巴罕之地以实上京壬申曲赦会宁府仍放免今年租税百姓年七十以上者补一官甲戌以会宁府官一人兼大宗正丞以治宗室之政帝谓羣臣曰上京风物朕自乐之每奏还都辄用感怆祖宗旧邦不忍舍去万岁之后当置朕于太祖之侧卿等无忘朕言丁丑宴宗室宗妇于皇武殿赐大功亲以下官阶年高属近者加宣武将军及封宗女赐银绢各有差帝曰朕寻常不饮酒今日甚欲成醉此乐不易得也宗室妇女及羣臣故老以次起舞进酒帝曰吾来数月未有一人歌本曲者吾为汝等歌之命宗室子弟叙坐殿下者皆坐殿上听帝自歌其词道王业之艰难及继述之不易至慨想祖宗宛然如覩歌毕泣下 【恭读通鉴辑览 御批观至此而不懍然惕■〈卜双〉然失愀然感者亦无人心者矣按金世宗待诸宗室故老缠绵悱恻动出至诚所谓亲贤乐利不惟当时感动即千载亦思慕不忘服膺 圣论真足以见感化之源理有不爽而金世宗诚不愧为贤主也】羣臣宗戚捧觞上寿皆称万岁于是诸夫人更歌本曲如私家之会既醉帝复续调至一鼓乃罢巳卯发上京庚辰宗室戚属奉辞帝曰朕久思故乡甚欲留一二岁京师天下根本不能久于此也太平岁久国无征徭汝等皆奢纵往往贫乏朕甚怜之当务俭约无忘祖先艰难因泣数行下宗室戚属皆感泣而退五月壬寅次天平山好水川癸卯遣使如临潢泰州劝农六月甲寅猎近山见田塍不治命笞田者庚申皇太子允恭薨庚午遣唐古鼎诣京师致祭皇太子秋九月辛巳朔次实沙河赐百岁老姬帛甲申次辽水召见百二十岁女真老

人能道太祖开创事帝嘉叹赐食并赐帛己酉至自上
京是日帝临奠宣孝皇太子于熙春园冬十月丙辰尚书省奏亲军数多宜稍减损诏定
额为三千宰臣退帝谓左右曰宰相年老艰于久立可
置小榻廊下使少休息甲子禁上京等路大雪及含胎时采捕帝谓宰臣曰护卫年老出
授临民字尚不能书何以治民其胸中明暗外不能知
精神昏耄已见于外是强其所不能也天子以兆民为子不能家家而抚在用人而已知
其不能而强授之百姓其谓我何丁丑命学士院等官
凡直官中午前许退十一月庚辰朔诏曰豺未祭兽不许采捕冬月雪尺以上不许用网
及苏克苏呼恐尽兽类丙申夏国遣使问起居戊戌以
曹王永功为御史大夫十二月戊午以皇孙玛达格判大兴尹进封原王丙寅完颜守道
等坐擅增东宫诸皇孙食料各削官一阶甲戌帝谓宰
臣曰太尉守道论事止务从宽犯罪罢职者多欲复用若惩其首恶后来知畏罪而复用
何以示戒丙子帝谓宰臣曰原王行事如何右丞噶达
尔对曰闻都人皆称之帝曰朕令察于民间咸言见事甚明予夺皆不失当曹鹵二王弗
能及也又闻有女真人诉事以女真语问之汉人诉事
汉语问之大抵习本朝语为善不习则淳风将弃矣左丞张汝弼对曰不忘本者圣人
之道也噶达尔曰以西夏小邦崇尚旧俗犹能保国数
百年帝曰事当任实一事有伪则丧百真故凡事莫如真实也

二十六年春正月甲辰如长春宫春水二月癸酉还都乙亥诏曰每季求仕人当问
以疑难令剖决之其才识可取者仍察访政迹如其言
行相副即加擢用三月丁亥以大理卿阙帝问谁可右丞钮祜禄噶达尔言前吏部尚书
唐古贡可乃授以是职己丑尚书省拟奏除授帝曰卿
等在省未尝荐士止限资级安能得人古有布衣入相者闻宋亦多用山东河南流寓疏
远之人皆不拘于贵近也本朝境土之大岂无其人但
无由进耳左丞张汝弼曰下位虽有才能必试之乃见参政程辉曰外官虽有声一旦入
朝却不称任亦在沙汰而已癸巳帝幸香山寺赐名大
永安寺给田二千亩粟七千株钱二万贯丁酉以亲军完颜齐诺言诏明安穆昆皆先读
女真字经史然后承袭帝因曰人稍通古今则不肯为
非亲军宠人乃能言此审其有益何惮而不从夏四月壬子帝曰朕尝日御膳槩从减省
尝有一公主至至无余膳可与若欲丰腆虽日用五十
羊亦不为难然皆民之脂膏不忍为也朕尝厯外任稔知民间之事想前代之君不知稼
穡艰难者甚多其失天下皆由此也辽主闻民间乏食
谓何不食干腊盖幼失师保之训故不知民间疾苦夫与正人同处所知必正道所闻必
正言不可不慎也今原王府官属当选秉性正直者勿

用有权术之人尚书省奏事帝曰比有上书言职官犯除名不可复用此言极当如军期急速权可使用今天下无事复用此辈何以戒将来又
诏曰今之税法考古行之但遇灾伤即加蠲免五月甲申以图克坦克噶为太尉赵王永中复为枢密使原王玛达格为尚书右丞相赐名璟庚
寅以鹵王永成为御史大夫戊戌以钮祜禄噶达尔为左丞张汝霖为右丞六月己巳帝谓宰执曰齐桓中庸主也得一管仲遂成霸业朕夙夜
以思惟恐失人朕既不知卿等又不荐必俟全才而后举盖亦难矣如举某人长于某事朕亦量材用之朕与卿等俱老矣天下至大岂得无人
荐举人材当今急务也又言干能之人固不易得然不若德行之士为优帝谓原王曰尔尝读太祖实录乎太祖征玛察泥淖马不能进太祖舍
马而步罕都射中玛察遂擒之创业之难如此可不思乎甲戌诏凡陈言文字诣登闻检院送学士院闻奏毋经省廷秋七月丙申以马惠迪为
参知政事八月丁丑帝谓宰臣曰朕于女真人未尝不加优恤然犯赃罪虽朕子弟亦不能恕丁亥遣吏部侍郎李晏等二十六人分路推排诸
路物力九月丙寅帝谓宰臣曰乌噶塔叛反已遣人讨之可益以甲士毁其船楫无使再窥边境也冬十月戊寅定职官犯赃同职相纠察法庚
寅帝谓宰臣曰西南西北两路委各明安穆昆官依时教练骑射其弛慢过期及不亲监视并决罚之甲午诏增河防军数十一月甲辰帝谓宰
臣曰女真中材杰之士朕少有识者盖亦难得也新进士如图克坦镒瓜尔佳阿里布尼玛哈鉴辈皆可用之材也起身刀笔者虽有才可用其
廉介之节终不及进士今五品以上阙员甚多必资级相当至老有不能得者况欲至卿相乎古来宰相率不过三五年而退罕有二三十年者
卿等不举人才甚非朕意因顾修起居注崇璧曰斯人孱弱付之以事未必能办以其谨厚长者故置之左右欲诸官效其为人也戊午以左警
巡副使和硕通敏善断擢殿中侍御史兼右三部司正庚申立原王璟为皇太孙甲子帝谓宰臣曰朕闻宋军自来教习不辍今我军专务游惰
勿谓天下既安而无豫防之心一旦有警军不可用顾不败事耶其令以时训练丙寅帝谓侍臣曰唐太子承干所为多非度太宗纵而弗检遂
至于废如早为禁止当不至是朕每见善人忠孝廉洁出于天性至于常人多喜为非苟无以惩之何由致治孔子为政七日而诛少正卯圣人
尚尔况余人乎戊辰帝谓宰臣曰朕虽年老闻善不厌孔子云见善如不及见不善如探汤大哉言乎以尼玛哈鉴纯直通敏擢皇太孙侍丞庚
午帝谓宰臣曰朕方前古明君固不可及至于不纳近臣谗言不受戚里私谒亦无愧矣朕尝自思岂能无过所患过而不改过而能改庶几无

咎十二月甲申左谏议大夫黄久约言递送荔支非便帝令罢之因谓宰臣曰有司奉上惟沽办事之名不问利害如何朕尝欲得新荔支兵部遂于道路特设铺递比因黄久约言朕方知之夫为人无识一旦临事便至颠沛宫中事无大小朕常亲览者以不得人故也丁亥帝谓宰臣曰朕年来惟以省约为务常膳止四五味比初即位十减七八天子亦人耳枉费安用丙申帝谓宰臣曰比闻河水泛滥民罹其害者赀产皆空今复遣官推排何耶右丞张汝霖曰推排皆非被灾之处帝曰必邻道也既邻水而居岂无惊扰迁避计其赀产岂有余哉尚何推排为又曰平时用人宜尚平直至于军职当用权谋使人不易测可以集事唐太宗自少年能用兵其后虽居帝位犹不能改吮疮翦须皆权谋也

二十七年春正月己酉以襄城令赵泐为应奉翰林文字泐入谢帝问宰臣曰学士院比旧殊无人材何也右丞张汝霖曰人材须作养若令久任练习自可得人二月己卯改闵宗庙号曰熙宗癸未命曲阳县置钱监赐名利通乙酉帝谓宰执曰朕自即位以来言事者虽有狂妄未尝罪之卿等未尝肯尽言是相疑也君臣无疑谓之嘉会事有利害可竭诚言之丁亥命沿河京府州县长贰官并带管勾河防事己丑谕宰执曰近侍局官须选忠直练达之人使佞人在侧将恐谗言渐渍矣又谓宰执曰朕闻宝坻尉蒙古特默清廉其为政何如左丞噶达尔对曰其部民亦称誉之然不知所称何事帝曰凡为官但得清廉亦可矣安得全才之人可进官一阶永为令又言朕时或体中不佳未尝不视朝诸王百官但有微疾便不治事自今宜戒之丙申命罪人在禁有疾听亲属入视三月帝谓大臣曰朕观唐之颜真卿段秀实皆节义之臣终不升用亦当时大臣錮蔽而不举也卿等当不私亲故而特举忠正之人又言国初风俗淳俭居家惟以布衣非大会宾客未尝辄宰羊豕朕每念当时节俭之风不欲妄费凡宫中之官与赐之食者皆有常数以此故也夏四月丙戌以崇浩为参知政事五月庚午御膳味不调适有旨问之尚食局直长言臣闻老母病剧私心愤乱以此有失尝视帝嘉其孝即令还家侍疾俟平愈乃来六月戊寅免中都河北等路常被河决水灾军民租秋九月己酉帝谓宰臣曰朕今岁春水所过州县其小官多干事盖朕前常有赏擢故皆勉力以此见专任责罚不如用赏之有激劝也冬十月乙亥宋前主构殂庚辰裕享于太庙庚寅帝谓宰臣曰朕观唐史惟魏征善谏所言皆国家大事甚得谏臣之体近时台谏惟指摘一二细碎事姑以塞责未尝有及国家大利害者岂知而不言欤无乃亦不知也十一月甲寅诏河水泛滥农夫被灾者与免差税一年卫怀孟郑四州塞河劳

役并免今年差税甲子帝谓宰臣曰卿等老矣殊无可以自代者乎必待朕知而后进乎春秋诸国分裂土地褊小皆称有贤卿等不举而已今朕自勉庶几致治他日子孙谁与共治乎十二月壬午宋遣使告哀【按大金国志载宋遣告哀使邢璞来至汴京锡宴欲用乐璞持不可考宋史邢璞作韦璞又未载锡宴事而金史并未载告哀使人姓名今为附识】甲申帝谕宰臣曰人皆以奉道崇佛设斋读经为福朕使百姓无冤天下安乐不胜于彼乎尔等居辅相之任诚能匡益国家使百姓蒙利不惟身享其报亦将施及子孙矣左丞噶达尔曰臣等敢不尽心第才不逮耳帝曰人亦安能每事尽善但加勉励可也戊子禁女真人不得改称汉姓学南人衣装犯者抵罪

二十八年春二月己丑宋遣使献先帝遗留物癸巳宋使朝辞以所献礼物中玉器五玻璃器二十及弓剑之属使还遗宋曰此皆尔国前主珍玩之物所宜宝藏以无忘追慕今受之义有不忍归告尔主使知朕意也三月丁酉朔万春节帝御庆和殿受羣臣朝复宴于神龙殿诸王公主以次捧觞上寿帝欢甚以本国音自度曲盖言临御久春秋高渺然思国家基绪之重万世无穷之托以戒皇太孙当修身养德善于持守及命太尉左丞相喀寔尽忠辅导之意于是帝自歌之皇太孙及喀寔和之极欢而罢戊申命随朝官举进士已在任才可居翰苑者试制诏等文字三道取文理优赡者补充学士院职夏四月癸酉命增外任小官及繁难局分承应人俸丁丑以富珠哩阿噜罕为参知政事癸未命建女真太学五月丙午制诸教授必以宿儒高才者充秋八月甲子朔日有食之庚辰帝谓宰臣曰近闻乌塔噶有不顺服之意若遣使责问彼或抵捍不逊则边境生事朕尝思之招徕远人于国家殊无所益彼来则听之不来则勿强之此前世羈縻之长策也壬午以完颜博勒和为参知政事甲申帝谓宰相曰用人之道当自其壮年心力精强时用之若拘以资格则往往至于耄老此不思之甚也阿噜罕使其早用朝廷必得补助之力惜其已衰老矣凡有可用之材汝等宜早思之冬十月乙酉尚书省奏拟除授资格帝曰日月资格所以待庸常之人若才行过人岂可拘以常例汝等但务循资守格不思进用才能岂以才能见用将夺己之禄位乎不然是无知人之明也羣臣皆曰臣等岂敢蔽贤才识不逮耳帝顾谓右丞张汝霖曰前世忠言之臣何多今日何少也汝霖对曰世乱则忠言进承平则忠言无所施帝曰何代无可言之事但古人知无不言今人不肯言耳汝霖不能对十一月戊戌帝谓侍臣曰凡修身者喜怒不可太极怒极则心劳喜极则气散得中甚难是故节其喜怒以思安身

今宫中一岁未尝责罚人也戊申帝谓宰臣曰制条拘于旧律间有难解之辞夫法律历代损益而为之彼智虑不及而有乖违本意者若行删正令众易晓有何不可宜修之务令明白有司奏重修上京御容殿帝曰宫殿制度苟务华饰必不坚固今仁政殿辽时所建全无华饰但见他处岁岁修完惟此殿如旧以此见虚华无实者不能经久也今土木之工灭裂尤甚下则吏与工匠相结为奸侵克工物上则户工部官支钱度材惟务速办至有工役纒毕随即欹漏者奸弊苟且劳民费财莫甚于此自今体究抵罪庚戌帝谓宰臣曰朕近读汉书见光武所为人有所难能者更始既害其兄伯升不思报怨事更始如平日人不见戚容岂非人所难能乎此其度量盖将大有为者也右丞张汝霖言湖阳公主奴杀人帝曰光武闻董宣直言而怒解可谓贤主矣令宣谢主则非也高祖英雄大度驾驭豪杰起自布衣数年而成帝业非光武所及然及即帝位犹有布衣麓豪之气光武所不为也十二月乙亥帝不豫庚辰赦天下乙酉诏皇太孙璟摄政居庆和殿东庑丙戌以图克坦克寔为太尉兼尚书令襄为尚书右丞相张汝霖为平章政事刘暉为参知政事戊子诏尚书令图克坦克寔左丞相襄平章政事张汝霖宿于内殿

二十九年春正月壬辰朔帝大渐不能视朝诏遣宋高丽夏贺正旦使还癸巳帝崩于福安殿年六十七谥曰光天兴运文德武功圣明仁孝皇帝庙号世宗陵曰兴陵

世宗大定二十九年

钦定续通志卷五十一

●钦定续通志卷五十二 金纪六

金纪 【六】

章宗 【一】

○章宗一

章宗皇帝讳璟小字玛达格显宗嫡子也母曰孝懿皇后图克坦氏初封金源郡王世宗令习本朝语言文字及汉字经书以进士完颜匡司经徐孝美等侍读大定二十五年六月显宗崩十二月进封原王判大兴府事入以国语谢世宗喜顾谓宰臣曰朕尝命诸王习本朝语惟原王语甚习朕甚嘉之二十六年四月诏赐名璟寻拜尚书右丞相世宗谓曰宫中有舆地图观之可以具知天下远近阨塞又谓宰臣曰朕所以置原王于近辅者欲令亲见朝廷议论习知政事之体故也十一月诏立为皇太孙世宗谕之曰建立在朕保守在汝宜尽忠孝无失众望二十八年十二月世宗不豫诏摄政二十九年正月癸巳世宗崩太孙即皇帝位于柩前 【恭

读 御制全韵诗题金章宗云乃祖嘉习国语为

孙宜守旧物服御渐染华风疏忌那闻吁咈付托却喜柔弱驯致金源道拙惜哉大定规模直使章宗衰讫按章宗即位以后一切政教未尝不

知治体虽典章文物稍有可观而诛戮诸王传授非人至于祖宗诘戎肄武之旧弃之如遗遂使元兵启衅莫之能支 圣制谓为孙宜守旧

物大哉 王言诚万世治道之本也谨录议之】 丙申诏免今岁租税并自来悬欠等钱山东统军裔以私过都城不赴哭临笞五十降授彰

化军节度使二月辛酉朔日有食之癸亥追尊皇考为皇帝尊母为皇太后甲子命学士院进呈汉唐便民事及当今急务敕开登闻院以达冤

枉已已敕御史台自今监察令本台辟举任内不称职亦从奏罢乙酉诏有司稽考典故许引用宋事是月宋主内禅子惇嗣立三月壬辰朝皇

太后于隆庆宫是月凡五朝 【按章宗朝隆庆宫及一切数行之典如禘飨谒陵与春水秋山诸国聘问之类俱于初见处书之后不复叙】

夏四月乙酉葬世宗皇帝于兴隆五月丙午以祔庙礼成大赦 【按弘简录载正月丙申大赦五月丙午又大赦盖正月大赦因初即位也五

月大赦以祔庙礼成也金史于正月丙申不载大赦当系脱漏】 庚戌诏罢送官钱今后诸护卫考满赐官钱二千贯壬子敕收录功臣之子孙

量材于局分承应闰月庚申朔封兄珣为丰王琮郢王瓌瀛王从彝沂王弟从宪寿王玠温王丙寅观稼于近郊庚午以唐古贡为御史大夫壬

申封乳母孙氏萧国夫人姚氏莘国夫人丙子进封赵王永中为汉王曹王永功冀王翊王永成吴王虞王永升随王徐王永蹈卫王滕王永济

潞王辞王永德湍王乙酉诏诸有司凡承应人将来受亲民之职可命所属谕使为学其护卫符宝奉御奉职侍直近密当选有德行学问之人

为之教授六月辛卯以廷臣谏罢围猎乙未初置提刑司分按九路并兼劝农采访事屯田镇防诸军皆属焉秋七月辛酉减民地税十之一河

东南北路十之二下田十之三丁卯以图克坦克温为太傅改封金源郡王辛巳诏京府节镇防御州设学养士初设经童科以伊喇履为参知

政事八月辛卯敕有司京府州镇设学校处以进士提控其事壬辰初定品官子孙试补令史格及提刑司所掌三十二条丁酉如大房山戊戌

谒奠诸陵已亥还都九月戊午朔天寿节以世宗丧不受朝壬戌诏罢告捕乱言人赏丁卯制强族大姓不得与所属官吏交往违者有罪丙子

猎于近郊冬十月庚戌中侍舒穆鲁阿古误带刀入禁门罪应死诏杖八十十一月癸亥帝谓宰臣曰今之用人太拘资格张汝霖对曰不拘资

格所以待非常之材帝曰崔佑甫为相未踰岁荐八百人岂皆非常之材欤甲子谕尚书

省太傅年高自旬休外四日一居休惟大事白之可也
戊辰谕尚书省自今五品以上官各举所知岁限所举之数如不举者坐以蔽贤之罪仍依唐制凡五品以上官到任即举自代并从提刑司采访之已巳初制转递文字法乙亥命伊喇履提控刊修辽史御史台奏台官不得与人相见无以访知民间利病官吏善恶诏自今许与四品以下官相见三品以上如故辛巳诏自后诸处或有饥谨令总管节度使或提刑司先行赈贷或赈济然后言十二月丙戌诏罢铸钱壬辰谕有司女真人及百姓不得用网捕野物及不得放羣鷗枉害物命亦恐女真人废射也戊戌复置北京辽东盐使司仍罢巡盐使赈宁化保德岚州饥其流移复业给复一年是日禁宫中上直官及承应人毋得饮酒壬子帝谕台臣曰提刑司所举劾多小过行则失大体不行恐有所沮其以此意谕之

明昌元年春正月丙辰朔改元不受朝贺辛酉谕尚书省宰执所以总持国家不得受人馈遗或遇生辰受所献毋过万钱若总大功以上亲及二品以上官不禁壬戌以王尉为尚书右丞完颜守贞为参知政事戊辰制禁自披剃为僧道者敕外路求世宗御书辛未如近畿春水二月丙申诏诸王凡出猎毋越本境壬寅谕有司寒食给假五日着于令甲辰还宫三月己未敕点检司诸试护卫人须身形及格若功臣子孙善射出众虽不及格亦令入见乙巳击球于西苑百寮会观癸酉诏内外五品以上岁举廉能官一员不举者坐蔽贤罪乙亥初设应制及宏词科丁丑制内外官并诸局承应人遇祖父母父母忌日并给假一日辛巳诏修曲阜孔子庙学夏五月乙卯祈雨于北郊及太庙戊午拜天于西苑射柳击球纵百姓观壬戌祈雨于社稷甲子制省元及四举终场人许该恩己巳复祈雨于太庙庚午置知登闻鼓院事一人丙子以祈雨望祭岳镇海渎于北郊戊寅命内外官五品以上任内举所知才能官一员以自代壬午以伊喇履为尚书右丞图克坦镒为参知政事六月己丑制定亲王家人有犯其长史府掾失觉察故纵罪秋八月癸未禁指托亲王公主奴隶占网船侵商旅及妄征钱债乙酉诏设常平仓己丑以宗室为平章政事癸巳罢诸府镇流泉务选才干之官为诸州刺史皆召见谕戒之戊戌诏集百官议何以使民弃末而务本以广储蓄户部尚书邓俨等曰今风俗侈靡宜定制度辨上下使服用居室各有差等抑昏丧过度之礼禁追逐无名之费用度有节蓄积自广矣右丞履参知政事守贞镒曰凡人之情见美则愿若不节以制度将见奢侈无极费用过多民之贫乏殆由此致方今承平之际正宜讲究此事为经久法帝是履议

【按弘简录止载后议总叙邓俨等名既失事实亦与诏集百官议句不合然金史载二议而说颇相同不应独以履议为是即后议亦履与守贞镒三人所同而云帝是履议似镒与守贞又有所议者恐系记载之误今仍原文而识之】 九月丙辰以廉能进授北海县令张翱等十八人官冬十月丙申诏赐贵德州孝子翟巽遂州节妇张氏绢粟十一月乙卯以惑众乱民禁罢全真及五行毗卢戊辰谕王儵张暉等曰朝廷可行之事汝谏官礼官即当辨析小民之言有可采者朕尚从之况卿等乎自今所议毋但附合于尚书省十二月甲辰以克盩为太师尚书令封淄王赐银绢

二年春正月乙卯皇太后不豫自是日往侍病丙夜乃还辛酉皇太后崩戊寅诏赐图古勒部羊三万口币五百端绢二千匹以赈其乏吴王永成隋王永升闻国丧奔赴失期罚其俸一月其长史笞五十巳卯有司言汉王永中以病失期帝谕使回 【按汉王永中转载孝懿皇后崩永中适有寒病不能至帝怒遣使责之与此互异】 二月丙戌禫祭永中始至入临行烧饭礼 【按汉王永中转载二月丙戌禫祭永中始至盖永中先以有病未奔丧至此自应奔临本纪失载今据补但永中转载壬辰永中兴诸王朝辞帝礼遇虽在而嫌忌自此始考章宗初年于诸王恩礼有加至四年郑王永蹈谋逆后方有疏忌之心谓因奔丧一节早成嫌忌恐深文不可为据也】 壬辰敕亲王及三品官之家母许僧尼道士出入谕有司进士程文但合格者即取之毋限人数丙申以瓜尔佳清臣为尚书左丞戊戌更定奴诱良人法夏四月戊子制诸部内灾伤主司应言而不言及妄言者等罪辛卯帝幸寿安宫张暉等上疏请止其行不允癸巳诏女真字直译为汉字甲午改封永中为并王永功鲁王永成兖王永升曹王永蹈郑王永济韩王永德幽王己亥学士院奏进唐杜甫韩愈刘禹锡杜牧贾岛王建宋王禹偁欧阳修王安石苏轼张耒秦观等集二十六部壬寅诏袭封衍圣公孔元措视四品秩五月庚戌敕自今四日一奏事仍免朝秋七月丁巳以图克坦镒为尚书右丞瓜尔佳衡为参知政事己未观稼于近郊己巳禁职官元日生辰受所属献遗九月乙卯谒奠裕陵丙辰还都已未以瓜尔佳清臣为平章政事封芮国公完颜守贞为尚书左丞张万公为参知政事冬十月甲午敕司狱毋得与府州官还往十一月丙午朔制诸女真人不得姓氏译为汉字甲寅禁伶人不得以历代帝王为戏戊午夏人贼杀边将阿鲁岱十二月己卯定镇边守将致盗贼罪己酉诏罢契丹字

三年春二月甲戌朔敕明安穆昆许于冬月率所属户畋猎二次每出不得过十日

闰月甲子以乌凌阿愿为御史大夫三月辛卯诏赐棣州孝子刘瑜锦州孝子刘庆佑绢粟旌其门闾帝因问宰臣其人可官使者守贞对以若辈多淳质不及事帝曰孝义之人素行已备稍可用即当用之后虽有希觊作伪者然伪为孝义犹不失为善可检勘前后所申孝义之人可用者以闻癸巳忻州陈毅上书言事帝命左丞守贞问之其一极论守令之弊问所以救弊之道莫之能言帝曰方今政欲知其弊也彼虽无救弊之术但能言其弊亦足嘉矣如毅言及有司不能奉行条制为人佣雇尚须出力况食国家禄而乃如是得无亏臣子之行乎其令检会前后所降条理举行之丁酉命有司祈雨望祀岳镇海渚于北郊夏四月壬寅朔定宣圣庙春秋释奠礼甲辰祈雨于社稷丙午罢天山北界外采铜诏赐云内孝子孟兴绢粟赐同州人妻师氏谥曰节丙辰旱灾下诏责躬遣御史中丞吴鼎枢等会决中都冤狱外路委提刑司处决左丞守贞以早上表乞解职不允参知政事衡等入谢帝曰前诏开罢不急之役省无名之费议冗官决滞狱四事其速行之五月甲戌祈雨于社稷是日雨戊寅出宫女百八十三人尚书省奏山东河北饥已委宣差所至安抚振济复遣范文渊往视之乙酉以雨足致祭社稷六月癸卯宰臣请罢提刑司帝曰诸路提刑司官止三十余员犹患不得其人州郡三百余处其能尽得人乎弗许丁巳定提刑司条制乙丑以刘玮为尚书右丞有司言河州灾伤民乏食而租税有未输诏免之秋七月戊寅敕尚书省曰饥民如至辽东恐难遽得食必有饥死者其令散粮官问其所欲居止给以文书命随处官长计口分散令富者出粟养之限以两月其粟充秋税之数癸未诏增北边军千二百人分置诸堡八月癸卯敕诸职官老病不肯辞退有司谕使休闲者不在给俸之列格前不论帝以军民不和吏员奸弊诏四品以下六品以上集议于尚书省甲辰问三品以下六品以上官朝政得失及民间利害令各书所对辛亥赐胡光谦明昌二年进士第三甲及第授太常寺奉礼郎旧设是职未尝除人以光谦德行才能故特授之己未以乌凌阿愿为尚书左丞乙丑帝谓宰臣曰朕欲任官令久于其事若今日作礼官明日司钱谷虽间有异材然事能悉办者鲜矣九月庚午谕尚书省去岁被灾伤处所阁租税及借贷钱粟俟丰收日以分数带征可也又谕随路提刑司旧止察老病不任职及不堪亲民者如得其实即改除他路若他路提刑司覆察得实勿复注亲民之职其集议速行之己卯如秋山免围场经过人户今岁夏秋租税之半曾当差役者复一年冬十月壬寅至自秋山甲寅敕置常平仓处并令州府提刑县官兼管勾其事以所余多寡约量升降以为永制戊午谕尚

书省访求博物多知之士十一月丙子诏臣庶之名有犯古帝王讳姓复同者禁之周公孔子之名亦令回避甲申改提刑司令史为书史丙申以有司言河州定羌民张显孝友力田焚券已责又献粟千石以助赈饥诏特补两官仍叙正班十二月辛亥谕有司祈雪丁巳敕华州下邽县京兆栎阳县许州舞阳县准所奏定地名置仓各设仓官一人其都监县官兼领之

四年春正月辛未以瓜尔佳清臣为尚书左丞相兼修国史丁丑遣户部侍郎李猷可等分路劝农事癸未尚书省奏擢大兴府推官苏德秀为礼部主事帝曰朕既尝语卿等百官当使久于其职今德秀方任理官称职又除礼部人才岂能兼之如久于其职即中材胜于新人事既经练亦必有济后不可轻易改除又谕凡称政有异迹者谓其断事有轶才也若止清廉此乃本分以贪者多故显其异耳宰臣言方今孝弟廉耻道阙乞正风俗帝曰今之察举官吏者多责近效以干办为上其有秉心宽厚欲行德化者辄谓之迂阔故人人皆以教化为余事此孝弟所以废也若敕所司擢举务行德化者则教化可行孝弟可兴矣今所察举皆先才而后德巧猾之徒虽有赃污一旦见用犹为能吏此廉耻所以丧也若敕所司察举官吏必审真伪使有才无行者不能覬覦非道求进者加之纠劾则奔竞之俗息而廉耻可兴矣辛卯赈河北诸路被水灾

者癸巳谕点检司行宫外地及围猎之处悉与民耕虽禁地听民持农器出入 【恭读

御批通鉴辑览云章宗以围猎之地悉与民耕则讲武因之而废盖立国之道武备原不可一日而弛虽劝农称善政而围猎亦所以为民圣谕以承租父基业不可变其旧俗为训真万世

立国之谟猷也谨录识之】 丙申东路副使王胜进鹰遣谕之曰汝职分非轻民闲利害官吏邪正略不具闻而乃以鹰进此岂汝所职也后母

复尔二月戊戌朔始以春秋二仲月上戊日祭社稷三月戊辰朔诸路提刑司入见诫谕之曰朕特设提刑司本欲安民于今五年效犹未着盖

多不识大体徒事细碎以致州县畏缩而不敢行事乃者山东民艰于食尝遣使赈济盖卿等不职故至于此既往之失其思悛改以胥持国为

参知政事甲午定配享功臣夏四月癸卯百官请上尊号帝以比年五谷不登百姓流离正当戒惧修身之日岂得虚受荣名不许戊申亲禘于

太庙辛亥右丞相清臣等及学官刘玘率六学诸生请上尊号如唐元和故事不许敕女真进士及第后仍试以骑射中选者升擢之正月丙寅

朔曹王永升及诸王请上尊号不许辛巳敕诸路月具雨泽田禾分数以闻六月壬戌以完颜守贞为平章政事秋七月己丑制三品以上有故

者若亲贤勋旧尚书省即与闻奏议加追赠以同判大睦亲府事襄为枢密使八月丁未释奠孔子庙北面再拜九月甲子朔天寿节御大安殿受亲王百官及宋高丽夏使朝贺戊辰以瓜尔佳衡为尚书右丞马琪为参知政事冬十一月丙戌诏诸职官以赃污不职被罪以廉能获升者列其姓名揭之公署以示劝惩十二月甲午谕大兴府于暖汤院日给米五石以贍贫者戊戌定武军节度使郑王永蹈以谋反伏诛己亥谕有司以郑王财产分赐诸王泽国公主财物分赐诸公主庚戌诏有司会试毋限人数是岁大有年

五年春正月乙丑尚书省进区田法诏相其地宜务从便又言遣官劝农之扰命提刑司禁止之乙亥以页噜古绅始制女真字诏加封赠依苍颉立庙整屋例祠于上京纳尔珲庄本路官及其子孙春秋致祭辛巳诸路所举才德之士文商等诏赐奖赏自后屡擢荐举之士乙酉初定长吏劝课能否赏罚格诏购求崇文总目内所阙书籍二月己酉宰臣请罢北边屯驻军马不允癸丑命伊喇敏持嘉锡尔格相视北边营屯经画长久之计三月壬申初定限钱禁庚辰诏定日月风雨雷神常祀戊子置弘文院译写经书夏四月己酉诏自今筐篋床榻之饰毋以金玉乙卯幸景明宫六月宋前主昫殂秋七月戊辰猎于和济格尔八月辛亥至自景明宫九月乙丑帝御睿思殿诸路提刑司入见戊辰初令民买扑随处金银铜冶戊寅敕尚书省集议备边事甲申命上京等九路并诸茂及纛等处选军三万俟来春调发仍命诸路并北准布以六年夏会兵临潢冬十月庚戌张汝弼妻高托噶以谋逆伏诛壬子尚书省奏升提刑司所察廉官大兴主簿蒙古满都在其中帝曰满都浇浮人也与其任浇浮孰若用淳厚使才智过人犹不当用况常才耶其再察之闰月甲子亲王百官及六学诸生屡奉表请上尊号不允戊寅帝问辅臣孔子庙诸处何如守贞对曰诸县见议建立帝因曰僧徒修饰宇像甚严道流次之惟儒者于孔子庙最为灭裂守贞曰儒者不能长居学校非若僧道久处寺观帝曰僧道以佛老营利故务在庄严阔侈起人施利所以为观美也丙戌以鄂屯忠孝温昉修治河防十二月辛酉平章政事完颜守贞为胥持国所忌罢去【按完颜守贞刚忠明亮称贤宰执故明昌之治具有可观自胥持国既进而守贞乃不能安金史止载其罢而未指以胥持国之故于原委不能了然兹据续通鉴纲目补辑】以尼玛哈鉴为参知政事丁卯免黄河水灾处今年秋税辛巳敕减修内司备营造军千人都城所五百人

六年春正月辛卯敕有司给天水郡公家属田宅壬寅如春水庚戌罢陝西括地辛

亥谕胥持国河上役夫聚居恐生病疫可廩医护视之
乙卯次御林二月丁巳朔敕有司行宫侧及猎所有农者勿禁庚午至自春水三月丙戌
朔日有食之甲午以富珠哩子元田仲礼等为司谏拾
遗谕之曰国家设置谏官非取虚名盖责实效庶几有所裨益卿等皆朝廷选擢置之谏
职如国家利害官吏邪正极言无隐近路铎左迁本以
他罪卿等勿以被责遂畏缩不言也戊戌括羣牧所三招讨司明安穆昆随纛及德呼勒
唐古都诸茂西京太原官民駟五千充北边粮运其駟
载为业者勿括敕取银绢金盃等物以备支給赏劳夏四月癸亥增修曲阜宣圣庙工毕
赐衍圣公以下三献法服及登歌乐一部甲子以乌凌
阿愿为平章政事瓜尔佳衡为尚书左丞戊寅以修河防工毕参知政事胥持国进官二
阶翰林待制鄂屯忠孝以下各一阶获嘉令王维翰以
下五十六人各赐银币有差庚辰以瓜尔佳清臣为左丞相监修国史襄为尚书右丞相
胥持国为尚书右丞壬午赐宰臣手诏以风俗不淳官
吏苟且责之五月丙戌命减万室官陈设九十四所辛卯以出师遣礼部尚书张暉告于
庙社乙未判平阳府事镐王永中及其二子以罪赐死
乙巳诏诸路明安穆昆农隙讲武本路提刑司察其惰者罚之庚戌命左丞相瓜尔佳清
臣行省于临潢府六月丙寅以唐古贡为枢密使辛巳
左丞相清臣遣使献捷秋八月己巳以温都伯英言命礼部令学官讲经壬申行省都事
通吉永中来报捷九月丙戌以伊喇仲方为御史大夫
冬十月乙亥命瓜尔佳衡行省于抚州命选亲军武卫军各五百人以从十一月戊子左
丞相瓜尔佳清臣罢右丞相襄代领行省事甲辰报败
敌于望云乙巳以唐古贡伊喇仲方张暉等二十三人充计议官凡军事则议之戊申初
定县官增水田升除制十二月戊午礼部尚书张暉等
进大金集礼庚辰帝幸后园阅军器右丞相襄率驸马都尉布萨揆等进军大盐泺分兵
攻取诸营

承安元年春正月甲申大盐泺羣牧使伊喇覩等为光嘉喇部兵所败死之丁亥国
子学斋长张守愚上平边议三篇特授本学教授仍以
其议付史馆二月初造虎符发兵三月癸卯敕尚书省刑狱虽已奏明其间恐有疑枉其
再议以闻人命至重不可不慎也夏四月壬子遣使审
决冤狱戊午初行区种法民十五以上六十以下有土田者丁种一亩五月庚辰朔观稼
于近郊因阅区田乙酉以久旱徙市庚子大雨六月甲
寅以百姓艰食诏出仓粟十万石减价粲之秋七月庚辰御紫宸殿受诸王百官贺乙酉
命有司收瘞西北路阵亡骸骨冬十月丙午朔诏选亲
军八百人戍抚州庚戌命左丞相襄行省于北京签书枢密院事完颜匡行院于抚州丙

辰裕享于太庙十一月庚寅特们羣牧契丹图卜苏德
寿反泰州军击败之御史大夫董师中北京留守裔并为参知政事丁酉朝享于太庙戊
戌有事于南郊大赦改元十二月丙午枢密使唐古贡
率百官请上尊号不允己酉遣提点太医近侍局使李仁惠劳赐北总将士授官者万一
千人授赏者几二万人凡用银二十万两绢五万匹钱
三十二万贯

二年春正月乙酉敕职官犯赃私不得诉于同官二月特命袭封衍圣公孔元措世
袭兼曲阜令三月壬午命温昉佩金符行六部尚书于
抚州庚寅幸西园阅军器辛卯始定保举德行才能格丁酉以参知政事裔代左丞相襄
行省于北京夏四月尚书省奏比岁北边调度颇多请
降僧道空名度牒以助军需从之癸酉亲王宣敕始用女真字五月甲戌朔谕宰臣曰比
以军须随路赋调司县不度缓急促期征察使民费及
数倍胥吏又乘之以侵暴其令提刑司究察之丙子再谕官吏今纪纲不立官吏弛慢迁
延苟简习以成弊职官多求善名计得自安国家何赖
焉至于徇情卖法省部令吏尤甚自今其戒勉之丁丑北京行省裔移驻临潢府六月戊
申敕王遵古霖雨免入直以年老且尝侍讲读也庚戌
罢瑶光殿工作秋八月庚辰敕计议官所进奏帖可直言利害勿用浮辞辛巳以边事未
宁诏六品以上官议攻守之计凡中外臣僚不以职位
高下或有方略材武或长于调度各举三五人以备选用议者凡八十四人言攻者五守
者四十六且攻且守者三十三召对睿思殿论难久之
丙戌以左丞相襄为左副元帅右丞胥持国以有罪免 【按胥持国柔佞有智术是时章
宗李妃宠幸擅政持国阴附结之以倾善类至是为
言者所论以有罪免金史称为致仕未得其实兹据续通鉴纲目改补】 壬辰以左副元
帅襄为枢密使兼平章政事九月壬寅遣官分诣上京
东京北京咸平临潢西京等路招募汉军不足则签补之乙巳诏许复夏国保安兰州榷
场癸丑以钮祜禄额特埒为平章政事辛酉以枢密使
襄知大兴府事胥持国为枢密副使权参知政事行省于北京冬十月庚午朔初设讲议
所官十员共议钱谷以孙铎高汝砺等为之壬辰诏奖
谕布萨揆等有功将士甲午大雪以米千石赐普济院令为粥以食贫民十一月乙巳以
薪贵敕围场地内毋禁樵采壬子谕尚书省明安穆昆
既不隶提刑司宜令监察御史察其臧否十二月己巳朔敕御史台纠察谄佞趋走有实
迹者癸未遣户部侍郎上官踰体究西京逃亡劝率沿
边军民耕种户部郎中李敬义规措临潢等路农务乙酉谕宰臣今后水潦旱蝗盗贼窃
发命提刑司预为规画

三年春正月己亥朔日有食之辛丑宋夏遣使来贺癸卯谕有司凡馆接伴并奉使者毋以语言相胜务存大体奉使者亦必得其人乃可
乙卯诏罢讲义所丁巳并上京东京两路提刑司为一提刑使副兼安抚使副安抚专掌教习武事毋令改其本俗二月辛巳谕宰臣曰自今内外有阙如有才能可任者虽资历未及亦具以闻虽亲故毋有所避丙戌萨察内附三月戊戌以张暉为御史大夫壬寅始榷醋丁巳敕随处盗贼毋以强为窃以多为少以有为无啸聚三十人以上奏闻违者杖百丙寅高丽王王皓以弟暉权国事遣使奉表来告遣孙侯往高丽宣问夏
四月丙申谕御史台曰随朝大小官虽有才能率多苟简朕甚恶之其察举以闻提刑司所察廉能污滥官皆当殿奏余事可转以闻庚子张汝方以漏泄廷议削官两阶五月壬寅射柳击球纵百姓观秋八月庚辰以护卫石和尚为押军万户率亲军八百人武卫军千六百人戍西北路
冬十月丁亥定官民存留见钱之数设回易务更立行用钞法十一月丁酉枢密使襄至自军癸卯以为尚书左丞相兼修国史茂申诏奖谕枢密副使瓜尔佳衡以下将士以边事定诏中外减死罪徒以下释之赐左丞相襄以下将士金币有差十二月甲子朔猎于酸枣林大风寒罢猎冻死者五百余人

四年春正月辛酉以瓜尔佳衡为平章政事起复张万公为平章政事杨伯通为尚书左丞签枢密院事完颜匡为尚书右丞二月庚午御宣华门观迎佛壬申谕有司自今每旬三品至五品官各一人转对有应奏事与转对官相见无面对者上章亦听戊寅如建春宫庚辰谕点检司曰自蒲河至长河及细河以东朕常所经行官为知买其地令百姓耕之仍免其租税甲申还宫乙酉以布萨揆治边有功召为参知政事三月丁酉以宗浩为枢密使己亥遣使册王暉为高丽国王丁未敕尚书官员必须改除者议之其月日浅者毋数改易夏四月壬午进封英王从宪为瀛王五月壬辰朔以旱下诏责躬求直言避正殿减膳审理冤狱命奏事于泰和殿戊戌命有司望祭岳渎祷雨己亥应奉翰林文字陈载言四事其一边民苦于寇掠其二农民困于军需其三审决冤滞一切从宽苟纵有罪其四行省官员例获厚赏而沿边司县曾不沾及此亦干和气致旱灾之所由也帝是之戊申宰臣以京畿雨率百官请御正殿复常膳不从庚戌帝谕宰臣曰诸路旱或关执政今惟大兴宛平两县不雨得非守令之过欤司空襄平章政事万公参知政事揆上表待罪帝以罪己答之令各还职壬子祈雨于太庙六月丁卯雨司空襄以下屡表请御正殿复常膳至是从之丁丑右补阙杨庭秀言自转对官外复令随令八品以上外

路五品以上及出使外路有可言者并许移检院以闻
则时政得失民间利病可周知矣从之癸未奉职酬和尚进浮漏水称影仪简仪图命有
司依式造之丁亥定宫中亲戚非公事传达语言转递
诸物及书简出入者罪秋七月辛亥敕宣徽院官天寿节凡致仕率执悉召与宴八月甲
戌以皇嗣未立命有司祈于太庙冬十月乙未敕京府
州县设普济院每岁十月至明年四月设粥以食贫民十二月右补阙杨庭秀请类集太
祖太宗世宗三朝圣训以时观览从之仍诏增熙宗为
四朝

五年春正月乙未尚书省言会试取士不得过六百人不及其数则阙之庚子命左
右司五日一奏事庚戌定明安穆昆军前怠慢罢世袭
制二月丁未帝与宰臣论置相曰国克坦镒朕志先定贾铉如何皆曰知延安府事孙即
康可平章政事且先铉一榜帝曰论相安问榜次特以
贾才可用耳右补阙杨庭秀言乞令尚书及第左右官一人应入史事者编次日历或一
月或一季封送史院帝是其言仍令送著作局润色之
三月癸亥孙铎完颜萨喇蒙古仁本召对便殿庚午以卞为御史大夫丙子尚书省奏拟
同知商州事富察锡津为济南府判官帝曰宰相岂可
止徇人情要当重惜名爵此人不堪朕常记之止与七品足矣庚辰以图克坦镒为平章
政事辛巳定本国婚聘礼制夏五月乙卯朔定明安穆
昆鬪殴杀人遇赦免死罢世袭制秋七月癸亥定居祖父母丧婚娶听离法初置富森羣
牧九月戊午命宗浩贾铉佩金符行省山东等路括地
己未通吉思忠言各路边堡墙隍自塔布色东至呼尔根几六百里向以起筑忽遽并无
女墙副堤近令修完计工七十五万止役戍军未尝动
民今已毕功赐诏奖谕修玉牒成立皇族收养异姓男为子者徒三年同姓者减二等立
嫡违法者徒一年冬十月辛丑集百官于尚书省问间
者亢旱近则久阴岂政有错谬而致然欤各以所见对十一月癸丑朔日有食之乙卯以
吕卿云为左补阙审官院以资浅驳奏帝谕之曰明昌
间卿云尝上书言宫掖事辞甚切直皆他人不能言者卿辈盖不知也臣下言事不令外
人知乃是谨密正当显用卿宜悉之十二月癸未朔诏
改明年为泰和元年乙未诏宫籍监户百姓自愿以女为婚者听

钦定续通志卷五十二

●钦定续通志卷五十三 金纪七

金纪 【七】

章宗 【二】

卫绍王

○章宗二

泰和元年春正月己巳太府监孙复言方今在仕者三万七千余员而门荫补叙居三之二诸司待阙动至累年盖补荫猥多流品混淆本末相舛至于进纳之人既无劳绩又非科第而亦荫及子孙无所分别欲流之清必澄其源乃更定荫叙法尚书省奏今杖式轻细民不知畏请用大杖诏不许过五分三月辛巳敕官司文字避始祖以下庙讳小字犯者论如律夏四月甲辰诏谕契丹人户累经签军立功者官赏恩例与女真同仍许养马为吏五月戊寅削尊长有罪卑幼追捕律六月己亥申明旧制明安穆昆户每田四十亩树桑一亩毁树木者有禁鬻地土者有刑其田多汗菜人户阙乏并坐所临长吏按察司以时劝督仍减牛头税三之一敕尚书省举行风俗奢僭之禁乙巳初许诸科征铺马黄河夫军须等钱折纳银一半愿纳钱钞者听秋七月甲子谕刑部官凡上书人言及宰相者不得申省八月壬寅制明安穆昆并隶按察司监察御史止按部纠举有罪则并坐监临之官诏推排西北京辽东三路人户物力九月定贍学养士法生员给民佃官田六十亩岁支粟三十石国子生人百八亩岁给以所入官为掌其数冬十月壬辰御史台奏在制按察司官比任终遣官考核然后尚书省命官覆察之今监察御史添设员多宜分路巡行每路女真汉人各一人同往从之壬寅敕有司购遗书宜偿其价以广搜访藏书之家有珍惜不愿送官者官为誊写毕复还之仍量给其值之半十一月丁巳谕工部曰比闻怀州有橙结实官吏检视已尝扰民今复进柑得无重扰民乎其诚所司遇有则进无则已十二月丁酉司空襄等进新定律令敕条格式五十二卷辛丑诏颁行之

二年春正月乙卯始朝献于衍庆宫夏四月辛丑谕御史台诸诉事于台当以实上闻不得辄称察知五月甲辰朔日有食之壬戌谕有司曰金井巴纳不过二三日留朕之所止一凉厦足矣若加修治徒费人力其藩篱不及之处用围幕可也己巳敕御史台京师拜庙及巡幸所过州县止令洒扫不许以黄土覆道六月辛卯谕尚书省诸路禾稼及雨多寡令州郡以闻秋八月丁酉皇子生九月甲寅以拱卫直都指挥使完颜瑋等贺宋生日使且戒之曰两国和好矣汝不宜争细故伤大体庚午封皇子为葛王冬十一月甲辰更定德运为土腊用辰以宗浩为枢密使十二月癸酉以皇子晬日放僧道戒牒三千闰月辛酉定人户物力随时推收法

三年春正月己卯以宗浩为尚书右丞相完颜匡为左丞布萨揆为右丞孙即康贾铉并为参知政事三月丁亥定从人铜牌卖毁罪赏制夏四月乙巳禘于太庙敕致仕官入宫年高艰于步履者并听策杖仍令舍人护卫扶之五月丙戌以定律令正土德凤凰来皇嗣建大赦辛卯

皇子葛王薨壬辰定擅增减宫门锁钥罪六月壬寅诏选聪明方正为修起居注又诘点检司诸亲军所设教授及受业人若干其为教何法通
大义者几人各具以闻秋九月壬辰诏定千户穆昆受随处捕盗官公移盗急不即以众
应之者罪有差冬十月庚申奉御完颜阿鲁岱使宋还
言宋权臣韩侂胄市马厉兵将谋北侵帝怒以为生事笞之五十出为彰德府判官及淮
平陷擢为安国军节度副使丁卯谕尚书省士庶陈言
可悉令诣阙量与食直仍给官舍居之其言切直及系利害重者并三日内奏闻十一月
甲午诏监察等察事可二年一出十二月庚子谕宰臣
曰贺正宋使且至可令监察随之以为常辛亥诏诸亲王公主每岁寒食十月朔听朝谒
兴裕二陵忌辰亦如之癸丑诏遣监察御史分按诸路
所遣者女真人即以汉人朝臣偕所遣者汉人即以女真朝臣偕

四年春正月丁丑尚书省奏宋贺正使还至庆都道卒诏遣防御使努色尔往祭贖
以绢布命送伴使张云护丧以归二月丁酉以山东河
北旱诏祈雨东北二岳庚戌始祭三皇五帝四王癸丑诏凡州郡无宣圣庙学者并增修
之三月癸酉命大兴府祈雨戊寅诏定前代帝王合致
祭者尚书省奏三皇五帝四王已行三年一祭之礼若夏太康殷太甲太戊武丁周成王
康王宣王汉高祖文景武宣后汉光武明章唐高祖文
皇一十七君致祭为宜从之壬辰辽阳府判官锡默瑠嘉以上书论列朝臣削官一阶罢
之夏四月丙申诏定县令以下考课法丙午定衣服制
甲寅以久旱下诏责躬求直言避正殿减膳彻乐省御厩马免旱灾州县徭役及今年夏
税遣使审系囚理冤狱乙卯宰臣上表待罪诏曰朕德
有愆上天示异卿等各趋乃职思副朕怀五月甲戌雨乙亥百官上表请御正殿复常仪
乙酉谢雨于宗庙丁亥报祀社稷汰随朝冗官六月壬
辰朔罢兼官俸给秋八月丁酉以崇浩为左丞相布萨揆为平章政事孙即康为尚书右
丞布萨端为左丞通吉思忠为参知政事庚子诏完颜
纲乔宇宋元吉等编类陈言文字其言涉宫庭若大臣省台六部各以类从凡二千卷辛
丑以崇肃为御史大夫癸卯尚书省奏前以天旱诏求
直言河南府卢显达汝州王大材所陈言涉不逊请论其罪从之减教坊长行五十人渤
海教坊长行三十人文绣署女工五十人出宫女百六
十人九月壬申定屯田户自种及租佃法冬十月丙申诏亲军三十五岁以下习孝经论
语十二月辛丑敕陕西河南饥民所鬻男女官为赎之

五年春正月乙亥诏有司自太和三年郡县三经行幸民尝供亿者赐今年租税之
半丁丑调山东河北军夫改治漕渠二月己丑朔谕各
路按察司限于近制各务因循莫思举刺郡县以贪黷相尚莫能畏戢自今若纠察得实

民无冤滞能使一路镇静者为称职其或繁紊使民不得伸愬者为旷废三月乙丑宋兵入秦川界甲戌谕有司进士名有犯孔子讳者避之仍着为令命给米诸寺自十月十五日至次年正月十五日作糜以食贫民辛巳宋兵入巩州唐州得宋谍者言韩侂胄屯兵鄂岳将谋北侵夏四月癸巳命枢密院移文宋人依誓约撤新兵毋纵入境壬子定随路转运司每季检视库物法五月甲子以布萨揆为河南宣抚使籍诸道兵以备宋【按续通鉴纲目载金章宗以宋事问大臣皆谓宋不敢渝盟及闻完颜匡言乃命布萨揆宣抚河南据此则非因唐州得宋谍者言而备宋也与金史异】甲申宋人破涟水县六月戊子复之己酉制镇防军逃亡致边事失错陷败户口者罪甲寅召诸大臣问备宋之策皆以设备养恶为言帝以南北和好四十余载民不知兵不忍先发秋七月壬午诏诸县盗贼多所选注巡尉八月辛卯诏罢宣抚司时宋殿帅郭倪濠州守将田俊迈诱虹县民苏贵等为间河南将臣亦屡纵谍往往利俊迈之赂皆为游说言宋之增戍本虞他盗及闻行台之建亦不敢去备且兵皆白丁自裹粮备穷蹙饥疫死者十二三由是中外信之宣抚司以宋三省枢密院及盱眙军谍来上又皆镌黜边臣为辞宣抚使揆因请罢司从之揆又奏罢临洮德顺秦巩新置弓箭手九月戊戌宋攻比阳寺庄副巡检阿里哈肆嘉努死之甲辰宋人焚黄润执巡检高颢冬十月丁丑宋人袭比阳唐州军事判官索多死之十一月乙酉宋人攻固县商州司狱寿祖击败之己丑以太常卿赵之杰等为贺宋正旦使【按宋史载金使赵之杰入见礼甚倨是时兵衅之开实先自宋如谓金使入见礼倨则以金欲南侵而先以使臣之倨挑之如海陵之使王全者然考续通鉴纲目载金使赵之杰入见韩侂胄故使赞者犯金王父嫌名以挑之金使怒遂无礼于事实原委甚晰】癸巳山东阙食赐钱三万贯以赈之丁酉诏山东陕西帅臣训练士卒以备非常仍以银十五万两分给边帅募民侦伺复遣完颜太平富察阿里赴边伺其入伏兵掩之宋吴曦拥众兴元欲窥关陇皇甫斌益募兵扰淮北

六年春正月丁亥宋贺正使陈克俊等朝辞遣御史大夫孟铸谕之曰大定初世宗皇帝许宋世为侄国朕遵守遗法和好至今岂意尔国屡有盗贼犯我边境以此遣大臣宣抚河南军民及得尔国有司公移称已罢黜边臣抽去兵卒朕方以天下为度不介小嫌遂罢宣抚司比来盗贼甚于前日羣臣屡以尔国渝盟为言朕惟和好岁久委曲涵容恐侄宋皇帝或未详知若依前不息臣下或复有云朕虽兼爱生灵事亦岂能终已卿等归国当以朕意具言之汝主丙申宋吴曦遣兵围穆舒隆堡部将布什长安

击走之癸卯始以沿河县官兼管句漕河事州府府官
兼提控庚戌宋人入萨满谷陕西统军判官完颜果啰巩州兵马钤辖完颜齐锦约宋西
和州守将会境上俄伏发为所袭木波部长赵彦雄等
七人死焉二月甲戌御史中丞孟铸言提刑改为按察司又差官覆察权削而望轻非便
参知政事贾铉曰按察司既差监察体访复遣官覆察
之诚为繁冗请自今差监察时即遣官与俱更不覆察从之三月甲午尚书省奏商州刺
史乌库哩扬珠请贖押军官与南兵战没者又奏迁右
振肃富察乌锦官皆从之己酉宋人攻灵壁夏四月丙辰宋人围寿春亳州同知防御使
贤圣努击却之河南统军使赫舍哩子仁言宋皇甫斌
遣兵四万规取邓以我叛人田元为乡导三万人规取唐以张贞张胜为乡导俱授统领
官故不敢无备乃聚郑汝阳翟之兵于昌武以赫舍哩
毅统之聚亳陈襄邑之兵于归德以图克坦铎统之而自以所部兵驻汴及拟山东东西
路军七千付统军赫舍哩执中驻大名河北东西路军
万七千屯河南皆给以马从之甲子宋人攻天水界部将刘铎战败之丙寅诏平章政事
布萨揆领行省于汴许以便宜从事升诸道统军司为
兵马都统府以赫舍哩执中为山东西路兵马都统使完颜萨喇副之陕西统军使充为
陕西五路兵马都统使和硕舒穆鲁仲温副之皆听揆
节制尽征诸道兵辛未宋吴曦攻来远镇之兰家岭丁丑宋人入新息内乡又入泗州褒
信虹县颍上五月壬午宋李爽围寿州田俊迈入蕲县
秦洗攻蔡州防御使完颜佛珠败之又入金城海口杀长山尉执二巡检以去丙戌以宋
畔盟出师告于天地太庙社稷戊子加揆兼左副元帅
充为元帅右监军乌库哩谊为元帅左都监辛卯以征南诏中外帝以东北新调之兵未
集河南之众不足支命河北大名北京天山之兵万五
千屯真定河间清献等处以为应壬辰谕尚书省今国家多故凡言军国利害五品以上
官以次奏陈朕将亲问之六品以下则具帖子以进癸
巳以完颜匡为右副元帅宋田俊迈攻宿州纳喇邦烈等出兵击之邦烈中流矢宋郭倬
李汝翼以众继至遂围宿州壬寅纳喇邦烈等击败之
俊迈退保于蕲执之甲辰皇甫斌攻唐州刺史吾克逊鄂屯泌阳副巡检纳哈塔军胜合
击败之六月辛亥平章政事揆报蕲之捷并送所获宋
将田俊迈至阙帝降诏褒谕赐赫舍哩贞纳喇邦烈萨克达等爵赏有差宋将李爽围寿
州刺史图克坦羲守踰月河南统军判官奇珠及迈格
等来援羲出兵应之爽大败同知军州事布埒库中流矢死乙卯初置急递铺腰铃转递
日行三百里非军期河防不许起马丁巳诏彰德府宋
韩侂胄祖琦坟毋得损坏仍禁樵采庚申右翼都统完颜萨布败宋曹统制于溱水壬戌

平章政事揆报寿州之捷戊辰诏升寿州为防御免今年租税诸科名钱释死罪以下以图克坦羲为防御使赠布埒库昭勇大将军赐钱三百贯官其子图喇擢奇珠同知昌武军节度使事迈格河南统军判官都统萨布副统布什万努各进爵一级赐金币有差乙亥宋吴曦攻盐川戍将完颜王喜败之秋七月癸未宋商荣复攻东海县令完颜绷森复败之还中伏矢死赠海州刺史以银绢给其家仍官其一子甲午宋统制戚春以舟师攻邳州刺史完颜从正败之春赴水死吴曦兵入秦州陕西路都统副使承裕等败之丙申夏国王李纯佑废侄安全立八月庚戌山东帅来报邳州之捷辛未宋程松袭取方山原富察贞破走之乙亥赦唐邓颖蔡宿泗六州免来年租税三分之二九月辛巳富察贞取和尚原临洮蕃部遵懿献刍粟战马以助军庚寅敕行尚书省有方略出众武艺绝伦才干办事工巧过人者其招选之戊戌布萨端行省于汴己亥梁鏜行六部尚书事于山东甲辰宋吴曦将冯兴杨雄李珪等入秦州陕西都统副使承裕等击破之斩杨雄李珪冬十月戊申朔平章政事布萨揆督诸道军伐宋庚戌揆以行省兵三万出颖寿赫舍哩子仁以兵三万出涡口匡以兵二万五千出唐邓赫舍哩执中以山东兵二万出清口充以关中兵一万出陈仓富察贞以岐陇兵一万出成纪完颜纲以汉蕃步骑一万出临潭舒穆噜仲温以陇右步骑五千出盐川完颜璘以本部兵五千出来远十一月壬午完颜匡攻下枣阳丁亥布萨揆克安丰军取霍邱县赫舍哩执中克淮阴遂围楚州庚寅完颜匡克光化军壬辰布萨揆次庐江宋督视江淮兵马事邱密遣使刘佑来乞和赫舍哩子仁克定远县乙未完颜匡取随州丙申赫舍哩子仁克滁州戊戌完颜匡围德安别以兵徇下安陆应城云梦孝感汉川荆山等县庚子完颜纲围佑州降之宋邱密遣使林拱持书乞和辛丑完颜匡攻襄阳破其外城布萨揆克含山富察贞克天水赫舍哩子仁徇下来安全椒二县壬寅完颜纲徇下荔川闾川等城癸卯邱密复遣使宋显等以书币乞和乙巳完颜纲克宕昌丙午富察贞克西和州十二月丁未朔完颜匡克宜城布萨揆攻和州萨克达中流矢死壬子完颜纲下大潭县富察贞克成州癸丑宋昭信军节度使四川宣抚副使吴曦纳款于完颜纲 【按吴曦叛降事续通鉴纲目载在是年六月以前宋史亦载四月吴曦献关外四州于金求封蜀王六月金人封吴曦为蜀王而金史载十二月始纳款于完颜纲纲以朝命立吴曦为蜀王时日与两书均异】 戊午充攻下大散关己未赫舍哩子仁克真州邱密复遣使陈璧等奉书乞和辛酉右监军雅绰哈以兵趋凤州城溃入焉完颜纲遣张仔会吴曦于兴州之

置口曦仍献阶州乙丑平章政事布萨揆班师完颜纲
以朝命使马良显赍诏书金印立吴曦为蜀王戊辰富察贞以西和天水等捷来报己巳
曦遣郭澄任辛奉表及蜀地图志吴氏谱谍来上壬申
诏完颜匡权尚书右丞行省事右副元帅如故以赫舍哩执中纵下虏掠遣近臣杖其经
历伊尔必斯等仍诏放还所掠 【按续通鉴纲目载
是岁蒙古却特穆津称帝于鄂诺河考金史于凡僭位称尊者虽经剿灭之后必书其
原委乃于元初独阙而未载即宋史记开禧二年事亦
未及此今仍其旧而附识之】

七年春正月丁丑完颜匡进攻襄阳戊寅敕宰臣举材干官同议南征事辛巳诏崇
肃图克坦怀忠范楫高汝砺张行简温特赫思齐等十
有四人同对于庆和殿壬午诏百官及前十四人同对于广仁殿乙酉赠寿州死节军士
魏全宣武将军封其妻乡君子谥充正班局分承应仍
赐钱百万初李爽围寿州刺史羲募人往斫敌营全在选中为敌所执敌令骂羲则免全
反骂敌遂杀之故有是恩戊子召完颜纲赴阙庚寅布
萨揆还驻下蔡而病丙申以崇浩兼都元帅行省于南京以代揆辛丑完颜匡取谷城二
月丙辰赦凤成西和阶山五州丁巳宋知枢密院张岩
遣方信孺以书诣平章政事揆乞和完颜匡克荆门军吴曦遣使奉三表来谢封爵陈誓
言贺全蜀内附戊辰平章政事兼左副元帅布萨揆薨
于军癸酉遣珠格高琪等册吴曦为蜀国王是月蜀国王吴曦为宋臣安丙所杀三月庚
寅招抚谕陕西军士壬辰宋复攻破阶州癸巳复攻破
西和州乙未宣抚副使完颜纲至凤翔诏撤五州兵分保要害纲召诸军还庚子以完颜
匡为左副元帅夏四月癸丑宋人攻破散关乌雅爱实
死之丙辰以赫舍哩子仁为右副元帅戊辰诏元帅府分遣诸将游奕淮南诸州癸酉复
下散关五月丙申宋张岩复遣方信孺以书至都元帅
府增岁币乞和宋四川安抚使安丙遣李孝义率步骑三万攻秦州围皂角堡珠格高琪
以兵赴之七战解其围六月己酉以山东盗制同党能
自杀捕出首官赏法戊午乌库哩谊为元帅左监军完颜萨喇为元帅左都监秋七月壬
午诏民间交易典质一贯以上并用交钞毋用钱乙酉
敕尚书省自今初受监察者令进利害帖子待召见甲午左副元帅匡至自许州乙未诏
核西夏人口尽赎放还有藏匿者以违制论八月戊申
宋张岩复遣方信孺赍其主誓书藁来乞和 【按方信孺之使金据续通鉴纲目作开禧
三年二月宋史作四月金史载二月五月八月三至
俱奉书乞和而宋史乃称奉书通谢彼此互异考是时金师未退和议未许其大散关濠
州俱未归则安得先为通谢也当以金史所载为正】

九月甲戌朔左丞相兼都元帅崇浩薨于军甲申以布萨端为平章政事完颜匡为平章政事兼左副元帅壬寅敕女真人不得改为汉姓及学南人装束冬十月辛未陕西宣抚使图克坦猛分遣巴噶哈攻下苏岭关是月定南征将士功赏格十一月癸酉诏新定学令内削去辞居正五代史止用欧阳修所撰者雅尔拔鹞岭关巴噶罕取小湖关进攻营口镇遂取其城丙子宋韩侂胄遣左司郎中王柟以书来乞和请称伯复增岁币犒军钱诛苏师旦函首以献壬辰宋参知政事钱象祖以诛韩侂胄移书行省戊戌诏完颜匡檄宋函侂胄首以赎淮南故地十二月庚申以孙即康为左丞通吉思忠为右丞孙铎为参知政事

八年春正月癸酉以完颜萨喇为参知政事乙亥宋安丙遣兵袭鹞岭关巴噶罕完颜果啰击走之二月乙巳宋钱象祖遣王柟来以书上行省复请川陕关隘庚申诏谕有司方农作时虽在禁地亦令耕种三月庚寅以与宋和谕尚书省夏四月戊申禘于太庙诏谕有司以苗稼方兴宜速遣官分道巡行农事以备虫蠹宋钱象祖复遣王柟以书上行省闰月辛未谕尚书省曰翰林侍讲学士富蔡乌延言使宋官当选人其言甚当其报聘人当先议择自此更始凡有礼数皆在奉使今既行之为永例不可不慎也甲戌制诸州府司县造作不得役诸色人匠违者准私役之律计佣以受所监临财物论乙未宋献韩侂胄等首于元帅府五月丁未御应天门备黄麾立仗亲王文武合班起居中路兵马提控平南抚军上将军赫舍哩贞以宋贼臣韩侂胄苏师旦首献【按韩侂胄倡议用兵意欲恢复而宋宁宗以兵败乃从金请遂诛其首以献之是始而用其谋既则谄其咎诚如通鉴辑览御批祇冀和议之成不顾事理之非也谨录识之】并奉元帅府以露布闻悬其首并画像于市以露布颁中外丙辰平章政事匡至自军巳未更元帅府为枢密院癸亥诏移天寿节于十月十五日六月癸酉宋通谢使试礼部尚书许奕右武卫上将军吴衡等奉其主书入见【按宋史载嘉定元年正月以许奕为金国通谢使考是时侂胄未诛金未许和安得先遣使通谢也金史载三月以与宋和谕尚书省则六月通谢使之来较得事实宋史时日恐系误载】癸未以许宋平诏中外免河南山东陕西等六路今年夏税河东河北大名等五路半之丁亥以乌库哩谊为御史大夫丁酉以副都点检完颜侃为宋谕成使礼部侍郎乔宇副之秋七月戊申宋使朝辞致答通谢书及誓书于宋主八月己巳以户部尚书高汝砺等为宋生日使九月甲子遣吏部尚书贾守谦等一十三人与各路按察司官推排民户物力十一月丁酉诏诸路按察使并兼转运使初设三司使掌判盐铁度支劝农

事以赫舍哩子仁兼三司使癸卯诏戒谕尚书省曰国家之治在于纪纲纪纲所先赏罚必信今乃上自省部之重下逮司县之间律度弗循私怀自便迁延旷岁苟且成风习此为恒从何致理朝廷者百官之本京师者诸夏之仪其勗自今各惩已往遵绳奉法竭力赴功无枉挠以循情无依违而避势一归于正用范乃民是日御临武殿试护卫丁未敕谕临潢泰州路兵马都总管承裔等修边备乙卯帝不豫丙辰崩于福安殿年四十一谥曰宪天光运仁文义武神圣英孝皇帝庙号章宗陵曰道陵

章宗明昌六年承安五年泰和八年凡十九年

○卫绍王

卫绍王韩永济小字兴胜初名允济以避显宗讳改允为永世宗第七子母曰元妃李氏封薛王进封滕王历刑部尚书殿前都点检章宗时进封潞王判安武军节度使寻封韩王又进卫王泰和五年判平阳府已而改武定军节度使八年十一月自武定军入朝是时章宗已感病卫王辞行章宗留之初章宗雅爱诸王置王傅府尉官以傅导德义及永中永蹈诛由是疏忌宗室遂以王傅府尉检制王家苛问严密门户出入皆有籍而卫王乃永蹈母弟柔弱鲜智能故章宗爱之章宗既无继嗣而诸叔兄弟在者又不欲立之惟欲立卫王故于辞行留之无何章宗崩平章政事完颜匡等传遗诏立卫王卫王承诏举哀即皇帝位于柩前

大安元年春正月壬戌改元大赦立元妃图克坦氏为皇后二月以章宗内人范氏损其遗腹诏中外范氏削发为尼封皇子六人为王三月甲辰葬章宗皇帝于道陵大赦夏四月庚辰杀章宗元妃李氏及承御贾氏以平章政事完颜匡为尚书令秋七月如大房山谒奠睿陵裕陵道陵百官表请建储不允冬十月己卯诏戒励风俗十二月诏平阳地震人户三人死者免租税一年二人及伤者免一年贫民死者给葬钱五千伤者三千以右丞相布萨端为左丞相进封兄越王永功为樵王

二年春二月以礼部侍郎耿端义为参知政事夏六月大旱下诏罪已赈贫民阙食者曲赦西京太原两路杂犯死罪减一等徒以下免乙丑立子胙王从恪为皇太子夏人侵葭州乙未诏求直言招勇敢抚流亡庚子遣使慰抚宣德行省军士丙午京师戒严【按金自章宗与宋再和后兵威渐弱蒙古之势已强至此忽云京师戒严疑系元兵入逼力不能支史家讳而不载今仍原文而附识之】帝日出巡抚百官请视朝不允辛亥宣德行省罢癸丑诏抚谕中都西京清沧被兵民户冬十二月辛酉朔日有食之是岁大饥禁百姓不得传说边事

三年春三月括民间马令职官出马有差夏四月元兵来侵遣钮祜禄哈达乞和不许初纳哈塔迈珠守北鄙以蒙古将侵边来告帝以擅生边隙囚之及侵扰云中诸处连岁不休遂破大水泆以进帝始惧【按金史载元兵初侵即遣使乞和于事理未协考续通鉴纲目所载则金固兵威屡挫及是而后乞和兹据补辑】以通吉迁嘉努和硕行省事备边赫舍哩呼沙呼行枢密院事鄂屯忠孝为尚书右丞梁■〈王堂〉为参知政事六月壬寅更定军前赏罚格八月迁嘉努和硕等自抚州退军驻于宣平河南大名路军逃归下诏招抚之九月迁嘉努和硕败绩于会河堡居庸关失守禁男子不得辄出中都城门元军至中都命梁■〈王堂〉镇抚京城冬十月图克坦谟遣乌克逊鄂屯将兵二万卫中都珠格高琪屯都城外帝巡抚诸军元兵退十一月杀河南陈言人郝赞以图克坦谟为右丞相签中都在城军赫舍哩呼沙呼弃西京走还京师即以为右副元帅益都杨安儿反是时得兴府弘州昌平怀来缙山丰润密云集宁东过平泆南至清沧由临潢过辽河西南至忻代皆归于元右副元帅呼沙呼请兵二万屯宣德诏与三千人屯妫州迁嘉努和硕坐覆全军迁嘉努除名和硕责授咸平路兵马总管万户奎腾屯古北口十二月签陕西两路汉军五千人赴中都太保张行简左丞相布萨端宿禁中议军事

崇庆元年春正月朔改元呼沙呼请退军屯南口诏数其罪免之三月夏人犯葭州延安路兵马总管完颜诺尔布御之五月签陕西勇敢军二万人射粮军一万人赴中都括陕西马泰安刘二祖反掠淄沂州【按大安三年益州杨安儿反崇庆元年泰安刘二祖反金史俱失载考是时元兵入侵而又盗贼蠹起契丹啸聚金所以不得并力御元也兹据续通鉴纲目补辑】贾铉起复参知政事福兴为尚书左丞诏卖空名敕牒以布萨端为河南陕西安抚使提控军马秋八月万秋节以兵事不设宴冬十月曲赦西京辽东北京十一月赈河东南路南京路陕西东路山东西路卫州旱灾

至宁元年春正月故辽人耶律瑠格反犯辽东州郡自立为辽王【按律耶瑠格于至宁元年正月反自立为辽王金史失载似于二月诏抚谕辽东及宣宗贞佑三年十月报败瑠格之捷俱无原委兹据续通鉴纲目补辑】二月诏抚谕辽东乌库哩谊谋不轨伏诛夏五月改元诏谕咸平路契丹部人之啸聚者起呼沙呼复为右副元帅领武卫军三千人屯通玄门外六月夏人犯保安州杀刺史犯庆阳府杀同知府事以胥鼎王维为参知政事秋八月尚书左丞完颜元努将兵备边诏军官军士赐赉有差

治中福海别将兵屯城北辛卯呼沙呼矫诏以诛反者
招福海执而杀之夺其兵壬辰自通玄门入杀知大兴府图克坦南平刑部侍郎图克坦
默呼福海男符宝珊延都统实古纳率众拒战死之呼
沙呼以兵入宫自称监国都元帅癸巳逼帝出宫以素车载至故邸以武卫军二百人
守之图克坦镒闻难作还第已而劝呼沙呼立升王 【
按图克坦镒闻难作还第已而劝立升王金史以为忠考呼沙呼以闻镒言乃弑卫绍王
于故邸迎立升王兹据续通鉴纲目补书至于图克坦
镒身为宰执顾以委蛇自免恭读通鉴辑览 御批谓其不能讨贼又不能尽节徒以
定计策立不得谓为忠臣真大公至正之言春秋褒贬
之义也谨录识之】 呼沙呼使宦者李思中弑帝于邸降封东海郡侯宣宗贞佑四年追
复卫王谥曰绍

卫绍王大安三年崇庆一年至宣宗元年凡五年

钦定续通志卷五十三

●钦定续通志卷五十四 金纪八

金纪 【八】

宣宗 【一】

○宣宗一

宣宗皇帝讳珣本名乌达布显宗长子也母曰昭华刘氏初生时世宗养于宫中赐
今名章宗时改赐名从嘉始封邢王进封升王至宣元
年八月卫绍王被弑呼沙呼使其党图克坦铭等迎帝于彰德府既至京亲王百官上表
劝进甲辰即皇帝位以赫舍哩呼沙呼为太师尚书令
兼都元帅封泽王九月乙巳朔谕尚书省事有规画者皆即规画悉依世宗所行丁未谕
宰臣曰朕即大位羣臣凡有所见各宜直言临奠于卫
绍王第有司奏旧礼当设坐哭帝命撤坐伏哭尽哀敕有司以礼改葬戊申御仁政殿视
朝赐呼沙呼坐呼沙呼不辞辛亥封皇子守礼为遂王
守纯为濮王元遣伊噶济来壬子改元贞佑大赦尚书右丞相图克坦镒进左丞相封广
平郡王庚申呼沙呼议废故卫王为庶人诏百官议于
朝堂壬戌授呼沙呼中都路和啰噶图世袭明安闰月授图克坦镒中都路达鲁明安庚
午帝复旧名珣辛未诏追尊皇妣为皇太后是日皇妃
皇子至自彰德府遣使如宋甲申立子守忠为皇太子丙戌降封故卫王为东海郡侯冬
十月丁酉朔京师戒严辛丑元伊噶济来辛亥元帅右
监军珠格高琪与元兵战于城北再战再败以兵入城杀呼沙呼于其第持其首诣阙待
罪赦之仍授左副元帅壬子殿前都检点赫舍哩特默
等补外张行信上疏极论呼沙呼罪恶及珊延实古纳之冤元兵陷涿州设京城镇抚弹

压官置招贤所癸亥放宫女百三十人十一月戊辰夏
人攻会州图克坦酬尔击走之庚午将乞和于元诏百官议于尚书省以横海军节度使
承晖为尚书右丞耿端义为参知政事癸未诏赠死事
费摩福兴及珊延实古纳官削呼沙呼官爵 【按张行信上疏极论呼沙呼罪恶宣宗乃
下诏削其官爵金史于壬子日仅载张行信上封事
不明指其论呼沙呼于癸未日仅载诏赠死事诸人官不及削呼沙呼官爵殊失事实兹
并从弘简录补辑】 元兵徇观州刺史高守约死之又
徇河间府沧州十二月丁酉朔帝御应天门诏谕军士仍出银以赐之图克坦公弼进尚
书右丞相承晖进都元帅兼平章政事左副元帅珠格
高琪进平章政事兼前职

二年春正月辛未元兵徇彰德府知府事洪果玖珠死之宋人攻秦州统军使舒穆
噜仲温击郟之癸未有司奏请权止今年禘享朝献原
庙及皇太后册礼乙酉征处士王恉不至元兵徇益都府又徇怀州沁南军节度使宋宸
死之二月壬子元伊噶济扎巴来壬戌伊噶济来三月

【按续通鉴纲目载金人屡遣使来督岁币起居舍人真德秀上疏请绝之反复数千言
遂罢金国岁币大金国志亦载遣人至宋索二年岁币

宋不予使又再至宋迄不予考宋嘉定七年三月即金贞佑二年三月金史失载今为附
识】 辛未遣承晖诣元军议和丁丑大赦癸未京师大

括粟甲申元伊噶济扎巴来诏百官议于尚书省戊子以濮王守纯为殿前都检点兼侍
卫亲军都指挥使权都元帅府事庚寅以卫绍王公主

归于元辛卯诏许诸人纳粟买官京师解严 【按金史载庚寅纳卫绍王公主辛卯京师
戒严是时金既纳主元当不复侵逼矣考续通鉴纲

目于纳公主下载蒙古主引归出居庸关则此处所载辛卯京师戒严当是解严之讹今
改正】 壬辰元兵下岚州镇西军节度使乌库哩仲温

死之夏四月乙未朔以知大兴府事胥鼎为尚书右丞时山东河北诸郡失守惟真定清
沃大名东平徐邳海数城仅存河东州县亦多残毁命

布萨安贞等为诸路宣抚使 【据续通鉴纲目作山东安抚使】 以元允和议大赦甲
辰诏有司具阵亡人子孙以备录用丁未以承晖为平

章政事乙卯尚书省奏巡幸南京诏从之己未葬卫绍王五月乙亥辍朝帝决意南迁诏
告国内太学生赵昉等上章极论和议之害以大计已

定慰遣之帝诣原庙奉辞以南京留守布萨端等尝请临幸先诏谕之壬午车驾发中都
以皇太子留守癸巳次中山府敕扈从所践禾稼计直

酬之六月甲午朔以高汝砺为参知政事癸丑次内邱县元伊噶济来戊午次彰德府曲
赦其境内庚申次巨桥镇是日南京行宫宝镇阁灾秋

七月至南京【按大金国志载贞佑二年大名守余崇义奏乞迁都诏集议于明阳殿时廷臣或主迁或主守而主迁者又各议其利害经日莫定下诏决迁汴京八月二十八日驾兴十月二十四日至汴与金史所载迥异】诏立元妃温都氏为皇后八月庚子皇太子至自中都【按续通鉴纲目载宣宗徙汴次良乡扈从军叛降元元合其兵围燕京宣宗闻之乃召皇太子至汴金史但云八月皇太子至自中都讳之也今仍原文而附识之】丁未夏人入边九月壬戌朔日有食之癸亥山东路奏莱州之捷庚辰诏训谕军士冬十月甲午诏遣官市木波西羌马陕西军户战死者给粮贍其家丁酉元兵徇顺州劝农使王晦死之壬寅穆延尽忠进平章政事以富珠哩德裕为参知政事兼签枢密院事曲赦中都路乙卯遣富珠哩德裕行尚书省于大名府丙辰元兵攻威州德州防御使完颜酬努以罪伏诛十一月丁卯以布萨端为尚书左丞相曲赦山东路辛未赐卫绍王家属廩饩丙子兰州译人程陈僧叛西结夏人为援癸未曲赦辽东路十二月戊戌遣真定行元帅府事永锡等援中都丁未以和议既定听民南渡乙卯登州刺史耿格伏诛流其妻孥元兵徇懿州节度使高闰山死之

三年春正月壬戌遣内侍谕永锡防边毋以和议为辞乙丑诏宣抚阿哈总管和卓讨贼刘二祖张汝楫乙亥夏人犯环州北京军乱杀宣抚使鄂屯襄丁丑右副元帅富察齐锦叛以其军降元乙酉皇太子薨二月辛卯环州刺史乌库哩延寿及锡默摩啰欢等与夏人战于州境败之元伊呀济来丁酉诏诸色人迁官并视女真人丙午尚书省奏请置选并于南京以便赴调者从之武清县巡检梁佐柳口巡检李耀珠以诛乱贼张晖刘永昌等功进官有差皆赐姓完颜丁未山东宣抚使布萨安贞遣提控布萨瑠嘉等讨贼杨安儿安儿败死【据续通鉴纲目增辑】歼其众降伪头目三百余人胁从民三万余户三月壬戌诏河北州县官令文武五品以上辟举不听以他事差占仍勒终任有劳绩者但升遥领之职应降罚者亦止本处居住癸亥诏百官冬陈防边利害丙寅赦河东河北大名长贰官训练随处义兵邻境有警责其掇援降人自拔归国者迁职仍列其姓名以招谕来者沿河州县官罢软不胜职任者汰去令五品以上官公举仍许于今季到部人先择能者量缓急易之丁卯安武军节度使张行信上书言急务四事庚午谕辽东宣抚使布什万努选精锐屯浑州广宁以候进止戊寅谕尚书省以岁旱议弛诸处碾硃以其水溉民田劝农事李华言河北州县官吏多求河南差占以避难宜发元任领戍兵者不可离则别注以往壬午山东宣抚司破红袄

贼于大沫堠瓜尔佳锡里格及默呼擒贼渠刘二祖等斩之前后殪贼万计前年京兆治中李友直私走华州结同知防御使冯朝等团集州民号忠义扈驾都统府相挺为乱杀其防御判官完颜巴锦及城中女真人以书约都统杨珪为府兵所得珪讳之请自劾诱友直等执之麾所招千余人纳仗坑诸城下时京师道路隔绝安抚司以便宜族友直等至是以状闻乃赠巴锦及被害官军十余人各一官珪伏诛夏四月丙申河南路蝗遣官分捕帝谕宰臣曰朕在潜邸闻捕蝗者止及道傍使者不见处即不加意当以此戒之又言旧制夏至后免朝四日一奏事此在平时可也方今多故朕岂惮劳但使国事无废则善矣癸卯籍赴选监当官为军乙巳曲赦富察齐锦胁从之党募能杀获齐锦者以其官官之丙午以调度不给罢随朝六品以下官及承应人输佣钱经兵州府其吏减半司县吏减三分之一其余除开封府南京转运司外例减三之一有禄官吏被差不出本境者并罢给券出境者以其半给之修内司军夫亦减其半壬子诏遣使同山西宣抚司选其民勇健者为军谕有司勿拒河北避兵之民所至口之招大沫堠渠贼孙邦佐张汝楫以五品职下诏湔洗其罪丙辰谕田琢留山西流民少壮者充军老幼者令就食于邢洺等州帝议遣亲军援中都宰臣以为行宫单弱不可遣遂止五月庚申中都陷尚书右丞相兼都元帅定国公承晖户部尚书任天宠知大兴府事高霖死之辛未立皇孙铿为皇太孙辛巳帝谕宰臣多事之秋陈言者悉送省恐卿等不暇朕于宫中置局命正官数员择可取者付出施行戊子议伐西夏遣大臣镇抚京兆秋七月戊午朔元兵陷济源县己未征弓箭于外内品官以级递减之庚申置陈颖漕运提举官以户部勾当官往来督察帝闻河北讥察官有要求民财始听民渡河者避兵民至或饿死自溺特命御史台体访之又禁随朝职官斂民碾硃以自营私诏河间孤城移其军民就粟清州括民间赢付诸军与马参用癸亥诏河北郡县军须并减河南之半丙寅遣参知政事高汝砺往河南便宜措置粮储甲戌借平阳民租一年丁丑肃宗神主至自中都奉安于明俊殿己卯明德皇后神主至自中都八月戊子朔以陕西统军使完颜哈达签枢密院事己丑制军府庶事枢密院官须与经历官裁决癸巳诏遣官体究京西路新迁军户己亥诏武举官非见任及已从军者随处调赴京师别为一军以备用被荐未授官者量才任之前冀州教授钮祜禄特烈集义兵御土寇复摄州召徕民户至五万迁三官以太常卿侯摯为参知政事行中书省于河北东西两路太祖御容至自西京奉安于启庆宫甲辰置行枢密院于徐州归德府丙午山东西路宣抚司完颜弼表张

汝楫将谋复叛密遣人招孙邦佐邦佐斩其人驰报弼弼杀汝楫及其党承制升邦佐德州防御使余立功者赏有差帝嘉弼功诏奖谕之丁未
诏近臣举良将加孙邦佐昭毅大将军泰定军节度使仍官其子戊申东平益都太原潞州置元帅府乙酉监察御史许古献恢复中都之策红
袄贼掠城武宣抚副使延扎天泽击败之进天泽一官将校有功者命就迁赏命侯摯招邢州贼程邦杰以官不从则诱其党图之壬子置行省
于陕西乙卯增沿河阑余之法十取八以抑贩粟之弊诏增步军以戍京东西选陕西骑兵增京畿之卫谕陕西坚守延安临洮环庆兰会保安
绥德平凉德顺镇戎经原鄜坊邠宁干耀等处要害分渭南州郡步兵屯平原令宣抚使治邠州副使治同州之澄城以统之更以步骑守沿渭
诸津丙辰永锡坐援中都失律【按中都之破由内则穆延尽忠有异志外则援兵败于霸州考承晖遣人以矾写奏告急宣宗乃命左监军
永锡左都监乌库哩庆寿御史中丞李英等率兵援救英遇元兵于霸州败死庆寿永锡军闻之皆溃归自是中都援绝金纪未载穆延尽忠之
出走亦未载霸州之败至于庆寿永锡同溃而止载永锡坐援中都失律于事实俱未详悉兹据续通鉴纲目附识】削其官杖之九月丁巳朔
定职官避难不仕违限者夺三官永不升注辛酉以永锡为信武将军息州刺史甲子谕宰臣沿淮塘路以南地向系民业今为豪势据夺者其
令有司察之丙寅枢密院言陕西河东世袭蕃部巡检与明安穆昆例罢其俸今边事方急宜仍给之庶获其用又西边弓箭手有才武出众获
功未推赏者令宣抚司核实以闻从之丁卯诏授隐士王浚太中大夫右谏议大夫充辽东宣抚司参谋官戊辰图克坦乌登告平章政事穆延
尽忠逆谋诏有司鞠之设潼关提控总领军马等官辛未置河北东路行总管府于原武阳武封邱陈留延津通许杞诸县以治所徙军户黜卫
绍王母李氏光献皇后尊谥神主在太庙画像在衍庆宫并迁出之陈州镇防军段仲连进羊三百诏迁三官命右丞高汝砺诣陈州规画粮储
癸酉朝谒世祖太祖御容于启庆宫行献享礼始用乐甲戌朝谒太宗熙宗睿宗御容行献享礼诏开滑浚济曹滕诸州置连珠寨如卫州诏经
兵处河北山东等路及平凉庆阳临洮府泾邠秦巩德顺诸州职事官并以二十月为满诏有能率众复取中都者封王迁一品阶授二品职能
战郟敌善诱降人取附都州县者予本处长官散官随职迁授余州县递减二等红袄贼周元儿陷深祁州束鹿安平无极等县真定帅府以计
破之斩元儿及杀其党五百余人丁丑定司县官募民进粮赏格庚辰陕西宣抚司奏万户杨再兴击走夏人之捷壬午以空名宣敕付陕西宣

抚司凡夏人入寇有能临阵立功者五品以下听迁受乙酉置大名府行总管府于柘城县以治所徙军户冬十月丙戌朔乌库哩德升出为集义军节度使兼亳州管内观察使丁亥尚书右丞汝砺言河北军户之徙河南者宜赐以系官闲田及牧马草地之可耕者而罢其月粮从之夏人入保安都统完颜果嘉努破之攻延安戍将又败之至是捷至戊子以图克坦思忠为参知政事庚寅诛穆延尽忠癸巳诏枢密副使布萨安贞行枢密院于徐州戊戌辽东宣抚司奏败瑠格之捷甲辰诏求广平郡王承晖之后得其犹子永怀以为器物直长丙午夏人陷临洮陕西宣抚副使完颜和索哩被执庚戌诏布萨端兼都元帅行尚书省于陕西壬子以同华旧屯陕西兵及河南所移步骑旧隶陕州宣抚司者改隶陕西行省召中奉大夫袭封衍圣公孔元措为太常博士辽东贼布什万努僭号改元天泰十一月丙辰朔河北行尚书省侯摯入见诏河北西路宣抚副使田琢自浚徙其兵屯陕枢密院进王世安取盱眙楚州之策遂以世安为淮南招抚使与泗州元帅府所遣人同往计度其事戊辰夏人犯绥德克戎寨官军击败之犯绥平又败之参知政事图克坦思忠言今陈言者多掇拾细故乞不送省止令近侍局度其可否发遣帝曰若尔是塞言路凡系国家者岂得不由尚书省乎庚午帝与高汝砺商畧遣官括田赐军之利害汝砺言不便者数端乃诏有司罢其令仍给军粮之半其半给折实之价甲戌伊喇托卜嘉与夏人战于熟羊寨败之丙子知临洮府图们呼图克们击破夏兵于城下庚辰诏官荒牧马地军户愿耕者听已为民承种者勿斂元兵徇彰德府知府图们色埒默死之十二月乙酉朔徙朔州民分屯岚石隰吉絳解等州己丑侯摯复行尚书省于河北戊戌陕西行元帅府乞益兵以田琢之众隶之仍奖谕以诏壬寅诏林州刺史惟宏与都提控苏尔坦同经理边事乙巳元兵徇大名府癸丑太孙薨

四年春正月丙寅红袄贼犯泰安德博等州山东西路行元帅府败之丁卯谕御史台曰今旦视朝百官既拜之后始闻开封府报衙声四方多故之秋弛慢如此可乎己巳尚书右丞高汝砺进左丞庚午元兵徇曹州辛未侯摯进尚书右丞乙亥以遂王守礼为枢密使濮王守纯为平章政事己卯立遂王守礼为皇太子壬午言者请遣官劝农宰臣言民恃农以生初不待劝但宽其力勿夺其时而巳遣官以往吏卒因为奸利是乃妨农何名为劝帝然之二月甲申朔日有食之诏皇太子控制枢密院事以金铸抚军之宝授之元兵围太原召枢密官问所以备御之策以永锡签枢密院事权尚书右丞丁亥以胥鼎为枢密副使权尚书左丞行省于平阳

【据续通鉴纲目作四月后事】 元兵攻下霍山诸隘甲辰命李革为修奉太庙使权祔肃宗神主于世祖室诏凡死节之臣立庙致祭同知观州军州事张开复河间府沧献等州并属县十有三三月经畧副使张文复恩邢二州已卯处士王浚以右谏议大夫复选中奉大夫翰林学士仍赐诏褒谕夏四月己丑陕西行省奏秦州官军破妖贼赵用刘高二之捷张开奏复清州等十有一城甲午改赐皇太子名守绪丙申河北行省侯摯言北商贩粟渡河官遮余其什八商遂不行民饥益甚请罢其令从之辛丑红袄贼渠郝定僭号署官陷滕兗单诸州莱芜等十余县道路不通诏枢密院招捕御备蔡息行元帅府兵拔木陡关五月癸丑朔礼官言太庙既成礼可从简约惟以亲行祔享为敬从之山东行省上沂州捷辛酉以侯摯行省事于东平己巳夏人将图临洮巩州窥长安命陕西行省严为之备夏人修来羌城界河桥元帅右都监完颜萨布遣兵焚之六月壬辰辽西伪瀛王张致上表来归诏授特进行北京路元帅府事兼本路宣抚使罢河北诸路宣抚司更置经畧司壬子以旱诏参知政事李革审决京师冤狱秋七月癸丑必喇阿噜岱复威州及获鹿县甲寅山东行省槛贼郝定等至京师伏诛闰月壬午朔日有食之辛卯复深州甲午命掌军官举奇才绝力之人提控都副统等官互举其属庚子诏河南陕西镇防军应荫及纳粟补官者当役如旧候事定乃听赴铨八月甲寅夏人入安塞堡元帅左监军乌库哩庆寿遣军败之乙亥命大名招抚使募人持诏往谕中都丙子元兵攻延安己卯夏人入结耶黼川官军击走之九月辛巳朔元兵攻防州以永锡为御史大夫领兵赴陕西便宜从事壬辰元兵攻代州经畧使鄂屯酬和尚死之 【按金史忠义传载鄂屯酬和尚被执不屈死之金纪止云战没则失其被执不屈之节矣今改辑】 冬十月己未亲王百官奉迎祖宗神主于太庙招射生猎户练习武艺知山径者分屯陝虢要地命必喇阿噜岱守潼关完颜仲元军卢氏元兵攻潼关 【按续通鉴纲目载元兵攻潼关时台臣言京师重兵徒以城守为事中都之危又将见于今日宜遣陝西兵拒潼关与伊尔必斯为犄角之势云云珠格高琪以元兵日逼欲以重兵驻汴自固川郡残破所不复恤乃谓备御方畧非台臣所知不用其议自此国势益衰矣】 西安军节度使尼玛哈富勒呼战没辛酉帝亲行祔享礼乙丑诏谕河南官吏军民以赏格募立功之士命参知政事图克坦思忠提控京师镇抚伊喇卓拉布屯关陝丙寅诏徙卫绍王及镐厉王家属于京师诏吏礼兵工四部尚书董治防城器械凿坎穿筑垣墙元兵徇汝州沿河惟存通报小舟余皆焚之庚午诏宿粮州县签民为兵

就署队长以自防遏河南行省胥鼎遣必喇阿鲁岱以
军一万图克坦拜扎以军五千由便道济河趣关陕自将平阳精兵援京师命枢府督军
应之辛未置官领招贤所事命内外官采访有才识勇
畧能区画防城者以闻不为人所知者听赴招贤所自陈壬申以费摩杨格知归德府事
行枢密院事甲戌谕附京民尽徙其刍粮入城丙子完
颜哈达以征兵失应坐诛户部郎中魏琦以没王事官其子从韩希祖言以战功致身者
尽拘京师备用十一月庚辰朔增定守御官及军人迁
赏格壬午河东行省胥鼎入援京师以知平阳府王质权元帅左监军同知完颜僧嘉努
权右监军代镇河东拜鼎为尚书左丞兼枢密副使遣
还平阳 【据续通鉴纲目增辑】 乙酉实嘉喀齐喀杨噶拉等大败夏人于定公元兵
至沔池右副元帅富察伊尔必斯军溃而逃丙戌权元
帅右监军完颜哈达以军归国升镇南军节度使癸巳帝谕皇太子京城提控官有以文
资充者彼岂知兵其速易之戊戌敕诸州县签籍军民
以备士寇华州元帅府复潼关庚子元兵退 【从弘简录补辑】 罢在京防城民军河
南路统军使赫舍哩素赫以发兵后期坐诛丙午内族
承立进所获马驼帝曰此军士所得即以予之可也十二月辛亥珠格高琪加崇进尚书
右丞相癸亥元兵攻平阳胥鼎遣兵拒战败之 【据
续通鉴纲目补辑】 丙寅元兵陷大名府壬申进自代州神仙横城及平定承天镇诸隘
攻太原府宣抚使乌库哩礼遣人间道告急诏发潞州
元帅府平阳河中绛孟宣抚司兵援之乙亥高琪请修南京里城帝曰民力已困此役一
兴病滋甚矣城虽完固朕亦何能独安此乎

兴定元年春正月癸未宋贺正旦使朝辞帝谓宰臣曰闻息州南境有盗此乃彼界
饥民沿淮为乱尔宋人何故攻我高琪请伐之以广疆
土帝曰但能守祖宗所付足矣安事外讨皇子平章政事濮王守纯授世袭东平府路三
屯明安尚书左丞胥鼎进平章政事封莘国公乙巳元
兵攻观州二月戊申朔初用贞佑通宝凡一贯当贞佑宝券千贯己酉命枢密院汰罢软
军士谕尚书省用官马给驿传以纾民力辛亥以完颜
萨布签枢密院事癸丑罢招贤所己未元兵徇忻代诏定州县官虽积阶至三品坐乏军
储者听行部决遣壬戌尚书省请罢州府学生廩给不
许三月戊寅敕事关刑名当面议之勿听转奏以李革知平阳府兼河东南路兵马都总
管权参知政事行尚书省壬午定民间收溃军亡马及
以马送官之格乙酉帝宫中见蝗遣官分道督捕仍戒勿以苛暴扰民乙未先征山东兵
接应苗道润共复中都而石海据真定叛虑为所梗乃
集钮祜禄贞郭文振武仙所部精锐与东平军为犄角之势图之己亥元兵攻新城庚子

攻霸州甲辰威州刺史武仙讨石海斩之及其党二百
余人降葛仲赵林张立等军进仙权知真定府事夏四月丁未朔以宋岁币不至 【按宋
与金修好已非一日忽尔渝盟罢币失计之甚恭读
通鉴辑览 御批谓其失己之信幸人之灾虢亡虞及理势必然足见宋之君臣真不
明于睦邻御敌之道矣】 命乌库哩庆寿完颜萨布等
经畧之南边庚戌花帽军作乱于滕州诏山东行省讨之节度副使伊喇杨格讨南阳五
朵山盗平之癸丑以安化军节度使完颜■〈宀禹〉
权元帅左都监行元帅府事督经畧使苗道润进复都城且令和辑河间招抚使伊喇特
尔格等军戊午平定州贼阎得用之党阎显杀得用以
其众降己未以权参知政事辽东路行省完颜伊尔必斯为参知政事行尚书省元帅府
于博索路以权辽东路宣抚使富察乌锦权参知政事
行尚书省元帅府于上京甲子元帅完颜萨布破宋兵于信阳乙丑济南泰安滕兖等州
贼并起侯摯遣棣州防御使完颜霆讨平之降其壮士
二万人老幼五万人萨布复奏败宋军于陇山等处俘馘甚众辛未权孟州经畧使苏尔
坦追贼宋子玉至辉州其党邢福杀子玉以众来归壬
申诏谕辽东诸将讨布什万努并捕受伪官家属得高礼妻子皆戮之完颜萨布军渡淮
破光州两关五月戊寅陕西行省破夏人于大北岔癸
巳宋人攻颍州焚掠而去戊戌行枢密院兵败宋人于泥河湾又败之樊城县宋人取涟
水县甲辰元兵下沔城县军官任福死之六月己酉苗
道润表归国人李琛复以众叛琛亦表道润异谋诏山东行省察之修潼关遣中使持诏
及暑药劳夫役设潼关使副及三门集津提举官权参
知政事张行信进参知政事甲寅招抚使惟宏言彰德府守臣擅徙民山砦避兵帝曰难
保之城守之何益徒伤吾民尔勿治丙辰诏枢密院遣
经历官分谕行院严兵利器以守冲要宋人合土寇攻东海境戊午以宋数犯境及岁币
不至诏谕沿边罪宋置南京流泉务辽东行省遣使奏
正月中败契丹之捷秋七月丙子朔日有食之辛巳宋人围泗州壬午围灵璧县癸未隩
州振威军万户马宽逐其刺史李策据城叛州吏擒戮
之夷其族乙酉宋人袭破东海县丙申置提举仓场使副甲辰夏人犯黄鹤垒官军败之
乙巳宋人及土寇攻海州经畧使击破其众夏人围羊
狼寨帅府癸诸镇兵击走之八月己酉官军及宋人战于石湫南及涟水县中土桥败之
壬子削御史大夫永锡官爵有司论失律当死帝以近
族等贯之癸丑宋人攻确山县官军击败之以宋人渝盟诏谕中外仍命大臣议其事乙
卯集贤院咨议官朱盖上书陈御敌三策壬戌海州经
畧使阿布哈努色尔败宋人于其境提控李元与宋人战屡捷多所俘获徙栏通渡经畧

司于黄陵峒丙寅左司谏布萨毅夫乞更开封府号赐
美名帝曰山陵在中都朕岂乐久居此乎遂止甲戌元帅右都监承裔遣其将纳喇吉逊
等合巴鄂特族都管尼玛哈以兵袭击果尔余族诸蕃
帐大破之九月丁丑以元帅左监军必喇阿鲁岱权参知政事行省于益都戊寅夏人犯
绥德克戎寨都统罗世晖逆击却之己卯宋人窥息州
蔡州帅府以轻兵诱其进别以锐师邀击之虜其将沈俊壬午改元大赦辛卯元兵徇隰
州及汾西县癸巳攻沁州辽东行省完颜伊尔必斯为
叛人伯特呼图所杀乙未元兵攻太原簸箕掌寨丁酉薄太原城攻交城清源冬十月丁
未霖雨诏宽农民输税之限庚戌以将有事于宋诏帅
臣整厉师徒甲寅息州帅府献破宋人于中渡之捷乙卯元兵徇中山府及新乐县辛酉
制定州府司县官失察奸细罪乙丑元兵下磁州又下
邹平长山及淄州壬午徙五朵山贼鱼张二等众于归德睢陈钧许诸府州元兵下滨棣
博淄沂五州甲午河西嘉纳克楚纳克等族千余户来
归丁酉诏唐邓蔡州行元帅府举兵伐宋戊戌元兵攻太原府庚子诏谓宰臣曰朕闻百
姓流亡逋赋皆配见人何以堪又添征军须钱太多
亡者詎肯复业其议减除十二月甲辰朔元兵攻潞州都统马甫死之庚戌元帅左监军
富察乌锦进右副元帅权参知政事充辽东行省元兵
下益都府甲寅海州经畧使报提控韩璧败宋人于盐仓己未元兵复攻沂州又下密州
节度使完颜■（亡禹）死之壬戌以侯摯兼三司使
庚午免逃户复业者差赋

二年春正月乙亥诏议賑恤免中京嵩汝等州逋租壬午宋人攻淮北唐州元帅府
击败之获统领季雄韬陈皋以归癸未近侍局副使额
尔克奏南师之捷乙酉元兵围夏王城李遵頊命其子居守而出走西凉诏谕诸帅府明
斥堠严守备戊子唐邓元帅完颜萨布奏连破宋人之
捷宋人攻泗州却之二月癸卯宋人侵清口行枢密院遣兵败之谕胥鼎克宋散关可保
则保不可保则焚毁而还丙午额尔克奏败宋人于防
山赫舍哩和勒端亦遣使奏光州信阳之捷庚戌海州经畧败宋兵于胸山辛亥张行信
出为彰化军节度使兼泾州管内观察使壬子御史以
北兵退请汰各处行枢密院元帅府冗官诏仍旧制完颜萨布奏枣阳之捷 【按续通鉴
纲目载枣阳之役金人战辄败力不能支遂溃金本
纪云完颜萨布奏捷二书互异如此】 癸丑完颜阿林奏皂郊堡之捷丁巳寿州行枢密
院破宋人高柳桥水砦夷其砦而还壬戌额尔克遣兵
拔宋栅于碁盘岭又破其裴家庄寒山岭龙门关等处得粟二千余石丙寅谕尚书省曰
闻中都纳粟官多为吏部缴驳殊不知方阙乏时其利

害为如何又立功战阵人必责保官若辈皆义军白丁岂识职官苟文牒可信即当与之至若在都时规运薪炭入城者朕尝授以官此岂容伪而间亦为所沮格自今勿复若是赫舍哩约赫德破宋人于盱眙己巳以侯摯行省河北兼行三司宣抚司事三月庚辰尚书集文资官杂议进士之选诏依泰和例行之癸未额尔克败宋人于光化军戊子以御史中丞巴古喇为参知政事陕西行六部尚书杨贞削五官累杖解职额尔克表言官军自桐柏入宋境所向多克捷癸巳宋人争皂郊堡军将完颜阿林战没辛丑富察乌锦表左监军格栅额诬杀防州宣抚副使赫舍哩阿敦帝从尚书省奏阿敦徐议恤典格栅额亦姑牢笼使之夏四月壬寅朔又表辽东便宜伊尔必斯贷粮高丽不应辄以兵掠其境帝遣人往谕高丽使知兴兵非上国意乙巳置河南捕盗使副以濮王府尉完颜摩啰欢为宣差提控以巡督之是日曲赦辽东等路以瓜尔佳必喇权参知政事行省于辽东丁未承裔败宋人于皂郊堡壬子遣完颜苏呼额尔克同赴辽东察访叛贼万努事体行省侯摯督兵复密州提控朱琛复高密县丁巳陕西行省兵破宋鸡公山取和州陈州至河池县黑谷关守者皆遁前后获粮九万斛钱数千万军实不可胜计戊午红袄贼犯徐邳行枢密院兵大破之己未伊尔必斯自柘城遣子上书待罪赦之丁卯临洮路奏败宋人之捷东平行省败黑旗贼拔胶西县渠贼李全来援并破之戊辰河北行省败红袄贼进至密州降伪将校数十人士卒七百人悉复其业五月辛未朔中都经畧副使贾瑀杀苗道润道润将张柔袭之柔遇元兵遂降【按金史载兴定二年六月枢密院论贾瑀杀苗道润罪而未载道润将张柔袭贾瑀事续通鉴纲目作张柔讨之考张柔本非奉命不可为讨谨遵通鉴辑览书法补载】凤翔元帅完颜闲山攻破宋部落沿边塌香炉堡诸屯甲戌招抚副使洪果阿噜岱袭破李全于莒州丙子夏人自葭州入鄜延元帅承立遣兵败之玛奇峯莱州民曲贵杀节度经畧使内族专努自称元帅以城叛附于宋山东招抚司遣提控王庭玉招抚副使洪果阿噜岱等讨平之丙戌巩州行元帅承裔遣提控乌库哩长寿纳喇吉逊分道伐宋皆克捷而还辛卯寿州行枢密院南城军攻辛城镇一军趣史河与宋人战败之壬辰河北行省复黄县乙未第凤翔秦巩三道南征将士功各迁其官己亥元兵徇锦州元帅刘仲亨死之六月甲辰枢密院言元集兵应州飞狐将分道南下以窥陕西河东各路义士士兵蕃汉弓箭手宜加教阅以备缓急东平单州冲要豫徙其农民粮畜置可守之城修近城水砦因以为固潼谷远连商虢宜令两帅府选官安视阨塞又言贾瑀等刺杀苗道润乞治其专

杀之罪余州郡各以正职授头目使分治一方帝曰道润之众亟收集之瑀等是非未明姑置勿问诸头目各制一方利害至重更审处之石州
贼冯天羽等据临泉县为乱败官军煽动旁郡县州刺史赫舍哩公顺以兵讨之天羽等数十人迎降公顺杀之余贼走保积翠山遣将王九思
攻之不下诏马季良持诰敕金帛往招之比至九思先破栅杀贼二千人余复走险已而其党安国用等诣季良降者五千余人就署国用同知
孟州防御使事以次迁擢有差分其众于绛霍间壬子红袄贼犯沂州官军败之追至白里港都提控齐信歿于阵丙辰遣监察御史钮祜禄苏
卜实往河中绛解等郡同守土官商度可保城池丁巳帝以久旱谕宰臣治京师冤岳壬戌御史言户部员外郎臧伯升供亿息州偶遇官军战
胜亦冒迁官乞论其罪帝曰诘所从来必连及帅府多故之秋岂为一官遂忘大计但令厘正之秋七月庚午朔日有食之辛未诏赏南伐将士
有差夏人犯龛谷提控瓜尔佳瑞及其副赵防击走之己卯遣官望祀岳镇海渎于北郊享太庙祭太社太稷祭九宫贵神于东郊以祷雨遣太
子太保阿布哈德刚礼部尚书杨云翼分道审理冤狱癸未大雨庚寅择明干官提控铨选无违失者与升擢令译史不任事者验已历俸月放
满别选能者甲午夏人复犯龛谷瓜尔佳瑞大破之遣官诣诸道选寄居守阙丁忧官及亲军入仕才堪总兵者付枢密任使八月己酉诏河北
行省完颜霆进军援山东招抚使田琢自今将士立功听琢先赏以闻元穆呼哩等自太和岭徇河东乙卯陷代州辛酉棣州提控赫舍哩绰哈
讨贼张聚大破其众复滨棣二州奸人李宜伏诛复禁北归民渡河戊辰元兵下隰州九月乙亥下太原府元帅左监军乌库哩德升死之丙戌
谕皇太子曰军务之速动关机会悉从中覆则或稽缓自今有当亟行者先行后闻以纳哈塔富拉塔为元帅右监军行元帅事于潞州戊子置
秦关等处九守御使命完颜芬彻等分戍诸阨议迁海州侯摯言不便乃止元兵徇汾州节度使乌雅恩彻亨死之庚寅李全破密州执招抚副
使洪果阿噜岱同知节度使瓜尔佳肆嘉努辛卯元兵下孝义县丙申李全破寿光县冬十月甲辰李全破邹平县戊申破临朐县己酉元兵徇
绛潞壬子攻平阳提控郭用死之癸丑下平阳知府事李革及苏尔坦死之权平定州刺史范铎以弃城伏诛山东路转运副使程戩及邳州副
提控王汝霖等通宋人为变伏诛宋人攻涟水县提控刘瑛败之丁巳元兵攻泽州戊午尚书省言获奸细叛亡率多僧道诏沿边诸州惟本处
受度听依旧居止来自河北山东遣入内郡讯其出入己未李全据安邱宣太府少监伯特玩擅率兵攻全为全所败提控王显死焉甲子诏河

东北路忻代盩化东胜诸州并受岚州帅府节制十一月庚午大赦庚辰御登贤门召致政旧臣赐食访以时政得失辛巳以赫舍哩和勒端权
签枢密院事行院于徐州额尔克行元帅府事于息州甲申诏河东南路隰吉等州听绛州元帅府节制元兵取潞州元帅右监军纳哈塔富拉
塔参议官王良臣死之戊子龔谷提控瓜尔佳瑞败夏人于质孤堡河北行省奏海州之捷丙申元兵下太原之韩村砦十二月辛丑签枢密院
事富察伊埒图伏诛甲寅以开封府治中吕子羽等使于宋至淮宋人不纳而还红袄贼攻彭城之胡村寨徐州兵讨败之乙卯以礼部侍郎穆
延呼喇勒为汾阳军节度使权元帅右监军岚州元帅瓜尔佳完渡河东癸亥诏伐宋命皇太子抚军胥鼎言枢密掌天下兵凡事已属东宫又
设诸道行院枢密但奉行文书而已自今军中号令关赏罚者皆明注诏旨毋容军司得售其奸欺帝从之以布萨安贞为左副元帅权参知政
事行尚书省元帅府事甲子帝谕有司丐食死于寒朕甚悯之给以后苑竹木令居获燠所

钦定续通志卷五十四

●钦定续通志卷五十五 金纪九

金纪 【九】

宣宗 【二】

○宣宗二

兴定三年春正月丙子税民种地亩议行均输戊寅敕和市边城军须无至配民定镇戍征行军官减资历月日格丙戌赫舍哩约赫德奏
濠州香山村之捷帝谓侍臣曰伐宋之事岂得已哉近日遣使实欲讲和彼既不从安得不月兵也免单丁民户月输军须钱时元兵已定太原
河北事势日亟集百官议备御长久之计二月宋许夏人会师来攻之约庚子帝与太子谋南征帅不得其人叹曰天下之广缓急无可使者朕
安得不忧赫舍哩约赫德败宋人于滁甲辰诏尚书枢密杂议军中诛赏事宜宰臣请城守野战将校有罪从七品以下许便宜决罚余悉奏裁
帝曰将权太轻或至误事自今四品以下听决乙巳攻宋光山县俘其统制蔡从定等光州以兵来援复败之丙午帝谓宰臣曰江淮之人号称
选慊然官军攻蔓菁■〈山冈〉其众困甚胁之使降无一肯从我者我家河朔州郡一遇北警往往出降此何理也戊申拔宋小江寨杀其统
制王大蓬己酉取宋武休关庚戌元帅右都监承立奏获夏统军司文移有保境息民之语诏尚书省议之宰臣言镇戎灵平等镇近耗夏人数
犯疆场此文正缓我尔宜严备御以破奸计帝然其言又曰顷近侍还自陕西谓博索已

得凤州如得武休关将遂取蜀朕意殊不然假令得之
亦何可守此举盖为宋人渝盟初岂贪其土地邪朕重惜生灵惟和议早成为佳尔己未
行省安贞破宋梁县等军擒统制李申之完颜萨布约
赫德白石关平山砦之捷俱至三月丁卯陕西兵破宋虎头关取兴元洋州 【按续通鉴
纲目载金取武休关乘胜入兴元洋州复大举团枣
阳宋将率师攻唐邓以救之金史仅载取洋州后诸将各路攻克而未载完颜额尔克枣
阳之围附识于此】 庚午破宋人于七口仓甲戌高丽
先请朝贡因遣使抚谕之使还表言道路不通俟平定后议通款命行省姑示羈縻勿绝
其好戊寅完颜哈达破宋人于海林关擒统制张时鄂
屯沃哩布败宋人于上津县军还至濠州宋人来拒约赫德击走之完颜哈达败宋人于
马岭堡丙戌行省安贞破宋人于石堰山庚寅攻宋麻
城县拔之获其令张侗等辛卯行省安贞破宋兵于涂山壬辰萨布败宋兵于老口镇又
败宋人于石鹞崖甲午录用罪废官副元帅富察伊尔
必斯御史大夫永锡等诏太原等路州县阙正授官令民推其所爱为长从行省量与职
任及运解盐入陕西以济调度命胥鼎兼领其事闰月
丙申朔以雄霸以东付权中都经畧李奇噜易州以西付权中都西路经畧靖安民治之
壬寅叛贼王公喜构宋人取沂州丁未谕枢密院议晋
安东平河中诸郡备兵之策庚戌行省左副元帅布萨安贞至自军前入见于仁安殿辛
亥少府少监钮祜禄苏卜实言利害七事甲寅以南伐
师还罢南边州郡籍民为兵者戊午夏人破葭州之通秦砦刺史赫舍哩旺嘉努战没甲
子胥鼎等各迁官赏南伐之功夏四月丙寅朔裕宿等
州置元帅府选陕西步骑精锐六千人实京兆戊辰选精锐六万分屯平凉泾邠干耀等
州庚午以秦州防御使钮祜禄古尔锦行元帅府于平
凉罢募民运解盐筑京师里城帝虑扰民募人能运致甃五十万者迁一官百万升一等
命侯摯董役高琪总监之甲戌以知临洮府事实嘉喀
齐喀为元帅左都监行元帅府事于巩州壬午遣近侍四人巡视筑城丁夫时其饮食听
其更休督吏惨酷悉禁止之甲申诏河北州县官止令
土著推其所爱者充朝廷已授者别议任使乙酉夏人据通秦寨提控纳哈塔迈珠击败
之己丑林州都统霍成以疑贰诬杀降人论罪当死元
帅惟良不欲以杀敌人诛边将请宽其罚仍请立护送降民赏格以杜后患帝为之赦成
而命有司班赏格焉庚寅高汝砺请备防秋之粮宜及
年丰于河南州郡验直立式募民入粟帝与议定其法而行之辛卯夏人犯通秦砦元帅
完颜哈达出兵安塞堡以捣其巢至隆州夏人逆战官
军击之众溃进薄城陷其西南隅会日暮遂还壬辰以同知平阳府事胡天作充便宜招

抚使五月乙未朔凤翔元帅府遣兵败宋人于黄牛等堡六月遣谕元帅哈达曰以卿干局故有唐邓之委或有侵轶战退不宜远追第固吾圉

【按续通鉴纲目载兴定三年六月宋将孟宗政扈再兴合击完颜额尔克于枣阳时额尔克围枣阳八十余日至是大败宋于是籍勇壮为忠顺军俾出没唐邓间故哈达有唐邓之委金史缺载额尔克之败盖讳之也】以实嘉纽勒欢为元帅右都监行平凉元帅府事诏赴辽东行省诏御史中丞完颜伯嘉行枢密院于许州甲戌李全寇日照博兴赫舍哩万努败之寇即墨完颜僧寿又败之复莱州戊寅曲赦河东南北路丁亥命防御使图克坦福定等帅所部义军与沂州民尽徙于邳戊子辽州总领提控唐古果勒帅师复太原府诏右司谏郭着抚谕其军民秋七月丁酉籍邳海等州义军及胁从归国者人给地三十亩有力者五十亩仍蠲差税充军者日支粮二升号决胜军时里城久未毕功尚书欲增调民帝虑妨农并粮储不继谕枢臣言是役之兴实为大计今功已过半偶值霖潦成功差迟所议增丁夫势必验口不令妨业比及防秋当告成矣卿等善为计划无貽朕忧乙卯曲赦山东西路八月壬申帝敕台臣曰朕处分尚书事或至数日不奉行及再问则巧饰次第以对大臣容有遗忘左右司玩弛台臣当纠今后复尔并罪卿等元兵下武州军事判官郭秀死之中山治中王善杀权知府事李仲等以叛元兵下合河县县令乔天翼等死之乙酉命枢密遣官简岭外诸军之武健者养之彰德邢洺卫浚怀孟等城弱者罢遣戊子敕侯摯谕三司行部官劝民种麦无种粒者贷之九月诏单州经畧使完颜仲屯宿州与右都监赫舍哩德同行帅府事丙申唐州从宜瓜尔佳天成败宋人于桐柏丁酉尚书省请广营积贮帝曰征敛已多今更规画不过复取于民尔防秋稍缓当量减戍兵用度幸足何至是邪甲辰元兵徇东胜州节度使伯特乌格死之庚戌命行省胥鼎领兵赴河中壬子沿河造战舰付行院帅府冬十月乙丑用蒙古纲言招集义军各置都统副统等官如贞佑三年制丁卯以完颜开权元帅左都监郭文振权右都监并行元帅府事己卯元兵次单州诏诸路民避兵癸未里城工毕宴宰臣便殿迁右丞摯官一阶右丞相琪左丞相汝砺参知政事思忠赏赉有差丁亥元兵屯绵上壬辰命有司葺闲舍给薪米以济贫民十一月乙未以官驴借朝士之无马者己亥元兵徇彰德府户部令史苏唐催租封邱期限迫促民有生刈禾输租者帝闻之杖唐五十县令高希隆减二等尚书以希隆罚轻帝曰使臣至外路孰能不从其依前诏甲寅徐州总领纳哈塔禄格大破红袄贼于狄山丁巳右丞相高琪下狱戊午元兵下晋安府行元帅府事工

部尚书钮祜禄贞死之十二月诛高琪

四年春正月丁酉元兵下好义堡霍州刺史伊喇阿里哈等死之庚戌宋步骑十余万围邓州巳而夜焚营去招抚副使珠格伊埒图追及之夺其所俘而还癸丑户部侍郎张师鲁上书请遣骑兵数千及春淮蜀并进以挠宋三月乙巳林州元帅惟良擒叛人口仲李俊诛之降其党卢广己酉以李复亨参知政事珠嘉赛音行怀孟帅府事辛亥进高汝砺为尚书右丞相监修国史李复亨兼修国史壬子红袄贼于忙儿袭据海州完颜辰尔复之夏四月庚申朔诏完颜伯嘉提控防城事癸亥安武军节度使柴茂破红袄贼于枣强祁州经畧使段增顺破叛贼甄全于唐县夏人犯边元帅实嘉喀齐喀破之封经畧使王福等九人为郡公分河北山东地以隶之 【据续通鉴纲目补辑】 戊辰禘于太庙元遣赵瑞以兵攻孟州提控鲁德王安复大名府以巴古喇权尚书右丞左副元帅承立为右监军权参知政事同行尚书省元帅府于京兆庚辰东平帅府总领提控富察善尔破红袄贼于聊城五月癸巳红袄贼寇乐陵盐山横海节度使王福连击败之张聚来寇又败之甲午帝击鞠于临武殿癸卯元兵徇隩州丙辰徇兖州泰定军节度使完颜威赫死之六月戊辰山东民侨居者募壮士五百人益东营公燕宁军以京畿不雨敕有司阅狱释杂犯死罪以下丁丑元兵下大名又攻开州及东明长垣等县庚辰宋人方子忻来归诏善视之毋使逃归漏泄机事秋七月辛卯宋人及红袄贼犯河朔诸郡皆叛降之独沧州经畧使王福固守会益都贼张林来攻福乃叛降林帅府请讨之癸丑林州行元帅府遣总领严禄等讨红袄贼于彰德府生擒伪安抚使王九诏李复亨与完颜伯嘉循行郡县劝农以乌库哩仲端等使于元八月戊午朔山东招抚高居实遣人招严实于青崖砦获其款以闻李全犯东平府监军王庭玉败之擒其伪安化军节度使张林庚申高阳公张甫请增兵守冀州帝谕枢密颍州民渡淮为宋军者凡十村可追索主者惩一二以诫其余庚午夏人陷会州刺史乌库哩世显降甲戌陕西行省奏龛谷败夏人之捷乙亥帝谕宰臣河南水灾唐邓尤甚其被灾州县除其租余止责正供和余杂征并免停周岁桑皮故纸折输免流民佃荒田者租丙子陕西行省与夏人议和 【按金己与夏议和越月而夏复来攻可知动辄议和徒然示弱而不足以纾患诚如通鉴辑览 御批所谓忘己之先人所以制人者即用人之受制于己之下策而反以受制于人徒失可守之势也谨录识之】 戊寅定选补亲军法遣官于河南陕西选之己卯罢葭州招抚司壬午陕西路行省承裔奏定西州之捷丙戌徙随路诸军户于河南京东西南路

各设检察使副恒山公武仙叛降元九月戊戌元穆呼哩驻军真定置总领元帅府于归德以寿州陈留两镇兵属之壬寅宋人军皂郊堡行军提控完颜伊都击败之元遣达呼等来癸卯夏人遣使如宋趣进兵夹攻【按续通鉴纲目载兴定四年九月夏人围巩昌遣人如宋趣兵夹攻宋史亦载程信王仕信引兵与夏人会于巩州城大金国志亦载西夏引兵围巩昌趣宋师来会金史缺载兹补辑又据宋史载九月辛卯夏人引兵围巩州此云癸卯夏人来侵二书时日亦异】甲辰滕州招捕提控夏义勇讨红袄贼败之乙巳以参知政事李复亨提控刍粮事已酉夏人陷西甯州尚书省都事布萨讷木舍布坐诛驸马都尉图克坦寿春夺官一阶杖六十甲寅宋人出秦州会夏人侵定西州丙辰巩州行元帅府事实嘉喀齐喀败之冬十月壬戌元遣蒙古达呼额哩埒等来己卯陕西东路行省奏绥德州之捷红袄贼寇泗州庚辰帝击鞠于临武殿辛巳授红袄贼时青滕阳公本处兵马总领元帅兼宣抚癸未京西山寨各设守御使副令本路帅府总之谕陕西行省图复会州帝击鞠于临武殿十一月丁亥元兵入济南严实以魏博等郡降之元兵进屯黄陵堙【按元将穆呼哩以兴定四年九月屯军真定十一月以轻骑入济南乌库哩沙瑋等袭之于黄陵堙为所败进围东平金史止载屯真定围东平而未载其人济南屯黄陵堙似于下文黄陵堙经畧使乌库哩沙瑋以失律伏诛原委未晰兹据续通鉴纲目补辑】易水公靖安民为其下所杀戊子黄陵堙经畧使乌库哩沙瑋等以战阵失律伏诛戊戌诏复卫绍王王爵仍加开府仪同三司乙巳诏柴茂权真定元帅左都监盖仁贵摄右都监元穆呼哩围东平十二月甲戌祈雪礼部郎中权左司谏穆延呼喇勒上封事戊寅诏军官许月击鞠者三次以习武事庚辰腊享于太庙乙酉镇南军节度使温特赫思敬上书言钱币税赋二事五年春正月壬辰议御西夏及征南事谕皇太子以东平御敌方畧甲午谕枢密院南伐事更当详议其便诏撰卫王事迹如海陵庶人例丁酉元兵攻天井关戊戌宋人袭泗州西城提控王禄死之乙巳诏诸道兵集蔡州伐宋庚戌山东行省奏东平之捷二月丙辰朔置招抚司于单州曲赦东平府庚申下诏伐宋以内族惟弼权同签枢密院事行院于中京沃呼哈达权蔡息行元帅府右都监纳哈塔降福权宿州行院签枢密院事富珠哩达哈权唐邓行元帅府右都监完颜额琳副右副监戊辰罢怀州行元帅府复置招抚司与孟州经畧司并受中京行枢密院节制辛未布萨安贞以兵出息州破宋人于净居山寺拔黄土关癸酉以旱灾曲赦河南路丙子禁京城兵器元帅赫舍哩约赫德破宋兵复泗

州进逼濠州至涡口乏粮而还三月丙戌朔帝御仁安殿祈雨仍望祭于北郊庚寅宋人围唐邓完颜额琳力战却之前邓州千户富珠哩摩啰欢自拔归国额琳以便宜迁三官授同知唐州事乙未罢河南路行三司丙申进图克坦思忠尚书右丞兼修国史以布萨毅夫为参知政事帝以近侍局多不留心采访外事命宰臣照章宗时秩满以所采事定升降预为考核之法以激劝之己亥叛人窦赵儿招夏人入据来羗城富珠哩和卓攻拔之夏四月己未山东行省蒙古纲言东莒公燕盍战败而死所居天胜砦众无所归变在朝夕权署提控孙邦佐为招抚使洪果乌页为总领以抚其众敕有司议之丙寅布萨安贞破宋黄蘄等州壬申俘宋宗室男女七十余人献于京师五月甲申朔日有食之戊戌宋人据楚邱官军复之庚子纳喇吉逊伏诛壬寅陕西元帅完颜萨布遣使来献晋安平阳之捷御史乌库哩呼噜劾其纵将士卤掠帝以萨布有功诏勿问癸卯唐州守将额琳与宋人战败绩反以捷闻御史纳喇发其事帝不之罪癸丑东平内徙命蒙古纲行省于邳州王庭玉行帅府于黄陵堙六月甲寅朔尚书省奏驸马都尉安贞反状帝谓英王守纯曰国家诛一大臣必合天下后世公议其令覆按之乙丑遣使谕晋阳公郭文振上党公完颜开各守疆土同心济难毋以细故启衅端误国事戊寅安贞伏诛秋七月己亥义勇军叛据砀山县庚子诏增给徐州清口等处戍兵衣粮己酉砀山贼夜袭永城县行军副总领高琬败之命蒙古纲并力讨捕辛亥单州招抚刘琼乞移河南粮济其军绍给之八月壬子朔罢黄陵堙招抚司帝谕尚书省给砀山叛军家属粮毋伤其生又谕枢密曰河北艰食民欲南来者日益多速令渡之毋致殍死癸亥林怀帅府邀击红袄贼于伏恩村败之甲子诏南征溃军复归而能力战者依出界立功格赏之乙丑宋人掠沈邱杀县令甲戌命有司除逋户负租毋征见户九月甲申以京东岁饥多盗遣御史大夫赫舍哩呼实默为宣慰使往抚安之戊子增授隰州招抚使轩成官改授西省节制冬十月癸丑命布萨毅夫行尚书省于京东督诸军刍粮戊午遣亲军讨河南羣盗辛酉元兵攻绥德州夏人以兵附之【按是时元兵侵夏夏主宴之且遣其将嗒海干布将兵五万属焉元兵遂取葭州及绥德州盖夏人不惟约宋会攻且已属附于元矣金史失载兹据续通鉴纲目补辑】壬戌夏人侵龛谷丁卯夏人犯定西积石之境戊寅分京畿戍卒万二千河中民兵八千以许州元帅赫舍哩鹤寿将之屯潼关西十一月癸未陕西东路行省奏安塞堡败夏人之捷甲申谕太府减损食品庚寅募民兴南阳水田乙未夏人攻龛谷宋人攻蘄县红袄贼掠宿州辛丑诏蠲徐邳宿

泗等州逋租官民有能垦辟闲田除来年科征归德亳寿颖停阁逋户租外仍蠲三之一
逋户田庐有司募民承业禁其毁损以俟来复壬寅宋
人焚颍州执防御判官而去元兵攻延安元帅哈达迈珠及其将士击败之加赐赏赉仍
下诏奖谕十二月辛亥朔元兵下潼关京兆壬子罢辟
举县令法丁巳乌克逊仲端安庭珍使北还各迁一阶庚申罢河南义军丁卯诏罢新签
民军减枢密院掌兵官及京城戍兵仍谕行院帅府毋
擅增设补签辛未罢行总管府及招讨统军检察等司定宋人来归赏格及诈诱征防军
人逃亡罪法闰月辛巳朔元兵徇鄜州完颜禄锦赫舍
哩鹤寿富察罗索钮祜禄资禄皆死之乙酉提控珠嘉耀珠破沈邱贼于陈瓦丙戌颁诏
抚谕河南土寇己丑孙瑀及捕盗官乌肯彻招降泰和
县贼二千人诏斩其首恶余皆释之同知保静军节度使郭澍以征粮失期诬杀平民坐
诛辛卯官军复葭州癸巳通远军节度使富珠哩和卓
削官丙申红袄贼夜入蒙城县军民死者甚众己亥发兵捕京东盗并抚谕百姓壬寅发
上林署粟赈贫民陈亳等州鹿邑城父诸县盗并起趣
枢府遣兵讨之捕盗军所过残民遣御史按视己酉更造兴定宝泉每一贯当通宝四百
贯

元光元年春正月元帅惟弼破红袄贼于张騫店壬午遣官垦种京东西南三路水
田甲寅诏陕西西路行省徙京兆者兵退还治平凉防
州刺史巴延实喇以弃城伏诛郑州防御使费摩扬格同知防御使瓜尔佳实伦并除名
西面节度使巴古珠夺官一阶壬辰诏徙中京唐邓商
虢许陕等州屯军及诸军家属赴京兆同华就粮屯二月乙酉陕西西路行省请以厚赏
募河西诸蕃部族寺僧图复大通城命行省枢密院筹
之癸巳帝谕宰臣宋人攻平輿褒信我师力战却之事状已详若俟帅府上功然后推赏
岂急于劝奖之道其遣清望官赍空名宣敕核实给之
甲辰帝念鄜延被兵又延安受围尝发民粟给军诏除延安鄜坊丹葭绥德税租仍令有
司偿其粟值戊申恒州军变万户呼延械等肆杀掠焚
庐舍而去己酉遣额尔克行元帅府事节制三路军马伐宋时全行院事副之三月辛酉
宋人掠确山县之刘村戊辰枢密院委差官贾天安上
书言利害壬申御史劾图克坦思忠以病马输官冒取豪价有司以监主自盗论死帝顾
惜大体降授陈州防御使癸酉提控李师林败夏人于
永木岭郭文振表近得俘者言南北合兵将攻河南陕西诏枢密备御夏四月辛巳以额
尔克签枢密院事置大司农司设大司农卿少卿丞京
东西南三路置行司并兼采访事壬午元兵攻陵川县丁酉削林怀路行元帅府事惟良
官两阶罢之更定辟举县令之法而复行之戊戌籍丁

忧待阙追殿等官以备防秋丁未行枢密院奏淮南之捷五月戊申朔元兵屯隰吉翼等州壬戌额尔克时全与宋人战败绩甲子镌额尔克官
两阶责以后效丁卯召致政胥鼎等赴省议利害壬申时全伏诛六月戊寅朔造舟运陕西粮由大庆关渡抵湖城癸未大赦陈州防御使吕子
羽坐乏军兴自尽制诸监官及八品以下职事丁忧待阙任满遥授者试补侍卫亲军命各路司农司设捕盗方畧丁酉红袄贼掠柳子镇提控
张瑀追击夺所掠而还伪监军王二据黎阳县提控王泉讨之复其城秋七月丙辰上党公完颜开复泽州己未归德行枢密院王庭玉奏曹州
破红袄贼之捷庚申定监当官选法河北羣盗犯封邱开封界令枢密院御捕戊辰红袄贼袭徐州之十八里砦又袭古城桃园官军破之八月
丁丑定西征将士官赏有差甲申增定藏匿逃亡亲军罪及告捕赏格积石州蕃族叛附于夏巩州提控尼玛哈萨兰讨之获羊千口进尚膳诏
却之改元大赦帝谓宰臣曰赦书已颁时刻之间人命所系其令将命者速往计期而至以巴图鲁为参知政事癸巳河间公伊喇重嘉努高阳
公张甫复河间府夏人入德顺九月丙午朔谕陕西行省备边乙卯议经畧淮南己巳宋人掠遂平县之石砦店复侵南阳唐州提控瓜尔佳玖
珠败之冬十月丁丑夏人掠德顺之神林堡壬午宋张惠攻零子镇鄂尔多击败之河中府万户孙仲威执其安抚使阿布哈呼喇勒据城叛陕
西行省讨平之癸未复曹州 【按续通鉴纲目载宋涟水统辖石珪于兴定四年十二月降元元穆呼哩使治曹州金复曹州杀石珪而大金
国志载宋涟水忠义统辖石珪来归是珪始则弃宋投金继而背金降元又为元守曹州金人复之珪亦见杀金史于珪降及复曹州杀珪事俱
未载附识于此】 甲申帝猎于近郊诏免百官送迎且勿令治道以劳百姓庚寅徙彰德招抚使杜先军于卫州乙未元兵下临晋甲辰京兆官
民避兵南山者多至百万诏兼同知府事完颜霆等安抚其众十一月丁未元兵徇同州定国军节度使李复亨同知定国军节度使额尔克死
之甲寅京东总帅约赫德破宋兵于临淮戊辰元兵攻凤翔府十二月乙亥朔帝谓皇太子曰吾尝夜思天下事必索烛以记明而即行汝亦当
然以河中治中侯孝顺权元帅府右都监许便宜行事乙酉迁史咏龙虎卫上将军赐号守节忠臣权行平阳公府事丁亥迭州总管青伊克卒
特命其子角袭职诏谕近侍局官曰奉御奉职皆少年不知书朕忆曩时置说书人日为讲论自古君臣父子之教使知所以事上者其复置已
丑兰州提控唐古昉败夏人于质孤堡元兵攻凤翔

二年春正月乙巳元兵下河中府权元帅右都监侯孝顺复之壬子寿州防御使完

颜肅尔夺官四阶戊午李奇嚕以罪罢宰臣请羈以散
地帝曰此辈豪杰正须诚待若以术制适使自疑但不畀军政外补何害乃授恒州刺史
诏罢丁忧官入粟起复令丁卯元兵复陷河中府二月
壬午诏军官犯罪旧制更不任用今多故之秋人才难得除大罪外有武艺善掌兵者量
才复用丁亥大赦己亥凤翔围解实嘉喀齐喀完颜仲
元各升赏有差三月 【按大金国志载元光二年三月张琳所部邢德复叛归于宋而宋
史不载金史亦缺】 甲辰朔宋人袭汝阳癸丑以河
中府推官嘉勒斡权元帅右都监总领侯孝顺军甲寅帝谓宰臣曰人有才堪任事其心
不正者终不足贵丞相汝砺对曰其心不正而济之以
才所谓虎而翼者也虽古圣人亦未易知帝然之以户部尚书实嘉乌绅为参知政事兼
修国史壬戌诏以凤翔战功及颁赏等级徧谕诸郡甲
子以完颜伯嘉权参知政事行尚书省于河中府辛未诏职官犯罪非死罪除名遇赦幸
免有才干者中外并用夏四月癸酉朔复霍州汾西县
丙子设京兆南山安抚司丁丑凤翔万户完颜绰哈以死节赠怀远大将军己卯遣官阅
河南帅府见兵籍闲官豪右亲丁及辽东河北客户为
军庚子募西山猎户为军五月癸卯朔始造元光重宝及元光珍货同银行用丙午复河
中府及荣州遣人持檄招前恒山公武仙及东平严实
乙卯权平阳公史咏复霍州及洪洞县己未参知政事毅夫言胁从人号忠孝军在沿淮
者所为多不法请防闲之帝曰人心无常顾驭之何如
尔驭之有术远方犹且听命况此辈乎不然虽左右亦难防闲正在廓开大度而已若是
而不能致太平者命也庚申签河南路寄居官民充军
六月乙亥京东总帅奏淮南之捷戊子议遣人招李全严实张林甲午诏罢河中行省置
元帅府辛丑遥授静难军节度使延扎哈玛尔等以保
凤翔功进官秋七月壬寅朔夏人犯积石州羌界寺族多陷没惟臧博寺僧堪布扎巴萨
美及达那寺僧班珠尔等拒而不从诏赏诸僧钤辖正
将等官给以廩禄乙巳遣兵守卫解州盐池壬子除市易用银及银与宝泉私相易之禁
癸丑敕诸御史曰琐细事非人主所宜诘然凡涉奸弊
靡不有关国政者比闻朝官及承应人月给俸粮多杂糠土有司所收曷尝有是物哉至
于出纳斗斛亦小大不一此皆理所不容者而台官初
不问事事须朕言之安用汝曹也丁巳扬布族之古渠们等叛归夏元帅瓜尔佳瑞发兵
讨之以捷闻御史中丞师安石言制敌二事乙丑诏籍
陕西路侨居官民为军八月辛未朔邳州从宜经畧使纳哈塔禄格等杀行尚书省蒙古
纲据州以叛壬申诏赏京兆路官军保全南山诸谷之
官甲戌遣官招谕纳哈塔禄格以拒命诏约赫德合行院兵讨之乙酉诏能捕获反贼禄

格者除见定官外仍与世袭穆昆丙戌遣官分行蔡息
陈毫唐邓裕诸州与诸县官同议凡民丁相聚立砦避兵与各巡检军相依五千户以上
置砦长一员百户增副一员能安民弭盗劝农者论功
注授九月庚子朔日有食之宋人入寿州钮祐禄博诺力战却之壬寅枢密院奏提控珠
嘉算绰和破宋人之功甲辰宋人攻南阳丙午约赫德
奏桃园淮阳之捷并以纳哈塔禄格南结李全之状来告戊申来降人孙邦佐自李全军
中归遥授知东平府兼山东西路兵马都总管官军与
宋人力战于胡陂却之提控珠格绰尔死于阵癸丑纳哈塔禄格所署伪都统乌库哩赛
罕瓜尔佳瑠珠等来归己未赠珠格绰尔银青光禄大
夫丙寅扎木雅呼噜等拔邳州南城丁卯权御史中丞师安石等劾英王守纯不实付有
司鞫治寻诏免其罪仍责谕之冬十月乙亥制行枢密
院及元帅府农隙之月分番巡徼校猎月不过三次丁丑帝猎于近郊己卯禘于太庙辛
卯诏石■〈王豪〉店沔池永甯县各屯兵千人壬辰
滕州人时明谋反伏诛戊戌唐邓行元帅奏淮南之捷十一月己亥红袄贼伪监军徐福
等来降诏进约赫德官一阶辛丑总帅约赫德奏邳州
之捷函禄格首以献丙午邳州红袄贼三千来降初拟置诸陈许之间帝以为若辈家属
尚在河朔余党必杀之所得者寡而被害者众不若加
以官赏而遣之还果忠于我虽处河朔必不负我且余众感恩将有效顺者戊午以上党
公完颜开之请谕开及郭文振史咏王遇张道卢芝等
各与所邻帅府相视可耕土田及濒河北岸之地分界而种之以给军饷以空名宣命金
银符给完颜开赏功辛酉巩州行元帅府奏会州破夏
人之捷十二月己巳朔徙沿淮巡检边军于内地辛巳诏延安土人充司县官义军使者
选人代之量免其民差税邳州民丁死战阵者各赠官
一阶归德徐邳宿泗永亳颍寿等州复业及新地民免差税二年见户一年尝供给邳州
者复免一年之半睢州陈留杞县免三之一丁亥帝不
豫庚寅崩于宣德殿年六十一谥曰继天兴统述道勤仁英武圣孝皇帝庙号宣宗陵曰
德陵

宣宗贞佑四年兴定五年元光二年凡十一年

钦定续通志卷五十五

●钦定续通志卷五十六 金纪十

金纪 【十】

哀宗 【十】

○哀宗十

哀宗皇帝讳守绪初讳守礼又讳宣嘉苏宣宗第三子也母曰明惠皇后王氏始封

遂王授秘书监改枢密使贞佑四年正月己卯立为皇太子仍控制枢密院事赐今名元光二年十二月庚寅宣宗疾已大渐直暮夜近臣皆出惟前朝贞明夫人郑氏在侧宣宗知其年老可托谓之曰吾病已至此速召皇太子来主后事言绝而崩夫人秘之已而皇后及贵妃庞氏继至庞氏阴狡多智常以其子守纯年长不得立心鞅鞅夫人恐其为变即给之曰帝方更衣后妃可少休他室也后与妃遂入他室夫人伺其入遽钥之急召大臣传遗诏皇太子即皇帝位于枢前壬辰大赦诏以朕述先帝遗意有便于时欲行而未及者悉奉而行之有司有以情破法使人罔遭刑宪者以故入人罪罪之草泽士庶许直言军国利害

正大元年春正月戊戌朔改元庚子百官始奏事秘书监富察和卓改恒州刺史左司员外郎尼玛哈华山同知栎州军州事邠州节度使伊喇玛纳布贡白兔诏曰得贤臣辅佐年谷丰登此上瑞也焉事此为令有司给道里费纵之丁巳诏朝臣议修复河中府廷臣言陕西民方疲敝未堪力役遂止戊午帝始视朝以李蹊为太常卿权参知政事荆王守纯罢判睦亲府布萨乌锦罢充大行山陵使尊皇后温都氏元妃温都氏皆为皇太后以持嘉喀齐喀权枢密副使有男子服麻衣望承天门且笑且哭诘之曰吾笑将相无人吾哭金国将亡羣臣请寘诸重典帝曰近诏草泽诸人直言虽涉讥讪不坐惟君门非笑哭之所杖而遣之三月癸丑葬宣宗皇帝于德陵甲寅起复致仕张行信为尚书左丞以延安帅臣完颜哈达战御有功授金虎符权参知政事行尚书省事于京兆兼统河东两路夏四月癸酉以宣宗祔庙大赦中外五月癸卯以完颜萨布为平章政事实嘉乌绅为尚书右丞李蹊为翰林承旨仍权参政甲辰赐策论经义词赋诸科进士及第诏刑部登闻检鼓院毋锁闭防护听有冤者陈诉六月辛卯立妃图克埋氏为皇后遣李唐英至宋议和【按伊喇布哈之遣止以谕宋界军民而非以通好朝廷也是时金不南伐宋即北侵考续通鉴纲目载哀宗先遣李唐英至宋议和金史失载兹据补辑】又遣伊喇布哈率兵至光州榜谕宋界军民更不南伐秋七月己亥诏谕百官各勤乃职九月伊喇布哈复泽潞冬十月戊午夏国遣使来修好十二月乙巳恒州刺史富察和卓有罪伏诛改定辟举县令法课以六事京东西南陕西设大司农司兼采访公事京师大司农总之右丞张行信言先帝诏国内刑不上大夫治以廉耻高琪所定职官犯罪决百余条乞改依旧制帝不欲彰先帝之过畧施行之

二年夏四月辛卯朔恒山公武仙自真定府来奔起复致仕胥鼎为平章政事行省

事于卫州进封英国公甲午以京畿旱遣使虑囚五月
丁丑以旱甚责已避正殿减膳赦罪苏椿自大名来奔诏置之许州秋七月都水富察摩
和纳以杀人免死除名八月巩州元帅田瑞反行省军
围之其母弟实格杀瑞出降赦其罪以为涇州节度使世袭明安冬十月以夏国修好诏
中外新军政改总领为都尉乙亥谕近臣曰宋人轻犯
边界我以轻骑袭之冀其惩创复通好以息民尔夏人从来臣属我朝今称弟以和我尚
不以为辱宋果行成尚欲用兵乎卿等宜悉朕意伊喇
布哈及宋人战于光州获马数千杀人千余而还内族王嘉努故杀鲜于主簿权贵多救
之者帝曰英王朕兄敢妄挞一人乎朕为人主敢以无
罪害一人乎族子恃势杀主簿吾民何赖特命斩之诏有司为死节士十有三人立褒忠
庙禁宿泗清口巡边官兵毋复擅杀过淮军民诏赵秉
文杨云翼作龟镜万年录

三年春三月诏尚书省议省减用度夏四月辛卯亲享于太庙邲国夫人车经御路
过庙前驭者乘马二婢坐车中俱不下诏系狱杖之辛
丑以旱遣官祷于济渎己酉遣使虑囚五月己未宋兵掠寿州境癸亥永州桃园军失利
死者四百人壬申诏谕夔州赵甫等能以土地来归当
任使之六月壬子诏谕高丽及辽东行省格栅额讨反贼万嘉努赦胁从者秋八月伊喇
布哈复曲沃及晋安辛卯诏设益政院于内廷以杨云
翼等为益政院说书官日二人入直备顾问冬十一月庚申议与宋修好戊辰又议之己
巳宋忠义军夏全自楚州来归楚州王义深张惠范成
进以城降俱封为郡王辛未改楚州为平淮府赦诸路从宋及淮楚官吏军民并其家属
丙子夏以兵事方殷来报各停使聘元兵征西夏平中
兴府召陕西行省及总帅完颜额尔克赫舍哩约赫德赴汴议兵事诏谕陕西两省凡戎
事三品以下官听以功过赏罚之

四年春正月壬戌增筑中京城浚汴城外濠二月布哈约赫德复平阳执知府李齐
锦获马八千三月以银赎平阳掳获男女分赐官军者
听自便元兵取德顺府节度使爱绅摄府判马肩龙死之元兵复陷平阳己巳征夏税二
倍夏五月丁丑元遣使来责岁币 【据续通鉴纲目
增辑】 元兵陷临洮府总管图们呼图克们死之陕西行省进三策上策自将出战中策
幸陕州下策弃秦保潼关不从六月戊申朔遣前御史
大夫完颜哈昭为元议和使元灭西夏以其主睨归 【按大金国志载兴定五年元军自
回鹘往攻西夏西夏国亡考西夏之亡在宋宝庆三
年乃金正大大四年也宋史宝庆三年虽未载夏国之亡而嘉定十四年犹载有夏人复以
书来趣会兵是时即金兴定五年也则其未亡可知盖

是年元曾伐西夏西夏以兵五万附元侵金大金国志即误以为西夏亡耳兹据续通鉴纲目所载夏亡年月补录】 秋七月元兵自凤翔徇京兆关中大震以师安石为尚书右丞壬辰以中丞乌克逊布什祭酒费摩阿固岱兼司农卿签民军劝率富民入保城聚兼督秋税令百姓知避迁之计丁酉赦陕西东西两路仍赐今年租八月庚戌诏有司罢遣防备丁壮修城民夫军须差发应不急者权停己巳李全自益都复入楚州据之遣总帅完颜额尔克元帅庆善努守盱眙与全战于龟山败绩降庆善努为定国军节度使冬十月辛酉诏赠德顺府死事爱绅马肩龙等官以淮南王爵招李全不受 【按李全为宋将在金正大二年作乱焚楚州走据青州正大三年元兵围全于青州被围一年乃降元行省事于山东淮南至是得报其家属被害于金乃以兵南还据楚州与完目附识于此】 十一月丁酉猎于近郊十二月授李蹊参知政事元兵下商州壬子遣使安抚陕西以牛千头赐贫民

五年春正月丁丑亲祭三庙庚辰遣知开封府事完颜莽伊苏如元吊慰丙戌议击盱眙二月癸丑诏有司以临洮总管图们呼图克们塑像入褒忠庙录死节者子孙姓名量材官之三月乙酉监察御史乌库哩布鲁劾近侍张文寿张仁寿李麟之受馈遗曲赦其罪而出之夏四月甲辰朔以御史言三奸不已凡四日不视朝辛亥议放还西夏人口六月壬戌以旱赦杂犯死罪以下秋七月戊子同判睦亲府事萨哈连出为中京留守行枢密院事八月甲子以博索为尚书右丞延扎舒噜权参知政事增筑归德府城行枢密院拟工役数百万诏遣权枢密院判官白华喻以农夫劳苦减其工三之二以节制不一并卫州帅府于恒山公府命白华往经画之九月庚寅雨足始种麦冬十二月庚子朔日有食之完颜莽伊苏以奉使不职免死除名壬子以陕西大寒赐军士柴炭银有差京兆凤翔府司竹监进材令分给之

六年春二月丙辰以伊喇布哈权枢密副使耀州刺史李兴有战功诏加赏赉以完颜萨布行尚书省事于关中召完颜哈达还朝伊喇布哈率完颜陈和尚忠孝军一千骑驻邠州遣白华驰谕布哈以用兵之意诏都尉司步卒及忠孝马军屯京西以白华专备军须三月乙亥忠孝军总领陈和尚大败元兵于大昌原 【据续通鉴纲目作五年三月事】 授定远大将军平凉府判官世袭穆昆夏五月陇州防御使舒穆噜栋尔进黄鸚鵡诏却之秋七月罢陕西行省军中浮费八月伊喇布哈再复泽潞冬十月伊喇布哈东还令陈和尚率陕西归顺马军屯钧许元兵驻庆阳界诏陕西行省遣使如元军议和十一月遣使选试陕西归顺人得军二千以

艺优者充忠孝军次充和尔和军十二月诏布哈赫舍

哩约赫德完颜额尔克救庆阳

七年春正月庆阳围解命额尔克屯邠州布哈约赫德还京兆夏五月诏清口所获宋军三千人愿留者屯许州欲还者纵遣之秋七月以哈达权枢密副使元军入陕西京兆同华之间破南山砦栅六十余所【按七月元军入陕西金史未载仅载八月赐陕西死事之孤一条于

事原委未晰兹从弘简录补辑】八月赐陕西死事之孤盐引及绢仍量材任使元兵围武仙于旧卫州冬十月哈达布哈引兵救之围解帝登

承天门犒军哈达布哈并世袭穆昆布哈权参知政事同哈达行省事于阆乡以备潼关

八年春正月元兵围凤翔遣白华瓜尔佳巴喇玛谕阆乡行省进兵哈达布哈以未见机会不行复遣白华谕之使将兵出关以解凤翔之

围又不行夏四月丁巳朔赦免京西路军须钱一年旱灾州县差税从实减贷元兵陷凤翔府两行省弃京兆迁居民于河南留庆善努守之陈

和尚败元将苏布特于倒回谷【按元兵内侵诸将畏缩陈和尚屡挫其锋亦足以少张军威金史失载兹据续通鉴纲目补辑】五月李全

妻杨妙真以全陷没于宋构浮梁于楚州之北欲以病宋帝以距河南不远遣哈达布哈屯桃源界激河口以备侵轶因约宋将赵范赵葵为夹

攻之计【从弘简录增辑】宋八里庄人拒其主将纳哈达布哈诏改八里庄为镇淮府秋七月宋将焚浮梁九月丙申慈圣宫皇太后温都

氏崩元兵驻河中府庆善努弃京兆东还召哈达布哈赴汴议引兵趋河中府惧不敢行还陕州出师至泠水谷而归元兵攻河中府哈达布哈

遣元帅王敢率兵万人救之冬十一月丁未元兵由峽峯关趋金州枢密院议以逸待劳未可与战帝曰自南渡以来二十年矣所在之民破田

宅鬻妻子以养军今敌至不能逆战止以自护京城纵存何以为国朕思之熟矣存与亡自有天命惟不负吾民可也乃诏诸将屯军襄邓十二

月己未葬明惠皇后元兵陷河中府权签枢密院事草火额尔克死之元帅板子额尔克提败卒三千走阆乡诏哈达布哈率诸军守邓州杨沃

衍陈和尚武仙引兵屯顺阳戊辰元兵渡汉江而北丙子毕渡哈达布哈将兵御于禹山之前元兵分道趋汴京京师戒严是夜二鼓哈达布哈

引兵还邓州元兵蹶其后尽获其辎重

天兴元年【是年本正大九年正月改元开兴四月又改元天兴】春正月元兵出唐州元帅完颜两罗索与战于襄城败绩走归汴京

遣完颜莽伊苏等部民丁万人决河水卫京城癸未置尚书省枢密院于宫中以便召问起前元帅瓜尔佳实伦权昌武军节度使行元帅府事

哈达布哈引军自邓州赴汴京乙酉以检点瓜尔佳萨哈为总帅将步骑三万巡河渡权近侍局使图克坦长乐监其军起近京诸邑军家属五十万口入京丙戌元兵既定河中由河清县之白坡渡河丁亥长乐萨哈至封邱而还戊子锡默爱实上书请斩长乐萨哈以肃军政不从都尉乌凌阿呼图自潼关入援至偃师闻元兵渡河遂走登封少室山壬辰卫州节度使完颜萨尼雅布弃城走归汴京甲午修京城楼橹及守御备元兵薄郑州与白坡兵合元帅马伯坚以城叛降于元防御使乌凌阿耀珠死之乙未游骑至汴城丁酉元兵及两省军战于钧州之三峰山两省军大溃哈达陈和尚杨沃衍走钧州城破皆死之枢密副使布哈就执寻亦死武仙走密县己亥徐州行省完颜庆善努引兵入援义胜军校侯进等降于元辛丑潼关守将李平以关叛降于元壬寅扶沟民钱大亨李钧叛杀县令王浩及其簿尉庚戌许州军叛杀元帅瓜尔佳实伦钮祐录仕周苏椿等以城降元二月壬子朔庆善努谋走归德遇元兵完颜乌登力战而死庆善努被擒与睢州刺史张文寿皆死之甲寅元兵徇临涣掇县令张若愚死之戊午元兵次卢氏关陕行省总帅两军及秦蓝帅府军弃潼关而东与之遇未战而溃行省图克坦乌登总帅纳哈塔和硕败死完颜重喜降于元都尉郑倜杀都尉苗英以降秦蓝总帅府经历商衡死之元兵陷睢州翰林待制冯延登使北来归乙丑元兵攻归德庚午起复右丞相致仕萨布为左丞相括京师军民二十万分隶诸帅三月丁亥元兵围中京留守萨哈连投水死【按续通鉴纲目载元兵围洛阳萨哈连以病投水死城中人共推强伸为府僉事悉力备御元益兵力攻凡三月不拔乃退金史于此未载强伸守城事今为附识】甲午命平章政事博索宿上清宫枢密副使哈齐哈宿大佛寺以备缓急元遣使来谕降庚子封荆王子额尔克为曹王议以为质密国公璠以曹王幼请代行不听壬寅以尚书左丞李蹊送曹王出质谏议大夫费摩阿固岱太府监国世荣为讲和使户部侍郎杨慥权参知政事分军防守四城置局养无家俘民元兵攻汴城帝出承天门抚西面将士癸卯帝复出抚东面将士亲傅战伤者药仍赐卮酒出内府金帛器皿以赏战士乙巳凤翔府炮军万户王阿噜樊乔来归夏四月丁巳遣户部侍郎杨仁奉金帛诣元兵议和戊午元人许和癸亥复葬明惠皇后甲子御端门肆赦改元天兴诏内外官民能完复州郡者功赏有差出金帛酒炙犒饫军士减御膳罢冗员放宫女释镐厉王卫绍王二族禁錮乙丑百官初起居于隆德殿前丙寅以尚书省兼枢密院事丁卯放宫女听以衣装自随金珠留犒士卒汴京解严步军始出采薪蔬己巳建威都尉完颜

鄂伦同元使摩多入城庚午见元使者于隆德殿辛未开郑门听百姓男子出入迁民告出城者日以万数甲戌御承天门大飨将士五月乙酉以内族思烈行尚书省于邓州召援兵丙戌拜天子大庆殿诏博索致仕放京城四面军李辛不奉诏戊子裕州镇防军将领贺德希率西军二千人入援癸巳杨春入据亳州观察判官刘均死之辛丑帝御香合面责宰相乙丑将相受保城爵赏六月庚戌诏百官举大将众举刘益不用癸丑以出师锢门禁飞虎军二百人夺封邱门出奔【按是时惟锢门禁故飞虎军夺门出奔金史载癸丑飞虎军夺门出奔甲寅锢门禁于事理未合兹从弘简录改辑】乙卯博索开渠于私第丙辰阅官马择瘠者杀以食丁巳丰绅据徐州图克坦伊都走宿州庚申塞京城四门以便守御壬戌国用安入徐州推丰绅为元帅己巳诏赠完颜陈和尚镇南军节度使立褒忠庙碑辛未复修汴城时有以疫事擅厚利者命倍征之以助其用甲戌宿州镇防千户高拉格李宣杀节度使赫舍哩阿古父子请行省图克坦伊都主帅事伊都不从率将吏西走遇元军死之乙亥左丞李蹊送曹王与其子全俱还丁丑恒山公武仙杀士人李汾秋七月辛巳军士挝登闻鼓乞以刘益为将癸未延扎舒噜罢以完颜纳绅为参知政事甲申飞虎军士申福蔡元擅杀北使唐庆等三十余人于馆诏贯其罪和议遂绝乙酉都人扬言欲杀博索密诏遣卫士护其家丙戌军士毁博索别墅丁亥拜天于承天门下出内府及两宫物赐军士戊子下令招军辛卯签民为兵巩昌民百二十人赴援国安用降诏封为兖王行京东等路尚书省事赐姓完颜改名用安新军有挝登闻鼓者杖杀之丙午完颜思烈武仙巩昌总帅完颜呼沙呼率诸将自汝州入援以喀齐喀为枢密使将兵一万应之命左丞李蹊劝谕出师乃行八月己酉朔喀齐喀屯杏花营又益兵五千人进屯中牟故城庚戌发丁壮五千人运粮饷喀齐喀军辛亥完颜思烈遇元兵于京水师溃武仙退保留山思烈走御寨左监军任守贞死之喀齐喀弃辎重奔至郑门聚兵乃入甲寅免为庶人籍其家以赐军士降监军长乐为符宝郎戊午括民间粟己未籍图克坦乌登完颜重喜纳哈塔和硕家赀前仪封令魏璠上言巩昌帅完颜仲德沉毅有远谋臣请奉命往召不报戊辰起复侯摯为平章政事行京都路尚书省事己巳摯率兵行至封邱将士将溃摯止之乃与众还汴丙子诏罢括粟丁丑京城民杨兴刘仲温以入赀授官九月戊寅朔诏减亲卫军己丑军士杀郑门守者以出庚辰起张开及王义深范成为元帅完颜哈昭权参知政事乙未召民卖放下年军须钱上户田租如之闰月戊申朔遣使以玉鱼带弓矢赐兖王用安其父母妻

皆赠封之又以世袭宣命十郡王宣命十玉兔鹖带十付用安其同盟可赐者即赐之辛亥遣张开乌实忻刘益高显率步军护陈留通许粮道罢贫民进献粮戊午招乡导己未有箭射入宫中书奸臣姓名明日再得之辛酉再括京城粟以御史大夫哈昭点检图克坦伯嘉等主之丙寅括粟使者完颜玖珠以粟有蓬稗杖杀孝妇于省门冬十月以前司农卿李焕飞语诏系左丞李蹊户部侍郎杨慥于狱以军储失计坐罪并除名焕遂权户部尚书寻赦残欠粮其应以粮事系者皆释之诏征诸道军期以十二月一日入援以汪世显为巩昌便宜总帅【据续通鉴纲目补辑】十一月丁未朔赐贫民粥己酉卫州军校白昼取丰备仓米壬子京城人相食癸丑诏曹门宋门放士民出就食壬戌诏将相入议事兖王用安率兵至徐州元帅王德全闭城不纳会刘安国与宿帅重僧努引兵入援至临涣用安使人劫杀之攻徐州久不下退保涟水制使因世英以用安不赴援还至宿州遇元兵死之丙寅兴宝军节度使赵伟袭据陕州杀行省阿布哈努色尔等诬以叛帝知其冤不能直授伟元帅左监军兼西安军节度使行总帅府事伟寻叛降于元十二月丙子以事势危急诏议亲出乙酉除扈从及留守京城官以萨布博索恩楚李蹊图克坦拜扎等率诸军扈从参知政事兼枢密院使完颜纳绅枢密副使兼知开封府萨尼雅布里城四面都总领完颜珠赫外城东面元帅博斯呼南面元帅珠嘉耀珠西面元帅崔立北面元帅富珠哩迈努等留守擢魏璠为翰林修撰如邓州招武仙入援丁亥帝御端门发府库及两府器皿宫人衣服赐将士戊戌官努阿里哈谋立荆王不果置不问庚子帝发南京与太后皇后诸妃别大恸行次公主苑太后遣中官持米肉徧犒军士辛丑至开阳门外麾百官使退诏谕戍兵曰社稷宗庙在此汝等壮士也毋以不豫进发之数便谓无功若保守无虞将来功赏岂在战士下众皆洒泣会巩昌元帅完颜呼沙呼至自金昌为帝言京西三百里之间无井灶不可往乃决议东行以呼沙呼为尚书右丞遂次陈留壬寅次杞县癸卯次黄城丞相完颜萨布之子安春有罪伏诛甲辰次黄陵垆乙巳诸将请幸河朔从之

二年春正月丙午朔济河北风大作后军不克济元兵追击南岸元帅完颜珠尔贺德喜赫舍哩额琳等俱死之建威都尉完颜额埒春叛降于元己酉帝哭祭战死士于河北岸皆赠官斩额埒春二弟以徇赦河朔招集兵粮议取卫州元帅富察官努将忠孝军千人东面元帅高显果毅都尉钮祜禄耀珠领军万人为前锋至蒲城庚戌帝次沔麻冈平章政事博索元帅哈萨喇乌达布继至辛亥博索攻卫州不克乙卯闻元

兵渡河而北至卫州之西南遂退师丁巳战于白公庙博索败绩弃军东遁元帅刘益上党公张开走死戊午帝进次蒲城复还魏楼村李辛自汴京出奔伏诛己未帝以博索败弃六军与副元帅和尔和六七人夜渡河走归德庚申诸军知帝已弃军出走遂大溃辛酉司农大卿富察世达元帅完颜呼图自归德西门奉迎帝入于归德遣奉御珠嘉塔克实布后弟图克坦肆喜往汴京奉迎两宫博索还自蒲城聚兵于大桥不敢入壬戌召之至亲数其罪下狱籍其家财以赐将士人予金一两博索及其子呼图哩皆死狱中以右丞完颜呼沙呼行省事于徐州官努再请率兵北渡纽勒欢不可遣归德知府行户部尚书富察世达都转运使张俊民如陈蔡取粮以元帅李琦王璧护之戊辰京城西面元帅崔立与其党韩铎药安国等作乱杀完颜纳绅完颜萨尼雅布勒兵入见太后乃遣韩铎以太后命召卫王子从恪封为梁王监国立自称左丞相都元帅增羣臣爵位有差凡除拜皆以监国为辞开封判官李禹翼弃官去户部主事郑着召不起右副点检温都阿里左右司员外郎聂天骥御史大夫费摩阿固岱谏议大夫左右司郎中乌克逊纳绅左副点检完颜阿萨尔奉御莽格讲议富察琦并死之立遂送款于元军癸酉元将苏布特进兵汴京甲戌立阅随驾官属军民子女于省署禁民间嫁娶括京城财是时两宫值变不果行塔克实布以其父耀珠肆喜以其妻夺门而出至归德帝惊问两宫何如二人奏京城军变不得出帝曰汝妻汝父独得出耶怒斩之乙亥遣提点近侍局事伊喇窳古如徐州相地形察仓库虚实白华如邓州召兵二月丙子朔鱼山总领张巘杀元帅完颜呼图巘寻为从宜严禄所诛括归德城中粮留元帅官努忠孝军四百五十人都尉马用军二百八十余人余尽赴宿徐陈三州就粮三月乙丑知归德府权参知政事实嘉钮勒欢乞尽散卫兵出城就食官努私与国用安谋邀帝幸海州不从蔡帅乌库哩镐以粮四百余斛至归德表请临幸帝从之遣学士乌库哩布什谕蔡州人戊辰官努以忠孝军作乱攻杀马用及尚书左丞李蹊权参知政事实嘉钮勒欢点检图克坦长乐及从官三百余人帝赦官努暴钮勒欢罪状以官努为枢密副使辛未授官努参知政事兼左都元帅官努徙帝居照碧堂禁诸臣毋入奏对帝叹曰自来姑息之仁适足以误事且恨朕不知用人致为此辈所困耳遂与内局令宋珪等谋诛之夏四月壬午徐州行省完颜呼沙呼执王德全并其子诛之及其党王琳杨瓚锡默延寿召经历商瑀用之鱼山从宜严禄叛归涟水庚寅陈州都尉李顺尔杀行省钮祜禄纳绅及招抚使刘天起送款于崔立张俊民李琦奔汴京王璧还归德癸巳崔立以梁王从

恪荆王守纯及诸宗室男女五百余人至青城皆及于难甲辰邓州节度使伊喇瑗以城叛既而亡入于宋六月己卯官努及其党阿里哈博济皆伏诛帝御双门赦忠孝军以安反侧以范陈僧王善尔为元帅统领之遂决策迁蔡诏蔡息陈颖各以兵来迓中京留守乌凌阿呼图弃城奔蔡壬午中京陷留守强伸死之戊子召徐州行省完颜呼沙呼赴行在所以穆延乌登代
行省事郭恩为总帅兼节度使辛卯帝发归德留元帅王璧守之壬辰次亳州避雨双沟寺中见艾蒿满目无一人迹喟然叹曰生灵尽矣癸巳命亳州节度使王进同知节度使王宾征民丁运铁甲糗粮留权参政张天纲董之临淄郡王王义深据灵璧望口寨以叛遣近侍直长钮祜禄温绰将徐宿兵讨之义深败走入宋丙申亳州的防军崔富格杀守臣王宾等张天纲以便宜授富格节度使罢运铁甲糗粮州人乃安己亥帝入蔡州百姓迎者千人拜伏道左帝令近侍谕以朕实自惭令汝等无忘祖宗之德众皆泣下【按哀宗避雨双沟寺及入蔡时其爱民之意虽势极仓猝而举念念不忘金史俱失载兹从弘简录补入】召武仙会兵入援徐州行省穆延乌登赴蔡州起复致仕萨布代行省事秋七月癸卯朔曲赦蔡州管内杂犯死罪以下弛门禁通众货蔡人便之乙巳以乌库哩镐为御史大夫总帅如故张天纲为御史中丞仍权参政完颜药师为镇南军节度使兼蔡州管内观察使戊申乌库哩布什兼息州刺史权元帅右都监行帅府事罗索签枢密院事己酉选室女备宫中使令已得数人以右丞呼沙呼谏留识文义者一人余听自便乙卯遣魏璠征武仙兵丁巳护卫布什舒噜负祖宗御容至自汴敕有司奉安于干元寺前御史大夫富察世达东面元帅博斯呼自汴来归辛酉武仙劫将士谋取宋金州行至浙水众溃行六部尚书卢芝侍郎石玠奔归蔡州仙追杀玠芝遁去丁卯定进马迁赏格西山帅臣范真姬汝作等各以马进凡得千余匹以穆延乌登领之遣使分诣诸道选兵会于蔡得精锐万人军威稍振己巳以富察世达为吏部侍郎权行六部尚书八月癸酉朔以秦州元帅钮祜禄乌展权参知政事行省事于陕西谕以蜡书期九月中征兵会于饶风关欲出宋不意以取兴元甲戌元王楸使宋还宋以军护之帝闻之惧丁丑帝阅兵于见山亭乙酉元召宋兵攻唐州元帅右监军乌库哩黑汉死于战主帅富察某为部兵所食城破宋人求食人者尽戮之宋人驻兵息州南丙戌诏权参政穆延乌登签枢密院事罗索行省院于息州丁亥乌库哩镐权参知政事乌凌阿呼图为殿前都点检庚寅初设四隅机察官壬辰息州行省穆延乌登袭宋人于中渡店斩获甚众乙未万年节州郡以表来贺二十余所九月

癸卯朔命蔡州都军内族阿鲁岱使宋借粮帝谕之曰宋人负朕深矣朕自即位以来戒饬边将毋犯南界边臣有请征讨者未尝不切责之向得宋一州随即付与近淮阴来归彼多以金币为赎朕若受财是货之也付之全城秋毫不计清口临阵生获数千人悉以资粮遣之今乘我疲敝据我寿州诱我邓州又攻我唐州彼为谋亦浅矣元灭国四十以及西夏夏亡及于我我亡必及于宋唇亡齿寒自然之理若与我连和所以为我亦为彼也卿其以此晓之至宋宋不许时诸帅多拥兵自固戊申鲁山元帅元志冒险数百里率兵入援升为总帅庚戌以重九拜天于节度使厅羣臣陪从成礼帝谕之曰国家自开创涵养汝等百有余年汝等或以先世立功或以劳効起身被坚执锐积有年矣今当厄运与朕同患可谓忠矣比闻元兵将至正汝等立功报国之秋纵死王事不失为忠孝之鬼往者汝等立功常虑不为朝廷所知今日临敌朕亲见之矣汝等勉之因赐卮酒酒未竟迁骑驰奏元兵数百突至城下将士踊跃请战是日分军防守以总帅富珠哩罗索守东面内族承麟副之乌库哩镐守南面元志副之乌凌阿呼图守西面忠孝军元帅蔡巴尔副之权殿前右副点检王善尔守北面元帅赫舍哩柏寿副之殿前右卫将军钮祜禄温绰守东南元帅左都监瓜尔佳当格副之殿前右卫将军内族色埒默守子城都尉王爱实副之辛亥元兵筑长垒围蔡城己未括蔡城粟冬十月戊寅更造天兴宝辛巳纵饥民老稚羸疾者出城癸未徐州守臣郭思叛行省萨布死之甲申给饥民船听采城壕菱芡水草以食戊子征诸道兵辛卯帝阅射于子城中者赏赉有差丙申殿前左副都点检温都察逊战歿戊戌赐义军战歿被创者麦十一月辛丑朔以右副都点检珠勒根伊实拉为宣差镇抚都弹压别设弹压四员副之四隅机察亦隶焉宋遣将江海孟珙率兵万人运粮三十万石助元攻蔡十二月甲戌尽籍民丁防守括妇人壮健者假男子衣冠运大石帝亲出抚军丁丑元兵决练江宋兵决柴潭入汝水己卯元兵破外城宿州副总帅高拉格战歿辛巳以都尉完颜承麟为东面元帅权总帅己丑元兵逼西城帝谓侍臣曰我为金紫十年太子十年人主十年自知无大过恶所恨者祖宗传祚百年至我而绝与自古荒淫暴乱之君等为亡国独此为介介尔又曰古无不亡之国亡国之君往往为人囚繫或为俘献或辱于阶庭闭之空谷朕必不至于此卿等观之朕志决矣都尉王爱实战歿炮军总帅王锐杀元帅瓜尔佳当格以众叛降于元庚寅以御用器皿赏战士甲午帝微服率兵夜出东城谋突围他去及栅不果而还乙未杀尚厩马五十匹官马一百五十匹犒将士

三年春正月甲辰以近侍分守四城戊申夜帝集百官传位于东面元帅承麟承麟固辞帝曰朕所以付卿者岂得已哉以肌体肥重不便鞍马驰突卿平日趑捷有将畧万一得免可图恢复此朕志也已酉承麟即皇帝位百官称贺礼毕亟出捍御而南面已立宋帜俄顷四面呼声震天地元兵入自南门与城中军巷战城中军不能支帝自缢于幽兰轩时呼沙呼富珠哩小罗索乌凌阿呼像素志王善尔赫舍哩柏寿乌库哩和勒端及军士五百余人皆从死焉 【按诸从死人姓名金史未载兹据续通鉴纲目补辑】 末帝退保子城闻帝崩率羣臣入哭谥曰哀宗哭奠未毕城溃奉御经实瘞之汝水上末帝为乱兵所害金亡

哀宗正大八年天兴三年凡十一年

右金九主合一百二十年

钦定续通志卷五十六

●钦定续通志卷五十七 元纪一

元纪 【一】

太祖 太宗 定宗 宪宗

○太祖

太祖皇帝讳特穆津姓却特氏蒙古部人其先世有曰托本默尔根妻曰阿伦果斡生二子长曰布固哈塔吉次曰博克多萨勒济固既而托本默尔根死阿伦果斡寡居夜寝帐中梦白光自天窗中入化为金色神人阿伦果斡惊觉遂有娠产一子曰勃端察尔勃端察尔状貌奇异沉默寡言家人谓之痴独阿伦果斡语人曰此儿非痴后世子孙必有大贵者阿伦果斡歿诸兄分贖财不及勃端察尔勃端察尔曰贫贱富贵命也贖财何足道独乘青白马猎禽兔以食至巴尔图敖位之地居焉居数月有民数十家自腾格哩呼喇之野逐水草来迁勃端察尔结茅与之居出入相资一日仲兄忽思之曰勃端察尔独出而无贖得无冻馁乎即走访得之邀与俱归勃端察尔中路谓其兄曰腾格哩呼喇之民无所附若临之以兵可服也兄以为然至家即选壮士令勃端察尔帅之前行果尽降之勃端察尔歿子巴噶哩台哈必齐嗣生子曰玛哈多丹玛哈多丹妻曰摩纳伦生七子而寡摩纳伦性刚急时雅賚尔部有羣小儿掘田闲草根以为食摩纳伦乘车出适见之怒曰此田乃我子驰马之所羣小辄敢坏之邪驱车径过之辗伤诸儿有至死者雅賚尔忿怨尽驱摩纳伦马羣以去摩纳伦诸子闻之不及被甲往追之为所败六子皆死雅賚尔乘胜杀摩纳伦灭其家唯一孙海都尚幼海都者摩纳伦长孙也乳母匿诸积木中得免先是摩纳伦第七子纳沁于巴喇呼民家

为赘婿闻其家被祸奔视之见病姬十数与海都尚在适有兄所乘黄马掣套竿逸归纳沁乘之乃伪为牧马者诣雅賚尔路逢父子二骑先后行臂鹰而猎纳沁识其鹰曰此吾兄所擎鹰也趋前以计给之转一河隈遂刺杀之繫马与鹰趋迎后骑给之如初复乘隙刺杀之前行至一山下有马数百牧者童子数人方击髀石为戏纳沁熟视之亦兄家物也尽杀童子驱马臂鹰而还取海都并病姬归巴喇呼之地止焉海都稍长纳沁率巴喇呼齐格诸民共立为君以兵攻雅賚尔臣属之形势寢大列营帐于巴喇噶沁河上跨河为梁以便往来由是四傍部族归之者渐众海都歿子拜星呼尔嗣拜星呼尔歿子敦巴噶嗣敦巴噶歿子噶布勒汗嗣噶布勒汗歿子巴尔达木嗣巴尔达木歿子伊苏克依嗣并吞诸部落势愈盛大伊苏克依崩至元三年十月追谥烈祖神元皇帝是为元之始祖初烈祖征塔塔尔部获其部长特穆津宣懿太后谪楞适生帝手握凝血如赤石烈祖异之因以所获特穆津名之志武功也族人泰楚特部旧与烈祖相善后生嫌隙绝不与通及烈祖崩帝方幼冲部众多归泰楚特近侍有托端呼尔察者亦将叛帝自泣留之托端呼尔察竟帅众驰去宣懿太后怒其弱已也麾旗将兵身自追叛者驱其大半而还时帝麾下绰奇别居萨里河而札木哈克部人托台奇尔者居伊噜格勒泉时欲相侵袭掠萨里河牧马以去绰奇麾左右匿羣马中射杀托台奇尔札木哈克以为怨遂与泰楚特诸部合谋以众三万来战帝时驻军都尔本兆苏之野闻变大集诸部兵分十有三翼以俟已而札木哈克至帝与大战破走之当是时诸部之中唯泰楚特最强其族昭垒部与帝所居相近帝常出猎偶与昭垒猎骑相属邀与同宿凡其留者悉饮食之明日再合围帝使左右驱兽向昭垒昭垒得多获以归其众感之私相语曰泰楚特与我虽兄弟常攘我车马夺我饮食有人君之度者其惟特穆津太子乎昭垒之长裕勒时为泰楚特所虐不能堪遂与塔海达鲁领所部来归请杀泰楚特以自效帝曰我方熟寐幸汝觉我已而二人复叛去塔海达鲁至中路为泰楚特部人所杀昭垒部遂亡时帝功德日盛泰楚特诸部多苦其主非法见帝宽仁时赐人以裘马心悦之遂稍稍来降会塔塔尔部长摩古津扫哩图背金约金主遣丞相完颜襄帅兵逐之北走帝闻之发近兵自鄂诺河迎击【按金史完颜襄传未载此事惟续通鉴纲目载金以灭塔塔尔功封元祖为绰尔图噜】杀摩古津扫哩图尽虜其輜重克呼部扎实甘布来归扎实甘布者部长王汗之弟也王汗名托里受金封爵为王番言音重故称王为王汗初托里之父呼尔察和斯必瑠既卒托里嗣位多杀戮昆弟其叔父珠尔帅兵与

托里战托里大败以百余骑脱走奔于烈祖烈祖亲为帅兵逐珠尔走西夏复夺部众归托里托里德之遂相与盟称为谿达烈祖崩托里之弟额尔克哈喇怨托里多杀之故复叛归奈曼部奈曼部长伊纳克齐为发兵伐托里尽夺其部众与之托里走河西回鹘回回三国奔契丹既而复叛归中道粮绝帝以其与烈祖交好遣近侍往招之亲迎抚劳安置军中振给之为伐默尔奇斯部取其赀财田禾以遗托里托里因此部众稍集居亡何托里自率兵复攻默尔奇斯部大掠而还于帝一无所遗会奈曼部长博啰汗不服帝复与托里征之至克实克巴克实之野会日暮各按营垒约明曰赴敌托里乘夜多燃火营中示人不疑潜移部众于别所及旦帝始知之因颇疑其有异志退师萨里河既而托里亦还至图喇河托里子伊勒哈及扎实甘布来会奈曼将齐苏等察知之乘其不备袭虏其部众于道伊勒哈奔告托里托里命伊勒哈与布尔古特共追之且遣使来曰奈曼不道掠我人民太子有四良将能假我以雪耻乎帝遂遣博尔济穆呼哩博啰罕齐拉袞四人帅师以往师未至伊勒哈已追及齐苏与之战大败布尔古特被擒伊勒哈马中流矢几为所获须臾四将至击奈曼走尽夺所掠归托里已而与皇弟 【按皇弟元史作皇帝考元世系哈札尔虽非烈祖之后然元祖尝美诸昆弟云哈札尔之射取天下足矣据此则为兄弟行无疑而帝弟音同遂至沿误于名义亦未合谨改】 哈札尔再伐奈曼与战于和伦扎色山大败之尽杀其诸将族众积尸以为京观奈曼之势遂弱帝欲为长子卓沁求婚于托里女超尔必济托里之子托斯和亦欲尚帝女浩沁必济俱不谐自是颇有违言初帝与托里合军攻奈曼也扎木哈克起兵援奈曼未及而奈曼败乃欲帝与托里有隙言于托里曰我于君是白翎雀他人鸿鴈耳白翎雀者寒暑常在北方鸿鴈遇寒则南飞就暖意谓帝心不可保也托里闻之疑遂移部众于别所及议婚不成扎木哈克复乘隙谓伊勒哈曰太子尝通信于奈曼将不利于君父子君若能加兵我当从傍助君也伊勒哈信之遣使言于托里托里不听伊勒哈力言之使者往返数四托里曰吾身之存实太子是赖汝善自为之毋贻吾忧可也扎木哈克遂纵火焚帝牧地而去岁癸亥 【按癸亥元史作癸丑考是年为金章宗泰和三年越二年而元太祖称帝是为丙寅况此下有岁甲子岁乙丑与元年丙寅相接此为癸亥之误无疑谨改】 托里父子谋欲害帝乃遣使者来曰向者所议媼事今当相从请来饮布瑋察尔布瑋察尔犹言许亲酒也帝以为然率十骑赴之至中道心动命一骑往谢帝遂还托里谋既不成即议举兵来侵圉人齐哩克齐闻其事密与弟巴达告帝帝

即驰军阿兰塞悉移辘重于他所 【亲征记作移辘重于锡勒津河】 遣哲哩默为前锋与托里兵遇败之伊勒哈将劲骑直前冲突射之中
颊即敛兵而退奇■〈口末〉部人遂弃托里来降托里既败而归帝亦将兵还至栋格泽驻军遣阿里哈往责托里曰君为叔父珠尔所逐困
迫来归我父即攻珠尔败之于河西其土地人民尽收与君此大有功于君一也君为奈曼所攻西奔日没处君弟扎实甘布在金境我亟遣人
召还比至又为默尔奇斯部人所逼我请我兄色辰伯奇及我弟色辰岱酬往杀之此大有功于君二也君困迫来归时我过哈达拉厯取诸部
羊马贖财尽以奉君不半月间饥者饱瘠者肥此大有功于君三也君不告我往掠默尔奇斯部大获而还未尝以毫发分我及君为奈曼所倾
覆我遣四将夺还尔民人重立尔国家此大有功于君四也我征都尔本塔塔尔哈塔锦萨勒珠特鸿吉哩五部如海东鷲禽之于鹅鴈见无不
获获则必致于君此大有功于君五也今乃易恩为讎而遽加兵于我哉遂进兵至班珠尔河河水方浑帝饮之以誓众凡与饮河水者谓之饮
浑水言其曾同艰难也时托里形势盛强众颇危惧帝与战于哈喇克沁沙图之地托里败走路逢奈曼部将遂为其所杀伊勒哈走至龟兹国
龟兹国王亦以兵讨杀之帝既灭托里大猎于特默格川宣布号令振凯而归时奈曼部长迪延汗心忌帝能遣使谋于巴达勒达部主阿噜哈
斯曰吾闻东方有称帝者天无二日民岂有二王耶君能益吾右翼吾将夺其弧矢也阿噜哈斯即以是谋报帝举部来归岁甲子帝大会于特
默格川议伐奈曼羣臣以方春马瘦宜俟秋高为言皇弟 【按皇弟元史作皇帝考世系表鄂齐锦为烈祖第四子太祖弟也当时国俗有大
皇帝二皇帝之称或修史者遂沿其误耳然名义未合谨据表改】 鄂齐锦曰事所当为断之在早何可以马瘦为辞帝悦遂进兵伐之驻兵于
沁达罕山先遣呼必哩哲伯二人为前锋迪延汗至自阿勒台营于杭爱山与默尔奇斯部长托克托克呼部长阿林台实卫喇特部长呼图克
伯奇暨都尔本塔塔尔哈塔锦萨勒珠特诸部合兵势颇盛时营中马有轶入奈曼营者迪延汗见之与众谋曰蒙古之马瘦弱如此今当诱其
深入然后战而擒之其将呼鲁苏伯奇对曰先王战伐勇进不回马尾人背不使敌人见之今为此迁延之计得非怯乎迪延汗怒即跃马索战
帝以哈扎尔主中军时扎木哈克从迪延汗来见帝军容整肃遁去帝与奈曼军大战至晡禽杀迪延汗诸部军一时皆溃余众悉降先是蒙古
居乌桓之北与奈曼回鹘接壤世修贡于辽金号微弱至是灭克呼降奈曼兼收都尔本塔塔尔哈塔锦萨勒珠特四部駸駸乎称雄矣岁乙丑

帝征西夏拔拉吉哩寨经罗索城而还

元年丙寅帝大会诸王羣臣建九游白旗即皇帝位于鄂诺河之源诸王羣臣共上尊号曰青吉斯皇帝是岁实宋宁宗开禧二年金章宗

泰和六年也帝既即位遂发兵复征奈曼时博啰汗猎于乌尔图山禽之以归迪延汗子库楚类汗与托克托奔雅尔塔实河上帝始议伐金初

金杀帝宗亲罕布海汗帝思欲报之会金降俘等具言金主璟肆行暴虐乃定义致讨

二年丁卯秋再征西夏克卫喇喀城是岁遣阿勒坦保喇二人使奇尔济苏既而伊德尔讷呼部阿勒达尔部皆通使来献名鹰

三年戊辰春帝至自西夏夏避暑龙庭冬再征托克托及库楚类汗时卫喇特部等遇我前锋不战而降因用为向导至雅尔塔实河讨默

尔奇斯部灭之托克托中流矢死库楚类汗奔契丹

四年春己巳辉和尔国来归【按亲征记云国主伊都呼遣官来议和时默尔奇斯托克托字呼图克齐位袞玛喇勒图沙于四人取托

克托首奔辉和尔伊都呼拒之与战于崧河遣使来告寻贡珍宝方物】帝入河西夏主李安全遣其世子率师来战败之获其副元帅高令公

克乌梁海城俘其太傅西壁氏进至克夷门复败夏师获其将威明令公薄中兴府引河水灌之堤决水外溃遂撤围还遣太傅额特入中兴府

招谕夏主纳女请和

五年庚午春金谋来伐筑乌沙堡帝命哲伯袭杀其众遂略地而东初帝贡岁币于金金主使卫王允济受之于静州帝见允济不为礼允

济归欲请兵攻之会金主璟殂允济嗣位【按太祖即位在金章宗泰和六年卫王嗣位当在太祖四年此叙于五年盖追述也】有诏至国

传言当拜受帝问金使曰新君为谁金使曰卫王也帝遽南面唾曰我谓中原皇帝是天上人做此等庸懦亦为之耶何以拜为即乘马北去允

济闻之益怒欲俟帝再入贡就进场害之帝知之遂与金绝益严兵为备

六年辛未春帝居吉鲁尔河西域哈喇萎部主阿尔斯兰汗来降二月帝自将南伐【按太祖起兵伐金卫绍王纪载在大安三年四月

此作二月彼此互异】败金将达实于野狐岭取大水泺丰利等县金复筑乌沙堡秋七月命哲伯攻乌沙堡及乌月营拔之八月帝及金师战

于宣平之会河川败之闰九月【按元史无闰字据续通鉴纲目增】拔德兴府居庸关守将遁去哲伯遂入关抵中都冬十月袭金羣牧监

驱其马而还以皇子卓沁察罕台乌格台分徇云内东胜武朔等州下之是冬驻蹕金之北境刘伯林瓜尔佳常格等来降

七年壬申春正月故辽人耶律瑠格聚众于隆安自为都元帅遣使来附帝破昌桓

抚等州金将赫舍哩纠坚等率兵三十万来援帝与战于獾儿觜大败之【按獾儿觜之战金史卫绍王纪未载续通鉴纲目载在嘉定四年闰九月盖太祖之六年也谨识】秋围西京金元帅左都监鄂屯襄率师来援帝遣兵诱至密谷口逆击之尽殪复攻西京不克九月察罕克奉圣州冬十二月甲申哲伯克东京

八年癸酉春耶律瑠格自立为辽王改元元统秋七月帝克宣德府遂攻德兴府拔之进至怀来与金行省完颜纲元帅高琪战败之追至北口金兵保居庸诏克特卜齐守之遂趋涿鹿金西京留守呼沙呼遁去帝出紫荆关败金师于五回岭拔涿易二州契丹乌兰巴尔等献北口哲伯遂取居庸与克特卜齐会八月金呼沙呼弑其主允济迎丰王珣立之是秋分兵三道命皇子卓沁察罕台乌格台为右军循太行而南取保遂安肃安定邢洺磁相卫辉怀孟掠泽潞辽沁平阳太原吉隰拔汾石岚忻代武等州而还皇弟哈扎尔及旺沁诺延卓齐特博恰为左军遵海而东取蓟州平滦辽西诸郡而还帝与皇子图类为中军取雄霸莫安河闲沧景献深祁蠡冀恩濮开滑博济泰安济南滨棣益都淄潍登莱沂等郡复命穆呼哩攻密州屠之史天倪萧伯特率众来降穆呼哩承制并以为万户帝至中都三道兵俱会是岁河北郡县尽拔唯中都通顺真定清沃大名东平德邳海州十一城不下

九年甲戌春三月驻蹕中都北郊诸将请乘胜破燕帝不从乃遣使谕金主曰汝山东河北郡县悉为我有汝所守惟燕京耳天既弱汝我复迫汝于险天其谓我何我今还军汝不能犒师以弭我诸将之怒耶金主遂遣使求和奉卫绍王女岐国公主及金帛童男女五百马三千以献仍遣其丞相完颜福兴送帝出居庸夏五月金主迁汴以完颜福兴及参政穆延尽忠辅其太子守忠留守中都六月金乱军卓多等杀其主帅率众来降帝怒金主南迁遂诏萨木哈舒穆噜明安与卓多等围中都帝避暑鱼儿泺秋七月金太子守忠奔于汴冬十月穆呼哩征辽东高州卢琮金扑等降锦州张鲸杀其节度使自立为临海王遣使来降

十年乙亥春正月金右副元帅富察齐锦以通州降二月穆呼哩攻北京金元帅音达瑋以城降以为留守乌叶尔权兵马都元帅镇之兴中府元帅石天应来降【按音达瑋石天应来降续通鉴纲目俱作上年事】以为兴中府尹三月金御史中丞李英等率师援中都战于霸州败之夏四月克清顺二州诏张鲸总北京十提控兵从南征鲸谋叛伏诛鲸弟致遂据锦州僭号汉兴皇帝改元兴龙五月庚申金中都留守完颜福兴仰药死穆延尽忠弃城走明安入守之是月帝避暑桓州凉泾遣呼图克等籍

中都帑藏秋七月红罗山寨主杜秀降以为锦州节度使遣伊奇哩往谕金主以河北山东未下诸城来献及去帝号为河南王当为罢兵金主不从诏史天倪南征授右副都元帅赐金虎符八月天倪取平州金经略使奇珠降穆呼哩遣史进道等攻广宁府降之是秋取城邑凡八百六十有二冬十月金宣抚布什万努据辽东僭称天王国号大真改元天泰十一月耶律瑠格来朝以其子锡沙入侍史天祥克兴州擒其节度使赵守玉

十一年丙子春帝还胘胸河【按胘胸河在杨林戍西北今名克噜伦河源出克特山南明成祖北征驻师于此改名饮马见明一统志及明史元史作庐胸误谨据改】行宫张致陷兴中府穆呼哩讨平之秋锡里济额特萨木哈巴图尔率师由西夏趋关中遂越潼关获金西安军节度使尼玛哈富勒呼拔汝州等郡抵汴京而还冬十月布什万努降以其子特格入侍既而复叛僭称东夏

十二年丁丑夏盗祁和尚据武平史天祥讨平之遂擒金将巢元帅以献察罕破金监军等兵于霸州金使求和察罕乃还秋八月以穆呼哩为太师封国王将蒙古纥纥诸军南征拔遂城蠡州冬克大名府遂东定益都淄登莱濰密等州是岁图们部民叛命布琳都尔伯讨平之

十三年戊寅秋八月兵出紫荆口获金行元帅事张柔命还其旧职穆呼哩自西京入河东克太原平阳及忻代泽潞汾霍等州金将武仙攻满城张柔击败之是年伐西夏围其王城夏主李遵瑱出走西凉契丹禄格据高丽江东城命浩沁扎拉率师平之高丽王■〈日育文〉遂降请岁贡方物

十四年己卯春张柔败武仙降祁阳曲阳中山等城夏六月帝率师征西域取鄂托喇尔城擒其酋哈济尔济兰图秋穆呼哩克尕岚吉隰等州进攻绛州拔之

十五年庚辰春三月帝克布哈城夏五月克塔什干城驻蹕叶实勒提斯河秋攻鄂托罗尔城克之穆呼哩徇地至真定武仙出降以史天倪为河北西路兵马都元帅行府事仙副之东平严实以彰德大名磁洺恩博滑浚等州来归穆呼哩承制授实金紫光禄大夫行尚书省事冬金邢州节度使武贵降穆呼哩攻东平不克留严实守之撤围趋洺州分兵徇河北诸郡

十六年辛巳春帝攻布哈尔赛玛尔堪等城皇子卓沁攻安集延巴尔昌等城并下之夏四月驻蹕铁门关金主遣乌克逊仲端奉国书请和称帝为兄不允金东平行省事孟古弃城遁严实入守之宋遣苟梦玉来请和六月宋涟水忠义统辖石珪率众来降【按宋史宁宗纪嘉

定十三年十一月涟水忠义军统辖石珪叛宋嘉定十三年庚辰为元太祖十五年此书在十六年六月与宋史异】以珪为济兗单三州总管秋帝攻巴喇勒哈等城皇子卓沁察罕台乌格台分攻玉隆哈什等城下之冬十月皇子图类克玛勒齐里克玛勒齐阿喇斯等城穆呼哩出河西克葭绥德保安鄜坊丹等州进攻延安不克十一月宋京东安抚使张琳以京东诸郡来降【宋史作张林】以琳为沧景滨棣等州行都元帅

十七年壬午春皇子图类克图舍尼绰尔等城还经穆垒国大掠之渡楚楚拉河克伊拉等城遂与帝会合兵攻塔尔哈寨拔之穆呼哩军克干涇邠原等州攻凤翔不克夏帝避暑塔尔哈寨西域主扎拉鼎出奔与玛里克汗合呼图克与战不利帝自将击之擒玛里克汗扎拉鼎遁去秋金复遣乌克逊仲端来请和见帝于回鹘国帝谓曰我向欲汝主授我河朔地令汝主为河南王彼此罢兵汝主不从今已尽取之乃始来请耶仲端固以请帝曰念汝远来河朔既为我有关西数城未下者其割付我令汝主为河南王勿复违也金平阳公胡天作【按金史传胡天作字景山元史纪误作天祚今改】以青龙堡降冬十月金河中府来附以石天应为兵马都元帅守之

十八年癸未春三月太师国王穆呼哩薨夏帝避暑帕尔满川皇子卓沁察罕台乌格台及巴拉之兵来会遂定西域诸城置达噜噶齐监治之冬十月金主珣殂子守绪立是岁宋复遣苟梦玉来

十九年甲申夏宋大名总管彭义斌侵河北史天倪与战于恩州败之是岁帝至东印度国角端见班师

二十年乙酉春正月帝还行宫二月武仙以真定叛杀史天倪董俊判官李全亦以中山叛三月史天泽击仙走之复真定夏六月宋彭义斌以兵应仙天泽御于赞皇擒斩之

二十一年丙戌春正月帝以西夏纳仇人实勒噶克伞昆及不遣质子自将伐之二月取黑水等城夏避暑于瑛楚山取甘肃等州秋取西凉府搆罗河罗等县遂踰沙陀至黄河九渡取应里等县九月李全执张琳郡王岱逊进兵围全于益都冬十一月庚申帝攻灵州夏遣威明令公来援丙寅帝渡河击夏师败之丁丑驻蹕盐州川十二月李全降授张柔行军千户保州等处都元帅是岁皇子乌格台及察罕之师围金南京遣唐庆责岁币于金

二十二年丁亥春帝留兵攻夏王城自率师渡河攻积石州二月破临洮府三月破洮河西窰二州遣旺沁诺延攻信都府拔之夏四月帝

次龙德拔德顺等州五月遣唐庆等使于金闰月避暑六盘山六月金遣完颜哈昭鄂屯阿古来请和帝谓羣臣曰朕自去冬已尝许不杀掠遽忘下诏耶今可布告中外令彼行人亦知朕意是月夏主李睨降执之以归遂灭夏帝次清水县西江秋七月壬午不豫己丑崩于萨里川哈喇图之行宫临崩谓左右曰金精兵在潼关南据连山北限大河难以遽破若假道于宋宋金世讎必能许我则下兵唐邓直捣大梁金急必征兵潼关然以数万之众千里赴援人马疲弊虽至弗能战破之必矣言讫而崩后卒如帝言年六十六葬起辇谷追谥曰圣武皇帝加谥法天启运圣武皇帝庙号太祖在位二十二年帝深沈有大略善用兵故能灭国四十遂平西夏其奇勋伟迹甚众惜乎当时史官不备多失于纪载云

戊子皇子图类监国

○太宗

太宗皇帝讳乌格台太祖第三子也母光献皇后鸿吉哩氏太祖伐金定西域帝攻城略地之功居多太祖崩自和博之地来会丧

元年己丑夏至固尔班苏巴克之地监国图类来见秋八月己未诸王羣臣大会于吉鲁尔河齐达勒敖拉之地以太祖遗诏即皇帝位于奎腾阿喇勒始立朝仪皇族尊属皆拜颁大扎萨克金遣阿固岱来归太祖之赙帝曰汝主久不降使先帝老于兵闲吾岂能忘也赙何为哉郟之遂议伐金印度国主木罗夷国主来朝西域伊斯巴尔城酋长来降金复遣使来聘不受

二年庚寅春正月诏自今以前事勿问是春帝与图类猎于谔尔根河遂遣兵围京兆金人来援败之寻拔其城夏避暑于塔密尔河多果郎及金兵战败绩命苏布特援之秋七月帝自将南伐图类及其子莽赉扣率师以从拔天成等堡遂渡河攻凤翔冬十一月攻潼关蓝关不克十二月拔天胜寨及韩城蒲城

三年辛卯春二月克凤翔【按元兵克凤翔金史哀宗纪载在四月续通鉴纲目同此作二月互异】攻洛阳河中诸城克之夏五月帝避暑于九十九泉命图类出师宝鸡遣绰布干如宋假道宋人杀之秋八月如云中始立中书省以耶律楚材为中书令钮佑禄珠顺为左丞相镇海为右丞相是月以高丽杀使者命萨里台率师讨之取四十余城高丽王■〈日育父〉遣使请降萨里台承制设官分镇其地乃还冬十月乙酉帝围河中十二月己未拔之【按元兵拔河中续通鉴纲目载在九月此作十二月金史哀宗纪与此同】

四年壬辰春正月戊子帝由河清县渡河庚寅图类渡汉江遣使来报即诏诸军进

发甲午次郑州金防城提控马伯坚降即使守之丁酉
次新郑是日图类及金师战于钧州之三峯大败之戊戌帝至三峯壬寅攻钧州克之遂
下商虢嵩汝陕洛许郑陈亳颖寿睢永等州三月命苏
布特等围南京金主遣其弟曹王额尔克入质帝还留苏布等守河南夏四月帝出居庸
避暑官山高丽叛杀所置官吏徙居江华岛秋七月遣
唐庆至金谕降金杀之和议遂绝八月萨里合复征高丽中矢卒金参政完颜色埒恒山
公武仙以兵援南京诸军与战败之九月图类薨帝还
龙庭冬十一月猎于纳喇齐拉袞之野十二月如太祖行宫

五年癸巳春正月庚申金主奔归德戊辰金西面元帅崔立杀留守完颜纳绅完颜
萨尼雅布以南京降二月如托里图夏四月苏布特进
至青城崔立以金太后王氏后图克坦氏及梁王从恪荆王守纯等 【考金史传从恪系
卫绍王子崔立为乱太后立为梁王守纯系宣宗子
正大元年进封荆王元史误作荆王从恪梁王守纯今据改】 至军中苏布特遣送行在
遂入南京六月金主奔蔡塔齐尔率师围之诏以孔子
五十一世孙元措 【元史作元楷续通鉴纲目及耶律楚材传皆作元措今据改】 袭
封衍圣公秋八月猎于额伯苏地以阿克栋阿等充宣
差勘事官括中州户得户七十三万余冬十一月宋遣荆鄂都统孟珙以兵粮来助十二
月诸军与宋兵合攻蔡败武仙于息州海沂莱潍等州
降是冬帝至呵噜乌格袞行宫敕修孔子庙及浑天仪

六年甲午春正月金主传位于宗室子承麟遂自经城破获承麟杀之与宋分定金
地界而归金亡是春会诸王宴射于谔尔根河夏五月
帝在达兰达巴之地大会诸王百僚颁谕条令秋七月以呼图克诺延为中州断事官遣
达海甘布征蜀是秋帝在巴尔斯达兰达巴之地议自
将伐宋国王扎拉图请行遂遣之冬猎于托卜辉罕地

七年乙未春城和琳作万安宫遣诸王巴图及子库裕克侄莽赉扣征西域子库腾
征秦巩子库春及呼图克伐宋唐古征高丽秋九月诸
王昆布哈获宋何太尉冬十月库春围宋枣阳拔之遂徇襄邓入郢十一月库腾攻石门
金便宜都总帅汪世显降 【按汪世显降元续通鉴
纲目载于十月与此异】 中书省臣请契勘大明历从之

八年丙申春二月命应州郭胜钧州富珠哩玖珠邓州赵祥从库春充先锋伐宋三
月复修孔子庙及司天台夏六月复括中州户口得续
户一百一十余万耶律楚材请立编修所于燕京经籍所于平阳編集经史召儒士梁陟
充长官以王万庆赵着副之秋七月命陈时可阅刑名
科差课税等案赴阙磨照诏以真定民户奉太后汤沐中原诸州民户分赐诸王贵戚寻

改命设达噜噶齐朝廷置官吏收其租颁之非奉诏不得征兵赋库腾率汪世显等入蜀取宋关外数州冬十月库腾入成都秦巩等二十余州皆降张柔等攻郢州拔之襄阳府来附以游显领襄樊城事

九年丁酉春帝猎于齐齐克察罕之泽莽赍扣征钦察部破之擒其酋巴齐玛克夏四月筑纛琳城作格根察罕殿秋八月命摩和纳刘中试诸路儒士中选者除本贯议事官冬十月猎于野马川如龙庭遂至行宫是冬昆布哈等克光州遂别攻蕲州降随州略地至黄州宋惧请和乃还

十年戊戌春塔斯军至北峡关宋将汪统制降夏襄阳别将刘义叛执游显等降于宋宋兵复取襄樊帝猎于齐齐克察罕之泽筑托斯和城作迎驾殿秋八月以诸路旱蝗诏免今年田租仍停旧未输纳者俟丰岁议之

十一年己亥春帝复猎于齐齐克察罕之泽秋七月游显自宋逃归以山东诸路灾免其税粮冬十一月莽赍扣围乌苏木奇城闕三月拔之

十二年庚子春正月皇子库裕克克西域未下诸部遣使奏捷命张柔等八万户伐宋冬十二月诏库裕克班师籍诸王大臣所俘男女为民

十三年辛丑春二月帝猎于齐齐克察罕之泽不豫诏赦囚徒秋高丽国王王■〈日育文〉以族子縉入质冬十月以伊啰斡齐主管汉民公事十一月丁亥大猎庚寅还至乌特古呼兰山辛卯帝崩于行殿在位十三年年五十六葬起辇谷追谥曰英文皇帝庙号太宗

壬寅春六皇后尼玛察氏称制秋七月张柔自五河口渡淮攻宋扬滁和等州

癸卯春正月张柔分兵屯田于襄城秋后命张柔总兵戍■〈木巳〉

甲辰夏五月中书令耶律楚材薨

乙巳秋后命马步军都元帅察罕等率骑三万与张柔掠淮西攻寿州拔之遂攻泗州盱眙及扬州宋制置赵葵请和乃还【按壬寅至是岁俱六皇后称制】

○定宗

定宗皇帝讳库裕克太宗长子也母六皇后尼玛察氏太宗尝命诸王阿齐台伐金帝以皇子从虜其亲王而归又从诸王巴图西征次阿克苏境攻围木栅山寨以三十余人战帝及宪宗与焉太宗尝有旨以皇孙实勒们为嗣太宗崩皇后临朝者凡五年乃召诸王百官于达兰达巴之地议立帝久不决诸王将谋乱会雷雨大作行帐水深数尺遂各散去

元年丙午春正月张柔入觐于和琳秋七月帝即位于昂吉苏默托里之地六皇后仍称制冬权万户史权等耀兵淮南攻虎头关寨拔之进围黄州

二年丁未春张柔攻泗州夏帝避暑于奇喇圭哈喇哈斯之地秋西巡八月命伊勒吉济达率绰斯满部兵西征是月诏蒙古人户每百以一名充巴图尔九月取太宗宿卫之半以伊克们都尔领之冬十月括人户

三年戊申春三月帝崩于杭锡雅尔之地在位三年年四十三葬起辇谷追谥曰简平皇帝庙号定宗夏四月皇后乌拉海额实氏抱太孙实勒们临朝称制是岁大旱河水尽涸野草自焚牛马十死八九人不聊生诸王及各部又遣使于燕京迤南诸郡征求货财弓矢鞍辔之物或于西域回鹘索取珠玑或于海东取鹰鹞驿骑络绎昼夜不绝民力益困自壬寅以来法度不一内外离心太宗之政衰矣

己酉皇后称制之元年

庚戌皇后称制之二年自定宗崩后议所立未决当是时已三岁无君其行事之详简策失书无从考也

○宪宗

宪宗皇帝讳莽赉扣睿宗图类之长子也母庄献皇后奇■（口末）氏太宗在潜邸养以为子及睿宗薨乃命归藩邸屡从征伐尝攻钦察部其酋巴齐玛克逃于海岛帝闻亟进师至其地适大风刮海水去其浅可渡帝曰此天开道与我也遂进屠其众擒巴齐玛克甫班师而水已至后军有浮渡者复与诸王巴图征俄罗斯部至额里齐城躬自搏战破之岁戊申定宗崩朝廷久未立君中外恟恟咸属意于帝诸王巴图穆格额呼布格绥克托台奇尔及大将乌兰哈达等咸会于阿尔图和赉之地巴图首建议推戴时定宗皇后乌拉海额实所遣使者巴拉在坐曰昔太宗命以皇孙实勒们为嗣诸王百官皆与闻之今实勒们故在而议欲他属将寘之何地耶穆格曰太宗有命谁敢违之然前议立定宗由皇后托里格呼勒与汝辈为之是则违太宗之命者汝等也今尚何言耶巴拉语塞乌兰哈达曰莽赉扣聪明睿知人咸知之巴图之议良是巴图乃申令于众众悉应之议遂定

元年辛亥夏六月帝即位于鄂诺河改更庶政以弟呼必赉领治蒙古汉地民户遣塔尔鄂勒博察球尔赛音谔德齐赵璧等诣燕京抚谕军民以蒙克萨勒为断事官以博勒和掌宣发号令朝觐贡献及内外闻奏诸事以鸿和尔留守和琳宫阙帑藏阿勒达尔副之以伊啰斡齐布扎尔鄂勒博都特达喇等充燕京等处行尚书省事赛音谔德齐鼐智密鼎佐之以诺海

塔喇海巴苏呼等充巴实伯里等处行尚书省事温都
尔乌逊阿哈玛特伊德实佐之以谔尔根充阿穆河等处行尚书省事帕哈哩鼎伊斯玛
音佐之以察罕伊尔根统两淮等处蒙古汉军以丹达
尔统四川等处蒙古汉军以和尔台统土蕃等处蒙古汉军皆仍前征进约苏图阿齐台
昌吉卓诺哈达奇凌阿勒楚尔及纲阿塔阿萨尔和塔
拉等坐诱诸王为乱并矣诛罢筑和琳城役千五百人冬以扬珠济达违命遣哈坦诛之
仍籍其家

二年壬子春正月如实珪之地遣奇塔特布哈攻莽赉伊勒都齐寨皇太后崩夏驻
蹕和琳分迁诸王于各所仍以太宗诸后妃家赉分赐
亲王定宗后及实勒们母以厌禳事觉并赐死谪实勒们伊苏布琳等于摩多齐之地禁
錮呼齐纳和斯图等于军营秋七月命呼必赉征大理
诸王托罗海萨奇勒征身毒奇尔台布哈征玛拉希实喇征西域苏勒坦诸国诏谕宋荆
南襄阳樊城均州诸守将使来附冬十月命诸王伊克
征高丽帝驻蹕乌特古呼兰之地十二月戊午大赦以特尔格齐库库楚等掌帑藏布琳
哈喇乌逊掌谔都阿固察掌祭祀医巫卜筮阿拉克布
哈副之诸王哈喇薨以珠尔噶岱掌传驿所需博勒和掌笔且齐写发宣诏及诸色目官
职是岁籍汉地民户诸王实喇薨

三年癸丑春正月帝会诸王于鄂诺河北罢征高丽兵以扎拉台为征东元帅遣必
齐克伯尔克括俄罗斯户口三月攻海州戍将王国昌
逆战于城下败之夏六月命诸王锡里库及乌兰哈达等帅师征西域法勒哈巴哈台等
国又命多托尔台萨里图尔哈等征痕都斯坦实克密
尔等国帝如和哩呼纳颜布哈之地秋至准淖尔以蒙克萨勒为万户哈坦为扎尔古齐
九月呼必赉次塔拉地分兵三道以进冬十二月大理
平帝驻蹕昂吉地命宗王雅勒呼与洪福源同领军征高丽攻拔禾山东州春州三角山
杨根天龙等城

四年甲寅春帝猎于齐齐克察罕夏如伊尔默色之地遣扎拉尔部人和尔齐征高
丽秋七月诏官吏之赴朝理算钱粮者许自首不公仍
禁以后浮费冬大猎于额默克沁哈尔察海之地呼必赉还自大理留乌兰哈达攻诸夷
之未附者是岁会诸王于库库淖尔之西乃祭天于日
月山初籍新军帝谕大臣求可以慎固封守闲于将略者擢史枢征行万户配以真定相
卫怀孟诸军驻唐邓张柔移镇亳州权万户史权屯邓
州以逼宋张柔遣张信将八汉军戍颍州王安国将四千户渡汉南深入而还张柔以连
岁勤兵两淮难于粮运奏据亳之利诏柔率山前八军
城而戍之均州总管孙嗣遣人赍蜡书降骁将锤显王梅杜柔袁师信各帅所部来降

五年乙卯春诏征逋欠钱谷夏帝如伊尔默色土秋九月张柔会大帅于符离筑百丈口甬路及横江堡是岁改命扎拉台与洪福源同征高丽

六年丙辰春帝会诸王百官于乌尔伯克图之地设宴六十余日赐金帛有差仍定拟诸王岁赐钱谷呼必赉遣默尔合齐诣行在所奏请续签内郡汉军从之夏四月驻蹕于塔密尔五月如实喇鄂尔多六月如岱尔哈达会议伐宋秋七月诸王塔齐尔驸马特尔格军过东平诸处掠民羊豕帝闻遣使问罪由是诸军无犯者是岁高丽国王细嗟甫云南酋长摩合罗嗟及苏勒坦诸国来觐乌兰哈达讨白蛮等克之【按续通鉴纲目载乌兰哈达讨克白蛮等国事在宝佑三年盖宪宗五年也此载在六月互异】遂自实巴尔地还至重庆府败宋将张都统赐金缕织文衣一袭银五十两彩帛万二百匹以赉军士冬帝驻蹕阿都齐塔齐尔爱满以阿珠河回回降民分赐诸王百官

七年丁巳春如呼兰伊勒吉诏诸王出师征宋奇塔特布哈等讨莽赉伊勒都齐寨平之夏六月谒太祖行宫祭旗鼓复会于吉鲁尔之地还至伊尔默色土秋驻蹕于准淖尔酺马乳祭天九月出师南征以驸马琳沁之子奇塔特为达噜噶齐镇守俄罗斯仍赐马三百羊五千回鹘献水精盆珍珠伞等物却之且禁后勿复献宗王塔齐尔率诸军南征围樊城霖雨连月乃班师元帅布琳济达军自邓州略地遂渡汉江冬十一月乌兰哈达伐交趾败之入其国安南主陈日昷窜海岛遣阿勒达尔托音曩嘉特等诣陕西等处理算钱谷是冬帝度漠南至于玉隆栈呼必赉及诸王额呼布格巴尔图楚木哈喇玉隆哈什锡里济公主塔玛噶等来迎大燕既而各遣归所部

八年戊午春正月朔如何尔班托哈之地受朝贺二月陈日昷传国于长子光曷光曷遣堉与其国人以方物来见乌兰哈达送诣行在所诸王锡里库讨回回法勒哈平之禽其王遣使来献捷帝猎于伊埒哈雅之地师南征次于河适冰合以土覆之而渡帝自将伐宋【按宪宗自将伐宋事续通鉴纲目及宋元通鉴俱作七年八月】由西蜀以入命张柔从呼必赉征鄂趋杭州命塔齐尔攻荆山分宋兵力宋四川制置使蒲泽之攻成都耨埒率师击败之进攻云顶山诏以耨埒为都元帅帝由东胜河渡遣参知政事刘太平括兴元户口三月命洪俊奇率师从扎拉台同征高丽夏四月驻蹕六盘山丰州千户郭燧奏请续签军千人修治金州从之是时军四万号十万分三道而进帝田陇州入散关诸王默格由祥州入米仓关布尔察克万户由渔关入沔州以明安岱尔为太傅守京兆诏

征益都行省李璿兵璿上言益都南北要冲兵不可撤
从之璿还击海州涟水等处五月皇子阿实达因猎驰骑伤民稼帝责让之仍挾近侍数
人【皇子阿实达因猎伤稼事宋元通鉴作八年四
月】士卒有拔毛葱者即斩以徇由是秋毫莫敢犯仍赐所经郡守各有差秋七月率兵
由宝鸡攻重贵山所至辄平八月辛丑璿与宋人战杀
宋师殆尽九月驻蹕汉中都元帅耨埒留密喇卜和卓刘哈玛尔等守成都悉率余兵渡
马湖禽宋制置使张实遂遣实招谕苦竹隘实遁冬十
月壬午帝次宝峯癸未如利州以汪特格能守蜀赐卮酒奖谕之帝渡嘉陵江至白水江
命特格造浮梁以济梁成赐特格等金帛有差帝驻蹕
剑门戊子攻苦竹隘裨将赵仲窃献东南门师入与其守将杨立战败之杀立徙赵仲于
隆庆己亥获张实支解之赐特格玉带留精兵五百守
之遣使招谕龙州帝至高峯庚子围长窰山守将王佐裨将徐昕等率兵出战败之十一
月己酉帝督军先攻鹅顶堡壬子知县王仲出降是夜
破其城王佐死焉癸丑诛佐之子及徐昕等四十余人以彭天祥为达噜噶齐治其事王
仲副之丙辰进攻大获山守将杨大渊降以为四川侍
郎仍命率其兵以从庚午次和溪口遣骁骑略青居山是月龙州降诸王孟格图攻礼义
山不克诸王塔齐尔略地至江而还并会于行在所命
呼必赉统诸路蒙古汉军伐宋十二月壬午杨大渊率所部兵与汪特格分击相如等县
都元帅耨埒攻简州以宋降将张威率众为先锋乙酉
帝次于运山大渊遣人招降其守将张大悦仍以大悦为元帅师至青居山裨将刘渊等
杀都统段元鉴降庚寅遣使招谕未附丁酉隆州降己
亥大良山守将蒲元圭降诏诸军毋俘掠癸卯攻雅州拔之石泉守将赵顺降是岁皇子
璿都薨于吉河之南

九年己未春正月乙巳朔驻蹕重贵山北置酒大会问诸王驸马百官曰今在宋境
夏暑且至汝等其谓可居否乎扎拉尔部人托欢曰南
土瘴疠帝宜北还所获人民委吏治之便阿尔拉部人巴哩齐曰托欢怯臣愿往居焉帝
善之戊申诸王孟格图复攻渠州礼义山伊尔图鲁雄
攻巴州平梁山丁卯大渊攻合州俘男女八万余人二月丙子帝悉率诸兵渡鸡爪滩至
石子山丁丑督诸军战城下辛巳攻一字城癸未攻镇
西门三月攻东新门奇胜门镇西门小堡夏四月乙未攻护国门丁酉夜登外城杀宋兵
甚众六月丁巳【按以本年正月乙巳六月不应有
丁巳但无可据改姑仍其旧】汪特格复选兵夜登外城马军寨杀寨主及守城者王坚
悉力拒之迟明遇雨梯折后军不克进而止是月帝不
豫秋七月辛亥留精兵三千守之余兵悉攻重庆癸亥帝崩于钓鱼山年五十二在位九

年追谥曰桓肃皇帝庙号宪宗

钦定续通志卷五十七

●钦定续通志卷五十八 元纪二

元纪 【二】

世祖 【一】

○世祖一

世祖皇帝讳呼必赉宪宗同母弟也帝仁明英睿事太后至孝尤善抚下当在潜邸思大有为于天下延藩府旧臣及四方文学之士问以治道宪宗以帝最长而贤故尽属以军国庶事命南驻扎固图之地初太宗立军储所于新卫以收山东河北丁粮后惟计直取银帛军行则以资之帝请设官筑五仓于河上始令民入粟宋遣兵攻虢之卢氏河南之永宁卫之八柳渡帝请立经略司于汴以莽格史天泽杨惟中赵璧为使陈纪杨果为参议俾屯田唐邓等州授之兵牛敌至则御敌去则耕仍置屯田万户于邓完城以备之岁壬子奉命帅师征云南寻受京兆分地奏割河东解州盐池以供军食立从宜府于京兆屯田凤翔募民受盐入粟转漕嘉陵立京兆宣抚司以布琳及杨惟中为使关陇大治岁癸丑出师临洮分三道以进帝由中道过大渡河经行山谷闲二千余里至金沙江乘革囊以渡遂进薄大理城先是大理主段氏微弱国事皆决于高祥高和兄弟至是祥率众遁去命大将伊克及巴图尔追斩之留大将乌兰哈达戍守以刘时中为宣抚使与段氏同安辑大理遂班师岁丙辰命僧子聪一地于桓州东滦水北城开平府经营宫室又奉命益怀州为分地岁丁巳入覲于伊克德呼苏之地议分道攻宋以明年为期岁戊午冬十一月戊申禡牙于开平东北是日启行岁己未秋七月师次汝南命大将巴图尔等前行备粮汉上戒诸将无妄杀命杨惟中郝经宣抚江淮笔且齐孙贞督军须蔡州八月丙戌渡淮辛卯入大胜关宋戍兵皆遁辛丑进次江北九月壬寅朔亲王穆格自合州钓鱼山遣使以宪宗凶问来告且请北归以系天下之望帝曰吾奉命南来岂可无功遽还甲辰登香垆山俯瞰大江江北曰武湖湖之东曰阳逻堡其南岸即泔黄洲宋以大舟扼江渡帝遣兵夺二大舟是夜遣玛拉噶齐张文谦等具舟楫乙巳迟明至江岸风雨晦冥诸将皆以为未可渡帝不从遂申敕将帅扬旗伐鼓三道并进天为开霁与宋师接战者三杀获甚众径达南岸丁未驻泔黄洲庚戌围鄂攻之逾月宋人城守益坚冬十一月丙辰移驻牛头山时先朝诸臣阿勒达尔瑋塔哈托果斯托里齐等谋立额呼布格额呼布格者睿宗第七子帝之弟也皇后闻之急遣托欢额默

根驰至军前密报帝请速还丁卯发牛头山声言趋临安留大将巴图尔等率诸军围鄂
闰月庚午朔还驻青山矾辛未临江岸遣张文谦往谕
诸将曰迟六日当去鄂退保汧黄洲宋宰相贾似道遣宋京请和命赵璧等语之曰汝以
生灵之故来请和好意甚善然我奉命南征岂能中止
果有事大之心当请于朝是日大军北还

中统元年春三月戊辰朔车驾至开平亲王哈坦阿济格率西道诸王塔齐尔额森
克呼鲁古尔卓多率东道诸王皆来会与诸大臣劝进
帝三让诸王大臣固请辛卯帝即皇帝位夏四月戊戌朔立中书省以王文统为平章政
事张文谦为左丞辛丑以即位诏天下丁未以翰林侍
读学士郝经为国信使翰林待制何源礼部郎中刘人杰副之使于宋乙丑征诸道兵六
千五百人赴京师宿卫置互市于涟水军禁私商不得
越境犯者死是月额呼布格僭号于和琳城西阿勒坦河五月丙戌建元中统甲午以额
呼布格反诏赦天下乙未立十路宣抚使征诸路兵三
万驻燕京近地六月戊戌以李璫为江淮大都督刘太平等谋反事觉伏诛高丽国王王
僖遣其子永安公禧判司宰事韩即来贺即位以国王
封册玉印及虎符赐之秋七月癸酉以燕京路宣慰使玛穆特行中书省事燕京路宣慰
使赵璧平章政事张启元参知政事王鹗翰林学士承
旨兼修国史河南路宣抚使史天泽兼江淮诸翼军马经略使丙子诏造中统元宝交钞
立互市于颍州光化军宋兵攻边城诏遣太尹奇■〈
口耒〉孟古岱率所部合兵击却之帝自将讨额呼布格八月己酉立秦蜀行中书省以
京兆等路宣抚使廉希宪为中书省右丞行省事宋兵
临涟州李璫乞遣将益兵渡淮攻宋以方遣使修好不从癸亥以泽潞二州旱赈之九月
壬午初置拱卫仪仗冬十月癸丑初行中统宝钞戊午
车驾驻锡衮之地命给官钱雇在京橐驼运米万石输行在所十一月戊子发常平仓赈
益都济南滨棣饥民十二月丙申以礼部郎中孟甲礼
部员外郎李文俊使安南大理乙巳帝至自和琳驻蹕燕京近郊始制祭享太庙祭器法
服以梵僧帕克斯巴为帝师授以玉印统释教立仙音
院复改为玉宸院括乐工立仪凤司又立符宝局及御酒库羣牧所

二年春正月乙酉宋兵围涟州己丑李璫击败之二月己亥宋兵攻涟水命阿珠等
帅兵赴之丙午车驾如开平诏减民闲差发罢守隘诸
军丁巳李璫破宋兵于沙湖堰三月壬戌朔日有食之夏四月丙午诏军中所俘儒士听
赎为民乙卯命宣抚司劝农桑抑游惰礼高年问民疾
苦举文学才识可以从政及茂才异等列名上闻以听擢用其职官污滥及民不孝悌者
量轻重议罚五月乙丑遣崔明道李全义为详问官诣

宋淮东制司访问国信使郝经等所在仍以稽留信使侵扰疆场诘之庚辰敕使臣及军士所过城邑官给廩饩毋扰于民丁亥申严沿边军民越境私商之禁禁私杀马牛以河南经略宣抚使史天泽为中书右丞相河南军民并听节制诏成都路置惠民药局六月戊戌诏谕十路宣抚司并管民官定盐酒税课等法癸卯以严忠范为东平路行军万户兼管民总管仍谕东平路达鲁噶齐等官并听节制乙卯诏宣圣庙及管内书院有司岁时致祭月朔释奠禁诸官员使臣军马毋得侵扰褻渎丙辰以汪良臣同签巩昌路便宜都总帅凡军民官并听良臣节制庚申宋泸州安抚使刘整举城降以整行夔府路中书省兼安抚使佩虎符仍喻都元帅耨埒等存恤其民罢金银铜铁丹粉锡碌坑冶所役民夫及河南舞阳姜户藤花户还之州县赐大理国主段实虎符优诏抚谕之命李璫领益州路盐课出工局绣女听其婚嫁高丽国王倂更名植遣其世子堪奉表来朝以布哈为中书右丞相耶律铸为中书左丞相张启元为中书右丞秋七月辛酉朔立军储都转运使司癸亥立翰林国史院以右丞相史天泽监修国史左丞相耶律铸平章政事王文统监修辽金史辛巳诏许衡即其家教怀孟生徒己丑谕将士伐宋八月丁酉谕开平守臣释奠于宣圣庙戊戌以燕京等路宣抚使赛音谔德齐为平章政事辛丑以宣抚使钮祜禄纳罕为中书右丞库库为中书左丞丁未以姚枢为大司农甲寅诏诸王妃公主驸马非闻奏不许擅取官物颁斗斛权衡宋私商七十五人入宿州诏宥之还其货听榷场贸易仍檄宋边将还北人之留南者九月庚申朔奉迁祖宗神主于圣安寺丙寅诏以钮祜禄纳罕行中兴府中书省戊辰大司农姚枢请以儒人杨庸教孔颜孟三氏子孙东平府详议官王镛兼充礼乐提举诏以庸为教授以镛特兼太常少卿辛未置和余所于开平丙子谕诸王驸马凡民闲词讼无得私自决断皆听朝廷处置敕今岁田租输沿河近仓官为转漕毋劳民癸未立诸路提举学校官冬十月庚寅朔帝自将讨额噶布格庚子以右丞张启元行中书省于平阳太原等路修燕京旧城命平章政事赵璧左三部尚书克噶木率蒙古汉军驻燕京近郊以河南屯田万户史权为江汉大都督甲辰宋兵攻泸州刘整击败之十一月壬戌与额噶布格遇于实默图诺尔之地诸王哈坦等奋击大破之额噶布格北遁癸酉驻蹕特默哈喇之地以尚书克噶木平章赵璧兼大都督率诸军从塔齐尔北上分蒙古军为二克噶木从穆苏山居庸口驻宣德德兴府阿海从阿固岱出古北口驻兴州帝亲将诸万户汉军及武卫军由檀顺州驻潮河川敕官给刍粮毋扰居民罢十路宣抚司止存开元路十二月庚寅

封子珍戡为燕王领中书省事甲午师还诏撤所在戍兵放民闲新签军命太常少卿王镛教习大乐

三年春正月癸亥修宣圣庙成庚午罢高丽互市赐高丽国历辛未禁诸道戍兵及势家纵畜牧犯桑枣禾稼者癸酉以军兴人民劳苦敕停公私逋负毋征丙戌命备宫悬钟磬乐舞钥翟二月己丑李璿反以涟海三城献于宋庚寅宋兵攻新蔡辛卯定中外官俸命大司农姚枢讲定条格甲午李璿入益都辛丑李璿寇蒲台癸卯诏发兵讨之以赵璧为平章政事甲辰发诸蒙古汉军讨李璿命水军万户解成张荣实大名万户王文干及万户严忠范会东平济南万户张宏归德万户邸浹武卫军炮手元帅薛军胜等会滨棣丙午命诸王哈必齐总督诸军以布扎尔额布根及赵璧行中书省事于山东宋子贞参议行中书省事以董源高逸民为左右司郎中许便宜行事真定顺天河闲平滦大名邢州河南诸路兵皆会济南己酉王文统坐与李璿同谋伏诛仍诏谕中外壬子李璿入济南癸丑诏大名洺滋彰德卫辉怀孟河南真定邢州顺天河闲平滦诸路皆籍兵守城宋兵攻滕州三月己未括穆苏爱满辉和尔雅尔喀斡达实爱满等户丁为兵徙弘州锦工绣女于京师诏以平章政事满拉廉希宪参政商挺断事官麦肖行中书省事于陕西壬申命户部尚书刘肃专职钞法癸酉命史枢阿珠各将兵赴济南遇李璿军邀击大破之璿退保济南乙亥宋将夏贵攻符离戊寅万户韩世安率镇抚马兴千户张济民大破李璿兵于高苑禁民闲私藏军器乙酉宋夏贵攻蕲县夏四月丙戌朔大军围济南丁亥诏博兴高苑等处军民尝为李璿胁从者并释其罪庚子诏安辑徐邳民禁征戍军士毋纵畜牧伤其禾稼桑枣癸卯宋兵攻亳州乙卯诏右丞相史天泽专征诸将皆受节度五月戊午蕲县陷权万户李义千户张好古死之庚申筑环城围济南甲子宋兵攻利津县蠲滨棣今岁田租之半东平十之三戊辰以左丞相和尔布哈兼中书省都断事官甲申大司农姚枢辞赴省议事帝勉留之命枢与左三部尚书刘肃依前商议中书省事六月乙酉朔宋兵攻沧州戊子滨棣安抚使韩世安败宋兵于滨州丁河口壬子申严军官及兵伍扰民之禁秋七月戊午复蒙古军站户差赋农民包银征其半俘户止令输丝民当输赋之月毋征私债甲戌李璿伏诛体解以徇八月己丑郭守敬请开玉泉水以通漕运广济河渠司王允中请开邢洺等处漳滏澧河达泉以溉民田并从之丙午立诸路医学教授戊申敕王鹗集廷臣商榷史事九月戊午亳州万户张弘略破宋兵于蕲县复宿蕲二城以侍卫亲军都指挥使董文炳兼山东路经略使收集益都旧军充武卫

军戍南边癸酉都元帅库岱卒于军以其兄阿珠代之闰月己丑以济南民饥免其租税及诸路军户他徭庚子中翼千户玖珠破宋兵于虎脑山庚戌发粟三十万赈济南饥民冬十月庚申分益都军民为二董文炳领军萨奇苏治民诏以李璿所掠民马还其主以郝经刘人杰使宋未还廩其家乙丑诏禁京畿畋猎丙寅分东西两川都元帅府为二以托迪及刘整等为都元帅及左右副都元帅庚午敕巩昌总帅汪惟正撤戍青居山军屯田利州乙亥分中书左右部十一月辛丑遣官审理陕西重刑敕河西民徙居应州其不能自贍者给牛具及粟麦种仍赐布人二匹乙巳诏谕史天泽朕或乘怒欲有所诛杀卿等宜迟留一二日覆奏行之丙午诏特征人员宜令乘传十二月丙辰立河南山东统军司以塔尔珙和尔齐为河南路统军使卢升副之东距亳州西至均州诸万户隶焉察克布哈为山东路统军使武秀副之西自宿州东至宁海州诸万户隶焉罢各路急递铺丁巳立十路宣慰司以真定路达鲁噶齐赵璫等为之辛酉立诸路转运使以燕京路监榷官曹泽等为之使癸亥享太庙诏各路总管兼万户者止理民事军政勿预其州县官兼千户百户者仍旧丙寅申严屠杀牛马之禁己巳诏诸路管民总管子弟有分管州府司县及鹰坊人匠诸色事务者罢之

四年春正月乙酉禁蒙古军马扰民丙戌以姚枢为中书左丞改诸路监榷课税所为转运司甲午立十路鄂啰总管癸卯诏兴河南等处铁冶及设东平等路巡禁私盐军乙巳诏以诸路汉军鄂啰毋隶各万户管领其科征差税山东河南隶统军司东西两川隶征东元帅府陕西隶行户部敕总帅汪忠臣都元帅托迪及刘整等益兵付都元帅奇彻戍青居山仍以解州盐课给军粮丙午以玛哈穆特所俘济南老僧口之民为奴者付原籍为民辛亥申禁民畜兵器及蒙古军扰民者二月甲寅诏诸路官员子弟入质甲子车驾如开平以王德素充国信使刘公谅副之使于宋诘其稽留郝经之故诏诸路置局造军器私造者处死民闲所有不输官者与私造同三月戊辰遣扎玛里鼎和余东京癸卯初建太庙夏四月癸丑选益都兵千人充武卫军戊寅召窦默许衡乘驿赴开平五月乙酉初立枢密院以皇子燕王守中书令兼判枢密院事戊子升开平府为上都【按地理志开平府中统五年以阙廷所在加号上都纪则书于四年与志异考中统止有四年明年即改元至元盖志误也】辛卯诏立燕京平准库六月癸酉建帝尧庙于平阳以锡津为中书右丞相塔齐尔为中书左丞相秋七月癸未诏诸投下毋擅勾摄燕京路州县官吏乙酉禁野狐岭行营民毋入南北口纵畜牧损践桑稼戊戌诏弛河南沿边

军器之禁壬寅诏阿珠戒蒙古军不得以民田为牧地
八月辛亥置元帅府于大理命锡勒希总制鬼国大理两路兵部郎中刘芳前使大理至吐蕃遇害命恤其家戊午以阿陶商挺行枢密院于成都凡成都顺庆潼川都元帅府并听节制甲子敕诸臣传旨有疑者须覆奏壬申车驾至上都九月乙酉立漕运河渠司庚寅遣使征诸路赋税钱帛冬十一月甲申诏以岁不登量减阿苏奇■〈口耒〉各军行饷东平大名等路旱量减今岁田租丙戌享太庙以哈坦塔齐尔王盘张文谦行事十二月丁未朔以凤翔屯军汪惟正青居等军刁国器平阳军令益都元帅奇彻统之戊虎啸寨甲戌敕驸马阿尔布哈葡萄户依民例轮赋雅克喀斡达实爱满僧道种田入租贸易输税

至元元年春正月壬午敕诸路宣慰司非奉旨无辄入覲己亥立诸路平准库癸亥罢南边互市申严持军器贩马越境私商之禁二月辛亥敕选儒士编修国史译写经书起馆舍给俸以贍之壬子发北京都元帅阿哈所领军疏双塔漕渠癸酉车驾如上都弛边城军器之禁三月辛丑立漕运司以王光益为使夏四月己卯诏高丽国王王禕来朝上都修世见之礼辛酉以四川茶盐商酒竹课充军粮戊辰给新附军粮饷五月乙亥遣苏尔托音郭守敬行视西夏河渠庚辰敕剑州守将分军守剑门丁亥释宋私商五十七人给粮遣归其国己亥以中书右丞钮祜禄纳罕为平章政事六月戊申高丽国王王禕来朝秋七月丁酉龙门禹庙成命侍臣阿哈托音代祀庚子额呼布格与诸王玉隆哈实阿实达锡里济及其谋臣来归诏诸王皆太祖之裔并释不问其谋臣布拉噶等皆伏诛八月乙巳立诸路行中书省以中书左丞相耶律铸参知政事张惠等行省事诏新立条格省并州县定官吏员数分品从官职给俸禄颁公田计月日以考殿最均赋役招流移禁勿擅用官物勿以官物进献勿借易官钱勿擅科差役凡军马不得停泊村坊词讼不得隔越陈诉恤鳏寡劝农桑验雨泽平物价具盗贼囚徒起数月申省部定立诸王使臣驿传税赋差发不许擅招民户癸丑命僧子聪同议枢密院事复其姓刘氏易名秉忠拜太保参领中书省事乙卯改燕京为中都丁巳大赦改元九月壬申朔立翰林国史院以改元诏论高丽国并赦其境内辛巳车驾至上都冬十月壬寅朔高丽国王王禕来朝庚戌有事于太庙十一月壬辰罢领中书左右部并入中书省以领中书省左右部兼诸路都转运使知太府监事阿哈玛特为平章政事领中书省左右部兼诸路都转运使阿里为中书右丞十二月乙巳罢各投下达噜噶齐定中外百官仪从庚午诏罢枢密院断事官及各路鄂啰官立迁转法

二年春正月辛未朔日有食之癸酉徙镇海巴勒巴沁谦州诸色匠户于中都又徙诺观特木德克炮手人匠八百名赴中都造船运粮甲申诏申严越境贩马之樊乙酉以河南北荒田分给蒙古军耕种二月辛丑朔元帅按东与宋兵战于钓鱼山败之甲辰初立宫闱局丁巳车驾如上都癸亥并六部为四禁山东东路私煎硝磺甲子以蒙古人充各路达噜噶齐汉人充总管回回人充同知永为定制以同知东平路宣慰使保赫鼎为平章政事山东廉访使王晋为参知政事廉希宪商挺罢二月乙未罢南北互市括民闲南货官给其直以辽东饥发粟并钞赈之夏五月戊子禁北京平滦等处人捕猎庚寅诏西川山东南京等路戍边军屯田闰月癸亥移秦蜀行省于兴元丁卯分四亲王南京属州郑州隶哈坦钧州隶明埒睢州隶博啰齐蔡州隶海都他属县复还朝廷以平章政事赵璧行省于南京河南府大名顺德洺磁彰德怀孟等路平章政事廉希宪行省事于东平济南益都淄莱等路中书左丞姚枢行省事于西京平阳太原等路诏诸路州府户不满千者量加并省各投下者并入所隶州城其散府州郡户少者不须更设录事司及司候司附郭县止令州府官兼领六月戊寅移山东统军司于沂州己卯王晋罢秋七月辛酉赈益都饥民癸卯安南国王陈光昞遣使奉表来贡八月己卯诸宰职皆罢以安图为中书右丞相巴延为中书左丞相戊子召许衡于怀孟杨诚于益都车驾至自上都冬十月己卯享于太庙戊子诏随路私商曾入南界者首实免罪充军十二月己巳省并州县凡二百二十余所庚午宋子贞言朝省之政不宜数行数改又刑部所掌事于人命尚书严忠范年少宜选老于刑名者为之又请罢北京行中书省别立宣慰司以控制东北州郡并从之

三年春正月丙午遣使抚谕四川将吏军民壬子立制国用使司以阿哈玛特为使二月丙寅复以廉希宪宋子贞为平章政事张文谦复为中书左丞史天泽为枢密副使壬午以中书丞张易同知制国用使司事张惠为制国用副使癸未车驾如上都甲申罢西夏行省立宣慰司初制太常礼乐工冠服立东京广宁懿州开元率宾海兰博索等路宣慰司三月己未王晋及侍中和尔扎达济南益都转运使王明以隐匿盐课伏诛夏四月丁卯亳州水军千户胡进等与宋人战荆山败之五月乙未遣使诸路虑囚丙午浚西夏中兴汉延唐来等渠丙辰罢益都行省蠲平滦益都质子户赋税之半六月丁卯封诺木欢为北平王丙子立漕运司戊寅申严陕西河南竹禁立拱卫司秋七月丙申罢息州安抚司丙午遣使祀五岳四渎 【按是时南北未一五岳四渎有不在其封内者所谓遣使盖遥

祭耳】甲寅添内外巡兵八月丁卯以兵部侍郎赫德礼部侍郎殷弘使日本戊子阿珠略地蕲黄俘获甚众九月戊午车驾至自上都冬十月丁丑徙平阳籍所于京师太庙成定为八室申禁京畿畋猎十一月辛卯初给京府州县司官吏俸及职田戊戌濒御河立漕仓丁未申严杀牛马之禁宋子贞致仕辛亥以呼图克岱尔为中书左丞相禁天文图讖等书十二月庚申给诸王哈必齐行军印辛酉改四川行枢密院为行中书省以赛音谔德齐伊苏岱尔等签行中书省事丁亥凿金口导卢沟水以漕西山木石

四年春正月癸卯修曲阜宣圣庙乙巳百济遣其臣梁浩来朝禁僧官侵理民讼辛亥以赵璧为枢密副使立诸路洞冶都总管府戊午城中都【中都元史作大都按地理志燕京至元元年改中都四年始于中都之东北置今城而迁都焉九年改大都此时尚未有大都之名盖沿误也谨据改】二月庚申钮祜禄纳罕复为平章政事阿里复为中书右丞丁卯改籍所为弘文院以马天昭知院事丁亥车驾如上都诏陕西行省招谕宋人三月己丑复以耶律铸为中书左丞相壬寅安图言比者省官员数平章左丞各一员今丞相五人素无此例臣等议拟设二丞相臣等蒙古人三员惟陛下所命诏以安图为长史天泽次之其余蒙古汉人参用勿令员数过多又诏宜用老成人如姚枢等一二员同议省事丁巳耶律铸制宫县乐成夏四月甲子筑宫城五月丁亥朔日有食之敕上都重建孔子庙六月壬戌以中都顺天东平等处蚕灾免民户丝料轻重有差乙丑复以史天泽为中书左丞相呼图克岱尔耶律铸并降平章政事巴延降中书右丞廉希宪降中书左丞阿里张文谦并降参知政事秋七月壬寅申禁京畿牧地之禁八月丙寅复立宣徽院以前中书右丞相锡津为使丁丑封子呼克齐为云南王阿珠略地至襄阳宋人来拒阿珠击败之九月壬辰作玉殿于广寒殿中乙未总帅汪良臣请立寨于穆章德山控扼江南以当钓鱼之冲从之戊申以许衡为国子祭酒癸丑车驾至自上都冬十月庚辰定品官子孙荫叙格十一月乙酉享于太庙十二月庚辰立诸位谔都总管府

五年春正月辛丑敕陕西五路四川行省造战舰付刘整闰月戊午以陈亳顷蔡等处屯田户充军二月己丑给河南山东贫乏军士钞三月丙寅罢诸路四品以下子孙入质者丁丑敕阿哩等诣军前阅视军器夏四月壬寅遣使祀岳渎五月辛亥朔以太医院拱卫司教坊司及尚食尚果尚酝三局隶宣徽院癸亥都元帅伯嘉努拔宋嘉定五花石城白马三砦秋七月癸丑立御史台以右丞相塔齐尔为御史大夫诏谕之

曰台官职在直言朕或有未当其极言无隐戊戌罢西夏宣抚司庚午省诸路打捕鹰坊工匠洞冶总管府令转运司兼领之丙子立西夏惠民局九月丁巳阿珠统兵围樊城己丑车驾至自上都冬十月戊寅朔日有食之己卯敕中书省枢密院凡有事与御史台官同奏庚寅敕从臣托果斯等录毛诗孟子论语乙未享于太庙以和尔果斯图古勒充翰林待制兼起居注戊戌宫城成刘秉忠辞领中书省事许之为太保如故十一月庚申宋兵自襄阳来攻沿山诸寨阿珠分诸军御之斩获甚众十二月戊寅敕二分二至及圣诞节日祭星于司天台

六年春正月戊午阿珠军入宋境至复州德安府荆山等处俘获甚众甲戌赈益都淄莱及恩州饥民敕史天泽与驸马呼喇珠董师襄阳二月壬午立四道提刑按察司丁丑诏颁行新制蒙古字丁酉签民兵赴襄阳振谦州人匠敕鞍鞞箭镞不得饰以黄金开元等路饥减户赋秋税三月戊午振曹州饥筑堡鹿门山夏四月辛巳制玉玺十纽甲午遣使祀岳渎振大名等路饥五月丙午振东平路饥六月辛巳克们征建都败续丁亥免河南北山东诸郡真定等路赋役壬寅河珠扼宋万山射垛冈路癸卯振东昌路饥七月庚申水军千户邢德立等擒宋荆鄂都统唐永坚己巳立诸路蒙古字学诏理冤滞诏谕宋官吏军民以不欲用兵之意宋将夏贵率兵船至鹿门山舟师解汝楫李庭败之八月高丽废国王禘立其弟湄遣鄂尔多斯布哈李谔等往问之九月壬戌免丰州云内东胜租赋辛未以呼喇珠史天泽并平章政事十月宋馈襄阳盐粮获之十一月签王綽洪察尔球军定高丽庚午敕诸路月给鰥寡废疾人米高丽王禘复位诏入覲十二月戊子筑东浑河堤己丑作佛事于太庙七昼夜振高唐固安二州饥

七年春正月丙午耶律铸廉希宠罢立尚书省罢制国用使司以平章政事呼图克岱尔为中书右丞相国子祭酒许衡为中书左丞相制国用使阿哈玛特平章尚书省事同知制国用使司事张易同平章尚书省事制国用使司副使张惠签制国用使司事李尧咨敏珠尔丹并参知尚书省事二月辛未朔以前中书右丞相巴延为枢密副使甲戌筑昭应宫于高粱河丙子帝御行宫观刘秉忠博啰许衡及太常卿徐世隆所起朝仪丁丑以岁饥罢修筑宫城役夫甲申置尚书省署壬辰立司农司以参知政事张文谦为卿设四道巡行劝农司乙未宋襄阳出步骑万余人兵船百余艘来趋万山堡万户张弘范千户托克托击败之高丽国王王禘来朝三月庚子朔日有食之改河南等路及陕西五路西蜀四川东京等路行中书省为行尚书省甲寅车驾如上都丙辰浚武县御河夏四月壬午设

诸路蒙古字学教授敕诸路达噜噶齐子弟荫叙癸未
定军官等级以所管军士为差五月癸卯陕西签省伊苏岱尔严忠范与东西川统军司
率兵及宋兵战于嘉定重庆钓鱼山马湖江皆败之拔
其三寨擒都统牛宣丁未以同知枢密院事哈达为平章政事丙辰改宣徽院为光禄司
以宣徽使锡津为光禄使六月庚辰敕戍军还有乏食
及病者令所过州城村坊主者给食医药丙申立藉田中都东南郊禁民擅入宋境剽掠
秋七月辛丑设上林署乙丑阅实诸路炮手户都元帅
伊苏岱尔等略地光州败宋兵于金刚台以辽东开元等路总管府兼本路转运司事八
月戊辰朔筑环城以逼襄阳己巳赈应昌府饥庚辰以
御史大夫塔齐尔同知枢密院事御史中丞特济为御史大夫九月丙寅括河西户口定
田税冬十月癸酉敕宗庙祭祀祝文书以国字乙亥宋
人攻莒州乙酉享于太庙己丑敕太庙牲牢用野豕时果勿市取之内园车驾至自上都
赈山东淄莱路饥闰十一月戊辰禁缁段织日月龙虎
及以龙犀饰马鞍者癸未敕西夏管民官禁僧徒冒据民田十二月丙申朔改司农司为
大司农司添设巡行劝农使副各四员以御史中丞博
啰兼大司农卿以陕西等路宣抚使赵良弼为秘书监充国信使使日本敕岁祀太社太
稷风师雨师雷师辛酉建大护国仁王寺于高粱河敕
更定僧服色

钦定续通志卷五十八

●钦定续通志卷五十九 元纪三

元纪 【三】

世祖 【二】

○世祖二

至元八年春正月己卯以同签河南等路行中书省事阿尔哈雅参知尚书省事壬
辰敕诸路鳏寡孤独疾病不能自存者官给庐舍薪米
高丽国王王禛遣使奉表为世子愾请昏诏禁边将受赂放军及科敛赈北京益都饥二
月乙未朔定民间婚聘礼币贵贱有差丁酉发中都真
定顺天河间平滦民二万八千余人筑宫城己亥罢诸路转运司入总管府以尚书省奏
定条画颁天下以中书左丞东京等路行尚书省事赵
璧为中书右丞乙巳以沙州瓜州鹰坊人充军戊申诏以治事日程谕中外官吏己未敕
军官佩金银符其民官工匠所佩并拘入勿复给辛酉
赈西京饥三月甲申车驾如上都乙酉许衡以老疾辞中书机务除集贤大学士国子祭
酒己丑命尚书省阅实天下户口颁条画谕天下赈益
都饥夏四月戊午阿珠率万户阿唎罕等与宋将范文虎等战于湍滩败之获统制朱胜

等百余人五月乙丑以东道兵方围襄阳命赛音谔德
齐郑鼎提兵水陆并进趋嘉定汪良臣彭天祥出重庆扎拉布哈出泸州奇尔济苏出汝
州以牵制宋师丙寅牢鱼国来贡丁丑赈蔚州饥己卯
命史天泽平章军国重事辛巳令蒙古官子弟好学者兼习算术六月甲午敕枢密院凡
军事径奏不必经由尚书省其千钱粮者议之癸卯宋
将范文虎率苏刘义夏松等舟师十万援襄阳阿珠率诸将击败之平章哈达又遣万户
解汝楫等邀击擒其总管朱日新郑皋大破之辛亥敕
凡管民官所领钱谷公事并俟年终考较乙卯招集河西鄂端阿济尔噶等处居民秋七
月壬戌朔设回回司天台官属丁卯以国王特讷克行
尚书省于北京辽东等路乙酉宋将来兴国攻北丈山营阿珠击破之八月壬辰朔日有
食之壬子车驾至自上都已未圣诞节初立内外仗及
云和署乐位东川统兵司引兵攻宋铜钹寨守寨总管李庆等降以庆知梁山军事九月
壬戌朔阿珠所部兵略地汉南丙寅罢陕西五路西蜀
四川行尚书省以伊苏岱尔行四川尚书省事于兴元京兆等路直隶尚书省败宋军于
涡河丙子敕今岁享太庙毋用牺牛壬午宋兵攻胶州
千户蒋德等逆战败之俘统制范广等五十余人癸未诏以四川民力困弊免茶盐等课
税以军民田租给沿边军食仍敕有司自今有言茶盐
之利者以违制论冬十月丁酉享于太庙十一月辛酉朔敕品官子孙僇直乙亥禁行金
泰和律建国号曰大元丙戌置四川行尚书省于成都
十二月辛卯朔诏天下兴起国子学

九年春正月甲子并尚书省入中书省以平章尚书省事阿哈玛特同平章尚书省
事张易并中书平章政事参知尚书政事张惠为中书
左丞参知尚书省事李尧咨敏珠尔丹并参知中书政事庚辰改北京中兴四川河南四
路行尚书省为行中书省京兆复立行省壬午改山东
东路都元帅府统军司为行枢密院以伊苏岱尔达春并为行枢密院副使二月辛卯诏
扎尔古齐乃太祖开创之始所置位百司右其赐银印
立左右司壬辰改中都为大都庚子建中书省于大都戊申始祭先农如祭社之仪诏诸
路开浚水利车驾如上都三月甲戌括民间四教经焚
之赈济南路饥夏四月甲寅赈大都路饥五月庚午减铁冶户罢西番金银矿户为民六
月己亥山东路行枢密院达春攻破射龙沟五港口盐
场白头河等城堡杀宋兵三百余人秋七月丁巳朔禁私鬻回回厯赈硕勒达部饥戊寅
集都城僧诵大藏经九会壬午和尔果斯奏蒙古字设
国子学而汉官子弟未有学者及官府文移犹有辉和尔字诏自今凡诏令并以蒙古字
行仍遣百官子弟入学八月丙戌朔日有食之戊子立

羣牧所癸卯千户崔松败宋襄阳援兵斩其将张顺乙巳车驾至自上都癸丑賑辽东等路饥九月甲子宋襄阳将张贵战阿珠阿尔哈雅等败之生获贵及将士二千余人戊寅賑益都路饥冬十月丙戌朔封子莽噶拉木为安西王赐京兆为分地驻兵六盘山遣使持诏諭巴勒布国痕都斯坦国壬辰享于太庙癸巳以赵璧为平章政事张易为枢密副使乙未筑浑河堤十一月壬戌诸王哲伯特穆尔筑新城成賜名永昌府辛未召高陆儒者杨恭懿不至己卯并中书省左右司为一参知行省政事阿尔哈雅言襄阳受围久未下宜先攻樊城断其声援从之十二月乙酉朔诏诸路府州司县达噜噶齐管民长官兼管诸军鄂啰辛亥宋将咎万寿攻成都签省严忠范战失利诏逮至京

十年春正月癸亥阿尔哈雅等攻樊城拔之丁卯立秘书监二月丙戌以皇后皇太子受册宝遣太常卿哈坦告于太庙丁未宋京西安抚使知襄阳府吕文焕以城降三月甲寅朔申諭大司农司遣使巡行劝课丙寅帝御广寒殿遣摄太尉中书右丞相安图授皇后鸿吉哩氏玉册玉宝遣摄太尉同知枢密院事巴延授皇太子珍戩玉册金宝辛未以皇后皇太子受册宝诏告天下癸酉以前中书左丞相耶律铸平章军国重事中书左丞张惠为中书右丞车驾如上都夏四月癸未朔阿尔哈雅以吕文焕入朝授文焕昭勇大将军侍卫亲军都指挥使襄汉大都督罢河南等路行中书省以平章军国重事史天泽平章政事阿珠参知政事阿尔哈雅行荆湖等路枢密院事镇襄阳左丞相哈坦参知行中书省事刘整山东都元帅达春董文炳行淮西等路枢密院事守正阳天泽等陞辞諭以襄阳之南多有堡寨宜乘机进取仍以钞五千錠賜将士及賑新附军民五月壬子定内外官复旧制三岁一迁戊辰诏天下狱囚除杀人者待报余并释之六月乙酉賑诸王塔齐尔部民饥丁亥以各路弓矢甲匠并隶军器监免大都南京两路赋役辛卯汰陕西贫难军癸巳敕襄阳造战舰丁酉置光州等处招讨司闰月己巳罢东西两川统军司秋七月庚寅以河南水发粟賑之仍免今年田租省西凉府入永昌路八月庚戌朔赦前所释诸路囚自至大都者九月辛巳以赫作为平章政事丙午车驾至自上都冬十月乙卯享于太庙丙辰敕巴延和尔果斯以史夫泽姚枢所定新格参考行之十二月甲寅宋夏贵攻正阳淮西行院击走之壬戌召阿珠同吕文焕入覲

十一年春正月己卯朔宫阙告成帝始御正殿受皇太子诸王百官朝贺庚寅初立军官以功升散官格免诸路军杂赋丙午彰德赵当道等以谋逆伏诛诏中书省签军十万人二月壬申造战船八百艘于汴梁以廉希宪为中

书右丞北京等处行中书省事车驾如上都三月己卯
诏以劝课农桑谕高丽国王王植仍命安抚高丽军民总管洪俊奇提点农事辛卯改荆
湖淮西二行枢密院为二行中书省巴延史天泽并为
左丞相【按巴延为左丞相续通鉴纲目在正月】阿珠为平章政事阿尔哈雅为右
丞吕文焕为参知政事行中书省于荆湖哈达为左丞
相刘整为左丞达春董文纳为参知政事行中书省于淮西夏四月癸丑初建东宫五月
丙申皇女呼图克库哩页额实下嫁高丽世子王愷六
月庚申问罪于宋甲子分遣孟古岱巴图伯嘉努率武卫军南征丙寅以哈喇哈斯为中
书左丞崔斌参知政事仍令河南道宣慰司事秋七月
乙亥朔敕山北辽东道提刑按察使乌鲁斯布哈同参知政事廉希宪行省北京国王特
纳克母署事有大事则希宪等就议癸未宋主禛殂子
■〈显，去页〉嗣位【据宋史增】癸巳高丽国王王植薨遣同知上都留守司事
张焕册其子愷为高丽国王乙未巴延等陛辞帝谕之
曰古之善取江南者唯曹彬一人汝能不杀是吾曹彬也八月甲辰朔贫诸路立社稷坛
壝仪式丁未复改淮西行中书省为行枢密院甲寅弛
河南军器之禁九月丙戌行中书省以大军发襄阳檄谕宋州郡官吏将校士民癸巳巴
延攻郢州万胜堡拔之车驾至自上都冬十月己酉享
于太庙乙丑巴延督诸将破沙洋堡丙寅攻新城拔之十一月壬午敕四川行枢密院伊
苏岱尔取嘉定府乙酉军次复州宋安抚使翟贵出降
丁亥诏宋嘉定安抚咎万寿及凡守城将校纳款来降与避罪及背主叛亡者悉从原免
癸巳东川元帅杨文安与青居山蒙古万户克呼克额
济类等会兵达州直趋云安军至马湖江与宋兵遇大破之遂拔云安罗拱高阳城堡十
二月丙午巴延大军次汉口遂入大江乙卯阿尔哈雅
督万户张弘范等攻武矶堡拔之丁巳巴延登武矾山宋荆湖宣抚使朱禕孙遁归江陵
己未师次鄂州未直秘阁湖北提举张晏然权知汉阳
军王仪知安德府来兴国并以城降荆鄂诸军都统程鹏飞以本军降巴延承制以宋鄂
州民兵总制王该知鄂州事王仪来兴国仍旧任撤其
戍兵分隶诸军禁侵暴凡逃民悉纵还之以阿尔哈雅兵镇鄂汉巴延阿珠将大军水陆
东下以侍卫亲军都指挥使图们岱为诸军殿以襄阳
路总管贾居贞为宣抚使商议行中书省事

十二年春正月甲戌大军次黄州宋沿江制置副使知黄州陈奕及其子知涟州岩
皆以城降乙亥东川副都元帅张德润拔礼义城癸未
师次蕲州宋安抚使管景模以城降丙戌次江州宋江西安抚使知江州钱真孙及淮西
路六安军曹明并迎降己丑选蒙古辉和尔汉人十四

人赴军前为新附州郡民官乙未遣兵部尚书廉希贤工部侍郎严忠范秘书监丞柴紫芝奉国书使于宋二月癸卯大军次安庆府宋殿前都指挥使知安庆府范文虎出降甲辰以中书右丞博罗罕为淮南都元帅中书右丞阿里左右副都元帅仍命阿里萨奇苏等各部蒙古汉军会邳州又发蕲宿戍兵将河南战船千艘赴之立后土祠于平阳之临汾伏羲女娲舜汤河渚等庙于河中解州洪洞赵城丙午大军次池州宋都统制张林以城降丁未禁无籍自效军俘掠新附军民戊申诏谕江黄鄂岳汉阳安庆等处归附官吏士民军匠僧道人等令各安己业如镇守官吏妄有骚扰诣行中书省陈告史天泽卒召游显杨庭训赴阙壬子宋都督贾似道遣计议宋京承宣使阮思聪诣行中书省请还己降州郡约贡岁币巴延不许庚申遣塔布岱干鲁召鄂汉降臣张晏然等赴阙辛酉师次丁家洲宋贾以道等率舟师拒战巴延命举巨炮击之宋兵大溃甲子师次芜湖宋江东运判知太平州孟之縉降都元帅博罗罕次海州宋知州丁顺以城降乙丑遣使谕江陵府制置司及高达已下官吏军民宋福州团练使知特摩道事农士贵率知那寡州农天或知阿吉州农昌成知上林州农道贤州县三十有七户十万诣云南行中书省请降戊辰师次采石宋知和州王善降都元帅博罗罕次涟州宋知州孙嗣武降庚午师次建康宋都统权兵马司事徐王荣等以城降贾似道遣总管段佑送国信使郝经刘人杰等来归车驾如上都三月壬申朔宋镇江府马军总管石祖忠以城降行中书省分遣淮西行枢密院安塔哈驻京口甲戌宋江阴签判李世修以城降丙子国信使廉希贤等至建康诏谕诸将各守营垒毋得妄有侵掠宋知滁州王文虎降庚辰知盩国府颜绍卿以城降江东路得府二州五军二县四十三户八十三万一千八百五十二口一百九十一万九千一百六丙戌宋常州安抚戴之泰通判王虎臣以城降国信使廉希贤严忠范等至宋广德军独松关为宋人所杀丁亥免诸路军杂赋庚子分置翰林院专掌蒙古文字以翰林学士承旨萨迪密迪哩主之其翰林兼国史院仍旧纂修国史典制诰备顾问以翰林学士承旨兼修起居注和尔果斯主之辛丑敕阿珠分兵取扬州夏四月丙午阿尔哈雅驻兵江陵城南沙市攻其栅破之宋知荆门军刘懋降丁未阿尔哈雅遣郎中张鼎赍诏入江陵宋荆湖制置朱禕孙【按续通鉴纲目咸淳十年以朱禕孙为宣抚使兼知江陵府元史阿尔哈雅转载宋禕孙降元亦称宣抚于此乃云荆湖制置今仍原文而识其异】湖北制置副使高达京西湖北提刑青阳梦炎李湜俱出降遂入江陵分道遣使招谕未下州郡宋知峡州赵真知归州赵仔权

澧州安抚毛浚 【澧州元史误丰州按文分谕江陵系宋荆湖北路考宋史地理志澧州与峡州归州常德府皆属荆湖北路无丰州之名今

改正】 常德府新城总制鲁希文旧城权知府事周公明等悉以城降辛亥遣使招谕宋五郡镇抚使吕文福辛酉宋郢州安抚赵孟复州安抚

翟贵降癸亥阿珠驻师瓜洲宋淮东制置司尽焚城中庐舍迁其民而去丙寅立尚牧监免京畿百姓今岁丝银丁卯以大司农御史中丞博罗

为御史大夫罢随路巡行劝农官以其事入提刑按察司括诸寺阑遗人口庚午以高达为参知政事五月辛未诏中书右丞廉希宪参知政事

托博和罗哈图行中书省于江陵府阿尔哈雅还鄂州辛巳宋知辰州吕文兴黄仙洞行随州事傅安国仙人寨行均州事徐鼎知沅州文用圭

知靖州康玉知房州李鉴等皆以城降荆南湖北路凡得府三州十一军四县五十七户八十万三千四百一十五口一百一十四万三千八百

六十丁亥召巴延赴阙庚寅宋五郡镇抚使吕文福来降壬辰宋都统制刘师勇殿帅张彦据常州六月庚子朔日有食之宋嘉定安抚使咎万

寿以城降赐名顺甲午以万户阿喽罕为行中书省参知政事辛酉宋潼川安抚使知江安州梅应春以城降丙寅宋扬州都统姜才副将张林

乘夜攻扬子桥木栅阿珠自瓜洲以兵赴援大败之生擒张林秋七月庚午朔阿珠集行省诸翼万户兵船于瓜洲安塔哈董文炳集行院诸翼

万户兵船于西津渡宋沿江制置使赵溍枢密都承旨张世杰知泰州孙虎臣等陈舟师于焦山南北阿珠分遣万户张弘范等击之宋师大败

壬午敕左丞相巴延率诸将直趋临安右丞阿尔哈雅取湖南蒙古万户宋都木达汉军万户武秀张荣实李恒兵部尚书吕师夔行都元帅府

取江西罢淮西行枢密院以右丞安塔哈参政董文炳同署行中书省事甲午以巴延为中书右丞相阿珠为中书左丞相八月己亥朔 【按

八月己亥下元史脱朔字考七月庚午朔至己亥方三十日其为朔日无疑今增】 免北京西京陕西等路今岁丝银癸卯巴延陛辞南行奉诏

谕宋君臣相率来附则赵氏族属可保无虞宗庙悉许如故辛酉车驾至上都九月庚午禁私造铜器甲午宋扬州都统姜才将步骑兵攻湾

头堡阿珠安塔哈击败之丙申以伊实特穆尔为御史大夫括江南诸郡书版及临安秘书省乾坤宝典等书冬十月戊戌朔享于太庙十一月

丁卯阿尔哈雅以军攻潭州 【按阿尔哈雅攻潭州续通鉴纲目载在十月与元史异】 乙亥巴延分军为三趋临安丙子宋权融宜钦三州

总管岑从毅沿边巡检使广西节制军马利瓦伊屏诣云南行中书省降己卯宋都木达等军次隆兴府宋江西转运使知府刘盘以城降江西诸

郡相继归附得府州六军四县五十六户一百五万一千八百一十九口二百七万六千四百壬午巴延攻常州拔之乙酉阿喽罕克广德趋独松关庚寅巴延遣降人游介实奉玺书副本使于宋仍以书谕宋大臣甲午以高丽国官制僭滥遣使谕旨凡省院台部官名爵号与朝廷相类者改正之十二月辛丑董文炳军次许浦宋都统制祁安以本军降宋主为书介国信副使严忠范侄焕请和甲辰巴延次平江府宋都统王邦杰以城降乙巳免江陵等处今岁田租庚戌【元史误作庚子兹据宋史改】宋主遣尚书夏士林右史陆秀夫奉书称侄乞和甲子答宋国主书令其来降丙寅阿喽罕军次安吉州宋安抚使赵与可以城降

十三年春正月丁卯朔克潭州湖南州郡相继降附得府一州六军二县四十户五十六万一千一百一十二口百五十三万七千七百四十巴延次嘉兴宋安抚刘汉杰以城降【按宋史德佑二年载嘉兴守刘汉杰以城降元续通鉴纲目亦载知嘉兴府刘汉杰元史独以安抚称后又载汉杰仍为其府安抚使考宋史职官志安抚使一条云中兴以后出守者亦可兼使或汉杰知嘉兴府时兼摄安抚亦属史家互纪之法】董文炳至乍浦宋统制官刘英以本军降辛未文炳至海盐宋知县事王与贤及澈浦镇统制胡全福建路马步军总管沈世隆皆降立回易库于诸路癸酉宋相陈宜中遣军器监刘庭瑞赍宋主称藩表章诣军前稟议又致宜中等书于巴延巴延以书答之乙亥宋复遣监察御史刘岳赍宋主称藩表至军前且致书巴延为宗社生灵请命丁丑宋遣都统洪模赍陈宜中吴坚等书请俟宗长福王至同诣军前戊寅巴延以军出嘉兴府留万户呼图克千户王图烈齐戍之以刘汉杰仍为其府安抚使辛巳军次崇德县宋遣侍郎刘庭瑞都统洪模来迓壬午军次长安镇董文炳以兵来会宋陈宜中吴坚等违约不至癸未军次临平镇甲申次皋亭山阿喽罕以兵来会宋主遣保康军承宣使尹甫和州防御使吉甫等赍传国玺及降表来诣军前巴延受之复遣囊嘉特以赵尹甫贾余庆等还临安召宰相出议降事乙酉师次临平北十五里宋陈宜中张世杰苏刘义刘师勇等挟益广二王出嘉会门渡浙江遁去巴延使阿喽罕董文炳范文虎率诸军先据守钱塘口以劲兵追陈宜中不及而还丙戌巴延下令禁军士入城违者以军法从事遣文炳赍黄榜安谕临安中外军民俾安堵如故巴延又遣宣抚程鹏飞计议孙鼎亨囊嘉特洪君祥入宫安谕宋太皇太后戊子宋太皇太后谢氏遣其丞相吴坚文天祥枢密谢堂安抚贾余庆中贵邓惟善来见巴延于明因寺巴延留天祥不遣且以其降表不称臣仍书宋号遣程鹏飞洪君祥偕来使贾余庆复往易之

己丑军次湖州市遣千户囊嘉特省掾王佑赍传国玺
赴阙辛卯张弘范孟祺程鹏飞赍所易宋主称臣降表至军前二月丁酉朔 【按元史不
书朔考宋史瀛国公纪德佑二年二月丁酉下有朔
字以正月丁卯朔推之亦合今据增】 诏刘颉程德辉招淮西制置使夏己亥克临江军
庚子宋文武百官出临安府诣行中书省各以其职来
见巴延承制以临安为两浙大都督府都督孟古岱范文虎入城视事辛丑巴延令张惠
阿喽罕董文炳左右司官石天麟杨晦等入城取军民
钱谷之数阅实仓库收百官诰命符印悉罢宋官府散免侍卫禁军宋主■（显，去页）
遣其右相贾余庆等充祈请使巴延以文天祥同行
两浙路得府八州六军一县八十一户二百九十八万三千六百七十二口五百六十九
万二千六百五十丁未诏谕临安新附府州司县官吏
军民人等曰间者行中书省右丞相巴延遣使来奏宋母后幼主暨诸大臣百官已于正
月十八日赍玺绶奉表降附朕惟自古降王必有朝覲
之礼已遣使特往迎致尔等各守职业其勿妄生疑畏凡归附前犯悉从原免公逋欠不
得征理一应抗拒王师及逃亡啸聚者并赦其罪百官
有司诸王邸第三学寺监秘书省史馆及禁卫诸司各宜安居所在山林河泊除巨木花果
外余物权免征税秘书省图书太常寺祭器乐器法服
乐工鹵簿仪卫宗正谱牒天文地理图册九典故文字并户口版籍尽仰收拾前代圣贤
后高尚儒医僧道卜筮通晓天文历数并山林隐逸名
士仰所在官司具其名闻名山大川寺观庙宇及前代名人遗迹不许折毁鰥寡孤独不
能自存之人量加贍给戊申立浙东西宣抚司于临安
以户部尚书麦归秘书监焦友直为宣慰使吏部侍郎杨居宽同知宣慰司事并兼知临
安府事丁巳命焦友直括宋秘书省禁书图籍戊午祀
先农于东郊宋淮西制置夏贵以淮西诸郡来降淮西路得府二州六军四县三十四户
五十一万三千八百二十七口一百二万二千三百四
十九庚申召巴延偕宋君臣入朝辛酉车驾如上都设资戒大会于顺德府开元寺巴延
遣本布周青招泉州蒲寿庚寿晟兄弟甲子董文炳索
多发宋随朝文士刘裒然及三学诸生赴京师帝既平宋召宋诸将问曰尔等何降之易
耶对曰宋有强臣贾似道擅国柄每优礼文士而独轻
武臣臣等久积不平所以望风归款也帝命董文忠答之曰借使似道实轻汝曹特似道
一人之过耳汝主何负焉正如所言则似道之轻汝也
固宜三月丁卯巴延入临安遣郎中孟祺籍宋太庙四祖殿景灵宫礼乐器册宝暨郊天
仪仗及秘书省国子监国史院学士院太常寺图书祭
器乐器等物甲戌文天祥自镇江遁去乙亥巴延等发临安丁丑安塔哈阿喽罕董文炳

趋宋主■〈显，去页〉同太后入覲太皇太后谢氏
以疾留戊寅敕淮西庐州置总管万户府以中书右丞河南等路宣慰使哈喇哈斯襄阳
管军万户实喇并行府事庚辰囊嘉特以宋玉玺来上
乙酉赣吉袁南安四郡内附闰月丙申置宣慰司于济甯路掌印造交钞供给江南军储
东川行枢密院总帅汪惟正略地涪州克山寨溪洞凡
二十有三所丁酉诏湖广阿尔哈雅呼图克特穆尔赴阙令托博和啰噶图崔斌并留后
鄂州辛亥命副枢张易遣宋降臣吴坚夏贵等赴上都
戊午淮西万户府招降方山等六寨甲子以中书省左右司郎中郝禎参知政事夏四月
戊辰以河南兵事未息开元路民饥并弛正月五月屠
杀之禁丙子省东川行枢密院及成都经略司以其事入西川行院壬午召嗣汉天师张
宗演赴阙乙酉召昭文馆大学士姚枢翰林学士王盘
翰林侍讲学士图坦公履赴上都庚寅修太庙以北京行中书省廉希宪为中书右丞行
中书省事于荆南府五月乙未朔巴延以宋主■〈显
, 去页〉至上都制授■〈显，去页〉开府仪同三司检校大司徒封瀛国公以平宋
遣官告天地祖宗于上都之近郊遣使代祀岳渎己亥
罢两浙宣慰司以孟古岱范文虎仍行两浙大都督府事庚子定度量癸卯复沂莒胶密
甯海五州所括民为防城军者为民仍免租徭二年乙
巳阿珠遣总管陈杰攻拔泰州之新城遣万户乌玛喇守之以逼泰州丁未宋扬州都统
姜才攻湾头堡阿尔彬击走之戊申宋冯都统等自真
州率兵袭瓜洲阿珠遣万户实喇罕阿都齐等出战大败之六月己巳以孔子五十三世
孙曲阜县尹孔治兼权主祀事辛未命阿尔哈雅征广
西壬申罢两浙大都督府立行尚书省于鄂州临安设诸路宣慰司以行省官为之并带
相衔其立行省者不立宣慰司甲戌以大明厯浸差命
太子赞善王恂与江南日官置局更造新厯以枢密副使张易董其事宋扬州都统姜才
夜率兵趋丁村堡守将史弼章齐出战阿里都督陈岩
及巴延彻尔踵至大破之戊寅诏作平金平宋录及诸国臣服传记仍命平章军国重事
耶律铸监修国史壬辰下诏招谕宋扬州制置李庭芝
以次军官及通泰真滁高邮所在官员又诏谕陈宜中张世杰苏刘义刘师勇等使降李
庭芝留朱焕守扬州与姜才率步骑五千走泰州阿珠
督右丞阿里万户刘国杰围之以户部尚书张澍参知政事行中书省于北京秋七月乙
未行中书省左右司郎中孟祺以金玉宝及牌印来上
命太府监收之乙巳朱焕以扬州降乙卯宋泰州守将孙良臣与李庭芝帐下卒刘发郑
俊开北门以降执李庭芝姜才系扬州狱【按孙良
臣续通鉴纲目作孙贵又载胡维孝而不及刘发郑俊盖史家互有详略也】丙辰阿珠

以总管乌玛喇等守泰州通滁高邮等处相继来附淮
东路得州十六县三十三户五十四万二千六百二十四口一百八万三千二百一十七
以中书右丞阿尔哈雅为平章政事签书枢密院事淮
东行枢密院拜奇页勒密实为中书右丞参知政事董文炳为中书左丞淮东左副都元
帅达春两浙大都督范文虎江东江西大都督知江州
吕师夔淮东淮西左副都元帅陈岩并参知政事八月己巳穿武清蒙村漕渠敕汉军都
元帅库岱李廷将侍卫军二千人西征乙亥斩宋淮
东制置使李庭芝都统姜才于扬州市庚辰罢襄阳统军司车驾至自上都遣太常卿托
东斯以铜爵一豆二献于太庙以四万户总管鄂啰齐
参知政事九月壬辰朔命国师额琳沁作佛事于太庙己亥享于太庙癸卯以平宋赦天
下丙午敕常德等府贡包茅丁未命有司隳沿淮城垒
辛酉召宋宗臣鄂州教授赵与■〈票上灬下〉赴阙【按■〈票上灬下〉字符史误
作票考宋史宗室世系表无名票者惟燕王德昭之
后有赵与■〈票上灬下〉见于元史列传尝为鄂州教授即其人也今据改】设资戒
会于京师阿珠入覲江淮及浙东西湖南北等路得府
三十七州一百二十八关一监一县七百三十三户九百三十七万四百七十二口千九
百七十二万一千一十五冬十月丁亥两浙宣抚使焦
友直以临安籍图画阴阳秘书来上戊子淮西安抚使夏贵请入覲乞令其孙贻孙权
领宣抚司事从之以淮东左副都元帅阿里为平章政
事河南等路宣慰使哈喇哈斯为中书右丞兵部尚书王仪吏部尚书兼临安府安抚使
杨镇河南河北道提刑按察使密里呼忻并参知政事
参知政事陈岩行中书省事于淮东十一月戊申阿喽罕克处州旋破建宁府邵武军癸
丑并省内外诸司宋主是航海趋潮州高丽国王王愷
遣其臣判秘书寺朱悦来告更名晷十二月辛酉朔【按辛酉元史误辛卯据宋史益广
二王传改】以十四年历日赐高丽戊辰宋主昱次
惠州乙亥定江南所设官府庚寅诏谕浙东西江东西淮东西湖南北府州军县官吏军
民昔以万户千户渔夺其民致令逃散令悉以人民归
之原籍州县凡管军将校及宋官吏有以势力夺民田庐产业者俾各归其主凡故宋繁
冗科差圣节上供经总制钱等百有余件悉除免之

十四年春正月癸巳行都元帅府军次广东宋知循州刘兴以城降丙申以江南平
免诸路今岁所纳丝银赐嗣汉天师张宗演演道灵应
冲和真人领江南诸路道教甲辰命阿珠选锐军万人赴阙丁未知梅州钱荣之以城降
二月壬戌宋瑞州安抚姚文龙率张文显来降丁卯荆
湖北道宣慰使塔海拔归山寨四十七所戊辰祀先农东郊甲戌西川行院布哈率众至

重庆营浮屠关宋都统赵安以城降车驾如上都丁亥
宋知南恩州陈尧道签判林叔虎以城降以大司农御史大夫宣慰使兼领侍仪司事博
啰为枢密副使兼宣徽使领侍仪司事三月辛卯湖广
行中书言广西二十四郡并已内附议复行中书省于潭州置广南西路宣抚使于静江
癸巳以行都水监兼行漕运司事乙未福建漳泉二郡
蒲寿庚印德傅李珣李公度皆以城降壬寅广东肇庆府新封等州皆来降乙巳命中外
军民官所佩金银符以色组系于肩腋以免褻渎具为
令庚戌建宁府通判郭纘以城降黄州归附官吏胜入覲以所部将校于跃等三十一人
战功闻命官之签书东西川行枢密院事咎顺遣同知
隆州事赵孟焘赍诏招谕南平军都掌蛮罗计蛮及凤凰中壘罗韦高崖等四砦皆降田
杨二家豕鹅夷民俱遣使纳款壬子宝应军人施福杀
其守将降于淮东都元帅府癸丑命汪惟正自东川移镇巩昌行中书省承制以闽浙温
处台福泉汀漳剑建宁邵武兴化等郡降官各治其郡
潭州行省遣使上言广南西路庆远郁林昭贺藤梧融宾柳象邕廉容贵浔皆降得府一
州十四以平章政事浙西道宣慰使安塔哈为平章政
事行中书省事于江淮郡王哈达为平章政事行中书省事于北京夏四月甲子宋特磨
道将军农士贵知安平州李惟屏知来安州岑从毅等
以所属州县溪洞百四十七户二十五万六千来附癸酉省各路转运司事入总管府设
盐转运司四置榷场于碉门黎州与吐蕃贸易丙戌禁
江南行用铜钱五月癸巳申严大都酒禁犯者籍其家癸卯改广南西路宣抚司为宣慰
司广西钦横二州改立安抚司各道提刑按察司兼劝
农事敕江南归附官三品以上者遣质子一人入侍西番长阿里鼎盎济等三十一族来
附得户四万七百辛亥以河南山东水旱除河泊课乙
卯选蒙古汉军相参宿卫六月丙寅涪州安抚阳立及其子嗣荣相继来附以立为夔路
安抚使嗣荣为管军总管丁亥以行省参政行江东道
宣慰使阿喇罕为中书左丞行江东道宣慰使湖北道鄂啰齐参知政事行湖北道宣慰
使秋七月戊子朔罢大名济宁印钞局丁酉敕自今非
佩符使臣及军情急速不听乘传癸卯诸王锡里济劫北平王于阿里玛图之地械系右
丞相安图诱胁诸王以叛使通好于海都海都海都弗
纳遂率西道诸王至和琳城北诏右丞相巴延率兵往御之诸王呼噜岱率其属来归与
巴延军合丙午置行御史台于扬州以都元帅姜卫为
御史大夫戊申东川都元帅张德润等克涪州擒其安抚程聪程广置行中书省于江西
以参知政事行江西宣慰使达春为右丞参知政事行
江西宣慰使敏珠尔丹为左丞淮东宣慰使彻尔特穆尔江东宣慰使张荣实江西宣慰

使李恒招讨使页特密实万户实勒们荆湖路宣抚使
程鹏飞闽广大都督兵马招讨使蒲寿庚并参知政事行江西省事壬子榷大都商税丁
巳湖北宣慰使调兵攻司空山复寿昌黄州二郡以参
知政事行江东道宣慰使吕文焕为中书左丞八月戊午朔诏布哈行院西川辛未车驾
畋于上都之北九月丙申广南东路广连韶德庆惠潮
南雄英德等郡皆内附戊申页特密实下邵武军人福州宋主昷次广州之浅湾诏达春
与李恒吕师夔等以步卒入大庾岭孟古岱索多蒲寿
庚及元帅刘深等以舟师下海合追宋二王壬子福建路宣慰使行征南都元帅索多遣
招讨使伯嘉努丁广取建宁之崇安等县及南剑州冬
十月丙辰朔日有食之己未享于太庙庚申湖北宣慰使塔尔海略地至夔州之太原坪
擒其将诛之乙亥以宋张世杰文天祥犹未降命安塔
哈选锐兵防遏隆兴诸城甲申播州安抚使杨邦宪言本族自唐宋世守此土将五百年
昨奉旨许令仍旧乞降玺书从之以行省参政呼图克
特穆尔托博和啰噶图崔斌并为中书左丞鄂州总管府达噜噶齐张鼎湖北道宣慰使
贾居贞并参知政事十一月戊子枢密院臣言宋文天
祥与其徒赵孟潜同起兵行中书发兵攻之杀孟潜天祥仅以身免诏以其妻孥赴京师
乙未定伪造宝钞同情者并处死庚子命中书省檄谕
中外江南既平宋宜曰亡宋行在宜曰杭州以吏部尚书巴图尔丹为参知政事刘深攻
宋主昷于浅湾张世杰奉昷退保秀山十二月丁卯以
大都物价翔踊发官廩万石赈糴贫民庚午梁山军袁世安以其城及金石城军民来降
乙亥都元帅杨文安攻咸淳府克之以参议中书省事
耿仁参知政事冠州及永年县水免今年田租导任河复民田三千余顷

十五年春正月辛卯遣阿喇卜丹将兵戍鄂端己亥禁军民掠卖良家子女丙午万
户图们岱尔郝扎拉布哈等克泸州戊申封宋福王赵
与芮为平原郡公敕自今御史台毋擅召仓库吏及究钱谷数二月戊午祀先农令蒙古
胄子代耕藉田癸亥以咸淳府等郡及良平民户饥赈
之壬午索多攻潮州破之置太史院以祭酒许衡兼领以参知政事夏贵范文虎陈岩并
为中书左丞黄州路宣慰使唐古特史弼并参知政事
三月乙酉诏孟古岱索多蒲寿庚行省福州镇抚濒海诸郡以沿海经略副使哈喇岱领
舟师南征升经略使兼左副都元帅佩虎符甲午西川
行枢密院招降重庆等处得府三州六军一监一县二十栅四十蛮夷司一并招宜胜土
恢等城及石榴寨相继来降壬寅以诸路岁比不登免
今年田租丝银癸卯都元帅杨文安克绍庆府斩其郡守鲜龙乙巳广南宣慰司招降雷
化高三州宋主昷奔碭洲夏四月乙卯命元帅刘国杰

北征戊午以江南十寇窃发人心未安遣官分道抚治检核钱谷察郡县灾伤吏廉能者举以闻贪残不胜任者劾罢之甲子以时雨沾足稍弛酒禁民之衰疾饮药者官为酝酿量给之戊辰宋主昷殁于碭洲广王昺嗣位辛未置光禄寺以同知宣徽院事推勒特穆尔为光禄卿丁丑云南行省招降临安白夷和泥分地城寨一百九所【按白夷史误作白衣考元地理志白夷为大理土蛮八种之一今据改】威楚金齿罗落分地城寨军民三万二千二百户【按罗落史误作落落考元地理志罗落蛮隶赵州今据改】秃老蛮高州筠连州等城寨十九所庚辰遣使至杭州等处取在官书籍版刻至京师壬午立行中书省于建康府敕自今罢免之官宰执为宣慰宣慰为路官路官为州官淮浙盐课直隶行省宣慰司官勿预改北京行省为宣慰司五月乙酉定武官承袭制凡主兵官已擢授其旧职宜别授有功者勿复以子孙承袭甲午敕诸职官犯罪受宣者奏闻受敕者从行台处治受省札者按察司治之自行中书省以下公务小事限七日中事十五日大事三十日选江南锐军为侍卫亲军乙未以乌蒙路隶云南行省六月己未宋主昷徙居厓山丁卯置甘州和余提举司以备军饷赈贫民甲戌汰江南冗官乙亥敕省院台诸司奏事必由起居注戊寅全州西延溪洞猺蛮二十所内附己卯发蒙古军千人从江东宣慰使张弘范由海道讨宋余众秋七月壬午朔宋湖南制置张烈良提刑刘应龙起兵应厓山阿尔哈雅袭杀之辛亥建汉祖天师正一祠于京师八月壬子朔追毁宋故官所受告身辛未复给漳州安抚使沈世隆家赉仍授本路管民总管甲戌安西王相府言川蜀悉平城邑山寨洞穴凡八十三其渠州礼义城等处凡三十三宜以兵镇守余悉彻毁从之己卯立提刑按察司于辉和尔分地辛巳诏行中书省索多蒲寿庚等曰诸蕃国列居东南岛砦者若有慕义之心可因蕃舶诸人宣布朕意诚能来朝朕将宠礼之其往来互市各从所欲以中书左丞董文炳签书枢密院事参知政事索多蒲寿庚并为中书左丞九月癸未省东西川行枢密院成都潼川重庆利州四处设宣慰司分拣诸路所括军为民庚寅昭信达噜噶齐李海拉苏言愿同张弘范取宋二王调汉军水军俾将之以中书左丞行江东道宣慰吕文焕为中书右丞冬十月己未享于太庙庚申车驾至自上都已巳张弘范统舟师由海道袭漳潮究三州李恒将步骑由梅岭袭广州庚午敕御史台凡军官私役军士者视数多寡定其罪十一月丁亥以辰沅靖镇远等郡与蛮獠接壤民不安业命塔尔海程鹏飞并为荆湖北道宣慰使置司常德路壬辰征宋相马廷鸾章鉴赴阙甲午敕已除官僚不之任者除名为农

辛丑建宁人黄华集盐夫及畚民为乱诏调兵讨之丁未行中书省自扬州移治杭州立淮东宣慰使于扬州闰月庚戌朔罗氏鬼国王阿榨西南蕃主韦昌盛并内附以阿榨韦昌盛各为其地安抚使甲子张弘范攻漳州得山寨百五十户百万余宋文天祥屯潮阳港先锋张弘正总管囊嘉特率轻骑追及于五坡岭败之执文天祥及其将校四人赴都 【按史二王纪天祥之被执在十二月】 十二月丙午禁玉泉山樵采渔弋以海州赣榆县雹伤稼免今年田租会诸王于大都以平宋所俘宝玉器币分赐之

十六年春正月癸丑以海南诸郡俱平令阿尔哈雅入觐辛酉宋合州安抚使王立以城降壬戌分川蜀为四道以成都等路为川西道广元等路为川北道重庆等路为川南道顺庆等路为川东道并立宣慰司甲戌张弘范李恒 【李恒据宋史二王纪及续通鉴纲目增】 兵至崖山张世杰来拒战败之世杰遁去广王昺偕其官属俱赴海死 【按二王纪二月癸未陆秀夫负昺投海中此书在正月甲戌与宋史不符】 以中书左丞拜奇页勒密实同知枢密院事禁中书省文册奏检用辉和尔字书二月戊寅朔祭先农于藉田壬午遣使访求通皇极数番阳祝泌子孙其甥傅立持泌书来上癸未建司天台于大都又于上都洛阳等五处分置仪表各选监候官己丑调潭州行省兵五千戌沿海州郡乙未诏湖南行省于戍军还涂每四十五里立安乐堂疾者医之饥者廩之死者藁葬之官给其需遣官核实癸卯发嘉定新附之千人屯田托里贝之地甲辰诏大都河间山东管盐运司并兼管酒醋商税等课程命嘉定以西新附州郡及田杨二家诸贵官子俱充质子入侍车驾如上

都三月戊辰朔禁归德亳寿临淮等处畋猎庚戌敕郭守敬繇上都大都历河南府抵南海测验晷景丙寅敕中书省臣凡掾史文移稽缓一日二日者杖三日者死甲戌潭州行省遣两淮招讨司经刘继昌招下西南诸番以龙方零等为小龙蕃等处安抚使仍以兵三千戌之命太常寺定州郡社稷制度礼官定祭祀仪式坛壝祭器图写成书名至元州县社稷通礼保定路旱减其租夏四月己卯立江西榷茶运司及诸路转运盐使宣课提举司癸巳以给事中兼起居注掌随朝诸司奏闻事乙巳选南军精锐者充侍卫军五月己酉中书省请各路设提举司提举副提举各一员专领课程从之辛亥诏谕漳泉汀邵武等处暨八十四畚官吏军民若能举众来降官吏例加迁赏军民安堵如故以泉州经张世杰兵减今年租赋之半乙丑敕江陵等路巴图户一万九千户置达噜噶齐一员直隶省部丙寅敕江南僧司文移毋辄入递临洮巩昌通安等十驿非有海青符不听乘传己巳诏沿路驿店民家凡往来使臣不当乘传者毋给人畜

饮食刍料壬申徙丁子峪所驻侍卫军万人屯田昌平
癸酉乌兰哈达言赋北京西京车牛俱至可运军粮帝曰民之艰苦汝等不问但知役民
使今年尽取之来岁禾稼何由得种其止之六月丁丑
朔诏发新附军五百人蒙古军百人汉军四百人戍碣门鱼通黎雅甲申宋张世杰所部
将校百五十八人诣琼雷等州降敕造战船征日本壬
辰以参知政事行河南等路宣慰使呼逊为中书右丞行中书省事癸巳以新附军二万
分隶六卫屯田以布哈行西川枢密院事总兵入川平
宋诸城之未下者仍令东川行枢密院调兵守钓鱼山寨云南都元帅爱鲁克尼雅斯拉
鼎招降西南诸国爱鲁克将兵分定亦乞不薛尼雅斯
拉鼎将大理军抵金齿蒲骠曲蜡缅甸国界内招忙木巨木秃等寨三百籍户十一万二百
诏定赋租立站递设卫送军军还送驯象十二辛丑命
枢密院发军五千京朝官雇役千人浚通州运河癸卯以临洮巩昌通安等十驿岁饥供
役繁重有质卖子女以供役者选官抚治之甲辰禁巴
延彻尔诸峪寨捕猎免四川差税以参知政事行中书省事巴图尔丹为河南等路宣慰
使以阿哈玛特子呼逊为潭州行省左丞哈斯哈雅等
并复旧职占城马八儿诸国遣使以珍物及象犀各一来献秋七月乙卯置东宫侍卫军
定江南上中路置达噜噶齐二员下路一员丁巳交趾
国遣使来贡驯象己未以德古尔穆苏地之苏默岱城为镇西府壬戌阿尔哈雅入覲罢
潭州行省癸酉西南八番罗氏等国来附洞寨凡千六
百二十有六户凡十万一千一百六十有八以中书左丞行四川行中书省事汪良臣为
安西王相以赵州等处水旱减今年租八月丁丑车驾
至上都戊子范文虎言臣奉诏征讨日本比遣周福栾忠与日本僧赍诏往谕其国期
以来年四月来报待其从否始宜进兵又请简阅旧战
船以充用皆从之海贼贺文达率众来降己丑宋降臣王虎臣陈便宜十七事令张易等
议可者行之庚寅敕沅州路蒙古军总管沁达罕征取
桐木笼犵狁伯洞诸蛮未附者以每岁圣诞节及元辰日礼仪费用皆敛之民诏天下罢
之丁酉以江南所获玉爵及坩凡四十九事纳于太庙
甲辰诏汉军出征逃者罪死且没其家置大护国仁王寺总管府九月乙巳朔范文虎荐
可为守者三十人诏今后所荐朕自择之女真硕达勒
达军不出征者令隶民籍输赋庚戌诏行中书省左丞呼逊兼领杭州等路诸色人匠岁
造繒段十万以进戊午王相府言四川宣慰司有籍无
军虚受赏者一万七千三百八人命诘治之议罢汉人之为达噜噶齐者乙丑以呼巴哩
巴尔斯台为都元帅将蒙古军二千人河西军一千人
戊鄂端城冬十月己卯享于太庙乙酉帝御香阁命大乐署令完颜椿等肄文武乐辛卯

赈和州贫民钞乙未纳碧玉爵于太庙辛丑以月直元
辰命五祖真人李居寿作醮事凡五昼夜壬寅诏皇太子燕王参决朝政凡中书省枢密
院御史台及百司之事先启后闻十一月戊申敕诸路
所捕盗初犯赃多者死再犯赃少者从轻罪论壬子遣礼部尚书柴椿偕安南国使杜中
赞赉诏往谕安南国世子陈日烜责其来朝乙卯罢太
原平阳西京延安路新签军还籍戊辰命湖北道宣慰使刘深教练鄂州汉阳新附水军
诏四川宣慰司括军民户数己巳并教坊司入拱卫司
十二月戊寅发粟钞赈盐司灶户之贫者括甘州户甲申祀太阳丁酉敕自明年正月朔
日建醮于长春宫凡七日岁以为例命李居寿告祭新
岁诏谕占城国主使来朝建圣寿万安寺于京城

钦定续通志卷五十九

●钦定续通志卷六十 元纪四

元纪 【四】

世祖 【三】

○世祖三

至元十七年春正月辛亥磁州永平县水给钞贷之丙辰立迁转官员法又定诸路
差税增益者即上报隐漏者罪之丁卯畋近郊诏毋以
侍卫军供工匠役戊辰数姜卫检核阿尔哈雅呼图克特穆尔等所俘丁三万二千余人
并放为民置行中书省于福州二月丁丑诏尼雅斯拉
鼎将精兵万人征缅甸己丑日本国杀国信使杜世忠等丙申诏真人析志诚等焚毁道
藏伪妄经文及板庚子发侍卫军三千浚通州运粮河
三月甲辰军驾如上都罢通政院官不胜任者丙午敕东西两川发蒙古汉军戍鱼通黎
雅乙卯立都功德使司掌奏帝师所统僧人并吐番军
民等事己未诏讨罗氏鬼国命以蒙古军六千哈喇章军一万西川雅尔哈万嘉努军万
人阿尔哈雅军万人三道并进癸亥赈高邮等处饥辛
未立辉和尔境内交钞提举司夏四月壬申朔诏以孟古岱仍行省福州癸酉西南康杜可
用叛命史弼讨擒之定杭州宣慰司官四员以游显管
如德呼图克刘宣充之乙酉以宋太常乐付太常寺丁亥立杭州路金玉总管府甲午敕
军户贫乏者还民籍五月甲辰作行宫于察罕淖尔癸
丑诏云南行省发四川军万人命雅尔哈领之与前所遣将同征缅甸高丽国王王晷以
民饥乞贷粮万石从之移福建行省于泉州六月丁丑
西安王薨罢王相府遣吕告蛮部安抚使王阿济同万户咎坤招谕罗氏鬼国壬辰召范
文虎议征日本戊戌江淮等处颁行钞法废宋铜钱遣
博啰哈达等检核江淮钱粮秋七月己酉立行省于京兆以前安西相李德辉为参知政

事兼领钱谷事徙泉州行省于隆兴戊午以参知政事
郝禎耿仁为中书左丞相开胶东河乙丑罢江南财赋总管府戊辰诏括前愿从军者及
张世杰溃军使征日本己巳遣中使耀尼历江南名山
访求高士且命持香币诣信州龙虎山临江阁皂山建康三茅山皆设醮八月乙亥改蒙
古侍卫总管为蒙古侍卫亲军都指挥使司戊寅以前
所括愿从军者为军付察呼领之征日本丁亥许衡致仕官其子师可为怀孟路总管以
便侍养纳碧玉盞六白玉盞十五于太庙戊戌高丽王
王晷来朝且言将益兵三万征日本以范文虎实都洪俊奇为中书右丞李庭张巴图为
参知政事并行中书省事九月壬子车驾至自上都壬
戌伊克德济进征鄂端丁卯罗氏鬼国主阿察及阿里降西安王相李德辉遣人偕入覲
冬十月癸酉加高丽国王王晷开府仪同三司中书左
丞相行中书省事甲戌遣使括开元等路军三千征日本丙子赐云南王和克齐印丁丑
以湖南兵万人伐亦奚不薛亦奚不薛降辛巳立营田
提举司置司柳林割诸色户千三百五十五隶之官给牛种农具壬午诏立陕西四川等
处行中书省甲申诏龙虎山天师张宗演赴阙己丑以
达实为招讨使往西域穷黄河源壬辰亦奚不薛称病遣其从子入覲帝曰亦奚不薛不
禀命辄以职授其从子无人臣礼宜令亦奚不薛出始
罢兵丙申命在官者任事一月始给俸遣使谕瓜哇国及交趾国始制象轿十一月己亥
朔翰林学士承旨和尔果斯等言俱蓝马八阁婆交趾
等国俱遣使进表乞答诏从之仍赐交趾使人职名及弓矢鞍勒降诏招谕瓜哇国戊申
中书省臣议疏通钞法辛亥敕缓营建工役壬子诏谕
俱蓝国使来归附甲子颁授时历十二月庚午江淮行省平章政事阿里布左丞雅克特
穆尔有罪诛之辛未以熟券军还襄阳屯田高国王王
晷领兵万人水手战船粮艘从征日本谕诸道出征日本兵取道高丽毋扰其民癸酉以
高丽国王王晷为中书右丞相戊寅以奉使木剌由国
斯隆玛等为招讨使乙酉敕民避役窜名匠户者复为民淮西宣慰使昂吉尔请以军士
屯田安塔哈等以发民兵非便宜募民愿耕者耕之且
免其租三年从之壬辰陈桂龙据漳州反索多率兵讨之桂龙亡入畚洞甲午重建太庙
成自旧庙奉迁神主于祐室行大享礼置镇北庭护府
都于辉和尔境以托克托穆尔等领其事丙申敕镂板印造帝师帕克斯巴新译戒本五
百部颁降诸路僧人左丞相阿珠巡历西边至巴实伯
里以疾卒赈巩昌常德等路饥民免其徭役

十八年春正月丁未畋于近郊敕江南郡州兼用蒙古回回人丙辰车驾如瀋州收
天下诸司职印二月辛未车驾如柳林乙酉改辉和尔

断事官为北庭都护府丙戌赈浙东饥己丑发肃州等处饥民凿渠溉田乙未皇后鸿吉哩氏崩【按元史后妃传鸿吉哩氏于至元十四年二月崩纪书于十八年二月彼此互异】丙申车驾还宫诏三茅山三十八代宗师蒋宗瑛赴阙遣丹巴巴克实等诣东海及济源庙修佛事以中书右丞行江东道宣慰使阿喇罕为中书左丞相行中书省事江西道宣慰使兼招讨使页特密实参知政事行中书省事以辽阳懿盖水北京大定诸州旱免今年租税之半三月戊戌许衡卒甲辰命天师张宗潢即宫中奏赤章于天七昼夜丙午车驾如上都辛酉立登闻鼓院许有冤者挝鼓以闻夏四月辛巳赈通泰二州饥戊子置蒙古汉人新附军总管五月癸卯禁西北边回回诸人越境为商甲辰遣使赈瓜沙州饥戊申罢霍州辉和尔按察司己酉禁甘肃瓜沙等州为酒壬子免耽罗国今岁入贡白纛丙辰以乌蒙阿谋宣抚司隶云南行省庚申严鬻人之禁乏食者量加赈贷壬戌括契丹户敕耽罗国达噜噶齐达喇齐禁高丽全罗等处田猎扰民者六月丙寅敕赛音谔德齐和尼齐分管鄂摩巴图奇尔等八处民户以太原新附军五千屯田甘州丁亥放奇彻所招猎户七千为民庚寅以阿喇罕有疾诏安塔哈统率军马征日本壬辰以中书左丞呼图克特穆尔为中书右丞行中书省事御史中丞行御史台事呼喇珠为中书左丞行尚书省事秋七月丁酉敕甘州置和中所以给兵粮京兆四川分置行省于河西己亥阿喇罕卒庚子括回回炮手散居他郡者悉令赴南京屯田辛酉索多征占城赐駝蓬以避瘴毒占城国来贡象犀八月甲子朔招讨使方文言择守令崇祀典戢奸吏禁盗贼治军旅奖忠义六事诏廷臣及诸老臣议行之庚午以孟古岱为中书右丞行中书省事乙亥申严大都总管府兵马司左右巡院敛民之禁壬辰以开元等路六驿饥命给币帛万二千匹民鬻妻子者官为赎诏征日本军回所在官为给粮实都洪俊奇范文虎李庭金方庆诸军船为风涛所激大失利余军回至高丽境十存一二设醮于上都寿宁宫海南诸国来贡象犀方物闰月丙午车驾至自上都丁巳命播州每岁亲贡方物改思州宣抚司为宣慰司兼管内安抚使敕中书省减执政及诸司冗员括江南户口税课壬戌诏谕鄂端等三城官民及呼图克岱尔括布呼齐人口两淮转运使阿喇卜丹坐盗官钞伏诛九月癸亥朔畋于近郊甲子增大都巡兵千人赈上都饥民癸酉定市舶商货已经泉州抽分者诸处止令输税庚辰帝还宫辛巳大都立蒙古站屯田编户岁输包银者及真定等路阑遣户并令屯田其在真定者与免皮货冬十月丙申募民淮西屯田己亥议封安南王号易所赐安南国辉和尔字虎符以国

字书之仍降诏谕安南国立日烜之叔遗爱为安南国王壬寅赐征日本将校衣装帛帑靴帽等物有差乙巳命安西王府协济户及南山隘口军于安西延安凤翔六盘等处屯田河西置织毛段匠提举司丁未安南国置宣慰司以北京路达噜噶齐巴延特穆尔参知政事行安南国宣慰司都元帅佩虎符察楚克鸿和尔副之己酉张易等言参校道书惟道德经系老子亲着余皆后人伪撰宜悉焚毁从之仍诏谕天下命实哩哈雅僧格巴拉满济勒噶为占城郡王加荣禄大夫赐虎符立行中书省于占城以索多为右丞刘深为左丞兵部侍郎伊埒默色参知政事庚戌敕以海船百艘新旧军及水手合万人期以明年正月征海外诸番仍谕占城郡王给军食以安南国王陈遗爱入安南发新附军千人卫送诏谕干不昔国来归附壬子用和尔果斯言于扬州隆兴鄂州泉州四省置蒙古提举学校官各二员以翰林学士承旨色埒默兼领会同馆集贤院事以平章政事枢密副使张易兼领秘书监太史院司天台事以翰林学士承旨和尔果斯守司徒改大都南阳真定等处屯田布埒齐总管府为农政院癸丑皇太子至自北边十一月陈吊眼伏诛己巳敕高丽国金州等处置镇边万户府以控制日本高丽国王请完滨海城防日本不允壬午诏谕瓜哇国主使亲来觐己丑赐礼部尚书留梦炎及出师马八儿国温都尔等钞各有差十二月甲午以昂吉尔岱为中书右丞相己亥罢日本行中书省癸丑敕免益都淄莱宁海开河夫今年租赋仍给其佣直丙辰免福州路十八年以前租税是岁保定路清苑县水平阳路松山县旱高唐夏津武城等县虫害稼并免今年租

十九年春正月丙寅罢征东行中书省丁卯诸王扎拉呼至自军中丙子车驾畋于近郊二月辛卯朔车驾如柳林以饶州总管姚文龙为江西道宣慰使兼措置茶法修宫城太庙司天台癸巳调军一万五千马五千匹征亦奚不薛甲午议征缅甸以台布为右丞伊克德济为参政领兵以行壬寅命军官阵亡者其子袭职以疾卒者授官降一等具为令戊申车驾还宫己酉减省部官冗员改上都宣课提领为宣课提举司立铁冶总管府罢提举司减大都税课官十四员为十员改罗罗斯宣慰司隶云南省分军戍守江南自归州以及江阴至三海口凡二十八所庚戌以参知政事唐古忒等六人镇守黄州建康江陵池州兴国壬子诏签亦奚不薛及播思叙三州军征缅甸甲寅车驾如上都申严汉人军器之禁三月辛酉朔乌蒙民叛敕诺海哈喇苏默率蒙古汉人新附军讨之益都千户王着以阿哈玛特蠹国害民与高和尚合谋杀之壬午诛王着张易高和尚于市 【按阿哈玛特蠹国害民固法所当诛但非王着所得擅杀且连

结妖人矫令发兵是直叛逆矣伏读通鉴辑览

御批谓太子珍戡已参朝政既知阿哈玛特之奸何难告之世祖明正其罪乃以素所嫉
恶之故为着辈所窥致得假托妄行构为祸乱他日酿
成疑衅皆其不能防慎嫌微有以致之也谨录识之】 戊子以领北庭都护阿必实克为
御史大夫行御史台事夏四月丁酉以和尔果斯为中
书右丞相降右丞相昂吉尔岱为留守仍同签枢密院事戊戌征蛮元帅鄂勒哲图等平
陈吊眼余其父及兄弟皆纳款令送赴京师敕以大都
巡军隶留守司壬寅立回易库中书左丞耿仁等言诸王公主分地所设达噜噶齐例不
迁调百姓苦之依常调任满从本位下选代为宜从之
乙巳帝悟阿哈玛特之奸以其子江淮行中书省平章政事呼逊罪重于父议究勘之考
核诸处平准库汰仓库官戊申敕凡文书俟奏可始用
御宝己酉刊行蒙古辉和尔字所书通鉴以和尔果斯为右丞相庚戌诏慰谕军民应逋
欠钱粮及官吏侵盗并权停罢拘括江南官豪隐匿逃
军壬子罢江南诸司自给驿券丙辰敕以妻女姊妹献阿哈玛特得仕者黜之核阿哈玛
特占据民田给还其主庇富强户输赋其家者仍输之
官定民闲贷钱取息之法以三分为率定内外官以三年为考五月己未朔钩考万亿库
及南京宣慰司沙汰省部官凡阿哈玛特党人并黜之
追治阿哈玛特罪剖棺戮其尸罢南京宣慰司及江南财赋总管府戊辰并江西福建行
省去江南冗滥官己巳遣浙西道宣慰司同知刘宣等
理算各盐运司及财赋府茶场都转运司出纳之数籍阿哈玛特妻子亲属所管贖产其
奴婢纵之为民罢宣慰使所带相衔癸未沿海左副都
元帅石国英请以税户贍军军逃死者令其补足站户苗税贫富不均者宜均其役又请
行盐法汰官吏罢捕户诏中书集议行之张惠阿里罢
以甘肃行省左丞敏珠尔丹为中书右丞行御史台御史中丞张雄飞参知政事乙酉元
帅綦公直言乞黥逃军仍使从军及设立冶场于巴实
伯里鼓铸农器从之六月己丑朔日有食之戊戌以占城既服复叛命索多讨之亡宋军
有手号及无手号者并听为民己亥命何子志为管军
万户使暹国壬子申敕中外百官立限决事癸丑从和尔果斯言罢司徒府又农政院诏
逮呼逊赴扬州鞠问丁巳征亦奚不薛尽平其地秋七
月戊午朔日有食之立行枢密院于扬州鄂州庚申命行御史台拣汰各道按察司官辛
酉剖阿哈玛特党郝禎棺戮其尸庚午令蒙古军守江
南者更番还家壬申立马湖路总管府戊寅议筑阿实达必实古皇城乙酉阁婆国贡金
佛塔八月癸巳发罗罗斯等军助征缅甸辛亥车驾驻
蹕龙虎台申严以金饰车马服御之禁禁诸监官不得令人匠私造物器甲寅帝还宫乙

卯御正殿受皇太子诸王百官朝贺九月丁巳朔敕中书省穷治阿哈玛特之党以阿哈玛特没官田产充屯田籍阿里家戊午诛阿哈玛特第三子阿萨尔庚申汰冗官游显乞罢涟海州屯田以其事隶管民官从之仍以显平章政事行省扬州辛酉诛耿仁苏都尔丹及阿哈玛特第四子实都招讨使杨廷璧招抚海外南番皆遣使来贡【按扬廷璧史纪误作杨庭坚今据马八儿国传改】壬戌敕官吏受贿及侵盗仓库轻者杖决重者处死言官緘默与受赃者一体论罪己巳定云南赋税用金为则罢云南宣慰司癸酉阿哈玛特侄宰努鼎伏诛罢呼逊党马璘江淮行省参知政事乙亥【乙亥史误作丁亥据上下干支改】遣使括云南所产金以博啰为打金洞达噜噶齐壬午【壬午史误作壬申据上下干支改】厘正选法置金簿以籍阿哈玛特党人之名令诸路岁贡儒吏各一人各道提刑按察司举廉能者升等迁叙冬十月辛卯以耶律铸为中书左丞相壬辰享于太庙罢西京宣慰司丙申立詹事院以鄂勒哲为右詹事赛音为左詹事由大都至中滦中滦至瓜洲设南北两漕运司【按瓜洲史纪误作瓜州考食货志至元十九年十二月立京畿江淮都漕运司二每岁令江淮漕运司运至中滦京畿漕运司自中滦运至上都此瓜洲当即江淮漕运司所属之瓜洲也谨据改但志书于十二月与此不符】分禁中出纳为三库乙巳遣阿达招降法里郎阿鲁干伯等国罢屯田总管府以其事隶枢密院令管军万户兼之丙午以汪惟孝为总帅丁未议征义巴洞庚戌议减四川冗官禁大都及山北州郡酒诏两广福建五品以下官从行省就便铨注耶律铸言有司官吏以采室女乘时害民如今大郡岁取三人小郡二人择其可者厚赐其家否则遣还为宜从之籍京畿隐漏田履亩收税命游显专领江浙行省漕运乙卯诛阿哈玛特长子呼逊第二子玛苏库于扬州皆醢之十一月戊午置利用库于上都丁卯江南袭封衍圣公孔洙入觐以为国子祭酒兼提举浙东道学校事壬申以势家为商贾者阻遏官民船立沿河巡禁军犯者没其家甲戌中书省臣言天下重囚除谋反大逆杀祖父母父母妻杀夫奴杀主因奸杀夫并正典刑外余犯死罪者令充日本占城缅甸国军从之改铸省印丙子四川行省招谕大盘洞主向臭友等来朝戊寅马八儿国遣使以金叶书及土物来贡【按马八儿国传至元二十年遣僧错克济巴勒人朝不载十九年入贡事纪于十九年书来贡而二十年反略之互异】罢都功德使图烈齐修设佛事妄费官物皆征还之十二月壬辰以张文谦为枢密副使乙未命瀛国公赵■〈显，去页〉赴上都杀宋丞相文天祥癸卯征处士刘因为右赞善寻辞

归朱清张瑄献海运策命总管罗璧暨瑄等造海船由海道运粮至大都浚济川河罢湖广行省金银铁冶提举司以其事隶各路总管府以扎萨克为平章政事诏立帝师达尔玛巴拉喇吉塔掌玉印统领诸国释教造帝师帕克斯巴舍利塔

二十年春正月己未立鸿吉哩氏为皇后和尔果斯言去冬中山府奸民薛保住为匿名书来上妄效东方朔书欺罔朝廷希覬官赏敕诛之又言自今应诉事者必须实书其事赴省台陈告其敢以匿名书告事重者处死轻者流远方又阿哈玛特专政时衙门太冗虚费俸禄宜依刘秉忠许衡所定并省为便皆从之设务农司丙寅发五卫军二万人征日本以燕南河北山东诸郡去岁旱税粮之在民者权停勿征仍谕自今管民官凡有灾伤过时不申及按察司不即行视者皆罪之刑部尚书崔彧言时政十八事诏中书省与御史大夫伊苏特穆尔议行之罢上都回易库壬申命右丞实喇特穆尔征日本丁丑以招讨杨廷璧为宣慰使使谕俱蓝等国壬午车驾畋于近郊以四川归附官杨文安为荆南道宣慰使二月戊子定两广四川戍军二三年一更廩其家属以春秋仲月上戊日祭社稷及武成王庚子减四川官府并西川东西北三道宣慰司及潼川等路镇守万户府新军总管府威灌茂等州安抚司十四处辛丑定军官选格立官吏赃罪法丁未定安洞酋长遣其兄弟入覲癸丑谕中书省大事奏闻小事便宜行之毋致稽缓甲寅遣官虑扬州囚徒三月丁巳罢河西行御史台立巩昌等处行工部罢福建市舶总管府并泉州行省入福建行省免福建归附后未征苗税己未罢京兆行省立行工部乙丑罢淮安等处淘金官惟计户取金给西川福建两广之任官驿马以湖南宣慰使张鼎新行省参知政事樊楫等尝阿附阿尔哈雅敕罢之丙寅车驾如上都江西行省参政完颜诺海坐越例骤升及妄举人入官罢之罢河西办课提举司癸酉广州新会县林桂芳赵良钤等聚众伪号罗平国称延康年号官军擒之伏诛余党悉平乙亥罢诸处役夫辛巳立辉和尔四处驿及交钞库壬午祀太一罢福建道宣慰司复立行中书省于漳州以中书右丞张惠为平章政事御史中丞额森特穆尔为中书左丞并行中书省事夏四月丙戌立巴实伯里和州等处宣慰司壬辰安塔哈求军官习舟楫者同征日本命元帅张林招讨张瑄总管朱清等行以高丽王就领行省规画日本事宜甲午免京畿所括豪势田旧税三之二新税三之一禁近侍为人求官紊乱选法申严酒禁有私造者籍其财产及女子入官犯人配役申私盐之禁许按察司纠察盐司癸卯授高丽国王王睿征东行中书省左丞相乙巳命枢密院集

军官议征日本事宜程鹏飞请明赏罚有功者军前给凭验候班师日改授从之庚戌右丞伊苏岱尔招抚筠连州定州阿永都掌等处蛮独山都掌蛮不降进讨之生擒酋长得兰纽遂班师五月己未免五卫军征日本甲子立征东行中书省丙寅免江南税粮三之二敕阿尔哈雅调汉军七千新附军八千以付索多从征辛未占城行省已破占城其国主补底遁去降玺书招徕之甲戌发征日本重囚往占城缅甸等处从征设高丽国劝农官四员丙子诏谕诸王桑阿克达尔先是云南重囚令便宜处决恐滥及无辜自今凡大辟罪仍须待报并省江淮云南州郡以耶律埒克为中书参知政事戊寅用御史中丞崔彧言罢各路选取民女【按续通鉴纲目于四月书用崔彧言罢采民闲女子元史本纪书于五月戊寅互异】颁行宋文思院小口斛己卯海南四州宣慰使朱国宝请益兵讨占城诏以阿尔哈雅军万五千人应之诏江南运粮于阿巴齐新开神山河及海道两道运之立鄂拓克总管府六月丙戌申严私易金银之禁以甘州行省参政王椅为中书参知政事己丑增官吏俸丙申修大都城庚戌流叛贼陈吊眼叔陈桂龙于噶达苏之地辛亥四川行省参政奇尔济苏等讨平九溪十八洞以其酋长赴阙定其地立州县听顺元路宣慰司节制以向世雄等为义巴诸洞安抚大使及安抚使秋七月丙辰免征古珪军赋丙寅立亦奚不薛宣慰司益兵戍守开云南驿路分亦奚不薛地为三设官抚治之丁卯罢淮南淘金司以其户还民籍壬申亦奚不薛军民千户宋添富及顺元路军民总管兼宣抚司阿里等来降立亦奚不薛总管府命阿里为总管丙子减江南十道宣慰司官一百四十员为九十三员敕上都商税六十分取一立总教院八月癸未以密拉齐平章军国重事立怀来淘金所甲午敕大名真定北京卫辉四路屯驻新附军于东京屯田丁未济州新开河成立都漕运司九月戊午哈喇岱等招降象山县海贼尤宗祖等九千五百九十二人【按续通鉴纲目载象山县民尤宗等亦聚众万余抄掠海上哈喇岱招降之与此互有异同】丙寅徙旧城市肆局院税务入大都减税征四十分之一辛未以岁丰登开诸路酒禁广东盗起遣兵万人讨之冬十月壬辰车驾至自上都甲午以扎萨克为枢密副使诏五卫军岁以冬十月听十之五还家备资装正月番上代其半还四月毕入役时各卫议先遣七人而以三人自代从之乙未享于太庙庚子建寔路管军总管黄华叛众几十万号头陀军伪称宋祥兴五年犯崇安浦城等县围建寔府诏布琳济达史弼等将兵二万二千人讨平之耶律铸罢戊申立和琳平准库罢中兴管课提举司及北京盐铁课程提举司庚戌各道提刑按

察司增设判官二员遣官检核益都淘金欺弊十一月丁巳命各省印造授时历壬戌复立南京宣慰司乙丑罢开成路屯田总管府入开城路隶京兆宣慰司戊辰立司农司掌官田邸舍人民十二月辛丑以海南道运粮招讨使朱清为中万户赐虎符张瑄子文虎为千户赐金符徙新附官仕内郡丙午罢云南造卖金箔规措所罢云南都元帅府及重设官吏定质子令凡大官子弟遣赴京师戊申云南施州子童为乱敕参知政事阿哈巴克实帅兵合罗罗斯脱儿世合讨之

二十一年春正月乙卯羣臣奉上尊号曰宪天述道仁文义武大光孝皇帝大赦己未罢云南都元帅府所管军民隶行省甲子罢扬州等处理算官以其事付行省浙江行省平章孟古岱进真珠百斤丁卯建都王乌蒙及金齿一十二处俱降庚午立江淮荆湖江西四川行枢密院治建康鄂州抚州成都立耽罗国安抚司二月【按元典章是年二月谕各路提堰总管府并州县长官常行验视听各道按察使纠察贫民情愿复业者给付原产仍免一切逋课私债三年后方许取索此宽大之政也元史本纪失载】辛巳浚扬州漕河罢高丽造征日本船丁亥命翰林学士承旨色埒默祀先农于藉田壬辰邕州宾州民黄大成等叛湖南宣慰使色埒默将兵讨之甲午罢羣牧所己亥罢阿巴齐开河之役以其军及水手各万人运海道粮放檀州淘金五百人还家丁未括江南乐工命安塔哈发兵万五千人船二百艘助征古城船不足命江西省益之戊申漳州盗起命江浙行省调兵进讨迁故宋宗室及其大臣之仕者于内地三月丁巳皇子北安王诺木欢【北安王元史作北平王按诸王表诺木欢至元十九年己改封北安王于此不得仍称北平今据改】至自北边右丞相安图继至丙寅帝如上都丁卯太庙正殿成奉安神主乙亥高丽国王王睿以皇帝尊号礼成遣使来贺【高丽传是年三月不载来贺事】夏四月【按元典章是月从御史李昂言有父兄居宪台而子侄为按察使或父兄为按察使而子侄在别道为官者并令回避军官毋受民词押运毋带私货管官自三月停讼十月始行和买诸物止从出产处所随时给值不得强其所无重累百姓盖世祖开国时规模如此元史本纪失载】壬午令军民同筑堤堰以利五卫屯田乙酉省泉府司入户部立大都留守司兼少府监立大都路总管府立西川延安凤翔兴元宣课司壬寅呼图克特穆尔征缅之师为贼所败戊申高丽王王睿及公主以其世子諫来朝敕发思播田杨二家军二千从征缅命开元等路宣慰司造船百艘付狗国戍军五月己酉从托克托呼言立二千户总钦察喀喇子弟愿为国宣劳者戊午敕中书省奏目及文册皆不许

用辉和尔字其宣命札付并用蒙古书乙丑蠲江南今年田赋十分之二其十八年以前逋欠未征者尽免之庚午括天下私藏天文图讖太乙雷公式七曜历推背图苗大监历有私习及收匿者罪之闰月己卯罢西南番安抚司立总管府丙午以侍卫亲军万人修大都城六月壬子遣使分道寻访测验晷景日月交食历法甲寅诏封皇子托欢为镇南王驻鄂州【诸王表作扬州】甲子命伊苏岱尔所部军六十人淘金双城移和琳屯田军于五条河【按五条河旧作五河考本卷二十二年亦书移五条河屯田军则此显系脱字今增】秋七月丁丑朔敕荆湖西川两省合兵讨义巴散毛洞蛮己卯立衍福司中书省臣言宰相之名不宜轻授今占城省臣已及七人宜汰之诏军官勿带相衔戊子诏镇南王托欢征占城遣所留安南使黎英等还其国八月丁未云南行省言华帖白水江盐井三处土老蛮叛杀诸王及行省使者调兵千人讨之定拟军官格例以河西回回辉和尔等依各官品充万户府达噜噶齐同蒙古人女真契丹同汉人若女真契丹生西北不通汉语者同蒙古人女真生长汉地者同汉人己酉御史台臣言无籍之军愿从军杀掠者初假之以张度江兵威今各持弓矢剽劫平民若不分隶各翼恐生他变诏遣之还家甲子放福建畚军收其军器其部长于近处州郡民官迁转庚午车驾至自上都九月甲申并市舶入盐运司立福建等处盐课市舶都转运司中书省言福建行省军饷绝少必于扬州转输事多迟误若并两省为一分命省臣治泉州为便诏以中书右丞行省事孟古岱为江淮等处行中书省平章政事其行省左丞呼喇珠蒲寿庚参政管如德分省泉州丙申以江南总摄嘉木杨喇勒智发宋陵冢所收金银宝器修天衣寺甲辰海南贡白虎狮子孔雀冬十月丁未享于太庙己酉敕管军万户为行省宣慰使者毋兼管军事仍为万户者毋兼莅民政辛酉征东招讨司以兵征古珪敕宋有手记军死则以兄弟若子继之毋文其手丁卯以招讨使张万为征缅招讨使佩三珠虎符戊辰立常平仓以五十万石价钞给之十一月戊子命北京宣慰司修滦河道庚子以范文虎为左丞辛丑和尔果斯敏珠尔丹张雄飞温迪罕皆罢前右丞相安图复为右丞相前江西榷茶运使卢世荣为右丞前御史中丞史枢为左丞博啰默色哈雅萨题勒密实并参知政事前户部尚书贝降参议中书省事敕中书省整治钞法定金银价禁私自回易癸卯福建行省遣使人巴噶鲁斯招降南巫里别里刺里伦大力等四国各遣其相奉表以方物来贡以江淮闲自襄阳至东海多荒田命司农司立屯田法募人开耕免其六年租税并一切杂役十二月甲辰朔中书省臣言江南官

田为权豪寺观欺隐者多宜免其积年收入限以日期
听人首实踰限为人所告者征以其半给告者从之立常平盐局乙巳崔彧罢以丁壮万人开山河立万户府以总之甲子以高丽提举司隶
工部乙丑祀太一丙寅荆湖占城行省遣八番刘继昌谕降龙昌龙盛延万等赴阙奉羊马白毡来贡各授本处安抚使立宣慰司招抚西南诸蕃等处酋长癸酉命翰林承旨色埒默翰林集贤大学士许国楨集诸路医学教授增修本草是月镇南王军至安南杀其守兵分六道以进安南兴道王以兵拒于万劫进击败之万户倪闰战死于刘邨 【按安南传镇南王征安南陈日烜拒战载在至元二十二年二月诸王表同续通鉴纲目与元纪俱载于二十一年十二月】 宋太皇太后谢氏卒于燕

二十二年春正月戊寅弛民闲买卖金银及怀孟诸路竹货江淮以南江河鱼利之禁庚辰毁宋郊天台壬午诏立市舶都转运司立上都等路羣牧都转运使司诸路常平盐铁坑冶都转运司戊子徙江南乐工八百家于京师西川赵和尚自称宋福王子广王及真定民刘驴儿谋不轨事觉皆磔裂以徇移五条河屯田军五百于兀失蛮札失蛮乙未卢世荣奏罢行御史台以其所属按察司隶御史台丙申帝畋于近郊以阿必实克为中书平章政事命礼部领会同馆辛丑以杨乌噜克岱为征古珪招讨使壬寅造大樽于殿是月壬午乌玛喇领兵与安南兴道王遇击败之乙酉安南世子陈日烜遁去入其城索多唐古特等引兵与镇南王会二月乙巳驻蹕柳林增济州漕舟三千艘役夫万二千人改江淮江西元帅招讨司为上中下三万户府蒙古汉人新附诸军相参作三十七翼上万户宿州蕲县真定沂郯益都高邮沿海七翼中万户枣阳十字路邳州邓州杭州怀州孟州真州八翼下万户常州镇江颍州庐州亳州安庆江阴水军益都新军湖州淮安寿春扬州泰州弩手保甲处州上都新军黄州安丰松江镇江水军建康二十二翼翼设达噜噶齐万户副万户各一人以隶所在行院丙午以荆湖行省所隶八番罗甸隶西川行省己酉为皇孙阿南达立衍福司使同知副使各一员辛亥广东宣慰使页特密实讨潮惠二州盗郭逢贵等四十五寨皆平辛酉御史台臣言近中书奏罢行御史台改按察司为提刑转运司俾兼钱谷而纠弹之职废请令复议从之壬戌中书省臣卢世荣请立规措所经营钱谷从之升御带库为章佩监 【按元史百官志御带库隶于章佩监监秩正三品至元二十二年置库秩从五品至元二十九年置岁月既殊亦非升秩也】 申严禁私造酒曲戊辰车驾如上都以安图言复立行御史台于江州立真定济南太原甘肃江西江淮湖广等处宣慰司兼都

转运使司以治课程立江西江淮湖广造船提举司以昂吉尔岱为中书左丞相己巳复立按察司以和塔拉为平章政事立供膳司三月 【按元典章是月禁民间不得织造销金缎匹倡优市井诸妇不得妄用金饰钗钏违者没官元史本纪失载】 丙子遣太史监候张公礼彭质等往占城测候日晷癸未罢甘州行中书省立宣慰司隶宁夏行省庚子照旧制凡盐一引四百斤价银十两折钞为二十贯夏四月癸卯立行枢密院都镇抚司庚戌监察御史陈天祥劾中书右丞卢世荣罪恶诏皆赴上都面质壬戌御史中丞阿拉克特穆尔等以卢世荣所招罪状上奏世荣对于帝前悉款服诏安图与诸老臣议世荣所行当罢者罢之更者更之其所用人实无罪者朕自裁决癸亥敕以敏珠尔丹所行清洁与安图治省事五月甲戌以御史中丞郭佑为中书省参知政事丁丑减上都商税戊寅以远方厯日取给京师不以时至荆湖等处四行省所用者隆兴印之哈喇章河西西川等处所用者京兆印之诏甘州每地一顷输税三石壬午以军千人修阿克实盐场仓以实都为达喇裕勒招讨使右巴等洞蛮平甲申立汴梁宣慰司依安西王故事汴梁以南至江以亲王镇之丁亥中书省臣言六部官冗甚可止以六十八员为额余悉汰去诏择其廉洁有干局者存之戊子云南行省臣图卜特穆尔言蠲逋赋征侵隐戍叛民明黜陟罢转运给亲王赋豪户除重税决盗贼增驿马取质子定俸禄教农桑优学者恤死事捕逃亡十六事命中书省议其可者行之戊戌陈日烜走海港镇南王命李恒追袭败之索多及恒皆战死六月丙辰遣巴苏呼阿里赉钞千锭往马八儿国求奇宝庚午减商税罢牙行省市舶司入转运司秋七月甲戌敕秘书监修地理志戊寅分甘州屯田新附军三百人田于额齐讷之地甲申改奇尔济苏等所平大小十溪洞悉为府州县修汴梁城庚寅枢密院言镇南王托欢所总征交趾兵久战力疲请于鄂啰齐等三万户分蒙古军千人江淮江西荆湖三行院分汉军新附军四千人选良将将之取镇南王托欢阿尔哈雅节制以征交趾从之复以唐古特为荆湖行省左丞唐古特请放征交趾军还家休憩诏从托欢阿尔哈雅处之八月辛丑朔给钞万二千四百锭为本取息贍甘肃二州屯田贫军命有司祭斗三日丙辰车驾至自上都己未复立泉府司九月 【按八月以辛丑之朔推之丙寅为二十六日戊辰为二十八日九月二字应在乙亥日上今仍其旧而识之】 丙寅遣蒙古军三千人屯田清沧靖海戊辰罢禁海商省哈喇章金齿二宣抚司为一治永昌立临安广西道宣抚司罢榷酤乙亥中书省以江北课程听杭鄂二行省节制道途迂远请改隶中书从之丙子真猎

占城贡乐工十人及药材鳄鱼皮诸物丙戌速木都刺马答二国遣使来贡癸巳乌蒙叛命四川行院伊苏岱尔将兵讨之西崖门酋长阿者等百余户来降冬十月己亥朔以钞五千锭和余于应昌府复分河闲山东盐课转运司为二遣阿萨尔哈雅使安南遣舒苏德济领辉和尔户一千戌哈喇章戊子享于太庙癸丑立征东行省以安塔塔为左丞相刘国杰陈岩并左丞洪俊奇右丞征日本赐托里察罕塔寺呼阿萨尔等印令考核中书其制如三品丙辰以参议特穆尔为参知政事戊午以江淮行省平章孟古岱为江浙省左丞相升大理寺为都护府十一月戊寅遣使告高丽发兵万人船六百五十艘助征日本仍令于近地多造船己丑御史台臣奏昔宋以无室家壮士为盐军数凡五千今存者一千二百二十二人性习凶暴民患苦之宜给以衣粮使屯田自贍诏议行之癸巳敕漕江淮米百万石泛海贮于高丽之合浦仍令东京及高严各贮米十万石备征日本诸军期于明年三月以次而发八月会于合浦乙未以图噜古为参知政事卢世荣伏诛丙申赦囚徒黥其面及招宋时贩私盐军习海道者为水工以征日本十二月乙未皇太子珍戩薨己未丹太庙楹辛酉立集贤院以济噜木领之丁卯敕有司祭北斗是岁命江浙转运司通管课程集诸路僧四万于西京普恩寺作资戒会七日夜命帝师聂尔巴沙克置遵锥喇克巴等递藏佛事于万安兴教庆寿等寺凡一十九会

钦定续通志卷六十

●钦定续通志卷六十一 元纪五

元纪 【五】

世祖 【四】

○世祖四

至元二十三年春正月戊辰朔以皇太子故罢朝贺禁赍金银铜钱越海互市甲戌诏罢征日本以江南废寺田土为人占据者悉付嘉木场喇勒智修寺癸未罢巩昌二十四城拘榷所以其事入有司辛卯命阿尔哈雅等议征安南事宜丁酉畋于近郊禁沮扰盐课二月己亥禁汉人持兵器甲辰谕皇子额森特穆尔调哈喇章军从征交趾乙巳罢山北辽东道开元等路宣慰司立东京等处行中书省戊午并江南行枢密院四处入行省罢鬻江南学田癸亥太史院上授时历经历议敕藏于翰林国史院甲子立甘州行中书省丙寅以编地里书召曲阜教授陈伊京兆萧■〈奭斗〉蜀人虞应龙伊■〈奭斗〉不至三月己巳遣侍御史程文海访求江南人才浚中兴路河渠乙亥以敏珠尔丹仍中书右

丞与郭佑并领钱谷杨居宽典铨选立钦察卫亲军都指挥使司丙子帝如上都诏行御史台按察使以八月巡行郡县罢征在籍百官俸之偿
万亿库者夏四月庚子罢燕南河东山道宣慰司敕江南诸路财赋并隶中书省甲辰以山南淮东淮西三道按察司隶内台庚戌制溢法己未
遣约苏穆尔钩考荆湖行省钱谷以汉民就食江南者多又从官南方者秩满多不归遣使尽徙北还中书省臣言比奉旨凡为盗者毋释今窃
钞数贯及佩刀微物与童幼窃物者悉令配役臣等议一犯者杖释再犯依法配役为宜帝曰朕以汉人徇私用泰和律处事致盗贼滋众故有
是言人命至重今后非详谳者勿辄杀人五月己巳荆湖行省阿尔哈雅上言约苏穆尔在鄂省岂无会贿臣亦请钩考之诏遣参知政事图尔
哈枢密院判李道治书侍御史陈天祥偕行六月辛丑中书省臣言图尔哈来奏前约苏穆尔阿尔哈雅互请钩考今阿尔哈雅虽已死事之是
非当令暴白帝曰此事自约苏穆尔所发当依其言究行之乙巳以立大司农司诏谕中外以所定农桑辑要书颁诸路戊申括诸路马凡色目
人有马者三取其二汉民悉入官敢匿与互市者罪之丁巳设陕西等路诸站总管府庚申以色彻肯为中书省平章政事辛酉封杨邦宪妻田
氏为永安郡夫人领播州安抚司事秋七月己巳立营田总管府核江南官田之为强豪所据者罢辽阳等处行中书省复北京咸平等三道宣
慰司庚午徙江淮行省于扬州立淮南洪泽芍陂两处屯田壬申置中尚监 【案元史百官志至元十五年置尚用监二十年罢二十四年改
置中尚监纪书于二十三年与志互异】 右丞拜达尔将兵讨阿蒙并其妻子禽之皆伏诛壬午总制院使僧格具省臣姓名以上帝曰右丞相
安图右丞敏珠尔丹参知政事郭佑杨居宽并仍前职以特穆尔为左丞其左丞相昂吉尔岱平章政事阿必实克和塔拉皆别议仍谕中书选
可代者以闻癸巳铨定省院台部官八月己亥免平阳路贫民税辛酉禁酒罢德平定昌二路置德昌军民总管府九月乙丑朔马八儿须门那
僧急里南无力马尔丹那旺丁呵儿来来急阑亦带苏木都刺十国各遣子弟上表来覲仍贡方物冬十月丁酉享于太庙己亥军驾至自上都
辛亥河决开封祥符陈留杞太康通许鄆陵扶沟洧川尉氏阳武延津中牟原武睢州十五处调南京民夫分筑堤防癸丑谕江南各省所统军
官教练水军十一月乙丑以张瑄朱清并为海道运粮万户免征覆舟粮敕禽兽字孕时毋畋猎十二月丙午置燕南河东山道宣慰司罢
大有署乙卯诏诸道宣慰司在内地者设官四员江南者六员戊午翰林承旨色埒默言国史院纂修太祖累朝实录请以辉和尔字翻译俟奏

读然后纂定从之诏诸路分置六道劝农司庚申置尚珍署于济宁等路是岁以伊实策凌为帝师命西僧递作佛事于万寿山玉塔殿万安寺
凡三十会大司农司上诸路学校凡二万一百六十六所

二十四年春正月戊辰浚河西务漕渠丙戌以参政程鹏飞为中书右丞阿里为中书左丞丁亥以巴雅尔哈雅为参知政事发新附军千人从阿巴齐讨安南复改江浙省为江淮行省赈鄂端及西边饥民辛卯以淮东淮西山南三道按察司隶行御史台命海道运粮万户张文虎等分道讨交趾二月壬辰朔遣使诣龙虎阁皂三茅设醮召天师张宗演赴阙甲午畋于近郊乙未以敏珠尔丹为平章政事甲辰以范文虎为中书右丞商议枢密院事壬子设都总管府以总皇子北安王民匠鄂端大小财赋戊午敕诸王实喇特穆尔节制诸军以赵与芮子孟桂袭平原郡公纳颜遣使征东道兵谕实喇特穆尔毋辄发闰月癸亥敕春秋二仲月上丙日祀尧帝祠乙丑畋于近郊召敏珠尔丹特穆尔杨居宽等与集贤院大学士谔尔根萨里及叶李程文海赵孟俯论钞法敏珠尔丹言自制国用使司改尚书省颇有成效今仍分两省为便诏从之各设官六员其尚书以僧格特穆尔平章政事谔尔根萨里右丞叶李左丞马绍参知政事余一员议遯回回人充辛未以复置尚书省诏天下除行省与中书议行余并听尚书省从便以闻立国子监设国学监官生员百二十人【案百官志国子学至元二十四年置生员额二百人】蒙古汉人各半仍隶集贤院设江南各道儒学提举司甲辰【案辛未之后乙酉之前不应有甲辰日应系甲戌或甲申之说】车驾还宫乙酉罢江南竹木柴薪及岸例鱼牙诸课敕行省宣慰司勿滥举官吏受除官延引岁月不即之任者追所受宣敕镇南王托欢徙镇南京范文虎改尚书右丞商议枢密院事改行中书省为行尚书省六部为尚书六部以吏部尚书实都为尚书省参知政事庚寅车驾如上都扎尔古齐哈喇哈斯等言去岁审囚官所录囚数南京济南两路应死者已一百九十人若总校诸路为数必多宜留扎尔古齐数人分道行刑帝曰囚非羣羊岂可遽杀耶宜悉配隶淘金三月甲午更造至元宝钞颁行天下中统钞通行如故乙卯如凉陞辽东饥弛太子河捕鱼禁丙辰命都水监开汶泗水以达京师夏四月诸王纳颜反五月己亥谕北京等处宣慰司凡隶纳颜所部者禁其往来毋令乘马持弓矢壬寅户工二部各增尚书二员授高丽王王睿行尚书省平章政事帝自将征纳颜发上都括江南僧道马匹甲辰免北京今岁丝银仍以军旅经行给钞三千锭赈之壬子高丽王王睿请益兵征纳颜以五百人赴之六月壬戌帝至实喇图噜之地纳颜当塔布

岱以兵逼行在而阵遣前军败之乙亥车驾驻齐达勒
鄂尔多之地获纳颜辎重千余秋七月癸巳纳颜党苏都尔犯咸平宣慰达春从皇子阿
雅噶齐合兵出浑州进讨宣慰伊尔苏克分兵趣懿州
其党悉平壬子罢纳颜所署分地移北京道按察司置濠州河西瓜沙等处立色辰屯田
八月乙丑车驾还上都置江南四省交钞提举司己巳
谪从叛诸王赴江南诸省从军自効丁亥立丰贍昌国济民三署女人国贡海人九月戊
申咸平懿州北京以纳颜叛民废耕作以海运粮五万
石賑之壬子高丽王王晷来朝冬十月戊午朔日有食之丙子检核中书钱谷杀参知政
事郭佑杨居宽 【案杀字符史作诛考郭佑杨居宽
为僧格所诬死以非罪诛字未合纲目书法恭依 御批通鉴辑览改】 乙酉立陕西
宝钞提举司罗北甸土官火者阿禾及维摩合刺孙之
子并内附丙戌立辽阳等处行尚书省十一月壬辰以僧格为尚书右丞相兼统制院使
领功德使司事右丞谔尔根萨里为平章政事叶李为
右丞参知政事马绍为左丞戊戌以巴实伯里汉军及新附军五百人屯田哈玛尔伊苏
奇尔之地庚子免大都路今年田租壬子以江西行省
平章呼图克特穆尔督捕广东等处盗贼十二月 【案元典章是月定告病官限期三年
以下者叙用五年以下者降一等七年以下者降二
等七年以上者不叙元史本纪失载】 癸亥立尚乘寺金竹寨主纛哩等以所部百二十
五寨内附丁卯减扬州省岁额米十五万石以盐引五
十万易粮免浙西余课三千锭听民自渔发河西甘肃等处富民千人往色辰地与汉军
新附军杂居耕植丁丑以朱清张瑄海漕有劳遥受宣
慰使乙酉镇南王以诸军渡富良江次交趾城下败其守兵陈日烜与其子弃城走敢喃
堡是岁命西僧嘉勒灿旺布博斯噶等作佛事坐静于
大殿寝殿万寿山五台山等寺凡三十三会

二十五年春正月陈日烜复走入海镇南王以诸军追之不及引兵还交趾城庚寅
祭日于司天台辛卯毁中统钞板乙未论征东功将士
升赏有差戊戌大赦敕弛辽阳鱼猎之禁惟毋杀孕兽癸卯海都犯边命诸王珠卜统兵
北征丙午畋于近郊己酉诏中兴西凉毋得沮坏河渠
两淮两浙毋得沮坏岁课賑辽阳军民饥癸丑诏行大司农司各道劝农营田司巡行劝
课举察勤惰 【营田原误作屯田据百官志改】 增
置淮东西两道劝农营田司二月丁巳镇南王引兵还万劫壬戌敕江淮勿捕天鹅弛鱼
溲禁丙寅改南京路为汴梁路北京路为武平路西京
路为大同路东京路为辽阳路中兴路为宁夏府路诏征葛洪山隐士刘彦深己卯以高
丽国王王晷复为征东行尚书省左丞相以江南站户

贫富不均命有司料筒合户税至七十石当马一匹并免杂徭独户税逾七十石愿入站者听辛巳以杭州西湖为放生池壬午命皇孙云南王额森特穆尔帅兵镇大理三月戊子车驾还宫庚寅帝如上都壬寅礼部言会同馆蕃夷使者时至宜令有司仿古职贡图绘而为图及询其风俗土产去国里程籍而录之实一代之盛事从之镇南王以诸军北还陈日烜遣使来谢进金人代己罪夏四月征宋江西招谕使谢枋得不至癸亥浑河决发军筑堤捍之乙丑广东贼董贤举等反剽掠吉赣瑞抚龙兴南安韶雄汀诸郡戊辰浚齐喇河以溉袞诺尔黄土山民田甲戌万安寺成佛像及窗壁皆金饰之庚辰安南国王陈日烜遣中大夫陈国用来贡方物【案安南国传陈日烜之立在至元十四年纪内仍书安南世子者以其不请命而自立也自后历年用兵至二十五年日烜遣使谢罪故是年四月始书安南国王非日烜至是始立也】甲申诏皇孙特穆尔抚诸军讨叛王和尔果斯哈坦多罗干五月戊子诸王察罕子库库岱叛绰和尔执之以来乙未遣官分道置局钩考中统钞本壬寅浑天仪成六月甲寅朔以新附军修尚食局戊辰海都将额布勒绰诺以兵犯伊尔根淖尔管军元帅阿尔岱击却之壬申以睢阳霖雨河溢害稼免其租甲戌改西南番总管府为永宁路丁丑发兵千五百人诣汉北浚井癸未处州贼柳世英寇青田丽水等县浙东道宣慰副使史耀讨平之秋七月丙戌弛宁夏酒禁以保定路霖雨害稼蠲今岁田租壬子命鄂端戍兵三百一十人屯田命六卫造军器八月癸酉以河间等路盐运司兼管顺德广平綦阳三铁冶丁丑减嘉祥鱼台金乡县今年租庚辰分万亿库为宝源赋源绮源广源四库九月壬辰车驾至大都乙未罢檀州淘金户都勒斡犯边庚子营五库禁中以贮币帛癸卯南台御史中丞刘宣自杀庚戌太医院新编本草成冬十月己未享于太庙庚申遣省院台官十二人理算江淮江西福建四川甘肃安西六省钱谷丙寅赐瀛国公赵■〈显，去页〉钞湖广省言左右江口溪洞蛮獠置四总管府统州县洞百六十所调官畏惮瘴疠多不敢赴请以汉人为达噜噶齐军官为民职杂土人用之就拟瓜尔佳萨哈等七十四人以闻从之庚午海都犯边丙子始造铁罗圈甲遣瀛国公赵■〈显，去页〉学佛于土番己卯诏免儒户杂徭尚书省臣请令集贤院廩给多才艺者从之十一月丁亥以何荣祖为参知政事禁有分地臣私役富室为柴米户及赋外一切杂徭十二月丁巳海都犯边巴图尔约苏图迎击死之乙亥湖头贼张治罔掠泉州丙子伊苏布哈以实勒们叛甘肃行省官约诸王巴拜巴尔达噶驸马昌吉合兵讨之实勒们以其属西走追执之归于

京师庚辰以雨雹河溢害稼减民租

二十六年春正月丙戌开安山渠己丑发兵塞沙陀间德勒格尔河辛卯沙布鼎上市舶司岁输珠四百斤金三千四百两诏贮之以待贫乏者哈坦入寇戊戌蠲汀漳二州今年租壬寅罢胶莱海道运粮万户府癸卯贼锺明亮寇赣州掠盩都据秀岭诏发江淮省及邻郡戍兵五千迁江西省参政管如德为左丞使将兵讨之畚民邱大老集众千人寇长泰县福州达噶噶齐托欢同漳州路总管高杰讨平之戊申以荆南按察使所统辽远割三路入淮西二路入江西二月丙寅诏自泉州至杭州立海站十五专运番夷贡物及商贩奇货丁卯帝如上都以中书右丞相巴延知枢密院事将兵镇和琳【置知院自此始】以拜达勒为中书平章政事哈坦兵寇呼噜口开元路治中乌延雅勒呼击破之己巳立左右翼屯田万户府甲戌命巩昌便宜都总帅汪惟和将所部军万人北征乙亥省屯田六署为营田提举司三月庚辰朔日有食之台州贼杨镇龙聚众盗海僭称大兴国寇东阳义乌浙东大震诸王昂吉尔岱时谪婺州帅兵讨之立云南屯田以供军储癸巳金齿人塞完以其民二十万一千户有奇来归夏四月戊午禁江南民挟弓矢犯者籍以为兵省江淮屯田打捕提举司七所存徐邳海州扬州两淮淮安高邮昭信安丰镇巢蕲黄鱼纲石湫十二所庚午沙河决发民筑堤以障之甲戌以御史大夫伊嚞勒为太傅加开府仪同三司金江西等处行尚书省事置浙东江东江西湖广福建木绵提举司福建参知政事魏天佑执宋谢枋得至燕不屈死之五月庚辰发武卫亲军千人浚河西务至通州漕渠丙申贼锺明亮率众来降以参知政事实都为尚书左丞中书参知政事何荣祖为参知政事【案百官志参知政事中书省二具尚书省二员此时何荣祖盖以中书参政徙官尚书也】参议尚书省事张天佑为中书参知政事己亥设回回国子学罢永盈库以所贮上供币帛入太府监及万亿库辛丑青山猫蛮以不莫台卑包等三十三寨相继内附六月辛亥诏以云南行省地远州县官多阙六品以下许本省选辟以闻庚申诸王奈曼岱败哈坦兵于托果琳河丙寅永和尔犯边辛未海都犯边和琳宣慰使奇卜同知奈曼岱副使巴噶图尔皆反应之甲戌西南夷中下烂土等处洞长忽带等以洞三百寨百一十来归乙亥金刚努寇扎兰齐喇立江淮等处财赋总管府掌所籍宋谢太后贖产隶中宫秋七月戊寅朔海都犯边帝亲征开安山渠成诏赐名会通河甲申四川山齐蛮民四寨五百五十户内附丙戌命百官市马助边辛卯遣扬珠济达诣江南搜访术艺之士发和琳所屯奇尔济苏等军北征八月乙卯免宜章县今年租

辛酉免大都路今年租仍减价棗诸路仓粮九月己卯
置高丽国儒学提举司丙戌罢济州泗汶漕运使司丁亥罢鄂端宣慰使元帅府癸巳以
京师余贵禁有司拘雇商车丙申江淮省平章沙布鼎
言提调钱谷积怨于众乞如约苏穆尔例拨戍兵三百人为卫从之冬十月乙卯以八番
罗甸隶湖广省丙辰禁内外官受人馈酒食者没其家
贖之半甲子享于太庙闰月戊寅帝还大都庚辰令税赋并输至元钞商贩中统料钞听
易至元钞以行页特密实以首贼邱应祥董贤举归于
京师丙戌西南夷生番心■〈木〈此上夕下〉〉等八族内附广东贼锺明亮复反韶
雄诸贼举兵应之诏页特密实复与福建江西行省合
兵进讨丙申婺州贼叶万五寇武义县江淮行省平章布琳济达将兵讨之庚子取石泃
滨为磬以补宫县之乐辛丑罗斛女人二国遣使来贡
方物十一月壬子漳州贼陈机察等寇龙岩执千户张武义与枫林贼合福建行省兵大
破之陈机察邱大老张顺以其党降癸丑建宁贼黄华
弟福结陆广马胜复谋乱事觉皆论诛十二月辛巳诏括天下马一品二品官许乘五匹
三品三匹四品五品二匹六品以下皆一匹徙宋赵氏
族人散居江南省居京师丁亥封子库库楚为宁远王甲午以官军万户汪惟能征西
都元帅将所部军入漠其先戍漠兵毋令还翼庚子巴
延遣使来言边民乏食诏赐网罟使取鱼自给是岁诏天下梵寺所贮藏经集僧看诵仍
给所费岁为例大圣寿万安寺置旃檀佛像命帝师及
西僧作佛事坐静二十会

二十七年春正月庚戌以河东山西道宣慰使阿里和卓为尚书右丞宣慰使如故
癸丑敕从臣子弟入国子学丙寅命高丽国发耽罗戍
兵讨哈坦余寇癸酉复立兴文署掌经籍板及江南学田钱谷二月乙亥朔立全罗州道
万户府辛巳括河间实保齐户口己丑江西羣盗锺明
亮等复降诏徙为首者至京师而给其余党粮辛卯复立南康兴国榷茶提举司发虎贲
更休士二千人赴上都修城癸巳以晋陵无锡二县霖
雨害稼免其租江西贼华大老黄大老等掠乐昌诸郡行枢密院讨平之三月己未放罢
福建猎户沙鱼皮户为民发云州民夫凿银洞庚申罢
行司农司及各道劝农营田司立江南营田提举司掌僧寺贖产放寿颍屯田军千九百
五十九户为民撤江南戍兵代之置金竹府大隘等四
十二砦蛮夷长官甲子杨震龙余众剽浙东总兵官讨贼者多俘掠良民敕行御史台分
拣之夏四月癸酉朔车驾如上都癸未罢海道运粮万
户府改利津海道运粮万户府为临清御河运粮上万户府发六卫汉军万人伐木为修
城具罢发遣江南兼并户及宋宗族之赴京师者丙戌

遣桑节喇实等诣马八儿国访求方伎士五月乙巳哈坦寇开元戊申江西行省管如德江西行院页特密实合兵讨反寇锺明亮罢江西行枢密院庚戌以陕西南市屯田陨霜杀稼免其租戊午移江西行省于吉州以便捕盗丙寅罢奉宸库江西行省言吉赣湖南广东福建以禁弓矢贼益发乞依内郡例许尉兵持弓矢从之庚午括天下阴阳户口仍立各路教官有精于艺者岁贡各一人六月壬申朔以太康河溢免其租甲戌桑州总管黄布篷那州长罗光寨安郡州长闭光过率蛮民万余户内附庚辰缮写金字藏经以韶州乐昌县并遭畚贼之乱免其租丙申完都城秋七月丙午禁平地忙安仓酿酒犯者死癸丑罢缅中行尚书省免大都路岁赋丝戊午贵州猫蛮三十余人作乱劫顺元路湖广省檄八番蔡州均州二万户府及八番罗甸宣慰司合兵讨之丙寅云南阁力白夷甸酋长凡十一甸内附八月辛未朔日有食之庚辰免大都平滦河间保定四路流民租及酒醋课九月乙巳禁诸王遣僧建寺扰民平章政事实喇特穆尔帅师与哈坦战于乌法大破之戊申金竹府知府纒哩贡马及雨毡且言金竹府虽内附蛮民多未服近招降竹古弄古鲁花等三十余寨乞立县设长官总把参用土人从之丙辰赦天下丁卯命江淮行省钩考行教坊司所总江南乐工租赋冬十月壬申封皇孙噶玛拉为梁王赐金印出镇云南癸酉享于太庙乙酉梁桐梁宫朝吴曲洞吴汤暖等凡二十洞以五千余户内附己丑新作太庙登歌宫悬乐以实保齐岁取鸬鹚成都扰民罢之十一月戊申江淮行省平章布琳济达言福建盗贼已平惟浙东一地道极边恶贼所巢穴宜复立三万户以哈喇岱一军戍沿海明台伊奇哩一军戍温处扎呼岱一军戍绍兴婺其扬州建康镇江三府跨据大江人民繁会宜置七万户府杭州行省诸司府库所在宜置四万户府钱塘控扼海口旧置战船二十艘故海贼时出夺船杀人今宜增置战船百艘海船二十艘则盗贼不敢发从之庚戌罢云南会州路采碧甸子罢大都东西二驿托克托和斯以通政院总之十二月戊寅免大都平滦保定河间自至元二十四年至二十六年逋租丙戌兴化路仙游贼朱三十五集众寇青山万户李纲讨平之乙未摘蒙古军万人分戍双城及博索府诸城以防哈坦兵己亥处州青田贼刘甲乙等集众万寿人寇温州平阳命帝师西僧递作佛事坐静于万寿山厚载门察罕淖尔圣寿万安寺桓州南屏庵双泉等所凡七十二会

二十八年春正月辛亥罢汴梁至正阳■〈木巳〉县睢州中牟郑唐邓十二站站户为民丁巳遣呼雅克齐四百人北征辛酉罢江淮漕运司并于海船万户府由海道漕运免江淮贫民至元十二年至二十五年逋租及二十

六年未输田租罢淘金提举司壬戌尚书省臣僧格等
以罪罢二月辛未徙万亿库金银入禁中富宝库癸酉以陇西四川总摄年扎克钟鼎为
诸路释教都总统改福建行省为宣慰司隶江西行省
诏行御史台勿听行省节度丙子罢征理司丁丑以太子右詹事谔勒哲为尚书右丞相
翰林学士承旨博果密平章政事巳卯立金齿等处宣
慰司都元帅府壬午以僧格沮抑台纲又捶监察御史命御史大夫阿尔娄辨正之癸未
帝如上都乙酉立江淮湖广江西四川等处行枢密院
以集贤大学士何荣祖为尚书右丞集贤学士贺胜为尚书省参知政事诏江淮行省遣
蒙古军五百汉兵千人从皇子镇南王镇扬州丁亥营
建宫城南面周庐以居宿卫之士执僧格妻党湖广行省平章约苏穆尔至京师戊子籍
约苏穆尔家赀癸巳籍僧格家赀三月巳亥朔僧格妻
弟燕南宣慰使巴结伊特以受赂积赃伏诛辛酉发侍卫兵营紫檀殿壬戌以甘肃行省
右丞崔彧为中书右丞南丹州莫国麟入覲授国麟安
抚使夏四月甲戌以地震免侍卫兵籍武平者今岁徭役庚辰弛杭州西湖禽鱼禁五月
戊戌遣托克托塔喇海呼逊三人追究僧官江淮总摄
嘉木扬喇勒智等盗用官物以参知政事廉希恕为湖广等处行省右丞行海北海南道
宣慰使都元帅琼州安抚使陈仲达海北海南道宣慰
使都元帅湖广行省左右司郎中布延伊苏巴实伯里副元帅王信并同知海北海南道
宣慰司事副元帅将二千二百人征黎蛮立左右两江
宣慰司都元帅府甲辰中书省臣敏珠尔丹崔彧言僧格当国四年诸臣多以贿进亲旧
皆授要官唯以欺蔽九重朘削百姓为事宜令两省严
加考核并除名为民从之约苏穆尔伏诛辛亥征太子赞善刘因不起僧格弟巩昌宣慰
司达尔玛达实自杀诏下僧格于狱癸丑罢尚书省事
皆入中书改尚书右丞相右詹事谔勒哲为中书右丞相平章政事敏珠尔丹博果密并
中书平章政事尚书右丞何荣祖中书右丞尚书左丞
马绍中书左丞参知政事贺胜高翥并参知中书政事征东行尚书省左丞相驸马高丽
国王王睿为征东行中书省左丞相丁巳建白塔二各
高一丈一尺以居呪师多斯德桑节等七人何荣祖以公规治民御盗理财等十事辑为
一书名曰至元新格命刻版颁行使百司遵守己未以
默德齐复为御史大夫行御史台事六月丁卯朔禁蒙古人往回回地为商辛巳洞蛮镇
远立黄平府乙酉洗国王洞主事备什王弟同来朝益
江淮行院兵二万击郴州桂阳宝庆武冈四路盗贼以汴梁逃人男女配偶成家给农具
耕种秋七月丙申朔置建都金冶令旁近民炼金输官
戊申罢江南诸省买银提举司丁巳僧格伏诛募民耕江南旷土户不过五顷官授之券

俾为永业三年后征租遣哈克伞总兵讨平江南盗贼
已未罢淘金提举司壬戌弛畿内秋耕禁八月己巳罢江西等处行泉府司大都甲匠总
管府广州人匠提举司广德路录事司乙酉遣默色和
斯乘传诣云南捕黑虎戊子咀喃番邦遣马不刺罕丁进金书宝塔及黑狮子辛卯命工
部造飞车九月辛丑以平章政事敏珠尔丹商议中书
省事复以咱希鲁鼎平章政事代之丙午立行宣政院治杭州壬子命海船副万户杨祥
哈玛尔张文虎并为副元帅将兵征琉球既又以祥为
宣抚使阮监兵部员外郎吴志斗礼部员外郎赍诏招谕琉球明年祥等不能达而还冬
十月壬申以前缅中行尚书省平章政事舒苏德济为
中书省平章政事癸酉享于太庙癸未罗斛国王遣使上表以金书字仍贡黄金象齿丹
顶鹤五色鹦鹉翠毛犀角笃耨龙脑等物罢各行枢密
院事入行省己丑敕没入嘉木扬喇勒智沙布鼎乌玛喇妻并遣诣京师癸巳免卫辉种
仙茅户徭役十一月乙卯新添葛蛮宋安抚率洞官阿
汾清贵来贡方物谕中书省议增中外官吏俸戊午金齿国遣阿腮入觐辛酉置望云银
冶十二月乙丑籍特默齐巴噶岱尔等六万户成丁者
为兵己巳宣政院臣言宋全太后瀛国公母子已为僧尼有地三百六十顷乞如例免征
其租从之辛未御史台臣言钩考钱谷自中统初至今
余三十年更阿哈玛特僧格当国设法已极而其余党公取贿赂民不堪命不如罢之有
旨议拟以闻壬申立河南江北行中书省治汴梁中书
省臣言江南在宋时差徭为名七十有余归附后一切未征今分隶诸王城邑岁赐之物
仰给京师又中外官吏俸少似宜量添可令江南依宋
时诸名征赋尽输之何荣祖言宜召各省官任钱谷者诣京师集议科取之法以闻从之
甲戌诏罢钩考钱谷应昔年逋负钱谷文卷聚置一室
非奉命而视之者罪之丙戌八番洞官吴金叔等以所部二百五十寨民二万有奇内附
戊子诏释天下囚非杀人抵罪者辛卯授策凌巴鄂尔
置勒为帝师统领诸国僧尼释教事 【案释老传策凌巴鄂尔置勒为帝师在至元三十
一年此载于二十八年与传不符】 令僧罗卜藏等
递作佛事坐静于圣寿万安涿州寺等所凡五十度

二十九年春正月甲午朔日有食之己亥开通州漕河以郭守敬领都水监事庚子
诏招谕江西福建汀漳诸处百姓入山避盗者使复其
业禁商贾私以金银航海甲辰诏江南州县学田其岁入听其自掌春秋释奠外以廩师
生及士之无告者贡士庄田则令核数入官丙午诏谕
未附平伐大瓮眼紫江皮陵潭溪九堡等处诸洞苗蛮癸丑立织造段匹提举司壬戌召
嗣汉天师张与棣赴阙二月甲子朔金竹酋长纒哩贡

马毡各二十有七诏减所部贡马赐新附黑蛮衣袄遣回命进所产朱砂雄黄之精善者
丁卯畋于近郊己巳除问刑官鞭背法庚午乌鲁斯招
附桑州生苗罗甸国古州等峒酋长三十一所诣阙贡献壬申遣使分行诸路释死罪以
下囚乙亥立总管高丽女真汉军万户府以泉府太卿
伊克穆苏邓州旧军万户史弼福建行省右丞高兴并为福建行中书省平章政事将兵
征瓜哇诏加高丽王王睿太保仍锡功臣之号遣诸王
之从逆者于各边俾从军自效戊子禁杭州放鹰三月壬寅御史大未阿尔娄等奏比监
察御史商琥举昔任词垣风宪时望所属如胡祗遹姚
燧王恽雷鹰陈天祥杨恭懿高道程文海陈俨赵居信十人宜召置翰林备顾问帝曰朕
未深知俟召至以闻丁未尼雅斯拉鼎摩哩以盗取官
民钞一十三万余锭实都以征理逋负迫杀五百二十人皆伏诛王巨济与实都同恶并
诛之定赃罪十三等枉法者五不枉法者八己酉以大
司农同知宣徽院事兼领尚膳监事特尔格翰林学士承旨通政院使兼知尚乘寺事琳
沁并为中书平章政事兼领旧职中书省臣言右丞何
荣祖以疾平章政事敏珠尔丹以久居其任乞令免署惟食其禄与议中书省事从之以
阿里为中书右丞梁温都尔为参知政事庚戌车驾如
一都壬子敕都水监分视黄河提堰罢河渡司壬戌给还嘉木扬喇勒智土田人口之隶
僧坊者夏四月辛卯设云南诸路学校其教官以蜀土
充五月丁未给还杨居宽郭佑家赀六月戊辰诏听僧食盐不输课壬申铁旗城后齐苏
哲尔率其族类部曲三千余户来附甲戌设司籍库隶
太府监土物之籍入者闰月壬寅罢福建岁造象齿鞞带辛亥左江总管黄坚言其管内
黄胜许聚众二万据忠州乞调军万人土兵三千人命
刘国杰讨之臣愿调军民万人以从诏许之甲寅右江岑从毅降诏以其子斗荣袭镇安
路总管是月诏谕廉访司巡行劝课农桑礼部尚书张
立道郎中奎腾使安南回以其使臣阮代之何维岩至阙陈日燿拜表笺修岁贡秋七月
庚申朔以史弼代伊克穆苏高兴将万人征瓜哇遣使
检核窜名鹰坊受粮者辛酉河南江北道廉访司还治汴梁癸亥完大都城壬申建社稷
于和义门内庚辰敕云南省拟所辖州县官如福建二
广例省台委官铨选以姓名闻随给授宣敕八月壬辰敕礼乐户仍与军站民户均输赋
壬寅括唐古图尔哈所部库特齐及河西逃人入蛮地
者甲辰车驾至自上都讨浙东孟总把等贼敕诸军之驻福建者听平章政事舍哩节度
壬子诏达喇齐程鹏飞讨黄圣许刘国杰驻马军戍守
戊午罢福建银冶诏布勒图蒙果勒默色以军征八百媳妇国九月辛酉诏谕安南国王
陈日燿使亲入朝选湖南道宣慰副使梁曾授吏部尚

书佩三珠虎符翰林国史院编修官陈孚授礼部郎中佩金符同使安南丁卯中书省臣言茆■（廿鷄）十围安化等新附洞蛮凡八万宜设管军民司以其土人蒙意蒙世莫仲文为长官以吕天佑塔布岱为达噜噶齐八番宣慰使乌鲁斯【案元史无宣慰使三字考百官志有八番顺元等处宣慰使司乌鲁斯时奉命经理其事不应举其地而遗其官今据增】招附光兰州洞蛮宜置定远府就用其所举图罕高守文黄世曾音扎噶为达噜噶齐知府同知判官从之癸酉徙瓜沙二州民于甘肃画地使耕盩夏半艺红花诏令尽种谷麦以补民食辛巳罢云南行台徙置西川丁亥置乌思藏纳喇苏古噜逊等三路宣慰使司都元帅冬十月戊子朔诏福建廉访司知事张师道赴阙授翰林直学士癸巳燕公楠言岁终各行省臣赴阙奏事亦宜令行台臣赴阙奏一岁举刺之数从之丙申四川行省以洞蛮酋长向思聪等七人入朝壬寅授高德诚管领海船万户佩双珠虎符以殷实陶大明副之令将出征水手甲辰星哈喇塔音国遣使入覲广东道宣慰司遣人以暹国主所上金册诣京师癸丑罢怀孟竹课十一月癸未禁所在私渡命天津讯察奸宄丙戌提省溪锦州铜人等洞酋长杨秀朝等六人入见进方物十二月庚寅改封皇孙梁王噶玛拉为晋王镇北边癸巳罢盩国路凿山岁额银己酉故麓川路军民总管达噜噶齐阿萨尔男本布同赵升等招木忽鲁甸金齿土官忽鲁马男阿噜来入见贡方物丁巳敕都水监修治保定府沙塘河堤堰是岁命国师诸僧呪师修佛事七十二会

三十年春正月壬戌遣使招谕漆头金齿蛮丙寅命中书汰冗员戊辰诏边境无事令本军屯耕以食庚午验洞酋长杨总国等来朝给尼奇哩女真牛价农具甲戌罢尼雅斯拉鼎摩里鱼盐局丙子西番一甸蛮酋三人来覲各授蛮夷军民官丁丑右丞相安图卒二月己丑以嘉木杨喇勒智子宣政院使温普为江浙行省左丞高丽国王王睿请易名曰距减河南江浙海运米四十万石免大都今岁公赋以济苏摩哩与鬼蛮之民隶詹事院丙申却江淮行枢密院官布琳济达进鹰仍禁军官无从禽扰民丁酉回回伯克玛哈玛迪沙等献大珠还之发海运米给辽阳戍兵丁未车驾如上都以新附洞蛮吴动鳌为潭溪等处军民官辛亥发总帅汪惟和所部军三千征土番陕西四川兵征西番复立云南行御史台诏沿海置水驿自耽罗至鸭绿江口凡十一所令洪君祥董之申严江南兵器之禁三月庚申以同知枢密院事扎萨克知枢密院事以平章政事范文虎董漕河之役平章政事李庭率诸军扈从甲子括天下马己巳立行大司农司夏四月己亥行大司农燕公楠翰林学士承

旨留梦炎言杭州上海澈浦温州庆元广东泉州置市舶司凡七所唯泉州物货三十取一余皆十五抽一乞以泉州为定制从之仍并温州舶司入庆元杭州舶司入税务甲寅遣使招谕暹国授光州蛮人光龙及邦崖王文显金竹府马麟大龙番秃卢忽永顺路彭世疆安化州吴再荣师壁散毛洞勾答什王等各为蛮夷官敕江南毁诸道观圣祖天尊祠五月壬戌定云洞蛮酋长来附癸亥括思播等处亡宋涅手军丙寅罢江浙行省左丞温普以浙西大水令富家募佃人疏决水道辛未敕僧寺邸店商贾舍止其物货依例收税六月丙戌选河西质子军赴皇孙阿南达所出征乙巳以皇太子宝授皇孙特穆尔总兵北边秋七月己未诏皇曾孙松山出镇云南以皇孙梁王印赐之免福建岁输皮货及泉州织作纴丝庚申命知鹤庆府实保齐赉玺书招谕农顺未附蛮寨壬申以伊彻察喇知枢密院事丁丑新开通州漕河成赐名通惠河壬午以济尔噶呼所汰奇尔济苏户七百屯田哈斯罕之地八月丙戌括所在荒田无主名者令放良漏籍等户屯田庚寅奉使安南国梁曾陈孚以安南使人陶子奇梁文藻偕来丁未设镇守黎蛮海北海南屯田万户府九月癸丑朔帝至自上都乙丑立海北海南博易提举司税依市舶司例癸酉以御史台赃罚钞给卫士之贫者冬十月戊子诏修汴堤己丑遣兵部侍郎哈喇托辉等使克噶格尔纳塔星哈喇塔音三国仍赐星哈喇塔音酋长三珠虎符庚寅享于太庙甲辰赦天下庚戌造象蹄掌甲辛亥禁江南州郡以乞养良家子转相贩鬻及强将平民略卖者十一月戊辰以金齿木朵甸户口增立下路总管府给其长双珠虎符庚午免江南都作院军匠出征己卯以河南江北行省平章巴延入为中书省平章政事位特尔格琳心博果密上十二月丁亥禁汉军更番者毋鬻军器乙未遣使督思播二州及镇远黄平发宋旧军八千人从征安南庚子平章政事伊克穆苏史弼高兴等征交趾无功而还各杖而耻之仍没其家赀三之一癸卯以僧格没入官田给额尔克乌兰所司匠户丙午以塔齐托克托穆尔耀珠巴延四人并为安西王傅是岁天下路府州县等二千三十八路一百六十九府四十三州三百九十八县千一百六十五宣抚司十五安抚司一寨十一镇抚所一堡一各甸部管军民官七十三长官司五十一录事司百三巡院三官府大小二千七百三十三处

三十一年春正月壬子朔帝不豫免朝贺癸亥知枢密院事巴延至自军中 【案纪于至元三十年十一月书河南江行省平章巴延入为中书省平章政事三十一年正月书知枢密院事巴延至自军中官位各不同盖实两人也】 庚午帝大渐癸酉崩于紫檀殿年八十葬起辇

谷谥曰圣德神功文武皇帝庙号世祖国语曰色辰皇帝

世祖中统四年至元三十一年凡三十五年

钦定续通志卷六十一

●钦定续通志卷六十二 元纪六

元纪 【六】

成宗 【一】

○成宗一

成宗皇帝讳特穆尔世祖之孙太子珍戩第三子也母鸿吉哩氏至元二十二年太子薨二十五年世祖命帝讨叛王哈坦削平辽左诸部

三十年受皇太子宝抚军北边明年甲午春正月世祖崩诸王大臣遣使如军中告哀夏四月壬午帝至上都左右部诸王毕会先是御史中丞

崔彧得玉玺于故臣之家其文曰受命于天既寿永昌上之帝母鸿吉哩氏至是手授于帝 【案续通鉴纲目时穆呼哩曾孙硕迪已死而贫

其妻出玉玺一鬻之或以告御史中丞崔彧召秘书监丞杨桓辨其文曰受命于天既寿永昌此历代传国玺也遂献之故太子妃鸿吉哩氏出

以遍示羣臣丞相以下次第上寿庆曰神宝之出此天意属于皇太孙也乃遣右丞张九思赉授之所载较本纪为详伏读通鉴辑览 御批

秦玺已为煨烬昔人言之甚详崔彧此举或以皇孙尚在北边恐上都宗室诸臣起滋异说欲假此以神道设教耳不然穆呼哩为元代世臣既

有此玺安敢久匿不献直待身后家贫出鬻耶 圣训煌煌允足订讹征信谨录识之】 甲午即皇帝位大赦除大都上都两路差税一年其

余减丁地税粮十之三追尊皇考曰皇帝尊母元妃曰皇太后庚子遣礼部侍郎李衍兵部郎中萧泰登赉诏使安南己酉云南行省以所定路

府州县来上上路二下路十一下州四十九中县一下县五十以金齿归附官阿噜为孟定路总管五月乙亥以扎实知枢密院事戊寅以阿尔

娄为太师巴延为太傅伊彻察喇为太保六月庚辰朔日有食之壬辰以特穆尔复为平章政事以甘肃等处米价踊贵诏禁酿酒乙未以世祖

皇后裕宗谥号播告天下免所在本年包银俸钞及内郡地税江淮以南夏税之半己亥以乳保劳封完颜巴延为冀国公妻何氏为冀国夫人

辛丑浙西道提刑按察使鸿吉勒岱鄂尔和受赂遇赦免复以为河西陇北道肃政廉访使宋使家铉翁安置河间年踰八十赐衣服遣还其家

戊申以策凌巴鄂尔嘉勒为帝师赐玉印秋七月壬子禁内外诸司减官吏俸为宴饮费壬戌诏中外崇奉孔子戊辰行枢密院页特密实程鹏

飞各加平章政事辛未令右丞阿里执政如故癸酉以陕西行省平章博果密为中书平章政事甲戌立随路民匠打捕鹰房纳绵等户总管府
诏招谕暹国王敢木丁来朝或有故则令其子弟及陪臣入质诏阿尔娄守北边八月戊子初祀社稷用堂上乐岁以为常己丑以大都留守段
贞平章政事范文虎监浚通惠河令军士复浚浙西太湖殿山湖沟港立新河运粮千户所九月壬子圣诞节帝驻蹕三部落受诸王百官贺甲
寅口授诸王傅昂哈布哈为丞相庚申以和啰罗及纳颜之党七百余入隶同知枢密院事布琳济达习水战乙亥遣托噶特穆尔等使阁蓝冬
十月戊寅车驾还大都辛巳令江南佃民当输田主者如所蠲今岁田租十之三壬午有事于太庙乙未金齿新附孟爱甸酋长遣其子来朝即
其地立军民总管府辛丑帝谕右丞阿里参政梁德珪曰中书职务卿等皆怀怠心又不约束吏曹使选人留滞僧格虽奸邪然僚属惮其威政
事无不立决卿等其约束曹属有不事事者笞之仍以朕意谕右丞相谔勒哲壬寅缅甸遣使贡驯象十十一月庚戌诏京师犯赃罪者三百人
事无疑者准世祖所定十三等例决之壬子诏以军民不相统壹罢湖广江西行枢密院并入行省乙卯令河西僧人依旧助役丁巳以巴延彻
尔参议中书省事罢呼雅克齐屯田总管府罢宣政院所刻河西藏经板甲子诏禁作奸犯科者以湖南道宣慰司何伟为中书参知政事罢海
北海南市舶提举司癸酉诏改明年为元贞元年十二月丙戌罢辽河等处人匠正副达噜噶齐戊戌禁侵扰农桑者庚子选各卫精兵千人命
巴喇罕岱尔等将之戌和琳听太师阿尔娄节度三年而更用帝师奏释京师大辟三十人杖以下百人是月太傅知枢密院巴延卒

元贞元年春正月癸丑以太仆卿济尔噶郎为御史大夫壬戌以云南行省左丞杨炎龙为中书左丞乙丑以亦奚不薛复隶云南行省以
行枢密院既罢赐中书省长官虎符领其军庚午以江浙行省平章阿喇卜丹为参知政事壬申立北庭都元帅府以平章政事赫伯为都元帅
江浙行省右丞色埒默为副都元帅立察逊塔拉都元帅府以根敦扎卜为都元帅罢瓜沙等州屯田二月丁丑翰林学士承旨留梦炎告老壬
午罢江南茶税以其数三千锭添入江西榷茶都转运司岁额戊子思州田曷刺不花云南夷卜木四川洞主查闾王金齿带梅混冬等来见丁
酉车驾如上都癸卯以工部尚书兼诸路金玉人匠总管府达噜噶齐吕天麟为中书参知政事立云州银场都提举司三月壬子禁来朝官敛
所属俸戊午罢福建银场提举司以东作方殷罢诸不急营造丙寅增置蒙古学正以各道肃政廉访司领之夏四月庚寅封乳母杨氏为赵国

安翼夫人癸巳以同知乌撒乌蒙等处宣慰使司事雅克诺木假兵部尚书佩虎符使马答儿的阴闰月丙午为皇太后建佛寺于五台山以前工部尚书鼐济为将作院使领工部事燕南河北道肃政廉访使宋德柔为工部尚书董其役以大都保定真定平阳太原大同河间大名顺德广平十路应其所需甲寅立舍哩招讨使司己未罢打捕鹰房总管府及司籍周用薄敛等库五月戊寅命敏珠尔丹何荣祖等厘正选法庚辰诏各省止存儒学提举司一余悉罢之升江南诸县为州以户为差户四万五万者为下州五万至十万者为中州下州官五员中州六员凡为中州二十八下州十五又以连州户不及额降路为州辛巳罢行大司农司加平章政事敏珠尔丹为平章军国重事中书左丞议中书省事何荣祖为昭文馆大学士与中书省事甲申诏免五月以前逋欠钱粮丙申以巴延子满达勒为金书枢密院事六月乙卯以江西诸郡水灾赈之仍弛江南湖泊之禁敕凡上封事者命中书省发緘视之然后以闻癸亥立蒙古军都元帅府于西川径隶枢密院庚午立西域卫亲军都指挥使司秋七月乙亥诏江南地税输钞己卯诏申飭中外有儒吏兼通者各路举之廉访司每道岁贡二人省台委官立法考试壬寅诏易江南诸路天庆观为元妙观毁所奉宋太祖神主八月己巳以驸马诺海知枢密院事九月甲戌帝至上都乙亥用帝师奏释大辟三人杖以下四十七人戊寅诏输米十万石于榷场故廩以备北塞庚辰罢宁夏路行中书省以其事并入甘肃行省冬十月癸卯有事于太庙十一月辛巳立江浙金银铜冶转运使司丙戌毳阳酋长之兄脱杭捧于法而刺酋长之弟密刺入都阿鲁酋长之弟脱杭忽先等各奉金表来覲十二月甲子减海运脚价钞一贯计每石六贯五百文着为令丁卯禁诸王辄召有司官吏是月立皇后巴约特氏

二年春正月己卯上思州叛贼黄圣许攻剽水口思光寨湖广行省调兵击破之丙戌立安西王相府惟行王傅事己丑御史台臣言汉人同寮者尝为奸人摺摭其罪由是不敢尽言请于近侍实保齐实古尔齐中择人用之帝曰安用此曹其选汉人识达事体者为之以御史中丞图沁为御史大夫甲午授嗣汉三十八代天师张与材太素凝神广道真人管领江南诸路道教乙未回纥布尔罕献狮豹药物二月乙亥朔中书省臣言陛下自御极以来所赐诸王公主驸马勋臣为数不轻向之所储散之殆尽今继请者尚多臣等乞甄别贫匮及赴边者赐之其余宜悉止从之丙午禁军将擅易侍卫军蒙古军以家奴代役者罪之仍令其奴别入兵籍以其主资产之半畀之军将敢有纵之者罢其职庚戌诏

军卒擅更代及逃归者死庚申诏自六盘山至黄河立屯田丙寅以大都留守司达鲁噶齐段贞为中书平章政事三月壬申以中书平章政事博果密为昭文馆大学士平章军国事罢太原平阳路酿进葡萄酒其葡萄酒园民恃为业者皆还之癸酉实都言晋王噶玛拉多罗岱言阿尔娄皆有异图枢密院鞫之无验帝命言晋王者死言阿尔娄者谪从军自效甲戌遣诸王伊奇哩班布尔实额琳沁雅里坚昂吉尔岱并驻夏于晋王齐喇拉之地丙子车驾如上都夏五月甲戌诏民间马牛羊百取其一羊不满百者亦取之惟色目人及数乃取甲甲禁诸王公主驸马招户己丑诏诸徒役者限一年释之毋杖庚寅罢四川马湖进独本葱诏诸王驸马及有分地功臣户居上都大都隆兴者与民均纳供需六月己亥给瓜州沙州站户牛种田具乙巳以调兵妨农免广西容州等处田租一年丙午叛贼黄圣许遁入交趾甲寅降官吏受赃条格凡十有三等秋七月癸酉诏茶盐转运司印钞提举司运粮漕运司以三年为代云南福建官吏满任者给驿以归壬午括巴延阿珠阿尔哈雅等所据江南田及权豪匿隐者令输租敕增江西河南省参政一员以朱清张瑄为之授特进上柱国广西贼陈飞雷通蓝青谢发寇招梧藤容等州湖广左丞巴等玛琳沁击平之八月丁酉朔禁舶商毋以金银过海诸使海外国者不得为商乙巳诏诸人告捕盗贼者强盗一名赏钞五十贯窃盗半之应捕者又半之皆征诸犯人无可征者官给九月甲戌罢民闲盐铁炉灶甲申云南省臣额森布哈征乞蓝拔瓦农开阳两寨其党答刺率诸蛮来降乞蓝悉平以其地为云远路军民总管府冬十月丁酉有事于太庙甲辰修大都城壬子车驾至自上都诏职官坐赃经断再犯者加本罪三等赣州贼刘六十攻掠吉州江西行省左丞董士选讨平之十二月戊戌立彻里军民总管府及蒙样刚等甸军民官癸卯定诸王朝会赐与癸亥释在京囚百人

大德元年春正月丙戌赐实保齐等农具牛种俾耕种自给辛卯以张斯立为中书省参知政事给晋王所部屯田农器二月丙申蒙阳甸酋长纳款遣其弟阿不刺等来献方物且请岁贡银千两及置驿传诏即其地立通西军民府甲辰诸军民相讼者命军民官同听之戊午罗罗斯酋长来朝己未改福建省为福建平海等处行中书省徙治泉州减福建提举司岁织段三千匹其车渠带工别立提举司掌之封的立普哇拿阿迪提牙为缅甸王庚申改元大赦三月己巳谕勒哲等奏定铨调选法庚午以陕西行省平章额森特穆尔为中书平章政事 中书省左丞梁温都尔为中书省右丞 【梁温都尔即梁德珪】 甲戌诏各省合并镇守军福建所

置者合为五十三所江浙所置者合为二百二十七所
丙子车驾如上都丁丑封诸王特穆尔布哈为镇西武靖王以江西省左丞巴特玛琳沁
为中书左丞丁亥禁正月至七月捕猎庚寅立江淮等
处财赋总管府及提举司五台山佛寺成皇太后将亲往祈祝监察御史李元礼上封事
止之【案李元礼传云元礼上疏台臣不敢以闻是
太后未尝因谏而止也】夏四月癸巳朔日有食之五月丙寅河决汴梁发民三万人塞
之戊辰追收诸位下为商者制书驿券丁丑禁民间捕
鬻鹰鹞庚寅平伐酋领内附乞附于亦奚不薛从之上思州叛贼黄圣许遣其子志宝来
降六月甲午诸王伊尔根遣使乘驿祀五岳四渎命追
其驿券仍切责之以湖广行省参政崔良知廉贫特赐盐课钞千锭戊戌平伐九寨来降
甲寅罢亦奚不薛岁贡马及毡衣丙辰诏僧道犯奸盗
重罪者听有司鞫问秋七月【案元典章是月定在外庆贺行礼以守土官为班首武职
虽品太者不得搀越元史缺载】辛未罢蒙古军万
户府入察逊塔拉都元帅府甲申诏出使招谕者授以招谕使副诸取药物者授以会同
馆使副但降旨差遣不给制命丁亥免上都酒课三年
八月丁未命诸王阿济格自今出猎悉自供具毋伤民力九月丙寅罢括两淮民田壬午
车驾还大都己丑罢南丹州安抚司立庆远南丹溪洞
等处军民安抚司诏边远官已优升品级而托他事不赴者夺其所升官平珠六洞蛮及
十部洞蛮皆来降命以蛮夷官授之给卫士牧马外郡
者粮令毋仰食于民冬十月丁酉有事于太庙乙卯瓜哇遣失刺班直木达奉表来降戊
午赈庐州扬州及韶州饥十一月壬戌禁权豪僧道及
各位下擅据矿炭山场癸亥诏自今田猎始自九月高丽王王昺告老乞以爵与其子諲
戊辰增太庙牲用马丁丑诏以高丽王世子諲为开府
仪同三司征东行中书省左丞相驸马上柱国高丽国王仍加授王昺为推忠宣力定远
保节功臣开府仪同三司太尉驸马上柱国逸寿王十
二月戊戌中书省臣言世祖抚定江南沿江上下置戍兵三十一翼今无一二惧有不虞
帝命与枢密院议之复立芍陂洪泽屯田壬寅朝洞蛮
内附立长官司二命杨汉次领之闰月壬戌诏诸军户卖田者由所隶官给文券己卯淮
东饥遣参议中书省事于章发廩赈之弛湖泊之禁仍
听正月捕猎

二年春正月壬戌诏以水旱减郡县田租十之三伤甚者尽免之老病单弱者差税
并免三年禁诸王公主驸马受诸人呈献公私田地及
擅招户者己酉并土番碉门安抚使司改为碉门鱼通黎雅长河西宁等处军民宣抚司
以翰林王恽阁复王构赵与■〈票上...下〉王之纲

杨文郁王德渊集贤王颙宋渤卢摯耶律有尚李泰郝采杨麟皆耆德旧臣清贫守职特
赐钞二千一百余錠二月乙丑立浙西都水庸田司专
主水利以中书右丞徽政院副使张九思为平章政事与中书省事丙子罢中外土木之
役癸未诏诸王驸马毋擅祀岳镇海渚申禁诸路军及
豪右人等毋纵畜牧损农乙酉车驾如上都罢建康金银铜冶转运司还淘金户于原籍
岁办金悉责有司诏廉访司作成人材以备选举禁诸
王从者假控鹤卫士佩带扰民丙戌以梁德珪为中书平章政事杨炎龙为中书右丞三
月庚寅以两淮闲田给蒙古军夏五月辛卯罢海南黎
兵万户府及黎蛮屯田万户府以其事八琼州路军民安抚司壬辰以中书右丞何荣祖
为平章政事湖广左丞巴特玛淋沁为中书右丞命中
书省遣使监云南四川海北海南广西两江广东福建等处六品以下选已酉免南辉顺
德今年田租六月庚申罢江南门摊及夏税并征法禁
诸王擅行令旨秋七月癸巳汴梁等处河决漂没归德数县免其田租一年遣尚书诺海
御史刘赓等塞之壬寅诏诸王驸马及诸近侍自今奏
事不经中书辄传旨付外者罪之高丽王王諤擅命妄杀诏遣中书右丞杨炎龙金枢密
院事洪君祥召其入侍以其父拒仍统国政九月丙申
车驾还大都辛丑命广海左右江戍军依旧制以二年或三年更代冬十月甲寅朔增海
漕米为七十万石壬戌置蒙古都万户府于凤翔戊寅
令御史台检劾枢密院案牒十一月丙申罢云南行御史台置肃政廉访司壬寅以中书
右丞王庆端为平章政事十二月乙丑括诸路马除牝
孕携驹者辛未诏诸逃军复业者免役三年以浙江行省平章政事达尔罕为左丞相辛
巳命廉访司岁举所部廉干者各二人定诸税钱三十
取一岁额之上勿增给阵亡军妻子衣粮

三年春正月己丑中书省臣以天变屡见请依故事引咎避位帝曰此汉人所说耳
岂可一一听从耶卿等但择贤者任之庚寅遣使问民
疾苦除本年内郡包银俸钞免江南夏税十之三增给小吏俸米置各路惠民药局择良
医主之命中书省自今后妃诸王所需非奉旨勿给辛
卯浙西廉访使王遇犯赃罪托权幸免命御史台鞫治之癸巳以达尔罕哈喇哈斯为中
书左丞相二月癸丑朔车驾如柳林丁巳谔勒哲等奏
铨定省部官以次引见帝谕之曰汝等事多稽悞朕昔未知其人为谁今既阅视且知姓
名其洗心涤虑各钦乃职复蹈前失罪不汝贷罢四川
福建等处行中书省陕西行御史台江东荆南淮西三道宣慰司置四川福建宣慰司都
元帅府及陕西汉中道肃政廉访司庚辰车驾如上都
三月癸巳遣补陀僧一山赍诏使日本甲午命何荣祖等更定律令诏军官受赃罪重者

罢职轻者降其散官或决罚就职停俸期年许令自效
夏四月庚午申严江浙两淮私盐之禁辛未自通州至两淮漕河置巡防捕盗司凡十九所己卯以礼部尚书额古尔布哈为中书左丞五年壬午罢江南诸路释教总统所丙申海南速古台速龙探奔奚里诸番以虎象及杪罗木舟来贡庚子复立征东行省【案地理志征东行省大德三年立未几罢至治元年复立令高丽国王为左丞相与纪互异】以福建行省平章政事奇尔济苏为平章政事六月癸丑罢大名路所献黄河故道田输租戊午申禁海商以人马兵仗往诸番贸易以福建州县官类多色目南人命自今以汉人参用禁福建民冒称权豪佃户规免门役秋七月庚辰中书省臣言江南编民五十余万悉为嘉木扬喇勒智冒入寺籍宜加厘正从之丙申诏禁捕鹯八月己酉朔太史院奏日食不应九月庚寅置河东山西铁冶提举司癸巳罢括宋手号军已亥车驾还大都冬十月戊申朔有事于太庙十一月庚辰置浙西平江湖渠堰堰凡七十八所丁酉浚太湖及淀山湖十二月己酉徙镇巢万户府戍沅靖毗阳万户府戍辰州均州万户府戍常德澧州丙寅诏各省戍军轮放次还二年供役癸酉诏中书省货财出纳自今无券记者勿与以谔尔根萨里为平章改事命兄子哈尚镇漠北

四年春正月丙申申严京师恶少不法之禁癸卯复淮东漕渠二月丁未朔日有食之丙辰皇太后鸿吉哩氏崩甲戌罢青海屯田改置于罕扎之地乙亥车驾如上都三月乙未以盗国太平两路旱赈之夏四月丙辰置五条河屯田戊午以中书省断事官布呼齐为平章政事五月癸未帝谕集贤大学士谔尔根萨里等曰集贤翰林乃养老之地自今诸老满秩者升之勿令辄去其谕中书知之六月己酉立缅甸王子窟麻刺哥撒八为缅甸王丙辰以太傅伊彻察喇为太师谔勒哲为太傅丁巳御史中丞博果密卒甲子置耽罗总管府诏各省自今非奉命毋擅役军吊吉而瓜哇暹国蘸八等国二十二人来朝秋七月甲戌朔上皇太后尊谥曰裕圣皇后升祔裕宗庙【案元史后妃传裕宗皇后大德四年谥曰裕圣升祔裕宗庙至大三年又追尊谥曰徽仁裕圣皇后本纪于此即书徽仁非是今据传改】辛卯改乳母冀国夫人韩氏为燕冀国顺育夫人舒穆鲁氏为冀国夫人八月癸卯朔更定荫叙格蒙古色目人特优一级闰月庚子车驾还大都以中书右丞贺仁杰为平章政事冬十月癸酉朔有事于太庙十一月壬寅朔诏颁宽令免上都隆兴大德五年丝银税粮附近秣养马駝之郡免税粮十之三其余免十之一徒罪各减一半杖以下释之并辽阳省所辖狗站牛站为一十二月癸巳遣刘深哈喇岱郑佑

将兵二万人征八百媳妇

五年春正月壬子罢檀景两州采金铁冶提举司以其事入都提举司二月己卯以刘深哈喇岱并为中书右丞郑佑为参知政事罢福建织绣提举司丁亥立征八百媳妇万户府二发四川云南囚徒从军乙未诏廉访司官非亲丧迁葬及以病给告者不得离职或以地远职卑受任不赴者台宪勿复用丁酉车驾如上都诏云南行中书省减内外诸司官己亥令军民官同鞠凡军士杀人奸盗者夏四月壬午调云南军征八百媳妇癸巳禁和琳酿酒其诸王驸马许自酿饮不得沽卖五月河南妖贼丑斯伏诛壬戌云南土官宋隆济叛六月壬辰宋隆济攻贵州知州张怀德战死梁王遣云南行省平章绰和尔参政布呼齐击败之秋七月戊戌朔以通泰等州水灾赈之丁未命御史大夫托和齐整饬台事诏军官受赃者与民官同例命监察御史审覆扎尔古齐罪囚检照蒙古翰林院案牍癸丑禁辉和尔阴阳巫覡等自今有大祠祷必请而行违者罪之命云南省分蒙古射士征八百媳妇癸亥哈坦之孙托欢自北来归以安巴阿固台并知枢密院事八月甲戌遣色辰额呼等将兵征金齿诸国庚辰遣官分道赈恤凡狱囚禁系累年疑不能决者令廉访司具其状申省台详谳仍着为例各路被灾重者免差税一年贫乏之家计口赈恤尤其者优给之乙酉【案史文原作九月乙酉以七月戊戌朔推算则九月不应有乙酉日考续通鉴纲目海都入寇事系于八月今据删九月二字】海都大举入寇哈尚大破之海都走死冬十月戊辰朔以畿内岁饥增明年海运粮为一百二十万石壬午车驾还大都丙戌以岁饥禁酿酒弛山泽之禁丁亥诏军官既受命而不时赴及差竣不即还者准民官例违限六月选人代之被代者期年始叙十一月己亥谕中书近因禁酒闻年老需酒之人有预市而储之者其无酿具者勿问丁未遣刘国杰及额森呼图克将兵万人巴拉及阿都齐将兵五千人征宋隆济减直隶米赈京师贫民设肆三十六所其老幼单弱不能自存者廩给五月戊申徯人蓝赖率丹阳三十六洞来降十二月辛卯定强窃盗条格凡盗人孳畜者取一偿九然后杖之

六年春正月癸卯诏千户百户等自军逃归先事而逃者罪死败而后逃者杖而罢之没入其男女乙巳晋王噶玛拉薨丙午朱清张瑄罢徙其诸子官江南者于京丁未江南僧石祖进告朱清张瑄不法事下御史台按问寻诛之帝语台臣曰朕闻江南富户侵占民田以致贫者流离转徙卿等尝闻之否台臣言曰富民多乞护持玺书依倚以欺贫民官府不能诘治宜悉追收为使命即行之毋越三日诏自今僧官僧人犯

罪御史台与内外宣政院同鞫宣政院官徇情不公者听御史台治之乙卯筑浑河堤禁豪家毋侵旧河诏军官除边远出征其余遇祖父母父母丧依民官例立限奔赴二月丙戌遣陕西省平章伊苏岱尔参政汪惟勤将川陕军湖广平章刘国杰将湖广军征亦奚不薛一切军务并听节制罢征八百媳妇右丞刘深等官收其符印驿券癸巳帝有疾释京师重囚三十八人三月丁酉以旱溢为灾诏赦天下大都平滦被灾尤甚免其差税三年其余灾伤之地已经赈恤者免一年今年内郡包银俸钞江淮以南夏税诸路乡村人户散办门摊课程并除之甲寅合祭昊天上帝皇地祇于南郊遣中书左丞相达尔罕哈喇哈斯摄事夏四月丁卯曲赦云南诸部蛮夷戊子修卢沟上流石景山河堤释重囚车驾如上都五月乙巳给贫乏汉军地以丁为差其孤寡者存恤六年逃散者招谕复业戊申太庙寝殿灾六月癸亥朔日有食之太史院失于推策诏中书议罪以闻甲子建文宣王庙于京师辛未享于太庙秋七月辛酉以江浙行省参知政事和尔多卜丹为中书右丞九月己酉龙兴民讹言括童男女至有杀其子者命诛为首者三人冬十月甲子改浙东宣慰司为宣慰司都元帅府徙治庆元镇遏海道置大同路黄花岭屯田罢军储所立屯储军民总管万户府丙子车驾还大都十一月甲午刘国杰裨将宋光率兵大败蛇节【案蛇节系水西土官之妻与宋隆济同时为乱】赐衣二袭仍授以金符辛亥以同知枢密院事哈达知枢密院事诏江南寺观凡续置民田及民以施入为名者并输租充役十二月辛酉御史台臣言自大德元年以来数有星变及风水之灾民间乏食陛下敬天爱民之心无所不尽理宜转灾为福而今春霜杀麦秋雨伤稼五月太庙灾尤古今重事臣等思之得非荷陛下重任者不能奉行圣意以致如此若不更新后难为力乞令中书省与老成识达治体者共图之复请禁诸路酿酒减免差税赈济饥民帝命即议行之庚辰命中书省更定略卖良人罪例七年春正月己酉弛饥荒所在山泽湖泊之禁一年乙卯诏凡为匿名书辞语重者诛之轻者流配首告人赏钞有差皆籍没其妻子充赏命御史台宗正府委官遣发朱清张瑄妻子来京师仍封籍其家资拘收军器海舶等丁巳命枢密院选军士习农业者十人教军前屯田二月壬戌诏中书省汰诸司冗员仍令谕枢密院除出征将帅外掌署院事者定其员数以闻辛未以平章政事行上都留守茂巴尔斯陕西行省平章阿喇卜丹并为中书平章政事江南行台御史中丞尚文为中书左丞江浙行省参知政事董士珍为中书参知政事壬申诏枢密院宗正府等自今每事与中书共议然后奏闻诸司不得擅奏迁奏迁调官员虽经特旨用之而于

例未允者亦听覆奏丁丑诏中书省设官自左右丞相
以下平章二员左右丞各一员参知政事二员定为八府 【案中书省官数本至元二十
二年旧制今因更定八府故复载之考元史百官志
至元末中书省平章或增至六员盖已非复旧制是年所以更定也然八府之制百官志
未载此则志有脱漏】 己卯以侍御史托迪为中书参
知政事壬午帝语中书省臣曰比有以岁课增羨希求爵赏者此非培克于民何从而出
自今除原额外勿以增羨作正数罢江南财赋总管府
及提举司丁亥诏自今除枢密院御史台宣政院依旧奏选诸司毋得擅奏其举用人员
并经中书省三月庚寅遣使宣抚循行天下乙未中书
平章巴延梁德珪段贞谔尔根萨里右丞巴特玛琳沁左丞额古尔布哈参政密喇卜和
卓张斯立等以受朱清张瑄贿赂诏皆籍其家治罪有
差以洪君祥为中书右丞甲辰诏定赃罪为十二章京朝官月俸外增给禄米外任官无
公田者亦量给之乙巳以征八百媳妇丧师诛刘深笞
哈喇岱郑佑罢云南征缅分省戊申索罗希岳铉等进大元一统志赐赉有差己酉追收
原降除免和顾和市玺书以托欢诬告诸王托克托谪
置湖广省军前自效癸丑枢密院臣及监察御史言中丞董士选贷朱清张瑄钞非义帝
曰台臣称贷不必问也若言者不已后当杖之甲寅车
驾如上都夏四月癸亥征藩臣陈天祥张孔孙郭筠至京师以天祥孔孙为集贤大学士
筠为昭文馆大学士皆同议中书省事庚午中书左丞
相达尔罕言僧人修佛事毕必释重囚有杀人及妻妾杀夫者皆指名释之生者苟免死
者负冤于福何有帝嘉纳之辛未流朱清张瑄子孙于
远方庚辰蛇节降令海拉苏将兵五千守之余众悉遣还各戍拨碉门四川等军人一千
镇罗罗斯丁亥诛蛇节 【谨案 御批通鉴辑览
是年三月刘国杰败宋隆济及蛇节于墨特川擒斩蛇节隆济遁去寻为兄子宋阿重执
之来献诏斩之元纪未载斩宋隆济事而载斩蛇节于
四月互有异同】 是月复以等尔格为平章政事兰溪处士金履祥卒五月己丑开上都
大都酒禁其所隶两都州县及山后河东山西河南尝
告饥者仍悉禁之辛亥奉使宣抚耶律希逸刘赓言平阳僧彻尔威犯法非一有司惮其
豪强不敢诘问闻臣等至潜逃京师中书省臣言宜捕
送其所令省台宣政院遣官杂治从之甲寅浚上都滦河乙卯禁诸王驸马毋辄杖州县
官吏违者罪王府官立和琳宣慰使都元帅府以呼喇
珠遥授中书省左丞为宣慰使都元帅闰月戊午朔日有食之壬戌诏禁犯曲阜林庙者
己巳谔勒哲卒辛巳诏僧人与民均当差役癸未命江
浙行省右丞董士选发所籍朱清张瑄货财赴京师其海外未还商舶至则依例籍没六

月己丑御史台臣言瓜沙二州自昔为边镇重地今大军屯驻甘州使官民反居边外非宜乞以蒙古军万人分镇险隘立屯田以供军实为便从之罢四川宣慰司立四川行中书省以云南行省平章托克托湖广行省议事平章程鹏飞并为平章政事癸巳叛贼雄挫来降乙未以亦奚不薛就平留特默齐军二千人讨阿永叛蛮余悉放还癸卯诏凡军官子弟年及二十者与民官子孙同儆直一年方许袭职万户于枢密院千户于行省百户于本万户乙巳命甘肃行省修阿合潭曲尤壕以通漕运秋七月壬戌禁僧人以修建寺宇为名赍诸王令旨乘传扰民汰宿卫士丙寅以达尔罕哈喇哈斯为中书右丞相知枢密院事【案宋元通鉴载是时并以阿固岱为左丞相元史畧之】丙子诏除集贤翰林老臣预议朝政其余三品以下年七十者各升散官一等致仕丁丑罢江南白云宗摄所其田依例输租都勒斡彻伯尔穆尔特穆尔等遣使请息兵帝命安西王慎飭军士安置驿传以俟其来八月辛卯以平阳太原地震遣使分道赈之九月戊午车驾还大都丙寅遣刑部尚书塔齐尔翰林直学士王约使高丽以其国相吴祈专权征诣阙问罪丙子罢僧官有妻者壬午复茂巴尔斯平章政事冬十月戊子弛太原平阳酒禁以浙江饥减海运粮四十万石辛卯复立陕西行御史台癸巳御史台臣及诸道奉使言行省官久任与所隶编氓联姻害政诏互迁之以济尔噶呼知枢密院事给大都文宣王庙洒扫户五乙未留蛇节养子阿闕于本境以抚其民诏诸司凡钱粮不经中书省议者勿奏辛亥诏军户贫乏者存恤六年十一月甲寅朔并海道运粮万户府为海道都漕运万户府甲子命依十二章断僧官罪十二月乙酉弛京师酒课许贫民酿酒辛丑加封真武为元圣仁威玄天上帝丁未以转输军饷劳免思播二州及潭衡辰沅等路税粮一年常泮三之一淘金站户无种佃者免杂役一年七道奉使宣抚所罢赃污官吏凡一万八千四百七十三人赃四万五千八百六十五錠【案元代设官分职皆有定数可稽若赃污官更多至一万八千余人是天下竟无一洁清自守者矣史官载事不免有过甚之词谨附识】审冤狱五千一百七十六事

八年春正月己未以灾异故诏天下恤民隐省刑罚庚申以云南顺元同知宣抚事宋阿重生获其叔隆济来献特升其官赐衣一袭癸亥禁錮朱清张瑄族属丙寅以御史中丞太仆卿塔斯布哈为中书右丞江南行台中丞赵仁荣为中书参知政事庚午以年扎克嘉勒灿为帝师辛巳诏诸王驸马往辽东捕海东鹞者毋给驿自蒙泽至睢州筑河防十有八所二月丙戌增置国子生二百员选宿卫大臣子孙充之辛卯命

诸王彻伯尔所部军屯田于纛察克楚谷甲午诏父子兄弟有才者许并居风宪减宿卫繁冗者丙午车驾如上都赐图沁及塔喇海以所籍朱清张瑄田人各六十顷三月丁巳诸军民官已除以地远官卑不赴者夺其官不叙军官擅离所部者悉遣还翼军人不告所部私归者杖而还之戊辰诏诸王驸马所分郡邑达噜噶齐惟用蒙古人三年依例迁代其汉人女真契丹名为蒙古者皆罢之夏四月丙戌置千户所戍定海以防岁至倭船诏诸路辉和尔哈玛尔自相讼者归都护府与民交讼者听有司专决甲午诏朝廷诸王驸马进捕鹰鹞皆有定户自今非鹰师而乘传冒进者罪之丁未分教国子生于上都五月癸丑朔日有食之辛酉以所籍朱清张瑄江南财产隶中政院壬申中书省臣言吴松江【案河渠志浙西诸山之水受之太湖下为吴松江元史吴字下多一江字与志不符谨据删】实海口故道潮水久淤凡湮塞良田百有余里况海运亦由是而出宜于租户役万五千人浚治岁免租人十五石仍设行都水监以董其程从之六月癸未开和琳酒禁立酒课提举司丁酉汝寇妖人李曹驴等妄言得天书或众事觉伏诛秋七月辛酉罢江淮等处财赋总管府九月癸丑车驾至自上都庚申巴延梁德珪并复为中书平章政事巴特玛琳沁复为中书右丞密喇卜和卓复为中书参知政事以江浙行省平章阿里为中书平章政事庚午以户部尚书张佑为中书参知政事癸酉诸王彻伯尔都勒斡等遣使来附以冀孟诸州去岁霖雨减其租冬十月己卯有事于太庙辛巳以宣徽使大都护长寿为中书右丞陕西行省右丞托欢为中书参知政事丁亥诏诸王驸马毋乘驿以猎庚寅封皇侄哈尚为怀宁王戊戌命省台院官鞫高丽国相吴祈及千户石天辅等以祈离间王父子天辅谋归日本皆笞之徙安西十一月壬子诏内郡江南人凡为盗黥三次者谪戍辽阳诸色人及高丽三次免黥谪戍湖广禁盗籩马者初犯谪戍再犯者死丁卯复免僧人租戊辰以武备卿特古勒德尔为御史大夫壬申增海漕米百七十万石十二月庚子复立益都淘金总管府辛丑封诸王彻伯尔为威武西宁王

九年春正月甲子以昂吉尔部民张道努等旧权为军者复隶民籍壬申弛大都酒禁二月癸未中书省臣言近侍自内传旨凡除授赏罚皆无文记惧有差违乞自今传旨者悉为文记付中书从之乙未建大天寿万宁寺丁酉封诸王谔勒哲为卫安王定远王永和尔为威定王庚子命中书议行郊祀礼辛丑大赦令御史台翰林集贤院六部于五品以上各举廉能识治体者三人行省行台宣慰司廉访司各举五人免大都上都隆兴差税内郡包银俸钞一年江淮以南租税及佃种官田者均免十之二致仕

官止有一子应承荫者其僦使并免之家贫者给半俸
终其身三月丁未朔车驾如上都庚戌以策凌巴鄂尔嘉勒侄桑节巴勒为帝师戊午以
枢密副使高兴为平章政事仍枢密副使夏四月乙酉
以大同路地震怀仁县地裂遣使赈之并免今年一切租课徭役壬辰中书省臣言前代
郊祀以祖宗配享臣等议今始行郊礼专祀昊天为宜
诏依所议行之五月丁未以大都旱遣使祷雨戊申征原任儒学提举萧■〈奭斗〉赴
阙命有司给以安车六月庚辰立子德寿为皇太子诏
告天下赐高年帛孝子顺孙堪从政者量才任之亲年七十别无侍丁者从近迁除外官
五品以下并减一资诸处罪囚淹系五年以上疑不能
决者释之流窜远方之人量移内地甲午以潼川霖雨江溢敕有司给粮一月免其田租
秋七月辛亥筑郊坛于丽正文明门之南壬戌命兄子
阿裕尔巴里巴特喇与其母鸿吉哩氏出居怀州丁卯以大司徒段贞中书右丞巴特玛
琳沁并为中书平章政事参知政事哈喇曼济为右丞
参知政事密喇卜和卓为左丞参议中书省事伊逊巴尔为参知政事丁丑给曲阜林庙
酒扫户以尚珍署田五十顷岁供祀丙戌商胡塔奇以
宝货来献以钞六万锭给其直九月庚申车驾至自上都冬十月辛巳有事于太庙乙未
帝谕中书省枢密院御史台臣曰省中政事听右丞相
哈喇哈斯达尔罕总裁自今用人非与达尔罕共议者悉罢之十一月丁未以钞万锭给
云南行省命与贝参用其贝非出本土者同伪钞论庚
午祀昊天上帝于南郊十二月庚寅皇太子德寿薨

十年春正月丙午浚吴松江等处漕河庚戌浚真扬等州漕河令盐商每引输钞二
贯以为佣工之费戊午罢江南白云宗都僧录司汰民
归州县僧归各寺田悉输租壬戌发河南民十万筑河防丁卯禁近侍无辄驿召外郡官
营国子学于文宣王庙西偏闰月甲午以前中书平章
政事等尔格江浙行省平章舍哩河南行省平章阿萨尔并为中书平章政事行宣政院
使张律四川行省左丞杜思敬并为中书左丞参议中
书省事刘源为参知政事二月辛亥中书省臣言近侍传旨以文记至省者凡一百五十
余人令臣擢用其中犯法妄进者寔多宜加遴选从之
丙辰封博啰为镇筵王锡以金印【按博啰封镇筵王诸王表作大德九年与纪互异】
丁卯以额古尔布哈为中书左丞戊辰车驾如上都
三月己卯崆古王遣使来贡夏四月庚子朔诏凡匿鹰犬者没家资之半笞三十来献者
给之以赏壬戌云南罗雄州军火主阿邦龙少结豆温
匡虏普定路诸蛮为寇平章伊苏岱尔捕斩之癸亥置昆山嘉定等处水军上万户府甲
子倭商有庆等抵庆元贸易以金铠甲为献命江浙行

省平章阿喇卜丹等备之五月癸未诏西番僧往还者不许驰驿给以舟车乙酉命同知枢密院事塔尔固岱塔喇海并知枢密院事遣高丽国王王矩还国仍署行省以镇抚之丁亥诏命右丞相哈喇哈斯达尔罕左丞相阿固岱等整饬庶务凡铨选钱谷等事一听中书裁决百司勤怠者悉以名闻六月壬戌来安路总管岑雄叛湖广行省遣宣慰副使和塔拉特穆尔招谕之雄令其子世坚来降赐衣物遣之秋八月丁巳京师文宣王庙成行释奠礼冬十月丁未有事于太庙丁卯青山叛蛮红猊獠等来附十一月己巳车驾还大都十二月乙卯帝有疾禁天下屠宰四十二日丙辰遣宣政院使实迪等祷于太庙

十一年春正月丙寅朔帝大渐癸酉崩于玉德殿年四十二葬起辇谷谥曰钦明广孝皇帝庙号成宗国语曰谔勒哲图皇帝

成宗元贞二年大德十一年凡十三年

钦定续通志卷六十二

●钦定续通志卷六十三 元纪七

元纪 【七】

武宗 【一】

○武宗一

武宗皇帝讳哈尚世祖皇太子珍戩第二子达尔玛巴拉之子成宗兄子也母鸿吉哩氏初总兵北边与叛王海都战屡败之海都走死大德八年封怀盗王置王傅官食瑞州六万五千户寻执叛王伊苏托噶等又俘获海都之子彻伯尔家属于都勒斡部降王图沙玛复叛与战败之北边悉平成宗晚年皇后巴约特氏与政忌帝兄弟乃出帝母弟阿裕尔巴里巴特喇与帝母居怀州无何太子德寿卒成宗寝疾后恐帝立修前怨召安西王阿南达及诸王莽赉特穆尔入朝而阴属意安西十一年正月成宗崩丞相阿固岱平章赛音谔德齐巴特玛琳沁巴延与莽赉特穆尔谋奉后垂帘听政援立安西王潜遣师断帝归路时帝适遣喀喇托克托入京计事丞相哈喇哈斯急令还报且恐帝不时至内难将作乃先遣使迎阿裕尔巴里巴特喇于怀州监国至则定计诛阿固岱巴特玛琳沁赛音谔德齐巴延等并执阿南达莽赉特穆尔归于上都遣使迎帝三月帝自阿勒台山至和琳诸王勋戚毕会合辞劝进帝谢曰吾母吾弟在大都俟宗亲毕会再议耳夏五月乙丑至上都阿裕尔巴里巴特喇侍母来会左右部诸王毕至乃废皇后巴约特氏出居东安州寻与阿南达莽赉特穆尔并赐死甲申帝即位于上都大赦追尊皇考曰皇帝尊母元妃曰皇太后壬辰加知枢密院事托多尔海太傅中书右丞相哈喇哈

斯达尔罕太保并录军国重事知枢密院事塔喇海为
中书左丞相预枢密院宣徽院事同知徽政院事绰和尔伊克扎尔古齐阿实克布哈江
浙行省平章政事莽赉布哈并为中书平章政事江浙
行省左丞刘正为中书左丞遥授中书左丞奇彻福建道宣慰使额森特穆尔并为中书
参知政事
中书右丞行御史中丞塔斯布哈为御史大
夫平章政事绰和尔为知枢密院事特授奇塔特布济克中书平章政事延庆使绰尔齐
中书右丞同知和琳等处宣慰司事塔尔海中书右丞
阿里中书左丞托克托御史大夫是月封皇太子乳母李氏为寿国夫人其夫燕嘉努为
寿国公以中书平章政事哈克伞为辽阳行省平章政
事六月癸巳朔立弟阿裕尔巴里巴特喇为皇太子甲午建行宫于翁果察图之地立宫
阙为中都己亥以拱卫直都指挥使茂穆苏角抵屡胜
遥授平章政事壬寅塔喇海加太保录军国重事太子太师甲辰以平章政事行和琳等
处宣慰使都元帅哈喇格尔通政使武备卿特穆尔布
哈并知枢密院事乙巳中书省臣言中书宰臣十四员御史大夫四员前制所无诏与翰
林集贤诸老臣议拟以闻戊申特授尚乘卿布呼齐绰
和尔并平章政事大同屯储军民总管府达噜噶齐克尔格木腾中书右丞辛亥以中书
平章政事托克托为江西行省平章政事甲寅敕内郡
江南高丽四川云南诸寺僧诵藏经为三宫祈福丙辰塔斯布哈托克托并遥授左丞相
戊午进封高丽王王矩为沈阳王加太子太傅驸马都
尉己未封宁远王库库楚为宁王庚申遥授左丞相行御史大夫塔斯布哈右丞相秋七
月癸亥朔封诸王图喇为越王甲子命御史台大夫特
古勒德尔知枢密院事塔尔呼岱中书平章政事绰和尔以即位告谢南郊丙寅以中书
参知政事赵仁荣为太子詹事以阿保功授莽赉大司
徒封其妻梅仙为顺国夫人遣丕勒雅尔迈达哩及达克丹诣西域取佛钵舍利丕勒雅
尔塔迈哩遥授宣政使达克丹遥授平章政事并命太
傅右丞相哈喇哈斯达尔罕太保左丞相塔喇海综理中书庶务诏谕中外壬申命御史
大夫特古勒德尔中书平章政事绰和尔枢密副使布
呼齐以即位祇谢太庙以安西平江吉州三路为皇太子分地越州路为越王图喇分地
癸酉罢和琳宣慰司置行中书省及青海等处宣慰司
都元帅府和琳总管府以太师伊彻察喇为和琳行省右丞相中书右丞相哈喇哈斯达
尔罕为和琳行省左丞相依前太傅录军国重事丙子
以江浙行省平章政事塔斯哈雅知枢密院事绰和尔并为中书平章政事丁丑封诸王
班布尔实为齐王图烈纳为济王德勒德尔布哈为北
宁王太师伊彻察喇为淇阳王加平章政事托克托太尉以中书左丞相塔喇海为中书

右丞相监修国史御史大夫塔斯布哈为中书左丞相
江浙行省平章政事嘉琿河南江北行省平章政事帕哈哩鼎并为中书平章政事平章
政事特们德尔为江西行省平章政事戊寅以仪凤司
大使和斯哈雅特穆尔布哈教坊司达噜噶齐实迪并遥授平章政事为玉宸乐院使己
卯以集贤院使拜布哈为中书平章政事庚辰以御史
中丞济尔噶朗为御史大夫辛巳加封至圣文宣王为大成至圣文宣王敕中书省庶政
非公议者勿奏以遥授左丞相同知枢密院事额尔吉
讷知枢密院事御史中丞王寿江浙行省左丞郝天挺并为中书左丞壬午命御史大夫
特古勒德尔知枢密院事塔尔呼岱中书平章政事绰
和尔以即位告社稷丙戌御史大夫阿尔娄言旧制中书省枢密院御史台宣政院许得
自选其人他司悉从中书铨择近臣不得辄奏如此则
纪纲不紊帝嘉纳之以同知宣徽院事巴勒达实为中书左丞中书参知政事奇彻为四
川行省左丞赈浙江湖广江西属郡饥己丑赈安西等
郡饥八月甲午中书省臣言内降旨与官者八百八十余人已除三百未除者犹五百余
请自今越奏者勿与诏自今不由中书奏者勿与官又
言外任官带相衔非制也请勿与从之乙未以治书侍御史额卜德呼勒为中书参知政
事戊戌御史大夫托克托封秦国公辛亥中书右丞博
啰特穆尔以国字译孝经进诏中书省刻板模印诸王以下皆赐之丁巳以中书左丞王
寿为御史中丞戊午中书平章政事奇塔特布济克绰
和尔拜布哈并加太尉中书右丞塔尔海加太尉平章政事以中书左丞博啰特穆尔为
中书右丞九月甲子车驾至大都辛未加塔喇海塔斯
布哈并太尉丁丑中书省臣言比议省臣员数奉旨依旧制定为十二员右丞相塔喇海
左丞相塔斯布哈平章绰和尔奇塔特布济克如故余
令臣等议臣等请以阿实克布哈塔斯哈雅为平章政事巴勒达实刘正为右丞郝天挺
额森特穆尔为左丞于璋额卜德呼勒为参知政事其
班朝诸司冗员并宜拣汰从之甲申诏立尚书省分理财用命塔喇海塔斯布哈仍领中
书以托克托嘉琿帕哈哩鼎任尚书省仍使自举官属
己丑以中书平章政事拜布哈为浙江行省平章政事辛卯御史台臣言至元中阿哈玛
特综理财用立尚书省三载并入中书其后僧格用事
复立尚书省事败又并入中书粤自大德五年以来四方地震水灾岁仍不登百姓重困
便民之政正在今日顷又闻为总理财用立尚书省如
是则必增置所司滥设官吏殆非益民之事也且综理财用在人为之若止命中书整饬
未见不可帝曰卿言良是此三臣愿任其事姑听其行
冬十月庚子中书省奏初置中书省时裕宗为中书令尝置省署敕其后僧格迁立尚书

省不四载而罢今复迁中书于旧省乞徙中书令位仍
请皇太子一至中书从之壬寅封知枢密院事绰尔和为容国公乙巳敕方士日者毋游
诸王驸马之门丙午封御史大夫特古勒德尔为郢国
公以中卫亲军都指挥使迈努知枢密院事丙辰以行省平章总督军马得佩虎符其左
丞等所佩悉追纳中书省奏常岁海漕粮百四十五万
石今江浙岁俭不能如数请仍旧例湖广江西各输五十万石并由海道达京师从之十
一月癸亥封诸王伊克图为楚王辛未以塔喇海领中
政院事乙亥中书省臣言大都路供亿浩繁槩于属郡取之其军站鹰坊控鹤等户恃其
杂徭无与冒占编氓请降玺书依祖宗旧制悉令均当
或辄奏请者亦宜禁止免建康路所属今年酒酤课乙酉诏皇太后军民人匠等户租赋
徭役并隶徽政院庚寅赐太师伊彻察喇江南田四十
顷时赐田悉夺还官中书省为言有旨伊彻察喇自世祖时积有勋劳非余人比宜以前
后所赐合百顷与之仍敕行省平章拜布哈领其岁入
十二月壬辰朔中书省臣言旧制金虎符及金银符典瑞院掌之给则由中书事已则复
归典瑞院今出入多不由中书下至商人结托近侍奏
请以致泛溢出而无归臣等请核之自后除官及奉使应给者非由中书省勿给从之辛
丑如大圣寿万安寺授吏部尚书察纳平章政事领工
部事癸卯命留守司以来岁正月十五日起灯山于大明殿后延春阁前庚戌以山东河
南江浙路饥禁民酿酒丁巳诏宣政院并省佛事中书
省臣言各处民饥除行宫外工役请悉停罢从之又言律令者治国之急务当以时损益
世祖尝有旨金泰和律勿用令老臣通法律者参酌古
今从新定制至今尚未行臣等为律令重事未可轻议请自世祖即位以来所行条格校
讎归一遵而行之从之庚申诏明年改元至大元年春
正月辛酉朔曲赦御史台见系犯赃官吏罪止征赃罢职癸亥敕枢密院发六卫军万八
千五百人供翁果察图建宫工役甲子授中书平章政
事阿实克布哈右丞相行御史大夫丙寅从江浙行省请罢行都水监以其事隶有司丁
卯以中书右丞伊克德济为平章政事己巳绍兴台州
庆元广德建康镇江六路饥户月给米六斗以没入朱清张瑄物货隶徽政院者鬻钞三
十万锭赈之特授乳母夫寿国公杨燕嘉努开府仪同
三司甲戌中书省臣言进海东青鹞者当乘驿马五百不敷敕遣奇■〈口末〉英通括
民闲车马兵部请以各驿马陆续而进勿括为便从之
戊子皇太子请以阿实克布哈复入中书托克托复入御史台己丑中书省臣言阿实克
特穆尔请遣嘉琿达诣河西地采玉馱攻玉沙需马四
十余匹采玉人千余臣等以为不急之务劳民乞罢之又言近百姓艰食盗贼充斥苟不

严治将至滋蔓宜遣使巡行遇有罪囚即行决遣与随处官吏共议弭盗方略明立赏罚或匿盗不闻或期会不至或踰期不获者官吏连坐有旨宜即议行之封诸王额森特穆尔为营王以乳母夫鄂尔多为司徒二月癸巳立鹰坊为仁虞院以右丞相托克托遥授左丞相推勒特穆尔伊克扎尔古齐伊尔齐并为仁虞院使赈汝宁归德路饥民甲午赈益都济宁等路饥戊戌以上都卫军三千人赴翁果察图行宫工役壬寅诏以开成路地震前已免租二年今再免一年甲辰发军千五百人修五台山佛寺甲寅赈和琳贫民北来者仍于大同隆兴等处余粮以赈就令屯田己未以皇太子建佛寺立营缮署三月丁卯建兴圣宫【为皇太后所居】遣使祀五岳四渎名山大川复立白云宗摄所戊寅车驾如上都建佛寺于大都城南封中书右丞相行平章政事阿实克布哈为康国公以甘肃行省右丞托克托穆尔为中书平章政事加大司徒壬午嗣汉天师张与材来朝加金紫光禄大夫封留国公夏四月戊戌封三宝努为渤国公希沙为宾国公加特们德尔右丞相都护迈珠中书右丞癸卯加授平章政事嘉珩太子太保太尉平章军国重事魏国公甲辰知枢密院事额尔吉讷遥授右丞相辛亥枢密院臣言诸王各用其印符乘驿使臣旁午驿户困乏宜准旧制量其马数降以玺书从之乙卯遣米楫等使苏鲁国丙辰高丽国王王昺请罢征东行省五月丙寅知枢密院事塔尔呼岱遥授左丞相乙亥知枢密院事哈喇格爾遥授左丞相丙子禁白莲社毁其祠以其人还隶民籍授右丞相塔斯在哈上柱国监修国史加左丞相奇塔特布济克太子太傅甲申立大同侍卫亲军都指挥使司以丞相齐勤等穆尔为使摘通惠河漕卒九百余人隶之漕事如故六月己丑渤国公三宝努加录军国重事中书右丞相应国公太子詹事平章军国重事大司农库春加太子太保左丞相托克托加上柱国太尉遥授参知政事行詹事丞达实多加平章军国重事戊戌以大都饥发官廩减价粿之封永和尔为定王驸马阿实克为昌王并赐金印加宦者李邦宁大司徒遥授左丞相仍领太医院事辛丑以没入朱清张瑄田产隶中宫立江浙财赋总管府提举司己酉以河南山东饥即以两道没入赃钞赈之加奇塔特布济克录军国重事秋七月庚申敕以金银岁入数少自今有以金银奏请及托人转奏者皆抵罪壬戌禁鹰坊于大同隆兴等处纵猎扰民筑呼鹰台于朔州泽中翁果察图行宫成立中都留守司兼开宁路都总管府丁卯【元史作辛卯误今改】赈济宁水灾己巳赈真定及藁城水灾癸酉弛上都酒禁壬午封奈曼岱为寿王癸未枢密院臣言世祖时枢密院臣六员成宗时增至十三员今

署事者三十二员乞省之敕罢塔斯岱等一十一人乙酉以豸虎人彻尔济苏为监察御史是月以左丞相哈斯布哈为中书右丞相太保奇塔特布济克为中书左丞相内外大小事务并听中书省区处诸王公主驸马势要人等毋得沮挠近侍官属及内外诸衙门毋得隔越间奏各处行省宣慰司及在外诸衙门等官非奉旨并中书省明文毋得擅自离职乘驿赴京营干私事八月辛丑以中都行宫成赏官吏有劳者癸卯加中书右丞领将作院吕天麟大司徒戊申立中都万亿库乙卯中书省臣言外台行省及诸人应诏言事未敢一一上烦圣听请集朝臣议择其切于事者小则辄行大则以闻从之九月丙辰高丽国王王矩卒命萨纳合特默彻勒使赛玛尔堪部壬戌太尉托克托奏泉州大商哈苏台吉噜进异木沈檀可构宫室者敕江浙行省驿致之癸亥万户伊拉玛和斯来自赛玛尔堪等城进呈太祖时所造户口清册赐银钞币帛有差乙亥帝还大都弛诸路酒禁戊寅泉州大商玛哈丹达尔进珍异及宝带西域马庚辰以高丽国王王章嗣高丽王诸王图们进所藏太宗玉玺封图们为阳翟王冬十月甲午以阿实克布哈知枢密院事丁酉罢大都榷酤癸卯中书省臣请以湖广米十万石贮于扬州江西江浙海漕三十万石内分五万石贮朱汪利津二仓以济山东饥民从之甲辰从帝师请以释教都总管多尔济巴勒兼领诺尔布地产钱物为都总管府达噜噶齐总其财赋以西番僧嘉勒斡巴勒为翰林承旨左丞相知枢密院事特穆尔布哈加录军国重事中书右丞司徒图古勒河南江北行省右丞伊苏内史托卜华并知枢密院事乙巳改护国仁王寺昭应规运总管府为会福院丙午立兴圣宫掌医监十一月己未中书省臣言世祖时省院台及诸司皆有定员迺者诸司递升一司多至二三十员事不改旧而官日增请依大德十年员数冗滥者悉行减汰从之庚申增官吏俸以至元钞依中统钞数给之止其禄米岁省米四十万石吏员以九十月出身如旧制丁卯中书省臣言今铨选钱粮之法尽坏廩藏空虚中都筑城大都建寺及为诸贵近营私第军民不得休息迺者用度愈广每赐一人辄至万锭惟陛下矜察又言铨选钱粮诸司乞毋于预帝曰已降制书令诸人毋于中书之政他日或有乘朕忽忘持内降文记及传旨至中书省其执之以来朕将加罪以额尔吉讷为御史大夫己巳以奇塔特布济克为右丞相托克托为左丞相既又从托克托言以塔斯布哈与奇塔特布济克俱为右丞相中书省臣言国用不给请沙汰宣徽太府利用等院籍定应给人数其在上都行省者委官裁省又天下屯田百二十余所由所用者多非其人以致废弛除四川甘州应昌府云南为地

绝远余当选习农务者往与行省宣慰司亲履其地可
兴者兴可废者废各具籍以闻并从之诏开甯路及宣德云州工役供亿浩繁其赋税除
前诏已免三年外更免一年辛巳罢益都诸处哈喇齐
等狩猎以银七百五十两钞二千二百锭币帛三百匹施昊天寺为水陆大会癸未皇太
后造寺五台山摘军六千五百人供其役闰月己丑以
大都米贵发廩十万石减价以糴其贫民有鬻子者官为赎之丙申罢江南进沙糖止富
民输粟賑饥补官丁酉禁江西湖广汴梁私捕驾鹅己
亥罢辽阳省进雕豹乙巳中书省臣言回回商人持玺书佩虎符乘驿马名奉敕求珍异
或以一豹上献亦邀回赐虎符国之信器驿马使臣所
需畀诸商人诚非所宣乞一概追之从之丁未敕河西僧户准先朝定制从军输税一与
民同甲寅达尔罕哈喇哈斯卒十二月庚申封哈喇伞
为陇王甲戌以平章政事商议中书省事太子宾客王太亨行太子詹事平章军国重事
太子少詹事达实多为太子詹事赐御史台官及监察
御史宴服

二年春正月庚寅越王图喇有罪赐死禁日者方士出入诸王公主近侍及诸官之
门辛卯皇太子诸王百官上尊号曰统天继圣钦文英
武大章孝皇帝丙申诏天下弛山泽之禁恤流移毋令见户包纳差税被灾百姓内郡免
差税一年江淮免夏税内外官加恩有差己亥封知枢
密院事容国公绰和尔为句容郡王乙巳塔斯布哈奇塔特布济克言诸人恃恩径奏玺
书不由中书直下翰林院给与者今核其数自大德六
年至至大元年所出凡六千三百余道皆于田土户口金银铁冶增余课程进贡奇货钱
谷选法词讼造作等事害及于民请尽追夺之今后有
不由中书者乞勿与从之丙午定制大成至圣文宣王春秋二丁释奠用太牢二月癸亥
罢行泉府院以市舶归行省壬申令卫董屯田官三年
一易甲戌弛中都酒禁三月己丑以梁王在云南有风疾命诸王罗丹代之庚寅车驾如
上都封诸王额布根为襄甯王辛卯罢杭州白云宗摄
所立湖广头陀禅录司甲辰中书省臣言国家岁赋有常顷以岁俭所入曾不及半而去
岁所支钞至千万锭粮三百万石陛下尝命汰其求刍
粟者而宣徽院博克逊竟不能行视去岁反多三十万石请用知钱谷者二三员于宣徽
院佐而理之又中书省断事官大德十年四十三员今
皇太子位增二员诸王库库楚喇嘛噶图勒亦各增一员非旧制臣等以为皇太子位所
增宜存诸王者宜罢并从之夏四月辛酉立兴圣宫江
淮财赋总管府癸亥摘汉军五千给田十万顷于直沽沿海口屯种又益以喀喇军二千
立镇守海口屯储亲军都指挥使司五月丁亥以通政

院使哈喇格尔知枢密院事董建兴圣宫丁酉以阴阳家言自今至圣诞节不宜兴土功
敕权停新寺工役甲辰御史台臣言乘輿北幸而京师
工役正兴加之岁旱乏食民愚易惑乞留一丞相镇京师后为例从之六月癸亥从皇太
子言禁诸赐田者驰驿征租扰民庚午中书省臣言奉
旨既停新寺工役其亭苑鹰坊诸役乞并罢又太医院遣使取药材于陕西四川云南费
公努劳驿传臣等议事干钱粮隔越中书省径行乞禁
止并从之以大都隶儒籍者四十户充文庙乐工甲戌以宿卫之士比多冗杂遵旧制存
蒙古色目之有阙阙者余皆革去皇太子言宣政院先
奉旨殴西番僧者截其手詈之者断其舌此法昔所未闻乞更其令又言宣政院文案不
检核于宪章有碍遵旧制为宜并从之乙亥中书省臣
言河南江浙省言宣政院奏免僧道伊噜勒昆达实密租税臣等议田有租商有税乃祖
宗成法今宣政院一体奏免非制有旨依旧制征之秋
七月壬辰改松潘迭宕威茂州安抚司为宣抚司迁治茂州汶川县乙未约苏请更钞法
图新钞式以进又与保巴议立尚书省诏与奇塔特布
济克塔斯布哈齐勤特穆尔托克托集议以闻甲辰改实保齐巴勒噶逊总管府为奉时
院乙巳保巴言臣与塔斯布哈奇塔特布济克等集议
立尚书省事政事得失皆前日中书省臣所为今欲举正彼惧有累孰愿行者臣请旧事
从中书新政从尚书尚书请以奇塔特布济克托克托
为丞相三宝努约苏为平章保巴为右丞王罽参知政事姓江者画钞式以为印钞库大
使并从之塔斯布哈言此大事遽尔更张乞与老臣更
议帝不从八月癸酉复立尚书省以奇塔特布济克为太傅右丞相托克托为左丞相三
宝努约苏为平章政事保巴为右丞孟克特穆尔为左
丞王罽为参知政事中书左丞刘楫授尚书左丞商议尚书省事诏告天下甲寅敕以海
拉逊昔与巴延阿珠平江南知兵事可授平章政事商
议枢密院事己未尚书省臣言中书省尚有逋欠钱粮应追理者宜存断事官十人余皆
并入尚书省又言往者大辟狱具尚书省议定令中书
省裁酌以闻宜依旧制从之以江西等处行中书省参知政事郝彬为尚书省参知政事
甲戌赐太师奎腾名多尔济戩己卯三宝努言尚书省
立更新庶政变易钞法用官六十四员其中宿卫之士有之品秩未至者有之未历仕者
有之此皆素习于事既已任之乞勿拘例授以宣敕诏
天下敢有沮挠尚书省事者罪之九月庚辰朔以尚书省条画诏天下改各行中书省为
行尚书省诏朝廷得失军民利害臣民有上言者皆得
实封上闻在外者赴所属转达各处人民复业者免一切逋欠仍除差税三年诏颁行至
大银钞壬午平章政事嘉琿以罪夺爵癸未尚书省臣

言方今地大民众事益繁冗若使省臣总挈纲领庶官各尽厥职其事岂有不治顷岁省
务壅塞朝夕惟署押文案事皆废弛天灾民困职此之
由自今省部一切皆令从宜处置大事或须上请得旨即行用成至治上顺天道下安民
心又言国家地广民众古所未有累朝格例前后不一
法吏轻重任意请自太祖以来所有政令九千余条删除繁冗使归于一编为定制并从
之以大都城南建佛寺立行工部领行工部事三人行
工部尚书二人仍令尚书右丞相托克托兼领之丙戌车驾至大都癸巳三宝努言冀益
大同保定真定以五台建寺所须皆直取于民宜免今
年租税从之丁酉御史台言比者近幸奏请江南田千二百三十顷乞拘还官从之己亥
尚书省臣言今国用需中统钞五百万锭前者尝借支
钞本至千六十万三千一百余锭今乞罢中统钞以至大银钞为母至元钞为子仍拨至
元钞本百万锭以给国用大都立资国院山东河东辽
阳江淮湖广川汉立泉货监六产铜之地立提举司十九尚书省臣言三宫内降之旨曩
中书省奏请勿行臣等谓宜仍旧行之倘于大事有害
则复奏请帝是其言又言中书之务乞以尽归臣等至元二十四年凡宣敕亦尚书省掌
之今臣等议乞从尚书省任人而以宣敕散官委之中
书从之以陕西行台大夫大司徒实迪为左丞相行土番等处宣慰使都元帅丁未禁贵
戚家养豹冬十月庚戌朔命皇太子兼尚书令以行铜
钱法诏天下辛亥皇太子言旧制百官宣敕散官皆归中书以臣为中书令故也自今敕
牒宜令尚书省给降宣命仍委中书从之丙辰约苏言
江南平垂四十年其民止输地税商税务余皆无与其富室有蔽占王民奴使之者动辄百
千家有多至万家者乞自今有岁收粮满五万石以上
者令石输二升于官仍质一子为军所输之粮半入京师以养御士半留于彼以备凶年
从之辛酉弛酒禁立酒课提举司尚书省以钱谷繁剧
增户部侍郎员外郎各一员又增礼部侍郎郎中各一员凡言时政者属之癸亥以翰林
学士承旨布琳尼敦为御史大夫乙丑以皇太后有疾
诏天下释大辟百人丁卯以御史大夫济尔噶朗及中书左丞相托克托尚服院使达都
并知枢密院事癸酉加知枢密院事图古勒左丞相丁
丑以辽阳行尚书省平章政事哈克伞为左丞相行中书省平章政事
中书参知政事巴图为平章政事行中书右丞商议中书省事和尔多卜
丹为右丞行中书省左丞参议中书省事特里托欢贾钧并中书参知政事戊寅御史台
臣言常平仓本以益民然岁比不登遽立之必反害民
又至大银钞始行品目繁碎民犹未悟而又兼行铜钱虑有相妨又民间拘铜器甚急弗
便乞与省臣详议又言岁凶乏食不宜遽弛酒禁帝令

与省臣议之十一月庚辰朔增吏部郎中员外郎主事各一员令考功以行黜陟乙酉尚书省及太常礼仪院言郊祀者国之大礼今南郊之礼已行而未备北郊之礼尚未举行今年冬至祀天南郊请以太祖皇帝配明年夏至祀地北郊请以世祖皇帝配从之丁亥以湖广行省左丞沙卜珠岱为平章政事商议枢密院事丁未择卫士子弟充国子学生十二月乙卯亲飨太庙执事者升赏有差丙辰并中书省左右司辛酉申禁汉人执弓矢兵仗壬戌封西僧玛尔布允则为宁国公赐金印丁丑诏增百官俸定流官封赠等第内外百官三品以上者许请谥勋戚大臣奉旨赐谥者不在此例

三年春正月癸未省中书官吏自客省使以下一百八十一员乙酉特授李孟平章政事集贤大学士同知枢密院事 【按枢密元纪作徽政考元典章及续通鉴纲目诸书皆作同知枢密院事元史百官志大德九年罢徽政院此时已不设是官矣李孟授平章政事集贤大学士自应作同知枢密院事方与品秩相协今据改】 己丑以耨埒参议尚书省事辛卯立皇后鸿吉哩氏乙未定税课法丙申立资国院泉货监命以历代铜钱与至大钱相参行用复立广平顺德路铁冶都提举司戊戌诏湖广行省招谕叛人上思州知州黄胜许辛丑降诏招谕大彻里小彻里壬寅诏谕八百媳妇遣云南行省右丞索勒济尔威招抚之乙巳令中书省官吏如安图居中书时例存设其已汰者尚书省迁叙二月己未浚会通河甲子以上皇太后尊号告祀南郊乙丑复以金枢密院事贾钧为中书参知政事丁卯从尚书省臣言以至元钞输万亿库销毁其板止以至大钞与钱相权通行己巳盗王库库楚与越王图喇子喇特纳实哩谋为不轨事觉库库楚下狱赐其妻谥勒哲死窜喇特纳实哩及其祖母母妻于拜特穆尔所以辉和尔僧锡哩等二十四人同谋或知谋不首并磔于市辛未多尔济戡加录军国重事壬申以约苏为尚书左丞相驸马都尉封齐国公乙亥以上皇太后尊号告祀太庙三月己卯朔枢密院臣言国家设官分职都省治金谷枢密治军旅各有定制迨者尚书省弗遵成宪易置本院官令依大德十年员数闻奏臣等议以特穆尔布哈托卜齐延绰和尔伊苏托克托额尔吉讷图卜布哈达都知枢密院事萨题勒密实史鬻同知枢密院事吴元珪枢密副使塔喇海姑令为副枢帝令枢密院如旧制设官十七员乙酉以知枢密院事济尔噶朗为陕西行尚书省平章政事遣刑部尚书玛尔往甘肃和市羊马庚寅尚书省臣言昔世祖令以叛王海都分地五户丝为币帛俟彼来降赐之藏二十余年今其子彻伯尔向慕德化归觐阙廷请以赐之帝曰世祖谋虑深远若是

待诸王朝会颁赏既毕卿等备述其故然后与之使彼
知愧壬辰车驾如上都夏四月己酉容米洞官田墨纠众为乱遣永顺安抚副使梓材往
招之赐高丽国王王章功臣号改封溍王改大承华普
庆寺总管府为崇祥监丙子立管领军匠千户所增国子生为三百员五月甲申封诸王
谔勒哲为卫王乙未加尚书参知政事王罽大司徒六
月丁未朔诏太尉尚书右丞相托克托太保尚书左丞相三宝努总治百司庶务并从尚
书省奏行戊申省土都留守司官七员以行中书左丞
和尔多卜丹为中书右丞己酉立上都中都等处银冶提举司庚戌立规运都总管府领
大崇恩福元寺钱粮置提举司资用库大益仓隶之甲
子以太子詹事库春为中书左丞集贤使领典医监事戊辰遣使诸道审决重囚壬申以
西北诸王彻伯尔等来朝告祀太庙赐托克托三宝努
珠衣封三宝努为楚国公以常州路为分地秋七月丙戌以循州大水赈之癸巳给亲民
长吏考功印历令监治官岁终验其行迹书而上之廉
访司御史台尚书礼部考校以为升黜增尚书省客省使副各一员直省舍人十四员立
河南打捕鹰坊鱼课都提举司乙未中都立光禄寺己
亥禁权要商贩挟圣旨懿旨令旨阻碍会通河民船八月丁未以江浙行尚书省左丞相
呼喇珠遥授中书右丞相哩日并为御史大夫九月己
卯平伐蛮酋不老丁遣其侄与甥十人来降升平伐等处蛮夷军民安抚司同知陈思诚
为安抚使佩金虎符丙戌帝还大都保巴遥授平章政
事壬辰皇太子言司徒刘夔乘驿省亲江南大扰平民二年不归诏罢之壬寅敕诸司官
滥设者毋给月俸诏谕三宝努等去岁中书省奏诸司
官员遵大德十年定制滥者汰之今闻员冗如故有不以闻而径之任者有旨不奏而擅
令之任及之任者并逮捕之冬十月甲寅敕谕中外民
户托名诸王妃主贵近臣僚规避差徭者俾充军驿及筑城中都郡县官不觉察者罢职
封僧额琳沁策喇实为文国公赐金印丁巳尚书省臣
言宣徽院廩给日增储■〈彳侍〉虽广亦不能给宜加分减帝曰比见后宫饮膳与朕
无异有是理耶其令博迪苏与宣徽院官核实分减之
庚申敕尚书省事繁重诸司有才职明达者并从尚书省选任枢密院御史台及诸有司
毋辄奏用违者论罪辛酉以皇太后受尊号赦天下大
都上都中都较他郡供给繁扰与免至大三年秋税其余至大二年以前民闲负欠差税
课程并行蠲免三宝努言省部官不肯勤恪署事敕自
今晨集暮退苟或怠弛不必与闻便宜罪之其到任或一再月辞以病者杖罢不叙从之
丁卯封诸王舒巴勒子满济勒噶为尧王壬申以玛哈
穆特丹达为遥授右丞海外诸蕃宣慰使都元帅领海道运粮都漕运万户府事以丞相

特古勒德尔为陕西行御史台御史大夫诏谕大司农
司劝课农桑十一月辛巳加托克托为太师录军国重事封义国公壬午改大崇恩福元
寺规运总管府为隆禧院戊子以益都濠海等处连岁
饥罢鹰坊纵猎容米洞田墨来降授黄沙寨千户以朱清子虎张瑄子文龙住治海漕以
所籍宅一区田百顷给之城中都丙申有事于南郊尊
太祖皇帝配享昊天上帝己亥尚书省以武卫亲军都指挥使郑阿尔斯兰与兄郑荣祖
段叔仁等图为不轨置狱鞫之皆诬服叔仁等十七人
并就诛籍没其家十二月甲辰朔以建大崇恩福元寺遥授奇彻勒左丞策凌刘良参知
政事并领行工部事

四年春正月癸酉朔帝不豫大赦庚辰崩于玉德殿年三十一葬起辇谷谥曰仁惠
宣孝皇帝庙号武宗国语曰库鲁克皇帝

武宗至大四年

钦定续通志卷六十三

●钦定续通志卷六十四 元纪八

元纪 【八】

仁宗 【一】

○仁宗一

仁宗皇帝讳阿裕尔巴里巴特喇武宗母弟也武宗为怀宁王总兵北边而成宗崩
后巴约特氏与左丞相阿固岱等议立安西王阿南达
右丞相哈喇哈斯知其谋急遣使迎帝时帝方奉母鸿吉哩氏居怀州使者至即奉母进
发至卫辉抵漳水值大风雪田叟有以盂粥进者近侍
却不受帝曰昔汉光武为寇兵所逼尝食豆粥大丈夫不备尝艰阻庸知稼穡艰难命取
食之赐叟束帛慰遣之行次邯郸谕守令曰吾虑卫士
不法胥吏科敛重为民困乃命王傅沿途巡察二月辛亥至大都与母入哭尽哀仍出居
旧邸朝夕入奠时哈喇哈斯称疾守宿掖门夜遣人启
曰怀宁王远不能猝至恐变生不测当先事而发三月丙辰 【丙辰元史作丙寅按成宗
纪是年正月丙辰朔则丙寅当在三月初旬以外考
哈喇哈斯传云三月朔日列牍请署后决以三月三日御殿听政明日迎仁宗入执阿固
岱等诛之是仁宗之入在三月二日不应为丙寅明矣
谨识】 帝率卫士入内召阿固岱等责以乱祖宗家法命执之鞫问辞服皆伏诛诸王库
库楚伊克图等曰今罪人斯得太子实世祖之孙宜早
正天位帝曰王何为出此言彼恶人潜结宫壺构乱我家故诛之岂欲作威观望神器耶
怀宁王吾兄也正位为宜乃遣使迎武宗于北边五月
乙丑帝与母会武宗于上都武宗即位立帝为皇太子受金宝乃遣使四方旁求经籍识

以玉刻印章命近侍掌之时有进大学衍义者命詹事王约等节而译之帝曰治天下此一书是矣因命与图象孝经列女传并刊行以赐近臣寻受玉册领中书省枢密院至大二年立尚书省帝兼尚书令詹事院臣启金州献瑟瑟洞请遣使采之帝曰所宝惟贤瑟瑟何用焉若此者后勿复闻有近侍言贾人售美珠者帝曰吾服御不喜馀珠玑以生民膏血不可轻耗汝等当广进贤才以恭俭爱人相规不可以奢靡蠹财相导也四年春正月庚辰武宗崩帝入居内殿壬午即罢尚书省以丞相托克托三宝努平章约苏右丞保巴左丞孟克特穆尔参政王罍变乱旧章流毒百姓命中书右丞相塔斯布哈知枢密院事特穆尔布哈等参鞫丙戌托克托三宝努约苏保巴王罍伏诛杖孟克特穆尔流海南壬辰罢城中都召世祖朝谙知政务老臣平章程鹏飞董士选太子少傅李谦少保张律右丞陈天祥尚文刘正左丞郝天挺中丞董士珍太子宾客萧■〈奭斗〉参政刘敏中王思廉韩从益侍御赵君信廉访使程巨夫杭州路达噜噶齐阿哈玛特给传诣阙同议庶务乙未禁百官役军人营造及守护私第丁酉以云南行中书省左丞相特们听尔为中书右丞相太子詹事鄂勒哲集贤大学士李孟并平章政事戊戌以塔斯布哈及徽政院使实沙并为御史大夫己亥改行尚书省为行中书省庚子停各处营造罢广武康里卫追还印符驿券玺书及其万户等官宣敕辛丑以达实特穆尔知枢密院事壬寅禁鹰坊驰驿扰民敕中书凡传旨非亲奉者勿行二月乙巳命和琳江浙行省依前设左丞相余省惟置平章二员遥授职事勿与戊申罢运江南所印佛经辛亥禁诸王驸马权豪擅据山场及宣政院违制度僧甲寅司徒萧珍以城中都徼功毒民命追夺其符印令百司禁锢之还中都所占民田罢江南行通政院行宣政院甲子命中书平章李孟领国子监学谕之曰学校人材所自出卿等宜数诣国学课试诸生勉其德业敕诸王驸马食户在缙山怀来等县者与民均服徭役诸司擅奏除官者毋给宣敕御史台臣言白云宗总摄所统江南为僧之有发者不养父母避役损民乞追收所受玺书银印勒还民籍从之罢福建绣匠河南鱼课两提举司省宣徽院参议断事官丁卯命西番僧非奉玺书驿券及无西番宣慰司文牒者勿辄至京师仍戒黄河津吏验问禁止罢总统所及各处僧录僧正都纲司凡僧人诉讼悉归有司罢仁虞院复置鹰坊总管府庚子 【按丁卯庚辰闲不应有庚子日非庚午即丙子之讹无可据改姑仍其旧】 命广西静江融州军民官镇守三载无虞者民官减一资军官升一阶着为令三月庚辰召前枢密副使吴元珪左丞贝降额卜德呼勒至京师同诸老臣议事丙

戊罢五台行工部己丑命毋赦十恶大逆等罪庚寅即
皇帝位于大明殿大赦辛卯禁民闲制金箔销金织金以御史中丞李士英为中书左丞
丁酉命伊彻察喇依前太师宣徽使特尔格为太傅集
贤大学士库春为太保敕百司改升品级者悉复至元旧制是月帝谕省臣曰卿等哀集
中统至元以来条章择晓法律老臣斟酌重轻折衷归
一颁行天下俾有司遵行则抵罪者庶无冤抑又谕太府监臣曰财用足则可以养万民
给军旅自今虽一缙之微不言于朕毋辄与人以陕西
行尚书省左丞额卜德呼勒为中书右丞昭文馆大学士察罕参知政事平章政事
知枢密院事绰和尔钦察亲军都指挥使托和齐巴图
尔中书右丞相知枢密院事特穆尔布哈录军国重事知枢密院事伊苏知枢密院事兼
山东河北蒙古军都万户额森特穆尔遥授左丞相仁
虞院使额尔吉太子詹事伊噜特穆尔并知枢密院事夏四月壬寅诏分汰宿卫士汉人
高丽南人冒入者还其原籍丁未以太子少保张律为
江浙平章戊申以即位告天地于南郊戊午告于太庙辛酉敕国子监师儒之职有才德
者不拘品级虽布衣亦选用癸亥敕诸使臣非军务急
速者毋给金字圆牌定四宿卫士岁赐钞二十四万二百五锭罢中都留守司复置隆兴
路总管府乙丑封知枢密院事特穆尔布哈为宣懿王
丁卯罢至大钱钞罢僧道伊啰勒昆达实密头陀白云宗诸司改封亲王德勒格尔布哈
为湘懿王罢回回哈达司属五月壬申以宦者塔舒尔
为利用监卿癸酉八百媳妇蛮与大小彻里蛮寇边命云南王及右丞阿固岱以兵讨之
改封乳母夫寿国公杨德荣为云国公丙子命翰林国
史院纂修先帝实录及累朝皇后功臣列传俾百司悉上事迹庚辰敕中书省裁省冗司
壬午拘诸王驸马及有司驿券自今遣使悉从中书省
给降是月禁民捕驾鹅六月癸卯敕宣政院凡西番军務必移文枢密院同议以闻吐蕃
犯永福镇敕宣政院与枢密院遣兵讨之乙巳命侍臣
咨访内外才堪佐国者悉以名闻丙午以内侍杨光祖为秘书卿谭振宗为武备卿关居
仁为尚乘卿并授弘文馆学士甲寅封伊苏台为怀仁
郡王丁巳敕翰林国史院春秋致祭太祖太宗睿宗御容岁以为常命和琳行省右丞巴
喇玛索和尔经理青海屯田大同路宣懿县民家■〈
牛 孛〉牛产犊颇类麒麟车载以献左右曰古所谓瑞物也帝曰五谷丰熟百姓安业乃
为瑞也此何为哉己未封枢密使博啰为泽国公庚申
敕自今诸司白事须殿中侍御史侍侧癸亥复云州银场提举司丙寅拘收泉府司原给
诸商贩玺书丁卯罢扎哈齐巴勒噶逊所造上供酒己
巳卫王阿穆尔克入见帝谕省臣曰朕与阿穆尔克同父而异母朕不抚育彼将谁赖其

赐钞二万锭他勿援例帝览贞观政要谕翰林侍讲额琳特穆尔曰此书有益于国家其译以国语刊行俾蒙古色目人诵习之秋七月辛未朔拘还辽阳省官提调诸事圆符玺书驿券裁减虎贲司职员己亥诏谕省臣曰朕前戒近侍毋辄以文记传旨中书自今敢有犯者不须奏闻直捕其人付邢部究治敕御史台臣选更事老成者为监察御史闰月辛丑命国子祭酒刘赓诣曲阜以太牢祠孔子甲辰车驾将还大都太后以秋稼方盛勿令鹰坊駝人卫士先往庶免害稼扰民禁止之戊申封李孟秦国公命额琳沁策喇实为司徒己酉吐蕃寇礼店文州命总帅额琳沁等讨之辛亥以西僧藏布班巴尔为国师己未诏谕省臣曰国子学世祖皇帝深所注意如平章博果密等皆蒙古人而教以成才朕今亲定国子生额为三百人仍增陪堂生二十人通一经者以次补伴读着为定式敕军官七十致仕始听子弟承袭其有未老即托疾引年令幼弱子弟袭职者除名不叙其巧计求迁者以违制论乙丑遣使招谕黑水白水等蛮十二万余户来降丁卯鄂勒哲李孟等言方今进用儒者而老成日以雕谢四方儒士成才者请擢任国学翰林秘书太常或儒学提举等职俾学者有所激劝帝曰卿言是也自今勿限资级果才而贤虽白身亦用之禁医人非选试及着籍者毋行医药八月己巳朔裁定京朝诸司员数并依至元三十年旧额以近侍吹喇实为户部尚书九月己亥朔遥授左丞相布哈进太尉丙午安南国王陈益稷入见言臣自世祖朝来归妻子皆为国人所害朝廷因遥授湖广平章仍与王爵赐汉阳田五百顷俾自贍以终余年今臣年几七十而有司拘臣所授田就食无所帝谓省臣曰安南国王慕义来归宜厚其赐以怀远人其进勋爵受田如故戊申禁民弹射飞鸟杀马牛羊当乳者庚戌命枢密院大阅各省军马壬子诏改明年为皇庆元年都水监卿茂巴尔斯传旨给驿往取杭州所造龙舟省臣谏曰陛下践阼诞告天下凡非宣索毋得擅进诚取此舟有乖前诏诏止之复置中宫位下齐哩克昆诸色民匠打捕鹰坊都总管府丙寅敕省部官勿托以宿卫废职罢西番茶提举司冬十月戊辰朔有事于太庙丁丑禁诸僧寺毋得侵冒民田辛巳罢宣政院理问僧人词讼特授故太师阿尔娄子穆哩库荣禄大夫知枢密院事辛卯罢诸王断事官其蒙古人犯盗诈者命所隶千户鞫问癸巳置汴梁平江等处田赋提举司掌大承华普庆寺贖产十一月戊戌封司徒穆苏为赵国公辛丑立乖西府以土官阿马知府事佩金符李孟奏钱粮为国之本世祖朝量入为出恒务撙节故仓库充牣今每岁支钞六百余万锭又土木营缮百余处计用数百万锭内降旨赏赐复用三百余万锭北边军需

又六七百万锭今帑藏见贮止十一万余锭若此安能
周给自今不急浮费宜悉停罢帝纳其言凡营善悉罢之辛亥诸王布琳尼敦等诬班布
尔实以不法诏窜布琳尼敦图罕于河南伊克鼎尔于
扬州纳琳于湖广台纳于江西巴勒楚纳克于云南己未以辽阳省平章政事哈萨为中
书平章政事丙寅加徽政使罗源为大司徒十二月癸
酉封宣政会福院使温普为秦国公甲申以浙西水灾免漕江浙粮四分之一存留赈济
命江西湖广补运输京师庚寅申禁汉人持弓矢兵器
田猎曲赦大都死罪囚一人并流以下罪辛卯遣官监视焚至大钞乙未命李孟整饬国
子监学中书省臣言世祖定立选法升降以示激劝今
官未及考或无故更代或躐等进阶僭受国公丞相等职诸司已裁而复置者有之今春
以内降旨除官千余人其中欺伪岂能悉知坏乱选法
莫此为甚帝曰凡内降旨一切勿行遣礼部尚书奈玛台等赍诏往谕安南并颁皇庆元
年历日

皇庆元年春正月庚子帝谕御史大夫塔斯布哈曰凡大臣不法卿等劾奏毋避朕
自裁之癸卯敕诸僧犯奸盗诈伪鬪讼仍令有司专治
之甲辰授太师录军国重事知枢密院事多尔济戡开府仪同三司嗣淇阳王庚戌封知
枢密院事绰哈为安远王出总北军戊午改封济王图
烈纳为吴王加崇福使阿哩雅秦国公二月丁卯徙大都路学所置周宣王石鼓于国子
监甲戌制定封赠名爵等级壬午封博啰为永丰郡王
置德安府行用钞库罢庄浪州唐古千户所庚寅敕岭北赈阙食流民赈山东流民至河
南境者三月丁酉朔罢诸王大臣私第营缮庚子加御
史大夫和尼齐开府仪同三司戊申以前河南行省平章政事塔斯哈雅为御史大夫置
五台寺济民局丙辰封同知徽政院事常布呼齐为赵
国公乙丑封诸王塔斯布哈为恩平王夏四月丁卯简控鹤士还本籍置察罕淖尔捕盗
司癸酉车驾如上都壬午敕僧人田除宋之旧有并世
祖所赐外余悉输租如制封知枢密院事穆哩库为广平王庚寅大崇恩福元寺成五月
丙申朔以中书平章政事哈克伞为中书左丞相江浙
行省平章张律为中书平章政事【按宰相表哈克伞为左丞相在九月张律为平章政
事在三年正月皆与纪异】知枢密院事额森特穆
尔授开府仪同三司壬寅禁诸王农时出猎丁未缙山县行宫建凉殿六月乙丑朔日有
食之己巳敕李孟博选中外才学之士任职翰林丁亥
敕罢封赠诫左右守法度勤职业勿妄侥幸加官秋八月己卯以吏部尚书许师敬为中
书参知政事庚辰帝还大都辛卯敕云南省右丞阿固
岱等领蒙古军从云南王讨八百媳妇蛮安南国王陈益稷来朝九月丁酉增江浙海漕

粮二十万石戊戌罢征八百媳妇蛮大小彻里蛮以玺
书招谕之甲辰以参议中书省事鄂博哈雅为参知政事冬十月甲子有事于太庙云南
行省右丞索勒济尔威有罪国师楚斯节巴咱尔奏请
释之帝斥之曰僧人宜诵佛书官事岂当与耶癸未以中书参知政事察罕为中书平章
政事商议中书省事辛卯大赦赐李孟潞州田二十顷
十一月丙午谕六部官毋踰越中书奏事丙辰封驸马托克托穆尔为岐王 【按诸王表
托克托穆尔以延佑四年由濮阳王进封与纪异】
庚申缅甸主遣其婿及云南不农蛮酋长岑福来朝十二月癸亥中书平章政事李孟致
仕以枢密副使张珪为中书平章政事癸酉遣使分道
决囚庚辰知枢密院事达实密罢甲申鹰坊布哈济勒请往河南湖广括取孔雀珍禽敕
以扰民不允丁亥遣官祈雪于社稷岳镇海渚省臣言
中书职在总挈纲维比者行省六部诸司应决不决者往往作疑咨呈以致文繁事弊诏
体世祖立中书初意定拟程序以闻俾遵行之己丑宗
王女巴勒丹给驿取江南田租命拘还驿券是月诸王吹丹叛

二年春正月甲午以察罕淖尔等处宣慰使布呼为御史大夫辛丑封前尚书右丞
相奇塔特布济克为安吉王丙午盗王库库楚薨丁未
以太府卿图古勒为中书右丞相己未置辽阳行省儒学提举司二月己卯免征益都饥
民所贷官粮二十万石各寺修佛事日用羊九千四百
四十敕遵旧制易以蔬食辛巳诏以钱粮造作诉讼等事悉归有司以清中书之务丁亥
功德使以佛事奏释重囚不允帝谕左右曰回回以宝
玉鬻于官朕思此物何足为宝唯善人乃可为宝善人用则百姓安兹国家所宜宝也三
月丙申以御史中丞托欢达尔罕为御史大夫丙午册
立皇后鸿吉哩氏壬子御史中丞郝天挺上疏论时政帝嘉纳之丙辰以亢旱既久帝于
宫中焚香默祷遣官分祷诸祠夏四月乙亥车驾如上
都丙子高丽王辞位以其世子王焘为征东行中书省左丞相上柱国封高丽国王辛巳
加御史大夫布呼开府仪同三司太傅乙酉御史台臣
言富人夤缘特旨滥受官爵徼政宣徼用人率多罪废之流近侍托为贫乏互奏恩赏西
僧以作佛事之故累释重囚外任之官身犯刑宪辄营
求内旨以免罪诸王驸马寺观臣僚士田每岁征租亦极为扰民请悉革其弊从之五月
辛丑以中书右丞额卜德呼勒为平章政事左丞巴勒
托音为右丞参知政事鄂博哈雅为左丞参议中书省事图尔哈特穆尔为参知政事六
月癸亥图古勒等以灾异乞赐放黜不允辛未以参知
政事许师敬纲领国子学乙亥诏僧俗争讼有司及主僧同问续置土田如例输税壬午
命监察御史检察监学官考其殿最甲申建崇文阁于

国子监以宋儒周敦颐程颢程颐张载邵雍司马光朱熹张栻吕祖谦及故中书左丞许衡从祀孔子庙庭秋七月癸巳以作佛事释囚徒二十九人辛丑复立四川等处儒学提举司八月丁卯帝还大都庚午以侍御史薛居敬为中书参知政事九月以萨斯嘉巴为帝师癸巳以宣徽院使鄂勒哲知枢密院事戊申封托欢为安定王敕镇江路建银山寺勿徙寺傍莹冢京师大旱帝问弭灾之道翰林学士程巨夫举汤祷桑林事帝奖谕之冬十月己卯敕中书省议行科举封博迪穆尔为安德王十一月甲辰行科举诏天下以皇庆三年八月天下郡县兴其贤者能者充贡有司次年二月会试京师中选者亲试于廷赐及第出身有差帝谓侍臣曰朕所愿者安百姓以图至治然匪用儒士何以致此设科取士庶几得真儒之用而治道可兴也十二月辛酉克里玛鼎上所编万年历海都都勒斡属户内附敕所在给衣粮丙子定百官致仕资格

延佑元年春正月丁亥授中书右丞刘正平章政事商议中书省事庚子敕各省平章为首者及汉人省臣一员专意访求遗逸苟得其人先以名闻而后致之以江浙行中书省左丞高昉为中书参知政事丁未改元释天下流以下罪囚免上都大都差税二年其余被灾曾经赈济人户免差税一年庚戌中书省臣图噜库以灾变乞罢不允二月庚申立印经提举司甲戌以侍御史赵世延为中书参知政事免蒙古地差税二年商贾勿免壬午图噜库罢以哈克伞为中书右丞相【按续纲目图噜库罢以哈克伞为右丞相宰相表图噜库亦于是年二月罢本纪原文上书图噜库乞罢不允此载以哈克伞为中书右丞相而无图噜库罢四字于宰臣更代书法殊为疏略今增】监修国史癸未以中书参政高昉为集贤学士三月乙巳以作佛事择释狱囚命中书审察丙午封阿噜图为赵王戊申车驾如上都己酉敕奸民宫其子为阉臣谋避徭役者罪之辛亥命参知政事赵世延纲领国子学癸丑中书平章政事察罕致仕【按察罕本传致仕在皇庆元年与纪异】晋宁民侯喜见昆弟五人并坐法当死帝叹曰彼一家不幸而有是事其择情轻者一人杖之俾养父母毋绝其祀闰月甲寅朔敕减枢密知院各冗员辛酉罢呪僧月给俸遣人视大都至上都驻蹕之地有侵民田者计亩给直夏四月丁亥太常寺臣请立北郊不允壬辰诸王托克托薨以谩斯伯袭位己酉敕郡县官勤职者加赐币帛以特们德尔录军国重事监修国史立回回国子监帝以资治通鉴载前代兴亡治乱命集贤学士和塔位都哩默色及李孟择其切要者译写以进五月丁卯赐李孟孝感县地二十八顷禁诸王支属径取分地租赋扰民敕岭北行省瘞阵没遗骸戊寅

京兆为故儒臣许衡立鲁斋书院降玺书旌之六月戊子敕内侍今后止授中官勿畀文阶置云南行省儒学提举司封河南省丞相布琳济达为河南王壬辰发军垦河南芍陂等处屯田秋七月庚午命中书省臣议复封赠弛下番市舶之禁八月戊子车驾至大都九月己巳复以特们德尔为右丞相哈克伞为左丞相罢陕西诸道行御史台冬十月乙未敕吏人转官止从七品在选者降等注授敕下番商贩须江浙省给牒以往归则征税如制私往者没其物遣官括淮民所佃闲田不输税者丙申复甘肃屯田置沙瓜等处屯储总管万户府庚戌监察御史言乞命枢密院设法教练士卒应军官袭职者试以武事而后任之从之遣张律经理江南田粮十一月戊辰以通政院使萧拜珠为中书右丞辛未以翰林学士承旨达实密知枢密院事癸酉敕吏人贼行者黥其面戊寅以前中书右丞相图噜库知枢密院事十二月辛卯禁诸王驸马权势之人增价鬻盐壬辰诏定官员士庶衣服车舆制度己亥敕中书省定义孔子五十三代孙当袭封衍圣公者以名闻庚子遣官浚扬州淮安等处运河以翰林学士承旨李孟复为中书平章政事乙巳敕经界诸卫屯田

二年春正月己巳置大圣寿万安寺都总管府庚午立行用库于江阴州乙亥遣宣抚使分十二道问民疾苦黜陟官吏并给银印命中书省臣分领庶务二月己卯朔会试进士庚子以恭噶诺尔布喇实置勒灿巴勒藏布为帝师赐玉印壬寅云南王罗丹来朝辰沅洞蛮吴千道为寇敕调兵捕之三月乙卯廷试进士赐呼图克岱尔张起岩等五十六人及第出身有差

【按是为左右榜之始元自世祖时议定科举新制

未及行至是始以蒙古色目人为右榜汉人南人为左榜每三岁一试其授官两榜皆同盖四十余年之创举也】庚午以加上皇太后尊号蠲

天下逋欠税课丁丑以中书平章张律为江浙行省平章政事夏四月戊寅朔日有食之辛巳赐进士恩荣宴于翰林院辛丑赐会试下第举人

七十以上从七品流官致仕六十以上府州教授余并授山长学正后勿援例敕诸王分地仍以流官为达噜噶齐各位所辟为副达噜噶齐命

李孟等类集累朝条格俟成书闻奏颁行乙巳车驾如上都加授特进上卿玄教大宗师张留孙开府仪同三司丙午封诸王彻伯尔为汝宁王

五月戊申朔复立陕西诸道行御史台庚午立海西辽东鹰坊万户府隶中政院壬申诸王实都实喇薨甲戌加授宦者中尚卿续元晖昭文馆

大学士六月辛丑以济宁益都亢旱汰省宿卫士刍粟秋七月甲寅改扎哈齐巴勒噶逊总管府为尚供府乙卯赣州土贼蔡五九聚众作乱敕

遣兵捕之敕阿苏卫户贫乏者给牛种耕具于拉萨哩地屯田癸酉命特们德尔总宣政

院事八月丙戌蔡五九陷汀州宁化县遣江浙行省平章张律等讨之己丑车驾至自上都乙未台臣言蔡五九之变皆由鼐智密鼎经理田粮与郡县横加酷暴逼抑至此信丰一县 【信丰元史作新丰按蔡五九之变起自赣州应指江西之信丰为是今据地理志改】 撤民庐千九百区虚张顷亩流毒居民乞罢经理及冒括田租从之壬寅增国子生百员岁贡伴读四员诏江浙行省印农桑辑要万部颁降有司遵守劝课九月丁未张律以括田逼死九人敕吏部尚书王居仁等鞫之壬戌蔡五九众溃伏诛余党悉平赏军士讨捕功并官其死事者子孙冬十月丁丑封托和齐为威宁郡王浩尔齐特穆尔布哈为赵国公庚辰以淮西廉访使郭贯为中书参知政事壬午有事于太庙乙未以同知枢密院事特穆尔图知枢密院事授白云宗主沈明仁荣禄大夫司空丁酉加授特们德尔太师十一月甲戌封和实拉为周王出镇云南十二月庚寅增置平江路行用库癸巳命省臣定拟封赠通例俾高下适宜以闻旌表汀州宁化县民赖禄孙孝行

三年春正月乙巳特授实保齐巴勒噶逊达噜噶齐托欢金紫光禄大夫太尉丙午封前中书左丞相和尔岱尔寿国公以真定保定荐饥禁畋猎辛酉以同知枢密院事玛鲁知院事二月丁丑调海口屯储汉军千人隶临清运粮万户府以供转漕三月辛亥特授高丽王世子王暉开府仪同三司渾王加授将作院使吕天麟大司徒甲寅敕萧拜珠及陕西四川省臣各一员护送周王之云南置周王常侍府癸亥车驾如上都壬申禁天下春时畋猎夏四月癸酉朔河南流民羣聚渡江所过扰害命行台廉访司以见贮赃钞赈之壬午敕卫辉昌平守臣修殷比干唐狄仁杰祠岁时致祭庚子上都留守哈喇格尔知枢密院事五月辛亥以江西行省右丞相库春为大司徒庚申以大都留守拜特穆尔为中书平章政事以中书右丞萧拜珠为平章政事左丞鄂博哈雅为右丞参政郭贯为左丞参议布哈为参知政事庚午置甘肃儒学提举司辽阳金银铁冶提举司六月乙亥改诸王功臣分地丙子融宾柳州猺蛮叛命湖广行省遣官督兵捕之丁丑敕大辟罪临刑敢有横加刳割者以重罪论凡鞫囚非强盗毋加酷刑己卯诏谕百司各勤其职毋隳废大政丁亥封绰和尔为句容郡王秋七月壬子命御史大夫布呼托欢达尔罕拯治台纲仍降诏宣谕中外乙卯封伊噜特穆尔为保恩王赐金印 【按诸王表伊噜特穆尔封保恩王在二年与纪异】 丙寅复以雅克特穆尔知枢密院事八月癸酉以兵部尚书奇塔特为中书参知政事己卯车驾至大都戊戌置织佛像工匠提调所九月辛丑复五条河屯田以

中书左丞郭贯为集贤大学士集贤大学士王毅为中书左丞冬十月壬申有事于太庙调四川军二千人云南军三千人于乌蒙等处屯田庚寅敕五台灵鹫寺置铁冶提举司丁酉申禁民有父在者不得私贷人钱及鬻墓木十一月壬寅命监察御史监治岭北钩校钱粮半岁更代乙卯改旧运粮提举司为大都陆运提举司新运粮提举司为京畿运粮提举司澧州路安抚司为安定军民府十二月庚午以知枢密院事图噜库为陕西行省左丞相壬午授嗣汉天师张嗣成太玄辅化体仁应道大真人掌江南道教事丁亥立子硕迪巴拉为皇太子兼中书令枢密使授以金宝告天地宗庙以同知枢密院事绰和尔知枢密院事

四年春正月庚子帝谓左右曰中书比奏百姓乏食宜加赈恤朕思民饥若此岂政有过差以致然欤向诏百司务遵世祖成宪宜勉力奉行辅朕不逮乙卯诸王托克托驻云南扰害军民以昂辉代之丙辰以知枢密院事鄂勒哲为云南行省平章政事闰月庚辰封诸王博啰为冀王丙戌以立皇太子诏天下给赐鳏寡孤独钞减各路租税辛卯封拜特穆尔为汾阳王二月甲辰敕郡县各社复置义仓戊申特授近侍鄂勒哲布哈翰林侍读学士知制诰同修国史三月辛卯车驾如上都夏四月壬寅加授太常礼仪院使拜珠大司徒戊申达哈苏寇边吴王图列纳等败之于和怀己未诸王耨埒薨乙丑禁岭北酒帝尝夜坐谓侍臣曰雨旸不时奈何萧拜珠对曰宰相之过也帝曰卿不在中书耶拜珠惶愧帝露香默祷既而大雨左右以雨衣进帝曰朕为民祈雨何避焉翰林学士承旨和塔拉都哩默色刘赓等译大学衍义以进帝览之谓羣臣曰大学衍义议论甚嘉其令翰林学士阿拉克特穆尔译以国语五月辛未授上都留守库库楚开府仪同三司大司徒乙亥加封大长公主孟古岱为皇姑大长公主壬午黄州高邮真州建甯等处流民羣聚持兵钞掠敕所在有司其伤人及盗者罪之余并给粮遣归以翰林学士承旨齐勤特穆尔为中书平章政事中书平章额卜德呼勒为集贤大学士己丑以中书左丞鄂博哈雅为平章政事参政奇塔特为右丞高昉为左丞参议中书省事和卓张思明并参知政事六月戊申特们德尔罢以左丞相哈克伞为中书右丞相己酉额卜德呼勒复为中书平章政事壬子以工部尚书王桂为中书参知政事丙辰敕诸王驸马功臣分地仍旧制自辟达噜噶齐秋七月乙亥李孟罢以江浙行省左丞王毅为中书平章政事壬午特授中卫亲军都指挥使布呼齐太尉辛卯帝谕省臣曰比闻蒙古诸部困乏往往鬻子女于民家为婢仆其命有司赎之还各部帝出见卫士有敝衣者驻马问之对曰戍守边镇踰十五年以故贫耳帝曰此辈久劳于

外留守臣未尝以闻非朕亲见何由知之自今有类此者必言于朕因赐之钱帛八月丙申车驾至自上都庚申哈克伞奏事毕帝问曰卿等日所行者何事哈克伞对曰臣等第奉行诏旨而已帝曰卿等何尝奉行朕旨虽祖宗遗训朝廷法令皆不遵守夫法者所以辨上下定民志自古及今未有法不立而天下治者使人君制法宰相能守而勿失则下民知所畏避纲纪可正风俗可厚其或法弛民慢怨言并兴欲求治安岂不难哉九月丙寅哈克伞言故事丞相必用蒙古勋臣哈克伞回回人不厌人望遂恳辞制以宣徽使博迪苏为中书右丞相哈克伞为左丞相冬十月甲午朔有事于太庙壬寅遣御史大夫布呼参知政事王桂祭陕西岳镇名山己酉监察御史言官吏丁忧起复人情惊惑请禁止以绝侥幸惟朝廷耆旧特旨起复者不在禁例从之戊午海外婆罗公民船漂至温州敕江浙省资遣还乡十一月己卯复浚扬州运河壬辰谕诸宿卫入直各居其次非有旨不得上殿阑入禁中者坐罪十二月丁酉复广州采金银珠子都提举司乙巳遣官即兴和路及净州发廩赈给北方流民丁巳以内宰领延福司事图们岱尔知枢密院事特授晋王内史阿勒坦绰克金紫光禄大夫鲁国公辛酉改齐哩克昆民匠总管府为缮用司

五年春正月乙酉敕诸王位下民在大都者与民均役丁亥湖广平章迈珠加鲁国公大司农二月癸巳朔日有食之丁酉封诸王鸿和特穆尔为嘉王图们特穆尔为武平王并赐印戊申建盥顶殿于文德殿后 【按辍耕录载光天殿西北有盥顶殿五闲后又有盥顶小殿与文德殿同在明晖门外此外又有盥顶井亭盥顶房盥顶之制三楹其顶若笥之平故名考字书盥与簏通盖匣榱之小者命名之义取此旧文误鹿今据改】 辛亥敕杭州守臣春秋祭淮安忠武王巴延祠乙卯敕上都诸寺权豪商贩货物并输税课戊午以札兰齐喇万户府为右卫率府给书西天字维摩经金三千两庚申罢封赠三月庚午立诸王鄂罗木乌逊部打捕鹰坊诸色人匠齐哩克昆总管府乙亥特授安远王绰哈开府仪同三司录军国重事知枢密院事癸未给金九百两银百五十两书金字藏经夏四月壬辰安吉王奇塔特布济克薨庚戌升印经提举司为延福监遣官分汰各部流民给粮赈济免怀孟河南南阳居民所输陕西盐课摩琳特尔格驿困乏济以马五千匹辽阳饥转海漕粮十万石于义锦州以赈贫民甲寅枢密院臣言各省调度军马惟长官二人领其事今四川省诸臣皆预非便请如旧制从之以齐诺史弼并为中书平章政事侍御史敬俨为中书参知政事戊午车驾如上都五月辛酉朔顺元等处军民宣

抚使阿昼以洞蛮酋黑冲子子昌奉方物来覲丁卯以御史中丞伊拉齐为中书右丞相壬申监察御史言比年名爵冒滥太尉司徒国公接迹于朝昔奉诏裁罢中外莫不欣悦近间礼部奉旨铸太尉司徒司空等印二十有六此辈无功于国载在史册貽笑将来请自今门阀贵重勋业昭著者存留一二余并革去从之癸酉遣官分道减决笞以下罪六月辛卯御史台臣言昔遣张律等经理江浙江西河南田粮虚增粮数流毒生民已尝奉旨俟三年征租今及其期若江浙江西当如例输之其河南请视向例减半征之从之癸巳以典瑞院使库春为集贤大学士领典瑞院事大司徒乙巳术者赵子玉等七人伏诛秋七月己未朔李邦奩加开府仪同三司壬申御史中丞赵简言皇太子春秋鼎盛宜选耆儒敷陈道义今李铨侍东宫说书未谙经史请别求硕学分进讲读实宗社无疆之福从之八月庚子车驾至大都九月癸亥大司农迈珠等进司农丞苗好谦所撰栽桑图说帝曰农桑衣食之本此图甚善命刊印散之民闲丙寅广西两江龙州万户赵清臣太平路总管李兴隆率土官黄法扶何凯并以方物来贡赐币帛有差丁卯以中书右丞宣徽使伊拉齐为中书平章政事左丞高昉为右丞参知政事和卓为左丞吏部尚书音扎噶为参知政事己卯以江浙省所印大学衍义五十部赐朝臣辛巳置大永福寺都总管府壬午敕军官犯罪行省咨枢密院议拟毋擅决遣丙戌以佾太常礼仪院事果勒为中书参知政事冬十月辛卯禁大同冀宁晋宁等路酿酒壬辰建帝师帕克斯巴殿于大兴教寺给钞万锭甲午有事于太庙癸丑赣州路零都县里胥刘景周以有司征括田新租聚众作乱敕免征新租招谕之十一月辛酉开成庄浪等处禁酒壬戌改黄花岭屯储军民总管府为屯储总管府山后民饥增海漕四十万石丁卯追夺建康富民王训等白身滥受宣敕仍禁冒籍贯宿卫及考授远方职官不赴任求别调者隐匿不自首者罪之己巳以同知枢密院事忠嘉知枢密院事丙子集贤大学士太保库春言唐陆淳春秋纂例辨疑微旨三书有益后学请令江西行省锺梓以广其传从之癸未敕江西茶运司岁课以二十五万锭为额敕大永福寺创殿安奉顺宗皇帝御容十二月壬辰特授集贤大学士图烈大司徒辛亥置重庆路江津巴县等处屯田省成都岁漕万二千石

六年春正月丁卯敕福建两广云南甘肃四川军官致仕还家官给驿传如民官例癸酉特授同知徽政院事超尔达尔罕金紫光禄大夫太尉己卯广东南恩新州猺贼龙郎庚等为寇命江西行省发兵捕之帝御嘉禧殿谓扎尔古齐玛鲁曰扎尔古齐人命所系其详阅狱辞事无

大小必谋诸同僚疑不能决者与省台臣集议以闻二月丁亥朔日有食之改释奠于中丁祀社稷于中戊祭星于回回司天台丁酉云南阁里
爰俄永昌蒲蛮阿八刺等并为寇命云南省从宜剿捕乙巳敕诸司不由中书奏官辄署事者悉罢之特授僧从吉祥荣禄大夫大司空加荣禄
大夫大司徒僧文吉祥开府仪同三司三月丁巳以天寿节释重囚一人辛酉以御史中丞托克托呼为御史大夫谕之曰御史大夫职任至重
以卿勋旧之裔故特授汝当思乃祖乃父忠勤王室仍以古名臣为法否则将坠汝家声负朕委任之意矣丙寅特授翰林学士承旨巴尔斯布
哈开府仪同三司大司徒己巳敕诸王驸马宗姻诸事依旧制领于内八府官勿径移文中书封诸王伊噜特穆尔为恩王夏四月壬辰中书省
臣言云南土官病故子侄兄弟袭之无则妻承夫职远方蛮夷顽犷难制必任土人可以集事今或阙员宜从本俗权职以行从之丙申命京师
诸司官吏运粮输上都兴和赈济蒙古饥民庚子车驾如上都以特们德尔为太子太师内外监察御史四十余人劾其徇私蠹政难居师保之
任不听诸王格藏薨五月丙子加安南国王陈益稷仪同三司六月癸巳以米五千石赈大长公主所隶贫民丁丑以济宁等路水遣官阅视其
民乏食者赈之仍禁酒开河泊禁秋七月丙辰来安路总管岑世兴叛据唐兴州赐玺书招谕之甲戌皇姊大长公主僧格喇实作佛事释全宁
府重囚二十七人敕按问全宁守臣阿从不法仍追所释囚还狱八月甲申以河东山西道宣慰使张思明为中书参知政事甲午以授皇太子
玉册告祭于南郊庚子车驾还大都丁未告祭于太庙闰月甲子浚会通河壬申以太傅御史大夫布呼为太师癸酉敕诸司有受命不之官及
避繁剧托故去职者夺其宣敕九月甲申以徽政使托迪为太傅参议中书省事奇彻为参知政事癸巳以作佛事释大辟囚七人流以下囚六
人戊戌增海漕十万石癸卯御史台臣言比者官以幸求罪以赂免乞凡内外官非勋旧有资望者不许骤升诸犯赃罪已款伏及当鞫而幸免
者悉付原问官以竟其罪其贪污受刑夺职不叙者夤缘近侍出入内庭觊幸名爵宜斥逐之帝皆纳其言浚镇江练湖冬十月乙卯中书省臣
言白云宗总摄沈明仁强夺民田二万顷诬诱愚俗十万人私赂近侍妄受名爵已奉旨追夺请汰其徒还所夺民田其诸不法事宜令核问有
旨朕知沈明仁奸恶其严鞫之辛酉以扎尔古齐特穆尔布哈为御史大夫丙子以皇太子受玉册诏天下己卯浚通惠河十一月辛卯木邦路
带邦为寇敕云南省招捕之乙巳【按辛卯庚子闲不应有乙巳日非癸巳即乙未之讹无可据改姑仍其旧】以秘书卿沙木斯鼎为大司

徒庚子敕晋王部贫民二千居青海屯田帝谕台臣曰有国家者以民为本比闻百姓疾苦衔冤者众其令监察御史廉访司审察以闻十二月壬戌命皇太子参决国政封宋儒周惇颐为道国公己巳复吏人出身旧制其犯赃者止从七品壬申平章政事王毅以亲老辞职从之仍赐其父币帛癸酉是夜风雪甚寒帝谓侍臣曰朕与卿等居暖室宗戚昆弟远戍边陲曷胜其苦岁赐币帛可不遍及耶敕上都大都冬夏设食于路以食饥者

七年春正月辛巳朔日有食之帝斋居损膳辍朝贺辛卯江浙行省丞相赫噜言白云僧沈明仁擅度僧四千八百余人获钞四万余锭既已辞伏今遣其徒沈崇胜潜赴京师行贿求援请速赴江浙并治其罪从之丁酉帝不豫辛丑崩于光天宫年三十六葬起辇谷谥曰圣文钦孝皇帝庙号仁宗国语曰布延图皇帝

仁宗皇庆二年延佑七年凡九年

钦定续通志卷六十四

●钦定续通志卷六十五 元纪九

元纪 【九】

英宗 【一】

○英宗一

英宗皇帝讳硕迪巴拉仁宗嫡子也母庄懿慈圣皇后鸿吉哩氏初武宗即位立仁宗为太子约以次传己子和实拉既而仁宗即位议立太子丞相特们德尔请立帝帝入谒太后固辞曰臣幼无能且有兄和实拉在宜立太后不许遂立为皇太子诏百司庶务先启太子然后奏闻帝谓中书省臣曰至尊委我以天下事日夜寅畏惟恐弗堪卿等亦当洗心涤虑恪勤乃职勿有隳坏以贻君父忧延佑七年春正月戊戌 【仁宗纪作丁酉】 仁宗不豫帝忧形于色夜则焚香泣曰至尊以仁慈御天下庶职顺成四海清晏今天降大厉不如罚殛我身使至尊永为民主辛丑仁宗崩帝哀毁过礼素服寝于地日歔一粥甲辰太子太师特们德尔以太后命为右丞相丙午遣使分谳内外刑狱戊申禁巫祝日者交通宗戚大臣二月壬子罢造永福寺以江浙行省左丞相赫噜为中书平章政事辛酉以平章政事齐勤特穆尔御史大夫托欢罢为集贤大学士甲子特们德尔阿萨尔请捕逮四川行省平章政事赵世延赴京参议中书省事青沙津坐鬻官刑部以法当杖太后命笞之帝曰不可法者天下之公徇私而轻重之非示天下以公也卒正其罪丙寅以陕西行省平章政事赵世荣为中书平章政事江西行省右丞茂巴尔为中书

右丞参知政事张思明为中书左丞中书左丞和卓罢为岭北行省右丞丁卯白云宗总摄沈明仁以不法坐罪诏籍江南冒称白云僧者为民
癸酉括勘崇祥院地冒以官地献者追其直以民地献者归其主丙子定京城环卫更番法准五卫汉军岁例丁丑夺前中书平章政事李孟所
受秦国公制命仍仆其先墓碑戊寅中书平章政事额卜德呼勒罢为甘肃行省平章政事阿尔哈雅罢为湖广行省平章政事特们德尔以前
御史中丞杨多尔济中书平章政事萧拜珠违太后旨矫命杀之并籍其家徽政院使实勒们以太后命请更朝官帝曰此岂除官时耶且先帝
旧臣岂宜轻动俟予即位议于宗亲元老贤者任之邪者黜之可也司农卿鄂勒哲布哈言先帝以土田颁赐诸臣者宜悉归之官帝问赐者为
谁对曰左丞相阿萨尔所得为多帝曰予常谕卿等当以公心辅弼卿于先朝常请海舶之税以阿萨尔奏而止今卿所言乃复私憾耳非公议
也岂辅弼之道耶遂出之为湖南宣慰使夺僧年扎克策喇实等所受司徒国公制仍销其印三月戊子征诸王驸马流窜者给侍从遣就分邑
庚寅帝即位于大明殿大赦尊太后为太皇太后壬辰太皇太后受百官朝贺于兴圣宫特们德尔进开府仪同三司上柱国太师敕羣臣超授
散官者朝会毋越班次壬寅降前中书平章政事李孟为集贤侍讲学士悉夺前所受制命御史台臣请降诏谕百司以肃台纲帝曰卿等但守
职尽言善则朕当服行否亦不汝罪也丙午有事于南郊告即位夏四月乙卯申诏京师势家与民均役己未绍庆路洞蛮为寇命四川行省捕
之祭遁甲神于香山命平章政事王毅等征理在京诸仓库粮帛亏额申严和琳酒禁庚申降百官越阶者并依所受之职以太常礼仪院使拜
珠为中书平章政事以西僧雅布达勒为元永延教三藏法师壬戌特们德尔请参决政务禁诸臣毋隔越擅奏从之乙丑仁宗丧卒哭作佛事
七月戊辰车驾如上都议祔仁宗以阴阳拘忌权结彩殿于太室东南以奉神主戊寅有献七宝带者因近臣以进帝曰朕登大位不闻卿等荐
贤而为人进带是以利诱朕也其还之五月庚辰上都留守贺巴延坐便服迎诏弃市籍其家己丑中书省臣请禁擅奏除拜帝曰然恐朕遗忘
或乘闲奏请滥赐名爵汝等当复以闻复置青海五条河屯田左丞相阿萨尔罢为岭北行省平章政事以拜珠为中书左丞相鼐喇呼塔斯哈
雅并为中书平章政事济尔噶朗为中书参知政事辛卯参知政事奇彻罢为集贤学士壬辰和琳民閤海瘞殍死者三千余人旌其门戊戌有
告岭北行省平章政事阿萨尔中书平章政事赫噜及御史大夫图塔哈徽政使实勒们等与故约苏穆尔妻伊呼萨巴谋废立拜珠请鞫状帝

曰彼若借太皇太后为词奈何命悉诛之籍其家追封陇西公汪世显为陇右王辛丑以知枢密院事特穆尔图为中书平章政事壬寅监察御史请罢僧道工伶滥爵及建寺豢兽之费丁未以贺巴延实勒们阿萨尔家贖田宅赐特们德尔等六月丁巳以江西行省左丞相托克托为御史大夫宗正扎尔古齐特穆尔布哈知枢密院事戊午罢广东采珠提举司以有司领其事封知枢密院事达实特穆尔为蓟国公庚申赐角抵百二十人钞各千贯辛酉诏免僧人杂役壬戌敕诸使至京者大事五日小事三日遣还乙丑新作太祖幄殿甲戌修宁夏奇彻埒佛事给钞二百一十二万贯秋七月戊寅命玄教宗师张留孙修醮事于崇真宫壬午立普定路屯田运和琳粮于扎昆仓以便边军甲申车驾将北巡调左右翊军赴北边浚井以知枢密院事玛鲁哈坦并为辽阳行省平章政事乙未以甘肃行省平章奇彻知枢密院事丙申中书平章政事鼐喇呼罢降封安王温都逊布哈为顺阳王禁献珍宝初制袞冕戊戌敕中外希赏自请者勿予庚子以江南行御史台中丞廉恂为中书平章政事乙巳以知枢密院事额尔吉讷为江西行省平章政事八月丁未朔岭北省臣实都坐以官钱犒军免官诏复其职丙辰祔仁宗皇帝庄懿慈圣皇后于太庙 【按元史仁宗皇后本传作至治二年崩祔庙纪未书崩而于此已书祔庙与传不符传又有英宗即位尊为皇太后之文纪亦未载】 戊午特们德尔以赵世延尝劾其奸诬以不敬下狱请杀之并究省台诸臣不允丁卯宫人官奴坐用日者请太皇太后祭星杖之籍其贖九月甲申建寿安山寺给钞千万贯括兴和马以贍北部贫民禁五台山樵采罢上都岭北甘肃河南诸郡酒禁壬辰土番利族阿俄等五种寇成谷遣巩昌总帅以兵讨之循州溪蛮秦元吉为寇遣守将捕之庚子常澧州洞蛮贞公合诸洞为寇命土官追捕之甲辰遣茂扎木等使占城占腊龙牙门索驯象冬十月丁巳酉阳耸依洞蛮田谋远为寇命守臣招捕之戊午车驾还大都诏太常院臣曰朕将以四时躬祀太室宜与羣臣集议其礼此追远报本之道毋以朕劳于对越而有所损其悉遵典礼庚申敕译佛书乙丑如大护国仁王寺帝师请以卓特巴嘉勒灿为土番宣慰司都元帅从之丙寅定恭谢太庙仪式丁卯为皇后作盥顶殿于上都己巳罢玉华宫祀睿宗登歌乐敕翰林院译诏关白中书庚午命拜珠督造寿安山寺癸酉流诸王阿拉克特穆尔于云南十一月戊寅造至元钞五千万贯中统钞二百五十万贯 【按元典章造至元中统钞在四月与此异】 庚辰禁京城诸寺邸舍匿商税丁亥作佛事于光天殿戊子如隆福宫丁酉诏各郡建帝师帕克斯巴殿其制视孔子庙有

加戊戌交趾蛮侬志德寇脱零那乞等六洞命守将讨之遣使阅实各行省戍兵己亥计京官俸钞给米三分甲辰太常礼仪院拟进时享太庙仪式十二月乙巳朔诏以明年为至治元年减天下租赋二分包银五分免大都上都兴和三路差税三年优复煮盐炼铁等户二年开燕南山东河泊之禁听民采取命官家属流落边远者有司资给遣之其子女典鬻于人者听还其家监察御史廉访司岁举可任守令者二人七品以上官有伟画长策可以济世安民者实封上之士有隐居行义明治体不求闻达者有司具状以闻丁未播州蛮羊笼等来降癸丑以天寿节预遣使修醮于龙虎山翰林学士呼图克都哩译进宋儒真德秀大学衍义帝曰修身治国无踰此书赐钞五万贯河南饥帝问其故羣臣莫能对帝曰良由朕治道未洽卿等又不尽心乃职委任失人致阴阳失和灾害荐至自今各务勤恪以应天心毋使吾民重困壬戌召西僧年扎克策喇实赴京师敕所过郡县肃迎乙丑祭星于回回司天监四十昼夜丙寅以典瑞院使库春贝知枢密院事修秘密佛事于延春阁丁卯特们德尔拜珠言比者诏内外言得失今上封事者或直进御前乞令臣等开视乃入奏闻帝曰言事者直至朕前可也如细民辄诉讼者则禁之以大学衍义印本颁赐羣臣己巳敕罢明年二月八日迎佛中书右丞茂巴尔罢为江西行省右丞以中书参知政事济尔噶朗为右丞江南浙西道廉访使薛处敬为中书参知政事辛未拜珠进卤簿图帝以唐制用万二千三百人耗财乃定大驾为三千二百人法驾二千五百人癸酉帝闻贺巴延母老悯之以所籍京兆田还其家

至治元年春正月丙戌帝服袞冕享太庙以左丞相拜珠亚献知枢密院事库春贝终献诏羣臣曰一岁惟四祀使人代之不能致如在之诚实所未安岁必亲祀以终朕身廷臣言祀事毕宜赦天下帝谕之曰恩可常施赦不可屡下遂命中书陈便宜事行之丁亥帝欲以元夕张灯宫中参议中书省事张养浩上书谏帝遽命罢之曰有臣若此朕复何忧自今朕凡有过岂独台臣当谏人皆得言赐养浩帛二匹二月丁巳监察御史观音保索约勒哈陶默色成珪李谦亨谏造寿安山佛寺杀观音保索约勒哈陶默色杖珪谦亨窜于尼嚕罕地甲子置承徽寺割常州宜兴四万户隶之丁卯以僧法洪为释源宗主授荣禄大夫司徒禁越台省诉事三月辛巳车驾如上都遣使赐西番萨斯嘉地僧金二百五十两银二千二百两袈裟二万帛旛茶各有差壬午遣呪师多尔济往伊济巴勒布二国取佛经癸未制御服珠袈裟乙酉宝集寺金书西番波若经成置大内香殿辛丑以特克实为御史大夫佩金符领忠翊侍卫亲军都指挥使夏

四月己未造象驾金脊殿戊辰敕赐特们德尔父祖碑
命宦者博啰台为太常署令太常官言刑人难与大祭遂罢之五月丙子毁上都回回寺
以其地营帝师殿壬午迁武宗子图卜特穆尔于琼州
禁日者毋交通诸王驸马掌阴阳五科者毋泄占候辛卯作行殿于缙山流杯池乙未命
世家子弟成童者入国学辛丑太常礼仪院进太庙制
图六月癸卯朔日有食之作金浮屠于上都藏佛舍利乙卯以特们德尔领宣政院事丁
巳参知政事敬俨罢为陕西行御史台中丞辛酉赵弘
祚等以言事勒归乡里仍禁妄言时政乙丑遣使往铨江浙江西湖广四川云南五省边
郡官选己巳上都留守济尔噶朗为中书平章政事
秋七月辛巳整屋县僧圆明作乱遣枢密院判官章台督兵捕之丙申禁服色踰制庚子
修上都城合阳道士刘志先以妖术谋乱命章台捕之
八月壬寅修都城戊申上都盂顶殿戊乙卯中书平章政事特穆尔图罢为上都留守壬
戌车驾驻蹕兴和左右以寒甚请还京师帝曰兵以牛
马为重民以稼穡为先朕迟留盖欲马得刍牧民得刈获一举两得何计乎寒九月丁酉
车驾还大都冬十月辛丑朔修佛事于大内妖僧圆明
等伏诛癸丑敕翰林集贤官年七十者毋致仕以内郡水罢不急工役敕蒙古子女鬻为
回回汉人奴者官收养之禁中书掾曹毋泄机事命枢
密遣官整视各郡兵马己巳遣雅克特穆尔巡边十一月乙亥如大护国仁王寺戊寅羣
臣上尊号曰继天体道敬文仁武大昭孝皇帝辛巳命
御史大夫特克实领左右阿苏卫癸巳以营田提举司征酒税扰民命有司兼榷丙申敕
立故丞相安图碑于保定新城十二月辛丑立伊奇哩
氏为皇后甲寅如西僧灌顶寺己未封索诺木藏布为白兰王甲子命帝师恭噶诺尔布
喇实置勒灿巴勒藏布诣西番受具足戒赐金千三百
五十两银四千五十两币帛万疋钞五十万贯复以马嘉努为司徒乙丑冶铜五十万斤
作寿安山寺佛像二年春正月甲戌禁汉人执兵器出
猎及习武艺丁丑亲祀太庙始陈卤簿赐导驾耆老币帛戊寅敕有司存恤孔氏子孙贫
乏者辛巳敕台宪用人勿拘资格癸未建行殿于柳林
封塔齐尔为兰国公癸巳以西僧罗卜藏为司徒二月庚子置左右钦察卫亲军都指挥
使司命拜珠总之罢上都歇山殿及帝师寺役癸卯以
江南行台御史大夫奇彻为中书平章政事江浙行省参政王居仁为中书参知政事 【
按宰相表奇彻拜平章政事在五月王居仁为参知
政事在闰五月与纪异】 薛处敬罢为河南行省左丞甲寅以太庙役军造流杯池行殿
广海郡邑官旷员敕愿往任者升秩二等乙卯以辽阳
行省平章政事玛鲁为中书平章政事 【按玛鲁为平章政事宰相表作四月与纪异】

西僧伊实拉默特藏布疾诏为释大辟囚一人笞罪

二十人三月己巳中书省臣言国学废弛请令中书平章政事廉恂参议中书事张养浩都事富珠哩翀董之外郡学校仍命御史台翰林院国

子监同议兴举从之敕四宿卫兴圣宫及诸王部勿用南人辛未禁捕天鹅违者籍其家壬申复张珪司徒丙戌以亲祀礼成赐与祭者币普减

内外官吏一资复置市舶提举司于泉州庆元广东三路禁子女金银丝绵下番己丑命有司建穆呼哩祠于东平仍树碑庚寅命将作院更制

冕旒辛卯遣御史录囚壬辰给宗仁卫蒙古子女衣粮丁酉如柳林驸马许纳之子苏克诉曰臣父谋叛臣母私从人帝曰人子事亲有隐无犯

今有过不谏乃复告讦命诛之夏四月戊戌朔车驾如上都乙丑中书省臣请节赏赉以纾民力帝曰朕思所出倍于所入出纳之际卿辈宜慎

之朕当撙节其用五月己巳修滹沱河堤庚辰置营于永平收养蒙古子女遣使谕四方匿者罪之癸未以御史大夫托克托为江南行台御史

大夫置宗仁卫蒙古侍卫亲军都指挥使司甲申车驾如五台山以济尔噶朗为御史大夫乙酉以拜珠领宗仁卫蒙古侍卫亲军都指挥使司

事佩三珠虎符戊子禁民集众祈神丙申以吴全节为玄教大宗师特进上卿闰月戊戌封诸葛忠武侯为威烈忠武显灵仁济王癸卯禁白莲

佛事戊申以特们德尔子同知枢密院事巴勒丹知枢密院事壬子作紫檀殿丙寅封公主苏喀巴拉乳母为顺国夫人六月丁卯朔车驾如五

台山禁扈从宿卫毋践民禾癸酉申禁日者妄谈天象丙子修浑河堤秋七月壬子遣亲王色彻图总兵北边戊午车驾次应州曲赦金城县囚

徒辛酉次浑源州中书左丞张思明坐罪杖免籍其家甲子录京师诸役军匠病者千人各赐钞遣还南康路及庐州大水命有司赈之八月甲

戌帝次奉圣州戊寅诏画蚕麦图于盍顶殿壁曰以时观之可知民事庚寅特们德尔死九月【按王圻续通考九月丙申朔日食元史纪未

载天文志亦阙书】辛亥幸寿安山寺赐监役官钞人五千贯丙辰太皇太后崩庚申敕停今年冬祀南郊冬十月丙子江南行台大夫托克托

坐请告未得旨辄去职杖谪云南己丑以拜珠为中书右丞相十一月甲午朔日有食之己亥以立右丞相诏天下流民复业者免差税三年站

户贫乏鬻卖妻子者官赎还之凡差役造作先科商贾末技富实之家以优农力戊申御史李端言朝廷虽设起居注所录皆臣下闻奏事目帝

之言动宜悉书之以付史馆从之乙卯遣西僧果尔卓斡迎帝师己未置八番军民安抚司改长官所二十有八为州县十二月丁卯中书平章

政事玛鲁罢为大司农廉恂罢为集贤大学士以集贤大学士张珪为中书平章政事【

按宰相表廉恂罢在十一月张珪为平章政事在三年正月与纪异】甲戌特们德尔子宣政院使巴尔斯济苏坐受刘夔冒献田地伏诛仍籍其家庚辰以知枢密院事奇彻台为宣政院使参知政事苏苏为中书左丞宗仁卫侍卫亲军都指挥使玛喇勒为参知政事癸未以御史大夫济尔噶朗知枢密院事封色彻图为武宣王受金印以地震日食命中书省枢密院御史台翰林集贤院集议国家利害之事以闻弛河南陕西等处酒禁禁近侍奏取没入钱物辛卯西僧灌顶疾请释囚帝曰释囚祈福岂为师惜朕思恶人屡赦反害善良何福之有宣徽院臣言世祖时鸿吉哩岁输尚食羊二千成宗时增为三千今请增五千帝不许曰天下之民皆朕所有如有不足朕当济之若加重赋百姓必致困穷国亦何益命遵世祖时旧制三年春正月壬寅以行中书省平章政事兼总军政军官有罪重者以闻轻者就决罢上都云州兴和宣德蔚州奉圣州及鸡鸣山房山黄芦三义诸金银冶听民采炼以十分之三输官授前枢密院副使吴元珪王约集贤大学士翰林侍讲学士韩从益昭文馆大学士并商议中书省事拜珠言前集贤侍讲学士赵居信直学士吴澄皆有德老儒请征用之帝喜曰卿言适副朕心更当搜访山林隐逸之士遂以居信为翰林学士承旨澄为学士甲辰遣诸王呼喇珠镇云南辛亥申命特克实振举台纲壬子静江邕柳诸郡獠为寇命湖广行省督兵捕之甲寅以宗仁卫蒙古女子额足万户命罢收之乙卯征东摩济地沃济户以貂鼠水獭海狗皮来献诏存恤三岁丙辰泉州民留应总作乱命江浙行省遣兵捕之丁巳定封赠官等秩辛酉四川行省平章政事赵世延为其弟讼不法事系狱待对其弟逃去诏出之仍着为令逃者百日不出则释待对者敕常调官外不次铨用者但升以职勿升其阶二月癸亥朔定军官袭职嫡长子孙幼者令诸兄弟侄摄之丙寅遣嘉珩等往西番征畜牧治邮传癸酉畋于柳林辛巳造五辂格例成凡二千五百三十九条名曰大元通制颁行天下丙戌京师饥发粟二万石赈巢造五辂旗丁亥敕金书藏经二部命拜珠等总之戊子封鹰师布哈为赵国公辛卯以太子宾客巴图廉贫赐钞十万贯三月壬辰朔车驾如上都丁未西番藏布凌诸族叛敕镇西武靖王绰斯本等发兵讨之辛亥以圆明王道明之乱禁僧道度牒符篆丙辰敕医卜匠官居丧不得去职七十不听致仕子孙无荫叙能绍其业者量材录用夏四月壬戌朔敕天下诸司饭僧诵经十万部己巳浚金水河甲戌命张珪及右司员外郎王士熙勉励国子监学敕都功德使科尔罗至京师释囚大辟三十一人杖五十七以上者六十九人放笼禽十万令有司偿其直己卯诏行助

役法遣使考视税籍高下出田若干亩使应役之人更掌之收其岁入以助役费官不得与敕京师万安庆寿圣安普庆四寺扬子江金山寺五台万圣佑国寺作水陆佛事七昼夜丁亥故罗罗斯宣慰使述古妻漂末权领司事遣其子娑住邦来献方物五月辛丑以特克实独署御史大夫事壬寅诏中外开言路戊申监察御史盖继元宋翼言特们德尔奸险贪污请毁所立碑从之仍追夺官爵及封赠制书戊午奉行行宫正殿灾上都利用监库火帝语羣臣曰世皇始建宫室垂数十年至朕而毁皆朕不能图治之故也有钦察卫戍卒累功请赏以官帝曰名爵岂赏人之物命赐钞三千贯六月戊辰毁特们德尔父祖碑追收原受制书告谕中外赠乳母呼图克台定襄郡夫人其夫阿拉追封定襄王谥忠愍癸酉置太庙夹室赠杨珠济达台吉为襄安王太常请纂修累朝仪礼从之乙酉诸王彻伯尔遣使来降帝曰朕非欲彼土地人民但吾民不罹边患军士免于劳役斯幸矣今既来降当厚其赐以安之秋七月辛卯朔宣政使奇彻台自传旨署事中书以体制非宜请通行禁止从之乙巳招谕左右两江黄胜许岑世兴巴酉封诸王呼图克特穆尔为威远王【按诸王表威远王名巴图特穆尔与纪异】授金印减海道岁运粮二十万石并免江淮增科粮丙辰籍特们德尔家赀诸王齐齐克图入朝请印帝以其政绩未着不允赐钞二十五万贯御史台请降旨开言路帝曰言路何尝不开但卿等选人未当尔八月癸亥车驾南还驻蹕南陂是夕御史大夫特克实知枢密院事额森特穆尔等谋逆以特克实所领阿苏卫兵为外应杀丞相拜珠遂弑帝于行幄年二十一从葬诸帝陵谥曰睿圣文孝皇帝庙号英宗国语曰格根皇帝英宗性刚明尝以地震减膳彻乐避正殿近臣有称觞贺者叱曰朕方修德不暇汝为大臣不能匡辅反为谄耶拜珠进曰地震乃臣等失职宜求贤以代帝曰毋多逊此朕之过也尝戒羣臣曰卿等居高位食厚禄当勉力图报苟或贫乏朕不惜赐汝若为不法则必刑无赦巴尔斯济苏下狱谓左右曰法者祖宗所创非朕所得私巴尔斯济苏虽事朕日久今有罪当论如法尝御盃顶殿谓拜珠曰朕以幼冲嗣承大业锦衣玉食何求不得惟我祖宗栉风沐雨戡定万方曾有此乐耶卿元勋之裔当体朕至怀毋忝尔祖拜珠顿首曰创业惟艰守成不易陛下睿思及此亿兆之福也其明断多类此然以果于刑戮奸党畏诛遂构大变云【伏读通鉴辑览御批谓英宗当特们德尔结党肆恶之时并未稍加诘究仅于其身后夺爵籍产而其党亦槩不为穷治未免姑息养奸以致酿成祸乱史臣无识转以果于刑戮为辞其何以垂按法惩恶之道乎谨录识之】

英宗至治三年

钦定续通志卷六十五

●钦定续通志卷六十六 元纪十

元纪 【十】

泰定帝 【一】

○泰定帝一

泰定皇帝讳伊苏特穆尔裕宗之孙晋王噶玛拉长子也初世祖太子珍戡生三子长曰噶玛拉次曰达尔玛巴拉三即成宗达尔玛巴拉先薨世祖封噶玛拉为晋王出镇北边统领太祖四大鄂尔多及军马达勒达国土至元十三年十月二十九日帝生于晋邸大德六年晋王薨帝袭封仍镇北边成宗武宗仁宗之立咸与翊戴有盟书赐南康路六万五千户为食邑英宗时所部告饥赈钞百万贯后遣使以地七千顷归朝廷请有司征租岁给粮钞执藩臣礼甚谨先是王府内史都尔苏得幸于帝常伺朝廷事机以其子哈克伞事丞相拜珠得入宿卫久之哈克伞脱归言御史大夫特克实与拜珠意相忤欲倾害之至治三年三月宣徽使塔坦来王邸为都尔苏言主上将不利于晋王由此二人深相要结八月二日帝猎于图喇之地特克实密遣乌鲁斯来告曰我与哈克伞额森特穆尔实达尔谋已定事成推立王为皇帝 【按续宏简录实达尔下尚有章台一人考章台亦于下十月被诛其与谋可知纪失载】 帝大惊命囚乌鲁斯遣巴勒密实特等赴上都以逆谋告未至英宗遇弑于是诸王谳达布哈及额森特穆尔奉皇帝玺绶来迎九月癸巳即位于龙居河 【伏读通鉴辑览 御批谓晋王初囚乌鲁斯而告逆谋正也及闻英宗遇弑即当入朝讨贼以伸大义乃因逆党奉迎遽践大位后虽从曼努之请骈戮羣凶惟计彰一已之善名不务戡国家之大难律以春秋直笔其能免邪谨录识之】 颁蒙古诏大赦以知枢密院事淇阳王额森特穆尔为中书右丞相诸王伊噜特穆尔袭封安西王甲午以内史都尔苏为中书平章政事奈玛台为中书右丞特克实知枢密院事巴苏呼同知枢密院事博啰为宣徽院使舒玛尔节为宣政院使乙未以枢密院副使阿萨尔为御史中丞内史舒苏为中书左丞丁酉以鄂勒哲知枢密院事图们同知枢密院事戊戌以萨题勒密实知枢密院事章台同知枢密院事己亥敕谕百司凡铨受官遵世祖旧制惟枢密院御史台宣政院宣徽院得自奏闻余悉由中书辛丑以茂穆苏知枢密院事实达尔为大司农召诸王官属流徙远地及还原籍者二十四人还京师冬十月癸亥修佛学于大明殿甲子诛逆贼额森特穆尔鄂

勒哲索诺木图们等于行在所以舒玛尔节为中书右丞相陕西行中书省左丞相图噜通政院使宝珠并为御史大夫苏苏为御史中丞遣舒玛尔节宝珠诛逆贼特克实实达尔齐勤特穆尔托和齐章台等于大都并戮其子孙籍入家产壬申以内史阿勒坦绰克为太师知枢密院事丙戌以江浙行省平章政事额卜德呼勒为中书平章政事十一月己丑朔车驾次中都修佛事于昆刚殿辛丑车驾至大都丁未御大明殿受诸王百官朝贺癸丑遣使诣曲阜以太牢祀孔子祭遁甲五福神丁巳诏有罪自首者槩与原宥十二月己未御史台经历多尔济巴勒御史实勒塔克愕都玛克额森呼图克并坐党特克实免官御史言曩者特们德尔专政诬杀杨多尔济萧拜珠贺巴延观音保索约尔哈陶默色黥窜李谦亨成珪罢免王毅高昉张志弼四川行省平章赵世延受祸尤惨天下咸知其冤请昭雪之诏存者召还录用死者赠官有差庚申以宦者噶达尔为中政院使壬戌浚镇江路漕河及练湖役丁万三千五百人戊辰追尊皇考晋王噶玛拉曰光圣仁孝皇帝庙号显宗皇妣晋王妃曰宣懿淑圣皇后庚午遣使祀海神天妃盗入太庙窃仁宗及庄懿慈圣皇后金主壬申作仁宗主仍督有司捕盗乙亥太常院臣言世祖以来太庙岁惟一享先帝始复古制一岁四祭请裁择之帝曰祭祀大事也朕何敢简其礼命仍四祭监察御史托克托赵成庆等言特们德尔在先朝包藏祸心离闲亲藩诛戮大臣使先帝孤立卒罹大祸其子索诺木亲与逆谋久遁天宪乞正其罪伊噜托克托哈苏台皆特克实之党不宜宥遂并伏诛丙子命岭北守边诸王齐齐克图月修佛事以却寇兵己卯命僧作佛事于大内以厌雷癸未流逆党诸王伊噜特穆尔于云南谿达布哈于海南库鲁克布哈于尼噜罕博啰及乌鲁斯布哈于海岛丙戌舒玛尔节言南陂之变诸王迈努逃赴潜邸愿效死力且请诛戮元凶上契圣衷尝蒙奖谕今臣等议宗戚之中能自拔逆党尽忠朝廷者惟有迈努请加封赏以示激劝遂以泰宁县五千户封迈努为泰宁王知枢密院事大司徒库春贝授开封仪同三司以前太师巴古商议军国重事丁亥议赏讨逆功赐舒玛尔节金十锭银三十锭钞七十锭都尔苏为中书左丞相知枢密院事茂穆苏御史大夫宝珠宣政院使索多并加授光禄大夫仍赐金银钞有差塑玛哈噶拉佛像于延春阁之徽清亭诏以明年为泰定元年免大都兴和差税三年八番思播两广洞寨差税一年江淮勑科包银三年四川云南甘肃秋粮三分河南陕西辽阳丝钞三分除虚增田税免鄂柘克逋钱赈恤云南广海八番等处戍军求直言赐高年帛禁献山场湖泊之利定吏员出身者秩许至四品

泰定元年春正月乙未以奈玛台为平章政事舒苏为右丞壬寅命僧讽西番经于光天殿甲辰敕译列圣制诏及大元通制刊本赐百官
戊申八番生蛮韦光正等及杨黄五种人以其户二万七千来附置长官司以抚之己酉命诸王远徙者悉还其部召亲王图卜特穆尔于琼州
河穆尔克于大同甲寅敕高丽王还国仍归其印二月丁巳朔作显宗影堂甲子作佛事命僧百八人及倡优百戏导帝师游京城庚午选守令
推官旧制台宪岁举守令推官二人有罪连坐至是言其不便复命中书于常选择人用之甲戌江浙行省左丞赵简请开经筵及择师傅令太子及诸王大臣子孙受学遂命平章政事张珪翰林学士承旨和塔拉都哩默色学士吴澄集贤直学士邓文原以帝范资治通鉴大学衍义贞观政要等书进讲复敕右丞相舒玛尔节兼领之三月丁亥朔以同知宣政院事杨廷玉为中书参知政事乙未以江西行省平章政事额尔吉
讷知枢密院事给蒙古流民粮钞遣还所部有擅徙者斩藏匿者杖之中书省臣请禁横奏赏赉及踰越奏事者从之庚子奇彻罢为陕西行台
御史大夫以四川行中书省平章政事囊嘉特兼宣政院使往征西番寇藏布凌癸卯命中书平章政事奈玛台摄祭南郊知枢密院事库春贝
摄祭太庙以册皇后皇太子告丙午御大明殿册鸿吉哩氏为皇后皇子喇实晋巴为皇太子巴西以皇子巴特玛雅尔藏布嗣封晋王遣湘宁
王巴拉实哩出镇察罕淖尔罢宣慰司立王傅府以知枢密院事额尔吉讷为云南行省右丞相召流人还京师夏四月辛酉亲王图卜特穆尔
至自潭州甲子车驾如上都以诸王库春布哈实喇平章政事额卜德呼勒右丞舒苏等居守以岭北行中书省左丞普尔普为中书左丞江南
行台中丞托多为中书参知政事玛喇勒罢为太史院使发兵民筑浑河堤癸酉以太子詹事图们岱尔为中书平章政事庚辰以风烈月食地
震手诏至大都戒饬百官五月丁亥监察御史董鹏南等言平章奈玛台宣徽院使特穆尔布哈詹事图们岱尔党附逆徒有亏臣节太常守庙
不谨辽王擅杀宗亲布哈济兰矫制乱法皆蒙宽宥甚为失刑乞定其罪以销天变不允己丑帝谕都尔苏曰朕即位以来无一人能执成法为
朕言者知而不言则不忠且陷人于罪自今凡有所知宜悉以闻使朕明知法度断不能自纵非独朕身凡天下一切政务能守法以行则众人
又安反是则天下罹于忧苦又曰凡事防之于小则易救之于大则难尔其以朕言明告于众俾知所慎壬辰省臣以灾异屡见皆抗疏乞罢帝
曰卿等皆辞去国家大事朕孰与图优诏慰留之戊戌迁列圣神主于太庙新殿丙午侍御史高奎上书请求直言辨邪正明赏罚帝善其言赐

以银币癸丑以中书平章政事图们岱尔领宣徽使詹事丞和和请如裕宗故事择名儒
辅太子敕中书省臣访求以闻六月戊午云南蒙化州
高兰神场寨主照明罗九等寇威楚庚申张珪至上都以守臣集议事言逆党未讨奸恶
未除忠愤未雪冤枉未理政令不信赏罚不公赋役不
均财用不节请裁择之不允癸亥作礼拜寺于上都及大同路给钞四万锭丙寅广西两
江土官黄胜许岑世兴乞遣其子弟朝贡许之丁卯大
幄殿成作镇雷坐静佛寺癸酉帝受佛戒于帝师己卯诏疏决系囚存恤军士免天下和
买杂役三年蠶户差税一年百官四品以下普覃散官
一等三品递进一阶远仕瘴地身故不得归葬妻子流落者有司资给还乡仍着为令秋
七月丙戌思州平茶杨大车酉阳州冉世昌寇小石耶
凯江等寨调兵捕之作柎木殿庚子诸王巴延特穆尔出镇库陵东部喇特纳实哩出镇
沙州各赐钞三千锭萨题勒密实率卫士佐太师阿勒
坦绰克行边赐钞千锭癸卯罢广州福建等处采珠蠶户为民仍免差税一年丙午以辉
和尔字译西番经丁未以山东盐运司判官马合谟为
吏部尚书佩虎符翰林修撰杨宗瑞为礼部郎中佩金符奉即位诏往谕安南中书省臣
言东宫卫士先朝止三千人今增至万七千请命詹事
院汰去仍依旧制从之八月己卯敕以刑狱复隶宗正府依旧制刑部勿与 【按元史刑
法志元世祖时宗正府置扎尔古齐哩诸王驸马蒙
古色目人奸盗诈伪及汉人杂犯仁宗时罢之至是增扎尔古齐为四十二员复世祖旧
制元纪统言之似刑部槩不与刑狱矣】 庚午作中宫
金脊殿辛未绘帝师帕克斯巴像十一颁各行省俾塑祀之敕武官坐罪制授者以闻敕
授者从行省处决丁丑罢浚玉泉山河役车驾至大都
癸未敕枢密役军凡三百人以上奏闻九月乙酉封伊苏伯奇为荆王辛卯罢哈斯德济
鲁斯本布总统所更置临洮总管府乙巳昭献元圣皇
后忌日修佛事饭僧万人敕存恤武卫军一年冬十月戊午立寿福总管府典累朝神御
殿祭祀庚申命左右丞相日直禁中有事则赴中书壬
申真州珠金沙河松江府吴江州诸河淤塞诏所在有司佣民丁浚之丁丑封亲王图卜
特穆尔为怀王十一月癸巳遣兵部员外郎宋本吏部
员外郎郑立鄂尔和工部主事张成太史院都事费着分铨闽海两广四川云南选己亥
以准台知枢密院事辛丑造金宝盖饰以七宝贮佛舍
利甲辰作歇山盃顶楼于上都十二月癸丑朔以岑世兴为怀远大将军遥授沿边溪洞
军民安抚使佩虎符仍来安路总管黄胜许为怀远大
将军遥授沿边溪洞军民安抚使佩虎符致仕其子志熟袭为上思州知州降诏宣谕仍
各赐币帛二乙卯云南徭阿吾及歪闹为寇行省督兵

捕之癸亥盐官州海水溢屡坏堤障侵城郭遣使祀海神仍与有司视形势所便还请迭石为塘诏曰筑塘是重势吾民也其增石囤扞御庶天其相之辛未新作棧殿成乙亥曲赦重囚三十八人为三宫祈福

二年春正月乙未禁后妃诸王驸马毋通星术之士非司天官不得妄言祸福中书省臣言江南民贫僧富诸寺观田土非宋旧置并累朝所赐者请仍旧制与民均役从之戊戌藏布凌来降辛丑怀王图卜特穆尔出居建康戊申以策喇实班巴尔藏布为土蕃等路宣慰使都元帅

往镇藏布凌之地庚戌诏谕宰臣曰向来珠尔罕楚古尔苏及山后皆地震内郡大小民饥朕惟太祖开创之艰世祖混一之盛期与人民共享安乐常怀祗惧灾沴之至莫测其由岂朕思虑有所不及而事或僭差天故以此示儆其与诸司集议便民之事定议以闻闰月壬子朔大赦除

江淮勅科包银免被灾地差税一年庚申修野狐色泽桑干三岭道丁卯中书省臣言国用不足请罢不急之费从之置惠远仓永需库于哈喇

图总管府己巳修滹沱河堰壬申罢永兴银场听民采炼以十分之二输官罢松江都水庸田使司命州县正官领之仍加兼知渠堰事癸酉作

棧毛殿己卯山东廉访使许师敬请颁族葬制禁用阴阳相地邪说二月丙戌颁道经于天下名山宫观丁亥平伐苗酋率其户十万来降自请

入覲从之己丑加嗣汉天师张嗣成太玄辅化体仁应道大真人己亥封阿尔默色为和国公张珪为蔡国公仍知经筵事以中书右丞舒苏为

平章政事【按宰相表舒苏为平章政事在五月与纪异】参知政事普尔普为右丞御史大夫图古勒加太保仍御史大夫庚子姚炜以河

水屡决请立行都水监于汴梁仿古法备捍仍命濒河州县正官皆兼知河防事从之戊申命道士祭五福太一神三月癸丑修曹州济阴县河

堤役民丁一万八千五百人甲寅禁捕天鹅辛酉咸平府清河寇河合流失故道坏堤堰敕蒙古军千人及民丁修之乙丑车驾如上都夏四月

癸巳敕宿卫駝马散牧民闲者归官厩饲之丁未封后父浩里乌齐尔为威靖王戊申以许师敬为中书左丞中政使冯亨为中书参知政事仍

中政使五月壬子车里陶刺孟及大阿哀蛮兵万人乘象寇陷朵刺等十四寨木邦路蛮八庙率僰夷万人寇陷倒入汉寨督边将严备之癸酉

融州否泉洞古龙洞洞村山黑江诸獠为寇广西元帅府发兵讨之丙子舒玛尔节等以国用不足请减厩马汰卫士及节诸王滥赐从之置谏

议书院于昌平祀唐刘蕡六月癸未浚州平南县獠作乱【按平南旧文误作平甫今据地理志改】达噜噶齐都尔嘉都监姚泰亨死之丙

申中书参政左塔布台言大臣兼领军务前古所无特克实以御史大夫额森特穆尔以

知枢密院事皆领卫兵如虎而翼故成逆谋今军卫之
职乞勿以大臣领之庶勋旧之家得以保全从之仍赐币帛以旌其直丁酉息州民赵丑
厮郭布萨妖言弥勒佛当有天下有司以闻命宗正府
刑部枢密院御史台及河南行省官杂鞫之丁未敕营造毋役五卫军士止以武卫虎贲
二卫给之秋七月庚戌遣阿尔萨巴祀宅神于北部行
幄甲寅遣使奉诏分谕猺蛮镇康路土官你囊谋粘路土官赛邱罗出降宝珠许师敬编
类帝训成请于经筵进讲仍俾皇太子观览有旨译其
书以进戊午遣使代祀龙虎武当二山己未置车里军民总管府以土人寒赛为总管佩
金虎符癸亥修大干元寺以许师敬及郎中玛鲁兼经
筵官广西诸猺寇城邑遣湖广行省左丞克楚兵部尚书李大成中书舍人玛鲁将兵讨
之仍以诸王乌尔图罕监其军海北猺酋盘吉祥寇阳
春县命江西行省督兵捕之庚午以国用不足罢书金字藏经封驸马博罗特穆尔知枢
密院事和斯并为郡王壬申御史台臣言廉访司莅军
非世祖旧制贾胡鬻宝西僧修佛事所费不支于国无益并宜除罢从之敕太傅托迪太
保图古勒曰至禁中集议国事八月戊子修上都香殿
辛丑敕诸王私入京者勿供其所用诸部曲宿卫私入京者罪之九月戊申朔分天下为
十八道遣使宣抚分行诸道按问官吏不法询民疾苦
审理冤滞凡可以兴利除害从宜举行有罪者四品以上停职申请五品以下就便处决
其有政绩尤异暨晦迹邱园才堪辅治者具以名闻以
郡县饥诏运粟十五万石贮濒河诸仓以备赈救仍敕有司治义仓募富民人粟拜官不
愿仕者旌其门诸王沃济遣使贡金浮图己酉海运江
南粮百七十万石至京师癸丑车驾至大都遣使祀海神天妃甲寅禁饥民结扁担社伤
人者杖一百着为令丁丑浚河闲陈玉带河冬十月戊
寅朔岑世兴及子特穆尔率众寇上林等州命抚谕之癸未以都尔苏为御史大夫乙未
皇后额琳沁巴拉受佛戒于帝师丁酉广西獠酋何童
降请防边自效从之十一月戊申周王和实拉遣使以豹来献丙辰郭布萨等伏诛诏并
杖流其党丁巳如大承华普庆寺祀昭献元圣皇后于
影堂赐僧钞千锭庚申广西道宣慰使获猺酋潘宝下狱其弟潘见遂寇柳州命湖广行
省左丞克楚捕之壬戌敕军民官荫袭者由本贯图宗
支申请铨授丙寅都尔苏复为中书左丞相加开府仪同三司录军国重事壬申诸王乌
尔图罕遣使以追捕广西猺寇上闻帝曰朕自即位累
诏天下悯恤黎元惟广西猺屡叛杀掠良民故命乌尔图罕等讨之今闻迎降者甚众宜更
以恩抚之若果不悛严兵追捕勿纵十二月戊寅以达
实特穆尔为中书右丞相癸未加达实特穆尔开府仪同三司上柱国录军国重事监修

国史封蓟国公乙酉帝复受佛戒于帝师丁亥中书省
臣言山东陕西湖广地接戎夷请议选宗室往镇从之申禁图讖私藏不献者罪之癸巳
京师多盗达实特穆尔请处决重囚增调逻卒仍立捕
盗赏格从之丁酉加盗珠知枢密院事与茂穆苏并开封仪同三司壬寅右丞赵简请行
区田法于内地以宋董煟所编救荒活民书颁州县

三年春正月丙午朔高丽国王王章遣使贺正旦 【自世祖至元二十一年正旦高
丽使者不会至是复至然其后亦不数见云】 播州
蛮酋黎平庆等来降壬子封诸王库春布哈为威顺王镇湖广迈努为宣靖王镇益都 【
按诸王表迈努封宣靖王作泰定二年与纪异】 征
前翰林学士吴澄不起置都水庸田司于松江掌江南河渠水利己未以湘宁王巴拉实
哩镇俄罗斯部癸亥封图烈讷为国公以知枢密院事
萨题勒密实为岭北行中书省平章政事戊辰緬国乱其主答里也伯遣使来乞师二月
庚辰命诸王罗本为大宗正壬午广西全茗州士官许
文杰寇茗盈州杀知州事李德卿等命湖广行省督兵捕之以奈玛台知枢密院事甲申
祭太祖太宗睿宗御容于翰林国史院丁亥中书请罢
征猺敕乌尔图罕等班师其镇戍者如故庚子以通政院使察纳为中书平章政事甲辰
车驾如上都命诸王谔特古布哈及中书省臣额卜德
呼勒察纳舒苏许师敬托多居守三月乙巳朔帝以不雨自责命审决重囚遣使分祀五
狱四渎名山大川及京城寺观丁未敕百官集议急务
中书省臣等请汰卫士节滥赏罢营缮防猺寇诸寺官署坑冶等事归中书并从之癸丑
八番岩霞洞蛮来降愿岁输布二千五百匹设蛮夷官
镇抚之丁巳遣诸王实喇镇北边甲子命功德使司简岁修佛事一百二十七丙寅翰林
承旨额琳特穆尔许师敬译帝训成更名曰皇图大训
辛未泉州民阮凤子作乱寇陷城邑军民官以失讨坐罪夏四月丙戌镇安路总管岑修
广为弟修仁所攻来告命湖广行省辨治之壬寅米洞
蛮田先什用等结十二洞蛮寇长阳县湖广行省遣九姓长官招降之修夏津武河堤二
十三所役丁万七千五百人五月乙巳修镇雷佛事三
十一所罢福建岁供蔗饧以西僧驰驿扰民禁之甲寅八百媳妇蛮招南道遣其子招三
听奉方物来朝乙卯以帝师兄索诺木藏布领西番三
道宣慰司事尚公主锡王爵给寿宁公主印仍赐田百顷钞三万锭甲子中书会岁钞出
纳之数请节用以补不足从之丁卯岑世兴及镇安路
岑路文合山獠角蛮六万余人入寇命湖广云南行省招谕之遣指挥使谔都玛勒镌西
番咒语于居庸关崖石庚午克楚招谕永明县五洞猺
河西加木笼四部来降各立其土官领之六月癸未播州蛮黎平爰复叛合谢乌穷为寇

宣抚使杨伊呼布哈招平爱出降乌穷不附命湖广行
省讨之丁亥命湘宁王巴拉实哩出镇阿南达实迪之地乙未命梁王旺沁及诸王齐齐
克图镇抚北军赐旺沁钞五千锭币帛各二百匹丁酉
遣道士吴全节修醮事于龙虎三茆阁皂三山巳亥纳皇姊寿宁公主女萨都巴拉于中
宫秋七月甲辰车驾发上都禁车骑践民禾造豸豹毡
车三十两丁未绍庆酉阳寨冉世昌及何惹洞蛮入寇辛亥封阿都齐为绥宁王壬子皇
后受雅满达噶戒于水精殿甲寅如大干元寺敕铸五
方佛铜像乙卯诏翰林侍讲学士阿鲁威直学士雅奇译世祖圣训以备经筵进讲戊午
敕入粟拜官者准致仕铨格乙丑发兵修野狐色泽桑
干三岭道庚午广西宣慰副使王瑞请益戍兵及以土民屯田备蛮仍置南宁安抚司八
月乙亥大天源延圣寺神御殿成甲午罢行宣政院及
功德使司丁酉藩王保赛音遣使献玉及独峯驼以星变下诏恤民辛丑次中都畋于翁
果察图之地盪顶殿成作天妃宫于海津镇九月辛亥
命帝师还京修洒净佛事于大明兴圣隆福三宫庚申车驾至大都壬戌以察纳领度支
事戊辰湖广云南各寨土官奉方物来献即其地置木
朵路木来州孟隆路及哀培各甸冬十月辛未朔发卒四千治通州道甲戌盪珠升右御
史大夫癸未河水溢汴梁路乐利堤坏役丁夫六万四
千人筑之赐大天源延圣寺吉安临江二路田千顷十一月庚子陕西行台中丞姚炜请
集世祖嘉言善行以时省览从之癸卯中书省臣言西
僧每假元辰疏释重囚有乖政典请罢之有旨自今当释者敕宗正府审覆巳酉作盪顶
棕楼辛亥追复前平章政事李孟官乙卯广西透江团
猛为寇宣慰使迈努谕降之扶灵青溪栎头等洞蛮为寇湖南道宣慰司遣使谕降之戊
午封诸王特穆尔布哈为镇南王镇扬州辛酉加御史
大夫盪珠开府仪同三司巳巳徙上都清宁殿于巴雅尔行宫十二月壬午御史贾厘请
祔武宗皇后于太庙不报 【按后妃传载武宗皇后
泰定四年崩本纪称是年请祔与传不符】 敕以来年元夕构灯山于内廷御史赵师鲁
以水旱请罢其事从之甲申师鲁又请亲祀郊庙帝嘉
纳之丙戌以回回阴阳家言天变给钞二千锭施有道行者及乞人系囚以禳之庚寅召
江浙行省右丞赵简为集贤大学士领经筵事癸巳作
盪顶殿巳亥命帝师修佛事释重囚三人置大承华普庆寺总管府罢规运提点所御史
言比年营缮以卫军供役废武事不讲请遵世祖旧制
教习五卫亲军以备扈从不报湖广屯戍千户济雅干布哈招谕扶灵洞蛮刘季等来降
四年春正月乙巳御史台臣请亲祀郊庙帝曰朕遵世祖旧制其命大臣摄之壬子
以中政院金银铁冶归中书靖安王扣布哈出镇陕西

庚申皇子允丹藏布受佛戒于智泉寺甲子武龙洞蛮寇武缘县诸堡丁卯浚会通河筑
澠州护仓堤役丁夫三万人二月乙亥亲王额森特穆
尔出镇北边丙子命伊拉齐领仁宗神御殿事大司徒额琳沁策喇实为大承华普庆寺
总管府达噜噶齐仍大司徒壬午狩于澠州诸王呼实
噶温都尔出镇北边赐金银币钞有差帝师灿默特伊实结卜姜楚卜扎卜卒命达实特
穆尔宝珠监修佛事丙戌诏同金枢密院事雅克特穆
尔教阅诸卫军士戊子诏进衍圣公孔思晦阶嘉议大夫以玛古斯为云南行省平章政
事提调乌蒙屯田三月辛丑皇子允丹藏布出镇北边
以诺海齐为惠国公商议内史府事丙午命西僧作止风佛事庚申遣使往江南求奇花
异果辛酉以太傅托迪为太师太保图古勒为太傅伊
克扎尔古齐博迪苏为太保敕前太师布呼与议大事食其俸终身召翰林学士承旨蔡
国公张珪集贤大学士廉恂太子宾客王毅悉复旧职
陕西行台中丞敬俨为集贤大学士并商议中书省事珪仍预经筵事中书省臣请酬哈
克伞等累朝售宝价钞十万二千锭从之壬戌车驾如
上都命亲王巴拉实哩出镇察罕淖尔封库春为国公以阿伞和卓知枢密院事浑河决
发军民万人塞之夏四月辛未盗入太庙窃武宗金主
及祭器壬申作武宗主癸巳高州猺寇电白县千户张额力战死之甲午以西僧恭噶伊
实巴忠喇实置勒灿巴勒藏布为帝师赐玉印仍诏谕
天下僧乙未以武备寺卿阿萨尔达尔罕为御史大夫五月辛丑太尉超尔卒甲子以典
守宗庙不严罢太常礼仪院官丁卯修佛事于贺兰山
及诸行宫罢诸王分地州县长官世袭俸如常调官以三载为考元江路总管普双坐赃
免遂结蛮兵作乱敕复其职德庆路猺来降归所掠男
女悉给其亲六月辛未翰林侍读学士阿噜威直学士雅奇等进讲仍命译资治通鉴以
进丁丑罢两都营膳工役录诸郡系囚辛巳造象輿六
乘癸未遣察纳巴延赴大都铨选甲申广西花角蛮为寇命所部讨之乙未绍庆路四洞
酋阿者等降并命为蛮夷长官仍设巡检司以抚之秋
七月丁酉元江路普双复叛巳亥御史台臣言内郡江南旱蝗荐至非国细故丞相达实
特穆尔都尔苏参知政事布哈史惟良参议迈努并乞
解职慰遣之丁未敕经筵讲读官非有故不得去职甲寅遣使市旄牛于西域丙寅籍僧
道有妻者为民塞保安镇渠役民丁六千人八月癸酉
奉元路治中单鹄言令民采捕珍禽异兽不便请罢之敕应猎者其捕以进乙亥苗人祭
伯秧寇李陀寨命湖广行省捕之乙酉巴雅尔鄂尔多
作钦明殿成癸巳发卫军八千修白浮瓮山河堤九月丙申朔日有食之阿恰齐德济猺
木绵大行帐禁僧道买民田违者坐罪没其直甲子御

史言广海古流放之地请以职官赃污者处之以示惩戒从之闰月己巳车驾至大都壬申以灾变大赦冬十月己酉以治书侍御史王士熙为参知政事丁巳以御史中丞赵世延为中书右丞戊午命太常纂修累朝礼仪壬戌开南州土官阿只弄率蛮兵为寇云南行省招捕之十一月庚午以思州土官田仁为思州宣慰使辛卯以降蛮谢乌穷为蛮夷官云南蒲蛮来附十二月庚子定捕盗令限内不获者偿其赃乙卯蔡国公张珪卒

致和元年春正月甲戌命绘蚕麦图乙亥诏谕百司凡不赴任及擅离职者夺其官避差遣者笞之御史邹惟亨言时享太庙三献官旧皆勋戚大臣而近以户部尚书为亚献人既疏远礼难严肃请仍旧制以省台枢密宿卫重臣为之丁丑颁农桑旧制十四条于天下仍诏励有司以察勤惰己卯帝将畋柳林御史王献等以岁饥谏帝曰其禁卫士毋扰民家命御史二人巡察之戊子罢河南铁冶提举司免陕西捞盐一年罢益都诸属县食盐二月庚申改元免河南自实田粮一年被灾州郡税粮一年流民复业者差税三年疑狱系三岁不决者咸释之三月庚午云南安隆寨上官岑世忠与其兄世兴相攻籍其民三万二千户来附岁输布三千四请立宣抚司以总之不允置州一以世兴知州事置县二听世忠举人用之仍谕其兄弟共处立万户府二领征西红胖袄军达实特穆尔都尔苏言灾异未弭由官吏以罪黜罢者怨诽所致请量才叙用从之乙卯帝御兴圣殿受无量寿佛戒于帝师甲申遣户部尚书李嘉努往盐官祀海神仍集议修海岸丙戌命帝师修佛事于盐官州造浮屠二百一十六以厌海溢戊子车驾如上都徙怀王图卜特穆尔于江陵以赵世延知经筵事赵简呵噜威同知经筵事曹元用吴秉道虞集段辅马祖常雅奇富珠哩翀并兼经筵官云南土官撒加布降置州一艾萨克加布知州事隶罗罗宣慰司夏四月己亥达实特穆尔都尔苏请凡蒙古色目人效汉法丁忧者除其名从之五月丙寅广西普宁县僧陈庆安作乱建国改元癸酉大理怒江甸上官阿哀你寇乐辰诸寨命云南行省督兵捕之戊子以岭北行省平章政事达实特穆尔为中书平章政事秋七月庚午帝崩于上都年三十六葬起辇谷称为泰定帝 【终元之世不为帝立庙上谥故止称泰定帝】

泰定帝泰定四年致和一年凡五年

钦定续通志卷六十六

●钦定续通志卷六十七 元纪十一

元纪 【十一】

○明宗

明宗皇帝讳和实拉武宗子也母伊奇哩氏武宗生二子长即帝次图卜特穆尔成宗无子武宗入继大统立弟仁宗为皇太子约以次传于帝及仁宗即位乃立英宗为太子于是封帝为周王出镇云南置常侍府官属以遥授中书左丞相图古勒大司徒鄂尔多中政使尚嘉努山北辽阳等路蒙古军万户博啰翰林侍讲学士嘉琿等并为常侍中卫亲军都指挥使唐古兵部尚书赛罕巴图尔为中尉仍置咨议记室各二员俱遣就镇帝至延安图古勒尚嘉努博啰及武宗旧臣哩日沙布鼎哈玛尔图等皆来会嘉琿谋曰天下者我武皇之天下也出镇之事本非帝意由特们德尔及左右构闲致然请以其故白行省俾闻之朝廷庶可杜塞离闲遂与数骑驰去先是阿斯罕为太师特们德尔夺其位出为陕西行省丞相及嘉琿等至即与平章政事塔齐尔行台御史大夫图鲁卜中丞托欢悉发关中兵分道自潼关河中府而东已而■〈土答〉齐尔托欢中变袭杀阿斯罕嘉琿于河中帝遂西行至北边金山西北诸王察克台等咸率众来附帝至其部与定约束每岁冬居扎延夏居阿噜噶察山春则命从者耕于约尼十余年闲边境盗谧及英宗嗣位以帝远居沙漠不足忌而特克实等复构帝弟图卜特穆尔徙之琼州英宗遇弑晋王以大宗入继泰定元年改封图卜特穆尔为怀王命居建康致和元年三月徙居江陵七年泰定帝崩于上都都尔苏专权自用踰月不立君朝野疑惧时签枢密院事雅克特穆尔留守京师乃谋举义八月甲午黎明召百官集兴圣宫兵皆露刃号于众曰武皇有圣子二人孝友仁文天下归心大统所在当迎立之不从者死乃缚平章额卜德呼勒巴延彻尔二人下中书左丞托多参知政事王士熙等于狱雅克特穆尔与西安王喇特纳实哩固守内廷以帝远在沙漠猝未能至虑生他变乃迎帝弟怀王于江陵且宣言已遣使北迎帝以安众心复矫称帝所遣使者自北方来云周王从诸王兵南下旦夕即至矣丁巳怀王入京师九月壬申怀王即位于大都是为文宗改元天历时都尔苏在上都立泰定帝子喇实晋巴为帝改元天顺遣兵分道攻大都而梁王旺沁右丞相达实特穆尔御史大夫宝珠太尉布哈等兵皆次于榆林雅克特穆尔与其弟萨都子腾吉斯等帅师与战屡败之上都兵皆溃十月辛丑齐王伊噜特穆尔元帅布哈特穆尔以兵围上都都尔苏乃奉皇帝宝出降【事详文宗纪】两京道路始通于是文宗遣哈克苏及萨题等相继来迎帝遂发北边诸王及旧臣博啰尚嘉努哈玛尔图皆从至金山

武懿王齐齐克图签枢密院事特穆尔布哈继至乃命博啰如京师诸王旧臣争先迎谒所至成聚天历二年正月乙丑文宗复遣中书左丞伊尔特穆尔来迎乙酉萨题等至入见帝于行幄以文宗命劝进丙戌帝即位于和宁之北乃遣萨题等还京师命之曰朕弟曩尝览观书史迹者得无废乎听政之暇宜亲贤士大夫讲论史籍以知古今治乱得失卿等至京师当以朕意谕之二月壬辰宣靖王迈努自京师来觐辛丑追尊皇妣伊奇哩氏曰仁献章圣皇后是月文宗立奎章阁学士院于京师遣人以除目来奏帝并从之三月辛酉文宗遣右丞相雅克特穆尔奉皇帝宝来上御史中丞巴济拉知枢密院事图勒噶特穆尔等各率其属以从四月癸巳雅克特穆尔见帝于行在率百官上皇帝宝帝嘉其勋拜太师仍命为中书右丞相开府仪同三司上柱国录军国重事监修国史达尔罕太平王并如故复谕雅克特穆尔等曰凡京师百官朕弟所用者并仍其旧卿等其以朕意谕之雅克特穆尔奏国家大事所系者中书省枢密院御史台而已宜择人居之帝然其言以武宗旧人哈玛尔图为中书平章政事前中书平章政事拜特穆尔知枢密院事常侍博啰为御史大夫甲午立行枢密院命昭武王赫伯知枢密院事和硕领行枢密院事赛音特穆尔迈努并同知行院事是日帝宴诸王大臣于行殿雅克特穆尔哈玛尔图拜特穆尔博啰等待帝谕台臣曰太祖有训美色名马人皆悦之然方寸一有系累即能坏名败德卿等居风纪之司亦尝念及此乎天下国家譬犹一身中书枢密左右手也左右手有病治之以良医省院阙失不以御史台治之可乎凡诸王百司违法越礼一听举劾风纪重则贪墨惧犹斧斤重则入木深其势然也朕有阙失卿等亦以闻朕不尔责也乙未特命博啰等传旨宣谕诸司曰世祖皇帝立中书省枢密院事御史台及百司庶府共治天下大小职掌已有定制世祖命廷臣集律令章程以为万世法成宗以来列圣相承罔不恪遵成宪朕今居太祖世祖所居之位凡省院台百司庶政询谋佥同标译所奏以告于朕军务机密枢密院当即以闻毋以夙夜为闲而稽留之其它事务果有所言必先中书院台其下百司及■〈执上目下〉御之臣毋得隔越陈请僥违朕意必罚无赦丁酉以陕西行台御史大夫特穆尔图为上都留守辛丑文宗立都督府于京师遣使来奏又以台宪官除目来上并从之癸卯遣使如京师卜日命中书左丞相特穆尔布哈摄告即位于郊庙社稷遣武懿王齐齐克图及哈玛尔图立文宗为皇太子仍立詹事院彻尔特穆尔为中书平章政事奇尔济苏为中书右丞乙巳监察御史言岑北行省控制一方广轮万里实为太祖肇基之地国家根本

系焉方面之寄岂可轻任平章■〈土答〉奇济素非勋旧奴事都尔苏崛起宿卫辄为右丞俄升平章年已七十眊昏殊甚左丞玛们本晋邸部民以女妻都尔苏引为都水遂除左丞郎中罗里市井小人图噜库乃晋邸卫卒不谙政务并宜黜退台臣以闻帝曰御史言甚善其并黜之五月戊午封特穆尔为保德郡王辛酉御史大夫博啰中政使尚嘉努并特授开府仪同三司典四番宿卫庚午命雅克特穆尔升用岭北行省官吏其余并赐散官一级选用潜邸旧臣及扈从士受制命者八十有五人六品以下二十有六人壬申封额琳沁巴勒为柳城郡王【按元史诸王表琳沁巴勒封柳城郡王在天历三年与纪不符】以巴济拉为陕西行台御史大夫仲嘉努为御史中丞乙亥敕大都省臣铸皇太子宝时求太子故宝不知所在乃命更铸之丁丑皇太子发京师诸王驸马及扈卫百官悉从行戊寅京师市马二百八十匹载乘輿服御送行在所巳卯加翰林学士承旨唐古为太尉壬午左丞相特穆尔布哈等以帝即位摄告南郊六月丁亥朔特穆尔布哈等以帝即位摄告于宗庙社稷戊子雅克特穆尔等奏中政院越中书省擅奏除授移文来征制敕已如所请授之然于大体非宜乞申命禁止庶使政权归一从之壬寅戒近侍毋得辄有奏请辛亥诏谕中书省臣凡国家钱谷铨选诸大政事先启皇太子然后以闻是月特穆尔布哈以久旱启于皇太子辞相位乞更选贤德委以燮理皇太子遣使以闻帝谕奇尔济苏等曰修德应天乃君臣当为之事特穆尔布哈所言良是天明可畏朕未尝斯须忘于怀也皇太子来会当与共图其可以泽民利物者行之卿等其以朕意谕羣臣七月丙辰朔日有食之壬申监察御史巴勒丹伊实言朝廷自去秋命将出师戡定祸乱其供给军需赏赉将士所费不可胜纪若以岁入经赋较之则其所出已过数倍况今诸王朝会旧制一切供亿俱尚未给而陕西等处饥馑荐臻饿殍枕藉加以冬春之交雪雨愆期麦苗槁死秋田未种民庶遑遑流移者众臣伏思之此正国家节用之时也如果有功必赏赉者宜视其官之崇卑而轻重之不惟省费亦可示劝其近侍诸臣奏请恩赐士悉停罢以纾民力帝嘉纳之仍敕中书省以其所言示百司丙子授皇太子宝壬午遣使诣京师敕中书平章政事哈玛尔图同翰林国史院官致祭太祖太宗睿宗三朝御容发诸卫军六千完京城八月乙酉朔次翁果察图之地丙戌皇太子入见是日晏皇太子及诸王大臣于行殿庚寅帝暴崩年三十葬起辇谷谥曰翼献景孝皇帝庙号明宗国语曰胡土克图皇帝后至元六年十月加上尊号曰顺天立道睿文智武大圣孝皇帝

明宗一年 【即文宗天历二年】

○文宗一

文宗皇帝讳图卜特穆尔武宗次子明宗弟也母唐古氏延佑中仁宗封明宗为周王命镇云南而帝尚留京师王治元年中政使耀珠告托欢彻尔等交通亲王将构异图于是出帝居于琼州泰定初召帝北还行至潭州复止之居数月乃还大都改封怀王仍命出居建康以殊祥院使额森纽尔掌其卫士时都尔苏为相很愎自用灾异数见而帝兄弟播越南北人心思之致和元年春泰定帝出畋柳林以疾还宫诸王们都阿穆尔台太常礼仪使噶海宗正扎尔古齐库库楚等与签枢密院事雅克特穆尔谋曰主上之疾日臻今且往上都如有不讳吾党扈从者执上都诸王大臣杀之居大都者即缚大都省台官宣言武宗子当正位传檄诸关守帅则大事济矣三月泰定帝如上都们都库库楚等从西安王喇特纳实哩居守雅克特穆尔亦留大都于时额森纽尔私至上都与都尔苏等图弗利于帝乃复迁帝居江陵七月泰定帝崩于上都都尔苏及梁王旺沁辽王托克托结党害政人皆不平之时雅克特穆尔掌大都枢密符印谋于西安王喇特纳实哩集百官告以欲立武宗二子意即遣前河南行省参知政事明埒克栋阿前宣政使达尔玛实哩驰驿迎帝于江陵密以意谕河南行省平章政事巴延令简兵以备扈从是日推前湖广行省左丞相拜布哈为中书左丞相太子詹事■〈土答〉斯哈雅为中书平章政事【按■〈土答〉斯哈雅为平章政事元史宰相表载在九月与纪异】前湖广行省右丞苏苏为中书左丞前陕西行省参知政事王布琳济达为枢密副使与中书右丞赵世延同签枢密院事雅克特穆尔翰林学士承旨伊拉齐通政院使哈沙分典机务调兵守御关要征诸卫兵屯京师出府库犒军士乙未以西安王令给宿卫京城军士钞有差调诸卫兵守居庸关及卢儿岭丙申遣左卫率使图噜将兵屯白马甸隆镇卫指挥使阿都玛勒将兵屯泰和岭丁酉发中卫兵守迁民镇又遣萨里布哈等往迎帝且令达实特穆尔矫为使者自南来言帝已次近郊使民毋惊疑戊戌征宣靖王迈努诸王雅克布哈于山东己亥征兵辽阳明埒克栋阿至汴梁执行省臣皆下之狱又收廉访司万户府及郡县印庚子发宗仁卫兵增守迁民镇辛丑遣万户彻尔特穆尔将兵屯河中癸卯雅克特穆尔之弟萨敦子腾吉斯自上都来归河南行省杀平章库哩右丞拜特穆尔是日明埒克栋阿等至江陵甲辰帝发江陵遣使召镇南王特穆尔布哈维顺王库春布哈湖广行省平章政事高昌王特穆尔布哈来会执湖广行省左丞玛哈穆特送

京师以布色代之乙巳遣隆镇卫指挥使伊苏岱尔将兵守碑楼口河南行省杀其参政图卜台召陕西行台侍御史满济尔噶台及行省平章
玫事特默齐不至丙午诸王阿固察至京师遣前西台御史喇嘛凯巴等谕陕西丁未以萨都守居庸关腾吉斯屯古北口戊申帝命河南行省
平章政事巴延为本省左丞相河南行省遣前万户博啰等将兵守潼关己酉诸王们都阿穆尔台宗正孔尔古齐库库楚前河南行省平章政
事玛鲁集贤侍读学士乌鲁斯布哈太常礼仪院使噶海齐等十八人谋附雅克特穆尔事觉都尔苏杀之庚戌帝至汴梁巴延等扈从北行以
前翰林学士承旨鄂博哈雅为河南行省平章政事发平滦民徙迁民镇以御辽东军辛亥以雅克特穆尔知枢密院事伊拉齐为御史中丞癸
丑上都诸王及用事臣以兵分道犯京畿甲寅喇嘛凯巴等至陕西皆见杀乙卯托克托穆尔及上都梁王实喇平章政事奈曼台詹事奇彻战
于宜兴斩奇彻于阵禽奈曼台送京师戮之实喇脱走丙辰雅克特穆尔等奉法驾郊迎丁巳帝至京师入居大内戊午以苏苏为中书平章政
事前御史中丞曹立为中书右丞江浙行省参知政事张友谅为中书参知政事【按元史宰相表苏苏为平章在九月张友谅为参政在十
月曹立为右丞表不载】河南行省左丞相巴延为御史大夫中书右丞赵世延为御史中丞己未以河南万户伊苏岱尔同知枢密院事上都
梁王旺沁右丞相达实特穆尔太尉布哈平章政事玛鲁御史大夫盗珠等以兵次榆林隆镇卫指挥使黑汉谋附上都杀之籍其家九月庚申
朔雅克特穆尔督师居庸关遣萨都以兵袭上都兵于榆林败之追至怀来而还隆镇卫指挥使阿都玛勒以兵袭上都诸王穆尔特穆尔特默
齐于托啰克台执之归于京师陕西兵入河中府劫行用库钞万八千锭杀同知府事布琳图壬戌命苏苏宣谕中外曰昔在世祖以及列圣临
御咸命中书省纲维百司总裁庶政凡钱谷铨选刑罚兴造罔不司之自今除枢密院御史台其余诸司及左右近侍敢有隔越中书奏请政务
者以违制论监察御史其纠言之以高昌王特穆尔布哈知枢密院事额森纽尔为宣徽使召雅克特穆尔赴阙上都诸王额森特穆尔平章图
们岱尔自辽东以兵入迁民镇诸王巴喇玛额森特穆尔以所部兵入管州杀掠吏民丁卯雅克特穆尔率诸王大臣请早正大位以安天下帝
固辞曰大兄在朔方朕敢紊天序乎雅克特穆尔曰人心向背之机闲不容发一或失之噬脐无及帝曰必不得已必明着朕意以示天下而后
可乃遣萨都拒辽东兵于蓟州东流沙河元帅敖拉守居庸关上都军攻碑楼口指挥使伊苏岱尔御之不克戊辰以大司晨明埒克栋阿大都

留守库库台并为中书平章政事命襄阳万户杨克忠邓州万户孙节以兵守武关已已铸御宝成立行枢密院于汴梁以同知枢密院事伊苏

岱尔知行枢密院事将兵行视太行诸关西击河中潼关军上都诸王呼喇台等引兵犯崞州庚午遣军民守归峡诸隘辛未帝常服谒太庙额

卜德呼勒特默格弃市托多王士熙巴延彻尔托欢等各流于远州并籍其家同知枢密院事托克托穆尔与辽东图们岱尔战于蓟州两家店

壬申帝即位于大明殿诏以致和元年为天历元年大赦仍诏天下曰谨俟大兄之至以遂朕固让之心癸酉命雅克特穆尔将兵击辽东军封

雅克特穆尔为太平王以太平路为食邑中书右丞曹立为江浙行省平章政事福建廉访使伊实栋阿为右丞前中书左丞相张思明为左丞甲

戌雅克特穆尔加开府仪同三司上柱国录军国重事中书右丞相监修国史依前知枢密院事巴延加太尉征左右两阿苏卫军老幼赴京师

不行者斩籍其家乙亥上都旺沁兵袭破居庸关关兵皆溃雅克特穆尔军次三河丙子旺沁游兵至大口雅克特穆尔还军次榆河帝出齐化

门视师丁丑还宫戊寅谕中外曰近以奸臣都尔苏额卜德呼勒潜通阴谋变易祖宗成宪既已明正其罪凡回回种人不预其事者其安业勿

惧有因而扇惑者罪之敕军中逃归及京城游民敢攘民财者斩命留守司完京城军士乘城守御雅克特穆尔与旺沁前军战于榆河败之 【

按克雅特穆尔传榆河之战在己卯曰与纪异】 追奔至红桥北其枢密副使阿拉克特穆尔指挥使呼图克特穆尔以兵会旺沁复来战又败

之辛巳以拜布哈知枢密院事依前中书左丞相雅克特穆尔与上都军大战于白浮之野败之托克托穆尔与辽东军战于蓟州之檀子山壬

午大雾旺沁等遁昆山州获上都颁诏使者及辽东征兵使者以闻诏诛之癸未以同知枢密院事图尔噶特穆尔知枢密院事中书平章政事

明埒克栋阿为江浙行省平章政事 【按元史宰相表明埒克栋阿未尝出为行省平章盖癸未有是命至乙酉即复留之中书也谨识】 旺

沁收集散亡复来迎战萨敦托克托穆尔夹击败之追及于昌平北又大败之靖安王扣布哈等将陕西兵潜由潼关南水门入分据陕西乙酉

以明埒克栋阿为中书平章政事岭北行省左丞雅克布琳知枢密院事上都兵入古北口分掠石槽雅克特穆尔遣萨都由昌平倍道袭击之

【按萨都倍道趋石槽雅克特穆尔转载在丙戌日与纪异】 复自以大兵继至转战至牛栏山 【牛栏山元史本纪作牛头山考昌平山

水记顺义县有牛栏山与石槽同在县之西北又辽史百官志有牛栏都统领司亦因山得名以今道里计之适相符合谨据改】 擒驸马博啰

特穆尔平章蒙古达实伊实特穆尔 【按达实伊实特穆尔系二人盖达实以蒙古人官平章其明证也原文脱伊实二字今增】 将作院使
苏尔■〈土答〉珲送阙下戮之托克托穆尔与辽东军战蓟州南屡败之调河南蒙古军五万人增守京师临清万户府运粮军三千五百并
御河分守山东丁壮万人守御益都般阳诸处海港丁亥辽东军抵京城雅克特穆尔引兵拒之募丁壮乘城守御戊子上都诸王呼喇台等入
紫荆关行枢密院官布延阿都玛勒指挥使伊苏岱尔以兵援之陕西行台御史大夫额森特穆尔引兵从大庆关渡河擒河中府官杀之河东
官吏皆弃城走额森特穆尔悉以其党代之召云南行省左丞相额尔吉纳不至冬十月巳丑朔雅克特穆尔引兵至通州击辽东军败之遣托
克托穆尔等将兵援紫荆关调江浙兵御潼关河南行省调兵守虎牢关庚寅雅克特穆尔与辽东军夹潞水而阵辽东军宵遁辛卯紫荆关兵
进逼涿州同知州事嘉珲达调丁壮御之壬辰额森纽尔以军至保定杀阿里沙等及张景武兄弟五人癸巳呼喇台游兵进逼南城令京城户
出壮丁一人持兵仗从军士乘城仍于诸门列瓮贮水以防火雅克特穆尔及阳翟王太平国王多罗台等战于檀子山之枣林斩太平于阵甲
午托克托穆尔章吉特与额森纽尔合击上都军于良乡转战至卢沟桥乙未雅克等穆尔率军循北山西趣良乡时诸将与呼喇台阿拉克特
穆尔等战于卢沟桥声言雅克特穆尔大军至上都兵溃遣使颁诏至陕西陕西省台官械使者送上都湘宁王巴拉实哩引兵入冀宁救万户
和尚将兵由故关援之迎战杀获甚众会上都兵大至和尚退保故关冀宁遂陷戊戌命湖广行省平章政事奇珠调兵守归峡左丞布色守八
番以御四川军诸将追阿拉克特穆尔等至紫荆关获之送京师皆弃市巳亥图们岱尔军复入古北口雅克特穆尔与战于檀州南败之走还
辽东辛丑以同知枢密院事托克托穆尔通政使额布勒并知枢密院事御史中丞伊立齐为御史大夫齐王伊噜特穆尔东路蒙古元帅布哈
特穆尔等以兵围上都都尔苏等奉皇帝宝出降梁王旺沁遁辽王托克托为齐王伊噜特穆尔所杀遂收上都诸王符印喇实晋巴不知所终
【按泰定帝乃裕宗嫡孙晋王长子于属为宗子非不当立也英宗遇弑既不与其谋又为诸王所迎立即位之初即立喇实晋巴为太子至是
五年名分已定图卜特穆尔遣兵攻之以致于死史不明言其致死之由然所以致之死地者谁也伏读通鉴辑览 御批谓图卜特穆尔构
变窃位兵犯上都实与弑逆无异洵为春秋直笔谨录识之】 壬寅以宣徽使额森纽尔知行枢密院事副使章吉特为行枢密院副使与知枢

密院事伊苏岱尔等将兵西击潼关军癸卯额森特穆尔军至晋窰本路官皆遁甲辰晋邸及辽王所辖路府州县达噜噶齐并罢免禁锢选流官代之丙午中书省臣言凡有罪者既籍其家货又没其妻子非古者罪人不孥之意今后请勿没人妻子从之丁未以中书平章政事塔斯哈雅为大司农复以奇彻台为中书平章政事侍御史伊噜布哈为中丞以度支刍豆经用不足凡诸王駙马来朝并节其给宿卫官已有廩禄者及内侍宫人岁给刍豆皆权止之陕西兵至巩县黑石渡遂据虎牢己酉陕西军夺武关万户杨克忠等兵溃庚戌帝御兴圣殿齐王伊噜特穆尔等奉上皇帝宝都尔苏等从至京师下之狱分遣使者檄行省内郡罢兵癸丑雅克特穆尔辞知枢密院事命其叔父东路蒙古元帅布哈特穆尔代之核上都仓库钱谷命御史台择人充各道廉访司官遣官赈良乡涿州定兴保定驿户之被兵者甲寅元帅伊苏岱尔执湘窰王巴拉实哩及赵王满济勒噶诸王呼喇台于马邑归于京师遣使止江浙军士之往潼关者就还镇额森特穆尔兵至潞州丙辰特默格兵入邓州丁巳毁显宗室戊午诏谕廷臣曰凡今臣僚唯丞相雅克特穆尔大夫巴延许兼三职署事余者并从简省百司事当奏者共议以闻或私任己意者不许独请上都官吏自八月二十一日以后擢用者并追收其制敕天下僧道有妻者皆令为民额森纽尔军次顺德盗杀太尉布哈十一月己未重给内外百司印命太保博迪苏总兵北边给辽东降军行粮遣还庚申汰近岁白身入官者辛酉额森纽尔兵至武安额森特穆尔以军降河东县尽杀其所署官吏癸亥帝宿斋宫甲子服袞冕享于太庙辛未特默格兵入襄阳知县谷庭珪主簿张德死之癸酉雅克特穆尔言向者上都举兵诸王实喇枢密同知阿齐拉等十人南望宫阙鼓噪其党拒命逆战情不可恕诏各杖一百七流之远方甲戌安置泰定后昂吉尔氏于东安州丁丑荆王伊苏额布根遣使传檄至襄阳等默格引兵走庚辰遣使奉迎周王于漠北以中政院使敬俨为中书平章政事同知枢密院事彻尔特穆尔为中书左丞壬午以御史中丞伊噜布哈为中书右丞癸未都尔苏伏诛磔其尸于市旺沁亦赐死茂穆苏及窰珠萨题勒密实额森特穆尔等皆弃市甲申命威顺王库春布哈还镇湖广丙戌遣诸卫兵各还镇左丞相拜布哈罢四川行省平章囊嘉特自称镇西王以其省左丞托克托为平章前云南廉访使杨静为左丞杀其省平章库春等官称兵烧绝栈道十二月丙申如大崇恩福元寺谒武宗神御殿御史台臣言额森纽尔将兵所至擅杀官吏俘掠子女货财诏籍其家杖之窜于南窰庚子大赦追赐诸王们都为果王阿穆尔台为毅王宗

正扎尔古齐库库楚等十七人并赐功臣号及阶官爵谥仍命有司刻其功于碑赐钞恤其家中书省臣言陕西行省行台官焚弃诏书坐罪当流虽经赦宥永不录用为宜从之乙巳巴延加太尉开府仪同三司与伊拉齐并为御史大夫戊申加巴延为太保知枢密院事布哈特穆尔为太尉希沙为司徒甲寅复遣治书侍御史萨题内侍布延特古斯奉迎周王于漠北丁巳封西安王喇特纳实哩为豫王赐南康路为食邑以彻尔特穆尔为右丞参知政事伊尔特穆尔为左丞参议省事赵世安为参知政事戊午免被兵郡县杂役弛山场河泺之禁私贷者俟秋成责偿蒙古色目人愿丁父母忧者听如旧制是月复遣使者召云南行省左丞相额尔吉讷不至

天历二年 【按文宗得位本为不顺然泰定之子立未踰年明宗又未改元元之统绪不得不以属之伏读 御批通鉴辑览书法大义昭垂谨录识之】 春正月庚申封知枢密院事和硕为昭武王辛酉封图烈特穆尔复为楚王高昌王特穆尔布哈为中书左丞相大司农王毅为平章政事奇彻台知枢密院事武宣王齐齐克图遣使来言周王启行之期乙丑中书省言度支今岁刍粟不足常例支給外凡陈乞者宜勿予从之巳巳陕西饥赈以钞丁丑四川囊嘉特攻破播州猫儿垭隘庚辰赐潜邸说书刘道衡等官辛巳起复中书左丞史惟良为御史中丞土都官吏惟初入仕及骤升者黜之余听叙复壬午以陕西行台御史大夫鄂博哈雅为中书平章政事周王遣常侍博啰及特节齐先至京师赏以金币居宅仍遣内侍屯嘉琿往迎癸未遣宣靖王迈帑如周王所丙戌周王即皇帝位于和宣二月己丑曲赦四川囊嘉特庚寅雅克特穆尔复为中书右丞相辛卯帝御大明殿立妃鸿吉哩氏为皇后壬辰囊嘉特据鸡武关夺三义柴关等驿癸巳遣翰林侍讲学士曹元用祀孔子于关里囊嘉特以书诱巩昌总帅汪延昌丁酉囊嘉特以兵至金州据白工关陕西行省督军御之枢密院言囊嘉特阻兵四川其乱未已请命镇西武靖王绰斯本等皆调军以湖广行省官托欢布色博啰及郑昂霄总其兵进讨从之戊戌命察罕淖尔宣慰使萨题勒密实将本部蒙古军会镇西武靖王等讨四川颁行农桑辑要及栽桑图辛丑中书省议追尊皇妣伊奇哩氏曰仁献章圣皇后唐古氏曰文献昭圣皇后命有司具册宝丙午囊嘉特分兵逼襄阳湖广行省调兵镇播州及归州辛亥帝谓廷臣曰萨题还言大兄已即皇帝位凡二月二十一日以前除官者速与制敕后凡铨选其诣行在以闻甲寅立奎章阁学士院以翰林学士承旨和塔拉都哩默色集贤大学士赵世延并为大学士侍御史萨题

翰林直学士虞集并为侍书学士三月辛酉遣雅克特穆尔奉皇帝宝诣明宗行在复命有司赉金千五百两银七千五百两币帛各四百匹及金腰带二十以备赐予癸亥命造乘舆服御北迎大驾改潜邸所在诸路名建康曰集庆江陵曰中兴琼州曰干宁潭州曰天临戊辰云南诸王达实布哈图沁布哈及平章默古斯等集众五万数丞相额尔吉讷专擅十罪将杀之额尔吉讷遁走八番达实布哈等伪署参知政事等官壬申以去冬无雪今春不雨命中书及百司官分祷山川羣祀设奎章阁授经郎二员以勋旧贵戚子孙及近侍年幼者肄业 【按元史百官志设授经郎在至顺元年与纪异】 乙亥置行枢密院以山东都万户伊苏岱尔知行枢密院事与湖广河南两省官进兵平四川伊苏岱尔以病不往夏四月己丑时享于太庙辛卯命伊尔特穆尔王布琳济达代伊苏岱尔讨四川布琳济达以母老辞同签枢密院事傅岩起请往从之壬辰浚潞州漕运河己亥湖广行省参知政事博啰奉诏至四川赦囊嘉特等罪囊嘉特等听命蜀地悉定诸省兵皆罢癸卯明宗遣武宁王齐齐克图中书平章政事哈玛尔图来锡命立帝为皇太子丙午封博啰布哈为镇南王戒诸王分邑达噜噶齐受代不得仍留官所其父兄所居官子弟不得再任辛亥赈邓州诸县被兵逃户粮壬子赈通州诸县被兵民并令有司护送被俘者归其家五月己未遣翰林学士承旨额森特穆尔北迎明宗甲戌命中书省臣拟注中书六部官奏于行在所丙子改储庆使司为詹事院丁丑帝发京师北迎明崇戊寅次于大口庚辰次香水园六月丁酉特穆尔布哈以旱乞避宰相位谕之曰皇帝远在沙漠未能即至是以暂摄大位今亢阳为灾皆予阙失所致汝其勉效厥职祇修实政庶可以上答天变仍命驰奏于行在庚戌次于上都之六十里店壬子赐凤翔府岐阳书院额祀周文宪王仍命设学官春秋释奠如孔子庙仪秋七月丙辰朔日有食之丁巳次上都之三十里店己未更定迁徙法凡应徙者验所居远近移之千里在道遇赦皆得放还所迁人死妻子听归土著着为令辛巳令诸王封邑达噜噶齐推择本部识达治体廉慎无过者以充或有冒滥罪及王傅八月乙酉朔明宗次于翁果察图丙戌帝入见明宗宴帝及诸王大臣于行殿庚寅明宗暴崩雅克特穆尔以明宗后命奉皇帝宝授于帝遂还 【伏读通鉴辑览 御批谓图卜特穆尔非能让国之人其推奉周王特以其序次居兄恐为公论所不容故阳为劝进以饰人耳目冀其固逊而后取之则既弋虚名复享厚实此逆贼本怀也周王不察诚伪遽受尊称遂兆翁果察图之祸图卜特穆尔固罪无可逃周王亦智不足以保身矣 圣论昭揭既可

以正当时君臣之罪又可以见作史者不敢明言之非谨录识之】 壬辰次博啰察罕以巴延为中书左丞相奇彻台阿尔斯兰哈雅赵世延并中书平章政事甘肃行省平章多尔济为中书右丞中书参议阿荣太子詹事丞赵世安并中书参知政事前右丞相达实特穆尔知枢密院事特穆尔布哈及上都留守特穆尔图并为御史大夫癸巳帝至上都丙申流诸王呼喇珠于海南戊戌四川囊嘉特以指斥乘輿坐大不道弃市巳亥帝复即位于上都大安阁大赦庚子命阿荣赵世安督造建康龙翔集庆寺甲辰遣奇彻台先还京师经理政务雅克特穆尔阿荣留上都监给恩赉金币发诸卫军浚通惠河丁未以满济勒噶台为上都留守戊申封诸王库春为肃王己酉车驾发上都庚戌改詹事院为储政院以巴延兼储政使中政使哈札尔布哈太子詹事丞赛音约苏前储庆使姚炜并储政使【按巴延传于是年二月加授储庆使此时詹事院未立也四月明宗罢储庆司仍立詹事至是复改为储政巴延亦系改授不特姚炜一人为前储庆使也谨识】 甲寅置隆祥总管府总监大承天护圣寺工役前丞相拜布哈坐潜与日者推测圣算命安置集庆九月乙卯朔市故宋太后全氏田为大承天护圣寺永业己未立龙翔万寿营缮提点所隶隆祥总管府【按百官志海南营缮提点所作规运提点所与纪异】 庚申加封故领诸路道教事张留孙为上卿大宗师辅成赞化保运神德真君辛酉命凡前往明宗行在所送宝官吏越次超升者皆从黜降丁卯大驾至大都戊辰敕翰林国史院官同奎章阁学士采辑本朝典故准唐宋会要着为经世大典敕使者颁诏赦率日行三百余里既受命逗留三日及所至饮宴稽期者治罪取赂者以枉法论癸酉帝御大明殿受诸王百官朝贺丙子特穆尔布哈加录军国重事以翰林学士承旨额尔吉讷元帅梁国公图烈纳并知行枢密院事论额森纽尔以不忠不敬伏诛壬午封知枢密院事雅克布琳为兴国公以大司农卿雅齐为司徒癸未建颜子庙于曲阜所居陋巷冬十月甲申朔帝服袞冕享于太庙辛卯立元江宣慰司于云南封太禧宗禋使图沁特穆尔为梁国公甲午中书省臣言旧制朝官以三十月为一考外任则三年为满比年朝官率不久于其职或数月即改迁于典制不类且治迹无从考验请如旧制为宜敕除风宪官外其余朝官不许二十月内迁调命江西湖广分漕米四十万石以纾江浙民力辛丑诏诸王公主官府寺观拨赐田租除鲁国大长公主听遣人征收外其余悉输于官给钞酬其直戊申以江淮财赋都总管府隶储政院供皇后汤沐之用征托多王士熙等十二人于贬所放还乡里庚戌以亲祀太庙礼成诏天下罢大承

天护圣寺工役囚在狱三年疑不能决者释之民闲拖欠官钱无可追征者尽行蠲免命
通政院官分职往所在官司金补逃亡驿户大都至上
都诸驿供给繁重官为应付免征奉元路民闲商税一年命所在官司设置常平仓云南
八番为囊嘉特所诿误反侧未安者并贯其罪免各处
煎盐灶户杂泛夫役二年免永平屯田总管府田租申禁天下私杀马牛十一月丙辰诏
列圣诸宫后妃陪从之臣永给衣廩刍粟戊午以多尔
济亦都护为河南行省丞相癸亥以翰林学士承旨库春贝知枢密院事位居众知院事
上己巳以萨题为中书右丞命中书左丞赵世安提调
国子监学丁丑造青木绵衣万领赐围宿军 【旧制大朝会时皇城外皆无墙垣故用军
围绕名曰围宿】 己卯翰林国史院臣言纂修英宗
实录请具都尔苏款伏付史馆从之高丽国王王焘久病不能朝请命其子楨袭位十二
月甲申以西僧年扎克策喇实为帝师诏僧尼徭役一
切无有所与丙戌诏百官言朝政得失录所上章疏善者即议举行庚寅以摩济为大司
徒定风宪官赴任毋拘远近均给驿乙未诏诸僧寺田
自金宋所有及累朝赐予者悉除其租其有当输租者仍免其役僧还俗者听复为僧壬
寅命江浙行省印佛经二十七藏丁未罢土番巡捕都
元帅府戊申以伊噜布哈为御史大夫兼领隆祥总管府事

钦定续通志卷六十七

●钦定续通志卷六十八 元纪十二

元纪 【十二】

文宗 【二】 宣宗

○文宗二

至顺元年春正月丁巳以知枢密院事拜特穆尔为辽阳行省左丞相丁卯云南诸
王图沁及万户布呼阿哈奇彻等叛攻中庆路陷之杀
廉访司官辛未中书省臣言科举会试日期旧制以二月一日三日五日近岁改为十一
十三十五请依旧制从之癸酉以宣徽使萨都复知枢
密院事与奇彻台并领长密卿 【按元史百官志无长密卿枢密院亦无卿名惟长信寺
及长秋寺设卿应系长信或长秋之误他无可考谨
仍原文而识之】 丁丑遣使赉金千五百两银五百两诣杭州书佛经己卯封太医院使
阿哩雅为秦国公辛巳改大都田赋提举司为宣农提
举司荆襄田赋提举司为荆襄济农香户提举司平江提举司为平江善农提举司 【按
元史百官志改三提举司俱系二年事与纪异】 二
年壬午朔以赵世安为御史中丞史惟良为中书左丞癸未加知枢密院事雅克布琳开
府仪同三司籍张珪子五人家赉乙酉以西僧嘉勒斡

藏布卓特巴嘉勒灿并为乌斯藏土番等处宣慰使都元帅丁亥命江南陕西河南等处富民输粟补官有差四川富民有能输粟赴江陵者依河南例其不愿仕乞封父母者听僧道加以师号己丑图沁布呼等攻陷仁德府至马龙州调八番元帅谔勒哲御之庚寅以修经世大典久无成功专命奎章阁额哩音特穆尔和塔拉都哩默色等译国言所纪典章为汉语纂修则赵世延虞集等雅克特穆尔如国史例监修辛卯奎章阁学士和塔拉都哩默色萨题虞集辞职诏谕之曰昔我祖宗睿知聪明其于致理之道自然生知朕以统绪所传实在眇躬夙夜忧惧自维早岁跋涉艰阻既乏生知之明于国家治体岂能周知故立奎章阁置学士员日以祖宗明训古昔治乱得失陈说于前使朕乐于听闻卿等其悉所学以称朕意其勿复辞甲午图沁布呼等攻晋宁州图沁自立为云南王布呼为丞相阿哈呼喇呼等为平章等官立城栅焚仓库以拒命丁酉帝及皇后皇子喇特纳达喇并受佛戒己亥命明宗皇子受佛戒监察御史言中书平章道拉实职任台衡不思报效铨选之际紊乱纲纪贪污着闻恬不知耻黜罢为宜从之甲辰流旺沁之子于吉阳军乙巳封明宗子琳沁巴勒为郕王丙午复以阿尔斯兰哈雅为江南行台御史大夫命中尚卿苏尔约苏以兵讨云南御史台臣言奇彻台天历初在上都常与库库楚等谋执都尔苏事泄同谋者皆死奇彻台以出征获免顷台臣疑而劾之不称事情宜雪其枉从之丁未以巴延知枢密院事依前太保录军国重事帝以雅克特穆尔有大功欲独相以尊异之谕省臣曰昔在世祖尝以宰相一人总领庶务故治出于一今雅克特穆尔为右丞相巴延既知枢密院事左丞相其勿复置戊申以太禧宗裡使鄂博哈雅为中书平章政事命史惟良及参知政事和尚总督建言之事省臣言旧制正旦天寿节内外诸司各有贄献顷者罢之今江浙省臣言圣恩公溥覆帔无疆而臣等殊无补报儿遇庆礼进表称贺请如旧制为宜从之诏谕枢密院以屯田籽粒钞万锭助建佛寺免其军卒土木之役辛亥命市故瀛国公赵■〈显，去页〉田为大龙翔集庆寺永业御史台臣言不必予其直帝曰吾建寺为子孙黎民计若取人田而不予直非朕志也三月丁巳徙封济阳王玛纳济为吴王吴王普尔普为济阳王戊午封皇子喇特纳达喇为燕王立宫相府总其府事以雅克特穆尔领之以河南行省平章奇珠为云南行省平章八番顺元宣慰使特穆尔布哈为云南行省左丞从豫王由八番道讨云南赐明宗近侍七十人官有差己巳议明宗升祔序英宗上视顺宗成宗庙迁例辛未封知枢密院事布哈特穆尔为武平郡王壬申奉玉册玉宝祔明宗神主于

太庙甲戌封诸王斯隆玛为西宁王 【按元史诸王表斯隆封西宁王在至顺二年与纪异】 夏四月丙戌封额尔勤额布根为桓国公戊子
四川行省调重庆五路万户以兵救云南壬辰以所籍张珪诸子田四百顷赐大承天护圣寺为永业辛丑明宗后班布尔实崩 【皇后谋杀之也】 壬寅括益都般阳宁海闲田十六万二千九十顷赐大承天护圣寺为永业立益都广农提举司及益都般阳宁海诸提领所并隶隆祥
总管府乌蒙土官禄余杀乌撒宣慰司官吏降于布呼罗罗诸蛮俱叛与布呼相应平章特穆尔布哈死之戊申云南贼禄余以蛮兵七百余入
据乌撒顺元界立关固守命诸王温都逊特穆尔与湖广平章托欢会兵讨之五月戊午羣臣上尊号曰钦天统圣至德诚功大文孝皇帝改元
己未罗罗斯权土官宣慰撒加伯阿漏土官阿刺里州土官德益叛附于禄余辛酉四川行省进军讨之戊辰车驾发大都命额哩音特穆尔为
大司徒遣豫王喇特纳实哩出镇西番加赵世延翰林学士承旨封鲁国公辛未置宣忠扈卫亲军都万户府总俄罗斯军士隶枢密院以太禧
宗裡使伊拉齐为中书平章政事甲戌八番乖西■〈碍，角代石〉苗阿马察伯秩等万人侵扰边境诏枢密臣分兵讨之乙亥置顺元宣抚
司统达喇齐军征云南六月丙戌帝至上都丙申立行枢密院讨云南赐给驿玺书十五银字圆符五以河南行省平章彻尔特穆尔知行枢密
院事陕西行省平章特默齐近侍嘉琿为同知副使发朵甘斯图沙玛及巩昌诸处军万三千人人乘马三匹彻尔特穆尔同镇西武靖王绰斯
本等由四川嘉琿从豫王喇特纳实哩等由八番分道进军庚子以内侍中瑞卿萨里为大司徒知枢密院事库春贝托克托穆尔通政使济尔
噶朗翰林学士承旨嘉琿达巴延额布根燕王宫相嘉琿达乌鲁斯中政使尚嘉努托噶台右阿苏卫指挥使诺海彻尔拜珠以谋变弃市籍其
家乙巳罗罗斯土官撒加伯合乌蒙蛮兵万人攻建昌县云南右丞伊尔特穆尔击败之四川军亦败撒加伯于芦古驿秋七月辛亥封诸王阿
固察为广宁王乙丑以翰林学士承旨额尔吉讷知枢密院事庚午中书省臣言近岁帑廩虚空其费有五曰赏赐曰作佛事曰创置衙门曰滥
冒支请曰续增卫士鹰坊请与枢密院御史台各集赛官同加汰减从之丁丑故丞相特们德尔子将作使索珠与其弟观音努姊夫太医使雅
尔鼐坐怨望造符策祭北斗咒诅事觉诏中书鞫之辞连前刑部尚书乌玛喇前御史大夫博罗上都留守玛勒及雅尔鼐姊乌讷实密逊等俱
伏诛闰月庚辰朔封诸王玛展为永宁王辛卯以陕西行台御史中丞托音纳尔为中书参知政事赵世延以年老罢癸巳以伊噜特穆尔为大

司徒命雅克特穆尔以钞万锭分赐天历初诸王羣臣死事之家戊戌甘肃平章奈曼台封宣懿郡王【按元史诸王表是年封宣懿郡王者为额哩音特穆尔与纪异】 驸马锦济勒封郟国公并知行枢密院事乙巳云南使来报捷遣使赐云南四川省臣行枢密院臣以上尊戊申加封孔子父齐国公叔梁纥为启圣王母鲁国太夫人颜氏为启圣王夫人颜子充国复圣公曾子邾国宗圣公子思沂国述圣公孟子邹国亚圣公河南伯程颢豫国公伊阳伯程颐洛国公八月辛亥云南伊尔特穆尔以兵屯建昌执罗罗斯把事曹通斩之己未大驾至京师壬申诏兴举蒙古字学九月甲申监察御史葛明诚劾辽阳行省平章哈喇特穆尔尝坐赃被杖罢之辛卯监察御史多罗台王文若言岭北行省平章哈玛尔图鄂徕无知理宜黜罢从之癸巳置麓川路军民总管府复立总管府于哈喇和卓甲午封魏王阿穆尔克子阿噜为西靖王乙未以立冬祀五福十神太一真君丙午史惟良辞归赐钞二百锭丁未以中书参知政事张友谅为左丞知枢密院事图卜台为陕西行台御史大夫冬十月戊申朔降玺书申饬衍圣公崇奉孔子庙事壬子立宣忠扈卫亲军都万户营于大都北市民田百三十余顷赐之戊午致斋大明殿己未遣亚献官中书右丞相雅克特穆尔终献官特穆尔布哈率诸执事告庙请以太祖皇帝配享南郊庚申出次郊宫辛酉帝服大裘袞冕祀昊天上帝于南郊以太祖皇帝配礼成是日大驾还宫【按元自世祖至是七世凡有大祀皆遣官摄行惟此始亲祀谨识】十一月辛巳陕西行省左丞齐喇坐受人僮奴一人及鸚鵡御史台谕如律帝曰位至宰执食国厚禄犹受人生口理宜罪之但鸚鵡微物以是论赃失于太苛其从重者议罪嗣后凡馈禽鸟者勿以赃论著为令甲申知枢密院事雅克布琳请依旧制全给鹰坊刍粟使毋贫乏帝曰国用皆百姓所供当量入为出朕岂以鹰坊失所重困吾民哉不从辛卯以库库台知枢密院事辛丑徽河南民自实田粮不通舟楫者许以钞代十二月己酉以董仲舒从祀孔子庙位列七十子下国子生积分及等者省台集贤院奎章阁官同考试中式者以等第试官不中者复入学肄业辛亥立燕王喇特纳达喇为皇太子甲寅监察御史言皆裕宗由燕邸而正储位世祖择耆旧老臣如王颀姚燧萧■〈奭斗〉等为之师保宾客今皇太子仁孝聪睿出自天成诚宜慎选德望老成学行纯正者俾之辅导于左右以宏养正之功实宗社生民之福也帝嘉纳之癸亥知枢密院事库库台兼大都留守甲戌御史中丞和尚坐受妇人为赂遇赦原罪监察御史言和尚所为贪纵有污台纲罪虽见原理宜追夺所受制命禁锢原籍终其身从之

敕各行省凡遇边防有警许令便宜发兵事缓则驿闻

二年春正月己卯行枢密臣言去岁十一月仁德府权达噜噶齐库楚纠集兵众以讨云南首败布呼贼兵于马龙州以是月十一日杀布呼弟巴延献馘于豫王十三日战于马金山获布呼及其弟巴延彻尔其党拜布哈布延特穆尔等十余人诛之余兵皆溃独禄余犹据金沙江有旨趋进兵讨之庚辰住持大承天护圣寺僧宝峯加司徒癸未立侍正府以总近侍丙戌巴延伊噜特穆尔伊噜布哈鄂博哈雅等十四人并以本官兼侍正 【按巴延传加侍正在八月与纪异】 丁亥命后卫指挥使史坝往四川行省调军官选戊子命努图克齐阿里和卓按行北边牧地以晋邸部民刘元良等二万四千余户隶寿安山大昭孝寺为永业户中书省臣言四川省臣达春图卜特穆尔等讨云南以去岁十一月九日领兵至乌撒周泥驿明日禄余阿奴阿答等贼兵万余自山后闲道潜出达春图卜特穆尔等进击屡战败之十五日又战七星关六日凡十七战贼大败溃去诏遣使以银币赏之罢益都等处广农提举司改立田赋总管府仍令隆祥总管府统之辛卯皇太子喇特纳达喇薨壬辰御史台臣劾奏福建宣慰副使哈济前为广东廉访副使贪污狼籍宜罢黜从之甲辰敕每岁四祭五福太一星建孔子庙于后卫乙巳封蒙古巫者所奉神为灵感昭应护国忠顺王号其庙曰灵佑镇西武靖王绰斯本豫王喇特纳实哩及行省行院官同讨云南阿哈就擒斩于军前遂复行省治分兵追捕残贼于嵩明州枢密院臣以捷闻诏总兵官量度缓急从宜区处二月丙午上都留守奈曼台行岭北行枢密院事太禧宗禋使锦济勒达朗达尔玛聂呼四人并知院事遥授平章政事戊申立广教总管府以掌僧尼之政凡十六所四川行省招谕怀德府驴谷什用等四洞及生蛮十二洞皆内附诏升怀德府为宣抚司以镇之诸洞各设长官司及巡检司且命各还所掠生口壬子以中书平章政事伊拉齐兼沈阳等路安抚使燕王宫相巴咱尔为中书平章政事陕西行台中丞多尔济巴勒为中书参知政事户部尚书高履亨两淮都转运盐使许有壬并参议中书省事乙卯云南统兵官来报捷诸蛮悉降唯禄余追捕未获命番休各卫汉军十之二以三月一日放遣庚午创建五福太一宫于京城干隅修上都洪禧崇寿等殿诸王齐齐克图沙格坐妄言不道诏安置齐齐克图广州沙格雷州三月辛巳御史台臣劾奏燕南廉访使布札尔前为闽海廉访使受赃计钞二万二千余锭金五百余两银三千余两男女生口二十二人及它宝货无算虽遇赦原乞追夺制命籍没流窜诏如所言仍暴其罪示天下壬午命喇特纳实哩沙津阿固齐 【按喇特纳

实哩沙津阿固齐原文倒置据续通鉴纲目及至顺

三年本纪改】 为三藏国师赐玉印甲申御史台臣言奎章阁参书雅勒呼阿媚奸臣所为不法宜罢其职从之丙戌司徒希沙言陶弘景胡笳

曲有负宸飞天历终是甲辰君之语今陛下生年纪号实与之合此实受命之符乞录付史馆颁告中外翰林诸臣议唐开元闲太子宾客薛让

进武后鼎铭云上玄降监方建隆基为玄宗受命之符姚崇表贺请宣示史官颁告中外而宋儒司马光斥其采偶合之文以为符瑞乃小臣之

谄而宰相实之是侮其君也今陛下应天顺人绍隆正统于今四年薄海内外罔不归心固无待于旁引曲说以为符命从其所言恐启讖纬之

端非所以定民志也事遂寝戊子以西僧苏尼德巴迪尔班迪为三藏国师赐金印癸巳诏累朝神御殿之在诸寺者各制名以冠之召亳州太

清宫道士马道逸汴梁朝天宫道士李若讷河南嵩山道士赵亦然各率其徒赴阙修普天大醮监察御史劾江浙行省平章通通荒佚宴安才

非辅佐诏免其官豫王喇等纳实哩镇西武靖王绰斯本等擒云南诸贼额默根罗罗托克托穆尔博勒巴居澄江路总管罗罗布哈布呼之叔

沁达噶伪署万户哈喇岱尔及诸将校悉斩之磔尸以徇己亥御史台臣劾奏大都总管刘原仁称疾久不视事及迁同知储政院事即就职饶

幸巧宦避难就易诏罢之癸卯御史台臣劾奏工部尚书苏炳性行贪邪诏罢之夏四月丙午朔全窳民王托欢献银矿诏设银场提举司隶中

政院中书枢密议定天历兵兴诸领军与敌战者功赏诏加雅克特穆尔及巴延宝带金银有差庚戌御史台臣言平章政事曹立累任江浙今

虽闲废犹与富民交纳宜遣还其本籍大同路又监察御史万嘉律尝荐中丞和尚托克托尝举廉访使布扎尔今和尚布扎尔俱以赃罪除名

万嘉律托克托不宜任台省之职并从之壬子命雅克特穆尔总制宫相都总管府事额布勒巴咱尔俱以本官兼官相都总管府都达噜噶齐

乙卯镇西武靖王绰斯本等已平云南各遣使来报捷诸王图烈纳镇云南品甸自以财力给军协力讨贼诏以袭衣赐之戊午以集庆路玄妙

观为大元兴崇寿宫命兴和建屋居海青上都建屋居鹰鹞庚申特命河南儒士吴炳为艺文监典簿仍予对品阶辛酉御史台臣言储政使哈

扎尔布哈侍陛下潜邸时受马七十九匹又盗用官库物天历初领兵卢沟桥迎敌即逃擅闭城门惊惑民庶度支卿纳克楚尝匿官马又矫增

制命臣等议其罪宜各杖一百七除名斥还乡里从之壬戌枢密院臣言云南事已平镇西武靖王绰斯本言蒙古军及哈喇章罗罗斯诸种人

叛者或诛或降虽已略定其余党逃窜山谷岂无反侧请留荆王伊苏额布根及诸王索

诺木等 【索诺木与卷二十九之索诺木非一人】

各领所部屯驻一二岁以示威重从之甲子奇彻台献名园命御史台给钞千锭酬其直御史台臣言同签中政院事殷仲容奸贪邪佞冒哀居

官诏黜之戊辰诏以泥金辉和尔字书无量寿佛经千部五月丙戌太禧宗祿院臣言累朝所建大万安等十二寺旧额僧三千一百五十人岁

例给粮今其徒猥多请汰去九百四十三人从之己丑置云南等处宣慰司都元帅府以土官昭练为宣慰使都元帅又置临江元江等处宣慰

使兼管军万户孟定路孟冒路并为军民总管府者线蒙庆甸银沙罗等甸并为军民府孟并孟广者样等甸并设军民长官司庚寅立云南省

芦傅路军民总管府以土官为之制授者各给金符癸巳云南威楚路之蒲蛮猛吾来朝贡愿入银为岁赋诏为置散府一及土官三十三所皆

赐金银符甲午封宣政使托音为薊国公以平江官田五百顷立稻田提举司隶宫相都总管府乙未以陕西行台御史大夫图卜台知枢密院

事纂修皇朝经世大典成诏以泥金书佛经一藏丙申车驾如上都敕在京百司日集公署自晨及暮毋废事己亥以额尔吉讷知行枢密院事

辛丑改阿苏万户府为宣毅万户府赐银印命巴延领之癸卯加额尔吉讷太尉六月乙巳朔征诸政院钞三万锭给中宫道路费乙卯监察御

史陈良劾浙东廉访使托克托济延阿附权奸都尔苏其生母何氏本父之妾而兄妻之欺诳朝廷封温国夫人请黜罢宪职追还赠恩从之癸

亥诏诸官吏在职役或守代未任为人行赂关说即有所取者官如十二章论赃吏罢不叙终其身虽无所取讼起灭由己者罪加常人一等甲

子太府监颁宫嫔阉宦及宿卫士行帐资装免控卫士当驿户秋七月甲戌朔艺文少监欧阳玄言先圣五十四代孙袭封衍圣公爵最五等秩

登三品而用四品铜印于爵秩不称诏铸从三品印给之己卯以云南既平惟禄余等惧罪窜伏降诏曲赦之壬午监察御史张益等言奇彻台

在英宗朝阴与中政使耀珠造谋诬告反复不可信诏夺职禁锢广东丁亥海南黎贼作乱诏江西湖广两省合兵捕之壬辰以知枢密院事图

卜台为御史大夫丁酉调甘州兵千人萨星辉和尔兵五百人守赞布凌以防土番戊戌封巴延为浚隘王赐金印仍前太保知枢密院事 【

按巴延传封浚隘王在八月与纪不符】 辛丑怀德府洞蛮二十一洞田先什用等以方物来贡还所掳生口八百余人给其家癸卯知行枢密

院事彻尔特穆尔以兵讨叛蛮锁力哈迷失戮其党七百余入八月甲辰朔日有食之封托琳和塔拉为靖恭王实喇卜多尔济为懿德王 【

按元史诸王表靖恭懿德二王俱至顺元年封与纪异】 辛亥帝还大都丙辰封内史沁

达噶为丰国公己未内侍实喇布哈坐巫蛊事杖流海
南九月癸酉朔诏皇子古噜达喇出居雅克特穆尔家乙亥筑驻蹕台于大承天护圣寺
东御史台臣劾四川参政马镛预借俸钞娶妾且诟骂
平章汪寿昌帝曰纲常之理尊卑之分懵无所知其何以居上临下亟罢之丙子海南贼
王周纠率十九洞黎蛮作乱命湖广左丞伊喇萨纳讨
捕之丁亥御史台臣言江西参政李允中乃故内侍李邦宁养子器质庸下误叨重选宜
黜罢从之庚寅禄余寇顺元路丁酉云南行省遣都事
诺海镇抚栾智等奉诏往谕禄余及授以参政制命至撒家关禄余拒不受诺海遇害冬
十月癸丑如大承天护圣寺蒙古都元帅齐喇引兵击
阿哈贼党于靖江路海中山为云梯登山破其栅图沁之弟必里克图库图齐举家赴海
死又获图沁弟二人子三人诛之丁巳以江浙平江湖
州等路水伤稼减明年海运漕米遣官赴通濠陵沧四州和籴粟豆以足国用乙丑立昭
功万户都总使府巴延特穆尔布哈并兼昭口万户都
总使丙寅命大都路定时估每月朔望送广谊司以酬物价十一月壬申朔日有食之云
南行省言亦奚不薛之地所牧国马岁给盐以每月上
寅日啖之则马健无病比因布呼叛乱云南盐不可到马多病死诏令四川行省以盐给
之乙亥李彦通萧布呼齐等谋反伏诛丙子封诸王沃
济为保宁王【按元史诸王表沃济封保宁王在天历二年与纪异】丁丑以兴和路
鹰坊及蒙古民户大雪畜牧冻死赈之己卯封觉等班
为豳国公庚辰左右钦察卫军士千四百九十户饥命上都留守司赈之辛巳以户部尚
书耿焕为中书参知政事癸未诏养雅克特穆尔之子
塔喇海为子赐居第贖产诏每岁枢密院宗正府遣官与辽阳行省官巡历诸郡毋令诸
王所部扰民隆祥司使鸿和尔布哈言海南所建大兴
龙普明寺工费浩穰黎人不胜其扰以故为乱诏湖广行省臣伊噜布哈及宣慰宣抚二
司领其役仍命廉访司莅之辛卯定诸盐课钞十二月
戊申陕西行台御史讷古伯高坦等劾监察御史陈良恃势覆法诏夺其敕命以黄金符
镌文曰翊忠徇义迪节同勋赐西域亲军副都指挥使
奇彻旌其天历初红桥战功壬子复命诸王呼喇珠还镇云南癸丑河南河北道廉访副
使僧嘉努言自古求忠臣必于孝子之门今官于朝者
十年不省覲者有之非无思亲之心实由朝廷无给假省亲之制而有擅离官次之禁古
律诸职官父母在三百里外三年听一给定省假二十
日父母歿者五年听一给拜墓假十日以此推之父母在三百里以至万里外者宜计道
里远近定立假期其应省覲匿而不省覲者坐以罪若
诈冒假期规避以掩其罪与诈奔丧者同科诏中书省礼部刑部及翰林集贤奎章阁议

之辛酉遣兵部尚书伊苏布哈同签通政院事哈努勒
布哈迎帝师诏中书省御史台遣官诣各道同廉访司录囚

三年春正月癸酉命高丽国王王焘仍为高丽国王赐金印己卯罢诸建造工役惟
城郭河渠桥道仓库勿禁广西罗韦里叛寇马武冲等
合龙州岭北朗龙洞韦大虫攻陷那马违那马安等砦命广西宣慰司严军御之壬午封
孔子妻郚国夫人亓官氏为大成至圣文宣王夫人戊
子万安军黎贼王奴罗等寇陵水县戊戌诸王章吉特献俄罗斯百七十人酬以银钞庚
子夔路忠信寨洞主阿具什用合洞蛮寇施州二月癸
卯诸王额森特穆尔薨己酉禄余乞降于四川行省诏中书枢密御史诸大臣杂议之辛
酉以雅克特穆尔兼奎章阁大学士领奎章阁学士院
事己巳命雅克特穆尔集翰林集贤太禧宗祿院议立太祖神御殿诏修曲阜宣圣庙邛
州旧井盐水涌溢州民侯坤愿自煮盐而输课于官诏
四川盐运司主之三月庚午朔帝师至京师己丑复立功德使司癸巳皇子古鲁达喇更
名雅克特古斯乙未复以钞万锭分给蒙古孤寡者己
亥赐行枢密院钞四万锭分给征乌撒乌蒙所调陕西四川蒙古军及渐丁万人【按元
典章元制新附军汉军死亡者所有男儿官为养济
俟成丁充军所谓渐丁盖指此谨附考】夏四月戊午命奎章阁学士院以国子译贞观
政要镌板模印以赐百官乙丑安西王阿南达之子伊
噜特穆尔坐与辉和尔僧乌尼德巴迪尔班迪国师喇特纳实哩沙津阿固齐谋不轨命
宗王大臣杂鞫之狱成三人皆伏诛仍籍其家以喇特
纳实哩沙津阿固齐妻彻辰赐通政副使布琳玉鞍赐萨都余人畜土田及七宝衾具金
珠宝玉钞币并没入大承天护圣寺命有司为巴延建
生祠立纪功碑于涿州仍别建祠立碑于汴梁五月癸酉赐雅克特穆尔宴于流杯池甲
戌萨题请备录目帝登极以来固让大兄往复奏答其
余训敕辞命及雅克特穆尔等宣力效忠之迹命多喇续为蒙古托卜齐延一书置之奎
章阁从之戊寅如大承天护圣寺己卯浙西道廉访司
劾副使三宝凶恶阴险紊乱纪纲诏罢之戊子遣使往帝师所居萨斯嘉之地以珠织制
书宣谕其属仍给钞四千锭币帛各五千匹分赐之庚
寅帝如上都置山东益都等处金银铜铁提举司辛卯复以司徒印给万安寺僧严吉祥
诏给钞五万锭修帝师帕克斯巴影殿壬辰太常博士
王瓚言各处请加封神庙滥及淫祠按礼经以劳定国以死勤事能御大灾能捍大患则
祀之其非祀典之神自后不得加封从之六月己亥朔
以伊噜特穆尔等罪诏告中外大赦免四川行省今年差税陕西行省今年商税录用托
多王士熙托欢等己酉以御史中丞赵世安为中书左

丞癸亥加授知枢密院事额布勒开府仪同三司乙丑御史台臣劾辽阳行省参政赛甫鼎庸鄙不胜任罢之监察御史陈思谦言内外官非文武全才出处系天下安危能拯金革之难者勿许夺情起复从之禁诸卜筮阴阳人毋出入诸王公大臣家秋七月辛未以车坊官园赐巴延赐从征云南将校钞币有差乙亥命僧于铁幡竿修佛事施金百两银千两币帛各五百匹布二千匹钞万锭丁丑湖广行省言黎贼势猖獗乞益兵三千以备调用诏依前诏促伊喇萨纳克日进兵壬午江西行省造螺钿几榻遣雅克特穆尔诏赐匠者币帛各一甲申雅克特穆尔献俄罗斯二千五百人庚寅给钞万锭命雅克特穆尔分赐累朝宫分嫔御之贫乏者八月辛丑诸王阿尔雅实哩献俄罗斯三十人渐丁百三人丙午遣官祭社稷【续宏简录云每岁上戊之典泰定朝无文至是乃一祭】丁未有事于太庙海道漕运粮复至京师己酉帝崩于上都年二十九葬起辇谷谥曰圣明元孝皇帝庙号文宗国语曰济雅图皇帝后至元六年六月以帝谋为不轨使明宗饮恨而崩诏除其庙主

文宗天历二年【其元年即泰定帝致和元年其二年即明宗即位之一年】至顺三年凡五年

○ 宣宗

宣宗皇帝讳伊埒哲伯明宗子也母懿玛锦氏明宗有子二人长托欢特穆尔次即帝初封郾王至顺三年八月己酉文宗崩右丞相雅克特穆尔请立皇子雅克特古斯皇后申文宗固让初志欲传位明宗子时托欢特穆尔居静江帝以文宗所眷爱独留京师于是雅克特穆尔请立帝【按顺帝纪及雅克特穆尔传皆云雅克特穆尔欲立文宗子雅克特古斯后不从而止此元史纪文但云请立帝殊属不合谨据增】遣使征诸王会京师中书百司政务咸启中宫取进止十月庚子帝即位大赦辛丑以知枢密院事萨都为御史大夫中书右丞萨题为中书平章政事宣政使奇尔济苏为中书右丞中书平章政事图勒噶特穆尔知枢密院事己酉敕诸王驸马勋旧大臣及中书省枢密院御史台秩正二品百司庶府秩至一品者阙门内施绳床以坐余皆禁之辛亥以江浙岁比不登其海运粮不及数俟来岁补运丙辰给宿卫士蒙古汉军三万人御寒衣命江浙行省范铜造和宣圣庙祭器凡百三十有五事庚申以巴延为徽政院使依前开府仪同三司浚宣王太保录军国重事甲子皇弟雅克特古斯受戒于西僧嘉勒斡巴勒丙寅楚邱县河堤坏发民丁二千三百五十人修之十一月壬申命郯王齐齐克图镇辽阳戊寅尊皇后曰皇太后御兴圣殿受朝贺壬辰帝崩年七岁葬起辇谷谥曰冲圣嗣孝皇帝

庙号宣宗 【王祎曰宣宗之立虽母后权臣利于立幼抑文宗顾命舍其子而立兄子是不可谓非公天下之心也然终不足以掩弑兄之恶人心天理吁可畏哉谨按通鉴辑览 御批谓文宗此举实欲掩其弑兄之罪且以矫仁宗不传位武宗二子之非耳孰知郕王既不永年而顺帝并至覆其宗社付托不慎贻害若斯明臣王祎乃谓其有公天下之心不亦谬乎恭录识之】

宣宗一年 【即文宗至顺三年】

钦定续通志卷六十八

●钦定续通志卷六十九 元纪十三

元纪 【十三】

顺帝 【一】

○顺帝一

顺帝名托欢特穆尔明宗长子母哈喇鲁特氏郡王阿尔斯兰之裔孙也初太祖取西北诸国阿尔斯兰率其众来降乃封为郡王俾领其部族及明宗北狩过其地纳哈喇鲁特氏而生帝文宗至顺元年明宗后班布尔实被讒遇害遂徙帝于高丽使居大青岛中不与人接阅一载复诏天下言明宗在朔漠之时素谓非其已子乃移于广西之静江 【按庚申外史谓帝为瀛国公子盖由文宗欲废帝而立己子故因帝乳母夫言播告中外好事者遂转相附会耳又案纪事本末文宗至顺元年五月黜帝居江南召翰林学士额琳特穆尔书其事于托卜齐延又命虞集书诏告天下与纪所载互异】 三年文宗崩宣宗立已而宣宗又崩雅克特穆尔请立文宗子雅克特古斯文宗后不从曰吾子尚幼托欢特穆尔在广西年十三矣且明宗长子礼当立之乃命中书右丞奇尔济苏迎帝于静江至良乡具卤簿迓之雅克特穆尔既见帝并马徐行具陈迎立意帝幼且畏之一无所答雅克特穆尔疑之故帝至京久不得立适太史亦言帝不可立立则天下乱以故议未决迁延者数月国事皆决于雅克特穆尔奏文宗后而行之癸酉春三月雅克特穆尔死后乃与大臣定议立帝且与帝约曰万岁后其传位于雅克特古斯若武宗仁宗故事于是诸王宗戚奉上玺绶劝进夏六月己巳帝即位于上都大赦时有阿勒呼木特穆尔者明宗亲臣也言于帝曰天下事重宜委宰相决之庶可责其成功若躬自听断则必负恶名帝信之由是深居宫中每事无所专焉辛未以巴延为太师中书右丞相上柱国监修国史兼奎章阁大学士领学士院太史院回回汉人司天监事萨都为太傅左丞相秋八月立雅克特穆尔女巴约特氏为皇后 【按雅克特穆尔传立

后在至元元年三月纪事本末在是年九月皆与纪异】 九月甲寅中书省臣言官员递升窒碍选法今请自省院台官外其余不许递升从之
庚申诏太师右丞相巴延太傅左丞相萨都专理国家大事余官不得兼领三职诏免儒人役冬十月戊辰诏改是年为元统元年丁丑依皇太后行年之数释放罪囚二十七人戊子封萨都为荣王腾吉斯袭父封为太平王进阶金紫光禄大夫十一月辛卯朔罢当州金课丙申巩昌成纪县地裂山崩令有司赈被灾人民辛丑起梭毛殿辛亥江西湖广江浙河南复立榷茶运司封巴延为秦王锡金印 【巴延传进封秦王在元统二年十一月与纪异】 乙卯以雅克特穆尔平江旧赐田五百顷复赐其子腾吉斯罢河闲大报恩寺诸色人匠总管府十二月乙丑广西猺寇湖南陷道州千户郭震战死壬申遣省台官分理天下囚
元统二年春正月辛卯以御史大夫图卜台为中书平章政事 【按元史宰相表图卜台为平章政事在元统元年与纪异】 阿尔哈雅为河南行省左丞相甲寅罢广教总管府二月己未朔诏内外兴举学校癸亥广西猺寇边杀官吏诏广海官已除而未上者罪之乙丑以雅克布琳为太保置僚属戊辰封额尔勤额布根为昌宁王甲申太庙木陛坏遣官告祭三月己丑朔诏科举取士国子学积分饬学钱粮儒人免役悉依累朝旧制学校官选有德行学问之人以充辛卯以阴阳家言罢造作四年癸巳广西猺寇复起杀同知元帅奇尔萨遣右丞图噜默色将兵讨之乙巳益都真定盗起诏选省院官往督捕之仍募能擒获者倍其实丁未以河南行省左丞相阿尔哈雅为江浙行省左丞相壬子广西庆远府猺寇全州诏平章政事特默齐统兵击之丁巳诏蒙古色目犯奸盗诈伪之罪者隶宗正府汉人南人犯者属有司夏四月戊午朔日有食之庚申封宗室曼济为文济王壬申以腾吉斯为总管高丽女真汉军万户府达噜噶齐与汉济勒噶台并为御史大夫己卯加荣王左丞相萨都开府仪同三司上柱国录军国重事癸未立盐局于京师南北城官自卖盐以革专利之弊乙酉中书省臣言佛事布施费用太广以世祖时较之岁增金三十八锭银二百三锭四十两缗帛六万一千六百余匹钞二万九千二百五十余锭请除累朝期年忌日之外余皆罢从之是月帝如上都五月己丑宦者博啰特穆尔传皇后旨取盐一十万引人中政院辛卯以腾吉斯代萨都为中书左丞相萨都仍商量中书省事壬辰以中书平章政事萨题领蒙古国子监戊申以文济王曼济镇大名云南王阿噜镇云南是月以江浙大饥发常平义仓赈之并存海运粮七十八万三百七十石以备不虞诏王侯宗戚军站人匠鹰坊控鹤但隶京师诸县者所在

一体役之六月乙亥腾吉斯辞左丞相不拜复命萨都
为左丞相辛巳诏蒙古色目人行父母丧秋七月壬辰帝如大安阁壬寅诏蒙古色目人
犯盗者免刺丙午帝如楠木亭八月戊午祭社稷 【
自是复举上戊之典】 辛未大赦九月辛卯帝还大都甲午猺贼陷贺州发河南江浙江
西湖广诸军及八番义从军命广西宣慰使都元帅章
巴延击之冬十月乙卯朔正内外官朝会议班次一依品从辛酉以侍御史许有壬为中
书参知政事癸未命台宪部官各举材堪守令者一人
十一月戊子中书省臣请发两■〈舟宗〉船下番为皇后营利十二月甲戌诏整治学
校

至元元年春正月癸巳申命廉访司察郡县劝农官勤惰达大司农司以凭黜陟二
月甲寅朔革冗官乙卯车驾将田于柳林以御史台臣
谏而止三月癸未朔遣五府官决天下囚御史台臣言丞相已领军国重事省院台官俱
不得兼领各卫从之平伐都云定云酋长宝郎天都虫
等来降即其地复立宣抚司参用其土酋为官庚子御史台臣言高丽为国首效臣节而
近年屡遣使往选取媵妾至使生女不举女长不嫁乞
赐禁止从之乙巳以中书左丞王结参知政事许有壬知经筵事封安南世子陈端午为
安南国王夏四月癸丑朔诏诸官非节制军马者不得
佩金虎符辛酉以江南行御史台中丞布哈为中书省参知政事己巳加腾吉斯开府仪
同三司己卯诏翰林国史院纂修累朝实录及后妃功
臣列传庚辰罢功德典瑞营缮集庆翊正羣玉缮工金玉珠翠诸提举司以萨题为御史
大夫禁犯御名五月戊子帝如上都遣使者诣曲阜孔
子庙致祭壬辰命严谥法以绝冒滥甲辰巴延请以右丞相让腾吉斯诏不允以腾吉斯
为左丞相 【按巴延传是时萨都已卒纪略之】 六
月庚辰腾吉斯作乱及其弟塔喇海皆伏诛诸王鸿和特穆尔自杀执皇后巴约特氏幽
于别所秋七月辛巳朔以满济勒噶台阿恰齐并为御
史大夫壬午巴延弑皇后巴约特氏于开平民舍壬辰加满济勒噶台银青荣禄大夫开
府仪同三司领承徽寺壬寅专命巴延为中书右丞相
罢左丞相不置乙巳罢雅克特穆尔腾吉斯举用之人戊申诛达哩及阿恰齐等于市诏
曰曩者文宗皇帝以雅克特穆尔尝有劳伐父子兄弟
显列朝廷而辄造事衅出朕远方文皇寻悟其妄有旨传次于予雅克特穆尔贪利幼弱
复立朕弟伊埒哲伯不幸崩殂今丞相巴延追奉遗诏
迎朕于南既至大都雅克特穆尔犹怀两端迁延数月天陨厥躬巴延等同辞翊戴乃正
宸极后萨都达哩腾吉斯相袭用事交通宗王鸿和特
穆尔图危社稷阿恰齐亦尝与谋赖巴延等以次掩捕明正其罪元凶构难貽我皇太后

震惊朕用兢惕永惟皇太后后其所生之子一以至公
为心亲挈大宝畀予兄弟迹其定策两朝功德隆盛近古罕比虽尝奉上尊号揆之朕心
犹为未尽已命大臣特议加礼巴延为武宗捍御北边
翼戴文皇兹又克清大憝明饬国宪爰赐达尔罕之号至于子孙世世永赖可赦天下八
月癸亥诏以岐阳王谔着哲特穆尔知枢密院事特穆
尔布哈并为御史大夫甲子加谔勒哲特穆尔太傅己卯议尊皇太后为太皇太后许有
壬谏以为非礼不从九月庚辰车驾驻扼虎岭丙戌赦
丁亥封知枢密院事奇尔济苏为宣国公太保中书平章政事鼎珠为宣德王庚子御史
台臣言国朝初用宦官不过数人今内府执事不下千
余乞依旧制裁减冗滥广仁爱之心省糜费之患从之丙午诏以乌撒乌蒙之地隶四川
行省是月帝还大都冬十月丙辰以大司农塔斯哈雅
为太尉置僚属商议中书省事丁巳以达实特穆尔为太禧院使议军国重事流鸿和特
穆尔达哩腾吉斯子孙于边地癸亥流御史大夫谔勒
哲特穆尔于广海安置选省院台宗正府通练刑狱之官分行各道与廉访司审决天下
囚戊辰监察御史吕思诚等十九人劾奏彻尔特穆尔
之罪不听皆辞去惟陈允文以不署名留十一月庚辰敕以所在儒学贡士庄田租给宿
卫衣粮诏罢科举乙酉巴延请内外官悉循资铨注今
后无得保举滞选法从之丁酉以户部尚书徐奭吏部尚书鼎珠参议中书省事戊戌召
前知枢密院事布敦实喇布哈实喇德格还京师辛丑
诏改元统三年仍为至元元年 【按年号袭旧于古未闻袭其名而不蹈其实更为无益
伏读通鉴辑览 御批谓法祖贵乎遵循成宪岂
在沿用旧名洵为至论谨录识之】 十二月丁巳诏巴延领宫相府壬戌命四川云南行
省保选蛮夷官以俟铨注乙丑奉玉册玉宝上太皇太
后尊号曰赞天开圣徽懿昭宣贞文慈佑储善衍庆福元太皇太后丁丑西番贼起遣兵
击之戊寅蒙古国子监成闰月乙酉诏四川盐运司仍
于官井造盐余井听民煮造收其课十之三壬辰诏宗室托克托穆尔袭封荆王赐金印
命掌莽赉诸军设立王府官属戊戌御史台臣复劾奏
中书平章政事彻尔特穆尔罪罢之壬寅流彻尔特穆尔于南安是岁赐天下田租之半
二年春正月置都水庸田使司于平江二月丁酉追尊帝生母玛里达为贞裕徽圣
皇后庚子进封宣靖王迈努为益王三月甲戌复四川
盐井之禁以旺嘉努为宣政院使加金紫光禄大夫夏四月丁丑朔禁民闲私造格例戊
寅封驸马博啰特穆尔为毓德王丁亥禁服麒麟鸾凤
白兔灵芝双角五爪龙八龙九龙万寿福寿字赭黄等服庚寅以知枢密院事特穆尔布
哈为中书平章政事萨题为御史大夫戊戌帝如上都

以中书左丞耿焕为侍御史王德懋为中书左丞五月丙午朔黄河复于故道六月庚辰命中书平章政事昂吉尔知经筵事戊子以特穆尔布哈为江浙行省左丞相辛卯礼部侍郎呼喇台请复科举取士之制不听秋七月庚戌以鼎珠索诺木参议中书省事庚申禁隔越中书口传敕旨冒支钱粮癸酉命宗王布呼齐驸马伊噜布哈特古斯嘉珙镇苏鲁克吉鲁尔之地八月甲戌朔日有食之壬辰立屯卫于满济勒噶之地庚子诏强盗皆死盗牛马者劓盗驴骡者黥额再犯劓盗羊豕者墨项再犯黥三犯劓劓后再犯者死盗诸物者照其数估价省院台五官府三年一次审决着为令九月癸亥弛巩昌总帅府汉人军器之禁戊辰帝还大都冬十月己亥诏每日右丞相巴延太保鼎珠中书平章政事博罗昂吉尔聚议于内廷平章政事塔斯哈雅右丞衮布巴勒参知政事纳琳许有壬等聚议于中书十一月壬子以诺海为湖广行省平章政事讨广西叛徭丁巳遣河南行省平章政事伊噜布哈于西番为僧癸亥安置宗王布呼齐于梧州辛未禁弹弓弩箭袖箭是岁以雅克特穆尔居第赐灌顶国师纳木喀僧格号大觉海寺塑千佛于其内

三年春正月癸卯广州增城县民朱光卿反其党石昆山锤大明率众从之伪称大金国改元赤符命指挥噶扎尔江西行省左丞实迪讨之戊午帝猎于柳林凡三十五日监察御史绰台宋绍明进谏帝嘉纳之赐金币绰台等固辞帝曰昔魏征进谏唐太宗未尝不赏汝其受之二月壬申朔日有食之棒胡反于汝宁信州破归德府鹿邑禁陈州屯营于杏冈命河南行省左丞庆通讨之丙子立船户提举司及提领定船户科差甲申定服色器皿舆马之制辛卯振江浙等处饥民开所在山场河泊之禁广西徭贼复反命湖广行省平章诺海江西行省平章图噜默色哈雅讨之庚子中书参知政事纳琳等请立采珠提举司先是尝立提举司泰定闲以其烦扰罢去至是纳琳请复立之且以采珠户四万赐巴延三月戊午立鸿吉哩氏巴延呼图克为皇后乙丑以宗王雅克特穆尔为大宗正府扎尔固齐夏四月癸酉禁汉人南人高丽人不得执持军器凡有马者拘入官己卯帝如上都壬午高丽王喇特纳实哩朝贺还国【此与前文喇特纳实哩非一人】并其从官赐与有差辛卯合州大足县民韩法师反自称南朝赵王己亥惠州归善县民聂秀卿谭景山等与朱光卿相结为乱命江西行省左丞实迪捕之是月诏省院台部宣慰司廉访司及部府幕官之长并用蒙古色目人禁汉人南人不得习学蒙古色目文字五月辛丑民闲讹言朝廷拘刷童男童女一时嫁娶殆尽戊申诏汝宁棒胡广东朱光卿聂秀卿等皆系汉人凡汉人官于省台院及翰

林集贤者可讲求诛捕之法以闻甲寅诏哈玛尔图及图沁特穆尔为太尉各设僚属幕官西番贼起杀镇西王子丹巴立行宣政院以额森特穆尔为院使往讨之壬戌命四川行省参知政事吉里等捕反贼韩法师秋七月癸卯车驾出猎丁未如龙冈洒马乳以祭庚申诏除人命重事之外凡盗贼诸罪不须候五府官审录有司依例决之是月朱光卿就擒八月辛巳京畿盗起癸未弛高丽执持军器之禁仍令乘马戊子汉人镇遏生番处并开军器禁是月帝还大都九月己酉立四川湖广江西江浙行枢密院冬十月乙亥命江浙行省丞相吹斯戡提调海运十一月丙午立屯田于雄州癸亥振宣德等处地震死伤人户十二月以满济勒噶台为太保分枢密院镇北边巴延请杀张王刘李赵五姓汉人帝不从征西域僧桑结喇嘛至京师号灌顶国师赐玉印

四年春正月丙申以地震赦天下诏内外廉能官父母年七十无侍丁者附近铨注以便侍养是月诏修曲阜孔子庙二月丁卯罢河南江西江浙湖广四川等处行枢密院庚午车驾猎于柳林三月辛酉命中书平章政事昂吉尔监修至正条格夏四月辛未以特默齐济尔噶岱为中书平章政事癸酉以托克托为御史大夫乙亥命昂吉尔为奎章阁大学士兼知经筵事己卯帝如上都河南执棒胡至京师诛之五月辛酉诏土番宣慰司军士许乘马执兵器湖广行省原领新化洞古州潭溪龙里洪州诸洞三百余处洞民六万余户分隶靖州是月命佛嘉律为考功郎中乔林为员外郎魏宗道为主事考较天下郡县官属功过令阿勒锦复为中书平章政事六月辛巳袁州民周子旺反寻伏诛是月漳州路南胜县民李志甫反围漳城守将吹斯戡与战失利诏江浙行省平章拜布哈发浙闽江西广东军讨之秋七月壬寅诏以巴延有功立生祠于涿州汴梁八月癸亥朔日有食之甲申云南老告土官八那遣侄那赛赍象马来朝为立老告军民总管府是月帝还大都十一月丁卯立绍熙府军民宣抚都总使司十二月戊戌立邦牙等处宣慰司都元帅府并总管府壬寅以宣徽使伯勒奇尔布哈为御史大夫

五年春正月癸亥禁滥予僧人名爵二月庚子免广海添办盐课万五千引夏四月帝如上都秋七月戊寅诏诸王位下官毋入常选八月丁亥帝还大都九月丁巳以沈阳饥振之冬十月壬辰禁倡优盛服许男子裹青巾妇女服紫衣不许戴笠乘马甲午以巴延为大丞相加元德上辅功臣之号赐七宝玉书龙虎金符十一月戊辰开封■〈木巳〉县人范孟反诈称诏使杀河南行省平章政事伊噜特穆尔左丞齐喇廉访使谔勒哲布哈等寻伏诛十二月辛卯复立都水庸田使司于平江先是尝置而罢至

是复立是岁敕赐曲阜宣圣庙碑

六年春正月甲戌立司禋监 【按元史百官志至元元年十二月依世祖故事复立司禋监与纪异】 奉太祖太宗睿宗三朝御容于石
佛寺二月己亥黜中书大丞相巴延为河南行省左丞相诏曰朕践位以来命巴延为太师秦王中书大丞相而巴延专权自恣欺朕年幼轻视太皇太后及朕弟雅克特古斯变乱祖宗成宪虐害天下加以极刑允合舆论朕念先朝之故尚存悯恤今出为河南行省左丞相所有原领诸卫亲军并集赛台人等诏书到时即许散还以太保满济勒噶台为太师中书右丞相太尉塔斯哈雅为太傅知枢密院事塔玛齐为太保御史大夫托克托为知枢密院事旺嘉努为中书平章政事岭北行省平章政事额森特穆尔为御史大夫壬寅诏除知枢密院事托克托之外诸王侯不得悬带弓箭环刀辄入内府乙巳罢各处船户提举广东采珠提举二司丁未罢通州河西务等处抽分按利房大都东里山查提领所三月甲寅漳州民陈君用袭杀反贼李志甫授君用同知漳州路总管府事癸亥以知枢密院事托克托御史大夫伯勒奇尔布哈知枢密院事雅克布哈知经筵事 中书参议阿兰法珠兼经筵官辛未诏徙巴延于南恩州阳春县安置未至死于道丁丑以治书侍御史达实特穆尔为奎章阁大学士翰林直学士济密斯为奎章阁供奉学士夏四月庚寅以同知枢密院事特穆尔达实为中书右丞丙午封满济勒噶台为忠王加达尔罕之号满济勒噶台辞五月癸丑禁民闲藏军器己未漳州龙岩尉黄佐才获李志甫余党郑子箕佐才因与贼战妻子四十余口皆遇害以佐才为龙岩县尹丙子帝如上都六月丙申撤文宗庙主徙太皇太后布达实哩东安州安置放太子雅克特古斯于高丽诏曰昔我皇祖武宗升遐之后祖母太皇太后惑于憊愿俾皇考出封云南及英宗遇害泰定告终我皇考远居朔漠宗王大臣同心翊戴于时以地近先迎文宗暂总机务继知天理人伦所在假让位之名以宝玺来上皇考推诚不疑即授以皇太子宝文宗当躬迓之际乃与其臣伊噜布哈阿哩雅明埒栋阿等谋为不轨使我皇考饮恨上宾归而再御宸极海内闻之靡不切齿又私图传子乃构邪言嫁祸于班布尔实皇后谓朕非明宗之子遂俾出居遐陬祖宗大业几于不继内怀愧慊则杀阿哩雅以杜口上天不佑随降殒罚叔婶布达实哩怙其势焰舍冢嗣而立孺稚奄复不年诸王大臣以贤以长扶朕践位每念治必本于尽孝事莫先于正名赖天之灵权奸屏黜尽孝正名不容复缓其命太常撤去图卜特穆尔在庙之主布达实哩阴构奸臣僭膺太皇太后之号迹其离闲骨肉罪恶尤重揆之大义削鸿名徙

东安州安置雅克特古斯昔虽幼冲理难同处朕终不陷于覆辙专务残酷惟放诸高丽当时贼臣伊噜布哈哩雅已死其以明噶克栋阿等明正典刑监察御史崔敬言雅克特古斯不宜放逐不报是月振济南历城县饥秋七月戊午以星异地震蝗旱颁罪己诏亨于太庙己未以琳沁巴勒为御史大夫戊寅命达哈库库等删修大元通制八月壬午以额森特穆尔为御史大夫戊子祭社稷是月车驾至自上都九月辛亥明噶克栋阿伏诛冬十月甲申尊皇考为顺天立道睿文智武大圣孝皇帝亲裸太室庚寅振奉符长清元城清平四县饥壬寅以托克托为中书右丞相特穆尔布哈为中书左丞相是月河南宜阳等县大水给死者殡葬钞振粮两月十一月辛未孔克坚袭衍圣公振处州婺州饥十二月复科举取士制戊子罢太禧宗禋等院改奎章阁为宣文阁

至正元年春正月己酉朔改元癸亥诏天寿节禁屠宰六日是月以托克托领经筵事命永明寺写金字经一藏三月庚戌罢两淮屯田手号打捕军役令属本所领之癸丑命屯储御军于河南芍陂洪泽德安三处屯种甲寅给还特穆尔布哈宣让王印镇淮西夏四月丁丑道州土贼藏丙等反破江华县掠明远县庚寅以中书右丞特穆尔达实为平章政事阿噜为右丞许有壬为左丞是月帝如上都五月戊申以崇文监属翰林国史院己未罢河西务行用库闰月甲午赏赐扈从明宗诸王官属八百七人金银钞币各有差六月戊午禁高丽及诸处民以亲子为宦者因避赋役戊辰改旧奎章阁为宣文阁秋八月帝还大都冬十月己酉封阿实克布哈为顺懿王实保齐哈沙顺国公甲寅中书省臣奏海运不给宜令江浙行省于中政院财赋府拨赐诸入寺观田粮总运二百六十万石从之十一月丙子道州路贼何仁甫等反庚子猺贼寇边湖广行省平章政事袞布巴勒讨平之十二月乙卯诏民年八十以上蒙古人赐缙帛二表里其余州县旌以高年耆德之名免其家杂役壬戌云南车里寒赛刀等反云南行省平章政事托克托穆尔讨平之

二年春正月丙戌开京师金口河二月壬寅颁农桑辑要乙卯李实迪伪造御宝圣旨称枢密院都事伏诛夏四月己酉罢云南蒙庆宣慰司是月帝如上都五月丁亥以江浙行省平章政事济尔噶岱为河南行省平章政事六月戊申命江浙拨赐僧道田还官征粮以备军储乙丑罢邦牙宣慰司秋七月己亥庆远路莫八聚众反攻陷南丹左右两江等处托克托济延讨平之八月庚子朔日有食之九月己巳诏遣湖广行省平章政事袞布巴勒领河南江浙湖广诸军讨道州贼平之复平巉峒堡寨二百余处

辛未帝还大都丁丑京城强贼四起冬十月己亥朔日
有食之壬戌遣官致祭孔子于曲阜甲子杭州嘉兴绍兴温州台州等路各立检校批验
盐引所权免两浙额盐十万引福建余盐三万引十一
月甲申诏免云南明年差税十二月丙午命中书右丞太平枢密副使姚庸御史中丞张
起岩知经筵事辛亥封鸿和特穆尔之子彻尔特穆尔
为抚宁王丙辰赐云南行省参知政事布拉三珠虎符以兵讨捕叛蛮癸亥阿鲁图们等
以谋害宰臣图为叛逆伏诛

三年春二月丁未辽阳沃济野人叛三月壬申造盥顶殿以终场下第举人充学正
山长国学生会试不中者与终场举人同戊寅诏作新
风宪在内官不法者监察御史劾之在外官不法者行台监察御史劾之岁八月出巡次
年四月中还司是月诏修辽金宋三史以中书右丞相
托克托为都总裁官中书平章政事特穆尔达实中书右丞太平御史中丞张起岩翰林
学士欧阳玄侍御史吕思诚翰林侍读学士济密斯为
总裁官夏四月丙申朔日有食之是月帝如上都六月壬子命经筵官月进讲者三是月
回回拉里五百余人渡河寇掠解吉隰等州中书户部
以国用不足请撙节浮费秋七月戊辰修大都城戊寅立永昌等处宣慰司八月甲午朔
命图沙玛同知宣慰司事纛勒噶等讨四川上蓬琐吃
贼戊戌山东有贼焚掠兖州是月帝还大都九月甲子湖广行省平章政事袞布巴勒擒
道州贺州猺贼首唐大二蒋仁五至京诛之其党蒋丙
自号顺天王攻破连桂二州冬十月己酉帝亲祀上帝于南郊以太祖配癸丑以金枢密
院事韩元善为中书参知政事中书参议敏珠尔丹同
知宣徽院事己未以郊祀礼成大赦文官普减一资武官升散官一等蠲民闲田租五分
赐高年帛以湖广行省平章政事袞布巴勒为宣徽院
使行枢密院知院拉拉为翰林学士承旨十二月丙申诏写金字藏经丁未以伯勒齐尔
布哈为中书左丞相是岁诏立常平仓罢民闲食盐征
遗逸托音巴延张瑾杜本本辞不至

四年春正月辛巳定守令黜涉之法庚寅河决曹州雇夫万五千八百修筑之二月
以中书右丞太平为平章政事 【按续通鉴以贺惟
一为平章政事复拜御史大夫故事台省正官非国姓不以授惟一固辞诏特赐姓改其
名曰太平】 闰月辛酉朔永平澧州等路饥振之三月
壬寅特授巴特玛多尔济征东行省左丞相嗣高丽国王癸丑以河南行省平章政事纳
琳为中书平章政事集贤大学士姚庸为中书左丞夏
四月帝如上都五月乙未右丞相托克托辞职不许甲辰许之以阿鲁图为中书右丞相
乙巳封托克托为郑王六月戊辰巩昌陇西县饥每户

贷常平仓粟三斗俟年丰还官己巳赐托克托松江田为立松江等处稻田提领所秋七月戊子朔益都濒海盐徒郭和尔齐作乱八月郭和尔齐上太行由陵川入壶关至广平杀兵马指挥复还益都是月帝还大都九月丁亥朔日有食之辛亥以南台治书侍御史秦从德为江浙行省参知政事提调海运癸丑命御史大夫额森特穆尔平章政事特穆尔达实知经筵事右丞达实特穆尔提调宣文阁知经筵事 【按元史宰相表是年九月以达实特穆尔为右丞董守简为左丞本纪俱未载】 冬十月乙酉议修黄河淮河堤堰十一月丁亥朔以各郡县民饥不许抑配食盐复令民入粟补官以备振济戊子禁内外官民宴会不得用珠花十二月己未四川廉访司建言广元等五路广安等三府永宁等两宣抚司请依内郡设置推官一员从之戊寅猺贼寇靖州是岁猺贼寇浔州同知府事保通率民兵击走之

五年春三月以陈思谦参议中书省事夏四月丁卯敕大都流民官给路粮遣其还乡是月募富民出米五十石以上者旌以义士号帝如上都五月己丑诏以军士所掠云南子女一千一百人放还乡里仍给其行粮不愿归者听丁未河闲转运司灶户被水灾诏权免余盐二万引候年丰还官秋七月丙午以额森特穆尔特穆尔达实并为御史大夫八月帝还大都九月壬午朔日有食之辛丑以中书右丞达实特穆尔为翰林学士承旨中书参知政事绰斯戩为右丞资政院使多尔济巴勒为中书参知政事冬十月壬子以中书平章政事太平为御史大夫辛酉命奉使宣抚巡行天下辛未辽金宋三史成右丞相阿鲁图进之帝曰史既成书前人善恶朕当取为法戒然岂止激劝为君者为臣者亦当知之卿等其体朕心以前代善恶为勉己卯监察御史布达实哩请罢造作不急之务是月以吕思诚为中书参知政事 【按元史宰相表是时改参知政事韩元善为司农大卿故以吕思诚代之纪未详载】 十一月甲午至正条格成奉元路陈望叔伪称雅克特古斯太子伏诛十二月

丁巳诏定荐举守令法是岁宣徽院使都棱特穆尔知枢密院事冯思温为御史中丞六年春二月庚戌朔日有食之三月辛未盗扼李开务之闸河劫商船戊申京畿盗起范阳县请增设县尉及巡警兵从之山东盗起诏中书参知政事索诺木巴勒至东平镇遏夏四月壬子辽阳为捕海东青烦扰沃济野人及硕达勒达皆叛甲寅以中书参知政事吕思诚为左丞丁卯帝如上都万户迈珠等讨沃济野人遇害诏恤其家以中书左丞吕思诚知经筵事命左右二司六部吏属于午后讲习经史五月壬午象州盗起丁亥盗窃太庙神主丁酉以黄河决立河南山东都水监六月己酉汀州连城县

民罗天麟陈积万叛陷长汀县福建元帅府经历真宝万户廉和尚等讨之丁巳云南贼死可伐作乱侵夺路甸命额图珲为云南平章讨之秋七月丁亥散毛洞蛮覃全在叛招降之以为散毛誓厓等处军民宣抚使癸巳诏选集赛官为路府县达噜噶齐丙申以多尔济巴勒为中书右丞达尔玛为参知政事壬寅以御史大夫琳沁巴勒等知经筵事甲辰京畿奉使宣抚鼎鼎举奏御史实巴尔等罪杖黜之八月丙午命江浙行省右丞呼图克布哈江西行省右丞图噜统军合讨罗天麟是月帝还大都九月乙酉复长汀冬闰十月乙亥大赦免差税三分水旱之地全免靖州猺贼吴天保陷黔阳癸未汀州贼徒罗德用杀首贼罗天麟陈积万以首级送官余党悉平十二月甲申复立大护国仁王寺大昭应宫财用规运总管府凡贷民闲钱二十六万余锭辛卯有司以赏赉泛滥奏请恩赐必先经省台院定拟甲午设立哈哈拉塔屯田二处复立八百宣慰司以土官韩部袭其父爵辛丑以济兰巴尔为太尉开府置僚属壬寅山东河南盗起遣左右阿苏卫指挥布尔噶等讨之尚书李綱请躬祀郊庙近正人远邪佞以崇阳抑阴不听

七年春正月甲辰朔日有食之大寒而风朝官仆者数人壬午以中书左丞相伯勒齐尔布哈为右丞相寻辞免丁巳复立东路都蒙古军都元帅府庚申云南老了等蛮来降立老丫耿冻路军民总管府二月庚辰以中书参知政事索诺木巴勒为中书右丞道通为中书参知政事

【按元史宰相表道通为参政在是年三月与纪异】 丙戌以宦者拜特穆尔为司徒是月猺贼吴天保寇沅州以昂吉尔为知枢密院事治军务三月甲辰中书省臣言世祖之朝省台院奏事给事中专掌之以授国史纂修近年废弛恐万世之后一代成宪无从稽考乞复旧制从之乙巳遣使铨选云南官员修光天殿戊午诏编六条政类夏四月辛巳以通政院使都兰格尔为辽阳行省参知政事讨沃济野人已丑以翰林学士承旨鼎珠为中书右丞庚寅复命伯勒齐尔布哈为中书右丞相以特穆尔达实为左丞相通州盗起监察御史言通州密迩京城而盗贼蜂起宜增兵讨之以杜其源不听是月河东大旱民多饥死遣使振之帝如上都五月庚戌吴天保陷武冈诏遣湖广行省右丞实保统军讨之乙丑右丞相伯勒齐尔布哈以灾异迭见罢诏以太保就第六月免太师满济勒噶台官安置西甯州其子托克托请与父俱行以御史大夫太平为中书平章政事秋七月甲寅召隐士谔勒哲图济尔噶朗为翰林侍制张枢董立为翰林修撰李孝先为著作郎张枢不至丁巳以江南行台大夫纳琳为御史大夫是月吴天保复寇沅州陷叙浦辰溪县九月癸卯巴哩纳哈喇

诺海塔尔哈巴贼起断岭北驿道戊申帝还大都甲寅
诏举才能学业之人以备侍卫丁巳中书左丞相特穆尔达实薨辛酉以御史大夫多尔
济为中书左丞相甲子集庆路盗起镇南王博罗布哈
讨平之丁卯吴天保复陷武冈延及宝庆杀湖广行省右丞实保于军中冬十月丁丑诏
左右丞相平章枢密知院御史大夫得赐玉押字印余
官不与丙戌琳沁达喇反遣兵讨之辛卯开东华射圃戊戌西番盗起凡二百余所陷哈
喇和卓劫供御蒲萄酒杀使臣是月吴天保复寇沅州
州兵击走之十一月甲辰沿江盗起两淮运使宋文瓚上言江阴通泰江海之门户而镇
江真州次之国初设万户府以镇其地今戍将非人致
使贼舰往来无常集庆花山劫贼才三十六人官军万数不能进讨反为所败后竟假手
盐徒虽能成功岂不貽笑 【按辍耕录载是时花山
贼毕四等三十六人内一妇一僧尤勇健官军讨之三月不能捕后募盐徒朱陈等率其
党擒之文瓚所言假手盐徒盖指此】 宜亟选智勇以
任兵柄以图后功不然东南五省租税之地恐非国家之有不听拨山东地土十六万二
千余顷属大承天护圣寺庚戌吴天保复陷武冈命湖
广行省平章政事果勒领兵讨之以河决命工部尚书穆尔玛哈穆特行视金堤甲寅吴
天保陷靖州命威顺王库春布哈镇南王博罗布哈及
湖广江西二省以兵讨之己未以韩嘉纳为中书平章政事 【韩嘉纳为平章据宰相表
改】 丁卯湖南猺贼窃发有司不以闻诏罪之是月
满济勒噶台薨召托克托还京师十二月庚午以中书左丞相多尔济为右丞相平章政
事太平为左丞相丙子以连年水旱民多失业选台阁
名臣二十六人出为郡守县令仍许民闲利害实封呈省丙戌中书省臣建议以河南盗
贼出入无常宜分拨达勒达军与扬州旧军于河南水
陆关隘戍守东至徐邳北至夹马营遇贼掩捕从之是岁置中书议事平章四人
八年春正月戊戌以额森特穆尔知枢密院事辛亥诏翰林国史院纂修后妃功臣
列传学士承旨张起岩学士杨宗瑞侍讲学士黄潜为
总裁官左丞相太平左丞吕思诚领其事是月湖广行省右丞桂齐湖南宣慰都元帅谔
勒哲特穆尔讨莫盘洞诸蛮缚其洞首杨鹿五赴京师
二月壬辰复立布达鼐尔图莽果三处屯田是月以前奉使宣抚贾惟贞称职特授永平
路总管诏济甯郟城立行都水监以贾鲁为都水监三
月丁酉诏以束帛旌郡县守令之廉勤者辽东萨古纳反诈称大金子孙硕达勒达路托
克托和斯唐古和尔果斯讨擒之壬寅土番盗起有司
请不拘资级委官讨之福建盗起诏汀漳二州立分元帅府辖之己未遣使诣江浙江西
湖广四川云南铨福建番广蛮夷等处官选辛酉辽阳

乌雅博罗罕妄称大金子孙作乱官军讨斩之是月吴天保复寇沅州夏四月乙亥帝幸国子学赐衍圣公银印升秩从二品定弟子员出身及奔丧省亲等法诏守令选立社长专一劝课农桑京官三品以上岁举守令一人守令到任三月亦举一人自代其谩德齐拱卫百户不得授县达噜噶齐止授佐贰久着廉能则用之丁丑辽阳董哈喇作乱镇抚奇彻讨擒之己卯海甯州沐阳县等处盗起遣翰林学士图沁布哈讨之是月帝如上都命托克托为太傅湖广行省左丞相巴延引兵捕土寇莫万五蛮雷等已而广西峒贼乘隙入寇巴延退走六月丙戌立司天台于上都秋七月丙申朔日有食之辛丑复立五道河屯田壬子量移窜徙官于近地安置死者听归葬乙卯遣使祭曲阜孔子庙丙辰以阿拉克布哈为大司徒八月帝还大都冬十一月辛亥吴天保掠全州是岁台州方国珍为乱聚众海上命江浙行省参知政事多尔济巴勒讨之

九年春正月乙巳广西猺贼复陷道州万户郑均击走之丙午命中书平章政事台哈布哈提调会同馆三月河北溃吴天保复寇沅州夏四月丁丑以知枢密院事奇彻台为中书平章政事己卯以燕南廉访使韩元善为中书左丞壬午以河闲水灾免盐运司课盐三万引是月帝如上都五月戊戌命托克托提调太鄂尔多内史府庚子诏修黄河金堤民夫日给钞三贯庚戌命翰林国史院荐举守令官丙辰定守令督摄之法路府州县以次督摄秋七月庚寅监察御史沃呼海寿劾奏殿中侍御史哈玛尔及其弟舒苏罪恶御史大夫韩嘉讷以闻不省章三上诏夺哈玛尔舒苏官出海寿为陕西廉访副使韩嘉讷罢为宣政院使壬辰令太子阿裕尔实哩达喇习学汉人文书甲午以额森特穆尔为御史大夫乙未以湖广行省左丞相琳沁巴勒知枢密院事甲寅以巴延为集贤大学士乙卯罢右丞相多尔济依前为国王左丞相太平为翰林学士承旨闰月辛酉以托克托为中书左丞相仍太傅韩嘉讷为江浙行省平章政事庚午以伊克扎尔古齐吹斯戡为中书右丞同知枢密院事伊苏乌尔图罕为中书参知政事八月甲辰以集贤大学士巴延为中书平章政事河南行省平章政事伊噜布哈为宣政院使庚戌以司徒雅克布哈提调太史院知经筵事是月帝还大都九月甲子诏凡建言中外利害者委官选其可行之事以闻冬十月丁酉命皇太子阿裕尔实哩达喇入端本堂肄业以托克托领端本堂事司徒雅克布哈知端本堂事十一月戊午朔日有食之十二月丁未吴天保陷辰州是岁诏汰冗官均俸禄赐致仕官及高年帛

十年春正月丙辰朔以中书右丞吹斯戡为平章政事伊苏乌尔图罕为中书右丞

壬戌立四川容美洞军民总管府夏四月己丑左司都
事武祺建言更钞法丁酉大赦是月帝上都秋八月壬寅帝还大都九月壬午托克托
以吏部选格条目繁多莫适据依铨选者得以高下之
请编类为成书从之冬十月乙未吏部尚书谔勒哲图建言更钞法命中书省御史台集
贤翰林两院之臣集议之辛丑置诸路宝泉都提举司
于京城是月大名东平济南徐州各立兵马指挥司以捕上马贼十一月壬子朔日有食
之辛酉罢辽阳滨海民煎熬野盐己巳诏天下以中统
交钞壹贯文权铜钱一千文准至元宝钞贰贯仍铸至正通宝钱并用以实钞法至元宝
钞通行如故十二月壬午朔修大都城辛卯以大司农
图噜等兼领都水监集河防正官议黄河便益事命前同知枢密院事布延布哈等讨广
西猺贼己酉方国珍攻温州

十一年春正月庚申命江浙行省左丞博罗特穆尔讨方国珍二月立湖南元帅府
分府于宝庆路三月庚戌立山东分元帅府于登州壬
戌征建宁处士彭炳为端本堂说书不至夏四月壬午诏开黄河故道命贾鲁以工部尚
书为总治河防使发汴梁大名十三路民十五万庐州
等戍十八翼军二万自黄陵冈南达白茅放于黄固哈只等口又自黄陵西至阳青村合
于故道凡二百八十里有奇仍命中书右丞伊苏乌尔
图罕同知枢密院事哈斯以兵镇之 【宋濂曰先是童谣云石人一只眼挑动黄河天下
反及贾鲁治河果于黄陵冈掘得石人一眼而汝颍
寇起议者谓天下之乱皆由贾鲁治河之役劳民动众所致不知元之亡实基于上下因
循纪纲废弛设不兴是役乱讫无从起乎伏读通鉴辑
览 御批许濂之论为确当而责当日君臣既兴大役不筹万全失寓振于工之良法
盖诚经国之不善无徒借口谣言以成败论事谨录识
之】 乙酉加封河渚神为灵源神佑弘济王仍重建河渚及西海神庙辛丑师壁安抚司
土官盘顺府土官降立长官司四巡检司七是月帝如
上都五月己酉朔日有食之辛亥颍州妖人刘福通作乱以红巾为号陷颍州初栾城人
韩山童祖父以白莲会烧香惑众谪徙广平永年县至
山童倡言天下大乱弥勒佛下生河南及江淮愚民皆翕然信之福通与杜遵道罗文素
盛文郁王显忠韩咬儿复鼓妖言谓山童实宋徽宗八
世孙福通等杀白马黑牛誓告天地欲同起兵为乱事觉县官捕之急福通遂反山童就
擒其妻杨氏同子韩林儿逃之武安壬申命同知枢密
院事图沁以兵讨刘福通六月刘福通据朱皋攻破罗山真阳确山遂犯舞阳叶县等处
江浙左丞博罗特穆尔为方国珍所败秋七月丁巳罢
四川大奴管勾洞长官司改立忠孝军民府是月开河功成乃议塞决河命大司农达实

特穆尔及江浙行省参知政事樊执敬浙东廉访使董
守恂同招谕方国珍八月丙戌萧县李二及老彭赵君用攻陷徐州李二号芝麻李与其
其党亦以烧香聚众而反是月帝还大都蕲州罗田县人
徐贞一名寿辉与黄州麻城人邹普胜等以妖术阴谋聚众遂举兵为乱亦以红巾为号
九月戊申以中书平章政事多尔济巴勒提调宣文阁
知经筵事平章政事鼎珠提调会同馆事壬子以御史大夫额森特穆尔知枢密院事及
卫王库春格尔总率大军讨河南妖寇壬戌诏以高丽
国王布达实哩之弟巴延特穆尔袭其王封布达实哩之子遂废是月刘福通陷汝宁府
及息州光州徐寿辉陷蕲水县及黄州路冬十月癸未
立宝泉提举司于河南行省及济南冀宁等路凡九江浙江西湖广行省等处凡三命知
枢密院事娄章以兵同额森特穆尔讨河南妖寇是月
徐寿辉据蕲水为都国号天元僭称皇帝十一月治河功成遣使告祭河伯召贾鲁还朝
超授集贤大学士赐托克托达尔罕之号俾世袭之命
立河平碑十二月己卯立河防提举司隶行都水监丙戌以治书侍御史乌克逊良楨为
中书参知政事辛丑额森特穆尔复上蔡县擒韩咬儿
等至京师诛之 【按额森特穆尔复上蔡续通鉴纲目载在九月与此异】

十二年春正月戊申竹山县贼陷襄阳总管柴肃死之荆门州亦陷庚戌以宣政院
使伊噜布哈为中书平章政事壬子中书省臣言河南
陕西腹里诸路供给繁重调兵讨贼正当春首耕作之时恐农民不安田亩守令有失劝
课宜委通晓农事官员分道巡视督勒守令亲诣乡都
省谕农民依时播种务要人尽其力地尽其利其有曾经盗贼水患供给之处贫民不能
自备牛种者所在有司给之仍令总兵官禁止屯驻军
马毋得踏践以致农事废弛从之丙辰徐寿辉陷汉阳丁巳陷兴国府己未陷武昌威顺
王库春布哈湖广行省平章政事和尚弃城走辛酉徐
寿辉陷安陆府知府超尔死之辛未徐寿辉兵陷沔阳府推官俞述祖死之壬申中兴路
陷是月拘刷河南陕西辽阳三省及上都大都腹裏等
处汉人马命四川行省平章政事伊噜特穆尔为总兵官与四川行省右丞昌吉讨兴元
金州等处贼宣政院同知僧格率领伊都呼辉和尔军
与荆湖北道宣慰使多尔济巴勒同守襄阳济宁兵马指挥使宝通统领右都卫军从知
枢密院事伊彻察喇讨徐州贼二月丁丑以集贤大学
士贾鲁为中书添设左丞以河南廉访使哈喇多尔济为荆湖北道宣慰使都元帅守襄
阳癸未命诸王图沁守扬州命宁王英实镇四川乙酉
徐寿辉陷江州总管李黼死之遂陷南康路丙戌徐寿辉陷岳州房州贼陷归州戊子置
安东安丰分元帅府辛丑邓州贼王权张椿陷澧州龙

镇卫指挥使温都尔哈玛尔等复之褒赠死义宣徽使特穆尔等二十七人壬寅以御史大夫纳琳为江南行台御史大夫仍太尉命翰林学士承旨巴拉与诸王布呼齐领军守大名癸卯命中书平章政事伊噜布哈知经筵事左丞贾鲁参知政事特哩特穆尔乌克逊良楨并同知经筵事是月贼侵滑浚起德珠为河南右丞守东明徐寿辉陷袁州命特哩特穆尔以中书参知政事分省济宁定远人郭子兴起兵自称元帅与其党孙德崖等破濠州三月丁未徐寿辉攻衡州洞官黄安抚败之陶九陷瑞州总管约苏卜万户张岳败之壬子河南平章台哈布哈复南阳癸丑行纳粟补官之令甲子徐寿辉陷饶州路遂陷徽州信州四川未附生蛮向亚甲洞主墨得什用出降立盘顺府丁卯出币帛于迤北万户千户所易马戊辰诏南人有才学者依世祖旧制中书省枢密院御史台皆用之 【按续通鉴纲目诏省台官兼用南人自世祖以后台省之职南人斥不用至是始复旧制凡南人有才学者并许用之所载较此为详】 中书省臣言张理献言饶州德兴三处胆水浸铁可以成铜宜即其地各立铜冶场直隶宝泉提举司宜以张理就为铜冶场官从之以江浙行省左丞相琳沁巴勒为江西行省左丞相领兵收捕饶信贼庚午诏随朝诸正官各举循良材干智勇兼全堪充守令者二人多者不限员数试用守令并兼管义兵防御诸军鄂啰劝农事是月方国珍复劫其党下海入黄岩港台州路达噜噶齐台哈布哈率官军与战死之闰月壬午以大理宣慰使达实巴图尔为四川行省添设参知政事与本省平章政事耀珠讨山南湖广等处贼乙酉徐寿辉陷安吉路乡民罗明远起兵复之命工部尚书多喇兵部侍郎玛们和卓分诣上都察罕淖尔集宁等处给散出征河南达勒达军口粮立淮南江北等处行中书省治扬州兼辖高邮淮安滁州和州庐州安丰安庆蕲州黄州壬辰以大都留守谔格实为江浙行省添设右丞讨饶信贼丁酉湖广行省参知政事铁杰以湖南兵复岳州戊戌诏淮南行省设官二十五员以翰林学士承旨鸿和尔布哈湖广平章政事实勒们并为平章政事淮东元帅曼济为右丞燕南廉访使秦从德为左丞陕西行台侍御史达实多山北廉访使赵璉并为参知政事庚子以枢密副使乌兰哈达为中书添设参知政事同知经筵事是月诏四川行省平章政事耀珠以兵东讨荆襄贼复忠万夔云阳等州命江西左丞相琳沁巴勒守江东西关隘诸王琳沁巴勒安班参政额森特穆尔与陕西平章伊噜特穆尔讨南阳襄阳贼刑部尚书阿噜讨海寇贼江西右丞和尼齐与参政托迪讨江西贼浙东宣慰使恩宁普守芜湖江西右丞谔格实江浙左丞罗罗与桑节巴延特穆

尔曼济哈雅同讨饶信贼方国珍不受招安之命命江浙左丞尊达实哩讨之额森特穆尔驻军沙河军中夜警军溃退屯朱仙镇诏以中书平章政事曼济代总其兵额森特穆尔还京师仍命为御史大夫夏四月癸卯朔日有食之江西临川贼邓忠陷建昌路甲寅以御史大夫绰斯戩为中书平章政事提调留守司丙辰江西宜黄贼涂佑与邵武建宁贼应必达等攻陷邵武路千户魏淳以计擒之复其城辛酉四川参政僧格实哩复渠州辛未荆门知州聂炳复荆门州是月帝如上都永怀县贼陷桂阳耀珠复归州进攻峡州与峡州总管赵余褫大破贼兵诛李太素等遂平之诏天下完城郭筑堤防命伊都呼伊噜特穆尔领辉和尔军马同豫王喇特纳实哩知枢密院事娄章讨襄阳南阳邓州贼陕西行台御史蒙果勒哈雅范文等纠额森特穆尔丧师辱国乞明正其罪诏不允左选西台御史大夫多尔济巴勒为湖广平章蒙里勒哈雅十二人为各路添设佐贰官五月戊寅命龙虎山张嗣德为三十九代天师海运万户李世安建言权停夏运从之己卯耀珠复中兴路庚辰监察御史齐克特穆尔等言河南诸处羣盗辄引亡宋故号以为口实宜以瀛国公子和尚赵完普及亲属徙沙州安置禁勿与人交通从之罢茺儿棚等处金银场课癸未建昌民戴良起乡兵克复本路乙酉命留守特默格与诸王多尔济守口北龙庆州是月达实巴图尔至荆门增募兵趋襄阳与贼战大败之命尊达实哩仍守芜湖险隘六月丙寅红巾周伯颜陷道州秋七月庚辰饶徽贼犯昱岭关陷杭州路 【按续通鉴纲目徐寿辉遣项普略引兵掠饶徽诸州遂犯昱岭关攻杭州城中猝无备参政樊执敬死之时济宁路总管董抟霄从江浙平章嘉珩征安丰奉命移军援江南遂渡江率兵复之较此倍详】 辛巳命通政院使达尔玛实哩与枢密副使图沁布哈讨徐州贼己丑湘乡贼陷宝庆路庚寅托克托亲请出师讨徐州诏许之辛卯命以托克托为行枢密院使提调二十万户丁酉以杜秉彝为中书添设参知政事湖南元帅副使苏尔约苏哈雅总管乌雅思忠复宝庆路是月徐寿辉陷福安宁德等县八月甲辰以同知枢密院事哈玛尔为中书添设右丞丁巳以中书平章政事布哈知经筵事托克托将出师尚书穆尔玛哈穆特等上言大臣天子之股肱中书庶政之根本不可以一日离乞诏留之不报丁卯诏托克托以达尔罕太傅中书右丞相分省于外督制诸处军马讨徐州省院台分官属从行稟受节制即日发京师是月帝还大都安陆贼将俞君正复陷荆门州知州聂炳死之贼将党仲达复陷岳州九月乙亥俞君正复陷中兴耀珠领兵与战于楼台败绩奔松滋本路判官绅图死之癸未中兴义士

范中偕荆门僧李智复中兴路俞君正败走龙镇卫指挥使温都尔哈玛尔领兵入城耀珠自松滋还屯兵于石马乙酉托克托至徐州辛卯托克托复徐州屠其城李二遁走己亥贼攻辰州达噜噶齐和尚击走之庚子诏加托克托为太师班师还京冬十月庚戌以平章鼎珠右丞哈玛尔同知经筵事十一月辛未命江浙平章庆通收捕常州贼乙亥以桑节为江西平章击徐寿辉兵于湖口败绩死之癸未命江浙行省右丞特哩特穆尔总兵讨方国珍十二月壬寅达实巴图尔复襄阳辛亥诏以杭常湖信广德诸路皆克复赦诖误者蠲其夏税秋粮命有司抚恤其民癸亥托克托请兴近畿水利召募江南人耕种岁可得粟麦百万余石不烦海运而京师足食帝曰此事有利于国家其议行之是岁海运不通立都水庸田使司于汴梁掌种植之事颍州沈邱人察罕特穆尔与信阳州罗山人李思齐同起义兵破贼有功授察罕特穆尔中顺大夫汝宁府达噜噶齐李思齐知汝宁府

钦定续通志卷六十九

●钦定续通志卷七十 元纪十四

元纪 【十四】

顺帝 【二】

○顺帝二

至正十三年春正月庚午朔用帝师请释放在京罪囚以中书添设右丞哈玛尔为中书右丞 【按哈玛尔传十二年八月为添设右丞十三年正月正除右丞八月由右丞除宣政院使至十四年十二月始为平章政事元史宰相表同十二年八月本纪亦称为添设右丞未尝为添设平章也原文误作平章政事今改】 参知政事乌兰哈达乌为添设右丞 【按元史宰相表乌兰哈达于是年正月代哈玛尔四月为正今于右丞上增添设二字】 参知政事乌克逊良楨为左丞辛未立分司农司 【立分司农司据续通鉴增】 以乌兰哈达乌克逊良楨兼大司农卿给分司农司印西自西山南至保定河闲北抵檀顺州东及迁民镇凡系官地及元管屯田悉从分司农司立法佃种给钞五百万锭供其费乙亥命中书右丞托克托讨商州贼丙子方国珍复降庚辰中书省臣言近立分司农司宜于江浙淮东等处召募能种水田及修筑围堰之人各一千名为农师教民播种宜降空名添设职事敕牒一十二道遣使赍往其地有能募农民一百名者授正九品二百名者正八品三百名者从七品即书填流官职名给之就令管领所募农夫不出四月十五日俱至田所期年为满即放还家其所募农夫每名给钞十锭从之

以杜秉彝为中书参知政事丙戌以达实巴图尔为四川行省右丞庚寅知枢密院事娄章复南阳唐州二月甲寅立托克托平徐勋德碑壬戌以宣政院使都棱特穆尔知经筵事 中书右丞乌兰哈达左丞乌克逊良楨参知政事杜秉彝并同知经筵事三月己卯以托克托领大司农司丁亥命托克托以太师开府提调太师院回回汉儿司天监是月命江浙行省左丞特哩特穆尔江南行台侍御史尊达实哩招谕方国珍夏四月帝如上都五月辛未江西行省左丞相琳沁巴勒江浙行省左丞罗罗引兵取道自信州元帅韩邦彦哈玛尔取道由徽州浮梁同复饶州蕲黄等贼皆溃走乙未泰州白驹扬亭民张士诚及其弟士德士信作乱陷泰州及兴化县遂陷高邮据之六月丙申朔立詹事院丁酉立子阿裕实哩达喇为太子以右丞相托克托兼詹事庚子命知枢密院事实喇巴图总河南军四川右丞达实巴图尔总四川军 【按达实巴图尔于本年正月为四川右丞至十四年三月始为平章政事俱见本纪此误预书平章今改】自襄阳分道而下复安陆府癸卯诏淮南平章达实特穆尔总领汉军蒙古守御淮安辽东沃济野人扎雅罕及奇塔特昆卓奇雅珠等以皮货来降给银牌一面令管沃济野人辛亥以前河西廉访副使额森布哈为淮西添设宣慰副使讨泰州是月诏淮南行省平章政事福寿讨兴化秋七月戊辰命宦官至一二品者依常例给俸禄壬申湖广参政鄂尔和复武昌及汉阳府癸酉诏詹事院自行铨注本院属官八月帝还大都资政院使托和齐复江州路左迁平章政事耀珠 【按元史宰相表未载耀珠为中书平章政事】为淮西元帅供给乌撒军进讨蕲黄九月乙丑朔日有食之己丑建皇太子盥顶殿于圣安殿西冬十月丁未广西元帅甄崇福复道州诛贼将周伯颜庚戌从特哩特穆尔尊达实哩之请授方国珍徽州路治中国璋广德路治中国瑛信州路治中督遣之任国珍等不受命立水军都万户府于昆山州以浙东宣慰使纳琳哈喇为正万户宣慰使董抟霄为副万户是月撤世祖所立毡殿改建殿宇十一月丁亥江西右丞和尼齐以兵平富州临江遂复瑞州是月立义兵千户水军千户所于江西事平愿还为民者听十二月江浙行省平章政事巴延特穆尔南台御史中丞曼济哈雅及四川行省参知政事哈喇图左丞桑图实哩西寇王英实合军讨徐寿辉于蕲水败之寿辉遁走获伪官四百余人陕西行省平章政事博啰四川行省右丞达实巴图尔复均房等州濠人朱元璋起兵据滁州 【是为明太祖】是岁造清宁殿前山子月宫诸殿宇以宦官留守额森特穆尔留守同知伊苏岱尔及都水少监陈阿穆尔克等董其役

十四年春正月癸酉立辽阳等处漕运庸田使司属分司农司是月达实巴图尔复峡州二月己未以湖广行省平章政事果勒为淮南行省平章政事讨张士诚是月以吕思诚为湖广行省左丞命湖广行省右丞巴延布哈江南行台中丞曼济哈雅江浙行省平章政事巴延特穆尔参知政事阿尔乌逊会合湖广行省平章政事额森特穆尔讨沿江贼立镇江水军万户府命江浙行省右丞佛嘉律领之诏河南淮南两省并立义兵万户府建清河大寿元忠国寺以江浙废寺田归之三月癸亥朔日有食之甲戌命亲王苏克特穆尔以兵讨宿州贼丙子颍州陷是月中书定拟义兵立功者权任军职事平授以民职从之以四川行省右丞达实巴图尔为本省平章政事兼知行枢密院事总荆襄诸军从宜调遣诏和买马于北边以供军用夏四月癸巳朔以武祺参议中书省事是月帝如上都方国珍复拥船据海道以江浙行省参知政事阿尔乌逊为本省右丞浙东宣慰使恩宁普为江浙行省参知政事总兵讨之发陕西军讨河南贼造过街塔于卢沟桥修筑白浮瓮山堤堰五月甲子安丰正阳贼围庐州是月诏修北巡所经色泽岭黑石头河西沿山道路立南阳邓州等处毛葫芦义兵万户府募土人为军免其差役令讨贼自劾诏以伊苏乌尔图华募兵万人下蜀江代达实巴图尔守中兴荆门命达实巴图尔以兵赴汝宁以湖广行省参知政事鄂尔和为右丞讨庐州命荆王达尔玛实哩代奎腾阿哈镇河西讨西番贼六月辛卯朔张士诚寇扬州丙申达实特穆尔以兵讨张士诚败绩诸军皆溃诏江浙行省参知政事佛嘉律会达实特穆尔复进兵讨之【按佛嘉律于本年二月已称行省右丞不载何时降为参知政事】己酉张士诚陷盱眙县庚戌陷泗州官军溃秋七月壬申命刑部尚书阿噜于汝宁州等处募兵讨泗州是月帝还大都九月庚申以湖广行省左丞吕思诚复为中书左丞【按元史吕思诚传思诚至湖广未数日召入是其左迁湖广行省左丞亦必系本年事传又云至武昌时贼已据城思诚至皆惊走去二日而武昌复陷纪俱失载又宰相表思诚以十二月召入为添设左丞与纪异】辛酉以知枢密院事伊彻察喇为中书平章政事诏丞相托克托总制诸王各翼军马出征高邮是月方国珍拘元帅伊德默色黄岩州达噜噶齐宋巴延布哈知州赵宜浩以俟诏命冬十月戊戌诏达实巴图尔及台哈布哈等会军讨安丰十一月丙寅敕省院台奏事先启皇太子丁卯托克托领兵至高邮辛未战于高邮城外大败贼众乙酉托克托遣兵平六合县是月达实巴图尔复苗军所据郑均许三州十二月丙申以中书平章政事鼎珠为左丞相宣政院使哈玛尔永昌宣

慰索诺木巴勒并为中书平章政事监察御史袁赛音布哈等劾托克托出师三月略无寸功倾国家之财为己用半朝廷之官以自随又其弟额森特穆尔庸材鄙器玷污清台章三上诏额森特穆尔出都门听旨以宣徽使旺嘉努为御史大夫丁酉诏削托克托官爵安置淮安路弟御史大夫额森特穆尔安置宁夏路以河南行省平章政事台哈布哈为本省左丞相中书平章政事伊彻察喇加太尉集贤大学士舒苏知枢密院事代领其军诏被灾残破之处令有司振恤仍蠲租税三年赐高年帛罢庸田茶运宝泉等司戊戌以鼎珠领经筵事中政院使僧格实哩为中书添设右丞庚子以僧格实哩同知经筵事冀国公图噜加太尉癸卯以哈玛尔提调经正监都水监会同馆知经筵事就带原降虎符甲辰以僧格实哩提调宣文阁哈玛尔兼大司农吕思诚兼司农卿提调农务是月命甘肃右丞威台讨捕西番贼达实巴图尔复河阴巩县猺贼自耒阳寇衡州万户许托音死之是岁诏谕民闲私租太重以十分为率普减二分永为定例京师大饥加以疫疠民有父子相食者帝于内苑造龙船自制其样又自制宫漏其精巧绝出人谓前代所鲜有时帝怠于政事荒于游宴以宫女三圣努妙乐努文殊努等一十六人按舞名为十六天魔首垂发数辫戴象牙佛冠身被纓络大红销金长短裙金杂袄云肩合袖天衣绶带鞦韆各执加噶布喇婉之器内一人执铃杵奏乐又宫女一十一人练槌髻勒帕常服或用唐帽窄衫所奏乐用龙笛头管小鼓箏■（^秦秦）琵琶笙胡琴向板拍板以宦者察罕岱布哈管领遇宫中赞佛则按舞奏乐宫官受秘密戒者得入余不得预

十五年春正月戊午朔以中书平章政事吹斯戡出为陝西行省平章政事【按出为陝西行省平章政事元史作提调留守司考宰相表至正十五年正月吹斯戡出为陝西行省平章吹斯戡传亦云至正十五年迁陝西行省平章复召还拜知枢密院事俄复拜中书平章提调大都留守司此下书以哈斯为中书平章者即补吹斯戡之缺而其提调留守司乃再入中书时事也纪文错误今改】宣徽使哈斯为中书平章政事河南行省左丞许有壬为集贤大学士辽阳行省左丞奇尔巴延布哈为本省平章政事壬戌以宣政院副使实都为太子詹事甲子江西行省平章政事道通加大司徒辛未大鄂尔多儒学教授郑咥建言蒙古乃国家本族宜教之以礼而犹循本俗不行三年之丧又收继庶母叔婶兄嫂恐貽笑后世宜令改革绳以礼法不报丁丑徐寿辉复陷沔阳府威顺王库春布哈令王子报恩努等同湖南元帅阿尔斯兰水陆并进讨之至汉川兵败报恩努死之庚辰复设仁虞云需尚供三总管府是月诏安置托克

托于额齐讷路收所赐田土遣兵分守河南陝西山东
诸路闰月壬寅以各卫军人屯田京畿人给钞五锭仍给牛种农器二月己未刘福通等
自礪山夹河迎韩林儿立为皇帝又号小明王建都亳州国号宋改元龙凤丙寅以中书平章政事哈斯左丞许有壬并知经筵事戊辰以太傅
御史大夫旺嘉努为中书右丞相中书平章政事鼎珠
为左丞相壬申立淮东等处宣慰使司都元帅府于天长县统濠泗义兵万户府听富民
愿出丁壮五千名者为万户五百名者为千户一百名
者为百户丙子以达实特穆尔为中书平章政事提调留守司平章政事哈斯兼大司农
三月癸巳徐寿辉陷襄阳路甲午授皇太子玉册锡冕
服九旒祗谒太庙辛丑以监察御史言安置托克托于云南镇西路额森特穆尔于四川
碉门托克托长男哈喇章安置肃州次男三宝努安置
兰州仍籍其家产己酉以知枢密院事重嘉努知经筵事知枢密院事尼苏该提调内史
府是月郭子兴卒夏四月壬戌中书省臣言江南因盗
贼阻隔所有阙官宜遣人与各省及行台官以广东广西海北海海南三品以下通行迁调
五品以下先行照会之任江浙行省三年一次迁调福
建等处阙官亦依前例从之癸亥以中书平章政事达实特穆尔知经筵事御史中丞扎
萨古逊同知经筵事乙丑以中书右丞藏实左丞乌克
逊良楨分省彰德辛未以御史中丞伯嘉努同知经筵事中书参议成遵兼经筵官癸酉
以左丞相鼎珠为右丞相平章政事哈玛尔为左丞相
太子詹事僧格实哩为中书平章政事舒苏为御史大夫丁丑加知枢密院事重嘉努太
傅是月帝如上都诏翰林待制乌玛喇集贤待制孙搆
招安张士诚御史台劾奏中书左丞吕思诚罢之诏四川等处立宣化镇南军民府罢四
川羊母甲洞臭南王洞长官司改立忠义军民安抚司
立汴梁等处义兵万户府五月壬辰复襄阳路监察御史伊埒呼图克等劾奏河南行省
左丞相台哈布哈慢功虐民诏削其职以达实巴图尔
为河南行省平章代之庚戌徐寿辉兵自沔阳陷中兴路元帅多尔济巴勒死之六月戊
辰命中书平章政事吹斯戡兼大司农 【按吹斯戡
自陝西行省复入中书元史宰相表书于九月纪于六月己称为中书平章政事与表不
符】 僧格实哩知经筵事庚辰征徽州隐士郑玉为翰
林待制不至 【按郑玉被征元史本传作十四年事汪克宽作玉行状亦同】 是月朱
元璋自和州渡江取太平路秋七月壬寅徐寿辉复陷
武昌汉阳等处是月以亲王实勒们等分守山东四川湖广诸路并招谕各起兵者八月
庚申命南阳等处义兵万户府召募毛葫芦义兵万人
进攻南阳戊辰以中书平章政事达实特穆尔为江浙行省左丞相便宜行事甲戌以大

宗正府扎尔古齐德埒默色为甘肃行省平章政事戊寅云南死可伐等降令其子莽三以方物来贡立平缅安抚司四川向思胜降改安定州为军民安抚司是月帝还大都诏淮南行省左丞相太平统淮南诸军讨所陷郡邑仍命湖广行省平章政事鄂尔和以所部苗军听其节制立沃济野人济喇敏等处诸军万户府于哈勒费延之地九月癸未朔以知岭北行枢密院事努都尔噶为中书平章政事乙酉立分海道防御运粮万户府于平江路是月移置托克托于阿恰济之地冬十月丁巳立淮南行枢密院于扬州甲子帝谓右丞相鼎珠等曰敬天地尊祖宗重事也朕将亲祀郊庙务尽诚敬卿等其议典礼从其简者行之以中书右丞拜珠为平章政事庚午以袭封衍圣公孔克坚同知太常礼仪院事其子希学袭封衍圣公己卯以翰林学士承旨庆通为淮南行省平章政事立黄河水军万户府于小清口十一月壬辰亲祀上帝于南郊命太子为亚献丞相鼎珠为终献甲午以台哈布哈为湖广行省左丞相湖广荆襄诸军悉听节制给还原夺宣命庚戌贼陷饶州路是月达实巴图尔攻夹河贼大破之贼陷怀庆命河南行省右丞布哈讨之十二月丁巳命中书参知政事伊呀森布哈陈敬伯分省彰德癸亥立忠义忠勤万户府于宿州武安州壬申以平章政事特哩特穆尔右丞鄂兰并知经筵事参议丁好礼兼经筵官乙亥以天下兵起下诏罪己大赦是月达实巴图尔大败刘福通等于太康遂围亳州伪宋主韩林儿遁走安丰哈玛尔矫诏杀右丞相托克托是岁诏凡有水田之处设大兵农司招集人夫有警乘机进讨无事栽植播种以中书平章政事拜珠分省济甯设兵列户工四部察罕特穆尔与贼战于河南北屡有功除中书刑部侍郎十六年春正月壬午朔改福建宣慰使司都元帅府为福建行中书省【按元史百官志至正十六年五月置福建等处行中书省于福州纪书于正月互异】己亥诏太尉昂吉尔开府设官属乙巳以辽阳行省左丞相约约为太子詹事翰林学士承旨图烈特穆尔同知詹事院事丙午以知枢密院事实勒们兼太府监卿庚戌左丞相哈玛尔罢【按续通鉴载哈玛尔既相以前进西僧为耻欲事太子以帝为太上皇语泄因罢之】辛亥御史大夫舒苏亦罢以吹斯戡为御史大夫复以鼎珠为右丞相是月徐寿辉建伪都于汉阳二月癸丑吹斯戡劾哈玛尔及其弟舒苏等罪恶帝曰哈玛尔兄弟虽有罪然侍朕日久与朕弟伊埒哲伯皇帝同乳且缓其罚令之出征自劾甲寅命右丞相鼎珠依前太保中书一切机务悉听总裁丙辰鼎珠及平章政事僧格实哩等复奏哈玛尔兄弟罪恶诏贬哈玛尔惠州安置舒苏肇州安置寻杖杀之丙寅

命翰林国史院太常礼仪院定拟皇后奇氏三代功臣谥号王爵甲戌命部院正官各举才堪守令者一人不拘蒙古色目汉南人听中书省酌用己卯命集贤直学士杨俊民致祭曲阜孔子庙是月张士诚陷平江路据之改平江路为隆平府遂陷湖州松江常州三月壬午徐寿辉复寇襄阳戊子命宣让王特穆尔布哈维顺王库春布哈以兵镇遏怀庆路庚寅朱元璋取集庆路江南行台御史大夫福寿死之 【按元史百官志江南行御史台旧治建康是时以建康文宗潜邸所在改名集庆路自后集庆失守行台遂徙绍兴矣】 丙申徐寿辉陷常德路丁酉立行枢密院于杭州命江浙行省左丞相达实特穆尔兼知行枢密院事节制诸军省院等官并听调遣朱元璋取镇江路戊申方国珍复降授为海道漕运万户其兄方国璋为衢州路总管夏四月辛亥以吹斯戡为中书左丞相丙辰以资政院使布哈为御史大夫丁巳命左丞相吹斯戡领经筵事中书平章政事乌兰哈达御史大夫布哈并知经筵事庚申以河南行省左丞布呼齐为湖广行省平章政事达实巴图尔加金紫光禄大夫丙寅命安班太子与陕西行省官同讨均房南阳辽阳行省平章政事奇尔巴延布哈加大司徒丁卯以陕西行台御史大夫托多为陕西行省左丞相大司农约为辽阳行省左丞相以知枢密院事实勒们分院济宁翰林学士承旨托克托同知詹事院事壬申命豫王喇特纳实哩与陕西行省官商议军机从宜攻讨是月帝如上都五月丙申徐寿辉陷沔州路六月乙丑朱元璋取广德路秋七月癸未以翰林学士图噜特穆尔为侍御史是月朱元璋自称吴国公 【朱元璋称吴国公谨遵 御批通鉴辑览增】 张士诚陷杭州江浙行省平章政事尊达实哩战死丞相达实特穆尔遁杨谔勒哲及万户普贤努击败之复其城八月丙辰奉元路判官王渊等以义兵复商州以渊同知关商襄邓等处宣慰司事庚午徐寿辉陷衡州路元帅甄崇福战死是月帝还大都九月庚辰汝颍贼李武崔德等破潼关参知政事舒噜杰战死壬午豫王喇特纳实哩同知枢密院事鼎珠复潼关河南行省平章政事伯嘉努以兵守之戊戌贼陷陕州及虢州诏以太尉纳琳复为江南行台御史大夫迁行台治绍兴是月察罕特穆尔复陕州及虢州复袭败贼兵于平陆安邑以功授签河北行枢密院事冬十月罢太尉额森特穆尔淮安城陷淮东道廉访使褚布哈死之十一月丙戌以噜达实达尔玛实哩并为詹事是月河南陷河南廉访副使温普遁十二月徐寿辉陷岳州路杀威顺王子岱音特穆尔湖广参政额森特穆尔与左江义兵万户邓祖胜合兵复衡州是岁诏沿海州县为贼所残掠者免田租三年赐高年帛河南

行省左丞相台哈布哈驻军于南阳嵩汝等州叛民皆降军势大振陝西行台监察御史李尚綱上关中形胜急论凡十有二事命大司农司屯种雄霸二州以给京师号京粮

十七年春正月丙子朔日有食之以巴延特古斯为大司徒辛卯命山东分省团结义兵每州添设判官一员每县添设主簿一员专率义兵以事守御仍命各路达噜噶齐提调听宣慰使司节制二月壬子李武崔德犯七盘蓝田命察罕特穆尔以军会达尔玛雅尔守陝州潼关哈喇布哈由潼关抵陝西会豫王喇特纳实哩及鼎珠等同进讨戊辰知枢密院事托克托复邳州调客省使苏尔达袞等攻黄河南岸贼大破之壬申刘福通遣其党毛贵陷胶州签枢密院事托欢死之甲戌徐寿辉陷陝州是月李武崔德陷商州察罕特穆尔与李思齐以兵自陝虢援陝西以察罕特穆尔为陝西行省左丞李思齐为四川行省左丞以高宝为四川行省参知政事将兵取中兴不克贼遂破辘轳关三月乙亥义兵万户赛富鼎阿穆尔丹叛据泉州庚辰毛贵陷莱州守臣山东宣慰副使沙克嘉鼐仗义死壬午朱元璋取常州路甲午毛贵陷益都路益王迈努遁山东郡邑皆陷乙未以江淮行枢密院副使董抟霄为山东宣慰使丁酉毛贵陷滨州戊戌以中书平章政事特哩特穆尔为御史大夫乌兰哈达鄂兰并为中书平章政事夏四月丙午监察御史五十九言今京师周围虽设二十四营军卒疲弱素不训练诚为虚设倘有不测诚可寒心宜速选择骁勇精锐卫护大驾镇守京师实当今莫安根本坚固人心之急务况武备莫重于兵而养兵莫先于食今朝廷拨降钞锭措置农具命总兵官于河南克复州郡且耕且战甚合寓兵于农之意为今之计权命总兵官从宜于军官府选委能抚字军民者兼路府州县之职务要农事有成军民得所则扰民之害益除而匮乏之忧亦释矣帝嘉纳之乙卯毛贵陷莒州辛酉以约约为甘肃行省左丞相达实巴图尔加太尉四川行省左丞相【按元史达实巴图尔传加太尉在三月与纪异】是月帝如上都朱元璋取盩厔路五月乙亥命知枢密院事布哈齐兵讨山东戊寅平章政事齐拉袞特穆尔复武安州等三十余城丙申以吹斯戩为右丞相太平复为左丞相免天下今岁税粮之半六月甲辰朔以实勒们为中书分省右丞守济盩丙辰监察御史托克托穆尔言去岁河南之贼窥伺河北惟河南与山东互相策应受害尤大为今之计中书当遴选能将就台哈布哈达实巴图尔阿噜三处军马内择其精锐以守河北进可以制河南之侵退可以攻山东之寇庶几无虞从之己未以特哩特穆尔鲁达实并为御史大夫庚申朱元璋取江阴州壬申额森特穆尔罢

陝西行樞密院是月刘福通犯汴梁其军分三道关先生破头潘冯长舅沙刘二王士诚寇晋冀白不信大刀敖李喜喜趋关中毛贵据山东其势大振秋七月庚辰朱元璋取徽州路乙酉命右丞相吹斯戡领宣政院事平章政事臧布知经筵事参知政事李稷同知经筵事参知政事谔勒哲特穆尔兼太府卿戊子以李稷为御史中丞中书省臣言山东殷阳益都相次而陷济南日危宜选将练卒信赏必罚为保燕赵计以卫京师不报己丑镇守黄河义兵万户田丰叛陷济甯路分省右丞实勒们遁义兵万户孟本周攻之田丰败走本周还守济甯甲午以御史中丞谔勒哲特穆尔为中书右丞河南廉访使温普为中书参知政事是月立四方献言详定使司归德府知府林茂万户时公权叛以城降贼归德府及曹州皆陷八月癸丑刘福通兵陷大名路遂自曹濮陷卫辉路达实巴图尔之子博啰特穆尔与万户方托克托击之乙丑以陝西行台御史中丞伯奇鼐尔为陝西行省平章政事淮南行省参知政事余阙为淮南行省左丞【余阙传载作右丞】江浙行省参知政事杨谔勒哲为左丞方国珍为江浙行省参知政事海道运粮万户如故是月帝还大都诏知樞密院事努都尔噶进讨山东朱元璋取扬州路张士诚请降【按明史太祖纪繆大亨克扬州张明鉴降在十月与此异】江浙左丞相达实特穆尔承制令参知政事周伯琦等至平江抚谕之诏以士诚为太尉士德为淮南行省平章政事九月丙子命同知樞密院事寿通以兵讨冠州以鲁达实为中书平章政事仍兼乌兰哈雅指挥使甲午泽州陵川县陷县尹张辅死之戊戌台哈布哈复大名路并所属郡县是月命努都尔噶加太尉总诸军守御东昌时田丰据济濮率众来寇击走之徐寿辉将倪文俊谋杀寿辉不果自汉阳奔黄州别将陈友谅袭杀之友谅遂自称平章闰月丙午右丞相吹斯戡左丞相太平并加开府仪同三司平章政事谔勒哲布哈兼大司农乙卯潞州陷冬十月戊戌曹州贼入太行山是月白不信大刀敖李喜喜陷兴元遂入凤翔【按明史韩林儿传白不信等入凤翔作是年秋事与元纪异】

【察罕特穆尔李思齐屡击败之其党走入蜀达实巴图尔与知樞密院事达尔玛实哩以军讨曹州贼战败达尔玛实哩死之十一月壬寅贼侵壶关察罕特穆尔大破之戊午以河南行省平章政事达兰为中书平章政事御史中丞李献为中书左丞陝西行台中丞巴延特穆尔樞密院副使哈喇诺海司农少卿崔敬侍御史陈敬伯皆为参知政事癸亥豫王喇特纳实哩与陝西行省左丞相托多陝西行台御史中丞伯奇鼐尔分道攻讨关陝己巳以中书参知政事巴特玛实哩为右丞十二月达实巴图尔卒于

军中是岁诏天下团结义兵路府州县正官俱兼防御
事赵均用及彭大之子早住同据淮安赵僭称永义王彭僭称鲁淮王义兵千户余宝杀
其知枢密院事宝通以叛降于毛贵余宝遂据棣州

十八年春正月丙午陈友谅陷安庆路淮南行省右丞余阙死之庚戌朱元璋取婺
源州甲子以布呼齐知枢密院事丙寅田丰陷东平路
是月以达实巴图尔子博罗特穆尔为河南行省平章政事总领其父原管军马诏察罕
特穆尔屯陝西李思齐屯凤翔二月己巳朔定团结西
山寨大小十一处设万夫千夫百夫长分守要害毛贵陷清沧州遂据长芦镇中书省臣
奏以陝西军旅事剧务殷去京师道远供费艰难请就
陝西印造宝钞诏分户部宝钞库等官置局印造仍命诸路拨降钞本界平准行用库倒
易昏币布于民闲癸酉毛贵陷济南路山东宣慰使董
搏霄死之辛巳以台哈布哈为中书右丞相总兵山东壬午田丰复陷济甯路甲申辉州
陷丙戌努都尔噶闻田丰渐逼东昌弃城走丁亥察罕
特穆尔复涇州平凉保巩昌戊子田丰陷东昌路庚寅王士诚自益都犯怀庆路周全击
败之辛卯以安图为中书参知政事丁酉兴元路陷三
月己亥朔加右丞相吹斯戡太保庚子毛贵陷般阳路癸卯王士诚陷晋甯路总管杜赛
音布哈死之甲辰察罕特穆尔遣赛音齐等复晋甯路
庚戌毛贵陷蓟州诏征四方兵入卫乙卯毛贵犯灤州至枣林枢密副使达国珍战死遂
略柳林同知枢密院事刘哈喇布哈击败之贵走据济
南丙辰朱元璋取建德路【按明史太祖纪邓愈克建德路在三月己酉此作丙辰互异
】以周全为湖广行省参知政事统鄂啰等军移镇
嵩州白龙寨冀甯路陷丁巳田丰陷益都路辛酉大同诸县陷察罕特穆尔遣关保等往
击之是时贼分二道犯晋冀一出沁州一侵絳州乙丑
以娄章为太子少保夏四月甲申陈友谅陷隆兴路省臣道通和尼齐弃城遁【按乙丑
壬午闲不应有甲申曰考陈友谅及各传其陷隆兴
路皆不详时日应系壬申或甲戌之讹他无可考今仍原文】壬午田丰陷广平路大掠
退保东昌元帅方托克托复广平甲午陈友谅陷瑞州
路是月帝如上都察罕特穆尔李思齐会宣慰张良弼等兵讨李喜喜于巩昌喜喜败入
蜀察罕特穆尔驻清湫李思齐驻斜坡张良弼驻秦州
郎中郭择善驻崇信宣尉同知拜特穆尔驻通渭平章鼎珠驻临洮各自除官属征纳军
需既而思齐良弼袭杀拜特穆尔分总其兵五月戊戌
朔察罕特穆尔遣董克昌等以兵复冀甯以方国珍为江浙行省左丞兼海道运粮万户
诏察罕特穆尔还兵镇冀甯李思齐杀郭择善庚子贼
兵踰太行察罕特穆尔部将关保击败之以察罕特穆尔为陝西行省右丞兼陝西行台

侍御史同知河南行枢密院事刘福通攻汴梁壬寅汴梁守将竹贞弃城遁福通等乃自安丰迎其主韩林儿居之以为都庚戌陈友谅陷吉安路癸丑监察御史七十等劾太保中书右丞相哈布哈缓师拒命之罪乙卯削台哈布哈官爵安置盖州时台哈布哈总兵山东以知行枢密院乌兰哈达代之节制河北诸军河南行省平章政事周全节制河南诸军辛酉陈友谅陷抚州路是月察罕特穆尔以刘尚质为冀宁路总管六月戊辰朔日有食之台哈布哈伏诛察罕特穆尔调浩尔齐关保同守潞州以察罕特穆尔为陕西行省平章政事便宜行事庚辰关先生破头潘等陷辽州浩尔齐击走之关先生等遂陷冀宁路乙酉命左丞相太平督诸军守御京城秋七月丁酉朔周全据怀庆路以叛附于刘福通杀守将尽驱怀庆民渡河入汴梁癸丑有贼兵犯京城刑部郎中布哈击退之己未刘福通遣周全攻洛阳守将登城以大义责之全愧谢而退刘福通杀之丙寅以旺布哈托克托特穆尔为中书平章政事八月庚辰陈友谅陷建昌路辛巳义兵万户王信以滕州叛降于毛贵庚寅以鲁达实为御史大夫诏作新风纪九月丁酉朔关先生攻保定路不克遂陷完州掠大同兴和塞外诸郡壬寅以中书参知政事布延布哈治书侍御史李国凤经略江南癸卯以福建行中书省平章政事庆通为江南行台御史大夫丙午贼兵攻大同路壬戌平定州陷乙丑陈友谅陷赣州路江西行省参知政事沁布阿咱尔及总管噶海齐死之冬十月壬申朱元璋取兰溪州壬午监察御史杨珠布哈劾右丞相吹斯戡奸贪误国诏收其印绶壬辰大同路陷达噜噶齐谔勒哲特穆尔弃城遁十一月乙未朔以布哈特穆尔为福建行省平章政事癸卯陈友谅陷汀州路丁未田丰陷顺德路十二月乙丑朔日有食之癸酉关先生破头潘等陷上都焚宫阙转略辽阳遂至高丽庚辰察罕特穆尔遣枢密院判官索珠进兵辽阳甲申朱元璋取婺州路达噜噶齐僧珠浙东廉访使杨惠死之

十九年春正月甲午朔陈友谅陷信州路守臣江东廉访副使巴延布哈德济力战死之【按续通鉴陈友谅陷信州巴延布哈德济死节俱在是年六月元史巴延布哈德济传亦同】朱元璋取诸暨州乙巳以多尔济巴勒为中书平章政事丙午辽阳行省陷懿州路总管吕震死之二月甲申叛将梁炳攻辰州守将和尚击败之以和尚为湖广行省参知政事贼由飞狐灵邱犯蔚州是月诏博啰等穆尔移镇大同捍蔽京师置大都督兵农司仍置分司十道专督屯种以博啰特穆尔领之所在侵夺民田不胜其扰台哈布哈溃散之兵数万钞掠山西察罕特穆

尔遣陈秉直分兵驻榆次招抚之其首领悉送河南屯种三月癸巳朔陈友谅遣兵由信州掠衢州复遣兵陷襄阳路壬戌诏定科举流寓人名
额夏四月甲子毛贵为赵均用所杀以天下多故郤天寿节朝贺已丑贼陷宁夏路遂略灵武等处五月壬辰朔以陝西行台御史大夫谔勒哲
特穆尔为陝西行省左丞相便宜行事壬寅察罕特穆尔请今岁八月乡试河南举人及避兵儒士不拘籍贯依河南省原定额数就陝州置贡
院应试从之是月察罕特穆尔大发秦晋诸军讨汴梁围之六月辛巳以宣徽使雅克科尔为御史大夫秋七月壬辰朔出吹斯戡为辽阳行省
左丞相便宜行事戊申命国王囊嘉特等统军征辽阳丙辰毛贵党续继祖自辽阳入益都杀赵均用八月辛酉朔倪文俊余党陷归州戊寅察
罕特穆尔破汴梁刘福通奉其主韩林儿复走安丰己卯以察罕特穆尔为河南行省平章政事兼同知河南行枢密院事陝西行台御史中丞
九月癸巳以中书平章政事特哩特穆尔为陝西行省左丞相便宜行事乙巳以湖南北浙东西四道廉访司所治之地皆陷诏任其所便之地
置司 【按元史百官志任其所便之地置廉访司在十八年与纪异】 丁未禁军人不得私杀牛马是月朱元璋取衢州路遣兵部尚书巴延
特穆尔户部尚书曹履亨以御酒龙衣赐张士诚征海运粮 【时中原既乱江南海漕久不至京师银一錠易米八斗民大饥至是河南始通
故往征之】 冬十月庚申朔诏京师十一门皆筑瓮城造吊桥以方国珍为江浙行省平章政事十一月癸卯朱元璋取处州路 【按明史太
祖纪胡大海克处州在十一月壬寅与此小异】 戊申陈友谅陷杉关十二月太子使监察御史诬成遵赵中以赃罪杖杀之是岁陈友谅以江
州为都迎其主徐寿辉居之自称汉王
二十年春正月己丑朔察罕特穆尔请以巩县改立军州万户府招民屯种从之癸卯大宁路陷壬子以危素为参知政事二月戊午朔左
丞相太平罢为太保留守上都三月戊子朔田丰陷保定路乙巳冀宁路陷壬子以吹斯戡为中书右丞相夏四月庚申命大司农司都事乐元
臣招谕田丰至其军为丰所害辛未签行枢密院事张居敬复兴中州五月丁亥朔日有食之陈友谅杀其主徐寿辉自称皇帝国号大汉乙未
陈友谅遣罗中显陷辰州己亥以班珠尔玛克为中书平章政事是月张士诚海运粮十一万石至京师闰月己未以太尉雅克特穆尔知经筵
事以甘肃行省左丞相昂吉尔为太尉六月己亥察罕特穆尔与博啰特穆尔争晋冀互相讎杀帝下诏令各守信地毋得越境侵犯是月朱元
璋取信州路 【按明史太祖纪胡大海克信州在闰五月与此异】 秋七月辛酉命辽

阳行省参知政事张居敬讨义州贼博罗特穆尔败王士诚于台州乙亥诏博罗特穆尔总领达勒达汉儿军马为总兵官仍便宜行事八月戊子命博罗特穆尔守石岭关以北察罕特穆尔守石岭关以南乙未永平路陷甲辰诏诸处权摄官专务渔猎百姓今后非朝命不得之任庚戌江浙行省左丞相达实特穆尔加太尉兼知江浙行枢密院事提调行宣政院事便宜行事九月乙卯朔遣参知政事额森布哈往谕博罗特穆尔察罕特穆尔令讲和时博罗特穆尔调兵自石岭关直抵冀宁围其城三日复退屯交城察罕特穆尔调参政阎奉先引兵与战已而各于石岭关南北守御壬戌贼陷孟州又陷赵州攻真定路癸未贼复犯上都右丞孟克特穆尔引兵击之败绩冬十月甲申朔以张良弼为湖广行省参知政事讨南阳襄樊诏博罗特穆尔守冀宁遣军倍道赴之丙戌命塔尔布斯为太尉守卫大鄂尔多斯已亥察罕特穆尔遣陈秉直索珠等以兵攻博罗特穆尔之军于冀宁与其部将图鲁卜战败之十一月癸酉贼犯易州十二月丙戌诏太庙影堂祭祀乃子孙报本重事近兵兴岁歉品物不能丰备累朝四祭减为春秋二祭今宜复四祭后竟不行辛卯广平路陷是岁阳翟王阿勒呼木特穆尔拥兵数十万屯于穆尔古楚之地将犯京畿使来言曰祖宗以天下付汝汝已失其大半若以国玺付我我当自为之帝遣报之曰天命有在汝欲为则为为之命枢密院事图沁特穆尔等将兵击之不克军士皆溃图沁特穆尔走上都

二十一年春正月癸丑朔大赦命中书参知政事七十往谕博罗特穆尔罢兵还镇复遣使往谕察罕特穆尔亦令罢兵时博罗特穆尔纵兵掠冀宁等处察罕特穆尔以兵拒之故有是命丁卯李思齐进兵平伏羌等处二月甲申同签枢密院事特哩特穆尔复永平滦州等处是月江南行台侍御史巴咱尔布哈杀广东廉访使谔勒哲图副使李思诚僉事特默齐以兵据广州三月张士诚海运粮一十一万石至京师博罗特穆尔罢兵还图鲁卜等引兵据延安谋入陝夏四月辛己朔日有食之是月以张良弼为陝西行省参知政事察罕特穆尔遣其子副詹事库特穆尔贡粮至京师五月癸丑四川明玉珍陷嘉定等路李思齐遣兵击败之是月李思齐受李武崔德等降六月丙申察罕特穆尔总兵讨山东发晋军下井陘出邯郛过磁相怀卫踰白马津发其军之在汴梁者继之水陆并进秋七月辛亥察罕特穆尔平东昌是月察罕特穆尔进兵复冠州八月庚子以福建行省平章政事布哈特穆尔为江南行台御史大夫癸卯朱元璋取江州路伪汉陈友谅退都武昌是月察罕特穆

尔遣其子库库特穆尔阎思孝等讨田丰直捣东平大破之丰降令为前锋从大军东讨
棣州俞宝东平王士诚东昌杨诚济南刘珪等皆降鲁
地悉定遂围益都九月戊午阳翟王阿勒呼木特穆尔兵败部将托欢擒送阙下诏诛之
以其弟呼图克特穆尔袭封阳翟王壬戌四川贼兵陷
东川郡县李思齐调兵击之是月命兵部尚书齐齐克布哈侍郎韩祺征海运粮于张士
诚朱元璋取建昌饶州二路冬十月癸巳以察罕特穆
尔为中书平章政事兼知河南山东等处行枢密院事陝西行御史台中丞察罕特穆尔
调参知政事陈秉直刘珪等守御河南十一月察罕特
穆尔李思齐遣兵围鹿台攻张良弼诏和解之俾各还信地兵乃解是岁京师大饥屯田
成收粮四十万石赐司农丞胡秉彝上尊金币以旌其
功

二十二年春正月甲寅诏李思齐封四川张良弼平襄汉时两军不和故有是命庚
申朱元璋取江西龙兴诸路丁卯以太尉谔勒哲特穆
尔为陝西行省左丞相仍命察罕特穆尔屯种于陝西申谕李思齐张良弼等各以兵自
効以额森布哈为中书右丞二月丁丑朔盗杀陝西行
省右丞塔布台三月甲寅四川明玉珍陷云南省治屯金马山陝西行省参政彻尔特穆
尔等击败之擒其弟明二是月以博啰特穆尔为中书
平章政事加太尉李思齐攻张良弼于武功良弼击破之夏五月乙巳朔泉州赛富鼎据
福州路福建平章杨珠布哈击败之余众航海还据泉
州福建参政陈友定复汀州路辛未明玉珍据成都自称陇蜀王遣其将杨尚书守重庆
分兵寇龙州青州犯兴元巩昌等路是月张士诚海运
粮一十三万石至京师六月戊子田丰王士诚刺杀察罕特穆尔走入益都诏以其子库
库特穆尔为中书平章政事兼知河南山东等处行枢
密院事一应军马并听节制仍谕将士力图报复以伸大义秋八月己亥库库特穆尔言
博啰特穆尔张良弼据延安掠黄河上下欲东渡以夺
晋宁乞赐诏谕九月癸卯朔刘福通以兵援田丰至火星埠库库特穆尔遣关保邀击大
破之冬十月壬申朔命江西平章图烈布哈分省广州
执巴咱尔布哈杀之甲戌博啰特穆尔南侵库库特穆尔分地据真定路十一月乙巳库
库特穆尔复益都田丰王士诚伏诛庚戌库库特穆尔
遣关保复莒州山东悉平庚申加库库特穆尔太尉便宜行事癸亥四川贼陷青州十二
月庚子以中书平章政事佛嘉努为御史大夫

二十三年春正月壬寅朔明玉珍僭称帝于成都建国号曰夏二月库库特穆尔自
益都领兵还河南张士诚遣将吕珍入安丰杀刘福通
据其城朱元璋击走之以韩林儿归滁州三月辛丑朔诏中书平章政事阿布哈分省冀

寇库特穆尔遣兵据之丙午大赦是月立广西行中书省以廉访使额尔吉讷为平章政事时南方郡县多陷没惟额尔吉讷独保广西者十五年是春关先生余党复自高丽还寇上都博罗特穆尔击降之夏四月博罗特穆尔李思齐互相攻击库库特穆尔遣摩该等击张良弼五月己巳朔张士诚海运粮十三万石至京师六月戊戌朔博罗特穆尔遣方托克托迎匡福于彰德库库特穆尔遣兵追之败还匡福遂据保定路已亥库库特穆尔部将岱律等驻兵蓝田七盘李思齐攻围兴平遂据整屋博罗特穆尔时奉诏进讨襄汉请催督库库特穆尔东出潼关道路既通即便南讨戊申博罗特穆尔遣珠展等入陕西据省治库库特穆尔遣部将摩该与李思齐合攻之珠展出降秋七月丁丑以马良为中书参知政事八月丁酉朔倭人寇蓬州守将刘暹击败之辛丑库库特穆尔遣兵侵博罗特穆尔所守之境是月朱元璋与伪汉兵大战于鄱阳湖陈友谅败死其子理自立九月张士诚自称吴王来请命不报遣户部侍郎博罗特穆尔等【此与下举兵犯阙之博罗特穆尔非一人】征海运于张士诚士诚不与冬十月己酉监察御史敏珠尔哈雅劾奏太傅太平罪状诏安置于土蕃未至逼令自杀是月库库特穆尔遣签枢密院事任亮复安陆府博罗特穆尔遣兵攻冀宁至石岭关库库击走之擒其将乌玛喇殷兴祖博罗军由是不振十一月壬申诏复故丞相托克托所授宣命是岁御史大夫鲁达实与知枢密院事图沁特穆尔得罪于太子奔大同博罗特穆尔匿之营中

二十四年春正月朱元璋自立为吴王二月吴王元璋围武昌陈理降三月辛卯太子矫诏削博罗特穆尔官爵夺其兵博罗拒命不受夏四月甲午朔命库库特穆尔讨博罗特穆尔乙未博罗特穆尔令图沁特穆尔举兵向阙壬寅图沁特穆尔兵入居庸关癸卯知枢密院事伊苏詹事布呼齐迎战败绩甲辰皇太子率侍卫兵出光熙门东走古北口趋兴松乙巳图沁特穆尔兵至清河列营都城大震使达勒达国师至军前问故以必得右丞相吹斯戡宦官保布哈为对诏复博罗特穆尔官爵仍总兵以慰解之不听丁未诏屏吹斯戡于岭北窜保布哈于甘肃执而与之以伊苏为左丞相庚戌图沁特穆尔陈兵自健德门入覲帝于延春阁恸哭请罪帝宴赉之加博罗特穆尔太保仍守大同图沁特穆尔为中书平章政事【按博罗特穆尔举兵犯阙逼胁储君悖逆已甚太子蓄积私怒结党肆行不复知有君父其罪亦无可解免皆由顺帝平日宴安姑息纪纲不振有以致之伏读通鉴辑览御批上示君道下禀臣子之分名义昭垂今录识之】辛亥图沁特穆尔军还皇太子至

路儿岭诏追及之还宫五月戊辰复命库库特穆尔讨博啰特穆尔东道以白索珠领兵三万守御京师中道以摩该珠展领兵四万西道以关保领兵五万合击之关保等兵逼大同博啰特穆尔留兵拒守而自率兵与图沁特穆尔鲁达实复大举向阙六月甲寅白索珠以兵至京师请皇太子西行秋七月丙戌博啰特穆尔前军入居庸关太子亲率兵御于清河伊苏军于昌平军士皆无鬪志太子驰还都城白索珠引兵入平则门丁亥白索珠扈从皇太子出顺承门由雄霸河闲取道往冀宁戊子博啰特穆尔驻兵健德门外与图沁特穆尔鲁达实入见帝于宣文阁庚寅以博啰特穆尔为中书左丞相鲁达实为中书平章政事图沁特穆尔为御史大夫其部属布列省台百司以伊苏知枢密院事诏谕博啰特穆尔库库特穆尔俱朕股肱视同心膂自今各弃宿忿弼成大勋是月吴王元璋取庐州路八月壬辰朔日有食之壬寅以博啰特穆尔为中书右丞相监修国史节制天下军马乙巳太子至冀宁乙卯张士诚逐达实特穆尔以其弟士信代为江浙行省左丞相南台御史大夫布哈特穆尔不从死之是月博啰特穆尔请诛狎臣图噜特穆尔布达斡尔密罢三宫不急造作沙汰宦官减省钱粮禁止西番僧人作佛事九月辛酉朔宦官斯隆尼潜送宫女布呼图出顺承门以达于皇太子是月吴王元璋取中兴及归峡潭衡等路冬十月己未诏谕太子还京师命伊苏鲁达实分道总兵

二十五年春正月癸亥封李思齐为许国公己巳吴王元璋取宝庆路守将唐隆道遁走伪汉守将熊天瑞以赣州及韶州南雄降于吴三月庚申皇太子下令于库库特穆尔军中曰博啰特穆尔袭据京师余既受命总督天下诸军恭行显罚少保中书平章政事库库特穆尔躬勒将士分道进兵诸王驸马及陝西平章政事李思齐等各统军马尚其奋义戮力克期恢复丙寅博啰特穆尔幽皇后奇氏于诸色总管府丁卯命鲁达实拜特穆尔并为御史大夫夏四月庚寅博啰特穆尔逼后还宫取印章伪为后书召太子遣内侍官谔勒哲图特往冀宁后出复幽之乙巳关保等兵进围大同乙卯遂入之五月乙亥吴王元璋破安陆府守将任亮迎战被执己卯吴王元璋破襄阳路六月戊子以黎安道为中书参知政事辛丑湖广行省左丞周文贵复宝庆路乙巳皇后奇氏还宫乙卯以太尉和尼齐为御史大夫是月太子加李思齐邠国公秋七月乙酉博啰特穆尔伏诛图沁特穆尔鲁达实皆北遁丙戌遣使函博啰特穆尔首往冀宁召太子还京师大赦黎安道方托克托雷一声皆伏诛八月丁亥朔京城门至是不开者三日珠展摩该军至城外命军士缘城而上碎平则门

键以入大掠都市癸卯诏皇太子分调将帅戡定未复
郡邑承制用人并准正授丁未皇后鸿吉哩氏崩壬子以洪巴拜特古斯布哈讷图并
为中书平章政事九月库库特穆尔扈从太子至京师
壬午以巴咱尔为太师中书右丞相监修国史库库特穆尔为太尉中书左丞相录军国
重事同监修国史知枢密院事兼太子詹事是月以方
国珍为淮南行省左丞相分省庆元冬十月壬寅以哈喇章为知枢密院事丁未益王昆
都特穆尔枢密副使观音努擒鲁达实诛之图沁特穆
尔以余兵往巴尔斯之地命岭北行省左丞相舒苏及知枢密院事魏赛音布哈同讨之
戊申以资政院使图噜为御史大夫闰月庚申以宾国
公五十八为知枢密院事诏张良弼俞宝孔兴等悉听库库特穆尔调遣辛未封库库特
穆尔河南王代太子亲征总制关陝晋冀山东迤南一
应军马听便宜行事辛巳以托克托穆尔为中书右丞达实特穆尔为参知政事十一月
吴王元璋取泰州十二月乙卯立次皇后奇氏为皇后
改奇氏为索隆噶氏癸亥以德呼苏为中书参知政事是月图沁特穆尔伏诛

二十六年春正月乙酉以崇政院使博罗实勒为御史大夫壬子以温扎木知枢密
院事是月以萨兰托里为中书左丞相命燕南河南山
东陝西河东等处举人会试者增其额数进士及第以下递升官一级二月癸丑朔立河
淮水军元帅府于孟津县是月库库特穆尔还河南分
立省部以自随调度各处军马陝西张良弼不应三月癸未朔罢洛阳嵩县宣慰司甲午
库库特穆尔遣关保浩尔齐以兵西攻张良弼于鹿台
以曼济托克托穆尔知枢密院事是月吴王元璋取高邮府夏主明玉珍卒子升立夏四
月吴王元璋取淮安路徐州宿州濠州泗州颍州安丰
路五月甲辰以托克托布哈为御史大夫秋七月辛巳朔日有食之甲申以李思齐为太
尉丙申库库特穆尔遣朱珍卢旺屯兵河中遣关保浩
尔齐合兵渡河会珠展商鬻且约李思齐以攻张良弼良弼遣子弟质于思齐合兵拒守
关保等不利思齐请诏和解之八月戊寅以李国凤为
中书左丞陈友定为福建行省平章政事九月甲申李思齐兵下盐井获川贼余继隆诛
之礼部侍郎满尚宾吏部侍郎温都尔罕自凤翔还京
师先是尚宾等持诏谕思齐开通川蜀道路思齐方兵争不奉诏尚宾等留凤翔一年至
是始还丙戌以方国珍为江浙行省左丞相弟国瑛国
珉侄明善并为江浙行省平章政事己亥以中书平章政事实勒们为御史大夫冬十月
甲子库库特穆尔遣其弟托音特穆尔及摩该谔勒哲
等驻兵济南控制山东十一月甲申吴王元璋取湖州路丙申取杭州路及绍兴路辛丑
取嘉兴路十二月吴王元璋立宗庙社稷韩林儿卒

二十七年春正月庚子吴王元璋取松江府癸卯取沅州路是月李思齐张良弼图鲁卜自会于含元殿基推李思齐为盟主同拒库库特穆尔二月

【按续通考载是年二月朔日食元史本纪失载】

庚申以迈珠为云国公七十为中书平章政事伊噜布哈为御史大夫乙丑以詹事伊噜特穆尔为御史大夫夏丑月戊寅以空名宣敕下福建行省命平章政事库春陈友谅同验有功者给之癸未福建行宣政院以废寺钱粮由海道送京师乙酉以谔勒哲特穆尔为中书右丞相己亥以温普为中书平章政事辛丑库库特穆尔定拟其所属官员二千六百一十人从之是月李思齐遣张良弼部将郭谦等守黄连寨库库特穆尔部将关保浩尔齐商曷珠展引兵拔其寨郭谦走会摩该等为变关保浩尔齐夜遁李思齐遂据长安六月丙午朔日有食之昼晦秋七月李思齐遣许国佐薛穆飞会张良弼图鲁卜兵屯于华阴时命图噜为陕西行省左丞相思齐不悦遣其部将郑应祥守陕西而自还凤翔八月丙午诏以皇太子总天下兵马其略曰元良重任在抚军稽古征今卓有成宪故察罕特穆尔仗义兴师献功敌忾为国捐躯深可哀悼其子库库特穆尔克继先志用成骏功会太子阿裕实哩达喇计安宗社累请出师朕以国本至重詎宜轻出遂授库库特穆尔总戎重寄畀以王爵俾代其行李李思齐张良弼等各怀异见构兵不已以致盗败愈炽深遣朕忧况全齐密迩鞬鞞失早计恐生异图询诸众谋金谓太子聪明仁孝文武兼资爰命以中书令枢密使悉总天下兵马诸王驸马各道总兵将吏一应军机政务生杀予夺事无轻重如出朕裁其库库特穆尔总领本部军马自潼关以东肃清江淮李思齐总统本部军马自凤翔以西进取川蜀以少保图噜为陕西行省左丞相本省驻扎总本部及张良弼孔兴图鲁卜各军进取襄樊王信本部军马固守信地别听调遣诏书到日汝等悉宜洗心涤虑同济时艰诏书虽下而太子不果行库库特穆尔亦不奉命于是其部将关保摩该等皆叛庚戌摩该杀卫辉守御官余仁辅彰德守御官范国英引军至清化欲袭怀庆闻库库有备遂还彰德乃上疏列其罪状于朝诏以库库特穆尔不遵君命宜黜其兵权就令摩该讨之辛亥特穆尔布哈进封淮王壬子为皇太子立大抚军院癸丑封太师巴咱尔永平王甲寅以右丞相谔勒哲特穆尔翰林承旨达尔玛并知大抚军院事辛酉以谔勒哲特穆尔仍前少师知枢密院事伊苏仍前太保中书右丞相特哩特穆尔以太尉为添设中书左丞相壬申命特哩特穆尔仍前太尉左丞相为知大抚军院事中书右丞陈

敬伯为中书平章政事九月丁丑以起兵迤南百姓供给繁重免真定河南陕西山东冀
宁等处今年田租之半其余杂泛一切住罢辛巳吴王
元璋取平江路执张士诚以归乙酉吴王元璋取通州丁亥取无锡州己丑诏伊苏以中
书右丞相分省山东萨兰托里以中书左丞相分省大
同己亥命特哩特穆尔提调端本堂及领经筵事辛丑吴王元璋取台州路时台州温州
庆元三路皆方国珍所据冬十月甲辰朔摩该以兵入
山西定孟州忻州下崞州遂攻真定诏伊苏自河闲以兵会摩该取真定不克命伊苏还
河闲摩该还彰德乙巳皇太子奏以淮南行省平章政
事王信为山东行省平章政事兼知行枢密院事立中书分省于真定路丙午加司徒淮
南行省平章政事王宣为沂国公壬子落库库特穆尔
太傅中书左丞相并诸兼领职事仍前河南王以汝州为其食邑其弟托音特穆尔以集
贤学士同居河南其帐前诸军索珠浩尔齐统之河南
诸军李克彝统之关保仍统本部诸军山东诸军伊苏统之山西诸军萨兰托里统之河
北诸军摩该统之大赦甲寅以浩尔齐为中书平章政
事乙丑以集贤大学士丁好礼为中书添设平章政事丙寅平章内史关保封许国公己
巳吴王元璋取温州十一月壬午取沂州守臣王信遁
癸未取庆元路方国珍迎降丙戌以平章政事伊噜特穆尔知枢密院事谔勒哲特穆尔
平章政事巴延特穆尔德呼苏并知抚军院事戊子吴
王元璋取泽州乙未以知枢密院事摩该为中书平章政事太尉中书左丞相特哩特穆
尔为抚军院使丁酉命关保分省于晋宁辛丑吴王元
璋取益都路平章政事巴拜降宣慰使布延布哈总管胡浚知院张俊皆死之十二月癸
卯朔日有食之丁未吴王元璋取般阳路戊申取济宁
路陈秉直遁己酉取莱州遂取济南及东平路丁巳入杉关取邵武路庚申以杨诚陈秉
直并为国公中书平章政事甲子命右丞相伊苏等会
杨诚陈秉直巴延布哈俞胜各部军同守山东又命关保往援山东丙寅以章嘉为中书
参知政事庚午吴王元璋由海道取福州守臣平章政
事库春遁行宣政院使托尔死之是月诏陕西行省左丞相图噜总统张良弼图鲁卜孔
兴等军以李思齐为副总统守关中仍令图鲁卜孔兴
等出潼关渡河合势东行共勤王事思齐等不奉命是岁诏分潼关以西属李思齐以东
属库库特穆尔各罢兵还镇于是关保退屯潞州商鬲
留屯潼关

二十八年春正月壬申朔皇太子命关保固守晋宁总统诸军以中书平章政事巴
延特穆尔为御史大夫乙亥吴王朱元璋即皇帝位于
建康国号曰明建元洪武是月明兵取建宁延平二路陈友定被执二月壬寅朔削库库

特穆尔爵邑令图鲁李思齐等讨之 【按明史库库特穆尔传顺帝削库库太傅中书左丞相令以河南王就食邑汝南分其军隶诸将库库既受诏即退军驻泽州其部将关保亦叛归于朝朝廷知库库势孤乃诏李思齐等东出关合兵攻之库库愤甚引兵据太原尽杀朝廷所置官吏于是下诏尽削其官爵令诸军四面讨之元史本纪俱略之】 癸丑明兵取东昌路守将申禁王辅元死之丙辰库库特穆尔自泽州退守晋宁关保守泽潞二州与摩该军合己未明兵取宝庆路甲子汀州路总管陈谷珍以城降于明丙寅明兵取棣州是月明兵至河南李思齐张良弼等解兵西还诏知枢密院事托和齐平章政事魏赛音布哈进攻晋宁兴化泉漳潮四路皆降于明三月明兵取河南李思齐张良弼会兵驻潼关明兵攻入之思齐奔凤翔明兵又取永惠二路夏四月辛丑朔取英德州戊申取广州路又取嵩陕汝等州五月庚午朔取道州李克彝奔河南城奔陕西推李思齐为总兵驻兵岐山是月李思齐部将和琳台托克托张意据整屋商曷据武功李克彝据岐山任从政据陇州六月癸丑明兵取全郴梧藤浔诸州贵象郁林等郡及静江路是月广西诸郡县皆附于明秋七月乙亥摩该关保以兵攻晋宁是月李思齐会李克彝商曷张意图鲁卜等于凤翔海南海北诸郡县皆降于明闰月己亥朔库库特穆尔与摩该关保战败之擒关保摩该遣其断事官以闻诏关保摩该闲谍构兵可依军法处治关保摩该皆被杀辛丑明兵取卫辉路癸卯取彰德路乙巳左江右江诸路皆降于明丁未明兵取广平路丁巳罢大抚车院诛知大抚军院事巴延特穆尔等诏复命库库特穆尔仍前河南王太傅中书左丞相统领见部军马由中道直抵彰德卫辉太保中书右丞相伊苏统率大军经由东道水陆并进少保陕西行省左丞相图鲁统率关陕诸军东出潼关攻取河洛太尉平章政事李思齐统率军马南出七盘金商克复汴洛四道进兵犄角剿捕毋分彼此秦国公平章知枢密院温普平章索珠等军东西布列乘机扫殄太尉辽阳左丞相额森布哈郡王知枢密院和逊等军捍御海口藩屏畿辅皇太子阿裕实哩达喇悉总天下兵马裁决庶务具如前诏甲子库库特穆尔自晋宁退守冀宁明兵至通州知枢密院事巴延特穆尔力战被擒死之左丞相实勒们传诏令太常礼仪院使鄂勒欢等奉太庙列室神主与皇太子同北行乙丑始罢内府兴造诏淮王特穆尔布哈监国庆通为中书左丞相同守京城丙寅帝御清宁殿集三宫后妃皇太子皇太子妃同议避兵北行左丞相实勒们及知枢密院事哈斯宦者赵巴延布哈等谏以为不可不听巴延布哈恸哭曰天下者世祖之天下陛下当以死守柰

何弃之臣等愿率军民及诸集赛台出城拒战愿陛下
固守京城卒不听夜半帝开健德门北去陈祖仁为乱军所害八月庚午【元史作庚申
按明兵入京城鸿猷录载系八月二日事上文闰
七月己亥朔推之应作庚午方与干支合谨改】明兵入京城元亡特穆尔布哈庆通丁
敬可郭允中死之后一年帝驻于应昌府又一年四月
丙戌殁年五十一太尉谔勒哲院使观音努奉梓宫北葬五月癸卯明兵袭应昌府皇孙
密迪哩巴拉及后妃并宝玉皆被获太子阿裕实哩达
喇从十数骑遁明主以帝知顺天命退避而去特加号曰顺帝封密迪哩巴拉为崇礼侯
【历代建元考云顺帝驻应昌一年而殁国人谥曰
惠宗太子嗣立改元宣光凡十一年谥曰昭宗按高丽史云顺帝北走驻应昌太子阿裕
实哩达喇嗣立徙和琳改元宣光称北元时洪武十年
也明年斗察剌特穆尔立北元遣使告高丽继又以改元天元告则继顺帝而建元者非
止宣光矣朔漠图考云洪武元年八月明兵取燕都
元主携历代传国玺遁出塞三年殁于应昌太子阿裕实哩达喇称帝于漠北传位于子
特古斯特穆尔后为其下伊苏岱尔所弑其臣复立袞
特穆尔为汗建文三年殁以果勒齐为汗永乐改元屡遣书招谕不服八年车驾亲征至
谔诺河十二年再征追至图拉河二十年三征次杀虎
原会部长阿噜台弑其主布尼雅实哩而自立数侵塞上宣德九年为威喇特部所败阿
噜台走死部落尽离散威喇特乃遣使入朝献传国玺
伏读通鉴辑览御批云顺帝出塞北去固未尝失帝号而子孙相继称汗与明代相
终始至我朝破察哈尔林丹汗而元始灭然史家于是
年即大书元亡以其失统系而远避正也圣训煌煌允为史家圭泉谨录识之】顺
帝元统二年至元六年至正二十八年凡三十六年右
元十四主合一百六十三年

钦定续通志卷七十

●钦定续通志卷七十一 后妃传一

后妃传

唐【一】

○唐一

（臣）等谨按郑樵通志帝纪之后次以后妃传自汉迄隋宫壶之鉴备焉厥后史
家著作互有异同旧唐书列武后于帝纪新书则纪传
兼收五代史立家人传后妃与宗室同科宋尊杜太后于卷首而辽金并溯先代金史又
载睿宗显宗诸后元史沿晋宋及旧唐书详载册命义
例固殊矣今裒辑后传汇为一编正其体例郑志吕后传仍班书则武后宜存传也郑志

后妃宗室分传则家人传宜析也郑志不载先代及王妃则辽金二史有可节也郑志不录晋宋以下册命则元史骈俪诸文可删也至公主传郑志唯后汉有之兹据旧史所有并加采辑各附于后传之后自唐而下宫闈之事治忽之原可以观矣

高祖太穆窦皇后 太宗文德长孙皇后徐贤妃 高宗废后王氏

【萧良娣】 则天武皇后 中宗和思

赵皇后庶人韦氏 上官昭容

△高祖太穆窦皇后

高祖太穆顺圣窦皇后京兆始平人【按新书作平陵人考隋京兆郡无平陵县有始平县今从旧书作始平】父毅在周为上柱国尚武帝姊襄阳公主入隋为定州总管神武公【按后周纪保定闲毅称神武公建德闲加上柱国隋纪开皇元年以上柱国神武郡公为定州总管则神武公本周爵也史以其仍袭旧封故系之定州总管之下】后幼读女诫列女等传一过不忘武帝爱之养于宫中异他甥时突厥女为后无宠后密谏曰吾国未靖突厥尚强愿抑情抚接以取合从则江南关东不吾梗矣武帝嘉纳及崩哀毁同所生闻隋高祖受禅自投床下曰恨吾非男子不能捋舅家祸毅遽掩其口曰毋妄言赤吾族常谓主曰此女不凡毋妄许人因画二孔雀屏闲请昏者使射二矢阴约中目则许之射者阅数十皆不合高祖后至射中各一目遂归于帝始元贞太后羸老有疾而姓素严诸娣姒皆畏莫敢侍后事之独怡谨尽孝淹月不释衣履工为篇章好存规诫又善书与高祖书相杂人莫辨也崩于涿郡年四十五帝在炆帝时多畜善马后见曰上性乐此盍以献徒留之速罪无益也不听顷果坐谴帝后见隋政乱多妄诛殛乃为自安之计数进鹰犬异驹炆帝果喜擢位将军因泣谓诸子曰早用而母言得此久矣帝有天下诏即所葬园为寿安陵谥曰穆及祔献陵尊为太穆皇后上元中益谥太穆神皇后

△太宗文德长孙皇后

太宗文德顺圣长孙皇后河南洛阳人父晟仕隋为右【新书作左今考隋书晟传改从旧书】骁卫将军后喜图传视古善恶以自鉴矜尚礼法晟兄炽为周通道馆学士尝闻太穆劝抚突厥女心志之每语晟曰此明睿人必有奇子不可不图昏故晟以归太宗后归奩舅高士廉妾见大马高二丈立后舍外惧而占之遇坤之泰卜者曰坤顺承天载物无疆马地类也之泰是天地交而万物通也女处尊位履中而居顺后妃象也时隐太子衅阅已构后孝事高祖谨承诸妃消释嫌猜及帝授甲宫中后亲慰

勉士皆感奋寻为皇太子妃太宗即位立为皇后性约素服御取给则止益观书虽容栉不少废与帝言或及天下事辞曰牝鸡司晨家之穷也乎帝固要之讫不对【谨按通鉴辑览 御批长孙后读书循理恭顺节俭固定为贤而辞议政一节识见卓越视汉明德尤远过之然以太宗英明岂不知牝鸡之意何必与后议赏罚哉】兄无忌于帝本布衣交以佐命元功出入卧内帝将引以辅政后固不可乘间曰妾托体紫宫尊贵已极不愿私亲更据权于朝汉之吕霍可以为诫帝不听竟用无忌为尚书仆射后密谕令牢让帝不获已改授无忌开府仪同三司后意乃怪异母兄安业无行当父丧时后及无忌并幼逐还外家后贵未尝以介意擢位将军后与李孝常【旧书作刘德裕】等谋反将诛后叩头曰安业罪死无赦然向遇妾不以慈外间知之今论如法人必谓妾释憾于兄无乃为帝累乎遂得减流越嵩后所生长乐公主帝特钟爱及将出降敕所司资送倍于长公主【谨按通鉴辑览 御批汉明封诸皇子皆令半楚淮阳向曾着论若太宗资送公主乃欲倍长公主较汉明之矫枉过正实为不及远矣】魏征引汉明帝封皇子事切谏帝以告后后叹曰尝闻陛下重魏征未知其故今闻其谏能以义制人主之情可谓正直社稷之臣矣忠言逆耳利于行有国家者纳之则俗寔杜之则政乱愿陛下详之因请遣中使赉帛五百匹诣征宅赐之【按后劝帝纳魏征谏事新书不载今从旧书增辑】太子承干乳媪请增东宫什器后曰太子患无德与名器何请为从幸九成宫【按新书柴绍急变一事旧书不载考吴缜纠缪云帝纪及柴绍传并未尝有急变事疑其无之今据删】染疾危惛太子欲请大赦并度人入道冀蒙福助后曰死生有命非人力所支若修福可延吾不为恶使善无效我尚何求且赦令国大事佛老异方教耳皆帝所不为岂宜以我乱天下法太子不敢奏以告房玄龄玄龄以闻帝嗟叹而羣臣请遂赦帝既许因后固争止及大渐与帝诀时玄龄小谴就第后曰玄龄久事陛下预奇计秘谋非大故愿勿置也妾家以恩泽进无德而禄易以取祸无属枢柄以外戚奉朝请足矣妾死不可以厚葬愿因山为垄无起坟无用棺椁器以瓦木约费送终是妾不见忘也又请帝纳忠容谏勿受谗省游畋作役死无恨崩年三十六后尝采古妇人事着女则十篇又为论斥汉之马后不能检抑外家使与政事乃戒其车马之侈此谓开本源恤末事且诫守者曰此吾以自检故书无条理勿令至尊见之及崩宫司以闻帝为之恻示近臣曰后此书可用垂后我岂不达天命而割情乎顾内失吾良佐哀不可已谥曰文德葬昭陵因九峻山以成后志帝自着表序始末揭陵

左上元中益谥文德顺圣皇后

△徐贤妃

徐贤妃名惠湖州长城人生五月能言四岁通论语毛诗八岁自晓属文父孝德尝试使拟离骚为小山篇曰仰幽岩而流盼抚桂枝以凝想将千龄兮此遇荃何为兮独往孝德大惊知不可掩于是所论著盛传太宗闻之召为才人手未尝释卷而辞致瞻蔚又无淹思帝益礼顾擢孝德水部员外郎惠再迁充容贞观末数调兵讨定四夷稍稍治宫室百姓劳怨惠上疏极谏且言东戍辽海西讨昆邱士马罢耗漕饷漂没捐有尽之农趋无穷之壑又言翠微玉华等宫虽因山藉水无筑构之苦而工力和儻不谓无烦又言伎巧为丧国斧斤珠玉为荡心酖毒侈丽纤美不可不遏志骄于业泰体逸于时安词意剝切反复数百言帝善而优赐之帝崩哀慕成疾不肯进药曰帝遇我厚得先狗马侍园寝吾志也复为诗连珠以见意永徽元年卒年二十四赠贤妃陪葬昭陵石室惠之弟齐聃齐聃子坚皆以学闻女弟为高宗婕妤亦有文藻世以拟汉班氏

△高宗废后王氏 【萧良娣】

高宗废后王氏并州祁人魏尚书左仆射思政之孙从祖母同安长公主以后婉淑白太宗以为晋王妃王居东宫妃亦进册擢父仁佑陈州刺史帝即位立为皇后仁佑以特进封魏国公母柳本国夫人仁佑卒赠司空初萧良娣有宠而武才人于贞观末以先帝宫人召为昭仪俄与后良娣争宠更相毁短而昭仪诡险即诬后与母挟媚道蛊上帝信之解魏国夫人门籍罢后舅柳奭中书令李义府等阴佐昭仪以偏言怒帝遂下诏废后良娣皆为庶人囚宫中后母兄良娣宗族悉流岭南许敬宗又讦奏仁佑无他功以宫掖故超列三事今庶人谋乱宗社罪宜夷宗仁佑应斲棺陛下不穷其诛家止流窜仁佑不宜引庇荫宥逆子孙有诏尽夺仁佑官爵帝忽念后闲行至囚所见门禁锢严进饮食囊中惻然伤之呼曰皇后良娣无恙乎今安在二人同辞曰妾等以罪弃为婢安得尊称耶流泪呜咽又曰陛下幸念畴日使妾死更生复见日月乞署此为回心院帝曰朕即有处置武后知之促诏杖二人百剔其手足反接投酿瓮中曰令二姬骨醉数日死殊其尸初诏旨到后再拜曰陛下万年昭仪承恩死吾分也至良娣骂曰武氏狐媚翻覆至此我后为猫使武后为鼠吾当扼其喉以报后闻诏六宫毋畜猫武氏频见二人被发沥血为厉恶之以巫祝解谢即徙蓬莱宫厉复见故多驻东都

△则天武皇后

则天顺圣皇后武氏并州文水人父士護见外戚传文德皇后崩久之太宗闻士護女美召为才人方十四母杨恸泣与诀后独自如曰见天子庸知非福何儿女悲乎母黷其意止泣既见帝赐号武媚及帝崩与嫔御皆为比丘尼高宗为太子时入侍悦之王皇后久无子萧淑妃方幸后阴不悦它日帝过佛庐才人见且泣帝感动后廉知状引纳后宫以挠妃宠才人有术数诡变不穷始下辞降体事后后喜数誉于帝故进为昭仪一旦顾幸在萧右寝与后不协后性简重不曲事上下而母柳见内人尚宫无浮礼故昭仪伺后所薄必款结之得赐予尽以分遗由是后及妃所为必得辄以闻然未有以中也昭仪生女后就弄之而去昭仪潜毙儿衾下伺帝至阳为欢言发衾视儿死矣惊问左右皆曰后适来昭仪即悲涕帝不能察怒曰后杀吾女往与妃相谗媚今又尔邪由是昭仪得入其訾后无以自解帝始有废后意久之昭仪乃诬后与母厌胜帝挟前憾实其言将遂废之长孙无忌褚遂良韩瑗来济濒死固争帝犹豫而中书舍人李义府卫尉卿许敬宗素险侧狙势即表请昭仪为后帝意决下诏废后诏李绩于志壹奉玺绶进昭仪为皇后命羣臣及四夷酋长朝后肃义门内外命妇入谒朝皇后自此始后见宗庙再赠士護至司徒爵周国公谥忠孝配食高祖庙母杨再封代国夫人家食魏千户后乃制外戚诫献诸朝解释讥噪于是逐无忌遂良踵死徙所宠煽赫然后城寓深痛柔屈不耻以就大事帝谓能奉己故扳公议立之已得志即盗威福施施无惮避帝亦懦昏举动钳勒使不得专久稍不平麟德初后召方士郭行真入禁中为盥祝宦人王伏胜发之帝怒西台侍郎上官仪指言后专恣失海内望不可承宗庙与帝意合乃趣使草诏废之左右驰告后遽从帝自诉帝羞缩待之如初【谨按通鉴辑览 御批密策废后此何等事岂有左右之奔告尚不能禁而可与图成者高宗羞缩受制庸懦不夫至此又岂特失臣之讥所能罄其恶哉】 犹意其恚且曰是皆上官仪教我后讽许敬宗构仪杀之初元舅大臣怫旨不阅岁屠覆道路目语及仪见诛则政归房帷天子拱手矣羣臣朝四方奏章皆曰二圣每视朝殿中垂帘帝与后偶坐生杀赏罚惟所命当其忍断虽甚爱不少隐也帝晚益病风不支天下事一付后后乃更为太平文治事大集诸儒内禁殿譔定列女传臣轨百寮新诫乐书等大抵千余篇因令学士密裁可奏议分宰相权始士護娶相里氏生子元庆元爽又娶杨氏生三女伯嫁贺兰越石早寡封韩国夫人仲即后季嫁郭孝慎前死杨以后故宠日盛徙封荣国始兄子惟良怀运与元庆等遇杨及后礼薄后衔不置及是元庆为宗正少卿元爽少府少监惟良司卫少

卿怀运淄州刺史它日夫人置酒酣谓惟良曰若等记畴日事乎今谓何对曰幸以功臣子位朝廷晚缘戚属进忧而不荣也夫人怒讽后伪为退让请惟良等外迁无示天下私繇是惟良为始州刺史元庆龙州元爽濠州俄坐事死振州元庆至州忧死韩国出入禁中一女国姝帝皆宠之韩国卒女封魏国夫人欲以备嫔职难于后未决后内忌甚会封泰山惟良怀运以岳牧来集从还京师后毒杀魏国归罪惟良等尽杀之以韩国子敏之奉土護祀初魏国卒敏之入吊帝为恻敏之哭不对后曰儿疑我恶之俄贬死杨氏徙鄆卫二国咸亨元年卒追封鲁国谥忠烈诏文武九品以上及五等亲与外命妇赴吊以王礼葬咸阳给班剑葆仗鼓吹时天下旱后伪表避位不许俄又赠士護太尉兼太子太师太原郡王鲁国忠烈夫人为妃上元元年进号天后建言十二事一劝农桑薄赋徭二给复三辅地三息兵以道德化天下四南北中尚禁浮巧五省费力役六广言路七杜谗口八王公以降皆习老子九父在为母服齐衰三年十上元前勋官已给告身者无追核十一京官八品以上益廩入十二百官任事久材高位下者得进阶申滞帝皆下诏畧施行之萧妃女义阳宣城公主幽掖庭几四十不嫁太子弘言于帝后怒酖杀弘帝将下诏逊位于后宰相郝处俊固谏乃止后欲外示宽裕却人心使归己即奏言今羣臣纳半俸百姓计口钱以贍边兵恐四方妄商虚实请罢之诏可仪凤三年羣臣蕃夷长朝后于光顺门即并州建太原郡王庙帝头眩不能视侍医张文仲秦鸣鳶曰风上逆砭头血可愈后内幸帝殆得自专怒曰是可斩帝体盗刺血处邪医顿首请命帝曰医议疾乌可罪且吾眩不可堪听为之医一再刺帝曰吾目明矣言未毕后帘中再拜谢曰天赐我师身负繒宝以赐帝崩中宗即位天后称皇太后嗣圣元年太后废帝为庐陵王自临朝以睿宗即帝位后坐武成殿帝率羣臣上号册越三日太后临轩命礼部尚书摄太尉武承嗣太常卿摄司空王德贞册嗣皇帝自是太后常御紫宸殿施惨紫帐临朝追赠五世以下祖考妣置园邑守户时睿宗虽立实因之而诸武擅命于是柳州司马李敬业等疾太后胁逐天子乃募兵谷欲迎庐陵王起兵三月而败传首东都始武承嗣请太后立七庙中书令裴炎沮止及敬业之兴下炎狱杀之并杀左威卫大将军程务挺太后方怫恚一日召羣臣廷让曰朕于天下无负若等知之乎羣臣唯唯太后曰朕辅先帝踰三十年忧劳天下爵位富贵朕所与也天下安佚朕所养也先帝弃羣臣以社稷为托朕不敢爱身而知爱人今为戎首者皆将相何见负之遽且受遣老臣伉扈难制有若裴炎乎世将种能合亡命若徐敬业乎宿将善战若程务挺乎彼皆

人豪不利于朕朕能戮之公等才有过彼蚤为之不然谨以事朕无貽天下笑羣臣顿首不敢仰视曰惟陛下命久之下诏阳若复辟者睿宗揣非情固请临朝制可乃冶铜匱为一室署东曰延恩受千赏自言南曰招谏受时政得失西曰申冤受抑枉所欲言北曰通玄受讖步秘策诏中书门下一官典领太后不惜爵位以笼四方豪杰自为助虽妄男子言有所合辄不次官之至不称职寻亦废诛不少纵务取实材真贤又畏天下有谋反逆者诏许上变在所给轻传供五品食送京师即日召见厚饵爵赏歆动之凡言变吏不得呵诘虽耘夫莠子必亲延见禀之客馆敢稽若不送者以所告罪之故上变者徧天下人人屏息无敢议新丰有山因震突出太后以为美祥赦其县更名庆山荆人俞文俊上言人不和疣赘生地不和堆阜出今陛下以女主处阳位山变为灾非庆也太后怒投岭外诏毁干元殿为明堂以浮屠薛怀义为使督作怀义鄂人本冯氏名小宝佯狂洛阳市千金公主嬖之主上言小宝可入侍后召与私悦之欲掩迹得通籍出入使祝发为浮屠拜白马寺主诏与太平公主婿薛绍通昭穆绍父事之给厩马中官为驺侍虽承嗣三思皆尊事惟谨至是护作十数万巨木率一章千人乃能引又度明堂后为天堂鸿丽严奥次之堂成拜左威卫大将军梁国公始作崇先庙于西京享武氏祖考承嗣伪款洛水石导使为帝遣雍人唐同泰献之后号为宝图擢同泰游击将军于是汜人又上瑞石太后乃郊上帝谢贶自号圣母神皇作神皇玺时柄去王室大臣重将皆挠不得逞宗室孤外无寄足地于是韩王元嘉等谋举兵唱天下迎还中宗琅琊王冲越王贞先发诸王仓卒无应者遂败元嘉与鲁王灵夔等皆自杀余悉坐诛诸王牵连死灭殆尽子孙虽婴褫亦投岭南太后身拜洛受图天子率太子羣臣蛮夷以次列大陈珍禽奇兽贡物鹵簿坛下礼成以永昌元年享万象神宫改服袞冕搢大圭执镇圭睿宗亚献太子终献合祭天地五方帝百神从以高祖太宗高宗配引魏王士護从配号父士護周忠孝太皇母杨忠孝太后以文水墓为章德陵咸阳墓为明义陵载初中又享万象神宫以太穆文德二皇后配皇地祇引周忠孝太后从配作璽■峯■团○■●■■■

■■十有二文【按吴缜纠缪云考集韵有■■■■■■■■七字亦后所作然则不止十有二文也】太后自名璽改诏书为制书拜薛怀义辅国大将军封鄂国公令与羣浮屠作大云经言神皇受命事春官尚书李思文诡言周书武成为篇辞有垂拱天下治为受命之符后喜皆班示天下稍图革命然畏人心不肯附乃阴忍鸩害肆斩杀怖天下内纵酷吏周兴来俊臣等数十人为爪吻有不慊若素疑惮者必危法中之

宗姓侯王及他骨鯁臣将相骈颈就鉄血丹豨户家不能自保太后操奩具坐重帟而国命移矣御史傅游艺率关内父老请革命改帝氏为武
又胁羣臣固请妄言凤集上阳宫赤雀见朝堂天子不自安亦请氏武示一尊太后知威柄在己因大赦天下改国号周自称圣神皇帝以皇帝
为皇嗣立武氏七庙于神都尊周文王为始祖武王 【后纪作四十代祖平王少子武】
为睿祖五世以下祖并称皇帝妣曰皇后加谥号罢
唐庙为享德庙四时祠高祖以下三室余废不享至日祀上帝万象神宫以始祖及考妣配以百神从祀尽王诸武诏并州文水县为武兴比汉
丰沛百姓世给复改建祖宗陵寝以章德陵为昊陵明义陵为顺陵太后虽春秋高善自涂泽虽左右不悟其衰俄而二齿生下诏改元为长寿
明年享神宫自制大乐舞工用九百人以武承嗣为亚献三思为终献帝之为皇嗣公卿往往见之会尚方监裴匪躬左卫大将军阿史那元庆
白涧府果毅薛大信监门卫大将军 【后纪作内常侍】 范云仙潜谒帝皆腰斩都市自是公卿不复上谒有上封事言岭南流人谋反者太
后遣摄右台监察御史万国俊就按得实即论决国俊至广州尽召流人矫诏赐自尽皆号哭不服国俊驱之水曲使不得逃一日戮二百余人
乃诬奏流人怨望请悉除之于是太后遣右卫翊府兵曹参军刘光业司刑评事王德寿苑南面监丞鲍思恭尚辇直长王太贞右武卫兵曹参
军屈贞筠皆摄监察御史分往剑南黔中安南等六道讯鞫而擢国俊左台侍御史光业等亦希功于上惟恐杀人之少光业杀者九百人德寿
杀七百人其余亦不减五百人太后久乃知其冤诏六道使所杀者还其家国俊亦相踵而死皆见有物为厉云太后又自加号金轮圣神皇帝
置七宝于廷曰金轮宝曰白象宝曰女宝曰白马宝曰珠宝曰主兵臣宝曰主藏臣宝率大朝会则陈之延载二年武三思率蕃夷诸酋及耆老
请作天枢纪太后功德以黜唐兴周制可使纳言姚璿护作乃大哀铜铁合冶之署曰大周万国颂德天枢置端门外悉镂羣臣蕃酋名氏其上
薛怀义宠稍衰而御医沈南璆进怀义失望因火明堂太后羞之掩不发怀义愈狠恣怏怏乃密诏太平公主择健妇缚之殿中命建昌王武攸
寔将作大匠宗晋卿率壮士击杀之以畚车载尸还白马寺怀义负幸昵气盖一时出百官上其徒多犯法御史冯思勗劾其奸怀义怒遇诸道
命左右殴之几死弗敢言默啜犯塞拜新平伐逆朔方道大总管提十八将军兵击胡宰相李昭德苏味道至为之长史司马后厌入禁中阴募
力少年千人为浮屠有逆谋侍御史周矩劾状请治验太后曰第出朕将使诣狱矩坐台少选怀义怒马造廷直往坐大榻上矩召吏受辞怀义

即乘马去矩以闻太后曰是道人素狂不足治力少年听穷劾矩悉投放丑裔怀义俄构矩免官太后祀天南郊以文王武王士彧与唐高祖并配太后加号天册金轮圣神皇帝遂封嵩山禅少室册山之神为帝配为后封坛南有大榭蔽日置鸡其杪赐号金鸡树自制升中述志刻石示后改明堂为通天宫铸九州岛鼎各位其方列廷中久之以崇先庙为崇尊庙礼视太庙旋复崇尊庙为太庙自怀义死张易之昌宗得幸乃置控鹤府有监有丞及主簿录事等官监三品以易之为之太后自见诸武王非天下意前此中宗自房州还复为皇太子恐百岁后为唐宗室躡藉无死所即引诸武及相王太平公主誓明堂告天地为铁券使藏史馆久视初以控鹤监为天驥府又改奉宸府罢监为令以左右控鹤为奉宸大夫易之复为令神龙元年太后有疾久不平居迎仙院宰相张柬之与崔玄暉等建策请中宗以兵入诛易之昌宗于是羽林将军李多祚等帅兵自玄武门入斩二张于院左太后闻变而起桓彦范进请传位太后返卧不复语中宗于是复即位徙太后上阳宫帝率百官诣观风殿问起居后率十日一诣宫俄朝朔望废奉宸府官迁东都武氏庙复唐宗庙诸武王者咸降爵是岁后死遣制称则天大圣皇太后去帝号谥曰则天大圣后祔干陵及韦武党诛诏则天大圣皇后复号天后景云元年号大天后太平公主奸政复请尊后曰天后圣帝俄号圣后太平诛诏罢昊顺等陵开元四年追号则天皇后太常卿姜皎建言则天皇后配高宗庙主题天后圣帝非是请易题为则天皇后武氏制可

△中宗和思赵皇后

中宗和思顺圣赵皇后京兆长安人祖绰武德中战有功终右领军卫将军父瓌尚高祖常乐公主帝为英王聘后为妃高宗于公主恩尤隆武后不喜乃幽妃内侍省瓌自定州刺史驸马都尉贬括州绝主朝谒随瓌之宫妃既囚扃键牢谨日给饲料卫者候其突烟数日不出披户视之死腐矣瓌以寿州刺史与主预越王事死神龙元年追谥妃曰恭皇后赠瓌左卫大将军中宗崩葺陵事韦庶人不臣不得祔有司加上尊号以后祔定陵

△庶人韦氏

庶人韦氏京兆万年人祖宏表贞观中曹王府典军帝在东宫后被选为妃嗣圣初立为皇后俄与帝处房陵每使至帝辄恐欲自杀后止曰祸福何常早晚等死耳无遽及帝复即位后居中宫是时上官昭容与政事方敬暉等将尽诛诸武武三思惧乃因昭容入请得幸于后卒谋暉等诛之初帝幽废与后约一朝见天日不相制至是与三思升御床博戏帝从旁点筹

不为忤三思讽羣臣上后号为顺天皇后乃亲谒宗庙
赠父元贞上洛郡王左拾遗贾虚己谏不听神龙三年宗楚客率羣臣请加号翊圣诏可
禁中谬传有五色云起后衣笥帝图以示诸朝因大赦
天下赐百官毋妻封号太史迦叶志忠表上桑条歌十二篇言后当受命曰昔高祖时天
下歌桃李太宗时歌秦王破阵高宗歌堂堂天后世歌
武媚娘皇帝受命歌英王石州后今受命歌桑条韦盖后妃之德专蚕桑共宗庙事也乃
赐志忠第一区彩七百段太常少卿郑愔因之被乐府
楚客又讽补阙赵延禧离释桑条为九十八代 【按旧书作十八代】 擢延禧谏议大
夫于是昭容以武氏事动后即表增出母服民以二十
三为丁五十九免五品而上母妻不由夫子封者丧得用鼓吹数改制度阴储人望稍宠
树亲属封拜之昭容与母及尚宫贺娄等多受金钱由
是墨敕斜封出矣三年帝亲郊引后亚献明年正月望夜帝与后微服过市彷徨观览纵
宫女出游皆淫奔不还国子祭酒叶静能善禁架常侍
马秦客高医光禄少卿杨均善烹调皆引入后庭均秦客烝于后尝丧免不厯旬辄起帝
遇弑议者讟咎秦客及安乐公主后大惧引所亲议计
乃以刑部尚书裴谈工部尚书张锡辅政留守东都诏将军赵承福 【旧书作赵承恩】
辞简 【旧书作辞崇简】 以兵五百卫譙王重
福与兄温定策立温王重茂为皇太子列府兵五万分二营屯京师然后发丧太子即位
是为殇帝皇太后临朝温总内外兵检护官省族弟濯
播宗子捷璇璇甥高崇及武延秀分领左右屯营羽林飞骑万骑京师大恐传言且革命
俄而临淄王引兵夜披玄武门入羽林杀璇播崇于寝
斧关叩太极殿后遁入飞骑营为乱兵所杀斩延秀安乐公主分捕诸韦诸武与其支党
悉诛之梟后及安乐首东市翌日追贬为庶人

△上官昭容

上官昭容名婉儿西台侍郎仪之孙父廷芝与仪同被诛 【新书作死于武后时按
纠缪云仪死在麟德元年不得谓之武后时也今改
从旧书】 婉儿始生与母郑配掖庭天性韶警善文章年十四武后召见有所制作若素
构自通天以来内掌诏命揆丽可观尝忤旨当诛后惜
其才止黥而不杀也然羣臣奏议及天下事皆与之帝即位大被信任进拜昭容封母郑
沛国夫人婉儿通武三思故诏书推右武氏抑唐家节
愍太子不平及举兵叩肃章门索婉儿婉儿曰吾死当次索皇后大家矣以激怒帝帝与
后挟婉儿登玄武门避之会太子败乃免婉儿劝帝侈
大书馆增学士员引大臣名儒充选数赐宴赋诗君臣赓和婉儿常代帝及后长宝安乐
二主众篇并作而采丽益新又差第羣臣所赋赐金爵

故朝廷靡然成风当时属辞者大抵虽浮靡然所得皆有可观婉儿力也郑卒谥节义夫人婉儿请降秩行服诏起为婕妤俄为昭容帝即婉儿居穿沼筑岩即引侍臣宴其所与崔湜乱遂引知政事韦后之败斩阙下初郑方姪梦巨人舁大称曰持此称量天下婉儿生踰月母戏曰称量者岂尔耶辄哑然应后内乘机政符其梦云景云中追复昭容谥惠文始从母子王昱为拾遗戒郑曰帝往囚房陵武氏得志矣卒而中兴天命所在不可幸也三思虽乘衅天下知必败今昭容帝所信而附之且灭族郑以责婉儿不从节愍诛三思果索之始忧惧及草遗制即引相王辅政临淄王兵起被收婉儿以诏草示刘幽求幽求言之王王不许遂诛死

钦定续通志卷七十一

●钦定续通志卷七十二 后妃传二

后妃传

唐【二】

○唐二

睿宗肃明刘皇后 昭成窦皇后玄宗废后王氏 贞顺武皇后元献
杨皇后 杨贵妃肃宗废后庶人张氏
章敬吴皇后韦妃 代宗贞懿独孤皇后睿贞沈皇后 崔妃德
宗昭德王皇后 韦贤妃顺宗庄宪王皇后
宪宗懿安郭皇后孝明郑皇后 穆宗恭僖王皇后贞献萧皇后
宣懿韦皇后尚宫宋若昭 敬宗郭贵妃
武宗王贤妃

△睿宗肃明刘皇后

睿宗肃明顺圣刘皇后祖德威自有传仪凤中帝在藩纳为孺人俄为妃生宁王寿昌代国二公主帝即位为皇后帝降号皇嗣复为妃长寿二年为户婢诬与宝德妃挟蛊道祝诅武后并杀之景云元年追谥肃明皇后

△昭成窦皇后

睿宗昭成顺圣窦皇后曾祖抗父孝湛自有传后婉淑尤循礼则帝为相王纳为孺人即位进德妃生玄宗及金仙玉真二公主与肃明同追谥肃明曰惠陵后曰靖陵立别庙曰仪坤以享之帝崩追称皇太后与肃明祔桥陵后以子贵故先祔睿宗室肃明以开元二十年乃得祔庙天宝八载制诏自太穆而下六皇后并增上顺圣二谥云

△玄宗废后王氏

玄宗废后王氏同州下邳人梁冀州刺史神念之裔孙帝为临淄王聘为妃将清内难预大计先天元年立为皇后久无子而武妃稍有宠

后不平显诋之帝密欲废后以语姜皎皎漏言即死后兄守一惧为求厌胜浮屠明悟教祭北斗取霹雳木刻天地文及帝讳佩之曰后有子与则天比开元十二年事觉帝自临劾有状乃废为庶人赐守一死始后以爱弛不自安承间泣曰陛下独不念阿忠脱紫半臂易斗面为生日汤饼耶帝悯然动容阿忠后呼其父仁皎云由是久乃废当时王譔作翠羽帐赋讽帝未几卒以一品礼葬后宫思慕之帝亦悔宝应元年追复后号

△贞顺武皇后

贞顺武皇后恒安王攸止女幼入宫帝即位寢得幸时王皇后废故进册惠妃其礼秩比皇后初帝在潞赵丽妃以倡幸有容止善歌舞开元初父兄皆美官及妃进丽妃恩亦弛以十四年卒谥曰和生太子瑛而皇甫德仪生鄂王刘才人生光王皆藩邸之旧后爱薄而妃乃专宠封所生母杨郑国夫人弟忠国子祭酒信秘书监将遂立为皇后御史潘好礼上疏言礼父母雖不共戴天春秋子不复讎不予也陛下欲以武氏为后何以见天下士妃再从叔三思从父延秀皆干纪乱常天下共疾匹夫匹妇尚相择况天子乎今人间咸言右丞相张说欲取立后功图复相今太子非惠妃所生而妃有子若一偏宸极则储位将不安遂不果立妃生二王一主皆不育及生寿王帝命宦王养之外邸又生盛王咸宜太华二公主后李林甫以寿王母爱希妃意陷太子鄂光二王皆废死会妃薨年四十余赠皇后及谥葬敬陵

△元献杨皇后

元献杨皇后华州华阴人曾祖士达为隋纳言天授中以武后母党追封士达为郑王父知庆大尉帝在东宫后以景云初入宫为良媛时太平公主忌帝而宫中左右持两端纤悉必闻媛方娠帝不自安密语侍讲张说曰用事者不欲吾多子柰何命说挟剂以入帝于曲室自煮之梦若有介而戈者环鼎三而三煮尽覆以告说说曰天命也乃止生男是为肃宗帝即位为贵嫔初肃宗生卜云不宜养乃命王皇后举之后抚肃宗如所生后又生宦亲公主乃薨肃宗即位至德二载太上皇自蜀诏有司其议尊称遂上册谥宝应末祔泰陵

△杨贵妃

杨贵妃隋梁郡通守汪四世孙徙籍蒲州遂为永乐人幼养叔父家始为寿王妃开元二十五年武惠妃薨【按吴缜纠谬载武惠妃薨于二十五年而杨贵妃传误作二十四年考新旧书纪及资治通鉴皆作二十五年今据改】后宫无当帝意者或言妃姿质天挺宜充掖廷遂

召纳禁中异之即为自出妃意者丐籍女官号太真更为寿王聘韦昭训女而太真得幸善歌舞邃晓音律且知算警颖迎意辄悟帝大悦遂专房宴宫中号娘子仪体与皇后等天宝初进册贵妃追赠父玄琰太尉齐国公擢叔玄珪光禄卿宗兄钜鸿庐卿锜侍御史尚太华公主主惠妃所生最见宠遇而钊亦寢显钊国忠也三姊皆美劭封韩虢秦三国为夫人出入宫掖声焰震天下台省州县奉请托奔走期会过诏敕四方献饷结纳门若市然建平信成二公主以与妃家忤至追内封物驸马都尉独孤明失官他日妃以谴还钜第比中仄帝尚不御食笞怒左右高力士欲验帝意乃白以殿中供帐司农酒饩百余车送妃所帝即以御膳分赐力士知帝旨是夕请召妃还下钥安兴坊门驰入妃见帝伏地谢帝释然抚慰良渥明日诸姨上食乐作骤赐左右不可货由是愈见宠赐诸姨钱岁百万为脂粉费钜以上柱国门列戟与锜国忠诸姨五家第舍联亘拟宪宫禁率一堂费缗千万见他第有胜者辄坏复造务以瓌侈相夸诩帝所得奇珍及贡献分赐之使者相衔于道五家如一妃每从游幸乘马则力士授辔策凡充锦绣官及冶琢金玉者大抵千人奉须索奇服秘玩变化若神四方争为怪珍入贡动骇耳目于是岭南节度使张九章广陵长史王翼以所献最进九章银青阶擢翼户部侍郎妃嗜荔枝乃置骑传送味未变已至京师天宝九载妃复得谴还外第国忠谋于吉温温因见帝曰妇人过忤当死然何惜宫中一席广为鉄锁地更使外辱乎帝感动辍食诏中人张韬光赐之妃因韬光谢帝曰妾有罪当万诛然肤发外皆帝所赐今且死无以报引刀断一縲发奏之曰以此留诀帝见骇惋遽召入礼遇如初因又幸秦国及国忠第赐两家巨万国忠遥领剑南十载正月望夜妃家与广盛主僮骑争阊门鞭挺讙竞主堕马仅得去主见帝泣乃诏杀杨氏奴贬驸马都尉程昌裔 【公主传作程昌胤】 官国忠辅政其息咄尚万春公主暄尚延和郡主弟鉴尚承荣郡主又诏为玄琰立家庙帝自书其碑钜秦国早死故韩虢与国忠贵最久而虢国素与国忠乱颇为人知不耻也每入谒并辔道中从监侍姆百余骑炬密如昼初安禄山有边功帝宠之诏与诸姨约为兄弟而禄山母事妃来朝必宴饯结欢禄山反以诛国忠为名且指言妃及诸姨罪帝欲以皇太子抚军因禅位诸杨大惧哭于庭国忠入白妃妃衔块请死帝意沮乃止及西幸至马嵬陈玄礼等以天下计诛国忠已死军不解帝遣力士问故曰祸本尚在帝不得已与妃诀引而去缢路祠下裹尸以紫茵瘞道侧年三十八帝至自蜀道过其所使祭且诏改葬礼部侍郎李揆曰龙武将士以国忠负上速乱为天下杀之今葬妃恐反仄自疑

帝乃止密遣中使具棺椁他葬焉启瘞故香囊犹在中人以献帝视之凄感流涕命工貌妃于别殿朝夕往必为哽欷马嵬之难虢国与国忠妻裴柔等奔陈仓县令率吏追之意以为贼弃马走林虢国先杀其二子柔曰娘子为我尽命即并其女刺杀之乃自刭不殊吏载置于狱问曰国家乎贼乎吏曰互有之乃死瘞陈仓东郭外

△肃宗废后庶人张氏

肃宗废后庶人张氏 【旧书作肃宗张皇后今从新书】 邓州向城人家徙新丰【旧书作南阳西鄂人后徙昭应按唐地理志邓州南阳郡其属有向城汉西鄂县地是旧书误沿汉名也至省新丰入昭应在天宝七载新旧书不嫌互异】 祖母窦昭成皇后女弟也玄宗幼失昭成母视姨鞠爱笃备帝即位封邓国夫人亲宠无比五息子曰去惑去疑去奢去逸去盈皆显官去盈 【公主传作去奢】 尚常芬公主去逸生后肃宗为太子时纳韦元珪女为妃后为良娣既以事绝韦妃良娣得专侍良娣慧中而辩能迎意傅合玄宗西幸娣与太子从度渭民鄣道乞留复长安太子不听中人李辅国密启娣又赞其谋遂定计北趋灵武时军卫单寡夕次娣必寝前太子曰暮夜可虞且捍贼非妇人事对曰事若仓卒妾自当之殿下可徐为计驻灵武产子三日起缝战士衣太子敕止对曰今岂自养时也 【谨按通鉴辑览 御批良娣新产为战士缝衣犹妇人固宠取怜常态至欲居前御寇自托于冯婕妤之当熊肃宗为巧言所惑不明甚矣先为小忠小信以成其大不忠不信妇寺类然他日窃柄宫闈几蹈武韦前辙皆此一念阶之祸也】 开元初册拜淑妃赠其父尚书左仆射弟清潜皆尚郡主遂立为皇后稍预政事与李辅国相助多以私谒挠权亲蚕苑中羣命妇相礼仪物甚盛二年羣臣上帝尊号后亦讽羣臣尊己号翊圣帝问李揆揆争不可会月蚀帝以咎在后宫乃止又与辅国谋徙上皇西内端午曰帝召见山人李唐帝方拥幼女顾唐曰我念之无怪也唐曰太上皇今日亦当念陛下帝泫然涕下而内制于后卒不敢谒西宫帝不豫后自针血写佛书以示诚初建宁王倓数短后于帝上皇在蜀以七宝鞍赐后而李泌请分以赏战士倓助泌请故后怨卒被谮死由是太子深畏事后谨甚后犹欲危之然以子昭早死而侗幼故太子得无患宝应九年帝大渐后与内官朱辉光等谋立越王系而李辅国程元振以兵卫太子幽后别殿代宗已立羣臣白帝请废为庶人清潜与舅窦履信皆流放支党伏诛 【按旧唐书作肃宗张皇后其废为庶人纪传中皆不载资治通鉴亦同唯新唐书直言肃宗废后庶人张氏详叙于传代宗纪亦载追废皇后张氏越王

系为庶人今纪传皆本新唐书为准故仍其例书之】

△章敬吴皇后

章敬吴皇后濮州濮阳人父令珪以郟丞坐事死故后幼入掖庭开元中玄宗幸忠王邸顾王服御萧然左右无嫔侍帝愀然谓高力士曰儿居处乃尔诏选京兆良家子五人娱侍太子力士曰京兆料择人有以借口不如取掖庭衣冠子可乎诏可得三人而后在中因蒙幸明年生代宗为嫡皇孙后性谦柔太子礼之甚优渥年十八薨代宗即位羣臣请以后祔肃宗庙乃追尊为皇后上谥合葬建陵【按新书原传载肃宗在东宫宰相李林甫阴谋不测太子内忧鬓发斑秃玄宗见不悦因幸其宫顾廷宇不汛扫乐器尘蠹左右无嫔侍帝愀然诏选掖庭衣冠子入侍后在选中因蒙幸生代宗又载代宗生三日帝临澡之负姆更取他宫儿以进吴缜纠缪云代宗之生以帝纪推之当在开元十五年时太子瑛尚在东宫李林甫未为相至二十六年肃宗为太子则代宗已年十二矣且肃宗既为太子汛扫廷宇整饰乐器宜各有典司岂有乘輿方至而恬然不加整治者至负姆易儿虽人臣之家不宜有是况至尊之前则原传固诞漫不足信也今依旧书重加订正事涉荒诞者悉删之】

△韦妃

韦妃父元珪兖州都督肃宗为忠王时纳为孺人及升储位为太子妃生兖王倓绛王佺永和公主永穆公主天宝中宰相李林甫不利于太子妃兄坚为刑部尚书林甫罗织起柳绩之狱坚连坐得罪兄弟并赐死太子惧上表自理言与妃情义不睦请离婚玄宗慰抚之听离妃遂削发被尼服居禁中佛舍西京失守妃亦陷贼至德二载薨于京城【按新书不为韦妃立传附载张后传中旧书则列传于吴后之前考郑志废后亦为立传今依旧书补入次于吴后之后】

△代宗贞懿独孤皇后

代宗贞懿独孤皇后父颖左威卫录事参军后以姝艳居常专夜帝即位册贵妃生韩王迥华阳公主大历十年薨追号为皇后上谥帝悼思不已故殡内殿累年不外葬后三年始诏于都左治陵欲朝夕望见之补阙姚南仲谏而止乃葬庄陵诏宰相常袞为哀册帝于后厚故送终华广务称其情诏羣臣为挽词帝择其尤悲者令歌之初后爱遇第一官其宗叔卓少府监兄良佐太子中允

△睿贞沈皇后

睿贞沈皇后吴兴人开元末以良家子入东宫太子以赐广平王实生德宗天宝乱贼囚后东都掖庭王入洛复留宫中时方北讨未及归

长安而河南为史思明所没遂失后所在代宗立以德宗为皇太子诏访后所在不能得德宗即位乃先下诏赠后曾祖士衡太保祖介福太傅父易直太师从父易良司空易直子震太尉一日封拜百二十七人建中元年乃具册前上皇太后尊号帝供帐含元殿具袞冕出自左序立东方羣臣在位帝再拜奉册欷歔感咽左右皆泣于是中书舍人高参上议汉文帝即位遣薄昭迎太后于代今宜用汉故事令有司择日分遣诸沈行州县物色咨访以述宣皇帝孝思意冀上天降休灵命允答须审知皇太后行在然后遣大臣备法驾奉迎帝乃以睦王述为奉迎使工部尚书乔琳副之升平公主侍起居使者分行天下故中官高力士女颇能言禁中事与女官李真一尝从后游李见高疑问之含糊不坚而年状差似于是迎还上阳宫驰以闻帝喜羣臣皆贺力士子知非是具言其情诏贷之帝谓左右吾宁受百罔冀一得真于是自谓太后者数矣及索验左皆辞穷终帝世无闻焉贞元七年诏赠外高祖琳为司徒封徐国公为立五庙以琳为始祖诏族子房为金吾将军奉其祀宪宗即位有司建言皇太后沈氏厌代二十有七年大行皇帝至孝哀思罔极建中时发明诏遣使者奉迎凡舟车所至罔不逮岁推月迁参访理绝请因大行皇帝启殡诏羣臣为皇太后发哀肃章内殿中人奉廡衣置幄坐宫中朝夕上食告天地宗庙上太皇太后谥册作神主祔代宗庙备法驾奉祔衣纳于元陵祠室诏曰可

△崔妃

崔妃博陵安平人父响秘书少监母杨氏韩国夫人当代宗为广平王时玄宗选韩国之女嫔于广平邸礼仪甚盛生召王偲初妃挟母氏之势性颇妬悍及西京陷贼母党皆诛妃从王至灵武恩顾渐薄达京而薨【按新书附载崔妃事于独孤后传中今依旧书别为立传以昭画一】

△德宗昭德王皇后

德宗昭德王皇后帝为鲁王时纳为嫔生顺宗尤见宠礼既即位册号淑妃赠其父遇扬州大都督子姓姻出悉得官贞元三年妃久疾帝念之遂立为皇后册礼方讫而后崩羣臣大临三日帝七日释服将葬后母郾国夫人请设奠有诏祭物无用寓欲祭听之于是宗室王大臣李晟浑瑊等皆祭自发涂日日奠终发引乃止葬靖陵置令丞如他陵台立庙奏坤元之舞敕宰相张延赏柳浑等制乐曲帝嫌文不工李纾上谥册曰大行皇后帝又谓不典并诏翰林学士吴通玄改撰册曰咨后王氏然议者谓岑文本所上文德皇后册言皇后长孙氏为得礼永贞元年

改祔崇陵

△韦贤妃

韦贤妃戚里旧族祖濯尚定安公主贞元四年册拜贤妃宫壶事无不听而性敏淑言动皆有绳矩帝宠重之后宫莫不师其行帝崩自表

留奉崇陵园元和四年薨

△顺宗庄宪王皇后

顺宗庄宪王皇后琅琊人祖难得有功名于世代宗时后以良家选入宫为才人顺宗在藩帝以才人幼故赐之为王孺人是生宪宗王在

东宫册为良娣后性仁顺宫中化其德莫不柔雍顺宗即位疾已绵顿后侍医药不稍怠将立后会病棘而止宪宗内禅尊为太上皇后元和元

年乃上尊号曰皇太后后谨畏深抑外家无丝毫假贷训厉内职有古后妃风十一年崩

【按新书作十年崩帝纪载十一年三月庚午皇太后崩与旧书纪传相符则十年误也今从帝纪改】 年五十四遗令皇帝宜三日听政二十七日释服天下吏民令到临三日止宫中非朝暮临无辄哭无禁昏嫁祠祀饮酒食肉已释服听举乐侍医无加罪陪祔如旧制有司上谥葬丰陵

△宪宗懿安郭皇后

宪宗懿安郭皇后汾阳王子仪之孙父暖尚升平公主实生后宪宗为广陵王聘以为妃顺宗以其家有大功烈而母素贵优礼之异诸妇

是生穆宗元和元年进册贵妃八年十二月羣臣三请立为后帝以岁暮来年者子午忌且止 【新书云八年羣臣三请立为后帝以岁子午

忌按资治通鉴元和八年岁在癸巳其来年则甲午也旧书较明晰从之】 是时后庭多嬖艳恐后得尊位钳掣不得肆故章报闻罢穆宗嗣位

上尊号皇太后赠暖太尉母齐国大长公主擢兄钊刑部尚书縱金吾大将军后移御兴庆宫凡朔望三朝帝率百官诣宫门为寿或岁时庆问

宴飨后宫戚里内外妇车骑骈壅环佩之声满宫帝亦豪矜朝夕供御务华衍侈大称后意后尝幸骊山登览徘徊诏景王督禁甲从帝至昭应

奉迎留帐饮数日还帝崩中人为后谋称制者后怒曰吾效武氏耶今太子虽幼尚可

选重德为辅吾何与外事哉敬宗立号太皇太后宝厯之变后召江王嗣帝位是为文宗文宗性谨孝事后有礼凡羞果鲜珍及四方奇奉必先

献宗庙三宫而后御之武宗喜畋游角武扑择五坊小儿得出入禁中他日问后起居从容请曰如何可为盛天子后曰谏臣章疏宜审览可用

用之有不可以询宰相毋拒直言勿纳偏言以忠良为腹心此盛天子也帝再拜还索谏章阅之往往道游猎事自是畋幸稀小儿武扑等不复

横赐矣宣宗立于后诸子也而母郑故侍儿有曩怨帝奉养礼稍薄后郁郁不聊与一二侍人登勤政楼将自陨左右共持之帝闻不喜是夕后崩【按旧书云宣宗继统恩礼愈异于前朝资治通鉴所载则与新书相合今从新书】有司上尊谥葬景陵外园太常官王皞请后合葬景陵以主祔宪宗室帝不悦令宰相白敏中让之皞曰后乃宪宗东宫元妃事顺宗为妇历五朝母天下不容有异论俄贬皞句容令懿宗咸通中皞还为礼官申抗前论乃诏后主祔庙

△孝明郑皇后

孝明郑皇后丹阳人或言本尔朱氏元和初李锜反有相者言后当生天子锜闻纳为侍人锜诛没入掖庭侍懿安后宪宗幸之生宣宗宣宗为光王后为王太妃及即位尊为皇太后太后不肯别处故帝奉养大明宫朝夕躬省候焉懿宗立尊后为太皇太后咸通三年帝奉后宴三殿命翰林学士侍立结绮楼下六年【旧书作大中末】崩移杖西内上谥册葬景陵旁园

△穆宗恭僖王皇后

穆宗恭僖王皇后越州人本仕家子幼得侍帝东宫生敬宗长庆时册为妃敬宗立上尊号为皇太后赠后父绍卿司空母张追封赵国夫人文宗时称宝历太后太和五年【旧书作太和八年】宰相建白以太皇太后与宝历太后称号未辨前代诏令不敢斥言皆以宫为称今宝历太后居义安殿宜曰义安太后诏曰可会昌五年崩有司上谥葬光陵东园

△贞献萧皇后

贞献萧皇后闽人也穆宗为建安王后得侍生文宗文宗立上尊号曰皇太后初后去家入长安不复知家存亡惟记有弟帝为访之俄有男子萧弘因后姊婿吕璋白之太后谓得真弟悲不自胜帝拜弘金吾将军出为河阳三城节度使稍徙鄜坊会闽有男子萧本又称太后弟仇士良以闻召弘下狱按治乃代人诏流驩州不半道赐死擢本赞善大夫宠赠三世帝以为真不淹旬赐累巨万然太后真弟庸软莫能自达本给得其家系仇士良主之遂听不疑历卫尉卿金吾将军会福建观察使唐扶上言泉州男子萧弘自言太后弟御史台参治非是昭义刘从谏又为言请与本辨有诏三司高元裕孙简崔郾杂问乃皆妄本流爱州弘儋州而太后终不获弟初太和中懿安太后居兴庆宫宝历太后居义安殿后居大内号三宫太后帝每五日问安及岁时庆谒率由复道至南内开成中正月望夜帝御咸泰殿大然镗作乐迎三宫太后奉觞进寿如家人诸王公主皆得侍武宗时徙积庆殿又号积庆太后大中元年【旧书作会昌中

】 崩上今谥

△宣懿韦皇后

宣懿韦皇后失其先世穆宗为太子后得侍生武宗长庆时册为妃武宗立妃已亡追册为皇太后上尊谥又封后二女弟为夫人有司奏太后陵宜别制号帝乃名所葬园曰福陵既又问宰相葬从光陵与但祔庙孰安奏言神道安于静光陵因山为固且二十年不可更穿福陵崇筑已备当遂就之臣等请奉主祔穆宗庙便帝乃下诏朕因诞日展礼于太后太后谓朕曰天子之孝莫大于承续今穆宗皇帝虚合享之位而宣懿太后实生嗣君当以祔庙由是奉后合食穆宗室

△尚宫宋若昭

尚宫宋若昭贝州清阳人世以儒闻父廷芬能辞章生五女皆警慧善属文长若莘【旧书作若华】次若昭若伦若宪若荀莘昭文尤高性皆素洁鄙熏泽靓妆不愿归人欲以学名家家亦不欲与寒乡凡裔为姻对听其学若莘诲诸妹如严师着女论语十篇大抵准论语以韦宣文君代孔子【宣文君即韦逞母】曹大家等为颜冉推明妇道所宜若昭又为传申释之贞元中昭义节度使李抱真表其才德宗召入禁中试文章并问经史大义帝咨美悉留宫中帝能诗每与侍臣赓和五人者皆预凡进御未尝不蒙赏又高其风操不以妾侍命之呼学士擢其父饶州司马元和末若莘卒赠河内郡君自贞元七年秘禁图籍诏若莘总领穆宗以若昭尤通练拜尚宫嗣若莘所职历宪穆敬三朝皆呼先生后妃与诸公主率以师礼见宝历初卒赠梁国夫人以卤簿葬若宪代司秘书文宗尚学以若宪善属辞尤礼之太和中李训郑注用事恶宰相李宗闵潜言因驸马都尉沈■〈立义〉厚赂若宪求执政帝怒幽若宪外第赐死家属徙岭南训注败帝悟其谗追恨之若伦若荀早卒廷芬男独愚不可教为民终身

△敬宗郭贵妃

敬宗贵妃郭氏右威卫将军义之子长庆时以容选入太子宫太子即位为才人生晋王普帝以早得子又母淑丽冠后庭故宠异之踰年为贵妃赠义礼部尚书兄环少府少监赐大第文宗立爱晋王若己子待妃礼不衰

△武宗王贤妃

武宗贤妃王氏邯郸人年十三善歌舞得入宫中穆宗以赐颖王性机悟开成末王嗣帝位妃阴为助画故进号才人遂有宠帝欲立为后宰相李德裕曰才人无子且家不素显恐贻天下议乃止帝稍惑方士说欲饵药长年后寢不豫才人每谓亲近曰陛下日燎丹言我取不死肤

泽消槁吾独忧之俄而疾亟才人侍左右帝熟视曰吾气息奄奄情虑耗尽愿与汝辞答曰陛下大福未艾安语不祥帝曰脱如我言柰何对曰陛下万岁后妾得以殉帝不复言及大渐才人悉取所常贮散遗宫中审帝已崩即自经幄下当时嫔媛虽常妬才人专上者返皆义才人为之感恻宣宗即位嘉其节赠贤妃葬端陵之柏城

钦定续通志卷七十二

●钦定续通志卷七十三 后妃传三

后妃传

唐 【三】

○唐三

宣宗元昭甯皇后 懿宗惠安王皇后恭宪王皇后 郭淑妃昭宗何皇后

△宣宗元昭甯皇后

宣宗元昭甯皇后不详其世少入邸最见宠答及即位以为美人大中中薨赠昭容诏翰林学士萧寘铭其窆具载生郗王万寿公主后夔昭等五王居内院而郗独出阁及即位是为懿宗外颇疑帝非长寘出铭辞以示外廷乃解帝追册昭容为皇太后上尊谥诏后二等以上亲悉官之配主宣宗庙自建陵曰庆陵置宫寝

△懿宗惠安王皇后

懿宗惠安王皇后亦失所来咸通中册号贵妃生普王七年薨十四年王即位是为僖宗追尊皇太后册上谥号祔主懿宗庙即其园为寿陵后属总以上帝悉官之

△恭宪王皇后

恭宪王皇后其出至微咸通中列后庭得幸生寿王而卒王立是为昭宗追号皇太后上谥祔主懿宗室即故葬号安陵召后弟瓌官之景福初瓌位任寝重帝亦以外家倚之为中尉杨复恭所媚表为黔南节度使瓌之镇道吉柏江复恭密谕杨守亮覆其家

△郭淑妃

郭淑妃幼入郗王邸宣宗在位春秋高恶人言立太子事王以嫡长居外宫心常忧惴妃护侍左右慰安起居终得无恙生女未能言忽曰得活王惊异之及即位以妃为美人进拜淑妃女为同昌公主下嫁韦保衡保衡处内宅妃以主故出入娱饮不禁是时晔言与保衡乱莫得其端僖宗立保衡缘他罪为人所发且污旧谤卒贬死妃犹处禁中黄巢之难天子出蜀仓卒妃不及从遂流落闾里不知所终

△昭宗何皇后

昭宗何皇后梓州人系族不显帝为寿王后得侍婉丽多智恩答厚甚既即位号淑妃从狩华州诏册为皇后生哀帝德王裕平原公主【按吴缜纠谬云凡后妃传必书所生独何后传不书然缜亦祇引哀帝德王为证而未及平原公主也今考公主传并为补入】光化三年帝猎夜归后遣德王还邸遇刘季述留王紫庭院明日季述等挟王陈兵召百官胁帝内禅后恐贼加害天子即取玺授季述与帝同幽东宫贼平反正天复中从帝幸凤翔李茂贞请帝劳军不得已后从御南楼会朱全忠逼帝东迁后谓帝曰此后大家夫妇委身贼手矣涕数行下帝奔播既屡威柄尽丧左右皆捍逆庸奴【按吴缜纠谬捍当作悍】后侍膳服无须臾去侧至洛帝忧忽忽与后相视无死所已而遇弑哀帝即位尊为皇太后宫中不敢哭徙居积善宫号积善太后帝将禅天下后亦遇害初蒋玄晖为全忠邀九锡入喻后度不免见玄晖垂泣祈哀以母子托命宣徽使赵殷衡潜于全忠曰玄晖等铭石像瘞积善宫将复唐全忠怒遂遣人缢后以丑名加之废为庶人

△公主附

世祖一女

同安公主高祖同母媼也下嫁隋州刺史王裕贞观时以属尊进大长公主永徽初赐实户三百薨裕隋司徒柬之子终开府仪同三司

高祖十九女

长沙公主下嫁冯少师

襄阳公主下嫁窦诞

平阳昭公主太穆皇后所生下嫁柴绍初高祖兵兴主居长安绍曰尊公将以兵清京师我欲往恐不能偕柰何主曰公行矣我自为计绍诡道走并州主奔鄂发家赀招南山亡命得数百人以应帝于是名贼何潘仁璧司竹园杀行人称总管主遣家奴马三宝喻降之共攻鄂别部贼李仲文向善志邱师利等各持所领会戏下因畧地整屋武功始平下之乃申法誓众禁剽夺远近咸附勒兵七万威振关中帝度河绍以数百骑并南山来迎主引精兵万人与秦王会渭北绍及主对置幕府分定京师号娘子军帝即位以功给赉不涯武德六年薨葬加前后部羽葆鼓吹大路麾幢虎贲甲卒班剑太常议妇人葬古无鼓吹帝不从曰鼓吹军乐也往者主身执金鼓参佐命于古有邪宜用之

高密公主下嫁长孙孝政又嫁段纶隋兵部尚书文振子为工部尚书杞国公永徽六年主薨遗命吾葬必令墓东向以望献陵冀不忘孝也

长广公主始封桂阳下嫁赵慈景慈景陇西人帝美其姿致故妻之帝起兵或劝亡去对曰母以我为念且安往吏捕系于狱帝平京师引拜开化郡公为华州刺史讨尧君素战死赠秦州刺史谥曰忠公主更嫁杨师道聪悟有思工为诗豪侈自肆晚稍折节以寿薨

长沙公主始封万春下嫁豆卢宽子怀让

房陵公主始封永嘉下嫁窦奉节又嫁贺兰僧伽

九江公主下嫁执失思力

庐江公主下嫁乔师望为同州刺史

南昌 【吴缙云苏勗传作南康】 公主下嫁苏勗

安平公主下嫁杨思敬

淮南公主下嫁封道言 【吴缙云封伦传作言道】

真定公主下嫁崔恭礼 【按吴缙纠谬云公主传言真定公主嫁崔恭礼馆陶公主嫁崔宣庆而崔器传云恭礼尚馆陶今考旧书器传亦同则此处误也】

衡阳公主下嫁阿史那社尔

丹阳公主下嫁薛万彻万彻蠢甚公主羞不与同席者数月太宗闻笑焉为置酒悉召它壻与万彻从容语握槊赌所佩刀阳不胜遂解赐之主喜命同载以归

临海公主下嫁裴律师

馆陶公主下嫁崔宣庆

安定公主始封千金下嫁温挺挺死又嫁郑敬玄

常乐公主下嫁赵瓌生女为周王妃武后杀之逐瓌括州刺史徙寿州越王贞将举兵遣瓌书假道瓌将应之主进使者曰为我谢王与其进不与其退若诸王皆丈夫不应淹久至是我闻杨氏篡周尉迟迥乃周出犹能连突厥使天下响震况诸王国懿亲宗社所托不舍生取义尚何须耶人臣同国患为忠不同为逆王等勉之王败周兴劾瓌与主连谋皆被杀

太宗二十一女

襄城公主下嫁萧锐性孝睦动循矩法帝敕诸公主视为师式有司告营别第辞曰妇事舅姑如父母异宫则定省阙止葺故第门列双戟而已锐卒更嫁姜简永徽二年薨

汝南公主蚤薨

南平公主下嫁王敬直以累斥岭南更嫁刘玄意

遂安公主下嫁窦逵逵死又嫁王大礼

长乐公主下嫁长孙冲帝以长孙皇后所生敕有司装赉倍长公主魏征谏止之

豫章公主下嫁唐义识 【按吴缜纠谬云唐俭传及宰相世系表皆作善识则义字误也今姑仍原文】

北景公主始封巴陵下嫁柴令武坐与房遗爱谋反同主赐死

普安公主下嫁史仁表

东阳公主下嫁高履行高宗即位进为大长公主韦正矩之诛主坐婚家斥徙集州又坐章怀太子累夺邑封临川公主韦贵妃所生下嫁周道务主工籀隶能属文高宗立上孝德颂帝下诏褒答永徽初进长公主恩赏卓异永淳初薨道务殿中大监譙郡公范之子历营州都督检校右骁卫将军谥曰襄

清河公主名敬字德贤下嫁程怀亮薨麟德时陪葬昭陵怀亮知节子也

【按吴缜纠谬云程知节传载子处亮尚清和公主怀字当是处字之误】

终窳远将军

兰陵公主名淑字丽贞下嫁窦怀悫薨显庆时怀悫官兖州都督太穆皇后之族子晋安公主下嫁韦思安又嫁杨仁轸

安康公主下嫁独孤谋

新兴公主下嫁长孙曦

城阳公主下嫁杜荷坐太子承干事诛又嫁薛瓘初主之婚帝使卜之繇曰二火皆食始同荣末同戚请昼昏则吉马周諫曰朝谒以朝思相戒也讲习以昼思相成也燕饮以晡思相欢也婚合以夜思相亲也今先乱其始不可帝乃止麟德初瓘历左奉宸卫将军主坐巫蛊斥瓘房州刺史主从之官咸亨中主薨而瓘卒双枢还京师子顓封河东县侯济州刺史琅琊王冲起兵顓与弟绍以所部庸调作兵募士且应之冲败杀都吏以灭口事泄下狱俱死

合浦公主始封高阳下嫁房玄龄子遗爱主帝所爱故礼异他婿王负所爱而骄房遗直以嫡当拜银青光禄大夫让弟遗爱帝不许玄龄卒主导遗爱异货既而反潜之遗直自言帝痛让主乃免自是稍疏外主怏怏永徽中与遗爱谋反赐死

金山公主蚤薨

晋阳公主字明达幼字兕子文德皇后所生后崩时主始孩不之识及五岁经后所游地哀不自胜帝诸子唯晋王及主最少故亲畜之王每出合主送至虔化门泣而别王胜衣班于朝主泣曰兄今与羣臣同列不得在内乎临帝飞白书下不能辨薨年十二

常山公主未及下嫁薨显庆时

新城公主晋阳母弟也下嫁长孙诠诠以罪徙巋州更嫁韦正矩为奉冕大夫遇主

不以礼俄而主暴薨高宗诏三司杂治正矩不能辩伏
诛

高宗三女

义阳公主萧淑妃所生下嫁权毅

高安公主义阳母弟也始封宣城下嫁颍州刺史王勣天授中勣为武后所诛神龙
初进册长公主实封千户开府置官属睿宗立增户千
薨开元时

太平公主则天皇后所生后爱之倾诸女下嫁薛绍绍死更嫁武承嗣会承嗣小疾
罢婚后杀武攸暨妻以配主主方额广颐多阴谋后常
谓类我而主内与谋外检畏终后世无它訾永淳之前亲王食实户八百增至千辄止公
主不过三百而主独加户五千及圣历时进及三千户
预诛二张功增号镇国与相王均封五千与相王卫王成王长宁安乐二公主给卫士环
第十步一区持兵呵卫僭肖宫省神龙时与长宁安乐
宣城新都定安金城凡七公主皆开府置官属视亲王主三子崇简崇敏崇行皆拜三品
韦后上官昭容用事自以谋出主下远甚惮之主亦自
以轧而可胜故益横于是推进天下士谓儒者多寡狭厚持金帛谢之以动大议远近翕
然向之玄宗将诛韦氏主与秘计遣子崇简从事定将
立相王未有以发其端者主顾温王乃儿子可劫以为功乃入见王曰天下事归相王此
非儿所坐乃掖王下取乘舆服进睿宗睿宗即位主权
由此震天下加实封至万户三子封王余皆祭酒九卿主每奏事漏数徙乃得退所言皆
从有所论荐或自寒穴躡进至侍从旋踵将相朝廷大
政事非关决不下间不朝则宰相就第咨判天子殆画可而已主侍武后久善策人主微
指先事逢合无不中田园徧近甸皆上腴吴蜀岭峽市
作器用州县护送道相望也天下珍滋譎怪充于家供帐声伎与天子等待儿曳纨縠者
数百奴伯姬监千人陇右牧马至万匹长安浮屠慧范
畜货千万谐结权近本善张易之及易之诛或言其豫谋者于是封上庸郡公月给奉稍
主乳媪与通奏擢三品御史大夫玄宗以太子监国使
宋王岐王总禁兵主恚权分乘辇至光范门召宰相白废太子于是宋璟姚元之不悦请
主出东都帝不许诏主居蒲州主大望太子惧奏斥璟
元之以销戢怨嫌主居外四月太子表追还京师时宰相七人五出主门下又左羽林大
将军常元楷知羽林军李慈皆私谒主主内忌太子明
又宰相皆其党乃有逆谋先天二年【即开元元年也考是年玄宗已即位而传中尚称
太子岂以睿宗尚与政故耶】与尚书左仆射窦怀
贞侍中岑羲中书令萧至忠崔湜太子少保薛稷雍州长史李晋右散骑常侍昭文馆学

士贾应福鸿胪卿唐峻及元楷慈慧范等【按资治通鉴载太平公主谋逆时尚有左金吾将军李钦中书舍人李猷本传不载今附录】谋废太子使元楷慈举羽林兵入武德殿杀太子怀贞羲至忠举兵南衙为应既有日矣太子得其奸召岐王薛王兵部尚书郭元振将军王毛仲殿中少监姜皎中书侍郎王琚吏部侍郎崔日用定策前一日因毛仲取内闲马三百率太仆少卿李令问王守一内侍高力士果毅李守德叩虔化门梟元楷慈于北阙下缚鹰福内客省执羲至忠至朝堂斩之因大赦天下主闻变亡入南山三日不出赐死于第诸子及党与死者数十人簿其田货瓌瑤若山督子贷凡三年不能尽崇简素知主谋苦谏主怒撈掠光楚至是复官爵赐氏李始主作观池乐游原以为盛集既败赐宁申岐薛四王都人岁祓禊其地

中宗八女

新都公主下嫁武延暉

宜城公主始封义安郡主下嫁裴巽巽有嬖姝主恚刎耳劓鼻且断巽发帝怒斥为县主巽左迁久之复故封神龙元年与长宁新宁【

原文有义安二字吴缜谓此即义安郡主传不宜复见今从删】安乐新平郡主皆进封

定安【文献通考作安定】公主始封新宁郡下嫁王同皎同皎得罪神龙时又嫁韦濯濯即韦皇后从祖弟以卫尉少卿诛更嫁大府卿崔铕薨

长宁公主韦庶人所生下嫁杨慎交造第东都府财几竭又取西京高士廉第左金吾卫故营合为宅右属都城左俯大道作三重楼以冯观筑山浚池帝及后数临幸置酒赋诗又并坊西隙地广鞠场东都废永昌县主勾其治为府以地濒洛筑郭之崇台蜚观相联属魏王泰故第东西尽一坊瀦沼三百亩泰薨以与民主内倚母爱宠倾一朝与安乐宜城二主后媚邨国崇国夫人争任事赇谒纷纷东都第成不及居韦氏败斥慎交绛州别驾主偕往开元十六年慎交死主更嫁苏彦伯

永寿公主下嫁韦鐸蚤薨

永泰公主以郡主下嫁武延基大足中忤张易之为武后所杀

安乐公主最幼女帝迁房陵而主生解衣以裸之名曰褻儿姝秀辩敏后尤爱之下嫁武崇训帝复位光艳动天下侯王柄臣多出其门尝作诏箝其前请帝署可帝笑从之又请为皇太女左仆射魏元忠谏不可主曰元忠山东木强乌足论国事阿武子尚为天子天子女有不可乎与太平等七公主皆开府而主府官属尤滥皆出屠贩纳货售官降墨敕斜封授之故号斜封官尝请昆明池为私沼帝曰先帝未有以与人者

主不悦自凿定昆池延袤数里司农卿赵履温为缮治累石肖华山墜犴横邪回渊九折以石瀼水又为宝炉镂怪兽神禽间以璪贝珊瑚不可涯计崇训死主素与武延秀乱即嫁之是日假后车辂自宫送至第帝与后为御安福门临观翌日大会羣臣太极殿主拔翠服出向天子再拜南面拜公卿公卿皆伏地稽首武攸暨与太平公主偶舞为帝寿赐羣臣帛数十万夺临川长公主宅为第旁撤民庐怨声嚣然第成禁藏空殫假万骑仗内音乐送主还第天子亲幸宴近臣公主独孺月帝后复幸第大赦天下时主与长窳定安三家厮台掠民子女为奴婢左台侍御史袁从一缚送狱主入诉帝为手诏喻免临淄王诛庶人主方览镜作眉闻乱走至右延明门兵及斩其首 【按旧书武延秀传韦庶人败延秀与公主在内宅格战良久皆斩之与本传异】 追贬为悖逆庶人睿宗即位诏以二品礼葬之赵履温谄事主尝褫朝服以项挽车庶人死蹈舞承天门呼万岁临淄王斩之

成安公主字季姜始封新平下嫁韦捷捷以韦后从子诛主后薨

睿宗十一女

寿昌公主下嫁崔真

安兴昭怀公主蚤薨

荆山公主下嫁薛伯阳

淮阳公主下嫁王承庆

代国公主名华字华婉刘皇后所生下嫁郑万钧

凉国公主字华庄始封仙源下嫁薛伯阳 【按吴缜纠谬云温彦博传载曾孙曦尚凉国长公主而公主传止有凉国公主下嫁薛伯阳又荆山公主亦嫁薛伯阳二者必有一误今考旧书薛稷传亦云子伯阳尚仙源公主仙源为凉国旧封则凉国之下嫁伯阳无疑也倘温曦实尚荆山而史误欤抑别有凉国长公主而史阙欤】

薛国公主始封清阳下嫁王守一守一诛更嫁裴巽郾国公主崔贵妃所生三岁而妃薨哭泣不食三日如成人始封荆山下嫁薛儻又嫁郑孝义

金仙公主始封西城县主景云初进封太极元年与玉真公主皆为道士

玉真公主字持盈 【旧书玄宗纪云赐名摘盈】 始封崇昌县主俄进号上清玄都大洞三景师天宝三载上言曰先帝许妾舍家今仍

叨主第食租赋诚愿去公主号罢邑司归之王府玄宗不许固请乃许之薨宝应时

霍国公主下嫁裴虚己

玄宗二十九女 【按吴缜纠谬玄宗二十九女按其名数乃有三十人则二十九字

误也】

永穆公主下嫁王繇

常芬公主下嫁张去奢 【按吴缜纠谬言肃宗张皇后传载去盈尚常芬公主此处则云去奢今考旧书后传亦云去盈奢今当是盈字之误】

孝昌公主蚤薨

唐昌公主下嫁薛锈

灵昌公主蚤薨

常山公主下嫁薛谭又嫁窦泽

万安公主天宝时为道士开元新制长公主封户二千帝妹户千率以三丁为限皇子王户二千主半之左右以为薄帝曰百姓租赋非我有士出万死赏不过束帛女何功而享多户耶使知俭嗇不亦可乎于是公主所禀始不给车服后咸宜以母爱益封至千户诸主皆增自是着于令主不下嫁亦封千户有司给奴婢如令

上仙公主蚤薨

怀思公主蚤薨

晋国公主始封高都下嫁崔惠童贞元元年与卫楚宋齐宿萧邓纪郃国九公主同徙封

新昌公主下嫁萧衡

临晋公主皇甫淑妃所生下嫁郭潜曜 【吴缜云当作郑潜耀】 薨大历时

卫国公主始封建平下嫁豆卢建又嫁杨说薨贞元时

贞杨公主下嫁源清又嫁苏震

信成公主下嫁独孤明

楚国公主始封寿春下嫁吴澄江上皇居西宫独主得入侍兴元元年请为道士诏可赐名上善普康 【文献通考作普昌】 公主蚤薨咸通九年追封

昌乐公主高才人所生下嫁窦锸薨大历时

永宁公主下嫁裴齐邱

宋国公主始封平昌下嫁温西华又嫁杨徽薨元和时

齐国公主始封兴信徙封宁亲下嫁张垆又嫁裴颖末嫁杨敷薨贞元时

咸宜公主贞顺皇后所生下嫁杨洄又嫁崔嵩薨兴元时

宜春公主蚤薨

广宁公主董芳仪所生下嫁程昌裔 【原文作程昌胤按吴缜纠谬云杨贵妃传载驸马都尉程昌裔今考旧书俱作裔谨改正】 又嫁

苏克贞薨大历时万春公主杜美人所生下嫁杨肸 【吴缜云肸当从日】 又嫁杨锜
薨大历时

太华公主贞顺皇后所生下嫁杨锜薨天宝时

寿光公主下嫁郭液

乐城公主下嫁薛履谦坐嗣岐王珍事诛

新平公主常才人所生幼智敏习知图训帝贤之下嫁裴玲又嫁姜庆初庆初得罪
主幽禁中薨大历时

寿安公主曹野那姬所生下嫁苏发

肃宗七女

宿国公主始封长乐下嫁豆卢湛

萧国公主始封宁国下嫁郑巽又嫁薛康衡干元元年降回纥英武威远可汗 【旧
书误作上皇第二女】 乃置府二年还朝贞元中让
府属更置邑司

和政公主章敬太后所生生三岁后崩养于韦妃性敏惠事妃有孝称下嫁柳潭安
禄山陷京师宁国公主方嫠居主弃三子夺潭马以载
宁国身与潭步日百里潭躬水薪主躬爨以奉宁国从玄宗至蜀始封迁潭驸马都尉郭
千仞反玄宗御玄英楼谕降之不听潭率折冲张义童
等殊死鬪主彀弓授潭潭手斩贼五十级平之肃宗有疾主侍左右勤劳诏赐田以女弟
宝章主未有赐固让不敢当阿布思之妻隶掖廷帝宴
使衣绿衣为倡主谏曰布思诚逆人妻不容近至尊无罪不可与羣倡处帝为免出之自
兵兴财用耗主以贸易取奇赢千万贍军及帝山陵又
进邑入千万代宗初立屡陈人间利病国家盛衰事天子乡纳吐蕃犯京师主避地南奔
次商于遇羣盗主谕以祸福皆稽颡愿为奴代宗以主
贫诏诸节度饷亿主一不取亲纫裳衣诸子不服纨絺广德时吐蕃再入寇主方妊入
语备边计潭固止主曰君独无兄乎入见内殿翌日免
乳而薨

郾国公主始封大宁下嫁张清薨贞元时

纪国公主始封宜宁下嫁郑沛薨元和时

永和公主韦妃所生始封宝章下嫁王诜薨大历时

郾国公主始封延光下嫁裴徽又嫁萧升升卒主与彭州司马李万乱而蜀州别驾
萧鼎澧阳令韦恹太子詹事李升 【通鉴考异云李
泌家传作升】 皆私侍主家久之奸闻德宗怒幽主它第杖杀万斥鼎恹升岭表贞元四
年又以厌蛊废 【按纲目载李升等出入主第且为
厌禱上大怒幽主禁中流升等岭表在贞元三年】 六年薨主女为皇太子妃帝畏妃怨

望将杀之未发会主薨太子属疾乃杀妃以厌灾溢曰
惠

代宗十八女

灵仙公主蚤薨追封

真定公主蚤薨追封

永清公主下嫁裴仿

齐国昭懿公主崔贵妃所生始封升平下嫁郭暖大历末寰内民诉泾水为碣壅不得溉田京兆尹黎干以请诏撤碣以水与民时主及暖家皆有碣勾留帝曰吾为苍生若可为诸戚倡即日毁由是废者八十所宪宗即位献女伎帝曰太上皇不受献朕何敢违还之薨元和时赠号国赐谥

华阳公主贞懿皇后所生韶悟过人帝爱之大历七年以病勾为道士号琼华真人病甚啗帝指伤薨追封

玉清公主蚤薨追封

嘉丰公主下嫁高怡与普宁公主同降薨建中时

长林公主下嫁卫尉少卿沈明贞元二年具册礼薨元和时

太和公主蚤薨追封

赵国庄懿公主始封武清贞元元年徙封嘉诚下嫁魏博节度使田绪德宗幸望春亭临饯厌翟敝不可乘以金根代之公主出降乘金根车自主始薨元和时赠封及谥

玉虚公主蚤薨

普宁公主下嫁吴士广

晋阳公主下嫁太常少卿裴液薨太和时

义清公主下嫁秘书少监柳杲

寿昌公主下嫁光禄少卿窦克良薨贞元时

新都公主贞元十二年下嫁田华

西平公主蚤薨

章宁公主蚤薨

德宗十一女

韩国贞穆公主昭德皇后所生幼谨孝帝爱之始封唐安将下嫁秘书少监韦宥未克而朱泚乱从至固城薨加封谥

魏国宪穆公主始封义阳下嫁王士平主恣横不法帝幽之禁中锢士平于第久之拜安州刺史坐交中人贬贺州司户参军门下客蔡南史独孤申叔为主作团雪散雪辞状离旷意帝闻怒捕南史等逐之薨追封及谥

郑国庄穆公主始封义章下嫁张孝忠子茂宗薨加赠及谥

临真公主下嫁秘书少监薛钊薨元和时

永阳公主下嫁殿中少监崔譔

普宁公主蚤薨

文安公主勾为道士薨太和时

燕国襄穆公主始封咸安下降回纥武义成功可汗置府薨元和时追封及谥

义川公主蚤薨

宜都公主下嫁殿中少监柳昱薨贞元时

晋平公主蚤薨

顺宗十一女

汉阳公主名畅庄宪皇后所生始封德阳郡主下嫁郭縱永贞元年与诸公主皆晋封时戚近争为奢诩事主独以俭文宗尤恶世流侈因

主入问曰姑所服何年法也今之弊何代而然对曰妾自贞元时辞宫所服皆当时赐未尝敢变元和后数用兵悉出禁藏纤丽物赏战士由是

散于人间内外相矜狃以成风若陛下示所好于下谁敢不变帝悦诏宫人视主衣制广狭徧谕诸主且敕京兆尹禁切浮靡主尝诲诸女曰先

姑有言吾与若皆帝子骄盈贵侈可戒不可恃开成五年薨

梁国恭靖公主与汉阳同生始封咸宁郡主徙普安下嫁郑何薨追封及谥

东阳公主始封信安郡主下嫁崔杞

西河公主始封武陵郡主下嫁沈翬薨咸通时 【按吴缜纠谬言郭子仪孙铈传云尚西河公主主初降沈氏生一子铈无嗣以沈氏子为嗣是西河公主又嫁郭铈也本传失载】

云安公主亦汉阳同生下嫁刘士涇

襄阳公主始封晋康县主下嫁张孝忠子克礼 【按旧书张孝忠传克礼乃茂昭之子孝忠之孙尚晋康郡主与新书同本传误】 主纵

恣常微行市里有薛枢薛浑李元本皆得私侍而浑尤爱至谒浑母如姑克礼以闻穆宗幽主禁中

浔阳公主崔昭仪所生太和三年与平恩邵阳二公主并为道士岁赐封物七百匹

临汝公主崔昭仪所生蚤薨

虢国公主始封清源郡主徙阳安下嫁王承系薨追封

平恩公主蚤薨

邵阳公主蚤薨

宪宗十八女

梁国惠康公主始封普宁帝特爱之下嫁于季友元和中徙永昌薨诏追封及谥

永嘉公主为道士

衡阳公主蚤薨

宣城公主下嫁沈■〈立义〉

郑国温仪公主始封汾阳下嫁韦让薨追封及谥

岐阳庄淑公主懿安皇后所生下嫁杜惊事舅姑以礼闻所赐奴婢偃蹇皆上还勾直自市侬为泮州刺史主与偕从者不二十婢乘驴不肉食州县供具拒不受姑寝疾主不解衣药糜不尝不进开成中惊自忠武入朝主寝疾曰愿朝兴庆宫虽死于道不恨道薨

陈留公主下嫁裴损损为太子谕德

真寔公主下嫁薛翊

南康公主下嫁沈汾薨咸通时

临真公主始封襄城下嫁卫洙薨咸通时

普康公主蚤薨

真源公主始封安陵下嫁杜中立

永顺公主下嫁刘弘景

安平公主下嫁刘异宣宗即位宰相以异为平卢节度使帝曰朕惟一妹欲时见之乃止后随异居外岁时辄乘驿入朝薨干符时

永安公主长庆初许下嫁回鹘保义可汗会可汗死止不行太和中勾为道士

义寔公主未及下嫁薨

定安公主始封太和下嫁回鹘崇德可汗会昌三年来归诏神策军四百具卤簿羣臣班迓主乘辂谒宪穆二室欷歔流涕退诣光顺门易

服褫冠■〈金 奠〉待罪自言和亲无状帝使中人劳慰复冠■〈金 奠〉乃入羣臣贺天子又诣兴庆宫明日主谒太皇太后进封长公主遂

废太和府王始至宣城以下七主不出迎武宗怒差夺封绢赎罪

贵乡公主蚤薨

穆宗八女

义丰公主武贵妃所生下嫁韦处仁薨咸通时

淮阳公主张昭仪所生下嫁柳正元

延安公主下嫁窦滸

金堂公主始封晋陵下嫁郭仲恭薨干符时

清源公主薨太和时

饶阳公主下嫁郭仲词

义昌公主为道士薨咸通时

安康公主为道士干符四年诏还南内

敬宗三女
永兴公主
天长公主
宁国公主薨广明时
文宗四女
兴唐公主
西平公主
朗宁公主薨咸通时
光化公主薨广明时
武宗七女
昌乐公主
寿春公主
长宁公主薨大中时
延庆公主
静乐公主薨咸通时
乐温公主
永清公主薨咸通时
宣宗十一女

万寿公主下嫁郑顥主帝所爱前此下诏先王制礼贵贱共之万寿公主奉舅姑宜从士人法旧制车舆以镣金扣饰帝曰我以俭率天下宜自近始易以铜主每进见帝必諄勉笃诲曰无鄙夫家无干时事又曰太平安乐之祸不可不戒故诸主祇畏争为可喜事帝遂诏夫妇教化之端其公主县主有子而寡不得复嫁

永福公主

齐国恭怀公主始封西华下嫁严祁祁为刑部侍郎主薨大中时追封及谥

广德公主下嫁于琮初琮尚永福公主主与帝食怒折七筯帝曰此可为士人妻乎更许琮尚主琮为黄巢所害主泣曰今日谊不独存贼宜杀我巢不许乃缢室中主治家有礼法尝从琮贬韶州侍者纔数人却州县馈遗凡内外冠婚丧祭主皆身答劳疏戚咸得其心为世闻妇

义和公主

饶安公主

盛唐公主

平原公主薨咸通时

唐阳公主

许昌庄肃公主下嫁柳涉薨中和时

丰阳公主

懿宗八女

卫国文懿公主郭淑妃所生始封同昌下嫁韦保衡咸通十年薨 【资治通鉴作十一年】 帝自制挽歌羣臣毕和又许百官祭以金贝

寓车廄服火之及葬帝与妃坐延门哭以过枢仗卫弥数十里冶金为俑怪宝干计实墓中与乳保同葬追封及谥

安化公主

普康公主

昌元公主薨咸通时

昌宁公主

金华公主

仁寿公主

永寿公主

僖宗二女

唐兴公主

永平公主

昭宗十一女

新安公主

平原公主积善皇后所生帝在凤翔以主下嫁李茂贞子继侁后谓不可帝曰不尔我无安所是日宴内殿茂贞坐帝东南主拜殿上继侁

族兄弟皆西向立主徧拜之及帝还朱全忠移茂贞书取主还京师

信都公主

益昌公主

唐兴公主

德清公主

太康公主

永明公主蚤薨

新兴公主

普安公主

乐平公主

钦定续通志卷七十三

●钦定续通志卷七十四 后妃传四

后妃传

五代

○五代

梁

后唐

晋

汉

周

△梁

太祖母文惠王皇后

太祖元贞张皇后陈昭仪

李昭容

末帝张德妃

郭妃

太祖母文惠王皇后

梁太祖母曰文惠皇后王氏单州单父人生三子长广王全昱次朗王存次太祖后少寡携三子佣食萧县人刘崇家太祖壮而无赖崇数加笞责独崇母怜之时时自为栉沐戒家人曰朱三非常人也宜善遇之黄巢起太祖与存俱亡为盗从巢攻广州存战死居数岁太祖降唐及破巢遂镇宣武乃遣人以车马之萧县迎后于崇家使者至门后惶恐走避曰朱三落魄无行作贼死矣何以至此邪使者具道所以后乃惊喜泣下与崇母俱载以归封晋国太夫人太祖置酒太夫人前举觞为寿欢甚太祖启曰朱五经平生读书不登一第有子为节度使无忝先人矣后恻然良久曰汝能至此可谓英特然行义未必如先人也太祖请其故后曰朱二与汝俱从黄巢独死蛮岭其孤皆在午沟汝今富贵独不念乎太祖泣谢罪乃悉召存诸子以归太祖刚暴好杀后每诫之多赖以全活大顺二年秋后疾卜曰宜还故乡乃归卒于午沟太祖即位立四庙追尊皇考为文穆皇帝后曰文惠皇后

太祖元贞张皇后

太祖元贞皇后张氏单州砀山县渠亭里富家子也 【案北梦琐言父蕤为宋州刺史】太祖少以妇聘之生末帝太祖贵封魏国夫人后贤明精悍动有礼法太祖虽刚暴亦尝畏之每暴怒杀戮得后救护辄免时以外事访之后言多中尝出兵行至中途后意以为不然驰一介召之如期而至郴王友裕既破走朱瑾不追太祖怒夺其兵友裕惶恐亡匿后阴教友裕脱身自归友裕晨驰入见太祖拜伏庭中泣涕请死太祖怒甚将斩之后闻之不及履走庭中持友裕泣曰汝束身归罪岂不欲明非反乎太祖意解乃免太祖已破朱瑾纳其妻以归后迎太祖于封邱见瑾妻瑾妻再拜后亦拜凄然泣下曰兖郛与司空同姓之国昆仲之闲以小故兴干

戈而使吾姒至此若不幸汴州失守妾亦如此矣言已

又泣太祖为之感动乃送瑾妻为尼后常给其衣食天福元年后卒 【按天福乃石晋年号后卒于梁祖未即位前应在唐代考唐末有天复

天佑年号福复音近福佑形近未审何者之误通鉴及会要不载无可据改姑存原文】

太祖即位追册为贤妃末帝立追谥曰元贞皇太后

【按五代会要开平二年追封贤妃干化二年追册为元贞皇后】 后已死太祖始为荒淫卒以及祸云

陈昭仪

昭仪陈氏宋州人也以色进太祖嫔妾数百而昭仪专宠太祖尝疾昭仪与尼数十人昼夜为佛法不少懈太祖以为爱己尤宠之开平三年度为尼居宋州佛寺

李昭容

昭容李氏亦以色进尤谨愿未尝去左右太祖病昼寝方寐忽栋折独李氏侍侧遽牵太祖衣太祖惊走栋折寝上太祖德之拜昭容皆不知所终

末帝张德妃

末帝德妃张氏父归霸太祖功臣帝初以妇聘之及即位将册为后妃请待帝郊天而帝卒不得郊贞明五年妃病甚帝遽册为德妃其夕薨

郭妃

次妃郭氏父归厚事梁为登州刺史妃少以色进梁亡庄宗入宫梁故妃妾皆号泣迎拜贺王友雍妃石氏有色庄宗召之石氏慢骂杀之

次召妃妃惧而听命己而度为尼赐名誓正居洛阳卒初庄宗入汴末帝登建国楼求自尽命控鹤指挥使皇甫麟进刃麟亦自刎庄宗命张全

义葬其尸藏其首于太社晋天福三年诏许收葬乃出末帝首与妃同葬之

△后唐

太祖刘太妃

贞简曹皇后庄宗神闵敬刘皇后 【韩淑妃伊德妃】

明宗和武宪曹皇后

昭懿夏皇后宣宪魏皇后

王淑妃愍帝孔皇后

废帝刘皇后

太祖刘太妃

太祖正室刘氏代北人次妃曹氏太原人也太祖封晋王刘氏封秦国夫人自太祖起兵代北刘氏常从征伐为人明敏多智略颇习兵机

常教其侍妾骑射以佐太祖上源驿之变左右有先脱归者以难告夫人神色不动立斩告者阴召大将谋保军以还迟明太祖还军与夫人相

向恸哭因欲举兵击梁夫人曰公本为国讨贼今梁事未暴而遽反兵相攻天下闻之莫分曲直不若敛军还镇自诉于朝太祖从之其后太祖击刘仁恭败归梁遣氏叔琮康怀英等连岁攻晋围太原晋兵屡败太祖忧窘不知所为李存信等劝太祖亡入北边收兵以图再举太祖然之入以语夫人夫人骂曰存信代北牧羊儿耳安足与计成败且公尝笑王行瑜弃邠州走卒为人擒今乃自为此邪昔公亡奔达鞞几不能自脱赖天下多故乃得南归今屡败之兵散亡无几一失其守谁能从公北边其可至乎太祖大悟乃止夫人无子性贤不妒忌尝为太祖言曹氏相当生贵子宜善待之而曹氏亦自谦退相得甚欢曹氏封晋国夫人后生子是为庄宗太祖性暴怒多杀人左右无敢言者惟曹氏从容谏譬往往见听及庄宗立事曹氏尤谨其救赵破燕取魏博与梁战河上十余岁岁尝驰归省母至三四人皆称其孝庄宗即位册尊曹氏为皇太后而以嫡母刘氏为皇太妃太妃往谢太后太后有惭色太妃曰愿吾儿享国无穷使吾获没于地以从先君幸矣复何言庄宗灭梁入洛使人迎太后归洛居长寿宫而太妃独留晋阳同光三年五月太妃薨七月太后崩谥曰贞简葬坤陵而太妃无谥太妃与太后甚相爱其送太后于洛也涕泣而别归而思慕遂不起太后闻之欲驰至晋阳视疾及卒又欲自往葬之庄宗泣谏乃止而太后自太妃卒悲哀不饮食逾月亦崩

庄宗神闵敬刘皇后 【韩淑妃 伊德妃】

庄宗神闵敬皇后刘氏魏州成安人庄宗正室曰卫国夫人韩氏次燕国夫人伊氏其次后也初封魏国夫人后父刘叟黄须善医卜自号刘山人后生五六岁晋王攻魏裨将袁建丰掠得后纳之晋宫曹太后教以吹笙歌舞既笄甚有色庄宗见而悦之庄宗已为晋王太后幸其宫置酒为寿自起歌舞太后欢甚以刘氏赐庄宗先是庄宗攻梁军于夹城得符道昭妻侯氏宠冠宫中谓之夹寨夫人庄宗出兵四方尝以侯氏从其后刘氏生子继岌庄宗以为类己爱之刘氏又多智善迎顺意旨由是宠益专自下魏博战河上十余年独以刘氏从其父闻刘氏贵诣魏宫上谒庄宗召袁建丰出刘叟示之建丰曰是曩时护刘氏黄须丈人也然刘氏方与诸夫人争宠以门望相高因大怒曰妾父不幸死于乱兵妾去乡时犹忆环尸恸哭此田舍翁安得至此因命笞刘嫂于宫门庄宗即位欲立刘氏为皇后而韩夫人正室也伊夫人位次在刘氏上以故难其事而未发宰相豆卢革枢密使郭崇韬希旨言刘氏当立庄宗大悦同光二年四月册刘氏为皇后封韩氏淑妃伊氏德妃庄宗自灭梁志意骄怠宦官伶人乱政后特用事于中自以出贱微踰次得立以为佛力又好聚敛分遣

人为商贾至于市肆闲薪刍果茹皆称中宫所卖四方
贡献一上天子一入中宫宫中货贿山积惟写佛书馈赂僧尼是时皇太后及皇后交通
藩镇太后称诰令皇后称教命两宫使者旁午于道庄
宗有爱姬甚有色而生子后心患之庄宗燕居宫中元行钦侍侧庄宗问曰尔新丧妇其
复取乎吾助尔聘后指爱姬请曰帝怜行钦何不赐之
庄宗不得已佯诺之后趣行钦拜谢行钦再拜起顾爱姬肩舆已出宫矣庄宗不乐称疾
不食者累日同光三年秋大水两河民流徙京师赋调
不充六军之士往往殍踣乃豫借明年夏秋租税百姓号泣于路庄宗方与后荒于畋游
十二月己卯猎于白沙后率皇子后宫毕从癸未乃还
所至责民供给坏什器彻庐舍而焚之县吏畏恐亡窜山谷明年三月客星犯天库有星
流于天棓占星者言御前当有急兵宜散积聚以禳之
宰相请出库物给军庄宗许之后曰吾夫妇得天下虽因武功盖亦有天命命既在天人
如我何因取妆奁及皇幼子满喜置帝前曰诸侯所贡
给赐已尽宫中所有惟此耳请鬻以给军宰相惶恐而退及赵在礼作乱出兵讨魏始出
物以赉军军士负而诟曰吾妻子已饿死得此何为庄
宗东幸汴州至万胜而还过罍子谷道路隘狭庄宗见从官执兵仗者皆以好言劳之曰
适报魏王平蜀得蜀金银五十万当悉给尔等对曰陛
下与之太晚得者亦不感恩庄宗泣下因顾内库使张容哥索袍带以赐之容哥对曰尽
矣军士抽刀逐之左右救之而免容哥曰皇后惜物不
以给军而归罪于我事若不测吾身万段矣乃投水死郭从谦反庄宗中流矢伤甚卧绛
霄殿廊下渴欲得饮后令宦者进殄酪不自省视庄宗
崩后与李存渥等焚其寝殿拥百骑出师子门后于马上以囊盛金器宝带欲于太原造
寺为尼在道因与存渥奸至太原削发为尼明宗入立
遣人赐后死晋天福五年追谥曰神闵敬皇后自唐末丧乱后妃之制不备至庄宗时后
宫有昭仪昭容昭媛出使御正侍真懿才咸一瑶芳懿
德宣一等名号不可胜纪庄宗遇弑后宫皆散走朱守殷入宫选得三十余人虢国夫人
夏氏以尝幸于庄宗守殷不敢留明宗立悉放庄宗时
宫人还其家夏氏归于河阳节度使夏鲁奇以同姓也后嫁契丹突厥李赞华赞华性酷
毒喜杀人婢妾微过常加刳灼夏氏惧求离婚乃削发
为尼以卒而韩淑妃伊德妃皆居于太原晋高祖反时为契丹所掠

明宗和武宪曹皇后 昭懿夏皇后

明宗和武宪皇后曹氏 【按五代会要及薛史皆作和武显皇后欧史作宪恐误】
昭懿皇后夏氏皆不见其世家夏氏无封爵明宗未
即位前卒天成元年封楚国夫人曹氏为淑妃追封夏氏晋国夫人长兴元年立淑妃为

皇后而夏氏所生二子皆己王乃追册为皇后谥昭懿

宣宪魏皇后

宣宪皇后魏氏镇州平山人也初适平山民王氏生子十岁矣明宗为骑将掠平山得其子母以归居数年魏氏卒其子是为潞王从珂明

宗时从珂己王乃追封魏氏为鲁国夫人废帝即位追尊为皇太后清泰三年谥曰宣宪王淑妃

淑妃王氏邠州饼家子也有美色少事梁故将刘鄩为侍儿鄩卒王氏无所归明宗因安重诲以纳之王氏素得鄩金甚多悉以遗明宗左

右及诸子妇人人皆为称誉明宗益爱之而曹淑妃为人简质常避事由是王氏专宠明宗即位立曹氏为皇后王氏为淑妃妃事后甚谨每帝

晨起盥栉服御皆妃执事及罢朝帝与后食妃侍食彻乃退未尝少懈后亦怜之然宫中事皆主于妃明宗病妃与宦者孟汉琼出纳左右遂专

用事杀安重诲秦王从荣皆与焉刘鄩诸子皆以妃故封拜官爵愍帝即位册尊皇后为皇太后妃为皇太妃初明宗后宫有生子者命妃母之

是为许王从益愍帝以司衣王氏事连太妃心不悦欲迁之至德宫以太后素善妃惧伤其意而止然待之甚薄废帝立视妃颇厚石敬瑭兵犯

京师太后与废帝俱自焚死妃与许王从益及其妹匿于鞠院以免晋高祖立妃自请为尼不可乃迁于至德宫晋迁都汴以妃俱东高祖皇后

事妃如母出帝即位妃还洛阳契丹入京师赵延寿所尚明宗公主已死耶律德光乃为延寿娶永安公主公主素亦养于妃妃至京师主婚礼

寻还洛阳德光北归萧翰召立从益汉高祖入乃杀妃语详从益传

愍帝孔皇后 废帝刘皇后

愍帝孔皇后父循自有传后有贤行生四子愍帝即位立为皇后 【按五代会要后初封鲁国夫人】 未及册命而难作后为废帝所弑

四子皆见杀晋高祖立追谥曰哀 【按五代会要事在天福五年】 废帝皇后刘氏父茂威应州浑源人后为人强悍废帝素惮之初封沛国

夫人即位立为皇后弟延皓累官天雄军节度使延皓素谨厚及贵而改节以后故用事受赇掠人园宅在邺不恤军士军士皆怨捧圣都虞候

张令昭以兵逐延皓延皓走相州令昭乃闭城遣其副使边仁嗣请己为节度废帝遣范延光讨令昭斩之有司请以延皓行军法废帝以后故

但削官爵而已

△晋

高祖李皇后

安太妃出帝冯皇后

高祖李皇后

高祖皇后李氏唐明宗皇帝女初号永窳公主清泰二年封魏国长公主自废帝立尝疑高祖必反三年公主自太原入朝千春节辞归留之不得废帝醉语公主曰尔归何速欲与石郎反邪公主归以语高祖高祖益不自安高祖即位公主当为皇后天福二年三月有司请上皇太妃宝册太妃者高祖庶母刘氏也高祖以宗庙未立谦抑未遑七年诏尊太妃为皇太后未奉册而高祖崩故后亦讫无册命出帝立册尊为皇太后太后为人强敏高祖常严惮之出帝冯皇后用事太后数训诫之帝不从乃及于败开运四年正月丁亥朔耶律德光入京师帝与太后肩輿郊迎德光不见馆于封禅寺以兵守之时雨雪寒冻皆苦饥太后乞食于寺僧僧辞阴祈守者乃稍得食辛卯德光降帝为光禄大夫检校太尉封负义侯迁于黄龙府德光使人谓太后曰闻重贵不从母教以至此可自便勿与俱行太后曰母不随子欲何所归于是太后与冯皇后皇弟重睿皇子延煦延宝等举族从帝而北所经州县皆故晋将吏有所供馈不得通路旁父老争持羊酒献卫兵不使见帝皆涕泣而去自幽州行十余日过平州出榆关行砂碛中饥不得食遣宫女从官采木实野蔬而食又行七八日至锦州辽人迫帝与太后拜案巴坚画象帝不胜其辱泣而呼曰辞超误我不令我死又行五六日过海北州至东丹王墓遣延煦拜之又行十余日渡辽水至渤海国铁州又行七八日过南海府遂至黄龙府是岁六月契丹国母徙帝太后于怀密州州去黄龙府西北一千五百里行过辽阳二百里而国母为永康王所囚永康王遣帝太后还止辽阳稍供给之明年四月永康王至辽阳帝白衣纱帽与太后皇后诣帐中上谒永康王留与坐饮酒奏乐帐下伶人从官望见故主皆悲泣不自胜五月永康王上阼其妻兄禅奴爱帝小女求之帝辞以尚幼永康王驰一骑取之以赐禅奴八月下阼太后驰至霸州见永康王求于汉儿城侧赐地种牧为生永康王以太后从行十余日遣还辽阳明年二月徙帝太后于建州自辽阳东南行千二百里至建州得地五十余顷帝遣从行者耕而食之明年三月太后寝疾无医药尝仰天泣南望戟手骂杜重威李守贞等曰使死者无知则已若其有知不赦尔于地下八月疾革谓帝曰我死焚骨送范阳佛寺母使我为异地鬼遂卒帝与皇后宫人皆被发徒跣扶柩至赐地焚其骨葬焉

安太妃

安太妃代北人不知其世家为敬儒妻生出帝帝即位尊为皇太妃妃老而失明从出帝北迁自辽阳徙建州卒于道临卒谓帝曰当焚我为灰南向扬之庶遗魂得反中国既卒碛中无草木乃毁奚车焚之载其烬骨至建州李

太后亦卒遂并葬之

出帝冯皇后

出帝皇后冯氏定州人父蒙以巧佞为安重诲所喜表为邺都副留守高祖留守邺都得蒙欢甚乃为重胤娶蒙女重胤早卒后寡居有色出帝悦之高祖崩梓宫方在殡出帝纳以为后以六宫仗卫太常鼓吹导后至西御庄见于高祖影殿羣臣皆贺帝顾谓冯道等曰皇太后之命与卿等不任大庆羣臣出帝与皇后酣饮歌舞过梓宫前醮而告曰皇太后之命与先帝不任大庆左右皆失笑帝亦自绝倒后既立专内宠兄玉执政内外用事晋遂以乱随帝北迁哀帝之辱数求毒药欲与帝俱饮以死而药不可得周显德中有人自契丹亡归者言帝与皇后诸子皆无恙后不知其所终【按出帝妃尚有楚国夫人丁氏乃延煦母见张彦泽传中史不为立传他书亦无可考】

△汉

高祖李皇后

高祖李皇后

高祖皇后李氏晋阳人父业农高祖少为军卒牧马晋阳夜入其家劫取之高祖贵封魏国夫人生隐帝开运四年高祖起兵太原赏军士帑藏不足充欲敛于民后谏曰方今起义民未知惠而先夺其财殆非救民之意也后宫所有请悉出之虽不足士亦不怨高祖改容谢之即位立为皇后隐帝立册尊为皇太后帝年少好弄日与郭允明后赞李业等游戏后数切责之不听帝与允明等谋诛大臣议已定入白太后太后曰此大事当与宰相议之李业从旁对曰先皇帝尝言朝廷大事勿问书生太后深以为不可帝拂衣而去曰何必谋于闺门史弘肇等已死周太祖起兵向京师慕容彦超败于刘子陂帝欲自出临兵太后止之曰郭威本吾家人非危疑何肯至此若按兵诏谕威必有说君臣之际庶几尚全帝不从以出遂及于难周太祖入京师举事皆称太后诰请太后临朝已而太祖出征契丹军士拥之还太祖请事太后为母太后诰以太祖监国遂即位迁后于太平宫上尊号曰昭圣皇太后显德元年崩【原注隐帝旧史实录皆无皇后帝立三年崩时年二十盖未尝立后也】
○按阳邠传帝欲立所幸耿夫人为后邠以为太速夫人卒帝欲以后礼葬之邠又以为不可则未尝立后之言信矣耿早卒故不为立传】

△周

太祖圣穆柴皇后

杨淑妃张贵妃

董德妃世宗贞惠刘皇后

后 宣懿符皇后【后立符皇后】

太祖圣穆柴皇后

太祖圣穆皇后柴氏邢州尧山人与太祖同里遂以归焉太祖微时喜饮博任侠不拘细行后尝谏止之太祖状貌奇伟后心知其贵人也事之甚谨【案宋史张永德传柴翁以经义教里中有女后唐庄宗时备掖庭明宗入洛遣出宫柴翁夫妇往迎之至鸿沟遇雨不能前女取装具千万分半与父母令归曰儿见沟旁邮舍队长项黯黑为雀形者极贵人也愿事之乃周祖也父母大恚然终不能夺他日语周祖君贵不可言妾有缗钱五百万资君时不可失周祖因其资得为军司柴翁好独寝人传其能司冥闲事一日晨起大笑不止妻问之不对翁好饮妻逼令极醉因漏言曰花项汉作天子矣考此事亦见苏辙龙川别志语近说家故欧史不取】及即位后已先卒追册为皇后谥曰圣穆

杨淑妃

淑妃杨氏镇州真定人幼以色选入赵王宫事王镕镕为张文礼所杀妃流寓民闲再嫁里人石光辅光辅死太祖柴夫人卒闻妃有色而贤遂娶为继室天福中卒葬太原太祖即位追册为淑妃拜妃弟廷璋为右飞龙使廷璋愿以授父弘裕乃拜弘裕金紫光禄大夫真定少尹太祖葬嵩陵后当陪葬而太原未克世宗诏有司营嵩陵侧为虚墓以俟显德元年太原闭壁被围乃迁妃丧而葬之

张贵妃

贵妃张氏镇州真定人父同芝事赵王王镕累官检校工部尚书镇州乱庄宗遣符存审以兵讨张文礼裨将武从谏馆于妃家见妃尚幼怜之以妃归太原为其子妇久之武氏子死而太祖杨夫人亦卒遂纳妃为继室累封吴国夫人太祖以兵入京师汉遣刘铎戮其家妃与诸子皆死太祖即位追册为贵妃

董德妃

德妃董氏镇州灵寿人父光嗣赵州昭庆尉妃幼颖悟始能言闻乐声即知律吕年七岁镇州乱其家失之为潞州牙将所得潞将妻养以为子怜之过于所生居五六年潞将仕京师遇妃兄瑀欣然归之时年十三以嫁里人刘进超进超歿契丹妃嫠居洛阳汉高祖自太原入京师太祖从过洛阳闻妃有贤行聘之太祖建国中宫虚位遂册为德妃广顺三年卒妃兄三人瑀官至太子左赞善大夫玄之自明皆至刺史

世宗贞惠刘皇后

世宗贞惠皇后刘氏不知其世家盖微时所娶也初封彭城县君世宗从太祖于魏后留京师太祖举兵汉诛太祖家属后见杀显德四年

追册为皇后谥贞惠陵曰惠陵

宣懿符皇后 【后立符皇后】

宣懿皇后符氏祖秦王存审父魏王彦卿后明果有大志初适李守贞子崇训守贞事汉为河中节度使已挟异志有术者善听人声以知吉凶守贞出家人使听之术者闻后声惊曰此天下母也守贞益自负于是决反汉遣周高祖讨之逾年攻破其城崇训知不免手自杀其家人次及后后走匿崇训惶遽遂自杀汉兵入其家后坐堂上顾军士曰郭公与吾王父有旧汝辈无犯我军士见之不敢迫高祖闻之谓一女子能使乱兵不敢犯奇之为加慰勉以归彦卿后拜高祖为父其母欲使后为尼不肯曰死生有命天也何必妄毁形发为世宗闻而奇之及刘夫人卒遂纳为继室即位册为皇后世宗卞急多暴怒后常追悔每怒后必从容伺颜色为解世宗意亦随释由是益重之世宗征淮后切谏不宜亲行不听师久无功遭大暑雨后以忧成疾而崩葬新郑懿陵后立皇后符氏后妹也宋初迁西宫号周太后

钦定续通志卷七十四

●钦定续通志卷七十五 后妃传五

后妃传

宋 【一】

○宋一

太祖母昭宪杜太后 太祖孝惠贺皇后孝明王皇后 孝章宋皇后
太宗淑德尹皇后 懿德符皇后明德李皇后
元德李太后真宗章怀潘皇后 章穆郭皇后章献明肃刘皇后
章懿李太后杨淑妃 沈贵妃仁宗郭
皇后 慈圣光献曹皇后张贵妃 苗贵妃周贵妃
杨德妃冯贤妃

△太祖母昭宪杜太后

太祖母昭宪杜太后定州安喜人也父爽赠太师后既笄归于宣祖治家严毅有礼法生鬯王光济太祖太宗秦王廷美 【按廷美传云母陈国夫人耿氏则非杜太后所生也与本传异】 夔王光赞燕国陈国二长公主周显德中太祖为定国军节度使封南阳郡太夫人及太祖自陈桥还京师人走报太后曰点检已作天子太后曰吾儿素有大志今果然太祖即位尊为皇太后太祖拜于堂上众皆贺太后愀然不乐左右问故太后曰吾闻为君难天子置身兆庶之上若治得其道则此位可尊苟或失驭求为匹夫不可得吾所以忧也太祖再拜曰谨受教建隆

二年太后不豫太祖侍药餌不离左右疾亟召赵普入受遗命太后因问太祖曰汝知所以得天下乎太祖鸣噎不能对太后固问之太祖曰臣所以得天下者皆祖考及太后之积庆也太后曰不然正由周世宗使幼儿主天下耳使周氏有长君天下岂为汝有乎汝百岁后当传位于汝弟四海至广万几至众能立长君社稷之福也太祖顿首泣曰敢不如教太后顾谓赵普曰尔同记吾言不可违也命普于榻前为约誓书于纸尾书臣普书藏之金匱命谨密宫人掌之太后崩于滋德殿谥明宪葬安陵祔享太庙干德二年更谥昭宪合祔安陵【按本纪及礼志宣祖安陵在京城东南隅干德二年改葬河南府巩县西南故本传两言之】

△太祖孝惠贺皇后

太祖孝惠贺皇后开封人右千牛卫率府率景思长女性温柔恭顺动以礼法晋开运初宣祖为太祖聘焉周显德三年太祖为定国军节度使封会稽郡夫人生秦国晋国二公主魏王德昭五年薨建隆闲追册为皇后葬安陵西北享于别庙神宗时与孝章淑德章怀并祔太庙

△孝明王皇后

孝明王皇后邠州新平人彰德军节度饶第三女孝惠崩聘为继室封琅邪郡夫人太祖即位建隆元年八月册为皇后常服宽衣佐御膳慈仁恭勤事杜太后得其驩心干德元年崩葬安陵之北享于别庙太平兴国二年祔享太庙

△孝章宋皇后

孝章宋皇后河南洛阳人左卫上将军偃之长女孝明崩纳入宫为皇后性柔顺好礼太祖崩号开宝皇后居西宫雍熙四年移居东宫至道元年崩祔葬永昌陵北

△太宗淑德尹皇后

太宗淑德尹皇后相州邺人滁州刺史廷勋女太宗在周时娶焉早薨及帝即位追册为皇后加谥葬孝明陵西北

△懿德符皇后

懿德符皇后陈州宛邱人魏王彦卿第六女周显德中归太宗建隆初封汝南郡夫人晋封楚国夫人太宗封晋王改越国开宝八年薨葬安陵西北帝即位追册为皇后享于别庙真宗即位诏有司议太宗配宰相请以后配从之【按王偁东都事略时宗正卿赵安易请以淑德配礼官以明德在万安宫宜虚配位秘阁校理吴淑以为皆未允因请以元德配诏谓礼宜酌于人情特以懿德升配所载甚详附识于此】升祔太庙

△明德李皇后

明德李皇后潞州上党人淄州刺史处耘第二女开宝中太祖为太宗聘为妃太平兴国三年始入宫雍熙元年十二月立为皇后性恭谨庄肃抚育诸子及嫔御甚厚真宗即位尊后为皇太后居西宫嘉庆殿咸平中别建宫居之仍上宫名曰万安【按真宗纪及东都事略俱不言建宫移居事岂以宫仍旧名故从略欤】景德元年崩祔葬永熙陵礼官请以懿德明德同祔太宗庙室以先后为次从之

△元德李太后

元德李太后真定人干州防御使英之女太祖闻妃有容德为太宗聘之开宝中封陇西郡君太宗即位进夫人性恭肃有法度六宫推重之生楚王元佐及真宗太平兴国二年薨真宗即位追封贤妃又进上尊号为皇太后祔葬永熙陵享于别庙大中祥符三年礼官赵湘请以后祔太宗庙室真宗曰此重事也俟令礼官议之六年秋相王旦与羣臣表请后尊号中去太字升祔太庙明德之次从之

△真宗章怀潘皇后

真宗章怀潘皇后大名人忠武军节度美第八女真宗在韩邸太宗为聘之封莒国夫人端拱二年薨真宗即位追册为皇后谥庄怀葬永昌陵侧陵名保泰享于别庙旧制后谥冠以帝谥庆历中礼官言孝字连太祖谥德字连太宗谥遂改庄为章以连真宗谥云

△章穆郭皇后

章穆郭皇后太原人宣徽南院使守文第二女淳化四年真宗在襄邸太宗为聘之封鲁国夫人进封秦国真宗嗣位立为皇后景德四年从幸西京还以疾崩后谦约惠下性恶奢靡族属入谒禁中服饰华侈必加戒勸有以家事求言于上者后终不许兄子出嫁以贫欲祈恩赉但出装具给之上尤加礼重及崩上深嗟悼谥曰庄穆葬永熙陵西北享于别庙仁宗即位升祔真宗庙室改谥章穆

△章献明肃刘皇后

章献明肃刘皇后其先家太原后徙益州为华阳人虎捷都指挥使嘉州刺史通第二女也后在襁褓而孤鞠于外氏善播鼗蜀人龚美者以锻银为业携之入京师后年十五入襄邸王乳母秦国家人性严因为太宗言之令王斥去王不得已置之王宫指使张耆家及即位入为美人以其无宗族乃更以美为兄弟改姓刘大中祥符中为修仪进德妃自章穆崩真宗欲立为皇后大臣多以为不可帝卒立之李宸妃生仁宗后以为己子与杨淑妃抚视甚至后性警悟晓书史闻朝廷事能记其本末真宗退朝阅

天下封奏多至中夜后皆预闻宫闈事有问辄传引故
实以对天禧四年帝久疾事多决于后宰相寇准密议奏请皇太子监国以谋泄罢相用
丁谓代之既而入内都知周怀政谋废后杀谓复用准
以辅太子为杨崇勋所告怀政诛准贬衡州司马【寇准传作道州司马】于是诏皇
太子开资善堂引大臣决天下事后裁制于内真宗崩
遗诏尊后为皇太后军国重事权取处分谓等请太后御别殿太后不可于是请帝与太
后五日一御承明殿帝位左太后位右垂帘决事议已
定太后忽出手书第欲禁中阅章奏遇大事召对辅臣其谋出于丁谓非太后意也谓既
贬冯拯等三上奏请如初议帝亦以为言于是始同御
承明殿有司请制令称吾以生日为长宁节出入御大安鞦韆鸣鞭侍卫如乘舆令天下避
太后父讳羣臣上尊号曰应元崇德仁寿慈圣太后御
文德殿受册正旦郊祀帝率百官上寿范仲淹力言其非不听明道二年帝亲耕藉田太
后亦谒太庙乘玉辂服袆衣九龙花钗冠斋于庙质明
服袞衣减宗彝藻去剑冠仪天前后垂珠翠十旒荐献七室加上尊号曰应天齐圣显功
崇德慈仁保寿太后是岁崩谥曰章献明肃葬永定陵
西北旧制皇后皆二谥称制加四谥自后始初仁宗即位尚少太后称制虽政出宫闈而
号令严明恩威加天下左右近习亦少所假借宫掖闲
未尝妄改作赐族人御食必易以扣器曰尚方器勿使入吾家也后性俭约常服絁縠练
裙侍者见仁宗左右簪珥珍丽欲效之太后戒曰彼皇
帝嫔御饰也汝安得学先是小臣方仲弓上书请依武后故事立刘氏庙而程琳亦献武
后临朝图后掷其书于地曰吾不作此负祖宗事【
谨案通鉴辑览 御批章献不尝问鲁宗道以武后何如主乎且欲立刘氏七庙被天
子袞冕皆何为者至进外家任宦者犹其过之小者耳
独于程琳之献图乃掷地诟之岂真乃心宋室盖亦知彼时势尚有不能而已史臣遂有
过誉之谈盖必出于曾受其惠者之口】有漕臣刘綽
者自京西还言在庾有出剩粮千余斛乞付三司后问曰卿识王曾张知白吕夷简鲁宗
道乎此四人岂因献羨余进哉后称制凡十一年自仁
宗即位乃谕辅臣曰皇帝听断之暇宜诏名儒讲习经史以辅其德于是设幄崇政殿之
西庑而日命近臣侍讲读丁谓曹利用既以侮权贬窜
而天下惕然畏之晚稍进外家任内官罗崇勋江德明等势倾中外姻戚厮役拜官者数
十人御史曹修古杨偕郭劝段少连论奏太后悉逐之
太后保护帝既尽力而仁宗所以奉太后亦甚备帝春秋长犹不知为宸妃所出终太后
之世无毫发闲隙焉其后言者多追诋太后时事帝曰
此朕所不忍闻也下诏戒中外毋辄言于是泰宁军节度使钱惟演请以章献章懿与章

穆并祔真宗室诏三省与礼院议皆以为章穆皇后位
崇中壺已祔真宗庙室自协一帝一后之文章献章懿宜崇建新庙以奉慈为名同殿异
室岁时荐飧一用太庙之仪庆历五年礼院言章献章
懿二后请遵国朝懿德明德元德三后同祔太宗庙室故事迁祔真宗庙序于章穆之次
从之

△章懿李太后

章懿李太后杭州人也父仁德终左班殿直初入宫侍章献太后庄重寡言真宗以
为司寝生仁宗封崇阳县君进才人后为婉仪仁宗即
位为顺容从守永定陵章献太后使刘美张怀德为访其亲属得其弟用和补三班奉职
初仁宗在襁褓章献以为己子二宗即位妃默处先朝
嫔御中未尝自异人畏太后亦无敢言者明道元年疾革进位宸妃薨章献太后欲以宫
人礼治丧于外丞相吕夷简奏礼宜从厚太后遽引帝
起有顷独坐帘下召夷简诘问且怒曰相公欲离闲吾母子邪夷简从容对曰陛下不以
刘氏为念臣不敢言尚念刘氏则丧礼宜从厚太后悟
遽曰且奈何夷简请治丧用一品礼殡洪福院夷简又谓入内都知罗崇勋曰宸妃当以
后服殓用水银实棺异时勿谓夷简未尝道及崇勋如
其言后章献太后崩燕王为仁宗言 【王铨默记作章惠后语】 陛下乃李宸妃所生
妃死以非命仁宗号恸顿毁不视朝累日下哀痛之诏
自责尊宸妃为皇太后谥庄懿幸洪福院祭告易梓宫亲哭视之妃玉色如生冠服如皇
太后仁宗叹曰人言其可信哉遇刘氏加厚陪葬永定
陵庙曰奉慈又即景灵宫建神御殿曰广孝庆历中改谥章懿升祔太庙拜用和为彰信
军节度使检校侍中

△杨淑妃

杨淑妃益州郫人祖瑀父知儻妃年十二入皇子宫真宗即位拜才人又拜婕妤进
婉仪帝东封西祀凡巡幸皆从章献太后为修仪妃位
与之几埒而妃通敏有智思奉顺章献无所忤章献亲爱之故妃虽贵幸终不以为己闲
后加淑妃真宗崩遗制以为皇太妃始仁宗在乳褓章
献使妃护视凡起居饮食必与俱所以拥佑扶持恩意勤备及帝即位尝召其侄永德见
禁中欲授以诸司副使妃辞曰小儿岂胜大恩小官可
也更命为右侍禁章献遗诏尊为皇太后居宫中与皇帝同议军国事议者以帝春秋长
习知天下情伪今始亲政事不宜使女后相继称制乃
诏删去同议军国事语第存后号后名其所居宫曰保庆称保庆皇太后景佑三年无疾
而薨殡于皇仪殿帝思其保护之恩命礼官议加服小
功谥曰庄惠葬永定陵祔享奉慈庙 【原传不载谥号及祔葬事今据仁宗纪补入】

初仁宗未有嗣后每劝帝择宗子近属而贤者养于宫中其选即英宗也英宗立言者谓礼慈母于子祭于孙止请废后庙瘞其主园陵英宗弗欲遽也诏下有司议会帝崩遂罢

△沈贵妃

沈贵妃宰相伦之孙父继宗光禄少卿大中祥符初选为人才厯美人婕妤充媛至德妃为人淑俭不华帝亦以妃家世故待之异众长秋虚位帝欲立之有从中沮之者不果嘉佑末进贵妃熙宁九年薨谥昭静

△仁宗郭皇后

仁宗郭皇后其先应州金城人平卢军节度使崇之孙崇仪副使允恭女天圣二年立为后初帝宠张美人欲以为后章献太后难之后立而颇见疏其后尚美人杨美人俱幸数与后忿争一日尚氏于帝前有侵后语后不胜忿批其颊帝自起救之误批帝颈帝大怒入内都知阎文应因与帝谋废后吕夷简亦以前罢相怨后思倾之后遂废诏封为净妃玉京冲妙仙师赐名清悟居长乐宫中丞孔道辅谏官御史范仲淹段少连等十人伏合言后无过不可废俱被黜责 【谨案通鉴辑览 御批妻之于夫亦犹臣之于君子之于父耳妻批夫而无罪则臣批君子批父亦可不罪乎仁宗之失在于宠二美人使之与后忿争既争而相鬪又失之自起相救耳然既已批及帝颈则罪在后矣即误亦不可而况宫闈之秘所云误者出诸谁口然则臣之于君子之于父又可误批乎仁宗不能明正大义抵之以罪而顾谋之宦官谋之执政以至议论纷然道辅仲淹反以黜而得名所为不益可笑哉】 景佑元年出居瑶华宫而尚美人亦废于洞真宫入道杨美人别宅安置又赐后号金庭教主冲静元师后帝颇念之遣使存问赐以乐府后和答之辞甚怆惋帝尝密令召入后曰若再见召须百官立班受册方可属小疾遣文应挟医诊视数日后暴薨中外疑阎文应进毒而不得其实帝深悼之追复皇后而停谥册祔庙之礼

△慈圣光献曹皇后

慈圣光献曹皇后真定人枢密使周武惠王彬之孙也明道二年郭后废诏聘入宫景佑元年九月册为皇后性慈俭重稼穡常于禁苑种谷亲蚕善飞白书庆历八年闰正月帝将以望夕再张灯后谏止后三日卫卒数人 【续通鉴作颜秀等】 作乱夜越屋叩寝殿帝闻变欲出后闭合拥持趣乎都知王守忠使引兵入卫后度贼必纵火阴遣人挈水踵其后果举炬焚帘水随灭之是夕所遣宦侍后皆亲翦其发谕之曰明日行赏用是为验故争尽死力贼即擒灭 【谨案通鉴辑览 御批观此所载仁宗

曾一后之不如直是无丈夫气但所云剪发征赏岂能尽识其人黠者将自翦发以邀功且不数月而以张美人为扈蹕功更谓贼本起皇后合以前后相形而论则纪事之不实多诬概可知】张妃怙宠上僭欲假后盖出游帝使自来请后与之无靳色妃喜还以告帝曰国家文物仪章上下有秩汝张之而出外廷不汝置妃不恠而辍英宗方四岁育禁中后拊鞠周尽迨入为嗣子赞策居多帝夜暴疾崩后悉敛诸门钥召皇子入及明宰臣韩琦等至奉英宗即位尊后为皇太后帝感疾请权同处分军国事御内东门小殿听政大臣日奏事有疑未决者则曰公辈更议之未尝出己意颇涉经史多援以决事梃曹氏及左右臣仆分毫不以假借宫省肃然明年夏帝疾益愈即降手诏命撤帘还政神宗立尊为太皇太后名宫曰庆寿帝致极诚孝所以承迎娱悦无所不尽后亦慈爱天至外家男子旧毋得入谒后春秋高后弟侑亦老帝数言宜使入见辄不许他日侑侍帝帝复为请乃许之因偕诣后合少焉帝先起若令侑得伸亲亲意后遽曰此非汝所当得留趣遣出元丰二年崩初王安石当国变乱旧章后乘闲语神宗谓祖宗法度不宜轻改吾闻民闲甚苦青苗助役宜罢之安石诚有才学然怨之者甚众帝欲爱惜保全之不若暂出之于外帝悚听垂欲止复为安石所持遂不果帝尝有意于燕蓟已与大臣定议乃诣庆寿宫白其事后曰储蓄赐予备乎铠仗士卒精乎帝曰固已办之矣后曰事体至大吉凶悔吝生乎动得之不过南面受贺而已万一不谐则生灵所系未易以言苟可取之太祖太宗收复久矣何待今日帝曰敢不受教苏轼以诗得罪下御史狱人以为必死后违豫中闻之谓帝曰尝忆仁宗以制科得轼兄弟喜曰吾为子孙得两宰相今闻轼以作诗系狱得非仇人中伤之乎摺至于诗其过微矣吾疾势已笃不可以冤滥致伤中和宜熟察之帝涕泣轼由此得免及崩帝哀慕毁瘠有司上谥曰慈圣光献葬于永昭陵祔享太庙

△张贵妃

张贵妃河南永安人父尧封为石州推官卒妻钱氏纳妃于章惠后宫寝长得幸有盛宠妃巧慧多智数善承迎势动中外庆历元年封清河郡君迁修媛忽被疾曰妾姿薄不胜宠名愿为美人许之皇佑初进贵妃后五年薨仁宗哀悼之追册为皇后谥温成

△苗贵妃

苗贵妃开封人父继宗母许氏先为仁宗乳保妃以容德入侍生唐王昕福康公主封仁寿郡君拜才人昭容德妃英宗育于禁中妃拥佑颇有恩既践祚酬其前劳进贵妃元佑六年薨谥曰昭节

△周贵妃

周贵妃开封人生四岁从其姑入宫张贵妃育为女稍长得侍仁宗生两公主帝崩妃日一疏食屏处一室昼夜诵佛书不解衣者四十年连进至贤妃徽宗立加贵妃历五朝勤约一致年九十三薨谥昭淑

△杨德妃

杨德妃定陶人天圣中以章献太后姻连选为御侍封原武郡君进美人端丽机敏妙音律组紉书艺一过目如素习父忠为禁侍仁宗欲加奖擢辞曰外官当积劳以取贵今以恩泽徼幸恐启谗谒之端帝悦命徙居肃仪殿积与郭后不相能后既废妃亦遣出后复召为婕妤历修媛修仪熙宁五年薨赠德妃

△冯贤妃

冯贤妃东平人以良家女九岁入宫及长得侍仁宗生邢国鲁国二公主封始平郡君帝将登其品秩力辞不拜养女林美人得幸神宗生二王而没王尚幼妃保育如己子累加才人婕妤修容在禁掖几六十年始终五朝动循礼度薨年七十七赠贤妃

钦定续通志卷七十五

●钦定续通志卷七十六 后妃传六

后妃传

宋 【二】

○宋二

英宗宣仁圣烈高皇后	神宗钦圣宪肃向皇后	钦成朱皇后	钦慈陈皇后
林贤妃	武贤妃	哲宗昭慈孟皇后	
昭怀刘皇后	徽宗显恭王皇后	显肃郑皇后	显仁韦皇后
	刘贵妃	刘安妃	钦宗仁

怀朱皇后

△英宗宣仁圣烈高皇后

英宗宣仁圣烈高皇后亳州蒙城人曾祖琼祖继勋皆有勋王室父遵甫北作坊使母曹氏慈圣光献后 【原文作妃按曹后未尝为妃应是后字之讹今改正】 姊也后少鞠宫中时英宗亦在帝所与后年同既长遂成昏濮邸生神宗岐王颢嘉王頵寿康公主嘉佑八年 【按高继勋传云嘉佑八年子遵甫女正位皇后李焘长编载嘉佑八年四月英宗即位立皇后高氏原文误作治平二年今改正】 册为后 【谨按通鉴辑览 御批尔时所谓诸正人者不尝斥贾昌朝交通女谒乎而此所立皇后

高氏之母固曹太后之姊也为交通为不交通且力赞
濮王子入继又何以对昌朝哉】 后弟殿内崇班士林供奉久帝欲迁其官后谢曰士林
获升朝籍分量已过岂宜援先后家比神宗立尊为皇
太后居宝慈宫帝累欲为高氏营大第后不许久之斥望春门外隙地以赐营缮费悉出
宝慈不调大农一钱元丰八年帝不豫浸剧宰执王珪
等入问疾乞立延安郡王为皇太子太后权同听政帝颔之珪等见太后帘下后泣抚王
曰儿孝顺自官家服药未尝去左右书佛经以祈福喜
学书已诵论语七卷绝不好弄乃令王出帘外见珪等珪等再拜谢且贺是日降制立为
皇太子初岐嘉二王日问起居至是令母辄入又阴敕
中人梁惟简妻制十岁儿黄袍怀以来为仓卒备 【谨按通鉴辑览 御批中人内侍
安得有妻且十岁儿袍宫中岂不能制史家不过欲
颂太后抚幼帝之美而不觉其言之过甚而谬矣】 哲宗即位尊为太皇太后与帝同御
延和殿听政更名宫曰崇庆驿召司马光吕公着迎问
今日设施所宜先未及条上已散遣修京城役夫减皇城戍卒止禁庭工技废导洛司出
近侍尤亡状者戒中外毋苛敛宽民闲保户马事由中
旨王珪等弗预知又起文彦博遣使劳诸途谕以复祖宗法度为先务且令亟疏可用者
从父遵裕坐西征失律抵罪蔡确欲献谏以固位乞复
其官后曰遵裕灵武之役涂炭百万先帝中夜得报起环榻行彻旦不能寐自是惊悸驯
至大故遵裕得免刑诛幸矣何敢顾私恩而违天下公
议确悚栗而止光公着至并命为相使同心辅政凡熙宁以来政事弗便者次第罢之
于是以常平旧式改青苗以嘉佑差役参募役除市易之
法道茶盐之禁举边砦不毛之地以赐西戎而宇内复安契丹主戒其臣下勿复生事于
疆场曰南朝尽行仁宗之政矣元佑三年廷试举人有
司请循天圣故事帝后皆御殿后止之又请受册宝于文德殿后曰母后当阳非国家美
专况天子正衙岂所当御就崇政足矣上元灯宴后母
当入观止之但令赐之灯烛遂岁以为常侄公绘公纪当转观察使力遏之临政九年中
外绥定力行故事抑绝外家私恩文思院奉上之物无
问巨细终身不取人以为女中尧舜元佑八年崩葬永厚陵后章惇蔡卞邢恕始造为不
根之谤皇太后太妃力辨其诬事乃已至高宗时昭暴
惇卞恕罪褻录后家

△神宗钦圣宪肃向皇后

神宗钦圣宪肃向皇后河内人故宰相敏中曾孙也治平三年归于颍邸封安国夫人
神宗即位立为皇后帝不豫后赞宣仁后定建储之
议哲宗立尊为皇太后宣仁命葺庆寿故宫以居后后辞曰姑居西而妇处东渎上下之

分不敢徙遂以庆寿后殿为隆佑宫居之帝将卜后及诸王纳妇后敕向族勿以女寘选中族党有欲援他族例求迁秩者后曰吾族未省用此例何庸以私情挠公法一不与哲宗崩独决策迎端王章惇不能沮徽宗立请权同处分军国事后以长君辞帝泣拜移时乃听凡绍圣元符以还惇所斥逐贤大夫士稍稍收用之故事如御正殿避家讳立诞节之类皆不用闻宾召故老宽徭息兵爱民崇俭之举则喜见于色甫六月即还政明年正月崩葬永裕陵

△钦成朱皇后

钦成朱皇后开封人父崔杰早世母李更嫁朱士安后鞠于所亲任氏熙宁初入宫为御侍进才人婕妤生哲宗及蔡王似徐国公主累进德妃哲宗即位尊为皇太妃时宣仁钦圣二太后皆居尊故称号未极元佑三年宣仁诏春秋之义母以子贵其寻绎故实务致优隆于是舆盖仗卫冠服悉侔皇后绍圣中钦圣复命即合建殿改乘车为舆出入由宣德东门百官上笏称殿下名所居为圣瑞宫 【东都事略作瑞圣宫

】 徽宗立奉礼尤谨崇宁元年薨追册为皇后上尊谥陪葬永裕陵

△钦慈陈皇后

钦慈陈皇后开封人幼颖悟庄重选入掖庭为御侍生徽宗进美人帝崩守陵殿思顾旧恩毁瘠骨立左右进粥药挥使去曰得早侍先帝愿足矣未几薨建中靖国元年追册为皇太后上尊谥陪葬永裕陵

△林贤妃

林贤妃南剑人幼选入宫既长遂得幸封永嘉郡君升美人生燕王侯越王偲邢国公主进婕妤元佑五年薨诏用一品礼葬赠贵仪又赠贤妃

△武贤妃

武贤妃始以选入宫元丰五年进才人生吴王佖贤和公主厯美人婕妤徽宗即位进昭仪贤妃大观元年薨谥曰惠穆

△哲宗昭慈孟皇后

哲宗昭慈圣献孟皇后洺州人眉州防御使马军都虞候赠太尉元之孙女也初哲宗既长宣仁高太后厯选世家女百余入宫后年十六宣仁及钦圣向太后皆爱之教以女仪元佑七年谕宰执孟氏子能执妇礼宜正位中宫命学士草制又以近世礼仪简略诏翰林台谏给舍与礼官议册后六礼以进帝亲御文德殿册为皇后宣仁太后语帝曰得贤内助非细事也久之刘婕妤有宠绍圣三年后朝景灵宫讫事就坐诸嫔御立侍刘独背立帘下后合中陈迎儿呵之不顾合中皆忿冬至日会朝钦圣太后于

隆佑宫后御坐朱髹金饰婕妤在他坐有愠色从者为
易坐制与后等众弗能平因传唱曰皇太后出后起立刘亦起寻各复其所或已撤婕妤
坐遂仆于地恚不复朝泣诉于帝会后女福庆公主疾
后有姊颇知医尝已后危疾以故出入禁掖公主药弗效持道家治病符水入治后惊曰
姊盍知宫中禁严与外闲异邪令左右藏之俟帝至具
言其故爇符于帝前宫禁相传厌魅之端作矣未几后养母听宣夫人燕氏尼法端与供
奉官王坚为后祷祠事闻诏入内押班梁从政管当御
药院苏珪即皇城司鞫之狱成命侍御史董敦逸覆录罪人过庭下气息仅属无一人能
出声者敦逸秉笔疑未下内侍郝随等以言胁之乃以
奏牒上诏废后出居瑶华宫号华阳教王玉清妙静仙师法名冲真初章惇诬宣仁后有
废立计以后逮事宣仁惇又阴附刘贤妃欲请建为后
遂与郝随构成是狱天下冤之久之帝亦悔曰章惇误我元符末钦圣太后诏后还内号
元佑皇后崇宁初郝随讽蔡京再废后徽宗从之诏依
绍圣诏旨复居瑶华宫加赐希微元通知和妙静仙师靖康初瑶华宫火徙居延宁宫又
火出居相国寺前之私第 【按东都事略及文献通
考俱云靖康之难六宫北去后以废居瑶华宫独留不载徙居延宁出居私第事与本传
异】 金人围汴钦宗与近臣议再复后尊为元佑太后
诏未下而京城陷时六宫有位号者皆北迁后以废独存张邦昌僭位尊为宋太后迎居
延福宫用胡舜陟马伸言复上尊号元佑皇后迎入禁
中垂帘听政后闻康王在济遣尚书左右丞冯澥李回及兄子忠厚持书奉迎王至南京
即皇帝位改元后以是日撤帘尊为元佑太后尚书省
言元字犯后祖名请易以所居宫名遂称隆佑太后将幸扬州命郭仲荀卫太后先行驻
扬州寻诏后侄忠厚奉太后幸杭州以苗傅为扈从统
制踰年傅与刘正彦作乱请太后听政又请立皇子太后力拒之帝闻事急诏禅位太子
太后垂帘听政朱胜非请令臣僚得独对论机事仍日
引傅党一人上殿以释其疑太后从之每见傅等曲加慰抚傅等皆喜韩世忠妻梁氏在
傅军中胜非以计脱之太后召见勉令世忠速来以清
岩陞梁氏驰入世忠军谕太后意世忠等遂引兵至逆党惧朱胜非等诱以复辟命王世
修草状进呈太后喜曰吾责塞矣再以手札趣帝还宫
即欲撤帘帝令胜非请太后一出御殿乃命撤帘是日上皇太后尊号帝幸建康 【按高
宗纪建炎三年五月帝至江宁改府名建康原文误
作建宁今改正】 命签书枢密院事郑穀卫太后继发比至帝率羣臣迎于郊会防秋迫
命刘盩止制置江浙卫太后往洪州百司非预军事者
悉从仍命滕康刘珣权知三省枢密院事从行凡四方奏献吏部差注举辟功赏之类皆

隶焉复命四厢都指挥使杨惟忠将兵万人卫从帝虑
敌人来侵密谕康珏缓急取太后旨便宜以行既至洪州金人自大冶县掩至康珏奉太
后行次吉州金人追急太后乘舟夜行质明至太和县
舟人景信反杨惟忠兵溃康珏俱遁兵卫不满百遂往虔州帝命中书舍人李正民来朝
谒时土豪陈新率众围城康珏惟忠弗能禁惟忠步将
胡友自外引兵 【高宗纪作叛将胡友亦犯虔州】 破新于城下新乃去帝闻罢康珏
命卢益李回代之遂遣御营司都统辛企宗带御器械
潘永思迎归太后至越帝亲迎于行宫门外遍问所过守臣治状太后生辰置酒宫中从
容谓帝曰宣仁太后之贤古今母后未有其比昔奸臣
肆为谤诬虽尝下诏明辨而国史尚未删定岂足传信吾意在天之灵不无望于帝也帝
闻之悚然后乃更修神宗哲宗实录始得其正而奸臣
情状益着绍兴元年 【原文误作五年今依高宗纪改正】 崩于行宫之西殿帝诏曰
朕以继体之重当从重服凡丧祭用母后临朝礼谥曰
昭慈献烈皇太后嫔于会稽上皇村祔神主于哲宗室位在昭怀皇后上三年改谥昭慈
圣献后性节俭谨有司月供千缗而止诏文书应奏
者勿避后父名羣臣请上太皇太后号亦不许戒敕忠厚等不得预闻朝政通贵近至私
第谒见宰执初后受册日宣仁太后叹曰斯人贤淑惜
福薄耳异日国有事变必此人当之后皆如所云 【谨案通鉴辑览 御批史家纪宣
仁之言以为孟后前后废立及隆佑播迁张本夫异
日之事宣仁非有神术先知何以识其然哉且宣仁若果先识其然则世家女百余人中
岂无一福德兼全者而必用此福薄之人以成异日之
祸何为哉】

△昭怀刘皇后

昭怀刘皇后初为御侍明艳冠后庭且多材艺由美人婕妤进贤妃有盛宠能顺意
奉两宫时孟后位中宫后不循列妾礼孟后既废后竟
代焉徽宗立册为元符皇后明年尊为太后名宫曰崇恩帝缘哲宗故曲加恩礼后以是
颇干预外事且以不谨闻帝与辅臣议将废之而后已
为左右所逼即帘钩自缢而崩

△徽宗显恭王皇后

徽宗显恭王皇后开封人德州刺史藻之女元符二年归于端邸封顺国夫人及即
位册为皇后生钦宗及崇国公主后性恭俭郑王二妃
方亢宠后待之均平大观二年崩谥曰靖和葬永裕陵之次四年改谥惠恭 【改谥事本
传失载今依徽宗纪补】 绍兴中始祔徽宗庙室改
上今谥云

△显肃郑皇后

显肃郑皇后开封人也父绅为直省官以后贵封太师乐平郡王后本钦圣殿押班徽宗为端王每日朝慈德宫钦圣命郑王二押班供侍及即位遂以二人赐之后入宫好观书章奏能自制崇宁初封贤妃迁贵妃有异宠徽宗多赉以词章天下歌之王皇后崩立为皇后将受册有司创制冠服后请命工改制妃时旧冠又乞罢黄麾仗小驾卤簿等仪从之恩泽皆弗陈请时族子居中在枢府后奏外戚不当预国政必欲用之且令充外职帝为罢之后性端谨善顺承帝意钦宗受禅尊为太上皇后迁居宁德宫称宁德太后从上皇幸南京金师退先归钦宗出郊迎后于是两宫欢甚洽汴京破从上皇幸青城北迁留五年崩于五国城绍兴七年何苏等使还始知上皇及后崩高宗大恻诏立重成服祔主徽宗室梓宫归入境承之以椁纳翠衣其中与徽宗合攒于会稽永佑陵

△显仁韦皇后

显仁韦皇后开封人高宗母也初入宫为御侍崇宁末封平昌郡君大观初进婕妤累迁婉容高宗在康邸出使进封龙德宫贤妃从上皇北迁建炎改元遥尊为宣和皇后封其父安道为郡王由是遣使不绝绍兴十年遥尊为皇太后上册宝于慈宁殿是后生辰至朔皆遥行贺礼洪皓在燕求得后书遣李微持归高宗大喜曰遣使百辈不如一书遂加微官金人遣萧毅邢具瞻来议和高宗语之曰太后果还誓当谨守誓约因命何铸曹勋报谢召至内殿谕之铸等至金首以后归为言再三恳请金主许之十二年八月至临安入居慈宁宫先是以梓宫未还诏中外辍乐至是庆太后寿节始用乐太后聪明有智虑初金人许还三梓宫太后恐其反复呼役者毕集然后起攒时方暑金人惮行太后虑有他变乃阳称疾须秋进发已而称贷于金人得黄金三千两以犒其众由是途中无闲言太后还宫谓两宫给使宜令通用不然则有彼我之分而佞人闲言易以入也时皇后未立太后屡言之高宗请降手书太后曰我但知家事外庭非所当预将册命承平典礼悉能记之二十九年崩于慈宁宫攒于永佑陵之西祔主太庙徽宗室太后性节俭有司进金唾壶太后易令用涂金宫中赐予不过三数千所得供进财帛多积于库至是丧葬之费皆仰给焉

△王贵妃

王贵妃与郑后俱为押班徽宗立封平昌郡君进位至贵妃生郢王楷莘王植陈王机惠淑康淑顺德柔福冲懿帝姬政和七年薨谥曰懿肃

△乔贵妃

乔贵妃初与高宗母韦后俱侍郑皇后约先贵者母相忘也既而贵妃得幸徽宗遂引韦后二人愈相得二帝北迁贵妃与韦后俱至是韦后将还贵妃举酒酌韦后曰姊善重保护归即为皇太后妹无还期终死于朔漠矣遂大恸以别

△刘贵妃

刘贵妃其出单微入宫即大幸由才人七迁至贵妃生济阳郡王棣祁王模信王榛政和三年薨先是妃手植芭蕉于庭曰是物长吾不及见矣已而果然帝深悼之特加四谥曰明达懿文又欲踵温成追崇故事使皇后表请因册赠为后而以明达谥焉

△刘安妃

刘安妃本酒保家女初事崇恩宫宫罢出居宦者何欣家内侍杨戩誉其美复召入遂有宠为才人进至淑妃生建安郡王模嘉国公椅英国公榑和福帝姬政和四年加贵妃妃天资警悟解迎意合旨雅善涂饰每制一服外闲即效之林灵素以技进目为九华玉真安妃肖其像于神霄帝君之左宣和三年薨初谥明节和文旋用明达近比加册赠为皇后葬其园之西北隅帝悼之甚后宫皆往唁帝相与啜泣崔妃独左视无戚容帝悲怒疑其为厌蛊遂废崔妃为庶人崔生汉王椿及帝姬五人云

△钦宗仁怀朱皇后

钦宗仁怀朱皇后开封祥符人父伯材武康军节度使钦宗在东宫徽宗临轩备礼册为皇太子妃钦宗即位立为皇后从帝北迁不知崩问庆元三年【宣宗纪作四年】上尊号祔太庙钦宗室

钦定续通志卷七十六

●钦定续通志卷七十七 后妃传七

后妃传

宋【三】

○宋三

高宗宪节邢皇后 宪圣慈烈吴皇后潘贤妃 张贤妃刘贵妃 刘婉仪张贵妃

孝宗成穆郭皇后成恭夏皇后 成肃谢皇后蔡贵妃 李贤妃

光宗慈懿李皇后 黄贵妃宣宗恭淑韩皇后

恭圣仁烈杨皇后理宗谢皇后 度宗全皇后杨淑妃

△高宗宪节邢皇后

高宗宪节邢皇后开封祥符人父焕朝请郎高宗居康邸以妇聘之封嘉国夫人金

兵犯京师从三宫北迁上皇遣曹勋归后脱所御金环
使内侍持付勋曰幸为吾白大王愿如此环得早相见也王怜之及即位遥册为皇后绍
兴九年崩于五国城金人秘之高宗虚中宫以侍者十
六年显仁太后回銮始知后崩谥懿节祔主于别庙绍兴十二年八月后梓宫至攒于圣
献太后梓宫之西北淳熙末改谥宪节祔高宗庙

△宪圣慈烈吴皇后

宪圣慈烈吴皇后开封人父近以后贵累官武翼郎后年十四岁高宗为康王被选
入宫王即帝位后常以戎服侍左右后颇知书从幸四
明卫士谋为变入问帝所在后给之以免未几帝航海有鱼跃入御舟后曰此周人白鱼
之祥也帝大悦后益博习书史又善翰墨由是宠遇日
至与张氏并为婉仪寻进贵妃绍兴十三年诏立为皇后显仁太后性严肃后身承起居
顺适其意尝绘古列女图置坐右为鉴又取诗序之义
扁其堂曰贤志初伯琮以宗子召入宫命张氏育之后时为才人亦请得育一子于是得
伯玖更名璩张氏卒并育于后后视之无闲伯琮性恭
俭喜读书帝与后皆爱之封普安郡王后尝语帝曰普安真天日之表也帝意决立为皇
子出璩居绍兴高宗内禅手诏后称太上皇后迁居德
寿宫孝宗即位上尊号曰寿圣太上皇后干道七年加号寿圣明慈淳熙二年复加寿圣
齐明广慈之号十二年加尊号曰备德上皇崩遗诏改
称皇太后帝欲迎还大内太后以上皇几筵在德寿宫不忍舍去因名所御殿曰慈福居
焉光宗即位更号寿圣皇太后以寿皇故不称太皇太
后也尝言及用人曰宜崇尚旧臣绍熙四年加尊号曰隆慈备福孝宗崩始正太皇太后
之号时光宗疾未平不能执丧宰臣请垂帘主丧事后
代行祭奠礼寻用枢密赵汝愚请于梓宫前垂帘宣光宗手诏立皇子嘉王为皇帝翌日
撤帘庆元元年加号光佑迁居重华宫三年崩遗诏太
上皇帝疾未痊愈宜于宫中承重皇帝服齐衰五月以日易月诏服期年丧谥曰宪圣慈
烈攒祔于永思陵

△潘贤妃

潘贤妃开封人元懿太子母也父永寿直翰林医局官高宗居康邸时纳之邢后北
迁妃未有位号帝即位将立为后吕好问谏止之立为
贤妃太子薨从隆佑太后于江西踰年还绍兴十八年薨

△张贤妃

张贤妃开封人建炎初为才人有宠进婕妤帝欲择宗室子养禁中辅臣问帝以宫
中可付托者帝曰已得之矣已而伯琮入宫年尚幼帝
因命婕妤母之是为孝宗寻迁婉仪十二年卒赠贤妃

△刘贵妃

刘贵妃临安人入宫为红霞帔迁才人累迁婕妤婉容绍兴二十四年进贤妃【高宗纪作贵妃】颇恃宠骄侈尝因盛夏以水晶饰脚踏帝见之命取为枕妃惧撤去之淳熙十四年薨

△刘婉仪

刘婉仪初入宫封宜春郡夫人寻进才人与刘婉容俱被宠进婉仪颇恃恩招权尝遣人讽广州番商献明珠香药许以爵官金人将败盟刘锜主战侍医王继先从中沮之因谋诛锜帝不怪一日婉仪见帝有忧色阴访得其言以宽帝意帝怪与继先言合诘之婉仪急具以实对帝大怒托以他故废之

△张贵妃

张贵妃开封祥符人初入宫封永嘉郡夫人干道六年进婉容淳熙中封太上皇淑妃进贵妃绍熙元年薨美人冯氏才人韩氏吴氏李氏王氏俱被宠后皆废吴氏中宫近属也绍兴三十年复故封李氏王氏俱明艳上皇爱之及崩宪圣后见二才人每感愤孝宗即追告命许自便盖非常制云

△孝宗成穆郭皇后

孝宗成穆郭皇后开封祥符人奉直大夫直卿之女孙其六世祖为章穆皇后外家孝宗为普安郡王时纳焉封咸安郡夫人生光宗及庄文太子愔魏惠宪王愷邵悼肃王恪绍兴二十六年薨追封淑国夫人三十一年用明堂恩赠福国夫人既建太子追封皇太子妃及受禅追册为皇后谥恭怀寻改安穆及营阜陵又改成穆祔孝宗庙父璘累官昭庆军承宣使

△成恭夏皇后

成恭夏皇后袁州宜春人曾祖令吉为吉水簿夏氏初入宫为宪圣太后合中侍御普安郡王夫人郭氏薨太后以夏氏赐王封齐安郡夫人即位进贤妃踰年奉上皇命立为皇后干道三年崩谥安恭宁宗时改谥成恭初后之生也父协奇之及长以姿纳宫中久之父益困及归僦居袁之僧舍号夏翁翁亡后始贵访得其弟执中补承信郎执中与其徽时妻至京宫人讽使出之择配贵族执中弗为动他日后亲为言执中诵宋弘语以对颇工书复善骑射尝为馆伴副使连射皆命中孝宗闻其才将召用之谢曰他日无累陛下保全足矣人以此益贤之

△成肃谢皇后

成肃谢皇后丹阳人幼孤鞠于翟氏因冒姓焉及长被选入宫宪圣太后以赐普安郡王封咸安郡夫人王即位进婉容踰年进贵妃成恭

皇后崩中宫虚位淳熙三年妃侍帝过德寿宫上皇谕以立后意寻遣张去为传旨立贵妃为皇后复姓谢氏光宗受禅上尊号寿成皇后孝宗崩尊为皇太后庆元初加号惠慈嘉泰二年加慈佑太皇太后开禧三年崩【按宁宗纪开禧三年五月太皇太后谢氏崩本传脱开禧二字蒙上作嘉泰三年今增入】 谥成肃攒祔于永阜陵后性俭慈减膳羊每食必先以进御服澣濯衣有数年不易者弟渊以后贵授武翼郎后尝戒之曰主上化行恭俭吾亦躬服澣濯尔宜崇谦抑远骄侈后历迁至保信军节度使封和国公

△蔡贵妃

蔡贵妃初入宫为红霞帔封和义郡夫人进婉容淳熙十年拜贵妃十二年薨父滂宜春观察使

△李贤妃

李贤妃初入宫为典字转通义郡夫人进婕妤淳熙十年卒赠贤妃

△光宗慈懿李皇后

光宗慈懿李皇后安阳人庆远军节度使赠太尉道之中女道帅湖北闻道士皇甫坦善相人出诸女拜坦坦见后曰此女当母天下言于高宗遂聘为恭王妃封荣国夫人进定国干道四年生嘉王七年立为皇太子妃性妒悍尝诉太子左右于高孝二宫高宗不怿谓吴后曰是妇将种吾为皇甫坦所误孝宗亦屡训后宜以皇太后为法不然行当废汝后疑其说出于太后及太子即位册为皇后光宗欲诛宦者近习皆惧遂谋离闲三宫会帝得心疾孝宗购良药欲因帝至宫授之宦者诬诉于后后心衔之顷之内宴后请立嘉王为太子孝宗不许后曰妾六礼所聘嘉王妾亲生也何为不可孝宗大怒后退持嘉王泣诉于帝谓寿皇有废立意帝惑之遂不朝上皇黄贵妃有宠因帝亲郊宿斋宫后杀之以暴卒闻是夕风雨大作黄坛烛尽灭不能成礼帝疾由是益剧不视朝政事多决于后【谨按通鉴辑览 御批光宗事多决于后视唐高宗令后决百司奏事何异至断臂擅杀之惨亦复相同然李后之毒悍实皆光宗闇懦不振有以酿成之而不朝寿皇失子道其罪更浮于高宗矣】 后益骄奢封三代为王家庙逾制卫兵多于太庙后归谒家庙爵赏益滥下至李氏门客亦奏补官是时帝久不朝上皇中外疑骇绍熙四年九月重明节宰执侍从台谏连章请帝过宫给事中谢深甫切谏帝感悟遂趣命驾朝重华宫百官列俟帝出至御屏后挽留帝入曰天寒官家且饮酒百僚侍卫相顾莫敢言中书舍人陈傅良引帝裾请母入因至屏后后叱退之遂传旨罢过宫【谨案通鉴辑览 御批晨昏定

省天性自然固非作而致之者至于侍从连章力谏台臣恸哭殿庭即勉强往朝而本心已不可问矣乃甫趣驾欲行旋以李后挽留即止忽而感悟天良忽而澌灭殆尽光宗既非失心狂易之疾何昧于父子之亲受制悍后恬不知耻此诚咸邱蒙所云天下殆哉岌岌乎之时矣】 宁宗

即位尊后曰太上皇后上尊号曰寿仁庆元六年崩

△黄贵妃

黄贵妃淳熙末在德寿官封和义郡夫人光宗为皇太子傍无侍姬上皇以夫人赐之遂专宠即位拜贵妃绍熙二年为皇后李氏所杀又有张贵妃亦旧侍东宫次婕妤符氏后出嫁于民间

△宁宗恭淑韩皇后

宁宗恭淑韩皇后相州人其六世祖为忠献王琦初后与姊俱被选入宫后能顺适两宫意遂归平阳郡邸封新安郡夫人进崇国王受禅册为皇后后父同卿由知泰州升扬州观察使庆元六年崩谥恭淑同卿累迁庆远军节度使同卿季父侂胄声势熏灼同卿每惧满盈不敢干政同卿没一年而后崩侂胄竟败人始服其善远权势云

△恭圣仁烈杨皇后

恭圣仁烈杨皇后少以姿容选入宫忘其姓氏或云会稽人【按周密齐东野语云后养母张于仪真长芦寺前僦居主僧善相知其女当贵假之资如杭入慈福宫宁宗至后所必目之因以为赐语异本传】 庆元元年封平乐郡夫人进婕妤有杨次山者亦会稽人后自谓其兄也遂姓杨氏五年进婉仪六年进贵妃恭淑皇后崩中宫未有所属后与曹美人俱有宠韩侂胄见后任权术而曹美人性柔顺劝帝立曹而后颇涉书史知古今性复机警帝竟立之次山客王梦龙知其谋密以告后后深衔之与次山欲因事诛侂胄会侂胄议用兵中原俾皇子曦入奏侂胄再启兵端将不利于社稷帝不答后从傍赞之甚力亦不答恐事泄俾次山择廷臣可任者与共图之礼部侍郎史弥远素与侂胄有隙遂欣然奉命开熙三年十一月三日侂胄方早朝弥远密遣中军统制夏震伏兵六部桥侧率健卒拥侂胄至玉津园搥杀之赴延和殿以闻后既诛侂胄弥远日益贵用事嘉定十四年帝以国嗣未定养宗室子贵和立为皇子赐名竑弥远专政竑渐不能平弥远惧阴蓄异志欲立他宗室子昀为皇子遂阴与昀通十七年闰八月帝大渐弥远夜召昀入宫遣后兄子谷及石以废立事白后后不可凡七往反后终不听谷等乃拜泣曰内外军民皆已归心苟不立之祸变必生杨氏无唯类矣遂矫诏废竑为济王立昀为皇子即帝位尊皇后曰皇太后同听政加尊号寿明绍

定元年复加慈睿四年加尊号寿明仁福慈睿皇太后五年十二月崩于慈明殿谥恭圣仁烈

△理宗谢皇后

理宗谢皇后讳道清天台人宰相深甫之孙父渠伯早卒初深甫为相有援立杨太后功太后德之帝即位议择中宫太后命选谢氏诸女后就道时贾涉女有殊色同在选中及入宫帝意欲立贾太后曰谢女端重有福宜正中宫帝不能夺宝庆三年册为皇后后既立贾贵妃专宠妃薨阁贵妃又以色进后处之裕如太后深贤之开庆初元兵渡江议迁都平江庆元后谏不可恐动民心乃止帝崩度宗立尊为皇太后号寿和圣福度宗崩帝■〈显，去页〉即位尊为太皇太后垂帘同听政太后以兵兴费繁痛自节省裁汰慈元殿提举已下官省泛索钱月万缗京朝官闻难往往避匿遁去太后命揭榜朝堂曰我国家三百年待士大夫不薄吾与嗣君遭家多难尔小大臣不能出一策以救时艰内则畔官离次外则委印弃城亦何以见先帝于地下乎天命未改国法尚存凡负国逃者御史觉察以闻德佑元年六月朔日食既太后削圣福以应天变张世杰兵败于焦山陈宜中弃官去太后遗书宜中母勉之还朝太后又亲为书召夏贵等兵贵等亦罕有至者元兵破常州太后遣陆秀夫等请和不从宜中即率公卿请迁都太后不许明年正月更命宜中使军中药用臣礼宜中难之太后涕泣曰苟存社稷臣非所较也未几元兵薄皋亭山驻钱塘帝■〈显，去页〉与全后北去太后以疾留杭是年八月至京师越七年崩

△度宗全皇后

度宗全皇后会稽人理宗母慈宪夫人侄孙女也父昭孙知岳州帝为忠王时议纳妃理宗以慈宪故乃诏后入宫问曰尔父昭孙昔在宝佑闲没于王事每念之令人可哀后对曰妾父可念淮湖之民尤可念也帝深异之语大臣曰全氏女言辞甚令宜配冢嫡以承祭祀景定二年册为皇太子妃度宗立册为皇后生帝■〈显，去页〉十年度宗崩帝■〈显，去页〉立册为皇太后后入燕京为尼正智寺而终

△杨淑妃

杨淑妃初选入宫为美人咸淳三年进封淑妃生益王昷昷即位于福州尊妃为太后【续通鉴作太妃】封弟昺卫王昺修容俞氏所生也是卒昺代立踰年投海死妃闻之大恸曰我闲关忍死者正为赵氏一块肉尚有望尔今天命至此夫复何言遂赴海死其将张世杰葬之海滨

△公主

宣祖一女

秦国公主 【按宋传英宗以上诸女称大长公主神宗哲宗女称长公主徽宗女称帝姬今依郑志概称皇女唐书概称公主例删归一

律帝姬则仍其旧云】 太祖同母妹也初适米福德福德卒太祖即位封燕国长公主再适忠武军节度使高怀德开宝六年十月薨谥恭懿真

宗追封大长公主元符三年改秦国政和三年 【按徽宗纪政和三年改公主为帝姬本传误作四年今改正】 改公主为帝姬太祖以下诸

女尽易之封恭懿大长帝姬有姊一人未笄而夭建隆三年追封陈国长公主元符末改荆国大长公主政和中改封恭献大长帝姬

太祖六女

申国公主蚤薨

成国公主蚤薨

永国公主蚤薨

魏国公主开宝三年封昭庆公主下嫁左卫将军 【王承衍传作右卫将军】 王承衍太宗即位进封郑国淳化元年改秦国真宗至道

三年进长公主大中祥符元年薨谥贤肃元符末改封魏国大长公主

鲁国公主开宝五年封延庆公主下嫁左卫将军石保吉 【按石保吉传保吉尚延庆公主在开宝四年】 太宗即位进封许国淳化元

年改晋国真宗初进长公主大中祥符二年进大长公主薨谥贤靖元符末改封鲁国

陈国公主开宝五年封永庆公主下嫁右卫将军魏咸信太宗即位进封虢国淳化元年改齐国真宗初进许国长公主咸平二年薨谥贞

惠后改恭惠景佑三年追封大长公主元符末改封陈国

太宗七女

滕国公主蚤薨

徐国公主太平兴国九年封蔡国下嫁左卫将军吴元房 【按吴元宸传太平兴国八年选尚太宗第四女与本传互异】 淳化元年改

魏国薨谥英惠至道三年追封燕国长公主景佑三年进大长公主元符末改徐国

邠国公主太平兴国七年为尼号员明大师八年卒至道三年追封曹国长公主景佑三年进大长公主元符末改邠国

杨国公主至道三年封宣慈长公主咸平五年进鲁国下嫁左卫将军柴宗庆宗庆禹锡之孙帝命主以妇礼谒禹锡第历徙韩魏徐福四

国仁宗立进邓国大长公主 【按宗庆传云累封楚国大长公主本传不载岂邓国为楚国之讹欤】 明道二年薨进封晋国谥和靖元符末

封杨国主性妒宗庆无子以兄子为后

雍国公主至道三年封贤懿长公主咸平六年下嫁右卫将军王贻永进封郑国景德元年薨谥懿顺景佑三年追封大长公主皇佑三年改韩国徽宗改封雍国

卫国公主至道三年封寿昌长公主大中祥符二年进封陈国改吴国号报慈正觉大师改楚国又改邠国天禧二年改建国干兴元年封申国大长公主天圣三年薨谥慈明徽宗改卫国

荆国公主幼不好弄未尝出房闼太宗尝发宝藏令诸女择取之欲以观其志主独无所取真宗即位封万寿长公主改隋国下嫁驸马都尉李遵勗旧制尚者降其父为兄弟行时遵勗父继昌生日主以舅礼谒之遵勗宾客皆一时贤士每燕集主必亲视饗饔历封越宿鄂冀四国明道元年进魏国遵勗出守许州暴得疾主亟欲驰视之左右白须奏得报乃可行主不待报而往其后居夫丧衰麻未尝去身服除不复御华丽尝燕禁中帝亲为簪花辞曰誓不复为此久矣主善笔札喜图史尤善女工尝诫诸子以忠义自守无恃吾以速悔尤视他子与己出均及病目帝挟医诊视亲舐其目曰先帝伯仲之籍十有四人今独存大主疾傥可移于朕亦所不避也主虽丧明平居隐几冲澹自若诫诸子曰汝父遗令柩中无藏金玉吾歿后当亦如是皇佑三年薨追封齐国大长公主谥献穆徽宗改封荆国

真宗二女

惠国公主蚤薨

升国公主初入道明道二年封卫国王长公主号清虚灵照大师庆历七年追封鲁国谥昭怀徽宗改封升国大长公主

仁宗十三女

周陈国公主帝长女也宝元二年封福康嘉佑二年进封兖国 【按李焘长编载嘉佑二年进封兖国公主为福康公主则是先封兖国也与本传异】 主性纯孝帝尝不豫主侍左右徒跣吁天乞以身代帝隆爱之帝念章懿太后不及享天下养故择其兄子李玮使尚主玮朴陋与主积不相能主中夜扣皇城门入诉玮惶惧自劾后数年不复协诏出玮于外主降封沂屏居内廷久之复召玮为驸马都尉如初英宗立进越国长公主神宗治平四年进楚国大长公主熙宁三年薨辅臣议谥帝以主事仁祖孝命曰庄孝追封秦国徽宗加周陈国政和闲改谥庄孝明懿大长帝姬

徐国公主蚤薨

邓国公主蚤薨
郑国公主蚤薨
楚国公主蚤薨
商国公主蚤薨
鲁国公主蚤薨
唐国公主蚤薨
陈国公主蚤薨

豫国公主蚤薨 【按文献通考载仁宗十三女周国汉国秦国魏国鲁国吴国燕国楚国八公主俱蚤夭封国人数皆与史不合】

秦鲁国贤穆明懿公主母周贵妃嘉佑五年封庆寿进惠国治平四年进鲁国大长公主下嫁吴越忠懿王曾孙右领军卫大将军钱景臻改韩周燕国徽宗朝进秦魏两国政和三年更封令德景行大长帝姬靖康二年诸帝姬北徙姬以先朝女金人不知留于汴建炎初复公主号改封秦鲁国绍兴三年请入见因留居焉帝以公主行尊年高甚敬之每内见必先揖靖康中戚里例纳节至是公主为其子忱请还旧官帝以忱为泸州节度使久之又为忱请优赐推恩加忱开府仪同三司时主有三子恹恺非己出故独厚于忱帝戒之曰长主寿考如此乃仁宗皇帝深仁厚泽所鍾长主待遇诸子宜法仁宗用心之均一主感服薨谥贤穆后加谥明懿

兖国公主嘉佑六年封永寿进荣国长公主治平四年进祁国大长公主熙宁九年改鲁国下嫁左领军卫大将军曹诗主性俭节于池台苑囿一无所增饰十年夏旱曹族以主生日将盛具为寿主曰上方损膳彻乐吾何心能安悉屏之元丰六年薨追封荆国谥贤懿徽宗追封兖国又改贤懿恭穆大长帝姬

燕舒国公主嘉佑六年封宝寿 【按文献通考不载燕舒国公主且云庆寿宝寿二公主史不言其所适今据庆寿即前秦鲁国公主宝寿即燕舒国公主也通考所纪恐误】 八年进封顺国长公主治平四年进冀国大长公主元丰五年改魏国下嫁开州团练使郭献卿八年进楚国徽宗改吴国进吴越国改秦兖国政和二年薨追封燕舒国谥懿穆

英宗四女

舒国公主蚤薨

魏楚国公主嘉佑八年封德懿治平三年进封徐国下嫁左卫将军王师约四年进陈国长公主元丰八年薨追封燕国大长公主谥惠和元佑四年追封秦国徽宗追封魏国加韩魏国改魏楚国

魏国公主母宣仁圣烈皇后嘉佑八年封宝安公主神宗立进舒国长公主改蜀国

下嫁左卫将军王洗洗母卢寡居主处之近舍日致膳
羞卢病自和汤剂以进以不得日侍宣仁于宝慈宫居常悒然闲遇早暝帝降损以祷主
亦如之曰我奉赐皆出公上固应同其休戚帝居慈圣
光献皇后丧毁甚主曰吾与上同体视此亦复何聊立散遣歌舞三十辈元丰三年病笃
主性不妒忌王洗以是自恣尝贬官至是帝命还洗官
以慰主意薨追封越国谥贤惠后进封大长公主累改秦荆魏三国韩魏国公主与魏国
同生始封寿康公主改祁国卫国下嫁张敦礼进冀国
大长公主改秦越楚国加今封政和三年改贤德懿行帝姬宣和五年薨

神宗十女

楚国 【文献通考作吴国】 公主蚤薨

郗国公主蚤薨

潞国公主蚤薨

邢国公主蚤薨

邠国公主蚤薨

兗国公主蚤薨

周国公主 【文献通考作周国淑怀公主】 母钦圣宪肃皇后封延禧公主生而
警悟自羈口宛如成人年十二卒追赠燕国元符末改
封周国

唐国公主 【文献通考作唐国贤穆公主】 始封淑寿公主初帝念韩琦功德欲
与为婚姻故哲宗缘先帝意以主降琦之子嘉彦厯封
温曹冀雍越燕六国 【按韩琦传嘉彦尚神宗女齐国公主本传载厯封六国而不及齐
疑有脱误】 政和元年薨追封唐国长公主潭国贤
孝公主母宋贵妃始封康国绍圣四年下嫁王遇厯韩鲁陈郓四国大观二年薨追加封
谥

徐国公主母钦成皇后始封庆国进益冀蜀徐四国年及笄犹处圣瑞宫侍母疾昼
夜不暂去药饵非经手弗以进迨疾革号恸屡绝左右
不忍视崇宁三年下嫁郑王潘美曾孙意事姑修妇道潘故大族夫党数千百人宾接皆
尽礼无里外言服玩不为纷华岁时简嬉游媵妾侍女
拊视如己出政和三年改称柔惠帝姬五年薨追封贤静长帝姬

哲宗四女

邓国公主蚤薨

扬国公主蚤薨

陈国公主始封德康公主进瀛国荣国大观四年下嫁石端礼徙陈国改淑和帝姬
政和七年薨秦国康懿公主始封康懿进嘉国庆国政

和二年改韩国公主出降潘正夫改淑慎帝姬靖康末与令德景行 【原文作贤德懿行考前传当是令德景行之误今改正】

大长公主俱以先朝女留于汴建炎初复公主号改封吴国避地至婺州绍兴四年入见奏言祖宗以来驸马都尉皆除使相今正夫厯事四朝在汴京曾建议迎陛下至杭州又言禁卫未集预宜防变乞除开府不许八年再入见又为正夫求恩数帝曰官爵岂可私与人况今日多事未暇及此时赵鼎当国颇抑正夫鼎去位正夫始得开府之命十九年又入朝子长卿粹卿端卿皆自团练使升观察使从所请也孝宗即位进封秦国大长公主隆兴二年薨谥康懿

徽宗三十四女

嘉德帝姬建中靖国元年封德庆公主改封嘉福再封嘉德下嫁左卫将军曹夔

荣德帝姬初封永庆公主改封荣福再封荣德下嫁左卫将军曹晟从帝北迁至燕京晟卒改适习古国王

顺淑帝姬初封顺庆公主薨追封益国追谥顺淑帝姬

安德帝姬初封淑庆公主改封安福再封安德下嫁左卫将军宋邦光

茂德帝姬初封延庆公主改封康福再进茂德下嫁宣和殿待制蔡肇

寿淑帝姬初封寿庆公主薨追封豫国复封寿淑

惠淑帝姬初封惠庆公主薨追封邓国复封惠淑

安淑帝姬初封安庆公主改封隆福薨追封蜀国复封安淑

崇德帝姬初封和庆公主改封崇福下嫁左卫将军曹湜再封崇德宣和二年薨

康淑帝姬初封康庆公主改封承福薨追封商国复封康淑

荣淑帝姬初封崇庆公主改封懿福薨追封蔡国复封荣淑

保淑帝姬初封保庆公主薨追封鲁国复封保淑

成德帝姬初封昌福公主再封成德下嫁向子房

洵德帝姬初封衍国公主寻改封洵德下嫁田丕

悼穆帝姬初封徽福公主薨追封悼穆

显德帝姬初封显福公主寻改封显德下嫁刘文彦

熙淑帝姬初封熙福公主薨追封华国复封熙淑

敦淑帝姬初封寿福公主薨追封泾国复封敦淑

顺德帝姬初封顺德公主寻改号帝姬下嫁向子扆

柔福帝姬初封柔福公主北迁五国城适徐还而薨绍兴闲追封和国长公主

申福帝姬薨追封冲慧

寗福帝姬政和四年封

保福帝姬追封庄懿

贤福帝姬追封冲懿

仁福帝姬追封顺穆

和福帝姬

永福帝姬

惠福帝姬

令福帝姬

华福帝姬

庆福帝姬

仪福帝姬

纯福帝姬

恭福帝姬靖康之变帝姬生纒周晬留于汴建炎三年薨封隋国公主

孝宗二女

嘉国公主绍兴二十四年封硕人进永嘉郡主蚤薨干道三年追封次女生五月而夭未及封

光宗三女

文安公主蚤薨

和政公主蚤薨

齐安公主蚤薨

宁宗一女

祁国公主生六月而夭追封祁国

理宗一女

周汉国公主母贾贵妃蚤薨帝无子公主生而甚钟爱初封瑞国公主改升国景定二年帝以杨太后拥立功乃选太后侄孙镇尚主进封

周国帝欲时时见之乃为主起第嘉会门飞楼阁道密迳宫苑帝常御小辇从宫人过公主第薨谥端孝

钦定续通志卷七十七

●钦定续通志卷七十八 后妃传八

后妃传

辽

○辽

太祖淳钦皇后舒噜氏 太宗靖安皇后萧氏世宗怀节皇后萧氏 甄妃穆宗皇后萧氏 景宗睿知皇后萧氏圣宗仁德皇

后萧氏 钦哀皇后萧氏兴宗仁懿皇后萧氏 萧贵妃道宗宣懿皇后萧氏

萧惠妃天祚皇后萧氏 萧德妃萧文妃

萧元妃

△太祖淳钦皇后舒噜氏

太祖淳钦皇后舒噜氏讳平小字鄂尔多其先回鹘人父巴噶穆尔名渊仕约尼氏为额珍尼果齐喀后简重果断有雄略太祖即位羣臣上尊号曰地皇后神册元年大册加号应天大明地皇后行兵御众后尝与谋太祖尝渡磧击党项黄头锡伯二室韦乘虚袭之后勒兵以待奋击大破之名震诸夷时晋王孝存勛欲结援以叔母事后幽州刘守光遣韩延徽求援后请用之太祖召与语大悦以为谋主吴主李升献猛火油以水沃之愈炽太祖选三万骑攻幽州后曰岂有试油而攻人国者指帐前树曰无皮可以生乎太祖曰不可后曰幽州之有土有民亦犹是耳吾以三千骑掠其四野不过数年困而归我矣何必为此万一不胜为中国笑吾部落不亦解体乎东平渤海后与有谋太祖崩后称制摄军国事及葬欲以身殉亲戚百官力谏因断右腕纳于柩 【按五代史契丹纪载辽太祖崩后杀从行大将百余人左右有过者多送之墓所杀之大将赵思温当往不肯行后曰尔先帝亲信安得不往见之对曰亲莫如后后何不行后曰可断吾臂以送之乃断其一腕而释思温与本传所云抑扬互异】 太宗即位尊为皇太后会同初上尊号曰广德至仁昭烈崇简应天皇太后太后尝属意少子鲁呼太宗崩世宗即位于镇阳太后怒遣鲁呼以兵逆击鲁呼败太后亲帅师遇于潢河之横渡赖耶律乌哲谏罢兵迁太后于祖州应历三年崩年七十五祔祖陵谥曰贞烈重熙二十一年更今谥

△太宗靖安皇后萧氏

太宗靖安皇后萧氏小字温淳钦皇后弟实鲁之女帝为大元帅纳为妃生穆宗及即位立为皇后性聪慧洁素尤被宠顾虽军旅田猎必与天显十年崩谥彰德葬奉陵重熙一二十一年更今谥 【按辽史太祖后传前载肃祖懿祖玄祖德祖四后今依郑例从删】

△世宗怀节皇后萧氏

世宗怀节皇后萧氏小字萨哈勒齐淳钦皇后弟阿固齐之女帝为永康王纳之生景宗天禄末立为皇后明年秋生萌古公主在蓐察克作乱弑太后及帝后乘步辇直诣察克请毕收殓明日遇害谥曰孝烈皇后重熙二十一年更今谥

△甄妃

妃甄氏后唐宫人有姿色帝从太祖南征得之宠遇甚厚生宣王札穆及即位立为皇后 【按世宗纪天禄四年册皇后萧氏皇子表但

称妃甄氏而不言后此云立为皇后纪载互异】 严明端重风神闲雅内治有法莫干以私世宗承强盛之资奄奄岁时后与参帷幄密赞大谋不果用察克乱遇害景宗立葬二后于医巫闾山建庙陵寝侧

△穆宗皇后萧氏

穆宗皇后萧氏父知璠内供奉翰林承旨后幼有仪则帝居藩纳为妃及正位中宫性柔婉不能规正无子

△景宗睿知皇后萧氏

景宗睿知皇后萧氏讳绰小字燕燕北府宰相思温女帝即位选为贵妃寻册为皇后生圣宗景宗崩尊为皇太后摄国政以耶律色珍韩德让参决大政委裕悦休格以南边事统和元年上尊号曰承天皇太后二十四年加上尊号曰睿德神略应运启化承天皇太后二十七年崩谥曰圣神宣献皇后重熙二十一年更今谥后明达治道闻善必从故羣臣咸竭其忠习知军政澶渊之役亲御戎车指麾三军赏罚信明将士用命圣宗称辽盛主后教训为多

△圣宗仁德皇后萧氏

圣宗仁德皇后萧氏小字菩萨格睿知皇后弟乌延之女 【东都事略作平州节度使萧猥思之女】 年十二美而才选入掖庭统和十九年册为齐天皇后尝以草茝为殿式密付有司令造清风天祥八方三殿既成益宠异所乘车置龙首鸱尾饰以黄金又造九龙辂诸子车以白金为浮图各有巧思生皇子二皆早卒开泰五年宫人讷木锦生兴宗后养为子帝大渐讷木锦冒后曰老物宠亦有既耶左右扶后出帝崩讷木锦自立为皇太后是为钦哀皇后护卫冯家努吉逊等希旨诬告北府宰相萧珠卜国舅萧必塔谋逆诏合鞠治连及后兴宗闻之曰皇后侍先帝四十年抚育藐躬当为太后今不果反罪之可乎钦哀曰此人若在恐为后患帝曰皇后无子而老虽在无能为也钦哀不从迁后于上京车驾春搜钦哀虑帝怀鞠育思驰遣人加害使至后曰我实无辜天下共知卿待我浴而后就死可乎使者退后崩重熙二十一年 【据兴宗纪增辑】 追尊仁德皇后与钦哀并祔庆陵

△钦哀皇后萧氏

钦哀皇后萧氏小字讷木锦淳钦皇后弟阿固齐五世孙黝面狠视入宫生兴宗仁德皇后无子取而养之如己出后以兴宗侍仁德皇后谨不悦圣宗崩迁仁德皇后于上京害之自立为皇太后摄政以生辰为应圣节重熙元年尊为法天应运仁德章圣皇太后 【按重熙元年二十三年两加尊号传误合为一今据兴宗纪增辑】 二十三年加上尊号曰仁慈圣善

钦孝广德安静贞纯懿和宽厚崇觉仪天皇太后兴宗
初年后阴召诸弟议欲立少子重元重元以所谋曰帝帝收太后符玺迁于庆州七括宫
八月 【传误六年据本传改】 秋帝悔之亲驭奉迎
侍养益孝谨后常不恠帝崩殊无戚容清懿初尊为太皇太后崩谥曰钦哀皇后葬庆陵
【据道宗纪增辑】

△兴宗仁懿皇后萧氏

兴宗仁懿皇后萧氏小字塔喇钦哀皇后弟孝穆之长女性宽容姿貌端丽帝即位
入宫生道宗重熙四年立为皇后二十三年号贞懿慈
和文惠孝敬广爱崇圣皇后道宗即位尊为皇太后清懿二年上尊号曰慈懿仁和文惠
孝敬广爱宗天皇太后九年秋敦睦宫使耶律良以重
元与其子尼嚕古反状密告太后乃言于帝帝疑之太后曰此社稷大事宜早为计帝始
戒严及战太后亲督卫士破逆党太康二年崩谥仁懿
皇后仁慈淑谨中外感戴凡正旦生辰诸国贡币悉赐贫瘠

△萧贵妃

兴宗贵妃萧氏小字伞察驸马都尉必鲁之女选入东宫帝即位立为皇后重熙初
以罪降贵妃

△道宗宣懿皇后萧氏

道宗宣懿皇后萧氏小字观音钦哀皇后弟枢密使惠之女咨容冠绝工诗善谈论
自制歌词尤善琵琶重熙中帝王燕赵纳为妃清懿初
立为皇妃二年羣臣上尊号曰懿德 【按王鼎焚椒录云清懿元年册为皇后二年羣臣
上帝尊号曰天佑皇帝后曰懿德皇后原传云立为
懿德皇后盖并两事为一事也今改正】 皇太叔重元妻以艳冶自矜后见之戒曰为贵
家妇何必如此后生太子浚有专房宠好音乐伶官赵
惟一得侍左右太康初宫婢单登教坊朱顶鹤诬后与惟一私枢密使耶律伊苏以闻诏
伊苏与张孝杰劾状因而实之族诛惟一赐后自尽归
其尸于家干统初追谥宣懿皇后合葬庆陵

△萧惠妃

道宗惠妃萧氏小字塔斯驸马都尉锡默之妹太康二年伊苏誉之选入掖庭立为
皇后居数岁未见皇嗣后妹额特埒先嫁伊苏子苏雅
后以宜子言于帝离婚纳宫中八年皇孙延禧封梁王降为惠妃徙干陵额特埒还其家
顷之其母燕国夫人厌魅梁王伏诛贬妃为庶人幽于
宜州诸弟没入兴圣宫天庆六年召还封太皇太妃后二年奔黑顶山卒葬太子山

△天祚皇后萧氏

天祚皇后萧氏小字多嚕伦宰相继先五世孙大安三年入宫明年封燕王妃干

统初册为皇后性闲淑有仪则兄弟奉先保先等缘后

宠柄任金兵至从天祚西狩以疾崩

△萧德妃

萧德妃小字实古北府宰相常格之女寿隆二年入宫封燕国妃生子塔鲁干统三年改德妃以柴册礼封塔鲁为燕国王加妃号赞翼王

薨以哀戚卒

△萧文妃

萧文妃小字色克哩国舅大父房之女干统初帝幸耶律特尔格第见而悦之匿宫中数月皇太叔和啰噶劝帝以礼选纳三年冬立为文

妃生蜀国公主晋王额噜温尤被宠幸以柴册加号承翼善歌诗金兵日见侵迫帝畋游不恤忠臣多被疏斥妃作歌讽谏天祚衔之元妃兄萧

奉先诬南军都统伊都谋立晋王以妃与闻赐死

△萧元妃

萧元妃小字贵格燕国妃之妹年十七册为元妃性沈静尝昼寝近侍盗貂裯妃觉而不言宫掖称其宽厚生梁王雅尔 【据皇子表增

辑】 从天祚西狩以疾薨 【按大金国志云兀室诛伊都并及宗翰次室萧氏因请罪于宗翰曰萧氏本契丹天祚元妃也张汇金节要亦云

宗翰之妻乃天祚元妃而契丹国志并以宗翰次室为天祚皇后辽史则并云以疾亡未详孰是】

△公主附 【按辽史无公主传今据公主表增辑】

太祖一女

质古幼为奥姑契丹故俗凡婚燕之礼推女子之可尊敬者坐于奥谓之奥姑下嫁淳钦皇后弟萧实噜未封而卒

太宗二女

燕国公主鲁尔古下嫁北府宰相萧实衮应历闲封汧

国长公主保宁中进封燕国大长公主兆威下嫁北府宰相萧哈里未封而卒

世宗三女

秦国公主和克坦下嫁侍中萧卓琳保宁间封秦国长公主

晋国公主观音下嫁萧实喇保宁闲封晋国长公主

萨喇下嫁萧斡里未封而卒

景宗四女

魏国公主观音女下嫁北府宰相萧继先进封齐国景福中封燕国大长公主重熙初薨

吴国公主长寿女下嫁宰相萧巴雅尔统和初进封卫国改封魏国长公主开泰六

年薨

越国公主延寿女下嫁萧恒德性沈厚睿智皇后尤爱之蚤薨追封赵国
硕格渤海妃所生下嫁卢俊改适萧神努无封号

圣宗十四女

随国公主燕格下嫁萧丕拉进封秦国兴宗时封宋国长公主

魏国公主伊木沁开泰七年封下嫁萧绰班改适萧哈里又适萧呼图克又适韩国
王萧惠进封秦国王公主改封秦晋国清宁初加大长

公主

越国公主硕格进封晋国姿质秀丽礼法自将下嫁萧孝忠景福初封晋蜀国王公
主清宁初加大长公主

南阳公主楚巴下嫁萧奉先初封郡主太平末东京大延琳反遇害

长宁公主陶格初封郡主下嫁萧扬陆

荆国公主达年初封平原郡主下嫁萧双宽

浚阳公主玖格初封郡主下嫁萧璉

临海公主长寿初封郡主下嫁达喇齐达喇齐坐大延

琳事伏诛改适萧纛古

同昌公主巴格初封县主下嫁刘三嘏

三河公主实格初封郡主下嫁奚王萧果济

仁寿公主丕绅初封县主下嫁刘四端

泰格下嫁萧呼哩

金乡公主赛格初封郡主统和中下嫁萧托云以杀奴

婢得罪薨于贬所

兴格下嫁萧旺禄

兴宗二女

魏国公主巴沁下嫁萧萨巴重熙末徙封晋国清宁初加长公主改适萧呼苏以妇
道不修徙中京嫁萧沃聂

郑国公主斡尔达下嫁萧额哩页清宁闲加长公主寿隆末加大长公主

道宗三女

郑国公主索克济端丽有智下嫁萧茂咸雍中徙封魏国太康初薨

齐国公主吉里下嫁萧托卜嘉进封赵国托卜嘉坐昭怀太子事被害其弟额图浑
欲逼尚公主公主以其党伊逊也恶之未几额图浑以

事伏诛时天祚尚幼伊逊用事公主每以匡救为心竟诛伊逊大安五年薨

越国公主特哩下嫁萧绰鄂太康八年绰鄂得罪离之太安初改适萧特默干统初
封秦晋国王公主徙封梁宋国特默与金人战败于

石辇铎被擒公主从天祚出奔后攻应州留公主守辇重金人围之公主奔行在为金人所获

天祚六女

蜀国公主伊林文妃生为金人所获 【按金史宗望传太祖嘉宗望功以辽蜀国公主伊林赐之本传不载附录于此】

元妃生三女宫人生二女俱为金人所获

钦定续通志卷七十八

●钦定续通志卷七十九 后妃传九

后妃传

金

○金

太祖圣穆唐古皇后 光懿费摩皇后钦宪赫舍哩皇后 宣献布萨皇后
萧崇妃 太宗钦仁唐古皇后熙宗悼

平费摩皇后 海陵嫡母图克坦氏海陵母大氏 海陵后图克坦氏世宗

明德乌凌阿皇后 张元妃李元妃

章宗母孝懿图克坦皇太后 章宗钦怀富察皇后李元妃

卫绍王图克坦后宣宗王皇后 明

惠王太后哀宗图克坦皇后

△太祖圣穆唐古皇后

太祖圣穆皇后唐古氏天会十三年追谥 【按金史太祖后传前载始祖以下十世诸后今依郑志从删】

△光懿费摩皇后

光懿皇后费摩氏天会十三年追谥

△钦宪赫舍哩皇后

钦宪 【熙宗纪作钦献】 皇后赫合哩氏天会十三年尊为太皇太后宫号庆元十四年正月己巳朔熙宗朝于庆元宫然后御干元殿受羣臣贺是月丁丑崩于庆元宫二月癸卯祔葬睿陵

△宣献布萨皇后

宣献皇后布萨氏睿宗母也天会十三年追册曰德妃大定元年追册与三后并附太祖庙室

△萧崇妃

崇妃萧氏熙宗时封贵妃天德二年正月封元妃是月尊封太妃海陵母大氏事之甚谨海陵篡立尊大氏为皇太后居永宁宫每有宴集

太妃上坐大氏执妇礼海陵积不能平及杀宗义等诬太妃以隐恶杀之并杀其子任王

威赫大定十九年诏改葬致祭帝欲复太妃旧号礼官

议前代称太妃者皆以子贵称后系夫称太系子萧妃不得称太止当追封妃乃封崇妃

△太宗钦仁唐古皇后

太宗钦仁皇后唐古氏熙宗即位与太祖钦宪皇后俱尊为太皇太后号明德宫天会十四年正月己巳朔帝朝两宫太后然后御干元殿

受贺自后岁以为常皇统二年上如天开殿皇子生遣使驰报太后太后至天开殿上与皇后亲迎之三年崩于明德宫谥曰钦仁皇后祔葬恭陵

陵

△熙宗悼平费摩皇后

熙宗悼平皇后费摩氏熙宗即位封贵妃 【按照宗纪位费摩氏为贵妃亦在天眷元年】 天眷元年立为皇后皇统元年熙宗受尊号

册为慈明恭孝顺德皇后二年太子济安生熙宗喜甚乃肆赦告天地宗庙弥月册为皇太子未一岁薨熙宗在位宗翰宗干宗弼相继秉政宗

弼既没旧臣亦多物故后干预政事无所忌惮朝官往往因之以取宰相熙宗未有继嗣后颇掣制之熙宗内不能平因纵酒酗怒手刃杀人左

丞相亮生日帝遣大兴国以物赐之后亦附赐礼物熙宗怒杖兴国而夺回所赐近侍高寿星随例迁屯燕南入诉于后后激怒熙宗杀左司郎

中三合杖平章政事秉德而寿星竟得不迁久之熙宗积怒遂杀后海陵已弑熙宗欲收人心以后无死罪降熙宗为东昏王追谥后为悼皇后

大定闲复熙宗帝号加谥后为悼平皇后祔葬思陵

△海陵嫡母图克坦氏

海陵嫡母图克坦氏宗干之正室也图克坦无子次室李氏生长子郑王充次室大氏生三子长即海陵庶人也图克坦氏贤遇下有恩义

大氏事之甚谨相得欢甚图克坦养充为己子充嗜酒图克坦常责怒之尤爱海陵海陵自以其母大氏与图克坦有嫡妾之分心常不安及弑

熙宗图克坦与太祖妃萧氏闻之相顾愕然曰帝虽失道人臣岂可至此及入宫见海陵不贺海陵衔之天德二年正月图克坦与大氏俱尊为

皇太后图克坦居东宫号永寿宫大氏居西宫号永宁克图克坦太后生日酒酣大氏起为寿太后方与坐客语大氏踞者久之海陵怒而出明

日召诸公主宗妇与太后语者皆杖之大氏以为不可海陵曰今日之事岂能尚如前日邪自是嫌隙愈深天德四年海陵迁中都独留图克坦

于上京图克坦常忧惧每中使至必易衣以俟命大氏至中都常念图克坦太后谓海陵曰永寿宫待吾母子甚厚慎毋相忘也十二月十四日

图克坦生日海陵使秘书监纳哈塔椿年往上京上寿贞元元年大氏病笃恨不得一见

临终谓海陵曰汝以我故不令永寿宫偕来中都我死必迎致之事永寿宫当如事我三年右丞相布萨思恭太宗正丞哈布尔往上京奉还山陵海陵以母大氏临终言并迎永寿宫太后与俱来继使平章政事萧玉迎祭祖宗梓宫于广宁海陵谓玉曰医巫闾山多佳致祭奠礼毕可奏太后于山水佳处游览及至沙流河海陵迎谒梓宫遂谒见太后十月太后至中都海陵率百官郊迎入居寿康宫是日海陵及后宫宰臣以下奉觴上寿极欢而罢海陵侍太后于宫中外极恭顺见者以为至孝太后亦以为诚然及谋伐宋太后谏止之海陵益不悦再迁汴京太后居懿德宫使侍婢高福娘问海陵起居海陵幸之因使伺太后动静及枢密使布萨思恭征契丹萨巴辞谒太后太后与思恭语久之大槩言国家世居上京既徙中都又自中都至汴州又兴兵涉江淮伐宋疲弊中国我尝谏止之不见听契丹事复如此奈何福娘以告海陵海陵意谓太后以充为子充四子皆成立恐思恭将兵在外太后或有异图乃召点检大怀忠等使杀太后于懿德宫且戒之曰汝等见太后但言有诏令太后跪受即击杀之太后方樗蒲大怀忠等至令太后跪受诏太后愕然方下跪华特默从后连击之仆而复起者再福娘等缢杀之年五十三海陵命焚太后于宫中弃其骨于水并杀充之子塔纳阿里布元努额布勒逃匿归于世宗自军中召思恭还杀之封高福娘为郕国夫人以福娘夫特默格为泽州刺史大定闲谥图克坦氏曰哀皇后自泽州械特默格福娘至中都诛之其后贬海陵为庶人宗干去帝号复封辽王图克坦氏复封辽王妃云

△海陵母大氏

海陵母大氏天德二年正月与图克坦氏俱尊为皇太后大氏居永宁宫及迁中都图克坦太后独留上京大氏常以为言贞元元年四月大氏病笃遗言海陵当善事永寿宫戊寅崩贞元三年大祥海陵率后宫奠哭于敢宫海陵将迁山陵于大房山故大氏犹在敢宫也九月太祖太宗德宗梓宫至中都尊谥曰慈宪皇后海陵亲行册礼与德宗合葬于大房山升祔太庙大定七年降封海陵太妃削去皇后谥号及宗干降帝号封辽王诏以图克坦氏为妃而大氏与顺妃李氏宁妃萧氏文妃图克坦氏并追降为辽王夫人

△海陵后图克坦氏

废帝海陵后图克坦氏太师舍音之女初为岐国妃天德二年封为惠妃九月立为皇后生太子光英后以太子居深宫之中不知民闲稼穡之务乃因太子生日绘田家稼穡图以赐海陵后宫寝多后宠颇衰希得进见正隆六

年海陵幸南京六月癸亥左丞相张浩率百官迎谒海陵备法驾乘玉辂与后及太子光英共载而入海陵伐宋后与光英居守瓜州兵变海陵遇害图们额哩页杀光英于汴后还中都居于海陵母大氏故宫顷之世宗怜其无依诏归父母家于上京岁赐钱二千贯奴婢皆给官廩大定十年卒初海陵后宫皇后以下北有元妃大氏宸妃萧氏丽妃耶律氏三人及侈心既萌淫嬖无厌杀诸宗室纳其妻女妃嫔封号有元妃姝妃惠妃贵妃贤妃宸妃丽妃淑妃德妃昭妃温妃柔妃凡妃主宗妇尝私之者皆分属诸妃位云 【按金史于此下备载海陵诸嬖然考贾益谏传云海陵被弑能暴其恶者辄得美官故一时多所附会是史文固未可尽信不独事涉秽褻也删之】

△世宗明德乌凌阿皇后

世宗明德皇后乌凌阿氏其先居海伦河世为乌凌阿部长率部族来归居上京与朝廷为婚姻曾祖双宽康宗时累使高丽父实德瑋骑射绝伦以功授世袭穆昆为东京留守后聪敏孝慈容仪整肃其在家宗族皆敬重之既归世宗事舅姑孝谨治家有叙甚得妇道睿宗伐宋得白玉带盖帝王之服御也睿宗歿后后谓世宗曰此非王邸所宜有也当献之天子世宗献之熙宗熙宗酗酒独于世宗无闲海陵篡立深忌宗室后劝世宗多献珍异以说其心海陵以世宗为恭顺畏己由是忌刻之心颇解后不妒忌为世宗择后房广继嗣虽显宗生后而此心不移后尝有疾世宗为视医药数日不离后曰大王视妾过厚其知者以为视疾不知者必有专妒之嫌世宗在济南海陵召后来中都后谓世宗曰我不行帝必害王我当自勉不以相累也召王府臣仆张谨言谕之曰为我祷诸东岳我不负王使皇天后土明鉴我心召家人谓之曰自我为妇以至今日未尝见王有违道之事今宗室往往被祸皆奴仆诬陷之汝等皆先国王旧人当念旧恩母或妄图也违此言者我于冥中必不赦后既离济南从行者知后必不肯见海陵将自为之所防护甚谨行至良乡去中都七十里防者稍缓后得闲即自杀海陵犹疑世宗教之改世宗西京留守大定二年追册为昭德皇后立别庙以后兄暉子天锡为太尉帝谓天锡曰朕幼与皇后订婚乃祖尝曰此壻后来必大吾门今卜葬有期昔言验矣十一年世宗宴于东宫谓皇太子曰汝母妇道至矣朕所以不立中宫者念皇后之德故也二十九年祔葬兴陵章宗时有司奏太祖谥有昭德字改谥明德皇后

△张元妃

元妃张氏父玄征母高氏与世宗母贞懿皇后姻亲世宗纳为次室生赵王永中而

卒大定二年追封宸妃累进元妃

△李元妃

元妃李氏南阳郡王李石女生郑王允蹈卫绍王允济潞王允德大定七年封元妃世宗感念明德皇后不复立后元妃下皇后一等在诸妃上虽贵不得预政故宫壶无事二十一年薨殡于兴德宫西位别室二十八年九月陪葬于坤厚陵卫绍王即位追谥光献皇后贞佑三年九月削皇后号

△章宗母孝懿图克坦皇太后

章宗母孝懿皇太后图克坦氏其先德里必喇人也曾祖绰从太祖取辽有功命以所部为明安世袭之祖博勒和以战功多累官开府仪同三司赠司徒齐国公父贞尚辽王宗干女梁国公主加驸马都尉赠太师广平郡王后性庄重寡言父母尝令总家事诸男不及也世宗初即位谓贞曰卿家法可尚其以卿女为朕子妃及显宗为皇太子大定四年九月备礼亲迎于贞第是年十一月显宗生辰初封为皇太子妃既而皇孙生是为章宗时世宗幸金莲川次冰井翌日临幸抚视甚欢后素谦谨每畏其家世崇宠见父母流涕而言曰高明之家古人所忌愿善自保持其后家果以海陵事败盖其远虑如此世宗尝谓诸王妃公主曰皇太子妃容止合度服饰得中尔等当法效之章宗即位尊为皇太后更所居仁寿宫名曰隆庆宫诏岁奉母拘其数上月或五朝六朝而后愈加敬俭见诸大长公主礼如平时敦睦九族恩纪皆洽尤恶闻人过谀佞之言无所得入恕以容物未尝见喜愠然御下公平虽至亲无所阿徇尝诫诸侄曰皇帝以我故乃推恩外家当尽忠图报勿谓小善为无益而弗为小恶为无伤而弗去毋藉吾之贵辄肆非违以干国家常宪一日妹并国夫人嫂涇国夫人等侍侧因谕之曰尔家累素重且非丰厚宜节约财用勿以我为可恃吾受天下之养岂有所私积哉况财用者天下之财用也吾终不能多取以富尔之私室明昌元年礼官议以五月奉上册宝后弗许上屡为之请后曰今世宗服未终遽衣锦绣佩珠玉于礼何安当俟服阕行之上谕有司曰太后执意甚坚其待来年明昌二年正月崩于隆庆宫年四十五谥曰孝懿祔葬裕陵后好诗书造次必于礼逮嫔御以和平其有生子而母亡者视之如己所生慈训无闲上时问安见事有未当者必加之严诫云【按原文睿宗显宗诸后并列后妃传今考郑志及诸史例以孝懿身受册命改称章宗母皇太后仍列之后传中其身后追尊者槩从刚】

△章宗钦怀富察皇后

章宗钦怀皇后富察氏上京路哈萨罕人父鼎寿尚熙宗郑国公主累官至金吾卫上将军赠太尉越国公后始生就养于姨冀国公主姿性淑明丰仪粹穆知读书为文孝事冀国如事所生大定二十三年章宗为金源郡王行纳采礼是年十一月备礼亲迎封金源郡王夫人后进封妃号生绛王洪裕而薨帝即位遂加追册大安初祔葬于道陵

△李元妃

元妃李氏名师儿其家有罪没入宫籍监大定末以监户女子入宫从宫教张建学故事宫教以青纱隔障蔽内外宫教居障外诸宫女居障内不得面见章宗尝问建宫教中女子谁可教者建对曰就中声音清亮者最可教章宗以建言求得师儿宦者梁道誉其才美劝纳之妃性慧黠能作字尤善伺候颜色迎合旨意遂大爱幸明昌四年封为昭容明年进封淑妃追赠三代兄喜尔与弟特尔格皆擢显近势倾朝廷射利竞进之徒争趋走其门怙财固位上下纷然虽知其奸蠹不敢击之自钦怀皇后歿中宫虚位久章宗意属李氏而国朝故事皆图克坦唐古富察讷喇布萨赫舍哩乌凌阿乌库哩诸部部长之家世为姻婚娶后尚主而李氏微甚章宗欲立之大臣固执不从帝不得已进封为元妃而势位熏赫与皇后侔矣承安五年帝以继嗣未立祷祀太庙山陵遣近臣诣诸岳观祈禱泰和二年八月丁酉元妃生皇子德里既弥月诏赐名封为葛王生满三月敕放僧道度牒三千道设醮于玄贞观祈福二岁而薨八年承御贾氏及范氏皆有娠未及乳月章宗得疾时卫王永济自武定军来朝章宗于父兄中最爱卫王欲立之卫王朝辞章宗谓卫王曰叔王不欲作主人遽尔去邪元妃在旁谓帝曰此非轻言者十一月乙卯章宗大渐卫王未发元妃与黄门李新喜议立卫王使内侍潘守恒召之守恒谓妃此大事当与大臣议乃使召平章政事完颜匡匡至遂与定策立卫王章宗遗诏有云朕之内人见有娠者两位如其中有男当立为储贰如皆是男子择可立者立之卫绍王即位诏谓先帝承御贾氏当以十一月免乳今则已出三月事未可知范氏胎气有损深用怛然又诏以元妃李氏潜计负恩与李新喜谋令贾氏诈称有身计取他儿以充皇嗣令赐李氏自尽李新喜正典刑李氏兄喜儿弟特尔格追除爵位复系监籍于远地安置承御贾氏亦赐自尽宣宗即位下诏昭雪贾氏事当时被罪贬责者俱令放免由是李氏家放皆得还

△卫绍王图克坦后

卫绍皇后图克坦氏大安元年立为皇后至宣宗元年呼沙呼乱与卫王俱迁于卫邸帝遇弑宣宗即位卫王降为东海郡侯图克坦氏削皇

后号贞佑二年迁都汴诏凡卫绍王及郾厉王家人皆徙郑州仍禁锢不得出入天兴元年诏释禁锢是时河南已不能守子孙不知所终

△宣宗王皇后

宣宗皇后王氏中都人明惠皇后妹也初宣宗封翼王章宗诏诸王求民家子以广继嗣后入王邸及见后姊有姿色又纳之贞佑元年九月封后为元妃姊为淑妃淑妃生哀宗后无子养为己子贞佑二年七月赐姓温都氏立为皇后三年庄献太子薨哀宗为太子宣宗崩哀宗即位正大元年尊后为皇太后号其宫曰仁圣受封之日后梦丐者数万踵其后心甚恶之及元兵围汴加以大疫汴城之民死者百余万后皆目覩焉哀宗释服将禘飨有司奏冕服成上请两宫太后御内殿因试衣之以见两宫大悦仁圣曰祖宗取天下甚不易何时使四方承平百姓安乐天子服此法服于中都祖庙行禘飨乎上曰阿婆有此意朕亦何尝忘慈圣曰恒有此心则见此当有期矣遂酌酒为寿欢然而罢天兴元年冬哀宗迁归德二年正月遣近侍图克坦肆喜珠嘉■〈土答〉克实布奉迎两宫后御仁安殿出錠金及七宝金洗分赐从行忠孝军是夜两宫及柔妃费摩氏等乘马出宫至陈留城左右火起疑有兵不敢进后亟命还宫明日入京憩肆喜家少顷攀迎入宫方谋再行京城破后及诸妃嫔北迁不知所终惟宝符李氏从至宣德州居摩诃院宿佛殿中会当同行将发自缢死且自书门纸曰宝符御侍此处身故

△明惠王太后

明惠皇后王皇后之姊也生哀宗封元妃哀宗即位诏尊为皇太后性端严颇达古今哀宗已立为皇太子有过尚切责之一日宫中就食尚器以玉盃楪奉太后及帝后以玛瑙器进荆王母真妃庞氏太后召主者责曰谁令汝妄生分别非饮食细故令有司杖杀汝矣自后宫中奉真妃有加或告荆王谋不轨下狱讞已定后曰汝止一兄奈何以谗言欲害之趣赦出使来见我移时不至吾不见汝矣帝起后立待王至涕泣慰抚之哀宗甚宠一宫人欲立为后太后恶其微贱固命出之不得已放之出宫点检萨哈连教上骑鞠后传旨戒之云汝为人臣当辅主以正顾乃教之戏耶比年小捷文士有奏赋颂言中兴者后不悦曰帝年少气锐无惧心则骄怠生今幸一胜何谓中兴而谄之如是正大八年九月崩遗命园陵制度务从俭约十二月己未葬汴城迎朔门外谥曰明惠太皇后

△哀宗图克坦皇后

哀宗皇后图克坦氏宣宗及后有疾后尝割肤以进兴定四年后父镇南军节度使乌逊有罪宣宗以后纯孝因曲赦之正大元年诏立为

皇后哀宗迁归德遣后弟肆喜等诣汴奉迎夜至陈留不敢进复归于汴未几城破北迁不知所终

钦定续通志卷七十九

●钦定续通志卷八十 后妃传十

后妃传

元

○元

太祖光献翼圣皇后 太宗昭慈皇后定宗钦淑皇后 宪宗贞节皇后

世宗昭睿顺圣皇后 诺尔布皇后成宗母徽仁裕

圣皇太后成宗贞慈静懿皇后 布尔罕皇后武宗母昭献元圣皇太后武宗宣慈惠

圣皇后 苏喀实哩皇后 【伊奇哩氏唐古氏】

仁宗庄懿慈圣皇后英宗庄静懿圣皇后 泰定帝巴拜哈斯皇

后 【鸿吉哩氏二妃】 明宗贞裕徽圣皇后班

布尔实皇后 文宗布达实哩皇后睿宗喀哩雅图默色皇后顺帝喇特纳实哩

皇后 巴延呼图克皇后谔勒哲呼图克皇后

△太祖光献翼圣皇后

太祖光献翼圣皇后名布尔特格勒津鸿吉哩氏托音色辰女也托音色辰与子阿禅从太祖征伐有功封王爵有旨生女为后生男尚公

主世世不绝世祖至元二年 【按元史祭祀志载至元三年十月始定尊谥庙号太祖本纪载追谥年月与志相符后妃表及诸后传则并作

二年今姑仍其旧】 追谥光献至大二年加谥光献翼圣皇后 【按后妃表云至元二年追谥光献至大二年加谥翼圣原史统系之至大二

年今改正】 升祔太祖庙其余后妃有四鄂尔多四十余人不记氏族其名悉见于表后皆仿此

△太宗昭慈皇后

太宗昭慈皇后名托里格呼勒尼玛察氏生定宗太宗崩后称制摄国者五年定宗立朝政多出于后至元二年崩追谥昭慈皇后升祔太

宗庙

△定宗钦淑皇后

定宗钦淑皇后名乌拉海额实定宗崩后抱子实勒们垂帘听政者六月至元二年追谥钦淑皇后

△宪宗贞节皇后

宪宗贞节皇后名呼图克台鸿吉哩氏托音色辰孙孟克沁之女也早崩至元二年追谥贞节皇后升祔宪宗庙

△世祖昭睿顺圣皇后

世祖昭睿顺圣皇后名彻伯尔鸿吉哩氏济宁忠武王阿禅女也生裕宗中统初立为皇后至元十年授册宝上尊号贞懿昭圣顺天睿文光应皇后一日四集赛官奏割京城外近地牧马帝许之后谏曰向初定都时若以地牧马则可今军民分业已定夺之可乎帝默然命寝其事

后尝于太府监支缙帛帝曰此军国所需非私家物后何可得支后自是率宫人亲执女工拘诸旧弓弦练之缉为绸以为衣其制密比绫绮宣徽院羊膻皮置不用后取之合缝为地毯其勤俭有节类如此十三年平宋宋主朝于上都众皆欢甚唯后不乐帝问其故后跪奏曰妾闻自古无千岁之国毋使吾子孙及此则幸矣帝以宋府库故物聚置殿庭召后视之后徧视即去帝遣问后所欲取后曰宋人贮蓄以遗子孙子孙不能守而归我我何忍取一物耶时宋太后全氏至京不习北方风土后为奏令回江南帝不允后退益厚待之后性明敏达于事机国家初政左右匡正当时与有力焉十四年【后妃表作十八年】二月崩成宗立追谥昭贞顺圣皇后升祔世祖庙

△诺尔布皇后

诺尔布皇后鸿吉哩氏纳沁孙仙童女也至元二十年纳为皇后继守正宫时世祖春秋高颇预政相臣常不得见帝辄因后奏事焉有子一人名特默齐

△成宗母徽仁裕圣皇太后

成宗母徽仁裕圣皇太后名伯奇音济齐一名库库沁鸿吉哩氏生顺宗成宗先是世祖出猎道渴见女子缉驼茸于账房因从觅马湏女子曰马湏有之但父母诸兄皆不在我女子难以与汝世祖欲去女子又曰我独居此汝自来自去于理不宜我父母即归姑待之须臾果归出马湏饮世祖世祖既去叹曰得此等女为妇岂不美耶后与诸臣谋择太子妃有老臣尝知向者之言知其未许嫁言于世祖世祖大喜纳为太子妃后性孝谨善事中宫世祖称之为贤德媳妇侍昭睿顺圣皇后不离左右一日裕宗有病世祖往视见床上设织金卧褥世祖愠曰我尝以汝为贤何乃若此后跪答曰常时不曾敢用今为太子病因用之实时彻去世祖崩成宗至上都诸王毕会先是御史中丞崔彧得玉玺于穆呼哩国王曾孙世德家其文曰受命于天既寿永昌上之于后至是后手授成宗即皇帝位尊后为皇太后命设官属置徽政院后院官有受献浙西田七百顷籍于位下太后曰我寡居妇人衣食自有余况江南率土皆国家所有我曷敢私之命中书省尽易院官之受献者后之弟欲因后

求官后曰若欲求官耶汝自为之勿以累我也其后弟果被黜人皆服后之先见大德四年二月崩祔葬先陵谥曰裕圣皇后升祔裕宗庙至大三年十月又追尊谥曰徽仁裕圣皇后【按徽仁裕圣身为皇太后昭献元圣身为太皇太后非身后追尊者可比原史与睿宗显宗二后别为一卷今稽其世次列之后妃传中从宋史杜太后之例也】

△成宗贞慈静懿皇后

成宗贞慈静懿皇后名实哩达喇鸿吉哩氏额埒春之女大德三年十月立为后【按成宗大德三年十月授册宝此巴约特氏事也至鸿吉哩氏后妃表祇称元妃武宗时追谥册文亦称元妃且云椒掖正名莫际龙飞之会则是未尝立为后也后字当是元妃字之误】生皇子德寿早薨武宗至大三年【后妃表作至大元年】追尊谥贞慈静懿皇后升祔成宗殿室

△布尔罕皇后

布尔罕皇后巴约特氏驸马图埒实之女元贞初立为皇后大德三年十月授册宝时帝多疾后居中用事信任相臣哈喇哈斯大德之政人称平允皆后处决后营谋贬顺宗妃塔济与其子仁宗出居怀州十一年帝崩时武宗在北边恐其归必报前怨乃取安西王阿南达实哩来京师谋立之仁宗自怀州入迎武宗于北边乃诛安西王并废后出居东安州寻杀之

△武宗母昭献元圣皇太后

武宗母昭献元圣皇太后名塔济鸿吉哩氏阿禅孙呼图克特穆尔之女裕宗居燕邸及潮河顺宗俱在侍稍长世祖赐女实古氏后乃纳后为妃生武宗及仁宗大德九年成宗不豫布尔罕皇后秉政遣仁宗母子出居怀州十年十二月后至怀州十一年十月成宗崩时武宗总兵北边左丞相达尔罕哈喇哈斯阴遣使报仁宗与后奔还京师即遣使迎武宗还以五月即位先是太后惑于阴阳家言遣近臣托尔谕旨武宗曰汝兄弟二人皆我所出岂有亲疏术家所言运祚修短不容不思也武宗闻之默然进喀喇托克托而言曰我捍北边十年又胤次居长太后以星命为言茫昧难信使我设施合于天心民望虽一日之短亦足垂名万世何可以阴阳家言而乖祖宗之法哉托克托以闻太后愕然曰吾为太子远虑所以深爱太子也既如是言当速来耳武宗既立即日尊太后为皇太后立仁宗为皇太子三宫协和十一月帝朝太后于隆福宫上皇太后玉册玉宝至大元年三月帝为太后建兴圣宫二年四月立兴圣宫江淮财赋总管府以司太后钱粮三年二月以上皇太后尊号告祀南郊十月帝率皇太子诸王羣臣朝兴圣宫上皇太后尊号册宝曰仪天兴圣慈仁昭

懿寿元皇太后诏赦天下四年仁宗即位延佑二年三月帝率诸王百官奉玉册玉宝加上皇太后尊号曰仪天兴圣慈仁昭懿寿元全德【后妃表作合德】泰定福庆皇太后七年英宗即位十二月奉玉册玉宝加上尊号曰仪天兴圣慈仁昭懿寿元全德泰定福庆徽文崇佑太皇太后丙辰太后御大明殿受朝贺戊辰告太庙太后见明宗少时有英气而英宗稍柔懦诸羣小以立明宗必不利于己遂拥立英宗及既即位太后来贺英宗即毅然见于色后退而悔曰我不拟养此儿耶遂饮恨成疾至治二年九月崩三月升祔顺宗庙【按英宗纪后崩及祔庙年月不同原传并系之三年今改正】后性聪慧历佐三朝教宫中侍女皆执治女工亲操井臼然不事检饬自正位东朝浊乱朝政无所不至及英宗立羣幸伏诛后势焰顿息焉

△武宗宣慈惠圣皇后

武宗宣慈惠圣皇后名珍格鸿吉哩氏托里子班巴尔之女至大三年四月册为皇后泰定四年十一月崩谥曰宣慈惠圣皇后升祔武宗庙

△苏喀实哩皇后【伊奇哩氏x唐古氏】

苏喀实哩皇后阿禅哈尔吉之女珍格皇后之从妹也伊奇哩氏钮抡公主之女实生明宗天历二年追谥仁献章圣皇后【按顺帝纪至正六年改明宗母徽号曰庄献嗣圣皇后本传失载附识于此】唐古氏生文宗天历二年追谥文献昭圣皇后

△仁宗庄懿慈圣皇后

仁宗庄懿慈圣皇后名阿南达实哩鸿吉哩氏生英宗皇庆二年三月册为皇后上册宝遣官祭告天地于南郊及太庙英宗即位上尊号曰皇太后至治二年崩【按后妃表云延佑七年上尊谥与本传先后异时】谥庄懿慈圣皇后升祔仁宗庙

△英宗庄静懿圣皇后

英宗庄静懿圣皇后名苏喀巴拉圣伊奇哩氏昌国公主伊勒噶雅女也至治元年册为皇后泰定四年六月崩谥曰庄静懿圣皇后

△泰定帝巴拜哈斯皇后【鸿吉哩氏二妃】

泰定帝巴拜哈斯皇后鸿吉哩氏阿禅孙鄂兰彻尔之女【后妃表作兖王罕女】泰定元年册为皇后妃二人一曰巴罕一曰苏喀达喇皆鸿吉哩氏兖王迈珠罕之女也文宗天历初俱安置东安州

△明宗贞裕徽圣皇后

明宗贞裕徽圣皇后名玛勒岱生顺帝而崩至元二年【按顺帝纪至元二年追尊

生母为贞裕徽圣皇后原传作文宗误今改正】 追

谥为贞裕徽圣皇后

△班布尔实皇后

班布尔实皇后寿宁公主女也 【按后系鼐玛锦氏见元史类编】 侍明宗潜邸生宁宗天历二年立宁徽寺掌皇后宫事至顺元年四月崩

△文宗布达实哩皇后

文宗布达实哩皇后鸿吉哩氏父驸马鲁王多阿克巴拉母鲁国公主僧格嘉勒帝居建业后亦在行及即位立为皇后天历二年授册宝至顺元年四月与宦者拜珠谋杀明宗后班布尔实三年八月帝崩后道扬末命申帝初志立明宗次子伊埒哲伯是为宁宗十一月奉玉册玉宝尊为皇太后宁宗崩大臣请立太子雅克特古斯后曰天位至重吾子尚幼明宗长子托欢特穆尔在广西理当立之于是迎至京师即位是为顺帝元统元年 【顺帝纪作至元元年】 尊为太皇太后仍称制临朝六年诏去尊号安置东安州寻崩

△宁宗塔哩雅图默色皇后

宁宗塔哩雅图默色皇后鸿吉哩氏至顺三年立为皇后至正二十八年崩升祔宁宗庙

△顺帝喇特纳实哩皇后

顺帝喇特纳实哩皇后钦察氏 【顺帝纪作巴约特氏】 太师太平王雅克特穆尔之女至顺四年 【按至顺只有三年次年即元统元年也但顺帝于是年六月即位十月改元而立后则在八月故仍称至顺年号】 立为后元统二年授册宝三年后兄御史大夫腾吉斯以谋逆诛弟塔喇海走匿后宫后以衣蔽之因迁后出宫丞相巴延鹄后于开平民舍

△巴延呼图克皇后

巴延呼图克皇后鸿吉哩氏宣慈惠圣皇后珍格侄毓德王博罗特穆尔之女也至元三年立为皇后生皇子珍戡二岁而天后性节俭不妒忌动以礼法自持第二皇后奇氏 【按本传作第三皇后据奇氏后传改】 素有宠居兴圣西宫帝希幸东内后无几微怨望意从帝巡上京次中道帝遣内官传旨欲临幸后辞曰暮夜非至尊往来之时内官往复者三竟拒不纳帝益贤之居坤德殿终日端坐未尝妄踰户闕至正二十五年八月崩年四十二踰月皇太子自冀宁归哭之甚哀

△鄂勒哲呼图克皇后

鄂勒哲呼图克皇后奇氏高丽人生皇太子阿裕实哩达喇家微因后贵三世皆追

封王爵初进为宫女主供茗饮性颖黠日见宠幸后喇
特纳实哩皇后方骄妒数捶辱之喇特纳实哩既遇害帝欲立之丞相巴延争不可巴延
罢相立为第二皇后居兴圣宫尝取女孝经史书访问
历代皇后之有贤行者为法四方贡献或有珍味辄先荐太庙然后敢食至正十八年京
城大饥后命官为粥食之又出金银粟帛于京都十一
门置冢葬死者遗骸十余万时帝颇怠于政治后与皇太子阿裕实哩达喇遽谋内禅遣
保布哈谕意丞相太平太平不答复召至宫自申前请
太平依违而已帝知后意怒而疏之两月不见初奇氏之族在高丽者怙势骄横高丽王
尽杀之二十三年后谓皇太子曰汝何不为我复仇遂
立高丽王族人留京师者为王以奇族之子三宝努为元子遣同知枢密院事崔特穆尔
为丞相用兵一万并招倭兵共往纳之过鸭绿水伏兵
四起大败而还二十四年博啰特穆尔称兵犯阙皇太子出奔冀宁下令讨博啰特穆尔
博啰特穆尔怒喉御史武起宗言后外挠国政宜迁出
于外帝不答二十五年遂矫制幽于诸色总管府至百日始还宫及博啰特穆尔死召皇
太子还京师后传旨令库库特穆尔以兵拥皇太子入
城欲胁帝禅位库库特穆尔至城三十里外即遣军还营会巴延呼图克皇后崩中书省
臣言后宜正位中宫帝不答又奏乃授之册宝命为皇
后二十八年从帝北奔

△公主附 【按元史无公主传其见于表者诸王女居大半焉今依汉唐例专辑帝
女取其可考者着于篇】

烈祖女 【按唐宗辽公主传悉依郑志后汉书例冠以某宗儿女元史纪载勿详疑
多阙佚故称某宗女而不言其数云】

昌国公主托摩抡下嫁忠武王巴图早薨

太祖女

昌国公主噶沁必济下嫁忠武王巴图为继室

伊埒哈屯公主下嫁伊都呼巴哩珠阿勒坦德济

赵国公主阿拉克必济下嫁赵武毅王布页赫公主明睿有智略太祖征伐四出尝
使留守军国大事谘禀而后行故师出无内顾之忧布页
赫未有子公主为进姬妾生三子视之如己出追封齐国大长公主加封赵国

太宗女

苏尔噶汉公主下嫁纳克纳克托音色辰曾孙也

定宗女

伊埒默色公主下嫁赵忠襄王准布哈追封赵国大长公主

巴克巴噶尔公主下嫁伊都呼和尔济哈喇德济

宪宗女

昌国公主巴雅尔下嫁昌忠宣王和琳

世祖女

乌尔戡公主下嫁和琳从弟布哈

鲁国公主囊嘉特章下嫁额埒春再嫁曼济台成宗初封大长公主

赵国公主伊埒下嫁赵武襄王阿尔布哈

齐国公主呼图克济延额实下嫁高丽王谏 【按高丽传愎后改名晔又改名晔】

成宗女

赵国公主阿尔实哩下嫁赵忠献王阿尔济苏阿尔济苏初娶裕宗女呼图克台默色大德九年并封赵国大长公主

昌国公主伊勒噶雅下嫁和琳子昌王阿实克

仁宗女

库库楞公主下嫁托音色辰孙托罗海为继室

明宗女

明慧贞懿公主布达实哩

钦定续通志卷八十

●钦定续通志卷八十一 氏族略一

氏族略 【一】

总叙

辽

○总叙

（臣）等谨按氏族分合古今不同三代而上姓合而氏分男子称氏女子系姓故姬姓一也而周之子孙氏凡百数周官小史辨昭穆奠系世瞽蒙诵诗并诵系氏以诏于王侯国亦有国史掌其系牒良以姓氏分而难稽其制不得不详也自封建罢为郡县则氏族统而合于姓姓氏合而易识史官之牒亦略矣然赐姓出宗避讳避仇之例起混淆紊错棼如乱丝北魏又以代北之氏更易汉姓世远年湮后人往往有不能辨者故官有簿状家有谱系历代有图谱局置郎令史掌之以备选格通婚姻唐世领以宰相其郑重犹然若此五季至宋谱牒之学略而不讲郑樵通帝王以来迄于五季约书志之文而为略其有功于氏族非浅鲜也若夫辽元起自朔陲金源兴于东徼风俗敦庞民情质朴合族而处因地而别贵有号而贱无氏辽世祇有耶律与萧二姓其余皆称部族犹然太古之遗也金源有白黑姓以别贵贱载百官志元代有蒙古色目姓以分内外载于陶宗仪辍耕录然考诸史传所见仅半而史传所载多有不在此数者

前百官志辍耕录不足以该金元二代之氏族明矣又其中虽有以号以国以官以名如郑志所分之类然寥寥数条不能据为典要故祇就国语解之例以部族姓氏分门可以包举而号国官名仅摘取标题而于总论以备义例焉其百官志辍耕录附于论末加按以辨其疵误至于部统族分称谓有时小异有去族而从部者如元后妃传奇氏之为素隆噶氏巴约特氏之称钦察氏是也有合部族而称者如金史之诺延温都思忠元忠之特尔格舒穆鲁爱辛是也凡此之类皆仍史文以为区别庶于二代史族有条而不紊矣夫班固之断代为书为郑氏所讥兹辽金氏族之见于元者不十数氏且译言互异反以滋后人之惑不若各从其代之为无弊也再郑氏著录汉姓以三十二类别受姓命氏之源凡类所不能尽者以四声收之其体例精而博矣而姑存其略所遗尚多因考姓氏诸书择其典而确者依类补之无则阙之闲有郑氏不详所自而他书可补者亦不嫌于重载又四声韵中稀僻之姓所收不过三之一补之何可胜补今惟有人可据者录之空姓概从其略窃以明代稀姓之多其故有三一金元之裔改汉姓者一革除之际变姓名者一苗蛮之族登仕版者倘不为之详载恐暨乞误呼话诸莫辨非所以资博闻矣故所补稀姓或古有今无者载古人或古今通有者载其源始而以宋明人继之或郑志已载而有宋明人可续者亦为摘录附于各韵之末使稀僻之姓可以了然指掌耳今纂辽金元氏族三卷总论一卷郑志补遗四卷省去总目一例而序述其大略为书凡八卷云

○辽

国族

外戚

列姓

属国之姓

△国族

达呼哩氏 【炎帝之后曰葛乌菟者世雄朔陞居鲜卑号鲜卑氏慕容燕并取其地分其部为三曰宇文曰库莫奚曰契丹隋唐之际契丹地直京师东北五千里而赢东距高丽西奚南营州北靺鞨室韦阻冷陁山以自固其君称达呼哩氏】

（臣）等谨案达呼哩氏始君辽世表不著名某但云唐武德六年君长绰罗猷名马丰貂贞观三年摩会入朝赐鼓纛由是有常贡太宗征高丽奚契丹首领从军还过营州置元州以契丹大帅纥主据曲为刺史置松漠都督府以库克为都督改八部为州隶之又营卫志云唐达

呼哩氏八部并元州松漠为十则达呼哩氏始君当是绰啰矣

约尼氏 【唐武后时遣将攻契丹溃其众达呼哩氏微弱别部长过折代之过折尽灭天宝间德呼勒部长聂呼立达年嘉哩为苏尔威汗更号约尼氏】

（臣）等谨案新唐书契丹传太宗时库克举部内属乃置松漠都督府以库克为使特节十州诸军事松漠都督封无极男赐姓李又天宝四载契丹大帅李怀秀降拜松漠都督辽史表达年嘉哩唐赐姓名李怀秀则达呼哩约尼唐时俱赐姓李氏郑志失载例应注于本氏之下因宋明两朝赐姓无可附录故别列赐姓一门而辽金元赐姓亦汇入焉兹不再注

锡里氏 【德呼勒部长聂呼之后左右约尼氏几百年国势复振至努尔苏之孙曰安巴坚功业勃兴号锡里氏】

耶律氏 【唐咸通中锡里氏有安巴坚者母萧氏梦日堕怀而娠及产室有神光异香三月能行睥而能言知未然事及长身長九尺丰上锐下目光射人智勇殊众累立战功哈陶津汗命总知军国事遗命立之是为辽太祖于是锡里与达呼理约尼号三耶律并为耶律氏】

（臣）等谨案部族志苏尔威汗时分三耶律为七彼时达呼哩约尼析为六锡里合为一所以德呼勒部强盛终代约尼则三耶律之称不始于辽太祖也

△外戚

舒敏氏 【本苏尔威汗时部因以为氏世为外戚】

伊苏济勒氏 【苏尔威汗分二舒敏为五曰伊苏济勒氏国舅族也】

巴哩氏 【苏尔威汗分二舒敏为五曰巴哩氏国舅族也】

舒噜氏 【回鹘诺苏之后太祖后族】

萧氏 【后族伊苏济勒氏巴哩氏世任国事太祖慕汉高皇帝以伊苏济勒巴哩比萧相国遂为萧氏太祖娶舒噜氏太宗自汴将还留外戚小汉为汴州节度使赐姓名曰萧翰由是巴哩伊苏济勒舒噜三族皆为萧氏】

（臣）等谨案营卫志序云部落曰部氏族曰族契丹故俗分地而居合族而处有族而部者五院六院之类是也有部而族者奚王室韦之类是也有部而不族者特哩特默寔保哈准之类是也有族而不部者约尼九帐皇族三父房是也此言部与族之分合也又曰其氏族可知者略具皇族外戚二表是则辽之氏族止有耶律萧氏也即诸部中如诺延唐古等有入金元为民者而辽时未着为姓与郑志氏族之例不符故置而不录第于金元姓氏内注明本辽部族云

△列姓

大氏 【唐初粟末靺鞨臣属于高丽李绩破高丽粟末保东牟山后为渤海王姓大氏辽南府宰相大康又中京留守大公鼎皆渤海人又平王隆光母大氏】

（臣）等谨案唐武后时高丽别种大乞乞仲象分王高丽故地后其子荣祚中宗封为渤海郡王是粟末靺鞨之姓大氏在唐初已然而郑樵大氏注中失载今辽史列传内惟大氏与诸汉姓不同故为补入

△属国之姓

（臣）等谨案属国五十有九其国姓绝无可考惟西夏氏族独详于金史交聘表中非五十八国者比因西夏起于唐末与辽金相为始终故以交聘表所载附录于辽后以从郑樵列代北关西氏族于汉姓篇末之例而宋辽元三史所有西夏氏族亦备入焉

于弥氏 【元史西夏国主李恒其先姓于弥氏唐末赐姓李】

（臣）等谨案辽金二史西夏传皆云夏主拓跋魏之后名思恭唐僖宗末年赐姓李元史云其先姓于弥氏岂拓跋其总称而于弥其分姓耶因时西夏氏族故汇录于此

威赫氏 【辽兴宗十九年正月遣使问罪于夏夏将旺布等攻之肃城耶律高嘉努等破之旺布被创遁去杀威赫伊特凌结五月旺布来降】

巴哩氏 【金交聘表夏巴哩公亮又殿前太尉巴哩昌祖押进匭匣使巴哩直信武功大夫巴哩安仁巴哩庆祖】

（臣）等谨案巴哩以下皆见金交聘表不再注

察喇氏 【夏御史大夫察喇公济】

额鲁氏 【夏武功大夫额鲁元智又武功大夫额鲁世殿前太尉额鲁绍甫额鲁绍先】

纽鄂氏 【夏武功大夫纽鄂文忠】

蔑布氏 【夏武功大夫蔑布师道】

浑氏 【夏武功大夫浑进忠武节大夫浑光中】

朗鄂特氏 【夏左枢密朗鄂特进忠殿前太尉朗鄂特元智御史中丞朗鄂特文广参知政事朗鄂特德光】

萨氏 【夏武功大夫萨执直萨进德】

威纽氏 【夏武功大夫威纽执忠】

诺尔桑氏 【夏武节大夫诺尔桑德昌】

纳琳氏 【夏知中兴府事纳琳思敬御史中丞纳琳思聪】

雅苏氏 【夏武节大夫雅苏守节】

舒威氏 【夏武节大夫舒威英】
巴沁氏 【夏武节大夫巴沁师德】
蔑莽氏 【夏殿前太尉蔑莽友直】
锡鄂氏 【夏武功大夫锡鄂绍昌】
威载氏 【夏武功大夫威载师宪】
威明氏 【夏武功大夫威明仁显武节大夫威明世安】
古沁氏 【夏武功大夫古沁文昌】
罔氏 【夏知中兴府事罔进忠御史中丞罔永德武节大夫罔敦信】
穆纳氏 【夏武功大夫穆纳好德御史大夫穆纳光祖】
莽古氏 【夏武功大夫莽古进德莽古德懋】
遇氏 【夏武功大夫遇忠辅遇惟德】
罗伊氏 【夏武节大夫罗伊守忠罗伊思忠】
哲伊氏 【夏武节大夫哲伊俊义】
连都氏 【夏武节大夫连都敦信】
谔氏 【夏武节大夫谔德中】
台楚噜氏 【夏武节大夫台楚噜忠毅】
美赫氏 【夏武节大夫美赫宇文】
鼐尔氏 【夏殿前太尉鼐尔思聪】
锡勒氏 【夏殿前太尉锡勒遵义】
纽纽氏 【夏武节大夫纽纽存忠武节大夫纽纽世忠】
■ 〈小上儿下〉氏 【夏武功大夫■ 〈小上儿下〉德昭武节大夫■ 〈小上儿下〉德元】
乌伊氏 【夏武节大夫乌伊遂良】
隗氏 【夏武节大夫隗敏修】
密氏 【夏御史中丞密元礼】
额伊氏 【夏武功大夫额伊德昌】
页允氏 【夏知中兴府事页允克忠武节大夫页允思文】
柔氏 【夏武节大夫柔思义】
庄浪氏 【夏武功大夫庄浪义显】
党氏 【夏武功大夫党得敬】
宇氏 【夏宣德郎宇德贤】
权氏 【夏御史大夫权鼎雄】
余氏 【夏翰林学士余精方】
卫慕氏 【夏主李继迁母卫慕氏宋封魏国太夫人】

（臣）等谨案卫慕氏以下皆从宋史夏国传补入

叶里氏 【夏主德明母叶里氏夏主元昊妃叶里氏又叶里仁荣主蕃学制夏国文字】

屈怀氏 【夏主德明妃屈怀氏】

密密氏 【夏主德明妃密密氏又贡宋史密密乞遇】

默藏氏 【夏主元昊妃默藏氏生谅祚】

摩益氏 【夏主元昊妃摩益氏】

赏罗氏 【宋环州种朴获夏赏罗鄂齐尔家属】

美勒氏 【宋折可适获夏监军美勒都辅】

星多氏 【夏右厢监军星多保忠】

慕氏 【夏枢密使慕洧弟慕浚】

昂氏 【夏西南都统昂里】

哩鼎氏 【夏首领哩鼎阿裕尔】

额氏 【夏监军额博啰】

谟氏 【夏使臣谟个】

鼎氏 【夏使臣鼎利】

玛努勒氏 【夏武功大夫玛努勒绍文】

叶朗氏 【夏人叶朗罗里】

嵬氏 【夏蕃部巡检嵬通又进表使嵬崖奶】

呼氏 【夏人呼珍】

芭氏 【夏人芭良】

如定氏 【夏主兵马使如定多丹玛又使宋议事如定聿舍】

聿氏 【夏使臣聿正】

（臣）等谨案辽国外有十部附庸于辽如乌尔古都回鹘部等亦有入金元为氏者又奚五部金大定时定奚姓曰约啰曰伯特曰斡里曰穆济曰吹皆附见于金元姓氏兹不具列

钦定续通志卷八十一

●钦定续通志卷八十二 氏族略二

氏族略 【二】

金

○金

国姓

以部为氏

以姓为氏

奚五族

△国姓

完颜氏 【金之先在元魏时为勿吉氏有七部至隋称靺鞨氏唐初有黑水粟末二部其五部无闻粟末靺鞨后居渤海称王姓大氏黑水靺鞨居古肃慎地东濒海五代时契丹取渤海地黑水部遂附属焉在南者籍契丹在北者不籍契丹自为一部靺鞨氏有名函普者自高丽往居完颜部为部人立约誓解怨部有贤女年六十未嫁函普娶之生二子因为完颜部人即金之始祖景元皇帝也金初起时完颜十二部后昔以为氏又宗室表有称宗室者有独完颜者其称完颜有二有同姓完颜盖疏族有异姓完颜盖部人】

△以部为氏

温特赫氏 【本温特赫部为温特赫氏景祖时图们水温特赫部来附景祖次室温特赫氏列传有温特赫富埒赫温特赫伊苏玛勒等又孝友传有温特赫干喇布列女传有完颜莽格妻温特赫氏】

珠格氏 【世祖次室珠格氏贞佑初有珠格筠寿】

乌陵阿氏 【景祖时邻部稍知附从乌陵阿部尚拒不服祖乃以计告辽主遣使责让其长锡馨锡馨遣子颇克绰欢入朝辽主厚赐遣还其后锡馨与颇克绰欢俱入见辽主于搜辽主流锡馨于边地而遣颇克绰欢还所部其部遂弱服属于祖景又世宗昭德皇后乌陵阿氏】

赫舍哩氏 【穆宗时锡馨水赫舍哩部阿苏穆都哩阻兵为难穆宗自将伐之拔其城留和卓守之穆都哩阿苏奔辽亡其后亦入于金并为赫舍哩氏列传有赫舍哩志寔赫舍哩良弼等】

穆延氏 【本穆延部泰和初有萨克达者世袭穆昆又穆延尽忠官尚书右丞】

乌库哩氏 【即辽乌库哩部穆宗时图们瑋春水之交乌库哩部埒克卓多与苏伯水乌库哩部达萨塔起兵于穆噜密斯罕城穆宗使和卓子萨哈为都统希卜苏阿里罕威泰副之以伐埒克卓多们图瑋实图美伐达萨塔实图美等与达萨塔战获之萨哈亦破埒克城尽杀其城中渠长埒克奔辽未几来降又穆宗贞惠皇后乌库哩氏】

尼玛哈氏 【太祖以偏师伐尼玛哈部伯赫布尔噶等平之遂获其众大定中进士尼玛哈鉴累官参知政事】

沃呼氏 【祖时沃呼部伯赫布尔后复有他志遂结乌春乌木罕举兵世祖使肃宗与战获博诺献之于辽其众复归世祖章宗时有武寔节度使沃呼忠宣宗时有权同签枢密院事沃呼哈达】

阿克占氏 【本阿克占部正隆中吏部侍郎阿克占斯罕大定中直宿将军阿克占

富勒呼】

唐古氏 【本辽唐古部景祖昭肃皇后唐古氏刷水鄂约人生世祖又唐古实库古从太祖平拉必玛察领穆昆孙达兰尚康宗女曾孙

德温尚睿宗女元孙鼎世袭西北路摩哩山明安徙隶泰州世宗时吏部尚书唐古贡】

锡默氏 【穆宗时锡默部长赫木颇内附先遣其子寔嘉从间道送款自与和勒端合军攻降诸部因领其众来归锡默哈里以战功授迪里部节度使进封王谥智敏】

温都氏 【康宗次室温都氏乌春传云阿卜萨水温都部人温都布拉温都部乌春之后又尚书兵部侍郎温都珠德勒】

乌雅氏 【本乌雅部列传有乌雅富埒瑋乌雅呼尔哈乌雅沃里布皆海兰路人乌雅普霞努乌雅札拉乌雅富埒赫皆率宾路人又兴定时乌雅威赫泰定军经略使乌雅恩彻亨汾阳军节度使皆守城死】

乌苏氏 【本辽乌苏部列传实垒节度使乌苏额琳】

瓜尔佳氏 【本瓜尔佳部隆州纳尔瑋河部长阿哈率众附太祖子布尔噶苏又有瓜尔佳清臣瓜尔佳衡又肃宗纳和卓之妻瓜尔佳氏交聘表有瓜尔佳达兰】

费摩氏 【后妃传太祖光懿皇后熙宗悼平皇后皆费摩氏又费摩华善世居辽海天辅闲移屯东受降城以御夏人后徙居临潢其孙费摩亨大定进士以监察御史同知大名府事屡有政绩】

图克坦氏 【后妃传昭祖威顺皇后图克坦氏图克坦部人海陵嫡母海陵后显宗孝懿皇后卫绍王后哀宗皇后皆图克坦氏图克坦克寔其先金源县人徙居北古土之地后徙置明安于山东遂占籍莱州官至丞相】

（臣）等谨案松漠纪闻金主亶妃屠始坦氏表传未见疑屠始坦即图克坦之讹

诺延氏 【本辽诺延瓜部列传诺延温都思忠本名伊喇布阿卜萨水人从太祖伐辽有功累官至太师封广平郡王侄诺延温都乌达官吏部拜参知政事】

富察氏 【景祖时富察部来附肃宗靖宣皇后睿宗钦慈皇后章宗钦怀皇后皆富察氏梁王宗弼军中有力士富察世杰等】

珠嘉氏 【本珠嘉部有珠嘉赛音珠嘉臣嘉珠嘉佛绅等】

△以姓为氏

布萨氏 【太祖宣献皇后布萨氏大定中布萨揆尚韩国大长公主官丞相平章政事】

乌克逊氏 【大定中有乌克逊鄂顿世袭明安忠义传有乌克逊仲端乌克逊珠绅】

珠勒根氏 【珠勒根干克山哈斯罕人珠勒根穆都哩上京纳琳河人】

纳哈塔氏 【金初制女真字立学官于西京纳哈塔椿年与都部儿童俱入学最号警敏忠义传纳哈塔富拉塔大名路明安人】

实嘉氏 【兴定中实嘉纽勒欢以河南路统军使为元帅右都监】

富珠哩氏 【富珠哩定方本名阿哈窳嘉河人仕至彰德军节度使富珠哩阿老罕隆州搏勒赫山人累官参知政事北京留守】

钮祜禄氏 【钮祜禄恩楚仕栢州刺史】

哈萨喇氏 【泰州刺史哈萨喇安礼贞佑初城破死之】

通吉氏 【通吉密拉本哈斯罕人收国二年来附遂为穆昆子和拉布善女真契丹字为御前管勾文字又通吉迁嘉努大安中平章政事】

洪果氏 【金初有洪果都本者世居锡馨水率其众内附以功袭穆昆忠义传有洪果玖珠】

必喇氏 【贞佑初昭义军节度使必喇阿噜岱】

纳塔氏 【宣宗时翰林侍读学士兼兵部侍郎纳塔谋嘉】

爱绅氏 【宣宗时有德顺节度使爱绅莽格】

延扎氏 【天会闲有延扎扬阿廷扎们都兄弟二人又们都子禄格隆州巴尔嘉山人】

纳喇氏 【世纪安国军节度使纳喇邦烈承安二年进士第一纳喇呼喇勒】

阿布哈氏 【大定中以太子赞善兼翰林修撰阿布哈德甫为横赐夏国使】

布什氏 【章宗纪宋将吴曦围穆舒隆堡部将布什长安击走之又布什万努河南副统军后叛护卫尉布什舒噜】

拜格氏 【宣宗纪西面节度使拜格珠】

布埒氏 【章宗纪寿州同知军州事布埒库死难赠昭勇大将军】

斡色氏 【宣宗纪延州刺史斡色克实又护军校斡色辛】

图们氏 【贞佑中保大军节度使知彰德府事图们色埒默元兵取彰德色埒默死焉正大中图们呼图们克为临洮府总管元兵破城被执不屈死之】

旺札卜氏 【百官志白姓】

辉特氏 【百官志白姓】

辉罕氏 【百官志白姓】

珠鲁氏 【百官志白姓】

辉罗氏 【百官志白姓】

彻木衮氏 【百官志白姓】

赛密埒氏 【百官志白姓】
舒尔都氏 【百官志白姓】
卓特氏 【百官志白姓】
乌苏古氏 【百官志白姓】
博提斯氏 【百官志白姓】
博尔济克氏 【百官志白姓】
乌实拉氏 【百官志白姓】
舒古苏氏 【百官志白姓】
珠尔罕氏 【百官志白姓】
光嘉喇氏 【百官志白姓】
阿达氏 【百官志白姓】
乌绅氏 【百官志白姓】
尼玛兰氏 【百官志白姓】
萨哈氏 【百官志白姓】
伊喇塔氏 【百官志白姓】
乌舍氏 【百官志白姓】
乌色氏 【百官志白姓】
纳雅氏 【百官志白姓】
尼沙氏 【百官志白姓】
博和哩氏 【百官志白姓】
巴尔氏 【百官志白姓】
斡哩氏 【百官志白姓】
都克达氏 【百官志白姓】
托尔特氏 【百官志白姓】
赫舒氏 【百官志白姓】
沙达喇氏 【百官志白姓】
温都逊氏 【百官志白姓】
阿苏氏 【百官志白姓】
萨察氏 【百官志白姓】
卓多穆氏 【百官志白姓】
纳木都鲁氏 【百官志白姓】
雅苏贝氏 【百官志白姓】
额苏哩氏 【百官志白姓】
古勒琿氏 【百官志白姓】

纳克氏 【百官志白姓】

索欢氏 【百官志白姓】

呼雅氏 【百官志白姓】

富色哩氏 【百官志白姓】

（臣）等谨案旺札卜氏以下四十四氏皆百官志白号之姓不详所出但珠噜光嘉喇乌舍考部族内有助鲁广吉喇兀惹疑即三部之讹

阿里氏 【本纪有阿里当堪阿里富埒瑋】

纳兰氏 【世祖简翼皇后纳兰氏】

持嘉氏 【持嘉晖传其先居张皇堡尝以张为氏又宣宗时商州刺史持嘉喀齐喀参知政事持嘉乌绅】

鄂屯氏 【大定十年鄂屯襄袭明安二十二年鄂屯忠孝中进士第又忠义传有鄂屯绰克哈尚】

钮赫氏 【世祖时钮赫额特埒以参知政事为右丞列传又有钮赫纳绅】

富色氏 【百官志黑姓】

珠格爱满氏 【百官志黑姓】

都克塔哩氏 【百官志黑姓】

摩年氏 【百官志黑姓】

伊年氏 【百官志黑姓】

托诺氏 【百官志黑姓】

苏伯林氏 【百官志白姓】

（臣）等谨案富色氏以下七氏皆百官志黑号之姓不详所出

图卜苏氏 【本纪特们羣牧图卜苏德寿】

蒙古氏 【本纪右补阙蒙古呼喇大兴主簿蒙古满都】

（臣）等谨案金蒙古氏以部为姓承安二年进士蒙古纲是也又金史百官志黑号之姓有蒙古氏与元史所载赐姓蒙古氏者异

杨珠氏 【正隆中回鹘使扬珠乌埒古来贡】

伊喇氏 【其先辽之国族列传伊喇氏甚众】

（臣）等谨案金史列传伊喇氏之族不一而皆出于辽初辽五院人伊喇博啰为准备任使官金都统杲克中京辽主西走留博啰督辎重被掠博啰自髡逃于山林皇统中辟博啰之子敬修辽史于是五院伊喇氏始至又有伊喇慥其先契丹裕噜部人伊喇底其先辽横帐人二族先后来归弃五院横帐俱为辽宗室三耶律其后皆为伊喇氏惟虞吕部之称伊喇氏未详辽后人之入于金者以契丹字书曰伊喇则耶律

伊喇名异而实同也又案金太宗二年含音袭约尼扎古雅走之后扎古雅率众降是三耶律中仍有称约尼氏者则辽后人之入金不独耶律

伊喇矣

舒穆噜氏 【其先辽之后族辽国语解以汉字书曰萧以契丹字书曰舒穆噜氏舒穆噜氏甚众】

（臣）等谨案元史舒穆噜额森传云在辽为舒噜氏辽亡改为舒穆噜氏则石抹即述律也

△奚五族

伯特氏 【伯特德哩布奚王五族人伯特梅和尚泰州人伯特乌格西南路茂糺奚人】

约啰氏 【交聘表有侍御史约啰特默格列传有崇义军节度使约啰伯特】

斡里氏

穆济氏

吹氏

（臣）等谨案奚王五族在辽为部金大定闲始定为氏故附于末

钦定续通志卷八十二

●钦定续通志卷八十三 氏族畧三

氏族畧 【三】

元

○元

国姓

以部为氏

以姓为氏

△国姓

博尔济锦氏 【见蒙古源流】

却特氏 【见元史太祖本纪】

（臣）等谨案蒙古源流载元之国姓为博尔济锦氏却特其贵种耳伏读通鉴辑览御批谓蒙古书却特与奇渥温字形相似宋濂承修

元史既不谙其国语又不辨其字文妄为音译今排纂元氏族谨据为登载于以见考古之宏而昭同文之盛恭附识于此

△以部为氏

扎拉尔氏 【太祖功德日盛多隆吉斯扎拉尔莽果诸部皆慕义来降列传穆呼哩扎拉尔氏世居阿南达水东又琳沁巴丹之子五人

其一曰扎拉尔太祖命其子因名为氏亦为扎拉尔氏又孟克萨喇传有察罕扎拉尔氏

达春传有蒙古扎拉尔氏或又因地而别之者】

扎拉台氏 【列传蒙古鄂啰官拜延巴图尔扎拉台氏又武昌路达鲁噶齐托欢扎拉台氏】

奇■〈口耒〉氏 【睿宗显懿庄圣皇后奇■〈口耒〉氏生宪宗世祖相继为帝列传山西大达鲁噶齐苏克河南行中书省左丞相额森布哈子奎章阁大学士阿荣皆奇■〈口耒〉氏其族最贵四世为丞相者六人世臣之家鲜与为比又卓沁台传亦作奇■〈口耒〉氏】

奇雅喇氏 【列传平阳太原两路达鲁噶齐哈克伞奇雅喇氏】

莽果氏 【太祖时莽果部来降后为氏列传鄂约达勒莽果人又琳沁巴丹之子其一曰莽果勒太祖命其子因名为氏亦为莽果勒氏】

伊奇哩氏 【太祖纪伊奇哩部人巴图遇帝与之同盟又琳沁巴丹之子其一曰伊奇喇斯太祖命其子孙因名为氏亦为伊奇喇斯氏武宗仁献章圣皇后伊奇哩氏生明宗列传太师驸马都尉巴图即章圣皇后之侄曾孙也作伊奇喇斯氏】

阿尔拉氏 【本部名列传太师广平王博尔济阿尔拉氏四世孙阿噜图拜中书右丞相兼修国史】

克埒氏 【太祖纪帝伐色辰岱酬灭之克呼部扎实甘布来归列传绰尔济都尔斡克呼氏】

默尔奇斯氏 【太祖纪帝征托克托及库楚类汗时卫喇特部等遇太祖前锋不战而降因用为向导至雅尔塔实河讨默尔奇斯部灭之列传大名路宣抚使库本默尔奇斯部族】

柰曼台氏 【本部名因以为氏和尚传蒙古柰曼台氏其祖父充蒙古军百户故加蒙古字也】

永古特氏 【列传阿勒楚尔永古特氏其先居云中塞上父达袞为金羣牧使太祖时驱所牧马来归阿勒楚尔鞠于外祖兆斋家人言讹为赵家因姓赵氏又额讷格尔传其先属永古特部曾祖特穆尔悦格仕金为马步军指挥使官名有马因以马为氏马祖常其后也】

赵氏马氏 【注见上】

苏达苏氏 【列传伊噜布哈蒙古苏达苏氏图卜特穆尔之子】

唐古氏 【武宗文献昭圣皇后唐古氏列传多啰台唐古氏孝义傅郭全继母唐古氏】

乌梁海氏 【列传苏布特乌梁海氏】

鸿吉哩氏 【本部名因以为氏又琳沁巴丹子其一曰鸿吉哩太祖命其子孙因名为氏亦为鸿吉哩氏又列传博啰哈达等俱鸿吉哩氏】

索隆噶氏 【顺帝鄂勒哲呼图克皇后索隆噶氏又保赛音布哈索隆噶台人】

（臣）等谨案鄂勒哲呼图克皇后奇氏高丽人而立后册文曰咨尔索隆噶氏笃生名族是奇氏为索隆噶部人因以部为氏也

高丽氏 【多啰布哈妻高丽氏列女传宣慰副使博啰特穆尔妻高丽氏】

达实密氏 【萨都拉达实密氏】

翁观氏 【阿勒古斯托克塔古哩翁观部人】

阿苏特氏 【列传阿尔斯兰阿苏特氏又哈噶斯阿苏特氏】

昭垒氏 【丞相顺德忠献王哈喇哈斯妻昭垒氏】

果啰罗氏 【太宗在潜邸养宪宗为子娶果啰罗部女呼尔察为妃又纳新果啰罗氏金山西北部人】

特尔格氏 【列传舒穆噜爱新特尔格氏自金来归】

（臣）等谨案特尔格本辽部名舒穆噜宜孙传云其先辽之特尔格人则特尔格以部为氏舒穆噜以族为氏部统族分于此可见

桂齐氏 【世祖诏民之荡析离居及僧道漏籍诸色人不当差徭者万余人充桂齐令明安领之兵志有桂齐卫亲军凡其卫人皆以桂齐为氏也】

辉和尔氏 【太祖四年辉和尔国来降列传阿尔哈雅集贤大学士图烈之子又图烈哈雅巴延布哈德济俱辉和尔氏又辉和尔氏女奴纳多卫主母御盗自尽人称为义烈】

回回氏 【西域国名太祖十八年定西域诸国皆降列传伊克台伊尔丹等并回回氏又阿喇卜丹伊斯玛音皆回回氏以炮匠授万户府万户】

喀喇氏 【本喀喇部即汉高车国也列传博果密世为喀喇部大人又俄罗斯喀喇氏官至四川行省平章政事又艾貌传巴图喀喇氏盖以号别之也又温都尔喀喇氏以祖名兰改兰姓】

钦察氏 【太祖时钦察部长哈喇察尔率所部来归顺帝达喇实哩皇后钦察氏太师太平王雅克特穆尔之女又鄂勒哲巴图钦察氏列女传额森呼图克蒙古钦察氏】

赛音氏 【彻伯尔和卓赛音西域部之族长因以为氏和卓其官称也】

伊埒巴尔氏 【托克托呼传其先本武平北折连川安塔哈山部族自库春出徙居西北伊埒巴尔山因以为氏号其国曰钦察库春生

苏木鼐苏木鼐生伊纳克实世为钦察国主伊纳克实之子和拉苏默遣使自归于太祖和拉苏默子巴图彻尔率钦察百人从世祖征大理伐宋以强勇称托克托呼巴图彻尔之子也】

达兰柰曼氏 【福建行省平章政事布哈特穆尔达兰柰曼氏张士诚据浙西死之】

尼古尔氏 【图烈图尼古尔氏】

伊噜勒昆氏 【孝传玛雅勒呼伊噜勒昆氏】

哈喇娄氏 【太祖时西域哈喇娄部主阿尔斯兰污来降列传沙全哈喇娄氏初名倬尔齐甫五岁为宋军所掠年十八留刘整幕下宋人使以沙为姓又儒学传巴哈延哈喇娄氏世居开州濮阳县以隐士征授翰林待诏】

沙氏 【注见上】

噶玛拉木氏 【番僧必噜匝纳实哩北庭噶玛拉木国人】

△以姓为氏

布斯格兰鸿吉哩氏 【列传托音色辰姓布斯格尔鸿吉哩氏世居朔漠本名托音因从太祖起兵有功赐名色辰故兼称曰托音色辰女曰传啰台太祖光献翼圣皇后子曰阿禅从太祖征伐有功赐银印封河西王以统其国族有诏鸿吉哩氏生女世以为后生男世尚公主故后妃传俱作鸿吉哩氏】

（臣）等谨按元史载鸿吉哩氏有二以部为氏者列传博啰哈达之鸿吉哩氏也以姓为氏者后妃传之鸿吉哩氏也而后妃传之鸿吉哩氏系布斯格尔鸿吉哩氏布斯格尔其语解为逃人故太祖去上四字祇称鸿吉哩氏

鄂尔和达氏 【列传卓沁台鄂尔和达氏其先琳沁巴丹以材武雄诸部生子曰鄂尔和达曰莽果勒曰扎拉尔曰鸿吉哩曰伊奇喇斯五人当开创之先协赞大业太祖即位命其子孙因名为氏号五投下鄂尔和达之孙卓沁台有胆畧善骑射勇冠一时遇战阵必为先锋太祖赐嫔御俸统鄂尔和达四千人世世无替】

尼玛察氏 【太后昭慈皇后尼玛察氏列传伊埒默色柰曼氏宣宗母尼玛察氏】

学顺氏 【列传博尔呼学顺氏】

唐古鄂摩克氏 【列传察罕唐古鄂摩克氏又布延特穆尔唐古鄂摩克氏】

图伯特克埒氏 【列传实纳台图伯特克埒氏】

赫呼氏 【列传特默齐赫呼氏子呼图克特穆尔】

托卜氏 【列传安扎尔托卜氏】

讷延氏 【安扎尔妻讷延氏】

锡林氏 【列传锡林沁布唐古人锡林氏】

巴哩勒都氏 【列传乌木罕巴哩勒都氏与父布格齐俱事太祖】

多托尔台氏 【列传布扎尔多托尔台氏】

阿勒坦多托尔氏 【列传库库布哈阿勒坦多托尔氏】

默尔吉特氏 【列传舒库尔默尔吉特氏】

博索氏 【列传超尔博索氏】

萨木坦氏 【列传沙扎该萨木坦氏】

斡尔喀氏 【列传奇奇尔斡尔喀氏】

苏尔嘉氏 【列传塔本哲尔苏尔嘉氏】

奇要奇氏 【博迪苏妾奇要奇氏】

苏页氏 【玛尔图苏页氏】

沙卜珠氏 【列传乌页尔沙卜珠氏】

廉氏 【博啰哈雅辉和尔人拜廉使命下之日子希宪适生喜曰吾闻古以官为氏天其以廉为吾宗之姓乎故子孙皆姓廉氏】

杨珠济达氏 【列传萨里扬珠济达氏又伯勒齐尔布哈丞相阿固台子也】

塔塔尔氏 【列传蒙古台塔塔尔氏】

谔鲁讷台氏 【列传辉图谔鲁讷台氏】

绰克台氏 【列传默呼绰克台氏】

全氏 【列传鄂尔根萨里辉和尔人以父字万全为氏忠义传盘萨勒全氏高昌人】

唐氏 【列传唐仁祖辉和尔人祖曰唐古直子孙因以为氏】

阿齐岱氏 【列传奇尔济苏阿齐岱氏】

默呼氏 【江西行省达春之妻默呼氏以贞节称旌门闾又孝友传毕伊苏岱尔立默呼氏】

乌噜克氏 【列传呼图克乌噜克氏】

托克托台氏 【列传布尔哈苏托克托台氏】

乌苏拉济吉氏 【列传哈喇乌苏拉济吉氏】

巴尔固岱氏 【列传呼鲁苏巴尔固岱氏】

察克台氏 【列传奇尔台察克台氏】

塔塔喇氏 【列传托音纳尔塔塔喇氏】

塔尔海德济氏 【阿实克布哈元配塔尔海德济氏封顺宁王夫人】

布古鲁克氏 【阿实克布哈继妻布古鲁克氏封顺宁王夫人以贞节称诏旌其门】

布朗吉尔都尔伯特氏 【列传伊噜特穆尔布朗吉尔都尔伯特氏】

伊伯氏 【江淮行省参知政事余阙之妻伊伯氏】

蒙古台氏 【元俗每岁十二月下旬武备寺供弓箭环刀束草为人形一为狗一选世家之贵重者交射之非布色扎拉尔柰曼蒙古台拉拜塔坦沙卜珠苏尼特等氏族不得与】

拉拜氏 【注见上】

苏尼特氏 【注见上】

■ 〈王荅〉坦氏 【注见上】

哈喇鲁特氏 【顺帝母哈喇鲁特氏】

巴拜哈斯氏 【泰定帝皇后巴拜哈斯氏】

兆斋氏 【赵良弼女真人本姓兆斋氏人言讹为赵家】

齐塔济氏 【耶律希亮母齐塔济氏】

兰氏 【温都尔喀喇氏祖阿尔斯兰尝从大将阿珠伐宋仕至冀宁路达噜噶齐子孙遂以兰为氏】

哈坦氏 【巴拜哈坦氏】

布延氏 【图烈布哈妻布延氏从夫遇难】

嘉卜塔喇氏 【哈喇布哈妻嘉卜塔喇氏】

郝氏 【列传郝天挺其先出于都鲁别族】

鄂齐尔苏达勒氏 【顺帝至元二十六年立皇太子妃鄂齐尔苏达勒氏】

巴雅喇氏 【江西廉访师克恭妻巴雅喇氏】

图卜布延氏 【列传谔勒哲图卜布延氏】

察罕默尔奇氏 【睿宗庶子拨绰娶察罕默尔奇氏】

臧密古玛里氏 【阿实克布哈祖母臧密古玛里氏】

乌赫哩氏 【塔塔图该妻乌赫哩氏】

奎苏氏 【孝友传彻辰台奎苏氏】

威喇诺尔氏 【奇尔实勒始事王汗托果琳后灭王汗归太祖其族为威喇诺尔氏列传哈喇哈斯威喇诺尔氏】

昂吉尔氏 【列女传哈喇布哈妻托克托鼐昂吉尔氏又萨奇苏传世祖即位以萨奇苏为北京宣抚赐宫人昂吉尔氏及金帛章服】

巴林氏 【太祖时有巴林珠尔格图以本部兵从太祖讨定诸部太师淮安忠武王巴延其后也】

都苏勒氏 【鄂都台妻都苏勒氏】

斗讷氏 【丞相淮安忠武王妻斗讷氏】

哈喇沁氏 【丞相顺德忠献王哈喇哈斯曾祖妣哈喇沁氏封王夫人】

谔勒哲氏 【丞相顺德忠献王哈喇哈斯祖妣谔勒哲氏封王夫人】

多罗噶纳氏 【丞相顺德忠献王哈喇哈斯妣多罗噶纳氏封王夫人】

都沁和塔拉氏 【阿里海母都沁和塔拉氏】

卓津氏 【太师广平忠宪王妻卓津氏】

图古勒氏 【太师广平贞宪王妻图古勒氏封王夫人】

阿噜威氏 【列传彻尔特穆尔阿噜威氏祖父累立战功为西域大族又王逖勒从太祖西征娶阿噜威氏】

巴约特氏 【成宗布尔罕皇后巴约特氏顺帝立雅克特穆尔之女巴约特氏为后列传台哈布哈巴约特氏】

（臣）等谨按后妃传顺帝后钦察氏太师雅克特穆尔之女是巴约特乃钦察氏之族也

伊埒巴尔巴约特台氏 【列传和尚伊埒巴尔巴约特台氏祖哈喇彻尔父古都斯】

（臣）等谨按此盖巴约特台别族合伊埒巴尔山名而为氏也

巴鄂尔氏 【列传阿喇勒乌苏回鹘巴鄂尔氏太祖征西域驻蹕巴鄂尔之地阿喇勒乌苏率其部曲来降】

多族氏 【列传赵阿克盘图伯特乌斯藏多族氏】

足克袞氏 【帝师帕克斯巴士番萨斯嘉人足克袞氏】

白氏 【列传察罕西域巴喇哈纥城人仁宗时平章政事帝语及古帝王赐性命氏之事因赐察罕姓白氏国人谓白为察罕也】

额卜氏 【列传昂吉尔姓额卜氏世为西夏将家父干布率所部归太祖隶蒙古军籍仍以干布为千户主之】

锡尔馨氏 【塔齐尔锡尔馨氏】

嘉纳克氏 【列传特尔格克实密尔人嘉纳克氏】

周氏 【喜同河西人姓周氏】

段氏 【列传信苴日斡人以段为氏】

钦定续通志卷八十三

●钦定续通志卷八十四 氏族畧四

氏族畧 【四】

总论

赐氏

改氏

有故改氏

冒氏

省言

以号为氏

以国为氏

以官为氏

以名为氏

同族异氏

别族同氏

金白姓

金黑姓

元蒙古七十二氏

元色目三十一氏

○总论

（臣）等谨按郑樵氏族一畧之后着总论十有三篇所以广明义类分别源流参稽讹误者至周而至核踵其书者所当禀为成式依例以立文者也然辽金元三朝氏族与汉姓记录不同论例亦自殊别虽仍十三篇之大旨而取裁则有小异焉曰赐氏郑氏于赐姓各注于本氏之下今辽金元之外宋明两朝赐姓无可附见因别立赐姓一篇五朝汇载其本氏下削而不注曰改氏仍郑志例曰有故改氏凡郑志改恶氏及避讳避仇诸例可以包举矣曰冒氏五季之君多起沙漠往往无姓氏者或因所依而冒之亦郑志受氏之义至生而有文其言多诞后世不概见焉曰省言同郑例曰以号曰以国曰以官曰以名盖即辽金元氏族仍就以部以姓中取其可考者区分标目以存义例曰同族异氏曰别族同氏祇据三朝之氏族分合言之而不及汉姓者以汉姓棼如乱丝不能一一厘定也其明赐元人姓名明史多不详本姓亦姑阙之曰金白黑姓曰元蒙古色目姓以金百官志及陶宗仪辍耕录所载多有史传所不详附录之以备考至郑氏字讹音讹二篇今三史之人地官名涉于三朝国语者音字俱讹谨依译音改正无庸另立盖以因文起例不必尽袭郑氏而其义无不同耳

○赐氏

李氏 【唐国姓太宗置松漠都督府以契丹首领库克为都督封无极男赐姓李氏玄宗复置都督府以契丹大帅达年嘉哩为都督赐姓名李怀秀又贞观初有拓跋赤辞者归唐太宗赐姓李唐末拓跋思恭讨黄巢有功复赐姓李又明赐元人姓名绰罗曰李贤观音保曰李观释嘉努曰李显忠阿尔实曰李从善】

（臣）等谨按唐赐契丹拓跋国姓郑樵于李氏下失载今据史补入

赵氏 【宋国姓西夏李继捧赐姓名赵保忠李继迁赐姓名赵保吉神宗时荣州团

练使穆辰赐姓名赵思忠河湟羌隆赞出降赐姓名

赵怀德西番巴沁扎卜内附赐姓赵氏赵良嗣本燕人马植易姓李徽宗赐姓赵氏宇文虚中谋劫二帝归宋不克而死开禧中赐其后姓赵氏

又明赐元人巴图姓名赵忠美】

耶律氏 【辽国姓耶律隆运本姓韩氏耶律俨本姓李氏并赐姓耶律氏道宗时行营都部署李仲禧北院宣徽使刘霖枢密副使王观都承旨杨兴工各赐姓耶律氏】

完颜氏 【金国姓以部为氏海陵以后完颜仲元完颜阿林本姓郭氏完颜霆完颜耀珠本姓李氏完颜佐本姓梁氏并赐姓完颜氏兰州汪三郎内附赐姓完颜氏伊喇钟嘉努张进张甫王果勒程琢蒙古国用安皆赐姓完颜氏】

蒙古氏 【本部名遂以为氏元太祖创业于此察罕本姓唐古鄂摩克氏太平本姓贺氏并赐姓蒙古氏又别部人来降编入蒙古军者于本姓上加蒙古二字睿宗时贾实喇本姓贾氏赐名实喇俾氏族与蒙古人同】

（臣）等谨按元人称蒙古氏者皆本部人盖即系籍之义其别部人来投者于本姓上加蒙古二字即所谓俾氏族与蒙古人同也至察罕太平之称赐姓蒙古究属作史者之讹传耳

朱氏 【明国姓太祖义子李文忠沐英何文辉徐司马皆赐姓朱后俱复本姓正德时都督钱盩钱安许国义子武德并赐姓朱氏又赐都督朱福朱刚都指挥朱谦朱春朱翥朱增朱斌朱政朱海朱岳朱升朱晟朱彪朱镛朱钊指挥千户镇抚旗舍朱钦等百二十人姓赐舍人朱山朱准朱容朱淮朱渭朱欣未义朱大爵朱印朱珂俱国姓诏都督江彬许泰刘晖张洪神周李琮指挥焦睿俱赐国姓又改指挥杨瑄曰璋焦椿曰棕桂曰松张天佑曰海廷鸾曰璧马定曰靖俱国姓又太祖时赐元人姓名策珠尔曰朱采托果齐曰朱静甘珠尔曰朱满都呼曰朱恩布都罕曰朱窥以上俱赐国姓】

衷氏 【丑代衷榆本衷姓仕南唐以庆贺不便赐姓衷氏】

包氏 【宋番部俞龙琦率属来降自言闻包待制为朝廷忠臣乞赐姓包氏从之】

温都氏 【金宣宗贞佑中追赐仁圣皇后父王彦昌为温都氏王皇后为温都皇后又赐东永昌姓亦为温都氏】

乌凌阿氏 【金杨沃衍本姓杨氏赐姓乌凌阿氏】

乌库哩氏 【金乌库哩长寿本姓包氏赐姓乌库哩氏又包世显包疙疸并赐姓乌库哩氏】

哈萨喇氏 【金都林古赐姓哈萨喇氏】

必喇氏 【金何定赐姓必喇氏】

钮祜禄氏 【金钮祜禄资禄本姓张氏赐姓钮祜禄氏】

延扎氏 【金郭哈玛尔赐姓延扎氏】

瓜尔佳氏 【金马福德马柏寿并赐姓瓜尔佳氏】

白氏 【元察罕西域纥城人生时月白如昼国人谓白为察罕因名之仁宗赐姓白氏又明赐元人姓名北斗努曰白忠阿都拉曰白瑜伯嘉律曰白毅】

刘氏 【明赐元人姓名萨尔图曰刘允信】

金氏 【明赐元人姓名额森图克曰金忠阿尔哈特实哩曰金顺】

平氏 【明赐元人姓名班第曰平以正】

于氏 【明赐元人姓名巴延达哩曰于忠】

吴氏 【明赐元人姓名巴图特穆尔曰吴允诚子额特特穆尔曰吴克思玛噜曰吴成谔勒哲特穆尔曰吴良布敦袞曰吴守义济兰曰吴克诚多罗于曰吴存敬玛噜曰吴管】

陈氏 【明赐元人姓名恰恰曰陈守忠哈哈曰陈元】

韩氏 【明赐元人姓名实哈塔曰韩以谦】

丁氏 【明赐元人姓名丹珠尔曰丁顺】

安氏 【明赐元人姓名孟格曰安汝敬达色曰安汝坚牟尼沙克置曰安思谦】

田氏 【明赐元人姓名察察曰田义】

高氏 【明赐元人姓名额哩音博啰曰高礼】

姚氏 【明赐元人姓名饶五十曰姚智】

和氏 【明赐元人姓名托克托博啰曰和爱】

罗氏 【明赐元人姓名阿拉克萨里曰罗秉忠】

海氏 【明赐元人姓名诺海曰海荣】

火氏 【明赐元人姓名浩里浩沁曰火真】

夏氏 【明赐元人姓名齐噜台曰夏贵】

蒋氏 【明赐元人姓名巴尔台曰蒋信子伊尔必斯曰蒋善】

柴氏 【明赐元人姓名娄托罗该曰柴秉诚铁柱曰柴克恭们苏尔噶曰柴志诚拜特穆尔曰柴志敬遵锥布哈曰柴永谦克木特穆尔曰柴永正】

杨氏 【明赐元人姓名巴珠曰杨效诚阿尔娄台曰杨汝诚托克托曰杨必敬】

张氏 【明赐元人姓名哈喇尼敦曰张隆善藏布曰张志义】

宋氏 【明赐元人姓名伯奇特穆尔曰宋一诚】

季氏 【明赐元人姓名伯嘉努曰季安祖】

芮氏 【明赐元人姓名雅克实纳曰芮刚】

王氏 【明赐元人姓名默色特穆尔曰王麟阿达纳曰王义音济布哈曰王懋忠柰曼岱曰王存礼呼逊曰王彪】

马氏 【明赐元人姓名多尔济曰马惟良丕勒玛帕玛曰马克顺】

陆氏 【明赐元人姓名五十六曰陆忠】

穆氏 【明赐元人姓名阿尔特穆尔曰穆义】

脱氏 【明赐元人姓名托克托博啰曰脱顺】

薛氏 【明赐元人姓名托果齐曰薛贵托欢曰薛斌】

郭氏 【明赐元人姓名喀尼曰郭以诚达都曰郭美】

霍氏 【明赐元人姓名和尼齐曰霍邱】

莫氏 【明赐元人姓名诺海齐曰莫清】

戚氏 【明赐元人姓名博德曰戚斌以上俱赐姓】

○改氏

刘氏 【宋真宗立刘氏为皇后以其无宗族少依龚美家改美姓刘为后兄弟又元刘国杰本女真人姓乌库哩氏入中原改姓刘氏】

萧氏 【辽太祖改后族巴哩氏伊苏济勒氏为萧氏太宗改舒噜氏为萧氏】

索隆噶氏 【元顺帝立次皇后奇氏改奇氏为索隆噶氏】

○有故改氏

陶氏 【五代陶谷本姓唐氏避晋祖讳改为陶氏】

元氏 【五代吴越危全讽钱镠恶其姓改为元氏元给其裔也】

尤氏 【五代闽王审知时闽人沈氏避讳去水为尤氏】

康氏 【宋初匡氏避太祖讳改为主氏政和中诏民间不得以主为姓因改为康氏】

汤氏 【宋汤悦本姓殷名崇义建隆和避宣庙讳改姓名汤悦】

商氏 【本姓殷避宣庙讳改为商氏】

殿氏 【姓氏辨证曰崇宁间有商人殿全自虔州石城徙居抚州自言本姓殷犯宣祖讳建隆中其祖以讼至县县令因字形改为殿字】

洪氏 【宋洪文抚本姓宏氏避宣祖讳改为洪氏】

文氏 【宋文彦博本姓敬氏曾大父避晋祖讳更姓文氏至汉复姓敬宋避翼祖讳复改文氏】

（臣）等谨按统谱苟姓注云一派出自敬氏避石晋讳去文为苟字世谱云敬氏避晋讳亦改为恭字是敬姓所改不独文氏也

亘氏 【宋绍兴中桓氏避钦宗讳改为亘氏】

勾氏钩氏苟氏句氏句龙氏勺氏约氏 【皆勾姓勾字去声宋绍兴中避高宗嫌名皆变音字改易】

真氏 【宋真德秀本姓慎氏避孝宗讳改为真氏】

舒穆噜氏 【辽舒噜氏因国亡改为舒穆噜氏】

张氏 【金张浩辽阳人本姓高氏东明王之后曾祖霸仕辽为张氏】

师氏 【金师安石本姓尹氏避国讳改为师氏】

马氏 【金马庆祥先世西域人入居临洮狄道以马为氏】

姬氏 【金宗端修章宗时避睿宗讳上一字改宗氏为姬氏】

李氏 【元李廷本金人富察氏金末来中原以李为氏】

段氏 【元信苴日夔人以段为氏】

金氏 【元金履祥其先本姓刘氏吴越时避钱鏐嫌名改姓金氏】

王氏 【元王珣本姓耶律氏避难辽西改为王氏】

周氏 【元喜同河西人以周为氏】

赵氏 【元阿勒楚尔永古特氏幼鞠于外祖兆斋家人言讹为赵家因姓赵氏又赵良弼女真人本姓兆斋氏讹兆为赵遂以赵为氏】

郝氏 【元郝天挺其先出于都噜别族以郝为氏】

汪氏 【元翁观部人以汪为氏】

潘氏 【元潘绍本姓赵系廷美之后因避难改姓为潘氏】

宥氏 【明滁州宥氏本姓乃有有若之后太祖加宥改为宥氏】

陝氏 【明天顺间进士■〈彡上且下〉茂公安人帝以音同改姓陝氏】

（臣）等谨按■〈彡上且下〉本彡姐陇西羌姓汉书西羌彡姐傍种反后姐去女作且遂合二字为■〈彡上且下〉而音陝耳

衷氏 【明南昌衷世用以衷姓中式上书请从南唐赐姓改衷氏】

○冒氏

李氏 【后唐明宗本姓邈佶烈氏李克用养为子继庄宗即位潞王本姓王氏明宗养为子即帝位俱姓李氏李存孝本姓安名敬思克用养为子遂冒姓李氏】

石氏 【后晋高祖本西域人冒姓石氏】

刘氏 【后汉高祖本沙陀人冒姓刘氏北汉刘承钧刘旻养子继思继元为承钧养子继思本姓薛继元本姓何皆冒姓刘氏又元呼图克特穆尔好读书仁宗字之曰汉卿父特默齐姓赫呼氏母姓刘氏人称为刘汉卿】

郭氏 【周世宗本柴守礼子周太祖养为子后即帝位】

王氏 【五代王镕本回纥遗种为王武俊养子王殷本姓蒋为王重盈养子王都本姓刘为王处直养子王宗佶本姓甘为王建养子皆

冒姓王氏】

慕容氏 【慕容超本汉祖同产弟养子阎氏冒姓阎后又姓慕容氏】

（臣）等谨按汉祖纪云沙陀人不详本氏则超之姓阎姓慕容亦俱为冒氏

赵氏 【五代赵延寿本姓刘为赵德钧养子冒姓赵氏】

骆氏 【五代骆元亮本姓安骆奉先子之遂冒姓骆氏】

符氏 【五代符守信本姓郎总管符翁子之冒姓符氏】

霍氏 【五代霍彦威不知何许人梁将霍存得于村落年十四列于厮养后养为己子遂冒姓霍氏】

杨氏 【宋宣宗后杨氏少以姿容选入宫忘其姓氏或谓会稽有杨次山者后自谓其兄乃姓杨氏】

魏氏 【宋魏了翁本姓高养于姑魏冒姓魏氏】

江氏 【宋江万里无子以蜀人王橐子镐为后遂冒姓江氏与万里同殉国难】

黄氏 【元黄公望本姓陆氏出继永嘉黄翁遂冒姓黄氏】

章氏 【元章卿孙蜀人本姓刘氏自幼章提刑子之遂冒姓章氏以孝行闻】

○省言

马氏 【五代司马球仕吴越以御史中丞为昆山镇遏使因家焉子孙隐居不仕称马氏】

吾氏 【元吾邱衍字子行钱唐人有诗名时称吾衍】

（臣）等谨按今吾邱后人称邱氏者知当日省言不独吾氏也

○以号为氏

达呼哩氏 【契丹在隋唐之际号达呼哩氏】

约尼氏 【契丹苏尔威汗更号约尼氏】

锡里氏 【辽始祖自为一部号锡里氏】

○以国为氏 【以地附】

阿苏特氏 【本阿苏特国】

辉和尔氏 【本辉和尔国】

回回氏 【本回回国】

钦察氏 【本钦察国】

高丽氏 【本高丽国】

噶玛拉木氏 【本噶玛拉木国】

伊埒巴尔氏 【本西北山名安塔哈山部族徙此因以为氏】

张氏 【金特嘉氏其先世居张皇堡尝以张为氏】

巴鄂尔氏 【木回鹘地名元太祖驻蹕巴鄂尔阿喇勒乌苏来降因以为氏】

○以官为氏

马氏 【金永古特部人特穆尔悦格仕金为马步军指挥以官名有马因以马为氏】

廉氏 【元博啰哈雅拜廉使因以廉为氏】

和氏 【明和男以祖阿噜台永乐时封和宁王因以和为氏】

桂齐氏 【元桂齐卫军人皆为桂齐氏】

○以名为氏

扎拉尔氏 【琳沁巴丹从元太祖征伐有功太祖命其子五人各以名为氏】

伊奇哩氏 【同上】

莽果氏 【同上】

鸿吉哩氏 【同上】

鄂尔和达氏 【同上】

唐氏 【元唐仁祖因其祖名唐古直子孙因以唐为氏】

贯氏 【元苏尔约苏哈雅以父名格济格因音讹为贯只哥遂以贯为氏】

兰氏 【元温都尔以祖名阿尔斯兰遂以兰为氏】

沙氏 【元绰尔齐为宋军所据以父名实迪因音讹为沙的遂以沙为氏】

全氏 【元鄂尔根萨哩以父字万全子孙以全为氏】

赛音氏 【西域之族长曰赛音因以为氏】

○同族异氏

辽耶律氏别为王氏

辽舒噜氏别为舒穆噜氏

金乌库哩氏别为刘氏

金富察氏别为李氏

金兆斋氏别为赵氏

元祖勃端察尔之后一为却特氏一为阿尔拉氏

元唐古氏别为锡林氏

元永古特氏别为赵氏

元都噜氏别为郝氏

元赫呼氏别为刘氏

○别族同氏

辽达呼哩氏约尼氏锡里氏同为耶律氏又韩隆运李俨李仲禧刘霖王观杨兴工并赐姓耶律氏

辽巴哩氏伊苏济勒氏舒噜氏并为萧氏又奚族亦称萧氏

金有同姓完颜氏异姓完颜氏又郭仲元郭阿林李霆李耀珠梁佐汪三郎伊喇钟嘉努张进张甫王果勒程琢国用安并赐姓完颜氏

金温都氏又王彦昌东永昌并赐姓温都氏
 金瓜尔佳氏又马福德马柏寿赐姓瓜尔佳氏
 金乌凌阿氏又杨沃衍赐姓乌凌阿氏
 金乌库哩氏又包长寿包世显包疙疸赐姓乌库哩氏
 金哈萨喇氏又都林古赐姓哈萨喇氏
 金必喇氏又何定赐姓必喇氏
 金钮祜禄氏又张资禄赐姓钮祜禄氏
 金延扎氏又郭哈玛尔赐姓延扎氏
 金蒙古氏又元唐古鄂摩克察罕贺太平并赐姓蒙古氏
 元索隆噶氏又奇氏改为索隆噶氏
 元鸿吉哩氏一以部为氏一以名为氏
 元扎拉尔氏一以部为氏一以名为氏
 元伊奇哩氏一以部为氏一以名为氏
 元莽果氏一以部为氏一以名为氏

○金白姓

完颜氏	温特赫氏	图们氏
布萨氏	珠格氏	伊喇塔氏
乌克逊氏	费摩氏	温都氏
图克坦氏	瓜尔佳氏	

（臣）等谨按瓜尔佳百官志作夹谷又作加古又有古里甲今并改画一

诺延氏	乌凌阿氏	赫舍哩氏
纳喇氏	富珠哩氏	珠勒根氏
纳哈塔氏	实嘉氏	穆延氏
哈萨喇氏	乌雅氏	乌库哩氏
钮祜禄氏	通吉氏	洪果氏
延扎氏	必喇氏	尼玛哈氏
沃呼氏	纳塔氏	萨哈氏
爱绅氏	旺扎卜氏	阿布哈氏
珠噜氏	辉特氏	辉罕氏
辉罗氏	彻木袞氏	赛密呼氏
舒尔都氏	卓特氏	乌实拉氏
舒古苏氏	珠尔罕氏	光嘉喇氏
阿克占氏	布什氏	阿达氏
尼玛兰氏	乌舍氏	乌绅氏

拜格氏	温都逊氏	乌色氏
纳雅氏	阿勒班氏	巴尔氏
尼沙氏	富色里氏	博和哩氏
斡哩氏	都克达氏	托尔特氏
赫舒氏	沙达喇氏	阿苏氏
萨察氏	卓多穆氏	纳木都鲁氏
雅苏贝氏	额苏哩氏	纳克氏
古勒瑋氏	斡色氏	索欢氏
呼雅氏	乌苏古氏	博提斯氏

博尔济克氏

○金黑姓

唐古氏	富察氏	珠嘉氏
蒙古氏	钮赫氏	鄂屯氏
锡默氏	富色氏	摩年氏
伊年氏	珠格爱满氏	托诺氏
苏伯林氏	都克塔哩氏	

○元蒙古七十二氏

阿尔拉	扎拉尔岱	必噜岱
库克新	莽固岱	

（臣）等谨按陶宗仪辍耕录蒙古七十二氏内既分列库克新与莽固岱为二姓又列库克新莽固岱一姓岂即列传中伊埒巴尔巴约特台之例合二氏为一姓耶所载重复姓甚多今并改画一声明于后

翁吉喇特	云吉喇实	乌楞乌
郭尔罗斯	齐哩克岱	鸿和坦

（臣）等谨按鸿和坦辍耕录作晃忽摊又有晃兀摊今并改画一

图卜岱	巴哩勒呼	奇哩娄
塔塔尔	哈塔锦	萨里岱
默勒吉岱	娄珠克岱	济雅岱
雅克布哈岱	塔拉尔约苏	森济乌克岱
阿达里吉达		

（臣）等谨按阿塔里吉达辍耕录作阿大里吉歹又有阿塔力吉歹阿达里吉歹今并改画一

乌鲁岱	拜托里岱	玛勒岱
伊克穆尔哈喇	纳颜济达	

（臣）等谨按纳颜济达辍耕录作那颜吉歹又有那颜乞台今并改画一

伊奇尔岱	和哈奇尔岱	摩哩齐
谔尔古岱	阿喇勒岱	巴雅尔岱
厄古尔岱	乌拉岱	摩哩奇尔岱
硕岱岱	伯苏岱	伊伯格勒岱
穆尔温塔岱	塔塔尔岱	

（臣）等谨按塔塔尔岱辍耕录作荅荅儿歹又有塔塔歹今并改画一

塔尼勒	乌噜克岱	森济岱
默勒吉	扎玛勒岱	乌噜勒岱
阿古拉里达	布德吉鼐满岱	伊克埒哈喇
昂吉岱	卓罗岱	蒙古岱
鄂摩克岱		

（臣）等谨按鄂摩克岱辍耕录作外抹歹又有外抹歹乃今并改画一

图鲁卜岱	巴琳	彻尔济达
巴尔固岱	哈达岱	伊勒齐勒
扎拉济兰	乌拉	图鲁卜岱

○元色目三十一氏

哈喇娄	钦察	唐古
阿苏特	图色	喀喇
科尔罗	拉察岱	奇彻勒岱
辉和尔	回回	柰曼岱
阿勒呼木	哈鲁乌	噶玛拉木
萨拉噶	图卜岱	永和尔岱
密搏斯	哈哩	科尔罗丹
桂齐	实喇娄	图鲁格
哈喇奇塔岱	绰尔齐岱	图鲁卜台
和尔拉		

（臣）等谨按和尔拉辍耕录作火鲁刺又有火里刺今并改画一

齐哩克 克实密尔

钦定续通志卷八十四

●钦定续通志卷八十五 氏族畧五

氏族畧 【五】

补遗

○补遗一

以国为氏
以郡国为氏
以邑为氏
以地为氏
以乡为氏
以亭为氏
以字为氏
以名为氏
以姓为氏
诸方大姓
以官为氏
以凶德为氏
以基德为氏
以溢为氏
以事为氏
以名氏为氏
以国爵为氏
以官氏为氏
代北复姓
诸方复姓
代北三字姓
诸方四字姓
△以国为氏

娥氏 【古今姓氏辨证曰古诸侯有娥氏之后或去有字以娥为氏后魏将军娥清明娥乔永乐中知县】

东楼氏 【姒氏少康之后支孙封为东楼公因以为氏周东楼羽■〈木巳〉大夫】

根牟氏 【姓字辨证曰出自东夷根牟小国在琅琊阳都县之东牟乡春秋鲁宣公九年取其国子孙氏焉六国时有根牟氏著书】

甫氏 【姓氏辨证曰出自姜姓炎帝裔孙伯夷为尧太岳封其后为甫侯子孙以国为氏明甫轻甫辙任知县】

郛氏 【统谱曰郛国之后以国为氏望出东平】

嬭氏 【统谱曰国名以国为氏汉嬭仲仁淮王相】

鄆氏 【国名汉章帝徙宋公于此因以为氏】

杨氏 【唐叔虞之后伯侨封杨侯因以为氏一云周宣王曾孙封杨为晋所灭子孙以国为氏】

（臣）等谨按杨氏为汉着姓杨喜从木扬雄从手从木之杨周有杨朱从手之扬晋有扬食我其始本不通也郑樵以邑为氏内有扬无杨注内亦不言有从木者何欤考左传霍杨韩魏皆姬姓国汉地理志河东县注曰古杨国其字皆从木晋语叔向食采于扬其子食我以邑为氏有罪而族灭是周伯侨以支庶受封于阳其后为杨氏晋叔向以大夫食采于扬其后为扬氏子云先叙伯侨之杨而云扬为别族其意或有所讳也汉杨修吾家子云一语乃文人酬应之词未可据为典要今立杨氏以补郑樵之漏依左传入以国为氏云

郟氏 【姓氏辨证曰出自春秋郟国在商密秦灭之子孙以国为氏】

那氏 【风俗通曰朝那东夷国名以国为氏其后军为那氏燕有辽西太守那颀明那尚綱那正佖举人】

介氏 【春秋时附庸小国后以为氏又地名晋有介之推统谱明嘉靖进士介一清】

（臣）等谨按郑樵氏族畧序曰介之推烛之武未必亡氏由国人所取信故特标其地以异于众而以地为氏内有烛氏无介氏似诚遗漏善乎邓名世辨证曰介之推不见得姓之始介葛卢不见亡国之年二人之氏不相沿也故入以国为氏而以地名附见于下

隋氏 【宋隋宝为高密令有能名明隋赞巢县丞升知府】

（臣）等谨按隋本随字国名风俗通云隋侯之后郑樵已收入以国为氏内至隋文帝始去辵为隋后人皆作隋氏今仍入以国类下

郟氏 【说文郟炎帝之后姜姓所封周弃外家国姓氏辨证曰弃为尧后稷以功封郟子孙氏焉宋郟端连州通判明郟清官御史郟博太常丞】

桐氏 【姓氏辨证曰出自春秋桐国之后其地汉桐乡宋舒州桐城是也鲁定公二年楚灭桐子孙以国为氏】

（臣）等谨按桐氏郑樵收入四声今据辨证补详所自

訾陬氏 【姓氏辨证曰三皇时诸侯以国为氏帝啻妃訾陬氏女也元和姓纂以为訾氏祖误矣訾陬自为复姓】

（臣）等谨按訾陬氏郑樵作訾氏入以名为氏中注亦引帝啻妃盖仍姓纂也今据辨证为复姓入以国为氏又史记作陬訾氏

有鬲氏 【姓氏辨证曰夏诸侯以国为氏少康之臣靡常奔焉自其国收三国之烬以灭寒浞】

（臣）等谨按有鬲氏郑樵作鬲氏注云即有鬲之国今德州平原有故鬲城云云而不详时代今据辨证作复姓

△以郡国为氏

凉氏 【姓氏辨证曰魏志有昌邑太子太傅凉茂山阳人必其先封于凉因氏焉】

折氏 【后汉书方术传折像字伯式广汉雒人其先张江者封侯于折曾孙国为郁林太守徙居广汉因封氏焉又羌族有西河折氏世家云中为北蕃大族自唐以来世为麟州节度使宋西河折氏唐振武军缘河五镇都知兵马使宗本生嗣伦麟州刺史嗣伦生从阮周静难军节度检校太师兼侍中从阮生德宸德愿德宸永安军节度检校太师赠侍中二子御勋宋开宝初泰宁军节度检校太师兼侍中】

（臣）等谨按凉氏折氏郑樵收入四声今补详所自

△以邑为氏

蕃氏 【姓纂曰其先出自鲁大夫食邑于蕃因以为氏后汉党锢传有蕃向按白裘鲁国记云陈子游为鲁相蕃子也国人为讳改音皮】

郟氏 【姓氏辨证曰左传赵盾杀公子乐于郟其大夫食邑者以为氏】

鄆氏 【曹公孙封于鄆以邑为氏】

■ 〈支卩〉 氏 【统谱曰邑周文王封支子于■ 〈支卩〉 因以为氏】

阳邱氏 【姓纂曰楚大夫食邑阳邱因以为氏】

针氏 【姓氏辨证曰出自妘姓陈僖公之孙针子以所食采邑为氏其孙庄子为卫大夫八世孙宜臼奔楚为针尹】

（臣）等谨按郑樵据姓苑收箴尹以为箴尹克黄之后子孙以官为氏又有箴尹宜臼本陈人既知宜臼与克黄不同所出乃未详考宜臼之先为针子而注宜臼于箴尹氏之下列针氏于四声之中皆其考核未精义例稍淆之处兹据辨证补正

牡邱氏 【姓苑有巨鹿太守牡邱胜姓氏辨证曰其先食邑牡邱因以为氏】

郟氏 【姓苑周封纪侯之邑因以为氏】

下阳氏 【春秋公子诸曰姬姓虢叔之后上阳下阳虢之二邑也】

鄆氏 【姓氏辨证曰鄆郑地其先以所食邑为氏楚有鄆将师卫有鄆武子肸统谱宋嘉熙进士鄆孝隆鄆发明鄆志南丰知县】

卜梁氏 【姓解曰楚文王子食采诸梁为卜梁氏庄子有卜梁猗】

堂氏 【风俗通堂楚邑楚大夫伍尚为令后因氏焉汉堂溪】

萌氏 【见姓苑州名五代萌虑蜀裨将】

漕氏 【卫邑名汉游侠传漕仲叔】

百氏 【秦大夫百里奚之后汉百政明百恭百通俱指挥千户】

絺氏 【周邑名以邑为氏杜预云野王西南有絺城汉絺宗灵帝时黄门令】

猗氏 【本作猗县名周猗顿鲁人用盐起家兴富于猗氏县因以为氏望出河南陈留】

针巫氏 【姓氏辨证曰鲁大夫针巫氏庄公三十二年使僖叔待命于其家使针季馘之是也姓书云或去巫为针盖指针季】

（臣）等谨按郑樵注针巫于针氏下不立针巫复姓殊为疏漏今据邓名世说补之

荣锜氏 【姓氏辨证曰周邑也今河南巩县西有荣锜涧即其地其先食邑者氏焉】

夏阳氏 【姓氏辨证曰晋大夫夏阳说其先以所食邑为氏】

圉氏 【左传有楚大夫圉公阳以邑为氏】

鄮氏 【县名明鄮良针咸监训导】

邾氏 【上邾下邾并邑名周邾巽孔子弟子明邾仲德举人广平府训导】

移氏 【风俗通曰齐公子雍食采于移其后氏焉明移善顺天府照磨】

虫氏 【姓氏辨证曰出自春秋邾国虫邑鲁昭公十九年宋围虫取之其大夫以邑为氏】

垣氏 【风俗通曰垣秦邑也因以为氏宋垣询徐州守明垣广户部照磨】

饶氏 【姓氏辨证曰出自六国时齐大夫食邑于饶者赵孝成王四年拔其邑以封其弟长安君齐之故臣以邑为氏姓苑曰临川人汉有鲁阳太守饶威因家焉又吴志襄阳饶助之后徙居永安】

（臣）等谨按徐广注史记曰饶属北海又曰饶阳在河间然则北海之饶宜为得姓之始

桃氏 【姓氏辨证曰其先食邑桃邱氏焉或曰周礼攻金之人有桃氏为剑者以世官为氏后燕慕容熙臣桃仁北燕勋臣子弟桃豹为左常侍】

羊角氏 【姓氏辨证曰卫大夫食采羊角以邑为氏】

养氏 【姓氏辨证曰楚大夫食邑于养因以为氏又明养雄卫指挥养贤都指挥同知】

■氏 【姓氏辨证曰案后汉马援征五溪蛮军次下■有壶头与充两道可入注曰下■县名属长沙县故城今辰州沅陵县■音字充反详此即或有上■下■汉隼不疑之先以邑为氏】

盖氏 【出自齐大夫食采于盖以为氏明盖天麟兴化知府】

（臣）等谨按移氏虫氏垣氏饶氏桃氏羊角氏养氏■氏盖氏郑樵皆收入四声

及复姓而不详所自今据辨证补之又宋元明有人名
可考者附录以广见闻亦郑樵于希姓采宋登科录之例

△以地为氏

期思氏 【风俗通曰楚大夫居期思城因以为氏姓氏辨证云春秋楚期思公复遂之后有去思单为时期氏】

延氏 【姓氏辨证曰出自吴公子札食采延陵及州来去陵称延曰延州来季子后以为氏宋延松年芜湖令明延祥户部侍郎延瑁给事中】

蓬氏 【统谱曰周封支于蓬州因以为氏酉阳杂俎蓬球北海人】

西河氏 【后汉书有西河子与相马法盖其先以地为氏】

洋氏 【姓氏辨证曰扬州海陵多此姓白云其先因洋以为氏】

枞氏 【姓氏辨证曰汉高祖命枞公与周苛守荥阳师古曰纵千容反则枞亦氏也地理志有枞阳必其先有以地为氏者】

邹屠氏 【拾遗记曰帝尝妃邹屠氏之女也轩辕去蚩尤之凶迁其民善者于邹屠之地恶者于有北之乡其先以地命族后分为邹氏屠氏】

（臣）等谨案郑樵于邹氏入以邑为氏屠氏入以技为氏与拾遗记所云后分为邹氏屠氏之说迥异存之以备参考

雒氏 【即雍字地名去声左传有雍纠周雒子宋雒美安州置制使明雒子重钦天监博士】

邗氏 【周邗子明邗端福州卫指挥】

乘邱氏 【鲁地春秋时鲁庄公十年败宋师于乘邱后居其地者以为氏汉艺文志有乘邱子五篇注曰六国时人】

句氏 【句吴地名周句如越大夫宋句希仲吉筠二州刺史明句玺广东都司】

柄氏 【姓源韵谱曰泰山下邑名居者因以为氏】

太室氏 【姓氏辨证曰太室山在河南阳城县西南其先民人因山为氏】

函谷氏 【姓氏辨证曰其先为函谷关守关之吏因以为氏】

邛氏 【见姓苑蜀中地名列仙传周有邛疏明邛林汀州府同知】

△以乡为氏

练氏 【姓氏辨证曰今建安多此姓自言先世食邑于闽之练乡因以为氏明春坊练坝御史大夫练子宁】

（臣）等谨案练氏郑樵收入四声不详所自今据邓名世说补

△以亭为氏

■ 〈共卩〉氏 【统谱曰亭名以亭为氏】

（臣）等谨案黄公绍韵会补■〈共阝〉亭名今南康郡志有■〈共阝〉亭湖无■〈共阝〉亭盖■〈共阝〉字始为亭名后人连二字为湖名也统谱之言可据

△以字为氏

公若氏 【姓氏辨证曰出自姬姓季武子之子公亥字公若其孙藐以王父字为氏】

公思氏 【姓氏辨证曰鲁季氏之族曰公思展后人以字为氏】

公交车氏 【出自嬴姓姓氏辨证曰秦公子针字伯车后世别为公交车氏】

颓氏 【姓氏辨证曰出自周大夫颓叔之后】

（臣）等谨案邵氏姓解曰史记有颓当考颓当姓韩颓当名也宜从邓名世说为是农氏 【风俗通曰神农之后明农益永乐举人农志科靖州学正】

邛氏 【姓苑曰出自穆公子邛后以王父字为氏周邛段郑大夫宋邛况进士】

螭氏 【统谱曰高阳氏玄孙螭牛之后周螭固见檀弓】

子穆氏 【世本曰陈僖子生子穆安因为子穆氏】

子车氏 【姓氏辨证曰秦大夫以王父字为氏春秋时子车氏奄息仲行针虎殉葬秦穆公国人哀其为秦之良赋黄鸟诗】

虎氏 【姓氏辨证曰出自高辛氏子八元伯虎之后子华子虎以字为氏汉虎旗为合浦太守元虎兼任知县明虎臣太学生以直谏闻】

遏氏 【出自妘姓虞遏父为周陶正支孙以字为氏】

夏丁氏 【姓氏辨证曰卫太叔悼子之甥曰夏戊其祖字丁以王父字为夏丁氏】

子木氏 【姓氏辨证曰出自牟姓楚平王太子建字子木为少师费无极所谮王使人杀之建惧奔吴其子孙以王父字为氏】

子高氏 【左传卫大夫子高之后】

将闾氏 【姓氏辨证曰出自秦公子将闾之后以字为氏】

（臣）等谨案将闾氏郑樵列入复姓不详所自今补

△以名为氏

公牛氏 【姓源韵谱曰齐公子牛之后淮南子有公牛哀病七日而化为虎】

公牵氏 【世本曰齐公子牵之后有公牵氏】

公仇氏 【姓苑曰后汉零陵太守公仇称出自晋穆侯太子仇之后为公仇氏】

公朱氏 【出自牟姓世本曰楚公子朱之后】

公房氏 【姓氏辨证曰出自牟姓楚公子房之后古今人表有公房皮】

公金氏 【出自嬴姓世本曰秦公子金之后有公金氏】

敦氏 【陈留风俗传姑姓之后又曰秦史敦之后汉敦倚明敦铎保定府推官】

佛氏 【统谱曰鲁佛肸之后以名为氏明佛正卫千户】

繇氏 【后汉书有西部督繇繇延注曰繇氏咎繇之后】

芒氏 【姓氏辨证曰出自夏王帝芒之后史记魏有芒卯明芒文缜国子学正】

印氏 【姓苑出自穆公子印之后以王父字为氏后蜀李雄遣李寿攻朱提印攀为前锋】

高氏 【姓解曰音薛契之后世为氏汉书契作高】

豫氏 【出自姬姓之后为毕氏有毕阳者其孙豫让事智伯报智伯之仇谋攻赵襄子史记宋有渔者豫且必其后也明豫铕上饶知县】

会氏 【风俗通曰陆终第六子会人之后汉会栩武阳令明会同云都丞】

大彭氏 【姓氏辨证曰夏诸侯大彭之后】

大连氏 【姓氏辨证曰出自古贤人大连之后】

衅氏 【姓氏辨证曰出自鲁宗人衅夏之后亦作豐】

佼氏 【后汉书刘永传更始拜西防贼帅佼强为横行将军注曰周原伯佼之后南北朝佼长生为盗蛮校尉】

喻氏 【姓氏辨证曰出自姬姓郑公子渝弥周威王时为郑司徒别族为渝氏历秦汉至景帝皇后讳志字阿渝避讳改水为口因为喻】

氏又南史陈庆之传云梁世寒门达者唯陈庆之与俞药药为武帝左右帝谓俞氏无先贤改姓喻历位云旗将军安州刺史唐咸通中有刺史

喻士珍宋有喻樗喻偃俱登进士明喻茂坚历官兵部尚书喻智历官都御史】

（臣）等谨案喻氏郑樵列入四声不详所出邓名世姓氏辨证颇有论据故录以补樵志之未及然左傅郑有俞弥无名渝弥者名世此言未知何本或堵氏至俞弥之后复别为渝氏俞与渝转相误也

举氏 【姓解曰楚椒举之后以名为氏】

鞅氏 【姓氏辨证曰出晋卿赵鞅之后】

犀氏 【姓氏辨证曰出自战国时魏将犀武之后元和姓纂曰秦有犀首邵氏姓解曰姓书元有此氏不敢削之皆误矣案庄子音义犀首魏官名公孙衍尝为此官非以犀为氏当以犀武之后为正明孟县主簿犀希古训导犀仲德】

犀首魏官名公孙衍尝为此官非以犀为氏当以犀武之后为正明孟县主簿犀希古训导犀仲德】

（臣）等谨案举氏鞅氏犀氏郑樵皆列入四声不详所自今补

△以姓为氏

葳氏 【姓氏辨证曰黄帝子得姓十四人其一曰葳氏】

铄氏 【姓氏辨证曰其先姚氏避难去女从金颍川郟县铄氏汉桂阳太守猛生卫

尉安成侯期期二子葛陵侯丹建平侯统丹生舒舒

生羽羽生蔡皆嗣侯】

（臣）等谨案郑樵云姚氏舜后至陈敬仲仕齐为田氏又至田丰子恢避王莽乱居吴郡改姓妘氏据此以为姚妘二姓可通而姚之为姚独未之详考仅列姚字于四声兹特补之

曼氏 【姓氏辨证曰出自子姓商王后春秋时为邓国楚郑皆有夫人邓曼也】

（臣）等谨案夫人邓曼犹齐姜宋子之一称国一称姓即以曼为氏也今补入以姓为氏

△诸方大姓

■〈鏹，去金〉氏 【姓氏辨证曰今辰沅州蛮种有此氏谓之■〈鏹，去金〉溪蛮】

梯氏 【西秦乞伏炽盘遣建威将军梯君破彭利和于湟州】

可氏 【后魏阿伏干可地干氏并改为可氏望出河南唐可中止谏大夫宋可懋绍兴进士明可越永乐举人】

裕氏 【西秦乞伏国仁时鲜卑大夫裕苟来降拜建忠将军兰泉侯】

诗氏 【姓纂望出合浦汉诗索交趾朱鸢人妻征侧甚勇同女弟征贰反】

受氏 【音到亦呼作藻集韵音号后魏河南姓也】

普氏 【后魏献帝次兄为普氏宋普贵土司赐王爵元普元理至正进士明普仲贤仕至湖广佾事】

瓦氏 【明广西土官有瓦氏】

者氏 【明云南土苗有者氏】

爱氏 【金爱薛西域弗林人命掌西域星历医药二司事爱申定州刺史明爱莫助永昌府通判】

沓氏 【官氏志沓卢氏改为沓氏南北朝沓龙超益州将】

薪氏 【夷姓薪犁之国】

菽氏 【西域天竺人姓】

■〈广外本内〉氏 【音本正字通云戎姓】

獾氏 【音猎正字通云戎姓】

北氏 【正字通云高丽姓】

妞氏 【正字通云高丽姓】

大氏 【高丽别种渤海王大乞乞仲象】

奢氏 【音蛇苗姓明万厯间有奢崇明奢进】

劝氏 【唐南诏王劝龙成】

倡氏 【官氏志姒改为倡又后魏葛为氏改为倡明倡锺户部尚书】

△以官为氏

公巫氏 【姓氏辨证曰鲁大夫有公巫召伯仲其子孙以官为氏】

公右氏 【姓氏辨证曰春秋国君戎右谓之公右必有以世官为氏者】

公族氏 【姓氏辨证曰其先出自晋公族大夫之后春秋时骊姬乱晋无畜羣公子自是晋无公族及成公自周归晋始宦卿之适子以为公族故赵盾请以括为公族韩厥子无忌谓之公族穆子其后遂有以官为氏者】

工师氏 【姓氏辨证曰其先出自古官治木者以官为氏汉有平悼侯工师喜子靖侯奴孙执嗣】

左师氏 【姓氏辨证曰出自子姓宋公子鱼世为左师以官为氏】

（臣）等谨案郑樵收右师氏亦云宋庄公生公子申世为右师氏独不收左师氏似漏然赵亦有左师之官左师氏或出自赵未可知也

左行氏 【姓氏辨证曰春秋晋文公时先蔑将左行后以为氏汉有御史左行恢】

左公氏 【姓解曰卫左公子泄之后】

右公氏 【姓氏辨证曰卫右公子职之后】

（臣）等谨案卫官名有左公子右公子

土氏 【句龙为后土子孙为氏宋土皋屯田郎中明土进良宣德进士】

行氏 【周有大行人之官子孙氏焉汉行巡隗嚣相明山西平阳有行氏音衡】

（臣）等谨案行氏郑樵注于行人氏之下今单姓繁而复姓罕见故另为标出

尉氏 【姓氏辨证曰出自古司寇之官曰尉氏独以其官为族汉地理志陈留尉氏县应劭曰古狱官曰尉氏郑之别族也瓚曰郑大夫尉氏之邑师古曰郑大夫尉氏亦以掌狱之官故为族耳应说是也郑有尉止尉翩】

（臣）等谨案尉氏郑樵收入去入两声一如字一音郁皆引郑大夫尉止尉翩是一人之氏无定呼矣且不详所自今据邓名世说补之尉止尉翩读为去声

大士氏 【姓氏辨证曰古狱官曰大士以官为氏讹为太】

（臣）等谨案太士氏郑樵入以次为氏不详所自今更正

△以凶德为氏

饕餮氏 【南史梁武陵王纪举兵败有司请绝属籍元帝赐姓饕餮氏】

毒氏 【唐宰相窦怀贞与太平公主谋逆既败投水死追戮其尸改姓毒氏】

△以基德为氏

益寿氏 【新唐书世系表老子父李氏名干字符果为周上御大夫娶益寿氏女曰婴敷生耳】

△以谥为氏

景氏 【姓氏辨证曰出自姜姓齐景公之后以谥为氏景丑景春皆其裔也战国时

景氏世为楚相景翠景鲤景含尤其显者或曰楚之公族别为景氏】

（臣）等谨案景氏郑樵入以族为氏注云半姓楚公族也又加案云景谥也楚未之闻疑齐景公后盛繁此为姜姓之族与是樵亦疑前注之有误也今据邓名世说更入以谥为氏

△以事为氏

成功氏 【统谱禹治水有功少子遂以为氏汉成功恢禹】

校师氏 【统谱子产称乡校为师遂曰校师氏】

△以名氏为氏

具封氏 【姓纂曰郑公子具食采开封因氏焉郑大夫具封狐人】

（臣）等谨案具封郑志误作封具今据姓纂改正

△以国爵为氏 【邑爵附】

逢侯氏 【史记世家楚怀王有裨将军逢侯丑亦夏商诸侯之后以国爵为氏者】

白公氏 【姓解曰楚白公胜之后有为氏者】

尹公氏 【姓氏辨证曰卫大夫尹公佗之后】

（臣）等谨案少昊之子封于尹城因以为氏世为周卿士食采于尹尹公佗盖其后人居卫者别族为尹公氏如韩侯子孙为韩侯氏是也

△以官氏为氏

伍相氏 【姓纂曰吴相伍员子孙吴人号之伍相氏】

△代北复姓

阿热氏 【唐回鹘传黠戛斯古坚昆国也自言李陵之后其君曰阿热遂姓阿热氏驻牙青山】

俟斤氏 【唐史突厥大臣曰俟斤世其官而无员限其先世官者为俟斤氏】

（臣）等谨案突厥别部典兵者有曰俟斤有曰努失毕俟斤

吐浑氏 【姓氏辨证曰与吐谷浑独孤浑渴足浑并为四氏】

吐缶氏 【后魏官氏望出河南】

可悉氏 【后魏有都幢将暨阳子可悉陵】

受酉氏 【姓解曰后魏有受酉氏】

布却氏 【见姓苑】

富陵氏 【见后魏官氏志】

斛谷氏 【南燕有斛谷提为慕容超将】

斛粟氏 【姓氏录曰代北斛粟氏后改为斛斯氏】

仆兰氏 【后魏官氏志仆兰氏改为仆氏】

悉罗氏 【慕容垂尝请尚书郎悉罗腾从军】

乞连氏 【西秦录有丞相乞连出都】

没鹿氏 【纥豆陵人本没鹿四部大人因氏焉或为没鹿氏】

达勃氏 【后改为褒氏】

车成氏 【见后魏河南官氏志】

△诸方复姓

颇超氏 【新唐书党项传云党项以姓别为部故有细封氏费听氏往利氏颇超氏野辞氏房当氏米禽氏拓拔氏】

温月氏 【唐书康居王姓温月先居张掖祁连山昭武城为突厥所破南依葱岭遂有其地支庶皆改姓昭武示不忘本也】

（臣）等谨案昭武氏已见郑志温月氏樵失载今补

破丑氏 【唐党项传庆州有破丑氏族三野利氏族五把利氏族一与吐蕃姻援扰边凡十年代宗用郭子仪计遣使招慰于是破丑野利把利三部皆入朝】

（臣）等谨案宋史夏国传其后妃有野利氏今西夏姓俱附于辽氏族卷后此不重列

刹利氏 【南蛮单国王姓刹利名尸陵伽】

（臣）等谨案旧唐书云中天竺国王姓乞利啞氏或云刹利氏岂西竺南蛮相近故传闻之讹耶

闭珊氏 【唐闭珊居集沾乌蛮也精卜筮之学夷中称为筮师】

真人氏 【白孔六帖建中元年日本国使者真人与能献方物兴能善书真人盖因官而氏也】

（臣）等谨案郑志有朝臣氏无真人氏注云日本国使臣朝臣真人是误以二氏为一人名姓也考张九成敕日本国王书有真人广城朝臣而代是二人二姓无疑今据补入

阿每氏 【旧唐书曰后王姓阿每氏】

霍里氏 【汉霍里子高朝鲜人】

毗河氏 【姓氏辨证曰百济人姓】

元氏氏 【乞姓羌也唐元氏舒箴校尉】

瞿昙氏 【隋书暹罗国王姓】

嘍哒氏 【刘璠梁典云滑国姓嘍哒后裔以姓为国号转讹为挹怛】

欢斯氏 【寰宇志琉球国王姓欢斯名渴刺兜】

△代北三字姓

多览葛氏 【唐书回鹘九姓一曰多览葛亦曰多滥薛延陀已灭其酋多滥葛末与

回纥皆入朝以其地为燕都督府授末都督末死以
多滥葛塞匐继为都督】

（臣）等谨案白孔六帖所载回纥九姓曰药罗葛曰胡咄葛曰咄罗勿曰貌歌息
纥曰阿勿唃曰葛萨曰斛温素曰药勿葛曰奚邪勿存
之以备参考

俟伏侯氏 【后魏有俟伏侯氏后改为侯氏】

伏俟龙氏 【后周大将军伏俟龙惠】

户卢提氏 【唐吐蕃传德宗即位遣使韦伦归蕃俘是时乞立赞为赞普姓户卢提
氏】

一利啞氏 【唐回鹘傅薛延陀者先与薛种杂居后灭延陀部有之因号薛延陀姓
一利啞氏在诸部最雄长】

△诸方四字姓

失利波罗氏 【哥罗王姓】

刹剥邪伽氏 【波利国姓】

牙罗五得氏 【婆罗门王姓】

钦定续通志卷八十五

●钦定续通志卷八十六 氏族畧六

氏族畧 【六】

补遗

○补遗二

平声

△平声

忠 【汉忠谭明洪武初忠仲简官刑部郎中】

工 【汉工里弹宋大观进士工稷成都人】

攻 【汉攻生单】

冲 【姓解汉博士冲和明冲敬香山县丞以劳瘁卒于官】

功 【风俗通晋功景】

全 【明洪武举人全希颜又全寅学京房易正统间占英宗北狩及复辟岁月皆验
】

隆 【明永乐举人隆俊邵武人宣德中监察御史隆英利津人】

嵩 【西京杂记汉成帝时高安嵩真与玄菟曹元理并明算术真尝自算其寿七十
三绥和元年正月二十五日晡时死具书于壁后以
正月二十四日死其妻曰见其算时长下一筹今果校后一日又自卜葬地依其言掘得
古时空椁即以葬焉】

公 【○宋绍兴进士公傅明弘治进士右佥都御史公勉仁嘉靖进士公跻奎】

酆 【○宋酆康英州知州明洪武御史酆洪正统进士酆海】

雄 【○宋雄飞政和进士】

彤 【○明永乐中三水县教谕彤浩又南昌千户彤铠】

醴 【○明醴象闰弘治中任山西霍州同知郟县人】

从 【○明弘治进士从兰官南工部尚书隆庆进士从文蔚】

弓 【○明宣德举人弓荇正德进士弓元任御史】

通 【○明通仁本山西朔州判官】

鸿 【○明鸿佑乐昌县丞鸿逵广州卫千户】

崇 【○明崇刚扬州卫都指挥靖难被执不屈而死崇高任知县】

红 【○明红尚朱郟西县丞红蠡郟武令】

（臣）等谨案公氏酆氏雄氏彤氏醴氏从氏弓氏通氏鸿氏崇氏红氏俱见郑志因希姓续载宋明人名即郑志分类者亦归入四声依韵附见以便稽考故于注首加圈别之后仿此

供 【明供仲序湖广攸县丞】

从 【明从龙顺天举人任知县有政声】

恭 【○宋恭辅通判龚州有政声明恭昭天顺进士官都御史】

重 【○明重省弘治举人又陕西镇平县有重姓平声】

松 【○明松冕长芦运司经厯】

庸 【○明庸以弘黄州府通判】

墉 【○明墉琼庆远府照磨】

冬 【○明冬青清河县训导】

容 【○明容善永乐进士容悌与香山人本县教谕以孝闻】

佟 【○明佟珍成化进士佟应龙正德进士】

■ 〈冫 〉 〈女上巾下〉 〉 【统谱才子厯■ 〈冫 〉 〈女上巾下〉 〉之后明■ 〈冫 〉 〈女上巾下〉 〉铭洪武中永嘉知县■ 〈冫 〉 〈女上巾下〉 〉垣山西都司经厯】

厯 【汉古今人表厯圉】

邦 【○明邦严顺德府通判】

涪 【○明广东番禺有涪姓】

双 【○明双凤鸣隆庆进士双瓚双桂宣德举人】

耆 【尧姓伊耆氏之后周耆域西域人善呪水】

祈 【与祁同元祁望芳狄道人以巨家擢守临洮有政绩明祈凤毛正德举人】

私 【汉私匡】

骐 【汉骐殷下邳令】
维 【汉维泛成都人光武时以符术动人明陕西庆阳府有维氏】
眉 【周眉间尺干将莫邪子宋眉寿政和进士明眉旭洪武中举孝廉】
羈 【见姓苑汉羈栩上党人】
糜 【见姓苑三国糜竺平乐太守注春秋谷梁传明糜子实永乐举人】
惟 【见姓苑后魏桓皇后惟氏宋惟官方南安知县】
颐 【见姓苑隋颐熨象川人与兄灵同受学于郑铎】
丌 【唐丌实左军副使】
葩 【宋葩成之政和进士】
縻 【宋縻师元新昌令明縻焕洪武举人縻玉顺庆府同知】
葵 【宋葵方直仕员外郎明葵玉顺庆府同知】
知 【见姓苑宋知浹通春秋左传明知陝景泰进士】
贻 【宋贻范华亭县尹贻训知汀州】
规 【见姓苑明规恂庆远府教授】
谁 【明谁能九江府照磨】
基 【明基厚湖广道州吏目】
毗 【明毗宠正统举人】
尼 【见姓苑明尼养德洛阳教谕尼江正德举人】
匙 【明匙广嘉靖中贡士任州判】
思 【见姓苑明思志道建安县丞】

（臣）等谨案思氏统谱注以谥为氏不详始自何人不敢据以分类

兹 【○宋兹成熙宁进士】
仪 【○宋仪大初连州佾判明仪智赠太子少师谥文简】
池 【○宋池鄂治平进士池梦经咸淳状元明池龙正德进士】
斯 【○宋斯泽知南康军明斯干长沙通判斯正嘉靖举人】
弥 【○宋弥冲祥符登第明弥坚刑科给事中】
其 【○宋其德林儒林郎明其福崇德县丞】
睢 【○元睢明义弘文馆学士明睢稼洪武中中书右参政】
宜 【○元宜桂可博通经史明宜顺正德举人宜秉英山知县】
彬 【○明彬纯绥德州判官】
锜 【○明锜胜庐江县训导】
丕 【○明丕承文三河县训导】
之 【○明之辅秦州教谕之福锦衣卫指挥】
驰 【○明驰九垓成化举人】

夷 【○明夷福福州卫指挥】
 元 【○明元葛商南县训导元诗教给事中】
 迟 【○明迟适太仆寺丞迟凤翔嘉靖进士官兵部侍郎】
 慈 【○明慈止大足县训导】
 夔 【○明夔信成化举人】
 奇 【○明奇景中洪武举人】
 熙 【○明熙光宣仪制郎中】
 蕲 【○明蕲航市舶司提举】
 尸 【○明尸聪尸帛永乐举人】
 资 【○明资颐嘉靖举人】
 怡 【○明怡居敬耀州训导】
 睦 【○明睦友直任府通判睦紘正德进士睦明才嘉靖进士】
 飞 【宋飞英朝奉郎明飞瀑永乐间户部郎中】
 贲 【音微○明贲胜建宁千户】
 衣 【○明衣勉仁凉州卫经历衣佑华亭县丞】
 希 【○宋希昔希德嘉定进士希绩坐元佑党】
 絮 【汉张敞传有京兆捕贼掾絮爱明絮乐心永乐中任郟县丞】
 役 【汉役讽光禄勋河南贤士】
 誉 【晋誉粹平原太守明誉哲山东濮州判官誉绍芳嘉靖举人】
 渔 【见姓苑宋渔仲修庆都尹】
 书 【明书永瓯宁县主簿】
 ■ 〈月〈匕上匕下〉〉 【音胥明浙江归安县有■〈月〈匕上匕下〉〉姓】
 初 【○明初颢举贤良方初杲正德进士谏大礼廷杖官御史】
 遽 【○明遽廷臣永安知县】
 渠 【○明渠仲宁滕县人精通地理永乐间召试之用量天尺度地之物曰其下有石如虎掘之果验授本科训术渠兆昌隆庆举人】
 疏 【○明疏勤陕西苑马寺监正疏冕正统贡士】
 无 【周无骇鲁人宋无光胄判南康军明无能淳化县丞又新郑县有无氏】
 驹 【周驹伯汉功臣表驹几】
 芦 【魏莫芦氏改芦氏通作卢】
 吁 【周吁子汉吁子先成都人寿百岁】
 荼 【汉荼恬江都王谒者】
 儒 【见韵会汉儒光】
 侏 【宋侏侯新涂县尹】

湖 【宋湖陶太常博士明湖澄交趾谅江府照磨湖湘福宁州吏目】
钩 【见姓苑宋钩光祖洪州都督副使】
（臣）等谨案宋句姓避高宗嫌名改钩
铢 【明铢炫宏治举人】
孤 【见姓苑明孤启德化县丞孤凤正德举人】
莆 【见氏族通志明莆森零都知县】
敷 【明敷季雅松溪知县】
奴 【明奴管湖广都司】
芜 【明芜恕江阴大使】
涂 【宋涂安知靖州】
浣 【明浣平成都教授】
扶 【○明扶明生海康训导扶让宣化知县】
狐 【○明狐忠中书舍人】
辜 【○元辜中永丰尹尚德化明辜皋知德兴县辜敏道永乐进士】
呼 【○明呼文瞻昆山知县呼为卿嘉靖进士任户部主事】
邾 【○明邾安洪武中以人材任渭南知县又大使邾恕】
舆 【○明舆信海丰县丞】
庐 【○明庐坦南城知县】
衢 【○明衢通建阳县丞】
提 【周提弥明】
畦 【汉畦观后燕中书令畦邃】
沂 【元沂川陶阳尹】
黎 【明黎公弁建阳训导又主簿黎希古】
霓 【明霓济零都知县】
鸡 【明鸡鸣时陕西苑马寺监正】
西 【○宋西达邵武推官元西汉杰封南阳郡侯明西管都指挥西华府通判】
稽 【○明稽照滦州守】
怀 【○明怀进忠鸿胪寺序班怀宽大埔县丞】
淮 【○明淮锡通州同知】
槐 【○宋槐京尚书郎明槐寅都指挥槐天相太平府推官】
追 【左传晋大夫追喜伐郑之役以戈杀犬于门中以示闲暇】
材 【宋材致知韶州】
杯 【见姓苑宋杯承宠知洪州】
霫 【宋霫恢府教授】

哈 【明哈左弘治举人平乡教谕】
才 【明才俊高邮州判才宽天顺进士历官宣大总督兵部尚书】
魁 【见姓苑明魁伦黄岩县主簿】
台 【○明台鼎长阳知县】
台 【○宋台亨与司马温公着闾阎之书明台谦台献皆任训导】
开 【○宋开赵英州刺史尝取肝救父明开济举明经仕至刑部尚书】
莱 【○明莱从善新喻教谕】
枚 【○明枚伦刑部主事枚应发吴县人事母至孝】
哀 【○明哀贤宝庆府推官哀冲霄巩昌府通判哀世用举人上疏改衷姓】
回 【○明回谦监察御史升知府回裔蒲州知州】
亲 【周亲弗齐人相秦汉亲肥亲宋】
邻 【汉艺文志道家有老子邻氏经传四篇】
臣 【见姓苑汉臣综安东将军唐臣悦撰隋平陈纪】
彬 【见姓苑唐彬霁撰秘苑状启四卷】
蟪 【唐咸通中有蟪固知音律】
银 【汉银木相川兵马明银嵩任知州银镜由进士官户部主事】
淳 【姓苑曰吴人姓宋淳坤端平进士明淳英景泰举人】
寅 【见姓苑宋寅午辰嘉兴教授】
伸 【宋伸意政和进士】
人 【见姓苑明人杰琼州卫百户】
尘 【明尘洪沙河县训导尘昂霄任赣州府经历】
神 【○宋神潜元符进士神应龙开宝进士明神英泾阳伯神德喜永乐举人】
钧 【○宋钧昌期隆兴进士钧仲甫大观进士】
因 【○明因礼景泰举人因綱成化举人】
新 【○明新度南城县教谕】
宾 【○明宾思贵洪武举人宾礼庆永州府推官以循良称】
闇 【○明闇敬洪武中任安吉州知州闇全宣德举人】
莘 【○明莘野洪武初自明经为本县训导升枣强县莘九经安吉州学正】
郇 【○明郇旃洪武进士郇存正德安庆府推官】
君 【周君陈君牙明君助漳州知府】
懃 【宋懃渊端平进士懃玄元佑进士明懃会弘治举人梧州府同知】
斤 【望出代郡明斤其明嘉靖贡士】
忻 【明忻恭逊成化举人任教谕】
勤 【○明勤秉礼永乐举人勤玺成化进士】

熏 【○明熏成建宁卫千户】
 根 【见姓苑周根牟子】
 奔 【宋奔衍咸淳进士】
 棖 【汉棖终古公钱塘人斩楼船将军】
 存 【见姓苑宋存光孙宝佑进士】
 藩 【明藩俊嘉靖举人清远知县】
 贲 【音奔明贲隆贲清邵武卫千户】
 辕 【○明辕朴鸿胪丞】
 门 【○明门克新洪武中由训导历官礼部尚书门相景泰进士】
 尊 【○明尊德太湖县丞】
 恩 【○明恩光鸿胪丞】
 轩 【○明轩輓永乐进士历官左都御史轩尚朱庐江知县】
 论 【○明论中立长沙府经历】
 ■ 〈赞支〉 【汉■ 〈赞支〉 授字仲华见海西先贤传】
 宽 【明宽彻洪武进士宽和永从知县】
 欢 【明欢慨丰城县丞】
 完 【见姓苑明完彦文南丰丞完愚归善知县】
 奸 【明奸闽平山卫千户】
 官 【○宋官鉴见朱子石鼓书院记明官谦知汝州官驹永乐进士】
 丹 【○宋丹山判永兴军明丹衷永乐举人】
 但 【○平声宋但忠盐运判官明但存礼洪武举人但懋户部郎中】
 端 【○明端澄洪武进士端宏景泰进士端廷赦历官都御史】
 干 【○明干思健钦天监春官正】
 兰 【○明兰侃洪武进士兰玉成化进士兰廷瑞有诗名】
 寒 【○明寒翔西平教谕】
 盘 【○明盘铭武进县丞】
 冠 【○明冠端安塞县丞】
 还 【周还无社萧大夫】
 蔺 【汉蔺忌中尉明蔺昱以材任知县】
 菅 【见姓苑菅禹明菅时中菅谷岐洪武进士菅琪宣德进士任湖广布政】
 穿 【见姓苑周穿封戌楚人】
 渊 【周渊湫齐大夫宋渊丰循州司马明渊澄长山县丞】
 千 【汉千献蜀郡都尉明千万宜山县典史】
 铨 【见姓苑汉铨征补羌校尉】

专 【汉专俊专轼专智专同专瓌俱见印藪】
 天 【见姓苑汉天高长社令】
 阙 【汉阙典代将】
 联 【晋联谦辅国将军联谭内史】
 藿 【唐藿璇中书舍人明藿永均光禄大夫】
 钳 【唐钳耳长兴令】
 阡 【唐阡能印州牙官】
 前 【见姓苑五代前刺晋人飞龙将】
 眠 【明眠民悦永乐乙酉选二甲杨相等二十六人于文渊阁肄业民悦预焉】
 仙 【见姓苑宋仙源固安知县明仙名合江知县】
 年 【见姓苑明年富永乐举人历官户部尚书谥恭定】
 旃 【见姓苑明旃英贡士任教谕】
 圆 【见姓苑明河南南阳府有圆氏】
 旋 【明旋善宣德贡士】
 骈 【见姓苑明骈恭户部主事骈哲洪武举人】
 烟 【明广东有此姓】
 坚 【○宋坚胡常知滁州明坚晟博平知县】
 肩 【○明肩固洪武中贡士】
 贤 【○明贤宣顺天府大使】
 弦 【○明弦尚强盩厔主簿】
 然 【○明然昌辽东卫经历】
 蹇 【○明蹇升洪武举人教谕蹇聪景泰举人蹇宏绍兴同知】
 寮 【见姓苑隋寮允后魏侍中】
 浇 【明浇彧成化间副总兵】
 瓢 【明瓢雄长阳县典史】
 钊 【明钊朝佩广西梧州卫指挥】
 么 【见姓苑明么谦通州训导么桓无锡县丞】
 稍 【明稍腾汉任知州】
 寥 【明寥贵永春县丞寥啤弘治举人】
 朝 【音潮南北朝朝景焕宋朝思诚湖州刺史明朝祉训导朝泰言永丰丞】
 （臣）等谨案郑志所载朝氏音雕引蔡大夫朝吾统谱两收今依统谱另列
 聊 【○宋聊世能大中大夫明聊让景泰进士聊珠湖口教谕】
 超 【○宋超必煜绍定进士明超童卫千户超华卫经历】
 昭 【○宋昭迥元佑进士】

韶 【○明韶护按察僉事】
 摇 【○明摇昌句容教谕】
 招 【○明招用永乐举人招于莘招宗广知县】
 要 【○明要绣成化中女为宪宗妃拜光禄署正要毅知县】
 尧 【○宋尧允恭邃于易学尧宗尧元符进士明尧卿成化进士】
 桥 【○明桥宗义什邡县丞】
 匏 【汉匏敏山阳令】
 钞 【见姓苑明钞秀正德举人钞介嘉靖进士】
 抄 【明抄思永乐举人】
 操 【见姓苑汉操乘宋操斗祥淳佑进士明操公琬元史纂修官】
 毫 【汉毫康女弟为桓帝后封安阳侯】
 豪 【宋豪彦干道进士明豪英宣都知县】
 糟 【明糟士奇嘉靖举人】
 皋 【○明皋玉稷山教谕】
 蒿 【○明蒿宾嘉靖进士】
 挈 【周挈错卫臣】
 苛 【汉苛异见印藪】
 佗 【音他汉佗羽明佗盛永乐进士佗超正统举人任知州】
 多 【宋功臣表多军故东粤将汉兵至弃甲降武帝元封元年封无锡侯千户薨子卯嗣位宋多岳从牟袞学】

（臣）等谨案姓氏辨证曰李奇注两粤传及汉书音义皆曰多军名也且粤姓驹氏则多军宜姓驹然其子卯不以姓着则必多为氏矣近世临川有疡医皆多氏而不知其自出若非无锡侯之裔必多于多兰之类有改为多氏者

■ 〈卅侈〉 【音多汉■ 〈卅侈〉 宗】

娥 【见姓苑北齐娥永乐明娥乔永乐中任知县】
 𠂔 【宋𠂔辅秀州教授明𠂔文光四川巴县令以笃学孝义称】

（臣）等谨案南唐书音释云𠂔彦池州牧事迹无考姓书无𠂔姓但有过涡二姓并音戈或以𠂔即涡非也或曰即过去辵亦非郑樵氏族畧以古帝女涡之后有媯氏媯𠂔音同当是媯而省去女文尔

禾 【列子范氏之上客有禾生宋禾实知安远军】
 河 【南北朝河湔余于令宋河灏绍兴进士明河源知襄阳府以治行称】
 庾 【音陀明庾五常南阳卫指挥】

（臣）等谨案明陆容菽园杂记曰广西有庾姓音托今吴中人以两臂量物曰托

度既与度似又从尺疑即此统谱收入五歌音陀殆声
转之讹也

鹅 【明河南南郑县有鹅氏】

轲 【见姓苑明轲兴卫千户】

阿 【○明阿其麟嘉靖进士】

葭 【汉葭众】

■ 〈庶卩〉 【宋■ 〈庶卩〉 巴福建路总管】

厓 【明厓成永乐举人任知府】

加 【明加傅正德举人】

杷 【○明杷安英山县丞】

巴 【○明巴镛永乐进士巴思明正德进士】

嘉 【○宋嘉正太平兴国进士明嘉缙景泰举人】

牙 【○明牙建旗金吾卫千户】

茶 【○明茶昱洛川训导茶孟元宝坻知县】

狂 【周狂狡宋大夫】

长 【见姓苑周长鱼矫宋长宗道宜州知州明长畧卫指挥长珊卫千户】

香 【见姓苑周香车谏齐宣王汉香坠见印蕝又二广有香氏】

枪 【见姓苑汉枪传】

防 【汉防广以孝闻明防盛永乐举人】

刚 【见姓苑宋有散祗侯刚仁遇明河南裕州有刚氏】

茫 【宋茫端臣承议郎】

藏 【见姓苑南北朝藏凝之尚书左丞五代藏珍北汉经畧使】

曩 【见姓苑曩秉彝举进士】

坊 【明坊蒙休寗县丞】

祥 【见姓苑明湖广荆州府有祥氏】

忙 【明忙义忙宗卫千户】

■ 〈廿殃〉 【明■ 〈廿殃〉 清宣德举人】

枨 【明枨锦句容训导】

光 【○宋光垂佑登科明光辉景泰举人】

皇 【○宋皇镇嘉熙进士明皇言材稷山尹】

昌 【○宋昌正大嘉定进士明昌应时嘉靖进士】

羌 【○宋羌子充治平进士明羌仁寅建平推官】

将 【○宋将继周绍兴进士明将翔邯鄣丞】

扬 【○宋扬无咎扬避举明扬光休永乐举人】

茘 【○明茘辉成化举人湖广均州有茘氏】

伶 【周伶州鸠汉伶征护羌校尉】

鸣 【见姓苑周鸣犊晋人】

争 【汉争不识争同见印藪】

夔 【明湖广松滋县有夔氏】

生 【汉生临明生用和桐城知县】

（臣）等谨案生氏姓苑注云阴飴生之后以名为氏考左传生作甥虽古字可通然非着族不敢据以分类

贞 【见姓苑宋贞德林汀州判】

清 【宋清贤端平进士清画同安知县】

并 【梁大同七年并韶富于词藻诣选求官吏部尚书蔡标以并姓无前贤除广阳门郎韶耻之还乡与李贲为死友】

坑 【见姓苑明坑应奎桐城主簿坑进良嘉靖进士】

■ 〈ㄅ〉 【明河南信阳有■ 〈ㄅ〉 氏】

明 【梁明僧绍宋明镐明天启中科臣明时举】

英 【○宋英秉臣明英文受永乐举人英继善洪熙举人任知县】

庚 【○宋庚乘国子博士】

营 【○宋营道学究出身明营世宝知真州】

衡 【○宋登科衡贡明衡岳桂林知府以廉吏称】

名 【○明名义都指挥名显工部员外郎】

征 【○明征俨征安贡士任训导】

卿 【○明卿文瑞嘉靖进士】

垧 【宋垧夫嘉定进士】

刑 【汉刑穆大司徒宋刑滌剑州法曹明刑哲香府长史刑昊应天府治中】

星 【○明星奎叙州推官】

经 【○明经纬纶举人经秀南康知县】

灵 【○明灵芳崞县知县】

零 【○明零畅博白知县】

寔 【○明寔全汤阴训导】

青 【○明青麟景泰举人青大青若水卫指挥】

呈 【汉呈绅见印藪】

凭 【唐凭祥兴黄巢之乱募兵勤王累功为将军宋凭正知泰州军】

僧 【见姓苑唐僧可朋诗人宋僧卖磨】

兴 【见姓苑汉兴渠济寔王谒者宋兴侯兴依嘉佑进士明内监兴安】

朋 【宋朋水安远知县朋山德化知县】
升 【宋升元中撰海外使臣记三卷】
升 【见姓苑南北朝升元瑞州路参军】
陵 【见姓苑明陵茂涿州同知陵澧通道知县】
藤 【明藤文泽同安县丞】
崩 【明崩愈坚固始县丞】
绳 【明绳服永福知县】
冰 【明冰如鉴宁川卫千户】
承 【○明承广南昌知事有诗名承林嘉靖进士】
稠 【汉稠雕封常乐侯】
彪 【望出齐郡周彪夫卫大夫宋彪虎臣从胡文定讲学明彪堂新宁知县】
聚 【见姓苑江南有此姓晋聚筹晋阳令】
璆 【宋璆瑜通贤知县】
镠 【宋镠文谟监潭州南岳庙明镠绩有诗名祖父孙皆以文学名世称三镠】
（臣）等谨案徐锴云书传无镠字疑即刘氏刀屈曲为之
犹 【宋犹道明嘉熙进士】
浮 【见姓苑明浮简抚州照磨】
油 【明油凤洪武举人知交趾谅江州油恭平凉通判】
攸 【○宋攸天佑福建宣慰使明攸承洪武中御史】
修 【○宋修武丹宝佑进士明修广顺大名府照磨】
由 【○金由居敬陵川尹明由礼门隆庆进士】
求 【○明求伯杰知郴州求琰九江通判】
缙 【○明缙贤曹州判官】
秋 【○明秋茂山东金事秋允弘治举人】
瓿 【○明瓿庚兴化县丞】
欧 【○与瓿仝明欧大任国子博士顺德人】
针 【明针惠隆庆举人】
吟 【见姓苑唐吟约嘉州刺史】
深 【见姓苑宋深訾朝散郎】
壬 【明壬士亨桂阳知县又湖州有壬姓】
今 【见姓苑明今颖嘉兴府教授】
鐔 【○明鐔鉴太平知府】
谏 【○宋谏重荆州刺史性至孝明谏贱生四川按察僉事以廉介称】
钦 【○宋钦德载不降元隐碧岩山中明钦拱极嘉靖进士】

寻 【○明寻适广西按察使】
参 【○明参安连江知县】
临 【○明临见诚平阳府经历】
琴 【○明琴惟和葭州知州】
男 【夏后有男氏之后周定州伪将男在贵江南人】
潭 【唐潭浚祠部郎中】
参 【宋参徐绍兴进士】
三 【见姓苑明三庸道祁门县丞】
澹 【水名见姓苑明澹文升长阳知县】
淡 【明淡成海盐知县淡恭莘县教谕】
郟 【○明郟微建平县丞】
蓝 【○明蓝玉】
添 【宋添颖循州司户明添礼增城知县】
粘 【明粘鹏洪武举人粘灿监察御史】
毡 【明毡求广西右参议毡徽慈利知县】
金 【见姓苑明金阳邢台教谕】
闫 【见姓苑明闫肃嘉靖举人闫三聘元氏知县】
淹 【隋淹彪莒州刺史】
占 【○宋占统太子中舍明占恩庄浪县丞】
苦 【○宋苦谷宣和进士】
潜 【○明潜溟永乐进士成祖呼为虎眼御史潜儒湖州府同知】
钗 【见姓苑明钗资钦天监灵台郎】
咸 【○明咸怀隆庆进士】
泛 【○明泛震句容教谕泛东平乐府经历】
凡 【○明陝西宁羌县有凡氏】

钦定续通志卷八十六

●钦定续通志卷八十七 氏族略七

氏族略 【七】

补遗

○补遗三

上声

去声

△上声

勇 【见姓苑周勇获吴大夫明勇金勇英卫千户】

宠 【见姓苑五代宠令图中门使】

拱 【见姓苑明拱北景泰进士拱廷臣嘉靖进士】

奉 【○宋奉真名医明奉科任知县奉明宣德举人】

（臣）等谨案奉氏已见郑志因希姓续载宋明人名即郑志分类者亦归入四声依韵附见以便稽考故于注首加圈别之后仿此

轨 【见姓苑周轨革精历算】

始 【见姓苑周始成秦章邯军侯】

蚁 【汉蚁逢见印藪】

市 【见姓苑汉市佩淮南王中郎明市朝卫经厯】

■ 〈底卩〉 【汉■ 〈底卩〉 林上郡太守】

以 【见姓苑汉以彤明以伯臣宣德中任断事】

累 【周累虎晋大夫南北朝累澄后赵将】

■ 〈穴上为下〉 【音委鲁大夫■ 〈穴上为下〉 氏】

喜 【见姓苑明喜姓都督又直隶唐县有喜氏】

底 【见姓苑明底蕴右都御史】

水 【见姓苑明水桓景泰进士水苏民邵武知县有政声】

祀 【见姓苑明祀渊洪武进士】

仕 【见姓苑明仕凤阳信主簿仕万仓成都府经厯】

耳 【见姓苑明耳元明卫经厯耳桓醴陵知县】

尔 【明尔名青州府照磨】

只 【明只好仁见正字通】

启 【○明启和零都训导】

紫 【○宋紫景望永州太守紫谏什邡县丞】

起 【○宋起圯龙溪知县明起镗弘治举人】

癸 【○宋癸仲知严州军】

■ 〈木巳〉 【○宋■ 〈木巳〉 开芜湖令】

弭 【○元弭礼开州尹明弭广弭宦任县丞】

姒 【○明姒庸道米脂知县姒昂襄阳通判】

理 【○明理英龙溪知县】

倚 【○明倚东周通江主簿】

是 【○明是天佑光泽县大使】

士 【○明士明善西安通判以孝友称】

斐 【见姓苑周斐豹晋人唐斐清宿州刺史明斐俊御史】

伟 【见姓苑汉伟璋光禄勋】

宸 【见姓苑明房昭昆山知县宸绣宸锦举人】
尾 【○明尾礼临城主簿】
姬 【唐艺文志有姬威浑舆经一卷】
绪 【明绪珊绪纪举人】
巨 【○宋巨光远嘉定进士辽巨构节度使明巨敬巨鲸御史】
楚 【○元楚鼎世祖将明楚淦楚荆瑞进士楚书金都御史】
所 【○明所铭千户】
汝 【○明汝泰弘治进士汝齐贤嘉靖进士】
户 【见姓苑汉户尊】
午 【见姓苑汉午汝臣宋午相淳熙进士明午明臣宣德举人】
卤 【汉卤公孺任侠】
愈 【宋愈植知高安军明愈德勤兴国县丞】
取 【宋取应宗取希晦希作俱淳熙进士】
俎 【明俎琚正德进士俎有用五台知县】
迕 【见姓苑明迕春文登县丞】
楮 【明楮山石首主簿】
樗 【明樗本直宣德中训导】

（臣）等谨案旧注秦相樗里疾考姓谱有相里无樗里杨慎曰樗里子疾盖樗里地名子疾之别号统谱以樗为姓里疾为名误耳

主 【○五代主禄团练使明主问礼任主事】
羽 【○宋羽仪嘉佑进士明羽口福成化举人】
禹 【○南唐禹万诚常州知军州事金禹显节度使明禹祥仁寿知县以治行称】
五 【○明五淮宣城知县】
古 【○明古朴户部尚书古其然古文炳进士】
宇 【○明宇宾大名通判宇灿正统举人】
且 【明且简潞州判官】
玺 【明玺书卫经略】
洗 【○宋洗一龙进士明洗尚文正德进士洗文渊南安知县】
邸 【○元邸亨万户府明邸鹏洪武进士】
买 【五代买叔千将军明买源成化举人】
哈 【明哈新民御史哈民安给事中哈铭锦衣卫指挥】
乃 【元乃穆泰三山人延平路总管】
在 【晋在盲汝南太守】
霭 【明霭翠系阿画之后今安氏其裔也】

揣 【明揣本永乐举人】

（臣）等谨案奚五族有揣氏金元无人表见此殆其后欤

海 【○明海渊户部尚书海澄海鲤进士海瑞粮储都御史】

宰 【○元宰需至正进士明宰用都督佥事宰魁知县】

隗 【○明隗邦衡嘉靖进士】

采 【○明采凤翔卫指挥】

尽 【宋尽言以贺启诋汤鹏举】

阍 【明阍立道上高县丞】

锦 【见姓苑汉锦被郎中令明锦彩卫经略】

恇 【明恇巍恇签恇绍芳俱进士】

隐 【○宋隐袞河间中尉】

反 【见姓苑汉反涘见印藪明河南怀庆府有反氏】

远 【五代远建丰洺州刺史明远志刑部员外郎远寿南乐教谕】

烜 【见姓苑明烜冲霄长寿主簿】

暖 【○宋暖谷珍仁宗时状元明暖子弘暖仪俱贡士】

宛 【○明宛嘉祥历官知县】

蹇 【○明蹇衡眉州人以孝旌】

罕 【明罕言弘治举人】

本 【○明本高成化举人】

缓 【○明郟阳府保康县有缓氏】

亶 【汉亶诵中谒者】

晚 【汉艺文志有子晚子三十五篇齐人好议兵与司马法相似】

坦 【宋坦中庸绍兴进士】

满 【○明满偁周以材行任浙江左布政使满成弘治举人】

散 【○明散惟听江阴县丞】

坎 【○明坎辉福甯州仓官】

产 【国语注云彭城有产氏明产麟永乐举人兵部主事】

扁 【庄子有扁子为孙休师姓解音卞】

勉 【汉勉昂上郡太守】

剪 【见姓苑明剪成卫千户】

郟 【见姓苑明郟福临淮训导】

展 【○宋文学传展伯兴明展毓永乐进士任御史展敏天顺进士】

善 【○宋善怱善辰俱进士元善庆嘉兴县丞明善养肇庆同知】

典 【○明典英陵川知县】

徼 【宋时有徼顺为东头供奉官】
兆 【见姓苑明兆元亨蓬莱县丞】
晓 【见姓苑明晓伎垫江县丞】
绍 【○宋绍鱼淳熙进士明绍旻弘治举人】
侨 【○明侨顺苏州知府又苏州有侨氏】
表 【○明表贡建阳教谕】
饱 【宋饱安盈通判临江军事】
驳 【汉驳少伯封安定侯】
皎 【五代皎公羨晋交州将明湖广竹溪县有皎氏】
茆 【明茆永庆陕西佥事茆钦成化进士】
草 【汉草中草王桥见印蕞明陕西镇安有草氏】
早 【晋将早衍明早礼交址同知】
藻 【见姓苑南北朝藻重鄱州刺史】
导 【南北朝导龙华州刺史】
葆 【明葆光先高淳训导】
道 【○宋道大亨常州人明道同番禺知县道中永乐举人】
宝 【○宋宝篆皇佑进士元宝鲁宋史局官明宝敬攸县丞】
枣 【○宋枣公彦山阴人明枣经纶长治丞】
浩 【○明浩本上犹县巡检】
保 【○明保睿曲江知县保嵌嘉靖举人又河南叶县有保氏】
老 【○明老兆祥嘉靖举人又广西桂林有老氏】
果 【古巴子国明果琳训导果有济源县丞】
锁 【宋锁政政和进士明锁住临湘知县锁钥弘治举人】
火 【明火源洁翰林侍讲火真同安侯】
且 【宋且谨修知德化县按且字又收入八荠韵】
把 【明把士聪永乐举人把宗都指挥】
诣 【汉诣于洛阳令明诣宠四川卫官】

（臣）等谨案诣诈上声正韵笈云诸别姓也明万历年间四川卫官诣宠唱名时误呼诸宠不应问之云字从工从白乃诈上声非诸姓也
谨列于此

埜 【明埜佑南昌卫千户】
也 【明也伯先任训导】
■ 〈门外卦内〉 【明■ 〈门外卦内〉 和永乐举人任教谕】
舍 【明舍敬江阴税课太使】

厓 【汉宝融传金城太守厓钧明厓继生上杭主簿】

（臣）等谨案汉书音义曰厓姓为仓库吏后音赦杨慎千家姓跋云厓之音赦本厓字去其上点无义

上 【见姓苑汉上雄见印藪元上都中兴判官明上泰广东参政上志天顺进士】

壤 【周壤駟赤孔子弟子】

访 【唐访式举进士官至转运使】

曩 【见姓苑元曩秉彝举进士官至河南省参政】

朗 【见姓苑明朗清都察院司务】

广 【○宋广汉通判赣州军明广嵩任中书】

赏 【○明赏震任理周赏璫顺德通判】

莽 【○明莽亨思南府通判】

仰 【○明仰瞻大理寺丞仰升仰儒俱进士又浙江湖州有仰氏】

褰 【元褰伯宣作浙江潮候说】

颖 【○宋颖棫徽州路知事颖洪江阴司法】

丙 【○宋丙发端平进士】

幸 【○元幸兴之至正进士明幸实永乐进士】

靖 【○明靖宣抚州通判靖洪鸿胪寺卿靖四方永州同知】

省 【○明省凯萍乡知县】

永 【○明永颖洪武进士永密成化举人任知县】

井 【○明井源驸马都尉追封巨鹿侯井田任户兵刑三科给事中】

鼎 【见姓苑周鼎革楚人宋鼎发淳佑进士】

洗 【其拯切又音线晋洗劲始兴太守宋洗云举知化州明洗光弘治进士工部侍郎洗桂彦嘉靖进士都御史】

（臣）等谨案郑志于洗氏下注云又音线不收洗字今从统谱另列

丑 【明丑成永乐举人丑慈邵武通判】

友 【见姓苑汉友道平原相】

九 【唐九嘉翰林应奉宋九真知庆元府明九焯德兴知县】

斗 【宋斗盖叙州人明斗胆洪武举人斗辅宣德举人任同知】

偶 【明偶桓有诗名以荐为崇安从事】

首 【见姓苑明首谦任提举首得仁汀州府推官】

纽 【○明纽师莹成化举人】

守 【○宋守仁杰袁州治中明守育仁蓬莱主簿】

寿 【○元寿安玉山尹明寿儒成化进士】

酉 【○明酉仁广信通判】

有 【○明有终庆陕西苑马寺监正】
口 【○明口禄宣府管粮通判】
后 【○明后敏永乐进士任陕西布政司参议后政任府教谕】
后 【○明后能镇守岷州】
酒 【○明酒好德神木卫经历】
审 【○明审錞郟县知县】
品 【○明品岩镇海卫千户】
噉 【晋噉铁苻秦将】
澈 【明澈仁亮宣德举人】
咎 【○明咎诚成化进士任郎中咎如思嘉靖进士官御史】
偃 【汉偃繇博陵皇后父】
橄 【○明橄皞橄大经俱举人】
闪 【明闪霭永州通判闪名夏邑教谕又河南■〈木巳〉县有闪氏】

△去声

梦 【宋梦仲才绍定进士元梦仙忠翊校尉】
洞 【南北朝洞林同州都官从事】
冻 【见姓苑元冻阿术钦州监郡明冻泰利津知县】
瓮 【明瓮蕙嘉靖进士任知府瓮大梧徽州府照磨】
重 【储用切宋重兴几连城知县明重谦永乐举人鄱阳知县】
凤 【○明凤阳和举人凤仪庭东乡知县】
痛 【○明山西榆次有痛氏】

（臣）等谨案凤氏痛氏俱见郑志因希姓续载宋明人名即郑志分类者亦归入四声依韵附见以便稽考故于注首加圈别之后仿此

纵 【明纵文日照训导】
用 【○明用夏辽州吏目】
示 【见姓苑周示眯明桑间饿夫明示郁府同知示容周府审理】
馈 【周馈间伦晋人】
媿 【见姓苑汉媿牟媿戊】
字 【汉字长孺见印藪宋字谔廉州推官】
刺 【见姓苑唐刺正甫撰姑苏水利志】
荔 【唐有荔非朔方节度使明河南商城有荔氏】
刈 【见姓苑五代刈怀】
四 【宋四象知汀州】
志 【见姓苑元志能知归德府】

自 【见姓苑汉百官表郎中令自为更光禄勋】
位 【明位安贡士任训导】
侍 【明侍懋綦江教谕】
注 【见姓苑明注宽任训导】
地 【明河南南阳有地氏】
义 【○宋义太初淳熙进士明义森濮州学正】
智 【○元智受益两浙运使明智审洪武进士智聪通州知州】
贲 【○元贲亨处州路万户明贲智大名教授】

（臣）等谨案郑志载两贲字一音肥一音奔统谱五征收贲字音肥此收四寘读鄙与郑音异

类 【○明类康新繁训导】
意 【○明意秀献县训导】
次 【○明次益浙川知县次摠广东都司】
利 【○明利济川任府同知利宾御史】
帅 【○明帅性洪武进士帅机帅兰俱隆庆进士】
秘 【○宋秘轸绍兴进士明秘心传郴州知州秘自谦知县】

（臣）等谨案秘乃俗书应作秘郑志已列秘氏故入续载

未 【汉未央知天文见乙巳占】
贵 【○明贵铎锦衣指挥贵仁嘉靖进士】
吏 【见姓苑汉吏宗王莽时人】
据 【○明据成刻漏博士】
诉 【汉诉梵治历数】
素 【见姓苑汉素霸宛邱长】
悟 【见姓苑汉悟明极见印藪】
慕 【元慕完刑部侍郎明慕容监察御史】
佐 【明佐皓登封县丞】
付 【见姓苑明付吉陕西按察副使】
亓 【本树姓望出河东】
度 【○宋度正礼部侍郎元度宗显沔州守明度智给事中】
故 【○宋故宿合肥县丞】
布 【元布景范举进士明布白云太常寺少卿】
树 【○元树谷天历进士明湖广郟阳府有树氏】
步 【○明步从信肇庆同知步元迁嘉靖进士】
具 【○明具春弘治举人任知县】

系 【姓氏辨证楚有系益唐系谨仕至补阙】

戍 【唐戍盈孙河阳令】

励 【宋励静嘉佑登科】

闭 【明闭鲁石屏知州闭敬闭琪举人】

岁 【○明河南邓州有岁氏】

祝 【明祝祯工部主事】

世 【○宋世宸嘉泰进士明世家宝刑部尚书】

羿 【○明羿忠遂宁知县】

系 【○明系授郟阳知县又河南谷城有系氏】

丽 【○明丽朴兴国州判】

裔 【○明裔璜卢溪知县】

税 【○明税璇平凉府同知税新成化进士】

锐 【○明锐廷緘洪武举人】

■ 〈麂页，古代虎〉 【音类汉 ■ 〈麂页，古代虎〉 元交州刺史】

泰 【见姓苑汉泰史林将军明泰行实安远知县泰谷潭县知县】

柰 【见姓苑明柰亨宣德进士户部侍郎】

大 【○辽大康义南府宰相大公鼎咸雍进士元大怀真洺州防御明大有知县】

（臣）等谨案姓谱云泰太大分为三或以泰为泰颠之后大为大庭之后今不可考又唐渤海国王姓大氏辽大康义大公鼎应为渤海

大氏之后

太 【○明太溥知文昌县】

蕘 【周蕘尚鲁人明蕘端汀州巡检】

拜 【见姓苑宋拜瑚举茂才元拜都举进士明拜礼嘉靖举人又江南山阳有拜氏

】

败 【五代败崇美泽潞州守】

卖 【见姓苑明卖廷杰宁德县丞】

画 【见姓苑明画芳宜黄知县】

槩 【见姓苑明槩仁寿景泰举人】

迈 【明迈文麟江西右参议】

祭 【○明祭节衡府纪善祭宗舜蒲城县丞】

丙 【见姓苑汉内宜之谋士】

对 【见姓苑汉对若方见急就章】

能 【音耐熊挚之后避难改为能氏望出华阴唐能延寿京兆尹宋能胜之绍兴进士明能昭永乐举人能口始兴知县】

赛 【见姓苑明河南南阳有赛氏】
塞 【○明直隶保安州有塞氏】
代 【○明代贤瓯宁县丞】
载 【○明载君用吴邑人父福洪武中监税失火当死君用代父刑妻守节旌表】
佶 【○明佶祺进士佶缙广东都指挥】
舜 【见姓苑周舜华晋大夫宋舜俞咨嘉兴教授明舜用禹刻漏博士】
振 【见姓苑宋振纪广州转运使】
顺 【见姓苑明顺境嘉靖进士顺廷训嘉靖举人】
韵 【明韵鳌永乐举人】
镇 【见姓苑明镇海任知县以廉爱称又湖广松滋县有镇氏】
闰 【见姓苑明河南南阳府有闰氏】
信 【明信时辽州判官信顺永乐举人】
晋 【○宋晋鹭知房州元将晋国宝明晋罡洪武进士晋宪嘉靖进士工部郎中

亘 【汉亘宽庐江郡丞】
■ 〈员见〉 【与员同南北朝■ 〈员见〉 平前燕金城人】

问 【见姓苑明问智成化贡士】
郡 【明郡敬余于知县】
训 【○明训浚袁州教授】
艮 【见姓苑汉艮当注药经】
逊 【见姓苑唐逊捞为李克用所擒不屈而死】
梵 【宋梵禹俞绍兴进士】
寸 【明寸居敬梓潼知县】
漫 【明漫智宣德举人】
万 【南州异物志后汉万震作】
宪 【○元宪德明福州路总管明宪章荆州府经历】
顿 【○明顿钦洪武举人顿锐正德进士】
翰 【见姓苑周翰胡曹大夫】
汗 【周汗明楚客】
杆 【汉杆胜瓠讷侯】
犴 【前汉书梁王传睢阳犴反师古注曰姓犴反名也】
干 【见姓苑宋干道冲西夏宰相干成昂知建宁】
免 【见姓苑明免忠永乐举人任知府免才训导】
汉 【○宋汉宗尧淳佑进士明汉邦杰盐井提举汉德金县高士】

爨 【○明爨勋郴州判官】
贯 【○明贯元顛横州知州贯义指挥使】
灌 【○明灌谦江陵主簿】
宦 【明宦绩永乐进士】
晏 【○明晏士翘嘉靖进士】
辨 【汉辨武淮南名士唐辨机尚高阳公主】
弁 【刘曜有太史令弁广明明弁志中监利训导】
院 【见姓苑宋院亨谦德化知县明院宾弘治进士官参议】
彦 【见姓苑宋彦茗淳熙登科彦端绍兴进士】
汴 【见姓苑宋汴焘明州同知】
线 【见姓苑元线荣为县尹以刚介称明线雍分水知县线补袞副总】
砚 【见姓苑元砚弥坚国子司业】
钏 【明钏国贤抚州照磨钏佩贵阳丞】
战 【○宋战仲恭司法参军明战正举人侄战翱训导以孝闻】
肖 【汉肖安国明肖靖宣德中解元】
钓 【宋钓宏绍兴进士】
妙 【见姓苑明妙龄河州卫指挥】
召 【○明召鸣神木知县】
教 【见姓苑明教辅置稷山县丞】
孝 【○宋孝发靖州知州明孝廉鸡泽县丞】
抱 【汉末■〈木巳〉康避董卓难改姓抱汉抱老寿见印藪】
冒 【明冒政都御史巡抚宁夏】
奥 【元奥屯茂盐运司明奥里俊余干知县】
郃 【○元郃知章有诗名明郃大经郃光先郃永春嘉靖进士】
昊 【○明昊方霖盱眙县丞】
暴 【○明暴昭大理寺少卿暴毅南康知府】
夜 【汉夜龙雒阳男子明夜珠光禄寺丞夜景光太原指挥】
怕 【唐怕善布衣以策干韩愈宋怕籛国子博士】
赦 【明赦敬正统举人】
亚 【明亚吉平阴县丞】
射 【○宋射纪宝佑进士明射子安弘治举人】
化 【○明化辉盩远知县化应时岳州指挥】
壮 【周壮驰兹晋大夫字典作侧羊切音庄古字与庄通用】
赣 【汉赣遂耆老大儒琅琊人】

晃 【汉晃华文士】
矜 【汉矜鲁赐申公弟子】
坑 【姓氏辨证曰鲁大夫氏左传司马牛卒于鲁东郭门外坑氏即其家也】
（臣）等谨案左传注疏坑苦康反似应入平声
偿 【姓苑吴中大族其一偿氏晋有郗隆主簿偿庆】
赏 【见姓苑南北朝赏耐虎姚弋仲将唐赏金毗仆固怀恩将】
邝 【音邝一音荒望出庐江姓苑云临淮有此姓今广东有邝氏宋邝靖嘉佑进士
明邝埜兵部尚书谥忠肃邝文成化进士】
旺 【明旺斌福州卫千户】
象 【姓苑云颍川人南昌有此姓】
况 【○元况逵高安令明况锺苏州府升正三品况惟垣嘉靖进士】
旷 【○明旷彦温余干知县旷宗舜湖广解元又沔阳有旷氏】
望 【○明望子威弘治进士望增常州府推官】
亢 【○明亢思谦嘉靖进士亢良玉临汾生员以孝旌】
令 【见姓苑汉令勉中大夫明令曦监察御史】
镜 【见姓苑汉镜敛河内令】
敬 【○元敬俨平章政事谥文忠明敬忠礼部主事敬承宣德举人】
姓 【○明姓秉恭南海贡士】
正 【○明正复洪武举人任大同教授正闰信灵县丞】
庆 【○明庆锺永乐举人庆冬任知县】
胜 【见姓苑汉胜勋宋胜珂华亭令明胜通卫指挥胜成永乐举人】
定 【见姓苑汉定武定林见印藪明定定广德州同知】
孕 【宋孕澍瑞州路推官】
贸 【汉贸充国博士】
幼 【汉幼安见印藪】
授 【汉授异众丹阳人】
茂 【汉茂负沮阳令明茂彪景泰进士茂镇山东副总兵】
懋 【明懋国辅山西参将】
又 【见姓苑明又尚珍卫经历】
耆 【明耆秉彝龙南县丞】
秀 【明秀芳礼部郎中】
右 【汉右公弼见印藪宋右喜祥安州司法明右岩惠州教授】
谬 【○明谬让永乐进士】
豆 【○明豆长窳河南卫千户豆革安塞主簿】

就 【○明就大勋西甯卫指挥】

漏 【○明漏瑜贡士有诗名漏真溧水教谕湖州乌程有漏氏】

宿 【○明宿进弘治进士宿椿宿应参嘉靖进士】

旧 【○明旧惟贤苑马寺监正】

斗 【明斗凤平阳府经历】

阍 【○明阍云成化举人知县阍继禹嘉靖进士知府】

念 【○明河南祥符有念氏】

汎 【三国程昱传陈宫使将汎疑取范范令靳允伏兵刺杀之北史尔朱荣传魏庄帝时荣奉驾向洛阳宫武卫将军汎礼苦执不听荣
迁都明汎克恭洪武举人】

（臣）等谨案郑樵于汜字注音凡又作汎入以邑为氏引汉汜胜之为证而于汎字不引汎疑是以汜汎二氏为一也考三国去汉不远而汜胜之汎疑各见其非一氏明矣统谱于汜字下引明汜震汜东汎字下引明汎克恭历千有余年仍分二姓知汉时非合为一也今据统谱入去声

鉴 【见姓苑明鉴文献徐州人洪武旧臣】

鉴 【明鉴复明江陵知县鉴抟霄洪武举人任主事】

钦定续通志卷八十七

●钦定续通志卷八十八 氏族略八

氏族略 【八】

补遗

○补遗四

入声

复姓

△入声

复 【周复涂祯卫臣明复扬清扶风尉】

缩 【周缩高为管守】

渎 【汉渎弘之】

曲 【晋曲崇裕着郊祀集十卷宋曲清绍兴进士】

福 【唐福信百济将宋福增知江州军事明福时任都督】

淑 【前燕慕容皝遣扬威将军淑虞攻乌悉罗于平岗斩之】

鞫 【宋鞫咏举进士官监察御史明鞫以正邳州知州】

速 【见姓苑宋速希觉知连州明速斌饶州卫千户】

褥 【宋宦官褥怀志掌香药推易院坐赃弃市】

斛 【宋斛继善判汀州事】
璞 【明璞俊举人任知县】
筑 【明筑应祥贵溪县丞】
壺 【见千姓编明壺常崇安县丞】
繆 【○宋繆若虚温州人繆渥越州守】
夙 【○宋夙子兴绍定进士明夙贡士任训导】
仆 【○宋仆斗南泉州知州明仆雅善化训导】
竹 【○明竹祥太仆寺少卿】
牧 【○明牧义兴化推官牧相弘治进士】
沐 【○明沐英封黔宁王】
服 【○明服用休扶沟知县】
宿 【○明宿进正德进士】
禄 【○明禄存永乐举人】
独 【○明独立平阳训导独善任行人】

（臣）等谨按繆氏夙氏仆氏竹氏牧氏沐氏服氏宿氏禄氏独氏俱见郑志因希姓续载宋明人名即郑志分类者亦归入四声依韵附见以便稽考故于注首加圈别之后仿此

笃 【见姓苑明笃自诚顺义县丞】
欲 【见姓苑元欲广成元帅府监军】
浴 【明浴沂永乐举人在通判】
粟 【○明粟恕户部尚书粟登弘治进士】
沃 【宋沃子政绍兴进士明沃干景泰进士沃类成化进士】
王 【○音宿宋玉珏玉天麟进士明玉恩眉州判官】

（臣）等谨案山堂肆考云汉武帝时有公玉带上黄帝明堂图子孙改为玉氏后汉司徒玉况其裔也郑樵既列公玉氏引公玉带于玉氏又引公玉带入以名为氏据此当是复姓省言不应以玉为名也又据尸子以公玉带为黄帝时人未免荒诞

束 【○元束崇芳诣军门救父以孝称明束清知县以廉称束春任御史】
续 【○明续旻永乐进士又湖州乌程县有续氏】
督 【○明督仲美归善县丞】
角 【汉角闾据并洛降光武明角岩利港巡检】
岳 【见姓苑明岳崇知上杭县岳思忠弘治举人知通渭县岳仲信卫指挥】
岳 【宋岳飞河南河北诸州招讨进封鄂王谥武穆明岳仲明隐居不仕赐号纯孝先生岳正正统会元榜眼谥文肃】

濯 【○宋濯庚干道进士濯融嘉佑进士】

朴 【○宋朴忠潮州通判明朴淳卫指挥朴素卫所镇抚以孝闻】

佚 【周佚之狐郑大夫】

（臣）等谨按郑樵于烛氏注云地名称烛之武犹介之推佚之狐也盖以地为氏

剧 【周剧辛燕相宋大理卿剧可久明剧暹永乐举人】

律 【见姓苑汉律子公】

壹 【汉壹元见印藪明壹震昌兴化府经历】

率 【见姓苑望出南阳范阳河南晋率曷尚书郎明率庆平度州判】

必 【见姓苑宋必赞嘉熙进士】

遯 【宋遯复泰州通判】

一 【见姓苑明一炫灵寿县丞一洪赞皇知县】

七 【明七希贤永春县训导】

柒 【明柒文伦弘治举人】

汨 【明汨澄彭泽主簿】

室 【○宋室神诸卫将军辽室昉翰林学士拜相】

（臣）等谨按姓苑作室昉归宋为诸卫将军是合二人为一郑樵因之误今据统谱改正

暨 【○南汉暨彦赞官指挥使宋暨陶元丰进士第一明暨文天顺进士】

（臣）等谨按陶登第时庐唱以洎音呼之迄不应苏颂奏当以入声呼之陶果出

漆 【○宋漆秀彦宝佑进士元漆希范临江路知事明漆居敬洪武进士】

栗 【○宋栗大用神童官南雄大守明栗铭弘治进士栗应麟嘉靖进士】

乙 【○宋以太度寔化知县明乙瑄成化进士又陕西镇安县有乙氏】

密 【○宋密佑江西都统明密镛凤阳同知密聪内黄知县】

郅 【○元郅朗武安尹明郅用义胶州判官】

宓 【○明宓天麟苏州府检校】

拙 【汉拙强见印藪】

蔚 【汉蔚旷宋蔚昭敏高阳关镇将明蔚绶礼部尚书蔚春弘治进士】

物 【宋物奴淳熙进士】

乞 【五代乞力徐边将明乞贤泌水知县乞住吴川知县】

跋 【五代时跋异汧阳人工画佛道神鬼】

郁 【○明郁让卫知事】

没 【见姓苑汉没未央见印藪】

揭 【唐揭镇青州刺史宋揭秀实政和进士元揭傒斯翰林学士追封豫章郡公谥文安明揭稽都御史兵部侍郎揭魁成化进士】

忽 【忽仲之后明忽忠荆州通判忽麒朝邑人以孝旌】
 月 【明月文宪武昌训导有诗名】
 孛 【见姓苑明字敏四川佾事】
 褐 【明褐奎成化举人】
 骨 【○五代吴将骨言明骨恭赵州学正】
 越 【○明越坚正统进士】
 厥 【○明厥惟明华州知州】
 脱 【见纂要明脱因廉州知府脱纲都指挥佾事】
 ■ 〈塌，禾代土〉 【音达望出南越明■ 〈塌，禾代土〉 明德刑部主事】
 搭 【明搭思任教谕】
 达 【○宋达惠远嘉定进士明达旺永乐进士达毅成化进士】
 笄 【○明笄贵沂州知州笄东光嘉靖进士】
 捌 【南北朝捌思护羌校尉明捌忠利港巡检】
 八 【明八通礼部主事】
 撒 【明撒祥永乐进士撒明清江知县】
 察 【○明察文质邵武同知】
 颀 【○明颀文林永乐举人颀宣赵州通判】
 裂 【周裂繻纪大夫】
 泄 【周泄冶陈大夫泄柳鲁贤人】
 舌 【周舌庸越大夫左传国语春秋传作后庸姓纂舌氏引越大夫为祖不知何本
 】
 偃 【见姓苑元偃傒斯昆山尹偃列虎兄弟五人俱进士明偃惟贤嘉靖进士】
 爨 【见姓苑宋爨元围咸平进士】
 捏 【明捏经平乡知县】
 孛 【明孛金分宜知县】
 雪 【明雪霁吴江巡检】
 别 【○明别丛举人任教谕】
 列 【○明列文邦长乐县丞】
 雒 【汉雒功见印藪明雒佾佾都御史雒铭弘治进士雒昂副都御史】
 若 【见姓苑汉若章下邳令宋若汉咸淳进士】

（臣）等谨按汉河间王元与妻若乘朱轮若之不为名而为氏者如称萧何夫人同霍光夫人显之类

貉 【周貉稽汉貉安见印藪】
 勺 【宋勺复之庆历进士】

■ 〈各上心下〉 【音恪晋■ 〈各上心下〉 任中郎将】

糕 【明糕芳南平训导】

药 【○五代药元福周将明药理金都御史药和宁德知县】

索 【○明索承学弘治进士】

薄 【○明薄彦徽弘治进士薄世佑郴州知州】

鄂 【○明鄂隆江阴县丞】

博 【○宋博尚之奉议郎元博敦留守明博彦约泾县教谕】

洛 【○明洛忠清浪参将以孝旌又江西高安县有洛氏】

宅 【见姓苑汉宅师见印藪】

液 【见姓苑汉液容调】

（臣）等谨按颜师古曰液氏上古道术之士善于炼化能作液汤者后嗣因以为氏据此当入以事为氏嫌其说近于无稽不敢据以分

类

客 【见姓苑汉客孙明熹宗乳媪奉圣夫人客氏】

裨 【汉裨强裨朗见印藪】

邨 【汉邨凤渠令】

亦 【见姓苑宋亦尚节开禧进士明亦孔昭江西参将】

罩 【南北朝罩文奏南部都尉】

迮 【明迮原霖翰林编修迮宇嘉兴县丞】

策 【明策敏策简俱长沙县丞】

貂 【明貂安内黄知县貂廷用颍川判官】

碧 【明碧潭大名训导】

伯 【○宋伯湘嘉定进士明伯希孟鸿胪寺鸣赞又四川忠州有伯氏】

益 【○宋益畅绍兴进士元益智普山士酋任曲靖宣慰使】

却 【○明却忠洪武进士却祥行唐人以孝闻】

籍 【○明籍贯茶陵知州籍一科嘉靖举人任知县】

柏 【○明相龄洪武进士柏英延安卫指挥以孝旌】

赤 【○金赤昱洛州刺史明赤从周汶上县丞】

格 【○明格化都司经历】

赫 【○明赫瀛万历进士】

革 【○明革从时成化进士】

笮 【○明吴郡有笮氏】

荻 【汉荻赦之见印藪】

惕 【明惕龙泂水知县】

锡 【○宋锡三锡崇寔进士】
 析 【○元析望芳擢守临洮】
 郦 【○明郦鏞任光禄卿郦坝正德举人】
 贼 【汉贼利刺客】
 德 【见姓苑汉德义见印藪】
 殖 【见姓苑汉殖广见印藪】
 则 【见姓苑汉则长见印藪】
 黑 【明黑光翰弘治举人黑元龙辽东参将】
 默 【见姓苑明默思道扶风县丞】
 ■ 〈月匕〉 【音尺明浙江武康县有■ 〈月匕〉 氏】
 力 【○宋力珪潮州佾判明力魁郟阳知县力谊尉氏县丞】
 植 【○五代植廷晓南汉大将明植士谦教谕植轩知文昌县又河南南阳有植氏
 】
 弋 【○明弋斌永乐进士任御史弋瑄成化进士历尚书】
 墨 【○明墨麟兵部侍郎赠少保谥荣毅】
 直 【○明直广永乐举人直凌霄河源知县】
 勒 【○明勒玺成化进士】
 息 【○明息治宝应县丞息昭贡士任知县】
 戢 【见姓苑明戢如止嘉靖进士】
 浥 【汉浥安见印藪】
 立 【唐立述长兴令明立子才颍上知县立渊中书舍人】
 及 【五代及永德周将明及官正德进士户部侍郎】
 疾 【明疾敬弘治贡士】
 习 【○宋习之伟习胜己俱进士明习嘉言永乐进士太子詹事】
 集 【○宋集守节衡州都监】
 袭 【○宋袭盍卿官右正言明袭勛扬州府训导】
 汲 【○明汲明学邯鄲县丞汲宛寿州通判】
 盍 【见姓苑宋盍簪常熟知县】
 纳 【见姓苑明纳台常德卫千户】
 闾 【见姓苑明闾胜前任御史闾谨闾英任知县】
 合 【○明合举鸡泽知县合鸾蒙阴知县】
 妾 【汉妾胥妾志见印藪】
 涅 【唐涅礼松潘都督】
 夹 【宋夹允陈州司狱】

帖 【明帖晏龙川知县】
掎 【明掎大伦持诏往谕佛赫国】
侠 【○宋侠亶郎中】
接 【○明接武举人任知县】
莢 【○明莢镇长阳县丞】
甲 【○明甲聪鸿胪寺序班】
法 【○明法愷保定通判】

△复姓

公冉 【周公冉务人齐宰杀惠公奉其奴以奔蔡】
公斂 【周公斂阳字处父】
公肩 【周公肩定孔子弟子】
公上 【古有公上不害南齐有晋陵令公上延孙为南沙人范修化所杀】
公仲 【子华子曰程子聚徒著书门人公仲承最能传其道与留务兹同学务兹即鬼谷子】
公息 【吕氏春秋有郑大夫公息房】
锺古 【风俗通锺古桀内史也因氏焉】
司铎 【周司铎射鲁大夫】
夷阳 【姓氏辩证曰晋厉公嬖臣夷阳五杀三却传曰五亦嬖于厉公则夷阳为姓】
茨芘 【姓苑曰晋有茨芘仲】
蒲成 【周蒲成南晋大夫】
奚容 【周奚容蒧鲁人孔子弟子】
申公 【楚公族申公巫臣申公寿余】
噐尹 【周噐尹喜】
涓浊 【吕氏春秋有夏首人涓浊梁善畏明失气而卒】
家仆 【周家仆徒晋大夫】
车遽 【世本齐有临淄大夫车遽氏】
长梧 【庄子有长梧子】
皇子 【庄子有皇子告敖】
公户 【汉公户满礼官大夫】
公绪 【汉党锢传公绪恭为八顾注公绪姓也】
公枹 【汉艺文志有公枹生终始十三篇传邹奭终始术师古注枹音畴】
公胜 【汉艺文志有公胜子五篇】
宫孙 【汉艺文志有宫孙子著书师古曰宫孙姓也】

弓里 【汉独行传建武二年骑都尉弓里戍将兵平幽州】
红阳 【汉红阳长见容斋随笔】
随巢 【汉艺文志有随巢子六篇注云墨翟弟子】
施屠 【汉书周勃击燕得卢绾御史大夫施屠浑都师古曰姓施屠名浑都】
朱评 【见姓苑汉朱评漫】
都尉 【汉都尉朝见容斋随笔】
长儿 【汉长儿鲁】
唐山 【汉礼乐志房中祠乐高帝唐山夫人所作注云姓也】
屠门 【汉屠门少见容斋随笔】
臧马 【汉臧马矢】
游水 【汉游水发根武帝时人】
铅陵 【吕氏春秋汉铅陵卓子】
公綦 【后汉中平四年渔阳人张纯杀护乌丸校尉公綦稠】
棠溪 【后汉延笃从颍川棠溪典受左氏传】
曹牟 【姓解曰先贤传有兖州刺史曹牟君卿平昌人】
三 ■ 〈元〉 【姓纂曰宋子姓微子之后】
凡门 【姓苑云唐叔之后】
真郭 【唐真郭待封总管同薛仁贵击吐番】
斜烈 【唐斜烈鼎寿泗元帅】
成纪 【唐将军成纪慕仁】
公师 【南北朝公师藩梁将】
公城 【南史王宏少尝樗蒲子野舍及后宏当权有人就宏求县此人尝以樗蒲戏

得罪宏诘之曰君得钱会戏何用禄为答曰不审公
城子野何所在宏默然】

茹连 【明茹连回谦长沙知府】
公孙 【○宋公孙一淳熙进士元公孙辅至正进士明公孙让安吉知县】
司徒 【宋司徒绰元佑登科明司徒绶新会训导】
司空 【宋司空宗韩绍圣登科明司空禧定海知县】
闾邱 【○宋闾邱昕吏部侍郎谥清简明闾邱玉瑞州推官】
西门 【○宋登科有西门治西门解明西门炳洧川县丞】
西方 【○宋登科西方琥】
成公 【○宋成公策通直】
青阳 【○宋进士青阳燮青阳泰元青阳梦炎官尚书】
东方 【○明东方正石屏知州】

公冶 【○明公冶志洪武中以材任金都御史】

巫马 【○明巫马寿万厯举人】

（臣）等谨案公孙氏司徒氏司空氏闾邱氏西门氏西方氏成公氏青阳氏东方氏公冶氏巫马氏俱见郑志因希姓续载宋明人名依韵附见以资稽考故于注首加圈别之后仿此

子行 【周子行敬子卫大夫】

浩生 【周浩生不害】

比人 【汉比人交四门博士】

古口 【汉古口引】

驳马 【汉驳马少伯见容斋随笔】

友通 【汉友通期见容斋随笔】

左邱 【姓氏辩证曰临川李瑞卿言蜀人有卖卜者左邱氏自云左邱明之后又尝见御史姓左者问其先出邱明乎御史曰左与左邱本自两氏因知蜀卜者果不妄】

（臣）等谨按孔子所称者古之闻人姓左邱名明郑樵所谓居左邱者也着春秋传者姓左名邱明郑樵所谓楚史倚相之后与左史氏同族者也但樵以地为氏内并未列入左邱氏殊失之疏漏今补入

水邱 【○吴越都监水邱昭券宋进士水邱袞水邱咨龙明水邱进水邱曦俱举人】

主父 【○宋登科主父诘】

毋邱 【○宋登科毋邱会毋邱斌】

赣娄 【周赣娄子】

少西 【姓氏辩证曰出自妣姓陈公子夏之后别为少西氏】

下门 【姓氏辩证曰国语周景王大夫下门子之后因氏焉世本晋有大夫下门聪】

鬪谷 【楚令尹鬪谷于菟按左传谷作谷】

乘马 【汉书周勃传勃斩陈豨将军乘马降师古曰姓乘马名降】

胜屠 【汉有胜屠公】

傅其 【汉傅其义】

利作 【英贤传后汉安乐任序同郡利作氏也】

大公 【宋大公鼎户部使】

第五 【○宋第五盩远嘉定进士明第五规永乐举人】

太史 【○宋太史洵武太史邵俱绍兴进士】

侍其 【○明侍其备高安人】

伯州 【周伯州犁楚臣】

角里 【汉角里先生四皓之一角里若叔后汉人】

默台 【汉默台峰】

涉其 【汉涉其帑】

赤章 【韩子智伯以钟遗仇繇赤章蔓枝谏令不受】

谷那 【唐谷那律弘文馆学士】

铁力 【明铁力必失鸿胪寺序班】

乐正 【○宋乐正子长即墨人遇仙家授巨胜赤散方年逾百八十岁入劳山不知所终】

濮阳 【○明濮阳恭永乐进士】

钦定续通志卷八十八

●钦定续通志卷八十九 六书略一

六书略 【一】

（臣）等谨按郑樵作六书略推本于经术之明皆由小学其义诚当已惟是专以隶书论六书而不求诸籀篆是以错误间生盖自史籀作大篆之后小篆与隶书相继递兴凡将元尚等篇皆古法所留遗而后世或传或不传即其传者若史游急就章扬雄方言等书亦非尽古人之旧惟许慎说文解字一书虽一淆于唐之李阳冰又参错于南唐之徐铉独其偏旁点书未改旧观于小篆之法厘然具备则六书之义犹得有所依据故言六书者惟说文最为近古若隶法即今之楷书 【梁庾肩吾云隶书今之正书唐张怀瓘云隶书程邈造字皆直正亦曰真书宋赵明诚云隶者今之楷书亦曰真书王应麟云自唐以前皆谓楷字为隶】 虽从篆出而已离其初意故林罕字源偏旁小说序谓隶书有不抛篆者有全违篆者有减篆者有添篆者有篆隶同文者非究于篆无由晓隶盖文字之讹实由隶书始郑氏仅从隶法以求六书则沿其流而不究其源如以星字作○ 【星字古文作□篆文作□】 而释之云古文星小则为星大则为盘释酉 【古文作□】 字云酉即卣也卣即尊也释真 【古文作□】 字云从匕从具变化之具等类未免于古人之旨稍有乖悞若其分别部居罗列文字于象形则有十形六象及兼声兼意于指事则兼声形意三体于会意则合同异二母转注之类则有四谐声之类则有六假借之类则有十二固极该洽矣逮乎元明以来诸家发明六书之义更互演说类例滋多至如魏校王应电吴元满之属揣测形声依文立范人自为说家自为疏一点画之微一横直之式必推衍其体象以致傅会穿凿之弊皆颇不免焉推其发原则郑樵之志别类太多未必

不为后人所借口也考许慎说文始一终亥中闲初未
尝区别六书类例而六书之类例自条贯于其中元明以来述者虽多就其中差可据者
若元载侗之六书故止及其五而不及于假借杨桓之
六书统不及其五而止及于谐声其它若张有复古编不区分六者而义已可以兼通周
伯琦赵古则诸书分晰六者而义转待于互见何者会
意之法有近于指事指事之变有类于转注转注之体有涉于象形今必欲取九千之籀
文字字分肌析理各指一例已有所不能矣况于楷书
数万之字而能一一分其类例乎且字者孳也所以究天地之精华通百昌之蕃汇而文
明日启训诂相宣事以适用为先礼以时宜为大贵沿
波而讨源无举本而遗末今续修郑志依类条次谨择诸书所载可以上下通贯而无执
于一时一家之论者自象形以下虽仿郑例而字必确
征不敢稍有臆附其诸家之说可以资考据者略附于后若郑志于六书之后兼载古今
殊文一代殊文诸国殊文而并及梵书之制今以辽金
元字各缘起略可考者附缀卷末以备六书之制又郑志所列上古殊文约举数条祇存
大概而鼎彝刀布流传后世其中可以征信者正复不
少今亦略加辑述于后以申郑志所未备云

象形一

指事二

○象形一

（臣）等谨按六书之次序郑康成周官保氏注引郑司农说一象形二会意三转
注四处事五假借六谐声贾公彦周礼疏因之班固汉
书艺文志一象形二象事三象意四象声五转注六假借颜师古汉书注因之许慎说文
解字一指事二象形三谐声四会意五转注六假借卫
恒书势因之徐锴之说文系传周伯琦之说文字源皆一象形二指事三会意四谐声五
转注六假借其叙次与汉书艺文志同张有之复古编
赵古则之六书本义吴元满之六书正义一象形二指事三会意四谐声俱同惟以假借
居转注之前叙次微异杨桓之六书溯源王应电之同
文备考一象形二会意与周礼注同而杨氏则三指事四转注五谐声六假借王氏则三
指事四谐声五转注六假借又自各异戴侗之六书故
一指事二象形与说文同而三会意四转注五谐声六假借复互异焉郑志则以象形居
一指事居二会意居三转注居四谐声居五假借居六
今谨依郑志原例编次又按宋元以后言六书者同异滋多难以尽据惟元黄公绍古今
韵会所分注象形会意各条悉依说文系传原本无失
许慎之旧故兹以韵会核校慎传所列者为主而参以戴侗六书故周伯琦六书正讹包

希鲁六书补义其余诸家所引绪棼而旨歧者概不敢取又郑志原图每条下又分正生侧生兼生续生各目虽字以孳生为义原其条晰无所不该然必指目造端一一分属亦恐转有牵合泥滞之弊故但以六书分列而郑之细目不复重加件系云

八 【八别也象分别相背之形徐锴曰数之八两两相背是别也○按郑志所列诸字并无一定之部分次第今续编诸字依说文系传所载者居多是以悉据说文部分叙之又按说文系传第一条解字之文皆依许慎之旧今每条所引说文之语不复明出说文字以省繁赘又郑志所列诸字之下有以篆书注其形者有以楷书释其体者今惟其字必须篆始明者谨用篆书别之若其笔画篆与楷皆可显著者即用楷书作注以昭省便】 齿 【口断骨也象口齿之形】 牙 【贝牡齿也象上下相错形徐锴曰比于齿为牡】 只 【语已词也从口象气下引之形】 鸟 【口长尾禽总名鸟之足似口故从匕今文作鸟】 胃 【本作口谷府也从口从口象形隶作胃○按说文及系传古作某象形与今楷书绝异者今概不载若其与楷书尚相近而形声体用未改其旧者则仍载之】 刀 【徐锴曰象刀背与刃也】 刃 【徐锴曰若今刀刃皆别铸刚铁故从口】 竹 【口象箬下垂形】 豆 【从口象形○按口象器腹之形与口耳之口不同】 爵 【口礼器也本作口象爵之形中有鬯酒口持之也徐锴曰口象爵头甘其盛酒处厂其尾柄也】 弋 【口口也象析木锐衰者形口象物挂之也本作弋今作杙】 朵 【徐锴曰口象其垂形按口亦象形非乃字亦非几字】 巢 【鸟在木上也徐谐曰口三鸟也口巢形也】 回 【口转也从口中象回转之形】 贝 【口海介虫徐锴曰下象其垂足尾也】 鼎 【口三足两耳象折木以坎】 克 【口肩也象屋下刻木之形徐锴曰肩任也任者又负荷之名也与肩膊义通故此字下亦微象肩字之上也能胜此物谓之克也本作口今作克】 秀 【徐锴曰禾实也有实之象下垂也○按口即下垂象形与乃字不同】 米 【矿实也象禾黍之形徐锴曰穰颗粒也十其粳汇开而米见也口口米之形也○按口口皆象形与七八之八不同】 气 【本作口象云气之形徐锴曰象云起貌也今作气】 臼 【中象米也】 瓜 【徐锴曰口瓜实也外口蔓也】 卮 【口圜器也所以节饮食象人口在其下徐谐曰厂象人口节也一专言也】 广 【因广为屋象对刺高屋之形徐锴曰因广为屋故但一边下】 石 【山石也在厂之下口象形○按口亦象形则与口音围者不同徐锴曰口音围误也】 冉 【口本作

母徐锴曰母弱也象毛细而下垂今作冉】 象 【南越大兽长鼻牙象耳牙四足之形】 马 【象马头髦尾四足之形】 犬 【口狗之有悬蹠者也徐锴曰蹠足趾高象犬之长体垂耳也】 鼠 【徐锴曰上象齿下象腹爪尾鼠好啮伤故象齿】 囟 【头会囟盖也】 心 【口人心在身之中】 鱼 【徐锴曰下火象尾而已非水火之火】 户 【半门为户】 门 【从二户】 耳 【口主听也】 手 【拳也口象五指之形】 刈 【本作义芟草也从口口相交徐锴曰象刈草之刀形后人加可作刈】 曲 【本作口象气曲受物之形】 蠹 【口食草根者本作■〈吊上虫下〉从虫吊象形徐锴曰惟此一口象虫形不从矛】 勺 【挹取也象中有实形】 几 【几踞几也徐锴曰人所凭坐也】 四 【四阴数也象四分之形毛晃曰从口从八口象四方八者别也】 宁 【口辨积物也徐锴曰象上隆四周之形】 辂 【联也本作口徐锴曰象交错互辂之形】 九 【口阳之变也象其屈曲究尽之形】 禽 【走兽总名从口凶象头形】 离 【口山神兽也从禽头从口从口徐铉等曰从口义无所取疑象形也】 甲 【口位东方之孟阳气萌动从禾戴孚甲之象一曰甲象人头也】 丁 【口夏时万物皆丁壮成实下承丙象人心也徐锴曰物挺然成立之貌万物盛于丙成于丁其形正中故象心】 子 【徐锴曰十一月夜半阳气所起人承阳故以为称李阳冰曰子在襁褓中足并也古文作口从口象发也】 了 【口迺也从子无臂徐锴曰迺音鸟旁无辅了迺然也】 己 【四月阳气已出阴气已藏万物见成文章故己为蛇徐锴曰己主蛇象蛇之变化有文章也】 亥 【口菱也十月微阳起接盛阴从二二古文上字一人男一人女也从乙象怀子咳咳之形徐锴曰象人怀妊也春秋传曰亥有二首六身又古文亥作口与豕同亥而生子复从一起也】

（臣）等谨按回字郑志已入天物形广石字郑志已入山川形凡若此类义有重申而形事益显者概不复引原文以省诂释之烦后数门并类此

汉许慎曰象形者画成其物随体诂诂曰 【古文作口亦作口篆文作口说文曰实也象太阳之精不亏】 月 【古文作口亦作口篆文作口说文曰阙也象太阴之精】 是也晋卫恒曰象形日月是也日满月亏效其形也唐贾公彦曰象形者日月之类是也象日月形体而为之

南唐徐锴曰象形第一古者文字少而民务寡是以文字多象形假借后世事繁字转滋益形声实众则不能纪远故也始于八卦瞻天拟

地日【见前】 盈月【见前】 亏山【古文作□亦作□篆文作□说文曰象有石而高】 拔水【古文作□亦作□篆文作□说文曰象众水并流中有征阳之气】 曲金【古文作金亦作□篆文作金说文曰象金在土中今声】 散土【土二象地之下地中物出形也】 重木【篆文作□说文曰昌也从□下象其根】 挺而上草【篆文作卅说文曰百卉也从二□】 聚而下皆象形也

宋张有曰象形者象其物形随体诘屈而画其迹者也如云回山川之类

元戴侗曰何谓象形象物之形以立文日月山川之类是也

杨桓曰凡有形而可以象之者摹仿其形之大体使入见之而自识故谓之象形又曰象形者象其可见之形也以上下分之则有在天成象在地成形之异总其可见者言之虽在天之象亦形也六书之象形总上下而言之也而象形之文有十一曰天文二曰地理三曰人品四曰宫室五曰衣服六曰器用七曰鸟兽八曰虫鱼九曰草木十曰怪异

明赵古则曰圣人之造书肇于象形故象形为文字之本而指事会意谐声皆由是而出象形者象其物形随体诘屈而画其迹者其别有正生十类曰数位之形则一口【围同】之类是也曰天文之形则云回之类是也曰地理之形则水厂【岸同】之类是也曰人物之形则子吕之类是也曰草木之形则禾尗【菽同】之类是也曰虫兽之形则虫牛之类是也曰饮食之形则酒肉之类是也曰服饰之形则衣巾之类是也曰宫室之形则□【壺同】■〈高上早下〉【郭同】之类是也曰器用之形则弓矢之类是也此十类直象其形故谓之正生又有兼生二类曰形兼意则日月之类是也曰形兼声则彙【星同】箕之类是也以其兼乎他类故谓之兼生以是推之可触类而通若鼠之首似曰【下一画连音旧】巢之腹似白【下二画开音菊】端之足似而毛类反手月形近肉苟泥而不通则于象形之义狭矣

（臣）等谨案杨桓所分象形十类中曰天文者即郑志之天物曰地理者即郑志之山川曰人品者即郑志之人物曰宫室者即郑志之井邑曰衣服者即郑志之服饰曰怪异者即郑志之鬼物其余若器用鸟兽虫鱼草木四类俱与郑志大略相埒赵古则之说亦与郑志大同小异其余诸家所列或分或合由此可以类推故不备载

王应电曰三才万物靡不有形肖其形而识之故曰象形此字学之本也

赵宦光曰象形者粗迹也绘画形似而使君子小人可并通也象形有独体如水木人女之类有多体如草竹虫龙之类有合体如𧈧【

音莽】 林从■〈龙龙〉 【音沓】 之类有聚体如苗蓂乐巢之类有变体如尸儿
【即人字】 之类有离合体如出□ 【即折字】
𠂇□ 【即癸字】 □ 【即涩】 之类有加体如□ 【即之字】 出未束之类有省
体如□ 【音彻】 □ 【音泼】 □ 【即才
字】 片之类若诸体之可以意求不可以象显者皆指事会意二者之分取成文合变为
会意取散笔合变为指事一义明而三体别矣

（臣）等谨案赵宦光之说以指事居先象形居后谓象显是见不必深求故以为
粗迹然古圣人仰观俯察莫不出于象形其义甚广若
但以粗迹视之恐非六书之本旨也赵氏之意在于遵用说文先事后形之序自以为能
守汉义故谓唐贾公彦始改形一事二非古人之本位
然考郑康成之周礼注班固之艺文志六书皆始于象形是汉儒已以象形为首并非始
于贾公彦也且即说文之言曰仓颉初作书依类象形
故谓之文其后形声相益谓之字着于竹帛谓之书是在许慎亦未尝不以象形为六书
之最初矣

又曰形者肖物貌也仰观俯察继事而起稍涉羸迹绘事之权舆欤

（臣）等谨案象形为文字之最初凡指事会意皆从之出说文列于第二未免失
当应从郑志列之第一者为是诸家所论象形之说皆
不越郑志所列正生十形及兼生二形所谓形兼声形兼意之内推郑志所载侧生六象
中所谓象属者仍是象形所谓象数中一二之类象位
中上下之类旧说皆以之当指事所谓象气中□ 【音呵】 □ 【音既】 之类象声
中■〈口𠂇〉 【音灵】 𠂇 【音虢】 之类
近于会意所谓象貌中如豈丰之类乃是象形如八丨之类则近于指事如𠂇串之类又
近于会意矣

○指事二

上 【上高也篆作□徐锴曰篆文屈曲象阳气也今省作上】 折 【食列切□断
也从斤断草篆文从手今作折】 牟 【□牛鸣
象其声气从口出也】 牵 【引前也从牛□象引牛之縻也】 牢 【篆作□从牛
□省取其四周匝也隶作牢】 义 【篆作□手指相
错】 反 【□覆也从□□徐锴曰□手也□象物之反复】 彗 【□埽竹也从□持
□】 画 【□界也徐锴曰若笔画之也□其界也
本作□隶省作画】 寸 【十分也人手却一寸动■〈瓜血〉谓之寸口□从□一徐
锴曰一者记手腕下一寸】 兆 【□灼龟坼也从
卜兆徐锴曰□兆有如此者○按□字说文以为象形系传以为指事而系传中仍载说
文象形之语盖所谓指事者亦即其所象之形而指之

故六书之体用有兼该者有互见者有单行者不能执一而论即如象形之字往往有通于指事者自许慎以逮郑樵所有分类互见之字甚多

今不具载】 ■ 〈大上佳下〉 【鸟张毛羽自奋从大佳徐锴曰大张大貌也】 争

【争引也从口口徐锴曰口所争也类篇曰口口二

手也口曳也二手而曳之争之道也】 腊 【本作■ 〈从从日，上中下〉 干肉也从

残肉日以晞之】 乎 【语之余也上句之余声口

余气上出而尽也本作口】 平 【口语平舒也从口从八八分也】 朱 【篆作口赤

心木一在其中一者记其心也乐书云一在木下为

本在木上为末在水中为朱则水之为物含阳于内南方之火所自藏也】 ■ 〈〈天天

〉上木下〉 【槎识也夏书曰随山■ 〈〈天天〉

上木下〉木徐锴曰谓随所行林木斫其枝为道记识也■ 〈天天〉盖其斫木低折状

篆作口亦指事】 发 【口犬走貌从犬而口之曳其

足则刺发也被芟跋字从此】 谷 【口泉出通川为谷从水半见出于口】 毋 【篆

作口止之也从女有奸之者徐锴曰能有守也】 氏

【篆作口本也至也从氏下着一地也】 俎 【俎礼俎也从半肉在且上○按且子

余切从几足有二横一其下地也从象半肉与从冻

之从笔陵切者不同】 ■ 〈廿木〉 【口两刃雷也说文曰从木口象形徐锴曰雷即

锹锤字也两刃形不成字此字难以象形又近于指事

○按此字说文已明言象形而徐锴作系传又云难以象形近于指事即此一条足见古

人制字初未尝画定六者之门径有可以的指为某象

形某会意者亦有不可的指而听学人参证者后儒纷纭辩论皆不深考六书之本而徒

执其末是以彼此互执一说其类例日以滋多而于六

书本义反滋牵合附会之弊是以（臣）等谨就前人所列某为象形某为指事择其义

类明显而篆隶楷法皆可通著者敬录原书出处略述

于编其有但言古体而不可宜于今亦或但执一说而不能通于众者虽有所本亦不敢

载是以每门之字所载无多谨因徐锴此条录■ 〈廿

木〉字于指事之末而附缀其义如此】

汉许慎曰指事者视而可识察而见意 【今本说文作察而可见颜师古汉书注引之作察而见意考说文于每二句各有用韵应从见

意】 上 【古文作上】 下 【古文作上】 是也

晋卫恒曰指事上下是也在上为上在下为下

唐贾公彦曰处事者上下之类是也人在一上为上人在一下为下各有其处事得宜故名处事也

（臣）等谨按上下字古文本作口口或作二口又变而作上丁故说文于丨 【音

袞】字训上下通也至篆文始变为口口贾公彦就

篆文之形似以为人在一上人在一下其说恐非

南唐徐锴曰指事第二无形可载有势可见则为指事上下之别起于互对有下而上上名所以立有上而下下名所以生无定物也故立

一而上下引之以见指归宋张有曰事犹物也指事者加物于象形之文直着其事指而可识者也如本末又叉【古爪字】之类

（臣）等谨案张有之说以加物于象形之文为指事如木字象形也加画于下为本加画于上为末又【篆文作口说文曰手也象形

三指亦通作左右之右】字象形也加点于上为叉加点于上下为口盖从说文上下之说而小变之所谓指事者即与象形相为比附此乃指

事之一端而非其全体以下刘泰赵古则诸家之说皆与张氏同

元戴侗曰何谓指事指事之实以立文一二上下之类是也

杨桓曰指事者何谓或形或意随体随用远有所主之事或特设一画二画三画直指其事之所在或立形立意未明复以其属指之或偶同他形他意复以体类各别而指之或形意互相指或以注指或以声指事明而止使人观之而自趋其事之所在故谓之指事

又曰指事者指其象形会意所主之事也文字之始先象其形象形不足而为会意会意者文之变事之别也象形会意俱不足而为指事

指事则上承乎象形会意而下生乎转注形声文之末字之首也其体有九一曰直指其事谓象形会意之文其上下左右各有所主之事但以

一画或二画三画指其事之所在事明而止也二曰以形指形既立一形恐其未明复以形之属指之也三曰以意指意既立一意恐其未明复

以意之属指之也四曰以意指形谓形与意相涉既立其形恐其未明复以意指之也五曰以形指意谓意与形相涉既立其意恐其未明复以

形指之也六曰以注指形既立其形一文不能指其事必以两文或三文指之始得明其事之义也七曰以注指意义与以注指形同而转注之

体于是乎基焉八曰以声指形既立其形恐其未明复以声指之也九曰以声指意义与以声指形同而形声之体于是乎基焉

（臣）等谨按杨桓之说以指事居象形会意之后谓形意俱不足而为指事故其所论指事即承象形会意而言以下刘泰王应电之说

皆与杨氏同然说文明以上下之类为指事武信之类为会意指事者文也会意者字也文在先而字在后故谓指事在象形之后则可谓指事

在会意之后则不可也至其所分指事九体中所谓直指其事者即张有以加体为指事之说所谓以形指形以意指意以意指形以形指意以





注指形以注指意多与会意相混所谓以声指形以声指意又谓谐声相混未为尽合


刘泰曰指事者文既成于象形会意而理不能该者则事生焉事虽有似乎人为其实亦莫不因其自然之理也如本末之类指其木之下者为本指其木之上者为末也

周伯琦曰形不可象则指其事上下是也

明赵古则曰事犹物也圣人造书形不可象则属诸事是以其文继象形而出象形文也指事亦文也象形文之纯指事文之加也故曰正




生附本盖造指事之本附于象形如本末朱禾未束之类是也夫木象形文也加一于下则指为本加一于上则指为末加一于中则指为朱 【





篆文作从木而一在其中与末字作未字作形俱别】 以其首曲而加则指为禾 【音筭木之曲头也与禾黍之禾别禾字篆文作

上右曲禾字篆作上左曲】 以其枝叶之繁而加则指为末以其条干有物而加则指为束其字既不可谓之象形又不可谓之会意故谓之

指事指事之别有十类如象形之所陈者兹不复述此外又有兼谐声而生之一类曰事兼声齿金之类是也








（臣）等谨按赵古则所举齿金二字郑志入之象形内谓之形兼声考齿字象人口齿形而由止得声金字象金在土中形而由今得声当从象形为是




王应电曰以形以意合数文而为经纶之象从又 【手也】 持肉于 〈二上小下〉为祭事从又持弓矢为射 【古文作亦作





右从又或作右从矢篆文作古亦从矢亦作右从寸说文曰弓弩发于身而中于远也】 事从哭亡为丧 【篆文作】 事从目加





木为相度之事故曰处事谓以人处事又曰指事谓指人之事即古语象事之谓也

（臣）等谨按王应电所举祭射丧相等字郑志皆入之会意内

朱谋 〈土韦〉曰指事史 【古文作亦作篆文作说文曰记事者也从又持中中正也】 夬 【篆文作亦作古文作

说文曰分决也从又中象决形考史夬二字皆从又取义又即手也】 尊 【古文作亦作篆文作说文曰酒器也从酋升以奉之或从

寸】 奉 【古文作篆文作说文曰承也】  〈𠂇𠂇〉 【音撰篆文作说文曰二𠂇也巽从此考𠂇字即符节之节】 巽 【古

文作篆文作亦作说文曰具也从廾声庶物皆具以荐之】 射 【见前】

侯 【古文作篆作说文曰从人从厂象张布

矢在其下】 之类
（臣）等谨案朱谋 〈土韦〉所举指事诸字惟史字郑志入于指事内夬字亦

当从史字之例其余如尊奉■〈卩卩〉巽射侯皆当
为会意字

张位曰指事谓直着其事而可知也如人目为见鼻臭为𦘔两户相向为门两手齐下为拜之类是也

（臣）等谨按见𦘔拜为会意字门为象形字与指事未合

吴元满曰圣人造书形不可象则属诸事始以象形易位为增减次以象形变体为差别三以象形加物为指事其文有加既不可谓为象形而所加之画又不成字亦不可谓之会意居文字之间故曰指事或转体以别意或变形以别象或加画于形体之上以成文或省形体之半以取义其正生者三种一曰转体指事二曰变体指事三曰加体指事其变生者一种曰省体指事其兼生者一种曰事兼会意以是五类推之而指事之义尽矣

（臣）等谨按吴元满所谓加体指事即张有之说其所谓转体变体及省体亦皆承象形而言所谓事兼会意则即郑志之事兼意也

赵宦光曰指事者指而可识也上古心目并用故书画未分中古始判而为二河图洛书以文成图象形古文以图成文文滋而为书图蔓而为画书犹字也画则形也后世颠倒其说以形先事者如一二三之类彼将曰象其数形独不知数可心通未可目取事也非物也非物乌得有形物形实事形虚实不先虚明甚曲说有谓以他文加点画变曲直损短长如古则诸人所引此固未可尽非但是书家第二翻造立当在后例所谓变体者皆六书之外非正法也变体指事如子去二臂为子了了木加一笔为本末未设子木未立事将何附故曰第二翻造立也

（臣）等谨按赵宦光以指事居象形之前故其所论多尊事而贱形固未尽可能据至其论指事象形分界之处颇为明析郑志所列象形诸类虽详而以说文指事之类皆入之象形未免泛滥矣

又曰指事有二一独体指事谓一二三十之类一附体指事谓上下本末之类

（臣）等谨按赵宦光所谓独体指事即许慎卫恒贾公彦徐锴戴侗周伯琦诸家之说是也所谓附体指事即张有刘泰赵古则诸家之说是也

又曰事者指其事也结绳之变中古之作以墨代绳易辨难穷其文简其字寡法之初也

（臣）等谨按有形者谓之形无形者谓之事故郑志以指事居象形之下郑志谓指事类乎象形指事事也象形形也指事类乎会意指事文也会意字也其所列指事有事兼声事兼形事兼意之分颇为周匝然其中如背亼

【古私字】 为公 【上从八字八象分别相背之形故有背义】 卜中为用 【古文作□篆文作□古中字本作□故加卜为用】 反予为幻 【篆文作□】 止舟为前 【篆文作□人在舟上不行而进为之前故上从止】 之类各有意义存焉似皆当为会意中字也至于说文以指事上下之类而郑志入之象形然上下皆有位而无形以例推之则称指事者为合所谓丨在上为上丨在下为下口在丨间为中者皆是也其它如卅卅卅等别为一类为会意字又不得以指事例之矣

钦定续通志卷八十九

●钦定续通志卷九十 六书略二

六书略 【二】

会意三

转注四

○会意三

（臣）等谨按宋元以来诸书言会意者大略不甚相远然形声皆有实证而会意多涉虚摹故凡诸家引义连类比例相求辄有委曲牵

引近于傅会者今概不收又有近于指事邻于假借而强为会意者今亦不载

元 【从一兀徐锴曰元者善之长故一兀高也与尧同义】 中 【和也从口丨上下通也徐锴曰口以出令也丨所以记其中也】

命 【使也从口令】 走 【趋也本作■〈足，夭代口〉从天止夭者屈也走则足屈

隶省作走】 弄 【玩也从口玉】 戒 【篆作

□警也从口持戈以戒不虞】 兵 【篆作□械也从口持斤并力之貌本作□隶省作

兵】 卑 【□贱也执事者从左甲徐锴曰右重而

左卑左在甲之下卑也】 史 【篆作□记事者也从口持中中正也徐楷曰记事当主

于中正也】 眇 【一目小也从目少】 美 【甘

也从羊大徐锴曰羊取大者羊美物也】 瞿 【鹰隼之视也从佳■〈目目〉亦声徐

锴曰惊视貌】 霍 【飞声也雨而双飞者其声霍

然徐锴曰其飞忽霍疾也】 双 【从佳二枚从又又即手字手持二佳也】 残 【从

歹戈声戈从二戈徐锴曰兵多则残也】 馱 【饱

也足也从甘然徐锴曰馱音然犬肉也甘口含一也】 舍 【篆作□市居曰舍从亼

□象屋也□象筑也徐锴曰亼众集也□立柱栢椳之形

□音围○按舍字徐云会意然亼□□皆由象形而得是会意亦从象形出也即此一字

可以征六书相通之大凡矣】 内 【入也从门入自

外而入也徐锴曰门音垠】 市 【篆作□贾卖所之也市有垣从□□象物相及也

□古文及字□之省声】 杲 【明也从日在木上徐
锴按淮南子曰拂于扶桑是谓晨明故东字日在木中登于扶桑是谓朏明故杲字日在
木上日晡则反景上照于桑榆故杳字日在木下】 杳
【不孝鸟日至捕磔杳之从鸟首在木上】 闲 【止也从木门徐锴曰闲犹阑也从木
距门】 负 【恃也从人守贝有所恃也】 外 【
卜尚平旦夕卜于事外矣】 兼 【□并也从□手也□二禾也兼持二禾也徐锴曰兼
持一禾兼持二禾可兼持者莫若禾也】 香 【本
作□从黍从甘徐锴按尚书稼穡作甘黍甘为香隶省作香】 察 【覆审也从宀从祭
徐锴曰宀覆也徐铉曰祭祀必质明明察也故从祭】
窞 【匿也从鼠在穴】 疢 【热病从火从疒】 两 【再也从冂从从徐锴曰从二入
也积双两而成一故从一】 表 【篆作□上衣
也从衣毛徐锴曰古者以皮为裘毛皆在外故衣毛为□隶作表】 令 【从人卩徐锴
曰人集也可号人者也人而为之节制】 色 【颜
气也从人从□徐锴曰颜色人之仪节也】 廛 【一亩半一家之居也从广里八土徐
锴曰古者百步为亩三亩为里一亩半半里也故从里
八土八半也分也】 仄 【侧倾也从厂人在厂下徐锴曰人在厓石之下不得安处也
】 猋 【犬走貌从三犬】 赤 【篆作■〈大上
火下〉南方色也从大从火隶作赤徐锴曰南方之星其中一者最赤名大火】 赫 【
火赤貌从二赤】 乔 【高而曲也从夭从高省徐
铉按尔雅木上句曰乔上曲也】 渊 【回水也■〈渊，去彡〉左右岸也中象水也
】 泮 【诸侯飨射之宫也水周其半故从水半】
戍 【守边也从人持戈】 域 【邦也或字从口戈以守其一地也徐锴曰口音围或
从土作域】 劣 【弱也从力少】 衔 【马勒
口中从金行衔者行马者也徐锴曰马衔所以制马之行也】 轰 【羣车声从三车】
成 【就也从戊丁徐锴曰戊中宫成于中也丁成
也】 辛 【秋时金刚味辛辛痛泣出从一■〈立上丨下〉■〈立上丨下〉皃也辛
承庚象人股徐锴曰言万物方盛初见断制故辛痛也
辛亦慚孛斂故象人股渐焦杀也】 辩 【治也从言在辨之闲辩音辨徐锴曰察言以
治之也】 孕 【篆作□裹子也从子□徐锴曰□
音殊草木之实垂亦取象于□朵字是也人裹妊似之】 ■〈子兔〉 【生子兔身也
从子兔】

汉许慎曰会意者比类合谊以见指撝武信是也

晋卫恒曰会意武信是也止戈为武人言为信

唐贾公彦曰会意者武信之类是也人言为信止戈为武会合人意故云会意也

南唐徐锴曰会意第三会意者人事也无形无势取义垂训故作会意载戢干戈杀以止杀故止戈为武君子先行其言而后从之去食存信故人言为信

宋张有曰会意者或合其体而兼乎义或反其文而取乎意拟之而后言议之而后动者也如休信鬻明之类

（臣）等谨按张有所举休信鬻明四字信字即说文会意之本义如人依木为休羔在■〈弓鬲弓〉为鬻月在冏为明【说文谓古文明字从月从目】皆从说文推广之此类尚多今不悉载

元载侗曰何谓会意合文以见意两人为从三人为丞【古众字】两火为炎三火为焱之类是也

（臣）等谨按戴侗之说但以同体之字为会意盖从说文武信之说而小变之亦会意之一端而非其全体以下刘泰之说与戴氏同

杨桓曰会意者何形者体也常也而其用也其动也其变也各有意主焉故必假其形之用之动之变以示其意使人观之而自悟故谓之会意

又曰会意者写天地万物变动之意使人观之而自晓自会也然意因形而生故意不能独见必假其形之变而意见焉盖形体也意用也形意相从体用一致先明其形则意无不了然而自会矣其体十有六一曰天运之意二曰地体之意三曰人体之意四曰人伦之意五曰人伦事意六曰人品之意七曰人品事意八曰数目之意九曰彩色之意十曰宫室之意十一曰衣服之意十二曰饮食之意十三曰器用之意十四曰飞走之意十五曰虫鱼之意十六曰生植之意

（臣）等谨按杨桓之说以会意居象形之后指事之前故其所论会意即承象形而言以下刘泰王应电之说皆与杨氏同至杨氏所分会意十六体中又多与指事相混未可尽泥

刘泰曰会意者天地万物之形既异其文又不一而足故摹庶物变动之意以成文如从比之类聚义两人相从为从两人相比为比也

周伯琦曰事不可该则会诸意信义是也

（臣）等谨按周伯琦所举信字即说文会意之本义至于义字古音俄从我羊徐铉谓与善同意故从羊周氏据断以为会意然义既从我得声又当为谐声字则又未可尽以会意概之矣

张位曰会意谓合文以成其义也如止戈为武力田为男女帚为妇人言为信人为为伪吏于人为使之类是也

吴元满曰事不能该则属诸意会合象形指事之文以成字拟议以成其变化故曰

会意或会本文以成字或合向背以成字或会二文三文以成字或省繁文以凑字其正生者四种一曰本体会意二曰合体会意三曰二体会意四曰三体会意其变生者一种曰省体会意其兼生者一种曰意兼谐声以是六类求之而会意之义得矣

赵宦光曰会意者事形不足合文为之二合以至多合有同体合如从采林森之类有异体合如休相意义之类有省体合如儿【古人字】□【古大字】之类有让体合如詹父【古父字本作□】之类有破体合如爰杂之类有变体合如忧盱之类其变而侧倒反化者如尸匕【篆文作□古化字】比勺诸文后人杂入形事远矣

（臣）等谨按赵宦光所谓异体合即许慎卫恒贾公彦徐锴张有周伯琦诸家之说是也所谓同体合即戴侗刘泰诸家之说是也所谓省体合让体合破体合变体合又因而广之尔

又曰意者会意义也即义去声渐斥其本本斥易淆得亚声教

（臣）等谨按郑志谓象形指事文也会意字也又谓一子一母为谐声二母合为会意谐声者一体主义一体主声会意者二体俱主义合而成字其论最为明确盖谐声字多会意字少谐声而兼会意会意不兼谐声也郑志所列有同母会意异母会意又有三体会意已为详备然其所收诸字中有以相并取意者如并木为林并生为牲之类郑志入之会意者也然并玉为珏并山为岫【音莘】之类则又入之象形矣有以相重取意者如重夕为多重戈为戠之类郑志入之会意者也然重火为炎重田为畺【音疆】之类又入之象形矣有以三合取意者如三耳为聶三马为彘【音彪】之类郑志入之会意者也然三车为轰三佳为龠【音杂】之类又入之象形矣有以四合取意者如四鱼为𩺰〈〈鱼鱼〉上〈鱼鱼〉下〉【音业】四工为𠄎〈〈工工〉上〈工工〉下〉【音展】之类郑志入之会意者也然四中为𠄎【音莽】四口为𠄎〈吕吕〉【音给】之类又入之象形矣有以相向取意者如邑向为𠄎〈邑邑〉【音巷】郑志入之会意者也然口向为𠄎【音遂】又入之象形矣有以相背取意者如臣背为𠄎【音誑】郑志入之会意者也然人背为北【篆文作𠄎故人背为北】又入之象形矣有以相反取意者如印反为𠄎【古抑字】郑志入之会意者也然止反为𠄎【音拏】又入之象形矣凡此皆郑志未能画一者而亦可以见象形与会意本有相通之义矣至于郑志之论会意但及于三体之合若兼吴元满赵宦光辈之说观之又有省体让体破体变体诸类例皆从武信之义推广之皆可与郑志相发明者

也

○转注四

（臣）等谨按转注之义诸家之说不同惟许慎说文为足据南唐徐锴作说文系传引而申之其义晰矣即毛晃亦误沿老下从匕考下从丂之说正为锴之所纠其余他家之说偏执一端益难以衷一是至明杨慎作转注古音略一书专就异音之字分属之叶韵而证以经史诸书以为此即古之所谓转注者盖误执毛晃之说而不知研究说文之本指是以有明诸家言转注者益纠纷而无所适从今惟以许慎徐锴之说为主而略采戴侗周伯琦诸书以补郑志之所未及而余说概不敢载是以所列之字视诸类为尤少云

止之转注 𠄎 【他达切蹈也从反止】 正之转注 𠄎 【符法切】 𠄎 【弥沅切戴侗曰反正为乏乏藏矢之具也从反正正受矢而乏藏之或曰反正为𠄎𠄎蔽矢短墙也正受矢而𠄎蔽之说文𠄎不见也象壅蔽之形但反正当为𠄎讹为乏尔○按侗说非也春秋传曰故文反正为乏周伯琦曰𠄎藏矢之具正之转注借为匱乏字耳包希鲁六书补义曰正之转为𠄎凡物之正者人见之必当审也使其偏斜反侧则观视者又安能得其实哉故反正则为乏转正则为𠄎惟其不见是以不正尔此条足该转注之义】 𠄎之转注 𠄎 【𠄎篆作𠄎竦手也居竦切从𠄎从又亦作𠄎从两手也𠄎普班切反手有所攀援也别作𠄎樊声加手又作𠄎〈才攀〉再加手者非汉书凡攀字皆止作𠄎】 父之转注 尹 【父矩也家长率教者从𠄎举杖尹治也从𠄎𠄎握事者也包希鲁补义曰父尹二字相缘而生但家难而天下易家必恩义兼尽尹正百官主于义也故父之所持者在𠄎之前尹之所持者𠄎之中中者严急所以易也前者恩义兼尽在适时宜所以难也】 可之转注 叵 【叵普火切不可之疾言为叵从反可】 𠄎之转注 𠄎 𠄎 【陟侈切象人两胫后有推而致之者苦瓦切跨步也从反𠄎𠄎字从此】 𠄎之转注 𠄎 【帀作答切卅根也卅未出地根延蔓周帀故以倒虫为义俗作匝】 人之转注 𠄎 【说文曰𠄎相与比叙也从反人孙氏云卑履切戴侗曰𠄎与匕不同𠄎人旋反也从人转注其文立匕栖类也象匕之形其文仰○按说文系傳𠄎相与比叙也从反人卑履切匙 𠄎〈匕笛〉之属从之匕变也从倒人呼跨切真化之属从之𠄎𠄎匕三字亦相缘而生也】 从之转注 比 【戴侗曰反从为比反而相亲比也古文从作𠄎○按包希鲁补义曰二人相顺则为从相反则为比又二人相背则为北三字相缘而生指事也然希鲁于比字下又注云意转注也盖此三

字相缘而生虽类指事而形与义转相注受视夫专以义为转者则胜矣故从戴侗六书故收入转注】 身之转注□ 【□转身也戴侗曰诗云殷其雷言雷声展转■〈殷，去殳〉地也周伯琦曰从反身取■〈殷，去殳〉归之义于机切】 见之转注□ 【□古恨切目不见也从目从反人人反身则无所见也】 欠之转注□ 【说文曰□并不得息也从反欠隶作□居未切古文作□】 印之转注□ 【□按也从反印印者外向而印之反印为内自□印之转注也借为反语词隶作抑】 仄之转注□ 【戴侗曰转仄为丸因为圜转之义引之为弹丸药丸之丸】 □之转注□ 【□水之流别也匹卦切别作派周伯琦曰水长流反则分■〈派，去氵〉】 □之转注□□之转注𠄎 【□莫饱切象门两辟也借为寅卯之□□与久切从𠄎而塞其通阖之义也因为十二辰□𠄎之𠄎日出于□日入于𠄎万物出乎□入乎𠄎故□辟而𠄎阖也𠄎别作酉留刘皆从𠄎王莽谓刘为刚卯金刀盖已昧其义矣】 好之转注■〈丑女〉 【说文■〈丑女〉人姓也引商书无有作■〈丑女〉今书文作好呼到切】 匚之转注□ 【说文□象器曲受物之形古文作□又作□□觚曲也隶作曲□本作□府良切器之为方者也取象于巨□省文说文□受物之器象形也籀文作□】 □之转注□ 【□情雪切断丝也象丝而绝之□古诣切续断也反□为□俗作继】 四之转注六 【包希鲁补义曰天数五一三五七九阳奇也地数五二四六八十阴偶也古文四作□六继四故加注于上以别之若五之于三九之于七则皆少变其形以相识别也】 子之转注□ 【□他骨切子顺生如脱也象子下出说文云□不顺忽出也从倒子周伯琦曰子不顺生有□之义也○按□为倒子□为倒□□古文子也□即□字育毓之属从之今文作突】

汉许慎曰转注者建类一首同意相受考老是也

晋卫恒曰转注考老是也以老为□ 【即寿字篆文作□从老首】 考也 【犹言以老字为□考之转注也】

唐贾公彦曰转注者考老之类是也建类一首文意相受左右相注故名转注

南唐徐锴曰转注第五属类成字而复于偏旁加训博谕近譬故为转注人毛匕 【音化老字下从之】 为老□耆耄亦老故以老字注

之受意于老转相传注故谓之转注义近形声而有异焉形声江河不同滩湿各异转注考老实同妙好无隔此其分也

又曰转注者建类一首同意相受谓老之别名有耆有耄有□有耄又孝子养老是也一首者谓此孝等诸字皆取类于老则皆从老转注

之言若水之出源分歧别派各受其名而本同主于一水也而今之俗说乃谓左回为𠃉右回为匕此乃委巷之言且又考老之字不皆从𠃉𠃉音考老从匕音化也散言之曰形声总言之曰转注谓耆耄耄𠃉皆老也凡五字试依尔雅之类言之耆耄𠃉老也又老𠃉耄耄耆可同谓之老老亦可同谓之耆往来皆通故曰转注总而言之也

（臣）等谨按转注之说自徐锴以前犹为近古故皆遵守说文考老之义然其所诂耆耄等字特举此以见例耳非谓尔雅一书凡义之同者皆得以转注概之盖既云建类一首则声义不离于形既云同意相受则形声不离于意故锴云散言之曰形声总言之曰转注此二言实转注一门之发凡矣后来诸家或偏主训义或偏主形体或偏主叶音皆执其一而未该其全者也

宋张有曰转注者展转其声注释他字之用也如其无少长之类

（臣）等谨按张有之说以假借中之异声者为转注而同声者为假借始与汉唐诸儒异其所举其无少长等字盖因说文有箕【篆文作𠃉古文作𠃉及𠃉与𠃉义皆簸也籀文作𠃉】字而无其字以其簸扬未定故借为其然之词又说文无字【篆文作𠃉说文曰丰也】本上声即尚书庶草繁庑之庑【说文引书本作庶草繁无】若有无之无【篆文作𠃉说文曰亡也】属平声音下从亡字自李斯书碑讳亡故借丰义之无为有无之无至少字为多之对本上声借为去声老少之少长字为短之对本平声借为上声长幼之长其实即六书中假借之义非转注之本旨以下赵古则王应电杨慎朱谋■〈土韦〉张位吴元满诸家之说皆与张氏同

元戴侗曰何谓转注因文而转注之侧山为𠃉【即阜字】反人为匕【音比与音化者别篆文作𠃉故反𠃉为𠃉】反欠为𠃉【音既篆文作𠃉故反𠃉为𠃉】反子为𠃉【音突篆文作𠃉故反𠃉为𠃉】之类是也

杨桓曰转注者何谓象形会意之文不足以备其文章言语变通之用故必须二文三文四文转相注释以成一字使人绎之而自晓其所为所用之义故谓之转注又曰转注者承指事而作也指事之体由会意之变而生转注又生于指事之变也故指事之初或直指其事或形指形或意指意或形意互相指转注已兆于斯又以二文三文共指其一形一意而转注之体所由着也然转注之作虽承乎指事其旨则实不出乎会意盖由会意之意止能因其象形而见之若夫天地之闲万有之意固非一象形之动变所能尽者苟不并累众文互转以成注其意何由而足故转注之制或二文成一字或三文成一字或四文成一字四文又不足又取已集

成字者杂其文而用之意足而后止也

（臣）等谨按杨桓之说以二文三文四文之义合而成字者即为转注又与诸儒异此乃会意中之一类亦未可以该转注之全义也

刘泰曰转注者指事之外意有不能尽者则取文字转相附注以足其意如圣贤之类圣从耳从口从口以其闻无不通言无不中口则人在士上口又士之大者贤从臣从寸从宝省以其臣有守 【贤字古文或作口及口从臣从寸寸者法度也守字即从寸取义故云其臣有守】 则国之宝也

（臣）等谨按说文圣字训通也从耳从呈声贤字训多才也从贝从馵 【音愷说文曰古文以为贤字】 声皆当为谐声字刘泰之说以从耳从口从口为圣从臣从寸从宝字省文为贤虽与说文互异而义亦可通又当为会意字亦与转注未合

周伯琦曰声有不可穷则因形体而转注焉币 【篆文作币故反口为币】 乏 【篆文作口故反口为乏】 是也

明赵古则曰转注者转展其声而注释为他字之用者也有因其义而转者有但转其声而无义者有再转为三声用者有三转为四声用者至于八九转者亦有之其转之之法则与造谐声相类有转同声者有转旁声者有转正音者有转旁音者有惟取其书而转者其别有五曰因义转注者如恶本善恶之恶以其恶也则可恶 【去声】 故转为憎恶之恶齐本齐一之齐以其齐也则如齐 【斋同】 故转为齐庄之齐此其类也曰无义转注者如荷本莲荷之荷而转为负荷之荷 【去声】 雅本鸟雅之雅 【鸦同】 而转为风雅之雅 【上声】 此其类也曰因转而转者如长本长短之长长则物莫先焉故转为长幼之长 【上声】 长则有余故又转为长物之长 【去声】 行本行止之行行则有踪迹故转为德行之行 【去声】 行则有次序故又转为行列之行 【音杭】 又为行行 【即论语子路行行如也之行】 之行 【音桁】 此其类也此三者谓之托生又有二用曰双音并义不为转注者如朋 【去声占凤字说文谓凤飞羣鸟从之故借以为朋党字】 皇之朋即鸱朋之朋 【平声】 皆象其飞形杷枋 【柄同】 之把补讶切 【音霸去声】 收麦之器白加切 【音爬平声】 又为木名 【此即枇杷之杷】 乐器之枇杷 【释名本从本俗作琵琶】 皆得从木以定意从巴以谐声此其类也是谓反生又有兼用曰假借而转注者如来乃来牟之来既借为往来之来又转为劳来之来 【去声】 风乃风虫之风既借为吹嘘之风又转为风

刺之风【去声】此其类也又有方音叶音不在转注例者如联袂之袂陟卫切南方之人则有株列切兄弟之兄呼庸切东吴之人则有呼荣切上下之下读如华夏押于语韵则音如户明谅之明读如姓名押于阳韵则音如芒凡此之类不能悉载若夫衰有四音齐有五音不有六音从有七音差有八音射有九音辟有十一音之类或主意义或无意义然转声而无意义者多矣学者引伸触类而通之可也自许叔重以来以同意相受考老子为转注康成以之而解经夹漈以之而成略遂失转注之本旨今夫老字从人从毛从匕者人之毛化而白则为老会意字也考者老也故从老省定意从丂者谐声字也初非以老字转而考也又若耆耇■〈耆，勿代句〉■〈耇，占代句〉孝耄六字皆从老省以为意从旨句勿占至以为声孝则从子承父道而为会意今夹漈以之入转注之篇可乎哉

（臣）等谨按赵古则从张有转声之说本非转注之本旨即以转声而论如负何之何说文作何训儻也本平声借为谁何之何乃以为莲荷之转声行之读如杭本古音也乃以为转音下之读如户明之读如芒亦古音也乃以为叶音袂之入屑韵本正音也乃以为南方之音兄之入庚韵亦正音也其或呼为匈者乃近代俗音字书皆不收之乃反以庚韵者为东吴之音皆臆说也至于考老之说最为近古赵氏欲自申其说故从而诋之亦未可为据详见于后

王应电曰声出于天或有余焉或不足焉声之有余也一义而各为一声不能声为之制字也从一字而转为数声故曰转注

杨慎曰郑渔仲六书略论假借极有发明至说转注之义则谬以千里矣原转注之义最为难明周礼注云一字数义展转注释而后可通后人不得其说遂以反此作彼为转注许慎云转注考老是也毛晃云考老各自成文非反考为老王柏正始之音亦以考老之训为非萧楚谓一字转其声而读是为转注程端礼谓假借借声转注转声皆合周礼注展转注释之说可正考老之谬矣又易疏云贲有七音义各不同触类而长之衰有四音齐有五音从有七音差有八音敦有七音辟有十一音皆转注之极也

（臣）等谨按以一字数义为转注其说始于宋之张有及毛晃并不见于周礼注在毛晃之说曰周礼六书转注谓一字数义展转注释而后可通后世不得其说遂以反此作彼为转注其说皆非盖自申其议论如此杨氏用其说而不察其文义遂直以为周礼注之文则舛谬甚矣

朱谋■〈土韦〉曰转注因谐以广音南北殊声平仄异读谟转慕莫之类

张位曰转注谓一字数义展转注释可通用也如长久长字长则物莫先焉故又为长幼之长长则有余故又为长物之长如行止行字行则有踪迹故又为德行之行行则有次序故又为周行之行如数目数字有数则可数故为数往之数有数则密矣故又为疏数之数又音促数罍亦密矣又有本其意特转声用之者如以女妻人为妻之类是也

吴元满曰假借不足故转声以演义因形事意声四体展转声音注释为他义之用故曰转注有转声注释别义有转声但取叶韵有转本音注释他义有转别音注释他义有别音注义有别音叶韵有转而复转有双声并转有因转复借其正生者四种一曰转声注义二曰转声叶韵三曰本音注义四曰转音注义其变生者四种一曰别音注意二曰别音叶韵三曰转而复转四曰双声并转其兼生者一种曰因转复转

（臣）等谨按自赵古则以下其说虽详略不同而取义则一皆以转声者为转注矣

赵宦光曰转注者声意共享也取其字就其声注以他字而义始显如𠂔字象气难上出之形而老人𠂔噎似之于是取老字省其下体以注于𠂔上而义始足也

又曰转注之体大类形声【即谐声】转注同声形声异声此二书之分而其扞法之初绝然不混也但须毋离所引考老二字本旨则不倍古人矣

又曰同声者为转注如考同𠂔之类转声者为谐声如耇谐句■〈耇，古代句〉谐占之类非声者为会意如孝从老子耆从老旨之类

（臣）等谨按赵宦光之说以谐声中之同声者为转注而异声者为谐声又与诸儒异其所论考老之为转注是也其所论耇■〈耇，古代句〉之为谐声非也且即如赵氏之说谓耇字谐句■〈耇，古代句〉字谐占今考说文耇字训老人面冻黎若垢也从老省句声是耇字之句乃从均【垢字亦作均】省本与耇同声说文■〈耇，古代句〉字训老人面如点也从老省占声是■〈耇，古代句〉字之占乃从点省本与■〈耇，古代句〉同声皆非转声也又说文耆字训老也从老省旨声是旨之与耆乃平上之通亦不得谓之非声也皆未可为据

又曰注者转示志识也同呼异用不令义混就形附释体烦握简譬则尔雅之未训传疏之肇基欬物之杂文之赘也

（臣）等谨按六书中惟转注之义古来说者判不相合约有数家自许慎以考老为转注而未详言其义卫恒谓考老者以老为口考也

徐锴谓口耆耄亦老故以老字注之受意于老转相传注皆遵用许氏之说而口耆耄等字特从考老二字推广之贾公彦亦主考老之说而增一语曰左右相注故名转注后人因左右相注遂专从字形求之裴务齐切韵序以为考字左回老字右转此转注之一说也然说文于考字下从丂音考亦作巧老字下从匕音化本各有取义故徐锴以左回右转为俗说郭忠恕以左回右转为野言毛晃谓考老下各自成文非反考为老也是左右转形之说虽似遵用说文而已与说文之本义相违诚未可为定论至于赵古则辈因此遂诋说文考老之非而实非许氏之误也

又有以转注为训诂者谓说文于考字下训老也于老字下训考也以二字同义者转相为注即名转注此又一说也以注字为注释之注似与说文之原训有合然六书各有本位必先有六书而后训诂随之是六书者母也训诂者子也凡六书皆当有训诂岂独转注一种为然今乃以后起之训诂配五书之本位于义既属未安况考之训老老之训考为许氏之文故谓之说文解字而六书在周初已有定名亦未可以汉儒之笺释为造书之本旨也且考说文之言曰建类一首同意相受本从前缀之相同者而言今即以考老互训之例推之如福字训祐祐字训福而凡禄祉之与福同意者即以福训之咽字训啞啞字训咽而凡喉吟之与咽同意者即以咽训之遇字训逢逢字训遇而凡遭遘之与遇同意者即以遇训之忧字训愁愁字训忧而凡怊悵之与忧同意者即以忧训之凡若此等皆可与同意相受之说推广发明者也若踰越之互相训待俟之互相训问讯之互相训谨慎之互相训明照之互相训始初之互相训又独非同意乎然部首各别字类各殊与说文建类一首之语终属格而难通也其不从考老之说者如张有赵古则王应电诸家之论转注则但主于字音故以为展转其声而注为他字之用其大指以一字而同声别义者为假借一字而转声别义者即为转注杨慎作转注古音略极论转注为文字之变而推之于双音叶音并直指郑志之谬其论似为辨矣然转声之说即说文之所谓令长已包于假借之中今乃移假借之义作转注之义显与说文相背亦未为允协也杨桓刘泰之论转注又兼主于字义故以为二文三文四文转相注以成一字使人绎之而自晓其义然合文成字之义即郑樵之所谓三体会意赵古则之所谓三四五体会意而乃以之当转注又将置会意于何地乎至于赵宦光着说文长笺专宗说文考老之说又出乎诸家所论之外其论转注自以为能守汉义所言近是矣乃惟以谐声中之不转声者为转注尚未为尽合即如口耆耄三字与考老字并为转注卫恒辈已言之果如赵氏之说

以同声者为转注转声者为谐声则考【𠂔与考同声】字为转注而𠂔耆耄【𠂔与𠂔旨与耆至与耄皆转声】字皆为谐声不得为转注矣岂唐以前相传之说果尽非乎且转注与谐声之辨本不在转声与不转声若以谐声中之同声音皆为转注则是江河【工与江可与河皆转声】之类为谐声而潇湘【萧与潇相与湘皆同声】之类将为转注矣又岂可训乎是数说者或以为左右成文则专主于字形或以为彼此互训则专主于字诂或以假借中之转声者为转注而已与假借相混或以会意中之合体者为转注而已与会意相混或以谐声中之不转声者为转注而又与谐声相混皆未合转注之本旨然此乃后人持论之岐出而要未可以为说文之咎也夫说文考老之说最为古义晋唐诸儒皆宗守之而无有异说然则欲定转注之义仍当以说文建类一首同意相受二语求之盖转注近乎会意而与会意不同转注者以此合彼而不离其原义如以老【凡前缀从耂〈老，去匕〉者皆在老部说文谓之老省】合𠂔为考而考字仍有老字之义以老合𠂔【音畴】为𠂔而𠂔字仍有老字之义会意者以此合彼而各自为义如以止合戈为武而武字已非止字之义以人合言为信而信字已非人字之义此转注与会意之分也转注又近乎谐声而与谐声不同转注者彼与此本属同意如𠂔字有气碍之象老人之哽噎似之故以老合之而为考𠂔字有屈曲之象老人之伛偻似之故以老合之而为𠂔谐声者彼与此一主义而一主声如以水合工为江工字本无水义而但取其声以水合可河可字本无水义而但取其声此转注与谐声之分也如此则与说文同意相受之语正合而于卫恒贾公彦徐锴诸家之说皆不至相背矣郑志之论转注用说文之说而分为四类曰建类主义曰建类主声曰互体别声曰互体别义其前二类约从建类一首立论举老部履部耂〈寐，梦代耂〉部𠂔【音蔑耂字从之】部𠂔〈八上儿下〉【音汪𠂔字从之】部及弦【𠂔𠂔耂〈𠂔 曷〉字从之】部诸字为例然其中亦有杂入谐声之字至于𠂔𠂔𠂔乃一二三字之别体夙为象形字夙乃皇字之俗体之𠂔字从耂〈米翟〉【音眺】得声而𠂔字从入得声𠂔【音含】字从弓【音颌】得声而𠂔【音合】字从合得声𠂔【音斯】字从厂【意曳】得声而𠂔〈厂外扁内〉【音扁】字从扁得声皆可谓之谐声而不可谓之转注也其后二类约从左右相注立论以一字而有二体者或左右转之或上下转之各自有义即为转注与裴务齐等诸家之说相近而其义较圆虽后儒亦有訾议之者然就郑志所列亦自具有条

理固足以备转注之一说矣

钦定续通志卷九十

●钦定续通志卷九十一 六书略三

六书略 【三】

谐声五

假借六

○谐声五

（臣）等谨按谐声一曰形声郑志谓触声成字不可胜举是也然郑志所列诸字仍各分主字母引类载之则义例滋多而莫可统纪实则谐声之最易见者无过许慎说文原注从某某声是则谐声之法毋庸别起类例者矣且古人论谐声举江河以见例其义本自简明而郑樵分别字母诸例但因文以训义而于所以得声之故转有未尽明者考说文始一终亥部叙虽繁然即江河之例推之则就其部字之中因声解字者类举一二已足备谐声之大凡矣如示部之祐从示古声禧从示喜声玉部之璠从玉番声珣从玉与声又有从某某亦声音此即郑樵所云或因义而兼声或因形而兼声者也然郑志既从附见而其详亦已具该于说文各部之中如必就各部之字一一胪叙未免涉于繁赘若于各部之外别举谐声之法则转生枝节又非六书正指是以今但举说文从某某声一条以期符合江河谐声成字之义故谐声一门不另摘编诸字

汉许慎曰形声者以事为名取譬相成江河是也

晋卫恒曰形声江河是也以类为形配以声也

唐贾公彦曰谐声者即形声一也江河之类是也皆以水为形以工可为声书有六体形声实多若江河之类是左形右声鸪鸽之类是右形左声草藻之类是上形下声娑娑之类是上声下形圃国之类是外形内声闾闾衡衡之类是外声内形此形声之等有六也

（臣）等谨按闾闾二字皆外形内声衡字说文训马勒口中从金从行衡以行马者也又当为会意字贾公彦皆入之外声内形恐误赵宦光说文长笺改为问闻衡徽 【中从系外从微省声】 四字



南唐徐锴曰谐声第四无形可象无事可指无意可会故作谐声江河四读名以地分口岱五岳号随境异逶迤峻极其状本同故立体于侧各以声韵别之六书之中最为浅末故后代滋益多附焉

宋张有曰谐声者或主母以定形或因母以主意而附他字为子以调合其声者也如鹅鸭江河之类王应麟曰谐声六书之一也声韵之

学尚矣夹漈谓五书有穷谐声无穷五书尚义谐声尚声释文序录云古人音书止为譬况之说孙炎始为反语考古编谓周颙始有翻切非也

（臣）等谨按王应麟之论谐声及于反语翻切乃音韵之学非谐声之本旨

元戴侗曰何谓谐声从一而谐以白声为百从晶而谐以生声为曐【即星字】从甘而谐以匕声为旨从又而谐以卜声为支之类是也

（臣）等谨按说文百字【古文作篆文作考口字即古自字与黑白之白别】从一从自戴侗谓从白声为百者与说文不合

杨桓曰形声者何形者非专指象形而言也盖总其象形会意以宾主言之也主为形宾为声也盖有此形必有声以为之称呼而转注不足以明其称呼之义故必于形之旁取一文一字直附其声使人呼之而自知其何形何意也故谓之形声又曰形声者承转注不足而作也声者名也谓万事万物之名也物主乎形事主乎意盖有此形必有此声以为之名别其称呼以明其形有异体而意有异用也

刘泰曰谐声者物之形意非转注所能尽故于形之旁附之以或文或字因声以明之如瞳眈之类从日以童龙为声也

周伯琦曰意不可尽则谐诸声江河是也

明赵古则曰六书之要在乎谐声声原于虚妙于物而无不谐故也然其为字则主母以定形因母以主意而附他字为子以调合其声者也原夫造谐声之法或取声以成字或取音以成字声者平上去入四声也音者宫商角征羽半征半商七音也有同声者则取同声而谐如控铜而谐空同声之类是也无同声者则取转声而谐如控洞而谐空同声之类是也无转声者则取旁声而谐如叨江而谐刀工声之类是也无旁声者则取正音而谐如箫昵而谐肃尼音之类是也无正音者则取旁音而谐如知威而谐矢戍音之类是也有惟取同音而谐者如风开而谐凡开之类是也此其大略也若其别则有声兼意如礼贯之类三体四体如归微之类又有左定意而右谐声者松柏之类是也右定意而左谐声者鸡都之类是也其或定意于上而谐声于下者莲■〈雨上彗下〉之类是也定意于下而谐声于上者帮常之类是也有形定于外而声谐于内者园圃之类是也意定于内而声谐于外者徽輿之类是也有从声之文散居而卒难认者𠂔【音干从旦从■〈方人〉声■〈方人〉音偃】黄【从田从𠂔声𠂔古文光字】之类是也其言之于语论寸之于寺专之类则谓之因母以主意其口【音围】之于园圃晶之于曐【星名同参】曐【星名同辰】之类则谓之主母以定形又有所

谓从声而省者盖省文有声关乎义者有义关乎声

者如甜之从舌以为义舌之所嗜者甘故也谓恬之从舌则非矣盖从甜省为声而关于义故也如营之从荧省声也以吕为义而关于声故也

谓劳之从荧则非矣盖从营省为义而关于声故也谐声之道既有无不谐之妙又有累加之妙如读字主言以为意从卖以为声则卖字主贝

以为意从■〈土八冂，上中下〉以为声又■〈土八冂，上中下〉字乃主冂以为意从■〈土上八下〉以为声矣敦字主支以为意从

学以为声则学字主■〈学，去子〉以为意从■〈爻上了下〉以为声又■〈爻上子下〉字乃主子以为意从爻以为声矣此又累相加

而不厌烦者此谐声之道所以无穷也

王应电曰主一字之形而以他字之声合之因其形之同而知为是类因其声之异而知为是物是义故曰形声非本声而谐之故又曰谐

声

朱谋■〈土韦〉曰谐声因名以定意枫讽从风需黍从雨【说文黍字从禾从雨省声】

张位曰谐声谓本一字以定其体而附他字以谐其声也如江河左从水以定其体而谐声在右鹅鸭右从鸟以定其体而谐声在左袞裳

谐声在上帘箔谐声在下园圃谐声在内徽輿谐声在外之类是也

吴元满曰未立文字先有声音意有尽而声无穷故因声以补意之所不足立部为母以定意附他字为子以调协其声音故曰谐声或谐

声转声以成字或谐音转音以成字或叶音转音以成字其正生者二种一曰谐本声二曰谐转声其变生者二种一曰谐本音二曰谐转音其

兼生者二种一曰叶本音二曰叶转音以是六类求之而谐声之义得矣

（臣）等谨按郑志谓五书有穷谐声无穷五书尚义谐声尚声然五书莫不有声其中象形指事居先为文字之本假借居末所以通字

义字音之用于不穷惟会意转注谐声三者则上承乎象形指事而下生乎假借必其字有非会意转注之所能该者而后属之谐声郑志谓谐

声之字多不能纪约举其总数为二万一千三百四十一字未免过于泛滥至其所分六类中曰子母【郑志谓母主义子主声】同声如■

〈聃十〉【从十从聃声以十字为母聃字为子而十字亦同声】■〈奈隶〉【从隶从奈声以隶字为母奈字为子而隶字亦同声】

之类曰子母为声如靡【从麻从非声以麻字为母非字为子既从非得声而音馘音麤亦从麻得声而音摩音蠖】雌【从虫从佳声以

虫字为母佳字为子既从佳得声而音垒音■〈目遗〉亦从虫得声而音海】之类曰

三体谐声如雁 【从佳从人从厂声】 𪔐 【从木从火从酉声】 之类皆谐声中之变体也其所谓母主声一类中如佳与■〈目目〉【音句】为瞿字瞿为鹰隼之视仍当以佳为母主义以■〈目目〉为子主声【说文别立瞿部】 嗇与斗【即床字之省文】为墙字墙取垣蔽之象仍当以嗇为母主义以斗为子主声【说文本无斗部】非尽母主声也其所谓主声不主义一类中如尸与夷为■〈尸外夷内〉字■〈尸外夷内〉者踞也故亦得尸义包与夸为匏字匏者瓠也故亦得包义非尽主声不主义也若夫申与束为■〈束申〉字■〈师父，去巾〉与垂为■〈垂师，去巾〉字【郑志在母主声一类中】尸与匕为尼字委与鬼为魏字【郑志在主声不主义一类中】又当在子母同声之例者也至其所列声兼意一类中如礼【说文示字训示神事也豊字训行礼之器也礼字训所以事神致福也盖豊为祭器本有事神之义故以示合之与谐声字之一主义一主声者不同也以示合豊为礼而礼字仍不离示字之原义与会意字之以彼合此各自为义者亦不同也故当为转注字以下袷袷禘诸字俱仿此】袷袷禘之类多为转注字又不当以谐声例之矣

○假借六

示【周伯琦曰古文作示即今旗字象飞旂之形借为神示字又借为昭示字神至切按古人制字多本同而未异故凡后世言六书者究诸古文篆书之始多与今楷法不同辄以假借为言实则大辘椎输之指无字不然岂得皆以假借目之今择其实属义借者摘数条于此以发其凡其余根极篆籀不尽通于今文之用者槩省不载】 戔【周伯琦曰戔伤也从戈才声戈有伤害之义又借为语词隶作哉加口以别之】 干【周伯琦曰干木之身也从木去其支象木干之形故十干之义取此又数竹木亦曰干犹言个也干楯干犯干求皆假借也俗又作竿】 讹【讹言也徐锴曰今诗假借作讹】 省【视也本作𠄎从木从𠄎周伯琦曰彻于目者省也隶作省假借作禁省简省字作景切】 雇【周伯琦曰农桑候鸟通作扈假借作雇庸字】 难【本作𠄎鸟也从鸟■〈难，去佳〉声或从佳作难徐锴曰今借为难易之难】 焉【鸟黄色象形假借为语助】 于【周伯琦曰古乌字孝鸟也借为乌乎字又借为语词既为借义所专后世复作乌字以别之】 兹【黑也春秋传何故使吾水兹徐锴曰借为慈此也】 胪【周伯琦曰胪皮也从月卢声假借作传也陈也】 馱【周伯琦曰馱也借为厌斲之厌】 弟【韦束之次第也从韦省指事也周伯琦曰因声借为兄弟

字又借为岂弟子】 某 【周伯琦曰酸果也古梅

字从木甘会意也又莫厚切凡不知名者皆言某后人借用也】 财 【人所宝也假借为仅能意又纚字徐锴曰仅能如此是纚能如此则纚

才裁皆财借为如字才始词也本借无正字】 ■ 〈襄阝〉 【南阳■ 〈襄阝〉 县从邑襄声徐锴曰即秦穰侯魏冉所封假借字也】 ■

〈羽阝〉 【南阳舞阴亭名从邑羽声徐锴曰按汉书艺文志有别栩阳亭赋■ 〈羽阝〉 之假借也】 ■ 〈觥〈虍外旦内〉〉 【合五

采鲜色也从觥盧声徐锴曰今诗衣裳楚楚作楚假借也】 伸 【屈伸徐锴曰周易假借作信】 望 【月满也与日相望徐锴曰假借作

望今经典通作望】 顷 【周伯琦曰头不正也从反人从页首也借为俄顷字】 ■ 〈干，毛代木〉 【兽豪从毛𠂔声徐锴曰翰林之

翰皆当作■ 〈干，毛代木〉 羽翰则作翰古多假借】 ■ 〈尸外〈彳 厯〉〉 【履下从履省厯声徐锴曰按周礼注意者以采丝砾履之

下臣以为履墙下连底处采丝编刺之厯厯然假借作砾】 般 【周伯琦曰旋辟也从舟从殳楫属令周旋者也假借作般乐般数】 □ 【

尽酒从欠□声徐锴按史记郭解姊子与人饮使之□作醮字假借也子妙反】 颠 【木顶也从页真声本作楨徐锴曰按楨树杪也假借作

颠仆字】 颔 【低头也从页金声春秋传迎于门颔之而已徐锴曰点头以应也今左传作颌假借也】 须 【周伯琦曰面毛也页首也

借为所须字】 ■ 〈彡上次下〉 【用梳比也从彡次声徐锴曰此即周礼所谓次今作次假借也】 厝 【厉石也从厂昔声诗曰他山

之石可以为厝徐锴曰今诗假借错字孝经又借为措字操各反】 倏 【走也从犬攸声读若叔徐锴曰倏忽也张衡赋儵眩眩兮返常间假

借作儵】 能 【周伯琦曰熊属足以鹿坚中象形借为贤能字又借为乃代切坚忍也别作耐】 频 【周伯琦曰眉目之交也借为频数

字别作颦颦】 非 【周伯琦曰象鸟翼奋起形借为是非字】 渝 【周伯琦曰水名假借为变也】 威 【姑也从女戌声汉律妇告威

姑徐锴曰今借为威权字】 率 【周伯琦曰劣戌切大索也上下两端绞索之形中象索旁象麻枲之余假借为率循字朔律切】 虽 【

周伯琦曰虽虫名似蜥蜴而大借为设两辞之虽字】 略 【包希鲁曰经略土地也假借为聊且大略之字】 录 【金色也从金录声徐

锴曰假借为领录字】 矜 【周伯琦曰矛柄也借为矜伐矜怜矜持之字】 舆 【周伯琦曰束缚捽挫为舆从口从乙口束缚也乙屈也

假借为须舆字】 尊 【周伯琦曰盛酒器也从酋口奉之也借为尊卑字】

汉许慎曰假借者本无其字依声托事令长是也

晋卫恒曰假借令长是也数言同字其声虽异文意一也

唐贾公彦曰假借者令长之类是也一字两用故曰假借也

南唐徐锴曰假借第六五者不足则假借之古人简易之意也出令【去声】所以使令【平声】或长【平声】于德或长

【上声】于年皆可为长故因而假之若依在体为衣巾车为巾之类也此圣人制字之大伦而中古之后师有愚智学有才拙智者据义而

借令长之类是也浅者远而假之若山海经以俊为舜列子以进为尽也又有本文已没假借独行若春秋莅盟本宜作■〈立隶〉今则为莅

省者减■〈女省〉之字本当从女今之■〈女省〉字世所不行

宋张有曰假借者本非己有因他所授而借其声义者也如亦非西朋之类

（臣）等谨按亦【古文作□篆文作□】字即古腋字象人之臂腋也后乃借为语词非【古文作□篆文作□】字取鸟飞下

翅因借为是非之非西【古文作□篆文作□】字象鸟在巢上因借为东西之西朋

【古文作□】字即古凤字象形后乃借为朋字

此皆同声借义为假借之一类张有于假借之中既分转声别义者为转注故但以同声别义者为假借与说文令长之说不合以下赵古则王

应电杨慎朱谋■〈土韦〉吴元满诸家之说皆与张氏同

元戴侗曰何谓假借本无正文假借以为用博之为博奕尔之为尔汝辞助之类是也

（臣）等谨按戴侗之论转注本不主转声之说至其论假借则不取令长之转声而别取博尔之同声者为例亦同张有之说

杨桓曰假借者何本分之所无而适须其必用乃托取他之所有以权我之用之谓也盖文字之蕴凡言语之声义固有难为形貌者故象

形会意指事转注形声五者既皆不足形貌以成字故必借其同近而用之使人因其声义以应其用亦足以因彼而明此也故谓之假借

又曰假借者承形声不足而作也取彼之所有济我之所无之谓也六书之假借犹五行之器用焉其体一十有四曰声义兼借曰借声不

借义曰借义不借声曰借谐声兼义曰借谐声曰借近声兼义曰借近声曰借谐近声兼义曰借谐近声曰因借而借曰因省而借曰借同形曰

借同体曰借而复借

（臣）等谨按杨桓所分假借十四类其取意多与郑志之十二类相同而其称名互异大指不越郑志所谓有义之假借无义之假借二

者而已

刘泰曰假借者其声义于上五者俱不能详故取一字两用以足之也如去取之类
去往也借为上声除去字取善听也借为取舍字

周伯琦曰因音义而假借焉令长是也

明赵古则曰假借之所以别有五而生有三曰因义之借曰无义之借曰因借而借
曰同音并义不为假借曰转注而假借此五者假借之
所以别也因义之借者如初本裁衣之始而借为凡物之始状本犬出之形而借为凡物
之形是也无义之借者如易本蜥易之易而借为变易
之易财本货财之财而借为财成之财是也因借而借者如商本商度之商既借为宫商
之商又借为商贾之商 【商贾之商本作商从贝与
宫商之商别】 之本之 【说文之字训出也象卅过中枝茎益大】 卅之之既借为之
往之之又借为语词之之是也是谓托生同音并义
不为假借者如台说之台 【同怡】 即台我之台皆得从口而为义从■（官，去宀
）而为声壬儋之壬 【同任】 既象治任之形壬
娠之壬 【同妊】 亦象怀壬之形是也是谓反生转注而假借者如顷本口 【音侧】
顷之顷 【平声同倾】 转为顷刻之顷 【上
声】 因顷刻之声而借为顷亩之顷过本过踰之过 【平声】 转为既踰曰过之过
【去声】 因既踰曰过之声而借为过失之过是也
是谓兼生假借之旨不明于世以至书然燎之然更加火州渚之州复加水果字有卅须
字有彡如此之类何可枚举尚奚论丁寔之类不用口
车渠马■（上凶下）之类不须石哉

（臣）等谨按赵古则所分假借五类中所谓因义之借无义之借因借而借及同
音并义不为假借四者皆假借中之同声者也所谓转
注而假借乃假借中之转声者也二者皆假借之正义惟是赵古则之论转注本主张有
转声之说而复以转声者入之假借未免自相矛盾即
如顷侧之顷 【平声】 又为顷亩之顷 【上声】 过踰之过 【平声】 又为过失
之过 【去声】 赵氏属之假借者也至于长短
之长 【平声】 又为年长之长 【上声】 行止之行 【平声】 又为德行之行 【
去声】 与顷过等字并无分别何以又属之转
注乎是赵氏之说本无定见要而言之所论假借则是而所论转注则非也

王应电曰声之不足也一声而或兼数义不能义为之制字也有一字而借为数义
故曰假借

杨慎曰假借借义不借音如兵甲之甲借为天干之甲鱼肠之乙借为天干之乙义
虽借而音不变故曰假借转注转音而注义如敦本敦
大之敦既转音顿而为尔雅敦口之敦又转音对而为周礼玉敦之敦所谓一字数音也

假借如假物于邻或宋或吴各从主人转注如注水行

地为浦为淑各有名字矣是奚可同哉

（臣）等谨按杨慎以借音者为转注故但以借义者为假借亦与说文不合

朱谋■〈土韦〉曰假借因义理相通而该括同异甲乙子丑之类

张泣曰假借谓本无其事因字声意而借用之也如能豪兽也今借为贤能英豪之类此声借也如内外之内 【去声】 作收内 【入

声同纳】 之内伯仲之伯 【入声】 作王伯 【去声同霸】 之伯有恶 【入声】

而可恶 【去声】 有好 【上声】 而可好

【去声】 之类此意借也又如占卜之占 【平声】 为占 【去声】 夺女子之女为尔女 【同汝】 房舍之舍 【去声】 为取

舍 【上声同舍】 肉骨之肉 【入声】 为肉 【去声】 好之类但借声不借义是也

（臣）等谨按张位所举能字即同声之假借内伯好恶等字即转声之假借但张位之论转注亦主转声之说者其所举转注中长行等

字与内伯好恶等字亦无分别其失与赵古则同

吴元满曰自象形指事以至会意谐声而文字之体备矣宇宙之内事物多端以文字配物不胜其繁矣文字有尽而事物无穷因形事意

声四体 【吴元满亦分假借中之转声者为转注则转注亦假借之类故但言形事意声四体】 声音相同借为他义之用故曰假借有有义

借无义借借复借俗字借联字借其正生者二种一曰因义假借二曰因声假借其变生者三种一曰借而复借二曰俗字假借三曰联字假借

以是五类求之而假借之义得矣

赵宦光曰假借者五义不足借声为之用声不用义也其有义之借转注未加声是矣半为古今之用事法其无义之借惟声为用则全假

借也又有字形先定物名后立势所难移若此类者借不能通不得不转其音以命之有一转以至多转者有同母转者有同韵转者有南音转

北北音转南者故长白等字南北互转得三呼亚辟等字母韵互转得一十余呼随世迁移逐方变易低昂多寡无有定则摛谦诸家谬改此类

作转注非矣造书本旨故当画一后世始有南北之分四声之辨尔又曰假借诸类古今言之详矣而用借诸门则无有及者因疏以悉之有本

无其字不得不借者如禅 【说文本训祭天也去声借为平声谈禅之禅】 佛 【说文本训见不审也借为神佛之佛】 缘 【说文本

训衣纯也去声借为平声因缘之缘】 县 【说文本训系也平声借为去声郡县之县】 乐 【说文本训五声八音总名借为娱乐之乐

】理【说文本训治玉也借为义理之理】之【说文本训出也借为语词】也
【说文本训女阴也借为语词】其【赵氏原
注曰箕正考说文其即古箕字偕为彼其之其】云【赵氏原注曰云正考说文云即
古云字借为语云之云】之类有古无其字后世已
增而说文不见者终为俗体如说【赵氏原注曰悦俗考说文说字本训释也一曰谈说
此字凡词说之说及喜悦之悦皆用之后增悦字】
止【赵氏原注曰趾俗考说文止字本训下基也此字凡行止之止及足趾之止皆用之
后增趾字】執【赵氏原注曰艺势并俗考说文
執字本训种也此字凡树艺之艺及时势之势皆用之后分艺势二字】膏【赵氏原
注曰享亨并俗考说文膏字本训献也此字凡祭享之
享及元亨之亨皆用之后分享亨二字】之类有两有其字各主本义而古今或分或借
不以为误者如黠【说文本训是少也】鲜【
说文本训鱼名后亦通作黠】欤【说文本训安气也】与【说文本训党与也后
亦通作欤】舍【说文本训释也】舍【说
文本训市居曰舍后亦通作舍】彰【说文本训口也考口字乃有章也此彰字乃古
文章之文】文【说文本训错画也后亦通作彰
】彰【说文本训文彰也此彰字乃古文章之章】章【说文本训乐竟为一章后
亦通作彰】■〈智于〉【赵氏原注曰智俗考
说文■〈智于〉字本训识词也即古仁知之知】知【说文本训词也后亦通作
■〈智于〉】之类有两有其字各主本义而古今通
将本字废置而混借为用者如乱【说文乱字本训治也又有■〈乱去乚〉字亦训治
也又有■〈乱，攴代乚〉字训烦也后通书作乱
】称【说文称字本训铨也又有聃字训并举也又有偁字训扬也后通书作称】省
【说文省字本训视也又有涓字训少减也又有
■〈女省〉字训减也后通书作省】易【说文易字本训蜥易又有■〈彳易〉字
训轻也一曰交■〈亻易〉又有■〈易攴〉字训侮
也后通书作易】兴【说文兴字本训起也又有嫫字训说也后通书作兴】逆【
说文逆字本训迎也又有莛字训不顺也后通书作
逆】两【说文两字本训二十四铢为一两又有口字训再也后通书作两】之类有
两有其字而本文为借所夺废置不用而反增俗字
以应世用者如口莖【赵氏原注曰花俗考说文口字本训卅本莖也莖字本训荣也俗
增花字】闲闲【赵氏原注曰间俗考说文闲字
本训闌也闲字本训隙也俗增间字】之类又有义可强通而声不协此古今从省之法
而混若假借者如齐【说文本训禾麦吐穗上平也

】 斋【说文本训戒洁也】 □ 【说文本训行口径也音由】 □ 【说文本训随
从也音遥】 之类有声义远甚而俗书混乱谬作
 假借者如**𦉳【说文本训解也音绎】 𦉳【说文本训败也音妒】 □ 【说文本训**
深也音深】 突【说文本训犬从穴中暂出也
音臚】 之类有古人两用声义偶混似借非借者如**鼎【籀文员字】 爰【赵氏原**
注曰石鼓文考石鼓文鼎爰二字互见义同】 □
【篆文乃字】 乃【赵氏原注曰峰山碑考峰山碑乃乃二字互见义同】 避我【
二字亦互见石鼓文】 于于【二字亦互见峰
山碑】 之类有古借汉分今不必借者如又有**寺时【又通作有寺通作时俱见石鼓**
文】 之类有二文声义俱别各自为用而文势相通
 俗谬作借者如**于【说文本训于也象气之舒】 于【说文本训象古文乌省此即古**
乌字考乌字取其助气于字象气之舒与助气义相
近故于于通用】 戏【说文本训三军之偏也】 摩【说文本训旌旗所以指摩此
即古麾字考戏字为三军之偏与指麾义相近故摩
戏通用】 之类有古人字形声义各别而许慎误合有类于假借者如**二【说文谓古**
文上字】 上【亦古上字赵氏原注曰上𦉳】 二
【说文未见六书本义谓古文下字】 下【亦古下字赵氏原注曰下𦉳】 长先【
说文谓古文长字】 终□【说文谓古文终字
】 之类有声义远甚俗混虽久本文具在可以毋借者如**烦【赵氏原注曰𦉳■〈卅**
𦉳〉并非考说文烦字本训热头痛也𦉳字训马髦饰
■〈卅𦉳〉字训白蒿也】 ■〈髟上般下）【赵氏原注曰蟠非考说文■〈髟上
般下〉字本训卧结也】 才财裁【赵氏原注曰
借声无义考说文才字训草木之初生也财字训人所宝也裁字训制衣也】 纚【赵
氏原注曰声义远甚考说文纚字训帛雀头色】 惟
维【赵氏原注曰借声无义考说文惟字训凡思也维字训车盖维也】 唯【赵氏原
注曰声转无义考说文唯字训诺也】 之类

（臣）等谨按赵宦光所举用借各条多属后人用字之假借非六书之本旨故特谓之用借而已

又曰借者假其名号也字有限物无穷有义无义耳目一揆名之寄声之囿也

包希鲁曰离丽离异假借也凡此类以有形之物假借为无形之字依声托事以通意义也有因其形义而假借者有形义皆无取而假借者若此则唯依其声于义无托也若夫为之象母猴能之象狡兽则声兼义焉许冲谓假借为令长之类则无形之假借唯以平上去入四声通其意而已是盖形事意声无可象可指可会可谐而又难于转注故假之以通其穷焉凡

假借之字其类不一大都仿此

（臣）等谨按郑志之论假借虽分为十二类其大要则借义与借音二者而已曰同音借义曰借同音不借义曰语词之借曰五音之借曰三诗之借曰十曰之借曰十二辰之借此七类皆因其字之本音者也曰协音借义曰借协音不借义曰因义借音曰方言之借此四类皆移其字之本音者也曰因借而借则同为一字而或从其原音或转为他音者也说文令长之类但指一字异音者而言故必合同音中之假借而其义始全也又汉碑多假借字宋洪适尝作急就一篇以训释之谓有可通者有不可通者然许氏说文既有瑟字矣而又有璚彼玉璚之璚既有跂字矣而又有■〈土支〉彼织女之■〈土支〉既有尔字矣而又有彼繭惟何之繭既有袒字矣而又有臙裼暴虎之臙既有翼字矣而又有趋进■〈走翼〉如之■〈走翼〉既有卒字矣而又有大夫曰■〈歹卒〉之■〈歹卒〉其类不可胜数盖字义之假借通用至汉为最甚如以浩仓为昊仓【见孟郁修尧庙碑】以广彼为广被【见周公礼殿记】以识方为职方【见樊毅修华岳碑】以奈何为奈何【见童子逢盛碑】以蹇鄂为蹇谔【见绥民校尉熊君碑】以朝娉为朝聘【见巴郡太守樊敏碑】以礫落为磊落庭电为霆电【见幽州刺史朱龟碑】以濡术为儒术背人为邨人【见卫尉衡方碑】等类皆是然亦不自汉始也礼记曲礼是职方注是或为氏证之仪礼觐礼太史是右注古文是为氏则知是氏通用论语季氏旅于泰山班固汉书述赞引作大夫胪岱证之仪礼士冠礼旅占注古文旅作胪则知胪旅通用士冠礼兄弟毕袵元注古文袵为均证之左传均服振振则知袵均通用各经中如此类者甚多此皆本有正字特临文时所借用虽非六书之本义亦可见古人假借之道其例本甚宽也

钦定续通志卷九十一

●钦定续通志卷九十二 六书略四

六书略【四】

通论

辽金元书略

○通论

许慎曰仓颉之初作书盖依类象形故谓之文其后形声相益即谓之字字者言孳乳而浸多也着于竹帛谓之书书者如也

徐锴曰凡六书之义起于象形则日月之属是也形声者以形配声班固谓之象声郑玄注周礼谓之谐声象则形也谐声者以形谐和其

声其实一也如江河之字水其象也工可其声也若空字鸡字等形或在下或在上或在左右亦未有微旨然亦多从配合之宜非尽有义也若言字口在口上则为言口在口右则五葛反其类甚多仓颉本其所起观察天地万物之形其文尚少故谓之文后相配合孳益渐多则谓之字形声会意是也转注者建类一首同意相受谓如老之别名有耆有耄有口有耇有耄又孝子养老是也此等字皆以老为首而取类于老则皆从老若松柏等皆木之别名皆同受意于木故皆从木后皆象此转注之言若水之出源分岐别派为江为汉各受其名而本同主于一水也又若医家之言病症言气转相染注也而今之俗说谓巧左回为考右回为老此乃委巷之言且又考老之字不皆从巧巧音考老从匕音化也假借者古省文如令者号令也可借为使令【平】长者长短也可借为长【上】幼诸如此类皆可以推至春秋之后书多口授传受之者未必皆得其人至着于简牍则假借文字不能皆得其义故经传之字多有乖异诗借害为曷之类是也指事象形其义相似物之实形有可象者则为象形山川之类皆是物也事之虚无不可图画谓之指事形则有形可象事则有事可指如上下之义无形可象故以一在上一在下一下指其事故象形指事大同而小异会意亦虚也无形可象故会合其意以字言之止戈为武人言必信故曰比类合义以见指摛形声者实也形体不相远不可以别故以声配之为分异若江河同水也松柏同木也江之与河但有所在之别其形状所异者几何松之与柏相去何若故江河同从水松柏皆从木有此形也然后谐其声以别之江河可以同谓之水水不可同谓之江河松柏可以同谓之木木不可同谓之松柏故散言之曰形声总言之曰转注谓耆耄耄寿耇皆老也凡五字试依尔雅之类言之耆耄耄口耇也又耇口耄耄耆可同谓之老老亦可同谓之耆往来皆通故曰转注总而言之也大凡六书之中象形指事相类象形实而指事虚形声会意相类形声实而会意虚转注则形事之别然立字之始类于形声而训释之义与假借为对假借则一字数用转注则一义数文凡六书为三耦也又曰文字之义无出说文而古来学者黜能师尚蔡邕汉末硕学而云色丝为绝殊不知绝字系旁为刀刀下为卩而又况不及蔡邕乎魏祖以合为人一口吴人云无口为天有口为吴曾不知吴从■〈吴，去口〉梁武书贞字为与上人取会嬉戏无顾经典矣庾肩吾述书法乃云土力为地随文帝恶随字为走乃去之殊不知随从是安步也而妄去之颜元孙作干禄字书欲以训世其从孙真卿书之于石而厘字改未为牙冕字转门为■〈向，去口〉邻正体也

而谓之讹邻俗谬也反谓之正益为病矣又国子司业张参作五经文字脑字匕旁留转
写者以匕在右乃作■〈〈止上止下〉 卩〉去■〈
《上凶下》不亦疏乎又图讖兴于两汉符命文字皆俗体相兼颜之推论之详矣又点
画之法着自前闻盖博物君子援豪布墨写其心素规
旋矩折始中绳墨萧何题署张芝章草笔迹轻重着在缣绡而后之学者弃本逐末争求
点画之妙不测布置之由乃至删除点画加减随意事
不师古可谓讹矣

又曰说文之学方俗异语而六书之内形声居多其会意之字学者不了鄙近传写
多妄加声字所宜隳括又曰古者以鸟迹为始即古文
也书有工拙或引笔为画头重而尾纤取类赋名谓之科斗孔子壁书滕公墓铭是也大
篆史籀所作所谓籀文是也字体繁复盖与古文并行
秦李斯颇删籀文谓之小篆会稽山铭及今之篆文是也篆复不足以给故程邈作古隶
字画曲折点缀易成即今之隶文凡此五者皆正文也
而鸟书虫书刻符殳书之类随事立制非文字之常也然而愚智不同师说或异豪端曲
折不能不小有异同许慎所解解其义也点画多少皆
案程序李斯小篆随笔增减所谓秦文字体或与小篆为异其中亦多云此篆文此古文
是也又穆天子传山海经诸子所有异字本皆篆体相
承隶书讹谬未始有极既未可深考所不取焉五体之外汉魏以来悬针倒口偃波垂露
之类皆字体之外饰造者而齐萧子良王融庾元威之
徒随意增益妄施小巧以异为博以多为贵其为虚诞不言可明矣

（臣）等谨按许慎说文有云篆作某者慎所列诸字皆小篆何又别之以篆作某
是以学者颇或疑之观徐锴此论可以释然矣盖许慎
时秦文着于金石者传世尚多凡所云篆作某者悉指秦篆而言不止徐铉等所列篆文
笔迹相承小异之类也又隶书相承之变较篆益繁若
洪适隶释所载汉碑之字注云以某为某者指不胜屈是以洪适作急就一章云自三苍
滂喜亡小学不绝如线字书行于世者篇莫加于类篇
韵莫善于集韵所载隶古以石刻校之则攉摭尚多脱略如隶法皆以悠作悠司马季德
碑又省作悠稽之篇韵咸无焉蔡伯喈奉熹平之诏刊
鸿都之碑晚学咸所取正未尝一字好奇也今之学者事不师古乃随手援笔变点画篆
偏傍以取新尚怪为能闲有所据不过魏晋以后字体
此膏肓之疾也适之此言诚中魏晋六朝字学之弊矣然洪适急就所举诸字如继作继
笔作口农作农楚作壑字作字弃作■〈去上兵下〉
秉作秉通作通之类实皆汉人随手之变与后之好奇者初无以异驯致六朝字体杂出
未始非此等字阶之为厉也是则秦篆汉隶已皆与六

书之旨颇相出入所以六书之义不得不衷诸许慎说文一书矣

郭忠恕曰造字之旨如于象形中则止戈反正而省声生焉至若旧本隶写不可具举触类而长实繁有徒

（臣）等谨按忠恕作佩觿三卷纠正讹异如以冰为凝以渴音竭以贞为鼎以■〈鼎 卩〉为则之类然其中亦有疏失如■〈井 邑〉从邑井户经切而以为邢口坚翻疋即雅字而以为八分正字则亦未尽合于六书之义也

戴侗曰文生于声者也有声而后形之以文义与声俱立治益繁巧益生故有刻画竹木以为识者所谓契也契不足以尽变于是象物之形指事之状而刻画之以配事物之名而简牖刀笔生焉所谓书也象形指事犹不足以尽变转注会意以益之而犹不足也无所取之取诸其声而已矣是故各因其类而谐之以其声木之形可象也而其别若松若柏者不可悉象故借公以谐松之声借白以谐柏之声水之形可象也而其别若江若河者不可悉象故借工以谐江之声借可以谐河之声所谓谐声也五者犹不足以尽变故假借以通之而后文字之用备焉六书之义虽不同皆以形声而已矣赵古则曰六书初一日象形文字之本也次二曰指事加于象形者也次三曰会意次四曰谐声合夫象形指事者也次五曰假借次六曰转注托夫四者之中者也独体为文合体为字象形指事文也象形文之纯指事文之加也会意谐声字也谐声字之纯会意字之闲【去声】也假借转注则文字之俱也肇于象形滋于指事广于会意备于谐声至于声则无不谐矣四者不足然后假借以通其声声有未合而又转注以演其声象形指事一也象形有加为指事会意谐声一也会意主声为谐声假借转注一也假借叶声为转注明乎此则六书之能事毕矣

（臣）等谨按古则又论子母相生之义谓母能生子不能生因纠许慎说文以句生拘拘羹生仆■〈臣 羹〉句羹为子不能生为虚设然说文诸部次第相因偏傍相系若以句羹二字不能相生则说文中之不能相生者多矣故凡古则所论象形指事为文会意谐声为字者义虽可通而未可以概六书之全指也

吴元满曰文字之有六书犹法令之有条例否则散漫无所纪矣故六书一曰象形象其物而画其形见而可知者二曰指事加物于形体之上指而可别者三曰会意会合二文以成字悟而可通者四曰谐声以声附意调和成字闻而可辨者五曰假借假四体借为他义之用六曰转注转四体之声注释他义之用六者文字之体用备矣

（臣）等谨按元满论六书其五者皆与说文相合惟论转注以注为注释犹专泥于言义而未合形声偏傍以通之也

赵宦光曰六书互生有指事而形互生者有象形而事互生者有谐声而意互生者有会意而声互生者有假借而注互生者有转注而借互生者有始于一书而五法交互相生者大校六书之实出之造书者六书之名未必出之造书者也即或有之矣六书剖厘分属尤不必出之造书者也若先定六书然后造字即非矣

（臣）等谨按宦光此论实该六书之要所以后来分类者以某字属某门虽有岐出而实非相戾也

又曰六书虽各有属每多错互成文如东本会意兼形工本指事兼形引本象形兼事丰虫本象形亦意从支本会意亦形龙则形而加形二三则事而加事熊罴之类形意声三法互用至若渠字六义变体无不赅备必欲限于一法则凿矣

（臣）等谨按六书分合诸家之说虽有不尽合一者而要之六书大指尤在区分偏傍部分之所属而已是以说文而下诂字诸书考古如汗简通楷如玉篇无不以某之属皆属某严其条贯者如喜同谷史等字皆从口员邑韦京之属则皆从口【音围】至于石足鬲壺之属则似口而又非口【石象山石在厂之下足象膝盖圆骨在蹇之上鬲以象鼎之属壺象豆形食肉之器也】革还等字则与口口皆不相侔矣【革中闲从白形还从叚口远等字皆从袁袁乃夷之省夷从亼变为口也】又如皙从白香从甘至于百者皆习之属则皆从白【白即自字】与白不相侔矣又如里留当男皆从田富富等字则从高省故似田而实非田思卑畀畏等字则与田皆不相侔矣【思从凶虑字从此卑从甲畀从由畏从由白音敷弗切禹字从此】又如昔旧■〈鏹，去金〉黄等字皆不从卅【昔作■〈欠欠〉上日下〉象残肉曰以晞之与俎同意旧从萑萑从口口工瓦切羊角也■〈鏹，去金〉从二十为廿黄从炘炘古文光字】要迁霸覆皆不从西【要作口从臼象形迁作口从白凶声霸作霸从■〈雨上革下〉月始生霸然也本普伯切今以为霸王字必驾切覆从口呼讶切核字从此】农豊等字皆不从曲【农作口从晨凶声豊行礼之器也上从口】徒从等字皆不从彳【徒从辵从土从本作从从二人或加辵】又如卖不从士【卖作口士从出敖字从此】稽不从禾【稽从禾禾古兮切木之曲头也】于不从方【于本乌字省作口旁从口】朋不从月【朋本凤字篆作口象凤飞之形借作朋字】诸如此类难执楷画以律篆文推

而广之斯可以求制字之初意是以析属偏旁系别部分使部皆统源字各归母篆隶真卅一以贯之矣至若■〈彡寻〉旁加彡【篆文寻作■〈彡寻〉从又从口从寸工彡声】■〈智于〉右加于【智篆作■〈智于〉从白从于从知古文又作口】晨星晨夜字各不同【房星为晨篆作晨从晶晶精光也彙从此早晨之晨篆作晨从白从辰】美好嗜好写亦异法【美好之好从女从子商书无有作好好字篆作口从女从丑呼到切】是则篆溯其原隶通其委今之楷法以明体适用为主又不必斤斤执古以绳一槩矣

○辽金元书略

（臣）等谨按郑樵六书略后附古今殊文一代殊文诸国殊文各图然所举诸字杂取钱刀钟鼎古器以为依据今惟钟鼎诸古器之文就其存于今者尚可见大小二篆以前六书之概谨附其略于后若辽金元三朝文字史家所录未有志书法之篇是以辽金二代之书实鲜征据今略摭数条于卷

辽史太祖本纪曰神册五年正月始制契丹大字天赞三年九月诏礲辟遏可汗故碑以契丹突厥汉字纪其功

辽史耶律庶箴传曰始太祖制契丹大字取诸部乡里之名续作一篇着于卷末

契丹国志曰辽太祖以隶书之半增损之作文字数千金史章宗本纪曰明昌五年正月以叶噜古绅始制女直字诏加封赠

大金国志曰太祖天辅六年令丞相陈王乌塔撰女直字以行

金史完颜希尹传曰希尹本名古绅■〈𠂔干〉都之子也金人初无文字国势日强与邻国交好乃用契丹字太祖命希尹撰本国字备制度希尹乃依仿汉人楷字因契丹字制度合本国语制女直字【穆宗第五子勔传曰完颜希尹依仿契丹字制女直字】天辅三年八月书成太祖大悦命颁行之其后熙宗亦制女直字与希尹所制字俱行用希尹所撰谓之女直大字熙宗所撰谓之女直小字

（臣）等谨按金制女直字大金国志在天辅六年金史完颜希尹传在天辅三年据通鉴宣和元年八月金制女直字宋之宣和元年实金之天辅三年也

（臣）等又按金史选举志大定四年命颁行女直大小字所译经书二十年定制试策用女直大字又辽史耶律富鲁传能诵契丹大字而金史诸列传中亦多有通习契丹大小字女直大小字之语此可见金源一代契丹字女直字与汉字并行然列传言有通习契丹女直字者则当日未必人尽通习可知也辽金二史皆出元中书右丞相托克托所修其时去辽金

未远文献尚有足征而托克托未能裒辑制字义例着于史册致使两朝制作湮没无传则诚当时疏略之故也

元史帝师帕克斯巴者中统元年世祖即位尊为国师命制蒙古新字字成上之其字仅千余其母凡四十有一其相关纽而成字者则有韵关之法其以二合三合四合而成字者则有语韵之法而大要则以谐声为宗也至元六年诏颁行于天下诏曰朕惟字以书言言以纪事此古今之通制我国家肇基朔方俗尚简古未遑制作凡施用文字因用汉楷及辉和尔字以达本朝之言考诸辽金以及遐方诸国例各有字今文治寔兴而字书有缺于一代制度实为未备故特命国师帕克斯巴创为蒙古新字译写一切文字期于顺言达事而已自今以往凡有玺书颁降者并用蒙古新字仍各以其国字副之

元史世祖纪曰至元十二年分置翰林院专掌蒙古文字以翰林学士承旨撒的迷底里主之十五年诏虎符旧用辉和尔字今易以国字二十一年敕中书省奏目及文册皆不许用辉和尔字其宣命札付并用蒙古书元史文宗纪曰至顺三年命奎章阁学士院以国字译贞观政要钁板模印以赐百官

（臣）等谨按蒙古字之制其见于元人著述者有陶宗仪书史会要所载蒙古字母朱伯颜所载蒙古字韵字母其中讹误相沿莫从订正我皇上钦定同文韵统综以国书合之梵筌于蒙古字音字体无不一以贯之谨牖载于皇朝六书七音二略内兹但就元代制字与用字之由识其大略于此

（臣）等又按古篆殊文其可见于今者惟钟鼎诸器物铭略可寻六书之源而钟鼎篆韵汗简古文四声韵广金石韵府等书虽亦摭其字体而未辨其所以合于六书之旨惟宋吕大防考古图后有释文一卷最有考据今掇其要以资订证古文三代之书名也书名所起将记言于简策象物形而画之故厥初以象形为主不取笔画之均正又有无形可象者然后会意假借形声指事转注之文生焉至周之兴尚文书必同文其笔画稍稍均正窃意周宣王太史籀所作大篆已有修正故与古文多异至秦李斯程邈之徒又有省改谓之小篆即今许氏说文是也小篆兴而古文亡至汉鲁恭王坏孔子宅得壁中书及张苍献古春秋左氏传鲁三老献古孝经及郡国于山川得鼎彝之铭而后古文复出孔安国以伏生口传之书训释壁中书以隶定古文然后古文稍能训读其传于今者有古尚书孝经陈仓石鼓及郭氏汗简夏氏集韵等书尚可参考然以今所图古器铭识考其文义不独与小篆有异有同在一器同是一字而笔画

多寡偏傍位置左右上下不一者如伯■〈一上自下〉
父敦之■〈一上自下〉字一作□一作□宝字一作□一作□蕲字一作□一作□
叔高父簋盖底皆有铭其簋字一作□一作□晋姜鼎之作字一作□一作□其异器者如彝尊寿万等字皆然乃知古字笔画非小篆所能该也然则古文有传于今者既可考其略则其余或以形象得之如□为射□为丁□为壶□为鬲□为车之类或以义类得之如□为虜□为■〈女鼎〉之类或笔画省于小篆如□作惟□作位之类或笔画多于小篆如□作万【小篆乃迈字】□作受□作秦□作■〈弁阝〉之类或左右反正上下不同如□□皆作永□□皆作福□□皆作姜□□皆作姬之类余皆文奇义密不可强释矣

钦定续通志卷九十二

●钦定续通志卷九十三 七音略一

七音略【一】

（臣）等谨按古音通转其由字母而递变者居其大半唐陆德明经典释文条例云古人音书止为譬况之说自魏孙炎始为尔雅音一卷今虽不传其散见于德明所引据者可考而知也隋书经籍志载婆罗门书一卷又云自后汉佛法行于中国得西域书能以十四字贯一切音文省而义广谓之婆罗门书字母之法权輿于此而晋魏以后等韵之学日以加详唐元和阳宁公南阳释处忠撰元和韵谱列五圆图为五声图二方图为九弄图唐舍利始立三十字母崇文总目载僧守温三十六字母图一卷僧宗彦四声等第图一卷横有三十六母纵有四等即七音韵鉴所由昉也门法之立盖以古今字音不同执音和一法以御反切率多乖迕故多为之法以取之郑志祇列韵图不及门法殊为疏略今谨列刘鉴十六摄二十四图于前以从简括又补门法二卷为之图解并考正其讹谬后附通释一卷俾承学之士资以考古焉

韵图

○韵图

（臣）等谨按郑志本七音韵鉴列内外转四十三图其韵部一本广韵考广韵二百六部盖隋陆法言切韵之旧而韵字则与切韵不同宋广韵卷首题云陆法言撰本长孙纳言笺注集韵韵例亦云祥符时令陈彭年邱雍因法言韵就为刊益是广韵本于切韵之证也广韵三锤恭字下注云九容切陆以恭龕纵等入冬韵非也是广韵韵字不同于切韵之证也七音韵鉴冬锤二韵同为内转第二而冬韵居一二等锤韵居三四等其恭纵字皆入锤韵是其部分韵字一依广韵也唐李涪刊误诋法言所分上

声为去去声为上又以为东冬中终妄别声律然唐韵
广韵诸书虽递有损益不出切韵架籀之外诸家据为韵图不可废也内外转四十三图
于等子极为详备而各母下四等之字四声各以类聚
致使一字之四声一贯者反分四处殊烦省览司马光切韵指掌图以字母总三百八十
四声别为二十图最为简明而一字四声分列之病亦
同韵鉴惟元人刘鉴作切韵指南一书依内外八转为十六摄横列三十六母纵列四等
每等之字四声一贯实为条理井然今采之为韵图一
卷其中为独韵者六摄分开合二呼为互韵者八摄又并互韵之果假二摄为一凡独韵
六图互韵十八图共二十四图又旧图以广韵之二百
六部为次今则以内外八转为次云

见图（图略）

钦定续通志卷九十三

●钦定续通志卷九十四 七音略二

七音略【二】

门法图

○门法图

（臣）等谨按反切之用本以代直音之穷音和一门其正法也而古今语音有轻
重则四等多紊字音有异同则三十六母亦互相出入
执古人反切而以今人之音求之则音和一门又有时而穷于是多立门法以取之此亦
不得已而为之者非故为繁重苛细之法以惑人也唐
人于音和门外祇有类隔一法凡舌头舌上轻唇重唇齐齿正齿之互切者归类隔门司
马光切韵指掌图序略云递用则名音和傍求则名类
隔同归一母则为双声同出一韵则为迭韵同韵而分两切者谓之凭切同音而分两韵
者谓之凭韵无字则点窠以足之谓之奇声韵阙则引
邻以寓之谓之寄韵其言门法始详至刘鉴作切韵十三门乃析类隔为轻重交互精照
互用诸法沙门真空着玉钥匙又增七门共二十门而
门法遂日以滋多矣后之议者见门法轳轳欲一扫而空之率用音和别立反切意非不
善顾一家之言何能徧易古人之书至如张尔烈正字
通不明字母妄立音切者更不足道矣况古人反切见于经典释文者粲然大备切韵唐
韵书虽不传而徐铉所援以释说文者实即孙愐之旧
广韵又渊源切韵唐韵二书而成试以诸书所立反语切取一字则舍门法固茫无涯涘
矣谨集门法图解各一卷

见图（图略）

钦定续通志卷九十四

●钦定续通志卷九十五 七音略三

七音略 【三】

门法解

○门法解

（臣）等谨按门法既繁有一字而分数切者有一切而分数字者一字而分数切此由立切时所用门法不同或同一门法而所用出切行韵之字不同所致然取径虽殊而会归则一固不害其为大同也若一切而分数字则多歧亡羊势难两顾学者于音韵正变本未易窥寻而复以二三之说参互其闲能无治丝而棼乎此其不可之甚者也今于每门之下先释其义次类举数字以为格式其有兼用别门法者亦附注各字之下而出切行韵有数法相犯者亦汇加案语附列于后庶几了然分明至旧传门法歌诀词多鄙俚兼之文不达意今一切删之不复引用其有资辨证者则间一引之兼刊其谬误焉

音和门第一

类隔门第二

窠切门第三

交互门第四

振救门第五

正音凭切门第六

互用门第七

寄韵凭切门第八

喻下凭切门第九

日寄凭切门第十

通广门第十一

局狭门第十二

内外门第十三

各韵不定门第十四

前三后一门第十五

寄正音和门第十六

就形门第十七

创立音和门第十八

开合门第四十九

小通广局狭门第二十

△音和门第一

音和者谓见溪郡疑此四母下不拘何等字出切但视行韵在第几字即随行韵之以取字也

公 【古洪切】

庚 【古行切】

虚 【起居切】

甄 【古贤切】

（臣）等谨案古洪切公出切行韵取字皆在一等古行切庚出切在一等行韵取字在二等起居切虚出切行韵取字皆在三等古贤切甄出切在一等行韵取字在四等是音和门出切字不论等之门证也又案音和门行韵宜先除去照一精二喻四来日舌三照二诸类盖来日舌三照二犯通广门

精二喻四犯局狭门照一犯内三外二门法也通广门牙音四母不拘何等出切照二行韵则切四等假令有牙音出切照二行韵而又适在通广六摄内者若用音和门法则取三等字用通广门法则取四等字其局狭门精二行韵取三等字者亦然又内三门牙音四母亦不拘何等出切照一行韵则切三等假令有牙音出切照一行韵而又适在内八转内者若用音和门法则取二等字用内三门法则取三等字其外二门照一行韵取二等字者亦然若此之类颇易混淆故凡遇牙音出切而行韵逢照一精二喻四来日舌三照二及各母三等者即为通广局狭内三外二诸门法非音和门也其不避一四四一音和门者以所切仍是此字无异同也旧图行韵格子率多误填今具为正之因并识于此

（臣）等又案牙音不拘何等出切但行韵取字同等者本图有字者即为音和门若本图无字可切则用开合门以济音和门之穷谓开韵切合合韵切开也又如行韵在局狭摄内第三者本图有字用音和门法若本图无字而开合两门有字者用开合门法若开合两门俱无字者则直切第四等字是为创立者和门盖所以济局狭摄内三等行韵音和开合两门之穷也又如牙音三等出切诸母一等行韵者音和开合两门不能取字则转而凭切取三等字为就形门此又以通一等行韵音和开合两门之穷也

一四音和者谓见溪郡疑端透定泥帮滂并明精清从心邪晓匣影喻来此二十二母第一等为切韵逢诸母第四即随韵向四等取字也

踪 【宗容切】

足 【宗足切】

叫 【高叫切】

丁 【东萦切又为开合门】

（臣）等谨案一四音和门行韵若在局狭摄内之精双喻四 【精双谓精清从心邪五母第二即正齿音之第四等也喻四则喻母下第四等也省文则为精双喻四后仿此】 则出切不用见溪郡疑帮滂并明晓匣影十一

母若以此十一母出切则行韵必不用精双喻四之六

母矣盖见溪郡疑帮滂并明晓匣影十一母出切局狭摄内精双喻四行韵则为局狭门法当切第三等字与一四音和门法当凭韵切第四等

字者不同也即如宗足切足行韵之足字系精二而出切之宗字则为精一假令以见滂晓匣影第一等字易之则切出是三等烛字而非四等

足字矣

四一音和者谓见溪郡疑端透定泥帮滂并明精清从心邪晓匣影喻来此二十二母第四等为切韵逢诸母第一即随韵向一等取字也

三 【思甘切】

糟 【焦糟切】

当 【丁当切】

当 【丁光切又为开合门】

（臣）等谨案四一音和门不犯他门法

△类隔门第二

端等类隔者谓端透定泥一四为切韵逢二三便切知等字

中 【东恭切】

嘲 【刀包切】

朝 【都朝切】

长 【唐王切又为开合门】

知等类隔者谓知彻澄娘二三为切韵逢一四便切端等字

东 【智通切】

同 【除洪切】

等 【知肯切】

登 【智肱切又为开合门】

（臣）等谨案端等一四出切无照一韵故不致与内三外二门法相碍知等第一出切则各母下一四等俱可行韵若知等第二出切韵

逢精清从心邪晓匣影喻九母即系窠切门如本图三等无字即为麻韵不定之切矣故知等第二出切无齐齿喉音等九母下之韵也

△窠切门第三

窠切者谓知彻澄娘第二为切 【知等第二即四等中第三也】 韵逢精清从心邪影匣晓喻九母第四并切第二知等字

中 【知容切】

紬 【直由切】

直 【除息切】

朝 【朝霄切】

（臣）等谨案窠切门若舌音下三等无字可切即切第四为麻韵不定之切盖三等有字者为窠切是为从切三等无字而切第四者为各韵不定之切是为从韵也

△交互门第四

重轻交互者谓帮滂并明一二四等为切韵逢有非等处第三便切轻唇字

非 【布追切】

望 【莫诳切】

房 【平房切】

分 【布云切】

正音凭切者谓照穿状审禅五母下第一等字为切韵逢诸母第三第四皆切照一也【照一即四等中第二】

初【楚居切】

刳【楚况切】

崇【鉏龙切】

史【山水切又为开合门】

以上四字系正音凭切三

仙【山田切】

缩【山足切】

搜【山幽切】

使【山嘴切】

以上四字系正音凭切四

（臣）等谨案正音者照一为正齿音也凭切者照一出切随出切之等而切第二等字也后言凭切者仿此

△互用门第七

精照互用者谓精清从心邪一四为切韵逢诸母第二并切照一

双【三江切】

生【心庚切】

山【苏山切】

史【仙揣切】

照精互用者谓照穿状审禅第一等为切韵逢诸母第一并切精一

三【师甘切】

苏【生苏切】

草【初老切】

僧【山肱切】

（臣）等谨案三十六母促为二十三排则舌音八母端类辖一四等知类辖二三等唇音八母帮类辖一二四等非类专辖三等齿音十

母精类辖一四等照类辖二三等是四等之中端类为知类所隔帮类为非类所隔精类为照类所隔故古人于此诸母之互切者皆以类隔一

门统之也然其取字之法不以出切之母为凭而祇以行韵之等为凭仍是音和一门之变若使各按三十六母列为三十六排则舌音八母端

类二三等知类一四等必空唇音八母帮类三等非类一二四等必空齿音十母精类二三等照类一四等必空矣是虽欲凭出切之母切之而

本母固无可取之字也李世泽韵图横列三十六母类隔各母互相附注其下如端母下注知知母下注端之类按标射之法求之【标射法

即音和】如箭到遇空或不空而于意未安即射标下小字为隔标法以御类隔诸门之字亦古人统立类隔一门之意也第唇音八母下行韵

遇通流二撮者又歧出前三后一门一例非隔标法所能御而齿音之精照互用门祇精等一四出切照一行韵取字而无照二行韵取字一法

其精一四出切照二行韵者则别为振救门而切精二第四等字照精互用门祇照一出切精一行韵取字而无照一出切精二行韵取字与照

二出切精一行韵取字二法其照一出切精二行韵则别为正音凭切门而切照一第二

等字照二出切精一四行韵则别为寄韵凭切门而切

照二第三等字是齿音十母于凭韵之外又歧出凭切二门至振救门则精二出切者尚可云凭切精一出切者并阑出凭韵凭切二例之外矣

舌音八母知二出切而韵遇精双喻四者则凭切切三等字为窠切门三等无字可切者则切第四等字为麻韵不定门是又因无字可切而阑

出凭韵凭切二例之外矣其所以然者则因古人已立之反切而始立法以切之故参互不齐也

△寄韵凭切门第八

寄韵凭切者谓照穿状审禅第二为切 【照类第二即四等中第三】 韵逢诸母一四皆切照二第三等字

梅 【章仙切】

慎 【十寸切】

者 【炙火切】

昌 【昌光切】

（臣）等谨案行韵之字寄于别韵而凭出切之字取之则仍归本韵故曰寄韵凭切

△喻下凭切门第九

喻下凭切覆者喻母下第三为切韵逢诸母第四并切第三

尤 【有由切】

为 【于慈切】

韵 【于信切】

羽 【云取切】

喻下凭切仰者喻母下第四为切韵逢诸母第三并切第四

唯 【以追切】

弋 【阳域切】

移 【阳知切】

演 【演展切】

（臣）等谨案内外转二十四图合数韵而为一图凭韵取字尚有七处互含之出入若凭切取字则等既不同其韵之出入更可知矣或谓单喻母下三四之等同出一韵则大不然如止摄则帙微而惟脂也遇摄则于虞而余鱼也臻摄则云文而匀淳也乌能尽同出一韵也即如于慈切为慈是之韵为是支韵为上之三等帙又是微韵即三四两等而含三韵余可类推矣

△日寄凭切门第十

日寄凭切者谓日字母下第三为切韵逢一二四并切第三

饶 【人高切】

若 【而郭切】

茸 【如同切】

汝 【乳虎切】

（臣）等谨案日寄凭切门本母三等出切诸母一二四行韵皆切三等然行韵在舌音泥娘母下者别有日母借切门法指掌图所谓日

下凭三等音和用莫疑二来娘下取一四定归泥者是也至若行韵照一而又在内八转

者虽与内三门法相犯然所切总为日母三等之字固

不以为碍耳

△通广门第十一

通广门者谓见溪郡疑帮滂并明非敷奉微晓匣影此十五母一二三四为切韵逢知彻澄娘照穿状审禅来日第三并切第四

祇 【渠知切】

篇 【芳连切】

频 【扶真切】

■ 〈世欠〉 【呼世切】

（臣）等谨案通广门牙音出切与音和门相犯舌音出切与重轻交互门相犯惟创立音和是行韵在局狭摄内者韵既不同则切出之

字自不能相犯也音和门行韵之在通广摄者既除去来日知照三等之十一处而重轻交互门宾出切弗一例究系立切之误亦应于彼处除

去行韵之犯通广门者庶于音和门为一例而通广门切法乃不致疑似耳

△局狭门第十二

局狭门者谓见溪郡疑帮滂并明非敷奉微晓匣影此十五母一二三四为切韵逢精清从心邪喻母第四并切第三

无 【无余切】

音 【于寻切】

金 【古心切】

靴 【休邪切】

（臣）等谨案局狭门犯音和门一四音和门知等类隔及窠切门轻重交互门麻韵不定门共六门而音和门及一四音和门为一类知

等类隔窠切麻韵不定三门为一类轻重交互门为一类是祇犯三门耳若以此相犯之六门凡行韵之在局狭摄者皆减去精双喻四之六处

则局狭门切法自不致紊乱矣又音和门重轻交互门与通广门相犯者系行韵在来日知照第三等之十一处音和一四音和知等类隔窠切

麻韵不定轻重交互六门与局狭门相犯者系行韵在精双喻四之六处而门法图不删去者以犯通广之二门止通广摄相犯而行韵在局狭

摄则不犯也犯局狭之六门止局狭摄相犯而行韵在通广摄则不犯也若于各门下行韵相犯之处注明通广局狭字样以便立切则了然矣

试以音和一门言之来日知照三等下注明局狭字则行韵在局狭者自依音和门切之若行韵在通广则依通广门切之精双喻四下注明通

广字则行韵在通广者自依音和门切之若行韵在局狭摄者则依局狭门切之余皆仿此

（臣）等又案止榛二摄为通门山蟹梗効四摄为广门其所以为通广门者以此六摄遇唇牙喉下为切韵逢来日知照第三并切第四

以第三而推之第四故曰通广通宕遇曾四摄为局门流咸深假四摄为狭门其所为局

狭门者因此八摄遇唇牙喉下为切韵逢精双喻四六
处并切第三以第四而归之第三故云局狭或云通广门中字多而第三等之音通及第
四为通广局狭门中第四等字少为局狭固是一说然
江果二摄之第四等俱无字何以不名之为局狭耶盖通广门因通广六摄中字有第三
而切第四者故立为通广门法局狭门因局狭八摄中
字有第四而切第三者故立为局狭门而江果二摄无此等切脚之字故不加以通广局
狭之名也凡切韵门法类皆因古人切脚不合今韵而
立特学者少悟耳

△内外门第十三

内三者谓见溪郡疑端透定泥知彻澄娘帮滂并明非敷奉微晓匣影喻来日此二
十六母一二三四为切韵逢内八转照穿状审禅第一
者并切第三

姜 【居霜切】

金 【居林切】

玉 【牛数切】

仿 【甫爽切】

外二者为见溪郡疑端透定泥知彻澄娘帮滂并明非敷奉微晓匣影喻来日此二
十六母一二三因为切韵逢外八转照穿状审禅第一
者并切第二

江 【古双切】

麻 【末沙切】

班 【布山切】

皆 【官斋切】

（臣）等谨案内三外二门亦因古人切脚不合今韵而立故以内转外转而分切
法犹之通广局狭二门以通广六摄局狭八摄而分切
法也或云牙舌唇喉四音无第二等字惟齿音方具足为内八转五音四等字皆具足为
外八转以其说考之臻摄开合二呼牙舌唇喉四音皆
无第二等字亦名外转则二等字多少之说为不可通矣

（臣）等又案音和门行韵在照一则与此门相犯旧图于音和门下不列照一行
韵者以内转外转俱犯则避之无可避也

△各韵不定门第十四

各韵不定门者为知彻澄娘第二等为切 【知等第二即四等中第三也】 韵逢
精清从心邪晓匣影喻九母第四当切出第二知等字
今稽开合俱无却切第二端等字 【端等第二即四等中等四也】

爹 【陟邪切】

体 【敕洗切】

■ 〈乃上养下〉 【女像切】

窳 【女星切】

（臣）等谨案此门旧名麻韵不定门因陟邪切爹而云然也今按不定之切各韵
俱有陟邪切爹是麻韵不定之切敕洗切体是荠韵不

定之切女像切■〈乃上养下〉是养韵不定之切女星切寔是青韵不定之切故改为各韵不定门而他处辨证仍称麻韵不定所以便于考

核也又知等类隔一门若知二出切精双喻四行韵则犯此门与窠切门若于知等类隔行韵图内精双喻四韵下各注知一字样自不犯此门

及窠切门矣至不定之切原因窠切门三等无字而立乃所以济窠切之穷不为相犯也

△前三后一门第十五

前三者谓非敷奉微第三等为切韵逢通流摄内诸母第一并切第三轻唇字

俸 【逢贡切】 浮 【缚牟切】

封 【封公切】 逢 【扶红切】

后一者谓帮滂并明第一等为切韵逢通流摄内诸母第三并切第一重唇字

篷 【蒲龙切】 木 【木曲切】

剖 【蒲柳切】 蒙 【莫龙切】

（臣）等谨案前三后一门惟通流二摄内有此切法是亦因古人切脚不合而立者也三近我故为前一远我故为后此门所以济重轻

交互轻重交互门之穷非相犯也

△寄正音和门第十六

寄正音和者谓照穿状审禅第二为切韵逢诸母第二并切照一

山 【书门切】 岑 【舌岑切】

床 【食庄切】 吏 【设揣切又为开合门】

（臣）等谨案寄韵凭切日寄凭切二门皆是行韵之字寄在他韵凭切取之则仍归本韵者此门行韵之等即取字之等乃音和门凭韵

取字之正法而云寄正音和治盖牙音四母喉音四母及来母之音和不拘何等字出切但凭行韵之等以取字惟齿音之音和则精一出切者

行韵亦必一等字而仍切精一字此门则照二出切而行韵则寄之各母二等即切照一字故谓之寄以其所寄为正齿故云寄正也又此门旧

名三二精照寄正音和门真空玉钥匙注云精谓精而不杂照谓照而不参是精照谓假设之辞并非字母之精照而故为迂曲以惑人者故删

之

△就形门第十七

就形者谓见溪郡疑帮滂并明非敷奉微晓匣影喻此一十六母第三为切韵逢诸母第一开合两门一等无字即切本图第三

风 【放空切】 渠 【其徒切】

羣 【羣魂切】 干 【巨寒切】

（臣）等谨案此门在见溪郡疑晓匣影喻八母俱为音和在帮滂并明四母则为

三一音和 【此门系字学元元新立】 在非敷奉微
则为轻重交互因所取之字本图无字则用开合门法取之互韵而互韵亦无所取之字
是开合两门俱无字而开合门法亦有所不行也故又
用此就形门法以御之此门系指掌图所立原名就形音和盖音和本当凭韵开合两门
韵无其字则就本门而变为凭切也今祇名就形以别
于音和诸门之凭韵者

△创立音和门第十八

创立音和者谓见溪郡疑帮滂并明晓匣影此一十一母一二三四为切行韵在局
狭摄内诸母第三开合两门三等无字即切本图第四

缪 【眉鳩切】

乜 【莫者切】

■ 〈驃 𠂔〉 【毘往切】

■ 〈口 芊〉 【弥阁切】

（臣）等谨案此门在牙音四母晓匣影三母下出切则为音和帮滂并明下出切
则为重轻交互局狭摄内开合两门无字则用此法以
御之盖韵行第三宜切出三等字而开合无字则韵不可凭若转而凭切则一二三四皆
可出切不能尽限以四等也今以三等无字而不论何
等出切直取四等字是又不得谓之凭切矣又诸母出切韵逢来日知照三等颇与通广
门相似而不得相犯者彼是通广摄内行韵此是局狭
摄内行韵自不得相犯也此门系韩道昭所立专以第四等取字故指南诸书谓之昌黎
翔立四等音和门

△开合门第四十九

开合者谓见溪郡疑至来日三十六母为切韵逢各母本图本排无字即切互韵

荣 【王平切】

王 【雨方切】

盘 【蒲千切】

建 【俱万切】

（臣）等谨案韵逢各母本排如蒲千切盘一等出切而行韵即在一等王平切荣
三等出切而行韵即在三等之类切韵同等皆音和也
宜以切韵同等之字切之而本图无字则开门切合合门切开以取之旧图列路往切两
一例路出切系一等字往行韵系三等字虽系来母下
音和而与韵逢各母本排之例不符盖各门法遇本图无字者便用开合门取之如就形
门创立音和门是以开合无字而变则凡就形创立音
和二门所有出切行韵之字本图有字即以本图之字切之可知矣不必尽拘于切韵同
等之字也此门切法专为互韵具开合两呼者而立若
独韵则不用此门矣虽呼有开合之异分为两图而两图原同一韵不为差谬也

△小通广局狭门第二十

小通广局狭者来母下第三等为切韵逢精清从心邪喻母第四并切第三

繚 【力小切广门】

纛 【力遂切通门】

两 【良蒋切局门】

廉 【力盐切狭门】

（臣）等谨案此门专为来三遇精双喻四行韵者而立云通广局狭则十六摄中惟江果二摄不与矣此一门行韵之等全与局狭门同若于局狭门出切十五母之外再加一来母第三共十六母出切则此小局狭门可省然不能以之该行韵在通广摄内之精双喻四者故又别出此门也

钦定续通志卷九十五

●钦定续通志卷九十六 七音略四

七音略 【四】

通释

○通释

（臣）等谨按等韵之书人各异说以学有华梵之异而师法多门又各据所传以为之说也自唐以后始立三十六母及四声等子而司马光刘鉴韩道昭真空因之门法日以加详然唐以前若沈约之纽字图神珙之四声五音九弄诸图大抵皆以古切字要法因烟人然之类为纽弄无云字母及等子者今其法具载玉篇广韵诸书特以切法烦碎图式错讹故人不省释耳大藏所译诸经字母自晋竺昙摩罗察梁僧伽婆罗而下凡十家一十二种然亦颇有异同等韵家无津逮者惟宋沈括据唐实义难陀所译华严经字母四十二字以为各有埋致而亦不能详言其义也伏读钦定同文韵统华梵字母合璧谱取梵音三十六字为华音字母所从出者列于上而以华言列于下合为一谱各按音韵呼法展转求之则华之某字出于梵之某字显然共见已谨载之六书卷中兹不再见今祇敬录大藏经字母同异谱于卷首以见梵呗源流具有本末其玉篇广韵诸切法及等韵诸家异同之说并以类从而华梵二家切韵之大凡于兹略备矣盖华学以反切为主自魏孙炎创为尔雅音其事大行故高贵乡公不解反语以为怪异厥后周颙沈约以平上去入为纽尤为详备该玉篇广韵所载切法皆以字纽反切不云字母也梵学以字母为主隋志载婆罗门书以十四字贯一切音若大藏所载译经十家一十二种皆字母也唐舍利立字母三十守温又增六母为三十六母盖始以切字要法因烟人然之类标之为母而华梵二家之学于兹而合至于等子之说虽创自宗彦而二百六部之旧实以字音洪细而分后人不明音有古今华梵之异错立门法遂滋棼扰北魏吕静仿李登声类之法作韵集五卷宫商角征羽各为一篇徐景安乐书以宫为

上平商为下平角为入征为上羽为去是字音分配五音之权輿而玉篇广韵以牙舌唇齿喉分配盖又不同今悉仍旧说载之并加辨证于后

大藏经字母同异谱

古切字要法

沈约纽字图

神珙四声五音九弄反纽图

七音分配

等韵三十六母

△大藏经字母同异谱

【钦定 僧加婆 不空 下空 竺章口 无罗义 鸠摩罗 元奘 佛驮跋
 实义 地婆 不空 般若天竺 罗译师 译文
 译企 罗察译 译放光 什译摩 译大 陀罗译 难陀 诃罗 谒华 译华
 字母 利问经 殊问 刚顶 光赞般 般若经
 诃般若 般若 华严经 译华 译华 严经 严经 经 经
 若经 经 经 严
 经 严经】阿 阿 阿 遏 阿 阿 阿 哀 阿 阿 阿 阿 婀 【阿阿
 】 阿 阿 阿 罗 罗 逻 洛 啰 多
 啰 啰 啰伊 伊 伊 壹 波 波 波 跛 跛 波 跛 跛 跛 【伊伊】
 伊 伊 翳 遮 遮 遮 者 者 者 者
 左 者乌 忧 坞 唄 那 那 那 娜 多 那 多 曩 曩 【乌乌】
 忧 污 污 罗 罗 罗 砢 逻 逻 逻
 攞 攞喇 厘 ■〈口吕〉 哩 陀 陀 陀 柁 茶 拖 茶 娜 娜 【喇
 伊】 厘 ■〈口吕〉 梨 波 波 婆 婆
 婆 婆 婆 摩 婆利 梨 力 鲁 跢 茶 茶 茶 茶 茶 茶 拏
 拏 【利伊】 梨 嚧 卢 沙 沙 沙 沙
 沙 沙 沙 洒 洒厄 翳 曠 伊 憩 和 和 缚 他 缚 他 嚩 嚩
 【厄厄】 翳 爱 爱 多 多 多 ■〈多
 页〉 那 哆 那 多 哆鄂 乌 污 郛 计 夜 夜 也 邪 也 耶
 野 也 【鄂鄂】 炮 奥 奥 咤 咤 咤
 【瑟咤 史咤 瑟咤 史咤 瑟咤 瑟咤】 昂 庵 暗 暗 娑 加 迦 迦
 迦 迦 迦 迦 迦 【呵斯】 痾 恶
 恶 摩 娑 娑 娑 娑 娑 娑 娑嘎 迦 迦 葛 迦 摩 磨 磨
 摩 么 摩 莽 莽咯 法 佉 渴 瘴 伽
 伽 伽 伽 伽 伽 譏 譏噶 伽 譏 ■〈口卉〉 口 阍 他 他 他

【娑他】 他 【娑他】 佗 他 【
 噶哈】 ■ 〈口恒〉 伽 竭 波 阁 阁 阁 社 社 社 惹 惹 【迎
 阿】 识 仰 识 【陀阿 湿波】 ■ 〈
 斡欺〉 【湿缚 室者】 锁 【室者 娑嚩 娑嚩】 匝 遮 左 拶
 奢 大 驮 达 柁 柁 柁 驮 驮 擦 车
 嗟 捺 祛 赦 除 舍 奢 奢 奢 舍 舍 杂 阁 惹 惹 义 佉
 祛 佉 佉 佉 佉 佉 佉 【杂哈】 禅
 鄢 嗟 ■ 〈尸外瘳内〉 义 义 屣 义 义 义 【讫洒 乞义尼鸦】
 若 娘 倪 ■ 〈卜若〉 侈 哆 【萨■
 〈多页〉 娑多 娑多 娑多 娑多 娑多】 查 多 咤 晰 【咤呵】
 若 若 若 娘 壤 壤 娘 娘 义 他
 咤 咤 【披何 伊□】 拖 【刺他】 颇 【□楞多】 颇 【
 啰佗 □啰多】 楂 陀 拏 疵 车 繁
 婆 呵 婆 婆 婆 婆 婆 【楂哈】 檀 茶 茶 那 车 车 薄
 车 车 车 蹉 车 那 那 拏 拏 【沙波
 】 魔 摩 绰 【娑摩 娑么 娑摩 娑么 娑摩】 答 【多轻】 多
 怛 蹉 叵 火 【□磨 诃娑 诃娑 诃
 娑 诃嚩 诃嚩】 塔 【他轻】 佗 拏 【迦何】 蹉 嗟 【嗑缚
 】 诃 缙 诃 【哆娑 哆娑】 达
 【陀轻】 娜 捺 【咤除】 峩 伽 蹉 伽 伽 伽 伽 伽 【达哈
 檀轻】 驮 达 那 咄 他 键 咤
 咤 咤 姪 姪 纳 【那轻】 曩 那 颇 那 拏 捩 拏 拏 拏 儻
 儻 巴 波 跛 钵 ■ 〈口迦〉 破 颇 拏
 【娑颇 娑颇 娑颇】 颇 颇 葩 颇 颇 癸 磋 歌 歌 颇 【娑
 迦 娑迦 娑迦 娑迦 娑迦】 拔 婆 么
 末 【伊咤】 嗟 醯 【塞迦】 阁 【也娑】 阁 【也娑 夷
 娑拔哈】 梵 婆 婆 侈 嗟 遮 【
 逸娑 多娑 室者 多娑 室左 室者】 嘛 磨 莽 摩 咤 咤 咤 酌
 佗 佗 佗 咤 佗 雅 耶 野 耶 唵
 茶 咤 陀 陀 陀 茶 茶 喇 罗 啰 啰 择
 拉 逻 砢 罗
 斡 婆 嚩 嚩
 沙 舍 舍 没
 卡 屣 洒 沙

萨 娑 娑 萨

哈 诃 贺 诃

【嘎刹】 楞 【乞洒】 刹

（臣）等谨按天竺字母五十字唐贞观初吐蕃相阿努身至中印度国依其本音译以唐古特字以为西域传布经咒之用其前十六字为音韵字然惟阿伊乌喇利厄鄂七字为单字其七字之下又细书一字者即七字之长声昂字即阿字合英字收 【阿斯】 即阿字带斯字收故十六字之中止七字为单字然喇利二字以翻切字配之仍系各字之下带本字音不能另成一字故七字之中又止阿伊乌厄鄂五字为单字皆收声于本字之喉音与国书第一字头之阿厄伊鄂乌五字相对其转韵所成之字皆从此五字而生而伊乌厄鄂又皆根于阿字故阿字为元声也后三十四字为翻切字其字音相近而呼法不同者嘎噶 【噶哈】 匝杂 【杂哈】 查楂 【楂哈】 答达 【达哈】 巴拔 【拔哈】 十五字皆各三字相近而嘎匝等字紧读噶杂等字缓读 【噶杂哈哈】 等字带喉音读也阿努又采天竺字母合之西番语音自制西番字母三十字惟末一阿字系天竺之音韵字嘎喀噶 【迎阿】 【尼鸦】 答塔达纳巴葩拔嘛匝擦杂鞞鸦喇拉沙萨哈二十三字系天竺之翻切字其于天竺音韵十六字止取一阿字者以阿字为元声包括终始音韵字由此而生翻切字即于此收韵故天竺用于字母之首西番用于字母之末则始终之义显然矣其余音韵十五字皆不用者则以阿字加各记号即成伊乌厄鄂喇利七字长呼即成迭书七字阿字合英字收声即成昂字阿字带斯字收声即成 【阿斯】 字皆于三十字母之内足以生之故皆不用其于翻切三十四字止取二十三字其余 【噶杂楂达哈哈哈哈拔哈】 查义揞那卡 【嘎刹】 十一字皆不用者以噶杂楂达拔五字西番无带哈字音者故不用查义楂三字西番例即于嘎喀噶三字内转出故亦不用那字西番无卷舌音卡字天竺兼喀哈二音西番例则或用喀字或用哈字 【嘎刹】 字天竺兼掐义二音西番则或作掐字或作义字亦于喀字内转出故亦不用此西番字母所以原本于天竺而较天竺尤简要也其增设 【赙妻赙鸦鸦】 纱鞞婀六字者 【赙妻赙鸦鸦】 三字系天竺字母所无婀字与阿字音本相同名小阿字然阿字止作正音而小阿字则可作引字用于字前可作随字用于字后纱字与沙字鞞字与萨字音亦相同而沙萨音紧纱鞞音缓又沙萨二字加引字仍读本字纱鞞二字加引字则其音随之而变故因其用而增设之也隋志称婆罗门书以十四

字贯一切音是为反切之祖然考之大藏经典则金刚
 顶文殊问师利问三经各五十字母前十六字为音韵后三十四字为翻切字与天竺字
 母相合其余光赞般若经则四十一字大般若经则四
 十三字放光般若摩诃般若及华严诸经俱四十二字各有多少之殊至其所定字母惟
 阿字为元声诸经俱同余如师利问之伊忧厘梨文殊
 问之伊坞污■〈口吕〉金刚顶之壹翳嗚污般若之罗逻洛波华严之啰多跋波等字
 大多互异盖其师资各别或同字而异呼或异字而同
 呼不能以画一也沈括梦溪笔谈梵学喉牙齿舌唇之外又有折撮二声折声自脐轮起
 至唇上发如■〈今牛〉字浮金反之类是也撮声鼻
 音如歆字鼻中发之类是也字母则有四十二【此下所列即唐时实义难陀所译华严
 经之阿多波者等四十二字不具录】为法不同各
 有理致虽先正所不言然不害有此理据此则梵音又多折撮二声宜其字母之多矣至
 于配合生字诸经皆无明文惟实义难陀所译华严经
 字母四十二后世沙门每字各唱演十二字仍归本字收声共十三字成句每诵经一段
 毕唱演三四句故沈括所论亦祇以华严字为据贝笈
 繁多学者未易综览而转梵为华之故今所传韵书皆无有补及之者然逐字寻声因声
 考字则华梵字母实无异同若夫中华有闭口西域有
 弹舌因字制母故多少不同即西番字母本于天竺而弹舌及卷舌诸音则西番无之而
 别有【赧鴉妻赧鴉鴉】等六字可以知立母者随
 各处之语音而为之原不必拘于一定矣方以智通雅载婆罗门十四字为阿侠鞞翁乌
 爇哀医因安音谳讴阿盖即华严字母之音韵西洋人
 金尼阁着西儒耳目资字父共三十分为轻重曰则者格百德日物弗额勒麦搦色右
 ○为轻曰测撻克魄忒○○○○○○○○黑为重其
 所云字父即中国之字母也其自鸣字母曰丫额衣阿乌则喉声也旁转之又列四十五
 字共五十曰字母乃中国之韵也与国书第一字头及
 天竺之音韵字相同

△古切字要法

因烟 人然 新鲜 饬涎 迎妍 零连 清千宾边 经坚 神禅 秦前
 窳年 寅延 真毡娉偏 亭田 澄缠【一作陈
 】 平便 擎虔 轻牵称燁【一作禅】 丁颠 兴掀 汀天 精笈 民眠声
 臙 刑贤 ○○ ○○

（臣）等谨按因烟人然等字凡三十类一本以末四虚圈作芬番文櫛四字亦分
 为三十类此法自魏秘书孙炎作反语后即有之传之
 最古故神珙之五音九弄诸图下及海篇诸书皆用此法作切无有言及字母者韩道昭

吕维祺皆云唐舍利初置字母三十后梁山僧守温益以六母盖即此切字要法之三十类舍利标出见溪郡疑等字为三十母而守温又增六母为三十六母耳然字海所云守温添微奉帮滂状娘六母者亦不可信切字要法三十类除四无文者外凡五十六字以字母考之少知彻澄娘非奉六母此即类隔交互诸门法所由起守温所增六字盖即在所少六母之内并舍利原定之三十母总之为三十六母也

△沈约纽字图

见图（图略）

（臣）等谨按此图分正纽到纽双声迭韵四法试即以章字论之余可类推章掌障灼与行韵之良两饷略皆正纽之四声也就正纽中细分之则有正到二纽章为正灼为到以灼良切章为正纽故云入声为首章略切灼为到纽故云平声为首此二法皆以正纽之字出切同韵之字行韵故为正纽到纽若以旁纽之字出切则是同母之字不必一纽是为正反到反不得云正纽到纽矣若不拘正纽旁纽之字出切而以本字行韵则为双声故章灼切灼良略切略为双声以本字出切而取同韵之字行韵则为迭韵故灼略切灼章良切章为迭韵其云双声平声为首迭韵入声为首者皆据灼字言之章灼切灼为双声故云平声为首灼略切灼为迭韵故云入声为首盖双声不拘平入但取同母若迭韵之法出切行韵二字必系同韵故据灼字而言灼略切灼以灼字出切而略字与之同韵二字皆入声也若据章字而言则必云平声为首矣惟入声以入为首平声以平为首则出切行韵皆同一韵而为迭韵也此双声迭韵法皆以正纽之字而言若神珙之圆方二图则皆兼旁纽言之也广韵载此图题为双声迭韵法按图具正纽到纽双声迭韵四法不得仅以双声迭韵目之神珙序云梁沈约创立纽字图皆以平书碎寻难见因列五圆图二方图此图在方圆图之前而每字又系平书是即沈之纽字图也因改题之以正广韵刊本之误其错互者并加厘正

（臣）等又按海篇云所谓双声迭韵者韵之子母正切回切也如龙卢容切反云卢零连龙卢字为韵之子容字为韵之母零连字为韵之祖双声者子正切得母母回切得子而且同祖迭韵者子正切得子母回切得母而不同祖唐人吟咏深以此为亲切刘禹锡诗出谷娇莺新睨睨营巢乳燕旧呢喃乃双声也正切睨睨睨兴掀睨回切睨睨睨兴掀睨正切呢喃呢宁年喃回切喃呢喃宁年呢此双声之说明矣又杜甫诗卑枝低结子接叶暗巢莺乃迭韵也正切卑枝卑宾边卑回切枝卑枝真毡枝正切接叶接精箠接回切叶接叶寅延叶此迭韵之说明矣是

故平上去入谓之双声同韵连绵谓之迭韵云尔宋书谢庄传王元谟问庄何者为双声何者为迭韵答曰元护为双声礲礲为迭韵梦溪笔谈
几家村草里吹唱隔江闻几家村草吹唱隔江皆是双声月色侵簪冷江光逼履清侵簪逼履皆是迭韵指掌图双声迭韵例曰回会二字为切
同归一母只是会字更无切也故号曰双声如章灼良略是矣商量二字为切同出一韵只是商字更无切也故号曰迭韵如灼略章良是矣总
是诸字皆以本字行韵为双声本字出切为迭韵不更言所切之字也纽字图章字下之正纽灼良切章到纽良略切灼五音圆图之正反居隆
切宫到反宫闾切居出切虽系同母而不以本字行韵则是正反到反又别为一类史之所载如晋孝武帝作清暑殿有识者以清暑反为楚声
楚声为清声楚为暑也刘俊旧名刘忱反为临雠临雠为刘雠临为忱也齐世祖于青溪立宫号曰旧宫时人反之为穷厩穷厩为旧厩穷为宫
也文惠太子立楼馆于钟山下号曰东田东田反语为颠童颠童为东童颠为田也梁武帝创同泰寺开大通门对寺之南门取反语以协同泰
同泰为大泰同为通也北齐刘邈请改元为武平谓和士开曰武平反为明辅明辅为武辅明为平也水经注索郎酒反为桑落桑落为索落桑
为郎也又有三字反者吴孙亮初童谣曰于何相求常子阁常子阁者反语石子堦常阁为石阁常为堦也齐武帝永明初百姓歌曰陶郎来言
唐来劳也陶郎为唐郎陶为劳也皆是正反到反之例

△神珙四声五音九弄反纽图

东方喉声 何我刚鄂诃可康各
西方舌声 丁的定泥宁亭听厯
南方齿声 诗失之食止示胜识
北方唇声 邦龙剥雹北墨朋邈
中央牙声 更硬牙格行幸亨客

（臣）等谨按此图五音分配与七音韵鉴指掌图诸书不同所隶舌齿唇声下之字与今韵图相合其喉声下除何字外我刚鄂诃可康
各七字皆牙音见溪疑母也牙声下除更硬牙格客外余行幸亨三字皆喉音晓匣母也考说文唐韵凡安恩鄂恶袄昂等字俱用乌字五字作
切而韵图皆系喉声是则陆孙诸人牙喉二音与今有异矣又广韵辩字五音法一唇声并二舌声灵厯三齿声陟珍四牙声迦佉五喉声纲
各今以韵图考之加佉纲各皆牙音字而以纲各为喉亦为牙喉相混又载辩十四声例法十一牙声迦佉俄等能所俱轻十三喉声鸦加痾等
能所俱轻是亦以牙音之鸦加为喉声也

五音圆图

二方图

罗文反样图

五音圆图

见图（图略）

（臣）等谨按神珙序云列五个圆图者即是五音之图每图皆从五音字行皆左
转中有注说之刊本脱讹率多难通今以宫音一图略
释其义宫隆居闾四字同声而宫与隆居与闾又为同韵因立法以居隆切顺切出宫字
者为正以宫闾切逆切出居字者为到其云正反到反
者居顺切宫宫逆切居反复皆可以出切取字也后人反切命名之义盖取诸此九弄图
有正纽傍纽二类神珙序云正傍纽者 【原本脱正
字今按文补之】 正在一纽之中傍出四声之外图所列征整正只为正纽征真毡之为
傍纽盖正纽为本字之四声傍纽为同母之字如因烟
人然之类也纽字图章字下所列灼良切章之正纽章略切灼之到纽章灼切灼良略切
略之双声皆是九弄图之正纽以章掌障灼良两饷略
为本字之四声也此五音圆图所列居隆切宫之正反宫闾切居之到反皆是九弄图之
傍纽以宫居隆闾为同母字也正纽谓之纽傍纽谓之
反顺逆取字则谓之正到自正反到反而下为双声迭韵者各四类皆属傍纽其迭韵之
分正傍者正到反以宫居互切而迭韵必以本字出切
又必与行韵之字同韵而为迭韵若以宫居二字出切则宫居二字不同韵不可互切也
以宫为正居为傍故以居闾切居为傍迭韵宫隆切宫
为正迭韵其以隆宫切隆为正迭重道闾居切闾为傍迭重道者居为傍闾与居同韵亦
为傍宫为正隆与宫同韵亦为正故谓之重道也其双
声之分正到傍到者到即到反之到宫闾切居为到反居出切为傍而宫出切为正宫隆
同韵故隆出切亦为正也其又云正双声傍双声者盖
即正反之正当云正正双声傍正双声而不言者从省文也居隆切宫为正反宫出切为
正而居出切为傍居闾同韵故闾出切亦为傍也居宫
切宫为正到双声隆闾切闾为傍到双声宫居切居为傍正双声闾隆切隆为正正双声
【原本以傍到双声之隆闾为正双声正双声之闾
隆为傍到双声盖因二字相邻而互易其文因以致误耳今悉改正】 盖即傍纽之正反
到反四字而居闾为傍宫隆为正又迭韵之闾隆以别
于居宫而系同韵故为正傍重道双声之宫闾以别于隆居而系到反故为正到傍到若
以纽字图之灼良章略四字而为此圆图之十类则灼
与略为正章与良为傍也灼良切章之正纽章略切灼之到纽即傍纽之正反到反其迭

韵则灼略切灼为傍迭韵章良切章为正迭韵略灼切
略为傍迭重道良章切良为正迭重道其双声则灼章切章为正到双声良略切略为傍
到双声章灼切灼为傍正双声略良切良为正正双声
皆与圆图同

二方图 【即九弄图】

见图（图略）

罗文反样图

见图（图略）

（臣）等谨按神序云又列二个方图者即是九弄之图图中取一字为头横列为图首目题傍正之文以别之盖九弄之法原于罗文反样二图今具为释之其征字为之盈反 【原本误征为真因讹之盈反为之寅反今改正】 以五圆图正倒反之例推之则出切之之字必为征怡反因以正纽征整正只傍纽征真毡之及盈字之正纽盈郢胫恠傍纽盈寅筵怡 【原本讹郢为引引非盈字上声盖与寅上之引相邻而互易其字也今悉改正又胫非盈去检韵谱是以匣喻二母互用其筵之去见入■〈才絜〉亦然疑此诸字本皆有音无字故借用匣母下字以当寄声也今悉仍其旧】 各以正傍纽经纬相交为罗文反样二图每图十六字皆同一母而纵横取字以为九弄图今以征字释之反音为之盈反者之字同母盈字同韵也此是正反若到反则以征怡反之是皆以傍纽为正到反若取正纽则征为只盈切之为职怡切为正到纽矣盖正纽是本字直下之四声故正为纽傍纽是同母横排之四韵故为正到反也以纽字图用正纽之正到纽及五圆图用傍纽之正到反验之悉可见矣双声者本字行韵也迭韵者本字出切也之征反征怡盈反盈为正双声征之反之盈怡反怡为傍双声故双声下列之盈怡等字 【原本误列整真旨是缘相邻之正韵下字而互易也辨见后】 征盈反征盈征反盈为正迭韵之怡反之怡之反怡为傍迭韵故迭韵下列盈之怡等字其分正傍者征为正纽之为傍纽故反征盈者为正反之怡者为傍是即五音圆图双声迭韵之各四类也其又云正韵傍韵者亦即反音之类第以反征字韵者为正如震盈■〈孱 卍〉盈旨盈皆反征是正也反之字韵者为傍如郢怡真怡以怡皆反之是傍也 【原本误以震■〈孱 卍〉旨为寅之怡是与双声互讹其文又讹盈为寅耳其震■〈孱 卍〉旨并讹整真旨真不与征同韵而整字既用之为正纽之上声必不重用之为正韵之出切字也今悉改正又傍韵郢真以原本讹引征以据上去入三图傍韵之軫震质例推之则征是真字讹文也

又引字非盈上是郢字讹文前已辨之】 罗文绮错皆系征字同母之出切字但行韵用本字则为双声用同韵字则为反音也其独取此数字

者既以罗文反样图征字之直下四声为正纽又以横排四韵为傍纽因又迤径斜行取征之平真之上毡之去之之入四声为罗文其未用者

祇质折志旨■〈孺 丿〉震六字既取震■〈孺 丿〉旨以为正韵因尽用所余之质折志以为绮错 【原本列正质折志旨■〈孺 丿〉六

字为绮错各弄皆三字此条不得独异且正韵目下既有旨字则■〈孺 丿〉震讹为真整踪迹显然盖同母之字声近致讹理所宜然以震■

〈孺 丿〉旨质折志六字各取其三以配正韵绮错二目多少适均若如原文所列六字既重正纽之正字又遗真纽下之震不可通矣】 其实

每图正傍纽十六字皆系同母皆可作反音及双声也

△七音分配

角 牙

征 舌

羽 唇

商 齿

宫 喉

半征 半舌

半商 半齿

（臣）等谨按宫商角征羽五音分配五方五行五藏自吕览月令史记乐书而后人无异词独有以喉舌牙齿唇分配五行五方而因

以分配五音者自等韵创为宫喉商齿牙角舌征唇羽之说后来韵书皆遵守之其实分配毫无确据且人各异说不足相难文献通考载王宗

道指元论一卷其说以晓匣影喻为牙音端透定泥为齿音来为半齿日为半舌今坊刻玉篇卷首亦曰东方喉西方舌南方齿北方唇中央牙

既以中央为牙则晓匣影喻为牙矣既以南方为齿则端透定泥为齿矣此说颇与宗道之说相类揆其所以盖舌音下三等之字颇与齿音三

等之字相混如通摄之中踵重与锤■〈行外童内〉崇及止摄之知緜驰与支鷗○之类喉音喻母下一等之音颇与牙音疑母下一等之字

相类如寅银牛由之类不知此类字以本母调之踪迹显然而娘之与审禅见溪郡之与晓匣以本排顺次呼之更毫无相类者也司马光以喉

为羽以唇为征以半征半商音为来日沈氏笔谈亦云舌齿牙唇喉当宫商角征羽不过取配四时五行相生之序耳章黼作韵学集成依韵会

帮滂并明属宫 【黄公绍韵会盖本之指掌图】 又依玉篇影晓二字属宫依韵会匣

喻属羽又依玉篇敷奉属羽另以非微二字独属征音
熊朋来云喉唇二音宫羽异说然彼此互易虽所配之宫羽有讹而音之相次尚未有失也今则半依韵会半依玉篇则宫羽二母之音皆荡析
离居矣欲究其原必须喉舌牙齿唇分配五藏确凿无疑然后以之分配五音始为至当不易然遍考诸书止有舌为心苗齿为肾余之说无有
以齿属肺者即喉属脾牙属肝之说诸家亦多异同是喉舌牙齿唇分配五藏已自不确其转而分配五音宜其多所窒碍矣大凡各韵各字止
能知其为牙舌唇齿喉之音而不能知其为宫商角征羽之音即以五音本字而论角属见母为牙征属知母为舌商属审母为齿皆于本音为
合而羽在喻母下属喉宫在见母属牙又何以解耶赵宦光以公字不可附牙音而改牙为宫字汇所引李世泽法亦以牙音公空为宫之宫皆
明知其不安而牵就以求合也故叶秉敬韵表凡五音分配皆一扫而空之不为无见今姑仍旧说载之

（臣）等又按七音之名本于乐律郑志既引隋书郑译之说又引唐杨收论琴之说殊为自相乖异盖五音之外加以变宫变征是为七律如黄钟为宫林钟为征太簇为商南吕为羽姑洗为角应钟为变宫蕤宾为变征是也若琴律则五弦之外加以少宫少商是为七弦而实止五音如一弦为黄钟宫二弦为太簇商三弦为姑洗角四弦为林钟征五弦为南吕羽六弦则黄钟清宫七弦则太簇清商是也二少之与二变迥乎不同五音加二变得七音五音加二少仍为五音不能比而同之也韵鉴于五音之外加以半商半征为七音不知自来论律吕者祇以五音二变为七音而不算半律半征半商与征商本音止有清正之别而同为一声正与琴之少宫少商为宫商二弦之清声者相同也七音之中本无半征半商二音而郑志从而信之其亦过矣故来日二母后之论者或云半舌半齿或云半商征音或云半征商音或云深喉浅喉迄无定说惟陈苾谟元音弦韵以来为半喉舌日为半舌喉当变宫变征二音恰与七音之序相合然舌之属征喉之属宫先已分配不确更无论二变矣

△等韵三十六母

牙 见溪郡疑

舌头 端透定泥

舌上 知彻澄娘

重唇 帮滂并明

轻唇 非敷奉微

齿头 精清从心邪

正齿 照穿状审禅

喉 晓匣影喻

半舌 来

半齿 日

(臣)等谨按宋崇文总目云三十六字母图一卷释守温撰皇极经世声音法上官万里注云番僧了义以三十六字为翻切母与崇文

总目云守温所撰者殊盖不可考矣自字母定三十六以后议增减者亦各异其说其议增母者吴澄曰三十六母俗本讹而莫或正也郡当

易以芹非当易以威知彻澄娘四字宜废圭缺羣危四字宜增乐安陈晋翁为指掌图节要卷首有切韵须知于照穿状娘下注曰已见某字母

下于经坚轻牵挚虔外出肩涓倾圈琼拳则宜废宜增亦已了然然非不可易威威乃喉声影母非乃轻唇殊不相及赵宦光又言母有不足补

其轻重见溪郡疑晓匣影日则补干开乔危好敛賈习喻来则补运离之类熊禾亦欲加母皆各见其一得非定论也其欲减母者吴敬甫切韵

枢纽减知彻澄娘敷而以微附喻下用三十一母叶秉敬韵表减知彻澄娘敷疑用三十母张位早梅诗东 【端】 风 【非敷奉】 破 【

滂并】 早 【精】 梅 【明】 向 【晓匣】 暖 【泥娘】 一 【疑影喻】 枝 【知照】 开 【溪郡】 冰 【帮】 雪

【心邪】 无 【微】 人 【日】 见 【见】 春 【彻澄穿状】 从 【清从】 天 【透定】 上 【审禅】 来 【来】

则止用二十母也李登书文音义便考曰三十六母除知彻澄娘非五重母惟用三十一字而声有清浊如通清同浊荒清黄浊是也三十一母

中见帮端照精五母皆有清而无浊疑微明泥来日六母皆有浊而无清此外溪与郡晓与匣影与喻敷与奉滂与并透与定穿与状审与禅清

与从心与邪二十母皆一清一浊如阴阳夫妇之相配焉然惟平声不容不分清浊仄声止用清母悉可该括故并去十浊母惟用见溪疑晓影

奉微帮并明端透泥来照穿审日精清心二十一字是平声母用三十一仄声母用二十一也方以智又改为二十母其切韵声原读曰帮滂 【

并】 明见溪 【郡】 疑 【影喻】 晓 【匣】 敷 【非奉】 微端透 【定】 泥 【娘】 来精清 【从】 心 【邪】 知

【照】 穿 【彻澄状】 审 【禅】 日盖益趋省易矣

四等

三十六母清浊

四等

一等 见溪○疑 端透定泥 帮滂并明 精清从心○ 晓匣影○ 来○

二等 见溪○疑 知澈澄娘 帮滂并明 照穿状审○ 晓匣影○ 来○

三等 见溪郡疑 知澈澄娘 【帮滂并明非敷奉征】 照穿状审禅 晓匣影喻 来日

四等 见溪郡疑 端透定泥 帮滂并明 精清从心邪 晓匣影喻 来○

（臣）等谨按音韵四等一等洪大二等次大三四皆细而四尤细凡字母三十六位合四等之音乃具又每等所空之位或以为有音无字夫有音而未制字者固有之若当此位而屡无字则非未制字也当此等则缺此位犹琴之汛当徽则鸣不当徽则否莫知其所以然也

（臣）等又按古人切字不分等第自僧宗彦撰四声等第图而切韵字因之因立类隔交互诸门法沈括笔谈云冬与东字母皆属端字冬乃端母中第一等声东乃端母中第三等声其等颇与指掌图七音韵鉴不同又云帮字纵调之为四等帮滂傍茫是也自注其下帮宫之清滂宫之次清傍宫之浊茫宫之不清不浊据此则是字母之清浊非四等也疑亦传写之误裁撮十六则韵多合并细考之孤之三等当另有局

唇音不为居居若三等其一等当另有音不为孤以通撮之公恭分调之自见止撮三等开饥其合当近居而非龟龟若一等其开当近该而非

鸡惟臻撮根巾昆磨上下颇吻合耳果假二撮以歌戈止一等嘉瓜止二三等因便合之为一因古歌麻不分如广韵切迦以伽行韵切伽以加

行韵仍附戈后所谓内外混等也然广韵于见母字羈又有饥有基有饥妫又有龟有归【羈妫为支饥龟为脂基为之又机归为微】居又

有拘【居为鱼拘为虞】佳又有皆媧又有乖【佳媧为佳皆乖为皆】巾又有斤磨又有君【巾磨为真斤君为文】奸又有间关

又有鰓【奸关为删间鰓为山】■〈才梟〉又有甄○又有■〈綦力〉【■〈才梟〉○为先甄■〈綦力〉为先】庚又有耕觥

又有○【庚觥为庚耕○为耕】弇又有甘【弇为覃甘为谈】緘又有监【緘为咸监为衔】皆等韵所难分者一一推广为之以

笔谈所云冬为端一等字东为端三等字者推之每一字必具四等俱有有音无字之别而不能悉着耳故切韵图以十六撮为简而论音之等

即七音韵鉴四十三图尚未细也

（臣）等又按三十六母皆随取各韵各等中之一字以别韵图横排字母之次第也如见母为牙音第一位清音见字虽系山撮四等字

甄字去声而统属牙音第一位之四等一十六声溪母为牙音第二位半清音溪字虽系

蟹摄四等平声而统属牙音第二位之四等一十六声
余母皆仿此皆随取一字以为标识尔不拘定等第也牙音之见溪郡疑四母喉音之影
匣晓喻四母及半舌来母皆统属四等所谓来晓见帮
居四等者是也惟舌音有舌头舌上各四母分为八音而舌头之端透定泥四母管一四
等舌上之知彻澄娘四母管二三等此知等类隔端等
类隔二门法所由起也唇音有重唇轻唇各四母分为八音而重唇之帮滂并明四母管
一二四等轻唇之非敷奉微专管三等又日母亦专管
三等此轻重交互重轻交互及日寄凭切三门法所由起也齿音以正齿齐齿各五母分
为八音而齐齿之精清从心邪管一四等正齿之照穿
状审禅管二三等此精照互用及内三外二诸门法所由起也

三十六母清浊

纯清 见端知帮非精 照 影

次清 溪透彻滂敷清心穿审晓

全浊 郡定澄并奉从邪状禅匣

半 【清浊】 疑泥娘明微 喻来日

（臣）等谨按牙音舌头舌上重唇轻唇皆四位二三相对为清浊首位无浊音四位无清音齿头正齿五位首位无浊音二三相对为清浊四五亦相对为清浊喉音四位一与三二与四各相对为清浊至来日皆一位俱系浊母无清音三十六母十八清十八浊分配适均清浊字音本于阴阳说者或云阳清阴浊或云阳浊阴清各无定见然以七音之理推之乐律以阳律为浊均阴吕为清均一定不移之法且以字音征之阳阳而央阴吟阳而阴阴即阴阳二字已具阳浊阴清之理故周德清中原音韵以阴平为清平阳平为浊平也一字四声俱有阴阳而人多不能辨凡郡定澄并奉从状七母本系最浊其上去入三声多有呼之似见端知帮非精照之仄声者是最浊变为最清盖浊声与清声有转音而最清母无浊最浊者一转遂于最清之位其实非最清之浊也又郡定澄并奉从邪状禅匣十母之上声或有呼之似去者其实非去也刘鉴切韵指南序云时忍切肾字时掌切上字同是浊音皆当呼如去声却将上字呼如清音赏字其蹇切件字其两切劈字亦如去声又以强字呼如清音■〈石羌〉【邱仰切】字然则亦以时忍切如晒字其蹇切如遣字可乎李嘉绍因之立浊声一法云上声内有十标之下尽似去声盖浊音也如多动切董思兆切小奴罪切馁是也皆惑于浊上声之说而为之词者也至如上去之浊有转音入为声之穷更不能转浊声甚似清声心邪审禅晓匣影喻之清浊尤易混淆不可不详辨之不知辨仄声之清浊则有

以啞嗲平上去入为五声如方以智之切韵声原谓上去入有同声之字如梅膺祚之切韵直图者矣不知仄声最浊似最清之浊则有同位分两声如邵子皇极经世近揆与干虬分隶两位者矣不知辨入声之清浊则有呼彻辙同音如韩昌黎之讳辨者矣

钦定续通志卷九十六

●钦定续通志卷九十七 天文略一

天文略 【一】

（臣）等谨按周官推步掌于冯相氏占变掌于保章氏各有专司故司马迁史记分为八书之二古者小民咸识天象仰瞻星汉用知时节而趣耕作夏小正月令诸书示农事女工勿怠缓也而律设科条私习天文有禁乃以绝民间或妄语襍祥是二者又有宜讲求不宜讲求之别矣然施之于用虽二事苟溯而上之日月星运行有常其为体也则一郑志录步天歌兼及其注文继以晋书所列天汉起没十二次度数州郡躔次又参以隋书所列七曜述是数者为天文略原序称歌辞句中有图言下见象不语休祥而注内仍不免涉灾祥休咎至若十二次宿度杂举刘歆费直蔡邕三家则由未解岁差故存其殊致莫之折衷其以郡隶州国也如曰燕幽州而所隶有西河上郡北地此三郡实古雍州曰卫而配以并州下列安定天水陇西酒泉张掖武都金城武威敦煌此九郡远出雍西曰魏而配以益州隶广汉越巂蜀郡犍为牂牁巴郡汉中于下寔非魏之疆土曰秦雍州而所隶乃云中定襄雁门代郡太原上党又属战国时赵域使星野别得之创闻岂地名亦可东西淆互如是盖天文一事非其所长至周官星土之说尤失传已久汉以来悉属附会而欲成全书固不可阙而不载是以徒袭旧史未能择之精语之详也今更为目十曰星见伏昏旦中曰列宿十二次曰星象曰黄道宿度曰七衡六间曰晷景短长曰北极高下曰日月五步规法曰仪象曰漏刻或补前书阙遗或广所未及凡占变推步不与焉考自唐虞以来下迄元明见于六经史籍有关运行之体者约而论之着于篇

星见伏昏旦中

列宿十二次

星象

黄道宿度

○星见伏昏旦中

尧典举四仲月昏中之星日中星鸟以殷仲春日永星火以正仲夏宵中星虚以殷仲秋日短星昴以正仲冬夏小正从而广之以纪候正

月鞠则见初昏参中斗柄县在下三月参则伏四月昴则见初昏南门正五月参则见初昏大火中六月初昏斗柄正在上七月汉案户初昏织女正东乡斗柄县在下则旦八月辰则伏参中则旦九月内火辰系于日十月初昏南门见织女正北乡则旦唐虞夏相承未远故火中并系之仲夏五月而春秋传张趯曰火星中而寒暑退则季冬十有二月寒退旦中季夏六月暑退昏中也凡星未中见而东升过中乃西流周以夏正之六月昏火中故豳诗曰七月流火此岁差之大较周语虢文公曰农祥晨正日月底于天庙土乃脉发单子曰夫辰角见而雨毕天根见而水涸本见而草木节解驷见而陨霜火见而清风戒寒营室之中土功其始火之初见期于司里左氏春秋龙见而雩凡土功龙见而毕务戒事也火见而致用水昏正而栽日至而毕申丰曰古者日在北陆而藏冰西陆朝觐而出之火出而毕赋月令孟春之月日在营室昏参中旦尾中仲春之月日在奎昏弧中旦建星中季春之月日在胃昏七星中旦牵牛中孟夏之月日在毕昏翼中旦婺女中仲夏之月日在东井昏亢中旦危中季夏之月日在柳昏火中旦奎中孟秋之月日在翼昏建星中旦毕中仲秋之月日在角昏牵牛中旦觜觶中季秋之月日在房昏虚中旦柳中孟冬之月日在尾昏危中旦七星中仲冬之月日在斗昏东壁中旦轸中季冬之月日在婺女昏娄中旦氏中是月也日穷于次月穷于纪星回于天考验岁差积而踰二千年列宿部星右移一次其见伏昏旦中后一月是以周人所言与尧典夏小正殊下至于唐复改月令以表其时之星候孟春日在虚昏昴中晓心中仲春日在营室昏东井中晓箕中季春日在娄昏柳中晓南斗中孟夏日在昴昏翼中晓牵牛中仲夏日在参昏角中晓危中季夏日在东井昏氏中晓东壁中孟秋日在张昏尾中晓娄中仲秋日在角昏南斗中晓毕中季秋日在角昏牵牛中晓东井中孟冬日在房昏虚中晓张中仲冬日在箕昏营室中晓轸中季冬日在南斗昏奎中晓氏亢中虞夏冬至日在虚殷在婺女周在牵牛汉以后在斗元在箕凡日躔所在其星同日出没谓之伏去日半次而后朝觐距日四分天周之一昏旦正见于南方是为中星以周秦上校虞夏星候差及一次至元明差及二次矣

（臣）等谨按星见伏昏旦中古今不同由于日躔所在之宿验之分至岁有差移大概近七十年而差及一度踰二千年而差及一次唐虞时春分日在胃昴之间故鸟中夏至日在七星故火中秋分日在氏房之间故虚中冬至日在虚故昴中夏小正于正月首云鞠则见大戴礼记兼载其说曰鞠者何也星名也自汉以来天文志诸书无所谓鞠星者鞠当为噉诗释

文引尔雅囓谓之柳今尔雅囓作味囓味本一字异体
虞夏正月日躔奎娄奎娄西没故柳东升诗召南三五在东毛传云三心五囓郑笺云囓
在东方正月时也可以订正鞠为囓字传写之讹又四
月言初昏南门正至十月言初昏南门见南门二星在亢氏之南四月日躔东井舆鬼故
昏见于南方十月日躔斗牵牛南门二星朝见于东南
隅非昏见也初昏二字盖后人误加孔颖达云月令昏明中星皆大略而言但一月之内
有中者即得载之又云凡十二月日之所在或举月初
或举月末皆据其大略此说得之王肃注尧典不知月令季月昏中者尧时仲月已昏中
其故因岁差则然强以所宅为孟月日中日永为仲月
星鸟星火为季月读仲为中言各正三月之中气最为疏谬稽诸载籍尧典夏小正所言
星候相近诗三百篇暨国语左氏春秋月令所言星候
相近虞夏与周先后一月不闻古人以为疑而各随其时代仰观之象着于令以示民则
岁差之故古人明知之汉初乃失其传故冬至日在斗
而犹系之牵牛至永元十五年造太史黄道铜仪乃言冬至日在斗十九度四分度之一
晋虞喜云尧时冬至日短星昴今二千七百余年乃东
壁中则知每岁渐差之所至后代言岁差始此岁差者以日星相较而差非天行有差也
天之有南北极为左旋之枢以定南北天之有赤道为
左旋之中带以界南北而黄极为右旋之枢距北极二十余度黄道为右旋之中带斜交
于赤道半在赤道南半在赤道北最远距赤道亦二十
余度与黄极距北极相应日循黄道右旋而成岁冬至最南夏至最北相距四十余度自
南敛北其下值中土所居渐近则寒退而暑进自北发
南其下值中土所居渐远则暑退而寒进日之右旋发敛于四十余度之间于黄道适周
本无纤微差数使发敛未终则无以成岁矣一岁之日
躔起冬至复值其起处而列宿部星则稍移而前不与起处相值其间甚微积而至于六
七十年差一度非日躔黄道有此差盖列宿部星亦循
黄道右转耳唐一行分天自为天岁自为岁其所谓天者指列宿而言所谓岁者指日躔
而言分而二之是也然立法乃减岁余益天周谓岁周
不及天周则非也当以黄道为日星右旋之天周不惟日循之而南北发敛以有寒暑列
宿部星亦循之而古今推移以成岁差右旋者七政列
宿旋转之实也论南北不论东西左旋则大气所运成东出西没之象论东西不论南北
虽名以左右而非一顺一逆知南北与东西殊致则无
疑于日月星实右旋矣知列宿部星之右旋犹似日月五星右旋则无疑于岁差之故而
星见伏昏旦中可以上推千古下推亿万年而皆准宋
书南徐州从事史祖冲之曰中星见伏记籍每以审时者盖以历数难明而天验易显各

据一代所合以为简易之政也斯言得古人以星纪候之意月各表一星举目即见故也

（臣）等又按晋书天文志称周髀家云日月寔东行而天牵之以西没譬之于蚁行磨石之上磨左旋而蚁右去磨疾而蚁迟故不得不随磨以左回焉此喻诚得之而未尽儒者往往以右旋于左为逆遂疑日月亦左旋因行迟而觉其右转则徒见左右顺逆而生迟速之说明史天文志记洪武中帝与羣臣论天与七政之行皆以蔡氏左旋之说对【蔡氏说见书经集传】帝曰朕自起兵以来仰观干象天左旋七政右旋厯家之论确然不易尔等犹守蔡氏之说岂所谓格物致知之学乎今考蔡氏说本之张子故自宋以来儒者与步算家各持一议试就蚁行磨上之喻论之不惟磨左旋而蚁右去也磨石有上下之厚均分其厚于上下之中设一圈又科络之设一圈交于中圈半在中圈之上至磨上侧坐在中圈之下至磨下侧蚁右行循此圈自下侧斜而上至上侧势必斜而下至下侧适一周此圈乃论上下非与中圈同转分迟速知此则赤道专论东西黄道专论南北其象显然又昔人所谓天左旋日月五星右旋者天指列宿则岁差之故不明况列宿与日月五星合为有象之天八楚辞天问篇何以言圜则九重古九重天之说以列宿与日月五星皆右旋而南北推移加大气左旋为九也左旋之天一右旋之天八而列宿右旋甚微且星汉周布以成浑体其右旋必浑体全转故借之以显指日月五星所在耳虽列宿譬之邮程日月五星譬之过客未尝不知列宿亦右转也惟列宿与日月五星皆右转人见其东出西没者乃大气运之而左则九天之说显然汉以来不以岁差归之列宿右旋而以岁差归之日躔不足殊乖实验亦谬于古所谓圜则九重者也

○列宿十二次

古以星记日月之行唐虞时分四象而已亦谓之四陆至周人言十二次二十八星始详左氏春秋梓慎曰元枵虚中也裨灶以婺女为元枵之维首据是递之星次之大致可考尔雅释天寿星角亢也大辰房心尾也大火谓之大辰析木之津【按今尔雅作析木谓之津据左传国语星次名析木之津谓字乃讹舛衍文】箕斗之间汉津也星纪斗牵牛也元枵虚也颛顼之虚虚也北陆虚也娵觜之口营室东壁也降娄奎娄也大梁昴也西陆昴也柳鹑火也尔雅所未举者实沈参也鹑首东井舆鬼也鹑尾轸也元枵一曰天竈娵觜之口一曰豕韦东陆苍龙七宿为寿星大火析木之津三次北陆元武七宿为星纪元枵娵觜之口三次西方白虎七宿为降娄大梁实沈三次南方朱鸟七宿为鹑首鹑火

鹑尾三次宋书祖冲之曰臣以为辰极居中而列曜贞观羣象殊体而阴阳区别故羽介咸陈则水火有位苍素齐设则东西可准非以日之所
在定其名号也次随星名义合宿体分至虽迁而厥位不改

（臣）等谨按曲礼言前朱鸟而后元武左青龙而右白虎此列宿之四象春秋传有日在北陆及西陆朝觐之文是四象又即为四陆尔
雅虽曰北陆虚也西陆昴也寔言陆则兼该三次故举中一宿以见七宿天既动体随时不同何以有东西南北之定方据尧典日中星鸟以殷
仲春鸟在南则苍龙在东白虎在公元武在北象各七宿或见或否因其时之定位命为南北东西移时则不同厯数千年则仲春初昏亦不同
然则分四象始自羲和可知周冬至白在牵牛为星纪之中则斗值星纪之初用是为十二次纪首故曰星纪唐虞冬至日在虚乃元枵正中元
以来冬至日在箕乃析木之津正中不首斗牵牛也然则十二次之名始自周人可知汉费直刘歆蔡邕诸人未识岁差各以节气日所在宿度
分十二次之界故刘蔡并云日至其初为节气至其中为中气晋虞喜始立岁差法而祖冲之尤论之详后此推步家虽知星次不随日躔推移
然其十二次之界不过损益汉志及月令章句为之咸非定论星次起于周人则当取春秋传元枵虚中及婺女为元枵之维首二语就黄道均
分其界庶几不大远于古耳

（臣）等又按二十八宿乃星之当黄道者日行黄道虽借星以纪日躔当分黄道
自为黄道列宿自为列宿黄道以冬至为最南夏至为
最北春秋分为南北之中列宿则唐虞时虚在最南元以来箕在最南分至由于南北中
一定之限十二次专以星辰为限不论黄道之南北中
也

○星象

尔雅释天略举星名至史记天官书而大备其传盖出于周秦之际晋以后志天文
者往往与之殊致转相祖述浸失其本言星象宜权舆
于此中官天极星其一明者太一常居也旁三星三公或曰子属后句四星末大星正妃
余三星后宫之属也环之匡卫十二星藩臣皆曰紫官
前列直斗口三星隋北端锐若见若不曰阴德或曰天一紫宫左三星曰天枪右五星曰
天棓后六星绝汉抵营室曰阁道北斗七星杓携龙角
衡殷南斗魁枕参首斗魁戴匡六星曰文昌宫一曰上将二曰次将三曰贵相四曰司命
五曰司中六曰司禄在斗魁中贵人之牢魁下六星两
两相比者名曰三台柄辅星 【案柄字从前汉志增入据史汉两文于北斗七星下俱言
与北斗相近之星文昌三台诸星则近斗魁者也招

摇二星则近斗杓者也辅星是与北斗第六星相近者史汉于辅星下俱有占验之语其云明近者谓其与斗柄相近也今既删去占验则辅星二字不能与上下文相附故从汉志增入柄字杓柄二文义无差别但杓据斗前言之柄据杓旁言之为异】 杓端有两星一内为矛招摇一外为盾天锋有句圜十五星属杓曰贱人之牢东官苍龙房心心为明堂大星天王前后星子属房为府曰天驷其阴右驂旁有两星曰铃北一星曰牵东北曲十二星曰旗旗中四星曰天市中六星曰市楼房南众星曰骑官左角李右角将大角者天王帝廷其两旁各有三星鼎足句之曰撮提撮提者直斗杓所指以建时节故曰撮提格亢为疏庙其南北两大星曰南门氏为天根尾为九子箕为敖客南官朱鸟权衡衡太微三光之廷匡卫十二星潘臣西将东相南四星执法中端门门左右掖门门内六星诸侯其内五星五帝坐后聚十五星蔚然曰郎位旁一星将位也廷藩西有隋星四曰少微士大夫 【案少微祇四星正义云少微四星在太微南北列第一星处士也第二星议士也第三星博士也第四星大夫也是其明证史记误四作五系传写之讹今从汉志改正】 权轩辕轩辕黄龙体前大星女主象旁小星御者后宫属东井为水事其西曲星曰钺钺北北河南南河两河天阙间为关梁舆鬼鬼祠事中白者为质柳为鸟注七星颈为员官张嗉为厨翼为羽翻轸为车其旁有一小星曰长沙轸南众星曰天库库有五车西官咸池曰天潢五潢五帝车舍水中有三柱奎曰封豕为沟渎娄为聚众胃为天仓其南众星曰廡积昴曰旄头毕曰■〈𠂔干〉车其大星旁小星为附耳昴毕间为天街其阴阴国阳阳国参为白虎三星直者是衡石下有三星锐曰伐其外四星左右肩股也小三星隅置曰觜觶为虎首其南有四星曰天厕厕下一星曰天矢其西有句曲九星三处罗一曰天旗二曰天苑三曰九旒其东有大星曰狼下有四星曰弧直狼狼北地有大星曰南极老人北官元武虚危危为盖屋虚为哭泣之事其南有众星曰羽林天军军西为垒或曰钺旁有一大星曰北落危东六星两两相比曰司空营室为清庙曰离宫阁道汉中四星曰天驷旁一星曰王良旁有八星绝汉曰天潢天潢旁江星杓曰四星在危南河鼓东匏瓜南斗为庙其北建星建星者旗也牵牛为牺牲其北河鼓 【案尔雅何鼓谓之牵牛注今荆楚人呼牵牛星为檐鼓檐者荷也是郭读何为荷释文云何郭胡可反又胡多反是何字有两读 檐鼓之义则荷何本系一字而河又从何而变但史汉明分牵牛河鼓为二星尔雅所云何鼓谓牵牛在河鼓之下如荷此河鼓者然义原本一致也今仍从史汉作河】 河鼓大星上将左右左

右将婺女其北织女织女天女孙也紫官房心权衡咸池虚危列宿部星此天之五官坐位也为经不移徙大小有差阔狭有常水火金木填星此五星者天之五佐为纬见伏有时所过行羸缩有度

（臣）等谨按世所传甘石星经出于后人伪托其积古以来由略而详者天官书集其大成篇内云汉之为天数者星则唐都气则王朔占岁则魏鲜又自序云谈为太史公太史公学天官于唐都然则迁述天官即所谓唐都分其天部者也虽兼存占气占岁之说而以星为本汉书天文志称经星常宿中外官凡百一十八名积数七百八十二中外官者中官及东南西北合而五谓之五官坐位索隐云案天文有五官官者星官也星座有尊卑若人之官曹列位故曰天官由是言之今本史记乃作中宫东宫南宫西宫北宫皆官字传写之讹索隐于中官下引春秋元命苞云官之言宣也于紫宫下引云命苞云宫之言中也今索隐中官并注并讹作官

（臣）等又按天官书言下见象远过后人述作其中涉及占变者今并削去又篇内言五官坐位不移徙大小有差阔狭有常可谓得其寔矣复有心宿不欲直老人见王良策马等占皆占星家妄生附会古以列宿部星为恒星又谓之经星终古如斯初无变动至若星之右旋以成岁差乃浑体全转而座位相距之度分不改

（臣）等又按恒星右旋循黄道而宗黄极其在赤道内外距北极远近古今不同而在黄道内外距黄极远近千古如一隋书天文志言贾逵张衡蔡邕王蕃陆绩皆以北极纽星为枢是不动处祖暅以仪准候不动处在纽星之末犹一度有余宋史载沈括浑仪议曰臣考验极星更三月而后知天中不动处远极星三度有余梅文鼎恒星纪要云极星祖暅时离不动处一度沈括时遽离三度奇至郭太史时仍三度奇今以其仪器考之则宋时离不动处正在二度左右耳祖氏虽云离一度余若其真度恐未及一度此专论近北极纽星古今去北极不同其余列宿部星古今距北极不同仿此

（臣）等又按晋书天文志引张衡云中外之官常明者百有二十四可名者三百二十为星二千五百微星之数盖万有一千五百二十又言后太史令陈卓总甘石巫咸三家所著星图大凡二百八十三官千四百六十四星以为定纪郑志录步天歌于晋书以后星名略备其分三垣二十八宿在天官书紫微垣为中官天市垣与苍龙七宿为东官太微垣与朱鸟七宿为南官白虎七宿为西官元武七宿为北官天官书出于唐都晋以后天文志咸本之三国时吴太史令陈卓所有增出星名已详郑志兹不

复赘

○黄道宿度

后汉志称在天成度在厯成日居以列宿终于四七此天度之所由起以日循黄道右旋一昼夜所过谓之一度凡三百六十五日小余不及四分日之一右旋一周古推步家约计大致定为岁周三百六十五日四分日之一因以命度定为天周之度永元四年左中郎将贾逵论曰臣前上傳安等用黄道度日月弦望多近史官一以赤道度之不与日月同于今法弦望至差一日已上辄奏以为变至以为日却缩退行于黄道日得行度不为变愿请太史官日月宿簿及星度课与待诏星象考校奏可臣谨按前对言冬至日去极百一十五度夏至日去极六十七度春秋分日去极九十一度赤道者为中天非日月道而以遥准度日月失其实行故也如安言问典星待诏姚崇并毕等十二人皆曰星图有规法日月寔从黄道官无其器不知施行按甘露二年大司农中丞耿寿昌奏以图仪度日月行考验天运状日月至牵牛东井日过度月行十五度至娄角日行一度月行十三度赤道使然此前世所共知也如言黄道有验合天日无前却弦望不差一日比用赤道密近宜施用十五年七月甲辰诏书造太史铜仪以角为十三度亢十氐十六房五心五尾十八箕十斗二十四四分度之一牵牛七须女十一虚十危十六营室十八东壁十奎十七娄十二胃十五昴十二毕十六觜三参八东井三十舆鬼四柳十四星七张十七翼十九轸十八凡三百六十五度四分度之一冬至日在斗十九度四分度之一

（臣）等谨按天本无度因日躔以起度度也者行而过之之名故曰循黄道一昼夜所过即为一度黄道斜交于赤道日躔自南敛北自北发南寒暑往来而成岁者黄道事也辨方位计辰刻者赤道事也日右旋三百六十五日有奇于黄道一周谓之岁周因分天为三百六十五度有奇谓之天周是度法本宜施之于黄道不宜施之于赤道而汉元封七年大中大夫公孙卿壶遂太史令司马迁与侍郎尊大典星射姓等定东西立晷仪下漏刻以追二十八宿相距于四方徒有赤道宿度无黄道宿度前汉志角十二亢九氐十五房五心五尾十八箕十一斗二十六牛八女十二虚十危十七营室十六壁九奎十六娄十二胃十四昴十一毕十六觜二参九井三十三鬼四柳十五星七张十八翼十八轸十七此列宿相距乃从赤道测其度数下至唐初相承不改开元中诏梁令瓚作黄道游仪测知毕觜参及舆鬼四宿赤道宿度与旧不同毕十七觜一参十鬼三宋皇佑以后屡有更改元新制浑仪测用二线角十二度十分亢九度二

十分氐十六度三十分房五度六十分心六度五十分
尾十九度十分箕十度四十分斗二十五度二十分牛七度二十分女十一度三十五分
虚八度九十五分太危十五度四十分室十七度三十
分壁八度六十分奎十六度六十分娄十一度八十分胃十五度六十分昴十一度三十
分毕十七度四十分觜五分参十一度十分井三十三
度三十分鬼二度二十分柳十三度三十分星六度三十分张十七度二十五分翼十八
度七十五分軫十七度三十分考觜参二宿汉定为觜
三参九唐为觜一参十元则觜仅百分度之五参十一度百分度之十明崇祯元年测改
参前觜后盖列宿循黄道右旋以成岁差其黄道度分
有定而从赤道视之近二至者度间必阔赤道当浑圆之中围周髀算经谓之中衡冬至
谓之外衡夏至谓之内衡其左旋皆准赤道平行以成
规法外内衡小于中衡则其应乎赤道也外内衡度狭中衡度阔黄道亦浑圆之中围而
势斜侧当其与二至近黄道以阔度应其狭度故在黄
道一度在赤道必过乎一度近二分则斜侧之势乃显故在黄道一度在赤道必不及一
度汉耿寿昌所谓考验天运状日月至牵牛东井日过
度月行十五度时牵牛近冬至东井近夏至故也赤道宿度因岁差而古今异致向之平
者今值乎斜侧向之侧者今转移近平体势殊观不惟
觜西距星从赤道视之转而在参西距星之东鬼西距星亦可转而在柳西距星之东皆
将前后异位而不得不各改距星始合黄道前后之定
序故宿度惟以黄道为主而赤道可不论况赤道以正时刻非以正节气无取乎日躔宿
度也然汉以来皆先测赤道乃用勾股弧矢之术推算
以知黄道测算有疏密故史志载黄道宿度亦古今不同

（臣）等又按前汉未有黄道宿度日月行黄道而以赤道度遥准之宜其差谬后
汉永元十五年始定黄道宿度而唐以后岁差之说行
损岁余益天周乃以列宿右移之数为日躔不足之数虚增之为天度元至元中定岁周
三百六十五日二十四分二十五秒天周三百六十五
度二十五分七十五秒岁差一分五十秒虚增此一分五十秒者入各宿试据冬至论之
日行最南测影最长始得为冬至倘日躔不足一分五
十秒必待其更行一分五十秒然后为最南岂日行非最南测影非最长可截去不足之
数谓之冬至是岁岁冬至皆非日南至矣此由不知寒
暑之故专属黄道论南北不论东西也岁差之数不定故史志所载天周亦不定又唐书
天文志云旧图奎误距以西大星今复距西南大星张
中央四星为朱鸟喙外二星为翼比距以翼而不距以膺今复以膺为距此古今距星之
有更易黄道宿度千古不变其不同之故有三测算疏

密一也天周不定二也距星更易三也

钦定续通志卷九十七

●钦定续通志卷九十八 天文略二

天文略 【二】

七衡六间

晷景短长

北极高下

○七衡六间

春秋时郯子述古少皞氏之官有司分司至司启司闭分者春分秋分至者冬至夏至启者立春立夏闭者立秋立冬是为八节下至周之列国凡分至启闭必书云物其后因而增详一岁分中气节气二十有四周髀算经言七衡周而六间以当六月故曰夏至在东井极内衡日冬至在牵牛极外衡也衡复更终冬至故曰一岁三百六十五日四分日之一一岁一内极一外极常以夏至夜半时北极南游所极冬至夜半时北游所极冬至日加酉之时西游所极日加卯之时东游所极此北极璇机四游正北极璇机之中正北天之中日出左而入右南北行故冬至从坎阳在子日出巽而入坤夏至从离阴在午日出艮而入干外衡冬至内衡夏至六气复返皆谓中气周髀所称正北极者左旋之枢是为赤道极所称北极璇机者右旋之枢是为黄道极赤道正而黄道半在其内半在其外日之行是以有发敛此寒暑相代易之故也璇机距正北极如内外衡距赤道之数正北极居中璇机环绕之而成规昼夜一周又过一度均分此规为十二宫璇机夜半至其初为节气至其中为中气中节气之距凡十五日有奇璇机之环绕正北极也与日行发敛相应是故北游所极值正北子位是为建子于时日值外衡而冬至所谓冬至从坎阳在子是也南游所极值正南午位是为建午于时日值内衡而夏至所谓夏至从离阴在午是也璇机夜半所建由子丑寅卯辰巳六宫以至于午则日自南而敛北由午未申酉戌亥六宫以至于子则日自北而发南如是终古不变故十二月建本于北极璇机宋书南徐州从事史祖冲之曰月位称建谅以气之所本名随实着非谓斗杓所指近校汉时已差半次审斗节时其效安在然则月建之义以表璇机周髀称从坎从离信而有征也准一岁二十四气以设衡日至其衡为中气璇机夜半必建一宫之中至其间为节气璇机夜半必在两宫之交春正月建寅其节气曰立春中气曰启蛰后汉改为雨水日入次五衡二月建卯其节气曰雨水后汉

改为惊蛰中气曰春分日入中衡三月建辰其节气曰
谷雨后汉改为清明中气曰清明后汉改为谷雨日入次三衡夏四月建巳其节气曰立
夏中气曰小满日入次二衡五月建午其节气曰芒种
中气曰夏至日抵内衡而发南六月建未其节气曰小暑中气曰大暑日出次二衡秋七
月建申其节气曰立秋中气曰处暑日出次三衡八月
建酉其节气曰白露中气曰秋分日出中衡九月建戌其节气曰寒露中气曰霜降日出
次五衡冬十月建亥其节气曰立冬中气曰小雪日出
次六衡十有一月建子其节气曰大雪中气曰冬至日抵外衡而敛北十有二月建丑其
节气曰小寒中气曰大寒日入次六衡此一岁机衡相
应之大较也

（臣）等谨按璇玑今尚书作璇玑伏生大传及隋书所引并作璇玑璇取旋运之
义机即枢机衡者准之赤道而平也黄赤道之极皆天
体旋运之枢机惟赤道极居其所而不移徙故步算家又谓之不动处贾逵张衡蔡邕王
蕃陆绩皆以纽星为不动处梁祖暉之测纽星离不动
处一度有奇元郭守敬测离三度有奇矣由恒星有岁差故近极之星其离之也亦古今
所测不同赤道极今在句陈大星纽星之间黄道极在
紫微垣外柱史星东南上弼少弼之间日随大气左旋以成昼夜其右旋则自南敛北复
自北发南以成寒暑左旋者昼夜之故也右旋者寒暑
之故也黄道极亦随大气而左昼夜一周又过一度是赤道极居中黄道极环绕其外昼
夜旋运而有移徙故古人以璇玑名之盖同为枢机而
有移徙不移徙之殊璇以言乎其移徙也日左旋昼夜一周璇玑左旋亦宜一周所以又
过一度者日昼夜有右旋之一度使日无此一度之减
则黄道极与日同一周矣减日右旋一度是黄道极左旋一周而日未满此一度必于左
旋补此一度之减始成昼夜故黄道极则过一度也冬
至夜半璇玑在正北极下是为北游所极日加卯之时在正北极左是为东游所极日加
午之时在正北极上是为南游所极日加酉之时在正
北极右是为西游所极此璇玑之一日四游所极也冬至夜半起正北因昼夜过一度积
九十一日有奇则春分夜半寔为东游所极如是而夏
至夜半南游所极秋分夜半西游所极此璇玑之一岁四游所极也古者冬夏致日故周
髀之文但举二至则二分可知又错举冬至卯酉则一
昼夜必周四游咸可知也吴太常姚信听天论谓冬至极低夏至极起亦有见于黄道极
低在赤道极之下则近黄道之星应之而起黄道极起
在赤道极之上则近黄道之星应之而低晋书天文志讥之不解极指黄极故耳隋书天
文志曰案虞书舜在璇玑玉衡以齐七政马季长创谓

机衡为浑天仪郑元亦云其转运者为机其持正者为衡皆以玉为之故玉蕃云浑天仪者羲和之旧器积代相传谓之机衡此徒据汉所制浑天仪以可旋转谓之机其横箫以视星辰者谓之衡蔡邕云悬机以象天而衡望之转机窥衡以知星宿是也与周髀所言北极璇机七衡六间指各不同唐虞机衡之制周髀近之古未有二十四气盖准八节为之宜设五衡内衡夏至次二衡立夏立秋中衡春分秋分次四衡立春立冬外衡冬至日入次四衡为春入次二衡为夏出次二衡为秋出次四衡为冬而四时序矣周末准十二中气故设七衡衡之规法由来盖远

（臣）等又按夏小正启蛰系之正月春秋左氏传称凡祀启蛰而郊又襄公七年孟献子曰夫郊祀后稷以祈农事也是故启蛰而郊郊而后耕杜预释例云正月节立春启蛰为中气二月节惊蛰春分为中气杜氏不言雨水而分启蛰惊蛰为二其释例又云传曰火伏而后蛰者毕此谓十月始蛰也至十一月则遂闭之犹二月之惊蛰既启之后遂惊而走出始蛰之后又自闭塞也此杜氏以意区分非当时所用汉志立春后次惊蛰下注今曰雨水次雨水下注今曰惊蛰次春分次谷雨下注今曰清明次清明下注今曰谷雨盖班固述刘歆原文于上而以东汉时改易其先后者注于下方孔颖达谓太初以后更改气名以雨水为正月惊蛰为二月节非也然周髀算经即以启蛰继雨水而逸周书淮南子易通卦验皆先雨水后惊蛰或周秦间别传与太初三统异或东汉用四分后不知者习于其时所以改古书蔡邕月令章句复移惊蛰于雨水前其作月令问答云问者曰既不用三统以惊蛰为正月雨水为二月节皆三统法也独用之何曰孟春月令曰蛰虫始震在正月也仲春始雨水则雨水二月也以其合故用之蔡氏但以释经至唐初傅仁均李淳风之说行则以之授时开元后又改从东汉至今因之王应麟云改启为惊盖避景帝讳此说足正杜预之失顾炎武云始雨水者谓天所雨者水而非雪也今二月间尚有雨雪惟南方地暖有正月雨水者当依古法以惊蛰为正月雨水为二月节为是南史宋孝武帝纪大明元年正月庚午都下雨水盖以雨水为异此说可与月令问答相发明二十四气内二分二至以日夜分南北至定名分者中分之适半也至者极也周礼稻人夏以水殄草而芟夷之泽草所生种之芒种国语处暑之既至又云古者大寒降土蛰发水虞于是讲罟罟又云駟见而陨霜陨霜而冬裘具荀卿书霜降逆女月令仲夏小暑至孟秋白露降季秋霜始降然则启蛰雨水芒种小暑处暑白露霜降大寒等名各有所依以立义特整齐之为二十四应起于周末耳

（臣）等又按十二月建自逸周书以为斗杓所指汉人据之说经刘宋祖冲之始辩其失后儒多未考宋书犹信所习阅近梅文鼎设问答辩证极详问行夏之时谓以斗柄初昏建寅之月为岁首议者以冬至既有岁差则斗柄亦从之改度今时正月不当仍为建寅曰孟春正月自是建寅非关斗柄自大挠作甲子以十二辰为地支寅卯辰列东巳午未列南申酉戌列西亥子丑列北尧典东作南讹西成朔易此四时分配四方而以春为首之证也既有四仲月以居卯午酉子之四正自各有孟月季月以居四隅仲春既正东为卯月其孟春必在东之北而为寅月何必待斗柄指寅乎故日中星鸟日永星火宵中星虚日短星昴并祇以昼夜永短为凭以昏中之星为断未尝一言及于斗柄也孔子去尧时已及千五百岁岁差之度已二十余度若尧时斗柄指寅孔子时必在寅前二十度而指丑矣岁差之法古虽未言然而月令昏中之星不同于尧典则实测当时之星度也月令兼言旦中又举其日躔所在兼举十二月而备言之可谓详矣然未尝一语言斗柄建寅为孟春史记律书以十二律配十二月所建地支而疏其义兼八风二十八舍以为之说而并不言斗建天官书曰杓携龙角衡殷南斗魁枕参首用昏建者杓夜半建者衡平旦建者魁而非仅斗杓非止初昏问说者又以各月斗柄皆指其辰惟闰月则斗柄指两辰之间由今以观其说亦非欤曰周天之度以十二分之各得三十度奇凡各月中气皆在其三十度之中半各月节气皆居其三十度之首尾今依其说斗柄所指各在其月之辰则交节气日斗柄所指必在两辰之间矣十二节气日皆指两辰之间又何以别其为闰月乎若夫闰月则止有节气无中气其节气之日固指两辰之间矣然惟此一日而已其前半月后半月并非两辰之间也十二辰首尾鳞次又何处设此三十度于两辰间以为闰月三十日之所指乎斗杓之星距北极止二十余度必以北极为天顶而后可以定其所指之方今中土所处在斗杓之南仰而观之斗杓与辰极并在天顶之北故古人言中星不言斗杓盖以此也淮南子等书言招摇东指而天下皆春不过大概言之原非以此定月古之人以星象授人时若以岁差考之则于今日并相差一二旬矣然而当其时各据其时之星象为之着令所以使民易知也而终未有言斗杓指何方而作何事者则以其方位之难定也十二月建之非关斗柄明矣是故斗柄虽因岁差而所指不同正月之建寅不可易也此论足以申明宋书祖氏之说今考夏小正举斗柄者三于正月云初昏参中斗柄县在下则寅月指子矣于六月云初昏斗柄正在上则未月指午矣于七月云斗柄县在其下则旦是申月指子

而且也与中星表候同一例不以为月建祖氏梅氏以岁差知月建非因斗柄移辰而不知北极璇机冬至夜半恒指子春分夜半恒指卯夏至夜半恒指午秋分夜半恒指酉以四游所极推之余月则月建十有二由璇机夜半所建显然且璇机所建与日躔黄道发南敛北相应寔为气之所本祖氏谓谅以气之所本者虽未能确言其识卓矣

○晷景短长

周礼大司徒以土圭之灋测土深正日景以求地中日南则景短多暑日北则景长多寒日东则景夕多风日西则景朝多阴日至之景尺有五寸谓之地中天地之所合也四时之所交也风雨之所会也阴阳之所和也然则百物阜安乃建王国焉制其畿方千里而封树之土方氏掌土圭之灋以致日景以土地相宅而建国都鄙周髀算经日运行处极北北方日中南方夜半日在极东东方日中西方夜半日在极南南方日中北方夜半日在极西西方日中东方夜半凡此四方者天地四极四和昼夜易处加四时相及然其阴阳所终冬至所极皆若一也极下不生万物北极左右夏有不释之冰中衡左右冬有不死之草夏长之类此阳彰阴微故万物不死五谷一岁再熟凡北极之左右物有朝生暮获后汉书律历志日道发南去极弥远其景弥长远长乃极冬乃至焉日道敛北去极弥近其景弥短短近乃极夏乃至焉二至之中道齐景正春秋分焉黄道去极日景之生据仪表也冬至晷景丈三尺小寒丈二尺三寸大寒丈一尺立春九尺六寸雨水七尺九寸五分惊蛰六尺五寸春分五尺二寸五分清明四尺一寸五分谷雨三尺二寸立夏二尺五寸二分小满尺九寸八分芒种尺六寸八分夏至尺五寸小暑尺七寸大暑二尺立秋二尺五寸五分处暑三尺三寸三分白露四尺三寸五分秋分五尺五寸寒露六尺八寸五分霜降八尺四寸立冬丈四寸二分小雪丈一尺四寸大雪丈二尺五寸六分【按后汉志注易纬所称晷景长短不与相应今列之于后至与不至各有所候以参广异同冬至晷长一丈三尺当至不至则旱多温病未当至而至则多病暴逆心痛应在夏至云云是纬意重在占验非测景之正且其所云至与不至者尤为疏舛以今术考之日躔盈缩古今微差之故一在黄赤大距度一在最高行然必历年之久始及一度断无数年内忽至忽不至之理测景之术至为微眇表短则分秒难明表长则影虚而淡又地半径差之加清蒙气差之减古人未有算术是以晷景小有更变占家不解遂强为当至不至未当至而至之占耳】唐书天文志宋元嘉中南征林邑五月立表望之日在表北交州景在表南三寸林邑九寸一分交州去洛水陆之路九

千里盖山川回折使之然以表考其弦当五千乎开元十二年测交州夏至在表南三寸三分铁勒回纥在薛延陀之北去京师六千九百里其北又有骨利干居瀚海之北北距大海昼长而夜短既夜天如曛不暝夕腓羊髀纒熟而曙太史监南宫说择河南平地设水平绳墨植表而以引度之自滑台白马始夏至之晷尺五寸七分又南百九十八里七十九步得浚仪岳台晷尺五寸三分又南百六十七里二百八十一一步得扶沟晷尺四寸四分又南百六十里百一十步至上蔡武津晷尺三寸六分半大率五百二十六里二百七十步晷差二寸余今以句股校阳城中晷夏至尺四寸七分八厘冬至丈二尺七寸一分半定春秋分五尺四寸三分滑台冬至丈三尺定春秋分五尺五寸六分浚仪冬至丈二尺八寸五分定春秋分五尺五寸扶沟冬至丈二尺五寸五分定春秋分五尺三寸七分上蔡武津冬至丈二尺三寸八分定春秋分五尺二寸八分比岁武陵晷夏至七寸七分冬至丈五寸三分春秋分四尺二寸七分半以图测之定气四尺七分蔚州横野军夏至二尺二寸九分冬至丈五尺八寸九分春秋分六尺四寸四分半以图测之定气六尺六寸二分半自阳城至武陵千八百二十六里七十六步自阳城至横野军千八百六十一里二百一十四步又以图校安南日在天顶北二度四分冬至晷七尺九寸四分定春秋分二尺九寸三分夏至在表南三寸三分其径五千二十三里至林邑日在天顶北六度六分强冬至晷六尺九寸定春秋分二尺八寸五分夏至在表南五寸七分其径六千一百一十二里距阳城而北至铁勒之地则五月日在天顶南二十七度四分北至晷四尺一寸三分南至晷二丈九尺二寸六分定春秋分晷九尺八寸七分其没地纒十五余度夕没亥西晨出丑东校其里数已在回纥之北又南距洛阳九千八百一十五里则极长之昼其夕常明然则骨利干犹在其南矣凡晷差冬夏不同南北亦异今更为覆矩图南自丹穴北暨幽都每极移一度辄累其差可以稽日食之多少定昼夜之长短而天下之晷皆协其数矣元史天文志南海夏至景在表南长一尺一寸六分昼五十四刻夜四十六刻衡岳夏至日在表端无景昼五十六刻夜四十四刻岳台夏至晷景长一尺四寸八分昼六十刻夜四十刻和林夏至晷景长三尺二寸四分昼六十四刻夜三十六刻铁勒夏至晷景长五尺一分昼七十刻夜三十刻北海夏至晷景长六尺七寸八分昼八十二刻夜一十八刻大都夏至晷景长二尺三寸六分昼六十二刻夜三十八刻

（臣）等谨按周礼土圭之灋与唐之覆矩图皆因地体浑圆准验其南北东西里差尧典命羲和言宅嵎夷宅南交宅西宅朔方宅本作

度即四方测景朱子云宅字古与度字通见周礼注等书者非一宅嵎夷之属皆谓度日景于此此说与周礼测日南日北日东日西合为一义人所居附于地目光察远皆直至其处地虽圆体百里数十里不足见耳圆而目之直注四望皆天似地与天际而平不知地在天中人目四望所见之星辰与仰观所见之星辰并距地绝远又不知因目直注四望如一即以为平其平乃目于所见绳直而不少曲之平非地面果平也天为大圆以地为大圆之中心大圆自周至中心气固而内行皆为自上而下六合皆天则六合皆上地在中心则中心为下以气固而内行故终古不坠凡自上而坠于下者随大气下行遇地之实体乃止如又下行至地之中心必不得或过矣天之至下不在地体之周而在地径之半人立于地体外周戴天皆上履地皆下阴阳大论黄帝问曰地之为下否乎岐伯曰地为入之下太虚之中者也帝曰冯乎岐伯曰大气举之也大戴礼记单居离问于曾子曰天圆而地方诚有之乎曾子曰天之所生上首地之所生下首上首谓之圆下首谓之方参尝闻之夫子曰天道曰圆地道曰方卢辩注云道曰方圆耳非形也梅文鼎云以浑天之理征之地之正圆无疑也所疑者地既浑圆则人居地上各以所居之方为正遥观异地皆成斜立其人立处皆当倾跌而今不然岂非首戴皆天足履皆地初无欹侧不忧环立欤梅氏所谓不忧环立推原其故惟大气举之一言足以蔽之各方之天顶则随其人之环立而异北极之下以北极为天顶而赤道适准乎地平南极之下以南极为天顶而赤道亦适准乎地平其处日过赤道而出于地上为昼环行渐高至二十余度则又渐下而入于地下为夜气候常寒而无暑故周髀言极下不生万物又言北极左右夏有不释之冰又言物有朝生暮获举北以该南南极左右亦如是也赤道之下以赤道为天顶而南北极适准乎地平气候常暑而无寒中土春秋分彼方皆气炎正夏中土冬夏至彼方皆气平如春秋分日出没于地虽渐南渐北上下皆半周天故无永短之异周髀言中衡左右冬有不死之草又言五谷一岁再熟中衡即赤道也唐书称覆矩图可以稽日食之多少定昼夜之长短其察晷景也兼论日在天顶若干度及日出地上日没地下若干度元史夏至所测衡岳则已无影南海景在表南一尺六寸北海景在表北六尺七寸八分南自南海夏至昼五十四刻至北海昼八十二刻北自北海夏至夜十八刻至南海夜四十六刻昼夜永短相差二十八刻惟地体浑圆故人居其周所戴之天顶随南北东西而移黄赤道之高下即随其南北之远近而殊而日食分数昼夜增损悉因之夏日永而地愈北愈增冬日短而地愈南愈损此皆实

测而得者也东西加时史志未详载设以地之圆周四分之就人所居之方为中其正东正西与中央相距四分圆周之一中表景正日加午东方必过午后而加酉为景夕西方必在午前而加卯为景朝自卯至午自午至酉皆四时也故周髀言天地四极四和昼夜异处加四时相及步算家测月入闾虚天下尽同也而东西各地相距视其远近以察其时刻则至不同由是言之周礼日南景短日北景长言乎南北里差以是准之也日东景夕日西景朝言乎东西里差以是准之也

（臣）等又按汉人相传曰景于地千里而差一寸其说疏舛隋书天文志刘焯云周官夏至日景尺有五寸张衡郑玄王蕃陆绩先儒等皆以为景千里差一寸言南戴日下万五千里表景正同天高乃异考之算法必为不可寸差千里亦无典说明为意断事不可依今交爰之州表北无景计无万里南过戴日是千里一寸非其实差

○北极高下

唐书天文志交州望极纔高二十余度八月海中望老人星下列星粲然明大者甚众古所未识乃浑天家以为常没地中者也大率去南极二十度已上星则见阳城以覆矩斜视极出地三十四度十分度之四自滑台表视之极高三十五度三分自浚仪表视之极高三十四度八分自扶沟表视之极高三十四度三分上蔡武津表视之极高三十三度八分虽秒分微有盈缩难以目校大率三百五十一里八十步而极差一度自此为率推之武陵按图斜视极高二十九度半蔚州横野军按图斜视极高四十度又以图校安南极高二十度四分林邑极高十七度四分周圆三十五度常见不隐铁勒之地极高二十五度周圆百四度常见不隐元史天文志测景之所凡二十有七东极高丽西至滇池南踰朱崖北尽铁勒自是八十年间司天之官遵而用之靡有差忒南海北极出地一十五度衡岳二十五度岳台三十五度和林四十五度铁勒五十五度北海六十五度大都四十度太强上都四十三度少北京四十二度强益都三十七度少登州三十八度少高丽三十八度少西京四十四度少太原三十八度少安西府三十四度半强兴元三十三度半强成都三十一度半强西凉州四十度强东平三十五度太大名三十六度南京三十四度太强河南府阳城三十四度太弱扬州三十三度鄂州三十一度半吉州二十六度半雷州二十度太琼州一十九度太

（臣）等谨按古人土圭之法以晷景知日行发敛测二至之景可以知黄道测二分之景可以知赤道既知黄赤二道则北极高下可推而知然分至有恒气定气之殊由于日躔赢缩不可得而齐赤道为天之中围以界南北

而茫然无有凭实非能目察定春秋分推算失准则日
景亦不足据黄道半在赤道外半在赤道内冬夏至距赤道最远若有限矣而近二至前
后数日南北之差甚微表景短长差在微茫冬至日躔
去地近游气又甚隋书姜岌言地有游气故参伐在旁则其间疏在上则其间数日晨夕
近地故色赤而大无游气则色白大不甚矣宋沈括言
在本局候景入浊出浊之节日日不同然则测景之难据诚非一端唐开元间及元初皆
详于测各方北极出地极处无星以近极大星测其旋
而上最高距地若干度旋而下最低距地若干度高低之中即北极出地若干度也极处
虽无星较黄赤道为有据而易明北极之高下定则距
极四分天周之一为赤道可得其准而外衡冬至内衡夏至及其余中气节气日躔距北
极度分悉推算不爽故测北极为考日月星辰与夫天
周地体之大纲领验南北里差之至要也（臣）等又按地体浑圆因人目四望似地与
天际而平是为地平虽地之四面距星辰甚远与人在
地上仰观星辰相等而人目不能曲观地平下之星故凡推算各据人所立之方上指天
顶平指天际一纵一横必相遇成正方纵为股横为句
浑圆之周以此截之而四地在天之中心应从地心为纵横之交地面至地心之差为地
半径古割圆之术自圆之中心觚分之割圆周成弧背
凡推算所得皆圆之中心起算测望所得在地面较诸推算所得隔地半径然以天视之
其差甚微惟人居地之周南北东西天顶随之而移则
地平上下随之而改以中土北极出地南极人地言之渐北则北极出地渐高非北极去
地远也天顶距北极减一度则北极距地平增一度故
北望地平下之星今在地平上南望地平上之星今入地平下渐南则北极出地渐低非
北极去地近也天顶距北极增一度则北极距地平减
一度故南望地平下之星今在地平上北望地平上之星今入地平下唐志称交州之南
海中望老人星下列星粲然明大者甚众此地体浑圆
之义愈北则南极左右尝隐不见之规愈大北极左右常见不隐之规亦甚大北至于北
极为天顶赤道适准乎地平则赤道以北之星全见不
隐赤道以南之星全隐不见南极为天顶之方反是南至于赤道为天顶南北极适准乎
地平则无常隐不见常见不隐之星此唐人得诸实测
者故周髀之说至唐而明备唐以前羲和之法失而汉初草创未闻四方测验元测景之
所二十有七自南海北极出地十五度至北海北极出
地六十五度然则南北海之相去极高差五十度即两地之天顶相距五十度以地应之
于地亦五十度也

钦定续通志卷九十八

●钦定续通志卷九十九 天文略三

天文略 【三】

日月五步规法上

○日月五步规法上

历元

度法及赤道黄地道平经纬度

岁实

日躔盈缩

日道交周

月离迟疾

实朔望

△历元

后汉志日周于天一寒一暑四时备成万物毕改摄提迁次青龙移辰谓之岁岁首至也月首朔也至朔同日谓之章同在日首谓之蓂蓂终六旬谓之纪岁朔又复谓之元是故日以实之月以闰之时以分之岁以周之章以明之蓂以部之纪以记之元以原之然后虽有变化万殊羸朒无方莫不结系于此而稟正焉汉太初历以前历上元泰初四千六百一十七岁至于元封七年复得阙逢摄提格之岁中冬十一月甲子朔旦冬至日月在建星太岁在子已得太初本星度新正其法十九年为一章二十七章为一会三会为统一统三统为一元得四千六百一十七岁刘歆三统历因之所谓九会而复元者是也熹平四年五官郎中冯光沛相上计掾陈晃言历元不正蔡邕议以为三光之行迟速进退不必若一术家以算追而求之取合于当时而已故有古今之术今之不能上通于古亦犹古术之不能下通于今也元命苞干凿度皆以为开辟至获麟二百七十六万岁即命历序积获麟至汉起庚子蓂之二十三岁竟己酉戊子及丁卯蓂六十九岁合为二百七十五岁汉元年岁在乙未上至获麟则岁在庚申推此以上上极开辟则不在庚申讖虽无文其数见存而光晃以为开辟至获麟二百七十五万九千八百八十六岁获麟至汉百六十二岁转差少一百一十四岁云其议备载后汉书志自太初以后虽诸术所用积年不同而立元之率莫之有改唐建中时术者曹士蒨始变古法以显庆五年为上元雨水为岁首号符天术行于民间谓之小历又五代石晋高祖时司天监马重绩造调元术以唐天宝十四载乙未为上元雨水为气首元郭守敬造授时历始用其术以至元辛巳为元明大统历因之后徐光启李天经采用西术亦以崇祯戊辰为元

（臣）等谨按七政之行不一其率故历家远取上古积年之元以齐之虞恭宗欣所谓建历之本必先立元元正然后定日法法立然后度周天以定分至是也授时不用积年旧术而加气闰转交四应以纪当时实测之数而为上考下求起算之率则七政之行皆可齐矣气应以纪冬至闰应以纪经朔转应以纪月行迟疾交应以纪月之阴阳历皆截算法也近梅文鼎所论授时历元尤为明晰今备载之其词曰造法者必有起算之端是谓历元历元之法有二其一远溯古初冬至以七曜齐元之日为元自汉太初至金重修大明术各家所用之积年是也其一为截算之元自元授时不用积年日法直以至元辛巳为元而今西法亦以崇祯戊辰为元是也二者不同然以是为起算之端一而已矣然则二者无优劣乎曰授时优夫所谓七曜齐元者谓上古之时岁月日时皆会甲子而又日月如合璧五星如连珠故取以为造法之根数也使其果然虽万世遵用可矣乃今廿一史中所载诸家历元无一同者是其积年之久近皆非有所受之于前直以巧算取之而已然谓其一无所据而出于胸臆则又非也当其立法之初亦皆有所验于近事然后本其时之所实测以旁证于书传之所传约其合者既有数端遂援之以立术于是溯而上之至于数千万年之远庶几各率可以齐同积年之法所由立也然既欲其上合历元又欲其不违近测畸零分秒之数必不能齐势不能不稍为整顿以求巧合其始也据近测以求积年其既也且将因积年而改近测矣又安得以为定法乎授时术知其然故一以实测为凭而不用积年虚率上考下求即以至元十八年辛巳岁前天正为元其见卓矣 以上历元

△度法及赤道黄地道平经纬度

后汉书志在天成度在历成日历数之生也乃立仪表以校日景景长则日远天度之端也日发其端周而为岁然其景不复四周千四百六十一日而景复初是则日行之终以周除日得三百六十五度四分度之一为岁之日数日日行一度亦为天度由是言之日周天为一岁周日为一度因日行以命天度岁周凡三百六十五日四分日之一即天周得三百六十五度四分度之一也太初法岁余一千五百三十九分日之三百八十五积四岁则一千五百四十分强于四分之一后汉刘洪作干象术谓四分于天疏阔由斗分太强始减斗分【案太初冬至日起牵牛其后渐觉在斗因归余分于斗谓之斗分】魏韩翊作黄初术又以干象减斗分太过复增其数自是以后小余之数虽各有增损然皆不满四分之一东晋虞喜始立岁差隋刘焯皇极术因分天自为天岁自为岁而天周岁

周分矣岁周既弱于天周犹用小余畸零之数以命度亦徒于算位乘除之开多所烦扰而实无能密合于日行也唐书云九执历者出于西域周天三百六十度无余分又言其名数诡异不着其详明大统历与回回历并设回回历分周天为三百六十度大统则因授时之旧至崇祯时徐光启改正历法采用欧罗巴术命天周为三百六十度度六十分分六十秒凡测赤道经纬黄道经纬地平经纬度皆如之

（臣）等谨按古法以太阳一日所行命之为度而所谓四之一者讫无定率故累代斗分诸家互异至授时而有减岁余增天周之法则日行与天度较然分矣况冬盈夏缩之异终岁之闲固未有数日平行者也故与其为畸零之度而初不能合于日行即不如以天为整度而用为起数之宗固推步善法矣【周天者数从所起而先有畸零故析之而为半周天为象限为十二宫为二十四象七十二候莫不先有畸零而日行之盈缩不与焉故推步稍难今以周天为整数而但求盈缩是以整御零为法倍易】且所谓度生于日者经度耳而术家所难尤在纬度今以三百六十命度则经纬通为一法故黄赤虽有正斜而度分可以互求七曜之天虽有内外大小而比例可以相较以其为三百六十者同也半之则一百八十四分之则九十而八线之法缘之以生故以制测器则度数易分以测七曜则度分易得以算三角则理法易明亦取其适于用而已矣【三百六十立算实本回回至欧罗巴乃发明之耳】况七曜之顺逆诸行进退损益全在小轮为推步之要眇然而小轮之与大轮比例悬殊若镒与铢而累黍不失者以其度皆三百六十也以至太阴之会望转交五星之岁轮无一不以三百六十为法而地球亦然故以日躔纪度但可施于黄道之经而整度之用该括万殊斜侧纵横周通环应可谓执简御繁法之最善者矣

（臣）等又按天为浑圆赤道黄地道平三者各有经纬度赤道匀分三百六十度平分之为半周各一百八十度四分之象限各九十多度六分之纪限各六十度十二分之宫为时各三十度是为赤经从经度出弧线与赤道十字相交各引长之会于南北极皆成全圆亦分为三百六十度两极相距各一百八十度两极距赤道各九十度是为赤纬依纬度作圈与赤道平行名距等圈此圈大小不一距赤道近则大距赤道远则小其度亦三百六十与赤道之度相应赤道之用有动有静动者随天左旋与黄道相交日躔之南北于是乎限静者太虚之位亘古不移昼夜之时刻于是乎纪此赤道之经纬也黄道之宫度并如赤道其与赤道相交之两点为春秋分相距皆半周平分两交之中为冬夏

至距两交各一象限六分象限为节气各十五度是为黄经从经度出弧线与黄道十字相交各引长之周于天体即成全圆其各圆相凑之处不在赤道之南北两极而别有其枢心是为黄极黄极之距赤极即两道相距之度其距黄道亦皆九十度是为黄纬而月与五星出入黄道之南北者于是乎辨此黄道之经纬也凡南北圈过赤道极者必与赤道成直角而不能与黄道成直角其过黄道极者亦必与黄道成直角而不能与赤道成直角惟过黄赤两极之圈其过黄赤道也必当冬夏二至之度所以并成直角为极至交圈以赤道度为主而以黄道度准之则互形大小者浑圆之体当腰之度最宽所谓腰围大圈也渐近两端则渐狭所谓距等圈也二至时黄道以腰度当赤道距等圈之度故黄道一度当赤道一度有余二分吋两道虽皆腰度然赤道平而黄道斜故黄道一度当赤道一度不足也此所谓同升之差而七政升降之斜正伏见之先后皆由是而推焉至于地平经纬则以各人所居之天顶为极盖人所居之地不同故天顶各异而经纬从而变也地在天中体圆而小随人所立凡目力所极适得大圆之一半则地虽圆而与平体无异故谓之地平乃诸曜出没之界昼夜晦明之交也地平亦分三百六十度四分为四方各相距九十度二十四分为二十四向各十五度是为地平经从经度出弧线上会于天顶并皆九十度是为地平纬亦曰高弧高弧从地平正午上会天顶者其全圆必过赤道南北两极名为子午圈乃诸曜出入地平适中之界而北极之高下晷景之长短中星之推移皆由是而测焉此地平之经纬也 以上度法及赤道黄地道平经纬度

△岁实

书云期三百有六旬有六日以闰月定四时成岁此历家岁实之法所由昉也前代诸术所定不一周髀算经以三百六十五日为一岁四分日之一故四年而闰一日太初术阙逢摄提格太初元年大余五十四索隐曰一岁十二月六大六小合三百五十四日以六除之五六三十余三百日余五十四日故下云大余者日也其岁余之数亦四分之一故下文命天度曰小余八盖以三十二为度法三统四分皆因其数自灵帝时会稽东部尉刘洪始减岁余后世因之代有损益其测验之法率以前岁冬至距今岁冬至计其小余时刻并入大余以为岁实至于授时术考验尤详郭守敬改法自言创造简仪高表凭所测实数考正者七事一曰冬至二曰岁余其求冬至也自丙子年立冬后依每日测到晷景逐日取对冬至前后日差同者为淮得丁丑年冬至在戊戌日夜半后八刻半又定戊寅冬至在癸卯日夜半后三十三刻己卯冬至在戊申

日夜半后五十七刻庚辰冬至在癸丑日夜半后八十一刻辛巳冬至在己未日夜半后六刻其求岁余也自刘宋大明以来测景验气得冬至时刻真数者有六用以相距各得其时合用岁余考验四年相符不差仍自宋大明壬寅年距至今八百一十九年每岁合得三百六十五日二十四刻二十五分减大明术一十一秒其二十五分为今历合周之数【按金赵知微重修大明历小余二十四分三十六秒实多授时一十一秒郭所减者赵术非祖冲之原数也】其上考下求又有消长之法其法自至元十八年辛巳元顺推至一百年则岁实当消一分如逆推至一百年则岁实当长一分每相距增一百年则岁实各消长一分以是为上考下求之本洪武十七年元统作大统术诸数悉仍授时而去其岁实消长之说以洪武十七年甲子为元监副李德芳言统不用消长之法以考鲁献公十五年戊寅岁天正冬至比辛巳为元差四日半强今当复用辛巳为元及消长之法万历中郑世子载堉进历书议岁余曰阴阳消长之理以渐而积未有不从秒起授时考古于百年之际顿加一分于理未安假如鲁隐公三年辛酉岁下距至元辛巳二千年以授时本法算之于岁实当加二十分得庚午日六刻为其年天正冬至至次年壬戌岁下距至元辛巳一千九百九十九年本法当加十九分得乙亥日五十刻四十四分为其年天正冬至两冬至相减得相距三百六十五日四十四刻四十四分则是岁余九分日之四非四分日之一也历法之谬莫甚于此新法酌量设若每年增损二秒推而上之则失昭公己丑增损一秒至一秒半则失僖公辛亥今约取中数以定距自相乘七因八归所得百约之为分得一秒七十五忽则辛亥己丑皆得矣其后徐光启修历法着学历小辩曰岁实小余自汉迄元渐次消减今新法定用岁实更减于元不知者必谓不惟先天更先大统乃以推壬申冬至大统得己亥寅正一刻而新法得辰初一刻十八分何也盖正岁年与步月离相似冬至无定率与定朔定望无定率一也朔望无定率宜以平朔望加减之冬至无定率宜以平年加减之故新法之平冬至虽在大统前而定冬至恒在大统后也

（臣）等谨按天行盈缩无骤增骤减之理郭氏百年消长之法郑世子谓其于理未安是也宋宣宗时杨忠辅造统天历所定岁实与授时同以斗分差乘距差为躔差暗藏加减之法约百年加减一分零六秒弱郭氏盖本统天术而为之者然杨忠辅术逐年分算而郭术则以距算总乘其数骤变较之杨术尤为不伦且消长分数必当时测定之岁实数已真确知其无可加减而后可据以为消长之根若授时则所测岁

余尚非真数也一岁小余二十四刻二十五分积之四岁正得九十七刻丁丑年冬至既在戊戌日夜半后八刻半则辛巳年冬至宜在己未夜半后五刻半不应有六刻如以辛巳之六刻为确则丁丑年宜在九刻不应祇八刻半此四年既皆实测所得则已多半刻矣而云相符不差何也又考大明五年辛丑祖冲之所测景长冬至在乙酉日夜半三十二刻七分自大明壬寅【辛丑年之十一月冬至实即壬寅岁前天正冬至也】下距至元辛巳八百一十九年以授时岁实积之凡二十九万九千一百三十三日六十刻七十五分以辛巳天正冬至己未日子正后六刻逆计之则当时冬至在乙酉日子正后五十四刻较祖氏所记后天愈多矣既不能与当时所测算者密合乃为百年长一之法以合之则此年冬至又在甲申日七十九刻太不又失之先天乎而云自大明壬寅距今每岁合得此数何也徐光启以定朔定望拟定冬至其论最确而其消长所以然之故则引而未发盖太阳因有高卑而生盈缩春分当平行之处则所得岁实为恒率得其恒乃可以求其定犹月之有平朔平望而后求定朔定望也李天经历法条议曰以圭表测冬夏二至非法之善盖二至前后太阳南北之行度甚微计一丈之表其一日之景差不过一分三十秒则一秒得六刻有奇若测差二三秒即差几二十刻安所得准乎今法独用春秋二分盖以此时太阳一日南北行二十四分一日之景差一寸二分即测差一二秒不满一刻较二至为最密西法以春分为岁首其岁余由累测春分得之既以每年春分测得岁实之平率又随其时之高冲及本轮均输加减之即定数可得不必言消长矣盖冬至近高冲则两岁冬至之距必多于平率夏至近最高则两岁夏至之距必少于平率又古时太阳本轮均输半径之差大于今日则加减均数亦大而冬至岁实当更增至元辛巳高冲约与冬至同度则岁实尤大也 以上岁实

△日躔盈缩

唐书志日躔盈缩略例曰北齐张子信积候合蚀加时觉日行有入气差然损益未得其正至刘焯立盈缩躔衰术与四象升降麟德术因之凡阴阳往来皆驯积而变日南至其行最急急而渐损至春分及中而后迟迨日北至其行最舒而渐益之以至秋分又及中而后益急急极而寒若舒极而燠若及中而雨暘之气交自然之数也元授时术冬至日行一度强出赤道二十四度弱自此日轨渐北积八十八日九十一分当春分前三日交在赤道实行九十一度三十一分而适平自后其盈日损复行九十三日七十一分当夏至之日入赤道内二十四度弱实行

九十一度三十一分日行一度弱向之盈分尽损而无余自此日轨渐南积九十三日七十一分当秋分后三日交在赤道实行九十一度三十一分而复平自后其缩日损行八十八日九十一分出赤道外二十四度弱实行九十一度三十一分复当冬至向之缩分尽损而无余盈缩均有损益初为益末为损自冬至以及春分春分以及夏至日躔自北陆转而西西而南于盈为益益极而损损至无余而缩自夏至以及秋分秋分以及冬至日躔自南陆转而东东而北于缩为益益极而损损至于无余而复盈盈初缩末俱八十八日九十一分而行一象缩初盈末俱九十三日七十一分而行一象盈缩极差皆二度四十分由实测晷景而得仍以算术推考与所测允合明大统术因之万历末西法论太阳盈缩主本天高卑之法其说谓太阳在本天终古平行人由黄道测其行度遂生盈缩盖黄道以地为心太阳本天不以地为心于是有两心之差而高卑判矣夏至前后在本天之高半故去黄道近而离地远远则见其本天之度小而人以黄道视之迟于平行矣是则行度之所以有缩也冬至前后在本天之低半故云黄道远而离地近近则见其本天之度大而人以黄道视之速于平行矣是则行度之所以有盈也又有本轮之法谓太阳本天与地同心而本天之周别有本轮以居太阳其在本轮上半顺动天西行去地远为高故右移之度减于平行为减在本轮下半逆动天而东去地近为卑故右移速于平行为加在本轮之左右去地不远不近为高卑适中谓之中距其行与平行等此即不同心之法而小变之盖本轮全径即两心差也至盈缩起算古法定于二至西法则谓太阳本天距地极远之点谓之最高距地极近之点谓之最卑亦曰高冲此二点为盈缩之界每年行一分余

（臣）等谨按古历太阳之行有各恒气十五日奇之总率而无每日细数太阴之行但有每一日之总率而无一日内分十二限之总率有之皆自授时始皆以平立定三差得之其法以盈缩日数分为六段各以段日除其段之积度得数相减为一差一差又相减为二差则其数齐同乃缘此以生定差及平差立差定差者盈缩初日最大之差也于是以平差立差减之则为每日之定差矣其分为六段者一年二十四定气分四象限各有六气故也李天经历法条议云七曜加减分用平立定之差法尚不足盖加减平行以求自行乃历家要务第天实圆体与平行异类旧所用三差法俱从句股平行定者于天体未合即盈缩损益之数未得其真今新法加减诸表乃以圆齐圆始可合天今考西法所用以测天者有平三角弧三角诸法皆以划圆八线为主而割圆八线之法正弦余弦半径

相对成反正二句股形于圆内半径正割与半径余切
余割成大小二句股形于圆外且锐角分两句股钝角补成句股皆不能外句股之法第
变而用角度则有八线即可得其正弧余弧视古之用
弧矢法求弧背者为精密矣若弧三角形正弧则以黄赤及地平经纬为十比例斜弧则
用边角比例及垂弧总较三法然亦不外乎同式句股
形也

（臣）等又按西术以最高最卑二点为太阳盈缩起算之端二点每年自有行分
其高卑于本天半径者非两心差之全数而止及其半
乃于本轮之周设一均轮以消息之四分两心差之全数以其三为本轮半径以其一为
均轮半径本轮在本天之周平行为经度均轮心在本
轮之周自行为自变量本轮心微速于均轮心之行两行之差即最高最卑之行分也太
阳在均轮周其行则倍于均轮心盖本轮有上下左右四
限均轮祇远近二限故太阳行必倍之也最高卑与二至同度则本轮心均轮心与地心
参直而无加减差最卑至最高之半周则平行在后实
行在前是为加差最高至最卑之半则平行在前实行在后是为减差由自变量以三角
形求均数则得每日之盈缩差以之加减平行得太阳实
行矣 以上日躔盈缩

△日道交周

前汉天文志月有九行者黑道二出黄道北赤道二出黄道南 【按此赤道即月道
之出于黄道南者故以南之方色名之唐宋志改名
朱道非天之赤道也】 白道二出黄道西青道二出黄道东立春春分月东从青道立秋
秋分西从白道立冬冬至北从黑道立夏夏至南从赤
道唐志凡月合朔所交冬在阴历夏在阳历月行青道 【冬至夏至后青道半交在春分
之宿当黄道东立冬立夏后青道半交在立春之宿
当黄道东南至所冲之宿亦如之】 冬在阳历夏在阴历月行白道 【冬至夏至后白
道半交在秋分之宿当黄道西立冬立夏后白道半交
在立秋之宿当黄道西北至所冲之宿亦如之】 春在阳历秋在阴历月行朱道 【春
分秋分后朱道半交在夏至之宿当黄道南立春立秋
后朱道半交在立夏之宿当黄道西南至所冲之宿亦如之】 春在阴历秋在阳历月行
黑道 【春分秋分后黑道半交在冬至之宿当黄道
北立春立秋后黑道半交在立冬之宿当黄道东北至所冲之宿亦如之】 四序离为八
节至阴阳之所交行与黄道会故月有九行各视月交
所入七十二候距交初中黄道日度 【案初交中交黄道之日度也】 每五度为限亦
初数十二每限减一数终于四乃一度强依平更从四

起每限增一终于十二而至半交其去黄道六度又自十二每限减一数终于四亦一度
强依平更从四起每限增一终于十二复与日轨相会
凡日以赤道内为阴外为阳月以黄道内为阴外为阳故月行宿度入春分交后行阴历
秋分交后行阳历皆为同名若八春分交后行阳历秋
分交后行阴历皆为异名大衍术议曰推阴阳历交在冬至夏至则月行青道白道所交
则同而出入之行异故青道至春分之宿及其所冲皆
在黄道东白道至秋分之宿及其所冲皆在黄道西若阴阳历交在立春立秋则月循朱
道黑道所交则同而出入之行异故朱道至立夏之宿
及其所冲皆在黄道西南黑道至立冬之宿及其所冲皆在黄道东北若阴阳历交在春
分秋分之宿则月行朱道黑道所交则同而出入之行
异故朱道至夏至之宿及其所冲皆在黄道正南黑道至冬至之宿及其所冲皆在黄道
正北若阴阳历交在立夏立冬月行青道白道所交则
同而出入之行异故青道至立春之宿及其所冲皆在黄道东南白道至立秋之宿及其
所冲皆在黄道西北其大纪皆兼二道而实分主八节
合于四正四维案阴阳历中终之所交则月行正当黄道去交七日其行九十一度齐于
一象之率而得 八行之中八行与中道而九是谓九
道凡八行正于春秋其去黄道六度则交在冬夏正于冬夏其去黄道六度则交在春秋
日出入赤道二十四度月出入黄道六度凡月交一终
退前所交一度及余八万九千七百七十三分度之四万二千五百三少半积二百二十
一月及分七千七百五十三而交道周天矣因而半之
将九年而九道终以四象考之各据合朔所交入七十二候则其八道之行也以朔交为
交初望交为交中若交初在冬至初候而入阴历则行
青道又十三日七十六分日之四十六至交中得所冲之宿变入阳历亦行青道若交初
入阳历则白道也故考交初所入而周天之度可知若
望交在冬至初候则减十三日四十六分视大云初候阴阳历而正其行也

（臣）等谨按汉志始言月有九道八行至唐书言之特详元史统名白道而无九
道之名今术仍之盖月道之交黄道亦犹黄道之交赤
道其初交中交如二分半交如二至每交一周则退一度半弱十八年有奇始退黄道一
周其所谓阴阳历者则以黄道之内为阴自南而
北入黄道内为阴自北而南出黄道外为阳也汉志以四方之色别黄道之段日语殊简
略唐志与大衍历议言各不同阅者或反轆轤今为析
之唐志云凡月合朔所交是据初交言之也 【今法谓之中交】 其云冬在阴历夏在
阳历月行青道者谓初交在冬至之宿而行阴历则前
半交自南而北行青道初交在夏至之宿行阳历则前半交自北而南行青道盖举初交

及前半交而中交及后半交可知也余仿此大衍议推
阴阳历交在冬至夏至则月行青道白道所交则同而
出入之道异是统交终言之如合朔在冬至之宿而行
阴历则初交自南而北东入青道中交变为阳历自北
而南一周皆青道合朔在夏至之宿而行阳历则初交
自北而南东出青道中交变为阴历自南而北一周皆
青道此即天文志所云冬在阴历夏在阳历月行青道
也但冬入而夏出为异耳又如合朔在冬至之宿而行
阳历则初交自北而南西出白道中交变为阴历自南
而北一周皆白道合朔在夏至之宿而行阴历则初交
自南而北西入白道中交变为阳历自北而南一周皆
白道此即天文志所云冬在阳历夏在阴历月行白道
也但冬出夏入为异耳余仿此 以上白道交周

△月离迟疾

元史志古法谓月平行十三度十九分度之七汉耿寿昌以为日月行至牵牛东井日过度月行十五度至娄角始平行赤道使然贾逵以为今合朔弦望月食加时所以不中者盖不知月行迟疾李梵苏统皆以月行当有迟疾不必在牵牛东井娄角之闲乃因行道有远近出入所生刘洪作干象术精思二十余年始悟其理列为差率以囿进退损益之数后之作术者咸因之至唐一行考九道委蛇曲折之数得月行疾徐之理先儒谓月与五星皆近日而疾远日而迟数家立法以入转一周之日为迟疾二术各立初末二限初为益末为损在疾初迟末其行率过于平行迟初疾末率不及于平行自入转初日行十四度半强从是渐杀积七日适及平行度谓之疾初限其积度比平行余五度四十二分自是其疾日损又积七日行十二度微强向之益者尽损而无余谓之疾末限自是复行迟度又积七日适及平行度谓之迟初限其积度比平行不及五度四十二分自此其迟日损行度渐增又历七日复行十四度半强向之益者亦损而无余谓之迟末限入转一周实二十七日五十五刻四十六分迟疾极差皆五度四十二分旧法日为一限皆用二十八限今定验得转分进退时各不同今分日为十二共三百三十六限半之为半周限析而四之为象限明崇祯中李天经进历法条议其论太阴曰朔望之外别有损益分一加减不足以尽之盖旧定太阴平行算朔望加减大率五度有奇然两弦时多寡不一即授时亦言朔望平行数不定明其理未着其法今于加减外再用一加减名为二三均数其法备载新法历书太阴本天之周设为本轮均轮次轮次均轮凡四而太阴实体则居次均轮之周步朔望则用本轮均轮步两弦则用次轮步两弦前后则用次均轮其本轮心平行度与均轮心所生迟疾之差为初均数初均数者所以求

初实行也二均数者次轮所生则次均轮心距次轮最近点当地心之角也三均数者次均轮所生太阴所实在之处与二均数相加减为二三均数又以之加减初实行为白道实行者也又其言各朔后月夕西见迟疾不一甚有差至三日者其故有三一因月视行度视行为疾段则疾见迟段则迟见一因黄道升降或斜或正正必疾见斜必迟见一因白道在纬南纬北凡在纬北疾见纬南迟见也

（臣）等谨按太阴之轮有四而本轮乃迟疾四限之所由生其余皆所以消息迟疾之数故本轮为步月离之主其初末四限亦犹太阳之有盈缩四限也西人初测止用本轮以步朔望次轮以步两弦第谷以其法不能密合太阴之行故于本轮上加一均轮又因两弦前后之行不同于两弦故又于次轮外加一次均轮盖朔望时太阴在次轮之最近点又在次均轮之最下点而次均轮心又必常在次轮周自地心视之俱在实行线上经度无异故求朔望之初均数止用均轮不用次轮也两弦时太阴在次轮之最远点又在次均轮之上点而次均轮心亦必在次轮之最远点故两弦时止用次轮不用次均轮也至朔望前后及两弦前后太阴在次轮远近二点之闲又在次均轮上下二点之闲而次均轮心亦不在次轮之远近二点故有次轮与次均轮之相差而或加或减也本轮者所以推本天之高卑而均轮则以消息本轮之行度次轮者所以定朔望两弦之远近而次均轮又以分别朔望两弦前后之加减故本轮行度合初均轮之倍引而生初均数分高卑左右而为朔望之加减差也次轮行度合次均轮之倍离而生二三均数分远近上下而为两弦及两弦前后之加减差也初均数之加减差即授时之迟疾差自最高至最卑六宫为迟历为减差自最卑至最高六宫为疾历为加差最高前三宫与后三宫相当最卑前三宫与后三宫相当其差数皆相等但加减异耳求初实行法皆以平行减月孛平行【月孛即本轮最高点也】得自变量用直角三角形以本轮半径之半为对直角之边以自变量为一角求得对角之边三因之【均轮半径为本轮半径之半合本轮均轮半径则为均输半径者三故小边无问大小皆三因之三之一为对角之边三之二即均轮上倍自变量之通弦均轮右旋必倍自变量其理与太阳同】又求得对余角之边与半径相加减复用直角三角形求得对小边之角为初均数并求得对直角之边为次轮最近点距地心线为求次均之用以初均数加减用时太阴平行即初实行也其朔望以外之加减差为二均三均二均数之生于次轮全径与三均数之生于次均轮之半径亦犹初均数之生于本轮及均轮半径也既得二均三均之

数复用三均数以加减乎二均数是二三均数故求白道实行法以初实行减本日太阳实行得次引用斜弧三角形两边夹一角法求得对通弦之角为二均数而定其加减号以初均数与均轮心距最卑之度相加为加减泛限视足九十度与否定加减限并求对角之边为次均轮心距地心线又以此线及次引用两边夹一角法求得三均数亦定其加减号【次引倍度不及半周者月在轮左故加过半周者月在轮右故减】乃以二均数与三均数相加减为二三均数【两均数同号则相加异号则相减】以加减初实行为白道实行 以上月离迟疾

△实朔望

傅仁均戊寅元术月有三大三小刘孝孙使算学博士王孝通以甲辰术法诘仁均曰平朔定朔旧有二家三大三小为定朔望一大一小为平朔望日月行有迟速相及谓之合会晦朔无定由时消息若定大小皆在朔者合会虽定而郤元纪首三端并失若上合履端之始下得归余于终合会有时则甲辰元术为通术矣仁均对曰书云季秋月朔辰弗集于房孔氏云集合也不合则日蚀可知又云先时者杀无赦不及时者杀无赦既有先后之差是知定朔矣诗云十月之交朔日辛卯又春秋传曰不书朔官失之也自后术差莫能详正故秦汉以来多非朔食宋御史中丞何承天微欲见意不能详究乃为散骑侍郎皮延宗等所抑孝通之语乃延宗旧说治数之本必推上元日月如合璧五星如连珠夜半甲子朔旦冬至自此七曜散行不复余分普尽总会如初惟朔分气分有可尽之理因其可尽即有三端此乃纪其日数之元尔或以为即夜半甲子朔冬至者非也冬至自有常数朔名由于月起月行迟疾匪常三端安得即合故必须日月相合与至同日者乃为合朔冬至耳大衍术合朔议曰虞■〈广 卩〉曰所谓朔在会合苟躔次既同何患于频大也日月相离何患频小也春秋日蚀不书朔者八公羊曰二日也谷梁曰晦也左氏曰官失之也刘孝孙推俱得朔日以邱明为是乃与刘焯皆议定朔为有司所抑不得行傅仁均始为定朔而曰晦不东见朔不西眺

（臣）等谨按日每日平行一度月每日平行十三度十九分度之七合朔时日月同度积弦策七日有奇而月度超前离日一象限是为上弦又积弦策而月度离日半周天与日对度是为望自此以后月向日行又积弦策而距日一象限是为下弦更积弦策而月追日及之又复周度而为合朔矣凡此者皆有常度有常期故谓之经朔经望经弦也乃若定朔定望定弦则有时而后于常期故有加差焉有时而先于常期故有减差焉凡加差之因有二一因于日度之盈夫日行既越于常度则月不能及一因

于月度之迟夫月行既迟于常度则不能及日二者皆必于常期之外更增时刻而后能及于朔望弦之度故时刻加也减差之因亦有二一因于日度之缩夫日行既缓于常度则月易及之一因于月度之速夫月行既速于常度则易及于日二者皆不待常期之至而已及于朔望弦之度故时刻减也乃若以日之盈遇月之迟二者皆宜有加差以日之缩遇月之疾二者皆宜有减差故盈与迟缩与疾并为同名而其度宜并若以日之盈遇月之疾在日宜加在月则宜减以日之缩遇月之迟在日宜减在月宜加故盈与疾缩与迟并为异名而其度宜相减用其多者主也如上所论既以盈缩迟疾二差同名相从异名相消则加减差之大数已定然而又有乘除者上所言者度也非时刻也故必以此所得之度分用每限之时刻乘之为实每限之月行度为法除之即变为时刻而命为加减差矣 以上实朔望

钦定续通志卷九十九

●钦定续通志卷一百 天文略四

天文略 【四】

日月五步规法下

○日月五步规法下

日月交食

五星经纬度及交周

△日月交食

春秋隐公三年春王二月己巳日有食之公羊传曰日食则曷为或日或不日或言朔或不言朔曰每月某日朔日有食之者食正朔也其或日或不日或失之前或失之后失之前者朔在前也失之后者朔在后也盖古者日月并纪平度而用平朔故日食每不在朔东汉刘洪作干象术始知月有迟疾北齐张子信始知日有盈缩有此二端以生定朔然人犹不敢用也至唐李淳风僧一行乃用之至今不改乃验历之首务也元史志术法疏密验在交食然推步之术难得其密加时有早晚食分有浅深取其密合不容偶然推术加时必本于躔离朏朧考求食分必本于距交远近苟入气盈缩入转迟疾未得其正则合朔不失之先必失之后合朔失之先后则亏食时刻其能密乎日月俱东行而日迟月疾日追月及是为一会交直之道有阳历阴历交会之期有中前中后加以地形南北东西之不同人目高下邪直之各异此食分多寡理不得一者也今合朔既正则加时无早晚之差气刻适中则食分无强弱之失推而上之自诗书春秋及三国以来所载亏食无不合焉者合于既往则

行之悠久自可无弊矣明万历中郑世子载堉进历书论日食曰日道与月道相交处有二若正会于交则日食既若但在交前后相近者则食而不既此天之交限也又有人之交限假令中国食既戴日之下所亏纔半化外之地则交而不食易地反观亦如之何则日如大赤丸月如小黑丸共悬一线日上而月下即其下正望之黑丸必掩赤丸似食之既及旁观有远近之差则食数有多寡矣春分以后日行赤道北畔交外偏多交内偏少秋分以后日行赤道南畔交外偏少交内偏多是故有南北差冬至以后日行黄道东畔午前偏多午后偏少夏至以后日行黄道西畔午前偏少午后偏多是故有东西差日中仰视则高旦暮平视则低是故有距午差食于中前见早食于中后见迟是故有时差凡此诸差惟日有之月则无也故推交食惟日颇难欲推九服之变必各据其处考晷影之短长揆辰极之高下庶几得之历经推定之数徒以燕都所见者言之耳旧云月行内道食多有验月行外道食多不验又云天之交限虽系内道若在人之交限之外类同外道日亦不食此说似矣而未尽也假若夏至前后日食于寅卯酉戌之闲人向东北西北观之则外道食分反多于内道矣日体大于月月不能尽掩之或遇食既而日光四溢形如金环故日无食十分之理虽既亦止九分八十秒授时历日食阳历限六度定法六十阴历限八度定法八十各置其限度如其定法而一皆得十分今于定法下各加一数以除限度则得九分八十余秒也其议月食曰闇虚者景也景之蔽月无早晚高卑之异四时九服之殊譬如悬一黑丸于暗室其左然烛其右悬一白丸若烛光为黑丸所蔽则白丸不受其光矣人在四傍观之无不同也故月食无时差之说自纪元历妄立时差授时因之误矣崇祯四年十月辛卯朔日食新法预推顺天见食二分一十二秒应天以南不食大漠以北食既例以京师见食不及三分不救护徐光启言月食在夜加时早晚苦无定据惟日食案晷定时无可迁就故立法疏密此为的证（臣）等纂辑新法渐次就绪而后交食为期尚远此时不与监臣共见至成书后将何征信且是食之必当测候更有说焉旧法食在正中则无时差今此食既在日中而新法仍有时差者盖以七政运行皆依黄道不由赤道旧法所谓中乃赤道之午中非黄道之正中也黄赤二道之中独冬夏至加时正午乃得同度今十月朔去冬至度数尚远两中之差二十三度有奇岂可因加时近午不加不减乎适际此日又值此时足可验时差之正术一也本方之地经度未得真率则加时难定其法必从交食时测验数次乃可较勘画一今此食依新术测候其加时刻分或前后未合当取从前所记地经度

分斟酌改定此可以求里差之真率二也时差一法但知中无加减而不知中分黄赤今
一经目见人人知加时之因黄道因此推彼他术皆然
足以知学习之甚易三也又曰宋仁宗天圣二年甲子岁五月丁酉朔司天推当食不食
诸术推算皆云当食夫于法则实当食而于时则实不
食今当何以解之盖日食有变差一法日在阴历距交十度强于法当食而独此日此地
之南北差变为东西差故论天行则地心与日月相参
值实不失食而从人目所见则日月相距近变为远实不得食顾独汴京为然若从汴以
东数千里则渐见食至东北万余里外则全见食也夫
变差时时不同或多变为少或少变为多或有变为无或无变为有推步之难全在此等
五年九月十五日月食监推初亏在卯初一刻光启推
在卯初三刻回回科推在辰初初刻三法异同致奉诘问至期测候阴云不见无可征验
光启具陈三法不同之故言时刻之加减由于盈缩迟
疾两差而盈缩差旧法起冬夏至新法起最高最高有行分惟宋绍兴闲与夏至同度郭
守敬后此百年去离一度有奇故未觉今最高在夏至
后六度此两法之盈缩差所以不同也迟疾差旧法只用一转周新法谓之自行轮自行
之外又有两次轮此两法之迟疾差所以不同也至于
回回又异者或由于四应或由于里差臣实未晓其故总之三家俱依本法推步不能变
法迁就也将来有宜讲求者二端一曰食分多寡日食
时阳晶晃耀每先食而后见月食时游气纷侵每先见而后食其差至一分以上今欲灼
见实分有近造窥筩日食时于密室中取其光景映照
尺素之上自初亏至复圆分数真确画然不爽月食用以仰观二体离合之际鄞鄂着明
与目测回异此定分法也一曰加时早晚定时之术壶
漏为古法轮钟为新法然不若求端于日星昼则用日夜则任用一星皆以仪器测取经
纬度数推算得之此定时法也二法既立则诸术之疏
密毫末莫遁矣六年李天经进交食之议四一曰日月景径分恒不一盖日月有时行最
高有时行最卑因相距有远近见有大小又因远近得
太阴过景时有厚薄所以径分不能为一二曰日食正午非中限乃以黄道九十度限为
中限盖南北东西差俱依黄道则时差安得不从黄道
论其初末以求中限乎且黄道出地平上两象限自有其高亦自有其中此理未明或宜
加反减宜减反加凡加时不合者由此也三曰日食初
亏复圆时刻多寡恒不等非二时折半之说盖视差能变实行为视行则以视差较食甚
前后鲜有不参差者视差既食甚前后不一又安能令
视行前后一乎今以视行推变时刻则初亏复圆其不能相等也明矣四曰诸方各以地
径推算时刻及日食分盖地面上东西见日月出没各

有前后不同即所得时刻亦不同故见食虽一而时刻异此日月食皆一理若日食则因视差随地不一即太阴视距不一所见食分亦异焉新法算书曰步交食之术有二一曰加时早晚一曰食分浅深加时者日食于朔月食于望当预定其食甚在某时刻分秒也食分者月所借之日光食于地景地所受之日光食于月景当豫定其失光几何分秒也加时早晚非在日月正相会相望之实时而在人目所见仪器所测之视时乃视时无均度可推故日月两食皆先求其实时既得实时然后从视处密求日食之定时惟月食则实时即近视时也然日与月实相会之度分未定即欲求其实时无从可得故须先推中会時計其平行及自行而得均数然后以均数加减求得其实会因得其实时矣若食甚之前为初亏食甚之后为复圆此两限闲亦应推定时刻分秒其法于前后数刻闲推步日躔月离求其实行视行【原注月有迟疾经时则生变易故宜近取】以得起复之闲时刻久近也食分多寡谓日食时月体掩日体若干月食时月体入地景若干也其法以日月两半径较太阴距黄道度分得其大小求二曜距交远近与古法不异第日月各有最高卑景径因之小大黄白距度有广狭食限为之多少至于日食三差尤多曲折此为异矣又曰食限者日月行两道各推其经度距交若干为有食之始也而日与月不同月食则太阴与地景相遇两周相切以其两视半径较白道距黄道度又以距度推交周度定食限若日食则太阳与太阴相遇虽两周相切其两视半径未可定两道之距度为有视差必以之相加而得距度故特论半径则日食之二径狭月食之二径广论日食之限反大于月食限以视差也又曰食甚前初亏也食甚后复圆也两限闲之时刻多寡其缘有三一在太阴本时距度因距度或多或寡每食不同即太阴入景浅深不同浅则时刻必少深则时刻必多其二在月及景两视半径半径小太阴过之所需时刻少半径大太阴过之所需时刻多其三在太阴自行自行有时速有时迟虽则距度同视径同而自行迟疾不同即所需时刻不同矣又曰月食生于地景地景生于日故天上之实食即人所见之视食无二食也日食不然有天上之实食有人所见之视食其食分之有无多寡加时之早晚先后各各不同推步日食难于太阴者以此其推算视食则依人目与地面为准凡交会者必参相直不参直不相掩也日之有实食也地心与月与日参居一线之上也其有视食也人目与月与日参居一线之上也人目居地面之上与地心相距之差为大地之半径则所见日食与实食恒偏左偏右其所指不得同度分是生视差而人目所参对之线不得为实会而特为视会视会

与实会无异者惟有正当天顶之一点过此以地半径以日月距地之远测太阳及太阴实有三等视差其法以地半径为一边以太阳及太阴各距地之远为一边以二曜高度为一边成三角形用以得高卑差一也又偏南而变纬度得南北差二也以黄道九十度限偏左偏右而变经度得东西差三也因东西视差故太阳与太阴会有先后迟速之异二曜之会在黄平象限东即未得实会而先得视会若在黄平象限西则先得实会而后得视会所谓中前宜减中后宜加者也因南北视差故太阴距度有广狭食分有大小之变如人在夏至之北测太阴得南北视差即以加于太阴实距南度以减于实距北度又东西南北两视差皆以黄平象限为主盖正当九十度限绝无东西差而反得最大南北差距九十度渐远南北差渐小东西差渐大至最远乃全与高卑差为一也三差恒合为勾股形高卑其弦南北其股东西其句至极南则弦与股合至极东极西则弦与句合也又曰东西南北高卑三差之外复有三差不生于日月地之三径而生于气气有轻重有厚薄各因地因时而三光之视差为之变易一曰清蒙高差是近于地平为地面所出清蒙之气变易高下也二曰清蒙径差亦因地上清蒙之气而人目所见太阳本径之大小为所变易也三曰本气径差本气者四行之一即内经素问所谓大气地面以上月天以下充塞太空者是也此比于地上清蒙更为精微无形质而亦能变易太阳之光照使目所见之视度随地随时小大不一也

（臣）等谨按月出入黄道每月有正交中交二次而或食或不食者月追及于日而无距度为朔距日一百八十度为望皆为东西同经其入交也正当黄道而无纬度是为南北同纬入交而非朔望则同纬而不同经【黄白距纬五度月入交则正当黄道无距纬度而不得食者月当黄道而日在其东西不同经度也】朔望而不入交则同经而不同纬【朔望时日月距交同度无东西之异其不得食者日距交既远则日月两半径南北不相切是不同纬也】皆无食其有食者必经纬同度也合朔时月在日与地之闲一线参直则月掩日光而日为之食望时地在日与月之闲一线参直日照地影是为闇虚月入其中则为月食也月去日远去人近合朔时但能蔽人目而不能上侵日体故食分时刻南北东西异视月入闇虚则九有同观但时刻有先后耳所以推算之法日食较月食为繁密也

（臣）等又按月日交食必在朔望而朔望有平实之异平朔望即古经朔望实朔望即古定朔望也日月两本轮心同度为平朔望而日用实体在轮周不必同度故必以两均轮之盈缩迟疾差为加减之均【月有本轮均轮

次轮次均轮四轮测朔望只用本轮均轮余二轮不

用】凡实行在平行之前为加均实行在平行之后为减均同名相消异名相从即得平朔望距实朔望之度其实行在平行之前为减在平行之后为加以之变时加减平朔望为实朔望【古谓之加减差】然而犹平时非用时也盖实朔望推算时刻以平行所临之时依黄道而定而平行实行既有盈缩差则时刻亦有增减又时刻以赤道为主而黄赤有升度差则时刻亦有进退故必以均数与升度二时差变为时分以加减实朔望之时刻为朔望用时也

（臣）等又按月食生于地影而地影有大小之不同凡食分之浅深食时之久暂由之凡太阳距地远则影长太阳距地近则影短又地影为尖圆体月在最卑时距地近则过影之粗处其径大行最高距地远则过影之细处其径小也故食分惟以视黄白距纬之多少定之距纬愈少太阴心与地影心相去愈近则太阴入影愈深故用太阴与地影两半径相并而与距纬相较其并径大于距纬之较即月食之分也其时刻之久暂则生于入影之浅深过影之迟速盖距纬有宽狭宽则入影浅而时刻少狭则入影深而时刻多又月与影之半径时有小大月大影小则过影速而时刻少月小影大则过影迟而时刻多抑且自行有迟疾迟则出影迟疾则出影速故虽距纬同半径同而自行不同即时刻亦异也至于见食先后则以人所居地面不同各以日中为南为子午日出入为东西故亏复各限亦因之而异也

（臣）等又按日食有三限时刻求之最难三限者初亏食甚复圆也三限时刻则用时近时真时也三者虽为三限所同而尤以食甚之时刻为急太阳距交之黄道经度与太阴距交之白道经度等是为东西同经即为实朔其距交之度为实朔交周然此时太阳与太阴相距犹远惟自白极过太阳作经圈与白道成直角太阴实经行至此直角之点与太阳相距最近是为食甚用时其距交之经度为食甚交周其相距之纬度为食甚距纬于是以实朔交周与食甚交周相减得升度差加减实朔用时为食甚用时次以食甚用时求得东西差加减食甚用时为食甚近时又以食甚近时求得东西差与用时东西差相较得视行然后以视行与用时东西差比例得时分加减食甚用时为食甚真时盖食甚用时者乃在天实行日月相掩最深之时刻食甚真时者乃人目所见日月相掩最深之时刻而食甚近时者所以定视行以求用时与真时相距之时分者也

（臣）等又按新法历书推算日食三差以黄平象限为本盖大圈相交必互相均

剖为两半分故黄赤二道之交地平也必皆有半周百八十度在地平之上其势似虹若中剖虹腰则为半周最高之处而两旁各九十度故谓之九十度限也此九十度限黄赤道并有之然在赤道则其度常居正午以其两端交地平常在卯正酉正也黄道则不然其九十度限或在午正之东或在午正之西时时不等其两端交地亦必不常在卯正酉正而时时不等故也盖黄道在地平半周之度自此中分则两皆象限若从天顶作线过此以至地平必成三角而其势平过如十字故又曰黄平象限也黄平象限之在午正每日必有二次者太阳东升西没成一昼夜则周天三百六十度皆过午正而西故每日必有冬至夏至在午正时此时此刻即黄平象限与子午规合而为一每日只有二次也自此二次之外二至必不在午正而黄平象限亦必不在二至矣今术改用白平象限盖三差并生于太阴而太阴之经纬度为白道经纬度较之用黄道为加密也

（臣）等又按日食三差一曰高下差一曰东西差一曰南北差东西南北二差又由高下差而生盖食甚用时以地心立算人自地面视之遂有地半径差而太阳地半径差恒小太阴地半径差恒大于太阴地半径差内减太阳地半径差始为太阴高下差高下差既变真高为视高故经度之东西纬度之南北皆因之而变也新法历书求三差以黄平象限为本盖以太阴在黄平象限东者视经度恒差而东太阴在黄平象限西者视经度恒差而西差而东者时刻宜减差而西者时刻宜加故日食之早晚必征之东西差而后可定也北极出地二十三度半以上者黄平象限恒在天顶南太阴之视纬度恒差而南北极出地二十三度半以下者黄平象限有时在天顶北太阴之视纬度即差而北差而南者实纬在南则加在北则减差而北者实纬在南则减在北则加故日食之浅深必征之南北差而后可定也其法自黄极作两经圈一过真高一过视高两经圈所截黄道度即实经度与视经度之较是为东西差两经圈之较即实纬度与视纬度之较是为南北差相交成正弧三角形直角恒对高下差黄道高弧交角恒对南北差余角恒对东西差惟太阴正当黄平象限则黄道经圈过天顶与高弧合真高视高同在一经圈上故高下差即南北差而无东西差黄平象限正当天顶则黄道与高弧合真高视高同在黄道上故高下差即东西差而无南北差过此距黄平象限愈近交角愈大则南北差大而东西差小距黄平象限愈远交角愈小则南北差小而东西差大故必先求黄平象限及黄道高弧交角而后东西南北差可次第求焉今术之改用白平象限者以太阴之经度为白道经度食

甚实纬又与白道成直角则东西差乃白道经差非黄道之经差也南北差乃白道纬差非黄道之纬差也三差相交成正弧三角形亦白道与白道经圈及高弧所成之三角形非黄道与黄道经圈及高弧所成之三角形也夫白道与黄道斜交则白平象限之与黄平象限白道高弧交角之与黄道高弧交角亦皆有不同新法历书因日食近两交黄白二道相距不远故止用黄道为省算究之必用白道方为密合然白平象限以黄平象限为根而白道高弧交角又以黄道高弧交角为据其创始之功不可诬也又日食三差起于唐宣明历日食气刻时三差气差今为南北差刻差今为东西差 以上日月交食

△五星经纬度及交周

史记天官书岁星岁行三十度十六分度之七率日行十二分度之一十二岁而周天填星岁行十二度百十二分度之五日行二十八分度之一二十八岁周天太白大率岁一周天汉书志木一见三百九十八日五百一十六万三千一百二分行星三十三度三百三十三万四千七百三十七分通其率故曰日行千七百二十八分度之百四十五金一复五百八十四日百二十九万五千三百五十二分行星亦如之故曰日行一度土一见三百七十七日千八百三万二千六百二十五分行星十二度千三百二十一万五百分通其率故曰日行四千三百二十分度之百四十五火一见七百八十八日千五百六十八万九千七百分行星四百十五度八百二十一万八千五分通其率故曰日行万三千八百二十四分度之七千三百五十五水一见复百一十五日一亿二千二百二万九千六百五分行星亦如之故曰日行一度后汉书志月有晦朔星有合见月有弦望星有留逆其归一也步术生焉金水承阳先后日下速则先日迟而后留留而后逆与日违违而后速速与日竞竞又先日迟速顺逆晨夕生焉见伏有日留行有度而率数生焉参差齐之多少均之会终生焉北史艺术传张胄元术超古独异者有七事其一古法五星行度皆守恒率见伏盈缩悉无格准胄元候之各得真率合见之数与古不同其差多者至加减三十许日即如荧惑平见在雨水气则均加二十九日见在小雪气则均减二十五日加减平见以为定见诸星各有盈缩之数皆如此例但差多不同特其积候所知时人不能原其旨其二辰星旧率一终再见凡诸古术皆以为然应见不见人未能测胄元积候知辰星一终之中有时一见及同类感召相随而出如辰星平晨见在雨水者应见即不见若平晨见在启蛰者去日十八度外三十六度内晨有水土金一星者亦相随见其三古推步术行有定限自见已后

依率而推进退之期莫知多少胄元积候知五星迟速留退真数皆与古法不同多者差八十余日留回所在亦差八十余度即如荧惑前疾初见
在立冬初则二百五十日行一百七十七度定见夏至初则一百七十日行九十二度追步天验今古皆密明史志载郑世子书论五纬曰古
法推步五纬不知变数之加减北齐张子信仰观岁久知五纬有盈缩之变当加减以求逐日之躔盖五纬出入黄道内外各自有其道视日远
近为迟疾其变数之加减如里路之径直斜曲也宋人有言曰五星行度为留退之际最多差自内而进者其退必向外自外而进者其退必向
内其迹如循柳叶两末锐于中闲往还之道相去甚远故星行两末度稍迟以其斜行故也中行度稍速以其径捷故也前代之书止增损旧法
而已未尝实者天度其法测验每夜昏晓夜半月及五星所在度秒置簿录之满五年其闲去阴云昼见日数外可得三年实行然后可以算术
缀之也崇祯六年李天经进五纬之议三一曰五星应用太阳视行不得以段目定之盖五星皆以太阳为主与太阳合则疾行冲则退行且太
阳之行有迟疾则五星合伏日数时少时多自不可以段目定其度分二曰五星应加纬行盖五星出入黄道各有定距度又木土火三星冲太
阳纬大合太阳纬小金水二星顺伏纬小逆伏纬大三曰测五星当用恒星为准则盖测星用黄道仪外宜用弧矢等仪以所测纬星视距二恒
星若干度分依法布算方得本星真经纬度分或绘图亦可免算新法算书曰测五星经度平行凡星之距太阳度分等或皆在日之左或皆在
日之右其在黄道经度亦等则其行必满周而复于故处其中积之年日数必等所以欲得距太阳等度者星之次行以太阳为行动之原距有
远近则行有迟疾高卑若距度等者即星之前后两测其迟疾等其高卑亦等其必满周也所以求黄道经度等者谓太阳亦在元经度则太阳
无高卑迟疾之差又日同经度则星在本圈之故处也古史依上法算各星平行土星以五十九平年又一日四分日之一弱行次行圈五十七
周行天周二周又一度四十三分木星以七十一年不及四日又六十分日之五十四行次行圈六十五周星行本圈六周不及四度又五十分
火星以七十九年又三日六十分日之一十六行次行圈三十七周经周行四十二周又三度一十分右三星皆于中积年数减本星次行之周
数其较为星本行周天之数金星以八年不及二日又六十分日之一十八行次行圈五周水星以四十六年又一日六十分日之三行次行圈
一百四十五周其平行皆与太阳同新法算引五纬之行各有二种其一为本行如填星约三十年行天一周日二分岁星约十二年一周天日

五分荧惑将满二年一周天日三十五分太白辰星皆随太阳每年旋天一周各有盈缩各有加减分各有本天之最高与最高冲即其最高又各有本行论其行界亦分四种非若回回法总一最高也其二在于本行之外西法称为岁行盖各星会太阳一次成一周也因此岁行之规推知各星顺逆留疾诸情故依新法图五纬各有一不同心圈一均圈一小轮凡星在小轮极远之所必合太阳其行顺而疾其体见小凡在小轮极近之所其行逆而疾其体见大土木火行逆则冲太阳金水行逆夕复而合行顺晨伏而合其各顺行转逆逆行转顺之两中界为留留非不行乃际于极迟行之所也留段前后或顺或逆皆有迟行其土木火行逆即冲太阳而金水则否者缘土木火之本天皆以太阳为心而包地得与太阳冲而金水之本天虽亦以太阳为心而不包地不能冲太阳也金水不能冲太阳而能与之离金离太阳四十八度水离二十四度又曰五星之道虽相距纬度各异而其斜络黄道则与月道同理故皆借月道诸名名之其两交之所亦谓正交中交其在南北两半限亦谓阴阳二限审是而五星纬行庶可详求矣盖各本道外之岁行小轮恒与黄道为平行而又斜交于本道其上半恒在黄本二道中凡星躔于此则减本道之纬其下半恒在本道外星躔于此则加其纬然此小轮之纬向则恒不变如土星三十年行天一周其在正中二交之下必无纬度分十五年恒北十五年恒南耳凡冲太阳因在小轮上半即减纬度他星亦犹是也其或行近于地小轮加纬益多太白至夕伏合之际因其近地其纬几及八度矣又金星或合太阳而不伏水星离太阳而不见所以然者金纬甚大凡逆行纬在北七度余而合太阳于寿星大火二宫则虽与日合其光不伏一日晨夕两见者皆坐此故水纬仅四度余假令纬向是南合太阳于寿星嗣后虽离四度夕犹不见也合太阳于降娄嗣后虽离四度晨犹不见也此二则用浑仪一测便见非旧法所能知也

（臣）等谨按五星合见之行皆由距日而生星与日同度谓之合星光为日所掩故伏而不见如月之合朔也既合以后星行迟日行速星在日后故晨见东方如月之生明东方也始见顺行最疾已而渐迟及距日一象限而留不行如月之上弦也既留之后星始退行由迟而疾距日半周谓之冲日如月之望也冲日以后星之退行由疾而迟日又渐与星近至距日一象限而复留不行如月之下弦也既留之后又复顺行由迟而疾去日渐近复与日同度而伏是为一终合伏以后星后于日谓之晨见冲日以后星先于日谓之夕见此土木火伏见之理也金水之行速于日无与日冲之时方其与日同度亦为合伏既合之后星速日迟星在日前故

夕见西方始见顺行由疾而迟距日渐远始留不行自是渐退行亦由迟而疾复与日同度而伏谓之退合退合以后星在日后故晨见东方退行由疾而迟距日渐远复留不行自是复顺行由迟而疾追及于日复与同度而伏是为一终土木火有合有冲金水有晨夕两合而无冲此其异也刘歆三统术始有五步之术四分术因之又以月之晦朔弦望与星之合见留逆为比其理最确古今步法虽疏密不同要无有易其说者也

（臣）等又按新法历书言五星古图以地为心新图以日为心历指又言火星独以太阳为心其实不然五星皆有本天即皆有本轮均轮次轮金水二星以日为心者乃其一轮非本天也土木火三星以日为心者乃次轮上星行距日之迹亦非本天也西人九重天之说第一重宗动天次则恒星又次土星次木星次火星次太阳次金次水次太阴是皆以其行度之迟速而知其距地有远近因以知其天周有大小理之可信者也星之天有大小既皆以距地之远近而知则皆以地心为心矣是故土木火三星距地心甚远故其天皆大于太阳之本天而包于外金水二星距地心渐近故其天皆小于太阳之天而在其内为太阳天所包是其本天皆以地为心无可疑也

（臣）等又按五星之有本轮次轮皆与太阴同太阴之朔望在次轮故五星之冲伏亦在次轮然太阴只有迟疾而五星则有留退者太阴之平行甚疾而轮甚小当其在轮周退行之时但能稍减其平行之度故止见其迟而不见其退五星则平行甚迟其本轮虽小而次轮则甚大当其在轮之上弧则见其顺行在轮之下弧则见其退行在轮之左右则见其留而不行至于伏见迟速其故有三一由星体之大小一由黄道之斜正一由纬度之南北如星体大黄道正升正降纬度在北则速见迟伏星体小黄道斜升斜降纬度在南则迟见速伏也

（臣）等又按五星交周名义虽同太阴而太阴之交逆行五星之交顺行其行实相反也上三星有本道与黄道交周而金水二星无之盖三星各有本道与黄道斜交其自南而北之点为正交自北而南之点为中交自交而后便生距度此本道与黄道相距所生之纬度也金水二星则皆以黄道为本道因无二道之交点故亦无二道相距之纬度其所以又有纬度者由于次轮之面不与本道平行星行次轮周凡离本道皆生纬度此在五星皆然不独金水二星也上三星纬度之原有四一曰初纬盖本道与黄道斜交本轮心循本道右旋均轮次轮亦随之而右旋次轮心虽不在本道然当本道之平面自地心计之与在本道等若次轮心适当

二道之交则无纬度距交渐远则纬度渐大是为初纬
乃初经度所当本道距黄道之纬度即次轮心距黄道之纬度也一曰实纬星循次轮周
行其经度既因次均数之加减而不同于初经则纬度
亦不同于初纬实纬者乃星体居次轮周为实经度所当本道距黄道之纬度也一曰次
纬次轮面与本道斜交而与黄道平行半周在本道南
半周在本道北由次轮心视之又生纬度乃星距本道之纬度也一曰视纬纬度之角生
于地心而次纬之角却生于次轮心必求得次纬当地
心之角与实纬相加减方为星距黄道之纬度其法实纬在黄道北而次纬又在本道北
或实纬在黄道南而次纬又在本道南则相加若实纬
在黄道北而次纬却在本道南或实纬在黄道南而次纬却在本道北者则相减乃自地
心作视线所得之真纬度也西术求初纬后即求视纬
而不用实纬及次纬者以次轮面与黄道平行星距黄道视线之远近必与次轮心距黄
道之远近等也既有次轮心距黄道之弧即可得星距
黄道之边再有星距地心之边即可得视纬之角故立法惟以次轮心距本道正交之度
求得初纬即以次轮心距地心线与初纬之正弦为比
例而得星距黄道线又以星距合伏之度用三角形法求得星当黄道视线点距地心之
远与星距黄道线为比例而得视纬度也金水二星纬
度生于次轮本无初纬实纬盖以其本道即黄道次轮虽不当黄道而与黄道平行自地
心计之与在黄道等故无初纬星循次轮周行其实行
所当本道经度亦即黄道度故无实纬也其次轮斜交黄道半周在南半周在北所生纬
度是为次纬次纬当地心之角即星距黄道之纬度是
为视纬其视纬之大小则以星距地心别之以上三星而言初纬度小星在合伏前后则
距地心远而视纬度愈小初纬度大星又在退冲前后
则距地心近而视纬度愈大也以下二星而言次纬度小星在最远前后则距地心远而
视纬度愈小次纬度大星又在最近前后则距地心近
而视纬度愈大也

（臣）等又按金水求次均用伏见轮历指谓其即岁轮其说非是七政皆有本天
本天皆有平行之实度月与五星皆有次轮而五星次
轮亦曰岁轮皆因离日远近而生离度月之离度起合朔终合朔五星离度起合伏终合
伏土木火三星在日之上其本天大其右行之度迟则
于太阳平行度内减其星之行度是为岁轮上离度合伏至冲日半轮星西而日东冲日
至合伏半轮星东而日西金水二星在日下其本天小
其右行之度速则于本天平行度内减太阳平行度为岁轮上离度合伏至冲日星东而
日西冲日至合伏星西而日东金水本天虽小而岁轮

亦如上三星与日天等大星在岁轮上半周则岁轮负星出日上至下半周乃在日天下其绕日之圆象实由岁轮上星行轨迹所成与上三星成绕日大圆者同理而术家别名为伏见轮但于伏见轮上离度算其距日实行则与岁轮所得不殊又即以太阳之平行为二星之平行皆径捷之权法而承用者遂以伏见当岁轮以日天为二星本天且置本轮均轮于日天上由是二星之本天与岁轮皆隐矣 以上五星经纬度及交周

钦定续通志卷一百

●钦定续通志卷一百一 天文略五

天文略 【五】

仪象

○仪象

虞书舜璇玑玉衡以齐七政先儒因星官在书北斗第二星名璇第三星名玑第五星名玉衡即以为北斗七星马季长创谓玑衡为浑天仪郑玄亦云其转运者为玑其持正者为衡皆以玉为之七政者日月五星也以玑衡视其行度以观天意也王蕃云浑天仪者羲和之旧器积代相传谓之玑衡其为用也以察三光以分宿度者也又有浑天象者以着天体以布星辰而浑象之法地当在天中其势不便故反观开形地为外匡于已解者无异在内诡状殊体而合于理可谓奇巧然斯二者以考于天盖密矣又云古旧浑象以二分为一度周七尺三寸半而莫知何代所造今案虞书云洛下閤为汉孝武帝于地中转浑天定时节作太初历或其所制也汉孝和帝时太史揆候皆以赤道仪与天地颇有进退以问典星待诏姚崇等皆曰星图有规法日月实从黄道官无其器至永元十五年诏左中郎将贾逵乃始造太史黄道铜仪至桓帝延熹七年太史令张衡更以铜制以四分为一度周天一丈四尺六寸一分夜于密室中以漏水转之令司之者闭户唱之以告灵台之观天者视机所加某星始见某星已中某星今没皆如合符蕃以古制周小以布星辰相去稠概不得了察张衡所作又复伤大难可转移蕃今所作以三分为一度周一丈九寸五分四分分之三长古法三尺六寸五分四分分之一减衡法亦三尺六寸五分四分分之一浑天仪法黄赤道各广一度有半蕃今所作浑象黄赤道各广四分半相去七寸二分又去黄赤二道相共交错其间相去二十四度以两仪准之二道俱三百六十五度有奇又赤道见者常一百八十二度半强又南北极之天见者亦一百八十二度半强是以知天之体圆如弹丸南北极相去一百八十二度半强

也而陆绩所作浑象形如鸟卵以施二道不得如法若使二道同规则其间相去不得满二十四度若令相去二十四度则黄道当长于赤道又两极相去不翅八十二度半强按给说云天东西径三十五万七千里直径亦然则绩意亦以天为正圆也器与言谬颇为乖僻然浑天仪者其制有玦有衡既动静兼状以效二仪之情又周旋衡管用考三光之分所以揆正宿度准步盈虚求古之遗法也则先儒所言圆规径八尺汉候台铜仪蔡邕所欲寝伏其下者是也梁华林重云殿前所置铜仪其制则有双环规相并间相去三寸许正竖当子午其子午之间应南北极之衡各合而为孔以象南北枢植榫于前后以属焉又有单横规高下正当浑之半皆周币分为度数署以维辰之位以象地又有单规斜带南北之中与春秋二分之日道相应亦周币分为度数而署以维辰并相连着属榫植而不动其里又有双规相并如外双规内径八尺周二丈四尺而属双轴之两头出规外各二寸许合两为一内有孔圆径二寸许南头入地下注于外双规南枢孔中以象南极北头出地上入于外双规北枢孔中以象北极其运动得东西转以象天行其双轴之间则置衡长八尺通中有孔圆径一寸当衡之半两边有关各注着双轴衡既随天象东西转运又自于双轴间得南北低仰所以准验辰历分考次度其于揆测唯所欲为之者【按此仪内外二重外之双环规正竖当子午今子午规也单横规以象地今地平也又有单规斜带南北之中与二分日道应今赤道规也其内层之双规所以为东西运转也衡附于内双规之间所以为南北低仰也】 检其镌题是伪刘曜光初六年史官丞南阳孔挺所造则古之浑仪之法者也而宋御史中丞何承天及大中大夫徐爰各着宋书咸以为即张衡所造其仪略举天状而不缀经星七曜沈约着宋书亦云然皆失之远矣浑天象之制有玦而无衡梁末秘府以木为之其圆如丸其大数围南北两头有轴徧体布二十八宿三家星黄赤二道及天汉等别为横规环以匡其外高下管之以象地南轴头入地注于南植以象南极北轴头出于地上注于北植以象北极正东西转运昏明中星既应其度分至气节亦验在不差而已不如浑仪别有衡管测揆日月分步星度者也吴太史令陈苗云先贤制木为仪名曰浑天即此之谓耶由斯而言仪象二器远不相涉则张衡所造盖亦止在浑象七曜而何承天莫辨仪象之异亦为乖失宋文帝以元嘉十三年诏太史更造浑仪太史令钱乐之依案旧说采效仪象铸铜为之五分为一度径六尺八分少周一丈八尺二寸六分少地在天内不动立黄赤二道之规南北二极之规布列二十八宿北斗极星置日月五星于黄道上

为之杠轴以象天运昏明中星与天相符梁末置于文德殿前至如斯制以为浑仪则内
阙衡管以为浑象而地不在外是参两法别为一体就
器用而求犹浑象之流外内天地之状不失其位也吴时又有葛衡明达天官能为机巧
改作浑天使地居于天中以机动之天动而地止以上
应晷度则乐之所放述也至元嘉十七年又作小浑天二分为度【案宋书作以分为一
度今命三百六十五度四分度之一为三百六十五
分四分分之一约之得周三尺六寸五分二厘五毫与隋书所载周径俱不合然以二分
为一度则周当得七尺三寸五厘亦不合原数也依隋
书所载周径算之当以一分八厘太为一度盖史有缺文难以意揣也】径二尺二寸周
六尺六寸安二十八宿中外官星备足以白青黄等三
色珠为三家星其日月五星悉居黄道亦象天运而地在其中宋元嘉所造仪象器隋开
皇九年平陈后并入长安大业初移于东都观象殿唐
贞观初李淳风上言舜在璇玑玉衡以齐七政则浑天仪也周礼土圭正日景以求地中
有以见日行黄道之验也暨于周末此器乃亡汉洛下
闳作浑仪其后贾达张衡等亦各有之而推验七曜并循赤道按冬至极南夏至极北而
赤道常定于中无南北之异盖浑仪无黄道久矣太宗
异其说因诏为之至七年份成表里三重下据准基状如十字末树鳌足以张四表一曰
六合仪有天经双规金浑纬规金常规相结于四极之
内列二十八宿一日十二辰经纬三百六十五度二曰三辰仪圆径八尺有璇玑规月游
规列宿距度七曜所行转于六合之内三曰四游仪玄
枢为轴以连结玉衡游筭而贯约矩规又玄枢北树北辰南矩地轴傍转于内玉衡在玄
枢之间而南北游仰以观天之辰宿下于识器之晷度
皆用铜帝称善置于凝晖阁用之测候阁在禁中其后遂亡开元九年一行受诏改治新
厯欲知黄道进退而太史无黄道仪率府兵曹参军梁
令瓚以木为游仪一行是之乃奏黄道游仪古有其术而无其器昔人潜思皆未能得今
令瓚所为日道月交皆自然契合于推步尤要请更铸
以铜铁十一年仪成一行又曰灵台铁仪后魏斛兰所作规制朴畧度刻不均赤道不动
乃如胶柱以考月行迟速多差多或至十七度少不减
十度不足以稽天象授人时李淳风黄道仪以玉衡旋规别带白道傍列二百四十九交
以携月游法颇难术遂寝废臣更造游仪使黄道运行
以追列舍之变因二分之中以立黄道交于奎轸之间二至陟降各二十四度黄道内施
白道月环用究阴阳朏朧动合天运简而易从可以制
器垂象永传不朽于是玄宗嘉之自为之铭又诏一行与令瓚等更铸浑天铜仪圆天之
象具列宿赤道及周天度数注水激轮令其自转一昼

夜而天运周外络二输缀以日月令得运行每天西旋一周日东行一度月行十三度十九分度之七二十九转有余而日月会三百六十五转
而日周天以木柜为地平令仪半在地下晦明朔望迟速有准立木人二于地平上其一前置鼓以候刻至一刻则自击之其一前置钟以候辰
至一辰亦自撞之皆于柜中各施轮轴钩键关鑰交错相持至于武成殿前以示百官无几而铜铁渐涩不能自转遂藏于集贤院其黄道游仪
以古尺四分为度旋枢双环其表一丈四尺六寸一分广八分厚三分直径四尺五寸九分古所谓旋仪也南北斜两极上下循规各三十四度
表里画周天度其一面加之银钉使东西运转如浑天游旋中旋枢轴至两极首内孔径大两度半长与旋环径齐玉衡望筭长四尺五寸八分
广一寸二分厚一寸孔径六分衡旋于轴中旋运持正用窥七曜列星之阔狭外方内圆孔径一度有半周日轮也阳经双环表一丈七尺三寸
里一丈四尺六寸四分广四寸厚四分直径五尺四寸四分置于子午左右用八柱八柱相固亦表里画周天度其一面加之银钉半出地上半
入地下双间使枢轴及玉衡望筭旋环于中也阴纬单环外内广厚周径皆准阳经与阳经相衔各半内外俱齐面平上为天下为地横周阳环
谓之阴浑也平上为两界内外为周天百刻天顶单环表一丈七尺三寸纵广八寸厚三分直径五尺四寸四分直中国人顶之上东西当卯酉
之中稍南使见日出入令与阳经阴纬相固如鸟壳之裹黄南去赤道三十六度去黄道十二度去北极五十五度去南北平各九十一度强赤道单环表一丈四尺五寸九分纵八分厚三分直径四尺五寸八分赤道者当天之中二十八宿之位也双规运动度穿一穴古者秋分日在角五度今在轸十三度冬至日在牵牛初今在斗十度随穴退交不复差谬傍在卯酉之南上去天顶三十六度而横置之黄道单环表一丈五尺四寸一分横八分厚四分直径四尺八寸四分日之所行故名黄道太阳陟降积岁有差月及五星亦随日度出入古无其器规制不知准的斟酌为率疏阔尤甚今设此环置于赤道环内仍开合使运转出入四十八度而极画两方东西列周天度数南北列百刻可使见日知时上列三百六十策与用卦相准度穿一穴与赤道相交白道月环表一丈五尺一寸五分横八分厚三分直径四尺七寸六分月行有迂曲迟速与日行缓急相反古亦无其器今设于黄道环内使就黄道为交会出入六度以测每夜月离上画周天度数度穿一穴拟移交会皆用钢铁游仪四柱为龙其崇四尺七寸木槽及山崇一尺七寸半槽长六尺九寸高广皆四寸池深一寸广一寸半龙能兴云雨故以饰柱柱在四维龙下有山云

俱在水平槽上皆用铜宋熙宁七年沈括上浑仪浮漏景表三议浑仪议曰五星之行有疾舒日月之交有见匿求其次舍经躔之会其法一寓于日冬至之日日之端南者也日行周天而复集于表锐凡三百六十有五度四分日之几一而谓之岁周天之体日别之谓度度之离其数有二日行则舒月行则疾会而均别之曰赤道之度日行自南而北升降四十有八度而迤别之日黄道之度度不可见其可见者星也日月五星之所由有星焉当度之画者凡二十有八而谓之舍舍所以絜度度所以生数也度在天者也为之玑衡则度在器度在器则日月五星可转乎器中而天无所豫也天无所豫则在天者不为难知也自汉以前为厯者必有玑衡以自验其后虽有玑衡而不为厯作为厯者亦不复以器自考气朔星纬皆莫能知其必当之数至唐僧一行改大衍厯法始复用浑仪参实故其术所得比诸家为多臣尝厯考古今仪象之法虞书所谓璇玑玉衡唯郑康成粗记其法至洛下閤制圆仪贾逵又加黄道其详皆不存于书其后张衡为铜仪于密室中以水转之盖所谓浑象非古之玑衡也吴孙氏时王蕃陆绩皆尝为仪及象其说以谓旧以二分为一度而患星辰稠概张衡改用四分而复椎重难运故蕃以三分为度周丈有九寸五分寸之三而具黄赤道焉绩之说以天形如鸟卵小椭而黄赤道短长相害不能应法至刘曜时南阳孔挺制铜仪有双规正距子午以象天有横规判仪之中以象地有特规斜络天腹以候赤道南北植干以法二极其中乃为游规窥管刘曜太史令晁崇斛兰皆尝为铁仪其规有六其外四规常定一象地形一象赤道其二象二极其内二规可运转乃是挺所谓双规者也其制与挺法大同 【按孔挺铜仪单横规以象地乎沈括省文曰横规又有单规以象赤道沈括改名特规双环规以象二极枢亦名外双规沈括省文作双规又有双规以象二极沈括改名游规】 唯南北柱曲抱双规下有纵衡水平以银错星度小变旧法而皆不言有黄道疑其失传也唐李淳风为圆仪三重其外曰六合有天经双规金浑纬规金常规次曰三辰转于六合之内圆径八尺有璇玑规月游规所谓璇玑者黄赤道属焉又次曰四游南北为天枢中为游筩可以升降游转别为月道傍列二百四十九交以携月游一行以为难用而其法亦亡其后率府兵曹梁令瓚更以木为游仪因淳风之法而稍附新意诏与一行杂校得失改铸铜仪古今称其详确至道中初铸浑天仪于承天监多因斛兰晁崇之法皇佑中改铸铜仪于天文院始用令瓚一行之论而去取交有失得臣今辑古今之说以求数象有不合者十有三事又言浑仪之为器其属有二相因为用其在外者曰体以立

四方上下之定位其次曰象以法天之运行常与天随其在内玑衡玑以察纬衡以察经求天地端极三明匿见者体为之用察黄道降陟辰刺运徙者象为之用四方上下无所不属者玑衡为之用体之为器为圆规者四其规之别一曰经【按经即子午规李淳风六合仪所谓天经者是也】经之规二并峙正抵子午若车轮之植二规相距四寸夹规为齿以别去极之度北极出紘之上三十有四度十分度之八强南极下紘亦如之对衡二釭联二规以为一釭中容枢二曰纬【按纬即赤道】纬之规一与经交于二极之中若车轮之倚南北距极皆九十一度强夹规为齿以别周天之度三曰紘【按紘即地平】紘之规一上际当经之半若车轮之仆以考地际周赋十二辰以定八方紘之下有趺从一衡一刻沟受水以为平中沟为池以受注水四末建趺为升龙四以负紘凡浑仪之属皆属焉龙吭为纲维之四榘以为固象之为器为圆规者四其规之别一曰玑【按玑亦天经也第子午规不动而玑则可以左右旋转如赤极之各过极大圈为异耳】玑之规二并峙相距如经之度夹规为齿对衡二釭釭中容枢皆如经之率设之亦如经其异者经胶而玑可旋二曰赤道【按赤道与上文所云纬者第以一不动一左右旋为异理与玑同】赤道之规一刻玑十分寸之三以衡赤道赤道设之如纬其异者纬胶于经而赤道衡于玑有时而移度穿一窍以移岁差三月黄道【按此黄道即李淳风三辰仪之璇玑规而去其月游规耳】黄道之规一刻赤道十分寸之二以衡黄道其南出赤道之北际二十有四度其北八赤道亦如之交于奎角度穿一窍以铜编属于赤道岁差盈度则并赤道徙而西黄赤道夹规为齿以别均迤之度玑衡之为器为圆规二曰玑对峙相距如象玑之度【按象玑即上文象之为器其规之别一曰玑者是也与玑衡之玑同名易于相淆故以象玑别之】夹规为齿皆如象玑其异者象玑对衡二釭而玑对衡二枢贵于象玑天经之釭中三物相重而不相胶为间十分寸之三无使相切所以利旋也为横箫二两端夹枢属于玑其中夹衡为横一栖于横箫之间中衡为轆以贯横箫两末入于玑之罅而可旋玑可以左右以察四方之祥衡可以低昂以察上下之祥其说最为详备元初袭用金旧规环不协难复施用太史郭守敬创为简仪仰仪皆臻精妙其说谓昔人以管窥天宿度余分约为太半少未得其的乃用二线推测于余分纤微皆有可考简仪之制四方为趺纵一丈八尺三分去一以为广趺面上广六寸下广八寸厚如上广中布横轆三纵轆三南二北抵南轆北一南抵中轆趺面四周为水渠四隅及卯酉位为基础础为渠与四周渠相灌通

【按以上言趺及础轨】 北极云架柱二植于干艮二隅础上左右内向其势斜准赤道合贯上规环径二尺四寸中为距相交为斜十字中心为窍以受北极枢轴自云架柱斜上去趺面七尺二寸为横軌 【按此横軌乃横于南北云架柱上非趺面之横軌三纵軌三也】 自軌心上至窍心为六尺八寸又为龙柱二植于卯酉础中分之北北向斜植以拄北架 【按以上言北极架柱】 南极云架柱二植于卯酉础中分之南斜向坤巽二隅相交为上字其上与百刻环边齐在辰巳未申之间南倾之势准赤道自趺面斜上三尺八寸为横軌以承百刻环下边又为龙柱二植于坤巽二隅础上北向斜拄其端 【按以上言南极架柱】 四游双环径六尺中间相离一寸相连于子午卯酉当子午为圆窍以受南北极枢轴两面皆列周天度分起南极抵北极余分附于北极去南北枢窍两旁四寸各为直距距中心各为横关东西与两距相连关中心相连厚三寸为窍方八分以受窥衡枢轴窥衡长五尺九寸四分中腰为圆窍以受枢轴衡两端为圭首以取中缩去圭首五分各为侧立横耳高二寸二分广如衡面中为圆窍径六分其中心上下一线界之以知度分 【按以上言四游环】 百刻环径六尺四寸周布十二时百刻每刻作三十六分又为十字距所以承赤道环也百刻环内广面卧施圆轴四使赤道环旋转无涩滞之患其环陷入南极架一寸仍钉之 【按以上言百刻环】 赤道环径广厚皆如四游环面刻列舍周天度分中为十字距中心为窍以受南极枢轴界衡二各长五尺九寸四分广三寸衡首斜刻五分刻度分以对环面中腰为窍重置赤道环南极枢轴其上衡两端自长窍至衡首低厚倍之取二衡运转皆着环面而无低昂之失且易得度分也 【按以上言赤道环】 二极枢轴皆以钢铁为之长六寸半为本半为轴本之分寸一如上规距心适取能容轴径一寸北极轴中心为孔孔底横穿通两旁中出一线曲其本出横孔两旁结之孔中线留三分亦结之上下各穿一线贯界衡两端中心为孔下洞衡底顺衡中心为渠以受线直入内界长窍中至衡中腰复为孔自衡底上出结之 【按以上言界衡上用二线之法】 定极环广半寸厚倍之皆势穹窿中径六度度约一寸许极星去不动处三度仅容转周中为斜十字距广厚如环连于上规环距中心为孔径五厘下至北极轴心六寸五分 【按以上言定极环】 又置铜板连南极云架之十字方二寸厚五分北面刻其中心存一厘以为厚中为圆孔径一分孔心下至南极轴心亦六寸五分 【按以上言铜板】 又为环二其一阴纬环面刻方位取趺面纵横軌北十字为中心卧置之 【按以上言地平

环】其一曰立运环面刻度分施于北极云架柱下当卧环中心上属架之横轴下抵跌轴之十字上下各施枢轴令可旋转中为直距【按元史误直为置今改正】当心为窍以施窥衡令可俯仰用窥日月星辰出地度分佐四游环东西运转南北低昂【按佐字符史误作右今改正】凡七政列舍中外官去极度分【按元史误凡为几今改正】皆测之赤道环旋转与列舍距星相当即转界衡使两线相对凡日月五星中外官入宿度分皆测之百刻环转界衡令两线与日相对其下直时刻则昼刻也夜则以星定之比旧仪测日月五星出没而无阳经阴纬云柱之映其仰仪之制以铜为之形若釜置于砖台内画周天度唇列十二辰位盖俯视图天者也其浑象之制圆如弹丸径六尺纵横各尽周天度分赤道居中黄道出入赤道各二十四度弱明南北二京仪器一以元法为断万历中西洋人利玛窦制浑仪天球地球等器仁和李之藻撰浑天仪说发明制造施用之法其制不外于六合三辰四游之法但古法北极出地铸为定度此则子午提规可以随地度高下于用为便耳其器之最精者为浑象简平二仪图说具见本书

（臣）等谨按仪象之法古则由略而详今则由繁而简璇玑玉衡之器久佚不传洛下閤所制马郑所训粗得彷彿而已刘曜时南阳孔挺所制浑仪始有双环以象天经又有横单规以象地平斜一单规以象赤道则李淳风之六合仪基于此矣至其内双规置衡之制隋志云衡既随天象东西转运又自于双轴间得南北低昂是四游仪亦本于此所少者祇三辰仪耳夫推步之术先考日躔而太阳所行实由黄道黄道不定则七曜之行皆不可得而考故淳风所作三辰仪增置黄赤二道为璇玑一规则七曜所行转于六合之内其功最巨故自唐迄明虽代有增损而大致则不出于六合三辰四游之制然淳风论浑仪又无黄道并言贾逵张衡推验七曜并循赤道则非也后汉志贾逵造黄道铜仪是黄道之仪在逵以前官无其器而实始于逵也宋元嘉中太史令钱乐之所作浑仪亦有黄赤二道之规淳风所作隋志所载其制至元郭守敬简仪仰仪出而法愈简易且省阳经阴纬交映之弊又以二线代窥管可得度分纤微法亦较旧为密而确厥后西人之象限纪限诸仪则精益求精者耳

（臣）等又按简仪之四游环用法与浑仪之四游环同而其制迥异原则外有经纬相结今则双环平列无经纬掩映之患只如一环又原在浑仪之内为第三重今则取出在外而中分其环命为两极北极枢轴连于上规之心南极枢在赤道环心故其铭曰四游两轴二极是当

南极攸沓下乃天常也天常即百刻环与赤道相迭言天常不言赤道省文也上规贯北云架柱之端赤道百刻二环迭置承以南云架柱两云架柱斜倚之势并准赤道则二轴相应如绳正指两极而四游环可以运动其势恒与上下两规作正方折其方中矩故其铭词曰维北欹倾取轴榘应也其地平环亦旧浑仪所有然彼有六合仪之一规此则独用平环卧置以承立运立运环浑仪所无兹特设之以佐四游之用其制亦平环分度而中分之上下二枢上枢在北云架柱之横轴下枢在地平环中心二枢上下相应如垂绳之立而环以之运故谓之立运也简仪凡有五环一四游二百刻三赤道四地平五立运也五环惟百刻地平不动其四游赤道立运三环并能运转立运窥衡一所以测日月星辰何方出地及其距地事之高下也四游窥衡一所以测去极之几而度分也至于赤道一环则有二衡元史所谓界衡二者是也赤道一环而能施二衡者凡衡之枢在腰而此二衡者并以赤道之南极轴为轴重迭交加可开可合其不曰窥衡而曰界衡者界衡之手在线不设窥管也用线之注以线自衡枢间循衡底之渠贯衡端小孔上出至北极轴穿轴端所结线折而下行玉衡之又一端入贯衡小孔顺衡底渠至衡中腰结之如此则一线折而成两并自衡端上属北极其势斜直张而不弛半衡如句而线为之弦一衡首尾二线重衡则四线矣四线并起衡端而宗北极故铭曰上结北轴也测日之法移衡对日取前线之影正加后线则衡之首尾二线与太阳参直则衡端所指即太阳所到加时早晚时初时正何刻何分并可于百刻环得之则一衡已足故云测日用一也测星之法移衡就星用目睨视取衡上二线与其星相参直则为正对与用日景同理其用二衡并测者二十八舍皆有距星以命初度若欲知各宿距度广狭者法当以一衡正对距星又以一衡正对次宿距星则两衡间赤道度分即本宿赤道度分矣若欲知中外官星入宿深浅者以一衡对定所入宿距星复以一衡正对此星稽两衡间赤道即得此星入宿度分矣元史备载简仪之制而铭词弗录然测星兼二之用则史所未言也故略举铭词而并解之

（臣）等又按仰仪如釜所以象地平下半周之浑天其度必皆与地平上之天度相对待故先平度之从仪面之子午卯酉各作弧线交于仪之底即釜底之正中亦即地平上之天顶也次斜度之于地平下子午半规自地平午数南极入地度为斜度之中心为南极之入地度亦即北极之出地度也地平下之宗南极犹地平上之宗北极无二理也铭曰小大必周入地画也始周浸断浸极外也者言斜度之法也斜画之

度既宗南极则其纬度之常隐不见者每度皆绕极环行而成圆象虽有大小皆为全圆若过此以往离南极浸远则纬度之圆浸大其圆之在地平下者渐不能成全圆而为半圆者以其渐出南极界外也其云衡竿加卦巽坤内也以负缩竿子午对也未负机板窾纳芥也上下悬直与缴会也视日漏光何度在也巽坤者釜口南之正东西也子午者釜口之正南北也盖以东西横竿负南北直竿竿末则正直釜之中心其形如板板心为圆窍则竿末之窍正对釜底之中故云与缴会缴即釜底之中心也是其理即如地心与天顶相应矣凡浑圆上经纬之相冲必过其心机板之窍既在地心如浑圆心从此透日光以至釜底视其光之在何度即可以知天上日躔之度分矣故云视日漏光何度在也其可以测发敛者以纬度之迟速分之也其可以测薄蚀之起复方位者以日光自浑圆心透于釜底必成小小圆象而食分之浅深进退毕肖其中也元史志虽载仰仪铭词而其理未着故详解之

（臣）等又案西法之最精者莫如浑盖简平二仪要而论之亦即周髀盖天之法也浑盖平仪置北极于中心其度最密次昼长规又次赤道规以渐而疏其理易知又次为昼短规在赤道规外其距赤道度与昼长规等理宜取小而今为平仪所限不得不反展而大其经纬度视赤道更阔以疏然以稽天度而七政之躔离可知考时刻而方位之加临不爽者何也立法之意盖以人置身南极以望北极故近人目者其度加宽远人目者其度加窄视法之理宜然而分秒忽微一一与勾股割圆之切线相应也至长规以外度必更宽更阔而平仪中不能容不得不割而弃之矣考之周髀算经言天象盖笠地法覆盘又云笠以写天而其制弗详今以理揆之既地如覆盘即有圆突隆起之形则天如盖笠必为圆坳曲抱之象其制或当为半浑圆而空其中略如仰仪之制则于高明下覆之形体相肖矣是则必以北极为中心赤道为边际其赤道以外渐敛渐窄必别有法以相佐或亦是半圆内空之形而仍以赤道为边其赤道以南并取其距赤道远近求其经纬度数而图之至于南距赤道甚远不可见星之处亦遂可空之不用于是两器相合即周天可见之星象俱全备而无遗矣又或写天之笠竟展而平而以北极为心赤道为边用割圆切线之法以考其经纬度数则周天之星象可一一写其形容其赤道南之星亦展而平而以赤道为边察星赤道起数亦用切线度定其经纬则近赤道者距疏离赤道南者渐密而一一惟肖其不见之星亦遂可空之是虽不言南极而南极已在其中今西洋所作星图自赤道中分为两即此制也夫笠以写天既不出坳平二制而浑盖之器乃能于赤道外展

阔平边以得其经纬遂能依各方之北极出地度求其天顶所在及地平边际即昼夜长短之极差可见于是地平之经纬与天度之经纬相与参互错综而如指诸掌而于周髀之所言无一不相应即断其为周髀盖天之遗术可矣利氏名其器为浑盖通宪盖有以得其源流而不敢没其实也

（臣）等又按测天之器圆者心为浑平者即为盖简平仪以平圆测浑圆是亦盖天中之一器也今考其法可以知一岁中日道发南敛北之以可行知寒暑进退之节可以知昼夜永短之故可以用太阳高度测各地北极之出地即可用北极出地求各地逐日太阳之高度推极其变而置赤道为天顶即知其地之一年两度寒暑而三百六旬昼夜皆平若北极为天顶即知其地之能以半年为昼半年为夜而物有朝生暮获凡周髀中所言皆可知之故知其为盖天中之一器也但周髀云笠以写天与浑盖较亲切耳夫盖天以平写浑必将以浑圆之度按而平之浑盖之器如剖浑球而空其中仍仰置几案以通明如玻璃之片平掩其口则圆球内面之经纬度分映浮平面一一可数而变坳为平矣然其度必中密而外疏故用切线此如人在天中寘北极于中心测浑天之内面乃正视也简平之器则如浑球嵌于立屏之内仅可见其半球而以玻璃片悬于屏前正切其球四面距屏皆如球半径而无欹侧则球面之经纬度分皆可写记而抑突为平矣然其度必中阔而旁促故用正弦此如置身天外以测浑天之外面故以极至交图为边两极皆安于外周以考其出入地之度乃旁视也由是言之浑盖与简平异制而并得为盖天遗器审矣而一则用切线一则用正弦非是则不能成器因以知三角八线之法并皆古人所有而西人能用之非其所创也

钦定续通志卷一百一

●钦定续通志卷一百二 天文略六

天文略 【六】

刻漏

○刻漏

昔黄帝创观漏水制器取则以分昼夜其后因以命官周礼挈壶氏则其职也其法总以百刻分于昼夜冬至昼漏四十刻夜漏六十刻夏至昼漏六十刻夜漏四十刻春秋二分昼夜各五十刻日未出前二刻半而明既没后二刻半乃昏减夜五刻以益昼漏谓之昏旦漏刻皆随气增损冬夏二至之间昼夜长短凡差二十刻每差一刻为一箭冬至互起其首凡有四十一箭昼有朝有禺有中有晡有夕夜有甲乙丙丁戊 【

按周官司寤氏掌夜时郑注夜时谓夜早晚若今甲乙至戊贾公彦疏云甲乙则早时戌亥则晚时非也郑自以甲乙丙丁戊五分夜为定或讹
戊为戊贾疏遂乘其讹而言戌亥耳颜氏家训云汉魏以来谓为甲夜乙夜丙夜丁夜戊夜亦云一更二更三更四更五更是其证也】昏旦有
星中每箭各有其数皆所以分时代守更其作役汉兴张苍因循古制犹多疏阔及孝武考定星术下漏以追天度亦未能尽其理刘向洪范传
记武帝时所用法云冬夏二至之间一百八十余日昼夜差二十刻大率二至之后九日而增损一刻焉至哀帝时又改用昼夜一百二十刻寻
亦寢废至王莽窃位又遵行之光武之初亦以百刻九日加减法编于甲令为常符漏品至和帝永元十四年霍融上言官术率九日增减一刻
不与天相应或时差至二刻半不如夏术漏刻随日南北为长短乃诏用夏术漏刻依日行黄道去极每差二度四分为增减一刻凡用四十八
刻终于魏晋相传不改宋何承天以月蚀所在当日之衡考验日宿知移旧六度冬至之日其影极长测量晷度知冬至移旧四日前代诸漏春
分昼长秋分昼短差过半刻皆由气日不正所以而然遂议造漏法春秋二分昏旦昼夜漏各五十五刻齐及梁初因循不改至天监六年武帝
以昼夜为百刻分配十二辰辰得八刻仍有余分乃以昼夜为九十六刻一辰有全刻八焉至大同十年又改用一百八刻依尚书考灵曜昼夜
三十六顷之数【按周髀算经赵君卿注引考灵曜曰分周天为三十六头头有十度九十六分度之十四长日分于寅行二十四头入于戌
行十二头短日分于辰行十二头入于申行二十四头此之谓也又考李籍周髀音义全录赵注亦作三十六头隋志云三十六顷未详孰是】
因而三之冬至昼漏四十八刻夜漏六十刻夏至昼漏七十刻夜漏三十八刻春秋二分昼漏六十刻夜漏四十八刻昏旦之数各三刻先令祖
暉之为漏经皆依浑天黄道日行去极远近为用箭日率陈文帝天嘉中亦命舍人朱史造漏依古百刻为法周齐因循魏漏晋宋梁大同并以
百刻分于昼夜隋初用周朝尹公正马显所造漏经至开皇十四年鄜州司马袁充上晷影漏刻充以短影平仪均布十二辰立表随日影所指
辰刻以验漏水之节十二辰刻互有多少时正前后刻亦不同袁充素不晓浑天黄道去极之数苟役私智变改旧章其于施用未为精密开皇
十七年张胄元用后魏浑天铁仪测知春秋二分日出卯酉之北不正当中与何承天所测颇同皆日出卯三刻五十五分入酉四刻二十五分
昼漏五十刻一十分夜漏四十九刻四十分昼夜差六十分刻之四十仁寿四年刘焯上皇极术有日行迟速推二十四气皆有盈缩定日春秋

分定日去冬至各八十八日有奇去夏至各九十三日有奇二分定日昼夜各五十刻又依浑天黄道验知冬至夜漏五十九刻一百分刻之八十六昼漏四十刻一十四分夏至昼漏五十九刻八十六分夜漏四十刻一十四分冬夏二至之间昼夜差一十九刻一百分刻之七十二胄元及焯漏刻并不施用然其法制皆着在算术推验加时最为详审大业初耿询作古欹器以漏水注之献于炀帝帝善之因令与宇文恺依后魏道士李兰所修道家上法称漏制造称水漏器以充行从又作侯景分箭上水方器置于东都干阳殿前鼓下司辰又作马上漏刻以从行辨时刻唐大衍术晷漏中星略例曰日行有南北晷漏有长短然二十四气晷差徐疾不同者句股使然也直规中则差迟与句股数齐则差疾 【按一行此论即升度时差之法其所谓规中即过二极二至经圈也盖黄道与赤道斜交二分以后黄道如弦赤道如股故黄道一度赤道一度不足赤道之度既少则时刻加矣二至以腰围大圈之度当赤道距等小圈之度故黄道一度赤道一度有余赤道之度既多则时刻减矣】 随辰极高下所遇不同如黄道刻漏此乃数之浅者近代且犹未晓今推黄道去极与晷景漏刻昏距中星四术反复相求消息率旋相为中以合九服之实其步轨漏术爻统千五百二十象积四百八十辰八刻百六十分昏明二刻二百四十分各置其气消息衰依定气所有日每以陟降率陟减降加其分满百从衰各得每日消息定衰其距二分前后各一气之外陟降不等皆以三日为限各置初日陟降率依限次损益之为每日率乃递以陟减降加气初消息衰各得定衰其陟降率消息衰具详本术南方戴日之下正中无晷自戴日之北一度乃初数自此起差每度增之为每度差因累其差以递加初数满百为分分十为寸各为每度晷差又累其晷差得戴日之北每度晷数又各置其气去极度以极去戴日度减之得戴日之北度数各以消息定衰得每日晷差及每日中晷常数又加减之得每日中晷定数置消息定衰满象积为刻不满为分各递以息减消加其气初夜半漏得每日夜半漏定数其全刻以九千一百二十乘之十九乘刻分从之如三百而一为晨初余数各倍夜半漏为夜刻以减百刻余为昼刻减昼五刻以加夜即昼为见刻夜为没刻半没刻加半辰起子初算分得日出辰刻以见刻加而命之得日入宋初复挈壶之职专司辰刻署于文德殿门内之东偏设钟鼓楼于殿廷之左右其制有铜壶水称渴乌漏箭时牌契之属壶以贮水乌以引注称以平其漏箭以职其刻牌以告时于昼 【牌有七自卯至酉用之制以牙刻字填金】 契以发鼓于夜 【契有二一曰放鼓二曰止鼓制以木

刻字于上】常以卯正后一刻为禁门开钥之节盈八刻后以为辰时每时皆然以至于酉每一时直官进牌奏时正鸡人引唱击鼓一十五声

【惟午正击鼓一百五十声】至昏夜鸡唱放鼓契出发鼓击钟一百声然后下漏每夜分为五更更分为五点更以击鼓为节点以击钟为

节为更初皆鸡唱转点即移水称以至五更二点止鼓契出【凡放鼓契出禁门外击鼓然后衙鼓作止鼓契出亦然而更鼓止焉】五点击

钟一百声鸡唱击鼓是谓攒点至八刻后为卯时正四时皆用此法大中祥符三年春官正韩显符上铜浑仪法要其中有二十四气昼夜进退

日出没刻数立成之法熙宁七年沈括上浮漏议曰播水之壶三而受水之壶一曰求壶废壶【按废壶玉海作度壶据后文云枝渠之委所

谓废壶也以受废水则玉海作度为误】方中皆圆尺有八寸尺有四尺五分以深其食二斛为积分四百六十六万六千四百六十曰复壶如

求壶之度中离以为二元一斛介八斗【按元字下疑有讹误】而中有达曰建壶方尺植三尺有五寸其食斛有半求壶之水复壶之所求

也壶盈则水驰壶虚则水凝复壶之肋为枝渠以为水节求壶进水暴则流怒以摇复以壶又折以为介复为枝渠达其滥溢枝渠之委所谓废

壶也以受废水三壶皆所以播水为水制也自复壶之介以玉权酺于建壶建壶所以受水为刻者也建壶一易箭则发上室以泻之求复建壶

之泄皆欲迫下水所趣也玉权下水之槩寸矫而上之然后发则水挠而不躁也复壶之达半求壶之注玉权半复壶之达枝渠博皆分高如其

博平方如砥以为水槩壶皆为之冪无使秽游则水道不慧求壶之冪龙纽以其出水不穷也复壶士纽士所以生法者复壶制法之器也废壶

颯纽止水之湍颯所伏也铜史令刻执漏政也冬设燠燎以泽凝也注水以龙囓直颈附于壶体直则易浚附于壶体则难败复壶玉为之喙衔

于龙囓谓之权所以权其盈虚也建壶之执室旒涂而弥之以重帛室则不吐也管之善利者水所洩也非玉则不能坚良以久权之所出高则

源轻源轻则其委不悍而洩物不利箭不效于玑衡则易权洗箭而改画覆以玑衡谓之常不弊之术今之下漏者始尝甚密久复先大者管泐

也管泐而器皆弊者无权也弊而不可复寿者术固也察日之晷以玑衡而制箭以日之晷迹一刻之度以赋余刻刻有不均者建壶有眚也赘

者磨之创者补之百刻一度其壶乃善昼夜已复而箭有余才者权鄙也昼夜未复而壶吐者权沃也如是则调其权此制器之法也下漏必用

甘泉恶其湜之为壶眚也必用一源泉之冽者权之而重重则敏于行而为箭之情慄泉之卤者权之而轻轻则椎于行而为箭之情弩一井不

可他汲数汲则泉浊陈水不可再注再注则行利此下漏之法也箭如建壶之长广寸有五分三分去二以为之厚其阳为百刻为十二辰博牍
二十有一如箭之长广五分去半以为之厚阳为五更为二十有五筹阴刻消长之衰三分箭之广其中刻契以容牍夜算差一刻则因箭而易
牍僚匏箭舟也其虚五升重一镒有半锻而赤柔者金之美者也然后渍而不墨墨者其久必蚀银之有铜则墨铜之有锡则屑特铜久濡则腹
败而饮皆工之所不材也淳熙十四年国学进士会稽石万言淳熙术立元非是气朔多差不与天合南渡后浑仪草创不合制度无圭表以测
日景长短无机漏以定交食加时设欲考正其差而太史局官尚如去年测验太阴亏食自一更一点还光一分之后或一点还光二分或一点
还光三分以上或一点还光三分以下使更点乍疾乍徐随影走弄以肆欺蔽然其差谬非独此耳冬至日行极南黄道出赤道二十四度昼极
短故四十刻夜极长故六十刻夏至日行极北黄道入赤道二十四度昼极长故六十刻夜极短故四十刻春秋二分黄赤二道乎而昼夜等故
各五十刻此地中古今不易之法至王普复位刻漏又有南北分野冬夏昼夜长短三刻之差今淳熙术皆不然冬至昼四十刻极短夜六十刻
极长乃在大雪前二日所差一气以上自冬至之后昼当渐长夜当渐短今过小寒昼犹四十刻夜犹六十刻所差七日有余夏至昼六十刻极
长夜四十刻极短乃在芒种前一日所差亦一气以上自夏至之后昼当渐短夜当渐长今过小暑昼犹六十刻夜犹四十刻所差亦七日有余
及昼夜各五十刻又不在春分秋分之下至于日之出入人视之以为昼夜其长短有渐不可得而急与迟也今日之出入增减一刻近或五日
远或三四十日而一急一迟与日行常度无一合者请考正淳熙法之差俾之上不违于天时下不乖于人事送秘书省礼部详之明崇祯二年
礼部侍郎徐光启兼理算法请造象限大仪六纪限大仪三平悬浑仪三交食仪一列宿经纬天球一万国经纬地球一平面日晷三转盘星晷
三候时钟三望远镜三报允已又言定时之法当议者五事一曰壶漏二曰指南针三曰表臬四曰仪五曰晷漏壶水有新旧滑濇则迟疾异漏
管有时塞时磷则缓急异正漏之初必于正午初刻此刻一误靡所不误故壶漏特以济晨昏阴晦仪晷表臬所不及而非定时之本指南针术
人用以定南北辨方正位咸取则焉然针非指正子午曩云多偏丙午之间以法考之各地不同在京即则偏东五度四十分若凭以造晷冬至
午正先天一刻四十四分有奇夏至午正先天五十一分有奇若表臬者即考工匠人置槩之法识日出入之影参议日中之影以正方位今法

置小表于地平午正前后累测日影以求相等之两长影为东西因得中间最短之影为正子午其术简甚仪者本台故有立运仪测验七政高度臣用以较定子午于午前屡测太阳高度因最高之度即得最短之影是为南北正线既定子午卯酉之正线因以法分布时刻加入节气诸线即成平面日晷又今所用员石欹晷是为赤道晷亦用所得正子午线较定此二晷皆可得天之正时刻所谓昼测日也若测星之晷实周礼夜考极星之法古时北极星正当不动之处今时久渐移已去不动处三度有奇旧法不可复用故用重盘星晷上书时刻下书节气仰测近极二星即得时刻所谓夜测星也七年督修算法右参政李天经言辅臣光启言定时之法古有壶漏近有轮钟二者皆由人力迁就不如求端于日星以天合天乃为本法特请制日晷星晷望远镜三器臣奉命接管敢先言其略日晷者砉石为平面界节气十三线内冬夏二至名一线其余日行相等之节气皆两节气同一线也平面之周列时刻线以各节气太阳出入为限又依京师北极出地度范为三角铜表置其中表体之全影指时刻表中之锐影指节气此日晷之大略也星晷者治铜为柱上安重盘内盘镌周天度数列十二宫以分节气外盘镌列时刻中横刻一缝用以窥星法将外盘子正初刻移对内盘节气乃转移铜盘北望帝星与句陈大星使两星同见缝中即视盘面锐表所指为正时刻此星晷之大略也若夫望远镜亦名窥筭其制虚管层迭相套使可伸缩两端俱用玻璃随所视物之远近以为长短不但可以窥天象且能摄数里外物如在目前至于日晷星晷皆用措置得宜必须筑台以便安放天经又请造沙漏明初詹希元以水漏至严寒水冻辄不能行故以沙代水然沙行太疾未协天运乃于斗轮之外复加四轮轮皆三十六齿厥后周述学病其窍太小而沙易堙乃更制为六轮其五轮悉三十齿而微裕其窍运行始与晷协天经所请殆其遗意欤新法算书太阳在地平上人目可得而覩谓之昼太阳渐隐地平之下人目不见则谓之夜是昼夜者全由人居以分随方【极出地若干】随时【太阳躔某宫】其昼夜刻分皆可依法推算焉然而法算与目见恒异盖太阳体大算法皆以体心出地为昼始而人目以一见日轮即为昼始又日出没升降度有斜正不同又地平各曜出没之界受清蒙气有变凡此皆非人目能辨故术家立有视差法也一昼一夜平分为十二时共刻九十有六此恒率也其昼夜永短递迁之故则不但日行南陆北陆不同而已亦由北极出地高卑互异而永短因焉如赤道正过天顶之地两极合于地平平行其昼夜亦均停绝无永短又极在天顶赤道与地平平行其下昼

夜亦无长短之数但太阳百八十日恒见百八十日恒隐耳此外诸方各有永短顾其一岁之中昼夜均停者四日握算者引而伸之据四日之一日逐渐加减因得九十日之昼夜长短随可以推终岁之数也晨昏者分昼分夜之二界也太阳将出未出数刻之前其光东发星光渐为所夺是名为晨太阳已入迴光反照亦经数刻始迺然灭尽是名为昏其久暂分数亦因冬夏而分短长新法以日在地下十八度内为晨昏之限但太阳行此十八度又各方各宫不等因有五刻七刻十刻之别若论极高七十二度以上之地则夏月晨昏相切虽至丙夜无甚黯黑也

（臣）等谨按昼夜永短以日出入之早晚而分而早晚之故有二一由于日行之内外一由于人居之南北盖日行黄道与赤道斜交春秋分日行正当交点与地平交于卯酉地平上下之度相等故昼夜适均春分以后日行赤道内至夏至而极其距等圈与地平交于寅戌地平上下之度上多下少故昼长夜短秋分以后日行赤道外至冬至而极其距等圈与地平交于辰申地平上下之度上少下多故昼短夜长二分前后距交不远黄道势斜则纬行疾故数日而差一刻二至前后黄道势平则纬行迟故半月而差一刻此由日行之内外而生者至于人居有南北则北极出地有高下于是见日之出入早晚随地不同中国在赤道北北极出地上南极入地下故夏昼长冬昼短所居之地愈北北极愈高则永短之差愈多至于北极之下则赤道当地平夏则有昼而无夜冬则有夜而无昼盖以半年为昼半年为夜矣所居之地愈南北极渐低则永短之差渐少至于赤道之下则北极当地平而昼夜常均并无永短盖一岁为四时者各二矣赤道以南与北相反此由人居之南北而生者也考之古术周髀算经曰冬至昼极短日出辰而入申阳照三不覆九东西相当正南方夏至昼极长日出寅而入戌阳照九不覆三东西相当正北方日出左而入右南北行故冬至从坎阳在子日出巽而入坤见日光少故曰寒夏至从离阴在午日出艮而入干见日光多故曰暑大衍术曰二十四气晷差徐疾不同由句股使然也直规中则差迟与句股数齐则差疾皆言日行之内外也周髀算经言七衡曰北极之下不生万物北极左右夏有不释之冰中衡左右冬有不死之草五谷一岁再熟凡北极之左右物有朝生暮获赵君卿去北极之下从春分至秋分为昼从秋分至春分为夜此即以地纬度分寒暖五带昼夜永短各处不同之法又唐宋志所载各家步晷漏之阳城术其陟降加减之衰亦皆言人居之南北也

（臣）等又按孔颖达尚书正义马融云古制刻漏昼夜百刻昼长六十刻夜短四

十刻昼短四十刻夜长六十刻融之此言据日出见为
说天之昼夜以日出入为分人之昼夜以昏明为限日未出前二刻半为明日入后二刻
半为昏损夜五刻以裨于昼则昼多于夜复校五刻古
今算术所候皆云夏至之昼六十五刻夜三十五刻冬至之昼四十五刻夜五十五刻春
分秋分之昼五十五刻夜四十五刻此其不易之法也
然今太史细候之法则校常法半刻也从春分至于夏至昼渐长增九刻半夏至至于秋
分所减亦如之又如每气之间增减刻数有多有少不
可通而为率汉初未能审知率九日增减一刻和帝时待诏霍融始请改之郑注书纬考
灵曜仍云九日增减一刻犹尚未觉误也郑注此云日
长者口见之漏五十五刻日短者日见之漏四十五刻与算不同故王肃难云知日见之
漏减昼漏五刻不意马融为传已减之矣因马融所减
而又减之故日长为五十五刻因以多至反之取其夏至夜刻以为冬至昼短此其所以
误耳此所云昏明之限即朦影限也太阳未出之前已
入之后距地平一十八度皆有光故以十八度为朦影限然其时刻则随时随地不同其
随时不同者天度使然也差十八度此大圈之度也赤
道亦为大圈其度阔自赤道而南北皆距等圈其度狭近二分者以阔度当阔度故刻分
少近二至者以狭度当阔度故刻分多也随地不同者
地南则赤道距天顶近太阳正升正降其度径地北距天顶远太阳斜升斜降其度纾故
愈北则朦影之刻分愈多愈南则朦影之刻分愈少也
若北极出地四十八度半以上则夏至之夜半犹有光愈北则愈不夜矣南至赤道下则
二分之刻分极少而二至之刻分相等赤道以南反是

（臣）等又按古今漏法之刻分多寡不一皆可以便于算也术家有大刻有小刻
初一初二初三初四正一正二正三正四谓之大刻合
一日计之得之十六刻其不尽者置一初初于初一之上置一正初于正一之上谓之小
刻每刻正当大刻六分之一合一曰计之为初初者十
二为正初者十二又得四大刻合前为百刻宋王逵蠡海集言百刻之说每刻为六十分
百刻共得六千分散于十二时每时得五百分如此则
一时占八刻零二十分将八刻截作初正各四刻却将二十分零数分作初初正初微刻
各一十分也周礼挈壶氏注漏箭书夜共百刻礼记乐
记百度得数而有常注百度百刻也灵枢经漏水下百刻以分昼夜说文漏以铜受水刻
节昼夜百刻五代史马重绩传重绩言漏刻之法以中
星考昼夜为一百刻八刻六十分刻之二十为一时时以四刻十分为正此自古所用也
今失其传以午正为时始下侵末四刻十分而为午由
是昼夜昏晓皆失其正请依古改正从之玉海每时初行一刻至四刻六分之一为时正

终八刻六分之一则交入次时盖古制法昼夜共百刻
每刻六分之六小刻每小刻又十分之故昼夜六千刻每刻六十分也其散于十二辰
每一辰四大刻二小刻共得五百分汉建平中改百刻
为百二十刻若不改分则五十分为一刻十刻为一辰也梁天监中改用整刻九十六若
不改分则每刻得六十二分有半二法皆不若古用八
大刻二小刻之密回回昼夜刻法亦用整刻九十六分每一辰八整刻而以四刻为一小
时犹夫古法之有初初初一初二初三初四正初正一
正二正三正四也每小时六十分犹夫古法每刻六十分之意而变用之也其法度有初
度有一度亦犹古法有初初初一正初正一也周天用
三百六十度亦犹昼夜三十六顷之说也

钦定续通志卷一百二

●钦定续通志卷一百三 地理略一

地理略【一】

（臣）等谨按郑樵作通志地理略首列水道自序云郡县蕃布州道瓜分皆由水
以别故禹贡为万世不易之书苟明乎此则天下可运
于掌其意甚善次历代封畛叙自黄虞讫于隋季次唐开元十道图皆载某道领若干州
州所领之县则不著录凡以云略也然其载水道杂采
汉书地理志水经注杜佑通典之文摭拾成篇别无义例如略中先载湔若诸水并不详
其源流又不依禹贡次序编辑贡赋户口本书自有食
货专门于此不必登载今所续纂仍以水道冠之一本禹贡之九州岛为序而以水经注
所载各水加案附识至若黄河大江济水俱经御制诗文
睿订详核当恭载于皇朝地略中此不复叙云

水道

○水道

衡漳

漳水横流至河故曰横漳衡故横字也漳水有二异源而下流相合水经济浊漳水
出上党长子县西发鸠山清漳水出上党沾县西北少
山大龟谷浊漳水自长子县东径屯留县南又东径壶关县北又东北径潞县北又东径
武安县清漳水自涉县东南来注之谓之交漳口又东
径邺县武城平阳斥邱即裴列人肥乡斥漳诸县杜佑通典谓漳水至肥乡乃归于河

恒卫

恒水出曲阳县恒阳溪东流注于滹水而与滹合流卫水出灵寿县雷沟河南流至
县东南与滹沱合流水经注滹水出代郡西北高氏山
即温夷之水东合温泉水东径灵邱广昌诸县至曲阳县北恒水西来注之又东径唐县

安喜安国诸县又东北径博陵侯世阿陵诸县又东北至长城注于易水元和志滹沱水出代州繁峙县泰戏山西南流径唐林秀容诸县东径定襄五台诸县至灵寿县西南卫水来会遂合流东南径真定九门鼓城深泽五极饶阳诸县至瀛莫二州然滹沱自宋时筑边州塘泺河之故道已改

泽水 【按禹贡泽水在导河节以其在冀州故叙于衡漳恒卫之后】

泽水发源屯留下乱漳津即与清浊二漳合流

（臣）等谨案衡漳恒卫泽水皆禹贡所载冀州之水也冀州为古帝都以今輿地言之则直隶之顺天永平保定广平顺德五府及真定河间二府之西北境并宣化府以外讫于大辽水山西之太原平阳汾州潞安大同泽州六府辽沁二州河南之怀庆卫辉彰德三府皆古冀州之域后以其地广大故分置幽并二州

（臣）等又案冀州之水禹贡所未及载者水经注汾水出太原汾阳县北管涔山沁水出谒戾山清水出黑山淇水出沮洳山荡水出荡阴县洹水出上党兹氏县洙水出河东绛县涑水出黍葭谷文水出犬陵县原公水出兹氏县洞涡水出沾县晋水出晋阳县湛水出轵县易水出故安县圣水出上谷巨马水即涑水出代郡广昌县湿水出雁门湿余木出上谷濡水从塞外来大辽水出白平山以今輿地言之诸水皆在山西直隶即古冀州域也

济

汉书地理志水经注括地志皆载济水出河东王屋山为沇水沇即兗也潜行地下重源出温地西北平地有东西二源东南流注于河其后故道已湮

九河

尔雅九河曰徒骇太史马颊覆釜胡苏简絜钩盘鬲津故道多湮汉唐诸儒皆指燕齐之间一二故道以实之大约谓徒骇最北鬲津最南

雷夏

雷夏泽名水之所鍾为泽水经注雷泽在大成阳故城西北史记称舜渔于雷泽就时于负夏意是时雷泽负夏皆泽所弥漫故总名雷夏

澠沮

澠沮二水名元和志澠沮俱出濮州雷泽县西北平地

漯

水经注漯水出东武阳经高唐而注于海

（臣）等谨案济九河雷夏澠沮漯皆禹贡所载兗州之水也兗州东南据济西北

距河以今輿地言之则河南卫辉府之北境直隶之大名府及真定河间二府之东南境山东之东昌兖州府及济南青州二府之西北境

（臣）等又案兖州之水禹贡所未及载者水经注瓠子河故渎自句阳县西东径雷泽北东北过廩邱为濮水芹沟水出台县东南西北注于济水泲水出历县故城西南北流注于济以今輿地言之则济南兖州二府之地皆古兖州域也

潍淄

水经注潍水出琅琊箕县潍山东北径东武都昌诸县故城东入于海淄水出莱芜县原山东北至皮邱沈注于海

汶

水经注汶水出莱芜县原山西南注于济

（臣）等谨案潍淄汶皆禹贡所载青州之水也青州东北至海西南距岱以今輿地言之则山东之登州莱州青州济南诸府奉安府兖州府之北境其东北跨海为盛京奉天府讫于朝鲜国也

（臣）等又案青州之水禹贡所未及载者水经注巨洋水出朱虚县泰山东北注于海陶水出琅琊大弁山注于沂水以今輿地言之则青州府之益都县沂州府之沂水县地皆古青州域也

淮

水经注淮水出平氏县胎簪山东北过期思诸县又东过当涂诸县至广陵淮浦注于海

沂

汉书志沂水出盖县临乐子山水经注沂水出沂山水有二源南源世谓之柞泉北水所发俗谓之鱼穷泉俱东南流合成一川故汉志与水经异也东南径下邳诸县注于泗

大野

大野泽名周礼职方氏兖州泽薮曰大野按大野在徐之西兖之东周无徐州故以属兖元和志大野泽在巨野县东五里南北三百里东西百余里

泗

水经注泗水出鲁卞县故城东南桃墟西北西南径鲁城小沛诸县又东南径彭城下邳诸县又东径魏阳城北流注于海

（臣）等谨案淮沂大野泗皆禹贡所载徐州之水也徐州东至海北至岱南及淮以今輿地言之则江南徐州府之邳州宿迁睢宁及凤阳府之怀远宿州灵璧泗州之五河淮安府之桃源清河安东海州之赣榆山东兖州府

则滋阳曲阜濰阳邹县泗水滕县峯县金乡之南境济
濰州则鱼台嘉祥汶上之南境沂州府则郯城蒙阴沂水莒州日照之南境泰安府则东
平平阴新泰莱芜之南境青州府则诸城之南境也

彭蠡

彭蠡泽名后称彭蠡湖水经注贛水总纳十川注于彭蠡是也汉书地理志豫章郡
贛县有豫章水雩都县有湖汉水鄱阳县有鄱水余汗
县有余水艾县有修水南城县有盱水建城县有蜀水宜春县有南水南壑县有彭水又
长沙国安成县有庐水皆注于湖即总纳十川之水也

三江

郑康成书注左合汉为北江右会彭蠡为南江岷江居其中为中江三江俱会彭蠡
合为一江注海

震泽

震泽泽名一名具区周礼职方氏扬州泽藪曰具区汉书地理志会稽吴县具区在
西古文以为震泽

（臣）等谨案彭蠡三江震泽皆禹贡所载扬州之水也扬州北据淮南距海以今
輿地言之浙江江西福建皆是江南则江濰扬州庐州
安庆池州太平濰国徽州镇江常州苏州松江十二府滁和广德三州其凤阳府则凤阳
定远寿州颍州府则霍邱泗州则盱眙天长淮安府则
山阳盐城河南则元州之光山固始湖北则黄州府之罗山蕲水蕲州广济黄梅广东则
潮州府也

（臣）等又按扬州之水禹贡所未载其水经注与汉书地理志异者水经注载新
淦县有牵水淦水南昌县有浊水僚水彭泽县有循水
皆注于彭蠡之水也庐江水出庐山北过彭泽县注于江渐江水出黟县北过余杭注于
海以今輿地言之在江西浙江地皆古扬州域也

汉

杜佑通典秦州上邽县嶓冢山西汉水所出经嘉陵曰嘉陵江经闻中曰阆江汉中
金牛县嶓冢山禹导漾水东流为汉亦曰沔水

九江

九江即洞庭因九水所合故名九江

云梦

云梦泽名周礼职方氏荆州泽藪曰云梦汉书地理志南郡华容县云梦泽在南
沧浪 【按禹贡沧浪在导漾节以其地在荆州故叙于云梦之后又按史记沧作苍

】

沧浪即汉水蔡传集注武当县北四十里汉水中有洲曰沧浪洲水曰沧浪水

（臣）等谨案汉九江云梦沧浪皆禹贡所载荆州之水也荆州北据荆山南及衡山之阳以今舆地言之湖广武昌汉阳安陆荆州岳州长沙衡州常德辰州宝庆永州施南十二府郴靖二州襄阳府之南漳县德安府之安陆云梦应城应山及随州之南境黄州府之黄冈麻城黄安四川夔州府之东境广西则桂林府之全州是也

（臣）等又按荆州之水禹贡所未载者水经注湘水出零陵始安县阳海山东北流注长沙会资沅微澧四水同注洞庭夷水出巴郡鱼复县东注于江以今舆地言之在长沙岳州之界古荆州域也

伊洛瀍涧

水经注伊水出南阳县西蔓渠山东北注于洛洛水出京兆上洛县讙举山东北注于河瀍水出河南谷城县北山东与千金渠合又东注于洛涧水出新安县南白石山东南注于洛

荣波

荣波泽名即汉荥阳县地

荷水

经典释文荷水出山阳胡陵水经注荷水过湖陆县南东注于泗

孟猪 【尔雅作孟诸】

孟诸泽名元和志孟诸泽在虞城县西北十里周回五十里

（臣）等谨案伊洛瀍涧荣波荷孟诸皆禹贡所载豫州之水也豫州西南至荆山北距河水以今舆地言之河南则河南开封归德南阳汝宁五府及汝州直隶则大名府之东明长垣山东则曹州府之定陶曹县城武单县江南则颍州府之颍上太和亳州蒙城湖北则襄阳府之襄阳光化宜城枣阳谷城均州郟阳府之郟县保康及郟西之东境德安府随州之北境是也

黑水

黑水即泸水水经注黑水亦曰泸水即若水出姚州徼外吐蕃界中东北至叙州宜宾县注于江此禹贡梁州之黑水也

沱潜 【按荆州亦有沱潜疏谓发源梁州而注荆州】

汉书地理志沱水在蜀郡郫县西东入大江即郫江也括地志潜水一名复水今名龙门水源出绵谷县东龙门山合注于嘉陵江

沔

水经注沔水一名沮水出武都沮县东狼谷东南至沔县注于汉水

（臣）等谨案黑水沱潜沔水皆禹贡所载梁州之水也梁州东据华山之南西距黑水以今舆地言之则陕西汉中府之凤县兴安州及

商州之雒南山阳镇安商南秦州之两当阶州之成县文县湖北郢阳府之房县竹山竹溪及郢西县之西境四川则成都保宁顺庆龙安嘉定雅州潼川诸府印眉泸诸州是也

（臣）等又案梁州之水禹贡所未载者水经注青衣水出青衣县与沫水合桓水出蜀郡岷山注于南海延江水出犍为南广县东南注于酉水存水出犍为■〈存阝〉鄢县温水出牂牁夜郎县淹水出越巂遂久县徼外东南注于若水以今輿地言之皆四川境内古梁州域也

黑水

雍州黑水杜佑通典谓不可得详樊绰程大昌金履祥李元阳焦竑诸说各异然皆雍州之境按括地志言出伊吾南流绝三危山则当自炖煌北大碛外流至郡界南经白龙堆东三危山西又南经吐谷浑界中又南经吐蕃界中绕出河源之外而注于南海地理今释引水经注黑水出张掖鸡山至于炖煌此雍州之黑水也

弱水

地理今释弱水出陕西山丹卫城西有山丹河古弱水也出卫西南穷石山正流西至合黎山与张掖河合

泾渭纳 【汉书纳作芮】

汉书地理志泾水出安定郡泾阳县西渭水出陇西郡首阳县西南纳水出扶风汧县西北东注于泾

漆沮

寰宇记漆水自耀州同官县来经华原县合沮水汉书地理志沮水出北地直路县东西注于洛

泂

汉书地理志酆水出扶风郿县东北过上林苑注于渭

猪野

猪野泽名汉书地理志武威县东北有休屠泽古文以为猪野

（臣）等谨案黑水弱水泾渭纳漆沮泂猪野皆禹贡所载雍州之水也雍州西距黑水东据河以今輿地言之陕西则西安延安凤翔诸度及甘肃之平凉庆阳巩昌各府皆是也

钦定续通志卷一百三

●钦定续通志卷一百四 地理略二

地理略 【二】

五代

○五代

（臣）等谨按古来志地者皆略于五代欧阳修作职方考仅标大致薛居正作郡县志王溥作会要虽尚存十道之名然一代偶及数道一道偶及数州沿革废置殊多遗缺其余各书如欧阳忞舆地广记乐史太平寰宇记马端临舆地考于五代亦靡得而详焉信乎欧史之序曰五代乱世文字不完而时有废置不可考究也若其沿唐之制改郡称州而尤重藩镇加军额者为节度镇州较他州为重故职方考特悉之凡以言其大要也今续纂五代地理略其分注以职方考为主其有职方考所无而采之羣书者则加案语以别之职方考或有疑误之处则别加案语于其下以资考订云

唐之盛时以天下为十道而其势未分洎其衰也置军节度号为方镇兵骄则逐帅将强则叛上僖昭以来日益割裂天下别为十一南有吴浙荆湖闽汉西有岐蜀北有燕晋朱温据汴遂成篡弑建号曰梁其地西至泾渭南逾江汉北濒河东际海所有州曰汴 【唐宣武军梁为东都开封府】 洛 【唐东都河南府梁为西都】 雍 【唐上都京兆府梁改大安府置永平军】 兖 【泰宁军】 沂密青 【平卢军】 淄齐棣登莱徐 【武宁军】 宿郓 【天平军】 曹濮宋 【唐属宣武军节度梁徙军于此】 亳辉 【唐昭宗光化二年朱全忠以宋州之砀山虞城单父曹州之成武表置州三年置崇德军】 颍陈蔡许 【唐忠武军梁改匡国军】 汝郑滑 【唐义成军梁改宣义军】 襄 【唐山南东道节度梁初改忠义军后复为山南东道】 均房金邓 【唐属山南东道梁分置宣化军】 随郢泌 【唐唐州昭宗天佑三年朱全忠徙治泌阳表更名】 复安 【宣威军】 申蒲 【护国军】 孟 【河阳三城】 怀晋 【唐属护国军节度梁初置定昌军后改建宁军】 绛陕 【唐保义军梁改镇国军】 虢华 【唐镇国军梁改感化军】 商同 【唐匡国军梁改忠武军】 崇 【唐末李茂贞以华原县建耀州置义胜军梁末帝时茂贞义子温韬以州降梁梁改州为崇州军为静胜军】 邠 【静难军】 宁庆 【唐末李茂贞建安定军节度梁为武静军○案此据太平寰宇记】 衍郾 【保大军】 坊丹延 【唐属保大军节度梁置忠义军○案自崇州至此凡九州岛职方考皆注岐字考史梁太祖开平三年取郾坊丹延诸州干化五年邠宁二州俱降梁衍州寻亦为梁所取是此数州实为梁有不得分属之岐今删去岐字】 夏 【定难军】 银绥宥灵 【朔方军】 盐魏 【天雄军】 博贝卫澶相 【唐属天雄军节度梁分置昭德军】 邢 【唐属昭义军节度昭义旧统泽潞邢洺磁五州唐末孟方立

为节度使徙军额于此而泽潞二州入晋故其时有两
昭义军梁晋之争或入于梁或入于晋梁以邢州统洺磁二州为保义军】 洺磁 【改
曰惠州】 镇 【唐成德军梁改武顺军】 冀深赵
易祁定 【义定军】 凡七十有八晋发愤仇讎既克燕孽遂翦朱梁改晋称唐其地东
至海南至淮汉西度秦陇北尽燕代所有州曰并 【
西京太原府寻改北都】 洛 【复为东都】 雍 【复为西都废永平军】 魏 【东
京兴唐府寻改邺都】 汴 【复为宣武军】 兖
沂密青淄齐棣登莱徐宿郓曹濮宋 【改归德军】 亳单 【梁辉州后唐改为单州】
颍陈蔡许 【复为忠武军】 汝郑滑 【复为
义成军】 襄均房金邓 【改为威胜军】 随郢唐 【复泌州为唐州】 复安 【改
为安远军】 申蒲孟怀晋 【改为建雄军】 绛
陕 【复为保义军】 虢华 【复为镇国军】 商同 【复为匡国军】 耀 【复崇州
为耀州改顺义军】 邠懿庆衍鄜坊丹延 【
改为彰武军】 夏银绥宥灵盐岐 【唐末为李茂贞所据后唐庄宗同光初内附仍为
凤翔军○案此据顾祖禹方輿纪要】 陇泾 【岐
彰义军】 原渭武秦 【岐雄武军蜀天雄军】 成 【梁改为汶州末帝贞明初地入
于蜀后唐同光中复曰成州○案此据太平寰宇记
】 阶凤 【故属山南西道节度蜀升为武兴军后唐废○案此据太平寰宇记】 干
【唐末李茂贞置后为威胜军后唐同光中改为刺
史○案此据太平寰宇记】 博贝卫澶相 【复隶天雄军○案此据太平寰宇记】 邢
洺磁 【复惠州为磁州以邢洺磁三州为安国军
】 镇 【初为北都寻罢都复为成德军○按此据五代史庄宗本纪】 冀深赵易祁定
沧 【唐横海军节度梁末以张万进归顺改顺化
军后唐复为横海军○案此据五代会要】 景德瀛莫幽 【卢龙军】 涿檀蓟顺蔚朔
【振武军】 云 【大同军】 应 【故属大
同军明宗置彰国军】 新 【威塞军】 妫儒武寰 【本朔州马邑县梁开平中晋王
存勖于此置兴唐军后唐明宗天成初改置州○案
此据方輿纪要】 忻代 【雁门军】 岚石宪麟府 【唐末于此置府谷镇后唐庄宗
以代北诸部屡为边患乃升为府谷县寻建州○案
此据輿地考】 汾慈隰泽潞 【改为安义军】 沁辽凡一百二十有三 【案职方考
庄宗初起并代取幽沧有州三十五后又取梁魏博
等十有六州合五十一州以灭梁岐王称臣得七州同光破蜀已而复失惟得秦凤阶成
四州而营平二州已陷于契丹其增置州一合为一百
二十三州今考后唐以同光三年破蜀而孟知祥僭号在长兴应顺之闲是时山南诸州

尚未尽入于蜀其仅有秦凤阶成四州盖石晋时事又
考同光二年瓜沙入贡命权知归义留后曹义金为刺史节度使长兴初凉州亦来附四
年又置保顺军于洮州兼领鄯州是后唐所有州殆不
仅如职方考所称而已也又职方考既称一百二十三州而谱内统营平二州为一百二
十五州盖误今删去】 石晋兴戎契丹助虐石氏既立
遂献燕云一十六州于契丹合得后唐故地及取蜀之州一增置之州一其所有州曰汴
【东京开封府】 洛 【西京河南府】 雍 【
废后唐西京为晋昌军】 魏 【改兴唐府为广晋府寻升为邺都○案此据会要】 兖
沂密青淄齐棣登莱徐宿郓曹 【故属宣武军晋
置威信军】 濮宋亳单颍陈 【镇安军】 蔡许汝郑滑襄 【晋太祖天福七年降为
防御州所管均房二州割隶邓州○案此据会要】
均房金 【故属山南东道节度唐末置戎昭军已而废之遂入于蜀晋天福中得其地置
怀德军寻罢】 邓随郢唐 【复为泌州○案此据
輿地考】 复安 【罢安远军】 申蒲孟怀晋绛陕虢华商同耀邠宁庆衍威 【天福
四年置割灵州之方渠宁州之木波马岭三镇为属
而治方渠】 鄜坊丹延夏银绥宥灵盐岐陇泾原渭武秦成阶凤干博贝 【永清军】
卫澶 【故属天雄军节度晋天福九年改镇宁军
又于顿邱县置德清军○案此据会要及輿地考】 相 【彰德军】 洺邢磁镇 【改
为顺德军】 冀深赵易祁定沧景德忻代岚石宪麟
府 【案职方考晋置永安军汉罢之周复考五代会要汉高祖天福十二年升为永安军
节度隐帝干佑三年降为团练周世宗显德元年复
旧军额而輿地考亦云晋高祖赂契丹以河西之地契丹欲迁河西之民实辽东人心大
扰从阮因保险阨之少帝绝契丹诏从阮出师从阮乃
深入拔十余砦汉时从阮归命升府州为永安军是永安军之置实在汉初职方考疑误
】 并汾慈隰泽潞 【复为昭义军】 沁辽 【天
福三年改置昭义军于此四年废○案此据方輿纪要】 凡一百有九晋天福六年以刘
知远为河东节度使北京留守自出帝立与契丹绝盟
及契丹入汴徙晋主于黄龙府知远乃称尊号以令四方远近争应之契丹留其臣萧翰
守大梁遂北去时潞州及晋陕皆来附知远遣师从晋
陕而东萧翰遁去河南遂定契丹适有内变晋之旧境悉归于汉其所有州曰汴 【东京
开封府】 洛 【西京河南府】 魏 【改广晋
府为大名府仍曰邺都】 雍 【改为永兴军】 兖沂密青淄齐棣登莱徐宿郓曹 【
罢威信军】 濮宋亳单颍陈 【废镇安军】 蔡
许汝郑滑襄 【复为山南东道○案此据会要】 均房金邓随郢唐 【复泌州为唐州

○案此据太平寰宇记】复安【复为安远军

】申蒲孟怀晋绛陕虢华商同耀解【隐帝干佑元年置割河中之闻喜安邑二县为属而治解○案此据輿地考】邠宁庆衍威鄜坊丹

延夏银绥宥灵盐岐陇泾原渭武干博贝卫澶相邢洺磁镇【复为成德军】冀深赵易祁定沧景德忻代岚石宪麟府【初置永安军寻

废】并汾慈隰泽潞沁辽凡一百有六【案职方考云一百有六州而谱内所列乃一百十州考五代史后蜀世家契丹灭晋汉高祖起于太

原中国多故雄武军节度使何建以秦成阶三州附于蜀昶因遣孙汉韶攻下凤州于是悉有王衍故地是秦凤阶成四州汉初即入蜀而职方

考误以为汉有也今删去四州以符一百六州之数】汉干佑三年以郭威为邺都留守天雄军节度使会汉主诛僇大臣并及于威威遂举兵

趋汴寻即帝位代汉称周世宗奋其雄略西克阶成南收江南北奠三关其所有州曰汴【东京开封府】洛【西京河南府】雍兖【

太祖广顺三年罢泰宁军○案此据会要】沂密青淄齐棣登莱徐宿郟曹【彰信军】濮济【广顺二年置割郟州之巨野郟城兖州

之任城单州之金乡为属县而治巨野】宋亳单颍陈【复为镇安军】蔡许汝郑滑襄均房金邓【武胜军】随郢唐复安【罢安

远军】申蒲孟怀晋绛陕虢华【罢镇国军】商同【广顺二年废匡国军○案此据太平寰宇记】耀【罢顺义军】环【广

顺二年改威州为环州世宗显德四年降为通远军】邠宁庆衍解鄜坊丹延夏银绥宥灵盐岐陇泾原渭秦成阶凤干魏【废邺都仍旧为

天雄军○案此据輿地考】博贝【显德元年废永清军○案此据会要】卫澶相邢洺磁镇冀深【置静安军○案此据太平寰宇记

】赵易祁定沧德滨【显德三年置割棣州之渤海蒲台为属而治渤海】瀛莫雄【唐属涿易二郡显德六年克瓦桥关置治归义】

霸【显德六年克益津关置治永清县割莫州之文安瀛州之大城为属】府【复为永安军】慈隰泽潞扬【唐大都督淮南节度

吴改江都府南唐以天长县为军六合为雄州周复故】楚【吴顺化军节度南唐因之显德五年废】泗滁和光黄舒蕲庐【吴昭顺

军节度南唐因之周改为保信军】寿【吴忠正军节度南唐改曰清淮军周复为忠正军】海泰【本唐扬州海陵县南唐置州以扬

之兴化楚之盐城来属○案此据輿地考】濠通【唐海陵之东境南唐置静海制置院周升为静海军节度后置通州分其地置静海海门

二县为属而治静海】凡一百一十有八当梁晋时岐称臣蜀燕继灭闽亦为吴浙所并

存者五国而后唐同光中孟知祥以西川叛略有前蜀
诸州仍号蜀周广顺初刘崇自立于晋阳号北汉盖自江以南润常宣歙鄂升池饶信江
洪抚袁吉虔筠建汀剑漳泉凡二十一州为南唐 【
案职方考于漳泉二州下注留从効字盖其时二州虽为留从効所据然已羁属南唐今
删去】 自剑以南及山南西道益汉彭蜀绵眉嘉剑梓
遂果阆普陵资荣简邛黎雅维茂文龙黔施夔忠万兴利开通涪渝泸合昌巴蓬集壁渠
戎梁洋凡四十六州为蜀自湖南北潭衡澧朗岳道永
邵全辰凡十州为楚自浙东西杭越苏湖温台明处衢婺睦秀福凡十三州为吴越自岭
南北融郴连昭宜桂贺梧蒙严富柳象容邕端康封恩
春新高竇雷化韶藤白廉钦广横宾浔惠郁林英雄琼崖儋万安罗潘勤泷辨凡四十七
州为南汉自太原以北忻代岚石宪麟并汾沁辽凡十
州为北汉而荆归峡三州为南平四分五裂废置无常今第附见州名而已

钦定续通志卷一百四

●钦定续通志卷一百五 地理略三

地理略 【三】

宋

○宋

宋初有州百一十一太祖建隆四年取荆南得州府三平湖南得州十五监一干德
三年平蜀得州府四十六开宝四年平广南得州六十
八年平江南得州一十九军三太宗太平兴国三年陈洪进献地得州二钱俶入朝得州
十三军一四年平太原得州十军一七年李继捧来朝

【按宋史本纪李继捧献地系太平兴国七年事地理志误作五年今改正】 得州四

【按地理志注云雍熙元年复以四州授继捧自后

不复领职方考陕西路有绥德军即绥州熙宁三年收复隶延州元符二年改为军又有
银州银川城俱详见本志是绥银仍领职方所不领者

夏宥二州耳】 是时天下既一未入职方者惟燕云十六州至道三年分天下为十五路
仁宗天圣中析为十八神宗元丰中又析为二十三曰

京东西京西南北河北东西永兴秦凤河东淮南东西两浙江南东西荆湖南北成都
梓利夔福建广南东西徽宗崇宁四年复置京畿路宣

和四年又置燕山府及云中府路天下分路二十六哲宗元佑元年并京东西为京东
路京西南北为京西路凡二十四路曰京畿路领府一

开封 【因周之旧为东京】 曰京东路领府五济南 【济南郡兴德军节度本齐州政
和六年升为府 按齐州宋史误作济州考本路自

有济州此当是齐州今据王存元丰九域志及各书改正】 应天 【河南郡归德军节

度本宋州宋景德三年升为府】 袭庆 【鲁郡泰
宁军节度本兖州政和八年升为府】 兴仁 【济阴郡彰信军节度本曹州崇宁元年
升为府】 东平 【东平郡天平军节度本郓州大
观元年升大都督宣和元年改为东平府】 州十二青 【北海郡镇海军节度】 密
【高密郡 按郡名据元丰九域志增入】 沂 【
琅邪郡】 登 【东牟郡】 莱 【东莱郡】 淮 【北海郡 按郡名据欧阳忞舆地
广记增入】 淄 【淄川郡】 徐 【彭城郡武
宁军节度】 济 【济阳郡】 单 【矚郡】 濮 【濮阳郡】 拱 【保庆军节度本
开封府襄邑县崇宁四年置州】 军二淮阳 【
太平兴国七年以徐州下邳县置】 广济 【本汉定陶县唐为镇隶曹州宋太平兴国
二年建为军 按汉县唐镇据舆地广记增入】 曰
京西路领府五襄阳 【襄阳郡山南东道节度本襄州宣和元年升为府】 河南 【洛
阳郡因梁晋之旧为西京】 颍昌 【许昌郡忠
武军节度本许州元丰三年升为府】 淮宁 【淮阳郡镇安军节度本陈州宣和元年
升为府】 顺昌 【汝阴郡本颍州元丰二年升顺
昌军节度政和六年改为府】 州十二邓 【南阳郡武胜军节度】 随 【汉东郡崇
信军节度】 金 【安康郡 按地理志云干德五
年改昭化军节度考李攸宋朝事实干德五年改昭化军节度复为防御是节度之建未
久即废而史仍误载也】 房 【房陵郡保康军节度
】 均 【武当郡宣和元年升武当军节度】 郢 【富水郡】 唐 【淮安郡】 郑
【荥阳郡奉宁军节度】 滑 【灵河郡太平兴
国初改武成军节度】 孟 【济源郡河阳三城节度】 蔡 【汝南郡淮康郡节度
按宋朝事实升节度系景佑二年事宋史不载】 汝
【临汝郡政和四年升陆海军节度】 军二光化 【干德二年以襄州阴城镇建为军
析谷城县三乡置干德县隶焉】 信阳 【唐义阳
郡本申州开宝九年降为义阳军太平兴国元年改今名】 曰河北东路领府三大名
【魏郡庆历二年建为北京】 开德 【澶渊郡镇
宁军节度本澶州崇宁五年升为府】 河闲 【河闲郡瀛海军节度本瀛州大观二年
升为府赐军额】 州十一沧 【景城郡横海军节
度】 冀 【信都郡庆历八年升安武军节度】 博 【博平郡】 棣 【乐安郡】 莫
【文安郡】 雄 【易阳郡本唐涿州瓦桥关
宋政和三年赐郡名】 霸 【永清郡本唐幽州永清县地后置益津关周置霸州宋政
和三年赐郡名】 德 【平原郡】 滨 【大观二
年赐渤海郡名】 恩 【清河郡本贝州庆历八年改今名】 清 【干宁郡本唐幽州

芦台军之地五代晋陷契丹周平三关置永安县属
沧州宋大观二年建为州政和三年赐郡名】 军三永静 【唐景州周降为通远军宋
景德元年改今名】 信安 【太平兴国六年以霸
州淤口砦建破虏军景德二年改今名】 保定 【涿州新镇太平兴国六年建平戎军
景德元年改今名】 曰河北西路领府四真定 【
常山郡成德军节度】 中山 【博陵郡本定州太平兴国初改定武军节度政和三年
升为府】 信德 【巨鹿郡安国军节度本邢州宣
和元年升为府】 庆源 【赵郡庆源军节度本赵州崇宁四年赐军额宣和元年升为
府】 州九相 【邺郡彰德军节度】 浚 【平川
军节度本滑州黎阳县端拱元年建通利军政和五年升为州赐军额】 怀 【河内郡
】 卫 【汲郡】 洺 【广平郡】 深 【饶阳
郡】 磁 【滏阳郡】 祁 【蒲阴郡】 保 【清苑郡本莫州清苑县建隆初置保塞
军太平兴国六年建为州政和三年赐郡名】 军
四安肃 【本易州遂城县太平兴国六年建为静戎军景德元年改今名】 永宁 【雍
熙四年以定州博野县建宁边军景德元年改今名
】 广信 【本易州遂城县太平兴国六年建为威虏军景德元年改今名】 顺安 【
本瀛州高阳关砦淳化三年建为军】 曰河东路领
府三太原 【太原郡河东节度】 隆德 【上党郡昭义军节度本潞州崇宁三年升为
府】 平阳 【平阳郡建雄军节度本晋州政和
六年升为府】 州十四绛 【绛郡】 泽 【高平郡】 代 【雁门郡】 忻 【定襄
郡】 汾 【河西郡】 辽 【乐平郡】 宪
【政和五年赐名汾源郡】 岚 【楼烦郡】 石 【昌化郡】 隰 【大宁郡】 慈麟
【新泰郡镇西军节度】 府 【荣河郡靖
康军节度本永安军崇宁元年改军额政和五年赐郡名】 丰 【宁丰郡庆历元年元
昊攻陷州地嘉佑七年以府州蓼泊川掌地复建为州
政和五年赐郡名】 军七威胜 【太平兴国三年于潞州铜鞮县乱柳石围中建为军
】 平定 【太平兴国二年以镇州广阳砦建为军
】 岢岚 【太平兴国五年以岚州岚谷县建为军】 宁化 【按輿地广记太平兴国
四年析岚州地置宁化县五年于县置军宋史未详
】 火山 【本岚州之地太平兴国七年建为军 按輿地广记以岚州雄勇镇建为军
宋史未详】 保德 【淳化四年析岚州地置定羌
军景德元年改今名 按岚州马端临輿地考作宪州】 晋宁 【本西界葭芦砦元符
二年建为军】 曰永兴路领府四京兆 【京兆郡
永兴军节度】 河中 【河东郡护国军节度】 延安 【延安郡彰武军节度本延州

元佑四年升为府】庆阳【安化郡庆阳军节度
本庆州政和七年升节度宣和七年改为府】州十五解陕【陕郡太平兴国初改保
平军节度】商【上洛郡】虢【虢郡】同
【冯翊郡定国军节度】华【华阴郡镇潼军节度】耀【华原郡感德军节度】
鄜【洛郊郡保大军节度】丹【威宁郡
按郡名据金史地理志增入】坊【中部郡】银【银川郡五代以来为西夏所有
宋元丰中收复后崇宁四年建为银州五年为银川
城】环【旧降为通远军淳化五年复为州】邠【新平郡静难军节度】宁【
彭元郡宣和元年升兴宁军节度】醴【旧干
州政和七年更名】军四清平【本凤翔府盩厔县清平镇大观元年升为军】保安
【按舆地广记太平兴国二年以延州永安镇置
军宋史未详】绥德【唐绥州宋熙宁三年收复废为城隶延州元符二年改为军】
定边【元符二年筑定边城后改为军】曰秦凤
路领府一凤翔【扶风郡凤翔军节度】州十九秦【天水郡雄武军节度】陇【
汧阳郡】成【同谷郡】凤【河池郡】
阶【武都郡本唐武州陷西戎后复其地改置焉】渭【陇西郡政和七年升平凉军
节度】泾【安定郡太平兴国元年改彰化军
节度】原【原平凉郡】会【元符二年进筑】西安【元符二年以南牟会新
城建】熙【临洮郡镇洮军节度本武胜军熙
宁五年收复改名寻为州】河【安乡郡熙宁六年收复】巩【熙宁五年以泰州
古渭砦为通远军崇宁三年升州】岷【和政郡
熙宁六年收复】兰【金城郡元丰四年收复】洮【唐末陷吐蕃号临洮城宋大
观二年收复仍旧为洮州】廓【崇宁三年收复
】乐【旧邈川城元符二年收复建湟州大观三年加向德军节度宣和元年改为乐
州】西宁【西平郡宾德军节度旧青唐城元符
二年建鄯州崇宁三年改名并赐郡名军额】军五德顺【庆历三年即渭州陇干城
建为重】镇戎【本原州高平县地至道三年建
为军按宋地理志脱平字今据宋朝事实增入】怀德【本平夏城大观二年建为
军初名威远又改今名】震武【政和六年进筑
古骨龙城赐名震武城未几改为军】积石【本溪哥城大观三年建为军】曰两浙
路领府八临安【余杭郡淳化五年改宁海军节
度本杭州建炎三年升为府】绍兴【会稽郡镇东军节度本越州绍兴元年升为府
】平江【吴郡太平兴国三年改平江军节度本
苏州政和三年升为府】镇江【丹阳郡开宝八年改镇江军节度本润州政和三年

升为府】 庆元 【奉化郡建隆元年升奉国军节
度本明州绍兴五年升为府】 瑞安 【永嘉郡本温州咸淳元年升为府】 建德 【
新定郡宣和元年升建德军节度三年改遂安军节
度本睦州后改严州咸淳元年升为府】 嘉兴 【政和七年赐名嘉禾郡本秀州庆元
元年升为府嘉定元年升嘉兴军节度】 州六湖 【
吴兴郡景佑元年升昭庆军节度】 婺 【东阳郡淳化元年改保宁军节度】 常 【
毘陵郡】 台 【临海郡】 处 【缙云郡】 衢
【信安郡】 军一江阴 【按两浙自熙宁十年合为一路南渡后复分临安平江镇江
嘉兴四府湖常严三州江阴一军为西路余各府州
为东路今仍依地理志合为一路】 曰淮南东路领州十一扬 【广陵郡淮南节度】
亳 【谯郡大中祥符七年建集庆军节度】 宿
【符离郡开宝元年建保静军节度】 楚 【山阳郡】 海 【东海郡】 泰 【海陵
郡】 泗 【临淮郡】 滁 【永阳郡】 真
【仪真郡干德三年为建安军大中祥符六年升州政和七年赐郡名】 通 【政和七
年赐静海郡名】 安东 【本涟水军景定初升州
】 军四高邮 【开宝四年以扬州高邮县为军】 招信 【本泗州盱眙县建炎三年
升军】 淮安 【本泗州五河县咸淳七年置军】
清河 【咸淳九年置】 曰淮南西路领府二寿春 【寿春郡忠正军节度本寿州政和
六年升为府】 安庆 【同安郡德庆军节度本
舒州政和五年赐军额庆元元年升府】 州六庐 【庐江郡保信军节度 按郡名据
元丰九域志增入】 蕲 【蕲春郡】 和 【历阳
郡】 濠 【锺离郡】 光 【弋阳郡宣和初升光山军节度】 黄 【齐安郡】 军三
六安 【政和八年升县为军】 无为 【太平
兴国三年以庐州巢县无为镇建为军】 怀远 【宝佑五年置】 曰江南东路领府二
江甯 【建康军节度开宝八年复为升州天禧二
年升为府加军额 按地理志复为升州下衍节度二字今据宋朝事实删去】 甯国
【宣城郡甯国军节度本宣州干道二年升为府】
州五徽 【新安郡本歙州宣和三年改今名】 池 【池阳郡】 饶 【鄱阳郡】 信
【上饶郡】 太平 【开宝八年改南平军太
平兴国二年升为州 按顾祖禹方輿纪要云南唐置新和州寻改雄远军开宝中改南
平军宋史未详】 军二南康 【太平兴国七年以江
州星子县建为军】 广德 【太平兴国四年以宣州广德县建为军】 曰江南西路领
府一隆兴 【豫章郡镇南军节度本洪州隆兴三
年升为府】 州六江 【浔得郡建炎元年升定江军节度】 贛 【南康郡昭信军节

度本虔州绍兴二十二年改今名】 吉 【庐陵郡】 袁 【宜春郡】 抚 【临川郡】 瑞 【绍兴十三年赐高安郡名本筠州宝庆元年改今名】 军四兴国 【太平兴国二年以鄂州永兴县置永兴军三年改今名】 南安 【淳化元年以虔州大庾县建为军】 临江 【淳化三年以筠州之清江建为军】 建昌 【旧建武军太平兴国四年改】 曰荆湖北路领府三江陵 【江陵郡荆南节度本荆州建炎四年置荆南府淳熙中改今名】 德安 【安陆郡安远军节度本安州宣和九年升为府 按方輿纪要云熙宁初升为德安府以旧为潜邸故也与宋史异】 常德 【武陵郡常德军节度本朗州干道元年升为府】 州九鄂 【江夏郡武昌军节度】 复 【景陵郡】 澧 【澧阳郡】 峡 【夷陵郡】 岳 【巴陵郡宣和元年升岳阳军节度】 归 【巴东郡】 辰 【卢溪郡】 沅 【潭阳郡本懿州熙宁七年收复】 靖 【本诚州熙宁九年收复崇宁二年改今名】 军三荆门 【按曾巩隆平集开宝五年以荆门镇为军宋史未详】 汉阳寿昌 【本鄂州武昌县嘉定为府淳佑六年加军额】 曰荆湖南路领府一宝庆州六潭 【长沙郡武安军节度】 衡 【衡阳郡】 道 【江华郡】 永 【零陵郡】 郴 【桂阳郡】 全军三茶陵 【本衡州茶陵县绍兴九年升为军】 桂阳 【本桂阳监绍兴三年升为军】 武冈 【本邵州武冈县崇宁五年升为军】 曰福建路领府一建宁 【建安郡端拱元年升建宁军节度本建州绍兴二十三年升为府】 州五福 【长乐郡威武军节度】 泉 【清源郡太平兴国初改平海军节度】 南剑 【剑浦郡本剑州太平兴国四年加南字】 漳 【漳浦郡】 汀 【临汀郡】 军二邵武 【太平兴国五年以建州邵武县建为军】 兴化 【太平兴国四年以泉州游洋百丈二镇地置太平军寻改今名】 曰成都府路领府三成都 【蜀郡剑南西川节度】 崇庆 【唐安郡崇庆军节度本蜀州绍兴十年加军额淳熙四年升府】 嘉定 【犍为郡嘉庆军节度本嘉州庆元元年升府开禧元年加军额】 州十眉 【通义军】 彭 【蒙阳郡】 绵 【巴西郡】 汉 【德阳郡】 邛 【临邛郡】 简 【阳安郡】 黎 【汉源郡】 雅 【卢山郡】 茂 【通化郡】 威 【维川郡本维州景佑三年改今名】 军二永康 【唐镇静军宋太平兴国三年改今名】 石泉 【本绵州石泉县政和七年建为军】 监一仙井 【本陵州熙宁五年为陵井监宣和四年改今名】 曰潼川府路领府三潼川 【梓潼郡剑南东川节度本梓州

重和元年升为府】 遂寔 【遂寔郡武信军节度
本遂州政和五年升为府】 顺庆 【南充郡本果州宝庆三年升为府】 州八资 【
资阳郡】 普 【安岳郡】 昌 【昌元郡】 叙
【南溪郡本戎州政和四年改今名】 泸 【泸川郡宣和中升泸川军节度】 合 【
巴川郡】 荣 【和义郡】 渠 【邻山郡】
军三长寔 【本羁縻州政和中建为军】 怀安 【干德五年以简州之金水县建为军
】 寔西 【开宝二年建广安军咸淳中建为军
】 监一富顺 【本泸州富义县干德四年升为监太平兴国初改今名】 曰利州路领
府二兴元 【汉中郡山南西道节度】 隆庆 【
普安郡普安军节度本剑州隆兴二年赐军额绍熙元年升为府】 州十利 【益川郡
景佑四年改寔武军节度】 洋 【洋川郡景佑四
年改武康军节度】 阆 【阆中郡干德四年改安德军节度】 巴 【清化军】 文
【阴平郡】 沔 【顺政郡本兴州开禧三年改
今名】 蓬 【咸安郡】 龙 【江油郡政和五年改为政州绍兴元年复旧】 金 【
安康郡昭化军节度】 西和 【和政郡本岷州
绍兴十七年改今名】 军二大安 【本三泉县至道二年建为军】 天水 【绍兴初
秦州入于金分置南北天水县嘉定元年升为军成
阶凤皆改隶利州】 曰夔州路领府三绍庆 【黔中郡武泰军节度本黔州绍定元年
升为府】 咸淳 【南宾郡本忠州咸淳元年升为
府】 重庆 【巴郡本渝州崇寔元年改恭州后升为府】 州九夔 【云安郡寔江军
节度】 施 【清江郡】 万 【南浦郡】 开
【盛山郡】 达 【通川郡本通州干德三年改今名】 涪 【涪陵郡】 珍 【大观
二年建】 思 【政和八年建】 播 【乐源
郡大观二年建】 军三云安 【开宝六年以夔州云安县建为军】 梁山 【高粱郡
开宝二年以万州丕氏屯田务建军】 南平 【熙
寔八年收西蕃部以恭州南川县铜佛坝地建为军】 监一大寔 【开宝六年以夔州
大昌县盐泉所建为军】 曰广南东路领府三英德
【浚阳郡本英州宣和二年赐郡名庆元元年升为府】 肇庆 【高要郡肇庆军节度
本端州元符三年升兴庆军节度重和元年升为肇
庆府并改军额】 德庆 【晋庆郡永庆军节度本康州绍兴十四年升为府并赐军额
】 州十二广 【南海郡清海军节度】 韶 【始
兴郡】 循 【海丰郡】 潮 【潮阳郡】 连 【连山郡】 梅 【义安郡本潮州程
乡县南汉置敬州开宝四年改政和二年赐郡名
】 南雄 【保昌郡本雄州开宝四年加南字宣和二年阳郡名】 贺 【临贺郡】 封

【临封郡】 新 【新兴郡】 南恩 【恩平郡本恩州庆历八年加南字】 惠 【宣和二年赐名博罗郡 按宋朝事实天禧五年改禎州为惠州輿地考亦云以犯仁宗御名故改宋史未详】 曰广南西路领府二静江 【始安郡静江军节度本桂州绍兴三年升为府】 庆远 【龙水郡庆远军节度本宜州宣和元年赐军额咸淳元年升为府】 州三十五容 【普安郡甯远军节度】 邕 【永甯郡建武军节度】 融 【融水郡大观三年升清远军节度】 象 【象郡】 昭 【平乐郡】 梧 【苍梧郡】 藤 【感义郡】 龚 【临江郡】 浔 【浔江郡】 柳 【龙城郡】 贵 【怀泽郡】 宾 【安城郡】 横 【甯浦郡】 化 【陵水郡本辩州太平兴国五年改今名】 高 【高凉郡】 雷 【海康郡】 钦 【甯越郡】 白 【南昌郡】 郁林 【郁林郡】 廉 【合浦郡】 琼 【琼山郡政和元年建靖海军节度】 平 【怀远郡崇甯四年于王口砦建怀远军寻改为州宣和二年赐郡名】 从 【崇甯四年于中古州置格州五年改今名政和初废】 允 【崇甯四年于安口隘置州政和初废】 庭 【大观元年以宜州河池县置州四年废】 孚 【大观元年以地州建隆县置州宣和三年废】 溪 【大观元年以宜州思恩县带溪砦置州四年废】 镇 【大观元年于琼州黎母山心置州赐静海军额政和元年废】 地文兰那 【以上四州俱崇甯五年纳土】 观 【大观四年于高峰砦置州绍兴四年废】 隆兑 【二州俱政和四年置宣和三年并废】 军四南甯 【本儋州熙甯六年废为昌化军绍兴中改今名】 万安 【万安郡旧万安州熙甯七年废为军】 吉阳 【本崖州熙甯六年废为朱崖军绍兴中改今名】 延德 【大观元年置军政和元年废】 曰燕山府路领府一燕山 【范阳郡卢龙军节度本唐幽州契丹为南京又改号燕京宋宣和四年改燕山府并改郡名军额】 州九涿 【涿水郡威行军节度】 檀 【横山郡镇远军节度】 平 【渔阳郡抚甯军节度】 易 【遂武郡】 营 【平卢郡】 顺 【顺兴郡】 蓟 【广川郡】 景 【滦川郡以上八州五代时皆陷契丹宋宣和四年收复赐郡名军额】 经 【本蓟州玉田县宣和六年建为州】 曰云中府路领府一云中 【大同军节度本云州契丹为西京宋宣和五年收复改为云中府】 州八武应朔蔚奉圣 【本新州契丹改为奉圣州】 归化 【本毅州五代唐改为武州契丹改为归化州】 儒妁 【以上八州五代时皆陷契丹宣和五年收复】 大约自建隆初讫于治平之末州郡沿

革无大增损熙宁始务辟土崇宁以来凿空驾虚驰

鹜于元符封域之表斥大土靡有宁岁凡所建州军关城砦堡纷然莫可胜纪高宗南渡中原陕右尽入于金东画长淮西割商秦之半以散

关为界所存者两浙两淮江东西湖南北西蜀福建广东广西十五路而已今据宋史所定首京畿终燕云悉着于篇而宋之疆宇大略可见矣

钦定续通志卷一百五

●钦定续通志卷一百六 地理略四

地理略 【四】

辽

○辽

（臣）等谨案辽代地理分为五道其各道之州军城有直属京者有属之府者有属之州者今惟取属京之州军城悉着于篇其余各府州所领者概行省去以归简当

辽国其先曰契丹本鲜卑之地世居辽泽南控黄龙北带潢水冷陁屏右辽河漙左当元魏时有地数百里至唐达呼尔氏蚕食扶余室韦

奚靺鞨之区地方二千余里唐太宗贞观三年以其地置元州寻置松漠都督府建八部为州各置刺史德吉部曰峭落州赫伯部曰弹汗州都

呼部曰无逢州芳阿部曰羽陵州图勒彬部曰日连州芮奚部曰徒河州卓津部曰万丹州富部曰匹黎赤山二州以达呼尔氏库克为使持节

十州军事迨于五代契丹约尼氏益强辟地东西三千里太祖以德呼勒部之众代约尼氏起临潢建皇都更约尼氏八部曰达尔结部伊斯琿

部舍琿部诺尔威部丕勒摩部纳古济部济勒锦部实袞部每部设刺史又西兼突厥东并渤海土宇日拓太宗援立石晋得燕云十六州以皇

都为上京升幽州为南京改南京为东京圣宗城中京兴宗升云州为西京于是五京备焉又以征伐俘户建州襟要之地加以萨纳置投下州

凡五道总京五府六 【案府六谓定理率宾铁利安定长岭镇海也而龙州亦曰黄龙府霸州亦曰兴中府开州亦曰开封府是有九府】 州

军城百五十有六上京道曰上京临潢府 【本汉辽东郡西安平之地辽太祖神册三年城之名曰皇都天显十三年更名上京府曰临潢

案辽史本纪天显无十三年十三年即太宗会同元年也本纪书此在会同元年】 道所辖州曰祖 【天成军上节度本辽右八部实默里地

太祖建州】 怀 【奉陵军上节度本唐归城州地辽世宗大同元年置州】 庆 【元宁军上节度本太保山黑河之地圣宗建州】 泰

【德昌军节度本契丹二十部族放牧之地后建州】 长春 【韶汤军下节度本鸭子

河春猎之地兴宗重熙八年置州】 乌 【静安军
刺史本乌丸之地辽建为州】 永 【永昌军观察景宗干亨三年置】 仪坤 【启圣
军节度本契丹右大部地太祖建为州】 龙化 【
兴国军下节度本汉北安平县地辽太祖置州】 降圣 【开国军下刺史本大部东
楼之地穆宗建州】 饶 【匡义军中节度本唐饶
乐府地贞观中置松漠府辽太祖建州】 又投下州曰徽 【宣德军节度景宗女秦晋
大长公主置】 懿 【广顺军节度圣宗女燕国长
公主置】 渭 【高阳军节度秦国王隆庆女韩国长公主置】 壕 【本辽东西安平
县地国舅宰相置州】 原 【本辽东北安平县地
国舅金德置州】 福 【本辽东北安平县地国舅萧懿置州】 横 【汉辽阳县地国
舅萧克忠置州】 凤 【本藁离国故地渤海之安
懿郡境南王府五帐分地】 遂 【本高州地南王府五帐放牧于此】 丰 【汉辽泽
大部落约尼氏赛音牧地】 顺 【汉辽队县地横
帐南王府建州】 闾 【罗古王牧地】 松山 【本辽泽大部落横帐布库王牧地】
豫 【横帐陈王牧地】 窳 【本达呼尔氏勒
牧山横帐固窳王牧地】 又边防州曰静 【观察本泰州之金山天庆六年升】 镇
【建安军节度本古哈屯城统和二十二年置】 招
【绥远军刺史开泰二年置】 城曰和坦 【本回鹘哈屯城】 静边 【本契丹二十
部族水草地】 皮被河塔里珠 【太康九年置
】 东京道曰东京辽阳府 【本朝鲜之地后为渤海大氏所有号中京显德府辽太祖
天显三年升为南京十三年改为东京府曰辽阳】
道所辖府曰率宾 【刺史故率宾国地渤海置府 案渤海置府据唐书渤海传增入】
定理 【刺史故挹娄国地渤海置府升案渤海置
府据 盛京通志增入】 铁利 【刺史故铁利国地】 安定长岭镇海 【防御】 黄
龙 【亦曰龙州本渤海扶余府辽太祖改置】
开封 【亦曰开州镇国军节度本濊貊地高丽为庆州渤海为东京龙原府辽圣宗开泰
中置】 州曰定 【保宁军高丽置】 保 【宣
义军节度高丽置】 辰 【奉国军节度本高丽盖牟城渤海改为盖州又改辰州】 卢
【玄德军刺史本渤海杉卢郡】 铁 【建武军
刺史本汉安市县高丽为安市城渤海置州】 兴 【中兴军节度本汉海冥县地渤海
置州】 汤 【本汉襄平县地】 崇 【隆安军刺
史本汉长岑县地渤海置州】 海 【南海军节度本沃沮国地高丽为沙卑城渤海号
南京南海府】 淶 【鸭淶军节度本高丽故国渤
海号西京鸭淶府】 显 【奉先军上节度本渤海显德府地辽世宗置州】 宗 【下

刺史圣宗置】干【广德军上节度本汉无虑县地圣宗统和三年置】贵德【窳远军节度本汉襄平县地辽太宗时察克以所俘汉民置后没入焉】渾【昭德军中节度本挹娄国地渤海置州】集【怀众军下刺史本汉险渎县地高丽为霜岩县渤海置州】广【防御汉属襄平县高丽为当山县辽太祖建铁利州圣宗开泰七年改今名】辽【始平军下节度本佛窳国城渤海为东平府辽太祖改为州】遂【刺史本渤海美州地辽采访使耶律佛德置州穆宗时没入焉】通【安远军节度本扶余国王城渤海号扶余城辽太祖改龙州圣宗更今名】韩【东平军下刺史本藁离国高丽置郑颉府辽太祖置三河榆河二州圣宗并二州置韩州】双【保安军下节度本挹娄故地渤海置安定郡额里森王置州后没入焉】银【富国军下刺史本渤海富州辽太祖改今名】尚【镇远军下节度本汉襄平县地辽太祖置州案本志下文又有尚州据金史地理志铜山县注作同州镇安军疑此尚字为同字之讹镇安镇远则未知孰是也】咸【安东军下节度本高丽铜山县地渤海置铜山郡辽开泰八年置州】信【彰圣军下节度本越喜故城渤海置怀远府辽开泰初置州案金史地理志作开泰七年建】宾【怀化军节度本渤海城辽统和中升州】湖【兴利军刺史渤海置】渤【清化军刺史渤海置】郢【彰圣军刺史渤海置】铜【广利军刺史渤海置】涑【刺史渤海置】冀【永安军圣宗置】东【以渤海户置】尚【以渤海户置】吉【福昌军刺史】麓【下刺史渤海置】荆【刺史】懿【窳昌军节度太平三年越国公主置道宗清窳七年进入】滕【昌永军刺史】窳【观察统和二十九年置】衍【安广军防御】连【德昌军刺史】归【观察太祖平渤海置】苏【安复军节度高丽南苏城辽兴宗置州】复【怀德军节度兴宗置】肃【信陵军刺史重熙十年置】安【刺史】荣率荷源渤海窳江【混同军观察清窳中置】河【德化军】祥【瑞圣军节度兴宗置】城曰顺化【向义军下刺史开泰三年置】来远【统和中置】中京道曰中京大定府【本汉新安平县唐置饶乐都督府辽统和二十五年城之号曰中京府曰大定】道所辖府曰兴中【彰武军节度本唐营州辽太祖改建霸州重熙十年升为府】州曰成【兴府军节度晋国长公主置军曰长庆初隶上京后改军名来属】宜【崇义军上节度本辽西奚县地兴宗置州】锦【临海军中节度本汉辽东无虑

县慕容皝置西乐县辽太祖置州】 川 【长窳
军中节度本唐青山县地辽太祖弟明王安图置白川州后没入者曰川州】 建 【保
静军上节度本唐昌乐县辽太祖置州】 来 【归
德军下节度本唐瑞州故地辽圣宗太平元年置州】 南京道曰南京析津府 【本幽
州唐置大都督府五代晋以辽有援立之功割幽州等
十六州以献太宗升为南京府曰幽都开泰元年改今名】 道所辖州曰平 【辽兴军
上节度】 西京道曰西京大同府 【本云州石晋
割献辽重熙十二年升为西京府曰大同】 道所辖州曰丰 【天德军节度本唐丰州
都督府辽太祖神册五年复为州】 云内 【开远
军下节度本中受降城地辽初置代北云朔招讨司改云内州 案续輿地考及方輿纪
要并云辽置开远军清窳初改云内州】 窳边 【镇
西军下刺史本唐隆镇辽置州】 奉圣 【武定军上节度本唐新州石晋割献太宗改
今名】 蔚 【忠顺军上节度石晋割献升军】 应
【彰国军上节度】 朔 【辽升顺义军下节度】 东胜 【武兴军下刺史】 金肃
【重熙十二年置】 军曰天德 【天德军节度
使】 河清 【重熙十二年置】 其地东至于海西至金山暨于流沙北至胘胸河南至
白沟盖幅员万里云

钦定续通志卷一百六

●钦定续通志卷一百七 地理略五

地理略 【五】

金

○金

金之先世居肃慎地太祖起兵伐辽攻黄龙府南取辽阳进克临潢拔中京又西掠
云中乃入居庸并幽冀还都会窳建国号金太宗时尽
得辽故地于是遣将分徇河南州县执宋二帝关陕山东以次俱下寻破西京宋高宗南
渡乃立刘豫于河南既又取之而长淮以北悉为版宇
其壤地封疆东极吉林密雅呼达噶之境北自扶余路之北三千余里和洛和搏穆昆地
为边右旋入泰州博勒郭所浚界壕而西经临潢金山
跨庆桓抚昌净州之北出天山外包东胜接西夏逾黄河复西历葭州及米脂寨出临洮
府会州积石之外与生羌地相错复自积石诸山之南
左折而东逾洮州越盐川堡循渭至大散关北并山入京兆络商州南以唐邓西南皆四
十里取淮之中流为界而与宋为表里袭辽制建五京
置十四总管府是为十九路上京路领府二曰会窳 【留守司即哈尔呼之地金之旧土
也初为会窳州太宗天眷元年升为府号上京】 隆

安【利涉军节度使本辽黄龙府金天眷三年改为济州世宗大定二十九年改为隆州宣宗贞佑初升为府】州二曰肇【武兴军招讨司旧珠赫店太宗天会八年建州】信【彰信军刺史】路五曰扶余【节府】海兰【初置总管府后改为尹】率宾【节度本辽率宾府金天会二年为路】哈斯罕【节度】和啰噶【节度】司一曰乌克苏喇【招讨司】咸平路领府一曰咸平【总管府本辽咸州金海陵天德二年升为府】州一曰韩【刺史】东京路领府一曰辽阳【留守司】州六曰澄【南海军刺史本辽海州金天德三年改今名】浑【昭德军刺史】贵德【刺史】盖【奉国军节度本辽辰州金章宗明昌四年改今名】复【刺史】来远【本辽来远城金大定中升为州】路一曰博索【初置总管府后改为尹】北京路领府四曰大定【留守司本辽中京金贞元元年改为北京】广宁【镇宁军节度使本辽显州金天辅七年升为府】兴中【辽同】临潢【初置总管府为临潢路大定后罢】州十曰利【刺史】义【崇义军节度使本辽宜州金海陵天德三年更今名】锦【临海军节度】瑞【归德军节度本辽来州金天德三年更为宗州泰和六年改今名】懿【宁昌军节度】建【保靖军刺史】全【盘安军节度章宗承安二年置】庆【玄宁军刺史】兴【宁朔军节度本辽北安州兴化军兴化县金承安五年升为州】泰【昌德军节度】西京路领府二曰大同【留守司】德兴【本辽奉圣州金大安元年升为府】州十四曰丰【天德军节度】弘【刺史】净【刺史大定十八年置】桓【威远军节度】抚【镇宁军节度】昌【案金史志云天辅七年降为建昌县明昌七年以徇复置而不详其初置年月】宣德【刺史本辽归化州金大定七年改今名】朔【顺义军节度】武【刺史】应【彰国军节度】蔚【忠顺军节度】云内【开远军节度】宁边【刺史】东胜【刺史】中都路领府一曰大兴【辽析津府金贞元元年改今名】州十三曰通【刺史天德三年升潞县置】蓟【刺史】易【刺史】涿【刺史】顺【刺史案以上四州在辽皆隶府金升】平【兴平军节度】滦【永安军节度案滦州辽隶平州金升】雄【永定军节度】霸【刺史】保【顺天军节度】安【刺史宋顺安军金天会七年升为州】遂【刺史宋广信军金天会七年升为州】安肃【刺史宋安肃军金天会七年升为

徐州天德三年改今名】 南京路领府三曰开封 【留守司】 归德 【宣武军节度
宋应天府归德军金天会八年改军名为府】 河南

【宋西京金兴定元年升为中京改府名曰金昌】 州十九曰睢 【刺史本宋拱州金
天德三年改今名】 单 【刺史】 寿 【刺史

】 陕 【保平军节度】 邓 【武胜军节度】 唐 【刺史】 裕 【宋方城县金泰
和八年升】 嵩 【刺史宋广州金天德三年改

升名】 汝 【防御】 许 【昌武军节度】 钧 【刺史宋阳翟县金大定二十二年
升】 亳 【集庆军节度】 阵 【防御】 蔡

【镇南军节度】 息 【宋新息县金泰和八年升】 郑 【防御】 颍 【防御】 宿
【保静军节度】 泗 【防御】 河北东路

领府一曰河闲 【总管府】 州八曰蠡 【刺史本宋永宁军金天会七年升为宁州天
德三年改今名】 莫 【刺史】 献 【刺史本

宋河闲府乐寿县金天会七年升为寿州天德三年改今名】 冀 【安武军节度】 深
【刺史】 清 【防御】 沧 【横海军节度

案元史地理志横海作临海谨附识】 景 【刺史本唐景州宋为永静军金初复为
州】 河北西路领府三曰真定 【总管府】 彰德

【彰德军节度本宋相州金明昌三年升为府】 中山 【定武军节度】 州九曰威
【刺史本宋井陘县金天会七年升为州】 沃 【

刺史本宋赵州后升为庆源府金天德三年更名仍为州】 邢 【安国军节度本唐州
宋升为信德府金天会七年复旧】 洺 【防御】

磁 【刺史】 祁 【刺史】 卫 【河平军节度】 浚 【防御】 滑 【刺史】 山
山东东路领府二曰益都 【总管府本宋青州金

初更名升为府】 济南州十一曰潍 【刺史】 宾 【刺史】 沂 【防御】 密海
【刺史】 莒 【刺史本宋城阳军金大定二十

二年升为城阳州二十四年改今名】 棣 【防御】 淄 【刺史】 莱 【定海军节
度】 澄 【刺史】 濰海 【刺史本濰海军大

定二十二年升为州 案山东通志金明昌中于牟平县置濰海军后升为州史文未晰
谨附识】 山东西路领府一曰东平 【天平军节度

】 州九曰济 【刺史】 徐 【武宁军节度】 邳 【刺史本宋淮阳军金贞佑三年
更名升为州】 滕 【刺史本宋滕阳军金大定

二十二年升为滕阳州二十四年改今名】 博 【防御】 兖 【泰定军节度本兖州
宋升为袭庆府金大定十九年复为州】 泰安 【

刺史本兖州奉符县金大定二十二年升为州】 德 【防御】 曹 【刺史本曹州宋
升兴仁府金复旧为州】 大名府路领府一曰大名

【总管府】 州三曰恩 【刺史】 濮 【刺史】 开 【刺史本澶州宋升为开德府金皇统四年更名降州】 河东北路领府一曰太原 【总管府】 州十三曰晋 【兴定四年以寿阳县西张寨置】 忻 【刺史】 平定 【刺史本宋平定军金大定二年升为州】 汾 【汾阳军节度】 石 【刺史】 葭 【刺史本宋晋宁军金大定二十二年升为晋宁州二十四年更今名】 代 【震武军节度】 隩 【本宋火山军金大定二十二年升为火山州后改今名】 宁化 【刺史本宋宁化军金大定二十二年升为州】 岚 【镇西军节度】 岢岚 【防御本宋岢岚军金大定二十二年升为州】 保德 【防御本宋保德军金大定二十二年升为州】 管 【刺史本宋宪州金天德三年改今名】 河东南路领府三曰平阳 【总管府】 河中 【护国军节度】 晋安 【绛阳军节度本宋绛州金兴定二年升为府】 州九曰隰 【刺史】 吉 【本宋慈州金天德三年改为耿州明昌元年更今名】 解 【宝昌军节度】 泽 【忠昌军节度】 潞 【昭德军节度本潞州宋升为隆德府金复旧为州】 辽 【刺史】 沁 【义胜军节度本宋威胜军金天会六年升为州】 怀 【沁南军节度】 孟 【防御】 京兆府路领府一曰京兆 【总管府】 州六曰商 【刺史】 虢 【刺史】 干 【刺史本干州宋改为醴州金天德三年复旧名】 同 【安国军节度】 耀 【刺史】 华 【金安军节度】 凤翔路领府二曰凤翔 【总管府】 平凉 【平凉军节度本宋渭州金大定二十六年改名升为府】 州四曰德顺 【陇安军节度本宋德顺军金皇统二年升为州】 镇戎 【刺史本宋镇戎军金大定二十二年升为州】 秦 【镇远军节度】 陇 【防御】 鄜延路领府一曰延安 【总管府】 州五曰丹 【刺史】 保安 【刺史本宋保安军金大定二十二年升为州】 绥德 【刺史本宋绥德军金大定二十二年升为州】 鄜 【保大军节度】 坊 【刺史】 庆原路领府一曰庆阳 【总管府】 州五曰环 【刺史】 宁 【刺史】 邠 【靖难军节度】 原 【刺史】 泾 【彰化军节度】 临洮路领府一曰临洮 【总管府本宋熙州金皇统二年改名升为府】 州六曰积石 【刺史本宋积石军金大定二十二年升为州】 洮 【刺史】 兰 【刺史】 巩 【通远军节度】 会 【刺史】 河 【平西军节度】 总京府州凡百七十有九而西北之乌尔袞锡林部族节度乌库里部族节度锡呼部族节度珠噜部族节度布塔本部族节度吉噜部族节度唐古

部族节度多罗努瑚部族节度密雅里纒详袞穆腾纒详袞库坦纒详袞唐古纒详袞伊喇都纒详究伊敦纒详袞色卜腾详袞呼敦纒详袞阿敦羣牧布沙堪羣牧耶鲁椀羣牧鄂尔多羣牧纒斡羣牧额勒本羣牧乌展羣牧特们羣牧多托都羣牧乌尔图羣牧腾羣牧富森羣牧不在其数焉

钦定续通志卷一百七

●钦定续通志卷一百八 地理略六

地理略 【六】

元

○元

元起朔漠并西域平西夏臣高丽定南诏太宗六年灭金得中原州郡世祖至元十三年平宋全有版图踵辽金故迹仍都于燕立中书省一统山东西河北之地谓之腹里行中书省十有一曰岭北曰辽阳曰河南曰陕西曰四川曰甘肃曰云南曰江浙曰江西曰湖广曰征东分镇藩服而西北要荒之地不与焉 【西北地名曰都呼特穆尔曰图鲁济曰克鲁伦地曰辉和尔曰格尔济农曰克布尔曰巴达克山曰图斯曰特尔默曰布哈尔曰诺海萨巴曰塔里堪曰赛玛尔堪曰和珍曰玛尔噶朗曰喀什噶尔曰和坦曰克特曰乌德埒尔曰巴布曰阿尔齐勤曰鄂赤曰库车曰喀伞曰阿特巴实曰巴尔莽曰察齐尔曰雅根赤曰额尔巴拉曰包喇曰叶密实曰阿尔穆尔曰哈喇和卓曰鲁克沁曰巴实伯里曰托克伞曰昂吉巴里白呼达巴里曰章巴尔曰伊尔萨巴曰锡喇哈斯曰阿噜音乌苏曰钦察曰俄罗斯曰布勒噶尔曰萨奇勒曰和拉扎木曰赛里木曰巴尔齐钦曰塔迪曰包赛音曰巴喇袞曰齐苏曰伯奇台曰苏勒坦尼雅曰和尔默色曰噶萨朗曰实喇斯曰色喇实曰库帕曰阿锡达曰乌楚辟喇曰茂沙里曰沙尔斡克曰噜尔曰奇尔玛锡达曰拉巴咱尔曰纳千班弟曰伊斯帕罕曰萨斡曰喀尚曰都兰曰郭斡尔曰锡木南曰阿勒木特曰克济叶曰阿穆尔曰萨里雅克曰塔玛沙曰安占曰阿巴哈纳尔曰萨里莽曰乌勒章曰迪斯坦曰巴勒达哈曰德尔本曰布木曰达布逊曰布色图曰佛叶曰泥沙布尔曰实喇哈达曰帕尔斡尔迪曰玛凌固曰特尔根曰巴勒噶曰奇尔济苏曰罕哈纳曰谦州曰伊兰州等处 案西北地名元史录于河源之后今附载于此】 大率以省领路以路领州领县而腹里或有以路领府府领州领县者其府与州又有不隶路而直隶省者其地盖北逾阴山西极流沙东际辽左南越海表者今具着于篇

中书省统腹里之地凡路二十有九曰大都路【元太祖十年克燕于金大兴府置燕京路总管大兴府世祖至元元年中书省臣言开平以阙庭所在加号上都燕京分立省部亦乞正名遂改中都四年即其路定都焉九年改大都二十一年置大都路】曰上都路【唐奚契丹地金置桓州元初为孔拉尔乌噜郡王营幕地宪宗五年命世祖居其地为巨镇明年世祖命刘秉忠相宅于桓州东滦水北之龙冈中统元年为开平府五年以阙庭所在号为上都至元二年置留守司五年升上都路】曰兴和【金抚州元中统三年改升路】曰永平【金平州元大德四年改升路】曰德宁曰净州曰泰宁曰集宁曰应昌曰全宁曰宁昌【案元史志以上七路皆缺今考净州本仍金之旧集宁则金抚州县特未知元于何年升置改隶耳谨附识】曰保定【金保州元至元十二年改升路】曰真定【金真定府元至元中改为路】曰顺德【金邢州元中统三年改升顺德府至元二年改为路】曰广平【金洺州元至元十五年改升路】曰彰德【金彰德府元至元中改路】曰大名【金大名府元改路】曰怀庆【金怀州元延佑六年改升路】曰卫辉【金卫州元中统元年改升路】曰河闲【金河闲府元至元二年改路】曰东平【金东平府元至元九年改路】曰东昌【金博州元至元十三年改升路】曰济宁【金济州元至元八年改升府十六年改为路】曰益都【金益都府元初改路】曰济南【金济南府元初改路】曰般阳【旧淄州元初升为路至元二年改淄莱路二十四年更改名】曰大同【金大同府元至元二十五年改路】曰冀宁【金太原府元大德九年改置】曰晋宁【金平阳府元大德九年改置】直隶省之州八曰曹曰濮曰高唐【金博州属县元至元中升为州】曰泰安曰德曰恩曰冠【金大名府冠氏县元至元六年升为州】曰宁海岭北行中书省路一曰和宁【旧名和琳元初建都于此立元昌路皇庆元年更名】辽阳行中书省路七曰辽阳【金辽阳府元至元二十五年改路】曰广宁【金广宁府元至元十五年改路】曰大宁【金大定府元至元七年改置】曰东宁【本高句骊地元至元八年置东宁府十三年升为路】曰沈阳【金浑州元元贞二年改升路】曰开元【金会宁府元至元二十三年改置案元史志开元路即金会宁府又云开元万户治黄龙府考辽黄龙府金改为隆州非会宁也开元西北曰会宁府西曰黄龙府是会宁黄龙与开元相近而非即开元地也今仍其旧而识之】曰合兰府硕达勒达等路【金扶

余海兰率瓚和啰噶等路及肇隆信三州地也】直隶省之府一曰咸平河南江北行中书省路十二曰汴梁【金开封府元至元二十五年改置】曰河南【金金昌府元初改为路】曰襄阳【宋襄阳府元至元中改为路】曰蕲州【宋蕲州元至元中升为路】曰黄州【宋黄州元至元十四年升为路】曰庐州【宋庐州元至元十四年升为路】曰安丰【宋寿春府安丰县后建为军元至元十四年升为路】曰安庆【宋安庆府元至元十四年改为路】曰扬州【宋扬州元至元十四年升为路】曰淮安【宋楚州后改淮安州元至元二十年升为路】曰中兴【宋荆南府元天历二年改置】曰峡州【宋峡州元至元十七年升为路】直隶省之府七曰南阳【金南阳县后升为申州元至元八年升为府】曰汝宁【金蔡州元至元三十年改升府】曰归德曰高邮【宋高邮军元至元十四年升为高邮路总管府二十年改为府】曰安陆【宋郢州元至元十三年改升府】曰沔阳【宋复州元至元十三年升为路十五年更名为府】曰德安州一曰荆门【宋荆门军元至元十四年升为府十五年降为州】陕西行中书省路五曰奉元【金京兆府元至元十六年改安西路皇庆元年更今名】曰延安【金延安府元初改为路】曰兴元【宋兴元府元改为路】曰河州【金河州元升为路】曰图沙玛直隶省之府五曰凤翔曰巩昌【案元史志金为巩昌府考金史地理志止称巩州则是元时始升为府也谨附识】曰平凉曰临洮曰庆阳州二十七曰邠曰泾曰开成【金镇戎州元至元十年升为开成府至治三年降为州】曰庄浪【沿革阙元初置庄浪路大德八年降为州】曰秦曰陇曰定西曰镇原【金原州元初更今名】曰西和曰环曰金曰静宁【金德顺州元初更今名】曰兰曰会曰徽【宋凤州河池县元初别置南凤州至元中更今名】曰阶曰成【唐旧州宋改同庆府元复旧名】曰金洋【本兴元路二州元初有雷李二将挈民户归附令迁至成州自行金洋州事】曰雅曰黎曰茂曰洮曰贵德【金积石州西界元初置州】曰岷【宋故岷州地元初复置】曰铁曰文【案宋有文州元志无之惟有礼店文州军民府意即宋之文州又明志文县注云本元文州是元自有文州而史阙之也今谨补入以符二十七州之数而附识之】四川行中书省路九曰成都【宋成都府元改为路】曰嘉定【宋嘉州后升嘉定府元至元十三年改为路】曰广元【宋利州元至元十四年改置】曰顺庆【宋果州后升顺庆府元至

元二十年改为路】 曰永宁 【宋泸州江安合江二县地元至元二十五年置路】 曰重庆 【宋重庆府元至元十六年改为路】 曰夔

【宋夔州元至元十五年升为路】 曰叙州 【宋叙州元至元十八年升为路】 曰马湖 【古牂牁属地旧名马湖部元至元十三年内附置路】 直隶省之府三曰潼川曰怀德 【沿革阙】 曰绍庆甘肃行中书省路七曰甘州 【唐甘州张掖郡宋初为西夏所据改镇彝郡元初复为甘州至元八年升为路】 曰永昌 【唐凉州武威郡宋初为西凉府后入西夏元初仍为府至元十五年改为路】 曰肃州 【唐肃州酒泉郡宋初入西夏元至元七年改升路】 曰沙州 【唐沙州炖煌郡宋初入西夏元至元十四年复立州十七年升为路】 曰额齐纳 【汉居延故城西夏立威福军元至元二十三年立为路】 曰宁夏 【唐夏州朔方郡宋初入西夏元至元八年立西夏中兴路二十五年更今名】 曰乌拉海 【阙】 直隶省之州二曰山丹 【唐删丹县宋初入西夏置甘肃军元至元六年为山丹城讹删为山二十二年升为州】 曰西宁 【唐时没于吐蕃号青唐城宋改为西宁州元初为章吉驸马分地至元二十三年立州】 云南行中书省 【云南故滇王国汉武开置益州蜀汉置云南郡唐为姚州后没于南诏元宪宗五年取其地至元十三年立行省】 路三十七曰中庆 【大理国曰善阐府元宪宗五年立万户府至元十三年改置】 曰威楚开南 【碣碌夷地爨酋威楚居此后附蒙氏曰威楚郡元宪宗六年立万户至元八年改为路】 曰武定 【唐隶姚州大理国罗婺部元宪宗七年立万户至元八年为北路十二年改本路】 曰鹤庆 【大理国曰谋统郡元宪宗三年立鹤州七年立三千户至元二十三年改升为路】 曰云远 【本南诏香柏城地元贞二年置路】 曰广南 【阙】 曰丽江 【本越嵩郡西徼地后为越析诏所有继入南诏元至元十三年改置路】 曰东川 【大理国闾畔部元宪宗时立万户至元十五年改军民府二十八年置路】 曰茫部 【至元中置】 曰孟杰 【泰定三年置 案元史自东川路至此沿革皆阙今据王圻续通考及一统志补之又按续通考云八百媳妇请官守置木安孟杰二路于其地而元志但有孟杰路无木安路明史志云元志孟绢路属八百宣慰司元志亦不载大抵元史多有失漏谨附识】 曰普安 【古夜郎地唐为盘州爨酋据之号于失部元宪宗七年立万户至元十三年改置路】 曰曲靖 【唐曲靖二州南诏东爨乌蛮居之元宪宗六年立万户至元十三年改置路】 曰澄江 【唐羁縻牂州大理国罗伽部元宪宗六

年立万户至元三年改万户为中路十六年更今名】 曰普定 【本罗甸普里部元改普定府大德七年升为路】 曰建昌 【唐中都府治越嶲蒙诏立城曰建昌府元至元十二年改为路】 曰德昌 【本南诏阿屈部元至元二十三年立为路】 曰会川 【大理曰会川府元至元十四年改为路】 曰临安 【唐隶牂州蒙氏号通海郡段氏号秀山郡元宪宗六年立万户至元八年改为南路十三年又改今名】 曰广西 【东爨乌蛮弥鹿等部所居元宪宗七年内附至元十二年置路】 曰元江 【古西南夷地阿僰诸部蛮据之名威远睽元至元二十五年置路】 曰大理 【本汉牂榆县地唐于昆明之弄栋州置姚州都督府南诏蒙氏立都于此本号大礼国后郑赵杨三氏互相篡夺至段思平改礼为理元宪宗六年立上下二万户至元七年并为路 案王圻续通考云天历闲升姚州为姚安路元志失载谨附识】 曰蒙怜曰蒙莱 【至元二十七年以蒙怜甸为蒙怜路蒙莱甸为蒙莱路】 曰柔远 【本僰蛮地元至元十三年置路】 曰茫施 【本茫施蛮地元至元十三年置路】 曰镇康 【本僰蛮地元至元十三年置路】 曰镇西曰平缅曰麓川 【以上三路皆白蛮地元至元十三年置路】 曰木连 【至正二十六年置】 曰蒙光曰木邦 【旧名孟都一名孟邦至元二十六年置路】 曰孟定 【旧名昌麻至元二十六年置路】 曰谋粘 【泰定三年置】 曰孟隆 【泰定三年置】 曰木朵 【至元三十年以木朵甸置】 曰蒙兀 【案元志自木连以下并阙今据王圻续通考及明史地理志补入】 直隶省之府二曰仁德 【本乌蛮新丁部语讹为仁德元宪宗六年立万户至元十三年改置府】 曰柏兴 【唐昆明县大理曰香城郡元至元二十七年置府】 江浙行中书省路三十曰杭州 【宋临安府元至元十五年改为路】 曰湖州 【宋湖州元至元十三年升为路】 曰嘉兴 【宋嘉兴府元至元十三年改为路】 曰平江 【宋平江府元至元十三年升为路】 曰常州 【宋常州元至元十四年升为路】 曰镇江 【宋镇江府元至元十三年升为路】 曰建德 【宋建德府元至元十四年改为路】 曰庆元 【宋庆元府元至元十四年改为路】 曰衢州 【宋衢州元至元十三年升为路】 曰婺州 【宋婺州元至元十三年升为路】 曰绍兴 【宋绍兴府元至元十三年改为路】 曰温州 【宋瑞安府元至元十三年改为路】 曰台州 【宋台州元至元十四年升为路】 曰处州 【宋处州元至元十三年升为路】 曰宁国 【宋宁国府元至元十四年改为路】 曰徽州 【宋徽州

元至元十四年升为路】 曰饶州 【宋饶州元至元十四年升为路】 曰集庆 【宋建康府元天历二年改为路】 曰太平 【宋太平州元至元十四年升为路】 曰池州 【宋池州元至元十四年升为路】 曰信州 【宋信州元至元十四年升为路】 曰广德 【宋广德军元至元十四年升为路】 曰福州 【宋福州元至元十五年升为路】 曰建宁 【宋建宁府元至元二十六年改为路】 曰泉州 【宋泉州元至元十五年升为路】 曰兴化 【宋兴化军元至元十四年升为路】 曰邵武 【宋邵武军元至元十三年升为路】 曰延平 【宋南剑州元至元十五年升为路大德六年更今名 案大德六年据福建通志】 曰汀州 【宋汀州元至元十五年升为路】 曰漳州 【宋漳州元至元十六年升为路】 直隶省之府一曰松江 【宋秀州华亭县元至元十四年升为府十五年更今名】 州二曰江阴 【宋江阴军元至元十四年升为路后降为州】 曰铅山 【宋信州铅山县元至元二十九年升为州】 江西行中书省路一十八 曰龙兴 【宋隆兴府元至元二十一年改为路】 曰吉安 【宋吉州元元贞元年改升路】 曰瑞州 【宋瑞州元至元十四年升为路】 曰袁州 【宋袁州元至元十九年升为路】 曰临江 【宋临江军元至元十四年升为路】 曰抚州 【宋抚州元至元十四年升为路】 曰江州 【宋江州元至元十四年升为路】 曰南康 【宋南康军元至元十四年升为路】 曰赣州 【宋赣州元至元十四年升为路】 曰建昌 【宋建昌军元至元十四年升为路】 曰南安 【宋南安军元至元十四年升为路】 曰广州 【宋广州元至元十五年升为路】 曰韶州 【宋韶州元至元十五年升为路】 曰惠州 【宋惠州元至元十六年升为路】 曰南雄 【宋南雄州元至元十五年升为路】 曰潮州 【宋潮州元至元十六年升为路】 曰德庆 【宋德庆府元至元十七年改为路】 曰肇庆 【宋肇庆府元至元十七年改为路】 直隶省之州九曰南丰 【宋建昌军南丰县元至元十九年升为州】 曰英德 【宋英德府元降为州】 曰梅曰南恩曰封曰新曰桂阳 【宋桂阳县元至元十九年升为州】 曰连曰循湖广行中书省路三十二曰武昌 【宋鄂州元大德五年改升路】 曰岳州 【宋岳州元至元十三年升为路】 曰常德 【宋常德府元至元十四年改为路】 曰澧州 【宋澧州元至元十四年升为路】 曰辰州 【宋辰州元至元中升为路】 曰沅州 【宋沅州元至元十四年升为路】 曰兴国 【宋兴国军元至元十四年升为路】

曰靖州【宋靖州元至元十三年升为路】 曰天临【宋潭州元至元十四年升为路
大历三年更今名】 曰衡州【宋衡州元至元
十四年升为路】 曰道州【宋道州元至元十四年升为路】 曰永州【宋永州元
至元十四年升为路】 曰郴州【宋郴州元至元
十四年升为路】 曰全州【宋全州元至元十四年升为路】 曰宝庆【宋宝庆府
元至元十四年改为路】 曰武冈【宋武冈军元
至元十四年升为路】 曰桂阳【宋桂阳军元至元十四年升为路】 曰静江【宋
静江军元至元十五年升为路】 曰南甯【宋邕
州元至元十六年升为路泰定元年更今名】 曰梧州【宋梧州元至元十六年升为
路】 曰浔州【宋浔州元至元十六年升为路】
曰柳州【宋柳州元至元十六年升为路】 曰思明【宋羁縻思明州隶邕州元至元
二十四年升为路】 曰太平【宋太平寨隶邕
州元至元二十九年升为路】 曰田州【宋羁縻田州隶邕州元升为路】 曰来安曰
镇安【案以上五路元志皆不详沿革今参之宋
史地理志取其有可考者注明各路之下而来安镇安之名宋皆无之王圻续通考及明
一统志并云宋于镇安洞建右江镇安军民宣抚司是
宋邕州右江本有是洞而史失之也以镇安例推之并可知来安亦不出宋左右江羁縻
之地也谨附识】 曰雷州【宋雷州元至元十五年
升为路】 曰化州【宋化州元至元十五年升为路】 曰高州【宋高州元至元十
五年升为路】 曰钦州【宋钦州元至元十五年
置安抚司十七年升为路】 曰廉州【宋廉州元至元十七年升为路】 直隶省之府
三曰汉阳【宋汉阳军元至元十四年升为路】
曰平乐【宋昭州元改升府】 曰定远【沿革阙】 州十三曰归曰茶陵【宋茶陵
军元至元十九年升为州】 曰耒阳【宋衡州
耒阳县元至元十九年升为州】 曰常甯【宋衡州常甯县元至元十九年升为州】
曰郁林曰容曰象曰宾曰横曰融曰藤曰贺曰贵安
抚司十五曰庆远【宋庆远府元至元十三年置司】 曰干甯【宋琼州元天历二年
置司】 曰罗番曰程番曰金石番曰卧龙番曰大
龙番曰小龙番曰洪番曰方番曰卢番曰顺元曰思州【宋旧州元初置司】 曰播州
曰葛蛮【自罗番以下至此皆八番顺元蛮夷官】
军三曰南甯曰万安曰吉阳征东行中书省统高丽国府二曰沈阳曰耽罗

钦定续通志卷一百八

●钦定续通志卷一百九 地理略七

地理略【七】

明

○明

明太祖起淮右首定金陵西克湖湘东兼吴会然后遣将北出并山东收河南进取幽燕芟除秦晋讫于岭表最后削平巴蜀收复滇南禹迹所奄尽入版图洪武初改元行中书省为布政使司以京畿应天诸府直隶京师置十三布政使司分领天下府州县及羁縻诸司又别置都指挥使司以领卫所其边境海疆则增置行都指挥使司而于京师建五军都督府俾外都指挥使司各以其方附焉成祖定都北京乃以北平为直隶又增设贵州交趾二布政使司仁宣之际旋弃交趾终明之世为直隶者二曰京师曰南京为布政使司者十三曰山东山西河南陕西四川江西湖广浙江福建广东广西云南贵州诸卫所则视形便错置其中京师领府八曰顺天【元大都路明洪武元年改为北平府永乐元年建北京改为顺天府】曰保定【元保定路明洪武元年改为府】曰河闲【元河闲路明洪武元年改为府】曰真定【元真定路明洪武元年改为府】曰顺德【元顺德路明洪武元年改为府】曰广平【元广平路明洪武元年改为府】曰大名【元大名路明洪武元年改为府】曰永平【元永平路明洪武二年改平滦府四年更今名】直隶州二曰延庆【元龙庆州明洪武初废永乐十三年置隆庆州隆庆元年改今名】曰保安【元隶上都路之顺宁府明洪武初废永乐十三年复置】都指挥一曰万全【元顺宁府明洪武中废宣德五年改置司】行都指挥一曰北平【洪武二十年置】南京领府十四曰应天【元集庆路明初改应天府洪武元年建都曰南京十一年曰京师永乐元年仍曰南京】曰凤阳【元濠州明太祖吴元年升为临濠府洪武六年改中立府七年更今名】曰淮安【元淮安路明初改为府】曰扬州【元扬州路明初改为府】曰苏州【元平江路明太祖吴元年改曰苏州府】曰松江曰常州【元常州路明初改为府】曰镇江【元镇江路明初改为府】曰庐州【元庐州路明初改为府】曰安庆【元安庆路明初改为府】曰太平【元太平路明初改为府】曰池州【元池州路明初改为府】曰宁国【元宁国路明初改为府】曰徽州【元徽州路明初改为府】直隶州四曰徐曰滁曰和【洪武初废二年复置】曰广德【元广德路明洪武四年改为州】山东布政使司领府六曰济南【元济南路明初改为府】曰兖州【元兖州明洪武十八年升为府】曰东昌【元东昌路明初改

为府】 曰青州 【元益都路明初改为青州府】 曰莱州 【元莱州明洪武元年升为府】 曰登州 【元登州明洪武九年升为府】
都指挥使司一曰辽东 【元辽阳路明洪武八年改司】 山西布政使司领府五曰太原 【元冀宁路明洪武元年改为府】 曰平阳 【元晋宁路明洪武初改为平阳府】 曰汾州 【元汾州明万历二十三年升为府】 曰潞安 【元潞州明嘉靖八年升为府】 曰大同 【元大同路明洪武初改为府】 直隶州三曰泽曰沁曰辽行都指挥使司一曰山西 【洪武八年置】 河南布政使司领府八曰开封 【元汴梁路明洪武元年改为开封府】 曰河南 【元河南府路明洪武元年改为府】 曰归德 【洪武初降为州嘉靖二十四年复旧】 曰汝宁曰南阳曰怀庆 【元怀庆路明洪正九年改为府】 曰卫辉 【元卫辉路明洪武元年改为府】 曰彰德 【元彰德路明洪武元年改为府】 直隶州一曰汝陕西布政使司领府八曰西安 【元奉元路明洪武二年改为西安府】 曰凤翔曰汉中 【元兴元路明洪武三年改为汉中府】 曰延安 【元延安路明洪武二年改为府】 曰庆阳曰平凉曰巩昌曰临洮 【元临洮路明洪武初改为府】 直隶州二曰灵 【洪武三年废弘治十三年复置】 曰兴安 【元金州明万历十一年更今名】 都指挥使司行都指挥使司各一曰陕西四川布政使司领府十三曰成都 【元成都路明洪武四年改为府】 曰保宁曰顺庆 【元顺庆路明洪武中改为府】 曰夔州 【元夔州路明洪武四年改为府】 曰重庆 【元重庆路明洪武中改为府】 曰叙州 【元叙州路明洪武六年改为府】 曰龙安 【元龙州明嘉靖四十五年改为龙安府】 曰马湖 【元马湖路明洪武初改为府】 曰镇雄 【元芒部路明洪武十五年改为府】 曰遵义 【元播州宣慰司明万历二十九年改置】 曰东川 【元东川路明洪武十七年升为府】 曰乌蒙 【元乌蒙路明洪武十七年改为府】 曰乌撒 【元乌撒路明洪武十七年改为府 案自遵义以下皆军民府】 直隶州六曰潼川 【元潼川府明洪武九年降为州】 曰眉 【洪武九年降为县十三年复置】 曰邛曰嘉定 【元嘉定府路明洪武九年降为州】 曰泸曰雅行都指挥使司一曰四川 【元罗罗蒙庆等处宣慰司明洪武二十七年改置】 江西布政使司领府十三曰南昌 【元龙兴路明初改为洪都府寻改今名】 曰瑞州 【元瑞州路明洪武初改为府】 曰九江 【元江州路明初改为九江府】 曰南康 【元南康路明初改为西宁府寻改今名】 曰饶州

【元饶州路明初改为鄱阳府后改今名】 曰广信 【元信州路明初改为广信府】
曰建昌 【元建昌路明初改为肇庆府寻改今名】
曰抚州 【元抚州路明初改为临川府寻改今名】 曰吉安 【元吉安路明初改
为府】 曰临江 【元临江路明初改为府】 曰
袁州 【元袁州路明初改为府】 曰赣州 【元赣州路明初改为府】 曰南安 【元
南安路明初改为府】 湖广布政使司领府十五
曰武昌 【元武昌路明初改为府】 曰汉阳 【洪武九年降为州十三年复为府】
曰黄州 【元黄州路明初改为府】 曰承天 【
元安陆府明洪武九年降为州嘉靖十年升为承天府】 曰德安 【洪武九年降为州
十三年复为府】 曰岳州 【元岳州路明初改为
府】 曰荆州 【元中兴路明初改为荆州府】 曰襄阳 【元襄阳路明初改为府】
曰郟阳 【成化十二年置】 曰长沙 【元天
临路明初为潭州府洪武五年更今名】 曰常德 【元常德路明初改为府】 曰衡州
【元衡州路明初改为州】 曰永州 【元永州
路明洪武元年改为府】 曰宝庆 【元宝庆路明洪武元年改为府】 曰辰州 【元
辰州路明初改为府】 直隶州二曰郴 【元郴州
路明洪武九年降为州】 曰靖 【元靖州路明洪武元年降为州】 浙江布政使司领
府十一曰杭州 【元杭州路明初改为府】 曰严
州 【元建德路明初改为府寻更今名】 曰嘉兴 【元嘉兴路明初改为府】 曰湖
州 【元湖州路明初改为府】 曰绍兴 【元绍
兴路明初改为府】 曰宁波 【元庆元路明初改为明州府寻改今名】 曰台州 【
元台州路明洪武初改为府】 曰金华 【元婺州
路明初改为宁越府寻改今名】 曰衢州 【元衢州路明初改龙游府寻改今名】 曰
处州 【元处州路明初改为安南府寻改今名】
曰温州 【元温州路明洪武初改为府】 福建布政使司领府八曰福州 【元福州路
明初改为府】 曰兴化 【元兴化路明洪武元
年改为府】 曰建宁 【元建宁路明洪武元年改为府】 曰建平 【元建平路明洪
武元年改为府】 曰汀州 【元汀州路明洪武元
年改为府】 曰邵武 【元邵武路明初改为府】 曰泉州 【元泉州路明洪武元年
改为府】 曰漳州 【元漳州路明洪武元年改为
府】 直隶州一曰福宁 【洪武二年降为县成化九年复置州】 广东布政使司领府
十曰广州 【元广州路明洪武元年改为府】 曰
肇庆 【元肇庆路明洪武元年改为府】 曰韶州 【元韶州路明洪武元年改为府】
曰南雄 【元南雄路明洪武元年改为府】 曰

惠州【元惠州路明洪武元年改为府】 曰潮州【元潮州路明洪武二年改为府】
曰高州【元高州路明洪武元年改为府】 曰
雷州【元雷州路明洪武元年改为府】 曰廉州【元廉州路明洪武元年改为府】
曰琼州【元干宁安抚司明洪武元年改为琼
州府】 直隶州一曰罗定【元泷水县明万历五年升为州】 广西布政使司领府十
一曰桂林【元静江路明洪武元年改为府五年
更今名】 曰平乐曰梧州【元梧州路明洪武元年改为府】 曰浔州【元浔州路
明洪武元年改为府】 曰柳州【元柳州路明洪
武元年改为府】 曰庆远【元庆远路明洪武元年改为府】 曰南甯【元南甯路
明洪武元年改为府】 曰思恩【元思恩州明正
统四年升为府六年加军民府】 曰太平【元太平路明洪武二年改为府】 曰思明
【元思明路明洪武二年改为府】 曰镇安【
元镇安路明洪武二年改为府】 直隶州九曰田【元田州路明洪武二年改为府嘉
靖七年降为州】 曰归顺【洪武初废弘治九年
复置】 曰泗城曰向武【洪武二十八年废建文二年复置】 曰都康【明初为夷
獠所据建文元年复置】 曰龙【元龙州万户府
明洪武二年改为州】 曰江曰思陵【洪武三年废二十一年复置】 曰凭祥【永
乐二年以思明府之凭祥镇置县成化十八年升为
州】 云南布政使司领府二十曰云南【元中庆路明洪武初改为云南府】 曰寻甸
【元仁德府明洪武十六年升为仁德军民府成
化十二年改为寻甸府】 曰临安【元临安路明洪武十五年改为府】 曰澄江【
元澄江路明洪武十五年改为府】 曰广西【元
广西路明洪武十五年改为府】 曰广南【元广南西路安抚司明洪武十五年改为
府】 曰楚雄【元威楚开南路明洪武十五年改
为楚雄府】 曰武定【元武定路明洪武十五年改为府】 曰景东【元至顺二年
置明洪武十五年降为州十七年仍为府】 曰镇沅
【洪武三十五年置镇沅州永乐四年升为府】 曰大理【元大理路明洪武十五年
改为府】 曰永甯【元属丽江永甯州路明永乐
四年升为府】 曰蒙化【元蒙化州明正统十三年升为府】 曰顺甯【元置明洪
武初降为州十七年仍升为府】 曰曲靖【元曲
靖路明洪武十五年改为府二十七年升军民府】 曰元江【元元江路明洪武十五
年改为府永乐初升军民府】 曰姚安【元姚安
路明洪武十五年改为府二十七年升军民府】 曰鹤庆【元鹤庆路明洪武十五年
改为府三十年升军民府】 曰丽江【元丽江路

安抚司明洪武十五年改为府三十年升军民府】 曰永昌 【元永昌府明嘉靖元年改军民府】 御夷府二曰孟定 【元孟定路明洪武十五年改为府】 曰孟良 【永乐三年置】 直隶州二曰北胜 【元北胜府明洪武中降为州】 曰广邑 【本金齿军民司之广邑寨明宣德五年升为州】 御夷州三曰威远 【元威远州明洪武十七年升为府后废三十五年复置】 曰湾甸 【永乐元年置湾甸长官司三年升为州】 曰镇康 【元镇康路明洪武十五年升为府十七年降为州】 贵州布政使司领府十曰贵阳 【本程番府隆庆三年更今名万历二十九年升军民府】 曰安顺 【元安顺州明万历三十年升军民府】 曰都匀 【本都匀安抚司弘治七年置府】 曰平越 【元平越长官司明万历二十九年改置军民府】 曰黎平 【本思州宣慰司洪武十八年置后废永乐十一年置黎平府】 曰思南 【元思南宣慰司明永乐十一年改为府】 曰思州 【元思州宣慰司明永乐十一年改为府】 曰镇远 【元镇远府明洪武四年降为州永乐中仍升为府】 曰铜仁 【本思州宣慰司地永乐十一年置府】 曰石阡 【本思州宣慰司地永乐十一年置府】 其地盖东起辽海西至嘉峪南至琼崖北抵云朔东西万余里南北万里

钦定续通志卷一百九

●钦定续通志卷一百十 都邑畧

都邑畧

（臣）等谨案郑樵作都邑畧谓天地设险之大者莫如河其次莫如江中原无事则居河之南多事则居江之南河南之都惟长安与洛阳江南之都惟建业此特郑氏一家之言其实尧舜禹之都当时固皆在河北也唐承隋都长安本周秦旧地议都邑者以此为首选然阅世久远盛极而衰所谓地绝其脉水化其味者非复秦汉以前之旧五代梁都汴晋汉周因之国失冯依五十年中祸变相轧宋世因循不改四战之冲以兵为卫靖康之际金兵长驱渡河矣南渡偏安临安是宅识者谓其无意中原要亦时势使然也辽金元皆起北方迁都燕蓟燕地左环沧海右拥太行北枕居庸南襟河济临中夏而控北荒诚所谓扼天下之吭而拊其背古称天府之国形胜甲于■〈宀禹〉内者是故金迁汴而中衰元都燕而一统及明祖卜居金陵而成祖复由燕起虽曰天命岂不由地势便利有德易兴哉然则论都邑者当以燕京为最上其视关中已衰之气汴梁四战之区固不可同日语矣而郑樵独取唐博士朱泚之议以南阳为建都之选非樵之闇于地势也是时燕为金有非南宋所

能睥睨南阳之说特就当时方域之地以为彼善于此耳岂议都之定论哉若明祖起自南方因取建康偏安之地为京邑而转弃北平为藩封迨永乐迁都而一时臣工犹且胥动浮言则洵乎识时势达地利者不易多得也谨述自唐迄明都邑续郑志后若夫邑有宗庙曰都或溯发祥或备巡幸陪京之制历代重焉史册所载悉为条列以资稽考云

唐都

五代都

十国都

宋都

辽都

金都

元都

明都

四夷都

○唐都

上都唐因隋京兆郡旧都初曰京城天宝元年曰西京至德二载曰中京上元二年复曰西京宝应元年曰上都在汉长安故城东南二十里【隋开皇二年移置】前直子午谷后枕龙首山左临灞岸右抵泂水京城长六千六百六十五步广五千五百七十五步周二万四千一百二十步崇丈有八尺

东都隋河南郡地曾置都武德四年废贞观六年号洛阳宫显庆二年曰东都光宅元年曰神都神龙元年复曰东都天宝元年曰东京上元二年罢京宝应元年复为东都在汉魏故洛城西十八里前直伊阙后据邙山左瀍右涧洛水贯其中有河汉之象都城东西五千六百一十步南北五千四百七十步崇丈有八尺

北都隋太原郡地天授元年置【通典作长寿元年今用新唐书】神龙元年罢开元十一年复置天宝元年曰北京上元三年罢京宝应元年复为北都左汾右晋潜邱在中都城长四千三百二十一步广三千一百二十二步周万五千一百五十三步其崇四丈【汾东曰东城贞观十一年筑两城之闲有中城武后时筑南有大明城故宫城也】

南都本江陵府隋为南郡武德四年改为荆州五年置大总管七年升为大都督贞观二年降为都督府天宝元年改为江陵郡干元元年复为荆州大都督府上元元年置南都号江陵府二年罢宝应元年又号南都寻罢西都本凤翔府隋扶风郡武德元年改为岐州天宝元年改

为扶风郡至德二载置凤翔府号西京上元二年罢京宝应元年曰西都寻罢

南京本成都府隋蜀郡武德元年改为益州置总管府天宝元年改为蜀郡置大都督府十五载玄宗幸蜀驻蹕成都至德二载十月玄宗回京师十二月改蜀郡为府号南京上元元年罢京

（臣）等谨案唐初以京兆河南为两都武后增置太原为北都则为三都肃宗又置江陵为南都凤翔为西都则为五都然江陵凤翔旋置旋罢而三都则历世不改至德二载因玄宗幸蜀之故改蜀郡为南京盖当时未有京名故蜀郡不在五都内也唐世都邑废置不一自肃宗宝应以后始无复更矣

○五代都

梁太祖因宣武军资力以篡唐因而居汴开平元年以汴州为开封府建东都以唐东都为西都

后唐庄宗同光元年即位于魏州升魏州为兴唐府建东京 【五代史庄宗纪同光三年改东京为邺都】 以唐北都为西京寻复为北都 【册府元龟后唐庄宗同光元年夏四月以太原为西京冬十一月改为北都 按后唐初以镇州真定府为北京后罢真定又以京兆为西京故改此】 复京兆府为西京 【册府元龟后唐同光元年复以永平军大安府为西京京兆府 按通鉴天佑初朱全忠奏废西京置佑国军大安府又改为永平军至后唐始复欧史改京兆府在同光三年薛居正旧史作元年】 以洛阳为洛京同光三年复为东都 【司马光资治通鉴庄宗同光元年河南尹张全义请迁都洛阳从之 按五代史庄宗纪同光元年如洛京三年始定为东都五代会要三年详定院奏云近以中兴大业以魏州为东京权名东都为洛京今复以洛京为东都】

晋高祖天福二年以汴州行宫为大宁宫三年升为东京以洛阳为西京邺都仍唐旧 【五代会要天福二年改兴唐府为广晋府三年复升为邺都】 汉东京西京皆同晋制以太原为北京 【册府元龟汉高祖以天福十二年二月即位于太原宫以太原为北京五代史高祖即位是年五月以太原尹刘崇为北京留守丙申如东京六月甲子至自太原】 干佑元年以晋邺都广晋府为大名府 【按大名府唐改后唐曰兴唐府晋曰广晋府汉复旧名】 周东京西京同晋制

○十国都

吴江都府本扬州吴升府建都居之金陵府本升州吴升府 【吴太和五年建都于金陵金陵火罢建都天祚三年以金陵为西都广陵为东都】

南唐东都吴曰江都府升元元年建都西都吴曰金陵府升元元年改江甯府建都南都本洪州交泰三年改南昌府建都

前蜀成都府本益州蜀升府建都居之与元府本梁州蜀升府

后蜀同前蜀制

南汉兴王府本广州干亨元年升为府建都居之齐昌府本循州兴甯县干亨元年置府

楚长沙府本潭州后唐天成二年封楚国王升为长沙府建都居之

吴越西府本杭州唐干甯四年吴越置西府后亦谓之西都东府本越州唐干甯四年吴越置东府后亦谓之东都

闽南都 【一作东都】 长乐府本福州龙启元年置府天德二年曰南都

荆南江陵府本荆州荆南置府建都居之

北汉太原府本并州北汉置府建都居之

（臣）等谨案五代京邑相因建改不一名虽异而实多同十国当时称帝改元者七吴越荆楚常行中国年号至于置都则惟南唐及闽余皆称府吴越虽或称东都西都然其先未有置都之名也诸国割据一方自相雄长既已置府建都应存其实谨依郑志十六国都之例以时代次于唐五代之后

○宋都

东京汴之开封也梁为东都后唐罢晋复为东京宋因周之旧为都旧城周二百里一百五十五步周显德三年筑 【按宋东京有新旧

二城宋朝会要云自朱梁建都以汴州为东京皆因藩镇旧制但改名额而周显德初始广新城王应麟地理通释曰东京开封府旧城唐建中

初筑宋曰阙城亦曰里城新城周显德三年韩通筑宋曰国城亦曰外城】 新城周五十里百六十五步 【大中祥符九年增筑元丰元年重

修政和六年诏有司度国之南展筑京城移置官司军营】

西京唐显庆闲为东都开元时改河南府宋为西京山陵在焉京城周五十二里九十六步 【隋大业元年筑唐长寿二年增筑】

南京大中祥符七年建应天府为南京京城周一十五里四十步

北京庆历二年建大名府为北京京城周四十八里二百六步

行在所建炎三年闰八月高宗自建康如临安以州治为行在所

（臣）等谨按宋设四京以开封为东京河南为西京应天为南京大名为北京开封即属京东路后为京畿路府河南为京西北路府应天初为宋州后为京东西路府大名为河北东路府高宗仓皇渡江驻蹕吴会其始但称行在所不以京名示不忘恢复之意然百五十年中终

不能复中原尺寸虽由天命而地势之不利又岂能与中土相抗衡哉

○辽都

上京本契丹故壤太祖取天梯蒙古必噜等三山之势于苇甸射金靛箭以识之谓之龙眉宫神册三年城之名曰皇都会同元年更名上京府曰临潢其地负山抱海太祖平渤海归乃展郛郭建宫室上京城高二丈不设敌楼幅员二十七里其北谓之皇城高三丈有楼橹南城谓之汉城【按契丹国志上京乃大部落之地离来州数十里即行海岸有纳都木威河其东北三十里即长泊也涉沙碛过白马淀渡土河亦云崇崇玛聚沙成墩少人烟多林木其河边平处国主曾于此过冬又至木叶山三十里许有居人瓦屋及僧舍】

东京本朝鲜之地唐武后时有且且綱桑者保有其地武后封为震国公传子祚荣建都邑自称震王中宗赐所居曰呼尔罕州封渤海郡王十有二世至彝震僭号改年为辽东盛国呼尔罕州即平壤故地时号中京显德府太祖攻渤海拔其城神册四年为东平郡天显三年升为南京会同元年改为东京府曰辽阳城名天福高三丈有楼橹幅员三十里宫城在东北隅高三丈具敌楼外城谓之汉城

中京自汉至唐奚族居之太祖建国奚人臣属圣宗尝过七金山土河之滨南望云气有郛郭楼阙之状因议建都统和二十五年城之实以汉户号曰中京府曰大定【契丹国志云中京承天太后建地居上东燕三京之中土肥人旷西临马孟山六十里其山南北一千里东西八百里连亘燕京西山遂以其地建城号曰中京按承天太后景宗萧后也是时圣宗虽在位而太后专政故以建中京为太后云】

（臣）等谨案辽时镇州亦曾有中京之称乃太宗大同元年南征时所立五代史载世宗于中京即皇帝位者是也未几即入于北汉惟圣宗所建之大定府称为中京

南京本幽州范阳郡地石晋所献会同元年升为南京府曰幽都开泰元年改府名曰析津仍置南京亦曰燕京城方三十六里崇三丈衡广一丈五尺敌楼战橹咸具

西京本云州云中郡地亦石晋所献重熙十三年升为西京府曰大同城广袤二十里敌楼棚橹咸具时元魏宫垣遗址尚在辽既建都以为重地命亲王主之【按契丹国志载四京本末有上中东南而无西故曰四京然大同建都实在兴宗之世叶隆礼但称四京误矣】

（臣）等谨案辽初国号契丹不设都名其所居曰西楼西楼者即上京也国初设四楼在木叶山者曰南楼在龙化州者曰东楼在唐州

者曰北楼与西楼而四岁时游猎皆出入其闲至太祖始建皇都太宗即皇都为上京更置东京南京为三京圣宗置中京兴宗置西京而五京具焉

○金都

上京本海古勒之地金之旧土也国言金曰爱新以爱新水源于此故名金源建国之号盖取诸此国初称为内地天眷元年号上京海陵

贞元元年迁都于燕削上京之号止称会宁府大定十三年七月复为上京

东京本辽东京太宗天会十年改南京路平州军帅司为东南路都统司之时尝治于此以镇高丽皇通四年立东京新宫

北京辽曰中京金初因之海陵贞元元年改曰北京

西京本辽西京大定五年建宫室

中都辽曰南京亦曰燕京【开泰元年号燕京】海陵贞元元年定都以燕乃列国之名不当为京师号遂改为中都府曰大兴

南京金初曰汴京贞元元年曰南京贞佑二年迁都焉

（臣）等谨按金起于混同江至显祖徙居海古勒水始筑室有栋宇之制人呼其地为额讷格尔额讷格尔者汉语居室也自是定都于

爱新之侧称为京师至熙宗升京师为上京海陵天德贞元之闲又定都燕京曰中都汴京为南京中京为北京上京罢京号世宗复上京宣

宗迁都南京而都邑之制遂定初宣宗议迁河中朝臣以河中背负关陕僻阻河朔城邑不及汴梁其议遂寝又临潢府辽为上京金初因称之

天眷元年改为北京贞元元年以大定府为北京复罢临潢府路入大定府路故不在四京之列

○元都

大都金曰中都元太祖十年克燕为燕京路至元元年加号中都四年始于中都之东北置城而迁都焉九年改大都【元史刘秉忠传

命秉忠筑中都城建宗庙宫室八年奏建国号曰大元而以中都为大都】京城右拥太行左挹沧海枕居庸奠朔方城方六十里

上都金桓州元初为扎拉尔部乌噜郡王营幕地宪宗命世祖居之为巨镇中统元年为开平府四年以阙庭所在加号上都每岁一巡幸

【元史刘秉忠传初帝命秉忠相地于桓州东滦水北建城于龙冈名曰开平继升为上都】

和琳太祖建都于此因其地西有哈喇和琳河以名亦曰元昌复曰和宁【按顺帝太子亦都于此称号曰北元】

（臣）等谨按元起于和琳世祖居开平浑一天下既改号踵辽金故事定都于燕

以开平为上都燕京为大都而和琳则前后五代所都

置行中书省为岭北要地焉

○明都

京师顺天府洪武元年曰北平府【按寰宇通志洪武初改大都路为北平府缩其城之北五里】永乐元年建为京改府名京城周四

十五里【按明成祖实录永乐十七年十一月拓北京城南计二千七百余丈】嘉靖二十三年筑重城包京城之南转抱东西角楼长二十

八里【按嘉靖实录二十一年兵部尚书聂豹等相度京城外四面宜筑外城约七十余里后以工费重大成功不易先筑南面四十二年增

修各门瓮城】

南京应天府【元堡庆路属浙江行省】太祖丙申年曰应天府洪武元年建都曰南京十一年曰京师永乐元年仍曰南京京城周九

十六里【洪武三年九月始建新城六年八月成】洪武二十三年建外城周一百八十里

中都凤阳府太祖吴元年曰临濠府洪武二年置都六年曰中立府七年改名城周五十里四百四十三步

（臣）等谨按明初设二京一都以应天府为京师开封府为北京凤阳府为中都洪武十一年罢北京永乐定都北平改为京师加应天

为南京于是复为二京凤阳仍中都之号嘉靖十年又升安陆州为承天府十八年建兴都然明世称京都者不数承天盖嘉靖特以陪藩故邸

隆其称号故不得与二京中都并称云

○四夷都

（臣）等谨按郑志于历代都邑后附列四夷都其有不知都邑所在者但云其国在某处而已盖外国荒远史有详畧未能一一详其都

会也考都邑畧载历代建都之处所以明王者建邦设都天时地利各有冯藉因以覘其得失足为考镜之资若四夷诸国或居海岛一隅幅员

逼促或逐水草所在迁徙靡常史册有云其王治某处者亦但据朝贡中国一时所闻者书之其前后所居靡得而详焉且通志自有四夷传在

无须复载惟唐之南诏宋之西夏明之安南其立国建都皆仿效内地而朝鲜世通朝贡都邑变迁亦有可纪他若元太子之都和琳既附注元

都下明世之通西洋诸国皆远在海外既详四夷传中兹概不录

朝鲜初都平壤后以新罗为东州乐浪府号东京百济为金州金马郡号南京平壤为镇州号西京西京最盛总之凡三京【按朝鲜箕

子封国汉末高氏改国号曰高丽又曰高句丽后唐时王氏兼并新罗百济地明洪武时

李氏更国号仍曰朝鲜】

南诏 【后为大礼国又改大理国】 都羊咀咩城别都曰善关府唐开元末徙治大和城

西夏宋咸平闲都灵州 【按唐贞观时拓跋赤辞归唐赐姓李置静边等州以处之其后析居夏州者号平夏部自是世有西土宋咸平

五年李继迁攻陷灵州以为西平府六年遂以为都】 干兴闲都兴州 【大中祥符闲李德明大起宫室于■〈金敖〉子山干兴末城怀远

镇为兴州以居子元昊仍居兴州阻河依贺兰山以为固】

安南本交址地明宣德时黎氏都交州曰东都 【即唐都护治所】 以清华府为西都

钦定续通志卷一百十

●钦定续通志卷一百十一 礼略一

礼略

（臣）等谨按五礼之名肇自虞书其吉凶军宾嘉之目则见于周礼春官宗伯之掌自秦以还礼教散轶汉兴诸儒缀辑传注遗经赖以

不亡要亦未遑更定一代之制魏晋而降时有述作至唐开元时诏学士等因贞观显庆所修五礼集开元礼一百五十卷其讨论删改参酌古

今为近代言礼者之冠贞元中京兆杜佑网罗旧闻纂辑前古以来沿革故事为礼典六十五卷别为开元礼纂三十五篇规制粲然大备宋郑

樵撰通志准杜氏成式作礼略四卷大要汰其仪文掇其纲领间述杜氏论撰或别加采录折衷古义以附本条之下其次序时代亦多讫于开

元礼而止虽其援据证明未若杜氏之该洽要之因革损益之大端亦云备矣窃惟代有兴废制有异同其势然也戴记礼器之文曰礼时为大

是以三王异世不相袭礼唐自开元而后秘书郎韦公肃撰礼阁新仪三十卷太常博士王彦威复集五礼裁制敕格为曲台新礼三十卷又续

曲台礼三十卷并损益旧章以合时变后唐明宗尝诏太常卿刘岳等删定郑余庆书仪周世宗显德中敕窦俨依唐会要门类编大周通礼宋

太祖开宝初命御史中丞刘温叟等撰开宝通礼二百卷又通礼义纂一百卷仁宗天圣初太常博士王皞为礼阁新编六十卷景佑间贾昌朝

撰太常新礼嘉佑初欧阳修苏洵等奉敕撰太常因革礼大观政和时诏郑居中等撰五礼新仪二百四十卷南宋绍兴初命礼官续太常因革

礼嘉泰二年礼部尚书费士寅等奏进所续中兴礼书八十卷嘉定六年秘书少监李■〈直上土下〉上通礼三十卷他若陈祥道礼书司马

光书仪韩琦范祖禹吕大防诸家祭式祭仪各有撰述朱子在光宗朝欲请置局编次仪

礼经传事虽未果而其门人黄干杨复所编经传通解其书固至今存焉辽初风尚质朴太宗克晋后文明日起辽史所载有辽朝杂礼及陈大任辽礼仪志金则有大金集礼金纂修杂录等书事物名数最为详赡元自世祖始制朝仪泰定四年博士李好文撰太常集礼五十卷天历中诏儒臣修经世大典作礼典上中下篇其目三十有二明洪武初讲求典礼首定郊社宗庙祀事寻命诸臣纂集礼书又诏郡县举博雅之士赴局编辑爰有洪武体制洪武礼澗礼制集要太常集礼等书无虑数十种其间厘正祀典一洗前代矫诬之失至嘉靖中世宗定明伦大典颇以制作礼乐为事其时议礼诸臣希旨苟容未免为世诟厉然所颁嘉靖祀典郊祀通典亦大有可甄录焉夫自唐讫明风会与世移易古称议礼之家纷如聚讼矧时代迭更阅八百余岁之久其纯驳互见文质异宜殆亦更仆难数今稽诸正史旁综书传续撰礼略若干卷其以宾嘉次吉军凶后宾及篇目次第条析部分则一循郑志之旧云

吉礼 【一】

○吉礼一

郊天

大雩

明堂

朝日夕月

大蜡

灵星

风师雨师及诸星等祠

△郊天

唐高宗显庆二年诏南郊祈谷孟夏雩明堂大享皆祭昊天上帝罢感帝祠 【太尉长孙无忌议曰据祠令及新礼并用郑玄六天之义圜丘祠昊天上帝南郊祭太微感帝明堂祭太微五天帝谨按郑玄此义惟据纬书所说六天皆指星象谓圜丘所祭昊天上帝为北辰耀魄宝郊祀及明堂为太微五帝周易云日月丽乎天又云在天成象足明神象非天且天地各一是曰两仪天尚无二焉得有六是以王肃羣儒咸驳此义又圜丘即郊异名同实而郑说分为两祭启絜郊天自以祈谷而谓为感帝之祭事甚不经理宜改革从之 案无忌此议新旧唐书作显庆二年许敬宗等议通典作永徽二年无忌等议今据唐会要及马氏通考辑】 干封初诏祈谷复祀感帝司礼少常伯郝处俊奏显庆礼废感帝之祀改祈谷为祀昊天上帝以高祖配旧礼感帝以世祖元皇帝配今既复祈谷为感

帝高祖已配圜丘昊天上帝又配感帝恐乖周人禘尝郊稷之义从之又诏圜丘以高祖太宗同配武后垂拱元年诏有司议郊丘明堂严配之礼用凤阁舍人元万顷范履冰之说郊丘诸司皆以高祖太宗高宗并配【成均助教孔元义请奉太宗高宗配圜丘及明堂神尧配感帝于南郊太子右谕德沈伯仪议神无二主之道高祖请配圜丘方丘太宗请配南郊北郊高宗制礼作乐告禅升中理当总配五天元万顷等议谨案见行礼昊天上帝等五祠咸奉高祖太宗兼配今议者远摭遗文近乖成典伏据见行礼高祖太宗既先配五祠理当依旧请奉高宗历配五祠制从万顷等议】天册万岁元年亲享南郊始合祭天地睿宗太极元年祭昊天上帝于南郊不设皇地祇位玄宗开元十一年亲享圜丘奉高祖配始罢三祖并配之礼天宝元年合祭天地于圜丘自是有事圜丘皆合祭肃宗宝应元年太常卿杜鸿渐等言周人祭天圜丘配以远祖高祖非始封之君不得为太祖以配天地乃罢高祖以太祖景皇帝配【谏议大夫黎干以为太祖非受命之君不宜配天作十诘十难以非之书奏不报宝应二年六月久旱言事者以为高祖不得配之过诏羣臣议太常博士独孤及以为景皇帝始封于唐天所命也由是配享不易】宪宗元和十五年十二月宣问有事南郊合卜日与否礼官奏曰自天宝以后凡欲郊祀必先朝太清宫次日飨太庙又次日飨天相循至今并不卜日从之

梁太祖开宝三年正月有事于南郊

后唐庄宗南郊合祭天地以献祖文皇帝配明宗南郊一并于洛阳郊坛

周太祖广顺三年九月太常礼院奏定郊庙制度洛阳郊坛在城南七里丙巳之地圜丘四成十二陛每节十二等燎坛在泰坛之丙地方一丈高一丈二尺开上南出户方六尺请下所司修奉从之

宋郊坛在都城南熏门外【太祖开宝九年南郊仍于洛阳郊坛时有徙洛之意故西幸而特行礼云】太祖干德元年十一月合祭天地于圜丘奉宣祖配太宗太平兴国三年十一月合祭于南郊奉太祖配【宋初南郊四祭及感生帝皇地祇神州凡七祭以僖祖顺祖翼祖宣祖迭配而太祖亲郊者四并以宣祖配太宗即位以宣祖太祖更配是年合祭天地始奉太祖升侑焉】雍熙元年从礼仪使扈蒙议以宣祖配天于圜丘太祖配上帝于明堂淳化四年从礼仪使苏易简议亲祀郊丘奉宣祖太祖同配其常祀祈谷神州明堂以宣祖配圜丘北郊雩祀以太祖配真宗即位有司上言圜丘雩祀方丘请奉太宗配祈谷明堂奉太祖配感帝神州奉宣祖配其亲祀圜丘奉太祖太宗并配诏可真宗

大中祥符四年判太常礼院孙奭言准礼冬至祀圜丘有司摄事以天神六百九十位从祀今惟有五方上帝及五人神十七位天皇大帝以下并不设位且太昊勾芒惟孟夏大雩季秋大享及之今乃祀于冬至恐未叶宜翰林学士晁迥等议如奭所请以开宝通礼神位为定其有增益者如后敕仁宗即位礼官定迁郊祀配帝祈谷神州以太祖配雩祀及昊天上帝皇地祇以太宗配感帝以宣祖配明堂以真宗配亲祀郊丘以太祖太宗配天圣二年八月太常礼院言南郊合行荐告之礼望降所用日诏将来玉清昭应宫景灵宫太庙同日行礼【景佑五年侍讲贾昌朝言朝庙之礼本告以配天享侑之意合于旧典所宜奉行其景灵宫朝谒本沿唐世太清宫故事有违经训固可改革望将来朝庙前未行此礼俟郊礼成诣景灵宫恭谢所冀尊祖事天礼简诚至】皇佑五年【皇佑五年马氏通考作景佑二年案礼志载谏官杨旼奏论及礼院议俱作皇佑诏书三圣并侑则作景佑者误今据礼志辑】郊诏三圣并侑嘉佑六年礼院言对越天地神无二主皇佑诏书三圣并侑后复迭配未几复并侑以为定制虽出孝思颇违经典下两制议翰林学士王珪等请如礼官议七年诏南郊以太祖定配神宗元丰元年枢密院陈襄等言伏承圣意以天地合祭于圜丘为非典礼之正诏令更定臣谨按周礼大司乐以圜钟为宫冬日至于地上之圜丘奏之六变以祀天神以函钟为宫夏日至于泽中方丘奏之八变以祭地祇夫祀以冬至者以阳气来复于上天之始也宫用夹钟以帝出乎震也谓之圜者取其形以象天也三一之变合阳奇之数也祭以夏日至者以阴气潜萌于下地之始也宫用林钟于坤之宫以万物致养于坤也谓之函者取其容以象地也二四之变合阴偶之数也又大宗伯以禋祀实柴禋燎祀其在天者而以苍璧礼之以血祭沈豷醯辜祭其在地者而以黄琮礼之皆所以顺其阴阳辨其时位仿其形色此二礼之不得不异也去周既远先王之法不行汉元始中附会周官大司乐之说谓当合祭故天地共犊礼之失自此始陛下恢五圣之述作举百王之废臣以为既罢合祭则南北二郊自当别祀于是诏礼官讲求六年冬至郊祀昊天上帝以太祖配始罢合祭不设皇地祇位【宋初郊礼止服袞冕至是稽古始加服大裘而被袞冕案分祭之说得矣然方丘仪制必准圜丘而是时圜丘之礼尚沿五代其费用较唐尤甚如百官之有荫补诸军之有赏赉皆袞靡文而不求礼意之实故苏轼得以帑藏空竭为言而古制卒不可复也】哲宗元佑七年七月诏冬至日南郊宜依故事设皇地祇位礼毕别议方泽之礼以闻八年四月丁巳诏南郊合祭天地罢礼部集官详

议【初诏议南北郊典礼苏轼主合祭从之者五人刘安世主分祭从之者四十人既而朝廷再令详定安世复议略云古者求神以类天阳物也地阴物也岁时日月方位牲器乐舞皆从其类今议者弃圣人成法猥用王莽不经之说至引夫妇同牢私褻之语渎乱天地又引昊天有成命之诗以为证臣等窃详此诗终篇未尝有合祭之文序乃后儒之辞亦谓圜丘方泽各歌此诗如潜之序曰季冬荐鱼春献鲔也丰年之序曰秋冬报也噫嘻之序曰春夏祈谷于上帝也如此之类不知为一祭耶抑二祭耶会有旨罢议安世议不得上】 绍圣元年右正言张商英言先帝谓天地合祭非古请诏礼部太常寺详议以闻用蔡京等议罢合祭徽宗建中靖国元年诏初郊权合祭天地于圜丘起居郎周常以为非曾布主其说乃罢合祭高宗建炎二年驾幸扬州筑坛于州南门内江都县之东南是岁冬至祀昊天上帝以太祖配【案通考作合祭天地今据宋史辑】 绍兴十二年诏建圜坛于临安府行宫东城之外十三年合祭天地以太祖太宗并配

辽不建郊丘而以祭山为大礼其仪设天神地祇位于木叶山有树木悬牲告办班位奠祝致嘏饮福诸礼

金之郊祀本于其俗有拜天之礼【端午中元重九拜天射柳岁以为常】 太宗即位乃告祀天地盖设位而祭也天德以后始有南北郊之制大定明昌其制寢备南郊坛在丰宜门外当阙之己地圜坛三成成十二陛各按辰位墼墙三匝四面各三门坛墼皆以赤土圻之冬至日合祭昊天上帝皇地祇于圜丘大定十一年始郊命宰臣议配享之礼右丞石琚言两汉魏晋以来皆配以一祖至唐高宗始以高祖太宗并配垂拱初又加以高宗宋亦尝以三帝配臣谓冬至亲郊宜从古礼帝曰唐宋以私亲不合古不足法今止当以太祖配

元兴朔漠代有拜天之礼衣冠尚质祭器尚纯帝后亲之宗戚助祭宪宗二年八月始以冕服拜天于日月山十二月【十二月元史祭祀志作十二日今据本纪更正】 又用孔氏子孙元措言合祭昊天后土大合乐作牌位以太祖睿宗配享世祖中统二年亲征北方四年亲祀天于旧桓州之西北洒马湏以为礼皇族之外无得而与皆如其初至元十二年以受尊号告祭天地于国阳丽正门东南七里建豪以祭自后国有大事皆即南郊告祭成宗即位始为坛于都城南七里遣司徒乌都岱为大行皇帝请谥成宗大德六年三月合祭昊天上帝皇地祇五方帝于南郊遣左丞相哈喇哈斯摄事九年右丞相哈喇哈斯等言祭天国之大事也陛下虽未及亲行宜如宗庙社稷遣官摄祭岁用冬至于是

命议郊祀礼中书集议曰冬至圜丘惟祀昊天上帝西汉元始间始合祭天地王莽之制何可法也今循三代之典惟祀昊天其方丘之礼续议以闻又议前代以祖宗配享今宗庙已依时祭郊礼专祀昊天为宜诏可七月筑郊坛于丽正文明门之南是岁南郊配位遂省武宗至大三年十一月有事于南郊以太祖配五方帝日月星辰从祀文宗至顺元年十月辛酉始服大裘袞冕祀昊天上帝于南郊以太祖配十二月戊午以郊礼成御大明殿受朝贺大赦自世祖混一六合至文宗凡七世而南郊亲祀始克举焉盖器物仪注至是益加详慎矣

明太祖洪武元年中书省臣李善长等进郊祀议言当遵古制分祭天地冬至则祀昊天上帝圜丘以大明夜明星辰太岁从祀从之建圜丘于钟山之阳二成四出陛陛皆九级又定郊祀宗庙岁必亲祀以为常是岁有事于南郊有司议配祀太祖谦让不许二年祀上帝于圜丘以仁祖配位第一成西向七年更定内壝之内东西各三坛星辰二坛分设于东西其次东则太岁五岳西则风云雷雨五镇内壝之外东西各二坛东四海西四渎次天下神祇东西分设十年秋太祖感斋居阴雨览京房灾异之说谓人君事天地犹事父母不宜分处遂改定为合祀即圜丘旧制以屋覆之名曰大祀殿凡十二楹中石台设上帝皇地祇座每岁正月中旬择日合祭奉仁祖配从祀丹墀四坛大明坛一夜明坛一星辰坛二内壝外二十坛五岳坛五五镇坛五四海坛四四渎坛一风云雷雨坛一山川坛一太岁坛一天下神祇坛一历代帝王坛一凡二十四坛大臣分献建文元年正月庚辰大祀天地于南郊奉太祖配成祖迁都北京建坛正阳门南之左规制悉如南京仁宗洪熙元年正月丙戌太祀天地于南郊以太祖太宗配世宗嘉靖九年既定明伦大典益覃思制作之事郊庙百神咸欲斟酌古法厘正旧章谓大祀殿乃屋下祭帝非祭天之礼天地合祭亦非专事上帝以问大学士张璁而璁言祖制已定不敢轻议帝再卜之奉先殿太祖前亦不吉议且寝会夏言上疏请举亲蚕礼帝以古者天子亲耕南郊后亲蚕北郊适与所议郊祀相表里因令璁谕言陈郊议言因上疏言国家合祭天地及太祖太宗之并配诸坛之从祀举行不于长至而于孟春皆不应古典宜令羣臣博考诗书礼经所载及汉宋诸儒匡衡刘安世朱熹等之定论以及国初分祀之旧制陛下称制而裁之此中兴大业也帝敕礼部及羣臣各陈所见于礼部集上羣臣所议郊礼分祭合祭言人人殊卒用夏言说命改筑圜丘坛定分祭之制帝又以夏言议降谕欲于二至日奉太祖配南北郊岁首奉太宗配上帝于大祀殿张璁等言古者郊与明堂异地故可分配今

圜丘大祀殿同兆南郊冬至礼行于报而太宗不与孟春礼行于祈而太祖不与实所不安帝曰万物本乎天人本乎祖天惟一天祖亦惟一祖止当以高皇帝配文皇帝功德非不可配天但开天立极高皇帝肇之耳如周之王业武王实成之而配天止以后稷配上帝止以文王未闻当时争论功德也因命寝其议已而夏言复上言二祖并配之非帝命申议于是礼臣复上议请南郊太祖专配大祀殿仍奉二祖配从之然帝心终以并配为未当十年正月祈谷礼毕谕嗣后大报与祈谷止奉太祖配十八年改行祈谷之祭于大内之元极宝殿不奉配遂为定制 【明初无祈谷礼嘉靖十年始行之至隆庆初而罢】 神宗万历三年大学士张居正进郊礼图册言高皇帝初定郊礼分祭十年而竟定于合祭者诚以古今异宜适时为顺故举以岁首人之始也卜以春初时之和也岁惟一举事之节也为屋而祭行之便也列圣相承莫之或易今以冬至极寒而裸将于星露之下夏至盛暑而骏奔于炎歊之中六飞再驾以时以义斯为戾矣且成祖再造宇宙功同开创配享百余年一朝而罢之于人亦有大不安者窃以为宜遵高皇之旧制循列圣之攸行岁惟一举合祀之礼于大祀殿而奉二祖并配从之

△大雩

唐肃宗干元二年以久旱徙东西二市祭风伯雨师修雩祀为泥土龙望祭名山大川以祈雨代宗大历九年七月久旱京兆尹黎干愿禱诸祠德宗贞元元年分命朝臣禱羣神以祈雨十九年自正月不雨至于五月命分禱山川

梁太祖开平二年令近镇按古法禳祈旬日乃雨干化二年八月雨泽愆期令宰臣于魏州灵祠祈禱

后唐庄宗同光二年孟夏雩祀奉太宗文皇帝配

晋高祖天福八年五月命宰臣分诣寺观禱雨

宋制孟夏雩祀昊天上帝为大祀初以四祖迭配太宗时以宣祖太祖更配真时以太宗配自宋初以来凡旱潦虫蝗无雪或亲禱诸寺观甚则再幸或撤乐减膳进蔬饌或分遣官告天地太庙社稷岳镇海渚或望祭于南北郊或五龙堂城隍庙九龙堂浚沟诸祠有如子夏子张信陵君段干木等庙亦祀之或启建道场于诸寺观或遣内臣分诣诸州如河中之后土庙太室宫亳之太清明道宫兗之会真景灵宫太极观凤翔府之太平宫舒州之灵仙观江州之太平观泗州之延祥观皆函香奉祝驿往禱之真宗咸平元年以旱遣使禱卫州百门庙白鹿山二年旱诏有司祭雷师雨师 【内出李邕祈雨法以甲乙日择东方地作坛取土造青龙长吏斋

三日诣龙所汲流水设香案茗果饗饵率羣官乡老

日再至祝酹不用音乐巫覡雨足送龙水中余四方皆如之饰以方色大凡日干及建坛取土之里数器之大小龙之修广皆取土生成之数诏

颁诸路】景德三年有司言今年四月五日雩祀上帝十三日立夏祀赤帝按月令立夏之日天子迎夏于南郊注云迎夏为祀赤帝又云是月

也大雩注云春秋传曰龙见而雩谓建巳之月阳气盛而常旱万物待雨而长故祭天以祈雨龙见谓角亢也立夏后昏见东方又按五礼精义

云自周以来岁星差度今之龙见或在五月以祈甘雨于时已晚请自今并于立夏后卜日如立夏在季春则待改朔庶时节协于纯阳典礼符

于旧史奏可大中祥符二年旱遣司天少监史序祀玄冥五星于北郊除地为坛望祭已而雨足遣官报谢旧制不祈四海至是特命祭之神宗

熙宁元年正月帝亲幸寺观祈雨仍令在京差官分祷各就本司先致斋三日然后行事诸路择端诚修洁之士分祷岳镇海渚名山大川诸路

神祠灵迹寺观虽不系祀典祈求有应者并委州县差官洁斋致祷已而雨足复幸太一宫报谢元丰四年详定礼文所言近诏宗祀明堂以配

上帝余从祀羣神悉罢今大雩犹沿旧制皆羣神从祀与诏旨相戾请孟夏大雩惟祀上帝以太宗配余从祀羣神悉罢又请改筑雩坛于国南

以严祀事并从之五年礼部言雩坛当立于圜丘之左已地高一丈广轮四丈周十二丈四出陛为三墼各二十五步周垣四门一如郊坛之制

【初大雩皆亲祀自熙宁迄靖康有司摄事而已】南渡后雩祀上帝在城西惠照院望祭斋宫行礼其后又于圜坛行礼孝宗时因雨泽愆

候分祷天地宗庙精修雩祀初沿唐开元礼祈雨雩坛谓之特祀不以乐荐于是太常朱时敏言通典载雩祀用舞僮歌云汉乞用舞僮六十四

人衣玄衣歌云汉之诗诏从之

辽制岁旱惟择日行色克色哩仪以祈雨【前期置百柱天棚皇帝致奠于先帝御容乃射柳皇帝再射亲王宰执以次各一射中柳者

质志柳者冠服不中者以冠服质之不胜者进饮于胜者然后各归其冠服又翌日植柳天棚之东南巫以酒醴黍稷荐植柳祝之皇帝皇后祭

东方毕子弟射柳皇族国舅羣臣与礼者赐物有差既三日雨则赐多啰伦穆腾马四匹衣四袭否则即以水沃之耳】金世宗大定四年五月

命礼部尚书王竞祈雨北岳以定州长贰官充亚终献又卜日于都门北郊望祀岳镇海渚有司行事用酒脯醢后七日不雨祈大社大稷又七

日祈宗庙不雨仍从岳镇海渚如初祈其设神座实尊罍如常仪其尊罍用甘瓢去蒂以为尊祝版惟五岳宗庙社稷御署余则否后十日不雨

乃徙市禁屠杀断伞扇造土龙以祈雨足报谢投龙水中十六年五月旱遣使祈雨于盩
静山神

元无雩礼遇水旱或遣官行事或命西僧致祷世祖至元元年四月东平太原平阳
旱分遣西僧致祷仁宗皇庆元年十二月遣官祈雪于
社稷岳镇海渚二年旱帝于宫中默祷遣官分祷诸祠泰定帝泰定三年帝以不雨自责
遣祀名山大川京城寺观文宗天历二年三月以去冬
无雪今春不雨命中书及羣臣分祷山川羣祀明太祖洪武元年旱祷雨于滁之丰山柏
子潭二年以春久不雨祈告诸神祇为十八坛中设风
云雷雨岳镇海渚凡五坛东设钟山两淮江西两广海南北山东燕南燕蓟山川旗纛诸
神凡七坛西设江东两浙福建湖广荆襄河南北河东
华州山川京都城隍凡六坛中五坛帝亲奠币初献余命官分献每坛犊羊豕各一币则
太岁风云雷雨用白余随方色笱豆簋簠视社稷孝宗
弘治十七年五月畿内山东久旱遣官祭告天寿山分命各巡抚祭告北岳北镇东岳东
镇东海世宗嘉靖八年帝谕礼部去冬少雪当春雨泽
不降当亲祭南郊社稷山川尚书方献夫等具上仪注二月亲祷南郊山川同日社稷用
次日不除道冠服浅色羣臣同文五品武四品以上于
大祀门外余官于南天门外就班陪祀九年帝欲于奉先殿丹陛上行大雩礼夏言请筑
雩坛孟春既祈谷自二月至四月雨暘时若则大雩遣
官摄行如雨泽愆期则躬行祷祝乃建崇雩坛于圜丘坛外泰元门之东为制一成岁旱
则祷奉太祖配十二年夏言等言古者大雩之祀命乐
正习盛乐舞皇舞盖假声容之和以宣阴阳之气请于三献礼成之后九奏乐止之时乐
奏云门之舞仍命儒臣括云汉诗辞制云门一曲使文
武舞士并舞而合歌之且教舞童百人青衣执羽 【礼志作扇讹】 绕坛歌云门之曲
曲凡九成因上其仪视祈谷礼帝从其议 【案明代
嘉靖以前雩祭无常仪凡遇水旱或躬祷或遣官祭郊庙陵寝及社稷山川至世宗始建
雩坛定仪制制乐章然行之未几复为更改其后神宗
万历十三年愍帝崇祯四年复行步祷亦暂焉耳其于常雩旱雩之典终未备焉】

△明堂

唐玄宗开元二十年季秋大享于明堂祀昊天上帝以睿宗配又以五方帝五官从
祀笱豆尊壘之数与雩礼同二十五年依旧改东都明
堂为干元殿自是迄唐之世季秋大享皆寓圜丘代宗永泰二年大享明堂以肃宗配宪
宗时以顺宗配穆宗时以宪宗配 【三大享暨配位
新旧书纪志俱不载从马贵与通考增补】

后唐庄宗同光元年有司上言季秋大享于明堂请奉太祖武皇帝配

宋初沿唐制季秋大享明堂寓祭南郊坛太宗雍熙元年诏以太祖配淳化四年以宣祖配然未尝亲祠止命有司摄事真宗始议行之属封岱宗祀汾阴故亦未遑仁宗皇佑二年三月仁宗谓辅臣今年冬至日当亲祀圜丘欲以季秋行大享明堂礼然自汉以来诸儒议论不同夫明堂者布政之宫朝诸侯之位天子之路寝乃今之大庆殿也今不当于郊壇寓祭其以大庆殿为明堂仍诏所司定仪注以闻礼院请依周礼设五室于殿旧礼明堂五帝皆为幔室今旁帷上幕宜用青缙朱里四户八牖赤缀户白缀牖宜饰以朱白缙绍曰祖宗亲郊合祭天地祖宗并配百神从祀今祀明堂正当亲郊之期而礼官所定祭天不及地祇配坐不及祖宗未合三朝之制且移郊为大享盖亦为民祈福【先是宋庠建议今年当郊而日至在晦用建隆故事宜有所避因请季秋大享于明堂从之盖是岁祀明堂即以代郊礼也】宜合祭皇地祇奉太祖太宗真宗并配而五帝神州亦亲献之日月河海诸神悉如圜丘从祀之数嘉佑七年【案马氏通考及玉海作嘉佑六年今据宋史本纪及礼志辑】七月诏复有事于明堂礼院言皇佑参用南郊百神之位不应祀法宜如隋唐旧制设昊天上帝五方帝位以真宗配而五人帝五官神从祀悉罢英宗即位礼官议仁宗配明堂知制诰钱公辅等奏曰三代之法郊以祭天以始封之祖有圣人之功者配焉明堂以祭五帝以创业继体之君有圣人之德者配焉孝经曰昔者周公郊祀后稷以配天宗祀文王于明堂以配上帝宋之太祖则周之后稷配祭于郊太宗则周之文王配祭于明堂此二配至重万世不迁之法也真宗则周之武王仁宗则周之成王虽有配天之功而无配天之祭未闻成康以严父之故废文王配天之祭而移于武王成王也唐中宗时以高宗配明皇时以睿宗配代宗时以肃宗配礼官杜鸿渐王涯辈不能推明礼意反雷同其说以惑时主延至于今牢不可破愿陛下深诏有司博谋羣贤循宗周之典礼替有唐之曲学诏台谏等官再详定以闻观文殿学士孙抃等曰仁宗继体保成功德在人祔庙之始不得配上帝之享甚非所以宣章陛下严父之大孝谏官司马光吕诲奏论舍真宗而以仁宗配于祭法不合诏从抃议以仁宗配享神宗朝大享以英宗配元丰三年详定所言祀帝于南郊以天道事之则虽配帝用犊所谓帝牛不吉以为稷牛是也享帝于明堂以人道事之则虽天帝用太牢诗所谓我将我享维羊维牛是也自梁用特牛隋唐因之皇佑熙宁用犊与羊豕皆未应礼请今亲祀上帝配帝五方帝五人帝用牛羊豕各一六月诏曰历代以来合宫所配杂以先儒六天之说朕甚不取将来祀英宗皇帝于明堂以配上帝余

从祀羣神悉罢详定所又言案晋挚虞议明堂之祭备物以荐三牲并陈笱豆咸列礼同人理故配以近考开元开宝礼及见行仪注明堂之享席用藁鞮器用陶匏并与郊祀无别殊非所谓礼同人理配以近考之意请以莞席代藁鞮蒲越以玉爵代匏爵其豆登簋俎尊罍一用宗庙之器从之哲宗元佑元年有事于明堂以神宗配徽宗政和三年八月诏立明堂于大内之丙地徙秘书省于宣德门之东以其地为之诏明堂之制朕取考工记互见之文得其制作之本取夏后氏益世室之度兼商人四阿重屋之制从周人度以九尺之筵上圆象天下方象地四户以合四序八窗以应八节五室以象五行十二堂以听十二朔九阶四阿每室四户夹以八窗飡帝严父听政班朔于一堂之上于古皆合其制大备宜令明堂使司依图建立蔡京言三代之制世室重屋明堂修广不相袭世每近制每广今度以二筵为太室方一丈八尺则室中设版位礼器已不可容理当增广今以九尺之筵为度大室修四筵【三丈六尺】广五筵【四丈五尺】共为九筵木火金水四室各修三筵益四五【三丈一尺五寸】广四筵【三丈六尺】共七筵益四尺五寸十二堂古无修广之数今亦广以九尺之筵明堂玄堂各修四筵广五筵左右今各修广四筵青阳总章各修广四筵左右个各修四筵广三筵益四五四阿各四筵堂柱外基各一筵堂总修十九筵【一十七丈一尺】广二十一筵【一十八丈九尺】蔡攸言明堂五门廊庑盖以素瓦而明堂则以琉璃其地则随所向而砌以五色之石栏楯柱端以铜为辟邪之象而饰五方所向之色八窗八柱则以青黄缘相间堂室柱门栏柱并以丹雘涂之堂为三级每级崇三尺共为一筵庭植松梓桧门不设戟而殿隅并垂铃诏玄堂避圣祖讳改为平朔重和元年九月辛巳大享明堂并祭五帝【礼部尚书许光凝等言月令季秋大享帝说者谓徧祭五帝曲礼大享不问卜说者谓祭五帝于明堂莫适卜也周官太宰祀五帝则掌百官之誓戒说者谓祀五帝于四郊及明堂自神宗下诏惟以英宗配上帝而悉去从祀羣神陛下肇祀宏规季秋大享位五帝于其室既无以祢禘配之嫌止祀五帝又无羣神从祀之黷则神宗黜六天于前陛下正五帝于后其揆一也从之案此议宋史作许光凝马氏通考作孔光凝所载详略亦微有不同今依宋史作许光凝而其文则兼采通考以归明晰】诏每岁季秋大享亲祀明堂如孟月朝献礼罢有司摄事及五使仪仗等自是迄宣和末岁行亲享云高宗绍兴元年合祭天地于明堂奉太祖太宗配【礼部尚书胡直孺言皇佑拘于礼文配帝并及真宗今主绍膺大统自真宗至于神宗均为祖

庙独跻则患在无名并配则几同祫享今参酌皇佑诏书将来请合祭昊天上帝皇地祇于明堂奉太祖太宗配惟礼专而事简庶几可以致力

于神明】礼毕不受贺文武百官拜表称贺如仪四年九月有事于明堂合祭天地以太祖太宗配兼祀百神【先是有司请议郊祀明堂祫

享之宜礼部侍郎陈与义谏曰谨按皇佑诏书曰国朝自祖宗以来三岁一郊今祀明堂正当三岁亲郊之期而礼官所定配坐不及祖宗宜并

配以称朕恭事祖宗之意盖太祖则周之后稷当配祭于郊者也太宗则周之文王当配祭于明堂者也郊当祭太祖而以当郊之岁举明堂之

礼则不可以遗太祖而不祭皇佑诏书可为万世不刊之典盖中兴郊祀明堂合祭天地并配祖宗之礼参据推明至是始定】三十一年九月

大享明堂罢合祭奉徽宗配祀五天帝五人帝于堂上五官神于东厢罢从祀诸神位用熙宁礼也孝宗淳熙六年以羣臣议复合祭天地并侑

祖宗从祀百神如南郊光宗受禅以高宗升侑理宗淳佑三年用枢密都承旨韩祥等言明堂以太祖太宗徽宗并侑宝佑五年复奉高宗升侑

于是明堂之礼一祖三宗并配度宗咸淳五年又去徽宗而奉理宗与祖宗并配焉

明初亦无明堂之礼嘉靖十七年六月致仕扬州府同知丰坊上疏请复古礼建明堂加尊皇考献皇帝庙号称宗以配上帝下礼部会议

尚书严嵩等言以功德论则当配以太宗以亲亲论则当配以献皇帝至称宗之说臣等不敢妄议帝降旨令再会议户部侍郎唐胄抗疏言大

享之祭必奉配太宗而后我朝之典礼始备帝怒下胄诏狱嵩乃再会廷臣议献皇帝配帝侑食文皇帝配孟春祈谷帝从献皇帝配帝之请而

却文皇帝议不行复以称宗之礼集文武大臣于东阁议之疏上帝以不言祔庙留中不下乃设为臣下奏对之词作明堂或问以示辅臣言明

堂当以父配及当称宗祔庙之义时未建明堂迫季秋遂大享上帝于元极殿奉睿宗献皇帝配二十一年即南郊大祀殿旧址建大享神御殿

岁以季秋大享上帝奉皇考睿宗配行礼如南郊陈设如祈谷及殿成而大享仍于元极殿遣官行礼岁以为常隆庆元年罢之

（臣）等谨按明堂之礼本于成周自汉儒已莫明其义故大戴礼白虎通及蔡邕等所说制度各不相符朱子谓郊者古礼明堂者周制

周公以义起之则其不必强行于后代可知汉孝武从方士之说祀太一五帝于明堂惑之甚矣唐世泥于孝经严父之义配享迭更宋臣钱公

辅讥之至为切当宋皇佑时于明堂行郊礼名实乖舛英宗治平后配位专以近考自是遂以为常虽徽宗播越亦得与于配天之享其失礼尤

甚辽金元皆无其制明至世宗欲追隆所生特创斯礼逮隆庆而复罢夫违经训而事靡

文与假礼文而丰私昵皆无当于制作之义也

△朝日夕月

唐开元礼以日月为中祀玄宗天宝三载诏升为大祀以四时致祭

宋真宗天禧初太常礼院详定秋分夕月合于未后三刻行礼仁宗庆历中定朝日夕月圭皆五寸用羊豕各二筮豆十二簋簠俎二皇佑五年定朝日坛旧高七尺东西六步一尺五寸增修高八尺广四丈如唐郊祀录夕月坛与隋唐制度不合从旧则坛小如唐则坎深今定坎深五尺广四丈坛高一尺广二丈四方为陛降入坎中然后升坛坛皆两墼皆二十五步增山壘二筮豆十二神宗元丰六年礼部言唐王泾郊祀录夕月坛方广四丈今止二丈请依制改造从之高宗绍兴三年司封员外郎郑士彦言春分朝日秋分夕月祀典未举望诏礼官讲求从之其后于城外惠照院望祭位版日书曰大明月书曰夜明玉用圭璧大明币用赤夜明币用白礼如祀感生帝

辽拜日仪皇帝升露台设褥向日再拜上香合门使通合使或副应拜臣僚左右阶陪位再拜皇帝升座奏榜讫北班起居毕时相以下通名再拜不出班奏圣躬万福又再拜各祇候宣徽以下横班同诸司合门北面先奏事余同教坊与臣僚同圣宗统和元年十二月千龄节祭日月四年十一月祭日月为驸马都尉萧德勒祈福

金朝日坛曰大明在施仁门外之东北当阙之卯地门墼之制皆同方丘夕月坛曰夜明在彰义门外之西北当阙西掘地污之为坛其中春分朝日秋分夕月斋戒陈设省牲器奠玉币进熟其节并如大祀之仪朝日玉用青璧夕月用白璧币皆如玉之色牲用羊一豕一有司摄三献司徒行事其亲行朝日金初用本国礼太宗天会四年正月始朝日于干元殿而后受贺熙宗天眷二年定朔望朝日仪有司设炉案御褥位于所御殿前陛上宣徽使奏导皇帝至位南向拜殿门外臣僚陪拜如常仪世宗大定二年以无典故罢十五年言事者谓今正旦并万春节宜令有司定拜日之仪有司援据汉唐春分朝日升烟奠玉如圆丘之仪又案唐开元礼南向设大明神位天子北面能无南向拜日之制今已奉敕以月朔拜日宜遵古制殿前东向诏姑从南向十八年上拜日于仁政殿始行东向之礼章宗明昌五年初定日月常祀

元世祖至元十六年十二月甲申祀太阳二十五年春正月庚寅祭日于司天台武宗至大三年议行南北郊及朝日夕月有旨所用仪物令有司速备其后仅举南郊北郊及朝日夕月皆不行

明太祖洪武三年礼部言朝日坛宜筑于城东门外夕月坛宜筑于城西门外朝日

以春分夕月以秋分星辰则祔祭于月坛从之其祀仪
与社稷同并设太尊二着尊二山罍二在坛上象尊二壶尊二山罍二在坛下笱豆各十
簋各四玉并用圭璧五寸币大明用赤夜明星辰并
用白牲大明用赤犊夜明用白犊星辰用纯犊二十一年于南郊大祀殿为日月星辰四
坛从祀其朝日夕月祭星之祭悉罢之世宗嘉靖九年
帝以日月星辰止一从祀义所不安复定春秋分祭如旧仪建朝日坛于朝阳门外西向
夕月坛于阜成门外东向坛制有隆杀以示别也朝日
护坛地一百亩夕月护坛地三十六亩朝日无从祀夕月以五星二十八宿周天星辰共
一坛南向祔焉春祭以寅迎日出也秋季以亥迎月出
也【朝日坛甲丙戊庚壬年上祭服亲祀余年遣文大臣摄之夕月坛丑辰未戌年上皮
弁亲祀余年遣武大臣摄之】

△大蜡【腊】

宋火德王以戌日为腊太祖建隆三年十二月戊戌腊有司画日以前七日辛卯蜡
博士和峴奏议曰蜡腊之别名也汉乘火德以戌腊腊
者接也新故相接畋猎禽兽以报百神享宗庙旁及五祀以致孝尽虔魏晋同之唐乘土
德贞观中以寅日蜡百神卯日祭社宫辰日享宗庙开
元定礼三祭皆于腊辰以应土德圣朝腊用戌而以辛卯日蜡礼官之失也事下有司议
如峴言蜡百神祀社稷享宗庙皆用腊日仁宗天圣三
年同知礼院陈诒言蜡祭一百九十二位祝文惟载一百八十二位五方田畯五方邮表
畷十位不载请于祝文内增入庆厯用羊豕各二大明
夜明坛增山罍为二笱豆十二皇佑定坛高八尺广四丈嘉佑加羊豕各五神宗元丰六
年详定礼文所言记曰八蜡以记四方年不顺成八蜡
不通厯代蜡祭独在南郊惟周隋有四郊之兆又月令以蜡与息民为二祭故隋唐息民
祭在蜡后请蜡祭四郊各为一坛有不顺成之方则不
修报其息民仍在蜡后先是太常寺言四郊蜡祭有不顺成之方即祭日月其神农以下
更不设祭又旧仪神农后稷并设位坛下当移坛上伊
耆氏即神农也坛下伊耆氏位宜除去从之徽宗政和三年礼局上新仪腊前一日蜡百
神四方蜡坛广四丈高八尺四出陛两壝每壝二十五
步东方设大明位西方设夜明位以神农后稷氏配配位以北为上南北坛设神农氏位
以后稷氏配五星二十八宿十二辰五官五岳五镇四
海四渎及五方山林川泽邱陵坟衍原隰井泉田畯苍龙朱鸟麒麟白虎玄武五水庸五
坊五于菟五麟五羽五介五毛五邮表畷五羸五猫五
昆虫各依其方设位中方镇星后土田畯设于南方蜡坛酉阶之西中方岳镇以下设于
南方蜡坛午阶之西伊耆氏设于北方蜡坛卯阶之南

其位次于辰星高宗绍兴十九年有司检会五礼新仪腊前一日蜡东方西方为大祀礼料视感生帝内从祀视释奠文宣王从祀南方北方为中祀礼料视岳镇海渚内从祀视释奠武成王从祀孝宗干道四年太常少卿王澹请于四方各为一坛以祀其方之神如政和之制其后南蜡于圜坛行礼北蜡于余杭门外精进寺行礼 【元明八蜡之祭不行明彭谨八蜡庙记云古礼天子大蜡今之制止于府州县王国则否畿甸以降惟两淮之间有之荆杨以南莫之行也宝庆旧无庙有庙自钧杨郭公始仁哉公之用心其善于复古矣陆东蜡议云八蜡神相沿以春秋仲月致祭考之典礼于义未当蜡祭当以十二月汉以戌魏以丑议立春于除前则用立春日前丑日立春于来岁则用下旬丑日庶几协于祭义】

△灵星

唐德宗贞元六年春二月复命祀灵星

宋诸星祠有灵星之祭仁宗庆历中以立秋后辰日祀灵星其坛东西丈三尺南北丈二尺皇佑定如唐制灵星寿星坛皆周八步四尺其享礼笱八豆八在神位前左右重三行俎二在笱豆外簠簋一在二俎间象尊二在坛上东南隅北向西上徽宗政和新仪改定坛高三尺东西袤丈三尺南北袤丈二尺四出陛一墼二十五步初真宗干兴祀灵星值屠牲有禁乃屠于城外至是敕有司凡祭祀牲牢无避禁日南渡后祀灵星如旧制明太祖洪武元年太常寺奏汉高祖命郡国立灵星祠唐制立秋日后辰日祀灵星今拟如唐制为坛于城南从之二年礼部尚书崔亮奏八月望日祀灵星遣官行礼三年罢之

△风师雨师及诸星等祠

唐玄宗天宝五载诏风师雨师久列常祀惟此震雷未登羣望其后每祀雨师宜以震雷同坛祭共牲别置祭器肃宗干元元年初置太一神坛于圜丘东命宰相王玙摄行祠事二年亲祀九宫贵神 【天宝三载术士苏嘉庆上言请于朝日坛东置九宫贵神坛坛三成成三尺四陛其上依位置九坛坛尺五寸东南曰招摇正南曰轩辕东北曰太阴正东曰天一中央曰天符正北曰太乙西南曰摄提正西曰咸池西北曰青龙五为中数戴九履一左三右七二四为上六八为下符于遁甲四孟月祭礼次昊天上帝而在太清宫太庙上用牲牢璧币类于天地神祇玄宗亲祠之如有司行事即宰相为之】 初九宫神位四时改位干元以后不易位德宗贞元二年诏问风师雨师祝版署讫合拜否太常寺奏本是小祀准礼无至尊亲祭之文今虽请御署检详经据并无拜礼诏曰风师雨师为中

祀有烈祖成命况在风雨至切苍生今礼虽无文朕当
屈已再拜以申子育万民之意仍永为例程宪宗元和十五年太常礼院奏来年正月三
日皇帝有事于南郊同日立春后丑日祀风师按有事
南郊百神从祀风师既是星神厌降之仪便当陪祭如非遇郊祀其特祭如常仪文宗太
和二年监察御史舒元舆奏臣伏见祀九宫贵神祝版
陛下亲署御名称臣王者父天母地兄日姊月此九神于天地犹子男于日月犹侯伯也
陛下尊为天子岂可称臣于天之子男耶诏都省议皆
如元舆言乃降为中祀祝版称皇帝不署名武宗会昌元年中书门下奏九宫贵神司水
旱兵荒累年水旱僭候恐是有司祷请诚敬稍亏请自
今以后用大祀之礼御署祝版以社稷为准所冀稍重其事以神严敬敕旨依奏

后梁太祖干化二年以旱诏委河南尹祈风师雨师

宋制二仲祭九宫贵神为大祀立春后丑日祀风师立夏后申日祀雨师为中祀立
秋后辰日祀灵星秋分享寿星立冬后亥日祀司中司
命司民司禄为小祀太乙九宫神位在国门之东郊初用中祀咸平中改为大祀真宗景
德三年知枢密院事王钦若请祠寿星诏有司详定请
以秋分日飨寿星及角亢七宿用灵星小祀礼坛亦如灵星坛制大中祥符元年东封泰
山于行宫东筑坛以祀九宫二年泽州请立风师雨师
庙命礼官考仪式颁之有司言唐制诸郡置风伯坛于社坛之东雨师坛于西各稍北数
十步卑下于社坛祠用羊一笮豆各八簋簠各二奏可
仁宗景佑二年学士承旨章得象等定司天监于渊等所请祀九宫太乙依逐年飞移位
次之法按郟良遇九宫法有飞碁立成图每岁一移主
九州岛灾福事请依唐礼遇祭九宫之时遣司天监官一员诣祠所随每年贵神飞碁之
方以定祭位仍自天圣己巳入厯太乙在一宫岁进一位
飞碁巡行周而复始诏可康定元年礼官言国家有天下之号实本于宋五运之次又感
火德宜因兴王之地商邱之旧为坛兆祀大火以阍伯
配建辰建戌出内之月内降祝版留司长吏奉祭庆厯四年灵台郎王太明言按占书主
河江淮济沟渠溉灌之事十九星汴口祭河渎七位而
不及星司天监详定亢池北河南河土司空不主江淮济箕计奎三星颛主津渎请与东
井天津天江咸池积水天渊天潢水位水府四渎九坎
天船王良罗堰等十七星在天河内者当祠诏汴口祭河兼祠十七星熙宁四年司天中
官正周琮言五福太乙自雍熙元年甲申岁入东南巽
官修东太乙宫天圣七年己巳岁入西南坤位修西太乙宫今五福太乙移入中都请稽
故事崇建祠宇迎之京师诏建中太乙宫于集禧观 【

太乙十神曰五福君基大游四神臣基直符民基小游天一地一】 元丰详定局言周礼

兆五帝于四郊四类亦如之郑氏曰日月星辰运行无
常以气类为之位兆日于东郊兆月与风师于西郊兆司中司命于南郊兆雨师于北郊
各以气类祭之谓之四类汉仪县邑常以丙戌日祠风
伯于戌地以己丑日祀雨师于丑地亦从其类也熙宁祀仪兆风师于国城东北兆与师
于国城西北司中司命于国城西北亥地则是各从其
星位而不以气类也请稽旧礼兆风师于西郊祠以立春后丑日兆雨师于北郊祠以立
夏后申日兆司中司命司禄于南郊祀以立冬后亥日
其坛兆则各从其气类其祭辰则各从其星位仍依熙宁仪以雷师从雨师之位以司民
从司中司命司禄之位又言国朝秋分飨寿星于南郊
于坛上设寿星一位南向坛下卯阶之南设角亢氐房心尾箕七位东向案尔雅寿星角
亢也说者曰数起角亢列宿之长故曰寿星非此秋分
所享之寿星也又按晋天文志老人一星在弧南一曰南极见则治平主寿昌常以秋分
候之南郊后汉于南郊立老人星庙常以仲秋祀之则
寿星谓老人星矣请依后汉于坛上设寿星一位祀老人星其坛下东方七宿不宜复设
从之六年太常博士何洵直言祀九宫贵神祝版宜依
会昌故事及开宝通礼书御名而不称臣又贵神九位共享二少牢于腥熟之俎骨体不
备谓宜每位一牢凡九少牢诏下太常修入祀仪徽宗
建中靖国元年建阳德观以祀荧惑又建荧惑坛于南郊赤帝坛壝外令有司以时致祭
增用圭璧以阙伯配俱南向五方火精神等从祀政和
新仪立春日祀东太一宫立夏及季夏土旺日祀中太一宫立秋日祀西太一宫立冬日
祀中太一宫又定风坛广二十三步雨雷坛广十五步
皆高三尺四陛并一壝二十五步其雨雷坛同壝司中司命司民司禄为四坛各广二十
五步同壝又请风师雨师司中司命用乐仍制乐章以
为降神之节祭以少牢仍用体解止荐熟并从之南渡后祀寿星风师雨师雷师并仍旧
制高宗绍兴三年太常寺言应天府祀大火今道路未
通宜于行在春秋设位七年五月命举荧惑之祀十八年诏择地建太一宫又诏临安府
于国城之东筑建九宫贵神坛壝其仪如祀上帝

辽圣宗统和二年祭风伯道宗清宁元年皇帝射柳讫诣风师坛再拜

金章宗明昌五年为坛于景丰门外东南阙之巽地岁以立春后丑日祀风师牲币
进熟如中祀仪又为坛于端礼门外西南阙之坤地以
立夏后申日祀雨师仪如中祀羊豕各一是日祭雷师于位下礼同小祀一献羊一无豕
其祝称天子谨遣臣某云宣宗兴定元年以久旱祀九
宫贵神于东郊

元每有兴作祭太岁月将日直于太史院世祖至元五年敕二分二至及圣诞节日

祭星于司天台七年大司农请于立春后丑日祭风师于东北郊立夏后申日祭雷雨师于西南郊【延佑五年始立坛壝其仪注阙】二十六年十二月命回回司天台祭荧惑【元祀仪皆礼官所拟而定于中书日星始祭于司天台而回回司天台遂以祭星为职事】成宗初即位五月壬子祭太阳太岁火土等星于司天台庚申祭紫微星于云仙馆大德元年建五福太一坛以道流主之仁宗即位祭五星于司天台英宗初祭星于回回司天台监四十昼夜文宗至顺元年以立冬祀五福十神太一真君二年正月敕每岁四祭五福太一二月建五福太一坛于京城干隅【张美和曰五福太一之贵神以二百二十五年行五宫自干而艮艮而巽巽而坤坤而中宫又至干每宫住四十五年所至之宫得福是年在干宫】

明初以太岁风雨雷师从祀圜丘复增云师于风师之次司中司命司民司禄寿星依唐制分日而祀太祖洪武二年以太岁风云雷雨诸天神合为一坛诸地祇合为一坛春秋专祀定惊蛰春分日祀诸天神于城南既又以诸神阴阳一气流布无间乃合二坛为一而增四季月将之祀改祭期与地祇俱用惊蛰秋分后三日【坛制见山川门】又从礼郊尚书崔亮奏每岁圣寿日祭寿星同日祭司中司命司民司禄皆遣官行礼三年罢寿星等祀从礼部奏于城南诸神享祀坛正南向增九间以圣寿节前三日于此祭周天星辰四年帝躬祀周天星辰正殿共十坛中设周天星辰位仪如朝日【先是三年八月夕月西郊附祭周天星辰至是乃罢】六年命天下祀风云雷雨之神九年更定山川坛制正殿太岁风云雷雨岳镇海渚钟山七坛东西庑各三坛东京畿山川夏冬二季月将西春秋二季月将京城隍共十三坛二十一年敕十三坛诸神并停春祭每岁八月中旬择日祭之命礼部更定祭山川坛仪与祭社稷同又以星辰既从祀南郊罢祭星之祭成祖迁都悉如旧制世宗嘉靖八年命每岁孟春及岁暮特祀太岁月将之神与享太庙同日十年即山川坛为天神地祇二坛左为天神坛四祀云雨风雷右为地祇坛五祀岳镇五陵山海渚以仲秋中旬致祭辰戌丑未年皇帝亲祀余年遣大臣摄祭别建太岁坛准社稷而差小其中太岁殿东庑春秋月将二殿西庑夏冬月将二殿帝亲祭于拜殿中每岁孟春享庙岁暮禘祭之日遣官致祭穆宗隆庆元年以天地神祇已从祀南北郊罢祭神祇坛惟太岁月将特祀于山川坛如故

（臣）等谨按郑氏周礼注谓风师雨师为箕毕二星然箕星好风毕星好雨特谓其气类之感召如此非谓二星即风雨之神也天文志

东井为水事而孙武书言翼轸壁皆为风星之主风雨者窳独箕毕耶颜师古注汉书郊祀志云志既言二十八宿又有风伯雨师则知非箕毕其破郑说良是云雷之祀不见于经典楚辞有云中君汉书郊祀志晋巫祠云中君元始时王莽分蠡公庙于东郊北自汉以后无闻焉唐天宝始祀雷师明初始祀云师窃以为风云雷雨皆阴阳之气流行鼓荡不得专指一星以主之而其功用相资祀典亦不容以偏废也汉郊祀志云天神贵者曰泰一泰一佐曰五帝天文志云天极星其一明者泰一之常居也晋隋天文志云泰一星天帝神也主使十六神知风雨水旱兵革饥馑疾疫灾害所在之国又云三台为泰阶泰一躐以上下则泰一者星象之尊者也然汉既祠泰一矣又别祠三一天一地一泰一唐宋既祠九宫泰一矣唐又别置泰一神坛宋又别祠十神泰一夫泰一一星耳不知其何以分为二祀又何以或为九神或为十神也易干凿度云泰一取其数以行九宫郑康成注云泰一者北辰神名下行八卦之宫每四乃还于中央中央者北辰之所居故谓之九宫然则九宫止泰一一神之所风流唐时术士九宫贵神之说则泰一第居九神之一而又别增其八以为九且九宫既有星名复有神名不知周天星辰皆有神名耶抑祇此九星者有之耶至十神泰一则有天一地一之名为汉三一之二而与八神皆加以泰一之号夫天一与泰一并列星象乃合而名之曰天一泰一此何义也而君基臣基大游小游等于星象又何当耶盖泰一九宫之说出于星厯五行之家而道家者流杂出其说以附益之凿空架虚支离悠缪不但为经典之所不言即求诸本术亦已淆乱而失其本矣太岁月将之祀说者谓起自元明然宋志载中太一宫灵贶殿太岁在中太阴在西则宋已祀太岁至明则泰一之祀废而太岁特尊居山川坛诸神祇之上郑氏注保章氏云岁谓太岁岁星为阳右行于天太岁为阴左行于地然则太岁者谓岁阴之在地者也若岁星虽每年移次与太岁同而其所值之辰与太岁正不相当若太岁在子则岁星在丑太岁在丑则岁星在子太岁在寅则岁星在亥明时礼官皆以岁星为太岁误矣若以岁星为太岁则汉时已祀五星厯代从祀圜丘又安得谓起自元世耶太岁月将虽亦出于阴阳家之言然正而近实略仿古者祭时与寒暑之遗意与九宫泰一之荒唐无据者不同矣

钦定续通志卷一百十一

●钦定续通志卷一百十二 礼略二

礼略 【二】

吉礼 【二】

○吉礼二

方丘

社稷

山川

藉田

先蚕

△方丘 【神州后土附】

唐代宗大历十二年增修北郊坛文宗太和三年太常寺奏北郊祀皇地祇坛请直斋宫一所可之

后唐庄宗同光元年有司上言孟冬祭神州地祇请奉懿祖昭圣皇帝配

宋初方丘在宫城北以夏至祭皇地祇别为坛于北郊以孟冬祭神州地祇真宗景德三年以太常寺言神州坛迫隘徙于方丘之西四年

正月以朝陵遣工部尚书王化基诣汾阴后土祠 【汉武帝所立睢上祠】 致祭用大祀礼大中祥符三年八月诏以来年春有事于汾阴后

土有司定制四年正月备銮驾出京师二月诣睢坛如封禅礼仁宗庆历时夏至祭皇地祇用犊羊豕各一皇佑初礼官言皇地祇坛卑陋不应

典礼请如唐制增广之五年诸坛皆改神宗元丰四年诏亲祀北郊并如南郊之仪有故以上公摄事六年礼部太常寺上亲祀仪并如南郊其

摄事唯改舞名不备官其俎豆乐器圭币之数史官奉祀册并如亲祀 【元佑后分祭合祭详见郊天】 徽宗崇宁元年礼部尚书黄裳言南

郊坛十二龛从享星位具载其名至于北郊第以岳渎海镇山林川泽邱陵坟衍原隰之目别以四方置于成壇而不列其名今讲行大礼宜诏

礼官考其名位礼部员外郎陈旸奏五行之帝既从享于南郊第一成则五行之神亦当从祀于北郊第一成昆仑神州宜列从祀之位又地莫

尊于大祇而五岳帝次之欲升之第一成并从之政和三年礼制局定方坛为再成再壇俱应坤地之数四年夏至亲祀皇地祇于方泽并如郊

祀仪是后七年至宣和二年五年亲祀者凡四高宗绍兴初惟用酒脯鹿麋行一献礼二年太常少卿程瑀言皇地祇当一依祀天仪式又言国

朝祀皇地祇设位于坛北南向政和设于南方北向令北面望祭于经典无据请仍南向并从之

辽祭木叶山以国俗行事 【详见郊天】 金海陵天德后始有南北郊之制大定明昌其礼渐备北郊方丘在通元门外当阙之亥地方

坛四成成为子午卯酉四正陛方壇三周四面三门夏至日祭摄官行三献礼

元世祖时每岁遣使代祀后土至元五年建后土祠于太庙宫十三年又立后土祠

于平阳成宗大德九年礼官博士奏冬至圜丘惟祀昊天上帝其方丘祭地之礼续议以闻制曰可武宗至大二年尚书省臣及太常礼官言郊祀者国之礼今南郊之礼已行而北郊之礼未举明年夏至祀北郊请以世祖配制可三年博士李之绍蒋汝砺疏曰案方丘之礼夏以五月商以六月周以夏五月其丘在国之北礼神之玉以黄琮牲用黄犊币用黄缙配以后稷其方丘之制历代不同然无出于三成之式今拟取坤数用六之义于都城北六里壬方择地中为方坛三成四陞外为三壝仍依古制自外壝之外治四面令稍低下以应泽中之义宫室墙围器血色并用黄其神州地祇以下从祀自汉以来制度不一至唐始因隋制以岳镇海渚山林川泽邱陵坟衍原隰各从其方从祀今盍参酌举行然终元世北郊竟未立云

明初建方丘于太平门外钟山之阴坛二成成皆四出陞陞八级太祖洪武二年夏至祀方丘皇地祇北向其仪惟迎神后瘞毛血祭毕奉帛祝饌而埋之与郊天异余并同圜丘三年亲祀方丘以仁祖配岳镇海渚从祀增祀天下山川之神于方丘【洪武十年定南郊天地合祭详见郊天】成祖迁都建大祀殿合祭天地制如南京世宗嘉靖九年建方泽于安定门外每岁夏至祭祀以太祖配神宗万历三年张居正进郊祀图册请复合祀天地于大祀殿以二祖配从之

（臣）等谨按唐宋虽合祭天地而不废北郊至明建大祀殿而北郊遂废又其制也屋而不坛其祀也以春不以冬此礼之大变也嘉靖改建郊丘古制始复惜中世以后怠于亲郊故一再传而张居正遂得以为言复行合祭虽继世之君苟安简便亦由世宗有慕古之心而无行礼之实不足以垂法后人故也

△社稷

唐德宗贞元五年国子祭酒包佶奏礼天子社稷用太牢大历中敕祀少牢社稷依开元礼为中祀沿用少牢至今未改宜准礼用太牢

周太祖广顺三年太常礼院奏定社稷坛制度诏可宋制岁以春秋二仲及腊日祭太社太稷为大祀州县则春秋二季刺史县令初献上佐县丞亚献州博士县簿尉终献牲用少牢仁宗庆历三年定社稷牲牢之数用羊豕各二报用两圭有邸祈不用玉神完元丰三年详定所言社稷祝版牲币饌物并请瘞于坎不设燔燎又言周礼以血祭祭社稷今祭社不用血祭背违经典请祭社稷以埋血为始古者祭社君南向于北壝下所以答阴也今社壝无北壝而有司摄事乃设东向之位于礼非是请太社壝内设北壝以备亲祀南向答阴之位其有司摄事则立北

墉下少西又王制天子社稷皆太牢诸侯社稷皆少牢今太社太稷用少牢不应礼请加角握二牛又社稷之祭有瘞玉而无礼玉开元礼太社太稷并以两圭有邸请下有司造之以礼神仍诏于坛侧建斋厅三楹以备望祭先是州县社主不以石礼部以为社主用石取其坚久请令州县社主用石尺寸广长半太社之制遂下太常修入祀仪哲宗元佑中从博士孙谔言祭太社太稷皆设登歌乐高宗南渡初规制未备绍兴元年以春秋二仲及腊前祭社稷于天庆观以酒脯一献明年望祭于临安天熹观八年改祀于惠照斋宫始用羊豕皆四十四年诏筑坛壝于观桥之东立石主置太社令一员太社坛广五丈五色土为之稷坛在西如其制社以石为主形如钟长五尺方二尺剡其上培其半四面宫垣饰以方色覆以黄土面各一屋三门每门二十四戟四隅连饰罍罍如庙制中植以槐其坛三分宫之一在南无屋孝宗淳熙四年命临安守臣更立望祭殿及庖室斋庐仪视神州设太社太稷位于坛之南方北向后土句芒后稷氏位于其西东向金海陵贞元元年有司奏立社稷坛于上京世宗大定七年建坛于中都其制外四周为垣南向开一神门门三间内又四周为垣东西南北各开一神门门三间各列二十四戟连饰罍罍无屋于中稍南为坛位令三方广阔一级四陛以五色土各饰其方中央覆以黄土其高广主石与宋同坛南栽栗以表之近西为稷坛如社坛之制而无石主四壝门各五间两塾三门门列十二戟壝有角楼楼之面皆随方色饰之外门止一间不施鸱尾祭以春秋二仲上戊日乐用登歌礼三献太尉太常卿光禄卿行事其州县祭享一如唐宋旧仪

元世祖至元七年有诏岁祀太社太稷十一年颁坛壝仪式于诸路三十年正月用御史中丞崔彧言于和义门内少南得地四十亩为壝垣近南为二坛坛高五尺方广如之社东稷西相去约五丈社坛土用青赤白黑四色依方位筑之中间实以常土上以黄土覆之依方面以五色泥饰之四面当中各设一陛道其广一丈亦各依方色稷坛如社坛之制其上四周纯用黄土坛皆北向立北墉于社稷之北以砖为之饰以黄泥瘞坎二于稷坛之北少西深足容物二坛周围壝垣以砖为之高五丈广三十丈四隅连饰内壝垣棂星门四所外垣棂星门二所每所门三列戟二十有四社主用白石【制如宋金】稷不用主树松于二坛之南各一玉币社稷皆黝圭一纁藉瘞玉一以黝石代之正配位皆玄币一各长一丈八尺牲用黝牛一其角握副羊豕各四祭日以春秋二仲上戊成宗元贞二年冬诏太常州县社稷坛壝置坛于城西南二坛方广视太社太稷杀其半牲用羊豕余与太社太稷同三献官以州长贰为之仁宗延佑六

年改祀社稷用中戊

明太祖洪武元年建社稷于宫城西南太社在东太稷在西坛皆北向岁以春秋二仲上戊亲祀以句龙后稷配牲用犊羊豕各一礼用三献又颁制于天下郡邑坛建于城西北东社西稷每岁春秋二仲月祭长官行三献礼三年于太社太稷坛北建祭殿五间又北建拜殿五间以备风雨四年定王国社稷之制立于王国宫门之右坛方三丈五尺高三尺五寸四出陞其制上不同于太社下异郡邑之制十年上以太社太稷分祭配祀皆因前代制欲更制为一代之典下礼部议从尚书张寿议改建社稷坛于午门之右共为一坛合祭设木主而丹漆之祭则设于坛上祭毕收藏仍用石主埋坛中如唐宋之制罢句龙与后稷配位以仁祖配升为大祀十一年春祭社稷行新定仪迎神送神饮福凡十二拜余如旧惠帝建文元年二月祀社稷奉太祖配成祖永乐十九年建北京社稷坛坛制祀礼一如南京旧式仁宗洪熙后以太祖太宗同配世宗嘉靖九年改正社稷配位仍以句龙后稷配先是亲耕礼成以给事中王玘言欲推衍耕藉之道礼部议西苑地宽宜令农夫垦蓺其中上以春秋临幸观省收其所入输之神仓上可其议命建土谷坛于豳风亭西十年更名帝社帝稷以上戊明日祭后改次戊戌在翌后则用上巳春告秋报为定制穆宗隆庆元年礼部言帝社帝稷之名自古所无嫌于烦数宜罢从之【案帝社帝稷之名唐神龙年间礼臣祝钦明实主其说以附于王自为立社曰王社之礼明隆庆礼臣言自古所无殊为失考以其烦数而罢之则得矣】

△山川

唐肃宗至德二载敕改沂阳郡吴山为西岳【上元时又改吴山为华山华山为泰山华州为秦州华阴县为秦阴县宝应元年复旧】

代宗广德二年诏五岳四渎名山大川宜令所管致祭德宗贞元二年诏太常卿裴郁等十人各就方镇祭岳渎等四年复御署祭岳镇海渎祝版文宗开成二年封终南山敕准四镇例以本府都督刺史充献官每年以季夏土旺日祭之

后唐愍帝应顺元年诏三京诸道州府界内名山大川祠庙有益于民者以时虔祀潞王清泰元年五月诏封吴岳为灵应王其祀享官属仍旧仪同五岳

晋高祖天福二年命使祀五岳四渎诏下各州府量事修崇所有近庙山林仍禁樵采

周太祖广顺二年五月亲征兖州遣翰林学士祭东岳庙

宋初沿旧制祭东岳于兖州西岳于华州北岳于定州中岳于河南府太祖建隆四年平湖南命给事中李昉祭南岳继命有司制诸神衣冠剑履遣使易之开宝四年广南平遣司农少卿李继芳祭南海除去刘鋹所封伪号及宫名易以一品服又诏岳渎各以本县令兼庙令尉兼庙丞专管祀事六年遣使奉衣冠剑履送西镇吴岳庙太宗太平兴国八年河决滑州遣枢密直学士张齐贤诣白马津祠以一太牢加两圭有邸沉之自是凡河决溢修塞皆致祭秘书监李至请遵旧制就五方迎气日祭各方岳镇海渎于所隶之州长吏以次为献官其后立春日祀东岳岱山于兖州东镇沂山于沂州东海于莱州淮渎于唐州立夏日祀南岳衡山于衡州南镇会稽山于越州南海于广州江渎于成都府立秋日祀西岳华山于华州西镇吴山于陇州西海河渎并于河中府西海就河渎庙望祭立冬祀北岳恒山于定州北镇医巫闾就北岳庙望祭北海济渎并于孟州北海就济渎庙望祭土旺日祀中岳嵩山于河南府中镇霍山于晋州真宗景德三年令澶州置河渎庙大中祥符元年封禅礼毕诏加号泰山为仁圣天齐王又封泰山通泉庙为灵派侯亭山庙为广禅侯峰山庙为灵岩侯十一月车驾至澶州幸河渎庙进号显圣灵源公四年祀汾阴命官祭西海及汾河车驾至潼关遣官祭西岳及河渎并用太牢备三献礼复亲谒华阴西岳庙羣臣陪位庙垣内外列黄麾仗遣官分奠庙内诸神加号岳神为顺圣金天王还至河中亲谒奠河渎庙及西海望祭坛五月加上东岳曰天齐仁圣帝南岳曰司天昭圣帝西岳曰金天顺圣帝北岳曰安天元圣帝中岳曰中天崇圣帝其玉册如宗庙谥册遣官分诣五岳充奉册使副又加上五岳帝后东曰淑明南曰景明西曰肃明北曰靖明中曰正明仁宗康定二年增封东海为渊圣广德王南海为洪圣广利王西海为通圣广润王北海为冲圣广泽王江渎为广源王河渎为灵源王淮渎为长源王济渎为清源王皇佑五年益封南海洪圣广利昭顺王神宗元丰三年集贤校理陈侗言案周礼小宗伯之职兆五帝于四郊四望四类亦如之郑氏注四望谓五岳四渎也今四郊无四望坛请依礼建之下礼文详定所请兆岱山沂山东海大淮于东郊衡山会稽山南海大江嵩山霍山大海于南郊华山吴山西海大河于西郊常山医巫闾山北海大济于北郊每方岳镇共为一坛海渎共为一坎以五时迎气日祭之皆用血祭瘞埋有事则祷之又以四方山川各附于本方岳镇海渎以下别为一坛一坎水旱则祷之其北郊从祀及诸州县就祭如故诏每方岳渎共为一坛余从之元丰八年封西镇吴山为成德王徽宗政和三年礼局定岳镇海渎坛各高五尺

周四十步四出陞两壝每壝二十五步坛饰依方色祭岳镇海渎设位南向以西为上山川从祀西向以北为上是年诏四镇并封王沂山东安王会稽山永济王医巫闾广宁王霍山应灵王高宗绍兴七年修岳镇海渎之祀岁以四立日及季夏土旺日设祭如祭五方帝礼孝宗干道五年太常少卿林栗言国家驻蹕东南东海南海实在封域之内而东海以莱州隔绝不曾致祭不知通泰明越温台泉福皆东海分界也元丰中尝建庙于明州定海县请依广州祭南海礼例遣官诣明州行礼诏可

辽尊木叶山为镇岁时临幸致祭兼及辽河之神望祭遣祠亦间举焉太祖天赞三年登阿勒坦音德尔山以麋鹿祭穆宗应历十二年六月祀木叶山及潢河圣宗统和七年遣巫覡祭名山大川十三年诏修山泽祠宇以时祭之

金世宗大定四年礼官言岳镇海渎当以五郊迎气日祭之诏依典礼以四立土旺日就本庙致祭其在他界者遥祀立春祭东岳于泰安州东镇于益都府东海于莱州东渎于唐州立夏日望祭南岳南镇于河南府南海南渎于莱州季夏土旺日祭中岳于河南府中镇于平阳府立秋祭西岳于华州西镇于陇州望祭西海西渎于河中府立冬祭北岳于定州北镇于广宁府望祭北海北渎于孟州其封爵并仍唐宋之旧十二年有司言长白山兴王之地理合尊崇敕封兴国灵应王即其北山地建庙宇十五年奏定长白山封册仪物冠九旒服九章玉圭玉册函香币祝册遣使副各一员诣会宁府行礼二十一年册封山陵地大房山神为保陵公冕八旒服七章圭册香币使副持节行礼并如册长白山之仪二十五年封混同江神为兴国应圣公致祭如长白山仪册礼如保陵公故事章宗明昌四年册长白山神为开天宏道圣帝加五镇四渎王爵 【会稽山永兴王江会源王余封号与宋同】

元岳镇海渎代祀自世祖中统二年始凡十有九处分五道后乃以东岳东海东镇北镇为东道中岳淮渎济渎北海南岳南海南镇为南道北岳西岳后土河渎中镇西海西镇江渎为西道既又以驿骑迂远复为五道遣使二人集贤院奏遣汉官翰林院奏遣蒙古官出玺书给驿以行中统初遣道士或副以汉官至元三年定岁祀岳镇海渎之制正月东岳镇海渎土旺日祀泰山于泰安州沂山于益都府界立春日祀东海于莱州界大淮于唐州界三 【疑当作四】 月南岳镇海渎立夏日遥祭衡山土旺日遥祭会稽山皆于河南府界又立夏日遥祭南海大江于莱州界六月中岳镇土旺日祀嵩山于河南府界霍山于平阳府界七月西岳镇海渎土旺日祀华山于华州界吴山于陇县界立秋日遥

祭西海大河于河中府界十月北岳镇海渚土旺日祀恒山于曲阳县界医巫闾山于辽阳广宁路界立冬日遥祭北海于登州界济渚于济源县祀官以所在守土官为之既有江南乃罢遥祭其礼物每岁祀银香盒一重二十五两五岳组金幡二钁五百贯四渚织金幡二四海五镇销金幡二钁并二百五十贯皇帝登宝位遣官致祭降香幡盒如前礼惟加银五十两或他有祷礼亦如之至元二十八年加上东岳为齐天大生仁圣帝南岳司天大化昭圣帝西岳金天大利顺圣帝北岳安天大贞元圣帝中岳中天大宁崇圣帝加封江渚为广源顺济王河渚灵源弘济王淮渚长源博济王济渚清源善济王东海广德灵会王南海广利灵孚王西海广顺灵通王北海广泽灵佑王成宗大德二年加封东镇为元德东安王南镇昭德顺应王西镇成德永靖王北镇贞德广宁王中镇崇德应灵王泰定三年遣使祠海神天妃作天妃宫于海津镇文宗天历二年加封天妃护国庇民广济福惠明着天妃顺帝至正十年诏加河渚神为灵源神佑弘济王仍重建河渚及西海神庙

明太祖洪武二年分天神地祇为二坛以岳镇海渚及天下山川城隍诸地祇合为一坛与天神埒定祭日以清明霜降等又改定建山川坛于正阳门外天地坛西合祀天地诸神凡设坛十九太岁四季月将为第一次风云雷雨次五岳次五镇次四海次四渚次京都钟山次江东次江西次湖广次淮东淮西次浙东浙西福建次广东广西海南海北山东山西河南河北次北平陕西次左江右江次安南高丽占城诸国山川次京城隍次旗纛诸神皆躬自行礼祝文太岁以下至四海五坛称臣钟山诸神称余皆亲署后又定惊蛰秋分后三日遣官致祭三年诏岳镇海渚并去前代所封名号各以山水本名称其神六年以琉球诸国朝贡祀其山川七年令春秋仲月上旬择日祭山川坛八年礼部尚书牛谅言外国山川非天子所宜亲祀请附祭各省从之【广西附祭安南占城真腊暹罗锁里广东附祭三佛齐瓜哇福建附祭日本琉球渤泥辽东附祭高丽陕西附祭甘肃朵甘乌斯藏】九年复定山川坛制凡十三坛正殿太岁风云雷雨五岳五镇四海四渚钟山七坛东西庑各三坛东京畿山川夏冬二季月将西春秋二季月将京城隍十年定正殿七坛帝亲行礼东西庑遣功臣分献二十一年增修大祀殿诸神坛壝乃敕十三坛诸神并停春祭每岁八月中旬择日祭之命礼部更定祭仪与社稷同成祖永乐中建山川坛于北京悉于南京旧制惟正殿钟山右增祀天寿山神世宗嘉靖十一年改山川坛为天地神祇坛天神坛在左云雨风雷凡四坛地祇坛在右南向五岳五镇五陵山四海四渚

凡五坛京畿山川西向天下山川东向辰戌丑未年仲秋皇帝亲祭余遣官摄祭太岁月将城隍别祀之穆宗隆庆元年礼臣言天地神祇已从祀南北郊其仲秋神祇之祭宜罢从之

（臣）等谨按礼记言五岳视三公四渎视诸侯此不过言祭祀之礼秩如之耳后世缘此遂徧加岳镇海渎封号或为公或为王至宋而岳神封为帝矣其尤不经者以人道求之而五岳皆有后焉明洪武三年诏曰岳镇海渎皆高山广水自天地开辟以至于今英灵之气萃而为神必皆受命于上帝幽微莫测岂国家封号之所可加今宜依古定制并去其前代封号止以山水本名称其神足以一正前代之谬矣又案城隍之祀莫详其自始北齐书慕容俨传载俨镇郢城城中有神祠一所俗号城隍神相率祈请城隍神之见于史传始此然考太平府志载城隍庙在府治东承流坊建于吴赤乌二年则由来已旧而庙祀亦非一处矣唐宋以来其祀徧天下或赐庙额或颁封爵至明而列在祀典盖有其举之莫可废也矣窃稽礼记大蜡有八水庸居七说者谓水即隍也庸即城也其典未尝非古且祭法谓功施于民则祀之能御灾捍患则祀之高城深沟实资保障仿诸古者门井户灶之祀孰为重轻宜乎索飨祈报之因时勿替云

△ 耨田

唐肃宗干元二年春正月行耨田礼先期至先农坛阅耨耜有雕饰文命撤之诏有司依农用例程改造翌日致祭神农氏以后稷配享冕而朱紘躬耨耨耜九推礼官奏天子合三推今过礼帝曰朕以身率下自当过之恨不能终千亩耳既而伫立久之观公卿诸侯王公以下耕毕宪宗元和五年诏以来岁正月耨田太常韦公肃言耨田礼久废有司无可考乃据礼经参采开元干元故事草具其仪未及施行而罢

宋太宗雍熙四年始诏以来年正月择日有事于东郊行耨田礼所司详定仪注依南郊置五使除耕地朝阳门七里外为先农坛高九尺四陛周四十步饰以青二壤宽博取足容御耕位观耕台大次设乐舞二县御耕位在壤门东南诸侯耕位次之庶人又次之其青城设于千亩之外用竹木为青箱无盖两端设欐中分九隔隔盛一种黍稷秫稻粱大小豆大小麦陈于箱中覆以青帑御耨耜二具并盛以青绦准唐干元故事不加雕饰其祭先农用纯色犊一如郊祀例进胙余并权用大祀之制皇帝散斋三日致斋二日百官不受誓戒初大礼使李昉请乘玉辂载耨耜于耕根车卤簿使贾模等复言用象辂载耨耜以重其事五年正月乙亥亲享神农以后稷配备三献遂行三推礼毕事解严还行宫百官称贺御干元门大赦改元文武递进官有差二月七日宴羣臣于大明殿行劳酒礼仁

宗明道元年诏以来年二月丁未行耤田礼而罢冬至
亲郊遣官奏告天地宗庙诸陵寝景灵宫州都就告岳渎宫庙其礼如端拱之制而损益
之礼成遣官奏谢如告礼神宗元丰二年诏于京城东
南度地千亩为耤田置令一员徙先农坛于中神仓于东南取卒之知田事者为耤田兵
增修籩麦殿成诏以思文为名徽宗政和元年有司议
享先农为中祀命有司摄事帝止行耕耤之礼罢命五使及称贺肆赦之类太史局择日
不必专用吉亥仿雍熙仪注九卿以左右仆射六尚书
御史大夫摄诸侯以正员三品官及上将军摄设庶人耕位于诸侯耕位之南以成终亩
之礼备青箱设九谷高宗绍兴七年始举享先农之礼
以立春后亥日行一献礼十六年 【通考作十五年误】 亲耕耤田并如旧制

元世祖至元七年立耤田于大都东南郊九年二月戊申始祭先农如祭社之仪武
宗至大三年从大司农请建农蚕二坛博士议二坛式
与社稷同纵广一十步高五尺四出陛不设外墼坛位在耤田内是岁命祀先农如社稷
礼乐用登歌日用仲春上丁后或用上辛或甲日祭毕
以次诣耕地所耕讫而退

明太祖洪武元年谕廷臣以来春行耤田礼礼官议耕耤之日皇帝躬祀先农礼毕
躬耕耤田以仲春择日行事二年建先农坛于南郊在
耤田北亲祭以后稷配器物祀仪与社稷同祀毕行耕耤礼御耒耜二具韬以青绢御耕
牛四被以青衣礼毕还大次应天府尹及江甯上元两
县令率庶人终亩是日宴劳百官耆老于坛所十年二月遣官享先农命应天府官率农
民耆老陪祀二十一年更定祭先农仪不设配位成祖
永乐中建坛北京如南京制在太岁坛西南每岁仲春上戊顺天府尹致祭后凡遇登极
之初行耕耤礼则亲祭孝宗弘治元年定耕耤仪前期
百官致斋顺天府官以耒耜及種稷进呈内官仍捧出授之由午门左出置彩輿鼓乐送
至耤田所至期帝祭先农毕太常卿导引至耕耤位南
向立三公以下各就位户部尚书北向跪进耒耜顺天府官北向跪进鞭帝秉耒三推三
反讫户部尚书跪受耒耜顺天府官跪受鞭太常卿奏
请复位府尹挟青箱以种子播而覆之帝御外门南向坐观三公五推尚书九卿九推太
常卿奏耕毕帝还具服殿升座府尹率两县令耆老人
行礼毕引上中下农夫各十人执农器朝见令其终亩百官行庆贺礼赐酒馔三品以上
丹陛上东西坐四品以下台下坐并宴劳耆老于坛旁
宴毕还宫鼓吹振作农夫人赐布一匹世宗嘉靖十年更定耕耤仪先二日顺天府尹以
耒耜種稷种置彩輿至耕耤所并罢百官庆贺后又议
造耕根车载耒耜府尹于祭日进呈毕以耒耜载车内前玉辂行其御门观耕地位卑下

议置观耕台一诏皆可三十八年罢亲耕惟遣官祭先农

△先蚕

先蚕之礼久废宋真宗景德三年从王钦若请诏有司检讨故事以闻礼院言按开宝通礼季春吉巳享先蚕于公桑前享五日诸与享官散斋三日致斋二日享日未明五刻设先蚕氏神座于坛上北方南向尚宫初献尚仪亚献尚食终献女相引三献之礼女祝读文饮福受胙如常仪按唐会要皇帝遣有司享先蚕如先农礼乃诏自今依先农例遣官摄祭礼院又言周礼蚕于北郊以纯阴也汉蚕于东郊以春桑生也请筑坛东郊从桑生之义坛高五尺方二丈四陛陛各五尺一壝二十五步祀礼如中祀庆厯用羊豕各一摄事官太尉太常光禄卿不用乐神宗元丰四年详定礼文所言季春享先蚕唐月令注以为天驷案先蚕当是始蚕之人故开元礼享先蚕为瘞埴于坛之壬地明非天驷星也今请就北郊为坛不设燎坛但瘞埋以祭余如故事政和礼局言礼天子必有公桑蚕室今请仿古制于先蚕坛侧筑蚕室度地为宫四面为墙高仞有三尺上被棘中起蚕室二十七别构殿一区为亲蚕之所仿汉制置茧馆立织室养蚕于薄度所用之数为桑林筑采桑坛于先蚕坛南相距二十步方三丈高五尺四陛置蚕宫令丞以供郊庙之祭服又周官太宰诏后帅内外命妇蚕于北郊郑氏谓妇人以纯阴为尊则蚕为阴事可知开元礼享先蚕币以黑盖以阴祀之礼祀之也请用黑币以合至阴之义诏从其议命亲蚕殿以无斲为名徽宗宣和元年皇后亲蚕即延福宫行礼命有司享先蚕氏于本坛六年皇后复行亲蚕之礼高宗绍兴七年始以季春吉巳享先蚕孝宗干道中定先蚕为中祀

元蚕坛与农坛同建而祀事不举

明初先蚕未列祀典世宗嘉靖九年从夏言言命考古制行之建坛于安定门外帝亲定其制坛方二丈六尺迭二级高二尺六寸四出陛东西北俱树桑柘内设蚕宫令置采桑台高一尺四寸方十倍三出陛釜驾库五间后盖织室三月皇后亲蚕于北郊祭先蚕氏四月蚕事告成行治茧礼选蚕妇善纴丝及织者各一人卜日皇后出宫导从如常仪至织室内命妇一人行三盆手礼布于织妇以终其事蚕宫令送尚衣织染监局造服其祀先蚕止用乐不用舞乐女生冠服用黑后以皇后出入不便改筑蚕坛于西苑十年十一年皇后皆亲蚕其后因事辄不举十六年诏罢之仍命进蚕具如常岁遣女官祭先蚕

钦定续通志卷一百十二

●钦定续通志卷一百十三 礼略三

礼畧

吉礼

○吉礼三

宗庙

时享

袷禘

功臣配享

七祀

上陵

△宗庙

唐宝应二年【时代宗嗣位尚未敢元】 祧献祖懿祖祔玄宗肃宗【开元创立九室此仍其制以太祖代祖高祖太宗高宗中宗睿宗玄宗肃宗为九室也】 自是之后常为九室德宗时礼仪使颜真卿议太祖高祖太宗皆不毁而代祖元皇帝当迁乃迁元皇帝而祔代宗顺宗时迁高祖而祔德宗宪宗时又迁中宗而祔顺宗自宪穆敬文四世祔庙睿玄肃代以次迁至武宗祔德宗以次当迁而于世次为高祖礼官始觉其非以为兄弟不相为后不得为昭穆乃议复祔代宗而议者言已祧之主不得复入太庙礼官曰昔晋元明之世已迁豫章颍川后皆复祔此故事也议者又言庙室有定数而无后之主当置别庙礼官曰晋武帝时景文同庙庙虽六代其实七主至元帝明帝庙皆十室故贺循曰庙以容主为限而无常数也于是复祔代宗而以敬文武同为一代自是终唐之世常为九代十一室焉

梁初立四亲庙于西京

后唐庄宗时以高祖太宗懿宗昭宗懿祖【庄宗曾祖执宜】 献祖【庄宗祖国昌】 太祖【庄宗父克用】 为七庙明宗即位西京七庙因庄宗时之旧而又别立四亲庙于应州庙号惠祖毅祖烈祖德祖【按明宗为太祖养子实夺庄宗之位故欧史以反书太祖庄宗有知岂歆其祀其仍同光之七庙者特缘饰耳】 愍帝应顺元年中书门下奏太常建议以山陵毕祔庙合祧迁献祖从之【时议者以献祖赐姓于懿宗以支庶系太宗宜以懿为始祖次昭宗可也不必祖神尧而宗太宗若依汉光武则宜于代州立献祖以下庙其唐朝依旧行之可也而议谥者忘咸通之懿宗又称懿祖父子俱懿可乎将朱邪三世与唐室四庙连叙昭穆非礼也议祧者不知受姓于唐懿宗而祧之今又

及献祖以礼论之始祧昭宗次懿祖可也而献祖如唐景皇帝岂可祧乎】

晋高祖天福二年中书门下奏所司请立靖祖肃祖睿祖献祖为四亲庙其始祖一庙未敢轻议御史中丞张昭议古以有功为太祖无追崇始祖之制请依隋唐有国之初创立四庙推四庙之中名位高者为太祖敕尚书省集议乃仿唐朝旧例追尊四庙

汉高祖立文祖德祖翼祖显祖为四亲庙更追尊远祖高皇帝光武皇帝为百代不祧之祖共立六庙

周太祖广顺元年有司议立信祖僖祖义祖庆祖为四亲庙从之

宋太祖建隆元年三月壬戌尊高祖曰僖祖曾祖曰顺祖祖曰翼祖考曰宣祖九月丙午御崇元殿备礼册四亲庙奉安神主真宗咸平元年礼官请称太祖室曰皇伯考妣太宗室曰皇考妣每大祭太祖太宗昭穆同位祝文并称孝子从之英宗初仁宗将祔庙礼院请增庙室孙抃等以为七世之庙据父子而言兄弟则昭穆同不得以世数故晋之庙十一室而六世唐之庙十一室而九世国朝禘祫图太祖太宗同居昭位真宗居穆位盖先朝稽用古礼着之祀典仁宗神位祔庙请增为八室以备天子事七世之礼卢士宗司马光以为太祖以上之主虽属尊于太祖然亲尽则迁故汉元之世太上之主瘞于寝园魏明之世处士之主迁于园邑晋武祔庙迁征西府君惠帝祔庙迁豫章府君自是以下大抵过六世则迁盖太祖未正东向故止祀三昭三穆唐初祀四世太宗增为六世及太宗祔庙则迁弘农府君高宗祔庙又迁宣皇帝皆祀六世前世成法也明皇立九室祀八世事不经见若以太祖太宗为一世则仁宗祔庙僖祖亲尽当迁夹室祀三昭三穆于典礼符合复诏抃议谓僖祖虽非始封之君要为立庙之祖今庙数未过七世不可遂毁其庙乃存僖祖室以备七世神宗初祧藏僖祖主于西夹室祔英宗于太庙熙宁五年中书门下言本朝自僖祖以上世次不可得而知则僖祖有庙与商周稷契疑无以异今毁其庙而藏主于夹室替祖考之尊而下祔于子孙殆非所以顺祖宗孝心事亡如存之义时王安石为相不主祧迁之义故复有此请乃复奉僖祖于太庙迁顺祖于夹室 【时元绛王益柔等上议谓僖祖以上世次不可知则僖祖当比契稷为始祖传曰毁庙之主陈于太祖未毁庙之主皆升合食于太祖今迁僖祖主于太祖之室则是僖顺翼宣四祖祫祭时皆降而合食情文不顺无甚于此韩维议僖祖虽于太祖为高祖然仰迹功业未见其有所因上寻世系又不知其所以始不得以比于契稷奉之而西夹室在顺祖之右于尊卑之次似亦无嫌孙固请特为僖祖立庙太祖以上迭毁之主皆藏之禘祫则僖祖权

居东向之位王介请依周官守祧之制创祧庙以奉僖祖议既上帝颇以韩维说为是而王安石以维言夹室在右为尊之说为非羣议纷纭帝不能决安石力主元绛初议遂从之】 哲宗元佑元年祧翼祖祔神宗于太庙徽宗初哲宗升祔礼部太常寺言宜如晋成帝故事于太庙殿增一室以祔哲宗神主诏权祔于太庙夹室又诏仁宗神宗庙永祀不祧徽宗崇宁二年祧宣祖以哲宗神主祔太庙第八室三年增太庙为十室复翼祖宣祖庙自太祖追尊僖顺翼宣四祖以来每遇禘祫祖宗以昭穆相对而虚东向之位王安石用元绛等议尊僖祖为始祖熙宁八年夏禘于太庙以僖祖东向自是无敢议者绍兴后董棻王普尤袤俱请正太祖东向之位未克行先是熙宁五年已祧顺祖钦宗祔庙又祧翼祖及高宗升祔遂为九世十二室 【十二室者僖祖宣祖太祖太宗真宗仁宗英宗神宗哲宗徽宗钦宗高宗也太祖太宗同一世哲宗徽宗同一世钦宗高宗同一世故为九世】 宁宗初孝宗将祔赵汝愚当国欲并祧僖宣二祖事下侍从台谏礼官议于是吏部尚书郑侨等请祧二祖而正太祖东向之位从之诏别建四祖殿于太庙大殿之西奉僖顺翼宣四主岁令礼官荐献 【时朱熹在讲筵独入议状条其不可者四大畧谓四祖祧主藏于夹室则是以祖宗之主下藏于子孙之夹室至于祫祭设幄于夹室之前则不得谓之祫欲别立一庙则丧事即远有毁无立欲藏之天兴殿则宗庙原庙不可相杂议者徒欲尊奉太祖今但以太祖当日追尊帝号之令推之则知今日太祖在天之灵必有所不忍而不敢当矣议不行】 及光宗祔庙遂复为九世十二室云

辽诸帝各有庙又有原庙如凝神殿之类其仪制俱未详大抵简朴有太古之风焉金太祖天辅七年八月太祖葬上京宫城之西南建宁神殿于陵上以时荐享自是诸京皆立庙惟在京师者曰太庙太宗天会三年十月诏建太祖庙于西京熙宗立之二年 【时仍太宗年号称天会十四年】 定始祖景祖世祖太祖太宗庙皆不祧皇统三年上京初立太庙海陵迁燕增广旧庙奉迁祖宗神主于新都 【按礼志正隆中营建宗庙其制史不备载见于传志杂记者殿规一屋四间限其北为神室其前为通廊东西二十六楹为间二十有五每间为一室庙端各虚一间为夹室中二十三间为十一室从西三间为一室为始祖庙祔德帝安帝献祖昭祖景祖祧主五余皆两间为一室世祖室祔肃宗穆宗室祔康宗余皆无祔】 世宗大定十九年闵宗祔庙为七世十二室二十九年世宗将祔庙用有司言祧献祖昭祖升祔世宗显宗于庙

元世祖中统四年建太庙于燕京至元元年奉安神主于太庙定七室之制皇祖皇

伯考【太宗】皇考【睿宗】皇伯考【珠
迦】皇伯考【察罕岱】皇兄【定宗】皇兄【宪宗】以西为上以次而东三
年尊皇祖为太祖秋九月增太庙八室烈祖神元
皇帝居第一室珠迦察罕岱居睿宗之上十四年八月诏建太庙于大都为前庙后寝庙
分七室三十一年四月成宗即位追尊皇考为皇帝庙
号裕宗武宗即位上都追尊皇考为皇帝庙号顺宗与成宗并祔庙太祖室居中睿宗西
第一室世祖西第二室裕宗西第三室顺宗东第一室
成宗东第二室英宗至治元年以成宗大德间太庙寝殿灾中书省臣请以今殿为寝别
作前庙十五间中三间通为一室以奉太祖神主余以
次为室凡六世而为八室焉泰定帝泰定元年追尊皇考晋王为皇帝庙号显宗二年中
书省臣言太庙太祖居中南向睿宗世祖裕宗主以次
祔西室顺宗成宗武宗仁宗主以次祔东室迺者集贤翰林太常诸臣言国朝尚左令尊
者居右为少屈非所以示后世太祖居中南向宜睿宗
祔左一室世祖祔右一室裕宗祔睿宗室之左显宗顺宗成宗兄弟也以次祔世祖室之
右武宗仁宗亦兄弟也以祔裕宗室之左英宗祔成宗
室之右臣等以其议近是谨绘图以进从之五月祔显宗英宗凡十室文宗天历元年十
月毁显宗室顺帝至元六年毁文宗室其宗庙之事本
末因革大槩如此

明太祖洪武元年立四亲庙德祖居中懿祖居东第一庙熙祖居西第一庙仁祖居
东第二庙八年改建太庙前殿后寝殿翼皆有两庑寝
殿九间奉藏神主为同堂异室之制成祖迁都庙制如旧孝宗弘治中以宪宗将祔庙自
德祖至英宗九庙已备及是下礼官议祧位少詹事杨
守陈请祧德懿熙三祖自仁祖以下为七庙别为殿于太庙之后以奉三祖礼部尚书周
洪谟侍郎倪岳谓国家自德祖以上无可推则德祖视
周后稷太祖视周文武皆百世不祧懿祖而下当以次祧今宪宗升祔当祧懿祖从之遂
于太庙建祧庙奉藏懿祖神主世宗嘉靖四年诏建世
庙奉皇考献皇帝其制一如太庙十年更定庙祀始祧德祖奉太祖为太庙始祖十四年
更建世室及昭穆羣庙于太庙之左右十五年庙成奉
安德懿熙仁四祖神主于祧庙太祖神主于太庙翼日奉安太宗以下神主于羣庙十七
年上太宗庙号成祖献皇帝庙号睿宗遂祔睿宗神主
于太庙跻武宗上二十二年命复同堂异室之旧庙制始定

△时享【荐新附】

唐玄宗开元二十二年【马氏通考作二十三年今据旧唐书辑】从韦绛请宗
庙之奠每室加笾豆各六天宝五载诏曰祭神如在传

诸古训以多为贵着自礼经腍膋之仪盖昔贤之尚质甘旨之品亦孝子之尽诚既切因心方资变礼其以后太庙每室加常食一牙盘仍令有司务尽丰洁德宗贞元九年博士韦彤裴堪等言谨案礼经前代故事宗庙无朔望祭食之仪园寝有朔望上食之礼天宝十一载三月初别令尚食朔望进食于太庙内官主之在臣礼司初无着令或云当时祀官王珣不本礼意妄推缘生之义每用宴私之馔此则可荐于寝宫而不可渎于太庙望遵开元万代之则省天宝权宜之制事竟不行宋制宗庙岁以四孟月及季冬凡五享朔望上食荐新太祖干德六年判太常和峴言将来享庙请如唐故事别设牙盘食太宗太平兴国六年十二月太常礼院言今月二十三日腊享太庙缘孟冬已行时享冬至又尝亲祀案礼每岁五享其禘祫之月即不行时享虑成烦渎有爽虔恭今请罢腊日荐享之礼从之淳化三年十月太常礼院言今年冬至亲祀南郊前期朝享太庙礼烦则不恭欲望权停是月朔望之祭其腊享如常仪从之仁宗景佑三年宗正丞赵良规言通礼荐新凡五十余物今太庙惟荐冰其余荐新之礼皆寝不行宜以品物时新所司送宗正令尚食简择滋味与新物相宜者配以荐之于是礼官条定荐新物二十八种自彘以下令御厨于四时牙盘食烹馔卜日荐献神宗元丰元年宗正寺奏据太常寺报选日荐新兔藟粟黄今三物久鬻于市而庙犹未荐颇违礼意又唐开元礼荐新不出神主今两庙荐新及朔望上食并出神主请下礼官参定所宜详定所言景佑更定荐新二十八物登荐已久今欲稍加刊定见于经者存之不经者去之既非正祭则不当卜日古者荐新于庙之寝汉仪尝韭之属皆在庙而不在寝隋唐因仍其失荐新虽在庙然皆不出主今出神主失礼尤甚请依五礼精义但设神主仍俟庙成荐新于寝诏依所定三年详定所言太庙四时虽有荐新而孟享礼料无祠禴烝尝之别请春加韭卵夏麦鱼秋黍豚冬稻鴈当馈熟之节荐之其笱豆于常数之外别加时物从之哲宗元佑八年从礼官吕希纯议复用牙盘食 【旧制于礼馔外设元丰中罢之至是复用】 更其名曰荐羞

辽告庙谒庙皆曰拜容以先帝先后生辰及忌辰行礼自太宗始也其后正旦皇帝生辰诸节辰皆行之若忌辰及车驾行幸亦尝遣使行礼凡色克色哩柴册再生纳后则亲行之凡柴册亲征则告幸诸京则谒四时有荐新

金海陵天德二年命有司议荐新礼依典礼合用时物令太常卿行礼正隆二年二月初定太庙时享牲牢礼仪世宗大定三年有司言每岁太庙五享若复荐新似涉烦数拟遇时享之月以所荐物附于笱豆荐之以合古者祭不欲数之义制可十一年尚书省奏海陵时止以二月

十月遣使两享非天子礼宜依唐礼四时孟月及腊凡五享从之享日并出神主前廊序列昭穆

元宗庙祭享之礼割牲奠马潼以蒙古巫祝致辞盖国俗也世祖中统元年七月设神位于中书省用登歌乐遣笔自齐致祭至元二年冬十月享于太庙自是岁用冬祀四年初定十二月荐新时物六年冬时享毕命国师僧荐佛事于太庙七昼夜为太庙荐佛事之始成宗大德二年正月特祭太庙用马一牛一羊鹿野豕天鹅各七余品如旧为特祀之始武宗至大二年春正月以受尊号恭谢太庙为亲祀之始英宗至治元年始以四孟月亲祀太庙顺帝至正初太庙岁四祭后以兵兴岁歉不能备举每岁一再享焉

明太祖洪武元年定宗庙之祭每岁四孟及岁除凡五享陶安等言古者四时之祭三时合享祖庙惟春祭于各庙自汉以下皆同堂异室则四时皆合祭今宜仿近制合祭于第一庙太祖命孟春特祭于各庙三时及岁除则禘祭于德祖庙二年定时享春以清明夏以端午秋以中元冬以冬至惟岁除如旧三年礼部尚书崔亮言孟月者四时之首因时变致孝思故备三牲黍稷品物以祭至仲季之月不过荐新而已既行郊祀则庙享难举宜从旧制其清明等节备时物以荐从之九年五享皆罢特祭而行合配之礼世宗嘉靖十七年复定立春特享三时禘祭其荐新洪武初皆天子躬行未几以属太常至三年定朔日荐新各庙共羊一豕一笱豆八簋簠登铏各二酒尊三及常饌鹅羹饭太常卿及与祭官法服行礼望祭止常饌鹅羹饭常服行礼又有献新之仪凡四方别进新物在月荐外者太常卿与内使监官常服献于太庙不行礼其后朔望祭祀及荐新俱于奉先殿

△禘禘

唐玄宗开元六年用上元礼制行禘祭明年而禘自是之后禘禘各自计年不相通数凡七禘五禘至二十七年禘禘并在一岁有司觉其非乃议以为五年再殷祭宜通数而禘后置禘岁数远近二说不同郑玄高堂隆先三而后二徐邈先二而后三而邈谓二禘相去为月六十中分三十置一禘焉此最为得遂用其说由是一禘一禘在五年之间合于再殷祭之义而置禘先后不同焉唐初以景皇帝为太祖而世近在三昭三穆之内至禘禘乃虚东向之位而太祖与羣庙列于昭穆代宗即位祔玄宗肃宗而迁献祖懿祖于夹室于是太祖居第一室禘禘得正其位而东向而献懿不合食德宗建中二年太学博士陈京请为献懿立别庙至禘禘则享礼仪使颜真卿曰太祖居百代不迁之庙配天崇享是

极尊严至禘祫之时暂居昭穆屈己以奉祖宗可也乃引晋蔡谟议以献祖居东向而懿祖太祖以下左右为昭穆由是议者纷然贞元十七年太常卿裴郁议以太祖百世不迁献懿二祖亲尽庙迁而居东向非是请下百寮议工部郎中张荐等议与真卿同太子左庶子李嵘等七人议曰真卿所引蔡谟之议当时已不用献懿二祖宜藏夹室以合祭法远庙为祧而坛墀有祷则祭无祷则止之义吏部郎中柳冕等十二人议曰周礼有先公之祧迁主藏于后稷之庙今献祖懿祖宜筑别庙以居之司勋员外郎裴枢曰建石室于园寝以藏神主至禘祫之岁则祭之考功员外郎陈京同官县尉仲子陵皆曰迁神主于德明兴圣庙京兆少尹韦武曰祫则献祖东向禘则太祖东向十一年左司郎中陆淳曰议者虽多不过三而已一曰复太祖之正位二曰并列昭穆而虚东向三曰祫则献祖禘则太祖迭居东向而复正太祖之位为是然太祖正位则献懿之主宜有所归一曰藏诸夹室二曰置之别庙三曰迁于圜寝四曰祔于兴圣然藏诸夹室则无享献之期置之别庙则非礼经之文迁于园寝则乱宗庙之仪惟祔于兴圣为是至十九年左仆射姚南仲等献议五十七封付都省集议户部尚书王绍【通考作诏】等五十五人请迁懿祖于兴圣庙议遂定由是太祖始复东向之位【韩愈为四门博士上议谓子虽齐圣不先父食禘祫之时献祖宜居东向之位景皇帝宜从昭穆之列祖以孙尊孙以祖屈求之神道岂远人情又常祭甚众合食甚寡则是太祖所屈之时至少所伸之祭至多议不用】

后唐明宗长兴二年四月禘享于太庙

周世宗显德五年六月禘于太庙先是言事者以宗庙无祧迁之主不当行禘祫国子司业聂崇义以为前代宗庙追尊未毁皆有禘祫援魏明帝以来故事九条为证从之

宋制三年一祫以孟冬五年一禘以孟夏仁宗天圣元年四月乙卯遣官禘享太庙遂以荐享为禘享嘉佑四年帝亲诣太庙行祫祭礼礼官张洞韩维言国朝每遇禘祫奉别庙四后之主合食太庙唐大顺中三后列配议者言其非礼臣谓每室既有定配则余后不当参列学士孙抃等议春秋传曰大祫者何合祭也国朝事宗庙百余年至祫之日别庙后主皆升合食非无典据臣愚以为如故便学士欧阳修等曰本朝禘祫以别庙之后列于配后之下非惟于古无文于今又有四不可淑德太宗之元配列于元德之下章怀真宗之元配列于章懿之下一也升祔之后统以帝乐别庙之后则以本室乐章自随二也升祔之后同牢而祭牲器祝册亦统于帝别庙诸后乃从专享三也升祔之后联席而坐别

庙之后位乃相绝四也若四后各祭于庙则其尊自伸而于礼无失请从礼官诏四后祫享依旧须大礼毕别加讨论先是大祫自僖祖以降止序昭穆而虚东向神宗时王安石用元绛等议始尊僖祖为始祖熙宁八年孟夏禘祭僖祖遂正东向之位自顺祖以下昭穆各以南北为序元丰四年详定礼文所言禘祫之年郑氏徐邈分为二说庆历初用徐邈说每三十月一祭熙宁八年既禘又祫此有司之失请今十八月而禘四十二月而祫【此郑氏之说】庶几举礼不烦事神不渎太常礼院言本朝自庆历以来皆三十月而一祭至熙宁五年后始不通计遂至八年禘祫并在一岁昨元丰三年已行禘礼今若依旧例十月行祫享即比年频祫复踵前失请依庆历以来之制通计年数皆三十月而祭诏如见行典礼五年帝谓宰臣曰祫者谛审祖之所自出秦汉以来谱牒不明莫知祖之所自出则禘礼可废也蔡确等谓圣训得禘之本意非诸儒所及乃诏罢禘享自王安石尊僖祖为始祖高宗绍兴五年吏部员外郎董棻言其非乞正太祖东向之位谓太庙世数已备而太祖犹居第四室乞遵典礼正庙制遇祫享则东向而事未克行光宗绍熙五年【时宁宗受禅尚未改元】太常少卿曾三复亦以为言既而吏部尚书郑侨等建议乞因祫庙之际定宗庙万世之礼慰太祖在天之灵破熙宁不经之论太祖为始祖则太宗为昭真宗为穆自是以下至于孝宗四昭四穆与太祖之庙而九上参古礼而不废崇宁九庙之制于理为允诏从之侨等又言僖祖当用唐兴圣之制立为别庙顺祖翼祖宣祖三主皆祔藏焉如此则僖祖自居别庙之尊三祖不祔子孙之庙自汉魏以来太祖以上毁庙之主皆不合食今遇祫则即庙而享于礼尤称诸儒楼钥陈傅良皆以为可从之宁宗庆元二年四月礼部太常寺言已于太庙西别建僖祖庙今年冬祫祭先诣四祖庙行礼次诣太庙逐幄行礼

金禘祫并出主始祖东向羣主依昭穆南北相向世宗大定十一年尚书省奏禘祫之仪曰礼纬三年一祫五年一禘自大定九年已行祫礼若议禘祭当于祫后十八月孟夏行礼诏以三年冬祫五年夏禘为常礼大定二十九年章宗即位礼官言大定二十七年十月祫享至今年正月以世宗大事四月不行禘祭案公羊传闵公二年吉禘于庄公言吉者未可以吉谓未三年也注谓禘祫从先君数朝聘从今君数三年丧毕遇禘则禘遇祫则祫故事宜于辛亥岁为大祥三月禫祭踰月即吉则四月一日为初吉适当孟夏禘祭之时可为亲祠从之及期又以孝懿皇后之故而止五月礼官言世宗升祔已三年尚未合食于祖宗而来冬又未可行祫礼案周礼虽有春官摄事之文窃以世宗及孝懿皇后祔

庙以来未曾躬诣岂可遣官先摄乞依故事于明昌四年四月一日行禘礼从之

元世祖至元十四年改建太庙十七年奉迁神主举大享之礼而未尝行禘祫

明太祖洪武元年祫享太庙德祖居中南向懿祖熙祖仁祖依昭穆东西向七年御史答禄与权请举禘祭下礼部太常寺翰林院议以为国家追尊四庙而始祖所自出者未有所考则禘祭似难遽行遂寝孝宗弘治元年定每岁暮奉祫庙懿祖神座于正殿左居熙祖上行祫祭之礼世宗嘉靖十年帝以禘祫义询大学士张璁令与夏言议言撰禘义一篇献之谓自汉以下谱牒难考欲如虞夏之禘黄帝商周之禘帝尝不能尽合谨推明古典采诸儒精微之论宜为虚位以祀而以太祖配享中允廖道南谓朱氏为颛顼之后宜禘颛顼诏会官详议咸谓称虚位者茫昧无据尊颛顼者世远难稽庙制既定高皇帝始祖之位当惟禘德祖为正帝意主虚位令再议而言复论禘德祖有四不可帝并下其章诸臣乃请设虚位以祀皇初祖南向奉太祖配西向礼官因言大祫既岁举大禘请三岁一行帝自为文告皇祖定丙辛岁一行其礼前期告庙致斋如时享至日行礼如大祀圜丘仪又议祫德祖罢岁除祭以季冬中旬行大祫礼设德祖主于太庙正中南向懿祖以下以次东西向十七年复定大祫日奉德懿熙仁及太祖异室皆南向成祖西向北上仁宗以下东西相向二十二年定时享大祫罢出主临期捧衣冠出纳太常及神宫监官奉行二十四年罢季冬中旬大祫仍祫于岁除礼同时享

△功臣配享

唐玄宗开元初复令禘曰功臣配享非旧典也 【贞观礼禘祭不配】 配享位在庙庭太阶之东少南西面以北为上

后唐明宗长兴二年诏以故昭义节度使李嗣昭故幽州节度使周德威故汴州节度使符存审配享庄宗庙庭

宋初禘祫皆以功臣配享有司先事设幄次布褥位于庙庭东门内道南当所配室西向设位板筮豆各二簠簋俎各一知庙卿奠爵再拜神宗熙宁末尝诏太常礼院讲求亲祠太庙不及功臣礼例元丰元年制禘祫外亲享太庙并以功臣与三年详定礼文所言谨按书盘庚曰兹子大享于先王尔祖其从与享之周礼司勋凡有功者祭于大烝书之所谓大享即礼之所谓大烝烝冬祭也谓之大者物成众多之时其祭比三时为大也方是时百物皆报焉祭有功宜矣卫孔悝之鼎铭曰勤大命施于烝彝鼎后世烝祭不及功臣而禘祫及之事不经见梁初误禘功臣何佟之以为夏物未成而禘功臣为非典礼唐韦挺亦云今禘祫以功臣配享而冬烝不及与经不合伏请冬烝以功臣配享其禘祫享罢之

诏凡冬享禘祫亲祠功臣并配享

辽兴宗重熙二十一年诏以太尉乌哲配享圣宗庙

金海陵天德二年二月太庙祫享有司拟上配享功臣世宗大定八年乃命图书功臣于太祖庙有司第其勋绩之大小官资之崇卑以次

上闻十一年尚书省奏禘祫之仪功臣配庙庭各配所事之庙以位次为序

元世祖至元三年太庙成丞相安图巴延言祖宗世数尊谥庙号功臣配享等事皆宜以时定英宗初博士言今冬祭即烝也天子亲裸太

室功臣宜配享事弗果行明太祖洪武二年孟春享太庙设青布帟六于太庙庭中内列功臣配位遣官分献三年定配享功臣春夏于仁祖庙

西庑秋冬于德祖庙西庑设位东向罢帟次之设更定三献礼皇帝初献时献官即分诣行礼不拜四年太祖谓中书省臣太庙之祭功臣配列

庑闲今既定太庙合享礼朕以祖宗具在使功臣故旧歿者得少依神灵以同享祀不独朝廷宗庙盛典亦以寓朕不忘功臣之意于是礼官议

凡合祭时为黄布幄殿中祖考神位旁设两壁以享亲王及功臣命大臣分献制可已而命去布幄世宗嘉靖二十四年进诸配位于新太庙西

壁罢分献神宗万历十四年太常卿裴应章言庙中列后在上异姓之臣礼当别嫌且至尊拜俯于下诸臣之灵亦必不安乃命改复西庑遣官

分献

（臣）等谨按明惟太祖成祖二庙有配享功臣自仁宗以后皆无之二祖配享之臣惟刘基姚广孝为文臣后广孝被黜文臣惟基一人

而已余皆武臣也嘉靖时夏言尝请考求六朝文武大臣功在当时泽及后世者进侑庙庭天启时太常少卿裴应章亦请以文臣配享事皆不

行周礼司勋凡有功者祭于大烝而其言功之别有王有国有民有事有治有战乃独以战功为功义亦狭矣

△七祀

（臣）等谨按郑志立天子七祀一门而以诸侯附之今考宋以后无所谓诸侯五祀之礼故不复区分但曰祀云

宋制七祀春祀司命及户夏祀灶季夏祀中溜秋祀门及厉冬祀行为小祀用羊一豕一不行饮福神宗元丰三年太常礼院请禘飨徧祭

七祀从之四年详定礼文所言按礼记祭法曰王自为立七祀曰司命曰中溜曰国门曰国行曰泰厉曰户曰灶孟春其祀户祭先脾孟夏其祀

灶祭先肺中央土其祀中溜祭先心孟秋其祀门祭先肝孟冬其祀行祭先贤又传曰春祀司命秋祀厉此所祀之位所祀之时所用之俎也周

礼司服掌王之吉服祭羣小祀则服玄冕注谓羣小祀宫中七祀之属礼记曰一献熟注

谓宫中羣小神七祀之等周礼大宗伯若王不与祭祀
则摄位此所祀之服所献之礼所摄之官也近世因禘祫则徧祭七祀其四时则随时享
分祭摄事以卿行礼而服七旒之冕分太庙牲以为俎
一献而不荐熟皆非礼制请立春祭户于庙室户外之西祭司命于庙门之西制脾于俎
立夏祭灶于庙门之东制肺于俎季夏土王日祭中溜
于庙庭之中制心于俎立秋祭门及厉于庙门外之西制肝于俎立冬祭行于庙门外之
西制肾于俎皆用特牲更不随时享分祭有司摄事以
太庙令摄礼官服必玄冕献必荐熟亲祠及腊享即依旧礼徧祭从之

金七祀随时享春户司命夏灶中溜秋门厉冬行凡郊祀前一日朝享太庙亦设七
祀之座遣官献之 【座在庙庭横街之北东向席以
莞褥以碧绡设板位于其座前笲豆簠簋各二俎一壶尊二尊实以法酒笲实以栗鹿脯
豆实以菁菹鹿鬻俎实以熟羊簠簋实以黍稷其燎柴
设于西神门之北俟享庙终献遣官行礼并读祝文】

元制附祭七祀神位于庙庭中街之东西向其分为四时之祭并与宋同惟中溜则
附于七月之祭特祭则徧设之每位笲豆各二簠簋各
一尊二俎一 【摄祀仪设七祀位于横街之南道东西向以北为上席皆以莞设神版位
各于座首终献将行赞者引七祀献官诣盥洗位搯
笲盥手帨手讫执笲诣酒尊所搯笲执爵酌酒以爵受执事者执笲诣首位神座前东向
立稍前搯笲跪执爵三祭酒于沙池奠爵于案执笲俛
伏兴少退立再拜讫每位并如上仪】

明太祖洪武二年定制岁终腊享通祀五祀于庙门外八年礼部奏五祀之礼周汉
唐宋不一今拟孟春祀户设坛皇宫门左司门主之孟
夏祀灶设坛御厨光禄寺官主之季夏祀中溜设坛干清宫丹墀内官主之孟秋祀门设
坛午门左司门主之孟冬祀井设坛宫内大庖井前光
禄寺官主之四孟于有事太庙之日季夏于土旺之日牲用少牢制可后改祀中溜于奉
天殿外文楼前又岁暮合祭五祀于太庙西庑下太常
少卿行礼用少牢五三年定制京都祭泰厉坛设坛玄武湖中岁以清明及十月朔日遣
官致祭祭日设京省城隍位于坛上无祀鬼神位于坛
下之东西羊三豕三饭米三石王国祭国厉府州祭郡厉县祭邑厉皆设坛城北一年二
祭如京师里社则祭乡厉后定郡邑厉乡厉皆以清明
七月十五日十月朔一年三祭

（臣）等谨按宋金元踵开元礼皆祭七祀盖本之祭法明祭五祀盖本之月令月
令冬祀行而无井而明制于孟冬祀井乃兼采班固白
虎通之说灶者火之所用事井者水之所用事水火王于冬夏夏祀灶冬宜祀井是以魏

晋之闲颇从班义然诗云取羝以軋以兴嗣岁则固冬祀行之证而张子谓水土之功已属之社故五祀不及井义或然也明虽不主七祀而五祀之外别立厉坛祭无祀之鬼神以仿古者泰厉族厉之祭则又未始不本祭法而变通之矣

△上陵 【拜扫及诸节上食附】

唐代宗大历十四年礼仪使颜真卿奏元陵 【代宗陵】 请朔望节祭日荐如故事泰陵 【玄宗陵】 惟朔望岁冬至寒食伏腊社一祭而罢日荐制可宪宗元和二年宰臣建言礼有着定后世徇一时之慕过于烦冗故陵庙有荐新而节有遣使请岁太庙以时享朔望上食诸陵以朔望奠亲陵以朝晡奠其余享及忌日告陵皆停

后唐庄宗同光三年寒食望祭于西郊潞王清泰三年车驾北幸路当徽陵 【明宗陵】 乃至陵所朝谒

晋出帝初 【时未改元仍称天福八年】 寒食望祭显陵 【高祖陵】

汉隐帝立之二年 【时仍称干佑三年】 寒食望祭于南御园

周太祖广顺元年二月寒食望祭于蒲池二月三月寒食望祭于郊世宗显德元年六月车驾征太原回祭嵩陵 【太祖陵】

宋初春秋命宗正卿朝拜安陵 【宣祖陵】 以太牢奉祠太祖干德三年始令宫人诣陵上冬衣岁以为常开宝九年幸西京遇谒安陵太宗雍熙二年宗正少卿赵安易言昨朝拜安陵永昌陵 【太祖陵】 有司止设酒脯香以未明行事不设烛燎又先赴永昌陵后赴安陵及帝后二位不徧拜颇愆于礼事下有司议曰按开元礼春秋二仲月司徒司空巡陵不设牲牢之祀今请如宗庙荐享少加裁省除不设登铎牙盘食及太常登歌余悉如大祠先赴安陵次永昌陵次孝明孝惠懿德淑德皇后陵从之真宗景德三年帝将朝陵太常礼院言贞观中皇帝至小次素服乘马检会今年正月车驾朝拜明德攒宫止服素色衣当时皇帝在大祥之内今既服除望止服淡黄袍特诏服素色衣四年正月车驾次巩县罢鸣鞭及太常奏严金吾传呼既至斋于永安镇 【朝陵后改镇为县】 行宫大官进蔬膳是夜漏未尽三鼓帝乘马却舆攀伞扇至安陵素服步入司马门行奠献礼诸陵亦然又诣下宫凡上宫用牲牢祀册有司奉事下宫备膳羞内臣执事百官陪位又诣元德太后陵奠献别于陵西南设幄设祭如下宫大中祥符四年正月祀汾阴经巩县有司请于訾村设幄殿置三陵 【安陵永昌陵及太宗永熙陵】 神座皇帝就幄设香酒时果牙盘食奠献而命大臣以香币酒脯诣诸陵祭告驾还复行亲谒之礼是岁命礼官定春秋二仲遣官朝陵仪注以祭服

行事专差宗正卿一员朝拜三陵别遣官二员分拜诸陵其后添差陵庙行礼官四员选朝官京官宗姓者充翰林学士钱惟演言春秋朝陵载于旧式公卿亲往盖表至恭唐显庆中始诏三公行事天宝以后亦遣公卿巡谒盖取朝廷大臣不必须同国姓后参用太常宗正卿晋开运中亦命吏部侍郎近年以来止遣宗正等官人轻位卑实亏旧制望自今于丞郎诸司三品内遣官阙则差两省谏舍以上所冀仰副追孝之心以成稽古之美仁宗景佑初沧州观察使守节言寒食例遣宗室拜陵而十月令内司宾往非所以致恭乃诏宗室正刺史以上一员朝拜初永安县官月朔朝定陵【真宗陵】望朝三陵英宗初韩琦言昭陵【仁宗陵】未有朝日乃令朔望分朝诸陵神宗熙宁中诏文臣自两省武臣合门使以上经过陵下并许朝拜故事车驾诣陵谓之亲谒南渡之后此礼不举高宗绍兴三年礼部太常寺言春秋二仲荐献诸陵乞于行在法惠寺设位望祭从之其永佑诸陵【永佑陵系徽宗陵】之在会稽者每岁荐献仍循旧制

辽制孟冬朔拜陵有司设酒馔于山陵皇帝皇后驾至多啰伦穆腾奏仪办合门使赞皇帝皇后诣位四拜讫巫赞祝燔胙及时服酹酒荐牲大臣命妇以次燔胙四拜皇帝皇后率羣臣命妇巡诸陵各三匝还宫【按辽史帝纪诸帝皆常举亲谒之礼不必尽在孟冬而与太后偕谒惟圣宗统和元年举行者二其它并无偕谒之文今据礼志酌载仪注其与本纪不符者谨附识于此】

金海陵天德四年正月朝谒世祖太祖太宗德宗陵世宗大定二年正月如大房山享献山陵三年十二月腊猎以所获荐山陵奉以为常八年命涿州刺史兼提点山陵每以朔望致祭仍以明年正月为首章宗泰和三年诏诸亲王公主每岁寒食十月朔听谒兴裕二陵【兴陵世宗陵裕陵显宗陵】

明太祖洪武元年三月遣官致祭仁祖陵二年定熙祖陵每岁正旦清明中元冬至及每月朔望本署官供祭行礼又即其地望祭德祖懿祖陵仁祖陵多孟冬一祭俱署官行礼朔望中都留守司官行礼八年四月以仁祖忌日亲诣皇陵【先号英陵后改皇陵】致祭诏翰林院议陵寝朔望节序祭祀礼学士乐韶凤等言我朝旧仪每岁元旦清明七月望十月朔冬至日俱用太牢遣官祭陵白塔二处则用少牢中官行礼今拟增夏至日用太牢伏猎社每月朔望则用特羊署官行礼如节与朔望伏腊社同日则用节礼从之成祖永乐后太祖陵每岁圣节正旦孟冬忌辰酒果行香清明中元冬至太牢致祭特遣勋旧大臣一员行礼南京各衙门文

武官俱陪祭英宗正统十年谒三陵 【成祖长陵仁宗献陵宣宗景陵】 命百官具浅色衣服如洪武永乐制武宗正德闲定长陵以下诸陵各设神宫宫监并卫及祠祭署凡清明中元冬至俱分遣驸马都尉行礼文武官陪祀忌辰及正旦孟冬圣节亦遣驸马都尉行礼恭让章皇后陵清明中元冬至忌辰内官行礼西山景皇帝陵祭期如上仪宾行礼世宗嘉靖十四年帝谕礼部我朝以清明中元冬至凡三上陵但中元俗节事本不经冬至既行大报配天之礼则陵事为轻可罢冬至上陵而移中元于霜降惟清明如旧着为令穆宗隆庆二年春诣天寿山祭长陵质明行礼帝服青袍上香四拜献帛爵亚献终献令执爵代随诣永陵 【世宗陵】 行礼是日遣官分祭六陵 【献陵景陵英宗裕陵宪宗茂陵孝宗泰陵武宗康陵】 神宗万历十一年谒长永昭 【穆宗陵】 三陵上香八拜亲奠帛初献六陵二寝 【恭让章皇后景皇帝陵】 上香四拜其奠帛三献俱执事官代

钦定续通志卷一百十三

●钦定续通志卷一百十四 礼略四

礼畧

吉礼 【四】

○吉礼四

释奠

祀历代帝王

孔子庙

太公庙

老君庙

巡狩

封禅

历代所尚

享司寒

祭

高禘

杂神祠

△释奠 【先儒附】

（臣）等谨按释奠之制旧矣汉魏迄乎唐初国学释奠周孔迭为先圣则释奠不专于孔子故郑志分释奠与孔子庙为二自唐显庆二

人用长孙无忌之议周公别配享武王庙而国学专以孔子为先圣自是相承孔子以外

无复有释奠之礼矣今承郑志仍分二门而以祀于国

学者入释奠祀于阙里者入孔子庙云

唐肃宗上元中以岁旱罢中小祀而文宣王之祭至中秋犹祀之于太学代宗永泰二年八月修国学祠堂成祭酒萧昕始奏释奠宰相元载杜鸿渐李抱玉及常参官六军将军就观焉德宗贞元九年九月太常奏以十一月贡举入谒先师与亲飨太庙日同准六典上丁释奠若与大祀同日即用中丁其谒先师请别择日从之十五年膳部郎中归崇敬奏每年春秋释奠祝版御署讫北面而揖臣以为其礼太重按大戴礼师尚父授武王丹书武王东面受之请参酌轻重庶得其宜

后唐明宗长兴三年国子博士蔡同文奏伏见每年春秋二仲上丁释奠于文宣王以兖公颜子配座以闵子骞等为十哲排祭奠其七十二贤前皆无酒脯自今后乞准本朝旧规文宣王四壁诸英贤画像前各设一豆一爵祀飨太常礼院以礼文无设一豆一爵之礼当准郊祀录所载释奠仪各陈筮二豆二簋簋酒爵各一实脯醢诸物以祭从之

周世宗显德二年别营国子监置学舍

宋初因周国学增塑先圣亚圣十哲像画七十二贤及先儒二十一人于东西庑之木壁其春秋二仲及仲冬上丁贡举人谒先圣先师命官行释奠礼并如旧典真宗大中祥符元年诏追谥孔子曰玄圣 【后以国讳改至圣】文宣王祭以太牢二年五月诏追封十哲为公七十二弟子为侯先儒为伯或赠官 【颜回兖国公闵损琅琊公冉耕东平公冉雍下邳公宰予临淄公端木赐黎阳公冉求彭城公仲由河内公言偃丹阳公卜商河东公曾参瑕邱侯顛孙师宛邱侯澹台灭明金乡侯宓不齐单父侯原宪任城侯公冶长高密侯南宫绛龚邱侯公皙哀北海侯曾点莱芜侯颜无繇曲阜侯商瞿须昌侯高柴共城侯漆雕开平舆侯公伯寮寿张侯司马耕楚邱侯樊须益都侯公西赤巨野侯有若平阴侯巫马期东阿侯陈亢南顿侯梁鱣千乘侯颜辛阳谷侯冉孺临沂侯冉季诸城侯伯虔沐阳侯公孙龙枝江侯秦冉新息侯秦祖鄆城侯漆雕哆濮阳侯颜高雷泽侯漆雕徒父高苑侯壤驷赤上邽侯林放长山侯商泽邹平侯石作蜀成纪侯任不齐当阳侯申枨文登侯公良孺牟平侯曹恤上蔡侯奚容蒧济阳侯句井疆濳阳侯申党淄川侯公祖句兹即墨侯荣旗厌次侯县成武城侯左人郢南华侯燕伋沂源侯郑国胸山侯秦非华亭侯施之常临濮侯颜吟济阴侯步叔乘博昌侯颜之仆宛句侯蘧瑗内黄侯叔仲会博平侯颜何堂邑侯秋黑林虑侯邾巽高堂侯孔忠郟城侯公西舆如临胸侯公西蒧徐城侯琴张顿邱侯左邱明瑕邱伯公羊高临淄

伯谷梁赤龚邱伯伏胜乘氏伯高堂生菜芜伯戴圣楚
邱伯毛萇乐寿伯孔安国曲阜伯刘向彭城伯郑众中牟伯杜子春缙氏伯马融扶风伯
卢植良乡伯郑康成高密伯服虔荥阳伯贾逵岐阳伯
何休任城伯王肃赠司空王弼偃师伯杜预赠司徒范宁新野伯】 诏太常礼院定州县
释奠器数先圣先师每座酒尊一 【尊皆加勺冪各
置于坩】 迁八豆八簋二簠二俎三罍一洗一篚一巾共二烛二爵共四坩共二或有从
祀之处诸座各筮二豆二簋一簠一俎一烛一爵一仁
宗景佑元年诏释奠用登歌帝再幸国学皆再拜焉神宗熙宁七年诏封孟轲邹国公礼
官言孟子于孔门当在颜子之列至于荀况扬雄韩愈
皆发明先圣之道有益学者诸自今春秋释奠以孟子与颜子同配食荀况扬雄韩愈并
加封爵以世次从祀诏如议 【封荀况兰陵伯扬雄
成都伯韩愈昌黎伯】 徽宗崇宁初封孔鲤泗水侯孔伋沂水侯诏辟文宣王殿以大
成为名帝幸国子监谒文宣王殿再拜酌献遣官分奠
兖国公而下增文宣王冕十有二旒大观二年绘子思像从祀于左邱明二十四贤之间
议礼局言孔子弟子唐会要七十七人开元礼七十二
人去取不一本朝议臣断以七十二子之说取琴张等五人而去公夏首等十人今以家
语史记参定公夏首后处公肩定颜祖鄫单罕父黑秦
商原抗乐欬廉洁唐会要开元礼亦互见之皆有伯爵载于祀典请追赠侯爵使预祭享
从之 【诏封公夏首巨平侯后处胶东侯公肩定梁
父侯颜祖富阳侯鄫单聊城侯罕父黑祈乡侯秦商冯翊侯原抗乐平侯乐欬建成侯廉
洁胙城侯又改封曾参武城侯颛孙师颍川侯南宫绛
汶阳侯司马耕睢阳侯琴张阳平侯左邱明中都伯谷梁赤睢陵伯戴圣考城伯以所封
犯先圣讳故也】 政和三年诏封王安石舒王配享王
雱临川伯从祀钦宗靖康元年右谏议大夫杨时言安石学术之谬请追夺王爵毁配享
之像诏降为从祀高宗绍兴十年诏文宣王与大社大
稷并为大祀孝宗淳熙四年去王雱画像理宗淳佑元年正月以周敦颐 【封汝南伯】
张载 【封郟伯】 程颢 【封河南伯】 程颐
【封伊阳伯】 朱熹 【封徽国公】 从祀黜王安石景定二年以张栻 【封华阳伯】
吕祖谦 【封开封伯】 从祀度宗咸淳三年
诏封曾参郈国公孔伋沂国公配享先圣封颛孙师陈国公升十哲位 【时闵子以下九
贤亦俱改封】 复以邵雍 【封新安伯】 司马
光从祀 【其序兖国公郈国公沂国公邹国公居正位之东面西向北上为配位费公闵
损薛公冉雍黎公端木赐卫公仲由魏公卜商居殿
上东面西向北上郚公冉耕齐公宰予徐公冉求吴公言偃陈公颛孙师居殿上西面东

向北上为从祀东庑金乡侯澹台灭明至华阳伯张栻

五十二人并西向西庑单父侯宓不齐至开封伯吕祖谦五十二人并东向】

辽太祖神册三年诏建孔子庙四年秋八月谒孔子庙道宗清宁六年六月中京置国子监命以时祭先圣先师

金熙宗皇统元年帝诣文宣王庙奠祭北面再拜世宗大定十四年从国子监请以邹国公孟子与颜子相对改塑法服定配位又礼官参

酌唐开元礼定拟释奠仪数文宣王兖国公邹国公每位笾豆各十牺尊一象尊一簋簠各二俎二祝版各一皆设案七十二贤二十一先儒每

位笾一豆一爵一两庑各设象尊二章宗承安二年春帝亲祀以亲王摄亚献终献皇族陪祀文武羣臣助奠其诸州释奠并遵唐仪

元太祖置宣圣庙于燕京世祖至元十年三月中书省言春秋释奠执事官各公服陪位诸儒襴衫唐巾行礼成宗时如命建宣圣庙于京

师仁宗皇庆二年六月诏以宋儒周敦颐程显程颐张载邵雍司马光朱熹张栻吕祖谦及故中书左丞许衡从祀延佑三年以赵世延请南北

祭礼不宜有异乃诏春秋释奠以颜曾思孟配享文宗至顺元年七月封颜子兖国复圣公曾子郕国宗圣公子思沂国述圣公孟子邹国亚圣

公十一月诏以董仲舒从祀

明太祖洪武元年二月诏以太牢祀孔子于国学又定制每岁仲春秋上丁皇帝降香遣官祀于国学四年增笾豆为十 【初定笾豆各

八】十五年新建太学落成帝亲诣释奠诏天下通祀孔子并颁释奠仪注凡府州县学笾豆以八器物牲牢皆杀于国学三献十哲两庑同一

献各以正官行之十七年敕每月朔望祭酒以下行释菜礼郡县长以下诣学行香二十八年罢扬雄从祀英宗正统二年以宋儒胡安国蔡沈

真德秀从祀八年以元儒吴澄从祀宪宗成化十二年增乐舞为八佾笾豆各十二孝宗弘治八年封杨时将乐伯从祀九年增乐舞为七十二

人如天子之制世宗嘉靖九年张璁言颜曾子思配享孔子庙廷而其父从祀两庑圣贤之心岂安请于大成殿后别立室祀叔梁纥而以颜路

曾皙孔鲤配之帝以为然因言圣人尊天与尊亲同今笾豆十二牲用犊全同祀天亦非正礼其谥号章服悉宜改正璁言孔子宜称至圣先师

不称王祠宇直称庙不称殿祀宜用木主塑像宜毁笾豆用十乐用六佾配位公侯伯之号宜削止称先贤先儒其从祀公伯寮等十四人宜罢

林放等七人改祀于其乡后苍王通欧阳修胡瑗蔡元定等五人宜从祀下礼部议遂去孔子王号及大成文宣之称题神主曰至圣先师孔子

改大成殿为先师庙大成门为庙门四配称复圣颜子宗圣曾子述圣子思子亚圣孟子

十哲以下凡及门弟子称先贤某子左邱明以下称先儒某子不复称公侯伯其塑像即令屏撤春秋祭祀遵国初旧制十筮十豆天下各学八筮八豆乐舞六佾凡学别立一祠祀叔梁纥题神主曰启圣公孔氏以颜无繇曾点孔鲤孟孙氏配俱称先贤某氏程珦朱松蔡元定从祀称先儒【隆庆时又增周子父辅成】申党即申枨厘去其一公伯寮秦冉颜何荀况戴圣刘向贾逵马融何休王肃王弼杜预吴澄罢祀【以公伯寮谱子路必非孔子门人秦冉颜何疑字画相似之讹荀况以下以学行多可议故也】林放蘧瑗卢植郑众郑玄服虔范宁祀于其乡而增入后苍王通欧阳修胡瑗又从薛侃议进陆九渊凡从祀九十一人穆宗隆庆五年增薛瑄神宗万历中增罗从彦李侗陈献章胡居仁王守仁又定每岁仲春秋上丁帝御殿传制遣大臣祭先师及四配十哲以翰林官两庑以国子监官各二员分献月朔及每科进士行释菜礼崇祯十五年改左邱明称先贤又改宋儒周二程张邵朱六子称先贤位七十二子下汉唐诸儒之上

△祀历代帝王【名臣附】

唐玄宗天宝九载立周武王汉高帝庙于京城代宗大历五年鄜坊节度使上言坊州轩辕黄帝陵阙请置庙四时列于祀典从之

宋太祖干德初诏历代帝王国国有常享五代乱离百司废坠闕神乏祀阙孰甚焉按祀令先代帝王三年一享以仲春之月牲用太牢祀官以本州岛长官有故则上佐行事官造祭器送诸陵庙又诏先代帝王载在祀典或庙貌犹在久废牲牢或陵墓虽存不禁樵采其太昊炎帝黄帝高辛唐尧虞舜夏禹成汤周文王武王汉高帝光武唐高祖太宗各置守陵五户岁春秋祀以太牢商中宗太戊高宗武丁周成王康王汉文帝宣帝魏太祖晋武帝后周太祖隋高祖各置三户岁一享以太牢秦始皇帝汉景帝武帝明帝章帝魏文帝后魏孝文帝唐玄宗肃宗宪宗宣宗梁太祖后唐庄宗明宗晋高祖各置守陵两户三年一祭以太牢其余诸陵禁樵采哲宗元佑六年诏相州河亶甲墓载祀典先是干德中定先代帝王配享仪下诸州以时荐祭牲用羊豕政和议礼局遂为定制高宗绍兴元年命祠禹于越州及祠越王句践以范蠡配

金前代帝王三年一祭以仲春祭伏羲于陈州神农于亳州轩辕于坊州少昊于兖州颡顛于开州高辛于归德府陶唐于平阳府虞舜夏禹成汤于河中府周文王武王于京兆府章宗泰和三年尚书省奏太常寺言开元礼祭帝尝尧舜禹汤文武汉祖祝版请御署开宝礼羲轩颡顛帝尝陶唐女娲成汤文武请御署自汉高祖以下不署敕命依期降祝版而不请署

元帝尧庙在平阳舜庙河东山东济南历山濮州湖南道州皆有之禹庙在河中龙门世祖至元元年龙门禹庙成命侍臣持香致敬十二年立伏羲女娲舜汤等庙于河中解州洪洞赵城十五年修会川县盘古王祠祀之二十四年敕春秋二仲丙日祀帝尧庙成宗元贞元年命郡县通祀三皇如宣圣释奠礼泰定帝致和元年太常寺议祀舜禹庙如尧祠其后又命汤阴县北故羸里城周文王庙有司奉祀如故事

明太祖洪武三年遣使访先代陵寝仍命各行省具图以进凡七十有九礼官考其功德昭著者自伏羲至宋理宗凡三十有六【伏羲神农黄帝少昊颡顛唐尧虞舜夏禹商汤中宗高宗周文王武王成王康王汉高祖文帝景帝武帝宣帝光武明帝章帝后魏文帝隋高祖唐高祖太宗宪宗宣宗周世宗宋太祖太宗真宗仁宗孝宗理宗】各制袞冕函香币遣官修祀六年建厯代帝王庙于京师钦天山之阳为正殿五室中一室三皇东一室五帝西一室夏禹商汤周文王又东一室周武王汉光武唐太宗又西一室汉高祖唐高祖宋太祖元世祖每岁春秋二仲上甲日致祭已而以周文王终守臣节唐高祖由太宗得天下寝其祀增祀隋高祖已而又罢隋高祖之祀二十一年令每岁郊祀附祭厯代帝王于太祀殿仍以岁八月中旬择日祭于本庙其春祭停之又定每三年遣祭各陵之岁则停庙祭是年诏以厯代名臣风后力牧皋陶夔龙伯夷伯益伊尹傅说周公旦召公奭太公望召虎方叔张良萧何曹参陈平周勃邓禹冯异诸葛亮房玄龄杜如晦李靖郭子仪李晟曹彬潘美韩世忠岳飞张浚穆呼哩博勒呼博勒珠齐拉袞巴延从祀于东西庑凡三十七人永乐迁都帝王庙遣南京太常寺官行礼世宗嘉靖九年罢厯代帝王南郊从祀建厯代帝王庙于都城岁以仲春秋祭二十四年罢元世祖陵庙之祀及从祀穆呼哩等凡祀十五帝名臣三十二人

△孔子庙

周太祖广顺二年六月以文宣王四十三代孙前曲阜县令孔仁玉为曲阜县令亚圣颜渊裔孙颜涉为主簿仍敕兖州修葺祠宇墓侧禁樵采时车驾亲征兖州既平遂幸曲阜谒孔子祠既奠将致敬左右曰仲尼人臣也无致敬之礼帝曰文宣为百代帝王师得无拜之遂拜于祠前

宋真宗大中祥符元年封泰山以十一月幸曲阜备礼谒文宣王庙内外设黄麾仗孔氏宗属并陪位帝服鞞袍行酌献礼命官分奠七十二弟子先儒初有司定仪肃揖帝特展拜以伸严师崇儒之意复幸孔林以树木拥道降輿乘马至文宣王墓奠拜追谥曰玄圣文宣王祝文进

署祭以太牢修饰祠宇给近便十户奉莹庙追封叔梁纥齐国公颜氏鲁国夫人亓官氏
郚国夫人仁宗至和二年封孔子后为衍圣公徽宗政
和五年太常寺言兖州邹县孟子庙请以乐正子配享公孙丑以下从祀者皆拟定其封
爵 【乐正子克利国侯公孙丑寿光伯万章博兴伯
告子不害东阿伯孟仲子新泰伯陈臻蓬莱伯充虞昌乐伯屋庐连奉符伯徐辟仙源伯
陈代沂水伯彭更雷泽伯公都子平阴伯咸邱蒙须城
伯高子泗水伯桃应胶水伯盆成括莱阳伯季孙丰城伯子叔承阳伯】

金熙宗天眷三年以孔子四十九代孙璠袭封衍圣公章宗承安二年命袭封衍圣
公世袭兼曲阜令

元太宗九年令衍圣公孔完措修阙里庙官给其费成宗大德十一年 【时武宗已
即位】 诏曰盖闻先孔子而圣者非孔子无以明后
孔子而圣者非孔子无以法朕纂承丕绪敬仰休风循治古之良规举追封之盛典加号
为大成至圣文宣王遣使阙里祀以太牢于戏父子之
亲君臣之义永为圣教之尊天地之大日月之明莫罄名言之妙尚资神化祚我皇元其
后延佑之末泰定致和初载皆尝遣使致祭所给锦币
杂彩有加焉文宗至顺元年冬十一月曲阜兖国复圣公庙落成顺帝元统二年改封颜
子考妣又割益都邹县牧地三十顷征其岁入以给常
祀

明太祖洪武元年遣使祭阙里三年令曲阜庙庭岁官给牲币俾衍圣公供祀事
△太公庙

唐德宗建中三年礼仪使颜真卿奏武成王庙宜如月令释奠用诸侯之数乐奏轩
悬 【上元中以岁旱罢中小祀武成王庙遂不祭至
是复祭】 诏史馆考定可配享者列古今名将凡六十四人图形焉 【范蠡孙臆廉颇
王翦曲曹参周勃李广霍去病邓禹贾复寇恂马援皇
甫嵩张辽汉寿亭侯周瑜陆逊羊祜王浚谢玄慕容恪檀道济王僧辩慕容绍宗宇文宪
韩擒虎史万岁尉迟敬德苏定方张仁亶王峻王孝杰
列于左管仲田单赵奢李牧彭越周亚夫卫青赵充国吴汉冯异耿弇段颎邓艾张飞吕
蒙陆抗杜预陶侃王猛长孙嵩王镇恶吴明彻斛律光
于谨韦孝宽杨素贺若弼李孝恭裴行俭郭元振张齐邱郭子仪列于右】 贞元二年刑
部尚书关播奏太公古称大贤下乃置亚圣义有未安
又仲尼十哲皆当时弟子今以异时名将列之非类也请但用古今名将配享而去亚圣
十哲之名自是惟享武成王及留侯而诸将不复祭

后唐明宗长兴三年太常礼院准国子博士蔡同文奏请武成王庙四壁从祀诸英
贤各设筵二豆二簋各一爵一

周世宗显德五年诏春秋上戊释奠武成王庙每祭差上将军将军充三献官

宋太祖建隆三年诏修武成王庙与国学相对仍令检阅唐末以来谋臣名将勋绩尤著者以闻四年帝幸庙历观图壁指白起像曰此人杀已降不武之甚何受享于此命去之真宗大中祥符元年加谥太公为昭烈武成王初建隆升历代功臣二十三人【灌婴耿纯王霸祭遵班超王浑周访沈庆之李崇傅永段韶李弼秦叔宝张公谨唐休璟浑瑊裴度李光颜李愬郑畋葛从周周德威符存审】旧配享者退二十二人【吴起孙臆廉颇韩信彭越周亚夫段颍邓艾汉寿亭侯张飞杜预陶侃慕容绍宗王僧辩吴明彻杨素贺若弼王孝杰张齐邱郭元振是年四月己罢白起至是张昭又议罢吴起等合之盖二十三人而诏以管仲升于堂吴起降于庑不罢其祀故所退者为二十二人】仁宗庆历议自张良管仲而下依旧配享不用建隆升降之次徽宗宣和五年从礼部议定武成王从祀七十二将其未经封爵之人皆追封侯伯【管仲涿水侯田穰苴横山侯孙武沪渎侯范蠡遂武侯乐毅平虏侯诸葛亮顺兴侯吴起广宗伯孙臆武清伯田单昌平伯廉颇临城伯王翦镇山伯李广怀柔伯周瑜平虏伯时所祀七十二将盖合唐上元从祀之十哲及建中图形之六十四将而罢檀道济慕容绍宗长孙嵩张齐邱四人增李光弼李晟二人也上元时虽以张良配而良像仍与白起吴起等居十哲之列此则升良殿上降白起吴起于两庑而升建中两庑之管仲范蠡郭子仪与旧列十哲之田穰苴孙武乐毅韩信诸葛亮李靖李绩为十人云】高宗绍兴十一年国子监丞林保奏昭烈武成王享以酒脯而不用牲牢非所以右武而励将士乞今后上戊释奠用牲牢以管仲至郭子仪十八人【按宣和议定从祀自管仲至郭子仪凡十人今据史志作十八人疑八字衍文】祀于殿上从之孝宗干道六年诏升李晟于堂降李绩于李晟坐次以曹彬从祀

金章宗泰和六年建昭烈武成王庙于阙庭之右丽泽门内其制一遵唐旧礼祀用二月上戊仪同中祀元武成王立庙于枢密院公堂之西以孙武子张良等十人从祀每岁春秋仲月上戊以羊一豕一牺尊象尊笱豆俎爵枢密院遣官行三献礼

明初武成王庙遣官致祭如释奠仪太祖洪武六年以太公从祀历代帝王庙遂去武成王号罢其庙祀

△老君庙

（臣）等谨按郑志老君祠在孔子祠之前颇失伦次又以庄列等附之称为先贤名尤不当今改老君庙在太公庙之后而削其所附见

者续辑如左

宋真宗大中祥符六年朝谒亳州太清宫奉上太上老君混元上德皇帝加号册宝夜漏上五刻天书扶侍使奉天书赴太清宫二鼓帝乘玉辂驻大次三鼓奉天书升殿行朝谒之礼相王元偓为亚献荣王元俨为终献帝还大次太尉奉册宝于玉匱缠以金绳封以金泥印以受命之宝纳于醮坛石匱将作监加石盖其上羣臣称贺于大次

明世宗嘉靖时于西苑建大高元殿以奉玉皇及三清像

△巡狩

唐玄宗开元二十年十月如潞州中书门下虑所过囚赦潞州给复三年赐高年粟帛十一月辛丑如北都给复如潞州庚申如汾阴大赦免供顿州今岁租赐文武官勋阶爵诸州侍老帛武德以来功臣三品以上一子官民酺三日

宋巡幸因唐开元礼有告至肆觐考制度之仪太祖幸西京所过赐夏秋田租之半真宗朝诸陵及举大礼所过赐巡警兵守津梁行邮治道卒时服钱履父老绶袍茶帛命官籍所过系囚逋负者曰引对多原释仍访民间疾苦振恤鰥寡孤独车服度量权衡有不如法者禁之有奇材异德及政事尤异者孝子顺孙义夫节妇为乡里所称者其不守廉隅昧于正理者并条析以闻 【案马氏通考以宋太祖之幸太原太宗之幸大名真宗之幸澶渊并述为巡狩之典而高宗之巡淮甸幸浙东西幸平江建康宋礼志亦具载之然太原诸役皆有军旅之事至建炎绍兴之出幸祇以避敌御敌而已实无与于省方问俗也兹故不录】

辽太宗天显四年西巡驻蹕凉陁赦囚系复如南京祠本叶山圣宗统和十三年幸延芳淀诏诸道观农 【按辽以搜狩习武事故岁常行幸诸京而车驾所至往往望祀羣神省风俗见高年议朝政阅户籍决囚释系蠲赋劝农禁布帛不中尺度者为能得古巡狩之意今错举一二以志大概云】

金熙宗皇统时车驾如东京右谏议大夫程案上疏谓古者天子巡狩省察风俗审理冤狱问民疾苦以宣布德泽今銮辂省方将宪古行事愿委之长贰厘正风俗或置匭篋以申冤枉或遣使郡国问民无告皆古巡狩之事也帝嘉纳之世宗大定二十四年帝如上京四月次东京复百里内夏秋租税一年五月至上京庚寅朝谒于庆元宫戊戌宴于皇武殿赐诸王妃主宰执百官命妇各有差帝谓宰臣曰天子巡狩当举善罚恶凡士民之孝弟睦婣者举而用之其不顾廉耻无行之人则教戒之不悛者则加惩罚

元世祖中统四年四月车驾幸开平【升开平为上都】八月车驾至自上都自后岁以为常每岁惟往来两都间别无巡狩之事

明成祖永乐六年北巡车驾将发祭告天地社稷太庙孝陵祭大江旗纛等神輶祭于承天门缘涂当祭者遣官祭将至北京设坛祭北京山川等神车驾至奏告天地祭境内山川宴羣臣耆老赐百官及命妇钞所过郡县官吏生员耆老朝见分遣廷臣核守令贤否即加黜陟给事御史存问高年赐币帛酒肉世宗嘉靖十八年幸承天先期亲告上帝于元极宝殿同日告皇祖及睿宗庙遣官分告北郊及成祖以下诸庙社稷日月神祇所过望祭北岳中岳河渚遣官祭济渚武当山至承天诣献皇帝庙谒告越四日行告天礼奉献皇帝配诣国社稷及山川坛行礼次日谒显陵次日从驾官上表贺遂颁诏如仪回京亲谢上帝皇祖皇考遣官告郊庙社稷如初

（臣）等谨按辽金分建诸京皆有宗庙宫室如周时丰洛之制元之上都明初之中都亦犹是也则其时往来行幸特若周成王之至丰至洛本与时巡方岳者不同故辽金之出幸诸京元之岁至上都明太祖之如中都皆不备述为巡狩之典而金臣程案之疏与世宗之所以谕宰臣者具能师古巡狩之实意而不事虚文爰采之以着于篇若明礼志所载巡狩之制扈从马步军至五万之多则仪卫太繁未足垂法今祇载永乐北巡嘉靖南巡之畧其涉于虚文者并削而不录云

△封禪

宋太宗太平兴国八年泰山父老千余人诣阙请封禪帝谦让不允既而羣臣颂功德请封禪者不可胜计雍熙元年诏以十一月有事于泰山寻以干元文明二殿灾遂停真宗大中祥符元年诏行其礼初太平兴国中有得唐玄宗社首玉册苍璧至是令瘞于旧所其前代封禪坛址摧圯者命修完之山上置圜台径五丈高九尺四陞上饰以青四面如其方色一壝广一丈围以青绳三周燎坛在其东南高丈二尺方一丈开上南出户方六尺山下封祀坛四成十二陞如圜丘制上饰以玄四面如方色外为三壝燎坛如山上坛制社首坛八角三成入陞三壝四门如方丘制又为瘞坎于壬地外壝之内以玉为五牒牒各长尺二寸广五寸厚一寸刻字而填以金联以金绳緘以玉匱置石■〈石感〉中正坐配位用玉册六副每简长一尺二寸广一寸二分厚三分简数量文多少匱长一尺三寸检长如匱厚二寸阔五寸缠金绳五周封以金泥印以受命之宝用石■〈石感〉藏之为石检十以擻■〈石感〉金绳缠之石泥封之用金铸宝曰天下同文如御前宝以封■〈石感〉际皆

再累为五色土圜封■〈石感〉上径一丈二尺下径三丈九尺帝服通天冠绛纱袍乘金辂备法驾至山门幄次改服鞞袍乘步辇登山鹵簿仪卫列山下天门险峻人给横版从卒推挽而上卫士皆给钉鞵供奉马止于中路自山趾盘道至太平顶两步一人彩繒相间树当道者不伐止縶以繒每经陜险必降辇徒步是夕山下罢警场明日设昊天上帝位于圜台奉天书于座左太祖太宗并配西北侧向帝服袞冕升台奠献悉去侍卫命官享五方帝及诸神于封祀坛上饮福酒掇中书令王旦跪称曰天赐皇帝太一神策周而复始永绥兆人三献毕封金玉匱王旦奉玉匱置予石■〈石感〉摄太尉冯拯奉金匱以降将作监领徒封■〈石感〉帝登圜台阅视讫还御幄宰臣率从官称贺山下传呼万岁声动山谷明日禘于社首奉天书升坛以祖宗配徽宗政和时蔡京当国将讲封禅以文太平预具金绳玉检及他物甚备迄不能行【明成祖永乐十四年祠部郎中周讷请封禅尚书吕震请如讷言帝曰今天下虽无事然水旱疾疫亦时有之岂敢自谓太平且经典未尝言封禅唐太宗亦不封禅魏征每以晓舜望其君尔欲处朕于唐太宗之下亦异于征之爱君矣】

（臣）等谨按封禅之说微独三代所无即春秋时亦未有言之者惟管子书有之乃后人附会之辞不足考信盖言封禅者始于七国时海上燕齐迂怪之士至汉世讖纬之书出又牵合经典以侈大之而其说始益盛若河图赤伏符会昌符合古篇提刘子雒书甄曜度孝经钩命决尚书中候等蔓衍而不可穷诘然方士之言谓封禅所以求神仙荒唐悠谬秦皇汉武而外未有深信之者至讖纬之书谓封禅所以告太平故郑康成于尚书柴望礼记升中皆引纬书指为封禅而后之说者遂真以登封告成为王者之盛事虽以唐魏征之贤亦不过谓供帐劳费未可遽行而不能有以明其非也惟梁许懋尝论封禅之失谓圣主不须封禅凡主不应封禅者最为深切着明宋真宗因澶渊之盟惑王钦若之言遂欲以封禅夸示中外伏读通鉴辑览御批自欺欺世贻讥史册洵千古不刊之定论足破秦汉以来之谬说矣

△历代所尚

宋初有司上言国家受周禅周木德木生火则本朝运膺火德色当尚赤腊以戌日诏从之太宗雍熙元年布衣赵垂庆上书言本朝当越五代而上承唐为金德若梁继唐至本朝亦为金德国初符瑞色白者不可胜纪皆金德之应也望改正朔易车旗服色以承天统事下尚书集议常侍徐铉等与百官奏议曰顷以唐末丧乱朱梁篡弑庄宗早编属籍亲雪国仇中兴唐祚重新土运以梁室比羿浞王莽不为正统自后相

传晋以金汉以水周以木天造有宋运膺火德况国初祀赤帝为感生帝于今二十五年岂可轻议改易且五运迭迁亲承厯数岂可越数姓之上继百年之运伏请祇守旧章以承天佑从之真宗大中祥符三年开封府功曹参军张君房言本朝当为金德疏奏不报天禧时光禄寺丞谢绛言国家当黜五代绍唐之土德以继圣祖犹汉之黜秦兴周之火德以继尧大理寺丞董行父又言宋当继唐为金德事下两制议谓汉虽尧之苗裔及序承正统乃越秦而继周非用尧之行今国家或用土德即当越唐承隋弥以非顺失其五德傅袭之序若越五代而绍唐则晋汉及周咸帝中夏太祖受终周室岂可弗遵传继之序续于遐邈之统雍熙中徐铉等议之详矣其谢绛董行父等所请难以施行诏可

△享司寒 【藏冰开冰附】

唐孟冬祭司寒笾豆皆八簋一簋一俎一黑牡一后唐明宗长兴元年冬十月始藏冰周太祖显德元年诏筑坛北郊以孟冬祭司寒其藏冰开冰之祭俟冰室成即行之宋太祖建隆二年始置藏冰署修其祭常以四月以黑牡秬黍祭于玄冥神乃开冰以荐太庙太宗淳化三年秘书监李至言按诗七月曰四之日献羔祭韭周之四月今之二月也月令献羔开冰先荐寝庙详其开冰之祭当在春分帝命正其礼仁宗天圣新令春分开冰祭司寒于冰井务卜日荐冰于太庙季冬藏冰设祭亦如之神宗元丰中详定所言熙宁祀仪孟冬选吉日享司寒春秋左传曰古者日在北陆而藏冰西陆朝觐而出之其藏之也黑牡秬黍以享司寒其出之也桃弧棘矢以除其灾古享司寒惟以藏冰启冰之日孟冬非有事于冰不应祭享今请惟季冬藏冰则享司寒牲用黑牡羊谷用秬黍仲春开冰则但用羔孔颖达注月令曰藏冰则牡黍启惟告而已祭礼大告礼小故也且开冰以御至尊当有桃弧棘矢以禳除凶灾设于神座则非礼也当从孔氏设置弓矢于冰室之户徽宗大观四年议礼局言春秋左氏传少昊有四叔其二为玄冥杜预郑玄皆以玄冥为水官故厯代祀之为司寒则玄冥非天神矣今仪注享司寒礼毕燔燎是以祀天神之礼享人鬼也请罢燔燎而埋祝币从之

（臣）等谨按古祭司寒有三仲秋迎寒迎气之祭也相近于坎坛祈禳之祭也藏冰开冰告祭也唐时以仲秋之祭移之孟冬宋元丰时废孟冬之祭惟藏冰开冰则祭司寒元明司寒之祭无闻焉邱浚曰本朝于春秋二时祭太岁之神及四时月将之神其即古者祭时与寒暑之遗意与

△祭

唐玄宗天宝十三载秋大霖雨害稼六旬不止九月开坊市北门盖井禁妇人入街市祭玄冥大社祭明德门代宗大历四年四月雨至于九月闭坊市北门置土台台上立黄幡以祈晴懿宗咸通六年久雨祭明德门

宋太祖太宗时凡京师水旱稍久帝亲祷者则有建隆观大相国太平兴国寺上清太一宫甚则再幸或撤乐减膳进蔬饌遣官祷者则天齐五龙城隍袄祠四庙大相国开宝报慈干明崇夏五寺及建隆观令开封府祭九龙浚沟黄沟子张子夏信陵君段干木扁鹊张仪吴起单雄信庙雍熙后多遣宰相近臣至道后又于寺观建道场复遣常参官诣岳渎致祠真宗咸平后祈祷又增玉清昭应景灵宫会灵祥源观太一宫哲宗元佑八年自四月常雨至八月诏开京师宫观五日所在令长吏祈祷高宗绍兴二年三月苦雨命往天竺祈晴即日雨止自后祈祷每于天竺或于明庆寺建道场理宗端平三年以霖雨害稼命近臣祷于天地宗庙社稷及岳渎宫观

辽太祖神册四年十月丙午次乌尔呼部天大风雪因祷于天俄顷而霁

金世宗大定十七年夏六月京畿久雨遵祈雨仪祈晴命诸寺观启道场祈祷章宗明昌四年以久雨祭六月丙辰以晴祭岳镇海渎

元时霖雨不止祈祷山川岳渎社稷宗庙或命西僧致祷

明代凡水旱灾伤或躬祷或露告于宫中及奉天殿陛或遣官祭郊庙陵寝及社稷山川无常仪英宗正统四年以京畿水灾祭告天地

（臣）等谨按古祭之名所施者广左传曰日月星辰之神则雪霜风雨之不时于是乎祭之山川之神则水旱疾疠之灾于是乎祭之祭法埋少牢于泰昭以下六祭皆祭也而雩祭祭水旱则水旱之祭皆谓之雩矣盖祭者营酈之名故为营酈而祭者皆曰祭雩者吁嗟之义故吁嗟而求者皆曰雩旱则吁嗟而求雨雨则吁嗟而祈晴也后汉始以祈雨为雩祈晴为祭后代因之而雩与祭之祭始各有专属然宋史之志禘祭金史之志祈祭皆兼述水旱之祷则自唐咸通以后又不专以祈晴为祭矣唐顺之稗编云祭门即雨中闭南门用甘匏二去蒂剖其中一以奉盛一以奉醴朱衣伐鼓于门祭毕开门屡获开霁盖即周礼鬯人祭门用瓢瓚之制但金时祈雨亦用之非独施于祈晴也

△高禘

宋仁宗未有嗣景佑四年二月御史张奎请亲祀高禘诏有司详定礼官以为月令虽可据然周官阙其文汉志郊祀不及禘祠惟枚皋传言皇子禘祀而已后汉至江左畧见其事而仪典委曲不可周知惟高齐禘祀最显妃嫔参飨黷而不蠲恐不足法唐明皇因旧月令特存其事

开元定礼以后不着朝廷必欲行之当筑坛于南郊春分日祀青帝本诗克禋以祓之义也配以伏羲帝尝伏羲本始尝着祥也以禘从祀报古为禘之先也以石为主牲用太牢乐以升歌仪视先蚕有司摄事祝版具言天子求嗣之意乃以弓矢弓鞬致神前祀己与胙酒进内以礼所御使斋戒受之仍岁令有司申请俟旨命曰特祀即用其年春分遣官致祭为圜坛高九尺广二丈六尺四陛三墼陛广五尺墼各二十五步青石主长三尺八寸用木生成之数形准庙社主植坛上稍北露其首三寸青玉青币牲用牛一羊一豕一如卢植之说乐章祀仪并准青帝尊器神位如勾芒惟受福不饮回授中人为异宝元二年皇子生遣参知政事王巖以太牢报祠准春分仪惟不设弓矢弓鞬着为常祀遣两制官摄事庆历三年太常博士余靖言皇嗣未广不设弓矢弓鞬非是诏仍如景佑之制神宗元丰四年礼官言高禘坛迫狭按祀仪青帝坛广四丈高八尺今祀高禘既用青帝为主其坛高广请如青帝之制又祀天以高禘配今郊禘坛祀青帝以伏羲高辛配复于坛下设高禘位殊为爽误请准古郊禘改祀上帝以高禘配改伏羲高辛位为高禘而撤坛下位诏改坛制其典礼如旧徽宗政和新仪祀高禘以简狄姜嫄从配皇帝亲祀并如祈谷祀上帝仪高宗绍兴元年太常少卿赵子昼请以来春复行高禘之祀从之十七年二月帝亲祀高禘如政和之仪

金章宗明昌六年二月尚书省臣奏行高禘之祀 【时章宗未有子】 筑坛于景风门外东南端当阙之卯辰地与圜丘东西相望坛如北郊之制每岁以春分日祀青帝伏羲氏女娲氏凡三位坛上南向西上姜嫄简狄位于坛之第二层东向北上每位羊豕各一有司摄三献司徒行事礼毕进胙官佩弓矢弧鞬以进帝命后妃嫔御皆执弓矢东向而射以次饮福享胙

明世宗嘉靖中始以岁祀高禘设木台于皇城东永安门北震方台上皇天上帝南向驛犊苍璧奉献皇帝配西向牛一羊一豕一高禘在坛下西向牛一羊一豕一礼三献乐九奏舞八佾皇帝位坛下北向后妃位坛下数十丈外北向用帷坛下陈弓矢弧鞬祭毕女官导皇后妃嫔至高禘前跪取弓矢授后妃嫔后妃嫔受而纳于弧鞬

（臣）等谨按宋景佑时定祀高禘以伏羲高辛配青帝而坛下别设先禘位丰礼官以为非然高禘之祀虽见于月令及生民诗所言不详所祀何神后世祀高禘大约依据郑康成之说其谓后王祀高辛而废先禘第出孔颖达礼记正义未可即为典据但高禘之称属之高辛先禘不当称高禘耳至政和又以简狄姜嫄参配青帝则又郑孔之所未尝言恐非所以

为别也

（臣）等又按郑志有苇菱桃梗及祓禊二门苇菱桃梗事止刘宋后无其礼至上已祓禊颇见于唐人歌咏则唐时犹行之而史志不载其礼故樵所叙述迄于南齐而不及唐盖其礼之行于唐者已莫可考也今并阙之

△杂神祠

唐玄宗开元二年诏祠龙池右拾遗蔡孚献龙池篇公卿以下一百三十篇诏太常寺考其词合音律者为龙池乐章十首又诏增置坛及祠堂每仲春将祭则奏之肃宗至德二年道士李国正奏皇室仙系修崇灵路请于昭应县南置天华上宫露台天地婆父三皇道君太古天皇中古伏羲娲皇等祠堂又于县南义扶谷故湫置祠并许之昭应令梁镇上疏谓天地婆父祀典无文言甚不经义无可取又湫者龙之窟也今湫竭已久龙安所在何必崇饰祠宇丰洁荐奠其三皇五帝则两京及所都之处已建宫观祠庙望并于本处依礼斋祭制曰可

后唐庄宗同光二年置水于城门以禳荧惑明宗天成二年幸白马寺祭突厥神

宋京城东旧有五龙池因唐礼岁以仲春祭之用中祀礼又有德安公庙祭夷门山神崔府君庙祭唐滏阳令崔君寔州普济王庙祭要册湫镇戎军灵泽庙祭朝那湫郑州灵显王庙俗传李靖神也安陵东北显灵庙祀蛇王炳灵公庙祭泰山三郎河南昭圣灵惠二庙祭泉神三水府神祭马当采石金山杭州吴山庙祭涛神明应公庙祭润州焦山宣州广惠王庙祭昭亭山神广济王庙祭秦蜀守李冰剑州英显王庙祭梓潼神张亚子梓州灵济公庙祭唐涪州刺史陆弼南康军■〈共阝〉亭庙祭■〈共阝〉亭湖中蛟神宗元丰三年诏加号江州庐山太平兴国观九天采访使者为应元保运真君眉州青城山丈人观九天丈人为储福定命真君徽宗崇宁元年用方士魏汉津之说备百物之象铸鼎九于中太一宫南为殿奉安之各周以垣上施埤堦墁如方色外筑垣环之名曰九成宫中央曰帝鼐其色黄祭以土旺曰为大祠币用黄乐用宫架北方曰宝鼎其色黑【通考作白】祭以冬至币用阜东北曰牡鼎其色青【通考作白】祭以立春币用阜东方曰苍鼎其色碧祭以春分币用青东南曰冈鼎其色绿祭以立夏币用绯南方曰彤鼎其色紫祭以夏至币用绯西南曰阜鼎其色黑祭以立秋币用白西方曰晶【通考作晶】鼎其色赤祭以秋分币用白西北曰魁鼎其色白祭以立冬币用阜八鼎皆为中祀乐用登歌享用素饌复以帝鼐之宫立大角鼎星祠大观三年诏以铸鼎之地作宝成宫总屋七十一区中置殿曰神灵以祀黄帝东庑曰成功祭夏后氏西庑曰持盈祀周成王

及周公旦召公奭后置堂曰昭应祭唐李良及隐士嘉晟侯魏汉津又诏每岁八月二十五日举祀事黄帝为天祀成功持盈二殿为中祀昭应堂为小祀并用素饌四年诏天下五龙神皆封王爵政和元年诏开封府一应神祠不在祀典者皆毁之凡毁一千三十八区仍禁军民擅立神祠

辽太宗天显三年四月祭麋鹿神景宗保宁三年十月以黑白羊祀神七年五月祭神姑圣宗统和十六年五月祭白马神

金世宗大定时封护国林神嘉阴侯遇月七日致祭泸沟河神安平侯春秋致祭加封郑州河阴县圣后庙神为昭应顺济圣后春秋致祭

章宗明昌时封旺国崖镇安公玛达格山瑞圣公【章宗生于此】又立贞献郡王庙祭叶噜古绅二人始制女贞文字

元世祖至元十五年正月封磁州崔府君为齐圣广佑王七月建汉祖天师正一祠于京城仁宗延佑七年四月【时英宗已即位】祭

遁甲神于香山英宗至治元年五月遣使祀天妃泰定帝泰定二年七月遣阿尔实保祀宅神于北部行幄遣使祠龙虎武当二山八月建天妃

宫于海津镇文宗天历元年遣使祀汉将军关侯庙【加封为显灵义勇武安英济王】顺帝至元三年降香于龙虎三茅阜角诸山

明直沽有天妃庙北京有真武庙洪恩灵济宫【祀徐温子知证知谔】仁宗洪熙元年封卢师山大小青龙神春秋遣官致祭景帝景

泰七年祀金龙四大王庙于沙湾宪宗成化十三年诏建汉寿亭侯庙【万历时加封三界伏魔大帝神威远镇天尊】又有凤阳显应庙

【神莫知所自明初祷雨有应】滁州丰山庙栢子潭庙徐州灵源宏济庙河平神庙平阳平水祠汾水灵泽庙【称白彪山马跑泉之神

】沁州南山庙焦龙神庙龙泉神庙兖州青山庙安平镇显惠等庙【弘治间改张秋为安平镇建真武龙王天妃三庙赐额显惠】严州

乌龙庙【三月三祀】宜春仰山庙【祀宜山二龙神】常德阳山庙【祭山神】沅州显应庙【祭明山神】长沙洞庭庙

【祀龙四月八日祭】马湖显应庙【祀元人于法】福州灵济宫广州天妃庙南海真武庙琼州灵山庙【祀毘耶山之神】电白

灵湫庙诚敬夫人祠【祭冯宝妻洗氏】皆终明之世有司岁时致祭不绝

钦定续通志卷一百十四

●钦定续通志卷一百十五 礼略五

礼畧

嘉礼

○嘉礼

天子加元服

皇太子冠

诸侯大夫士冠

天子纳后

天子册妃嫔

△天子加元服

金皇帝加元服告太庙或一室或徧告及原庙并一献礼用祝币

明制天子加元服前期太史院卜日工部制冕服翰林院撰祝文祝辞礼部具仪注中书省承制命某官摄太师某官摄太尉既卜日遣官奏告天地宗庙行一献礼前一日陈御冠席于奉天殿正中是日质明皇帝服空顶帻双童髻双玉导绛纱袍御舆以出警蹕奏乐如常仪皇帝升坐太师太尉入就拜位引礼导太师太尉盥帨讫侍仪跪奏请加元服太尉诣皇帝前跪脱空顶帻以授内使内使跪受帻兴置于箱太尉进栲设纚毕退立于西太师诣御前北向立内使监令就案取冕立于左太师祝曰令月吉日始加元服寿考维祺以介景福内使监令捧冕跪授太师太师跪受冕加冠加簪纓讫退立于西御用监令跪请皇帝着袞服讫侍仪跪奏请就御坐内赞赞进醴乐作太师进御前北面立光禄卿奉酒进授太师太师受酒祝曰甘醴惟厚嘉荐令芳承天之休寿考不忘祝讫跪授内使内使跪受酒捧进御前皇帝受酒祭少许饮酒讫以虚盞授内使乐止内赞导太师太尉出殿西门引礼接引至丹墀拜位太师太尉及文武官皆四拜舞蹈山呼侍仪奏礼毕皇帝改服通天冠绛纱袍入宫拜谒太后如正旦仪择日谒太庙与时祭同明日百官朝服称贺赐宴于谨身殿【神宗万历三年正月帝择日长发命礼部具仪以闻大学士张居正等奉言礼重冠昏皇上前在东宫已行冠礼上公掌冠辅臣陪列巨礼已成可畧其细臣等以为不必令部臣拟议第先期诣奉先殿宏孝殿神霄殿以长发告是日礼毕诣两宫皇太后行五拜三叩头礼随诣御干清宫受贺帝是之着为令】

△皇太子冠 【皇子皇孙附】

宋皇太子冠仪尝行于大中祥符之八年徽宗亲制冠礼沿革十一卷命议礼局仿以编次其仪前期奏告天地宗庙社稷诸陵宫观殿中监帅尚舍张设垂拱文德殿门内太常设太子冠席东阶上光禄卿设醴席西阶上南面礼直官通事舍人太常博士引太子诣朵殿东房皇帝乘辇驻垂拱殿百官起居如月朔视朝仪皇帝服通天冠绛纱袍诣文德殿即座待宝郎

奉宝陈于御座左右礼直官通事舍人太常博士引掌
冠赞冠者入门左辅诣御座前承制降东阶诣掌冠者前西向称有制典仪赞在位官再
拜讫宣制曰皇太子冠命卿等行礼掌冠赞冠者再拜
讫礼直官等引太子内侍二人夹侍东宫官后从即席西向坐掌冠赞冠者以次诣盥洗
所盥帨讫执折上巾者升掌冠者降一等受之右执项
左执前进皇太子席前北向立祝曰咨尔元子肇冠于阼筮日择宾德成礼具于万斯年
承天之祜乃跪冠兴席南北面立 【后准此】 赞冠
者进席前北面跪正冠兴立于掌冠者之后太子兴内侍跪进服掌冠者揖太子复坐礼
直官等引掌冠者降诣盥洗如上仪赞冠者进席前北
向跪脱折上巾内侍跪受执远游冠者升掌冠者降二等受之执进如上仪祝曰爰即令
辰申加元服崇学以让三善皆得副予一人受天百福
乃跪冠兴赞冠者进跪簪结紘兴太子兴内侍跪进服太子复坐掌冠者降诣盥洗及赞
冠者跪脱远游冠并如上仪执袞冕者升掌冠者降三
等受之执进如上仪祝曰三加弥尊国本以正无疆惟休有室大竞懋昭厥德保兹永命
乃跪冠兴赞冠者进跪簪结紘内侍进服礼直官等引
太子降自东阶由西阶升即醴席南向坐又引掌冠者诣盥洗盥帨讫升西阶赞冠者跪
取爵内侍注酒掌冠者受爵跪进太子席前北向立祝
曰旨酒嘉荐有飴其香拜受祭之以定尔祥令德寿岂日进无疆太子跪受爵饮讫奠爵
大官令设饌席前太子食讫大官令彻饌爵礼直官等
引自西阶诣东房易朝服降立横街南北向掌冠者少进字之曰始生而名为实之宾既
冠而字以益厥文永受保之承天之庆奉敕字某太常
博士请再拜太子再拜讫搯笏舞蹈再拜奏圣躬万福又再拜左辅承旨降自东阶诣太
子前西向宣敕曰事亲以孝接下以仁远佞近义禄贤
使能古训是式大猷是经宣讫太子再拜讫礼直官等引太子前俛伏跪奏称臣虽不敏
敢不祇奉奏讫兴复位再拜讫引出殿门礼毕皇帝降
坐放仗太子入内朝见皇后如宫中仪择日谒太庙别庙羣臣称贺皇帝赐酒三行皇子
冠前期择日奏告景灵宫太常设皇子冠席文德殿东
阶上稍北东向其日质明皇帝服通天冠绛纱袍御文德殿皇子自东房出内侍二人夹
侍王府官从即席南向坐掌冠者进折上巾北向跪冠
赞冠者进北面跪正冠皇子兴内侍跪进服讫掌冠者揖皇子复坐以爵跪进祝曰酒醴
和旨筮豆静嘉授尔元服兄弟具来永言保之降福孔
皆皇子跪受爵饮讫大官令进饌讫再加七梁冠掌冠者进爵祝曰宾赞既成肴核惟旅
申加厥服礼仪有序允观尔成承天之祜三加九旒冕
掌冠者进爵祝曰旨酒嘉栗甘荐令芳三加尔服眉寿无疆永承天休俾炽而昌饌彻皇

子降易朝服立横街南北向位掌冠者字之曰岁日云

吉威仪孔时昭告厥字君子攸宜顺尔成德永受保之奉敕字某皇子再拜舞蹈又再拜奏圣躬万福又再拜左辅宣敕戒曰好礼乐善服儒讲

艺蕃我王室友于兄弟不溢不骄惟以守之皇子再拜进前俛伏跪称臣虽不敏敢不祇奉兴复位再拜出礼成放仗明日百僚诣东上合门贺

【政和四年礼制局定皇长子冠掌冠以礼部尚书赞冠以鸿胪卿】

明初定皇太子冠礼其年近则十二远则十五既筮日遣官祭告天地宗庙设御座于奉天殿设太子冠席于殿上东面西向设醴席于西

阶上南向择三公太常为宾赞皇帝服通天冠绛纱袍御殿侍仪司承制命宾赞行礼初加折上巾再加十八梁远游冠三加九旒冕一祝醴字

之辞曰奉敕字某 【余仪与宋制同】 礼毕内给事导皇太子入内殿朝见皇后如正旦仪明日谒庙如时享礼又明日百官朝服诣奉天殿

称贺退易公服诣东宫称贺锡宴成祖永乐九年命皇太子嫡长子为皇太孙冠于华盖殿上御奉天殿傅制持节行礼其仪与皇太子同宪宗

成化十四年续定皇太子冠礼前期一日遣官具特牲告庙行一献礼设幕次于文华殿东序设节案香案冠席醴席盥洗司尊所具如仪内侍

张帟幄陈袍服皮弁服袞服圭带舄翼善冠皮弁九旒冕是日质明皇帝御奉天殿传制遣官持节皇太子迎接于文华门外持节官捧节入置

于案退礼部官导皇太子就冠席初加翼善冠再加皮弁三加冕旒行醮礼 【余如旧仪】 是日皇太子冕服谒祭奉先殿毕诣皇太后皇帝

皇后前谢行五拜三叩头礼俱用乐明日皇帝及皇太子受贺如仪皇子冠礼初加网巾再加翼善冠三加袞冕酌醴宣敕戒礼毕谒庙诣父皇

及东宫前谢初皇子冠之明日百官诣王府称贺成化二十三年皇子冠之次日各诣奉天门东庑序坐百官常服四拜神宗万历二十九年礼

部尚书冯琦言旧制皇太子冠设冠席醴席于文华殿内今殿为皇上临御之地则皇太子冠席应移于殿之东序又亲王冠旧设席于皇极门

之东庑今皇太子移席于殿东序则亲王应移于殿西序从之

（臣）等谨按皇太子冠历代但告宗庙五礼精义云皇帝加元服告天地太子冠独告太庙者天子为天下主有大事必先告天地皇太

子虽储贰之尊未接天地故独告宗庙也惟政和及洪武仪并告天地又皆皇帝亲临成化时又定制皇帝传制遣官而不亲临盖与开元礼同

所异者开元就东宫行礼而成化则在别殿行礼也

△诸侯大夫士冠

（臣）等谨按后世之诸侯王古之诸侯也后世之品官古之大夫士也宋明之亲

王即皇子其冠仪已附见皇太子一条下此但录品官

以下官仪云

宋政和仪品官冠子将冠主人谏日择宾告于祢庙无庙者为位于厅事两楹之间南面主人公服再拜以告前三日主人戒宾前一日主

人择宾可使冠子者一人而宿之又宿赞冠者质明陈设冠服等物如仪主人公服立于东阶下西面兄弟各服其服立于洗东西面北上将冠

者立于房中南面宾赞如主人服立于外门之外主人迎宾揖逊升阶就位主人东阶上西面宾赞西阶上东面赞冠者盥于洗升立于房中西

面设冠位于主人东北西面将冠者出房南面赞冠者奠巾总于席南端宾揖将冠者即席坐赞冠者坐设巾总宾降主人从降宾辞降主人曰

吾子降辱敢不从降宾既盥揖逊升主人复初位宾即将冠者席前跪正巾兴降西阶一等执折上巾者升东面授宾宾右执项左执前进揖冠

者席前东向立祝曰粤惟初冠考礼之称正尔容体顺尔辞令尽革童心永膺大庆乃跪冠兴复位赞冠者跪正折上巾冠者兴宾揖冠者适房

服折上巾服出房南面立宾主俱兴宾揖冠者即席坐赞冠者跪脱折上巾设筭宾降盥再加二梁冠祝曰载契我龟载加尔服尔既顺序毋曰

欲速自天申之申以百福三加平冕祝曰授时之吉迎天之休抗以高明掖其进修三加弥尊百禄是遒 【仪并如前】 执事者布席于西阶

上南面设酒饌如常仪执事者盥手洗爵于房中赞冠者以酒注于爵宾揖冠者即席西南面立宾受爵进席前北向立祝曰旨酒既嘉载肴斯

阜既曰克家亦惟继祖孝友慈祥受天之祐冠者拜受爵宾东面答拜赞冠者荐饌冠者坐饮食讫降席再拜宾答拜易服拜父父为起入拜母

母为起宾降当西序东面主人降当东序西面立冠者出立于西阶东南面宾少进字之曰卜筮云吉礼仪孔明爰字尔德嘉尔有成曰伯某甫

【仲叔季惟其所当】 冠者曰某虽不敏敢不祇奉宾出主人请礼宾宾就次如别仪冠者庙见及见诸父诸兄姊妹如常仪 【若以巾帽

折上巾为三加者听孤子冠即诸父诸兄为主如上仪品官子孙三舍生依品官仪】 庶人子冠二加仪如品官 【司马光书仪男子年十二

至二十皆可冠必父母无期以上丧始可以行之其仪始裹巾再加帽三加幘头朱子家礼并同】

明制品官冠礼前期择日告于家庙乃筮宾前二日主者戒宾及赞冠者至日夙兴陈设如仪宾赞至门外掌次者引入次宾赞公服诸行

事者各服其服执尊壘筐者皆就位冠各一笥各一人执之待于西阶之西东面北上设主席于阼阶上西面设宾席于西阶东面冠者席于主

者东北西面主者公服立于阼阶下宾者立门内道东冠者双童髻空顶帻双玉导金宝饰彩褶锦绅鸟皮履【六品以上导不以玉】立于房中南面主者赞冠者公服立于房内户东西面宾及赞冠者出次立于门西宾者入告主者迎宾于大门外之东西面再拜宾答拜主者揖赞冠者赞冠者报揖又揖宾宾报揖主者入宾赞次入主者自阼阶立于席东西向宾自西阶立于席西东向宾赞冠者及庭盥于洗升自西阶入于东房立于主赞冠者之南西面主赞冠者导冠者立于房外之西南面宾赞冠者取纚栉簪跪奠于冠者筵南端退立于席北少东西面宾揖冠者冠者进升席西向坐宾赞冠者进筵前东面跪脱双童髻栉毕设纚兴复位立宾降至盥洗盥讫诣西阶主者立于席后西面宾立于西阶上东面执缙布冠者升宾降一等受之右执项左执前进冠者筵前东向立祝用士礼祝词祝毕跪冠兴复位宾赞冠者进筵前东面跪结纓兴复位冠者兴宾揖之适房宾主皆坐再加进贤冠三加爵弁仪如初又设筵于室户西南向冠者出房户主赞洗觶于房酌醴出南面立宾揖冠者就筵西南面立宾受醴进冠者筵前北面立祝毕冠者拜受觶宾复西阶上答拜执饌者荐饌冠者左执觶右取脯祭于筯豆闲赞者取肺一以授冠者奠觶于荐西以祭冠者坐取觶祭醴奠觶再拜宾答拜冠者执觶兴宾主俱坐冠者升筵跪奠觶于荐东兴进北面跪取脯降自西阶入见母进奠脯于席前退再拜【母不在则使人受脯于西阶下】初冠者入见母宾主俱兴宾降当西序东面立主者降当东序西面立冠者出立于西阶东南面宾少进字之辞同士礼冠者再拜跪曰某不敏夙夜祇承宾出主者送于内门外西向请礼从者宾就次主者入初宾出冠者东面见诸亲诸亲拜之冠者答拜冠者西向拜宾赞宾赞亦答拜见诸尊于别室亦如之宾主既释服入醴席一献讫出次主者揖宾入授酬币于宾及宾之赞冠者【孤子则诸父诸兄戒宾冠之日主者紿而迎宾冠于阼阶下其仪亦如之】明日见庙庶人冠礼初加幪头再加帽三加幪头余仪与品官同

（臣）等谨按士冠礼郊特牲皆云无大夫冠礼而有其昏礼古者大夫五十而后爵何大夫冠礼之有唐宋以后品官冠仪大率依仿士冠礼为之虽历代微有损益而大较不异观唐柳宗元所言孙昌允事则知当时行此礼者绝少闲有为之者反见骇笑于时俗降宋及明益复寥寥仪注虽存以备一代掌故而己

△天子纳后【册后附】

后唐朝宗长兴元年三月帝临轩命使册淑妃曹氏为皇后【礼院言百官上疏于

皇后曰皇后殿下六官及率土妇人庆贺祇呼殿下
中书覆奏若祇呼殿下恐与皇太子无别凡上中宫表章呼皇后殿下若不形文词寻常祇呼皇后从之】

宋太祖建隆元年立琅琊郡夫人王氏为皇后命所司择日备礼册命自后凡制书云册命者多不行册礼后妃皆写册命告身以金花龙凤罗纸金涂褙袋有司进入学士院草制宣于正殿近臣牧守宗室皆修贡礼羣臣拜表称贺又诣内东门奉笺贺皇后真宗册德妃刘氏为皇后不欲令藩臣贡贺不降制于外廷止命学士草词付中书仁宗景佑元年立皇后曹氏冬至行册礼与通礼异者不立仗不设县其日百官常服早入礼直官通事舍人先引中书令侍中门下侍郎中书侍郎及捧册宝官执事人绛衣介帻诣垂拱殿门就次以俟册降礼直官通事舍人分引宰臣枢密册宝使副百官入文德殿庭立班内侍二员自内承旨降册宝率执事者捧册宝出垂拱殿由东上合门出至文德殿庭权置礼直官通事舍人引使副就承制位次引侍中于使前西向称有制典仪曰再拜赞者承传使副在位官皆再拜宣曰赠尚书令冀王曹彬孙女册为皇后命公等持节展礼使副再拜侍中还位门下侍郎帅主节诣使东北主节以节授门下侍郎门下侍郎执授册使册使跪受兴付主节幡随节立于使左次引中书令侍中诣册宝东北西向立中书侍郎引册案立于中书令之右中书令取册授册宝使使跪受兴置于案中书令侍郎退复本班又门下侍郎引宝案于侍中之右侍中授宝册宝使受宝复位如授册之仪典仪再拜如前礼直官通事舍人引使副押册宝持节者前导捧册宝官捧舁援卫以次出朝堂由右升龙门入诣内东门内臣引内外命妇俱入就位立内侍诣合奏请皇后首饰祔衣册宝至内东门外位使副东向立内给事进就南向位礼直官通事舍人引使就内给事前北向跪称册宝使李迪副使王随奉制授皇后册宝讫内给事入诣受册宝殿阁皇后前跪奏内侍进诣使前西向跪受册宝以授内谒者监使退复位内谒者监主当内臣持册宝入内东门内侍从之以次入诣殿庭内侍赞引皇后降立庭中北向位内侍跪取册又内侍跪取宝兴进立于皇后之右少前西向内侍二员进立于皇后之左少前东向又内侍称有制内侍赞皇后再拜内侍奉册授皇后皇后以授内侍奉宝亦然复赞再拜前导皇后升座南向内臣引内外命妇称贺如常仪礼毕皇后还合常服谢皇帝皇太后用常礼百官东上合门拜表称贺哲宗元佑六年三省枢密院言纳后六礼命使纳采问名纳吉纳成告期差执政官摄太尉充使侍从官或判宗正官摄宗正卿充副使以旧尚书省权为皇后行第纳

采问名同日次日纳吉纳成告期纳成加谷圭纳采前
择日告天地发册命使差宰臣摄太尉执政官摄司徒前一日告宗庙命使奉迎皇帝临
轩与册礼使副同遣令文武百官诣行第班迎其日皇
后服袞衣乘重翟车鹵簿依礼令由宣德门东偏门入文臣大卿监武臣正任刺史以上
宣德门外班迎诏从之【时给事中范祖禹言临轩
发册命使奉迎及皇后入内皇帝乃服通天冠绛纱袍于礼宋隆请并服袞冕以重大昏
之礼翰林学士范伯禄言昏礼下达匪媒不克今采择
先定有司既集而形于制麻以后氏族姓宣告外庭方且遣使赉制行纳采问名礼颠倒
失序请以降诏之日行纳采问名之礼宣制之日行纳
吉纳成告期之礼皆不从】既而礼部太常寺言五礼命使据开元纳采问名合用一使
其纳吉纳成告期各别日遣使今未委三礼共遣一使
或各遣使文武百官诣行第班迎缘至日门外已设皇后车乘仪仗逼隘不容百官车马
其文武百官欲并于宣德门外立班奉迎案士昏礼用
鴈以为贽也又案曲礼凡贽天子鬯郑康成谓天子无客礼以鬯为贽者惟用告神今
据周礼用谷圭聘后欲更不用鴈文德殿发制欲依发
册例立仗或止用月朔视朝仗百官朝服诏纳吉纳成告期各遣使文德殿发制依发册
例立仗余并从之高宗绍兴十三年闰四月册贵妃吴
氏为皇后其日质明皇帝服通天冠绛纱袍出西合协律郎举麾奏干安之乐皇帝降辇
即御座乐止册使副以下应在位官皆再拜侍中宣制
曰立贵妃吴氏为皇后令公等持节展礼册使副再拜参知政事以节授册使册使跪受
以授掌节者中书令以册授册使侍中以宝授副使并
权置于案册使副以下应在位官皆再拜册使押册副使押宝持节者前导正安之乐作
出文德殿门乐止至穆清殿门外幄次权置以俟皇后
首饰袞衣出合协律郎举麾坤安之乐作皇后至殿上中闲南向立定乐止册使副就内
给事前东向跪称册使副姓某奉制授皇后备礼典册
内给事入诣皇后前北向奏讫册使举册授内侍内侍转授内谒者监副使举宝授内侍
内侍转授内谒者监掌节者以节授掌节内侍掌节内
侍持节前导举册宝并案进入诣殿庭册宝初入门宜安之乐作至位乐止皇后降自东
阶至庭中北向位初行承安之乐作至位乐止皇后再
拜举册官搯笏跪举册读册官搯笏跪宣册内谒者监奉册进授皇后皇后受以授司言
又奉宝进授皇后皇后受以授司宝司言司宝置册宝
于案举册宝官并举案官俱搯笏举册宝并案兴诣东阶之东西向位置定皇后初受册
宝成安之乐作受讫乐止皇后再拜礼毕

辽皇帝纳后之仪择吉日至日后族毕集诘旦后出私舍坐于堂皇帝遣使及媒者

以牲酒饗饩至门执事者以告使及媒者入谒再拜平
身立少顷拜进酒于皇后次及后之父母宗族兄弟酒徧再拜纳币致词再拜讫后族皆
坐特哩袞夫人四拜请就车后辞父母伯叔父母兄弟
四拜宗族长者皆再拜皇后升车父母饮后酒致戒辞徧及使者媒者送者发轳伯叔父
母兄饮皇后酒如初教坊遮道赞祝后命赐以物后族
追拜进酒遂行将至宫门宰相传敕赐皇后酒徧及送者既至特哩袞率皇族奉迎再拜
皇后车至便殿东南七十步止特哩袞夫人请降车负
银罍捧滕履黄道行后一人张羔裘若裘之前一妇人捧镜却行置鞍于道后过其上乃
诣神主室三拜南北向各一拜酌酒向谒者一拜起居
讫再拜次诣舅姑御容拜奠酒选皇族诸妇宜子孙者再拜之授以罍滕诣诸帝御容拜
奠酒神赐袞衣珠玉佩饰拜受服之后姊若妹陪拜者
各赐物皇族迎者后族送者徧赐酒皆相偶饮讫后坐别殿送后者退食于次媒者传旨
命送后者列于殿北以俟皇帝即御座选皇族尊者一
人当奥坐主昏礼命执事者往来致辞于后族引后族之长率送后者升当御座皆再拜
又一人少进附奏送后之词退复位再拜后族之长及
送后者向当奥者三拜南北向各一拜向谒者一拜后族之长跪问圣躬万福再拜复奏
送后之辞又再拜当奥者与媒者行酒三周命送后者
再拜皆坐终宴翼日皇帝晨兴诣先帝御容拜奠酒讫复御殿宴后族及羣臣皇族后族
偶饮如初百戏角抵戏马较胜以为乐又翼日皇帝御
殿赐后族及嫔送后者各有差受赐者再拜皇帝御别殿有司进皇后服饰之籍酒五行
送后者辞讫皇族献后族礼物后族以礼物谢当奥者
礼毕册皇后仪至日北南臣僚内外命妇诣端拱殿幕次皇后至合侍中奏中严引命妇
班人就东西相向位立皇帝临轩命使发册使副押册
至端拱殿门外幕次侍中奏外办所司承旨索扇扇上举麾乐作皇后出合升坐扇开帘
卷偃麾乐止引命妇合班面殿起居八拜皇后降坐乐
作至殿下褥位乐止引册入置皇后褥位前侍中传宣皇后四拜命妇陪位皆拜引读册
官至皇后褥位前俛伏跪读讫皇后四拜陪位者皆拜
引皇后升殿使臣引册置皇后坐前册案退西向侍立命妇当殿称贺四拜引班首东阶
上殿致词讫东阶下殿复位四拜侍中奏宣答称有教
旨四拜宣答讫四拜班首上殿进酒皇后赐押册使副等酒讫侍中奏礼毕承旨索扇乐
作皇后起入合乐止分引命妇等东西门出

金海陵天德二年十月九日册妃图克坦氏为皇后其日诸卫勒所部署列黄麾细
仗于庭羣官朝服就次侍中板奏中严外办殿上索扇
协律郎举麾宫县作皇帝服通天冠绛纱袍出东房警蹕侍卫如常仪即座坐帘卷乐止

通事舍人引册使副入宫县使作副就受命位侍中中
书令门下侍郎中书侍郎西面立羣臣合班横行北面如常朝之仪立定典仪曰再拜赞
者承传班首以下羣官在位者皆再拜班首问起居又
再拜合门官引摄侍中出班承制降诣使副东北西向称有制使副稍前鞠躬再拜摄侍
中宣制曰命公等持节授后册宝宣讫又俱再拜侍中
还班门下侍郎引主节诣册使所主节以节授门下侍郎门下侍郎授太尉太尉受付主
节中书侍郎引册床门下侍郎引宝床立于册使东北
西向以次授与太尉太尉皆捧受册床置于北宝床置于南侍中中书令礼仪使举捧册
宝官及舁床者退于东西砖道之左右相向立门下侍
郎中书侍郎退还班位典仪曰再拜承传再拜如前引诸舁册宝床者进册床先行读册
官次之宝床次行读宝官次之通事舍人引册使随之
以行持节者前导摄侍中升殿奏礼毕降座入自东房先是有司预设太尉司徒本品革
车鹵簿于门外至殿门左右排列俟使副出鼓吹振作
礼仪使等以册宝少驻于泰和门太尉司徒及读册宝官暂归幕次内侍合门引入泰和
殿俟至殿下鼓吹止有司预供张泰和殿设皇后座于
宸前殿上垂帘其日诸卫于殿门外畧设黄麾细仗质明执事官太乐令等各就位皇后
常服乘龙饰肩輿至泰和殿后合近仗导卫如常仪宣
徽使奏中严外办内侍合门官引后出后合宫县作帘卷皇后降西阶望勤政殿御合所
在立乐止册使进立于右宣曰有制合门使内侍赞再
拜册使宣曰制遣太尉臣某司徒臣某恭授后册宝合门使内侍赞再拜册使少退中书
令侍中及举捧官率抬舁人奉册宝以次进宫县作册
宝床自东阶升并置于殿之前楹闲册床在北宝床在南读册宝官于床之东西向立定
乐止合门使内侍赞再拜捧谢表官以表授左立内侍
内侍以授后受讫以付右立内侍内侍持表立于右合门使赞再拜讫册使退持表内侍
以表付合门官随册使行册使副至御合所在跪奏礼
毕合门官进表讫并退初册使退及门乐止阁门内侍引后自西阶升殿宫县作后于座
前南向立乐止中书令读册侍中读宝讫并降东阶立
升座宫县作坐定乐止奉安册宝床讫举捧官降立合班再拜讫退出殿门合门引内外
命妇入称贺礼毕降座还合更常服内侍承教旨宣外
命妇会并如常仪

元册立皇后大昕引赞叙太尉以下于阙庭各公服礼仪使侍仪使分引册使副等
官由月华日精门入至露阶下立侍仪使入报外办皇
帝出合升辇导从入大明殿升御座如常仪宣赞唱曰各恭事引赞引册使以下入就位
掌仪舍人引承奉班都知侍仪使礼仪使主节捧册捧

宝官升自左阶至御座前立礼仪使奏请发皇后册宝掌仪赞内谒者以册宝授捧册宝官赞主节官搢笏持节礼仪使引节导册宝出至露阶南向立礼仪使宣制命太尉某等持节授皇后册宝侍仪使礼仪使引太尉及捧册宝官随至皇后宫庭以册宝置于案内侍入启皇后出合诣褥位拜三上香皇后升殿立于座榻前捧册宝官由正门至殿内读册宝官读毕纳册于匣纳宝于盥太尉以下皆就拜捧册宝官以册宝授太尉转授掌谒置于案太尉跪致祝辞伏愿皇后与天同算司徒应曰如所祝太尉进酒乐作皇后饮毕乐止礼仪使引节并主节由正门侍仪使引太尉以下由左门出至阶下北面立再拜还诣皇帝御座前跪奏礼毕就拜侍仪使引导从导皇后诣大明殿前谢恩如仪掌谒导皇后升御座坐典引引丞相入位右丞相进酒至御榻前跪宣徽使随入立于东南右丞相祝赞曰册宝礼毕臣等不胜庆忭同上皇帝皇后万万岁寿宣徽使应曰如所祝宴毕导驾还寝殿并如来仪

明册立皇后洪武初定制前期遣官祭告天地宗庙是日早列卤簿陈甲士设乐如仪质明正副使及百官入皇帝袞冕御奉天殿礼部官奉册宝各置于案诸执事官入就殿上位立承制官奏发皇后册宝由中门出至宣制位宣制毕由殿西门入正副使俯伏兴执事者举册宝案由中门出降自中陛奉节官率掌节者前导至正副使褥位以案置于北掌节者脱节衣以节授奉节官奉节官以授正使正使以授掌节者掌节者跪受兴立于正使之左奉节官退引礼引正使诣受册位奉册官以册授正使正使跪受置于案退复位副使受宝亦如之乐作正副使四拜兴乐止正使随册副使随宝掌节者前导举案者次之乐作出奉天门乐止侍仪奏礼毕驾兴百官出掌节者加节衣奉册宝官皆搢笏取册宝置龙亨内仪仗大乐前导至中宫门外乐作皇后具九龙四凤冠服袂衣出合至殿上南向立乐止正副使奉册宝权置于门外所设案上引礼引正副使及内使监令俱就位正使诣内使监令前称册礼使臣某副使臣某奉制授皇后册宝内使监令入告皇后出复位引礼引内外命妇入就位正使奉册授内使监令内使监令跪受以授内官副使授宝亦如之各复位内使监令率奉册奉宝内官入置于案尚仪引皇后降陛诣庭中位立内官奉册宝立于皇后之东西内使监令称有制尚仪奏拜皇后拜乐作四拜兴乐止宣制讫奉册内官以册授读册内官读讫以授内使监令内使监令跪以授皇后皇后跪受以授司言奉宝如前仪受讫以授司宝尚仪奏拜皇后拜如前内使监令出诣正副使前称皇后受册礼毕使者退诣奉天殿横街南再拜复命乃退皇后既受册宝升座引礼以次引内

外命妇贺毕俱出皇后降座还合次日百官上表笺称
贺皇帝御殿受贺如常仪遂卜日谒庙是日皇帝宴羣臣于谨身殿皇后宴内外命妇于
中宫皆如正旦宴会议成祖册皇后徐氏其制小异皇
帝皮弁服御华盖殿翰林院官以诏书用宝讫然后御奉天殿传制皇后受册礼毕翰林
院官以诏书授礼部官礼部官奉诏书于承天门开读
皇帝还宫率皇后谒告奉先殿毕皇后俟皇帝升座诣拜位谢恩余如前仪英宗天顺八
年增定亲王于皇帝前庆贺次诣皇太后庆贺次诣皇
后前八拜仪世宗嘉靖十三年册皇后方氏礼臣具仪注但谒告内殿帝命增谒告太庙
世庙之礼纳后仪注英宗正统七年始定凡纳采问名
前期择日遣官告天地宗庙至期设御座制案节案卤簿彩舆中和大乐如仪礼部陈礼
物于丹陛上及文楼下质明皇帝冕服升座百官朝服
行礼讫各就位正副使朝服四拜执事举制案节案由中门出礼物随之俱置丹陛中道
传制官宣制曰兹选某官某女为皇后命卿等持节行
纳采问名礼正副使四拜驾兴制节案由中门出正副使奉节及制书置彩舆中仪杖大
乐前导出大明门释朝服乘马行诣皇后第引礼导使
者入幕次执事官陈礼物于正堂使者出次奉制书于案礼官先入立于东主昏朝服出
立于西礼官曰奉制建后遣使行纳采问名礼引主昏
者出迎使者捧制书及节主昏者随至堂奉制书及节于案主昏者四拜诣案前跪正使
取纳采制宣讫授主昏者主昏者授执事者置于北案
上稍左副使取问名制宣讫受如前置案上稍右主昏者俛伏兴执事举表案以表授主
昏者主昏者跪授正使主昏者俛伏兴四拜使者出置
表彩舆中主昏者曰请礼从者酒饌毕主昏者捧币以劳使者使者出主昏者送至大门
外使者还复命次纳吉纳征告期传制遣使并如前仪
但纳征用玄纁束帛六马谷圭等物使者至以制书玉帛置案上六马陈堂下执事先设
皇后冠服诸物于正堂礼官入主昏者出迎执事举玉
帛案正使捧纳吉纳征制书副使捧告期制书执节者捧节以次入各置于案主昏者四
拜诣案前跪正使以次宣纳吉纳征制书讫授主昏者
正副使又捧圭及玄纁以授主昏者俱如前仪副使宣告期制书讫授如前仪主昏者四
拜使者持节出主昏者礼使者使者还复命次发册奉
迎所司陈设如前仪礼部陈鴈及礼物于丹陛上内官监陈皇后卤簿车辂于奉天门外
宣制持节奉册宝行奉迎礼正副使以册宝置彩舆中
诣皇后第至门取制书册宝置案上礼官先入主昏朝服出迎使者执事者举案前行使
者奉制书及节执事者以鴈及礼物从之至堂中各置
于案主昏者四拜退立于西南女官以九龙四凤冠祔衣进皇后使者以节册宝授司礼

监官内赞导入中堂皇后具服出合诣香案前向阙立
四拜赞宣册皇后跪宣册官宣讫以授皇后皇后受册以授女官赞宣宝如宣册仪皇后
入合司礼监官持节出授使者报受册宝礼毕主昏者
诣案前跪正使取奉迎制宣讫授主昏者副使进鴈及礼物主昏者皆跪受如前仪女官
奏请皇后出合自东阶下立香案前四拜升堂南向立
主昏者进立于东西向曰戒之敬之夙夜无违退立于东阶母进立于西东向施衿结帨
曰勉之敬之夙夜无违退立于西阶内执事请乘舆皇
后降阶升舆导从出仪仗大乐前行从大明门中门入百官朝服于承天门外班迎候舆
入乃退皇后至午门外鸣钟鼓卤簿止正副使以节授
司礼监复命授册宝官捧册宝仪仗女乐前导进奉天门至内庭皇后出舆由西阶进皇
帝由东阶降迎揖入内殿帝更服具袞冕后更礼服同
诣奉先殿谒礼毕还宫合盞帝更皮弁升内殿后更衣从升各升座东西相向执事者举
饌案于前女官取四金爵酌酒以进既饮进饌复进酒
进饭讫女官以两盞酌酒合和以进既饮又进饌毕兴易常服帝从者俛后之饌后从者
俛帝之饌次曰早帝后皆礼服候太后升座帝后升座
前四拜皇后进殿修讫复位帝后复四拜三日早帝冕服后礼服同诣太后宫行八拜礼
还宫帝服皮弁升座后礼服诣帝前行八拜礼后还宫
升座引礼导在内亲属及六尚等女官次各监局内官内使俱行八拜礼是日皇帝御奉
天殿颁诏四日行庆贺礼五日行盃饌礼俱如常仪

△天子册妃嫔

后唐庄宗同光二年六月以卫国夫人韩氏为淑妃燕国夫人伊氏为德妃令所司
择日册命八月庚午正衙命使以宰臣豆卢革韦说充
册使

宋初妃嫔不行册礼真宗大中祥符七年封婉仪杨氏为淑妃翰林草制付中书不
宣于外庭仁宗庆历八年封美人张氏为贵妃所司择
日备礼册命十二月发册设次位命官持节授册印内外命妇称贺畧如册皇后仪

明太祖洪武三年册孙氏为贵妃定仪皇帝不御殿承制官宣制曰妃某氏特封某
妃命卿等持节行礼但授册无宝余并如中宫仪成祖
永乐七年定册妃礼皇帝皮弁服御华盖殿传制至宣宗立孙贵妃始授宝宪宗封万贵
妃始称皇世宗嘉靖十一年册九嫔礼官上仪注先日
所司陈设仪仗如朔望仪至期皇帝具袞冕告太庙世庙讫易皮弁服御华盖殿百官公
服入行礼正副使朝服承制举节册至九嫔宫九嫔迎
于宫门外随至拜位女官宣册九嫔受册先后八拜送节出宫门复命九嫔随具服候皇
后率诣奉先殿谒告及诣皇帝皇后前谢恩俱如册妃

礼惟圭用次玉谷文银册少杀于皇妃五分之一二十年册德妃张氏以妃将就室而帝方静摄不传制不谒告内殿余并如旧

钦定续通志卷一百十五

●钦定续通志卷一百十六

礼畧

嘉礼 【二】

○嘉礼二

皇太子纳妃

公侯大夫士婚礼

元正冬至受朝贺

读时令

册命诸王侯

三老五更

乡饮酒

△皇太子纳妃 【皇子诸王婚公主嫁附】

后唐庄宗同光二年太常礼院奏皇子兴圣宫使继岌虽未封建官是检校合准一品婚姻礼妇人从夫之爵亦准一品命妇礼亲迎日太常卤簿鼓吹前导乘辂车其妃花钗九枝博鬓褵翟衣九等其日平明皇帝差官告亲庙一室宗正卿摄昏主行礼其夕亲迎至女氏之门以结彩车御轮三周从之

晋高祖天福四年太常礼院定长安公主出降仪太仆寺供厌翟二马车轂中书省备团方编扇各十六行障座伞一大扇一团大扇二从之又奏婚用诞马在礼无文周礼诸侯以璋请驂马都尉加以璋郡王之壻加玄纁以代马书函之礼出自近代请废之诏曰纳采之时主人再拜使者不答虽开元礼具载其仪今宜答拜仍令郑王重贵主其婚礼中外不贺余依所奏

宋皇太子纳妃因前代之制皇太子亲迎天子临轩醮戒而增盥馈之礼诸王纳妃聘礼赐女家白金万两敌门 【即古纳采】 用羊二十口酒二十壶彩四十匹定礼羊酒彩各加十茗百斤头■〈须上巾下〉巾段绫绢三十匹黄金钗钏四双条脱一副真珠琥珀瓔珞真珠翠毛玉钗朵各二副销金生色衣各一袭金涂银合二锦绣绫罗三百匹果盘花粉花冪眠羊卧鹿花饼银胜小色金银钱等物纳财用金器百两彩千匹镇五十万锦绮绫罗绢各三百匹销金绣画衣十袭真珠翠毛玉钗朵各三副函

书一架缠束帛押马函马二十匹羊五十口酒五十壶
系羊酒红绢百匹花粉花罽果盘银胜罗胜等物亲迎用涂金银装肩輿一行障坐障各
一方团掌扇四引障花十树生色烛笼十高髻钗插并
童子八人骑分左右导扇輿其宗室子聘礼赐女家白金五千两其敌门定礼纳财亲迎
礼皆减半远属族卑者又减之公主下降初被选尚者
即拜驸马都尉赐玉带袈衣银鞍勒马采罗百匹谓之系亲又赐办财银万两进财之数
倍于亲王聘礼出降赐甲第余如诸王夫人之制掌扇
加四引障花烛笼各加十皆行舅姑之礼诸亲递加赐赉其县主系亲以金带赐办财银
五千两纳财赐赉大率三分减二宗室女特分郡君者
又差降焉仁宗嘉佑初礼官言礼阁新仪公主出降前一日行五礼古者结婚始用行人
告以夫家采择之意谓之纳采问女之名归卜夫庙吉
以告女家谓之问名纳吉今选尚一出朝廷不待纳采公主封爵已行诞告不待问名而
卜之若纳成则既有进财请期则有司择日宜稍依五
礼之名存其物数俾知婚姻之义重而夫妇之际严亦不忘古礼之义也时兖国公主下
嫁李玮诏俟出降日令夫家主昏者具合用鴈币玉马
等物陈于内东门外以授内谒者进入内侍付掌事者受之惟马不入神宗即位诏旧制
尚帝女者辄升行以避舅姑之尊岂可以富贵之故屈
人伦长幼之序宜诏有司革之着为令仍令陈国长公主行见舅姑之礼驸马都尉王师
约更不升行公主见舅姑行礼自此始

辽公主下嫁仪选公主诸父一人为昏主凡当輿者媒者致词之仪自纳币至礼成
大略如纳后仪择吉日诘旦媒者趣尚主之家诣宫侯
皇帝皇后御便殿率其族入见进酒讫命皇族与尚主之族相偶饮翼日尚主之家以公
主及婿率其族入见致宴于皇帝皇后献赆送者礼物
讫朝辞赐公主青幘车二螭头盖部皆饰以银驾駟赐婿朝服四时袈衣鞍马凡所须无
不备选皇族一人送至其家亲王女封公主者婚仪仿
此以亲疏为差降圣宗太平八年六月权北院大王耶律哲鲁奏今岁十一月皇太子纳
妃诸族备会亲之帐诏以豪盛者三十户给其费兴宗
重熙十六年定公主行妇礼于舅姑仪

明初定皇太子纳妃凡行礼皆遣使持节如皇帝大昏仪纳采问名制曰奉制纳某
氏女为皇太子妃命卿等行纳采问名礼至妃第候者
出请事使者曰储宫纳配属于令德邦有常典使某行纳采之礼候者入告主昏者曰臣
某之女昧于壶仪不足以备采择恭承制命臣某不敢
辞候者出告使者入陈礼物于庭宣制曰某奉诏采择奠鴈礼毕使者出候者复请事使
者曰储宫之配采择既谐将加卜筮奉制问名候者入

告主昏者曰制以臣某之女可以奉侍储宫臣某不敢辞候者出告使者复入陈礼奠鴈如仪宣制曰臣某奉诏问名将谋诸卜筮主昏者曰臣某第几女某氏出次纳吉候者请事使者曰谋诸卜筮其占协从制使某告吉候者入告主昏者曰臣某之女蠢愚惧弗克堪卜筮云吉惟臣之幸臣谨奉典制候者出告使者入陈礼奠鴈如仪宣制曰奉制告吉又次纳微候者出告使者入陈玉帛礼物不奠鴈宣制曰某奉制告成又次请期辞曰询于龟筮某月某日吉制使某告期主昏者曰敢不承命陈礼奠鴈如仪又次告庙遣使持节授册宝又次醮戒皇帝服通天冠绛纱袍御奉天殿百官侍立引进导皇太子至丹陛四拜入殿东门就席位东向立司爵以醴进皇太子跪搢圭受醴祭酒司饌以饌进跪受亦如之兴就席坐饮食讫导诣御座前跪皇帝命之曰往迎尔相承我宗事勗率以敬皇太子曰臣某谨奉制旨俯伏兴出至丹陛四拜毕皇帝还宫皇太子出又次亲迎其日质明东宫官具朝服陈鹵簿鼓吹于东宫门外皇太子冕服乘輿出侍卫导从如仪至宫门降輿升辂东宫官皆从至妃第降辂升輿至次降輿入就次东宫官皆就次妃服褕翟花钗出合南面立傅姆立于左右主昏者朝服立于西阶下引进导皇太子出次立于大门之东西向候者朝服出立于门东请事引进跪启皇太子曰某奉制亲迎引进兴承传于候者候者入告导主昏者出迎于大门外之西东向再拜皇太子答拜引进导皇太子入门奠鴈出至次以侯主昏者不降送宫人傅姆导妃出听父母命戒毕乘輿出门降輿乘风轿皇太子揭帘讫遂升辂至东宫门外降辂乘輿入俟于内殿门外之东西面司闺导妃诣内殿门外之西东面皇太子揖妃入行合巹礼如中宫仪又次朝见其日妃诣内殿陛下候皇帝升座司闺导妃入北面立再拜自西阶升宫人奉枣栗盘进至御座前授妃奠于御前复位再拜礼毕诣皇后前奉殿修盘如上仪又次醴妃次盥饌次谒庙次羣臣命妇朝贺皆如仪亲王昏礼畧于皇太子同盥饌毕王皮弁服妃翟衣诣东宫前行四拜礼凡公主出降行纳采门名礼壻家备礼物表文于家庭望阙再拜掌昏者奉至内东门诣内使前曰朝恩颺室于某官某之子某习先人之礼使臣某请纳采以表跪授内使内使跪受奉进内殿执鴈及礼物者从入内使出掌昏者曰将加卜筮使臣某问名进表如初内使出曰有制掌昏者跪内使宣曰皇帝第几女封某公主掌昏者俯伏兴入就次赐宴出纳吉仪与纳采同纳征壻家具玄纁束帛乘马表文如仪请期词曰某臣命某谨请吉日亲迎日壻公服告庙将行父醮于厅随意致戒壻再拜出至内东门内内使延入次执鴈及奉礼物者各陈于庭其日公主礼

服辞奉先殿诣帝后前四拜受爵帝后随意训戒受命讫又四拜降阶内命妇送至内殿门外公主升辇至内东门降辇婿揭帘公主升轿婿出次立执鴈者以鴈跪授婿婿受鴈跪进于内使内使跪受以授左右婿再拜先出乘马还公主卤簿车辂后发公侯百官命妇送至府婿先候于门公主至婿揭帘公主降同诣祠堂婿东公主西皆再拜进爵读祝又再拜出诣寢室婿公主相向再拜各就座婿东公主西进饌合盃如仪复相向再拜明日见舅姑行四拜礼舅姑答二拜第十日驸马朝见谢恩行五拜礼太祖洪武九年以太师李善长子祺为驸马都尉尚临安公主先期告奉先殿下嫁前二日命使册公主册后次日谒奉先殿又定驸马受诰仪吏部宣捧诰命置龙亭至太师府驸马拜受次日善长及驸马谢恩后十日始请昏期二十六年稍更仪注然其拜舅姑及公主驸马相向拜之礼终明世实未尝行也成化二十二年更定皇太子昏礼凡册节等案俱由奉天左门出皇太子亲迎由东长安门出其日妃服燕居服随父母家庙行礼执事者具酒饌妃饮食讫父母坐堂上妃诣前各四拜合盃前于皇太子内殿各设拜位皇太子揖妃入就位再拜妃四拜然后各升座庙见后百官朝贺帝赐宴如正旦仪命妇诣太后皇后前贺亦赐宴余大率如洪武仪孝宗弘治二年册封仁和长公主复位昏仪入府公主驸马同拜天地行八拜礼堂内设公主座于东西向驸马东向座余如前仪

△公侯大夫士婚礼

宋品官昏礼纳采问名纳吉纳成请期亲迎同牢庙见见舅姑醴妇盥饌享妇送者并如诸王以下昏四品以下不用盥饌享妇礼士庶人婚礼并问名于纳采并请期于纳成其无鴈奠者三舍生听用羊庶人听以雉及鸡鹜代其辞称吾子亲迎质明掌事者设祢位厅事东间南向婿之父北面再拜以告将行父坐厅事南向子服其服【三舍生及品官子孙假九品服余并皂衫衣折上巾】立父位西行醮礼初昏掌事者设酒饌室中置二醮于盘婿服如前至女家赞者引就次主人醮女于房中出迎婿揖入主人升东阶婿进当房户前北面掌事者陈鴈于阶婿曰某受命于父以兹嘉礼躬听成命主人曰某固愿从命婿再拜出主人不降送婿先还俟于门外妇至婿揖以入至于室掌事者设对位室中婿妇皆即坐赞者注酒于醮授婿及妇饮讫设饌毕婿及妇皆兴再拜赞者彻酒饌见祖祢见舅姑醴妇享送者如仪

金章宗明昌元年制民庶聘财为三等上百贯次五十贯次二十贯

明品官昏娶或为子聘妇皆使媒氏通书女氏许之择吉纳采用鴈主昏者受礼讫

复陈鴈及问名礼物主昏者以红罗或销金纸书女之
第行年岁授宾主昏者请礼从者礼毕送宾至门外纳吉如仪纳征加玄纁束帛函书不用鴈请期如仪亲迎日婿父告于祢庙婿北面再拜立
听父命毕媒氏导婿之女家其日女氏主昏者告庙讫醴女如家人礼婿至门就次女从者请女盛服就寝门内南向坐婿出次主昏者出迎于
门外揖而入至寝户前婿再拜奠鴈出就次主昏者不降送婿既出女父母南向坐保母导女四拜命之如仪女升车婿先还以俟妇车至出迎
于门内揖妇入及寝门婿先升阶妇从升入室就盥各就座婿东妇西举食案进酒饌侍女以盞注酒进于婿妇前饮毕皆兴立于座南东西相
向皆再拜婿妇易服明日见宗庙次见舅姑如仪次舅姑醴妇如家人礼次盥饌其日妇家备饌至婿家舅姑即座妇四拜升自西阶至舅前从
者举食案以饌授妇妇进饌执事者加七箸进饌于姑亦如之食讫彻饌妇降阶四拜礼毕再醴妇如初仪凡庶人取妇男年十六女年十四以
上并听昏娶婿常服或假九品服女花钗大袖其纳采纳币请期有媒无宾亲迎前一日女氏使人陈设于婿之寝室俗谓之铺房余畧如品官
仪 【洪武元年令民间嫁娶并依朱文公家礼行】

△元正冬至受朝贺

唐德宗建中二年正月朔御含元殿四方贡献列为庭实复旧制也武宗会昌二年中书门下奏元日御含元殿百官就列惟宰相及两省
官皆未索扇前立于栏槛之内及扇开便侍立于御前三朝大庆万邦称贺惟宰相侍臣同介冑武夫竟不拜至尊而退酌于礼意事未得中请
御殿曰味爽宰相两省官对班于香案前俟扇开通事赞两省官再拜讫升殿侍立从之后唐庄宗同光二年正月庚子朔帝袞晚御明堂殿受朝贺太常乐左右金吾仗六军诸卫如常仪

晋高祖天福四年十二月礼官奏正旦宫县歌舞未全请杂用九部雅乐歌声坊法曲从之五年冬十一月冬至帝御崇元殿受朝贺始用
二舞帝举觞奏玄同之乐登歌奏文同之乐举食文舞歌昭德之舞武舞歌成功之舞

周太祖广顺三年正月壬子朔帝御崇元殿羣臣朝贺乐悬仗卫如常仪班退御永福殿羣臣称觞献寿举教坊乐

宋承前代之制以元日五月朔冬至行太朝会之礼太祖建隆二年正月朔始受朝贺于崇元殿服袞冕设宫县侍卫如仪仗退羣臣诣皇
太后宫门奉贺帝常服御广德殿羣臣上寿用教坊乐五月朔受朝贺于崇元殿帝服通天冠绛纱袍宫县仪仗如元会议干德四年于朝元殿
受贺毕常服御大明殿羣臣上寿始用雅乐登歌二舞羣臣酒五行罢太宗淳化三年正

月朔命有司约开元礼定上寿仪皆以法服行礼设宫
县万舞酒三行罢仁宗天圣四年十二月诏明年正月朔先率百官赴会庆殿上皇太后
寿毕乃受朝天安殿仍令太常礼院修定仪制五年正
月朔晓漏未尽三刻宰臣百官与辽使诸军将校并常服班会庆殿内侍请皇太后出殿
后幄鸣鞭升座又诣殿后皇帝幄引皇帝出帝服鞞袍
于帘内北向褥位再拜跪称贺讫诣皇太后御座稍东内给侍酌酒授内谒者监以进帝
跪进讫以盘兴内谒者监承接之帝却就褥位跪奏谨
上千万岁寿再拜还幄通事舍人引百官横行典仪赞再拜舞蹈起居太尉升自西阶称
贺讫宰臣以下进寿酒皆再拜宣徽使承旨宣羣臣升
殿再拜升及东西厢坐酒三行侍中奏礼毕退枢密使以下迎乘輿于长春殿起居称贺
百官就朝堂易朝服班天安殿朝贺帝服袞冕受朝既
贺更服通天冠绛纱袍称觴上寿止举四爵乘輿还内恭谢太后如常仪神宗元丰元年
诏龙图阁直学士史馆修撰宋敏求等详定正旦御殿
仪注其制元正冬至大朝会有司设御座大庆殿东西房于御坐之左右少北东西合于
殿后百官宗室客使次于朝堂之内五辂先陈于庭
兵部设黄麾仗于殿之内大乐令展宫架之乐于横街南鼓吹令分置十二案于宫架
外协律郎二人一位于殿上西阶之前楹一位宫架西
北俱东向陈輿鞞御马于龙墀伞扇于沙墀贡物于宫架南 【冬至不设贡物】 余则
列大庆门外陈布将士于街左右金吾六军诸卫勒所
部列黄麾大仗于门及殿庭百僚客使等俱入朝文武常参官朝服陪位官公服近仗就
陈于合外大乐令乐工协律郎入就位中书侍郎以诸
方镇表案给事中以祥瑞案俟于大庆门外之左右 【冬至不设给事中位祥瑞案】
诸侍卫官各服其服鞞出至西合降鞞符宝郎奉宝诣
合门奉迎百官客使陪位官俱入就位侍中版奏中严又奏外办殿上鸣鞭宫县撞黄钟
之钟右五钟皆应内侍承旨索扇扇合帝服通天冠绛
纱袍御輿出协律郎举麾奏干安乐鼓吹振作帝出自西房降輿御座扇开殿下鸣鞭协
律郎偃麾乐止炉烟升符宝郎奉宝置御座前中书侍
郎给事中押表案祥瑞案入诣东西阶下对立百官宗室及辽使班分东西以次入正安
乐作就位乐止押乐官归本班起居毕复案位三师亲
王以下及御史台外正任辽使俱就北向位典仪赞在位者皆再拜起居讫太尉将升中
书令门下侍郎俱降至两阶下立 【凡太尉行则乐
作至位乐止】 太尉诣西阶下解剑脱舄升殿中书令门下侍郎各于案取所奏文诣褥
位解剑脱舄以次升分东西立以俟太尉诣御坐前北
向跪奏文武百寮太尉具官臣某等言元正启祚万物咸新 【冬至易为晷运推移日南

长至】 伏惟皇帝陛下膺干纳祐与天同庥俯伏兴
降阶佩剑纳舄 【余官准此】 还位在位官俱再拜舞蹈三称万岁再拜侍中进当御
座前承旨退临阶西向称制答曰履新之庆 【冬至
易为履长之庆】 与公等同之赞者曰拜舞蹈三称万岁横行官分班立中书令门下侍
郎升诣御坐前各奏诸方镇表及祥瑞讫户部尚书就
承制位俯伏跪奏诸州贡物请付所司礼部尚书奏诸蕃贡物如之司天监奏云物祥瑞
请付史馆侍中进当御坐前奏礼毕殿上承旨索扇殿
下鸣鞭宫县撞蕤宾之钟左五钟皆应协律郎举麾奏干安乐鼓吹振作帝降座御輿入
自东房扇开偃麾乐止侍中奏解严百官退还次客使
陪位官并退有司设食案大乐令设登歌于殿上二舞入立于架南预坐当升殿者位御
座前文武相向异位重行以北为上非升殿者位东西
廊下尚食奉御设寿尊于殿上之东楹少南设坫于尊南加爵一有司设上下羣臣酒尊
于殿下东西厢侍卫官及执事者各立其位百官立班
如朝贺仪侍中版奏中严外办皇帝御輿出东房仪如前光禄卿诣横街南跪奏具官臣
某言请允羣臣上寿兴侍中承旨称制可少退光禄卿
再拜复位三师以下皆再拜三称万岁太尉升殿诣寿尊所北向尚食奉御酌酒一爵授
太尉太尉搢笏执爵诣御座前跪进帝执爵太尉出笏
俛伏兴少退跪奏文武百官太尉具官臣某等稽首言元正首祚 【冬至云天正长至】
臣等不胜大庆谨上千万岁寿俛伏兴降复位在位
者皆再拜如前侍中承旨退西向宣曰举公等觴在位者再拜如前北向班分东西序立
太尉升阶侍立皇帝举第一爵和安乐作饮毕乐止太
尉受虚爵复于坫降阶三师以下再拜舞蹈如上仪侍中升跪奏具官臣某言请延公王
等升殿降复位承旨称有制在位者皆再拜宣曰延公
王等升殿皆再拜诣东阶升立于席后尚食奉御进酒殿中监进第二爵登歌作甘露之
曲饮讫殿中监受爵乐止羣臣升殿就横行位舍人曰
各赐酒羣官皆再拜舍人曰就坐大官令行酒搢笏受爵宫县作正安之乐文舞入立宫
架北觴行一周乐止尚食奉御进食又设羣官食作盛
德升闻之舞三变止出殿中监进第三爵羣官立于席后登歌作嘉禾之曲饮讫受爵就
坐行酒如上仪作正安之乐武舞进觴又行一周乐止
尚食奉御进食又设羣官食作天下大定之舞三变止出殿中监进第四爵登歌作灵芝
之曲其礼如第三爵大官令行酒又一周乐止舍人曰
可起百官立于席后侍中进跪奏礼毕俛伏兴与羣官俱降复位羣官皆再拜如仪分东
西序立内侍承旨索扇还合如上仪有司承旨放仗羣
官再拜退其后徽宗以元日受八宝及定命宝冬至受元圭皆于大庆殿行朝贺礼 【新

仪成改太尉为上公侍中中书令为左辅右弼太乐
令为大晟府盛德升闻舞为天下化成天下大定舞为四夷来王及增刑部尚书奏断绝
请付史馆余并如旧仪】 遇国恤则废若无事不视朝
则下敕云不御殿羣臣进表称贺于合门高宗绍兴十四年九月有司言明年正旦朝会
请权以文德殿为大庆殿合设黄麾大仗五千二十七
人欲权减三分之一合设八宝座于御坐之东西及登歌宫架乐舞诸州诸蕃贡物行在
致仕官诸路贡士举首并令立班诏从之明年正旦御
殿受朝贺如仪

辽正旦朝贺仪臣僚诸国使味爽入朝班齐皇帝升殿坐契丹舍人殿上通讫引契
丹臣僚东洞门入引汉人臣僚并诸国使西洞门入合
班舞蹈五拜鞠躬平身引亲王东阶上殿栏内褥位俛伏跪自通全銜臣某等祝寿讫俛
伏兴下殿复位舞蹈五拜鞠躬宣徽使称有敕班首以
下听制讫再拜鞠躬宣云履端之庆与公等同之舍人赞谢宣谕拜舞蹈五拜赞各祇候
分班引出引班首西阶上殿奏表目讫教坊起居贺十
二拜毕赞各祇候引契丹汉人臣僚并诸国使东西洞门入合班再拜亲王自东阶上殿
就栏内褥位搯笏执台盞进酒讫退复褥位置台盞出
笏少前俛伏自通全銜臣某等谨进千万岁寿酒与殿下臣僚皆再拜鞠躬俟宣徽使称
有旨亲王以下再拜如初仪宣云饮公等寿酒与公等
内外同庆舍人赞谢宣谕如初赞各祇候亲王搯笏执台盞殿下臣僚分班皇帝饮酒教
坊奏乐上下臣僚皆拜呼万岁赞各祇候乐止教坊再
拜皇帝卒饮亲王进受盞复褥位置台盞下殿复位合班再拜赞各祇候分班引出皇帝
起诣皇太后殿臣僚并诸国使皆从皇太后升殿引契
丹汉人臣僚并诸国使两洞门入班称贺进酒皆如皇帝之仪毕引出教坊入起居进酒
亦如之金元旦圣诞上寿仪皇帝升御座鸣鞭报时毕
殿前班小起居各复位立舍人引皇太子并臣僚使客合班入至丹墀舞蹈五拜平立合
使奏诸道表目皇太子以下皆再拜皇太子升殿褥位
搯笏捧盞盘进酒皇帝受置于案皇太子退复褥位转盘与执事者出笏二合使齐揖入
栏子内拜跪致辞云元正启祚品物咸新恭惟皇帝陛
下与天同庥 【若圣节则云万寿令节】 谨上寿卮伏愿皇帝陛下万岁万岁万万岁
祝毕拜兴复褥位同殿下臣僚皆再拜宣徽使称有制
在位皆再拜宣答曰履新上寿 【圣节则白得卿寿酒】 与卿等内外同庆词毕舞蹈
五拜齐立皇太子搯笏执盘臣僚分班教坊奏乐皇帝
举酒殿上下侍立臣僚皆再拜皇太子受虚爵退立褥位转盘盞与执事者出笏左下殿
乐止合班在位臣僚皆再拜分引与宴官上殿次引宋

国人从至丹墀再拜不出班奏圣躬万福再拜唱有敕赐酒食又再拜各祇候平立引左廊立次引高丽夏人如上仪毕分引左右廊立御果床入进酒皇帝饮则坐宴侍立臣皆再拜进酒官接盞还位坐宴官再拜复坐行酒传宣立饮讫再拜坐次从人再拜坐三盞致语揖臣使从人立诵口号毕坐宴侍立官皆再拜坐次从人再拜坐食入七盞曲将终揖从人立再拜毕引出闻曲时揖臣使起再拜下殿果床出至丹墀合班谢宴舞蹈五拜各祇候分引出

元元正受朝仪前期习仪至期大昕侍仪使引导从护尉各服其服入奏外办皇帝出合升辇鸣鞭三侍仪使并通事舍人分左右引擎执护尉劈正斧中行导至大明殿外劈正斧直正门北向立导从倒卷序立惟扇置于椅侍仪使导驾时引进使同内侍官引宫人擎执导从入至皇后宫庭报外办驸马出合升辇引进使引导从导至殿东门外引进使分退押直至堊涂之次引导从倒卷出俟两宫升座鸣鞭三劈正斧退立于露阶东司晨报时鸡唱毕尚引引殿前班皆公服分入日精月华门就起居位通班舍人唱左右卫上将军兼殿前都点检臣某以下起居尚引赞引至丹墀拜位知班报班齐行三拜礼都点检稍前宣赞报圣躬万福都点检复位再拜舞蹈三跪左膝三叩头山呼者三【凡传山呼控鹤呼噪应和曰万岁传再山呼应曰万万岁后仿此】复行三拜礼宣赞唱各恭事两班点检宣徽将军分左右升殿宿直以下分立殿前俟后妃诸王驸马以次贺献礼毕典引引丞相以下入就起居位如前通班唱文武百僚开府仪同三司录军国重事监修国史右丞相【具官无常】臣某以下起居赞拜舞蹈山呼并如前仪侍仪使诣丞相前请进酒双引升殿前行乐工分左右引登歌者及舞童舞女以次升殿登歌音中本月之律丞相至宇下褥位立侍仪司分左右北向立俟前行色曲将半舞旋列定通赞唱分班乐作侍仪引丞相入宣徽使随至御榻前丞相跪宣徽使立于东南曲终丞相祝赞曰溥天率土祈天地之洪福同上皇帝皇后亿万岁寿宣徽答曰如所祝丞相俛伏兴退诣进酒位尚酝官以觞授丞相丞相搢笏奉觞北面立宣徽使复位前行色曲降舞旋至露阶下教坊奏乐乐舞至第四拍丞相进酒皇帝举觞宣赞唱殿上下侍立臣再拜丞相三进酒毕以觞授尚酝官出笏侍仪使引出复位乐止通赞赞合班礼部官押进奏表章礼物至横阶下读表章官等至宇下跪宣表目毕皆俛伏兴进降第一重阶下立俟读礼物舍人升阶至宇下跪读礼物目如上仪同降至横街随表章西行至右楼下侍仪仍领礼物东行至左楼下太府受之赞拜舞蹈山呼如前仪僧道耆老外国蕃客以次贺礼

毕大会诸王宗亲驸马大臣宴飨殿上丞相等升殿赐

宴四品以上赐酒殿上五品以下赐酒于日精月华门下宴毕鸣鞭三侍仪使导驾帝后还寝殿如来仪

明凡正旦冬至先日尚宝司设御座于奉天殿及宝案于御座东香案于丹陛南教坊司设中和韶乐于殿内东西北向翌明锦衣卫陈鹵簿仪仗于丹陛及丹墀设明扇于殿内列车辂步辇于丹墀鸣鞭四人正右北向教坊司设大乐于丹陛东西北向仪礼司设同文玉帛两案于丹陛东金吾卫设护卫官于殿内及丹陛陈用士于丹墀至午门外锦衣卫设将军于丹陛至奉天门外陈旗帜于奉天门外俱东西列典牧所陈仗马犀象于文武楼南东西向司晨郎报时位于内道东近北纠仪御史二位于丹墀北东西相向内赞二位于殿内外赞二位于丹墀北东西相向传制宣表等官位于殿内俱东西向鼓初严百官朝服班午门外次严由左右掖门入诣丹墀东西北向立三严执事官诣华盖殿帝具袞冕升座钟声止仪礼司奏执事官行礼赞五拜毕奏请升殿驾兴中和乐作尚宝司捧宝前行导驾官前导扇开帘卷置宝于案乐止鸣鞭报时赞班齐大乐作行四拜礼乐止典仪唱进表乐作给事中二人诣同文案前导引序班举案由东门入置殿中乐止宣表目官跪宣讫俛伏兴展表官取表宣表官至帘前众官皆跪宣表讫序班举表案于殿东众官皆跪代致词官跪丹陛中致词云具官臣某兹遇正旦三阳开泰万物咸新【冬至则云律应黄钟日当长至】恭惟皇帝陛下膺干纳祐奉天永昌贺毕众官皆俯伏兴乐作四拜兴乐止传制官跪奏传制由东门出至丹陛东向立称有制赞礼唱跪宣制云履端之庆与卿等同之【冬至则云履长之庆与卿等同之万寿圣即则致词曰具官臣某钦遇皇帝陛下圣诞之辰谨率文武官僚敬祝万岁寿不传制】赞礼赞俯伏兴搯笏三舞蹈山呼百官拱手加额呼万岁者三出笏俯伏兴乐作四拜兴乐止仪礼司奏礼毕中和乐作鸣鞭驾兴尚宝官捧宝导驾官前导至华盖殿乐止百官以次出太祖洪武三十年更定同文玉帛案俱进安殿中宣表讫举置于宝案之南世宗嘉靖十六年改设蕃国贡方物案于丹陛中道左右定时鼓于文楼上大乐陈奉天门内

△读时令

唐肃宗干元元年十二月立春御宣政殿命太常卿于休烈读春令常参官五品以上正员并升殿与坐德宗贞元六年制四孟月迎气之日令所司宣读时令文宗太和八年六月中书门下奏天宝后盛典久废请来年正月依旧礼读时令命太常撰仪注

宋仁宗景祚四年三月诏五月朔行入合之仪仍读时令先是诏国朝时令委编修官约唐月令撰定以备宣读于是贾昌朝等采国朝律历典礼日度昏晓中星及祠祀配侑诸事当以岁时施行者改定一篇上之遂诏因入阁行其礼后亦不果行徽宗初建明堂礼制局请御明堂正南向之位布政则随月而御堂又请以每岁十月于明堂受新历退而颁之郡国政和七年诏颁朔布政自十月为始是月一日帝御明堂平朔左个颁天运政治及八年戊戌岁运历数于天下自是每月御明堂布是月之政先是羣臣五上表请负宸听朝诏勿允至是复再请始从之十一月一日帝御明堂南面以朝百辟退坐于平朔颁政其礼百官朝服立明堂下乘輿自内殿出负斧宸坐大晟乐作百官朝于堂下大臣升阶进呈所颁时令左右丞一员跪请付外施行宰相承制可之左右丞乃下授颁政官颁政官受而读之讫出合门奏礼毕百官乃退自是以为常宣和元年蔡京言周观治象于正月之始和以十二月颁告朔于邦国皆不在十月后世以十月者祖秦朔故也今请以季冬颁岁运于天下诏自今以正月旦进呈宣读四年二月太常王黼编类明堂颁朔布政与诏书条例气令应验凡六十二册上之钦宗靖康元年罢颁朔布政

（臣）等谨按宋史志不载宋初读时令事玉海言景佑时欲行之而不果然通考载三朝艺文志云唐明皇御删月令集贤院别为之注释文义疏皆本郑注有别注小注者词颇卑鄙淳化初李至请复行郑注下两制馆阁集议韩丕张佖胡旦等条陈唐注之失请如至奏余请如旧以便宣读时令然则宋初固有宣读时令之制矣岂史文之阙畧与抑虽有此制而实未之行与唐辟闾仁谓谓元日受朝读令此则听朔礼毕合于玉藻之文杜佑非之谓太宰职言悬治象春官言颁朔玉藻言听朔并无读时令故事定宣和颁朔读令似参用政和之制然不久旋罢辽金元明无有踵而行之者矣

△册命诸王侯

梁太祖开平元年敕朝廷之仪封册为重用报勋烈以隆恩荣旧章久缺自我复行今后每册封大臣宜令有司备临轩之礼

后唐庄宗同光二年太常礼院奏秦王李茂正备礼册命请备革辂一乘载册犍车一乘并本品卤簿鼓吹如仪从之三年太常礼院奏吴越国王钱鏐将行册命按礼文合用竹简敕有司备制玉册俾称元勋潞王清泰元年太常礼院奏册拜王公如在京城所司备卤簿车辂法物皇帝临轩行册礼如在外镇正衙命使押册赴本道行礼今奉制命幽州赵德钧封北平王青州房知温封东平王皆备礼册命其合用车辂法

物在兵部太常太仆寺请载往本州岛行礼后送纳本司从之

宋册命亲王大臣之制具开宝通礼虽制书有备礼册命之文多上表辞免而未尝行每命亲王宰臣使相枢密使西京留守节度使并翰林草制夜中进入翼日自内置于箱黄门二人舁之立御座东南朝退乃奉箱出殿门外宣付合门降置千案俟文德殿立班合门使引制案置于庭宣付中书门下宰相跪受复位以授通事舍人赴宣制位唱名讫奉诣宰相宰相受之付所司若立后妃封亲王公主即宣称有制百官再拜宣制讫复再拜舞蹈称贺若宰相加恩制书即宣付通事舍人引宰相于宣制石东北向再拜立听讫拜舞复位若百官受制即自班中引出听麻文班于宣制石东武班于石西并如宰相仪听讫出赴朝堂其罢相者即引出赴朝堂金吾仗舍诸王宰相朝谢前一日内降官告从内出东上合门外宣词以赐授节者仍交旌节受者俛伏执旌节交于颈上者三亲王节度使相官告并载以彩舆迎归第政和礼局上册命亲王大臣仪迄不果行

辽册王妃公主仪至日押册使副并读册等官押册东便门入持节前导至殿册案置横街北少东引使副等面殿鞠躬立侍中临轩称有制皆再拜鞠躬宣制讫舞蹈五拜引册于宣庆门出使副等押领仪仗册案赴各私第厅前向阙陈列受册者就位立传宣称有制再拜宣制毕舁册人举册匣于褥前跪捧引读册者与受册者皆俛伏跪读讫皆俛伏兴受册者谢恩国王五拜王妃公主四拜

元诸王惟降制命之不行册礼

明太祖洪武三年定制册命亲王先期告宗庙至日皇帝御奉天殿皇太子亲王由奉天东门入乐作升自东陛皇太子由殿东门入至御前侍立亲王入至丹陛拜位赞拜乐作再拜兴乐止承制官承制如仪诸王皆跪宣制曰封皇子某为某王某为某王宣毕诸王俯伏兴赞拜乐作再拜兴乐止引礼导王由殿东门入乐作至御前拜位乐止王跪赞授册捧册官以册授读册官读讫以授丞相丞相授王王搢圭受以授内使授宝如上仪讫王出圭俯伏兴引礼导王出复位以次引诸王入殿授册宝如仪内使以册宝置彩亭讫赞拜乐作诸王皆四拜兴乐止内使举亭前行亲王由东阶降乐作出奉天东门乐止礼部尚书请诏书用宝赴午门开读礼毕皇帝还官皇太子出王年幼则遣官赉册宝授之丞相承制至王所宣制最幼者保抱行礼是日亲王朝谢皇后太子与东宫受册朝谢同亲王各自行贺幼者诣长者行四拜礼百官诣亲王贺亦行四拜礼丞相至殿上跪文武官于庭中致词毕丞相及百官复四拜次日皇太子冕服

朝贺皇帝及中宫百官进表笺贺皇帝及中宫东宫内
外命妇贺中宫并如东宫受册仪是日百官及命妇各赐宴择日诸王谒太庙宪宗成化
末封兴岐益衡雍五王帝亲告奉先殿遣使就各王府
册之罢临轩礼诸王当袭封者俱于岁终遣官册封世宗嘉靖中改于孟春着为令

△三老五更

宋养老于太学皇帝服通天冠绛纱袍乘金辂至太学酌献文宣王三祭酒再拜归
御幄比车驾初出量时刻遣使迎三老五更于其第老
更俱朝服乘安车导从至太学就次国老庶老有司预戒之各服朝服集于其次大乐正
帅工人二舞入立于庭东上合门御史台太常寺客省
四方馆自下引百官宗室客使学生等以次入就位太常博士赞三老五更出次国老庶
老立于后重行异位礼直官通事舍人引左辅奏请中
严少顷又奏外办皇帝出大次侍卫如常仪大乐正令撞黄钟之钟右五钟皆应协律郎
跪俛伏举麾兴宫架干安之乐作皇帝即御座乐止典
仪曰再拜在位官皆再拜三老五更杖而入各左右二人夹扶太常博士前引史臣执笔
以从三老五更入门宫架和安之乐作至宫架北北向
立以东为上奉礼郎引羣老随入位于其后乐止博士揖进三老在前五更在后仍杖夹
扶宫架和安之乐作至西阶下乐止博士揖三老五更
自西阶升堂国老庶老立于堂下三老五更当御座揖羣老亦揖皇帝为兴次奉礼郎揖
国老升博士引三老五更奉礼郎引国老以下各于席
后立典仪赞各就位赞者承传宫架尊安之乐作三老五更就坐三公授几九卿正履讫
殿中监尚食奉御进珍羞及黍稷等先诣御座前进呈
遂设于三老前乐止尚食奉御诣三老座前执酱馈讫尚酝奉御诣酒尊所取爵酌酒奉
于三老次大官良酝令以次进珍羞酒食于五更羣老
之前皆食大乐正引工人升登歌奏惠安之乐三终史臣记录三老所论善言善行宫架
作申安之乐宪言成福之舞毕文舞退作受成告功之
舞毕三老以下降筵博士引三老五更于堂上当御座前奉礼郎引羣老复位俱揖皇帝
为兴三老五更降阶至堂下宫架和安之乐作出门乐
止礼直官通事舍人引左辅前奏礼毕退复位典仪赞拜讫皇帝降座太常卿导还太次
百僚以次退车驾还宫三老五更升安车导从还翼日
诣阙表谢

明世宗嘉靖中祭酒吕柟据开元礼参定视学养老仪注岁季春之月择吉日行礼
有司先奏定三师三少致仕者用德行年高一人为三
老次一人为五更三品上下年德高邵者为羣老并开具致政之老与其孤姓名事状以
闻前期一日祭先师孔子遣官行礼如丁祭之仪又设

先老位于庙门前至日黎明鼓征警众设六佾舞生皆至驾出宫至太学传制迎三老五更于其第老更俱朝服乘安车导从如常仪择史官二人充惇史朝服从之其羣老及致政之老与其孤则有司先戒之宿于太学以俟驾至太学堂上命官释奠于先老礼毕太常卿导帝入御幄易冠服出升御座执大圭协律郎跪俯伏举麾金奏姑洗之均乐止太常卿导三老五更皆杖各二人夹扶惇史执笔以从自西阶升堂帝与揖逊欲拜三老五更去杖摄齐皆稽首逊辞帝不果拜乃揖就坐三老五更皆坐三公授几九卿正履进珍羞及黍稷等帝省之遂设于三老五更前工升歌鹿鸣三终太常卿引帝诣三老座前以大珪授侍臣执酱而馈讫有司以次进珍羞酒食于五更前又设酒食于羣老前太常卿引帝诣酒尊所取爵赞酌酒讫引诣三老座前执爵而酹讫帝即座三老以下皆坐光禄卿进酒帝饮酒三老以下坐食饮酒各三爵笙入三终光禄卿进加肴羹饮酒各三爵间歌三终三老乃论父子君臣长幼之道治政之要五更论亦如之帝俱虚躬听受惇史录之乃大合六乐羽舞大韶以云门咸池合之干舞大武以大夏大濩合之帝兴冕而总干三老以下皆兴稽首逊辞帝复即座三老以下皆复坐饮酒各三爵乐九变毕太常卿跪奏乐阕致政之老与其孤馆于门外者饮食毕皆入侍制命有司曰养尔老幼毋违朕命三老以下趣出赐三老五更袭衣冠带牢醴彩币其余帛衣米肉三老以下序立于庭皆拜三稽首兴分班序立有司奏礼毕驾还宫明日三老率五更以下诣阙表谢

（臣）等谨案临雍养老之礼惟后汉时数行之考诸史传明帝以李躬桓荣为三老五更章帝以伏恭为三老安帝以李充为三老灵帝以袁逢为三老又鲁丕再为三老周译数为三老五更杨统仕至光禄大夫为国三老而帝纪自章帝以后不复书岂以为常事而畧之与后惟魏高贵乡公北魏孝文周武帝尝一行之至唐宋及明虽有天子养老之礼而实未尝行也

△乡饮酒

唐李栖均为常州刺史行乡饮酒礼登歌降饮人人知劝

后唐时左仆射李愚请颁唐六典州县贡士行乡饮酒礼时以其迂阔不用

宋制州军贡士之月以礼饮酒以知州军事为主人学事司所在以提举学事为主人其次本州岛官行上舍生当贡者与州之羣老为众宾是月也会凡学之士及武士习射唐贞观所颁礼惟明州独存太宗淳化中会例行之政和礼局定饮酒登降之节与举酒作乐器用之属并参

用辟雍宴贡士仪其有古乐之处用古乐既又以河北转运判官张孝纯言诏诸路州郡

每岁宴贡士于学因讲射礼于是礼官参定射仪高宗
绍兴十三年比部郎中林保乞修定乡饮酒仪徧下郡国于是国子祭酒高闾草具其仪
僎介之位与古制不合诸儒莫解其指宁宗庆元中朱
熹以仪礼改定主宾僎介之位其主则州以守县以令位于东南宾以里居年高及致仕
者位于西北僎则州以倅县以丞或簿位东北介以次
长位西南三宾以宾之次者司正以众所推服者相及赞以士之熟于礼仪者其日质明
主人率宾以下先释菜于先圣先师退各就次以俟肃
宾介与众宾既入主人序宾祭酒再拜诣盥洗洗觶至酒尊所酌实觶授执事者至宾席
前跪以献宾宾酬主人主人酬介介酬众宾宾主以下
各就席坐讫酒再行次沃洗赞者请司正扬觶致词司正复位主人以下复坐主人兴复
至阼阶楣下僎从宾介复至西阶下立三宾至西阶立
并南向主人拜宾介以下再拜宾介与众宾先自西趋出主人少立自东出宾介以下立
于庠门外之右东向主人立于门外之左西向僎从主
人再拜宾介以下皆再拜退明太祖洪武五年诏定乡饮酒仪令有司与学官率士大夫
之老者行于学校民间里社亦行之十六年诏颁乡饮
酒图式于天下每岁正月十五日十月初一日于儒学行之其仪以府州县长吏为主以
乡之致仕官有德行者为僎择年高有德者为宾其次
为介其次为三宾又其次为众宾教职为司正赞礼赞引读律皆使能者里中乡饮畧同
二十二年定乡饮酒礼以善恶分别三等为坐次凡有
过恶之人列于外坐不许杂于善良之中着为令

（臣）等谨案古者乡大夫宾贤能州长习射党正正齿位皆行乡饮酒礼明初定
集礼宾兴贤能尚用乡饮之礼洪武十六年重颁图式
删去此条而宾兴与乡饮判为两事然明时乡饮读律又以善恶分别坐次兼有古者属
民读法上贤简恶之遗意诚一时之良法也

钦定续通志卷一百十六

●钦定续通志卷一百十七 礼略七

礼略

宾礼

军礼

○宾礼

三恪二王后

△三恪二王后

唐太宗贞观二年立二王后庙置国官玄宗天宝八载封后魏孝文十代孙元伯明
为韩国公以备三恪初王勃谓王者乘土王世五十数

尽千年乘金王世四十九数九百年乘水王世二十数六百年乘木王世三十数八百年
乘火王世二十数七百年自黄帝至汉五运适周土复
归唐唐当继周汉不可承周隋短祚乃斥魏晋以降非真主正统皆五行沴气遂作唐家
千岁历至是有崔昌者采勃旧说上五行应运历请承
周汉废周隋为闰李林甫赞佑之集公卿议可否集贤学士卫包起居舍人阎伯玑曰都
堂集议之夕四星聚尾天意昭然矣于是下诏以唐承
汉黜隋以前帝王废介鄘二公尊周汉为二王后以商为三恪十二载杨国忠为右相自
称隋宗建议复旧

梁太祖开平二年封鸿胪卿李崧莱国公与鄘国公为二王后以介国公为三恪
晋同梁制高祖天福四年封李从益为郇国公以奉唐后

宋太祖建隆元年正月诏曰封二王之后备三恪之宾所以示子传孙兴灭继绝古
先哲王实用兹道矧予凉德厯试前朝虽周德下衰勉
从于禅让而虞宾在位岂忘于烝尝其封周帝为郑王以奉周嗣正朔服色一如旧制开
宝六年周郑王殂诏辍朝十日帝素服发哀于便殿谥
曰恭帝葬顺陵仁宗嘉佑四年著作郎何鬲言本朝受周天下而近代之盛莫如唐愿考
求唐周之裔以备二王后事下太常议言唐室世数已
远于经不合惟周则我受禅之所自义不可废宜访求子孙如孔子后衍圣公授一京官
爵以公号使专奉庙飨从之诏曰国家受命之元继周
而王虽民灵欣戴厯数允集而虞宾将逊德美丕显顷者推明本始褒及支庶每遇南郊
许奏白身一名充班行思则厚矣而义未称将上采姚
姒之规略循周汉之典详其世嫡优以公爵异其仕进之路申其土田之锡俾庙寝有奉
享祀不辍庶几春秋通三统厚先代之制矣八月封相
州兵马都监柴咏为崇义公以奉周祀徽宗重和元年诏周柴氏后已封崇义公复立恭
帝后以为宣义郎监周陵庙世世为国二恪 【按本
纪作三恪此据志改辑】

金封辽主延禧为海滨王宋二帝为昏德公重昏侯 【皇统元年改封海滨王为豫
王昏德公为天水郡王重昏侯为天水郡公】 其后
以辽延禧宋钦宗及伪齐刘豫为三恪

元封宋主■〈显，去页〉为瀛国公

明封元顺帝孙迈达哩巴拉为崇礼侯皆不为恪

（臣）等谨按存二代之说出于礼郊特牲三恪之说出于左传子产之言盖所以
兴灭继绝崇德象贤皆先王忠厚之意也周世宗本以
后侄为郭氏后宋存周后则宜别封郭氏子孙熙宁时司马光尝以为言然卒未改封其
亦不能无议者乎

○军礼

天子出征类宜造禡并祭所过山川

輶祭

田猎

命将出征

宣露布

大射乡射

合朔伐鼓

祭马祖

时雩

△天子出征类宜造禡并祭所过山川

宋太祖建隆元年车驾征泽州遣官告天地宗庙社稷及名山大川帝王名臣陵庙去路十里内者皆令本州以香祭告仍祭佛庙泰山城隍

太宗太平兴国五年车驾北征遣官祭告天地于圜丘用特牲太庙社稷用太牢望祭岳渎名山大川于四郊祭风于风伯坛祀两师于本坛

禱马于马祖坛祭蚩尤禡牙于北郊并用少牢祭北方天王于北郊迎气坛真宗咸平中诏太常礼院定禡仪除地为坛两壝绕以青绳张幄帘

置军牙六纛位版祭用刚日牲用太牢以羊豕代其币军牙以白六纛以阜都部署初献副都部署亚献部署三献皆戎服行礼祭毕焚币衅鼓

以一牢又择日祭马祖马社

辽将出师先告庙乃立三神主祭之曰先帝曰道路曰军旅刑青牛白马以祭天地其祭常依独树无独树即所舍而行之皇帝服介冑祭

诸先帝宫庙乃阅兵将行牝牡麋各一为■〈示厌〉祭将临敌结马尾祈拜天地而后入下城克敌祭天地以黑白羊班师以所获牡马牛各

一祭天地景宗干亨二年十月将南伐祭旗鼓

金巡守征伐皆告庙或一室或遍告及原庙并一献礼用祝币太祖伐辽告于天地元宪宗二年命皇弟呼必哩伐大理禡牙西行八年伐宋禡牙于开平东北

明亲征礼择日祭告天地宗社皇帝服武弁乘革辂备六军具牲币作乐皆行三献礼仪与大祀同又于国南神祠行禡祭礼凡所过山川

岳镇海渎用太牢其次少牢又次特牲若行速止用酒脯祭器笱豆各一前期斋一日皇帝服通天冠绛纱袍省牲视涤祭之日皇帝服武弁行

一献礼凯还告祭宗社与出师同太祖洪武元年立旗纛庙九年别建庙于山川坛左以躬祀山川日遣旗手卫官行礼其正祭旗头大将六纛

大将五方旗神主宰战船正神金鼓角铙炮之神弓弩飞鎗飞石之神阵前阵后神祇五

獬等众凡七位共一坛南向祭物视先农帛七黑二白
五瘞毛血望燎与风云雷雨诸神同祭毕设酒器六于地刺雄鸡六沥血衅之霜降日祭
于教场岁暮享太庙祭于承天门外后罢霜降之祭成

祖永乐中又有神旗之祭专祭火雷之神每月朔望神机营提督官祭于教场用少牢

（臣）等谨案禡者祭始造兵法之人谓黄帝及蚩尤也至后世则变而为旗纛之
祭顾恺之祭牙文曰敢告黄帝蚩尤五兵之神则似祭
牙即祭黄帝蚩尤宋太平兴国中既祭蚩尤又禡牙则又分而为二而祭蚩尤不名为禡
矣明世旗纛庙祭神凡七位禡祭至此益详盖无事而
禡者也邱浚谓至所征之地既有其祭则无事之时必有其祠可知然考古者四时田猎
有表貉之祭则禡祭一岁四举不必又有无事之禡矣

△輶祭

宋制凡行幸征伐车驾出京则有輶祭用羝羊一太祖建隆元年车驾征泽潞及扬
州太宗太平兴国四年征河东并用此礼

辽将出师立三神主祭之其一为道路

明成祖永乐六年车驾北巡輶祭于承天门每遇亲王来朝之国必设祭于承天门
外虽曰门祭实即古人輶行之祀也

（臣）等谨案輶行神其祀本在冬祖道之輶则又因事而特祭者也但孟冬祀行
在庙门外之西祖道輶祭在国门外为异耳诗言取羝
以輶周礼犬人祭祀共犬牲伏瘞亦如之孔颖达谓天子诸侯礼异天子用犬诸侯用羝
自隋唐至宋明天子皆用羝羊

△田猎

唐立宗开元十七年十二月校猎渭滨德宗贞元十一年十二月帝猎苑中戒多杀
行三驱之礼劳士而还武宗会昌二年十月帝幸泾阳
校猎白鹿原谏议大夫高少逸等于阁内论校猎太频出城稍远万几废弛且宜停止帝
优劳之

后唐庄宗同光三年十二月己卯猎于白沙皇后及太子后宫毕从厯伊阙宿龔润
癸未乃还明宗天成二年十二月畋于东郊

晋出帝天福八年【时未改元故仍称天福】十月畋于近郊开运二年三月畋
于戚城十二月腊畋于郊

宋太祖建隆二年始校猎于近郊先出禁军为围场五坊以鹞禽细犬从帝亲射走
兔三从官贡马称贺后多以秋冬或正月田于四郊从
官或赐窄袍煖鞞亲王以下射中者赐以马开宝八年九月狩近郊逐兔马蹶坠地引佩
刀刺马杀之既而悔曰吾为天下主轻事游畋又何罪

马哉自是遂不复猎太宗将北征因阅武猎近郊以多盗猎狐兔者禁之有卫士夺人獐

当死帝曰若杀之后世必谓我重兽而轻人特贯其罪
帝常以腊日校猎谕从臣曰腊日出狩以顺时令缓辔从禽非荒也后猎西郊亲射走兔
五诏以所猎禽荐宗庙遂为定式帝雅不喜弋猎诏除
有司行礼外罢近甸游畋五坊所畜鹰犬悉放之腊日但命诸王略畋近郊真宗时复诏
教骏所养鹰鹞量留十余以备诸王从时展礼仁宗庆
厯五年言者请修校猎之制以习戎事于是命枢密院讨论制度十月御内东门赐从官
酒三行奏钧容乐幸琼林苑门赐从官食遂猎于杨村
宴于幄殿奏教坊乐遣使以所获麋兔驰献太庙明年复猎于城南东韩村时道旁居人
或畜狐兔鳧雉驱场中帝谓田猎以训武事非专所获
也悉纵之免围内民田一岁租仍召父老劳问其后以谏者多罢猎近甸自是以后不复
讲

辽国尽有大漠包长城之境因宜为治秋冬违寒春夏避暑随水草就渔畋以为常
行在之所谓之捺钵春曰鸭子河冻正月上旬起牙帐
约六十日方至天鹅未至卓帐冰上凿冰取鱼冰泮乃纵鹰鹞捕鹅鴈皇帝每至侍御皆
服墨绿色衣各备连锤一柄鹰食一器刺鹅锥一枚于
冻周围排立皇帝冠巾时服系玉束带于上风望之有鹅之处举旗探骑驰报远泊鸣鼓
鹅惊腾起左右围骑皆举帜麾之五坊拜授海东青鹞
皇帝放之鹞擒鹅坠势力不加排立近者举锥刺鹅取脑以饲鹞皇帝得头鹅荐庙羣臣
各献酒果举乐更相酬酢致贺弋猎网钓春尽乃还夏
捺钵无常所多在图尔山四月中旬起牙帐卜吉地为纳凉所五月末旬六月上旬至与
北南臣僚议国事暇则游猎七月中旬乃去秋捺钵曰
伏虎林七月中旬自纳凉处起牙帐入山射鹿皇族而下分布泺水侧伺夜将半鹿饮盐
水令猎人吹角效鹿鸣既集而射之谓之舐颯鹿又名
呼鹿冬捺钵曰广平淀其地稍暖牙帐于此坐冬时出校猎讲武穆宗应历元年腊猎前
期一日诏司猎官选猎地其日皇帝皇后焚香拜日毕
设围命猎夫张左右翼司猎官奏成列皇帝皇后升輦多啰伦穆腾以酒二尊盘飧奉进
北南大王以下进马及衣皇帝降輿祭东毕乘马入围
中皇太子亲王率羣臣进酒分两翼而行皇帝始获兔羣臣进酒上寿各赐以酒中食之
次亲王大臣各进所获及酒讫赐羣臣饮还宫自是遂
为常仪圣宗统和中罢之

金世宗大定三年八月敕殿前都点检唐古德温重九出猎国朝旧俗 【按大金国
志载金都会窳四时皆猎海陵迁燕后以都城外皆
民田三时无地可猎候冬月则出与史所载重九出猎互异】 今扈从军二千不无扰民
可严为约束仍以钱万贯分赐之十二月猎于近郊所

获荐山陵自是岁以为常

元制自御位及诸王皆有实保齐【注鹰人也御位下打捕鹰房官至千二百户诸王位下几至千户】是故捕猎有户使之致鲜肉以

荐宗庙供天庖而齿革羽毛又以备用然地有禁取有时而违者则罪之春冬之交天子或亲幸近郊纵鹰隼搏击以为游豫之度谓之飞放

明成祖定都北京岁时校猎于南苑宣宗宣德四年十月猎于峪口五年十月巡近郊己卯猎于盆道英宗天顺二年十月猎南苑帝亲御弓矢命勋戚武将应诏驰射获辄献之既毕赐酒馔以所获分赐从臣至武宗畋游无度非训农讲武之意矣

讲武

唐肃宗至德二载帝在凤翔六军大阅帝御府城楼观军阵之容开元元年大阅诸军于含元殿代宗宝应元年大阅兵马于鸣凤门街

梁太祖开平元年冬十月讲武于繁台

晋高祖天福二年十月敕习战讲武历代通规选士练兵其来旧制宜以每年农隙时讲武仍准令式处分

周世宗显德元年三月壬辰次泽州阅兵于北郊

宋阅武仍前代制太祖太宗征伐四方亲讲武事不尽用旧仪亦不常其处凿讲武池朱明门外以习水战复筑讲武台城西杨村九月大

阅与从臣登台观焉真宗诏有司择地含辉门外之东武村为广场凭高为台台上设幄构行宫夜三鼓殿前马步诸军分出诸门诘旦帝乘马

从官并戎服赐以窄袍至行宫诸军阵台前左右相向步骑交属亘二十里有司奏成列帝登台御戎帐以观殿前都指挥使王超执五方旗以

节进退两阵中别起候台相望使人执旗如台上之数以相应初举黄旗诸军旅拜举赤旗则骑进举青旗则步进次举白旗诸军再拜呼万岁

有司奏阵坚而整士勇而厉欲再举诏止之遂举黑旗以振旅军于左者略右阵以还由台前出西北隅军于右者略左阵以还由台前出西南

隅并凯旅以退神宗阅左藏库副使开斌所教牌手于崇政殿命殿前步军司择骁健者依法教习自是营屯及更戍诸军畿甸三路民兵皆召

见亲阅第其精拙赐以金帛超等者至命为吏选官命校试官定八军法颁行诸路既又定九军法以一军营阵即城南好草坡阅之高宗绍兴

十四年阅殿前马步军将士艺精者赏有差自是岁以冬月行之号曰冬教孝宗干道二年阅兵于白石教场四年阅兵于江岸东茅滩皇帝登

台主管殿前司王逵奏人马齐举黄旗诸军呼拜者三王逵奏请从头教中军鸣角倒门角旗出营马步军簇队成收鼓讫连三鼓马军上马步

军撮起旗枪四鼓举白旗中军鼓声相应变方阵为备敌之形别高一鼓步军四向作御敌之势且战且前马军出阵作战鬪之势别高一鼓各分归地分五鼓举黄旗变圆阵为自环内固之形如前节次讫三鼓举赤旗变锐阵诸军相属鱼贯斜列前列后张为冲敌之形亦依前节次讫王逵奏人马教绝取旨举青旗变放教直阵收鼓讫一金止重鼓三马军下马步人龔落旗枪皆应规矩帝大悦犒赏有加士卒欢呼谢恩如仪

辽太宗天显四年以云中郡县未下大阅六军会同三年五月戊子阅骑兵于南郊六月丙申阅步卒于南郊七年南伐次古北口阅诸道兵于温榆河

金太宗天会三年诏有司拣阅善射勇健之士以备宋分遣呼沙呼等十三人阅诸路丁壮调赴军世宗大定二十二年三月命尚书省申敕西北路招讨司勒明安穆昆官督部人习武备章宗明昌六年五月诏诸路明安穆昆农隙讲武提刑司察其惰者罚之

元世祖至元十六年命湖北道宣慰使刘深教练鄂州汉阳新附水军二十五年六月诏蒙古人总汉军阅习水战成宗大德五年选六御扈从汉军习武事

明太祖吴元年大阅时将讨张士诚遂拣将士更制编伍命镇抚居民领之分队习战胜者赏银其伤而不退者亦赏银有差成祖五驾北征六师常自校阅宣宗宣德三年车驾巡边阅武英宗正统元年十月阅武于将台命诸将骑射以三矢为率穆宗隆庆二年八月大阅帝登台升御幄举号炮三京营将士叩头毕分东西侍立台上吹号笛麾黄旗总协戎政官指挥副参游佐等官各归所部整搦人马兵部尚书跪奏请阅阵号炮三马步军演阵如法毕台上吹号笛麾黄旗各将官军士俱回营兵部尚书跪奏请阅射马上人三箭步下人六箭中的者鸣鼓以报其刀枪火器等艺听总协戎政官各量取一队于御前呈试

△命将出征

宋徽宗政和命将仪受旌节前一日仪鸾司设大将位于朝堂其日大将常服入就次谒者引大将就褥位北面立揖东上合门官宣有敕大将再拜躬听宣讫搢笏谒者二人持制诰箱进于大将之前大将受讫次少府监执事者交旌节大将俛伏兴再搢笏舞蹈又再拜讫出文德殿门次端礼门入右升龙门出宣德西偏门大将勒所部兵卫并偏将裨将各建旗以正行列【大将建旗饰以熊虎偏将建旗饰以鸟隼裨将建旗饰以龟蛇】执擎旌节并押节人骑士枪牌步兵乐工等分左右前导至第引见日大将常服入就殿门外次舍人引诣殿庭当陛北面

再拜讫升殿近御前之左奏事禀方略讫降东阶下殿再拜而出造于庙告于武成王甫皆告官行礼大将陪位于告官之南

明太祖洪武元年定遣将礼皇帝武弁服御奉天殿大将军入就丹墀四拜由西陞入殿再拜跪承制官宣制以节钺授大将军大将军受之以授执事者俛伏兴再拜出降陞复位四拜驾还宫大将军出至午门外勒所部将士建旗帜鸣金鼓正行列擎节钺奏乐前导百官以次送出造庙宜社即命大将军具牲币行一献礼如遣官告祭庙社之仪其告武成王庙自省牲金祝版以及进熟酌献彻豆望燎皆大将行礼配位亦大将行礼两庑陪祀诸将分献于旗纛坛备牲牢币帛行三献礼大将为初献诸将为亚献终献祭将毕则割鸡洒血于酒以酹神以鸡掷于四方

△宣露布

后唐明宗天成四年定州行营招讨使王宴球献逆人王都首级并俘馘帝御咸安楼立仗百官就列尚书兵部宣露布于楼前宣讫百官称贺

晋高祖天福七年正月镇州行营招讨使杜重威收复镇州传逆人安重荣首级来献帝御干明楼仗卫如仪宣露布讫百官称贺其年九月襄州行营都部署高行周等执逆贼安重进等四十四人来献帝御干明门受俘宣露布讫百官称贺

汉隐帝干佑二年七月西南行营都部署露布献河中府所获逆贼李守贞首级并俘馘等帝御明德门楼受俘羣臣称贺

宋平岭南刘鋹就擒有司率武士系鋹等白练露布前引告庙社毕乃押至楼南御路之西下马立俟献俘将校戎服带刀摄侍中版奏中严百官班定版奏外辨帝常服御坐百官舞蹈起居毕通事舍人引鋹就献俘位将校等诣楼前舞蹈讫次引露布案诣楼前北向宣付中书门下如宣制仪通事舍人跪受露布转授中书门下转授摄兵部尚书次摄刑部尚书跪奏以所献俘付有司帝召鋹诘责鋹伏地待罪赦弗诛南唐平帝御明德门露布引李煜及其子弟官属素服待罪帝以煜奉正朔非若鋹拒命寝露布弗宣

明亲征师还皇帝服通天冠绛纱袍升午门楼以露布颁天下百官具朝服以听仪与开读赦诏同大将奏凯先期大都督以露布奏闻皇帝常服御楼前侍卫如常仪鼓吹奏凯安乐止赞宣露布承制官以露布付受露布官引礼引诣案跪受由中道南行以授宣露布官宣讫付中书省颁示天下将校引俘至献俘位刑部尚书奏请付所司讫大将以下舞蹈山呼如常

仪

（臣）等谨案露布之名始于汉光武纪注汉制度曰制诏三公皆玺封尚书令印重封露布州郡祭祀志注引东观书有司奏孝顺号露布奏可鲍昱传故事通官文书不着姓又当司徒露布李云露布上书此第为不封而宣露散布之义不以为文书告令之目亦非将帅献捷所用军中露布杜佑谓起自后魏潘昂霄金石例云东晋未有露布隆兴初以晋破苻坚命题似有可疑然文章缘起曰汉贾洪为马超伐曹操作魏志注谓虞松从司马宣王征辽东及被贼作露布隋志有魏武帝露布文九卷世说云桓温北征令袁宏倚马前作露布则魏晋时已有之矣

△大射乡射

大射之礼废于五季宋太宗始命有司草定仪注其羣臣朝谒如元会酒三行有司言请赐王公以下射侍中称制可皇帝改服武弁布七埽于殿下王公以次射开乐县东西厢设熊虎等侯陈赏物于东阶以賚能者设丰爵于西阶以罚否者并图其冠冕仪式表着埽埽之位以进帝览而善之谓宰臣曰俟弭兵当与卿等行之凡游幸池苑或命宗室武臣射每帝射中的从官再拜奉觞贡马为贺预射官中者帝必为之解赐裘衣金带散马不解则不赐苑中皆有射棚画晕的射则用招箭班三十人服绯紫绣衣帕首分立左右以唱中否节序赐宴则宗室禁军大校牧伯诸司使副皆令习射遂为定制外国使入朝亦令帅臣伴赐射于园苑徽宗政和时河北转运判官张孝纯言周官六艺教士必射而后行古者诸侯贡士天子试诸射宫请诏诸州郡每岁宴贡士于学因讲射礼于是礼官参定乡射仪乡饮酒前一日本州岛于射亭东西序量地之宜设提举学事诸监司知州通判州学教授应赴乡饮酒官贡士幕次本州岛兵马教谕备弓矢应用物设乐其日初筵提举学事知州军通判帅应赴乡饮酒官贡士诣射亭执弓矢揖入射乘矢若中则守帖者举获唱获执算者以算投壶毕多算胜少算射毕赞者赞揖酬酢如仪毕退饮如乡饮酒孝宗干道二年二月四日车驾幸玉津园皇帝射讫命皇太子庆王恭王及管军臣僚等以次射如是者三每射四发帝前后四中的淳熙元年九月车驾幸玉津园命从臣行宴射之礼皇太子宰执以下酒三行乐作皇帝临轩有司进弓矢皇帝中的皇太子进酒率宰执以下再拜称贺宣皇太子射射中赐宣预射臣僚射使相郑藻起居舍人王卿月环卫官萧多嘏伦射中各赐裘衣金带

辽俗以重五中元重九行拜天射柳击球之戏金因之凡重五日拜天礼毕插柳球场为两行当射者以尊卑序各以帕识其枝去地约数

寸削其皮而白之先以一人驰马前导后驰马以无羽横镞箭射之既断柳又以手接而驰去者为上断而不能接者次之或断其青处及中而不能断与不能中者为负每射必伐鼓以助其气

元制自天子公卿至郡国将佐皆有射堞翦柳之法大抵循用国俗

明太祖洪武三年五月诏行大射礼帝以先王射礼久废弧矢惟习于武夫而文士多未解至是诏大学及郡县学诸生皆令习射其仪前期戒射定耦选执事充司正副司正司射司射器请射举爵收矢执旗树鹄陈设如仪是日执事者入就位请射者引主射正官及各官员子弟士民俊秀者各就品位司射器者以弓矢置于各正官及司射前请射者诣正官前图揖毕引诣司器前授弓矢毕引复本位司正执算入立于中后请射者引司射二人耦进各以三矢搢于腰带之右以一矢挟于二指之间推年齿相让士射先进诣射位向鹄正立发矢司正书中投算置于中举旗者举旗如式上射射毕下射者诣位发矢如前请射者引复位次请士民俊秀射次请官员子弟射次请品卑至高品者射仪皆如式

△合朔伐鼓

唐德宗贞元三年八月日有食之有司将伐鼓帝不许太常卿董晋言伐鼓所以责阴而助阳请听有司依经伐鼓不报由是其礼遂废

宋仁宗嘉佑六年六月朔日食诏礼官详检典故皇帝素服不御正殿毋视事百官废务守司合朔前二日郊社令门仆守四门巡门监察鼓吹令率工人如方色执麾旂分置四门屋下龙蛇鼓随设于左东门者立北塾南面南门者立东塾西面西门者立南塾北面北门者立西塾东面队正一人执刀率卫士五人执五兵之器立鼓外矛处东戟处南斧钺在西槩在北郊社令立■〈矛赞〉于坛四隅紫朱丝绳三匝又于北设黄麾龙蛇鼓一次之弓一矢四次之诸兵鼓俱静立俟司天监告日有变工举麾乃伐鼓祭告官行事太祝读文其词以责阴助阳之意司天官称止乃罢鼓如雾晦不见即不伐鼓以后皆如其制 【政和礼合朔有司陈设太社有玉币豆筴】

金世宗大定二年正月戊辰朔日食伐鼓用币命寿王京代拜行礼为制凡日月亏食禁酒乐屠宰一日七年四月戊辰朔日食帝避正殿减膳伐鼓应天门内百官各于本司庭立明复乃止九年八月甲申朔有司奏日当食以雨不见为近奉安太社乃伐鼓于社用币于应天门内

明太祖洪武六年二月定救日礼皇帝常服不御正殿中书省设香案百官朝服行礼鼓人伐鼓复圆乃止月食大都督府设香案百官常

服行礼不伐鼓雨雪云翳则免二十六年三月更定礼部设香案于露台向日设金鼓于仪门内设乐于露台下各官拜位于露台上至期百官朝服入班乐作四拜兴乐止跪执事者捧鼓班首击鼓三声众鼓齐鸣候复圆复行四拜礼【月食如旧制】在外诸司日食则于布政使司府州县月食则于都指挥使司卫所救护如仪穆宗隆庆六年大丧方成服遇日食百官先哭临后赴礼部青素衣黑角带向日四拜不用鼓乐

（臣）等谨案左氏以日食用牲为非礼公羊不非用牲又有朱丝萦社之说颇为迂怪汉世尊公羊故日食则割羊祠社唐始不用牲而朱丝萦社犹用公羊之说宋时救日率用唐制明救日不设五兵不萦朱丝又在礼部而不在社皇帝常服而不素服百官朝服入班而不守司此皆异于前代者也

△祭马祖

唐代宗永泰五年命太常寺复置马祖坛依例程享祭宋仲春祀马祖仲夏享先牧仲秋祭马社仲冬祭马步并择日坛各广九步高三尺四出陛一壝太宗太平兴国四年征河东祷马于马祖用少牢高宗绍兴三十一年于昭庆寺设位行祭

明太祖洪武二年命祭马祖先牧马社马步之神筑坛后湖礼官言四神之祭隋用周制以四仲月唐宋因之今定春秋二仲月甲戌庚日遣官致祭为坛用羊一豕一乐用时乐礼三献四年蜀明升献良马十其一白者长丈余不可鞿勒太祖曰天生英物必有神司之命太常以少牢祭马祖囊沙四百斤压之令人骑而游苑中久之渐驯帝乘之以夕月于清凉山比还大悦赐名飞越峯复命太常祀马祖五年并诸神为一坛岁止春祭成祖永乐十三年立北京马神祠其南京马神则南太仆主之孝宗弘治九年修通州马神祠【祠在通州北燕兵初起时战其地觉有神相之因诏作马祖祠久之祠废至是顺天府尹彭礼等修之】

△时傩

宋志不载傩礼东京梦华录云除日禁中呈大傩仪并用皇城亲事官请班直戴假面绣画色衣执金鎗龙旗装将军门神判官钟馗小妹土地灶神之类共千余人自禁中驱出南熏门外转龙湾谓之埋崇而罢此则傩礼之行于汴京者也干淳岁时记云禁中腊月三十日呈女童驱傩装六丁六甲六神之类此则傩礼之行于南渡者也

（臣）等谨案月令三傩季春之傩注谓傩阴气也此月日行历昴有大陵积尸之气气佚则厉鬼随而出行仲秋之傩注谓傩阳气也此月宿直昴毕得大陵积尸之气气佚则厉鬼亦随而出行季冬之傩注谓傩阴气也此月

日历虚危有坟墓四司为厉鬼将随强阴出害人也盖
阴阳之气无日不流行于天地之间其正也则能发育收藏以成岁功其过也则将淫厉
底伏以为疾病故春之雩曰毕春气春之阳气达则阴
气之过者可止矣秋之雩曰达秋气秋之阴气达则阳气之过者可止矣冬之雩曰送寒
气寒气送则冬阴之已盛者可以退而春阳之方萌者
可以发矣此亦圣人节宣调燮之一端也郑氏斗直日躔之说必有所本斗直左行为阳
日躔右行为阴而所躔所直之星能为人害者必随乎
时之阴阳而出亦莫非气之相为感召而已张衡两京赋卒岁大雩驱除羣厉仅于东京
言之则西京无此制可知唐时雩礼大率依仿后汉之
制惟于季冬一行之宋史遂不复载观东京梦华录所言大抵杂以委巷鄙俚之说盖唐
时犹以为国家之典礼至宋则直以戏视之而古意益
微矣此史志所以削之与辽金元明俱无雩礼明臣邱浚大学衍义补请斟酌汉唐之制
俾内臣依古制为索室逐疫之法然亦未见施行也

钦定续通志卷一百十七

●钦定续通志卷一百十八

礼略 【八】

凶礼

○凶礼

大丧及山陵制

丧期

天子吊大臣服

天子为大臣及诸亲举哀

诸侯及公卿大夫为天子服

皇太后长公主及三夫人以下为天子服

挽歌

季孝为举主服

郡县吏为守令服

师弟子相为服

朋友相为服

△大丧及山陵制

（臣）等谨按郑志大丧及山陵制下有细注云并为期以下亲哭及不亲事附而
所载并无其事惟丧期条内载亲哭及不视事语綦详
疑此处附注为当时传写之讹今删之

唐元陵遗制丧仪及山陵制度务从俭约诏问宗子在外州府合赴京师否所司奏

曰案礼五庙之孙祖庙未毁虽为庶人冠娶妻必告死
必赴练祥则告不忘亲也又曰四世而缌服之穷也五世祖免杀同姓也六世亲属竭矣
又传云天子七月而葬同轨毕至此则宗子五等以上
不限远近同赴山陵

周太祖葬嵩陵先时帝屡戒晋王曰昔吾西征见唐十八陵无不发掘者此无他惟
多藏金玉故也我死当衣以纸衣敛以瓦棺速营葬勿
久留宫中圻中无用石以甃代之工人徒役皆和雇勿以烦民葬毕募近陵民三十户蠲
其杂徭使之守视勿修下宫勿置守陵宫人勿作石羊
虎人马惟刻石置陵前云周天子平生好俭约遗命用纸衣瓦棺嗣天子不敢违也汝或
违吾吾不福汝

宋太祖崩羣臣叙班殿庭宰臣宣制发哀毕太宗即位号哭见羣臣礼官定羣臣当
服布斜巾四脚直领布襴腰经命妇布帕首裙帔皇弟
皇子文武二品以上加布冠斜巾帽首经大袖裙袴竹杖士民缟素妇人素幔诸军就屯
营三日哭羣臣屡请听政始御长春殿羣臣丧服就列
帝去杖经服斜巾垂帽卷帘视事小祥改布服四脚直领布襴腰经布袴二品以上官亦
如之大祥帝服素纱软脚折上巾浅黄衫緞皮鞋黑银
带羣臣及军校以上本色黻服铁带鞞笏诸王入内服衰出则服黻成服后羣臣朝晡临
三日大小祥禫除朔望皆入临奉慰内出遗留物颁赐
诸臣亲王遣使赉赐方镇明年三月十七日羣臣奉谥号册宝告于南郊明日读于灵座
前四月十日启攒宫帝与羣臣皆服如初丧朝晡临殿
中退易常服出宫城十三日发引帝衰服启奠哭羣臣入临升梓宫于龙輶祖奠彻设次
明德门外行遣奠礼读哀册帝哭尽哀再拜辞释衰还
宫百官辞于都城外二十五日掩皇堂二十九日虞主至奉安于大明殿五月十九日祔
庙太宗崩帝服布斜巾四脚大袖裙袴帽竹杖腰经首
经直领布襴衫白绫衬服诸王皇亲以下如之加布头冠绢衬服文武二品以上布斜巾
四脚头冠大袖襴衫裙袴腰经竹杖绢衬服自余百官
并布幞头襴衫腰经省五品御史台尚书省四品诸司三品以上见任前任防御团练刺
史内客省合门入内都知押班等布头冠幞头大袖襴
衫裙袴腰经诸军庶民白衫纸帽妇人素幔不花钗三日哭而止山陵前朔望不视事灵
驾发引其凶仗法物擎舁牵驾兵士力士凡用万二千
一百九十三人永熙陵皇堂深百尺方广八十尺陵台方二百五十尺真宗崩大敛成服
明日有司设御坐垂帘崇政殿之西庑帘幕皆缟素羣
臣叙班殿门外帝衰服杖经侍臣扶升坐通事舍人引羣臣入殿庭西向合班俟帘卷羣
臣再拜班首奏圣躬万福随班三呼万岁退宰臣升殿

奉事如仪小祥帝行奠释衰服羣臣入临退赴内东门进名奉慰自是每七日皆临至四十九日止大祥帝释服服黻 【按时帝虽用以日易月之制改服临朝宫中实行三年之丧】 仁宗崩丧服制度及修奉永昭陵并用定陵故事 【定陵皇堂深八十一尺方百四十尺】 英宗崩礼院准礼羣臣成服后乘布裹鞍鞞小祥临讫除头冠方裙大袖大祥临讫裹素纱软脚幞头黻公服乘阜鞍鞞禫除讫素纱幞头常服黑带二日改吉服去佩鱼神宗神主祔庙是日冬至百官表贺崇政殿说书程颐请改贺为慰不从高宗南渡后制皇帝未成服则素纱软脚幞头白罗袍黑银带丝鞋成服日布梁冠 【朱子云当用十二梁】 首经直领布大袖衫 【朱子云不当用襴盖下已有裙】 布裙袴腰经竹杖白绫衬衫或斜巾帽子视事日去杖首经小祥日改服布幞头襴衫腰经布袴大祥毕服素纱软脚幞头白罗袍素履黑银带禫祭毕素纱软脚幞头浅色黄罗袍黑银带祔庙日服赭黄袍红带御正殿视事则阜幞头淡黄袍黑鞞犀带素丝鞋孝宗居忧再定三年之制小祥不易服大祥礼毕始去杖经禫祭毕始服素纱软脚幞头白袍黑银带祔庙毕服阜幞头黑鞞犀带每遇过宫庙谒则衰经行礼二十五月而除三年之内禁中常服布巾布衫布背子视事则御内殿服白布幞头白布袍黑银带殿设素幄每五日一次过宫则衰经而杖虞祭则布折上巾黑带布袍受金使吊则衰经御德寿殿东廊之素幄受贺节使则御垂拱殿东楹之素幄

辽丧仪先帝小殓前一日皇帝丧服上香奠酒哭临其夜北院枢密院契丹行宫都部署入小殓翼日遣北院枢密副使林牙以所贖器服置之幽宫行葬礼圣宗庙兴宗哭临于鼓涂殿大行之夕四鼓终帝率羣臣入枢前三致奠奉柩出殿之西北门就輶辂车藉以素裯巫者祓除之诘旦发引至葬所凡五致奠大巫祈禳皇族外戚大臣诸京官以次致祭乃以衣弓矢鞍勒图画马驼仪卫等物皆燔之葬毕上哀册皇帝御幄命改火面火致奠三拜又东向再拜天地讫乘马率送葬者过神门之木乃下东向又再拜翼日诘早率羣臣命妇诣山陵行初奠礼升御容殿受遗赐又翼日再奠如初道宗崩有司奉丧服天祚帝问礼于总知翰林院事耶律固始服斩衰皇族外戚使相阿敦官及郎君服如之余官及承应人皆白帛衣巾以入哭临特哩袞三父房南府宰相要尼祥袞九奚首郎君伊勒希巴国舅祥袞十扎萨克郎君南院大王郎君各以次荐奠进鞍马衣裘犀玉带等物表列其数读讫焚表诸国所贖器服亲王诸京留守奠祭进贖物亦如之灵柩至葬所降车就輶皇帝免丧服步引至长福冈是夕皇帝入陵寝授遗物皇族外戚及诸大臣乃出命以先帝寝幄过于陵

前神门之木帝不亲往遣近侍冠服赴之初奠皇帝皇

后率皇族外戚使相节度使夫人以上命妇皆拜三匝而降再奠如初辞陵而还

元制凡帝后有疾危殆度不可愈移居外毡帐房有不讳则就殓其中棺用香楠木中分为二刳肖人形其广狭长短仅足容身殓用貂皮袄皮帽其鞞鞮系盒钵俱用白粉皮为之殉以金壶瓶二盏一椀楪匙筋各一殓讫用黄金为籬四条以束之輿车用白毡青缘纳奇实为帘覆棺亦以纳奇实为之前行用蒙古巫媪一人衣新衣骑马索马一匹以黄金饰鞍辔笼以纳奇实谓之金灵马日三次用羊奠祭至所葬陵地其开穴所起之土成块依次排列之棺既下复依次掩覆之其有剩土则远置他所送葬官三员居五里外日一次烧饭致祭三年然后返

明太祖洪武十五年皇后马氏崩礼部引宋制为请于是命在京文武官及听除官人给布一匹令自制服皆斩衰二十七日而除服素服百日凡在京官越三日素服至右顺门外具丧服入临毕素服行奉慰礼三日而止武五品文三品以上命妇亦于第四日素服至干清宫入临用麻布盖头麻布衫裙鞋去首饰脂粉其外官服制与京官同闻讣日于公厅成服命妇服亦与在京命妇同皆三日而除军民男女素服三日禁屠宰在京四十九日在外三日停音乐祭祀百日嫁娶官停百日军民一月将发引告太庙帝亲祭于几筵百官丧服诣朝阳门外奉辞是日安厝皇堂皇太子奠元纁玉璧行奉辞礼神主还宫百官素服迎于朝阳门外仍行奉慰礼帝以醴饌祭于几筵殿自再虞至九虞皆如之卒哭祔庙丧满百日帝辍朝于几筵致钦不拜东宫以下奠帛爵百官素服行奉慰礼东宫亲王妃主以牲醴祭孝陵公侯等从命妇祭几筵殿自后凡节序及忌日东宫亲王祭几筵及陵小祥辍朝三日禁在京音乐屠宰设醮于灵谷寺朝天宫各三日帝率皇太子以下诣几筵殿祭百官素服诣宫门进香讫诣后右门奉慰外命妇诣几筵殿进香皇太子亲王熟布练冠九■〈衤取〉皇孙七■〈衤取〉皆去首经负版辟领衰见帝及百官则素服乌纱帽乌犀带妃主以下熟布盖头去腰经宗室驸马练冠去首经内尚衣尚冠以所释服于几筵殿前丙位焚之皇太子亲王复诣陵行礼大祥奉安神主于奉先殿预期斋戒告庙百官陪祀毕行奉慰礼太祖崩礼部定仪京官闻丧次日素服乌纱帽黑角带赴内府听遗诏于本署斋宿朝晡诣几筵哭越三日成服朝晡哭临至葬乃止自成服日始二十七日除命妇孝服去首饰由西华门入哭临诸王世子王妃郡主内使宫人俱斩衰三年二十七日除凡临朝视事素服乌纱帽黑角带退朝衰服羣臣麻布员领衫麻布冠麻经麻鞋命妇麻布大袖

长衫麻布盖头明器如鹵簿神主用栗制度依家礼行人颁遗诏于天下在外百官诏书到日素服乌纱帽黑角带四拜听宣读讫举哀再四拜
三日成服每旦设香案哭临三日除各遣官赴京致祭祭物礼部备建文帝诏行三年丧以遭革除丧葬事皆不传成祖皇后徐氏崩自次日辍朝不鸣钟鼓帝素服御西角门百官素服诣思善门外哭临毕行奉慰礼三日成服哭临如上仪自次日为始各就公署斋宿二十七日文武四品以上命妇成服日为始诣思善门内哭临三日听选办事官俱丧服人材监生吏典僧道坊厢耆老各素服自成服日始赴应天府举哀三日
余悉遵旧仪成祖崩遗诏一遵太祖遗制礼部定丧礼宫中自皇太子以下及诸王公主成服日为始斩衰三年二十七月除服内停音乐嫁娶祭祀止停百日文武官闻丧之明日诣思善门外哭五拜三叩头宿本署不饮酒食肉四日衰服朝夕哭临三日又朝临十日衰服二十七日凡入朝及视事白布裹纱帽垂带素服腰经麻鞋退朝衰服二十七日外素服乌纱帽黑角带二十七月而除听选办事等官衰服监生吏典僧道素服赴顺天府朝夕哭临三日又朝临十日命妇第四日由西华门入哭临三日俱素服二十七日除凡音乐祭祀并辍百日婚嫁官停百日军民停一月军民素服妇人素服不妆饰俱二十七日在外以闻丧日为始越三日成服就本署哭临余如京官命妇素服举哀三日二十七日除军民男女皆素服十三日余俱如京师发引前三日百官斋戒皇帝遣官以葬期告天地宗社皇帝衰服告几筵皇太子以下皆衰服随班行礼百官衰服朝一临至发引止前一日遣官祭金水桥午门端门承天门大明门德胜门并所过河桥京都应祀神祇及经过应祀神祠仪用酒果肴饌是夕设辞奠帝后太子以下皆衰服以序致祭司礼监礼部锦衣卫命执事者设大升輦陈葬仪于午门外并大明门外将发设启奠皇帝暨皇太子以下衰服四拜奠帛献酒读祝四拜举哀兴哀止望瘞执事者升彻帷幙拂拭梓宫进龙輶于几筵殿下设神亭神帛輿溢册宝輿于丹陛上设祖奠如启奠仪皇帝诣梓宫前西向立皇太子亲王以次侍立内侍于梓宫前奏请灵驾进发捧册宝神帛置輿中次铭旌出执事官升梓宫内执事持翼左右蔽降殿内侍官请梓宫升龙輶执事官以彩帷幕梓宫内侍持伞扇侍卫如仪旧御仪仗居前册宝神帛神亭铭旌以次行皇帝由殿左门出后妃皇太子亲王及宫妃后随至午门内设遣奠如祖奠仪内侍请灵驾进发皇帝以下哭尽哀俱还宫梓宫至午门外礼官请梓宫升大舁輦执事官奉升輦讫礼官请灵驾进发皇太子亲王以下哭送出端门外行辞祖礼执事官设褥位于太庙香案前皇太子

易常服捧神帛由左门入至褥位跪置神帛于褥兴正立于神帛后跪礼官跪于左奏太宗体天弘道高明广运圣武神功纯仁至孝文皇帝谒辞皇太子俯伏兴赞五拜三叩头毕皇太子捧神帛兴以授礼官礼官安輿中请灵驾进发皇太子仍丧服亲王以下随行梓宫由大明中门出皇太子以下由左门出步送至德胜门外乘马至陵在途朝夕哭奠临诸王以下及百官军民耆老四品以上命妇以序沿途设祭文武官不系山陵执事者悉还至陵执事官先陈龙輶于献殿门外俟大升輦至礼官请灵驾降輿升龙輶诣献殿执事官奉梓宫入皇太子亲王由左门入安奉讫行安神礼皇太子四拜兴奠酒读祝兴四拜举哀亲王以下陪拜如常仪遣官祀告后土并天寿山设迁奠礼如常仪将掩元宫皇太子以下诣梓宫前跪内侍请灵驾赴元宫执事官奉梓宫入皇堂内侍捧册宝置于前陈明器行赠礼皇太子四拜兴奠酒进赠执事官捧玉帛进于右皇太子受献以授内执事捧入皇堂安置俯伏兴四拜举哀遂掩元宫行殮礼如迁奠仪遣官祀谢后土及天寿山设香案元宫门外设题主案于前西向设皇太子拜位于前北向内侍盥手奉主置案上题主官盥手西向题毕内侍奉主安于神座藏帛箱中内侍奏请太宗文皇帝神灵上神主赞皇太子四拜兴献酒读祝俯伏兴四拜举哀内侍启榑受主讫请神主隆座升輿至献殿奏请神主降輿升座行初虞礼案柔日再虞刚日三虞后间日一虞至九虞止在途皇太子行礼还京皇帝行礼仁宗崩丧仪俱如旧惟改在京朝夕哭临三日后又朝临止七日在外止朝夕哭临三日无朝临礼文武官一品至四品命妇入哭临先是诏营献陵帝召尚书蹇义夏原吉议曰国家以四海之富葬亲岂惜劳费然古圣帝明王皆从俭制孝子思保其亲体魄于永久亦不欲厚葬况皇考遗诏天下所共知宜遵先志于是建陵殿五楹左右庑神厨各五楹门楼三楹其制较长陵远杀皆帝所规画也宣宗崩丧葬如献陵故事惟改命妇哭临自三品以上正统中仁宗皇后张氏崩皇帝成服后三日即听政祀典皆勿废诸王以下内外各官及命妇哭临如前仪衰服二十七日而除军民男女素服十三日诸王勿会葬外官勿进香臣民勿禁音乐嫁娶及葬遣官告太庙帝亲奉太后衣冠谒列祖帝后及仁宗神位又奉宣宗衣冠谒太后神位礼视时享英宗崩宪宗即位百日御奉天门视朝礼仪悉用古典宪宗崩孝宗既除服仍素翼善冠麻衣腰经视朝不鸣钟鼓百官素服朝参百日后如常弘治元年正旦时未及小祥帝黄袍御殿受朝次日仍黑翼善冠浅淡服犀带孝宗崩工部言大行遗诏惓惓以节用爱民为本乞敕内府诸司凡葬仪冥器山陵殿宇务从节省

世宗嘉靖元年帝祖母邵氏崩服除部臣毛澄等请即吉视事帝命考孝肃太皇太后丧礼澄等言孝肃崩时距葬期不远故暂持凶服以待山陵事竣与今不同况当正旦朝元亦不宜缟衣若孝思未忘第毋御中门及不鸣钟鼓足矣从之仍免朔望日升殿既葬四日帝御奉天门百官行奉慰礼始从吉后孝宗皇后张氏崩罢祭告谒庙礼朝祖祔庙俱不出主盖从杀也先是武宗皇后夏氏崩礼部上仪注有素冠素服经带举哀及羣臣奉慰礼帝曰朕于皇兄后无服矧上奉两宫又迫圣母寿旦忍用纯素朕青服视事诸仪再拟于是尚书夏言等言庄肃皇后丧礼在臣民无容议惟是陛下以天子之尊服制既绝不必御西角门羣臣成服后不当素服朝参及上葬仪帝复谕毅皇后事与累朝皇后不同无几筵之奉当即行祔庙命皇后摄事于内殿言等因具上其仪制可七年世宗皇后陈氏崩帝欲五日释服阁臣张璠等言皇帝为后服期以日易月仅十二日臣子为君母服三年以日易月仅二十七日较古礼已杀陛下宜服期十二日臣子素服终二十七日不然则恩纪不明典礼有乖礼臣方献天亦争之詹事霍韬言今百官遭妻丧无服衰莅事之礼盖妻丧内而不外阴不可以当阳也请陛下元冠素服御西角门十日即元冠元裳御奉天门百官入左掖门则乌纱帽元衣公署及私室仍素服白帽二十七日若曰于礼犹有未慊则山陵事毕而除帝从其议明自仁宗献陵以后规制俭约世宗葬永陵其制始侈至神宗定陵费至八百余万云

△丧期

后唐庄宗同光三年七月贞简皇太后遗令曰皇帝以万几至重八表所尊勿衣麤纛勿居谅闇皇后诸妃及诸王公妃主并制齐纛本服以日易月十三日除中书门下翰林学士在朝文武百官内诸司使及诸道节度观察防御使刺史监军及前资官并僚佐官吏士庶僧道百姓并准本朝故事降服施行勿使过制皇帝释服不御八音勿废羣祀勿断屠宰勿禁游宴园陵丧制皆从简省其月太常礼院奏案故事中书门下翰林学士在朝文武官内诸司使供奉官以下从成服三日每日赴长寿宫朝临自后不临其服以日易月十三日除至小祥日合释服每至朔望小祥大祥释服日未除服者纛服临已除服者则素服不临并赴长寿宫先拜灵訖移班近东进名奉慰又奏准故事文武前资官及六品以下未升朝官并士庶等各于本家素服一临禁卫诸军使以下各于本军厅事素服一临僧尼道士各于本寺观一临外命妇各于本家素服朝临三日诸道节度观察防御团练刺史及僚佐等闻哀后当日成服三日改黻十三日除从之

宋太祖建隆二年皇太后杜氏崩太常礼院言皇后燕国长公主皇弟光义光美并服齐衰三年准故事随皇帝以日易月之制二十五日释服二十七日禫除毕服吉心丧终制从之太祖崩遗诏以日易月皇帝三日而听政十三日小祥二十七日大祥诸道节度防御团练使刺史知州等不得辄离任赴阙诸州军府临三日释服仁宗景佑三年保庆皇太后崩太常礼院言皇帝本服缙麻三月皇帝皇后服皆用细布宗室皆素服吉带大长公主以下亦素服并常服入内就次易服三日而除诏以保佑冲人加服为小功五日而除哲宗元佑八年仁宣圣烈皇后崩遗诏皇帝成服三日内听政羣臣十三日诸州长吏以下三日而除勿禁作乐园陵制度务从俭省元符末哲宗升祔毕羣臣吉服如故事太常寺言太宗上继兄弟相及虽行易月之制实斩衰三年以重君臣之义公除以后庶事相称皇帝嗣位已为哲宗服重今神主已祔百官之服并用纯吉皇帝宜如太平兴国二年故事礼部言太平兴國中宰臣薛居正表称公除以来庶事相称独命彻乐议未得宜即是公除不举乐外释衰从吉事理甚明今皇帝当御常服素纱展脚幞头淡黄衫黑犀带宰臣请从礼官议乃诏候周替服吉寺诏不由门下径付有司给事中龚原言丧制乃朝廷大事今行不由门下是废法也臣为君服斩衰三年古未尝改且陛下前此议服礼官持两可之论陛下既察见其奸其服遂正今乃不得已从之臣窃为陛下惜开宝时服制乃一时权宜非故事也原坐黜知南康军于是诏依原降服丧三年之制高宗于外庭以日易月内廷则行三年之制御朝则浅素浅黄孝宗淳熙十四年十月八日高宗崩孝宗号恻擗踊二日不进膳寻谕宰执王淮欲不用易月之制如晋武帝魏孝文实行三年丧自不妨听政淮等奏通鉴载晋武帝虽有此意后来只是宫中深衣练冠帝曰当时羣臣不能将顺其美司马光所以讥之后来武帝竟欲行淮曰记得亦不能行帝曰自我作古何害淮曰御殿之时人主衰经羣臣吉服可乎帝曰自有等降乃出内批朕当衰经三年羣臣自行易月之制其合行仪制令有司讨论诏百官于以日易月之内衰服治事二十日丁亥小祥帝未改服明日车驾还内帝衰经御辇设素仗军民见者往往感泣诏自今五日一诣梓宫前焚香帝欲衰服素幄引辅臣及班次而礼官奏谓苴麻三年难行于外廷奏入不出十一月戊戌朔礼官颜师鲁尤衰等奏乞大祥礼毕改服小祥之服去杖经禫祭礼毕改服素纱软脚折上巾淡黄袍黑银带神主祔庙毕改服幞头鞞犀带过宫烧香则于宫中衰经行礼二十五日而除帝批淡黄袍改服白袍二日己亥大祥四日辛丑禫祭礼毕五日壬寅百官请听政不

允八日百官三上表引康诰被冕服出应门等语以证九日诏可十五年正月十八日甲寅百日帝过宫焚香二十一日丁巳谕辅臣曰昨内引洪迈见朕已过百日犹服衰麤因奏事应以渐今宜服知古人墨衰之义而巾则用缁或罗朕以罗绢非是若用细布则可王淮等言寻常士大夫丁忧过百日巾衫皆用细布出而见客则黻布今陛下举旷古不能行之礼足为万世法帝又曰晚间引宿直宿之类如何淮曰布巾布背子帝不以为然自是每御延和殿止服白布折上巾布衫过宫则衰经而杖三月壬子启攒帝服初丧之服甲寅发引丙寅掩攒四月甲戌亲行第七虞祭大臣言虞祭乃吉礼合用鞞袍帝曰止用布折上巾黑带布袍可也二十日丙戌神主祔庙是日诏曰朕昨降指挥欲衰经三年缘羣臣屡请御殿易服故以布素视事内殿虽有俟过祔庙勉从所请之诏稽诸典礼心实未安行之终制乃为近古宜体至意勿复有请于是大臣乃不敢言孝宗崩光宗不能执丧宁宗嗣服欲大祥毕更服两月监察御史胡纘言孙为祖服已过期矣议者欲更持禫两月不知用何典礼若曰嫡孙承重则太上圣躬亦已康复于宫中自用二十七月之重服而陛下又行之是丧有二孤也诏侍从台谏给舍集议吏部尚书叶翥等欲从纘所请参以典故大祥礼毕皇帝及百官并纯吉服诏从所议初高宗之丧孝宗为三年服及孝宗之丧有司请于易月之外用漆纱浅黄之制循绍兴以前之旧朱熹初至不以为然奏言今已往之失不及追改惟有将来启攒发引礼当用初丧之服则其变除之节尚有可议望明诏礼官稽考礼律豫行指定其官吏军民方丧之服亦宜稍为之制勿使肆为华靡其后诏中外百官皆以凉衫视事盖用此也 【熹上议时门人有疑者未有以折之后读礼记正义丧服小记为祖后者条因自识于本议之末其略云准五服年月格斩衰三年嫡孙为祖法意甚明而礼经无文但传云又没而为祖后者服斩然而不见本经未详何据但小记云祖父没而为祖母后者三年可以旁照至为祖后者条下疏中所引郑志乃有诸侯父有废疾不任国政不任丧事之问而郑答以天子诸侯之服皆斩之文方见父在而承国于祖之服向上此议时无文字可检又无朋友可问故大约且以礼律言之亦有疑父在不当承重者时无明白证验但以礼律人情大意答之心常不安归来稽考始见此说方得无疑】

明太祖遗诏丧葬之仪一如汉文天下臣民令到出临三日皆释服建文帝既即位诏行三年丧成祖之丧踰十七日礼部尚书吕震奏遵遗命释服帝不听自是临朝素冠麻衣麻经朝退仍衰服仁宗之丧服除礼部请帝服浅

淡衣乌纱翼善冠黑角带于奉天门视事百官皆浅淡
色衣乌纱帽黑角带朝参如常仪退朝仍终文皇帝服制帝曰朕心何忍虽加一日愈于
已仍素服坐西角门不鸣钟鼓令满百日再议已百日
复命俟山陵事毕吏部尚书蹇义等请祔庙后素服御西角门视事至孟冬岁暮行时飨
礼鸣钟鼓黄袍御奉天门视朝禫祭后始释素服从之
宪宗之丧已百日帝以梓宫在殡仍不释服视事百官素服朝参如旧制孝宗崩礼臣言
百日例应变服但梓宫未入山陵请仍素翼善冠麻布
袍服腰经御西角门视事不鸣钟鼓百官仍素服朝参从之嘉靖中穆宗母杜氏薨礼部
言用成化中淑妃纪氏丧制且裕王已成婚宜持服主
丧送葬出城乃识辍朝五日裕王遵孝慈录斩衰三年帝谓非礼令酌考贤妃郑氏例于
是尚书欧阳德等复上仪注辍朝二日不鸣钟鼓帝服
浅淡色衣奉天门视事百官浅色衣乌纱帽黑角带朝参命裕王主馈奠之事王率妃八
宫素服哭尽哀四拜视殓成服后朝夕哭临三日后每
一日一奠通前二十七而止仍于燕居尽斩衰二年

△天子吊大臣服

宋制车驾临奠其仪乘輿自内出千牛将军四人执戈一人执桃一人执芻前导车
驾将至所幸之第赞礼者引丧主哭于大门内望见乘
輿止哭再拜立于庭皇帝至幕殿改素服就临丧主内外再拜皇帝哭十五举音丧主内
外皆哭皇帝诣祭所三奠酒丧主以下再拜皇帝退止
哭从官进名奉慰皇帝改常服还内通礼着皇帝临诸王妃主外祖父母皇后父母宗戚
贵臣等丧出宫服常服至所临处变服素服仁宗天圣
丧葬令皇帝临臣之丧一品服锡衰三品以上总衰四品以下疑衰皇太子临吊三师三
少则锡衰宫臣四品以上总衰五品以下疑衰

明制乘輿临王公大臣丧銮驾至大次降辂升輿入易素服百官皆易服先入就厅
前分班侍立御輿出次丧主以下免经去杖衰服哭迎
于大门外望见乘輿止哭再拜入于门内之西乘輿入门将军四人前导四人后从入至
正厅降輿升阶诣灵座前百官班于后皇帝哭百官皆
哭太常卿奏奠止哭三上香三祭酒出至正厅御座丧主以下诣厅下拜位再拜承制官
诣丧主前云有制丧主以下皆跪宣制讫皆再拜退立
于厅西太常卿奏礼毕皇帝升輿出就大次易服御輿出丧主以下诣前再拜退皇帝降
輿升辂丧主杖哭而入诸仪卫赞唱大略如常

△天子为大臣及诸亲举哀

宋制举哀挂服尚舍设次于广德殿或讲武殿大明殿其后皆于后苑壬地前一日
所司预设举哀所幕殿周以帘帷色用青素其日皇帝

常服乘輿詣幕殿侍臣奏請降輿俟時釋常服服素服白羅衫黑銀腰帶素紗軟脚幘頭太常博士引太常卿當御座前跪奏請皇帝為某官薨舉哀又請舉哭十五舉音又奏請可止中書門下文武百官進名于崇政殿門外奉慰皇帝釋素服服常服乘輿還內太祖建隆四年山南東道節度使慕容延釗卒太祖素服發哀其後趙普薨太宗亦如之真宗景德四年李沆薨禮官言舉哀品秩雖載禮典伏緣國朝惟趙普曹彬皆行茲禮今望裁自聖恩詔特擇日舉哀自後宰臣薨皆用此禮真宗乳母秦國延壽保聖天人卒以太宗喪始替疑舉哀禮官言通禮皇帝為乳母總麻按喪葬令皇帝為總一舉哀止秦國夫人保傅聖躬宜備哀榮況太宗之喪已終易月之制今為乳母發哀合于禮典從之鄭國長公主薨禮官言降服大功擇日成服緣居大行皇太后大祥之內衰服未除典禮舊章以輕包重酌情順變禮當厭降望不成服皇親諸親亦不制服帝曰宗室諸王皆不制服情所未忍至期當遣諸王就其第成服及令皇后臨奠余如所請皇從弟右監門衛大將軍德鈞卒以皇帝恭謁陵寢罷舉哀成服天禧元年太尉王旦薨時季秋大享明堂其日發哀真宗疑之禮官言祠事在質明之前成服于既祠之後于禮無嫌詔可仁宗康定二年皇子壽國公昞薨年二歲禮官言已有爵命宜同成人遂發哀成服神宗熙寧十年永國公薨系無服之殤詔特舉哀成服哲宗元祐元年王安石薨在神宗小祥之內【按禮志作大祥之內考神宗崩于元豐八年三月王安石薨于元祐元年二月在小祥內今改輯】司馬光薨亦在諒闇中皆不舉哀成服高宗于劉光世張俊秦檜之喪皆為臨奠然設幄舉哀成服之禮未之行也孝宗干道三年始為皇伯母秀王夫人薨設幕殿后苑壬地舉哀成服

金熙宗皇統元年五月梁宋國王宗干薨庚戌帝親臨日官奏戌亥不宜哭泣帝曰君臣之義骨內之親豈可避之遂哭之恸六月紀王宗強薨帝親臨如宗干儀

明太祖洪武二年開平王常遇春卒于軍讞至禮官請如宋太宗為趙普舉哀故事遂定制凡王公薨讞報太常司示百官于西華門內壬地設御幄陳御座置素褥設計者位于前設百官陪哭位東西向奉慰位于讞者位北北向贊禮二人位于讞者拜位之北引讞者二人位于贊禮之南引百官四人位于陪位之北皆東西向其日備儀仗于奉天門迎駕皇帝素服乘輿詣幄樂陳于幄之南不作太常卿奏某官來讞某年月日某官以某疾薨請舉哀皇帝哭百官皆哭太常卿奏止哭百官奉慰訖分班立讞者四拜退太常卿奏禮畢乘輿還宮百官出

△诸侯及公卿大夫为天子服

唐代宗崩常袞以为礼臣为君斩衰三年汉文权制犹三十六日玄宗以来始服二十七日古者卿大夫从君而服羣臣当从皇帝二十七日而除其天下吏人三日释服自遵遗诏崔佑甫以为遗诏无朝臣庶人之别皆应三日释服相与力争袞奏佑甫率情变礼贬之

宋制臣为君服制有三等中书门下枢密院副尚书翰林学士节度使金吾上将军文武二品以上布梁冠直领大袖衫布裙袴腰经竹杖或布幞头襴衫布斜巾绢衬服文武五品以上并执事官监察御史以上内客省宣政昭宣知合门事殿前都知押班布梁冠直领大袖衫裙袴腰经或幞头襴衫自余文武百官布幞头襴衫腰经而已入局治事并不易服宰执奏事去杖小祥去冠余官奏事如之大祥素纱软脚折上巾黻公服白鞋锡带禫除毕去黻服常服仍黑带阜鞞鞞祔庙毕始纯吉服宗室出则常服居则衰麻以终制神宗崩大敛成服秘书正字范祖禹言先王制礼以君服同于父皆斩衰三年盖恐为人臣者不以父事其君此所以管乎人情也自汉以来不惟人臣而人君遂亦不为三年之丧惟国朝自祖宗以来外庭虽用易月之制而宫中实行三年之丧故十二日而小祥而期又小祥二十四日大祥再期而又大祥夫练祥不可以有二也既以日为之又以月为之此礼之无据者再期而大祥中月而禫禫者祭之名非服之色也今乃为之黻服三日然后禫此礼之不经者也既除服至葬而又服之盖不可以无服也祔庙而后即吉纁八月矣而遽纯吉无所不佩此又礼之无渐也易月之制因袭已久既不可追宜令羣臣朝服止如今日而未除衰至期而服之渐除其重者再期而又服之乃释衰其余则君服斯服可也至于禫不必为之服惟未纯吉以至于祥然后无所不佩则三年之制略如古矣诏礼官详议礼部尚书韩忠彦等议朝廷典礼时世异宜言者欲令羣臣服丧三年民闲禁乐如之虽过山陵不去衰服庶协古制缘先王恤典节文甚多必欲循古又非特如所言而已今既不能尽用则当循祖宗故事及先帝遗制诏从其议孝宗行三年丧令羣臣自行易月之令光宗居孝宗之忧赵汝愚当国始令羣臣服白凉衫阜带治事终制乃止熈宗居光宗之忧复令百官以日易月禫除毕服紫衫阜带治事从礼部侍郎陈宗召请诸路监司州军县镇长吏以下服布斜巾四脚直领布襴衫麻腰经朝晡临三日除之内外命妇当入临者布裙衫帔首经绢衬衫帕首士庶于本家素服三日而除

明太祖崩遗诏丧葬之仪一如汉文天下臣民令到出临三日皆释服仁宗崩礼部上丧礼仪注在京文武官闻丧素服乌纱帽黑角带自

明日始至三日旦俱诣思善门外哭退于本衙门宿歇不饮酒食肉第四日各俱斩衰至思善门外朝夕哭临三日又朝临七日各十五举声止凡在朝及衙门视事用布裹纱帽垂带素服腰经麻鞋退居即服孝服通前二十七日而除释服后仍终文皇帝服制

（臣）等谨案宋孝宗力行三年之丧布幘头布衫以终制可谓一正千古之失然当时宰相不学三日后便服朝服而孝宗谦让又不欲明谕臣下遂致君服于上臣除于下是有父子而无君臣也朱子云国家自祖宗以来三年通丧实行于内独所以为臣民之虑者未有折衷夫古礼为君方丧三年方者比也谓服如父母而分有亲疏则义至而情或不尽非必使天下之人寝苦枕块饮水食粥泣血三年俱同居父母之丧也独庶人军吏之贫者宜无责乎其全惟白纸冠去华饰其亦可也至婚嫁之事则分别贵贱亲疏以为隆杀之节一月之外许庶民三月之外许士吏复土之后许选人祔庙之后许承议郎以下小祥之后许朝请大夫以下大祥之后许中大夫以下各借吉三日大中大夫以上禫祭然后行吉礼官卑而差遣职事高者从高贬官者从旧迁官者从新则亦不悖于古庶乎可行矣

△皇太后长公主及三夫人以下为天子服

（臣）等谨案郑志标题皇太后长公主及三夫人以下为天子服杖今续纂宋事无用杖明文谨删杖字

宋太宗之丧有司定散发之礼皇帝皇后诸王公主县主诸王夫人六宫内人并左被发皇太后全被发其服皇太后皇后内外命妇布裙衫幘帕头首经绢衬服宫人无幘南宋大丧仪大行皇帝丧成服日皇后以下及贵妃内外命妇麤布盖头衫幘首经绢衬服六宫内人无幘白布盖头长衫裙首经绢衬服大行皇太后丧成服日服齐衰布盖头【余并同】内外命妇只帕头不用盖头【余并同】孝宗崩太皇太后有旨皇帝以疾在内成服太皇太后代皇帝行礼

明太祖崩礼部定议王妃郡主内使宫人俱斩衰三年

△挽歌

宋太宗山陵挽郎服白练宽衫练裙勒帛绢帟诏葬礼院例诸引披铎翼挽歌【按引者引车之缚也披者以纁为之系于轎车四柱在旁执之以备倾覆者也铎者以铜为之所以节挽歌者】三品以上四引四披六铎六翼挽歌六行三十六人四品二引二披四铎四翼挽歌四行十六人五品六品挽歌八人七品八品挽歌六人九品挽歌四人其持引披者皆布帟布深衣挽歌者白练帟白练禱衣皆执铎并鞮鞣又按

会要勋戚大臣薨卒多命诏葬遣中使监护官给其费凡凶仪皆有买道方相引魂车香
盖纸钱鹅毛影輿锦绣虚车大輿铭旌仪棺行幕各一
挽歌十六太祖干德六年中书令秦国公孟昶薨其母李氏继亡诏礼部官议定仪仗礼
制太常礼院言检详故事晋天福十三年葬故魏王周
广顺元年葬故枢密使杨邠侍卫使史宏肇三司使王章并用一品礼明器九十四輶车
一挽歌三十六人拂一熏一翼六輶车魂车仪棹车买
道车志石车各一方相氏鹅毛熏铭旌香輿影輿盖輿钱輿五谷輿酒醢衣物輿庖牲輿
各一黄白纸帐园宅象生什物行幕并志文挽歌词启
攒启奠祝文并请下有司修制太宗太平兴国七年命翰林学士李昉等复位士庶丧葬
制度昉等奏准后唐长兴二年诏五品六品常参官丧
輿舁者二十人挽歌八人明器三十事共置八床七品常参官舁者十六人挽歌六人明
器二十事置六床六品以下京官及检校试官等舁者
十二人挽歌四人明器十五事置五床并许设纱笼二庶人舁者八人明器十二事置两
床悉用香輿魂车从之

明丧葬之制墙翼公侯六三品以上四五品以上二明器公侯九十事一品二品八
十事三品四品七十事五品六十事六品七品三十事
八品九品二十事公侯四引六披左右各八铎一品二品三引四披左右各六铎三品四
品二引二披左右各四铎五品以下二引二披左右各
二铎

△季孝为举主服

（臣）等谨按郑志此条标题季孝为举将服盖自魏晋而降士人多由镇帅州将
所举故有举将之名唐宋以后辟署贡举由州郡主之
故宋史选举志有举主之名今仿宋志改举将为举主以通时变云

唐制为座主齐衰三月宋苏轼之服张方平也亦然李庭芝举进士中第孟珙辟置
幕中主管机宜文字珙卒遗表荐之庭芝感珙知己扶
其柩葬之兴国弃官归为珙行三年丧

△郡县吏为守令服

齐褚渊以司徒改授司空薨时司空掾属以渊未拜疑应为吏敬不王俭议依礼妇
在涂闻夫家丧改服而入今掾属虽未服勤而吏节稟
于天朝宜申礼敬司徒府史又以渊既解职而未恭后授府犹应上服以不俭又议依中
朝士孙德祖从乐陵迁为陈留未入境乐陵郡吏依见
君之服陈留迎吏依娶女有吉日齐衰吊司徒府宜依居官制服

魏石文德有行义真君初县令黄宣在任丧亡单贫无期亲文德祖父苗以家财殓
葬持丧三年奉养宣妻二十余载及亡又衰经敛祔率

礼无阙自苗至文德刺史守令卒官者制服送之

唐程贺为杜亚持衰三年

（臣）等谨案汉魏以来掾史为首令率制斩衰之服盖本古者臣为君服之礼也虽故吏犹准为旧君齐衰三月然古之诸侯世有其土世子其民其大夫士有纯臣之义故为之服斩而为天子仅總衰裳牡麻经既葬除之后世罢侯置守则虽郡县之掾史皆天子之臣耳而欲以迁除无常之守令仿古者分茅胙土之诸侯为之服斩既已不情况公卿为天子二十七日而除而故吏为守令乃齐衰三月不亦轻重倒置之甚乎唐宋以后此礼久废闲有行者要出一时至情本非经义所有而所服轻重又各从恩意厚薄为率皆不足为典要故略举齐魏唐三条以补郑志所未备余俱阙而勿论云

△师弟子相为服

唐王义方卒门人员半干何彦先行丧蒔松柏冢侧三年乃去

宋黄干受业朱熹熹卒干治心丧三年 【按濂洛关闽诸儒之门从游者遍海内其弟子为师自黄干服朱子而外史传罕记然胡文定答子宏书言心丧三年若子贡曾子之于仲尼近世吕与叔潘康仲之于张横渠则知当时固有弟子为师之服矣】 何基卒金履祥谓治丧之礼四方所观瞻乃考按礼制而为之议曰为师服者吊服加麻心丧三年古之制也布褌俗服也今之服總钩以上者用之生绢钩领之衫俗服也今之服總麻者亦用之服今總麻之服是不得同丧父无服之重也疑衰古士之吊服也其服亡矣白布深衣古庶人之吊服也其制今犹存焉然古之士今之官也今之士其未仕者古之庶人也宜用古庶人之服而以深衣为吊服昔朱子之服门人用细麻深衣而布缘矣然凡布皆麻古以三十升麻为麻冕之布以十五升为深衣之布深衣之麻自司马氏朱氏皆云用极细布则深衣布用苧代麻久矣其缘则孤子纯以素是丧父既除之服也孔门丧夫子若丧父而无服则以丧父服除之服为若丧父无服之服其纯用素可也其冠则庶人之吊素委貌失其制矣以白布代之而加素经于冠可也加麻之经總服之经也今用總麻而小可也加麻之带總服之带也今用细苧可也所谓疑衰拟于衰者也王柏乃与治丧者首遵用之而履祥因复考深衣之制为之外传柏歿履祥率门人制服如初乡人乃始知师弟子之义系于伦常之重如此

元韩择卒门人为服總麻者百余人顾德玉幼从盩国路儒学教授俞长孺学长孺无子访医吴中道卒于尸山德玉奉其尸敛于室衰经就位邦人士为德玉来吊者拜之越明年葬于海盐近顾氏之先莹岁时祭享惟仪或曰

敛于家礼欤曰吾闻师哭诸寝又曰生于我乎馆死于我乎殡非家敛之则将师尸委诸草莽有人心者勿为也曰师无服而为衰经固近于掠美矣曰疑衰加麻之侄带礼也故曰二三子经而出既葬除之心丧戚容终三年夫民生于三师居其一于父子也何异吾加一等以行之盖出于人心天理之本然若之何其惑也

明湛若水师陈献章献章歿若水心丧三年邹守益师事王守仁守仁歿守益行心丧之礼钱德洪问其师王守仁之丧与同门王畿议服制德洪以父母在麻衣布经弗敢加焉畿请服斩衰以从筑场庐墓三年而后去吕柟受学于行人孙昂歿为之服衰及柟卒高陵人为罢市三日四方学者闻讣皆设位持心丧

（臣）等谨按民生于三事之如一然为君为父斩衰三年而师则吊服加麻不在五服之内何也程子谓师不立服不可立也盖师之传授道德者成己之恩同于君父而浅业哲学之徒亦莫不谓之师焉至后世则又有纳丝粟质衣物以徼利者矣如此而概使之服斩则将不可胜服而情必不足以称文矣若制为轻服则于传授道德恩同君父者又嫌于贬而降之也故不为制服而使行心丧盖欲人自以其恩谊之久暂轻重斟酌以为之节焉故于恩谊之深者则虽不为服而心丧三年等于丧父其余亦各使随分自尽此先王之所以不制为师弟之服也

△朋友相为服

魏睦夸少与崔浩为莫逆交浩为司徒奏征为中郎辞疾不赴及浩歿夸为之素服受乡人吊唁经一时乃止马八龙闻友人尹灵哲在军丧亡即奔赴负尸而归以家财殡葬为制缙麻抚其孤遗恩如所生州郡表列诏表门闾【以上二事郑志未载今补辑】

唐杜审言少与李峤崔融苏味道为文章四友融之亡审言为服缙

宋朱子家礼为朋友缙麻三月语类云朋友麻则吊服而加麻经尔然不言日数至于祭奠则温公说闻亲戚之丧当为位哭之不当设祭以神灵不在此也又当以厚薄长少而为之节难以一定王柏朋友服议云咸淳戊辰腊月十有九夜承北山河先生之讣次早排闥往哭之既殓仆虽以深衣入哭隐之于心疑所服之未称也自我夫子之丧门人不立正服乃以义起若丧父而为心丧程子曰师不立服不可立也当以情之厚薄事之大小处之若颜闾之于孔子虽斩衰三年可也其成己之功与君父并其次各有浅深称其情而已仆于北山受教为甚深岂可自同于流俗因思仪礼丧服有朋友麻三字岂非朋友之服乎郑康成云朋友虽无亲有同道之恩相为服缙之经带又曰士以缙麻为丧服其

吊服则疑衰疑之为言拟也总麻之布十五升疑衰十四升即白麻深衣拟于吉服也盖总衰服之极轻者也他无服矣止有吊服所以拟之注

云吊服加麻其师与朋友同既葬除之疏云以白布深衣庶人之常服又尊卑未成服以前服之故庶人得为吊服素冠吉屨无紃其吊服图云

庶人吊服素委貌白布深衣士朋友相为服吊服加麻加麻者加总之经带是为疑衰仆于北山成服日服深衣加经带冠加丝武即素委貌覆

以白巾越数日通斋叶仲成父来吊仆问昔日毅斋之丧门人何服曰初遭丧时朋友以襴屨加布带其后其考仪礼至葬时方以深衣加经带

仆于是释然知其无戾于礼也故作朋友服议

钦定续通志卷一百十八

●钦定续通志卷一百十九 谥略上

谥略 【上】

（臣）等谨按谥以尊名名以征实陈列行事所以别尊卑彰美恶周公叙谥法考行以受名其作谥之制则掌之太师赐谥之典则掌之

太史小史乐记曰闻其谥知其行士冠礼曰生无爵死无谥明乎锡名之典非可幸邀者也考左氏内外传及史记本纪世家年表所载周末之

谥与立法之初已有互殊周初天子称天以谥诸侯以下赐谥其或不赐臣子不得私谥春秋以后诸侯之谥皆臣子为之非复天子所赐矣天

子之元子士也士无谥故世子亦无谥世子之有谥也自晋恭世子始也厥后陈有悼太子东周有共太子焉士之有谥也自鲁庄公之诛县贲

父始也厥后展禽谥惠黔娄谥康焉妇人无爵故无谥如卫夫人称庄姜郑夫人称武姜皆蒙夫谥以为谥也其王后之特谥者周有穆后夫人

之特谥者晋有穆嬴自鲁有声子成风卫有戴妫定姒齐有懿姬声姬则妃娣皆有谥矣夫制定于周而即变于周其始各致其尊奉之辞其继

遂开为变通之例驯至汉唐以降谥法日增赠谥之例日宽子孙门吏皆得饰行状以陈乞而考功太常三省诸臣不能无私爱憎复互举一端

之善恶以概平生于是定谥驳谥之文改谥夺谥追谥之请持论纷耘是非淆杂不可究诘矣郑樵作谥略定上中下三谥分言其用复为前后

诸论驳正前人着议之非具深考核臣等恭读御制咏谥法诗敬绎按语详引郑樵谥略之论所谓成周初无恶谥者许为其论甚正并指示史

记后附谥法解一篇乃张守节所录非司马迁手笔逸周书系迁所未见圣训煌煌剴切详至洵千古谥法之折衷昭然无遗蕴矣臣等续修谥

略寻流溯源考古者论谥之书今多不传逸周书谥法解虽属后儒附会之词然由来最久犹为谥书之祖故唐张守节录入史记正义之后其

文有增减盖据别本也次则蔡邕独断帝谥次则苏洵嘉佑谥法郑樵云洵承诏编定取周公春秋广谥沈约贺琛扈蒙之书断然有所去取则沈贺诸书既逸犹赖苏氏以存其概郑志止列谥文全删其义而于苏氏外增取之字甚多高识卓论足以资参考而备逸遗今以谥法解冠首逐条疏证其史记正义蔡邕独断嘉佑谥法次第编载广周书之所无志历代以来用谥之流变明王圻谥法考所载明代谥法亦附采录间有阙漏则以散见于史册者补之其自周迄明每代诏书及名臣谥议之有关典法者按代分编统厘为三卷庶几有可考见云

周书谥法解

史记正义增多谥

独断帝谥增多谥

○周书谥法解 【参考丛书秘书本及史记正义蔡邕独断校定】

（臣）等谨按周公谥法一书其始见于大戴记者今本已逸宋崇文总目晁公武郡斋读书志所载周公谥法春秋谥法今亦不存据晁氏引周公谥法序与周书同盖周书中摘出专行非别一本也罗泌路史云杜预取周书谥法纳之释例世遂重出之谓之春秋谥法则亦与周书为一本耳今以有周一代用谥考之周三十五传有显王鲁卫陈有慎公秦有宣公谥法解俱不载而所载百二十九言质诸左传集解正义及史记诸书凡王朝列国已用者祇五十余谥则是书在当时已不能尽用而流传日久舛误寔多郑樵以为多有附会之词今取史记正义蔡邕独断同异注于条下凡当时所用及后代所取并据史传辨证以志采用之始其郑志所削者亦仍存其原文而为之疏晰于下以资参考焉

维周公旦太公望开嗣王业攻于牧野之中终葬乃制谥遂叙谥法谥者行之迹也号者功之表也车服者位之章也是以大行受大名细行受细名行出于己名生于人

一人无名曰神 【史记正义曰民无能名】

书大禹谟受命于神宗明臣郑晓据以为尧谥遂疑谥法不始于周不知尧之称神宗犹舜典之文祖王肃注以为庙名非谥也前史谥神者自北魏神元皇帝始

称善赋简曰圣敬宾原礼曰圣 【称善史记正义作扬善】

史记索隐引世本有卫圣公驰为慎公之子然史记卫世家作声公训则称圣公者音之讹也北史魏神元皇帝追谥考曰圣武皇帝盖前史谥圣者亦自北魏始

德象天地曰帝

靖民则法曰皇

仁义所在曰王 【史记正义作仁义所往考孔晁逸周书注云民从之也盖释往字之义则晋时本固与史记同】

立制及众曰公 【史记正义作立志及众考孔晁注云志无私也则晋时周书本亦作志】

执应八方曰侯

以上五言苏洵谥法及郑志皆不取夫帝王尊号之不可为谥苏郑论之详矣此五言疑是后人窜入但其书既古不可以意增删今悉仍其旧以存疑

一德不解曰简平易不疵曰简 【史记正义作平易不訾独断止一德不懈曰简】

周二十二世简王为谥简之始

经纬天地曰文道德博厚曰文学勤好问曰文慈惠爱民曰文愍民惠礼曰文锡民爵位曰文 【道德博厚史记正义作道德博闻考孔晁注云无不知则作博闻者为正学勤好问明王圻谥法考所载周谥法作勤学苏洵诸家并同则作勤学者为正独断止经纬天地曰文】

经纬天地周文公是也勤学好问卫孔文子是也慈惠爱民汉孝文帝是也锡民爵位卫公叔文子是也陆德明左传释文于鲁文公下引谥法忠信接礼曰文今谥法无此语当即是愍民惠礼之讹陆据异本故也

刚强直理曰武威强馭德曰武克定祸乱曰武刑民克服曰武大志多穷曰武 【威馭德史记正义作威强敌德注与有德者敌大志

多穷史记正义作夸志多穷苏洵亦从史记独断止克定祸乱曰武】

大志多穷孔晁注曰大志行兵多所穷极盖亦是美谥威馭德应劭以为汉武之谥

敬事供上曰恭尊贤贵义曰恭尊贤敬让曰恭执事坚固曰恭安民长悌曰恭执礼敬宾曰恭既过能改曰恭庇亲之阙曰恭尊长让善曰

恭渊源流通曰恭 【史记正义别作渊源流通曰康安民长悌作爱民长弟尊长让善作尊贤让善执礼敬宾作执礼御宾考孔晁注云迎待宾也则敬当作御读若迓既过能改独断作知过能改】

既过能改楚恭王是也庇亲之阙周恭王晋恭世子是也左传楚恭王卒子囊谋谥曰赫赫楚国而君临之抚有蛮夷奄征南海以属诸夏而知其过可不谓共乎国语晋语人谓申生曰非子之罪何不可去乎申生曰不可去而罪释必归于君是恶君之章父之恶而笑诸侯吾谁乡而入是以谥为共君又鲁语闵马父曰周恭王能庇昭穆之阙而为恭楚恭王能知其过而为恭韦昭注云恭王周昭王之孙穆王之子也昭王

南征而不反穆王欲肆其心皆有阙失恭王能庇覆之故谥为恭恭或作共者古共与恭通

照临四方曰明潜诉不行曰明 【史记正义增多思虑果远曰明句明字误说见后独断作保民耆艾曰明】

照临四方汉孝明帝是也明之谥自此始若潜诉不行曰明盖因孔子答子张之语而附会之疑非周公之旧周时亦无用此谥者

威仪悉备曰钦

唐明宗谥圣德和武钦孝皇帝为谥钦之始

大虑静民曰定安民大虑曰定安民法古曰定纯行不爽曰定 【大虑静民独断静作慈纯行不爽周书原本作纯行不二孔晁注云行台不伤壹乃纯字之训伤乃爽字之训是晋时本原作不爽传写讹为二耳今据史记正义改作爽】

安民大虑鲁定公是也纯行不爽鲁定姒是也

谋虑不威曰德 【史记正义增多绥柔士民曰德句谋虑不威作谏诤不威考孔晁注云不以威相拒也则作谏诤者为正史记又增多执义扬善曰德句德字系怀字之讹见怀字条注】

周僖王时秦有德公为谥德之始

辟土有德曰襄甲冑有劳曰襄 【独断止辟土有德曰襄】

陆德明左传音义于鲁襄公下释云谥法因事有功曰襄辟土有德曰襄今谥法无因事有功句应即是甲冑有劳之互异陆亦据异本故也苏洵则兼取甲冑有劳因事有功二义

有伐而还曰厘质渊受谏曰厘 【史记正义作有伐而还曰厘增多小心畏忌曰僖句独断止小心畏忌曰僖无厘字谥】

僖与厘两字古或通用故春秋齐僖公鲁僖公史记并作厘遂至二谥莫可别白然左传音义及注疏于鲁僖公下皆引小心畏忌句则是借厘为僖非借僖为厘矣

博闻多能曰献聪明睿哲曰献惠无内德曰献 【聪明睿哲独断哲作智今本周书于篇末错出惠而内德曰献句孔晁法云无内德惠不成也则句中而字乃无字之误今改正类纪于此苏洵作向忠内德明谥法作向惠内德盖皆因仍此义传写讹也史记正义增多智质有圣曰献句惠无内德曰献作惠无内德为平】

鲁八世献公为谥献之始

温柔圣善曰懿 【独断同史记正义圣善作贤善】

五宗安之曰孝慈惠爱亲曰孝协时肇享曰孝秉德不回曰孝大虑行节曰孝 【慈

惠爱亲曰孝独断及史记正义文周书原本作慈惠

爱亲曰厘然绎其义是释孝字非释厘字且苏洵诸家并作孝知旧本如是今据史记独断改正】

陈四世孝公突为谥孝之始

执心克庄曰齐辅轻供就曰齐 【注轻有所辅而供成也史记正义作资辅就共注资辅佐而共成考史记正义所引孔晁注亦与今本周书异然绎齐谥之义则史记得之】

左传鲁襄公二年葬我小君齐姜注引执心克庄曰齐盖谥齐之始见史记者

温年好乐曰康安乐抚民曰康令民安乐曰康 【史记正义增多渊源流通曰康句温年好乐作温柔好乐然孔晁注云好丰年勤民事则晋时本固作温年盖谓温饱之年也独断止安乐治民曰康】

安民立政曰成

布德执义曰穆中清见貌曰穆 【独断止布德执义曰穆】

上三言皆周初王谥后世习用之

敏以敬慎曰顷甄心动惧曰顷 【今本逸周书无甄心动惧句第一百四十三条为丑心动惧曰甄考谥法无用甄者盖即甄心动惧曰顷之讹也今据史记正义改正类纪于此】

此谥郑志所削考史记周十九传为顷王列国谥顷者春秋以前有卫顷侯燕顷侯春秋有齐顷公无野晋顷公去疾七国时有楚顷襄王鲁顷公周之谥顷者甚多自不宜削也

容仪恭美曰昭昭德有劳曰昭圣文周达曰昭 【圣文周达史记正义文作闻独断作声闻宣达】

容仪恭美鲁昭公是也圣文周达汉昭帝是也

保民耆艾曰胡弥年寿考曰胡

史记陈有胡公满其子为申公孙为相公申与相不列谥法则疑胡之非谥不为无因然齐有胡公静次哀公不辰后哀既为谥胡亦是谥矣汉阳信侯吕清怀昌侯刘延年晋都亭侯华谭梁之王汾吉士瞻皆用胡谥樵谓特胡者之称是其疑古之过也

强毅果敢曰刚追补前过曰刚 【史记正义无强毅果敢曰刚】

以上二谥亦郑志所削周时无谥刚者汉初功臣表有棘蒲刚侯陈武复阳刚侯陈胥都昌刚侯朱率卒于孝文八年胥于十一年武于后元年则谥刚者自朱率始

柔德考众曰静恭己鲜言曰静宽乐令终曰静 【史记正义作柔德安众独断作柔德好众曰靖】

古静与靖通故谥作靖者皆即静字 【晋六世靖侯宜臼三十七世静公俱酒盖先后同谥而字异】 又与靓通周慎靓王即慎靖王也
又或作净秦文公赐太子谥为净公

治而清省曰平执事有制曰平布纲治纪曰平 【周书后文又错出治而生眚为平句盖复衍首句而互异史记正义作治而无眚曰平
苏洵诸家并同考孔晁注云无失阙之病也则作无眚为正正义后文又错出惠无内德为平句平字周书作献互见献字条注独断止布纲治
纪曰平】

周十三世为平王于是陈有平公燮至简王时宋有平公成灵王时晋有平公彪景王时有杞平公郁厘蔡平公庐楚平王居曹平公须及
燕平公敬王时有齐平公懿战国时有卫平侯鲁平公则平谥周所习用郑志以为义不专而削之非是

由义而济曰景布义行刚曰景 【史记正义增多耆意大虑曰景句注耆强也独断作致志大图曰景】

晋二十六世景公孺 【史记作据】 为谥景之始

清白守节曰贞大虑克就曰贞不隐无屈曰贞 【清白守节独断作清白自守屈周书原作克考孔晁注云坦然无私也则作屈为是今
据史记正义改正】

卫康叔六传为贞伯此谥贞之始杜佑通典诸侯卿大夫谥议引卫公叔文子之谥贞注云外内用情曰贞今周书无此文

强以刚果曰威猛以强果曰威强毅信正曰威 【强以刚果史记正义作猛以刚果强毅信正作强毅执正】

凡桓谥或作威因后人避讳改也若周威烈王及桓公之子威公齐威王娶齐楚威王商则是其本谥非因讳故

辟土服远曰桓 【史记正义增多克敬动民曰桓辟土兼国曰桓二义独断止辟土兼国曰桓】

郑始封桓公友为谥桓之始

道德纯一曰思不眚兆民曰思外内思索曰思追悔前过曰思 【不眚兆民史记正义作大省兆民孔晁注云大亲民而不杀苏洵诸家
并从史记】

周三十世为思王汉有两刘苍并谥思一赵王彭祖子阴城侯一长沙王发子安成侯而后汉又有安成思侯则章帝后父窦勋也

柔质受谏曰惠 【史记正义作柔质受谏曰慧增多柔质慈民曰惠爱民好与曰惠二义独断止爱民好与曰惠】

周十七世为惠王秦有两惠公一夷公之子一简公之子燕亦有两惠公一召康公九世孙一懿公之子而东周公巩巩之父杰则父子同
谥惠公

能思辨众曰元行义说民曰元始建国都曰元主义行德曰元 【独断作仁义说民曰元】

周二十七世为元王春秋时宋有元公佐许有元公成战国时蔡有元侯鲁有元公嘉卫有元君

兵甲亟作曰庄叡通克服曰庄死于原野曰庄屡征杀伐曰庄武而不遂曰庄 【史记正义增多胜敌志强曰庄句叡通克服作叡圉克服注通边圉使能服独断作好勇致力曰庄】

陆德明释文于鲁庄公下引谥法胜敌克乱曰庄盖据春秋谥法故与周书互异汉书表庄作严避明帝讳改也梁侍中韦叡于普通三年谥严梁人不必避汉讳由其袭用之讹遂别出严谥

克杀秉正曰夷安心好静曰夷 【正史记正义作政注云秉政不任贤似政字是】

周九世为夷王至厉王时卿士有荣夷公列侯有曹夷伯喜共和时有蔡夷侯幽王时有陈夷公说春秋时秦哀公太子亦谥夷公考孔颖达春秋疏于夷王引谥法安民好静曰夷盖据春秋谥法故与周书互异

执义扬善曰怀慈义短折曰怀 【史记正义作执义汤善曰德据独断亦以此为怀谥今绎其义则作德者误慈义史记作慈仁】

春秋时晋有怀公圉陈有怀公柳战国时楚有怀王槐卫有怀公亶及嗣君子怀君夙夜警戒曰敬夙夜恭事曰敬象方益平曰敬合善法典曰敬 【夙夜警戒独断作夙兴夜寝史记正义无夙夜恭事曰敬象方益平曰敬二句法典史记作典法】

周惠王时齐有管敬仲夷吾高敬仲奚田敬仲完盖谥敬之始见史传者

述善不克曰丁述义不悌曰丁 【史记正义作述义不克无述义不悌曰丁句】

丁许慎说文作玎考丁之为谥说者引齐侯伋宋公申以车之然齐丁公之子为乙公孙为癸公丁乙癸皆于名则伋称丁公者以干纪号耳宋开国至丁公申四世矣微子启启弟衍衍子稽皆未尝有谥安见丁公之独为谥况以干纪号固殷法也宋殷之后又何怪其循用殷法乎史记谥丁者盖自北魏穆崇始其后贾彦浩孙彦潜并用此谥郑志创之亦非阙疑之义魏书引作述义不克与史记同与今本异

有功安民曰烈秉德遵业曰烈 【遵史记正义作尊】

晋三十五世烈公止为谥烈之始

刚克为伐曰翼翼思虑深远曰翼

后汉关内侯阴兴建初五年追谥翼此谥翼之始见史传者

刚德克就曰肃执心决断曰肃

赵五世肃侯语为谥肃之始

爱民好治曰戴典礼不塞曰戴 【史记正义作典礼不愆】

曹八世戴侯鲜为谥戴之始

死而志成曰灵乱而不损曰灵极知鬼神事曰灵不勤成名曰灵死见思能曰灵好祭鬼神曰灵 【史记正义作极知鬼神死见神能好祭

鬼怪独断止乱而不损曰灵】

周灵王为谥灵之始

短折不成曰殇未家短折曰殇 【独断止短折不成曰殇】

晋穆侯弟殇叔为谥殇之始

不显尸国曰隐隐拂不成曰隐 【史记正义增多见美坚长曰隐句独断作违拂不成曰隐陆德明释文作不尸其位曰隐】

隐古与偃同用故徐隐王亦称徐偃王

年中早夭曰悼肆行劳祀曰悼恐惧从处曰悼 【年中早夭独断作中身早折恐惧从处一本作徙处】

卫宁喜称悼子此谥悼之始见于春秋者

不思忘爱曰刺愆很遂过曰刺 【过史记正义作祸盖传写讹】

汉燕王刘旦长沙王刘建德利昌侯刘殷当涂侯魏杨宣城侯燕安汜乡侯何武平阿侯王仁宋晋平王刘休佑后周卫王宇文直毕王宇文贤唐巢王元吉中书侍郎高璩并谥刺考璩传太常博士曹璞建言璩为相交游丑杂谥法不思忘爱曰刺请谥为刺盖与周书作忘爱者互异然孔晁注云忘其爱己者则作忘爱为正

外内从乱曰荒好乐怠政曰荒 【史记正义增多凶年无谷曰荒句周书别作凶年无谷曰糠见后】

汉城阳王刘顺梁王刘喜朝阳侯刘圣什邡侯雍巨鹿舞阳侯樊市人建平侯杜业红阳侯王立宋散骑常侍颜师伯侍中何勣唐归义侯突厥颉利并谥荒

在国逢难曰愍在国连忧曰愍祸乱方作曰愍使民折伤曰愍 【史记正义难作躄连作遭折作悲独断止在国逢难曰愍】

古愍与闵通故凡春秋时之谥闵者皆即愍也又与愍通史记宋闵公鲁闵公皆作愍三字实一义又南宋以后兼用悯字宋张廷坚绍兴时追谥节悯辽托卜嘉道宗时谥贞悯

早孤短折曰哀恭仁短折曰哀 【恭仁独断作恭人】

蚤孤有位曰幽壅遏不通曰幽动祭乱常曰幽 【独断止壅遏不通曰幽】

克威捷行曰魏克威惠礼曰魏

鲁有魏公考史记与汉书古今人表皆作魏律历志作微古微音徽徽魏音近故也
汉潞阴侯昆邪子苏亦谥魏

去礼远众曰炀 【独断同史记正义作去礼远正增多好内远礼曰炀句据孔晁注
云内好朋淫外则荒政似非去礼远众之义检苏洵
谥法于炀谥下列好内怠政一条与注意合则周书旧有此文今本讹脱】

周穆王时鲁有炀公懿王时宋有炀公并名熙汉有魏其炀侯刘昌史表作畅侯谥
法无畅盖史误也

容仪恭美曰胜 【史记正义胜作昭】

汉书表河陵郭客谥胜胜谥仅一见

威德刚武曰圉

汉高陵侯王虞人高后三年谥圉此谥圉之始考王虞人以前有强侯留胙高祖十
一年谥圉但圉史表作简恐或误

圣善周闻曰宣施而不成曰宣 【施而不成曰宣句今本周书及史记正义皆错出
篇末今类纪于此圣善周闻独断周作同陆德明释
文于鲁宣公下引谥法作善问周达曰宣】

治民克尽曰使

行见中外曰悫

上二谥郑志所削使谥无考明武进伯朱冕谥忠悫

胜敌壮志曰勇 【史记正义无】

此谥至唐乃用之盖自高祖时谥绛州总管罗士信始

昭功寔民曰南

状古述今曰誉

商誉二谥亦郑志所削

心能制义曰度

上三谥前史亦无用之者宋有度宗乃庙号非谥也考心能制义曰度及篇中所列
照临四方曰明勤施无私曰类教诲不倦曰长慈和徧
服曰顺择善而从曰比数条皆昭公二十八年左传文周公之书不宜反引左氏之说当
是后人所窜入者崇文总目云学者录之托以名篇盖
亦因此类而致疑耳

好和不争曰安

后汉书安帝纪注应劭引谥法宽容和平曰安今周书无此文

外内贞复曰白

晋陶宏景谥贞白先生

不生其国曰声 【独断同】

鲁声伯之母不聘因谥为声然曹有声公野郑有声公胜蔡有声侯产楚有声王当卫有声公训列国大夫谥声者尤多岂尽不生其国者
意声谥或兼声闻之义而周书流传日久不无阙漏乃仅传不生其国一义其义亦太专矣

杀戮无辜曰厉 【独断作暴虐无亲曰厉】

周恭王时晋蔡皆有厉侯此谥厉之始

官人应实曰知

古智字作知金辽王杲谥智烈舒穆噜阿里父和垣谥智敏元孟苏色谥智敏盖用此谥

凶年无谷曰糠 【史记正义无此文别作凶年无谷曰荒】

汉被阳侯刘偃安阳侯刘延年皋虞侯刘定并谥糠

名实不爽曰质

汉棘阳侯杜但于元光四年谥质盖前史谥质者自但始后汉书质帝纪注应劭引谥法忠正无邪曰质今周书无此文

不悔前过曰戾

汉戾太子始谥戾

温良好乐曰良

唐皇甫无逸长孙敞并于太宗时谥良盖此谥至唐始见之

怙威肆行曰丑

魏吴质初谥丑侯后改谥威侯晋何曾北魏于中亦尝议谥丑而卒从美谥蒙此谥而不改者唐白敏中也郑志下谥六十五缪丑二言皆不载

勤政无私曰类 【史记正义作施勤无私左传作勤施无私】

曲台奏议五代鄂州刺史刘敬文谥类

好变动民曰躁

周元王时秦有躁公谥躁之始见前史者汉有阳都趣侯丁宁又有东昌趣侯刘成颜师古注曰趣古躁字也

慈和徧服曰顺 【独断作慈仁和民曰顺】

后汉孝顺帝始谥顺

满志多穷曰惑

后周有陈惑王宇文纯

危身奉上曰忠

汉辉渠侯仆明始谥忠

思虑深远曰□ 【曰字下各本周书俱阙史记正义作思虑果远曰明注云自任多近于专与周书同玩注义似别释一字系不美之谥非释明字知史记明字亦误明王圻谥法考载有思虑深远曰捍句与注意稍近但史传无用捍谥者今仍阙之以传疑】

怠政外交曰携 【今本周书作息政外交曰推史记正义无此文独断息作怠推作携明王圻谥法考所载亦同考古谥携者为周幽王次子伯服汉容成侯徐卢梁邵陵王萧纶推谥不见史册为传写之误无疑今改正】

疏远继位曰绍

汉有汲绍侯公上不害金有卫绍王永济

彰义掩过曰坚

汉有临辕坚侯戚鳃孝惠五年谥坚盖前史谥坚者自鳃始

肇敏行成曰直

汉王根谥直道让公

内外宾服曰正

后汉有节卿正侯赵熹为谥正之始

华言无实曰夸

教诲不倦曰长

上二谥前史无考长谥郑志所不载

爱民在刑曰克

汉有隆虑克侯周灶史表作哀侯北魏慕容熙刘社生并于熙平时谥克

嗇于施与曰爱

汉成安侯郭迁元康三年谥爱盖前史谥爱者自迁始

逆天虐民曰抗 【抗一作炀】

抗谥前史无考郑志作亢

好廉自克曰节

汉闾氏侯冯解散高祖十二年谥节盖前史谥节者自解散始

择善而从曰比

比谥前史无考

好更改旧曰易

此谥郑志亦不载周显王时燕有易王盖谥易之始见者

名与实爽曰缪 【独断作名实过爽曰缪】

古缪与穆通故史记曹缪公燕缪侯秦缪公鲁缪公凡作缪者皆本谥穆至唐谥封伦裴延龄为缪乃取名与实爽之义

思虑不爽曰愿

古字愿原同故此谥周书作愿苏洵谥法作原汉王子侯表剧侯错山侯国柴侯代修市侯寅景成侯雍枣侯山皆谥原箕侯文谥愿颜师古曰愿音愿又音原盖汉时两字通用

贞心大度曰匡 【独断同】

周有匡王

（臣）等谨按宋晁公武称周公谥义一百九十余条今逸周书自一人无名曰神至贞心大度曰匡祇百八十余条而唐张守节所录以冠于史记者计百九十四条适符晁氏所称之数盖今本残缺非唐宋之旧矣篇末隐哀也以下多因上文而申释之虽间有增出之文然释训而不条其义故晁氏不并数之谥义之内今既以张守节所录及蔡邕独断核其异同于条下俾资参订其篇末释训亦仍据史册疏证以备考云

隐哀也 【史记正义增多景武也句】

施德为文

除恶为武

辟地为襄

服远为桓 【一作视远为桓误】

刚克为发 【史记正义作刚克为僖无柔克为懿履亡为庄有过为僖三句】

发谥郑志不载前史亦无考

柔克为懿

履亡为庄 【履亡疑当作履正】

有过为僖余皆象也 【原本有过为僖下有施而不成曰宣惠无内德曰献今改入上文宣献谥义条内复出治而无眚为平乱而不损为灵由义而济为景今删】

（臣）等谨按隐哀也至此自刚克为发外皆申释上文和会也以下又多因上谥义之文而转释之

和会也

后汉孝和帝始谥和自此至末三十一言郑志取以为谥者曰和勤睿考周敏然周谥前史无考

勤劳也

汉宗室泗水王综永光三年谥勤盖谥勤之始唐赠广州都督谢方叔谥曰勤考通典载唐赠谥有五窦抗谥曰博宇文士及谥曰纵杨昉谥曰恪于匡济谥曰果方叔谥曰勤云此五谥谥法并无出于有司一时之议不知汉时

已有谥勤者杜佑未之考耳

遵循也 【史记正义作尊修也】

爽伤也

肇始也

又治也 【史记正义无】

康安也 【史记正义无】

申释康谥

怙恃也

享祀也

胡大也

申释胡谥

服败也

康顺也 【史记正义康作秉】

据上文有秉德不回曰孝句孔晁注云顺于德而不违疑史记作秉者为正就会也

■ 〈卜寒〉过也

据上文有典礼不塞曰戴句孔晁注云无过考塞字无训过者疑本作不■ 〈卜寒

〉后讹为塞也

锡与也

典常也

肆放也

糠虚也 【史记正义作康尔雅作糠虚也】

考小雅酌彼康爵郑笺康空也则史记作康亦通然此申释上文糠谥之义当作糠叡圣也

叡字郑志作睿唐代宗谥睿文孝武皇帝盖谥睿之始见前史者睿宗则庙号也

惠爱也

申释惠谥

绥安也

坚长也

申释坚谥

耆强也

考成也

周昭王时鲁有考公盖谥考之始

周至也

怀思也

申释怀溢

式法也 【史记正义式作武】

汉有土军式侯宣义乐成式侯丁吾客宗室济北式王胡史表并作武与汉书异

敏疾也 【史记正义增多速也二字】

梁宗室建安侯正溢敏盖史传溢敏者自正始

捷克也 【史记正义无】

卫有■〈广外走内〉伯史记音义■〈广外走内〉音捷古■〈广外走内〉捷
二字通

载事也

弥久也

○史记正义增多溢

（臣）等谨按张守节史记正义所录周书溢法大致与周书同字义亦互有增损
其一溢数义先后错出固不如周书编次之有纪然其
文字之异如道德博闻曰文威强敌德曰武与孔晁注合小心畏忌曰僖与左传音义合
慈惠爱亲曰孝与蔡邕独断合其余类此尚多则其字
之讹误较周书为少固溢法之善本也考其义一百九十四条错出后文者二条增多于
周书十条其溢字一百有一无周书胜勇糠携愿五溢
增多君僖祁慧莫宪厚汤八溢内僖祁慧宪等溢皆历代常用则固非张守节臆增矣今
既以其与周书互异者注于各条之

下复取其增多之字逐条标列以补周书之阙焉赏庆刑威曰君从之成羣曰君
君字亦尊号不可为溢疑后人窜入

小心畏忌曰僖 【僖与厘通用见前厘字注】

怡典不杀曰祁 【独断祁或作震】

卫有石祁子楚文王舅为邓祁侯陈广州刺史沈君高亦溢祁

柔质受谏曰慧 【周书慧作惠】

北魏北平王元懋溢贞慧

德正应和曰莫

博闻多能曰宪 【周书宪作献】

汉临乐侯刘建始溢宪

思虑不爽曰厚 【周书厚作愿】

厚溢无考似愿字之讹然苏氏郑氏二溢俱收知周书旧有此溢传写讹脱致两字
同一义耳

除残去虐曰汤

以名为谥盖汉世相传有此说亦如帝王王公之以尊号为谥耳罗泌谓汤谥杜预所增未然

景武也

申释景谥但景无武义恐误

布施也

亦因上谥义之文而转释之

○独断帝谥增多谥

（臣）等谨按周书及史记正义谥法百有余言言每兼数义独断止四十六言言各止一义其阙轶不全无疑然其名为帝谥帝谥者帝者之所取用非下此通用之谥可得而列晁公武序沈约贺琛谥法云沈约撰七百九十四条贺琛加妇人谥二百三十八条妇人既与丈夫异谥则臣下亦不得与天子同谥矣观其于文取经纬天地而不及勤学好问锡民爵位于武取克定祸乱而不及刚强直理刑民克服盖举其大而置其小固非天子莫能当之也其传本之善如慈惠爱亲曰孝怠政外交曰携俱可借以订周书之讹至其以黄尧舜等古帝王名为谥则固旧有此说非邕臆勑邕特未之削耳今亦循史记正义之例将增多字逐一标列加案辨证

靖民则法曰黄

翼善传圣曰尧

仁圣盛明曰舜

残人多垒曰桀

残义损善曰纣

（臣）等谨按以黄尧舜禹汤等字为谥出于汉初诸儒傅会后遂转相师述马融注尚书裴驷解史记皆祖之张守节录周书全篇犹窜入汤字一谥苏洵编定六家舍黄字而取尧舜禹汤桀纣则相传既久不以为非惟郑氏力辨谥法之起于周以尧舜禹汤桀纣为生名非死谥证以尚书咨女舜格女禹之文诚为确见今以其相沿已久姑附录于此云

钦定续通志卷一百十九

●钦定续通志卷一百二十 谥略中

谥略 【中】

宋苏洵嘉佑谥法增多谥

苏洵嘉佑谥法新义

郑樵谥略增多谥

明通用谥法增多谥

○宋苏洵嘉佑谥法增多谥

（臣）等谨按谥法之书自周书独断而后见于隋唐宋志及晁公武郡斋读书志者有刘熙谥法三卷沈约谥法十卷贺琛谥法五卷王彦威续古今谥法十四卷李涪谥法三卷范正周沅编六家谥法二十卷苏洵嘉佑谥法三卷皇佑谥录二十卷刘熙之书久佚今不可考沈约贺琛之书罗沁以为皆本于广谥晁公武谓沈约撰七百九十四条贺琛加妇人谥二百三十八条意其时去汉未远师承有自王彦威以下转相祖述必有可观惜其书今皆不存惟苏洵嘉佑谥法三卷见于本集其皇佑谥录亦缺如矣考洵于嘉佑六年与姚辟等承诏编定周公春秋广谥沈约贺琛扈蒙六家谥法八年上之意有所未尽乃又讲求六家外采今文尚书汲冢师春蔡邕独断诸书考其得失别为嘉佑谥法三卷谥录三十五卷【宋史志二十卷应是南宋亡失】曾巩谓其谥法藏于有司宗孟谓世不得传中秘独有之则书虽一人所为实一代之经制也今观其书于谥义多所增改如圣不可知曰神取之孟子穷理尽性曰圣取诸易系辞大而难名曰尧取诸论语仁圣盛明曰舜取之小戴记见于自注者甚明至其所列谥字删去周书帝皇王公侯德殇甄胜恣誉度知糠丑惑推长缪等十九谥史记君僖慧抗四谥独断黄字一谥增多贤禹章强以下七十谥郑樵云洵承诏编定六家谥法断然有所去取又云苏氏所取者百六十八谥所去者百九十八谥则其谥实一取于古无有臆朐足备汉魏以来之轶典爰取其增多字逐一标列仍以历代经用者附证如左

行义合道曰贤

宋太祖女魏国大长公主谥贤肃鲁国大长公主谥贤靖盖贤谥自宋始用之

渊原通流曰禹受禅成功曰禹

于尧舜外增多禹盖亦旧儒附会相传已久者

法度明大曰章敬慎高亢曰章出言有文曰章

后汉孝章帝始谥章本纪注引谥法温克令仪曰章应是沈贺诸家相传有此义苏洵删

和而不流曰强中立不倚曰强守道不变曰强死不迁情曰强自胜其心曰强

梁光禄大夫江革谥强

致果杀敌曰毅强而能断曰毅

梁尚书左丞江子四元帝时谥毅盖谥毅之始见史传者

胜敌克乱曰壮武而不遂曰壮

史表有广严壮侯召欧博阳壮侯陈凖并于高祖六年十二月甲申受封侯此前史

谥壮之始

好力致勇曰果

汉更始将军廉丹始谥果后周谥襄国公李端唐谥定州刺史于匡济亦用此

肇敏行成曰真不隐无屏曰真

唐睿宗谥大圣真皇帝考史记鲁世家有真公潏索隐曰真音慎本亦作慎则鲁公潏本谥慎传写误真也

思虑不爽曰原

周书作思虑不爽曰愿愿与原古通本书既改周书愿作原而又以弱无立志训愿则分为两谥矣未知何据

综善典法曰曷

行见中外曰显

周三十五传为显王疑是周公谥法所有周书失去者

含和无欲曰元

唐天宝十三载加睿宗谥为元真大圣大兴孝皇帝

德覆万物曰高

汉太祖谥高

功格上下曰光能绍前业曰光居上能谦曰光

后汉世祖皇帝谥光武章怀太子注引谥法曰能绍前业曰光唐上元元年追谥懿祖曰光皇帝

则天法尧曰大

三国吴孙权谥大皇帝

出类拔萃曰英

宋太宗女魏国大长公主谥英惠

多闻强识曰博

唐左武侯大将军窦抗本传谥密通典作谥博又秘书少监萧德言谥博

可以作圣曰睿

唐代宗沈皇后谥睿真穆宗谥睿圣

承命不迁曰世

治典不杀曰军

意深虑远曰赶

蓄义丰功曰仁慈民爱物曰仁克己复礼曰仁贵贤亲亲曰仁

敏事以敬曰慎沈静寡言曰慎

周有慎靓王鲁卫陈皆有慎公

奉义顺则曰礼恭俭庄敬曰礼

制事合宜曰义见利能终曰义除去天地之害曰义先君后己曰义取而不贪曰义
后汉光武帝姊新野长公主建武三年追谥节义盖谥义之始见史传者

守命共时曰信出言可复曰信

汉海阳齐信侯摇母余昌武靖信侯单宁并高祖六年受封盖谥信之始见前史者
武帝时塞侯直不疑亦谥信

质直而好义曰达疏通中理曰达

隋岐州刺史郑译开皇十一年谥达盖谥达之始见史传者

含光得众曰宽

梁宗室广信侯萧瑛谥宽

才理审谛曰理

梁浚阳太守到洽谥理后周骠骑大将军合阳伯辩寔亦谥理盖理谥始用于南北
朝时

中心乐易曰凯

后梁萧警中书监安丰公蔡大宝谥文凯

避远不义曰清

北魏骠骑大将军刁双兴和三年谥清穆盖谥清之始见史传者

迁善改过曰益取于人以为善曰益

德性温恭曰基

后周广成郡公段永天和四年谥基

视民如子曰慈

宋宗室高密郡王赵德恭明道中谥慈哲

追改前过曰鼎

秉心塞渊曰深

德性宽和曰温

梁鸿胪卿顾协侍中王训陈广德侯章景明尚书右仆射王劼唐绛州刺史孔祜并
谥温

推功尚善曰让

唐睿宗长子宁王宪谥让皇帝考王莽谥王根为直道让公则谥让者始于莽之伪
谥矣

追补前过曰密

北魏孝明杜皇后始谥密乐陵王元思誉唐左武侯大将军窦抗皖城郡公张俭并
谥密

执一不迁曰介

宋右正言陈禾谥文介知邓州刘汲知麟州杨震父宗闵谥忠介介本美谥而郑志

列之下谥之十九言谓将用之小人抑何诬也

中正精粹曰纯

宋忠州团练使赵仲恕谥纯熙程子于嘉定十三年谥纯

行见中外曰敌

达礼不达乐曰素

宋张举谥正素先生

卑而不可踰曰谦

宋刘虞谥谦静先生

睦于兄弟曰友

众方益平曰傲

元江西省参政全布延萨里 【旧作普庵撒里今改正】 死于陈友谅谥傲哀

追补前过曰摄

美化及远曰广所闻能行曰广

唐太宗增谥文武大圣大广孝皇帝

言行不回曰淑

元定宗乌拉海额实 【旧作海迷失今改正】 后谥钦淑

献敏成行曰革

思愆深远曰惧

谋虑不成曰息

汉虚水侯刘爵五凤四年谥息

举事而迟曰舒

北齐河南王高孝愉谥康舒 【或作康献】

幼少短折曰冲

后汉孝冲皇帝纪注引谥法曰幼少在位曰冲晋有东海冲侯司马祗宋有临庆冲王刘休倩

质胜其文曰野敬不中礼曰野

后周宗室越王宇文盛大象二年为隋文帝所害谥野

菲薄废礼曰俭

刚克好胜曰伐

凉德薄礼曰虚

宠禄光大曰荣先利后义曰荣

宋宗室豫章王赵宗谔谥荣孝定王赵元良谥荣易吴王赵颢谥荣怀王赵宗暉谥荣穆此外谥荣者甚多盖宋代习用

好内远礼曰荡好智不好学曰荡狂而无据曰荡

后周晋公宇文护追谥荡

色取仁而行违曰闻

后周有滕闻王宇文迪

贪以败官曰墨

宋侍中钱惟演卒太常张瓌初请谥文墨后改文僖

言行相违曰僭自下陵上曰僭

后周赵王宇文招以谋诛隋文帝见杀谥僭

高而无民曰亢知存而不知亡曰亢

犯国之纪曰干

心隘不容曰褊

后梁明帝子萧瑀唐太宗以其性忌谥贞褊

违命自用曰专

唐太常博士张星议御史中丞宋庆礼之谥引谥法好功自是曰专后庆礼改谥敬

薄德弱志曰轻

烦酷伤民曰苛

以势致君曰要

○苏洵嘉佑谥法新义

（臣）等谨按苏洵嘉佑谥法增改旧谥义其书乃奉诏编定故终宋世行之下至明代亦依是为增损今取其谥与周书独断同而义异者别为新义逐条标列其有一二字更改及移彼释此者亦为注明至于全不相关者仍不加辨焉

圣不可知曰神

行道化民曰圣穷理尽性曰圣

大而难名曰尧

云行雨施曰汤

施而中理曰文敏而好学曰文修德来远曰文忠信接礼曰文刚柔相济曰文修治班制曰文

保大定功曰武刚强以顺曰武 【周书以顺作直理】 辟土斥境曰武折冲御侮曰武

礼乐明具曰成刑名克服曰成 【周书此句作武字义】 持盈守满曰成遂物之美曰成通达强立曰成

抚民安乐曰康温良好乐曰康 【周书抚民安乐作安乐抚民温良作温年别有温良好乐曰良】

向忠内德曰献 【周书作惠无内德考周书献谥有三义此书取其二其博闻多能

一义别作宪谥义与史记正义同】

柔克有光曰懿 【周书作温柔圣善后文有柔克为懿】

体仁长民曰元

耆意大图曰景 【史记正义作耆意大虑独断作致志大图】

施而不私曰宣善闻周达曰宣诚意见外曰宣 【周书史记作圣善周闻施而不成】

任贤致远曰明总集殊异曰明独见先识曰明能扬仄陋曰明察色见情曰明

明德有功曰昭 【周书作昭德有劳】

畏天爱民曰敬斋庄中正曰敬夙夜就事曰敬 【周书就事作恭事】 受命不迁曰敬死不忘君曰敬陈善闭邪曰敬

卑以自牧曰恭不懈为德曰恭治典不易曰恭责难于君曰恭

严敬临民曰庄威而不猛曰庄履正志和曰庄 【周书后文有履亡为庄】

正己摄下曰肃

因事有功曰襄 【周书作甲冑有劳】

安民有功曰烈 【周书作有功安民】

克亟成功曰桓

赏劝刑怒曰威以刑服远曰威

率义共享曰勇

秉义行刚曰克爱民作刑曰克 【周书作爱民在刑】

兆民寔赖曰安

绝行不爽曰定 【绝行周书作纯行】 追补前过曰定 【与前密字摄字义同周书无此义有追补前过曰刚句】

治典不杀曰简正直无邪曰简 【治典不杀史记训祁谥独断训震谥此书既仍独断震谥义又以之释简谥可谓两歧无定矣】

固节干事曰贞图国忘死曰贞

谨行制度曰节

涅而不缁曰白

以法正国曰匡

中正无邪曰质

恭仁鲜言曰靖 【周书作恭己鲜言曰静】

慈和徧顺曰顺和比于理曰顺 【周书徧顺作徧服】

安民好靖曰夷 【周书作安心好靖】

谋虑不僭曰思念终如始曰思

大虑方行曰考 【周书后文有考成也】

保民畏慎曰胡称年寿考曰明 【周书作保民耆艾弥年寿考】

柔远能迩曰和号令悦民曰和不刚不柔曰和推让贤能曰和 【周书后文有和会也】

赏善罚恶曰宪博闻多曰宪行善可记曰宪 【周书无宪谥有献谥此博闻多能曰宪周书作献史记正义作宪】

磨而不磷曰坚

能养能恭曰孝继志成事曰孝干蛊用誉曰孝

盛衰纯固曰忠临患不忘国曰忠推贤尽诚曰忠廉公方正曰忠

尊明胜患曰智默行言当曰智推芒折廉曰智临事不惑曰智察言知人曰智择任而往曰智 【周书作知】

行归忠信曰周事君不党曰周

应事有功曰敏 【周书后文有敏疾也】

治乱守正曰直不隐其亲曰直 【周书止肇敏行成曰直无此二义】

敬事节用曰钦

小心敬事曰良

强毅敦朴曰厚

能修其官曰勤 【周书后文有勤劳也】

治定不陂曰祁 【史记作治典不杀】

失位而死曰怀

未中身夭曰悼 【周书作年中早夭】

怀情不尽曰隐

好更故旧曰易 【周书作好更改旧】

不主其国曰声 【周书作不生其国】

未及而动曰躁

动静乱常曰幽 【周书作动祭乱常】

暴慢无礼曰厉愎很遂过曰厉 【周书止杀戮无辜曰厉独断作暴虐无亲曰厉愎很遂过周书作刺谥义】

纵乐无度曰荒昏乱纪度曰荒

贼仁多杀曰桀

暴慢无亲曰刺

嗇于赐予曰爱 【周书赐予作施与】

堕覆社稷曰顷震动过惧曰顷阴靖多谋曰顷

事君有党曰比

弱无立志曰愿 【周书作思虑不爽曰愿】

○郑樵谥略增多谥

（臣）等谨按郑樵作谥略序论五篇谥法三篇后论四篇序论言谥以讳事神为昭穆之次非美刺之法恶谥非所以加于君父桀纣是名非谥幽厉桓灵皆非恶谥又言美恶即文而见不即说而见故所取谥只以一文见义苏氏不取周书帝皇王公侯君师长胥之称已亦不取尧舜禹汤桀纣等字表里苏氏为典礼之大谥法言上谥百三十一用之君亲用之君子中谥十四用之闵伤用之无后者下谥六十五用之小人皆所以备典礼后论言已与苏氏各有去取辨驳详尽实已深抉谥法之奥今即三类二百十言有文无义其已见于周书蔡氏苏氏诸篇者不复赘录其增多未见者谨标而列之着于篇仍以历代经用之谥疏证其下并撮序其论著之大略如此云

上谥法

中谥法

下谥法

△上谥法

絜 宋兵部侍郎司马朴谥忠洁礼部侍郎谭世绩高宗时不受张邦昌伪命谥端洁与絜古通

贲 汉戚侯季必孝文四年谥贲

逸

退

讷

偲

逌

懋

宜

哲

察

通 金宗室都元帅宗诰谥通敏

仪 唐宪宗女郑国公主谥温仪

经

庇

协

端 汉书表有煮枣端侯革朱乃高祖十二年功臣侯而史表作靖侯史表有范汤端侯代乃中元三年以匈奴王降侯者而汉书表作靖

端靖二字篆文相近故传写易讹然谥端谥靖未详孰是姑识之以备考

休 史记宋世家有休公田

悦

绰

容 北魏宗室广陵王欣恭帝时谥容此谥容之始见史传者

确 宋汾州守张克戡绍兴中为金人所攻力屈死谥忠确

恒

熙 后梁开平元年追谥曾祖妣范氏为宣熙皇后洽

右上谥法

△中谥法

■〈幽卩〉 无考

右中谥法

△下谥法

暴

虐

愎

悖

凶

慢

忍

毒

恶

残

曩 后周宗室代王宇文达与越王盛同遇害谥曩

攘

顽

昏

骄 梁神威将军萧子显大同三年敕以恃才傲物谥骄

酗

湎

饶

狃

侈

靡

弱
伪 陈侍中徐陵至德元年谥章伪

妄
讞
谄
诬
诈
譎
讷
诡
奸
邪
慝
蛊
危
圯
懦
挠
覆
败
戮
疵
饕
费

右下谥法

○明通用谥法增多谥

（臣）等谨按谥法自宋嘉佑而后全用苏氏元虽或更革未有成书至于明世颇加损益间着新义太祖谥中山王徐达曰宣非前书所有盖规模又一变矣纪明之谥者有张志淳谥法二卷何三省帝后尊谥纪略一卷鲍应鳌皇明臣谥汇考二卷叶秉敬皇明谥考三十八卷郭良翰皇明谥纪汇编二十五卷诸书皆不行惟王世贞谥法通纪全载本集自云徧考国史及秘阁诸籍参以家乘靡所不备然犹不如王圻谥法考所载皇明通用谥较为明简圻之为谥法考也先编各书谥义次辑历代经用谥其所辑各依正史记传按次排比搜揽几于靡遗至所编

谥书于周公谥法取史记而不取汲冢独断而外于春秋广谥沈约贺琛诸家及左氏内外传注史记两汉书注所引古谥法绝无采取独取宋苏氏郑氏于苏氏书又未见其本苏氏本一百六十八谥圻止列九十二谥内又窜入端通修恪敦容裕洁确九谥非洵书之所有谥义又多与洵不合独所载明通用谥法首列文武成康等有谥义者六十八字次列宥慎冲淑善崇无谥义者六字别有当代经用谥义未备者恒淳高睿等二十五字又于后文摭列事实补其缺遗视王世贞之书可谓详备矣今取其增多字逐一标列仍以史传经用者附证其下至其全文与苏氏以上谥书同者不备列焉

强学好问曰裕

宋宗室侍中东平郡王德文仁宗时谥恭裕元成宗母鸿吉哩 【旧作宏吉刺今改正】 后谥徽仁裕圣至顺三年追封颜无繇为杞国

公谥文裕

勤其世业曰修

宋吏部尚书胡宗愈谥修简此谥修之始见史传者

敬共官次曰恪盛容端严曰恪温恭朝夕曰恪

唐文宗太子谥曰庄恪唐尚书右丞工部尚书杨昉谥恪杜佑曰恪字谥法所无考史记有牧邱恪侯石庆汉书作恬侯检谥法亦无恬字

史汉异同未详孰是据杜氏所言则唐以前未有谥恪者以昉为始 【以上三谥有义】

宥 明初谥中山王徐达

善 宏治中谥夫人项氏曰荣善

崇 汉宗室蠡吾侯刘翼桓帝之父帝即位谥为孝崇

皇洪武初谥合浦侯陈清曰崇武宏治中谥夫人胡氏曰崇善夫人姚氏曰崇敬 【以上三言脱去谥义】

（臣）等谨按明王圻谥法考所载明通用谥法大要本于王世贞谥法通纪其有释义者皆阁籍也有周书不为苏洵所取而兹取者如于武则取刚强直理刑名克服于成则取安民立政之类有苏氏新创义而兹屏不取者如于明则不取能扬仄陋于恭则不取治典不易责难于君之类惜所列止六十八谥于明史诸臣用谥良多未备终非全书今取其新增谥义照前代各书例逐一标列至其时经用为谥而义轶者不另列焉

道德纯一曰元

敬顺事上曰恭正德美容曰恭

守礼执义曰端

物至能应曰通事起而辨曰通

明德有盛曰贤

施勤无私曰惠

柔克有光曰和 【周书后文有和会也苏洵谥法作柔克有光曰懿】

柔德教众曰静

临难不惧曰勇

致果杀敌曰刚强而能断曰刚 【此二义苏洵谥法作毅谥义】

胜敌志强曰壮馥圉见服曰壮死于原野曰壮兵甲亟作曰壮履征杀伐曰壮

表里如一曰悫

不污不义曰洁

无过为僖小心恭慎曰僖 【周书作有过为僖】

好学近智曰果

善行不怠曰毅温仁忠厚曰毅能纪国善曰毅

宽裕温柔曰容

（臣）等谨按周书合汲冢史记本共一百三十五谥经用者八十四谥苏洵谥法增多七十谥经用四十七谥郑樵通志增多七十一谥经用十一谥而历代史传所载已用谥不见于谥书者自共和以前鲁郑诸邦已有之战国两汉而后不可胜纪盖著作之始不过预定若干谥原不能必后人之尽用而政教既衰王章渐废列国诸侯人自为政虽田赋职官之大多有不循乎周礼者况谥法乎况秦汉以下乎且又重以鲁鱼亥豕之易讹国史家乘之歧出隶事者循其所采而不究其由来读书者专于一编而不博乎异本遂至书与谥各不相符亦势之所无如何也臣等综观历代用谥不见于谥书者仍博采之以补谥书之缺遗爰自周初迄于明代各依史传按次编列以备考焉

郑 燕有郑公

宫 蔡曹皆有宫伯

利 陈有利公

赧 周有赧王

于 汉景帝子胶西王端宗室安郭侯传富柳侯自为并谥于史记索隐广周书谥法优能其德曰于盖美谥也考苏洵别有犯国之纪曰

干而王圻谥法考遂以端等三人为谥干误矣传富史表作傅

纲 汉有清河纲王

令 汉有周吕令武侯吕泽史记索隐曰周吕国也令武谥也

终 汉酈侯萧何谥文终安国侯王旂秣陵侯刘缠什邡侯雍桓并谥终考汲绍侯

公上不害史表亦作终侯

制 汉有高宛制侯丙猜蒯成制侯周继

祗 汉衍侯翟山稟侯陈锴并溢祗

中 汉羹颉侯刘信厌次侯元顷高胡侯陈夫乞并溢中元顷汉书表作爰类

谷 汉有祁谷侯繒贺史记索隐曰溢法行见中外曰谷

庆 汉邳侯黄荣盛溢庆

麂 汉有广陵麂侯刘裘史表作常侯刘裘考常溢亦诸家所未载

敷 汉有定敷侯刘越柳敷侯刘罢师史记索隐曰敷溢也说文云敷读如跃

恬 汉有牧邱恬侯石庆考史记作恪侯马端临封建考王圻溢法考俱从汉书表

作恬

敦 汉宗室刘光元封六年溢敦此敦溢之始见于史传者

肥 汉常乐侯稠雕溢肥稠雕汉书卫青传作雕离

衍 汉邳会侯刘仁挟术侯刘昆景溢衍汉书表作扶■〈彡 帚〉侯刘昆吾

昌 汉都昌侯朱充溢昌

刻 汉成安侯郭赏溢刻

■〈思 卩〉 汉成安侯郭长溢■〈思 卩〉长乃刻侯赏之子

道 王莽追溢王根为直道让公又北魏太祖溢道武皇帝

睦 王莽妻溢孝睦皇后

熹 后汉孝和帝邓皇后溢和熹北魏阴平王元列亦溢熹

太 魏溢曹嵩为太皇帝北魏世祖亦溢太武

禧 晋安帝王皇后溢禧

渊 宋洮阳侯宋恣溢渊

替 梁萧通明卒有司按溢法言行相违曰替

脱 陈周敷溢脱

惕 北魏南皮灵侯高佑初有司议溢惕诏以不遵上命溢灵

愷 北魏康成县公柳带韦溢愷

实 北魏沧州刺史尧杰溢实

闇 隋文帝溢岐国公斛斯征用之

纵 唐左卫大将军宇文士及初溢为恭刘洎驳之改溢纵

晟 宋黥卒魏汉津以铸九鼎赐号冲显处士卒溢为熹晟侯

柔 辽义宗后溢柔贞

默 金德祖溢渊默皇帝

济 金宗室郑国公们图瑋【旧作漫都河今改正】溢定济京兆尹隋国公和

尼【旧作活女今改正】溢贞济

杰 金太傅托卜嘉谥杰忠

亮 元永平郡公阿勒台 【旧作阿台今改正】

谥忠亮

嘉 元漆水郡公耶律希亮谥忠嘉

遂 元宁夏郡公安巴 【旧作暗伯今改正】 代国公鄂拓克齐 【旧作斡脱赤今改正】 并谥忠遂

淳 明太祖追谥考为仁祖淳皇帝

愬 明熹宗谥愬皇帝

钦定续通志卷一百二十

●钦定续通志卷一百二十一 谥略下

谥略 【下】

（臣）等谨按谥法起于周而累朝赐谥之典多与周异周制君臣不嫌同谥至晋太康中则以同号为嫌矣周汉定谥或用单文或兼两字各视其所宜无所轻重后世则以单谥复谥为升降矣至于追谥之恩改谥之议夺谥之条累朝定制互有等差而立法失宜者莫如唐之议谥驳谥盖其制以太常掌定议以考功掌驳正其有子孙陈诉复下三省官参议然定议者不能无爱憎而驳正者复有所向背驯至章奏纷然互相诘难因以启党援邀结之术非惟不足以定公评亦非所以成政体也夫无爵者无谥礼有明文赐谥之不可以私冀犹爵禄之不可幸邀王者受命于天故称天以谥人臣受爵于君则君赐之谥礼乐必自天子出始能昭彰瘅之大权是岂得专责于太常又奚必预设驳正之官徐议其后哉郑志祇载三等之谥于累朝制度阙而不载今上采经传旁及汉晋以及元明定谥之制录其有关证据者以补郑志之阙即唐人议谥驳谥之文亦略存梗概用以考其得失焉

历代谥议

○历代谥议

周礼春官太师帅瞽而夔作匱谥

太史小丧赐谥

小史卿大夫之丧赐谥读誄

仪礼士冠礼死而谥今也古者生无爵死无谥

（臣）等谨按礼记郊特牲亦有此语

礼记曲礼君子已孤不更名已孤暴贵不为父作谥

檀弓幼名冠字五十以伯仲死谥周道也

又公叔文子卒其子戍请谥于君曰日月有时将葬矣请所以易其名者君曰昔者

卫国凶饥夫子为粥与国之饿者是不亦惠乎昔者卫
国有难夫子以其死卫寡人不亦贞乎夫子听卫国之政修其班制以与四邻交卫国之
社稷不辱不亦文乎故谓夫子贞惠文子

表记先王谥以尊名节以壹惠耻名之浮于行也

乐记闻其谥知其行也

春秋左传无骇卒羽父请谥与族公问于众仲对曰天子建德因生以赐姓胙之土
而命之氏诸侯以字为谥因以为族

又楚子疾告大夫曰不谷不德少主社稷生十年而丧先君未及习师保之教训而
膺受多福是以不德而亡师于鄢以辱社稷为大夫忧
其弘多矣若以大夫之灵获保首领以歿惟是春秋窳窳之事所以从先君于祢庙者请
为灵若厉大夫择焉莫对及五命乃许秋楚共王卒子
囊谋谥大夫曰君有命矣子囊曰君命以共若之何毁之赫赫楚国而君临之抚有蛮夷
奄征南海以属诸夏而知其过可不谓共乎请谥之共
大夫从之

又卫侯赐北宫喜谥曰贞子析朱鉏谥曰成子

（臣）等谨按事见左传昭公二十年杜注云皆未死而赐谥

谷梁传谥所以成德也于卒事乎加之

论语子贡问曰孔文子何以谓之文也子曰敏而好学不耻下问是以谓之文也

又公叔文子之臣大夫僎与文子同升诸公子闻之曰可以为文矣

史记秦始皇追尊庄襄王为太上皇制曰朕闻上古有号无谥中古有号死而以行
为谥如此则子议父臣议君也甚无谓朕弗取焉自今

以来除谥法朕为始皇帝后世以数计二世三世至于万世传之无穷

白虎通德论谥者何也谥之为言引也引列行之迹也所以进劝戒上务德也故礼
郊特牲曰古者生无爵死无谥此言生有爵死当有谥

也死乃谥之何言人行终始不能若一故据其终始可知也士冠礼曰死而谥之今也所
以临葬而谥之何因众会欲显扬之也黄帝先黄后帝

何古者质死生同称各持行合而言之美者在上黄帝始制法度得道之中万世不易名
黄自然也后世虽圣莫能与同也后世德与天合亦得

称帝不能立制作故不得称黄也谥或一言或两言何文者以一言为谥质者以两言为
谥故尚书曰高宗殷宗也汤死后世称成汤以两言为

谥也号无质文谥有质文何号者始也为本故不可变也周以后用意尤文以为本生时
号令善故有善谥故合文武王也合言之则上其谥明

别善恶所以劝人为善戒人为恶也帝者天号也以为尧犹谥顾上世质直死后以其名
为号尔所以谥之为尧何为谥有七十二品礼记谥法

曰翼善传圣谥曰尧仁圣盛明谥曰舜慈惠爱民谥曰文强理劲直谥曰武幼不谏长贱不谏贵诸侯相谏非礼也臣当受谥于君也卿大夫老归死有谥何谥者别尊卑彰有德也卿大夫归无过犹有禄位故有谥也显号谥何号法天也法日也日未出而明谥法地也法月也月已入有余光也

（臣）等谨按以黄帝尧舜为谥自白虎通始抱朴子曰上古无谥始于周家耳黄帝谥盖后人追为之非当时羣臣之称也此说可以证班固之诬

五经通义曰谥之言列陈列所行善有善谥恶有恶谥以为劝戒也

郑志赵商问曰曲礼曰已孤暴贵不为父作谥而武王即位追王太王王季文王改谥爵何也答曰周道之业兴于二王功德由之王迹初焉凡为人父岂能尽贤乎若夏禹商汤则不追谥矣

说文解字谥行之迹也从言兮皿

释名谥曳也物在后为曳言名之于人亦然也

风俗通义礼臣子无爵谥君父之义也故羣臣累其功美葬日遣太尉于南郊告天而谥之

荀氏家传荀爽对策曰臣闻火生于木故其德孝汉之谥帝称孝者其义取此也

（臣）等谨按颜师古注汉书曰孝子善述父之志故汉家之谥自惠帝以下皆称孝荀爽惑于讖纬之书而以火生于木为说陋矣

后汉书祭遵卒博士范升上疏曰礼生有爵死有谥爵以殊尊卑谥以明善恶臣愚以为宜因遵薨论叙众功详案谥法以礼成之显章国家笃古之制为后嗣法

通典魏刘辅等启论赐谥云古者存有号则没有谥必考行迹论功业而为之制汉不修古礼大臣有宠乃赐之谥今国家因用未革臣以为今诸侯薨于位者可有谥主者宜作得谥者秩品之限尚书卫覬奏旧制诸王及列侯薨无少长皆赐谥古之有谥随行美恶非所以优之又次以明识昭穆使不错乱也臣以为诸侯王及王子诸公侯薨可随行迹赐谥其列侯始有功劳可一切赐谥至于袭封者则不赐谥尚书赵咨又奏云其诸袭爵子嗣无殊才异勋于国及未冠成人皆不应赐谥黄门侍郎荀攸议以为古之谥纪功惩恶也故有桓文灵厉之谥今侯始封其以功美受爵土者虽无官位宜皆赐谥以纪其功且旌奉法能全爵禄者也其斩将搆旗以功受爵而身在本位类皆比列侯自关内侯以下及名号赐爵附庸非谥所及皆可阙之若列侯袭有官位比大夫以上其不莅官理事则尝宿卫忠勤或身死王事皆宜加谥其余袭爵既无功

劳官小善微皆不足录八座议以为太尉荀顗所撰定体统通叙五等列侯以上尝为郡国太守内史郡尉牙门将骑督以上薨者皆赐谥

晋书景帝纪魏正元二年谥景帝曰武公文帝表让曰臣亡父不敢受丞相相国九命之礼亡兄不敢受相国之位诚以太祖尝所阶历也
今谥与二祖同实所祇惧昔萧何张良霍光咸有匡佐之功何谥文终良谥文成光谥宣成必以文武为谥请依何等就加诏许之谥曰忠武

（臣）等谨按魏初谥晋宣帝曰文至是谥景帝曰武盖与魏武魏文二帝同谥故表云谥与二祖同也乃改宣帝谥宣文景帝谥忠武君臣同谥之嫌实始于此

晋书礼志武帝太康八年十月太常上谥故太常平陵男郭奕为景侯有司奏云晋受命以来祖宗号谥羣下未有同者故郭奕为景与景皇同不可听宜谥曰穆王济羊璞等并云夫无穷之祚名谥不一若皆相避于制难全如悉不避复非推崇事尊之礼宜依讳名之例但及七庙祖宗而已不及迁毁之庙成粲武茂刘讷并云同谥非嫌号谥者国之大典所以历时作教经天人之远旨也固虽君父义有所不隆及在臣子或以行显故能使上下迈德罔有殆荒臣愿圣世同符尧舜行周同谥之礼舍汉魏近制相避之义帝诏曰非言君臣不可同正以奕谥景不当耳宜谥曰简

晋书嵇绍传太尉广陵公陈准薨太常奏谥绍驳曰谥号所以垂之不朽大行受大名细行受细名文武显于功德灵厉表于闇蔽自顷礼官协情谥不依本准谥为过宜谥曰缪事下太常时虽不从朝廷惮焉

（臣）等谨按此后世驳谥之始晋中兴书曰时赐谥多由封爵不考德行王导上疏曰臣闻大行受大名小行受小名则实称不诬而已
近代以来唯爵得谥武官牙门有爵必谥乡校常伯无爵悉不得谥甚失制谥之本今中兴肇建勋德兼备宜深体前训使行以谥彰岂可限以有爵中宗纳焉自后公卿无爵而谥自导始也

通典东晋元帝太兴三年诏古者赐谥名实相称顷来有爵乃谥非圣贤本意通议之有司表云刘毅宜谥以申毅忠允匪躬赠右光禄大夫仪同三司斯诚圣朝考绩以着勋之美事也按谥者行之迹号者功之表今毅功德并立而有号无谥于义失体窃以春秋之事求之谥主于行而不系爵然汉魏相承爵非列侯则皆没其高行而不加之谥至使三事之贤臣不如野战之将士臣愿圣代举春秋之远制改近代之旧服

（臣）等谨按晋书刘毅传太康六年卒即赠仪同三司羽林左监王宫上疏曰中诏以毅忠允匪躬赠班台司斯诚圣朝考绩以着勋之

美事也臣谨按谥者行之迹号者功之表今毅功德并立而有号无谥于义失体云云奏寝不报则请谥刘毅乃太康六年毅卒之岁非太兴三年也杜佑以王宫疏为有司表牵合太兴之诏为一事误矣

晋书礼志永和十一年彭城国为李太妃求谥博士曹耽之议夫妇行不必同不得以夫谥谥妇春秋妇人有谥甚多经无讥文知礼得谥也胡讷云礼妇人生以夫爵死以夫谥春秋夫人有谥不复依礼耳安平献王李妃琅琊武王诸葛妃太傅东海王裴妃并无谥今宜率旧典王彪之云妇人有谥礼坏故耳声子为谥服虔诸儒以为非杜预亦云礼妇人无谥春秋无讥之文所谓不待贬绝自明者也近世惟后乃有谥耳

（臣）等谨按通典载王彪之议云妇人无既从夫爵则己无实爵以从为称也以从为称则无谥可知春秋妇人有谥者周末礼坏耳故服虔注声子之谥非礼也杜氏注惠公仲子亦云礼妇人无谥泰始以来藩国王妃无有谥者中兴敬后登阼乃追谥耳琅琊武王诸葛妃恭王夏侯妃元帝犹抑蒸蒸之至情不追谥今彭城王妃不应谥其论视礼志稍详今并录之通典东晋琅琊世子未周而卒大司农表琅琊世子降君一等宜谥哀愍太常贺循曰谥者所以表功行之目也故古者未居成人之年及名位未备者皆不作谥也是以周灵王太子聪哲明智年过成童亡犹无谥春秋诸侯即位之年称子踰年称君称子而卒皆无谥名未成也未成为君既无君谥时见称子复无子谥明俱未得也唯晋之申生以仁孝遭命年过成人晋人悼之故特为谥诸国无例也及至汉代虽遵兹义过于古礼然亦未有未踰年之君而立谥也殇冲二帝皆已踰年方立谥按哀冲太孙各以幼龄立谥不必依古然皆即位临官正名承重与诸下定君臣之义尊成体具事无所屈且天下之名至重体其尊者亦宜殊礼故随时定制有立谥之事也琅琊世子虽正体乎上生而全贵适可明嫡统之义未足定为谥之证也

（臣）等谨按卫懿侯世子早死谥曰共伯事在春秋以前世子得谥不始于申生也循以为诸国无例失考矣

又孝武太元四年光禄勋王欣之表伏寻太康中郭奕谥曰景有司执孝宗同号臣闻姬朝盛明父子齐称诸侯与周同谥经诸哲王不易之道也宜遵古典训范来裔徐邈议按郭奕谥景诏实不以犯帝谥而改也又惠帝永平元年诏书贵贱不嫌同号周公谥文君父同称名行不殊谥何得异自今以后其各如礼尚书奏文武举其一致圣贤有时而同故文王经纬天地孔文子不耻下问所以为文也远稽周典嘉号通乎上下近惟太康改谥非嫌同称自顷议者或乖体尚之实非所以经纶无穷永代垂式王

欣之所表抑实旧典宜如所陈诏可

又太常蔡司空谥议云博士曹耽之等议曰谥可谓善始令终者矣按谥法布德执义曰穆司空左长史孔严与王彪之书云博士引礼之义以通高尚之事穆诚是美谥然蔡公德业既重又是先帝师傅居总录之任则是参贰宰相考行定名义存实录不可不详彪之答云按谥法布德执义曰穆谓此名目殊为不轻泰始初张皇后大室庾太后并谥曰穆魏司空陈泰王昶贺循皆名士也并谥曰穆此与蔡公名体相应中朝复谥亦不胜单安平献王孚齐献王攸并单谥自顷复谥者非大晋旧典必重复谥也盖是近来儒官相承近意耳皆顾命重勋或居分陕或处阿衡蔡公存谦素之怀不当此任于今咏之所以不复谥欲令异于数公所以表冲虚述德美也又中朝及中兴曾居师傅及录台事者亦皆不复谥山李二司徒吾族父安丰侯近贺司空荀太尉周光禄或曾师傅或曾总录并不复谥吾谓此谥洪美不应翻改按谥法条有限而应谥者无限亦何得令名德必皆齐同远准周之文武则后代不应复得通用此名近校晋朝旧比山涛荀顗周顗谥康羊佑荀勖同谥成此例甚众不可悉载近朱伯高谥简时尚书符却已不应与和峤同谥蔡为太常据上论可同理甚有义遂便施行蔡家固当有此故事准例如此复无所为疑唐六典注诸职事三品以上散官二品以上身亡者佐吏录行状申考功考功责厯任勘校下太常寺拟谥讫覆申考功于都堂集省内官议定然后奏闻赠官同职事无爵者称子若蕴德邱园声实明着虽无官爵亦奏赐谥曰先生

通典咸通三年太常博士袁思古谥扬州大都督高阳郡公许敬宗曰缪议曰敬宗位以才升厯居清级弃长子于荒徼嫁少女于部落闻诗闻礼事绝于趋庭纳采问名惟闻于黠货白圭斯玷有累清尘易名之典须凭实行敬宗孙太子舍人彦伯诉屈户部尚书戴至德问于博士王福时答曰昔晋司空何曾既忠且孝徒以日食万钱所以贬为缪丑况敬宗忠孝不逮于曾饮食男女之累过之而定谥为缪无负于许氏矣

诏令尚书省集五品上重议礼部尚书杨思敬议称按谥法既过能改曰恭请谥为恭

（臣）等谨按杨思敬旧唐书作袁思敬考新唐书宰相世系表隋观德王杨士雄第四子曰演演次子曰思敬官礼部尚书驸马都尉盖尚唐高祖女安平公主者也旧唐书误

景云元年太常谥赠荆州大都督舒国公韦巨源曰昭户部员外郎李邕驳曰三思引之为相阿韦托之为亲无功而封无德而禄同族则

丑正安石他人则附邪楚客谥之曰昭良恐未当博士李处直请依前定时虽不从邕议

而论者是之

旧唐书太常博士张星谥赠工部尚书宋庆礼曰专议曰庆礼太刚则折至察无徒有事东北所亡万计所谓害子而家凶于而国按谥法好功自是曰专礼部员外郎张九龄驳之曰庆礼在人苦节为国劳臣一行边陲三十年所户庭可乐彼独安于传递稼穡为艰又能实于军廩莫不服劳辱之事而匪懈其心守贞坚之规而自尽其力请以所议更下太常庶素行之迹可寻易名之典不坠乃谥曰敬

（臣）等谨按张九龄驳议全文载于宋庆礼本传通典所录于事实谥义均未显晰兹据旧唐书节辑

通典开元十八年太常寺议请谥张说为文贞左司郎中杨伯成驳曰谥者德之表行之迹将以激厉风俗检束名教固无虚称是存实录准张说罢相制云不肃细微之人颇乖周顺之旨又致仕制云行亏半古防阙周身未免瓜李之嫌而喧众多之口且玉之有瑕尚可磨也人之斯玷焉得追诸谥曰文贞何成劝沮请下太常更据行事定谥工部侍郎张九龄又立议请依太常为定未决玄宗为制碑文赐谥曰文贞

永泰中太常博士独孤及谥赠凉州都督太原郡公郭知运曰威右司员外郎崔厦驳之曰郭知运承恩诏葬向五十余年今请易名窃谓非礼谨按礼经云礼时为大又曰过时不及非礼也昔卫公叔文子卒将葬其子戍请谥于君曰日月有时将葬矣请所以易其名者盖时不可踰也节度既没名不浮行数纪之前门生故吏已合谋谥今乃申请窃将有为而作嗣子英义顷属多故屡制方隅朝廷策勋位表端揆附从者窃不中之礼合无妄之求况今裂土者接轸专征者百辈若率而行之谁曰无请不惟有司疲于简牍抑恐名器等于草芥虽欲曲全窃将不可又礼经云已孤暴贵不为父作谥若知运合谥而不以其时则嗣子废先君之德若不合谥而苟遂其志则先君因嗣子而见尊以仆射而言恐貽越礼之让以国家而言又殊旌善之体请下太常寺重议及答曰礼时为大顺次之将葬易名时也有故阙礼追远请谥顺也公叔戍请谥适当葬前谨按三百礼经三千威仪曾不言已葬则不追谥况三王殊涂不相沿礼新礼则死必有谥不云日月有时今请易名者五家无非葬后苗太师一年矣吕諲四年矣卢奕五年矣颜杲卿八年矣并荷褒宠无异同之论独知运不幸遂以过时见抑苟必以已葬为节制则八年与五十年其缓一也而与夺殊制无乃不可乎议云已孤暴贵不为父作谥此谓其父无位而子居贵位不当以子贵加荣于父若知运者处方面重寄列位九卿茂勋崇名与卫霍侔饰终之礼宜加于他将一等岂待因嗣子之德然后作

谥今之征镇者率多起屠贩皂隶之中虽逢风云化为王侯而其闲祖父爵位与知运等当请谥者有几何乃惧名器等于草芥以是废礼窃谓近诬窃考载籍征诸旧章易名之礼请如前议独孤及又谥赠吏部尚书吕諲曰肃度支员外郎严郢驳曰今所议荆南之政详矣而曰在台司齷齪无匪躬之能者乃抉瑕掩德非中道之言也国家故事宰臣之谥皆有二字以彰善旌德焉夫以吕公文能无害武能禁暴贞则干事忠则利人盛烈宏规不可备举传叙八元之德曰忠肃恭懿若以美谥拟于形容请谥吕公曰忠肃及重议曰谨按旧仪凡没者之故吏得以行状请谥于尚书省而考行定谥则有司存朝廷辨可否宜存众议今驳议撰谥异同之说并故吏专之恐乱庖人尸祝之分违公器不私之诚且非唐虞师锡金曰之道谥法在惩劝善恶不在字多文王伐崇周公诛淮夷武功盛而皆谥文冀缺恪德临事宁俞忠于其国文德优而并谥武固知书法者必称其大而略其细故言文不言武言武不言文三代以下朴散礼坏乃有二字之谥非古也其源生于衰周汉兴萧何张良霍去病霍光俱以文武大略佐汉致太平其事业不一一文不足以纪其善于是有文终文成景桓宣成之谥虽黜礼甚矣然犹褒不失人唐兴参用周汉之制以魏征为文贞萧瑀为贞褊其杜如晦王珪封德彝陈叔达温彦博岑文本唐休璟魏知古崔日用并当时赫赫以功名居宰相者谥不过一字不闻子孙佐吏有以字少称屈者由此言之二字不必为褒一字不必为贬若褒贬果在字数则是尧舜禹汤文武成康不如周威烈慎靓也齐桓晋文不如赵武灵魏安厘也杜如晦王珪以下或成或明或懿或宪不如萧瑀之贞褊也以諲之从政威能闲邪德可济众故以肃易名而忠在其中矣亦犹随会宁俞之不称文岂必因而重之然后为美魏晋以贾诩之筹算贾逵之忠壮张既之政能程昱之智勇顾雍之密重王浑之器量刘惔之鉴裁庾翼之智略彼八君子者方之东平宜无惭德死之日并谥曰肃当代不以为贬何尝征一字二字之升降乎上稽前典下据甲令参之礼经而究其往事请依前定

（臣）等谨按晋书王浑传浑本谥元独孤及引为谥肃之证盖临文时详未详考大历十三年太常谥赠司徒杨綰曰文贞比部郎中苏端驳曰夫道德博闻曰文清白守节曰贞且元载与司徒友敬殊深推为长者首举清要人莫与京及司徒宠望渐高载畏其偪旋又知载隳坏纲纪心贰于君既惧其疑因为疏简有口皆知载恶而独无一言或有发载之恶证告未明抱诚坐法者司徒时居上列奏达非难不能因此披衷陈辞全志之士命露凶狡之私而乃晏安自泰优游过日使元载祸大灭身竟劳

圣上防伺之虑岂守节不隐邪岂怀道无毒邪非谓文贞明矣洎元载嗾恩于下招怨于上使北塞人劳有过时之戍西郊寇至无吊灾之惠磁邢坚义之士将死复生梁宋伤夷之人或寒或馁搜访旌恤中外所急载皆绝之使王泽不及于下为行路所嗟而杨公当圣上维新之时居天下得贤之望诚宜不俟终日造次速言乃寂寥启悟噤闭谋猷贪食万钱之赐虚承一心之顾岂慈惠爱人乎既曰不慈不惠何以谓之文有隐有毒何以谓之贞乎古者诸侯有国卿大夫有家上以报祖宗下以处子孙之义也杨公历处厚俸人谓儒宗曾不立家又无私庙窳使人老阙敬祖之礼位极无祭祔之宫凡在衣冠谁不叹恨又乖大义克就愍仁接礼之义矣曰文与贞曷可以议圣人立谥尽公而无私之谓也所以周宣不敢私于父谥曰厉汉宣不敢私于祖谥曰戾百王明制历圣通则昔公叔文子有死卫之节修班制之勤社稷不辱方居此谥爰及太宗初魏公征有匡救公直之忠中宗末苏公瓌有保安不夺之节所以诸贤甚众谥文贞者不过数公至于燕国公张说先朝输能名节昭著省司尚谓不可至今人故称之由是言之焉可比德请牒太常更详他谥以守彝章庶乎青史之笔不乖于周汉黄泉之魂免惭于苏魏别谥为文简

（臣）等谨按杨绾传称苏端为儉人持异议即指此事

赠司空陈国公窦抗谥曰博赠左卫大将军宇文士及初谥为恭黄门侍郎刘洎驳之曰士及居家侈纵不宜为恭竟谥为纵工部尚书杨昉谥曰恪定州刺史定襄郡公于匡济谥曰果广州都督谢方叔谥曰勤

（臣）等谨按杜佑云以上五人谥法所无乃有司一时之议然汉时有泗水勤王综王莽时更始将军廉丹后周襄国公李端并谥果而牧邱恬侯石庆史表作恪侯则佑以为谥法所无者未之考耳又按唐书窦抗传称抗谥密与通典异

唐书元和中赐太子宾客于頔谥曰忠初有司谥曰厉至是特易之右丞张正甫封其敕请还本谥补阙高越上疏曰夫谥者所以惩恶劝善激浊扬清使忠臣义士知劝乱臣贼子畏罪孔子修春秋乱臣贼子惧盖为此也垂范如此尚不能救况又隳其典法乎

五代史同光二年史馆事例凡王公百官定谥考功录行状并谥议逐月具有无牒报中外官薨已请谥许本家各录行状一本申奏

宋史礼志王公及职事官三品以上薨本家录行状上尚书省考功移太常礼院议定博士撰议考功审覆判都省集合省官参议上中书门下宰臣判准始录奏闻敕付所司即考功录牒以未葬前赐其家省官有异议者听具议闻蕴德邱园声实明着虽无官爵亦奏赐谥曰先生

太平兴国八年诏增周公谥法五十五字美谥七十一字为一百字平谥七字为二十字
恶谥十七字为三十字其沈约贺琛续广谥尽废后以直史馆胡旦言旧制文武官臣僚皆以功行上下各赐谥法近朝以来遂成阙典建隆以后臣僚三品以上合赐谥者百余人望令史馆编录行状送礼官定谥付史馆修入国史诏今后并令礼官取行状定谥送考功详覆关送史馆永为定式直集贤院王皞言谥者行之表也善行有善谥恶行有恶谥盖闻谥知行以为劝戒六典太常寺博士掌王公以下拟谥皆迹其功德为之褒贬近者臣僚薨卒虽官该拟谥其家自知父祖别无善政虑定谥之际斥其缪戾皆不请谥法窃惟谥法自周公以来垂为不刊之典盖以彰善瘅恶激浊扬清使其身没之后是非较然用为劝惩今若任其迁避则为恶者肆志而不悛乞自今后不必候其请谥并令有司举行如此则隐匿无行之人有所沮劝若须行状申乞方行拟谥考诸方册别无明证唯卫公叔文子卒其子戍请谥臣谓春秋时礼坏乐阙公叔之卒有司不能明举旧典故至将葬始请谥于君且周制太史掌小丧赐谥小史掌卿大夫之家赐谥以此知有司之职自当举行明矣诏下有司详定如皞请焉礼院更议赠安远军节度使马怀德已葬请谥乃言自古作谥皆在葬前唐开元三品以上将葬既启殡告赠谥于柩前无赠者设启奠即告谥既葬加谥出于唐时如颜杲卿卢奕尽忠王室当时置而不议至郭知运死五十余年乃始请谥右司员外郎崔厦以为非旌善之礼而太常博士独孤及谓新制死不必有谥又谓有故阙礼追远请谥顺也及长于开元之世亲闻启奠告谥而谓新制不必有谥岂非诬哉又有故阙礼追远请谥皆违礼经何顺之有国家给谥一用唐令然请谥之家例供尚书省官酒食撰议官又当有所赠遗故或阙而不请景佑四年宋绶建议令官给酒食其后又罢赠遗自此既葬请谥者甚众岁月浸久官阙行迹士大夫所不能知子孙与其门生故吏志在虚美隐恶而有司据以加谥是废圣人之法而徇唐庸有司之议也诏自今得谥者令葬前奏请或其家不请则尚书太常会议定谥前葬牒史馆及付其家即徇私谥不以实论如选举不以实法既葬请谥者不定谥

（臣）等谨按唐六典有蕴德邱园亦奏赐谥之制宋代因之故元佑中谥邵雍为康节政和中谥徐积为节孝官不过学校而已厥后宣宗理宗表彰儒术嘉定三年谥朱子曰文七年谥张栻曰宣八年谥吕祖谦曰成九年谥周惇颐曰元十三年谥程伯子曰纯程叔子曰正十四年谥张载曰明宝庆时谥陆九龄曰文达陆九渊曰文安淳佑间谥罗从彦曰文质李侗

曰文靖而朱子高第弟子黄干则谥文肃蔡沈则谥文正此皆官未及谥而谥者宋之谥法颇为冒滥罗泌至谓之辱典而追谥诸贤以崇尚理学则庶乎得彰瘝之意云

武宁军节度使郑国公赠太师中书令夏竦始谥文正知太常礼院司马光奏曰臣等窃迹谥法本意所谓道德博闻曰文者非闻见博雅之谓也靖共其位曰正者非柔懦苟偷之谓也盖诗云靖其尔位正直是与也今竦奢侈无度聚敛无厌内则不能制义于闺门外则不能立效于边鄙言不副行貌不应心语其道德则贪淫矣语其正直则回邪矣此皆天下所共闻非臣等所敢诬加也乃以文正谥之臣等蠢愚不达大体不知将以何谥待天下正人君子哉伏惟改赐竦谥天下幸甚乃改谥文庄

司徒岐国公赠太师兼侍中陈执中仁宗时谥恭时礼官韩维奏曰执中以公卿之子遭世承平因缘一言遂至贵显而不能率礼秉道谥法宠禄光大曰荣不勤成名曰灵执中出入将相以一品就第宠禄光大矣得位行政贤士大夫无述焉不勤成名矣请谥曰荣灵诏谥曰恭

（臣）等谨按唐宋皆有议谥驳谥之制维时太常考功守官而不阿者固亦有之而是非瞽乱如苏端之诋諆杨绾则适以滋植党营私之渐惟宋司马光奏夏竦谥韩维议陈执中谥持论侃侃史家称之然仁宗时谥法之未愜者匪直加夏竦陈执中以美谥也蓝纪宗谥僖靖张惟吉谥忠安石全彬谥恭僖卢守懃谥安恪皆宦官也石全彬者虽有破依智高功抑厚其赏赉可矣乃宠以使职之不己又加之美谥且其它如守懃辈则有何功耶唐世宦官至为横恣顾得谥者杨复光李辅国而已宋自真宗作法谥刘承规为忠肃至仁宗习为故常后世踵之神宗时李舜举谥忠敏哲宗时梁从吉谥敏恪李宪初谥敏恪改谥忠敏徽宗时宋用臣谥僖敏冯世寔谥恭节高宗时康履谥荣节蓝安石谥良恪康谓谥忠定凡宦官得谥者十有余人夫以先王尊名之典而至加诸刑余之阅寺其渎礼不经又孰甚焉是乌足以语激扬之大法哉

元史旧令三品官以上立朝有大节及有大功勋于王室者得赐功臣号及谥
太祖至元二十二年制谥法

（臣）等谨按元刘致议肃■〈奭斗〉谥引谥法好古不怠曰敏虞集议陈文靖谥引仕不躁进曰靖柳贯议姚燧谥引敬直慈惠曰文考周书及苏洵诸家皆无此文疑即元所制谥法也

武宗至大二年诏内外百官三品以上者许请谥凡请谥者许其家具本官平日勋劳政迹德业艺能经由所在官司保勘与本家所供相同转申吏部考覆呈都督都省拟准令太常礼仪院验事迹定谥若勋戚大臣奉旨赐谥

者不在此例

顺帝至元元年命严谥法以绝冒滥

（臣）等谨按元代赠谥之制史志不详而参考纪传则所行异典足资搜辑者不少乐平民许则祖谋恢复德兴县遇害谥忠显亳州民曹彦可不为贼写旗而死谥节愍两人皆以布衣得谥褒死节也谥处士金履祥为文安许谦为文懿重儒学也谥揭来成为贞文先生表笃行也谥安南王陈益稷为忠懿旌外藩之恭顺也追谥比干为仁显忠烈公箕子为仁显公以劝忠也追谥杜甫为文贞刘蕡为文节以崇文也颜子父无繇追谥文裕朱子父松追谥献靖尊先贤之所自出也明太祖嘉常遇春之功谥其曾祖四三曰庄简祖重五曰安穆父六六曰靖懿王世贞以为循元之制则元制固有功高谥及三代者盖亦易名之异典而史志阙略不可复考始摭其可考者以见一代之制焉

明会典凡议谥洪武初俱礼部奉旨施行二十五年令礼部行翰林院拟奏请旨凡亲王谥例用一字郡王二字宏治十五年奏准亲王行巡抚巡按等官覆勘郡王行本府亲王及承奉长史等覆勘善恶得实明白结报具奏定谥

邱浚举赠谥以劝忠疏臣惟生者之祸福出于一时蒙蔽众论之不公人众者胜天固可侥幸而苟免而事久则论定天定则胜人至于盖棺事则定矣犹以偏爱之心持不公之论以愚而为贤当辱而反荣是终无天道矣是以三代时王立为谥法以为死后荣辱之典善者予之以美谥恶者予之以恶谥孟子所谓孝子慈孙百世不能改而世之庸主嬖臣乃以一己之私而掩天下之公非惟得罪于世教而实得罪于天帝也三代以前君之谥则请命于天臣之谥则请命于君天不言而人代言人代天言而反天之道天必殛之君不定而俾臣代之臣承君命而负君之托逆天之理违国之法虽一时遁于人刑其如天道何唐宋议谥掌于太常博士凡于法应得谥者考其行状撰定谥文移文吏部考功郎中覆定之本朝虽设太常博士而不掌谥议洪武初惟武臣有谥至永乐中文臣始得谥盖自姚广孝胡广始也自后文武亦多有之然我朝之谥皆出恩赐然臣窃以为九重之上于臣下之贤否未易尽知请自今以后有应得谥者未赐之先先下所司俾其考定订议以闻然后从中赐下如此则得之者以为荣不当得者不因其亲故之属托其当得者不为朋党之掩蔽国家激劝臣子之大法端有在于是其为世教之助夫岂细哉

宏治四年令凡乞恩赐谥者礼部斟酌可否务合公论不许一概比例滥请

隆庆四年题准凡冒袭王爵奉旨改正者不许一概请谥凡文武大臣请谥亦用二字与否取自上裁若官品未高而侍从有劳或以死勤事特恩赐谥者不拘常例十五年奏准文武大臣有请谥者礼部照例上请得旨行吏兵二部备查实迹礼部定上中下三等以行业俱优者为上行实颇可者为中行实无取者为下开送翰林院拟谥请旨

万历元年题准大臣应得谥者礼部仍广加咨询稽核名实闲有应谥而未经题请及曾题请而未蒙赐谥者不论远近许各该抚按及科道官从公举奏礼部酌议题覆补给若不公举子孙自陈乞补谥者不行

十二年题准凡遇文武大臣应得谥号者备查本官生平履历必其节概为朝野具瞻勋猷系国家休戚公论允服毫无瑕疵者具请上裁如行业平常即官品虽崇不得概与

明史万历三十一年礼部侍郎郭正域请严谥典议夺者四人许论黄光升吕本范谦应夺而改者一人陈瓚补者七人伍文定吴悌鲁穆杨继宗邹智杨源陈有年阁臣沈一贯朱赆力庇吕本不从其议未几御史张邦俊请以吕枬从祀孔庙而论应补谥者雍泰魏学曾等十四人部议久之共汇题先后七十四人留中不发天启元年始降旨俞允又增续请者十人而邦俊原请九人不与正域所请伍文定等亦至是始定凡八十四人其官卑得谥者邹智刘台魏良弼周天佐杨允绳沈炼杨源黄巩杨慎周怡庄■〈日上永下〉冯应京皆以直谏孟秋张元忭曹端贺钦陈茂烈马理陶望龄皆以学行张铨以忠义李梦阳以文章鲁穆杨继宗张朝瑞朱冠傅新德张允济皆以清节杨慎之文宪庄■〈日上永下〉之文节则又兼论文学云三年礼部尚书林尧俞言谥典五年一举自万历四十五年至今蒙恤而未谥者九卿台省会议与臣部酌议帝可之然是时迟速无定六年给事中彭汝楨言耳目近则覩记真宜勿逾五年之限又谓三品以上为当予谥而建文诸臣之忠义陶安等之参帷幄叶琛等之殉行闲皆宜补谥事下礼部以建文诸臣未易轻拟不果行至福王时始从工科给事中李清言追谥开国功臣李善长等十四人正德谏臣蒋钦等十四人天启惨死诸臣左光斗等九人而建文帝之弟允熲允熿允熙子文奎亦皆因清疏追补

（臣）等谨按明史所称官卑得谥者特指天启元年补谥诸臣而万历以前非三品得谥者王世贞明异典述则称有三十一人杨恭惠信民以佾都御史刘文恭铤以少詹事宋文恪讷李文忠时勉陈文定敬宗邹文庄守益以国子祭酒李文通奎刘文介俨以太常少卿俱四品朱文肃善胡文穆广吕文懿原以翰林学士张文僖益以侍读学士杨忠愍继盛以兵部

员外郎朱忠定复张恭僖景明以长史俱五品徐文肃善述以春坊中允王文靖汝玉以赞善王忠文祜以翰林待制刘忠愍球以侍讲罗文毅伦舒文节芬以修撰罗文恭洪先以赞善蒋恭靖用文以太医院判俱六品锺恭愍同以御史七品陈恭愍选以布政使毛忠襄吉周节愍宪冯恪愍杰许忠节逵以宪副岳文肃正以知府邓恭毅颺以知县皆藩臬郡邑外臣虽品秩不同而或禁近硕德或封疆殉义皆无愧荣名者独蒋用文以技艺小臣得之殊为幸耳然用文独医士也方士邵元节谥文康荣靖陶仲文谥荣康惠肃而王世贞亦述为异典则不啻褻典矣考明代追谥者五人汉荥泽侯纪信谥忠烈唐韶州刺史邓文进谥忠襄宋邕州推官谭必宋谥忠愍信国公文天祥谥忠烈知信州谢枋得谥文节褒先世之孤忠以激厉风俗乃可为明代之异典云尔

钦定续通志卷一百二十一

●钦定续通志卷一百二十二 器服略一

器服略【一】

（臣）等谨按郑志器服略自序谓祭器出于礼图宜先辨其形制因列尊彝爵觶之制于前寥寥数行十不及一不知三代法物首重鼎钟他如壘舟壶爵斝觚篚簋甗匚敦之属为食器者即为祭器又陶器始于上古礼称器用陶匏古人制作着于典籍者亦班班可考郑氏俱略而不载今续器服先列彝器援据博古考古诸图及聂崇义杨复所编以至经史各子所载典物近古者撮其大端辨其得失异同与累朝制度之更易者以类相叙至郑氏所载服章制度悉本唐杜佑嘉礼典加之删节今仍其例博取各史礼志及輿服仪卫诸志参以会要会典集礼诸书撮举大要视郑志稍详而其文仍归简约云

鼎

鼎始于泰帝伏羲名曰神鼎至商而其制始备父乙鼎瞿父鼎乙毛鼎召夫鼎以字命名持刀父己鼎象形饗饗鼎立戈父甲鼎取其象形或三足或四足铭词或纪其功或纪其时则后代之鼎皆同也周蛟螭鼎蟠夔鼎夔龙雷纹鼎夔龙侈口鼎饗饗鼎兽足鼎鳞纹鼎旋云鼎穆公鼎鬯鼎益鼎鲜鼎师窳父鼎伯■〈盍卩〉父鼎其取义悉与商同秦时丞相樗里子作一鼎文曰智囊汉武帝祀汾阴得宝鼎名曰汾阴宝鼎又登泰山铸鼎其形如瓮昭帝元平元年于蓝田覆车山铸鼎高三尺受五斗宣帝甘露元年于华山仙掌铸一鼎高五尺受四斗后汉光武建元元年铸一鼎其文曰定天下万物伏三足高九尺明帝永平十年铸一鼎于洛水高六尺其文曰蛟龙伏又铸一鼎于谷水高五尺其文曰谷

洛章帝元和二年于北岳铸一鼎高四尺无足其文曰镇地鼎安帝延光四年铸一鼎于少室山其文曰承露鼎顺帝永建六年铸一鼎于伊水名曰鱼鼎灵帝嘉平元年铸一大鼎埋之鸿都门文曰儒鼎汉时臣下铸鼎者杨震为太尉时作太尉鼎王朗为司空时作司空鼎又其小可置诸掌仿鼐而为之曰小鼎四围各周以乳曰百乳鼎蜀汉章武二年于汉川铸鼎名曰克汉鼎诸葛亮作八阵鼎魏曹操铸一鼎于白鹿山高一丈纪征伐战阵之功古文篆书四足曹叡太和六年铸一鼎曰万寿鼎吴孙权黄武元年于彭蠡水沈一鼎其文曰百神助阳侯伏孙亮建兴元年于武昌铸一鼎其文曰镇山鼎晋怀帝永嘉六年铸一鼎沈于瓜步江中无文字鼎似龟形王羲之于九江作书鼎高五尺四面周币书遍刻之沈于水中皆真隶书宋高祖永初三年从秦中还纪功铸一鼎于九江其文曰沸秦洛伏大漠古篆书梁武帝大通中铸鼎萧子云书老子五千言沈之九江中陈武帝即位铸鼎文曰元勋鼎宣帝铸鼎文曰忠烈鼎常侍丁初正书唐武后时九鼎成后欲用黄金涂之姚璿进曰鼎者神器贵质朴不得外饰乃止宋徽宗崇宁四年秋九鼎成奉安于九成宫以蔡京为定鼎礼仪使帝幸宫行酌献礼殿中央曰帝鼎北曰宝鼎东北曰牡鼎东方曰苍鼎东南曰冈鼎南方曰彤鼎西南曰阜鼎西方曰皐鼎西北曰魁鼎

（臣）等谨按鼎制崇乎古圣圜以象阳方以象阴三足以象三公四足以象四辅黄耳以象才之中金铉以象才之断象饗饗以戒其贪象雌形以寓其智作云雷以象泽物之功着夔龙以象不测之变至于牛鼎羊鼎豕鼎又各取其象而饰之大者谓之鼐圜弁上谓之鼐其有腹着饗饗而闲以雷纹者父己鼎父癸鼎之类缘饰旋花象形鼎横戈父癸鼎之类他如孟鼎之侈口中鼎之无文自方如簠分底如鬲设盖如敦大小不同模范各异考士虞礼有上鼎中鼎下鼎有司彻司马举羊鼎司士举豕鼎明堂位载崇鼎贯鼎天子之器三代之时或为寻常日用之器或为子孙永宝用秦汉以降作者稍渺云

尊

夏后氏之尊名山罍商持刀父癸尊祖戊尊雌尊父己尊辛尊父乙尊父丁尊立戈癸尊从尊祖丁尊兄丁尊持刀父己尊谏尊龙凤方尊周月星尊召公尊高克尊师觶尊取义与鼎同惟召公尊器盖用铭高克尊师觶尊纪其宠锡铭至数十字

（臣）等谨按羣书考索尊之为言尊也周礼冡人以疏布冡八尊尊或有盖间有提梁皆为盛酒之器云

罍

尊之大者为壘古者天子用玉壘诸侯大夫以金士以梓小壘谓之坎厠于六尊之间以盛三酒比于六尊周有牺首壘素牺壘象首壘麟凤百乳壘饗餐壘或文或素不同

（臣）等谨按壘之象形取义与鼎同或文或素或有盖无盖不同毛诗正义引郑注司尊彝谓壘刻而画之为山云之形疑用木为之证以韩诗士用梓之说则惟士用梓而孔颖达疑大夫以上同用梓而加饰者盖臆度之辞也

彝 【舟附】

古者司尊彝掌六彝之位彝皆有舟夏后氏鸡彝商■〈卩 虜〉彝已举彝子孙父辛彝子孙彝父丁彝立戈父甲彝虎首彝周己酉方彝单彝召父彝叔彝云雷宝彝伯映彝百乳彝高足彝彝皆有铭义同鼎或文或素高不踰尺

（臣）等谨按古者鸡彝斝彝虎彝盛明水黄彝雌彝鸟彝盛郁鬯彝必有舟郑氏谓舟尊下台若今时承盘云

卣

古者卣为中尊尊彝为上壘为下卣居其中商持刀祖乙卣执戈父癸卣内言卣田卣世母辛卣卦象卣立戈卣宝卣册卣周师淮父卣单癸卣乐司徒卣汉四足卣取名之义与鼎同

（臣）等谨按卣以盛郁鬯形制不一皆有盖有提梁有铭文以记其作始文素不同汉以后不制云

壶

壶为礼器腹方口圆曰壶商贯耳弓壶两耳以弓铭之有两耳者可以贯绳又有斝姬壶仲丁壶周制觚棱壶饗餐方壶盘云壶文以盘云交螭云雷壶三螭壶四鸮壶汉大官壶绥和壶进鹿壶鳧壶小匱壶圆壶汉以后之制或匱或圆其制愈多唐宋以后不仅作酒器或有提梁及盖文素不同

（臣）等谨按壶始于商至周蒸尝馈献用两壶次于尊彝闲所以盛酒云

爵斝

爵为饮酒器取其能飞而不溺于酒以寓傲焉古者刻木为之继以铜为之夏时曰琖商招父丁爵父乙爵祖乙爵祖丙爵父戊丁爵祖己爵斧爵子爵中爵纒爵云雷爵周瑶爵大田爵篆带爵玉爵子乙斝父丁斝山斝风纹斝云雷斝汉虎斝皆两耳三足有铭文素不同取名之义与鼎同

（臣）等谨按觥一升曰爵斝与爵形相同名虽殊而用则一又按礼记载卑者举

角角受四升形与爵略同云

觚 【卮附】

觚亦饮器商合孙祖丁觚子乙父丁觚女乙觚木觚龙觚四象觚周四山饗饗觚四虺觚蝉纹觚雷纹觚小圆觚素觚其形如瓶口大而腹小高不踰尺铭不过数字文素不同

（臣）等谨按觚受二升周礼梓人掌之此器于当中屹起四棱又考说文觚为乡饮酒之爵又汉建光卮蝉纹卮匏斗螭首卮制与觚略异皆饮器云

觶

觶亦饮器商立戈父辛觶立戈觶周父贝觶饗饗觶铭不过数字高不踰尺文素不同或有盖

（臣）等谨按觶与觚异形设之祭祀燕享之间受三升又有散觥形制与觶略相类云

敦

敦始于有虞氏之两敦商己丁敦周散季敦师毁敦仲驹父敦敌敦姜敦宰辟父敦兕敦刺公敦师望敦g敦周虔敦虎耳敦夔足敦皆有铭

高不踰尺或有盖或有盘有耳文素不同铭或数十字纪勋烈也

（臣）等谨按周礼合诸侯用玉敦小宰主妇执金敦敦制不同若鼎三足两大耳其盖有圈足可置诸地者宰辟父敦之类无盖而下连

方座毁敦之类上古用瓦中古用金或以玉饰或以木形各异云

簋 【豆锤附】

簋簋之用于周者有叔邦父簋太师望簋京叔簋素簋皆有盖或有铭高不踰尺文素不同周有鱼豆单疑生豆蟠虺豆汉轻重雷纹豆或

有盖高亦不踰尺文素不同

（臣）等谨按韩诗外传载舜饭乎土簋又云土埴即土簋则簋之制为最古矣又案周礼注疏外方内圆曰簋外圆内方为簋考工记旒

人为簋及豆则以瓦为之聘礼注簋以竹为之簋皆用木宣和博古图所载则皆铜器又按左传齐旧四量豆区釜锤注釜十则锤六十四斗

也又小尔雅二缶谓之锤博古图有汉大官铜锤盖亦量器之一以铜制之云

甗

商时有父己甗父乙甗祖己甗鬲甗二饗饗甗周垂花雷纹甗盘云饗饗甗纯素甗汉偃耳甗商周之制高皆踰尺文素不同或三足而圆

或四足而方惟汉制无足止六寸

（臣）等谨按周官陶人为甗郑康成注甗无底甗又自关以东谓之甗或谓之鬻

至梁谓之鋹大抵皆烹饪之具又按汉书郊祀志及说文云鼎空足曰鬲盛谷六斗其形如斛与甗甑略相类云

盃

商阜父丁盃执戈父癸盃周单从盃嘉仲盃龙首盃云雷盃三螭盃蛟螭盃麟盃虬虬盃粟纹盃细纹熊足盃汉凤盃螭首虬纹盃或有耳有提梁有盖有三足四足文素不同取名之义与鼎同高不踰尺

（臣）等谨按说文从皿从禾为调味之器王安石谓和如禾则从禾者取和之意云

匱

商启匱凤匱三夔匱周父癸匱文姬匱义母匱孟皇父匱皆有铭或有盖有耳取名之义与鼎同文素不同高或踰尺

（臣）等谨按内则敦牟卮匱非餽莫敢用公食大夫礼小臣具盘匱即后世之洗器云

钟

颛顼命飞龙氏铸洪钟垂作垂钟炎帝孙岐伯因鼓遂为钟黄帝作五钟一曰青钟二曰赤钟三曰黄钟四曰景钟五曰黑钟周官皂氏为钟有鱼腹钟九龙钟十龙钟千石钟齐侯搏钟蛟篆钟迟父钟聘钟宝和钟宋公■（音莛）钟双夔钟双螭钟特钟素乳蟠夔钟素乳钟蟠龙钟立夔钟篆带钟星带钟素带钟雷纹钟旋纹钟花乳钟辅乳钟环钮钟虎钟凤钮钟双凤钟荇叶钟山纹钟实箫钟汉辟邪钟环钮钟饗饗钟蕤宾钟唯齐侯搏钟铭四百九十二字取名之义与鼎同或文或素或有垂带或虬蟠相向大小制各不同至南齐时制景阳钟唐制漏钟唯乐器之特钟编钟其制式历代不易云

（臣）等谨按钟为乐器制详于考工记博古图所摹周代为独多云

铎 【鋹附】

铎始于夏周官鼓人以金铎通鼓周有凤栖铎铭字作凤栖木形又大雷柄铎皆无铭

（臣）等谨按铎有金铎木铎之分金铎舌以金木铎舌以木金铎振武事若司马之振铎摠铎官师振铎是也木铎振文事若书礼所言徇以木铎是也又按周礼鼓人以金鋹和鼓博古图载有虎龙鋹山纹鋹圜花鋹紮马鋹双鱼鋹凤鋹虎鋹雌鋹皆象形取名而无铭云

历代陶器

（臣）等谨按范金合土谓之陶器考工记有陶旗诸制以补郑志之阙焉职三代迄秦汉谓之甓而周书载神农作瓦器物原神农作瓮

则前民利用肇自三皇大尊瓦甒用之享祀实与鼎彝敦卣同为法物之传今谨考摭羣书凡陶器之可考证者以类甄叙并详其规模形

食器

神农作瓮及甒黄帝作釜甑轩辕作盃楛有虞氏作瓦大【仪礼疏瓦大有虞氏尊】土簋土型周官陶人作甗盆缶壶簋豆【考工记簋实一穀崇尺厚半寸唇寸豆实三而成穀崇尺】甗甗【尔雅甗甗谓之甗康瓠谓之甗】挈壶灌瓮经程【韩诗外传齐桓公饮诸臣酒令曰后者罚一经程盖酒器之大者】瓦卮汉孟康瓠甗甗甗瓠【货殖传酏酱千瓠】儋瓠安哉【太平御览李尤安哉铭安哉令名甘旨是盛埏埴之巧甄陶所成】晋缥瓷东瓠甗器鹤觞罍【洛阳伽蓝记河东人刘白堕善酿以罍贮酒千里相饷谓之鹤觞】唐紫瓷盆越盃【陆羽茶经越盃上口唇不卷底卷而浅受半升】内邱白瓷盃绿瓷栳瓷罍越瓠邢瓠高足盃【三楚新录荆南瓷器皆高足谓之高足盃】宋玛瑙釉小罍汝窑壶汝窑方圆瓶【清秘藏汝窑较官窑质尤滋润】官哥窑方圆壶立瓜卧瓜壶定窑瓜壶茄壶驼壶青冬瓷天鸡壶建安兔毫瓠【蔡襄茶录黑纹如兔毫】小海鸥紫盃铜叶汤■〈敞上瓦下〉哥窑八角把栳酒榼饶州花青盃浙瓮元饶州小足印花盃酒瓠明永乐窑压手栳宣德窑白坛瓠白茶瓠红鱼靶栳朱砂大盃朱砂小壶成化窑鸡缸嘉靖窑小白瓠坛瓠鱼扁瓠

祭器

有虞氏作泰尊【礼记疏泰用瓦】周作大鬯瓦旒【礼图祭天用瓦旒】汉大尊【山堂考索大尊与甗形制容受同】魏陶尊唐大尊牺尊着尊象尊壶尊概尊散尊山尊廔尊山鬯大羹和羹盃看甒牡丹甒壶甒

日用器

周作登【尔雅瓦豆谓之登】甒【礼记尊于甒】汉康瓠晋军持【庶物异名疏云梵语军持此言甒也】五代八缶【紺珠缶如水瓠置桌上】陶砚【砚史砚连盖盖上有凤余雕杂花】宋三山五山笔格【考盘余事哥窑所制】青冬瓷菊瓣水中丞细花纹水中丞双桃注双莲房注蟾注【考盘余事皆宋时定官哥窑所制】官哥龙泉定笔洗【考盘余事陶者有官哥元洗葵花洗磬口洗元肚洗四卷荷叶洗卷口蔗段洗长方洗以粉青纹片朗者为贵又有龙泉双鱼洗菊花瓣洗钵盂洗百折洗又有定窑三籀元洗梅花洗绦环洗方池洗柳斗元洗元口洗棱洗】镇纸【砚北杂志笔砚间物曰镇纸】印色池

【考盘余事官哥窑方者佳入角委角者难得】

彝炉乳炉 【考盘余事官哥定窑龙泉彝炉乳炉大如茶杯而式雅者为上】 香盒糊

【考盘余事方斗如斛中置一梁】 书灯瓷箫 【

南村随笔德化瓷箫色莹白声凄朗远出竹上】 瓷枕明敞口花尊 【尊与瓶异瓶口

小于腹尊腹小于口】 坐墩 【博物要览五采各

色】

钦定续通志卷一百二十二

●钦定续通志卷一百二十三 器服略二

器服略 【二】

君臣冠冕巾幘等制度

君臣服章制度

士庶冠服

后妃命妇首饰服章制度

士庶妻首饰服章制度

天子诸臣玉佩剑绶玺印

○君臣冠冕巾幘等制度

（臣）等谨按郑志本门列君臣冠冕巾幘等制度标题考下首列冕次冠次弁次幘次巾等制其标题接行复列历代冕弁一条所举两

歧今为删去以与下各标题画一

唐制天子六冕大裘冕无旒广八寸长一尺二寸金饰玉簪导以组为纓色如其绶黼纁充耳祀天地神祇则服之衮冕广一尺二寸长二

尺四寸金饰垂白珠十有二旒以组为纓色如其绶玉簪导享庙及庙遣上将征还饮至践阼加元服纳后若元日受朝临轩册拜王公则服之

鷩冕八旒有事远主则服之毳冕七旒祭海岳则服之絺冕六旒祭社稷先农则服之元冕五旒蜡祭百神朝日夕月则服之皇太子衮冕白珠

九旒以组为纓色如其绶青纁充耳犀簪导侍从皇帝祭祀及谒庙加元服纳妃则服之侍臣服第一品衮冕垂青珠九旒以组为纓色如其绶

青纁充耳宝饰角簪导第二品鷩冕八旒第三品毳冕七旒第四品絺冕六旒第五品元冕五旒

宋制天子不备六冕有大裘冕冬至祀昊天上帝立冬祀黑帝立冬后祀神州地祇服之高宗绍兴后加十有二旒广八寸长一尺六寸前

圆后方前低寸二分元表朱里以繒为之玉笄玉瑱衮冕广一尺二寸长二尺四寸十有二旒二纁并贯真珠又有翠旒十二碧凤衔之在珠旒

外金饰玉簪导祭天地宗庙朝太清宫飨玉清昭应宫景灵宫受册尊号元日受朝册皇

太子则服之皇太子衮冕九旒犀簪导其臣下正一品

九旒冕犀簪二品七旒冕角簪三品五旒冕后又改为鷩冕八旒毳冕六旒絺冕四旒元冕无旒

辽制天子衮冕垂白珠十有二旒以组为纓色如其纓鞋纁充耳金饰玉簪导祭祀宗庙遣上将出征饮至践阼加元服纳后若元日受朝则服之

金制天子衮冕广八寸长一尺六寸青罗为表红罗为里前后珠旒共二十四鞋纁二玉簪导皇太子衮冕白珠九旒红丝组为纓青纁充耳犀簪导

元制天子衮冕广八寸长一尺六寸前后珍珠旒各十二鞋纁二朱丝组为纓玉簪导皇太子衮冕白珠九旒红丝组为纓青纁充耳犀簪导

明太祖洪武十六年定衮冕之制元表纁里前后各十有二旒红丝组为纓鞋纁充耳玉簪导祭天地宗庙服之皇太子衮冕九旒红组纓金簪导陪祀天地社稷宗庙及大朝会受册纳妃则服之亲王衮冕九旒助祭谒庙朝贺受册纳妃服之

通天冠 【宋制天子通天冠仁宗天圣中改称承天冠二十四梁加金博山附蝉十二高广各一尺青表朱里首施珠翠黑介帨组纓翠纁玉犀簪导凡四孟朝献景灵宫郊祀明堂诣宫宿庙进胙上寿两宫及端门肆赦并服之辽与宋同金亦如之元不置明亦与宋制同】

远游冠 【宋制皇太子远游冠十八梁青罗表金涂银钹花饰犀簪导红丝组为纓加博山附蝉受册谒庙朝会则服之辽皇太子远游冠三梁加金附蝉施珠翠黑介帨发纓翠纁犀簪导谒庙还宫元日冬至朔日入朝服之亲王及诸王则青纁金皇太子远游冠十八梁金涂银花饰博山附蝉红丝为纓犀簪导】

进贤冠 【宋制诸臣唯一二品服进贤冠五梁涂金银花额犀玳瑁簪导立笔辽制三品以上进贤冠三梁宝饰五品以上二梁金饰九品以上一梁无饰】

貂蝉冠 【宋制貂蝉冠三梁犀角簪导诸司三品御史台四品两省五品服元制助祭诸执事官亦服之】

獬豸冠 【宋制官为御史则冠有獬豸角两梁犀角簪导金与宋同元制亦同唯助祭则服之】

翼善冠 【辽制皇帝翼善冠朔视朝服之明制皇帝及皇太子常服用乌纱折上巾亦名翼善冠】

金文金冠 【辽皇帝国服大祀服之】

实鲁袞冠 【辽皇帝国服大祀服之】

进德冠 【辽制九琪金饰皇太子服之】

毡冠 【辽制金花为饰或加珠玉翠毛额后垂金花织成夹带中贮发一总】

纱冠 【辽制如乌纱帽无檐不擗双耳额前缀金花上结紫带末缀珠】

七宝重顶冠 【元制天子夏服】

珠子卷云冠 【元制天子冬服】

金凤顶漆纱冠 【元制天子夏服】

忠静冠 【明世宗嘉靖七年制品官之服仿古元端冠匡如制以乌纱冒之两山俱列于后冠顶仍方中微起三梁各压以金线边以金缘之】

保和冠 【明嘉靖七年赐诸王以下服】

折上巾 【宋因唐制为天子常服皇太子亦服之辽皇帝及臣下亦有之明初翼善冠亦名折上巾】

紫皂幅巾 【辽皇帝国服】

四带巾 【金国服以皂罗或纱为之上结方顶折垂于后顶之下际两角各缀方罗径二寸许方罗之下各附带长六七寸当横额之上】

貂蝉笼巾 【宋臣下朝服貂蝉笼巾七梁貂鼠尾立笔金臣下朝服一品貂蝉笼巾七梁额花冠貂鼠立笔犀簪导二品七梁冠银立笔犀簪导三品四品五梁冠银立笔五品四梁冠六品七品三梁冠元笼巾貂蝉冠为司徒大礼使祭服明制公冠八梁加笼巾貂蝉立笔五折侯七梁立笔四折伯立笔二折】

幞头 【唐制君臣通服制以藤织草巾子为裹纱为表帝服则脚上曲人臣下垂宋制君臣通服平脚乘舆或服上曲辽制臣僚常服用幞头元亦为百官常服其交角幞头巾后交折其角凤翅幞头式如唐巾两角上曲作云头两旁覆以两金凤翅控鹤幞头制如交角金缕其额花角幞头额上簇象生花皆仪卫之服明制唯乐舞生服幞头】

皮弁 【明制皇帝视朝降诏降香进表四夷朝贡外官朝覲策士传牒皆服之其制用乌纱冒之前后各十二缝每缝缀五采玉十二以为饰玉簪导红组纓皇太子皮弁前后各九缝每缝缀五采玉九金簪朱纓亲王皮弁如东宫亲王世子皮弁各八缝每缝缀三采玉八郡王皮弁各七缝每缝缀三采玉七】

武弁 【明制皇帝亲征遣将服之冒以绛纱上锐】

燕弁 【明嘉靖中制皇帝常服制如皮弁冒以乌纱分十有二瓣各以金线压之前饰五采玉云各一后列四山】

（臣）等谨按周礼有弁师之官司服亦掌韦弁弁之制最为近古考之史志及会要会典诸书唐以后无闻焉唯明制有之谨胪备于左云

帽 【宋为帽子宣宗时为皇帝后殿早讲之服辽国服有硬帽皇帝小祀之服元制天子冬服有金锦暖帽红金荅子暖帽白金荅子暖帽银鼠暖帽夏之服则有白藤宝贝帽黄雅库特宝贝珠子带后檐帽七宝漆纱带后檐帽仪卫之服有学士帽制如唐巾两角如匙头下垂锦帽制以漆纱后幅两旁前拱而高中下后画连钱锦前额作聚文明制自郡王长子以下至羣臣常服皆用乌纱帽内使冠服用乌纱描金曲脚帽侍仪舍人服用乌纱唐帽校尉用金鹅帽】

簪戴 【宋制幘头簪花谓簪戴中兴郊祀明堂毕回銮臣僚及扈从并簪花恭谢日亦如之遇庆典及锡宴新进士闻喜宴并如之】

重戴 【宋制以皂罗为之方而垂檐紫里两紫丝组为缨盖折上巾又加以帽宋初御史台服之新进士亦戴释褐则否】

钹笠 【元制天子夏服有宝顶金凤钹笠珠缘边钹笠金凤顶笠】

○君臣服章制度 【袍附】

唐高宗上元元年制文武三品以上服紫金玉带四品服深绯五品服浅绯并金带六品服深绿七品服浅绿并银带八品服深青九品服浅青并鍮石带庶人服铜铁带睿宗文明元年七月甲寅诏八品以下旧服青者并改以碧京文官五品以上六品以下七品清官每日入朝常服袴褶诸州县长官在公衙亦准此

梁太祖开平二年十一月南郊礼义使奏今检详礼文皇帝赴南郊服通天冠绛纱袍文武官及导驾士绛衣平巾幘

后唐庄宗同光二年七月太常礼院奏按本朝旧仪自一品至三品婚姻得服袞冕九章今皇子兴圣宫使继岌虽未封建官是检校太尉合准一品婚姻施行明宗天成四年九月太常礼院奏来年二月十八日致斋于明堂准旧仪皇帝服通天冠绛纱袍文武五品以上着袴褶陪臣着朝服

周世宗显德元年正月一日敕节文今后升朝官两任以上著录十五周年者与赐绯

宋制天子之服大袞冕服大袞青表纁里黑羔皮为领襍襍朱裳被以袞服冬至祀昊天上帝立冬祀黑帝及神州地祇皆服之袞冕服袞

服青色红裙十二章青襦褙裾大带白罗中单革带祭天地宗庙朝太清宫飨玉清昭应宫景灵宫受册尊号元日受朝册皇太子则服之又有通天冠绛纱袍履袍赭黄淡黄袍衫玉装红束带皂文鞞大燕则服之又有赭黄淡黄■〈衤癸〉袍红衫袍常朝则服之又有窄袍便坐视事则服之其御阅服则以金装甲乘马大阅则服之皇太子衮冕用青罗衣红罗裳九章白纱中单青襦褙裾革带从祀则服之其服远游冠用朱明服红花金条纱衣皂襦褙红纱裳白花罗中单革带受册谒庙朝会则服之其常服阜纱折上巾紫公服通犀金玉带诸臣祭服沿唐制有衮冕九旒青罗衣绯罗裳九章白花罗中单革带亲王中书门下奉祀则服之毳冕七旒五章九卿奉祀服之元冕五旒无章四品五品为献官服之六品以下紫檀衣朱裳其朝服戴进贤冠则服绯罗袍白花罗中单绯罗裙皂襦褙白罗大带银革带六品以下无中单神宗元丰七年诏夏祭百官朝祭服用纱其公服因唐之制三品以上服紫五品以上服朱七品以上服绿九品以上服青其制曲领大袖下施横栏束以革带幞头乌皮鞞自王公至一命之士通服之又有紫衫本军校之服高宗建炎后士大夫服之以便戎事绍兴二十六年严禁士大夫毋得以戎服临民自是皆服凉衫以为便服孝宗干道初因礼部侍郎王曷奏禁之其襦衫以白细布为之圆领大袖下施横栏为裳腰闲有襞积进士及国子生州县生服之

（臣）等谨按礼记云三王异世不相袭礼夏收殷舛各异其制各代损益随时而礼征从朔义崇敦本自北魏始起浇风变其旧俗至辽金元之世服饰并更未几而国势浸衰沦胥洵及史籍所载殷鉴具存洪惟皇上念切绍衣训行万禩于序礼器图暨评通鉴辑览务惩轻易之弊前于馆臣纂嘉礼典中于辽金元改服之由叙按未能明晰复降谕旨订正且申示本天本祖飨帝飨亲之至论所以绵景祚而昭来许者实亘古所未有兹续纂通志仍依通典之例于正史之外参用契丹国志大金国志诸书详载改制之缘起云

辽国服之制大祀皇帝戴金文金冠则服白绫袍红带络缝乌鞞小祀皇帝戴硬帽则服红克丝龟文袍其朝服皇帝戴实鲁衮冠则服络缝红袍垂饰犀玉带络缝鞞太宗更以衮冕锦袍金带臣僚戴毡冠或纱冠服紫窄袍系■〈革占〉鞞带以黄红色绛裹革为之用金玉水晶靛石缀饰谓之盘紫太宗更以锦袍金带羣臣高年有爵秩者亦赐之其公服之制皇帝戴紫皂幅巾则服紫窄袍玉束带或衣红袄臣僚亦幅巾紫衣臣僚便衣谓之盘裹绿花窄袍中单多红绿色贵者披貂裘以紫黑色为贵青次

之贱者貂毛羊鼠沙狐裘田猎则皇帝幅巾擐甲戎装以貂鼠或鹅项鸭头为扞腰蕃汉诸司使以上并戎装衣皆黑绿色太宗会同中太后北面臣僚并国服皇帝南面臣僚并汉服圣宗统和元年册承天太后给三品以上法服兴宗重熙元年尊号册礼皇帝服龙袞北面臣僚并朝服自是以后大礼并从汉服其汉服之制祭服皇帝袞冕元衣纁裳十有二章朝服皇帝通天冠绛纱袍制度皆与宋同皇太子远游冠绛纱袍制度亦与宋同唯皇帝公服戴翼善冠服柘黄袍九环带白练裙襦六合鞞皇太子戴进德冠服绛纱单衣白裙襦革带臣僚冠幘纁绛纱单衣白裙襦常服五品以上紫袍金玉带六品以下绯衣银带八品九品绿袍鍤石带又有绿巾绿花窄袍 【按叶隆礼契丹国志所载未详何品】

金初国服其皇帝视朝之服纯纱幘头窄袖赭袍玉匾带黄满领太宗即位始加赭黄平居闲暇皂巾杂服太子服纯纱幘头紫罗宽袖袍章宗明昌六年七月始定文武官承应人并及荫者系籍儒生章服制泰和元年礼官请考汉唐之制更制祭服四年四月定衣服制先是熙宗天眷三年车驾将幸燕有司以通天冠绛纱袍进后又定制皇帝有袞冕服皇太子亦有袞冕服制度皆与宋同臣僚朝服戴貂蝉笼巾则服绯罗大袖绯罗裙白纱中单金涂银革带公服文资五品以上紫服三师三公亲王宰相一品官服大独科花罗执政官服小独科花罗二品三品服散搭花罗四品五品服小杂花罗六品七品服绯花麻罗八品九品服绿无纹罗凡武官紫服世宗大定十五年制曰袍不加襴非古也遂命文资官公服加襴其常服四带巾则盘领衣乌皮鞞其束带曰吐鹞其衣色多白三品以皂窄袖盘领缝腋下为襞积而不缺袴其胸臆肩袖或饰以金绣其从春水之服则多鹞捕鹅杂花卉之饰其从秋山之服则以熊鹿山林为文其长中骭取便于骑也

元初立国冠服车輿并从旧制史志不载其国俗可考者天子积苏冬之服凡十有一等服纳奇实奇凌则冠金锦暖帽服大红桃红紫蓝绿宝里则冠七宝重顶冠服红黄粉皮则冠红金苔子暖帽服白粉皮则冠白金苔子暖帽服银鼠则冠银鼠暖帽其上并加银鼠比肩夏之服凡十有五等服塔纳图纳奇实则冠宝顶金凤钹笠服苏布特图纳奇实则冠珠子卷云冠服纳奇实则帽亦如之服大红珠宝里红毛子塔纳则冠珠缘边钹笠服白毛子金丝宝里则冠白藤宝贝帽服駝褐毛子则帽亦如之服大红绿蓝银褐枣褐金绣龙五色罗则冠金凤顶笠各随其服之色服金龙青罗则冠金凤顶漆纱冠服珠子褐七宝珠龙苔子则冠黄雅库特宝贝珠子带后檐帽服青苏普金丝阑子则冠七宝漆纱

带后檐帽其百官积苏冬之服凡九等大红纳奇实一大红奇凌一大红官素一桃红蓝绿官素各一紫黄鸦青各一夏之服凡十有四等素纳奇实一聚线宝里纳奇实一枣褐浑金闲丝蛤珠一大红官素带宝里一大红明珠苔子一桃红蓝绿银褐各一高丽鸦青云袖罗一駝褐茜红白毛子各一鸦青官素带宝里一世祖至元十二年十一月博士始议皇帝皇太子冕服其制尚简成宗大德十一年九月博士又议唐制冕服重加更订事未果行英宗初命礼仪院使巴尔斯济苏传旨令省臣与太常礼仪院速制法度八月中书省会翰林集贤太常礼仪院官讲议依秘书监所藏前代帝王袞冕法服图本命有司制如其式天子袞冕服十二章皇太子袞冕服九章制度与宋同臣僚祭服三献官及司徒大礼使有笼巾貂蝉冠青罗服红罗裙白纱中单银束带助奠以下诸执事官青罗服红绫裙紫罗公服白纱中单铜束带其百官公服制以罗大袖盘领一品紫大独科花二品小独科花三品散搭花四品五品小杂花六品七品绯罗小杂花八品九品绿罗无纹玉犀金带仁宗延佑元年十二月诏曰比年以来所在士民靡丽相尚尊卑混淆命中书省定服色等第凡蒙古及现当集赛诸色人等不许服龙凤文其职官除龙凤文外一品二品服浑金花三品服金苔子四品五品服云袖带襴六品七品服六花八品九品服四花御赐之物不在禁限

明太祖洪武元年学士陶安请制五冕太祖曰此礼太繁祭天地宗庙服袞冕社稷等祀服通天冠绛纱袍余不用三年更定正旦冬至圣节并服袞冕祭社稷先农册拜亦如之十六年定袞冕之制袞元衣黄裳十二章大带玉革带二十六年更定袞冕袞元衣纁裳素纱中单红罗蔽膝世宗嘉靖八年谕阁臣张璁袞冕今何不用革带璁对按陈祥道礼书古革带以系佩玦今不用失古制乃用革带复为元衣黄裳帝谕衣有六章古以绘今以织裳六章古用绣亦当从之皇帝通天冠服绛纱袍深衣制白纱内单阜领襍裾革带皇帝武弁服亲征遣将服之嘉靖八年谕阁臣张璁云会典纪亲征类馮之祭皆具武弁服不可不备璁随具图以进乃定制武弁服鞅衣鞅裳俱赤色佩绶革带如常制又制皮弁服绛纱衣革带皇帝常服洪武三年定乌纱折角向上巾盘领窄袖袍永乐初更定翼善冠袍黄盘领窄袖前后两肩各织金盘龙一嘉靖七年帝以燕居冠服尚沿习俗更定燕弁服谕张璁考古帝王燕居法服之制璁乃采礼书元端深衣之文图注以进帝为参定其制谕璁详议如古元端之制色元边缘以青两肩绣日月前盘圆龙一后盘方龙二边加龙文八十一领与两祛其龙文五九衽同前后齐共龙文四九衽用深

衣之制色黄袂圆袂方下齐素带朱里青表绿缘边腰围饰以玉龙九元履朱缘红缨黄结白袜皇太子冠服亦有袞冕袞服九章元衣纁裳素纱中单青领襍裾革带其皮弁服绛纱袍本色领襍裾素纱中单如深衣制皇太子常服乌纱折角向上巾袍赤盘领窄袖前后两肩各织金龙一亲王袞服青衣纁裳嘉靖七年颁赐保和冠青质青缘服前后方龙补身用素地边用云衬用深衣玉色带青表绿里绿缘常服与皇太子同亲王世子冕服七章青衣纁裳素纱中单青领襍裾革带常服与亲王同郡王冕服五章青衣纁裳中单领织黻文七常服与亲王世子同郡王长子朝服七梁冠大红素罗衣白素纱中单大红素罗裳玉朝带公服皁绉纱幘头大红素纁丝衣玉革带常服乌纱帽大红纁丝织金狮子开■〈衤癸〉圆领其臣僚冠服尚赤祭服则上衣青罗皂缘下裳赤罗皁缘独锦衣卫堂上官大红蟒衣飞鱼乌纱帽鸾带佩绣春刀朝服定用梁冠赤罗衣白纱中单赤罗裳革带公服则盘领右衽袍用纁丝或纱罗绢袖宽三尺一品至四品绯袍五品至七品青袍八品九品绿袍公服花样一品大独科花径五寸二品小独科花径三寸三品散搭花径二寸四品五品小杂花径一寸五分六品七品小杂花径一寸八品以下无纹常服用杂色纁丝绫罗彩绣洪武二十四年定公侯驸马伯服绣麒麟白泽文官一品仙鹤二品锦鸡三品孔雀四品云雁五品白鸂六品鹭鸶七品鸂鶒八品黄鸂九品鸂鶒杂职练鹊风宪官獬廌武官一二品狮子三四品虎豹五品熊罴六品七品彪八品犀牛九品海马嘉靖中既定燕居法制之服阁臣张璠因言品官燕居之服未有明制诡异之徒竞为奇服以乱典章乞更法古元端别为简易之制昭布天下使贵贱有等帝因复制忠静冠服图颁礼部其服仿古元端服色用深青以纁丝纱罗为之三品以上云四品以下素缘以蓝青前后饰本等花样补子深衣用玉色素带素履青绿缘状元冠二梁绯罗圆领白绢中单进士乌纱巾深蓝罗袍缘以青罗传胪日服之释菜毕易常服

○士庶冠服

（臣）等谨按郑志器服略止载君臣服章而士庶缺焉今考各史志及会要会典所可酌载者撮其大端以存各朝制度云

唐制国子太学四门生俊士参见之服黑介帻簪导白纱单衣青襟襍领革带庶人婚假绛公服

后唐明宗天成二年正月敕庶人商旅祇着白衣

宋制庶人服白流外及贡举人通许服皁仁宗天圣三年诏在京士庶不得衣黑褐地白花衣服并蓝黄紫地撮晕花样孝宗淳熙中朱子

定祭祀冠婚之服时颁行之凡处士则幘头阜衫带

金章宗明昌六年制系籍儒生止服白衫领系背带并以紫圆绦罗带余人用纯紫领不得用缘杂色圆板绦罗带不得用紫世宗大定十三年太常拟庶人止许服絁紬绢布毛褐花纱无纹素罗丝绵其头巾系腰领帕许用芝麻罗绦许用绒织成者

元仁宗延佑元年制庶人除不得服赭黄唯许服暗花纹丝紬绦罗毛毳帽笠不许饰用金玉

明太祖洪武三年令士人戴四方平定巾二十三年定儒士生员衣自领至裳去地一寸二十四年以士子巾服无异吏胥宜甄别之命工部制式以进太祖亲视凡三易乃定生员襦衫用玉色布绢为之宽袖阜缘阜绦软巾垂带世宗嘉靖二十二年礼部言士子冠服诡异有凌云等巾甚乖礼制诏所司禁之庶人戴四方平定巾杂色盘领衣不得僭用金绣锦绮纁丝绦罗止服紬绢素纱其衣制长去地五寸袖长过手六寸云

○后妃命妇首饰服章制度

后唐庄宗同光二年太常礼院奏皇子兴圣宫使继岌婚礼其妃准一品命妇礼花钗九枝博鬓褙翟衣九等宋制后之服有祔衣朱衣礼衣缘用翟为章三等大带随衣色朱里紕其外上以朱锦下以绿锦白玉双佩大绶小绶施玉环惟鞠衣无翟文其首饰花十二株并两博鬓饰以九龙四凤妃褙翟青罗绣为摇翟之形编次于衣青质以紬为领缘以摇翟为章二等其首饰花九株并两博鬓冠饰以九翬四凤皇太子妃褙翟青质织为摇翟之形以紬为领缘以摇翟为章二等大带随衣色上以朱锦下以绿锦白玉只佩大绶小绶其鞠衣以黄罗为之无翟其首饰花九株并两博鬓其后妃常服则用大袖生色领长裙霞帔玉坠子背子生色领用绛罗徽宗政和中议礼局上命妇之服花钗冠皆施两博鬓宝钿饰其翟衣皆用青罗绣为翟编次于衣一品花钗九株翟九等二品花钗八株翟八等三品花钗七株翟七等四品花钗六株翟六等五品花钗五株翟五等以紬为领缘加文绣重雉为章二等

辽皇后祭山仪御绛帔络缝红袍悬玉佩双结帕小祀皇后戴红帕服络缝红袍悬玉佩双鱼臣僚命妇服饰各从本部旗帜之色

金皇后花株冠前后花十有二金九龙四凤祔衣深青罗织成翬翟之形领褙襖并红罗织成云龙大绶小绶施玉环大带青罗朱里紕其外上以朱锦下以绿锦宗室及外戚并一品命妇衣服听用明金期亲虽别籍女子出嫁并同五品以上官母妻许披霞帔 【按宇文懋昭大

金国志金初富人多以纁丝绵紬为衫裳亦闲用细布秋冬以貂鼠或羊皮为裘妇人衣曰大袄子裳曰锦裙盖系金国初服金史失载附识于此】

元后妃及大臣正室皆带古库勒衣大袍命妇衣服一品至三品服浑金四品五品服金苔子六品以下惟服销金

明皇后冠服受册谒庙朝会服礼服其冠圆匡冒以翡翠上饰九龙四凤大花十二树小花数如之两博鬓十二钿后定制饰翠龙九金凤四皆口衔珠滴三博鬓饰以金龙翠云皆垂珠滴翠口圈一珠宝钿花十二翼钿如其数祔衣深青绘翟赤质五色十二等素纱中单黻领朱罗谷襖襪裾以纁为领缘用翟为章三等大带随衣色朱里紕其外上以朱锦下以绿锦玉革带翟衣深青织翟文十二等红领襖襪裾织金云龙文中单玉色纱为之红领襖襪裾织黻文玉革带大绶小绶玉环玉佩垂玉花玉滴常服龙凤珠翠冠上饰金龙一翊以珠翠凤二皆口衔珠滴翠口圈一金宝钿花九饰以珠金凤二口衔珠滴三博鬓饰以鸾凤金宝钿二十四边垂珠滴其服则大彩霞帔衫黄霞帔深青织金云霞龙文或绣或铺翠圈金饰以珠玉坠子琢龙文四■〈衤癸〉袄【即褙子】深青金绣团龙又制鞠衣红色前后织云龙文或绣或铺缘襪袄子黄色红领襖襪裾皆织金彩色云龙文皇妃受册助祭朝会礼服冠饰九翬四凤花钗九树小花数如之两博鬓九钿后更定九翟冠附以翠博山大珠翟二小珠翟三翠翟四皆口衔珠滴翟衣青质绣翟编次于衣及裳重为九等青纱中单黼领朱纁襖襪裾加文绣重雉为章二等以纁为领缘玉革带九嫔冠用九翟次皇妃之凤大衫鞠衣如皇妃制其内命妇冠服三品以上花钗翟衣四品五品山松特髻大衫为礼服皇太子妃礼服冠九翬四凤翬凤皆口衔珠滴大珠花九树小珠花数如之双博鬓饰以鸾凤皆垂珠滴翠口圈一珠宝钿花九翠钿如其数翟衣青质织翟文九等红领襖襪裾织金云龙文常服大衫霞帔外命妇朝服一品花钗九树两博鬓九钿金翟衣绣翟九重玉带金绣文霞帔二品花钗八树两博鬓八钿翟衣八等犀带金绣云肩大杂花霞帔三品花钗七树两博鬓七钿翟衣七等金革带金绣大杂花霞帔四品花钗六树两博鬓六钿翟衣六等金革带绣小杂花霞帔五品花钗五树两博鬓五钿翟衣五等乌角带销金大杂花霞帔六品花钗四树两博鬓四钿翟衣四等七品花钗三树两博鬓三钿翟衣三等皆乌角带衣销金小杂花霞帔八品九品衣大红素罗霞帔后又定制命妇朝见君后在家见舅姑并夫及祭祀则服礼服公侯伯夫人与一品同大袖衫真红色一品至五品纁丝绫罗六品

至九品绫罗紬绢霞帔褙子皆深青段品官次妻许用本品褙子为礼服

○士庶妻首饰服章制度

（臣）等谨按郑志器服略后妃命妇之后不载士庶妻今据各史及集礼会典所
载者酌取大略以存各代之制且以补郑氏之未备云

宋太宗端拱二年诏除命妇许服销金泥金真珠装缀衣服外余人并禁仁宗天圣
三年诏妇女不得将白色褐色毛段并淡褐色匹帛制
造衣服南渡后定妇人假髻大衣长裙众妾假紉背子

金制妇人常服襜裙多以黑紫上衣谓之团衫用黑紫或皂及紺直领带色用红黄
前双垂至下齐年老者以皂纱笼髻如巾状散缀玉钿
于上谓之玉逍遥此皆辽服也金亦袭之许嫁之女则服綽子妇人首饰不许用珠翠钿
子等物

元制庶人家首饰许用翠花并金钗钿各一事惟耳环用金珠碧甸余并用银

明太祖洪武中定士庶妻首饰用银镀金耳环用金珠钏镯用银服浅色团衫用纁
丝绫罗紬绢礼服惟紫紬不用金绣袍衫止紫绿桃红
及诸浅淡颜色不许用大红鸦青黄色带用蓝绢布

○天子诸臣玉佩剑绶玺印

（臣）等谨按郑志标题列天子诸侯玉佩剑绶玺印其称诸侯盖缘首载局制也
今续纂唐以下各朝均无封建之制诸侯二字自应删
去改列天子诸臣以符下所载备举上下各制之例

晋高祖天福三年六月中书门下奏准敕制皇帝受命宝今按唐贞观十六年太宗
文皇帝刻之元玺白玉为螭首其文曰皇帝景命有德
者昌敕宜以受天明命惟德允昌为文刻之

周太祖广顺三年二月内司制国宝两坐诏太常具制度因奏历朝之制乃制宝两
坐用白玉方六寸螭虎纽其一以皇帝承天受命之宝
为文其一以皇帝神宝为文

宋制天子衮冕有六采绶下垂小绶结玉环鹿卢玉具剑玉鏢首镂玉双佩绛纱袍
佩有衡琚瑀冲牙大祭祀大朝会皆执圭有大圭镇圭
皇太子衮冕有瑜玉双佩四采绶结玉环玉具剑玉鏢首服远游冠则执桓圭亦有剑佩
绶其诸臣祭服有玉装剑佩锦绶玉环六品以下无剑
佩绶朝服亦如之太宗雍熙元年南郊后内出鱼袋赐近臣由是内外升朝官皆佩鱼凡
服紫者饰以金服绯者饰以银廷赐紫则给金涂银者
赐绯亦有特给者京官幕职川县官赐绯紫者亦佩亲王武官内职将校皆不佩太祖受
禅即受周太祖广顺中所造二宝又制大宋受命之宝

至太宗又别制承天受命之宝是后诸帝嗣服皆自为一宝以皇帝恭膺天命之宝为文凡上尊号有司制玉宝则以所上号为文用玉箸篆文广四寸九分厚一寸二分真宗大中祥符元年作天下同文之宝天禧元年作皇帝昭受干符之宝仁宗庆历八年诏刻皇帝钦崇国祀之宝皇佑五年作镇国神宝又别造受命宝至哲宗亦作焉其文并同徽宗崇宁五年作镇国宝大观元年作受命宝方四寸有奇琢以白玉篆以虫鱼政和七年帝自制宝文曰范围天地幽赞神明保合太和万寿无疆号曰定命宝方九寸其后诸宝俱失惟大宋受命之宝与定命宝独存高宗建炎初始作金宝三一曰皇帝钦崇国祀之宝祭祀词表用之二曰天下合同之宝降付中书门下省用之三曰书诏之宝发号施令用之绍兴元年又作玉宝一文曰大宋受命中兴之宝十六年又作八宝一曰护国神宝以承天福延万亿永无极九字为文二曰受命宝以受命于天既寿永昌为文三曰天子之宝四曰天子信宝五曰天子行宝六曰皇帝之宝七曰皇帝信宝八曰皇帝行宝皇太子金宝方二寸厚五分文曰皇太子宝凡诸臣之印沿唐制用铜诸王及中书门下方二寸一分枢密宣徽三司尚书省诸司方二寸除尚书省外皆涂金节度使方一寸九分涂金余并方一寸八分唯观察使涂金高宗建炎后唯三省枢密用银印余皆用铜

辽制皇帝祭山用国服则悬鱼三山红垂饰犀玉刀错用汉服袞冕则有剑佩绶通天冠绛纱袍亦有剑佩绶皇太子亲王及二品以上皆同七品以上去剑佩绶其诸臣公服一品以下五品以上皆佩纷鞶囊常服五品以上文官佩手巾算袋刀子砺石金鱼袋武官■〈革占〉鞞七事六品以下银鱼袋佩其玺印自太宗会同九年伐晋末帝表上传国宝一金印三其御前宝金铸文曰御前之宝以印臣僚宣命诏书玉文曰书诏之宝凡书诏批答用之又有契丹宝授契丹册仪符宝郎捧宝置御坐东皇太子亦有宝其制未详凡诸臣之印吏部兵部枢密院诸行军部署中书省诸行宫都部署印并银铸余内外百官皆以铜

金制天子礼服玉具剑佩绶乘舆服大绶小绶间施三玉环白玉双佩玉钩■〈角棊〉袞服佩绶同用镇圭大圭皇太子礼服亦有瑜玉双佩四采绶玉环执桓圭朝服则加玉带双鱼袋臣下朝服正一品佩剑玉环绶玉珠佩二品以下不佩剑玉环绶并同四品银环绶珠佩御史中丞青荷莲绶正五品以下铜环绶银珠佩监察御史青绶凡公服皆加襴带皇太子玉带佩玉双鱼袋亲王佩玉鱼一品至四品金鱼五品服紫者金鱼服绯者银鱼符印悉掌于礼部其宝玺熙宗皇统五年始铸金御前之宝一书诏之宝一世宗大定十八年制大金受命宝以大金受

命万世之宝为文二十三年制宣命之宝金玉各一又太子之宝世宗大定二十四年铸金宝文曰监国其百官印三师三公亲王尚书并金印
一品二品金镀银印三品以下并同印

元天子冕服则有玉佩珩琚瑀冲牙各一璜二玉环三玉镇圭长一尺二寸皇太子衮服亦有玉佩三献官及司徒大礼使祭服有红组金绶绅玉佩助奠以下诸执事有织金绶绅铜佩其玺印天子之宝有八一曰受命宝二曰传国宝三曰天子之宝四曰皇帝之宝五曰天子行宝六曰皇帝行宝七曰天子信宝八曰皇帝信宝世祖至元元年制玉玺大小十诸臣唯中书令左右丞相大宗正府扎尔固齐用银印

明天子衮冕则有玉佩大绶六采小绶三色施玉环玉圭三一长尺二寸刻山四象四镇之山服衮冕时用之一长如冕服之圭有脊服皮弁时用之一视镇圭差小剡上方下服武弁时用之皮弁服用白玉佩玉钩■〈角棊〉皇太子冠服初用五采绶后更定大绶四采小绶三采施玉环金钩■〈角棊〉玉佩玉圭长九寸五分亲王冠服制如东宫惟圭长九寸二分亲王世子佩白玉元组绶施玉环圭长九寸郡王冠服佩绶玉圭与亲王世子同郡王长子锦鸡绶玉佩其文武官朝服一品二品三品佩玉四采绶一品施玉环二品施犀环三品施金环四品以下佩药玉明初宝玺十七其大者曰皇帝奉天之宝曰皇帝之宝曰皇帝行宝曰皇帝信宝曰天子之宝曰天子行宝曰天子信宝曰制诰之宝曰敕命之宝曰广运之宝曰皇帝尊亲之宝曰皇帝亲亲之宝曰敬天勤民之宝此外又有御前之宝表章经史之宝及钦文之玺成祖又制皇帝亲亲之宝皇帝奉天之宝诰命之宝敕命之宝大明受命之宝巡狩天下之宝垂训之宝命德之宝讨罪安民之宝敕正万民之宝皆系尚宝司堂之皇太子宝周尺方五寸九分厚一寸七分用金龟纽篆书皇太子宝亲王宝与皇太子同其宝亦用龟纽依周尺方五寸二分厚一寸五分文曰某王之宝郡王镀金银印其百官印信正一品银印三台方三寸四分厚一寸六分部都察院并在外各都司俱正二品银印方三寸二分厚八分其余正二品从二品银印二台方三寸一分厚七分唯衍圣公以正二品三台银印则景帝景泰三年赐也顺天应天二府印方二寸九分厚六分俱正三品银印其余则皆铜印其方自二寸九分至一寸九分各依其品差降百官唯文渊阁银印直纽玉箸篆文武臣受重寄者征西镇朔平蛮诸将军银印虎纽方三寸三分厚九分柳叶篆文其它文武大臣有领敕而权重者或给以铜关防直纽唯监察御史每道铸二印文曰绳愆纠缪守院御史掌其一其一藏内府有事则受以出复命则纳之

钦定续通志卷一百二十三

●钦定续通志卷一百二十四

器服略【三】

天子车辂

皇太后皇后车辂

皇太子皇子车辂

公卿大夫等车辂

主妃命妇等车

鞶舆

○天子车辂

（臣）等谨按郑志本门列天子车辂标题考下首列五辂次各车于历朝之制度綦详乃其标题接行复出五辂字样似与各标题未为画一今并删去

宋神宗元丰中置局造辂而五辂副辂多仍唐旧徽宗政和三年议礼局更上皇帝车辂之制诏颁行玉辂箱上置平盘黄屋饰以金涂银山花叶及翟羽青丝络带■〈纟畏〉带铜佩银穗球四角句阑青画轮辕前辕三并加金涂银螭首横辕施银立凤十二左建太常十有二旒右载闾戟驾青马六马饰翟羽鞶纓青织屈锦包尾踏路马二在辂前凡大祭祀乘之金辂赤质以金饰诸末建大旗驾赤马六凡玉辂之饰以青者金辂以绯象辂浅黄质以象饰诸末建大赤驾赭白六凡金辂之饰以青者象辂以银褐革辂黄质挽之以革建大白驾駟马六凡象辂之饰以青者革辂以黄木辂黑质建大麾驾黑骝六凡革辂之饰以青者革辂以皂凡玉辂用金涂银装者象辂革辂木辂及五副辂并金涂铜装高宗绍兴后再制玉辂青色饰以玉缀垂玉佩遇雨则覆油黄繒轼有牌镂曰玉辂以玉篆之左建太常右建龙旗驾青马六驾士二百三十二人金辂黄色饰以金涂银建大旗九旒驾黄马六驾士一百五十四人象辂朱色饰以象及金涂铜建大赤七旒驾赤马六驾士一百五十四人革辂浅黄白色饰以金涂铜建大白六旒驾黄白马六驾士一百五十四人木辂黑色饰以金涂铜建大麾四旒驾黑马六驾士一百五十四人其五辂驾士服色并各随其辂

辽太宗会同元年晋使冯道刘煦等备车辂法物上皇帝皇太后尊号册礼自此有天子车服五辂其玉辂祀天地享宗庙朝贺纳后用之青质玉饰黄屋左纛十二釜在衡二铃在轼龙辔左建旗十二旒驾苍龙金■〈梭，去木〉镂锡鞶纓十二就金辂飨射祀还饮至用之赤质

金饰余如玉辂色从其质驾赤骝象辂行道用之黄质象饰驾黄骝革辂巡狩武事用之白质革鞅驾白翰木辂田猎用之黑质漆饰驾黑骆 【

按契丹旧俗有毡车大车妇人乘马亦有小车贵者加之华饰会同中始制天子车服其国輿旧制仍参用之】

金制五辂玉辂金辂制阙象辂黄质金涂银装以象饰诸末轮衣以银褐建大赤革辂黄质鞅之以革金涂铜装轮衣以黄建大白木辂黑质漆之轮衣以皂建大麾元制五辂玉辂青质金装饰以玉轮衣络带色从其质左建太常旗十有二旂右建鬪戟一九旂辂马诞马并青色驾士平巾大袖并青绘纁丝为之金辂赤质金装饰以金涂鍤石余如玉辂色从其质辂马诞马并赤色驾士平巾大袖并绯绣纁丝为之象辂黄质金装饰以描金象牙辂马诞马并黄色驾士平巾大袖并黄绣纁丝为之革辂白质金装饰以描金白檀辂马诞马并白色驾士平巾大袖皆白绣纁丝为之木辂黑质金装饰以描金紫檀辂马诞马并黑色驾士平巾大袖皆紫绣纁丝为之

明永乐三年定卤簿大驾有大辂玉辂大辂高一丈三尺九寸五分广八尺二寸五分辂座平盘前后车椽并雁翅及四垂如意滴珠板辕轮轴辐皆红髹辂亭四柱前左右有门俱用云龙饰绘五采云冒以黄绮谓之黄屋左右转角阑干后树太常旗二以黄线罗为之皆有十二旂每旂内外绣升龙一左旗腰绣日月北斗右旗腰绣黻字缀金铜铃二垂红纓十二卫以黄绢幟衣以二象驾之玉辂亦驾以二象制如大辂

（臣）等谨按郑志五辂之后继以副车即副辂也今考唐以后惟宋有五副辂自辽及明五辂或多不备亦无副辂云

耕根车 【宋制耕根车青质盖三层余如玉辂之副驾六青马驾士四十人南渡后改用七十五人亲祠具大驾法驾卤簿并列于仗内若耕藉则乘之辽耕根车青质盖三重余如玉辂耕藉用之金耕根车亦青质制如玉辂而无玉饰明嘉靖十年帝将耕藉田诏造耕根车礼官上言考明集礼耕藉用宋制乘玉辂以耕根车载耒耜同行今考仪注顺天府官奉耒耜及種蒞种置彩輿先于祭前二日而出今用耕根车以载耒耜宜令造车于祭祀日早进呈置耒耜先玉辂以行第稽诸礼书祇有图式而无高广尺寸宜依今制车式差小通用青质从之】

明远车 【宋明远车即古四望车驾以牛太祖干德元年改用四马赤质制如屋重櫺句阑上有金龙四角垂铜铎上层四面垂帘下层周以花板三辕驾士四十人服绣对凤衣辽明远车亦名四望车金饰青油纁朱里通幟驾牛金明远车制如屋锐顶重檐句阑顶上有金四角

垂铎上层四面垂帘下层周以花板三轅】

进贤车 【宋制进贤车即古安车太祖干德元年改赤质两壁纱窗擎耳匱一轅绯幟衣络带门帘皆绣凤红丝网中设朱漆床香案紫

绫案衣绯纒里挽索朱漆行马驾四马驾士二十有四人辽进贤车亦名安车金饰重輿曲壁八鸾在衡紫油纒朱里幟朱丝络网驾赤骝朱鞶

纒金进贤车赤质如革车绯纒衣络带门帘画凤上设朱漆床香案紫绫衣一轅】

羊车 【宋制羊车即古辇车亦为画轮车驾以二小马赤质两壁画龟文金凤翅绯幟衣络带门帘皆绣瑞羊童子十八人辽羊车赤质

两壁龟文凤翅绯幟络带门帘皆绣瑞羊画轮驾以牛童子十八人服绣瑞羊挽之金羊车赤质两壁油画龟文金凤翅幟衣络带并绣瑞羊二

轅】

指南车 【宋指南亦名司南车赤质两箱画青龙白虎四面花鸟重台句阑镂拱四角垂香囊上有仙人车虽转而手常南指一轅凤首

四马驾士十八人太宗雍熙四年增为三十人】

记里鼓车 【宋制记里鼓车一名大章车赤质四面画花鸟重台句阑镂拱行一里则上层木人击鼓行十里则次层木人击鐻一轅凤

首驾四马驾士十八人太宗雍熙四年增为三十人】

鸾旗车 【宋制鸾旗车赤质曲壁一轅上载赤旗绣鸾鸟驾四马驾士十八人】

崇德车 【宋制崇德车本秦辟恶车上有桃弧棘矢所以禳除不祥太祖干德元年改赤质周施花板四角刻辟恶兽中载黄旗亦绣此

兽太卜署令一人在车中执旗驾四马驾士十八人】

皮轩车 【宋制皮轩车冒以虎皮为轩赤质曲壁上有柱贯五轮相重画虎文驾四马驾士十八人金皮轩车赤质上有漆柱贯五轮相

重画虎文一轅】

黄钺车 【宋制黄钺车赤质曲壁中设金钺一锦囊綯扛左武卫队正一人在车中执钺驾二马驾士十五人】

豹尾车 【宋豹尾车制同黄钺车上载朱漆竿首缀豹尾右武卫队正一人执之驾二马驾士十五人】

属车 【宋制属车一曰副车一曰贰车一曰左车黑质两箱奩装前有曲阑金铜饰上施紫通幟络带门帘皆绣云鹤紫丝网帟踏每乘

驾二牛驾士十人】

五车 【宋制鹵簿有青旌车赤质曲壁中载青旌以绛帛为之画青鸟于其上鸣鳶车赤质曲壁中载鸣鳶旌以绛帛为之画鸣鳶于其

上飞鸿车赤质曲壁中载飞鸿旌以绛帛为之画飞鸿于其上虎皮车赤质曲壁中载虎

皮旌以绛帛为之缘以赤画虎皮于其上貔貅车赤质

曲壁中载貔貅旌以绛帛为之缘以赤画貔貅于其上其轅皆一】

凉车 【宋制凉车赤质金涂银装龙凤五采明金织以红黄藤油壁绋丝绦龙头梅红罗褥银螭头穗球云朵踏头莲花座雁钩火珠门

脊■〈金屈〉钺频伽大小辔驾以橐驼省方在道及校猎回则乘之辽制凉车赤质金涂银装五采龙凤织藤油壁绋丝莲座驾以橐驼】

白鹭车 【宋制白鹭车一名鼓吹车赤质周施花板上有朱柱贯五轮相重柱杪刻木为鹭衔鹅毛笛红绶带轮衣以绋阜顶及绋络带并绣飞鹭一辔驾四马驾士十八人金制亦如之】

总纛车 【辽制总纛车驾以御駟】

○皇太后皇后车辂

宋因唐制皇后车六等一曰重翟二曰厌翟三曰翟车四曰安车五曰四望车六曰金根车初用厌翟车徽宗政和三年议礼局上皇后车

輿之制重翟车青质金翟诸末间以五采轮金根朱牙其箱饰以重翟羽青罗幟衣青丝络网紫罗画云龙络带青罗画云龙幔紫罗画帷驾青

马六马插翟羽鞶纓青屈青包尾若受册谒景灵宫则乘之厌翟车赤质其箱饰以次翟羽紫幟衣红丝络网红罗画络带夹幔锦帷余如重翟

车驾赤骝四若亲蚕则乘之翟车黄质其箱侧饰以翟羽黄幟衣黄丝络网锦帷络带余如重翟车驾黄骝四安车赤质金饰间以五采紫幟衣

锦帷络带红丝络网驾赤骝四凡驾马鞶纓之饰并从车质四望车朱质青幟衣余同安车金根车朱质紫幟衣余同安车驾牛三自重翟车以

下备卤簿则皆以次陈设 【按辽史仪卫志不具皇太后皇后车辂之制惟于国輿内载祭山仪见皇太后升总纛车纳后仪见皇后就车于

汉輿内载永寿节仪皇太后乘小辇册承天太后仪皇太后乘平头辇即此可略稽其制度矣】

金皇后之车六一曰重翟车青质金饰紫罗销金生色宝相帷青罗青油幟衣各一朱丝络网紫罗明金生色云龙络带各二两箱明金五

彩闲装翟羽二长辔凤头三横辔立鸾八香炉香宝子一青罗明金生色云凤夹幔一红竹帘二油蒙帕一行道褥寻仪褥罗及裹索用青二曰

厌翟车赤质倒仙锦帷一紫罗紫油幟衣各一朱丝络网宜男锦络带各二余同重翟唯行道寻仪褥罗及裹索等用红三曰翟车黄质金饰宜

男锦帷黄罗油幟衣长辔凤头三无横辔立鸾余同厌翟而罗色用黄四曰安车赤质倒仙锦帷紫油幟衣朱丝络网天下乐锦带长辔凤头三

无横辔立鸾及香炉香宝子余同翟车而色皆用红五曰四望车朱质宜男锦帷青油幟

衣轅端螭头二余同安车六曰金根车朱质紫罗紫油
幟衣朱丝倒仙锦络带各二余同安车后复改造圆辂重檐方辂五华亭头平头六等之
制圆辂车方辂车重檐车皆驾马四驾士各五十人平
头辇五华辇亭头辇舁士各九十六人又增制九龙车一五凤车四

明制皇后辂高一丈一尺三寸有奇平盘前后车椽并雁翅四垂如意滴珠板辂亭
四柱饰以金鸾凤及云文上施黄绮帷幔四周绣凤前
后左右有转角阑干皆饰以花其安车高九尺七寸有奇平盘前后车椽并雁翅板辂轮
轴辐皆红髹帷幔用黄绮红帘幟衣其制大略与辂同
其太皇太后皇太后之辂与皇后同

○皇太子皇子车辂

后唐明宗长兴元年博士段颀奏册拜诸王宜依唐开元礼今秦王受册宜乘辂车
宋初皇太子皇子车辂无定制真宗仁宗为太子时谒太庙乘金辂常朝则乘马徽
宗政和三年议礼局上皇太子车辂之制金辂赤质金
饰诸末重较箱画茝文鸟兽黄屋伏鹿轼龙辔金凤一在轼前设障麈朱盖黄里轮画朱
牙左建旗九旒右载闾戟八鸾在衡二铃在轼驾赤骝
四金鍍方鉞插翟尾镂锡鞶纓九就从祀谒太庙纳妃则供之辒车金饰诸末紫油通幟
紫油纁朱裹驾马一四望车金饰诸末青油通幟青油
纁朱里朱丝络网驾马一

辽皇太子车辂其金辂从祀享正冬大朝纳妃用之其受册仪则乘黄令陈金辂皇
太子升降金辂【按辽皇太子金辂制度辽史及叶
隆礼契丹国志皆不载或沿唐宋之制】其辒车五日常朝享宫臣出入行道用之金饰
紫幟朱里驾一马四望车金饰紫油纁通幟驾一马

金皇太子车制世宗大定六年奏皇太子金辂典故制度及上用金辂仪式奉敕详
定凡应用龙者更以麟为饰其制赤质金饰诸末重较
箱画虞文鸟兽黄屋轼作赤伏鹿龙辔金凤一在轼前设障尘朱盖黄里轮画朱牙左建九
旒右载闾戟八鸾在衡二铃在轼驾赤骝四金鍍方鉞
插翟尾镂锡鞶纓九就【按元史及元典章诸书皆不载元皇太子皇子车辂之制盖元
至治元年英宗亲祀太庙始诏中书及太常礼仪院
礼部拟制五辂以平章政事张珪等董其事是年玉辂成明年亲祀御之其金辂等四辂
工未成而罢则下此之无定制益可知矣】

明皇太子金辂高一丈二尺二寸有奇广八尺九寸辂座平盘滴珠板辂轮轴辐同
玉辂辂亭四柱皆红前左右有门施红罗帷幔外用红
帘左右转角阑干亭后红旗二以红罗为之九旒每旒内外绣升龙一左旗腰绣日月北
斗右旗腰绣黻字亲王象辂其高视金辂减六寸广减

一尺轂座轂亭四柱皆红前左右有门其帷幔红帘之制皆同金轂红旗二与金轂所树同皇孙车成祖永乐中皇太孙婚礼仪仗如亲王降皇

太子一等用象轂 【按皇太孙车制历代未制惟明初有之】

○公卿大夫等车轂

宋初定羣臣车轂之制亲王一品二品奉使及葬并给革轂制同乘輿之副惟改龙饰为螭六引内三品以上乘革车赤质制如进贤车无案驾四赤马驾士二十五人绯幟衣络带旗戟绸杠绣文司徒以瑞马京牧以隼御史大夫以獬豸兵部尚书以虎太常卿以凤县令乘轂车黑质一轂金铜饰紫幟衣络带并绣雉衔瑞草驾二马驾士十八人徽宗政和六年礼制局言古之诸侯出封于外同姓锡以金轂异姓锡以象轂来覲则不敢乘金轂象轂以同于王当降而乘墨车若公侯采地在天子县内者则为都鄙之长大司马所谓师都建旃是矣今开封牧列职于朝与御史大夫同谓之卿可也其在周官则卿大夫之职是矣又无金轂象轂之锡而乃自比于古之诸侯来覲而乘墨车可乎成周上公九命车旗以九为节故建常九旂自此以降俱各视其命之数则卿之建旃当用六旂大夫建物当用四旂至于三旂则上士所建也其开封令宜乘

墨车而建物四旂开封牧御史大夫户兵礼部尚书皆卿也宜乘夏纁而建旃六旂从之金王公以下车制一品轂用银螭头凉棚杆子月板并许以银装饰三品以上螭头不得施银凉棚杆子月板亦听用银为饰五品以上轂狮头六品以上轂云头明百官乘车之制太祖洪武元年令凡车不得雕饰龙凤文职官一品至三品间用金饰银螭绣带青纁四品五品素狮头绣带青纁六品至九品用素云头青带青纁武宗正德四年礼部侍郎刘机言大明集礼公卿大臣得乘安车帝以京城内安车久不行却其请

○主妃命妇等车

后晋高祖天福四年门下奏据太常礼院定长安公主出降仪太仆寺供厌翟二马车

宋制皇太子妃用厌翟车驾以三马内命妇用厌翟车从车六乘又定制九嫔用翟车婕妤以下用安车并驾二马从车九嫔四乘婕妤以下三乘外命妇亦有厌翟车驾一马馭八人非公主王妃并乘白铜饰犍车驾牛从车六乘二三品四乘四品以下二乘

辽公主下嫁用青幟车二螭头盖部皆饰以银驾用駟金章宗明昌元年定妃嫔车辇之制用镀金凤头黄结御妻世妇用闲金凤头梅红

结子 【按宇文懋昭大金国志载金后妃用殿车车如五花楼之状上以锦缘青毡为盖

四围以帘秋冬亦用毡或四轮或两轮并朱车之四角后用金凤妃用金孔雀金史失载附识以资考证】

明皇妃车曰凤轿其制青顶上抹金铜珠顶四角抹金铜飞凤各一轿身红髹木匡三面绘以翟文红帘其交床坐踏褥皆用红销金罗东宫妃及王妃车亦曰凤轿制略同公主车沿宋制用厌翟车其后亦用凤轿与妃同

○鞦韆

宋太祖建隆四年翰林学士承旨陶谷为礼仪使始造大鞦赤质正方油画金涂银叶龙凤装其上四面行龙云气火珠方鉴四角龙头衔香囊顶轮施耀叶中施黄褥上置御座扶几香炉锦结绶几衣轮衣络带并绯绣黄罗缘席褥主鞦六十四人亲祀南郊谒太庙还及省方还都则乘之神宗以后因其制太繁重稍减之徽宗政和时更其制黄质其衣带皆用黄色车箱四围于程之外高二尺二寸设轼于前楹轼高三尺二寸建大旗于后楹旗十二旂其色黄绘以交龙素帛为繒绘以日月其芳亭鞦黑质顶如幕屋绯罗衣裙栏络带皆绣云凤两面朱绿窗花板外施红丝网绸金铜盼踏前后垂帘下设牙床勾阑主鞦一百二十人政和时略改其制帘以红罗绣鹅为额其风鞦赤质顶轮下有二柱绯罗轮衣络带门帘皆绣云凤顶有金凤一两壁刻画龟文金凤翅前有轼匱香炉香宝结带内设红锦褥主鞦八十人其逍遥鞦以椽栏为屋赤质金涂银装朱漆扶板长竿二饰以金涂银龙头常行幸所御鞦官十二人东封时别造辟尘逍遥鞦加窗隔黄繒为里赐名省方逍遥鞦南渡后稍减其制为简素平鞦饰如逍遥鞦而无屋鞦官十二人东封时别造升山天平鞦施机关赐名登封鞦七宝鞦则孝宗隆兴二年制高五尺一寸阔二尺七寸深三尺六寸比附大鞦平鞦制度为之 【按宋初鞦制颇繁南渡后唯存大鞦平鞦逍遥鞦余皆不置】 其輿制帝所御有小輿赤质顶轮下施曲柄如盖绯绣轮衣络带制如风鞦而小中设方床绯绣罗衣锦褥上有小案坐床皆绣衣踏床绯衣奉輿二十四人南渡后稍更其制宫殿从容所乘设卤簿则陈之又腰輿绯绣凤裙襴上施锦褥别设小床绯绣花龙衣奉輿十六人南渡后亦加裁减其皇太后龙輿自东都皇太后多垂帘皆抑损远嫌不乘鞦乃止用輿哲宗既嗣位尊朱贵妃为皇太妃乘檐子有司请用牙鱼凤为饰元佑三年太皇太后诏有司寻绎典故于是檐子饰以龙凤九年羣臣议改檐子为輿上饰行龙五高宗绍兴初诏造皇太后龙輿其制朱质正方金涂银饰竿头螭首赭窗红帘上覆以椽加走龙六内设黄花罗帐裯褥朱椅踏子红罗绣巾二其皇后龙肩輿一名椽檐子一名龙檐子皆南渡后所制东都皇后

本乘仄翟车常乘则白藤輿南渡后所用檐子其制方质椽顶施走脊龙四走脊云子六红黄藤织百花龙为障緋门帘看窗帘朱漆藤坐椅踏子红罗裯褥软屏夹幔其诸臣肩輿之制自神宗优待宗室老疾不能骑者许乘肩輿南渡后人臣无乘车之制诏许百官乘轿王公以下俱乘之其制正方饰有黄黑二等以篋席为障左右设牖前施帘名曰竹轿子亦曰竹輿【按程大昌演繁露百官于寓京乘轿自扬州始先时百官虽在外亦不许乘】其内外命妇乘银装白藤輿檐

辽制皇帝大凤辇赤质顶有金凤壁画云气金翅前有轼下有勾阑络带皆绣云凤银梯主辇八十人芳亭辇黑质幕屋緋椽皆绣云凤朱绿夹窗花板红网两帘四竿银饰梯主辇一百二十人逍遥辇常行用之椽屋赤质金涂银装红绦辇官十二人平头辇亦常行用之制如逍遥辇无屋其大芳辇小辇仙游辇大玉辇小玉辇步辇制俱不详或不常御也腰輿之制前后长竿各二金银螭头緋绣凤襕上施锦褥别设小床奉輿十六人小輿赤质青顶曲柄緋绣络带制如凤辇而小上有御座奉輿二十四人

金制皇帝大辇赤质正方油画金涂银叶龙凤装其上四面施行龙云朵火珠方鉴顶轮施耀叶内设圆鉴香囊中施黄褥上置御座曲几香炉锦结绶几衣轮衣络带皆緋绣云龙宝相花其七宝辇制如大辇饰以玉裙网七宝滴子用真珠其皇后之辇有平头辇五华辇亭头辇舁士各九十六人

元皇帝用腰輿制以香木后背作山字牙嵌七宝装云龙屏风上施金圈焰明珠两旁引手屏风下施雕镂云龙床坐前有踏床锦褥一坐上貂鼠缘金锦条褥又有象轿驾以象凡行幸用之

明制大马辇其制高一丈二尺五寸九分广八尺九寸五分辇座辇亭四柱皆红髹前左右有门门旁榻各二后榻三外用红帘辇顶并圆盘上下俱红髹惟辇盖用青饰其铜龙莲座宝盖黄屋太常旗悉同大辂驾以八马备鞍鞞秋辔铃纓之饰其小马辇高广之制及前左右门榻皆较大马辇而稍减之驾以四马步辇高一丈二尺二寸有奇广八尺二寸有奇辇座四周雕木五彩云龙板间以浑贴金仰覆莲座轅四红髹辇亭四柱前左右有门门旁榻各二后用红屏风雕沈香色描金云龙板其红帘辇盖天轮嚙衣之属俱同马辇其大凉步辇高一丈二尺五寸有奇广一丈二尺五寸有奇四面红髹匡装雕木五彩云板闲以贴金仰覆莲座红轅六前后俱饰以雕木贴金龙头龙尾辇亭四柱前左右有门门旁榻各二后榻三皆红髹亭底上施垫毡加红锦褥并席红坐椅一四周雕木沈香色描金宝相花其褥裙帷幔与马辇同内设红卓红锦

墩外红帘三扇辇顶四周施黄绮沥水三层绣五彩云龙文顶下四周以红毡为帷黄毡缘条亭内宝盖绣五龙顶冒以黄绮为黄屋四周绣云龙亭前左右皆有转角阑干其柱饰及踏梯之属俱与马辇同又皇帝所乘之轿其制高六尺九寸有奇其顶红髹装圆匡蜎房窗镰金铜火焰宝带左右门二轿内坐椅一椅内黄织金绮靠坐褥四周椅裙下铺席并踏褥有黄绢轿衣油绢雨衣各一世宗嘉靖十三年谒庙帝及后妃俱乘肩舆出宫以后郊祀庆成宴亦多乘板舆其皇妃东宫妃用凤轿亲王妃公主同郡王妃及郡主用翟轿制与凤轿同第易凤为翟其百官所用之轿景帝景泰四年令在京三品以上得乘轿武宗正德四年礼部侍郎刘机请定轿扇品级等差世宗嘉靖十五年礼部尚书霍韬言礼仪定式京官三品以上乘轿迺者文官皆用肩舆乞申明礼制俾臣下有所遵守乃令四品以下不许乘轿亦毋得用肩舆焉

钦定续通志卷一百二十四

●钦定续通志卷一百二十五 器服略四

器服略 【四】

卤簿 【旌旗用】

○卤簿一

后梁太祖开平二年十一月南郊礼仪使奏皇帝赴南郊法驾卤簿自清游队已下诸卫将军平巾帟绯两裆大口袴锦滕蛇银隐起金带刀弓箭欵飞执旗引驾三卫并武弁绯两裆大口袴供奉官并武弁服色各一人步从除文武官及导驾士绛衣平巾帟余并戎服近侍导驾官引车从本县令州府御史大夫朝服各乘辂车前导其引驾官员不总备车辂自中书令侍中以下则公服内诸司使并常服

宋制卤簿四等曰大驾曰法驾曰鸾驾曰黄麾仗大驾之仪极盛郊祀籍田荐献玉清昭应景灵宫用之法驾减三分之一泰山汾阴明堂则用之鸾驾又减半谒陵封祀朝谒太清奏告玉清昭应宫用之黄麾仗又减于鸾驾亲征御楼省方还京太庙上册用之太祖建隆四年将郊祀大礼使范质与卤簿使张昭仪仗使刘温叟同详定大驾卤簿之制执仗军士悉衣五色画衣以五行相生之色为次黑衣先之青衣次之赤黄白又次之干德三年蜀平命左拾遗孙逢吉收蜀中法物其不中度者悉毁之后又改画衣为绣衣谓之绣衣卤簿其后郊祀皆用之太宗至道中令有司以绢画为图凡三幅中幅车辂六引及导驾官外两幅仪卫藏秘阁凡仗内自行事官排列职掌并捧日奉宸散手天武外步骑一万九千一百九十八人真宗咸平五年诏南郊仪仗引驾官不得多带从人大中祥符元

年改小驾为鸾驾仁宗时宋绶定卤簿为图记凡大驾用二万六十一人皇佑二年将享明堂卤簿使奏法驾减大驾三分之一诏礼官与兵部考正用万有一千八十八人嘉佑二年祫享用礼仪使奏南郊仗金吾上将军六统军左右千牛皆服紫绣戎服珂佩骑而前节度使亦衣袴褶导驾如旧例是月礼仪使奏南郊还礼当乘金辂而或诏乘大辇宜着于令常以大辇从神宗元丰元年更定大驾卤簿仪仗仗下官一百四十六人执仗押引从军员职掌诸军诸司二万二千二百二十一人徽宗政和七年兵部尚书蒋猷请取天圣卤簿图记更加考正高宗初至南京孟太后以乘舆服御及御辇仪仗来进仓卒渡江皆为金兵所焚后乃检会旧仪始备黄麾仗庆册亲飨皆用焉孝宗隆兴二年令有司条奏其可省者次年郊祀用六千八百八十九人明堂用三千三百十九人孝宗干道六年郊祀备五辂大安辇六象人数如旧后遂无所改定然宋初卤簿本后唐长兴之制器物颇多疏略南渡后务为简省亦多未备唯政和时所制为完美其政和大驾卤簿之制象六分左右次六引开封令开封牧大司乐少傅御史大夫兵部尚书次金吾纛稍左右阜纛各六押衙四人爆稍八本卫上将军将军各四人本卫大将军二人爆稍四夹大将军次朱雀旗队金吾卫折冲都尉一人引队爆稍二夹都尉陈弩弓矢稍左右金吾卫果毅都尉二人押队次龙旗队大将军一人检校风伯雨师雷公电母旗各一五星旗五左右摄提旗二北斗旗一次指南车记里鼓车白鹭车鸾旗车崇德车皮轩车各一次金吾引驾骑本卫果毅都尉二人仪刀弩弓矢稍次大晟府前部鼓吹令二人府史四人管辖指挥使一人陈摛鼓金钲诸乐器次太史相风行漏等舆太史令及令史各一人相风鸟舆一交龙钲鼓各一司辰典事各一人【按宋史仪卫志于国初卤簿条内作典事于政和卤簿条内作典士据新旧唐书及文献通考载唐卤簿均作典事则宋志此条士字实误今改正】漏刻生四人鼓楼钟楼行漏舆各一太史正一人清道二人十二神舆一次持钺前队左右武卫果毅都尉二人引队左右武卫校尉二人绛引旛一左右金节十二■〈𠂔干〉■各一朱雀幢一义一导盖青龙白虎各一幢义三队长一人钺戟二百八十人左右武卫将军二人检校校尉四人押队次黄麾幡一次六军仪仗左右神武军羽林军龙武军各有统军二人都头二人押仗本军旗各一排栏旗各二十吏兵力士旗各五掩尾天马旗二白柯枪五十哥舒棒十钺仗八次引驾旗天王旗二排仗通直官二人押旗十二辰旗各一次龙墀旗天下太平旗一排仗大将二人夹旗五方龙旗各一金鸾金凤旗各一狮子旗二君王万岁旗一日

月旗各一次御马二十四为十二重次中道队大将军
一人检校次日月合璧旗一苕文旗二五星连珠旗一祥云旗二长寿幢二次金吾细仗
青龙白虎旗各一五岳神旗五方神旗五方龙旗五方
凤旗各五次八宝分左右为四重香案八各以二列于宝輿之前符宝郎一人碧褙二十
四次方伞二大雉尾扇四次金吾四色官六人押仗
二人次金甲二人次太仆寺进马四人次引驾千牛卫上将军一人千牛八人中郎将二
人千牛二人次长史二人次金吾引驾官四人次导驾
官次伞扇輿辇大伞二中雉尾扇四腰輿一小雉尾扇四应奉人员一人十将将虞候节
级二人长行十六人排列官二人中雉尾扇十二华盖
二香镫一小輿一逍遥子一平辇一次驾前东第五班开道旗一阜纛十二引驾六十二
人钧容直三百人五方色龙旗五门旗四十御龙四直
步执门旗六十天武驾头下一十二人茶酒班执从物十一人御龙直仗剑六人天武把
行门八人麋旗一殿前班击鞭十人簇辇龙旗八日月
麟凤旗四青白赤黑龙旗各一御龙直四十人踏路马二夹辂大将军二人进辂职掌二
人部押二人教马官二人皇帝乘玉辂驾青马六驾士
一百二十八人扶驾八人骨朵直一百三十四人行门三十五人分左右陪乘将军二人
次奉宸队御龙直左厢骨朵子直右厢弓箭直弩直御
龙四直并以逐班直所管人数列为五重天武骨朵大剑三百一十人次驾后东第五班
大黄龙旗一钧容直三十一人扇篋下天武二十人茶
酒班簇辇三十一人招箭班三十二人次副玉辂一驾青马六驾士四十人次大辇一掌
辇四人应奉人员十二人十将将虞候节级共十人长
行三百五十五人尚辇奉御二人殿中少监供奉职官二人令史四人书令史四人次太
仆御马二十四为十二重次持钺后队左右武卫旅帅
二人次重轮旗二大伞二大雉尾扇四小雉尾扇朱团扇各十二华盖二又二睥睨十二
御刀六真武幢一絳麾二义一细稍十二次左右金吾
卫果毅都尉二人总领大角一百二十次大晟府后部鼓吹丞二人典事四人管辖指挥
使一人陈羽葆鼓拱宸箫管箎诸乐器次黄麾幡一芳
亭辇一凤辇一次金象革木四辂并有副辂金辂踏路赤马二正副各驾赤马六驾士六
十人余辂正副驾马数同而色异象辂以赭白革辂以
骝木辂以黑驾士各四十人耕根车一驾青马六驾士四十人进贤车一驾士二十四人
明远车一驾士四人次属车十二乘每乘驾牛三驾士
十人次门下中书秘书殿中四省局官各二人次黄钺车豹尾车各一各驾赤马二驾士
十五人次掩后队左右威卫折冲都尉二人领队大戟
刀盾弓矢稍各五十次真武队金吾卫折冲都尉一人爆稍二仙童旗一真武旗一螭蛇

神龟旗各一稍二十五弓矢二十弩五其大驾外仗清
游队次第六引外白泽旗二左右金吾卫折冲都尉二人弩八弓矢三十二稍四十左右
金吾各十六骑帅兵官二人弩八弓矢稍各十二次饮
飞队左右金吾卫果毅都尉二人分领虞候饮飞四十八人铁甲饮飞二十四人次前队
受仗左右领军卫将军二人检校爆稍四受义分五队
第一百六十人第二八十人第三一百人第四第五各八十人逐队有帅兵官左右领军
卫左右威卫左右武卫左右骁卫左右卫各四人次后
队受仗受义分五队第一第二各八十人第三一百人第四八十人第五百六十人帅兵
官左右卫左右骁卫左右武卫左右威卫左右领军卫
凡前后队受仗前接中道北斗旗后尽鹵簿后队次前部马队凡十二皆以都尉二人分
领第一前左右金吾卫折冲领角亢斗牛宿旗四弩十
弓矢二十稍四十第二氏房京虚宿旗四第三心危宿旗第四尾室宿旗各二以上四队
各以左右领军卫果毅领第五箕壁宿旗第六奎井宿
旗各二各以左右威卫折冲领第七娄鬼宿旗第八胃柳宿旗第九昴星宿旗各二各以
左右武卫果毅领第十毕张宿旗第十一觜翼宿旗第
十二参轸宿旗各二各以左右骁卫折冲领弩弓矢稍人数同第一队次步甲前队凡十
二左右领军卫将军二人检校爆稍四逐队皆有都尉
二人分领第一第三各以左右领军卫第五以左右威卫第七以左右武卫第九以左右
骁卫第十一以左右卫并折冲第二第四各以左右领
军卫第六以左右威卫第八以左右武卫第十以左右骁卫第十二以左右卫并果毅内
鹞貔玉马三角兽黄鹿飞麟馱騃鸾麟驯象玉兔辟邪
等旗各二以序居都尉之后逐队有弓矢刀盾相闲各六十人居旗之后次前部黄麾仗
绛引幡二十下分六部第一左右威卫第二左右领军
卫第三左右威卫第四左右武卫第五左右骁卫第六左右卫诸部各有殿中侍御史二
人本卫大将军二人检校本卫折冲都尉二人分领又
各有帅兵官二十人龙头竿六重重各二十揭鼓三重重各二仪鞞五色幡小戟稍各一
重重各二十弓矢三重重各二十朱绿滕络盾并刀二
重重各二十次青龙白虎旗各一左右卫果毅都尉二人分押旗及领后七十骑弩八弓
矢二十二稍四十次班剑仪刀队左右卫将军二人分
领郎将二十四人左右亲卫勋卫各四人每卫班剑二百二十人诸翊卫左右卫六人领
仪刀四百八人左右骁卫二人领仪刀一百三十六人
左右武卫威卫领军卫金吾卫各二次亲勋散手骁卫翊卫队左右卫供奉中郎将四人
分领亲勋翊卫四十八人左右卫郎将二人分领散手
翊卫六十人左右骁卫郎将二人分领骁卫翊卫五十六人次左右骁卫翊卫三队各有

二人分领第一本卫大将军第二本卫将军第三本卫
郎将花凤飞黄吉利旗各二分为三队逐队弩十弓矢二十稍四十次夹毂队凡六逐队
都尉二人检校第一第四左右折冲第二第三第五第
六并左右卫果毅逐队力盾各六十人内第一第四有宝符旗二次捧日队逐队引一人
押二人长行殿侍二十八人旗头三人枪手五人弓箭
手二十人左右厢天武约栏各一百五十五人次后部黄麾仗分六部左右卫左右骁卫
左右武卫左右威卫左右领军卫左右武卫部内殿中
侍御史大将军都尉帅兵官绛引幡龙头竿等并同前部次步甲后队凡十二皆有都尉
二人分领第一以左右卫第三以左右骁卫第五以左
右武卫第七以左右威卫第九第十一各以左右领军卫以上并果毅第二以左右卫第
四以左右骁卫第六以左右武卫第八以左右威卫第
十第十二各以左右领军卫以上并折冲内有貔鷃鸡仙鹿金鸚鵡瑞麦孔雀野马牦牛
甘露网子祥光翔鹤等旗各二以序居都尉之后逐队
有弓矢刀盾相闲各六十人居旗之后次后部马队凡十二皆以都尉二人分领第一第
二各以左右卫第五第六第七各以左右武卫第十第
十一第十二各以左右领军卫并折冲第三第四各以左右骁卫第八第九各以左右威
卫并果毅内有角■〈角端〉赤熊兕天下太平驯犀
鷁■〈义鸟〉驪■〈马蜀〉驺牙苍乌白狼龙马金牛等旗各二以序居都尉之后每
队弩十弓矢二十稍四十以上卤簿凡门有六中道门
二第一门居日月合璧等旗之后第二门居掩后队之后各有金吾牙门旗四监门校尉
六人左右道门四第一居步甲前队第六队之后第二
居第十二队之后第三居夹毂队之后第四居步甲后队第六队之后各有监门校尉四
人【案宋史仪卫志载牙门旗制并云左右道五门
门二旗而于本条仅叙四门且步甲前队第六队有门第十二队又有门而步甲后队祇
第六队有门疑史志失载一门及监门校尉四人上脱
金吾牙门旗二六字】其小驾减大驾六引及象木革辂五副辂小輿小辇又减指南记
里白鹭鸾旗崇德皮轩耕根进贤明远黄钺豹尾属车
等十二车余并减大驾之半宋旌旗之制太祖创制错绣诸旗着于通礼其殿廷立仗旌
旗正至五月一日御正殿设青龙白虎旗各一五岳旗
五五星旗五五方龙旗二十五五方凤旗二十五红门神旗二十八朱雀真武旗各一阜
纛十二各分左右【以上金吾】天一太一旗各一
摄提旗二五辰旗五北斗旗一二十八宿旗各一风伯雨师旗各一白泽驯象仙鹿玉兔
驯犀金鸚鵡瑞麦孔雀野马牦牛旗各二日月合璧旗
一五星连珠旗一雷公电母旗各一军公旗六黄鹿飞麟兕驺牙白狼苍乌辟邪网子貔

旗各二信幡二十二传教告止幡各十二黄麾二各分
左右 【以上兵部】 日旗月旗各一君王万岁旗一天下太平旗一狮子旗二金鸾金
凤旗各一五方龙旗各一各分左右 【以上龙墀】
龙君虎君旗各五赤豹黄罽旗各五小黄龙旗一天马旗一吏兵力士旗各五天王旗四
太岁旗十二天马旗六排栏旗六十左右幡斨各五行
行七十五大黄龙旗二大神旗六各分左右 【以上六军】

辽鹵簿初用国仗其制甚简十二神纛十二旗十二鼓曲柄华盖直柄华盖盖太宗
伐唐晋以前所用皆是物也会同三年太宗在蓟州观
导驾仪卫图遂备法驾幸燕自后御殿受朝备以为常大同元年三月太宗将幸中京镇
阳诏收鹵簿法物委所司押领先往未几镇阳入汉鹵
簿法物随世宗归于上京其仪仗步行擎执二千四百一十二人坐马擎执二百七十五
人坐马乐人二百七十三人步行教坊七十一人御马
牵拢官五十二人御马二十六匹官僚马牵拢官六十六人坐马挂甲人五百九十八人
步行挂甲人一百六十人金甲二人神輿十二人长寿
仙一人诸职官等三百五人内侍一人引稍押衙二人赤县令一人府牧一人府吏二人
少尹一人司录一人功曹一人太常少卿一人丞一人
博士一人司徒一人太仆卿一人鸿胪卿一人大理卿一人御史大夫一人侍御史二人
殿中侍御史二人监察御史一人兵部尚书一人侍郎
一人郎中一人员外郎一人符宝一郎人左右诸卫将军三十五人左右诸折冲二十一
人左右诸果毅二十八人尚乘奉御二人排仗承直二
人左右夹骑二人都头六人主帅十四人押纛二人左右金吾四人虞候饮飞十六人鼓
吹令二人漏刻生二人押当官一人司天监一人令史
一人司辰一人统军六人千牛备身二人左右亲勋二人左右郎将四人左右拾遗二人
左右补阙二人起居舍人一人左右谏议大夫二人给
事中书舍人二人左右散骑常侍二人门下侍郎二人中书侍郎二人鸣鞭二人侍中一
人中书令一人监门校尉二人排列官二人武卫队正
一人随驾诸司供奉官三十人三班供奉官六十人通事舍人四人御史中丞二人乘黄
丞二人都尉一人太仆卿一人步行太卜令一人 【
按太仆卿一人已见前据续文献通考作步行太仆令一人而无步行太卜令一人之文
疑续通考讹卜为仆而此太仆卿一人五字即属衍文
考辽史太仆寺无称令者而太卜令亦不着令姑仍其旧】 职官乘马三百四匹进马四
匹驾车马二十八匹人之数凡四千二百三十有九马
之数凡千五百二十 【按辽史仪卫志载渤海仗天显四年太宗幸辽阳府备乘輿羽卫
干亨五年圣宗东巡东京留守具仪卫迎车驾此故

渤海仪卫也但史未详其制或系用于一时故兹亦从略云】 金大驾卤簿世宗大定三年祫享用黄麾仗三千人分四节第一节无县令府牧即用黄麾前三部次前部鼓吹次金吾牙门旗次驾头次引驾龙墀队次天王十二辰等旗第二节黄麾第四第五部次君王万岁日月旗次御马内增控马司围挟马司围各一十六人次日月合璧五星连珠等旗次八宝内增执黑杖传喝一十八人在香案前次七宝辇第三节黄麾后第一第二部次玉辂次栲栳队次导驾门仗官第四节黄麾后第三第四第五部次金辂次牙门旗次后部鼓吹大定六年九月西京还都用黄麾仗二千五百四十二人骑七百六十二匹分四节第一节摄官五十四人执擎三百二人乐工一百七十人第二节摄官三十二人执擎三百七十六人第三节仗内摄官四十四人导驾官四十二人门仗官一百人玉辂青马八驾士一百四十人护驾栲栳队五百人执擎二百四十二人第四节摄官五十人金辂赤马八驾士九十四人控鹤二十二人乐工八十四人执擎二百九十人大定十一年将有事于南郊朝享太庙右丞石琚奏其礼帝谓祭天在诚不在仪仗之盛减半用之于是增损黄麾仗为大驾卤簿凡用七千人分八节第一节第一引七十人县令第二引二百六十四人府牧第三引二百二十九人御史大夫名色与府牧同颇损其数而增行止旗一第二节金吾阜纛旗一十二人朱雀队三十四人指南记里鼓车皆五十二人鸾旗车一十八人前部鼓吹一百二十九人清游队七十二人内白泽旗二旗五人折冲都尉二人弩六弓矢二十四稍三十饮飞队四十八人内果毅都尉二虞候饮飞三十人铁甲饮飞一十六人前部马队第一队六十四人第二第三队皆六十人第四第五队皆五十八人受义仗五十四人内帅兵官二人受义各二十人行止旗一第三节前部鼓吹第二三百六十九人前部甲队第一至第五队皆四十二人牙门旗二十人黄麾前第一部一百五十人第二部一百二十人受义仗五十八人行止旗一第四节黄麾幡三人六军仪仗二百二十六人御马三十三人黄麾前第三至第五部皆一百二十人青龙白虎队五十二人受义仗五十六人行止旗一第五节八宝二百三十二人平头辇三十人七宝辇四十二人班剑仪刀队二百人内将军二人折冲都尉二人班剑仪刀各九十八骁卫翊卫队六十人内供奉郎将二人凤旗二旗五人弩弓矢稍皆一十六夹毂队第一队九十二人内折冲都尉二人宝符旗二旗五人朱鍪甲刀盾八十第二队八十二人内果毅都尉二人飞黄旗二旗五人银褐鍪甲刀盾七十第三队八十二人内果毅都尉二人吉利旗二旗五人阜鍪甲刀盾七十受义仗五十

六人行止旗一第六节马步门旗队一百人驾头一十五人广武官茶酒班执从物者二十三人御龙直四十人内人员二玉辂一百五十一人
栲栳队五百人内金枪队银枪队每队各一百二十六人分左右人员各十八长行各一百八人又弓箭直步队骨朵直步队每队各一百二十四人人员各四长行各一百二十人金吾牙门旗二十人黄麾后第一部一百五十人第二部一百二十人笏义仗五十二人行止旗一第七节
扇篲二十五人金辂九十四人大安辇一百八十一人内尚辇奉御二人殿中少监二人奉职官二人令史四人书令史四人掌辇四人人员十二舁士一百五十一人御马三十三人持钺队三十九人后部鼓吹一百六十人黄麾后第三至第五部皆一百二十人后步甲队第一至第二队皆四十二人笏义仗五十六人行止旗一第八节后部鼓吹第二一百四十人象轂革车木轂皆五十人进贤车二十六人豹尾车一十八人属车八十人元武队六十一人后步甲队第三至第五队皆四十二人金吾牙门旗二十人后部马队第一队七十六人第二队六十四人第三队六十人笏义仗六十人行止旗一殿庭内仗旗旗左行自北西向列黄麾旛一首右行东向者同面北第一行牙门旗八第二行 【不列旗】
】 第三行长寿幢一次东五方龙旗十五次西五方凤旗十五第四行自内而东青龙旗五红龙旗二十自内而西青龙旗五红龙旗二十第五行同上又君王万岁旗一居中日旗一在左月旗一在右第六行自内而东天下太平旗菑文旗日月合璧旗菑文旗青龙施赤龙旗河渚旗江渚旗各一未午己辰卯寅旗各一青天王旗白天王旗各一自内而西祥云旗五星连珠旗祥云旗黄龙旗白龙旗黑龙旗淮渚旗济渚旗各一申酉戌亥子丑旗各一绯天王旗阜天王旗各一第七行自内而东孔雀旗一苍乌旗兕旗牝牛旗驪■〈马蜀〉旗赤熊旗白狼旗金鸚鵡旗驯犀旗角■〈角端〉旗鷁■〈义鸟〉旗驺牙旗野马旗瑞麦旗甘露旗各一自内而西者同外仗左边西向自北列绛引幡五首右边东向者同左五行从北每大旗一均用小红龙旗二闲之角亢氐房心尾箕斗牛宿旗均用二女宿旗一红龙并黄排栏旗各一虚宿旗一黄红排栏旗二危宿旗一红紫排栏旗二室宿旗一紫黄排栏旗二壁宿旗一黄红排栏旗二重轮旗一红紫排栏旗二左摄提旗一紫黄排栏旗二青龙旗一黄红排栏旗二木星旗一红紫排栏旗二火星旗一紫黄排栏旗二土星旗一黄红排栏旗二金星旗一红紫排栏旗二水星旗一紫排栏并吏兵旗各一北岳旗一吏兵并龙君旗各一东岳旗一龙君并黄熊旗各一中岳旗一黄熊并赤豹旗各一西岳旗一赤豹并力士旗各一南

岳旗一力士并虎君旗各一朱雀旗一虎君并天马旗各一右五行奎娄胃昂毕觜参井鬼宿旗均用二旗如前柳宿旗一红龙并黄排栏旗各一星宿旗一黄红排栏旗二张宿旗一红紫排栏旗二翼宿旗一紫黄排栏旗二轸宿旗一黄红排栏旗二重轮旗一红紫排栏旗二右摄提旗一紫黄排栏旗二白虎旗一黄红排栏旗二东方神旗一红紫排栏旗二南方神旗一紫黄排栏旗二中央神旗一黄红排栏旗二西方神旗一红紫排栏旗二北方神旗一紫排栏并力士旗各一风伯旗一力士并虎君旗各一雨师旗一虎君并黄熊旗二雷公旗一黄熊并赤豹旗二电母旗一赤豹并吏兵旗二北斗旗一吏兵并龙君旗二元武旗一龙君并天马旗二黄麾内仗左行西向自北列黄麾旛一首右行东向同面北第一行长寿幢一居中牙门旗八分左右第二行君王万岁旗居中日旗在左月旗在右第三行五方龙旗十五五方凤旗十五第四行红龙旗三十四第五行红龙旗三十四皆分左右第六行自内而东太平苕文合璧苕文赤龙青龙旗未午巳辰卯寅旗青天王旗白天王旗各一自内而西祥云连珠祥云黄龙白龙黑龙旗申酉戌亥子丑旗绯天王旗皂天王旗各一第七行自内而东河渚江渚兕赤熊驯犀角■〈角端〉鷄■〈义鸟〉网子旗各一自内而西淮渚济渚兕赤熊驯犀角■〈角端〉鷄■〈义鸟〉网子旗各一外仗左边西向自北列绛引旛五首右边东向亦同左三行从北角亢氐房心尾箕斗牛女虚危室壁旗各一次重轮旗左摄提旗青龙旗各一木火土金水星旗各一北东中南西岳旗各一次紫排栏四黄排栏四红排栏四吏兵旗二天马旗一右三行从北奎娄胃昂毕觜参井鬼柳星张翼轸旗各一次重轮旗右摄提旗白虎旗各一东南中西北方神旗各一风伯雨师雷公电母北斗旗各一次紫排栏四黄排栏四红排栏四吏兵旗二天马旗一

钦定续通志卷一百二十五

●钦定续通志卷一百二十六 器服略五

器服略 【五】

卤簿 【旌旗附】

○卤簿二

元崇天卤簿中道顿递队象六饰以金装莲座香宝鞍鞞秋辔鬪勒牦牛尾拂跋塵铍具导者六人驭者南越军六人次驼鼓九饰驼以镀金铍具辔饰鬪笼旗鼓纓枪驭者九人次舍人二人次青衣二人次清道官四人次信旛二执者二人引护者四人次骠鼓六饰骠以镀金铍具辔鬪笼旗鼓纓枪驭者六人次告止旛二执者二人引护者四人次传教旛二执者二人

引护者四人次桥道顿递使一人舍人清道官桥道顿
递使从者凡七人熏稍队金吾将军二人次弩而骑者五人次稍而骑者五人次熏一执
者一人夹者四人护者二人押熏官二人次马鼓四饰
如骡鼓馭者四人次佩弓矢而骑者五人押衙四人爆稍者四人控马八人次稍而骑者
五人金吾将军押熏官从者凡四人朱雀队舍人一人
次朱雀旗一执者一人引护者四人次金吾折冲一人帅甲骑凡二十有五弩五人次弓
五人次稍五人次弓五人次稍五人舍人金吾折冲从
者凡二人十二旗队舍人一人金吾果毅二人帅引旗骑士五次风伯旗左雨师旗右雷
公旗左电母旗右执者四人次五星旗五执者五人次
北斗旗一执者二人左右摄提旗二执者二人执副筭者二人执稍而护者五人舍人金
吾果毅从者凡三人门旗队舍人二人监门将军二人
次门旗二执者二人引护者四人次监门校尉二人次鸾旗一执者一人引护者四人舍
人监门将军监门校尉从者凡六人云和乐云和署令
二人前行乐工十有六人次乐工百七十有二人云和署令从者二人殿中黄麾队舍人
二人殿中侍御史二人次黄麾一执者一人夹者二人
舍人殿中侍御史从者凡四人太史钲鼓队太史一人交龙摛鼓左金钲右舁者四人工
二人次司辰郎一人左典事一人右太史司辰郎典事
从者凡三人武卫钺戟队武卫将军一人领五色绣旛一金节八■〈𠂔干〉右翬左朱
雀青龙白虎幢三横布导盖一中道义四武卫果毅二
人级二十戟二十徒五十有九人武卫将军武卫果毅从者凡三人龙墀旗队舍人二人
中郎将二人帅骑士凡二十有四人执旗者八人天下
太平旗中道中岳帝旗左中央神旗右次日旗左月旗右次祥云旗二分左右次皇帝万
岁旗中道引者八人护者八人舍人中郎将从者凡四
人御马队舍人二人左右卫将军二人御马十有二匹馭士控鹤二十有四人次尚乘奉
御二人舍人左右卫将军从者凡四人拱卫控鹤第一
队拱卫指挥使二人帅步士凡二百五十有二人负剑者三十人次执吾杖者五十人次
执斧者五十人次执鐙杖者六十人次执列丝骨朵者
三十人次携金水瓶者一人左金盆者一人右次执列丝骨朵者三十人拱卫指挥使从
者二人安和乐安和署令二人领押职二人次乐工二
十有四人安和署令从者二人金吾援宝队舍人二人金吾将军二人马十二重甲士一
十二骑弩四次弓四次稍四为三重次香案二金炉合
各二舁士十有六人侍香二人次典瑞使二人引八宝受命宝左传国宝右次天子之宝
左皇帝之宝右次天子行宝左皇帝行宝右次天子信
宝左皇帝信宝右舁士八人朱团扇四人凡九十有六人援宝三十人次符宝郎二人次

金吾果毅二人次稍四次弓四次弩四为三重舍人金
吾将军侍香典瑞使符宝郎金吾果毅从者凡十有二人殿中伞扇队舍人二人骑而执
旗者四人日月合璧旗左五星连珠旗右次金龙旗左
金凤旗右骑而引旗者四人骑而护旗者四人次朱团扇十有六次小雉扇八次中雉扇
八次大雉扇八为十重重四人次曲盖二次红方伞二
次紫方伞二次华盖二次大伞二执者五十人舍人从者二人控鹤围子队围子头一人
执骨朵由中道领执围子十有六人次朱伞中道次金
脚踏左金椅右拱卫指挥使一人控鹤二十人拱卫指挥使从者一人天乐一部天乐署
令二人领押职二人次乐工十有八人徒二人 【按
武卫钺戟队载徒五十有九人后黄麾队载徒三人皆系执旛节幢麾等仗与步土步卒
例同若乐部则乐工之外不须用徒帷据云和安和署
令皆有从者而本条失载疑此徒二人或即从者二人之讹耳】 控鹤第二队金拱卫司
事二人帅步土凡七十有四人执立瓜者三十有六人
次捧金杙一人左鞭桶一人右次蒙鞍一人左伞手一人右次执立瓜者三十有四人金
拱卫司事从者二人殿中导从队舍人二人香镫案一
黄销金盘龙衣金炉合结绶龙头竿舁者十有二人侍香二人次警蹕三人次舍人二人
天武官二人执金钺次金骨朵二次幢二次节二次金
水盆左金椅右次蒙复左副执椅右次金水瓶鹿卢左销金净巾右次金香球二金香合
二次金唾壶左金唾盂右金拂四扇十次黄伞中道伞
衣从凡骑士三十人步卒四人舍人天武官从者凡六人控鹤第三队拱卫直铃辖二人
执卧瓜八十人 【按控鹤第一队第二队领队官皆
有从者而此第三队失载疑系史文脱漏】 导驾官引进使二人次给事中一人左起居
注一人右侍御史一人左殿中侍御史一人右次翰林
学士一人左集贤学士一人右次御史中丞一人左同知枢密院事一人右次御史大夫
一人左知枢密院事一人右次侍仪使四人中书侍郎
二人黄门侍郎二人侍中二人次仪仗使一人左鹵簿使一人右次礼仪使二人持劈正
斧一人中道次大礼使一人左太尉一人右从者三十
人惟执劈正斧官从者二人羽林宿卫舍人二人次羽林将军二人领宿卫骑士二十人
执骨朵六人次执短戟六人次执斧八人舍人羽林将
军从者凡四人检校官顿递队监察御史二人次纛稍队循仗检校官二人次朱雀队金
吾中郎将二人次十二旗队兵部侍郎二人次门旗队
纠察仪仗官二人次云和乐部金吾将军二人知队仗官二人次武卫钺戟队监察御史
二人次外道左右牙门巡仗监门中郎将二人次金吾
援宝队兵部尚书二人次循仗检校官二人次殿中伞扇队监察御史二人次礼部尚书

二人次围子队知队仗官二人次金吾大将军二人次
殿中导从队纠察仪仗官二人次循仗检校官二人次羽林宿卫队左点检一人左右检
点一人右领大黄龙负图旗二执者二人夹者八人控
鹤外外仗内前后检校仗内知班六人承奉班都知一人太常博士一人前后巡察宿直
将军八人夹路检校三卫陪辂队诞马二匹乘黄令二
人次殿前将军二人玉辂太仆卿驭千牛大将军驂乘左右卫将军陪辂辂马六匹步卒
凡八十有二人驭士四人驾士六十有四人行马二人
踏道八人推竿二人托义梯各一人教马官二人进辂职长二人夹辂将军二人青沥水
扇二次千牛备身二人献官二人殿中监六人内侍十
人千牛备身后骑而执弓矢者十人尚衣奉御四人尚食奉御二人尚药奉御二人次腰
輿黄纒丝销金云龙蒙复步卒凡十有三人舁八人道
扇四人黄伞一人尚舍奉御二人尚辇奉御二人从者三十有四人大神牙门旗队都点
检一人次监门大将军二人门凡三重亲卫郎将帅甲
士分左右夹辂而阵绕出辂后合执斨者二为第一门翊卫郎将帅护尉夹亲卫而阵绕
出辂后合为第二门监门校尉二人左右卫大将军帅
骑士执五色龙凤旗夹护尉而阵绕出辂后合牙门旗二为第三门监门校尉二人主之
云和乐后部云和署丞二人领前行乐工十人次乐工
四十人云和署丞从者二人后黄麾队元武幢一绛麾二徒三人次黄麾执者一人夹者
二人豹尾一执者一人夹者二人元武黑甲掩后队金
吾将军一人后卫指挥使二人帅甲骑五十有七人元武旗一执者一人夹者二人小金
龙凤黑旗二执者二人稍四十人弩十人执卫司爆稍
二人金吾将军后卫指挥使从者三人其外仗金鼓队金鼓旗二执者二人引护者八人
次折冲都尉二人帅步士凡百二十人鼓钲皆二十四
人角二十四人车辐棒长刀皆二十四人清游队舍人二人金吾折冲二人帅步士凡百
有十人白泽旗二执者二人引护者八人次执弩次执
稍次执弓次执稍次执弓并二十人饮飞队铁甲饮飞执稍者十有二人次金吾果毅二
人次虞候饮飞执弩二十人 【按前后各队领队官
皆有从者而此上金鼓清游饮飞三队失载疑系史文脱漏】 受仗前队领军将军二人
帅步士五十人执受执义并二十五人领军将军从者
二人诸卫马前队舍人二人左右卫郎将二人帅骑士百五十有六人前辟邪旗应龙旗
次玉马旗三角旗次黄龙负图旗黄鹿旗次飞麟旗馱
馱旗次鸾旗凤旗次飞黄旗麒麟旗并分左右执旗十有二人引旗十有二人护旗十有
二人执弓六十人执稍六十人每旗弓五稍五舍人左
右卫郎将从者四人二十八宿前队舍人二人领军将军二人帅步士百十有二人井鬼

柳星张翼轸旗在左参觜毕昴胃娄奎旗在右执旗十
有四人引旗十有四人护旗十有四人从以执刀盾者三十人弓矢者二十人■〈矛赞〉者二十人舍人领军将军从者四人左右领军黄麾
仗前队舍人二人领军将军二人帅步士凡一百五十人绛引旛十次龙头竿绣鼉十皆
分左右次江渚旗左济渚旗右次小戟十次弓十皆分
左右次南方神旗左西方神旗右次镗十次录滕络盾加刀十皆分左右次南岳帝旗左
西岳帝旗右次龙头竿鼉十次朱滕络盾加刀十皆分
左右次南天王旗左西天王旗右次小戟十次弓十皆分左右次龙君旗左虎君旗右次
镗十次绿滕络盾加刀十皆分左右执者百三十人引
旗十人护旗十人受仗后队领军将军二人帅步士五十人执受执义并二十五人【按
受仗前队领队官有从者黄麾仗后队领队官亦有
从者而此上黄麾仗前队及受仗后队二条失载疑系史文脱漏】左右牙门旗队监门
将军二人次牙门旗四每旗执者一人引夹者二人次
监门校尉二人从者四人左右青龙白虎队舍人二人领军将军二人帅甲士凡五十有
六人青龙旗左执者一人夹者二人从以执弩五人弓
十人稍十人白虎旗右执者一人夹者二人从以执弩五人弓十人稍十人舍人领军将
军从者四人二十八宿后队舍人二人领军将军二人
帅步士百十有二人角亢氐房心尾箕旗在左壁室危虚女牛斗旗在右执旗凡十四人
引者护者并十四人从以弓矢三十人■〈矛赞〉盾
并二十人舍人领军将军从者四人诸卫马后队舍人二人左右卫果毅都尉二人帅卫
士百五十有六人前角■〈角端〉旗赤熊旗次兕旗
太平旗次驪■〈马蜀〉旗驺牙旗次犀牛旗鷓■〈义鸟〉旗次苍乌旗白狼旗次龙
马旗金牛旗执夹引护并同前队舍人左右卫果毅都
尉从者四人左右领军黄麾仗后队舍人二人领军将军二人帅步士百六十人龙头竿
鼉十次朱滕络盾加刀十皆分左右次吏兵旗左力士
旗右次小戟十次弓十皆分左右次东天王旗左北天王旗右次镗十次绿滕络盾加刀
十皆分左右次东岳帝旗左北岳帝旗右次龙头竿鼉
十次朱滕络后加刀十皆分左右次东方神旗左北方神旗右次小戟十次弓十皆分左
右次淮渚旗左河渚旗右次镗十次绿滕络盾加刀十
皆分左右执者百三十人引旗护旗并十人次绛引旛十掩后舍人领军将军从者四人
左右卫仪刀班剑队舍人二人左右卫中郎将二人帅
步士凡四十人班剑二十人仪刀二十人舍人左右卫中郎将从者四人供奉宿卫步士
队供奉中郎将二人帅步士凡五十有二人执短戟十
有二人次执列丝十有二人次义戟十有二人次斧十有六人亲卫甲士队亲卫郎将二

人帅步士凡百四十有八人执龙头竿擎四人次小戟
十人次擎二人次仪镗十人次擎二人次小戟十人次擎二人次仪镗十人次擎二人次
小戟十人次擎二人次仪镗十人次擎二人次小戟十
人次擎二人次仪镗十人次擎二人次小戟十人夹供奉宿卫队次擎二人次仪镗十人
次擎二人次小戟十人次擎二人次仪镗十人次擎二
人折绕宿卫队后而合其端为第一门翊卫护尉队翊卫郎将二人帅护尉骑士百有二人
执金装骨朵分左右夹亲卫队行折绕队后而合其
端为第二门左右卫甲骑队左右卫大将军二人帅骑士百人执青龙旗五人青凤旗五
人次赤龙旗五人赤凤旗五人次黄龙旗五人黄凤旗
五人次白龙旗五人白凤旗五人次黑龙旗五人黑凤旗五人次五色凤旗二十五五色
龙旗二十五曲绕辂后合牙门旗为第三门左卫青甲
队左卫指挥使二人帅骑士三十有八人执大青龙旗二人大青凤旗二人小青龙旗二
人小青凤旗二人从以持青稍者三十人 【按后赤
甲黄甲白甲三队领队官皆有从者惟此青甲队失载疑系史文脱漏】 折绕陪门前卫
赤甲队前卫指挥使二人帅骑士凡四十有八人执大
赤凤旗三人大赤龙旗三人小赤凤旗二人小赤龙旗一人从以持朱稍者三十有八人
从者二人折绕陪门中卫黄甲队中卫指挥使二人帅
骑士凡五十有八人执大黄龙旗三人大黄凤旗三人小黄龙旗三人小黄凤旗三人从
以持黄稍者四十有六人从者二人折绕陪门右卫白
甲队右卫指挥使二人帅骑士凡七十有四人执大白凤旗四人大白龙旗四人小白凤
旗三人小白龙旗三人从以持白稍者六十人从者二
人折绕陪门牙门四监门中郎将二人次左卫次前卫次中卫次右卫牙门旗各二色并
赤监门校尉各二人从者十人仪卫旌旗殿下黄麾仗
凡四百四十有八人分布于丹墀左右各五行右前列执大盖二人执华盖二人执紫方
盖二人执红方盖二人执曲盖二人次二列执朱团扇
八人执大雉扇八人执中雉扇八人执小雉扇八人执朱团扇八人次三列执黄麾幡十
人执绛引幡十人执信幡十人执传教幡十人执告止
幡十人次四列执葆盖四十人执仪镗斧四十人执小戟飞龙掌四十人左列亦如之皆
以北为上押仗四人行视仗内而检校之殿下旗仗执
护后屏凡五百二十有八人分左右左前列建天下太平旗第一牙门旗第二每旗执者
一人护者四人后屏五人左二列日旗第三龙君旗第
四每旗执者一人护者四人后屏五人右前列建皇帝万岁旗第一牙门旗第二每旗执
者一人护者四人后屏五人右二列月旗第三虎君旗
第四每旗执者一人护者四人后屏五人左次三列青龙旗第五执者一人护者二人后

屏五人天王旗第六执者一人护者二人后屏五人风伯旗第七执者一人护者二人后屏五人雨师旗第八执者一人护者二人后屏五人雷公旗第九执者一人护者二人后屏五人电母旗第十执者一人护者二人后屏五人吏兵旗第十一执者一人护者二人后屏五人右次三列白虎旗第五执者一人护者二人后屏五人天王旗第六执者一人护者二人后屏五人【按元史輿服志于白虎旗第五条下脱天王旗第六执护后屏一条今依左次三列增纂】江渎旗第七执者一人护者二人后屏五人河渎旗第八执者一人护者二人后屏五人淮渎旗第九执者一人护者二人后屏五人济渎旗第十执者一人护者二人后屏五人力士旗第十一执者一人护者二人后屏五人二十二旗内拱卫直指挥使二人分左右立执玉斧次卧瓜一列次立瓜一列次列丝一列次鐙仗一列次吾仗一列次班剑一列并分左右立左次四列朱雀旗第十二执者一人护者二人后屏五人木星旗第十三执者一人护者二人后屏五人荧惑旗第十四执者一人护者二人后屏五人土星旗第十五执者一人护者二人后屏五人太白旗第十六执者一人护者二人后屏五人水星旗第十七执者一人护者二人后屏五人鸾旗第十八执者一人护者二人后屏五人右次四列元武旗第十二执者一人护者二人后屏五人东岳旗第十三执者一人护者二人后屏五人南岳旗第十四执者一人护者二人后屏五人中岳旗第十五执者一人护者二人后屏五人西岳旗第十六执者一人护者二人后屏五人北岳旗第十七执者一人护者二人后屏五人麟旗第十八执者一人护者二人后屏五人左次五列角宿旗第十九亢宿旗第二十氐宿旗第二十一房宿旗第二十二心宿旗第二十三尾宿旗第二十四箕宿旗第二十五每旗执者一人护者二人后屏五人右次五列奎宿旗第十九娄宿旗第二十胃宿旗第二十一昴宿旗第二十二毕宿旗第二十三觜宿旗第二十四参宿旗第二十五每旗执者一人护者二人后屏五人左次六列斗宿旗第二十六牛宿旗第二十七女宿旗第二十八虚宿旗第二十九危宿旗第三十室宿旗第三十一壁宿旗第三十二每旗执者一人护者二人后屏五人右次六列井宿旗第二十六鬼宿旗第二十七柳宿旗第二十八星宿旗第二十九张宿旗第三十翼宿旗第三十一轸宿旗第三十二每旗执者一人护者二人后屏五人凡执者佩剑护者佩剑加弓矢后屏执稍左右列皆如之

明制皇帝仪仗吴元年十二月中书左相国李善长率礼官以即位礼仪进是日清晨拱卫司陈设鹵簿列甲士于午门外之东西列旗仗

于奉天门外之东西龙旗十二分左右用甲士十二人北斗旗一纛一居前豹尾一居后俱用甲士三人虎豹各二驯象六分左右布旗六十四

门旗日旗月旗青龙白虎风云雷雨江河淮济旗天马天禄白泽朱雀元武等旗木火土金水五星旗五岳旗熊旗鸾旗 【按下洪武元年十

月定元旦朝贺仪载奉天门外左右布旗六十四左行内列熊旗鸾旗右行内列黑旗麟旗而此处独缺黑麟二旗史文脱漏系沿明会典之讹

】及二十八宿旗各六行每旗用甲士五人内一人执旗旗下四人执弓弩设五辂于奉天门外玉辂居中左金辂次革辂右象辂次木辂俱并

列丹墀左右布黄麾仗黄盖华盖曲盖紫方伞红方伞雉扇朱团扇羽葆幢豹尾龙头竿信旛传教旛告止旛绛引旛戟擎戈擎仪鎗擎等各三

行丹陛左右陈幢节响节金节烛笼青龙白虎幢班剑吾仗立瓜卧瓜仪刀鐙杖戟骨朵朱雀元武幢等各三行殿门左右设圆盖一金交椅金

脚踏金水盆金水罐团黄扇红扇皆校尉擎执太祖洪武元年十月定元旦朝贺仪金吾卫于奉天门外分设旗帜宿卫于午门外分设兵仗卫

尉寺于奉天殿门及丹陛丹墀设黄麾仗内使监擎执于殿上凡遇冬至圣节册拜亲王及蕃使来朝仪俱同其宣诏赦降香则惟设奉天殿门

及丹陛仪仗殿上擎执云其陈布次第午门外刀盾戛义各置于东西甲士用赤奉天门外中道金吾宿卫二卫设龙旗十二分左右用青甲士

十二人北斗旗一纛一居前豹尾一居后用黑甲士三人虎豹各二驯象六分左右左右布旗六十四左前第一行门旗二每旗用红甲士五人

内一人执旗旗下四人执弓箭第二行月旗一用白甲士五人内一人执旗旗下四人执弩青龙旗一用青甲士五人内一人执旗旗下四人执

弩第三行风云雷雨旗各一每旗用黑甲士五人内一人执旗旗下四人执弓箭天马白泽朱雀旗各一每旗用红甲士五人内一人执旗旗下

四人执弓箭第四行木火土金水五星旗各一随其方之色每旗用甲士五人内一人执旗旗下四人执弩其甲木青火红土黄金白水黑熊旗

鸾旗各一每旗用红甲士五人内一人执旗旗下四人执弩第五行角亢氐房心尾箕旗各一每旗用青甲士五人内一人执旗旗下四人执弓

箭第六行斗牛女虚危室壁旗各一每旗用青甲士五人内一人执旗旗下四人执弩右前第一行门旗二每旗用红甲士五人内一人执旗旗

下四人执弓箭第二行日旗一用红甲士五人内一人执旗旗下四人执弩白虎旗一用白甲士五人内一人执旗旗下四人执弩第三行江河

淮济旗各一随其方之色每旗用甲士五人内一人执旗旗下四人执弓箭其甲江红河白淮青济黑天禄白泽元武旗各一每旗用甲士五人

内一人执旗旗下四人执弓箭天禄白泽红甲元武黑甲第四行东南中西北五岳旗各一随其方之色每旗用甲士五人内一人执旗旗下四人执弩其甲东岳青南岳红中岳黄西岳白北岳黑黑旗麟旗各一每旗用红甲士五人内一人执旗旗下四人执弩第五行奎娄胃昂毕觜参旗各一每旗用青甲士五人内一人执旗旗下四人执弓箭第六行井鬼柳星张翼轸旗各一每旗用青甲士五人内一人执旗旗下四人执弩奉天门外拱卫司设五辂玉辂居中左金辂次革辂右象辂次木辂俱并列典牧所设乘马于文武楼之南各三东西相向丹墀左右布黄麾仗凡九十分左右各三行左前第一行十五黄盖一红大伞二华盖一曲盖一紫方伞一红方伞一雉扇四朱团扇四第二行十五羽葆幢二豹尾二龙头竿二信旛二传教旛二告止旛二绛引旛二黄麾一第三行十五戟斨五戈斨五仪鞞斨五右前第一行十五黄盖一红大伞二华盖一曲盖一紫方伞一红方伞一雉扇四朱团扇四第二行十五羽葆幢二豹尾二龙头竿二信旛二传教旛二告止旛二绛引旛二黄麾一第三行十五戟斨五戈斨五仪鞞斨五皆校尉擎执丹陛左右拱卫司陈幢节等仗分左右为四行左前第一行响节十二金节三烛笼三第二行青龙幢一班剑三吾杖三立瓜三卧瓜三仪刀三鐙仗三戟三骨朵三朱雀幢一右前第一行响节十二金节三烛笼三第二行白虎幢一班剑三吾杖三立瓜三卧瓜三仪刀三鐙杖三戟三骨朵三元武幢一皆校尉擎执奉天殿门左右拱卫司陈设左行圆盖一金脚踏一金水盆一团黄扇三红扇三右行圆盖一金交椅一金水罐一团黄扇三红扇三皆校尉擎执殿上左右内使监陈设左拂子二金唾壶一金香合一右拂子二金唾盂一金香炉一皆内使擎执和声郎陈乐于丹墀文武官拜位之南十二年礼部奏增设丹墀仪仗黄伞华盖曲盖紫方伞红方伞各二雉扇红团扇各四羽葆幢龙头竿绛引传教告止信旛各六戟斨戈斨鞞斨各十成祖永乐三年增定仪仗肃靖旗二金鼓旗二金龙画角二十四鼓四十八金四金钲四杖鼓四笛四板四白泽旗二门旗八黄旗四十金龙旗十二日月旗二风云雷雨旗四木火金水土星旗五列宿旗二十八北斗旗一东岳旗一南岳旗一中岳旗一西岳旗一北岳旗一江河淮济旗四青龙旗一白虎旗一朱雀旗一元武旗一天禄旗一天马旗一鸾旗一麟旗一熊旗一黑旗一红纛二阜纛二红节二小铜角二大铜角二纓头一豹尾一麾一戏竹二箫十二笙十二龙笛十二头管十二方响四■〈竹秦〉八琵琶八箜篌八杖鼓三十六板四大鼓二弓矢百御杖六十诞马二十四领头十二黄麾二绛引旛十传教旛十告止旛十信

旛十龙头竿十豹尾四仪鎗斃二十戈斃二十戟斃二十单戟六龙戟六班剑六吾杖六立瓜六卧瓜六仪刀六金镡六金钺六骨朵六羽葆幢十青龙幢一白虎幢一朱雀幢一元武幢一响节二十四金节六方天戟二十四鸣鞭四金马杌一金交椅一金脚踏一金水盆一金水罐一金香炉一金香合一金唾盂一金唾壶一拂子四红纱灯笼十二红油纸灯笼六魮灯六紫罗素方伞四红罗素方伞四红罗直柄华盖绣伞四红罗曲柄绣伞四黄罗直柄绣伞四红罗直柄绣伞四黄罗曲柄绣伞二青罗销金伞三红罗销金伞三黄罗销金伞三白罗销金伞三黑罗销金伞三黄油绢销金雨伞一红罗绣花扇十二红罗绣雉方扇十二红罗单龙扇十黄罗单龙扇十红罗双龙扇二十黄罗双龙扇二十红罗素扇二十黄罗素扇二十寿扇二黄罗销金九龙伞一黄罗曲柄绣九龙伞一仗马六朱红马杌四鞍笼二金铜玲珑香炉一宝匣一板轿一步辇一大凉步辇一大马辇一小马辇一玉辂一大辂一黄账房一宣宗宣德元年增定卤簿仪仗有具服幄殿一座金交椅一金脚踏一金水盆一金水罐一金马杌一鞍笼一金香炉一金香合一金唾盂一金唾壶一御杖二摆锡明甲一百副盔一百弓一百箭三千刀一百其执事校尉每人鹅帽积逊衣铜带鞞履鞋一副凡常日奉天门早朝则设丹陛驾于午门外及金水桥南祇用单龙戟六双龙戟六班剑六吾杖六仪刀六立瓜六卧瓜六镡杖六金钺六骨朵六单龙扇二十双龙扇二十黄盖伞二黄曲柄伞二五方伞五鸣鞭四弓矢五十副明制卤簿仪仗前后增置详略不同而旌旗之制亦递有更定焉肃旗黄质上阔七尺二寸下三尺二寸黑字朱漆攢竹竿长八尺二寸下有铁■〈矛赞〉靖旗制与肃旗同但用靖字金鼓旗黄质阔一丈二尺五寸下七尺红金鼓二字朱漆攢竹竿长一丈四尺九寸内贴金木鎗头长一尺五寸八分上节红纓下有铁■〈矛赞〉金龙画角木质黑漆金为饰上节宝相花中节缠身单龙云文下节八宝双海马鼓四十八木匡加红油冒以革面径一尺七寸匡画宝相花面画双狮彩球金四以铜为之径一尺七寸金钲四铜质竹匡用红纆系钲于匡钲径九寸五分杖鼓四木匡细腰匡两头加黑漆钺金云龙文铁圈二皆冒以革附于匡联以红纆加铜龙头钩子以青绒匾绦悬之笛四截竹为之六窍长一尺六寸板四铁力木板各六贯以青彩组各长一尺一寸上阔一寸九分下阔二寸五分白泽旗二一红质四旁加黄襴赤火焰闲彩脚傍竿加红腰彩织白泽飞状及云文旗上有素额织白泽二青字旗身黄襴火焰长六尺六寸广二尺九寸揭以朱漆攢竹竿长一丈三尺六寸九分内贴金木鎗头长一尺三寸五

分饰以红纓■〈矛赞〉用铁一青质但织白泽为走状余同前制凡绣旗褙脚腰额并字色竿纓■〈矛赞〉制皆同惟黄旗北斗旗稍异门旗红质中织金为门字余同白泽制黄旗四十黄质上广八尺下四尺朱漆■〈矛赞〉竹竿长一丈一尺三寸五分内贴金木鎗头长一尺三寸五分上饰红纓下有铁■〈矛赞〉金龙旗十二青质织金云龙文额织龙旗二字日旗青质织为日红色及日字月旗青质织为月白色及月字风旗青质织箕星四及风字云旗青质织五色云文及云字雷旗青质织雷文五及雷字雨旗青质织毕星八附耳一星在旁及雨字木星旗青质织木星一及木字火星旗赤质织火星一及火字土星旗黄质织土星一及土字金星旗白质织金星一及金字水星旗黑质织水星一及水字角宿旗青质织角宿二及角字亢宿旗青质织亢宿四及亢字氐宿旗青质织氐宿四及氐字房宿旗青质织房宿四钩连二小星在旁及房字心宿旗青质织心宿三及心字尾宿旗青质织尾宿九神容小星一及尾字箕宿旗青质织箕宿四及箕字斗宿旗青质织斗宿六及斗字牛宿旗青质织牛宿六及牛字女宿旗青质织女宿四及女字虚宿旗青质织虚宿二及虚字危宿旗青质织危宿三及危字又四星在下室宿旗青质织室宿二及室字又六星在旁壁宿旗青质织壁宿二及壁字奎宿旗青质织奎宿十六及奎字娄宿旗青质织娄宿三及娄字胃宿旗青质织胃宿三及胃字昴宿旗青质织昴宿七及昴字毕宿旗青质织毕宿八及毕字附耳一星在旁觜宿旗青质织觜宿三及觜字参宿旗青质织参宿七及参字又四小星在左足下三星在内井宿旗青质织井宿八及并字又一星在旁鬼宿旗青质织鬼宿四及鬼字柳宿旗青质织柳宿八及柳字星宿旗青质织星宿七及星字张宿旗青质织张宿六及张字翼宿旗青质织翼宿二十二及翼字轸宿旗青质织轸宿四及轸字又一星在中左右二星在旁北斗旗黑质黄褙黑腰火焰闲彩脚织北斗星七及北斗二字又一星在旁东岳旗青质织彩为山形及东岳二字南岳旗赤质织山形及南岳二字中岳旗黄质织山形及中岳二字西岳旗白质织山形及西岳二字北岳旗黑质织山形及北岳二字江旗赤质织水文及江字河旗白质织水文及河字淮旗青质织水文及淮字济旗黑质织水文及济字青龙旗青质织青龙形云文及青龙二字白虎旗白质织白虎形云文及白虎二字朱雀旗赤质织朱雀形云文及朱雀二字符武旗黑质织龟蛇形云水文及元武二字天禄旗赤质织天鹿形云文及天鹿二字天马旗赤质织天马形云文及天马二字鸾旗赤质织鸾形云文及鸾字麟旗赤质织麟形云文及麟字熊旗赤质织

熊形云文及熊字黑旗赤质织黑形云文及黑字红纛朱竹竿长一丈三尺九寸用牦牛尾染红簇为纛上施抹金银宝盖周围瓷珠络建于竿下有铁■〈矛赞〉阜纛与红纛制同但用黑牦牛尾抹金铜宝盖红节朱竹竿抹金银宝珠头用牦牛尾染红簇成如圆斗大凡四层每层上施抹金银顶周围缀瓷珠络建于竿下有铁■〈矛赞〉竿长同红纛黄麾朱竹竿长一丈二尺五寸内龙头钩一尺衔抹金铜圈悬抹金铜顶四角红罗宝盖高七寸五分围二尺七寸五分周以绿罗腰黄罗三檐销金云龙文中垂大红罗旛长六尺三寸广五寸五分旛上节彩绣荷叶盖莲花座其中青罗额金书黄麾二字中节描金双升龙下节描金云日文旛下缀五色横板绛引旛十制同黄麾但用五色罗为旛不加金绣三檐用紫无额并字传教旛十制同黄麾但额用黄罗绣青传教二字中描金升降云龙无下节云日三檐用绿罗头衔铜佩四铜铃三十二其铜佩俱抹金告止旛十制同黄麾但额用黄罗绣青告止二字描金升降鸾凤云文三檐用青铜佩铃如传教之数信旛十制同黄麾但用黄罗额绣青信字描金升降云龙与传教同但三檐用黄罗铜佩铃如传教之数

钦定续通志卷一百二十六

●钦定续通志卷一百二十七 乐略一

乐略 【一】

（臣）等谨按郑樵之志乐略欲以继三百篇凡分类有四曰正声曰遗声曰祀飨正声曰祀飨别声而文武二舞附焉其上下古今别裁雅郑实能得乐府之要千载以下迹其源以别其流莫不赅而举之然世代屡更大略相因不无损益之异且当每朝草创之初雅音残缺及乎搜罗订定往往古制弗详新声闲起则变革之势有不期然而然者是则非郑志所能该矣兹谨条其流别发明前后所以不尽合者于左饶歌源出汉世用之军中战胜之事何代无之然自元以还饶歌独为衰息杂舞曲随世异名统系则一唐后传者寥如横吹本画角遗声其后用以导法驾出入至宋遂指事为名则实之渐漓故法从而变也相和歌乃里巷之风自隋文帝悦清商三调歌曲遂寢炽于宫廷迨后一变而为唐之供奉诸篇再变而为宋之排当杂类则所谓清商者亦渐漓其正虽其音节具有师承究之蔓延且无区别故降及元而杂剧大盛雅俗混淆不可复录以登斯志矣乐者以声为主是以古者或有声而无词杂剧固不能改唐宋以来之旧而独创为新声徒倚繁乱不一之歌而强以合调则又不如排当以前之失次犹未为己甚也隋唐有西凉八部其后远方之声更无部籍则随其流传可纪者着而存之郑志所录琴操不尚

事词未免偏而弗举宜补其遗而凡近世之丝桐雅调皆可附益其有词而未尝谱者弗列也至于遗声悉仍旧类因其繁多略为抉择不使备数过于正音仍郑例也祀飨之乐自汉以后往往有诗歌而无篇目郑志谓既无伟绩之可陈又无题命之可纪故独取梁之十二雅唐之十二和唐世乐章二百而樵以十二和括之者盖凡飨祀不过天神地祇宗庙三类足以尽其略而当时大小祀亦各以其类不立异名闲或稍有更张总非常制且十二之数咸从月律虽有新名不易故调故得以大包小以常统变而非直缺略之也洎宋迄元旧法寢湮繁名各出然其义类犹秩然不棼尚可次第但改作既多徒取其十二曲亦不免因噎废食之讥宜依彼类悉登附记俾部居井然而损益源流亦藉以考见至于前明乃从编注之例因其无复古法随事立名以类求之转多枘凿礼贵从宜乐岂有异哉别声一类各从时制先后不必相符合房中之歌至隋而绝闻喜诸乐盖汉所无有云韶钧容直遂无坐立二部有教坊杂剧调遂无法曲清声舞在庙中者各室分殊别文武者随世变易郑志录文武之舞而废庙室之舞谓其纷然出于私意不足纪而传之亦一偏之论也兹悉列入以补其阙凡所采辑与郑志异同如此

正声序论

遗声序论

○正声序论

（臣）等谨按郑樵之序正声其意讥汉儒不识风雅颂之别而徒以义论诗故凡所列自饶歌迄琴曲皆风雅遗音而郊庙乐篇返居其后者盖谓积风而雅积雅而颂其次第宜如是也然饶歌雅也而首及之则其立例与其树论不尽相符但今续其书无容更张宜辨而仍之至如因时变革前有后无则当考厥源流以从彼类损者缺之益者增之不可复一一以求合矣

唐饶歌四曲

破阵乐 应圣期 贺朝欢 君臣同庆乐

（臣）等谨按唐制命将征伐有大功献俘馘者其日备神策兵卫于东门外如常仪其凯歌用饶吹二部乐工等次第陈列如鹵簿之式鼓吹令丞前导分行于兵马俘馘之前将入都门鼓吹振作迭奏破阵乐应圣期贺朝欢君臣同庆乐四曲行至大社及太庙门又徧奏四曲案柳宗元集有表进鼓吹饶歌十二曲一曰晋阳武二曰兽之穷三曰战武牢四曰泾水黄五曰奔鲸沛六曰苞枿七曰河右平八曰铁山碎九曰靖本邦十曰吐谷浑十一曰高昌十二曰东蛮当时未见施行附录于此

宋饶歌十四曲

上帝命【言宋受命也】 河之表【言平上党也】 淮海清【言定维扬也】
沅之上【言取湖南也】 皇威畅【言得
荆州也】 蜀土邃【言取蜀也】 时雨霈【言取广南也】 望钟山【言下江南
也】 大哉仁【言吴越献国也】 讴歌归【
言漳泉献土也】 伐功继【言克河东也】 帝临墉【言征澶渊也】 维四叶【
美仁治也】 炎精复【歌中兴也】

（臣）等谨按右曲宣宗时姜夔所上诏付太常者又尹洙撰进皇雅十篇亦未见
施行且其体制不尽与饶歌合故无足采

（臣）等又按饶歌盛于汉晋迨隋唐之世其歌曲传者视前代不及十之二三宋
时饶歌尚有可纪自是而后盖寥如矣考元末陈友谅
据龙兴平章阿哩袞实克宪金察吉合兵破之江右诸郡款附功成有龙兴平之曲又有
银章复之曲银章复者因龙兴始陷宪史刘夔怀印埋
土中土生瑞木一本察吉购得之施诸移文遂以恢复故名但此二曲皆词臣拟作之篇
当时未必录用是亦柳宗元尹洙撰进之属不得与施
行者比姑附记于此以存之若前明一代饶歌则自正史会典诸书以迨著作家皆未尝
及也

晋鞞舞曲一

晋世窳

（臣）等谨按鞞舞汉时遗法右晋太康中曲也宋改为宋世窳齐改为齐代昌唐
仍谓之鞞舞鲍昭诗云七鞞起长袖即此

唐上元舞曲十二

上元 二仪 三才 四时 五行 六律 七政八风 九宫 十洲 得一
庆云

（臣）等谨按右曲高宗所作诸大享祀并奏之肃宗上元三年诏惟圜丘方泽太
庙乃用余皆罢

唐软舞曲十

垂手罗 回波乐 兰陵王 春莺啭 半社渠 借席鸟夜啼 苏合春 掘柘
枝 团乱旋 甘州

唐健舞曲十

阿辽 柘枝 黄獐 拂林 太渭州 达磨支 大杆阿连 剑器 胡旋 胡
腾

隋唐鼓角横吹十七曲

企喻歌 琅琊王歌 巨鹿公主歌 黄淡思 地驱乐 雀劳利 慕容垂歌

隔谷 淳于王歌 东平刘生歌 捉搦 幽州马客
歌 高阳乐人歌 雍台 吐谷浑 部落稽 白净王

（臣）等谨按郑樵载鼓角横吹止十五曲然梁时有七十七曲散轶大半其存者二十一曲隋以后以横吹用之卤簿与鼓吹列为四部并以供大驾及皇太子王公等一曰搥鼓部二曰铙歌部三曰大横吹部四曰小横吹部是鼓角横吹至隋尚有此数而郑志不皆列入则搜之不广也兹谨取二十一曲去其与志重复之篇存十四曲又按唐承隋后存有五十三曲然其名可解者六章而已其曰慕容汗曰巨鹿公主曰太子企喻三曲犹十四曲之旧曰吐谷浑曰部落稽曰白净王三曲则隋世所增也兹取以附十四曲后焉

宋鼓吹十曲

（臣）等谨按自汉迄唐鼓角横吹本于边徼所传而用以为出入警严之节盖取其声之激越震厉多仍其旧曲闲或依仿彼调别谱新词然所述皆北方之事也宋时旧曲失传于是鼓吹一部所奏曲命名乃大远古意角声之变革自此始矣

导引 六州 十二时

（臣）等谨按右三曲宋初旧制凡大祭祀及法驾出入用以警严迨仁宗景佑以后每有增益大抵随事立名与三曲相间迭奏通十曲

奉禋歌

（臣）等谨按仁宗景佑二年郊祀李照等于导引三曲外别撰警严曲请名振容帝以其义无取改曰奉禋其后太庙祫享亲耕藉田亦用之

降仙台

（臣）等谨按神宗熙宁十年南郊皇帝归青城奏导引曲名降仙台罢六州十二时曲迨建炎迄绍熙承景佑熙宁之后郊祀奏导引三曲已仍并奏奉禋歌降仙台二曲亦不忘祖制之意尔

合宫歌

（臣）等谨按明堂大享以黄钟宫奏导引等曲仍增合宫歌

祔陵歌 虞主歌

（臣）等谨按神宗元丰二年慈圣光献皇后发引奏导引等曲后增祔陵歌虞主回京奏导引等曲后增虞主歌

永裕陵歌 虞神歌

（臣）等谨按神宗元丰八年神宗灵驾发引奏导引等曲后增永裕陵歌虞主回京奏导引等曲后增虞神歌

辽鼓吹前后部

（臣）等谨按辽乐散佚当世有前后鼓吹二部今仅传其器而已至其曲名则不可复考矣或者有声无辞

金鼓吹二曲

导引 采茨

（臣）等谨按金世鼓吹惟导引采茨二曲通行

明鼓吹一曲

武成

（臣）等谨按明会典有大乐鼓吹而不载曲词故其名至今缺轶惟穆宗隆庆三年大阅礼成奏武成之曲隶鼓吹部此为仅存可采者

（臣）等又按郑志于鼓吹后列相和歌大抵皆汉魏六朝之篇盖以系声乐府实滥觞于是也其闲有后人拟前人所作如匪新题则槩不入录其意主声而不主词故第纪其篇名所自而隋唐以后名作虽多亦阙如焉近世所传相和歌悉拟前题而里巷讴吟又往往不叶于雅调固不得滥取而续之也惟辽金本俗之相和歌乃从古所未尝有学士大夫因其非所熟习拟作者希然当世仿效流传其声者宜亦不少兹谨着而存之

辽相和歌一曲

踏锤

（臣）等谨按郑志云相和歌者街陌讴谣之词辽渤海俗每岁时聚会先命善歌舞者数辈前行士女追逐更相唱和回旋宛转名曰踏锤与相和歌合

金相和歌一曲

鹧鸪

（臣）等谨按大金国志云鹧鸪曲歌声高下长短如鹧鸪之声亦相和歌也

（臣）等又按郑樵于相和歌之后备列清商及西凉等八部盖隋唐之际其声音有伦者尽在是矣至元宗天宝中诸部渐非其旧当时供奉靡曼新词若梨园宜春院及小部所习雅俗无别惟乐署所掌旧乐闲易新名然犹清商等部之余音遗韵也但一经改革淆乱部居清商遂鲜专调而西凉等曲传者亦复寥寥更无统纪宋承其后愈趋愈下朝廷制作之外悉隶教坊其流至使教坊掌大晟雅乐教坊既盛于是淫哇鄙俚之声满天下矣朝廷所用排当乐曲大远雅音第犹彼善于此至是而欲求清商难已兹谨依郑志序列清商之次录唐乐署供奉二百二十六曲宋教坊排当九十六曲自元迄明变为杂剧其名以千数殊非大雅则槩从其

阙云于后又列累朝远方之乐以继西凉八部绝响庶

几因革源流粲然如指诸掌盖清商之不可上追风雅而杂剧之不可复为清商亦必然之势也

唐乐署供奉二百二十六曲

金华洞真 【旧名龟兹佛曲】 归圣曲 【旧名因度玉】 承天乐 顺天 景云 君臣相遇 九真 九仙 天册引 永昌乐 永代乐 庆云乐 冬乐 长寿乐 紫极 万国欢 封禅曜日光 舍佛儿 钦明引 【旧名胡歌】 燕山骑 【旧名河东婆】 宝伦光 【旧名俱伦仆】 紫云腾 【旧名色俱腾】 归真火罗 【旧名摩酰首罗】 白蛤盐 【旧名鸽鸽盐】 合浦明珠 【旧名罗刹末罗】 无疆寿 玉京春 【旧名苏莫刺耶】 元昭庆 【旧名河个盘陀】 急金华洞真 【旧名急龟兹佛曲】 万字清 【旧名苏莫遮】 舞仙鹤 仙云升 【旧名乞■〈浦上女下〉■〈浦上女下〉案以上沙陁调三十三曲即太簇宫调也】

破阵乐 大定乐 英雄乐 欢心乐 山香乐 年年乐 武成升平乐 兴明乐 黄骠■〈马棊〉 入天云卷白云 辽帝释九野 【旧名婆野娑】 泛金波 【旧名优婆师】 高唐云 【旧名半射渠沮】 庆维新 【旧名半射没】 司晨宝鸡 【旧名耶婆色鸡】 神鹊盐 【旧名野鹊盐】 布春阳 【旧名捺利梵】 怀思引 【旧名苏禅师胡歌】 万岁乐 【按以上大食调二十一曲即太簇商调也】

太和万寿乐 天统九胜乐 元妃 真元妃 急元妃 太监女采乐 真女采乐 山水白鹤 芳桂林 【旧名郎刺神】 大仙都 【旧名移师都】 跃泉鱼 【旧名借渠沙鱼】 日重轮 【旧名俱伦朗】 未央年 【旧名苏刺耶】 芳林苑 【旧名叱钵罗】 泛兰丛 【旧名达摩支】 琼台花 【旧名悉尔都】 春阳柳 天地宝引 宝廷引 【旧名苏刺耶胡歌按以上般涉调十九曲即太簇羽调也】

大同乐 六合来庭 安平乐 戎服来宾 安公子 红蓝花 【按以上太簇角调六曲】

道曲 垂拱乐 万国欢 九仙步虚 飞仙 景云 钦明引 玉京 宝轮光 曜日光 紫云腾 神仙 【旧名山刚】 舞盐 【旧名急火凤按以上道调十三曲即林钟宫调也】

天地大宝 迎天欢心乐 太平乐 破阵乐 五更转 圣明乐 卷白云 凌

波神 九成乐 泛龙舟月殿 蝉曲 英雄乐 山
 香 会罗仙 迎祥 翊圣 司晨宝鸡 九野欢 来宾引 【旧名讷陵加胡歌】
 仪凤 【旧名胡残】 升朝阳 【旧名苏罗密】
 芳苑墟 【旧名须婆栗特】 北戎还淳 【旧名拨维背陵】 金风 【旧名金波借席】
 庆淳风 【旧名厥磨贼】 庆维新 【以
 上小食调二十七曲即林钟商调】
 火凤 真火凤 急火凤 舞媚娘 长命 西河 三台 监行天 濮阳女
 神白马 春阳柳 长欢 【旧名无愁】 玉关引
 【旧名支胡歌】 因地利 大仙都 春台 祥云飞 【旧名东祇罗】 文明 塞
 尘清
 【旧名新造胜蛮奴以上平调十九曲即林钟羽调】 四时花 绿沈杯 赤白桃
 李花 大白纒 堂堂十二时 荷来苏 【旧名
 天下兵按以上林钟角调七曲】
 大封山乐 【按以上黄钟宫调一曲】
 破阵乐 天授乐 舞为倾杯乐 文武九华 急九华 大迭瑞蝉曲 北维归
 淳 庆淳风 兰山吹 【旧名杜兰乌多迴】 天长
 宝寿 【旧名老寿】 春莺啭吹 急兰山 来宝引 【旧名高丽】 静边引 【旧名
 耶婆地胡歌】 霓裳羽衣 【旧名婆罗门】
 思归 金方引 【旧名达牟鸡胡歌】 升朝阳 三辅安 【旧名三部罗按以上越调
 十九曲即黄钟商调】
 火凤 急火凤 春阳柳 飞仙 大仙都 天统思归 祠洞灵章 【旧名达菩
 提儿】 明凤乐 真明凤 阿蓝堆 濮阳女 【
 旧名百舌鸟按以上黄钟羽调十二曲】
 破阵乐 太平乐 倾杯乐 大辅乐 迎天乐 蝉曲 山香 月殿 天长宝
 寿 【旧名大百岁老寿】 五更转 同昌还城乐
 庆维新 金风 泛金波 司晨宝鸡金方引 紫府洞真 【旧名俱摩尼佛】
 神雀盐 北维归淳 【按以上双调十九曲即中吕商调也】
 破阵乐 九野欢 泛金波 凌波神 升朝阳 苏莫遮 欢心乐 蝉曲 来
 宾引 天地大宝 五更转 【按以上水调十一曲
 即南吕商调也】
 感皇恩 【旧名苏莫遮】 流水芳菲 【旧名婆伽儿按以上金风调二曲】
 上云曲 自然真仙曲 明一曲 难思曲 平珠曲 无为曲 有道曲 调元
 曲 立政曲 献寿曲高明曲 闻大曲 仪凤曲
 同和曲 闲雅曲 多稼曲 金镜曲 【按以上十七曲不详何调】

宋教坊排当九十六曲

长生乐引子 蕙兰芳引子 喜新春慢 曲犯 喜庆曲 万寿无疆 薄媚曲
破 齐天乐曲破 老人星 降黄龙曲破 碎锦梁

州歌头 万寿兴隆乐法曲 六么 梅花伊州 【按以上诸部合十四曲】

玉漏迟慢 雁穿柳 圣寿永歌曲子 献仙音 卖花声 帘外花 【合小唱】
舞杨花 【合小唱】 金莲倒垂 万寿永无疆

引子 圣寿齐天乐慢 永遇乐慢 赏仙花慢 柳初新慢 上林春引子 万岁
梁州曲破 圣寿永歌曲子 庆芳春慢 庆箫韶慢

万花新曲破 【按以上觥栗起二十曲】 侧犯 真珠髻 芳草渡 鱼水同欢
花犯 帝寿昌慢 寿南山慢 上苑春慢 降圣乐

慢 延寿慢 【按以上笛起十曲】 倾杯乐 忆吹箫 捧瑶卮慢 【按以上琵琶起
三曲】 寿南山 吴音子 升平乐慢 恋春光

慢 庆寿乐慢 月明起花灯慢 托娇莺慢 【按以上笙起七曲】

出墙花慢 月中仙慢 【按以上箏起二曲】

缕金蝉慢 【按以上箫起一曲】

安平乐 万方窳慢 碧牡丹慢 尧阶乐 进圣花 玉京春慢 【按以上方响
起六曲】

花梢月慢 寿炉香慢 【按以上嵇琴起二曲】

筵前保寿乐 【按以上觥栗独吹一曲】

庆千秋 【按以上笛独吹一曲】

寿千春 无疆寿 会羣仙 寿齐天 庆成功 九曲清 凤来仪 蕊宫春
连理枝 朝天乐 奉宸欢 贺昌时 寰海清 玉

芙蓉 泛仙槎 帝台春 宴蓬莱 美时清 寿星见 【按以上琵琶独弹十九曲】

福寿永康窳 【按以上玉轴琵琶独弹一曲】

长生宝宴乐 寿长春 【按以上笙独吹二曲】

会羣仙 聚仙欢 【按以上箏独吹二曲】

玉箫声 柳初春 【按以上箫独吹二曲】

惜春 【按以上方响独打一曲】

圣寿永 【按以上玉方响独打一曲】

缠令神曲 【按以上箏琶方响合一曲】

唐南诏乐曲一

奉圣乐

（臣）等谨按右曲德宗贞元中南诏异牟寻因西川押云南八国使韦皋以献者
其后骠国亦献国乐皋复谱次其声凡十二曲多演释

氏之词按唐会要远方乐有十四国曰高丽曰百济曰扶南曰天竺曰南诏曰骠国曰高昌曰龟兹曰疏勒曰康国曰安国曰鲜卑曰吐谷浑曰部落稽外又有文康礼毕及高昌圣明曲但自隋时已有之盖罢黜不在九部之列毋庸续载其诸国乐名在列九部后者并皆缺佚失传惟南诏所献尚存一曲故特录之

宋龟兹乐曲二

宇宙清 感皇恩

宋牂牁曲一

水曲

（臣）等谨按太宗至道元年牂牁王龙汉■（王尧）遣使来贡太宗召见令作本国歌舞一人吹瓢笙如蚊蚋声良久数十辈连袂宛转而舞以足顿地为节询其曲名曰水曲自是遂流传中国云

元达达乐曲二十八

哈巴尔图 昆尔伊克达袞 辉和尔 莽古尔 齐特库尔 巴尔斯托罗海
锡锡卜 额埒苏 蒙古额埒苏 实勒坦额埒苏
阿雅勒古 僧格袞卜丹 达尔罕 库济巴克实 阿尔斯兰哲伯 额哩讷 哈哩
古实哈齐 栋丹巴 绰勒们 济古尔 彭楚克鄂
乌尔 巴勒丹格卜实 锡里森 玛哈 相公 仙鹤 阿勒坦绥克

元回回曲三

伉里 马黑某当当 清泉当当

琴操七十六曲

龙蛇歌 【介子推所作也晋文公反国赏从亡者未及介子推子推乃作龙蛇之歌亡入绵上或云从者所作一名士矢志操】 献玉退怨歌 【卞和所作也和得璞玉以献楚怀王王使乐正子占之言石王以为欺谩斩其一足怀王死子平王立和复献之又以为斯斩其一足平王死子立为荆王欲献之恐复见害乃抱玉而哭王使剖之果得玉封和为侯辞不受而作退怨之歌】 穷劫之曲 【楚乐师扈非子所作也荆王信谗佞杀伍奢伯州犁而寇不绝于境又昭王困迫几为天下笑扈子乃援琴为楚作穷劫之曲昭王闻之垂涕扈子遂不复鼓】 偕隐歌 【牧犊子与妻偕隐所作也】 渡易水歌 【荆轲所作燕太子丹使荆轲刺秦王太子及宾客白衣冠以送之至易水上高渐离击筑轲和而歌为变征之声士皆垂泪复为羽声士皆瞋目发尽上指】 垓下歌 【亦名力拔操项羽所作也汉高祖围羽垓下羽夜闻汉军皆楚歌王是起饮帐中悲歌慷慨泣数行下遂上马溃围南出】 大风歌 【汉高祖所作也高

祖既定天下还过沛置酒召故人父老子弟发沛中儿
得百二十人教之歌酒酣帝击筑自歌令羣儿皆和】采芝操【亦作紫芝歌四皓所
作也四皓并为秦博士遭世坑黜儒术于是退而作此
歌共入商洛隐居地肺出不出】八公操【淮南王安所作也王好道书及方术之士
有八公诣门须眉皓白授王丹经及三十六水方王乃
援琴歌其事亦名淮南操】于忽操【庞德公所作也】楚明妃曲【汤惠休所作
也或云惟嵇康能为此曲以后传习数人而已】

（臣）等谨按郑樵于正声中录琴操五十七曲其说曰琴操所言本无其事但善
音之人欲写其幽怀隐思故取古人悲忧不遇之事以
命操君子之于琴瑟取其声而已不尚事词也此论深明古人寄托指意然有不尽然者
琴操所传其中往往有秦汉以来有是曲即有是事之
篇凡皆陶写性情自述境遇与依附命名畅所欲发者其致一耳兹谨采其志中所未及
者以续九引十二操之后至杂曲三十六一类则取琴
谱诸篇以附之别录于此

鲁风 洞天春晓 阳春 梅花三弄 梧桐夜雨和阳春 流水 修禊吟 双
鹤听泉 梧叶舞秋风 鸥鹭忘机 圮桥进履 墨
子悲丝 清夜闻钟琴书乐道 桃源吟 静观吟 风雷引 秋江夜泊 释谈章
溪山秋月 列子御风 松下观泉【泉一作涛】
养生主 苍梧怨 塞上鸿 樵歌 渔歌 耕歌牧歌 醉渔唱晓 关雎 苏门啸
山居吟 洞庭秋思 鴈过衡阳 宋玉悲秋 禹
会涂山 佩兰汉宫秋月 沧江夜雨 鹤舞洞天 春睡吟 羽化登仙 神化曲
庄周梦蝴蝶 平沙落雁 大雅挟仙游 六合游
潇湘水云 款乃歌 搔首问天 离骚 秋鸿 飞龙引 秋风引 明月引 绿竹
引 龙宫操 升仙操 飞鸢操 霍将军 幽涧泉
山人劝酒

（臣）等谨按右杂曲皆被诸丝桐者凡后人拟作新词槩不采入从郑志例也

○遗声序论

（臣）等谨按郑樵云遗声者逸诗之流也盖以逸诗喻新题乐府之未尝被管弦
者欲俟后人之取而谱之故曰遗声兹谨录唐以后新
题乐府以续之其名不雅驯者皆弃不取若古调一门宜从阙焉

征戍【将帅 城塞校猎附】

苦战行 兵车行 仗剑行 边词 平戎词 河塞子 征南谣 征夫词 盖
将军歌 平南谣 赵将军歌 勒将军歌 魏将军
歌 塞垣行 大漠行合肥战 封刀行 血镞行 遇敌即倒戈 金山捷 昆阳战

河阳战 昆仑战 免胄行 猎城行 鑿羌归来乎
游侠
并州少年行 义侠行 解剑行 枕剑行 黄金行 千金赠
行乐
登楼歌 湖上对酒行 余杭醉歌行 春游曲 袞襖曲 夜游曲 游春词
无愁可解
佳丽
章华美人歌 戚夫人歌 郑樱桃歌 静女歌 美人舞歌 洛阳女儿行 虢
国夫人词 飞燕篇 卢姬篇 绿珠旋 浣纱篇
玉人歌 玉女摇仙佩 烈妇行 续小娘歌 楚国两贤妇 楚妃曲 虞美人行 眉
妩词 唐姬饮酒歌 安乐公主画眉歌 乔家妾 银
瓶女 巴陵女 高凉洗 金溪孝女歌 阜罗特 眉峰碧 月边娇 绣停针 绮
罗香 别离 【迎客附】 临路歌 北上行 怀
哉行 惜别行 离会曲 新婚别 垂老别 无家别 离别难 归去难 望远行
忆旧游 望云涯引 送我入门来 西游曲 留客
住 望归吟
怨思
静夜思 哀王孙 哀江头 悲青坂 悲陈陶 征妇词 蕃女怨 遐方怨
望江怨 伤春怨 思越人 思远人 怨王孙 织
妇怨 长门怨 明妃怨 数奇叹 归母怨 永贞叹 济阳怨 南风叹 归舟怨
芳华怨 征妇词
歌舞
踏歌词
丝竹
月下笛 断弦曲
觞酌
荷叶杯 上行杯 尉迟杯 凤衔杯 月氏王头饮器歌 后庭宴 寿春宴
山亭宴
宫苑 【楼台 门阙附】
轮台歌 梁园歌 乐游苑歌 幽州台歌 越王台歌 殿前曲 魏宫词 楚
宫词 长信词 梁园吟 天门谣 翠楼吟 丛台
歌 天门引 隋故宫行 西楼曲 凤池吟 齐云楼 金台篇 悬瓠城歌
都邑
金陵曲 榆林郡歌 营州歌 金陵歌 襄阳歌 夔州歌 夷门歌 青门歌

南都行 江夏行 长安曲 甘州词 凉州词 帝
京篇 忆江南 【又名梦江南又名望江南 又名望江梅 又名江南好 又名梦江
口 又名归塞北 又名春去也 又名谢秋娘】

忆帝京 熙州行 炖煌后庭歌 邯郸客舍歌 蓟门行 古大梁行 云中行 灞
陵行 丹阳行 舂陵行 新丰行

道路

函关歌 劳劳亭歌 陇上行 南州行 光禄坂行 沙苑行 淮亭吟 陈桥
行 长乐坂 宜阳行 马嵬曲 筑长堤 九折坂

时景

明月歌 峨眉月歌 白云歌 火山云歌 白云歌 天山雪歌 春旦歌 三
月歌 日出入行 岁晏行 上元词 春词 春台
引 瑞雪篇 明河篇 七夕曝衣篇 庆云章 月下吟 夏日叹 秋雨叹 冉冉云
望云谣 甘露行 梅子黄时雨 春从天上来

吴中晓寒曲

人生

长生乐 千年调

人物

皇娲补天谣 伯仁怨 申生怨 平原君 春申君 文信侯 漂母词 聂政
篇 田横客 淮阴叹 茂陵徐生歌 锺进士歌 高
阳酒徒 一纲谣 岳王行 唐孔目 淮南刺客词 腕可断 颜太师姚家有牙将
石忠烈 韩宣慰 安石工 花将军 晋州男子

神仙 【隐逸 渔父附】

道君曲 圣郎曲 金丹曲 王母歌 玉真主歌 玉华仙子歌 薛仙子谣 石
湖仙 赤松词 壶山处士歌 逸人歌 白毫子歌
徐无山人歌 华山隐者歌 荆台隐士 白衣老人 青岩山人 渔父歌

蕃调

优钵罗花歌 婆罗门引 婆罗门令 金浮图 纥那曲 罗唖曲 鲜卑儿
穆护沙 番枪子

山水 【登临 泛渡附】

嵩山天门歌 小山歌 西岳云台歌 闾山歌 望终南山歌 夜归鹿门歌
下山歌 归山歌 温泉歌 敷水歌 河上歌 秋
浦歌 闾水歌 严氏溪歌 赤壁歌 甘泉歌 燕支行 热海行 走马川行 清
溪行 漾陂行 湖南曲 湘川曲 横江词 龙池
篇 梦游天姥吟 江上吟 庐山谣 巫山一段云 越江吟 江月晃重山 芳草

渡 清波引 渡江云 飞雪满羣山 庐山高 于
湖曲 骊山歌 金山行 湖上曲 湘中咏 后于湖曲 冰山火突词 蠶颐津
易水行 澶渊行 渐台水 白马河 舶上谣

草木 【采种 花果附】

官渡柳歌 黄台瓜词 落花叹 荔枝叹 连根有长丝 勿去草 渚莲怨
结杨柳怨 商山芝 梓树生枝叶 黄花词 伐棘
篇

车马

引驾行 车簇簇行 天育骠骑歌 赤骠马歌

龙鱼 【虫豸附】

蛟龙引 井底蛙

鸟兽

义鹞行 杜鹃行 白凫行 火凤词 鹦鹉猫儿篇 黄雀痴 黄麈歌 黄特
谣 野雉词 怒虎行 黄鹂绕碧树 换巢鸾凤 鹤
叹 白雁行 走狗谣 凤凰曲 凤雏行 老弩恋栈豆 牧羝曲 一足夔

杂体

堂堂谣 戴 谣

钦定续通志卷一百二十七

●钦定续通志卷一百二十八 乐略二

乐畧 【二】

祀飨正声序论

○祀飨正声序论

（臣）等谨按祀飨之乐自汉以后郑樵独取梁之十二雅唐之十二和谓其制作非古而音声有伦故世因之而不能易嗣是而五代梁唐晋乐曲散佚不足其类汉有十二成周有十二顺宋有十二安金有十二窳辽乐不传元亦微有缺失然皆祖述十二雅之遗音不改焉至明始不分类属杂用宫商不得复以成法求之盖雅乐变革之一候也兹溯五代至元乐曲悉依郑志之例论次而于明代独编而注之法久必变例有所穷耳

五代梁雅乐

（臣）等谨按梁雅乐绍承唐制改十二和如九庆今之所传仅存八曲其轶者祀地祇享宗庙皇后皇太子出入诸篇盖惟郊祀之乐尚可考见如奠玉币等曲遂藉以传焉其后张文矩又更其别名曰同者六曰熙者一庆和

（臣）等谨按庆和以祀天神与唐豫和相类太祖开平二年将郊禋有司撰进乐曰庆和之乐舞曰崇德之舞是庆和为降神曲明甚薛史乃称亚献奏庆和疑有讹误后改曰永同

庆顺

（臣）等谨按庆顺以为皇帝行节与唐太和相类后改曰大同

庆平

（臣）等谨按庆平以奠玉币与唐肃和相类后改曰顺同

庆肃

（臣）等谨按庆肃以迎俎与唐雍和相类

庆熙

（臣）等谨按庆熙以酌献与唐寿和相类后改曰寿同

庆隆

（臣）等谨按庆隆以饮福与唐制酌献饮福同曲者微异后改曰福同

庆融

（臣）等谨按庆融以退文舞迎武舞与唐舒和相类后改曰混同

庆休

（臣）等谨按庆休以亚终献与唐亚终献出入二舞同曲者异制后改曰咸熙

后唐雅乐

（臣）等谨按后唐初用十二和旧乐至明宗时始有长兴乐之名隶于太常然皆教坊杂曲仅可用以飨燕且其篇名亦缺轶失传其正

声存者惟庙中各室酌献五曲而已曰昭应 【懿祖室】 曰文明 【献祖室】 曰应天 【太祖室】 曰永年 【昭宗室】 曰雍熙

【庄宗室】 以十二和求之乃寿和之一类耳

晋雅乐

（臣）等谨按晋雅乐改唐十二和为十二同而其目缺畧不详高祖天福四年十二月庚戌礼官奏言正至上寿皇帝举酒奏元同再饮

三饮并奏文同三饮毕羣臣再拜奏大同是月壬戌又言宫悬歌舞未全且请杂用九部乐歌教坊法曲从之今正声可考见者惟元同等三曲

姑附录于此

汉雅乐十二成曲

（臣）等谨按汉有雅乐十二成曲与郑志所载唐世用乐之法一一脗合云

禋成 顺成 裕成 肃成 政成 弼成 德成 宸成 裔成 庆成 驛成
寿成

周雅乐十二顺曲

昭顺

（臣）等谨按昭顺以祀天神亦唐豫和之类

寔顺

（臣）等谨按寔顺以祀地祇亦唐顺和之类

肃顺

（臣）等谨按肃顺以享宗庙亦唐永和之类但间用以彻俎与旧制不同乃当时假借行之非成法也

感顺

（臣）等谨按感顺登歌以奠玉币亦唐肃和之类然或于酌献时奏之则唐世所未尝行尔日礼官不能厘正至宋尚踵其误云

治顺

（臣）等谨按治顺皇帝以临轩亦唐太和之类

忠顺

（臣）等谨按忠顺王公以出入以退文舞迎武舞亦唐舒和之类

康顺

（臣）等谨按康顺皇帝食举亦唐休和之类

雍顺

（臣）等谨按雍顺皇帝以受朝皇后以出入在十二之数当唐正和一曲唐时正和但皇后出入所奏而皇帝以受朝之说史志未闻乃周代一变旧法也

温顺

（臣）等谨按温顺皇太子以出入亦唐承和之类

礼顺

（臣）等谨按礼顺以正至礼会在十二之数当唐昭和一曲唐时昭和为皇帝皇太子举酒所奏盖所谓举酒者即礼会时所有事也但唐书宋尝详言之耳又周祭先圣亦奏礼顺义有所取说戴宋乐永安条下

禋顺

（臣）等谨按禋顺以入俎亦唐雍和之类

福顺

（臣）等谨按福顺以酌献饮福亦唐寿和之类正至公卿献寿亦奏之考献寿乃朝会时事宜用礼会乐或宴乐此与酌献通奏一曲是郑樵所讥为不分雅颂之遗响者也

宋雅乐十二安曲

高安

（臣）等谨按高安一曲仿唐之豫和以祀天神哲宗元符郊祀改曰景安然圜钟为宫三奏黄钟为角大簇为征姑洗为羽各一奏其为祀天神之乐未改也至徽宗政和中乃用以祭帝鼐则失之踰矣其大安普安并以祀天神虽随事傅名亦高安属也又迎神奏高安者则送神亦奏之惟熙宁以后祀高禘绍兴朝日夕月祀大辰送神乃奏理安以送人鬼之乐而送天神戾矣

静安

（臣）等谨按静安一曲仿唐之顺和以祀地祇神宗熙宁改曰导安又别常祀为宁安哲安元符以后导安亦废宁安独存正祀常祀并用之高宗绍兴时用于别庙彻豆之乐又有凝安以祀岳镇海渚徽宗政和时亦用于冈鼎魁鼎迎神乐皆函钟为宫三奏太簇为角姑洗为征南吕为羽各一奏

理安

（臣）等谨按理安一曲仿唐之永和以享宗庙仁宗景佑以后改曰兴安嘉佑裕享偶易怀安之名旋复其旧惟皇后庙又有肃安歆安与兴安并用其它告飨各别为异名皆黄钟为宫三奏大吕为角太簇为征应钟为羽各一奏

（臣）等又按正祀之外复有告飨如上尊谥徽号升祔别奏显安真宗祀汾阴毕躬谢亦用显安东封毕躬谢别奏封安受天书别奏瑞安非常制也

嘉安

（臣）等谨按嘉安一曲仿唐之肃和登嘉以奠玉币或酌献之时废禧安不奏而以此代之盖奠献初无异礼亦无异乐可矣仁宗以后亦用之于后庙盥洗又按大祀配食及皇后别庙奠玉币咸自为曲奏不相混蒙则踵事增华强分区别但义归颂美不嫌铺张其它祀典实繁

间亦各为奠玉币曲以明轩轻之差盖昧其本则不能不务其末要皆嘉安一曲之支流余裔也配位奠玉币郊祀曰广安 【景佑三圣位绍

兴太祖位】 曰定安 【建炎太祖位】 曰化安 【绍兴太宗位】 祈谷曰仁安 【景佑太宗位】 曰宗安 【绍兴太宗位】 雩祀

曰献安 【景佑太祖位】 祀感生帝曰皇安 【景佑以后宣祖位绍兴以后禧祖位】 明堂大飨曰诚安 【景佑真宗位熙宁英宗位

】 曰信安 【皇佑三圣位符神宗位】 曰广安 【绍兴淳熙太祖位】 曰化安 【绍兴淳熙太宗位】 曰泰安 【绍兴徽宗位

】 曰宗安 【淳熙高宗位】 祀皇地祇曰恭安 【景佑太祖位】 曰肇安 【熙宁

太祖位】 曰定安 【绍兴太祖位】 祀神州地

祇曰化安 【景佑太宗位】 享别庙曰达安 【章献明肃室】 曰报安 【章懿室】
曰翕安 【章惠室】 其它祀典奠玉币祀感

生帝曰庆安又曰光安玉清昭应宫上尊号曰灵安冬至祭宝鼎曰明安祭岳镇海济享
先农祭文宣王武成王祚德庙曰明安 【淳佑祭四

海又曰德安润安瀛安瀚安雍熙享先农又曰敷安】 享先蚕曰娯安祭风师雨师司中
司命曰容安蜡祭曰钦安 【景德用嘉安熙宁东西

方用钦安南北方用嘉安绍兴后南北方复改吉安】 祭五龙曰文安以上配位别庙之
曲间或实异而名同盖礼官未遑厘正又多内出篇目

称名偶复不敢议更兹谨编次以列于嘉安之后俾来者有所考焉又真宗朝奠瓚间万
国朝天之曲则非常制也

隆安

（臣）等谨按隆安一曲仿唐之太和以为皇帝出入举止之节复增采茨独于还
宫时奏之哲宗元符以后改曰干安杂用正安又改仪

安靖安憩安诸名变革纷纷非能于声音之道有所发明徒好事更张而已甚至降奏正
安为主以太簇为商者当黄钟为宫之乐则是不辨君

臣淆乱无等乃尔日职司诸臣弗克厘正之咎也惟太祖干德中和岷按开元礼请依月
律别撰采茨一曲奏以还宫与隆安并行颇为近古矣

正安

（臣）等谨按正安一曲仿唐之舒和以为皇太子及王公出入之节以亚献终献
以退文舞迎武舞以奉册宝其后于皇太子出入复有

明安之名于王公出入复有保安祇安之名于亚献终献退迎二舞复有文安恭安顺安
飨安雍安惠安庆安曼安威安穆安仪安和安嘉安冲

安同安之名于奉册宝复有圣安礼安宜安明安登安大安真安之名皆随事以立文求
其节奏不外乎太簇之商自明安以下皆正安而已古

人于乐取其声以合于义后人徒夸其词而锡以名自谓益求大备而不知圣作明述之
意由此寢亡矣王真宗朝亚终献间用平晋乐哲宗受

传国宝又有永昌神光翔鹤之曲皆非常制也

和安

（臣）等谨按和安一曲仿唐之休和以侑皇帝饮食间奏燕乐白龟甘露诸篇

顺安

（臣）等谨按顺安一曲仿唐之正和以为皇后出入举止之节其后改曰坤安承
安和安成安泰安徽安史称皇帝受朝亦奏之然考自

建隆迄绍兴朝会所奏不外隆安干安二曲而皇后出入举止其曲奏可以考见者惟已

改坤安诸名亦无顺安足据疑宋初偶一行之而后之
纪录者并畧不及也

良安

（臣）等谨按良安一曲仿唐之承和皇太子在其宫出入则奏之若在君父左右
出入则奏正安与王公同所以避尊也

永安

（臣）等谨按永安一曲以正至朝会仿唐之昭和其与唐制昭和为皇帝皇太子
举酒所奏似异实同说具周乐礼顺条下今观唐舍举

酒乐外无朝会正乐五代迄宋舍朝会正乐外举酒无乐益可见其为历代相承之制矣

（臣）等又按史志云祭文宣王武成王同用永安而所列祭文宣王武成王及祚
德庙乐章并称凝安且永安之名不见乐章之列殊为

可异考凝安以祀岳镇海渚乃祀地祇之一类与静安同似不宜奏于文武祚德三庙若
三庙之祭视天地祖宗有不可从同之义是故假正至

朝会之乐以奏之当时具有深意存焉其以凝安殆史书之误否则景佑以还或不免混
淆之失也

丰安

（臣）等谨按丰安一曲仿唐之雍和以奉俎亦以彻豆自干德改奉俎为咸安彻
豆为肃安自是奉俎彻豆遂有二曲真宗大中祥符改

曰吉安哲宗元符改曰熙安禧安钦安高宗绍兴改曰承安成安娱安歆安恭安失古意
矣然理宗淳佑朝享明堂尚循并奏丰安之曲则旧章

固未尽泯亡而改制之始终离合亦藉以考见所谓存什一于千百者此也按祀天神宜
奏以黄钟之宫祀地祇宜奏以太簇之宫祀人鬼宜奏

以无射之宫同曲异调以义考之则咸安肃安熙安歆安禧安钦安系黄钟之宫承安成
安娱安系太簇之宫吉安恭安系无射之宫既匪通行

未尝转调是但知有词章而不知有节奏欲乐之正难矣禧安（臣）等谨按禧安一曲
仿唐之寿和以酌献饮福然自太祖干德以后更名亦

多要以黄钟为宫则不可得而变也兹谨分类序列如左以明皆禧安所出配位酌献曰
彰安 【景佑郊祀三圣位绍兴郊祀太祖位】 曰英

安 【景佑常祀太祖位景佑绍兴祀皇地祇太祖位淳熙明堂大飨太宗位】 曰大窳
【政和郊祀文祖位】 曰韶安 【景佑祀神州

地祇太宗位绍兴郊祀太宗位明堂大飨太宗位】 曰绍安 【景佑祈谷太宗位】 曰
德安 【景佑明堂大飨真宗位熙宁明堂大飨英

宗位绍兴祈谷太宗位淳熙明堂大飨太宗高宗位】 曰肃安 【景佑祀感生帝宣祖
位绍兴祀感生帝禧祖位】 曰孝安 【皇佑明堂

大飨三圣位绍兴明堂大飨太祖位】 曰大明 【大观明堂大飨哲宗位】 曰成安
【绍兴明堂大飨徽宗位】 曰恭安 【淳熙明堂
大飨太祖位】 曰佑安 【熙宁祀皇地祇太祖位】 曰化安 【绍兴祀神州地祇太
宗位】 曰大善亦曰基命 【享太庙熙祖室】
曰大宁 【顺祖室】 曰大顺 【翼祖室】 曰大庆亦曰天元 【宣祖室】 曰大定
亦曰皇武 【太祖室】 曰大盛亦曰大定 【
太宗室】 曰大明亦曰熙文 【真宗室】 曰大仁亦曰美成 【仁宗室】 曰大英亦
曰治隆 【英宗室】 曰大明 【神宗室】 曰
重光 【哲宗室】 曰承元 【徽宗室】 曰端庆 【钦宗室】 曰大德 【高宗室】
曰大伦 【孝宗室】 曰大和亦曰大承 【
光宗室】 曰大安亦曰考安 【宁宗室】 享别庙曰惠安 【孝明室】 曰奉安 【
孝惠室】 曰懿安 【孝章室】 曰顺安 【懿
德室】 曰嘉安 【淑德室】 曰理安 【章穆室】 曰永安 【章怀室】 曰兴安
【元德室】 曰厚安 【章献明肃室】 曰衍
安 【章懿室】 曰昌安 【章惠室】 曰慈安 【崇恩室】 曰歆安 【懿节安穆安
恭显仁成肃五室】 其它祀典酌献祀五方帝
曰佑安祀感生帝曰崇安明堂大享朝谒玉清昭应宫奉迎圣像曰庆安祀高禔大辰曰
佑安祀汾阴毕告庙曰显安上尊号曰大安朝献景灵
宫曰祖安封禅曰封安曰禅安祀社首曰瑞安祀汾阴曰博安祇奉天书告祭曰瑞安祭
九鼎祀岳镇海渚享先农祭文宣王武成王祚德庙曰
成安 【淳佑祭四海又有熙安贵安类安溥安之名】 享先蚕曰美安祭风师雨师雷
师司中司命曰雍安蜡祭曰恠安禋安择安穆安祭五
龙曰愷安饮福亦曰广安胙安禋安大安报安博安绥安其同异分合之数大畧与嘉安
同

辽雅乐章名章 【章名阙】

（臣）等谨按辽史称辽初用唐十二和乐其后改名十二安而不能备纪其目据
圣宗统和元年册承天皇太后太后仪卫动举麾太和
乐作文武三品以上入舒和乐作皇帝入门雍和乐作又兴宗重熙九年上契丹册皇帝
出奏隆安之乐又载册太子仪太子入门贞安之乐作
则是圣宗已前尚沿十二和之名兴宗已后始改名曰安矣但初用十二和既袭唐旧而
后改十二安又与宋制若合符节岂有辽二百十年之
中不克创为雅乐新名独垂制作而始终蹈袭若此抑元初史臣于辽代乐制未尽搜罗
遂乃摭拾傅会从而为之词耶故疑而阙之

金雅乐十二宁曲 【奠玉币侑食太子出入宫县三曲未详】

干寔

（臣）等谨按干寔以祀天神犹唐有豫和宋有高安海陵天德中册立皇后及皇太子奏以为皇帝出入之节其制若因册立而尊皇帝用盛乐然天人同事郑樵所识不无假借之失至世宗大定中册立皇太子始改用洪寔意盖不敢拟郊祀降神乐而拟其奠玉币乐是已

镇寔

（臣）等谨按镇寔以祀地祇犹唐有顺和宋有静安也

来寔

（臣）等谨按来寔以享宗庙犹唐有永和宋有理安祭文宣王亦用之正祀之外如升祔则奏显寔静寔犹宋之有显安也

（臣）等又按登歌奠玉币唐以肃和宋以嘉安金世奠玉币通行之曲不得而详沿革源流难以考见兹列其可知者于左郊祀曰洪寔

【昊天上帝位】 曰神寔 【皇地祇配位】 曰永寔 【太祖配位】 祀方丘曰亿寔其亲享宗庙及他祀典奠玉币曲并轶

丰寔

（臣）等谨按丰寔以奉俎彻豆犹唐有雍和宋有丰安也

嘉寔

（臣）等谨按酌献唐以寿和宋以禧安凡祀通奏此曲宋时配位及各室别庙酌献之曲并别为异名然其节奏悉以禧安为准金世酌

献郊祀及宗庙摄事并奏嘉寔则其为通行之曲可见惟方丘独奏溥寔其它配位各室别庙亦仿效宋制改名区别兹附列于左曰泰寔 【

郊祀皇地祇配位】 曰燕寔 【太祖配位】 曰保寔 【方丘太宗配位】 宗庙曰肃寔各室曰大元 【始祖室】 曰大熙 【德帝

室】 曰大安 【安帝室】 曰大昭 【献祖室】 曰大成 【昭祖室】 曰大昌 【景祖室】 曰大武 【世祖室】 曰大明 【

肃宗室】 曰大章 【穆宗室】 曰大康 【康宗室】 曰大定 【太祖室】 曰大惠 【太宗室】 曰大同 【熙宗室】 曰大和

【睿宗室】 曰大钧 【世宗室】 曰大寔 【显宗室】 曰大隆 【章宗室】 曰大庆 【宣宗室】 曰仪坤 【昭德别庙】 曰

和寔 【宣孝太子别庙】 又案唐时酌献饮福并同一曲梁始分为二后唐以还皆仍唐制至金饮福独奏福寔之曲亦与梁同附识于此

昌寔

（臣）等谨按昌寔以为皇帝出入举止之节犹唐有太和宋有隆安凡郊庙行事通奏此曲惟祀方丘及别庙升降别奏肃寔行册礼出

入别奏泰窳洪窳殆因事改名强分差别其实则与昌窳不异也

肃窳

（臣）等谨按肃窳以为皇太子王公出入之节以亚献终献退文舞迎武舞犹唐有舒和宋有正安惟郊祀及方丘亚终献文舞退武舞

进别奏咸窳又皇太子册立时出入别奏元窳但匪通行者耳

和窳

（臣）等谨按和窳以朝会犹唐有昭和宋有永安也

（臣）等又按唐有休和宋有和安以侑皇帝饮食金制不可得详至朝会用燕乐与宋世畧同其曲名见后祀飨别声类中

坤窳

（臣）等谨按坤窳皇后以受册宝出入犹唐有正和宋有顺安也

（臣）等又按太子在其宫出入奏宫县唐以承和宋以良安金制轶未闻

元雅乐

（臣）等谨按元承宋制改雅乐之名曰成自大德迄至元颇称美备盖约畧亦沿十二以为数今溯其创制改作源流仅存七曲而已如

祀地祇朝会举酒侑食皇后皇太子出入所奏之乐并阙如焉考史志称祭天地五方帝社稷先农间用金之十二窳旧乐以此观之当时不无

因袭之迹或者所阙五者皆承宋金之旧未可知也兹谨论次凡承用窳安者槩从删省独取七曲着而存之以见变革之始终若其曲目则不

可得而断也

天成

（臣）等谨按天成以祀天神成宗大德九年所定元初沿用金乐奏干窳之曲

来成

（臣）等谨按来成以享宗庙亦名保成迎送神并奏后乃分来成迎神保成送神实本一曲耳已复改为思成史志云思成世祖至元四

年名来成

钦成

（臣）等谨按钦成以奠玉币成宗大德九年所定元初沿用金乐奏亿窳之曲

隆成

（臣）等谨按隆成以为皇帝出入举止之节凡郊庙初献盥洗望燎则奏之后改曰肃成又曰顺成元初用金乐肃窳之曲以皇太子王

公出入所奏而用于皇帝出入在金时别庙已尝行之然武宗至大中旋废肃窳而用昌窳乃复其正自是昌窳与隆成并用云

窳成

（臣）等谨按奉俎彻豆元初用金乐丰窳之曲成宗大德九年始更譔定名曰窳成后又改嘉成以奉俎丰成以彻豆焉

明成

（臣）等谨按明成以酌献其庙中各室曰开成【烈祖室】曰武成【太祖室】曰文成【太宗室】曰弼成【至元皇伯考卓沁室】曰协成【皇伯考察罕岱室】曰明成【睿宗室】曰熙成【定宗室】曰威成【宪宗室】曰混成【世祖室】曰昭成【裕宗室】曰庆成【顺宗室】曰守成【成宗室】曰威成【武宗室】曰歆成【仁宗室】曰献成【英宗室】曰永成【明宗室】武宗至大中改武成曰开成以献太祖明成曰武成以献睿宗史志云词仍其旧则不过易名而已盖本同律之曲虽并更其词亦不得为异乐考世祖至元三年以前各室酌献之曲有庆成熙成昌成鸿成乐成康成明成诸名及后更定则以庆成献顺宗熙成献定宗明成献睿宗余并废其饮福奏厘成不与明成通用乃沿金制而非唐宋以来之旧要以曲律断之不得竟分为二也

和成

（臣）等谨按和成以出入二舞以亚献终献其后杂用肃成顺成与皇帝出入同一曲奏非也

（臣）等又按元祭文宣王袭用宋乐十二安曲其后尝譔易命之曰明于通行乐曲之外更制雅音以祭先圣尊崇之意已极惜乎当事畏难卒废不用也兹列其名于左曰文明【迎神】曰昭明【盥洗】曰景明【升降】曰德明【奠币】曰诚明【酌献配位同】曰灵明【亚献终献】曰庆明【送神】凡七曲

明雅乐

（臣）等谨按明代雅乐其名曰和与唐相类然其曲奏天人并用统纪不分十二和遗法至斯大变盖草创之初未遑考正其后岁月寢更补苴修饰莫能发明作述之旨以论定而整齐之于是明代乐律与前世判然异矣兹谨易郑樵论次旧例序其曲目凡所施行备为条注俾览者错综求之自可知其视唐宋以来迥不相侔之故云

中和【太祖洪武元年圜丘迎神二年方丘迎神三年朝日夕月亚献四年祀周天星辰亚献七年祀历代帝王亚献八年圜丘方丘迎神十二年合祀天地迎神世宗嘉靖九年圜丘方丘迎神十年祈谷迎神十一年雩迎神十七年大飨迎神十八年兴都大飨迎神】保和

【洪武三年朝日夕月奠玉币四年祀周天星辰奠玉币初献六年合祀天神地祇迎神

奠币七年祀历代帝王奠玉币初献 世宗嘉靖九年

夕月迎神十年祭社稷彻饌】

（臣）等谨按明史乐志太祖洪武六年有合祀天神地祇乐章考礼志元年从李善长等议分祀天地九年以分祭未安命作大祀殿于南郊是岁冬至殿工未成乃合祀于奉天殿悉与本纪合则在六年于天地尚未合祀安得于神祇先有合祀乐章疑六年或系十二年之讹盖十二年既有合祀天地乐章自应即有合祀天神地祇乐章耳

熙和 【太祖洪武元年圜丘终献宗庙终献二年方丘终献三年朝日夕月迎神入年方丘终献十一年合祭太社稷终献十二年合祀

天地终献 世宗嘉靖九年圜丘终献朝日迎神十七年大亨终献】 凝和 【太祖洪武元年圜丘社稷奉俎二年方丘奉俎三年朝日夕月

彻饌夕月迎神四年祀周天星辰迎神七年祀历代帝王彻饌八年圜丘方丘奉俎十二年合祀天地奉俎 世宗嘉靖九年圜丘方丘奉俎朝

日奠玉币夕月迎神十年祈谷彻饌十一年雩彻饌十七年大飨奉俎十八年兴都大亨奉俎】 广和 【太祖洪武元年十一年社稷迎神

世宗嘉靖九年方丘奠玉币十年社稷送神望瘞】 时和 【太祖洪武元年圜丘望燎社稷望瘞二年方丘望瘞八年圜丘望燎方丘望瘞十

一年社稷望瘞十二年合祭天地望燎 世宗嘉靖九年圜丘望燎方丘终献朝日亚献十年社稷迎神十七年大飨望燎】 太和 【太祖洪

武元年宗庙迎神二年享先农望瘞 世宗嘉靖十年祈谷望燎十一年雩望燎十五年孟春时享大禘时禘迎神大禘彻饌】 元和 【大禘

迎神】 雍和 【太祖洪武元年圜丘方丘社稷宗庙彻饌二年享先农奉俎四年祀周天星辰送神望燎七年祀历代帝王迎神八年圜丘方

丘彻饌十一年社稷彻饌十二年合祭天地彻饌 世宗嘉靖九年圜丘彻饌十年社稷亚献十五年孟春时享彻饌十七年大亨彻饌】 咸和

【太祖洪武六年祀先师孔子迎神彻饌送神 世宗嘉靖九年方丘奉俎十年祈谷奉俎十一年雩奉俎】 永和 【太祖洪武二年享先

农迎神奠玉币彻饌送神 世宗嘉靖十年祈谷终献十一年雩终献十八年兴都大飨彻饌大禘送神】 贞和 【世宗嘉靖九年享先蚕迎

神方丘彻饌】 肃和 【太祖洪武元年圜丘社稷奠玉币二年方丘奠玉币三年朝日夕月终献四年祀周天星辰终献七年祀历代帝王终

献八年圜丘方丘奠玉币十二年合祭天地奠玉币世宗嘉靖九年圜丘奠玉币十年祈谷奠玉币十一年雩奠玉币十七年大亨奠玉币】 宣

和 【太祖洪武六年祀先师孔子奠玉币 世宗嘉靖九年方丘送神享先蚕终献十年

社稷终献十五年孟春时享终献】 寿和 【太祖洪武元年圜丘社稷宗庙初献二年方丘初献享先农初献亚献终献三年朝日夕月送神七年祀历代帝王送神八年圜丘方丘初献十一年社稷初献十二年祭天地初献 世宗嘉靖九年圜丘方丘朝日夕月初献享先农奠玉币享先蚕初献奠帛十年社稷祈谷初献十一年雩初献十五年孟春时享初献十七年大亨初献十八年兴都大飨初献大禘初献】 安和 【太祖洪武元年圜丘社稷宗庙送神二年方丘送神三年朝日夕月初献六年祀先师孔子初献八年圜丘方丘送神十一年社稷送神十二年合祭天地送神 世宗嘉靖九年方丘亚献朝日夕月享先蚕彻饌十五年孟春时享时禘还宫】 豫和 【太祖洪武元年圜丘亚献社稷亚献终献宗庙亚献二年方丘亚献三年朝日夕月望燎四月祀周天星辰彻豆七年祀历代帝王望燎十一年社稷亚献 世宗嘉靖九年圜丘夕月亚献十七年孟春时享亚献彻饌大亨时禘亚献】 康和 【世宗嘉靖九年夕月终献】 景和 【太祖洪武六年祀先师孔子亚献终献 世宗嘉靖十年祈谷亚献十一年雩亚献】 敷和 【世宗嘉靖十八年兴都大飨亚献】 承和 【世宗嘉靖十八年兴都大飨终献】 仁和 【大禘亚献】 德和 【大禘终献】 顺和 【世宗嘉靖九年享先蚕亚献】 清和 【世宗嘉靖九年圜丘送神十年祈谷送神十一年雩送神十七年大飨送神】 昭和 【世宗嘉靖九年朝日送神】 感和 【世宗嘉靖十八年兴都大飨送神】 恒和 【世宗嘉靖九年享先蚕送神望燎】

（臣）等谨按明制王国享祀别奏雅乐改名曰清兹列于左凡七曲

太清 【迎神社稷山川改广清】 寿清 【初献】 豫清 【亚献】 熙清 【彻饌】 安清 【送神】 时清 【社稷山川望燎】

（臣）等谨按明制朝贺别奏雅乐取名曰安兹列于左凡三曲

圣安 【朝贺驾出】 定安 【朝贺驾还】 治安 【公卿出入】

钦定续通志卷一百二十八

●钦定续通志卷一百二十九 乐略三

乐畧 【三】

祀飨别声序论

乐舞序论

文武舞

○祀飨别声序论

（臣）等谨按郑樵于祀飨正声后系以别声盖凡非常祭所用又非古今通行体制乃出于一时之事被诸管弦形为歌咏者皆列入此类焉所以条其流别而甄综之也顾自唐以后常乐而外朝廷新制以希所有者大抵皆纪述灵符导扬功伐而已独金之本曲眷怀祖宗垂训

后嗣可为典型明太祖御銮歌亦存古者蒙眊奏诗之义兹所采择谨分类而载之

汉上寿乐一

四会

（臣）等谨按四会之乐有钟鼓而无歌诗颇为近古魏初改用琴筑

唐述佛法曲一

文叙子

（臣）等谨按右曲因吟经而作与梁时善哉等曲同

宋云韶部乐曲十三

万年欢 中和乐 普天献寿 梁州 泛清波 大定乐 喜新春 胡渭州
清平乐 长寿仙 罢金钲 绿腰 彩云归

（臣）等谨按云韶部者黄门乐也始名箫韶部太宗雍熙初改曰云韶每上元观灯上巳端午观水嬉皆令作于宫中遇南至元正清明

春秋分社之节亲王内中宴射亦用之

（臣）等又按太宗太平兴国三年籍军中之善乐者命曰引龙直每巡幸游省则车驾出入而奏乐若御楼观灯赐酺则奏第一山车端

拱二年又选择日天武拱圣军晓畅音律者增多其数藩臣以乐工贡者亦隶之淳化三年改名钧容直其所用乐工视云韶部云韶部乐遂革

钧容直有三十六人曲鼓笛二十一曲并他曲甚众其后监领内侍言钧容直乐调与教坊乐不谐乃取教坊十七调肄习之至高宗绍兴三十年

遂蠲钧容直悉用教坊故其曲名亦窜入教坊不复传于世云

宋法曲二

望瀛 献仙音

（臣）等谨按法曲乃弦鼗之遗制传为秦汉所作唐时为梨园法部之曲宋二曲未详所用

宋瑞曲三十

神龟 甘露 紫芝 嘉禾 玉兔 瑞文 驯象玉鸟 皓雀

（臣）等谨按太祖干德四年和岷言近岁荆南进甘露京兆果州进嘉禾黄州进紫芝和州进绿毛龟黄州进白兔请依月律撰五瑞曲

每朝会登歌首奏之六年又言合州进瑞木成文驯象由远方自至秦州获白鸟黄州获白雀并合播在管弦荐于郊庙诏岷作四瑞乐章以备

登歌自后遇有祲祥辄形诸歌咏焉

祥麟 丹凤 河清 白龟 瑞麦

（臣）等谨按太宗太平兴国中岚州献祥麟雍熙中苏州贡白龟瑞拱初澶州河清广州凤凰集诸州麦两穗三穗者连岁来上因作五瑞之曲先时冬至朝会上寿用教坊乐至是改用祥麟诸篇迨淳化中和■〈山蒙〉又请择本朝祥瑞之尤者作四瑞之乐章备郊庙奠献以代旧曲从之有司承诏不能奉行四瑞乐章遂不传于世云

醴泉 祥芝 庆云 灵鹤 瑞木

（臣）等谨按真宗大中祥符元年制五瑞曲亦朝会宴飨时所用也

甘露 瑞木 嘉禾 玉芝 寿星 奇木连理

（臣）等谨按仁宗天圣五年大朝会羣臣上寿有甘露瑞木嘉禾之曲乃当时新制以纪灵符者非建隆旧乐也仁宗明道初章献皇太后御前殿见羣臣复以瑞应作玉芝寿星奇木连理三曲

瑞木成文 沧海澄清 瑞粟呈祥 灵芝 瑞麦

（臣）等谨按高宗朝瑞曲有五其乐专以太簇为宫取其生气凑达万物以元会时奏之

宋大乐三曲

恭膺天命 旧疆来归 永清四海

（臣）等谨按宣宗嘉定十四年诏明年元日命宫架奏大乐三章即恭膺天命等曲也

宋闻喜宴乐曲四

宾兴贤能 于乐辟雍 乐育英才 乐且有仪

宋鹿鸣宴乐曲四

乐育人才 贤贤好德 烝我髦士 利用宾王

（臣）等谨按宋制闻喜鹿鸣二宴并制乐章取六经之词以作篇目至太宗淳化中有乡饮酒乐则用词臣所撰曲而傅以鹿鸣南陔嘉鱼崇邱关雎鹊巢之名似涉傅会今不录

金宴乐一曲

君臣乐

（臣）等谨按右曲世宗所制也尝于皇太子生日宴羣臣用之

金本曲一

猗欤我祖

（臣）等谨按世宗大定二十五年幸上京宴宗室于皇武殿自歌本曲道祖宗创业艰难及所以继述之意其事与汉高祖过沛宫畧同

但此曲无名兹谨录其曲词之首句以当篇目亦仿大风名歌之法也

明宴乐四十三曲

起临濠 开太平 安建业 削羣雄 平幽都 抚四夷 定封赏 大一统
守承平

（臣）等谨按太祖洪武三年定宴飨之乐凡九奏大都述创造以来迄享太平之事皆用杂剧填词曲调以飞龙引奏起临濠以风云会奏开太平以庆皇都奏安建业以喜升平奏削羣雄以贺圣朝奏平幽都以龙池宴奏抚四夷以九重欢奏定封赏以凤凰吟奏大一统以万年春奏守承平

本太初 仰大明 民初生 品物亨 御六龙 泰阶平 君德成 圣道行
乐清宁

（臣）等谨按右九曲太祖洪武四年更定命陶凯詹同等制词其曲调本太初用朝天子仰大明用归朝欢民初生二曲用沽美酒太平令品物亨用醉太平御六龙二曲用清江引碧玉箫泰阶平用十二月君德成二曲用十二月尧民歌圣道行二曲用金殿万欢得胜令乐清宁三曲用普天乐沽美酒太平令世宗嘉靖间仁寿宫落成宴飨乐章奏本太初仰大明民初生品物亨御六龙五曲其曲调惟仰大明用殿前欢余俱同前又豳风亭宴讲官乐章亦奏此五曲其调俱同惟词异耳

炎精开运 皇风 眷皇明 天道传 振皇纲 金陵 长杨 芳醴 驾六龙

（臣）等谨按右九曲太祖洪武十五年更定曲调未详

上万寿 仰天恩 感地德 民乐生 感皇恩 庆丰年 集祯祥 永皇图
乐太平

（臣）等谨按右九曲成祖永乐中更定曲调与太祖洪武四年同至世宗嘉靖宴飨并更制乐章改上万寿为上万岁感地德为感昊德余俱不改

喜千春 永南山 桂枝香 初春晓 乾坤泰 昌运颂 泰道开

（臣）等谨按右七曲东宫宴乐亦成祖永乐中所定者其曲调喜千春用贺圣朝永南山用水仙子桂枝香用蟾宫曲初春晓用小梁州乾坤泰用满庭芳昌运颂用喜秋风泰道开用沽美酒明御銮歌五曲

神降祥 神祝 酣酒 色荒 禽荒

（臣）等谨按明太祖尝命儒臣撰御銮歌于法驾回宫时奏之皆寓讽谏之词以自儆有古者瞽蒙诵诗之风当时有三十九曲仅传其五

明中宫朝会乐一曲

天香凤韶

（臣）等谨按右曲太祖洪武二十六年所制凡命妇朝中宫用之世宗嘉靖间皇后亲蚕亦以为宴命妇乐但词异耳

○乐舞序论

（臣）等谨按文武二舞历代相因其来远矣郑志所录至唐而止至于各庙之舞悉从删削顾以纷纷改制诋议前人其论高而近狭兹谨溯汉迄明递增其阙畧然后乐舞之名乃备

汉郊庙配食乐舞

云翘之舞 【立春迎春东郊立夏迎夏南郊亦同之魏改为凤翔】 育命之舞 【立秋迎秋西郊立冬迎冬北郊亦用之至季夏迎黄灵于中兆则兼舞二舞魏改育命为灵应】

（臣）等谨按皇览曰迎礼春夏秋冬之乐以顺天道天子迎春于东堂唱之以角舞之以羽翟此迎春之乐也迎夏于南堂唱之以征舞之以鼓鼗此迎夏之乐也迎秋于西堂唱之以羽舞之以干戚此迎秋之乐也迎冬于北堂唱之以羽舞之以干戈此迎冬之乐也据此则云翘

乃文舞育命乃武舞也春夏用文舞者象其茂豫秋冬用武舞者象其严肃也

汉庙乐舞

武德舞 【高祖庙光武明帝章帝同魏改为武颂】 昭德舞 【孝文庙】 盛德舞 【孝武庙】 大武舞 【光武庙】 文始舞

【本舜韶舞也高祖六年更名为文始以示不相袭也魏改为大韶】 五行舞 【本周舞也秦始皇二十六年更名曰五行魏改为大武】

四时舞 【孝文所作以示天下之安和也】

（臣）等谨按文始五行四时三舞汉诸帝庙皆常奏故列于次云

魏庙乐舞

武始舞 【武帝庙】 咸熙舞 【文帝庙】 帝斌舞 【明帝庙】

（臣）等谨按右三舞总名大钧之乐凡天地宗庙荐享及朝飨皆用之又王肃等议设宫悬之乐八佾之舞高皇大帝太祖高祖文昭庙皆当兼用先代及武始大钧之舞以文始大武武德武始大钧可以备四代之乐犹周存六代之乐也故奏黄钟舞文始以礼天地奏太簇舞大武以祀五郊明堂奏姑洗舞武德巡狩以祭四望山川奏蕤宾舞武始大钧以祀宗庙二至祀丘泽可兼舞四代又汉云翘育命之舞旧以祀天今可兼以云翘祀圜丘育命祀方泽卒如肃议据此则魏用前代之乐与汉相似按周官大司乐云舞大濩以享先妣舞大武以享先祖又云九

磬之舞于太庙之中奏之则汉魏之庙乐犹有周人遗意也

齐庙乐舞

高德宣烈之舞 【太祖室】 穆德凯容之舞 【穆后室】 明德凯容之舞 【高祖室】

北齐庙乐舞

恢祚之舞 【六世至曾祖祖室并奏之】 昭烈之舞 【高祖神武室】 宣政之舞 【文襄室】 光大之舞 【文宣室】 休德之舞 【孝昭室】

唐庙乐舞

光大之舞 【献祖室】 长发之舞 【懿祖室】 大政之舞 【太祖室】 大成之舞 【世祖室】 大明之舞 【高祖室】 崇德之舞 【太宗室】 钧天之舞 【高宗室】 大和之舞 【中宗室】 景云之舞 【睿宗室】 广运之舞 【玄宗室】 惟新之舞 【肃宗室】 保大之舞 【代宗室】 文明之舞 【德宗室】 大顺之舞 【顺宗室】 象德之舞 【德宗室】 和宁之舞 【穆宗室】 大钧之舞 【敬宗室】 文成之舞 【文宗室】 大定之舞 【武宗室】 咸宁之舞 【昭宗室 按唐庙舞名惟宣宗懿宗僖宗三室阙】

五代梁庙乐舞

大合之舞 【一室】 象功之舞 【二室】 来仪之舞 【三室】 昭德之舞 【四室】

后唐庙乐舞

昭德之舞 【懿宗室】 文明之舞 【献宗室】 应天之舞 【太祖室】 永平之舞 【昭宗室】 武成之舞 【庄宗室】 雍熙之舞 【明宗室】

汉庙乐舞

灵长之舞 【一室】 积德之舞 【二室】 显仁之舞 【三室】 章庆之舞 【四室 按右四舞乃高祖即位之初太常张昭所定后高祖庙则有司所上观德之舞云】

周庙乐舞

肃雍之舞 【信祖庙】 章德之舞 【僖祖庙】 善庆之舞 【义祖庙】 观成之舞 【庆祖庙】 明德之舞 【太祖庙】 定功之舞 【世宗庙】

宋庙乐舞

大善之舞 【僖祖室至绍兴用基命之乐舞】 大濫之舞 【顺祖室】 大顺之舞 【翼祖室】 大庆之舞 【宣祖室至绍兴用天元之乐舞】 大定之舞 【太祖室至绍兴用皇武之乐舞】 大盛之舞 【太宗室至绍兴用大定之乐舞】 大明之舞 【真宗室至绍兴用熙文之乐舞】 大仁之舞 【仁宗室至绍兴用美成之乐舞】 大英舞 【英宗室至绍兴用治隆之乐舞】 大成舞 【神宗室至绍兴用大明之乐舞】 重光舞 【哲宗室】 承元舞 【徽宗室】 瑞庆舞 【钦宗室】 大德舞 【高宗室】 大伦舞 【孝宗室】 大和舞 【光宗室】 大安舞 【宁宗室 按朱庙舞名惟理宗度宗二室阙】
唐祀五帝乐舞

角音之舞 【立春日祀青帝坛】 征音之舞 【立夏日祀赤帝坛】 宫音之舞 【季夏土王日祀黄帝坛】 商音之舞 【立秋日祀白帝坛】 羽音之舞 【立冬日祀黑帝坛】

（臣）等谨按右五舞高宗显庆元年所定也至若祭地祇用顺和之舞朝日祭风师雨师雷师及九宫贵神用元和之舞蜡祭百神用象和之舞祭先农用丰和之舞先蚕用永和之舞祭文宣王武成王庙用宣和之舞皆以乐章名舞故不备列

○文武舞

五代晋二舞

昭德之舞 成功之舞

（臣）等谨按唐以后二舞已废五代梁太祖开平初造崇德之舞以祀昊天开平之舞以享宗庙后唐仍其制至晋高祖天福五年始诏太常卿崔胤等详定更名昭德成功及出帝开运中陶谷奏言管二舞郎皆坊市大户州县居民缘避差徭投名鼓舞乞议停废从之是当时二舞固无足观录之以存五季之掌故云

汉二舞

治安之舞 振德之舞

（臣）等谨按改唐旧二舞治康曰治安凯安曰振德又改九功舞为观象之舞七德舞为讲功之舞独于宴会时用时

周二舞

政和之舞 善胜之舞

（臣）等谨按周于右二舞外复有崇德之舞象成之舞亦观象讲功遗制也

宋二舞

文德之舞 武功之舞

（臣）等谨按文德武功二舞太祖建隆元年乃窦俨所定之名也未几和峴奏改曰元德升闻之舞天下大定之舞其天下大定之舞凡六变一变象六师初举二变象上党克平三变象淮扬底定四变象荆湖归复五变象邛蜀纳款六变象兵还振旅焉太宗太平兴国中峴弟■

〈山蒙〉复奏改曰化成天下之舞威加海内之舞其威加海内之舞凡六变一变象登台讲武二变象漳泉奉土三变象杭越来朝四变象克珍并汾五变象肃清银夏六变象兵还振旅焉自唐后乐舞废阙石晋兴举之初尚多简陋讫汉周二代不过沿袭唐旧托诸新名于崇德象功形为舞蹈之意咸有未尽迨宋初乐舞乃盛于前足以上追唐轨矣降及嘉佑治平之际奉行既久视若弁髦礼官李育上言旧典文武二舞各用八佾今乃二舞总六十四人文舞罢舍羽钥执干戚就为武舞纷然纵横进退蹙迫宜敕复常则当时佾数尚不免阙略至是其为舞节槩可知已考真宗时别号文舞曰发祥流庆武舞曰降真观德又因太宗万国朝天及平晋曲造同和之舞定功之舞仁宗皇佑又有古文化俗威功睿德二舞以奉明禋帝临嘉至神娱锡羨二舞以有司摄事祀帝神宗元丰又有孝熙昭德礼袷储祥二舞以献太庙徽宗宣和又有广生储佑厚德迎福二舞以祀方泽高宗绍兴又有储灵锡庆严恭将事二舞以祀皇地祇皆踵事增华不在文武舞之数盖乐曲乐舞繁简类从十二安而外不一其曲故文武二舞外亦不一其舞其势然也兹谨附录以备参考

辽二舞

景云乐舞破阵乐舞

（臣）等谨按辽文武二舞不见正史据袁桷清容集称圣宗时定景云乐舞以昭文德破阵乐舞以彰武功后又增庆云乐舞承天乐舞是辽时仍用文武二舞也可以补史志之阙

金二舞

仁丰道洽之舞 功成治定之舞

（臣）等谨按右舞名熙宗皇统间所定也海陵贞元中改曰保大定功之舞万国来同之舞世宗大定十一年又有四海会同之舞则系武舞名其文舞名独轶

元二舞

武定文绥之舞 内平外成之舞

（臣）等谨按内平外成之舞第一成象灭旺汗二成象破西夏三成象克金四成象收西域定河南五成象取西蜀平南诏六成象臣高丽服交趾成宗大德中定右二舞用之宗庙而于郊祀改曰崇德之舞定功之舞盖酌用

前代旧名也

明二舞

文德之舞 武功之舞

（臣）等谨按宋初二舞曰文德武功明初亦然惟其容节可观故其称名至质后改文舞曰车书会同武舞曰平定天下曰抚安四夷其势渐趋文饰永乐时又有表正万邦之舞天命有德之舞凡宴飨诸舞间进夸大备焉殊不知文武二舞历代相沿盖袭韶箭大武之旧不容有增益以乱其列各庙异舞及随事异舞其失不过繁文若立新舞以参二舞其流至于失序此去质崇文之弊也

钦定续通志卷一百二十九

●钦定续通志卷一百三十 职官略一

职官畧 【一】

（臣）等谨按郑志职官畧本杜典而删润之以唐六典为准溯前古三代秦汉以来设官之制存其累代相因者而于后世所不置者则阙焉粤惟帝王设官分职因时制宜不相沿袭白云鸟纪官五鸠九扈之职因事更名虞之四岳九官夏之道人官师主夫嗇人陶正车正殷之六大五官六府六工名爵递更典司亦异记曰有虞氏官五十夏后氏官百殷二百盖官制若是其不相沿也即以周官考之六官分治为周公致太平之书而春秋传所载王朝列国诸官如周有御士尉氏鲁有左宰周人晋有执秩元尉齐有舟蛟祈望宋郑皆有褚师以及楚之莫敖右尹箴尹芊尹秦之不更庶长皆为周礼所无因时创置在一代之中已不能无变更矣而况秦汉以后九寺三省之分设州部军府之轻重代有增损或仿周官或仍秦制或创新名繁简异宜裁并异制必不能据周官汉百官志以强配魏晋南北朝之设官亦必不能据唐六典以傅会周秦之分职但以宋代建官率因唐旧故郑志原本杜典详于近而畧于古亦著作之体宜尔也考唐自肃宗至德以德藩镇日重名器渐紊五代事多草创至宋神宗元丰闲更定官制犹存六典之遗意然损益多寡不必尽合于唐矣至如辽之北面官金初建国之贝勒等官元之侍正府中政院内宰司承徽寺经正监明之督理侍郎协理戎政总理抚治诸职皆前所未有而各为创置者也宋以中书舍人与翰林学士分典制诰谓之两制而明之两房舍人为内阁之属宗正寺旧列于诸卿而明之宗人府居文职之首主事旧为令史至明则与郎中员外郎同为六部郎官巡检在宋为边徼典军之要职而元明则属于州县宋之安抚司宣抚司元之宣慰司多领以大臣统理军民总辖郡县而明则授诸土官此

前后名实之不相因也其余内外之迁移班秩之崇卑委任之繁省五朝制度彼此互殊视唐以前为尤甚夫郑志之述唐官制祇取近代章程备当时法鉴未尝以六典为至当不可易之圭臬则后之述官制者又奚必一一傅会六典勉强以求合哉且如殿阁大学士自明以来为宰辅之任而唐六典则无之太尉司徒司空古称三公近代久不复置中书门下唐宋谓之政府至明仅存舍人给事中而已枢密院始于五代权在宰相之右宋与宰相称两府辽金元皆为重任至明乃革畧举其大端已难强以相附此亦如封建郡县古今异宜必欲举春秋侯国之封域以配合唐之十道宋之二十三路明之两京十三布政司多见其拘而鲜通矣兹续修职官畧始自唐中叶迄于元明上下八百余年沿革不同自毋庸更袭六典之旧惟是建官列职一代有一代之规模若专据近代以溯往古则凡宋辽金元之官明代所不设者皆阙而不载又未免挂漏之病今参酌古今取其大畧相因者区而别之曰唐五代宋官制曰辽官制曰金元官制曰明官制次第列陈不紊不漏其中或名称虽异而职守相因或名目似同而崇卑攸别并详加案语以通古今之邮以存通史之例若一代所刱置后世无相同者亦按时代增入以存当日之掌故其禄秩官品各门仍依郑志之例总其大纲载于序官之后焉

唐五代宋官制上

○唐五代宋官制上

唐以六典设官三省九寺六军十六卫诸司一代无所更易肃宗至德以后国有重事辄以宰相兼领其官崇儒学则为集贤大学士理财用则兼盐铁转运使治军旅则领行营都统至太微宫使太清宫使皆为荣宠之任又增置枢密院使掌内外表奏传宣出纳其时方镇之有功者多加平章事至僖宗光启间率加司徒司空藩镇之重极于唐末非复六典之旧矣五代多仍唐制以同中书门下平章事为宰相昭文馆大学士集贤殿大学士监修国史皆以宰相分领之其三省六曹诸司则因而不改惟梁改枢密院为崇政院亲信大臣知院事后唐复为枢密院领自宰相凡军国机务兵防边备之政悉领焉至总理诸司则归诸宣徽院经治财赋则责之三司使职任之重亚于枢密然五代典章散佚三公赴上不备其仪而藩镇多领三省长官及三公三师之职其信任惟六军马步都指挥使左右控鹤都指挥使复有龙捷左右军虎捷左右军左右厢都指挥使随时更名得亲近者即为重任后又置端明殿学士掌四方章奏佐枢密使所未逮亦因时而立制也宋初参用唐五代之制尚书门下并列于外别置中书禁中为政事堂与枢密对掌大政天下财赋内庭诸司中

外筦库悉隶三司台省寺监官无定员无专职皆出入分莅庶务故三省六曹二十四司类以他官主判其官人受授之别则有官有职有差遣官以寓禄秩叙位着职以待文学之选而别为差遣以治内外之事其次又有阶勋爵邑以分差等外官则惩唐以后藩镇之专恣颇用文臣知州事复设通判以贰之凡一品以下谓之文武官未尝参者谓之京官枢密宣徽三司使副学士诸司而下谓之内职殿前都校以下谓之军职外官则有亲民厘务二等而监军巡警皆比亲民之任焉神宗熙宁末始命馆阁校唐六典元丰三年以摹本赐羣臣乃置局中书命官详定遂肇新官制省台寺监领空名者一切罢去而易之以阶及详定所上寄禄格明堂礼成即用新制迁秩而省台寺监之名各还所职矣五年省台寺监法成六年尚书新省成帝亲临幸召六曹长贰以下询以职事因诫敕焉哲宗元佑以后二府不分班奏事枢密加置签书户部则不令右曹专典常平而总于其长起居郎舍人则通记起居馆阁则增置校勘黄本稍更元丰之制高宗南渡复讨论元丰故事而加润色然政尚权宜如御营使国用使诸职宰相执政并有兼官因事勅名殊非经久诸部或长贰不并置或并郎曹使相兼之唯吏部户部不省不并后乃稍为增置继又增馆阁之员广环卫之官厘正庶务盖自元丰定制以后屡议增损然于大而分政任事之臣微而筦库监局之官便于时政者沿袭不革犹存六典之遗也

（臣）等谨按唐六典设官之先后与夫内外诸司之职掌详见郑志欧阳修五代史不志职官其散见于纪传者参考五代会要诸书畧存梗槩惟宋史职官志以唐典为本于宋时增设之官依类分见条理整齐今据宋代官制以上朔唐至德以后及五代之设官沿革俾前后相通且不使增置各官有所阙畧焉其官秩次第亦以宋史为叙

三师

三公

三孤

门下省

中书省

尚书省

枢密院

宣徽院

三司

翰林学士院

东宫官

吏部

户部

礼部

兵部

刑部

工部

△三师

太师太傅太保 【唐制三师不常置至德以后太傅太保多为藩镇勋臣及宰辅优礼之官唯太师不轻授五代仍唐制宋初为宰相亲王使相加官其特拜者不预政事赴上于尚书省徽宗政和三年以太师太傅太保为三公】

△三公

太尉司徒司空 【唐制三公非有大功者不授五多为藩镇加官及赠官宋初仍唐制其特拜者赴上仪与三师同凡除授则自司徒迁太保自太傅迁太尉政和三年罢太尉司徒司空不置】

△三孤

少师少傅少保 【唐五代皆不置宋政和三年八月始立三孤亦称三少为三次相之称】

（臣）等谨按公孤之职昉自周官唐六典仍汉制以太尉司徒司空为三公亦曰三司而周官之三公则号为三师后遂因而不改宋政和中诏以司徒司空周六卿之职太尉秦主兵之任皆非三公并宜罢之仍考周制并建三公三孤于是公孤之名始正然宣和之末三公至十八人而郓王楷肃王枢皆以皇子出合为太傅太保识者讥其非制乃改授他官后复置太尉为武阶之首秩在节度使上非复三公之任矣

宰相 【唐制侍中中书令为宰相至德以后宰相仍称平章事五代以中书门下两侍郎同中书门下平章事为宰相宋承唐制以同平章事为宰相无常员有二人则分日知印上相为昭文馆大学士监修国史其次为集贤殿大学士或置三相则昭文集贤学士与监修国史并除元丰更制以侍中中书令尚书令官高不除而以尚书左右仆射为宰相左仆射兼门下侍郎行侍中之职右仆射兼中书侍郎行中书令之职政和中改左右仆射为太宰少宰仍兼两省侍郎钦宗靖康中复改为左右仆射建炎三年诏左右仆射并加同中书门下平章事孝宗干道八年改左右仆射为左右丞相】

参知政事 【唐制宰相亦称参知政事五代不置宋太祖干德二年始置以副宰相不押班不知印不升政事堂开宝六年诏参政于都堂与宰相同议政事太宗至道元年诏宰相与参政轮班知印同升政事堂押敕齐衙行则并马元豊更制废参知政事以门下中书省二侍郎尚书左右丞代之建炎三年复置参知政事】

平章军国重事 【唐制宰相亦称平章军国重事宋元佑二年特置以优硕德老臣后不恒置宣宗开禧元年改称平章军国事】

（臣）等谨按唐初以三省长官为宰相复以三省事相统制乃设官参掌以要其成其见于唐书宰相表者如知政事平章政事参知政事平章军国重事名称不一要皆宰相之任肃宗以后宰相皆称平章事至宋则以参知政事为平章事之佐而平章重事则以优礼文彦博吕公着而特置虽仍唐代之名而职任稍殊矣干道中改设左右丞相以正宰臣之名当时叶适尝谓名虽正而委任不得其人仍无益于治夫左右辅弼祇以布职分猷其襄治理如其事权旁寄无论谓之丞相谓之平章事皆能窃政柄以自专故道揆之任不在乎轻重其名而在审其实也论者称其切于时政焉又唐中叶后藩镇多领平章事五代因之宋制亲王枢密使留守节度使兼侍中中书令同平章事者皆称使相不预政事不书敕惟宣敕除授敕尾存其衔亦尚仍唐末之制也

△门下省

侍中 【唐至德以后侍中不常置五代为藩镇加官宋制侍中一人掌佐天子议大政审中外出纳之事以官高罕除元丰更制以左仆射兼门下侍郎行侍中职别置侍郎以佐之南渡后省侍中不置】

门下侍郎 【唐肃宗干元元年改门下侍郎为黄门侍郎代宗大历二年复为门下侍郎五代时多以宰相兼之宋制侍郎一人掌贰侍中之职省中外出纳之事为执政官南渡后不置】

左散骑常侍左谏议大夫 【唐制左散骑常侍二人左谏议大夫四人德宗建中二年改谏议大夫一人为知匭使五代亦置左散骑常侍左谏议大夫宋制左散常骑常侍左谏议大夫各一人与司谏正言同掌规谏讽谕以登闻检院隶谏议大夫】

左司谏左正言 【唐制左补阙左拾遗各六人宋初改为左司谏左正言各一人置谏院知院官以司谏正言充职而他官领者谓之知谏院正言司谏亦有领他职而不预谏诤者元丰更制始皆正名以登闻鼓院隶司谏正言】

给事中 【唐肃宗宝应元年以给事为理匭使五代仍置给事中宋置四人分治六

房掌读中外出纳及判后省之事若政令失当除授

非人则论奏而驳正之故事诏旨付银台司封驳元丰更制给事中始正其职而封驳司归门下通进司进奏院俱隶给事】

起居郎 【唐置二人五代因之宋置一人掌记天子言动元丰六年诏与起居舍人分记言动元佑元年仍诏不分】

符宝郎 【唐制四人掌天子八宝五代因之宋置二人掌外庭符宝之事而禁中别有内符宝郎】

（臣）等谨按唐制弘文馆典仪城门郎皆属于门下省考宋代官制校书郎掌昭文馆图籍隶秘书监别置合门使皇城司无所隶属元佑间以诏令稽留吏员冗多徒为重复议废门下省后虽不行然散骑常侍多不置人唯给事中仍司封驳之职云

△中书省

中书令 【唐至德以后为勋臣加官不轻授五代时宰臣多加此职宋制令一人掌佐天子议大政受所行命令而宣之未尝特拜元丰更制以右仆射兼中书侍郎行令之职南渡以后不置】

中书侍郎 【唐制二人五代时拜中书侍郎即为宰相宋制侍郎一人掌贰令之职参议大政南渡后不置】

右散骑常侍右谏议大夫 【唐置右散骑常侍二人右谏议大夫四人五代亦置此官宋制各一人所掌与门下省同】

右司谏右正言 【唐制右补阙右拾遗各六人宋初改为右司谏右正言各一人与门下省司谏正言通谓之两省官高宗南渡诏谏院不隶两省绍兴二年诏并仍旧】

中书舍人 【唐宝应元年以中书舍人为理匭使五代亦置中书舍人宋制四人掌行命令为制词分治六房初为迁转官实不任职复置知制诰及直舍人院为学士对掌内外制元丰更制始正名判后省之事复诏中书省置点检房令舍人通领】

起居舍人 【唐制二人宋置一人所掌同门下省起居郎】

（臣）等谨按中书省旧列门下省之后宋制事有论奏门下省必先关白中书听其可否故中书省之任视唐代较重其自中书侍郎迁门下侍郎者虽晋其秩实夺其权也又唐以集贤殿史馆属之中书省宋时馆职次于翰林院及殿阁学士之后与唐制亦稍殊焉

△尚书省

尚书令 【唐制尚书令总领百官高祖武德元年太宗为尚书令自后阙其官不置代宗广德二年以郭子仪为尚书令固辞不拜后不

复除五代为勋臣宰臣加官宋制令一人掌佐天子议大政奉所出命令而行之建隆以来不除政和二年诏不置宣和七年复置亦无除者南渡后并省】

左仆射右仆射 【唐制为令之贰令阙则总省事五代仍之宋左右仆射各一人掌佐天子议大政与三省长官皆为宰相之任元丰更制以左仆射兼门下侍郎右仆射兼中书侍郎行侍中中书令事政和中改左右仆射为太宰少宰靖康元年复旧南渡后不置】

左丞右丞 【唐制左丞总吏户礼三部右丞总兵刑工三部五代亦尚书丞宋制左右丞各一人掌参议大政通治省事以贰令仆射之职旧班六曹尚书下元丰更制升其秩为执政南渡以后不置】

左右司郎中员外郎 【唐制左司郎中一人员外郎一人右司郎中一人员外郎一人宋如唐制掌受六曹之事而举正文书之稽失分治省事建炎中诏减左右司郎官二员置中书门下检正诸房公事二员次年复旧干道七年复增右司郎官二人】

（臣）等谨按唐书百官志尚书省居三省之首以太宗尝为尚书令一代无特拜者唯以仆射总尚书省事六部尚书分职而统属焉宋制以仆射行宰相之任而六曹各治其事故宋史职官志列六部尚书于诸卿之首不隶尚书省与初设三省之制异矣徽宗大观中置议礼局宣和六年置讲议司皆在尚书省则一时权设之官也

△枢密院

枢密院 【唐代宗永泰元年始置枢密院设内枢密院使以宦者为之职掌内外表奏凡奏诏处分则宣付中书门下施行梁改为崇政院更用士人备顾问参谋议后唐庄宗同光元年复为枢密院命宰臣兼使又置院使一人晋高祖天福四年废枢密院出帝开运元年复置汉隐帝干佑元年为藩镇加官旋复置使宋枢密使掌军国机务出纳密命佐天子执兵政元丰更制罢使不置高宗绍兴七年复置】

知院事 【晋天福元年始置知枢密院事宋太宗淳化二年始置知院事与院使不并除熙宁元年院使二人复置知院事一人元丰更制定知院事一人为制绍兴四年诏宰臣兼枢密者惟兼知院事】

同知院事 【周世宗显德元年设参知枢密院事宋淳化二年始置同知院事二人元丰更制定置同知院事一人】

枢密副使 【后唐废帝清泰元年置枢密副使周显德元年与参知院事并除宋初置副使为枢密使知院事之贰与同知院不并除元丰更制废副使不置绍兴七年复置】

签书院事同签书院事 【宋太宗太平兴国中始置签书院事英宗治平中始置同签书院事元丰改制并废政和中复置寻改同签书院事为权领枢密院南渡后复置签书同签书为端明殿学士恩数特依执政或以武臣为之】

都承旨副都承旨 【五代有承旨副承旨以诸卫将军充宋制掌承宣旨命通领院务太平兴国中始置都承旨与副都承旨多用士人参谋议真宗景德后用院吏递迁熙宁改用儒臣兼领元丰时复用武臣其后则文武兼用焉】

检详官编修官计议官 【宋熙宁四年始置检详官元丰初定用三人后废元佑四年定编修官以四人为制建炎三年复置检详官二人四年置计议官四人绍兴三年置编修官二人后复用三人】

（臣）等谨按枢密院掌枢密文书始于唐沿于五代其与中书对持文武二柄实自宋始元丰中言者以唐六典无枢密使议从省并既乃考定旧制以军国机务不当分隶有司宜以亲信大臣专司其事遂仍置知枢密院事其细务则归之兵部诸曹焉南渡初置御营使以宰臣为之旋以其事归枢密院机速房开禧后胥以宰相兼使视元丰之制又一变矣

长春宫使 【唐武德二年命太宗镇长春宫自后凡牧同州者多带长春宫使梁太祖开平元年废后唐同光元年复置晋天福四年又废后不复置】

太清宫使 【唐德宗兴元元年以检校司徒中书门下平章事李勉为太清宫使唐以后不置】

太微宫使 【唐兴元元年以门下侍郎同中书门下平章事卢翰为太微宫使唐以后不置】

建昌宫使 【梁开平元年置建昌院以博王友文为使所管四镇兵车税赋诸色课利后改为建昌宫使以宰臣判其事侍郎为副使梁以后不置】

兴圣宫使 【后唐同光元年以皇子继岌为兴圣宫使判六军诸卫事唐以后不置】

景灵宫使 【宋真宗大中祥符五年创建景灵宫命辅臣为使】

△宣徽院

宣徽南院使北院使 【唐末始置宣徽使五代分南北院使宋制分为南北院掌总领内诸司及三班内侍之籍郊祀朝会宴飨供帐之仪二使共院而各设厅事故事与参知政事枢密副使同知枢密院事以先后入叙位熙宁四年诏位参政枢副同知下元丰改制罢宣徽院以

职事分隶省寺而使号犹存哲宗绍圣三年罢自后不复置】

延资库使 【梁开平三年置延资库使多以执政大臣兼之梁以后不置】

△三司

三司使副使 【五代置三司使总理邦计治四方贡赋之入宋制位亚执政号曰计省淳化中置使一人总领三部又分天下为十道在京东者曰左计在京西者曰右计置使二人分掌后又置总计使判左右计事罢十道左右计使其正使以两省五品以上及知制诰杂学士充副使以员外郎以上历三路转运使及六路发运使充元丰后裁归户部】

盐铁使度支使户部使副使 【唐末以重臣兼领盐铁度支租庸五代分置盐铁使度支使租庸使宋太平兴国八年分置三司三部副使各一人通金逐部之事又各置判官三人分掌逐案之事孔目官一人都勾押官一人勾覆官四人元丰改制并废】

（臣）等谨案宣徽院三司使皆元丰后删并之官宋史职官志仍分载于枢密院后考五代时宣徽南北院使多迁枢密使宋初宣徽院礼均二府专以待勋旧大臣三司使自五代总计财赋宋制选除执政侍从必先历钱谷有自度支副使擢知制诰者有先除权三司使乃拜枢密使者其职綦重诚不得阙其官而不载也然计省本户部之职三司分置复无异于户部诸曹元丰之裁并未尝不归画一而当时论者多言其非便是徒见元丰以后户部不得其人而不知财用之裕绌不在三司之废置也平赋通财均量出入择人以任职盖户部已足总其成否则增置三司使亦奚益哉至熙宁中又有制置三司条例司三司会计司权宜立制固不足为久远之模也

（臣）等又案唐五代诸使名号不一唐有开稻田使回造使秘书省图书使梁有天骥使飞龙使庄宅使太和库使丰德使仪鸾使干文院使五坊如京使洛苑使宫苑使大内皇城使西京大内皇城使武备库使弓箭库使闲厩使左右军巡使教坊使内园栽接使后唐有中门使支度务使内勾使宫苑使武德使捧圣军使西南供馈使三州搜图籍使庄宅使内园栽接使晋有左飞龙使缘河巡检使引进使侍卫使作坊使周有尚食使■〈彳 公〉江招讨使要皆废置不常不足为法又五代有山陵使礼仪使鹵簿使仪仗使桥道顿递使宋有封禅大礼使经度制置使祀汾阴经度制置使奉迎使刻玉使天书扶持使因事设官无常员焉宋有宫观诸使则皆优礼臣下之虚衔故宋志不载云

△翰林学士院

翰林学士承旨 【唐元宗开元初置翰林侍诏掌四方表疏批答应和文章既又以

中书务剧乃选文学之士号翰林供奉与集贤院学士分掌制诰书敕二十六年改翰林供奉为学士专掌内命宪宗元和中复置学士承旨五代时学士承旨多与谋议宋制学士院承旨不常置以学士久次者为之】

翰林学士知制诰【唐制学士院自诸曹尚书下至校书郎皆得与选入院一岁则选知制诰未知制诰者不作文书班次各以其官内宴则居宰相之下五代亦置翰林学士后唐复置护玺书制学士盖庄宗初建号特立此名非故事也宋制掌制诰诏令撰述之事凡他官入院未除学士谓之直院学士俱阙他官暂行院中文书谓之翰林权直孝宗淳熙五年更为学士院权直后复与翰林权直互除】

（臣）等谨案唐置翰林学士本在至德以前惟其与三省无所系属故郑志阙而不载今据唐书百官志详其职守以补郑志之遗宋初以翰林学士与中书舍人分典内外制诰谓之两制元丰更制凡职名之不丽于三省寺监者皆从裁革惟翰林学士与诸学士待制犹存旧典

翰林侍读学士【宋初惟置侍读真宗咸平二年始置侍读学士二人元丰更制废学士不置为侍从以上兼官元佑七年复增学士之号元符元年省去建炎元年诏以侍从官四人充讲读官】

翰林侍讲学士【宋咸平二年始置翰林侍讲学士故事两省台端以上兼侍讲其由庶官兼者必以特命元丰以后宫观多兼侍读南渡后多以台谏兼之】

崇政殿说书【宋仁宗景佑元年始置说书四人日轮二员祇候后为庶官兼经筵者之称】

（臣）等谨案侍读侍讲学士及崇政殿说书宋时谓之经筵后乃择学士侍从有学术者为侍讲侍读其秩卑资浅而可备讲说者则为说书岁以春二月至端午日秋八月至长至日遇只日入侍迺英阁轮官讲读元佑间程颐以布衣为说书范祖禹司马康以著作佐郎兼侍讲皆出于异数不为常制

观文殿大学士【唐制大学士四人以象四时宋仁宗庆历七年始更旧延恩殿为观文殿皇佑元年置观文殿大学士诏今后曾任宰相乃得除授】

观文殿学士【宋初置文明殿学士庆历七年改为紫宸殿寻又改为观文殿学士非曾任执政者不除】

金銮殿大学士【梁太祖干化元年置金銮殿大学士一人命崇政院使敬翔为之梁以后不置】

资政殿大学士 【宋景德二年置资政殿学士在翰林学士下寻置资政大学士班
文明殿学士下翰林学士承旨上仁宗康定中大学
士置一人学士置二人】

端明殿学士 【后唐明宗天成元年始置端明殿学士以翰林学士充班在翰林学
士上宋仁宗明道二年改承明殿为端明殿复置端
明殿学士在翰林学士下以待学士之久次者以前执政为之】

诸阁学士直学士待制 【唐元和二年置御书院学士直学士皆用五品初永徽中
高宗命弘文馆学士一人日待制于武德殿西门宋
制以优行义文学之士备顾问与论议典校讎大中祥符初建龙图阁以奉太宗御书置
直学士学士待制其后沿为定制天章阁以奉真宗御
制宝文阁以藏仁宗御集显谟阁以藏神宗御集徽猷阁以藏哲宗御集学士直学士待
制亦并设焉南渡后复置敷文阁藏徽宗御制后又增
焕章阁华文阁宝谟阁宝章阁显文阁以藏高宗孝宗光宗宁宗理宗之御制并设学士
直学士待制】

（臣）等谨案大学士之称始于唐中宗景龙中至德以后如杨綰裴度皆加弘文
馆大学士李勉裴垍李德裕皆加集贤殿大学士自宰
辅而下固不轻授之矣宋时观文殿资政殿大学士以待宰执之就闲者与阁学士直学
士待制并称侍从焉

集英殿修撰 【唐置集贤殿修撰官宋初仍唐制政和六年始置集英殿修撰下待
制一等】

右文殿修撰 【唐置集贤殿学士宋绍圣二年易集贤殿学士为修撰政和改为右
文殿修撰与集英殿修撰为贴职之高等】

秘阁修撰 【宋政和六年置以待馆阁之资深者多自直龙图阁迁授】

直阁 【宋祥符九年始置直阁凡馆阁久次者必选直龙图阁为擢待制之渐南渡
后直阁为庶官任藩阃监司者贴职随高下而等差
之直天章阁至显文阁并同】

直秘阁 【唐制弘文馆有直馆集贤院有直院史馆有直馆宋初以史馆昭文馆集
贤院为三馆皆寓崇文院太宗端拱元年诏就崇文
院建秘阁置直秘阁直馆直院谓之馆职以他官兼者谓之贴职元丰更制废崇文院为
秘书监列为职事官罢直馆直院之名独以直秘阁为
贴职】

（臣）等谨案宋初以三馆为储材之地直馆直阁皆谓之馆职仁宗天圣中修史
即以三馆秘阁校理编修元丰以后馆阁尽为贴职史
局无定所修史无定员而三馆职事悉归诸秘书监

△东宫官

太子太师太子太傅太子太保 【唐制各一人官不备五代多为加官宋初不常置后多以待宰相未及仆射者及枢密使致仕官随高下除授晋至太师即迁司空】

太子少师太子少傅太子少保 【唐制各一人五代亦为加官宋景德中始置太子三少后为前执政致仕官惟少师非特命不除南渡多以宰相兼少师少傅】

太子宾客 【唐制置四人五代亦置太子宾客宋至道元年初置二人以他官兼之后以执政兼领南渡后不设开禧三年复置】

太子詹事 【唐制詹事一人少詹事一人宋景德中置詹事二人以他官兼干道七年以直学士待制为太子詹事不兼他官】

左庶子右庶子左谕德右谕德 【唐置左庶子二人左谕德一人右庶子二人右谕德一人宋景德中庶子谕德各置二人南渡后各置一人开禧中始并置又有主管左右春坊事二人以内臣兼同主管春坊事以武臣兼承受官一人以内侍充】

太子侍读侍讲 【唐制侍读一人宋置侍读侍讲各一人】

中舍人舍人 【唐制中舍人二人舍人四人宋各置一人或二人】

资善堂翊善赞读直讲 【唐置左右赞善大夫各五人宋设资善堂自仁宗为皇子时肄业之所每皇子就外傅选官兼领南渡后增置说书皇子宫小学教授资善堂小学教授】

家令寺家令 【唐置家令一人掌太子出入及财赋之事率更寺丞一人仆寺仆一人五代宋不置】

率府 【唐制东宫环卫官有左右卫左右司御左右清道左右监门左右内并置率府率及副率宋承唐制官存而无职司南渡后惟以监门率府副率为环卫官】

（臣）等谨按唐时东宫设官详备左春坊以比门下省右春坊以比中书省又尝改司经局为桂坊比御史台宋代储闈之建随宜制官多用他官兼领景德中以丁谓兼少师冯拯兼少傅曹利用兼少保东宫三少始备其官绍兴后复增置说书教授以广辅导然如中允洗马诸职一代未尝置官视唐制为简云

△吏部

吏部尚书 【唐置尚书一人五代如唐制宋因之掌文武二选曰尚书左选尚书右选文臣自京朝官武臣自大使臣以上选授封爵功赏课最所隶官分掌其事而总于尚书】

吏部侍郎 【唐置二人五代如唐制宋因之分左右选侍郎左选掌文臣之未改官者侍郎右选掌武臣之未升朝者皆定其选授注拟之法】

吏部郎中员外郎 【唐制郎中二人员外郎二人宋制郎中员外郎各置四人分尚左尚右侍左侍右参掌选事】

司封郎中员外郎 【唐制郎中员外郎各一人宋因之掌官封叙赠承袭之事】

司勋郎中员外郎 【唐置郎中一人员外郎二人宋各置一人掌勋赏之事绍兴元年省并以司封官兼领】

考功郎中员外郎 【唐置郎中一人员外郎亦一人宋因之掌文武官选叙磨勘资任考课之政令】

△户部

户部尚书 【唐置一人五代如唐制宋太祖建隆时止置判部事一人以两制以上充元丰更制始置尚书一人掌军国政用以周知其出入盈虚之数】

户部侍郎 【唐制二人五代如唐制宋因之为尚书之贰】

户部郎中员外郎 【唐置郎中二人员外郎二人宋置郎中二人分左右曹员外郎二人亦分曹治事】

度支郎中员外郎 【唐置郎中一人员外郎一人掌天下租赋物产丰约至德以后多以大臣判度支宋置郎中员外郎各二人参掌计度军国之用】

金部郎中员外郎 【唐置郎中一人员外郎一人宋因之掌天下库藏出纳权衡量度之数】

仓部郎中员外郎 【唐置郎中一人员外郎一人宋因之掌天下库储出纳租税禄粮仓廩之事】

△礼部

礼部尚书 【唐置一人五代如唐制宋初置礼仪院掌其事以枢密院参知政事等官充止设判部事一人元丰更制始设尚书一人掌礼乐祭祀朝会宴飨学校贡举之政令建炎三年诏鸿胪光禄并归礼部太常国子监亦隶焉】

礼部侍郎 【唐置一人五代如唐制宋制掌内严外办同省牲及视饌腥熟诸礼节元丰更制置侍郎一人绍兴七年置二人后复置一人】

礼部郎中员外郎 【唐置郎中一人员外郎一人宋因之参与尚书侍郎所掌之事】

祠部郎中员外郎 【唐置郎中一人员外郎一人宋因之掌祀典道释祠庙医药之政】

主客郎中员外郎 【唐置郎中一人员外郎一人宋因之掌二王后及诸藩朝见之事】

膳部郎中员外郎 【唐置郎中一人员外郎一人宋因之掌陵庙之牲豆诸司供奉之事】

△兵部

兵部尚书 【唐制一人五代如唐制宋初设判部事一人以两制充元丰更制设尚书一人掌兵卫仪仗卤簿武举民兵厢军番军番官承袭之事与马器械之政天下地土之图建炎三年诏卫尉寺并归兵部】

兵部侍郎 【唐置二人五代如唐制宋因之绍兴后止置一人为尚书之贰】

兵部郎中员外郎 【唐置郎中二人员外郎二人宋各置一人参掌本部长贰之事】

职方郎中员外郎 【唐置郎中一人员外郎一人宋因之掌地图远近及番国归化之事】

驾部郎中员外郎 【唐置郎中一人员外郎一人宋因之掌兴辇车乘传驿廐牧马牛杂畜之籍】

库部郎中员外郎 【唐置郎中一人员外郎一人宋因之掌戎器卤簿仪仗】

△刑部

刑部尚书 【唐置一人五代如唐制宋淳化二年置审刑院知院事一人以郎官以上至两省充大中祥符三年置纠察在京刑狱司二人以两制以上充元丰更制悉归刑部置尚书一人掌天下刑狱之政令】

刑部侍郎 【唐置一人五代如唐制宋置二人佐尚书治制勘体量奏谏纠察录问之事徽宗崇宁二年诏侍郎一治左曹一治右曹】

刑部郎中员外郎 【唐置郎中二人员外郎二人宋因之分左右厅掌详覆叙雪之事】

都官郎中员外郎 【唐置郎中一人员外郎一人宋因之掌徒流配隶凡天下役人在京百司吏职皆有籍以考其役放及增损废置之数】

比部郎中员外郎 【唐置郎中一人员外郎一人宋因之掌句会内外赋敛经费俸禄赃赎徒役课程逋欠之物】

（臣）等谨案杜佑通典魏有比部曹隋刑部所属有比部侍郎一人又案唐六典及唐书百官志刑部所属有比部郎中员外郎宋史职官志刑部亦有比部郎中员外郎宋以后不置盖比部之名起于魏至隋始属刑部而唐

宋因之也

司门郎中员外郎 【唐置郎中一人员外郎一人宋因之掌门关津梁道路之禁令及废置移覆之事】

△工部

工部尚书 【唐置一人五代如唐制宋初置判部事一人以两制以上充元丰更制置尚书一人掌百工水土之政令凡制作营缮计置

采伐所用时物按其程序以授有司绍兴中以文思院属工部】

工部侍郎 【唐置一人五代如唐制宋因之为尚书之贰】

工部郎中员外郎 【唐置郎中一人员外郎宋因之凡营缮计置按程序以授有司则参掌之】

屯田郎中员外郎 【唐置郎中一人员外郎一人宋因之掌屯田职田及塘泺堤堰修筑之事】

虞部郎中员外郎 【唐置郎中一人员外郎一人宋因之掌山泽苑囿场冶辨其地产而为之厉禁】

水部郎中员外郎 【唐置郎中一人员外郎一人宋因之掌津济船舫渠梁沟洫渔捕运漕之事】

（臣）等谨案唐承隋制六部分领四司五代尚书多进平章事或领枢密使宋初以他官兼摄特以万禄秩品位而已咸平至治间廷臣屡请复二十四司之旧未及施行元丰中讨论官制欲采昔时苏绰建议上自朝廷下至州县悉分为六曹体统如一其推行之序先自京师始于是六部长贰曹司皆复其职然其时惟除李清臣为吏部尚书安焘为户部尚书而礼兵刑工四部之长犹未除授乃以谢景温为礼部侍郎许将试兵部侍郎崔台符为刑部侍郎熊本为工部侍郎司其职守焉又唐制吏部兵部分掌文武铨选而元丰更制则文武之选并归吏部其兵部惟掌军籍故元佑中苏轼表言古今殊制闲剧异宜武选隶于天官兵政总干枢辅司马之职独有文书盖正名授职虽复六典之遗而尚书之职掌已不相符矣至绍兴时兵部工部皆一司兼领四曹二十四司之属多不备其官此宋制之异于唐典也

钦定续通志卷一百三十

●钦定续通志卷一百三十一 职官略二

职官略 【二】

唐五代宋官制下

○唐五代宋官制下

御史台
秘书省
殿中省
太常寺
宗正寺
光禄寺
卫尉寺
太仆寺
大理寺
鸿胪寺
司农寺
太府寺
国子监
少府监
将作监
军器监
都水监
司天监
殿前司
侍卫亲军马军步军
环卫官
△御史台

御史大夫 【唐置一人为御史长官五代亦置御史大夫宋初不除正员止为加官元丰更制罢不置】

御史中丞 【唐置三人为御史大夫之贰元和后不置五代仍置御史中丞宋置中丞一人为台长掌纠察官邪肃正纲纪】

侍御史 【唐制侍御史六人至德以后定议侍御史弹奏先白中丞大夫复通状中书门下然后得奏五代时以郎中员外郎兼侍御史宋置侍御史一人掌贰台政】

殿中侍御史 【唐置九人五代亦置是官宋置二人掌言事以仪法纠百官之失凡大朝会及朔望六参则东西对立弹纠失仪御史所属有主簿一人检法一人即令殿中侍御史奏辟宣宗嘉定后主簿检法多不置】

监察御史 【唐置十五人大历十四年以监察御史察尚书省六司谓之六察五代亦置是官宋置六人分掌六曹及百司之事纠其谬

误大事则奏劾小事则举正其官卑而入殿中监察侍御者谓之里行宣宗庆元以后常置三人】

（臣）等谨案宋承唐制御史台与谏议诸职并称台谏唐以谏官主谏诤御史主弹劾分司其事故称拾遗补阙为侍臣而称御史中丞为法吏宋则御史兼纠劾论谏之事是其委任之殊也元丰三年诏监察御史以三人分领察案以三人专言事八年复命殿中御史兼察曹司监察御史兼言得失由是殿中侍御史与六察官同一责守矣

△秘书省

秘书监少监 【唐置监一人少监二人丞一人宋置监一人少监一人监丞一人掌古今经籍图书国史实录天文术数之事初为寄禄官郎官至秘书监有以他官兼领有特令供职有以秘阁官兼判者凡经籍图书悉归秘阁而秘书所掌惟祭祀祝版而已元丰改制悉以三馆职事归秘书监南渡后遇修国史则开国史院遇修实录则开实录院其会要所则以省官统任其事又有太史局钟鼓院算学并属焉】

著作郎著作佐郎 【唐制著作局郎二人佐郎二人宋置著作郎一人佐郎二人掌修纂日历】

秘书郎 【唐制三人宋制二人掌集贤院史馆昭文馆秘阁图籍以甲乙丙丁为部各分其类】

校书郎正字 【唐制秘书省校书二人正字二人又置弘文馆校书郎二人集贤殿校书四人正字一人宋惟秘书省置校书郎四人正字二人掌校讎典籍刊正讹谬】

（臣）等谨案宋以三馆秘阁四处藏书初置三馆长庆门北谓之西馆太平兴国初于升龙门东北勅立三馆书院三年赐名崇文院迁西馆书贮焉东廊为集贤书库西廊分四部为史馆书库崇宣初修缮秘书省告成以秘阁总其中而昭文书库列于东廊集贤书库列于南端史馆书库列于西序犹存唐代分贮秘书之制焉绍兴中重建秘书省右文殿居中列四库于殿前秘阁居后石渠次之道山堂又次之著作庭居后然收藏图书终不克复崇宣之旧盖偏安一隅事多简略即藏书亦未能完备也

△殿中省

殿中监少监 【唐置监一人少监二人丞二人宋制监少监各一人丞二人掌供奉玉食医药服御幄帟輿辇舍次之政令又置提举六尚局及管干官一人又有御乐院句当官无常员尚衣库使副使二人内衣物库监官二人新衣库监官二人朝服法物库监官二人】

（臣）等谨案唐殿中省总领六局尚食尚药尚酝尚衣尚舍尚辇皆置奉御宋初

六局之官随局而移不领于省监

（臣）等又案唐六典以秘书省殿中省及内侍省分载尚书门下中书三省之后称为六省郑志以门下中书列尚书之前复改秘书殿中二省为监与内侍省并列诸卿盖本唐典而稍易其前后焉今从宋职官志以秘书殿中二省列九寺之前至内侍惟供扫除初无职守前代轻假事权渐窃威柄设官亦日见冗繁而诸史之述职官者遂以宦者与诸卿并载仍累朝之弊政而未能厘正舛陋孰甚焉臣等前进续职官典遵旨于历代官品删去内侍凡在阁寺诸使给役掖庭不得与朝士齿肃官方而昭鉴戒诚万世所当遵守今秩品内谨依续通典之例不入内侍阶品而省院则仍撮其大略移载军卫之后以备考核其辽金元明各代亦随其官制依类附见焉

△太常寺

太常卿少卿 【唐置卿一人少卿二人丞二人后唐置卿一人宋初置判太常寺及同判寺以两制以上充别置太常礼院有判院同知院四人太常寺与礼院事不相兼康定元年判寺兼礼院事元丰更制置卿一人少卿一人掌礼乐郊庙社稷坛壝陵寢之事丞一人博士四人主簿协律郎奉礼郎太祝各一人其属有郊社令太庙令籍田令宫闈令太医局大晟府】

△宗正寺

宗正卿少卿 【唐置卿一人少卿二人丞二人后唐置卿一人宋置卿一人少卿一人掌叙宗派属籍丞一人主簿一人初置判寺事以宗姓充元丰更制诏宗正长贰不专用国姓以大宗正司统皇族南渡后卿不常置以太常兼少卿绍兴三年复置少卿一人】

大宗正司 【宋景佑三年始置司有知事同知事元丰更制增置丞二人熙宁三年以异姓朝官知丞事】

△光禄寺

光禄卿少卿 【唐置卿一人少卿二人丞二人后唐置卿一人宋初置判寺事以朝官以上充元丰更制置卿一人少卿一人掌祭祀朝会宴飨酒醴膳羞之事丞一人主簿一人其属有大官令法酒库内酒坊大物料库牛羊司牛羊供应所奶酪院外物料库南渡后废寺并入礼部】

△卫尉寺

卫尉卿少卿 【唐置卿一人少卿二人丞二人后唐置卿一人宋初置判寺事以郎官以上充元丰更制置卿一人少卿一人掌仪卫甲

胄兵械之政令丞一人主簿一人其属有内弓箭库南外库军器弓枪库军器弩剑库仪鸾司宣德楼什物库左右金吾街司左右金吾仗司六军仪仗司南渡后废寺并入工部】

△太仆寺

太仆卿少卿 【唐置卿一人少卿二人丞四人后唐置卿一人宋初置判寺事元丰更制置卿一人少卿一人掌厩牧车辂之令丞一人主簿一人其属有车辂院骐驎院鞍辔库义象所南渡后废寺并入兵部】

羣牧司 【朱景德四年始置司有制置使副使都监判官又置鞍辔使副监官元丰后并入太仆寺】

△大理寺

大理卿少卿 【唐置卿一人少卿二人丞四人后唐置卿一人宋初置判寺事元丰更制置卿一人少卿二人掌折狱详刑鞫讞之事正二人推丞四人断丞六人司直六人评事十二人主簿二人职务分左右凡奏劾官校及辟囚疑讞皆隶左断刑若特旨委勘及责偿官逋皆隶右治狱以少卿分领其事而卿总其成】

△鸿胪寺

鸿胪卿少卿 【唐置卿一人少卿二人丞一人后唐置卿一人宋初置判寺事元丰更制置卿一人少卿一人掌四裔朝贡宴劳给赐送迎之事丞一人主簿一人其属有往来国信所都亭西驿及管干所礼宾院怀远驿中太乙宫建隆观等提点所在京寺务司提点所传法院左右街僧录司同文馆及管句所南渡后寺废并入礼部】

△司农寺

司农卿少卿 【唐置卿一人少卿二人丞六人后唐置卿一人宋初置判寺事二人元丰更制置卿一人少卿一人掌仓储委积之政令丞主簿各一人所隶有仓二十五草场十二园苑四下卸司都曲院水磨务柴炭库炭场南渡后罢寺并隶仓部后复置】

△太府寺

太府卿少卿 【唐置卿一人少卿二人丞四人后唐置卿一人五代亦置太府卿宋初置判寺事元丰更制置卿一人少卿一人掌邦国财货之政令丞主簿各一人所隶有左藏东西库西京南京北京左藏库内藏库奉宸库祗候库元丰库布库茶库杂物库粮料院库审计司都商税务汴河上下锁蔡河上下锁都提举市易司市易上界市易下界杂买务杂卖场榷货务交引库抵当所和济局惠民局店宅务石炭场香茶库南渡后寺罢并隶金部后复置】

（臣）等谨案九寺卿与尚书分设唐宋皆仍隋制考寺监之名多昉于汉然汉百官志无所谓六部尚书也故诸卿并建各有专司隋以后六部之任既专二十四司之曹复备则以前代九卿之职归诸六部矣而复增立诸寺谓之九卿多设官属是徒知沿袭其名而不知职任冗烦转使事权不一而官失其守也元丰更制惟锐意复唐六典尚书诸卿必参用周六官汉九寺故事岂非好言法古不复权量于时宜哉然诸卿之中如宗正以统族大理以恤刑太常光禄以理祭祀宴飨鸿胪以通朝译太仆以均马政皆有分职惟卫尉司农太府宜分隶诸曹焉绍兴中多所裁并而司农太府旋废旋置尚未为因革之善也

△国子监

祭酒司业 【唐置祭酒一人司业二人丞一人后唐置祭酒一人司业一人宋初置判监事二人以两制或带职朝官充元丰更制置祭酒一人司业一人掌国子太学武学律学小学之政令复置丞主簿各一人崇宁元年建外学于国之南设司业丞各一人三年诏辟雍置司成司业各二人四年改辟雍司成为太学司成总国子监及内外学士宣和三年罢三舍法悉依元丰旧制南渡后以国子监并礼部后复置】

博士 【唐制国子学太学广文馆四门馆律学书学算学俱置博士宋初置直讲八人以京官选人充元丰三年改国子监直讲为太学博士十人掌分经讲授考校程文以德行道艺训导又置律学博士二人掌传授法律武学博士学谕各二人掌训授武艺卜学置职事教谕二人集正一人】

学正学录 【唐置正录一人宋制学正学录各五人掌举行学规考校训导如博士之职又置职事正录五人学谕二十人直学四人】

（臣）等谨案唐国子监领国子太学广文四门律书算六学宋熙宁中分为三学置大学律学武学博士而考其成于祭酒司业然唐六学之外复置五经博士宋三学之外复设小学教谕亦因时而广其制也宋又置书库官掌印经史羣书备朝廷宣索赐予之用其宗学博士则属之宗正等

△少府监

少府监少监 【唐置监一人少监二人丞六人宋初置判监事以朝官充元丰更制监少监各一人掌百工技巧之政令丞主簿各一人所隶文思院绫锦院染院裁造院文绣院旧置南郊祭器库监官二人太庙祭器法物库监官二人旌节官二人铸印篆文官二人诸州铸钱监监官各一人并属焉】

△将作监

将作监少监 【唐制监一人少监二人丞四人宋初置判监事一人以朝官以上充元丰更制置监少监各一人掌宫室城郭桥梁舟车营缮之事亟主簿各一人所隶修内司东西入作司竹木务事柴场麦■〈麦昌〉场窑务丹粉所作坊物料库三界退材场帘箔场南渡后以将作监并归工部后复置】

△军器监

军器监少监 【唐置监一人丞二人宋初戎器之职领于三司胄案熙宁六年废胄案乃按唐令置监以从官总判元丰定制始置监少监各一人掌监督缮治兵器什物以给国用丞二人主簿一人所隶有东西作坊皮角扬作坊物料库南渡后置御前军器所以军器监并工部后复置】

△都水监

都水使者 【唐置使者二人丞二人宋初置三司河渠案仁宗嘉佑三年始置监一人置局于澶州曰外监元丰中置使者一人掌内外川泽河渠津梁堤堰之事丞二人主簿一人元佑中复置外都水使者所隶有街道司绍兴十年以监归于工部不复置】

（臣）等谨案唐六典以国子少府将作军器都水为五监宋元丰始复唐制后复议删并盖六曹二十四司之任既专则自国子监外四监官皆为赘设也至建炎初议废国子监而独不及少府监殆未审乎损益之宜矣

△司天监

司天监少监 【唐置司天台监一人少监一人丞一人宋承唐制监少监各一人掌察天文祥异写造历书丞主簿各一人春官正夏官正秋官正冬官正灵台郎保章正挈壶正各一人元丰更制罢司天监立太史局隶秘书省】

（臣）等谨案唐武德中以太史局隶秘书省后屡有改置元宗天宝元年改太史局为监始不隶秘书省宋元丰中以太史局属秘书监仍行唐代之制也

△殿前司

都指挥使副都指挥使 【周显德元年始置殿前都指挥使其散员则又有铁骑控鹤诸使又置殿前都点检在都指挥使上宋置都指挥使副都指挥使各一人都虞候一人掌殿前诸班直及步骑诸指挥之名籍而总其政令所隶诸使骑军则有殿前指挥使内殿直散员散指挥散都头散祗候金鎗班东西班散直钩容直及捧日以下诸军指挥步军则有御龙直

骨朵子直弓箭直弩直及天武以下诸军指挥其诸班
则有都虞候指挥使都军使都知副都知押班其御龙诸直则有四直都虞候本直各有
都虞候指挥使副指挥使都头副都头十将将虞候南
渡后都指挥多不除则以主管殿前司一人任其事所属有干办公事主管禁卫二员准
备差遣准备差使点检医药饭各一员书写机宜文字
一员其下有统制统领将佐等分领其事】

捧日天武四厢都指挥使 【五代有日骑都指挥使控鹤都指挥使宋太平兴国二年改控鹤为天武雍熙四年改日骑为捧日各置都
指挥使一人捧日天武又各分左右厢并置都指挥使每军又分置都指挥使都虞候每
指挥有指挥使副指挥使每都有军使副兵马使十将
将虞候并隶于殿前司】

△侍卫亲军马军步军

都指挥使副都指挥使 【后唐天成中始设侍御亲军马步军都指挥使宋初以侍
卫亲军为亲近之职在殿前司之上咸平中始分马
步为二军居殿前司下马步军各置都指挥使一人副都指挥使一人都虞候一人掌马
步军诸指挥之名籍而总其政令】

龙卫四厢都指挥使神卫四厢都指挥使 【五代置龙捷都指挥使虎捷都指挥使
宋改龙捷为龙卫虎捷为神卫各置都指挥使一人
统隶于侍卫马军步军都指挥使】

（臣）等谨案亲军指挥之名自梁起宣武军乃使以镇兵因其旧号置在京马步
军都指挥使后唐遂改为侍卫亲军至周则尤重殿前
诸班焉宋以殿前司马军司步军司为三衙而分捧日天武龙卫虎卫为四厢又谓之上
四军各有左右厢各三军而分属于三衙是其互相
统辖之制也

△环卫官

左右金吾卫 【唐制上将军各一人大将军各一人将军各二人五代亦置左右金
吾卫宋为环卫官无定员以宗室为之亦为武臣赠
官大将军以下中郎将郎将为武臣责授散官绍兴中置上将军寻罢后以节度使领上
将军】

左右卫 【唐制上将军大将军各一人将军各二人五代亦置左右卫宋设官如唐
制不专授后以承宣使领上将军】

左右骁卫 【唐置上将军大将军各一人将军各二人五代亦置骁卫宋设官如唐
制不除授】

左右武卫 【唐置上将军大将军各一人将军各一人宋设官不除】

左右屯卫 【唐置左右威卫上将军大将军各一人将军各二人宋改为左右屯卫设官不除授】

左右官军卫 【唐置左右领军卫上将军大将军各一人将军各二人宋为官军卫设官如唐制不专授无定员】

左右监门卫 【唐置上将军大将军各一人将军各二人宋设官如唐制不专授无定员】

左右千牛卫 【唐置上将军大将军各一人将军各二人五代亦置千牛卫宋置官如唐制与金吾卫以下并为环卫官】

（臣）等谨按唐制禁军分南北衙以十六卫为南衙而以羽林龙武神武诸军为北衙兵政之兴废皆以十六卫为轻重宋世禁军分隶

殿前及侍卫两司遂以十六卫为散官唯爵秩之名尚仍唐典尔

皇城司 【唐置城门郎四人属门下省五代亦置皇城使梁太祖开平元年改城门郎为门局郎宋置干当官七人掌宫城出入之政令

三卫官三卫郎一人中郎文武各一人博士主簿各一人亲卫府勋卫府翊卫府各有郎十人中郎十人南渡初为行营禁卫府后改称皇城司

所隶有冰井务】

客省引进使 【五代置客省使引进使宋置客省使副使各一人掌国信使见辞宴赐及四方进奉及朝覲贡献之仪引进司使副使各一人掌臣僚番国进奉礼物之事】

四方馆使 【宋置使二人掌进章奏建炎初客省四方馆并归东上合门】

东西上合门使 【唐设典仪二人领赞唱之节属门下省宋置东上合门使西上合门使各三人掌朝会宴幸供奉赞相礼仪之事宣赞

舍人十人祇候十二人旧制东西上合门多以处外戚勋贵建炎初并省为一】

带御器械 【宋初选三班以上武干亲信者佩橐鞬御剑或以内臣为之亦名御带咸平元年改为带御器械】

（臣）等谨按元丰更官制务使省寺军卫大小相维然如皇城司客省四方馆合门御带诸职仍无所隶属南渡后诸将在外多兼带御

器械盖假禁近之名为军旅之重也

入内内侍省 【唐内侍省置监二人宋初有内中高品班院淳化五年改入内内班院又改内侍省入内内侍班院景德三年入内内侍

省有都都知副都知押班内东头供奉官内西头供奉官内侍殿头内侍高品内班高班内侍黄门】

内侍省 【唐置内侍省少监二人内侍四人宋初有内班院淳化五年改为黄门旋改为内侍省有左班都知副都知右班都知副都知

押班内东头供奉官内西头供奉官内侍殿头内侍高品内侍高班内侍黄门其属有句当官诸员】

（臣）等谨按唐中叶以后内侍多兼领他职宋以入内侍省为前省内侍省为后省而前省尤为亲近政和中更定内侍官阶其内容省使延福宫使宣政使宣庆使昭宣使等称皆易以大夫美名其所属有阁院诸司句当官皆一时弊政兹不详载

府尹 【唐有都牧有府尹有少尹五代皆置开封尹宋制开封府牧尹不常置权知府一人以待制以上充掌尹正畿甸之事其属有判官推官四人司录参军一人功曹仓曹户曹兵曹法曹士曹参军各一人左右军巡使判官各二人左右厢公事干当官四人应天府亦置知府事通判判官推官各一人其次府牧尹以下并同开封多不除授南渡后置临安府知府一人通判二人其属有签书公事推官判官参军九人分使臣十员立五酒务监六都监两提辖干道七年废通判签判等官置少尹判官推官后复旧】

节度使 【唐制节度使掌总军旅黜杀其属有节度副使判官至德以后增置二十余道其有功者多加同中书门下平章事五代仍唐制宋初无定员职事悉归本州岛恩数与执政同其加中书令或侍中及中书门下平章者谓之使相元丰更制改为开府仪同三司南渡后诸州刊改节镇勋臣多兼两镇或兼三镇节度使】

承宣使 【唐至德以后藩镇置留后以所亲信充后务五代仍唐制有留后兵马留后副留后宋初节度观察留后无定员政和七年改为承宣使】

观察使 【唐置观察使掌察所部善恶举大纲宋沿唐制诸州观察使无定员其遥领者资品止叙本官】

防御使团练使刺史 【唐制防御使一人团练使一人州刺史各一人五代仍唐制宋防御使团练使诸州刺史无定员】

大都督府 【唐太府皆置都督长史司马宋设大都督长史司马录事参军司户司法司士司理文学参军助教阙则置知府事一人通判一人凡都督州并置官属南渡后多以宰相充都督】

大都护府 【唐置大都护一人副大都护二人长史一人司马一人五代仍唐制共分为四大都护宋不置】

（臣）等谨按节度使观察使皆唐时方镇之任宋则节度使为优礼之官观察使多用遥领盖矫藩镇之弊而夺其权也然不与以权而犹存其职与防御团练诸使并授当由名号相沿未能遽革尔至大都督府旧与长史掌

司牧尹南渡后以宰相兼领有同都督兼视军马多以
执政为之名称虽同实以总理军政督护诸将而未尝开府厘务在一代中前后已殊制
矣

制置使 【唐宣宗大中五年始设制置使五代有安抚制置宋制置使掌经画边鄙
军旅之事不常置南渡后多以安抚大使兼之其地
重秩高者加制置大使位宣抚副使上或置副使以贰之开禧中江淮四川并置大使后
惟四川守臣带安抚制置使又有沿海制置使以明州
守臣领之】

宣谕使 【宋绍兴元年始置宣谕使掌宣谕德意不预他事归即罢任后以宣谕使
招抚盗贼按察官吏节制军马其权任遂亚于宣抚
开禧后多以从官行使】

宣抚使副使 【宋制宣抚使掌宣布威灵抚绥边境及统护将帅督视军旅之事以
二府大臣充副使掌贰使事徽宗宣和末始置又置
判官南渡后亦称处置宣抚使或以正使兼副使】

总领 【宋置四人掌措置移运应办诸军钱粮以朝臣充初建炎中置四川总领绍
兴十一年改置淮东湖广淮西三总领序位在转运
副使上十五年复置四川总领其官属有干办公事准备差使淮东西有分差粮料院审
计司榷货务都茶场御前封桩甲杖库大军仓大军库
赡军酒库市易抵当库惠民药局湖广有给纳场分差粮料院审计院御前封桩甲仗库
大军仓库赡军酒库四川有分差粮料院审计院大军
仓库拨遣船运官赎药库余买场】

（臣）等谨按宋南渡后以制置使宣抚使为行军要职及增置总领则军屯之财
赋皆有专责然朝臣领职者仍带报发御前军马文字
则又使之与闻军政不独专理馈饷也

留守副留守 【唐置三都留守五代置留守及副留守宋制天子亲征则命亲王或
大臣总留守事其西南北京留守各一人南渡初东
京北京并置留守又以掌兵官为副留守】

经略安抚司 【唐置安抚使经略使德宗贞元中又置安抚副使宋初不常置咸平
二年始置安抚使五年置经略使皇佑四年置经略
安抚使宣和三年诸路经略安抚使以直秘阁以上充掌一路兵民之事南渡初以文臣
充后以知州带管内安抚使寻废又置安抚大使自二
品以上为帅即为安抚大使】

走马承受 【宋制隶经略安抚总管司诸路各一人政和六年改为廉访使者靖康
初复旧】

发运使 【唐置水陆发运使宋置发运使掌经度山泽财货之源漕淮浙江湖六路储廩以输中都又置副使及判官绍兴九年改为经制使干道六年复置都大转运使后不复置】

转运使 【唐置转运使及副使后诸道分置巡院五代罢巡院复置转运使宋初设句当水陆计度转运使太平兴国初置转运使掌经度一路财赋两省以上则为都转运使又置副使及诸路判官仁宗庆历中并兼按察使寻废又设随军转运使与都转运皆不常置其属有主管文字干办官】

招讨使 【唐置招讨使五代有行营北面招讨使南面招讨使又置都招讨使宋制掌收牧招讨杀盗贼之事不常置建炎中许便宜行事其属官并听奏辟】

抚谕使 【宋制掌存问采民之利病条奏而罢行之不常置】

（臣）等谨按五代时招讨使或加中书令非亲任之臣与藩镇之有功者不轻授焉宋南渡后招讨多遥领其地又权宜置官招徕河北则设招抚使安辑羣盗则设镇抚使旋即罢废盖偏安一隅仅为补苴之术而已

提点刑狱公事 【宋制掌所部讼狱而平其曲直景德四年始置以朝臣充后参用武臣为副使熙宁二年罢用武臣建炎元年复置武提刑四年罢之其属有检法官干办官又有提点开封府诸县镇公事掌察畿内县镇刑狱盗贼场务河渠之事】

提举常平茶盐司 【宋熙宁中始置提举常平司及提举茶盐司又有都大提举茶马司建炎初以常平职事并归提刑寻复置绍兴十五年改充提举常平茶盐公事并行两司之事依旧法为监司与转运判官叙官】

提举坑冶司 【唐置诸道铸钱使宋初以转运使兼提点坑冶景佑二年始置提点元丰二年复分置两司政和七年又置提点两员于饥州虔州绍兴中并归虔州又称都大提点干道六年复置二人淳熙中并为一司】

提举市舶司 【唐广德元年置广州市舶使宋初以知州事兼市舶使元丰中始令转运使兼提举市舶使后又专置提举司建炎中罢闽浙市舶司归转运使唯广南如故后复并置】

提举学事司 【宋崇宁二年置掌一路州县学政岁巡所部以察师儒之优劣诸生之勤惰而专举刺之事宣和三年罢不置】

（臣）等谨按唐以观察使为监司宋初唯置转运使后乃设提点刑狱至熙宁后增置监司有提举河北余便司提举制置解盐司经制边防财用司提举兵马提辖兵甲提举保甲司提举弓箭手提举三白渠公事检发司辇运司旋置旋废事权不一故司马光谓增立提举为病

民之本源苏轼亦论其事少员多人轻权重适以滋冗官之弊也南渡后转运提刑屡有增损又合常平茶盐为一司唯坑冶市舶仍置提举犹用元丰之制焉

府州军监 【唐设州刺史后改为郡太守五代仍称刺史宋初惩藩镇之弊分命朝臣出守列郡号权知军州事其后以文武官参为知州军事二品以上及带二府职事者称判诸府置知府事一人州军监亦如之掌总理郡政通判大郡置二人余置一人州不及万户者不置武臣知州及小郡亦特置焉幕职官有签书判官厅公事两使防团军事推判官节度掌书记观察支使诸曹官有录事户曹司法司理诸参军庆历四年诏诸路州军监并立学增置教授】

县令 【唐制县置令一人五代仍唐制宋制县置令一人若京朝幕官则称知县事有戍兵则兼兵马都监或监押建炎初多用武臣后复改用文臣其属有丞主簿尉】

庙令 【唐制五岳四渎令各一人宋制五岳四渎东海南海诸庙各置令丞主簿】

总管钤辖司 【宋置掌军旅屯戍营房守御之政令崇宁四年京畿四辅置副总管钤辖一人知州为总钤辖】

路分都监 【宋制掌本路禁旅屯戍边防训练之政】

诸军都统制 【宋建炎初置御营司立都统制绍兴十一年设御前诸军都统制其后诸军皆除都统制权任在帅臣右官卑者称副都统制又有统制同统制副统制统领其下有正将准备将训练官部将队将等名皆偏裨之任】

巡检司 【宋制有沿边溪峒都巡检番汉都巡检或数州数县管界或一州一县巡逻又有刀鱼船战棹巡检江河淮海置捉贼巡检及巡马递铺巡河巡捉私茶盐诸职各视其名以修举职业】

（臣）等谨按都统制初为御营军帅其后分驻诸州即以屯驻州名冠军额之上则为方州治军之职故宋职官志次于州县之后都巡检以治边徼军政宋初择亲臣为之边圉扞御多以都巡检奏绩南渡后分置巡检以控要害而总于都巡检其制亦稍殊云

监当官 【宋制掌茶盐酒税场务征输及冶铸之事诸军州随事置官建炎四年诏州以五人为额】

钦定续通志卷一百三十一

●钦定续通志卷一百三十二 职官略三

职官略 【三】

辽官制

○辽官制

辽太祖受位要尼用其旧俗职守名称与古迥异迨世宗兼有燕代始增置官班渐仿唐制自兹而降日以浸繁辽俗东向而尚左故御帐东向谓之横帐其官则分北面南面北面治契丹宫帐部族属国之政南面治汉人州县军马租赋之事叶隆礼契丹国志谓北面在牙帐之北以主番事南面在牙帐之南以主汉事是也然北面官又自有北南二院自宰相枢密宣徽林牙下至郎君护卫皆分北南其实所治皆北面之事以其牙帐居大内帐殿之北则谓之北院居南则谓之南院耳今观其制北南枢密以下略视六部而以北南宰相总之北府治兵南府治民各有专司不相侵越此其制之得也若夫百官择人必先宗姓属国既灭犹存部族迹其用意厚矣而又惧皇族之专也任五帐以贰之尊要尼之后也列二院以制之仁厚之中智略寓焉以至宫帐部族体统相承属国边防扼制有术凡此北面之制创自太祖者史谓事简职专官制朴实洵不虚也至世宗天祿之际内设南面三省六部台院寺监诸卫东宫之属外设节度观察防御团练之任始未尝不欲备前代之制以润色乎大业而位号张皇掌寄纷杂或暂置于一时或偏设于一地史家不得其详往往一官而仅举一曾任其职者以实之揆其所由岂非北面官体制已备南面第袭其名职事简而权势轻故不得与北面比也夫一代之兴创制显庸必有足录辽立国二百余年与五代北宋相终始政刑不坠人民乂安岂偶然哉其官职既不与古同谨自为一编叙其要者着于篇

北面

南面

△北面

北面朝官

北面御帐官

北面着帐官

北面皇族帐官

北面诸帐官

北面宫官

北面部族官

北面坊扬局冶牧厩等官

北面军官

北面边防官

北面行军官

北面属国官

北面朝官

（臣）等谨按辽制北面朝官有北南二枢密分掌文武铨实与历代之吏兵二部无异南北二大王视户部多啰伦穆腾视礼部伊勒希巴视刑部宣徽视工部而以北南宰相府总之又置特哩袞以比宗正林牙以比翰林裕悦坐而谕议以象公师史称官生于职职沿于事而名加之固有名不相沿而职可相例者犹想见当日设官之遗意云

契丹北枢密院 【掌兵机武铨羣牧之政凡契丹军马皆属焉其官有北院枢密使知北院枢密使事知北枢密院事北院枢密副使知北院枢密副使事同知北院枢密使事签书北枢密院事北院都承旨北院副承旨北院林牙知北院贴黄给事北院知圣旨头子事掌北院头子北枢密院敞史北院郎君北枢密院通事北院掾史其所属北枢密院中丞司有北南枢密院点检中丞司事总知中丞司事北院左中丞北院右中丞同知中丞司事北院侍御】

契丹南枢密院 【掌文铨部族丁赋之政凡契丹人民皆属焉其官有南院枢密使知南院枢密使事知南院枢密事南院枢密副使知南院枢密副使事同知南院枢密使事签书南枢密院事南院都承旨南院副承旨南院林牙知南院贴黄给事南院知圣旨头子事掌南院头子南枢密院敞史南院郎君南枢密院通事南院掾史其所属南枢密院中丞司有北南枢密院点检中丞司事总知中丞司事南院左中丞南院右中丞同知中丞司事南院侍御】

（臣）等谨按辽制林牙掌文翰之事北南枢密二院林牙即五代及宋枢密直学士之职其敞史郎君亦即前代之掌故令史也考契丹国志其佐吏如绷郭德斯弩袞推勒弩袞图卜弩袞职掌皆与令史同又辽初有额真尼郭齐喀为要尼故官后并其职于枢密院云

（臣）等又按北枢密院南枢密院所属官皆各隶南

北独点检中丞司事则两院并称北南或是互相司事之官但史志未详其所职掌无可稽核谨附识以存其疑

北宰相府 【掌佐理军国之大政有北府左宰相北府右宰相总知军国事知国事】

南宰相府 【掌佐理军国之大政有南府左宰相南府右宰相总知军国事知国事】

（臣）等谨按辽史纪传任总知军国事者代乏其人岂有其官而不轻授欤考太祖于要尼时曾任斯职或亦如唐之尚书令太宗曾为

之后遂不以授人耶若北宰相府皇族世预其选南宰相府国舅世预其选相臣必简用于宗戚又与历代之制异矣

北大王院 【分掌部族军民之政初名德呼勒部额勒金太祖分南北院太宗会同元年改额勒金为大王有北院大王知北院大王事北院太师北院太保北院司徒北院司空北院郎君其所属北院都统军司掌北院从军之政令有北院统军使北院副统军使北院统军都监又北院详袞司掌北院部族军马之政令有北院详袞北院都监北院将军北院小将军又北院都部署司掌北院部族军民之事有北院都部署北院副部署】

南大王院 【分掌部族军民之政有南院大王知南院大王事南院太师南院太保南院司徒南院司空南院郎君其所属南院都统军司掌南院从军之政令有南院统军使南院副统军使南院统军都监又南院详袞司掌南院部族军马之政令有南院详袞南院都监南院将军南院小将军又南院都部署司掌南院部族军民之事有南院都部署南院副部署】

（臣）等谨按太师太保唐宋为三师之职司徒司空唐宋为三公之职皆不轻除授惟辽制北面官凡公师崇秩仅为各司有职掌之官矣如北面大王院文班司侍卫司护卫府横帐详袞司王子院要尼九帐大国舅司十二宫各部族五冶羣牧使司东都省各属国皆有之或置太师司徒或祇置太保或称都太师各领所司之事或为属官此与唐宋名同而实异者也

宣徽北院 【会同元年置掌北院御前祇应之事有北院宣徽使知北院宣徽事北院宣徽副使同知北院宣徽事】

宣徽南院 【会同元年置掌南院御前祇应之事有南院宣徽使知南院宣徽事南院宣徽副使同知南院宣徽事】

大裕悦府 【有大裕悦无职掌班百僚之上非有大功德者不授为辽国之尊官犹南面之有三公云】 大特哩袞司 【太祖有国首设此官有特哩袞知特哩袞司事特哩袞司事】

（臣）等谨按辽之特哩袞治宗族即唐之宗正卿唯不置属官其制差异然史称皇族帐官皆统于大特哩袞司即其属也

伊勒希巴院 【掌治刑狱有伊勒希巴左伊勒希巴右伊勒希巴知左伊勒希巴事知右伊勒希巴事敝史选底掌狱】

大林牙院 【掌文翰之事有北面都林牙北面林牙承旨北面林牙左林牙右林牙】

多啰伦穆腾司 【掌礼仪之事有多啰伦穆腾总知朝廷礼仪总礼仪事】

文班司 【有文班太保文班林牙文班牙署文班吏】

北面御帐官

（臣）等谨按周官幕人掌帷幕幄帟绶之事注云四合象宫室曰幄王所居之帐也辽制盖仿此顾古制出宫用之而辽初则未有城郭沟池宫室之固是以毡车为营硬寨为宫史称御帐之官不得不谨以此耳其制出于贵戚为侍卫着帐为近侍北面部族为护卫武臣为宿卫亲军为禁卫百官番宿为宿直奉宸以司供御三班以肃朝会硬寨以严晨夜法制极其严密而总名曰御帐官盖与唐之十六卫宋之环卫官带御器械之职制略相似

侍卫司 【掌御帐亲卫之事有侍卫太师侍卫太保侍卫司徒侍卫司空侍卫】

（臣）等谨按侍卫司所属有近侍局近侍详袞司盖宦者之职此外有内省 【设官有使副使内藏库提点】 有内侍省 【设官有黄门令内谒者押班左厢押班右厢押班契丹汉儿渤海内侍都知左承宣使右承宣使】 又着帐祇应诸司亦有以奄寺充者辽史宦官传赵安仁尝为秦晋国王府祇应可推也

北护卫府南护卫府 【分掌北院南院护卫之事其官各有护卫太师护卫太保护卫司徒其所属北有总领左右护卫司总领左右护卫南有总理左右护卫司总理左右护卫又左护卫司有左护卫太保左护卫右护卫司有右护卫太保右护卫又奉宸司掌供奉宸御之事有奉宸又三班院掌左右寄班之事有左班都知右班都知寄班都知三班院祇候又宿卫司专掌宿卫之事有总宿卫事总知宿卫事同掌宿卫事宿卫官又禁卫局有总禁卫事禁卫长又宿直司掌轮直官员宿直之事有宿直详袞宿直都监宿直将军宿直小将军宿直官宿直护卫】

硬寨司 【掌禁围枪寨下铺传铃之事有硬寨太保】

（臣）等谨按御帐官又有皇太子特哩袞司掌皇太子宫帐之事又皇太后宫亦有宿直官史志皆载于御帐之后其实皆宫官也

北面着帐官

（臣）等谨按辽制内族外戚及世官之家犯罪者皆没为着帐官其诸色人犯罪则为着帐户司凡职事禁卫以及祇从诸役皆充之称为着帐郎君娘子以示矜恤云

着帐郎君院 【有着帐郎君节度使着帐郎君司徒】

祇候郎君班详袞司 【有祇候郎君班详袞祇候郎君直长祇候郎君扎萨克辖祇候郎君祇候郎君伊喇】

左祇候郎君班详袞司右祇候郎君班详袞司 【各有祇候郎君班详袞祇候郎君

直长祇候郎君扎萨克辖祇候郎君祇候郎君伊喇
其所属有笔砚局有笔砚祇候郎君笔砚史又牌印局有牌印郎君裊褌局有裊褌郎君
灯烛局有灯烛郎君床幔局有床幔郎君殿幄局有殿
幄郎君车輿局有车輿郎君御盞局有御盞郎君本班局有本班郎君】

着账户司 【有着帐节度使着帐殿中】

（臣）等谨按史志载着账户司其所属有承应小底局有笔砚寝殿佛殿司藏习
马鹰坊汤药尚饮盥漱尚膳尚衣裁造各小底皆给事
贱役未足列于职官也

北面皇族帐官

（臣）等谨按辽之皇族有二院四帐肃祖及懿祖之后共五房谓之二院元祖之
后曰孟父房仲父房季父房太祖曰横帐共三房一帐
谓之四帐二院治之以北南二大王四帐治之以大内特哩袞而总以大特哩袞司统之
又置锡里司以治军政而诸王公主院府亦各设官其
法制详矣

大内特哩袞司 【掌皇族四帐之政教有大内特哩袞知大内特哩袞事大内特哩
袞都监】

大横帐详袞司 【掌太祖后九帐皇族之事有横帐详袞横帐太师横帐太保横帐
司空横帐郎君横帐知事】

孟父族帐详袞司 【掌蜀国王雅本房族之事】

仲父族帐详袞司 【掌隋国王舒噜房族之事】

季父族帐详袞司 【掌德祖皇帝三房族之事】

四帐都详袞司 【掌四房军马之事有都详袞都监将军小将军其所属有横帐详
袞司孟父帐详袞司仲父帐详袞司季父帐详袞司
】

锡里司 【掌皇族之军政有锡里详袞锡里都监锡里将军锡里小将军锡里美棱
】

大东丹国中台省 【太祖天显元年置有左大相右大相左次相右次相】

（臣）等谨按天显元年征渤海克辉罕城改其国曰东丹而以皇子倍为人皇王
主之仍赐王子冠服故特置宰相以辅之至圣宗干亨
元年乃省焉

北面诸帐官

（臣）等谨按太祖受位于要尼尊九帐于御营之上存渤海之族帐亚于要尼并
奚王之众抚其帐部拟于国族任国舅以耦皇族崇伊
锡以抗奚王列二院以制要尼立国之初制此控御之良法后遂相沿不变云

要尼九帐大详袞司 【掌要尼温汗卓木布汗和抡汗苏尔扞沙津汗招固汗伊兰汗巴尔汗哈陶津汗九世宫分之事有大详袞要凡太师要尼太保要尼太尉要尼司徒要尼司空要尼侍中敞史知事其所属有要尼帐节度使司有节度使节度副使又要尼纛详袞司有要尼纛详袞要尼纛都监要尼纛将军要尼纛小将军又有要尼克】

大国舅司 【掌国舅伊苏济勒伯哩二帐之事有伊苏济勒国舅大翁帐详袞小翁帐详袞伯哩国舅大父帐详袞少父帐详袞国舅太师国舅太保国舅太尉国舅司徒国舅司空敞史又国舅伊苏济勒大翁帐详袞司有国舅详袞国舅都监国舅本族将军小将军又国舅伊苏济勒小翁帐详袞司国舅伯哩大父帐详袞司国舅伯哩少父帐详袞司又国舅伊勒希巴司有国舅伊勒希巴国舅左伊勒希巴国舅右伊勒希巴敞史又有国舅帐克】

（臣）等谨按契丹国志国舅帐有国舅钤辖掌国舅司事辽史百官志失载谨附识于此

国舅别部 【世宗置有国舅别部敞史】

渤海帐司 【有渤海宰相渤海太保渤海达噶拉美其所属有渤海近侍详袞司】

奚王府 【有二详袞二宰相又有图尔太尉奚六部汉军详袞奚伊喇详袞锡里哈都抡】

伊锡王府 【有伊锡府达呼尔节度使司】

北面宫官

（臣）等谨按行宫各官为行在扈从之官十二宫各官各掌一宫军民之政如太祖弘义宫太宗永兴宫世宗积庆宫应天皇太后长窻宫穆宗延昌宫景宗彰愍宫承天皇太后崇德宫圣宗兴圣宫兴宗延庆宫道宗太和宫天祚永昌宫孝文皇太弟敦睦宫是也又有文忠王府其设官亦同于十二宫云 【按契丹国志祇载十宫盖失载道宗天祚二宫也其彰愍宫作章敏与此互异】

诸行宫都部署院 【总契丹汉人诸行宫事有诸行宫都部署知行宫诸部署司事诸行宫副部署诸行宫判官】

契丹行宫都部署司 【总行在行军诸鄂尔多之政令有契丹行宫都部署知契丹行宫都部署事契丹行宫副部署契丹行宫判官】

行宫诸部署司 【掌行在诸宫之政令有行宫都部署行宫副部署行宫部署判官】

十二宫 【各宫俱有使副使太师太保侍中又有某宫都部署司掌本宫契丹军民之事有都部署副部署判官又有某宫提辖司某宫

马羣司有侍中敞史又某锡林有额勒锦玛尔布牙书又某斡里有玛固某摩哩有扎萨克辖又有某德哩】

押行宫辘重伊勒希巴司 【掌诸宫巡幸扈从辘重之事有伊勒希巴有敞史】

北面部族官

（臣）等谨按部落曰部氏族曰族契丹故俗分地而居合族而处自太祖析九帐三房之族列二十部圣宗之世分置十有六增置十有八并旧为五十四而大小分焉大部族四曰五院部六院部伊锡部奚六部其官散见于诸帐官者不复载小部族五十设官皆同兹纪其实而不复列其部族之号云

大部族 【各部俱有大王左宰相右宰相太师太保太尉司徒又有某部节度使司有节度使节度副使节度判官又某部族详袞司有详袞都监将军小将军又某锡林有额勒锦玛尔布牙书某密拉有锡里琨】

小部族 【某部族司徒府有司徒司空又有某部节度使司某部族详袞司又某锡林有凌袞玛尔布牙书某密拉有锡里琨】

北面坊扬局冶牧厰等官

坊官 【有某坊使副使又某坊详袞司有某坊详袞都监】

（臣）等谨按诸坊惟鹰坊铁坊可考又有五坊史未详也又八坊止载军器坊余亦未详

场官 【有围场都太师围场都管围场使副使】

局官 【有客省器物太医医兽四局都林牙又有某局使副使】

冶官 【五冶有太师】

羣牧官 【某路羣牧使司有某羣太保侍中敞史又总典羣牧使司有总典羣牧簿籍使羣牧都林牙又某羣牧司有羣牧使副使又有西路羣牧使司达塔岭西路羣牧使司浑河北马羣司漠南马羣司漠北滑水马羣司牛羣司】

（臣）等谨按唐宋羣牧之官皆隶于殿中监太仆寺辽则无所隶属有侍中太保诸职以董率之此辽制之异于前代也

诸厰官 【尚厰有尚厰使副使飞龙院有飞龙使副使又总领内外厰马局有总领内外厰马】

监养鸟兽官 【监鸟兽详袞司有监某鸟兽详袞都监监某鸟监某兽又有监鹿详袞司又有监雉】

北面军官

天下兵马大元帅府 【以太子亲王总军政有天下兵马大元帅副元帅】

大元帅府 【以大臣总军马之政有大元帅副元帅】

都元帅府 【以大将总军马之事有兵马都元帅副元帅同知元帅府事】

便宜从事府 【有便宜从事】

大详袞司 【有大详袞都监将军小将军军校队帅】

（臣）等谨按辽制文武诸职所属各有详袞司盖分司之职也大详袞司则专掌军马佐元帅府行事异于各属之详袞焉

东都省西都省 【分掌军马之政有东都省太师西都省太师】

大将军府 【各统所治军之政令有大将军上将军将军小将军】

护军司 【有护军司徒】

卫军司 【有卫军司徒】

诸路兵马统署司 【有诸路军马都统署副统署】

各军详袞司 【有左皮室右皮室北皮室南皮室黄皮室各军又有舒新军锡里军北王府锡里军南王府锡里军各部族锡里司又有禁军郎君军伊喇军旗鼓伊喇千伊喇猛伊喇摩哩军炮手军弩手军铁林军大鹰军鹰军鹞军凤军龙军飞龙军虎军熊军左铁鹞子军右铁鹞子军龙卫军威胜军天云军特们军迪里军迪里皮室呼哩奚军尼格奚军渤海军尼古尔各详袞司又有奚王南克军奚王北克军并国舅帐克军三克军彭布格军九克军各详袞司并有克官又有十二行纛军各宫分纛军要尼纛军各部族纛军羣牧二纛军各详袞司俱有司徒又有怨军八营都详袞司】

北面边防官

上京路诸司 【诸军都虞候司有都虞候又有奚王府大特哩袞司大国舅司大详袞司五院司六院司沓温司】

（臣）等谨按奚王府以下诸司史未载其所属者以其名目皆见于帐宫及部族官中惟沓温司所属则史阙焉

辽阳路诸司 【有东京兵马都部署司契丹奚汉渤海四军都指挥使司契丹奚军都指挥使司奚军都指挥使司汉军都指挥使司渤海军都指挥使司东京都统军使司东京都详袞司保州都统军司汤河详袞司双宽司金吾营铜州北兵马指挥使司涿州南兵马指挥使司其官有某兵马都部署某兵马副部署某兵马都监某都部署判官又有某军都指挥使某军副指挥使某军都监又有都统军使副使都监】

长春路诸司 【有黄龙府兵马都部署司黄龙府铁骊军袞司又咸州兵马详袞司有知咸州路兵马事同知咸州路兵马事咸州纛将又东北路都统军使司有掌法官道宗大安六年置】

南京诸司 【并隶南京都元帅府有都元帅大元帅南京兵马都总管府有兵马都

总管总领南面边事总领南面军务事总领南面戍兵等官其所属有南京马步军都指挥使司侍卫控鹤都指挥使司燕京禁军详衮司南军都统司有南京统军都监又牛栏都统领司有都统领副统领又距马河戍长司有戍长又监军寨统领司石门统领司南皮室军详衮司北皮室军详衮司猛伊喇详衮司又管押平州甲马司有管押平州甲马】

（臣）等谨按南京诸司有南京兵马都总管府南京马步军都指挥使司侍卫控鹤都指挥使司史称其属于南面而其所以列于北面者不详其故岂辽设南京在得燕代诸州之后地多汉儿军民故不得不兼南面以抚治之欤若辽阳路之金吾营西北路之金吾营亦皆属于南面其互相控制之义则不可考姑阙疑而附识之

西京诸司 【西南面安抚使司有西南面安抚使西南面都招讨司有西南面招讨使又西南边大详衮司西南路详衮司西南面五押招讨司有五押招讨大将军西南路巡察司有西南路巡察将军又有西南巡边官西南面巡检司有西南面巡检同巡检又西南面伊喇详衮司山北路都部署司有知山北道边境事又金肃军都部署司南王府北王府伊锡王府山阴司】

西北路诸司 【西北路招讨使司有知西路招讨事监军又西北路管押详衮司西北路总领司有总领西北路军事又领西北路十二班军使司契丹军吐浑军舒噜军禁军奚王府锡里军大室韦军小室韦军北王府军特们军羣牧军宫分军各详衮司又西北路金吾军西北路兵马都部署司西北路卓木布都部署司西北路统军司西北路戍长司西北路禁军都统司西北部镇抚司有镇抚西北部事西北路巡检司黑水河提辖司】

东北路诸司 【有东北路兵马详衮司东北路监军马司有东北路监军马使管押东北路军马事又东北路女直详衮司北女直兵马司】

东路诸司 【东路兵马都总管府有东路兵马都总管同知东路兵马事又东路都统军使司约啰等十军都详衮司九水诸夷安抚使】

西南边诸司 【西南面节制司有节制西南诸军事又西南面都统军司】

西路诸司 【有山西兵马都统军司西路招讨使司西边大详衮司四番都军所夏州管内番落使达塔岭节度使司达塔岭统军司塔斯节度使司塔玛城节度使司】

（臣）等谨按圣宗统和四年授李继冲为四番都军所李继迁为夏州管内番落使官不常设特以羁縻西夏非边防之职也而史列其官于西路诸司者盖西路壤接梁州其慎固封圉之意则同尔

北面行军官

行枢密院 【有左右林牙参谋】

行军都统所 【有行军都统副都统都监监军行军诸部都监监战又有中军御营先锋左翼军右翼军各都统所又有河南道北道东北面西北面西南面各行军都统所又有南面行营总管府南面行营都部署司行军都部署司先锋使司行军都押司有都押副押】

（臣）等谨按行军官又有远探军之小校伊喇候骑之侦候人伊喇皆兵校之事非有常职又史载东征行枢密院东征都统所东征统军司东征先锋使司西征统军司南征都统所南征统军司皆临时所设之官故不复载也

北面属国官

属国 【各国俱有大王裕悦左相右相特哩袞司徒太师太保司空节度使副使详袞都监将军小将军】

（臣）等谨按辽制属国属部官大者拟王封小者准部使用其本国之人而契丹人亦参用焉辽史百官志于属国属部皆胪载之盖以见臣服之远役属之众无关于官制故亦不具载云

△南面

（臣）等谨按史志称辽得燕代十六州乃用唐制设南面官然考太祖本纪于时已有左仆射礼部尚书则当建国分职之初固参用唐制矣特至太宗入汴世宗建政事省之后所设南面官乃日益多耳至其除授之法虽南北区分为二而又未尝不互相迁转若耶律硕老以同平章事为特哩袞耶律洪以上京留守为北院大王是由南面官而迁北面者也休哥以裕悦为南京留守蒲奴窳以北院大王为山后五州都管吴留以伊锡帐郎君为御史大夫是由北面官而迁南面者也惜史志简略于官司之所职掌多阙而不载其迁转阶次盖不可考云

南面朝官

南面宫官

南面京官

南面大番府官

南面方州官

南面分司官

南面财赋官

南面军官

南面边防官

南面朝官

太师太傅太保 【不常置】

少师少傅少保 【不常置】

太尉司徒司空 【不常置】

汉人枢密院 【太祖初有汉儿司太宗置枢密院掌汉人兵马之政有枢密使知枢密使事知枢密院事枢密副使同知枢密院事知枢

密院副使事枢密直学士都承旨副承旨吏房承旨兵刑房承旨户房主事厅房主事】

（臣）等谨按枢密以掌兵政唐宋皆列于三省之后辽南面官则列于三省之前此辽制之异于唐宋也

中书省 【初名政事省太祖置官世宗天禄四年建政事省兴宗重熙十三年改中书省有中书令大丞相左丞相右丞相知中书省事

中书侍郎同中书门下平章事参知政事堂后官主事守堂官令史其所属中书舍人院有中书舍人右谏院有右谏议大夫右补阙右拾遗】

门下省 【有侍中常侍散骑常侍给事中门下侍郎所属有起居舍人院有起居舍人知起居注起居郎又左谏院有左谏议大夫左补

阙左拾遗又通事舍人院有通事舍人符宝司有符宝郎东上合门使司有东上合门使东上合门副使西上合门使司有西上合门使西上合

门副使东头承奉班有东头承奉官西头承奉班有西头承奉官通进司有左通进右通进登闻鼓院有登闻鼓使匭院有知匭院使诰院有诰

院给事】

尚书省 【太祖尝置左右尚书有尚书令左仆射右仆射左丞右丞左司郎中右司郎中左司员外郎右司员外郎】

（臣）等谨按三省之制于唐首尚书省于宋首门下省辽则首中书省叙次稍异而官制略同惟唐于开元二年宋于干道八年尝改左

右仆射为左右丞相则固尚书省之纪纲庶务以贰于令者而辽乃列之中书省又置大丞相以位其上此特与唐宋殊矣然考赵延寿之为大

丞相实兼政事令张俭之拜左丞相实受命以辅兴宗其号虽殊其为揆席之任不殊也盖自唐宋中叶三省长官秩高罕置凡中书门下侍郎

及左右仆射诸官并为相职其任相职者往往皆兼除之辽之册命宰臣亦颇因仍此制故名为三省实则一政府尔

六部 【各部有尚书侍郎郎中员外郎】

（臣）等谨按辽设六部沿唐制也而官未尝备史亦未详太祖神册三年以礼部尚书康默记充版筑使为辽代设部臣之始厥后邢抱朴为礼部侍郎刘景为吏部郎中马守琪祁正崔佑为库部仓部虞部员外郎刘涇为户部侍郎加工部尚书南承颜为吏部员外郎王景运为礼部员外郎郑弘节为兵部郎中杨又元为吏部尚书刘六符为膳部员外郎并见于纪传惟除兵部长贰及刑部官者不少概见岂太祖太宗准六典以设北面朝官者固已职分而政举故六部所掌不必备其人欤

御史台 【有御史大夫御史中丞侍御所属殿中司有殿中殿中丞尚舍局有奉御又有尚乘局奉御尚辇局奉御尚食局奉御尚衣局奉御】

（臣）等谨按尚乘尚衣诸奉御唐宋皆属于殿中监辽制则以殿中司主之而统属于御史台此又异于前代之制也

翰林院 【掌天子文翰之事有翰林都林牙南面林牙翰林学士承旨翰林学士翰林祭酒知制诰所属翰林画院有画待诏医官国史院有监修国史史馆学士史馆修撰修国史】

（臣）等谨按辽设南面翰林医官其制盖略与宋同考宋太医令丞属太常寺又于太常所属之外置良医医正等阶而胥以翰林之名冠之马端临又称五代时有翰林医官使则医官之厕于翰林不独宋为然已翰林始建于唐特为待诏之所故一切医卜杂流执艺事以奉上者皆得并处于其闲逮后别建学士院于旧院之南于时翰林遂分而为二至宋沿其制号学士院为玉堂之署而医官之所居者乃与天文书艺图画为四局矣且宋尝以中官领之故志职官者第寄其衔于合班之制与十四阶九品之中其于序职概不之及则与辽制固稍殊焉

宣政殿观书殿 【有宣政殿学士观书殿学士】

昭文馆崇文馆 【有昭文馆直学士崇文馆大学士】

干文阁 【有干文阁学士】

宣徽院 【会同元年置有宣徽使知宣徽院事宜徽副使同知宣徽使事同知宣徽院事】

客省 【会同元年置有都客省客省使左客省使右客省使客省副使所属四方馆有四方馆使副使引进司有引进使点签司有同签点签使事礼信司有句当礼信司礼宾使司有礼宾使】

（臣）等谨按点签礼宾二司古无其官盖辽建国于幽冀并营之闲东抚高丽西臣夏国南子石晋而兄弟于赵宋其邦交之事多矣因时设官俾典宾客亦犹金之有报谕宋国使南宋之有金国申议使此亲仁善邻史志所

以称美也夫

各寺 【有太常崇禄卫尉宗正太仆大理鸿胪司农诸寺寺各有卿少卿丞簿其太常寺有博士赞引太祝奉礼郎协律郎所属有太乐署鼓吹署署有令有丞有法物库库有使有副使大理寺有提点有正】

诸监 【有秘书太府少府将作都水诸监监各有太监少监丞主簿惟秘书监有秘书郎秘书郎正字所属著作局有著作郎佐郎校书郎正字其司天监有太史令有司历灵台郎挈壶正五官正丞主簿五官灵台郎保章正司历监候挈壶正司辰刻漏博士典钟典鼓国子监有祭酒司业监丞主簿所属国子学有博士助教】

（臣）等谨按辽之南面官多仿唐制故所设太常寺秘书监诸职略与唐同惟光禄寺以避太宗讳改曰崇禄而称司天台为司天监名稍殊耳然唐志以秘书监次翰林院之后其太常寺等官亦以所掌不同析条分序辽志则自太常以下概称寺官秘书以下概称诸监汇叙不伦使览者无以别其官守之同异且考穆宗纪应历十七年司天台奏月当食不亏则辽固仍称司天台而志别称监与纪互殊此皆秉史笔者未尝参稽同异故失其伦次耳夫辽代事迹宋人闲有纪载然大半得自传闻未足据以核其制度正史之讹遂莫可纠正矣

诸卫 【各卫俱有大将军上将军将军折冲都尉果毅都尉其各卫有亲卫勋卫翊卫左右卫左右骁卫左右武卫左右威卫左右领军卫左右金吾卫左右监门卫左右千牛卫左右羽林军左右龙虎军左右神武军左右神策军左右神威军】

东宫官 【三师府有太子太师太子太傅太子太保太子少师太子少傅太子少保太子宾客院有太子宾客太子詹事院有太子詹事少詹事詹事丞主簿太子司直司有太子司道左春坊有左庶子中允司议郎左谕德左赞善大夫所属文学馆有崇文馆学士直学士太子校书郎司经局有洗马文学校书郎正字典设局有典设郎宫门局有宫门郎右春坊有右庶子中舍人舍人右谕德右赞善大夫通事舍人所属太子家令寺有家令丞主簿率更寺有率更令丞主簿太子仆寺有太子仆丞主簿又有左右卫率府左右司御率府左右清道率府监门率府左右内率府俱有率】

南面宫官

汉儿行宫都部署院 【有汉儿行宫都部署副部署知南面诸行宫副部署同知汉儿行宫都部署事同签都部署司事都部署判官】

（臣）等谨按契丹国志辽南面官有行宫都总管司掌行宫事辽史百官志失载

谨附识于此

十二宫南面行宫都部署司 【有某宫汉人行宫都部署某宫南面副都部署某宫同知汉人都部署】

（臣）等谨按辽代宫卫之制所隶有正户番汉转户之别而皆统于都部署南面所治则汉儿军民也史称圣宗开泰九年改南面行宫都部署为左仆射则都部署亦崇秩云然兴宗重熙十五年除耶律玛鲁耶律信先为是官其称都部署如故意者改制未久旋复旧名欤

南面京官

（臣）等谨按宋职官志一品以下谓之文武官未常参者谓之京官而辽之南面京官则皆分理五京之职固非未常参之谓也自太祖开国临潢建为皇都既并渤海得城邑之居百有三乃葺辽阳故城分建南京太宗援立石晋兼幽涿十六州之地而跨有之遂升幽州为南京而改南京为东京皇都为上京于是三京之名鼎立矣逮圣宗统和二十四年城大定府号曰中京兴宗重熙十三年以云州为西京而五京乃备考其所设京官若留守都总管等职五京略同而上京别置城隍使中京别置文思院诸使南京别置宣徽院诸使至若云州管内宣谕招抚使则别置于西京辽阳大都督渤海承奉都知押班则别置于东京是五京设官又不尽同此犹唐于东京之河阳独设三城使以治租税而西京太原固不必准其制也夫

三京宰相府 【东京中京南京各有宰相有左相右相左平章政事右平章政事】

（臣）等谨按唐制以尚书门下中书三省长官为相职而高祖武德时于陕西诸道分置尚书令仆射左右丞各一人以治管内军民谓之行台尚书省则犹古者以相臣分陕之意辽之设三京宰相府盖其遗制也

诸京客省司 【有使副使】

五京诸使 【五京诸使有上京盐铁使司东京户部使司中京度支使司南京三司使司转运使司西京计司其官有某京某使知某京某使事某京某副使同知某京某使事某京某判官】

五京留守司 【上京东京中京南京西京各有留守司其官有某京留守行某府尹事又有某京副留守知某京留守事某府少尹同知某京留守事同签某京留守事某京留守判官某京留守推官】

五京都总管府 【有某京都总管知某府府事同知某府事】

五京都虞候司 【有某京都虞候】

五京警巡院司 【有某京警巡使副使】

五京处置使司 【有某京处置使】

五京学 【有博士中京别有国子监与朝官同】

上京城隍使司 【有上京城隍使】

东京渤海承奉官 【有渤海承奉都知押班】

辽阳大都督府 【有辽阳大都督】

东京安抚使司 【有东京安抚使】

东京军巡院 【有东京军巡使】

中京文思院 【有中京文思使】

中京路按问使司 【有中京路按问使】

中京巡逻使司 【有中京巡逻使】

中京大内都部署司 【有中京大内都部署副部署】

南京宣徽院 【有南京宣徽使知南京宣徽院使事知南京宣徽院事南京宣徽副使同知南京宣徽院事】

南京处置使司 【有燕京管内处置使】

南京侍卫亲军马步军都指挥使司 【有南京侍卫亲军马步军都指挥使南京马步副指挥使】

南京侍卫亲军马军都指挥使司 【有南京马军都指挥使副指挥使】

南京侍卫亲军步军都指挥使司 【有南京步军都指挥使副指挥使】

南京栗园司 【有典南京栗园】

云州宣谕招抚使司 【有云州管内宣谕招抚使】

（臣）等谨案以上五京院司各官多寡互异名目都不相类要各随时递置因地制宜故员额无所强同惟南京设官独多者则以燕地南面所治之事较繁耳

南面大番府官

黄龙府 【有知黄龙府事同知黄龙府事判官黄龙府侍卫亲军马步都指挥使侍卫亲军都指挥使副指挥使马军都指挥使副指挥使步军都指挥使副指挥使府学有博士助教】

兴中府 【有知兴中府事同知兴中府事判官府学有博士助教】

南面方州官

节度使司 【五京各州府皆有节度使司有节度使节度副使同知节度使事行军司马军事判官掌书记衙官其属有某马步军都指挥使司都指挥使副指挥使某马军指挥使司指挥使副指挥使某步军指挥使司指挥使副指挥使】

观察使司 【中京高州武安州利州东京益州宁州归州宁江州上京永州静州皆有观察使观察副使观察判官其所属州学有博士

助教】

团练使司 【有某州团练使团练副使团练判官其所属州学有博士助教】

防御使司 【有某州防御使防御副使防御判官其所属州学有博士助教】

州刺史 【有某州刺史同知州事录事参军州学有博士助教】

县令 【有某县令丞主簿尉县学有博士助教】

（臣）等谨按天禄五年诏县主簿政事省差注盖是时以中书省为政事省特重亲民之官虽丞簿铨选亦归其权于中书省云

南面分司官

分决诸道滞狱使 【统和九年命邢抱朴等五员又命马守瑛等三员分决诸道滞狱】

按察诸道刑狱使 【开泰五年遣刘涇等分路按察刑狱】

采访使 【会同三年命伊库呼为采访使】

（臣）等谨按分司官不常设有诏则选有材望者为之史称平理庶狱采摭民隐恤民之善政也

南面财赋官

诸钱帛司 【长春路辽西路平州路俱有钱帛司有某州钱帛都点检】

转运使司 【有某转运使转运副使同知转运使转运判官】

（臣）等谨按辽志称西京多边防官南京多财赋官及详其所建置则固不然辽置转运使司凡七日燕京奉圣州蔚州应州朔州保州西山置都转运使司一曰山西路考山西路之设地理志不载其见纪传多矣而皆不确言其所在惟耶律斜轸传云宋将杨继业攻陷山西诸郡各以兵守以宋史业传证之时所攻克者云应寰朔四州也盖云州于辽初为山西路至重熙十三年升州为京以丰奉圣蔚应朔东胜诸州属焉乃不复谓之山西然则奉圣蔚应朔四州转运固分理西京道财赋之官而山西路之都转运又其综理之官也史志徒见转运无西京之名遂止谓南京多财赋官则考之未审也

南面军官

点检司 【有殿前都点检司点检侍卫亲军马步司各有都点检副点检同知都点检】

诸指挥使司 【有侍卫亲军马步军都指挥使司侍卫亲军马军侍卫亲军步军侍卫控鹤兵马侍卫汉军兵马四军兵马归圣军兵马各有都指挥使司指挥署归圣军左右厢兵马第一至第七左右厢兵马各有都指挥使司又宣力军四捷军天圣军汉军各有都指挥使司其官有某军都指挥使副使都监】

诸军都团练使司 【有某军都团练使团练副使团练判官】

（臣）等谨按唐肃宗开元初置诸州团练使岁以八月考其治绩以安民为上考此固方州理民之官监司之职任也自宋以安抚提刑诸使为监司于是团练虽设而无职任遂多为武臣遥领之官如王荣为龙卫都指挥使遥领罗州团练使傅潜为捧日右厢都指挥使遥领富州团练使其名则方州官其实军官也辽之有团练使司固仍唐之旧制而核其官守以置于诸州者谓之方州官置于诸军者谓之军官视旧制亦稍变焉然较宋之名实不相符者固殊矣

诸军兵马都总管府 【有某兵马都总管副总管同知某兵马事某兵马判官】

南面边防官

易州飞狐招安使司兵马司招抚司 【史不详其官】

西南面招安使司 【有西南面招安使】

巡检使司 【有巡检使】

五州都总管府 【穆宗应历初耶律速为义霸祥顺圣五州都总管】

山后五州都管司 【有山后五州都管】

五州制置使司 【开泰九年置霸建宜泉锦五州制置使】

三州处置使司 【太宗时韩德枢为平滦营三州处置使又有霸州处置使】

（臣）等谨按辽之南面边防如易州飞狐山后诸司壤地皆与宋接顾设官甚少较之北面边防官多寡相悬此非备宋之独疏也盖辽初于北面边防设南京兵马都总管府至重熙四年改为南京都元帅府自都元帅而下有总领南面边事之官有兼属南面之都指挥使凡所以备宋者已为详至厥后和议既成聘使往来相继乃渐疏于防范此固辽末诸君习宴安而忘边备而太祖太宗饬边之道其贻谋固未尝不善耳

钦定续通志卷一百三十二

●钦定续通志卷一百三十三 职官略四

职官略 【四】

金元官制上

○金元官制上

金自太宗天会四年置尚书省于是三省并建至熙宗颁新官制而其制乃定然大率循辽宋之旧未有更制海陵正隆元年罢中书门下二省祇置尚书省自省而下官司之号曰院曰台曰司曰寺曰监其在外者曰总管府曰府曰节镇曰防御州曰刺史州曰县各统其属以修其职业有定位员有常数是以终金之世守而弗变焉元太祖肇基朔土以万户统军旅以

断事官治政刑所任用者一二亲贵重臣而已及太宗取中原始立十路宣课司金人来归者则因其故官授之盖亦颇承金制远世祖即位登用老成酌古今之宜定内外之职一代鸿模炳焉大备其设官乃数倍于金矣而官司之号所谓院台司寺监者犹半沿金代之称惟金之总政务者为尚书省元则于至元八年并其事于中书罢尚书不设余亦多所增改以视金制固有殊耳大抵金元开国之初风俗淳朴非有庶务之繁故其制简而官省及抚临四字庶政更新由质而文固其宜也况元之混一南北大辟版图特踰前代又安得不多设之官以牧兹广土哉然元设官虽多于金而其所因革皆可稽考谨录二代之制为一编以志其职掌焉

太师太傅太保 【金为三师秩最尊或为宰臣及将帅加官元太宗即位始建三公世祖时其职常缺仅置太保至成宗武宗而后三公并建遂无虚位】

太尉司徒司空 【金为三公除拜与三师同元制闲置司空又置大司徒于司徒太尉之上且或置或不置其置者或开府或不开府俱无定制】

中书令 【元置中书令一人典领百官会决庶务或以相臣为之或以皇太子为之】

（臣）等谨按金史有尚书令总领纪纲位在左右丞相上而中书令则不载又考宇文懋昭大金国志载中书令侍中位皆居丞相下正隆闲遂罢之则金初虽暂设中书令而品秩不尊元则自至元七年以后立尚书省八年乃罢嗣后废置屡更至武宗至大四年尚书省仍归中书省其职典领百官位视丞相视金初所置秩较重云

右丞相左丞相 【金制左右丞相各一人元与金同统六官率百司居中书令之次令缺则总省事】

（臣）等谨按历代尚左唯元制尚右故右丞相为首揆其左右丞亦皆尚右

平章政事 【金置二人元置四人掌机务贰丞相凡军国重事无不由之】

右丞左丞 【金置左右丞各一人元与金同副宰相裁成庶务号左右辖】

参知政事 【金置二人元与金同副宰相参大政其职亚于左右丞】

（臣）等谨按参知政事起于唐宋金元因之元史百官志作参政宰相表仍作参知政事百官志因省文而误也

参议中书省事 【元置四人典左右文牒为六曹之管辖军国重事咸预决焉元以前各代皆不置】

左右司郎中员外郎 【金置左右司郎中各一人员外郎各一人都事二人元置左

右司郎中各二人员外郎各二人都事四人总理六曹之事】

（臣）等谨按金设尚书省元设中书省其左右丞相以下至左右都事官属职掌悉同唯金之尚书省属有祗候郎君架阁库管句同管句堂食公使副直省局长副局长管句尚书省乐工元之中书省属有断事官客省使副使检校照磨管句架阁库管句等职二代之制略异云

吏部 【金置尚书一人侍郎一人郎中二人员外郎无定员主事四人架阁库管句一人同管句一人官诰院提举二人元置尚书三人侍郎二人郎中二人员外郎二人首领官主事三人】

户部 【金置尚书一人侍郎二人郎中一人员外郎三人主事五人架阁库管句一人同管句检法无定员句当官五人干办官十人又所属有榷货务使副使交钞库使副使判官都监印造钞引库使副使判官钞纸坊使副使判官交钞库物料场官随处交钞库钞纸坊使平准务使副使句当官元置尚书三人侍郎二人郎中二人员外郎三人首领官主事八人其属有都提举万亿宝源库都提举一人提举一人同提举一人副提举一人掌宝钞玉器都提举万亿广源库掌香药纸札诸物都提举万亿绮源库掌诸色緞疋都提举万亿赋源库掌丝绵布帛诸物设官并与宝源库同四库照磨兼架阁库管句一人提举富窰库提举一人同提举一人副提举一人分掌万亿宝源库出纳金银之事诸路宝钞提举司达噜噶齐一人都提举一人副达噜噶齐一人提举一人同提举一人副提举二人知事一人照磨一人宝钞总库达噜噶齐一人大使一人副使三人印造宝钞库达噜噶齐一人大使二人副使二人烧钞东西二库达噜噶齐一人大使一人副使一人行用六库提领一人大使一人副使一人大都宣课提举司掌诸色课程并领京城各市提举二人同提举二人副提举一人其各市又有提领一人大使一人副使一人煤木所提领一人大使一人副使一人大都酒课题举司掌酒醋榷沽之事提举一人同提举二人副提举二人钞纸坊提领一人大使一人副使二人印造茶盐等引局大使一人副使一人京畿都漕运使司掌漕运之事运使二人同知二人副使二人判官二人经历一人知事一人新运粮提举司达噜噶齐一人都提举一人同提举二人副提举一人所属各仓有监支纳大使副使通惠河运粮千户所置中千户一人副千户二人都漕运使司掌御河上下至直沽河西务李二寺通州攒运粮斛之事运使二人同知二人副使二人运判三人经历一人知事一人所属各仓有监支纳大使副使檀景州等处采金铁冶都提举司提举一人同提举一人

副提举一人大都河闲等路都转运盐使司使二人同
知二人副使一人运判二人经历一人知事一人照磨一人各盐场置司令一人司丞一
人山东东路转运盐使司运判一人各盐场置司令一
人司丞一人管句一人河东陕西等路转运盐使司运判一人所属管句一人同管句一
人各提领所正提领一人副提领一人】

礼部 【金置尚书一人侍郎一人郎中一人员外郎一人主事二人又所属有惠民
司令直长都监元置尚书三人侍郎二人郎中二人
员外郎二人成宗元贞元年复增尚书一人领会同馆事首领官主事二人其属有侍仪
使四人通事舍人十六人侍仪舍人十四人引进使知
侍仪事二人承奉班都知一人典簿一人所属法物库提点一人大使副使各一人直长
二人拱卫直都指挥司掌控鹤及仪卫之事达噜噶齐
一人都指挥使四人副指挥使二人僉事二人经历一人知事一人仪从库掌收仪卫器
仗大使一人副使一人仪凤司掌乐工供奉祭享之事
大使五人副使四人经历一人知事一人云和署掌乐工音律及部籍更番之事署令二
人署丞二人管句二人协音一人协律一人安和署设
官职掌与云和同常和署署令一人署丞二人管句二人天乐署署令署丞及管句各二
人协音协律各一人广乐库大使一人副使一人教坊
司达噜噶齐一人大使三人副使四人知事一人兴和署署令二人署丞二人管句二人
祥和署设官职掌与兴和署同广乐库大使一人副使
一人会同馆领会同馆事一人以尚书充大使二人副使二人铸印局大使一人副使一
人直长一人白纸坊大使一人副使一人掌薪司司令
一人司丞二人】

兵部 【金置尚书一人侍郎一人郎中一人员外郎二人主事二人又所属有四方
馆使副使法物库使副使直长承发司管句同管句
元置尚书三人侍郎二人郎中二人员外郎二人首领官主事二人其属有大都陆运提
举司掌两都陆运粮斛之事提举二人副提举一人吏
目一人管领随路打捕鹰房民匠总管府达噜噶齐一人总管一人副总管二人总历一
人知事一人管领本投下大都等路打捕鹰房诸色人
匠都总管府达噜噶齐二人总管一人同知一人副总管一人知事一人东局织染提举
司达噜噶齐一人提举一人副达噜噶齐一人副提举
一人随路诸色民匠打捕鹰房等户都总管府达噜噶齐一人总管一人同知一人经历
一人知事一人管领木位下打捕鹰房民匠等户都总
管府达噜噶齐一人总管一人副达噜噶齐一人同知一人副总管一人判官一人经历
一人知事一人】

刑部 【金置尚书一人侍郎一人郎中一人员外郎二人主事二人架阁库管句一人同管句一人又所属有万宝宫提举司提举同提举庆宝宫提举司提举同提举元置尚书三人侍郎二人郎中二人员外郎二人首领官主事三人司狱司司狱一人狱丞一人司籍所提领一人同提领一人】

工部 【金置尚书一人侍郎一人郎中一人员外郎一人主事二人覆实司管句一人又所属有修内司使副使直长部役官受给官都城所提举司提举左右厢官受给官祇应司提点令丞直长收支库都监同监甄官署令丞直长上林署提点令丞直长花木局都监同监同乐园管句元置尚书三人侍郎二人郎中二人员外郎二人首领官主事五人司程官四人其属有诸色人匠总管府掌百工之技艺达鲁噶齐一人总管一人同知二人副总管二人经历一人知事一人梵像提举司提举一人同提举一人副提举一人吏目一人出蜡局设官同铸泻等铜局大使一人副使一人银局大使一人直长一人鍔铁局大使一人玛瑙玉局直长一人石局大使一人管句一人木局大使一人直长一人油漆局副使一人诸物库提领一人副使一人管领随路人匠都提领所提领一人大使一人诸司局人匠总管府达鲁噶齐一人总管一人副达鲁噶齐一人同知一人副总管一人经历一人知事一人其所隶各库各局俱有大使副使提举右八作司提举二人同提举一人副提举一人左八作司置官如之诸路杂造总管府达鲁噶齐一人总管一人同知一人副总管一人知事一人其所隶局库各置大使副使茶迭儿局总管府达鲁噶齐一人总管一人同知一人知事一人所属局库或置提领或兼置大使副使大都人匠总管府达鲁噶齐一人总管一人同知一人经历一人其所隶各院局有大使副使提领各官随路诸色民匠都总管府达鲁噶齐一人总管一人同知一人副总管一人经历一人知事一人照磨一人其所隶各提举司及收支库设达鲁噶齐提举同提举副提举各官提举都城所提举二人同提举二人副提举二人吏目一人照磨一人受给库提领一人大使一人副使一人符牌局大使一人副使一人直长一人旋匠提举司提举一人副提举一人色特呼济提举司提举一人副提举一人巴什佰里局掌织造御用领袖实实段大使一人副使一人及呼达巴哩局大使一人平则门光熙门窑场及大都皮货所通州皮货所各置提领一人大使副使各一人晋宝路织染提举司提举一人所属各局设提领副提领各官冀宝路及真定路织染提举司各置提举一人同提举一人副提举一人其所隶杂造织染纹锦各局各司或置大使副使提举

同提举副提举院长局副提领各官各随其地又巡河

提领所提领二人副提领一人】

（臣）等谨按唐宋六部郎官皆置四曹金元则不分置各曹惟以部署其名各司其部之事故选任独重其郎中员外郎与尚书侍郎协恭厥职非若唐宋之区以曹司也至六部之制或以吏户礼为左三部兵刑工为右三部此金元初制之所同也或合吏礼为一部兵刑为一部或仍分兵刑为二部吏礼为二部此元代初制之所独也金至熙宗乃分六曹置长贰焉元世祖中统以后员额尚未有定制迨至元二十三年尚书以下始以二员为额其设官之多寡金则事简员少元则事重职烦时与代更有未可执一以例者又考元史志所载隶于户工二部者官职独多盖元自世祖以后规模既远体统相维度支出纳之事山林川泽之需有不得不日趋于繁盛者亦其势使然岂独异于唐宋哉

枢密院 【金置枢密使一人枢密副使一人金书枢密事一人同金枢密院事一人经历一人都事一人掌凡武备机密之事元置知院六人同知四人副枢二人金院二人同金二人院判二人参议二人经历二人都事四人承发兼照磨二人架阁库管勾一人同管勾一人其属客省司大使二人副使二人断事官八人掌处决军府之狱讼经历一人所隶各卫有右卫掌宿卫扈从兼管屯田之事都指挥使三人副都指挥二人金事二人经历二人知事二人照磨一人行军千户所十达噜噶齐十人副达噜噶齐十人千户十人副千户十人弩军千户所一达噜噶齐一人千户一人屯田左右千户所二达噜噶齐二人千户二人蒙古字教授一人儒学教授一人掌诸屯卫行伍战耕之暇习学国字通晓书记由枢府选举后归吏部左卫中卫前卫后卫职掌悉与右卫同置官亦同武卫掌修治城隍及京师内外工役兼大都屯田事达噜噶齐一人都指挥使三人副都指挥使二人金事二人经历二人知事二人照磨一人所属行军千户所七达噜噶齐七人副达噜噶齐七人千户七人副千户七人屯田千户所六达噜噶齐各一人千户六人蒙古字教授一人儒学教授一人隆镇卫掌屯军都指挥使三人副指挥使二人金事二人经历二人知事二人承发兼照磨一人所属北口千户所达噜噶齐一人千户一人其南口白羊口牌楼口古北口迁民镇黄花镇芦儿岭太和岭紫荆关隆镇各千户所设官皆同左右翼屯田万户府掌军屯事两府达噜噶齐各一人万户副万户经历知事各一人所属千户所八达噜噶齐八人千户八人副千户八人又千户所四达噜噶齐四人千户四人副千户四人左卫率府为东宫卫军率使三人副使三人金事二

人经历一人知事一人照磨一人所属行军千户所十达噜噶齐十人千户十人副千户
十人弩军千户所一达噜噶齐一人千户一人屯田千
户所三达噜噶齐三人千户三人蒙古教授一人儒学教授一人阴阳教授一人右卫率
府设官与左卫率府同河南淮北蒙古军都万户府都
万户一人副都万户一人经历一人知事一人巴咱尔万户府万户一人副万户一人经
历知事各一人所属千户所十翼达噜噶齐十人千户
十人副千户十人扎拉噶台万户府万户一人经历知事各一人所属千户所七翼千户
七人托里都万户府万户一人副万户一人经历知事
各一人所属千户所九翼千户九人华善万户府设官与托里都万户府同所属千户所
六翼达噜噶齐四人千户六人副千户四人炮手千户
所一翼千户一人哨马千户所一翼达噜噶齐一人千户一人副千户一人右阿克苏卫
亲军都指挥使司掌宿卫城禁兼管漕河苏沽两州屯
田供给军储达噜噶齐一人都指挥使三人副都指挥使二人僉事二人经历二人知事
二人照磨一人所属行军千户所千户七人把门千户
二人本投下达噜噶齐一人长官副长官各一人庐江县达噜噶齐一人主簿一人儒学
教授一人左阿克苏卫职掌与右阿克苏卫同设官亦
同回回炮手军匠上万户府达噜噶齐一人万户一人副万户一人经历知事各一人所
属千户所三翼达噜噶齐三人千户三人副千户三人
唐古卫亲军都指挥使司总领河西军以备征讨都指挥使三人副都指挥使二人僉事
二人经历照磨知事各二人千户所九翼正千户副千
户各九人儒学教授一人蒙古教授一人桂齐卫亲军都指挥使司达噜噶齐一人都指
挥使二人副都指挥使二人僉事二人经历知事各二
人照磨二人千户所八翼每翼置达噜噶齐一人千户一十六人延安屯田打捕总管府
掌析居放良人户并乌兰济苏田地北来蒙古人户达
噜噶齐一人总管同知各一人经历知事各一人打捕屯田官一十二人大宁海阳等处
屯田打捕所掌北京平滦等路析居放良布噶齐等户
都指挥使三人副都指挥使二人僉事二人经历知事各二人照磨一人所属行军千户
所十翼达噜噶齐十人副达噜噶齐千户副千户各十
人弩军千户所一翼达噜噶齐一人千户一人屯田左右千户所二翼达噜噶齐二人千
户二人西域亲军都指挥使司达噜噶齐一人都指挥
使副都指挥使各二人僉事二人经历知事各二人照磨一人所属行军千户所千户十
三人把门千户二人儒学教授一人宗仁蒙古侍卫亲
军都指挥使司都指挥使三人副都指挥使二人僉事二人经历知事各二人照磨一人
所属蒙古军千户所十翼千户二十人屯田千户所千

户四人儒学教授一人蒙古教授一人山东河北蒙古军大都督府掌各路军民科差及调遣总摄军马公事大都督三人同知一人副使一人
经历一人都事二人照磨一人所属左万户府万户一人副万户一人经历知事各一人千户九翼千户十一人右万户府设官同千户九人巴
图万户府达鲁噶齐一人万户一人副万户一人经历知事各一人千户七翼千户七人哈达万户府达鲁噶齐一人万户一人经历知事各一
人千户八翼千户八人蒙古回回水军万户府达鲁噶齐一人万户一人副万户一人经历知事各一人千户八翼达鲁噶齐二人千户六人奇
图噶万户府达鲁噶齐一人万户一人副万户一人经历知事各一人千户七翼千户七人噶必雅齐千户一翼千户一人洪泽屯田千户一翼
达鲁噶齐一人千户副千户各一人左翼蒙古侍卫亲军都指挥使司都指挥使三人副都指挥使二人僉事三人经历知事各二人照磨一人
千户所七翼正千户副千户各七人知事七人蒙古字教授一人儒学教授一人右翼蒙古侍卫亲军都指挥使司设官与左翼同所属千户所
十二翼正副千户各十二人蒙古字教授一人儒学教授一人虎贲亲军都指挥使司掌领上都路元籍军人兼鄂勒之事设官亦与左翼同所
属锡迪千户翼正达鲁噶齐一人副达鲁噶齐一人正千户副千户各一人知事一人布哈千户翼正达鲁噶齐一人副达鲁噶齐一人正千户
副千户各一人托克托穆尔千户翼正达鲁噶齐一人副达鲁噶齐一人正千户副千户各一人知事一人大呼都拉千户翼正达鲁噶齐一人
副达鲁噶齐一人正千户副千户各一人知事一人扬千户翼正达鲁噶齐一人副达鲁噶齐一人正千户副千户各一人知事一人密喇卜和
卓千户翼正达鲁噶齐一人副达鲁噶齐一人正千户副千户各一人知事一人】

（臣）等谨按枢密院金太祖天辅七年始置掌凡武备机密之事元则制昉于中统四年掌天下兵甲机密之务宫禁宿卫边庭军役征讨戍守节制调度诸务无不由之设院同于金而元制尤重官属亦繁其时或平章议事或分镇制边屡有增设而知院以下所隶者众盖唐宋之制屯田营缮综于工部扈卫统于十六卫率府统于詹事府各有攸属而元悉于枢密院隶之领之以重秩综之以庶政职既不同制亦迥异若元初有行枢密院国有征伐乃置为一方一事而设史称某处行枢密院事已则罢非制所常设故不备列云

大都督府 【元置大都督府管领左右钦察两卫龙翊侍卫东路蒙古军元帅府及万户府哈喇鲁万户府大都督三人同知二人副都督三人僉都督事二人经历都事各二人管勾照磨各一人所隶右钦察卫达鲁噶齐一

人都指挥使二人副使二人佥事二人经历知事照磨
各二人其属行军千户十八所达鲁噶齐各一人千户三十六人屯田千户所二达鲁噶
齐二人千户二人儒学教授一人蒙古字教授一人左
钦察卫都指挥使三人副都指挥二人佥事二人经历知事各二人照磨一人其属行军
千户所十翼千户十人守城千户所一翼达鲁噶齐一
人千户一人屯田千户所一翼设官同有儒学教授一人龙翊侍卫亲军都指挥使司都
指挥使三人副都指挥使二人佥事二人经历一人知
事二人照磨一人其属行军千户所达鲁噶齐一人千户六人副千户一人屯田钦察千
户所达鲁噶齐一人千户一人蒙古字教授一人儒学
教授一人哈喇鲁万户府掌守禁门及应直宿卫达鲁噶齐一人万户一人经历知事各
一人其属千户所三翼千户三人】

（臣）等谨按扈卫禁门及应直宿卫之职唐宋以来皆属环卫及三署郎官卫尉
诸署元则招集哈喇鲁军人六万户府移屯襄阳寻复
改隶大都督府而于扈卫禁门应直宿卫之职则与古未尝不同云

御史台 【金置御史台掌纠察朝仪弹劾官邪勘鞫官府公事凡内外刑狱所属理
断不当有陈诉者付台治之设御史大夫御史中丞
无员额侍御史二人掌奏事判台事治书侍御史二人掌同侍御史殿中侍御史二人遇
朝对立于龙墀之下专劾朝者仪矩监察御史十二人
掌纠察内外非违刷磨诸司察帐监察礼及出使之事其属典事二人架阁库管句一人
检法一人狱丞一人元置御史台大夫二人中丞二人
侍御史二人治书侍御史二人经历一人都事二人照磨一人承发管句狱丞一人架阁
库管句兼承发一人殿中侍御史二人监察御史三十
二人职掌与金同】

行御史台 【元置诸道行御史台以监临各省其江南诸道行御史台监江浙江西
湖广三省统江东江西浙东浙西湖南湖北广东广
西福建海南十道大夫一人中丞二人侍御史二人治书侍御史二人经历一人都事二
人照磨一人架阁库管句一人承发管句兼狱丞一人
监察御史十人陕西诸道行御史台统汉中陇北四川云南四道大夫一人中丞二人侍
御史二人治书侍御史二人经历一人都事二人照磨
一人架阁库管句一人承发管句兼狱丞一人监察御史二十人】

（臣）等谨按御史台金元制略同而设官不一元至元五年始建英宗至治以后
厥制乃定纠察百僚弹劾政治内有监察院隶之外有
廉访司承之执纪纲肃风宪为职纂要至行御史台之职金熙宗皇统二年曾定行台官
品而制不详故金史百官志不载元则至元十四年后

始置是职分江南陕西诸道秩与内台等其所掌统摄各道宪司而总诸内台此其为制内外相维专纠庶政故行御史台设官亦多且重与行枢密院随置随罢因事偶设者不同

肃政廉访司

【元初设提刑按察司至元二十八年改肃政廉访司共二十二道每道廉访使二人副使二人佾事四人两广海南止二人经历知事照磨兼承发管勾各一人其内道八隶御史台有山东东西道济南路置司河东山西道冀宁路置司燕南河北道真定路置司河北河南道汴梁路置司山南江北道中兴路置司淮西江北道广州路置司江北淮东道扬州路置司山北辽东道大宁路置司江南十道隶江南行台江东建康道宁国路置司江西湖东道龙兴路置司江南浙西道杭州路置司浙东海右道婺州路置司江南湖北道武昌路置司岭北湖南道天临路置司岭南广西道静江府置司海北广东道广州路置司海北海南道雷州路置司福建闽海道福州路置司陕西四道隶陕西行台陕西汉中道凤翔府置司河西陇北道甘州路置司西蜀四川道成都路置司云南诸路道中庆路置司】（臣）等谨按元改按察使为肃政廉访司虽监制各路实统隶于内台及各行台故附于御史台之后非若金之按察使不隶于御史台而所掌皆镇抚人民稽察边防军旅诸事且有兼宣抚使之职者故不同云

登闻鼓院 【金置知登闻鼓院同知登闻鼓院事掌奏进告御史台登闻鼓台理断不当事无员额又知法二人以谏官兼之元不置】

登闻检院 【金置知登闻检院同知登闻检院事掌奏进告尚书省御史台理断不当事又知法二人元不置】

（臣）等谨按宋制登闻检院属门下省金制则属御史台故附载于御史各职之后焉

审官院 【金置审官院掌奏驳除授失当事知院一人同知审官院事一人元不置】

（臣）等谨按金制审官院掌封驳事盖唐之给事中宋之司谏正言之职也

谏院 【金置谏院有左谏议大夫右谏议大夫左司谏右司谏左补阙右补阙左拾遗右拾遗皆无员缺元不置】

（臣）等谨按金史百官志审官院列于翰林学士院之后谏院杂于诸监寺之中然其职掌封驳谏诤拾遗补阙各有攸司兹移载于御史台之后以从其类

大宗正府 【金置大宗正府掌敦睦纠率宗属判大宗正事一人同判大宗正事一

人同金大宗正事一人大宗正丞一人章宗太和六年避讳改宗正为睦亲知事一人元置大宗正府扎鲁古齐四十二人郎中二人员外郎二人都事二人承发架阁库管勾一人】

（臣）等谨按金制大宗正府其职奉王命纠宗属而已元初则于府置断事官曰扎鲁古齐会决庶务诸王驸马蒙古色目人等犯公事及汉人有罪悉掌之逮泰定帝致和以后上都太尉所属者归宗正府其路府州县蒙古汉人词讼则悉归刑部焉盖其时上都大都与诸路中外不同故因初制而特加变通云

大司农司 【金宣宗兴定六年置司农司兼采访公事大司农一人卿三人少卿三人知事二人元置大司农司凡农桑水利学校饥荒之事悉掌之置大司农四人卿二人少卿二人丞二人经历一人都事二人架阁库管勾一人照磨一人所属籍田署掌耕种籍田以供宗庙祭祀署令一人署丞一人供膳司掌供给应需货买百色生料达鲁噶齐一人提点一人司令一人丞一人辅用库大使副使各一人兴中州等处油户提领所提领一人大使副使各一人蔚州面户提领所提领一人副使一人永平屯田总管府达鲁噶齐一人总管一人同知一人知事一人所辖昌国济民丰赡三署各置署令一人署丞一人】

（臣）等谨按元大司农司掌农桑储积之事与唐宋略同金则置司农卿以下迭出巡按察官吏臧否而黜陟之使节所过奸吏屏息同于唐宋之观察处置元之廉访意在澄叙官方而于司农之掌迥殊矣

劝农使司 【金置劝农使一人副使一人掌劝课天下力田之事元不置】

三司 【金置三司掌劝农盐铁度支户部三科等事使一人副使一人金三司事一人同金三司事一人掌盐铁度支判官三人参议规措审计官三人知事二人句当官二人管勾架阁库一人知法三人元不置】

（臣）等谨按三司起于唐末五代特重其职至宋而专掌财赋皆以重臣领之金泰和以后以省户部官故置是职然其所以经理财赋者仍不外户部三科之制焉

翰林兼国史院 【金制国史院置监修国史修国史同修国史编修检阅官修辽史刊修官编修官翰林学士院掌制撰词命置翰林学士承旨翰林学士翰林侍读学士翰林侍讲学士翰林直学士翰林侍制翰林修撰应奉翰林文字元置翰林兼国史院承旨六人学士二人侍读学士二人侍讲学士二人直学士二人待制五人修撰三人应奉翰林文字五人编修官十人检阅四人典籍二人经历都事各一人】

（臣）等谨按金制分国史翰林为二院元则以翰林兼国史合为一院又按元一

统志及析津志有滦京翰林分院盖别立官署于上都

者元史百官志不载谨附识于此

蒙古翰林院 【元置蒙古翰林院掌译写一切文字及颁降玺书并用蒙古新字仍各以其国字副之置承旨七人学士二人侍读学士二人侍讲学士二人直学士二人待制四人修撰二人应奉五人经歴都事各一人承发架阁库管句一人所隶蒙古国子监祭酒一人司业二人监丞一人蒙古国子监博士二人助教二人教授二人学正学录各二人】

内八府宰相 【元置内八府宰相掌诸王朝覲宾介之事】

（臣）等谨按元史称内八府宰相遇有诏令则与蒙古翰林院官同译写而润色之其贵近宠异迥越侪等故有宰相之名然终元之世迄无除授宣命之诏惟成宗大德九年以默齐图等八人为之其秩视二品云

集贤院 【元置集贤院掌提调学校征求隐逸召集贤良之士大学士五人学士二人侍读学士二人侍讲学士二人直学士二人经歴一人都事二人待制一人修撰一人兼管句承发架阁库一人所隶国子监祭酒一人司业二人监丞一人典簿一人博士二人助教四人学正二人学录二人兴文署署令一人以翰林修撰兼之署丞一人以翰林应奉兼之典簿一人】

（臣）等谨按唐元宗开元中始置集贤殿书院设学士直学士等职宋仍唐制而与昭文史馆谓之三馆所司者秘书图籍耳惟元之集贤则掌提调学校征求隐逸之事故国子监诸职隶焉而许衡之为国子祭酒实兼集贤大学士盖其职本相统也然则集贤之名虽沿唐宋而官守不同矣至金之国子监则无所隶属而设官悉与元同惟别置国子校勘国子书写官此又与元制稍殊尔

宣政院 【元置宣政院掌释教僧徒及吐蕃之境而隶治之院使十人同知二人副使二人佾院二人同佾三人院判三人参议二人经歴二人都事三人照磨一人管句一人所属断事官四人经歴知事各一人客省司大使二人副使一人大都规运提点所达鲁噶齐一人提点一人大使副使各一人上都规运提点所设官同大都提举资善库达鲁噶齐一人提举同提举副提举各一人上都利贞库提领一人副使一人大济仓监支纳一人大使一人兴教寺管房提领一人吐蕃等处宣慰司都元帅府宣慰使五人经歴都事各二人照磨一人捕盗官二人儒学教授一人图沙玛路军民万户府达鲁噶齐一人万户一人副达鲁噶齐副万户各一人经歴知事各一人西夏中兴河州等处军民总管府达鲁噶齐一人总管一人同知一人治中一人府判一人经歴一人知事一人托克托郭

逊五人洮州元帅府达鲁噶齐一人元帅一人知事一人十八族元帅府达鲁噶齐一人元帅一人同知一人知事一人积石州元帅府设官同复置托克托郭逊一人礼店文州蒙古汉军西番军民元帅府达鲁噶齐一人元帅一人同知一人经历知事各一人蒙古鄂勒官一人相副官一人礼店文州蒙古汉军鄂勒军民千户所达鲁噶齐一人千户副千户各一人礼店文州蒙古汉军西番军民上千户所设官同礼店阶州西水蒙古汉军西番军民总把二人吐蕃等处招讨使司招讨使二人知事一人图沙玛探马军四万户府万户五人千户八人经历一人图沙玛路新附军达鲁噶齐一人千户副千户各一人文扶州西路南路迪延等处万户府达鲁噶齐一人万户二人凤翔等处千户所达鲁噶齐一人千户一人庆阳盩厔等处总把一人文州课程仓粮官一人岷州十八族周迴捕盗官二人昌阳特克城阿布隆等处万户府达鲁噶齐一人千户一人阶文扶州等处番汉军上千户所达鲁噶齐一人千户二人贵德州达鲁噶齐知州各一人同知州判各一人托克托郭逊一人捕盗官一人必鲁万户府达鲁噶齐二人万户四人松潘迭宕威茂州等处军民安抚使司达鲁噶齐一人安抚使一人同知僉事各一人经历知事照磨各一人静州茶上必鲁溪安乡等二十六族军民千户所达鲁噶齐一人千户一人龙木头都留等二十二族军民千户所达鲁噶齐一人千户一人岳希蓬罗卜村等处二十二族军民千户所达鲁噶齐一人千户一人折藏万户府达鲁噶齐一人万户一人吐蕃等路宣慰使司都元帅府宣慰使四人同知二人副使一人经历都事各二人捕盗官三人朵甘思田地里管军民都元帅府都元帅一人经历一人拉玛尔纲等处招讨使司达鲁噶齐一人招讨使一人经历一人本布田地里招讨使一人经历一人本布尔伊斯噶特百姓达鲁噶齐一人碉门鱼通黎雅长河西盩厔等处军民安抚使司达鲁噶齐一人安抚使一人同知副使僉事各一人经历知事照磨各一人六番招讨使司达鲁噶齐一人招讨使一人经历知事各一人天全招讨司达鲁噶齐一人招讨二人经历知事各一人鱼通路万户府达鲁噶齐一人万户一人经历知事各一人碉门鱼通等处管军守镇万户府达鲁噶齐一人万户一人镇抚一人经历知事各一人千户八人长河西管军万户府达鲁噶齐一人万户二人长河西管军招讨使司招讨使二人经历一人朵甘思招讨使一人朵甘思哈达李唐鱼通等处钱粮总管府达鲁噶齐一人总管副总管各一人达勒达托克托郭逊一人哈里托克托郭逊一人朵甘思昂吉尔济密斯千户一人伊实玛尔甘万户府达鲁噶齐一人万户二人乌斯藏

纳喇苏呼鲁逊等三路宣慰使司都元帅府宣慰使五人同知二人副使二人经历一人捕盗官一人纳喇苏呼鲁逊元帅二人乌斯藏管蒙古军都元帅二人达哩管军招讨使一人乌斯藏等处转运一人舒鲁苏田地管民万户一人哈尔巴田地管民万户一人乌斯藏田地管民万户一人苏尔玛嘉斡田地管民官一人萨喇田地管民官一人楚密克万户一人傲兰塔拉万户一人斯达克隆拉万户一人布木古噜万户一人当布持巴千户四人嘉玛斡万户一人嘉裕勒斡万户一人雅埒克巴勒藏策巴万户府达噜噶齐一人万户一人千户一人达里托克托郭逊一人穆尔军万户府达噜噶齐一人万户一人绰珪坚巴千户一人普尔巴官一人】

（臣）等谨按元置宣政院官吏最多皆掌外藩之事每遇吐蕃有事则分院往镇有大征伐则会枢府论议用人则自为选择史称其军民通摄僧俗互用其制不经故不足多也

宣徽院【金置宣徽使掌朝会燕享凡殿庭礼仪及监知御膳有左宣徽使右宣徽使同知宣徽院事同佥宣徽院事宣徽判官所属有拱卫直使司掌本直卫都指挥使副都指挥使钤辖都辖客省使副使掌接伴人使见辞之事引进使副使掌外贡献东上合门使副使佥事西上合门使副使佥事合门通事舍人承奉班都知御院通进尚衣局掌御用衣服冠带有提点使副使都监直长同监仪鸾局掌殿庭铺设提点使副使直长收支都监同监尚食局掌总知御膳有提点使副使直长都监同监尚药局掌汤药茶果有使副使直长都监果子都监同监太医院掌诸医药有提点使副使判官管勾元置宣徽院掌供玉食凡稻粱牲酒庶品及燕享宗戚宾客诸事院使六人同知二人副使二人佥院二人同佥院二人院判二人经历二人都事三人照磨一人承发架阁库一人所属光禄寺卿四人少卿二人丞二人主事二人大都尚饮局提点一人大使一人副使一人上都尚饮局设官同大都尚酝局上都尚酝局设官亦同大都醴源仓提举一人大使副使各一人上都醴源仓大使一人直长一人尚珍署达噜噶齐一人令一人丞二人安丰怀远等处稻田提领所提领二人尚舍寺掌行在帷幄账房陈设之事监二人少监二人监丞二人知事二人诸物库提领一人大使副使各一人阑遣监掌布埒齐人口头匹诸物监一人少监二人监丞二人知事一人尚食局掌供御膳提点一人大使一人副使二人直长二人大都生料库提点二人大使二人副使三人上都生料库提点一人大使一人副使二人直长一人大都太仓及上都太仓各设提举一人大使副使各一人大都上都柴炭局各

置达鲁噶齐一人大都大使一人上都大使三人副使
各二人尚牧所提举一人同提举副提举各一人沙糖局达鲁噶齐一人提点大使副使
各一人永备仓提点一人大使副使各一人丰储仓大
使一人淮东淮西屯田打捕总管府掌献田岁入以供内府达鲁噶齐一人总管一人同
知一人府判一人经历知事各一人淮安州等处各屯
田打捕提举司每司设达鲁噶齐一人提举一人同提举副提举各一人抽分场提领所
凡十所每所各设提领一人同提领副提领各一人满
浦仓大使副使各一人圆米棋子局软皮局各设提领同提领副提领各一人手号军人
打捕千户所达鲁噶齐一人上千户上副千户各一人
龙庆栽种提举司管领缙山岁输梁米并易州等处瓜果桃梨以奉上供达鲁噶齐一人
提举同提举副提举各一人弘州种田提举司掌输麦
面设官同丰润署掌岁入刍粟以给饲养駉马之事达鲁噶齐一人令一人丞一人直长
一人常湖等处茶园都提举司掌摘茶芽以贡内府达
鲁噶齐一人提举同提举副提举各一人提领所七处每所各设正同副提领一人建宁
北苑武夷茶场提领所提领一人】

（臣）等谨按唐宋之制尚食尚舍良酝诸职皆属殿中监及光禄寺而金元则并
载于宣徽院盖掌供玉食及燕享宗戚宾客之事胥隶
于是院与唐宋制不同耳

（臣）等又按金内侍省俱属宣徽院有史常侍给事中内谒者又宫闈局有提点
使副使掌宫中阁门之禁内藏库有使副使掌内府金
宝财物率随库都监等供奉其事虽不专立省署其与唐之内常侍内给事内侍伯内府
局令丞宋之阁院诸司句当官职守无异也

大禧宗禋院 【元置大禧宗禋院掌神御殿朔望岁时讳忌日辰禋享礼典设院使
都典制神御殿事六人同知兼佐仪神御殿事二人
副使兼奉赞神御殿事二人佾院兼祇承神御殿事二人同佾兼肃治神御殿事二人院
判供应神御殿事二人参议二人经历都事各二人管
句照磨各一人所属隆禧总管府达鲁噶齐一人总管一人副达鲁噶齐一人同知一人
治中判官各一人经历知事照磨各一人福元营缮司
达鲁噶齐一人司令一人大使副使各一人普安智金营缮司达鲁噶齐一人司令一人
大使副使各一人佑国营缮都司设官同平松等处福
元田赋提举司达鲁噶齐一人提举同提举副提举各一人又田赋提举司提举一人同
提举副提举各一人资用库提领大使各一人万圣库
提领大使副使各一人会福总管府达鲁噶齐一人总管同知各一人治中府判各一人
经历知事各一人仁王营缮司达鲁噶齐一人司令一

人大使副使各一人襄阳营田提举司达噜噶齐一人提举同提举副提举各一人江淮等处营田提举司设官同大都等路民佃提领所提领一人大使副使各一人会福财用所提领一人大使一人副使二人崇祥总管府达噜噶齐一人总管一人副达噜噶齐一人同知治中府判各一人经历知事提控案赎兼照磨各一人永福营缮司达噜噶齐一人司令一人大使副使各一人昭孝营缮司普庆营缮司设官并同崇祥财用所提领一人大使副使各一人永福财用所设官同镇江稻田提举司达噜噶齐一人提举同提举副提举各一人汴梁稻田提举司平江等处田赋提举司设官同冀宁提领所提领二人隆祥使司使四人同知二人副使司丞各二人经历一人都事二人照磨兼架阁一人普明营缮都司达噜噶齐一人司令一人大使副使各一人知事一人集庆万寿营缮都司设官同元兴营缮都司达噜噶齐二人司令一人大使副使各一人知事一人宜农提举司达噜噶齐一人提举同提举副提举各一人护圣营缮司达噜噶齐一人司令一人大使副使各一人平江善农提举司达噜噶齐一人提举同提举副提举各一人善盈库提领一人大使副使各一人荆襄等处济农香户提举司达噜噶齐一人司令一人提举同提举副提举各一人龙庆州等处田赋提领所提领一人同提领副提领各一人集庆崇禧财用所大使副使各一人寿福总管府达噜噶齐一人总管副达噜噶齐各一人同知治中府判各一人经历知事照磨各一人万安营缮司达噜噶齐一人司令大使副使各一人万宁营缮司设官同收支库提领一人大使一人延圣营缮司达噜噶齐一人司令大使副使各一人诸物库提领一人大使一人】

钦定续通志卷一百三十三

●钦定续通志卷一百三十四 职官略五

职官略 【五】

金元官制下

○金元官制下

太常礼仪院 【金制太常寺卿一人少卿一人丞一人掌礼乐郊庙社稷祠祀之事博士二人检阅二人检讨二人太祝奉礼郎协律郎无员额所属太庙署兼廩牺署令一人丞一人郊社署令丞各一人武成王庙令丞各一人诸陵署提点以涿州刺史兼令丞各一人园陵署令丞各一人以宛平大兴二县丞兼大乐署兼鼓吹署令丞各一人元置太常礼仪院掌大礼乐祭享宗庙社稷封赠谥号等事院使二人同知二人金院二人同金二人院判二人经历一人都事一人照磨兼管勾承发架阁库一人博

士二人奉礼郎二人奉礼兼检讨一人协律郎二人太祝十人礼直管勾一人所属太庙署令二人丞一人郊祀署令丞各二人社稷署令二人丞一人大乐署令二人丞一人】

典瑞院 【元置掌宝玺金银符牌院使四人同知二人金院二人同金二人院判二人经历二人都事二人照磨兼管勾承发架阁库一人】

（臣）等谨按唐宋皆置符宝郎隶门下省辽仍属门下省金则符玺之事掌于礼部符宝郎又属于殿前都点检司元代特置典瑞院崇其秩为正二品则为当时所独创其名典瑞者亦犹周官之遗制也

太史院 【元置掌天文历数之事院使五人同知二人金院二人院判二人经历一人都事一人管勾一人所属春官正兼夏官正一人秋官正兼冬官正中官正一人保章正副各五人掌历二人腹裹印历管勾一人各省司历十二人印历管勾二人灵台郎一人监候副监候各六人掌壶正一人司辰郎二人教授学正各一人校书郎二人】

太医院 【金置太医院提点使副使无定员隶宣徽院元置太医院掌医事及制奉御药物院使十二人同知二人金院二人同金二人院判二人经历二人都事二人照磨兼承发架阁库一人所属广惠司卿四人少卿丞各二人经历知事照磨各一人大都上都回回药物院达噜噶齐一人使二人副使二人御医药院达噜噶齐一人大使二人副使三人御药局达噜噶齐一人局使副使各二人行御药局达噜噶齐一人大使二人副使三人御香局提点司令各一人大都惠民司上都惠民司提点司令各一人医学提举司提举副提举各一人各路提举司提举同提举副提举无定员】

（臣）等谨按唐宋太医署皆为太常寺属员金为宣徽院属员元则特置太医院院使之职二品其设官亦多于前代云

奎章阁学士院 【元文宗天历二年置于兴圣殿西命儒臣进经史书及考论帝王之治大学士四人侍书学士二人承制学士二人供奉学士二人其属参书二人典签二人照磨一人所属羣玉司监司一人司尉一人亚尉一人金司二人司丞二人典簿一人】

（臣）等谨按元置奎章阁学士专掌经史及考论帝王之治犹唐之北门学士称为内相者是也金之置益政院以学问该博者数人兼之以备顾问亦称内相而不设专员其与元之奎章阁固名异而实同者欤

艺文监 【元天历二年置艺文监太监检校书籍事二人少监同检校书籍事二人监丞参检校书籍事二人典簿照磨各一人所属监

书博士二人艺林库藏贮书籍提点大使副使各一人广成局传刻经籍大使副使各一人】

（臣）等谨按元之艺文监掌经籍图书即唐宋辽之弘文院秘阁观书殿昭文馆崇文馆干文阁是也其设官则较前代略少者由其专

以国语敷译儒书及儒书之合校讎者俾兼治之而其实分掌图籍则又有秘书监在焉

侍正府 【元置掌内廷近侍之事侍正十四人同知二人参府二人侍判二人经歴一人都事一人奉御二十四人尚冠奉御副奉御各二人尚衣奉御副奉御各二人尚鞶奉御副奉御各二人尚沐奉御副奉御各二人尚饰兼尚鞶奉御副奉御各二人奉御掌簿四人】

（臣）等谨按元不立内侍省设侍正府皆以四集赛充之以其贵近也其所属供御之事大率皆宦者之职又按刘祁归潜志金代亦有

奉御奉职诸员在宫中近侍局多以贵戚世家恩幸者居其职实与元之奉御相同而金史百官志不载谨附识于此

给事中 【元至元十五年置给事中兼修起居注二人右侍议奉御同修起居注一人左侍议奉御同修起居注一人掌随朝省台院诸司凡奏闻之事悉记录之】

（臣）等谨按唐宋给事中专掌封驳隶于三省记注之事则掌于起居郎及起居舍人金则特置记注院专掌修起居注事元则以给事中修记注是名衔与唐宋相同而职掌异也

将作院 【金置少府监掌营造之事监少监各一人丞二人所属尚方署掌造金银器物图画署掌图画裁造署掌造龙凤车具亭帐铺

陈诸物文绣署掌绣造御用服饰织染署掌织纀色染文思署专造亭帐皆有令丞等官无员额元置将作院掌成造金玉珠翠犀象宝贝冠佩

器皿织造刺绣段疋纱罗异样百色造作院使七人同知二人同丞二人院判二人经歴都事各一人所属诸路金玉人匠总管府达噜噶齐二

人总管副达噜噶齐同知副总管各二人经歴知事各一人玉局提举司提举同提举副提举各一人金银器盒提举司设官同玛瑙提举司提

举同提举各一人阳山玛瑙提举司提举同提举副提举各一人金丝子局大使副使各一人鞞带斜皮局设官同瓘玉局大使一人浮梁磁局

大使副使各一人画局大使一人妆钉局大使一人大小雕木局大使副使各一人宣德隆兴等处玛瑙人匠提举司提举副提举各一人温犀

玳瑁局大使一人上都金银器盒局大使副使各一人漆纱冠冕局设官同大同路采砂所大使一人管匠都提领所提领一人监造诸般宝贝

官达噜噶齐二人收支诸物库大使副使各一人行诸路金玉人匠总管府达噜噶齐总

管同知副总管经歴知事各一人异样局总管府设官
同异样文绣提举司提举同提举副提举各一人绫锦织染提举司纱罗提举司设官并
同砂金颜料总库大使副使各一人大都等路民匠总
管府总管同知副总管经歴知事各一人备章总院大使副使各一人尚衣局达噜噶齐
提举同提举各一人御衣局达噜噶齐提举同提举副
提举各一人御衣史道安局大使副使各一人高丽提举司提举一人织佛像提举司提
举副提举各二人】

（臣）等谨按唐宋将作监专掌营造宫室之事少府监专掌御用服饰元不置少
府监以将作院兼之金置少府监而不设将作院其所
司既同故类列之

通政院 【元置分大都上都管硕达勒达展齐仍兼领汉人展齐大都院使四人同
知二人副使二人金院一人同金一人院判一人经
歴都事各一人照磨兼管勾承发架阁库一人上都院使同知副使金院判官各一人经
歴都事各一人其属廩给司掌诸王诸番各省四方边
远使客饮食供张等事置提领司令司丞各一人】

（臣）等谨按元代幅宇辽广象致往来相望于道初置驿以给使传设托克托郭
逊以辨奸伪寻建是官以总之固有元所独创耳

中政院 【金置卫尉司掌中宫事务有中卫尉副尉左右常侍给事局有使副使掖
庭局有令丞皆无员额元置中政院掌中宫财赋营
造供给并番卫之士汤沐之邑院使七人同知金院同金院判各二人司议掌史各二人
照磨兼管勾承发架阁库一人其属中瑞司掌奉宝册
卿五人丞典簿各二人翊正司供膳服赐予卿四人少卿丞典簿各二人尚工署令一人
丞二人玉列赤局提领大使副使各一人赞仪署设官
司管领六盘山齐哩克口民匠都提举司达噜噶齐都提举各一人同提举副提举各二
人知事一人奉元等五处长官司达噜噶齐长官副长
官各一人提领所凡十各设提领同提领副提领各一人翊正司令五人丞四人典簿二
人照磨一人管领上都等处诸色人匠提举司达噜噶
齐提举同提举副提举各一人管领随路打捕鹰房纳绵等户提举司设官同管领归德
亳州等处管民提领所提领同提领副提领各一人典
饮局大使副使各二人管领大都等路打捕民匠等户总管府达噜噶齐总管同知副总
管经歴知事各一人在京提举司达噜噶齐提举同提
举副提举各一人提领所凡二十五处提领同提领副提领各一人管领诸路打捕鹰房
民匠等户总管府达噜噶齐总管同知各一人副总管
二人经歴二人知事一人照磨一人管民提举司大都等路凡四司每司达噜噶齐提举

同提举副提举各一人提领所大都等路十一所每所
提领二人同提领副提领各一人江浙等处财赋都总管府达鲁噶齐都总管同知副总
管经历知事照磨各一人平江等处提举司凡三每司
各设达鲁噶齐提举同提举副提举各一人丰盈库提领大使副大使各一人织染局局
使一人管领种田打捕鹰房民匠等户万户府万户经
历知事各一人管领大名等处种田诸色户总管府总管副总管各一人管领本投下大
都等处诸色户计都达鲁噶齐达鲁噶齐各一人管领
大都河间等路打捕鹰房总管府总管副总管各一人管领东平等路管民官总管相副
官各一人管领大名等路宣抚司燕京路管民千户所
提领副提领各一人管领曹州等处各提领所每所提领各二人同提领副提领各一人
海西等处万户府达鲁噶齐万户副万户经历知事各
二人哈斯罕等处千户所达鲁噶齐千户副千户各一人诸色人匠齐哩克千户所肇州
千户所设官并同辽阳等处金银铁冶都提举司都提
举同提举副提举各一人管领本位下齐哩克口随路诸色民匠打捕鹰房都总管府达
鲁噶齐都总管同知副总管经历知事照磨各一人管
领诸路打捕鹰房民匠等户总管府达鲁噶齐总管同知副总管经历知事照磨各一人
大都等路管民提举司达鲁噶齐同提举副提举各一
人大都等处提领所提领二人同提领副提领各一人河间等处提领所设官同唐州提
举司达鲁噶齐提举同提举副提举各一人南阳邓州
提领所提领二人同提领副提领各一人唐州泌阳襄阳湖阳汝宁陈州汴梁裕州河南
嵩汝南阳唐州冀宁晋宁各提领所设官皆同河南提
举司达鲁噶齐提举同提举各一人冀宁提举司达鲁噶齐一人提举一人宝昌库提领
大使各一人金银场提领所七每所各设提领同提领
副提领各一人铁冶管勾所二处各设管勾同管勾副管勾各一人奉宸库提点四人副
使二人广禧库达鲁噶齐提举大使各一人副使二人

】

储政院 【金置詹事院有太子詹事少詹事掌总统东宫内外庶务左右卫率府掌
周卫导从仪仗左右监门掌门卫禁钥仆正副仆正
仆丞掌车马厩牧又置掌宝典仪赞仪侍正侍丞典食令丞侍药正奉药正掌饮令丞家
令家丞司经正副正司藏副司仓副中侍局都监同监
左右谕德左右赞善内直郎皆无定员元置储政院备左右辅翼皇太子之任初亦名詹
事院后改为储政院使六人同知金院同金院判司议
长史照磨管勾各二人其属家令司掌饮膳供帐家令家丞各二人典簿二人照磨二人
典幄署令丞各二人府正司掌鞍辔弓矢府正府丞典

簿各二人资武冀用二库提点大使各一人延庆司掌修建佛事使二人同知一人副使典簿各二人典用监掌缎疋宝货卿四人监少监丞各二人经历知事各一人典医监达噜噶齐二人卿三人监少监丞各二人经历知事各一人广济提举司达噜噶齐提举同提举副提举各一人行典药局典药局各置达噜噶齐一人大使副使各二人典牧监卿监少监丞各二人经历知事各一人照磨一人储膳司卿四人少卿丞主事各二人典宝监卿监少监丞各二人经历知事各一人】

东宫官 【金置太子太师太子太傅太子太保太子少师太子少傅太子少保掌保护东宫导以德义元不置】

（臣）等谨按元之储政院初名詹事院仍金制也厥后院署名目递更至文宗而始改定为储政院其实东宫官也兹故以金之东宫诸官附载储政院之后

殿前都点检司 【金置掌亲军总领左右卫有殿前都点检兼侍卫将军都指挥使掌行从宿卫关防门禁殿前左右副都点检亦兼侍卫将军副都指挥使皆无定员殿前都点检判官殿前左右卫将军殿前左右卫副将军俱掌行从宿卫所属符宝郎掌御宝左右宿直将军左右振肃宫籍监掌内外监户有提点监副监丞直长近侍局掌侍从承敕有提点使副使器物局掌进御器械有提点使副使尚厩局掌御马有提点使副使尚辇局亦有使副使鹰坊有提点使副使武库署掌甲仗有令丞武器署掌仪仗有提点令丞直长皆无定员元不直】

（臣）等谨按金制殿前都点检掌宿卫扈直如唐宋十六卫环卫官三署郎之职元之枢密院所辖各卫是也其尚厩尚辇诸局如唐宋之殿中监武库武器诸署如唐宋之军器监是也元则分属于天都留守司及武备寺此又各代官制所不相沿袭者也

左都威卫使司 【元置皆侍卫亲军至元三十一年拨隶中宫使三人副使二人佥事二人经历知事照磨各一人行军千户所千户副千户各二人屯田左右千户所弩军千户所千户各二人资食仓大使副使各一人】

右都威卫使司 【元置属东宫使三人副使二人佥事二人经历知事照磨各一人行军千户所千户副千户各二人屯田左右千户所弩军千户所千户各一人资食仓大使副使各一人儒学教授各一人蒙古字教授一人】

（臣）等谨按唐之左右威卫皆掌禁旅之事而元置左右都威卫使司则皆拨属东宫盖与宋左右率府所掌同然旋即改隶非东宫官属之常制也又按元制各官皆尚右惟左右都威卫司则史志序职以左列右之前其所

以独异于各官者盖不可考今姑仍史家之旧云

卫候直都指挥使司 【元置掌东宫仪从金银器物达噜噶齐都指挥使副指挥使各二人知事一人所属百户所六各置百户二人仪从库大使二人副使一人】

内宰司 【元置掌内府事内宰六人司丞四人典簿二人照磨一人其属典膳署掌内府饮膳之事令丞各二人洪济镇提领三人柴炭局提领大使副使各一人藏珍等库各设提点大使副使各二人提举备用库达噜噶齐提举大使各一人嘉酝局提点大使副使各二人西山煤窑场提领大使各一人副使二人保定路打捕提领所提领四人广惠库大使副使各一人丰裕仓监支纳仓使各一人备物库大使副使各二人】

（臣）等谨按元置内宰司与唐之少监六尚所称尚食尚酝者相似夫宰夫之职若惟刀匕是供者元制则不仅令司典膳凡采薪掌饮及备用仓储丝银粮税皆得领之盖由家令司所改而卒统于宣徽院云

管领齐哩克口诸邑民匠都总管府 【元置达噜噶齐总管同知副总管经历知事各一人所属各提举司达噜噶齐提举同提举副提举各一人典制局大使副使各一人典设署令丞各四人杂造局院长直长各一人】

随路诸色人匠都总管府 【元中统五年命招集析居放良还俗僧道等户习诸色匠艺乃立总管府以司其造作达噜噶齐一人总管二人同知一人副总管二人经历知事各一人上都诸色民匠提举司提举同提举副提举各一人其金银器盒等九局各置大使副使云州提领所提领一人大都等路提举司提举一人双线等局各置提领大使副使无定员成制提举司达噜噶齐一人提举同提举副提举各一人上都大都诸局各置提领大使副使直长等无定员大都鄂勒提领所掌人匠词讼提领一人上都鄂勒提领所同上都异样各局各置大使副使直长等官蔚州定安等处山场提领所提领大使各一人副使二人上都隆典等路杂造局提领大使各一人真定杂造局大使副使各一人珠翠局同】

管领大都等路打捕鹰房膳粉人户总管府 【元至元十四年招集平滦散逸人户置达噜噶齐总管各一人】

（臣）等谨按元制设管领总管府最多如大都等路齐哩克民匠所属有提举提领诸路齐哩克民匠所属提领共二十所各局大使副使数十员至如汴梁江淮等掌屯田土地总管府招功万户都使司各总管府所属提领大使副使几至百余员皆分理人匠承佃之职而非临

民之员不足纪述故附识于此

内史府 【金置亲王府官有傅掌师范辅导参议可否府尉本府长史掌警严侍从司马掌门禁文学掌资广学问记室参军掌表笺书

启皆无定员元置内史府掌王府事内史九人中尉六人司马四人咨议记室各二人其属延庆司掌王府祈禳之事使三人同知二人典簿一

人断事官三人理王府词讼之事经历知事各一人典军司典军副使各二人】

（臣）等谨按王府之官金制又有提举卫绍王家属镐厉王家属及提控巩国公家属等官元又别置诸王傅官凡四十五王每位皆置之员额无定盖因时特设非定制也

随路诸色民匠总管打捕鹰房都总管府 【元置总四鄂尔多位下户计民匠之事达噜噶齐二人都总管一人同知副总管各二人经历知事各一人】

管领保定等路阿哈托摩啰诸色人匠总管府 【元置专掌太祖大鄂尔多事务达噜噶齐总管同知副总管各一人】

管领各提举各局各提领各长官司 【元置管领官最多如曹州东平民匠提举司大都纳绵提举司奉圣州长官司保定织染局丰州鼎济局管领口子迤北长官司随路诸色民匠打捕纳绵民匠大都民匠涿州成锦局河间民匠河间沧州等处长官司河间临邑等处军民长官司随路诸色民匠打捕鹰房等户涿州等处民匠异锦局上用织染局上都大都曲米等官司彰德等处长官司上都大都等处长官司泰安曹州各处长官司大都上都打捕鹰房纳米面提举司大都涿州织染提举司河间路清州人匠提举司大都等处纳绵提举司大都等处金玉民匠稻田提举司大都蓟州等处打捕提举司杂造局齐哩克口诸色民匠上都人匠提领所上都大都提领所归德长官司管领上都大都诸色人匠纳绵户提举司致用库提领司上都人匠局各设达噜噶齐提举同提举副提举长官副长官总管同知副总管提领同提领副提领大使副使或一人或二三人不同】

（臣）等谨按元制各提举提领长官等职皆非要任故总叙于左其专掌太祖及鄂尔多位下者则专载焉

管领打捕鹰房民匠达噜噶齐总管府 【元置掌二皇后鄂尔多位下岁赐财物造作等事达噜噶齐总管同知副总管知事各一人其管领随路诸色民匠打捕总管府掌太祖鄂尔多四季行营事又管领随路打捕鹰房诸色民匠齐哩克口总管府掌太祖鄂尔多位下四季行营事设官亦同】

都护府 【元置掌领旧州城及辉和尔之居汉地者有词讼则听之大都护四人同知副都护各二人经歴都事照磨兼承发架阁库管勾各一人】

（臣）等谨按唐之都护掌征戍元则兼理词讼所谓辉和尔断事官也考史志至元二十年曾以都护改为大理寺则其以听讼之事责成之者重矣然尝设领北庭其于边戍之事又未尝不统焉

崇福司 【元置掌领玛哈锡哩巴拉伊啰勒琨十字寺祭享等事司使四人同知副使司丞各二人经歴都事照磨各一人】

大都留守司 【金置诸京留守司留守一人带本府尹兼本路兵马都总管同知留守事一人副留守留守判官都总管判官推官各一人元置大都留守司掌守卫宫阙及供亿门禁诸政留守五人同知副留守判官各二人经歴一人都事二人管勾承发架阁库一人照磨兼覆料官一人其属修内司提点大使副使各一人直长五人吏目照磨各一人所属八局各置提领同提领副提领管勾提控等官员额或一二人不一祇应司大使副使各一人直长三人吏目一人所属五局各置提领同提领副提领管勾等官又别置器物局掌内府宫殿京城门户寺观公廡及御用器物大使副使各一人直长二人所属十二局各置提领提控管勾大使副使等官员额不一大都城门尉掌门禁尉二人副尉一人特置犀象牙局大使副使直长各一人所属二局有提领管勾等官员额不一大都四窑场提领大使副使各一人南西二窑场及琉璃局各置大使副使一人凡山采木提举司达噜噶齐提举同提举副提举各一人上都采山提领所提领同提领提控各一人管夫匠所亦置提领同提领各二人器备库提点大使各一人副使二人直长四人甸皮局大使一人上林署署令署长直长各一人养种园提领二人花园勾管二人苜蓿园提领三人仪鸾局掌殿庭灯烛张设大使四人副使直长各二人所属提领十六人木场提领大使副使各一人大都路管领诸色人匠提举司提举同提举副提举吏目各一人真定保定大名晋宁各路管匠官大使副使管匠官或一人或三人无定制收支库提点大使各一人副使二人直长二人诸色库大使副使各一人太庙收支诸物库大使副使各一人南寺北寺收支诸物库提领大使各一人副使二人广谊司总和雇和买营缮诸事司令同知副使判官经歴知事各二人照磨一人】

（臣）等谨按唐宋之制诸冶皆属于少府监陈设专掌于殿中监金则专设都城所提举甄官署令丞及上林署提点令丞花木局同乐园都监管勾司其职隶于工部已殊于唐宋之制元则悉综理于大都留守司则与属于

诸监者更不同矣

武备寺 【金置军器监掌修治邦国戎器之事设监少监丞无定员所属军器库有大使副使甲坊署置令丞直长利器署亦置令丞直长皆无定员元置武备寺掌缮作戎器兼典受给卿四人同判六人少卿丞各四人经歴知事各一人照磨管勾各一人所属寿武库利器库广胜库各置提点大使副使达噜噶齐官无定员大同等路军器人匠提举司凡十有四司各有达噜噶齐提举同提举副提举各一人大名军器等局凡十有九局各有局长大使副使各一人】

（臣）等谨按元之武备寺即金之军器监也金制仍唐宋之旧而元始改名武备寺其设官亦多于唐宋盖元时军政饬修缮治戎器之事视前代较繁云

太仆寺 【元置掌马疋事卿少卿丞各二人经歴知事各一人照磨管勾各一人】

尚乘寺 【元置掌上御鞍辔輿辇四集赛阿克塔齐词讼远方马疋等事卿四人少卿丞各二人经歴知事各一人所属资乘库提点四人大使三人副使四人】

长信寺 【元置掌领大鄂尔多齐哩克口诸事卿四人少卿丞各二人经歴知事各一人所属齐哩克口诸色人匠提举司达噜噶齐一人提举同提举副提举各一人大都铁局大使副使各一人上都铁局设官同】

长秋寺 【元置掌武宗五鄂尔多户口钱粮诸事卿五人少卿丞各二人经歴知事各一人所属齐哩克口诸色人匠提举司达噜噶齐一人提举同提举副提举各一人】

承徽寺 【元置掌达尔玛锡里皇后位下事卿五人少卿丞各一人经歴知事各一人所属齐哩克口诸色人匠提举司达噜噶齐一人提举司提举同提举副提举各一人】

长窳寺 【元置掌英宗苏喀巴拉皇后位下事卿六人少卿丞各二人经歴知事各一人】

长庆寺 【元置掌成宗鄂尔多及行幸集赛台人等衣粮之事卿六人少卿二人丞一人经歴知事各一人】

窳徽寺 【元置隶必巴什皇后位下卿六人少卿四人丞二人经歴知事各一人】

太府监 【金置太府掌出纳邦国财用事有监少监丞各官所属左藏库掌货宝财帛有使副使右藏库同太仓使副使掌廩藏出纳酒坊使副使掌酝造典给署有令丞市买司有使副使掌收买宫中诸物无定员元置太府监掌钱帛出纳之数有卿六人监六人少监五人丞五人经歴知事各一人其属内藏库提点四人大使副使各二人其右藏左藏设官皆同】

度支监 【元置掌给马駝刍粟卿三人监二人少监三人监丞二人经历二人知事一人照磨管勾各一人】

利用监 【元置掌出纳皮货卿八人监少监各五人监丞四人经历知事各一人其属资用库提点二人大使三人副使五人齐哩克口皮局人匠提举司提举二人同提举一人杂造双线等八局各置大使副使直长提举同提举副提举管勾各一人】

中尚监 【元置掌大鄂尔多位下齐哩克口诸务及领资成库毡作供内府陈设账房帘幕车舆雨衣之用卿八人监少监各二人监丞二人经历知事照磨各一人所属资成库提点大使副使各三人】

章佩监 【元置掌御服宝带卿五人监四人少监监丞各二人经历知事照磨各一人】

经正监 【元置掌营盘纳钵及标拨投下草地有词讼则治之卿一人监少监各二人监丞二人经历知事各一人】

都水监 【金置都水监掌川泽津梁舟楫河渠之事有监少监无定员兼漕事少监丞二人所属街道司管勾都巡河官掌河防之事无定员又有散巡河官元置都水监亦掌治河渠堤防水利桥梁闸堰之事都水监二人少监一人监丞二人经历知事各一人所属大都河道提举同提举副提举各一人】

秘书监 【金置秘书监掌经籍图书之事监一人少监一人丞一人秘书郎二人校书郎一人所属著作局著作郎著作佐郎各一人笔砚局直长二人书画局直长一人都监无定员元置秘书监亦掌历代图籍监少监监丞各二人典籍一人所属著作郎著作佐郎各二人秘书郎校书郎各二人辨验书画直长一人】

（臣）等谨按元制唯中书令友左右丞相用银印秘书监亦给银印盖异数也其监丞皆用大臣奏荐世家名臣子弟为之又按析津志秘书监有秘书卿元史百官志不载谨附识以资考证云

司天台 【金置提点监少监判官教授司天管勾等官无员额元置提点一人司天监三人少监五人丞四人知事一人所属提学二人教授二人学正二人天文科管勾二人算历科管勾二人三式科管勾二人测验科管勾二人漏刻科管勾二人阴阳管勾一人押宿官二人司辰官八人又置回回司天监提点一人司天监三人少监二人监丞二人知事一人令史二人所属教授一人天文科管勾一人算历科管勾一人三式科管勾一人测验科管勾一人漏刻科管勾一人】

（臣）等谨按司天台之官昉于唐而实则改太史局以置者也金制盖沿唐旧元

代既置太史院乃复踵金制设司天台之官岂一事而分建二署欤考诸史志称授时之政归院学校之设隶监盖当时习测验之学者置有提学教授等官以考其业而天文星学必设专署以省试而第别之然后步算无差耳

上都留守司 【元置职掌同大都留守司兼治民事车驾还大都则领上都诸仓库之事留守六人同知副留守判官各二人经历二人都事四人照磨兼管勾一人其属修内司大使一人副使三人直长三人祖应司大使一人副使二人直长三人器物局大使副使各一人直长二人仪鸾局大使二人副使三人直长二人兵马司指挥使三人副指挥二人知事一人警巡院达鲁噶齐一人警巡使一人副使判官各二人开平县达鲁噶齐一人尹丞主簿尉各一人平盈库大使副使各一人万盈库达鲁噶齐监支纳大使副使各一人广积仓设官与万盈库同万亿库达鲁噶齐提举同提举副提举各一人行用库提点一人大使副使各一人税课提举司提举二人同提举副提举各一人八作司达鲁噶齐提领大使副使各一人饩廩司大使副使各一人】

（臣）等谨按元初置开平府后改为留守司盖世祖相宅龙冈桓州以东滦水以北有都邑繁会之象焉故至元元年加号上都以其阙庭之所近在车驾之所临幸乃特置留守司以治民事是犹唐之有东都宋之有南北京保厘之职盖綦重也

尚供总管府 【元置掌守护东凉亭行宫及游猎供需之事达鲁噶齐一人总管一人同知副总管判官各一人经历知事各一人所属香河等处巡检一人景运仓提点大使副使各一人法物库大使副使各一人】

云需总管府 【元置掌守护察罕诺尔行宫及行营供办之事达鲁噶齐一人总管一人同知副总管判官经历知事各一人】

大都路都总管府 【金置大兴府尹一人掌宣风导俗肃清所部总判府事兼领本路兵马都总管府事同知少尹总管判官府判各一人推官二人元置大都路都总管府达鲁噶齐二人都总管一人副达鲁噶齐二人同知治中判官推官各二人经历知事各二人照磨管勾各一人】

（臣）等谨按金之大兴府即元初燕京路中统五年称中都至元九年改号大都考唐宋于京府或置尹或置牧所以重京畿也此都总管府之所由置欤

大都路兵马都指挥使司 【金置武卫军都指挥使司掌防卫都城警捕盗贼都指挥使副都指挥使各二人副都一人判官一人所属

铃辖司铃辖十人都铃辖四人都将十人元置大都路兵马都指挥使司掌京城盗贼奸伪鞫捕之事都指挥使二人副指挥使五人知事一人所属司狱司司狱丞各一人左右警巡院达鲁噶齐一人副使判官各一人大都提举学校所提学一人教授二人学正二人学录一人】

管领诸路打捕鹰房总管府 【元置达鲁噶齐一人总管副达鲁噶齐同知副总管各一人经历知事各一人所属宛平县达鲁噶齐一人尹一人丞三人主簿三人尉一人大兴县达鲁噶齐一人尹一人丞一人主簿二人尉一人东关厢巡检司巡检三人西南北三厢设官同】

京城门收支器物使 【金置于开阳宣仁安利平化通远宜照利川崇德迎秋广泽顺义迎朔顺常广智各门又置各门尉副尉等官皆无定员元不置】

上京提举皇城司 【金置提举同提举各一人元不置】

南京提举京城所 【金置提举一人同提举一人掌本京城壁及缮修等事所属有管勾受给各官其皇城使副使则专修宫阙元皆不置】

（臣）等谨按金置提举京城所及皇城使掌缮修之事如元两都留守司修内司之职又按金制各宫苑各园皆有管勾少监都监苑使御容殿合门诸员掌缮修陈设等事如元祇应司器物局之职盖金为特置之员无所隶属而元则统属于留守司也

行中书省 【元置行中书省掌国之庶务统郡县镇边鄙凡钱粮兵甲屯粮漕运军国重事无不领之与都省相为表里每省置丞相一人平章一人左右丞各一人参知政事二人甘肃岭北二省各减一人郎中员外郎都事各二人其所置各省河南江北行省江浙行省江西行省湖北行省陕西行省四川行省辽阳行省甘肃行省岭北行省云南行省唯征东行省以征日本置于高丽后即去之初福建亦设行省至元二十二年并入江西二十三年改并入江浙其行省属官有检校所检校照磨所照磨架阁库管勾理问所理问副理问知事都镇抚司都镇抚副都镇抚皆无定员】

（臣）等谨按隋以前有行台省置三省长官及各部曹属唐以后不置杜佑谓唐之诸道采访使所属有判官又兼判尚书行事即行台也然或置或罢无定制元之行中书省统辖各路府凡路府之事必申行省国有大政由中书省札于行省故行省长官慎于选择盖仿古行台之制而变通之者也

宣慰司 【元置掌军民之务分道以总郡县每司宣慰使三人同知副使各一人经

历都事各一人司凡六道山东道河东山西道淮
东道浙东道荆湖北道湖南道】

宣慰使司都元帅府 【元置使三人同知二人副使二人经历知事各二人照磨兼
管勾一人凡置于广东道大理金齿等处蒙庆等处
广西两江道海北海南道福建道八番顺元等处察罕诺尔等处惟蒙庆一府所设官各
减一人广西两江道以下五府则特设都元帅三人副
都元帅佥都元帅事各二人】

宣慰使兼管军万户府 【元置每府宣慰使三人同知副使各一人经历一人都事
二人照磨兼管勾一人凡置于曲靖等路罗罗斯临
安广西道元江等处】

都元帅府 【金置掌征伐之事都元帅一人左右副元帅各一人元帅左监军一人
右监军一人左都监一人右都监一人经历一人都
事一人知事一人检法一人正隆六年又立三道都统制府及左右领军大都督三十二
总管泰和六年伐宋又设平南抚军上将军平南冠军
大将军平南龙骧将军平南虎威将军平南荡江将军及中郎将都尉等职皆因事而置
暂设之官也元置都元帅二人副元帅二人经历知事
各一人】

（臣）等谨按都元帅之名起于唐之中叶辽沿其制于北面官设南京都元帅府
金之有都元帅府盖循唐与辽之旧而品秩颇尊然止
以掌征讨之事兵罢则省天会二年伐宋始置元则专设于边境考当时置诸北庭者则
隶吐蕃宣慰司若蒙古军征东二府止置都元帅一人
副一人惟察逊塔拉独置都元帅三员盖边防轻重不同故员额多寡亦异第系常设之
官则与金制殊矣

元帅府 【元置达噜噶齐一人元帅一人经历知事各一人凡所置之处礼店文州
特克城哈哩雅图朵甘思当阳岷州积石州洮州路
图沙玛路十八族惟礼店文州增置同知副元帅各一人其余八府隶吐蕃宣慰司】

（臣）等谨按元之元帅府设镇边境与辽之诸京元帅府同考元史地理志载元
代幅员之广谓其西北有不可以里数限者兹常设元
帅之职于岷洮积石而外意良远矣

宣抚司 【元置每司达噜噶齐一人宣抚一人同知副使各二人佥事一人计议经
历知事各一人凡所置之地广南西道丽江路顺元
等处播州思州叙南】

（臣）等谨按宋置宣抚使以督视军旅故以二府大臣充之事已即罢元则置于
边境专事抚绥非宋宣抚使之职也

安抚司 【元置每司达噜噶齐一人安抚司一人同知副使金事各一人经历知事各一人凡所置之处师壁散毛等洞罗番遏蛮等军】

（臣）等谨按安抚使始于唐宋唐则奉诏巡省宋则统制军旅元则置于边境职掌与宣抚使同亦与唐宋之制异也

招讨司 【金置招讨司使一人副使二人掌招怀降附征讨携贰其属判官勘子官各一人知事一人知法二人元置招讨司达噜噶齐一人招讨使一人经历一人】

按察使 【金置掌审刑使有使副使签按察使事其属有知事知法各官无定员元不置】

诸总管府 【金置掌统诸城隍兵马甲仗总判府事都总管一人同知都总管一人兵马副都总管一人判官一人府判推官各一人元诸总管府达噜噶齐一人总管一人同知治中判官各一人推官二人经历知事各一人】

诸路万户府 【金置诸镇节度使一人掌管军务同知节度使一人通判节度使一人副使判官各一人元置诸路万户府专管军务分上中下三府每府达噜噶齐万户副万户各一人所属镇抚二人上中下各千户所达噜噶齐千户副千户各一人上百户所百户二人下百户所百户一人】

（臣）等谨按金制诸镇掌军务者犹称节度使沿唐宋辽之衔名也元则改为万户府有上中下之殊以管军多寡为别虎符金牌官皆世袭有功则升之俨然雄镇矣

诸防御州防御使 【金置防御使一人掌防捍不虞御制盗贼同知通判判官各一人元不置】

儒学提举司 【元置各行省皆置司统诸路府州学校之事及考校进呈文字每司提举一人副提举一人蒙古提举学校官同】

（臣）等谨按金代祇于府州置文学博士教授等员依宋辽旧制也元则特置于行省无所隶属较金特崇其秩盖亦慎重学校之良制云

都转运使 【金置掌赋税钱谷仓库出纳有使副使判官皆无定员元不置】

都转盐运使司 【金置各盐使司凡七所掌干盐利以佐国用使一人副使二人判官三人管勾二十二人同管勾五人都监八人监同七人知法一人元置转运盐使司三所掌盐课事使二人同知副使各一人运判二人经历知事各一人所属盐场各场司令丞管勾各一人盐

课提举司二所提举同提举副提举各一人所属盐场设官同茶盐转运使一所使同知副使运判官各一人经历知事各一人所属各盐场设官亦同】

诸路总管府 【金置诸府尹一人同知少尹府判推官各一人所属教授一人知法一人元改为总管府达鲁噶齐总管各一人同知治中判官各一人推官二人经历知事各一人所属儒学教授学正学录各一人蒙古教授医学教授阴阳学教授各一人司狱司司狱一人丞一人平准行用库提领大使副使各一人织染局局使副使各一人杂造局局使副使各一人府仓大使副使各一人惠民药局提领一人税务提领大使副使各一人录事司达鲁噶齐录事司候判官各一人】

（臣）等谨按金史百官志诸府录事诸州司候市令司军器库使商税务使各库使都监买物司不隶于各府之下其与元制稍殊者元制每府所置之官皆同金则诸府州属员额多寡互异且有或置或不置者故难画一备载耳

散府 【元分置散府达鲁噶齐一人知府或府尹一人同知判官推官各一人】

（臣）等谨按元之散府或隶诸路或隶宣慰司或隶行省或直隶省部或统州县或不统州县其制无定故其设官亦不备也

诸州 【金置诸州刺史一人同知判官各一人元置诸州达鲁噶齐知州同知判官无定员其州分上中下三等】

诸县 【金置诸县令一人丞主簿尉各一人元置诸县达鲁噶齐一人尹一人丞簿尉各一人】

（臣）等谨按金制大兴宛平为赤县其次为次赤县为剧县在京倚郭为京县自京县而下乃分上中下三等令之品秩亦分等差是犹沿唐宋之制元以大兴宛平属于管领诸路打捕鹰房总管府不分赤剧其各省之州县则分上中下而令之品秩亦殊焉

中都曲使司 【金置掌酝造曲蘖办课有使副使都监皆无定员元不置】

提举南京路榷货事 【金置无员额】

中都商税务司 【金置使一人副使一人都监一人掌办课以佐国用】

中都广备库 【金置使一人副使一人判官一人掌疋帛颜色油漆诸物出纳之事】

永丰库 【金置使一人副使一人判官一人掌泉货金银珠玉出纳之事所属电镀院都监二人】

南京交钞库 【金置使一人副使一人掌出入钱钞之事】

中都流泉务 【金置使一人副使一人掌流通泉货之事所属有中都店宅务管勾

四人】

中都左右厢别贮院 【金置使一人副使一人判官无员额掌拘收退朴等物及出给之事】

中都木场 【金置使一人副使一人判官一人掌拘收材木诸物及出给之事】

中都买物司 【金置使一人副使一人掌收买官中所用诸物都监四人掌支应等事】

京兆府司竹监 【金置管勾一人掌■〈廿耨〉养竹园采斫之事】

诸绫锦院 【金置院于真定平阳太原河间怀州等处使一人副使一人掌织造缎疋之事】

规措京兆府耀州三白渠公事 【金置规措官无员额掌灌溉民田之事】

漕运司 【金置提举一人同提举一人勾当官无员额掌催督起运纲船】

诸仓 【金置使副使掌仓廩蓄积纳租税支給禄廩之事】

草场 【金置使副使掌储积受给之事】

南京诸仓 【金置监支纳官又有草场监支纳官无员额】

南京提控规运柴炭场 【金置使副使无员额】

西京规运柴炭场 【金置使副使无员额】

（臣）等谨按金之设官员简而职陈元之设官额繁而事统其各有攸属者既类列于编而家国天下食货之所需其间至纤至悉凡以利民用而阜民财当必有经理而区画之者未可以其秩卑事琐而谓无足轻重也若金之中都曲使司以下诸职或以办课榷商或以交钞质剂或专掌灌溉之宜或分领漕运之务下至木场竹监锦院纲船悉有以兼司其事而以较有元官制则凡此诸职皆分隶于户部工部宣徽院留守司以及诸路总管府特其名目不同故未可以类叙耳

诸总管府节镇兵马司 【金置兵马司掌巡捕盗贼事都指挥一人副都指挥使二人指挥使一人军使一人左右什将各一人诸府镇

又有都军使都指挥使一人诸防刺州军辖一人诸府州兵马铃辖一人所掌皆同】

诸巡检 【金置中都有东北都巡检使西南都巡检诸州都巡检散巡检皆无定员元巡检司巡检皆属于诸县】

（臣）等谨按巡检始于宋以材武大小使臣充之金犹仍宋制无所隶属元则属于诸县丞簿之下其职卑而其权亦稍杀矣

各讥察使 【金置潼关讥察官孟津渡讥察提举讥察使沿淮讥察使掌纠察非违元不置】

诸边将 【金置诸边有正将副将部将各一人巡守边境元不置】

统军司 【金置统军司使一人掌镇摄封陲副统军判官各一人元不置】

诸明安 【金置明安掌修理军务所属穆昆掌抚辑军户皆无定员元不置】

诸部族节度使 【金置统制各部镇抚诸军副使判官各一人元不置】

诸纛详袞 【金置详袞默济格掌守戍边堡皆无定员元不置】

诸额勒金司 【金置额勒金一人掌部族村寨元不置】

诸图哩 【金置图哩一人掌部落词讼元不置】

（臣）等谨按金代详袞额勒锦诸职犹沿辽制之旧虽名目不异而品秩悬殊要以治其部族之官盖终金之世不废云

诸羣牧所 【金置乌勒呼一人使副使判官各一人掌检校羣牧事元不置】

诸蛮夷长官司 【元置长官司秩如下州有达噜噶齐长官副长官各一人】

各处托克托郭逊 【元置掌辨使臣奸伪正副各一人】

钦定续通志卷一百三十四

●钦定续通志卷一百三十五 职官略六

职官略 【六】

明官制上

○明官制上

明之官制自太祖初下建康设官仍元之旧洪武元年设六尚书皆隶中书省十三年废中书省革丞相诸官乃分其职于六部惟选简才望以备顾问成祖践阼始建内阁以翰林院平驳诸司章奏仁宗登极始以东宫旧臣入阁办事擢杨士奇为礼部侍郎加少保兼华盖殿大学士杨荣为太常卿兼内阁办事由是阁权渐重无异宋辽金元三省长官而六部皆禀受内阁风旨而后行初又改枢密院为都督府分府为五而摄其枢要于兵部改宋辽金元之御史大夫中丞为都御史台为察院分十三道御史并革前代治书殿中诸侍御史名衔而纠劾巡按照刷问拟之任一切责之监察御史设给事中八十余人掌侍从规谏补阙拾遗分察六部之事而纠其弊误权为最重革元置行中书省参政等官用布按二司统摄郡县永乐间于要害之地始遣巡抚仁宣之际添设渐多用都御史侍郎通政卿丞景帝景泰以后悉用都御史洎乎末造一省设有数员官冗而事愈不振矣又明初金陵官制已具后虽定鼎北京而南省之官如故惟事权不属职事高简终明之世不废亦一代之制也

宗人府 【明置宗人府宗人令一人左右宗正各一人左右宗人各一人掌皇九族之属籍以时修其玉牒其属经历司经历一人南京宗人府不置官惟经历一人】

（臣）等谨按孙清宗人府题名碑记明太祖建宗人府以亲王之长领府事以勋

旧大臣佐之其职较唐以后各代为独重故明会典载

于各署之前又按孙承泽春明梦余录英宗正统三年北京始建府治

太师太傅太保 【明制以太师太傅太保为三公无定员无专授或为加衔或为赠官】

（臣）等谨按明代沿唐宋辽金元之制不特置三公之官洪武三年加李善长为太师徐达为太傅时常遇春已赠太保嗣后祇加之勋

威武臣其文臣得加者善长之外惟张居正一人余则皆赠官云

少师少傅少保 【明制以少师少傅少保为三孤亦无定员无专职与三公同】

（臣）等谨按明初三孤无兼领者惟宣宗宣德三年以蹇义为少师杨士奇为少傅夏原吉为少保各辍所领侍左右咨访政事公孤之

官几于专授唐以后历代所未有也又考三孤之官各代所不置惟宋徽宗政和中置而即罢明则独仿周制设是职而不轻授官云

太子太师太子太傅太子太保 【明制以太子太师太子太傅太子太保为东宫三师无定员无专职或为加官或为赠官】

太子少师太子少傅太子少保 【明制以太子少师太子少傅太子少保为东宫三少亦无定员与东宫三师同】

太子宾客 【明制无定员其秩亚于东宫三师三少为尚书侍郎加官间以祭酒都给事中兼之】

殿阁大学士 【明置中极殿大学士建极殿大学士文华殿大学士武英殿大学士文渊阁大学士东阁大学士掌献替可否奉陈规诲点检题奏以平允庶政】

（臣）等谨按明郑晓百官述洪武十五年冬始仿宋制置殿阁学士其时检讨典籍诸官皆得为殿阁大学士宣德初始以侍郎直内阁

景泰以后加至宫保尚书遂与唐宋辽金元之三省长官同其秩焉

（臣）等又按明初罢丞相析中书省之政归六部殿阁大学士祇备顾问鲜所参决仁宣以后加公孤参可否由是内阁拟票而职掌渐

崇然拟票又决于内监之批红以致流弊从生云

吏部尚书侍郎 【明置尚书一人左右侍郎各一人尚书掌天下官吏选授封勋考课之政令侍郎贰之东京吏部尚书一人右侍郎一人】

（臣）等谨按明初六部皆属于中书省洪武十三年诏政归六部而吏部长官尤慎其选较五部为特重

文选郎中员外郎主事 【明置文选司郎中一人员外郎一人主事二人掌官吏班秩迁升改调之事南京吏部文选司郎中一人主事

一人】

（臣）等谨按明初吏部设属部四第一曰总部洪武二十二年改总部为选部二十九年改为文选司而吏部四属部并五部属皆称清吏司即唐宋以来吏部郎官之职也

（臣）等又按唐宋辽金元以主事为曹郎属官与司务检校诸员同列明制升主事为曹郎共理部事各部司务厅司务二人掌催督稽缓勾销簿书职掌仍与唐以后各代同

验封郎中员外郎主事 【明置验封司郎中一人员外郎一人主事一人掌封爵袭废褒赠吏算之事南京吏部验封司郎中一人主事

一人】

（臣）等谨按明之验封即唐宋司封郎官之职金元则皆属吏部郎官不特设司封

稽勋郎中员外郎主事 【明置稽勋司郎中一人员外郎一人主事一人掌勋级名籍丧养之事南京吏部稽勋司郎中一人主事一人

】

（臣）等谨按明之稽勋即唐宋司勋之职金元则皆属吏部郎官不特设司勋

考功郎中员外郎主事 【明置考功司郎中一人员外郎一人主事二人掌官吏考课黜陟之事南京吏部考功司郎中一人主事一人

】

（臣）等谨按明制南京官职皆隶北吏部惟六年考察则属南京考功司焉

户部尚书侍郎 【明置户部尚书一人左右侍郎各一人掌天下田赋之政令稽其版籍之数南家户部尚书一人右侍郎一人】

（臣）等谨按明会典世宗嘉靖时以户部侍郎总理西苑农事后裁又按神宗万历以后增设督理钱法侍郎及督饷侍郎至三四人盖出一时权宜非定制也

十三司郎中员外郎主事 【明制户部分浙江江西湖广陕西广东山东福建河南山西四川广西贵州云南十三司各郎中一人员外郎一人主事二人各掌其分省之事兼领所分两京直隶贡赋及诸司卫所禄俸边镇粮饷各仓场盐课钞关南京户部十三司郎中十三人员外郎九人主事十九人】

（臣）等谨按明会典明初设属部四曰民部度支部金部仓部洪武二十三年改为浙江诸省十二部二十九年改十二部为十二清吏司永乐以后改为十三司

（臣）等又按明制户部属官最多有照磨检校提举副提举典史大使副使几四

十余员南京户部亦有照磨提举大使副使检校等官较他部独多明初又置司农司判录司诸职分掌户部之事盖仿宋金元大司农司之制后皆废不复置悉归其职于户部焉

仓场总督 【明置总督仓场一人专督诸仓或用尚书或用侍郎俱不治部事】

（臣）等谨按明永乐中置京仓及通州诸仓以户部司员经理之宣德五年命李昶为户部尚书专理仓务遂为定制南京亦设总理粮储一人即元粮运提举司之职也

礼部尚书侍郎 【明置礼部尚书一人左右侍郎各一人掌天下礼仪祭祀宴飨贡举之政令南京礼部尚书一人右侍郎一人】

（臣）等谨按唐宋礼部仅掌祠祀若音乐之司唱导之职分隶太常鸿胪元己省并于礼部而祭祀则又分掌于大禧宗祿院番贡则专隶宣政院明则合典乐典教内而宗藩外而诸番上自天官下逮医师膳夫之属靡不兼综故其属四司之外又有教习驸马主事会同馆主事铸印局大使副使教坊司奉玺左右韶舞左右司乐南京礼部亦有铸印局副使教坊司韶舞司乐等官其职较前代独重宪宗成化以后登公孤任宰辅者多由宗伯盖冠于诸部焉

仪制郎中员外郎主事 【明置仪制司郎中一人员外郎一人主事一人正统六年增主事一人掌诸礼文宗封贡举学校之事南京礼部仪制司郎中一人主事一人】

（臣）等谨按明初设属部四其一曰总部洪武二十二年改曰仪部二十九年改为仪制司即前代礼部郎中之职也

祠祭郎中员外郎主事 【明置祠祭司郎中一人员外郎一人主事一人正统六年增主事一人掌诸祀典及天文国恤庙讳之事南京礼部祠祭司郎中一人主事一人】

（臣）等谨按明初沿唐宋之制祠部洪武二十九年改为祠祭司

主客郎中员外郎主事 【明置主客司郎中一人员外郎一人主事一人掌诸番朝贡接待给赐之事南京礼部主客司郎中一人】

（臣）等谨按明制吏礼兵工四部曹属制度职掌大略与唐宋相同而悉改其衔名惟主客则仍唐宋之旧也

精膳郎中员外郎主事 【明置精膳司郎中一人员外郎一人主事一人掌宴飨牲豆酒膳之事南京精膳司郎中一人】

（臣）等谨按唐宋之制鸿胪亦掌宴飨明制专隶礼部初亦仍唐宋之名曰膳部洪武二十九年改曰精膳司

兵部尚书侍郎 【明置兵部尚书一人左右侍郎各一人掌天下武卫官军选授简

练之政令南京兵部尚书一人右侍郎一人】

（臣）等谨按唐初之制军政总于宰辅肃代以后内枢密及神策诸中尉亦专兵柄宋辽金元掌于枢密院兵部祇以稽尺籍储军器而已明则军政无所不掌凡命将出师调度兵食悉属本兵权重而职专此明制之异于前代也

（臣）等又按明制南京各部任轻职简皆为养望之官惟兵部尚书专奉敕谕加参赞机务銜同内外守备官操练军马抚恤人民振举庶务其职较五部特重焉

武选郎中员外郎主事 【明置武选司郎中一人员外郎一人主事一人后增主事至四人掌卫所土官选升调袭替功赏之事南京兵部武选司郎中一人主事一人】

（臣）等谨按明初兵部属部其一曰总部洪武二十二年改曰司马部二十九年改为武选司

职方郎中员外郎主事 【明置职方司郎中一人员外郎二人主事一人掌舆图军制城隍镇戍简练征讨之事南京兵部职方司郎中一人员外郎一人主事一人】

（臣）等谨按兵部四属职掌悉依唐宋之制而改其衔名惟职方则仍其旧

车驾郎中员外郎主事 【明置车驾司郎中一人员外郎一人主事一人掌卤簿仪仗禁卫驿传廐牧之事南京兵部车驾司郎中一人员外郎一人主事二人】

武库郎中员外郎主事 【明置武库司郎中一人员外郎一人主事一人掌戎器符勘尺籍武学薪隶之事南京兵部武库司郎中一人主事一人】

（臣）等谨按兵部所属又有山海关职方主事会同馆大使副使大通关大使副使南京兵部亦有典牧所提领会同馆大使大胜关大使等官盖皆分设而统辖于兵部者也

（臣）等又按明职官志兵部之后有协理京营戎政一人或尚书侍郎或右都御史为之掌京营操练之事嘉靖二十年专命尚书辍部务理戎政另给关防此盖以文臣理京营故与兵部尚书同列耳其后京营武职又重载此官今删去兵部后所列协理京营戎政并入于后京营一条与总督京营戎政并列焉

刑部尚书侍郎 【明置刑部尚书一人左右侍郎各一人掌天下刑名及徒隶勾覆关禁之政令南京刑部尚书一人右侍郎一人】

（臣）等谨按明初刑部设四科科设尚书侍郎各一人洪武十三年删并其数如

各部之制其属十三司之外又有漕运理刑主事照磨

检校司狱等官焉南京刑部亦设照磨司狱

十三司郎中员外郎主事 【明置刑部分浙江江西湖广陕西广东山东福建河南山西四川广西贵州云南十三司各郎中一人员外郎一人主事二人各掌其分省及兼领所分京府直隶之刑名南京刑部十三司郎中十三人员外郎五人主事十四人】

（臣）等谨按明初沿唐宋之制设总部比部都官司门四属洪武二十二年改总部为宪部二十三年分为十二部设官如户部之制而以浙江部兼领云南二十九年改为十二清吏司永乐以后分为十三司

工部尚书侍郎 【明置工部尚书一人左右侍郎各一人掌天下百工山泽之政令南京工部尚书一人右侍郎一人】

（臣）等谨按唐以后各代皆置卫尉太府少府将作军器都水各监分掌营缮工作水利之政明则省并诸监悉归工部此明制之异于前代也

（臣）等又按明初设将作司又置营造提举司皆隶于工部后增设四科科设尚书侍郎各一人洪武二十九年始省并如各部之数而工部所属如所正所副所丞大使副使提举副提举典史诸员几四十人南京亦有所正所副所丞提举大使等官大略与户部同

营缮郎中员外郎主事

【明置营缮司郎中一人员外郎三人主事五人掌经营兴作之事南京工部营缮司郎中一人员外郎一人主事三人】

虞衡郎中员外郎主事 【明置虞衡司郎中一人员外郎二人主事四人掌山泽采捕陶冶之事南京工部虞衡司郎中一人主事二人】

都水郎中员外郎主事 【明置都水司郎中五人员外郎一人主事七人掌川泽陂池桥道舟车织造券契量衡之事南京工部都水司郎中一人员外郎一人主事二人】

屯田郎中员外郎主事 【明置屯田司郎中一人员外郎一人主事三人掌屯种抽分薪炭夫役坟莹之事南京工部屯田司郎中一人主事一人】

（臣）等谨按明洪武六年设总部虞部水部并屯田为四属部二十二年改总部为营部二十九年改四属部为营缮虞衡都水屯田四清吏司中叶以后工部有添设尚书属部一司增置郎中四人主事五人盖因事而置事已则罢非常制也

提督易州山厂 【明制或以尚书或以侍郎督理厂事掌督御用薪炭之事嘉靖后专设主事管理】

都察院 【明置都察院左右都御史各一人穆宗隆庆以后祇置左都御史一人不置右左右副都御史各一人左右僉都御史各二人掌纠劾百司其属经历一人都事一人司务二人照磨检校司狱各一人分十三道监察御史浙江江西河南山东各十人福建广东广西四川贵州各七人陕西湖广山西各八人云南十一人掌纠察内外百司之官邪南京都察院右都御史一人右副都御史一人右僉都御史一人提督操江一人即以副僉都御史为之司务经历都事照磨各一人司狱二人十三道监察御史浙江江西河南山东山西陕西四川云南贵州各二人福建湖广广东广西各三人至嘉靖后恒以一人兼数道不全设】

（臣）等谨按明初仿唐宋辽金元之制设御史大夫中丞侍御史治书侍御史殿中侍御史察院监察御史后改唐制以都御史代大夫副都御史代中丞而治书殿中之职掌亦临时擢用悉以监察御史摄之监察御史至一百十人较前代独多矣至唐宋御史祇有知杂事及左右巡六部监察使诸职掌明则在内有两京刷卷巡视京营巡视光禄巡视仓场巡视内库皇城五城在外有巡按清军提督学校巡盐茶马巡漕巡关攢运印马屯田监军诸职大抵皆奉敕行事复命时则都察院核其称职不称职以闻而河南道独专内外考察其权较诸司为尤重焉

（臣）等又按明永乐十九年遣尚书蹇义诸人巡行天下安抚军民名曰巡抚事毕停遣后定为都御史出使之职兼军务者加提督有总兵者加赞理事重者加总督又有经略总理整饬抚治巡治诸衔然必以都御史任之以便行事也盖仿秦监郡御史唐巡按州县御史之制而其秩较尊大略与元之行御史台同故附载于都察院之后焉

经略使 【明制无专设有兵事则暂敕行事嘉靖中以易州昌平州通州为三辅各置经略使一员寻罢万历中倭侵高丽命都御史以经略使督兵事寻罢熹宗天启元年辽东置经略一员寻并入总督】

总督 【明置总督漕运兼提督军务巡抚凤阳兼管河道一人总督蓟辽保定军务兼理粮饷一人总督宣大山西军务兼理粮饷一人总督陕西三边军务一人总督两广军务兼理粮饷带管盐法兼巡抚广东一人总督四川陕西河南湖广军务一人总督浙江福建江南兼制江西军务一人总督陕西山西河南湖广四川军务一人总督凤阳兼制河南湖广军务一人总督保定地方军务一人总督河南湖广军务兼巡抚河南一人总督九江兼制江西湖广军务一】

总理 【明置总理南直隶河南山东湖广四川军务一人总理河漕兼提督军务一人总理粮储提督军务兼巡抚应天等府一人】

巡抚 【明置巡抚浙江兼提督军务一人巡抚福建兼提督军务一人巡抚顺天兼整饬蓟州等处边备一人巡抚保定提督紫荆等关兼管河道一人巡抚河南兼管河道提督军务一人巡抚山西兼提督雁门等关军务一人巡抚山东督理营田兼管河道提督军务一人巡抚辽东赞理军务一人巡抚宣府赞理军务一人巡抚延绥赞理军务一人巡抚宁夏赞理军务一人巡抚甘肃等处赞理军务一人巡抚陕西赞理军务一人巡抚四川兼提督军务一人巡抚湖广兼赞理军务一人巡抚江西兼赞理军务一人巡抚南赣汀韶提督军务一人巡抚广东兼赞理军务一人巡抚广西地方一人巡抚云南兼建昌毕节地方赞理军务兼督川贵粮饷一人巡抚贵州兼湖北川东提督军务一人巡抚天津赞理军务一人巡抚登莱赞理军务一人巡抚安庐赞理军务一人巡抚偏沅赞理军务一人巡抚密云赞理军务一人巡抚淮扬赞理军务一人巡抚承天赞理军务一人】

抚治 【明置抚治郟阳兼提督军务一人】

赞理 【明置赞理松潘军务一人】

通政使司 【明置通政使司通政使一人左右通政各一人誊黄右通政一人左右参议各一人掌受内外章疏敷奏封驳之事其属经历一人知事一人南京通政使司通政使一人右通政一人右参议一人经历一人】

（臣）等谨按宋辽以通进司掌章奏隶于门下省金以登闻鼓院登闻检院掌奏御进告隶御史台明则专设重臣崇其秩为三品无所隶属此明制之异于各代也

（臣）等又按明初置察言司受章奏洪武十年始置通政司

大理寺 【明置大理寺卿一人左右少卿各一人左右寺丞各一人掌审讞平反之政令其属司务二人左右二寺各寺正一人寺副二人评事四人南京大理寺卿一人右寺丞一人司务一人左右寺正各一人左右评事各三人】

（臣）等谨按明初置磨勘司及审刑司犹沿宋制也永乐初乃定制置大理寺

詹事府 【明置詹事府詹事一人少詹事二人府丞二人其属主簿一人录事二人通事舍人二人詹事掌统府坊局之政事以辅导太子左右春坊大学士各一人庶子各一人谕德各一人中允各二人赞善各二人司直郎各二人清纪郎各一人司谏各二人大学士掌太子士奏请下启笈及讲读之事庶子谕德中允赞善各奉职以从司直清纪郎掌弹劾宫僚司

谏掌箴诲谏戒司经局洗马一人校书二人正字二人

洗马掌经史子集制典图书刊辑之事校书正字掌缮写装潢南京詹事府主簿一人】

（臣）等谨按明初沿唐宋辽金之制置左右率府使副使及文学中舍等员又沿元制称詹事院至洪武二十五年乃改院为府置坊局

诸官然多以尚书侍郎都御史摄职成化以后以礼部尚书侍郎兼掌之嘉靖以后府坊局仅为翰林迁转之阶不置兼掌之官焉

翰林院 【明置翰林院学士一人掌制诰史册文翰之事以考议制度详正文书侍读学士侍讲学士各二人侍读侍讲各二人掌讲读

经史五经博士九人掌专经讲义典籍二人侍书二人待诏六人孔目一人参撰编修检讨庶吉士无定员南京翰林院学士一人孔目一人】

（臣）等谨按明初沿唐宋辽金元之制置弘文馆秘书监后并于翰林院又置学士承旨直学士诸员后裁永乐初以讲读编检参预机

务平驳诸司章奏谓之内阁则内阁即翰林职也后直内阁者皆由尚书侍郎加以宫保不复以翰林官阅章奏而翰林专为文学侍从之臣矣

（臣）等又按明会典翰林院序各寺后今从明史职官志移于国子监之前

国子监 【明置祭酒一人司业一人掌国学诸生训导之政其属绳愆厅监丞一人博士厅五经博士五人率性修道诚心正义崇志广

业六堂助教十五人学正十人学录七人掌讲说经义文字典簿一人典籍一人掌饌二人南京国子监祭酒一人司业一人监丞一人典簿一

人博士三人助教六人学正五人学录二人典籍一人掌饌一人】

（臣）等谨按明会典明初置中都国子监置祭酒司业诸员后裁又按明史职官志以衍圣公序于国子监之后洪武元年授孔子裔孙

希学袭封爵正二品置官属有掌书典籍司乐知印奏差书写各一人世职曲阜知县一人翰林院世袭五经博士二人又五经博士十二人颜

氏一人曾氏一人仲氏一人孟氏一人周氏一人程氏二人邵氏一人张氏一人朱氏二人刘氏一人其教授司教授学录司学录孔颜曾孟四

氏各一人尼山洙泗二书院各学录一人皆前代所未有也

钦定续通志卷一百三十五

●钦定续通志卷一百三十六 职官略七

职官略 【七】

明官制下

○明官制下

太常寺 【明置太常寺卿一人少卿一人寺丞二人掌祭祀礼乐之事总其官属籍其政令以听于礼部其属有典簿二人博士二人协

律郎二人赞礼郎九人司乐二十人天坛地坛朝日坛夕月坛先农坛帝王庙祈谷殿长陵献陵景陵裕陵茂陵泰陵显陵康陵永陵昭陵各祠祭署奉祀一人祀丞二人牺牲所吏目一人提督四译馆少卿一人掌译书之事南京太掌寺卿一人少卿一人典簿一人博士一人协律郎二人赞礼郎七人司乐二人各祠祭署合奉祀八人祀丞七人】

（臣）等谨按明会典协律郎五人赞礼郎三十一人司乐三十一人奉祀十五人祀丞十六人盖嘉靖后所增设者也又按明初作太常司洪武三十年仍依前代之制改司为寺

光禄寺 【明置光禄寺卿一人少卿二人寺丞二人掌祭享燕劳酒醴膳羞之事其属典簿二人录事一人大官珍馐良酝掌醢四署各署正一人署丞四人监事四人司牲司大使副使各一人银库大使一人南京光禄寺卿一人少卿一人典簿一人大官珍馐良酝掌醢四署各署正一人署丞一人】

（臣）等谨按明初沿宋辽金元之制置宣徽院后改为光禄寺

太仆寺 【明置太仆寺卿一人少卿三人寺丞四人掌牧马之政令以听于兵部其属主簿一人常盈库大使一人各牧监监正一人监副一人录事一人各羣羣长一人南京太仆寺卿一人少卿二人寺丞二人主簿一人】

（臣）等谨按洪武四年沿袭旧制置羣牧监专司牧养六年置监于滁州改为太仆寺三十年置行太仆寺于北平永乐以后以行太仆寺为太仆寺其在滁州者为南京太仆寺

鸿臚寺 【明置鸿臚寺卿一人左右少卿各一人左右寺丞各一人掌朝会礼仪之事其属主簿一人司仪司宾二署各署丞一人鸣赞九人序班四十八人南京鸿臚寺卿一人主簿一人司仪司宾二署各署丞一人鸣赞四人序班九人】

（臣）等谨按宋辽金皆置东西上阁门诸使分掌朝会引进之事明初沿元代之制置侍仪使引进使通事舍人诸员洪武三十年改为鸿臚寺省前代合门诸使盖明制不置三省故专掌于鸿臚也

尚宝司 【明置尚宝司卿一人少卿一人司丞三人掌宝玺符牌印章而辨其所用南京尚宝司卿一人】

（臣）等谨按宝玺符牌唐宋辽则掌于三省金则掌于礼部元则特设典瑞院专官掌之明初设符玺郎旋改尚宝司盖沿元制而改易其衔名者也

（臣）等又按明会典尚宝司卿少卿丞无定员盖其后多以勋卫大臣恩荫添注亦以其职掌之简也

吏户礼兵刑工六科 【明置六科各都给事中一人左右给事中各一人吏科给事中四人户科给事中六人礼科给事中五人兵科给事中七人刑科给事中六人工科给事中四人掌侍从规谏稽察六部百司及封驳之事南京六科给事中六人又户科给事中一人管理后湖黄册】

（臣）等谨按唐宋给事中皆属门下省明则无所隶属又按金制封驳掌于审官院给事中为内侍转官元之给事中专掌记注明则以给事中专掌封驳盖沿唐宋之制也

中书科 【明置中书科中书舍人二十人掌书写诰敕制诏银册铁券等事直文华殿东房中书舍人直武英殿西房中书舍人内阁诰敕房中书舍人制敕房中书舍人俱无定员】

（臣）等谨按唐制中书舍人分押尚书六曹佐宰相判案宋制中书舍人行命令制词专主封驳其职綦重明初尝置承敕监司文监考功监又有承天门待诏阁门使观察使未几裁革惟存两房中书舍人为宰相属官职在书写不得升列九卿其由进士者得迁科道部属亦有监生生员布衣能书者俱可为之又有恩荫添注之员员无定额选用轻而职掌简此明制之异于前代也

行人司 【明置行人司司正一人左右司副各一人行人三十七人掌捧节奉使之事南京行人司左司副一人】

（臣）等谨按奉使之官汉以后皆不专设明之行人司虽若规仿周制然时势回异殊为泥古云

钦天监 【明置钦天监监正一人监副二人掌察天文占候推步之事其属主簿一人春夏中秋冬官正各一人五官灵台郎四人五官保章正一人五官挈壶正一人五官监候二人五官司历二人五官司晨八人漏刻博士六人南京钦天监监正一人监副一人主簿一人五官正一人五官灵台郎二人五官监候一人五官司历一人】

（臣）等谨按唐以后各代皆以司天监隶秘书监至元代始特置专官明初置太史监旋改太史院又改为司天监洪武三年定为钦天监又沿元制置回回司天监三十一年罢回回监以其算法隶于钦天监

太医院 【明置太医院院使一人院判二人掌医疗之法其属御医十人吏目十人生药库惠民药局各大使一人副使一人南京太医院院判一人吏目一人惠民药局生药库各大使一人】

（臣）等谨按唐宋尚药局俱属殿中省辽北面官汤药小底属着张户司南面官汤药局属内侍省金太医御药各院属宣徽院明则特

设专官无所隶属盖沿元之制也

内侍省 【明置十二监四司八局司礼监提督太监一人掌督理皇城內一应仪礼刑名及铃束长随当差听事各役关防门禁催督光禄供应等事掌印太监一人掌理内外章奏及御前勘合又秉笔太监随堂太监掌章奏文书照阁票批朱无定员书籍名画等库内书堂六科廊俱有掌司典簿亦无定员内官监掌印太监一人总理管理金书典簿掌司写字监工无定员掌营造宫室陵墓并铜锡妆奁器用暨冰窖诸事御用监掌印太监一人里外监把总二人典簿掌司写字监工无定员掌御前造办司设监掌印太监一人总理管理金书典籍掌司写字监工无定员掌卤簿仪仗帷幙诸事御马监掌印太监一人腾骧四卫营各设监官掌司典簿写字拏马等员象房有掌司等员神宫监掌印太监一人金书掌司管理无定员掌太庙各庙洒扫香灯等事尚膳监掌印太监一人提督光禄太监一人总理一人管理金事掌司写字监工无定员掌御膳及宫内食用并筵宴诸事尚宝监掌印一人金书掌司无定员掌宝玺敕符将军印信印绶监掌印一人金书掌司无定员掌古今通集库并铁券诰敕贴黄印信勘合符验信符诸事直殿监掌印太监一人金书掌司无定员掌答殿及廊庑扫除之事尚衣监掌印太监一人管理金书掌司监工无定员掌御用冠冕袍服及履舄鞞袜之事都知监掌印太监一人金书掌司长随奉御无定员随驾前导警蹕惜薪司掌印太监一人总理金书掌道掌司写字监工及各厂金书监工无定员掌所用薪炭之事钟鼓司掌印太监一人金书司房学艺官无定员管出朝钟鼓及内乐传奇过锦打稻诸杂戏宝钞司掌印太监一人金书管理监工无定员掌造粗细草纸混堂司掌印太监一人金书监工无定员掌沐浴之事兵仗局掌印太监一人提督军器库太监一人掌制造军器火药司属之银作局掌印太监一人掌打造金银器饰巾帽局掌印太监一人掌宫内使用冠鞞针工局掌印太监一人掌造宫中衣服内织染局掌印大监一人掌染造御用及宫内应用缎疋酒醋面局掌印太监一人掌宫中食用酒醋糖酱面豆诸物司苑局掌印太监一人掌蔬菜瓜果浣衣局掌印太监一人掌凡宫人年老及退废者发此局居住其管理金书掌司写字监工俱无定员此外如内府供用库司钥库内承运库各有掌印太监及总理管理金书掌司写字监工等员甲字乙字丙字丁字戊字承运广盈广惠赃罚等库各有掌库太监及贴库金书等员御酒房御药房御茶房牲口房有提督太监及金书近侍等员刻漏房更房鼓房甜食房弹子房各有掌房金书等员灵台有掌印条作有掌作盔甲厂有掌厂及贴

厂金书等员其皇城京城及内外各宫门东西厂各设提督京营文书房礼仪房中书房御前近侍等职皆设长贰在外则守备织造镇守市舶监督仓场诸陵神宫监监军采办粮税矿关等使】

（臣）等谨按阁寺之设祇以给使令备洒扫而已明代设官之多几于寺监职掌无所不有而司礼位尊权重职批红者体侔宰辅以致窃弄威福倒握太阿中叶而还甚且恩荫弟侄列爵公侯紊乱官常褻渎名器神熹之间粮税矿关之使四出无一方不罹厥害卒至大憝济恶宗社沦亡与汉唐祸踵相寻虽有善者莫之补救胪载篇籍诚足为万世之炯戒也

上林苑 【明置上林苑左右监正各一人左右监副各一人左右监丞各一人掌苑囿园池牧畜树种之事其属典簿一人良牧蕃育林衡嘉蔬四署各典簿一人署丞一人录事一人】

（臣）等谨按唐宋上林署属司农寺金属工部元属大都留守司明则特设专官无所隶属此明制之异于前代也

中东西南北五城兵马指挥司 【明置五城兵马司各指挥一人副指挥四人吏目一人掌缉捕及街道沟渠诸事南京五城兵马司指挥各一人副指挥各一人吏目各一人】

（臣）等谨按明特置兵马司指挥专掌缉捕盖沿元制兵马局指挥使之职即金之武卫军都指挥使各代所不置者也

顺天府 【明置顺天府府尹一人府丞一人治中一人通判三人推官一人儒学教授一人训导一人府尹掌京府之政宣化和人劝农问俗府丞兼领学校治中参理府事通判分理粮储推官理刑名其属经历一人知事一人照磨一人检校一人所辖宛平大兴二县各知县一人县丞二人主簿无定员典史一人司狱一人都税司大使一人副使一人宣课司大使四人税课司大使二人税课分司副使二人递运所批验所各大使一人南京应天府设官略同】

武学 【明置京卫武学教授一人训导一人各卫武学教授一人训导二人掌教京卫各卫幼官及应袭舍人与武生以待科举而听于兵部】

（臣）等谨按武学始于唐代宋金亦间一行之然未有专设学校者明之武学盖出特置云

僧录司道录司 【明置僧录司左右善世二人左右阐教二人左右讲经二人左右觉义二人道录司左右正一二人左右演法二人左右至灵二人左右元义二人神乐观提点一人知观一人龙虎山正一真人一人法官赞教掌书各二人阁皂山三茅山各灵官一人太和山提

点一人僧道录司分掌天下僧道】

（臣）等谨按宋辽金各史职官志俱不载僧道之职考金石文辽代僧人有加赠至三公者大金国志载浮屠之教在京曰国师帅府曰僧录僧正道教于帅府置司正曰道录副曰道正以三年为任则金时僧道亦有职官也明之僧道录司大略与金制相同

（臣）等谨按明史职官志载女官六局曰尚宫尚仪尚服尚食尚寝尚功分领二十四司悉依唐制又增设彤史宫正各二人然自永乐以后尽移其职于宦者宫官所存惟尚寝四司而已今纂辑明官制谨将女官六局附识于此即从宋辽元三史志不载女官之例以归画一云

承宣布政使司 【明制定十三布政司浙江江西福建广西四川山东广东河南陕西湖广山西云南贵州各布政司左右布政使各一人左右参政左右参议无定员掌宣播朝廷德泽禁令廉察僚属其属经历一人都事一人照磨一人检校一人理问一人副理问一人提控案牘一人司狱一人库大使副使各一人仓大使副使各一人杂造局军器局宝泉局织染局大使副使各一人】

（臣）等谨按明初沿元代之制置行中书省有平章政事左右丞参知政事洪武九年罢行省平章诸职改为左右布政使参政参议其名虽易其实则仍元之制故初置藩司与六部均重或布政使即为尚书副都御史每出为布政使其时未置巡抚故职重而秩崇也又按明会典陕西布政司所属有茶马司大使副使四川布政司所属有茶课司广西布政司所属有裕民司云南布政司所属有滇池鱼课局皆因时暂设之官云

提刑按察司 【明制各省置按察使一人副使佥事无定员掌一省刑名按劾之事其属经历一人知事一人照磨一人检校一人司狱一人】

（臣）等谨按明仿金制置提刑按察司即宋之提点刑狱元之肃政廉访使也

布政分司诸道 【明制以布政司参政参议分司诸道十三布政司俱有督粮道其分守道则浙江杭嘉湖道宁绍台道金衢严道温处道江西道瑞道湖东道湖西道饶南九江道赣南道山东济南道东兖道海右道山西冀宁道河东道冀北道冀南道陕西关内道关西道西宁道关南道湖西道陇右道河南大梁道河南道汝南道河北道湖广武昌道上荆南道下荆南道荆西道上湖南道下湖南道上江防道下江防道福建兴泉道福宁道漳南道建南道汀南道广东岭东道岭西道罗定道岭北道岭南道四川川西道川北道上下川东道上川南道下川南

道广西桂平道苍梧道左江道右江道贵州安平道贵宁道新镇道思仁道云南临安道腾冲道澜沧道】

（臣）等谨按布政分司各道起于永乐间令方面官巡视民瘼遂定参政参议分理各属州县而江西陕西间设督册道然不常置无定员云

按察分司诸道 【明制以按察司副使佥事分司诸道有提督学道清军道驛传道其分巡道则浙江杭严道宁绍道嘉湖道金衢道江西饶南九江道湖西道南昌道湖东道岭北道山东兖州道济宁道青州海防道济南道海右道海道登莱道辽海道山西冀宁道冀南道雁门道陕西关内道关西道陇右道河西道西宁道河南大梁道汝南道河南道河北道湖广武昌道荆西道上荆南道下荆南道湖北道上湖南道下湖南道沅靖道福建巡海道福宁道兴泉道建南道武平道漳南道建宁道海道汀漳道广东岭东道岭西道岭南道海北道海南道四川上东道下东道川西道川北道上川南道下川南道广西府江兵巡道桂林兵巡道苍梧兵巡道左江兵巡道右江兵巡道贵州贵宁道思石道都清道云南镇普道临元道洱海道金沧道其整饬兵备道则浙江宁绍道嘉兴道温处道台海道江西南瑞道广建道山东临清道武德道曹濮道沂州道辽东道山西雁北道大同道阳和道潞安道岢岚道陕西肃州道固原道临洮道洮岷道靖远道榆林中路道榆林东路道宁夏河西道宁夏河东兵粮道庄浪道汉羌道潼关道湖广辰沅道河南睢东道福建兵备道巡海道广东南韶道南雄道四川松潘道威茂道建昌道重夔道安绵道叙泸道广西分巡五道皆兼兵备不特置贵州威清道毕节道云南曲靖道又有寄衙各道其北直隶之道寄衙于山东者有密云道大名道天津道霸州道寄衙于山西者有易州道口北道昌平道井陘道蓟州永平道南直隶之道寄衙于山东者有太仓道颍州道徐州道寄衙于浙江江西湖广者有苏松道漕储道常镇道庐凤道徽宁池太道淮扬道其外又有河南浙江之协堂道浙江之水利道江西河南四川之屯田道河南之管河道盐法道陕西之抚治商洛道湖南之抚民抚苗道监军道山东之招练道皆因事而置不常设】

（臣）等谨按兵道之设始自仁宗洪熙间遣参政副使沈固刘绍等往各总兵处整理文书商榷机密孝宗弘治中兵部尚书马文升虑武职不修议增副佥各一员敕之由是兵备之员盈直省矣

行太仆寺 【明置行太仆寺卿一人少卿一人寺丞无定员掌各边卫所营堡之马政以听于兵部其属主簿一人】

（臣）等谨按唐宋之制牧马诸监悉隶于太仆寺辽则领于飞龙院元则掌于尚乘寺明则以京员卿贰分驻于外此明制之异于前代也

苑马寺 【明置苑马寺卿一人少卿一人寺丞无定员掌六监二十四苑之马政而听于兵部其属主簿一人各牧监监正一人监副一人录事一人各苑圉长一人】

（臣）等谨按明之苑马寺盖仿唐诸苑监之制特董以卿贰大员则历代所未有也

（臣）等又按明会典以行太仆苑马二寺列于州县之后今从明史职官志序于分司各道之次

都转盐运使司 【明置都转运使一人同知一人副使一人判官无定员专掌盐盐之事其属经历一人知事一人库大使副使各一人各场盐课司大使副使各盐仓大使副使各批验所大使副使各一人】

（臣）等谨按明都转运使凡六两淮两浙长芦河东山东福建大略沿金元之制然前代运使得专其职明则节制于巡盐御史则又异于前代矣

盐课提举司 【明置提举一人同提举一人副提举无定员其属吏目一人库大使副使一人所辖各盐仓大使副使各场各井监课司大使副使各一人】

（臣）等谨按明制提举司凡七四川广东海北黑盐井白盐井安甯五井察罕诺尔职掌同都转盐运使

市舶提举司 【明置提举一人副提举二人掌海外各番朝贡市易之事其属吏目一人】

（臣）等谨按自宋始置市舶仅有数处元则近海诸路悉置焉明仅置于广东沿宋制也

茶马司 【明置大使一人副使一人掌市马之事】

（臣）等谨按明之茶马司专掌互市茶马即宋辽金元榷场之官也

各府 【明置知府一人同知通判无定员推官一人知府掌一唐之政令察属吏之贤否以进于省上之吏部同知通判分掌清军巡捕管粮水利屯田牧马诸事无常职无定员推官理刑名赞计典其属经历一人知事一人照磨一人检校一人司狱一人】

（臣）等谨按明初府分三等上府从三品中府正四品下府从四品后改为正四品计天下府凡一百五十有九

各州 【明置知州一人同知判官无定员知州掌一州之政令其属吏目一人】

（臣）等谨按明制州有二等直隶州视府属州视县而品秩则同计共天下州凡二百三十有四

各县 【明置知县一人县丞一人主簿一人知县掌一县之政县丞主簿分掌粮马巡捕之事其属典史一人管文移出纳】

（臣）等谨按明初县分三等上县知县从六品中县知县正七品下县知县从七品后皆改为正七品计天下县凡一千一百七十有一

儒学 【明置儒学府教授一人训导四人州学正一人训导三人县教谕一人训导二人掌教诲所属生员】

（臣）等谨按唐制都督府始制文学一人以五经教授诸生宋于立学之州军置教授金因之元则多置学生学录诸员然仅置于府州

明则各县亦置以训导佐之

巡检司 【明制各府州县关津要害处皆设巡检副巡检主缉捕之事】

驿丞 【明制府州县置驿丞掌邮传迎送之事】

税课司 【明置税课司大使一人专典税事】

仓库局 【明制府州县各置仓大使副使库大使及织染杂造局大使副使】

河泊所 【明置河泊所官掌收鱼税闸官坝官掌启闭之事】

批验所递运所 【明置批验所大使副使各一人掌验茶盐引递运所大使副使各一人掌递运粮物】

金银局铁冶所 【明置金银局大使副使各一人铁冶所大使副使各一人】

医学阴阳学 【明置医学府正科一人州典科一人县训科一人皆设官不给禄阴阳学府正冲一人州典术一人县训术一人皆设官不给禄】

僧纲道纪各司 【明置府僧纲司都纲副都纲各一人州僧正司僧正一人县僧会司僧会一人府道纪司都纪副都纪各一人州道正司道正一人县道会司道会一人皆设官不给禄】

（臣）等谨按自巡检以至僧道各司皆杂职也各府州县有无多寡不同

五军都督府 【明置中军左军右军前军后军五都督各府置左右都督都督同知都督僉事掌军旅之事各领其都司卫所以达于兵部其属经略都事各一人南京五军都督府不全设官分掌南京卫所以达于南京兵部】

（臣）等谨按明会典都督府掌印官必于亲任公侯伯推举盖重职也又有南京守备一人兼领中军都督府事协同守备一人参赞机务亦必以公侯伯充之洪熙以后始变祖制以内臣同守备明政之不纲即此可见矣

京营 【明制京营有三曰五军营神机营神枢营置总督京营戎政一人协理京营

戎政一人各营设副将参将游击将军佐击将军坐
营号头中军千总把总等官共五百八十六员】

京卫 【明置上直亲军指挥使司二十有六掌番上宿卫以护宫禁不隶五军都督
府又非亲军而亦不隶都督府者十有五其隶都督
府者三十有三各卫有指挥使一人指挥同知二人指挥僉事四人镇抚二人其属经历
一人知事吏目仓大使副使各一人南京京卫指挥使
司共四十九隶亲军卫者十有七余俱分隶南京五都督府设官如京卫】

（臣）等谨按明之京营以卫皇城即宋侍卫马步军指挥使司元武卫隆镇卫诸
职明之京卫有锦衣旗手金吾羽林府军虎贲燕山大
兴济阳济州通州腾骧武骧等二十六卫掌宿卫宫禁即唐宋之十六卫环卫官辽之北
南护卫府金之殿前都点检司元之枢密院各卫之职
而设官独多至若锦衣卫兼掌缉捕刑狱恒以勋戚都督领之恩荫寄禄无定员浸至末
季附势骄横斯有明之弊政也

王府护卫仪卫各司 【明置王府护卫指挥使司设官同京卫又置仪卫司仪卫正
一人仪卫副二人典仗六人其护卫掌防御非常仪
卫掌侍卫仪仗】

各总兵官 【明置总兵官副总兵参将游击将军守备把总无品级无定员其总兵
挂印者或称将军或称副将军其镇守各省有镇守
蓟州总兵官一人副总兵三人分守参将十一人游击将军六人统领南兵游击将军三
人领班游击将军七人坐营官八人守备八人把总一
人提调官二十六人镇守昌平总兵官一人分守参将三人游击将军二人坐营官三人
守备十人提调官一人镇守辽东总兵官一人副总兵
一人分守参将五人游击将军八人守备五人坐营中军官一人备御十九人镇守保定
总兵官一人分守参将四人游击将军六人坐营中军
官一人守备七人把总七人忠顺官二人镇守宣府总兵官一人副总兵一人分守参将
一人游击将军三人坐营中军官二人守备三十一人
镇守大同总兵官一人副总兵一人游击将军二人入卫游击将军四人坐营中军官二
人守备三十九人镇守山西总兵官一人副总兵一人
分守参将六人游击将军一人坐营中军官一人守备十三人操守二人镇守延绥镇总
兵官一人副总兵一人分守参将六人游击将军二人
入卫游击四人守备十一人坐营中军官一人镇守宁夏总兵官一人副总兵一人分守
参将四人游击将军三人入卫游击一人守备三人坐
营中军官二人管理镇城都司一人管理水利屯田都司一人镇守甘肃总兵官一人副
总兵一人分守副总兵一人分守参将四人游击将军

四人坐营中军官一人守备十一人领班备御都司四人镇守陕西总兵官一人副总兵一人分守参将五人游击将军四人坐营中军官二人守备八人镇守四川总兵官一人副总兵一人协守参将二人游击将军二人守备六人镇守云南总兵官一人分守参将三人守备二人巡抚中军坐营官一人镇守贵州总兵官一人加提督麻阳等处地方职衔分守参将二人守备七人巡抚中军官一人镇守广西总兵官一人分守参将五人守备三人坐营官一人镇守湖广总兵官一人分守参将三人守备十一人把总一人镇守广东总兵官一人副总兵一人分守参将七人练兵游击将军一人守备五人坐营中军官二人把总四人提督狼山副总兵一人镇守江南副总兵一人分守参将二人游击将军一人守备六人凤阳军门中军官一人把总十三人镇守浙江总兵官一人分守参将四人游击将军二人总捕都司一人把总七人分守江西参将一人守备四人把总六人镇守福建总兵官一人分守参将一人守备三人把总七人坐营官一人镇守山东总兵官一人总督备倭都司一人领蓟镇班都司四人又河南守备三人总督漕运总兵官一人兼理河南协同督运参将一人把总十二人】

留守司 【明置留守司正留守一人副留守一人指挥同知二人掌中都兴都守御防护之事其属经历一人都事断事副断事吏目一人】

（臣）等谨按宋制留守以枢密使殿阁大学士充元制大都上都二留守司兼尹牧之任皆文职也明则以留守司为武秩秩同各卫盖与前代衔名同而职守异焉

都指挥使司 【明置都指挥使一人都指挥同知二人都指挥僉事二人掌一方之军政各率其卫所以隶于五府而听于兵部其属经历都事断事副断事吏目司狱仓场草场大使副使各一人】

（臣）等谨按明制都指挥使为都卫节制方面职系甚重凡朝廷有事表笺序衔布按二司上故与布按称三司盖一省守土之官也初分置于十三省后增辽东大宁万全卫计天下都司凡十有六又于陕西山西福建四川湖广置行都司云

各卫各所

【明制各卫设官如京卫统属于都司及留守司各所设千户所正千户一人副千户一人镇抚二人其属吏目一人所辖百户所凡十共百户十人总旗二十人小旗百人其守御千户所军民千户所设官并同皆隶于都司】

（臣）等谨按洪武七年申定卫所之制递相统辖计天下内外卫凡五百四十有

九所凡二千五百九十有三

宣慰司 【明置宣慰使一人同知一人副使一人佥事一人经历都事各一人】

（臣）等谨按元宣慰司掌军民之务以统郡县明则为土官武职此衔名同而职守异也

宣抚司 【明置宣抚使一人同知一人副使一人佥事一人经历知事照磨各一人】

（臣）等谨按宋以枢密重臣为宣抚掌宣布威灵抚绥边境及统护将帅其职最重元宣抚司置于广南西道亦掌政令明则以宣抚使为上官武职

安抚司 【明置安抚使一人同知一人副使一人佥事一人吏目一人】

招讨司 【明置招讨使一人副招讨一人吏目一人】

（臣）等谨按宋制招讨使亦以大臣充之有征讨则置金招讨使掌招怀降附征讨携贰元招讨使则多置于沿边诸要地明则略仿元制而为土官武职品秩职守皆与宋金异也

各长官司 【明置长官司长官一人副长官一人吏目一人蛮夷长官司长官副长官各一人又有蛮夷官苗民官千夫长副千夫长等官】

军民府土州土县 【明置军民府土州土县设官同府州县】

（臣）等谨按明土官武职又有番部都指挥使司卫指挥使司万户府千户所皆因其俗以附寨番人官其地羁縻之而已

钦定续通志卷一百三十六

●钦定续通志卷一百三十七 职官略八

职官略 【八】

历代王侯封爵

○历代王侯封爵 【公主并官属附】

宋爵一十二等王嗣王郡王国公郡公开国公开国郡公开国县公开国侯开国伯开国子开国男皇子兄弟封国谓之亲王亲王之子承嫡者为嗣王宗室近亲承袭特旨者封郡王遇恩及宗室祖宗后承袭及特旨者封国公余宗室近亲并封郡公其食邑沿唐制王食五千户郡王国公三千户特加者不在此数其开国公侯伯子男皆随食邑公二千户以上侯一千五百户以上伯七百户以上子五百户以上男三百户以上分国三等大国二十七次国二十小国二十凡亲王府有傅长史司马咨议参军友记室参军王府教授小学教授傅及长史司马有其官而未尝除太宗太平兴国七年诸王出合楚王府置咨议参军二人翊善二人陈王府置

咨议翊善各一人继又置记室及诸王府侍讲一人并以常参官充其后咨议翊善多不置记室或止一员真宗大中祥符九年仁宗初封寿春郡王置友二员亦以常参官充天禧二年进封升王友迁咨议仍置记室一人后惟增置教授属于太宗正司凡公主亦如唐制分大长公主长公主公主郡主县主等封号皆不置官属辽封爵惟国王郡王国公三等其初宗室与勋戚无异道宗太康五年诏惟皇子封一字王余并削降其王府官属北面官有亲王祇应司王子院有王子太师王子太保王子司徒王子司空王子班郎官南面官王傅府有王傅亲王内史府有内史长史参军诸王文学馆有诸王教授诸王伴读又北面官有驸马都尉府掌公主宅帐之事

金封爵郡王国公郡公郡侯郡伯 【初称县伯章宗承安二年更】 县子县男凡七等其食邑略如唐宋之制凡食邑五千户者实封五百户余视此分国三等大国之号二十次国三十小国三十封王之郡号十封公主之县号三十其王府官有傅府尉长史司马文学记室参军

元爵视金惟郡王上多王一等其初宗室驸马通称诸王无位号之别惟视印章以为轻重后始有国邑之名其制封一字王者金印兽纽两字王者金印螭纽次有金印驼纽金镀银印驼纽金镀银印龟纽有止用银印龟纽各分等级有同姓无国邑而称王者但曰宗王诸王傅官库春布哈太子至齐王位下凡四十五王每位下各设王傅傅尉司马三员傅尉惟库春布哈额布根谔尔根王有之自此以下皆称府尉

明制亲王授金册金宝皇太子之次嫡子及庶子年十岁立为王世子授以涂金银册银印亲王嫡长子年十岁立为王世子授以涂金银册银印次子及庶子年十岁皆封郡王册印亦如之郡王次子授镇国之孙辅国次曾孙奉国皆将军凡三等次元孙镇国次五世孙辅国次六世孙奉国皆中尉凡三等其禄米亲王岁万石郡王六千石郡王诸子年十五人赐田六十顷为永业除其租其王府官属长史司左右长史各一人其属典簿一人审理所审理正一人副一人典膳所典膳正一人副一人奉祠所奉祠正一人副一人典乐一人典宝所典宝正一人副一人纪善所纪善二人良医所良医正一人副一人典仪所典仪正一人副一人伴读四人教授无定员引礼舍人三人仓大使副使各一人郡王府教授一人典膳一人镇国将军教授一人神宗万历年间周府设宗正一人后各府亦渐置郡王府增设教授一人凡王府护卫指挥使司设官如京卫其王府仪卫司仪卫正一人副二人典仗六人仪卫掌侍卫仪仗护卫掌防御非常护卫王邸有征调则听命于朝凡功臣外戚封爵三

等曰公侯伯有流有世功臣则给铁券岁禄以功为差公主亦有大长公主长公主公主凡尚主者皆称驸马都尉位在伯上其尚郡主县主郡君县君乡君者并曰仪宾洪武七年公主府设家令一人司丞一人录事一人二十三年改家令为中使司以内使为之

（臣）等谨按自唐迄元朝廷无裂土以王子弟者明太祖洪武三年立长子标为皇太子封第二子椿为秦王次纲晋王棣燕王橚吴王楨楚王椿齐王榑潭王■〈木巳〉赵王檀鲁王侄孙守谦靖江王置藩府于各直省设官属护卫其后或徙封或续封谓当恪守藩屏夹辅王室世有茅土以图盘石之安乃未几而周王子有■〈火动〉告其父橚谋反词连燕齐湘三王惠帝纷纷削夺致起靖难之师及成祖即位还齐岷二王故封不数年而榑以凶暴骄纵梗以沉湎擅杀仍坐废黜沿至武宗朝宸濠包藏祸心觊觐生变设非王守仁御侮得宜又将惠及宗社皆由太祖泥古好名举行封建以阶之厉而基之祸伏读御批通鉴辑览谓师古而不知度今务名而以致害实诚笃论也

散官

勋官

命妇

△散官

文散官

武散官

文散官

开府仪同三司

唐制以开府仪同三司为文散官第一阶即不带职官亦与朝参禄俸宋承唐制亦以开府仪同三司为散官第一阶辽不置金文散官上曰开府仪同三司中曰仪同三司元与金同明不设

（臣）等谨按唐制仪同三司以罢职就闲者居之至宋则神宗元丰八年以韩绛为开府仪同三司判大名府自是而后凡执政外戚率加此职遂为恩宠之秩与唐制异矣

特进

唐制文散官特进亦与朝参禄俸宋承唐制【按宋自徽宗政和以后诏特进非宰相不除】辽不置金一品文散官中次曰特进下曰崇进元与金同明亦置特进省崇进

（臣）等谨按唐虽置特进之阶然授者甚少宋自元丰更定官制省左右仆射以特进换之故宰臣王安石以仆射改特进政和后辞昂

白时中皆以特进为宰臣是宋制不以特进为散官竟为执政之要秩与前代之制异矣金代以降仍为散秩云

光禄大夫 【荣禄大夫附】

唐制文散官以光禄大夫为二品金紫光禄大夫银青光禄大夫为三品宋制皆为二品上曰金紫光禄大夫次曰银青光禄大夫又次曰光禄大夫辽不置金正二品官阶金紫光禄大夫银青光禄大夫从二品光禄大夫荣禄大夫元与金同皆阶一品明亦置特进光禄大夫特进荣禄大夫光禄大夫荣禄大夫皆阶一品

资德大夫 【资政资善大夫附】

金制正三品阶上曰资德大夫中曰资政大夫下曰资善大夫元亦置资德大夫资政大夫资善大夫皆阶二品明与元同

（臣）等谨按资德资政资善三阶宋以前各代俱无盖创制于金而元明因之也

正奉大夫 【通奉宣奉正议中奉大夫附】

宋制三品阶有正奉大夫宣奉大夫通奉大夫正议大夫金制从三品阶有正奉大夫通奉大夫中奉大夫元与金同皆从二品明亦如之

（臣）等谨按宋元丰更定官制大率沿唐之制无正奉宣奉通奉诸阶至徽宗大观中始有斯号自后历代沿之惟改宣奉为中奉云

通议大夫 【大中大夫以下附】

宋制四品阶有通议大夫大中大夫金四品阶正四品上曰正议大夫中曰通议大夫下曰嘉议大夫从四品上曰大中大夫中曰中大夫

下曰少中大夫元与金同皆阶三品 【按元沿金制惟改少中曰亚中】 明沿制不易

中大夫 【中奉大夫以下附】

宋制五品阶正五品曰中大夫从五品曰大中大夫中散大夫金五品阶正五品上曰中议大夫中曰中宪大夫下曰中顺大夫从五品上

曰朝请大夫中曰朝散大夫下曰朝列大夫元与金同皆阶四品明沿元制惟改朝散大夫为朝议大夫

（臣）等谨按唐宋之制四五品祇分二阶或三阶金代以后则每品分为六阶散官之多始于金也

朝奉大夫 【朝请大夫以下附】

宋六品阶有朝奉大夫朝请大夫朝散大夫金以后皆为五品

奉政大夫 【奉议大夫以下附】

金六品阶正六品上曰奉政大夫下曰奉议大夫从六品上曰奉直大夫下曰奉训大夫元与金同皆阶五品明沿元制不易

（臣）等谨按唐元明六品无大夫之阶惟宋金有之即唐以前历代亦不置也

朝请郎以下

宋七品阶正七品有朝请郎朝散郎朝奉郎从七品有承议郎金正七品上曰承德郎下曰承直郎从七品上曰承务郎下曰儒林郎元与金同皆阶六品明沿元制不易【案元明惟改从六品上为儒林郎下为承务郎】宋八品阶正八品曰奉议郎通直郎从八品曰宣教郎宣义郎金八品阶正八品上曰文林郎下曰承事郎从八品上曰征事郎下曰从仕郎元与金同皆阶七品明沿元制不易【案元制惟改从仕为从事明制又改征事为征仕】宋九品阶有承事郎承奉郎金九品阶正九品上曰登仕郎下曰将仕郎从九品上曰登仕佐郎下曰将仕佐郎元与金同皆阶八品明八品阶正八品曰修职郎曰迪功郎从八品曰修职佐郎曰迪功佐郎九品阶正九品曰登仕郎曰将仕郎从九品曰登仕佐郎曰将仕佐郎

（臣）等谨按金及明制九品皆有四阶惟元不置九品之阶故元史谓元代无九品散官也又按宋制八品阶别置承务郎惟以授亲民之官明制六品则置宣德郎七品别置宣议郎惟以授吏材干出身之官盖所以别涂品也

武散官

骠骑大将军

宋沿唐制无正一品之武散官阶其从一品曰骠骑大将军金制武散官凡仕至从二品至从一品皆用文资元明武散官亦无一品阶

（臣）等谨按唐以前武散官止称将军其称大将军则自唐始也

辅国大将军以下

宋二品武阶正二品曰辅国大将军从二品曰镇国大将军元正二品武阶曰龙虎卫上将军金吾卫上将军骠骑卫上将军从二品曰奉国上将军辅国上将军镇国上将军明正二品武阶曰龙虎将军金吾将军骠骑将军从二品曰奉国将军定国将军镇国将军

冠军大将军以下

宋三品武阶正三品曰冠军大将军怀化大将军从三品曰云麾将军归德将军金三品武阶正三品曰龙虎卫上将军金吾卫上将军骠骑卫上将军从三品曰奉国上将军辅国上将军镇国上将军元正三品武阶曰昭武大将军昭勇大将军毅大将军从三品即金从四品明沿元制止称将军不加大【案明制正三品昭武之下次昭毅次昭勇】

忠武将军以下

宋四品武阶正四品曰忠武将军壮武将军从四品曰宣威将军明威将军金四品

武阶正四品曰昭武大将军昭毅大将军昭勇大将军
从四品曰安远大将军定远大将军怀远大将军元四品武阶正四品曰广威将军宣威
将军明威将军从四品曰信武将军显武将军宣武将
军明沿元制不易

定远将军以下

宋五品武阶正五品曰定远将军定远将军从五品曰游骑将军游击将军金正五
品阶即元之四品其六品阶正六品曰武节将军武德
将军从六品曰武义将军武略将军元五品阶即金之六品明沿元制不易 【按明制惟
改武义为武毅】

诸校尉

宋六品武阶正六品曰昭武校尉昭武副尉从六品曰振威校尉振威副尉元六品
武阶正六品曰承信校尉昭信校尉从六品曰忠武校
尉忠显校尉明沿元制不易宋七品武阶正七品曰致果校尉致果副尉从七品曰翊麾
校尉翊麾副尉金七品武阶正七品曰承信校尉昭信
校尉从七品曰忠武校尉忠显校尉元七品武阶正七品曰忠勇校尉忠翊校尉从七品
曰修武校尉敦武校尉宋八品武阶正八品曰宣节校
尉宣节副尉从八品曰御武校尉御武副尉金八品武阶即元之七品阶元八品武阶正
八品曰保义校尉进义校尉从八品曰保义副尉进义
副尉宋九品武阶正九品曰仁勇校尉仁勇副尉从九品曰陪戎校尉陪戎副尉金九品
武阶即元之八品

（臣）等谨按唐制以后武散官惟宋金备列九品至元代则八品而止明代六品
而止其置阶之数宋三十有一金元皆三十有四明代
三十其制各殊

△勋官

宋勋官十有二等上柱国柱国上护军护军上轻车都尉轻车都尉上骑都尉骑都
尉骁骑尉飞骑尉云骑尉武骑尉金与宋同元亦与宋
金同惟不置云骑尉武骑尉明文勋十左右柱国柱国正治上卿正治卿资治尹资治少
尹赞治尹赞治少尹修正庶尹协正庶尹武勋官十有
二左右柱国柱国上护军护军上轻车都尉轻都都尉上骑都尉骑都尉骁骑尉飞骑尉
云骑尉武骑尉

（臣）等谨按勋官分文武惟明代为然此所未有也

△命妇

宋外命妇之号曰国夫人郡夫人淑人硕人令人恭人宜人安人孺人金章宗承安
二年敕王妃止封王夫人郡王母妻封郡王夫人国公

母妻封国公夫人郡公母妻封郡公夫人郡侯母妻封郡君后改封郡侯夫人文武四品
母妻封县君后改封郡君五品母妻封乡君后改封县
君元仍金制明外命妇之号有九公曰某国夫人侯曰某侯夫人伯曰某伯夫人一品曰
夫人后称一品夫人二品曰夫人三品曰淑人四品曰
恭人五品曰宜人六品曰安人七品曰孺人因其子孙封者加太字夫在则否

钦定续通志卷一百三十七

●钦定续通志卷一百三十八 职官略九

职官略 【九】

禄秩

致仕官禄

职田

○禄秩

唐

宋

辽

金

元

明

△唐

唐自玄宗天宝十四载兵兴已后权臣增领诸使月给厚俸比开元时制禄数倍肃
宗至德初以用物不足内外官不给料钱郡府县官给
半俸五代时文臣多兼武职禄亦无定制 【按新旧五代史皆不载百官俸给其载于五
代会要资治通鉴册府元龟诸书者仅一时敕令及
权宜之制非定则也】 梁太祖开平三年正月诏曰禄俸所以养贤而励奉公也朕今肇
建诸色已毕郊裡职贡至多经用差少其百官俸料委
左藏库依例全给 【按唐以前户部度支掌百官之俸给梁独委左藏库亦权宜之制也
】 后唐庄宗同光三年二月租庸院奏新定四京及
诸道副使判官以下俸料请降敕各道逐处支遣兼除各道所置副使判官掌书记推官
外如本处所置署官员即勒本道节度使自备请给不
得擅支系省钱物定制节度使副每月料钱四十千米一石面一石春服冬服绢各十五
匹绵三十两节度观察判官每月料钱三十千米六斗
面一石春服冬服绢各十二匹绵二十五两节度掌书记每月料钱二十五千米六斗面
一石春服冬服绢各十匹绵二十两节度推官每月料
钱十五千米六斗面一石春服冬服绢各十匹绵二十两租庸院又奏诸道州县官并防

御团练副使判官等月俸贍给其防御团练副使判官
逐月料钱三十千及二十千不等畿县令及各参军诸曹判官文学主簿诸职二十千至
一十二千有差晋高祖天福六年敕诸卫上将军逐月
加俸余不加汉隐帝干佑二年七月敕诸道州府令录判官主簿宜令等第支与俸给周
太祖广顺元年敕牧守之任委过非轻分忧之务既同
制禄之数宜等前有富庶之郡请给则优或边远之州俸料独薄以至迁除之际拟议为
难宜分多益寡均利同恩今复位则例诸州防御使料
钱二百千禄粟百石元随三十人衣粮团练料钱一百五十千禄粟七十石元随三十人
衣粮刺史料钱一百千禄粟五十石元随二十人衣粮
世宗显德五年又定制县令逐月料钱二十千至十千有差米麦五石至三石有差主簿
料钱十二千至六千有差米麦三石至二石有差州司
录事参军及两京司录每月料钱二十千至十千有差米麦五石至三石有差

△宋

宋制宰相参知政事枢密使同中书门下平章事枢密副使知院事同知院事及宣
徽使签书枢密院事节度观察留后知枢密院事及充
枢密副使同知枢密院事并带宣徽签书检校太保签书及三司使中书门下侍郎尚书
左右丞太尉月各一百石料钱四百千至二百千有差
春冬绫各十匹春绢十匹冬绢二十匹绵五十两枢密使带使相节度使同中书门下平
章事以上及带宣徽使并前两府除节度使枢密使副
知院事带节度使月各给二百石料钱略同绫绢绵亦略同三公三少一百五十石绫各
十匹绢各二十匹权三司使公事七十石春冬绫各十
疋绢十五匹权发遣使三十五石绫绢同权三司外节度使 【前所载除节度使以京朝
官兼节度使外节度则各军之节度也】 一百五十
石料钱三百千春绢二十匹冬绢三十匹绫各十匹春罗一匹绵百两留后观察防御使
一百石料钱三百千至二百千有差春冬绢各十匹绫
各十匹绵五十两刺史五十石凡一石给六斗米麦各半赤令七石丞四石京府司录五
石诸曹参军四石至三石有二等畿县知县六石至三
石有四等司理司法四石至二石有三等司户三石至二石有二等诸县令五石至三石
有三等簿尉三石至二石有二等西京军巡判官四石
军监判官防团推官二石神宗熙宁二年中书门下言天下选人奉簿多少不一不足以
劝廉吏欲月增米麦料钱县令以下诸职旧三石者并
增至四石司理等官旧二石者增至三石云

△辽

辽圣宗统和十六年四月诏罢民输官俸给自内帑

△金

金百官俸给正一品钱粟自三百贯石至二百二十贯石有差曲米麦五十称石至三十五称石有差春衣罗秋衣绫五十金至三十五匹有差春秋绢二百匹至一百二十匹有差绵千两至六百两有差从一品钱粟二百贯石至一百八十贯石有差曲米麦三十称石至二十五称石有差春罗秋绫三十匹至二十五匹有差绢一百匹至九十匹有差绵五百两至四百两有差正二品钱粟一百五十贯石曲米麦各二十二称石春罗秋绫各二十二匹绢各八十匹绵三百五十两从二品钱粟一百四十贯石至一百二十贯石有差曲米麦各二十称石至十八称石有差春罗秋绫各二十四匹至十八匹有差绢各七十五匹至七十匹有差绵三百两至二百五十两有差正三品钱粟七十贯石曲米麦各十六称石春罗秋绫各十二匹绢各五十五匹绵二百两外官钱粟一百贯石至十二贯石有差曲米麦各十五称石至十二称石有差绢四十匹绵二百两从三品钱粟六十贯石曲米麦各十四称石春罗秋绫各十匹绢五十匹绵一百八十两外官钱粟六十贯石曲米麦各十称石绢各二十五匹绵一百二十两正四品钱粟四十五贯石曲米麦各十二称石春罗秋绫各八匹绢各四十匹绵一百五十两外官钱粟五十贯石至四十五贯石有差曲米麦各八称石绢各二十二匹绵八十两从四品钱粟四十贯石曲米麦各十称石春罗秋绫各六匹绢各三十匹绵一百三十两外官钱粟四十贯石曲米麦各七称石绢各八十匹绵六十两明安钱粟四十八贯石余皆无乌尔古使同正五品钱粟三十五贯石曲米麦各八称石春罗秋绫各五匹绢各二十五匹绵一百两外官钱粟三十五贯石曲米麦各六称石绢各十七匹绵五十五两从五品钱粟三十贯石曲米麦六称石春罗秋绫各五匹绢各二十匹绵八十两外官钱粟二十五贯石曲米麦各四称石绢各十四匹绵四十两穆昆钱粟二十五贯石余皆无正六品钱粟二十五贯石麦五石绢各十七匹绵七十两外官钱粟二十贯石曲米麦三称石绢八匹绵三十两从六品钱粟二十二贯石麦五石春秋绢各十五匹绵六十两正七品钱粟二十二贯石麦四石衣绢各十二匹绵五十五两外官略同从七品钱粟一十七贯石麦四石衣绢各十匹绵五十两外官略同较其职之繁简而略加损益焉正八品钱粟十五贯石麦三石衣绢各八匹绵四十五两外官亦略加损益从八品钱粟一十三贯石麦三石衣绢各七匹绵四十两外官略同正九品钱粟一十二贯石麦二石衣绢各六匹绵三十五两外官略同从九品钱粟一十贯石麦二石衣绢各五匹绵三十两外官略同天德二年以三师宰臣

以下有以一官而兼数职及有食其禄而复领他事者
前此并给以俸今宜从高其兼职之俸并不重给大定二十六年又诏兼给之
△元

元制俸米俸则较其品之大小米则较其职事之繁简世祖至元二十二年定百官俸例各品又分等次从一品有六定五定之差正二品有四定二十五两四定一十五两之差从二品分三等有四定及三定三十五两三定二十五两正三品分三等有三定二十五两三定一十五两三定从三品分三等有三定二定三十五两二定二十五两正四品分三等有二定二十五两二定十五两二定从四品分三等二定一定四十五两一定四十两正五品以下皆二等有一定四十两一定三十两从五品有一定三十两一定二十两正六品有一定二十两一定一十五两从六品一定一十五两一定十两正七至正九品一定一十两至三十五两从九品三十五两皆以五两递降焉其米数则太师太傅太保中书省右左丞相一十五石平章政事右左丞以下自十二石递减有差六部尚书八石侍郎五石以下递减有差枢密院知院十三石五斗自同知至参议十一石五斗至三石有差各卫指挥使至签事自七石五斗至四石五斗有差御史大夫十二石中丞至监察御史自十一石至三石有差奎章阁学士院大学士十石五斗其侍书学士至授经郎自九石五斗至三石有差大禧宗祿院院使十二石其同知至参议自十石至三石五斗有差其宣政院翰林国史院翰林院集贤院长贰略同中政院院使十石五斗其同知至司议照磨自八石五斗至二石有差其太医院典瑞院将作院太史院储政院并同太常礼仪院使米八石五斗其院同至院判自七石五斗至四石有差通政院同大宗正府伊克扎尔古齐一员十二石二十七员各八石五斗各六石大司农十二石其卿至丞自十二石至九石有差大都留守司留守十石五斗其同知至留判自八石至四石有差都护府太都护八石五斗其同知至副都护自七石至六石有差武备寺卿米七石五斗同判六石其少卿至寺丞自四石五斗至三石五斗有差其光禄尚乘长庆长秋承徽长监长信监徽诸寺并同其尚舍寺引进司拱卫都指挥司翊正司内正司都漕运司太府监秘书章佩利用中尚度支各监长贰自七石至二石略同国子监祭酒米六石其司业至博士自三石五斗至二石五斗有差蒙古国子监同经正监卿米七石五斗其太监至监丞皆五石至三石司天监提点米六石司天监米五石其监丞至教授自三石至一石有差回回司天监少监米四石五斗余并同司天监都水监亦略同

△明

明制正一品月俸米八十七石从一品至三品递减十三石至三十五石从三品二十六石正四品二十四石从四品二十一石正五品十六石从五品十四石正六品十石从六品八石正七品至从九品递减五斗至五石而止定为制不易

○致仕官禄

致仕官禄始于唐宋以前历代皆未有也宋制仁宗景佑三年诏曰致仕官旧皆给半俸而未尝为显官者或贫不能自给岂所以遇高年养廉耻也其大两省大卿监正刺史合门使以上致仕者自今给俸并如分司官例仍岁时赐羊酒米麦徽宗大观二年诏致仕官应给俸者以缗钱充然宋制设祠禄之官以佚老优贤其始员数甚少熙宁以后增置愈多在京宫观旧制以宰相执政充使或丞郎学士以上充副使两省或五品以上为判官诸司使副为都监又有提举提点主管其戚里近属及前宰执留京师者多除宫观以示优礼时朝廷方经理时政以疲老不任事者废职欲悉罢之仍使任宫观以食其禄王安石亦欲以此处异议者遂诏宫观毋限员又诏杭州洞霄宫亳州明道宫华州云台观建州武夷观台州崇道观成都玉局观建昌军仙都观江州太平观洪州玉隆观五岳庙并依嵩山崇福宫舒州灵仙观或提举提点官俸给大两省卿监及职司资序人视小郡知州知州资序人视小郡通判武臣仿此四年诏宫观岳庙留官一员余听如分司致仕例从便居任其在京宫观诸使则不轻授如王安石以右仆射观文殿大学士为集禧观使吕公着韩维以资政殿学士兼侍读仍提举中太一宫兼集禧观公事冯京以观文殿学士梁焘以资政殿学士为中太一宫醴泉观使是也是后祠观有内外之别京祠以前宰相见任使相充使次充提举余则为提点为主管随官之高下处之其非自陈而特差者如黜降之例外祠或有以选人充之者盖高宗绍兴以来士大夫多流离困厄之余未有阙以处之于是以承务郎以上权差宫观一次而选人亦得有宫观至后又罢之金制官职致仕者给半俸【按金史不载致仕官俸宇文懋昭大金国志详载致仕官半俸仪】明制无致仕之俸唯宰执致仕在籍者遣行人司存问或赐羊酒或赐文绮然非一时元臣硕辅则无是优礼尚书以下亦无存问及优赐焉

○职田

宋

金

元

明

△宋

宋真宗咸平中欲复唐职田之制令馆阁检校故事申定其制以官庄及远年逃亡田充悉免租税佃户以浮客充其两京大藩府四十顷次藩镇三十五顷防御团练州三十顷中上刺史州二十顷下州及军监十五顷边远小州上县十顷中县八顷下县七顷转运使副十顷兵马都监押砦主厘务官录事参军判司等比通判幕职之数而均给之后又稍更其制凡大藩长吏二十顷通判八顷判官五顷幕职官四顷凡节镇长吏十五顷通判七顷判官四顷幕职官三顷五十亩凡防团以下州军长吏十顷通判六顷判官三顷五十亩幕职官三顷其余军监长吏七顷判官幕职官并同防团以下州军凡县令万户以上六顷五千户以上五顷不满五千户并四顷凡簿尉万户以上三顷五千户以上二顷五十亩不满五千户二顷录事参军比本判官曹官比倚郭簿尉发运制置转运使副武臣总管比节镇长吏发运制置判官比大藩府通判安抚都监路分都监比节镇通判大藩府都监比本府判官兼黄汴河许汝石塘河都大催纲比节镇判官节镇以下至军监诸路走马承受并砦主都同巡检提举捉贼提点马监都大巡河不得过节镇判官在州监当及催纲拨发巡捉私茶盐贼盗驻泊捉贼不得过簿尉自此人有定制田有定限至熙宁间复诏更定凡大藩府以下至防御团练州军略有增损其藩府节镇录参视本州岛判官余视幕职官藩府节镇曹官视万户县簿尉发运转运使副视节镇知州开封府界提点视余州发运转运判官常平仓司提举官视藩府通判同提举视万户县令发运司干当公事视节镇通判转运司管干文字提刑司检法官提举常平仓司干当公事视不满万户县令蔡河许汝石塘河都大催纲管干机宜文字府界提点司干当公事视节镇判官总管视节镇知州路分钤辖视余州知州安抚路分都监州钤辖视节镇通判藩府都监视本州岛判官诸路正将视路分都监副将视藩府都监走马承受及诸州都监都同巡检都大巡河并视节镇判官巡检保砦都监砦主在州监当及催纲拨发巡捉私茶盐贼盗驻泊捉贼并视幕职官巡辖马递铺监堰并县镇砦监当并视本县簿尉诸路州学教授京朝视本州岛判官选人视本州岛曹官唯成都府路则以职田所收之课税论职之大小繁简而均给之知成都府一千石转运使六百石钤辖转运判官各五百石通判各四百五十石签判节推察推知录干当粮料院监军资库都监都巡检巡检走马承受京朝官知县各二百

石监商税市贾院交子务视职官城外巡检排岸十县
巡检各一百五十石司理司户司法学教授监甲仗库各一百石知眉蜀彭雅邛嘉简陵
州永嘉军视成都通判其通判减三之一知咸黎茂州
视眉蜀通判其都监监押驻泊都巡检签判推判官知录京朝官并职官知县监棚口镇
视成都职官监押巡检同巡检驻泊初等职官或权入
职官录事参军县令试衔知县视成都城外巡检司理司户司法诸县主簿尉应监当场
务选人监税监盐巡辖马铺视成都曹官应诸县令佐
系职员权摄者不给时有丰歉则税有多少皆随时斟酌为之增减后又诏熙河泾原兰
州路州军官属职官每顷给银钞十千哲宗元符三年
朝散郎杜子民奏职田之法每患不均神宗首变两川之法均给上下一路便之至元佑
中推广此意以限月之法变为均给士大夫贪冒者或
穷日之力以赴期会或交书请嘱以幸权摄奔竞之风长廉耻之节亏乞复元丰均给之
法以养士廉节从之徽宗建中靖国元年知延安府范
纯粹奏昨帅河东日闻晋州守臣所得职田谕属邑增广租税比旧数倍后襄陵县令周
汲力陈其弊郡守为之减税十之七八佃户始免苛敛
而晋绛陕三州圭腴素号优厚多由苛敛所致或改易种色或遣子弟公皂监获贪污猥
贱无所不有乞下河东陕西监司悉令改正从之大观
四年臣僚言圭田欲以养廉无法制以防之则贪者奋矣奸吏挟肥瘠之议以逞其私给
田有限课入无算祖宗深虑其弊以提点刑狱官察之
而未尝给以圭租庶不同其利而公其心也近时提点刑狱所受圭租同于他司故积年
利弊壅于上闻元丰旧制检法官其属也当视其长自
元佑初并提举常平职事归提刑司兼领编敕遂将提举官合给之数拨与提刑司参详
修立而检法官亦预焉乃诏依旧法政和八年臣僚言
尚书省以县令之选轻于措置自不满五千户至万户递增给职田一顷夫天下圭租多
寡不均久矣县令所得亦复不齐多至九百斛如泾川
高苑八百斛如常之江阴六百斛常之宜兴亦六百斛自是而降或四百五百或三百二
百凡在河北京东京西荆湖之间少则有置三二十斛
者二广福建有自来无圭租处川陕四路自守倅至簿尉又以所收租税均给令固不得
而独有今欲一槩增给一顷岂可得哉诏应县令职田
顷亩未及条格者催促标拨务期如例均给宣和七年诏诸路职官各有职田所以养廉
也诸县多踰法抑令都保正长及中上户分佃认纳不
问所收厚薄使之必输甚至不知田亩所在虚认租课闻之惻然所有违法抑勒及诡名
委保者以违诏论至高宗绍兴间又以田数或有不均
诏诸路提刑司依法标拨官多田少即于邻近州县通融须令足数又诏将空闲之地为

他司官属所占者拨以足之仍先自簿尉始其有无职田选人并亲民使臣每员月支茶汤钱十贯其虽有职田每月不及十贯者皆补足之所以厚其养廉之利又惧其病民则委通判县令核寔除其不可力耕之田损其已定过多之额皆所以示优恩厉清操也至其顷亩多寡则南渡后又有定式凡知藩府二十顷发运转运使副总管知节镇一十五顷知余州及广济淮阳无为临江广德兴国南康南安建昌邵武兴化汉阳永康军并路分钤辖一十顷发运转运判官提举淮南两浙江南荆湖东西河北路盐事官通判藩府八顷知余军及监并通判节镇州钤辖安抚副使都监路分都监将官发运司干办公事七顷通判余州及军满万户县令六顷藩府判官录事参军州学教授都监发运转运司主管文字满五千户县令副将官节镇判官录事参军州学教授转运司主管帐司不满五千户县令满万户县丞余州都监走马承受公事主管机宜文字都巡检都大巡河提点马监四顷节度掌书记观察支使藩府及节镇推官巡检县镇砦都监砦主巡捉私茶盐驻泊捉贼在城监当余州判官学教授并诸承务郎以上之军监都监三顷五十亩军监判官余州推官余州及军监录事参军巡检县镇砦都监砦主巡捉私茶盐驻泊捉贼在城监当藩府及节镇曹官州学教授满五千户县丞满万户县簿尉巡辖马递铺县镇砦监当及监堰三顷余州及军监曹官州学教授不满五千户县丞满五千户县簿尉巡辖马递铺县镇砦监当及监堰二顷五十亩不满五千户县簿尉巡辖马递铺县镇砦监当及监堰二顷

△金

金制正从一二品无职田正三品外官公田三十顷统军使招讨司副使公田二十五顷海陵天德二年省臣奏公田课租有数前此百姓各随公宇就输而吏或贪冒多取以伤民宜送之官仓均定其数与月俸随给从三品外官公田二十一顷正四品外官副统军职田十七顷余官公田十五顷从四品外官公田十四顷正五品外官刺史知军盐使公田十三顷余官职田十顷从五品外官公田七顷正六品从六品外官公田六顷正七品从七品诸同知州军都转运判诸府推官诸节度判诸观察判诸京县令诸剧县令提举南京京城规措渠河官诸都巡检诸酒曲盐税副诸正将统军司知事诸镇军都指挥使诸招讨司勘事官诸县令诸警巡副京兆府司竹监管勾盐使司判诸部图哩司提举上京皇城司同提举南京京城所黄河都巡河官诸河税榷场使职田五顷会安关使诸知镇城堡寨职田四顷正八品外官市令诸录事诸防御判赤县丞诸剧县丞崇福埽都巡河官诸酒税使醋使榷场副诸都巡检职田四顷按察司

知事大兴府知事招讨司知事诸副都巡检使诸节镇
以上司狱诸副将职田二顷从八品外官南京交钞库使诸统军按察司知法诸州判官
诸京县丞诸次副县丞诸三品盐司判官漕运司管勾
永丰广备库副使左右别贮院木场使职田二顷诸默济格诸额尔锦职田三顷正九品
外官南京交钞库副诸警巡判官诸县丞诸酒税副使
职田三顷市丞诸司候诸主簿诸录判诸县尉散巡河官黄河埽物料场官职田二顷诸
盐场管勾左右别贮院木场副永丰库广备库判诸都
队将店宅务管勾诸州军司岳俱同从九品外官诸教授职田三顷三品以上官司知法
司候判官职田二顷

△元

元至元三年定随路府州县官职田之制上路达鲁噶齐十六顷总管同同知八顷
治中六顷府判五顷下路达鲁噶齐十四顷总管同同知七顷府判五顷散府达鲁噶齐十顷知府同同知六顷府判四顷上州达鲁噶齐十顷
州尹同同知五顷州判四顷中州达鲁噶齐八顷知州
同同知四顷州判三顷下州达鲁噶齐六顷知州同同知四顷州判三顷警巡院达鲁噶
齐五顷警使同警副四顷警判三顷录事司达鲁噶齐
三顷录事同录判二顷县达鲁噶齐四顷县尹同县丞三顷主簿二顷县尉主簿兼尉并
同经历四顷十四年定按察司职田各道按察使十六
顷副使八顷签事六顷二十一年又更定其制江南行省及诸司职田比腹里减半上路
达鲁噶齐八顷总管同同知四顷治中三顷府判二顷
五十亩下路达鲁噶齐五顷总管同同知三顷五十亩府判二顷五十亩经历二顷知事
一顷提控案牍同散府达鲁噶齐六顷知府同同知三
顷府判二顷提控案牍一顷上州达鲁噶齐五顷知州同同知二顷五十亩州判同提控
案牍一顷中州达鲁噶齐四顷知州同同知二顷州判
一顷五十亩都目五十亩下州达鲁噶齐三顷知州同同知二顷州判一顷五十亩上县
达鲁噶齐二顷县尹同县丞一顷五十亩主簿一顷县
尉同中县与上县同下县达鲁噶齐一顷五十亩县尹同主簿兼尉一顷录事司达鲁噶
齐一顷五十亩录事同录判一顷司狱巡检同按察使
八顷副使四顷佾事三顷经历二顷知事一顷运司官运使八顷同知四顷运副三顷运
判同经历二顷知事提控案牍同盐司官盐使二顷盐
副同盐判一顷各场正同管勾各一顷

△明

明初边臣有养廉田勋臣及公以下庄田百顷至千顷不等又赐功臣暨武臣公田
又赐百官公田以其租税充禄指挥没于阵者皆赐公

田其后令还田给禄米公五千石至二千五百石侯千五百石至千石伯千石至七百石正从一二三四品官自千石至三百石每阶递减百石至五品二百二十石从减五十石正六品百二十石从减十石正七品视从六品递减十石正八品七十五石从减五石正从九品视从八品递减五石 【详载禄秩门】

钦定续通志卷一百三十八

●钦定续通志卷一百三十九

职官略 【十】

官品

○官品

宋

金

元

明

△宋

宋承唐制分为九品品有正从诸太师太傅太保左右丞相少师少傅少保王为正一品诸枢密使太子太师太傅太保开府仪同三司特进嗣王郡王国公为从一品诸知枢密院事参知政事同知枢密院事太尉金紫光禄大夫开国郡公上柱国为正二品诸签书枢密院事观文殿大学士太子少师少傅少保御史大夫吏部户部礼部兵部刑部工部尚书左右金吾卫左右卫上将军冀兖青徐扬荆豫梁雍州牧殿前都指挥使节度使银青光禄大夫开国县公柱国为从二品诸观文殿学士资政保和殿大学士翰林学士承旨翰林学士资政保和端明殿学士龙图天章宝文显谟徽猷敷文阁学士枢密直学士左右散骑常侍权六曹尚书宣奉正奉大夫冠军怀化大将军上护军为正三品诸龙图天章宝文显谟徽猷敷文阁直学士御史中丞开封尹尚书列曹侍郎诸卫上将军太子宾客詹事正议通奉大夫云麾归德将军开国侯护军为从三品诸给事中中书舍人太常卿宗正卿秘书监诸卫大将军殿前副都指挥使承宣使通议大夫忠武壮武将军开国伯上轻车都尉为正四品诸保和殿龙图天章宝文显谟徽猷敷文阁待制左右谏议大夫权六曹侍郎七寺卿国子监祭酒少府将作监诸卫将军太中大夫宣威明威将军轻车都尉为从四品诸马步军都指挥使副都指挥使观察使中大夫通侍正侍宣政履正协忠中侍大夫定远窳远将军开国子上骑都尉为正五品诸太常宗正少卿秘书少监太子左右庶子枢密都承旨殿前马步军

都虞候防御使捧日天武龙神卫四厢都指挥使团练
使诸州刺史驸马都尉中奉中散大夫中亮中卫翊卫亲卫大夫游骑游击将军开国男
骑都尉为从五品集英殿修撰七寺少卿中书门下省
检正诸房公事尚书左右司郎中国子司业军器监都水使者太子少詹事左右谕德枢
密承旨副承旨朝议奉直大夫拱卫左武右武大夫昭
武校尉副尉骁骑尉为正六品诸起居郎起居舍人侍御史尚书省左右司员外郎枢密
院检详诸房文字右文殿秘阁修撰开封少尹尚书诸
司郎中开封府判官推官少府将作军器少监灵台令朝请朝散朝奉大夫和安成和成
安大夫振威校尉副尉飞骑尉为从六品诸殿中侍御
史左右司谏尚书诸司员外郎侍讲直龙图天章宝文阁开封府司录参军事翰林良医
太子侍读侍讲两赤县令朝请朝散朝奉郎武功至武
翼大夫成全平和保安大夫致果校尉副尉云骑尉为正七品诸左右正言符宝郎监察
御史直显谟徽猷敷文阁太常宗正秘书丞大理正着
作郎崇政殿说书翰林医官合门宣赞舍人太子中舍人舍人诸率府率亲王府翊善赞
读直讲判太医局令翰林医效医痊承议郎正侍至右
武郎武功至武翼郎和安至保安郎翊麾校尉副尉武骑尉为从七品诸七寺丞秘书郎
太常博士枢密院计议官编修官敕令所删定官直秘
阁著作佐郎国子监丞诸王宫大小学教授国子博士大理司直评事开封府诸曹参军
事军巡使判官京府判官京畿县令两赤县丞三京赤
县畿县令太史局五官正中书门下省录事尚书省都事奉议通直郎训武修武郎宣节
校尉副尉为从八品诸御史台检法官主簿少府将作
军器都水监丞寺监主簿秘书省校书郎正字太常寺奉礼郎太祝太学武学律学博士
主管太医局合门祗候枢密逐房副承旨太子诸率府
副率亲王府记室节度观察防御团练军事监判官节度掌书记观察支使京府节度观
察防御团练军事推官诸州签判节镇上中下州录事
参军京府诸曹参军事军巡判官京畿县丞三京赤县畿县丞诸州上中下县令丞两赤
县主簿尉诸府诸曹节镇上州诸司参军事节度副使
行军司马防御团练副使太史局丞直长灵台郎保章正翰林医愈医证医诊医候三省
枢密院主事令史书令史宣教宣义承直儒林文林从
事从政修职从义秉义郎御武校尉副尉为从八品诸郊社藉田太官令国子太学正录
武学谕律学正太医局丞挈壶正京畿县主簿尉三京
赤县主簿尉诸州别驾长史司马枢密院守阙书令史丞事承奉郎忠训忠翊成忠保义
郎仁勇校尉副尉为正九品诸中下州诸司参军诸州
上中下县主簿尉城砦马监主簿诸州司士文学助教翰林医学承务郎承节承信迪功

郎陪戎校尉副尉为从九品

（臣）等谨案宋制官品定于神宗元丰时至高宗绍兴以后屡有更定宋史所载仍从元丰初制故官勋至绍兴后已有罢省而令仍不废则悉依旧制详载考其所叙悉与马端临职官考相同盖元时修史多本通考故也

（臣）等又按辽史百官志不载官品叶隆礼契丹国志叙设官制度一门于官品之正从亦不及载盖辽代所设南面官皆随时而置本无定员又修辽史时已无可考故从其略也

△金

金制太师太傅太保太尉司徒司空尚书令郡王国公为正一品左右丞相平章政事都元帅枢密使大宗正府判大宗正事 【章宗泰和六年避睿宗讳改为大睦亲府判大睦亲事】 宣抚司使开府仪同三司仪同三司特进崇进 【按崇进之阶前代所无始于金制】 郡王国公为从一品左右丞大司农左右副元帅太子太师太傅太保金紫光禄大夫银青光禄大夫郡公上柱国为正二品参知政事枢密副使同判大宗正事御史大夫三司使翰林学士承旨光禄大夫荣禄大夫郡公柱国为从二品吏部户部礼部兵部刑部工部尚书元帅左右监军签书枢密院事同签大宗正事宣抚司副使劝农司使三司副使翰林学士殿前都点检宣徽院左右宣徽使太子少师少傅少保大兴府尹诸京留守司留守监察采访使诸总管府都总管诸府尹都转运司使统军司使招讨司使资德资政资善大夫龙虎卫金吾卫骠骑尉上将军郡侯上护军为正三品元帅左右都监御史中丞太常寺卿殿前左右副都点检武卫军都指挥使司都指挥使詹事院詹事翰林侍读学士秘书监审官院知院太后两宫卫尉诸节镇节度使诸部族节度使正奉通奉中奉大夫奉国辅国镇国上将军郡侯护军为从三品吏部户部礼部兵部刑部工部侍郎同签枢密院事司农司卿签三司事同知宣徽院事国子监祭酒太府监少府监都水监左右谏议大夫大理寺卿亲王傅诸驸马都尉总管同知留守事按察副使诸府同知副统军正议通议嘉议大夫昭武昭毅昭勇大将军郡伯上轻车都尉为正四品大宗正丞翰林直学士同知审官院事拱卫司都指挥使左右司谏知集贤院武卫副都指挥使副都少詹事亲王府尉两宫副卫尉大兴府同知诸京副留守同知都总管诸防御使都转运使同知副招讨使诸明安诸羣牧司使太中大夫中大夫少中大夫安远定远怀远大将军郡伯轻车都尉为从四品尚书省左右司郎中劝农副使司农少卿同签三司事翰林待制太常少卿同签宣徽院事客省使引进使合门使宫籍监提点各局

提点秘书少监司天台提点国子监司业四方馆使左右谕德大兴府少尹签按察司事
兵马副都总管诸府少尹同知节度使诸州刺史都转
运司副使诸监使司使提举讷察使漕运司提举诸镇兵马司都指挥使中议中宪中顺
大夫广威宣威明威将军县子上骑都尉为正五品吏
部户部礼部兵部刑部工部郎中枢密院经略使御史左右宿直将军提点山陵拱卫副
都指挥使司天台监太府少监少府少监军器监都水
少监兼漕事大理寺少监弘文院知院知登闻鼓院知登闻检院同知集贤院修内司使
祗应司提点上林署提点宫籍监各局使提举南京榷
货司提举提举仓场司使左右卫率府亲王府长史大兴府判官留守司判官诸节镇节
度副使提举讷察副使提举秦蓝两关提举沿淮讷察
使统军司判官南京提控规运柴炭使诸部族节度副使诸纛详袞诸穆昆朝请朝散朝
列大夫信武显武宣武将军县男骑都尉为从五品尚
书省左右司员外郎司农司丞太常寺丞拱卫钤辖合门副使秘书丞都水少监大理正
同知登闻鼓院事同知登闻检院事武卫钤辖詹事院
左右监门仆正左右赞善同知防御使事诸京警巡院使盐使司副使漕运司同提举诸
兵马司副都指挥使南京提控规运柴炭副使秦蓝两
关同提举提举三门集津奉政奉议大夫武节武德将军骁骑尉为正六品吏部户部礼
部兵部刑部工部员外郎治书侍御史三司判官翰林
修撰太庙署令郊社署令武成王庙署令诸陵署令大乐署令宣徽院判官殿前都检点
判官合门签事客省使副使引进使副使宫籍监副监
各局副使著作郎司天台少监国子监丞太府监丞左右藏库使典给署令太仓使少府
监丞少府监所属各署令军器监少监利器署令大理
寺丞同知弘文院事榷货务使惠民司令四方馆副使法物库使万宝宫提举修内副使
都城所提举祗应司令甄官署令上林署令京东西南
三路检察司使榷货司同提举仓场司副使诸羣牧所副使詹事院掌宝典仪亲王府司
马提举卫绍王家属提举大兴府推官留守司推官上
京皇城司提举按察司判官总管府判官诸府府判赤县令都转运司判官中都都曲使
司使提举南京榷货事兵马司指挥使诸府州兵马钤
辖招讨司判官奉直奉训大夫武义武略将军飞骑尉为从六品尚书省左右司都事都
元帅府经略都事知事枢密院都事殿中侍御史监察
御史诸宗室将军司农司知事三司参议规措审计官太常博士承奉班都知押班秘书
郎著作佐郎国子博士太学博士都水监丞左右补阙
左右拾遗大理司直庆宝宫提举京东西南三路检察副使詹事院副仆侍正内直郎南
京京城提举诸总管府推官诸府推官节度判官诸州

同知次赤县尉县令盐使司判官三白渠规措官兵马司军使都军司都指挥使诸巡检使都巡检潼关使诸边正将承德承直郎承信昭信使尉云骑尉为正七品尚书省管勾官各部主事御史台典事大宗正府知事三司知事应奉翰林文字典给署丞太常所属各署丞殿前都点检司知事校书郎左右藏库副使太仓副使少府监所属各署丞军器监丞利器署丞宫籍监丞都巡河宫武卫都钤辖榷货务副使平准务副使法物库副使承发司管勾万宝宫同提举都城所同提举祇应司丞甄官署丞上林署丞亲王府文学京城诸门尉上京皇城同提举南京京城同提举警巡院副诸县令诸知镇知城知堡知寨中都广备库使永丰库使京兆府司竹监管勾居庸关紫荆关通会关会安关诸使讷察使统军司知事招讨司勘事官诸图哩图哩承务儒林郎忠武忠显校尉武骑尉为从七品尚书省及六部枢密院三司架阁库管勾左右三部检法司司正国史院编修诸陵署直长秘书监各局直长宣徽院各局直长国子监助教教授太学助教少府军器利器各监署直长都水监掾大理评事弘文院校理集贤院司议惠民司直长法物库直长庆宝宫同提举修内司直长部役官受给官都城所廨官受给官祇应司甄官署上林署各直长交钞库使丰衍库使詹事院侍丞以下各官亲王府记事参军大兴府知事留守司狱南京京城所管勾皇城使按察司知事诸节镇司狱录事诸防御州判官赤县丞市令司令军器库使中都都曲司都监税务使流泉务使南京交钞库使绫锦院使诸仓使诸支纳言诸州副都巡检大庆关管勾孟津渡讷察讷察副使诸边副将招讨司知事诸羣牧所判官文林承事郎忠勇忠翊校尉为正八品尚书省架阁库同管勾酒库使直省局局长各部同管勾检法都元帅府检法枢密院知法御史台管勾检法三司知法太常寺太祝奉礼郎协律郎国子校勘及书写官酒坊使市买局使大理寺知法明法登闻鼓院检院知法印造钞引库使钞纸坊使交钞库副使承发司同管勾大兴府知法按察司知事知法诸州判官都转运使都孔目知法中都别贮院使木场使买物使京西规运柴炭场使漕运司勾当官统军司知法招讨司知法诸默济格诸额尔钦诸羣牧司知法征事从仕郎修武敦武校尉为从八品尚书省酒库使副直省局副局长酒坊副使市买副使军器库副使都水监街道司管勾集贤院咨议官交钞库判官印造钞引库副使判官钞纸坊副使交钞库物料场场官惠民司都监南京丰衍东西库判正南京榷货司勾当官詹事院典食丞以下诸员京城诸门副尉皇城副使警巡院判官诸节镇录事司判官诸州司候诸司狱司司狱市令司丞赤县主簿

次赤县丞主簿诸县丞主簿尉盐使司管勾中都都商税务副使广备永丰诸库判官南京交钞副使中都流泉务副使别贮院副使木场副使判官买物司副使绫锦院副使诸仓副使柴炭场副使散巡检潼关孟津渡等副讞察管勾泗州排岸巡检边境部将队将登仕将仕郎保义进义校尉为正九品管勾尚书省乐工御史台狱丞国史院检阅官太常寺检阅官检讨大乐署正副正拱卫司都辖司天管勾钞纸坊判詹事院司藏副诸员诸州司军教授军辖兼巡捕使诸州司候司司判军器库副使都商税务都监别贮院判官买物司都监登仕将仕佐郎保义进义副尉为从九品

（臣）等谨按大金国志列叙于官品列一门以左右丞相左右平章事为正一品左右丞参知政事为从一品又文阶内以开府仪同三司为正一品其品秩与金史互异又文阶有荣进与特进皆为从一品五品有中散大夫皆金史所未载附识以资考证云

△元

元制太师太傅太保右左丞相【按元制尚右故宰相表列右丞相于前】开府仪同三司仪同三司特进崇进金紫光禄大夫银青荣禄大夫上柱国王为正一品平章政事枢密院知院御史大夫大宗正府扎尔固齐大司农翰林院承旨集贤院大学士宣政院使宣徽院使大禧宗祿院使行中书省丞相平章光禄大夫荣禄大夫柱国郡王为从一品右丞左丞枢密院同知大都督【山东蒙古军大都督从二品其同知已下各官品亦递杀】御史中丞大司农卿翰林学士集贤院学士宣政院同知宣徽院同知太常礼仪院使典瑞院使太史院使太医院使奎章阁大学士将作院使中政院使储政院使内史府内使随路诸色民匠打捕鹰房都总管府都总管大都上都留守司留守行中书省右丞左丞资德资政资善大夫龙虎金吾骠骑卫各上将军上护军国公为正二品参政枢密院副使侍御史司农少卿翰林院侍读侍讲学士集贤院侍读侍讲学士宣政宣徽院各副使奎章阁侍书学士通政院使都护府大都护崇福司使隆祥司使太仆寺卿行中书省参知政事宣慰使正奉通奉中奉大夫奉国辅国镇国上将军护军郡公为从二品中书省断事官吏部户部礼部兵部刑部工部尚书京畿御河都漕运使侍仪使各部院所属各路各随路诸色人匠总管府各达噜噶齐总管【秩品不一】枢密院签院断事官各院各府所属各卫各亲军各屯田万户府卫使都指挥使达噜噶齐万户【秩品不一】大都督府同知宣政宣徽各院签院光禄寺卿太常礼仪典瑞太史太医将作通政中

政储政各院同知奎章阁承制学士治书侍御史肃政廉访使大都上都留守同知武备
尚乘长信长秋承徽长监长庆监徽各寺卿太府度支
利用中尚章佩经正秘书各监卿中瑞内正各司卿翊正司令内史府中尉延庆司使断
事官元帅府达鲁噶齐元帅宣抚司达鲁噶齐宣抚使
安抚司达鲁噶齐安抚使招讨司达鲁噶齐招讨使上万户府达鲁噶齐万户上路总管
府达鲁噶齐总管管军达鲁噶齐 【有从三品者】
各都转盐运使正议通议嘉议大夫昭武昭勇昭毅大将军上轻车都尉郡侯为正三品
仪凤司大使各卫各亲军副使副都指挥使大都督府
副都督司农丞翰林直学士国子监祭酒集贤院直学士太常礼仪典瑞太史太医中政
储政各院签院艺文监太监都水监通政院副使都护
府崇福司各同知武备寺同判太府度支利用中尚章佩经正秘书各监太监宣慰司同
知中万户下万户府下路总管府各达鲁噶齐万户总
管太中大夫中大夫亚中大夫安远定远怀远大将军轻车都尉郡侯为从三品参议中
书省事各部侍郎各部各院各府寺所属达鲁噶齐都
提举都漕运使同知引进使知侍仪事教坊司会同馆各大使枢密院同签通政院签院
内史府司马各卫各亲军签事签都督事殿中侍御史
廉访副使宣政宣徽太常礼仪典瑞太史太医将作中政储政各院同签奎章阁供奉学
士给事中卫候直达鲁噶齐都指挥使两都副留守司
天监大都上都兵马都指挥宣慰副使各盐运司同知行中书省理问散府达鲁噶齐知
府府尹中议中宪中顺大夫广威宣威明威上将军上
骑都尉郡伯为正四品仪凤司副使光禄寺少卿艺文监少监通政院同签武备太仆尚
乘长信长秋承徽长监长庆监徽各寺少卿太府度支
利用中尚章佩经正秘书各监少监尚供云需各府同知副都护崇福司副使广海盐课
都提举上千户所达鲁噶齐千户上州达鲁噶齐州尹
朝请朝散朝列大夫信武显武宣武将军骑都尉郡伯为从四品中书省右左司郎中客
省使各部各院各卫所属达鲁噶齐副提举及提点都
漕运司副使新运粮司达鲁噶齐都提举教坊司副使枢密宣政宣徽太常礼仪典瑞太
史太医将作通政中政储政各院院判五官正枢密院
各卫所属千户所达鲁噶齐千户翰林集贤各待制国子司业都水司天各少监太府中
尚章佩经正各监丞廉访司签事各总管府同知副总
管各长官司 【品秩不一】 各留守判官中千户所达鲁噶齐千户盐运副使中州达
鲁噶齐知州奉政奉议大夫武节武德将军骁骑尉县
子为正五品各部郎中各部所属各库各司达鲁噶齐提举大宗正府郎中翰林集贤宣
政宣徽太常礼仪典瑞太史将作通政枢密院大司农

御史台各经历集贤院司直奎章阁参书中政储政院司议枢密宣政院各客省使太医
将作院所属各大使 【秩品不一】 宣徽院太府监
武备寺所属各库局提点内史府咨议大都上都所属修内祗应各司及各局大使光禄
寺丞武备以下九寺各寺丞度支秘书艺文各监丞尚
供云需各府副总管崇福司丞行中书省郎中副理问广东盐课提举广海盐课同提举
各路儒学提举市舶提举下千户所达鲁噶齐千户下
州达鲁噶齐知州各处托克托和逊奉直奉训大夫武义武略将军飞骑尉县男为从五
品中书省左右司员外郎客省副使都漕运使判官国
子司天都水各监监丞储政中政各院长史宣徽院所属各大使 【秩品不一】 大都
上都留守司警巡使大都路学校所提举尚供云需各
总管府判官开平宛平大兴三县达鲁噶齐尹各盐运司运判上州同知承德承直郎承
信昭信校尉为正六品各部员外郎各部各院各寺监
及司农司所属提举副提举大使副使提点副提点各署令大宗正府员外郎大都督府
经历翰林及集贤修撰秘书监著作郎内史府记室都
护府崇福司及大都上都留守司经历宣慰司经历官医提举行中书省员外郎广海盐
课副提举广东盐课同提举市舶同提举上百户所百
户中州同知上县达鲁噶齐尹儒林承务郎忠武忠显校尉为从六品中书省右左司都
事检校官各部各院各寺监所属各提举副提举大使
副使提点同提点及各库各局达鲁噶齐大使副使各市各局提领各仓达鲁噶齐监支
纳官侍仪司承奉班都知掌薪司令枢密院御史台都
事太常礼仪院博士大史院保章正灵台郎秘书监著作佐郎秘书郎监察御史批验提
领中百户所百户上州判官下州同知中县达鲁噶齐
尹各处托克托和逊副文林承事郎忠勇忠翊校尉为正七品各部各院各寺监所属提
举同提举副提举大使副使提点同提点各署令各仓
大使大都督府大宗正府大司农司翰林集贤宣政宣徽太常礼仪典瑞太史太医将作
通政各院都护府崇福司宣慰司两都留守司都事仪
凤司枢密院客省使太医院廉访司各卫各亲军各都总管各万户及各盐运司经历应
奉翰林文字光禄寺主事各卫各所所属百户秘书监
及中瑞内正翊正各司典簿行中书省都事检校儒学副提举广东盐课副提举盐场司
令中州判官下县达鲁噶齐尹下百户所百户征事从
事郎修武毅武校尉为从七品中书省照磨管勾架阁库管勾各部各院各寺监所属使
大使副使提领同提领各仓副使掌薪司丞刑部司狱
大都督府御史台司农司及宣政以下各院枢密院照磨管勾各卫各亲军知事照磨宣
徽院各库局知事直长翰林院编修检阅官典籍国子

助教教授秘书监校书郎太史院保章副掌厯廉访司知事两都留守各司局直长行中书省照磨管勾各盐场批验大使各路录事司下州判官登仕将仕郎保义进义校尉为正八品各部各院各卫各亲军各寺监各府所属诸司局知事照磨大使副使提领同提领直长大宗正府管勾太常礼仪院举礼郎奉礼兼检讨协礼郎太祝太史院监候挈壶正教授各盐运使知事各盐场司丞管勾登仕将仕佐郎保义进义副尉为从八品各部各院各卫各亲军各寺监各府所属诸司局照磨大使副使提领同提领枢密院御史台廉访使架阁库管勾太史院各省司厯副监候司晨郎宣慰司照磨批验副使各路儒学教授巡检司为正九品各部各院所属各库各司属管勾大使副使提领枢密院同管勾太常礼仪院礼直管勾太史院管勾印厯管勾学正司天监提学教授学正各科管勾各盐运司照磨各盐场管勾为从九品

（臣）等谨按析津志及元马祖常诸人文集元制上都皆有分院分监而元史百官志不载又大禧宗祿院为一品之秩而院使副使签院诸官皆不载其品左右威卫为亲军要职而副使签事亦不详其品他如各路及各府之同知治中判官推官各县之丞簿尉典史皆亲民之职其品级之大小皆失载史志之疏略可知已又元制各部院寺监卫府所属提举同提举提领同提领大使副使以千百计或详其品或不详其品兹仅撮其大略附载于各品中所以节繁冗亦依郑氏原书简约之例

△明

明制宗人府宗人令左右宗正左右宗人太师太傅太保五军都督府左右都督特进荣禄大夫特进光禄大夫左右柱国驸马都尉公侯伯【按都尉及三等爵秩品不着附见于此】为正一品少师少傅少保太子太师太子太傅太子太保都督同知荣禄大夫光禄大夫柱国为从一品太子少师太子少傅太子少保吏部户部礼部兵部刑部工部尚书都察院左右都御史衍圣公都督僉事留守司正留守都指挥使资善资政资德大夫骁骑金吾龙虎将军正治上卿上护军为正二品承宣左右布政使都指挥同知正奉中奉通奉大夫镇国定国奉国将军正治卿护军为从二品太子宾客吏部户部礼部兵部刑部工部左右侍郎左右副都御史通政使大理寺卿詹事府詹事太常寺卿顺天应天两府府尹按察使京卫指挥使副留守都指挥僉事嘉议正议通议大夫昭勇昭毅昭武将军资治尹上轻车都尉为正三品光禄寺卿太仆寺卿行太仆寺卿苑马寺卿布政司左右参政都转运盐使留守司指挥同知京卫指挥同知宣慰使亚中大夫中大夫大中大夫怀远定远安远

将军资治少尹轻车都尉为从三品左右签都御史左右通政眷黄右通政大理寺左右少卿少詹事太常寺少卿太仆寺少卿行太仆寺少卿苑马寺少卿鸿胪寺卿顺天府丞按察司副使各府知府京卫指挥签事宣慰司同知中顺中宪中议大夫明威宣威广威将军赞治尹上骑都尉为正四品国子监祭酒布政司左右参议转运司同知宣抚使宣慰司副使朝列朝议朝请大夫宣武显武信武将军赞治少尹骑都尉为从四品宗人府经历中极殿建极殿文华殿武英殿文渊阁东阁大学士吏部户部礼部兵部刑部工部郎中通政司左右参议大理寺左右寺丞詹事府左右春坊大学士左右庶子翰林院学士光禄寺少卿尚宝寺卿钦天监正太医院使上林苑左右监正顺天应天两府治中按察司签事各府同知王府左右长史仪卫正千户所正千户宣抚司同知宣慰司签事奉议奉政大夫武德武节将军修正庶尹骁骑尉为正五品吏部户部礼部兵部刑部工部员外郎左右春坊谕德司经局洗马翰林院侍读侍讲学士鸿胪寺左右少卿尚宝司少卿转运使副盐盐课提举市舶提举各州知州五军都督府经历京卫镇抚司镇抚王府仪卫副千户所副千户宣抚司副使安抚使招讨使奉训奉直大夫武略武毅将军协正庶尹飞骑尉为从五品吏部户部礼部兵部刑部工部主事都察院经历詹事府丞大理寺正左右春坊中允翰林院侍读侍讲国子监司业太常寺丞太仆寺丞行太仆寺丞苑马寺丞尚宝司丞钦天监副五官正太医院院判上林苑左右监副中东西南北五城兵马司指挥顺天应天两府通判宛平大兴上元江甯各县知县王府审理正僧录司左右善世道录司左右正一神乐观提点各府通判王府典仗留守司及都指挥司经历断事宣抚司签事安抚司同知副招讨长官司长官百户所百户承直承德郎昭信承信校尉云骑尉为正六品大理寺副左右春坊赞善左右司直翰林院史官修撰光禄寺丞署正鸿胪寺左右寺丞顺天应天两府推官僧录司左右阐教道录司左右演法布政司经历理问转运司判官盐课同提举市舶副提举安抚司副使各州同知千户所镇抚承务儒林宣德郎忠显忠武校尉武骑尉为从六品工部营缮所正都察院都事监察御史通政司经历大理寺评事翰林院编修太常寺典簿博士吏户礼兵刑工六科都给事中行人司司正上林苑左右监丞各典署正五城副指挥王府审理副按察司经历各府推官各县知县京县县丞留守司都事副断事都指挥司都事副断事安抚司签事承事文林宣义郎为正七品翰林院检讨光禄寺典簿署丞太常寺奉祀太仆寺主簿行太仆寺主簿苑马寺主簿六科左右给事中六科给事中

中书科中书舍人詹事府主簿行人司左右司副钦天监灵台郎顺天应天两府经历布政司都事副理问转运司经历盐课副提举各州判官
五军都督府都事京卫指挥司经历宣慰司经历长官司副长官从事征仕郎为从七品
户刑二部照磨户部宝钞司提举工部营缮所副各局
大使大通关提举通政司知事翰林院五经博士国子监丞太常寺协律郎行人司行人
钦天监主簿五官保章正上林苑监各署丞太医院御
医京县主簿僧录司左右讲经道录司左右至灵王府典膳正奉祠正典宝正纪善良医
正工正郡王府典膳按察司知事各府经历各县县丞
京卫知事宣慰司都事迪功修职郎为正八品左右春坊左右清纪郎翰林院典籍国子
监五经博士助教典簿太常寺寺丞光禄寺录事监事
鸿胪寺主簿钦天监挈壶正顺天应大两府知事僧录司左右觉义道录司左右玄义知
观王府典膳副奉祠副典宝副良医副工副布政司照
磨转运使知事宣抚司经历迪功修职佐郎为从八品户刑二部检校户部宝钞司副提
举各库大使兵部会同馆大使工部营缮所丞各院局
大使大通关副提举都察院检校詹事府录事司经局校书翰林院待诏国子监学正太
常寺赞礼郎太仆寺监正苑马寺监正茶马大使钦天
监五官监候五官司历鸿胪寺署丞上林苑录事典簿教坊司奉銮王府典簿典乐典仪
正布政司检校按察司照磨各府知事各县主簿宣抚
司知事将仕登仕郎为正九品各部各院各寺司务户部各库副使各仓大使兵部会同
馆副使刑部司狱工部各院局副使都察院司狱左右
春坊左右司谏司经局正字翰林院孔目国子监学录典籍太常寺司乐牺牲所吏目太
医院吏目光禄寺各司大使教坊司左右韶舞左右司
乐太仆寺监副苑马寺监副录事圉长茶马副使鸿胪寺鸣赞序班钦天监司晨博士顺
天府各学教授照磨司狱各税课大使王府典仪副伴
读教授衍圣公教授郡王府教授镇国将军教授布政司各仓库局大使按察司检校盐
课司市舶司各吏目各府照磨各儒学教授巡检副巡
检各府医学正科各府阴阳学正术僧纲司都纲道纪司都纪宣抚司照磨安抚司招讨
司各吏目将仕登仕佐郎为从九品

（臣）等谨按明制在外文职如经略总督提督巡抚总理赞理巡视抚治诸员皆以都御史或副都御史侍郎及各寺卿少卿奉命莅事故无一定之品武职如总兵官副总兵参将游击将军守备把总皆无品级亦无定员总镇一方者为镇守独镇一路者为分守各守一城一堡者为守备同守一城者为协守又有提督提调巡视备御备倭诸职皆以公侯伯都督及勋戚充之品级无分校前代之制独异又正从九品之

外别有未入流亦前代所无以其官冗职故不胪载云

钦定续通志卷一百三十九

●钦定续通志卷一百四十 选举略一

选举畧【一】

（臣）等谨按举贤任官之制昉于上古自虞廷敷奏以言明试以功为奋庸熙载之本三考黜陟以课其续上庠下庠以储其才后世选造铨课之法国学党塾之教所由并设也杜典之志选举首举周官大司徒之三物宾兴以及汉晋六朝至唐天宝以前取士之殊制综其大纲别为杂议论一卷以备采择而学校则分载于后焉郑志取杜典而删节之沿其体例至德以后则补所未备若长庆之先请详覆建中之改试杂文太和之从内命题与夫殷侑请立史科李德裕议取实艺皆备着于篇则有唐一代之制度备矣惟杂议论一卷杜典本因唐之中叶登进乏才铨选壅滞始议更定其条例又取赵匡沈既济诸奏议评推其是非然其意祇欲救一时之弊固不暇为累代久远之谟也其举人条例请令通礼记尚书孝经论语者必兼通道德诸经管墨诸子盖唐人尊奉老子置崇元观及道学生徒故诸子与六经并重宋以后专尚儒学凡不在六艺之科折衷孔孟者皆不立于学宫视唐制之兼采诸子为醇正矣其选人条例请令两都选人来年先试以定等第盖唐时选法在洛州者谓之东选在岭南者谓之南选皆就近授职以省往来其后江南淮南福建并遣郎官御史为选补使选法不一故当预定其章程后世铨政多总于尚书无所谓诸州分选之事矣至选举杂议欲广外州辟召以分选柄则又狃于藩镇辟官之见在唐时亦未见其议之尽善也郑志之述杜典惟以宋承唐制选举之法屡有改移故载前人议论以待取裁岂必以杜典之条例可垂法守哉夫时异势异因变制宜立议之规切利弊者亦祇补救于一时迨世代既久流弊亦殊设追举其言而起行之庸有当乎即以宋名臣之建议者论之如苏轼之议贡举请复诗赋而罢经义因言选举之道不必尽由于学此为王安石之设三经新义而发也及新义既废则选举悉由学校未尝不行之永久司马光之请立十科欲以省唐代科目之繁抑宋时特奏名之滥也元明进士皆无特奏名之例而元之考试程序明之三途并用又与唐宋之科目迥殊矣诸臣立议在当时未尝不凿然可见施行故诸史皆取其事之切时政者类编于志以考见古今得失若专采议论别为一帙不与时事相附丽则虽指陈剴切徒托空言且五朝法制彼此互殊利病各见必不能定从一家之议以折衷前代之权衡又无庸兼采同异诸说往复诘难先后参差而

仍无益于考证此杜典杂议不必袭也臣等承命续修选举畧凡唐制之详于郑志者无俟复载自五代宋辽金元明诸史选举之制详为综核以次汇叙而于臣僚之条议散见诸篇不别为总系焉唐以后用人皆资科举故前列进士制科次之荐举及胥史又次之而铨选则详其条格为历代制二卷宋时重磨勘之法特置考课院金元皆更定考课之法明代考绩要其成于吏部总为考绩一卷太学用人及州郡置学宋制较唐代为广元明多仍宋制谨详其规约为学校一卷其篇目之前后仍以郑志为叙

历代制上

○历代制上

五代

△五代

五代科举取士皆仍唐制惟知贡举则临时简授不限常格先是唐开元时以礼部侍郎专知贡举其后或以他官领多用中书舍人及诸司四品清资官梁始以尚书左仆射知贡举后或以户部侍郎刑部侍郎为之不专领于礼部太祖开平元年敕近年举人当秋荐之时不亲试者号为拔解今后宜止绝又敕礼部贡院每年所放明经及第不得过二十人后唐庄宗同光三年敕今年新及第进士符蒙正等令翰林院覆试今后礼部所试委中书门下详覆奏闻是时工部侍郎任赞奏请诸色举人不是家在远方水陆隔越者逐处选宾从官僚中艺学精博一人各于本贯一例分明比试如非通赡不许妄给文解明宗天成五年正月礼部贡院奏当司准天成三年十二月敕文内准近敕自此进士试杂文后据所习本经一二考试须帖得通三以上即放及第者奉敕进士帖经本朝旧制盖欲明先王之旨趣阅多士之文章近代以来此道稍坠今且上从元辅下及庶僚虽习百艺者极多能明经者甚少恐此一节或滞羣才今年凡应进士举所试文策及格帖经或不及通三与放及第来年秋赋词人所习一本经许令对义目多少次第仍委所司条例闻奏其今年本经内对义二目五道考试通二通三准帖经例放入第其将来秋赋诸寺监及诸州府所解送进士第亦准去年十月敕考具诗赋义目帖经等并解送赴省如或不依此解送当司准近敕并不许送试其悉奉敕行长兴元年敕进士科已及第者计选数年满日许令就中书省陈状于都堂前各试本业诗赋判文等其中才艺灼然可取者便与除官如或事业未甚精者祇许准添选周太祖广顺三年敕礼部贡院于引试之前精加考核逐场去留无艺者虽应举年深不得饶借场数有艺者虽遭黜落并许陈诉户部侍郎权知贡举赵上交奏进士原试诗赋各一首帖经二十

帖对义五道今欲罢帖经对义别试杂文二首试策一道从之后刑部侍郎权知贡举徐召符奏请别试杂文二首外其帖经对义亦依原格从之世宗显德二年敕礼部贡院奏今年新及第进士李覃等一十六人所试诗赋文论策文等国家设贡举之司求俊茂之士务询文行以重科名比闻近年以来多有滥进或以年劳而得第或因媒势以出身今岁所贡举人试令看详果见纰谬须至去留其李覃等四人宜放及第其严说等一十二人艺学未精并宜黜落且令苦学以俟将来礼部侍郎刘温叟失于选士颇属因循据其过尤本应谴谪尚示宽恕特与矜容刘温叟放罪将来贡举公事仍令所司具条理闻奏又尚书礼部侍郎知贡举窦仪奏其进士请今后省卷限纳五卷以上于中须有诗赋论各一卷余外杂文歌篇并许同纳帖经对义并须实考通三以上为合格其不及人以文义优劣为五等取文字乖舛词理纰谬最甚者为第五等殿五举其次者为第四等殿三举以次稍优者为第三等第二等并许次年赴举其所殿举并于所试卷子上朱书封送中书门下请行指挥五年诏曰比者以近年贡举颇是因循频诏有司精加试练所冀去留无滥优劣昭然昨贡举院奏今年新及第进士等所试文书或有臧否爰命词臣再令考核其刘恒等诗赋稍优宜放及第王汾文词未至精敏念以顷曾驳落特与成名熊若儒陈保衡皆是远人深可嗟念亦放及第其郭浚等并从退落更宜修进以俟将来知贡举右谏议大夫刘涛选人不当有失用心可责授右赞善大夫五代制度紊隳举士私滥周世宗励精图治激励斯严焉其它制科童子科则晋出帝开运元年一行之周太祖广顺三年正月赵上交奏童子凡念书二十四道今欲添念书通前五十道念及三十道者放及第从之世宗显德二年窦仪奏罢之明法科则后唐明宗长兴二年七月敕明法科今后宜与开元礼科同其选数兼赴举之时委员院别奏请会法试官依格考试晋高祖天福六年五月敕明法一科今后宜令五选集合格注官日优与处分周太祖广顺三年正月赵上交奏明法原帖律令各十五帖对义二十道今欲罢帖律令试墨义六十道从之宏辞拔萃科则梁太祖开平三年一举行之登科者二人前进士余渥承旨舍人李遇后唐明宗天成三年深州参军王蟾一人欲应此举有司不谙条例乃援引唐故事敕考官焉长兴元年复行之应书判拔萃祇有卢氏县主簿张岫后即停罢 【按五代进士科多不过二十余人少或十数人诸科唯后汉天福十二年取百五十五人干佑元年多至百七十九人其余或七八十人少亦竟至一二人】 至铨法则乱离之后文籍散失虽间有创设亦多权宜补苴之计后唐庄宗同

光二年八月中书门下奏本朝创立检制奸滥伦叙官
资颇谓精详久同遵守自乱离之后巧伪滋多兼同光元年八月车驾在东京权判南曹
工部员外郎卢重因兴复之始务切怀来凡有条疏多
失根本以至冬集赴选人并南郊行事官及陪位宗子共一千三百余人铨曹检勘之时
互有援引去留之际不绝争论若又依违必长讹滥望
差权判尚书省铨左丞崔沂吏部侍郎崔贻孙给事中郑韬光李光序吏部员外郎边损
等同详定旧长定格循资格十道图务令简要可久施
行从之明宗天成二年三月铨司奏选人或有出身或因除授各拘常例方赴调集其有
因远地干戈兼以私门事故遂致过格固非愿为伏请
且依旧格不问过格十年外不在赴选之限从之天成四年五月敕今后应前资州县官
及两除官可依常调赴选兼有庄宗及朕御署亦准近
敕赴选其一任除官未入选调若无定制难以进身宜约所守官资序高卑许令同有出
身人合格年限求官赴京日仍须本道申送其解由考
牒罢任年月分明别与除授第二任官两除后便准常调选人例如藉才升擢不在此限
又敕应进策人等若是选人所进内一事可行与减两
选两事减四选三事以上依资与官如无选可减及所欠选数则少可行事件则多据等
第更优与恩奖其诸色举人不在进策之限闵帝应顺
元年闰正月中书门下奏天成二年敕准长定格应经学出身一任三考许入下县令下
州录事参军亦入中州录事参军两任四考许入中下
县令中州录事参军两任六考许入上县令紧州录事参军凡为进取皆有缘因或少年
便受好官或暮齿不离卑任况举士或年四十始得经
学及第八年赴调方受一官于一任之中多不成三考再来赴选年已蹉跎有一生不至
令录者若不改革何以发扬自此经学出身一任两考
许入中下县令下州录事参军奉敕其经学出身一任两考元敕入中下县令下州录事
参军今后更许入下县令中州下州录事参军一任三
考者于人户多处州县注拟如于近敕内资序无相当者即准格循资考入官其两任四
考者准五考例入官余准格条处分周世宗显德元年
初令翰林学士两省官举令录除官之日署举者姓名若贪秽败官连坐五月吏部奏流
内铨准格例南曹十一月末开宿判成选人后先具数
申铨司铨司举状便榜示选人引纳京诸司官使印家状及试判纸三度榜引得齐足方
至十二月上旬内定曰鑠铨应行内诸司公事或有干
系申铨司取裁便准敕格指挥如铨司难议裁酌即申堂取裁焉 宋之科目有进士有
诸科有武选常选之外又有制科有童子举而进士得
人为盛神宗始罢诸科而分经义诗赋以取进士其后遵行未之有改初礼部贡举设进

士九经五经开元礼三史三礼三传学究明经明法等
科皆秋取解冬集礼部春考试合格者列名发榜于尚书省凡进士试诗赋论各一首策
五道帖论语十帖对春秋或礼记墨义十条凡九经帖
书一百二十帖对墨义六十条凡五经帖书八十帖对墨义五十条凡三礼对墨义五十
条凡三传一百一十条凡开元礼三史各对三百余条
凡学究毛诗各对墨义五十条论语十条尔雅孝经共十条周易尚书各二十五条凡明
法对律令四十余条兼经并同毛诗之制各间经引试
通亦为合格仍抽卷问律本科则否诸州判官试进士录事参军试诸科不通经义则别
选官考校而判官监之凡诸司长吏举送必先稽其版
籍察其行为乡里所推每十人相保内有缺行则连坐不得举自唐以来所谓明经不过
帖书墨义观其记诵而已故贱其科而不通者其法特
重太祖干德元年诏曰旧制九经一举不第而止非所以启迪仕进之路也自今依诸科
许再试又诏食禄之家有登第者礼部具姓名以闻令
覆试之 【按太祖干德三年陶谷子邴擢上第帝曰谷不能训子安得登第故有是诏】
开宝三诏礼部阅贡士及十五举尝终场得一百六
人赐本科出身特奏名恩例盖自此始翰林学士李昉知贡举有诉其用情取舍者帝乃
籍终场下第人姓名得三百六十人皆召见御殿给纸
笔别试诗赋赐数十人及第于是殿试遂为常制太宗太平兴国三年得第者五百余人
唐后未有如此之盛其甲乙第一进士及九经皆授为
将作监丞大理评事通判诸州其余亦优等授官仁宗天圣时天下又安取才唯进士诸
科为最广名公巨卿皆由此选而仁宗亦向用之登上
第不数年辄显贵其贡礼部而数拙者得特奏名或因循不学乃诏曰学犹殖也不学将
落朕虑天下之士或有遗也既已临轩较得失而忧其
屡不中科则衰迈而无所成退不能返其里闾而进不得预于禄仕故常数之外特为之
甄采而徇于宽恩遂隳素业苟简成风甚可耻也自今
宜笃进厥学无习侥幸焉嘉佑二年又定明经试法凡明两经或三经五经各问大义十
条两经通八三经通六五经通五为合格兼以论语孝
经时务三条出身与进士等又定制进士第一除大理评事签书两使幕职官代还升通
判再任满试馆职进士第二第三除两使幕职官代还
改次等京官第四第五除试衔知县代还迁两使职官哲宗元佑四年立经义诗赋两科
凡诗赋进士于易诗书周礼二记春秋左传内听习一
经初试本经义二道语孟义各一道次试赋及律诗各一首次论一首末试子史时务策
二道凡专经进士须习两经以诗礼记周礼左氏春秋
为大经书易公羊谷梁仪礼为中经左氏春秋得兼公羊谷梁书周礼得兼仪礼或易礼

记并兼书初试本经义三道论语义一道次试本经义
三道孟子义一道次论策如诗赋科并以四场通定高下而取解额中分之各占其半专
经者用经义定取舍兼诗赋者以诗赋为去留其名次
高下则于策论参之又立经明行修科岁委升朝文臣各举所知以勉励天下使敦士行
以示不专取文学之意预荐者不试于州郡唯试礼部
不中许用特奏名格赴廷试徽宗崇宁三年遂诏天下取士悉由学校升贡其州郡发解
及试礼部法并罢乃行三舍之法宣和三年又罢之唯
大学仍存三舍以甄序课试遇科举仍自发解时奏名赐第者八百余人因上书献颂直
令赴试者殆百人自设科以来南宫试者无踰此年之
盛士又有不由科举若三舍而赐进士第出身者南渡后复诏复位科举之制高宗建炎
二年定诗赋经义取士第一场诗赋各一首习经义者
本经义二道语孟义各一道第二场并论一道第三场并策三道殿试亦如之自哲宗绍
圣后举人不习诗赋至是始复帝亲策于集英殿赐正
奏名李昌以下四百五十人进士及第进士出身同学究出身同出身第一人为左宣教
郎第二三人左宣义郎第四第五人左儒林郎第一
甲第六名以下并左文林郎第二甲并左从事郎第三甲并左迪功郎后国子司业高阅
言取士当先经术请参合三场以本经语孟义各一道
为首诗赋各一首次之子史论一道时务策一道又次之庶几如古试法又春秋义当于
正经出题从之以后或重诗赋或重经义虽屡有更张
大约不离初制至其制举则无常科所以待天下之才杰天子每亲策之然宋之得才多
由进士以制科应诏者少唯召试馆职及博学宏词间
有忠鲠文学之士起焉或取之山林或取之朝宁多至大用自太祖始置贤良方正能直
言极谏经学优深可为师法详闲吏理达于教化凡三
科不限前资见任职官黄衣草泽悉许应诏对策三千词理俱优则中选既有司举之士
子亦得诣阙自荐然举之极少或塞责应诏则悉以不
中式而报罢焉真宗景德二年增置博通坟典达于教化才识兼茂明于体用武足安边
洞明韬畧运筹决胜军谋宏远材任边计等科诏中书
门下试察其才具名闻奏将临轩亲策之自是应令者寔广而得中高等亦少于是复增
置书判拔萃科以待选人高蹈邱园沉沦草泽茂材异
等等科以待布衣之被举者其法先上艺业于有司有司较之然后试秘阁中格天子又
亲策之又因欧阳修言命宰执各举馆职五人其直言
极谏南渡后高宗绍兴七年一行之于是吕祉举选人胡铨汪藻举布衣刘度即除铨枢
密编修官而度不果召他如沿唐制者有童子科凡童
子十五岁以下能通经作诗赋州升诸朝而天子亲试之真宗景德二年抚州晏殊大名

府姜盖始以童子召试诗赋赐殊进士出身盖学究出身寻复召殊试赋论帝嘉其敏贍授秘书省正字后或罢或复南渡后唯朱虎臣授官赐金带后祇以诵书为事其科遂轻又有荐举之科或命公卿或诏州郡搜罗如治平之黄君俞熙宁之王安国元丰之程颐元佑之陈师道元符之徐积则卓然较著者也高宗垂意遗逸首召布衣谿定而尹焞以处士入讲筵其后束帛之聘王忠民以忠节张志行以高尚刘勉之胡宪以力学皆赐出身教授本郡云至宋铨法多袭唐制而稍损益之凡八仕有贡举有奏荫摄署流外从军五等吏部铨唯注拟州县官幕职两京诸司六品以下官皆无选文臣少卿监以上中书主之京朝官则审官院主之武臣副率以上内职枢密院主之使臣则三班院主之其后典选之职分为四文选曰审官东院曰流内铨武选曰审官西院曰三班院元丰定制而后铨注之法悉归选部以审官东院为尚书左选流内铨为侍郎左选审官西院为尚书右选三班院为侍郎右选于是吏部有四选之法文臣寄禄官自朝议大夫职事官自大理正以下非中书省敕授者归尚书左选武臣升朝官自皇城使职事官自金吾卫仗司以下非枢密院宣授者归尚书右选自初仕至州县幕职官归侍郎左选自借差监当至供奉官军使归侍郎右选凡应注拟升移叙复荫补封赠酬赏随所分隶校勘合格团甲以上尚书省若中散大夫合门使以上则列选叙之状上中书省枢密院得画旨给告身凡选人阶官为七等其一曰三京府判官留守判官节度观察判官其二曰节度掌书记观察支使防御团练判官其三曰军事判官京府留守节度观察推官其四曰防御团练军事推官军监判官其五曰县令录事参军其六曰试衔县令知录事其七曰三京军巡判官司理户曹司户法曹司法参军主簿县尉其七阶选人须三任六考用奏荐及功赏乃得升改自五代以来牧令悉受节度节制其节度观察往往专恣太祖重惩其弊削夺外权命文臣往莅之由是内外所授官多非本职唯以差遣为资历太祖干德元年诏选朝士分治剧邑以重其事大理正奚屿知馆陶监察御史王佑知魏杨应梦知永济屯田员外郎于继徽知临清常参官宰县自此始【按前代牧令多铨于吏部宋则特命朝臣往莅其职乃有知府知县之称亦一代之制也】然其时选格未备二年命陶谷等议凡拔萃制举及进士九经判中者并入初等职官判下者依常选帝又虑选曹唯用资历而才杰或绌于下僚乃诏吏部取赴集选人历任课绩多而无阙失其材可副升擢者送中书引验以闻时仕者愈众颇委积不可遣开宝初令选人应格者到京即赴集不必限四时及成次甲又给限南曹八日铨司旬有

五日门下省七日自磨勘注拟及点检谢词总母踰一月若别论课绩或负过名须考验行遣如法及资考未合注拟者不在此限其时选用庶僚皆得引对观其敷纳可采者超擢之复虑因缘矫饰徼幸冒进乃诏应临轩所选官吏并送中书下考其履历审取进止旧制州县官南曹判成流内铨注拟其职事官中书除授然而历任功过须经南曹考验遂令幕府官罢任并归铨曹其特除拜者听朝旨然身言书判之试尚沿唐制真宗朝议者以为无益罢之乃立铨试之制命两制三员鑱试于尚书省糊名誊录习词业者试论试诗赋词理可采不违程序为中格习经业者人专一经兼试律十而通五为中格听预选士选以上经三试至选满京朝官保任者三人补远地判司簿尉无举主者补司士参军或不赴试亦无举者永不预选京官年二十五以上岁赴试于国子监如选人中格者调官自太祖干德以来铨曹之外又有中书堂选百司郡县奏举虽小大殊科然皆不隶于有司神宗元丰初中书无堂选奏举亦罢一时更制必欲公天下而诒永久于是除免选之恩重出官之试定赏罚之则酌资荫之宜凡设试以待命士而入之铨注者自荫补铨试之外有进士律义武臣呈试及试刑法官等而铨试所受为特广又更定铨试之制凡守选者岁以八月二月试断按二或律令大义五或议三道后增试经义法官同铨曹撰式考试第为三等上等免选优等升资如判超格无出身者赐之出身任子年及二十听赴铨试其试不中或不能试选人满三岁许注官哲宗时御史上官均言今任籍合文武二万八千余员当清其源宜加裁折朝廷下其章议之苏轼上议曰祖宗旧制凡任子年及二十五方许出官进士诸科初命及已任而应守选者非逢恩不得放选先朝患官吏不习律令欲诱之读法乃减任子出官年数去守选之格概令试法通者随得注官自是天下争诵律令于事不为无补然人人习法则试无不中故荫补者例减五年而选人无复选限吏部今年已用后四年夏秋阙官冗至此亦极矣宜追复祖宗守选旧法而选满之日兼行试守之科【按宋制除授职事官并以寄禄官品高下为法凡高一品以上者为行下一品者为守二品以下为试品同者不用行守试】此亦今日之便也事报闻南渡后行都置吏部时四选散亡名籍莫考始下诸道州府军监条具属吏寓官之爵里年甲出身历仕功过举主到罢日月编而籍之然自兵难以来典籍散失吏缘为私申明繁苛承用踳驳保任滋众阻会无期参选者苦之乃令凡文字有不应于今而披牒参照明白从郎官审覆长贰予决有徇私挟情则令御史纠之又诏京畿京东河北京西河东士夫在部注受虽铨未中而年及者皆听

注官然行在匆遽设官未有成制起居郎胡寅言今典章文物废坠无几百司庶府不可阙者莫如吏部姑置侍郎一员郎中二员胥吏三十人凡常程之事可按而举诏三省议之会广东转运司以所录元丰元佑吏部法来上乃以省记旧法及续降指挥详定焉干道时有议减任子者帝以祖宗法令难于遂改令吏部严选试之法旧制任子降等补文学及恩科人皆免至是悉试焉凡未经铨中及呈试者勿堂除虽墨敕亦许执奏理宗绍定元年臣僚上言铨曹之患员多阙少注拟甚难自干道嘉定以来尝命选部职官窠阙各于元出缺年限之上与展半年用阙历年浸久入仕者多即今吏部参注之籍文臣选人武臣小使臣校尉以下不下二万七千余员大率四三人共注一阙宜其胶滞壅积而不可行乞命吏部录参司理司法令丞监当酒官于元展限之上更展半年从之于是监察御史陈垓建言乞申戒饬铨法十弊一曰添差数多破法耗财【谓倅贰幕职参议几宜总戎铃辖监押之类】二曰抽差员众州县废职【谓监司帅守幕属多差见任州县他官权摄】三曰掇局违法蠹政害民【谓监司帅守徇私差权幕属等职】四曰须入不行徼幸挠法【谓初改官人必作知县今多规免苟图京职躐求倅贰遂使不曾历县之人冒当郡寄】五曰奏辟不应奔竞日甚【按宋代辟举之法屡罢而屡复】六曰改任巧捷紊乱官常七曰荐举不公多归请托八曰借补繁多官资泛滥九曰瘵旷职守役心外求十曰匿过居官翫视国法旧制军功补受之人自合从军无参部及就辟之法比年诸路奏功不实夤缘窜名许令到部及诸司纷然奏辟实碍铨法且自兵兴之后杂流补授者众有曰上书献策曰勤王曰守御曰捕盗曰奉使其名不一皆阍帅假便宜承制之权以擅除擢有进士径补京官者有素身冒名即为郎大夫者至是始诏从军应赏者第补右选以清流品云

钦定续通志卷一百四十

●钦定续通志卷一百四十一 选举略二

选举畧【二】

历代制下

○历代制下

辽

金

元

明

△辽

辽初官职多由帐院所选不设科举保荐之法至景宗保宁八年诏复南京礼部贡院圣宗统和以后用唐宋之制取士六年诏开贡举一人及第是年三月宋进士挈家来归者十七人命有司考其中第者补国学官余授县令簿尉十二年诏郡邑贡明经茂才异等自是以后放进士及第者每年有之大约不过二三人或间一二年举行开泰中始广进士之额景福以后增至六十余人五年御元和殿试进士于廷以冯立为右补阙赵徽以下皆为太子中舍赐绯衣银鱼遂大宴御试进士自此始于是定进士接见之仪从时相至御帐前通名榜子与时相榜子同奏其赐等甲敕仪依等甲唱名引两阶上殿就位赐座酒其赐章服仪宣敕赐章服更衣谢恩赐宴簪花寿隆后进士及第多至百余人他如制科则道宗咸雍六年设贤良科诏应是科者先以所业十万言进然终辽之世仅三诏而已【咸雍十年御永安殿策贤良至天祚干统二年复策贤良】其统和三年北皮室详袞进勇敢士十二年诏诸道军勇敢者具以名闻则犹宋之武举也至世及之制自国初行之终其代不易皇族四帐世选北宰相国舅五帐世选南宰相太祖时百官择人必先宗姓天显二年诏选约尼氏九帐子弟可任官者穆宗应历五年命郎君萧哈里世为北府宰相时萧和斯为北院枢密使命世预宰相选辞曰臣子孙贤不肖未可知得一客省使足矣从之景宗保宁时耶律思温为北院枢密使兼北府宰相仍命世预其选兴宗重熙中诏世选官择有才能者用于是贤否稍汰焉其铨政不掌于吏部有契丹北枢密院掌兵机武铨羣牧之政凡契丹军马皆属焉契丹南枢密院掌文铨部族丁赋之政凡契丹人民皆属焉

△金

金制进士科目兼采唐宋之法而增损久其及第出身视前代特重太宗天会元年急欲得汉士抚辑新附故设科取士无定数亦无定期至明年二月凡再行五年河北河东初降职员多缺以宋辽制不同诏南北各因其所习业取士号南北选熙宗天眷初诏南北选各以经义词赋两科取士海陵天德三年并南北选为一罢经义策试两科专以词赋取士正隆元年命以五经三史正文内出题定以三年一举世宗大定四年专选女真人颁行女真大小字所译经书每穆昆选二人习之寻兴女真字学校于明安穆昆内多择良家子为生诸路至三千人遂选异等者得百人荐于京师廩给之命教以古书作诗策复试得图克坦镒三十余人乃定制每场策一道以五百字以上咸免乡试府试止赴会试

御试且诏京师设女真国子学诸府设女真府学以新进士充教授以教士民子弟之愿学者俟行之久学者众则三年一试之乃以图克坦镒等教授中外其学大振遂定制以策诗赋三场策用女真大字诗用小字既而以选补县令缺员帝问翰林直学士李晏晏对曰国家设科始分南北两选北选词赋进士擢第一百五人经义五十人南选百五十人计三百五十人嗣后北选词赋进士七十人经义三十人南选百五十人尚有二百五十人其后南北通选止设词赋科不过取六七十人以入仕者少故县令员缺帝曰自今文理可采者取之定限以数章宗承安四年更定科举策论二人取一词赋经义五人取一五举终场年四五十以上四举终场年五十以上者受恩 【按此即宋特奏名恩例】

又令策论进士试弓箭格宣宗贞佑时策论词赋经义进士及武举人入见赐诰命章服其它制科偶一行之章宗明昌元年初设应制宏词科二年设制举有贤良方正能直言极谏博学宏词达于从政等科试无常期听内外文武六品以下职官无公私过者从内外五品以上官属于所属诏试之若草泽士德行为乡里所服者则从府州荐凡试则先投所业策论三十道于学士院视其词理优者委官以羣经子史内出题一日试论三道如可则廷试策一道不拘常格取其无不通贯者优等迁擢之宏词科试诏诰章表露布檄书皆用四六诫谕颂箴铭序记则或依古今体或参用四六其除官上等迁两官次等迁一官临时取旨授之承安二年定保举德行才能格泰和中复申明其制焉其武举则始于皇统至承安时始定制其制试以弓箭枪法再问律一条孙吴事十条继又敕行尚书省有方略出众武艺绝伦招选之宣宗贞佑三年武举中者同进士例其随处武举入试非居现职及已用于军前者令郡县尽遣诣京师别为一军以备缓急其被荐而未授官者亦量才任之并诏近臣举良将然科举虽行所举人终鲜实用金代科目得人进士为极盛至如诸宫护卫及省台译史令史通事仕进皆列于正班宣宗南渡后吏习日盛仕进之歧既广侥幸之俗益炽军伍劳效杂置令录门荫右职日以繁多科举取士亦随泛滥焉其铨法则文武选悉掌于吏部自从九品至从七品职事官部拟正七品以上呈省以听制授凡进士则授文散官谓之文资官自余皆武散官谓之右职又谓之右选文资则进士为优右职则军功为优自进士举人劳效应袭恩例之外入仕之途甚多皇统时定牌印护卫令史之出职海陵时置检法知法国史院书写大定时又定宗室将军宫中诸局承应人宰相书表太子护卫妃护卫王府祇候郎君内侍及宰相之子并译史通事省祇候郎君亲军骁骑诸格章宗

时又置太常检讨内侍寄禄官皆仕进之门户词赋进士状元除应奉余授令簿等官其经义进士女真进士则不得除应奉律科经童祇授司候等职而已省令史译史出职则授六品以下官省通事枢密院令史译史出职则授从七品以下官自海陵天德四年以河南北选人并赴中京吏部各置局铨注又命吏部尚书萧颐定河南北官通注格以诸司横班大解并大将军合注差人依年例一就铨注余求仕人分四季拟授遂为定制大定初诏随朝官能否大率可知若外路转运司幕官以至县令但验资考其中纵有忠勤廉洁者无路而进是此人终身不敢望三品矣自今通三考视其能否以定升降为格又今用人之法甚弊其有不求闻达入仕虽久限于冗职至三四十年不离七品者而新进结朝贵致显达岂激劝之道于是清州防御使常德辉上言吏部格法止叙年老是以虽有才能拘于法而不得升以致人才多滞下位刺史县令亲民之职多不得人乞加体察从之章宗明昌三年诏旧制每季到部求仕人识字者试以书判不识字者问以疑难二事体察言行相副者依条试验量与升除宣宗贞佑二年以播越流离官职多阙命河朔诸道宣抚司得补七品以下南迁后诏吏部以秋冬于南京春夏于中都置选赴调者惮于北行率皆南来遂于南京设之大抵金制简约铨法自国初既定而后无甚更张选人待阙不致如唐宋之冗杂其举荐之典偶一诏行之始自大定二年诏随朝六品外路五品以上官各举廉能官一员后以选举十事命奉御赫噜谕尚书省定拟其一旧格进士军功最高初除丞簿至八九任始至刺史令提刑采访可用之才减资格而用之其二旧格任满四日有四降之例今若其人果才能可为免降其三随路提刑所访廉能之官就令定其堪任职事从宜迁注其四从来宰相不得与求仕官相见无以知天下人材优劣其许相见以访才能其五旧时臣下虽知亲友有可用者皆远嫌不引荐今以五品以上各举所知几人其六前代官到任之后即举可自代者今自五品以上官举自代以备交承内外五品以上到任须举所知才行官一员以自代其七随朝外路长官一任之内足知僚属之能否每任可令举几人其八人才随色有之监临诸物料及草泽隐逸之士不无人才宜荐举用之令外路五路随朝六品以上举廉能直言长官移文转申省差官察访得实随才任使草泽隐逸当遍下司县以提刑司察访呈省随色人才令内外五品以上职官荐之其九亲军出职内有尤长武艺勇敢过人者其令内外官举提刑司察升品拟注其十内外所荐人才即依所举试之委提刑司采访虚实果能称职更加迁擢如或碌碌即送常调凡各款随色能举一人即

充岁举之数尚书省覆察相同则置簿籍之如有阙随才奏拟又敕齐民中有德行才能者司县举之特赐同四举五举人例兴定后诏辟举县令而所举官或私其亲或徇于请求或谬于鉴裁以滥去者甚众哀宗正大元年令监察御史司农官先访察随朝七品外路六品以上官清慎明洁可为举主者然后移文使举所知仍以六事课殿最而升黜其举主于是举主既为之尽心县令亦得人矣

△元

元制仕进多歧铨衡亦无定制其出身有出于学校者有国子监学有蒙古字学回国学有医学有阴阳学其策名于荐举者有遗逸有求言有进书有童子其出于宿卫勋臣之家待以不次其用于宣徽中政之属重为内官又荫叙有循常之格而超擢有选用之科由直省侍仪出官者亦名清望以仓庾赋税任事者例视冗职至工匠皆列班资舆隶亦跻流品吏道杂而进仕之阶最宽焉然自宋五代辽金悉重科举元则偶一举行而已太宗九年下诏命断事官穆呼尔岱与山东西路课税所长官刘中立诸路考试以论及经义词赋分为三科分三日程专治一科能兼者听但以不失文义为中选其中选者复其赋役令与各处长官同署公事得东平杨奂等若干人皆一时名士而当世咸以为非便复中止世祖中统二年四月命宣抚官举文学才识可以从政及茂才异等列名上闻以听擢用至元初丞相史天泽等议及科举当行仍不果行四年翰林学士承旨王鹗等请行选举法以为贡举不行士无仕进之阶或习刀笔以为吏胥或作仆役以事官僚或作技巧贩鬻以为工匠商贾以今论之惟科举取士最为切务奏上帝曰此良法也其行之中书与翰林学士议立程序又请依前代立国学选蒙古人诸职官子孙百人专命师儒教习经义俟其艺成然后试用庶凡勋旧之家人材辈出以备超擢议上不果行后丞相和尔果斯留梦炎翰林学士王恽屡上言不用仁宗皇庆二年中书省又奏请开科并言取士之法经学实修己治人之道词赋乃摘章绘句之学自隋唐以来取士专尚词赋故士习浮华今臣等所拟将律赋省题讨小义皆不用专立德行明经科以此取士庶可得人帝然之乃下诏以皇庆三年八月天下郡县兴其贤者能者充赋有司次年二月会试京师中选者亲策焉其科场之制每三岁一次开试举人从本贯官司于诸色户内推举年及二十五以上乡党称其孝悌朋友服其信义经明行修之士以礼敦遣诸路府或徇私滥举并应举而不举者监察御史肃政廉访司体察究治其考试程序蒙古色目人第一场经问五条大学论语孟子中庸内设问朱氏章句集注其义理精明文词典雅

者为中选第二场策一道以时务出题限五百字以上
汉人南人第一场明经经疑二问大学论语孟子中庸内出题并用朱氏章句集注复以己意结之限三百字以上经义一道各治一经限五百字以上不拘格律第二场古赋诏诰章表内科一道古赋诏诰用古体章表四六参用古体第三场策一道经史时务内出题不矜浮藻唯务直述限一千字以上蒙古色目人愿试南人汉人科目中选者加一等注授蒙古色目人作一榜汉人南人作一榜第一名赐进士及第从六品第二二名以下及第二甲皆正七品第三甲以下皆正八品两榜并同又定制乡试八月二十日蒙古色目人试经问五条汉人南人明经经疑二问经义一道至二十三日蒙古色目人试策一道汉人南人古赋诏诰章表内科一道二十六日汉人南人试策一道会试省部依乡试例定期次年二月分三场试三月于殿廷考试汉人南人试策一道限一千字以上成蒙古色目人时务策一道限五百字以上成【按元时乡试行省十一共选合格者三百人赴会试于内取中选者一百人】延佑二年用赵孟俯元明善议贡试之法凡蒙古由科举出身授从六品色目汉人递降一级岁贡八人上四人充部令史下四人各路教授泰定初中书省臣奏下第举人仁宗延佑间命中书省各授教官之职以慰其归今当改元之初恩泽宜溥蒙古色目人年三十以上并两举不第者与教授以下与学正山长汉人南人年五十以上并两举不第者与教授以下与学正山长先有资品出身者更优加之不愿仕者令备国子员以后下第之士间有试补书吏以登仕籍者顺帝至元元年诏罢科举至六年始复举行其外如医学之官转至常调可任亲民他如荐举之制亦屡诏焉世祖至元十八年诏求山林隐逸之士继遣侍御史程文海访求江南遗才又命求隐晦之士俾有司具以名闻然其时如刘因萧■〈奭斗〉辞召不赴武宗至大四年旺扎勒李孟等言方今进用儒者而老成日以凋谢四方儒士有成材者请擢任国学秘书太常或儒学提举等职俾学者有所激劝帝曰自今勿限资级果才而贤虽白身亦任用之仁宗延佑元年敕各省大臣专意访求遗逸苟得其人先以名闻而后致之七年诏曰比岁设立科举以取人才尚虑高尚之士晦迹邱园无从可致其有隐居行义才德高迈深明治道不求闻达者所在官司具姓名牒报本道廉访司覆奏察问以备录用又屡诏求言于下使得进言于上虽指斥时政并无谴责往往采择其言任用其人列诸庶位以图治功其它著书立言裨益教化启迪后人亦斟酌录用着为例程英宗至治三年召前集贤侍讲学士赵居信为翰林学士承旨前直学士吴澄为学士因命搜访山林隐

逸顺帝至正中前后征处士张枢彭炳郑玉等以枢为翰林修撰炳为端本堂说书玉为翰林侍制皆不至若铨法则多与前代制不同大抵元制仕进者多以胥吏起家故有部令史译史通事出职后注六品台院大司农司译史令史出职多正八品其各院各寺监令史考满皆作正七品或八品九品不等至诸王分地与所受汤沐邑得自举其人以名闻朝廷而后授其职世祖至元二年乃诏各投下总管府长官不迁外其所属州县长官于本投下分到城邑内迁转其投下官必用蒙古人员他如大禧宣徽诸院皆由本司擢用直省舍人则择勋臣子弟为之至拟历六十月者亦得从政礼仪诸职则国子生员举充皆不由铨选唯最贵者则有集赛出身盖以元初用左右宿卫为心膂爪牙故四集赛子孙世为宿卫之长使得自举其属诸集赛岁久被遇常加显擢亦无定制也

△明

明初制进士举贡杂流三途并用虽有畸重未尝偏废太祖洪武三年诏开科举中外文臣皆由科举而选凡京师及各行省乡试皆八月初场经义二道四书义一道第二场论一道第三场策一道中式者后十日复以骑射书算律五事试之又诏各行省连试三年庶官足任使自后三年一举着为定例科举凡词理平顺者皆预选列唯吏胥心术已坏不许应试十七年又定科举程序凡三年一大比直隶府州县试于应天府外州府县试于各布政司举人不拘额数从实充贡第一场四书义三道每道二百字以上经义四道每道三百字以上未能者许各减一道第二场试论一道三百字以上判语五条诏诰表内科一道第三场试经史时务策五道未能者许减二道俱三百字以上应试人皆有司保举资性敦厚文行可称者仁宗洪熙元年定取士额数南京国子监并南直隶共八十名北京国子监并北直隶共五十名江西五十名浙江福建各四十五名湖广广东各四十名河南四川各三十五名陕西山西山东各三十名广西二十名云南交趾各十名贵州愿试者就试湖广【按宣德二年令贵州就试云南继又云南乡试增五名正统五年定顺天府八十名应天府百名浙江福建六十名江西六十五名河南广东皆五十名湖广五十五名山东四川皆四十五名陕西山西皆四十名广西三十名云南二十名以后屡有损益崇祯间两直隶增至百三十余名他省渐增无出百名者】会试则太祖洪武三年定额百名英宗正统五年奏准增额为百五十人宪宗成化以后进士以三百名为率其由恩请而广额者不为定制天子亲策于廷曰廷试亦曰殿试用翰林及朝臣文学之优者为

读卷官共阅对策拟定名次候临轩或如所拟或有所更定传制唱第一甲授修撰编修三甲考选庶吉士其它或授给事御史主事中书行人评事太常国子博士或授府推官知州知县等官至举人贡生不第在监而选者或授小京职或授府佐及州县正官或授教职旧制会试主考皆由特简其同考则参用翰林及教职其后增置房考悉以翰林科部为之两京乡试主考悉用翰林而各省考官则于儒官儒士内聘明经公正之人景帝景泰三年令推举见任教官年五十以下三十以上文学廉谨者聘充考官于是教官主试遂为定例迨后监临官往往侵夺其职掌由职分既卑听其指使以外帘官预定去取科举之法大坏神宗万历十一年始定制浙江江西福建湖广皆用编修检讨他省用科部官同考亦多用甲科教职仅取一二云武科则太祖洪武十二年立武学用武举武臣子弟于各直省应试英宗天顺中令天下文武官举通晓兵法谋勇出众者各抚按三司直隶巡按御史考试中式者兵部同总兵官于帅府试策畧教场试弓马答策二道宪宗成化十四年武科乡会试悉视文科例其后倏罢倏复无定制至庄烈帝崇祯四年始行武殿试传胪之制焉荐举之典明初与科举并用太祖洪武元年征天下贤才至京授以职守三年谕廷臣山林之士德行文艺可称者有司采举备礼遣送以德行为本文艺次之其目曰聪明正直曰贤良方正曰孝弟力田曰儒士曰孝廉曰秀才曰人才曰耆民皆礼送京师不次擢用而各省贡生亦由太学以进由布衣而至大僚者其途甚广耆儒鲍洵年九十余至京即命为文华殿大学士儒士王本等为四辅官兼太子宾客贤良郭有道季才范敏人才郑沂等为尚书明经张文通等为佾都御史孝廉李德为府尹贤良栾世英等孝弟李好诚等为参政聪明张大亨等为参议其显擢者如此以渐而跻贵显者不可胜数成祖永乐间荐举起家犹有内授翰林外授藩司者自后科举日重荐举日轻能文之士率由场屋进以为荣有司虽数奉求贤之诏亦奉行故事而已至于铨政则文归吏部武归兵部凡文职铨选之事专属之吏部文选司以三途分用京官六部主事中书行人评事博士外官知州推官知县由进士选为一途其推官知县及学官兼用举人贡生选京官五府六部首领官通政司太常光禄詹事府属由官荫生选州县佐贰都布按三司首领官由监生选为举贡等一途外府盐运司首领官中外杂职入流未入流官由吏员承差等选为吏员一途此其大凡也初授曰听选升任曰升选选人之法每年吏部六考六选其拣选则三年举行举人及恩岁贡就教无定期凡升选必满考若员缺应补不待满者曰推升布按员缺三品以

上官会举监司则序迁其防边兵备等率由选择保举授以敕书边府及佐贰亦付以敕凡常选官除授悉由吏部其后党论日纷选法日紊万历中尚书孙丕扬乃改用掣签之法以清铨政焉【按掣签之议发于文选员外郎倪斯蕙尚书李戴拟行未果至孙丕扬始定其制】初太祖御奉天门选官且谕毋拘资格选人有即授侍郎者而监司最多进士监生参错互用给事御史亦初授与升迁各半中叶后拘于资格举贡虽与进士并称正途轩轻迥异隆庆中大学士高拱言进士偏重之弊久而弥甚请自授官而后惟考政绩不问其出身以复国初三途并用之制然积势已重不能复返崇祯中间推一二举人置之要位又推广推官知县行取考选之制而时事日非无益于治武选自增设团营以亲信大臣为提督其坐营官皆不由兵部铨选故武选之任不能如文选司之得行其职焉初定南北更调之法南人官北北人官南其后官制既定自学官外不得官本省亦不限以南北矣

（臣）等谨按科目之设自唐人专尚进士五代沿唐制惟用词赋宋中叶始重经义金设经义诗赋两科元用经疑明定三场之制虽条格数有变更而设科取士以备用者则因而不改至荐举征辟之典尚沿汉制间亦举行焉考汉初屡行荐辟审材受职号为得人然其时秀才孝廉之举已患名实之不相符其后举主以汲引为私而士之竞进者复立名誉分标目以相矜尚驯至邀结党援互相倾轧则乡举里选之法固不可行于后世矣夫事举言扬古之论选造者未尝不因言以考绩唐以后科目取士虽不能无流弊而科场既显设章程士亦得一风教以就有司之短矐人才即不必尽出其中而文辞得失较有定衡诚登明而选公则科目之视他途寔非此善于彼哉至若铨政掌自吏部历代相沿以进退黜陟为冢宰之任其清慎者犹能自持稍不得人滋弊擅权辄紊朝政明初三途并用驳而不纯始以吏部尚书综六部之权继而选司侵尚书之职后复以科道与吏部相攻击党论日纷纪纲渐隳威柄之旁移亦由制度之未善也前代立法以救弊者如汉左雄之限年授职晋刘毅之九品论人皆先定资格而后能正一代之铨衡盖资格不定则无以绝徼幸而禁舞文即有勤于奉职者好尚之偏闻见之误并足以紊铨选与其越格以待奇才孰若循资以课实绩乎万历时孙丕扬定掣签法一破从来吏部专私之积习分选注授悉本于至公洵为典铨不易之良规矣

钦定续通志卷一百四十一

●钦定续通志卷一百四十二 选举略三

- 1433 -

选举畧 【三】

考绩

○考绩

唐

五代

宋

辽

金

明

△唐

唐肃宗宝应元年吏部奏州县三考一替 【按唐代以三十月为三考至周世宗显德元年乃定制一年为一考三年为三考云】 如替人不到请校四考后停二年考功奏请立京外按察京察连御史台分察使外察连诸道观察使各访察官吏善恶其功过稍大事当奏者使司案成便奏其功过虽小理堪惩劝者案成即报考功至校考曰参事迹以为殿最德宗贞元六年以司勋员外郎赵宗儒判考功行贬考之令因奏诸司下兼宪官及检校郎每年功课当具考等第申省七年考功奏准诸司皆据功过论其考第自至德后至今三十年来一例申中上考今请覆其能否以定升降从之又言准考课令三品以上及同中书门下平章事考课并奏请取裁亲王及大都督亦同则职位崇重考绩褒贬不在有司皆合上奏今诸州刺史大都督府长史及上中下都督都护等有带节度观察使者爵位既崇名礼当异每岁考绩亦请奏裁其非节度观察等州府长官有带台省官者请不在此限宪宗元和二年中书门下奏请京常参官五品以上前资见任起宪宗元和二年量定考数于中书置具员簿应诸州刺史次赤府少尹次赤令诸陵令王府司马及东宫官除左右庶子王府官四品以下并请五考台官先定月数与转三省官并三考余官并四考其外文武官并五考今后请尚书省四品以上其余文武官三品以上缘品秩已崇不可限以此例并请临时奏听进止其权知官须至两考方与正授未与正授不得用权知官资改转或系官要阙人及缘事须有移者即不在常格叙迁之限诸道及诸使副使行军司马判官参谋掌书记支使推官巡官有敕充职掌带检校五品以上官及台省官三考与官转四考与改转三卫之考有三等第其上中下而黜陟之凡十六卫及监门校尉直长亦分三等法与三卫同宣宗大中五年吏部奏近年以来刺史皆自录课绩申省矜夸者则张皇其事谦

退者则缄默不言今后巡内刺史请并委本道观察使定其考第然后录申本州岛不得自录课绩申省又诸州府所申考解皆不指言善最或漫称考秩或广说门资既乖令文实为繁弊今后如有此色并请准令降其考第然唐制考课之任属之吏部专以考功郎中主之

△五代

五代周世宗显德五年考功奏奉新敕今后授官并以三周年为限闰月不在其内其内外六品以下赴选官员总以一周年校成一考如考满以后未有替人在任更一周年与成四考

△宋

宋初特重其事不仅责之吏部特命清望官同任其事太宗端拱四年制磨勘京朝官之司曰审官院幕职州县官曰考课院【按历代考课之法皆专属吏部考功惟宋制别有审官院以考京官考课院以考幕职皆历代所未有也】诏翰林学士钱若水枢密直学士刘昌言同知审官院事凡京朝官考校功过以定任使皆其职也又以判流内铨翰林学士苏易简虞部员外郎知制诰王旦等同知考课院凡常调选人流内铨主之奏举及历任有私累者考课院主之真宗景德元年令诸路转运使辨察所部官吏能否为三等公勤廉干惠及民者为上干事而无廉誉清白而无治声者为次畏懦贪猥者为下其时又定磨勘京朝官之制设审官院以枢密院直学士等官充然至英宗治平中考绩之制无审定殿最格法自发运使转而下之至知州皆归考课院专以监司所第等级为据至考监司则总其甄别吏部采访才行合二事为课悉书中等无所高下神宗即位凡职皆有课凡课皆责实监司酌上守臣必治状优异者增秩赐金帛以玺书奖励之其监司以上则命御史中丞侍御史考校又诏立考课县令之法以政治为最而参用德义神宗元丰元年诏御史台六察案言以所纠劾官司稽违失职事迹多寡为殿最中书置簿以时书之任满取旨升黜哲宗元佑中文彦博奏唐六典载以德行才用劳效三类察在选之士参辨能否今之选格特多以举主有军功为上然举主可求军功或妄何可尽据请委吏依仿三类第其才德功效送中书门下核验取其应选者引对而去留之诏令近臣议议者请用元丰考课令第为高下以行升黜又改立县令课为四善五最高宗绍兴二年诏监司守臣举行考课之法其守令课分上中下三等每等分三甲置籍守俸考县令监司考知州考功会其已成较其优劣而赏罚之十四年司封郎中李涧言今知县再任六考乃升通判而丞与诸司属官初无吏责反以四考关升故人皆有所择而不愿就又因民事得罪之人虽微罪亦终

身废弃故人皆有所惧而不敢就请自今应理亲民者
并通及六考关升而应缘民事之人自徒以上乃取旨孝宗干道三年廷臣上言宋初有
京朝官考课有幕职州县官考课其后为审官院为考
课院皆命中书或两制臣僚校其能否以施赏罚熙宁中始罢之州县之吏苟简自恣不
复知有殿最今陛下恪勤庶政综核名实望遵故事应
监司郡守朝辞日别给御前历子如荐贤才为几人若为治钱谷若为理讼狱兴某利除
某害每考令当职官吏从实书之执事复严加考核其
风绩有闻者优与增秩所莅无状者罚自无赦薄海内外风俗丕变贤者效职而中下之
才亦皆强于为善帝乃诏经筵官参照祖宗考课之法
讲而行之广西提刑张维考察本部守令以政平讼理为臧以政不平讼不理为否臧否
之中复有优劣臧之品有三臧之最臧之次臧之下否
之品有二否之最否之次天子嘉其法颁之诸道视以为式令监司帅臣各以其能否之
实闻于朝其有贪墨庸懦庇而不发致台谏论列者各
有罚后又诏臧否分为三等治效显者为臧贪刻庸缪为否无功无过为平令详加考察
明着事实其不公者令御史弹奏宁宗庆元三年右正
言应武言一郡之官总之太守诸郡之官总之监司而又以诸道之监司总之御史朝廷
以殿最三等察监司监司以三科考郡守而下皆辨其
职而进退之今郡国按刺之权寢轻多徇私情而废公法臣尝考承平旧制于御史台则
立考课职司一司以刺举多者为中无所刺举为下盖
监司受察则郡守不得苟安郡守振职则僚属莫敢自肆愿陛下遵而行之申严其令各
以能否之实闻于上以诏升黜其贪墨昏懦致台谏奏
劾者坐监司郡守以容庇之罪诏行之嘉定九年诏边县择才不拘常制其余并遵三年
之制

△辽

辽初无考课之法至圣宗统和九年诏诸道举行能察贪酷 【按辽史及契丹国志
俱不载吏部掌考课之政参考纪志列传似辽代考
绩之政多掌于外官长吏】 十二年诏州县长吏有才能无过考减一资太平六年诏南
北诸部廉察州县及伊色哩密拉之官不治者罢之诏
大小职官有贪残害民者立罢之终身不录其不廉直虽处重任即代之能清勤自励者
在卑位亦当荐拔至内族受赂事发与常人所犯同科
兴宗重熙十一年诏外路官勤瘁正直者至考满始代不治事者即易之

△金

金制凡内外官之政绩所历之资考更代之期去就之故秩满皆备陈于解由吏部
据以定能否又撮解由之要于铨拟时读之谓之铨头

又会历任铨头而书于行止簿行止簿者以姓名为类而书各人平日所历之资考功过
又为簿列百司官名有所更代则以小黄绫书更代之
期及所以去就之故而制其铨拟之要领县令则省除部除者通书而疏之章宗泰和四
年定考课法作四善十七最之制凡县令以下三最以
上有四善或三善者为上升一等三最以上有二善者为中减两资历三最以上有一善
为下减一资历节度判官防御判官军判以下一最而
有四善或三善为上减一资历一最而有二善为中一最而有一善为下又以明昌四年
所定军民俱称为廉能者是谓廉能官之制参于其间
而定其甄擢其余举县令之法以六事考之六事俱备为上升一等兼四事者为中
等减二资历其次为下等减一资历否则为不称职罢
而降之平常者依本格太宗天眷三年温敦思忠检问诸吏得廉吏杜遵晦以下百二十四
人各进一阶贪吏张断以下二十一人皆罢之世宗
大定三年命廉到廉能官第一等进官一阶升一等其次酌量注授污滥官第一等殿三
年降二等次二年又次一年皆降一等诏廉问明安穆
昆廉能者第一等迁两官其次迁一官污滥者第一等决杖一百罢去择其兄弟代之第
二等杖八十第三等杖七十皆令复职佛窳决则罢去
永不补差十年诏今天下州县之职多阙员朕欲不限资历用人何以徧知其能欲遣使
廉问则扰民行辟举之法则生弊不若选人暗察明廉
如其相同然后升黜升黜之后奏所廉善恶官诏罪重者遣官就治所犯细微减励而释
之凡廉能官四品以下委官覆实同则升擢三品以上
以闻朕自处之又诏外路官与内除者察其公勤则升用之但苟简于事不须任满便以
本品出之章宗泰和元年御史台奏在制按察使官比
任终遣官考覆然后尚书省命官覆核之今监察御史添设员多宜分路巡行每路女真
汉人各一人同往从之又定制自第一等阙外第二等
阙满合注县令者升上令少一任与中令少二任与下令少三任以上者与录事军防判
仍减一资注令少五任以上者注丞簿第三等任满合
注县令者升中令少一任与下令少二任以上者与录事防判亦减一资注令少四任以
上者并注丞簿已入县令者秩满日与上令仍依各等
资考内通减两任呈省已任六品七品者减一资注授经保充县令名问相同依资考不
待满升除见随朝者考满升注既升除后将来覆察公
正廉明者不降四年谕按察使近制以镇静而知大体者为称职苛细而暗于大体者为
不称职由是各路按察使以因循为事莫思刺举郡县
以贪黷相尚莫能畏戢自今若纠察得实能使一路镇静者为称职其或烦紊使民不得
申诉者为旷职五年更定考试随朝检知法条格宣宗

贞佑三年诏司县官能募民进粮五千石以上减一资考万石以上迁一官减二资考二万石以上迁一官升一等注见阙兴定元年以县官或非材监察御史一遇不能备知遂令每岁两遣监察御史巡察乃别选官巡访以行黜陟之政又诏行辟举县令之法以六事考之六事俱备为上等四事为中等其次为下等哀宗正大元年设司农司自卿以下迭出巡察吏治臧否以升黜之 元制官员考数省部定拟或历三任或历二任各有等差世祖中统三年诏置簿立式取会各官姓名籍贯年甲入仕次第至元六年制凡随朝职官一考升一等两考通升二等十九年定内外官以三年为考满任满者迁叙未考者不许超迁又诏诸职官解由到部考其功过以凭黜陟外任官解由到吏部止于邢部照过将各人所立行止簿就检照定拟二十二年诏各道提刑按察司能遵奉条画莅事有成者任满升职赃污不称任者罢黜除名后又改提刑案察司为肃政廉访司每道仍设官八员除二使留司以总制一道余六人分临所部如民事钱谷一切委之仍令省台官遣官考其功效集贤学士兼秘书少监程巨夫言国朝建御史台虽有考课之目未得其要莫可致诘乞照前朝体例应诸道府州司县下至曹掾等各给山身印纸历子一卷书本人姓名出身于其前俾各处长吏联衔结状明书其历任月日在任功过于后秩满有司详视而差其殿最东平布衣赵天麟上太平金镜策略曰今国家选法腹外三年为一考腹裹二年半为一考自非负罪之员皆有进而无退臣以为方今选法宜以贤能为先不宜以日月为上且人材有大有小例以初仕者职小则淹滞英才例以久宦者职迁则施为安得皆称窃恐郡县之官以苟且存心有更张之事皆苟且因循郡县之民迎新送故百弊皆生或谓州县之官久则擅权生事钱谷之官久则私弊难制臣谓此言非也若循三德八才而用之则皆才德应官之人伏望陛下量其短长察其可否内外官员三年第一考为初考上等加官阶二级中加一级下则仍旧阶皆复守其本职六年再考如初考而复守本职九年终考如再考然后黜陟其职也凡考法令廉访司官重其保结考其行实而牒司路以达于上司铨定阶次籍记倚阁凡三考黜陟其事业循常者依累次官阶而除之以次第所宜其才德超异者虽阶次甚卑而待之以不次之位如是则居官守禄者既思阶次之超升而尽其公道又惧宪职之知觉而去其私心矣时言虽不用议者嘉其切于时政成宗大德八年中书省臣言自内降旨除官者未为近侍宿卫践履年深者依以除叙尝宿卫未官者视散官秩始历一考准为初阶无资滥进降官二级官高者量降各位下再任者从所隶用三任之上听

入常调蒙古诸色人不在其限从之武宗至大二年令州县正官以九年为任三年给亲民长吏考功印历令监治官岁终验其行迹书而上之廉访司御史台尚书礼部以为黜陟仁宗皇庆元年御史中丞郝天挺言比者省台寺院之臣有旬日之间屡迁数易奔走往来之不暇何暇宣风布化参理机务哉乞自今惟大臣可急阙选授其余内外大小官属必候任满考绩方许选调庶免朝除夕改启幸长奸之弊从之二年令监察御史检察监学官考其殿最又敕守令劝课农桑勤者升迁怠者黜降着为令文宗天历二年中书省臣言旧制朝官以三十月为一考比年或数月改迁于典制不类且治绩无从考验请如旧制为宜敕除风宪官外其余朝官不许二十月内迁调顺帝至元四年诏考核郡县官功过令佛吉噜为考功郎中乔林为员外郎魏宗为主事考核郡县官功过以凭黜陟

△明

明制稍异于历代考满考察二者相辅而行考满论一身所历之俸考察通天下计之考满之法三年给由曰初考六年曰再考九年曰通考依职掌事例考核升降诸部寺所属初止署职必考满始实授外官必递考以待核杂考或一二年或三年九年郡县之烦简或不相当则互换其官谓之调繁调简太祖洪武十一年命吏部课朝覲官殿最称职而无过者为上赐坐而宴有过而称职者为中宴而不坐有过而不称职者为下不预宴序立于门宴者出然后退此朝覲考核之始也十四年其法稍定凡在京六部五品以下听本衙门正官察其行能验其勤怠其四品以上及一切近侍官与御史为耳目风纪之司及太医院钦天监王府官不在常选者任满黜陟取自上裁直隶有司首领官及属官从本司正官考核任满从监察御史核考各布政使首领官俱从按察使考核其茶马盐马盐运盐课提举司军职首领官俱从布政使考核仍送按察使核考其布政司四品以上按察司盐运司五品以上任满黜陟取自上裁内外杂职九年任满给由赴吏部考核依例黜陟果有殊勋异等超迈等伦者取自上裁又以事之繁简与历官之殿最相参互核为等第之升降十六年裁酌京官考核之制俱由其长开具送部核考十八年吏部言天下布按府州县朝覲官凡四千一百一十七人称职者十之一平常者十之七不称职者十之一贪污鬩茸者亦共得十之一帝令称职者升平常者复职不称职者降贪污者付法司罪之鬩茸者免为庶人后又定制初考称职次考未经考核今考称职者俱依称职例升用二十六年又定在京官初仕者令试职一年考核堪用者与实授不堪用者降黜量才录用成祖永乐元年令府州县官到任半年之上者巡按御

史按察使察其能否廉贪之迹具奏宣宗宣德五年令国子监官九年考满学行端悫者量加翰林史职仍理教事武宗正德中议准加俸宪宗成化中吏科给事中王瑞等言三载黜陟朝廷所以励庶官之典也今天下诸司除土官外无虑九千余处诸司官除阴阳医僧道外无虑千万余员吏部于各官之贤否在布按二司则据抚按揭帖在诸司则参布按等官揭帖上之询访虽出于公心下之奏报多任其私意或假公以市恩或乘机以偿怨毁誉失真贤否失实其它弊端不一而足乞谕吏部榜示各官凡揭帖所报失实者连坐或有当黜而留者许本处抚按论奏有当黜而妄诉者亦罪之诏朕以黜陟之典付吏部吏部以贤否之实寄长吏使其所报失实则黜陟不公贤否无别何以示劝惩于是宜严连坐之罚其当黜而留与当黜而妄诉者俱如所言穆宗隆庆中掌吏部事高拱言外官考才力不及者不徒曰调用而必曰酌量调用原无定议然部院所考与抚院论劾概以不及则铨补之日无所适从当得迁就其间自今方面有司有才不宜于地者当移其地不易其官署曰调简僻有官不称其才者虽易其官当仍其品署曰调闲散亦有操守可嘉性气稍偏而或尚有他长可录年劳当叙者署曰降级或才力不宜有司文学犹堪造士者署曰改教四者皆丽不及之条者也至于先已调简再考不及者此终难于策励议以罢斥可矣奏可至考察之法洪武二十六年始定其制凡京官六年四品以上自陈以取上裁五品以下分别致仕降调闲住为民者有差具册奏请谓之京察自弘治时定外官三年一朝观察典随之谓之外察州县以月计上之府府上下其考以岁计之上之布政司至三年抚按通核其属事状丽以八法而处分之谓之大计计处者不复叙用定为永制初洪武四年命工部尚书朱守仁廉察山东莱州诸郡官吏六年命御史台御史及各道按察司察举有司官有无过犯奏报黜陟此考察之始也景帝景泰二年吏部都察院考察当黜退者七百三十余人帝虑其未当仍集诸大臣更考存留者三之一孝宗弘治六年考察当罢者一千四百员又杂职一千一百三十五员时帝谕方面知府必指实迹毋虚文泛言以致枉人府州以下任未二年者亦通核具奏尚书王恕等执奏以为今之府州县官贪鄙殃民者虽年浅不可不黜帝终谓人才难得降谕谆谆多所原宥当黜而留者九十员给事御史又交章请黜遗漏及宜退而留者复命吏部指实迹恕疏各官考语及本部访察者以闻帝终以考语为未实谕令复核恕以言不用遂力求去十四年南京吏部尚书林瀚言在外司府以下官俱三年一次考察两京及在外武职官五六年一考察唯两京五品以下官十年

始一考察法甚阔畧旨下吏部乃定京官六年一考察之例京察则大臣自陈去留既定而居官有遗行者给事御史纠劾谓之拾遗拾遗所攻击无获免者弘正嘉隆间士大夫廉耻自重以挂察典为终身之玷至万历时阁臣有所徇庇间留一二以挠察典而羣臣之争益甚党局之成互相报复弊有不可胜言者矣武职考课之法唐宣宗大中五年敕问诸道军将及官健儿等近日所在将帅多务因循自今以后委诸道观察都防御团练经畧等使每年各以本艺阅试其间或有伎艺超异者量加优赏仍作等第节级与进改职名其支部有兵处亦委本道简点训练准照处分

五代晋高祖天福二年敕习战讲武历代通规选士练兵由来旧制宜以每年农隙时简练仍准令式处分 宋太宗太平兴国九年帝阅诸军参考优绌仁宗庆历二年定制诸军以射优劣为赏罚又诏骑兵带甲射不能发矢者夺所乘马与艺优士卒神宗熙宁六年诏自今巡教使臣校殿最虽以十分为率其事艺第一等及九分以上或射亲及四分虽殿除其罚第二等事艺及八分或射亲不及三分虽最削其赏 辽太祖天显二年阅北克南克兵籍圣宗统和十四年命刘遂教南京神武军士剑法赐袍带锦币 金世宗大定二十六年帝谓宰臣曰西南西北两路地隘明安人民不能娴习骑射其委明安穆昆官以时教练其弛慢过期者并决罚之章宗明昌六年诏诸路明安穆昆农隙讲武本路提刑司察其勤惰者赏罚之 元仁宗延佑元年监察御史上言乞命枢密院设法教练士卒诏曰可 【按唐以后各史志俱不载军政之制参考册府元龟及各代会要诸书间载一二盖唐宋辽金元未尝有定制也又考唐书百官志兵部员外郎掌武职资历考课宋史职官志载枢密院掌禁兵阅试赏罚之事金史百官志载吏部亦掌武选考课元史百官志于吏部云掌天下官吏考课之法于兵部不云考课于枢密院则云掌天下兵甲简阅差遣举功转官之务则元武职考课亦隶于枢密院也】 明制武之军政犹文之考察宪宗成化二年令五年一行以见任掌印带俸差操及初袭官一体考核十三年令两京通考以为常五府大臣及锦衣卫堂上官自陈候旨直省总兵官如之在内五府所属并直省卫所官悉由巡视官及部官注送在外都司卫所官由巡抚造册缴部副参以下千户以上由布都按三司察注送抚咨部考举题奏锦衣卫管戎务者倍加严考南北镇抚次之各卫所及地方守御并各都司隶巡抚者例同唯管漕运者不与考焉

钦定续通志卷一百四十二

●钦定续通志卷一百四十三 选举畧三

选举畧 【三】

学校

○学校

唐

五代

宋

辽

金

元

明

△唐

唐元宗开元五年诏诸州乡贡进士宜令引就国子监谒先师学官为之开讲令所司优厚设食天宝十二载诏天下举人皆须补国子学

生然后听举至天宝后学校益废生徒流散代宗永泰中虽广置监生而馆无定员宪宗元和中始定生员西京国子官生八十人太学七十人

四门三百人广文六十人律馆二十人书算馆各十人东都国子馆十人太学十五人四门五十人广文十人律馆十人书馆三人算馆三人 【

按韩愈文集请复国子监生徒疏云国家典章崇重庠序近日趋竞未复本原至使公卿子弟耻游太学工商凡冗或取上庠今请国子监并依

六典如有资荫不补学生应举者请礼部不收试云又按李绛请崇国学疏今天下遭逢圣明万人倾耳思望圣化而儒硕解散国学毁废生徒

无鼓篋之志博士有倚席之讥伏惟陛下挺超代之姿发振俗之令复崇太学重延硕儒先王之道日盛太学之训日隆兴裨圣教以助皇风则

至德以后学校俱废至元和时始复也】武宗会昌五年制公卿百官子弟及京畿内士人寄客修明经进士业者并隶名太学外州寄士人并

隶名所在官学

△五代

五代后唐明宗天成三年正月中书门下奏祭酒之资历朝所贵爰从近代不重此官况属圣朝方勤庶政须宏雅道以振时风望令宰臣

一员兼判国子祭酒敕令宰臣崔协兼判其年崔协奏请国子监每年祇置监生二百员候解送至十月满数为定又请颁下诸道州府各置州

学如有乡党备谳文行可举者录其事实申监司方与解送又每年于二百人数内不系时节有投名者先令学官考校其学业浅深方议收补

姓名敕宜依

△宋

宋仁宗庆历二年国子监奏请自今试补学生听读五百日方许取解已得国文学解省试下者听读一百日许再请解又国子监除七品以上子孙许召保官试补外八品以下至庶人子弟例不收补以此每逢科场多有冒称品官子孙难以详别请仿唐制立四门学以八品以下至庶人子孙补充学生自今每岁一补试差学官考校取文理稍通者具名奏闻给牒收补内不合格者且令依旧听读后次与试若三试不中不在试补之限从之神宗熙宁四年侍御史邓绾言国家治平百余年虽有国子监仅容释奠斋庖而生员无所容至于太学未尝营建请以锡庆院为太学仍修武成王庙为右学以拟三王四代胶庠序学东西左右之制乃诏尽以锡庆院及朝集院西庑建讲书堂四诸生斋舍官掌事者直庐畧具其主判官外益至直讲总而为十员率二员共讲一经委中书选差生员厘为三等初入学为外舍再升内舍又升上舍上舍员以百内舍二百外舍不限员各以其经从所讲官受学月考试举业优等上中书其正录学谕以上舍为之元丰二年颁学令太学置八十斋斋容三十人外舍生二千人内舍生三百人上舍生百人月一私试岁一公试其试则弥封誊录如贡举法公试外舍生入第一第二等参以所书行艺与籍者升内舍内舍试入优平二等参以行艺升上舍上舍分三等俱优为上一优一平为中俱平若一优一否为下上等命以官中等免礼部试下等免解徽宗崇宁元年命将作少监李诫即城南门外营建外学是为辟雍【按唐代屡讲辟雍之制终未施行宋崇宁中一行即罢亦循名之举故历代专重国学不置辟雍也】高宗南渡建炎初诏即驻蹕所置国子监立博士二员以随驾之士三十六人为监生绍兴十三年始建太学置祭酒等官三舍各有员额重修旧法较元丰时更为详密又制太学上舍生积校已优而舍试又人优等者就化源堂释褐例补承事郎太学正录郑鉴曾由此选不四年而为著作郎补郡其后刘尧叟复以释褐除国子正时王中行为兵部尚书奏定今两优释褐初授京秩即授学官恩数过隆事理不当乞先与外任时张商卿亦言今中上舍为学官不数年便可作监司政事非所素习岂能保其不谬乞先注职官帝然之光宗绍熙三年礼部侍郎倪思请混补以徠多士诏两省台谏可否于是吏部尚书赵汝愚等合奏曰崇宁创行舍法诚得党庠遂序之遗意一时学者粗知防检非冠带不敢行于道路遇乡曲之长及学校之职则敛容而避之习俗诚美而其失也在于专习经义崇尚老庄废

黜春秋绝灭史学又罢去科举遂使寒酸之士进取无他途炎祚中兴始建太学于行都
行贡举于诸郡然奔竞之风胜忠信之俗微季考月书
尽成文具臣等远稽古制近酌时宜惟重教官之选仍假守贰之权仿舍法以育才因大
比以取士考终场之数定所贡之员期以次年试于太
学庶几士修实行不事虚文渐复淳风仰裨大化有三舍之利而无三舍之害其诸州教
养课试升贡之法仍下有司条上于是思奏遂不行
宗庆元二年以国子生员多伪滥制自今职事官期亲厘务官子孙乃得试补凡监学生
皆给绶牒若告谒在外遇科举则试于漕司

△辽

辽太祖时上京置国子监又于南京设太学东京西京亦俱设学圣宗统和九年八月
以南京太学生员寝广特赐水碓庄一区道宗清宁
五年诏设学养士颁经及传疏置博士助教各一员六年中京亦置国子监

△金

金海陵天德三年始置国子监定制词赋经义生百人小学生百人以宗室及外戚
皇后大功以上亲诸功臣及三品以上官兄弟子孙年
十五以上者入学不及十五者入小学世宗大定六年始置太学初养士百六十人后定
五品以上官兄弟子孙百五十人曾得府荐及终场人
二百五十人凡四百人府学亦大定十六年置凡十七处共千人初以尝与延试及皇家
袒免以上亲并得解举人为之后增州学遂加以五品
以上官曾任随朝六品官之兄弟子孙余官之兄弟子孙经府荐者同境内举人试补三
之一阙里庙宅子孙年十三以上不限数经府荐及终
场免试者不得过二十人凡试补学生太学则礼部主之州府则以提举学校学官主之
曾得府荐及终场举人俱免试凡学生会课三日作策
论一道又三日作赋及诗各一篇三月则私试以季月初先试赋闲一日试策论中选者
以上五名申部凡国子学生三年不能充贡欲就诸局
承应者学官试能粗通大小经者听大定二十九年上封事者乞兴学校推行三舍法户
部尚书邓俨等谓三舍之法起于宋熙宁闲然其法多
席势力尚趋走之弊是以宋时屡兴屡罢宋两学五千人今策论词赋经义三科取士而
太学所养止百六十人外京府或至十人天下今及千
人今若每州设学专除教授月加考试每举所取数多者赏其学官月试定为三等籍之
一岁中频在上等者优复之不率教行恶者黜之庶几
得入之道也后又定制京府十七处千人之外置节镇防御刺史州学六十处增养千人
各设教授一员选五举终场或进士年五十以上者为
之府学二十四学生九百五人节镇学三十九共六百一十五人防御州学二十一共二

百三十五人凡千八百人章宗太和元年更定贍学养
士法国子生给民佃官田百八亩官所掌为数其女真学自大定四年以女真大小字译
尚书颁行之后择明安穆昆内良家子弟为学生诸路
至三千人九年取其尤俊秀者百人至京师以编修官温特赫德木达教之十三年以策
诗取士始设女真国子学诸路设女真府学以新进士
为教授国子学策论生百人小学生百人府州学二十二中都上京和啰噶率宾海兰扶
余博速咸平泰州临潢北京冀州开州丰州西京东京
盖州隆州东平益都河南陕西置之凡取国子学生府学生之制皆与词赋经义生同又
定制凡每穆昆取二人若宗室每二十户内无愿学者
则取有物力家子弟年十三以上二十以下者充凡会课三日作策论一道季月私试如
汉生制二十九年敕凡京府镇州诸学各以女真汉人
进士长贰官提控其事

△元

元制有蒙古国子学蒙古字学回回国子监 【按历代国子皆特立官署无所隶属
元则蒙古国子监隶于蒙古翰林院国子监隶于集
贤院皆与历代异制云】 然皆设于世祖至元以后唯国子学则太宗六年即置焉其蒙
古国子学则至元八年始置于京师教习诸生于随朝
蒙古汉人百官及集贤台官员选子弟俊秀者入学然未有员数以通鉴节要用蒙古语
言译写教之俟生员习学成效出题试问观其所对通
达者量就官职成宗大德十年增生员廩膳通前三十员为六十员仁宗延佑以后就学
者不下二三百人欲增廩饩乃减去庶民子弟听陪堂
学业其蒙古字学于至元六年中书省定学制颁行之命各路府官子弟入学上路二人
下路二人府一人州一人余民闲子弟上路三十人下
路二十五人愿充生徒者与免一身杂役以译写通鉴节要颁行各路俾肄习之大德五
年又定生员散府二十人上中州十五人下州十人成
宗元贞元年命有司割地给诸路蒙古学生员饩廩其学正等职上自国学下及州县举
生员高等从翰林考试凡学官译史取以充焉其回回
国子监世祖至元二十六年尚书省臣言伊斯提斐文字宜施于用今翰林院伊普迪哈
鲁鼎能通其字学乞授以学士之职凡公卿大夫与富
民之子皆依汉人入学之制日肄习之帝可其奏乃置回回国子监至仁宗延佑元年设
监官以其文字便于关防令依旧制泰定初以近岁公
卿大夫子弟与夫凡民之子入学者众其学官及生员五十余人及助教一人并给廩膳
置于国都凡百司庶府所设译史皆从本学取以充焉
其国子监则建置最先始太宗六年以冯志常为国子学总教命侍臣子弟十一人入学

以长者四人从许衡童子七人从王恂继复定制于国
子学设博士通掌学事分教三斋生员讲授经旨是正音训上严教道之术下考肄习之
业复设助教同掌学事而专守一斋正录申明规矩督
习课业凡读书助教亲授句读音训正录伴读以次传习之其功课对属诗章经解史评
则博士出题生员具橐先呈助教博士既定始录附课
簿以凭考校其生员之数定二百人先令一百人及伴读二十人入学其百人之内蒙古
半之色目汉人半之许衡又着诸生入学杂仪及日用
节目七年命生员八十人入学俾永为定式而遵行之成宗大德八年始定国子生蒙古
色目汉人三岁各贡一人十年又定国子学蒙古色目
汉人生员二百人三年各贡二人武宗至大四年立国子学试贡法蒙古授官六品色目
正七品汉人从七品仁宗延佑二年增置生员百人陪
堂生二十人用集贤学士赵孟俯礼部尚书元明善等所议国子学贡试之法一曰升斋
等第六斋东西相向每斋员数不等每季考其所习经
书课业及不违规矩者以次递升二曰私试规矩本学举实历坐斋二周岁以上许令充
试三周岁以上充贡举汉人私试孟月试经疑一道仲
月试经义一道季月试策问表章诏造科一道蒙古色目人孟仲月各试明经一道季月
试策问一道词理俱优者为上等准一分理优词平者
为中等准半分每岁通计其年积分至八分以上者升充高等试贡三曰黜罚应试生员
不事课业违戾规矩者学正录纠举延佑八年定岁贡
之数充部令史者四人路教授者四人又命生员每大比选士与天下士同试于礼部策
于殿廷又增至备榜而加选择焉其各行省学校自太
祖始定中原即议建学设科取士世祖中统二年始命置诸路学校官凡诸生进修者严
加训诲务使成材以备选用至元十九年夏四月命云
南诸路皆建学二十三年帝御德兴府行宫诏江南学校旧有学田复给之以养士二十
八年令江南诸路学内设立小学选老成之士教之其
他先儒过化之地名贤经行之所与好事之家出钱粟赡学者并立为书院凡师儒之命
于朝廷者曰教授路府上中州置之命于礼部及行省
及宣慰司者曰学正山长学录教谕路州县及书院置之路设教授学正学录各一人散
府上中州设教授一人下州设学正一人县设教谕一
人书院设山长一人中原州县学正山长学录教谕并受礼部付身各省所属州县学正
山长学录教谕并受行省及宣慰司札付凡路府州书
院设直学以掌钱谷从郡守及宪府官试补直学考满又试所业十篇升为学录教谕凡
正长学录教谕或由集贤院及宪台等官举充之多用
下第举人有荐举者亦参用之自京学及州县学以及书院凡生徒之肄业于是者守令

举荐之台宪考核之或用为教官或取为吏属其制不一焉【按学校之官元制最多有学正山长学录教谕教授诸职又特置书院以教生徒设山长一官专其职亦前代所未有也】

△明

明制学校有二曰国学曰府州县学其府州县学诸生入国学者方可得官其入国学者通谓之监生举人曰举监生员曰贡监品官子弟曰荫监捐费曰例监贡监有岁贡选贡恩贡纳贡之分荫监有官生恩生之分太祖洪武元年命品官子弟及民俊秀通文义者并充学生选国琦王仆等十余人侍太子读书禁中入对谨身殿姿状明秀应对详雅太祖喜因厚赐之天下既定诏择府州县学诸生入国子学又择年少举人赵唯一等及贡生董■〈日上永下〉等入学读书赐以衣帐命于诸司先习吏事谓之历事监生取其中尤英敏者李扩等人文华武英堂说书谓之小秀才其才学优赡聪明俊伟之士使之博极群书讲明道德经济之学以期大用谓之老秀才设国子监置祭酒以下各职分六堂以馆诸生广号房以存诸生给廩饩赐布帛其教法祭酒司业坐堂上属官自监丞以下以次序立诸生揖毕质问经史拱立听命会讲复讲背书轮课以为常天下按察司选生员年二十以上端秀厚重者送监继又设为定例府州县学岁贡生员各一人翰林考试经书义各一道判语一条中式者入国子监成祖永乐元年始设北京国子监十八年迁都乃以京师国子监为南京国子监太学生遂有南北监之分太祖以武臣子弟但习武事鲜知问学命大都督府选入国学嗣后勋臣子弟多入监读书凡公侯伯未经任事者年三十以下者送监读书寻令已任者亦送监六堂诸生有积分之法孟月试本经义一道仲月试论一道诏诰表内科一道季月试经史策一道判语二条每试文理俱优者与一分理优文劣者与半分积八分者为及格与出身如有才学超异者奏请上裁洪武二十六年尽擢监生刘政龙鐔等六十四人为行省布政按察两使及参政参议副使佥事等官一旦重用为四方大吏者无算李扩等自文华武英擢御史改给事中台谏之选亦出太学其常调者乃为府州县六品以下官其时监生与荐举人才参用者多故其时布列中外太学生最盛一再传之后进士日益重荐举遂废举贡遂日益轻虽积分历事不改初法举贡得为府佐贰及州县正官官恩生得选部院府卫司寺小京职尚为正途而援例监生仅得选州县佐贰及府首领官其授京职者乃光禄寺上林苑之属其愿就远方者则云贵广西及各省边卫有司首领及卫学王府教授之缺用遂为异途然明代入监之途甚多其

举人入监始于永乐中会试下第举人辄令翰林院录其优者俾入学以俟后科给以教谕之俸是时会试有副榜大抵署教官故令入监亦食其禄贡生入监初由生员选择既命各学岁贡一人故谓之岁贡其人数之例亦屡更选贡之法令提学于当贡之外不分廩膳生员通行考选务求学行兼优累试优等者乃以充贡荫子入监在京三品以上者方得请荫谓之官生出自特恩者不限官品谓之恩生拨历之法监生得积出身拨历诸司历事三月仍留一年送吏部铨选后亦屡更其制云

钦定续通志卷一百四十三

●钦定续通志卷一百四十四 刑法略一

刑法畧 【一】

（臣）等谨按刑法者所以辅治也刑以治已然法以禁未然历代刑制沿革不一隋世以上郑志详哉言之矣唐撰律令格式论者谓能集刑制之成迄于今犹未尽变其法然自武后开告密之门林甫兴钳网之狱贞观之典败坏尽矣五代日事争杀政多残酷惟后唐明宗号称仁恕其所用亦多本唐制宋初于律令格式外参用五代刑书复置省刑之官改定折杖之则用意固厚而立法亦綦详焉然而崇宁以降创议纷更南渡而还规条未立权輿之制亦渐隳废辽金元之初多用国俗后乃参考古法定为新律以成一代之模非不灿然具备然辽初法尚严酷景圣二宗外鲜有能审权宜达通变者至天祚之季益为残忍以抵于亡金元皆尚宽大而金世宗之援经揆义有古仁君听断之风焉元至正条格立法实乖公允固不足取也明初承元偏纵之后刑用重典继复酌轻重之宜申画一之令纤悉具载律书乃英宪以后厂卫肆凶侦伺之风炽而钦恤之意渺矣夫历代之法虽宽严殊尚顾住往开国之初用之而多得数世而后寢以陵夷何也盖创法之始斟酌损益因变立程后世因循莫识其用意之所在严者流为残刻宽或抵于废弛简牍所存可为往鉴今采唐以后史志纪传参以实录会要通考诸书芟繁冗补阙遗正讹舛为续刑法畧俾观者有所考焉

历代刑制 【唐 梁 后唐 晋 汉 周】

○历代刑制一

唐

梁

后唐

晋

汉

周

△唐

唐之刑书有四曰律令格式令者尊卑贵贱之等数国家之制度也格者百官有司所常行之事也式者其所常守之法也凡邦国之政必从事于此三者其有所违及人之为恶而入于罪戾者一断以律律之为书因隋之旧为十有二篇一曰名例二曰卫禁三曰职制四曰户婚五曰厩库六曰擅兴七曰贼盗八曰鬪讼九曰诈伪十曰杂律十一曰捕亡十二曰断狱以笞杖徒流死为五刑笞刑五自十至五十杖刑五自六十至百徒刑五自一年至三年流刑三自一千里至二千里死刑二绞斩又有议请减赎当免之法初高祖入关约法十二条惟杀人劫盗背军叛逆者死余苛政悉蠲除之及受禅命纳言刘文静等因隋开皇律令而损益之尽削大业所用繁峻之法遂除苛细制新格五十三条颁行之仍令仆射裴寂等更撰定律令数年成书诏颁天下大畧以开皇为准凡律五百丽以五十三条流罪三皆加千里居作三岁至二岁半二岁者悉为一岁余无改焉【案刑志二岁半下漏二岁字今据唐六典增入】又诏每年正月五月九月及每月十斋日不行刑吏受赇及犯盗诈冒府库物者皆不原赦【按册府元龟不行刑诏在正月不原赦诏在二月志倒置今改正】太宗即位以古者断狱讯于三槐九棘之下乃诏死罪中书门下五品以上及尚书等平议之三品以上犯公罪流私罪徒皆不追身又诏长孙无忌房元龄等复定旧令帝尝览明堂针灸图见人之五藏皆近背针灸失所则其害致死叹曰夫捶者五刑之轻死者人之所重安得犯至轻之刑而或致死遂诏罪人无得鞭背河内人李好德坐妖言下狱大理丞张蕴古以为好德病狂督法不当坐治书侍御史权万纪劾蕴古奏不以实太宗怒遽斩蕴古既而大悔因诏死刑虽令即决皆三覆奏久之又令二日五覆奏决日尚食勿进酒肉教坊太常辍教习诸州死罪三覆奏其日亦蔬食故时律兄弟分居荫不相及而连坐则俱死祖孙则配没帝以为未愜乃令反逆者祖孙与兄弟缘坐皆配没恶言犯法者兄弟配流而已元龄等遂与法司增损隋律降大辟为流者九十二流为徒者七十一以为律定令一千五百九十条以为令【按定令条数旧唐书作一千五百九十条通典同新唐书作一千五百四十六条通考同今从通典】又删武德以来敕三千余条为七百余条以为格又取尚书省列曹及诸寺监十六卫计帐以为式凡州县皆有狱而京兆河南狱治京师其诸司有罪及金吾捕者又有大理狱京师之囚刑部月一奏御史巡行之每岁立春至秋分及大祭祀致斋朔

望上下弦二十四气雨及夜未明假日断屠月皆停死刑京师决死莅以御史金吾在外
则上佐余皆判官莅之五品以上罪论死乘车就刑大理正莅之或赐死于家凡囚已刑无亲属者将作给棺瘞于京城七里外圻有砖铭上揭
以榜家人得取以葬诸狱之长官五日一虑囚夏置浆饮月一沐之疾病给医药重者释械其家一人入侍职事散官三品以上妇女子孙二人
入侍天下疑狱谳大理寺不能决尚书省众议之录可为法者送秘书省奏报不驰驿经覆而决者刑部岁以正月遣使巡覆所至阅狱囚柙校
粮饷治不如法者柙校钳锁皆有短长广狭之制量囚轻重用之囚二十日一讯三讯而止数不过二百凡杖皆长三尺五寸削去节目讯杖大
头径三分二厘小头二分二厘常行杖大头二分七厘小头一分七厘笞杖大头二分小头一分有半死罪校而加柙官品勋阶第七者锁禁之
轻罪及十岁以下至八十以上者废疾侏儒怀妊皆颂系以待断居作者着钳若校京师隶将作女子隶少府缝作旬给假一日腊寒食二日毋
出役院病者释钳校给假疾差倍役谋反者男女奴婢没为官奴婢隶司农七十者免之凡役男子入于蔬圃女子入于厨饘流移人在道疾病
妇人免乳祖父母父母丧男女奴婢死皆给假授程粮非反逆缘坐六岁纵之特流者三岁纵之有官者得复仕自张蕴古之死法官以失出为
诫有失入者反不加罪自是吏法稍密帝以问大理卿刘德威得其故遂命失出入者皆如律自此吏亦持平诏流罪无远近皆徙边要州其后
犯者寢少又诏徙死罪以实西州流者戍之以罪轻重为更限高宗永徽初勅太尉长孙无忌等共撰定律令格式旧制不便者皆随有无更改
遂分格为两部其曹司常务曰留司格留本司天下所共者曰散颁格下州县又以律学未有定疏每年所举法无准凭遂诏无忌等参撰律疏
自是断狱者皆引疏分析之龙朔闲改易官号因勅司刑太常伯源直心等复位格式惟改曹局之名不易篇第【案艺文志及册府元龟皆作
司刑太常伯源直心少常伯李敬元刑志作太常伯李敬元殊误今改正】仪凤初官号复旧又敕左仆射刘仁轨等删辑格式当是时大狱
以尚书刑部御史台大理寺杂案谓之三司而法吏以惨酷为能至不释枷而笞捶以死者皆不禁律有杖百凡五十九条犯者或至死而杖未
毕乃诏内有盗窃及蠹害尤甚者量留十二条自余四十七条并宜停武后垂拱中内史裴居道凤阁侍郎韦方质咸阳尉王守慎等删改格式
加计帐勾帐二式又以武德以来垂拱以前诏敕便于时者编为新格新格之外别编六卷堪为当司行用者为垂拱留司格其律惟改二十四
条文有不便者大抵依旧后自徐敬业起兵疑天下人

多图已乃修后周告密之法诏官司受讯有言密事者驰驿奏之又引酷吏周兴来俊臣辈数兴大狱天下仄足及周来等伏诛狄仁杰等相与论垂拱以来酷滥之冤太后感悟大足元年乃诏法司及推事使敢多作辨状而加语者以故入论中宗神龙初诏左仆射唐休璟等定垂拱格又续其后至神龙元年正月二十五日以前制敕为散颁格又删补旧式睿宗景云初敕户部尚书岑羲等删定格式律令至太极元年成名大极格玄宗开元初紫微令姚崇黄门监卢怀慎等删定格式令名为开元格 【按开元前格艺文志及唐会要俱作姚崇卢怀慎等删定刑志但举卢怀慎而遗姚崇似非体例今从艺文志改正】 诏今后总管以下私使兵士计庸以受所监临财物论又敕吏部尚书兼侍中宋璟等删定律令格式律令式仍旧名格曰开元后格 【按宋璟所撰开元后格会要及艺文志皆云开元七年上刑志以为二十六年殊误今改正】 于时犯盗者先决一百大半殒毙乃诏今后抵罪人合杖杖者并决杖六十又诏曰诉竞之人即自刑害耳目者先决四十然后依法又御史中丞李林甫奏天下定赃估绢互有高下如山南绢贱河南绢贵贱处计赃不至三百即入死刑贵处至七百以上方至死刑即轻重不侔刑典安寄请天下定赃估绢每匹计五百五十价为限从之其后侍中裴光庭中书令萧嵩以格后制敕行用之后颇与格文相违于事非便奏令所司删撰为格后长行敕寻又诏户部尚书李林甫等修缉格令旧格式律令及敕总七千九十八条其一千三百二十四条于事非要并删之二千一百八十条随事损益三千五百九十四条仍旧不改 【按总七千九十八条刑志误作七千二十六条与所删所存条数不符今据唐律议疏改正】 总成律及律疏令式开元新格共一百二卷又撰格式律令事类四十卷便于省览二十五年上之敕令尚书都督写五十本颁于天下天宝初李林甫为相数起大狱以诬陷忠良天子亦自喜边功公私交困盗贼起而狱讼繁乃下诏曰徒非重刑而役者寒暑不释械系杖古以代肉刑也或犯非巨蠹而官吏生情捶以至死其皆免以配诸军自効民年八十以上及重疾有罪皆勿坐待丁犯法原之俾终养肃宗即位诏官吏枉法犯赃者终身勿齿既而广平王俶克复东京百官受安禄山父子伪命者以六等定罪重者刑于市次赐自尽次重杖一百死次三等流贬独达奚珣及韦恒腰斩初史思明高秀岩自拔归命闻珣等被诛惧乃复叛去而三司用刑连年流贬相继河北叛人畏诛不降兵连不解肃宗后亦悔诏今后诸色律令杀人反逆奸盗及伪造十恶外自余烦冗一切删除临崩诏天下流人皆释之代宗常以至德以来用刑为

戒即位五年府县等狱无重囚故时别敕决人捶无数有司言应决重杖之人令式先无
分别京城知是蠹害决者多死外州见流岭南决不至
死决有两种法开二门请详处分乃诏凡制敕与一顿杖者其数止四十至到与一顿及
重杖一顿痛杖一顿者皆止六十并不至死德宗即位
诏中书门下选理识通明官共删定律令格式条目又取至德以来制敕奏献掇其可为
法者编入条格而不名书建中时刑部侍郎班宏言谋
反大逆及叛恶逆四者十恶之大犯者宜如律其余当斩绞刑者请决重杖一顿处死以
代极法从之故时死罪皆先决杖其数或百或六十德
宗以为既处极法重此伤残实所不忍诏今后罪至死者勿先决杖宪宗元和时命刑部
侍郎许孟容等删天宝以后敕为开元格后敕刑部奏
改律卷第八为鬪竞诏坐赃及他罪当赎者诸道委观察判官一人专勾当及时申报又
诏刑部大理决断系囚过为淹迟是长奸幸今后大理
检断不得过二十日刑部覆下不得过十日如刑部覆有异同寺司重断不得过十五日
省司重复不得过七日其有狱情可疑须再三详审非
限内可毕者即别状分析中书门下奏请常参官所举人如到任后刑罚冤滥及有赃犯
者其荐举官削阶及停见任其诸司奏官属及有状论
荐人如有赃犯过恶亦请具名奏闻量加殿罚从之诏两京及关内河南河东河北淮南
山东西道州府除大逆及杀人外其余死罪并配流天
德五城诸镇有妻儿者亦任自随又顷年配隶或非重辟便至远迁有司上陈又烦年限
向后如有轻犯更不得配流五城 【按此诏河南志
作山南山东西道志脱山字大逆杀人下志有铸钱造印若强盗持杖劫京兆界中及它
盗赃踰三匹者二十二字妻儿志作父祖子孙考之原
诏皆非今删】 先是天德流人与诸州异无归还之限刑部侍郎王播奏以七年放还为
限着为定令凤翔节度使郑余庆等奏上详定格后敕
诏刑部左侍郎许孟容蒋乂等删定复勒成三十卷刑部侍郎刘伯刍等考定之穆宗时
每有司断大狱令中书舍人一人参酌而轻重之号参
酌院其后大理少卿崔■〈木巳〉以为予夺系于人情而法官不得守其职宜废乃罢
之又以御史中丞牛僧孺言立申奏程限大事大理寺
限三十五日详断毕申刑部限三十日闻奏 【一状所犯十人已上断罪二十件已上为
大事】 中事大理寺三十日刑部二十五日 【所
犯六人所断罪十件已上为中事】 小事大理寺二十五日刑部二十日 【所犯五人
所断罪十件已下为小事】 如元推节目不尽致令
所司须更盘勘者元推官转选日量殿三选文宗太和中命尚书省郎官各删本司敕而
丞与侍郎覆视中书门下参其可否而奏之为太和格

后敕诏犯轻罪人除情状巨蠹法所难原者其它过误罪■〈儻，心代贝〉及寻常公事违犯不得鞭背开成中令刑部侍郎狄兼善采开元二十六年以后至于开成制敕删其繁者为开成详定格故时窃盗无死所以原民情迫于饥寒也至武宗时诏窃盗赃满千钱者死又律已去任者公罪流已下勿论武宗以为公罪之条情有轻重苟涉欺诈岂得勿论乃诏向后公罪情状难恕者并不在勿论之限宣宗大中初诏持杖行劫并故杀人者勿论已伤未伤已死及生并以杀人法处分不在赦原之限欺冒老小以取财物者意欲杀伤偶得免者准此仍编如令格又诏攘窃之兴起于不足赃至一千便处极法轻人性命重彼财货既多杀伤且乖教化况非旧制须议改更乃准建中三年敕赃满三匹以上决杀不满者量事科决又敕刑部侍郎刘瑑等修大中刑法总要格后敕取贞观二年至大中五年杂敕二千一百六十五条分六百四十门订其轻重名曰大中刑法统类其后左卫率府仓曹参军张戣又集律令格敕条件相类者一千二百五十条分为一百二十门号曰刑律统类上之诏刑部颁行【按刘瑑之刑法统类止于杂敕张戣之刑律统类则律令格敕皆有之门类既殊条数亦异其为二书无疑新唐书刑志祇载张书而无刘书今增正】又敕官吏犯赃及诸色取受但是全未发觉已前能经官陈首即准律文与减等如知事发已有萌肇虽未被追捕勘问亦在不许陈首之限法司断罪每脊杖一下折法杖十下臀杖二下折笞杖五下估绢结赃天下一例依上都以一千一百文九十为陌计赃绢一匹僖宗干符时又以法律去任勿论之条颇为侥幸敕今后州县官吏所犯诸罪五年之后去任勿论五年内同见任官例追收据事定例

（臣）等谨按有唐一代刑制论者皆痛恨武后之任酷吏此其说固然然未若天宝之为祸更烈也夫自武后开告密之门周兴来俊臣等纷纷罗织自宗室大臣至刺史郎将莫不被其毒害淫刑极矣然当时上则有狄仁杰魏元忠等为之辅弼下则有徐有功杜景俭等存其平恕周来之党又皆不久伏诛故唐祚复盛李林甫之奸甚于周来吉网罗钳甚于侯万其所诬陷数十百人如韦坚李邕等皆一时名臣而玄宗独畀林甫为宰辅任以终身使开元之治荡然无余其播迁也不亦宜哉肃宗目覩安史之乱宜存殷鉴而信任深刻之吏不异宣宗以故藩镇叛人兵连不解使非代宗济以仁恕天下其能少靖乎若夫文宗之时政由宦寺甘露之变李训郑注王涯舒元舆等悉腰斩族诛文宗心知其冤而不能救其事益无足论矣

△梁

梁太祖开平三年诏太常卿李燕等删定律令格式及律疏四年宰臣薛贻矩奏进
请目为大梁新定律令格式凡五部一十帙共一百三
卷诏颁行之

△后唐

后唐庄宗周光元年御史台奏本朝法书自朱温篡迎删改事条今见在三司收贮
皆无旧本节目只定州敕库本朝法书具在请敕定州
节度使速写副本进纳从之未几定州王都进纳唐朝格式律令凡二百八十六卷二年
刑部尚书卢质奏纂集同光刑律统类凡一十三卷上
之又敕应御史台河南府行台马步司左右军巡院见禁囚徒据罪轻重限十日内并须
决遣申奏仍委诸道州府见禁囚徒速宜疏理不得淹
停其有内外形势官员私事寄禁者务要绝止俾无冤滞三年敕在京及诸道州府所禁
罪人如无大过速令疏决又诏诸司囚徒罪无轻重并
宜各委本司据罪详断申奏轻者实时疏理重者候至秋分然后行法如事系军机颁行
严令或谋逆恶或蓄奸邪或行杀劫人难于留滞并不
在此限明宗天成中敕应天下州使系囚除大辟罪以上委所在长史速推勘决断不得
旁追证对经过食宿之地除当死刑外并仰释放不许
惩治大理寺少卿王郁奏请死罪囚近年全不覆奏乞敕在京决前日各一覆奏有凶逆
犯令者亦许临时一覆奏诸州府乞别降敕指挥从之
又诏诸府州官员如有善推疑狱及曾雪冤滥兼有异政者具姓名闻奏别加甄奖长兴
中令凡关贼徒若因推勘而致死者有故以故杀论无
故减一等如因拷决别增疾患候验分明如无他故虽辜内致死亦以减一等论又令赃
罪条件或是监临或因公事凡取与若显涉货财并宜
为赃罪其余不是监临不因公事不在此限又敕州县官僚能雪冤狱活人生命者许非
时选仍加阶超资注官与转服色已着绯者与转兼官
又诏自今后逐处官吏凡关推究速与剽裁如敢故纵依违遂成枉滥其元推官并当责
罚其逐处观察使刺史别议朝典前濮州录事参军崔
■〈王崇〉奏诸道狱囚恐不依法拷掠或不胜苦致毙翻以病闻请置病囚院敕委随
处长史专切经心凡有病囚当时遣医人诊候疗治据
所犯轻重决断并令五日一度差人洗刷枷匣又敕录六典法书分为二百四十卷自夏
徂冬命御史台每日递转勘读其后又敕御史中丞龙
敏等详定大中刑法统类末帝清泰初敕在京百司各于律令格式六典内录出本司事
裁成卷轴或粉壁写在廨署本司官常宜省览以备顾
问诸道州县亦有六曹内合行公事条件抄录粉壁官吏长宜观省其后以法书盗窃条
量情量罪之文不定乃令赃一匹杖脊十八不满者仗

十五不得财仗臀十五又天雄军节度使范廷光上言天成三年敕应山林羣盗害物残人者全家处置长兴四年敕父母兄弟妻女小儿一切不罪臣当管盗贼屡发盖因用法太宽今后捕盗权行重条诏曰凡盗贼劫掠乡村依长兴四年敕条处断攻劫城镇依天成二年敕处断三年御史中丞卢损等进清泰元年以前十一年内制敕可久远施行者凡三百九十四道编为三十卷其不中选者各令本司分闭不得行用诏付御史台颁行

△晋

晋高祖天福二年敕统类十二卷编敕三卷散敕七十六道令大理寺改正国号庙讳如或显系重轻须要详议别具奏闻八月敕今后或有系囚染疾者并令逐处军医看候于公廩钱内量支药价或事轻者仍许家人候看三年中书门下以天福元年十月敕唐明宗朝敕受法制仰所在遵行不得更易而明宗朝敕除清泰闲編集外尽已封鑰不行奏请将編集及封鑰前后敕文并请详定从之四年上详定编敕三百六十八道分为十二卷诏令百司写录与格式参用九月相州节度使桑维翰奏管内所获贼人从来籍没财产云是邺都旧例格律未见明文敕今后凡有贼人准格定罪不得没纳家赀五年诏自大中以来厘尔称冤决杖流配诉虽有理不在申明今后宜据其所陈与为勘断准例别科又诏窃盗赃满五匹处死三匹以上决杖配流以盗论者依律文处分

△汉

汉高祖时四方多盗乃敕天下凡关贼盗捕获不计赃物多少按验不虚并处死仍分命使者捕逐由是捕贼使者张令柔杀平阴十七村民及三叛连兵民闲震动惊讹史宏肇掌部禁兵巡逻京城得罪人不问情轻重于法如何皆专杀不请或决口断舌斫筋挫胫无虚日虽奸盗屏息而冤死者甚众

△周

周太祖广顺初以汉隐帝末年法书亡失敕大理寺重写以晋汉及国初事闻刑法敕条二十六件分为二卷附于编敕目为大周续编敕命省寺行用焉二年诏凡强盗并准自来格条断遣其犯窃盗者计赃绢满三匹以上者并集众决杀不满三匹者等第决断应有夫妇人被强奸者男子决杀妇人不坐其犯和奸者并准律科断罪不至死又诸色罪人除谋反大逆外余并不得诛杀骨肉籍没家产先是晋天福中敕凡和奸者男子妇人并处极法至是始改从律文焉又敕承前所立盐曲条法每犯至少尽处极刑近年以来抵罪甚重兼以邑居人户随税请盐

既不许将入城隍又不容向外破卖立法之弊一至于此自后凡盐曲犯一斤以下至一两杖臀十七配役一年五斤以下一斤以上杖脊二十役三年五斤以上杖死之煎盐犯一斤已下杖脊二十杖三年一斤已上杖死之凡城郭人户后屋税盐并于城内请给若外县镇郭下人户亦许将所请盐归家供食又敕民有诉讼必先历县州及观察使处决不直乃听诣台省世宗显德四年中书门下奏准宣法书行用多时文意古质条目繁细使人难会并前后敕格互换重迭亦难详定宜令中书门下并重删定从之五年七月编集成部别有目录凡二十一卷因为大周刑统与疏律令式通行又敕州县自长官已下因公事行责情杖量情状轻重用不得过臀杖十五因责情杖致死者具其事由闻奏又敕诸盗前后三犯曾经官司推问伏罪者不问赦前后赃多少并决杀

（臣）等谨按五代之君其最仁恕者莫如唐明宗其最残酷者莫如汉高祖若梁若晋则介乎二者之闲焉周世宗英毅雄杰可谓一时贤主然考其行事若竹奉璘孟汉卿之流往往以小事而遽罹大辟嗜杀之机亦所不免焉夫时当五季藩镇专杀百姓已遭涂炭朝廷方覆露之不暇而乃以草菅视之其何以建不拔之基哉

钦定续通志卷一百四十四

●钦定续通志卷一百四十五 刑法略二

刑法畧 【二】

历代刑制 【宋】

○历代刑制二

宋

△宋

宋法制因唐及五代之律令格式而随时损益 【按玉海云国初用唐律令格式外有后唐同光刑律统类清泰编敕晋天福编敕周广顺类敕显德刑统皆参用焉】 太祖惩五代藩镇专杀之弊建隆中诏天下断大辟录案牘及判官法直官等名闻奏下刑部覆视诸州狱则录事参军与司法掾参断之 【按宋史刑志此下又有惧刑部大理寺用法之失别置审刑院献之考审刑院之设太宗本纪及通考皆云淳化二年八月置并无太祖置审刑院之文宋志盖袭汪应辰疏而误者今删】 诏窃盗赃满五贯足陌者死旧法强盗持杖虽不伤人皆弃市又诏但不伤人者止计赃论令诸州获盗非状验明白未得掠治其当讯者先具白长吏得判乃讯之凡有司擅掠囚者论罪四年始定折杖法 【

按稽古录云干德元年三月癸酉始定析杖法考干德之改元在建隆四年十一月则折

杖实建隆四年三月事也宋史载于太祖受禅之初固非通考载于建隆三年亦非】凡流刑四加役流脊杖二十配役三年流三千里脊杖二十二千五百里脊杖十八二千里脊杖十七并配役一年凡徒刑五徒三年脊杖二十徒二年半脊杖十八二年脊杖十七一年半脊杖十五一年脊杖十三凡杖刑五杖一百臀杖二十九十臀杖十八八十臀杖十七七十臀杖十五六十臀杖十三凡笞刑五笞五十臀杖十下四十三十臀杖八下二十臀杖七下常行官杖制杖三尺五寸大头阔不过二寸厚及小头径不得过九分徒流笞用常行杖徒罪决而不役命工部尚书判大理寺窦仪等详定显德刑统乃削出令式宣敕一百九十条增入制敕十五条又录律内余条准此者凡四十四条附于名例之次号建隆新定刑统又取旧削去格令宣敕及后来续降要用者凡一百六条为新编敕诏模印颁行开宝二年五月帝以暑气方盛诏令两京诸州令长吏督狱掾五日一检视洒扫狱户洗涤杻械贫者给饮食病者给医药轻系小罪实时决遣自是岁以为常六年始以士人为司寇参军改诸州马步院为司寇院天下巨镇得置左右两院者十有六太宗太平兴国三年改司寇参军为司理参军以司寇院为司理院又置判官一员命有司取国初以来敕条纂为太平兴国编敕六年诏诸州长吏每五日一虑囚情得者即决之复制听狱之限大事四十日中事二十日小事十日不须逮捕而易决者不得过三日后又定令决狱违限准官书稽程律论踰四十日则奏裁然州县禁系犹以根究为名追扰辄至破家江西转运副使张齐贤以为言乃令外县罪人五日一具禁放数白州州狱别置厯长吏检察三五日一引问疏理月具奏上刑部阅其禁多者即命官往决遣冤滞则降黜既而长吏惧朝廷诘其淹滞辄隐落囚数妄言狱空乃诏妄奏狱空及隐落者加深谴雍熙初令诸州十日一具囚帐及所犯罪名系禁日数以闻俾刑部专意纠察时所奏狱状有系三百人者帝乃令门留寄禁取保在外并邸店养疾人等咸准禁囚例件析以闻其鞫狱违限及可断不断事小而禁系者有司驳奏之既又遣御史十四人分往江南两浙四川荆湖岭南等道审决劾吏之弛怠者令诸州十日一虑囚帝又闻台中鞫狱御史多不躬亲委任胥吏诏飭止又令诸州笞杖罪不须证逮者长吏即决之勿复付所司羣臣受诏鞫狱狱既具骑置来上有司断已复骑置下之州凡上疑狱覆无疑状者官吏同违制论其应奏疑案亦骑置以闻二年令窃盗满十贯者奏裁七贯决杖黥面隶牢城五贯配役三年三贯二年二贯一年他如旧制八月复分遣使臣按巡诸道诏京朝幕职州县并须习读律令格式秩满至京者当加试

问其全不明习者量加殿罚三年始用儒士为司理判
官令诸州讯囚不须众官共视申长吏得判乃讯囚刑部张佖言官吏枉断死罪者请稍
峻条章以责其明慎始定制应断狱失入死刑者官吏
停削不得减赎淳化初置刑部详覆官六员专阅天下所上案牍勿复遣鞫狱又置御史
台推勘官二十人皆以京朝官为之凡诸州有大狱则
乘传就鞫临遣赐以装钱还必召问所推事状着为定令自是大理寺杖罪以下须刑部
详覆又所驳天下案牍未具者亦令详覆乃奏二年始
置诸路提点刑狱司凡管内州府十日一报囚帐有疑狱未决即驰传往视之州县稽留
不决按讞不实并官吏用情者长吏则劾奏佐史小吏
许便宜按劾从事帝又虑大理刑部吏胥舞文始置审刑院于禁中以枢密直学士李昌
龄知院事兼置详议官六员凡狱上奏先达番刑院印
讞付大理寺刑部详覆奏闻复下审刑院裁决讞以付中书省当即下之其未允者宰相
覆以闻始命论决令诸州决死刑有呼号不伏及亲属
称冤者即以白长吏移司推鞫既而诸路提点刑狱司未尝有所平反诏悉罢之归其事
于转运司初端拱闲诏翰林学士宋白等详定端拱以
来诏敕至淳化二年上之名淳化编敕上以其烦碎命翰林承旨苏易简等同详定五年
上之名重删定淳化编敕至道二年敕大理寺决天下
案牍大事限二十五日中事二十日小事十日三年诏御史台鞫徒以上罪狱具令尚书
丞郎两省给舍以上一人亲往虑问寻又诏狱无大小
自中丞以下皆临鞫问不得专责所司 【按玉海通考诸路提点之罢在淳化四年大理
寺限诏在至道二年宋志倒置殊非又大理寺限诏
正至道二年事而宋志序于至道二年前非今悉改正】 真宗即位闻诸州所断大辟情
可疑者惧为诸司所驳不敢上乃诏死事有可疑者具
狱申转运司择部内详练格律者决之须奏者乃奏 【按此诏玉海以为真宗事宋史以
为太宗至道二年事今从玉海】 诏户部尚书张齐
贤删定淳化后尽至道末续降宣敕咸平元年张齐贤等上新编敕又诏给事中柴成务
重详定名咸平新定编敕四年从黄州守王禹偁之请
诸路置病囚院持杖劫贼徒流以上有疾者处之余责保于外 【按病囚院之设通考在
咸平四年宋史在元年今从通考】 六年诏有盗主
财者五贯以上杖脊黥面配牢城十贯以上奏裁勿得私黥涅景德初诏诸道州军断案
内有宣敕不定刑名止言当行极断者所在即寘大辟
颇乖平允自今凡言处断重断极断决配朝典之类未得论决具狱以闻 【按断案诏通
考在景德元年宋史在三年今从通考】 四年复置
诸路提点刑狱官仍以使臣副之知审刑院朱选言官吏因公受财许为曲法决遣之际

依法科刑以规避枉法之罪者望以枉法论至死者加役流从之 【按此条宋志作官吏因公事受财证左明白者望论以枉法考官吏因公受财律文早有明条朱选此疏特为枉法规避者言耳

今从通考】 定枷制以十五斤为准大中祥符中诏御史台开封府及在京凡有刑案之处特置司纠察决杖令众者旧十日减为三日半月以上勿过五日暑月免之初景德闲三司上新编敕及农田编敕大中祥符六年诏判大理寺王曾及陈彭年等删定三司编敕及咸平后至祥符七年诏敕九年上之名大中祥符新编敕天禧四年诏天下犯十恶劫杀谋杀故杀鬪杀放火强劫正枉法赃伪造符印厌魅咒诅造妖书妖言传授妖术合造毒药禁军诸军逃亡为盗罪至死者每遇十一月权住区断过天庆节即决之余犯至死者十二月内及春夏未得区遣禁锢奏裁 【按过天庆节始决死刑条咸平中殿中侍御史赵湘曾以为言故有是诏】 仁宗天圣四年以冒法者情有轻重而有司一切寘之重辟乃令天下死罪情理可矜及刑名疑虑者具案以闻有司毋得举驳其后虽法不应奏吏当坐罪者审刑院贴奏率以恩释为例名曰贴放六年集贤校理聂冠卿请罢覆笞杖而徒以上虽不系狱皆附奏从之又诏杖之轻重毋得过十五两初帝申命学士夏竦等重删定编敕合农田敕为一书又详定祥符七年至天圣五年宣敕唐令与宋事异者亦修定之诏中外言敕得失七年书成凡数种曰天圣编敕曰敕书德音曰新修令曰附令敕天圣编敕视祥符敕损百有余条其丽于法者大辟之属十有七流之属三十有四徒之属百有六杖之属二百五十有八笞之属七十有六又配隶之属六十有三大辟而下奏听旨者七十有一既颁行断令毋得删改明道二年令天下凡上具狱大理寺详断大事期三十日小事递减十日审刑院详议又各减半其不待期满而断者谓之急按官吏议刑有失者坐之景佑二年判大理寺司徒昌运请自四月至六月减期日之半两川广南福建湖南如急按奏其后犹以为淹滞又诏月上断狱数列大中小事期日以相参考翰林学士章得象上一司一务及在京编敕是岁改强盗法不持杖不得财徒二年得财为钱万及伤人者死持杖而不得财流三千里得财为钱五千者死伤人者殊死不持杖得财为钱六千若持杖罪不至死者仍刺隶三千里外牢城既而有司言窃盗不用威力得财为钱五千即刺为兵反重于强盗请减之遂诏至十千始刺为兵又诏京城持杖窃盗得财为钱四千亦刺为兵庆历中诏天下罪殊死者若祖父母父母年八十及笃疾无期亲者列所犯以闻命陈大素等删定景佑二年至庆历三年宣敕为庆历编敕别为总例后又修一司敕

二千三百一十七条一路敕千八百二十七条一州一
县敕千四百五十一条其丽于法者大辟之属总三十有一流之属总二十有一徒之属
总百有五杖之属总百六十有八笞之属总十有二又
配隶之属总八十有一大辟而下奏听旨者总六十有四至和初置京畿提点刑狱二年
寻诏罢之嘉佑闲枢密使韩琦言自庆历四年至嘉佑
二年敕增至四千余条前后抵牾请删定为嘉佑编敕诏中外言敕得失如天圣故事七
年书成总千八百三十四条视庆历敕大辟增六十流
增五十徒增六十有一杖增七十有三笞增三十有八又配隶增三十大辟而下奏听旨
者增四十有六又别为续附令敕三卷神宗即位令诸
州军巡司理院所犯罪人一岁在狱病死及二人推吏狱卒皆杖六十增一人者加一等
罪止杖一百熙宁元年以京朝官分治左右厢凡鬪讼
杖六十已下情轻者得专决四年立盗贼重法凡劫盗罪当死者籍其家赀以赏告人妻
子编置千里囊橐之家斩籍其家之半以为赏余递降
有差若复杀官吏及累杀三人焚舍屋百闲或羣行于州县之内劫掠于江海船楫之中
虽非重地亦以重论先是诸路经畧钤辖不得便宜断
制百姓赵抃知成都言当独许成都四路中书枢密院议许之其后谢景初奏成都妄以
便宜诛释多不当于是中书删定旧文惟军士犯罪及
边防机速许特断武臣犯赃经赦叙复后更立年考升迁帝曰若此何以戒贪吏命改法
六年定议仿文臣叙法少增损之七年置律学元丰初
复置大理狱二年成都府利州路钤辖言往时川陕绢匹为钱二千六百以此估赃两铁
钱得比铜钱之一近绢匹不过千三百估赃二匹乃得
一匹之罪多至重法令法寺定以一钱半当铜钱之一从之初帝置狱修敕词中外言法
不便者至是左谏议安焘等上诸司敕式上以律不足
以周事情凡律所不载者一断以敕乃更其目曰敕令格式而律恒存乎敕之外谕之曰
禁于未然之谓敕禁于已然之谓令设于此以待彼之
谓格使彼效之之谓式修书者要当识此于是凡入笞杖徒流死自名例以下至断狱十
有二门丽刑名轻重者皆为敕自品官以下至断狱三
十五门约束禁止者皆为令命官之等十有七吏庶人之赏等七十有七又有倍全分厘
之级凡五等有等级高下者皆为格表奏帐籍关牒符
檄之类有体制模楷者皆为式七年书成上之八年诏诸州鞫讯强盗情理无可愆刑名
无虑疑而辄奏并令刑部举驳重行朝典毋得用例破
条哲宗元佑初御史中丞刘摯言元丰中命有司编修敕令凡旧制裁于敕者多移之于
令盖违敕之法重违令之罪轻此足见神宗仁厚之德
而有司不能推广乃增多条目离析旧制意苛文晦不足以该事物之情右谏议大夫孙

觉亦言细碎烦多难以检用乃诏摯等刊修元丰敕令格式并续降条贯二年上之刑部大理寺定制凡断讞奏狱每二十缙以上为大事十缙以上为中事十缙以下为小事大事以十二日中事九日小事四日为限若在京八路大事十日中事五日小事三日台察及刑部举劾约法状并十日三省枢密院再送各减半有故量展不得过五日凡公案日限大事以三十五日中事二十五日小事十日为限在京八路大事以三十日中事半之小事参之一台察及刑部并三十日每十日断用七日议用三日三年罢大理寺右治狱五年诏命官犯罪事于边防军政文臣申尚书省武臣申枢密院中丞苏辙请并归三省其事干边防军政者令枢密院同进取旨乃诏文武官有犯同按干边防军政者刑部定断仍三省枢密院同取旨刑部言佃客犯主加凡人一等主犯之杖以下勿论徒以上减凡人一等谋杀盗诈有所规求避免而犯者不减因殴致死者不刺面配邻州情重者奏裁凡命士死于官或去位其送徒道亡则部辖将校节级与首率众者徒一年情轻则杖百虽自首不免从之哲宗亲政稍复熙宁元丰旧制迨元符三年诏强盗赃应绞者赃数并增一倍赃满不伤人及虽伤人而情轻者奏裁其用兵仗汤火之类伤人及残虐主家情状酷毒或污辱良家或入州县镇寨行劫不在奏裁之限若驱虏官吏巡防人等罪不至死仍奏裁凡重法地嘉佑中始于开封府诸县后稍及诸州以开封府东明考城长垣县京西滑州淮南宿州河北澶州京东应天府濮齐徐济单兗郓沂州淮阳军亦立重法着为令至元丰时河北京东淮南福建等路皆用重法郡县寢广元丰敕重法地分劫盗五人以上凶恶者方论绍圣后有犯即坐不计人数至是改依元丰旧敕徽宗崇宁元年诏追复元丰法制凡元佑条例悉毁之时臣僚言三省六曹所守者法法所不载然后用例今顾引例而破法非理也乃令取前后所用例以类编修与法妨者去之宰臣蔡京请令诸州筑圜土以居强盗贷死者大观中诏计赃之律以一贯五百定罪又更定笞法自今并以小杖行决笞十为五二十为七三十为八四十为十五五十为二十不以大杖比折永为定制政和中诏立聚问审录之限死囚五日流罪三日杖笞一日又诏宗子犯罪庭训示辱比有去衣受杖伤肤败体有恻朕怀其令大宗正恪守条制违者以违御笔论中书省言律在官犯罪去官勿论盖为命官立文其后相因掌典解役亦用去官免罪例有犯则解役归农幸免重罪诏改政和敕掌典解役听从去官法重和中定折杖数徒二年杖九十者折十七徒二年杖八十者十五以是为差宣和中诏州县官不亲听囚而使吏鞫讯者徒二年是时蔡京当国欲快己

私请降御笔多出法令之外前后抵牾靖康初羣臣
请参用国初以来条法删修成书诏从其请书不果成高宗南渡着令诸狱具当职官依
式检校枷以干木为之轻重长短刻识其上笞杖不得
留节目亦不得钉饰及加筋胶之类仍用官给火印暑月每五日一洗濯枷杻刑寺轮官
一员躬亲监视诸狱司并旬申禁状品官命妇在禁别
具单状合奏案者具情款招伏奏闻法司朱书检坐条例推司录问检法官吏姓名于后
各州每年开收编配羁管奴婢人及断过编配之数各
置籍各路提点刑狱司岁具本路州军断过大辟申刑部诸州申提刑司其应书禁历而
不书应申所属而不申奏案不依式检坐开具违令回
报不圆致妨详覆与提刑司详覆大辟而稽留失覆大辟致罪有出入者各抵罪旧以绢
计赃者千三百为一匹窃盗至二十贯者徒建炎元年
以二千为一匹盗至三贯者徒一年三年复诏以三千为一匹窃盗及凡以钱定罪递增
五分四年又诏特旨处死情法不当者许大理寺奏审
凡靖康元年以前所降御笔有坏正法者悉厘正之赃罪至死者籍其家 【按通考以绢
定罪条在建炎元年除徽宗御笔条在四年宋志倒
置今改正】 先是高宗播迁断例散逸建炎以前凡所施行多出吏省记至建炎三年始
命取嘉佑条法与政和敕令对修而用之嘉佑法与见
行不同者自官制役法外赏格从重条约从轻绍兴元年书成号绍兴重修敕令格式而
吏胥省记者亦复引用寻因监察御史刘一正言诏左
右司敕令所刊定省记二年秘书少监傅崧卿言军国异容刑亦殊制不可槩以军法从
事乃诏知州兼统兵者非出师临阵毋得轻用重刑 【
按知州毋用重刑诏通考在绍兴二年而宋史在建炎元年以绢计赃条前殊误今改正
】 三年诏捕获强盗虽无被主姓名赃满已经论决者
许推赏五年尚书省以狱吏惨酷囚垂死者皆托疾患杀之未尝依条医治乞举行岁终
比较计分断罪法是岁比较得宣州衢州福州无病死
囚当职官各转一官舒州病死及一分惠州二分六厘当职官各降一官六年令刑部体
量公事邵州广州高州勘命官淹系至久不报诏知州
降一官当职官展二年磨勘当行吏永不收叙德庆府勘封川县令事七月不报诏知州
勘官各抵罪十年诏诸狱并一更三点下锁五更五点
开锁定牢违者杖八十狱官令佐不亲临及县令辄分轮余官并徒一年知通监司觉察
按劾着为令先是在京通用敕内有已冲改不该引用
之文大理正张柄言之乃诏删削至是右仆射秦桧上之然自桧专政率用都堂批状指
挥行事杂入吏部续降条册之中修书者不敢删至与
成法并立其后因吏部尚书周麟之言乃诏削去之旧法刑部郎官四人分左右厅或以

详覆或以叙审同僚而异事有防闲覆考之意南渡以来务从简省大理少卿止一员刑部郎中初无分异狱有不得其情法有不当于理者无所平反追改二十六年右司郎中汪应辰言之诏刑部郎官依元丰法分左右厅治事二十七年诏四川以钱引科罪者准铜钱孝宗干道二年刑部侍郎方滋上干道新编特旨断例其后臣僚言绍兴以来续降指挥无虑数千抵牾难以考据诏大理寺官详定其可否类申刑部以所隶事日分送六部长贰参详六年刑部侍郎汪大猷等上其书号干道重修敕令格式又诏以绢计赃者更增一贯以四千为一匹议者又言犯盗以敕计钱定罪以律计绢今律以绢定罪者递增一千敕内以钱定罪亦合例增一千从之临安府左右司理府院三狱杖直狱子以无所给至为无藉七年诏人月给钱十贯米六斗每院止许置一十二人淳熙初浙西提刑郑兴裔上检验格目诏颁之诸路提刑司当是时法令虽具然吏一切以例从事法当然而无例则事皆泥而不行甚至隐例以坏法至是诏除刑部许用干道所修刑名断例司勋许用编类获盗推赏例其余并不得引例又删改干道新书号淳熙敕令格式帝读至收骡马舟船契书税曰恐后世有算及舟车之讥户令绝户之家许给其家三千贯及二万贯者取旨帝曰其家不幸而绝及二万贯乃取之是有心利其财也又捕亡律公人不获盗者罚金帝曰罚金而不加罪是使之受财纵盗也又监司知州无额上供者赏帝曰上供既无额是白取于民也可赏以诱之乎并令削去之又令敕令所分门编类名曰淳熙条法事类【按玉海云淳熙三年以干道新书编削未尽诏刊修四年进重修敕令格式御笔圈去户令一条捕亡令一条及无额上供赏并令删去六年诏敕局取敕令格式随事分门纂为一书七年书成赐名条法事类是帝读一条乃敕令格式也宋志以为条法事类殊误今改正】是时有司以覆勘不同则前官有失入之罪往往雷同前勘帝知其弊十四年诏特免一案推结一次于是大小之狱多得其情二广州军狱吏畏宪司点检送勘之害凡有重囚多毙于狱臣僚以为请乃诏二广提刑司详覆公事若小节不完不须追逮狱吏委本州岛究实保明遇有死者必根究其所以致死三衙及江上诸军各有推狱谓之后司狱成决于主帅不经属官故军吏多受财为奸光宗时乃诏通晓条制属官兼管之广东路瘴疠惟英德府为最甚谓之人闲生地狱诸司公事欲速成者多送之自非死罪至即诬伏亟就刑责以出绍熙五年臣僚言之诏本路诸司公事应送别州者无送英德府宁宗庆元时敕令所上重修敕令格式嘉泰二年上庆元条法事类是年天下上死案千八百一十一人而断死者纔

一百八十一人余皆贷之乃诏诸宪台岁终检举州军
有狱空并禁人少者申省取旨嘉定四年诏以绢计赃定罪则江北铁钱依四川法二当
铜钱一江西提刑徐似道言检验官指轻作重以有为
无差讹交互以故奸吏出入人罪乞以湖南广西见行刊印正背人形随格目给下令于
伤损去处依样朱红书画唱喝伤痕众无异词然后署
押诏从之颁天下五年诏三衙及江上四川诸军以武举人主管后司公事理宗宝庆初
敕令所言自庆元新书之行今二十九年前指挥殆非
一事或旧法该括未尽文意未明须用续降参酌者或旧法元无而后因事立为成法者
或已有旧法而续行不必引用者或一时权宜而不可
为常法者条目滋繁无所遵守乞考定之淳佑二年四月敕令所上其书名淳佑敕令格
式十一年又取庆元法与淳佑新书删润其闲修改者
百四十条初入者四百条增入者五十条删去者十七条自此书出至度宗以后悉遵行
之无所更定其余一司一路一州一县敕前后时有增
损不可胜纪也诏狱本以纠大奸慝故其事不常见熙丰之闲权臣欲藉此以威缙绅逞
私忿故诏狱特盛祖无择之狱王安石私怨所诬也郑
侠苏轼之狱杜绝忠言也赵世居之狱则吕惠卿欲文致李士宁以倾王安石也陈世儒
之狱则贾稚民欲文致世儒妻母吕以倾吕公着也王
安石欲报吕惠卿而特勒张若济之狱蔡确欲撼吴充而特勘潘开之狱绍圣闲章惇蔡
卞用事元佑旧臣悉遭贬黜至南渡后娄寅亮岳飞等
狱悉出秦桧私意名曰诏狱实非诏旨也其后所设诏狱大率类此故不备录云

（臣）等谨案宋自建隆初厘定刑统律令格式屡有更改置省刑之官定折杖之
法尝有意于恤刑矣然崇宁以后大狱屡兴臣僚士庶
之枉抑者严刑曲法史不绝书盖其时上无烛奸听直之智而臣下互结党援迭相倾辄
法吏之舞文悉奉权臣之意指徒欲以删定律文托于
宽厚岂非好其名而不求其实哉南渡偷安一隅条规未立而诏狱之陷善更甚于崇宁
以前诸路提刑多旷其职守令专恣以武健为能好刑
者国削滥刑者国危信矣惟孝宗之删除苛政犹知以慎刑为重焉

钦定续通志卷一百四十五

●钦定续通志卷一百四十六 刑法略三

刑法畧 【三】

历代刑制 【辽 金】

○历代刑制三

辽

金

△辽

辽之刑制凡四曰死曰流曰徒曰杖死刑有绞斩凌迟之属又有籍没之法流刑量罪轻重寘之边城部族之地远则投诸境外又远则罚使绝域徒刑一曰终身二曰五年三曰一年半终身者决五百其次递减百杖刑自五十至三百凡杖五十以上者以沙袋决之其制用熟皮合缝之长六寸广二寸许柄一尺许又有黥刺之法木剑大棒铁骨朵之制木剑面平背隆大臣犯重罪欲宽宥则击之其数与大棒俱三自十五至三十铁骨朵之数或五或七有重罪者将决以沙袋先于胛骨之上及四周击之拷讯之具有羸细杖及鞭烙法羸杖之数二十细杖之数三自三十至于六十鞭烙之数凡烙三十者鞭三百烙五十者鞭五百被告诸事应伏而不服者以此讯之品官公事误犯民年七十以上十五以下犯罪者听以赎论赎铜之数杖一百者输钱千亦有八议八纵之法籍没之法内外戚属及世官之家犯反逆等罪没入斡里余人则没为着账户其没入宫分及分赐臣下者亦有之太祖初年庶事草创犯罪者量轻重决之其后治诸弟逆党权宜立法亲王从逆不罄诸甸人或投高崖杀之淫乱不轨者五车轘杀之逆父母者视此讪詈犯上者以熟铁锥搯其口杀之从坐者量罪轻重杖决杖有二大者重钱五百小者三百又为梟磔生瘞射鬼箭炮掷支解之刑归于重法神册六年五月诏大臣定治契丹及诸夷之法汉人则断以律令仍置锺院以达民冤至太宗时治渤海人一依汉法余无改焉穆宗应历十二年国舅帐郎君萧延之奴哈里强陵伊喇都哩未及年之女以法无文加之宫刑仍付都哩以为奴因着为令十六年谕有司凡行幸顿次必高立标识以禁行者令民勿犯违者以死论景宗保宁三年以穆宗废锺院穷民有冤者无所诉故诏复之仍命铸钟纪诏其上道所以废置之意圣宗统和元年二月禁所在官吏军民不得无故聚众私语及冒禁夜行违者坐之四月枢密院请诏北府司徒佛德译南京所进律文从之十一月诏民闲有父母在别籍异居者听邻里觉察坐之先是契丹及汉人相殴致死其法轻重不均至是一等科之九年闰月遣翰林承旨邢抱朴三司使李嗣给事中刘京政事舍人张干南京副留守吴浩分决诸道滞狱十二年诏契丹人犯十恶亦断以汉律旧法死囚尸市三日至是一宿即听收瘞诏叛逆之家兄弟不知情者虽同居亦免连坐着为令二十四年诏主非犯谋反大逆及流死罪者其奴婢无得告首若奴婢犯罪至死听送有司其主无得擅杀二十九年以旧法宰相节度使世选之家子孙犯罪徒杖如齐民惟免黥面诏自今犯罪当黥即准法同科开泰八年诏窃盗赃满二十五贯者其首

处死从者决流始置大理寺少卿及正主覆奏犹虑其
未尽而亲为录囚数遣使诣诸道录囚五院部民有自坏铠甲者其杖杀之帝怒其用
法太峻诏夺官以故不敢酷撻五院部民偶遗火延及
木叶山兆域法当死杖而释之因着为法又诏自今三犯窃盗者黥额徒三年四则黥面
徒五年至于五则处死太平六年诏贵戚以事被告官
司不案辄申及受请托为奏言者以本犯人罪罪之七年诏中外大臣曰制条中有遗阙
及轻重失中者其条上之议增改焉兴宗重熙元年诏
职事官公罪听赎私罪各从本法子弟及家人受赍不知情者止坐犯人先是南京三司
销钱作器皿三斤持钱出南京十贯及盗遗火家物五
贯者处死至是铜逾三斤持钱及所盗物二十贯以上处死二年诏自后犯终身徒者止
刺颈奴婢犯逃若盗其主物主无得擅鲸其面刺臂及
颈者听犯窃盗者初刺右臂再刺左三刺颈之右四刺左至于五则处死五年新定条制
成诏有司凡朝日执之仍颁行诸道盖纂修太祖以来
法令参以古制其刑有死流杖及三等之徒而四凡五百四十七条十年七月诏诸职官
私取官物者以正盗论敢以先朝已断事相告言者罪
之诸帐郎君等于禁地射鹿决杖三百不征偿小将军决二百已下至百姓犯者决三百
十一年七月诏盗易官马者减死论 【按盗易官马
事据本纪在私取官物禁地射鹿之后刑法志误列在五年前后舛错今正之】 道宗清
宁元年诏诸官都部署有投诽谤之书其受及读者皆
弃市二年命诸郡长吏如诸部例与僚属同决罪囚无致枉死狱中又诏自今凡强盗得
实者听即决之四年复诏左伊勒希巴曰比诏外路死
刑听所在官司即决然恐未能悉其情或有枉者自今虽已款伏仍令附近官司覆问无
冤然后决之有冤者即具以闻咸雍元年诏狱囚无家
者给以粮三年诏给诸路囚粮六年帝以契丹汉人风俗不同国法不可异施于是命特
哩衮苏枢密使伊逊等更定条制凡合于律令者具载
之其不合者别存之大安四年五月诏免役徒终身者五岁免之五年十月诏复行旧法
【先是校定官即重熙旧制更窃盗赃二十五贯处
死一条增至五十贯处死又删其重复者二条为五百四十五条取律一百七十三条又
创增七十一条凡七百八十九条增重编者至千余条
皆分类列以太康闲所定复以律及条例参校续增三十六条其后因事续校至大安三
年止又增六十七条条约既繁典者不能徧习愚民莫
知所避犯法者众吏得因缘为奸故有是诏】

天祚即位赏罚无章其后益务严酷投崖炮掷钉割脔杀之刑复兴焉或有分尸五
京甚者至取其心以献祖庙而辽亦遂亡矣

（臣）等谨按辽初以武立国用法尚严一切刑制有出五服三就外者其时庶事草创法制未立用以禁暴戢奸威克厥爱势使然耳景圣二宗加意详慎更定法令轻重适宜史称开泰之闲诸道狱空有刑昔之风焉及季世掾忠无策专尚残酷舍景圣之善制而法先代之严刑不知时异势殊开国权宜之令固不可用于法制既定之后也夫刑以弼教用得其宜虽严而民服刑失其当而欲以严威止乱不几于抱薪而救火耶

△金

金国旧俗轻罪笞以柳椶杀人及盗劫者击其脑杀之没其家赀以十之四入官其六赏主并以家人为奴婢其亲属欲以马牛杂物赎者从之或重罪亦听自赎然恐无辨于齐民则劓刖以为别其狱则掘地深广数丈为之穆宗时苦多盗欲皆杀之太祖曰以财杀人不可财者人所致也遂立盗征偿法为征三倍太祖天辅元年五月诏自收盗江州以后同姓为婚者杖而离之三年正月东京人为质者永吉等五人结众叛事觉诛其首恶余皆杖百没入在行家属资产之半诏继有犯者并如之太宗天会二年二月诏有盗发辽诸陵者罪死三年七月诏权势之家毋买贫民为奴其胁买者一人偿十五人诈买者一人偿二人并杖一百七年诏凡窃盗但得物徒三年十贯以上徒五年刺字充下军三十贯以上徒终身仍以赃满尽命刺字于面五十贯以上死征偿如旧制熙宗天眷三年复取河南地诏其民约所用刑法皆从律文罢狱卒酷毒刑具熙宗皇统闲诏诸臣以本朝旧制兼采隋唐之制参辽宋之法类以成书名曰皇统制颁行中外时制杖罪至百则臀背分决及海陵时以脊近心腹遂禁之虽主决奴婢亦论以违制天德四年正月立捕盗赏格正隆二年八月始置登闻鼓院四年正月更定私相越境法并论死五年二月遣使分道监视所获盗贼并凌迟处死或锯灼去皮截手足仍戒屯戍千户穆昆等有获者并处死总管府官亦决罚十二月禁朝官饮酒犯者死海陵喜变旧制因取所改易至正隆闲者为续降制书与皇统制并行焉世宗即位以正隆之乱盗贼公行兵甲未息一时制旨多从时宜遂集为军前权宜条理大定三年五月更定出征军逃亡法四年断死罪十有七人五年命有司删定条理与前制书兼用六年十二月诏有司每月朔望及上七日毋奏刑名七年五月大兴府狱空诏赐钱三百贯以为宴乐之用是岁断死囚二十人八年制品官犯赌博法赃不满五十贯者其法杖听赎再犯者杖之且曰杖者所以罚小人也既为职官当先廉耻既无廉耻故以小人之罚罚之九年十二月制职官犯公

罪在官已承伏者虽去官犹论复命杖至百者臀背分受已而闻民闲有不欲者令罢之十年四月制命妇犯奸不用夫荫以子封者不拘此法十一月制盗太庙物者与盗宫中物同论十一年诏谕有司曰司狱廨舍须近狱安置囚禁之事常亲提控其狱卒必选年深而信实者轮直十二年命凡守令科部内钱者虽遇赦仍追还其主惟应入官者免征三月诏自今官长不法其僚佐不能纠正又不言上者并坐之定告捕盗发冢者赏格十三年诏立春后立秋前及大祭祀月朔望上下弦二十四气雨未晴夜未明休假并禁屠宰日皆不听决死刑惟强盗则不待秋后更定盗宗庙祭器法十五年诏改窃盗赃至八十贯者处死十七年设提刑司以纠诸路刑狱之失又诏审录官失纠察官吏罪者严加惩断不以赎论十月更护送罪人逃亡制十二月以渤海旧俗男女婚娶必先攘窃以奔诏禁绝之犯者以奸论十八年正月定杀异居周亲奴婢同居卑幼辄杀奴婢及妻无罪而辄殴杀者罪十九年三月制纠弹之官知有犯法而不举者减犯一人等科之关亲者许回避六月帝以正隆续降制书多任己意伤于苛察而与皇统之制并行是非混乱莫知适从奸吏因得上下其手遂置局命大理卿伊喇慥总中外明法者共校正乃以皇统正隆之制及大定军前权宜条理后续行条理伦其轻重删繁正失制有缺者以律文足之制律俱缺及疑而不能决者则取旨画定军前权宜条理内有可以常行者亦为定法余未应者亦别为一部存之参以近所定徒杖减半之法凡校定千一百九十条分为十二卷以大定重修制条为名【按大定重修制条事刑法志误隶十七年后今据世宗本纪改正】十月制知情服内成亲者虽自首仍依律坐之二十年帝见有蹂践禾稼者谓宰相曰今后有践民田者杖六十盗人穀者杖八十并偿其直四月定冒荫罪赏二十二年三月诏颁重修制条十二月立强取诸部羊马法二十三年帝以法寺断狱以汉字译女真字会法又复各出情见妄生穿凿徒致稽缓遂诏罢情见【先是尚书省送大理寺文字初送如法裁断再送司直披详又送闾寺参详反复三次二十二年诏自今可止一次送寺闾寺披详苟有情见即具以闻至是诏罢情见】二十五年帝以妇人在囚输作不便而杖不分决与杀无异遂命免死输作者决杖二百而免输作以臀背分决二十六年尚书省奏定太子妃大功以上亲及与皇家无服者及贤而犯私罪者皆不入八议十月定职官犯赃同职相纠察法二十七年二月命罪人在禁有疾听亲属入视十二月禁女真人不得改称汉姓学南人衣装违者抵罪二十八年十月禁糠禅瓢禅其停止之家抵罪章宗即位敕登闻鼓院所以远冤

枉旧尝锁户其令开之九月制诸盗贼聚集至十人或骑五人以上所属移捕盗官捕之仍递言省部三十人以上闻奏违者杖百制强族大姓不得与所属官吏交往违者有罪明昌元年帝问宰臣曰今何不专用律文平章政事张汝霖曰前代律与令分其有犯令以律决之今国家制律混淆固当分也遂置详定所命审定律令二年四月制诸部内灾伤主司应言而不及妄言者杖七十检视不以实者罪如之因而有伤人命者以违制论致枉有征免者坐赃论妄告者户长坐诈不以实罪计赃重从许匿不输法六月禁称本朝人及本朝言语为番违者杖之九月定诈为制书未施行罪十月敕司狱毋得与府州司县官筵宴还往违者罪之十一月禁伶人不得以历代帝王为戏及称万岁犯者以不应为事重法科十二月定镇边守将致盗贼罪三年三月更定强盗征赃品官及诸人亲获强盗官赏制七月详定所进所校律帝复命中都路转运使王寂大理卿董师中等重校之四年三月制定民刁角抵枪棒罪五年正月复令钩校制律即付详定所时详定官言当用今制条参酌时宜准律文修定历采前代刑书宜于今者以补遗阙取刑统疏文以释之着为常法名曰明昌律义别编榷货边部权宜等事集为敕条遂以知大兴府事尼玛哈鉴等为校定官大理卿阎公贞等为覆定官重修新律焉 【按明昌三年七月详定所进所校律及明昌五年正月复令钩校制律二条刑志误作泰和三年五年事考三年七月详定所进所校律条命大理卿董师中等重校之据师中传师中为大理卿时在明昌初年至泰和二年已薨则志所载三年七月进律条其为明昌三年无疑又考五年正月重修新律条名曰明昌律义则为明昌时所修可知且云知大兴府事尼玛哈鉴为校定官据尼玛哈鉴传章宗立累迁尚书户部侍郎改知大兴府事明昌五年拜参知政事薨则志所载五年正月重修新律事为明昌五年亦显而易见今悉改正】 又令徒二年以下者杖六十二年以上杖七十妇人犯者并决五十着于敕条承安二年制军前受财法一贯以下徒二年以上徒三年十贯处死三年三月敕随处盗贼毋以强为窃以多为寡以有为无啸聚三十人以上奏闻违者杖百十一月定属托罪法四年四月尚书省请再覆定令文五月帝以法不适平常行杖样多不能用遂定分寸铸铜为杖式颁之天下六月定宫中亲戚非公事传达语言转递诸物及书简出入者罪五年三月定妻亡服内婚娶听离制四月尚书省进律义五月诏定进纳官有犯决断法七月定居祖父母丧婚娶听离法九月定皇族收养异姓男为子者徒三年姓同者减二等立嫡违法者徒一年十二月定管军官受所部财物辄放

离役及令人代役法定造作不如法三年内有损坏者罪有差又命编前后条制书之于册以备将来考证泰和元年正月尚书省奏今杖式轻细民不知畏请用大杖诏命量所犯用大杖不得过五分三月敕官司私文字避始祖以下庙讳小字犯者论如律五月削尊长有罪卑幼追捕律十二月所修新律成凡十有二篇一曰名例二曰卫禁三曰职制四曰户婚五曰厩库六曰擅兴七曰盗贼八曰鬪讼九曰诈伪十曰杂律十一曰捕亡十二曰断狱实唐律也但加赎铜皆倍之增徒至四年五年为七削不宜于时者四十七条增时用之制百四十九条因而畧有损益者二百八十有二条余百二十六条皆从其旧又加以分一为二分一为四者六条凡五百六十三条为三十卷附注以明其事疏义以释其疑名曰泰和律义自官品令职员令之下曰祠令四十八条户令六十八条学令十一条选举令八十三条封爵令九条封赠令十条宫卫令十条军防令二十五条仪制令二十三条衣服令十条公式令五十八条禄令十七条仓库令七条厩牧令十二条田令十七条赋役令二十三条关市令十三条捕亡令二十条赏令二十五条医疾令五条假宁令十四条狱官令百有六条杂令四十九条释道令十条营缮令十三条河防令十一条服制令十一条附以年月之制曰律令二十卷又定制敕九十五条榷货八十五条番部三十九条曰新定敕条三卷六部格式三十卷司空襄以进诏颁行之【按章宗本纪泰和元年十二月司空襄等进新定律令敕条格式五十二卷刑志云律令二十卷敕条三卷六部格式三十卷合为五十三卷纪志互异未详孰是】二年监察御史史肃言泰和新格放良从良例与大定条理不同皆编格官妄为增减以致随处致讼敕付所司正之三年五月定擅增减宫门锁钥罪九月诏定千户穆昆受随处捕盗官公移盗急不即以众应之者罪有差四年四月增定关防奸细格五月定省吏关决公务诡称已稟擅退六部大理寺法状及妄有所更易者罪七月定申报盗贼制十月定私讎法五年二月定鞫勘官受饮宴者罪制盗用及伪造都门契者罪视官城门减一等六月更定鬻米面入外界法制镇防军逃亡致边事失错陷败户口者罪七月宣抚使布色揆奏定奸细罪赏格定围场误射中人罪六年六月定军前差发受赃罪除飞蝗入境虽不损苗稼亦坐罪法七月诏禁卖马入外境但至界欲卖而为所捕即论死七年三月定蝗蝻生发地主及邻主首不申之罪六月以山东盗制同党能自杀捕出首免罪加赏法九月更定受制忘误及误写制书事重加等罪八年闰四月制诸州府司县造作不得役诸色人匠违者准私役之律计佣以受所监临财物论七月

诏更蝗虫生发坐罪法九月更定安泊强窃盗罪格宣宗贞佑元年定亡失告身文凭格三年诏宰臣曰自今监察官犯罪其事关军国利害者并笞决之三月禁州县置刃于杖以决罪人四年诏凡监察失纠劾者从本法论外使入国私通本国事情宿卫近侍官承应人出入亲王公主宰执家灾伤乏食有司检核不实致伤人命转运军储而有私载考试举人而防闲不严其罪并决在京犯至两次者台官减监察一等治罪论赎余止坐专差任满日议定若任内曾以漏察被决依格虽为称职止从平常平常者从降罚六月诏凡进奉帖及申尚书省枢密院关应密大事私发视者绞误者减二等制书应密者如之十一月定毁防城器具法兴定元年八月制增定擒捕逃军赏格及居停人罪十月制定州府司县官失觉奸细罪二年十一月定京师失火罪三年六月制沿河戍兵逃亡罪并同征行军人例十月定赃吏计罪以银为则四年九月更定安泊逃亡出征军人罪及捕获赏格五年九月更定监察御史违犯的决法十月尚书省言司县官贪暴不法部民逃亡既有决罚他县藏匿亦宜定罪从之十二月定诈诱征防军人逃亡罪法元光元年八月增定藏匿逃亡亲军罪哀宗正大元年诏刑部登闻检鼓院毋锁闭防护听有冤者陈诉十二月左丞行张信言先帝诏国初刑不上大夫治以廉耻丞相高琪所定职官犯罪的决百余条乞改依旧制从之

（臣）等谨按金源刑制务尚宽平开国之初法制简易及世宗御宇尤重刑章或讷律援经或揆义制法大定之治洽于人心虽三代盛时曷以加焉章宣二宗尝亲民事当宁裁决期于平允庶乎克绍祖风矣夫任法不若任人岂独用刑为然顾人不易得不若详立法制使可遵守之为愈也观其一代条制律义屡经更定可为详矣惜末季弗能尽守其法以致于敝坏岂前人立法之过哉

钦定续通志卷一百四十六

●钦定续通志卷一百四十七 刑法略四

刑法畧 【四】

历代刑制 【元】

○历代刑制四

元

△元

元五刑之目凡七下至五十七谓之笞刑凡五等六十七至一百七谓之杖刑凡五等其徒法自一年至三年凡五等杖数与年数相附丽

为加减盐徒盗贼既决而又镣之流则南人迁于辽阳迤北之地北人迁于南方湖广之

乡死刑则有斩而无绞恶逆之极者又有凌迟处死之法焉元初未有法守百官断理循用金律太祖初颁条画刑狱惟重罪处死其余杂犯量情笞决太宗六年五月大会诸王百僚谕条令凡当会不赴而私宴者斩诸出入宫禁各有从者男女止以十人为朋出入毋得相杂军中凡十人置甲长听其指挥专擅者论罪其甲长以事来宫中即置杖摄一人甲外一人二人不得擅自往来违者罪之诸公事非当言而言者拳其耳再犯笞三犯杖四犯论死诸千户越万户前行者以木铍射之百户甲长诸军有犯罪同不遵此法者斥罢凡来会用善马五十匹为一羈守者五人饲羸马三人守克呼苏鲁克三人但盗马一二者即论死诸人马不应绊于克呼苏鲁克内者辄没与畜虎豹人诸妇人制积苏燕服不如法者及妒者乘以驺牛狗部中论罪即聚财为更娶世祖中统二年九月谕诸王驸马凡民间词讼毋得私自断决皆听朝廷处置四年二月诏诸路私造军器者处死凡民间所有不输官者与私造同至元二年五月诏军中犯法不得擅自诛戮罪轻断遣重者奏闻六月敕行院及诸军将校卒伍须正身应役违者罪之四年始禁僧官侵理民讼五年三月禁民间兵器犯者验多寡定罪十二月诏谕四川行省沿边屯戍军士逃役者处死禁市毒药如附子乌头巴豆砒霜之类及不通医理妄行针灸或与妇人堕胎戕害人命者加等治罪【按毒药之禁刑志及纪传皆不载今据元典章增入】八年二月敕凡讼而自匿及诬告人罪者以其罪罪之是岁始禁行金泰和律十年五月诏主守失陷官钱者杖而释之十月谕安图及巴延等曰近史天泽姚枢纂定新格朕已亲览皆可行之典也汝等亦当留心参考岂无一二可增减者各令纪录促议行之置宗正府扎尔固齐十员掌诸王驸马投下蒙古色目人所犯一切公事及汉人奸盗等罪十一年诏凡盗皆杀无赦寻敕革之十二年二月禁民间赌博犯者流之十一月中书省臣议断死罪诏今后杀人者死罪状已白即行刑其奴婢杀主者具五刑论又枢密院言新附郡县有既降复叛及纠众为盗犯罪至死者既已款伏乞听权宜处决从之十四年五月申严大都酒禁犯者籍其家赀散之贫民十五年正月禁官吏军民卖所娶江南良家子女及为娼者卖买者两罪之官没其直人复为良敕官吏隐匿及擅易马匹私配妇人者没其家又诏军官不能抚治军士及役扰致逃亡者没其家赀之半五月定诸职官犯罪处置法受宣者闻奏受敕者从行台处之受省札者按察司治之其宣慰司官吏应有死罪有司勘问明白提刑按察司覆审无冤依例结案类奏待命十月又敕御史台凡军官私役军士者视数多寡定其罪十六年三月敕中书

省凡掾吏文移稽缓一日二日者杖三日者死八月诏
汉军出征逃者罪死没其家十一月敕诸路所捕盗初犯赃多者死再犯赃少者从轻罪
论十七年十一月诏有罪配役者量其程远近 【按
世祖本纪至元二十四年扎尔固齐奏去岁所录囚数南京济南两路应死者一百九十
人若总校诸路为数必多宜留扎尔固齐数人分道行
刑帝曰囚非羣羊岂可遽杀耶宜悉配隶淘金据此则配役之法亦不一辙也】 十二月
敕擅据江南逃亡民田者有罪十九年九月始定官吏
受贿及仓库官侵盗台察官知而不纠者验其轻重罪之凡中外官吏赃罪自五十贯以
上皆杖决除名不叙百贯以上者处死言官緘默与受
赃者一体论罪十一月耶律铸言前奉诏杀人者死仍征烧埋银五十两后止征钞二锭
其事太轻臣等议依蒙古人例犯者没一女入仇家无
女者征钞四锭从之中书省臣言天下重囚除谋反大逆杀祖父母父母妻杀夫奴杀主
并正典刑外余犯死罪者令充日本占城缅甸军从之
定势家为商贾阻遏官民船者没其家二十年正月敕自今敢以匿名书告事重者处死
轻者流远方能发其事者给犯人妻子仍以钞赏之又
敕自今管民官凡有灾伤过时不申及按察司不即行视者皆罪之四月申严酒禁有私
造者财产女子没官犯人配役五月诏云南重囚先令
便宜处决恐滥及无辜自今凡大辟罪仍须待报九月浙西道宣慰使史弼陈弭盗之策
为首及同谋者死余屯田淮上帝然其言诏以其事付
弼贼党耕种内地其妻奴送京师以给鹰坊人等二十一年五月括天下私藏天文图讖
太乙雷公式七曜历推背图苗太监历有私习及收匿
者罪之二十三年诏百官集议至元钞计赃论罪时议欲计至元钞二百贯赃满者死赵
孟俯曰始造钞时以银为本虚实相权今二十余年间
轻重相去至数十倍故改中统为至元又二十年后至元必复如中统使民计钞抵法疑
于太重古者以米绢民生所需谓之二实银钱与二物
相权谓之二虚四者为直虽升降有时终不大相远也以绢计赃最为适中况钞乃宋时
所创施于边郡金人袭而用之皆出于不得已乃欲以
此断人命似不足深取也四月中书省臣言比奉旨凡为盗者毋释今窃钞数贯及佩
刀微物与童幼窃物者悉令配役臣窃议一犯者杖释
再犯者依法配役为宜二十四年御史中丞叶李奏宪臣以绳愆纠缪为职苟不自检于
击搏何有其有贪恠败度之人宜付法司增条科罪以
惩欺罔制曰可二十六年十月禁内外百官受人馈酒食者没其家贖之半二十八年五
月颁行至元新格其书所载有名例四条卫禁八条职
制三百七条祭令五条学规十三条军律十二条户婚七十一条食货三十六条大恶五

十条奸非五十八条盗贼一百四十条诈伪五十一条
诉讼二十一条鬪殴四十二条杀伤一百六条禁令一百十条杂犯十四条捕亡九条恤
刑十五条平反四条狱具枷长五尺以上六尺以下阔
一尺四寸以上一尺六寸以下死罪重二十五斤徒流二十斤杖罪一十五斤皆以干木
为之长关轻重各刻志其上手纽长一尺六寸以上二
尺以下横三寸厚一寸脚镣长八尺以上一丈二尺以下连环重三斤笞大头径三分七
厘小头径一分七厘罪五十七以下用之杖大头径三
分二厘小头径一分七厘罪六十七以上用之讯杖大头径四分五厘小头径三分五厘
长三尺五寸并刊削节目无令筋胶诸物装钉应决者
并用小头其决笞及杖者臀受拷讯者臀若股分受务令均停七月敕江南重囚依旧制
闻奏处决十月诏严益都般阳泰安宁海东平济宁畋
猎之禁犯者没其家货之半二十九年二月除问刑官鞭背法三月制赃罚十三等枉法
者五自一贯至十贯笞四十七不满贯者量情断罪除
名一十贯以上至二十贯笞五十七二十贯以上至五十贯杖七十七一百贯以上杖一
百七不枉法者八自一贯至二十贯笞四十七不满贯
者量情断罪解任别行求仕二十贯以上至五十贯笞五十七注边远一任五十贯以上
至一百贯杖六十七降一等一百贯以上至一百五十
贯杖七十七降二等一百五十贯以上至二百贯杖八十七降三等二百贯以上至三百
贯杖九十七降四等三百贯以上杖一百七除名罪入
死者以闻三十年二月禁戢军官无纵禽扰民违者论罪成宗即位师京犯赃罪者三百
人帝命事无疑者准世祖所定十三等例决之元贞元
年二月诏贷鄂托克钱而逃隐者罪之仍以其钱赏首告者七月立擒盗格又诏职官坐
赃论罪再犯者加二等仓库官吏盗所守钱粮一贯以
下决五十七至十贯杖六十七每二十贯加一等一百二十贯徒一年每三十贯加半年
二百四十贯徒三年满三百贯者死计赃以至元钞为
则诸物以当时价估折计之二年正月诏诸王公主驸马非奉旨毋罪官吏五月诏诸徒
役者限一年释之毋杖六月御史台臣言官吏受贿初
既辞伏继以审核而有司徇情致令异辞者乞加等论罪从之又降官吏受赇条格凡十
有三等八月定告捕盗例强盗一名赏钞五十贯窃盗
半之应捕者又半之皆征诸犯人无可征者官给十月诏职官坐赃经断再犯者加本罪
三等诏禁军将擅易侍卫军蒙古军以家奴代役者罪
之仍令其奴别入兵籍以其主货产之半畀之军将敢有纵之者罢其职大德元年五月
诏强盗奸伤事主者首从悉诛不伤事主止诛为首者
从者刺配再犯亦诛六月诏僧道犯奸盗重罪者听有司鞫问其军民相讼者令军民官

同听之二年七月诏诸王驸马及诸近侍自今奏事不经中书辄传旨付外者罪之又诏禁辉和尔僧阴阳巫覡道人咒师自今有大祠祷必请而行远者罪之三年命何荣祖更定法令【初成宗之即位也翰林学士王暉上书请将累朝圣训与中统迄今条格通行议拟参而用之与百姓更始帝曰善至是始命修之】四年正月申严京师恶少不法之禁犯者黥刺杖七十拘役五年正月御史台臣言官吏犯赃及盗官钱事觉避罪逃者宜同狱成虽经原免亦加降黜庶好伪可革从之二月诏凡军士杀人奸盗者令军民官同鞫七月又诏军官受赃者与民官同例量罪大小殿黜十二月又定强窃盗条格凡盗人孳畜者取一偿九然后杖之六月正月诏千户百户等军中先事而逃者罪死败而后逃者杖而罢之没入其男女又诏自今僧官僧人等犯罪御史与内外宣政院同鞫宣政院官徇情不公者听御史台治之十二月更定畧卖良人罪例七年正月定诸改补钞罪例为首者杖一百有七从者减二等再犯从者杖与首同为首者流三月定大都南北兵马司奸盗等罪答罪付本路杖罪付伊克扎尔固齐更定赃罪为十二章又定货卖莹地罪凡子孙或因贫困或听师巫邪说诬诱擅发祖父坟墓移弃尸骸货卖莹地者与逆恶同罪【按此条志及纪传皆缺今据元典章增入】五月禁诸王驸马毋辄杖州县官吏违者罪王府官十一月命依十二章断僧官罪八年二月敕军人奸盗诈伪悉归有司三月诏军官擅离所部者悉遣还翼违者论如律军人不告所部私归者杖而遣之敕军民逃奴有获者即付其主主在他所赴所在官司给之仍追逃奴钞充获者赏逃及诱匿者论罪有差十一月诏内郡江南人凡为盗黥三次者谪戍辽阳诸色人及高丽人三次免黥谪戍湖广盗禁籋马者初犯谪戍再犯者死十年四月诏凡匿鹰犬者没家货之半答三十大德间王约上言国朝之制笞杖十减为七今之杖一百者宜止九十七不当又加十也武宗即位中书省言刑法者譬之权衡不可偏重世祖已有定制自元贞以来以作佛事之故放释有罪失于太宽故有司无所遵守今请凡内外犯法之人悉归有司依法裁决又奏律令重事未可轻议请自世祖即位以来所行条格校讎归一遵而行之制可又用御史大夫塔斯布哈言凡受赃为御史所劾者不得托言事入覲以避其罪至大元年正月中书省臣言近盗贼充斥苟不严治将至滋蔓宜遣使巡行遇有罪囚即行决遣与随处官吏共议弭盗方畧明示赏罚或匿盗不闻或典会不至或踰期不获者官吏连坐二年八月尚书省臣言往者大辟狱具尚书省议定令中书裁酌以闻宜依旧制从之九月尚书省言国家地广民众古所未有

累朝格例前后不一执法之吏轻重任意请自太祖以来所行政令九千余条删除繁冗使归于一编为定制从之十月三宝努言养豹者害民为甚帝禁之有复犯者虽贵幸亦加罪三年十月敕省部官晨集暮退怠弛者罪之仁宗即位谕省臣曰卿等哀集中统至元以来条章择晓法律老臣斟酌轻重折中归一颁行天下俾有司遵行则抵罪者庶无冤抑于是以格例条画有关风纪者类集成书号曰风宪宏纲始罢诸王断事官其蒙古犯盗诈者命所隶千户鞫问汉人刑名俱归刑部诏罢总统所及各处僧录等司凡僧人诉讼悉归有司敕商税官盗税课者同职官赃罪又诏谕省臣曰朕前戒近侍毋辄以文记传旨中书自今敢有犯者不须奏闻直捕其人付刑部究治皇庆元年正月敕诸僧犯奸盗诈伪鬪讼仍令有司专治之二年六月诏谕僧俗辩讼有司与主僧同问延佑元年三月敕奸民宫其子为阉宦谋避徭役者罪之三年六月敕大辟罪临刑敢有横加刳割者以重罪论凡鞫囚非强盗毋加酷刑四年十一月谕诸宿卫入直各居其次非有旨不得上殿敢有阑入禁中者坐罪五年十一月禁冒籍贯宿卫及巧受远方职官不赴任求别调者隐匿不自首者罪之六年九月用御史台臣言诸犯赃罪已款伏及当鞫而幸免者悉付原问官以竟其罪七年英宗即位禁宗戚权贵作奸犯科六月定边地盗孳畜罪犯者给各部力役如不悛断罪如内地法至治二年三月禁捕天鹅犯者籍其家时漳州路推官上言律徒者不杖今杖而又徒非恤刑之意宜加徒减杖遂定为令五月敕匿蒙古子女者罪之三年正月禁故杀子孙诬平民者四川行省平章赵世延为其弟讼不法事系狱待对其弟逃去诏出之仍着为令逃者百日不出则释待对者二月命宰执儒臣取至元新格及风宪宏纲而损益焉定为格例凡二千五百三十九条内断例七百一十七条格千一百五十一诏制九十四令类五百七十七名曰大元通制颁行天下 【按刑志脱令类五百七十七一条与二千五百三十九条总数不合今据本纪增入】 泰定帝即位诏凡有罪自首者原其罪泰定元年八月敕以刑狱复隶宗正府依世祖旧制刑部勿与置扎尔固齐四十二员理之又敕武官坐罪制授者以闻敕授者从行省处决二年八月敕诸部曲宿卫私入京者罪之九月禁饥民结扁担社伤人者杖一百着为令十二月京师多盗达实特穆尔请处决重囚增调逻卒仍立捕盗赏格从之申禁图讖私藏不献者罪之四年九月禁僧道买民田违者坐罪没其直文宗天历元年敕军中逃归及京城游民敢攘民财者斩十月中书省臣言凡有罪者既籍其家贖请勿没其妻子制可二年正月省臣又言近籍没奇彻家其子年

十六请令与其母同居仍请继今臣僚有罪致籍没者其妻其子他人不得陈乞亦不得没为官口从之二月诏诸佣雇者主家或犯恶逆及侵损己身许诉官余非干己不许告讦着为令六月陕西行台御史孔思迪言人伦之中夫妇为重比见内外大臣得罪就刑者其妻妾即断付他人似与朝廷旌表贞节之旨不侔夫亡终制之令相反况以失节之妇配有功之人又与前贤所谓取失节者以配身是已失节之意不同今后凡负国之人籍没奴婢财产不必罪其妻子当典刑者则孥戮之不必断付他人使妇人均得守节请着为令从之八月敕自今有以朝贺敛钞者依枉法论罪十月敕刑部察民之无赖者惩治之至顺元年八月中书省枢密院御史台奉旨裁省卫士奏自裁之后各宿卫有容匿汉人南人高丽及奴隶滥充者集赛官与其长杖五十七犯者与典给散者皆杖七十七没家货之半以籍入之半为告者赏仍令监察御史察之制可九月敕诸人非其本俗敢有弟收其嫂子收庶母者坐罪十月御史台臣言内外官吏令家人受财以其干名犯义罪止四十七解任今贪污者缘此犯法愈多请依十二章计赃多寡论罪从之二年六月诏诸官吏在职役或守代未任为人行赍关说即有所取者官如十二章论赃吏罢不叙终其身虽无所取讼起灭由已者罪加常人一等十二月河南河北道廉访副使僧嘉努言自古求忠臣必于孝子之门今官于朝者十年不省觐者有之非无思亲之心实由朝廷无给假省亲之制而有擅离官次之禁古律诸职官父母在三百里于三年听一给定省假二十日无父母者五年听一给拜墓假十日以此推之父母在三百里以至万里宜计道里远近定立假期其应省觐匿而不省觐者坐以罪若诈冒假期规避以掩其罪与诈奔丧者同科御史台臣以闻命中书省等议之宣宗即位定妇人犯私盐罪【先是英宗时王克敬为两淮盐运使温州逮犯盐者以一妇人至怒曰岂有逮妇人千百里外与吏卒杂处者污教甚矣自今毋得带妇人建议着为令至是始定妇人犯私盐罪】顺帝元统二年三月诏蒙古色目人犯奸盗诈伪之罪者隶宗正府汉人南人犯者属有司七月诏蒙古色目人犯盗者免刺至元二年六月中书省员外郎陈思谦言强盗但伤事主者皆得死罪而故杀从而加功之人与鬪而杀人者例杖一百七下得不死与私宰牛马之罪无异是视人与牛马等也法应加重因奸杀夫所奸妻妾同罪律有明文今止坐所犯似失推明遂令法曹议者为定制八月诏凡强盗皆死盗牛马着劓盗驴骡者黥额再犯劓盗羊豕者墨项再犯黥三犯劓劓后再犯者死盗诸物者照其数估价省院台五府官三年一次审决着为令三年七月又诏

除人命重事之外凡盗贼诸罪不须俟五府官审录有司依例决之四年三月命中书平章政事阿齐拉监修大元通制【按监修大元通制顺帝纪作监修至正条格考此时乃至元四年尚未改元至正何得以至正名书史取后日始定之名冠先时方修之稿殊误今改正】六年七月又命翰林学士承旨达哈奎章阁学士库库等删修大元通制九月又诏今后有罪者毋籍其妻女以配人至正三年三月诏作新风宪内官不法者监察御史劾之外官有不法行台监察御史劾之岁以八月终出巡次年四月中还司五年十一月库库等所修书成名曰至正条格六年四月颁行天下

（臣）等谨按元史刑志第撮录至元新格条例而于历朝因革不具载今谨采拾元史纪传参以元典章次其前后勒为一卷以为一代之刑制焉考元制刑罚惟尚轻典其立意未始不厚然末流以是滋弊史称其得在仁厚其失在弛缓而不知检信夫君临天下者建极驭民当以无党无偏大公至正昭示海宇岂可以一毫私意存乎其间若其于蒙古毆汉人不得施报毆西僧者截其手詈者断其舌而蒙古人犯法概勿许拷掠收禁此岂足以服輿情垂后世而为明法敕罚者训乎信如斯也又盗止失在弛缓而已哉

钦定续通志卷一百四十七

●钦定续通志卷一百四十八 刑法略五

刑法略【五】

历代刑制【明上】

历代刑制五

○历代刑制五

明上

△明上

明之刑制理刑之官内则有三法司曰刑部曰都察院曰大理寺刑部受天下刑名都察院司纠察大理寺主驳正刑部有十三清吏司治各布政司刑名而陵卫王府公侯伯府在京诸曹及两京州郡亦分隶之按察名提刑盖在外之法司也参以副使僉事分治各府县事凡词诉必自下而上有事重而迫者许击登闻鼓四方有大狱则受命往鞫之凡决狱岁疏其名数以闻曰岁报月上其拘释存亡之数曰月报狱成移大理寺覆审必期平允凡提牢月更主事一人修葺圜圉严固扃钥省其酷滥给其衣粮囚病许家人入视脱械锁医药之簿录俘囚配没官私

奴婢咸籍知之官吏有过并纪录之岁终请湔涤之以名例摄科条以八字括辞议【以
准皆各其及即若】以五服参情法以墨涅识盗贼
籍产不入莹墓籍财不入支度宗人不即市宫人不即狱悼耄疲癯不即讯凡死刑即决
及秋后决并三覆奏两京十三布政司死罪囚岁讫平
之五岁遣官审录冤滞霜降录重囚会五府九卿科道官共录之矜疑者戍边有词者调
所司再问比律者监候夏月热审免笞刑减徒流出轻
系遇岁旱特旨录囚亦如之凡赎法有二有律得收赎者有例得纳赎者律赎无取损益
而纳赎之例则因时权宜先后互异其法初尝纳铜又
尝纳马后皆不行惟纳钞纳钱纳银尝并行焉而以初制纳钞为本故律赎者曰收赎律
钞纳赎者曰赎罪例钞凡狱囚已审录应决断者限三
日应起发者限十日逾限计日以笞囚淹滞至死者罪徒停刑之月自立春以后至春分
以前停刑之日初一初八十四五十八二十三二十
四二十八二十九三十凡十日检验尸伤照磨司取部印尸图一幅委五城兵马司如法
检验府则通判推官州县则长官亲检毋得委下僚其
法之不衷古制者有廷杖有锦衣卫镇抚司有东西厂廷杖始于太祖然非定制后世因
之不废锦衣卫者世所称诏狱也凡天下重罪逮京师
者收系其中其全刑有械有镣有棍有拶有夹棍五毒备具镇抚司职理狱讼初置一司
与外卫等后添设北司而以军匠诸职掌属之南镇抚
司于是北司专理诏狱东厂者立于东安门北令中官提督之缉访谋逆妖言大奸恶等
与锦衣卫均权势后又别设西厂所领缇骑倍东厂势
远出卫上初太祖以唐宋皆有成律断狱惟元不仿古制取一时所行之事为条格胥吏
易为奸币吴元年十月命左丞相李善长参知政事杨
宪傅瓛御史中丞刘基翰林学士陶安等二十人详定律令每御西楼召诸议律官及儒
臣赐坐讲论以求至当十二月书成凡为令一百四十
五条吏令二十户令二十四礼令七十兵令十一刑令七十一工令二律则准唐之旧而
增损之计二百八十五条吏律十八户律六十三礼律
十四兵律三十二刑律一百五十工律八命有司刊布中外又恐小民不能周知命大理
卿周桢等作律令直解颁行郡县使家喻户晓焉洪武
元年诏曰顷因戡乱以军律行刑未为平允中书省宜重讲究务从中典决重囚须待秋
后毋非时以伤生又谕省臣鞫狱当平恕古者非大逆
不道罪止及身民有犯者毋得连坐尚书夏恕常引汉法请着律反者夷三族太祖曰古
者父子兄弟罪不相及汉仍秦旧法太重却其奏不行
又令自反叛外其余罪犯止没田产孳畜十二月置登闻鼓于午门外一御史日监之非
大冤及机密重情不得击击即引奏后移置长安门外

六科锦衣卫轮收以闻旨下校尉领驾帖送所司问理蒙蔽阻遏者罪之三年六月诏自今武官有犯非奏请不得逮问四年十一月命自今官吏犯赃者罪无贷五年二月命有司于内外府州县及乡之里社皆建申明亭凡境内人民有犯者书其过名榜于亭上使人有所惩戒六月定宦官禁令凡内使于宫城内相骂詈者先发理屈笞五十后发理直者不坐其不服本管铃束而诋骂者杖六十内使骂奉御者杖六十骂门官监官者杖七十内使于宫城内相鬪殴者先鬪理屈杖七十殴伤者加一等后应理直而无伤者笞五十其有不服本管铃束而殴之者杖八十殴伤者加一等殴奉御者杖八十殴门官监官者杖一百伤者各加一等其内使有心怀恶逆出不道之言者凌迟处死有知情而蔽之者同罪知其事而不首者斩首者赏银三百两又虑公侯之家奴仆人等冒犯国典乃作铁榜申明禁令除亲属别议外凡奴仆一犯即用究治六年正月工部尚书王肃坐法当笞太祖曰六卿贵重不宜以细故辱命以俸赎罪【后羣臣置悞许以俸赎始此】八月更定亲属相容隐律【按更定亲属相容隐律邢志作洪武五年事实录作六年八月今从实录】闰十一月诏刑部尚书刘惟谦详定大明律其篇目一准于唐曰卫禁曰职制曰户婚曰厩库曰擅兴曰贼盗曰鬪讼曰诈伪曰杂律曰捕亡曰断狱曰名例采用旧律二百八十八条续律百二十八条旧令改律三十六条因事制律三十一条掇唐律以补遗一百二十三条合六百有六条分为三十卷其间损益务合轻重之宜每进一篇帝亲加裁定七年二月书成诏颁行之十四年二月诏武官三品以上有犯者奏请得旨乃鞫之四品以下有犯所司逮问定罪议功请旨裁决若文职有犯干涉武官三品以上者亦须奏请毋得擅问四月敕刑部自今官吏有犯宥罪复职榜示其过于门果能省身改过则除之不悛者论如律十五年三月置锦衣卫及镇抚司掌侍卫巡捕等事若有重囚下卫司推勘八月诏自今天下郡邑申明亭惟犯十恶奸盗诈伪干犯名义有伤风俗及犯贼至徒者书于亭其余杂犯公私过误非干风化者悉除之其有私毁亭舍除所悬法令及涂抹姓名者监察御史按察司官以时按视罪如律十月敕刑部申明越诉之律凡军民诉户婚田土作奸犯科诸事悉由本属官司自下而上陈告毋得越诉辄赴京师亦不许家居上封事违者罪之又诏自今有以繁文出入人罪者罪之仍命刑科会诸司官定义成式榜示中外十六年命刑部尚书开济等定诈伪律条及五六日旬时三审五覆之法又敕天下州县官凡民有犯笞杖罪者县自断决具实以闻犯徒流罪者县拟其罪申州若府以达布政司定拟其有犯死罪

者县拟其罪申州若府以达布政司刑部定拟或准工赎罪或奏闻遣官审决凡诸司讼狱当详审按律决遣毋得淹禁【按明初有司决狱
笞五十者县决之杖八十者州决之一百者府决之其徒罪以上具狱送行省由是或州县受赇或省府弄法出入轻重文移驳议动多淹滞洪
武九年乃命中书省御史台详议革月报为季报以季报之数类为岁报凡府州县狱囚依律断决毋须转发其有违枉者御史台按察司纠劾
之然罪无轻重州县皆得专决一时虽便久必滋弊殊非慎刑之意至是因有此命】十七年十月定土官犯罪律凡土官选用者有犯依流官
律定罪世袭者所司不许擅问先以千证之人推得其实定义奏闻杖以下则纪录在职徒流则徙之北平着为令闰十月诏天下罪囚刑部都
察院详议大理寺覆讞奏决又建三法司于太平门外钟山之阴命之曰贯城十八年命刑部录内外诸司职官犯法罪状明白者揭于申明亭
以示惩戒十月颁大诰于天下上惠民徇元习狗私灭公乃辑官民过犯条为大诰其目有十曰揽纳户曰安保过付曰诡寄田粮曰民人经该
不解物曰洒派抛荒田土曰倚法为奸曰空引偷军曰黥刺在逃曰官吏长解卖囚曰寰中士夫不为君用其罪至抄札次年复为续编三编皆
颁学宫以课士里置塾师教之囚有藏大诰者罪减等二十年正月以治锦衣卫者多非法凌虐命取刑具焚之出系囚送刑部审录诏内外狱
咸归三法司詹徽言军人有犯当杖其人尝两得罪而免宜并论前罪诛之太祖曰前罪既宥复论之则不信矣杖而遣之二十一年二月命自
今有司官凡入流品以上犯罪者皆须奏闻方许逮问又诏谋逆奸党及造伪钞者没赀产丁口以农器耕牛给还之凡应合钞札者曰奸党曰
谋反大逆曰奸党恶曰造伪钞曰杀一家三人曰采生拆割人为首其大诰所定十条后未尝用也复讎惟祖父被殴条见之曰祖父母父母为
人所杀而子孙擅杀行凶人者杖六十其实时杀死者勿论其余亲属人等被人杀而擅杀之者杖一百按律罪人应死已就拘执其捕者擅杀
之罪亦止此凡决囚每岁朝审毕法司以死罪诸旨刑科三覆奏得旨行刑在外者奏决单于冬至前会审决之二十二年八月命翰林院同刑
部官更定大明律【按更定大明律刑志及本纪俱作洪武二十二年事作艺文志作二十八年考王圻续通考亦系其事于三十年五月彼
此互异按刑志云太祖之于律令也草创于吴元年更定于洪武六年整齐于二十二年至三十年始颁行天下然则续通考所载乃颁行之日
艺文志所载或成书之年耳今并识于此】取比年所增者以类附入改名例律冠于篇首凡三十卷为条四百有六十名例一卷四十七条吏

律二卷曰职制十五条曰公式十八条户律七卷曰户役十五条曰田宅十一条曰婚姻
十八条曰仓库二十四条曰课程十九条曰钱债三条
曰市廛五条礼律二卷曰祭祀六条曰仪制二十条兵律五卷曰宫卫十九条曰军政二
十条曰关津七条曰廐牧十一条曰邮驿十八条刑律
十一卷曰盗贼二十八条曰人命二十条曰鬪殴二十二条曰骂詈八条曰诉讼十二条
曰受赃十一条曰诈伪十二条曰犯奸十条曰杂犯十
一条曰捕亡八条曰断狱二十九条工律二卷曰营造九条曰河防四条又为五刑之图
二首图五曰笞曰杖曰徒曰流曰死笞刑五自一十至
五十每十为一等加減杖刑五自六十至一百每十为一等加減徒刑五徒一年杖六十
一年半杖七十二杖八十二年杖九十三杖一
百每杖十及徒半年为一等加減流刑三二千里二千五百里三千里皆杖一百每五百
里为一等加減死刑二绞斩五刑之外有总徒四年 【
遇例減一年者】 有准徒五年 【斩绞杂犯減等者】 流有安置有迁徙 【去乡一
千里杖一百准徒二年】 有口外为民徒流之外有
充军绞斩之外有凌迟皆非五刑之正故图不列次图七曰笞曰杖曰讯杖曰枷曰杻曰
索曰镣笞大头径二分七厘小头減一分杖大头径三
分二厘小头減如笞之数笞杖皆以荆条为之皆臀受讯杖大头径四分五厘小头減如
笞杖之数以荆条为之臀腿受笞杖讯皆长三尺五寸
用官降式较勘毋以筋胶诸物装钉枷自十五斤至二十五斤止刻其上为长短轻重之
数长五尺五寸头广尺五寸杻长尺六寸厚一寸男子
死罪者用之索铁为之以系轻罪者其长一丈镣铁连环之以繫足徒者带以输作重三
斤又为丧服之图凡八族亲有犯视服等差定刑之轻
重其因礼以起义者养母继母慈母皆服三年毆杀之与毆杀嫡母同罪兄弟妻皆服小
功互为容隐者罪得遞減舅姑之服皆斬衰三年毆杀
骂詈之者与夫毆杀骂詈之罪同姨之子舅之子姑之子皆緦麻是曰表兄弟不得相为
婚姻大恶十曰谋反曰谋大逆曰谋叛曰恶逆曰不道
曰大不敬曰不孝曰不睦曰不义曰内乱虽常赦不原贪墨之赃六曰监守盜曰常人盜
曰窃盜曰枉法曰不枉法曰坐赃当议者八曰议亲曰
议故曰议功曰议贤曰议能曰议勤曰议贵曰议宾其惻隐之意散见于各条者如罪应
加者必赃满数乃坐 【如监守自盜赃至四十贯绞
若止三十九贯九十九文欠一文不坐也】 加极于流三千里以次增重终不得至死而
減至流者自死而之生无绞斩之别 【即唐律称加
就重条】 称日者以百刻称年者以三百六十日 【如人命辜限各文书违限难稍不
及一时刻仍不得以所限之年月科罪即唐例称日以

百刻条】 未老疾犯罪而事发于老疾以老疾论幼小犯罪而事发于长大以幼小论
【即唐律老小废疾条】 犯死罪非常赦所不原而
祖父母父母老无养者得奏闻取上裁犯徒流者余罪得收赎存留养亲 【即唐律罪非
十恶条】 功臣及五品以上官禁狱者许令亲人入
侍徒流者并听随行违者罪杖同居亲属有罪得互相容隐 【即唐律同居兼容隐条】
奴婢不得首主凡告人者告人祖父不得指其子孙
为证弟不证兄妻不证夫奴仆不证主文职责在奉法犯杖则不叙军官至流徒以世功
犹得擢用凡若此类或间采唐律或更定新制书成太
祖以谕太孙太孙请更定五条以上太祖览而善之又请凡与五伦相涉者宜皆屈法以
伸情乃命改定七十三条二十三年十二月谕刑部尚
书杨靖自今惟犯十恶并杀人者论死余死罪皆令输粟北边以自赎二十四年禁罪人
诬引善良二十六年定制布政司及直隶府州县笞杖
就决徒流迁徙充军杂犯死罪解部审录行下具死囚所坐罪名上部详议如律者大理
寺拟覆平允监收候决其决不待时重囚报可即奏遣
官往决之情词不明或失出入者大理寺驳回改正再问驳至三改拟不当将该官吏
奏闻谓之照驳若停拟谳决而囚有番异则改调隔别
衙门问拟二次番异不服则具奏会九卿鞫之谓之圆审至三四讯不服而后请旨决焉
又制应允军者大理寺审讫开付陕西司本部置立文
簿注姓名年籍乡贯依南北籍编排甲为二册一进内府一付该管百户领去充军如浙
江河南山东陕西山西北平福建直隶应天庐州凤阳
淮安扬州苏州松江常州和州滁州徐州人发云南四川属卫江西湖广四川广东广西
直隶太平宁国池州徽州广德安庆人发北平大宁辽
东属卫有逃故按籍勾补其后条例有发烟瘴地面极边沿海诸处者例各不同而军有
终身有永远者罚及子孙皆以实犯死罪减等者充之
二十八年九月颁皇明祖训禁用黥刺劓刖阉割之刑臣下敢以请者置重典 【按本纪
禁用黥刺劓刖之刑作六月事颁皇明祖训作九月
事考祖训首篇具载禁用黥刺条似不应分隶从志为优】 三十年命部院定赎罪事例
凡内外官吏犯笞杖者记过徒流迁徙者俸赎之三犯
罪之如律五月作大明律造成上以法在有司民不周知因命刑官取大诰条目撮其要
畧附载于律凡榜文禁例悉除之除谋逆及律诰该载
外其杂犯大小之罪悉依赎罪例论断又定会官审录之例初制有大狱必面讯十四年
命法司论囚拟律以奏从翰林院给事中及春坊正字
司直郎会议平允然后覆奏论决至是置政平讼理二藩审论罪囚谕刑部自今论囚惟
武官死罪亲审之余俱以所犯奏然后引至承天门外

命行人持讼理旛传旨谕之其无罪应释者持政平旛宣德意遣之继令五军都督府六部都察院六科通政司詹事府闻及驸马杂听之录冤者以状闻无冤实犯死罪以下悉论如律惠帝建文三年十二月诏中官奉使侵暴吏民者所在有司系治成祖即位诏法司问囚一依大明律拟议毋妄引榜文条例为深文又定功臣死罪减禄格永乐元年二月命法司五日一引奏罪囚凡死囚百人以上者差御史审决又定诬告法凡诬告三四人者杖一百徒三年五六人者杖一百流三千里所诬重者从重论诬告十人以上者凌迟处死梟首其乡家属迁化外三年三月定制文职官及中外旗校军民人等凡犯重条依律科断轻者免决记罪其有不应侵损于人等项及情犯重者临时奏请四年十一月法司进月系囚数凡数百人大辟仅什之一上谕吕震曰此等既非死罪而久系不决天气沍寒必有听其冤死者凡杂犯死罪以下约二百悉准赎发遣八年七月申弃子不育禁有犯者两邻并罪之九年九月谕法司凡死罪必五覆奏十一月刑科曹润等言以天寒审释轻囚今囚或淹一年以上且一月间瘐死者九百三十余人乃诏徒流以下三日内决放重罪当系者恤之无令死于饥寒十一年正月谕通政司礼科给事中凡朝覲官境内灾伤不以闻为他人所奏者罪之又令除公罪依律纪录收赎及死罪情重者依律处治其情轻者斩罪八千贯绞罪及榜例死罪六千贯徒流杖笞纳钞有差无力者发天寿山种树十月遣副都御史李庆斋玺书命皇太子录南京囚赎杂犯死罪以下十二年七月诏六师入关有践田禾取民畜产者以军法论十六年十月下令京师凡盗马者斩十二月严官吏犯赃之禁十七年十二月令自今在外诸司死罪重囚悉送京师审录三覆奏然后行刑十八年二月谕甘肃总兵官陕西行都司所属军士有犯笞杖徒流迁徙罪者就发本地极边处瞭守烟墩其为事官以下犯死罪者送京师是年始设东厂命中官刺事仁宗即位敕自今官司所用物料于所产地计直市之科派病民者罪不赦十月命三法司会大学士府部通政六科于承天门录囚着为令十一月诏有司凡被灾不即请赈者罪之立赦条三十五尽除永乐年间弊政凡先朝不便于民者皆援遗诏或登极诏革除之凡以赦前罪告言人罪者即坐以所告者罪洪熙元年三月诏自今论囚悉依律拟罪或有朕过于嫉恶法外用刑者法司执奏五奏不允同三公大臣执奏必允乃已文武诸司亦毋得暴酷用鞭背等刑及擅用宫刑绝人嗣续有自宫者以不孝论除谋反及大逆者余犯止坐本身毋一切用连坐法告讟谤者勿治 【按仁宗此旨命学士杨士奇等以诏书行之永为定制似亦知慎刑

之道伏读通鉴辑览 御批法令之当否详慎至于再三斯已可矣必令法司往复五
奏徒滋烦冗且详求庶狱轻重本无遁情即介于微暖
疑似之间或覆勘以得其平或集款以衷于是自不至犹有枉纵如必待臣下执奏乃允
则明慎之谓何而权势下移又开其渐云云仰见鉴空
衡平得钦恤之要领若仁宗者则未知敕法之本矣】 宣宗宣德元年五月定贵州土人
断罪例杂犯死罪就彼役作终身徒流迁徙者依年限
役之应笞者役五月应杖者役十月毕日释放二年定笞杖罪囚每十赎钞二十贯徒流
罪名每徒一等折杖二十三流并折杖百四十其所罚
钞悉如笞杖所定无力者发天寿山种树死罪终身徒流各按年限杖五百株笞一百株
又令多官覆阅重囚毋致枉死江西按察司黄翰言民
间无赖之徒好兴词讼辄令老幼残疾诬告平人必更议涉虚加罚乃可因定老幼残疾
男妇罚钞赎罪例三年八月令犯奸妇女照例用刑四
年二月谕三法司凡犯不孝及烝父妾收兄弟之妻为妻一切败伦伤化者在外有司毋
擅断决悉送京师如律讯治若武官及其子弟有犯此
者不许复职承袭永为定制六月罢文职犯赃赎罪例十月以天气沍寒敕南北刑官悉
录系囚以闻不分轻重五年五月命追夺赃吏诰敕着
为令闰月敕内外诸司久淹狱囚者罪之六年十一月分遣御史往逮贪暴中官袁琦等
十一人寻命弃市榜其罪示天下七年二月亲阅法司
所进系囚罪状决遣千余人减等输纳春审自此始六月又以炎暑命自实犯死罪外悉
早发遣且驰谕中外刑狱悉如之八年三月谕内外优
恤军士违者风宪官察奏罪之九月遣官录天下重囚

钦定续通志卷一百四十八

●钦定续通志卷一百四十九

刑法畧 【六】

历代刑制 【明下】

○历代刑制六

明下

△明下

英宗正统元年正月命自今各处奸徒以妇女残疾老幼诬告平民者追坐壮丁又
令重囚三覆奏毕仍请驾帖付锦衣卫监刑官领校尉
诣法司取囚赴市临决时囚有诉冤者直登闻鼓给事中取状封进仍批校尉手驰赴市
曹暂停刑二年九月令盗贼株连者勿捕三年三月令
妇女非犯奸恶杀人及毁骂舅姑不孝等罪并毋提问四年八月敕令后法司论狱有妄
援重律者以变乱成法罪之又定直省决遣之制徒流

就彼决遣死罪以闻五年行在三法司言洪武定律时钞贵物贱所以枉法赃至百二十贯者免绞充军今钞贱物贵若以物估钞至百二十贯枉法赃俱发充军则轻重失伦今后文职官吏人等受枉法赃比律该绞者估钞八百贯以上俱发北方边卫充军其受赃不及前数者视见行例发落从之六年正月命六品以下官有犯听分巡御史按察司并分司取问四月以灾异频见敕遣三法司官详审天下疑狱时评事马豫言臣奉敕审刑窃见各处捉获强盗多因讎人指攀拷掠成狱不待详报死伤甚多今后宜勿听妄指果有赃证御史按察司会审方许论决若未审录有伤死者毋得准例升赏诏从之八年七月定窃盗已刺遇赦再犯者依常例拟不论赦仍通具前后所犯以闻九年山东副使王裕言囚当会审而御史及三法司官或踰年一会囚多瘐死因命审例仍旧复如详审例选按察司官一员与巡按御史同审失出者姑勿问涉赃私者究如律十二年命民以后妻所携前夫之女为子妇及以所携前夫之子为婿者并依同父异母姊妹律减等科断景帝景泰元年令问拟笞杖罪囚有力者纳钞笞二百贯每十以二百贯递加至笞五十为千贯杖六十千八百贯每十以三百贯递加至杖百三千贯其官吏赃物亦视今例折钞五年二月大理少卿薛瑄言法司发拟罪囚多加参语奏请变乱律意刑罚失中请敕自今法司问狱一依律令不许妄加参语从之英宗天顺三年令每岁霜降后三法司同公侯伯会审重囚谓之朝审历代遂遵行之五年令罪囚纳钞每笞十钞二百贯余四笞递加百五十贯至杖六十增为千四百五十贯余杖各递加二百贯又戒法司凡锦衣卫所行事枉人者许与辩理时帝召李贤屏左右问时政得失贤因极论官校提人之害帝然其言阴察皆实又缉弋阳王事虚乃深戒之然是时指挥门达镇抚逮杲怙宠贤亦数为罗织达遣旗校四出杲又立程督并以获多为主千户黄麟之广西执御史吴祯至索狱具二百余副天下朝覲官陷罪者甚众杲死达兼治镇抚司构指挥使袁彬系讯之五毒更下仅免朝官杨璘李蕃韩祺李观包瑛张祚谏万鍾辈皆银铛就逮冤号道路者不可胜记宪宗即位敕三法司中外文武羣臣除赃罪外所犯罪名纪录在官者悉与湔涤其后岁以为常成化二年令妇人犯法赎罪四年二月命分别赌博轻重等差时获赌博者四十余人命枷项示众仍榜禁之已而犯者复三十余人有不胜苦至死者刑科给事中毛宏等奏其中情犯亦有轻重怙终之徒固不足惜愚民不知榜例一时误犯致死可悯乞敕法司分为三等从之五年南大理评事张钰言南京法司多用严刑迫囚诬服其被纠者亦止改正而无罪甚非律意乃诏

申大理寺参问刑部之制六年刑科给事中白昂言凡盗处决例于行劫所在梟首示众其在京城关厢行劫则免然鞶鞶之下情犯尤为深重亦须梟首于京城百里外冲要处示众庶令严知警部院议从之七年敕今后官司于军民词讼悉依律问拟毋许罚物十年都御史李宾言锦衣卫镇抚司累获妖书图本皆诞妄不经之言小民无知辄被幻惑乞备录其书名目榜示天下使知畏避免陷刑辟报可又当决囚冬至节近特命过节行刑既而给事中言冬至后行刑非时遂诏俟来年冬月山西巡抚何乔新劾奏迟延狱词金事尚敬刘源因言凡二司不决断词讼者半年之上悉宜奏请执问帝曰刑狱重事周书曰要囚服念五六日至于旬时特为未得其情者言耳苟得其情即宜决断无罪拘幽往往瘐死是刑官杀之也故律特着淹禁罪囚之条其即以乔新所奏通行天下又定制凡盗贼赃仗未真人命死伤未经勘验辄加重刑致死狱中者审勘有无故失明白不分军民职官俱视酷刑事例为民十三年正月置西厂令官校刺事初成祖起北平刺探宫中事多以建文左右为耳目故即位后专倚宦官立东厂于东安门北令嬖昵者提督之至是时尚铭领东厂又别设西厂刺事以汪直督之自京师及天下旁午侦事虽王府不免【伏读 御批通鉴辑览曰自永乐设立东厂寄宦官以访缉之任固已作法于凉至宪宗信任汪直复为特置西厂其势益横甚且擅行逮问易置近臣其初不过因汪直举发覃力明杀人事嘉其摘奸孰知此正若辈先为小忠小信以成其大不忠大不信之故智宪宗竟堕其术中深相倚毗自此厂卫乘时窃柄日渐恣肆以底危亡宪宗岂得辞作俑之咎圣训煌煌可为万世人君信任宦官者戒矣】十四

年增铸北司印信一切刑狱毋关白本卫即卫所行下亦径自上请可否卫使毋得与闻故镇抚职卑而其权日重又定讳盗罪例凡盗贼窃发所司隐匿一二次不报者停俸三次者戴罪俱捕盗如故若四次以上者奏请降等叙用十五年南京巡抚王恕言在京书坊刊行大明律后有会定见行律百有八条不知所起如兵律多支廩给刑律骂制使及骂本管长官条轻重失伦流传四方有误官守乞追板焚毁命即焚之有依此律出入人罪者以故论十七年命司礼太监一员会同三法司堂上官于大理寺审录谓之大审南京则命内守备行之自此定例每五年辄大审【案内官同法司录囚始于正统六年命刑部侍郎何文渊大理卿王文审行在疑狱敕同内官典安巡抚侍郎周忱刑科给事中郭瑾往南京敕亦如之时虽未定五年大审之制而南北内官得与三法司刑狱矣成化八年命司礼太监王高少监宋文毅两京会审而各省亦有

恤刑之使至是命太监怀恩同法司录囚嗣后五年一举大审之例乃定凡大审录赉敕张黄盖于大理寺为三尺坛中坐三法司左右坐御史郎中以下捧牍立唯诺趋走惟谨三法司视成案有所出入轻重俱视中官意不敢违忤伏读 御批通鉴辑览曰中涓录囚滥觞于正统陵夷已非一曰但热审朝审之制自永乐以来守而不变更何至宪宗竟尽改旧章而以会猷大典专任宦官廷臣遂无由过问纪纲倒置甚矣权势既崇法司惟视其意指则其所宽者必其通苞苴者也不然必甚流离贫贱与彼无涉者也而其所严者必其有仇隙或受属托而欲置之于死者也国法尚可问乎至九卿乃朝廷重职其于阉寺序次尊卑有关国体乃以刑余丑竖竟令其张盖倨中抑尚书以下使列坐亦竟无一人敢与抗争骇观听而褻班联更不可问 圣训昭垂可见为人君者始谋不善祸且不可胜言若英宪二宗者宁得辞作俑之咎耶】十九年十月定窃盗三犯罪法例司以南京有三犯窃盗计赃至百贯者当绞斩罪虽系杂犯其情颇重三犯前罪即累恶不悛之人难准常例其不满贯犯徒流以下罪者虽至三犯原情实轻宜依常例治之议上报可 【案定窃盗三犯罪例条实录作成化十九年事刑志隶弘治十三年误今据实录改正】 孝宗弘治元年刑部尚书何乔新言旧制提人所在官司必验精微批文与符号相合然后发遣近者中外提人止凭驾帖既不用符真伪莫辨奸人矫命何以拒之请给批文如故命复行之时有吕梁山等四人坐窃盗杀人死遇赦都御史马文升请宥死戍边帝特命依律斩之又知州刘槩坐妖言罪斩以王恕争得长系六年五月令审录错误者以失出入人论罪其受贿及任已见者以故出入人论罪闰五月太常少卿李东阳言五刑最轻者笞杖今在外诸司笞杖之罪往往致死纵令事觉不过以因公还职以极轻之刑致之不可复生之地多者数十甚者数百积骸满狱流血涂地可为伤心请凡拷讯轻罪实时致死累二十或三十人以上本律外仍议行降调或病死不实者并治其医诏从之十二年正月巡抚彭礼言各府州县预备仓粮凡遇查盘每石准开耗一升三年准三升三年之外不准开耗若亏折不及百石者从常论罪责偿其侵盗等项亏折百石以上者从重论罪帝从之十三年二月刑部上言洪武未定大明律后又申明大诰有罪减等累朝遵用其法外遗奸列圣因时推广之而有例例以辅律非以破律也乃中外巧法吏多引例以便已私而律寢格不用于是命尚书白昂等会九卿议增历年问刑条例经久可行者二百九十七条以闻帝从之十四年定赎罪折收银钱之制例难的决人犯并妇人有力者每杖百应钞二千二百五十

贯折银一两每十以二百贯递减至杖六十为银六钱笞五十应减为钞八百贯折银五钱每十以百五十贯递减至笞二十为银二钱笞十应
钞二百贯折银一钱十七年吏部尚书马文升言会审重囚坐妖书惑众者甚多与其诛于已犯不若禁于未然乞敕榜谕有收藏者许半月内
首告官司有私录厥罪惟均从之又定讦告原问官罪例先是成化间定义凡讦告原问官司者核究得实然后逮问至是南京御史王良臣按
指挥周恺等怙势黷贿恺等遂讦良臣诏下南京法司逮系会鞫侍郎杨守随言此与旧章不合请今后官吏军民奏诉牵缘别事摭拾原问官
者立按不行所奏事仍令问结虚诈者拟罪原问官枉断亦罪诏如所请十八年二月南京刑部奏决不待时者三人大理寺已审允下法司议
谓在京重囚间有决不待时者审允奏请至刑科三覆奏或蒙恩仍监候会审南京无覆奏例乞俟秋后审竟类奏定夺如有巨憝难依常例者
更具奏处决请着为令从之武宗正德元年掌大理寺工部尚书杨守随言每岁热审事例行于北京而不行于南京五年一审事例行于在京
而畧于在外今宜通行南京凡审囚三法司皆会审其在外审录亦依此例诏可又命邱聚领东厂复设西厂以命谷大用 【按成化十三年
设立西厂行之数年大学士万安奏请革去帝从之至是复设焉】 皆刘瑾党也两厂争
用事遣逻卒刺事四方于是无赖子乘机为奸天下皆
重足立三年改惜薪司外薪厂为办事厂荣府旧仓地为内办事厂命刘瑾领之京师谓之内行厂虽东西厂皆在伺察中加酷烈焉且创例罪
无轻重皆决杖永远戍边或枷项发遣枷重至百五十斤不数日辄死尚宝卿顾浚副使姚祥等俱不免濒死而后谪戍御史柴文显汪澄以微
罪致凌迟官吏军民非法死者数千五年瑾以谋反伏诛西厂内行厂俱革独东厂如故时冤狱众多大学士李东阳等因风霾上言请王府逃
校窝主邻右连累者乞释放倾使假银伪造印信举放私债乞照本律问罪余皆放免充军正犯已故无子妇人一应家属乞免遣死罪重诉三
次者乞免加罪妇人无夫者乞免配边军凡犯罪家产除重罪外乞免入官两京见监罪囚乞照热审事例奏夺文武官罚米家贫者乞展限仍
免倍纳各处获盗数多不无冤抑乞令研审毋得妄希升职免罪从之十年六月诏凡侵盗部解官物照侵盗仓库科断十六年十二月禁武臣
滥刑御史姚谩言各将于所辖官军除临阵退缩许用军法外其余有犯只用常刑如酷用非刑致损人命听抚按纠举论罪世宗即位因日精
门灾疏理冤抑又革锦衣卫传奉官十六汰旗校十五复谕缉事官校惟察不轨妖言人命强盗重事他词讼及外州县事毋得与嘉靖元年锦

衣卫千户白寿等赍驾帖诣科给事中刘济谓当以御批原本送科使知其事两人相争并列上命检成弘事例以闻济复言自天顺时例即如此帝入寿言责济以状对二年十月令决囚务于未刻前毕事凡决囚前期一日该科覆奏毕即给驾帖取囚赴市行刑限未刻前毕事如有鸣鼓诉冤许三覆奏前封进奏后无得辄受违者坐罪五年九月申明诉冤之例凡民人冤抑止许赴通政司或登闻鼓下投递有擅入禁门叫诉及摭拾辱骂原问官及挟制官吏者并主使之入俱重治其罪六年侍郎张璠等言祖宗设三法司以纠官邪平狱讼设东厂锦衣卫以缉盗贼诘奸宄自今贪官冤狱仍责法司其有徇情曲法乃听厂卫觉察盗贼奸宄仍责厂卫亦必送法司拟罪诏如议行又敕有司凡狱囚逮系日月并已竟未竟疾病死亡者各载文册申报长吏较其结竟之迟速病故之多寡而黜陟之且命中外有用法深刻致戕民命者即斥为民虽才守可观不得推荐凡内外问刑官惟死罪窃盗重犯始用拷讯余止鞭扑常刑酷吏辄用挺棍夹棍脑箍烙铁及一封书鼠弹箠马棍燕儿飞或灌鼻钉指用径寸懒杆不去棱节竹片或鞭脊背两踝致伤以上者俱奏请罪至充军七年罢官校提人之例诏伪造印信及窃盗三犯者不得用可矜例又刑部尚书胡世宁请编断狱新例命止依律文及弘治十三年所钦定者八年诏今后官吏犯枉法赃者追赃入官仍问军发遣酷刑致死人命虽因公亦照例为民其故禁故勘者论如律十年令每年热审并五年审录之期杂犯死罪准徒五年者皆减一年十五年时有以手足殴人伤重延至辜限外死者部议鬪殴杀人论绞大理寺执嘉靖四年例谓当以殴伤论笞部臣言凶器伤人虽平复例亦充军岂有实殴人致死偶死限外遂不当一凶器伤人之罪乎请仍如条例诏依部议自今有犯辜限外人命者俱遵律例拟议奏请定夺二十二年定制文书以印信为重押字次之今后盗用印信即无押字俱坐杖流若止犯押字不必概用前律如有诈为衙门关防俱比各衙门印信拟罪凡盗用弃毁伪造悉与同科二十三年刑科罗崇奎言五六月间笞罪应释放徒流应减等者亦宜如成化时钦恤枷号例暂与蠲免至六月终止南法司亦如之报可【按热审始于永乐二年止决遣轻罪命出狱听候寻并宽及流徒以下成化时始有重罪矜疑轻罪减等枷号疏放诸例其例每年自小满后十余日司礼监传旨下刑部即会都察院锦衣卫题请通行南京法司一体审拟具奏京师自命下之日始至六月终止南京自部移至日为始亦满两月而止】正德二十八年刑部尚书喻茂坚言自弘治间定例垂五十年乞敕臣等会同三法司申明问刑条例及嘉靖

元年后钦定事例永为遵守弘治十三年以后嘉靖元年以前事例虽奉诏革除顾有因事条陈拟议精当可采者亦宜详检会茂坚去官诏尚书顾应祥等定义增至二百四十九条诏有任情妄引者重治二十九年定制凡军民诸色人役及舍余审有力者与文武官吏监生生员冠带官知印承差阴阳生医生老人舍人不分笞杖徒流杂犯死罪俱令运灰运炭运砖纳米纳料等项赎罪若官吏人等例应革去职役与军民人等审无力者笞杖罪的决徒流杂犯死罪各做工摆站哨瞭发充仪从情重者煎盐炒铁死罪五年流罪四年徒按年限四十四年定坐赃不及百两产绝者免监追穆宗隆庆二年敕买休卖休本属奸条今后有犯非系奸情者不得引用五年定赃银止十两以上监久产绝或身故者热审免追释其家属又命以大明律诸家注解折中定论纂辑成书参以续定事例附列条例之后刊布中外以明法守并敕中外有司及今科进士各熟读之神宗万历二年罢岁遣清军御史并于巡按民获稍安又命法司定例奉特旨处发叛逆家属子孙止于本犯亲枝内勾补尽绝即与开籍若未经发遣而病故免其勾补其实犯死罪免死充军者以着伍后所生子孙替代不许勾原籍子孙其它充军及发口外者俱止终身三年命今后三营官军有犯非命盗事情须关白总协大臣不许巡城御史竟自勾摄四年敕杂犯死罪准徒五年者并两犯徒罪应总徒四年者各减一年其它徒流等罪俱减等五年敕有司有隐匿盗情反累失主者参奏重治六年诏京城内外钱法壅滞重困小民今再行申飭各地方有犯私铸及倡言阻挠者除为首依律论死余各问罪不贷七年改侵盗钱粮加侵盗海边钱粮一倍者罪照边海事例着为令十二年严私行披剃之禁凡披剃第四十以下并无度牒者放归农或递还本籍或收入里户私会者坐以左道惑众之律十三年命刑部尚书舒化等辑嘉靖三十四年以后诏令及宗藩军政条例捕盗条格漕运议单与刑名相关者律为正文例为附注凡三百八十二条刊布中外有申明刺字事例凡盗贼犯徒罪以下者不问赃数多寡并从刺字监守常人盗二条据律各载刺字之文而满贯罪至斩绞者从无刺字之例敕今后除各盗犯该徒罪以下刺字外其杂犯斩绞准徒者俱照旧免刺十五年因御史吴时来言令在外凶恶至于杀父者御史单详到院院寺单奏决单一到实时处决其死者下府州县戮其尸熹宗天启时魏忠贤以秉笔领厂事用卫使田尔耕镇抚许显纯之徒专以酷虐钳中外东厂之属无专官掌刑千户一理刑百户一亦谓之贴刑皆卫官其隶役悉取给于卫最轻黠猾巧者乃拨充之每月旦厂役数百人掣签庭中分瞰官府其视

中府诸处会审大狱北镇抚司考讯重犯者曰听记他官府及各城门访辑曰坐记某官行某事某城门得某奸胥吏疏白坐记者上之厂曰打事件至东华门虽夤夜投隙中以入即屏人达至尊以故事无大小天子皆得闻之卫之法亦如厂然须具疏乃得上闻愍帝即位诛魏忠贤而王体干王永祚郑之惠李承芳相继领厂事告密之风仍未尝息崇祯十一年冬以彗见停刑其事关封疆及钱粮剿寇者诏刑部五日具狱又谕兵部编遣事宜以千里为附近二千五百里为边卫三千里外为边远其极边烟瘴以四千里外为率拘本妻无妻则已不许擅勾亲邻如衰痼老疾准发口外为民十四年刑部尚书刘泽深复请议定问刑条例帝以律应恪遵例有上下事同而二三其例者删定画一为是然时方急法有司救过不暇议未及行十五年御史杨仁愿极陈厂卫之害复切言缇骑不当遣帝谕东厂言所缉止谋逆乱伦其作奸犯科自有司存不宜缉并戒锦衣卫校尉之横索者然帝倚厂卫益甚以讫于亡

（臣）等谨按明之刑制太祖惩元季废弛用重典以矫时之弊厥后定大明律例亦颇详尽然胡蓝之狱株连四万余人得毋已甚乎成祖初立因忠正不附大肆诛戮吏尚深刻盖钦恤之意渺矣仁宣之世颇事宽厚英宪而后任用中官如王振刘瑾汪直魏忠贤之徒相继擅权厂卫恣横专事罗织戕害善类延及无辜刑罚不中皆委任非人之故也

钦定续通志卷一百四十九

●钦定续通志卷一百五十 刑法略七

刑法畧 【七】

赦宥 【唐 五代 宋】

○赦宥一

唐

五代

宋

△唐

唐制赦令凡会赦及降者盗者准枉法犹征正赃除赃非见在及收赎之物限内未送者并从赦降原诸赦前当罪不断者若处轻为重宜改从轻处重为轻即依轻法其常赦所不免者依常律凡流配人在道赦计程过限者不得以赦原 【谓从上道日总计行程有违者】 有故者不用此律若程内逃亡不在免限即逃者身死所随家口仍准其上法听还诸以赦前事相告言者以其罪罪之官司受而为理者以故入人罪论至死者各加徒流若事须追究者不用此律 【追究谓婚姻良贱赦限外蔽匿应改

正征收及追见赃之类】高祖武德四年帝躬录囚

徒以人因乱冒法者众盗非劫伤其主及征人逃亡官吏枉法皆原之七月以王世充竇建德既平大赦天下时赦令已下而王竇余党尚有远

徙者治书侍御史孙伏伽谏曰今兹大赦既云常赦不原者皆赦除之此非直赦其有罪亦是与天下更新因何既赦而复徙之且世充尚蒙宽

宥况于余党所宜纵释帝从之太宗贞观初殿中监卢宽持私药入尚食厨所司议当重刑帝曰止是错误不解遂赦之五年帝以曹司断狱多

据律令虽情在可矜而不敢违法守文定罪或恐有冤自今门下覆奏有据法合死而情在可宥者宜录状奏自是全活者众六年十二月帝亲

录囚徒悯死罪者三百九十人纵之还家期以明年秋即刑及期囚皆诣朝堂无后者帝嘉其诚信悉赦之【按唐太宗纵囚之事当世史官

固称为盛德之感而欧阳修着论亦谓可偶一为之伏读御制读欧阳修纵囚论直揭太宗设诈沽誉之隐微并以正修之立言不可以辞

害义仰见知人论世允昭天下万世之成宪恭识于此】十五年七月宥周隋名臣及忠烈子孙贞观以后流配者武后长寿二年有敕公

坐流私坐徒以上会赦应免死罪者皆限赦后百日内自首如其不首依法科罪侍御史徐有功深以为不便乃奏曰今陛下播非常之恩宽殊

死之罪已发觉者咸赦除之是启其改过之心通其自新之路何容于赦前未发觉之罪赦后必须令其自首今赦前之罪不自首者还依律法

论科即国家肆眚之恩徒自颁于天下臣愚窃为陛下不取天册万岁元年九月加尊号大赦获嘉县主簿刘知几上表言今六合清晏而赦令

不息近则一年再降远则每岁无遗至于违法悖礼之徒无赖不仁之辈编户则寇攘为业当官则赃贿是求而元日之朝指期天泽重阳之节

伫降皇恩如其忖度咸果释免或有名垂结正罪当断决窃行货贿方便规求故致稽延毕沾宽宥古语云小人之幸君子之不幸斯之谓也望

今后宜节于赦使黎民知禁奸吏肃清武后颇嘉之【按唐书武后纪是年正月加号改元证圣太赦九月加号改元天册万岁大赦刘知几

此奏通鉴系正月通考系九月今从通考】玄宗开元十年八月武强令裴景仙坐赃五千匹事觉亡命帝怒命集众斩之大理寺李朝隐奏景

仙赃皆乞取罪不至死又其曾祖寂有建义大功后以非罪破家惟景仙独存今为承嫡宜宥其死投之远荒帝许之【案此条通考系开元

十八年通典系开元十年八月考通鉴所载年月亦与通典同今从通典】天宝十三年二月赦文左降官承前遭忧皆不得离任孝行之道所

未宏通情理之间深可哀恤如有此类宜并放归仍申省计至服满日准法处分自今以

后编入例程肃宗至德二年九月郭子仪克华阴弘农二郡关东献俘百余人敕皆斩之监察御史李勉言今元恶未除为贼所污者半天下闻陛下龙兴咸思洗心以承圣化今悉诛之是驱之使从贼也帝遽使赦之十二月克复两京赦天下惟与安禄山同反及李林甫王鉷杨国忠子孙不在免例代宗大历五年三月赦京畿系囚命尽释鱼朝恩党与且曰北军将士皆朕爪牙并宜仍旧勿有忧惧帝性仁恕常以至德以来用刑为戒及河洛平下诏河北河南吏民任伪官者一切不问得史朝义将士妻子四百余人皆赦之仆固怀恩反免其家不缘坐谏者常讽帝政宽故朝廷不肃帝笑曰艰难时无以逮下顾刑法峻急有威无恩朕不忍也宪宗元和六年九月富平县人梁悦报父仇杀秦杲投县请罪敕复讎杀人固有彝典以其自诣公门发于天性本无求生之心特从减死之法宜决一百配流十二年七月敕今后左降官及责授正员官等宜从到任后经五考满方许量移如未五考遇恩赦者从节文处分如犯十恶大逆赃贿缘坐者奏取进止敬宗宝历元年正月大赦改元三月羣臣上徽号大赦天下时李绅贬官李逢吉恶绅不欲绅量移乃于赦书节文内但言左降官已经量移者宜与量移近处不言未量移者宜与量移翰林学士上疏论列云不可为李绅一人与逢吉相恶遂令逐年流贬官皆不得量移则乖旷荡之道也帝遽命追赦书漆改之穆宗长庆二年四月云阳县角觝力人张莅负羽林官骑康宪钱米宪往征之莅乘醉拉宪气息将绝宪男买得年十四持木锤击莅首破三日而卒刑部奏覆敕曰买得尚在童年能知子道虽杀人当死为父可哀若从抵命之科恐失原情之意可减死罪一等文宗太和六年五月兴平县人上官兴因醉杀人而亡窜官捕其父囚之兴归待罪有司京兆尹杜惊中丞宗文鼎以兴自首免父之囚其孝可奖请免死诏两省参议皆言杀人者死古今共守兴不可免帝竟从惊等讯免死杖流灵州【按杀人者死律有明条兴因醉杀人始而亡窜继因父被囚复归自首虽有不忍陷亲之心究与捐躯救父者不同若遽以为孝而免死恐凶暴之徒反得假此以幸生典刑其谓何文宗之从惊议特妇人之仁也岂可为训哉】宣宗大中元年以旱故命同平章事卢商与御史中丞封敖疏理京畿系囚大理卿马植奏称卢商等务求宽宥凡抵极法者一切免死彼官典犯赃及故杀平日大赦所不免今因疏理而原之使贪吏无所惩畏死者含冤无告恐非所以消旱灾致和气也

△五代

梁太祖开平元年十一月赦军士逃亡为盗者初帝在藩镇用法严将校有战没者

所部兵悉斩之谓之跋队斩士卒多亡乃命军士皆文其面以记军号逃辄执之无不死者由是亡者皆聚山泽为盗至是赦其罪听还乡里盗减什七八

后唐庄宗同光二年二月祀南郊大赦【按洪迈容斋随笔云庄宗同光二年大赦前云罪无轻重常赦所不原者咸赦除之而又曰十恶五逆屠牛铸钱故杀人合造毒药持杖行劫官典犯赃不在此限正得其中当分据之时乃能如此亦可取也】时孔谦欲聚敛以求媚凡赦文所蠲者谦复征之百姓怨望

晋高祖天福三年二月左散骑常侍张允进驳赦论以为自古帝王遇天灾多肆赦谓之修德假有二人讼一有罪一无罪遇赦则有罪者幸免无罪者衔冤冤气升闻乃所以致灾非弭灾也小民遇天灾则皆喜而相劝以为恶曰国家好行赦必舍我以救灾如此则是教民为恶也且天道福善祸淫若以赦恶人而变灾为福则是天助恶民也凡天之降灾所以警戒人主节嗜欲务勤俭恤鳏寡正刑罚而已高祖纳之三月

中书舍人李详上疏以为十年以来赦令履降诸道职掌皆许推恩而藩方荐论动至数百乃至藏典书吏优伶奴仆初命则至银青阶被服皆紫袍象笏名器僭滥贵贱不分请自今诸道主兵将校之外节度州听奏朱记大将以上十人他州止听奏都押牙都虞候孔目官自余但委本道量迁职名而已【按马端临文献通考云赦之为言宥有罪之谓也后来之赦非独有罪而已又从而推恩焉于是有罪者幸免无功者超迁刑赏俱失皆由于赦其无益而有害也明矣】九月制以范延光为天平节度使仍赐铁券应广晋城中将吏军民今日以前罪皆释不问其

张从宾符彦饶余党及自官军逃叛入城者亦赦之初河阳行军马司李彦珣刑州人父母在乡里未尝供馈后与张从宾败奔广晋范延光以为步军都监使登城拒守杨光远访获其母置城下以招之彦珣引弓射杀其母延光既降帝以彦珣为坊州刺史近臣言彦珣杀母恶逆不可赦帝曰赦令已行不可改也乃遣之官【按司马光通鉴论曰治国家者固不可无信彦珣之罪三灵所不容高祖赦其叛君之罪而治其杀母之罪何损于信此论最为得中乃徒以赦令为言不欲失信于天下使梟獍之辈恬然人世不深可慨也哉】

出帝开运三年八月濮州慕容彦超坐违法科敛擅取官麦李彦韬素与彦超有隙发其事趣冯玉使杀之李崧曰如彦超之罪今天下藩侯皆有若尽其法恐人人不安乃赦免死削官爵流房州

汉高祖天福十二年六月改国号赦罪人蠲民税

周太祖广顺元年正月改元大赦凡犯窃盗及和奸者并依晋天福元年以前条制施行罪人非反逆无得诛及亲族籍没家赀初唐衰多盗不用律文更定峻法窃盗赃三匹者死晋天福中加至五匹奸有夫妇者无论强和男女并死汉法窃盗一钱以上皆死又罪非反逆往往族诛籍没故帝即位首革除之二年三月大理卿萧俨恶范延巳为人数上疏攻之会俨坐失入人罪锺谟李德明辈欲杀之延巳曰俨误杀一妇人诸君以为当死俨九卿也可误杀乎独上言俨素有直声今所坐已会赦宜从宽宥俨由是得免四月帝自将讨兖州县容彦超自杀帝欲悉诛其将吏翰林学士窦仪见冯道范质与共白曰彼皆胁从耳乃赦之世宗显德三年四月帝尝怒窦仪欲杀之范质入救帝起避之质趣前伏地叩头曰仪罪不至于死臣为宰相致陛下枉杀近臣罪皆在臣继之以泣世宗意解乃宥之四年二月帝耀兵于寿春城北唐节度使刘仁贍病甚不知人监军周廷构等作表舁仁贍出城降仁贍卧不能起帝慰劳赐赉复令入城养疾徙寿州治下蔡赦州境死罪以下

△宋

宋赦宥之制遇非常覃庆则常赦所不原者咸除之其次释杂犯死罪以下皆谓之大赦杂犯死减等而余罪释之流以下减等杖笞释之皆谓之德音亦有释杂犯罪至死者其恩霈所及有止于京城两京两路一路数州一州之地者则谓之曲赦初太祖干德元年将祀南郊诏两京诸道自后犯窃盗不得预郊祀之赦所在长吏当告谕下民毋令冒法是后将祀郊丘必申此诏开宝元年十一月南郊大赦改元自是三年而郊必加恩肆赦以为常制凡赦十恶杀人官吏受赃者皆不原太宗太平兴国三年郊大赦诏自元年十二月二十二日以后 【即登极赦

】京朝幕府州县官犯入已赃除名配诸州者纵逢恩赦不在放还之限六年十一月因郊礼议赦有秦再思者 【按秦再思通考作秦思今据续通鉴改正】 上书愿勿赦引诸葛亮相蜀数十年不赦之事以为证帝颇疑之时赵普对曰凡郊祀肆眚圣朝彝典其仁如天尧舜之道也若刘备区区一方臣所不取帝善其对赦宥之议遂定端拱元年正月大赦少府监言犯赃配役人郭冕等九人皆尝任京朝官会赦当叙用帝曰冕等赃吏不可复齿仕版止令释遣之真宗咸平二年诏如闻小民知有恩赦故为盗劫自今不在原免之限景德二年十一月大理寺言郊礼在近诸州奏按多不精详冀于驳覆延留以俟恩宥请自今有侵损赃私事状明白公然抗拒当驳退者即具情实定断以绝侥幸诏可天禧元年正月上玉皇圣祖宝册大赦时江南提点刑狱范应辰上言伏覩辛亥制书常赦不

原者咸除之臣今所部州军过误而被宥者虽多切害而蒙释者亦众望自今应有知赦在近而故为罪戾及赦后彰显情理切害者死罪以下递减一等赦前杀人剽财赦后虽不复为因事捕获决配远恶州军其杀人放火掳劫财货已依赦配本城者如更犯逃亡饮博之罪依禁军例科断其重罪该原而情理切害者所在长吏籍其犯由若再黷宪纲不以罪之大小禁锢奏裁其州县官吏侮刑受赂望止原其罪而削其官以申警戒帝览而嘉之仁宗天圣五年马亮上言朝廷虽有诏自十月后犯强窃盗者郊赦不原而法官断狱乃言终是会赦多所宽贷惠奸宄失诏旨遂诏已下约束而犯劫盗及官典受赃勿复奏悉论如律七年春京师雨弥月不止仁宗谓辅臣曰岂政事未当天心耶因言向者大辟覆奏州县至于再京师至于五盖重人命如此其戒有司决狱议罪毋或枉滥又曰赦不欲数然舍是无以召和气遂命赦天下宝元元年九月诏应祀事已受誓戒而失虔恭者毋以赦原至和二年八月赦京辅先是正月已降德音知谏院范镇言京辅岁一赦而去岁再赦今岁三赦姑息之政无甚于此天岁一赦者细民谓之热恩以其必在五六月间也奸猾为过指以待免况再赦三赦乎请自今罢所谓岁一赦以摧奸猾而使善良得以立也时帝尤恶人告讦阴事一时士大夫亦习为醇厚而小人乘间密上书疏人过失又数按人赦前事翰林学士张方平言中外官多发人积年罪状及奏劾事辄请不以赦原减快一时之小忿失天下之大信自今有类此者请以故违制书坐之其后御史吕诲复以为言诏曰比者中外多上章言人过失外托公言内缘私忿诋欺暧昧苟陷善良又赦令者所以与天下更始而有司多举按赦前事殆非慎命令重刑罚使人洒然自新之意也自今有上章告人罪及言赦前事者讯之至于言事之官宜务大体非关朝政自余小过细故勿须举察神宗即位以中外臣僚多以赦前事据摭吏民兴起讼狱诏内外言事按察官司勿得依前举劾具按取旨否则纠违制之罪知谏院司马光上言御史之职本以绳按百辟纠摘奸邪固非一日所为国家素尚宽仁数下赦令或一岁之间至于再三若赦前之事皆不得言则其可言者无几矣万一有奸邪之臣朝廷不知误加进用御史欲言则违今日之诏若其不言则陛下何从知之臣恐因此言者得以借口偷安奸邪得以放心不惧此乃人臣之至幸非国家之长利也请追改前诏刊去言事两字光论至再帝谕以言者好以赦前事诬人光曰若言之得诚所欲闻若其不实当罪言者帝命光送诏于中书熙宁七年二月帝以旱欲降赦时已两赦王安石曰汤旱以六事自责曰政不节欤若一岁三赦是政不节非所以弭

灾也乃止 【按洪迈容斋随笔云安石生平持论务与众异独此说为二公近者六年之间再行覃霈婺州富人卢助教以刻核起家因至田仆之居为仆父子四人所执投置杵臼内捣碎其躯为肉泥既鞫治成狱而遇巳酉赦恩获免至复登卢氏之门笑侮之曰助教何不下庄收谷兹事可为冤愤而州郡失于奏论绍熙甲寅岁至四赦凶盗杀人一切不死惠奸长恶何补于治哉据此则赦虽宽典然行之太数其流弊有不可胜言者矣】 八年编定废免人叙格常赦则郡县以格致用凡三期一叙即期未滿而遇非次赦者亦如之元丰元年青州民王贇父为人毆死贇幼未能复讎几冠刺讎断支首祭父墓自首论当斩帝以杀讎祭父又自归罪其情可矜诏贷死刺配邻州六年郊赦大理少卿刘袞言赦书以赦降日昧爽以前为限非次恩霈人难预期请依德音例以赦到日为限从之哲宗元佑元年门下省言当官以职事旷隳虽去官不免犹可言至于赦降大恩与物更始虽劫盗杀人亦蒙宽宥岂可以一事差失负罪终身今刑部所修不以去官赦降原减条 【按宋史刑志此句官上脱去字今据文献通考增入】 所留尚多所删尚少请更删改存留从之六年以上清储祥宫成将肆赦枢密直学士王岩叟言昔天禧中祥源成治平中醴泉成皆未尝赦古人有垂死谏君无赦者此可见赦无益于圣治也八年门下侍郎韩维言请自今每近郊赦令刑部大理寺开封府并依当时决遣狱讼不减日限其情重难释者别为一等奏断从之元符三年中书省言元佑编敕惟习妖教变幻之术及故盗决河堤堰不以赦降原减余犯一再遇非次赦或两经大礼者听从原免元符新敕删去遂使犯法者无由自新诏依元佑法徽宗政和五年知兴仁府夏竦言诸路奏狱有因祖父母为人所毆而子孙毆之以致死者并坐情理可悯奏裁多免流配若遇赦则不复奏裁即作鬪杀情理减等流配是不遇赦者为幸遇赦者为不幸请自今虽遇赦亦令奏裁从之高宗建炎元年六月尚书右仆射李纲上疏言祖宗登极赦令皆有例程前日赦书乃以张邦昌伪赦为法如赦恶逆及罪废官尽复官职皆泛滥不可行宜悉改正诏班其议于朝又皇长子生大赦李纲言陛下登极旷荡之恩独遗河北河东及勤王之师夫两河为朝廷坚守而赦令不及人皆谓已弃之何以慰忠臣义士之心勤王之师在道路半年擐甲荷戈冒犯霜露虽未效用亦已劳矣加以疾病死亡恩恤不及后有急难何以使人愿因今赦广示德意帝从之绍兴二十五年郊赦右正言凌哲言陛下深念比年臣僚有缘诬告不测之罪投窜遐裔无路自明乃因郊祀赦旷然与之昭雪或除罪籍或复原官冤愤既伸万物吐气甚盛德也至

于奸赃狼籍已经按治迹状显著者亦复巧辞理咸以违忤权臣为词今陛下开公正之路小人乃欲启侥幸之门此正清议之所不容也又况此曹嗜利之人未易悛革倘再临民社其害将有甚于前日矣请特诏有司应自今陈雪过名之人并须检会原犯事因如系赃罪已经勘刻者乞止依原断条法施行诏刑部看详本部言命官犯罪若原因论诉按发鞫勘赃证结录别无番异者并欲具原断因依告示其余特放罪或因缘连坐之人后来有司看详委有冤抑者即行开具因依申取朝廷指挥从之二十九年中书舍人洪迈上言请自今凡天下凶盗及杂犯杀人罪应至死而赦之者量地里远近分配大军不惟可免逋亡异日生患而此徒轻生好杀既隶军伍知有洗心自新之路稍加阅习必乐为用孝宗淳熙九年大理卿王尚之言近以民间词讼官司按劾多有连及赦前事者复送有司根勘如此则与不曾经大赦无异非所以示信也请降指挥应今后送所司推勘者止合将大赦后罪犯依法结断若所犯在大赦前苟非恶逆以上并不许推究从之光宗绍熙二年殿中侍御史张釜言国家三岁一郊霈旷荡之泽以幸天下德至渥也然赦文与令甲抵牾者有失参考乞预飭省部令将各按具到赦文内合行事件逐一比照见行条法法意宽而条或从窄则改定赦文令舍窄而究竟赦文本宽而法或从窄则明载赦书令舍法而从赦毋令引法以沮赦毋令因赦而伤恩如此则国家旷荡之泽不为虚文从之五年五月肆赦七月熈宗登极九月宗祀明堂尚书省契勘一岁之间三行赦放诚恐有凶恶累犯之人指恩作过内曾犯徒流罪已经登极赦恩免罪后再犯徒流以情理深重者未曾断遣别听朝廷指挥其指挥与赦文同降但以白纸连书于黄牒前盖前所未有云

钦定续通志卷一百五十

●钦定续通志卷一百五十一 刑法略八

刑法略 【八】

赦宥 【辽 金 元 明】

放生附 【唐 五代 宋 辽 金 元 明】

○赦宥二

辽

金

元

明

△辽

辽太宗天显五年三月皇弟鲁呼请赦宗室锡里郎君以罪系囚者诏从之七年八月林牙德勒宾逸囚复获而鞫之知其事本诬构释之会同三年九月边将奏破吐谷浑擒其长诏止诛首恶余并赦世宗时耶律吼有定策功加采访使益以宝货辞曰臣位已高敢复求富臣从弟达鲁诸子坐事籍没陛下哀而赦之臣受赐多矣帝曰吼舍重赏请赦族人贤远甚从之天禄三年正月以萧翰及公主阿布哩谋反翰伏诛阿布哩自死狱中诏肆赦景宗保宁五年二月近侍萨喇勒误触神熏法论死杖而释之兴宗重熙八年十一月以皇太后行再生礼大赦【按礼志再生仪十有二岁一举行盖辽祖苏尔威汗制此礼以发嗣君孝思而兹则皇太后亦行之也迨后二十年十二月皇太后又举此制诏赦天下】默尔根达使酒杀人而逃会永寿节自首特赦其罪十二年七月以枢密使萧孝忠薨特赦重囚十五年十二月赦大辟以下罪是日为圣宗在时生辰十六年十二月以皇太后疾愈肆赦杂犯死罪减一等论徒以下免十八年十二月有弟从兄为强盗者兄弟俱无子特原其弟道宗咸雍三年六月有司奏新成县民杨从谋反伪署官吏帝曰小人无知此儿戏耳独流其首恶余并释之太康九年六月诏诸路检括脱户罪至死者原之十一月进封梁王延禧为燕国王大赦天下大安四年十一月兴中府民张化法以父兄犯盗当死请代皆免

△金

金世宗大定二年二月诏前户部尚书梁球户部郎中耶律道安抚山东百姓招谕盗贼凡避赋役在他所者并令归业无问罪名轻重悉与原免三年五月诏谕契丹余党富色克等如能自新并释其罪五年二月赦河南诸州罪囚以被兵故也四月两京留守寿王京谋反狱成特免死杖之除名岚州安置十年尚书奏河中府张锦言自言复父讎法当死帝曰彼复父讎又自言之烈士也以减死论二十三年大兴府民赵某带酒乱言父千捕告法当死帝曰为父不恤其子而告捕之人所甚难可特减死一等章宗承安四年二月监察御史姬端修以妄言下吏赦其罪令家居俟命十一月亳州医者孙士明擅用黄纸大书敕赐神针先生等十二字纸尾年月摹作宝样朱篆青龙二字以诳市人有司捕治款伏值赦大理寺议宜照伪造御宝虽会赦不应原参知政事贾铉奏天子八宝其文各异若照伪造御宝非本法意遂得赦原宣宗兴定元年五月山东行帅府事蒙古纲擅械转运使李秉钧法当决秉钧反詈纲应论赎诏两宥之二年四月伊尔必斯自潼关之败逃居柘城为御史台觉察系其家属帝令释伊尔必斯之罪伊尔必斯不自诣阙遣子上书请图后效台臣力

请诛之以惩不忠帝曰中丞言是也业已赦之矣乃除
名三年四月林州都统霍成以疑贰诬杀降人罪当诛元帅惟良请宽其罚仍请立护送
降民赏格以杜后患帝为之赦成而命有司领赏格焉
时有诬宗室苏尔坦杀人者太学生马肩龙上书略曰苏尔坦有将帅材少出其右者臣
一介书生无益于用愿代苏尔坦死留为天子将兵帝
问汝与苏尔坦交厚乎对曰臣知有苏尔坦苏尔坦未尝知臣苏尔坦冤人不敢言臣以
死保之乃赦苏尔坦哀宗正大元年正月降德音于河
南关陕山东诸路罪无轻重皆与蠲除二年陈和尚随其兄色埒默在军中以事笞万宜
翁宜翁愤死语其妻必报妻以故杀其夫诉台省且积
薪欲自焚陈和尚系狱者十有八月色埒默入朝帝谕以欲赦之意寻以台谏言复止及
闻色埒默卒始弛赦之且谕曰有司奏汝以私忿杀人
汝兄死失吾一名将今以汝兄故曲法赦汝天下必有议我者他日汝奋发立功名始以
我为不妄赦矣陈和尚且泣且拜后死节于钧州天兴
元年七月飞虎军士申福蔡元擅杀北使唐庆等三十余人于馆诏贯其罪

△元

元世祖中统元年五月以额呼布格反大赦天下至元十年五月诏天下罪囚杀人
者待报其余一切疏放限以八月内自诣大都如期而
至者皆赦之八月前所释诸路罪囚自至大都者凡二十二人并赦之十三年以平宋大
赦天下时监察御史赵天璘上策曰赦者欲以荡涤瑕
秽与民更始以负罪者言之则实莫大之洪恩以致治者论之则非太平之常事也近世
以来郊天祝宗建储立后未有不肆赦者侥幸之子逆
知期会能不启匪滥之心哉又况大赦之后奸邪未尝衰止朝脱囹圄夕纒縲继其不能
承化日新亦已明矣今国家哀囚徒之辞悯小民之庸
駮频降原赦此盖朝廷不忍人之心形于外而不能自己也推此以及良民顺天道以正
生杀则周文之治不难同矣伏望陛下信赏决罚无肆
赦宥使上下有纪内外绝幸则天下可运之掌上矣成宗大德七年内丞相达尔罕言僧
人修佛事毕必释重囚有杀人及妻妾杀夫者皆指名
赦之生者苟免死者负冤于福何有帝嘉纳之 【按元世西僧每岁为佛事必请释轻重
囚徒以为福利谓之都勒斡成宗时用帝师奏释大
辟三人及杖以下者七人厥后豪民犯法者皆贿赂之以求免虽大臣有罪莫不假是道
其诛迨仁宗朝始以僧人作佛事命中书审察择释狱
囚又功德使额琳沁以佛事奏释重囚帝不允时台省亦疏上请革其弊然终元之世故
事相沿迄不能革】 仁宗延佑五年三月晋宁民侯喜
儿昆弟五人坐法当死帝叹曰彼一家人不幸而有是事其择情轻者一人杖而宥之俾

养父母母绝其祀英宗至治元年正月廷臣或言祀事
毕宜赦天下帝曰恩可常施赦不可屡下使杀人获免则死者何辜遂命中书陈便宜行
之三年三月命僧诵经十万部寻敕诸寺作水陆佛事
七昼夜敕都功德使至京师释囚大辟二十一人杖五十以上者六十九人文宗天历三
年六月以伊噜特穆尔等罪诏告中外赦天下顺帝元
统时布衣苏天爵疏自昔国家务明刑政苟或赦宥之数行必致纪纲之多紊近岁以来
赦宥太数诚恐奸人贪吏各怀侥幸大为奸利非国家
之福世祖在位三十五年肆赦者八近自天历改元至元统初岁六年之中肆赦者九盖
敷恩宣泽虽出于朝廷之美意然长奸惠恶诚为政者
所当慎也伏愿自今以始追法世祖皇帝之所行使中外臣民洗心革虑守法奉公知非
常之恩不可复觊天下幸甚

△明

明赦令之制凡有大庆及灾荒皆赦然有常赦有不赦有特赦十恶及故犯者不赦
律文曰赦出临时定罪名特免或降减从轻者不在此
限十恶中不睦又在会赦原赦之例此则不赦者亦得原若传旨肆赦不别定罪名则仍
依常赦不原之例太祖洪武元年八月以元都平大赦
天下诏赦殊死以下毋非时决囚惟十恶不原二年十二月诏临洮将士之亡匿山谷者
罪无大小并行赦之五年八月命中书省凡指挥千户
镇抚以罪谪在军伍或降为巡检者悉令赴京仍录用之其见犯者今从征立功赎罪又
谕中书省曰凡犯赃罪者罪虽已赦仍征其赃赦文内
有云已发觉未发觉已结正未结正之类其详定以闻刑部奏覆凡谋反大逆谋杀祖父
母父母妻妾杀夫奴婢杀主谋故杀人及强盗蛊毒厌
魅不赦外其余轻重咸赦有以赦前事相告讦者抵罪若系官钱粮事须推究罪虽遇原
依律改正征收民闲户婚田产钱债虽已经赦应合改
正归还者并听追理凡今后官吏受赃遇赦免罪赃并追纳其在赦前犯赃事发惧罪逃
避及革役发落依律追究奏上制从之七年十一月诏
分别应赦诸人制曰古人谓赦乃小人之幸君子之不幸朕为生民主恐悖理乖仁脱凶
顽于侥幸长奸幸于姑息有乖圣人明刑慎罚之意中
书具陈狱囚若果真犯但笞罪以上俱各不原其余诖误过失因人致罪者悉皆宥之八
年正月山阳县民有父得罪当杖请以身代帝以出于
至性特释之十一月杭州民有罪当戍其子请代亦释之十五年正月敕刑部方春万物
发生而无知之民有犯法至死者虽有决不待时之律
然于朕心有所不忍其犯大辟者皆减死论九月北平民以诬逮其子诉于刑部所司坐
以越诉帝曰子诉父枉出于至情不可加罪时沅陵知

县张杰当输作自陈母贺当元季乱离守节今年老失养帝谓可励俗特赦之给事中彭与民坐系其父为上表诉哀立释之且免同系者十七人有死囚妻妾诉夫冤法司请黥之帝以妇为夫诉职也不罪二十五年天策卫卒吴英父系狱英诣阙自陈愿没入为官奴以赎父罪帝曰汝之情固可矜但平日何不劝父使不犯法姑念尔爱父之至屈法宥之成祖永乐二年十一月江浦知县周益以罪当刑其妻梅氏诉益母老无养愿代夫死帝悯其情特宥之四年八月宥强盗初犯不寘重法时侍臣有言其宽无以示惩帝曰好善恶恶人情皆同岂本心乐于为恶或迫于饥寒不得已为之且为不善者能改过为善圣人未尝绝之朕怜其初出于不得已又冀其终能改过耳若再犯必不宥矣七年三月诏起兵时将士及北京效力人民杂犯死罪咸宥之充军者官复职军民还籍伍九年三月有县官以赃罪谪戍边击鼓陈情言年逾七十求免帝命宥之十三年正月释工作囚徒先是命出系囚输作赎罪既而多亡者有司请捕之帝曰此皆衣食空乏出于不得已遂令见役者俱还家共释四千九百余人二十二年十一月仁宗即位诏曰建文奸臣其正犯已悉受显戮家属初发教坊司锦衣卫浣衣局并习近及功臣家为奴今有存者既经大赦可宥为民给还田土凡前为言事失当谪充军者并宥之颁赦令三十五条皆杨士奇代草尽除永乐年间弊政凡不便于民者皆援恩诏革除之凡以赦前事言人罪者即坐以所告者罪宣宗宣德时宽诏岁下阅囚屡放遣有至三五千者谕刑官曰吾虑其瘐死故宽贷之非常制也宪宗成化元年十一月法司以申明赦例会奏帝命人命故杀者不宥余皆宥之犯在十恶者罪虽轻亦不可宥官吏贪淫事无显迹证佐者具奏区处边远为民者自天顺元年为始于谪所成家业不愿回者听有犯赃追未完者悉免之六年八月以旱涝相仍诏除兵犯死罪不宥外徒以上降等发落杖以下悉宽宥十三年三月河东知州徐字为驿丞王仁所奏坐妖言法当斩其妻李氏上疏求代帝矜其情特宥之世宗嘉靖九年十一月大赦天下时以大报礼成钦恤刑狱法司释放罪囚一千八百五十五人十六年六月九江府同知姜辂先以严酷事觉为巡按御史陈襄所奏都御史王廷相等论辂当迁发帝曰辂所犯在赦前今迁发何也廷相对言去年诏书迁发为民者不言赦宥又有户部奏准事例诏所不原皆如律迁发故以此拟辂帝以辂未经逮问仍令法司议拟以闻于是法司言每诏书首条明开重罪不赦其余已未发觉已未结正不论罪名大小咸准赦除今辂未经逮问则事属理官当如诏书宥免帝是其议赦辂罪以都察院违诏法司不行参奏俱切责而

宥之穆宗隆庆元年八月南京刑工二部以徒犯钱金等援恩诏乞赦各持论不合移刑部议侍郎樊深等言臣按律令凡徒犯已至配所者例不许赦还第徒流着役之人虽律令俱称不宥然律又有赦出临时定罪名特免之文则是国家立法之意凡遇沾恩自当别论且诏书所云已发觉未发觉已结正未结正罪无大小咸赦除之徒流着役之人独非已结正者乎臣惟国家制法所以立万世之经使人难犯赦宥所以博旷荡之恩使人自新今遵行明诏而又胶柱于律令奉扬殊典而又掣肘于常法宜乎其执滞不通也今诸犯罪者既蒙宽宥而此辈独以已至配所反不得一沾殊恩恐非所以昭乐与天下更始之意疏上诏特许放还神宗万历十二年二月御史屠叔明请释建文诸臣外亲之谪戍者并宥还乡于是得免者凡三千余人

○放生

（臣）等谨案郑志所载放生诸条乃全录杜典旧文考杜典于此门类下自注禁止屠杀以活飞走亦同赦宥云云今仍用其意例续辑以附见焉

唐

五代

宋

辽

金

元

明

△唐

唐宪宗元和九年诏如闻比来京兆府每及腊日府县捕养狐兔以充进献深乖道理既违天性又劳人力自今以后宜并停文宗太和四年诏曰时属阳和命禁麋卵所以保兹怀生仁遂物性如闻京畿及关辅近地豪家弋猎放纵鹰犬颇伤田苗长吏切加禁察违者捕系以闻开成二年三月诏曰韶阳御辰生气方盛思全物类以顺天时内外五方凡有笼养鹰鹞及鸟雀狐兔等悉宜放之起今月一日至五月十三日禁京城及畿内采捕鸟兽罗网水虫以遂生成永为定制委台府及本司切加禁止

△五代

后唐明宗长兴三年五月敕春夏之交长育是务眷彼含灵之类方资亭育之功自此至冬初凡罗网及诸弋猎之具并宜止绝如有违犯仰随处官吏便科违诏之罪起今后每年至于二月初便依此敕晓示中外

周太祖广顺二年凤翔路言义州番部买牛入番多是宰杀乞止绝沿路州县道涂百姓不得杀牛货卖与番人从之

△宋

宋真宗景德三年诏牛羊司畜有孳乳者放牧勿杀大中祥符三年禁方春射猎每岁春夏所在长吏申明此旨天禧四年判杭州王钦若奏以西湖为放生池禁捕鱼鸟

△辽

辽太宗会同五年五月五日禁屠宰道宗咸雍七年罢猎禁屠杀以置佛骨于招仙浮图故也

△金

金海陵正隆五年禁中都河北山东河南河东京兆军民网捕禽兽及畜养鵙隼者世宗大定五年诏曰马者军旅所用牛者农耕之资杀牛有禁马亦何殊其令禁之十四年诏明安穆昆之民不许杀生祈祭章宗泰和二年御史台奏监察御史史肃言诏制与律文轻重不同及律所无者各校定以闻如禁屠宰之类当着于令也

△元

元世祖至元十二年敕辉和尔地春夏毋猎孕字野兽申严屠牛马之禁又刑制禁令条开每月朔望二弦凡有生之物杀者禁之诸郡县岁正月五月各禁宰杀十日自十二月至来岁正月杀牝羊者禁之诸宴会虽达官杀马为礼者禁之其有老病不任鞍勒者亦必与众验而后杀诸私宰官马牛为首杖一百七为从者八十七助力者减正犯二等论罪

△明

明世宗嘉靖初令纵内苑禽兽天下毋得进献

钦定续通志卷一百五十一

●钦定续通志卷一百五十二 食货略一

食货略

（臣）等谨按洪范八政首重食货自班固为食货志详汉以前分田定税及布币泉刀之用晋隋诸书多仍班志之旧通典汇核诸史之文篇析条分体归简要郑志又本杜典而加简为食货畧二卷若汉之平准后魏之均田唐之租庸调两税皆详其法制余则唯举其大纲焉易曰水地比君子以容民畜众书曰懋迁有无化居周礼泉府之官管子轻重之法因时制宜以裕民益国后世时政之得失国用之盈绌民生之昌悴胥视食货为权衡唐以后制度变移屡更条例故宋辽金元明五朝之史事繁于前文增于旧诚以食货者经国之大猷不可不详其利弊

也夫敬授民时敷土制田为安集之本五代仍唐两税法屡下垦田均赋之诏而疆域未定罕见施行宋时讲求方田寻至废格继乃措置经界仅及一隅其岁赋则分公田民田城郭丁口杂税为五类辽初分部以课树艺金制官地输租私田输税厘为九等元定里社之分合其内郡之赋则用租庸调江南之赋则用两税明初定赋税以黄册为准后复用开方法以丈量民田此田赋之因时而立制也其钱币之用漕运之宜盐铁之榷累朝相仍宋设交子会子元重海运明立开中之商或创或因利病互见惟屯田为前代良法盖自汉赵充国秦上屯田便宜十二事魏晋皆修复其法所谓省输挽而增守望筹边广储之要无过于此唐末之韩重华宋之何承矩皆着成绩元则分隶于中书省枢密院内而各卫外而行省皆开屯政经务之广最称详善明制军屯领于卫所民屯领自有司然仅行沿边及大河南北规模视元代为挟其后屯政日弛军制亦隳则夫整防卫以安边计岂不赖乎纪纲之立欤平余之法广惠钧施前史称为善政宋金元皆行和余与常平义仓相辅明初置预备仓后又设义仓春粃秋余之政偶见举行未有定制欲俾敛散得其节轻重便于时平货以遂利洵为论积贮者所当预计也记曰先王量地以制邑度地以居民节务成业勗农桑之本通山海之利正三日之徭平九均之赋不诚在食足货通国实民富以成其教化哉今续修食货略谨考唐中叶以后累朝食货之制综其始末厘为四卷其篇目次第仍从郑志之旧叙次如左

田制

陂渠

○田制

唐

五代

宋

辽

金

明

△唐

唐制分给永业口分田及按比垦田之数详见郑志代宗大历元年诏流民还者给复二年田园尽则授以逃田德宗贞元四年两税之法久而生弊帝以问宰相陆贽贽上疏言其甚害者大畧有六因及授田之制疏曰古者百亩地号一夫盖一夫授田不得过百亩欲使人不废业田无旷耕今富者万亩贫者无容足之居依托强家为其私属终岁服劳常患不充有田

之家坐食租税京畿田亩税五升而私家取租亩一石
官取一私取十穡者安得足食宜为占田条限裁租价损有余优不足此安富恤穷之善
经不可舍也论者以为切于唐末田制之弊

△五代

后唐明宗长兴二年敕凡置营田比召浮客若取编户实紊常规其三京诸道营田
及无主荒田皆召浮客此后若有违越其官吏及投名
税户当行重断闵帝应顺元年诸处没官田宅并属户部除赐功臣外禁请射晋高祖天
福二年以杜筮策言荒田一任百姓开种三年检照所
开种顷亩多少量纳一半租税敕曰辟彼污莱期于富庶方当开创正切施行宜令逐处
长吏遍下管内应是荒田有主者一任本主开垦无主
者一任百姓请射佃蒔其三年内并不在收税之限周世宗显德二年敕逃户庄田许人
请射承佃供纳租税五年七月帝特均定天下民租 【
按均田之名始见汉书王嘉传注孟康曰自公卿以下至于吏民名曰均田皆有顷数】
诏以唐元微之均田表及图颁赐诸道并命左散骑常
侍艾颖等三十四人于诸州检定民租

△宋

宋太祖建隆二年遣使度民田太宗端拱二年诏兴置方田命知定州张永德等各
兼方田都总管诏谕边将令缘边作方田量地里远近
列置寨栅以为战守之具至道元年诏州县旷土许民佃为永业蠲三岁租三岁外输二
分之一州县官吏劝民垦田之数悉书于印纸以俟旌
赏咸平中令阁馆检校故事申定职田之制以官庄及逃田充佃户以浮客充其两京大
藩府四十顷次藩镇三十五顷防御团练州三十顷中
上刺史州二十顷下州及军监十五顷边远小州上县十顷中县八顷下县七顷转运使
副十顷兵马都监押砦主厘务官录事参军判司等比
通判幕职之数而均给之继静戎军王能言军城东新河之北开方田广袤相去皆五尺
深七尺仍以地图来上于是令威虜顺安军亦兴置真
宗干兴元年准臣僚奏命官所置庄田定以三十顷为限衙前将吏合免户役者定以十
五顷为限庆历中诏限职田有司复申定其数大藩长
吏三十顷通判八顷判官五顷幕职官四顷节镇长吏十五顷通判七顷判官四顷幕职
官三顷五十亩凡防团以下州军长吏十顷通判六顷
判官三顷五亩幕职官三顷其余军监长吏七顷判官幕官并同其防团以下州军及县
令自万户以上至不满五千户者六顷至二顷有差其
录事参军比判官曹官比倚郭簿尉发运制置转运使副武臣总管比节镇长吏发运制
判官比大藩府通判安抚都监路分都监比节镇通判

大藩府都监比本府判官黄汴河许汝石塘河都大催纲比节镇判官节镇以下至军监
诸路走马承受并砦主都同巡检提举捉贼提点马监
都大巡河不得过节镇判官在州监当及催纲拨发巡捉私茶盐贼盗驻泊捉贼不得过
簿尉神宗熙宁时复详定其制稍加损益而已五年因
田赋不均重修定方田法诏司农以均税条约并式颁之天下以东西南北各千步当四
十一顷六十六亩一百六十步为一方岁以九月每县
以令佐分地计量随陂原平泽而定其地因赤淤黑垆而辨其色方量毕以地及色参定
肥瘠而分五等以定税以济州巨野尉王曼为指教官
先自京东路行之诸路仿焉其后必岁稔农隙乃行而县多山林者或行或否八年诏罢
方田徽宗崇宁三年宰臣言自开阡陌使民得以田私
相贸易富者恃其有余厚立价以规利贫者迫于不足薄移税以速售而天下之赋调不
平久矣神宗讲究方田作法而推行之方为之帐而步
亩高下丈尺不可隐户给之帖而升合尺寸无所遗以卖买则民不能容其巧以推收则
吏不能措其奸今文籍具在可举而行诏诸路提举常
平官选官习熟其法谕州县官吏各以丰稔日推行自京西北两路始品官限田一品百
顷以差降杀至九品为十顷至宣和元年臣僚言方量
官惮于跋履并不躬亲一付之胥吏御史受诉有二百余亩方为二十亩者其租税亦有
增损之弊望诏常平使者检察遂诏罢之高宗南渡后
复定职田无大损益申明旧制而已绍兴十二年左右司员外郎李椿年言经界不正十害
一侵耕失税二推割不行三衙门及坊场户虚供抵当
四乡司走弄税名五诡名寄产六兵火后税籍不存争讼日起七倚阁不实八州县隐赋
多公私俱困九豪猾户自陈诡籍不实十逃田税偏重
人无肯售经界正则害可转为利且言平江岁入二十万不及昔之半考按核实请自平
江始乃以椿年为两浙运副专委措置经界椿年请平
江以及诸州宜均平为民除害不增税额图写墟亩选官按覆十九年经界事毕惟淮东
西京西湖北四路以边境姑仍其旧漳汀泉三州权行
倚阁琼州万安昌化吉阳军海外土产瘠薄与泸叙州长宁军并免经界其余诸路州县
次第有成光宗时知漳州朱熹奏经界状略疏奏千余
言切指时弊而贵家豪右占田隐税侵渔贫弱者胥为异论乃格不行 【按绍兴时因李
椿年之请各州县已次第有成至是时法弛弊生故
朱子力请整顿复格不行】 宁宗嘉定闲知婺州赵■〈与上心下〉夫行经界于其州
整有伦序后守魏文豹行之益力向上户析为贫下户
逃绝田俱为实田三年而后上其事于朝八年诏职田蠲放如民田度宗咸淳元年监察
御史赵顺孙又言经界之便民宜随诸州之便宜而为

之区处从之司农卿季鏞言经界之法必多差官吏徧走阡陌以量地亩不如行推排之法以县统都以都统保选才干公平者定田亩税色载之图册凡民有定产产有定税税有定籍吴门绍兴及湖南一路俱已告成宜令监司郡守递相稽察于是诏诸路施行

△辽

辽皇祖允丹达锡为大德呼勒府额尔奇木喜稼穡相地利以教民耕太祖分北达窳额为二部程以树艺诸部效之太宗会同初以乌尔固之地水草丰美命谔尔昆锡林居之益以哈里水之善地为农田三年诏以嘉哩河胙胸河近地赐南院鄂津图噜伊苏巴尔北院乌兰哈喇三锡林人以事耕种圣宗干亨六年【按辽史本纪景宗改元干亨四年圣宗建元统和二十九年开泰九年太平十一年纪无干亨年号今食货志称圣宗干亨六年以言景宗则年既不符以言圣宗则并无此年号疑统和六年之误也】徙哲伯寨居民三百户于檀顺蓟三州择沃壤给牛种谷

△金

金代量田以营造尺五尺为步阔一步长二百四十步为亩百亩为顷民田业各从其所便卖质于人无禁但令随地输租而已凡官地明安穆昆及贫民请射者宽乡一丁百亩狭乡十亩中男半之请射荒地者以最下第五等减半定租八年始征之作已业者以第七等减半为税七年始征之自首冒比邻地者输官租三分之二佃黄河退滩者次年纳租海陵正隆元年遣刑部尚书赫舍哩罗索等十一人分行于大兴府及山东真定拘括系官或荒闭牧地及官民占射逃绝户地授所迁之明安穆昆户世祖大定十七年以明安穆昆所给官地瘠薄遣重臣拘籍各地以给之后陈言者奏豪强之家多占夺田上曰前参政纳哈塔椿年占地八百顷山西田亦为权要所占小民无田可耕其令占官地十顷以上者皆括籍入官均赐贫民余豪强所占田皆拘入官山东路所括民田分给女真屯田人户章宗泰和四年定制所拨地止十里内自种之数每丁四十亩续进丁同此余许便宜租赁贞佑中以河北军户徙居河南刍粮浩大命右司谏冯开等五人分诸郡就授以荒官田及牧地可耕者人三十亩继因括荒田及牧马地之议碍法难行乃拟民有能开牧马地及官荒田者以半给之为永业半给军户奏可元世祖至元三年定随路府州县职田上路达噜噶齐十六顷总管同同知八顷治中六顷府判五顷下路达噜噶齐一十四顷总管同同知七顷府判五顷散府达噜噶齐十顷知府同同知六顷府判四顷上路达噜噶齐十顷州尹同同知五顷州判

四顷中州达噜噶齐八顷知州同同知四顷州判三顷
下州达噜噶齐六顷知州同州判三顷警巡院达噜噶齐五顷警使同警副四顷警判三
顷录事司达噜噶齐三顷录事同录判二顷县达噜噶
齐四顷县尹同县丞三顷主簿二顷县尉主簿兼尉同经历四顷又定各道按察使十六
顷副使八顷金事六顷八年立司农司二十八年颁农
桑之制县邑所属村疇凡五十家立一社择高年晓农事者一人为之长增至百家者别
设长一人不及五十家者与别村合社以教督农桑为
事凡种田者立牌橛于田侧书某社某人于其上社长以时点视劝诫不率教者籍其姓
名以授提点官责之田无水者凿井井深不能得水者
听种区田二十一年又定江南行省诸司职田较至元三年所定悉减其半武宗至大二
年淮西廉访金事苗好谦献种蒔之法其说分农民为
三等上户地十亩中户五亩下户三亩或一亩皆筑垣墙围之以时收采桑椹依法种植
大约本之齐民要术等书武宗善而行之仁宗延佑元
年平章章闾言经理大事世祖已尝行之但其闲欺隐多而未尽实或以实田为荒田或
惧差而析户或富民买贫民田而仍其旧名若行经理
之法俾有田之家一切从实自首庶税入无隐差徭亦均于是遣官经理以章闾等往江
浙尚书鼐智密鼎等往江西左丞陈士英等往河南仍
命御史台分台镇遏枢密院以军防护焉然限期猝迫贪刻用事仁宗知之明年遂下诏
罢免顺帝至正十三年命乌兰哈达乌克逊良楨兼大
司农卿给分司农印西自西山南自保定河闲北至檀顺州东至迁民镇凡系官地及元
管各处屯田悉从分司农司立法佃种十六年台臣言
系官牧马草地俱为权豪所占今后除规运总管府见种外余尽取勘令大司农召募耕
垦岁收租课以资国用从之

△明

明土田之制有二等曰官田曰民田官田皆宋元时入官田地厥后有还官田没官
田断入官田学田皇庄诸王公主勋戚大臣内监寺观
赐乞庄田百官职田边臣养廉田军民商屯田通谓官田其余为民田元季版籍多亡田
赋无准洪武初遣周铸等百六十四人核浙西田亩定
其赋税复命户部核实天下土田而两浙富民畏避徭役以田产寄他户明太祖洪武二
十年命国子生武淳等分行州县随粮定区设粮长
四人量度地亩方圆书主名及田之丈尺编类为册又以中原田多芜命省臣议计民授
田设司农司开治河南掌其事临濠之田验其丁力计
亩给之母许兼并北方近城地多不治召民耕人给十五亩蔬地二亩免租三年每岁中
书省奏天下垦田数少者亩以千计多者至二十余万

官给牛及农具者乃收其税额外垦荒者永不起科田以近郭为上地迤远为中地下地仍元里社制河北诸州县土著者以社分里甲迁民分屯之地以屯分里甲社民先占亩广屯民新占亩狭屯地谓之小亩社地谓之广亩宣德间垦荒田永不起科及洿下斥卤无粮者皆核入赋额数溢于旧有司乃以大亩当小亩以符旧额土地不均人得以意赢缩世宗嘉靖中桂萼郭宏化唐龙简霄先后疏请核田亩顾鼎臣请履亩丈量江西安福河南裕州先行之法未详具人多疑惮神宗初建昌知府许孚远为归户册以田从人法简而密万历六年帝用大学士张居正议天下田亩通行丈量限三载竣事用开方法以径围乘除畸零截补于是豪猾不得欺隐里甲免赔累而小民无虚粮然居正尚综核颇以溢额为功有司争改小弓以求田多或掊克见田以充虚额北直隶湖广大同宣府遂先后按溢额田增赋云

○陂渠

唐

宋

辽

金

元

明

△唐

唐代宗大历五年朗州刺史韦夏卿于所治开槎陂溉田千余顷德宗贞元九年明州刺史任侗修鄞县仲夏堰溉田数千顷宪宗元和三年江南西道观察使韦丹开南昌南塘斗门以节江水开陂塘以溉田淮南道节度使李吉甫筑扬州高邮堤塘溉田数千顷

△宋

宋太宗至道元年度支判官梁鼎陈尧叟上郑白渠利害按旧史郑渠元引泾水自仲山西抵瓠口并北山东注洛三百余里溉田四万顷亩收一锺白渠亦引泾水起谷口入涿阳注渭水长二百余里溉田四千五百顷两渠溉田四万四千五百顷今所存者不及二千顷灌溉之利绝少于古郑渠难为兴工今请遣使先诣三白渠行视复修旧迹于是诏大理寺丞皇甫选光禄寺丞何亮乘传经度选等还言郑渠用功最大并仲山而东凿断冈阜首尾三百余里连亘山足岸壁頽坏陁废已久度其制置之始泾河平浅直入渠口年代久远泾河陡深水势渐下与渠口相悬水不能至峻崖之处渠岸推毁荒废难于致力其三白渠溉泾阳栌阳高陵云阳

三原富平六县田三千八百五十余顷望令增筑堤堰
以固护之旧设节水斗门皆请缮完就近度其岸势别开渠口以通水道泾河中旧有石
堰废坏已久造用木堰梢椿出于缘渠之民夏潦木堰
流失至秋敛民复葺自今溉田既毕命拆堰木真于岸侧所役缘渠之民计田出丁调万
三千人疏渠造堰各获其利选能吏以时行视又言邓
许陈颖蔡宿亳七州之地有公私闲田二十二万余顷民力不能尽耕皆汉魏以来召信
臣杜诗杜预任峻司马宣王邓艾等垦辟之地内南阳
界凿山开道疏通河水散入唐邓襄三州以溉田后盐铁副使林特度支副使马景盛陈
关中河渠之利请遣官诣郑白渠兴修古制乃诏太常
博士尚宾乘传经度率丁夫治之宾言郑渠久废不可复今自介公庙回白渠洪口直东
南合旧渠以畎泾河灌富平等县工既毕水利饶足民
获数倍神宗熙宁元年诏诸路监司比岁所在陂塘堙没濒江圩埠浸坏沃壤不得耕宜
访其可兴者劝民兴之具所增田亩税赋以闻二年权
三司使吴充言前宜城令朱紘修复水渠民乐趋之渠成溉田六千余顷诏迁紘大理寺
丞制置三司条例司具农田利害条约诏颁诸路有能
修复陂湖河港或元无陂塘圩埠堤堰沟洫而可以创修或水可及众而为人所擅有或
田去河港不远为地界所隔可以均济流通者县有废
田旷土可纠合兴修大川沟渎浅塞荒秽合行浚导及陂塘堰埭可以取水灌溉若废坏
可兴治者各述所见编为图籍上之有司其土田迫大
川数经水害或地势污下雨潦所鍾要在修筑圩埠堤防之类以障水涝其县不能办州
为遣官事关数州具奏取旨民修水利许贷常平钱谷
给用四年前知襄州光禄卿史照言开修古淳河一百六里灌田六千六百余顷修治陂
堰民已获利虑州县遽欲增税诏三司应兴修水利垦
开荒梗毋增税六年程昉言得共城县旧河漕若疏导入三渡河可灌西坵稻田从之诏
诸创置水碓碾碓妨灌溉民田者以违制论命赞善大
夫蔡曩修永兴军白渠七年金州西地县民葛德出私财修长乐堰引水灌溉乡户土田
授本州岛司士参军八年深州静安令任迪乞俟来年刈
麦毕全放滹沱胡卢两河又引永静军双陵口河水溉南北岸田二万七千余顷河北安
抚副使沈披请治保州东南沿边陆地水田皆从之
右班殿直干当修内司杨琰言开封陈留咸平三县种稻乞于陈留界旧汴河下口因新
旧二堤之间修筑水塘用碎甃筑虚堤取汴河清水入
塘灌溉从之江甯府上元县主簿韩安厚引水溉田二千七百余顷迁光禄寺丞太原府
草泽史守一修晋祠水利溉田六百余顷九年程师孟
言淤田甚利尚虑河东犹有荒田可引大河淤溉者于是遣都水监丞耿琬淤河东路田

【熙宁中程昉悉陈淤田之利然损多益少或事

半而废或成而复隳故不具载云】 哲宗元佑四年诏濒河州县积水占田在任官能为民沟畎疏导退出良田百顷至千顷以上者递赏之功

利大者取特旨干道七年委御前诸军统制吴玠经理兴元府山河堰发卒万人修浚大小渠六十五溉南郑褒城田二十三万余亩四川宣抚

王炎表称玠宣力最多诏书褒美淳佑中参政程伯大命知长溪县黄恪修营田陂灌溉长溪一县制帅颜颐仲浚定海西市抵鄞桃花渡六十

里以复故河灌溉田畴民蒙其利名曰颜公渠宁德县令李泽民躬率僚佐鳩工作堤过东山之水田无旱涝之虞邑人德之号李公堤

△辽

辽道宗清宁十年禁南京决水大安四年禁民挟私引水犯田

△金

金章宗时诏郡县有河者皆开渠引水溉田中都路言安肃定兴二县可引河溉田诏行之先是傅慎微权陕西诸路转运使修三白龙首

等渠以溉田募民屯种卢庸为定平令治旧堰引泾水溉田民赖其利明昌六年定制县官任内有能兴水利田百顷以上升本等首注除穆昆

所管屯田创增三十顷以上赏银绢二十两匹承安二年敕放白莲潭东闸水与百姓溉田三年命勿毁高粱河闸从民灌溉泰和八年诏诸路

按察使规画水田因劝农按问开河或掘井如何为便规画具申以俟兴作宣宗贞佑三年谕尚书省岁旱议弛诸处碾碓以其水溉民田禁随

朝职官夺民碾碓以自营利四年言事者程渊言碓山诸县陂湖水至则畦为稻田水退种麦所收倍于陆地宜募人佃之官取三之一岁可得

十万石从之兴定五年南阳令李国瑞创开水田四百顷诏升职二等仍录其最状徧谕诸道于是议兴水田省臣奏河南郡县多古所开水

田之地宜敕令分治户部按行州郡有可开者诱民赴功其租止依陆田不复添征仍以官赏激之陕西除三白渠设官外亦宜视例施行元光

元年正月遣户部郎中杨大有等诣京东西南三路开水田

△元

元制内立都水监外设各处河渠司兴举水利修理堤埧太宗十二年令梁泰充宣差规措三白渠使郭时中副之修三白渠世祖中统元

年怀孟路岁旱总管谭澄令民凿塘造渠引沁水以溉田二年诏提举王允中开沁河渠经济源河内河阳温武陟五县名广济渠允中又请开

邢洺等处济滏澧河达泉以溉民田至元初张文谦行省中兴路修复唐来汉延各渠灌田十数万顷后诏诸路开复水利敕巴图军于齐鲁纳

之地开渠耕田导肥河入于鄠淤陂尽为良田浚奇拉尔河以溉袞诺尔黄土山民田西夏行省郎中董文用开秦家等渠垦中兴西凉甘肃瓜沙等州之土为水田平阳总管郑鼎导汾水溉民田千余顷荆南行省廉希宪决江陵城外蓄水得良田数万亩武宗至大初右丞相哈喇哈斯出镇和琳浚古渠溉田数千顷至正时右丞相托克托言京畿近水地利召江南人耕种岁可收粟麦百万余石不烦海运而京师足食于是立分司农司于河闲保定等处引水立法佃种中书省议于江浙淮东召募能种水田及修筑围堰之人各一千名为农师教民播种降空名添设职事故牒一十二道遣使赍往其地有能募农民一百名者授正九品二百名者正八品三百名者从七品即书填流官职名给之领管所募农夫期年散归是岁大稔

△明

明太祖立国之初设营田司专掌水利洪武中命长兴侯耿炳文浚泾阳洪渠堰溉泾阳以下田二百余里决荆州岳山坝以灌民田浚鄆县东钱湖灌田数万顷又特遣国子监生分行天下督吏民修水利成祖永乐元年户部尚书夏原吉奏浙西诸郡皆环太湖浦港堙塞宜于疏浚按禹贡三江入海之迹相度地势各置石闸以时启闭遇水涸之时修筑圩岸以御暴流诏从其言治之逾年而成农田大利于是诏工部安徽苏松浙江江西湖广凡湖泊卑下圩岸倾颓令有司修治濒江濒湖之郡建圩修塘者以时兴举英宗正统五年令天下有司秋成时疏浚陂塘以便农作于时兴水利者宁夏巡抚金濂疏鸣沙州七星汉伯石灰三渠溉田千三百余顷芜湖弋阳海阳诸县皆浚旁郡陂湖世宗嘉靖二十六年给事中陈斐请仿江南水田法开江北沟以祛水溢益岁收报可三十八年尚书杨博请开宣大荒田水利从之神宗万历中给事中徐贞明上水利议谓陕西河南故渠废堰在在有之山东诸泉引之率可成田畿辅诸郡或支河所经或涧泉自出皆足以资灌溉今顺天真定河闲诸郡桑麻之区半为沮洳永平滦州沧州庆云地皆萑苇土实膏腴若招徕南人俾之耕艺北起辽海南滨青齐皆良田也俟有成绩次及河南山东陕西庶东南转漕可减西北储蓄常充事下所司朝议以水田劳民请俟异日贞明以事谪官着潞水客谈一书论水利当兴之事于是顺天巡抚张国彦副使顾养谦行之蓟州永平丰润玉田皆有效给事中王敬民荐贞明乃进尚宝少卿兼御史赐敕勘水利贞明先治京东州邑不及一年垦田三万九千余亩又遍历诸河穷源竟委将大兴疏浚而奄人勋戚之占闲田为业者恐水利兴而已失其利为蜚语闻于帝御

史王之栋遂言水利不可行而水田遂罢三十年保定巡抚汪应蛟在天津见葛沽白塘诸田尽为污莱营作水田当必有利募民垦田五十亩为水田者十之四亩收至四五石移保定疏请广兴水利言臣境内诸川俱可灌溉请通渠筑防量发军夫一准南方水田之法行之所部六府可得田数万顷工部尚书杨一魁亟称其议报可愍帝崇祯二年兵部侍郎申用懋言永平滦河诸水逶迤宽衍可疏渠以防旱潦宜令有司相度其地为民兴利从之

钦定续通志卷一百五十二

●钦定续通志卷一百五十三 食货略二

食货略 【二】

屯田

赋税

○屯田

唐

宋

辽

金

元

△唐

唐宪宗元和中振武军饥宰相李绛请开营田可省度支漕运及绝和籴欺隐宪宗称善乃以韩重华为振武京西营田和籴水运使起代北垦田三百顷出贖罪吏九百余人给以耒耜耕牛假种粮使偿所负粟二岁大熟因募人为十五屯每屯百三十人人耕百顷就高为堡东起振武西逾云州极于中受降城垦田三千八百余顷岁收粟二十万石文宗太和末王起奏灵武邠窳土广肥而民不知耕宜立营田后邠窳节度使毕誠亦募士开营田岁收三十万斛

△宋

宋太宗端拱中知雄州何承矩言宜因积潦蓄为陂塘大作稻田以足食诏以承矩为制置河北沿边屯田使发诸州镇兵一万八千人给其役凡雄郑霸州平戎顺安等军兴堰六百里置斗门引淀水灌溉知襄州耿望请于旧地括荒田置营田上中下三务调夫五百筑堤堰集邻州兵每务二百人种稻三百余顷陕西转运使刘综亦言宜于古原州建镇戎军置屯田今本军刍粮茶盐转输之用浩繁请于军城四面立屯田务又于军城前后各置堡砦分居其人无寇则耕寇来则战命知军为屯田制置使择

使臣充四砦监押每砦五百人充屯戍从之是时兵费
浸广言屯营田者辄诏边臣经度行之顺安军兵马都监马济请于靖戎军东壅鲍河开
渠入顺安威虜二军置水陆营田知保州赵彬复言决
鸡距泉分徐河水注运渠广置水陆屯田然河北诸处屯田岁入无几利在蓄水以限戎
马而已真宗天禧末诸州屯田总四千二百余顷熙宁
五年知延州赵高请募民耕陕西旷土以纾朝廷输送括地得万五千余顷募汉蕃兵几
五千人八指挥诏迁高官赐金帛知熙州王韶请以
河州蕃部近城川地招弓箭手以山坡地招蕃兵弓箭手每砦五指挥以二百五十人为
额人给地一顷蕃官二顷或三顷不等于是熙河多良
田诏委提点秦凤路刑狱郑民宪兴营田许辟奏官属以集事神宗元丰二年提举熙河
营田康识言新复土地乞命官分画经界选知田厢军
人给一顷耕之余悉给弓箭手人加一顷有马者又加五十亩四砦堡见缺农作厢军许
于秦凤泾原熙河三路选募厢军及马递铺卒愿行者
人给装钱二千诏皆从之知太原府吕惠卿疏请葭芦米脂及河外三州荒闲之地皆垦
辟以贍军用可以免远输贵余困公之弊俟财力稍丰
又通葭芦之道于麟州之神木其横山膏腴之地皆为我于是雇五县耕牛耕新疆葭
芦吴堡闲得地五百余顷麟府丰州地七百三十顷弓
箭手与民之无力及异时两不耕者又九百六十顷高宗绍兴元年知荆南府解潜奏辟
宗纲樊宾措置屯田诏除宗纲充荆南府归峡州荆门
公安军镇抚使司措置五州营田官樊宾副之南渡后营田盖始于此其后荆州军食仰
给省县官之半焉继后汉阳军镇抚使陈规亦仿古作
屯田相险隘立堡砦且守且耕诏江东西宣抚使韩世忠措置建康营田如陕西弓箭手
法其淮南川陕荆襄皆创置屯田光宗绍熙元年知和
州刘炜以剩田募民充万弩手分耕熈宗嘉定七年以京西屯田募人耕种十三年四川
宣抚安丙总领任处厚言初绍兴十五年诸州共垦田
二千六百五十余顷饷所屯将兵罢民和余为利可谓博矣孝宗干道四年以后屯兵归
军教阅而营田付诸州募佃遂失其利骄将豪民乘时
占据其弊不可殫举今豪强移徙田土荒闲正当播种之秋合自总领所与宣抚司措置
其逃绝之田关内外亦多有之为数不费其利不在营
田之下乞并括之理宗端平八年以臣僚言屯五万人于淮之北且田且守置屯田判官
一人经纪其事暇则散以骑射理宗嘉熙四年孟珙为
四川宣抚司令流民于边江七十里内分田以耕遇警则用以守江于边城三五十里内
亦分田以耕遇警则用以守城在砦者则耕四野之田
而用以守砦

△辽

辽太宗会同五年正月诏以契丹分屯南边兴宗重熙中西番多叛欲为守御计命耶律唐古督耕稼以给西军唐古率众田庐胥河侧岁登上熟移屯镇州又诏选南北府兵富者援山西路余令屯田于天德军

△金

金制屯田户佃官地者有司移明安穆昆督之太祖收国二年二月遣完颜昱及宗雄分诸路明安穆昆之民万户屯泰州以博勒郭统之赐耕牛五十太宗天会九年宗叙请募贫民戍边屯田给以廩粟诏新徙戍边户乏耕牛者给以官牛章宗明昌二年敕当军人所受田止令自种力不足者许人承佃泰和以后频年有征伐事迁河北军于河南或括官田或括牧马地以给军议者纷纷法亦屡更而愈紊焉

△元

元太祖十六年舒穆鲁拜达勒为霸州等路元帅镇守固安水寨令军士屯田且耕且战披荆棘立庐舍数年之闲城市悉完为燕京外蔽宪宗二年以时有宋兵立经略司于汴置屯田万户屯田唐邓等州世祖中统三年调枢密院二千人于东安州南永清县东荒地及本卫元占牧地立屯开耕为左卫屯田又调本卫军二千人于永清孟津等处开耕为右卫屯田继后涿州霸州等处为武卫屯田武清香河等处为中卫屯田保定涿州等处为前卫屯田昌平等处为后卫屯田清州等处为左右钦察卫屯田又以蒙古侍卫军人及鄂端伯什巴里回还汉军及大名卫辉两翼新附军与前后二卫迤东还戍士卒屯田于大都路为左翼屯田发真定军人于武清崔黄口屯种为右翼屯田又以各万户府摘大同隆兴太原平阳等军于音扎噶齐勤地及红城周围开耕为忠翊卫屯田皆隶于枢密院世祖至元二年诏西川山东南京等路戍边军屯田又以河南北荒田给蒙古军耕种七年因东征日本积粮饷为进取计遂以高丽户及发中卫等军立屯田于王京东宁府凤州等十一处后于四川各路置屯田在潼川府夔路总管府顺庆路成都路广元路绍庆路嘉定路者皆为民屯崇庆州成都路顺庆万户府保宁万户府广安万户府者皆为军屯陕西则栌阳等处为民屯凤翔整屋等处为军屯甘肃则宁夏等处为军屯塞外则和琳清噶玛尼齐巴达克山皆置屯田焉云南则大理金齿鹤庆路中庆曲靖澄江澄德临安威楚建昌会川德昌乌撒等路皆有军民屯田广西则上浪忠州藤州诸处皆有军民屯田其军民屯皆属行中书省所辖 【按元初用兵征讨遇坚城大敌必屯田以守之海内既一于是内而各卫外而行省皆立屯田以资军饷

或因古之制或以地之宜或为一时权宜之制极于云南八番海南海北虽非屯田之所而以为蛮夷腹心之地则又因制兵屯旅以控扼之由是天下无不可屯之兵无不可耕之地屯政之详屯田之多前代莫比焉】 明制亦分军民屯太祖洪武六年太仆丞梁额森特穆尔 【梁系明初赐姓】 言宁夏境内及四川西南至船城东北至塔滩相去八百里地土膏沃宜招集流亡屯田从之是时遣邓愈汤和诸将屯陕西新德汝宁北平永平徙山西真定民屯凤阳于是天下皆事垦辟其制移民就宽乡或召募或罪徙者为民屯皆领之有司军屯则领之卫所边地三分守城七分屯种内地二分守城八分屯种每军受田五十亩为一分给耕牛农具成祖永乐中定例屯军以公事妨农务者免征子粒且禁卫所差拨于时东自辽左北抵宣大西至甘肃南尽滇蜀极于交址中原则大河南北在在兴屯宣宗宣德中迤北来归就屯之人给车牛农器景帝时边方多事令兵分为两番六日操守六日耕种英宗正统以后屯政稍弛屯田多为内监军官占夺法尽坏然明代屯政惟商屯为善其法募盐商于各边开种谓之商屯至孝宗弘治中叶淇变法诸淮商悉撤业归西北商亦多徙家于淮边地为墟而商屯之政亦遂废云 【商屯之法详见盐法】

○赋税

唐

宋

辽

金

元

明

△唐

唐自肃宗至德以后国用不足率多重敛德宗时赵赞请税闲架算除陌其法屋二架为闲上闲钱二千中闲一千下闲五百除陌法分私贸易千钱旧算二十加为五十物两相易者约直为率民益愁怨后乃罢之宪宗时分天下之赋以为三一曰上供二曰送使三曰留州宰相裴垍令诸道节度观察调费取于所治州不足则取于属州属州送使之余与其上供者皆输度支后五代梁受唐禅两税之法咸因唐制后唐庄宗同光二年敕历代除桑田正赋外祇有盐茶铜铁出山泽之利有商税之名其余诸司无税额伪朝已来通言杂税有形之类无税不加为弊颇深今军需尚重国力未充犹且权宜未能全去见简天下桑田正税除三司上供既能

无漏则四方杂税必可尽除仰所司速简勘天下州府
户口正额垦田实数待凭条理以息烦苛是时吏部尚书李琪上疏请两税不以折纳为
事不以纽配为名止以正税加纳敕本朝征科唯有两
税至于折纽比不施为宜依李琪所论应逐税合纳钱物斛斗及盐钱等宜令租庸司指
挥并准元准本色输纳不得更改晋高祖天福元年敕
应诸道州府所征百姓正税斛斗钱帛等除关系省司文帐外所在州府并不得以私增
添纽配租物七年礼部郎中李为光上封事为诸州府
仓场逐年所纳百姓秋夏租加耗颇多乞行条理敕所司明行条理俾绝侵渔使税额无
亏户口获济斯为急务要在颁行便可散下诸州严诫
主者尽令遵守毋使因循周广顺三年敕青州在城及诸县镇乡村人户等朕临御已来
安民是切务除疾苦俾遂苏舒据知州合门使张凝近
奏陈八事于人不便积久相承宜降指挥并从改正其一属州营田后槽两务所管课利
斛斗钱物人户牛具屯官等宜并割属州县官旧额税
课其务及职员并废其课额内有红花紫草菜淀麻据时估纳钱其系官桑土牛具什物
并赐见佃人为永业其二省司元纳夏秋税匹段每匹
纳十钱每贯七钱丝绵絁线每一两纳耗半两粮食每石纳耗一斗此外别无配率其三
刘铕在任时于苗亩上征车脚钱每顷配柴炭今后并
止绝其四四川司每年配和买秆草及苦营草今后并止绝其五所征食盐钱每贯别纳脚
钱今后并止绝其六别征进奏院粮课钱及递铺钱今
后并止绝要即于州司公用钱内支遣其七州司配啖马药及泛配药又县镇科配石炭
红花紫草今后并止绝不得配率又州司于夏苗上配
纳麦面今后据州合用多少量于近县配纳不得遍据州县其八旧例州县供纳夏秋租
税皆毕顷追人吏到州勘会此后止绝税无欠少不得
追集县吏其属郡淄登莱等州亦宜照青州例施行世宗显德三年宣三司指挥诸道州
府今后夏税以六月一日起征秋税以十月一日起征
为定制

△宋

宋制岁赋其类有五曰公田之赋凡田之在官赋民耕而收其租曰民田之赋百姓
各得专之曰城郭之赋宅税地税之类曰丁口之赋百
姓岁输身丁钱米曰杂变之赋牛革蚕盐之类随其所出变而输之岁赋之物其类有四
谷帛金铁物产谷则粟稻麦黍稷菽杂子帛则罗绫绢
纱絁絁杂折丝线绵布葛金铁则金银铁镞铜铁钱物产则六畜齿革翎毛茶盐竹本麻
草刍菜果药油纸薪炭漆蜡杂物太宗自克平诸国每
以恤民为先务累朝相承凡无名苛细之敛悉革一遇水旱徭役则蠲除其兼并冒伪未

尝考按故赋视前代为薄仁宗天圣时以州县言税之
苛细无名者蠲损甚众自唐以来计田输赋外增取他物复折为赋谓之杂变亦谓之沿
纳名品烦细其类不一官司岁附帐籍并缘侵扰明道
中帝诏三司以类并合于是悉除诸名品百姓便之庆历中以州县赋役之烦诏诸路上
其数俾二府大臣合议蠲减诏曰税籍有伪书逃徙或
因推割走移或请占公田而不输税县令佐能究见其弊以增赋税量数议赏谏官王素
言天下田赋轻重不等请均定欧阳修言秘书丞孙琳
尝往洛州肥乡县与大理寺丞郭谠以千步方田法括定民田愿诏二人任之于是遣谠
往蔡州谠括一县得田二万六千九百三十余顷均其
赋于民既因谠言州县多逃田未可尽括罢之皇佑中诏广西赋布匹为钱二百又损开
封诸县田赋视旧额十之三初湖广闽浙因旧制岁敛
丁身钱米真宗大中祥符闲诏除丁钱而米输如故天圣中并除婺秀二州丁钱后庞籍
请罢漳泉兴化军丁米有司持不可皇佑三年帝命三
司减郴永州桂阳监丁米以最下数一岁为准岁减十余石既而漳泉兴化亦第损之
嘉靖四年复命转运司裁定郴永桂阳衡道州所输丁
米及钱绢杂物无业者弛之有业者减半南渡以后赋税烦多右承议郎前知宜兴县鲁
冲上书论郡邑之弊以宜兴一县言之漕计合收有丁
盐坊场课利钱租地钱租丝租纴钱岁入不过一万五千余缗其发纳之数有大军钱上
供钱余本钱造船钱军器物料钱天申节银绢钱岁支
不啻三万四千余缗又有见任寄居官请奉过往官兵批券督索拖欠畧无虚日于是屡
诏蠲除孝宗隆兴二年知赣州赵公称以宽剩钱为民
代输夏税是后守臣时有代输者淳熙三年臣僚言湖北百姓广占官田量输常赋似为
过优比议者欲从实起税而开陈首之门殊不思朝廷
往年经界独两淮京西湖北依旧盖以四路被边土广人稀诱之使耕犹惧不至若履亩
而税孰肯远徙力耕以供公上之赋哉今湖北唯鼎澧
地接湖南垦田稍多自荆南安复岳鄂汉沔沔莱弥望户口稀少且江南狭乡百姓远求
请佃以田亩宽而税赋轻也若从议者之言恐于公家
无一毫之益而良民有无穷之扰矣宜诱其开耕不必增税使田畴尽辟岁收滋广一遇
丰稔平糶以实边则所省漕运亦博望依绍兴十六年
诏旨以十分为率年增输一分不愿开垦者即许退田别佃期限稍宽取之有渐远民安
业一路幸甚诏户部议之光宗绍熙元年臣僚言古者
赋税出于民之所有不强其所无今之为绢者一倍折而为钱再倍折而为银银愈贵钱
愈艰得谷愈不可售使民贱粟而贵折则大熟之岁反
为民害愿诏州郡凡多取而多折者重置于罚民有粟不售者令常平就糶异时岁歉平

价以糗庶于民无伤于国有补诏从之至杂税之兴南渡后唯四川最多高宗建炎四年尽起元丰以来诸路常平司坊场钱又次科激赏绢又次奇零绢估钱又次布估钱又次常平司积年本色又次对余米皆于常赋外岁增之军储稍充而民始困六年都官员外郎冯康国言四川地狭民贫祖宗时正税重者折科稍轻正税轻者折科稍重二者平准民甚安之近年漕总二司辄更旧法反复纽折取数务多致民弃业逃移望并罢之一道旧制诏如所请

△辽

辽太祖任韩延徽始制国用太宗籍五京户丁以定赋税其市并之赋各归头下军州

△金

金制官地输租私田输税其田分为九等而差次之夏税亩取三合秋税亩取五升又纳秸一束束十有五斤屯田户佃官地有司移明安穆昆督之凡输送粟麦三百里外石减五升以上每三百里递减五升粟折秸百称者百里内减三称二百里减五称不及三百里减八称三百里及输本色稊草各减十称计民田园邸舍车乘牧畜种植之资藏镪之数征钱有差谓之物力钱遇差科必按版籍有横科均科桑被灾不能成蚕则免丝绵绢税诸路雨雪及禾稼收获之数月以捷步申户部叙使品官之家并免杂役验物所当输者止出雇钱输纳凡有出身不兴齐民等者皆免一身之役世宗大定三年诏曰朕比以元帅府便宜行事今闻陕西河南山东北京以东及北边州郡调发甚多省部又与他州一例征取赋役是重扰也可凭元帅府已取者例蠲除之后尚书省奏两路田多峻陂硠瘠者往往再岁一易若不以地等级蠲除则有不均遂敕特免一分外中田复减一分下田减二分旧制夏秋税纳麦粟草三色以各处所输之物不一户部复令以诸所用物折纳乃命太府监应折纳之物为祇承宫禁者治黄河薪刍增直二钱折纳黄河岸所用木石非土产令所属计置罢他应折纳者

△元

元制取于内郡者仿唐租庸调之法曰丁税曰地税取于江南者仿唐两税法曰秋税曰夏税自太宗始行之太宗初制每户科粟二石后以兵食不足增为四石至丙申年乃定科征之法令诸路验民成丁之数每丁岁科粟一石驱丁五升闲有耕种者或验其牛具之数或验其土地之等征之丁税少而地税多者纳地税地税少而丁税多者纳丁税岁书其数于册由课税所申省以闻世祖至元十七年命户部大定诸例

全科户丁税每丁粟三石驱丁粟一石地税每亩粟三升减半科户丁税每丁粟一石新收交参户第一年五斗因年递加之地税亦每亩税三升其输仓粟每粟一石折纳轻赍钞二两后因姚元之请命江南税粮依宋旧例折输绵绢杂物继又用耿左丞言令输米三之一余并以钞折焉成宗元贞二年始定征江南夏税之制于是秋税止命输租夏税则输以木绵布绢丝绵等物唯湖广则罢宋夏税改科门摊泰定初有设助役粮其法命江南民户有田一顷之上者于所输税外每顷量出助役之田具书于册里正以次掌之岁收其入以助充役之费焉其科差之法有二曰丝料曰包银各验户之上下而定其数丝科之法太宗丙申年始行之每二户出丝一斤并随路丝线颜色输于官五户出丝一斤并随路丝线颜色输于本位包银之法宪宗乙卯年始定之初汉民科纳包银六两后止征四两二两输榷二两折收丝绢颜色等物世祖中统以后复定户籍科差条例有元管户交参户漏籍户协济户诸户之中又有丝银全科户减半科户止纳丝户止纳钞户外又有摊丝户其丝料包银之外又有俸钞之科其法亦以户之高下为等全科户输一两减半户输五钱大德六年又命止输丝户每户科俸钞中统钞一两包银户每户科二钱五分摊丝户每户科摊丝五斤八两

△明

明太祖即位之初定赋役法一以黄册为准有丁有田丁有役田有租租曰夏税曰秋粮役有里甲有均徭有杂泛以户计曰甲役以丁计曰徭役上命非时曰杂役皆有力役有雇役其两税洪武时夏税有米麦有钱钞有绢秋粮有米有钱钞有绢孝宗弘治时会计之数夏税有大小米麦有麦苽有丝绵并荒丝有税丝有丝绢折绢有税丝折绢有本色丝有农桑丝折绢有农桑零丝有人丁丝折绢有改科绢有棉花折布有苧布有土苧有红花有麻布有钞有租钞有税钞有原额小绢有币帛绢有本色绢有绢有折色丝秋粮有米有租钞有赁钞有山租钞有租丝有租绢有租粗麻布有课程绵布有租苧布有牛租半谷有地亩棉花绒有枣子易米有枣株课米有课程苧麻折米有绵布有鱼课米有改科丝折米神宗万历时小有所增损大畧以米麦为主而丝绢与钞次之初制赋法天下官民田赋凡官田亩税五升三合民田减二升万历时始有事于加派役法初制按田出丁后皆金有力之家名曰大户而初法亦渐弛云

钦定续通志卷一百五十三

●钦定续通志卷一百五十四 食货略三

食货略 【三】

历代户口丁中

钱币

○历代户口丁中

（臣）等谨案郑氏通志沿通典之例户口丁中列为两门而丁中仍杂以户口未能条分缕析今谨依马氏通考之例合户口丁中为一门凡正史所载以及他书之可以援据者备为摭摭详列于左又按丁中之义唐制十六为中二十一为丁后各朝有可考者宋时以二十为丁己与唐少异金则以十六为中十七为丁明代民始生籍其名曰不成丁年十六曰成丁较前代之法又不同云

唐

五代

宋

金

元

明

△唐

唐宪宗元和时户二百四十七万三千九百六十三六年制自定两税以来刺史以户口增损为其殿最故有析户以张虚数或分产以系户兼招引浮客用为增益至于税额一无所加徒使人心易摇土著者寡观察使严加访察必令诣实穆宗长庆时户三百九十四万四千五百九十五敬宗宝历时户三百九十七万八千九百八十二文宗开成四年户四百九十九万六千七百五十二武宗会昌时户四百九十五万五千一百五十一元年正月制安土重迁黎民之性苟非艰窘岂至流亡将欲招绥必在资产诸道频遭灾沴州县不为申奏百姓输纳不办多有逃移长吏惧在官之时破失人户或恐务免正税减克料钱祇于现在户中分外摊配亦有破除逃户桑地以充税钱逃户产业已无归还不得见户每年加配流亡转多自今以后应州县开成五年以前观察使刺史差强明官就村乡诣实检会桑田屋宇等仍敕令长加检校租佃与人勿令荒废据所得与纳户内正税有余即官为收贮待归还给付如欠少即与收破至归还日不须征理自今己后二年不归复者即仰县司召人给付承佃仍给公凭任为永业其逃户钱草斛斗等计留使钱物合十分中三分已上者并仰于当州当使杂给用钱内方圆权落下不得克正员官吏料钱及馆驿使料递乘作人课等钱仍任大户归还日渐复元额

△五代

周太祖广顺三年敕天下县邑素有等差年代既深增损不一其中有户口虽众地望则卑地望虽高户口至少每至调集不使铨衡宜立成规庶协公共应天下州府及县除赤县畿县次赤次畿外其余三千户以上为望县二千户以上为紧县一千户以上为上县五百户以上为中县不满五百户为中下县宜令所司据今年天下县户口数定望紧上中下次等奏闻户部据今年诸州府所管县户数目定为望县六十曰紧县七十上县一百二十四中县六十五下县九十七

△宋

宋太祖建隆元年户九十六万七千三百五十三千德元年令诸州岁奏男夫二十为丁六十为老女口不预开宝四年诏曰朕临御以来忧恤百姓所通抄人数目寻常别无差徭只以春初修河盖是与民防患而闻豪要之家多有欺罔并差贫阙岂得均平特开首举之门明示赏罚之典应河南大名府宋亳宿颍青徐兖郓曹沂濮蔡陈许汝邓济卫淄潍滨棣沧德贝冀澶滑怀孟磁相邢洺镇博瀛莫深扬泰楚泗州高邮郓所抄丁口宜令逐州判官县令佐子细通检不计主户中客小客尽底通抄差遣之时所冀共分力役敢有隐漏令佐除名典吏决配募告者以犯人家财赏仍免三年差役太宗雍熙元年令江浙荆湖广南民输丁钱以二十成丁六十入老并身有疾废者免之真宗大中祥符四年诏除两浙福建荆南广南旧输身丁钱凡四十五万四百贯天禧五年天下主客户八百六十七万七千六百七十七口一千九百九十二万三千二百二十诏诸州县自今招徕户口及创居入中开垦荒田者许依格式申入户口籍无得以客户增数仁宗天圣七年天下主客户一千一十六万二千六百八十九口二千六百五万四千二百三十八英宗治平三年天下主客户一千二百九十一万七千二百二十一口二千九百九万二千一百八十五神宗熙宁八年天下主客户一千五百六十八万四千五百二十九口二千三百八十万七千一百六十五元丰六年天下主客户一千七百二十一万一千七百一十三口二千四百九十六万九千三百高宗绍兴三十年天下主客户一千一百三十七万五千七百三十三口一千九百二十二万九千八 【按仁宗为宋全盛之时主客户仅一千一十六万余高宗南渡后河北州府俱入于金户至一千一百三十七万较天圣时转多而口则少七百余万殊不可解然史志与文献通考所载悉同或系记载之误今仍原文纂辑附识于此】 孝宗干道二年诸路主客户一千二百三十三万五千四百五十二口二千五百三十七万八千六百八十四光宗绍熙四年诸路主客户一千二百三十万

二千八百七十三口二千七百八十四万五千八十五
宋宗嘉定十六年诸路主客户一千二百六十七万八千一百一十二
开禧三年正月令两淮帅守招集流民嘉定二年诏两淮荆襄守令以户口多寡为殿最理宗景定五年两浙江东西湖南北广东西福建成
都京西潼川夔利路户五百六十九万六千九百八十九口一千三百二万六千五百三十二
辽建五京幅员万里其户丁之可见者有五京乡丁诸宫卫户丁之目五京乡丁者临潢为上京丁一十六万七千二百辽阳为东京丁四万一千四百辽西为中京丁籍莫考可见者高州三韩一县丁一万蕃汉转户为多析津为南京丁五十六万六千大同为西京丁三十二万二千七百诸宫卫户丁者太祖曰弘义宫正户八千转户七千正丁一万六千转丁一万四千太宗曰永兴宫正户三千转户七千正丁六千转丁一万四千世宗曰积庆宫正户五千转户八千正丁一万转丁一万六千应天皇太后曰长宁宫正户七千转户六千正丁一万四千转丁一万二千穆宗曰延昌宫正户一千转户三千正丁二千转丁六千景宗曰彰愍宫正户八千转户一万正丁一万六千转丁二万承天太后曰崇德宫正户六千转户一万正丁一万二千转丁二万圣宗曰兴圣宫正户一万转户二万正丁二万转丁四万兴宗曰延庆宫正户七千转户一万正丁一万四千转丁二万道宗曰太和宫正户一万转户二万正丁二万转丁四万天祚帝曰永昌宫正户七千转户一万正丁一万四千转丁二万孝文皇帝弟曰敦睦宫正户三千转户五千正丁六千转丁一万文忠王府正户五千转户八千正丁一万转丁一万六千五京府十二宫户丁固得若干数焉太祖即位亲征西部奚下之复分兵平东部奚于是尽有奚霫之地东际海南暨白檀西踰松漠北抵潢水凡五部咸入版籍神册元年平突厥吐浑党项小蕃沙陀诸部至八月拔朔州十一月攻蔚新武妯儒五州俘获不可胜计自代北至河曲踰阴山尽有其地天赞元年十月以户口滋繁纪辖疏远分北达努哈为二部立两节度以统之三年六月大征吐浑党项等部击索欢纳山东部族破之遣骑攻卓木布略地西南又破呼穆苏山诸蕃部又遣兵踰流沙拔浮图城西鄙诸部悉为辽有天显元年平渤海地方五千里五京十五府六十二州尽有其众国境益大太宗大同元年四月俘晋主重贵凡归顺七十六处得户一百九万一百一十八景宗保宁三年十一月牖胸河裕悦阿延聂咾等率户四百来附乞隶宫籍诏留其户分隶敦睦积庆永兴三宫圣宗统和七年宋鸡壁砦守将郭荣率众来降砦民二百户徙居檀顺蓟三州复分八户隶飞狐十五年三月通括宫分人户二

十一年十一月通括南院部民开泰二年四月诏以韩斌所括瞻国塔鲁河奉豪等州户二万五千有奇置长霸兴仁保和等十县道宗大安三年二月以岁饥民多流散除安泊逃户征偿法

△金

金制户有数等有课役户不课役户本户杂户正户监户官户奴婢户二税户有物力户为课役户无者为不课役户女真为本户汉人及契丹为杂户明安穆昆之奴婢免为良者止隶本部为正户没入官良人隶宫籍监者为监户没入官奴婢隶太府监者为官户户以五家为保焉太祖天辅二年通祺双辽等州八百余户来归命分置诸部择膏腴之地处之七月辽户二百来归处之泰州又诏达啰克部贝勒锡林凡降附新民善为存抚来者各令从便安居给以官粮毋辄动扰五年以境土既括旧部多瘠鹵移其民于泰州先遣皇弟昱及族子宗雄按视其地昱等直其土以进言可种植遂摘诸明安穆昆中民户万余使宗人博勒和统之七年二月取燕京路尽徙六州氏族富强工技之民于内地太宗天会元年徙迁润来隰四州之民于浑州以新迁之户艰苦不能自存诏民乏食鬻子者听以丁力等者赎之二十年令明安穆昆人户与汉人错居至其户口之数世宗大定二十三年明安二百二穆昆千八百七十八户六十一万五千六百二十四口六百一十五万八千六百三十六在都宗室将军司户一百七十口二万八千七百九十塔喇唐古二部五纛户五千五百八十五口十二万七千五百四十四二十七年户六百七十八万九千四百四十九口四千四百七十万五千八十六章宗明昌元年户六百九十三万九千口四千五百四十四万七千九百六年天下女真契丹汉户七百二十二万三千四百口四千八百四十九万四百七年户七百六十八万四千四百三十八口四千五百八十一万六千七十九户增于大定二十七年一百六十二万三千七百一十五口增八百八十二万七千六十五此金版籍之极盛也

△元

元初算赋之制中原以户西域以丁蒙古以马牛羊至世祖定户籍之制则有元管户交参户漏籍户协济户于诸户之中又有丝银全科户减半科户止纳丝户止纳钞户太宗五年八月括中州户得户七十三万余八年初定中原户赋宪宗二年立儒人免丁之令中原凡业儒者试通一经即不同编户世祖中统元年立十路宣抚司定户籍凡元管交参等户籍皆于此定时定二年六月括漏籍老幼等户协济编户赋税八月核实新增户口措置诸路转输法至元六年二月免单丁贫乏军士一千九百余户为

民六月免益都新金军单丁者千六百二十一人为民
至于诸蕃户之内附又见于至元十二年三月侧布蕃官税昔礮州蕃官庄寮男车甲等
率四十三族户五千一百六十诣四川行枢密院来附
十四年四月宋特磨道将军农士贵等以所属州县溪洞百四十七户二十五万六千来
附五月西蕃长阿立丁宝占等三十一族来附得户四
万七百十五年十一月攻漳州得山寨百五十户百万一十六年六月招忙木巨木秃等
寨三百籍户十一万二百七月西南八蕃罗氏等国来
附洞寨凡一千六百二十有六户凡十万一千一百六十有八二十六年三月金齿人寨
完以其民二十万一千户有奇来归六月西南夷中下
烂土等处洞长忽带等以洞三百寨百一十来归得户三千余七月四川山齐蛮民四寨
五百五十户内附二十九年二月斡罗思招附桑州生
猫罗甸国左州等峒酋长三十一所部民十二万九千三百二十六户诣阙贡献其内地
户口自至元十三年平宋通得江淮浙东西湖南北等
路户九百三十七万四百七十二口一千九百七十二万一千一十五十二月诏谕浙东
西江东西淮南北湖南北府州军县官吏军民昔以万
户千户渔夺其民致令逃散今悉以人民归之元籍州县凡管军将校及宋官吏有以势
力夺民产业者俾各归其主无主则以给付近人民之
无产者十九年二月籍福建户数九月籍云南新附民二十二年二月定京城民居时修
完大都城诏旧城居民之迁京城者以赏高及居职者
为先仍定制以地八亩为一分其或地过八亩及力不能作室者皆不得冒据听民作室
二十九年八月敕礼乐户仍与军站民户均输赋总之
世祖时之户口其中统二年天下户一百四十一万八千四百九十九至元十二年天
下户四百七十六万四千七七七二十八年户部上天
下户数内郡百九十九万九千四百四十四江淮四川一千一百四十三万八百七十八
口五千九百八十四万八千九百六十四游食者四十
二万九千一百一十八僧尼二十一万三千一百四十八人成宗大德三年七月放江南
僧寺佃户五十万为编民十一年十一月禁军站鹰坊
控鹤等户冒占编民泰定帝泰定元年七月罢广州福建等处采珠蚕户为民文宗至顺
元年户部钱粮户数一千三百四十万六百九十九视
前世又增二十万有奇矣

△明

明制户凡三等曰民曰军曰匠民有儒有医有阴阳军有校尉有力士弓铺兵匠有
厨役裁缝马船之类滨海有盐灶寺有僧观有道士毕
以其业着籍太祖洪武三年十一月诏户部籍天下户口置户帖十四年正月命天下郡

县编赋役黄册其法以一百一十户为里一里之中推丁粮多者十人为之长余百户为十甲甲凡十人岁役里长一人甲首十人董其事先后各以丁粮多寡为次每里编为一册是年天下户一千六十五万四千三百六十二口五千九百八十七万三千三百五十二年九月编军户图籍二十六年天下户一千六十五万二千八百七十七口六千五十四万五千八百一十二惠帝建文三年八月诏抚绥直隶淮安及北平永平河闲诸郡避兵流移复业者凡七万一千三百余户成祖永乐元年天下户一千一百四十一万五千八百二十九口六千六百五十九万八千三百三十七五年五月平安南得府州四十八县一百八十户三百十二万设交址布政司宣宗宣德三年四月招逃民复业时谕户部限各处逃徙人民三月内复业凡所负税粮悉与蠲免其有久居于彼产业已成者许令占籍仍命有司善加抚绥英宗正统元年令山西河南山东湖广陕西南北直隶保定等府州县造逃户周知文册天顺元年天下户九百四十六万六千二百八十八口五千四百三十三万八千四百七十六宪宗成化二年天下户九百二十万二千七百一十八口六千六十五万三千七百二十四十六年八月申存恤孤老之令先是成祖永乐三年二月巡按福建御史洪湛言存恤孤老王政所先今各府州县养济院多颓坏有司非奉勘合不敢修葺又或一县之内素无建置者乞敕有司常加修葺未建置者即建置之如例收养庶无告之民不致失所帝纳之至是复申命焉孝宗弘治四年天下户九百一十一万三千四百四十六口五千三百二十八万一千一百五十八武宗正德九年天下户九百一十五万一千七百七十三口四千六百八十万二千五世宗嘉靖元年天下户九百七十二万一千六百五十二口六千八十六万一千二百七十三穆宗隆庆六年天下户一千六十二万一千四百三十六口六千六十九万二千八百五十六熹宗天启元年天下户九百八十二万五千四百二十六口五千一百六十五万五千四百五十九此有明代户籍之大略也

○钱币

唐

五代

宋

辽

金

元

△唐

唐穆宗长庆元年敕泉货之义所贵流通如闻比来所在陌除不一今后不得更有加除武宗会昌六年敕缘诸道铁铸物像钟磬等所镕新钱已有次第须令旧钱流布绢价稍增文武百寮俸料并给见钱京城及诸道已后公私行用并取新钱【按新旧唐书食货志皆不载唐时用铁钱考唐会要会昌六年之敕则铁钱不独行于宋代也】

△五代

后唐庄宗同光二年敕令京师及诸道于市行使钱内检点杂恶铅锡并宜禁断明宗天成元年中书门下奏访闻诸道州府所买铜器为价甚贵多是销镕见钱以邀厚利宜遍告晓如原旧破损铜器许铸造器物其生熟铜俱令每州定价晋高祖天福三年诏曰国家所资泉货为重销蠹则甚添铸无闻宜令三京诸道州府无问公私应有铜者并许铸钱仍以天福元宝为文左环读之仍禁将铅铁杂铸诸道应有久废铜冶许百姓取便开炼除铸钱外不得接便别铸铜器又敕近来趋利之人销镕不已毁蠹日滋宜令盐铁使禁止私下打造铜器周太祖显德二年帝以县官久不铸钱而民间多销钱为器皿乃立监采铜铸钱其铜镜官中铸造于东京置坊货买许民收卖货贩朝廷及诸州见管法物军器旧用铜制及装饰者候经使用破坏即令改造不更用铜其有合使铜者奏取进止【按五代时钱币互用南唐主既失江北困于用兵锤谩请铸大钱文曰永通钱货后废韩熙载又铸铁钱故南唐钱有铜铁二等且五代又相承多用唐钱诸国割据者江南曰唐国通宝两浙河东自铸铜钱亦如唐制西川湖南福建皆用铁钱与铜钱兼行湖南文曰干封泉宝】

△宋

宋太祖初铸钱曰宋通元宝凡诸州轻恶小钱及铁鑱钱悉禁之太宗时铸淳化元宝钱作真行草三体书真宗天禧后凡铸铜钱有四监饶州曰永平池州曰永丰江州曰广宁建州曰丰国京师升鄂州南安军旧并有钱监杭州有宝兴监凡钱文皆用元宝而冠以年号及改号宝元元宝诏学士议因请改曰丰济元宝至后复以皇宋通宝为文仁宗庆历后复冠以年号迨军兴陕西移用不足始用知商州皮仲容议采洛南县红崖山虢州青水冶青铜置阜民朱阳二监以铸钱既而陕西都转运使张奎知永兴军范雍请铸大铜钱与小钱兼行奎等又请因晋州积铁铸小钱及奎徙河东又铸大铁钱于晋泽二州以助关中军用未几三司奏罢河东铸大铁钱而陕西复采仪州竹尖岭黄铜置博济监铸大钱朝廷因敕江南铸大铜钱而江池饶仪虢州又铸小铁钱悉辇致关中数州钱杂行

民闲盗铸者众钱文大乱物价翔踊于是奎复奏晋泽石三州及威胜军日铸小铁钱独留用河东而河东铁钱既行盗铸者获利诸弊悉至言者皆以为不便朝廷遣鱼周询欧阳修分察两路钱利害至庆历末命学士张方平宋祁御史中丞杨察与三司杂议时叶清臣复为三司使与方平先上陕西钱议曰关中用大钱本以县官取利甚多致奸人盗铸其用日轻比年以来皆虚高物估始增直于下终取偿于上县官虽有折当之名遂致亏欠之咎请以江南诸州大小钱皆权其轻重行之且罢官所置炉朝廷皆用其言盗铸始止徽宗宣和以后因东南钱额不敷乃令饶赣钱监铸小平钱高宗绍兴十五年置利州绍兴监二十八年命御府铜器千五百事付泉司大索民闲铜器告者有赏孝宗干道九年大江之西及湖广多毁钱杂以沙泥诏严禁之宁宗庆元三年禁铜器期两月鬻于官

△辽

辽初色勒迪为额尔钦以土产多铜始造铁币太祖龚而用之遂致富强以开帝业太宗置五冶太师以总四方铁钱晋高祖又献沿边所积钱以备军实景宗以旧钱不足于用始铸干亨新钱钱用流布圣宗凿大安山取刘守光所藏钱【按唐书及五代史皆载刘仁恭为卢龙节度使敛钱穴大安山藏之辽史食货志作刘守光考唐书藩镇列传及五代史刘守光传守光嗣节度使后专恣无忌不应有藏钱之事或系辽史之误谨识于此】散诸五计司兼铸太平钱新旧互用统和中又出内藏钱赐南京诸军司又以官钱宴享军士钱不胜数故东京所铸至清宁中方用是时诏诸路不得货铜铁以防私铸又禁铜铁卖于回鹘法益严矣道宗之世钱有四等咸雍太康大安寿隆皆因改元易名至其后国用不给禁民钱不得出境清宁九年禁民鬻铜太康十年禁毁铜钱为器天祚之世更铸干统天庆等新钱而上下穷困府库无余积矣至西辽耶律达什时复铸新钱仿辽初之制而异其篆

△金

金初用辽宋旧钱太宗天会末虽刘豫阜昌元宝亦用之至海陵正隆二年以议鼓铸禁铜越外界括民闲铜器陕西南京者输京兆他路悉输中都三年中都置钱监二东曰宝源西曰宝丰京兆置监一曰利用文曰正隆通宝与旧钱通用世宗大定元年用吏部尚书张中彦言命陕西路参用宋旧钱后寝不行诏陕西行户部并西路通检官详究其事皆言民闲用钱名与铁钱并用其实不为准数公私不便遂罢之十一年禁私铸铜镜旧有铜悉送于官十八年代州立监铸钱命镇威军节度使李天吉知保

德军事高季孙往监之而所铸班驳黑色不可用诏削
天吉季孙等官两阶解职更命工部郎中张大节吏部员外麻珪监铸文曰大定通宝胜
正隆之制二十年名代州监曰阜通设监正等官二十
九年曲阳县铸钱别为一监以利通为名设副监监丞等官给驿更出经营铜事后京府
及节度州增置流泉务凡二十一所章宗明昌初诸府
镇流泉务悉罢之泰和四年铸大钱一直十名泰和大钱五年欲增铸钱命百官议足铜
之术中丞孟铸谓销钱作铜及盗用出境者不止宜罪
其官太府监梁镗等乞采铜拘工以铸宰臣谓鼓铸未可速行其铜冶听民煎炼官为买
之民闲输铜器期以两月宣宗贞佑后用交钞号曰宝
券后更造号曰通货又改曰通宝

△元

元初悉用钞至武宗至大三年以尚书省言以铜钱与钞通行【按宋时交子会子
之制皆一时权宜金则宣宗时一沿用之改名曰钞
惟元代则盛行遂与钱通用焉】大都立资国院山东河东辽阳江淮湖广四川立泉货
监六产铜之地设提举司十九铸钱曰至大通宝【
按钱录元武宗时钱二品一至大通宝楷书一至元通宝西番篆书】后即不行仍行钞
法明初仍元之制亦兼用钞法【按明史食货志及
明会典明初钞甚通行永乐以后钞遂壅滞虽设门摊诸课专欲通行钞法而钞终不行
故遂重钱法而钞法仅存其名焉】太祖洪武初置宝
源局于应天府铸大中通宝钱与历代钱兼行江西等行省各置货泉局颁大中通宝大
小五等钱设官铸造又令户部及各行省铸洪武通宝
钱制凡五等有当十当五当三当二当一当十钱重一两余递降至一钱成祖永乐九年
令差官于浙江江西广东福建四布政司铸永乐通宝
钱英宗天顺四年令民闲除假钱锡钱外凡历代并洪武永乐宣德铜钱依数准使宪宗
成化中令内外课程俱钱钞中半兼收孝宗弘治元年
令京城九门都课宣课司顺天等八府并山东河南二布政司民闲食盐全收钞贯淮安
临清扬州苏州杭州九江等板闸船料钞关俱令钞钱
兼收送库支用世宗嘉靖二十八年议准军民交易将洪武永乐宣德弘治嘉靖制钱并
历代铜钱相兼行使禁私铸铅锡假钱三十二年令照
新式铸洪武至正德纪元九号钱【安宋后铸钱皆铸改元年号其兼铸前朝年号惟嘉
靖时有是令】后又令钱法行使悉依历代年号随
钱高下咸得通行但严禁销镕旧钱及新铸钱穆宗隆庆初钱法不行兵部侍郎谭纶言
欲富民必重布帛菽粟而贱银欲贱银必制钱法以济
银之不足今钱惟布于天下而不以输于上故其权在市井请令民得以钱输官则钱法

自通于是课税银三两以下复收钱民闲交易一钱以下止许用钱时钱八文折银一分禁民无得任意低昂宜隶巡按杨家相请铸大明通宝钱不识年号部议格不行神宗万历四年命户工二部准嘉靖钱式铸万历通宝钱及旋边钱颁行天下俸粮银钱兼给云南巡按郭庭梧言国初京师有宝源局各省有宝泉局【按明制各省有宝泉局即宋代各路置钱监之制】自嘉靖闲省局停废民闲告匱滇中产铜不行鼓铸而以重贿购海■〈贝巴〉非利也遂开局铸钱寻命十三布政司开局采铸而王府皆铸造私钱吏不敢讦古钱阻滞不行国用不足乃命南北宝源局拓地增炉鼓铸而北钱视南钱其直较昂南铸大抵轻薄然各循其旧并行不废熹宗天启元年铸泰昌钱兵部尚书王象干请铸当十当百当千三等大钱用龙文略仿白金三等之制于是两京皆铸大钱后有言大钱之弊者诏南京停铸大钱发局改铸而开局遍天下矣庄烈帝崇祯三年御史饶京言铸钱开局本通行天下今乃苦于无息旋开旋罢南北两局外仅有湖广陕西四川云南及宣密二镇而所铸之息不尽归朝廷复苦无铸本盖以买铜而非采铜也【按明初唯江西德兴铅山有铜场后云南路南州诸处有铜坑嘉靖以后鼓铸屡开云南诸处铜场所获渐少崇祯时至括古钱以供炉冶则买铜繁而铸本益少不及采铜之易且省云】乞遵洪武初及永乐九年嘉靖六年例遣官各省铸钱采铜于产铜之地置官吏驻兵铜山之利朝廷擅之小民所采仍予直以市帝从之是时铸厂并开用铜益多铜至益少钱多轻薄故明代惟嘉靖钱最工天启崇祯时新铸出旧钱悉弃日以蒲恶大半杂以铅沙辄易破坏给事中黄承昊疏销古钱御史王燮复言之于是古钱销毁殆尽云

钦定续通志卷一百五十四

●钦定续通志卷一百五十五 食货略四

食货略【四】

漕运

盐铁茶

榷酤

杂税

平准

平余

○漕运

唐

五代

宋

金

元

明

△唐

唐懿宗咸通元年南蛮陷交趾征诸道兵赴岭南诏湖南水运自湘江至溇渠并江西水运以馈行营诸军泝运艰难军屯广州乏食润州人陈磻石诣阙言海船至福建往来大船一只可致千石自福建不一月至广州得船数十艘便可得三五万石胜于江西湖南溯流运粮又引刘裕海路进军破卢循故事乃以磻石为盐铁巡官往扬子县专督海运于是军不阙供宪宗元和十一年始置淮颖水运扬子等诸院其功比汴运较省宝历二年盐铁使王播奏开扬州古七里港通旧官河以济运

△五代

后唐庄宗同光三年吏部尚书李琪奏请敕下诸道合差百姓转般之数有能出力运官物到京者五百石以上白身授一资初任州县官有官者依资次迁授欠选者便与放选千石以上至万石者不拘文武显加酬赏此亦转仓赡军之一术也敕租庸司下诸州有应募者闻奏施行明宗长兴四年三司使奏洛河水运至洛口至京往来牵船下卸皆是水运牙官每人管定四十石今洛岸至仓门稍远牙官转运维艰欲于洛河北岸别凿一湾引船直至仓门下卸从之周世宗显德二年上谓侍臣曰转输之物向来皆给斗耗自汉以来不与支破仓廩所纳新物尚有破耗况水路所般岂无损失今后每石宜与耗一斗四年诏疏下汴水一派北至于五丈河又东北达于济自是齐鲁之舟楫皆至京师六年命侍卫马军都指挥使韩令坤自京东疏汴导汴水至蔡水以通陈颖之漕侍卫步军都指挥使袁彦浚五丈河【按通鉴作五丈渠今依宋史及通考作五丈河】以通青郛之漕

△宋

宋初东京之制受四方之运者谓之转般仓曰永丰通济万盈广衍延丰顺成济远富国皆受江淮所运谓之东河亦谓之里河曰永济永富受怀孟等州所运谓之西河曰广济第一受颖寿等州所运谓之南河亦谓之外河曰广积广储受曹濮等州所运谓之北河受京畿之租者谓之税仓曰广济受京东诸县广积第一左右骐驎天驷监凡三仓受京北诸县左天厰坊仓受京西诸县大盈右天厰二仓受京南诸县其漕

运所会则有转般仓太宗端拱元年徐休复上言京师内外凡大小二十五仓官吏四百二人计每岁所给不下四百万石望自今米麦菽各以一百一十石为一界每界命常参官供率官殿直各一人专知副知各二人凡七人共掌之诏可然四河所运之粟未有定制太平兴国六年汴河岁运江淮米三百万石菽一百万石黄河粟五十万石菽三十万石惠民河粟四十万石菽二十万石广济河渠十二万石非水旱大蠲民租未尝不及其数至道初汴河运米至五百八十万石自是京城积粟盈溢真宗大中祥符初至七百万石凡水运自淮南江南荆湖南北路所运粟于扬真楚泗州四处置仓以受其输既而分调舟船泝流而至京师发运使领之陕西诸州菽粟自黄河三门沿流由汴河而至亦置发运使领之陈颖许蔡光寿等六州之粟帛由石塘惠民河而至京东十七州之粟帛由广济河而至皆有京朝官廷臣督之凡三水皆通漕运河北卫州东北由御河达于军仁宗嘉佑中诏减漕船三百艘【按苏轼文集轼知扬州时上言嘉佑以后漕运米数渐减纲运之船多揽载货物漕运之弊愈多故米数远不及宋初云】熙宁七年诏委官疏浚广济河增置漕舟依旧运京东米上供十年提举汴河堤岸司言京东地富谷粟可以漕运但以河水浅涩不能通舟近修京东河岸开斗门通广济河为利甚大今请通津门里汴河岸东城里三十步内开河一道及置斗门上安水磨下通广济河应接行运从之徽宗政和元年张根为江西转运副使岁漕米百二十万以给中都江南州郡僻远官吏难于督趣根常存三十万石于本司为转输之本以宽诸郡时甚称之高宗建炎初诏诸路纲米以三分之一输行在所余赴京师二年诏二广湖南北江东西路纲运赴江甯府福建两浙赴平江府京畿淮南京东西河北陕西及川纲并赴行在又诏二广湖南北纲运如经由两浙亦许赴平江送纳福建纲运经由江东西亦许赴江甯府送纳绍兴初因地之宜以两浙粟专供行在以江东之粟饷淮东以江西之粟饷淮西荆湖之粟饷鄂岳荆南量所运之数责漕臣将输归其余于行在【按吴曾能改斋漫录曰本朝岁漕米六百万石而江西居三分之一盖天下漕米多取于东南而东南之米多取于江西也】辽圣宗太平时燕大饥户部副使王嘉献计造船使民谕海事者漕粟以振燕民

△金

金都于燕东去潞水五十里故为闸以节高良河白莲潭诸水以通山东河北之粟凡诸路濒河之城则置仓以贮世宗之世言者请开卢沟金口以通漕运役众数年竟无成功其后但以车挽其制春运以冰消行暑雨毕秋运

以八月行冰凝毕时刘玘为同知漕运使事奏漕户顾直太高虚糜官物宜裁损以省官钱上是其言章宗明昌三年尚书省奏辽东北京路米粟素饶宜航海以达山东昨以按视东京近海之地自大务清口并咸平铜善馆皆可置仓贮粟以通漕运若山东河北荒歉即可运以相济制曰可六年以北边粮运括羣牧駝因以金银杂彩备赏劳宣宗元光元年造船运粮由大庆关以抵湖城

△元

元世祖中统四年诏北京运米五千石赴开平其车牛之用并从官给至元十三年遣泸州屯军转漕重庆然自丞相巴延献海运之言江南之粮分为春夏二运至于京师盖巴延平江南时尝命张瑄朱清等以宋库藏图籍自崇明州从海道载至京师而运粮则自浙西涉江至淮由黄河逆水至平滦旱站陆运至淇门入御河以达于京后又开济州泗河自淮至新开河由大清河利津河至海因海口沙壅又从东阿旱站运至临清入御河至元十九年巴延请于朝廷命上海总管罗璧朱清张瑄等遣平底海船六十艘运粮四万六千余石从海道至京师然创行海洋沿山求屿风信失时明年始至直沽又立京畿江淮漕运司二仍各置分司以督纲运又立万户府二分新河军士水手及船于扬州平滦两处运粮命三省造船二千艘于济州河运粮犹未专于海道也二十四年始立行泉府司专掌海运增置万户府二总为四府至二十五年内外分置漕运司二其在外者于河西务置司接运海道粮事二十八年又用朱清张瑄之请并四府为都漕运万户府二止令清瑄二人掌之二十九年用朱清等言复开海道自浙西至京师不过旬日云

△明

明漕运之法凡三变初支运次兑运支运相参至支运悉变为长运而制定太祖洪武元年北伐命浙江江西及抚州九府运粮三百万石于汴梁已而大将军徐达令忻崞代坚台五州粮运大同其后海运饷北平辽东其西北边则浚开封漕河饷陕西自陕西转饷宁夏河州其西南令川贵纳米中盐以省远运于时各路皆得就近转输成祖永乐元年纳户部尚书郁新言用淮船导淮至黄河赴卫河输北平与海运相参宣宗宣德四年平江伯陈瑄及尚书黄福建议用支运法令江西湖广浙江民运粮于淮安仓苏松盩池庐安广德民运粮于徐州仓应天常镇淮扬徐凤太滁和徐民运粮于临清仓令官军接运至京通二仓六年瑄言江南民运粮诸仓往返多误农业令民运至淮安瓜洲兑与卫所官军运载至北军民两便是兑运之始也宪宗成化七年乃有改兑之议应天巡抚滕昭令

运军赴江南水次交兑重其加耗后数年帝乃命淮徐
临德四仓悉改水次交兑由是悉变为改兑而官军长运遂为定制明初命武臣督海运
尝建漕运使寻罢成祖以后用御史又用侍郎都御史
催督郎中员外郎分理主事督兑其制不一景帝景泰二年始设漕运总督于淮安与总
兵参将同理漕事漕司领十二总十二万军与京操十
二营相准其制总漕巡扬州经理瓜淮过闸总兵驻徐邳督过洪入闸同理漕参政管押
赴京趲运则有御史郎中押运则有参政监兑理刑管
洪管厂管闸管泉监仓则有主事清江卫河有提举兑毕过淮过洪巡抚漕司河道各以
职掌奏报又有把总留守皆专督运故理漕之官明代
最多云

○盐铁茶

盐

铁

茶

△盐

唐

五代

辽

金

元

明

唐

唐自宣宗即位盐法益密巢盐少私盗多者谪观察判官户部侍郎判度支卢宏正
以两池盐法敝遣巡院官司空舆更立新法其课加倍
后户部侍郎裴休为盐铁使上盐法八事其法皆施行两池榷课大增至后兵遍天下诸
镇擅利两池为河中节度使王重荣所有岁贡盐三千
车中官田令孜募新军五十四都鐸转不足倡议两池复归盐铁使而重荣究不奉诏

五代

后唐庄宗同光三年敕魏府每年所征随丝盐钱每两量与减放明宗天成元年敕
诸州府百姓合散蚕盐依夏税限纳钱晋高祖天福元
年敕洛京管内食盐每斗量为减价周太祖广顺二年敕青白二盐池依前旧例置官抽
税世宗显德三年敕漳河以北州府管界先是官场巢
盐今后除城郭草市内仍旧禁法其乡村并不许盐货通商逐处有咸卤之地一任人民
煎炼兴贩不得踰漳河亦不得通商界 五代时盐法

太峻宋太祖建隆二年始定官盐阑入禁法凡禁榷之地官立标识候望以晓民其颗盐末盐通商之地各随其利便雍熙后以用兵乏馈饷令商人输刍粟塞下增其直令江淮荆湖给以颗末盐太宗端拱二年置折中仓听商人输粟京师优其直给江淮茶盐仁宗康定元年诏商人入刍粟陕西并边愿受东南盐者加数予之而河北复出三税法亦以盐代京师所给缗钱然东西盐利特厚商旅不愿受金帛皆愿得盐江湖漕盐既杂恶又官估高故百姓利食私盐而并海民以鱼盐为业用工省而得利厚无赖之徒盗贩者众捕之急则起为盗贼江淮间虽衣冠士人狃于厚利或以私盐为事江西则虔州地连广南而建之汀州与虔接虔盐既不善汀故不产盐多盗贩广南盐以射利盐法于是大坏神宗熙宁时转运使沈希颜更为榷法请假常平钱自买解盐卖之本路然其制亦不能尽行南渡后官给本钱诸州置仓令商人置钞算孝宗干道六年户部侍郎叶衡奏今日财赋之源煮海之利居其半然年来课入不增商旅不行者皆私贩之害也乞委官分路措置诏酌行之宣宗庆元初以提举陈损之言改盐课剩钞为正支而课愈重盐法弊益多矣

辽

辽太祖时以所得汉民数多即八部中分古汉城别为一部治之城有盐池之利八部皆取食之及征幽蓟还次于和拉泺命取盐给军自后泺中盐益多上下足用太宗会同初晋献十六州地而瀛莫在焉始得河间煮盐之利置榷院于香河县于是燕云迤北暂食沧盐一时产盐之地如渤海镇城海阳丰州阳洛城广济湖等处五京计司各以其地领之

金

金世宗大定三年定军煮私盐及盗官盐之法命明安穆昆巡捕二十五年置山东等七盐司章宗明昌二年省臣以山东盐课不足由盐司官出巡不敢擅捕遂诏自今如有盗贩听盐司官辄甫民私煮及藏匿则约所属收捕太和六年右丞相内族宗浩参知政事贾铉言国用最重盐课今山东亏课甚多盖以私煮盗贩者成党盐司既不能捕统军司按察司亦不为禁宜立制以各官在职时增亏之实令盐司达省部以为升降遂诏请统军招讨司所部有犯者罚并令按察使有司察之

元

元自太宗时始行盐法世祖中统二年复申定之至元十九年议设盐使司卖盐引法择利民者行之仍令按察司磨刷运司文卷元初朝廷之用盐利居十之八两淮盐当天下之半法日以坏【按官卖盐之制宋熙宁中转运使沈希颜行之本路至元代遂为定制】以郝彬行

户部尚书省经理之彬请度舟楫所通道里所均建六仓煮盐于场运积之听羣商于转运司探仓筹定乃买券文宗天历二年行省复请令商贾入粟中盐【按元中盐之法令商以粟易盐引即明制中盐之始也元则各行省施其法明则令商人输粟于边给照再赴盐场领引鬻盐耳】至顺帝元统二年京师置局鬻盐于南北城官自糶卖

明

明太祖洪武初诸产盐地次第设官两淮等都转运使六广东等盐课提举司七盐课司一然明代盐法开中最善于山西诸仓或入米一石或一石三斗给淮盐一小引商人即以原引赴所在官司缴之故转运省而边储充其后各行省边境多召商中盐以为军储盐法边计相辅而行后定中盐例输米临濠开封陈桥襄阳安陆荆州归州大同太原孟津北平河南府陈州北通州诸仓计道里远近自五石至一石先后增减则例不一率视时缓急米直高一中纳者利否道远地险则减而轻之成祖即位以北京诸卫粮储缺乏悉停天下中盐专于京卫开中后以安南新附饷益难继于是诸所复召商中盐他边复以次及英宗正统三年宁夏总兵官史昭以边军缺马乃奏请纳马中盐然中马之始验马掣盐既而纳银于官以市马银入布政司宗禄屯粮修边振济悉由于此银尽而马不至边储亦将告匮于是召商中淮浙长芦盐以纳之旧例中盐户部出榜召商无径奏者富人吕铭等托势要奏中两淮存积盐中旨允之户部尚书马昂不能执正由是势豪多为揜中商人既以失利盐法于是遂坏后给事中管怀理虽极言其弊亦不能行虽督理盐法者必遣重臣然终不如明初之法充边储而清积弊矣

△铁

铁冶之课后唐明宗长兴元年敕今后不计农器烧器动使诸物并许百姓逐便自铸上纳农器钱随夏秋二税送纳晋高祖天福六年敕诸道铁冶三司今后许百姓所便铸造宋徽宗政和间臣僚言诸路产铁多民资以为用请仿茶盐法榷而鬻之于是户部言详度官置炉冶收铁给引召人通市辽太祖时哈准部多铁置冶及得东平县地产铁乃置采炼者随赋供纳又铁利州亦多铁置冶金海陵正隆三年遣使检视随路铁冶章宗泰和时李复亨奏民间销毁农具以给军器臣窃以为未便汝州鲁山保丰邓州南皆产铁募工置冶可以获利且不厉民从之元铁冶置于世祖中统三年后遣重臣督之鼓铸农器为局卖之后又立铁冶总管府及提举司专司其事明太祖洪武六年置江西等铁冶一十三所后成祖永乐时设于四川诸处至英宗正统十四年广州置铁厂以

盐课提举司领之禁私贩如盐法云

△茶

榷茶之法唐宣宗大中初盐铁转运使裴休请正茶商之税委强干官吏于出茶山口布置把捉量加半税昭宗天佑末卢龙节度使刘仁恭禁南方茶自邈山为茶号其山曰大恩以邀利 宋太祖干德五年诏民茶折税外悉官员收藏 【安宋时茶已盛行有产茶之场十三蕲州曰王祺石桥洗马黄州曰麻城庐州曰王同舒州曰太湖罗源寿州曰霍山麻步开顺口光州曰商城于安其各场之外建茶亦别置务所制龙凤各式以佳者充贡南渡以后各场特置官者则有洪州江州兴国军潭州建州诸处焉】 太宗太平兴国八年乃诏禁伪茶端拱二年置折中仓听商人输粟京师给江淮茶与盐法相同其收茶之法凡百姓所输税愿折茶者亦折为茶谓之折税其鬻茶之法凡民鬻茶者皆售于官其以给日用者谓之食茶出境则给券商贾之愿贸易者入钱若金帛京师榷货务以射六务十三场茶 【按射茶之法即以货物易茶引取茶鬻焉】 给券随所射予之谓之文引然其后或官置场或置捕私茶赏罚榷法愈密矣南宋绍兴后遂置榷场货茶于金 【建炎二年诏成都诸州更茶法令茶商即在茶园市茶不复官买惟严禁私商而已】 金初茶多贸易于宋界之榷场至章宗承安四年淄密宁海蔡州各置坊造新茶付各司县鬻之买引者纳钱及折物各从其便 元世祖至元六年始立榷茶场使司十七年又置榷茶都转运司于江州总江淮荆湖福建之税十九年于江南官为置局令客买引然其法屡变成宗元贞元年罢其税元统元年江浙湖南江西湖广皆复立榷茶转运使焉 明制有官茶有商茶皆贮边易马官茶间征课钞商茶输课略如盐制初太祖令商人于产茶地置茶纳钱请引 【按明代产茶之地南直隶常庐池徽浙江湖严衢绍江西南昌饶州南康九江吉安湖广武昌荆州长沙宝庆四川成都重庆嘉定夔泸】 置茶局批验所称较茶引不相 当即私茶后诸产茶地设茶课司定税额其禁私茶之法自三月至九月月遣行人四员巡视河州临洮碣门黎雅往来旁午至宣宗宣德十年乃定三月一遣又设茶马司于秦洮河雅诸州主以茶易马之政又于成都诸处置茶仓令商人纳米中茶后至专遣御史巡察竟与盐法同 云世宗嘉靖三年御史陈讲以商茶低为悉征黑茶地产有限乃第茶为上中二品神宗万历以后湖南产茶其值甚贱商人多越境私贩御史李楠请禁湖茶言湖茶行茶法马政两弊 【按明制以茶与诸番人易马特设官专其政其职颇重云】 宜令巡茶御史召商给引愿报汉兴

保夔者准中越境下湖南者禁止

○榷酤

唐

五代

宋

辽

金

元

明

△唐

唐文宗太和八年罢京师榷酤至武宗会昌六年敕扬州等八道州府置榷曲并置官店酤酒代百姓纳榷酒钱并充资助军用其扬州陈许汴州襄州河东五处榷曲浙西浙东鄂岳三处置官店酤酒

△五代

梁太祖开平三年敕听诸道州府百姓自造曲官中不禁后唐明宗天成三年敕三京邺诸道州府乡村人户于夏秋田苗上每亩纳曲钱任百姓造曲酤酒周世宗显德四年敕停罢先置卖曲都务乡村人户并许自造米醋及买糟造醋其酒曲条法依旧施行 【按晋汉以来诸道州府皆权置曲额置都务以酤酒民间酒醋遂多漓薄上知其弊故命改法】

△宋

宋制三京官造曲听民纳直诸州城内皆置务酿之县镇乡闾或有许民酿而定其岁课若有遣利则所在皆请官酤真宗景德时承平日久掌财赋者法禁愈密诏曰榷酤之法素有定规宜令计司立为永式中外不得复议增课至道中各路皆置务立课唯夔黔达开施涪云安梁山福汀泉漳兴化广南东西两路诸州军不置榷焉仁宗时河北酒税务有监临官有转运司复遣官比视岁课至高宗建炎三年张浚用赵开总领四川财赋开言蜀民已困唯榷酤尚有赢余遂大变酒法自成都始即旧扑卖坊场设官主之民以米赴官自酿计斛输钱明年徧下其法于四路于是东南酒额日增

△辽

辽自神册以来未有榷酤之法自冯延休韩绍勋建议乃兴酒税东辽之地与南京诸路一例然诸税皆纳于头下军州唯酒税课纳上京盐铁司

△金

金世宗大定三年省臣奏中都酒户多逃以故课额愈亏上曰此官不严禁私酿所致也命设军百人隶兵马司同酒使副合千人巡察虽权要家亦许搜索奴婢犯禁杖其主百且令大兴少尹招复酒户十八年命戍边女真人遇祭祀婚嫁节辰许自造酒二十七年议以天下院务依中都例改收曲课而听民酤

△元

元太宗始置酒课其法立酒务坊场官榷酤办课仍以各州府司县长官充提点官隶征收课税所世祖至元十六年大都河间山东酒税课并归盐运司二十二年右丞卢世荣等言酒课改榷酤之制令酒户自具工本官司拘买英宗至治元年以营田提举司征酒税扰民命有司兼榷之文宗天历二年中书省臣言在京酒坊五十四所每岁输课比者闲以赐诸王公主及诸宫寺诸王公主自有封邑岁赐宫寺亦各有常产其酒课悉令仍旧输官为宜从之

△明

明不置榷酤法

○杂税

（臣）等谨案通志原书榷酤之后别立算缗一门所载自汉至陈而止不及隋唐以隋以后无是制也今考唐宋辽金元明诸史及各代会典会要并各朝诏疏奏议俱无所载知唐以后各朝无算缗之制云

唐

五代

辽

金

元

明

△唐

唐德宗时军用不给乃税间架算除陌其间架法屋二架为间上间钱二千中间一千下间五百吏执笔握算入人家计其数除陌法者公私给与及买卖每缗官留五十钱给他物及相贸易者约钱为率算之

△五代

五代时有津渡之算至宋太祖建隆元年诏除沧德棣淄等三十九处所算钱或水涨听民置渡而收其算二年诏自今宰相枢密使带平章事兼侍中中书令节度使依故事纳礼钱宰相枢密使三百千蕃镇五百千充中书门下公用 【按五代时天成元年门下中书省奏纳礼

钱以充公用至宋建隆时复举行之】太宗淳化元年诏诸处鱼池旧皆省司所管系与民争利自今池塘河湖鱼鸭之类任民所取如经市货卖乃收税神宗元丰二年有司言纲船有商人附载有留阻之弊请置堆垛场于泗州贾物至者先入官场官以船运至京稍输船算从之新法行鬻坊场河渡至哲宗元佑五年以户部郎中高铸言稍为止损至牙契之税则始于太祖开宝二年始收民印契钱令民典卖田宅输钱印契税契限两月【按文献通考税封始于东晋历代相承史文简略不能尽考】神宗元丰时又令民有交易官为之据因收其息

△辽

辽太祖神册三年置羊城于炭山之北以通市易圣宗统和元年南京留守奏请秋霖害稼请权停关征以通山西棗易七年诏以南北府市场人少宜率当部车百乘赴集开奇峯路通易州市后耶律隆运为大丞相以南京岁不登请免百姓农器钱又请平诸郡商贾价从之十五年弛东京鱼冻之禁十九年减关市税圣宗开泰二年诏贵德龙化仪坤双辽同祖七州一例征商

△金

金制租税之外算其田园屋舍车马牛羊树艺之数及其藏镪多寡征钱曰物力又有铺马军需输庸司吏河夫桑皮故纸等钱又有牛具税诏内地诸路每牛一具赋粟三斗后又限民口二十五算牛一具世宗大定三年以尚书工部令史刘行义言定城郭出赁诸税至醋课则始于大定初以国用不足权时榷醋以助经用后旋罢之章宗明昌元年敕尚书省定院务课商税额

△元

元成宗元贞二年诏江南道士贸易田者输商田税又诏民间马牛羊百取其一九年以冀宁岁不登弛山泽之禁听民采捕然元时额外之课甚多如历日课契本课河泊课山场课窑冶课房地租课门摊课池塘课蒲苇课食羊课荻苇课煤炭课撞岸课各省各路之数多寡不一

△明

明初关市之征犹为简约后增置渐多有都税有宣课有司有局有分司有抽分场局有河泊所所收税课有本色有折色又令军卫自设场分太祖洪武十年遣中官国子生及部委官各一人核实税课立为定额仁宗洪熙元年增市肆门摊课钞宣宗宣德四年始设钞关凡舟船受雇装载者计所载料多寡及路之远近纳钞【按其时有灤县济宁泰州徐州淮安扬州上新河浒墅九江金沙洲临清北新诸钞关量舟

大小修广而差其额谓之船料】 宪宗成化以后凡抽分竹木止取钞者皆易以银世宗嘉靖八年诏直省关税向收钱钞者以后俱易以银四十二年令各关税额定数之外余饶悉归公帑穆宗隆庆二年始给钞关主事关防敕书寻令钞关去府近者知府收解去府远者令佐贰官收贮府库季解部万历以后量为差减至熹宗天启五年户部尚书李起元请复诸路冲要之地依万历时例诏允行之庄烈帝崇祯时又于各关屡加增益然明代诸课程始收钞间折收米已而收钱钞半后乃折收银而折色本色逐年输收本色归内库折色归太仓

○平准 【均输】

唐

宋

辽

金

元

明

△唐

唐德宗时赵赞请置常平官兼储布帛于两都江陵成都扬汴苏洪置常平轻重本钱上至百万缗下至十万积米粟布帛丝麻贵则下价而出之贱则加估而收之并榷商贾钱以贍常平本钱帝从之

△宋

宋制均输市易之法自神宗熙宁二年制置三司条例司言今天下财用无余典领之官拘于弊法内外不相知盈虚不相补诸路上供每岁有常数年丰则便道可以多致而或不能赢年歉则物贵难以供亿而不敢不足远方有倍蓰之输中都有半价之鬻徒使富商大贾乘公私之急以擅轻重敛散之权今发运实总六路之赋而其职以制置茶盐矾酒税为事军储国用多所仰给宜假以钱货资其用度周知六路财赋之有无而移用之凡余买税敛上供之物皆得以徙贵就贱用近易远令预知中都帑藏年支见在之定数所当供办者得以从便变易蓄买以待上令稍收轻重敛散之权归之公上而制其有无以便转输则国用可足民财不匮诏令本司具条例以闻以发运使薛向领均输平准事赐内帑钱五百万缗上供米三百万石时议虑其为扰多以为非向既董其事乃请置官设属帝曰兹事鼎新脱有纷纭须朝廷坚主之使得自择其属向于是辟置卫琪孙珪张穆之陈倩为属权开封府推官苏轼言均输立法之初其说尚浅徒言徙贵就贱用近易远然而广置官属多出

缙钱豪商大贾皆疑而不敢动以为虽不明言贩买然既已许之变易变易既行而不与商贾争利未之闻也夫商贾之事曲折难行其买也先期而予钱其卖也后期而取直多方相济委曲相通今官买是物必先设官置吏簿书廩禄为用已多非良不售非贿不行是以官买之价比民必贵及其卖也弊复如前商贾之利何缘而得纵使其闲薄有所获而征商之额所损必多谏官李常亦论均输不便时帝用王安石之说不用其言元丰二年诏市易旧法听人赎钱以田宅或金银为抵当无抵当者三人相保则给之高宗建炎三年车驾初至杭州朱胜非为相两浙运副王琮言本路上供和买紬绢每匹俱折纳钱以助国用许之制曰朕累下宽恤之诏而迫于经用未能悉如所怀今闻江南预和买绢其弊尤甚可下江浙减四分之一以宽民力

△辽

辽太祖神册三年置羊城于炭山之北以通市易圣宗统和中耶律隆运为大丞相以南京岁不登请免百姓农器钱又请平诸郡商贾价从之

△金

金宣宗兴定三年议行均输又敕和市边城均输毋得折配贫民

△元

元世祖中统四年诏立燕京平准库以均平物价至元二年立诸路平准库十三年立四易库于诸路凡十有一掌市场币帛诸物成宗元贞元年诏大都路和顾和买及徭役以诸色户与民均当

△明

明太祖洪武二年令内外军民官司并不得指以和顾和买扰害于民如果官司缺用之物照依时值对物两平收买或客商中买物货并即给价如或减驳价直及不即给价从监察御史按察使体察究治之以后亦不置平准均输之制云

○平余 【常平义仓】

唐

五代

宋

辽

金

元

明

△唐

唐宪宗元和六年制京畿旧谷已尽粟麦未登宜以常平义仓粟二十四万石贷借百姓诸道州府有乏粮处依例借贷十三年户部侍郎孟简奏天下州府常平义仓等斗斛请准旧例减估出粜但以石数申奏有司更不收管州县得专以利百姓从之敬宗宝历元年以两京河西大稔委度支和籴二百万斛以备灾沴文宗开成元年户部奏诸州府所置常平义仓伏请今后通公私田亩别纳粟一升逐年添贮义仓敛之至轻事必通济岁月稍久自致盈充从之

△五代

周太祖广顺元年敕天灾流行分野代有苟或闭粜岂是爱人宜令沿淮渡口镇浦不得闭粜

△宋

宋太祖干德元年诏曰多事之后义仓废寝岁或小歉失于豫备宜令诸州于所属县各置义仓自今官所收二税石别税一斗贮之三年诏民有欲借义仓粟充种食者令州县即计口给计以闻勿俟报义仓不足当发公廩者奏待报太宗淳化三年京畿大穰物价甚贱分遣使臣于京城四门置场僧价以籴令有司虚近仓以贮之俟岁饥即减价粜与贫民不过一斛真宗景德三年诏于京东京西河北河东陕西淮南江南两浙各置常平仓量留上供钱付司农司系帐委转运使并本州岛委幕职一员专其事每岁夏秋加钱收籴遇贵减价出粜或三年以上不经粜即回充粮廩别以新粟充数至天禧四年诏荆湖川陕广南并置常平仓高宗建炎二年臣僚言常平和籴州县视为具文以新易旧法也闲有损失而未尝问不许借贷法也闲有悉充他用而实无所储乃诏委官徧行按视

△辽

辽圣宗统和十三年令郡县置义仓岁秋熟社民随所获户出粟储仓遇岁歉发以振民后东京苏复辰海同银乌遂春泰等五十余城内沿边诸州各有和籴仓依圣宗法出旧易新所在无虑二三十万石虽累兵兴未尝乏用后至道宗太康时耶律孟简以中京饥减价粜粟以振民

△金

金太宗皇统二年十月燕西东京河北山东汴京等秋熟命有司增价和籴世宗大定十二年诏在都和籴以实仓廩且使钱币通流又诏凡秋熟之郡广籴以备水旱十四年诏定常平仓制中外行之其法寻废章宗明昌元年御史请复设常平仓敕省臣详议以闻省臣言大

定旧制丰年则增市价十之二以余俭岁则减市价十之一以糴夫所以丰则增价以收者恐物贱伤农俭则减价以出者恐物贵伤民增之减之以平粟价故谓常平非谓使天下之民专仰给于此也立法之始贵在必行其令提刑司各路计司兼领之郡县沮格者纠能推行者加擢用若中都路年谷不熟之所则依常平仓法减其价三之一以糴诏从之三年敕州府糴余可各县置仓命州府县官兼提控管勾又敕置常平仓之地令州府官提举之县官兼董其事以所余多寡约量升降为永制又谕上京路州县未有常平仓如亦可置定其当备粟数以闻五年尚书省奏明昌三年始设常平仓定其永制天下常平仓总五百一十九处见积粟数可备官兵五年之食米可备四年之用而见在钱数仅支二年且比年稍丰而米价犹贵若复预余恐米价腾涌于民未便遂诏权罢中外常平仓和余俟官钱羨余日举行

△元

元初立义仓于乡社又置常平于路府使歉不损民丰不伤农粟直不低昂而民无菜色其常平仓世祖至元六年始立八年以和余粮及诸路仓所拨粮贮焉二十三年定铁法又以铁课余粮充贮义仓其和余之法各路府悉申行之至仁宗延佑四年敕郡县各社复置义仓

△明

明英宗正统四年因大学士杨士奇言命户部平余储荒至五年令六部都察院推选属官领敕分诣两畿各省府州县立预备仓发所在库银余粮贮之军民中有能出粟以佐官者授以散官旌其门宪宗成化十八年命南京糴常平仓粮时岁饥米贵南京户部议减价糴以济民候秋成平余还仓

钦定续通志卷一百五十五

●钦定续通志卷一百五十六 艺文略一

艺文略 【一】

（臣）等谨按郑志艺文略有十二类类各分门门各标目自叙以为经籍之散亡由于编次之无纪易虽一书而学有十六种诗虽一书而学有十二种非可浑为一家说诚踴矣顾其所标细目失之太繁且如图谱既有专略又见于艺文略中重复之讥殆不免焉今辑自宋迄明之艺文谨遵钦定四库全书例以著录存目分编凡宋代诸书已登郑志者不复载入所标总类仍依郑志为十二每门细目则以四库全书为准云

经类第一 【易 书 诗 春秋 孝经 四书 尔雅 经解】

○经类第一

（臣）等谨按郑志经类有易书诗春秋国语孝经论语尔雅经解九门国语自宋庠国语补音外眇所著录兹故阙之论语与孟子大学中庸朱子作章句集注遂称四书今改论语门为四书门至诸门细目郑志过为区分为之随宜酌并元明无石经隋焚禁讖纬后亦无托是名著书者概从删削

易
书
诗
春秋
孝经
四书
尔雅
经解
△易

温公易说六卷【宋司马光撰】 横渠易说三卷【宋张子撰】 东坡易传九卷【宋苏轼撰】 易传四卷【宋伊川程子撰】 易学辨惑一卷【宋邵伯温撰】 了翁易说一卷【宋陈瓘撰】 吴园易解九卷【宋张根撰】 周易新讲义十卷【宋耿南仲撰】 紫岩易传十卷【宋张浚撰】 读易详说十卷【宋李光撰】 易小传六卷【宋沈该撰】 汉上易集传十一卷卦图三卷丛说一卷【宋朱震撰】 周易窥余十五卷【宋郑刚中撰】 易璇玑三卷【宋吴沆撰】 易变体义十二卷【宋都絜撰】 周易经传集解三十六卷【宋林栗撰】 易原八卷【宋程大昌撰】 周易本义十二卷【宋朱子撰】 周易古占法一卷古周易章句外编一卷【宋程迥撰】 郭氏传家易说十一卷【宋郭雍撰】 周易义海撮要十二卷【宋李衡撰】 南轩易说三卷【宋张栻撰】 复斋易说六卷【宋赵彦肃撰】 杨氏易传二十卷【宋杨简撰】 周易玩辞十六卷【宋项安世撰】 易说四卷【宋赵善誉撰】 诚斋易传二十卷【宋杨万里撰】 大易粹言十卷【宋方闻一编】 易图说三卷【宋吴仁杰撰】 古周易一卷【宋吕祖谦编】 易传灯四卷【旧本题宋徐总干撰不着名字】 易裨传二卷【宋林至撰】 厚斋易学五十二卷【宋冯椅撰】 童溪易传三十卷【宋王宗传撰】 周易总义二十卷【宋易祓撰】 西溪易说十

二卷【宋李过撰】 丙子学易编一卷【宋李
心传撰】 易通六卷【宋赵以夫撰】 周易经传训解二卷【宋蔡渊撰】 易象意
言一卷【宋蔡渊撰】 周易要义十卷【宋
魏了翁撰】 东谷易翼传二卷【宋郑汝谐撰】 朱文公易说二十三卷【宋朱鉴
编】 易学启蒙小传一卷【宋税与权撰】 周
易辑闻六卷附易雅一卷筮宗一卷【宋赵汝楳撰】 周易详解十六卷【宋李杞撰
】 淙山读周易记二十一卷【宋方实孙撰】
周易传义附录十四卷【宋董楷撰】 易学启蒙通释二卷【宋胡方平撰】 三易
备遗十卷【宋朱元升撰】 周易集说四十卷
【宋俞琰撰】 读易举要四卷【宋俞琰撰】 周易象义十六卷【宋丁易东撰】
易图通变五卷易筮通变三卷【宋雷恩齐撰
】 读易私言一卷【元许衡撰】 易本义附录纂疏十五卷【元胡一桂撰】 易学
启蒙翼传四卷【元胡一桂撰】 易纂言十卷
【元吴澄撰】 易纂言外翼八卷【元吴澄撰】 易原奥义一卷周易原旨六卷【
元宝巴撰】 周易程朱传义折衷三十三卷【
元赵采撰】 周易衍义无卷数【元胡震撰】 易学滥觞一卷【元黄泽撰】 大易
辑说十卷【元王申子撰】 周易本义通释十
二卷【元胡炳文撰】 周易本义集成十二卷【元熊良辅撰】 大易象数钩深图
三卷【元张理撰】 学易记九卷【元李简撰
】 周易集传八卷【元龙仁夫撰】 读易考原一卷【元萧汉中撰】 易精蕴大义
十二卷【元解蒙撰】 易学变通六卷【元
曾贯撰】 周易会通十四卷【元董真卿撰】 周易图说二卷【元钱义方撰】 周
易爻变义蕴四卷【元陈应润撰】 周易参义
十二卷【元梁寅撰】 周易文诠四卷【元赵沔撰】 周易大全二十四卷【明胡
广等奉敕纂】 易经蒙引十二卷【明蔡清撰
】 读易余言五卷【明崔铣撰】 易学启蒙意见五卷【明韩邦奇撰】 易经存疑
十二卷【明林希元撰】 周易辨录四卷【
明杨爵撰】 易象钞四卷【明胡居仁撰】 周易象旨决录七卷【明熊过撰】 易
象钩解四卷【明陈士元撰】 周易集注十六
卷【明来知德撰】 读易纪闻六卷【明张献翼撰】 八白易传十六卷【明叶山
撰】 洗心斋读易述十七卷【明潘士藻撰】
像象管见九卷【明钱一本撰】 周易札记三卷【明逮中立撰】 周易易简说三
卷【明高攀龙撰】 易义古象通八卷【明魏
浚撰】 周易像象述五卷【明吴桂森撰】 易用五卷【明陈祖念撰】 易象正十

六卷【明黄道周撰】 儿易内仪以六卷儿易
外仪十五卷【明倪元璐撰】 卦变考略一卷【明董守论撰】 古周易订诂十六
卷【明何楷撰】 周易玩辞困学记无卷数【
明张次仲撰】

以上见文渊阁著录

方舟易学二卷【宋李石撰】 周易系辞精义二卷【旧本题宋吕祖谦撰】
东莱易说二卷【旧本题宋吕祖谦撰】 周易辑
说明解四卷【旧本题宋冯椅撰】 水村易镜一卷【宋林光世撰】 易序丛书十
卷【旧本题宋赵汝楳撰】 周易上下经解残本
四卷【宋丁易东撰】 大易衍说无卷数【旧本题元李简撰】 大易法象通赞七
卷【元郑滁孙撰】 周易订疑十五卷序例一卷
易学启蒙订疑四卷周易本义原本十二卷【旧本题董养性撰不着时代】 学易举
隅三卷【元鲍恂撰】 周易旁注图说二卷【
明朱升撰】 八卦余生十八卷【明邓梦文撰】 石潭易传撮要一卷【明刘髦撰
】 易经图释十二卷【明刘定之撰】 玩易意
见二卷【明王恕撰】 学易象数举隅二卷【明汪敬撰】 周易传义约说十二卷
【明方献夫撰】 图书纪愚一卷【明阮琳撰
】 易图识漏无卷数【明黄芹撰】 周易说翼三卷【明吕柟撰】 易经大旨四卷
【明唐龙撰】 周易议卦一卷【明王崇庆
撰】 读易索隐六卷【明洪鼎撰】 古易考原三卷【明海鹫撰】 周易赞义七卷
【明马理撰】 易问笺一卷【明舒芬撰】
易学四同八卷别录四卷【明季本撰】 图书质疑无卷数【明薛侃撰】 易经浅
说八卷【明陈琛撰】 易象解四卷【明刘濂
撰】 补斋口授易说无卷数【不着撰人名氏】 周易古经无卷数【明雷乐编】
周易不我解二卷【明徐体干撰】 周易义丛
十六卷【明叶良佩撰】 古易世学十七卷【明丰坊撰】 易辨一卷【明丰坊撰
】 易修墨守一卷【明唐枢撰】 易象大旨
八卷【明薛甲撰】 胡子易演十八卷【明胡经撰】 周易卦变图传二卷【明吕
怀撰】 易经中说四十四卷【明卢翰撰】
看易凡例图说一卷【明龙子昂撰】 周易私录无卷数【明王樵撰】 九正易因
无卷数【明李贽撰】 今文周易演义十二卷
【明徐师曾撰】 周易传义补疑十二卷【明姜宝撰】 顾氏易解无卷数【明顾
曾唯撰】 淮海易谭四卷【明孙应鳌撰】 易
经渊旨一卷【旧本题明归有光撰】 周易古今文全书二十一卷【明杨时乔撰】

六爻原意一卷【明金瑶撰】 易疑三卷【明陈言撰】 易学十二卷【明沈一贯撰】 图卦亿言四卷【明贺沚撰】 大象观二卷【明刘元卿撰】 周易象义四卷【明唐鹤征撰】 易象会旨一卷【旧本题延伯生述不著名氏】 易象管窥十五卷【明黄正宪撰】 蟻衣生易解十四卷【明郭子章撰】 学易举隅六卷【明戴廷槐撰】 易传阐庸一百卷【明姜震阳撰】 今易论二十四卷【明邓伯羔撰】 羲经十一翼二卷【明傅文兆撰】 周易象通八卷【明朱谋■〈土韦〉撰】 易学识遗一卷【明朱睦■〈木挈〉撰】 易经疑问十二卷【明姚舜牧撰】 易测十卷【明曾朝节撰】 周易冥冥篇四卷【明苏浚撰】 易经儿说四卷【明苏浚撰】 续韦斋易义虚裁八卷【明涂宗浚撰】 易会八卷【明邹德溥撰】 像钞六卷【明钱一本撰】 四圣一心录六卷【明钱一本撰】 易筮六卷附论一卷【明焦竑撰】 周易正解二十卷【明郝敬撰】 易领四卷【明郝敬撰】 易学饮河八卷【明张纳陛撰】 周易旁注会通十四卷【明姚文蔚撰】 古易汇编十七卷【明李本固撰】 玩易微言摘抄六卷【明杨廷筠撰】 易引九卷【明方时化撰】 周易颂二卷【明方时化撰】 学易述谈四卷【明方时化撰】 易指要绎三卷【明方时化撰】 易疑四卷【明方时化撰】 易通一卷【明方时化撰】 周易铁笛子一卷【明耿橘撰】 易经通论十二卷【明曹学佺撰】 周易可说七卷【明曹学佺撰】 易经澹窝因指八卷【明张汝霖撰】 周易古文钞二卷【明刘宗周撰】 周易宗义十二卷【明程汝继撰】 周易象义十卷【明章潢撰】 易经会通十二卷【明王邦柱江柁同撰】 易芥八卷【明陆振奇撰】 易林疑说不分卷【明杨瞿崃撰】 易经勺解三卷【明林欲楫撰】 松荫堂学易六卷【明贾必选撰】 易略三卷【明陆梦龙撰】 易臆三卷【明郑圭撰】 重订易学说海八卷【明郭宗盘撰】 周易易简编无卷数【明陆起龙撰】 易学残本十二卷【明卓尔康撰】 易窥无卷数【周程玉润撰】 易学管见无卷数【明洪启初撰】 易学五卷【明吴极撰】 周易揆十二卷【明钱士升撰】 周易时论合编二十三卷【明方孔照撰】 易就六卷【明徐世淳撰】 伏羲图赞二卷【明陈第撰】 风姬易遯五卷【明王宣撰】 周易古本一卷【明华兆登编】 易经僧注十卷【明张镜心撰】 系辞十篇书十卷【明陈仁锡撰】

】易经颂十二卷【明陈仁锡撰】易思图解
无卷数【明刘日曦撰】易佣十四卷【明文安之撰】易史象解二卷【明林允
昌撰】周易纂六卷【明朱之俊撰】易学
统此集二十卷【明孙维明撰】易经小传二十卷【明郑友元撰】周易爻物当
名二卷【明黎遂球撰】广易筌四卷【明沈
瑞锺撰】周易独坐谈五卷【明洪化昭撰】雪园易义四卷图说一卷【明李奇
玉撰】易疏五卷【明黄端伯撰】苑洛易学
疏四卷【明周一敬撰】易鼎三然无卷数【明朱天麟撰】周易广义四卷【明
郑敷教撰】尺木堂学易志三卷【明马权奇
撰】十愿斋易说一卷霞舟易笈一卷【明吴锺峦撰】易经说意七卷【明陈际
泰撰】周易翼简捷解十六卷附羣经辅易说一卷
【明陈际泰撰】易辰九卷【明贺登选撰】易序图说二卷【明秦鏞撰】读易
略记无卷数【明朱朝瑛撰】读易隅通二卷
【明来集之撰】卦义一得无卷数【明来集之撰】易图亲见一卷【明来集之
撰】读易绪言二卷【明钱棻撰】易宪四卷
【明沈泓撰】说易十二卷【明乔中和撰】桂林点易丹十六卷【明顾懋燮撰
】周易说统十二卷【明张振渊撰】周易去
疑十一卷【明舒宏谔撰】四易通义六卷【明程观生撰】易发八卷【明董说
撰】周易时义注无卷数【明章佐圣撰】
易参五卷【明钱彭曾撰】易旨一览四卷【明蒋时雍撰】周易辨正一卷【明
喻国人撰】河洛定义赞一卷【周喻国人撰
】全易十有八变成卦定义一卷【明喻国人撰】周易对卦数变合参一卷【明
喻国人撰】河洛真传一卷【明喻国人撰】
周易生生真传一卷【明喻国人撰】三易大传七十二卷【明李陈玉撰】易经
补义四卷【明方芬撰】读易镜六卷【明沈
尔嘉撰】易学古经正义十二卷【明邹元芝撰】射易淡咏二卷【不着撰人名
氏】大易衍说无卷数【不着撰人名氏】原
易二卷【不着撰人名氏】易传义十二卷【不着编辑名氏】易象与知编一卷
图书合解一卷【旧本题天山道人撰不著名氏
】

以上见四库全书存目

易类凡二百六十七部

（臣）等谨案郑志原例于每门之后合计卷数今考诸书本有末分卷者无从核
计兹但纪部数于后

△书

书传十三卷 【宋苏轼撰】 尚书全解四十卷 【宋林之奇撰】 郑敷文书说一卷 【宋郑伯熊撰】 禹贡指南四卷 【宋毛晃撰】 禹贡论五卷后论一卷山川地理图二卷 【宋程大昌撰】 尚书讲义二十卷 【宋史浩撰】 尚书详解二十六卷 【宋夏僎撰】 禹贡说断四卷 【宋傅寅撰】 书说三十五卷 【宋吕祖谦撰】 尚书说七卷 【宋黄度撰】 五诰解四卷 【宋杨简撰】 絜斋家塾书钞十二卷 【宋袁燮撰】 书集传六卷 【宋蔡沈撰】 尚书精义五十卷 【宋黄伦撰】 尚书详解五十卷 【宋陈经撰】 融堂书解二十卷 【宋钱时撰】 洪范统一一卷 【宋赵善湘撰】 尚书要义十七卷序说一卷 【宋魏了翁撰】 尚书集传或问二卷 【宋陈大猷撰】 尚书详解十三卷 【宋胡士行撰】 尚书表注二卷 【宋金履祥撰】 书纂言四卷 【元吴澄撰】 尚书传纂疏六卷 【元陈栎撰】 读书丛说六卷 【元许谦撰】 尚书辑录纂注六卷 【元董鼎撰】 尚书通考十卷 【元黄镇成撰】 书蔡传旁通六卷 【元陈师凯撰】 读书管见二卷 【元王充耘撰】 书义断法六卷 【元陈悦道撰】 尚书纂传四十六卷 【元王天与撰】 尚书句解十三卷 【元朱祖义撰】 书传会选六卷 【明刘三吾等奉敕撰】 书传大全十卷 【明胡广等奉敕撰】 尚书考异五卷 【明梅鷟撰】 尚书疑义四卷 【明马明衡撰】 尚书日记十六卷 【明王樵撰】 尚书砭蔡编一卷 【明袁仁撰】 尚书疏衍四卷 【明陈第撰】 尚书注考一卷 【明陈泰交撰】 洪范明义四卷 【明黄道周撰】

以上见文渊阁著录

书古文训十六卷 【宋薛季宣撰】 书疑九卷 【宋王柏撰】 古洪范一卷 【宋贺成大撰】 定正洪范二卷 【元胡一中撰】 尚书旁注六卷 【明朱升撰】 书义卓跃六卷 【旧本题明庐陵陈雅言撰】 书传通释六卷 【明彭勛撰】 尚书直指六卷 【明徐善述撰】 书经提要卷数 【明章璈撰】 书传洪范考疑一卷 【明吴世忠撰】 禹贡详略无卷数 【明韩邦奇撰】 尚书说要五卷 【明吕柟撰】 书经旨略一卷 【明王大用撰】 尚书谱五卷 【明梅鷟撰】 书畴彝训一卷 【明蔡悉撰】 禹贡图说一卷 【明郑晓撰】 禹贡说一卷 【明郑晓撰】 古书世学六卷 【明丰坊撰】 书经解十三篇 【明张居正撰】 书经说意十

卷【明沈伟撰】书经讲义会编十二卷【明申时行撰】禹贡山川郡邑考四卷
【明王鉴撰】禹贡元珠一卷【明俞鲲撰】
书经疑问十二卷【明姚舜牧撰】书帷别记四卷【明王樵撰】尚书要旨三十
卷【明王肯堂撰】尚书辨解十卷【明郝敬
撰】禹贡备遗增注二卷【明胡瓚撰】书传会衷十卷【明曹学佺撰】虞书笺
二卷【明茅瑞征撰】禹贡汇疏十五卷【
明茅瑞征撰】尚书传翼十卷【明陆键撰】尚书晚订十二卷【明史维堡撰】
尚书揆一六卷【明邹期楨撰】尚书菁钥二
十一卷【明潘士遴撰】书经集意六卷【明万嗣达撰】禹贡图注无卷数【明
艾南英撰】禹贡合注五卷【明夏允彝撰】
读尚书略记无卷数【明朱朝瑛撰】书绎六卷【明杨文彩撰】禹贡广览三卷
【明许胥臣撰】尚书讲义无卷数【明蔡璋
撰】尚书解意六卷【明李楨宸撰】禹贡通解一卷【旧本题明邵璜撰】

以上见四库全书存目

书类凡八十四部

△诗

毛诗本义十六卷【宋欧阳修撰】诗集传二十卷【宋苏辙撰】毛诗名物
解二十卷【宋蔡卞撰】毛诗集解四十二卷
【不着编录人名氏】诗补传三十卷【宋范处义撰】诗总闻二十卷【宋王质
撰】诗集传八卷【宋朱子撰】慈湖诗传二
十卷【宋杨简撰】吕氏家塾读诗记三十二卷【宋吕祖谦撰】续吕氏家塾读
诗记三卷【宋戴溪撰】絜斋毛诗经筵讲义四
卷【宋袁燮撰】毛诗讲义十二卷【宋林岳撰】诗童子问十卷【宋辅广撰】
毛诗集解二十五卷【宋段昌武撰】诗缉
三十六卷【宋严粲撰】诗传遗说六卷【宋朱鉴编】诗考一卷【宋王应麟撰
】诗地理考六卷【宋王应麟撰】诗传名
物钞八卷【元许谦撰】诗传通释二十卷【元刘瑾撰】诗传旁通十五卷【元
梁益撰】诗经疏义二十卷【元宋公迁撰】
诗疑问七卷【元朱倬撰其末附宋赵惠诗辨说一卷】诗缙绪十八卷【元刘玉汝
撰】诗演义十五卷【元梁寅撰】诗集传大
全二十卷【明胡广等奉敕撰】诗解颐四卷【明朱善撰】诗说解颐四十卷【
明季本撰】读诗私记二卷【明李先芳撰】
诗故十卷【明朱谋玮撰】六家诗名物疏五十四卷【明冯应京撰】诗经疑问
十二卷【明姚舜牧撰】诗经世本古义二十八

卷【明何楷撰】待轩诗记八卷【明张次仲撰】读诗略记六卷【明朱朝瑛撰】毛诗陆疏广要二卷【明毛晋撰】

以上见文渊阁著录

诗说一卷【宋张耒撰】诗论一卷【宋程大昌撰】诗疑二卷【宋王柏撰】毛诗正变指南图六卷【明陈重光辑】

诗义断法五卷【不着撰人名氏】国风尊经一卷【旧本题明陶宗仪撰】毛诗说序六卷【明吕柟撰】毛诗或问一卷【明

袁仁撰】鲁诗世学三十二卷【明丰坊撰】诗传一卷【明丰坊伪撰】诗说一卷【明丰坊伪撰】诗传纂义无卷数【明

倪复撰】张氏诗说一卷【明张廷臣撰】读风臆评无卷数【明戴君恩撰】诗经正义二十七卷【明许天赠撰】诗经存固

八卷【明叶朝荣撰】诗序解颐一卷【明邵弁撰】毛诗多识编七卷【明林兆珂撰】毛诗原解三十六卷【明郝敬撰】

诗经类考三十卷【明沈万钊撰】毛诗微言二十卷【明张以诚撰】诗经说通十三卷【明沈守正撰】诗经六帖重订十四卷

【明徐光启撰】毛诗说四卷【明陈以蕴撰】诗经图史合考二十卷【明锺惺撰】毛诗解无卷数【明锺惺撰】诗通四卷

【明陆化熙撰】诗传阐二十三卷阐余二卷【明邹忠允撰】诗经脉八卷【明魏浣初撰】毛诗发微三十卷【明宋景云撰

】 1. 2. 3. 4. 5. 6. 7. 8. 9. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100. 101. 102. 103. 104. 105. 106. 107. 108. 109. 110. 111. 112. 113. 114. 115. 116. 117. 118. 119. 120. 121. 122. 123. 124. 125. 126. 127. 128. 129. 130. 131. 132. 133. 134. 135. 136. 137. 138. 139. 140. 141. 142. 143. 144. 145. 146. 147. 148. 149. 150. 151. 152. 153. 154. 155. 156. 157. 158. 159. 160. 161. 162. 163. 164. 165. 166. 167. 168. 169. 170. 171. 172. 173. 174. 175. 176. 177. 178. 179. 180. 181. 182. 183. 184. 185. 186. 187. 188. 189. 190. 191. 192. 193. 194. 195. 196. 197. 198. 199. 200. 201. 202. 203. 204. 205. 206. 207. 208. 209. 210. 211. 212. 213. 214. 215. 216. 217. 218. 219. 220. 221. 222. 223. 224. 225. 226. 227. 228. 229. 230. 231. 232. 233. 234. 235. 236. 237. 238. 239. 240. 241. 242. 243. 244. 245. 246. 247. 248. 249. 250. 251. 252. 253. 254. 255. 256. 257. 258. 259. 260. 261. 262. 263. 264. 265. 266. 267. 268. 269. 270. 271. 272. 273. 274. 275. 276. 277. 278. 279. 280. 281. 282. 283. 284. 285. 286. 287. 288. 289. 290. 291. 292. 293. 294. 295. 296. 297. 298. 299. 300. 301. 302. 303. 304. 305. 306. 307. 308. 309. 310. 311. 312. 313. 314. 315. 316. 317. 318. 319. 320. 321. 322. 323. 324. 325. 326. 327. 328. 329. 330. 331. 332. 333. 334. 335. 336. 337. 338. 339. 340. 341. 342. 343. 344. 345. 346. 347. 348. 349. 350. 351. 352. 353. 354. 355. 356. 357. 358. 359. 360. 361. 362. 363. 364. 365. 366. 367. 368. 369. 370. 371. 372. 373. 374. 375. 376. 377. 378. 379. 380. 381. 382. 383. 384. 385. 386. 387. 388. 389. 390. 391. 392. 393. 394. 395. 396. 397. 398. 399. 400. 401. 402. 403. 404. 405. 406. 407. 408. 409. 410. 411. 412. 413. 414. 415. 416. 417. 418. 419. 420. 421. 422. 423. 424. 425. 426. 427. 428. 429. 430. 431. 432. 433. 434. 435. 436. 437. 438. 439. 440. 441. 442. 443. 444. 445. 446. 447. 448. 449. 450. 451. 452. 453. 454. 455. 456. 457. 458. 459. 460. 461. 462. 463. 464. 465. 466. 467. 468. 469. 470. 471. 472. 473. 474. 475. 476. 477. 478. 479. 480. 481. 482. 483. 484. 485. 486. 487. 488. 489. 490. 491. 492. 493. 494. 495. 496. 497. 498. 499. 500. 501. 502. 503. 504. 505. 506. 507. 508. 509. 510. 511. 512. 513. 514. 515. 516. 517. 518. 519. 520. 521. 522. 523. 524. 525. 526. 527. 528. 529. 530. 531. 532. 533. 534. 535. 536. 537. 538. 539. 540. 541. 542. 543. 544. 545. 546. 547. 548. 549. 550. 551. 552. 553. 554. 555. 556. 557. 558. 559. 560. 561. 562. 563. 564. 565. 566. 567. 568. 569. 570. 571. 572. 573. 574. 575. 576. 577. 578. 579. 580. 581. 582. 583. 584. 585. 586. 587. 588. 589. 590. 591. 592. 593. 594. 595. 596. 597. 598. 599. 600. 601. 602. 603. 604. 605. 606. 607. 608. 609. 610. 611. 612. 613. 614. 615. 616. 617. 618. 619. 620. 621. 622. 623. 624. 625. 626. 627. 628. 629. 630. 631. 632. 633. 634. 635. 636. 637. 638. 639. 640. 641. 642. 643. 644. 645. 646. 647. 648. 649. 650. 651. 652. 653. 654. 655. 656. 657. 658. 659. 660. 661. 662. 663. 664. 665. 666. 667. 668. 669. 670. 671. 672. 673. 674. 675. 676. 677. 678. 679. 680. 681. 682. 683. 684. 685. 686. 687. 688. 689. 690. 691. 692. 693. 694. 695. 696. 697. 698. 699. 700. 701. 702. 703. 704. 705. 706. 707. 708. 709. 710. 711. 712. 713. 714. 715. 716. 717. 718. 719. 720. 721. 722. 723. 724. 725. 726. 727. 728. 729. 730. 731. 732. 733. 734. 735. 736. 737. 738. 739. 740. 741. 742. 743. 744. 745. 746. 747. 748. 749. 750. 751. 752. 753. 754. 755. 756. 757. 758. 759. 760. 761. 762. 763. 764. 765. 766. 767. 768. 769. 770. 771. 772. 773. 774. 775. 776. 777. 778. 779. 780. 781. 782. 783. 784. 785. 786. 787. 788. 789. 790. 791. 792. 793. 794. 795. 796. 797. 798. 799. 800. 801. 802. 803. 804. 805. 806. 807. 808. 809. 810. 811. 812. 813. 814. 815. 816. 817. 818. 819. 820. 821. 822. 823. 824. 825. 826. 827. 828. 829. 830. 831. 832. 833. 834. 835. 836. 837. 838. 839. 840. 841. 842. 843. 844. 845. 846. 847. 848. 849. 850. 851. 852. 853. 854. 855. 856. 857. 858. 859. 860. 861. 862. 863. 864. 865. 866. 867. 868. 869. 870. 871. 872. 873. 874. 875. 876. 877. 878. 879. 880. 881. 882. 883. 884. 885. 886. 887. 888. 889. 890. 891. 892. 893. 894. 895. 896. 897. 898. 899. 900. 901. 902. 903. 904. 905. 906. 907. 908. 909. 910. 911. 912. 913. 914. 915. 916. 917. 918. 919. 920. 921. 922. 923. 924. 925. 926. 927. 928. 929. 930. 931. 932. 933. 934. 935. 936. 937. 938. 939. 940. 941. 942. 943. 944. 945. 946. 947. 948. 949. 950. 951. 952. 953. 954. 955. 956. 957. 958. 959. 960. 961. 962. 963. 964. 965. 966. 967. 968. 969. 970. 971. 972. 973. 974. 975. 976. 977. 978. 979. 980. 981. 982. 983. 984. 985. 986. 987. 988. 989. 990. 991. 992. 993. 994. 995. 996. 997. 998. 999. 1000. 1001. 1002. 1003. 1004. 1005. 1006. 1007. 1008. 1009. 1010. 1011. 1012. 1013. 1014. 1015. 1016. 1017. 1018. 1019. 1020. 1021. 1022. 1023. 1024. 1025. 1026. 1027. 1028. 1029. 1030. 1031. 1032. 1033. 1034. 1035. 1036. 1037. 1038. 1039. 1040. 1041. 1042. 1043. 1044. 1045. 1046. 1047. 1048. 1049. 1050. 1051. 1052. 1053. 1054. 1055. 1056. 1057. 1058. 1059. 1060. 1061. 1062. 1063. 1064. 1065. 1066. 1067. 1068. 1069. 1070. 1071. 1072. 1073. 1074. 1075. 1076. 1077. 1078. 1079. 1080. 1081. 1082. 1083. 1084. 1085. 1086. 1087. 1088. 1089. 1090. 1091. 1092. 1093. 1094. 1095. 1096. 1097. 1098. 1099. 1100. 1101. 1102. 1103. 1104. 1105. 1106. 1107. 1108. 1109. 1110. 1111. 1112. 1113. 1114. 1115. 1116. 1117. 1118. 1119. 1120. 1121. 1122. 1123. 1124. 1125. 1126. 1127. 1128. 1129. 1130. 1131. 1132. 1133. 1134. 1135. 1136. 1137. 1138. 1139. 1140. 1141. 1142. 1143. 1144. 1145. 1146. 1147. 1148. 1149. 1150. 1151. 1152. 1153. 1154. 1155. 1156. 1157. 1158. 1159. 1160. 1161. 1162. 1163. 1164. 1165. 1166. 1167. 1168. 1169. 1170. 1171. 1172. 1173. 1174. 1175. 1176. 1177. 1178. 1179. 1180. 1181. 1182. 1183. 1184. 1185. 1186. 1187. 1188. 1189. 1190. 1191. 1192. 1193. 1194. 1195. 1196. 1197. 1198. 1199. 1200. 1201. 1202. 1203. 1204. 1205. 1206. 1207. 1208. 1209. 1210. 1211. 1212. 1213. 1214. 1215. 1216. 1217. 1218. 1219. 1220. 1221. 1222. 1223. 1224. 1225. 1226. 1227. 1228. 1229. 1230. 1231. 1232. 1233. 1234. 1235. 1236. 1237. 1238. 1239. 1240. 1241. 1242. 1243. 1244. 1245. 1246. 1247. 1248. 1249. 1250. 1251. 1252. 1253. 1254. 1255. 1256. 1257. 1258. 1259. 1260. 1261. 1262. 1263. 1264. 1265. 1266. 1267. 1268. 1269. 1270. 1271. 1272. 1273. 1274. 1275. 1276. 1277. 1278. 1279. 1280. 1281. 1282. 1283. 1284. 1285. 1286. 1287. 1288. 1289. 1290. 1291. 1292. 1293. 1294. 1295. 1296. 1297. 1298. 1299. 1300. 1301. 1302. 1303. 1304. 1305. 1306. 1307. 1308. 1309. 1310. 1311. 1312. 1313. 1314. 1315. 1316. 1317. 1318. 1319. 1320. 1321. 1322. 1323. 1324. 1325. 1326. 1327. 1328. 1329. 1330. 1331. 1332. 1333. 1334. 1335. 1336. 1337. 1338. 1339. 1340. 1341. 1342. 1343. 1344. 1345. 1346. 1347. 1348. 1349. 1350. 1351. 1352. 1353. 1354. 1355. 1356. 1357. 1358. 1359. 1360. 1361. 1362. 1363. 1364. 1365. 1366. 1367. 1368. 1369. 1370. 1371. 1372. 1373. 1374. 1375. 1376. 1377. 1378. 1379. 1380. 1381. 1382. 1383. 1384. 1385. 1386. 1387. 1388. 1389. 1390. 1391. 1392. 1393. 1394. 1395. 1396. 1397. 1398. 1399. 1400. 1401. 1402. 1403. 1404. 1405. 1406. 1407. 1408. 1409. 1410. 1411. 1412. 1413. 1414. 1415. 1416. 1417. 1418. 1419. 1420. 1421. 1422. 1423. 1424. 1425. 1426. 1427. 1428. 1429. 1430. 1431. 1432. 1433. 1434. 1435. 1436. 1437. 1438. 1439. 1440. 1441. 1442. 1443. 1444. 1445. 1446. 1447. 1448. 1449. 1450. 1451. 1452. 1453. 1454. 1455. 1456. 1457. 1458. 1459. 1460. 1461. 1462. 1463. 1464. 1465. 1466. 1467. 1468. 1469. 1470. 1471. 1472. 1473. 1474. 1475. 1476. 1477. 1478. 1479. 1480. 1481. 1482. 1483. 1484. 1485. 1486. 1487. 1488. 1489. 1490. 1491. 1492. 1493. 1494. 1495. 1496. 1497. 1498. 1499. 1500. 1501. 1502. 1503. 1504. 1505. 1506. 1507. 1508. 1509. 1510. 1511. 1512. 1513. 1514. 1515. 1516. 1517. 1518. 1519. 1520. 1521. 1522. 1523. 1524. 1525. 1526. 1527. 1528. 1529. 1530. 1531. 1532. 1533. 1534. 1535. 1536. 1537. 1538. 1539. 1540. 1541. 1542. 1543. 1544. 1545. 1546. 1547. 1548. 1549. 1550. 1551. 1552. 1553. 1554. 1555. 1556. 1557. 1558. 1559. 1560. 1561. 1562. 1563. 1564. 1565. 1566. 1567. 1568. 1569. 1570. 1571. 1572. 1573. 1574. 1575. 1576. 1577. 1578. 1579. 1580. 1581. 1582. 1583. 1584. 1585. 1586. 1587. 1588. 1589. 1590. 1591. 1592. 1593. 1594. 1595. 1596. 1597. 1598. 1599. 1600. 1601. 1602. 1603. 1604. 1605. 1606. 1607. 1608. 1609. 1610. 1611. 1612. 1613. 1614. 1615. 1616. 1617. 1618. 1619. 1620. 1621. 1622. 1623. 1624. 1625. 1626. 1627. 1628. 1629. 1630. 1631. 1632. 1633. 1634. 1635. 1636. 1637. 1638. 1639. 1640. 1641. 1642. 1643. 1644. 1645. 1646. 1647. 1648. 1649. 1650. 1651. 1652. 1653. 1654. 1655. 1656. 1657. 1658. 1659. 1660. 1661. 1662. 1663. 1664. 1665. 1666. 1667. 1668. 1669. 1670. 1671. 1672. 1673. 1674. 1675. 1676. 1677. 1678. 1679. 1680. 1681. 1682. 1683. 1684. 1685. 1686. 1687. 1688. 1689. 1690. 1691. 1692. 1693. 1694. 1695. 1696. 1697. 1698. 1699. 1700. 1701. 1702. 1703. 1704. 1705. 1706. 1707. 1708. 1709. 1710. 1711. 1712. 1713. 1714. 1715. 1716. 1717. 1718. 1719. 1720. 1721. 1722. 1723. 1724. 1725. 1726. 1727. 1728. 1729. 1730. 1731. 1732. 1733. 1734. 1735. 1736. 1737. 1738. 1739. 1740. 1741. 1742. 1743. 1744. 1745. 1746. 1747. 1748. 1749. 1750. 1751. 1752. 1753. 1754. 1755. 1756. 1757. 1758. 1759. 1760. 1761. 1762. 1763. 1764. 1765. 1766. 1767. 1768. 1769. 1770. 1771. 1772. 1773. 1774. 1775. 1776. 1777. 1778. 1779. 1780. 1781. 1782. 1783. 1784. 1785. 1786. 1787. 1788. 1789. 1790. 1791. 1792. 1793. 1794. 1795. 1796. 1797. 1798. 1799. 1800. 1801. 1802. 1803. 1804. 1805. 1806. 1807. 1808. 1809. 1810. 1811. 1812. 1813. 1814. 1815. 1816.

十五卷【宋刘敞撰】春秋意林二卷【宋刘敞撰】春秋传说例一卷【宋刘敞撰】春秋经解十三卷【宋孙觉撰】春秋集解十二卷【宋苏辙撰】春秋辨疑四卷【宋萧楚撰】春秋经解十二卷【宋崔子方撰】春秋本例二十卷【宋崔子方撰】春秋例要一卷【宋崔子方撰】春秋五礼例宗七卷【宋张大亨撰】春秋通训六卷【宋张大亨撰】春秋传二十卷【宋叶梦得撰】春秋考十六卷【宋叶梦得撰】春秋谏二十二卷【宋叶梦得撰】春秋集解三十卷【宋吕本中撰】春秋传三十卷【宋胡安国撰】春秋集注四十卷【宋高闾撰】春秋后传十二卷【宋陈傅良撰】春秋左氏传说二十卷【宋吕祖谦撰】春秋左氏传续说十二卷【宋吕祖谦撰】详注东莱左氏博议二十五卷【宋吕祖谦撰】春秋比事二十卷【旧本题宋沈棐撰】春秋左传要义三十一卷【宋魏了翁撰】春秋分纪九十卷【宋程公说撰】春秋讲义四卷【宋戴溪撰】春秋集义五十卷纲领三卷【宋李明复撰】春秋集注十一卷纲领一卷【宋张洽撰】春秋王霸列国世纪编三卷【宋李琪撰】春秋通说十三卷【宋黄仲炎撰】春秋说三十卷【宋洪咨夔撰】春秋经筌十六卷【宋赵鹏飞撰】春秋或问二十卷附春秋五论一卷【宋吕大圭撰】春秋详说三十卷【宋家铉翁撰】读春秋编十二卷【宋陈深撰】春秋提纲十卷【旧本题陈则通撰】春秋集传释义大成十二卷【元俞皋撰】春秋纂言十二卷总例二卷【元吴澄撰】春秋诸国统纪六卷目录一卷【元齐履谦撰】春秋本义三十卷【元程端学撰】春秋或问十卷【元程端学撰】春秋三传辨疑二十卷【元程端学撰】春秋谏义九卷【元王元杰撰】春秋诸传会通二十四卷【元李廉撰】春秋经传阙疑四十五卷【元郑玉撰】春秋集传十五卷【元赵汭撰】春秋师说三卷【元赵汭撰】春秋属辞十五卷【元赵汭撰】春秋左氏传补注十卷【元赵汭撰】春秋金锁匙一卷【元赵汭撰】春秋胡传附录纂疏三十卷【元汪克宽撰】春秋大全七十卷【明胡广等奉敕纂】春王正月考二卷【明张以宁撰】春秋钩玄四卷【明石光霁撰】春秋经传辨疑一卷【明童品撰】春秋正传三十七卷【明湛若水撰】左传附注五卷【明陆粲撰】春秋胡氏传辨疑二卷【明陆粲撰】春秋明志录十二卷【明熊过撰】春秋正旨一卷【明高拱撰】春

秋辑传十三卷凡例二卷 【明王樵撰】 春秋
亿六卷 【明徐学谟撰】 春秋事义全考十六卷 【明姜宝撰】 春秋胡传考误一
卷 【明袁仁撰】 左传属事二十卷 【明傅逊
撰】 左氏释二卷 【明冯时可撰】 春秋质疑十二卷 【明杨子庭撰】 春秋孔义
十二卷 【明高攀龙撰】 春秋辨义三十九卷
【明卓尔康撰】 读春秋略记十卷 【明朱朝瑛撰】 春秋四传质二卷 【明王介
之撰】 左传杜林合注五十卷 【明王道焜赵
如源同编】

以上见文渊阁著录

左传节文十五卷 【旧本题宋欧阳修编】 春秋道统二卷 【不着撰人名氏】
左氏君子例一卷诗如例一卷诗补遗一卷 【
宋李石撰】 春秋通论二卷 【不着撰人名氏】 春秋握奇图一卷 【金利銮孙撰
】 春秋左传句解三十五卷 【元朱申撰】 春
秋经疑问对二卷 【元黄复祖撰】 春秋合题着说三卷 【元杨维楨撰】 春秋透
天关四卷 【旧本题元晏兼善撰】 春秋四传三
十八卷 【不着编辑名氏】 麟经指南一卷 【不着撰人名氏】 春秋图说无卷数
【不着撰人名氏】 春秋提要四卷 【明饶秉
鉴撰】 左觚一卷 【明邵宝撰】 春秋经世一卷 【明魏校撰】 春秋说志五卷
【明吕柟撰】 春秋集要十二卷 【明锺芳撰
】 春秋私考三十六卷 【明季本撰】 春秋世学三十二卷 【明丰坊撰】 左氏春
秋镌二卷 【明陆粲撰】 春秋读意一卷 【
明唐枢撰】 春秋录疑十六卷 【明赵恒撰】 春秋国华十八卷 【明严訥撰】 春
秋四传私考十三卷 【明徐浦撰】 左传注解
辨误二卷 【明傅逊撰】 左氏诗一卷左氏论一卷 【明冯时可撰】 春秋翼附二
十卷 【明黄正宪撰】 春秋诸传辨疑四卷 【
明朱睦■〈木挈〉撰】 春秋以俟录一卷 【明瞿九思撰】 春秋疑问十二卷 【
明姚舜牧撰】 春秋匡解六卷 【明邹德溥撰】
春秋直解十五卷 【明郝敬撰】 读左漫笔一卷 【明陈懿典撰】 春秋阐义十二
卷 【明曹学佺撰】 麟经统一篇十二卷 【明
张杞撰】 春秋麟宝六十三卷 【明余敷中撰】 春秋续义发微十二卷 【明郑良
弼撰】 春秋心印十四卷 【明郑録撰】 春秋
左翼四十三卷 【明王震撰】 春秋衡库三十卷 【明冯梦龙撰】 别本春秋大全
三十卷 【明冯梦龙撰】 春秋四传通辞十二卷
【明陈士芳撰】 春秋左传典略十二卷 【明陈许廷撰】 春秋揆一卷 【明黄道

周撰】春秋实录十二卷【明邓来鸾撰】春秋纂无卷数【明朱之俊撰】麟旨定无卷数【明陈于鼎撰】春秋三书三十二卷【明张溥撰】春秋说三十卷附录三卷【明王寢大撰】春秋义三十卷【明顾懋燮撰】锺评左传三十卷【明锺惺评】春秋左传评注测义七十卷【明凌雅隆撰】麟传统宗十三卷【明夏元彬撰】春秋因是三十卷【明梅之焯撰】春秋三传衷考十二卷【明施天遇撰】春秋五传平文四十一卷【明张岐然撰】春秋左传地名录二卷【明刘城撰】春秋年考一卷【不着撰人名氏】

以上见四库全书存目

春秋类凡一百三十一部

△孝经

孝经刊误一卷【宋朱子撰】孝经大义一卷【元董鼎撰】孝经定本一卷【元吴澄撰】孝经述注一卷【明项霖撰】孝经集传四卷【明黄道周撰】

以上见文渊阁著录

孝经本旨一卷【宋黄干撰】孝经句解一卷【元朱申撰】孝经外传二十二卷【元江直方撰】孝经正误一卷附录一卷【明潘府撰】孝经宗旨一卷【明罗汝芳撰】孝经疑问一卷【明姚舜牧撰】孝经集讲一卷【原本题明熊兆集讲】

以上见四库全书存目

孝经类凡十二部

△四书

论语拾遗一卷【宋苏辙撰】孟子解一卷【宋苏辙撰】论语全解十卷【宋陈祥道撰】孟子传二十九卷【宋张九成撰】尊孟辨三卷续辨二卷别录一卷【宋余允文撰】中庸集解二卷【宋石■〈敦上山下〉编】大学章句一卷中庸章句一卷论语集注十卷孟子集注七卷【宋朱子撰】四书或问三十九卷【宋朱子撰】论孟精义三十四卷【宋朱子撰】中庸辑略二卷【宋石■〈敦上山下〉原本朱子删定】论语意原二卷【宋郑汝谐撰】癸巳论语解十卷【宋张栻撰】癸巳孟子说七卷【宋张栻撰】石鼓论语问答三卷【宋戴溪撰】蒙斋中庸讲义四卷【宋袁甫撰】四书集编二十六卷【宋真德秀撰】孟子集疏十四卷【宋蔡模撰】论语集说十卷【宋蔡节撰】大学发微一卷大学

本旨一卷中庸指归一卷中庸分章一卷 【宋黎立武撰】 四书纂疏二十六卷 【宋赵顺孙撰】 大学疏义一卷 【宋金履祥撰】 论语集注考证十卷孟子集注考证七卷 【宋金履祥撰】 四书集义精要二十八卷 【元刘因撰】 四书辨疑十五卷 【元陈天祥撰】 读四书丛说四卷 【元许谦撰】 四书通二十六卷 【元胡炳文撰】 四书通证六卷 【元张存中撰】 四书疑节十二卷 【元袁俊翁撰】 四书经疑贯通八卷 【元王充耘撰】 四书纂笺二十八卷 【元詹道传撰】 四书通旨六卷 【元朱公迁撰】 四书管窥八卷 【元史伯璇撰】 大学中庸集说启蒙二卷 【元景星撰】 四书大全三十六卷 【明胡广等奉敕纂】 四书蒙引十五卷别附一卷 【明蔡清撰】 四书因问六卷 【明吕柟撰】 问辨录十卷 【明高拱撰】 论语类考二十卷 【明陈士元撰】 孟子杂记四卷 【明陈士元撰】 学庸正说三卷 【明赵南星撰】 论语商二卷 【明周宗建撰】 论语学案十卷 【明刘宗周撰】 四书留书六卷 【明章世纯撰】

以上见文渊阁著录

苏评孟子二卷 【旧本题宋苏洵评宋志不著录】 孟子解二卷 【旧本题宋尹焞撰】 孟子发题一卷 【宋施德操撰】 或问小注三十六卷 【旧本题宋朱子撰】 四书问目无卷数 【旧本题宋朱子撰】 论语孟子考异二卷 【宋王应麟撰】 中庸合注一卷 【不着撰人名氏】 重订四书辑释二十卷 【元倪士毅撰】 四书通义二十卷 【明刘剡撰】 大学指归二卷附考异一卷 【明魏校撰】 大学管窥一卷 【明廖纪撰】 中庸管窥一卷 【明廖纪撰】 大学千虑一卷 【明穆孔晖撰】 大学稽中传三卷 【明李经纶撰】 四书讲意无卷数 【明郑晓撰】 大学注一卷 【明蔡悉撰】 四书人物考四十卷补考八卷 【前考为明薛应旗撰补考为应旗元孙竑编】 日进直讲五卷 【明高拱撰】 大学新编五卷 【明刘元卿撰】 孟义订测七卷 【明管志道编】 四书疑问十一卷 【明姚舜牧撰】 经籍异同三卷 【明陈禹谟撰】 经言枝指一百卷 【明陈禹谟撰】 别本四书名物考二十四卷 【明陈禹谟撰】 孟子说解十四卷 【明郝敬撰】 论语义府二十卷 【明王肯堂撰】 中庸点缀一卷 【明方时化撰】 元晏斋困思钞三卷 【明孙慎行撰】 大学中庸读二卷 【明姚应仁撰】 四书湖南讲九卷 【明葛寅亮撰】 四书会解十卷 【明毛尚

忠撰】 四书正学渊源十卷 【明章一阳编】 大学古今通考十二卷 【明刘斯源编】 四书测六卷 【明万尚烈撰】 四书说丛十七卷 【明沈守正撰】 四书说约无卷数 【明鹿善继撰】 四书酌言三十一卷 【明寇慎撰】 四书考二十八卷四书考异一卷 【明陈仁锡撰】 四书通义三十八卷 【明鲁论撰】 三经见圣编一百八十卷 【明谭贞默撰】 四书经学考十卷补遗一卷续考六卷 【前考为明徐邦佐撰续考为明陈鹏霄撰】 四书读十卷 【明陈际泰撰】 四书则无卷数 【明桑拱阳撰】 四书集说二十八卷 【明徐养元赵渔同撰】 四书衍五卷 【明乔中和撰】 四书大全辨三十八卷附录六卷 【明张自烈撰】 举庸切已录二卷 【明谢文洊撰】

以上见四库全书存目

四书类凡九十部

△尔雅

埤雅二十卷 【宋陆佃撰】 尔雅翼三十二卷 【宋罗愿撰】 尔雅注三卷 【宋郑樵撰】 骈雅七卷 【明朱谋■〈土韦〉撰】

以上见文渊阁著录

崔氏小尔雅一卷 【旧本题明崔铎撰】 汇雅二十卷续编二十八卷 【明张萱撰】 方言据二卷 【明魏浚撰】 方言类聚四卷 【明陈与郊撰】

以上见四库全书存目

尔雅类凡八部

△经解

程氏经说七卷 【不着编辑名氏】 六经正误六卷 【宋毛居正撰】 刊正九经三传沿革例一卷 【宋岳珂撰】 融堂四书管见十三卷 【宋钱时撰】 四讲稿六卷 【宋黄仲元撰】 六经奥论六卷 【旧本题宋郑樵撰】 明本排字九经直音二卷 【不着撰人名氏】 五经说七卷 【元熊朋来撰】 十一经问对五卷 【旧本题元何异孙撰】 五经蠡测六卷 【明蒋悌生撰】 简端录十二卷 【明邵宝撰】 五经稽疑六卷 【明朱睦■〈木挈〉撰】 经典稽疑二卷 【明陈耀文撰】

以上见文渊阁著录

羣经疑辨录三卷 【明周洪谟撰】 石渠意见四卷拾遗二卷补阙二卷 【明王

恕撰】 五经心义无卷数 【明王崇庆撰】 十
三经解诂五十六卷 【明陈深撰】 说经札记八卷 【明蔡汝补撰】 五经异文十
一卷 【明陈士元撰】 五经绎十五卷 【明郑
元锡撰】 经书音释二卷 【明玛保撰】 孙月峯评经十六卷 【明孙矿撰】 九经
考异十二卷附九经逸语一卷 【明周应宾撰】
谈经九卷 【明郝敬撰】 六经三注粹钞无卷数 【明许顺义撰】 五经纂注五卷
【旧本题明锺惺纂】 峯阳草堂说书七卷 【
明郑鄮撰】 拙存堂经质二卷 【明冒起宗撰】 五经读五卷 【明陈际泰撰】 五
经圭约无卷数 【明蒋鸣玉撰】 经髓七卷 【
明陈世浚撰】

以上见四库全书存目

经解类凡三十一部

钦定续通志卷一百五十六

●钦定续通志卷一百五十七

艺文略 【二】

礼类第二 【周官 仪礼 礼记 月令 会礼 仪注】

乐类第三 【乐书 舞 乐器】

小学类第四 【文字 音韵 音释 古文 法书】

○礼类第二

（臣）等谨案郑志礼类分周官仪礼丧服礼记月令会礼仪注七门分并丧服于
仪礼而礼记门之中庸大学则移入四书至仪注一门

原志分目十有八条今统以朝庙礼仪杂礼仪而溢法国玺附焉

周官

仪礼

礼记

月令

会礼

仪注

△周官

周礼新义十六卷附考工记解二卷 【宋王安石撰】 周礼详解四十卷 【宋王
昭禹撰】 周礼复古编一卷 【宋俞廷椿撰】

礼经会元四卷 【宋叶时撰】 太平经国之书十一卷 【宋郑伯谦撰】 周官总义
三十卷 【宋易祓撰】 周礼订义八十卷 【宋

王与之撰】 虞斋考工记解二卷 【宋林希逸撰】 周礼句解十二卷 【宋朱申撰

】周礼集说十卷【不着撰人名氏】周官集
传十六卷【元毛应龙撰】周礼传十卷图说二卷翼传二卷【明王应电撰】周
礼全经释原十四卷【明柯尚迁撰】周礼注疏
删翼三十卷【明王志长撰】

以上见文渊阁著录

周礼井田谱二十卷【宋夏休撰】周礼补亡六卷【元邱葵撰】周礼集注
七卷【明何乔新撰】周礼沿革传四卷【明
魏校撰】周礼定本四卷【明舒芬撰】读礼疑图六卷【明季本撰】考工记述
注二卷【明林兆珂撰】周礼训隽二十卷【
明陈深撰】周礼因论一卷【明唐枢撰】明礼发明一卷【明沈瑶撰】周礼述
注六卷【明金瑶撰】周礼说十四卷【明
徐即登撰】批点考工记一卷【明郭正域批点】周礼完解十二卷【明郝敬撰
】周礼古本订注六卷【明郭良翰撰】古周
礼六卷【明郎兆玉撰】考工记通二卷【明徐昭庆撰】重校古周礼六卷【明
陈仁锡撰】周礼注疏合解十八卷【明张采
撰】读周礼略记六卷【明朱朝瑛撰】古周礼释评六卷【周孙攀撰】考工记
纂注二卷【明程明哲撰】周礼说略六卷【
不着撰人名氏】周礼文物大全无卷数【不着撰人名氏】

以上见四库全书存目

周官类凡三十八部

△仪礼

仪礼识误三卷【宋张淳撰】仪礼集释三十卷【宋李如圭撰】仪礼释宫
一卷【宋李如圭撰】仪礼经传通解三十七卷
续二十九卷【前三十七卷宋朱子撰丧礼十五卷黄干编祭礼十四卷杨复增定】
仪礼要义五十卷【宋魏了翁撰】内外服制通
释七卷【宋车垓撰】仪礼逸经二卷【元吴澄撰】仪礼集说十七卷【元敖继
公撰】礼经补逸九卷【元汪克宽撰】

以上见文渊阁著录

五服集证六卷【明徐骏撰】乡射礼仪节无卷数【明林烈撰】仪礼节解
十七卷【明郝敬撰】礼经集注十七卷【明
张凤翔撰】读仪礼略记十七卷【明朱朝瑛撰】

以上见四库全书存目

仪礼类凡十三部

△礼记

礼记集说一百六十卷 【宋卫湜撰】 礼记纂言三十六卷 【元吴澄撰】 云庄礼记集说十卷 【元陈澧撰】 礼记大全三十卷 【明胡广等奉敕纂】 表记集传二卷 【明黄道周撰】 坊记集传二卷 【明黄道周撰】 缙衣集传四卷 【明黄道周撰】 儒行集传二卷 【明黄道周撰】

以上见文渊阁著录

批点檀弓二卷 【旧本题宋谢枋得批点】 檀弓丛训二卷 【明杨慎撰】 就正录礼记会要六卷 【明宗周撰】 礼记明音二卷 【明王觉撰】 礼记集说辨疑一卷 【明戴冠撰】 礼记集注三十卷 【明徐师曾撰】 礼记日录三十卷 【明黄干行撰】 礼记辑览八卷 【明徐养相撰】 礼记要旨补十卷 【旧本题戈九畴撰闻人德行增补】 礼记中说三十六卷 【明马时敏撰】 礼记新义三十卷 【明汤三才撰】 礼记疑问十二卷 【明姚舜牧撰】 檀弓辑注二卷 【明陈与郊撰】 檀弓述注二卷 【明林兆珂撰】 礼记通解二十二卷 【明郝敬撰】 礼记新裁三十六卷 【明童维岩撰】 檀弓原二卷 【明姚应仁撰】 礼记说义集订二十四卷 【明杨梧撰】 礼记纂注三十卷 【明汤道衡撰】 礼记手书十卷 【明陈鸿恩撰】 檀弓通二卷 【明徐昭庆撰】 礼记意评四卷 【明朱泰贞撰】 说礼约十七卷 【明许兆金撰】 礼记敬业八卷 【明杨鼎熙撰】 读礼记略记四十九卷 【明朝瑛撰】 檀弓评二卷 【明牛斗星撰】

以上见四库全书存目

礼记类凡三十四部

△月令

月令解十二卷 【宋张虞撰】 夏小正戴氏传四卷 【宋传崧卿撰】 岁时广记四卷 【宋陈元靓撰】 月令明义四卷 【明黄道周撰】

以上见文渊阁著录

月令七十二候集解一卷 【旧本题元吴澄撰】 四时宜忌一卷 【明瞿佑撰】 四时气候集解四卷 【明李泰撰】 月令通考十六卷 【明卢翰撰】 月令广义二十五卷 【明冯应京撰】 节宣辑四卷 【明朝瞿撰】 养余月令二十九卷 【明戴羲撰】 日涉编十二卷 【明陈阶撰】 广月令三卷后集二卷 【明王勋撰】

以上见四库全书存目

月令类凡十三部

△会礼

礼经奥旨一卷 【旧本题宋郑樵撰】 三礼考一卷 【旧本题宋真德秀撰】
三礼考注六十四卷 【旧本题元吴澄撰】 二礼
经传测六十八卷 【明湛若水撰】 庙制考议无卷数 【明季本撰】 三礼纂注四
十九卷 【明贡汝成撰】 三礼编绎二十六卷
【明邓元锡撰】 二礼集解十二卷 【明李黼撰】 礼经类编三十卷 【明李经纶
撰】 礼乐合编三十卷 【明黄广撰】

以上见四库全书存目

会礼类凡十部

△仪注 【朝庙礼仪 杂礼书 谥法国玺附】

（臣）等谨案郑志国玺原附仪注门而谥法则附于经解焦竑经籍志尝非之今
从四库全书例并附于此

朝庙礼仪

杂礼书

谥法国玺

朝庙礼仪

政和五礼新仪二百二十卷 【宋郑居中等奉敕撰】 绍熙州县释奠仪图一卷
【宋朱子撰】 大金集礼四十卷 【金张暉等
所进】 庙学典礼六卷 【不着撰人名氏】 大明集礼五十三卷 【明徐一夔等奉
敕撰】 頌宫礼乐疏十卷 【明李之藻撰】

以上见文渊阁著录

通祀辑略三卷 【元人所撰不著名氏】 明堂或问一卷 【明世宗御撰】 正
孔子祀典说一卷 【明世宗御撰】 存心录十卷
【不着撰人名氏】 临雍录一卷 【明费阁撰】 大礼集议五卷 【明席书撰】 太
庙敕议一卷 【明嘉靖中礼部颁行本】 太常
总览无卷数 【明金赆仁撰】 王国典礼八卷 【明朱勤美撰】 孔庙礼乐考六卷
【明瞿九思撰】 明典礼志二十卷 【明郭正
域撰】 万古法程一卷 【明袁应兆撰】 辟雍纪事无卷数 【明卢上铭撰】

以上见四库全书存目

杂礼书

书仪十卷 【宋司马光撰】 家礼八卷 【旧题宋朱子撰】 泰泉乡礼七卷 【
明黄佐撰】

以上见文渊阁著录

郑氏家仪无卷数 【元郑泳撰】 家礼仪节八卷 【明邱浚撰】 礼问二卷 【明吕柟撰】 别本家礼仪节八卷 【旧题明杨慎编】 四礼初稿四卷 【明宋纁撰】 四礼疑五卷 【明吕坤撰】 四礼翼四卷 【明吕坤撰】 四礼辑一卷 【明马从聘撰】 明四礼集说八卷 【明韩承祚撰】 四礼约言四卷 【明吕维祺撰】

以上见四库全书存目

谥法国玺

明臣谥汇考二卷 【明鲍应鳌撰】 明谥纪汇编二十五卷 【明郭良翰撰】

以上见文渊阁著录

谥法通考十八卷 【明王圻撰】 明臣谥类钞一卷 【明郑汝璧撰】 谥苑二卷 【明朱睦㮮〈木挈〉撰】 谥法纂十卷 【明孙能传撰】 秦玺始末一卷 【明沈德符撰】 明谥考三十八卷 【明叶秉敬撰】

以上见四库全书存目

仪注类凡四十部

○乐类第三

（臣）等谨案郑志乐类十一门歌舞题解曲簿声调鼓吹并收雅郑琴即弦属乃与管弦钟磬并列为三兹酌为删并分乐书舞乐器三门杂歌小令则入之词曲以各从其类耳至讖纬一书其说已详经类无庸赘云

乐书

舞

乐器

△乐书

乐书二百卷 【宋陈旸撰】 律吕新书二卷 【宋蔡元定撰】 韶舞九成乐补一卷 【元余载撰】 律吕成书二卷 【元刘瑾撰】 苑洛志乐二十卷 【明韩邦奇撰】 钟律通考六卷 【明倪复撰】 乐律全书四十二卷 【明朱载堉撰】

以上见文渊阁著录

雅乐发微八卷 【明张敬撰】 大乐律吕元声六卷附律吕考注四卷 【明李文利撰】 六乐说无卷数 【明刘积撰】 古乐经传三卷 【明湛若水撰】 乐律纂要一卷 【明季本撰】 蔡氏律同二卷 【明蔡宗兗撰】 乐律举要一卷 【明韩邦奇撰】 乐经元义八卷 【明刘濂撰】 乐典三十六卷 【明黄佐撰】 八音摘要二卷 【明汪浩然撰】 律吕新书分注图纂十三卷 【明许

珍撰】 箫韶考逸二卷 【明吕怀撰】 律吕古义三卷 【明吕怀撰】 律吕分解二卷律吕发明二卷 【明孙应鳌撰】 李氏乐书十九卷 【明李文察撰】 雅乐考二十卷 【明韦焕撰】 律吕正声六十卷 【明王邦直撰】 律吕正论四卷 【明朱载堉撰】 律吕质疑辨惑无卷数 【明朱载堉撰】 乐经以俟录无卷数 【明瞿九思撰】 律吕解注二卷 【明邓文宪撰】 乐经集注二卷 【明张凤翔撰】 大乐嘉成一卷 【明袁应兆撰】 古乐义十二卷 【明邵储撰】

以上见四库全书存目

乐书类凡三十一部

△舞

舞志十二卷 【明张敕撰】

以上见四库全书存目

舞类一部

△乐器

琴史六卷 【宋朱长文撰】 瑟谱六卷 【元熊朋来撰】 松弦馆琴谱二卷 【明严澄撰】

以上见文渊阁著录

琴瑟谱三卷 【明汪浩然撰】 琴谱正传六卷 【旧题明宋仕校正杨嘉森编】 琴谱大全十卷 【明杨表正撰】 文会堂琴谱六卷 【明胡文焕撰】 理性元雅六卷 【明张廷玉撰】 青莲舫琴雅四卷 【明林有麟编】 伯牙心法一卷 【明杨抡撰】 太古遗音无卷数 【明杨抡撰】

以上见四库全书存目

乐器类凡十一部

○小学类第四

（臣）等谨案郑志小学类列蕃书神书二门蕃书收婆罗门书神书收仙篆鬼篆今并从删

文字

音韵

音释

古文

法书

△文字

字通一卷 【宋李从周撰】 班马字类五卷 【宋娄机撰】 六书故三十三卷

【宋戴侗撰】 六书统二十卷 【元杨桓撰】

字鉴五卷 【元李文仲撰】 说文字原一卷六书正讹五卷 【元周伯琦撰】 六艺
纲目二卷 【元舒天民撰】 六书本义十二卷

【明赵撝谦撰】 俗书刊误十二卷 【明焦竑撰】 字李四卷 【明叶秉敬撰】

以上见文渊阁著录

说文解字五音韵谱十卷 【宋李焘撰】 续千文一卷 【宋侍其良器撰】 四
声篇海十五卷 【金韩孝彦撰】 六书统溯原十

二卷 【元杨桓撰】 蒙古译语一卷 【不着撰人名氏】 华夷译语一卷 【明火源
洁撰】 篇海类编二十卷 【旧本题明宋濂撰

】 童蒙习句一卷 【明赵撝谦撰】 同文备考八卷附声韵会通韵要粗释二卷 【
明王应电撰】 古俗字略七卷 【明陈士元撰】

字考启蒙十六卷 【明周宇撰】 六书赋音义三卷 【明张士佩撰】 字义总略四
卷 【明顾充撰】 明同文集五十卷 【明田艺

衡撰】 六书指南二卷 【明李登撰】 诸书字考二卷 【明林茂槐撰】 五侯鯖字
海二十卷 【不着撰人名氏】 字学指南十卷

【明朱光家撰】 字学订讹二卷 【明李当泰撰】 合并字学集篇集韵二十三卷

【明徐孝编】 字考二卷 【明夏宏撰】 类纂

古文字考五卷 【明都俞撰】 六书正义十二卷 【明吴元满撰】 六书总要五卷

【明吴元满撰】 六书泝原直音二卷 【明吴

元满撰】 谐声指南一卷 【明吴元满撰】 说文长笺一百四卷 【明赵宦光撰】

六书长笺七卷 【明赵宦光撰】 正字通十二

卷 【旧本题明张自烈撰】 字韵合璧二十卷 【不着撰人名氏】

以上见四库全书存目

文字类凡四十部

△音韵

切韵指掌图二卷附检例一卷 【宋司马光撰】 韵补五卷 【宋吴棫撰】 附
释文互注礼部韵略五卷附贡举条式一卷 【礼

部韵略旧本不着撰人名氏】 增修互注礼部韵略五卷 【宋毛晃增注其子居正重
增】 增修校正押韵释疑五卷 【宋欧阳德隆撰

郭守正增修】 九经补韵一卷 【宋杨伯岳撰】 五音集韵十五卷 【金韩道昭撰
】 古今韵会举要三十卷 【元熊忠撰】 四声

等子一卷 【不着撰人名氏】 洪武正韵十六卷 【明宋濂等奉敕编】 古音丛目
五卷古音猎要五卷古音余五卷古音附录一卷 【

明杨慎撰】 古音略例一卷 【明杨慎撰】 转注古音略五卷 【明杨慎撰】

以上见文渊阁著录

书学正韵三十六卷 【元杨桓撰】 蒙古字韵二卷 【元朱宗文撰】 声音文字通三十二卷 【明赵撝谦撰】 韵学集成十三卷 【明章黼撰】 韵略易通二卷 【明兰廷秀撰】 韵学大成四卷 【明濮阳涑撰】 古今韵分注撮要五卷 【明甘雨撰】 并音连声字学集要四卷 【不着撰人名氏】 交泰韵一卷 【明吕坤撰】 音声纪元六卷 【明吴继仕撰】 正韵汇编四卷 【明周嘉栋撰】 字学元元十卷 【明袁子让撰】 韵表无卷数 【明叶秉敬撰】 音韵日月灯七十卷 【明吕维祺撰】 律古词曲赋叶韵十二卷 【明程元初撰】 韵谱本义十卷 【明茅溱撰】 韵总持三卷 【明朱简撰】 韵会小补三十卷 【明方日升撰】 篇韵贯珠集一卷 【明释真空撰】 西儒耳目资无卷数 【明金尼阁撰】 正韵笺四卷 【明杨时伟撰】 元韵谱五十四卷 【明乔中和撰】 皇极图韵一卷 【明陈苾谟撰】 元音统韵二十八卷 【明陈苾臣撰】 青郊杂着一卷文韵考衷六声会编十二卷 【明桑绍良撰】 古叶读五卷 【明龚黄撰】

以上见四库全书存目

音韵类凡三十九部

△音释

经史正音切韵指南一卷 【元刘鉴撰】 毛诗古音考四卷 【明陈第撰】 屈宋古音义三卷 【明陈第撰】

以上见文渊阁著录

读易韵考七卷 【明张献翼撰】 书文音义便考私编五卷附难字直音一卷 【明李登撰】 诗音辨略二卷 【明杨贞一撰】 石鼓文音释三卷附录一卷 【明杨慎撰】

以上见四库全书存目

音释类凡七部

△古文

钟鼎款识二十卷 【宋薛尚功撰】 复古编二卷 【宋张有撰】 汉隶字源六卷 【宋娄机撰】 汉隶分韵七卷 【不着撰人名氏】 奇字韵五卷 【明杨慎撰】 古音骈字一卷 【明杨慎撰】

以上见文渊阁著录

增修复古编四卷 【旧本题吴均撰】 从古正文五卷 【明黄谏撰】 六书精蕴六卷音释一卷 【明魏校撰】 集古隶韵五卷

【明方仕撰】 六书索隐五卷 【明杨慎撰】 经子难字二卷 【明杨慎撰】 石鼓文正误二卷 【明陶滋撰】 金石遗文五卷

【明丰道生撰】 古器铭释十卷 【明下蓑编】 问奇集一卷 【明张位撰】 摭古遗文二卷补遗一卷 【明李登撰】 集钟鼎古

文韵选五卷 【明释道泰撰】 篆韵五十卷 【不着撰人名氏】

以上见四库全书存目

古文类凡十九部

△法书

翰墨志一卷 【宋高宗御撰】 宣和书谱二十卷 【不着撰人名氏】 墨池编六卷 【宋朱长文撰】 书史一卷 【宋米芾撰】

【宋米芾撰】 宝章待访录一卷 【宋米芾撰】 海岳名言一卷 【宋米芾撰】 广川书跋十卷 【宋董道撰】 续书谱一卷 【宋姜夔撰】

宝真斋法书赞二十八卷 【宋岳珂撰】 书小史十卷 【宋陈思撰】 书苑菁华二十卷 【宋陈思撰】 书录三卷 【宋董更撰】

衍极二卷 【元郑杓撰】 法书考八卷 【元盛熙明撰】 书史会要九卷补遗一卷续编一卷 【明陶宗仪撰朱谋堃读】 墨池琐录

四卷 【明杨慎撰】 书诀一卷 【明丰坊撰】 书法雅言一卷 【明项穆撰】 寒山帚谈二卷拾遗附录一卷 【明赵宦光撰】

书法离钩十卷 【明潘之淙撰】

以上见文渊阁著录

草书集韵五卷 【不着撰人名氏】 书法钩玄四卷 【元苏霖撰】 字学新书摘钞一卷 【元刘惟志撰】 法书通释二卷 【

明张绅撰】 书学会编四卷 【明黄瑜编】 书纂五卷 【明周瑛撰】 书辑三卷 【明陆深撰】 书苑十卷书苑补益八卷 【书

苑为明王世贞编补益为詹景凤续编】 弇州山人题跋七卷 【明王世贞撰】 笔元要旨一卷 【明徐渭撰】 笔道通会一卷 【明

朱象衡撰】 游鹤堂墨藪二卷 【明周之士撰】

以上见四库全书存目

（臣）等谨案郑志于书画类以书学入小学以画学入艺术今从其例其有兼论书画者则仍归艺术门法书类凡三十二部

钦定续通志卷一百五十七

●钦定续通志卷一百五十八 艺文略三

艺文略 【三】

史类第五上 【正史 编年 别史 杂史 载记 史评 故事 职官 刑法

】

○史类第五上

（臣）等谨案郑志立史类十三门各为细目正史之目则有通史编年之目则有纪录今遵四库全书例增立别史史评二门与正史编年并列而凡通史纪录诸书俱入焉至起居注一门宋元以来简帙残缺罕见成书四库全书中亦未经著录今仍阙之

正史

编年

别史

杂史

载记

史评

故事

职官

刑法

△正史

两汉刊误补遗十卷 【宋吴仁杰撰】 班马异同三十五卷 【宋倪思撰刘辰翁评】 补后汉书年表十卷 【宋熊方撰】 三国志辨误三卷 【不着撰人名氏】 宋史四百九十六卷 【元托克托等奉敕撰】 辽史一百十六卷 【元托克托等奉敕撰】 金史一百三十五卷 【元托克托等奉敕撰】 元史二百十卷 【明宋濂等奉敕撰】

以上见文渊阁著录

订正史记真本凡例一卷 【旧本题宋洪遵撰】 史记琐琐二卷 【明郝敬撰】 史论五卷 【明程一技撰】 史汉方驾三十五卷 【明许相卿撰】 宋史偶识三卷 【明项梦原撰】

以上见四库全书存目

正史类凡十三部

△编年

通鉴考异三十卷通鉴目录三十卷通鉴释例一卷 【宋同马光撰】 稽古录二十卷 【宋司马光撰】 皇王大纪八十卷 【宋胡宏撰】 大事记十二卷通释三卷解题十二卷 【宋吕祖谦撰】 西汉年纪三十卷 【宋王益之撰】 续资治通鉴长编五百二十卷 【宋李焘撰】 续宋编年资治通鉴十五卷 【宋刘时举撰】 靖康要录十六卷 【不着撰人名氏】 中兴小纪四十卷 【宋熊克

撰】建炎以来系年要录二百卷【宋李心传撰】宋九朝编年备要三十卷【宋陈均撰】两朝纲目备要十六卷【不着撰人名氏】宋季三朝政要六卷【不着撰人名氏】宋史全文三十六卷【旧本题曰续通鉴长编宋李焘撰】通鉴地理通释十四卷【宋王应麟撰】通鉴前编十八卷举要三卷【宋金履祥撰】通鉴释文辨误十二卷【元胡三省撰】通鉴续编二十四卷【元陈桎撰】大事记续编七十七卷【明王祎撰】元史续编十六卷【明胡粹中撰】纲目续麟二十卷汇览三卷校正凡例一卷附录一卷【明张自勋撰】

以上见文渊阁著录

续通鉴十八卷【宋李焘撰】少微通鉴节要五十卷【宋江贇编】增节音注资治通鉴一百二十卷【宋陆唐老编】通鉴纲目测海三卷【元何中撰】帝王纪年纂要一卷【元察罕撰明黄谏补】世史正纲三十二卷【明邱浚撰】通鉴纲目前编三卷【明许诰撰】通鉴纲目前编二十五卷【明南轩撰】经世策一卷【明魏校撰】人代纪要三十卷【明顾应祥撰】考信编七卷【明杜思撰】宋元资治通鉴一百五十七卷【明薛应旗撰】甲子会纪五卷【明薛应旗撰】宪章录四十七卷【明薛应旗撰】明本纪一卷【不着撰人名氏】龙飞纪略八卷【明吴朴撰】姜氏秘史一卷【明姜清撰】嘉隆两朝闻见纪十二卷【明沈越撰】明大政记二十五卷【明雷礼撰】明六朝索隐十六卷【明雷礼撰】昭代典则二十八卷【明黄光升撰】明成宪录十一卷【不着撰人名氏】秘阁元龟政要十六卷【不着撰人名氏】明通纪述遗十二卷【明卜世昌屠衡同撰】世穆两朝编年史六卷【明支大纶撰】明大政纂要六十卷【明谭希思撰】大政记三十六卷【明朱国桢撰】两朝宪章录二十卷【明吴瑞登撰】国史纪闻十二卷【明张铨撰】纲鉴正史约三十六卷【明顾锡畴撰】历年二十一传残本十二卷【明程元初撰】春秋编年举要无卷数【明杨时伟撰】

以上见四库全书存目

编年类凡五十三部

△别史【史钞附】

（臣）等谨案四库全书采陈振孙书录解题例立别史一门而以史钞附焉今遵为式

古史六十卷【宋苏辙撰】 路史四十七卷【宋罗泌撰】 续后汉四十七卷【宋萧常撰】 古今纪要十九卷【宋黄震撰】 隆平集二十卷【曹本题宋曾巩撰】 东都事略一百三十卷目录一卷【宋王偁撰】 大事记讲义二十三卷【宋吕中撰】 契丹国志二十七卷【宋叶隆礼撰】 大金国志四十卷【旧本题宋宇文懋昭撰】 续后汉书九十卷【元郝经撰】 南北史合注一百五卷【明李清撰】 宋史纪事本末二十六卷【明陈邦瞻撰】 元史纪事本末四卷【明陈邦瞻撰】

以上见文渊阁著录

历代帝王纂要谱括一卷【不着撰人名氏】 蜀汉本末三卷【元赵居信撰】 晋史删四十卷【明茅国缙撰】 晋书别本一百三十卷【明蒋之翘撰】 唐纪无卷数【明孙恂撰】 宋史质一百卷【明王洙撰】 宋史新编二百卷【明柯维骐撰】 南宋书六十卷【明钱士升撰】 邃古记八卷【明朱谋■〈土韦〉撰】 季汉书五十六卷【明谢陞撰】 荒史六卷【明陈士元撰】 藏书六十八卷【明李贽撰】 续藏书二十七卷【明李贽撰】 甬史上编八十一卷【明邓元锡纂】 甬史下编二十一卷【明邓元锡纂】 明书四十五卷【明邓元锡编】 书系十六卷【明唐大章撰】 稽古编五十五卷【明郭之奇撰】 阅史约书五卷【明王光鲁撰】 读史图纂一卷【明俞焕章撰】 征吾录二卷【明郑晓撰】 明帝后纪略一卷【明郑汝璧撰】 识大录无卷数【明刘振撰】 从龙谱无卷数【原本题李泽长编】

以上见四库全书存目

史钞

史钞

两汉博闻十二卷【宋杨侃编】 通鉴纪事本末四十二卷【宋袁枢撰】 通鉴总类二十卷【宋沈枢撰】 春秋左氏传事类始末五卷【宋章冲撰】 春秋别典十五卷【明薛虞畿撰】

以上见文渊阁著录

史记法语八卷【宋洪迈撰】 南朝史精语十卷【宋洪迈撰】 诸史提要十五卷【宋钱端礼撰】 东汉精华十四卷【宋吕祖谦撰】 汉隽十卷【宋林越撰】 十七史详节二百七十三卷【宋吕祖谦编】 十八史略二卷【元曾先之撰】 元史节要十四卷【明张九韶撰】 读史备忘八卷【明范理撰】 春秋左传类解二十卷【

明刘绩撰】 两晋南北奇谈六卷 【旧本题宋
王涣撰】 分类通鉴四卷 【不着撰人名氏】 读书漫笔十八卷 【明方澜撰】 诸
史品节三十九卷 【明陈深编】 史纂左编一
百二十四卷 【明唐顺之编】 左氏始末十二卷 【明唐顺之编】 史记钞六十五
卷 【明茅坤编】 史略详注补遗大成十卷 【
明李纪撰】 史要编十卷 【明梁梦龙编】 左国腴词八卷 【明凌迪知撰】 太史
华句八卷 【明凌迪知撰】 两汉隽言十六卷
【明凌迪知撰】 春秋贯玉四卷 【明颜鲸撰】 四史鸿裁四十卷 【明穆文熙编
】 全史论赞八十卷 【明项笃寿编】 彩线贯
明珠秋槩录一卷 【不着撰人名氏】 春秋类编三十二卷 【明秦淪撰】 宋史纂
要二十卷 【明王思义撰】 古今彝语十二卷
【明汪应蛟撰】 史书纂略二百二十卷 【明马维铭撰】 史裁二十六卷 【明吴
士奇撰】 史觚十七卷 【明谢肇淛撰】 读史
快编四十四卷 【明赵维寰撰】 史裔二十五卷 【明余文龙编】 南北史钞无卷
数 【明周诗雅撰】 左记十二卷 【明章大吉
撰】 二十一史论赞辑要三十六卷 【明彭以明编】 左传分国纪事二十二卷 【
明孙范撰】 史品赤函四卷 【明陈仁锡编】
读史集四卷 【明杨以任撰】 宋史存二卷 【明文德翼撰】 读史汉翹二卷 【明
施端教编】 二十一史论赞三十六卷 【明沈
国元编】 三国史瑜八卷 【明张毓睿撰】 史书十卷 【明姚允明撰】 廿一史识
余三十七卷 【明张墉撰】 史异编十七卷 【
明俞文龙撰】 高庙纪事本末无卷数 【不着撰人名氏】

以上见四库全书存目

别史类凡九十部

△杂史

元经十卷 【隋王通撰唐薛收续宋阮逸注】 战国策注十卷 【宋鲍彪注】
燕翼贻谋录五卷 【宋王栻撰】 北狩见闻录一
卷 【宋曹勋撰】 松漠纪闻一卷续一卷 【宋洪皓撰】 三朝北盟会编二百五十
卷 【宋徐梦莘撰】 蜀鉴十卷 【宋郭允蹈撰
】 太平治迹统无卷数 【宋彭百川撰】 咸淳遗事二卷 【不着撰人名氏】 大金
吊伐录四卷 【不着撰人名氏】 战国策校注
十卷 【元吴师道撰】 汝南遗事四卷 【元王鹗撰】 钱塘遗事十卷 【元刘一清
撰】 东南纪闻三卷 【不着撰人名氏】 平
宋录三卷 【元刘敏中撰】 弇山堂别集一百卷 【明王世贞撰】 炎徼纪闻四卷

【明田汝成撰】革除逸史二卷 【明朱睦■

〈木挈〉撰】明宫史五卷 【旧题吕毖校次】

以上见文渊阁著录

艺祖受禅录一卷 【宋赵普曹彬同撰】 景命万年录一卷 【不着撰人名氏】
青溪寇轨一卷 【宋方勺撰】 青溪弄兵录二
卷 【宋王弥大编】 避戎夜话一卷 【宋石茂良撰】 靖康蒙尘录一卷 【不着撰
人名氏】 靖康纪闻拾遗一卷 【不着撰人名
氏】 北狩行录一卷 【宋蔡偲撰】 靖炎两朝见闻录二卷 【宋陈东撰】 建炎时
政记三卷 【宋李纲撰】 建炎通问录一卷 【
宋傅雱撰】 建炎维扬遗录一卷 【不着撰人名氏】 维扬巡幸记一卷 【不着撰
人名氏】 己酉航海记一卷 【宋李正民撰】
燕云录一卷 【宋赵子砥撰】 建炎复辟记一卷 【不着撰人名氏】 绍兴甲寅通
和录一卷 【宋王绘撰】 顺昌战胜录一卷 【
宋杨汝翼撰】 淮西从军记一卷 【不着撰人名氏】 采石战胜录一卷 【宋员兴
宗撰】 南渡录二卷 【不着撰人名氏】 窃愤
录一卷 【不着撰人名氏】 御侮录二卷 【不着撰人名氏】 重明节馆伴语录无
卷数 【宋倪思撰】 正隆事迹记一卷 【宋张
棣撰】 金图经一卷 【一名金国志不着撰人名氏】 汤王江上录一卷 【不着撰
人名氏】 使金录一卷 【宋程卓撰】 襄阳守
城录一卷 【宋赵万年撰】 诛吴录一卷 【宋张革之撰】 丁卯实编一卷 【宋毛
方平撰】 平叛录一卷 【宋郭士宁撰】 辛
巳泣薪录一卷 【宋赵与■〈穴上衾下〉撰】 使北日录一卷 【宋邹伸之撰】
广王卫王本末一卷 【宋陈仲微撰】 三朝野史
一卷 【不着撰人名氏】 平巢事迹考一卷 【不着撰人名氏】 碧溪丛书八卷 【
不着编辑名氏】 焚椒录一卷 【辽王鼎撰】
南迁录一卷 【旧本题金张师颜撰】 南宋补遗无卷数 【旧本题谢朱胜撰不着时
代】 平獠记一卷 【元虞集撰】 圣武亲征录
一卷 【不着撰人名氏】 大狩龙飞录二卷 【明世宗御撰】 洪武圣政记二卷 【
明宋濂撰】 庚申外史二卷 【明权衡撰】
国初礼贤录一卷 【明刘基撰】 平蜀记一卷 【不着撰人名氏】 北平录一卷 【
不着撰人名氏】 别本北平录一卷 【不着撰
人名氏】 明高皇后传一卷 【不着撰人名氏】 云南机务钞黄一卷 【明张紘撰
】 战国策谈榷十卷 【明张文燿撰】 汉唐秘
史二卷 【明宁王权撰】 奉天靖难记四卷 【不着撰人名氏】 别本洪武圣政记

十二卷【不着撰人名氏】 国初事迹一卷【明刘辰撰】 北征录一卷后北征录一卷【明金幼孜撰】 后北征记一卷【明杨荣撰】 小史摘钞二卷【不着撰人名氏】 三朝圣谕录三卷【明杨士奇撰】 天顺日录一卷【明李贤撰】 否泰录一卷【明刘定之撰】 朝鲜记事一卷【明倪谦撰】 南征录一卷【明张瑄撰】 出使录一卷【一名使北录明李实撰】 东征纪行录一卷【明张瓚撰】 马端肃三记三卷【明马文升撰】 复辟录一卷【明杨暄撰】 平蛮录一卷【明王轼撰】 北征事迹一卷【明袁彬撰】 正统临戎录一卷【明杨铭撰】 燕对录一卷【明李东阳撰】 平吴录一卷【不着撰人名氏】 史余一卷【不着撰人名氏】 明政要二十卷【明娄性撰】 苏州府纂修识略六卷【明杨循吉撰】 安楚录十卷【明秦金撰】 东征忠义录无卷数【明刘昭撰】 治世余闻二卷【不着撰人名氏】 继世纪闻五卷【不着撰人名氏】 壬午功臣爵赏录一卷壬午功臣别录一卷【明都穆撰】 平番始末一卷【明许进撰】 南城召对录一卷【明李时撰】 南巡日录一卷北还录一卷【明陆深撰】 革除编年无卷数【不着撰人名氏】 明良集十二卷【明霍韬撰】 革朝志十卷【明许相卿撰】 维祺录一卷附录一卷【明陈沂撰】 平汉录一卷【明童承叙撰】 茂边纪事一卷【明朱纨撰】 革除遗事节本六卷【明黄佐撰】 楚纪六十卷【明廖道南撰】 哈密事迹一卷附赵全献牒一卷【不着撰人名氏】 今言四卷【明郑晓撰】 云中纪变一卷【明孙允中撰】 七雄策纂八卷【明穆文熙撰】 辽记一卷【明田汝成撰】 龙凭纪略一卷【明田汝成撰】 行边纪闻一卷【明田汝成撰】 洗海近事二卷【明俞大猷撰】 奉天刑赏录一卷【明袁褰撰】 广右战功录一卷【明唐顺之撰】 建文事迹备遗录一卷【不着撰人名氏】 平濠记一卷【明钱德洪撰】 南泰纪略一卷【明尹耕撰】 处苗近事一卷【明李恺编】 革除遗事十六卷【明符验撰】 安南奏议一卷【不着撰人名氏】 议处安南事宜一卷【不着撰人名氏】 伏戎纪事一卷【明高拱撰】 靖夷纪事一卷【明高拱撰】 绥广纪事一卷【明高拱撰】 防边纪事一卷【明高拱撰】 平倭录无卷数【不着撰人名氏】 世庙识余录二十六卷【明徐学谟撰】 西南纪事六卷【明郭应聘撰】 交黎抚剿事略五卷【明方民悦撰】 鸿猷录十

六卷 【明高岱撰】 召对录一卷 【明申时行撰】 平夷功次录一卷 【明焦希程编】 嘉靖倭乱备钞二卷 【不着撰人名氏】 瀛舫谈苑十二卷 【旧题明钓瀛子撰不著名氏】 平黔三记一卷 【明赵汝谦撰】 平播始末二卷 【明郭子章撰】 建文朝野汇编二十卷 【明屠叔方撰】 明祖四大法十二卷 【明陈栋如编】 肃皇外史四十六卷 【明范守己撰】 圣典二十四卷 【明朱睦㮮〈木挈〉撰】 倭患考原二卷 【明黄俟卿撰】 典故纪闻十八卷 【明余继登撰】 乙未私志一卷 【明余寅撰】 明馭倭录九卷 【明王士骥撰】 建文书法儼五卷 【明朱鹭撰】 绳武编三十四卷 【明吴瑞登撰】 北楼日记无卷数 【不着撰人名氏】 明宝训四十卷 【明陈治本吕允昌朱锦同编】 吴淞甲乙倭变志二卷 【明张鼐撰】 两朝平攘录五卷 【明诸葛元声撰】 挺击始末一卷 【明陆梦龙撰】 逊国君记钞一卷臣事钞六卷 【明郑晓撰】 虐政集一卷邪氛集一卷倒戈集一卷 【不着撰人名氏】 泰昌日录一卷 【明杨维休撰】 阉党逆案一卷 【明韩爌等奉敕撰】 逊国逸书七卷 【明钱士升撰】 守麋纪略一卷 【明高斗枢撰】 建文史待无卷数 【明陈继儒撰】 永陵传信录六卷 【明戴笠撰】 事辞辑余无卷数 【明沈諤撰】 逊国正气纪二卷 【明曹参芳撰】 嘉靖大政类编二卷 【明茅元仪撰】 平巢事迹考一卷 【明茅元仪撰】 定保录无卷数 【明赵元祉撰】 蜀国春秋十八卷 【明苟廷诏撰】 先拔志始二卷 【明文秉撰】 守汴日志一卷 【明李光壁撰】 东林始末一卷 【明蒋平阶撰】 谈往一卷 【旧本题花村看行侍者不著名氏】 平播全书十五卷 【明李化龙撰】

以上见四库全书存目

杂史类凡一百七十八部

△载记

（臣）等谨案郑志立霸史一门收十六国春秋三十国春秋之类而桓元僭伪事二卷与故事门复出今从四库全书例改为载记门

南唐书三十卷 【宋马令撰】 南唐书十八卷音释一卷 【宋陆游撰】 南唐书合订二十五卷 【明李清撰】 越史略三卷

【不着撰人名氏】 朝鲜史略六卷 【不着撰人名氏】

以上见文渊阁著录

十六国考镜一卷 【旧本题宋石延年撰】 西夏事略一卷 【旧本题宋王侁撰】

】明氏实录一卷【明杨学可撰】高丽史二卷【旧本题高丽使臣郑麟趾撰】唐余纪传十八卷【明陈霆撰】南诏事略一卷【明顾应祥撰】吴越世家疑辨一卷【明马荩臣撰】吴越纪余五卷附杂吟一卷【明钱贵撰】滇载记一卷【明杨慎撰】陈张本末略一卷附方国珍本末略一卷【明吴国伦撰】越峤书二十卷【明李文凤撰】孤忠小史十八卷【不着撰人名氏】朝鲜国纪一卷【明黄洪宪撰】后梁春秋二卷【明姚士舜撰】韩氏事迹一卷方氏事迹一卷【明刘文进撰】南诏野史一卷【旧本题倪辂集】

以上见四库全书存目

载记类凡二十一部

△史评

唐史论断三卷【宋孙甫撰】唐书直笔四卷【宋吕夏卿撰】通鉴问疑一卷【宋刘羲仲撰】三国杂事二卷【宋唐庚撰】经幄管见四卷【宋曹彦约撰】涉史随笔一卷【宋葛洪撰】六朝通鉴博议十卷【宋李焘撰】两汉笔记十二卷【宋钱时撰】旧闻证误四卷【宋李心传撰】通鉴答问五卷【宋王应麟撰】历代名贤确论一百卷【不着撰人名氏】历朝通略四卷【元陈栎撰】十七史纂古今通要十七卷【元胡一桂撰】学史十三卷【明邵宝撰】史纠六卷【明朱明镐撰】国史考异六卷【不着撰人名氏】

以上见文渊阁著录

四明尊尧集十一卷【宋陈瓘撰】读史管见三十卷【宋胡寅撰】议史摘要四卷【旧本题宋吕祖谦撰】三国六朝五代纪年总辨二十八卷【不着撰人名氏】小学史断二卷续集一卷附通鉴总论一卷【宋南宮靖一撰】三国纪年一卷【宋陈亮撰】史学提要一卷【宋黄继善撰】承华事略一卷【元王恽撰】叙古颂二卷【元钱天佑撰】史义拾遗二卷【元杨维桢撰】事偶韵语一卷【旧本题凌纬撰不详时代】世史积疑二卷【元李士实撰】史通评释二十卷【明利瓦伊桢评郭孔延附评】史通训故二十卷【明王惟俭撰】通鉴博论三卷【明盛王权撰】宋论三卷【明刘定之撰】蔗山笔麈一卷【明商辂撰】政监三十二卷【明夏寅撰】雪航肤见十卷【明赵弼撰】新旧唐书杂论一卷【明李东阳撰】宋纪受终考三卷【

明程敏政撰】续资治通鉴纲目广义十七卷【明张时泰撰】宋史阐幽二卷【明许浩撰】元史阐幽一卷【明许浩撰】史通会要三卷【明陆深撰】兀涯西汉书议十二卷【旧题明张邦奇撰】史评十卷【明范光宙撰】责备余谈二卷【明方鹏撰】东源读史录无卷数【明田惟佑撰】翼正录四卷【明何思登撰】尚论编二十卷【明邹泉撰】世谱增定二卷【明吕颀编】帝鉴图说无卷数【明张居正吕调阳同撰】羣史品藻三十卷【明戴璟撰】汉唐通鉴品藻三十卷【明戴璟撰】两汉解疑二卷【明唐顺之撰】两晋解疑一卷【明唐顺之撰】觉山史说二卷【明洪垣撰】太史史例一百卷【明张之象撰】史乘考误十卷【明王世贞撰】洗心居雅言集二卷【明范梈撰】古史要评五卷【明吴崇节撰】史取十二卷【明贺祥撰】读史漫录十四卷【明于慎行撰】史韵二卷【明赵南星撰】余言二卷【明徐三重撰】涉世雄谈八卷【明朱正色撰】读史漫笔一卷【明陈懿典撰】兰曹读史日记四卷【明熊尚文撰】史谈补五卷【明杨一奇撰】尚友斋论古无卷数【明涂一榛撰】人物论三十四卷【明郑贤编】读史商语四卷【明王志坚撰】史怀十七卷【明鍾惺撰】左羽外编四十六卷【明张大龄撰】诗史十五卷【明唐汝询撰】测史剩语六卷【明冯士元撰】史拾载补无卷数【明吴宏基撰】史砭二卷【明程至善撰】评史心见十二卷【明郭大有撰】古质疑一卷【明郑賡唐撰】读书镜十卷【明陈继儒撰】青油史漫二卷【明茅元仪撰】史疑四卷【明宋存标撰】历代史论二编十卷【明张溥撰】读史书后一卷【明胡梦泰撰】拙存堂史括三卷【明冒起宗撰】孟叔子史发无卷数【明孟称舜撰】狂狷裁中十卷【明杨时伟撰】廿一史独断二十一卷【明张自勋撰】尚论编六卷【不着撰人名氏】宋史笔断十二卷【旧题正谊斋編集不著名氏】卖菜言一卷【不着撰人名氏】

以上见四库全书存目

史评类凡八十九部

△故事【通制 通令 军政 工政 贡举 杂法令附 杂典制附】

（臣）等谨案郑志故事一门但收三辅旧事西京杂记等书而政令法制之属皆载在刑法门今惟以断狱入刑法余皆列于故事门参

用四库全书例及郑志例分通制通令军政工政贡举五目而以杂法令杂典制附焉

通制

通令

军政

工政

贡举

杂法令

杂典制

通制

建炎以来朝野杂记四十卷 【宋李心传撰】 西汉会要七十卷 【宋徐天麟撰】 东汉会要四十卷 【宋徐天麟撰】 汉制考四卷 【宋王应麟撰】 文献通考三百四十八卷 【元马端临撰】 明会典一百八十卷 【明弘治十年敕撰】 七国考十四卷 【明董说撰】

以上见文渊阁著录

元典章前集六十卷附新集无卷数 【元英宗时官撰】 明祖训一卷 【明洪武二年命中书编次】 明朝典汇二百卷 【明徐学聚撰】 经世实用编二十八卷 【明冯应京撰】 明典章无卷数 【不着撰人名氏】 会典钞略无卷数 【不着编辑名氏】

以上见四库全书存目

通令

永徽法经三十卷 【元郑汝翼撰】 至正条格二十三卷 【元顺帝时官撰】 金玉新书二十七卷 【不着撰人名氏】 官民准用七卷 【不着撰人名氏】 明律三十卷 【明太祖时敕撰】

以上见四库全书存目

军政

历代兵制八卷 【宋陈傅良撰】 补汉兵志一卷 【宋钱文子撰】 马政纪十二卷 【明杨时乔撰】

以上见文渊阁著录

马政志四卷 【明陈讲撰】

以上见四库全书存目

工政

营造法式三十四卷 【宋李诫奉敕撰】

以上见文渊阁著录

元内府宫殿制作一卷 【不着撰人名氏】 造砖图说一卷 【明张问之撰】
西槎汇草一卷 【明龚辉撰】 南船纪四卷 【
明沈■〈启上山下〉撰】 水部备考十卷 【明周梦旸撰】

以上见四库全书存目

贡举

贡举叙略一卷 【旧本题宋陈彭年撰】 科场条贯一卷 【明陆深撰】 明贡
举考九卷 【明张朝瑞撰】 历代贡举志一卷
【明冯梦楨撰】 留都武学志五卷 【明徐伯征撰】 学科考略一卷 【明董其昌
撰】 堂考故一卷 【明张鼐撰】

杂法令附

阳明乡约法一卷 【明王守仁撰】 阳明保甲法一卷 【明王守仁撰】

以上见四库全书存目

杂典制附

大金德运图说一卷 【金尚书省会官集议之文】

以上见文渊阁著录

改元考一卷 【明朱当■〈彳 眇〉撰】 年号韵编一卷 【明陈懋仁撰】

以上见四库全书存目

故事类凡四十部

△职官 【官制 官箴附】

（臣）等谨案郑志职官一门分上下帙凡考功课绩之书多入下帙兹汇为一帙
专叙官制于前而以官箴附后

官制

官箴

官制

麟台故事五卷 【宋程俱撰】 翰苑羣书二卷 【宋洪遵撰】 南宋馆阁录十
卷 【宋陈騊撰】 南宋馆阁续录十卷 【不着

撰人名氏】 玉堂杂记三卷 【宋周必大撰】 宋宰辅编年录二十卷 【宋徐自明
撰】 秘书监志十一卷 【元王士点滴企翁同撰

】 翰林记二十卷 【不着撰人名氏】 殿阁词林记二十二卷 【明廖道南撰】 礼
部志稿一百一十卷 【明泰昌元年官修】 太

常续考八卷 【不着撰人名氏】 土官底簿二卷 【不着撰人名氏】

以上见文渊阁著录

历代铨政要略一卷 【宋杨亿撰】 太常沿革二卷 【元任栻撰】 南台备要
二卷 【元刘孟保等撰】 官职会通二卷 【明

魏校撰】南雍志二十四卷【明黄佐撰】虔台志十二卷【明萧根等撰】吕梁洪志一卷【明冯世雍撰】郟台志略九卷【明徐桂撰】虔台续志五卷【明陈灿撰】南京太常寺志十三卷【明汪宗元撰】列卿记一百六十五卷【明雷礼撰】南京太仆寺志十一卷【明雷礼撰】太仆寺志十四卷【明顾存仁撰】浙省分署纪事本末六卷【明茅坤撰】留台杂记八卷【明符验撰】南京吏部志十五卷【明汪宗伊撰】吏部职掌无卷数【明黄养蒙撰】公侯簿三卷【不着撰人名氏】词林典故一卷附翰苑须知一卷【明张位撰】明功臣封爵考八卷【明郑汝璧撰】馆阁漫录无卷数【不着撰人名氏】掖垣人鉴十七卷附录一卷【明萧彦撰】职官志一卷附后纪妃嫔传外戚传三篇【不着撰人名氏】楚台记事七卷【明李天麟撰】符司纪六卷【明刘日升撰】旧京词林志六卷【明周应宾撰】南京鸿胪寺志四卷【明桑学夔撰】官制备考二卷【明李日华撰】续宋宰辅编年录二十六卷【明吕邦耀撰】大臣谱十六卷【明范景文撰】南京工部志十八卷【明朱长芳撰】南京都察院志四十卷【明施沛撰】南京行人司志十六卷【明翁逢春撰】明文武诸司衙门官制五卷【不着撰人名氏】官爵志三卷【明徐石麒撰】古今官制沿革图无卷数【明王光鲁撰】明官制五卷【不着撰人名氏】念初堂集十二卷【不着撰人名氏】

官箴

官箴一卷【宋吕本中撰】百官箴六卷【宋许月卿撰】昼帘绪论一卷【宋胡太初撰】州县纲四卷【不着撰人名氏】三事忠告四卷【元张养浩撰】

以上见文渊阁著录

牧民忠告一卷【元张养浩撰】官箴一卷【明宣宗御制】牧津四十四卷【明祁承■〈火业〉撰】明职一卷【明吕坤撰】仕学全书三十五卷【明鲁论撰】

以上见四库全书存目

职官类凡六十部

△刑法

折狱龟鉴八卷【宋郑克撰】棠阴比事一卷附录一卷【宋桂万荣撰明吴讷删补】补疑狱集六卷【明张景撰】

以上见文渊阁著录

刑统赋二卷 【宋傅霖撰】 刑法叙略一卷 【旧本题宋刘筠撰】 洗冤录二卷 【宋宋慈撰】 无冤录二卷 【不着撰人名氏】 政刑类要一卷 【元彭天锡撰】 名公书判清明集十七卷 【不着撰人名氏】 唐律文明法会要录一卷 【不着撰人名氏】 祥刑要览二卷 【明吴讷撰】 王恭毅驳稿二卷 【明王槩撰】

以上见四库全书存目

刑法类凡十二部

钦定续通志卷一百五十八

●钦定续通志卷一百五十九 艺文略四

艺文略 【四】

史类第五下 【传记 地理 谱系 食货 目录】

○史类第五下

传记

地理

谱系

食货

目录

△传记 【圣贤 名人 列传 列女 科第 名号冥异】

（臣）等谨案郑志传记一门分目十三以圣贤入之耆旧门已属不伦且高隐孝友忠烈名士既各自为目矣而圣贤高士传赞则高隐与名士兼收英雄录则忠烈又与名士复见尤为错杂今从四库全书例并为圣贤名人二目而于列传中附入杂录别录至列女科第名号冥异等目悉仍其旧即以交游家传祥异散见焉

圣贤

名人

列传

列女

科第

名号

冥异

圣贤

孔子编年五卷 【宋胡仔撰】 东家杂记二卷 【宋孔传撰】

以上见文渊阁著录

孔子世家补十二卷 【宋欧阳士秀撰】 孔氏实录一卷 【不着撰人名氏】
孔子论语年谱一卷 【旧本题元程复心撰】 孟
子年谱一卷 【旧本题元程复心撰】 阙里志二十四卷 【明陈镐撰】 孔颜孟三
氏志六卷 【明刘浚编】 孔孟事迹图谱四卷
【明季本撰】 素王记事无卷数 【不着撰人名氏】 夷齐录五卷 【明张玘撰】
孔圣全书三十五卷 【明蔡复赏编】 尊圣集
四卷 【明陈尧道编】 仲志五卷 【明刘天和撰】 夷齐考疑四卷 【明胡其久撰】
夷齐志六卷 【明白瑜撰】 道统图赞一
卷 【不着撰人名氏】 圣贤图赞不分卷 【不着撰人名氏】 阙里书八卷 【明沈
朝阳撰】 圣门志六卷 【明吕元善撰】 三
迁志五卷 【明吕元善撰】 宗圣志十二卷 【明吕兆祥撰】 陋巷志八卷 【明吕
兆祥撰】 东野志四卷 【明吕兆祥撰】 孔
子年谱纲目一卷 【明夏洪基撰】 孔门弟子传略二卷 【明夏洪基撰】 圣门志
考略二卷 【不着撰人名氏】 关帝纪定本四卷
【明戴光启邵潜同撰】

以上见四库全书存目

名人

杜工部年谱一卷 【宋赵子栋撰】 杜工部诗年谱一卷 【宋鲁豈撰】 绍陶
录二卷 【宋王质撰】 金陀粹编二十八卷续编
三十卷 【宋岳珂撰】 象台首末五卷 【宋胡知柔编】 魏郑公谏续录二卷 【不
着撰人名氏】 忠贞录三卷附录一卷 【明李
维樾林增志同编】 诸葛忠武书十卷 【明杨时伟编】

以上见文渊阁著录

王文正公遗事一卷 【宋王素撰】 韩魏公家传二卷 【不着撰人名氏】 韩
魏公别录三卷 【宋王岩叟撰】 韩忠献遗事一
卷 【宋强至撰】 丰清敏遗事一卷 【宋李朴撰】 三苏年表二卷 【宋孙汝听撰】
东坡年谱一卷 【宋王宗稷撰】 范文正
年谱一卷补遗一卷附义庄规矩一卷 【年谱为宋楼钥撰补遗不着撰人名氏】 蔡
崇礼年谱一卷 【宋蔡焕撰】 吕忠穆公遗事一
卷 【不着撰人名氏】 吕忠穆公年谱一卷 【不着撰人名氏】 涪陵纪善录一卷
【宋冯忠恕撰】 尹和靖年谱一卷 【不着撰
人名氏】 周子年谱一卷 【宋度正撰】 正梅公年谱二卷 【梅询年谱一卷宋陈
天麟撰梅尧臣年谱一卷元张师曾撰】 韩柳年谱
八卷 【韩文类谱七卷宋魏仲举撰柳子厚年谱一卷宋文安礼撰】 朱子年谱一卷

【宋袁仲晦撰】 君臣相遇录十卷 【不着撰人名氏】 鄱阳遗事录一卷 【宋陈贻范撰】 范文正遗迹一卷 【不着撰人名氏】 言行拾遗事录四卷 【不着撰人名氏】 道命录十卷 【宋李心传编】 饶双峯年谱一卷 【不着撰人名氏】 许鲁斋考岁略一卷 【元耶律有尚撰】 刘文靖公遗事一卷 【元苏天爵撰】 辜君政绩书二卷 【元陶凯撰】 思贤录五卷续录一卷 【元谢应芳撰】 草庐年谱二卷附录二卷 【明危素撰】 褒贤集五卷 【不着撰人名氏】 滁阳王庙岁祀册一卷 【不着撰人名氏】 钟鼎逸事一卷 【明李文秀撰】 直道编八卷 【明陈怡辑】 翊运录二卷 【明刘廌编】 崔清献全录十卷 【明崔子燧编】 陆右丞蹈海录一卷 【明丁元吉编】 张乖厓事文录四卷 【明颜端徐瀚同编】 李卫公通纂四卷 【明王承裕撰】 阳明先生浮海传一卷 【明陆相撰】 朱子实纪十二卷 【明戴铣编】 韩祠录三卷 【明叶性谈伦同编】 奕世增光录八卷 【明王道行编】 薛文清行实录五卷 【明王鸿撰】 商文毅公行实一卷 【明商汝颐编】 商文毅年谱四卷 【明商振伦撰】 传信辨诬录一卷 【明陈虞岳撰】 夏忠靖遗事一卷 【明夏崇文撰】 云林遗事一卷 【明顾元庆撰】 旌孝录一卷 【不着撰人名氏】 岳庙集四卷 【明徐阶编】 吴疏山集十七卷 【明吴悌撰】 胡默林行实不分卷 【明胡桂奇编】 忠烈编十卷 【明孙堪孙墀孙升同编】 郑端简年谱七卷 【明郑履淳撰】 董子故里志六卷 【明李廷宝撰】 濂溪志九卷 【明李楨撰】 濂溪志十三卷 【明李崐慈撰】 东方类语十六卷 【明朱维陞撰】 二程年谱二卷 【明唐伯元撰】 武侯全书二十卷 【明王士骥编】 米襄阳外纪十二卷 【明范明泰撰】 米芾志林十六卷 【明范明泰撰】 精忠类编八卷 【明徐缙芳撰】 薛文清年谱一卷 【旧本题明杨鹤撰】 苏米谭史一卷苏米谭史广六卷 【明郭化撰】 海珠小志五卷 【明李韩撰】 襄阳外编无卷数 【明顾道洪撰】 程朱阙里志八卷 【明赵滂编】 温公年谱六卷 【明马峦撰】 宋三大臣汇志二十一卷 【明郑鄮撰】 苏米志林三卷 【明毛晋撰】 顾端文年谱二卷 【明顾与沐编】 张抱初年谱一卷 【明冯奋庸撰】 心斋类编二卷 【明王元鼎编】 邵康节外纪四卷 【明陈继儒编】 逊志斋外纪二卷续集二卷 【明姚履旋撰】 周元公集十卷 【明周沈珂编】 周氏遗芳集五卷 【明周沈

珂编】 灵卫庙志一卷 【明夏宾撰】 靡略
二卷 【明陈念先撰】 宋四家外纪四十九卷 【不着编辑名氏】

以上见四库全书存目

列传 【杂录别录附】

春秋列国诸臣传三十卷 【宋王当撰】 廉吏传二卷 【宋费枢撰】 伊雒渊
源录十四卷 【宋朱子撰】 名臣言行录前集十
卷后集十四卷续集八卷别集二十六卷外集十七卷 【前集后集宋朱子撰续集以下
李幼武补编】 名臣碑传琬琰集一百七卷 【宋
杜大珪撰】 名贤氏族言行类稿六十卷 【宋章定撰】 钱塘先贤传赞一卷 【宋
袁韶撰】 庆元党禁一卷 【旧题沧州樵叟撰不
着编人名氏】 京口耆旧传九卷 【不着撰人名氏】 昭忠录一卷 【不着撰人名
氏】 敬乡录十四卷 【元吴师道撰】 唐才子
传八卷 【元辛文房撰】 元朝名臣事略十五卷 【元苏天爵撰】 浦阳人物记二
卷 【明宋濂撰】 嘉靖以来首辅传八卷 【明
王世贞撰】 明名臣琬琰录二十四卷续录二十二卷 【明徐紘编】 今献备遗四十
二卷 【明项笃寿撰】 百越先贤志四卷 【明
欧大任撰】 元儒考略四卷 【明冯从吾撰 以上列传】

孙威敏征南录一卷 【宋滕元发撰】 守城录四卷 【宋成规汤璠撰】 驂鸾
录一卷 【宋范成大撰】 吴船录二卷 【宋范
成大撰】 入蜀记六卷 【宋陆游撰】 保越录一卷 【不着撰人名氏 以上杂录
附】

以上见文渊阁著录

广卓异记二十卷 【宋乐史撰】 靖康小雅一卷 【不着撰人名氏】 绍兴正
论一卷 【旧本题湘山樵夫撰不著名氏】 桐阴
旧话一卷 【宋韩元吉撰】 南渡十将传十卷 【宋章颖撰】 稗传一卷 【元徐显
撰】 万柳溪边旧话一卷 【元尤玘撰】 旌
义编二卷 【元郑涛撰】 忠传四卷 【不着撰人名氏】 草莽私乘一卷 【旧本题
明陶宗仪编】 别本宋遗民录一卷 【不着撰
人名氏】 金华贤达传十二卷 【明郑柏撰】 四明文献录一卷 【明黄润玉撰】
孝纪十六卷 【明蔡保桢撰】 润州先贤录六
卷 【明姚堂撰】 忠义录十四卷 【明王蒙撰】 名相赞一卷 【明尹直撰】 南
宋名臣言行录十六卷 【明尹直撰】 伊洛渊
源续录六卷 【明谢铎撰】 宋遗民录十五卷 【明程敏政撰】 尊乡录节要四卷
【明王弼撰】 考亭渊源录二十四卷 【明宋

端仪撰】鹿城书院集无卷数【明邓淮撰】吴中往哲记一卷续吴中往哲记一卷补遗一卷【吴中往哲记明杨循吉撰续记补遗
明黄省曾撰】吴中故实记一卷续记一卷补遗一卷【旧本题明杨循吉撰】掾曹名臣录一卷续集一卷【明王琼撰】苏材小纂
六卷【明祝允明撰】莆阳文献十三卷列传七十五卷【明郑岳编】东嘉先哲录二十卷【明王朝佐撰】国宝新编一卷【
明顾璘编】春秋列传五卷【明刘节撰】备遗录一卷【明张芹撰】拾遗书一卷【明林塾撰】台学源流七卷【明金赅
亨撰】新安学系录十六卷【明程瞳撰】二科志一卷【明阎秀卿撰】明瑯彰瘕录一卷【明顾尔迈撰】革朝遗忠录二卷
【明郁袞撰】别本革朝遗忠录二卷【不着撰人名氏】羣忠录二卷【明唐龙撰】昆山人物志十卷【明方鹏撰】名臣言
行录前集十二卷后集十二卷【明徐咸撰】昆陵忠义祠录四卷附录一卷【明叶夔撰】昆陵人品记四卷【明叶夔撰】昆陵
正学编一卷【明毛宪撰】名臣像图一卷【明吴守大撰】畜德录一卷【明陈沂撰】剑阳名儒录二卷【明李璧撰】广
州人物传二十四卷【明黄佐撰】建甯人物传四卷【明李默撰】纪善录一卷【明杜琼撰】三家世典一卷【明郭勋撰】
淮郡文献志二十六卷补遗一卷【明潘坝撰】祥符文献志十七卷【明李濂撰】祥符乡贤传八卷【明李濂撰】金华先民传
十卷【明应廷育撰】国琛集二卷【明唐枢撰】闽学源流十六卷【明杨应诏撰】道南源委录十二卷【明朱衡撰】东
吴名贤记二卷【明周复俊撰】友于小传二卷【明纪廷相撰】善行录八卷续录二卷【明张时彻撰】义乌人物记二卷【
明金江撰】济美录四卷【明郑烛编】逸民传二卷【明皇甫濂撰】元佑党人碑考一卷【明海瑞撰】续吴先贤赞十五卷
【明刘凤撰】羣忠备遗录二卷【明罗汝鉴撰】宋五先生郡邑政绩一卷【明李贵撰】硕辅宝鉴要览四卷【明耿定向撰
】守令懿范四卷【明蔡国熙撰】樵李往哲前编一卷【明戚元佐撰】古今廉鉴八卷【明乔懋敬撰】怀忠录无卷数【
明郑应旗撰】吴兴名贤续录六卷【明王道隆撰】桐彝三卷【明方学渐撰】靖难功臣录一卷【不着撰人名氏】贫士传
二卷【明黄姬水撰】昆山人物传十卷名宦传一卷【明张大复撰】历代相臣传一百六十八卷【明魏显国撰】儒林全传二

十卷 【明魏显国撰】 历代守令传二十四卷 【明魏显国撰】 元相臣传十二卷
【明魏显国撰】 忠节录六卷 【明张朝瑞撰】 吴中人物志十二卷 【明张■〈日上永下〉撰】 辅世编六卷 【明唐鹤征撰】
【明唐鹤征撰】 圣门人物志十二卷 【明郭子章撰】 豫章
书一百二十二卷 【明郭子章撰】 国士懿轨十卷 【明余养蒙撰】 春秋名臣传
十三卷 【明姚咨撰】 战国人才言行录十卷
【明秦淪撰】 镇平世系记二卷 【明朱睦■〈木挈〉撰】 江右名贤编二卷 【
明喻均刘元卿同撰】 宗谱纂要一卷 【明王
应昌撰】 貂珣史鉴四卷 【明张世则撰】 圣学宗传十八卷 【明周汝登编】 历
朝珣鉴四卷 【明徐学聚撰】 盐梅志二十卷
【明李茂春撰】 汉唐宋名臣录五卷 【明李廷机撰】 栖真志四卷 【明夏树芳
撰】 献征录一百二十卷 【明焦竑撰】 熙朝
名臣实录二十七卷 【明焦竑撰】 四侯传四卷 【明王士骥撰】 历代内侍考十
卷 【明毛一公撰】 梅墟先生别录二卷 【明
李日华郑琰同撰】 明十六种小传四卷 【明江盈科撰】 伙坏封疆录一卷 【明
魏应嘉撰】 东林点将录一卷 【明王绍徽撰】
东林籍贯一卷 【不着撰人名氏】 东林同志录一卷 【不着撰人名氏】 东林朋
党录一卷 【不着撰人名氏】 天鉴录一卷 【
不着撰人名氏】 盗柄东林伙一卷 【不着撰人名氏】 事编内篇八卷 【明孙慎
行撰】 廉吏传无卷数 【明黄汝亨撰】 历代
名臣芳躅二卷 【明金汝谐撰】 圣学嫡派四卷 【明过庭训撰】 宰相守令合宙
十三卷 【明吴伯与撰】 昆陵人品记十卷 【
明吴亮撰】 名世编八卷 【明吴亮撰】 安危注四卷 【明吴牲编】 明表忠记十
卷 【明钱士升撰】 壶天玉露四卷 【明钱
士升撰】 浙学宗传无卷数 【明刘鳞长撰】 榕阴新检八卷 【明徐■〈火勃〉撰
】 为臣不易编无卷数 【明黄廷鹄撰】 令史
高山集七卷 【旧本题明吴用先撰】 晋陵先贤传二卷 【明欧阳东凤编】 明词
林人物考十二卷 【明王兆云撰】 弇州史料三
十卷 【明董复表编】 两浙名贤录五十四卷外录八卷 【明徐象梅撰】 忠义存
褒什二卷 【明许有谷撰】 逸民史二十二卷
【明陈继儒编】 东越文苑六卷 【明陈鸣鹤撰】 姑苏名贤小记二卷 【明文震
孟撰】 崇祯阁臣行略一卷 【明陈盟撰】 王
谢世家三十卷 【明韩昌箕撰】 名臣志钞二十四卷 【明吴孝章撰】 历代相业
军功考二卷明代相业军功考二卷 【明沈梦熊

撰】 银鹿春秋一卷 【明陆嘉颖撰】 孝友传二十四卷 【明郭疑之撰】 明孝友传八卷 【明郭疑之撰】 逊国忠记十八卷 【明周鏊撰】 古今宗藩懿行考十卷 【旧本题潞王编不着其名】 明经济名臣传四卷 【明贺中男撰】 宗圣谱十四卷 【明邹泉撰】 辨隐录四卷 【明赵凤翀撰】 陆氏世史钞六卷 【明陆浚源撰】 衡门晤语六卷 【明潘京南撰】 楚宝四十五卷 【明周圣楷撰】 道南录五卷 【不着撰人名氏】 国殇纪略一卷 【不着撰人名氏以上列传】

西征记一卷 【宋卢襄撰】 乙巳泗洲录一卷 【宋胡舜申撰】 己酉避乱录一卷 【宋胡舜申撰】 逢辰记一卷 【不着撰人名氏】 勤王记一卷 【旧本题宋臧梓撰】 乌台诗案一卷 【旧本题宋朋九万编】 客杭日记一卷 【元郭昇撰】 七人联句诗记一卷 【明杨循吉撰】 归田杂识二卷 【明毛纪撰】 归闲述梦一卷 【明赵璜撰】 淮封日记一卷 【明陆深撰】 南迁日记一卷 【明陆深撰】 断碑集一卷 【明方豪撰】 东观录一卷 【明舒芬撰】 滇程记一卷 【明杨慎撰】 郟金传一卷 【明王世懋撰】 南内记一卷 【不着撰人名氏】 西迁注一卷 【明张鸣凤撰】 历仕录一卷 【明王之垣撰】 黄梁遗迹志一卷 【明杨四知撰】 恩命世录十卷 【明张国祥编】 饥民图说一卷 【明杨东明撰】 视履类编二卷 【明李同芳撰】 宫省贤声录四卷 【明高曰化撰】 绣斧西征录一卷 【明何鏊编】 礼白岳记一卷 【明李日华撰】 玺召录一卷 【明李日华撰】 两宫鼎建记二卷 【明贺仲轼撰】 北行日谱一卷 【明朱祖文撰】 鉴劳录一卷 【明孙传庭撰】 定变录六卷 【明许徽编 以上杂录附】

张邦昌事略一卷 【旧本题宋王偁撰】 伪豫传一卷 【宋杨克弼撰】 徐海本末一卷 【明茅坤撰】 汪直传一卷 【不着撰人名氏 以上别录附】

以上见四库全书存目

列女

古今列女传三卷 【明解缙等奉敕编】

以上见文渊阁著录

古今贞烈维风什四卷 【明许有谷撰】 续列女传九卷 【明邵正魁撰】

以上见四库全书存目

科第

绍兴十八年同年小录一卷 【宋王佐榜进士齿录】 宝佑四年登科录一卷 【宋文天祥榜进士齿录】

以上见文渊阁著录

明三元考十四卷 【明张宏道张凝道同撰】 莆阳科第录二卷 【明吴爵编】 类姓登科考六卷 【不着撰人名氏】

以上见四库全书存目

名号

小字录一卷补录一卷 【小字录宋陈思撰补录明沈宏正撰】 名疑四卷 【明陈士元撰】 历代不知姓名录十卷 【明李清撰】 同姓名录十二卷补录一卷 【同姓名录明余寅撰补录周应宾撰】

以上见文渊阁著录

补侍儿小名录一卷 【宋王铨撰】 姬侍类偶二卷 【宋周守忠撰】 续补侍儿小名录一卷 【宋温豫撰】 侍儿小名录拾遗一卷 【旧本题宋晋阳张邦几撰】 男子双名记一卷 【明陶涵中撰】 妇女双名记一卷 【明李肇亨撰】

以上见四库全书存目

冥异

茅亭客话十卷 【宋黄休复撰】 分门古今类事二十卷 【不着撰人名氏】 陶朱新录一卷 【宋马纯撰】 睽车志六卷 【宋郭彖撰】 夷坚支志五十卷 【宋洪迈撰】

以上见文渊阁著录

括异志十卷 【宋张师正撰】 云斋广录八卷后集一卷 【宋李献民撰】 五色线二卷 【不着撰人名氏】 峡山神异记一卷 【宋黄辅撰】 闲窗括异志一卷 【宋鲁应龙撰】 续夷坚志二卷 【金元好问撰】 异闻总录四卷 【不着撰人名氏】 山海经释义十八卷图二卷 【明王崇庆撰】 效颦集三卷 【明赵弼撰】 谈纂二卷 【明都穆撰】 陆氏虞初志八卷 【不着撰人名氏】 志怪录五卷 【明祝允明撰】 西樵野记四卷 【明侯甸撰】 广夷坚志二十卷 【明杨慎撰】 见闻纪训一卷 【明陈良谟撰】 耳钞秘录一卷 【不着撰人名氏】 高坡异纂二卷 【明杨仪撰】 冶城客论二卷 【明陆采撰】 佑山杂说一卷 【明冯汝弼撰】 古今奇闻类记十卷 【明施显卿撰】 二酉委谈一卷 【明王世懋撰】 燃犀集四卷 【不着撰人名氏】 异林十六卷

【明朱睦■〈木挈〉撰】 快雪堂漫录一卷 【明冯梦祯撰】 孝经集灵一卷 【明虞淳熙撰】 前定录二卷 【明蔡善继撰】 仙佛奇踪四卷 【明洪应明编】 猗园十六卷 【明钱希言撰】 耳新十卷 【明郑仲夔撰】 王氏杂记十四卷 【明王兆云撰】 燕山丛录二十二卷 【明徐昌祚撰】 芙蓉镜孟浪言四卷 【明江东伟撰】 敝帚轩剩语三卷补遗一卷 【明沈德符撰】 耳谈十五卷 【明王同轨撰】 闻见录一卷 【明姚宣撰】 逸史搜奇无卷数 【明汪云程撰】 四明龙荟一卷 【明闻性道撰】 才鬼记十六卷 【明梅鼎祚撰】

以上见四库全书存目

传记类凡三百九十部

△地理 【地理总志 都城宫苑 郡邑 地理杂记 川渚 名山洞府 朝聘行役 蛮夷】

（臣）等谨案郑志地理类有图经方物二目今以图经隶图谱略而方物则从四库全书例改为地理杂记

地理总志

都城宫苑

郡邑

地理杂记

川渚

名山洞府

朝聘

行役

蛮夷

地理总志

輿地广记三十八卷 【宋欧阳忞撰】 方輿胜览七十卷 【宋祝穆撰】 明一统志九十卷 【明李贤等奉敕纂】

以上见文渊阁著录

历代地理指掌图一卷 【旧本题宋苏轼撰】 寰宇通衢一卷 【明洪武中官撰】 輿图记叙二卷 【明桂萼撰】 志略十六卷

【明廖世昭撰】 皇輿考十二卷 【明张天复撰】 图注水陆路程途八卷 【明黄汴撰】 郡县释名二十六卷 【明郭子章撰】

目营小辑四卷 【明陆化熙撰】 輿地名胜志一百九十三卷 【明曹学佺撰】 海内奇观十卷 【明杨尔曾撰】 地图综要无卷数

【明朱绍本吴学俨朱国达朱国干同撰】 今古輿地图无卷数 【不着撰人名氏】

以上见四库全书存目

都城宫苑

干道临安志三卷 【宋周淙撰】 咸淳临安志九十三卷 【元潜说友撰】 洛阳名园记一卷 【宋李格非撰】 长安志图三卷

【元李好文撰】 汴京遗迹志二十四卷 【明李濂撰】 武林梵志十二卷 【明吴之鲸撰】

以上见文渊阁著录

华阳宫记事一卷 【宋僧祖秀撰】 艮岳记一卷 【宋张昞撰】 金陵古今图考不分卷 【明陈沂撰】 金陵世纪四卷 【明

陈沂撰】 南畿志六十四卷 【明闻人诠撰】 万历应天府志三十三卷 【明王一化撰】 顺天府志六卷 【宋谢杰撰】 故宫遗

录一卷 【明萧洵撰】 西岳神祠事录七卷 【明孙仁编】 历代山陵考一卷 【明王在晋撰】 关中陵墓志二卷 【明祁光宗撰

】 金陵梵刹志五十三卷 【明葛寅亮撰】 重辑祖陵纪略二卷 【明朱自新撰】

以上见四库全书存目

郡邑 【古迹附】

淳熙三山志四十二卷 【宋梁克家撰】 吴郡志五十卷 【宋范成大撰】 新安志十卷 【宋罗愿撰】 雍录十卷 【宋程大

昌撰】 剡录十卷 【宋高似孙撰】 会稽志二十卷会稽续志八卷 【会稽志宋施宿等撰续志宋张昞撰】 嘉定赤城志四十卷 【

宋陈耆卿撰】 四明志二十一卷续志十二卷 【宋罗浚撰梅应发等续】 澈水志八卷 【宋常棠撰】 景定建康志五十卷 【宋周

应合撰】 景定严州续志十卷 【宋郑瑶方仁巩同撰】 至元嘉禾志三十二卷 【元徐硕撰】 昌国州图志七卷 【元冯复京等撰

】 金陵新志十五卷 【元张铉撰】 延佑四明志十七卷 【元袁桷撰】 齐乘六卷 【元于钦撰】 无锡县志四卷 【不着撰人

名氏】 姑苏志六十卷 【明王鏊撰】 武功县志三卷 【明康海撰】 朝邑县志二卷 【明韩邦靖撰】 岭海輿图一卷 【明姚

虞撰】 吴兴备志三十二卷 【明董斯张撰】 滇畧十卷 【明谢肇淛撰】

以上见文渊阁著录

成化山西志十六卷 【明胡谧撰】 甯波府简要志五卷 【明黄润玉撰】 成化杭州府志六十三卷 【明夏时正撰】 建阳县

志四卷杂志三卷续志一卷 【明黄璇撰】 毘陵志四十卷 【明王■〈亻与〉撰】

中都志十卷【明柳瑛撰】 金华府志三十卷
【不着撰人名氏】 赤城新志二十三卷【明谢铎撰】 弘治八闽通志八十七卷
【明黄仲昭撰】 成化陕西志三十卷【明伍
余福撰】 嘉兴府志三十二卷【明柳琰撰】 弘治湘州府志二十四卷【明王珣
撰】 重修毗陵志四十卷【明朱昱撰】 三原
县志十六卷【明朱昱撰】 徽州府志十二卷【明汪舜民撰】 常州府志续集八
卷【明张恺撰】 吴邑志十六卷【明杨循吉
撰】 赤城会通记二十卷【明王启撰】 松江府志三十二卷【明顾清撰】 嘉靖
江西通志三十七卷【明林庭■〈木昂〉周广
同撰】 雍大记三十六卷【明何景明撰】 崇安县志四卷【明李让撰】 彰德府
志八卷【明崔铎撰】 嘉靖惟扬志三十八卷
【明盛仪撰】 常熟县志四卷【明杨子器撰】 嘉兴志补十二卷【明邹衡撰】
嘉靖安庆府志三十卷【明胡纘宗撰】 嘉靖
广信府志二十卷【明费棗撰】 正德大同府志十八卷【明张钦撰】 商略无卷
数【明任庆云撰】 澈浦续志九卷【明董谷
撰】 随志二卷【明颜木撰】 浦江志略八卷【明毛凤韶撰】 嘉靖广西通志六
十卷【明黄佐撰】 山东通志四十卷【明
陆鉞撰】 全陕政要略四卷【明龚辉撰】 吴兴掌故集十七卷【明徐献忠撰】
广东通志初稿四十卷【明戴璟撰】 平凉府
通志十三卷【明赵时春撰】 湖州府志十四卷【明唐枢撰】 嘉兴府图记二十
卷【明赵文华撰】 滁州志四卷【明胡松撰
】 嘉靖全州志六卷【明谢少南撰】 嘉靖邵武府志十五卷【明陈让撰】 嘉靖
真定府志三十三卷【明雷礼撰】 嘉靖河间
府志二十八卷【明樊深撰】 陕西行都司志十二卷【不着撰人名氏】 嘉靖贵
州通志十二卷【明张道撰】 北地纪四卷【
明汪来撰】 括苍汇纪十五卷【明何镗撰】 万历开封府志三十四卷【明曹金
撰】 嘉靖仁和县志十四卷【明沈朝宣撰】
万历湖广总志九十八卷【明徐学谟撰】 定远县志十卷【明高鹤撰】 续朝邑
县志八卷【明王学谟撰】 三郡图说一卷【
明王世懋撰】 万历广东通志七十二卷【明郭棐等撰】 嘉靖贵州图经新志十八
卷【明赵赞撰】 万历四川总志三十四卷【
明魏朴如游朴童良同撰】 安邱县志二十八卷【明马文炜撰】 嘉靖江都县志八
卷【明葛洞撰】 绍兴府志五十卷【明张元
汴孙矿同撰】 丰润县志十三卷【明石邦政撰】 隆庆永州府志十七卷【明史

朝富陈良珍同撰】 万历江都县志八卷 【明陆君弼撰】 万历衡州府志十五卷 【明伍让撰】 天启赣州府志二十卷 【明谢诏撰】 万历德州志十二卷 【明李■〈木龠〉撰】 通州志八卷 【明沈明臣撰】 闽书一百五十四卷 【明何乔远撰】 万历济甯州志八卷 【明王国祯撰】 南康府志十二卷 【明田管撰】 万历信阳县志八卷 【明刘尚朴撰】 万历饶州府志四十五卷 【明陈大绶撰】 岳郡图说一卷 【明黄元忠撰】 海盐县图经十六卷 【明胡震亨撰】 万历容城县志七卷 【明蒋汝莘撰】 万历嘉定县志二十卷 【明韩浚撰】 万历严州府志二十四卷 【不着撰人名氏】 天台县志二十卷 【明张宏代撰】 泰州志十卷 【明刘万春撰】 万历余杭县志十卷 【明戴日强撰】 万历温州府志十八卷 【明王光蕴撰】 万历襄阳府志五十一卷 【不着撰人名氏】 清江县志八卷 【明秦镛撰】 崇祯砀山县志二卷 【明刘芳撰○以上郡邑】

古迹

古迹

石湖志略一卷文略一卷 【明卢襄撰】 石鼓书院志四卷 【明周诏撰】 净慈寺志十卷 【明释大壑撰】 云门志略五卷

【明张忬撰】 白鹭洲书院志二卷 【明甘雨撰】 石鼓书院志二卷 【明李安仁撰】 九鲤湖志六卷 【明黄天全撰】 径山志十四卷 【明宋奎光撰】 延寿寺纪略一卷

【明释圆复撰】 禹门寺志六卷 【明戴英撰】 邓尉圣恩寺志十八卷 【明周永年撰】 天童寺集二卷 【明杨明撰】 南溪书院志四卷 【明叶廷祥撰】 破山兴福寺志四卷 【明程嘉燧撰○以上古迹附】

以上见四库全书存目

地理杂记

益部方物略记一卷 【宋宋祁撰】 岳阳风土记一卷 【宋范致明撰】 东京梦华录十卷 【宋孟元老撰】 六朝事迹类编二卷 【宋张敦颐撰】 会稽三赋三卷 【宋王十朋撰】 桂海虞衡志一卷 【宋范成大撰】 岭外代答十卷 【宋周去非撰】 都城纪胜二卷 【不着撰人名氏】 梦粱录二十卷 【宋吴自牧撰】 武林旧事十卷 【宋周密撰】 禁扁五卷 【元王士点撰】 岁华纪丽谱一卷附笺纸谱一卷蜀锦谱一卷 【元费着撰】 平江记事一卷 【元高

德基撰】 江汉丛谈二卷 【不着撰人名氏】

桂胜十六卷 桂故八卷 【明张鸣凤撰】 益部谈资三卷 【明何宇度撰】 蜀中广记一百八卷 【明曹学佺撰】 增补武林旧事八

卷 【明朱延焕撰】 闽中海错疏三卷 【明屠本峻撰】

以上见文渊阁著录

豫章今古记一卷 【不着撰人名氏】 庐阳客记一卷 【明杨循吉撰】 蜀都杂钞一卷 【明陆深撰】 闽部疏无卷数 【明

王世懋撰】 淞故述一卷 【明杨枢撰】 秦录一卷 【明沈思孝撰】 晋录一卷 【明沈思孝撰】 长溪琐语一卷 【明谢肇淛

撰】 滇南杂记二卷 【明许伯衡撰】 西事珥八卷 【明魏浚撰】 泉南杂志二卷 【明陈懋仁撰】 闽中考一卷 【明陈鸣鹤

撰】 两河观风便览四卷 【不着撰人名氏】 帝京景物略八卷 【明刘侗于奕正同撰】 山左笔谈一卷 【旧本题明黄淳耀撰】

楚书一卷 【明陶晋樵撰】

以上见四库全书存目

川渚

吴中水利书一卷 【宋单锷撰】 四明它山水利备览二卷 【宋魏岷撰】 河防通议二卷 【元沙克什撰】 治河图略一卷

【元王喜撰】 浙西水利书三卷 【明姚文灏撰】 河防一览十四卷 【明潘季驯撰】 三吴水利录四卷 【明归有光撰】 北河

纪八卷 纪余四卷 【明谢肇淛撰】 敬止集四卷 【明陈应芳撰】 三吴水考十六卷 【明张内蕴周大韶同撰】 吴中水利书二十

八卷 【明张国维撰】

以上见文渊阁著录

河源记一卷 【元潘昂霄撰】 浙西水利议答十卷 【一名水利文集元任仁发撰】 海道经一卷 【不着撰人名氏】 海道经

一卷 【不着撰人名氏与上一书疑皆元人作】 治河总考四卷 【明车玺撰】 漕河图志三卷 【明王琼撰】 问水集三卷 【明

刘天和撰】 通惠河志二卷 附录一卷 【明吴仲撰】 三吴水利论一卷 【明伍余福撰】 新河初议一卷 【不着编辑名氏】 浙

西水利书一卷 【不着编辑名氏】 胶莱新河议二卷 【明王献撰】 吴中水利通志十七卷 【不着撰人名氏】 治河通考十卷

【明吴山撰】 吴江水利考五卷 【明沈■〈启，山代口〉撰】 全吴水略七卷

【明吴韶撰】 两河管见三卷 【明潘季驯撰

】治水或问四卷【明庞尚鸿撰】新浚海盐内河图说一卷【不着撰人名氏】
新河成疏无卷数【明游季勋沈子木朱应时涂
渊陈楠张纯唐炼等同编】东吴水利考十卷【明王圻撰】黄河图议一卷【明
郑若曾撰】治河管见四卷【明潘凤梧撰】
潞水客谈一卷【明徐贞明撰】西渎大河志五卷【明张光孝撰】千金堤志八
卷【明谢廷谅等撰】古今疏治黄河全书四卷
【明黄克缵撰】河漕通考二卷【明黄承元撰】海塘录八卷【明仇俊卿撰】
河渠志一卷【明吴道南撰】泉河史十五卷
【明胡瓚撰】皇都水利一卷【明袁黄撰】南河志十四卷【明朱国盛撰】常
熟水论一卷【明薛尚质撰】黄运两河考议
六卷【不着撰人名氏】

以上见四库全书存目

名山洞府

庐山记三卷附庐山记略一卷【宋陈舜俞撰】赤松山志一卷【宋倪守约撰】
】洞霄图志六卷【宋邓牧撰】西湖游览志
二十四卷志余二十六卷【明田汝成撰】

以上见文渊阁著录

西湖繁胜录一卷【旧本题西湖老人撰不著名氏】大涤洞天记三卷【宋邓
牧撰】龙虎山志三卷【元元明善撰】茅山
志十五卷【元刘大彬撰】仙都志二卷【元道士陈性定撰】天台山志一卷【
不着撰人名氏】武夷山志十九卷【明裘仲
孺撰】震泽编八卷【明蔡升撰】金山杂志一卷【明杨循吉撰】雁山志四卷
【明朱谏撰】京口三山志十卷【明张莱
撰】慧山记三卷【一名九龙山记明邵宝撰】邓尉山志一卷【明沈津撰】衡
岳志十三卷【明彭簪撰】庐山纪事十二卷
【明桑乔撰】仙都山志二卷【明戴葵撰】牛首山志二卷【明盛时泰撰】仙
岩志六卷【明王应辰撰】黄海六十卷【
明潘之恒撰】武夷山志略四卷【明徐表然撰】径山集三卷【明释宗净撰】
阿育王山志十卷【明郭子章撰】京口三山
续志四卷【明徐邦佐陈朝用朱文山同撰】齐云山志五卷【明鲁点撰】普陀
山志六卷【明周应宾撰】太岳太和山志十七
卷【明田玉撰】太姥志一卷【明史起钦撰】续刻麻姑山志十七卷【明左宗
郢撰】嵩书二十二卷【明傅梅撰】蜀中
名胜记三十卷【明曹学佺撰】华岳全集十三卷【旧本题明李时芳撰】九疑

山志九卷【明蒋鑽撰】 罗浮野乘六卷【明
韩晃撰】 雁山志胜四卷【明徐待聘撰】 泰山纪事三卷【明宋焘撰】 天台山
方外志三十卷【明释无尽撰】 幽溪别志十
六卷【明释无尽撰】 方广岩志四卷【明谢肇淛撰】 恒岳志二卷【明赵之韩
王浚初同撰】 天目山志四卷【明徐嘉泰撰
】 烟云手镜二卷【明杨继益撰】 海阳山水志四卷【明丁惟曜撰】 惠山古今
考十卷附录三卷补遗一卷【明谈修撰】 龙
门志三卷【明樊得仁撰】 崆峒志三卷【明李应奇撰】 岷山志六卷【明张睿
卿撰】 上天竺山志十五卷【明释广宾撰】
烂柯山志二卷【明徐日灵撰】 东西天目志八卷【明章之采撰】 九华山志八
卷【明顾元镜撰】 锡山景物略八卷【明王
永积撰】 横溪录八卷【明徐鸣时撰】 合阜山志二卷【明俞策撰】

以上见四库全书存目

朝聘

宣和奉使高丽图经四十卷【宋徐兢撰】

以上见文渊阁著录

日本东夷朝贡考一卷【明张迪撰】 使交录十八卷【明钱溥撰】 使琉球
录二卷【明郭世霖撰】 使琉球录二卷【明
萧崇业谢杰同撰】

以上见四库全书存目

行役

游城南记一卷【宋张礼撰】 西使记一卷【元刘郁撰】 河朔访古记二卷
【元纳新撰】 徐霞客游记十二卷【明徐宏
祖撰】

以上见文渊阁著录

西征道里记一卷【宋郑刚中撰】 使西域记一卷【明陈诚撰】 东祀录一
卷【明李东阳撰】 使西日记二卷【明都穆
撰】 奇游漫记四卷【明董传策撰】 古今游名山记十七卷【明何鏜撰】 天下
名山诸胜一览记十六卷【明慎蒙撰】 名山
游记一卷【明王世懋撰】 名山注无卷数【明潘之恒撰】 五岳游草十二卷【
明王士性撰】 广志绎五卷杂志一卷【明王
士性撰】 黔志一卷【明王士性撰】 豫志一卷【明王士性撰】 日畿访胜录二
卷【明姚士舜撰】 天目游记一卷【明黄
汝亨撰】 纪游稿一卷【明王衡撰】 循沧集二卷【明姚希孟撰】 山行杂记一

卷【明宋彦撰】 名山记四十八卷图一卷附

录一卷【不着撰人名氏】

以上见四库全书存目

蛮夷【边防府】

诸蕃志二卷【宋赵汝适撰】 溪蛮丛笑一卷【宋朱辅撰】 安南志略十九卷【元安南人黎崱撰】 真腊风土记一卷【元周达观撰】 岛夷志略一卷【元汪大渊撰】 朝鲜赋一卷【明董越撰】 海语三卷【明黄衷撰】 东西洋考十二卷【明张燮撰】 职方外纪五卷【明西洋人艾儒略撰】 赤雅三卷【明邝露撰】 朝鲜志二卷【不着撰人名氏以上蛮夷】 筹海图编十三卷【明胡宗宪撰】 郑开阳杂着十一卷【明郑若曾撰以上边防附】

以上见文渊阁著录

高丽记无卷数【宋徐兢撰】 记古滇说一卷【宋张道宗撰】 异域志一卷【不着撰人名氏】 异域图志一卷【不着撰人名氏】 百夷传一卷【明钱古训撰】 南夷书一卷【明张洪撰】 西洋番国志无卷数【明巩珍撰】 瀛涯胜览一卷【明马观撰】 朝鲜杂志一卷【明董越撰】 海槎余录一卷【明顾■〈山介〉撰】 日本考略一卷【明薛俊撰】 朝鲜图说一卷【明郑若曾撰】 日本图纂一卷【明郑若曾撰】 琉球图说一卷【明郑若曾撰】 安南图说一卷【明郑若曾撰】 西洋朝贡典录三卷【明黄省曾撰】 夷俗记一卷【明萧大亨撰】 朝鲜国志一卷【不着撰人名氏】 东南夷图说二卷岭海异闻一卷续闻一卷【明蔡汝贤撰】 四川土夷考四卷【明谭希恩撰】 日本考五卷【明李言恭都杰同撰】 咸宾录八卷【明罗曰褫撰】

以上蛮夷】 北边备对一卷【宋程大昌撰】 江东地利论一卷【宋陈武撰】 东南防守利便三卷【宋陈克吴若同撰】 边防控阨形势图论一卷【宋江默撰】 东关图一卷【明闻人诠辑】 修攘通考四卷【明何镗编】 九边考十卷【明魏焕撰】 海防图论一卷【明郑若曾撰】 万里海防图说二卷【明郑若曾撰】 江防图考一卷【明郑若曾撰】 江防考六卷【明吴时来撰】 两浙海防类考续编十卷【明范涑撰】 温处海防图略二卷【明蔡逢时撰】 筹海重编十卷【明邓鍾撰】 海防图论一卷【不着撰人名氏】 陕西镇考一卷【不着撰人名氏 以上边防附】

以上见四库全书存目

地理类凡三百七十四部

△谱系 【总谱 家谱】

总谱

家谱

总谱

万姓统谱一百二十六卷 【明凌迪知撰】 氏族博考十四卷 【明凌迪知撰】

以上见文渊阁著录

姓源珠玑六卷 【明杨信民撰】 姓汇四卷 【明陈士元撰】 姓觚十卷 【明陈士元撰】 奇姓通十四卷 【明夏树芳撰】

姓氏谱纂七卷 【旧题明李日华撰】

家谱

闵子世谱十二卷 【明张云汉撰】 涑水司马氏源流集略八卷 【明司马晰编】 考亭朱氏文献全谱十二卷 【明朱锺文撰】

以上见四库全书存目

谱系类凡十部

△食货 【食货总录 货宝 器用 豢养 种艺 茶 酒】

（臣）等谨案郑志食货门首列货宝入以盐筴诸书其转运会计等书则别隶职官门义未允协今增立食货总录而以赋税盐法隶之

食货总录

货宝

器用

豢养

种艺

茶

酒

食货总录

救荒活民书三卷 【宋董煟撰】 熬波图无卷数 【元陈椿撰】

以上见文渊阁著录

邦计汇编一卷 【旧本题宋利瓦伊撰】 拯荒事略一卷 【旧本题元欧阳元撰】 救荒括民补遗书三卷 【明朱熊撰】 救荒事宜一卷 【明周孔教撰】 开荒十二政一卷 【明魏纯粹撰】 救荒策会七卷 【明陈龙正撰】 救荒事宜一卷 【明张陞撰】

元海运志一卷 【旧本题明危素撰】 海运详考一卷海运志二卷 【明王宗沐撰】

海运新考三卷 【明梁梦龙撰】 海运编二卷

【明崔旦撰】 漕政举要录十八卷 【明邵宝撰】 漕书一卷 【明张鸣凤撰】 漕运通志十卷 【明杨宏撰】 通漕类编九卷

【明王在晋撰】 国赋纪略一卷 【旧本题明倪元璐撰】 苏松浮赋议一卷 【明郑若曾撰】 海运图说一卷 【明郑若曾撰】

洲课条例一卷 【明王佺撰】 嘉靖清源关志四卷 【明刘玺撰】 淮关志八卷 【明马麟撰】 北新钞关志十六卷 【明荆之琦

撰】 茶马类考六卷 【明胡彦撰】 八闽政议三卷 【不着撰人名氏】 盐法考略一卷 【旧本题明邱浚撰】 盐政志十卷 【

明朱廷立撰】 两淮盐法志十二卷 【明史起螯张矩同撰】 山东盐法志四卷 【明查志隆撰】 重修两浙鹺志二十四卷 【明王

圻撰】 长芦盐法志十三卷 【明何继高冯学易闵远庆同撰】 粤东盐政考二卷

【明李樵撰】 古今鹺略九卷鹺略补九卷 【明

汪砢玉撰】 盐法考十卷 【不着撰人名氏】 铁冶志二卷 【明傅浚撰】 以上见四库全书存目

货宝

钱通三十二卷 【明胡我琨撰】

以上见文渊阁著录

古玉图谱一百卷 【宋龙大渊等奉敕撰】 泉志十五卷 【宋洪遵撰】 百宝总珍集十卷 【不着撰人名氏】 宝钞通考八卷

【元武祺撰】 明通宝义一卷广通宝义一卷 【明罗汝芳撰】 钱法纂要一卷 【旧本题明邱浚撰】

以上见四库全书存目

器用

考古图十卷续考古图五卷释文一卷 【宋吕大临撰】 啸堂集古录二卷 【宋王侁撰】 宣德鼎彝谱八卷 【明吕震等奉敕

编次】 文房四谱五卷 【宋苏易简撰】 奇器图说三卷诸器图说一卷 【奇器图说明西洋人邓玉函撰诸器图说明王征撰】 歙州

砚谱一卷 【宋唐积撰】 墨谱三卷 【宋李孝美撰】 砚史一卷 【宋米芾撰】

砚谱一卷 【不着撰人名氏】 墨经一卷 【

旧本题晁氏撰不着其名】 歙砚说一卷辨砚石说一卷 【不着撰人名氏】 云林石谱三卷 【宋杜绾撰】 端溪砚谱一卷 【不着

撰人名氏】 砚笈四卷 【宋高似孙撰】 墨史二卷 【元陆友撰】 墨法集要一卷 【明沈继孙撰】 香谱二卷 【不着撰人名

氏】香谱四卷【宋陈敬撰】香乘二十八卷【明周嘉胄撰】

以上见文渊阁著录

别本考古图十卷【宋吕大临撰】绍兴内府古器评二卷【宋张抡撰】古奇器录一卷【明陆深撰】古器具名二卷附古器总说一卷【明胡文焕编】分宜清玩谱一卷【不着撰人名氏】槎居谱一卷【明黄鹤撰】文苑四先生集四卷【明鍾岳秀撰】燕几图一卷【宋黄伯思撰】蠙衣生剑记卷【明郭子章撰】剑策二十七卷【明钱希言撰】歙砚志三卷【明江贞撰】程氏墨苑十二卷【明程君房撰】方氏墨谱六卷【明方于鲁撰】冠谱一卷【明顾孟容撰】素园石谱四卷【明林有麟撰】汝水巾谱一卷【明朱术珣撰】蝶几谱一卷【明严澄撰】香国三卷【明毛晋撰】石品二卷【明郁浚撰】

以上见四库全书存目

豢养

解谱二卷【宋傅肱撰】解略四卷【宋高似孙撰】异鱼图赞四卷【明杨慎撰】

以上见文渊阁著录

安骥集三卷【不着撰人名氏】类方马经六卷【不着撰人名氏】司牧马经痊骥通元论六卷【旧题卞管勾集】疗马集四卷附录一卷【明喻仁喻杰撰】痊骥集二卷【不着撰人名氏】禽虫述一卷【明袁达撰】马记一卷【明郭子章撰】虎荟六卷【明陈继儒撰】虫天志十卷【明沈宏正撰】

以上见四库全书存目

种艺

扬州芍药谱一卷【宋王观撰】刘氏菊谱一卷【宋刘蒙撰】橘录三卷【宋韩彦直撰】史氏菊谱一卷【宋史正志撰】范村梅谱一卷【宋范成大撰】范村菊谱一卷【宋范成大撰】金漳兰谱三卷【宋赵时庚撰】菌谱一卷【宋陈仁玉撰】百菊集谱六卷菊史补遗一卷【宋史铸撰】海棠谱三卷【宋陈思撰】

以上见文渊阁著录

学圃杂疏一卷【明王世懋撰】羣芳谱三十卷【明王象晋撰】汝南圃史十二卷【明周文华撰】花史左编二十七卷【明王路撰】花史十卷【明吴彦匡撰】花里活三卷【明陈诗教撰】瓶花谱一卷【明张谦德撰】唐昌玉蘂辩证一卷

【宋周必大撰】 天彭牡丹谱一卷 【宋陆游撰】 兰谱一卷 【宋王贵学撰】 兰易一卷附录兰易十二翼一卷兰史一卷 【兰易旧题宋鹿亭翁撰附录以下原题蕈溪子撰】 亳州牡丹志一卷 【不着撰人名氏】 牡丹史四卷 【明薛凤翔撰】 永昌二芳记三卷 【明张志淳撰】 琼花谱一卷 【明杨端撰】 香雪林集二十六卷 【明王思义编】 澹圃芋纪一卷 【明杨德周撰】 荔支通谱十六卷 【明邓庆家撰】 笋梅谱二卷 【明释真一撰】

以上见四库全书存目

茶

茶茶录二卷 【宋蔡襄撰】 品茶要录一卷 【宋黄儒撰】 宣和北苑贡茶录一卷附北苑别录一卷 【茶录宋熊蕃撰别录宋赵汝砺撰】 东溪试茶录一卷 【宋宋子安撰】

以上见文渊阁著录

水品二卷 【明徐献忠撰】 茶寮记一卷 【明陆树声撰】 煮泉小品一卷 【明田艺蘅撰】 茶约一卷 【明何彬然撰】 别本茶经三卷 【明汤显祖撰】 茶董二卷 【明夏树芳撰】 茗笈二卷 【明屠本峻撰】 茗史二卷 【明万邦宝撰】 茶疏一卷 【明许次纾撰】 汤品无卷数 【不着撰人名氏】

以上见四库全书存目

酒

北山酒经三卷 【宋朱翼中撰】 酒谱一卷 【宋窦苹撰】

以上见文渊阁著录

酒谱一卷 【明徐炬撰】 酒史六卷 【明冯时化撰】 觴政一卷 【明袁宏道撰】 酒概四卷 【明沉沉撰】

以上见四库全书存目

食货类凡一百四十二部

△目录 【总目 家藏总目 杂书目】

总目

家藏总目

杂书目

总目

汉艺文志考证十卷 【宋王应麟撰】 文渊阁书目四卷 【明汤士奇撰】

以上见文渊阁著录

永乐大典目录六十卷 【明解缙等奉敕纂】 宝藩书目一卷 【不着撰人名氏】

】 秘阁书目无卷数 【明钱溥撰】 国史经籍
志六卷 【明焦竑撰】 经厂书目一卷 【明内府刊】

以上见四库全书存目

家藏总目

郡斋读书志四卷后志二卷附志一卷 【读书志后志宋晁公武撰附志赵希弁辑

】 遂初堂书目一卷 【宋尤袤撰】 直斋书录

解题二十二卷 【宋陈振孙撰】

以上见文渊阁著录

蓁竹堂书目六卷 【明叶盛撰】 宝文堂分类书目三卷 【明晁璠撰】

以上见四库全书存目

杂书目

子略四卷目录一卷 【宋高似孙撰】 授经图二十卷 【明朱睦㮮〈木挈〉撰

】

以上见文渊阁著录

文苑春秋叙录一卷 【明崔铣撰】 经序录五卷 【明朱睦㮮〈木挈〉撰】

以上见四库全书存目

目录类凡十六部

钦定续通志卷一百五十九

●钦定续通志卷一百六十 艺文略五

艺文略 【五】

诸子类第六 【儒家 道家 释家 法家 杂家 农家 小说家 兵家】

○诸子类第六

（臣）等谨案郑志诸子类分十一门今依类编次其名家墨家纵横家谨从四库
全书例缺之至宋以后传孟子学者俱归入四书门

儒家

道家

释家

法家

杂家

农家

小说

兵家

△儒家 【儒术 数学】

（臣）等谨案四库全书于术数类以数学之属收皇极经世等书兹于儒家门分

儒术数学二目凡有发明图书洪范之旨者俱汇载数学焉

儒术

数学

儒术

太极图说一卷【宋周子撰】 通书二卷【宋周子撰】 张子全书十四卷附录一卷【宋张子撰】 二程遗书二十五卷附录一卷【宋二程子门人所记朱子辑录】 二程外书十二卷【宋朱子辑】 二程粹言二卷【宋杨时辑】 帝学八卷【宋范祖禹撰】 儒志编一卷【宋王开祖撰】 公是先生弟子记四卷【宋刘敞撰】 节孝语录一卷【宋徐积撰】 儒言一卷【宋晁说之撰】 童蒙训三卷【宋吕本中撰】 省心杂言一卷【宋李邦献撰】 上蔡语录三卷【宋曾恬胡安国编】 袁氏世范三卷【宋袁采撰】 延平答问一卷附录一卷【宋朱子编】 近思录十四卷【宋朱子吕祖谦同撰】 小学六卷【宋朱子辑】 杂学辨一卷附记疑一卷【宋朱子撰】 朱子语类一百四十卷【宋黎靖德编】 戒子通录八卷【宋刘清之撰】 知言六卷附录一卷【宋胡宏撰】 明本释三卷【宋刘荀撰】 少仪外传二卷【宋吕祖谦撰】 丽泽论说集录十卷【宋吕祖俭辑吕祖谦语吕乔年编次】 曾子一卷【宋汪晫编】 子思子一卷【宋汪晫编】 迹言十二卷【宋刘炎撰】 木钟集十一卷【宋陈埴撰】 经济文衡前集二十五卷后集二十五卷续集二十五卷【宋滕珙编】 大学衍义四十三卷【宋真德秀撰】 读书记六十一卷【宋真德秀撰】 心经一卷【宋真德秀撰】 政经一卷【宋真德秀撰】 项氏家说十卷附录二卷【宋项安世撰】 先圣大训六卷【宋杨简撰】 黄氏日钞九十五卷【宋黄震撰】 北溪字义二卷【宋陈淳撰】 准斋杂说二卷【宋吴如愚撰】 性理羣书句解二十三卷【宋熊节编】 东宫备览六卷【宋陈谟撰】 孔子集语三卷【宋薛据辑】 朱子读书法四卷【宋张洪齐■〈〈颐，去页〉上…下〉同编】 家山图书一卷【旧本题朱子撰】 读书分年日程三卷【元程端礼撰】 辨惑编四卷【元谢应芳撰】 治世龟鉴一卷【元苏天爵撰】 管窥外篇二卷【元史伯璇撰】 内训一卷【明仁孝文皇后撰】 理学类编八卷【明张九韶撰】 性理大全书七十卷【明胡广等奉敕纂】 读书录十卷续录十二卷

【明薛瑄撰】 大学衍义补一百六十卷 【明邱浚撰】 小学集注三卷 【明陈选撰】 枫山语录一卷 【明章懋撰】 东溪日谈录十八卷 【明周琦撰】 居业录十二卷 【明胡居仁撰】 困知记二卷续记二卷附录一卷 【明罗钦顺撰】 读书札记八卷 【明徐问撰】 士翼三卷 【明崔铎撰】 泾野子内篇二十七卷 【明吕柟撰】 周子钞释三卷 【明吕柟撰】 张子钞释六卷 【明吕柟撰】 二程子钞释十卷 【明吕柟撰】 朱子钞释二卷 【明吕柟撰】 太极图说述解一卷 【明曹端撰】 通书述解二卷 【明曹端撰】 西铭述解一卷 【明曹端撰】 中庸衍义十七卷 【明夏良胜撰】 格物通一百卷 【明湛若水撰】 世纬一卷 【明袁表撰】 呻吟语摘二卷 【明吕坤撰】 圣学宗要一卷学言三卷 【明刘宗周撰】 人谱一卷人谱类记二卷 【明刘宗周撰】 榕坛问业十八卷 【明黄道周撰】 温氏母训一卷 【明温璜录其母陆氏之训】

以上见文渊阁著录

渔樵对问一卷 【旧本题宋邵子撰】 伊川粹言二卷 【旧本题宋张栻编】 浩斋语录二卷 【旧本题宋过源撰】 唐氏遗编四卷 【宋唐棣编】 通言一卷 【宋吴沆撰】 道南三先生遗书十一卷 【不着编辑名氏】 崇正辨三卷 【宋胡寅撰】 紫阳宗旨二十四卷 【旧本题宋王伋撰】 朱子文语纂编十四卷 【不着编辑名氏】 玉溪师传录一卷附录一卷 【宋童伯羽撰】 分类标注朱子经济文衡七十五卷 【宋滕珙编】 性理字训一卷 【旧本题宋程端蒙撰】 圣门事业图一卷 【宋李元纲撰】 庸言一卷 【宋杨万里撰】 明伦集三卷 【宋涂近正撰】 子家子一卷 【宋家颐撰】 言子三卷 【宋王爚编】 研几图一卷 【旧本题宋王柏撰】 太极辨三卷 【元孙自强撰】 鲁斋心法一卷 【元许衡撰】 圣贤语论二卷 【元王广谋编】 通书问一卷 【元何中撰】 圣学心法四卷 【明成祖御制】 颜子鼎编二卷 【明徐达左编】 西村省己录二卷 【明顾谅撰】 杂诚一卷 【明方孝孺撰】 家语注八卷 【明何孟春撰】 曾子全书三卷 【明曾承业撰】 太极图分解一卷 【明罗鹗撰】 太极绎义一卷 【明舒芬撰】 通书绎义一卷 【明舒芬撰】 正蒙释四卷 【旧本题明高攀龙集注】 二程节录四卷文集钞一卷附录一卷 【明高攀龙编】 程子详本二十卷 【明陈龙正编】 周张全书二十二卷 【明徐

必达编】月川语录一卷【明曹端撰】夜行
烛无卷数【明曹端撰】从政名言二卷【明薛瑄撰】辞子道论一卷【明薛瑄
撰】明良交泰录十八卷【明尹直撰】朱
子学的二卷【明邱浚撰】居业录类编三十一卷【明胡居仁撰】性理要解二
卷【明蔡清撰】虚斋三书无口数【明蔡清
撰】白沙遗言纂要十卷【明张诩编】文公先生经世大训十六卷【明余佑编
】近言一卷【明顾璘撰】传习录略一卷【
明王守仁撰】慎言十三卷【明王廷相撰】心经附注四卷【明程敏政撰】道
一编六卷【明程敏政撰】后渠庸言一卷【
明崔铣撰】同异录二卷【明陆深撰】心性书无卷数【明湛若水撰】扬子折
衷六卷【明湛若水撰】遵道录八卷【明
湛若水撰】甘泉新论一卷【明湛若水撰】论学要语一卷洞语一卷接善编一卷
人伦外史一卷【明刘阳撰】闲辟录十卷【
明程瞳撰】苑洛语录六卷【明韩邦奇撰】愿学编二卷【明胡缵宗撰】近取
编二卷【明胡缵宗撰】海樵子一卷【明
王崇庆撰】东石讲学录十一卷【明王奠撰】心学录四卷【明王奠撰】大儒
心学语录二十七卷【明王奠撰】性理羣书
集览七十卷【旧题琼山玉峯道人不著名氏】三难轩质正无卷数【明戴金编】
正学编二卷【明陈琛撰】说理会编十五卷
【明季本撰】困辨录八卷【明聂豹撰】燕居答述二卷【明戴经撰】研几录
无卷数【明薛侃撰】庸言十二卷【明黄
佐撰】慎言集训二卷
【明敖英撰】辨惑续编七卷附录二卷【明顾亮撰】拟学小记六卷续录一
卷【明尤时熙撰】心斋约言一卷【明王
艮撰】一庵遗集二卷【明王栋撰】绪山会语二十五卷【明钱德洪撰】东溪
蔓语一卷【明曹煜撰】诸儒语要二十卷【
明唐顺之撰】洙滨语录二十卷【明蔡爟撰】廉矩一卷【明王文禄撰】道林
诸集无卷数【明蒋信撰】西田语略二十三
卷续集二十九卷【明樊深撰】识仁定性注解二卷【明何祥撰】辞方山纪述
一卷【明薛应旗撰】辞子庸语十二卷【明
薛应旗撰】二谷读书记二卷【明侯一元撰】礼要乐则二卷【明阮鶚撰】学
菴通辨十二卷【明陈建撰】大学衍义通略
三十一卷【明王诤撰】格物图一卷【明孙丕扬撰】论学篇一卷【明孙丕扬
撰】耿子庸言二卷【明耿定向撰】胡子

衡齐八卷【明胡直撰】 大儒学粹九卷【明魏时亮编】 三儒类要五卷【明徐用检编】 李材见罗全书二十卷【明李复阳编】 心学宗四卷【明方学渐撰】 日言一卷【明孔承倜撰】 性理图说一卷【明徐中撰】 一书增删四卷【明俞邦时撰】 性理钞二十卷【明杨道会撰】 诸儒学案八卷【明刘元卿撰】 宪世编六卷【明唐鹤征撰】 羣书归正集十卷【明林昺撰】 呻吟语六卷【明吕坤撰】 咙言十卷【明范涑撰】 中途六卷【明汪应蛟撰】 王门宗旨十四卷【明周汝登编】 信古余论八卷【明徐三重撰】 庸斋日记八卷【明徐三重撰】 邹南皋语义合编四卷【明邹元标撰】 道学正宗十八卷【明赵仲全撰】 小心斋札记十六卷【明顾宪成撰】 顾端文公遗书三十七卷附年谱一卷【明顾宪成撰】 龟记四卷【明钱一本撰】 圣学范围图无卷数【明岳元声撰】 性理备要十二卷【明王三极撰】 南雍诚勗浅言一卷【明傅新德撰】 冯子节要十四卷【明冯从吾撰】 残本文华大训箴解三卷【明吴道南撰】 荷薪义八卷【明方大镇撰】 增订论语外篇四卷【明潘士达编】 龙沙学录六卷【明王在晋撰】 圣学启关臆说三卷【明龙遇奇撰】 经书孝语无卷数【明朱鸿编】 证人社约言一卷【明刘宗周撰】 刘子节要十四卷【明恽日初编】 宋先贤读书法一卷【不着撰人名氏】 诸儒要语九卷【明王化振编】 存古约言六卷【明吕维祺撰】 真儒一脉无卷数【明吴桂森编】 论语逸编三十一卷【明锺韶编】 闲道录十六卷【明沈寿民撰】 印正稟六卷【明张信民撰】 衡门芹一卷【明辛全撰】 经世硕画三卷【明辛全撰】 思聪录一卷【明贺时泰撰】 作师编一卷【明贺时泰撰】 人模样一卷【明贺时泰撰】 傅习录论述参一卷【明王应昌编】 留书别集二卷【明章世纯撰】 己未留二卷【明章世纯撰】 性理综要二十二卷【旧本题明詹淮辑】 性理标题汇要二十二卷【旧本题明詹淮陈仁锡同编】 家诫要言一卷【明吴麟征撰】 读书札记四卷【明乔可聘撰】 弟经一卷【明林允昌撰】 经史稹义二十二卷【明林允昌撰】 消闲录十卷【明成勇编】 颜子绎五卷【明张星撰】 性理会通七十卷续编四十二卷【明锺人杰撰】 学脉正编五卷【明李公柱编】 道学回澜八卷【明王尹撰】 西畴日钞二卷【明顾枢撰】

】 求仁录十卷 【明潘平格撰】 卓庵心书
四卷 【明张自勋撰】 壘庵杂述二卷 【明朱朝瑛撰】 孔子遗语一卷 【不着编
辑名氏】 两峰集四卷 【明刘阳撰】

以上见四库全书存目

数学

皇极经世十二卷 【宋邵子撰】 皇极经世索隐二卷 【宋张行成撰】 皇极
经世观物外篇衍义九卷 【宋张行成撰】 易通
变四十卷 【宋张行成撰】 观物篇解五卷附皇极经世解起数诀一卷 【宋祝泌撰
】 易学一卷 【宋王湜撰】 洪范皇极内外篇
五卷 【宋蔡沈撰】 天原发微五卷 【宋鲍云龙撰】 大衍索隐三卷 【宋丁易东
撰】 易象图说内篇三卷外篇三卷 【元张理
撰】 三易洞玑十六卷 【明黄道周撰】 太元本旨五卷 【明叶子奇撰】

以上见文渊阁著录

正易心法一卷 【旧本题宋麻衣道者撰】 翼元十二卷 【宋张行成撰】 皇
极经世书类要九卷 【宋锺过撰】 皇极经世节
要无卷数 【不着撰人名氏】 皇极经世书说十八卷 【明朱隐老撰】 皇极经世
书传八卷 【明黄畿撰】 皇极经世心易发微八
卷 【明杨向春撰】 洪范九畴数解三卷 【明熊宗立撰】 洪范图解二卷 【明韩
邦奇撰】 易十三传十三卷 【不着撰人名氏
】 性理三书图解九卷 【明韩万锺撰】 范衍十卷 【明钱一本撰】 太微经二十
卷 【明文翔凤撰】 洪范皇极注四卷 【明
李经纶撰】 说畴一卷 【明乔中和撰】 河图发微未分卷 【明陈士槐撰】 参两
无卷数 【不着撰人名氏】

以上见四库全书存目

儒家类凡二百六十八部

△道家

（臣）等谨按郑志道家门分目二十有五释家门分目凡十道家则同一服气也
分吐纳胎息且既分胎息矣复以胎息定观经入内视
释家则同一说法也分论议语录且既分语录矣复以北山语录入论述未免复杂今于
总门中依次编叙不复别标细目云

道德经解二卷 【宋苏辙撰】 道德宝章一卷 【宋葛长庚撰】 冲虚至德真
经解八卷 【宋江谧撰】 南华真经新传二十卷
【宋王雱撰】 庄子口义十卷 【宋林希逸撰】 南华真经义海纂微一百六卷 【
宋褚伯秀撰】 文子缵义十二卷 【宋杜道坚

撰】 阴符经考异一卷 【宋朱子撰】 周易参同契考异一卷 【宋朱子撰】 阴符经讲义四卷 【宋夏元鼎撰】 周易参同契解三卷 【宋陈显微撰】 悟真篇注疏三卷附直指详说一卷 【宋张伯端撰】 古文龙虎经注疏三卷 【宋王道撰】 周易参同契发挥三卷释疑一卷 【宋俞琰撰】 易外别传一卷 【宋俞琰撰】 席上腐谈二卷 【宋俞琰撰】 云笈七签一百二十二卷 【宋张君房撰】 道德真经注四卷 【元吴澄撰】 周易参同契分章注三卷 【元陈致虚撰】 老子翼三卷老子考异一卷 【明焦竑撰】 庄子翼八卷庄子阙误一卷附录一卷 【明焦竑撰】 古文参同契集解三卷 【明蒋一彪撰】 道藏目录详注四卷 【明道士白云霁撰】

以上见文渊阁著录

金丹诗诀二卷 【宋夏元鼎编】 按节坐功法一卷 【旧本题宋陈抟撰】 极没要紧一卷 【宋刘敞撰】 三洞羣仙录二十卷 【宋陈葆光撰】 梅仙观记一卷 【宋杨智远撰】 道门定制十一卷 【道士吕元素等撰】 阴符经注一卷 【宋俞琰撰】 元学正宗二卷 【宋俞琰撰】 炉火鉴戒录一卷 【宋俞琰撰】 海琼传道集一卷 【宋道士洪知常撰】 延寿第一绅言一卷 【旧本题宋愚谷老人不着撰人名氏】 集仙传十五卷 【不着撰人名氏】 元上秘要一卷 【不着撰人名氏】 胎息经一卷 【不着撰人名氏】 广胎息经二十二卷 【不着撰人名氏】 阴符经注一卷 【金刘处元撰】 华山志一卷 【金王处一撰】 古老子二卷 【元高翮书道士李道谦手刊】 摄生消息论一卷 【元邱处机撰】 中和集三卷后集三卷 【元李道纯撰】 三元参赞延寿书五卷 【元李鹏飞撰】 修真快捷方式九卷 【元余觉华撰】 金丹大要十卷 【元陈致虚撰】 清微仙谱一卷附录三卷 【元陈采撰】 终南山祖庭仙真内传二卷附终南山说经台历代仙真碑记一卷 【元道士李道谦朱象先编】 甘水仙源录十卷 【元道士李道谦撰】 元品录五卷 【元张两撰】 徐仙翰藻十四卷附赞灵集四卷 【不着编辑者名氏】 周颠仙传一卷 【明太祖御制】 神隐志二卷 【明宣王权撰】 道德经说奥二卷 【旧本题朱孟尝撰不详时代】 庄子通义十卷 【明朱得之撰】 解庄十二卷 【明陶望龄撰】 南华经副墨八卷 【明陆西星撰】 读庄小言一卷 【明文德翼撰】 阴符经解一卷 【明焦竑撰】 阴符质剂一卷 【明

方时化撰】药地炮庄九卷【明方以智撰】观老庄影响论一卷【明释德清撰】周易参同契注解三卷【明张位撰】悟真篇注解三卷【明张位撰】修龄要指一卷【明冷谦撰】鹤林类集无卷数【明道士郭本中步履常同撰】龙门子凝道记二卷【明宋濂撰】紫阳道院集二卷【明范应虚撰】霞外杂俎一卷【明杜巽才撰】至游子二卷【不着撰人名氏】诸真元奥集成九卷【明朱载堉〈土韦〉编】羣仙珠玉集成四卷【不着编辑名氏】黄白镜一卷续黄白镜一卷【明李文烛撰】观化集一卷【明朱约佶撰】含元子十二卷【明赵枢生撰】香案牒一卷【明陈继儒撰】养生肤语一卷【明陈继儒撰】化机汇参五卷【明段元一撰】含素子麈谭十卷【明朱清仁撰】引年录二卷【明朱应鼎撰】读丹录无卷数【明彭在份撰】古今南华内篇讲录十卷【不着撰人名氏】道书类钞无卷数【不着编辑名氏】摄生要语一卷【旧本题明息斋居士撰不著名氏】二六功课一卷【旧本题明石室道人撰不著名氏】玉洞藏书四卷【明李堪撰】实地论二卷【不着撰人名氏】

以上见四库全书存目

道家类凡八十七部

△释家

宋高僧传三十卷【宋释赞宁撰】道院集要三卷【宋王古编】法藏碎金录十卷【宋晁迥撰】僧宝传三十二卷【宋释惠洪撰】林闲录二卷后集一卷【宋释惠洪撰】五灯会元二十卷【宋释普济撰】罗湖野录四卷【宋释晓莹撰】释氏稽古略四卷【元释觉岸撰】佛祖通载二十二卷【元释念常撰】

以上见文渊阁著录

迦谈四卷【宋晁迥撰】佛祖统纪五十四卷【宋僧志盘撰】武林西湖高僧事略一卷【宋僧元敬元复同撰】神僧传九卷【不着撰人名氏】大藏一览十卷【明陈实原编】觉迷蠡测三卷剩言一卷附录一卷【明管志道撰】法喜志三卷【明夏树芳撰】长松茹退二卷【明释可真撰】吴都法乘十二卷【明周永年撰】

以上见四库全书存目

释家类凡十八部

△法家

管子补注二十四卷【明刘绩撰】

以上见文渊阁著录

管子权二十四卷 【明朱长春撰】 论叙管子成书十五卷 【明梅士享编】

韩子迂评二十卷 【旧本题明门无子评不著名

氏】 法家哀集无卷数 【明陈永辑】

以上见四库全书存目

法家类凡五部

△杂家 【杂学 杂考 杂说 杂品 杂纂 杂编】

（臣）等谨案郑志杂家一门不分细目自宋以来简帙繁多谨从四库全书例分杂学杂考杂说杂品杂纂杂编为目凡六

杂学

杂考

杂说

杂品

杂纂

杂编

杂学

刍言三卷 【宋崔敦礼撰】 习学记言五十卷 【宋叶适撰】 乐庵遗书四卷

【旧本题宋李衡撰龚昱编】 本语六卷 【明

高拱撰】

以上见文渊阁著录

心传录三卷日新录一卷 【宋子恕撰】 经鉏堂杂志八卷 【宋倪思撰】 善

诱文一卷 【宋陈录撰】 樵谈一卷 【旧本题

宋许棐撰】 几上语一卷枕上语一卷 【宋施清臣撰】 千古功名镜十二卷拾遗一

卷 【宋吴大有撰】 厚德录四卷 【宋李元纲

撰】 乐善录二卷 【宋李昌龄撰】 西畴常言一卷 【宋何坦撰】 东谷所见一卷

【宋李之彦撰】 鸣道集说一卷 【旧本题

金李纯甫撰】 中说三卷 【元敖■〈森 丿〉撰】 学问要编六卷 【元刘君贤撰

】 虑得集四卷附录二卷 【元华惊鞞撰】 郁

离子二卷 【明刘基撰】 青岩丛录一卷 【明王祚撰】 华川卮辞一卷 【明王祚

撰】 空同子瞽说一卷 【明苏伯衡撰】 笔

畴二卷 【明王达撰】 黎子杂释一卷 【明黎久之撰】 类博杂言一卷 【明岳正

撰】 警时新录一卷 【明胡澄撰】 桑子庸

言一卷 【明桑悦撰】 祝子罪知七卷 【明祝允明撰】 浮物一卷 【明祝允明撰

】 读书笔记一卷 【明祝允明撰】 空同子

一卷【明李梦阳撰】空同子纂一卷【不着编辑名氏】濯旧藁一卷【明王俊撰】雅述二卷【明王廷相撰】大复论一卷【明何景明撰】经世要谈一卷【明郑善夫撰】惜阴录十二卷【明顾应祥撰】西原遗书二卷【明薛蕙撰】约言无卷数【明薛蕙撰】钱子测语二卷【明钱琦撰】百感录一卷【明陈相撰】拘墟晤言一卷【明陈沂撰】竹下寤言二卷【明王文禄撰】海沂子五卷【明王文禄撰】宋学商求一卷附录一卷【明唐枢撰】疑谊偶述一卷【明唐枢撰】一庵杂问录一卷【明唐枢撰】嘉禾问录一卷【明唐枢撰】辖圜杂着一卷【明唐枢撰】酬物难一卷【明唐枢撰】咨言一卷【明唐枢撰】景行馆论一卷【明唐枢撰】积承录一卷【明唐枢撰】一庵语录一卷【明唐枢撰】因领录一卷【明唐枢撰】唐集辑要四卷【明唐枢撰】存愚录一卷【明张纯撰】百泉子绪论一卷【明皇甫汈撰】夜灯管测二卷【明沈懋撰】冬游记一卷【明罗洪先撰】太藪外史一卷【明蔡羽撰】拟诗外传一卷【明黄省曾撰】客问一卷【明黄省曾撰】闲适剧谈五卷【明邓球撰】汲古丛语一卷【明陆树声撰】病榻寤言一卷【明陆树声撰】耄余杂识一卷【明陆树声撰】金罍子四十四卷【明陈绛撰】经济录二卷【明张炼撰】学道记言五卷事行纪略一卷【明周思兼撰】推篷寤语九卷余录一卷【明李豫亨撰】三事遯真一卷【明李豫亨撰】瞿塘日录十二卷【明来知德撰】一贯编四卷【明罗汝芳撰】近溪子明道录八卷【明罗汝芳撰】会语续录二卷【明罗汝芳撰】识仁编二卷【明罗汝芳撰】古言二卷【明郑晓撰】浑然子二卷【明张翀撰】经子臆解一卷【明王世懋撰】望崖录二卷【明王世懋撰】澹思子一卷【明王世懋撰】内外篇二卷【明周宏祖撰】文雅社约一卷附录一卷【明沈鲤撰】脉望八卷【明赵台鼎撰】庭帙杂录二卷【明袁衷撰】甘露园长书六卷短书四卷【明陈汝铤撰】化书新声无卷数【明王清一撰】海蠡编二卷【明袁士瑜撰】槐亭漫录无卷数【明严尧黻撰】东水质疑六卷【明胡袞撰】宵练匣十卷【明朱得之撰】意见一卷【明陈于陞撰】艺圃琳琅四卷【明蒋以忠撰】笔麈十八卷【明于慎行撰】问辨牒四卷续问辨牒四卷【明管志道撰】从先维俗议五卷【

明管志道撰】 无甚高论七卷 【明赵鸿赐撰】 何之子一卷 【明周宏禴撰】 鸿苞四十八卷 【明屠隆撰】 证学编四卷附证学论策一卷 【明杨起元撰】 因明子无卷数 【明张恒撰】 进修录三卷 【明冯渠撰】 三一子无卷数 【明程德良撰】 微言四卷附说书随笔一卷 【明詹在泮编】 宗一圣论二卷 【明吴应宾撰】 祈嗣真诠无卷数 【明袁黄撰】 支谈三卷 【明焦竑撰】 焦弱侯问答一卷 【明焦竑撰】 丛语十二卷 【明吴炯撰】 环碧斋小言一卷 【明祝世禄撰】 时习新知六卷 【明郝敬撰】 西行草一卷 【明曾伟芳撰】 传家迂言一卷 【明贺应保撰】 迂议一卷 【明贺应保撰】 迂亿四卷 【明贺应保撰】 共发编四卷 【明曹于汴撰】 尽心编一卷证语二卷海鸥居日识二卷 【明陈伯友撰】 寅阳十二论二卷 【明叶秉敬撰】 剩言十四卷 【明戴君恩撰】 宏山集四卷 【明张后觉撰】 感述录六卷续录四卷 【明赵维新撰】 治平言二卷 【明曾大奇撰】 论学绪言六卷 【明邹士元撰】 林子全集四十卷 【明林兆恩撰】 韦弦佩无卷数 【明屠本峻撰】 纪闻类编四卷 【明窦文照撰】 虞精集八卷 【明周伯耕撰】 王氏二书选要十一卷 【明王贞善撰】 听心斋客问一卷 【旧题万尚父撰不着时代】 文园漫语一卷 【旧题程希尧撰不着时代】 辨学遗牍一卷 【明西洋人利玛窦撰】 二十五言一卷 【明利玛窦撰】 天主实义二卷 【明利玛窦撰】 畸人十篇二卷附西琴曲意一卷 【明利玛窦撰】 交友论一卷 【明利玛窦撰】 七克七卷 【明西洋人庞迪我撰】 西学凡一卷附录唐大秦寺碑一篇 【明西洋人艾儒略撰】 灵言蠡勺二卷 【明西洋人毕方济撰】 空际格致二卷 【明西洋人高一志撰】 寰有诠六卷 【明西洋人傅汛际撰】 苍崖子无卷数 【明朱健撰】 爨下语二卷 【明张复撰】 尚綱小语三卷 【张姚张斌撰】 垂训朴语一卷 【明陈其德撰】 狂夫之言三卷续狂夫之言二卷 【明陈继儒撰】 安得长者言一卷 【明陈继儒撰】 睿养图说无卷数 【明杨观光撰】 寻乐编一卷 【明毛元淳撰】 补计然子一卷 【明董汉策撰】 蔬斋扉语四卷 【明沈大洽撰】 激书不分卷 【明贺贻孙撰】 真如子醒言九卷 【明王化隆撰】 养生弗佛二论一卷 【明魏大成撰】 枕流日札一卷 【不着撰人名氏】

以上见四库全书存目

杂考

东观余论二卷【宋黄伯思撰】 猗觉寮杂记二卷【宋朱翌撰】 能改斋漫录十八卷【宋吴曾撰】 云谷杂记四卷【宋张昞撰】 西溪丛语三卷【宋姚宽撰】 学林十卷【宋王观国撰】 容斋随笔十六卷续笔十六卷三笔十六卷四笔十六卷五笔十卷【宋洪迈撰】 考古编十卷【宋程大昌撰】 演繁露十六卷续演繁露六卷【宋程大昌撰】 纬略十二卷【宋高似孙撰】 瓮牖闲评八卷【宋袁文撰】 芥隐笔记一卷【宋龚颐正撰】 示儿编二十三卷【宋孙奕撰】 芦浦笔记十卷【宋刘昌诗撰】 野客丛书三十卷附野老记闻一卷【宋王楙撰】 坦斋通编一卷【宋邢凯撰】 爱日斋丛钞五卷【不着撰人名氏】 考古质疑六卷【宋叶大庆撰】 经外杂钞二卷【宋魏了翁撰】 古今考一卷续古今考三十七卷【宋魏了翁撰元方回续】 颖川语小二卷【宋陈叔方撰】 宾退录十卷【宋赵与峕撰】 学斋占毕四卷【宋史绳祖撰】 鼠璞一卷【宋戴埴撰】 朝野类要五卷【宋赵升撰】 困学纪闻二十卷【宋王应麟撰】 识遗十卷【宋罗璧撰】 日损斋笔记一卷【元黄潛撰】 丹铅余录十七卷续录十二卷摘录十三卷总录二十七卷【明杨慎撰】 谭苑醍醐九卷【明杨慎撰】 正杨四卷【明陈耀文撰】 疑耀七卷【明张萱撰】 艺彀三卷彀补三卷【明邓伯羔撰】 笔精八卷【明徐■〈火勃〉撰】 通雅五十二卷【明方以智撰】 卮林十一卷【明周婴撰】 拾遗录一卷【明胡燝撰】 名义考十二卷【明周祁撰】

以上见文渊阁著录

肯綮录一卷【宋赵叔问撰】 古今考一卷【宋魏了翁撰】 正朔考一卷【宋魏了翁撰】 读书杂钞二卷【宋魏了翁撰】 搜采异闻集五卷【宋永亨撰】 续古今考九卷【旧题金元好问撰】 箐斋读书录二卷【明周洪谟撰】 两山墨谈十八卷【明陈霆撰】 灼薪剧谈二卷【明朱承爵撰】 古今原始十四卷【明赵鉞撰】 史纲疑辨四卷【明林有望撰】 千古辨疑七卷【明陈锡撰】 读史订疑一卷【明王世懋撰】 简籍遗闻二卷【明黄溥撰】 稗乘四卷【不着撰人名氏】 常谈考误四卷【明周梦旸撰】 琅琊曼衍四卷【明张鼎思撰】 糝言四卷【明郑明选撰】 升庵新语四卷【明王宇编】 学林就正四

卷【明陈耀文撰】玉唾壶二卷【明王一槐撰】戏瑕三卷【明钱希言撰】
析醒漫录六卷【明陈懋仁撰】雅俗稽言四
十卷【明张存绅撰】读书考定三十卷【明程良儒撰】事物初略三十四卷【
明吕毖撰】俗语一卷【不着撰人名氏】
纬略类编三十五卷【不着撰人名氏】寓言十二卷【明陈世宝撰】

以上见四库全书存目

杂说

春明退朝录三卷【宋宋敏求撰】笔记三卷【宋宋祁撰】东原录一卷【
宋龚鼎臣撰】王氏谈录一卷【宋王钦臣录
其父洙之书】文昌杂录七卷【宋庞元英撰】仇池笔记二卷【旧题宋苏轼撰
】东坡志林五卷【宋苏轼撰】珩璜新论一
卷【宋孔平仲撰】晁氏客语一卷【宋晁说之撰】师友谈记一卷【宋李廌撰
】杨公笔录一卷【宋杨延龄撰】吕氏杂
记二卷【宋吕希哲撰】曲洧旧闻十卷【宋朱弁撰】元城语录三卷附行录一
卷【语录宋马永卿编行录明崔铣续】懒真子
五卷【宋马永卿撰】石林燕语十卷【宋叶梦得撰】避暑录话二卷【宋叶梦
得撰】岩下放言三卷【宋叶梦得撰】却
扫编三卷【宋徐度撰】五总志一卷【宋吴炯撰】紫微杂说一卷【宋吕本中
撰】辨言一卷【宋员兴宗撰】墨庄漫录
四卷【宋张邦基撰】寓简十卷【宋沈作喆撰】栾城遗言一卷【宋苏籀撰】
东园丛说三卷【宋李如箴撰】常谈一卷
【宋吴箕撰】云麓漫钞十五卷【宋赵彦卫撰】游宦纪闻十卷【宋张世南撰
】密斋笔记五卷续记一卷【宋谢采伯撰】
梁溪漫志十卷【宋费衮撰】涧泉日记三卷【宋韩澆撰】老学庵笔记十卷续
笔记二卷【宋陆游撰】程史十五卷【宋岳
珂撰】愧郟录十五卷【宋岳珂撰】祛疑说一卷【宋储泳撰】鹤林玉露十六
卷【宋罗大经撰】贵耳集一卷二集一卷三
集一卷【宋张端义撰】吹剑录外集一卷【宋俞文豹撰】脚气集二卷【宋车
若水撰】藏一话腴四卷【宋陈郁撰】佩
韦斋辑闻四卷【宋俞德邻撰】书斋夜话四卷【宋俞琰撰】齐东野语二十卷
【宋周密撰】困学斋杂录一卷【元鲜于枢
撰】隐居通议三十一卷【元刘埙撰】湛渊静语二卷【元白珽撰】敬斋古今
齎八卷【元李冶撰】日闻录一卷【元李
翀撰】勤有堂随录一卷【元陈栎撰】玉堂嘉话八卷【元王恽撰】庶斋老学

丛谈三卷【元盛如梓撰】 研北杂志二卷【元陆友撰】 北轩笔记一卷【元陈世隆撰】 闲居录一卷【元吾邱衍撰】 乐郊私语一卷【元姚桐寿撰】 霏雪录二卷【明榴绩撰】 雪履斋笔记一卷【元郭翼撰】 蠡海集一卷【明王逵撰】 草木子四卷【明叶子奇撰】 胡文穆杂着一卷【明胡广撰】 谏言长语一卷【明曹安撰】 蟬精隽十六卷【明徐伯龄撰】 震泽长语二卷【明王鏊撰】 井观琐言三卷【明郑瑗撰】 南函漫录十卷【明张志淳撰】 雨航杂录二卷【明冯时可撰】 采芹录四卷【明徐三重撰】 画禅室随笔四卷【明董其昌撰】 六研斋笔记四卷二记四卷三记四卷【明李日华撰】 物理小识十二卷【明方以智撰】

以上见文渊阁著录

试笔一卷【旧本题宋欧阳修撰】 章申公九事一卷【不着撰人名氏】 蒙斋笔谈二卷【旧本题宋郑景望撰】 麟书一卷【宋汪若海撰】 扞虱新话十五卷【宋陈善撰】 蕉窗杂录一卷【旧本题宋稼轩居士撰】 诚斋挥麈录一卷【旧本题宋杨万里撰】 鹤山笔录一卷【旧本题宋魏了翁撰】 萤雪丛说二卷【宋俞成撰】 宜斋野乘一卷【宋吴枋撰】 木笔杂钞二卷【宋吴子良撰】 吹剑录一卷【宋俞文豹撰】 碧湖杂记一卷【不着撰人名氏】 志雅堂杂钞一卷【宋周密撰】 袖中锦一卷【旧本题宋太平老人撰不著名氏】 衍约说十三篇【不着撰人名氏】 月下偶谈一卷【旧本题宋俞琰撰】 学易居笔录一卷【元俞镇撰】 春雨杂述一卷【旧本题明解缙撰】 海涵万象录四卷【明黄润玉撰】 古穰杂录三卷【明李贤撰】 琅琊漫钞一卷【明文林撰】 三余赘笔二卷【明都印撰】 损斋备忘录二卷【明梅纯撰】 蝸笑偶言一卷【明郑瑗撰】 荷亭辩论十卷【明卢格撰】 凝斋笔语一卷【明王鸿儒撰】 余冬序录六十五卷【明何孟春撰】 听雨纪谈一卷【明都穆撰】 山堂琐语二卷【明陈霆撰】 正思斋杂记二卷【明刘教撰】 遯言十卷【明孙宜撰】 停驂录一卷续录三卷【明陆深撰】 河汾燕闲录二卷【明陆深撰】 传疑录二卷【明陆深撰】 春雨堂杂钞一卷【明陆深撰】 卮言余录十三卷【明林炫撰】 询刍录一卷【明陈沂撰】 真珠船八卷【明胡侍撰】 墅谈六卷【明胡侍撰】 东谷赘言二卷【明敖英撰】 绿雪

亭杂言一卷【明敖英撰】七修类稿五十一卷【明郎瑛撰】东巢杂箸二卷【不着撰人名氏】郊外农谈三卷【明张鈇撰】
【明陆瑛撰】遁旃琐语一卷【明苏佑撰】读书一得四卷【明黄训撰】长水日钞一卷【明陆树声撰】
【明戴冠撰】太岳杂箸一卷【明张居正撰】次麓子集十二卷【明李锦撰】黄谷琐谈四卷【明李
蓑撰】窥天外乘一卷【明王世懋撰】远壬文一卷【明王世懋撰】四友斋丛说三十八卷【明何良俊撰】
览古评语五卷【明陈师撰】禅寄笔谈十卷续谈五卷【明陈师撰】青林杂录一卷【明王熏撰】
厌次琐谈一卷【明刘世伟撰】对问编八卷【明江应晓撰】孤竹宾谈四卷【明陈德文撰】应庵任意录十四卷【明
罗鹤撰】路史二卷【明徐渭撰】梅花草堂笔谈十四卷二谈六卷【明张大复撰】闻雁斋笔谈六卷【明张大复撰】
河上楮谈三卷【明朱孟震撰】汾上续谈一卷【明朱孟震撰】浣水续谈一卷【明朱孟震撰】游宦余谈一卷【明朱孟震撰】
【明朱孟震撰】黄帝祠额解一卷【明利瓦伊楨撰】木几宥谈一卷【明彭汝让撰】说颐八卷【明余懋学撰】
留青日札三十九卷【明田艺蘅撰】玉笑零音一卷【明田艺蘅撰】留留青六卷【明徐懋升编】天都载六卷【明马大壮撰】
异林十卷【明支允坚撰】宙合编八卷【明林兆珂撰】累瓦三编十二卷【明吴安国撰】牖景录二卷【明徐三重撰】
家则一卷野志一卷【明徐三重撰】涌幢小品三十二卷【明朱国楨撰】俟后编六卷补录一卷附录二卷【明王敬臣撰】
艺林剩语十二卷【明顾成宪撰】赵氏连城十八卷【明赵世显撰】说原十六卷【明穆希文撰】焦氏笔乘八卷【明焦竑撰】
郁冈斋笔麈四卷【明王肯堂撰】紫桃轩杂缀三卷又缀三卷【明李日华撰】瓶花斋杂录一卷【明袁宏道撰】
文海披沙八卷【明谢肇淛撰】西峰字说三十三卷【明曹学佺撰】射林八卷【明朱光裕撰】青溪暇笔三卷【明姚福撰】
读书杂记二卷【明胡震亨撰】说储八卷二集八卷【明陈禹谟撰】阅耕余录六卷【明张所望撰】书肆说铃二卷【明叶秉敬撰】
蓬窗日录八卷【明陈全之撰】欧余漫录十二卷【明闵元衢撰】秋泾笔乘一卷【明宋凤翔撰】燕居功课二十七卷【明安世凤撰】
仙愚馆杂帖七卷【明黄元会撰】认字测三卷

【明周宇撰】 吕氏笔奕八卷 【明吕曾见撰】 黄元龙小品二卷 【明黄奂撰】 古今评录四卷 【明商维浚撰】 雪庵清史五卷 【明乐纯撰】 露书十四卷 【明姚旅撰】 稽古堂论古三卷 【旧本题明张燧撰】 书蕉二卷 【明陈继儒撰】 枕谈一卷 【明陈继儒撰】 偃曝谈余二卷 【明陈继儒撰】 明辨类函六十四卷 【明詹景凤撰】 澹斋内言一卷外言一卷 【明杨继益撰】 说楛七卷 【明焦周撰】 谭子雕虫二卷 【明谭贞默撰】 福堂寺贝余五卷 【明茅元仪撰】 兰叶笔存无卷数 【明释本以撰】 蒙泉杂言二卷 【不着撰人名氏】 东皋杂记一卷 【不着撰人名氏】 春寒闲记一卷 【不着撰人名氏】 戒庵漫笔八卷 【明李诩撰】

以上见四库全书存目

杂品

洞天清录一卷 【宋赵希鹄撰】 负暄野录二卷 【宋陈樾撰】 云烟过眼录四卷续录一卷 【宋周密撰】 格古要论三卷 【明曹昭撰】 竹屿山房杂部三十二卷 【宋宋诩及其子公望撰】 遵生八笺十九卷 【明高濂撰】 清秘藏二卷 【明张应文撰】 长物志十二卷 【明文震亨撰】

以上见文渊阁著录

物类相感志一卷 【旧本题宋苏轼撰】 物类相感志十八卷 【旧本题宋苏轼撰】 格物彙谈二卷 【宋苏轼撰】 居家必用事类全集十卷 【不着撰人名氏】 多能鄙事十二卷 【旧本题明刘基撰】 都氏铁网珊瑚二十卷 【明都穆撰】 水云录二卷 【明杨溥撰】 李氏居室记五卷 【明李濂撰】 便民图纂十六卷 【不着撰人名氏】 羣芳清玩无卷数 【明李琦撰】 鼃采馆清课二卷 【明费元禄撰】 蕉窗九录无卷数 【旧本题明项元汴撰】 考盘余事四卷 【明屠隆撰】 游具雅编一卷 【明屠隆撰】 筠轩清秘录三卷 【旧本题明董其昌撰】 墨林快事十二卷 【明安世凤撰】 飞帛语略一卷 【明沈德符撰】 华夷花木鸟兽珍玩考十卷 【明慎懋官撰】 妮古录四卷 【明陈继儒撰】 岩栖幽事一卷 【明陈继儒撰】 博物要览十六卷 【明谷泰撰】 广社无卷数 【明张云龙撰】 莖录三卷 【不着撰人名氏】

以上见四库全书存目

杂纂

紺珠集十三卷【宋朱胜非撰】类说六十卷【宋曾慥撰】事实类苑六十三卷【宋江少虞撰】仕学规范四十卷【宋张铉撰】自警编九卷【宋赵善璪撰】琴堂谕俗编二卷【宋赵玉道撰】言行龟鉴八卷【元张光祖撰】说郛一百二十卷【明陶宗仪撰】玉芝堂谈荟三十六卷【明徐应秋编】

以上见文渊阁著录

徽言一卷【宋司马光编】帝皇龟鉴三十四卷【旧本题宋王钦若撰】卧游录一卷【旧本题宋吕祖谦撰】经子法语二十四卷【宋洪迈撰】文苑英华钞四卷【宋高以孙撰】养生杂纂二十二卷附月览二卷【宋周守忠撰】石屏新语二卷【旧本题宋戴复古撰】补妬记八卷【旧本题王绩编】古今艺苑谈槩上集六卷下集六卷【旧本题俞文豹撰】澄怀录二卷【宋周密撰】女教书四卷【元许熙载撰】景行录一卷【旧本题元史弼编】有官龟鉴十九卷【元苏霖撰】忍经一卷【元吴亮撰】闲博录一卷【不着撰人名氏】女红余志二卷【旧本题龙辅撰】诚斋杂记二卷【旧本题元林坤撰】琅嬛记三卷【旧本题元伊世珍撰】劝善书二十卷【明仁孝皇后撰】臣鉴三十七卷【明宣宗御撰】外戚事鉴二卷【不着撰人名氏】君鉴五十卷【明景帝御撰】昭鉴录十一卷【明洪武初奉敕撰】永鉴录二卷【明洪武中奉敕撰】历代驸马录二卷【明洪武中奉敕撰】公子书三卷【明洪武中熊鼎等奉敕撰】帝王宝范三卷【明马顺孙撰】使规一卷【明张洪撰】景仰撮书一卷【明王达撰】学范二卷【明赵撝谦撰】纲常懿范十卷【明周是修撰】为善阴鹭十卷【明永乐中官撰颁行】政训二卷【明彭韶编】闻见类纂小史十四卷【明魏偁撰】食色绅言二卷【旧题明皆春居士撰】奚囊手镜十三卷【明杨循吉撰】诸子纂要八卷【明黎尧卿撰】俨山外纪一卷【旧题明陆深撰】续观感录六卷【明方鹏撰】物异考一卷【明方凤撰】祷雨录一卷【明钱琦撰】欣赏编无卷数【明沈津撰】诸子品节五十卷【明陈深撰】翼学编十三卷【明朱应奎撰】谈资三卷【明秦鸣雷撰】广仁类编四卷【明王明槐撰】学圃蕙苏六卷【明陈耀文撰】初潭集十二卷【明李贽撰】读升庵集二十卷【明李贽撰】续自警编八卷【明黄希宪撰】牧鉴十卷【明杨昱撰】芸心识余七卷续一

卷【明陈其力撰】烟霞小说三十二卷【明陆貽孙编】阅古随笔续二卷【明穆文熙撰】诸子汇函二十六卷【旧本题明归有光撰】困学纂言六卷【明李栻撰】灼艾集八卷【不着撰人名氏】百家类纂四十卷【明沈津编】警心类编四卷【明张位撰】天池秘集十二卷【旧本题明徐渭撰】六鉴举要六卷【明刘元卿撰】古今名贤说海二十二卷【不着编辑名氏】名贤汇语二十卷【不着编辑名氏】羣书摘草五卷【明王国宾编】闺范四卷【明吕坤撰】百子咀华十四卷【明胡效臣编】琅邪代醉编四十卷【明张鼎思撰】兰芳录二卷【明徐三重撰】警语类钞八卷【明程达撰】诸经品节二十卷【明杨起元编】霞外麈谈十卷【明周应治编】宋贤事汇二卷【明李廷机撰】说类六十二卷【明叶向高编】遯世编十四卷【明钱一本撰】廉平录五卷【明傅履礼高为表同撰】焦氏类林八卷【明焦竑撰】二十九子品汇释评二十卷【旧题翰林三状元会选】田居乙记四卷【明方大镇撰】省括编二十三卷【明姚文蔚撰】智品十三卷【明樊玉衡撰】再广历子品粹十二卷【明汤宾尹撰】续说郛四十六卷【明陶珽编】智囊二十八卷【明冯梦龙编】智囊补二十八卷【明冯梦龙编】知非录二卷【明黄时耀撰】学古适用编九十一卷【明吕纯如编】经史典奥六十七卷【明来斯行编】宗藩训典十二卷【明冯柯撰】清寤斋欣赏编一卷【明王象晋撰】稗史汇编一百七十五卷【明王圻撰】增定玉壶冰二卷【明闵元衢编】古今长者录八卷【明黄文照撰】洵词记事钞一卷附明良记四卷【明李鸚翀撰】清赏录十二卷【明张翼包衡同撰】十可篇十卷【明马嘉松编】舌华录九卷【明曹臣撰】元壶杂俎八卷【明赵尔昌撰】教家类纂八卷【明薛梦李编】益智编四十一卷【明孙能传撰】法教佩珠二卷【明林有麟撰】经世环应编八卷【明钱继登撰】愧林漫录十卷【明瞿式耜撰】掌录无卷数【旧题绣云居士今考定为明李辂撰】检蠹随笔三十卷【明杨宗吾撰】厚语四卷【明钱蓑撰】偶得绀珠一卷【明黄秉石撰】培垒居杂录四卷【明郑端允编】广百川学海无卷数【明冯可宾编】湘烟录十六卷【明闵元京凌义渠同编】云薏淡墨六卷【明木增撰】子史碎语二十四卷【明胡尚洪编】诸子拔萃八卷【明李云翔编

】 倘湖樵书十二卷 【明来集之撰】 博学汇书十二卷 【明来集之撰】 尧山堂外纪一百卷 【明蒋一葵撰】 家辑要无卷数 【明胡燠撰】 笔记二卷 【明陈继儒撰】 读书十六观一卷 【明陈继儒撰】 羣碎录一卷 【明陈继儒撰】 珍珠船四卷 【明陈继儒撰】 销夏四卷 【明陈继儒撰】 辟寒四卷 【明陈继儒撰】 古今韵史十二卷 【明陈继儒撰】 福寿全书无卷数 【明陈继儒撰】 广销夏一卷广辟寒一卷销夏补一卷辟寒补一卷销夏再一卷辟寒再一卷寒夏合再一卷 【明周诗雅撰】 可如六卷 【明董德镛撰】 谭槩三十六卷 【明冯梦龙撰】 枕函小史无卷数 【明闵子忱撰】 捣坚录二十四卷 【明朱廷旦撰】 萃古名言四卷 【明赵民献撰】 昨非斋日纂二十卷 【明郑瑄撰】 迪吉录九卷 【明颜茂猷撰】 读书止观录五卷 【明吴应箕撰】 韦弦自佩录十二卷 【明朱辅撰】 广仁品二集无卷数 【明李长科编】 今古钩元四十卷 【明诸茂卿撰】 山樵暇语十卷 【明俞弁撰】 杨氏塾训六卷 【明杨兆坊撰】 着疑录九卷 【明戴有孚撰】 布粟集八卷 【不着撰人名氏】 九朝谈纂无卷数 【不着撰人名氏】 观生手镜一卷 【旧本题蘋川布衣编】 枕中秘无卷数 【明卫泳编】 百子金丹十卷 【明郭伟编】 ■〈薨，侵代死〉古介书无卷数 【旧本题东海黄禹金定邵闇生编】 沈氏学■〈山上〈弓文〉下〉十六卷 【明沈尧中撰】

以上见四库全书存目

杂编

俨山外集三十四卷 【明陆深撰】 古今说海一百四十二卷 【明陆楫编】 少室山房笔丛正集三十二卷续集十六卷 【明胡应麟撰】

以上见文渊阁著录

五子纂图互注四十二卷 【宋龚士高编】 艺圃搜奇十八卷补阙二卷 【旧本题徐一夔撰】 柏斋三书三卷 【明何塘撰】 六诏纪闻二卷 【明俞夔等撰】 水钟台集无卷数 【明唐枢撰】 邱陵学山无卷数 【明王文禄编】 历代小史一百五卷 【不着编辑名氏】 陆学士杂箸十一卷 【明陆树声撰】 陆文定公书无卷数 【明陆树声撰】 两京遗编五十七卷 【明胡维新编】 纪录汇编二百十六卷 【明沈节甫编】 左传国语国策评苑六十一卷 【明穆文熙

编】中都四子集六十四卷【明朱东光编】

明小史八十九卷【不着编辑名氏】山居清赏二十八卷【明程棊编】今献汇言八卷【明高鸣凤编】吕公实政录七卷【

明吕坤撰】天学初函五十二卷【明李之藻编】合刻五家言无卷数【明锺惺编】夷门广牒一百二十六卷【明周履靖编】

盐邑志林六十二卷【明懋维城编】张氏藏书四卷【明张应文撰】格致丛书无卷数【明胡文焕编】学易堂笔记一卷二笔

一卷三笔一卷四笔一卷五笔一卷【明项皋谟撰】天都阁藏书二十五卷【明程允兆编】眉公十集四卷【明陈继儒撰】津

逮秘书无卷数【明毛晋撰】汉魏别解十六卷【明黄澍叶绍泰同编】快书五十卷【明闵景贤何伟然同编】广快书五十卷

【明何伟然编】诸子裒异十六卷【明汪定国编】皇书帝佚无卷数【明蒋轶凡编】明百家小说一百九卷【明沈廷松编

】溪堂丽宿集无卷数【不着撰人名氏】翰苑丛钞十四卷【不着撰人名氏】

以上见四库全书存目

杂家类凡六百四十三部

△农家

农书三卷【宋陈旉撰附秦湛蚕书一卷】农桑辑要七卷【元世祖时官撰颁行本】农桑衣食撮要二卷【元鲁明善撰】

农书二十二卷【元王桢撰】救荒本草八卷【明周王橐撰】农政全书六十卷【明徐光启撰】泰西水法六卷【明西洋人

熊三拔撰】野菜博录四卷【明鲍山撰】

以上见文渊阁著录

耕织图诗无卷数【宋楼璹撰】经世民事录十二卷【明桂萼编】野菜谱一卷【旧本题王盘撰】农说一卷【明马一

龙撰】别本农政全书四十六卷【明徐光启撰】沈氏农书一卷【不着撰人名氏】

以上见四库全书存目

农家类凡十四部

△小说【琐事 琐语】

（臣）等谨案郑志小说家一门亦不分细目今从四库全书例以琐事琐语二目分收之

琐事

琐语

琐事

南唐近事一卷 【宋郑文宝撰】 北梦琐言二十卷 【宋孙光宪撰】 贾氏谈录一卷 【宋张洎撰】 洛阳搢绅旧闻记五卷 【宋张齐贤撰】 南部新书十卷 【宋钱易撰】 王文正笔录一卷 【宋王曾撰】 儒林公议二卷 【宋田况撰】 涑水记闻十六卷 【宋司马光撰】 澠水燕谈录十卷 【宋王辟之撰】 嘉佑杂志一卷 【宋江休复撰】 东斋记事六卷 【宋范镇撰】 青箱杂记十卷 【宋吴处厚撰】 钱氏私志一卷 【宋钱佃撰】 龙川略志十卷别志八卷 【宋苏辙撰】 后山谈丛四卷 【宋陈师道撰】 孙公谈圃三卷 【宋刘延世编】 孔氏谈苑四卷 【宋孔平仲撰】 画墁录一卷 【宋张舜民撰】 甲申杂记一卷闻见近录一卷随手杂录一卷 【宋王巩撰】 湘山野录三卷续录一卷 【宋僧文莹撰】 玉壶野史十卷 【宋僧文莹撰】 铁围山丛谈六卷 【宋蔡绦撰】 春渚记闻十卷 【宋何薳撰】 国老谈苑二卷 【宋王琪撰】 道山清话一卷 【不着撰人名氏】 墨客挥犀十卷 【宋彭乘撰】 唐语林八卷 【宋王谠撰】 枫窗小牋二卷 【不着撰人名氏】 侯鯖录八卷 【宋赵令畤撰】 萍洲可谈三卷 【宋朱彧撰】 泊宅编三卷 【宋方勺撰】 珍席放谈二卷 【宋高晦叟撰】 高斋漫录一卷 【宋曾慥撰】 默记三卷 【宋王铨撰】 挥麈前录四卷后录十一卷三录三卷余话二卷 【宋王明清撰】 玉照新志六卷 【宋王明清撰】 投辖录一卷 【宋王明清撰】 张氏可书一卷 【不着撰人名氏】 闻见前录二十卷 【宋邵伯温撰】 闻见后录三十卷 【宋邵博撰】 清波杂志十二卷别志二卷 【宋周辉撰】 鸡肋编二卷 【宋庄季裕撰】 中吴纪闻六卷 【宋龚明之撰】 北窗炙輠录一卷 【宋施德操撰】 南窗纪谈一卷 【不着撰人名氏】 过庭录一卷 【宋范公偁撰】 步里客谈二卷 【宋陈长方撰】 独醒杂志十卷 【宋曾敏行撰】 耆旧续闻十卷 【宋陈鹄撰】 四朝闻见录五卷 【宋叶绍翁撰】 癸辛杂识前集一卷后集一卷续集一卷别集二卷 【宋周密撰】 随隐漫录五卷 【宋陈世崇撰】 归潜志十四卷 【元刘祁撰】 吴中旧事一卷 【元陆友仁撰】 山房随笔一卷 【正蒋子正撰】 山居新话四卷 【元杨瑀撰】 遂昌杂录一卷 【元郑元佑撰】 辍耕录三十卷 【明陶宗仪撰】 水东日记三十八卷 【明叶盛撰】 菽园杂记十五卷 【明陆容撰】 先进遗风二卷 【明耿定向撰】

】 觚不觚录一卷 【明王世贞撰】 何氏语

林三十卷 【明何良俊撰】

以上见文渊阁著录

昨梦录一卷 【宋康与之撰】 谈薮一卷 【宋庞元英撰】 月河所闻集一卷

【宋莫君陈撰】 养疴漫笔一卷 【宋赵溍撰】

】 清夜录一卷 【宋俞文豹撰】 翠屏笔谈一卷 【旧本题王应龙撰】 朝野遗记一卷 【旧本题宋无名氏撰】 三朝野史一卷

【旧本题宋无名氏撰】 幽居录三卷 【不着撰人名氏】 至正直记四卷 【一曰静斋类稟元孔齐撰】 冀越集记二卷 【元熊

太古撰】 农田余话二卷 【旧题明长谷真逸撰不著名氏】 东园客谈一卷 【明孙道易撰】 东园友闻一卷 【不着撰人名氏】

可斋杂记一卷 【明彭时撰】 方洲杂言一卷 【明张鼐撰】 蹇斋琐缀录八卷 【明尹直撰】 双槐岁钞十卷 【明黄瑜撰】

石田杂记一卷 【明沈周撰】 双溪杂记无卷数 【明王琼撰】 立斋闲录四卷 【明宋端仪撰】 寓圃杂记十卷 【明王琦撰】

复斋日记二卷 【明许浩撰】 野记四卷 【明祝允明撰】 前闻记一卷 【明祝允明撰】 明记略四卷 【明皇甫录撰】 近峰

闻略八卷 【明皇甫录撰】 下埤纪谈二卷 【明皇甫录撰】 延休堂漫录三十六卷 【明罗凤撰】 翦胜野闻一卷 【不着撰人

名氏】 玉堂漫笔三卷 【明陆深撰】 金台纪闻二卷 【明陆深撰】 春风堂随笔一卷 【明陆深撰】 知命录一卷 【明陆深

撰】 溪山余话一卷 【明陆深撰】 愿丰堂漫书一卷 【明陆深撰】 见闻考随录无卷数 【明韩邦奇撰】 碧里杂存一卷 【

明董谷撰】 苹野纂闻一卷 【明伍余福撰】 贤识录一卷 【明陆鉞撰】 病逸漫记无卷数 【明陆鉞撰】 孤树哀谈十卷 【

明李默撰】 吏隐录二卷 【明沈津撰】 北窗琐语无卷数 【明余永麟撰】 螭头密语一卷 【明杨仪撰】 病榻遗言二卷 【

明高拱撰】 名世类苑四十六卷 【明凌迪知撰】 迩训二十卷 【明方学渐撰】 西吴里语四卷 【明宋雷撰】 典故辑遗二十

卷 【不着撰人名氏】 吴社编一卷 【明王穉登撰】 笔记一卷 【明连铤撰】 世说新语补四卷 【明何良俊撰】 樊川丛话

八卷 【明姜兆熊撰】 西台漫记六卷 【明蒋以化撰】 见闻杂记四卷 【明李乐撰】 林居漫录前集六卷畸集五卷 【明伍袁

萃撰】 閤然堂类纂六卷 【明潘士藻撰】 西山日记二卷 【明丁元荐撰】 玉堂

丛说八卷 【明焦竑撰】 贻清堂日钞不分卷

【明钱养廉撰】 汝南遗事二卷 【明李本固撰】 客座赘语十卷 【明顾起元撰】 翦桐载笔一卷 【明王象晋撰】 金华杂识

四卷 【明杨德周撰】 峤南琐记二卷 【不着撰人名氏】 琅环史唾十六卷 【明徐象梅撰】 避暑漫笔二卷 【明谈修撰】

明世说新语八卷 【明李绍文撰】 管窥小识四卷 【不着撰人名氏】 见闻录八卷 【明陈继儒撰】 太平清话四卷 【明陈继

儒撰】 西峰淡话四卷 【明茅元仪撰】 癸未夏钞 【明释静福撰】 明遗事三卷 【不着撰人名氏】 云闲杂记三卷 【不着

撰人名氏】 兰畹居清言十卷 【明郑仲夔撰】

以上见四库全书存目

琐语

清异录二卷 【宋陶谷撰】 续博物志十卷 【旧本题晋李石撰今考定为宋时人撰】

以上见文渊阁著录

牡丹荣辱志一卷 【旧本题宋邱璪撰】 东坡问荅录一卷 【旧本题宋苏轼撰】 渔樵闲话二卷 【旧本题宋苏轼撰】 谈谐

一卷 【宋陈日华撰】 谐史一卷 【宋沈俶撰】 古今谚一卷 【宋周守忠撰】

滑稽小传二卷 【不着撰人名氏】 笑苑千金

一卷 【旧本题张致和撰】 醉翁滑稽风月笑谈一卷 【不着撰人名氏】 文章善戏一卷 【元郑持正撰】 拊掌录一卷 【宋元

怀撰】 古杭杂记诗集四卷 【不着撰人名氏】 玉堂诗话一卷 【不着撰人名氏】 埤雅广要二十卷 【明牛衷撰】 十处士传

一卷 【明支立撰】 蓬窗类记五卷 【明黄暉撰】 博物志补一卷 【明游潜撰】 古今文房登庸录一卷 【明黄谦撰】 香奁

四友传二卷 【明陆奎章撰】 居学余情三卷 【明陈中州撰】 古今谚二卷古今风谣二卷 【明杨慎撰】 梨洲野乘无卷数 【

明舒纓撰】 六语三十卷 【明郭子章编】 广滑稽三十六卷 【明陈禹谟撰】 谐史集四卷 【明朱维藩编】 广谐史十卷 【

明陈邦俊撰】 小窗自纪四卷艳纪十四卷清纪五卷别纪四卷 【明吴经先撰】 青泥莲花记十三卷 【明梅鼎祚撰】

以上见四库全书存目

小说类凡一百七十部

△兵家

武经总要四十卷【宋曾公亮等奉敕撰】 虎铃经二十卷【宋许洞撰】 武编十卷【明唐顺之编】 阵记四卷【明何良臣撰】 江南经略八卷【明郑若曾撰】 练兵实记九卷杂集六卷【明戚继光撰】 纪效新书十八卷【明戚继光撰】 三略直解三卷【明刘寅撰】

以上见文渊阁著录

将鉴论断十卷【旧本题宋戴少望撰】 江东十鉴一卷【宋李舜臣撰】 美芹十论一卷【旧本题宋辛弃疾撰】 江东十考一卷【宋李道传撰】 南北十论一卷【旧本题许学士撰不着其名】 百将传一百卷【宋张预撰】 握机经三卷握机纬十五卷【明曹允儒撰】 八阵合变图说无卷数【明龙正撰】 北边事迹一卷【明王琼撰】 西番事迹一卷【明王琼撰】 海寇议一卷【明万表撰】 塞语一卷【明尹耕撰】 备倭记二卷【明卜大同撰】 两浙兵制四卷【明侯继国撰】 将将纪二十四卷【明李材撰】 运筹纲目八卷决胜纲目十卷【明叶梦熊撰】 军权四卷【明何良臣撰】 倭情考略一卷【明郭光复撰】 长子心铃无卷数【旧本题明戚继光撰】 莅戎要略一卷【明戚继光撰】 武备新书十四卷【明戚继光撰】 古今将略四卷【明冯孜撰】 岭西水陆兵纪二卷【明盛万年撰】 剑草一卷【明熊明遇撰】 岭南客对一卷【旧题粤西舜山子撰】 左氏兵略三十二卷【明陈禹谟撰】 类辑练兵诸书十八卷【明董承诏编】 火器图一卷【明顾斌撰】 兵机类纂三十二卷【明张龙翼撰】 广名将谱十七卷【不着撰人名氏】 左略一卷【明曾益撰】 谈兵髓七卷【旧题浙西器器生撰不著名氏】 残本 金汤十二筹八卷【明李盘撰】 左氏兵法测要二十卷【明宋征璧撰】 孙子参同五卷【不着编辑者名氏】

以上见四库全书存目

兵家类凡四十三部

钦定续通志卷一百六十

●钦定续通志卷一百六十一 艺文略六

艺文略【六】

天文类第七【天文 历数 算术】

五行类第八【占卜 阴阳 命书相书 宅书葬书】

艺术类第九【书画 技艺】

医方类第十 【脉经 医书 针灸 本草 炮炙方书 伤寒 脚气 杂病
疮肿妇人 小儿食经】

类书类第十一

○天文类第七

天文

历数

算术

△天文

新仪象法要三卷 【宋苏颂撰】 六经天文编二卷 【宋王应麟撰】 原本革
象新书五卷 【元赵友钦撰】 重修革象新书二
卷 【明王祎删定本】 七政推步七卷 【明贝琳辑】 测量法义一卷测量异同一
卷勾股义一卷 【明徐光启撰】 浑盖通宪图说
二卷 【明李之藻撰】 圜容较义一卷 【明李之藻撰】 乾坤体义二卷 【明西洋
人利玛窦撰】 表度说一卷 【明西洋人熊三
拔撰】 简平仪说一卷 【明西洋人熊三拔撰】 天问略一卷 【明西洋人阳玛诺
撰】

以上见文渊阁著录

星象考一卷 【旧本题宋邹淮撰】 天文主管一卷 【金武亢撰】 戎事类占
二十一卷 【元李克家撰】 天文精义赋四卷
【旧本题岳熙载撰不着时代】 清类天文分野之书二十四卷 【明刘基撰】 白猿
经风雨占候说一卷 【旧本题明刘基撰】 天
元玉历祥异赋无卷数 【明洪熙中官撰本】 天心复要三卷 【明鲍泰撰】 太阳
太阴通轨无卷数 【明戈永龄撰】 象纬汇编二
卷 【明韩万锤撰】 纬谭一卷 【明魏浚撰】 宣夜经无卷数 【明柯仲炯撰】
九圜史图一卷 【明赵宦光撰】 盖载图宪一
卷 【明许胥臣撰】 ■〈石肃〉庵槩一卷 【明陈荃谟撰】 天官翼无卷数 【明
董说撰】 天文秘略无卷数 【本题新安胡氏
撰不著名】 参筹秘书十卷 【明汪三益撰】 星占三卷 【明刘孔昭撰】 天文书
无卷数 【明柯洽撰】 象纬全书无卷数 【
不着撰人名氏】 神枢鬼藏经二卷 【不着撰人名氏】 灵台秘苑一百二十卷 【
不着撰人名氏】 注解祥异赋七卷 【不着撰人
名氏】 天汉全占二卷 【不着撰人名氏】 海上占候一卷 【不着撰人名氏】 军
占杂事一卷 【不着撰人名氏】 天文诸占一
卷 【不着撰人名氏】 占候书十卷 【不着撰人名氏】

以上见四库全书存目

△历数

圣寿万年历八卷附律历融通四卷 【明朱载堉撰】 古今律历考七十二卷 【明邢云路撰】 历体略三卷 【明王英明撰】

以上见文渊阁著录

官历刻漏图二卷 【宋王普撰】 戊申立春考证一卷 【明邢云路撰】 星历释义二卷 【明林祖述撰】 折衷历法十三卷 【明朱仲福撰】

以上见四库全书存目

△算术

数学九章十八卷 【宋秦九韶撰】 益古演段二卷 【元李冶撰】 测圆海镜十二卷 【元李冶撰】 测圆海镜分类释术十卷 【明顾应祥撰】 弧矢算术一卷 【明顾应祥撰】 同文算指前编二卷通编八卷 【明李之藻演西洋人利玛窦所译之书】 新法算书一百卷 【明徐光启撰】 几何原本六卷 【明西洋人欧几里得撰利玛窦口译徐光启肇受之书】

以上见文渊阁著录

算法统宗十七卷 【明程大位撰】

以上见四库全书存目

天文类凡五十七部

○五行类第八

（臣）等谨案郑志五行类三十门若易占筮占等门为占卜书遁甲太乙等门为阴阳书元辰三命等门为推命书相法相笏等门为谈相书宅经为相宅书葬经为相墓书今略依编次其未备者缺之

占卜

阴阳

命书相书

宅书葬书

△占卜

六壬大全十二卷 【不着撰人名氏】

以上见文渊阁著录

六壬毕法赋一卷 【宋凌福之撰】 皇极大定动数得一论一卷 【元吴正撰】 易尚占三卷 【不着撰人名氏】 玉灵聚义五卷 【元陆森撰】 六壬五变中黄经二卷 【不着撰人名氏】 六壬行军指南无卷

数【不着撰人名氏】 六壬兵占二卷【不着撰人名氏】 皇极数三卷【不着撰人名氏】 皇极生成鬼经数一卷【不着撰人名氏】 九天玄妙课一卷【不着撰人名氏】 易占经纬四卷【明韩邦奇撰】 筮易一卷【明卢翰撰】 周易悬镜十卷【明喻有功撰】 大易变通六卷【明乔中和撰】 易数总断无卷数【旧题程汝文撰不着时代】

以上见四库全书存目

△阴阳

遁甲演义二卷【明程道生编】 禽星易见一卷【明池本理撰】

以上见文渊阁著录

丙丁龟鉴五卷续录二卷【宋柴望撰】 黄帝奇门遁甲图一卷【不着撰人名氏】 太乙统宗宝鉴二十卷【旧本题元晓山老人撰不著名氏】 太乙成书八卷【不着撰人名氏】 演禽总法无卷数【不着撰人名氏】 黄帝演禽七元三传心法一卷【不着撰人名氏】 七元六甲天书一卷【不着撰人名氏】 奇门要略一卷【不着撰人名氏】 奇门遁甲赋一卷【不着撰人名氏】 太乙遁甲专征赋一卷【不着撰人名氏】 佐元直指图解十卷【旧本题明刘基撰】 肘后神经大全三卷【旧本题涵虚子臞仙撰不著名氏】 遁甲吉方直指一卷【明王巽撰】 类编历法通书大全三十卷【不着撰人名氏】 原本五行类事占征验九卷【旧本题明李淑通撰】 五行类事占征验六卷【不着撰人名氏】 通书快捷方式无卷数【明楼楷撰】 选择集要六卷【明黄一凤撰】 五行类应九卷【明钱春撰】 大统皇历经世三卷【明胡献忠撰】 奇门说要一卷【明郭仰廉撰】 将门秘法阴符经三卷【不着撰人名氏】 纪梦要览三卷【明童轩撰】 梦占类考十二卷【明张凤翼撰】 梦林元解三十四卷【明陈士元撰】 龟鉴易影皇极数一卷【旧题邵居敬撰不着时代】

以上见四库全书存目

△命书相书

三命指迷赋注一卷【旧本题宋岳珂补注】 徐氏珞珞子赋注二卷【宋徐子平撰】 珞珞子三命消息赋注二卷【宋释昙莹撰】 星命总括三卷【辽耶律纯撰】 人伦大统赋一卷【金张行简撰】 演禽通纂二卷【不着撰人名氏】 星学大成十卷【明万民英撰】 三命通会十二卷【原题育吾山人不着撰人名氏】 星命溯源五

卷【不着编辑名氏】太清神鉴六卷【不着撰人名氏】

以上见文渊阁著录

河洛真数二卷【旧本题宋陈搏撰】康节内秘影一卷【旧本题宋邵子撰】邵子加一倍法一卷【不着撰人名氏】子平三命渊源注一卷【元李钦夫撰】九宫八卦遁甲秘书二卷【不着撰人名氏】成数大定一卷【不着撰人名氏】寸金易鉴无卷数【不着撰人名氏】演禽图诀无卷数【旧本题明刘基撰】古今识鉴四卷【明袁忠彻编】范围数无卷数【明赵迎撰】百中经无卷数【不着撰人名氏】吕氏摘金歌无卷数【不着撰人名氏】五曜源流二卷【不着撰人名氏】五星考三卷【不着撰人名氏】星平会海十卷【不着撰人名氏】五星要录无卷数【不着撰人名氏】

以上见四库全书存目

△宅书葬书

催官篇二卷【宋赖文俊撰】发微论一卷【宋蔡元定撰】

以上见文渊阁著录

天玉经外传一卷四十八局图一卷【旧本题宋吴克诚撰】九星穴法四卷【旧本题宋廖瑀撰】玉尺经四卷【旧本题元刘秉忠撰】披肝露胆经一卷【旧本题明刘基撰】地理大全一集三十卷二集二十五卷【明李国本撰】地理总括三卷【明罗珏撰】罗经顶门针二卷【明徐之镆撰】堪輿类纂人天共宝十二卷【明黄慎撰】罗经消纳正宗二卷【明沈升撰】寸金穴法二卷【不着撰人名氏】

以上见四库全书存目

五行类凡八十二部

○艺术类第九

（臣）等谨案郑志艺术类其目十有七今酌为删并而以书画技艺分目遵四库全书例也

书画

技艺

△书画

宣和画谱二十卷【不着撰人名氏】五代名画补遗一卷【宋刘道醇撰】林泉高致集一卷【宋郭思撰】德隅斋画品一

卷【宋李廌撰】画史一卷【宋米芾撰】山水纯全集一卷【宋韩拙撰】广川画跋六卷【宋董通撰】画继十卷【宋邓椿撰】竹谱十卷【元李衍撰】画鉴一卷【宋汤垕撰】图绘宝鉴五卷续编一卷【元夏文彦撰明韩昂续】珊瑚木难八卷【明朱存理撰】铁网珊瑚十六卷【明朱存理撰】寓意编一卷【明都穆撰】书画跋跋三卷续三卷【明孙矿撰】绘事微言二卷【明唐志契撰】画史会要五卷【明朱谋壘撰】郁氏书画题跋记十二卷续题跋记十二卷【明郁逢庆撰】清河书画舫十二卷【明张丑撰】真迹目录一卷二集一卷三集一卷【明张丑撰】法书名画见闻表一卷【明张丑撰】南阳法书名画表二卷【明张丑撰】清河书画表一卷【明张丑撰】珊瑚网四十八卷【明汪砢玉撰】

以上见文渊阁著录

宣和论画杂评一卷【旧本题宋徽宗御制】华光梅谱一卷【宋释仲仁撰】画山水诀一卷【旧本题宋李澄叟撰】山水诀一卷【旧本题唐李成撰按成宋人】竹谱详录一卷【旧本题元李衍撰】画纪补遗二卷元画纪一卷【不着撰人名氏】明书画史三卷元朝遗佚附录一卷【明刘璋撰】平泉题跋二卷【明陆树声撰】画苑十卷画苑补益四卷【明王世贞编辑画苑补益为詹景凤编】中麓画品一卷【明李开先撰】吴郡丹青志一卷【明王穉登撰】绘林题识一卷【明汪显节撰】海内名家工画能事二卷【明张凤翼撰】画禅一卷【旧本题明释莲儒撰】湖州竹派一卷【旧本题明释莲儒撰】竹懒画媵一卷续画媵一卷【明李日华撰】墨君题语二卷【明项圣谟编】画说一卷【明莫是龙撰】宝绘录二十卷【明张泰阶撰】书画史一卷【明陈继儒撰】唐诗画谱五卷【明黄凤池撰】画志一卷【明沈与文撰】画谱六卷【不着撰人名氏】

以上见四库全书存目

△技艺

元元棋经一卷【宋晏天章撰】棋诀一卷【宋刘仲甫撰】学古编一卷【元吾邱衍撰】

以上见文渊阁著录

射书四卷【明顾煜撰】射义新书二卷【明程道生撰】适情录二十卷【明林应龙编】奕史一卷【明王穉登撰】

奕律一卷【明王思任撰】 秋仙遗谱十二卷【不着撰人名氏】 壶谱一卷【明李孝元撰】 壶史三卷【明郭元鸿撰】 丸经二卷【不着撰人名氏】 双陆谱一卷【旧本题丫角道人撰不著名氏】 古今印史一卷【明徐官撰】 印藪六卷【明顾从德撰】 印史五卷【明何通撰】 宣和集古印史八卷【明来行学刊】

以上见四库全书存目

艺术类凡六十四部

○医方类第十

（臣）等谨案郑志医方类分上下帙今以脉经医书之总论证治者为上帙而针灸本草诸目统归下帙如胡方岭南方等之未备者缺之而五藏等门即散见焉

医方上

医方下

△医方上

脉经

医书

脉经

素问元机原病式一卷【金刘完素撰】 金匱钩元三卷【元朱震亨撰明戴原礼补】

以上见文渊阁著录

素问运气图括定局立成一卷【明熊宗立撰】 素问钞补正十二卷【明丁璫撰】 续素问钞九卷【明汪机撰】 素问注证发微九卷【明马蒔撰】 图注难经八卷【明张世贤撰】 图注脉诀四卷附方一卷【明张世贤撰】

以上见四库全书存目

医书

圣济总录纂要二十六卷【宋政和中奉敕编】 寿亲养老新书四卷【前一卷宋陈直撰后三卷元邹铉续增】 卫济宝书二卷

【旧本题东轩居士撰不著名氏】 医说十卷【宋张杲撰】 太医局程文九卷【宋时考试医学之制】 仁斋直指二十六卷附伤

寒类书活人总括七卷【宋杨上瀛撰】 宣明方论十五卷【金刘完素撰】 病机气宜保命集三卷【金张元素撰】 儒门事亲十

五卷【金张从正撰】 内外伤辨惑论三卷【金李杲撰】 脾胃论三卷【金李杲论】 兰室秘藏六卷【金李杲撰】 医垒元

戒十二卷【元王好古撰】 此事难知二卷【元王好古撰】 格致余论一卷【元朱震亨撰】 局方发挥一卷【元朱震亨撰】
脉诀刊误二卷附录二卷【元载启宗撰】 医经■〈彳 苴〉洄集一卷【元王履撰】 难经本义二卷【元滑寿撰】 推求师意二卷【明戴原礼撰】 玉机微义五十卷【明徐用诚撰】 仁端录十六卷【明徐谦撰】 薛氏医案七十八卷【明薛己撰】 石山医案三卷【明陈桷撰】 名医类案十二卷【明江瓘撰】 赤水元珠三十卷【明孙一奎撰】 医旨绪余二卷【明孙一奎撰】 奇经八脉考一卷【明李时珍撰】 濒湖脉学一卷【明李时珍撰】 证治准绳一百二十卷【明王肯堂撰】 先醒斋广笔记四卷【明缪希雍撰】 类经三十三卷【明张介宾撰】 景岳全书六十四卷【明张介宾撰】

以上见文渊阁著录

大本琼瑶发明神书二卷【旧本题刘真人撰不着时代人名】 崔真人脉诀一卷【旧本题紫虚真人撰宋道士崔嘉彦也】 东垣十书二十卷【不着编辑名氏】 泰定养生主论十六卷【旧本题元王中阳撰】 安老怀幼书四卷【明刘宇编】 医学管见一卷【明何塘撰】 神应经一卷【明陈会撰】 医开七卷【明王世相撰】 医史十卷【明李濂撰】 医学正传八卷【明虞抟撰】 卫生集四卷【明周宏撰】 心印绀珠经二卷【明李汤卿撰】 运气易览三卷【明汪机撰】 养生类要二卷【明吴正伦撰】 志斋医论二卷【明高士撰】 丹溪心法附余二十四卷【明方广撰】 上池杂说一卷【明冯时可撰】 医学六要十九卷【明张三锡撰】 删补颐生微论四卷【明李中梓撰】 普门医品四十八卷附医品补遗四卷【明王化贞撰】 孙氏医案五卷【明孙泰来孙明来同编】 河闲六书二十七卷【明吴勉学编】 折肱漫录六卷【明黄承昊撰】 运气定论一卷【明董说撰】 简明医彀八卷【明孙志宏撰】 金鑑秘论十二卷【旧本题李药师撰不详时代】 扁鹊指归图一卷【不着撰人名氏】

以上见四库全书存目

△医方下

针灸

本章

炮灸

方书

伤寒

脚气

杂病

疮肿

妇人

小儿

食经

针灸

针灸资生经七卷 【旧本题叶氏刊不着撰人名氏】 扁鹊神应针灸玉龙经一卷 【元王国端撰】 针灸问对三卷 【明王机撰】

以上见文渊阁著录

针灸大全十卷 【明阳继洲编】 针灸聚英四卷 【明高武撰】 针灸节要三卷 【明高武撰】

以上见四库全书存目

本章

汤液本草三卷 【元王好古撰】 本草纲目五十五卷 【明李时珍撰】 神农本草经疏三十卷 【明缪希雍撰】 本草乘雅半偈十卷 【明卢之颐撰】

以上见文渊阁著录

珍珠囊指掌补遗药性赋四卷 【旧本题金李杲撰】 药镜四卷 【明蒋仪撰】

以上见四库全书存目

炮灸

雷公炮制药性解六卷 【旧本题明李中梓撰】

以上见四库全书存目

方书

旅舍备要方一卷 【宋董汲撰】 全生指迷方四卷 【宋王颙撰】 类证普济本事方十卷 【宋许叔微撰】 太平惠民和剂局方十卷附指南总论三卷 【宋陈师文等奉敕编】 卫生十全方三卷奇疾方一卷 【宋夏德撰】 传信适用方二卷 【不着撰人名氏】 三因极一病症方论十八卷 【宋陈言撰】 济生方八卷 【宋严用和撰】 急救仙方六卷 【不着撰人名氏】 瑞竹堂经验方五卷 【元沙图穆苏撰】 世医得效方二十卷 【元危亦林撰】 普济方一百六

十八卷 【明周王櫛撰】

以上见文渊阁著录

如宜方二卷 【元艾元英撰】 类编南北经验医方大成十卷 【旧本题元孙允贤撰】 医方选要十卷 【明周文采编】 万氏家钞济世良方六卷 【明万表编】 摄生众妙方十一卷 【明张时彻编】 急救良方二卷 【明张时彻编】 灵秘十八方加减一卷 【旧本题明胡嗣廉编】 经验良方十一卷 【明陈仕贤撰】 避水集验要方四卷 【明董炳撰】 鲁府秘方四卷 【明刘应泰编】

以上见四库全书存目

伤寒

伤寒微旨二卷 【宋韩祗和撰】 伤寒直格方三卷 伤寒标本心法类萃二卷 【金刘完素撰】 伤寒论注十卷 明理论三卷 论方一卷 【金成无己撰】 伤寒论条辨八卷 附本草钞一卷 或问一卷 痘书一卷 【明方有执撰】

以上见文渊阁著录

伤寒心镜一卷 【一名张子和心镜别集旧本题常德编不详时代】 伤寒心要一卷 【旧本题榴洪编不详时代】 伤寒医鉴一卷 【元马宗素撰】 伤寒治例一卷 【明刘纯撰】 伤寒指掌十四卷 【明皇甫中撰】

以上见四库全书存目

脚气

脚气治法总要二卷 【宋董汲撰】

以上见文渊阁著录

杂病

瘟疫论二卷 补遗一卷 【明吴有性撰】 疟症论疏一卷 【明卢之颐撰】

以上见文渊阁著录

流注指微赋一卷 【元何若愚撰】 杂病治例一卷 【明刘纯撰】 痘症理辨一卷 附方一卷 【明汪机撰】

以上见四库全书存目

疮肿

集验背疽方一卷 【宋李迅撰】 外科精义二卷 【元齐德之撰】 外科理例七卷 附方一卷 【明汪机撰】

以上见文渊阁著录

疮疡经验全书十三卷 【旧本题宋窦汉卿撰】

以上见四库全书存目

妇人

妇人大全良方二十四卷 【宋陈自明撰】 产宝诸方一卷 【不着撰人名氏】

孕育宝庆方二卷 【不着撰人名氏】

以上见文渊阁著录

小儿

小儿卫生总微论方二十卷 【不着撰人名氏】 颅顛经二卷 【不着撰人名氏】

】

以上见文渊阁著录

保婴撮要八卷 【明薛铠撰】 袖珍小儿方十卷 【明徐用宣撰】

以上见四库全书存目

食经

（臣）等谨案郑志医方之后附以食经盖即周礼医师之职首列食医之意也故依例编次

糖霜谱一卷 【宋王灼撰】

以上见文渊阁著录

饮膳正要三卷 【元和斯辉撰】 易牙遗意二卷 【元韩奕撰】 饮食须知八卷 【元贾铭撰】 蔬食谱一卷 【明汪士贤编

】 饌史一卷 【不着撰人名氏】 天厨聚珍妙饌集一卷 【不着撰人名氏】

以上见四库全书存目

医方类凡一百三十六部

○类书类第十一

（臣）等谨案郑志类书类分上下帙唐以前者为上帙宋为下帙今以宋元明诸类书统为一帙云

实宾录十四卷 【宋马永易撰】 海录碎事二十二卷 【宋叶廷珪撰】 古今姓氏书辨证四十卷 【宋邓名世撰】 帝王经世

图谱十六卷 【宋唐仲友撰】 职官分纪五十卷 【宋孙逢吉撰】 历代制度详说十二卷 【宋吕祖谦撰】 事物纪原十卷 【不

着撰人名氏】 永嘉八面锋十三卷 【不着撰人名氏】 锦绣万花谷前集四十卷后集四十卷续集四十卷 【不着撰人名氏】 事文

类聚前集六十卷后集五十卷续集二十八卷别集三十二卷新集三十六卷外集十五卷遗集十五卷 【前集至别集宋祝穆撰新集外集

元富大用撰遗集元祝渊撰】 纪纂渊海一百卷 【宋潘自牧撰】 羣书会元截江网

三十五卷 【不着撰人名氏】 鸡肋一卷 【宋赵崇绚撰】 全芳备祖前集二十七卷后集三十一卷 【宋陈景沂撰】 山堂考索二百十二卷 【宋章如愚撰】 古今全璧事类备要前集六十九卷后集八十一卷续集五十六卷别集九十四卷外集六十六卷 【宋谢维新编】 源流至论前集十卷后集十卷续集十卷别集十卷 【前集至续集宋林駟撰别集黄履翁撰】 白孔六帖一百卷 【宋孔传增唐白居易之书】 玉海二百卷附辞学指南四卷 【宋王应麟撰】 小学紺珠十卷 【宋王应麟撰】 姓氏急就篇二卷 【宋王应麟撰】 六帖补二十卷 【宋杨伯崑撰】 韵府羣玉二十卷 【宋阴时夫撰】 翰苑新书前集七十卷后集上二十六卷后集下六卷别集十二卷续集四十二卷 【不着撰人名氏】 纯正蒙求三卷 【元胡炳文撰】 排韵增广事类氏族大全十卷 【不着撰人名氏】 荆川稗编一百二十卷 【明唐顺之撰】 喻林一百二十卷 【明徐元太撰】 经济类编一百卷 【明冯琦撰】 说略三十卷 【明顾起元撰】 天中记六十卷 【明陈耀文撰】 图书编一百二十七卷 【明章潢撰】 骈志二十卷 【明陈禹谟撰】 山堂肆考二百二十八卷补遗十二卷 【明彭大翼撰】 古俚府十二卷 【明王志庆撰】 广博物志五十卷 【明董斯张撰】 诸史同异录六十八卷 【明李清撰】

以上见文渊阁著录

春秋经传类对赋一卷 【宋徐晋卿撰】 文选类林十八卷 【旧本题宋刘攽撰】 记室新书七十卷 【旧本题宋方龟年撰】 诗律武库前后集三十卷 【旧本题宋吕祖谦编】 璧水羣英待问会元选要八十二卷 【宋刘达可编】 翰墨大全一百二十五卷 【宋刘应李撰】 两汉蒙求十一卷 【宋刘班撰】 野服考一卷 【宋方凤撰】 羣书类句二十七卷 【宋詹光大撰】 古今诗材八卷 【宋萧元登撰】 十二先生诗宗集韵二十卷 【宋裴良甫编】 训女蒙求一卷 【宋徐伯益撰】 经学队仗三卷 【旧本题朱景元撰】 八诗六帖二十九卷 【旧本题王状元撰不着其名】 诸史偶论十卷 【旧本题计宗道校】 裁纂类函一百六十卷 【不着撰人名氏】 万卷菁华前集八十卷后集八十卷续集三十四卷 【不着撰人名氏】 三场通用引易活法九卷 【不着撰人名氏】 聚课琼珠诗对九卷 【不着撰人名氏】 对属发蒙二卷 【不着撰人名氏】 赋学剖蒙二卷 【不着撰人名氏】 敏求机要十六卷

【旧本题刘实撰不详时代】 古赋题十卷后集五卷 【旧本题天历己巳刘氏翠岩识不着其名】 类编古今事林羣书一览十卷 【旧本题宋祝穆撰】 增修诗学集成押韵渊海二十卷 【元严毅撰】 羣书钩元十二卷 【元高耻传撰】 声律发蒙五卷 【元祝明撰】 别本声律发蒙六卷 【元祝明撰】 原始秘书十卷 【明宁王权撰】 羣书拾唾十二卷 【明张九韶撰】 羣书备数十二卷 【明张九韶撰】 羣书纂类十二卷 【明袁均哲撰】 韵府续编四十卷 【旧本题元包瑜撰】 典籍便览八卷 【明范泓撰】 羣书集事渊海四十七卷 【不着撰人名氏】 别本实宾录一卷 【不着编辑名氏】 涉览属比四卷 【明朱文撰】 谢华启秀八卷 【明杨慎撰】 均藻四卷 【明杨慎撰】 哲匠金桴五卷 【明杨慎撰】 可知编八卷 【旧本题明杨慎撰】 王制考四卷 【明李黼撰】 经世格要二十八卷 【明邹泉撰】 物原一卷 【明罗颀撰】 五车霏玉三十四卷 【明吴昭明撰】 修辞指南二十卷 【明浦南金编】 左粹类纂十二卷 【明施仁撰】 骈语雕龙四卷 【明游日章撰】 诗学事类二十四卷 【旧本题明李攀龙撰】 韵学事类十二卷 【旧本题明李攀龙撰】 韵学渊海十二卷 【明李攀龙撰唐顺之校】 名物类考四卷 【明耿随朝撰】 异物汇苑五卷 【旧本题明王世贞撰】 汇苑详注三十六卷 【一名类苑详注明王世贞撰】 古今类腴十八卷 【不着撰人名氏】 强识略四十卷 【明吴梦材编】 考古辞宗二十卷 【明况叔祺编】 杂俎十卷 【明刘凤撰】 国宪家猷五十六卷 【明王可大撰】 文选锦字二十一卷 【明凌迪知撰】 羣书纂粹八卷 【旧本题明徐时行编辑】 续文献通考二百五十四卷 【明王圻撰】 三才图会一百六卷 【明王圻撰】 正音攬言四卷 【明王荔撰】 亘史钞无卷数 【明潘之恒撰】 楮记室十五卷 【明潘坝撰】 注释启蒙对偶续编四卷 【明孟绂撰】 三通政典无卷数 【不着撰人名氏】 类隼三十卷 【明郑若庸撰】 含元斋别编十卷 【明赵枢生撰】 古隼考略六卷 【明顾充撰】 三才考略十二卷 【明庄元臣撰】 翰林诸书选粹四卷 【明张元忭撰】 黔类十八卷 【明郭子章撰】 祝氏事偶十五卷 【明祝彦撰】 广修辞指南二十卷 【明陈与郊撰】 缥緜对类二十卷 【旧本题明屠隆撰】 何氏类镕三十五卷 【明何三畏撰】 事词类奇三十卷 【明徐常吉撰】 六经类聚四卷 【明徐常吉编陶元良续增

】春秋内外传类选八卷【旧本题明樊王家撰】异物汇苑十八卷【明闵文振撰】广蒙求三十七卷【明姚光祚撰】秘笈新书十三卷别集三卷【明吴道南编】事物绀珠四十一卷【明黄一正编】玉海纂二十二卷【明刘鸿训编】时物典汇二卷【旧本题明李日华撰】对制谈经十五卷【明杜涇编】诸书考录四卷【明徐鉴编】诸经纪数十四卷【明徐鉴撰】八经类集二卷【明许獬撰】藻轩闲录补续词丛类采八卷【明林灏撰】舆识随笔一卷【明杨德周撰】事言要元三十二卷【明陈懋学撰】狮山掌录二十八卷【明吴之俊撰】诸经纂注三十四卷【明杨联芳编】骈字凭霄二十四卷【明徐应秋撰】经济言十二卷【明陈子壮编】事文玉屑二十四卷【明杨淙撰】朱翼无卷数【明江旭奇编】史说萱苏一卷【明黄以升撰】唐类函二百卷【明俞安期编】诗隽类函一百五十卷【明俞安期编】类苑琼英十卷【明俞安期编】刘氏类山十卷【明刘嗣昌撰】卓氏藻林八卷【明卓明卿撰】史学璧珠十八卷【明钱应充撰】事典考略六卷【明徐袍编】故事选要十四卷【明王思义撰】刘氏鸿书一百八卷【明刘仲达编】儒函数类六十二卷【明汪宗姬撰】蟬史十一卷【明穆希文撰】五侯鯖十二卷【明彭俨撰】文竽汇氏二十四卷【明傅作兴撰】艺林累百八卷【明李绍文撰】十三经类语十四卷【旧本题明罗万藻编】庶物异名疏三十卷【明陈懋仁撰】尚友录二十二卷【明廖用贤编】诗学汇选二卷【明胡文焕编】文奇豹斑十二卷【明陈继儒撰】五车韵瑞一百六十卷【明凌稚隆撰】五经总类四十卷【明张云鸾撰】茹古略集三十卷【明程良儒撰】古今好议论十卷【明吕一经编】名物考十卷【明刘侗撰】六经纂要无卷数【明颜茂猷撰】事物考八卷【明傅岩撰】佣吹录首集二十卷次集二十一卷【明文德翼撰】广韵藻六卷【明方夏编】丽句集六卷【明许之吉撰】文苑汇隽二十四卷【明孙丕显撰】事类通考十卷【明刘叶撰】古今事物原始三十卷【明徐炬撰】古史汇编四卷【明韩孔赞撰】子史汇纂二十四卷【明冯廷章撰】清异续录三卷【明李琪枝撰】类雅二十卷【不着撰人名氏】万年统纪十二卷【不着撰人名氏】对类二十卷【不着撰人名氏】大政管窥四卷【不着撰人名氏】汲古编四卷【

不着撰人名氏】

以上见四库全书存目

类书类凡一百七十八部

钦定续通志卷一百六十一

●钦定续通志卷一百六十二 艺文略七

艺文略 【七】

文类第十二上 【楚辞 别集】

○文类第十二上

（臣）等谨案郑志文类自楚辞别集总集之外诗赋赞颂箴铭之类俱各自为目考宋元以来名家专集杂见诸体未便分析今并收入

别集总集二门其余如制诰表章四六之属闲有自为一书者则仍依类编次云

楚辞

别集

△楚辞

楚辞补注十七卷 【宋洪兴祖撰】 楚辞集注八卷辨证二卷后语六卷 【宋朱子撰】 离骚草木疏四卷 【宋吴仁杰撰】

以上见文渊阁著录

天问天对解一卷 【宋杨万里撰】 楚辞集解八卷蒙引二卷考异一卷 【明汪瑗撰】 离骚草木疏补四卷 【明屠本峻撰】

楚骚协韵十卷附读骚大旨一卷 【明屠本峻撰】 楚辞听直八卷合论一卷 【明黄文焕撰】 楚词评林八卷 【明沈云翔撰】 骚

苑四卷 【前三卷明黄省曾撰后一卷张所敬补】 楚范六卷 【明张之象撰】 楚骚绮语六卷 【明张之象撰】

以上见四库全书存目

楚辞类凡十二部

△别集 【批注 编录 宋 金 元 明】

（臣）等谨案文类别集所收皆宋元明人著作惟前代诸集经宋元明人注释编次无可附见特立批注编录二门收之凡宋人诗文即

为宋人注释及后人选辑元人文集为明人评选者统归此二门登载焉

批注

编录

宋

金

元

明

批注

分类补注李太白集三十卷 【宋杨齐贤注元王 赧补】 补注杜诗三十六卷
【宋黄希原本其子鹤续成之】 九家集注杜诗
三十六卷 【宋郭知达编】 韩集举正十卷外集举正一卷 【宋方崧卿撰】 原本
韩文考异十卷 【宋朱子撰】 五百家注音辨昌
黎先生文集四十卷 【宋魏仲举编】 五百家注音辨柳先生文集二十一卷外集二
卷新编外集一卷龙城录二卷附录八卷 【宋魏仲
举编】 诂训柳先生文集四十五卷外集二卷新编外集一卷 【宋韩醇音释】 东雅
堂韩昌黎集注四十卷外集十卷 【宋廖莹中撰
】 增广注释音辨柳集四十三卷 【旧题宋童宗说注释张敦颐音辨潘纬音义】 笺
注评点李长吉歌诗四卷外集一卷 【旧题宋吴
正子笺注刘辰翁评点】 王荆公诗注五十卷 【宋李壁撰】 东坡诗集注三十二卷
【宋王十朋注】 施注苏诗四十一卷东坡年谱
一卷王注正讹一卷苏诗续补遗二卷 【宋施元之顾禧同注元之子施宿为年谱】
山谷内集注二十卷外集注七卷别集注二卷 【宋
任渊史容史季温注】 后山诗注十二卷 【宋任渊注】 绛守居园池记注一卷 【
元赵仁举吴师道许谦注樊宗师诗】 集千家注杜
诗二十卷 【元高楚芳辑】 杜诗攷四卷 【明唐元竑撰】 温飞卿集笺注九卷 【
明曾益撰】 璇玑图诗读法二卷 【明康万民
撰】

以上见文渊阁著录

杜律注二卷 【旧题元虞集撰】 陶诗析义二卷 【明黄文焕撰】 李诗钞述
注十六卷 【明林兆珂撰】 读杜愚得十八卷
【明单复撰】 杜诗通十六卷本义四卷 【明张縠撰】 杜诗钞述注十六卷 【明
林兆珂撰】 杜律意笺二卷 【明颜廷榘撰】
杜律意注二卷 【明赵统撰】 杜诗解八卷 【明杨德周撰】 杜律注评二卷 【明
陈与郊撰】 类笺王右丞集十卷附文集四卷
【明顾起经撰】

以上见四库全书存目

编录

别本韩文考异四十卷外集十卷遗文一卷 【宋朱子原本王伯大重编又采洪兴
祖各家为音释】 欧阳文粹二十卷 【宋陈亮编

】放翁诗选前集十卷后集八卷附别集一卷【宋罗椅刘辰翁合编陆游诗】浮溪文粹十五卷【明胡尧臣所刊宋汪藻诗文不载编录名氏】

以上见文渊阁著录

北山律式二卷附王炎诗一卷晁冲之诗一卷【宋叶梦得所选程俱诗】朱子大同集十三卷【宋陈利用编】分类诚斋文脍后集十二卷【不着编辑名氏】杜诗分类五卷【明傅振商编】欧阳遗粹十卷【明郭云鹏编】老泉文妙无卷数【明郭祥鹏编】东坡外集八十六卷【不着编辑名氏】黄楼集二卷【明鲁点编】东坡守胶西集四卷【明阎士选编】苏文奇赏五十卷【明陈仁锡编】东坡禅喜集十四卷【明凌蒙初编】苏诗摘律六卷【旧题刘宏注不着时代】吕次儒集一卷【不着编辑名氏系宋吕南公集】山谷禅喜集二卷【明陶元柱编】精华录八卷【黄庭坚诗明朱承爵编】襄阳遗集一卷【明范明泰编】晦庵文钞续集四卷【明崔铣编】漫叟拾遗一卷【选录唐元结文不着编辑名氏】草庐吴先生文辑粹六卷【明王冀编】吴草庐文钞无卷数【不着编辑名氏】李忠定集选四十四卷【宋李纲撰明李嗣元选】

以上见四库全书存目

宋

咸平集三十卷【宋田锡撰】逍遥集一卷【宋潘闻撰】南阳集六卷【宋赵湘撰】和靖诗集四卷【宋林逋撰】穆参军集三卷附录遗事一卷【宋穆修撰】春卿遗稿一卷【宋蒋堂撰】文恭集五十卷补遗一卷【宋胡宿撰】武溪集二十卷【宋余靖撰】安阳集五十卷【宋韩琦撰】河南集二十七卷【宋尹洙撰】祠部集三十六卷【宋强至撰】罽津集二十二卷【宋释契嵩撰】祖英集二卷【宋释重显撰】苏魏公集七十二卷【宋苏颂撰】古灵集二十五卷【宋陈襄撰】清献集十卷【宋赵汴撰】金氏文集二卷【宋金君卿撰】公是集五十四卷【宋刘敞撰】彭城集四十卷【宋刘攽撰】邕州小集一卷【宋陶弼撰】都官集十四卷【宋陈舜俞撰】丹渊集四十卷拾遗二卷年谱一卷附录二卷【宋文同撰】西溪集十卷【宋沈遘撰】郟溪集三十卷【宋郑獬撰】钱塘集十四卷【宋韦骥撰】净德集三十八卷【宋己陶撰】冯安岳集十

二卷【宋冯山撰】龙学文集十六卷【宋祖无择撰】忠肃集二十卷【宋刘摯撰】王魏公集八卷【宋王安礼撰】范太史集五十五卷【宋范祖禹撰】潞公集四十卷【宋文彦博撰】击壤集二十卷【宋邵子撰】鄱阳集十三卷【宋彭汝砺撰】曲阜集四卷【宋曾肇撰】周元公集九卷【宋周子撰】南阳集三十卷附录一卷【宋韩维撰】节孝集三十卷附录一卷【宋徐积撰】乐全集四十卷【宋张方平撰】忠宣文集二十卷奏议二卷遗文一卷附录一卷补编一卷【宋范纯仁撰】广陵集三十一卷【宋王令撰】宛邱集七十六卷【宋张耒撰】济南集八卷【宋李荐撰】参寥子集十二卷【宋僧道潜撰】宝晋英光集八卷【宋米芾撰】石门文字禅三十卷【宋僧惠洪撰】画墁集八卷【宋张舜民撰】倚松老人集二卷【宋饶节撰】西塘集十卷【宋郑侠撰】云巢编十卷【宋沈辽撰】景迂生集二十卷【宋晁说之撰】乐圃余藁十卷附录一卷【宋朱长文撰】龙云集三十二卷【宋刘弇撰】云溪居士集三十卷【宋华镇撰】演山集六十卷【宋黄裳撰】何博士备论一卷【宋何去非撰】姑溪居士前集五十卷后集二十卷【宋李之仪撰】滴水集十六卷【宋李复撰】学易集八卷【宋刘跂撰】道乡集四十卷【宋邹浩撰】游廌山集四卷【宋游酢撰】西台集二十卷【宋毕仲游撰】乐静集三十卷【宋李昭玘撰】北湖集五卷【宋吴则礼撰】溪堂集十卷【宋谢逸撰】竹友集十卷【宋谢薖撰】日涉园集十卷【宋李彭撰】灌园集二十卷【宋吕南公撰】庆湖遗老集九卷【宋贺铸撰】摘文堂集十五卷附录一卷【宋慕容彦逢撰】襄陵集十二卷【宋许翰撰】东堂集十卷【宋毛滂撰】浮沚集八卷【宋周行己撰】刘给事集五卷【宋刘安上撰】刘左史集四卷【宋刘安节撰】竹隐畸士集二十卷【宋赵鼎臣撰】应诏集十二卷【宋苏辙撰】洪龟父集二卷【宋洪朋撰】跨鳌集三十卷【宋李新撰】忠愍集三卷【宋李若水撰】忠肃集三卷【宋傅察撰】宗忠简集八卷【宋宗泽撰】龟山集四十二卷【宋杨时撰】梁溪集一百八十卷附录六卷【宋李纲撰】横塘集二十卷【宋许景衡撰】西渡集二卷补遗一卷附洪龟父诗一卷洪驹父诗一卷【宋洪炎撰】老圃集二卷【宋洪刍撰】丹阳集二十四卷【宋葛胜仲撰】昆陵集十五卷【宋

张守撰】 浮溪集三十六卷 【宋汪藻撰】 庄简集十八卷 【宋李光撰】 忠正德文集十卷 【宋赵鼎撰】 东窗集十六卷 【宋张扩撰】 忠惠集十卷附录一卷 【宋翟汝文撰】 松隐文集三十九卷 【宋曹勋撰】 石林居士建康集八卷 【宋叶梦得撰】 简斋集十六卷 【宋陈与义撰】 北山小集四十卷 【宋程俱撰】 槲溪居士集十二卷 【宋刘才邵撰】 筠溪集二十四卷 【宋李弥逊撰】 华阳集四十卷 【宋张纲撰】 忠穆集八卷 【宋吕颐浩撰】 紫微集三十六卷 【宋张焯撰】 茗溪集五十五卷 【宋刘一止撰】 东牟集十四卷 【宋王洋撰】 相山集三十卷 【宋王之道撰】 三余集四卷 【宋黄彦平撰】 大隐集十卷 【宋李正民撰】 龟溪集十二卷 【宋沈与求撰】 栟榈集十六卷 【宋邓肃撰】 默成文集八卷 【宋潘良贵撰】 鄱阳集四卷 【宋洪皓撰】 澹斋集十八卷 【宋李流谦撰】 韦斋集十二卷附玉澜集一卷 【宋朱松撰】 陵阳集四卷 【宋韩驹撰】 灞山集三卷 【宋朱翌撰】 云溪集十二卷 【宋郭印撰】 卢溪集五十卷 【宋王庭珪撰】 屏山集二十卷 【宋刘子翬撰】 北海集四十六卷附录三卷 【宋綦崇礼撰】 鸿庆居士集四十二卷 【宋孙覿撰】 崧庵集六卷 【宋李处权撰】 藏海居士集二卷 【宋吴可撰】 豫章文集十七卷 【宋罗从彦撰】 和靖集八卷 【宋尹焞撰】 王著作集八卷 【宋王苹撰】 郴江百咏一卷 【宋阮阅撰】 双溪集十五卷 【宋苏籀撰】 少阳集十卷 【宋陈东撰】 欧阳修撰集七卷 【宋欧阳澈撰】 东溪集二卷附录一卷 【宋高登撰】 岳武穆遗文一卷 【宋岳飞撰】 茶山集八卷 【宋曾几撰】 雪溪集五卷 【宋王铨撰】 芦川归来集六卷 【宋张元干撰】 东莱诗集二十卷 【宋吕本中撰】 澹庵文集六卷 【宋胡铨撰】 五峯集五卷 【宋胡宏撰】 斐然集三十卷 【宋胡寅撰】 北山集三十卷 【宋郑刚中撰】 浮山集十卷 【宋仲并撰】 横浦集二十卷 【宋张九成撰】 湖山集十卷 【宋吴芾撰】 文定集二十四卷 【宋汪应辰撰】 缙云文集四卷 【宋冯时行撰】 嵩山居士集五十四卷 【宋晁公遯撰】 默堂集二十二卷 【宋陈渊撰】 知稼翁集二卷 【宋黄公度撰】 唯室集四卷附录一卷 【宋陈长方撰】 汉滨集十六卷 【宋王之望撰】 香溪集二十二卷 【宋范浚撰】 郑忠肃奏议遗集二卷 【宋郑兴裔撰】 云庄集五卷 【宋曾协撰】 竹轩杂着六卷 【

宋林季仲撰】拙斋文集二十卷【宋林之奇撰】于湖集四十卷【宋张孝祥撰】太仓稊米集七十卷【宋周紫芝撰】邓绅伯集二卷【宋邓深撰】归愚集十卷【宋葛立方撰】夹漈遗稿三卷【宋郑樵撰】鄮峯真隐漫录五十卷【宋史浩撰】燕堂诗稿一卷【宋赵公豫撰】海陵集二十三卷外集一卷【宋周麟之撰】竹洲集二十卷附棣华杂笔一卷【宋吴儆撰】高峰文集十二卷【宋廖刚撰】鄂州小集六卷附录二卷【宋罗愿撰】艾轩集九卷附录一卷【宋林光朝撰】晦庵集一百卷续集五卷别集七卷【宋朱子撰】梁溪遗稿一卷【宋尤袤撰】文忠集二百卷【宋周必大撰】雪山集十六卷【宋王质撰】方舟集二十四卷【宋李石撰】网山集八卷【宋林亦之撰】东莱集四十卷【宋吕祖谦撰】止斋文集五十一卷附录一卷【宋陈傅良撰】梅溪集五十四卷【宋王十朋撰】香山集十六卷【宋喻良能撰】宫教集十二卷【宋崔敦礼撰】蒙隐集二卷【宋陈棣撰】倪石陵书一卷【宋倪朴撰】乐轩集八卷【宋陈藻撰】定庵类稿四卷【宋卫博撰】澹轩集八卷【宋李吕撰】攻媿集一百十二卷【宋楼钥撰】尊白堂集六卷【宋虞侍撰】东塘集二十卷【宋袁说友撰】义丰集一卷【宋王阮撰】涉斋集十八卷【宋许及之撰】蠹斋铅刀编三十二卷【宋赵蕃撰】干道稿一卷淳熙稿二十卷章泉稿五卷【宋双溪集二十七卷【宋王炎撰】止堂集二十卷【宋彭龟年撰】缘督集二十卷【宋曾表撰】象山集二十八卷外集四卷附语录四卷【宋陆九渊撰】慈湖遗书十八卷续集二卷【宋杨简撰】絜斋集二十四卷【宋袁燮撰】舒文靖集二卷【宋舒璘撰】云庄集十二卷【宋刘燠撰】定斋集二十卷【宋蔡戡撰】九华集二十五卷附录一卷【宋员兴宗撰】野处类稿二卷【宋洪迈撰】盘洲集八十卷【宋洪适撰】应斋杂着六卷【宋赵善括撰】芸庵类稿六卷【宋李洪撰】浪语集三十五卷【宋薛季宣撰】石湖诗集三十四卷【宋范成大撰】诚斋集一百三十二卷【宋杨万里撰】剑南诗稿八十五卷【宋陆游撰】渭南文集五十卷逸稿二卷【宋陆游撰】金陵百咏一卷【宋曾极撰】颐庵居士集二卷【宋刘应时撰】水心集二十九卷【宋叶适撰】南湖集十卷【宋张镃撰】南涧甲乙稿二十二卷【宋韩元吉撰】自鸣集六卷【宋章甫撰】

客亭类稿十五卷【宋杨冠卿撰】石屏集六卷【宋戴复古撰】莲峰集十卷【宋史尧弼撰】江湖长翁文集四十卷【宋陈造撰】烛湖集二十卷附编二卷【宋孙应时撰】昌谷集二十二卷【宋曹彦约撰】省斋集十卷【宋廖行之撰】南轩集四十四卷【宋张栻撰】勉斋集四十卷【宋黄干撰】北溪大全集五十卷外集一卷【宋陈淳撰】山房集九卷【宋周南撰】后乐集二十卷【宋卫泾撰】竹斋诗集四卷【宋裘万顷撰】华亭百咏一卷【宋许尚撰】梅山续稿十七卷【宋姜特立撰】菊磻集一卷附林湖遗稿一卷江村遗稿一卷疏寮小集一卷【宋高翥撰】性善堂稿十五卷【宋度正撰】漫塘文集三十六卷【宋刘宰撰】克斋集十七卷【宋陈文蔚撰】芳兰轩集一卷【宋徐照撰】二薇亭集一卷【宋徐玑撰】西岩集一卷【宋翁卷撰】清苑斋集一卷【宋赵师秀撰】瓜庐诗一卷【宋薛师石撰】洺水集三十卷【宋程秘撰】龙川文集三十卷【宋陈亮撰】龙洲集十四卷附录二卷【宋刘过撰】鹤山全集一百九卷【宋魏了翁撰】西山文集五十五卷【宋真德秀撰】方泉集四卷【宋周文璞撰】东山诗选二卷【宋葛绍体撰】白石诗集一卷附诗说一卷【宋姜夔撰】野谷诗稿六卷【宋赵汝鎡撰】平斋文集三十二卷【宋洪咨夔撰】蒙斋集十八卷【宋袁甫撰】康范诗集一卷附录三卷【宋汪晫撰】清猷集二十卷【宋杜范撰】鹤林集四十卷【宋吴泳撰】东涧集十四卷【宋许应龙撰】方是闲居士小稿二卷【宋刘学箕撰】翠微南征录十一卷【宋华岳撰】浣川集十卷【宋戴栩撰】渔墅类稿八卷【宋陈元晋撰】沧州尘缶编十四卷【宋程公许撰】安晚堂诗集七卷【宋郑清之撰】篔窗集十卷【宋陈耆卿撰】友林乙稿一卷【宋史弥莹撰】方壶存稿八卷【宋汪莘撰】铁庵集三十七卷【宋方大琮撰】默斋遗稿二卷【宋游九言撰】履斋遗集四卷【宋吴潜撰】臞轩集十六卷【宋王迈撰】东野农歌集五卷【宋戴昺撰】敝帚稿略八卷【宋包恢撰】清正存稿六卷附录一卷【宋徐鹿卿撰】寒松阁集三卷【宋詹初撰】沧浪集二卷【宋严羽撰】泠然斋集八卷【宋苏洵撰】可斋杂稿三十四卷续稿八卷续稿后十二卷【宋李曾伯撰】后村集五十卷【宋刘克庄撰】涧泉集二十卷【宋韩澂撰】矩山存稿五卷【宋徐经孙撰】雪窗

集二卷附录一卷【宋孙梦观撰】庸斋集六卷【宋赵汝腾撰】文溪存稿二十卷【宋李昉英撰】彝斋文编四卷【宋赵孟坚撰】张氏拙轩集六卷【宋张侃撰】灵岩集十卷【宋唐士耻撰】玉楮集八卷【宋岳珂撰】榘埜集十二卷【宋徐元杰撰】耻堂存稿八卷【宋高斯得撰】秋崖集四十卷【宋方岳撰】芸隐横舟稿一卷芸隐勅游稿一卷【宋施枢撰】蒙川遗稿四卷【宋刘黻撰】菊山清隽集一卷附题画诗一卷锦钱集一卷杂文一卷【菊山清隽集宋郑震撰题画诗锦钱集及杂文皆其子思肖撰】雪砚丛稿五卷【宋乐雷发撰】北涧集十卷【宋释居简撰】西塍集一卷【宋宋伯仁撰】梅屋集五卷【宋许棐撰】潜山集十二卷【宋释文珩撰】孝诗一卷【宋林同撰】字溪集十一卷附录一卷【宋阳枋撰】勿斋集二卷【宋杨至质撰】巽斋文集二十七卷【宋欧阳守道撰】雪坡文集五十卷【宋姚勉撰】文山集二十一卷【宋文天祥撰】文信公集杜诗四卷【一名文山诗史宋文天祥撰】迭山集五卷【宋谢枋得撰】本堂集九十四卷【宋陈着撰】汶阳端平诗隽四卷【宋周弼撰】虞斋续集三十卷【宋林希逸撰】鲁斋集二十卷【宋王柏撰】须溪集十卷【宋刘辰翁撰】须溪四景诗四卷【宋刘辰翁撰】苇航漫游稿四卷【宋胡仲弓撰】兰皋集三卷【宋吴锡畴撰】云泉诗一卷【宋薛嵎撰】嘉禾百咏一卷【宋张尧同撰】柳塘外集四卷【宋释道璨撰】碧梧玩芳集二十四卷【宋马廷鸾撰】四明文献集五卷【宋王应麟撰】覆瓿集六卷【宋赵必■〈王象〉撰】阆风集十二卷【宋舒岳祥撰】北游集一卷【宋汪梦斗撰】秋堂集三卷【宋柴望撰】蛟峰文集八卷外集四卷【宋方逢辰撰】秋声集六卷【宋卫宗武撰】牟氏陵阳集二十四卷【宋牟巘撰】湖山类稿五卷水云集一卷【宋汪元量撰】晞发集十卷晞发遗集二卷遗集补一卷附天地闲集一卷西台恸哭记注一卷冬青引注一卷【宋谢翱撰明张丁注】潜斋文集十一卷附铁牛翁遗稿一卷【宋何梦桂撰】梅岩文集十卷【宋胡次焱撰】四如集五卷【宋黄仲元撰】林霁山集五卷【宋林景熙撰】勿轩集八卷【宋熊禾撰】古梅吟稿六卷【宋吴龙翰撰】佩韦斋文集十六卷【宋俞德邻撰】庐山集五卷英溪集一卷【宋董嗣昊撰】西湖百咏二卷【宋董嗣昊撰】则堂集六卷【宋家

铉翁撰】富山遗稿十卷【宋方夔撰】真山民集一卷【宋真山民撰】百正集三卷【宋连文凤撰】月洞吟一卷【宋王铉撰】伯牙琴一卷【宋邓牧撰】存雅堂遗稿五卷【宋方凤撰】吾汶稿十卷【宋王炎午撰】在轩集一卷【宋黄公绍撰】紫岩诗选三卷【宋于石撰】九华诗集一卷【宋陈岩撰】宝极斋稿一卷附慎独叟遗稿一卷【宋陈深撰】仁山集六卷【宋金履祥撰】自堂存稿四卷【宋陈杰撰】心泉学诗稿六卷【宋蒲寿■〈山上成下〉撰】云泉诗集一卷【宋释永颐撰】

以上见文渊阁著录

别本公是集六卷【宋刘敞撰】陈副使诗一卷【宋陈泊撰】支离子集一卷【宋道士黄希旦撰】斜川集十卷【旧题宋苏过撰】双峰存稿六卷【旧题宋舒邦佐撰】别本海陵集一卷【宋周麟之撰】林泉结契五卷【宋王质撰】别本汪文定集十三卷【宋汪应辰撰】延平文集三卷附录二卷【宋李侗撰】别本芦川归来集六卷【宋张元干撰】陈文恭公集十三卷【宋陈康伯撰】志道集一卷【宋顾禧撰】蕊阁集一卷【旧题宋辛弃疾撰】别本攻媿文集三十二卷诗集十卷【宋楼钥撰】别本象山文集六卷【宋陆九渊撰】别本缘督集十二卷【宋曾丰撰】别本后乐集十卷附录二卷【宋卫泾撰】骚略三卷【宋高似孙撰】棠湖诗稿一卷【旧题宋岳珂撰】松垣集十一卷【旧题宋辛元龙撰】猷丑集一卷【宋许棐撰】断肠集二卷【宋女子朱淑真撰】石堂遗集四卷【宋陈普撰】东涧集一卷【宋汤汉撰】剪绡集二卷【宋李龔撰】汪水云诗钞一卷【宋汪元量撰】须溪记钞八卷【宋刘辰翁撰】鸡肋集一卷【宋何希之撰】牧莱脞语十二卷二稿八卷【宋陈仁子撰】宝峰集二卷【宋赵偕撰】方韶卿集一卷【旧题宋方凤撰】待清遗稿二卷【宋潘音撰】心史七卷【旧题宋郑思肖撰】罗沧洲集五卷【旧题宋罗公升撰】林屋山人集一卷【宋俞琰撰】

以上见四库全书存目

金

拙轩集六卷【金王寂撰】滏水集二十卷【金赵秉文撰】滹南遗老集四十五卷【金王若虚撰】庄靖集十卷【金李

俊民撰】 遗山集四十卷附录一卷 【金元好问撰】

以上见文渊阁著录

遗山诗集二十卷 【金元好问撰】

以上见四库全书存目

元

湛然居士集十四卷 【元耶律楚材撰】 藏春集六卷 【元刘秉忠撰】 淮阳集一卷附录诗余一卷 【元张宏范撰】 陵川集

三十九卷附录一卷 【元郝经撰】 归田类稿二十四卷 【元张养浩撰】 白云集三卷 【元释英撰】 稼村类稿三十卷 【元王

义山撰】 桐江续集三十七卷 【元方回撰】

趣有声画二卷 【元杨公远撰】 月屋漫稿一卷 【元黄庚撰】 剡源集三十卷 【元戴表元撰】 剩语二卷 【元艾性夫撰

】 养蒙集十卷 【元张伯淳撰】 墙东类稿二十卷 【元陆文圭撰】 青山集八卷 【元赵文撰】 桂隐文集四卷诗集四卷 【

元刘诜撰】 水云村稿十五卷 【元刘埙撰】 巴西文集一卷 【元邓文原撰】 屏岩小稿一卷 【元张观光撰】 玉斗山人集三

卷 【旧题南宋王弈撰】 谷响集一卷 【元释善住撰】 竹素山房诗集三卷 【元吾邱衍撰】 紫山大全集二十六卷 【元胡祇

遹撰】 松乡文集十卷 【元任士林撰】 松雪斋集十卷外集一卷 【元赵孟俯撰】 吴文正集一百卷私录二卷 【元吴澄撰】

金渊集六卷 【元仇远撰】 山村遗集一卷 【元仇远撰】 湛渊集一卷 【元白斑撰】 牧潜集七卷 【元僧圆至撰】 小亨集

六卷 【元杨宏道撰】 还山遗稿二卷附录一卷 【元杨奂撰】 鲁斋遗书八卷附录二卷 【元许衡撰】 静修集三十卷 【元刘

因撰】 青崖集五卷 【元魏初撰】 养吾斋集三十二卷 【元刘将孙撰】 存悔斋稿一卷补遗一卷 【元龚璘撰】 双溪醉隐集

八卷 【元耶律铸撰】 东庵集四卷 【元滕安上撰】 白云集四卷 【元许谦撰】 畏斋集六卷 【元程端礼撰】 默庵集五卷

【元安熙撰】 云峰集十卷 【元胡炳文撰】 秋涧集一百卷 【元王恽撰】 牧庵文集三十六卷 【元姚燧撰】 雪楼集三十卷

【元程巨夫撰】 曹文贞公诗集十卷后录一卷 【元曹伯启撰】 芳谷集二卷 【元徐明善撰】 观光稿一卷交州稿一卷玉堂稿

一卷附录一卷 【元陈孚撰】 陈秋岩诗集二卷 【元陈宜甫撰】 兰轩集十六卷 【元王旭撰】 玉井樵唱三卷 【元尹廷高撰

】 清容居士集五十卷 【元袁桷撰】 此山集四卷 【元周权撰】 申斋集十五卷
【元刘岳申撰】 霞外诗集十卷 【元马臻撰】 西岩集二十卷 【元张之翰撰】 蒲室集十五卷 【元释大欣撰】 弁山小隐
吟录二卷 【元黄玠撰】 续轩渠集十卷附录一卷 【元洪希文撰】 定宇集十六卷别集一卷 【元陈栎撰】 艮斋诗集十四卷
【元侯克中撰】 知非堂稿六卷 【元何中撰】 云林集十卷附录一卷 【元贡奎撰】 梅花字字香前集一卷后集一卷 【元郭
豫亨撰】 中庵集二十卷 【元刘敏中撰】 王文忠集六卷 【元王结撰】 静春堂集四卷 【元袁易撰】 惟实集四卷外集一卷
【元刘鹗撰】 勤斋集八卷 【元萧■〈奭斗
〉撰】 石田集十五卷 【元马祖常撰】 渠庵集十五卷 【元同恕撰】 道园学古
录五十卷 【元虞集撰】 道园遗稿十六卷 【元虞集撰】 杨仲宏集八卷 【元杨载撰】 范德机诗七卷 【元范梈撰】 文安集
十四卷 【元揭傒斯撰】 翠寒集一卷 【元宋无撰】 桧亭集九卷 【元丁复撰】 伊滨集二十四卷 【元王沂撰】 渊颖集十二
卷附录一卷 【元吴莱撰】 黄文献集十卷 【元黄潛撰】 圭斋集十五卷附录一卷 【元欧阳元撰】 待制集二十卷附录一卷
【元柳贯撰】 闲居丛稿二十六卷 【元蒲道源撰】 所安遗集一卷 【元陈泰撰】 至正集八十一卷 【元许有壬撰】 圭塘
小稿十三卷别集二卷续集一卷附录一卷 【元许有壬撰】 礼部集二十卷 【元吴师道撰】 积斋集五卷 【元程端学撰】 燕石
集十五卷 【元宋褫撰】 秋声集四卷 【元黄镇成撰】 雁门集三卷外诗一卷 【元萨都拉撰】 杏亭摘稿一卷 【元洪焱祖
撰】 安雅堂集十三卷 【元陈旅撰】 傅与砺诗文集二十卷 【元傅若金撰】 瓢泉吟稿五卷 【元朱晞颜撰】 筠轩集十三卷
【元唐元撰】 俟庵集三十卷 【元李仔撰】 滋溪文稿三十卷 【元苏天爵撰】 青阳集四卷 【元余阙撰】 方叔渊遗稿一卷
【元方澜撰】 鲸背吟集一卷 【旧本题元朱晞颜撰】 近光集三卷扈从诗一卷 【元周伯琦撰】 经济文集六卷 【元李士瞻
撰】 纯白斋类稿二十卷附录二卷 【元胡助撰】 圭峰集二卷 【元卢琦撰】 蛻庵集五卷 【元张翥撰】 五峰集六卷 【元李
孝光撰】 野处集四卷 【元邵亨贞撰】 梦观集五卷 【元释大圭撰】 金台集二卷 【元纳新撰】 子渊诗集六卷 【元张仲深
撰】 午溪集十卷 【元陈镒撰】 药房樵唱

二卷附录一卷 【元吴景奎撰】 栲栳山人集二卷 【元岑安卿撰】 梅花道人遗墨二卷 【元吴镇撰】 玩斋集十卷拾遗一卷
【元贡师泰撰】 羽庭集六卷 【元刘仁本撰】 不系舟渔集十六卷 【元陈高撰】 居竹轩集四卷 【元成廷珪撰】 句曲外史
集三卷补遗三卷集外诗一卷 【元张雨撰】 侨吴集十二卷 【元郑元佑撰】 咏物诗一卷 【元谢宗可撰】 鹿皮子集四卷 【
元陈樵撰】 林外野言二卷 【元郭翼撰】 傲轩吟稿一卷 【元胡天游撰】 师山文集八卷遗文五卷附录一卷 【元郑玉撰】
友石山人遗稿一卷 【元王翰撰】 闻过斋集八卷 【元吴海撰】 学言诗稿六卷 【元吴当撰】 北郭集六卷补遗一卷 【元许
恕撰】 玉笥集十卷 【元张宪撰】 青村遗稿一卷 【元金涓撰】 丁鹤年集一卷 【元丁鹤年撰】 贞素斋集八卷附录一卷又
北庄遗稿一卷 【元舒頔撰】 一山文集九卷 【元李继本撰】 江月松风集十二卷 【元钱维善撰】 龟巢集十七卷 【元谢应
芳撰】 石初集十七卷 【元周霆震撰】 山窗余稿卷 【元甘复撰】 梧溪集七卷 【元王逢撰】 吾吾类稿三卷 【元吴皋撰
】 樵云独唱六卷 【元叶颙撰】 桐山老农文集四卷 【元鲁贞撰】 静思集十卷 【元郭钰撰】 九灵山房集三十卷 【元戴
良撰】 滦京杂咏一卷 【元杨允孚撰】 云阳集十卷 【元李祁撰】 南湖集二卷 【元贡性之撰】 佩玉斋类稿十卷 【元杨
翻撰】 清閤阁集十二卷 【元倪瓒撰】 玉山璞稿一卷 【元顾瑛撰】 麟原文集二十四卷 【元王礼撰】 来鹤亭诗九卷补遗
一卷 【元吕诚撰】 云松巢集三卷 【元朱希晦撰】 环谷集八卷 【元汪克宽撰】 性情集六卷 【元周巽撰】 花溪集三卷
【元沈梦麟撰】 樗隐集六卷 【元胡行简撰】 东山存稿七卷附录一卷 【元赵汭撰】 东维子集三十卷附录一卷 【元杨维
桢撰】 铁崖古乐府十卷乐府补六卷 【元杨维桢撰】 复古诗集六卷 【元杨维桢撰】 丽则遗音四卷 【元杨维桢撰】 夷白
斋稿三十五卷外集一卷 【元陈基撰】 庸庵集十四卷 【元宋禧撰】 可闲老人集四卷 【元张昱撰】 石门集七卷 【元梁寅
撰】 玉笥集九卷 【元邓雅撰】

以上见文渊阁著录

水云村泯稿二卷 【元刘埙撰】 别本松雪斋集二卷 【元赵孟俯撰】 安南即事诗一卷 【元陈孚撰】 辉山存稿一卷 【

元萧国宝撰】 赵仲穆遗稿一卷 【旧题元赵雍撰】 清江碧嶂集一卷 【元杜本撰】 水镜集一卷 【元元淮撰】 宸务集三卷
【旧题元王楨撰】 山林清气集一卷续集一卷 【元释德净撰】 道园集无卷数
【元虞集撰】 虞伯生诗续编三卷 【元虞集撰】 范 曰诗集六卷 【元范梈撰】 揭曼硕遗文一卷 【元揭傒斯撰】 鳌溪文集二卷 【元周闻孙撰】 王鲁公诗钞一卷 【元王士熙撰】 存复斋集十卷 【元朱德润撰】 吟吃集一卷 【元宋无撰】 书林外集七卷 【元袁士元撰】 黄杨集三卷补遗一卷 【元华幼武撰】 肃雝集一卷 【元女子郑允端撰】 倪雲林诗集六卷 【元倪瓚撰】 韩山人集无卷数 【元韩弈撰】 九灵山房遗稿五卷 【元戴良撰】 书山遗集二十卷 【元吴会撰】 高闲云集六卷 【元董养性撰】 程梅轩集四卷 【元程从龙撰】 茶山老人遗集二卷 【元沈贞撰】 得月稿四卷 【元吕不用撰】 拱和诗集一卷 【元曹志撰】 兰雪集一卷 【元松阳女子张玉娘撰】 荻溪集二卷 【元王偕撰】

以上见四库全书存目

明

明太祖文集二十卷 【明太祖御制】 宋学士全集三十六卷 【明宋濂撰】 宋景濂未刻集二卷 【明宋濂撰】 诚伯文集二十卷 【明刘基撰】 凤池吟稿十卷 【明汪广洋撰】 陶学士诗二十卷 【明陶安撰】 西隐集十卷 【明宋讷撰】 王忠文公集二十四卷 【明王祜撰】 翠屏集四卷 【明张以盗撰】 说学斋稿四卷 【明危素撰】 云林集二卷 【明危素撰】 白云集七卷 【明唐桂芳撰】 登州集二十三卷 【明林弼撰】 槎翁诗集八卷 【明刘崧撰】 东皋录三卷 【明释妙声撰】 覆瓿集七卷附录一卷 【明朱同撰】 柘轩集四卷 【明凌云翰撰】 白云稿五卷 【明朱右撰】 密庵集八卷 【明谢肃撰】 清江诗集十卷文集三十一卷 【明贝琼撰】 苏平仲集十六卷 【明苏伯衡撰】 胡仲子集十卷 【明胡翰撰】 始丰稿十四卷 【明徐一夔撰】 王常宗集四卷补遗一卷续补遗一卷 【明王彝撰】 白石山房逸稿二卷 【明张孟兼撰】 沧螺集六卷 【明孙作撰】 临安集六卷 【明钱宰撰】 尚綱斋集五卷 【明童冀撰】 考古文集二卷 【明赵撝谦撰】 刘彦昂集九卷 【明刘炳撰】 蓝山集六卷 【明蓝仁撰】 蓝涧集六卷 【明蓝智撰】 大全集十八卷 【明高启撰】

】 鳧藻集五卷 【明高启撰】 眉庵集十二卷 【明杨基撰】 静居集四卷 【明张羽撰】 北郭集六卷 【明徐贲撰】 鸣盛集四卷 【明林鸿撰】 白云樵唱集二卷 【明王恭撰】 草泽狂歌五卷 【明王恭撰】 半轩集十四卷 【明王行撰】 西庵集九卷 【明孙蕡撰】 南村诗集四卷 【明陶宗仪撰】 望云集五卷 【明郭奎撰】 蚓窍集十卷 【明管时敏撰】 西郊笑端集一卷 【明董纪撰】 草阁集六卷拾遗一卷附筠谷诗一卷 【明李昱撰】 樗庵类稿二卷 【明郑潜撰】 春草斋集十卷附录一卷 【明乌斯道撰】 耕学斋诗集十二卷 【明袁华撰】 可传集一卷 【明袁华撰】 强斋集十卷 【明殷奎撰】 海桑集十卷 【明陈谟撰】 哇乐诗集一卷 【明梁兰撰】 竹斋集三卷续集一卷附录一卷 【明王冕撰】 独醉亭集三卷 【明史谨撰】 海叟集四卷集外诗一卷 【明袁凯撰】 荣进集四卷 【明吴伯宗撰】 梁园寓稿九卷 【明王翰撰】 自怡集一卷 【明刘琏撰】 斗南老人集六卷 【明胡奎撰】 希澹园诗三卷 【明虞堪撰】 鹅湖集六卷 【明龚敦撰】 荥阳外史集七十卷 【明郑真撰】 全室外集九卷续集一卷 【明僧宗泐撰】 岷泉集四卷 【明张宇初撰】 唐愚士诗二卷附会稽怀古诗一卷 【明唐之淳撰】 继志济集十二卷附录一卷 【明王绅撰】 练中丞集二卷 【明练子宁撰】 逊志斋集二十四卷 【明方孝孺撰】 贞白遗稿十卷附显忠录二卷 【明程通撰】 静学文集一卷 【明王叔英撰】 刍菘集六卷 【明周是修撰】 巽隐集四卷 【明程本立撰】 易斋集二卷 【明刘璟撰】 黄给谏遗稿一卷 【明黄钺撰】 野古集三卷 【明龚诩撰】 文毅集十六卷 【明解缙撰】 虚舟集五卷 【明王偁撰】 王舍人诗集五卷 【明王绂撰】 泊庵集十六卷 【明梁潜撰】 毅斋诗文集八卷附录一卷 【明王洪撰】 颐庵文选二卷 【明胡俨撰】 青城山人集八卷 【明王璘撰】 东里全九十七卷别集四卷 【明杨士奇撰】 杨文敏集二十五卷 【明杨荣撰】 省愆集二卷 【明黄淮撰】 金文靖集十卷 【明金幼孜撰】 夏忠靖集六卷附录一卷 【明夏原吉撰】 抑庵集十三卷后集三十七卷 【明王直撰】 运甓漫稿七卷 【明李昌祺撰】 古廉集十一卷附录一卷 【明李时勉撰】 梧冈集八卷 【明唐文凤撰】 曹月川集一卷 【明曹端撰】 薛文清集二十四卷 【明薛瑄撰】 两溪文集二十四卷 【明刘球撰】 于

忠肃集十三卷 【明于谦撰】 兰庭集二卷 【明谢晋撰】 古穰集三十卷 【明李贤撰】 武功集五卷 【明徐有贞撰】 倪文僖集三十二卷 【明倪谦撰】 襄毅文集十五卷 【明韩雍撰】 白沙集九卷 【明陈献章撰】 类博稿十卷附录二卷 【明岳正撰】 平桥稿十八卷 【明郑文康撰】 竹岩诗集一卷文集一卷补遗一卷 【明柯潜撰】 彭惠安集十卷附录一卷 【明彭韶撰】 清风亭稿七卷 【明童轩撰】 方洲集二十六卷 附读史录四卷 【明张盩撰】 重编琼台会稿二十四卷 【明邱浚撰】 谦斋文录四卷 【明徐溥撰】 椒邱文集四十四卷 【明何乔新撰】 石田诗选十卷 【明沈周撰】 东园文集十三卷续编一卷 【明郑纪撰】 怀麓堂集一百卷 【明李东阳撰】 清溪漫稿二十四卷 【明倪岳撰】 康斋文集十二卷 【明吴与弼撰】 楼居杂着一卷野航诗稿一卷野航文稿一卷附录一卷 【明朱存理撰】 一峰集十卷 【明罗伦撰】 篁墩集九十三卷 【明程敏政撰】 枫山集四卷附录一卷 【明章懋撰】 庄定山集十卷 【明庄■〈日上永下〉撰】 未轩文集十二卷 【明黄仲昭撰】 医闾集九卷 【明贺钦撰】 翠渠摘稿七卷补遗一卷 【明周瑛撰】 家藏集七十七卷 【明吴宽撰】 归田稿八卷 【明谢迁撰】 震泽集三十卷 【明王鏊撰】 郁洲遗稿十卷 【明梁储撰】 见素文集二十八卷奏疏七卷续集十二卷 【明林俊撰】 古城集六卷补遗一卷 【明张吉撰】 虚斋集五卷 【明蔡清撰】 容春堂前集二十卷后集十四卷续集十八卷别集九卷 【明邵宝撰】 罗圭峰文集三十卷 【明罗玘撰】 吴文肃公摘稿四卷 【明吴俨撰】 熊峰集十卷 【明石珪撰】 立斋遗文五卷 【明邹智撰】 西村集八卷附录一卷 【明史鉴撰】 胡文敬公集三卷 【明胡居仁撰】 小鸣稿十卷 【明秦王朱诚泳撰】 方简肃文集十卷 【明方良永撰】 怀星堂集三十卷 【明祝允明撰】 整庵存稿二十卷 【明罗钦顺撰】 东江家藏集四十二卷 【明顾清撰】 空同集六十六卷 【明李梦阳撰】 山斋集二十四卷 【明郑岳撰】 浮湘集四卷山中集四卷凭几集五卷续集二卷息园存稿诗十四卷文九卷缓恻集一卷 【明顾璘撰】 华泉集十四卷 【明边贡撰】 刘清惠集十二卷 【明刘麟撰】 垂光集二卷 【明周玺撰】 东田遗稿二卷 【明张羽撰】 沙溪集二十三卷 【明孙绪撰】 王文成全书三十八卷 【明王守仁撰】 双溪集八卷 【明杭淮撰】

对山集十卷【明康海撰】 柏斋集十一卷【明何瑭撰】 竹涧文集八卷奏议四卷【明潘希曾撰】 大复集三十八卷【明何景明撰】 洹词十二卷【明崔铣撰】 庄渠遗书十二卷【明魏校撰】 俨山集一百卷续集十卷【明陆深撰】 迪功集六卷附谈艺录一卷【明徐祯卿撰】 郑少谷集二十五卷【明郑善夫撰】 太白山人漫稿八卷【明孙一元撰】 苑洛集二十二卷【明韩邦奇撰】 东洲初稿十四卷【明夏良胜撰】 升庵集八十一卷【明杨慎撰】 东岩集六卷【明夏尚朴撰】 灋溪草堂稿五十八卷【明孙承恩撰】 方斋诗文集十卷【明林文俊撰】 考功集十卷【明薛蕙撰】 云村文集十四卷【明许相卿撰】 小山类稿十二卷【明张岳撰】 梦泽集二十三卷【明王廷陈撰】 泰泉集十卷【明黄佐撰】 甫田集三十五卷附录一卷【明文征明撰】 西村诗集二卷补遗一卷【明朱朴撰】 天马山房遗稿八卷【明朱泚撰】 苏门集八卷【明高叔嗣撰】 愚谷集十卷【明李舜臣撰】 遵岩集二十五卷【明王慎中撰】 陆子余集八卷【明陆粲撰】 念庵集二十二卷【明罗洪先撰】 皇甫司勋集六十卷【明皇甫汈撰】 杨忠介集十三卷附录三卷【明杨爵撰】 荆川集十二卷【明唐顺之撰】 皇甫少元集二十六卷外集十卷【明皇甫涪撰】 瑶石山人稿十六卷【明黎民表撰】 南行集四卷东游集二卷北观集四卷山中集十卷【明邱云霄撰】 洞麓堂集十卷【明尹台撰】 张庄僖文集五卷【明张永明撰】 具茨集五卷补遗一卷文集八卷补遗一卷附录一卷遗稿一卷【明王立道撰】 青霞集十一卷年谱一卷【明沈炼撰】 沧溟集三十卷附录一卷【明李攀龙撰】 山海漫谈三卷附录二卷【明任环撰】 杨忠愍集三卷附录一卷【明杨继盛撰】 弇州山人四部稿一百七十四卷续稿二百七卷【明王世贞撰】 读书后八卷【明王世贞撰】 方麓集十六卷【明王樵撰】 存家诗稿八卷【明杨巍撰】 海壑吟稿十一卷【明赵完璧撰】 伐檀斋集十二卷【明张元凯撰】 备忘集十卷【明海瑞撰】 石洞集十八卷【明叶春及撰】 宗子相集十五卷【明宗臣撰】 衡庐精舍藏稿三十卷续稿十一卷【明胡直撰】 薜荔园集四卷【明余翔撰】 郭鯤溟集四卷【明郭谏臣撰】 亦玉堂稿十卷【明沈鲤撰】 温恭毅公集三十卷【明温纯撰】 震川文集三十卷别集十卷【明归有光撰】 四溟集十卷【明谢

榛撰】 蟻螻集五卷 【明卢柟撰】 少室山房
类稿一百二十卷 【明胡应麟撰】 谷城山馆诗集二十卷 【明于慎行撰】 宗伯
集十卷 【明孙继皋撰】 临皋文集四卷 【明
杨寅秋撰】 澹然轩集八卷 【明余继登撰】 泾皋藏稿二十二卷 【明顾宪成撰
】 小辨斋偶存八卷附事定录三卷 【明顾允成
撰】 高子遗书十二卷附录一卷 【明高攀龙撰】 冯少墟集二十二卷 【明冯从
吾撰】 石隐园藏稿八卷 【明毕自严撰】 仰
节堂集十四卷 【明曹于汴撰】 愿学集八卷 【明邹元标撰】 刘戡山集十七卷
【明刘宗周撰】 学古绪言二十五卷 【明娄
坚撰】 檀园集十二卷 【明李流芳撰】 忠介烬余集三卷 【明周顺昌撰】 范文
忠集十二卷 【明范景文撰】 幔亭诗集十五
卷 【明徐燧撰】 孙白谷集六卷 【明孙传庭撰】 集玉山房稿十卷 【明葛昕撰
】 宋布衣集三卷 【明宋登春撰】 忠肃集
三卷 【明卢象升撰旧题忠烈集从原谥也今改谥忠肃题今名】 倪文贞集十七卷
续编三卷奏疏十二卷讲编四卷诗集二卷 【明倪
元璐撰】 凌忠介集六卷 【明凌义渠撰】 茅檐集八卷 【明魏学洵撰】 申忠愍
诗集六卷 【明申佳允撰】 陶庵全集二十二
卷 【明黄淳耀撰】

以上见文渊阁著录

明宣宗诗文一卷 【明宣宗御制】 御制回文诗一卷 【不着朝代】 元宫词
一卷 【不着撰人名氏】 枫林集十卷 【明朱
升撰】 槎翁集八卷 【明刘崧撰】 野庄集六卷 【明王钝撰】 沧浪棹歌一卷
【明陶宗仪撰】 危学士全集十四卷 【明危
素撰】 元释集一卷 【明释克新撰】 爱礼集十卷 【明刘驷撰】 坦斋文集二卷
【明刘三吾撰】 一斋集十六卷 【明朱善
撰】 甘白集六卷 【明张适撰】 秣坡诗稿七卷附录一卷 【明黎贞撰】 竹居集
一卷 【明王珙撰】 别本袁海叟诗集四卷 【
明袁凯撰】 安分斋集十卷 【明郑本忠撰】 三畏斋集四卷 【明朱吉撰】 新本
白石山房稿五卷 【明张孟兼撰】 静庵集一
卷 【明张羽撰】 陈竹山文集四卷 【明陈诚撰】 退庵遗稿七卷 【明邓林撰】
尹讷庵遗稿八卷附录二卷 【明尹昌隆撰】
黄介庵集十一卷 【明黄淮撰】 豕宰文集一卷 【明张紘撰】 王天游集十卷 【
明王达撰】 黄忠宣集八卷 【明黄福撰】
坦庵文集八卷 【明梁本之撰】 桐屿集四卷 【明释德祥撰】 松月集一卷 【明

释睿略撰】 林公辅集三卷 【明林右撰】
逃虚子集十一卷类稿补遗八卷 【明姚广孝撰】 光庵集二卷 【明王宾撰】 别
本东里文集二十五卷 【明杨士奇撰】 胡文穆
集二十卷 【明胡广撰】 节庵集八卷续编一卷 【明高得昉撰】 存轩集无卷数
【明赵友同撰】 澹然集五卷 【明陈敬宗撰
】 寅庵集三卷外集四卷附录一卷 【明罗肃撰】 觉非集十卷 【明罗亨信撰】
西墅诗集十卷 【明曾棨撰】 东墅诗集六卷
【明周述撰】 质庵文集无卷数 【明章敞撰】 南斋摘稿十卷 【明魏骥撰】 东
冈集十卷 【明柯暹撰】 石潭存稿三卷 【
明刘髦撰】 若金集二卷 【明彭百炼撰】 岁寒集二卷 【明孙瑀撰】 芳洲集十
卷 【明陈循撰】 东行百咏集句九卷附芳洲
年谱一卷 【明陈循撰】 袜线集十五卷 【明萧仪撰】 半隐集十卷 【明陈衡撰
】 石溪文集七卷附录一卷 【明周叙撰】
寻乐文集二十卷 【明习经撰】 松臞集二十八卷 【明曾鹤龄撰】 河汾诗集八
卷 【明薛瑄撰】 啸台集二十卷木天清气集十
四卷 【明高棅撰】 道山集六卷 【明郑棠撰】 恒轩集六卷 【明韩经撰】 西
涧文集十六卷 【明熊直撰】 凤鸣后集十卷
【明郑楷撰】 贯珠编贝集五卷 【明沈行撰】 敝帚集二卷 【明陈益撰】 草窗
集一卷 【明刘溥撰】 澹轩集七卷 【明马
愉撰】 别本澹轩集八卷 【明马愉撰】 尚约居士集无卷数 【明萧铤撰】 廖恭
敏佚稿一卷附录一卷 【明廖庄撰】 淡轩稿
十二卷补遗一卷 【明林文撰】 吴竹坡文集五卷诗集二十八卷 【明吴节撰】
云川文集六卷附恭愍遗文一卷 【明锺复撰】
松岗集十一卷 【明姜洪撰】 畏庵集十卷 【明周旋撰】 桐山诗集十卷 【明王
伟撰】 呆斋集四十五卷 【明刘定之撰】
完庵诗集一卷 【不着撰人名氏今考定为刘珏撰】 刘文介公集三十卷 【明刘俨
撰】 姚文敏集八卷 【明姚夔撰】 兰轩集四
卷 【明沈彬撰】 静轩集十三卷 【明陈宜撰】 商文毅公集十卷 【一名素庵集
明商辂撰】 蓁竹堂稿八卷 【明叶盛撰】
卞郎中诗集七卷 【明卞荣撰】 彭文宪集四卷 【明彭时撰】 刘古直集十六卷
【明刘翊撰】 王端毅文集九卷 【明王恕撰
】 鸣秋集二卷 【明赵迪撰】 王文肃集十二卷 【明王■〈亻与〉撰】 王太傅
集二卷 【明王越撰】 王襄敏集二卷续集一
卷 【明王越撰】 野庵文集十卷 【明吴宣撰】 奉使录二卷 【明张盩撰】 彭

文思集六卷【明彭华撰】 耻庵集十卷【明陈炜撰】 礼庭吟二卷【明孔承庆撰】 耕石斋石田集九卷【明沈周撰】 桂坡集十五卷【明左赞撰】 别本彭惠安公文集七卷附录一卷【明彭韶撰】 余力稿十二卷【明徐贯撰】 栗庵遗稿二卷【明郑环撰】 东白集二十四卷【明张元祜撰】 定庵集五卷【明张悦撰】 巽川集十六卷附录二卷【明祁顺撰】 东园诗集续编八卷【明郑纪撰】 东泷遗稿四卷【明彭教撰】 闵庄懿集八卷【明闵珪撰】 桃溪净稿八十四卷【明谢铎撰】 沧州集十卷续集二卷【明张泰撰】 西山类稿五卷【明谢复撰】 陈剩夫集四卷【明陈真晟撰】 履坦幽怀集二卷【明祝淇撰】 思元集十六卷【明桑悦撰】 涑水集二卷【明文洪撰】 龙皋文稿十九卷【明陆简撰】 东海文集五卷【明张弼撰】 东皋文集十三卷附录一卷【明陆渊之撰】 张文僖公文集十四卷诗集二十二卷【明张升撰】 使东日录一卷【明董越撰】 太和堂集六卷【明屠勋撰】 交石类稿三卷【明吴文度撰】 文温州集十二卷【明文林撰】 孙清简公集二卷【明孙需撰】 石淙稿十九卷【明杨一清撰】 东溪稿十卷【明邓庠撰】 梅岩小稿三十卷【明张旭撰】 东田漫稿六卷【明马中锡撰】 别本东田集十五卷【明马中锡撰】 镇南行稿四卷附录一卷【明苏章撰】 七星诗文存十二卷【明刘鸿撰】 碧川文选四卷【明杨守址撰】 西征集无卷数【明林俊撰】 半江集十五卷【明赵宽撰】 柴墟斋集十五卷【明储懋撰】 虚斋先生遗集十卷【明祝萃撰】 蔡文庄集八卷【明蔡清撰】 雪洲文集十四卷【明黄瓚撰】 雨村集四卷【明周东撰】 松筹堂集十二卷【明杨循吉撰】 都下赠僧诗一卷【明杨循吉撰】 菊花百咏一卷【明杨循吉撰】 斋中拙咏一卷【明杨循吉撰】 灯窗末艺一卷攒眉集一卷【明杨循吉撰】 东所文集十三卷【明张诩撰】 南海杂咏十卷【明张诩撰】 李大厓集二十卷附录一卷【明李承箕撰】 费文宪集选要七卷【明费宏撰】 湘皋集三十三卷【明蒋冕撰】 别本熊峰集四卷【明石珪撰】 堇山集十五卷【明李堂撰】 西轩效唐集录十二卷【明丁养浩撰】 鳌峰类稿二十六卷【明毛纪撰】 赤城集二十三卷【明夏鍬撰】 西巡类稿八卷【明吴廷举撰】 月湖集四十八卷【明杨廉撰】 程念斋集十卷【明程楷撰】 东

峤集十五卷【明李承芳撰】 戒庵文集二十卷【明靳贵撰】 集古梅花诗四卷【明童琥撰】 白露山人遗稿二卷【明黄傅撰】 鹤滩集六卷【明钱福撰】 勉斋遗稿三卷【明郑满撰】 毛文简集二卷【明毛澄撰】 何燕泉诗四卷【明何孟春撰】 吴文端集四十卷【明吴一鹏撰】 姚东泉文集八卷【明姚镛撰】 静芳亭摘稿八卷【明陈洪谟撰】 矩洲集十卷附樗亭集一卷【明黄衷撰】 仁峰文集二十四卷外集一卷【明汪循撰】 漾陂集十六卷续集三卷【明王九思撰】 南川稿十二卷【明陶谐撰】 庄敏集八卷附兰渚遗稿十卷【明陶谐撰】 静观堂集十四卷【明顾潜撰】 阳明要书八卷附录五卷【明王守仁撰】 王阳明集十六卷【明王守仁撰】 阳明文钞二十卷【明王守仁撰】 阳明全集二十卷传习录一卷语录一卷【明王守仁撰】 张伎陵集七卷【明张凤翔撰】 凌溪集十八卷【明朱应登撰】 贞翁淨稿十二卷【明周伦撰】 白斋竹里集七卷【明张琦撰】 梦蕉存稿四卷【明游潜撰】 对山集十九卷【明康海撰】 王氏家藏集六十八卷【一名浚川集明王廷相撰】 内台集七卷【明王廷相撰】 鲁文恪存集十卷【明鲁铎撰】 山堂萃稿十六卷【明徐问撰】 白石野稿十七卷【明林魁撰】 水南稿十九卷【明陈霆撰】 周恭肃集十六卷【明周用撰】 樗林摘稿三卷附录一卷【明秦镗撰】 未斋集二十二卷【明顾鼎臣撰】 铃山堂集三十五卷【明严嵩撰】 洵词别本十七卷附录四卷【明崔铣撰】 甘泉集三十二卷【明湛若水撰】 白沙诗教解十卷诗教外传五卷【明陈献章撰湛若水注】 石川集四卷附集一卷【明殷云霄撰】 孟有涯集十七卷【明孟洋撰】 梅国集四十一卷【明刘节撰】 宝制堂私录二卷【明刘节撰】 玉岩集九卷附录一卷【明周广撰】 倪小野集二十二卷【明倪宗正撰】 治斋集十七卷【明万镗撰】 南原集七卷【明王韦撰】 西樵遗稿八卷【明方献夫撰】 行远集行远外集无卷数【明陆深撰】 雪窗诗六卷【明吴爰撰】 霞城集二十四卷【明程诰撰】 类稿十卷【明涂几撰】 士斋集三卷【明女子邹赛贞撰】 丹岩集十卷【明黄云撰】 东壁遗稿二卷【明蒋焘撰】 寻乐堂集十一卷【明王烈撰】 康谷子集六卷【明刘养微撰】 句曲纪游诗一卷【明朱凯撰】 谦光堂诗集八卷【明文城王朱弥钳撰】 省愆稿五卷【明刘魁撰】

】 禺山文集一卷诗集四卷 【明张含撰】 泾野集三十六卷 【明吕柟撰】 矫亭存稿十八卷续稿八卷 【明方鹏撰】 韩五泉诗集四卷附录二卷 【明韩邦靖撰】 乌鼠山人集二十九卷 【明胡缵宗撰】 拟涯翁拟古乐府二卷 【明胡赞宗撰】 拟汉乐府八卷 【明胡缵宗撰】 邃谷集十二卷 【明戴冠撰】 少岷拾存稿四卷附司徒大事记一卷 【明曾琦撰】 毛襄懋集十八卷 【明毛伯温撰】 东塘诗集十卷 【明毛伯温撰】 欧阳恭简集二十二卷 【明欧阳铎撰】 东畲集十四卷 【明钱琦撰】 峰溪集五卷外集一卷 【明孙玺撰】 棠陵集八卷 【明方豪撰】 锺筠溪家藏集三十卷 【明锺芳撰】 丁吏部文选八卷 【明丁奉撰】 渔石集四卷 【明唐龙撰】 涂水集八卷 【明寇天叙撰】 东廓集十二卷 【明邹守益撰】 阳峰家藏集三十五卷 【明张璧撰】 黼庵遗稿十卷 【明柴奇撰】 巽峰集十二卷附录一卷 【明尹襄撰】 平田诗集二卷 【明管楫撰】 费文通集选要六卷 【明费宥撰】 东岩诗集八卷 【明夏尚朴撰】 古庵文集十卷 【明毛宪撰】 蓉川集七卷 【明齐之鸾撰】 节爱汪府君诗集二卷 【明汪文盛撰】 后斋遗稿二卷 【明陈宪撰】 桃谷遗稿一卷 【明陆俸撰】 渐斋诗草二卷 【明赵汉撰】 襄敏集四卷 【明王以旗撰】 琴溪集八卷 【明陈寰撰】 八厓集十三卷 【明周廷用撰】 常评事集一卷 【明常伦撰】 鸥汀长古集二卷前集二卷别集二卷续集一卷渔啸集二卷顿诗一卷 【明顿锐撰】 杏东集十卷 【明郭维藩撰】 海涯集十卷 【明顾盘撰】 南湖诗集四卷 【明张縯撰】 古山集四卷 【明桂华撰】 渭厓文集十卷 【明霍韬撰】 西原遗书二卷 【明薛蕙撰】 溪田文集十一卷补遗一卷 【明马理撰】 颐山私稿十卷 【明吴仕撰】 南泠集十二卷 【明蒋山卿撰】 函山集十卷 【明刘天民撰】 嵩渚集一百卷 【明李濂撰】 观政集一卷 【明李濂撰】 洞阳诗集二十卷 【明顾可久撰】 人瑞翁集一卷 【明林春泽撰】 谷平文集五卷 【明李中撰】 石居漫兴稿二卷 【明陈器撰】 明水文集十四卷 【明陈九川撰】 鹿原存稿九卷 【明戴钦撰】 黄洛邨集二卷 【明黄宏纲撰】 双江文集十四卷 【明聂豹撰】 东洲集二十卷续集十卷 【明崔桐撰】 东麓稿十卷 【明汪佃撰】 青湖文集十四卷 【明汪应轸撰】 紫峰集十三卷 【明陈琛撰】 青萝文集二十卷 【明王渐逵撰】 公元

集八卷【明马汝骥撰】戴中丞遗集八卷【明戴黻撰】笔峰存稿五卷【明王凤灵撰】桂洲集十八卷【明夏言撰】朱福州集六卷【明朱豹撰】过庭私录七卷外集一卷【明吴鼎撰】半洲稿四卷【明张经撰】郑思斋文集一卷【明郑洛书撰】林次崖集十八卷【明林希元撰】陆少石集十三卷【明陆钺撰】少华集四卷【明詹泮撰】介塘文略一卷【明王相撰】栋峰遗稿二卷【明曾梧撰】龙湖文集十五卷【明张治撰】张水南集十一卷【明张袞撰】张文忠集十九卷【明张孚敬撰】宏艺录三十二卷【明邵经邦撰】羣玉楼集八卷【明李默撰】柘山稿一卷【明田頔撰】甓余集十二卷【明朱紈撰】李征伯存稿十三卷【明李兆先撰】董从吾稿一卷【明董澐撰】嗜泉诗存二卷附录一卷【明李璋撰】谭樵海集六卷附幽谷集一卷霜岩集一卷【明谭焕撰】宝性理吟二卷【明谭宝焕撰】玩鹿亭稿八卷附录一卷【明裘万撰】鸿泥堂小稿八卷续稿十卷东原集七卷【明杜琼撰】畚山人诗集四卷【明畚世亨撰】雅宜集十卷【明王宠撰】少鹤诗集八卷【明朱显槐撰】雁湖钓叟自在吟九卷附录一卷【明王周撰】十岳山人诗集四卷【明王寅撰】边仲子诗一卷【明边习撰】世经堂集二十六卷【明徐阶撰】少湖文集七卷【明徐阶撰】欧阳南野集三十卷【明欧阳德撰】南野文选四卷【明欧阳德撰】笠江集十二卷【明潘恩撰】章介庵集十一卷【明章袞撰】芝园定集五十一卷别集十一卷【明张时彻撰】赘疣录九卷续录二卷【明顾梦圭撰】北泉集无卷数【明蓝田撰】石比部集八卷【明石英中撰】飞鸿亭集二十卷【明吴鹏撰】叶海峰文集一卷【明叶良佩撰】两崖集八卷【明朱廷立撰】水西居士集八卷【明华钥撰】春溪诗集四卷【明狄冲撰】王凤林文集四卷诗集三卷【明王从善撰】中川遗稿三十三卷【明王教撰】水洲文集四卷【明魏良弼撰】东游集一卷【明黄金撰】北海野人稿一卷【明黄祯撰】漳埜文集八卷【明李新芳撰】端简文集十二卷【明郑晓撰】娄子敬文集六卷【明娄枢撰】梅樵先生集二十一卷【明陈鹤撰】长谷集十五卷【明徐献忠撰】胥台集二十卷【明袁袞撰】赵浚谷集十六卷【明赵时春撰】别本浚谷十七卷【明赵时春撰】云岗选稿二十卷【明冀用卿撰】东汇

诗集十卷【明吕希周撰】 陆篔斋集十卷外
集二卷【明陆瑛撰】 田叔禾集十二卷【明田汝成撰】 玩芳堂摘稿四卷【明
王慎中撰】 江午坡集四卷【明江以达撰】
白堯录二十卷【明冯恩撰】 少泉集三十三卷【明王格撰】 谷原文草四卷【
明苏佑撰】 谷原集十卷【明苏佑撰】 岳
云石集五卷【明岳伦撰】 金陵览胜诗一卷【明章恩撰】 别本罗念庵集十三
卷【明罗洪先撰】 松溪集十卷【明程文德
撰】 程文恭遗稿三十二卷【明程文德撰】 周汉中集四卷【明周显宗撰】 南
北奉使集二卷【明唐顺之撰】 陈后冈诗集
一卷文集一卷【明陈束撰】 燕诒录十三卷【明孙应奎撰】 胡庄肃集六卷【
明胡松撰】 别本胡庄肃集八卷【明胡松撰
】 鹤田草堂集十卷【明蔡云程撰】 熊南沙文集八卷【明熊过撰】 环溪集六
卷【明沈恺撰】 闲居集十二卷【明李开
先撰】 蔡可泉集十五卷【明蔡克廉撰】 端肃公集十卷【明葛守礼撰】 知白
堂稿十四卷【明翁溥撰】 张静思文集十卷
附录二卷【明张选撰】 洩滨集十卷附录二卷【明蔡爟撰】 崔笔山文集十卷
【明崔涯撰】 环碧斋诗集三卷尺牘三卷【
明祝世祿撰】 司勋文集八卷【明罗虞臣撰】 五岳山人集三十八卷【明黄省
曾撰】 蓉山集十六卷【明董燧撰】 孔文谷
诗集十四卷【明孔天允撰】 孔文谷文集十六卷续集四卷别本诗集二十四卷【
明孔天允撰】 霞海篇一卷【明孔天允撰】
佑山文集十卷诗集四卷【明冯汝弼撰】 粤台稿二卷【明谢少南撰】 序芳园
稿二卷【明赵伊撰】 菲泉存稿八卷【明来
汝贤撰】 洛原遗稿八卷【明白悦撰】 蒋道林文粹九卷【明蒋信撰】 巾石遗
编一卷【明吕怀撰】 闵午塘诗集七卷【
明闵如霖撰】 冰玉堂缀逸稿二卷兰舟漫稿一卷附二余词一卷【明陈如纶撰】
包侍御集六卷【明包节撰】 承启堂稿二十九
卷【明钱薇撰】 自知堂集二十四卷【明蔡汝楠撰】 泾林集八卷【明周复俊
撰】 龙溪全集二十卷【明王畿撰】 龙溪
语录八卷【明王畿撰】 王侍御集七卷【明王瑛撰】 少峰草堂诗集一卷【明
林应亮撰】 寒村集四卷【明苏志皋撰】
东白草堂集四卷【明顾存仁撰】 期斋集十四卷【明吕本撰】 璞冈集三卷【
明马汝彰撰】 许水部稿三卷【明许应元撰
】 元光漫稿五卷【明李征撰】 苕心堂集二卷【明王尚文撰】 白云山房集二

卷【明高应冕撰】求志斋言草三十卷【明陈瀚撰】孙文恪集二十卷附录一卷【明孙升撰】西野遗稿十四卷【明李玘撰】文肃集二十三卷【明赵贞吉撰】骆两溪集十四卷附录一卷【明骆文盛撰】奚囊蠹余二卷【明张瀚撰】珽川诗集八卷【明施峻撰】陈梧冈集九卷【明陈尧撰】骊山集十四卷【明赵统撰】方山文录二十二卷【明薛应旗撰】两城集二十卷【明靳学颜撰】嵩阳集无卷数【明刘绘撰】王氏存笥稿二十卷【明王维楨撰】天山草堂存稿八卷【明何维柏撰】金斋集四卷【明宋诺撰】沈凤冈集四卷【明沈良才撰】陈文冈集二十卷【明陈棐撰】省中稿二卷二台稿二卷归田稿十卷【明许谷撰】徐阳溪集六卷【明徐灿撰】见沧文集十五卷【明茅瓚撰】袁文荣诗略二卷【明袁炜撰】爱吾庐集八卷【明徐良傅撰】崇兰馆集二十卷【明莫如忠撰】陈两湖集三十四卷【明陈昌积撰】松风轩藏稿八卷【明陈昌积撰】己宽堂集四卷【明陈鎰撰】钱永州集八卷【明钱芹撰】阳华漫稿十四卷【明章焕撰】天目山斋岁编二十四卷【明吴维岳撰】白华楼藏稿十一卷续稿十五卷吟稿八卷玉芝山房稿二十二卷耄年录七卷【明茅坤撰】大拙堂集九卷【明杨载鸣撰】大司空遗稿十卷【明陈绍儒撰】让溪甲集四卷乙集十卷【明游震得撰】鸡土集六卷【明刘干撰】青峰存集十二卷【明江柏撰】同春堂遗稿四卷【明刘熠撰】泌园集三十七卷【明董份撰】严文靖公集十二卷【明严讷撰】高文襄公集四十四卷【明高拱撰】玉堂公草十卷【明高拱撰】万子迂谈八卷【明万衣撰】履庵集十二卷【明万士和撰】石龙庵诗草四卷附刊二卷【明徐学诗撰】山带阁集三十三卷【明朱曰藩撰】石室秘钞五卷【明魏文焮撰】白雪楼诗集十卷【明李攀龙撰】李沧溟集选四卷【明李攀龙撰宋光庭选】敬所文集三十卷【明王宗沐撰】师暇哀言十二卷【明吴桂芳撰】五鹄别集二卷【明卢宁撰】崇质堂集二十卷【明李万实撰】小海存稿八卷【明冯覲撰】太乙诗集五卷【明张炼撰】无闻堂稿十七卷【明赵鈇撰】郭东山文集七卷诗集二卷【明郭文周撰】百川集十二卷【明孙楼撰】貽安堂集十卷【明李春芳撰】太岳集四十六卷【明张居正撰】余清堂稿三十二卷【明汪鏜撰】念初堂稿四

卷续集二卷 【明陈嘉谟撰】 友庆堂合稿七卷
【明王时槐撰】 周叔夜集十一卷 【明周思兼撰】 凤洲笔记二十四卷续集四卷
后集四卷 【明王世贞撰】 弇州稿选十六卷
【明王世贞撰沈一贯选】 文恪集二十二卷 【明林嫌撰】 三洲诗脍八卷 【明
沈淮撰】 金輿山房稿十四卷 【明殷士儋撰
】 道峰集六卷 【明章适撰】 彭比部集八卷 【明彭辂撰】 华阳馆文集十七卷
续集二卷 【明宋仪望撰】 华阳文集十二卷
【明宋仪望撰】 太函集一百二十卷 【明汪道昆撰】 副墨五卷 【明汪道昆撰
】 汪次公集十二卷 【明汪道贯撰】 江右诗
稿二卷 【明李先芳撰】 李氏山房诗选六卷 【明李先芳撰】 北虞先生遗文八
卷 【明邵圭洁撰】 平山文集八卷诗集八卷
【明何涛撰】 子威集三十二卷 【明刘凤撰】 素园存稿十八卷 【明方宏静撰
】 云山堂集六卷 【明魏裳撰】 大雅堂摘稿
无卷数 【明况叔祺撰】 居来山房集六十五卷 【明张佳允撰】 天目山堂集二
十卷附录一卷 【明徐中行撰】 青萝馆诗六卷
【明徐中行撰】 余德甫集十四卷 【明余曰德撰】 丰阳集十二卷 【明冯皋谟
撰】 采薇集四卷幽贞集二卷邕歛集六卷 【
明董传策撰】 甌甌洞稿五十四卷续稿二十七卷 【明吴国伦撰】 苏山集二十卷
【明陈柏撰】 苏山选集七卷 【明陈柏撰黄
谦选】 小渔遗藁十二卷 【明唐汝楫撰】 春明藁十四卷 【明徐学谟撰】 徐氏
海隅集四十卷 【明徐学谟撰】 归有园藁二
十九卷 【明徐学谟撰】 留余堂集四卷 【明潘季驯撰】 李温陵集二十卷 【明
李贽撰】 周禹川集五卷 【明周大章撰】
羽王先生集略无卷数 【明张鸣凤撰】 子相文选五卷 【明宗臣撰郑二阳选】
九愚山房诗集十三卷 【明何东序撰】 惺堂文
集十四卷 【明史桂芳撰】 曹太史含斋集十六卷 【明曹大章撰】 姜凤阿文集
三十八卷 【明姜宝撰】 虚籟集十四卷 【明
刘尧诲撰】 绿波楼诗集十四卷 【明张九一撰】 学孔精言舍汇藁十二卷 【明
孙应鳌撰】 百可亭摘藁九卷 【明庞尚鹏撰】
石泉山房文集十卷 【明郭汝霖撰】 李子田文集四卷 【明李蓑撰】 近溪子文
集五卷 【明罗汝芳撰】 愧非集十四卷 【明
马攀龙撰】 震堂集六卷 【明王养端撰】 潜学藁十二卷 【明邓元锡撰】 耿天
台文集二十卷 【明耿定向撰】 济美堂集八
卷 【明吴文华撰】 屏居集八卷浪游集六卷耕余集八卷 【明姚汝循撰】 济美

堂集六卷【明陈瓚撰】 兰晖堂集四卷【明屠应竣撰】 怡云堂集十卷【明蔡国珍撰】 心泉集二十五卷【明何源撰】 张洵东集十四卷【明张鹵撰】 华阳洞稟二十二卷【明张祥鸢撰】 王奉常集六十九卷【明王世懋撰】 关洛记游稟二卷【明王世懋撰】 赐闲堂集四十卷【明申时行撰】 王文肃集五十二卷附录二卷【明王锡爵撰】 观我堂摘稟十二卷【明李材撰】 敬和堂集八卷【明许孚远撰】 卫阳集十四卷【明周世选撰】 海亭集四卷【明郑普撰】 覆瓿草六卷【明林烜撰】 逍遥园集二十卷【明穆文熙撰】 处实堂集八卷【明张凤翼撰】 文起堂集十卷【明张献翼撰】 纨绮集一卷【明张献翼撰】 狎鸥子摘稟一卷【明吴崇节撰】 鲁望集十二卷【明袁尊尼撰】 天池草二十六卷【明王宏诲撰】 谢山存稟十卷【明陈吾德撰】 震川文集初本三十二卷【明归有光撰】 二酉园诗集十二卷文集十四卷续集二十三卷【明陈文烛撰】 杨端洁集无卷数【明杨时乔撰】 洪洲类稟四卷【明王圻撰】 宝善堂稟二卷【旧本题朱宗川撰不着时代】 山居集八卷【明栗应宏撰】 吾野漫笔十三卷【明许炯撰】 俞仲蔚集二十四卷【明俞允文撰】 天隐子遗稟十七卷【明严果撰】 汪山人集十八卷【明汪少廉撰】 大鄣山人集五十三卷【明吴子玉撰】 何翰林集二十二卷【明何良俊撰】 芸晖馆稟十四卷【明茅翁积撰】 兔园草六卷【明曹干学撰】 黄说仲诗草十八卷【明黄惟楫撰】 被褐先生稟十七卷【明华善述撰】 童子鸣集六卷【明童佩撰】 松韵堂集十二卷【明孙七政撰】 王世周集二十卷【明王伯稠撰】 壮游编三卷【明王叔承撰】 吴越游草八卷【明王叔承撰】 涉江诗选七卷【明潘之恒撰袁宏道删定】 蓼蓼集四十卷【明俞安期撰】 江山人集七卷【明江瓘撰】 尚元草八卷咏物诗二卷【明姚充撰】 少岳集四卷【明项元淇撰】 蛞蝓集八卷【明郑若庸撰】 北游漫稟二卷【明郑若庸撰】 越草一卷【明沈明臣撰】 丰对楼诗选四十三卷【明沈明臣撰】 徐文长集三十卷【明徐渭撰】 徐文长逸稟二十四卷【明徐渭撰】 朱邦宪集十五卷【明朱察卿撰】 白阳集无卷数【明陈淳撰】 隆池山樵集二卷【明彭年撰】 止止堂集五卷【明戚继光撰】 句漏集四卷【明顾起纶撰】 赤城集三卷【明顾起纶撰】 卯洞集四卷【

明徐珊撰】 傅山人集三卷 【明傅汝舟撰】
包参军集六卷 【明包大中撰】 沧沔集八卷 【明张重华撰】 栗斋文集十一卷
【明金瑶撰】 槃庵集二卷 【明汪禔撰】
湛然堂诗稟无卷数 【明陈汝珩撰】 龟川诗集四卷 【明董绪撰】 田子艺集二
十一卷 【明田艺蘅撰】 方建元诗集十二卷续
集一卷 【明方于鲁撰】 石西集八卷附崇礼堂诗一卷 【明汪子祐撰】 石孟集
十七卷 【明汪坦撰】 石门诗集一卷 【一名
霞居集明高澥撰】 东厓遗集二卷 【明王襞撰】 儻寮集一卷 【旧本题古杭月
堂宗贤撰】 松菊堂集二十四卷 【明孙鏊撰】
郑京兆集十二卷外集二卷 【明郑心材撰】 冬溪集二卷 【明释方泽撰】 徐花
潭集二卷 【明嘉靖中朝鲜生员徐敬德撰】 沧
海披沙集十三卷 【明朱理阶撰】 芝堂遗草七卷 【明叶朝荣撰】 四游稟六卷
【明赵志皋撰】 朱秉器集八卷 【明朱孟震
撰】 谷城山馆文集四十二卷 【明于慎行撰】 庞眉生集十六卷 【明于慎思撰
】 程幼博集六卷 【明程大约撰】 云东拾草
十四卷附录一卷 【明韩世能撰】 玉恩堂集九卷附录一卷 【明林景昉撰】 醒
后集五卷续集一卷附京省次五卷 【明卢维禎
撰】 朱文懿文集十二卷 【明朱賡撰】 王文端集十四卷 【明王家屏撰】 溪山
堂草四卷 【明沈思孝撰】 天远楼集二十七
卷 【明徐显卿撰】 华礼部集八卷 【明华叔阳撰】 闲云馆集钞六卷 【明张位
撰】 江岷岳文集四卷 【明江以东撰】 钟
台集十二卷 【明田一儁撰】 大泌山房集一百三十四卷 【明利瓦伊禎撰】 刘
聘君全集十二卷 【明刘元卿撰】 不二斋文选七
卷 【明张元忭撰】 粤卅十卷蜀卅七卷 【明郭子章撰】 晋卅九卷楚卅十二卷
家卅七卷 【明郭子章撰】 黔卅二十一卷 【
明郭子章撰】 李中丞文集二卷 【明李涑撰】 文洁集四卷 【明邓以赞撰】 方
初庵集十六卷 【明方扬撰】 陈如冈文集二
卷 【明陈大科撰】 赐余堂集十四卷 【明吴中行撰】 邹聚所文集六卷外集一
卷 【明邹德涵撰】 研山山人漫集一卷 【明
方盱撰】 苍耳斋诗集十七卷 【明方问孝撰】 交翠馆集十卷 【明万道光撰】
汪禹乂诗集八卷 【明汪淮撰】 巢云轩诗集
六卷续集五卷诗余一卷 【明吴宗儒撰】 卓光禄集三卷 【明卓明卿撰】 卓澄
甫诗续集三卷 【明卓明卿撰】 广燕堂集二十
四卷 【明朱翊■〈金氏〉撰】 梅雪轩诗稿四卷 【明朱敬鑑撰】 乐陶吟草三

卷【明姚舜牧撰】林初文诗选一卷【明林章撰】郁仪楼集五十四卷【明邹迪光撰】石语斋集二十六卷【明邹迪光撰】调象庵稿四十卷【明邹迪光撰】快独集十八卷【明李尧民撰】征南草一卷【明王邦俊撰】林伯子诗草一卷【明林兆珂撰】隅园集十八卷蘋川集八卷【明陈与郊撰】去伪斋文集七卷【明吕坤撰】来禽馆集二十九卷【明邢侗撰】支子余集五十二卷【明支大纶撰】御龙子集七十七卷【明范守己撰】郢巫集十二卷【明范守己撰】场居集二卷田居稿一卷河上稿一卷【明李化龙撰】郊居遗稿十卷【明沈懋学撰】快雪堂集六十四卷【明冯梦祯撰】海门先生集十二卷【明周汝登撰】东越证学录十六卷【明周汝登撰】詹养贞集三卷【明詹事讲撰】片玉集四卷【明陈邦科撰】梅谷集十八卷【明庄履丰撰】宝庵集八卷【明顾绍芳撰】瑞阳阿集十卷【明江东之撰】杨文懿集十二卷【明杨起元撰】松门稿八卷【明王庭譔撰】孟云浦集八卷年谱一卷附录一卷【明孟化鲤撰】梅园集二十卷【明沈一中撰】九芝集选十二卷【明龙膺撰】姑孰集二卷【明章嘉祯撰】崇雅堂集十五卷【明锺羽正撰】负苞堂稿九卷【明臧懋循撰】农丈人文集二十卷诗集八卷【明余寅撰】杨道行集十七卷【明杨于庭撰】青棠诗集八卷【明董嗣成撰】邹孚如集无卷数【明邹观光撰】来复堂集二十五卷【明曾维伦撰】亦为堂集四卷【明史孟麟撰】玉堂遗稿无卷数【明萧良有撰】刘司成集十六卷【明刘应秋撰】方众甫集十四卷【明方应选撰】葛太史集五卷【明葛曦撰】占星堂集十五卷【明唐文献撰】大云集无卷数【明曹璜撰】中秘草三卷【明李沂撰】尊拙堂文集十二卷【明丁元荐撰】永思斋文集六卷【明李日茂撰】溟池集十六卷【明张文柱撰】容台文集九卷诗集四卷别集四卷【明董其昌撰】竹素堂藏稿十四卷【明陈所蕴撰】青藜馆集四卷【明周如砥撰】小山草十卷【明郝敬撰】姜同节集八卷【明姜志礼撰】刘直洲集十卷【明刘文卿撰】吴继疏集十二卷【明吴仁度撰】叶玉成全集四卷附录二卷【明叶永盛撰】李湘洲集十卷补遗一卷【明李腾芳撰】关中集四卷【明余懋衡撰】绿滋馆稿九卷【明吴士奇撰】灵讷阁集八卷【明汤兆京撰】西楼集十八卷【明邓原

岳撰】 繁露园集二十二卷 【明董复亨撰】
袁中郎集四十卷 【明袁宏道撰】 游燕集二卷小草斋稿一卷 【明谢肇淛撰】
芙蓉馆集二卷 【明杨一葵撰】 旭山集十六卷
【明金忠士撰】 石伯成诗稿四卷 【明石九奏撰】 水明楼集十四卷 【明陈荐
夫撰】 折腰漫草八卷 【明华善继撰】 奉使
稿无卷数 【明朱之蕃撰】 清晖馆集二卷 【明谢廷谅撰】 薄游草十五卷 【明
谢廷谅撰】 自愉堂集十卷 【明来俨然撰】
骆台晋文集八卷 【明骆日升撰】 尚友堂集二卷忠谏遗稿一卷 【明林秉汉撰】
元居集九卷附哀荣录一卷 【明李春熙撰】
蛰庵日记四卷 【明顾起元撰】 樗全集七卷附录一卷 【明王畿撰】 大旭山房
集一卷 【明邓渼撰】 百花洲集二卷 【明邓
云霄撰】 解■〈山上〈弓父〉下〉集一卷 【明邓云霄撰】 一斋诗集十三卷
【明陈第撰】 缙山集二十七卷 【明王衡撰】
许锺斗集五卷 【明许獬撰】 刘练江集七卷附录一卷 【明刘永澄撰】 叶子诗
言志十二卷 【明叶秉敬撰】 元凯集五卷 【
明陈勋撰】 白榆集二十卷 【明屠隆撰】 由拳集二十三卷 【明屠隆撰】 玉茗
堂集二十九卷 【明汤显祖撰】 适适斋鉴须
集七卷 【明陈玉辉撰】 辞文介公文集四卷 【明辞三省撰】 丛桂轩集二卷 【
明吴大经撰】 蟋蟀轩草无卷数 【明刘士骥
撰】 四然斋集十卷 【明黄体元撰】 樊致虚诗集四卷 【明樊良枢撰】 峡云阁
存草七卷后存草七卷 【明魏浚撰】 隆德堂
诗文稿二卷 【明魏纯粹撰】 萑言六卷 【明余懋孳撰】 皆春园集四卷 【明陈
完】 达观楼集二十四卷 【明邹维琏撰】
埽余之余三卷附归涂闲纪一卷 【明刘锡元撰】 湛园集十卷 【明程正己撰】
太古堂集二卷 【明高宏图撰】 泊水斋文钞三
卷 【明张慎言撰】 妙远堂集四十卷 【明马之骏撰】 东极篇无卷数 【明文翔
凤撰】 文太青文集二卷 【明文翔凤撰】
慧阁诗八卷 【明陈翼飞撰】 漆园卮言二十四卷 【明庄起元撰】 铜马编二卷
【明杨德周撰】 许灵长集无卷数 【明许光
祚撰】 无欲斋诗钞一卷 【明鹿善继撰】 明德堂文集二十六卷 【明吕维祺撰
】 逸园新诗一卷咏怀诗一卷 【明耿志炜撰】
文敏遗集三卷 【明李国晋撰】 丰麓集七卷 【明吴兆璧撰】 博望山人稿二十
卷 【明曹履吉撰】 蘧园集十卷 【明顾简撰
】 白下集十一卷 【明黄姬水撰】 高素斋集二十九卷 【明黄姬水撰】 黄淳父

集二十四卷 【明黄姬水撰】 元蓋副草二十卷 【明吴稼澄撰】 皆非集二卷附一枝轩吟草一卷 【明万达甫撰】 瞿罔卿集十四卷 【明瞿汝稷撰】 梅颠稿选二十卷 【明周履靖撰陈继儒汇选】 雅尚斋诗草二集二卷 【明高濂撰】 甬东山人稿七卷 【明吕时撰】 李山人诗二卷 【明李生寅撰】 复初集三十六卷 【明方承训撰】 玩画斋杂着编八卷 【明姚翼撰】 性灵稿二卷 【明朱师孔撰】 石秀斋集十卷 【明莫是龙撰】 段黄甫诗稿无卷数 【明段黼撰】 汪遗民诗一卷 【明汪逸撰】 环翠堂坐隐集选四卷 【明汪廷讷撰】 笑拙墅稿一卷 【明金建中撰】 古雪斋近稿一卷 【明朱多颖撰】 荪堂集十卷 【明吴文奎撰】 江皋吟一卷 【明刘师朱撰】 潘象安诗集四卷 【明潘纬撰】 白云集七卷 【明陈昂撰】 黄元龙诗集八卷附尺牋二卷 【明黄奂撰】 张太初集八卷 【明张汝元撰】 吾野诗集五卷 【明黄克晦撰】 梦草堂稿十二卷 【明胡镇撰】 程仲权诗集十卷文集十二卷 【明程可中撰】 丰正元集四卷 【明丰越人撰】 甜雪斋集二十卷 【明单思恭撰】 梅禹金集二十卷 【明梅鼎祚撰】 牒草四卷 【明赵宦光撰】 益斋存稿一卷 【明翁任春撰】 谢耳伯诗集八卷文集十六卷 【明谢兆申撰】 雪浪集二卷 【明释洪恩撰】 空华集二卷 饮河集二卷止啼集一卷石头庵集五卷 【明释如愚撰】 幻华集二卷 【明释斯学撰】 懒园漫稿五卷 【明王寰治撰】 檀雪斋集四十卷 【明胡敬辰撰】 白雪堂诗一卷 【明李嵩撰】 赭留集一卷 【明黄文涣撰】 岳归堂集十卷 【明谭元春撰】 谭友夏合集二十三卷 【明谭元春撰】 谭子诗归十卷 【明谭元春撰】 寸碧堂稿二卷 【明汪膺撰】 此观堂集六卷 【明罗万藻撰】 编篷集十卷后集十五卷 【明唐汝询撰】 国门集一卷国门乙集一卷 【明凌蒙初撰】 贞元子诗草无卷数 【明项穆撰】 绮咏一卷绮咏续集一卷 【明汪汝谦撰】 栖老堂集一卷 【明殷仲春撰】 上生集八卷 【明泰燮撰】 自娱斋诗集二卷 【明黄应征撰】 天启宫中词一卷 【明陈惊撰】 曲涧遗稿十五卷 【明孙奎撰】 赉志斋集十卷 【明陈泰交撰】 玩梅亭诗集二卷 【明柴惟道撰】 丛桂堂全集四卷诗集四卷 【明颜廷榘撰】 芜园诗集六卷 【明葛征奇撰】 陇首集一卷 【明王与允撰】 瑶光阁集十三卷 【明黄端伯撰】 涂子一杯水五卷 【明涂伯昌撰】 敬亭

集十卷补遗一卷【明姜采撰】更生吟无卷数【明高名衡撰】章格庵遗书五卷【明章正宸撰】鹤和篇三卷【明闪仲侗撰】花王阁剩稿一卷【明纪坤撰】雅似堂文集十卷诗集三卷【明文德翼撰】文嘻堂诗集三卷【明朱芾煌撰】心远堂集二十卷【明王永积撰】野获园集二卷【明欧阳铉撰】文斋文集十一卷【明余祚征撰】云樵文集八卷【明程士鯤撰】罗溪阁韵语无卷数【明董养河撰】画响无卷数【明李永昌撰】采菊杂咏一卷【明马宏衡撰】射堂诗钞十四卷【明吴梦阳撰】诚斋文集二卷西铭问答一卷【明施璜撰】榴馆初函集选十二卷【明杨思本撰】东江集钞九卷别集一卷【明沈谦撰】弹剑草无卷数【明陈邦仪撰】乐府一卷【明周道仁撰】王冠九文集无卷数【明王业撰】七十二候诗一卷【明顾德基撰】绣佛斋草一卷【明冯元鼎妻陈氏撰】祝子遗书四卷附录一卷【明祝渊撰】征古堂类稿十八卷【明陈文涛撰】蕘中草一卷蜀中草一卷【明董应扬撰】仁节遗稿无卷数【明陶琰撰】采芝堂集十六卷【明周益祥撰】西溪百咏二卷【明释大善撰】石屋山居诗一卷【旧题石屋禅师撰不着其名】

以上见四库全书存目

别集类凡一千七百三十九部

钦定续通志卷一百六十二

●钦定续通志卷一百六十三 艺文略八

艺文略【八】

文类第十二下【总集 碑碣 制诰 表章 四六 奏议 论策 书 文史 诗评 词曲】

○文类第十二下

总集

碑碣

制诰

表章

四六

奏议

论策

书

文史

诗评

词曲

△总集

唐百家诗选二十卷 【旧本题宋王安石编】 同文馆倡和诗十卷 【宋邓忠臣编】 会稽掇英总集二十卷 【宋孔延之编】
清江三孔集四十卷 【宋王违编】 三刘家集一卷 【宋刘元高编】 二程文集十三卷附录二卷 【宋胡安国编】 坡门酬唱集二十三卷 【宋邵浩编辑】 乐府诗集一百卷 【宋郭茂倩编】 古今岁时杂咏四十六卷 【宋蒲积中编】 严陵集九卷 【宋董棻编辑】 南岳倡酬集一卷附录一卷 【宋朱子与张栻林用中南岳纪游诗】 万首唐人绝句诗九十一卷 【宋洪迈编】 声画集八卷 【宋孙绍远编】 文苑英华辨证十卷 【宋彭叔夏编】 宋文鉴一百五十卷 【宋吕祖谦奉敕编】 古文关键二卷 【宋吕祖谦编】 回文类聚四卷补遗一卷 【宋桑世昌编】 五百家播芳大全文粹一百十卷 【宋魏齐贤叶棻同编】 崇古文诀三十五卷 【宋楼昉编】 成都文类五十卷 【宋程遇孙等八人同编】 文章正宗二十卷续集二十卷 【宋真德秀编】 天台前集三卷前集别编一卷续集三卷续集别编六卷 【宋李庚原木林师葺与子表民增辑】 赤城集十八卷 【宋林表民辑】 妙绝古今四卷 【宋汤汉编】 唐僧宏秀集十卷 【宋李龔编】 众妙集一卷 【宋赵师秀编】 江湖小集九十五卷 【曹本题宋陈起编】 江湖后集二十四卷 【宋陈起编】 三体唐诗六卷 【宋周弼编辑】 柴氏四隐集三卷 【宋柴望等撰】 吴都文粹九卷 【宋郑虎臣编】 古文集成前集七十八卷 【旧题宋王霆震编】 文章轨范七卷 【宋谢枋得编】 月泉吟社诗一卷 【宋吴渭编】 文选补遗四十卷 【宋陈仁子编】 苏门六君子文粹七十卷 【不着编辑名氏】 三国志文类六十卷 【不着编辑名氏】 宋文选三十二卷 【不着编辑名氏】 诗家鼎裔二卷 【不着编辑名氏】 两宋名贤小集一百五十七卷 【旧本题宋陈思编】 中州集十卷附中州乐府一卷 【金元好问编】 唐诗鼓吹十卷 【金元好问编】 二妙集八卷 【金段克己成己诗合编】 瀛奎律髓四十九卷 【元方回编】 谷音二卷 【元杜本编】 梅花百咏一卷 【元冯子振与释明本倡和诗】 河汾诸老诗集八卷 【元房祺编】 天下同文集五

十卷 【中阙六卷元周南瑞编】 古赋辨体八卷外集二卷 【元祝尧编】 圭塘欵
乃集二卷 【元许有壬弟有孚子楨倡和诗】 忠
义集七卷 【元赵景良编】 宛陵羣英集十二卷 【元汪泽民张师愚同编】 元文
类七十卷目录三卷 【元苏天爵编】 元风雅二
十四卷 【元傅习采集孙存吾编次续辑】 唐音十四卷 【元杨士宏编】 古乐府
十卷 【旧题元左克明编】 玉山名胜集无卷数
【元顾瑛编】 草堂雅集十三卷 【元顾瑛编】 大雅集八卷 【元赖良编】 元音
遗响十卷 【不着编辑名氏】 风雅翼十四卷
【元刘履编】 荆南倡和集一卷 【元周砥马治同撰】 玉山纪游一卷 【明袁华
编】 乾坤清气集十四卷 【明偶桓编】 元音
十二卷 【明孙原理编】 雅颂正音五卷 【明刘仔肩编】 唐诗品汇九十卷拾遗
十卷 【明高棅编】 广州四先生诗四卷 【不
着编辑名氏】 三华集十八卷 【明钱公善编】 闽中十子诗三十卷 【明袁表马
燮同编】 元诗体要十四卷 【明宋绪编】 沧
海遗珠四卷 【不着编辑名氏】 中州名贤文表三十卷 【明刘昌编】 明文衡九
十八卷 【明程敏政编】 新安文献志一百卷
【明程敏政编】 海岱会集十二卷 【明冯琦编】 经义模范一卷 【不着编辑名
氏】 文编六十四卷 【明唐顺之编】 诗记一
百五十六卷 【明冯惟讷编】 全蜀秩文志六十四卷 【明周复俊编】 古今诗删
三十四卷 【明李攀龙编】 文氏五家诗十四卷
【明长洲文氏祖孙父子诗】 宋秩圃集二十二卷 【明李蓑编】 元秩圃集四卷
【明李蓑编】 唐宋八大家文钞一百六十四卷
【明茅坤编】 吴都文粹续集五十六卷补遗一卷 【明钱谷编】 石仓历代诗选五
百六卷 【明曹学佺编】 古乐苑五十二卷 【
明梅鼎祚编】 皇霸文纪十三卷 【明梅鼎祚编】 西汉文纪二十四卷 【明梅鼎
祚编】 东汉文纪三十二卷 【明梅鼎祚编】
西晋文纪二十卷 【明梅鼎祚编】 宋文纪十八卷 【明梅鼎祚编】 南齐文纪十
卷 【明梅鼎祚编】 梁文纪十四卷 【明梅鼎
祚编】 陈文纪八卷 【明梅鼎祚编】 北齐文纪三卷 【明梅鼎祚编】 后周文纪
八卷 【明梅鼎祚编】 隋文纪八卷 【明梅
鼎祚编】 释文纪四十五卷 【明梅鼎祚编】 文章辨体汇选七百八十卷 【明贺
复征编】 古诗镜三十六卷唐诗镜五十四卷 【
明陆时雍编】 汉魏六朝一百三家集一百十八卷 【明张溥编】 古今禅藻集二十
八卷 【明释正勉性熿同编】 三家宫词三卷

【明毛晋编】 二家宫词二卷 【明毛晋编】

以上见文渊阁著录

文选句图一卷 【宋高似孙编】 诸儒性理文锦八卷 【宋常挺编】 桃花源集一卷 【宋姚孳编】 诗准三卷附录一卷诗翼四卷 【旧本题宋何无适倪希程同撰】 发蒙宏纲三卷 【宋罗黄裳编】 宋四家诗四卷 【不着编辑名氏】 宋名臣献寿集十二卷 【不着编辑名氏】 大全赋会五十卷 【不着编辑名氏】 宋遗民录一卷 【不着编辑名氏】 濂洛风雅六卷 【宋金履祥编】 唐诗说二十一卷 【元释圆至编】 元朝野诗集无卷数 【不着编辑名氏】 武夷山诗集二卷 【不着编辑名氏】 庚辛唱和诗一卷 【元缪思恭等撰】 赠言小集一卷 【不着编辑名氏】 风林类选小诗一卷 【明朱升编选】 静安八咏诗集一卷 【元释寿宁编】 文选纂注十二卷 【明张凤翼撰】 选诗约注十二卷 【明林兆珂撰】 文选章句二十八卷 【明陈与郊编】 文选尤十四卷 【明邹思明编】 文选淪注三十卷 【明闵齐华编】 麟溪集二十二卷别篇二卷 【明郑太和编】 余姚海堤集一卷 【明叶翼编】 残本光岳英华十五卷 【明许中丽编】 五伦诗五卷 【明沈易编】 姑苏杂咏二卷 【明周希孟希夔同编】 金兰集三卷附录一卷 【明徐达左编】 文章类选四十卷 【不着编辑名氏】 虎邱诗集一卷 【明王宾编】 燕山八景图诗一卷 【不着编辑名氏】 文章辨体五十外集五卷 【明吴讷编】 桥门听雨诗一卷 【明金庠编】 鼓吹续编九卷 【明朱绍朱积同编】 士林诗选一卷 【明怀悦编】 兴观集一卷附山村遗诗杂着一卷 【明瞿暹编】 柳黄同声集二卷 【明杜桓编】 存存稿十卷续稿三卷 【明周泰周宥同编】 双桂集六卷 【明徐燠编】 诗学权輿二十二卷 【明黄溥编】 二麓正议三卷 【明汤光烈及其子護所著】 齐山诗集七卷 【明释祖浩与徒道璫同编】 雍音四卷 【明胡纘宗编】 石钟山志八卷 【明王恕编】 江南春词一卷 【明沈周等撰】 新安文粹十五卷 【明金德珵编苏大补】 联句录五卷 【明李东阳编】 雅音会编十二卷 【明康麟编】 咏史集解七卷 【明程敏政编】 唐氏三先生集二十八卷附录三卷 【明程敏政编】 明珠玉八卷 【明王谔编】 海钓遗风集四卷 【明萧鸣凤编】 春秋词命三卷 【明王鏊编】 浙元三会录无卷数 【明杨守址编】 宸章集录一卷 【明费宏

编】振鹭集一卷【明陈镐编】联句私钞四卷【明毛纪编】古黄遗迹集一卷
【明卢浚编】文翰类选大成一百六十三卷
【明李伯琦冯原同编】古栝遗芳四卷【旧本题郑宣辑】太白楼集十卷【明
蔡炼编】东瓯诗集七卷补遗一卷续集八卷【
明赵谏编】金华正学编十二卷【明赵鹤编】金华文统十三卷【明赵鹤编】
来苏吴氏原泉诗集八卷【明吴宗周编】唐
文鉴二十一卷【明贺泰编】洞庭君山集三卷【明胥文相编】广文选六十卷
【旧本题明刘节编】文苑春秋四卷【明崔
铎编】二陆集三卷【长白山人集二卷明陆之箕撰南门续集一卷陆之裘撰】残
本成仁遗稿五卷【明舒芬编】蓉溪书屋集四
卷续集五卷【正集明方豪编续集高第编】古隼八卷【明杨慎编】风雅逸篇
十卷【明杨慎编】翰苑琼琚八卷【旧本题
明杨慎编】三苏文范十八卷【旧本题明杨慎编】李太白诗选五卷杜少陵诗选
六卷【不着编辑名氏】婺贤文轨四卷拾遗一
卷【明戚雄编】南华合璧集五卷【明黄鲁曾编】六艺流别二十卷【明黄佐
编】南滁会景编十二卷【明赵廷瑞编】
九代乐章二十三卷【明刘濂编】石洞遗芳二卷【明郭鈇编】滕王阁集十卷
【明董遵编】宏正诗抄十卷【不着编辑名
氏】吴兴绝唱集四卷续集二卷【明邱吉编】皇华集二卷续集一卷【明唐皋
等使朝鲜倡和诗】皇华集十三卷【明朝鲜国
刊使臣倡和之作】辅臣赞和诗集一卷【明杨一清等和御诗】翊学诗一卷【
明杨一清等和御诗】诗学正宗十六卷【明浦
南金编】明文范六十六卷【明张时彻编】四明风雅四卷【明宋宏之编】乐
府原十五卷【明徐献忠编】六朝声偶七卷
【明徐献忠编】五十家唐诗无卷数【不着编辑名氏】麻姑集十二卷【明陈
克昌编】武夷游咏一卷【明田汝成蔡汝楠
同撰】骊珠随录五卷【明杨仪编】古虞文录二卷文章表录一卷【明杨仪编
】浯溪诗文集二卷【明黄焯编】订补浯溪
集二卷【明陈斗编】三贤集三卷【明杨名编】秉忠定义集二卷【不着编辑
名氏】玉峰诗纂六卷【明周复俊编】清
泉精舍小志一卷【明黎民表编】平吴凯旋录四卷【明朱泽编】郴州文志七
卷【明王心编】二温诗集四卷【明温新及
其弟秀撰】盛明百家诗三百卷【明俞宪编】越望亭诗集二卷【明陈鹤编】
名笔私钞六卷【明曾佩编】黎川文绪四卷

【明王材编】 二妙集八卷 【明万士和编】 游峩集一卷 【明殷绮编】 唐诗选七卷 【旧本题明李攀龙编】 蓬莱观海亭集十卷 【明潘滋编】 三异人集二十二卷 【明李贽编】 文章正论十五卷绪论五卷 【明刘佑编】 文体明辨八十四卷 【明徐师曾编】 六李集三十二卷 【明内乡李氏二世六人之诗】 泰山搜玉二卷 【明袁枪编】 三台文献录二十三卷 【明李时渐编】 词海遗珠四卷 【明劳堪编】 宋文钞无卷数 【明查志隆编】 徽郡诗八卷 【明陈有守汪淮李敏同编】 昆山杂咏二十八卷 【明俞允文编】 荆溪倡和诗一卷 【明俞允文编】 衡门集十五卷 【明郑履淳编】 西湖八社诗帖无卷数 【明祝时泰等编】 文章指南五卷 【旧本题明归有光编】 桃花源集三卷 【明冯子京辑】 少林古今录二卷 【明刘思温撰】 青溪诗集七卷 【明徐楚编】 广中五先生诗选二卷 【明陈暹编】 清江二家诗四卷 【明熊逵编】 彤管新编八卷 【明张之象编】 唐雅二十六卷 【明张之象编】 唐诗类苑二百卷 【明张之象编】 古诗类苑一百二十卷 【明张之象编】 吴越钱氏传芳集二卷 【明钱筠钱筛同编】 百花鼓吹五卷梅花鼓吹二卷 【明王化醇编】 经世宏辞十五卷 【明沈一贯编】 吴越游稿一卷 【明沈明臣沈一贯余寅倡和之诗】 灵洞山房集二卷 【明赵志皋编】 滑耀编无卷数 【明贾三近编】 唐诗纪一百七十卷 【明吴管编】 岳阳纪胜汇编四卷 【明梅淳编】 诗女史十四卷拾遗二卷 【明田艺蘅编】 梅坞贻琼四卷 【明周履靖编】 国雅二十卷续国雅四十卷 【明顾起纶编】 市隐园诗文无卷数 【明姚淞及其子之裔编】 今文选十二卷 【明孙矿编】 三忠集十四卷 【明郭维贤编】 文府滑稽十二卷 【明邹迪光编】 钓台集六卷 【明陈文焕编】 诗宿二十八卷 【明刘一相编】 巨文十二卷 【旧本题明屠隆辑】 古诗所五十六卷 【明臧懋循编】 唐诗所四十七卷 【明臧懋循编】 词致录十六卷 【明李天麟编】 广广文选二十三卷 【明周应治编】 江皋小筑集三卷 【明李元弼编】 顺则集八卷 【明程文潞编】 埧箴音二卷 【明虞淳熙淳贞同撰】 韩文杜律二卷 【明郭正域编】 频阳四先生集四卷 【明刘兑编】 明文征七十三卷 【明何乔远编】 评注八代文宗八卷 【旧本题明袁黄编】 钓台集二卷 【明杨束编】 嵩少集四卷 【明郑太原编】 古文辑选六卷 【明冯从

吾编】 中原文献二十四卷 【旧本题明焦竑编】 三忠文选三卷 【明吴达可编】 世玉集选二卷 【明孙榘编】 小孤山诗集一卷 【明陈恪编】 明文隽八卷 【旧本题明袁宏道选】 明百家诗选三十四卷 【明朱之蕃编】 凤山郑氏诗选二卷 【明曹学佺编】 湛园杂咏一卷 【明米万鍾编】 谪仙楼集三卷 【明骆骏曾编】 唐音戊签二百一卷 闰余六十四卷 【明胡震亨编】 清源文献十二卷 【明何炯编】 岭南文献三十二卷 【明张邦翼编】 文■〈王篆〉清娱四十八卷 【明华国才编】 续文选三十二卷 【明汤绍祖编】 梁园风雅二十七卷 【明赵彦复编】 缉玉录五卷 【明傅振商编】 蜀藻幽胜集四卷 【明傅振商编】 四家诗选四卷 【明傅振商编】 岭南文献补遗六卷 【明杨瞿崃编】 幽风概一卷 【明蒋如莘编】 古文读编二十三卷 【明王志坚编】 文俪十四卷 【明陈翼飞编】 四大家文选八卷 【明陶珽编】 诗归五十一卷 【明鍾惺谭元春同编】 明诗归十卷补遗一卷 【旧本题明鍾惺谭元春编】 名媛诗归三十六卷 【旧本题明鍾惺编】 周文归二十卷 【明鍾惺编】 宋文归二十卷 【明鍾惺编】 合评选诗七卷 【明凌蒙初编】 陶韦合集十八卷 【明凌蒙初编】 八代文钞无卷数 【明李宾编】 晋安风雅十二卷 【明徐燧编】 闽南唐雅十二卷 【明徐■〈火勃〉编】 古逸书三十卷 【明潘基庆编】 秦汉鸿文二十五卷 【明顾锡畴编】 六朝声偶删补七卷 【明邵一儒编】 蔡氏九贤全书九卷 【明蔡鹄编】 弈世文集十六卷 【明萧自开编】 汉魏名家无卷数 【明汪士贤编】 玉屑斋百家论钞十二卷 【明张文炎编】 经济文钞十一卷 【明张文炎编】 尚元斋三世诗十二卷 【明姚悦及其子充孙舜聪之诗】 唐乐府十八卷 【明吴勉学编】 情采编三十六卷 【明屠本峻着】 文坛列俎十卷 【明汪廷讷编】 寒山蔓草十卷 【明赵宦光编】 启隽类函一百九卷 【明俞安期编】 古文品外录十二卷 【明陈继儒编】 秦汉文脍五卷 【明陈继儒编】 唐诗选脉会通评林六十卷 【明周珽编】 秦汉文钞十二卷 【明冯有翼编】 师子林纪胜二卷 【明释道忞编】 三僧诗三卷 【三僧皆不着其名】 西曹秋思一卷 【明黄道周叶廷秀董养河等倡和诗】 古文奇赏二十二卷 续奇赏三十四卷 三续奇赏二十六卷 明文奇赏四十卷 【明陈仁锡编】 古文汇编二百三十六卷 【明陈仁锡编】 秦汉文尤十二

卷【明倪元璐编】国玮集六十一卷【明方岳贡编】经济文辑二十三卷【明陈其慤编】古诗解二十四卷【明唐汝谔撰】唐诗解五十卷【明唐汝询撰】滕王阁续集十九卷【明李嗣京编】金华诗粹十二卷【明阮元声编】古文正集二编无卷【旧题葛鼎评辑】汉魏诗乘二十卷【明梅鼎祚编】宛雅十卷【明梅鼎祚编】文致无卷【明刘士麟编】史汉文统十五卷【明童养正编】同时尚论录十六卷【明蔡士顺编】南园五先生集二卷【明葛征奇编】三忠文选十六卷【明胡接辉编】小瀛州社诗六卷【明钱孺谷锺祖述同编】成氏诗集五卷【明大名成氏家集】玉台文苑八卷续玉台文苑四卷【明江元禧元祚编】汉魏名文乘不分卷【明张运泰余元熹同编】元四家诗二十六卷【明毛晋编】吴兴艺文补四十八卷【明董斯张闵元衢韩千秋同编】十六名家小品三十二卷【明陆云龙编】唐诗韵汇无卷数【明施端教编】文字会宝不分卷【明朱文治撰】集古文英八卷【明顾祖武编】天台诗选五卷【明许鸣远编】唐诗近体集韵三十卷【明施重光编】唐诗广选七卷【明凌宏宪编】西园遗稿无卷数【明汪口槐编】海虞文苑二十四卷【明张应遴编】荆溪外纪二十五卷【明沈敕编】名媛汇诗二十卷【明郑文昂编】汉饶歌发一卷【明董说编】吟堂博笑集五卷【不着编辑名氏】二十六家唐诗无卷数【不着编辑名氏】三苏文粹七十卷【不着编辑名氏】赋苑八卷【不着编辑名氏】诸儒文要八卷【不着编辑名氏】天籁集二卷【释无相编】

以上见四库全书存目

总集类凡三百七十三部

△碑碣

集古录十卷【宋欧阳修撰】法帖刊误二卷【宋黄伯思撰】籀史一卷【宋翟耆年撰】隶释二十七卷【宋洪适撰】隶续二十一卷【宋洪适撰】绛帖平六卷【宋姜夔撰】石刻铺叙二卷【宋曾宏父撰】法帖谱系二卷【宋曹士冕撰】兰亭考十二卷【宋桑世昌撰】兰亭续考二卷【宋俞松撰】宝刻丛编二十卷【宋陈思编】輿地碑记目四卷【宋王象之撰】宝刻类编八卷【不着撰人名氏】金石例十卷【元潘昂霄撰】周秦刻石释音一卷【元吾邱衍撰】古刻丛钞一卷【

明陶宗仪撰】 名迹录六卷附录一卷 【明朱珪撰】 吴中金石新编八卷 【明陈
暉撰】 金薤琳琅二十卷 【明都穆撰】 法帖
释文考异十卷 【明顾从义撰】 金石林时地考二卷 【明赵均撰】 石墨镌华六
卷附录二卷 【明赵岷撰】 金石史二卷 【明
郭宗昌撰】

以上见文渊阁著录

吴下冢墓遗文三卷 【明都穆撰】 水经注碑目一卷 【明杨慎撰】 金石古
文十四卷 【明杨慎撰】 苍润轩碑跋纪一卷续
纪一卷 【明盛时泰撰】 瘞鹤铭考无卷数 【明顾元庆撰】 金陵古金石考一卷
【明顾起元撰】 碑目三卷 【明孙克宏撰】
唐碑帖跋四卷 【明周锡珪撰】 金石备考十四卷 【旧本题来浚撰】 天下金石
志无卷数 【明于奕正撰】 金石文七卷 【明
徐献忠撰】 焦山古鼎考一卷 【明张潮编】

以上见四库全书存目

碑碣类凡三十五部

△制诰

唐大诏令集一百三十卷 【宋宋敏求编】 两汉诏令二十三卷 【西汉诏令十
二卷宋林虑编东汉诏令十一卷宋楼昉编】

以上见文渊阁著录

火警或问一卷 【明世宗御制】 代言录一卷 【明杨士奇撰】 谕对录三十
四卷 【明张孚敬所奉世宗密谕及其奏草】 明
诏制八卷 【明霍韬编】 明诏令二十一卷 【不着编辑名氏】 丝纶捷要便览一
卷 【不着编辑名氏】 外制集一卷 【明高拱
撰】 瞿文懿制敕稿一卷制科集四卷诗文集十六卷 【明瞿景淳撰】

以上见四库全书存目

制诰类凡十部

△表章

唐宋元名表四卷 【明胡松编】

以上见文渊阁著录

名家表选八卷 【明陈埜编】 古表选十二卷 【明张一卿编】

以上见四库全书存目

表章类凡三部

△四六

格斋四六一卷 【宋王子俊撰】 橘山四六二十卷 【宋李廷忠撰】 四六标

准四十卷 【宋李刘撰】 壶山四六一卷 【不着撰人名氏】 四六法海十二卷 【明王志坚编】

以上见文渊阁著录

南塘四六一卷 【宋赵汝谈撰】 臞轩四六二卷 【宋王迈撰】 巽斋四六一卷 【宋危昭德撰】 四六膏馥七卷 【旧本题 宋杨万里撰】 羣公四六续集十卷 【不着编辑名氏】 四六丛珠汇选十卷 【明王明整编】 四六类编十六卷 【明李日华编】

古今濡削选章四十卷 【明李国祥编】 四六霞肆十六卷 【明何伟然撰】

以上见四库全书存目

四六类凡十四部

△奏议 【奏议专集 奏议总集】

奏议专集

奏议总集

奏议专集

尽言集十三卷 【宋刘安世撰】 说论集五卷 【宋陈次升撰】 左史谏草一卷 【宋吕午撰】 商文毅疏稿略一卷 【明商辂撰】 王端毅公奏议十五卷 【明王恕撰】 马端肃奏议十二卷 【明马文升撰】 关中奏议十卷 【明杨一清撰】 杨文忠公三录七卷 【明杨廷和撰】 胡端敏奏议十卷 【明胡世宁撰】 何文简疏议十卷 【明何孟春撰】 孙毅庵奏议二卷 【明孙懋撰】 玉坡奏议五卷 【明张原撰】 南宫奏稿五卷 【明夏言撰】 讷溪奏疏一卷 【明周怡撰】 谭襄敏奏议十卷 【明谭纶撰】 潘司空奏疏六卷 【明潘季驯撰】 两河经略四卷 【明潘季驯撰】 两垣奏议一卷 【明逯中立撰】 周忠愍奏疏五卷 【明周起元撰】

以上见文渊阁著录

田表圣奏议一卷 【宋田锡撰】 李忠定奏议六十九卷附录九卷 【宋李纲撰】 朱子奏议十五卷 【明朱吾弼编】 奏对录一卷 【明杨士奇撰】 叶文庄奏疏四十卷 【明叶盛撰】 两广奏草十六卷 【明叶盛撰】 王介庵奏稿六卷 【明王恕撰】 晋溪奏议十四卷 【明王琼撰】 密勿稿三卷 【明毛纪撰】 辞荣录一卷 【明毛纪撰】 毛襄懋奏议二十卷 【明毛伯温撰】 方改亭奏草一卷 【明方凤撰】 石峰奏疏四卷 【明邵锡撰】 桂文襄奏议八卷 【明桂萼撰】 漕河奏议四卷 【明王以旗撰】

】 谏垣奏草四卷 【明毛宪撰】 梦虹奏议二卷 【明邓显麒撰】 桂洲奏议二十一卷 【明夏言撰】 复套议二卷 【明曾铣撰】 奏对稿十二卷 【明张孚敬撰】 督抚经略疏八卷 【明李遂撰】 前川奏疏二卷 【明曾忭撰】 本兵疏议二十四卷 【明杨博撰】 台省疏稿八卷 【明张瀚撰】 平倭四疏三卷 【明章焕撰】 南宫奏牍二卷 【明高拱撰】 纶扉内稿一卷外稿一卷 【明高拱撰】 掌铨题稿十四卷 【明高拱撰】 献忱集二卷 【明高拱撰】 奏疏辑略一卷 【明董传策撰】 粤西疏稿三卷 【明吴文华撰】 留都疏稿一卷 【明吴文华撰】 存笥录一卷 【明张橧撰】 王文肃奏草二十三卷 【明王锡爵撰】 小司马奏草六卷 【明项笃寿撰】 冲庵抚辽奏议二十卷督抚奏议八卷 【明顾养谦撰】 敬事草十九卷 【明沈一贯撰】 内阁奏题稿十卷 【明赵志皋撰】 王文端奏疏四卷 【明王家屏撰】 奏议二卷 【明李颐撰】 掖垣题稿三卷 【明顾九思撰】 谏垣疏稿四卷 【明姚学闵撰】 海防奏议四卷 【明万世德撰】 治河奏疏四卷 【明李化龙撰】 黄门集三卷 【明陈与郊撰】 奏疏遗稿无卷数 【明吴达可选】 周中丞疏稿十六卷 【明周孔教撰】 青琐荅言二卷 【明杨东明撰】 掖垣谏草五卷 【明张贞观撰】 兰台奏疏无卷数 【明马从聘撰】 畿南奏议六卷 【明王纪撰】 杨全甫谏草四卷 【明杨天民撰】 督蜀疏草十二卷 【明朱燮元撰】 朱襄毅疏草十二卷 【明朱燮元撰】 朱少师奏疏八卷 【明朱燮元撰】 留垣奏议四卷 【明黄起龙撰】 留垣疏草无卷数 【明黄建中撰】 湖湘五略十卷 【明钱春撰】 兵垣奏疏一卷 【明刘懋撰】 吴侍御奏疏一卷 【明吴玉撰】 治河奏疏二卷 【明周堪赓撰】 真定奏疏一卷附刻一卷 【明卫楫固撰】 按晋疏草无卷数 【不着撰人名氏】

以上见四库全书存目

奏议总集

诸臣奏议一百五十卷 【宋赵汝愚撰】 历代名臣奏议三百五十卷 【明杨士奇等奉敕编】 名臣经济录五十三卷 【明黄训编】

以上见文渊阁著录

赤城论谏录十卷 【明谢铎黄孔昭同编】 大儒奏议六卷 【明邵宝编】 明疏议辑略三十七卷 【明张瀚撰】 嘉隆疏钞二

十卷 【明张鹵编】 两朝疏钞十二卷 【明顾尔行编】 留台奏议二十卷 【明朱吾弼李云鹤萧如松孙居相同编】 右编四十卷

【明唐顺之编】 右编补十卷 【明姚文蔚撰】 古奏议无卷数 【明黄汝亨编】 二李先生奏议二卷 【明徐宗夔编】

以上见四库全书存目

奏议类凡九十五部

△论策

论学绳尺十卷 【宋魏天应编】 十先生舆论四十卷 【不着编辑名氏】 增注唐策十卷 【不着编辑名氏】

以上见文渊阁著录

锦绣论二卷 【宋杨万里撰】 千虑策二卷 【宋杨万里撰】 止斋论祖五卷 【宋陈傅良撰】 答策秘诀一卷 【旧题宋刘锦文辑】 论范二卷 【元欧阳起鸣撰】 太平金镜策八卷 【元赵天麟撰】 残本诸儒舆论策学统宗二十卷 【元谭金孙编】

策府羣玉三卷 【明何乔新撰】 文安策略十卷 【明刘定之撰】 艺圃萃盘录十卷 【明周汝砺等编】 百家论钞十二卷 【明王思任编】 古论元箸八卷 【明傅振商编】 古论大观四十卷 【明陈继儒编】 策论纲目三十九卷 【明卓有见撰】

以上见四库全书存目

论策类凡十七部

△书

内简尺牍编注十卷 【宋孙覿撰门人李祖尧编注】

以上见文渊阁著录

范文正公尺牍三卷 【宋范仲淹撰】 山谷刀笔二十卷 【宋黄庭坚撰】 启札锦绣一卷 【旧本题清旷赵先生编不着其名】 中州启札二卷 【元吴宏道撰】 可庵书牍十卷 【明张栋撰】 尺牍筌蹄三卷 【明陈桎编】 尺牍清裁六十卷补遗一卷 【明王世贞编】 尺牍隽言十二卷 【明陈臣忠编】 政府书答四卷 【明高拱撰】 名公翰藻五十卷 【明凌迪知编】 翰墨选注十二卷 【旧题明屠隆编】 二戴小简二卷 【不着编辑名氏】 羣公小简六卷 【不着编辑名氏】 书记洞铨一百十六卷 【明梅鼎祚编】 翰墨鼎彝十卷 【不着编辑名氏】 启札云锦裳八卷 【不着撰人名氏】 启札锦语七卷 【不着撰人名氏】 启札渊海二卷 【不着撰人名氏】 启札青钱十八卷 【不着撰人名氏】

以上见四库全书存目

书类凡二十部

△文史

四六话二卷【宋王铨撰】 四六谈尘一卷【宋谢伋撰】 文则二卷【宋陈騏撰】 余师录四卷【宋王正德撰】 荆溪林下偶谈四卷【宋吴子良撰】 文章精义一卷【宋李耆卿撰】 浩然斋雅谈三卷【宋周密撰】 文说一卷【元陈绎曾撰】 修词鉴衡二卷【元王构编】 作义要诀一卷【元倪士毅撰】 墓铭举例四卷【明王行撰】

以上见文渊阁著录

容斋四六丛谈一卷【宋洪迈撰】 唐子西文录一卷【旧题宋强行父撰】 艺苑雌黄十卷【旧题宋严有翼撰】 吟窗杂录五十卷【旧题宋陈应行撰】 竹窗诗文辨正丛说四卷【旧题器器子编】 太学黼藻文章百段锦一卷【宋方颐孙编】 文筌八卷附诗小谱二卷【元陈绎曾撰】 诗文轨范二卷【元徐骏撰】 东坡文谈录一卷【元陈秀民编】 菊坡丛话二十六卷【明单宇撰】 诗文原始一卷【旧题明李攀龙编】 文脉三卷【明王文禄撰】 玉堂日钞三卷【明黄洪宪撰】 冷邸小言一卷【明邓云霄撰】 艺活甲编五卷【明茅元仪撰】 文通三十一卷【周朱荃宰撰】 尧山堂偶隽七卷【明蒋一葵编】 明人文断无卷数【不着撰人名氏】

以上见四库全书存目

文史类凡二十九部

△诗评

后山诗话一卷【旧本题宋陈师道撰】 临汉隐居诗话一卷【宋魏泰撰】 优古堂诗话一卷【宋吴开撰】 诗话总龟前集四十八卷后集五十卷【宋阮阅撰】 彦周诗话一卷【宋许顛撰】 紫微诗话一卷【宋吕本中撰】 珊瑚钩诗话三卷【宋张表臣撰】 石林诗话一卷【宋叶梦得撰】 藏海诗话一卷【宋吴可撰】 风月堂诗话二卷【宋朱弁撰】 岁寒堂诗话二卷【宋张戒撰】 庚溪诗话二卷【宋陈岩肖撰】 韵语阳秋二十卷【宋葛立方撰】 ■〈巩上石下〉溪诗话十卷【宋黄彻撰】 唐诗纪事八十一卷【宋计有功撰】 观林诗话一卷【宋吴聿撰】 环溪诗话一卷【不着撰人名氏】 竹坡诗话一卷【宋周

紫芝撰】 苕溪渔隐丛话前集六十卷后集四十卷 【宋胡仔纂集】 二老堂诗话一卷 【宋周必大撰】 诚斋诗话一卷 【宋杨万里撰】 沧浪诗话一卷 【宋严羽撰】 诗人玉屑二十卷 【宋魏庆之撰】 娱书堂诗话一卷 【宋赵与峿撰】 后村诗话前集二卷后集二卷续集四卷新集六卷 【宋刘克庄撰】 对床夜语五卷 【宋范晞文撰】 草堂诗话二卷 【宋蔡梦弼撰】 竹庄诗话二十四卷 【宋何溪汶撰】 诗林广记前集十卷后集十卷 【宋蔡正孙撰】 文选颜鲍谢诗评四卷 【元方回撰】 怀麓堂诗话一卷 【明李东阳撰】 颐山诗话二卷 【明安盘撰】 诗话补遗三卷 【明杨慎撰】 艺圃撷余一卷 【明王世懋撰】 唐音癸签三十三卷 【明胡震亨撰】

以上见文渊阁著录

容斋诗话六卷 【宋拱迈撰】 少陵诗格一卷 【宋林越撰】 历代吟谱五卷 【宋蔡传撰】 全唐诗话十卷 【宋尤袤撰】 深雪偶谈一卷 【宋方岳撰】 诗话一卷 【宋陈日华撰】 吴氏诗话二卷 【宋吴氏撰不着其名】 玉壶诗话一卷 【宋释文莹撰】 诗法家数一卷 【元杨载撰】 木天禁语一卷 【元范梈撰】 诗学禁脔一卷 【元范梈撰】 老杜诗评五卷 【宋方深道撰】 东坡诗话三卷 【元陈秀民编】 南溪诗话二卷 【不着撰人名氏】 归田诗话三卷 【明瞿佑撰】 琼台诗话二卷 【明蒋冕编】 诗话十卷 【明杨成玉编】 余冬诗话三卷 【明何孟春撰】 南濠居士诗话一卷 【明都穆撰】 梦蕉诗话二卷 【明游潜撰】 渚山堂诗话三卷 【明陈霆撰】 诗谈一卷 【明徐泰撰】 存余堂诗话一卷 【明朱承爵撰】 全唐诗说一卷诗评一卷 【明王世贞撰】 诗家直说二卷 【明谢榛撰】 过庭诗话二卷 【明刘世伟撰】 解颐新语八卷 【明皇甫汈撰】 冰川诗式十卷 【明梁桥撰】 豫章诗话六卷 【明郭子章撰】 玉笥诗谈四卷 【明朱孟震撰】 诗心珠会八卷 【明朱宣璿编】 艺薮谈宗六卷 【明周子文撰】 恬志堂诗话三卷 【明李日华撰】 诗薮十八卷 【明胡应麟撰】 夷白斋诗话一卷 【明顾元庆撰】 诗谭十卷 【明叶廷秀撰】 畚山诗话三卷 【明陈继儒撰】 藕居士诗话二卷 【明陈懋仁撰】 诗话类编三十二卷 【明玉昌会编】 唐诗谈丛一卷 【明胡震亨撰】 诗脍八卷 【明陈云式撰】 绿天耕舍燕钞四卷 【旧题雪畴子辑不着其名】

雅伦二十六卷 【明费经虞撰】 艳雪斋诗评二卷词曲评一卷 【不着撰人名氏】
诗法源流三卷 【明王用章辑】

以上见四库全书存目

诗评类凡八十部

△词曲 【词集 词选 词话 词谱 曲类】

（臣）等谨按郑氏文类诸目至文史诗评而止自宋以下词学日盛今从四库全书例增词曲一门

词集

词选

词话

词谱

曲类

词集

珠玉词一卷 【宋晏殊撰】 乐章集一卷 【宋柳永撰】 安陆集一卷 【宋张先撰】 六一词一卷 【宋欧阳修撰】 东坡

词一卷 【宋苏轼撰】 山谷词一卷 【宋黄庭坚撰】 淮海词一卷 【宋秦观撰】

书舟词一卷 【宋程垓撰】 小山词一卷 【

宋晏几道撰】 晁无咎词六卷 【宋晁补之撰】 姑溪词一卷 【宋李之仪撰】 东

堂词一卷 【宋毛滂撰】 溪堂词一卷 【宋

谢逸撰】 片玉词二卷补遗一卷 【宋周邦彦撰】 初寮词一卷 【宋王安中撰】

友古词一卷 【宋蔡伸撰】 和清真词一卷 【

宋方千里撰】 圣求词一卷 【宋吕滨老撰】 石林词一卷 【宋叶梦得撰】 筠溪

乐府一卷 【宋李弥逊撰】 丹阳词一卷 【

宋葛胜仲撰】 坦庵词一卷 【宋赵师侠撰】 酒边词二卷 【宋向子諲撰】 无住

词一卷 【宋陈与义撰】 竹坡词三卷 【宋

周紫芝撰】 漱玉词一卷 【宋李清照撰】 芦川词一卷 【宋张元干撰】 东浦词

一卷 【宋韩玉撰】 ■〈女蕙〉窟词一卷 【

宋侯寘撰】 逃禅词一卷 【宋杨无咎撰】 于湖词三卷 【宋张孝祥撰】 海野词

一卷 【宋曾觌撰】 审斋词一卷 【宋王千

秋撰】 介庵词一卷 【宋赵彦端撰】 归愚词一卷 【宋葛立方撰】 克斋词一卷

【宋沈端节撰】 稼轩词四卷 【宋辛弃疾

撰】 龙川词一卷补遗一卷 【宋陈亮撰】 西樵语业一卷 【宋杨炎正撰】 放翁

词一卷 【宋陆游撰】 樵隐词一卷 【宋毛

开撰】 知稼翁词一卷 【宋黄公度撰】 蒲江词一卷 【宋卢祖皋撰】 平斋词一

卷 【宋洪咨夔撰】 白石道人歌曲四卷别集

一卷 【宋姜夔撰】 梦窗稿四卷补遗一卷 【宋吴文英撰】 惜香乐府十卷 【宋赵长卿撰】 龙洲词一卷 【宋刘过撰】 竹屋痴语一卷 【宋高观国撰】 竹斋诗余一卷 【宋黄机撰】 梅溪词一卷 【宋史达祖撰】 石屏词一卷 【宋戴复古撰】 散花庵词一卷 【宋黄升撰】 断肠词一卷 【宋朱淑真撰】 山中白云词八卷 【宋张炎撰】 竹山词一卷 【宋蒋捷撰】 天籁集二卷 【金白朴撰】 蜕岩词二卷 【元张翥撰】

以上见文渊阁著录

寿域词一卷 【宋杜安世撰】 后山词一卷 【宋陈师道撰】 哄堂词一卷 【宋卢炳撰】 近体乐府一卷 【宋周必大撰】 金谷遗音一卷 【宋石孝友撰】 白石词集一卷 【宋姜夔撰】 别本白石词一卷 【宋姜夔撰】 文溪词一卷 【宋李昉英撰】 空同词一卷 【宋洪璚撰】 洺水词一卷 【宋程秘撰】 后村别调一卷 【宋刘克庄撰】 芸窗词一卷 【宋张榘撰】 烟波渔隐词二卷 【宋宋伯仁撰】 渔父词集句二卷 【宋释少嵩撰】 蕉窗蕙隐词一卷 【元吴管撰】 乐府遗音五卷 【明瞿佑撰】 玉霄仙明珠集二卷 【明吴子孝撰】 花影集五卷 【明施绍莘撰】

以上见四库全书存目

词选

花闲集十卷 【蜀赵崇祚编】 尊前集二卷 【不着编辑名氏】 梅苑十卷 【宋黄大舆编】 乐府雅词五卷 【宋曾慥撰】 花庵词选二十卷 【宋黄升撰】 绝妙好词七卷 【宋周密编】 类编草堂诗余四卷 【不着编辑名氏】 乐府补题一卷 【不着编辑名氏】 花草粹编十二卷 【明陈耀文撰】

以上见文渊阁著录

风雅遗音二卷 【宋林正大撰】 方壶词三卷水云词一卷 【宋汪莘汪元量撰】 鸣鹤余音八卷 【旧题道士彭致中编不详时代】 词林万选四卷 【明杨慎编】 唐词纪十六卷 【明董逢元撰】 宋名家词六卷 【明毛晋编】 秦张诗余合璧二卷 【明王象晋编】 羣贤梅苑十卷 【旧题明朱鹤龄撰】

以上见四库全书存目

词话

碧鸡漫志一卷 【宋王灼撰】 沈氏乐府指迷一卷 【宋沈义父撰】 渚山堂

词话三卷 【明陈霆撰】

以上见文渊阁著录

乐府指迷一卷 【宋张炎撰】 词旨一卷 【元陆辅之撰】

以上见四库全书存目

词谱

诗余图谱三卷附录二卷 【明张縠撰】 啸余谱十卷 【明程明善编】

以上见四库全书存目

曲类

中原音韵二卷 【元周德清撰】 顾曲杂言一卷 【明沈德符撰】

以上见文渊阁著录

张小山小令二卷 【元张可久撰】 朝野新声太平乐府八卷 【元杨朝英撰】

词品一卷 【旧本题元涵虚子撰不著名氏】

碧山乐府五卷 【明王九思撰】 雍熙乐府十三卷 【旧本题海西广氏编不详时代人名】 度曲须知二卷弦索辨讹三卷 【明沈

宠绥撰】 琼林雅韵不分卷 【明宁王权编】

以上见四库全书存目

词曲类凡一百九部

钦定续通志卷一百六十三

●钦定续通志卷一百六十四 校讎略

校讎略

（臣）等谨案校讎之要在于正部分考原委部分者犹星垣之次舍也原委者犹山川之支脉也谈天者必明次舍度地者必寻支脉编

书者必循部分原委书各自为类因其类而类之此部分也于各自为类之中而复有异同焉有先后焉此原委也昔郑樵作校讎略上自班志

下暨崇文总目咸论及之然第粗举大略不全不备率有遗焉兹据正史所有艺文经籍志为之辨其类例稽其失得不敢为臆断参以先儒之

论说而折衷之自唐以前则补郑樵所未备宋以后则续增焉不及明史者系我朝官书编次精当非前史所可比也若钦定四库总目别类分

门美善兼尽多发先儒所未发兹未及载者将全入皇朝校讎略所以别于五朝也

汉艺文志

隋经籍志

唐艺文志

宋艺文志

○汉艺文志

汉志序六艺为九种诸子为十家诗赋为五种兵书为四种数术为六种方技为四种其有阙遗及纰缪应正者并列于左

凡易十三家

王应麟曰连山归藏子夏易传不著录考桓谭新论曰连山八万言归藏四千三百言汉世盖有二易矣隋志周易二卷魏文侯师卜子夏传残缺梁六卷

周书七十一篇

焦竑曰入尚书非改杂史

（臣）等谨案郭璞尔雅注题周书曰逸周书疏云不在尚书百篇内故曰逸据此当入别史

议奏四十二篇

焦竑曰入尚书非改入集

（臣）等谨案议奏者石渠论也志凡四见书家四十二篇礼家三十八篇春秋家三十九篇论语类十八篇应并改入集焦氏独举尚书殆欲以类推欤

凡诗六家

王应麟曰元王诗不著录考楚元王交与鲁穆生白生申公俱受诗于浮邱伯伯者孙卿门人也申公始为诗传号鲁诗元王亦次诗传号元王诗世或有之

军礼司马法百五十五篇

焦竑曰入礼非改兵家

古封禅羣祀二十二篇封禅议对十九篇汉封禅羣祀三十六篇

马贵与曰三代之礼其流传于汉世周官仪礼戴记三书而已艺文志所述皆三书也然其末则以古封禅羣祀等篇继之而皆以为礼家按封禅秦汉之事难厕其书于礼经之后今析入仪注门

凡礼十三家

王应麟曰大戴礼小戴礼王制不著录考陈邵周礼论叙云戴德删古礼二百四篇为八十五篇谓之大戴礼戴圣删大戴礼为四十九篇是为小戴礼史记封禅书文帝使博士诸生刺六经中作王制索隐刘向七录云文帝所造书有本制兵制服制篇

凡乐六家

王应麟曰乐经元语不著录考元始四年立乐经

王充论衡云阳成子长作乐经非庶几之才不能成也然则汉儒所作欤食货志乐语有五均邓展曰乐元语河闲献王所传道五均事

战国策三十三篇

晁公武曰历代以其记诸国事载于史类予谓其纪事不皆实录难尽信盖出学纵横者所著当列之纵横家云焦竑曰入春秋非改纵横

凡春秋二十三家

王应麟曰冥氏春秋不著录考秋官冥氏注郑司农云冥读如冥氏春秋之冥儒林传堂溪惠授泰山冥都疏谓若晏子吕氏春秋之类恐非

五经杂议十八篇

马贵与曰本志十一家五十九篇今削五经杂议以下见经解门焦竑曰入孝经非改经解

尔雅三卷二十篇小尔雅一篇古今字一卷

晁公武曰文字之学凡有三其一体制其二训诂其三音韵论体制之书说文之类是也论训诂之书尔雅方言之类是也论音韵之书沈约四声谱及西域反切之学是也三者虽各一家其实皆小学之类而汉艺文志独以尔雅附孝经类隋经籍志又以附论语类皆非是今依四库书目置于小学之首焦竑曰入孝经非改小学

弟子职一篇

焦竑曰入孝经非还管子

晏子八篇

晁公武曰柳宗元谓墨子之徒有齐人者为之墨好俭名世故墨子之徒尊着其事以增高为己术者且其旨多尚同兼爱非乐节用非厚葬久丧非儒明鬼皆出墨子又往往言墨子闻其道而称之此甚显白自向歆彪固皆录之儒家非是后宜列之墨家今从宗元之说云

焦竑曰入儒非改墨家

高祖传十三篇孝文传十一篇

焦竑曰入儒非改制诏

管子八十六篇

陈振孙曰管子似非法家而世皆称管子商岂以其操术用心之同故耶然以为道则不类隋唐志着之法家之首今从隋唐志焦竑曰入道家非改法家

道三十七家

王应麟曰老子指归素王妙论不著录考隋唐志老子指归十一卷严遵撰列子释文云遵字君平作指归十四篇演解五千文素王妙论七略云司马迁撰隋志梁有太史公素王妙议二卷

邓析子二篇

马贵与曰高氏子略曰观其立言则曰天于人无厚君于民无厚又曰势者君之舆威者君之策其意义盖出于申韩矣荀子又言其不法先王不是礼义察而不惠辨而无用则亦流于申韩矣班固乃列之名家

纵横十二家

王应麟曰鬼谷子不著录考尹知章叙谓此书即授仪秦者捭阖之术十三章本经持枢中经三篇柳子厚尝曰刘向班固录书无鬼谷子

凡兵书五十三家

王应麟曰黄石公记不著录考后汉光武诏报臧宫马武曰黄石公记曰柔能制刚弱能制强注即张良于下邳圯所见老人出一编者隋

志黄石公三略三卷

天文二十一家

王应麟曰夏氏日月传甘氏岁星经石氏星经巫咸五星占周髀星传皆不著录考天文志引夏氏日月传曰日月食尽主位也不尽臣位也史记正义甘德楚人作天文星占八卷石申作天文八卷隋志巫咸五星占一卷周髀一卷天文志引星传曰日者德也月者刑也

历谱十八家

王应麟曰九章算术五纪论不著录考周礼保氏九数郑司农云方田粟米差分少广商功均输方程赢不足旁要今有重差夕桀勾股疏云方田以下皆依九章算术而言重差以下此汉法增之律历志刘向总六历列是非作五纪论

五行三十一家

王应麟曰翼氏风角不著录考翼奉传注翼氏风角曰木落归本水流归末故木利在亥水利在辰金火强各归其乡故火刑于午金刑于酉

山海经十三篇

焦竑曰入刑法非改地里

经方十一家

王应麟曰本草不著录考淮南子云神农尝百草之滋味一日而七十毒梁七录神农本草三卷

(臣)等谨案王应麟考证云肃宗章和元年正月召曹褒诣嘉德门令小黄门持班固所上叔孙通汉仪十二篇敕褒曰此制散略多不合经然十二篇不着于七略盖与律令同录藏于理官晋刑法志萧何定律九篇叔孙通益律所不及为十八篇张汤越宫律二十七篇赵禹朝

律六篇合六十篇又汉时决事集为令甲以下三百余篇以藏于理官故志不著录据此则汉仪律令三者不著录与他书之失于编纂者别也

○隋经籍志

隋志合六艺经纬为十种史为三十种子为十四种集为三种附道佛书于四部之末其有重出及纰缪应正者并列于左夏小正一卷

焦竑曰入礼非改时令

制旨革牲大义三卷

焦竑曰入礼非今削

尔雅三卷尔雅七卷尔雅五卷集注尔雅十卷尔雅音八卷尔雅图十卷广雅三卷广雅音四卷小尔雅一卷方言十三卷释名八卷辨释名一卷

焦竑曰入论语非改小学

五经音十卷五经正名十二卷白虎通六卷五经异义十卷五经然否论五卷五经钩沈十卷五经大义三卷五经大义十卷经典大义十二卷五经大义五卷五经通义八卷五经义六卷五经要义五卷五经析疑二十八卷五经宗略二十三卷五经杂义六卷长春义记一百卷大义九卷游玄桂林九卷六经通数十卷七经义纲二十九卷七经论三卷质疑五卷经典玄儒大义序录二卷玄义问答二卷六艺论一卷圣证论十二卷郑志十一卷郑记六卷

焦竑曰入论语非改经解

谥法三卷谥法十卷谥法五卷

晁公武曰谥法隋志附于论语类中今入礼类

江都集礼一百二十六卷

焦竑曰入论语非附仪注

字林七卷

马贵与曰巽岩李氏曰隋唐志皆云七卷恐误今五卷具在此说文部叙初无欠阙不应五卷外更有两卷也

东观汉记一百四十三卷

焦竑曰入正史非改杂史

汉纪三十卷后汉纪三十卷 【袁彦伯】 后汉纪三十卷 【张璠】 献帝春秋十卷魏氏春秋二十卷魏纪十二卷汉魏春秋九卷晋纪四卷晋纪二十三卷晋纪十卷汉晋阳秋四十七卷晋纪十一卷晋阳秋三十二卷晋纪二十三卷晋纪十卷晋纪四十五卷续晋阳秋二十卷续晋纪五卷宋略二十卷宋春秋二十卷齐春秋三十卷齐典五卷齐典十卷三十

国春秋三十一卷战国春秋二十卷梁典三十卷 【

刘璠】 梁典三十卷 【何之元】 梁撮要三十卷梁后略十卷梁太清纪十卷齐纪三十卷齐志十卷

焦竑曰入古史非改编年

（臣）等谨案焦竑经籍志纠缪云汉纪等三十三种改编年是并淮海乱离志数之然淮海乱离志焦氏又云应改杂史则不得混入编年故止三十二种也

战国策三十二卷战国策二十一卷战国策论二卷

焦竑曰入杂史非改纵横

梁皇帝实录三卷梁皇帝实录五卷

马贵与曰案实录即是仿编年之法惟唐志专立实录一门隋史以实录附杂史宋史以实录附编年今从宋志

焦竑曰入杂史非附起居注

陈王业历一卷

（臣）等谨案赵齐旦陈王业历志列杂史焦竑经籍志改入编年

洞纪四卷续洞纪一卷帝王世纪十卷帝王世纪音四卷帝王本纪十卷续帝王世纪十卷五代略一卷帝王要略十二卷周载八卷汉书钞三十卷拾遗录二卷

焦竑曰入杂史非改通史

王子年拾遗记十卷

焦竑曰入杂史非改传记

后周太祖号令三卷

焦竑曰入起居注非改制诏

海岱志二十卷

焦竑曰入杂传非改地里

竹谱一卷钱谱一卷

焦竑曰入谱系非改食货

书品二卷名手画录一卷

焦竑曰入簿录非改艺术

玉烛宝典十二卷四时录十二卷

焦竑曰入杂家非改时令

皇览一百二十卷类苑一百二十卷华林遍略六百二十卷

焦竑曰入杂家非改类家

古今艺术二十卷

焦竑曰入小说非改蓍术

鲁史欹器图一卷器准图三卷

焦竑曰入小说非改食货

碁势四卷杂博戏五卷投壶经一卷梁东宫撰太一博法一卷双博法一卷皇博法一卷象经一卷博塞经一卷碁势十卷 【沈敞】 碁

势十卷 【阙名】 碁势十卷 【王子冲】 碁势八卷碁图势十卷碁九品序录一卷碁后九品序一卷围碁品一卷碁品序一卷碁法一

卷弹碁谱一卷二仪十博经一卷象经一卷象经三卷象经一卷象经发题义一卷

焦竑曰入兵家非改蓍术

五行二百七十二部

马贵与曰班氏阴阳二十一种之书并无一存而隋史遂不立阴阳门盖隋唐闲已不能知其名义故无由以后来所著之书总立此门矣

然隋唐志及宋九朝史凡涉乎术数者总以五行一门包之殊欠分别独中兴史志旧用班志旧例以五行占卜刑法各自为门今从之

老子禁食经一卷崔氏食经四卷食经十四卷食馔次第法一卷四时御食经一卷

焦竑曰入医方非改食货

（臣）等谨案焦竑经籍志纠缪云食经五种据隋志老子禁食经等五种外仍有马琬食经三卷会稽郡造海味法一卷淮南王食经并

目百六十五卷膳羞养疗二十卷应并改食货

香方一卷杂香方五卷龙树菩萨和香法二卷

焦竑曰入医方非改食货

金匱录二十三卷炼化杂术一卷玉衡隐书七十卷太清诸丹集要四卷杂神丹方九卷合丹大师口诀一卷合丹节度四卷合丹要略序

一卷仙人金银经并长生方一卷狐刚子万金诀二卷杂仙方一卷神仙服食经十卷神仙服食神秘方二卷神仙服食药方十卷神仙饵金丹

沙秘方一卷卫叔卿服食杂方一卷金丹药方四卷杂神仙丹经十卷杂神仙黄白法十二卷神仙杂方十五卷神仙服食杂方十卷神仙服食

方五卷服食诸杂方二卷服饵方三卷真人九丹经一卷太极真人九转还丹经一卷练宝法二十五卷太清璇玑文七卷陵阳子说黄金秘法

一卷神方二卷狐子杂诀三卷太山八景神丹经一卷太清神丹中经一卷养生注十一卷养生术一卷龙树菩萨养性方一卷引气图一卷道

引图三卷养身经一卷养生要术一卷养生服食禁忌一卷养生传二卷帝王养生要方二卷素女秘道经一卷素女方一卷彭祖养性一卷郗

子说阴阳经一卷序房内秘术一卷玉房秘诀八卷徐太山房内秘要一卷新撰玉房秘

诀九卷

焦竑曰入医方非改道家

（臣）等谨案彭祖养性神仙服食经服食诸杂方三种志两出

翰林论三卷文心雕龙十卷

马贵与曰宋三朝艺文志晋李充始着翰林论梁刘勰又着文心雕龙言文章体制又锺嵘为诗评其后述略例者多矣至于扬推史法着为类例者亦各名家焉前代志录散在杂家或总集然皆所未安惟吴兢西斋有文史之别今取其名而条次之

○唐艺文志

唐艺文志分为四部甲部经类十一乙部史类十三丙部子类十七丁部集类三其有重出及纰缪应正者并列于左崔令钦教坊记一卷南卓羯鼓录一卷

陈振孙曰刘歆班固虽以礼乐着之六艺略要非孔氏之旧也然三礼至今行于世犹是先秦旧传而所谓乐六家者影响不复存矣窦公之大司乐章既已见于周礼河闲献王之乐记亦已录于小戴则古乐已不复有书而前志相承乃取乐府教坊琵琶羯鼓之类以充乐类与圣经并列不亦悖乎晚得郑子敬氏书目独不然其为说曰仪注编年各自为类不得附于礼春秋则后之乐书固不得列于六艺今从之而着于子录杂艺之前马贵与曰自唐有四库之目而后世之所谓书者入史门所谓诗者入集门独礼乐则俱以为经于是以历代典章仪注等书厕之六典仪礼之后历代乐府教坊之书厕之乐记司乐之后猥杂殊甚如陈氏书录列之杂艺之闲又太不伦今与仪注讖纬并列于经解之后史子之前云

（臣）等谨案教坊记诸书厕之乐记司乐之后固为猥杂然马氏列于经解之后子史之前是犹未离经类也陈氏书录解题着于子录杂艺之前其说较马氏为长矣

谥法三卷沈约谥例十卷贺琛谥法三卷古今谥法十四卷

焦竑曰入经解非改附仪注

庾肩吾书一卷李嗣真书后品一卷张怀瓘书断三卷

陈振孙曰自刘歆以小学入六艺略后世因之以为文字训诂有关于经艺故也至唐志所载书品书断之类亦厕其中则庞矣盖其所论

书法之工拙正与射御同科今并削之而列于杂艺类不入经录

荆浩笔法记一卷

（臣）等谨案陈振孙书录有山水受笔法记一卷即荆浩笔法也入杂艺类其书

论画非论书志八小学误矣

武德贞观两朝史八十卷

焦竑曰入正史非

葛洪史记钞十四卷又汉书钞三十卷后汉书钞三十卷张緌后汉书略二十五卷
又晋书钞二十卷范蔚宗后汉书续十三卷张温三史

要略三十卷阮孝绪正史削繁十四卷王廷秀史要二十八卷萧肃合史二十卷又录一卷
王蔑中汉要集二卷

焦竑曰入杂史非改附正史

虞溥江表传五卷

焦竑曰杂史传记两出改霸史

关东风俗传六十三卷

焦竑曰入杂史非改地理

蒋乂大唐宰辅录七十卷又凌烟功臣秦府十八学士史臣等传四十卷

焦竑曰入杂史非改传记

（臣）等谨案杂史门仍有张荐宰辅传略应入传记

凡诏令一家十一部

马贵与曰唐志特立诏令一门历代史皆无之按古左史记言右史记动后官制中
起居郎起居舍人即左右之任也故以诏令并入起居

注门庶从其类云

（臣）等谨案旧唐书经籍志诏令并入起居注故其标目则曰五曰起居注以纪
人君言动析之者自新书始也

春坊旧事三卷春坊要录四卷

焦竑曰入故书非改职官

马总唐年小录八卷

焦竑曰入故事非改杂史

刁凿齿襄阳耆旧传五卷

晁公武曰隋志曰耆旧记唐志曰耆旧传观其书记录丛脞非传体也名当从隋志

云

列藩正论三十卷

焦竑曰传记儒家两出

（臣）等谨案旧唐书入传记不列儒焦氏经籍志同

李袭誉江东记三十卷

焦竑曰入传记非改地里

王氏训诫五卷

焦竑曰入传记非改儒家

李筌中台志十卷

晁公武曰其书起殷周迄隋唐纂辅相邪正之迹分皇王霸乱亡五类以为鉴戒故入职官类焦竑曰入传记非改职官

张鷟朝野僉载二十卷封氏闻见记五卷

焦竑曰入传记非改杂史

韦机西征记【卷亡】韩琬南征记十卷陆贽遣使录一卷裴肃平戎记五卷房千里投荒杂录一卷

焦竑曰入传记非改地理

许康佐九鼎记四卷

焦竑曰入传记非改食货

李德裕异域归忠传二卷西番会盟记三卷西戎记二卷

焦竑曰入传记非改地理

葛洪西京杂记二卷

焦竑曰故事地里两出

凡释氏二十五家四十部

焦竑曰入道家非今别出

鬼谷子二卷

马贵与曰唐志以鬼谷子为苏秦之书然苏秦所记以为周时有豪士者隐居鬼谷自号鬼谷先生无乡里俗姓名字又史记战国时隐居颍川阳城之鬼谷因以自号长于养性治身苏秦张仪师之

刘子十卷

陈振孙曰刘昼孔昭撰播州录事参军袁孝政为序凡五十五篇案唐志十卷刘勰撰今序云昼伤己不遇天下陵迟播迁江表故作此书时人莫知谓为刘勰

（臣）等谨案晁公武读书志亦云刘昼字孔昭之书虽刘昼之为人莫详本末然以为刘勰据序文殆不然也

朱澹远语丽十卷

陈振孙曰语丽十卷采摭书语之丽者为四十门案前志但有杂家而无类书新唐书志始别出为一类此书乃犹列杂家虽分门类无伦理要之实类书也

孟仪子林二十卷沈约子钞三十卷庾仲容子钞三十卷薛克构子林三十卷

焦竑曰入杂非附子

徐陵文府七卷

焦竑曰入杂非改总集

王方庆绩世说新书十卷

焦竑曰入杂非改小说

王范续蒙求三卷白延翰唐蒙求三卷李伉系蒙二卷

焦竑曰入杂非改小学

崔实四人月令一卷宗懔荆楚岁时记一卷杜公瞻荆楚岁时记二卷杜台卿玉烛
宝典十二卷王氏四时录十二卷孙氏千金月令三卷
薛登四时记二十卷裴澄乘輿月令十二卷王涯月令图一轴李綽秦中岁时记一卷韦
行规保生月录一卷韩鄂四时纂要五卷岁华纪丽二
卷

陈振孙曰前史时令之书皆入子部农家类今案诸书自国家典礼下及里闾风俗
悉载之不专农事也故中兴馆阁书目别为一类列之
史部是矣焦竑曰入农非改时令

顾烜钱谱一卷浮邱公相鹤经一卷尧须跋鸢击录二十卷范蠡养鱼经一卷鹰经
一卷相贝经一卷

陈振孙曰唐志著录相牛马诸书是犹薄有关于农者至于钱谱相贝鹰鹤之类于
农何与焉焦竑曰钱谱相贝经入农非改食货

戴祚甄异传三卷袁王寿古异传三卷祖冲之述异记十卷刘质近异录二卷千宝
搜神记三十卷刘之遴神录五卷梁元帝研神记十卷
祖台之志怪四卷孔氏志怪四卷荀氏灵鬼志三卷谢氏鬼神列传二卷刘义庆幽明录
三十卷王廷秀感应传八卷陆果系应验记一卷王琰
冥祥记十卷王曼颖续冥祥记十一卷刘泳因果记十卷颜之推冤魂志三卷又集灵记
十卷征应集二卷侯君素旌异记十五卷唐临冥报记
二卷

焦竑曰入小说非改传记

吴筠两同书一卷

陈振孙曰中兴书目唐吴筠撰唐志同但入小说类其书采孔老为内外十篇名祝
融子两同书祝融者谓鬻子为诸子之首也

（臣）等谨案两同书陈氏书录马氏经籍考咸入杂家至晁氏读书志则附此书
于庄老之后志入小说非也

陆羽茶经三卷张又新煎茶水说一卷

焦竑曰入小说非改食货

（臣）等谨案唐志著录仍有温庭筠采茶录一卷应并入食货

石氏星经簿赞一卷

陈振孙曰唐志称石氏星经簿赞馆阁书目以其有徐颖婺台等州疑后人附益今此书明言依甘石巫咸氏则非专石申书也

历算类三十六家

陈振孙曰张邱建夏侯阳算经之类志皆入历算案射御书数均一艺也不专为历算设故列杂艺

刘秩政典三十五卷杜佑通典二百卷苏冕会要四十卷续会要四十卷

陈振孙曰凡通典之书唐志列之类书类馆阁书目亦然案通典载古今制度沿革非类也焦竑曰通典会要系典制书入类家非

（臣）等谨案陈氏书录通典会要入典故焦氏经籍志同

太清神丹中经三卷

焦竑曰入医非改道家

（臣）等谨案医术一门仍有太清神仙服食经太清璇玑文太清诸丹药要录金匱仙药录神仙药食经神仙服食方神仙服食药方狐子万金诀狐子杂诀明月公陵阳子秘诀黄公神临药秘经黄白秘法房中秘术玉房秘诀焦氏经籍志并改入道家

○宋艺文志

宋志仿前史分经史子集为四类而条列之经类十一史类十三子类十七集类四其有重出及纰缪应正者并列于左周公谥法一卷沈约谥法十卷贺琛谥法三卷王彦威续古今谥法十四卷春秋谥法一卷谥法三卷六家谥法二十卷苏洵嘉佑谥法三卷皇佑谥录二十卷蔡攸政和修定谥法八十卷郑樵谥法三卷

马贵与曰谥者国家之大典今历代史志俱以谥法入经解门则伦类失当今除周公谥法春秋谥法二项入礼门而历代之谥法则俱附于仪注之后焦竑曰谥法十一种入经解非附仪注

（臣）等谨案周公谥法即汲冢谥法篇春秋谥法即杜预释例晁氏读书志亦以二种入礼门焦氏谓十一种皆改附仪注未尽然也

虞荔鼎录一卷

焦竑曰入小学非

（臣）等谨案焦竑经籍志入食货

崔逢玉玺谱一卷郑文宝玉玺记一卷

焦竑曰入小学非

（臣）等谨案焦竑经籍志入仪注

荆浩笔法一卷

焦竑曰入小学艺术两出

（臣）等谨案焦竑经籍志入艺术

刘敞先秦古器图一卷吕大临考古图十卷李公麟古器图一卷政和甲午祭礼器
欵识一卷宣和重修博古图录三十卷薛尚功历代钟
鼎彝器欵识法帖二十卷庆元嘉定古器图六卷

马贵与曰考古图诸书晁氏以入小学门陈氏以入书目门皆失其伦类既所考者
古之礼器则礼文之事也故厘入仪注门

（臣）等谨案志入小学与晁氏同

宋名臣录八卷宋勋德传一卷宋两朝名臣传三十卷咸平诸臣录一卷熙宁诸臣
传四卷两朝诸臣传三十卷张唐英宋名臣传五卷葛
炳奎国朝名臣叙传二十卷

焦竑曰入正史非改传记

编年类一百五十一部

焦竑曰日历起居注实录入编年今别出

（臣）等谨案马贵与之言曰实录即是仿编年之法故以实录入编年而日历则
附起居注云

宋政录十二卷宋圣政编年十二卷黄维之太祖政要二十卷

焦竑曰圣政宝训编年别史故事三出

（臣）等谨案宋志编年惟见政录圣政政要等书而宝训则未之见至别史一门
则有圣政纪政要圣政录三朝宝训两朝宝训六朝宝
训三朝训览图故事一门又有五朝宝训三朝训览图及高宗圣政光宗圣政诸书是圣
政三出而宝训则两出也焦氏经籍志石介三朝圣政
录三卷入杂史而富弼三朝圣政录十卷又入时政记吕夷简三朝宝训三十卷入杂史
而李淑三朝宝训三十卷又入时政记至宋政录十二
卷则杂史时政记两出是亦编纂之讹也案陈振孙书录马贵与经籍考凡圣政宝训皆
入故事而编年别史则无之庶从其类云

唐僖宗日曆一卷

（臣）等谨案日曆之书已见编年矣兹于别史复出僖宗日曆似于体例未画一
也

蔡邕独断二卷

（臣）等谨案陈振孙之言曰独断一书记汉世制度礼文车服及诸帝世次而兼
及前代礼乐盖其书言礼为详故崇文总目遂初堂书

目陈振孙书录马贵与经籍考咸入仪注志入故事非也

故事类一百九十八部

（臣）等谨案御史台记集贤注记翰林故事史馆故事麟台故事诸书志皆入故

事类据崇文总目遂初堂书目陈振孙书录马贵与经籍考咸列职官夫书以御史集贤标题则职官之书非故事之书也

司马光百官公卿表十五卷

陈振孙曰本入职官类以稽古录序云由三晋开国迄于显德之末臣既具之于历年图自六合为宋接于熙宁之元臣又着之于百官表即谓此书盖与通鉴相表里故着之编年

（臣）等谨案宋志在职官

王应麟通鉴地理考一百卷通鉴地理通释十四卷

焦竑曰入职官非改编年

汉艺文志考证十卷

焦竑曰入职官非改附正史

汉制考四卷

焦竑曰入职官非改故事

李恕己诫子拾遗四卷

焦竑曰入传家非附儒家

包诩河洛春秋二卷

焦竑曰入传记非改杂史

李涪刊误一卷

焦竑曰入传记非改小说

邱旭宾朋晏语一卷

焦竑曰入传记非改小说

沈立都水记二百卷又名山记一百卷李清臣重修都城记一卷王革天泉河记一卷郑言复交趾录二卷干明会稽录一卷

焦竑曰入传记非改地理

三楚新录一卷

焦竑曰入传记非改杂史

洪遵泉志十五卷张甲浸铜要录一卷

焦竑曰入传记非改食货

（臣）等谨案陈振孙书录列此二书于杂艺而遂初堂书目则以铸钱故事及浸铜要录咸入本朝故事类马贵与经籍考同志以铸钱

故事入故事类而泉志浸铜要录乃入传记顾协钱谱又入小说乱其例矣

曾致尧广中台记八十卷

焦竑曰入传记非改职官

王皞唐余录六十卷

（臣）等谨案陈振孙之言曰其书列韩通于忠义传且表出本朝褒赠之典五代史新旧皆不及此故陈氏书录入别史而焦竑经籍志至列之编年志入别史可也乃于传记又出是书误矣

学士年表一卷

焦竑曰入传记非改职官

欧阳修归田录八卷朱定国归田后录十卷

焦竑曰入传记非改小说

王通元经薛氏传十五卷

焦竑曰编年传记两出改儒

五龙秘法一部 【卷亡】

焦竑曰入地里非改五行

孟子十四卷

陈振孙曰前志孟子本列于儒家然赵岐固尝以为则象论语矣自韩文公称孔子传之孟轲死不得其传天下学者咸曰孔孟孟子之书固非荀扬以降所可同日语也今国家设科取士语孟并列为经而程氏诸儒训解二书常相表里故今合为一类

（臣）等谨案宋志仍前史入儒家

颜师古纠缪正俗八卷

焦竑曰入儒非改经解

碧云子老子道德经藏室纂微二卷

焦竑曰陈景元集志云不知名

老子指略一卷

焦竑曰王弼作志云不知名

李士表庄子十论一卷

焦竑曰庄列十论志作庄子误

德山集一卷 【仰山汾山语录】

焦竑曰三人皆唐僧志云不知撰人

僧宗密禅源诸论二卷

焦竑曰本百卷作二卷非

魏静永嘉一宿觉禅宗集一卷

焦竑曰永嘉集三出

僧宗世法苑珠林一卷

焦竑曰本百卷作一卷非

僧宗杲语录五卷

焦竑曰本三十卷作五卷非

僧菩提达摩存想法一卷又胎息诀一卷

焦竑曰入释非附道家

陆机正训十卷

崇文总目云不着撰人名氏按唐志有正训二十卷辛德源撰而此题云陆机又止十卷据隋以前书录皆无陆机正训之目正史机传亦不言尝有此书而德源所著今世已亡疑是其遗书

罗隐两同书二卷吴筠两同书二卷

（臣）等谨案两同书唐艺文志及中兴书目题吴筠撰崇文总目晁公武读书志题罗隐撰陈振孙书录则两存之而以为未详孰是今志于杂家两出是书一云罗隐一云吴筠误矣

韩熙载格言五卷

（臣）等谨案韩熙载格言五卷已见儒家矣兹于杂家又出是书误

虞荔古今鼎录一卷

（臣）等谨案鼎录入小说非焦氏经籍志改入食货

顾协钱谱一卷

焦竑曰入小说非

（臣）等谨案董道钱谱十卷志亦入小说家焦氏经籍志改入食货

房千里南方异物志一卷

焦竑曰入小说非改地里

陈致雍晋安海物异名记三卷

焦竑曰入小说非改食货

逢行珪鬻子注一卷

焦竑曰入小说非

（臣）等谨案焦氏经籍志入道家

战国策三十二卷

焦竑曰入兵家非

（臣）等谨案焦氏经籍志改纵横

类事类三百七部

焦竑曰会要通典类要诸书入类事非改故事蒙求诸书改小学

钦定续通志卷一百六十四

●钦定续通志卷一百六十五 图谱略上 记有

图谱略 【上】

（臣）等谨案图谱之传与经籍相表里班固艺文志以易神输图春秋世本孙轫

形势图分缀于六艺诸子之列隋唐史志并沿其例郑
樵通志始辑图谱为专门首述索象原学明用以辨其源流次分记有记无以考其存佚
上起周秦下迨北宋记其有者二百有六记其无者一
百七十有五其用意可谓勤矣然郑氏生当南渡局于方隅见闻未广于前代著作或存
或亡抵牾罅漏自不能免且书属草创体例未纯尚有
待于更正恭逢

圣主右文图籍大备册府所储光昭球璧更复网罗散佚凡海内藏书毕输秘馆皇
上几余观览亲加厘定图谱之孰有孰无稽诸四库瞭
如指掌臣等分撰续略断自淳熙迄于明季博采史志旁及画谱书目以类相从而要不
戾于郑志之例其闲有稍为变通者郑志记有不分条
目而记无则自地理而下各标题而件系之同涂歧轨安所适从又大半不着撰人姓名
论世知人将何所考至于世系一条但直叙云帝系之
谱皇帝之谱戚里之谱百官族姓之谱既未标其为何代之书亦未实指为某某之所著
尤为缺略甚而击桐试马春社莲社等图无关考订者
亦滥及焉未免庞杂无伦矣是编但取其有资实学者考定年代分别门类厘为二卷若
后世文人游艺涉笔成图与夫私家谱牒偶见存留者
均从芟薙阴阳符瑞之说多出傅会竺干符箓别归二藏亦不复分条缀录云

记有 【一百七十四种四库全书著录者六十有三附存四库全书总目者一百十一】

经学

史乘

天文

地理

政典

学术

艺事

物类

○经学

易

宋吴仁杰易图说

雷恩齐易图通变

元钱义方周易图说

张理易象数钩深图

又易象图说内外篇

明朱升周易旁注图说

刘定之易经图释

黄芹易图识漏

吕怀周易卦变图传

龙子昂看易凡例图说

陈第伏羲图赞	刘日曦易思图解
李奇玉雪园易义图说	秦镛易序图说
来集之易图亲见	
书	
宋傅寅禹贡图考	程大昌禹贡山川地理图
明梅鹜尚书谱	艾南英禹贡图注
韩邦奇洪范图解	
诗	
宋人毛诗正变指南图	明鍾惺诗经图史合考
礼	
宋夏休周礼井田谱	林希逸考工记图解
明王应电周礼图说	宋杨复仪礼图
又仪礼旁通图	明季本读礼疑图
刘绩三礼图	宋朱子家山图书
乐	
元余载韶舞九成乐谱	明朱载堉操缦古乐谱
又旋宫合乐谱	又乡饮酒乐谱
又六代小舞谱	又小舞乡乐谱
又二佾缀兆图	又灵星小舞谱
许珍律吕新书分注图纂	
春秋	
金利銮孙春秋握奇图	
四书	
元程复心孔子论语年谱	又孟子年谱
明夏洪基孔子年谱纲目	
总经	
宋杨甲六经图	明卢谦重刊五经图
吴继仕七经图	朱睦■〈木挈〉授经图
小学	
宋李焘说文解字五音韵谱	
明乔中和元韵谱	陈荇谟皇极图韵
○史乘	
编纂	
宋熊方补后汉书年表	辽大臣年表

金大臣年表	明雷礼列卿年表
俞焕章读史图纂	历代帝王纂要谱括
论赞	
宋唐仲友帝王经世图谱	大金德运图说
明李泽长从龙谱	张居正帝鉴图记
吴守大名臣像图	范景文大臣谱
世系	
明天潢玉牒	朱睦■〈木挈〉镇平世系记
凌迪知历代帝王姓系统谱	
又万姓统谱	李日华姓氏谱纂
○天文	
测算	
明李之藻浑盖通宪图说	赵宦光九图史图
许胥臣盖载图宪	
岁时	
元费着岁华纪丽谱	
○地理	
总叙	
明桂萼輿图纪叙	朱绍本地图总要
今古輿地图	
都邑	
元李好文长安志图	明陈沂金陵古今图考
闻人诠东关图	
山川	
宋邓牧洞霄图志	元王喜治河图略
明姚虞岭海輿图	郑若曾黄河图议
新浚海盐内河图说	
外域	
宋人异域图志	明郑若曾日本图纂
又朝鲜图说	又琉球图说
又安南图说	
○政典	
仪制	
宋朱子绍熙州县释奠仪图	

明邝璠便民图纂	王光鲁古今官制沿革图
张问之造砖图说	
食货	
元陈椿熬波图	王祯农器图谱
明郑若曾海运图说	
兵防	
宋江点边防控扼形势图论	
明郑若曾海防图论	又万里海防图说
又江防图考	胡宗宪筹海图编
蔡逢时温处海防图略	龙正八阵合变图说
顾斌火器图	
刑法	
明章潢五刑六赃图	
○学术	
统绪	
宋李元纲圣门事业图	明季本孔孟事迹图谱
道统图赞	圣贤图赞
岳元声圣学范围图	王应昌宗谱纂要
邹泉宗圣谱	张云汉闵子世谱
刘宗周人谱	
性理	
宋王柏研几图	明赵谦造化经纶图
孙丕扬格物图	徐中性理图说
韩万锺性理三书图解	杨观光睿养图说
文辞	
明王圻三才图会	章潢图书编
宋高似孙文选句图	明程明善啸余谱
张縉诗余图谱	
○艺事	
五行	
演禽图诀	佐元直指通解
医药	
明张介宾类经图翼	熊宗立素问运气图括
张世贤图注难经	又图注脉诀

杂技

宋姜夔续书谱

明严澄松风馆琴谱

何文焕文会堂琴谱

李孝元投壶谱

双陆谱

○物类

器用

宋人古玉图谱

严澄蝶几谱

端溪砚谱

明林有麟素园石谱

方干鲁墨谱

又蜀锦谱

明顾孟容冠谱

宋陈敬香谱

明王征诸器图说

饮食

宋王灼糖霜谱

明王盘野菜谱

植物

明王象晋羣芳谱

陈思海棠谱

史正志菊谱

范成大范村菊谱

明释真一梅谱

邓庆棠荔枝通谱

元李衍竹谱

张谦德瓶花谱

动物

明杨慎异鱼图赞

钦定续通志卷一百六十五

●钦定续通志卷一百六十六 图谱略下 记无

图谱略 【下】

元熊朋来琴谱后录

杨表正琴谱大全

汪浩然琴瑟谱

秋仙遗谱

明吕震宣德鼎彝谱

宋人砚谱

宋杜绾雪林石谱

明沈继孙墨法集要

元费着笺纸谱

冠图

朱术■〈土旬〉汝水巾谱

西洋人邓玉函奇器图说

蔬食谱

宋赵时庚金漳兰谱

陆游天彭牡丹谱

史铸百菊集谱

又范村梅谱

杨纶琼花谱

宋陈仁玉菌谱

明释真一笋谱

记无 【二百九十一一种见宋艺文志明艺文志朱彝尊经义考及各家画谱书目】

经学

史乘

天文

地理

政典

学术

艺事

物类

○经学

易

宋张杲周易罔象成名图 孙份周易先天流衍图

饶鲁太极三图 史弥大衍极图说

王宗道易说指图 乐洪周易卦气图

林栗河图洛书八卦九畴大衍总会图

又六十四卦立成图 司马子己先后天图

柳申锡三易图说 齐梦龙周易附说卦变图

程新恩易图 郑仪孙易图说

俞琰易图纂要 又六十四卦图

刘整易纂图 元程龙易图补

倪渊易图说 严养晦先天图义

谢仲直易三图 许天籥易象图说

瞻思齐奇偶阴阳消息图 卢观易集图

吕洙易图说 邓锜大易图说

邵整六十四卦图说 明宋升周易旁注前图

谈纲易考图义 刘玉执斋易图说

余诚易图说 周垣易图说

顾允成易图说臆言 刘宗周读易图说

潘士龙演易图说 王寅周易图说

容若春今易图学心法释义

王润孙周易图解 季本图文余辨

金润周易图解 左辅周易图说

叶应易卦方位次序图 韩邦奇卦爻要图

张庭芳易经十翼章图蕴义

胡宾易经全图	沈束易图
沈亨卦画图	任庆云易图集览
陈林周易图	郑敷教易经图考
程观生易内三图注 书	
宋程大昌书谱	又禹贡后图
孟先禹贡治水图	吴仁杰尚书洪范辨图
卢硕洪范图章	李焘尚书百篇图
陈伯达翼范九图	黄千能禹贡图说
王柏禹贡图	张性善禹贡沿革图
夏唐老九畴图	楼钥金滕图说
李郡旅葵图	颜直之金滕图
又尚书治要图	元赵孟俯洪范图
王文泽尚书制度图纂	明郑晓禹贡图说
胡宾书经全图	郑瑶禹治水谱
桂萼禹迹九州岛图	何模禹贡图注
曾俊洪范图辑 诗	叶良佩洪范图解
宋李焘诗谱	王应麟草木鸟兽谱
俞琰弦歌毛诗谱	元赵孟俯豳风图
明郑若曾重辑诗谱 纂图互注毛诗 礼	林子免豳风图
宋郑樵乡饮礼图	郑景炎周礼开方图说
吴沆周礼本制图论	俞言周官礼图
魏了翁周礼井田图说	项安世周礼邱乘图说
赵彦肃士冠士昏馈食图	姚圣臣明堂定制图
明王廷相昏礼图	又乡射礼图注
又深衣图论	闻人诠饮射图解
陈林礼文物大全图	又仪礼会通图
林兆珂考工记图	张鼎思考工记补图
胡宾礼经图	何栋如乡饮图考
冯应京乡饮图说	骆商礼乡饮序次图说
林文奎射礼图注易览	

乐

宋郑樵系声乐谱
又十二月乐辞谱
吕柟诗乐图谱
李文察四圣图解
朱载堉乐和声大成乐舞图说

元吾衍九歌谱
明刘绩六乐图
张谔大成乐舞图谱
李璧宴飨乐谱
又八音图注

朱敕大成乐谱

春秋

宋洪勋春秋图鉴
张杰春秋图
崔表春秋世本图
沈炎春秋指掌图
徐梅龟春秋指掌图
又春秋传授谱
张事心春秋左氏人物谱

刘英春秋列国图
又春秋车服图
郑樵春秋地名谱
邓世名春秋四谱
元吴莱春秋世变图
明吴国伦春秋世谱
傅逊春秋古器图

四书

宋李思正中庸图说
林处恭四书指掌图
元胡炳文大学指掌图
程复心四书章图总要
又四书图解

程时登大学本末图说
饶鲁庸学图
吴成四书图
林起宗论语图
明瞿九思中庸位育图说

吴继仕四书引经节解图

孝经

元李孝光孝经图

林起宗孝经图解

总经

宋俞言六经图说
胡宾六经图全集

明黄润玉经谱
陈仁锡六经图考

周安九经图注

小学

宋王宗道四声等第图
穆正文字谱系

元吴正道六书渊源图
邱葵经世书声音既济图

明王应电六义音切贯珠图

○史乘

编纂

宋崔侗帝王授受图

何许甲子纪年图

韦光美帝王年号图

又天禧以来御史年表

宋朝宰辅拜罢图

张绂历代史年表

论赞

宋李焘唐宰相谱

明吴震元宋相谱

世系

宋丁维皋百族谱

明主壻牒谱

周国世系表

周定王年表

○天文

测算

宋陈刚浑仪图

钱选五星图

郭守敬仰规俯矩图

又日出入永短图

陈廷策中星图说

王臣夔测候图说

王应麟干象图说

陈嗣昌天文地理图说

艾儒略图注天文祥异赋

又赤道两总星图

明杨廉数学图诀发明

岁时

明黄道周月令明义图

○地理

总叙

宋王象之輿地图

六合掌运图

牛检帝王事迹相承图

郑伯邕帝王年代图

李焘历代宰相年表

又天禧以来谏官年表

宋朝相辅年表

陈权类编汉唐君臣图

龚颐正元佑党籍谱述

明宗谱

朱睦■〈木絜〉帝系世表

蜀府宗支图谱

周宪王年表

潘翼星图证验

元李学逊中星仪象等图

又异方浑盖图

明周文安璇玑图

周述学天文图学

余文龙祥异图说

又中星图

李元庚干象图说

徐光启见界总星图

元彭丝算经图释

王希先方域谱

南北对镜图

混一图	明罗洪先增补广舆图
项笃寿考定舆地图	李默舆地图
陈组绶职方地图	王崇庆山海经图
都邑	
宋曹叔远永嘉谱	明洪武京城图志
赵秉忠江西舆地图说	
山川	
明贾庆璧绍兴水利图说	王琼漕河图志
外域	
宋西南蛮朝贡图	明仇英职贡图
西洋人庞迪我海外舆图全说	
○政典	
仪制	
明张璁乘舆冕服图说	又武弁服制图说
又元端冠服图说	又保和冠服图说
圜丘方泽总图	圜丘方泽祭器乐器图
朝日夕月坛总图	朝日夕月坛祭器乐器图
神祇社稷雩坛总图	太庙总图
太庙供器祭器图	大享殿图
大享殿供器祭器图	天寿山诸陵总图
泰神殿图	帝王庙总图
皇史宬景神等殿图	圆明阁阳雷轩殿宇图
沙河行宫图	龚端礼五服图解
食货	
宋曾之谨续农器谱	楼璫耕织图
元苗好谦农桑图说	韩彦直耕织图
慎温其耕谱	王祜谷谱
明陈惟之互易矿税疏图	
兵防	
宋蔡元定八阵图说	明张焘西洋火攻图说
李承式圆机营阵图	卜大同备倭图记
又征苗图记	余子俊车营图
郑林轩辕阵图	魏焕九边图考
许论九边图论	霍冀九边图说

范守己筹边图记	刘昌两镇边关图说
翁万达宣大山西诸边图	杨时宁大同镇图说
又大同分营地方图	刘敏宽延镇图说
刑法	
宋张履冰法例六赃图	
○学术	
统绪	
宋郭天锡历代圣贤图	王力行朱氏传授支派图
元孔文升阙里谱系	明卢熊孔颜世系谱
性理	
元林起宗志学指南心学渊源二图	
明焦竑养正图解	
文辞	
明宁献王权臞仙文谱	又诗谱
宋高似孙乐曲谱	元宋英曲谱
○艺事	
五行	
明刘黄裳元图符藏	徐之镆罗经简易图解
医药	
宋刘温舒运气论奥二十七图	
叶玠五运指掌图	明吕柟寒暑经图解
熊宗立伤寒活人指掌图	
杂技	
明唐寅画谱	韩昂明画谱
宋杨缵紫霞洞琴谱	明宁献王权神奇秘谱
宋人射谱	
○物类	
器用	
宋庆元嘉定古器图	明程士庄博古图录
宋人续文房四谱	元鲜于枢笺纸谱
宋姜夔集古印谱	元王厚之复斋印谱
颜叔夜古印谱	明温博砚谱
明人茶具图	
饮食	

元陈居中鬪茶图

植物

明刘世儒梅谱

动物

明樗庵居士鹞谱

钦定续通志卷一百六十六

●钦定续通志卷一百六十七 金石略一

金石略【一】

（臣）等谨按金石之文传小学之源流资经史之考核非徒嗜其奇古与夫波磔之足供临抚也自考工载嘉量之铭礼记述孔悝之鼎法训微言阐昭后世辨牺尊为象形识舜管之用玉先王制器尚象之精赖三代彝器犹有存者周秦以后石刻盛行汉魏人所引诗书多当时经师异义形声通转藉以考定六书注史记者引泗水之碑释汉书者据伏生之碣官爵年月世系子姓俱得因碑文以补史家之阙遗而辨章其同异斯其有关于问学者甚巨而非空言撰着所可比郑志撰金石略徒谓观晋人字画可见晋人之风猷观唐人书踪可见唐人之典则持论尚未得其要矣撰金石遗文为一书者始于六朝金楼子载碑集十帙百卷隋经籍志载杂碑二十二卷碑文十五卷今俱不传至宋欧阳修赵明诚薛尚功洪适黄长睿董道诸人递有撰述或载释文或存题跋或系以地或系以人先后详略互有得失要各自为一书郑氏取诸家着录以入通志故条列其目省其原文不加论断羸具撰书人姓氏存其地望按代递编而名之曰略亦通史之例宜然尔夫金石因时显晦宋人立国本弱北自燕云西极宁夏南迤滇黔诸境俱未隶职方南宋偏安一隅疆圉日蹙士生其时耳目限于方域凡夫三代遗文与秦汉魏晋六朝隋唐所题刻散见于燕晋齐鲁秦陇河豫之闲者闻其名而不得摩其迹即从南北榷场购得拓本审视摩挲究莫详立碑之地郑氏虽极意搜罗列为一卷张皇补苴徒形阙陋又前后时有抵牾如虞世南书既载汝南公主碑又误分为狄道人墓志陈谏南海碑既载于唐总目又复载于善书家之后重沓舛谬不可枚举当由凭虚悬拟未见原碑非徒考订之不精亦其时地为之也恭遇圣朝鸿图式廓车书大同天山南北辟地二万余里旷古未入版图者皆设官授牧增置郡县汉裴岑勒铭之石唐姜行本纪功之碑并在巴里坤为自来好古者所无从访求而甄录今官吏往来胥得手摩其文搨本流传远迹而崑岩涧壑径涂日辟生聚日滋吉金贞石应时显著多前人所未及见幽珉古篆久而弥新右

文稽古之盛天禄石渠之藏又岂宋世郑樵所能望见哉臣等续修金石略仍依郑志之例先金后石以时代为叙唐以前取郑志所未载者统为一卷五代及宋辽金碑刻为一卷元明合为一卷排纂目次分缀撰书姓氏建立年岁与现存之地皆据直省所上拓本详确考核务求征信其有本在某地而或沦没榛芜销蚀水火散佚难稽者另列为一卷以存其目古碑闲有剥蚀或不具姓名皆仍其旧以昭阙疑之义至前人着录之误兼为辨证用备论古者之取资焉

历代金刻

历代石刻

○历代金刻

（臣）等谨按庸器少而碑刻多自来志金石者类能言之宋人搜剔鼎彝吕大防谓聚前代之藏珍备兴朝之法器郑志载鼎鬲爵匜统系诸宣和博古图犹前志也然宋人所甄录真贋杂收未臻其盛伏读钦定西清古鉴载泉刀货贝之文彝鼎尊彝之制辨析精微折衷至当（

臣）等敬谨缮录编入皇朝金石略以彰美备惟取钟鼎之散见四方者唐以前补原书之遗唐以后则次第续纂庶符郑志之体例每器必考

其所存之地所以征实也谨列今有者若干条如左

周鼎铭 【篆书丹徒】

汉虑虎铜尺题字 【篆书建初三年 曲阜】

唐宝室寺钟铭 【正书贞观三年 鄆州】

唐合州庆林观钟识 【正书长安四年 保宁】

唐景龙观钟铭 【正书景云二年 西安】

唐端州铜钟款识 【正书干宁四年 肇庆】

（臣）等谨按此钟又有款文云咸平三年敕命指挥镌凿当系宋代重铸而存唐时旧识也

唐锡钱鏐铁券 【正书干宁四年 台州】

（臣）等谨按钱氏铁券字迹模糊难以摸搨无拓本又按郑志所列诸器祇据图谱非徒未覩其器并未尝亲见搨文也然古器久而复

显三代至唐之法物时见于山溪祠宇之闲所谓应时而出也今据现存者补载如石

晋溪州铜柱记 【李宏皋记 正书天福五年 永顺】

（臣）等谨按此记为天策上将军江南诸道都统马希范与溪州刺史彭士愁约誓命天策府长史李宏皋作记欧阳修五代史记作彭

士然朱彝尊跋又误作士愁唯路振九国志作士愁与铜柱文合可以订欧阳史之讹

吴大安寺铁炉题字 【正书太和五年 新建】

南唐龙兴寺钟铭 【正书干德五年 南昌】
南汉干亨寺钟款识 【正书大宝四年 广州】
南汉黄莲山铜钟记 【正书大宝五年 韶州】
南汉光孝寺铁塔铭 【正书大宝十年 广州】
宋保宁寺浴室院钟款 【正书咸平三年 兴平】
宋卧龙寺钟款 【正书咸平六年 兴平】
宋净安寺钟款 【正书崇宁四年 朝邑】

（臣）等谨按净安寺钟款字迹模糊无拓本

宋鼎铭 【篆书丰润】

（臣）等谨按丰润古鼎出于明弘治闲土人凿井得之其铭云维甲午八月肇作宋器或疑为刘宋所铸然考之正史于事无据惟北宋政和四年岁在甲午方讲求古器为图谱鼎当铸于此时后随石鼓辇致燕京容或有遗在近郊者今定为北宋时鼎

宋星罗寺钟铭 【正书嘉定十七年 兴安】
宋崇胜寺铁甬题识 【正书淳佑五年 岳州】
宋崇胜寺七宝钟识 【正书咸淳十年 岳州】
昭化寺钟铭 【胡宗鷲撰 阮廷珍书 正书自题昌符九年 廉州】
菁口铁柱识 【正书柱凡十九字自题建极十三年 蒙化】

（臣）等谨按昭化寺钟为安南国所铸菁口铁柱南诏蒙氏所铸今以其时属南宋附于宋末

金铸九阳神钟铭 【柴震撰 正书 大定二十一年 临潼】
金崇教禅院钟识 【正书明昌三年 咸宁】
金泰宁寺铸钟记 【正书太和六年 咸宁】
金东安谯楼钟识 【正书大安二年 东安】
金东岳庙钟识 【正书大安二年 郿县】
元天真观铁方响题识 【正书至元十一年 郿县】
元灵应宫钟识 【正书至元二十一年 朝邑】
元滴漏铜壶记 【正书延佑三年 南海】
元祀西镇铁版文 【冯道安书 正书泰定四年 陇州】
元南海禅堂铜锅题字 【正书至元四年 韶州】
明五仙观钟识 【篆书洪武十一年 广州】
明净化院钟赞 【成化七年铸上刻宋嘉定九年普庵赞盖重铸也 正书 万载】

明净觉寺钟识 【鍾昶撰 正书成化十二年 万载】

明承恩寺钟识 【正书成化十二年 谷城】

明宜春台铜鼎记 【袁龚裳撰 正书嘉靖二十三年 袁州】

○历代石刻

（臣）等谨按郑志载历代碑刻以年代先后为叙惟唐人列为三类又分缀书家闲附金刻时见复互未免自紊其例今载唐以前石刻补郑志之阙遗统以时代为叙列今有者若干条如左

三代

汉

三国

晋

六朝

隋

唐

△三代

岫嵎山铭 【篆书衡山】

（臣）等谨按岫嵎禹碑始述于唐韩愈刘禹锡宋嘉定五年何致手摹其文重刻于岳麓书院凡七十七字明杨慎沈镒杨时乔各为释

文今浙江绍兴湖北汉阳四川重庆云南大理安甯摩刻本俱存山东黄县摩刻本已佚

孔子题殷比干墓字 【篆书汲县】

△汉

鲁孝王石刻 【篆书五凤二年 曲阜】

上谷府卿坟坛 【分书居摄二年 曲阜】

祝其卿坟坛 【分书居摄二年 曲阜】

汉中太守郤君开石门刻字 【分书永平六年 褒城】

中岳太室神道石阙铭 【分书元光二年 登封】

开母庙石阙铭 【篆书延光二年 登封】

敦煌太守裴岑纪功碑 【分书永和二年 巴里坤宜禾】

（臣）等谨按裴岑之功不见正史遗碑仅存恭遇

圣朝绥远辟疆俾其姓名事迹得表见于世幸矣然碑中所述祇称其斩馘部众克敌全师而已方今雪山月毳悉隶版图

鸿业广谟岂汉世所敢望哉

杨孟文石门颂 【分书建和二年 褒城】

鲁相置百石卒史碑 【分书永兴元年 曲阜】

郎中郑固碑 【分书延熹元年 济甯】

司隶校尉杨淮表纪 【分书熹平二年 褒城】

闻喜长韩仁铭 【分书熹平四年 荥阳】

（臣）等谨按韩仁铭不见于欧赵著录金正大中荥阳令李天翼得之京索闲土中赵秉文李献能俱有跋刻于碑之左方

州从事尹宙碑 【分书 即追封大成至圣碑熹平六年 鄆陵】

（臣）等谨按尹宙碑万历年闲始出土字尚完好

校官碑 【分书光和四年 江甯】

合阳令曹全碑 【王敞等刊石 分书中平二年 合阳】

碑阴 【分书】

（臣）等谨按曹全碑万历年闲始出土惟一因字半缺余俱完好

十三字残碑 【分书合阳】

尉氏令郑李宣碑阴 【篆书中平二年 济甯】

荡阴令张迁碑 【分书中平三年 东平】

碑阴 【分书】

祀三公山碑 【篆书元氏】

（臣）等谨按欧赵二录有汉三公山碑乃隶书光和四年碑今不存此碑在元氏城外篆书略可辨识者一百九十字碑首行有 【缺

】 初四年字

鲁相谒孔庙残碑 【分书曲阜】

竹叶碑 【郭尚等题 分书曲阜】

武都太守等题名残碑 【分书华阴】

胶东令王君庙门碑 【篆书济甯】

石人冢前残字 【篆书曲阜】

（臣）等谨按石人冢前题字一曰府门之卒一曰故乐安太守庶君亭汉乐安本王国其罢为郡置太守在桓帝以后

会稽山禹庙窆石题字 【分书山阴】

仓颉庙碑 【隶书白水】

（臣）等谨按此碑字迹磨泐不可读两侧题名略可识

△三国

（臣）等谨按三国六朝碑刻流传颇少郑志统题为三国六朝今仍其例

魏荡寇将军李苞题字 【正书景元四年 褒城】

△晋

潘宗伯韩仲元褒斜谷题字 【正书太始六年 褒城】

咸康砖题字 【正书咸康四年 句容张氏】

△六朝

梁侍中吴平忠侯萧山神道碑 【正书 重刻江甯】

梁始兴忠武王憺碑 【徐勉撰 贝义渊书 正书上元黄城村】

魏孙秋生等二百人造像记 【孟广逵撰 萧显庆书正书 太和七年 洛阳】

魏始平公造像记 【孟达撰 朱义章书 正书太和十一年 洛阳】

魏石门铭 【王远撰并书 正书永平二年 褒城】

魏杨大眼为孝文皇帝造像记 【正书洛阳】

魏灵藏薛法绍造石像记 【正书洛阳】

魏龙门老君洞铭 【正书熙平二年 洛阳】

魏兖州贾使君碑 【正书神龟二年 东平】

碑阴 【正书】

魏济青相凉朔恒六州刺史高植墓志 【正书德州】

魏敬史君碑 【正书兴和二年 长葛】

碑阴 【正书】

（臣）等谨按敬史君碑借史为使六朝多别体字此碑如纲作■〈纟 岗〉喜作
愷皆异文碑阴有茘社令又借茘为长矣

魏李仲璇修孔子庙碑 【正书兴和三年 曲阜】

碑阴 【正书】

魏修太公庙碑 【正书武定八年 汲县】

魏造像残碑 【正书富平】

齐陇东王感孝颂 【分书武平元年 肥城】

般若波罗密经 【王子椿书 正书武平元年 登封】

齐少林寺碑 【正书武平元年 登封】

齐朱岱林墓志 【子敬修撰序 侄敬范撰铭 正书武平二年 寿光】

（臣）等谨按墓志铭始于汉盛于六朝分撰志铭自此碑始唐宋人闲有效之者
为潘昂霄金石例所未载

齐佛座铭 【正书河清三年 益都】

齐南阳寺碑 【分书武平四年 青州】

周圣母寺四面像铭 【正书保定四年 蒲城】

周荥阳郑文公碑 【正书永定四年 掖县】

△隋

淮安定公赵芬残碑 【正书开皇五年 西安】 舍利塔下铭 【分书仁寿元年

益都】 安喜公李使君碑 【分书开皇十七

年 干州】 白云寺石幢 【正书开皇中立 巩县】 灵州刺史贺若谊碑 【正书

兴平】舍利塔铭额 【分书仁寿元年 大荔】

△唐

秦王告少林寺教 【正书武德四年 登封】

观音寺方碣 【陆德明撰 正书武德五年 汜水】

（臣）等谨按立碑列撰书人姓名始于六朝至唐人而盛行然唐碑亦有不载书人姓名者并有撰书人姓名俱不载者今并仍其旧

九歌 【欧阳询书 行书丰润】

幽州昭仁寺碑 【朱于奢撰文 正书 无书人姓名有明嘉靖年人题名】

姜行本纪功碑 【正书贞观十四年 镇西】

（臣）等谨按此碑额书大唐屯田卫将军姜行本碑考其时西域实未行屯田也今安西郡县屯牧相望民安乐业

圣朝声教之广远过汉唐矣

虞恭公温公碑 【欧阳询书 正书贞观十一年 醴泉】

（臣）等谨按温公碑字迹磨泐不可读

褒忠壮公段志元碑 【正书贞观十六年 醴泉】

申文献公高士廉莹兆记 【许敬宗撰 赵模书 正书贞观二十一年 醴泉】

国子祭酒孔颖达碑 【于志宁撰 正书贞观二十二年 醴泉】

高唐公马周碑 【许敬宗撰 殷仲容书 正书贞观二十二年 醴泉】

屏风碑 【太宗御书 行书余杭】

（臣）等谨按太宗书帝王龟鉴语为二屏风一系正书一系行书今余杭摩刻者行书也后附宋淳熙丁未姜夔跋嘉泰甲子王允初跋元延佑丙辰王昌跋

梁文昭公房元龄碑 【褚遂良书 正书醴泉】

汾阴献公薛牧碑 【正书永徽六年 醴泉】

三藏圣教序并记 【太宗撰记 高宗序 王行满书正书 显庆二年 在咸宜

】

尚书张胤碑 【正书显庆三年 醴泉】

卫景武公李靖碑 【许敬宗撰 王知敬书 正书显庆三年 醴泉】

碑阴 【行书 宋游师雄跋】

李靖告西岳文 【行书在华阴 又在广西藤县】

（臣）等谨按此碑朱彝尊疑其词旨不类系近时所伪托然宝刻类编已见著录则非出于近时矣今一在华阴一在藤县在藤县者为宋绍兴丙寅秋七月右朝请郎知军州施硅摩刻

鄂忠武公尉迟敬德碑 【许敬宗撰 正书显庆四年 醴泉】

姜遐断碑 【姜晞撰并书 正书醴泉】

兰陵长公主碑 【李义府撰 殷仲容书 分书显庆四年 醴泉】

左监门将军许洛仁碑 【正书龙朔二年 醴泉】

道因碑额佛名 【正书 额字分书龙朔三年 西安】

骑都尉李文墓志 【正书麟德元年 同州】

赠太师孔宣公碑 【崔行功撰 孙师范书 分书干封元年 曲阜】

纪国先妃陆氏碑 【正书干封元年 醴泉】

道安禅师塔记 【正书总章元年 长安百塔寺】

碧落碑 【篆书咸亨元年 绛州】

淄川公李孝同碑 【诸葛思贞书 正书咸亨元年 三原】

左监门将军张阿难碑 【瑶台寺僧书 正书咸亨二年 醴泉】

三藏圣教序并心经 【僧怀仁集王羲之书 行书咸亨三年 西安】

薛公阿史那忠碑 【正书上元二年 醴泉】

修孔子庙诏表 【分书仪凤二年 曲阜】

开业寺碑 【李尚一撰 苏文举书 正书开耀二年 元氏】

散骑常侍褚亮碑 【分书醴泉】

永泰寺石幢 【正书永淳元年 登封】

王征君口授铭 【王绍宗录并书 正书垂拱二年 登封】

夏日游神泉序 【韦光旦撰序 贾言淑无名氏诗各一首 尹元凯书 篆书垂拱四年 富平】

同游神泉诗 【尹元凯温翁念李鹏诗各一首 元凯书篆书 垂拱四年 富平】

（臣）等谨按金石录以为垂拱元年作又以温翁念为公念今俱据碑文改正
宣州刺史陶大举德政碑 【僧灵廓撰 托德甄书正书 永昌元年 太平】

太虞候副率乙速孤昭佑碑 【苗神客撰 正书载初二年 醴泉】

封祀坛碑 【武三思撰 薛曜书 正书天册万岁二年 登封】

顺陵残碑 【武三思撰 相王旦书咸阳】

荣德县丞梁师亮墓志 【正书万岁通天二年 长安百塔寺】

浮图铭并序 【赵顼撰 正书万岁通天二年 长葛】

（臣）等谨按浮图铭与敬史君碑系一石

金轮石幢 【开元相等造 正书圣历二年 永清】

（臣）等谨按金轮石幢字迹残缺无拓本明堂令于大猷碑 【正书 圣历三年 三原】

武后游石淙诗并序 【薛曜书 正书久视元年 登封】

造阿弥陀像铭 【王璇造 王无惑书 正书长安三年 西安】
造阿弥陀像赞 【高延贵书 正书长安三年 西安】
宝庆寺造像记 【姚元之造 正书长安三年 西安】
光宅寺造佛像铭 【姚元景造 正书长安四年 西安】
法门寺千佛像碑 【正书 内有武后新制字扶风】
荥阳县令卢公清德文 【刘穆之撰 王守质书 分书神龙三年 荥阳】
赐荥阳令卢正道敕 【飞白书景龙元年 荥阳】
道德经 【正书景龙二年 易州】

（臣）等谨按易州道德经字迹剥蚀无拓本

比邱尼法琬碑 【沙门承远撰 刘钦旦书 正书景龙三年 西安】
幽州石浮图记 【宁思道书 正书景云二年 房山】
孝子郭思训墓志 【正书景云二年 洛阳】
果毅都尉田义起石浮图颂 【王利贞撰 正书太极元年 房山】
凉国公契苾明碑 【姜师德撰 殷元祚书 正书先天元年 咸阳】
净域寺法藏禅师塔铭 【田休光撰 正书开元四年 西安终南山】
尹尊师碑 【员半千撰 侯少敬建 分书开元五年 盩厔】
幽栖寺正觉浮图铭 【分书开元六年 汜水】
唐兴寺碑 【许景先撰 僧师某书 分书开元六年 闻喜】
郁林观东岩壁记 【崔逸撰 分书开元七年 海州】
北岳府君碑 【姜虚心撰 陈怀志书 行书开元九年 曲阳】
镇军大将军吴文墓志 【沙门大雅集王羲之书 行书开元九年 西安】
云居寺李公石浮图颂 【梁高望书 行书开元十年 房山】
奉先寺牒 【正书开元十年 洛阳】
大卢舍那像龕记 【正书开元十年 洛阳】

（臣）等谨按奉先寺牒与像龕记同一石

少林寺赐田牒 【正书 开元十一年 登封】
赠池州刺史冯公碑 【崔尚撰 郭谦光书 分书开元十一年 咸阳】
香积寺净业法师塔铭 【毕彦雄撰 正书开元十二年 长安】
虢国公杨花台铭 【申屠液撰 正书咸宜花塔寺】

（臣）等谨按金石文字记误题虢国公主花台铭金石表因而附会谓顺宗女封虢国公主申屠液系顺宗时人今此碑实无主字宝刻类编作虢国公杨思勳花台铭新旧唐书俱载杨思勳封虢国公为得其实液系开元时人

肚痛帖 【张旭书 草书西安】

杨将军新庄像铭 【正书开元十二年 咸宜花塔寺】

右卫大将军乙速孤行俨碑 【刘宪撰 白羲暉书分书 开元十三年 醴泉】

恒山祠碑 【张嘉贞撰并书 正书开元十五年 曲阳】

端州石室记 【开元十五年 肇庆】

（臣）等谨按石室记书撰人姓名模糊不可辨识

云居寺浮图铭 【王大悦撰并书 正书开元十五年 房山】

尊胜陀罗尼经石幢 【沙门佛陀波利书 杨淡造 正书 开元十六年 陇州】

兴唐寺主尼法澄塔铭 【嗣彭王志陈撰并书 正书开元十七年 咸宜】

开元寺碑 【分书开元十八年 深泽】

净土寺石幢 【正书开元十九年 巩县】

坚行禅师塔铭 【正书开元二十一年 西安】

齐城神宝寺碑 【李■〈𠂔上袁下〉撰并书 分书开元二十四年 长清】

佛说蜜多心经 【行书】

（臣）等谨按此经系刻于神宝寺碑之侧

景贤大师身塔石记 【羊俞撰 僧温古书 行书开元二十五年 登封】

山顶石浮图后记 【王守泰书 行书开元二十八年 房山】

莒公唐俭碑 【正书开元二十九年 醴泉】

兖公之颂 【张之宏撰 包文该书 正书天宝元年 曲阜】

（臣）等谨按此碑后书牛孝麟崔庭玉宋休光赵再良许槿孔璿芝姓名璿芝时为邠王文学文宣公

老子灵应颂 【戴璇撰序 刘同升撰颂 戴仍书 分书 天宝元年 盩厔】

吏部南曹石幢颂 【左光胤撰序 尹匡祚撰颂 正书天宝元年 鄠县】

隆闾大法师怀恠碑 【怀恠及书 行书天宝二年 西安】

窦居士神道碑 【李邕撰 段青云书 行书天宝六载 三原】

北岳封安天王碑铭 【李荃撰 戴千龄书 分书天宝七载 曲阳】

碑阴 【康杰撰 戴千龄书 分书】

崇圣寺陀罗尼咒石幢 【张少悌书 行书天宝七载 长安】

陀罗经石幢 【蒋图撰 张贲书 行书天宝七载 咸宜】

开元寺石幢 【正书 骆齐休跋天宝七载 咸宜】

少林寺灵运禅师塔铭 【崔祺撰 沙门勤某书 行书天宝九载 登封】

中岳永泰寺碑 【沙门靖彰撰 荀望书 正书天宝十一载 登封】

题安期生诗石刻 【李白撰并书 正书掖县】

隐静寺诗 【李白撰并书 正书繁昌】
东方朔画像赞碑阴记 【颜真卿撰并书 正书天宝十三载 陵县】
施灯功德幢 【正书天宝十三载 长安】
云门山投龙诗 【赵居贞撰 吴某书 正书天宝中立 益都】
悯忠寺宝塔颂 【张不矜撰 苏灵芝书 行书至德二载 京师】
华岳题名 【颜真卿书 正书开元元年 华阴】
通微道诀碑 【肃宗御制 行书开元二年 三原】
述圣颂 【吕向撰并书 正书华阴】
祈雨记 【张惟一等记 李权书 分书开元二年 华阴】
左武卫大将军白道生碑 【于益撰 摯宗书 正书永泰元年 咸宜】
成德军节度使李宝臣纪功载政颂 【王佑撰 王志则书 永泰二年 真定】

（臣）等谨按纪功颂字迹剥蚀难以摩搨

陀罗尼经石幢铭 【僧昔真撰 康价书 行书大历二年 蒲城】
李氏迁先莹记 【李季卿撰 李阳冰书 篆书大历二年 西安】
谦卦 【李阳冰书 篆书芜湖】
会善寺戒坛敕牒 【行书大历二年 登封】
孔子庙堂碑 【程浩撰 颜真卿书 正书大历二年 永平济阳俱有重刻本】
义琬禅师墓志 【正书大历三年 洛阳】
储潭神颂 【裴谔撰 正书大历五年 赣州】
祈雨感应颂 【裴谔撰 裴宏书 正书刻于储潭神颂碑阴】
左金吾卫将军臧希宴碑 【张孚撰 韩秀弼书 分书大历五年 三原】
逍遥楼石刻 【颜真卿书 正书大历五年 临桂】
钱塘丞殷君夫人碑 【颜真卿撰并书 正书洛阳】
华岳庙题名 【侯季文书 正书大历七年 华阴】
宋璟碑侧记 【颜真卿撰并书 正书大历七年 沙河】
美原田真人碑 【萧森撰并摸王羲之书大历七年 富平】
文宣王庙新修三门记 【裴孝智撰 裴平书 分书大历八年 曲阜】
清源公王忠嗣碑 【元载撰 王缙书 正书大历十年 渭南】
妬神颂 【李譔撰 行书大历十一年 平定】
裴遵庆神道碑 【杨綰撰 卢晓书 分书大历十一年 洛阳】
高力士残碑 【行书大历十二年 蒲城】
题吴季子庙孔碑记 【萧定撰 正书大历十四年 丹阳】
景教流行中国碑 【僧景净撰 吕秀岩书 正书建中二年 西安】

建中四年奉使蔡州书 【颜真卿书 行书下有鲁公画像 同州】
吴岳祠堂记 【于公异撰 冷朝阳书 行书兴元二年 陇州】
石桥诗 【李祜撰 正书贞元三年 衢州】
移丹河记 【武少仪撰 正书贞元七年 高平】
自序帖 【僧怀素书 草书贞元九年 零陵】
圣母帖 【僧怀素书 草书贞元九年 后有太和四年裴休等题名 西安】
怀素藏真律公二帖 【草书西安】
会善寺戒坛记 【陆长源撰 陆郢书 分书贞元十一年 登封】
华岳庙题名 【郑全济书 正书贞元十三年 华阴】
澄城令郑公德政碑 【陈京撰 郑云逵书 行书贞元十四年 澄城】
留别南溪诗 【李渤撰并书 正书元和二年 临桂】
朝请大夫郑君碑 【韩淮撰 正书元和二年 洛阳】
谒华岳庙诗 【贾竦撰并书 正书元和二年 华阴】
窦叔向碑 【羊士谔撰 窦易书 正书元和三年 偃师】
保唐寺灯幢赞 【柳澈撰并书 正书元和七年 西安】
尊胜碑 【沙门不空译 正书元和八年 西安】
李辅光墓志 【崔元略撰 崔巨雅书 正书元和十年 高陵】
龙城柳铭 【柳宗元书 行书元和十二年 柳城】
浯溪诗 【皇甫湜撰 行书祁阳】
太保李良臣碑 【李宗闵撰 杨正书 正书长庆二年 榆次】
邠国公梁守谦功德碑 【杨承和撰并书 正书长庆二年 西安】
白鹦鹉赋 【韩愈书 草书海阳】
千岩表三字 【韩愈书 正书阳山】
大悲陀罗尼幢 【何宥则造 正书宝历二年 广州】
状嵩高灵胜诗 【尉迟汾撰 正书太和三年 登封】
浯溪题名 【王轩书 正书太和五年 祁阳】
杨岐山甄叔大师塔铭 【僧至闲撰 元幽书 行书太和六年 袁州萍乡】
尊胜陀罗尼经并序 【僧叡川撰 僧无可书 正书太和六年 西安】
义阳郡王符璘碑 【李宗闵撰 柳公权书 正书太和七年 富平】
寂照和尚碑 【段成式撰 僧无可书 正书太和七年 咸阳】
修龙宫碑 【李绅撰 正书太和九年 嵯县】
重阳庵题名 【分书开成元年 杭州】
国子学石经 【艾居晦等书 正书开成二年 西安】
周易 【九石】

尚书 【十石】
毛诗 【十六石】
周礼 【十七石】
仪礼 【二十石】
礼记 【三十三石】
春秋左氏传 【六十七石】
公羊传 【十七石】
谷梁传 【十六石】
孝经 【一石】
论语 【七石】
尔雅 【五石】
五经文字三卷 【一百六十部 张参撰】
九经字样一卷 【七十六部 唐元度撰合五经文字十石】

（臣）等谨按唐石经立于开成二年书石者为艾居晦陈玠段绛等当时书非一手所录经文偶不能无误然终胜他本金石文字记转据明代监本驳石经之误今以经典释文诸书校之皆当从石经为是文字记祇凭监本所见亦固矣

梓州刺史冯宿碑 【王起撰 柳公权书 正书开成二年 西安】
大偏觉法师元奘塔铭 【刘轲撰 沙门建初书 行书开成四年 西安】
华岳庙题名 【李景让撰 正书开成四年 华阴】
慈恩寺法师基公塔铭 【李宏度撰 沙门建初书 正书 开成四年 西安】
太尉李光颜碑 【李程撰 郭度书 正书开成五年 榆次】
浯溪题名 【卢钧撰 马植续书 正书开成五年 祁阳】
司直厅石幢 【郑模撰 裴诸书 正书开成五年 西安】
华岳庙题名 【陈商书 行书会昌元年 华阴】
尊胜陀罗尼经幢 【僧契元书 正书会昌二年 吴县】
谒华岳庙诗 【强至撰并书 行书会昌二年 华阴】
王文干墓志铭 【赵造撰 萧睦书 正书会昌四年 西安】
重藏舍利记 【采师伦书 正书会昌六年 京师】
蓬莱观碑 【孙谏卿撰 贝灵该书 分书大中二年 象山】

（臣）等谨按此碑出土未久字虽有可识处而书人名字模糊莫辨今据宝刻类编定为贝灵该书现无拓本

周公祠灵泉碑 【崔拱状奏 答诏 正书大中二年 凤翔岐山】
浯溪题名 【韦瓘书 正书大中二年 祁阳】

敕内庄宅使牒 【正书大中五年 西安】
比邱尼正言疏 【正书大中五年 西安】
尊胜陀罗尼经幢并序 【胡季良书 行书大中五年 杭州】
杜顺和尚行记 【杜殷撰 董景仁书 行书大中六年 西安】
定慧禅师碑 【裴休撰并书 正书大中九年 鄂县】
郎官石柱题名 【正书大中十二年 西安】
尊胜陀罗尼经幢 【李遇书 正书咸通六年 西安】
律大德禅师道行碑 【何筹撰 张景琮书 正书咸通八年 房山】
修文宣王庙记 【孔温裕奏状 贾防撰记 正书咸通十一年 曲阜】
碧落碑释文 【郑承规书 正书咸通十一年 绛州】

（臣）等谨按碧落碑在唐已刻别本今原碑已亡其存者别本耳所释篆文彼此互异今以郑承规所释为正

大悲心陀罗尼经 【正书咸通十二年 咸宜】
尊胜陀罗尼经 【僧从贤立 正书咸通十五年 登封】
尊胜陀罗尼经 【李瑞符书 行书干符三年 无锡】

（臣）等谨按李瑞符书陀罗尼经碑石模糊难以模搨

琅琊王氏夫人墓志 【正书干符三年 长安】
宏福寺石幢 【正书干符中立 西安】
谒升仙太子庙诗 【郑畋撰干符四年 偃师】
修武安君庙记 【正书干符五年 咸阳】
南护国院石幢 【李茂彰等记 正书中和四年 亳州】
重藏舍利记 【沙门南叙撰 知常书 正书景福元年 京师】
观世音经幢 【正书干宁元年 咸宜】
卧龙寺佛殿前石幢 【正书干宁元年 咸宜】
济安侯庙记 【李巨川撰 柳怀素书光化二年 华州】
王审知德政碑 【于兢撰 正书天佑三年 福州】
重修法门寺塔庙记 【薛昌序撰 王仁恭书 正书天佑十九年 扶风】
敬善寺石像铭 【李孝伦撰 正书洛阳】
润州仁寿观魏法师碑 【胡楚滨撰 张德言书 行书丹徒】
宝庆寺题名 【梁义深书 正书西安】

（臣）等谨按梁义深不见正史金石史疑为武后长安时人亦无确据今从阙疑凡唐碑无时代可稽者俱附载于末

盘山题名 【李从简书 正书蓟州】

（臣）等谨按李从简来游数字落茅石中不能摸搨

北岳坛庙碑 【郑子春撰 崔铨书 分书曲阳】

赠邢州刺史宋府君碑 【正书沙河】

（臣）等谨按宋府君碑字迹剥蚀难辨

居士赵琮墓志 【正书益都】

邛州刺史狄公碑 【正书洛阳】

检校太子宾客尔朱逵墓碣 【程彦矩撰 正书合阳】

尊胜陀罗尼经 【李师简造 正书扬州东隐庵】

荐福寺三阶禅师碑额 【正书西安】

钦定续通志卷一百六十七

●钦定续通志卷一百六十八 金石略二

金石略 【二 今有】

五代

宋

辽

金

△五代

（臣）等谨按宋人录金石之文多自唐兼及五代唯郑志迄于唐末今自五代以后碑刻次第续纂疏称五代者从郑志题三国六朝旧例也

唐振武节度使李存进碑 【吕梦奇撰 梁邕书 正书同光二年 太原】

唐风山灵德王庙碑 【钱鏐撰 正书长兴二年 武康】

净土寺陀罗尼幢 【正书长兴三年 巩县】

唐赐冥福院地土牒 【正书长兴四年 泰安】

晋建雄节度使相里金碑 【李象撰 成知训书 正书天福五年 汾阳】

晋广慈院南北两庄地土牒 【正书天福六年 咸宜】

晋冥福院写经碑 【周元休撰 正书天福八年 泰安】

晋赠太保史匡翰碑 【陶谷撰 阎光远书 行书天福八年 太原】

晋开化寺瑶严阁记 【苏万珪撰 苏晓书 行书开运三年 太原】

晋移文宣王庙记 【冯道撰并书 正书开运三年 大荔】

周创修六曹轩宇记 【僧应文撰 正书显德元年 顺德】

周卫州刺史郭公屏盗碑 【杜鞞撰 孙崇望书 行书显德二年 卫辉】

周中书侍郎景范碑 【扈载撰 孙崇望书 行书显德三年 邹平】

（臣）等谨按景范碑系行书金石文字记误作正书

周龙泉禅院记 【徐纶撰 王献可跋并书 正书显德三年 阳城】

周高阳许氏石幢 【正书显德五年 苏州】

（臣）等谨按许氏石幢现在虎邱千人石傍岁久剥蚀难以摸搨

闽坚牢塔记 【林同颖撰 僧无逸书 正书永隆三年 福州】

南汉大觉寺宏明碑 【陈守中撰 僧行修书 正书大宝七年 乳源】

南汉造千佛宝塔记 【行书大宝十年 广州】

北汉千佛楼碑 【李恽撰 刘守清书 行书广运二年 太原】

（臣）等谨按金石文字记作晋开运二年误今据碑改正

南唐龙光院寂禅师碑 【韩熙载撰 张藻书 分书开宝二年 吉水】

（臣）等谨按闽南汉北汉南唐诸碑附见五代后从金石录之例

△宋

重修文宣王庙记 【刘从义撰 王昭吉书 行书建隆三年 西安】

龙兴寺铸像修大悲阁序 【僧惠演撰 正书干德元年 真定】

重修中岳庙碑 【骆文蔚撰并书 行书干德二年 登封】

二体千字文 【僧梦英篆书 袁正己隶书干德三年 西安】

三体阴符经 【郭忠恕书 以篆为正以古隶分注于下干德四年 西安】

十八体书 【僧梦英书 干德五年 西安附刻僧梦英诗十二首 袁正己书正书】

篆书千字文序 【陶谷撰 皇甫俨书 正书干德五年 西安】

摩利支天经 【袁正己书 正书干德六年 西安】

阴符经 【袁正己书 正书干德六年 西安】

修商王成汤庙碑 【李莹撰 张仁愿书 正书开宝六年 荣河】

修周武王庙碑 【卢多逊撰 孙崇望书 行书开宝六年 咸阳】

修周康王庙碑 【黄逊浮撰 孙崇望书 行书开宝六年 咸阳】

修汉光武庙碑 【苏德祥撰 孙崇望书 行书开宝六年 孟津】

修唐太宗庙碑 【李莹撰 孙崇望书 行书开宝六年 醴泉】

修嵩岳中天王庙碑 【卢多逊撰 孙崇望书 行书开宝六年 登封】

修南海广利王庙碑 【裴丽泽撰 韩溥书 行书开宝六年 广州】

修商王中宗庙碑 【梁周翰撰 司徒俨书 行书开宝七年 内黄】

（臣）等谨按宋史礼志太祖命李昉卢多逊王佑扈蒙等分撰岳渎祠及历代帝王碑遣孙崇望等分诣诸庙书于石今尚存者成汤庙

以下七碑皆刻于开宝六年唯中宗庙刻于七年四月当系统刻

苍颉庙碑并碑阴 【韩从训撰 韩文正书 行书开宝八年 白水】

龙兴寺新修三门记 【王禹偁撰 司徒俨书 行书 太平兴国元年 滋阳】

保宁寺牒 【正书太平兴国三年 兴平】

重书程浩夫子庙堂记 【僧梦英书 正书太平兴国七年 西安】
修文宣王庙碑 【吕蒙正撰 白崇矩书 正书太平兴国八年 曲阜】
广慈院修像记 【陈抟撰 杨从义书 正书雍熙二年 咸宜】
新译三藏圣教序 【太宗御制 僧云胜书 篆书端拱元年 西安】
龙兴寺铸大悲像并建阁碑 【田锡撰 吴郢书 行书端拱二年 真定】
香城寺牒 【正书淳化二年 咸宜】
重修北岳安天王庙碑 【王禹偁撰 黄仲英书 正书淳化二年 曲阳】
回山重修王母宫记 【陶谷撰 僧梦英书 行书咸平二年 泾阳】
赠梦英大师诗 【僧正蒙书 正书咸平二年 西安】
修夫子庙碑 【李垂撰 集王羲之书 行书咸平二年 绛州】
说文目录偏傍字源 【僧梦英书 篆书咸平二年 西安】

（臣）等谨按梦英所书说文目录以今本说文目录校之多一子部少一说部末附梦英自序并郭忠恕答书俱正书

敕赐西岳乳香记 【韩见素撰 正书咸平六年 华阴】
敕赐文宣王庙牒 【正书景德三年 曲阜】
修灵宝三篆坛记 【庞奎撰 正书景德三年 华阴】
留题读易亭诗 【黄梦松撰并书 正书景德四年 青州】
登泰山谢天书述功德铭 【真宗御制御书 正书大中祥符元年 泰安】
禅社首坛颂 【王钦若撰 正书大中祥符元年 泰安】
周文宪王赞 【真宗御制 正书大中祥符元年 曲阜】
元圣文宣王赞 【真宗御制御书 正书大中祥符元年 曲阜】
赐御制御书牒 【草书大中祥符元年 曲阜】
天贶殿碑铭 【杨亿撰 尹熙古书 行书大中祥符二年 泰安】
封祀坛颂 【王旦撰 裴瑀书 行书大中祥符二年 泰安】
南山十咏 【刘仲堪述 行书大中祥符二年 韶州】
重书旌儒庙碑 【徐■〈王延〉书 正书 附张綽记大中祥符三年 临潼】
龙泉寺普济院碑 【阎仲卿撰 张綽书 行书大中祥符三年 汧阳】
龙门铭 【真宗御制御书 正书大中祥符四年 洛阳】
泰宁宫牒 【正书大中祥符四年 渭南】
重修文宣王庙碑 【董储撰 僧嗣端书 正书大中祥符四年 蓝田】
御制文宣王赞及加号诏 【正书大中祥符五年 南雄】
东岳天齐仁圣帝碑 【晁迥撰 尹熙古书 行书大中祥符六年 泰安】
中岳崇圣帝碑 【王曾撰 白宪书 行书大中祥符七年 登封】
赐陈尧咨疏龙首渠敕 【行书大中祥符七年 西安】

淮渎长源公庙碑 【路振撰 杨昭度书 行书大中祥符七年 桐柏】

北岳安天元圣帝碑 【陈彭年撰 邢守元书 行书大中祥符九年 曲阳】

勃兴颂 【马应撰 唐英书 篆书天禧三年 西安】

（臣）等谨按此碑自题虚仪先生撰不著名末云皇帝嗣明离之三叶岁在未金石文存云虚仪不知何人碑当立于开宝四年辛未今

考宋史文苑传云马应服道士衣自称先生开宝初仿元结中兴颂作勃兴颂以述太祖下荆湘之功则此碑马应所撰也太祖开创之主不当

云嗣明离其称三叶者犹言三世也碑当补立于真宗天禧三年己未

中岳醮告文 【真宗御制 刘太初书 行书天禧三年 登封】

放生池记 【王随撰 僧思齐书 正书天禧五年 钱塘】

灵佑观中书门下牒 【徐则书 行书天禧五年 吴县】

中岳中天崇圣帝碑 【陈知微撰 邢守元书 正书干兴元年 登封】

七星岩题名 【赵胜书 正书干兴元年 肇庆】

（臣）等谨按七星岩赵胜题名剥落难搨

王母宫颂 【陶谷撰 上官秘书 篆书天圣三年 涇州】

昭庆寺梦笔桥记 【叶清臣撰 吴则之书 正书天圣四年 萧山】

浴室院钟楼记碑阴 【僧思铨书 正书天圣四年 兴平】

七星岩题名 【贾守文书 正书天圣六年 肇庆】

（臣）等谨按七星岩贾守文题名剥落难搨

慎刑箴并序 【晁迥撰 卢经书 正书天圣六年 西安】

劝慎刑文 【晁迥撰 正书西安】

新修河亭记题额 【文彦博书 正书天圣六年 翼城】

净惠罗汉院碑 【张观撰 李九思书 行书天圣八年 巩县】

栖禅寺新修水磨记 【僧志陆撰并书 行书天圣八年 鄠县】

重修升仙太子庙碑 【谢绛撰】

灵山闻喜院记 【许申撰 许用其书 正书景佑元年 潮阳】

会圣宫碑 【石中立撰 李孝章书 正书景佑元年 偃师】

祖庙祭文 【孔道辅撰 张宗孟书景佑二年 曲阜】

永兴军牒 【僧惟悟书 正书景佑二年 西安】

曰佛院建宝殿记 【廖偁撰 僧思惠书景佑二年 浦江】

新建讲堂记 【成昂撰 孙正己书 正书景佑四年 曲阜】

五贤堂碑 【孔道辅撰并书 正书景佑五年 曲阜】

读中兴颂诗 【陈统撰 郑弦书 行书景佑五年 祁阳】

尊胜陀罗尼经序 【剧如锡书 正书景佑五年 赵州】

重书江总栖霞寺碑 【僧怀则书 行书康定元年 江甯】

邢州大安山封峦寺碑 【石介撰 僧绍珍书康定二年 沙河】

（臣）等谨按封峦寺碑字多剥落不可读

石氏世表 【石介撰 士建中书 正书康定二年 泰安】

中书门下牒 【陆贄书 正书康定二年 南海】

石室题名 【朱显之书 行书庆历二年 肇庆】

（臣）等谨按朱显之题名字迹残缺不能摸搨

兴元府修文宣王庙记 【窦充撰 正书庆历二年 褒城】

兴庆池禊宴诗并序 【张子定撰序 范雍等十二人诗正书 庆历二年 西安

】

东海郁林观三言诗 【祖无择撰 苏唐卿书 篆书庆历三年 海州】

转运使马寻题名 【朱显之书 行书庆历三年 肇庆】

（臣）等谨按马寻题名字迹残缺不能摸搨

谒首阳山二贤祠文 【邵必撰 黄载书 篆书庆历四年 蒲州】

孔子庙碑 【刘子图撰 王乐书 分书庆历四年 朝城】

普通塔记 【卢觐撰 僧可度书 正书庆历五年 扶风】

过淮阴侯庙诗 【韩琦撰 曹泾书 正书庆历八年 获鹿】

重修北岳庙记 【韩琦撰并书 正书皇佑元年 曲阳】

石室题名 【宋克隆书 正书皇佑元年 肇庆】

重修李太尉祠堂记 【王皙撰 张大中书 正书皇佑元年 富平】

重修县学记 【姚嗣宗撰 正书皇佑元年 扶风】

同游泐溪石室记 【余靖撰 黄昌龄书 正书皇佑二年 乐昌】

谒广利王庙题名 【祖无择书 正书皇佑二年 南海】

崇教南辟支佛塔记 【僧普庄撰 顾清书 正书皇佑二年 江宁】

新置永通监记 【余靖撰 黄昌龄书 正书皇佑二年 韶州】

（臣）等谨按永通监记字迹残缺不可读

三洲岩题名 【祖无择书 正书皇佑二年 肇庆】

三洲岩题名 【况子仪书 正书无年月 肇庆】

复惟识廡院记 【黄庶撰 正书皇佑三年 西安】

祭南海庙题名 【朱显之书 正书皇佑三年 广州】

众春园记 【韩琦撰 正书皇佑三年 定州】

浯溪题名 【狄青书 行书皇佑四年 祁阳】

（臣）等谨按狄青题名字迹剥落无拓本

游碧落洞诗 【苏缄撰 行书皇佑四年 英德】

（臣）等谨按苏缄诗字迹剥落无拓本

岱岳观题名 【宋禧书 正书皇佑四年 泰安】

加封南海敕 【下附元绛记 李直书 正书皇佑五年 广州】

平依智高将佐题名记 【撰人名阙 正书皇佑五年 临桂】

浯溪题名 【柳拱辰书 行书皇佑六年 祁阳】

（臣）等谨按宋史皇佑祇五年次年四月改元至和柳拱辰浯溪题名记皇佑六年甲午正月二十日尚书职方员外郎知永州柳拱辰

同尚书驾部郎中分司周世南祁阳县令齐术同游盖其时尚未改元也故仍题六年

野吏亭诗 【陈尧佐撰 黄岳书至和元年 惠州】

京兆府小学规 【裴矜书 正书至和元年 西安】

游药水寺记 【刘异撰 行书至和三年 略阳】

白水路记 【雷简夫撰并书 正书嘉佑二年 略阳】

白云岩题名 【曾伸书 正书嘉佑三年 惠州】

云门山僧守忠碑 【李世昌书 正书嘉佑三年 益都】

舍利塔铭 【赵抃撰 慎东美书 正书嘉佑三年 龙游】

崧台石室题名 【翁彦升书 正书嘉佑五年 肇庆】

别立摩崖碑记 【谢景初撰 正书嘉佑五年 汾州】

万安桥记 【蔡襄撰并书 正书嘉佑五年 晋江】

宿少林寺诗 【文彦博撰 正书嘉佑五年 登封】

千佛殿记 【王逵撰 正书嘉佑五年 长清】

清平军修夫子庙碑 【郭灏撰 僧神俊书 正书嘉佑六年 章邱】

白革湖修舍利塔记 【赵抃撰 慎东美书 行书嘉佑七年 龙游】

浯溪诗 【杨异撰并书 行书嘉佑七年 祁阳】

（臣）等谨按杨异浯溪诗字迹残缺不能读

妙德院明觉殿记 【雷简夫撰 刘戡书 正书嘉佑八年 耀州】

寄薛绍彭诗 【米芾撰并书 行书治平元年 襄阳】

浯溪题名 【沈绅书 行书治平元年 祁阳】

题太史公庙诗 【李奎撰 正书治平元年 韩城】

七星岩题名 【皇甫宗宪书 正书治平二年 肇庆】

隐贤岩记 【杨杰撰 正书治平二年 桐城】

相州昼锦堂记 【欧阳修撰 蔡襄书 正书治平二年 彰德】

（臣）等谨按昼锦堂记福建莆田江南华亭云南昆明俱有翻刻本

龙门峡题字 【沈绅书 正书治平三年 昭平】

玉华山诗 【张岫撰 正书治平三年 宜君】

留题玉华山诗 【宋球张道宗撰 冀上之书 正书治平三年 宜君】
九曜石题名 【卢士宏书 正书治平三年 南海】
重修南海庙记 【章望之撰 曹鹭书 正书治平四年 广州】
重书张说温泉箴 【杨方平书 正书治平四年 临潼】
题观鱼轩诗 【韩琦撰并书 正书治平四年 安阳】
七星岩题名 【康卫书 正书熙宁二年 肇庆】
游天平山留题碣 【王琬书 正书熙宁二年 林县】
浯溪题名 【李昭邈书 正书熙宁二年 祁阳】
虔州修储潭庙记 【董庆基撰 正书熙宁二年 赣州】
重建晋太尉嵇公碑 【韩琦撰并书 正书熙宁三年 汤阴】
泂冈阡表 【欧阳修撰 正书熙宁三年 庐陵】
北禅寺题名 【何宗道书 正书熙宁四年 连州】
谒南海祠题名 【何宗道书 正书熙宁四年 南海】
李忠信墓表 【姜潜撰 郭棨书 正书熙宁五年 泰安】
牡丹诗 【苏轼撰并书 正书熙宁五年 钱塘】
石笋和韵诗二首 【张紘张征撰 正书熙宁五年 邵武】
骑牛图诗 【陈禹俞撰并书 行书熙宁六年 金华】
栖岩题名 【李宗仪书 正书熙宁六年 韶州】
枢室二大字 【无书人年月即在李宗仪题名之正面】
祈雪记 【王谠书 正书熙宁六年 华阴】
雁塔题名 【吴中复书 分书熙宁六年 西安】
九曜石题名 【金君卿书 正书熙宁六年 广州】
浯溪题名 【柳应辰书 行书熙宁六年 祁阳】
敕祠南海神记 【陈之方撰 正书熙宁七年 广州】
题九曜石诗并记 【许彦先撰并书 正书熙宁七年 广州】
兴庆池题名 【吴中复书 分书熙宁七年 西安】
同游药洲题名 【程师孟书 行书熙宁七年 广州】
浯溪题名 【蔚宗书 行书熙宁七年 祁阳】
开元寺重塑佛像记 【李騃撰 邝强书 正书熙宁七年 韶州】
南海祷雨记 【苏缄撰 李穉书 正书熙宁七年 广州】
题中兴颂诗 【米黻撰并书 行书熙宁八年 祁阳】
雪夜书北台壁诗 【苏轼撰并书 正书熙宁八年 诸城】
刻杜甫白水县诗记 【吕昌彦撰 李慥书 行书熙宁九年 白水】
张揆读书台碑 【苏轼书 正书熙宁十年 历城】

梵书庵字赞 【太宗御制 僧显俊书 正书熙宁十年 咸宜】
题种明逸会真宫诗后 【胡宗回等撰 谭述序 行书熙宁十年 泰安】
游碧落洞诗 【许彦先撰并书 正书熙宁十年 韶州】
龙洞祈雪题名 【韩铎书 正书元丰元年 历城】
九曜石题名 【曾布书 行书元丰元年 广州】
封忠武王敕 【正书元丰二年 宜川】
敕封顺应侯牒 【正书元丰二年 历城】
浑王庙记 【马唐民撰 郭仲益书 正书元丰二年 宜川】
龙洞祷雨题名 【韩铎书 正书元丰二年 历城】
留题坊州玉华宫诗 【蒋之奇撰 全载书 正书元丰三年 宜君 上有元丰
癸亥胡淳夫题】

韩忠献祠堂记 【郭时亮撰 滕中书元丰三年 定州】
书江淹香炉峯诗 【米芾书 行书元丰三年 南康】
天马赋 【米芾书 行书元丰三年 西安】
云岩寺金像记 【李公彦撰 正书元丰三年 长清】
题旧隐堂诗碑 【王临撰并书 行书元丰四年 历城】
双阜茱萸行 【陈叔度撰 陈正举书 分书元丰五年 临潼】
龙井方圆庵记 【僧守一撰 米芾书 行书元丰六年 钱塘】
五岳庙记 【刘郭撰 郝淇书 正书元丰六年 望都】
天和寺诗 【苏轼撰并书 行书 陈雄跋 正书元丰六年 扶风】
南山顺济龙王碑 【黄庭坚撰并书 行书元丰六年 淳熙己亥刻 江西】
塔寺创修法堂记 【姚宗道撰并书 王好问题额正书元丰六年 芮城】
南山题名 【廖君玉书 正书元丰七年 英德】

（臣）等谨按廖君玉南山题名字迹残缺不能摸搨

海市诗 【苏轼撰并书 正书元丰八年 蓬莱】
真娘墓诗 【米芾书 正书元丰八年 襄阳】
永安院度僧记 【马昭撰 马城书 行书元丰八年 赵州】
东山题名 【张翥书 正书元丰八年 潮阳】
禹王庙题名 【司马光书 分书 后有李权跋元丰八年 夏县】
家人卦 【司马光书 分书钱塘】
乐记 【司马光书 分书钱塘】
中庸 【司马光书 分书钱塘】

（臣）等谨按司马光所书乐记自礼乐不可斯须去身至举而措之所书中庸自
道不远人至无入而不自得焉与家人卦并刻于杭州

南屏山石壁旁刊右司马温公书六字盖宋时重光之分书南渡后勒石者也

京兆尹杜公志铭 【李琚撰 杜大忠书元佑元年 辉县】

南山题名 【郑侠书 正书元佑元年 韶州】

布袋真仪赞 【苏轼书 正书元佑二年 潍县】

上清词 【苏轼撰并书 附苏辙诗 正书元佑二年 盩厔】

武溪深诗 【蒋之奇书 行书元佑二年 韶州】

（臣）等谨按蒋之奇诗字迹残缺无拓本

玉华宫记 【游师雄撰并书 正书元佑三年 宜君】

白云岩题名 【谭粹书 正书元佑三年 惠州】

昭陵六马像赞 【游师雄撰 刁爝书 正书元佑四年 醴泉】

李英公神道碑阴记 【游师雄撰 黎持书 正书元佑四年 醴泉】

刻李义山题浑忠武祠诗 【游师雄跋并书 正书元佑四年 干州】

赐嘉贤庙敕 【附杨杰奏状 正书元佑四年 丹阳】

（臣）等谨按元佑嘉贤庙敕墨迹尚存丹阳碑石已无考

九成宫诗 【游师雄撰 正书元佑五年 麟游】

京兆府学移石经记 【黎持撰 安宜之书 正书元佑五年 西安】

浑忠武祠记 【辛育撰 安宜之书 正书元佑五年 干州】

韩魏公祠绘事记 【王岩叟撰 刘安世书 正书元佑五年 定州】

谒太史公祠记 【邵■〈禽虎〉撰 正书元佑五年 韩城】

醉翁亭记 【欧阳修撰 苏轼书 行书元佑六年 滁州】

醉翁亭记小本 【行书 无书人姓名滁州】

碧落洞题名 【陆远题 正书元佑六年 韶州】

丰乐亭记 【欧阳修撰 苏轼书 行书元佑六年 滁州】

（臣）等谨按醉翁亭记丰乐亭记刻于滁州者皆重摹本河南鄢陵又刻醉翁亭记谓得苏轼手迹双钩上石末附赵孟俯沈周诸跋

宸奎阁碑铭 【苏轼撰并书 正书元佑六年 鄞县】

七佛偈 【黄庭坚书 正书元佑六年 南康】

满庭芳词 【苏轼撰并书 正书元佑六年 定州】

云门山题名 【曾布书 正书元佑六年 益都】

社稷坛铭 【梅述撰 王裕民书 正书元佑六年 侯官】

七星岩题名 【许珏书 正书元佑六年 肇庆】

寿阳修学记 【李殷撰 王可书 正书元佑七年 寿阳】

韩文公庙碑 【苏轼撰 正书元佑七年 潮州】

芮城县题名记 【章炳文撰 正书元佑七年 芮城】

清明游龙洞题名 【潘世美书 正书元佑八年 历城】
重书孝女曹娥碑 【蔡卞书 行书元佑八年 会稽】
重修县学记 【时彦撰 王宽书 正书元佑八年 合阳】
重书阿房宫赋 【安宜之书 正书元佑八年 西安】
碧落洞题名 【范闳父书 行书元佑八年 韶州】
祈雨淮渚记 【顿起撰并书 篆书绍圣元年 桐柏】
佛牙赞 【仁宗御制 正书绍圣元年 钱塘】
碧落洞题名 【方希觉题名 正书绍圣二年 韶州】
游玉华山记 【钱景允撰 分书绍圣二年 宜君】
南山众乐亭诗 【方希觉撰并书 正书绍圣三年 英德】
新葺南山亭诗 【朱伯虎撰 正书绍圣三年 英德】
（臣）等谨按朱伯虎南山亭诗难以摸搨无拓本
仇公着墓志 【柳子文撰 王同老书 行书绍圣三年 益都】
净土寺宝月碑 【李洵撰并书 正书绍圣三年 巩县】
陀罗尼经 【苏轼书 正书绍圣四年 宣城】
游师雄墓志 【张舜民撰 邵■〈龠鹿〉书 正书绍圣四年 西安】
仁寿县君苏氏志 【刘次庄撰并书 正书绍圣四年 上元】
龙兴寺大悲阁记 【葛繁撰 正书绍圣四年 真定】
奉议郎施镇墓记 【李琮撰 张绶书 正书绍圣四年 宣城】
玉华宫诗 【胡授撰 正书绍圣四年 宜君】
赐戒香寺公据 【僧文才书 正书绍圣四年 合阳】
三坛寺宰堵波铭 【潘卞撰 冯睿书 正书绍圣五年 历城】
越州重修城隍庙记 【吴夔撰 王仲勇书 行书绍圣五年 绍兴】
真武经 【宋传书 正书元符二年 登封】
县署题名 【朱子才书 行书元符二年 汲县】
游南山题名 【孙叔静书 行书元符二年 英德】
顺应侯碑阴记 【李元膺撰 行书元符三年 历城】
修鸠摩罗什塔亭记 【宁祖武撰 僧宗议书 分书元符三年 鄂县】
温泉遇雪诗 【程懿叔撰 正书元符三年 临潼】
三洲岩题名 【苏轼书 正书元符三年 肇庆】
题灵峯山诗 【苏轼撰 正书凡九幅元符三年 广州】
表忠观碑 【苏轼撰并书 正书钱塘】
云浪石盆铭 【苏轼书 正书定州】
安平泉诗 【苏轼撰并书 正书仁和】

乔禹功等题名 【苏轼书 分书诸城】
黄州谢上表稿 【苏轼撰并书 行书太平】
诗偈 【苏轼撰并书 行书太平】
归去来二章 【苏轼撰并书 行书太平】
罗池庙迎送神诗 【苏轼书 正书柳州】
径山诗 【苏轼撰并书 行书余杭】
浴日亭诗 【苏轼撰并书 正书南海】
都昌县诗 【苏轼撰并书 正书都昌】
蒲礪寺诗 【苏轼撰并书 正书南海】
浮休二字 【苏轼书 正书在曲阳水窠岩】
洞酌亭诗 【苏轼撰并书 正书琼州】
超然台赋 【苏辙撰 苏轼书 正书诸城】
黄楼赋 【苏辙撰并书 正书徐州】
重书比干庙碑 【张琪书 正书建中靖国元年 汲县】
三十六峯赋 【楼异撰 僧昙潜书 行书建中靖国元年 登封】
题期思庙诗 【张某撰并书 正书建中靖国元年 固始】
重建南山亭诗 【谭粹撰 正书建中靖国元年 英德】
首楞严经偈 【蔡卞书 行书建中靖国元年 长清】
赐辟雍诏 【薛昂书 行书崇宁元年 陵县】
芜湖县学记 【黄裳撰 米芾书 行书崇宁元年 芜湖】
李长者行迹碑 【比邱宗胜立石 正书上有像崇宁元年 寿阳】
草堂寺诗刻 【梅泽撰 崔珙书 正书崇宁元年 鄂县】
七星岩题名 【郑敦义书 正书崇宁元年 肇庆】
（臣）等谨按郑敦义七星岩题名难以摸搨无拓本
橙轩诗 【彭迪明撰 正书崇宁元年 兴平】
中岳寺修罗汉洞记 【僧有挺撰 王遯书 正书崇宁元年 登封】
终南山杂咏 【李駒撰 崔珙书 行书崇宁二年 鄂县】
孙真人庙记 【王允中撰 束长孺书 正书崇宁二年 华原五台山】
赐妙应孙真人牒 【行书崇宁三年 华原五台山】
兴学圣德颂 【范致君撰 正书崇宁三年 顺德】
进兴学圣德颂表 【范致君撰 正书崇宁三年 顺德】
元佑党籍碑 【正书崇宁三年 柳州】
栖禅寺诗 【唐遯撰 正书崇宁三年 鄂县】
云中谒李长者祠诗 【员逢源撰并书 行书崇宁三年 寿阳】

浯溪诗 【黄庭坚撰并书 正书崇宁三年 祁阳】

（臣）等谨按黄庭坚浯溪诗碑字迹残缺无拓本

云亭宴集诗 【黄庭坚撰并书 行书安化】

少林寺达摩颂 【黄庭坚撰并书 行书登封】

孔圣手植桧赞 【米芾书 行书曲阜】

御制文宣王赞 【米芾书 篆书崇宁四年 无为】

颜鲁公祠碑阴 【米芾书 行书费县】

动静交相养赋 【米芾书 行书襄阳】

春赋 【米芾书 行书襄阳】

赠卢平叙诗三首 【米芾书 行书襄阳】

书朱文长虎邱诗 【米芾书 行书襄阳】

书昌黎诗三首 【米芾书 行书襄阳】

二王书跋并苏子瞻诗 【米芾书 行书襄阳】

药洲二字 【米芾书 行书广州】

（臣）等谨按米芾药洲二字难以摸搨未得拓本

宝藏二大字 【米芾书 正书英德无为俱有刻本】

第一山三字 【米芾书杭州华阴登封当涂俱有刻本】

荔枝谱 【蔡襄撰并书 正书莆田】

忘归石三字 【蔡襄书闽县】

苔泉二字 【蔡襄书侯官】

太白峯三字 【蔡襄书 正书惠安】

七星岩题名 【张渐书 正书崇宁四年 肇庆】

五台山唱和诗 【于巽王允中等撰 正书崇宁四年 耀州】

石室题名 【滕佑书 正书崇宁四年 肇庆】

大乘山普岩寺碑 【范致明撰并书 正书崇宁五年 裕州】

万寿院记 【尔朱权撰 杨时中书 正书崇宁五年 同州】

学校八行八刑条碑 【徽宗御制大观元年 河南】

大观圣作碑 【徽宗御制大观二年 兴平荷泽俱有】

（臣）等谨按大观御制碑当时统行学宫今仅有存者八行碑存其二一在襄城一在昆山圣作碑存其三一在厯城一在荷泽一在兴平厯城无拓本

留题南山诗 【李舟书 行书大观二年 英德】

游灵岩记 【郭思撰 正书大观二年 厯城】

草堂寺诗 【孙鳌撰 正书大观三年 鄆县】

留题南山诗 【吴师能撰并书 行书大观三年 英德】
开元寺圆照塔记 【陈振撰 晁咏之书 正书大观四年 顺德】
孙覲墓志 【许翰撰并书 正书大观四年 泰安】
游超化寺诗 【程颖撰并书 行书大观四年 密县】
过临潼三绝句 【李昉撰 李熙民书跋 正书大观四年 临潼】
雁塔题名 【徐处仁撰 正书政和元年 西安】
河渚灵源王庙碑 【陈振撰 王毖书 正书政和二年 韩城】
穆氏先莹表 【王寿卿撰并书 篆书 黄庭坚跋政和二年 章邱】
宗城新学记 【秦怛撰 牛直孺书 正书政和三年 广平威县】
政禅师状记 【僧宗悟撰 郭援书 正书政和四年 泰安】
游骊山寺记 【孙渐撰并书 正书政和四年 临潼】
修荐福寺塔记 【李壘 正书政和六年 咸宜】
留题昌黎庙诗 【谢彦撰并书 行书政和六年 潮阳】
淡山岩诗 【黄庭坚撰并书 行书政和六年 永州零陵】
（臣）等谨按淡山岩诗有谢用宾黄山谷蒋之奇祁崇嗣蒋纬凡五种
光济寺碑 【张鉴撰 僧洪禧书 正书政和六年 合阳】
折武恭公克行神道碑 【毛友撰 宇文虚中书 正书政和六年 府谷】
报恩塔记 【王登撰 正书政和八年 历城】
升元观牒 【敕行书 前后皆正书政和八年 泰安】
御笔付李邦彦诏 【行书 下刻李邦彦记 正书政和八年】
（臣）等谨按付邦彦诏韶州济南有刻本今济南无
姑射洞牒 【行书政和八年 临汾】
（臣）等谨按姑射洞牒同崇道观牒告姑射山神文告崇道观文共刻于一石
崇道观牒 【行书政和八年 临汾】
丰泽庙碑 【上刻政和八年敕下刻黄翰撰记并书宣和元年 浚县】
干陵碑题字 【李士观书 正书宣和元年 干州】
告姑射山神文 【正书宣和元年 临汾】
告崇道观文 【正书宣和元年 临汾】
昙延法师赞 【壬午撰并书 正书宣和二年 蒲州】
辟牛岩题名 【陈康年书 正书宣和四年 潮阳】
（臣）等谨按陈康年辟牛岩题名字迹残缺无拓本
面壁塔碑 【蔡京书 正书宣和四年 登封】
高逸上人诗 【行书宣和四年 上元】
慈恩寺诗 【范智闻撰 行书宣和四年 西安】

呈妙空禅师诗 【朱济道撰并书 篆书宣和五年 长清】

韩退之五箴 【李宗书 篆书宣和六年 西安】

重修东岳庙碑 【宇文粹中撰 张滂书 正书宣和六年 泰安】

修太史公庙记 【尹扬撰 焦丙书 正书靖康元年 韩城】

三洞碑记 【李邦彦撰并书 正书建炎三年 临桂】

石室题名 【张达明书 正书绍兴元年 肇庆】

青原饭僧诗 【李纲撰并书 行书南康】

净土院建释迦殿记 【邹起撰 骆闳书 行书绍兴二年 临安】

无相庵题识 【薛公庆书 正书绍兴二年 祁阳】

满江红词 【岳飞撰并书 行书汤阴钱塘俱刻石】

（臣）等谨按岳飞词钱塘碑石存汤阴石刻无存

手牋三通 【岳飞书 草书汤阴】

墨庄二字 【岳飞书 正书汤阴永新俱刻石】

题许侯像后八字 【岳飞书 分书汤阴】

仙迹记 【尹穉撰 李弥大书 正书绍兴五年 临桂】

七星岩题名 【朱文中书 分书绍兴五年 肇庆】

（臣）等谨按朱文中七星岩题名字迹残缺无拓本

拱极观记 【薛某撰 雷道之跋 权洗书 正书绍兴九年重刻 华阴】

三洲岩题名 【赵庆辰书 分书绍兴十二年 肇庆】

九曜石题名 【詹文举书 行书绍兴十三年 广州】

芜湖县新学记 【陈长方撰并书 正书绍兴十三年 芜湖】

金华寺龙骨塔铭 【僧修信撰 正书绍兴十四年 褒城】

列秀亭题名 【张浚书 正书绍兴十七年 连州】

绍兴十八年进士题名记 【正书滁州】

高座寺新公塔铭 【僧法永撰 李布书 正书绍兴十九年 江甯】

九曜石题名 【吕少卫等 行书绍兴二十二年 广州】

游东山题名 【章元振书 正书绍兴二十三年 潮阳】

御书石经 【高宗御书 正书杭州】

易 【二碑】

书 【六碑】

春秋 【四十碑】

论语孟子中庸 【十九碑】

（臣）等谨按石刻铺叙载御书石经礼记节书中庸儒行大学经解学记五篇今在杭州府学礼记惟存中庸一碑诸经亦多阙失其存

者字画尚完

宣圣及七十二弟子像赞 【高宗御制并书 正书绍兴二十六年 杭州】
妙喜泉铭 【张九成撰并书 正书绍兴二十七年 鄞县】
浯溪题名 【刘尧撰并书 正书绍兴二十八年 祁阳】
七星岩题名 【郑安恭书 正书绍兴二十八年 肇庆】
四十二章经 【沈该等书绍兴二十九年 杭州】

（臣）等谨按杭州六和塔所刻四十二章经为沈该汤思退陈诚之陈康伯王纶
贺允中叶义问杨椿周麟之洪遵杨偁沈介赵令珩孙
道夫王晞亮黄祖舜张孝祥宋棐金安节李洪董莘钱端礼张宗元张运杨朴莫蒙路彬
张廷实周操叶谦亨胡沂陈俊卿鲍彪陈棠杨廷弼张
洙黄子淳杨倓沈区韩彦直虞允文洪迈等四十二人分章书

重建玉皇三官殿记 【陈师中撰 正书隆兴二年 潮阳】
赐开化寺牒 【正书隆兴二年 钱塘】
过钓台诗 【张浚撰 行书隆兴二年 桐庐】
南海庙碑 【陈丰撰 詹彦弓书 正书干道元年 广州】
汉中府新修堰记 【杨绛记并书 正书干道二年 褒城】
昆山校官碑 【范求象撰 黄万顷书 分书干道二年 昆山】
重修南海庙碑 【康与之撰并书 正书干道三年 广州】
碑阴记 【廖颀撰并书 正书干道三年】
赐魏王诏书 【行书干道七年 金华】
浯溪题名 【王彦清书 正书干道七年 祁阳】
朝阳亭记 【张孝祥撰并书 正书干道九年 临桂】
水月洞铭并序 【范成大撰并书 正书干道九年 临桂】
卢珧庙碑 【石塾撰并书 正书干道九年 尤溪】
利泽庙记 【陈知柔撰 王仁孝书 分书干道九年 尤溪】
碧虚铭 【范成大撰并书 正书淳熙元年 临桂】
淳化镇题名 【李仲春书 正书淳熙元年 上元】
寂通证誓禅师碑 【孙时敏撰并书 正书淳熙三年 韶州】
广济王像题字 【陈师中跋 正书淳熙四年 钱塘】
苏舜钦诗 【杨倓跋 正书淳熙五年 太平】
风洞山题名 【詹仪之书 正书淳熙五年 临桂】
临安在城兴福院记 【刘庄士撰 周邽书 正书淳熙八年 仁和】
增置广州赡学田记 【陈德铭书 行书淳熙十一年 广州】
题张文献画像 【孝宗御赞 正书淳熙十三年 韶州】

游谢元晖池诗 【张子颜书 正书淳熙十三年 当涂】
舍宅誓愿文 【张铉撰并书 行书淳熙十四年 仁和】
九曜石题名 【郑飞熊书 分书淳熙十五年 广州】
太平州瑞麻赞 【洪迈撰 正书淳熙十六年 太平】
书周子拙赋 【朱子书 正书道州】
敬以直内八字 【朱子书 行书衡州】
上蔡先生语 【朱子书 行书崇安】
静廉二字 【朱子书 正书镇海】
苍野题名 【朱子书 正书莆田】
与造物游四字 【朱子书 正书龙溪】
香山洞三字 【朱子书 分书福清】
天风海涛四字 【朱子书 正书闽县】
石室清隐四字 【朱子书 正书侯官】
读书处三字 【朱子书 正书长乐】
蟠桃坞三字 【朱子书 正书福清】
书韩退之合江亭诗 【张栻书 行书衡州】
礼义廉耻四字 【张栻书 行书衡州】
招隐二字 【张栻书 正书临桂】
同年酬唱诗 【袁说友等撰 范成大序 龚颐正书正书 绍熙元年 苏州】
广寿慈云寺记 【史浩撰 楼钥书 正书绍熙元年 仁和】
贤令山石壁圣传颂 【张本中撰并书 正书绍熙元年 阳山】
石门汉隶释文后记 【晏袤撰并书 分书绍熙五年 褒城】
潘宗伯韩仲元李孝章通褒斜阁道碑阴 【晏袤书分书庆元元年褒城】
九曜石题名 【李元题 行书庆元元年 广州】
九曜石题名 【张金题 分书庆元元年 广州】
锡英护庙额牒 【正书庆元四年 广州】
竹鹤二字 【苏唐卿书 篆书庆元五年 南海】
陈学圃醉时歌 【朱子更书 行书嘉泰元年 广州】
赐灵应院牒 【正书嘉泰二年 分水】
楞伽峡题名记 【叶适撰 汪之强书 正书嘉泰二年 连州】
复三相祠碑并序 【赵师逸撰并书嘉泰三年 柳州】
盐官修学记 【锺必万撰 邹应隆书 行书开禧元年 海盐】
风洞山题名 【赵善某撰 正书开禧二年 临桂】
应星楼记 【叶宗鲁撰 何澹书 正书开禧三年 处州】

盩远记 【王介撰 陈新书 正书嘉定元年 仁和】

虞泉铭 【方信孺撰 方直孺书 分书嘉定三年 韶州】

石门题名 【鲜于申之书 分书嘉定三年 褒城】

浯溪诗 【赵善■〈言盍〉撰 正书嘉定四年 祁阳】

（臣）等谨按赵善■〈言盍〉浯溪诗字迹残缺无拓本

诗境二字 【陆游书 正书嘉定四年 韶州】

观张魏公遗墨题字 【方信孺书 正书嘉定五年 连州】

修威惠庙记 【赵希槩书 正书嘉定六年 潮州】

（臣）等谨按威惠庙记字迹残缺不可读

清真观建昊天阁记 【陈振撰 郑准书 正书嘉定八年 昆山】

七星岩题名 【陈光祖书 正书嘉定八年 肇庆】

谒淮祠记 【何友直书 行书嘉定九年 桐柏】

题金山拙窝诗 【赵清卿撰并书 分书嘉定十年 潮阳】

（臣）等谨按拙窝诗字迹残缺不可读

灵岩叙别记 【李耆寿撰并书 正书嘉定十年 略阳】

七星岩题名 【赵汝袭书 正书嘉定十一年 肇庆】

三清殿上梁文 【龚颐正书 章劼跋 正书嘉定十二年 长洲】

建康府教授西厅记 【郑自成撰 正书嘉定十六年 江甯】

治平寺建藏殿记 【僧宝华撰 正书嘉定十六年 上元】

诗词十首 【陆游撰并书 行书太平】

（臣）等谨按太平府学所刻陆游诗词为玉京行醉歌纸阁绝句初夏词春晚绝句追怀南郑幕府一竿风月词南窗绝句读刘伯伦传诗共十首合苏轼诗文稿俗称姑孰帖然无汇刻年月疑因淳熙时洪迈尝刻苏轼书后人因取陆游书补刻其后也今存石七方诗九首

寄玳公禅师八札 【陆游书 行书金华】

重修南海庙碑 【曾噩撰 刘元素书 正书宝庆元年 广州】

七星岩题名 【郑起沃书 正书宝庆元年 肇庆】

天庆观碑 【高之问撰 王松书 正书宝庆二年 长洲】

新建四先生祠堂记 【真德秀撰 正书宝庆三年 南雄】

浯溪题名 【赵必愿书 行书宝庆三年 祁阳】

（臣）等谨按赵必愿浯溪题名字迹残缺无拓本

嘉定县学记 【沈璞撰并书 正书绍定二年 嘉定】

无垢居士像赞 【张九成自题并书 正书绍定二年 海甯】

劝农碧落洞题名 【夏子昂书 正书绍定三年 英德】

褚遂良祠堂记 【魏了翁撰 正书绍定三年 湘乡】
浯溪诗 【卫樵撰 正书绍定六年 祁阳】
七星岩题名 【赵崇垓书 正书端平二年 肇庆】
（臣）等谨按赵崇垓七星岩题名字迹残缺无拓本
灵通庙正显侯牒 【正书端平二年 仁和】
南海庙题名 【彭铉书 行书端平三年 广州】
学田记 【杨瑾撰 行书嘉熙元年 华亭】
明行院记 【僧居简撰 杨瑾书 正书嘉熙元年 奉贤】
增修学廩记 【刘汉英撰 正书嘉熙元年 广州】
书杜甫画鹞行 【韩琦书 正书嘉熙二年 融县】
观仙掌石题名 【陈畴书 分书嘉熙三年 广州】
（臣）等谨按陈畴仙掌石题名字迹残缺无拓本
九曜石题名 【黄朴书 正书嘉熙四年 广州】
金祝二太尉庙记 【郑文子撰 彭一飞书 正书淳佑元年 钱塘】
息心铭 【张即之撰并书 正书淳佑元年 城武】
绍兴手诏及陈襄荐士章稿 【正书 陈某跋淳佑元年 苏州】
（臣）等谨按绍兴手诏字迹残缺无拓本
应梦名山四字 【理宗御书 正书淳佑五年 奉化】
加太学土地敕 【行书淳佑六年 钱塘】
南山石屏题名 【李昂英书 正书淳佑六年 英德】
放生池敕 【理宗御书 项公择跋 正书淳佑十年 昆山】
嘉定修学记 【林应炎撰并书 正书淳佑十一年 嘉定】
重修寒翠亭诗 【叶堪之撰 行书淳佑十二年 英德】
游燕喜寺诗 【朱洗撰 分书淳佑十二年 连州】
胜因院碑 【僧处仁撰 集颜真卿书 正书宝佑元年 奉化】
西湖石题名 【陈炜书 正书宝佑二年 潮州】
（臣）等谨按陈炜西湖石题名字迹残缺无拓本
积庆教寺碑 【理宗御书 史岩之跋 正书宝佑四年 余姚】
西湖石三言诗 【林世光撰 正书开庆元年 潮州】
赐忠显庙牒 【正书景定五年 仁和】
浯溪题名 【刘锡书 正书景定五年 祁阳】
游七星岩诗 【苏良撰并书 正书咸淳元年 肇庆】
（臣）等谨按苏良七星岩诗石多残缺字迹模糊无拓本
学田租记 【唐梦翔撰并书 正书咸淳二年 嘉定】

光孝寺大鉴禅师殿记 【陈宗礼撰 王应麟书 正书咸淳五年 广州】

改定岳王庙号敕 【正书德佑元年 仁和】

宣圣庙石壁诗 【张绅书 行书无年月 韶州】

过张许庙词 【文天祥撰潮州】

（臣）等谨按文天祥词字迹残缺无拓本

石经周礼残碑 【篆书正书二体陈留】

（臣）等谨按陈留石经碑仅存其二前后无年月及书人姓氏据玉海称仁宗命国子监取易诗书周礼礼记春秋孝经为篆隶二体刻

石两楹今此碑有篆书正书盖即宋嘉佑石经也然别无确据姑附于宋末

△辽

（臣）等谨按辽碑著录者少今就现存者编定其目次审视其文多词尚简要事必核实考官爵之等差办年号之离合即梵官题碣与

夫石幢之款识要皆可与正史相参考盖其时俗尚朴茂不事浮华摩刻不多而有合于古人铭金刻石之体虽少而弥足珍焉

尊胜陀罗尼幢记 【行书会同九年 京师】

燕山云居寺碑 【王正撰 郑熙书应历十四年 房山】

广济寺佛殿记 【宋璋撰 正书太平五年 宝坻】

马鞍山石幢记 【正书太康元年 京师】

戒坛寺石幢记 【正书太康三年 京师】

（臣）等谨按马鞍山戒坛寺辽石幢二一题庚时一题坤时据金石通例盖其时以甲乙丙丁庚辛壬癸乾坤艮巽代十二支也

悯忠寺尊胜陀罗尼石幢记 【王进思书 正书京师】

（臣）等谨按此幢字迹模糊无年月可考内有应历年字知为辽建

故慈智大德幢记 【正书重熙十二年 京师悯忠寺】

弥勒邑特建起院碑 【正书咸雍元年 京师】

碑阴 【正书】

马鞍山僧法均遗行碑 【王鼎撰并书 僧悟总篆额 正书大安七年 京师】

地宫舍利函记 【僧善梨撰 僧义中书 正书大安十年 京师】

（臣）等谨按刘侗帝京景物略载此碑为金刻考金大安祇四年而碑作十年盖辽道宗时所刻也今改正

兴国寺太子诞生邑碑 【僧方偁撰 张云书 正书寿昌四年 易州】

定觉寺碑 【张铎撰 正书天庆二年 东安】

云居寺续秘藏石经塔记 【僧志才撰 正书天庆七年 房山】

△金

重修庙学记 【刘光国撰 正书天会十二年 大城】
皇弟经略郎君行记 【黄应期书 国书 后附正书天会十二年 干州】
泰山元阳子记 【朱衣点撰 正书天眷元年 历城】
普恩寺修殿碑 【朱弁撰 正书皇统三年 大同】
古柏行 【任君卿书 行书西安】
天宁万寿禅寺碑 【仲汝尚撰 集柳公权书 正书皇统三年 兰山】
云山禅师像记 【正书皇统七年 长清】
传戒大师遗行碑 【韩昉撰 高衍书 王兢篆 正书天德四年 京师】
修德观问道碑 【刘文饶撰并书 正书贞元二年 密县】
宗城县修宣圣庙碑 【僧慎微撰 翟炳书 正书正隆二年 威县】
重修京兆学记 【李■〈卤上木下，欠代义〉撰 潘师雄书 正书正隆二年
西安】
重立泰宁宫记 【乔逢辰撰 王仲成书 正书正隆四年 渭南】
重修天龙寺铭 【智允迪撰 任臬书正隆四年 太原】
南鲁村广严院记 【朱阜宁撰 马致远书 正书大定三年 城武】
谒无尽居士祠堂记 【王雷撰 行书大定三年 寿阳】
龙泉寺碑记 【侯邦达撰 正书大定三年 永清】
（臣）等谨按龙泉寺记碑石剥落难以摸搨
灵泉观牒 【行书大定三年 同官】
开元寺重修圆照塔记 【刘仲尹撰 张天酥书 正书大定五年 顺德】
诚公塔铭 【僧师伟撰 正书大定五年 兴平】
观音院碑 【李居仁书 正书大定六年 陇州】
惠济院牒 【正书大定七年 郟县】
重刻孙真人祠记 【宋王瓛撰 米孝思跋 正书大定九年 耀州】
思政堂记 【郑彦文撰并书 正书大定十一年 干州】
文登儒学记 【郭长倩撰 正书大定十二年 文登】
太清观碑 【乔宸撰 正书大定十四年 沁源】
晋先轸庙碑 【赵扬撰 耶律质书大定十五年 辽州】
重修九龙庙碑 【崔昱撰 正书大定十六年 太原】
礼部令史题名记 【党怀英撰 正书大定十八年 京师】
重修东岳庙记 【杨伯仁撰 黄久约书大定十八年 泰安】
重修太史公墓碣 【赵振撰 正书大定十九年 韩城】
慈恩寺题名 【许沂书 正书大定二十年 西安】
济源县刱建石桥记 【王藏器撰 史仲尹书 分书大定二十一年 济源】

博州重修庙学记 【王去非撰 王庭筠书 行书大定二十一年 聊城】

碑阴记 【王遵古撰 王庭筠书 正书】

（臣）等谨按博州学记世称三绝碑以王去非文王庭筠书与党怀英篆额也碑阴记亦有篆额为庭筠门人李谷书

重修中岳庙记 【黄久约撰 郝史书 正书大定二十二年 登封】

寿圣院珍公塔铭 【李天益书 正书大定二十四年 泰安】

重修天封寺记 【党怀英撰并书 正书大定二十四年 泰安】

灵泉观记 【杨峻撰 刘光书 正书大定二十五年 同官】

归山操 【马某撰 邱处机书大定二十八年 潍县】

张中伟墓表 【正书明昌元年 郟县】

修孔庙碑跋 【高德裔撰并书 正书明昌二年 曲阜】

重修文宣王庙记 【党怀英撰并书 正书明昌二年 曲阜】

张莘卿墓碑 【马文约撰 高延年书明昌二年 日照】

修纪圣碑亭记 【毛麾撰 孔之固书 正书明昌三年 浮山】

大奉国寺续装贤圣题名记 【张劭撰 刘永锡书明昌三年 西安】

威显庙祈雨感应记 【马肃撰并书 正书明昌三年 崞县】

昌宁公庙碑 【张守愚撰 正书明昌五年 静乐】

重书旌忠牒并记 【许安仁撰并书 正书明昌五年 泽州】

治平寺碑 【许安仁撰并书 正书明昌五年 泽州】

观京兆府学古碑诗 【刘仲游撰并书 草书明昌五年 西安】

普照寺开堂疏 【党怀英书 分书明昌六年 济宁】

任城李氏先莹碑 【黄晦之撰 陈度书明昌六年 济宁】

书王荆公诗 【党怀英书 篆书明昌六年 济宁】

普照寺照公塔铭 【赵汾撰 党怀英书 分书明昌七年 济宁】

灵岩寺记 【党怀英撰并书 分书明昌七年 长清】

重修兖国公庙碑 【穆昌世撰 正书明昌七年 曲阜】

过超化寺诗 【王庭筠撰并书 行书承安二年 密县】

题超化寺舍利塔诗 【王庭筠撰并书 行书承安二年 密县】

（臣）等谨按超化寺诗二种刻于一石

杏坛二字 【党怀英书 篆书承安三年 曲阜】

骊山有感诗 【伊喇霖撰 孙极之书 正书承安三年 临潼】

重修蜀先主庙碑 【王庭筠撰 行书承安四年 涿州】

重书汉司农郑公碑 【万安中书 正书承安五年 高密】

阴符经 【赵秉文书 草书平遥】

叶令刘云卿碑 【赵秉文撰并书叶县】
重建州学碑 【正书泰和元年 绥德】
谷山寺记 【党怀英撰并书 分书泰和元年 泰安】
修三清庙碑 【段时可撰 李琳书 正书泰和二年 浮山】
首阳山吊夷齐诗 【王仲通撰并书 行书泰和四年 蒲州】
岱岳观题名 【高梦得书 正书泰和四年 泰安】
龙兴寺题名 【孙铎书 正书泰和四年 同州】
慈恩寺题名 【虞用庚书 正书泰和五年 西安】
谒二贤祠诗 【王文蔚撰 李亿书 正书泰和七年 蒲州】
法门寺真身塔记 【僧师伟撰 朱景佑书 正书大安二年 扶风】
重修文宣王庙碑 【赵铎撰 屈师古书大安三年 禹州】
孔朝散诗 【行书贞佑二年 郟县】
杨振碑 【元好问撰 张某书 正书贞佑四年 干州】
济州刺史李濂碑 【崔禧撰 赵秉文书 正书贞佑四年 济宁】
杲禅师塔铭 【乐铎撰 僧性英书 正书兴定二年 洛阳】
香林十咏 【僧净照撰 行书兴定四年 巩县】
郭汾阳庙碑 【赵琢撰 正书元光二年 巩县】
重书赞三藏罗什诗 【僧义金书 正书正大二年 鄂县】
府学教养碑 【刘涓撰 杨焕书 正书正大二年 西安】
济渎灵应记 【韩时举撰并书 正书正大五年 济源】
重修济渎庙记 【楚邦瑞书 正书正大五年 济源】
唐帝庙碑 【赵秉文撰并书 安阳】

钦定续通志卷一百六十八

●钦定续通志卷一百六十九 金石略三

金石略 【三 今有】

元

明

△元

史氏庆源碑 【崔铉撰 平元书 正书太宗十二年 永清】

尚书史秉直神道碑 【刘祁撰 平元书 正书太宗皇后称制四年 永清】

兵马元帅史进道神道碑 【殷绍先撰 平元书 正书太宗皇后称制四年 永清】

万安恩公碑铭 【刘百熙撰并书 正书定宗皇后称制二年 顺德】

德州防御秦津立先莹碑 【宗贞撰 董诰书 篆书宪宗四年 历城】

道德经 【高翻书 篆书 李道谦跋宪宗五年 整屋】
祭济渎记 【李忠国撰 史芝书 正书中统元年 济源】
修伏羲庙记 【孟祺撰 李湮书 正书中统二年 鱼台】
建文宣王庙记 【王处厚撰 冯庆书 正书中统二年 干州】
杨奂碑 【元好问撰 姚燧书 正书中统五年 干州】
请珪公住韶山云门寺疏 【沙门福某书 正书至元二年 澠池】
昭济侯献殿舞亭记 【雷豫撰并书至元二年 澠池】
李氏先莹碑 【张起岩撰 揭傒斯书 正书至元二年 济阳】
创建唐帝庙碑 【郝经撰 正书至元三年 望都】
修宣圣庙记 【张鼎撰 正书至元三年 高陵】
栖岩寺请师疏 【正书至元五年 蒲州】
瞻学田记 【贾仁撰 雷孜书 正书至元六年 西安】
敕赐开福寺额记 【僧志清撰 正书至元六年 同官】
杨公灵应记 【苏棣撰 郭居仁书 行书至元七年 济源】
御香投龙简感应记 【李淮深撰 正书至元七年 济源】
济渎投龙简记 【李惟深撰 附姚枢杨果送行诗 正书至元七年 济源】
天坛修紫微庙记 【薛元撰 苏珪书至元七年 澠池】
诚明真人道行碑 【王盘撰 贾廷臣书 分书至元九年 整屋】
首阳二贤祠碑 【王恽撰 王博文书 分书至元十一年 蒲州】
栖岩寺碑 【陈赓撰 王恽书 正书至元十一年 蒲州】
代祀济渎投龙简记 【袁志远撰 史芝书 正书至元十二年 济源】
终南山重阳真人碑 【金源璫撰 李道谦书 正书至元十二年 整屋】
重修宣圣庙记 【徐瑛撰 正书至元十三年 西安】
治平寺舍田记 【正书至元十四年 上元】
安西王盛德碑 【孟文昌撰 骆天骧书 正书至元十四年 西安】
祭张飞卿文 【何某撰 正书至元十四年 太平】
玉清万寿宫碑 【姚燧撰 王元辅书 正书至元十四年 汧阳】
资戒坛碑 【王盘撰 商挺书 正书至元十六年 邢台】
重修兴国院碑 【僧福和撰 李源兴书 正书至元十七年 诸城】
崇灵庙记 【王博文撰 仆射祖英书 正书至元十七年 渭南】
重修永庆院记 【僧惠洪撰并书 正书至元十七年 诸城】
重修礮溪成道宫记 【魏初撰 孙德彧书至元十七年 宝鸡】
加封伯夷叔齐诏 【正书至元十八年 蒲州】
圣清庙碑 【马祖常撰并书 正书至元十八年 卢龙】

重刻灵泉碑 【宋革撰并书 正书至元十九年 诸城】
常山祷雨谢雨碑 【赵文昌撰 宋革书 正书至元二十年 诸城】
无为真人道行碑 【王利用撰 孙德彧书 正书至元二十年 整屋】
谒淮祠记 【冯岵书 正书至元二十一年 桐柏】
汉柏诗 【王恽撰 正书至元二十一年 泰安】
宗圣宫说经台记 【李道谦撰 李志宗书 正书至元二十一年 整屋】
圣旨焚毁诸路伪道藏经碑 【王盘等撰 钮祐禄玮书 正书至元二十二年 泰安】
重新学记 【陈万里撰并书 行书至元二十三年 芜湖】
重建慈湖书院记 【王应麟撰 黄翔龙书 正书至元二十四年 慈溪】
望嵩楼记 【尚野撰并书 正书至元二十四年 汝州】
济渎灵异记 【王光祖撰并书 正书至元二十四年 济源】
猎虎记 【正书至元二十六年 汝宁】
重建风后八阵图碑 【刘道源书 正书至元二十七年 密县】
新学记 【元好问撰 李恂书 正书至元二十七年 寿阳】
修扁鹊庙记 【胡祗遹撰并书 正书至元二十八年 汤阴】
加封济渎清源善济王记 【正书至元二十八年 济源】
模刻峰山碑记 【刘之美撰 正书至元二十九年 西安】
天唐观记 【元好问撰 王炳书至元二十九年 忻州】
梁公祈雨灵应记 【张唐臣撰 杨天泽跋 正书至元二十九年 平遥】
重修宣圣庙记 【刘忠撰 齐天祥书 正书至元三十年 澄城】
郡侯冀德方重建大成殿记 【李谦撰 杨桓书 分书至元三十年 济宁】
御香祭南海记 【王献撰 正书至元三十年 广州】
陈大中墓铭 【郭汝弼撰并书 正书至元三十年 韩城】
李白酒楼四面碑 【沈光撰 杨桓书 篆书至元三十年 济宁】
谕中外尊奉孔子诏 【上层蒙古书 中层正书 下层张翰记正书至元三十一年 松江】

（臣）等谨按尊奉孔子诏当时颁行天下并立学宫今存者昆山学则正书定州学并列中山府学地产数今定州石刻不可考

尼山圣像记 【司居敬撰 正书至元三十一年 曲阜】
重修庙学记 【杨文郁撰 赵孟俯书至元三十一年 济阳】
佑圣观重建元武殿记 【元明善撰 赵孟俯书 正书元贞元年 钱塘】
重修文宣王庙记 【韩择撰并书 正书元贞元年 临潼】
扁鹊庙碑 【康继孔撰 刘潜德书元贞二年 南宫】

游辟牛崑观大颠古迹诗 【唐古特撰 正书元贞二年 潮阳】
（臣）等谨按辟牛崑诗碑字残缺无拓本
进义副尉张仪神道碑 【刘敏中撰 曹质书 篆书元贞元年 历城】
郭景仁修学后碑 【李谦撰 耶律有尚书 正书元贞二年 济甯】
松江南山胜地记 【阎复撰 傅大有书 正书大德元年 松江】
冠州庙学记 【李谦撰 张孔孙书大德元年 冠县】
敕建天坛紫微大帝庙记 【刘伟撰 赵守正书 正书大德元年 澠池】
改邢州为顺德记 【宋子贞撰 刘赓书 正书大德二年 邢台】
重修宣圣庙碑 【杨德纲撰 田宗礼书 正书大德二年 高邑】
郝天挺墓碣铭 【元好问撰 郝采麟书大德三年 陵川】
祁真人道行碑 【李谦撰 博果密书大德三年 赤城】
重建艮山庙记 【沈德章撰并书 正书大德三年 仁和】
九先生像赞 【吴澄撰 周恒书 正书大德三年 洛阳】
县学重建大成殿记 【张伯淳撰 赵孟俯书 行书大德三年 萧山】
知州李宗武建遵经阁记 【陈俨撰 杨桓书 正书大德三年 济甯】
浯溪题名 【杜名书 正书大德四年 祁阳】
镇抚张仁神道碑 【李吉撰 张巨渊书 篆书大德四年 历城】
重建至圣文宣王庙碑 【阎复撰 刘赓书 正书大德五年 曲阜】
初立兴国观记 【傅光国撰 王正一书 正书大德五年 澠池】
宅庙落成后碑 【李谦撰并书 正书大德五年 曲阜】
济渎北海庙图志碑 【薛贵祖撰 严君宏书大德六年 济源】
济渎投龙简记 【李思诚撰 柏德元书 正书大德六年 济源】
重修关龙逢祠记 【熊正德撰 王道亨书 正书大德六年 灵宝】
重修大奉国寺碑 【卢懋撰 王遂书 正书大德七年 义州】
兰穹山福仙院记 【任士林撰 赵孟俯书大德七年 上虞】
怀净土诗 【僧明本撰 赵孟俯书 行书钱塘】
谢天吉神道碑 【麻革撰 正书大德七年 临晋】
密州创堦贤像记 【李之绍撰 刘赓书 正书大德七年 诸城】
栖岩寺中书省牒 【正书大德七年 蒲州】
平云南碑 【程文海撰 正书大德八年 太和】
宣差都督管疏 【正书大德九年 蒲州】
宣差船桥都总管疏 【正书大德九年 蒲州】
通理妙明禅师云公碑 【教授智京撰 僧智澄巨雅书 正书大德十年 历城

】

玩鞭亭记 【卢摯撰 行书 周子镇跋大德十年 芜湖】

新建三皇庙记 【潘昂霄撰 杜与可书大德十一年 昆山】

加号大成至圣文宣王诏 【正书大德十一年 曲阜】

（臣）等谨按加号诏通行诸路今自曲阜外其存者定州则上层蒙古书下层正书
书历城则附刘敏中记正书济甯则附曹元用记正书

江甯则附记及题名在绩溪者正书在仁和者附陈必跋分书在韩城者正书

西镇祀香记 【梁某撰 正书大德十一年 陇州】

二学资福寺碑 【僧福真撰 赵孟俯书 正书大德十一年 惠民】

九候名山四字 【僧无碍书 正书大德十一年 诏安】

县学庠记 【刘必大撰 富珠理书 正书至大元年 襄城】

松江宝云寺记 【牟巘撰 赵孟俯书 行书至大元年 华亭】

万安寺茶榜 【僧溥光撰并书 正书至大二年 登封 凡八张】

袁州修学记 【杜与可撰并书 正书至大二年 袁州】

建康路文庙祭器记 【刘泰撰 潘汝劼书 正书至大二年 江甯】

江东宣慰使珊竹公神道碑 【姚燧撰 赵孟俯书行书 仪征】

玉泉禅院唐贤留题诗序 【张田撰 行书皇庆元年 当阳】

从祀绘堦碑 【陈俨撰 赵璧书 正书皇庆元年 济甯】

集仙宫东岳行祠记 【张与材撰 张与绍书 行书皇庆元年 嘉定】

碑阴诗 【元贞子撰 行书】

集仙宫瑞竹记 【行书皇庆元年 嘉定】

建康路学祭器记 【胡助撰并书 正书皇庆二年 江甯】

宣圣兗公小影碑 【下方重摹颜真卿书庙堂记皇庆二年 广州】

采石矾蛾眉亭记 【王文龙撰并书 正书皇庆二年 太平】

大都路总治碑 【王构撰 刘赓书 正书皇庆二年 京师】

辽阳路香严寺雪庵塔碑 【陈景元撰 史弼书 正书皇庆二年 辽阳州】

（臣）等谨按此碑字迹模糊惟存碑额雪庵和尚金公塔记八字

汉尹宙碑阴记 【李警撰 王克谦书 正书皇庆三年 鄢陵】

谢公庙碑 【陈观撰 胡菊南书 正书延佑元年 奉化】

东岳行宫记 【孟淳撰 赵孟俯书 正书延佑元年 长兴】

少林寺开山裕公禅师碑 【程巨夫撰 赵孟俯书正书延佑元年 登封】

敕藏御服之碑 【赵世延撰 赵孟俯书 正书延佑二年 盩厔】

中宪大夫张成墓碑 【元明善撰 赵孟俯书 正书延佑二年 城武】

四川廉访使梁天翔神道碑 【李源撰 赵孟俯书 正书延佑二年 平遥】

敕赐南阳诸葛书院记 【程巨夫撰 刘赓书 正书延佑二年 南阳】

敕赐伊川书院碑 【薛友谅撰 赵孟俯书 行书延佑三年 嵩县】
修济渎清源善济王庙记 【王公孺撰 王笱书 正书延佑三年 济源】
庆元路建学记 【袁桷撰 薛基书 正书延佑三年 鄞县】
孔子庙讲堂记 【元明善撰 张珪书 正书延佑三年 保定】
任城二贤堂碑 【曹元用撰 张楷书 正书延佑三年 济甯】
上真殿记 【章嘉撰 行书延佑四年 嘉定】
天开中院碑阴记 【魏必复撰并书 正书延佑四年 房山】
敕修殷比干墓碑 【王公孺撰 刘敏中书 正书延佑四年 汲县】
重修宣圣庙记 【宋湜撰 正书延佑四年 偃师】
武穆王碑 【姚燧撰并书 分书延佑四年 泰安】
祝延圣主本命长生碑 【王思廉撰 赵孟俯书 正书延佑四年 真定】
修唐张九龄祠记 【曾三省撰并书 正书延佑五年 韶州】
（臣）等谨按九龄祠记下多残缺不可读
万象山崇福寺记 【僧明本撰 赵孟俯书 行书延佑五年 丽水】
龙洞造像记 【僧普光撰 正书延佑五年 历城】
监寺敏公寿塔记 【僧智澄撰并书 分书延佑六年 历城】
虚照禅师塔铭 【陈庭宝撰 赵孟俯书 正书延佑六年 邢台】
大报国圆通寺记 【赵孟俯撰并书 行书延佑六年 嘉定】
万象山崇福寺记 【僧明本撰 赵孟俯书 行书延佑七年 处州】
金仙寺裕公道行碑 【赵孟俯撰并书 行书延佑七年 翼城】
祀南海碑 【正书延佑七年 广州】
横渠祠堂记 【文礼愷撰 杨粹书 正书延佑七年 郟县】
书杜诗二十三首 【赵孟俯书 行书长兴】
自书野竹图诗并札 【赵孟俯书 行书长兴】
游天冠山诗 【赵孟俯书 行书西安】
临褚河南枯树赋 【赵孟俯书 正书镇洋】
书归去来词 【赵孟俯书 行书延佑五年 太仓】
书盘谷序 【赵孟俯书 行书皇庆元年 太仓】
书前后赤壁赋 【赵孟俯书 行书松江】
龙津二字 【赵孟俯书 正书松溪】
洗墨池三字 【赵孟俯书 正书黄岗】
襄城学记 【富珠理翀撰 温特赫绍基书 正书至治元年 襄城】
长春道院记 【杨载撰 赵孟俯书 行书至治元年 松江】
修儒学记 【杨载撰 赵孟俯书 行书至治元年 苏州】

重建万寿宫碑 【李之绍撰 刘赓书 分书至治元年 邹县】
县尹苏公政绩记 【杨震撰 赵孟俯书 行书至治二年 泾县】
大瀛海道院记 【吴澄撰 赵孟俯书 正书至治二年 象山】
神通寺祖师兴公道德碑 【邢天佑撰 杜良书 正书至治二年 历城】
大成乐记 【周仁荥撰 萨题勒默色书 行书至治三年 嘉定】
胜果院僧明通勒绩记 【王照撰并书 正书至治三年 历城】
祀海记 【陈性存撰 连文质书 正书泰定元年 广州】
尧帝庙碑铭 【王盘撰 宁若拙书 正书泰定元年 临汾】
太上感应篇 【陈坚刻石 正书泰定元年 仁和】
儒学教授题名记 【刘德载撰 正书泰定二年 嘉定】
清惠明德大师敬公寿塔铭 【僧智澄撰并书 正书泰定三年 历城】
祀海记 【吕宏道撰 正书泰定四年 广州】
默庵记 【赵良弼撰并集颜真卿书 正书泰定四年 咸宁】
杏坛碑 【范涇书 正书泰定闲立 广州】
道教张留孙碑 【赵孟俯撰并书 正书天历二年 京师】
广庆寺建飞来殿记 【杨观撰并书 正书天历二年 清远】
寄南窗炼师诗 【杨大伦撰 行书天历二年 嘉定】
孔子庙碑 【卢摯撰 王叔善书 正书至顺元年 江甯】
加封启圣王及夫人制 【正书至顺二年 江甯】
加封文宣王夫人元官氏制 【正书至顺二年 江甯】
加封复圣宗圣述圣亚圣四公制 【正书至顺二年 江甯】

（臣）等谨按元时尊奉孔子其诏旨皆遍布诸路至顺二年诸诏惟江甯府尚存全文可考见其制云

张氏先莹记 【张养浩撰 正书历城】
代祀淮渚记 【张策撰 正书至顺二年 桐伯】
重修儒学记 【楚惟善撰 巴延书至顺二年 威县】
重修储潭庙记 【刘泰撰 正书至顺二年 赣州】
县学记 【柳贯撰并书 正书至顺三年 永嘉】
韩山书院记 【吴澄撰 邢让书 正书至顺三年 潮州】
承天灵应观牒 【正书至顺三年 钱塘】
贤首寺田记 【黄溍撰 钱良右书 行书至顺三年 吴县】
汉校官碑释文 【单禧跋并书 正书至顺四年 江甯】
建北寺碑 【赵孟俯书 正书元统元年 元和】
加赐孔庙田宅记 【欧阳元撰 揭傒斯书元统二年 曲阜】

加封颜子父母制词 【上蒙古书 下正书元统二年 曲阜】
修兗国复圣公庙记 【欧阳元撰 正书元统二年 曲阜】
月夜过采石江诗 【李洞撰 草书元统二年 太平】
偃师伯王辅嗣墓碣 【吴炳书 分书元统二年 偃师】
碑阴记 【陈思忠撰元统二年】
飞骑尉杨世庆碑 【富珠理翀撰 库库书 正书元统三年 澠池】
孙公道行碑 【邓文原撰 赵孟俯书 行书元统三年 整屋】
知州张仲仁修学碑 【辛明远撰并书 正书元统三年 济甯】
元公书院西湖田记 【邵舜生撰 正书元统三年 潮州】
祀海记 【刘本撰 葛元鼎书 正书至元二年 广州】
西湖书院记 【陈泌撰并书 正书至元二年 仁和】
六聘山天开寺重建碑记 【僧福珪撰并书 正书至元三年 房山】
文宣王庙碑 【李洞撰并书 分书至元三年 诸城】
修尊经阁碑 【王宜振撰 尚甘澍书至元三年 济甯】
洙泗书院碑 【宋元隆撰 正书至元四年 曲阜】
尼山书院碑 【虞集撰 正书至元四年 曲阜】
闾乡县临高寺碑 【邵节撰 张绘书 正书至元五年 闾乡】
祀济渎记 【姜朴撰 郭安贞书 行书至元五年 济源】
清河郡侯张公神道碑 【欧阳元撰 库库书 正书至元五年 巩县】
敕修先圣庙碑记 【欧阳元撰 库库书至元五年 曲阜】
普度禅师义公塔铭 【虞集撰 柳贯书 正书至元六年 苏州】
重书黄山谷承天书院记 【僧士莹书 正书至元六年 江陵】
慕容氏先莹碑 【欧阳元撰 巴延书 正书至元六年 城武】
栖岩寺碑 【陈賡撰 王恽书 正书 攸中孚篆额至元十一年 永济】
孝门铭 【王思诚撰 逯居敬书 正书至正二年 宁阳】
重建清源庙碑 【李桓撰 赵俨书 分书至正三年 江甯】
碑阴 【戴元吉书 正书】
二贤祠碑 【汪泽民撰 正书至正三年 济甯】
曲堤镇修大成庙碑 【王世熙撰 杨僖书 篆书至正三年 济阳】
幻住经堂记 【僧昙噩撰 王元恭书 正书至正三年 奉化】
武林弭灾记 【杨维桢撰 陈遘书 正书至正三年 仁和】
九老仙都宫碑 【欧阳元撰 危素书至正三年 江陵】
重建庙学记 【黄潛撰 和立平书 正书至正三年 松江】
太平广福寺记 【沈景颜撰 俞伯和书 正书至正三年 海甯】

县尹赵侯德政碑 【张继祖撰 萧起贤书至正四年 长葛】
常山感应碑 【张恕撰 张思祖书 正书至正四年 诸城】
知州蔡思中重绘贤像碑 【孔克亮撰 正书至正四年 济甯】
题仙湖仙掌诗并志 【韦德安书 分书至正四年 广州】
重修南镇庙碑 【贡师泰撰 台哈布哈书 分书至正四年 绍兴】
仁靖真人碑铭 【赵孟俯撰并书 行书至正四年 广信】
（臣）等谨按仁靖真人碑字迹残缺无拓本
燕居亭至圣先师像记 【僧嘉努撰 张湮书 分书至正五年 广州】
昭化院显德忠惠王碑 【僧本诚撰 殷天佑书 正书至正五年 仁和】
仙湖观仙掌题名 【韦德安题 行书至正六年 广州】
（臣）等谨按韦德安仙湖观题名字迹残缺无拓本
周伯温游白牛岩诗序 【楔列箎撰 正书至正六年 潮阳】
（臣）等谨按周伯温白牛岩诗字迹残缺无拓本
凤山上乘寺记 【胡长孺撰 台哈布哈书 正书至正七年 上虞】
重书魏了翁承天院记 【僧士莹书 正书至正七年 江陵】
加封启圣王碑 【吕思诚撰 正书至正八年 曲阜】
修南海王祠诗 【王溥化撰 正书至正八年 广州】
禹庙诗 【归昉撰并书 正书至正八年 安邑】
修儒学棣星门记 【郑奕夫撰 赵孟俯书 正书至正八年 鄞县】
济渎潮阳之记 【陶黄庭撰 马道蕴书 行书至正九年 济源】
常山神感应碑 【刘惟敬撰并书 正书至正九年 诸城】
济渎庙题名记 【郝正撰并书 正书至正九年 济源】
归田兴学记 【薛元德撰 马遂良书 正书至正九年 嘉定】
祀海记 【杨舟撰 正书至正十年 广州】
县学明伦堂记 【林泉生撰 高若凤书 正书至正十年 潮阳】
长洲县重修学宫记 【杨维桢撰 危素集欧阳询书至正十年 长洲】
祀海记 【正书至正十一年 广州】
西岩石壁题名 【僧怀清书 正书 二幅至正十一年 乐昌】
天开寺碑 【僧洪珪撰并书 正书至正十一年 房山】
中山圣庙礼器记 【王秉彝撰 正书至正十二年 定州】
碑阴 【正书】
祀孟庙碑 【杨惠撰 张思政书 正书至正十二年 邹县】
鼓山题名 【李世安题 正书至正十三年 福州】
王德修重修学记 【孔克坚撰 刘谦书至正十三年 济甯】

大田洞磨厓记 【郑文■〈走皋〉撰 正书至正十三年 恩平】
修公廡记 【刘谦撰 岳秉中书至正十四年 威县】
丽阳神庙碑 【危素撰 刘文庆书 分书至正十四年 丽水】
（臣）等谨按丽阳神庙碑无拓本
修禹庙碑 【李克敏撰 裴时静书 行书至正十四年 韩城】
大成殿配享碑 【危素撰 正书至正十四年 曲阜】
重修大禹庙碑 【欧阳元撰 韩镛书 正书至正十四年 夏县】
重修祝融庙记 【特穆尔布哈撰 孙瑞书 正书至正十四年 辽州】
修忠惠王庙碑 【黄理仙撰 正书至正十四年 兴安】
重新圣水龙祠记 【杜翱撰 王思齐书 行书至正十四年 青州】
教授题名记 【朱孔昭撰 正书至正十四年 嘉定】
重修学记 【郝忠撰并书 正书至正十四年 文水】
代祀南海庙记 【牛继志撰 黄异书 分书至正十五年 广州】
郭钧遗爱碑 【常视远撰 李琇书 正书至正十五年 郟县】
奉国寺庄田记 【杜克中撰至正十五年 义州】
重建李晋王影堂碑 【正书至正十五年 代州】
城隍显应灵佑王碑 【余阙撰 分书至正十六年 安庆】
重建武佑庙记 【刘基撰 刘俨书 行书至正十七年 萧山】
祀济渎神应记 【赵恒撰并书 正书至正十七年 济源】
续兰亭诗并序 【刘仁本撰序并书 正书至正十七年 余姚】

（臣）等谨按此碑取兰亭记图阙诗者补之吴越之士赋诗者刘仁本谢理赵傲
朱右王霖诸綱徐昭文郑彝张溥僧悦僧阜僧福报凡
十二人

重建儒学记 【杨维桢撰 褚奂书 分书至正二十一年 嘉定】
本一禅院记 【杨维桢撰 林镛书 正书至正二十一年 松江】
察罕特穆尔祀文宣王文 【正书至正二十一年 广州】
库库特穆尔祀渎记 【田文举撰 行书至正二十二年 济源】
琼公 行碑 【僧洪撰 正书至正二十二年 咸寧】
岳庙碑 【孔克仁撰并书 正书至正二十三年 长武】
修三皇庙记 【陈秀民撰 饶介书至正二十三年 昆山】

（臣）等谨按三皇庙记字迹残缺无拓本

修学碑 【孔希学撰 艾伯谦书 正书至正二十四年 济寧】
昭祝神庙记 【战惟肃撰 吴肃书 正书至正二十五年 钱塘】
浑忠武王感应碑 【魏志远撰 王克明书 正书至正二十五年 宜川】

周公庙润德泉记 【孔克仁撰并书 正书至正二十五年 岐山】
修宣圣庙碑 【董立撰 张冲书 分书至正二十六年 西安】
白牛岩三字 【王用文书 篆书至正二十七年 潮阳】
白牛岩题名 【王用文书 分书至正二十七年 潮阳】
重刻苏轼昌黎庙记 【正书至正二十七年 潮州】
重建韩山书院记略 【刘嵩撰 张泰书 正书至正二十七年 潮州】
增置养士学田记 【正书至正闲 嘉定】

（臣）等谨按学田记系刻于宋绍定二年沈璞所撰嘉定县学记碑之阴
丹阳书院记 【正书太平】

欧阳修手植梅图 【元尹梦璧题刻无年月】

△明

（臣）等谨按碑刻之足传于后者以其纪载实而题款确也明人碑文多窜易古
书字句以其贗古措辞闇昧其甚者夸诞矫诬语皆失
实则纪载不足信矣题款专重进士沿袭古官名如称布政司为方伯称知府为太守辄
转假借难以考核则题款不足据矣撰书姓氏时或不
具文字多劣弱借款互题有一人之书而迴若数手者明代纲纪文章苟简荒率远逊于
前代碑刻亦其一端也以其时代近而摹搨易故直省
所上碑册惟明独多兹择其语近质实事关沿革与夫书法之尚存先民矩矱者慎而录
之聊以备一代之掌故焉

重修儒学记 【姜渐撰 姚德厚书 洪武元年 长洲】
重修五仙观寺记 【孙贲撰 吴汤举书 正书洪武二年 广州】
柳山庙碑 【王祎撰 陈继宗重书 行书洪武四年 分水】
王祀典名号碑 【行书洪武七年 钱塘】
横山仁济庙碑 【宋濂撰 刘基书 正书洪武八年 永嘉】
方克勤重建西斋记 【夏侯霁撰 律启原书洪武八年 济甯】
修学宫记 【金玫撰 卢熊书洪武九年 长洲】
乡贤祠记 【徐一夔撰 正书洪武十一年 钱塘】
寄东林社主诗 【僧道衍撰 正书洪武二十二年 震泽】
汪王祠诰封碑 【正书洪武二十七年 钱塘】

（臣）等谨按碑立于明初并刻前代诸诰敕及归唐表唐有武德四年诰宋有政
和七年诰宣和四年诰隆兴二年诰干道四年诰嘉定
四年诰淳佑十年诰宝佑二年诰宝佑六年诰德佑元年诰元有至正元年诰

卧龙庙碑 【朱济熺撰 正书洪武三十一年 太原】
祭中镇霍山文 【正书建文元年 霍州】

新意山法海寺记 【僧大安撰 吴恩器书 正书永乐十四年 丽水】
苏禄国王碑 【成祖御制 正书永乐十六年 德州】
接待寺碑 【朱■〈日上永下〉书 正书永乐二十一年 元和】
御书跋 【沈度书 正书宣德元年 吴江】
程太常书绝句石经歌 【吴讷撰 正书宣德二年 仁和】
重修弥陀寺记 【杨士奇撰 金幼孜书 正书宣德五年 宣化】
重修金丝堂碑 【裴侃撰 正书宣德九年 曲阜】
重修朝元观记 【杨荣撰 黄养正书 行书宣德九年 宣化】
重建庙学记 【杨士奇撰 胡濙书 正书宣德九年 宣化】
重修学记 【黄淮撰 黄养正书 正书正统二年 永嘉】
重书严先生祠堂记 【蒋晖书 正书正统三年 桐庐】
重修庙学记 【黄淮撰 徐参书 正书正统三年 永嘉】
慧辨禅师塔铭 【宋濂撰 陈頼书 正书正统四年 海盐】
复圣新庙碑 【英宗御制 正书正统六年 曲阜】
修中镇庙记 【何子聪撰并书 王宪篆 正书正统六年 赵城】
报恩感慈寺碑 【胡濙撰 王直书 正书正统八年 阳湖】
黄忠宣神道碑 【杨士奇撰 程南云书 正书正统十年 昌邑】
朝真观碑 【李时勉撰 沈粲书 正书正统十一年 吴县】
朱德诚舍地记 【苏正撰 正书正统十三年 钱塘】
金粟广慧寺记 【胡濙撰 沈为忠书 正书正统十四年 海盐】
重刻朱子建学记 【卢钦书 正书景泰元年 龙岩】
谒尧庙记 【李棠撰并书 正书景泰五年 灵川】
叶及庵八城社学记 【商辂跋 杨奕书 正书景泰七年 龙门】
重修西关社学记 【商辂撰 黄采书 正书景泰七年 龙门】
舞阳侯庙碑 【沈彬撰 唐礼书 正书景泰七年 武康】
修明因寺记 【胡濙撰 黄采书 正书天顺元年 仁和】
重建思范亭记 【胡拱辰撰 许黯书 正书天顺元年 建德】
潮鸣教寺碑 【郑厚撰 叶蓁书 正书天顺二年 仁和】
杏坛赋跋 【黄谏书 正书天顺四年 广州】
杏坛赋碑 【马昂撰 分书 黄谏跋 正书天顺四年 曲阜】
学宫图记 【胡拱辰撰 正书天顺六年 广州】
重建睢阳太守许公祠记 【魏骥撰 夏■〈日上永下〉书 正书天顺六年
新城】
游栖霞寺记 【徐孚撰并书 正书天顺六年 蒲圻】

天妃庙后殿记 【黄谏书 分书天顺七年 广州】
三洲岩诗 【韩雍撰 行书成化二年 肇庆】
修孔庙碑 【宪宗御制 正书成化四年 曲阜】
海门禅师碑 【张盩撰 张宏书 正书成化四年 海盐】
修佑圣宫记 【周时乐撰 陈毅书 正书成化五年 平湖】
谒楚令尹庙诗 【刘昌撰并书 正书成化五年 固始】
修庙学记 【商辂撰 姚夔书 正书成化五年 诸暨】
岁贡题名记 【卞荣撰 达颖书 行书成化七年 海盐】
重建城隍庙记 【黎淳书 正书成化七年 蒲圻】
琼州府学祭器记 【邱浚撰 正书成化八年 琼州】
县治记 【黎淳撰 龚卿书 正书成化九年 蒲圻】
重建恩州城记 【卢秩撰 正书成化九年 恩州】
清节庙碑 【商辂撰 刘翊书 正书成化十年 卢龙】
永通河闸碑 【商辂撰 俞钦书 正书成化十一年 济甯】
修金牛禅寺记 【僧道深撰 僧道坚书 正书成化十一年 谷城】
敕赐大承恩寺记 【襄王瞻墉书 正书成化十二年 谷城】
灵卫庙碑阴记 【于冕撰 吴经书 正书成化十二年 钱塘】
修庙学记 【张元祜撰 罗伦书 正书成化十二年 南昌】
谒淮祠诗 【柳琰书 行书成化十二年 桐柏】
灵卫庙迎送神词碑 【夏时正撰 项麒书 正书成化十三年 钱塘】
崇寿寺碑 【汪谐撰 何洪书 行书成化十三年 昌平】
公冶书院记 【耿英撰并书 正书成化十三年 安邱】
紫霄宫圣德昭应碑 【李衍撰 杨琚书 正书成化十五年 均州】
清凉寺重兴记 【杨琚撰 王琰书 正书成化十五年 枣阳】
敢勇祠记 【陶鲁撰 陈献章书 正书成化十五年 广州】
重建石将军庙碑 【陆瑜撰 洪常书 正书成化十七年 鄞县】
修兴福寺记 【王鏊撰并书 正书成化十八年 太湖】
恩平学记 【陈献章撰并书 正书成化十八年 恩平】
游心楼记 【林光撰 陈献章书 正书成化十八年 广州】
报恩寺开设僧会司记 【董伯圭撰 阎忠书 正书成化十九年 枣阳】
书朱文公建二程祠记 【吴瑄撰 行书成化二十年 黄陂】
浴日亭次韵诗 【陈献章撰并书 湛若水跋 草书成化二十一年 广州】
六祖坛经法宝序 【宪宗御制 符锡书 正书成化二十一年 韶州】
修城隍庙记 【沈棨撰 倪辅书 行书成化二十一年 平湖】

玉田寺修佛殿记 【袁恺撰 李本修书 行书弘治元年 石首】
重修庙学记 【韩庭撰 王景连书 正书弘治元年 晋州】
福龙山明教寺碑 【朱宽撰 毛荣书 正书弘治二年 南漳】
惠泽祠记 【邹干撰 孙冕书 正书弘治二年 余杭】
游焦山诗并跋 【杨一清撰 行书弘治三年 丹徒】
重建海会寺记 【李旻撰 钱钺书 正书弘治五年 钱塘】
宝幢寺诗 【吴宽撰 文林书 正书弘治七年 吴县】
古北岳飞石岩诗 【阎钰撰 董锡书 行书弘治七年 浑源】
城隍庙记 【陈献章撰并书 行书弘治七年 肇庆】
圣水禅寺建佛殿记 【沈征撰 胡懋钦书 正书弘治八年 钱塘】
桧图碑记 【孔涇撰 正书弘治八年 曲阜】
明道先生庙碑 【王鏊撰 王九思书弘治十年 鄂县】
安平治水碑 【徐溥撰 周文通书 正书弘治十年 东阿】
忍字赞 【陈献章撰并书 行书弘治十年 新会】
风采楼记 【陈献章撰并书 行书弘治十年 韶州】
程乡学记 【陈献章撰 王栩书 行书弘治十一年 嘉应】
慈元庙碑 【陈献章书 行书弘治十二年 广州】
有客诗 【陈献章撰并书 行书新会】
书包孝肃诗 【陈献章书 行书肇庆】
游大叵山赋 【王守仁撰并书 正书弘治十二年 浚县】
重建庙学记 【刘瑞书撰 张宦书 正书弘治十二年 望都】
绿野书院记 【吴宽撰 陶琰书 正书弘治十二年 武功】
修灵卫庙碑记 【赵宽撰 杨峻书 正书弘治十三年 钱塘】
金祝庙妥神碑 【胡道撰 正书弘治十四年 钱塘】
砥柱行 【杨一清撰 正书弘治十四年 丹徒】
兴福寺记 【吴宽撰 李应楨书弘治十六年 太湖】
塘栖镇重建长桥记 【钱福撰并书 正书弘治十六年 仁和】
嘉会楼记 【张诩撰并书 行书弘治十六年 新会】
龙兴寺碑 【王相撰 正书弘治十七年 当阳】
预备仓记 【王守仁撰并书 正书弘治十七年 山阴】
诗礼堂铭 【李东阳撰 分书弘治十八年 曲阜】
金丝堂铭 【李东阳撰 正书弘治十八年 曲阜】
奎文阁赋 【李东阳撰 乔宗书 正书弘治十八年 曲阜】
桃花庵诗 【唐寅撰并书 行书弘治十八年 吴县】

兴福寺山居记 【王鏊撰弘治十八年 太湖】
寒山寺化钟碑 【唐寅书 行书吴县】
登法华寺诗 【马旋书 僧成珍刻正德元年 太湖】
谒北岳诗 【乔宇撰并书 行书正德元年 浑源】
修颜子庙碑 【王鏊撰 正书正德二年 曲阜】
净土庵中兴塔院碑 【广原撰并书 正书正德二年 桐乡】
修洞阳观记 【王显高撰 廖观海书 正书正德二年 枣阳】
游金山诗 【杨一清撰 正书正德四年 丹徒】
法华寺诗 【王鏊撰并书 行书正德四年 太湖】
甘露寺诗 【杨一清撰正德四年 丹徒】
兴隆月潭寺记 【王守仁撰并书 行书正德五年 兴隆】
李忠定祠堂碑 【邵宝撰 俞泰书 行书正德五年 金匱】
修庙学记 【吕柟撰 康海书 正书正德五年 华州】
修严子陵祠堂记 【屠滂撰 王华书 正书正德五年 桐庐】
三洲岩记 【王弘撰并书 正书正德九年 肇庆】
毛忠襄祠碑 【倪宗正撰 徐爱书 正书正德九年 余姚】
重建宝奎寺记 【洪钟撰 陈良器书 正书正德十年 钱塘】
修啸台记 【李梦阳撰并书 正书正德十年 辉县】
风洞山诗 【张佑撰并书 草书正德十年 临桂】
修公冶子长祠碑 【韩肇撰 郭郊书 行书正德十一年 诸城】
程子祠记 【孙恭撰并书 正书正德十一年 博野】
平寇喜雨记 【王守仁撰并书 正书正德十二年 上杭】
重刻采薇歌 【吕经跋 篆书正德十二年 蒲州】
重修县学记 【林瀚撰 陈仁书 正书 林绍篆额正德十二年 潮阳】
宋尚书祠记 【李鏊撰 刘永书 正书正德十三年 汶上】
尊经阁藏书记 【刘瑞撰 胡镇书 分书正德十三年 钱塘】
千字文 【祝允明书 行书正德十三年 镇洋】
和沈石田诗 【祝允明撰并书 正书吴江】
诗文手简三通 【祝允明书 正书长兴】
孝娥井铭 【刘瑞书 行书正德十四年 仁和】
奎文阁置书籍碑 【熊相撰 正书正德十五年 曲阜】
樊侯仲山甫祠记 【吴华撰 正书嘉靖元年 襄阳】
复东坡亭记 【傅佩撰 戴冠书 正书嘉靖元年 昌化】
改建文文山祠堂记 【叶式撰 李阶书 正书嘉靖元年 永嘉】

重刻曹娥碑 【顿恩集李邕书 行书嘉靖元年 会稽】
古帝王圣贤赞 【陈凤梧撰并书 篆书嘉靖四年 于潜】
新建三高祠记 【郑杰撰 分书嘉靖四年 襄阳】
修汉丞相忠武侯祠记 【郑杰撰 徐咸书 正书嘉靖四年 襄阳】
望洋台三大字 【蔡潮书 正书嘉靖五年 诏安】
玉峡关铭 【夏言撰并书 正书嘉靖七年 长治】
平思田记 【王守仁撰并书 正书嘉靖七年 隆安】
阳明洞天题字 【王守仁书 正书嘉靖七年 隆安】
游白水寺诗 【元朴生撰 正书嘉靖七年 枣阳】
具瞻亭铭 【夏言撰并书 正书无年月 京师】
玻璃泉亭记 【张惟恕撰 正书嘉靖十二年 盱眙】
元妙观修钟楼记 【裴騫撰 李承恩书 正书嘉靖十三年 泽州】
修惠果寺记 【马理撰并书 正书嘉靖十四年 泾阳】
三洲岩题名 【陈嘉谋书 行书嘉靖十五年 肇庆】
泾州五渠记 【马理撰并书 正书嘉靖十五年 泾阳】
修儒学碑 【文征明撰并书 行书嘉靖十五年 长洲】
书寒山寺诗 【文征明书 草书吴县】
补修奉国寺圣像记 【住持某某撰嘉靖十五年 义州】
重书先贤先儒赞 【蔡经书 正书嘉靖十五年 曲阜】
重修东坡大悲阁记 【沈栋书 正书嘉靖十六年 海盐】
九曜石题名 【吴鹏书 正书嘉靖十七年 广州】
总理河道题名碑 【于湛撰 正书嘉靖十七年 济甯】
楚大夫宋玉墓祠记 【王镛书 正书嘉靖十七年 宣城】
涵晖谷诗 【何世绛书 行书嘉靖十七年 韶州】
重修钱武肃王祠记 【汤绍恩撰 王畿书 正书嘉靖十八年 会稽】
修韩文公祠记 【翟奎撰并书 正书嘉靖十八年 昌黎】
学宫七柏赋碑记 【张璧撰并书 行书嘉靖十九年 石首】
重游碧落洞诗并序 【符锡撰并书 行书嘉靖十九年 英德】
客星亭诗 【霍韬撰 草书嘉靖十九年 桐庐】
钓台诗 【张奎撰 行书嘉靖二十一年 桐庐】
东岳中兴观记 【江晓撰 江曜书 正书嘉靖二十一年 钱塘】
登钓台诗 【胡宗宪撰并书 行书桐庐】
岷首亭碑 【陈勋撰 江汇书 行书嘉靖二十一年 襄阳】
金柜山题字 【毛伯温书 正书嘉靖二十一年 崇善】

九月登风洞山诗 【张宏撰并书 行书临桂】
修府学碑 【伦以训撰 黄佐书 正书嘉靖二十一年 广州】
唐秘监贺公祠记 【沈垞撰集李邕书 行书嘉靖二十二年 鄞县】
千字文 【沈垞书 草书嘉靖二十二年 鄞县】
望阙台题额并诗 【戚继光书 正书福清】
庙学告成记 【钱德洪撰并书 行书嘉靖二十四年 诸暨】
石门瀑布诗 【夏浚撰并书 行书嘉靖二十四年 青田】
关巡杂诗 【苏佑撰 行书嘉靖二十四年 曲阳】
金蝉关碑 【即汉王褒移金马碧鸡文 汤慎书于罗汉寺今残缺七字移置归化寺 行书嘉靖二十四年 昆明】
明伦堂颂 【湛若水撰并书 行书嘉靖二十四年 增城】
勤民楼记 【李一清撰 正书嘉靖二十五年 枣阳】
重建大开元寺碑 【施忠书 正书嘉靖二十五年 钱塘】
重建纯阳祠记 【文征明书 行书嘉靖二十五年 吴县】
谒恒岳庙诗 【王士翘书 行书嘉靖二十六年 曲阳】
建诸生肄舍碑 【王九思撰 冯熊书 正书嘉靖二十六年 济甯】
千字文 【文征明书 正书嘉靖二十七年 吴县镇洋俱有刻本】
洲田碑 【唐顺之撰 文征明书 分书丹徒】
鹅湖书院诗 【吴世良撰并书 行书嘉靖二十七年 铅山】
郭公庙碑 【季本拟 胡守贞书 正书嘉靖二十七年 会稽】
兴福寺重建慧堂记 【文征明撰并书 行书嘉靖二十八年 大通】
和李忠定显应庙诗 【曾佩撰并书 正书嘉靖二十九年 甯化】
太祖梦游西岳碑 【正书嘉靖二十九年立石 华阴】
谒岳庙诗 【高大节撰 行书嘉靖二十九年 曲阳】
和李忠定草仓诗 【曾佩撰 正书嘉靖二十九年 甯化】
瑞光寺兴修记 【马承学撰 章伏书 正书嘉靖二十九年 吴县】
李师中神道碑 【周螯撰并书 正书嘉靖二十九年 蓬莱】
从化三箴 【黄佐撰 黎民表书 分书嘉靖二十九年 从化】
孟秋登恒岳诗 【胡宗宪撰并书 正书嘉靖二十九年 浑源】
灵岩寺诗 【孙永思撰并书 行书嘉靖三十二年 略阳】
游灵岩诗 【钱泮撰 行书嘉靖三十二年 略阳】
玉虚宫碑 【世宗御制 正书嘉靖三十二年 均州】
重书竹楼记 【文征明书 行书嘉靖三十二年 黄冈】
闻韶台记 【曹天宪撰 正书嘉靖三十二年 济阳】

五仙观诗 【湛若水撰并书 行书嘉靖三十三年 广州】
重建县城记 【瞿景淳撰 文征明书 行书嘉靖三十三年 常熟】
修学记 【阮鹗撰 赵廷松书 正书嘉靖三十四年 瑞安】
游灵岩诗 【杨美益撰 行书嘉靖三十五年 略阳】
邢州司马厅记 【归有光撰 正书嘉靖三十六年 邢台】
重修文庙记 【瞿景淳撰 范宗吴篆 余兆阳书 正书嘉靖三十六年 晋州

】

寿春庵新建关王祠记 【张寰撰并书 正书嘉靖三十六年 钱塘】
武隆山治平寺记 【田汝成撰 正书嘉靖三十七年 昌化】
永平祀殷训导名宦记 【王世贞撰 纪公巡书 嘉靖三十七年 卢龙】
大成乐记 【湛若水撰 正书嘉靖三十八年 广州】
重建鹿顶山法华寺记 【汪鏜孙撰 李坤书 正书嘉靖三十八年 奉化】
新城碑记 【徐阶撰 孙升书 正书嘉靖三十九年 余姚】
东湖戏珠亭记 【陆杲撰 正书嘉靖三十九年 平湖】
重修县治记 【徐蠲撰 万一贯篆 天恩书 正书嘉靖四十年 恩平】
书前赤壁赋 【文征明书 行书嘉靖四十年 吴县宝月庵】
书后赤壁赋 【赵孟俯书 小楷 文征明跋 小行吴县宝月庵】
谒北岳庙诗 【刘应节书 行书嘉靖四十二年 曲阳】
修大承恩寺记 【朱厚頰书 行书嘉靖四十二年 谷城】
白鹿洞赋 【张纯书嘉靖四十三年 江西】
真武像赞 【黎民表撰并书 分书嘉靖四十四年 广州】
阳明书院记 【阮文中书 正书隆庆二年 修文】
总河翁大立修学碑 【郑真撰 靳学颜书 正书隆庆四年 济甯】
重建旌忠祠碑 【李春芳撰 高耀书 正书隆庆四年 清苑】
重修儒学碑 【董份撰 章藻书 正书隆庆六年 长洲】
重建资福庙记 【项守安撰 孙鹗书 行书隆庆六年 奉化】
报本塔记 【孙植撰 正书万历元年 平湖】
重书崔灏黄鹤楼诗 【赵贤跋 陈演书 分书万历元年 江夏】
重建晴川阁记 【姚宏模撰 马顾泽书万历元年 汉阳】
创建华严庵记 【曾可前撰 王濯书万历二年 石首】
书张佑金山诗 【祝允明书 草书万历二年刻 丹徒】
修儒学记 【王祖嫡撰 王一鹤书 正书万历三年 枣阳】
吴山江东庙碑 【来三聘撰 诸应元书 正书万历五年 钱塘】
章郡伯生祠记 【张执中撰 王世康书 行书万历五年 清苑】

谒岳庙诗 【顾尔行书 行书万历六年 曲阳】
修启圣祠碑记 【颜鲸撰 张谦书 正书万历六年 慈溪】
新建方正学祠记 【徐孚谟撰 行书万历六年 南郑】
迁城记 【胡价撰 陈敕书 正书万历六年 光化】
還元洞记 【郑洛书 正书万历六年 浑源】
修奉真道院碑记 【卓明卿撰 胡心得书 正书万历八年 仁和】
灵源篇 【陈省撰 行书万历九年 京山】
泗水桥碑 【万克赞撰 邢侗书 行书万历十年 滋阳】
修学记 【詹莱撰 叶承遇书 正书万历十一年 永嘉】
重修儒学记 【侯一元撰 王叔杲书 正书万历十一年 永嘉】
修云台观纪义碑 【张九迁撰 行书万历十一年 华阴】
净乐宫碑 【顾问撰 李珍熏书 正书万历十一年 均州】
重新汉寿亭侯祠额歌 【陈省撰 周恭先书 行书万历十一年 光化】
（臣）等谨按谷城县亦有陈省所撰歌周恭先书与光化同
建文昌祠记 【茅坤撰 冯孜书 正书万历十一年 桐乡】
礼部题名记 【徐学谟撰 正书万历十一年 京师】
重建忠靖王庙碑 【宋濂撰 姜准书 分书万历十二年 永嘉】
麟川侯生祠记 【赵南星撰 郭宝书 正书万历十二年 高邑】
仙岩修陈止斋祠记 【王叔杲撰 蔡一蛟书 正书万历十三年 瑞安】
重修儒学记 【翁大立撰 孙应奎书 正书万历十三年 余姚】
卓忠贞庙碑 【焦竑撰 正书万历十四年 永嘉】
重修明德观碑 【朱维藩撰 葛晓书 行书万历十四年 上虞】
昭烈武成王祠记 【沈友儒撰 正书万历十四年 海盐】
白鹿洞规 【沈九畴撰 正书万历十五年 九江】
重建灵隐寺记 【张瀚撰 潘季驯书 正书万历十六年 钱塘】
庆善井铭 【吴绍廉撰 草书万历十六年 海盐】
修治万金渠记 【郭朴撰 正书万历十六年 安阳】
修复学宫记 【杨巍撰 正书万历十六年 乐陵】
佑圣观记 【张瀚撰 陈善书 正书万历十七年 钱塘】
郭景纯苏东坡像二碑 【顾文曜立右万历十七年 广州】
修清道观碑记 【颜鲸撰 冯叔吉书 正书万历十八年 慈溪】
慧理大师塔铭 【虞淳熙撰 程理书 行书万历十八年 钱塘】
重修儒学记 【韩世能撰 张凤翼书 行书万历十八年 长洲】
游龙井诗 【卢高撰 行书钱塘】

重修尧母庙记 【杨绍程撰 正书万历十八年 望都】
重立总督河道题名碑 【潘季驯撰 罗文瑞书 正书万历十八年 济甯】
重修儒学四祠碑 【陈煜撰 侯廷柱书 正书万历十九年 诸城】
西樵山白云洞诗 【常宪元撰 行书万历十九年 广州】
鹤雀楼诗 【杜华先撰 正书万历十九年 蒲州】
修睢阳祠记 【谢师启撰 分书万历十九年 蒲圻】
王梁碑 【邢玠撰 邢侗书 行书诸城】
修潮鸣寺碑 【孙本撰并书 正书万历二十年 仁和】
拜将台诗 【潘一桂撰 行书南郑】
日迟亭记 【徐可求撰 徐日炅书 正书万历二十一年 西安】
刼修太和石道碑记 【詹贞吉撰 阎芹书 正书万历二十一年 均州】
龙井茶歌 【屠隆撰并书 行书万历二十二年 钱塘】
重建城隍庙记 【陆光祖撰 陆万垓书 正书万历二十二年 平湖】
修董孝子庙记 【沈一贯撰 林芝书 正书万历二十二年 鄞县】
重修积庆寺碑 【陈有年撰 陈鏞书 正书万历二十三年 余姚】
迁学记 【赵南星撰 吴一麟书 正书万历二十三年 赞皇】
阙里重修林庙记 【于慎行撰 正书万历二十三年 曲阜】
石门洞诗 【任可容书 行书万历二十四年 青田】
元妙观玉皇阁碑记 【沈一忠书 正书万历二十四年 江陵】
■ 〈目瞽〉子藏书记 【屠隆撰 行书万历二十四年 钱塘】
藏阴符灵鹫岩记 【虞淳熙撰 虞淳贞书 行书万历二十四年 钱塘】
修海门禅寺记 【许开造撰 钱与映书 正书万历二十五年 海盐】
金刚经 【朱敬鑑书 子谊润跋 正书西安】
修公冶子墓祠碑 【马文炜撰 陈煜书 正书万历二十五年 诸城】
修身为本四大字 【李材书 正书万历二十六年 龙溪】
丽阳山祖庙志 【冯时可撰 林芝书 行书万历二十七年 丽水】
佛说阿弥陀经 【黄辉书 马一腾跋 正书万历二十七年 钱塘】
盖公堂记 【陈煜撰 臧尔劝书 正书万历二十七年 诸城】
重建琅琊台碑 【张世则撰 正书万历二十七年 诸城】
修四献祠记 【张士佩撰 正书万历二十九年 蓝田】
重修儒学记 【徐显卿撰 杜大绶书 正书万历二十九年 长洲】
修西岳庙记 【张经新撰 王一干书 正书万历三十年 华阴】
杜康台碑记 【胡明佐撰 行书万历三十年 宣城】
书唐人赠孟襄阳诗 【王慎微书 行书万历三十年 鍾祥】

(臣)等谨按王慎微书刻于孟浩然像后
金山寺疏【董其昌书 行书万历三十年 丹徒】
重书东坡像赞【董其昌书 行书丹徒】
重书米南宫像赞【董其昌书 行书丹徒】
题孟庙古桧诗【董其昌书 行书邹县】
鱼乐国三大字【董其昌书 行书嘉兴】

(臣)等谨按鱼乐国三字在嘉兴烟雨楼之旁临湖难以摸搨
入三摩地碣【董其昌书 行书定海】

心经【董其昌书并跋 行书钱塘】

文昌阁碑【赵秉忠跋 陈煜书 正书万历三十年 诸城】

修广惠汪王殿记【史继辰撰 行书万历三十一年 钱塘】

重修奉国禅寺碑记【梁廷登撰 白应合书万历三十一年 义州】

重修倒座观音记【孙世捷撰 王悦祖书万历三十一年 义州】

吴山至德观记【史继辰撰并书 行书万历三十一年 钱塘】

酌水赋【叶秉敬撰并书 正书万历三十一年 宜阳】

修文庙碑【邢侗撰 韩取善书 正书万历三十一年 淄川】

修颜子庙记【于慎行撰 正书万历三十一年 曲阜】

修太山庙并建玉皇阁记【周梦旸撰 曾克雅书 正书万历三十一年 南漳

云栖禅院记【董其昌撰并书 行书万历三十二年 钱塘】

建北寺碑【章藻书 行书万历三十二年 吴县】

重建西林禅院记【包世杰撰 僧性融书 正书万历三十二年 平湖】

吴山越国汪王祠记【汪道亨撰 盛可继书 行书万历三十四年 钱塘】

重立成安君祠记【刘永脉撰 正书万历三十四年 钱塘】

自在庵碑记【郭正域撰 行书万历三十五年 均州】

修孟庙碑【戴章甫撰 吴端集王羲之书 行书万历三十六年 邹县】

少林寺道公碑【董其昌撰并书 行书万历三十七年 登封】

重修恩惠寺记【叶向高撰 包渐林书万历三十七年】

重建旌忠祠碑【孙承撰 杜大受书 正书万历三十九年 清苑】

莲居庵记【吴用先撰 许光祚书 正书万历三十九年 仁和】

洞霄吊古诗【管见撰 行书余杭】

修庙学记【邹元标撰并书 正书万历三十九年 安远】

光明寺碑【翁正春撰 张延登书 行书万历四十年 诸城】

游径山碑【王在晋撰 正书万历四十年 余杭】

密印寺钟成碑记 【李乐撰 唐泐书 行书万历四十年 桐乡】
古净因寺碑 【虞淳熙撰 陈禹谟书 行书万历四十年 钱塘】
修鹿门三高祠记 【马朴撰 王三宅书 正书万历四十一年 襄阳】
重修庙学记 【李峤岱撰 正书万历四十一年 南郑】
古延寿谷更名莲居记 【吴来泰撰 李流芳书 正书万历四十一年 仁和】
四十二章经 【李流芳书 正书万历四十二年 钱塘】
重修儒学记 【胡士容撰 文震孟书 万历四十三年 长洲】
重建尊经阁记 【赵南星撰 正书万历四十三年 赵州】
吴山关庙记 【王迪吉撰 盛可继书 正书万历四十三年 钱塘】
重修崇圣禅院记 【方应祥撰 许光祚书 正书万历四十三年 钱塘】
天禧昌运宫碑 【御制 万历四十五年 京师】
西湖关殿募疏跋 【董其昌书 行书 万历四十五年 京师】
樵李徐公家训碑 【董其昌书 行书 万历四十五年 西安】
秣陵旅舍送会稽章生诗 【董其昌撰并书 行书 西安】
临米芾龙井记 【董其昌跋并书 行书 钱塘】
四氏学碑 【吕调章撰并书 正书 万历四十六年 曲阜】
重修资庆禅院记 【周宗建撰 郑睿书 正书 万历四十六年 仁和】
重书苏轼昌黎庙记 【杨于陞书 行书 万历四十六年 昌黎】
石壁铭 【张翀撰并书 正书 都匀】
欲飞二大字 【邓子龙书 正书 安南】
天竺禅院藏经记 【彭宗孟撰 王廷俊书 正书 万历四十八年 海盐】
修鹤林寺记 【陈继儒撰 赵年书 正书 天启元年 丹徒】
题鹤林寺僧诗 【陈继儒书 丹徒】
金粟广惠寺碑 【赵国琦撰 沈孝征书 行书 天启元年 海盐】
放生池记 【文震亨书 正书 天启元年 吴县】
周府报国庵记 【李春华撰 正书 天启元年 均州】
重书永福寺壁法华经记 【董其昌书 行书 天启二年 钱塘】
石门洞停舟诗 【苏茂相题 行书 天启二年 青田】
重建金华寺碑 【樊维城撰 正书 天启二年 海盐】
开河记 【韩光佑撰 朱楷书 正书 天启二年 光化】
建圣观功德碑 【凌登名撰 严闇书 正书 天启四年 钱塘】
登建宝山阅兵观海赋 【米万锺撰并书 行书 天启四年 镇海】
金刚般若波罗密多经 【严调御书 正书 钱塘】
过崇圣禅林诗 【行书 钱塘】

(臣)等谨案此碑为李流芳徐时泰陈立政殿敕俞时笃姚奇胤僧海眼傅岩米万锺闻启祥沈鼎新十一人唱和诗

华严经 【沈鼎新书 正书钱塘】

书沈休文八咏诗 【米万锺书 行书天启四年 金华】

重建禹稷行宫碑记 【张元芳撰并书 正书天启五年 汉阳】

一勺之多四大字 【刘永基书 正书天启六年 临榆】

海潮寺福聚社放生约 【李事道撰 郭云龙书 行书天启六年 钱塘】

釋山贤关诗 【樊良枢撰并书 行书天启六年 丽水】

重修吴山东岳庙碑 【范绍序撰并书 正书天启六年 钱塘】

恒山诗 【汪裕撰并题 行书天启七年 浑源】

谒李忠愍祠诗 【方大镇撰 行书威县】

小山石刻 【张为纲书 行书崇祯元年 惠安】

重修五祖寺碑 【朱维庭撰 正书崇祯二年 黄梅】

云栖寺莲花口铭 【吴应宾撰 文震孟书 正书崇祯四年 钱塘】

阿弥陀经 【钱田征书 正书崇祯四年 钱塘】

孝经 【董其昌书 行书 钱谷跋崇祯四年 青浦】

春日郊游诗 【利瓦伊祯撰 李营易书 行书崇祯五年 京山】

天皇自来佛像记 【陶宗遗书 正书崇祯六年 江陵】

新城迁学记 【徐时泰撰 郑士奇书 正书崇祯六年 新城】

遗教经并唐太宗敕 【严调御书 正书崇祯七年 钱塘】

孔子像跋 【汪伟撰 正书崇祯八年 慈溪】

孔子暨先贤十哲像跋 【汪伟撰 正书崇祯九年 慈溪】

重修黄帝庙记 【万云路撰 正书崇祯九年 中部】

大士像赞 【董其昌书 正书崇祯九年 钱塘】

金刚般若波罗蜜多经 【董其昌书 正书崇祯十年 钱塘】

飞来石三字 【范志完书 行书崇祯十年 曲阳】

崇圣院启心堂记 【吴太冲撰 俞时笃书 正书崇祯十一年 钱塘】

佛说八大人觉经 【俞时笃书 正书崇祯十一年 钱塘】

汾山警策文 【俞时笃书 正书钱塘】

般若神丹颂 【严缶书 俞时笃跋 行书钱塘】

南明山纪游诗 【许彞徐日隆撰 行书崇祯十三年 丽水】

谒北岳诗 【方承郁书 草书无年月 曲阳】

谒北岳诗 【郑一麟书 正书无年月 曲阳】

第一岩三字 【书人姓名缺残不可识 无年月肇庆】

到难二大字 【肇庆】

真境二大字 【肇庆】

钦定续通志卷一百六十九

●钦定续通志卷一百七十 金石略四

金石略 【四 今无】

（臣）等谨案金石之文大半在深山邃谷之中梵宇幽宫之侧旁风上雨最易销沈砺角磨沙颇难护惜是以历年既久亡佚遂多或名

存地志而搜剔则久废榛芜或文在著录而毡撮则末由踪迹使概从芟削既不足昭往迹之可珍亦无以贻后来之考核今就直省所上碑目

中核查无迹可摭者另列为一卷其旧在某处仍列各条之下较郑氏之例尤为详慎云

历代金制

历代石刻

○历代金制

汉鍤斗铭 【篆书元康元年 海盐】

汉货泉范题字 【篆书建武二年 嘉兴】

魏帐构铜铭 【篆书景初元年 扬州】

唐造佛像铜牌题识 【正书天宝五载 钱塘】

唐宝相寺钟铭 【正书太和三年 汶上】

吴越国王金涂塔记 【正书显德二年 元和】

吴越祇园寺铜塔记 【正书显德五年 萧山】

宋慈化寺洪钟记 【僧普庵撰 正书干道二年 宜春】

宋隆兴府钟识 【僧奉窳撰 正书干道三年 南昌】

宋冀州钟识 【正书永清】

（臣）等谨按永清古钟朱彝尊日下旧闻以为唐钟验其题识乃宋时官制可见非唐时物矣今订正

辽舍利铁塔记 【正书重熙十六年 承德】

金密州钟识 【正书大定十三年 诸城】

元兴国寺钟识 【僧希陵撰 正书大德九年 宜春】

元元妙观钟识 【正书延佑二年 宜春】

元光孝殿铁镬题字 【正书延佑二年 广州】

元南岳庙铸钟记 【陈大同撰 董袭常书 正书泰定元年 湘潭】

元南岳庙铁钟记 【正书泰定元年 衡山】

元仰山孚惠庙钟铭 【完颜鼎尔撰 正书泰定二年 宜春】

明万寿寺钟佛经 【沈度书 正书永乐十三年 京师】

明洪教寺铸钟记 【正书洪熙元年 南漳】

明迎恩宫钟识 【正书成化十六年 均州】

明万汇寺钟识 【正书正德十三年 永清】

○历代石刻

秦

汉

三国

晋

六朝

隋

唐

五代

宋

辽

金

元

明

△秦

琅琊台刻石 【篆书诸城】

△汉

琅琊残碑 【分书延光四年 诸城】

△三国

魏十八字残碑 【分书合阳】

魏六字碑 【分书合阳】

魏王基碑 【正书景元二年 东平】

吴宝鼎砖 【篆书苏州】

△晋

杨绍买冢地荊 【正书太康五年 山阴】

咸和砖题字 【正书咸和四年 武康】

秦广武将军碑 【分书建元二年 宜君】

（臣）等谨案苻秦碑附见晋后从晋书载记之例

△六朝

魏盩厔将军司马元兴墓志 【正书永平四年 洛阳】

魏洛川刺史刁遵墓志 【正书熙平二年 乐陵】

（臣）等谨案刁遵碑没于土中后半截已残阙今就其存字核诸魏书刁雍传前后略同遵雍子也

魏浮图石盖铭 【正书神龟三年 登封】

魏荻阳太守元奩造石像记 【正书孝昌二年 洛阳】

（臣）等谨案汉书地理志荻阳荣字从水北史王邵传有云荻字三火则六朝荻字从三火与此碑合

魏中岳嵩阳寺碑 【分书天平二年 登封】

魏汝阳王造弥勒像题字 【正书天平四年 厯城】

魏齐州刺史高湛墓志 【正书元象二年 德州】

魏齐州太守刘世明造石像记 【正书武定二年 益都】

魏曹续造像铭 【正书大统五年 富平】

魏造太上老君像记 【正书大统十四年 洛阳】

齐石刻佛经 【正书天保二年 太原】

齐相里寺碑 【分书天保三年 汾阳】

齐张景晖造像记 【正书天保五年 益都】

齐豫州刘刺史碑 【正书天保八年 登封】

齐造丈八大像颂 【正书天统三年 许州】

齐造弥勒像记 【正书天统三年 洛阳】

大般若经 【王子椿书登封】

石刻佛名 【正书武平元年 太原】

齐涇州刺史齐郡王佑造像记 【正书武平二年 洛阳】

齐邑义主一百人等造塔记 【正书武平三年 洛阳】

齐造像记 【正书武平七年 洛阳】

齐会善寺造像记 【正书武平六年 登封】

周豆卢恩碑 【分书咸阳】

△隋

佛座记 【王他奴造 正书开皇四年 西安】

东阿王庙碑 【正书兼隶开皇十三年 东阿】

张洪亮等造像记 【正书开皇十三年 益都】

宋文彪等造泮水石桥碑 【分书开皇中立 南和】

宋文彪等造桥柱碑 【分书开皇中立 南和】

荻泽令常丑奴墓志 【正书大业三年 兴平】

舍利塔铭 【正书大业五年 西安】

齐太公庙碑 【正书芮城】

△唐

千佛崖造像记 【正书武德中立 历城】

徐州都督房彦谦碑 【李百药撰 欧阳询书 分书贞观五年 章邱】

睦州刺史张琮碑 【正书贞观十三年 长安北原】

临济县男任恭碑 【正书贞观十七年 涿州】

造石像记 【正书贞观十八年 历城】

芮公豆卢宽碑 【正书永徽元年 醴泉】

颍川定公韩仲良碑 【于志宁撰 王行满书 正书永徽六年 三原】

渝国公刘元意造像记 【正书显庆二年 历城】

南平长公主造像记 【正书显庆二年 历城】

化度寺僧海禅师坟记 【正书显庆二年 长安百塔寺】

王居士砖塔铭 【上官灵芝撰 敬容书 正书显庆三年 西安】

（臣）等谨案砖塔铭今有碎石数方尚存

赵王福造弥勒像记 【正书显庆三年 东昌】

夫人程氏塔铭 【正书显庆四年 西安】

岱岳观造像记 【正书显庆六年 泰安】

（臣）等谨案岱岳观碑其侧面多刻历代设醮造像记刻于北面者有仪凤三年正月设醮记天授二年二月造像记万岁通天二年造像记久视二年正月斋醮记长安元年十二月造像记长安四年十一月造像记神龙元年三月造像记景龙二年二月设醮记大历八年九月修庙记贞元十四年十二月任要等题名又任要等腊月与韦户曹游发生洞诗刻于南面者有圣历元年腊月造像记长安四年九月设醮记景龙三年三月造大醮记景云二年六月赐道士杨太希敕景云三年八月设醮记开元八年七月修岱岳观记开元十九年十一月修斋记开元二十年二月胡寂等题名大历七年正月修金篆斋醮记祭岳题名大历十四年王圆等题名建中元年祭岳题名又兖州团练使都虞候高晃等题名刻于东侧者有马令陪敕使麻先生祭岳诗建中元年二月敬睿等题名刻于西侧者有大历七年正月公孙杲赠诸法师诗宋政和甲午董元康题名又徂徕山人高季良等题名干封县令刘难等题名今以其题记琐碎总附于此

会善寺造像记 【分书麟德元年 登封】

燕公于志宁碑 【令狐德棻撰 子立政书 正书干封元年 三原】

郭君残碑 【正书干封二年 汾阳】

（臣）等谨案此碑名字剥落朱彝尊跋据碑文擒斩宋老生语定为唐初人金石

统表又以为郭翼俱无确证今从阙疑

金刚经 【王知敬书 正书咸亨三年 登封】

郑惠王石塔记 【行书咸亨四年 醴泉】

周豫州刺史杜君墓志 【正书仪凤二年 仪封】

新息令某君墓志 【正书光宅元年 沙河】

（臣）等谨案此碑无撰书人姓名题目及首二行并磨泐故失其姓氏名字其文有云加君郑州新息令考唐书地理志不载新息尝隶郑州盖史有阙文也

沐润魏夫人祠碑 【路敬淳撰 僧从谦书 行书垂拱四年 绛州】

梁府君并夫人唐氏墓志 【朱宾撰 郑庄书 正书垂拱四年 西安】

中岳体元先生潘尊师碣 【王适撰 司马承祜书 分书 圣历四年 登封】

大云寺碑 【贾膺福撰并书 分书大足元年 绛州】

造佛像铭 【韦均造 正书长安二年 西安】

造弥勒像赞 【萧元昶造 正书长安三年 西安】

造阿弥陀像记 【李承嗣造 正书长安三年 西安】

卫州共城县百门陂碑 【辛怡谦撰 张元惊记 孙去烦书 长安四年 行书 辉县】

涅槃经 【正书 内有武后新制字洛阳】

王三娘坟记 【正书神龙二年 西安】

中兴三藏圣教序 【中宗御制 唐奉一书 分书神龙三年 长清】

遵化郡公德功纪 【郭谦光撰并书 分书景龙元年 太原】

长安县丞萧思亮墓志 【颜惟贞书 正书景龙二年 咸宜】

醴泉寺志公碑 【行书太极元年 章邱】

冯氏妇墓志铭 【孟友直撰 正书开元三年 宝鸡】

兖州都督于知微碑 【姚崇撰 正书开元七年 三原】

莱州刺史唐府君德政碑 【沙门重润书 分书开元十年 莱州】

京兆总监茹守福墓志 【正书开元十一年 咸宜】

高福墓志 【孙翌撰 正书开元十二年 咸宜】

石佛堂志 【孙义龙撰并书 行书开元十二年 临城】

唐仲烈墓志铭 【王无竞撰并书 正书开元十二年 掖县】

王无竞墓志 【孙逖撰 正书莱州】

明皇行次成皋诗 【史叙书 行书开元十三年 中牟】

帝陵光业寺大佛堂碑 【杨晋撰 正书开元十三年 庆云】

思恒律师志文 【常某撰 正书开元十四年 咸宜】

嵩岳少林寺碑 【裴灌撰并书 行书开元十六年 登封】

佛说六门陀罗尼经 【行书开元十六年 太原】

敬节法师塔铭 【正书开元十六年 咸宜】

谒郭巨祠堂记 【杨杰撰 李皋书 分书开元二十三年 肥城】

美原县尉张府君墓志 【正书开元二十四年 长安】

令长新诫 【明皇御制 韦坚书 正书开元二十五年 怀庆】

檀法师塔铭 【姜立佑撰 正书开元二十五年 西安】

临高寺碑 【常允之撰 弟演之书开元二十五年 绛州】

进法师塔铭 【陈光撰 僧智祥书 正书开元二十五年 西安】

华岳庙题名 【苏颖书 正书开元二十六年 华阴】

龙光寺舍利塔记 【正书开元二十八年 扶风】

祠部员外郎裴正墓志 【裴肱撰并书 正书开元二十八年 西安】

县令卢公志铭 【魏万成撰 正书开元二十九年 洛阳】

晋州刺史顺义公碑 【正书醴泉】

褒封四子敕 【正书天宝元年 整屋】

左金吾将军张嘉佑志铭 【柳贲撰天宝元年 洛阳】 赐张说敕 【正书天宝元年 闻喜】

张尊师遗烈碑 【蔡玮撰 韩赞书天宝二载 闻喜】

法昌寺主身塔铭 【韩诤撰 董光朝书天宝二载 西安】

骑都尉薛良佐塔铭 【薛钧撰 薛良史书 正书天宝三载 西安】

灌澈琵琶泓诗 【王纾书 行书天宝五载 建昌】

昭庆县令王公清德颂 【李大亮撰 正书天宝五载 隆平】

周夫人墓志铭 【正书天宝六载 长安】

香山寺陀罗尼幢 【牛某书 分书天宝七载 洛阳】

孙志廉墓志 【申堂构撰 韩献之书 行书天宝十二载 长安】

（臣）等谨案此碑首行府君二字上其姓剥落文内叙先世云吴称帝业飞龙郁起于江东汉辟贤臣易道超来于北海知其系出孙氏

少林寺还天王师子记 【正书天宝十四载 登封】

张希古墓志 【田颖书 行书天宝十五载 西安】

光禄卿王训墓志 【嗣泽王諲撰并书 正书大历二年 咸宜】

左武卫郎将元君墓志 【郑渌撰并书 正书大历四年 洛阳】

慈州刺史王履清碑 【侯冤撰 正书大历十二年 高陵】

（臣）等谨案此碑仅存上截其姓不着雍州金石记云碑首篆书唐故慈州刺史王府君神道碑今据增

解慧寺三门楼赞 【李宥撰 周羸金书 行书大历十二年 真定】
梵纲经碑 【高坚书 正书大历十三年 登封】
赠扬州都督段行琛碑 【张增撰 正书大历十四年 汧阳】
易州刺史张公山亭再葺记 【王璇撰 行书建中二年 易州】
魏文侯师段干木庙铭 【卢士牟撰 赵彤书 正书贞元元年 芮城】
杜府君夫人韦氏墓志 【李宣撰 杜成均书 行书贞元十年 西安】
少林寺厨库记 【颜少连撰 崔溉书 正书贞元十四年 登封】
靳英布墓志铭 【张遇撰并书 行书贞元十七年 通州】
浯溪题名 【杜杰书 正书贞元十八年 祁阳】
剑州长史李广业碑 【郑云逵撰 正书贞元二十年 三原】
巨鹿县时■〈彳 癸〉墓志 【刘通明撰 行书贞元二十一年 蓟州】
龙泉记 【张铸撰 裴少微书 正书元和三年 芮城】
涿鹿山石经堂记 【刘济撰 正书元和四年 房山】
河南府司录卢公夫人崔氏墓志 【窦从直撰 公燮书 正书元和九年 河南】
】

大德塔铭 【僧文湜撰 王叔清书 正书元和十二年 西安】
谒华岳庙记 【韩常撰 韦泰书 正书元和十二年 华阴】 朔方节度使
李光进碑 【令狐楚撰 于季元书 行书元和十
五年 太原】

（臣）等谨案碑无建立年月金石文字续记作元和十一年据令狐楚结衔系门
下侍郎唐书宰相表楚以元和十五年闰三月为门下
侍郎七月罢则此碑系元和十五年所立

忠武军监军朱孝敬碑 【苏遇撰 曹郢书 行书长庆元年 三原】
裴颖修岳庙中门纪石 【张从本书 行书长庆元年 华阴】
尚书左丞孔公墓志铭 【韩愈撰并书 正书长庆四年 泛水】
汝南周君墓志 【正书太和二年 海盐】
东郡怀古诗 【李德裕撰 分书太和四年 滑县】
湘中纪行诗 【李谅撰 诗后附题名 行书太和四年 祁阳】

（臣）等谨案碑见宝刻类编今考碑末有题名云太和四年十月二十五日桂管
都防御观察制置等使桂州刺史兼御史大夫李谅过
此偶题并领男颖同登览为宝刻类编所未载

龙泉记 【郑泽撰 姚全书太和六年 濮州】
石鼓山西溪题名 【正书太和九年 衡州】
尊胜陀罗尼经 【胡季良书 正书会昌元年 湖州】

尊胜陀罗尼经并序 【僧会洪书 正书会昌三年 湖州】

高士廉碑侧记 【高元裕书 正书会昌四年 醴泉】

六种真言 【曹巨川书 苏特等题名大中二年 湖州】

林夫人墓志 【褚符撰 正书大中二年 福州】

襄州别驾韩昶墓志 【昶自志 正书大中九年 孟县】

（臣）等谨案昶为愈之子自撰墓志其同时杜牧等皆尝为之非昶所创也碑未有卒日葬地当为后人补刊

华岳庙题名 【崔彦昭书 正书大中十一年 华阴】

尊胜陀罗尼经 【凌渭书 正书大中十一年 湖州】

大佛顶首楞严经 【凌渭书 正书大中十一年 湖州】

郑太常暨夫人崔氏墓志 【秦贯撰 正书大中十二年 卫辉】

浚河石幢 【正书咸通二年 西安】

宰堵波塔录 【高鏞述并书 正书咸通五年 咸阳】

华岳庙题名 【温璋书 正书咸通五年 华阴】

尊胜陀罗尼经幢 【沙门继远书 正书咸通七年 洛阳】

盘山道宗禅师遗行碑 【僧智宗撰 梁知止书 正书咸通七年 蓟州】

尊胜陀罗尼经并序 【莫少卿题名 正书咸通八年 嘉定南翔寺】

尊胜陀罗尼经并序 【冯卯书 正书咸通十年 湖州】

尊胜陀罗尼经 【陈珏题名 正书咸通十一年 湖州】

石经堂题名 【姚可矩书 正书咸通十二年 房山】

甘泉普济寺灵塔记 【郎肃撰 正书咸通十三年 蓟州】

左拾遗孔府君墓志 【郑仁表撰并书 正书咸通十五年 泛水】

尊胜陀罗尼经 【范信建 正书干符五年 湖州】

北岳庙题名 【李克用书 正书中和五年 曲阳】

吴承必墓志 【裴廷裕撰 书人不辨姓名 行书干宁二年 咸宁】

尊胜陀罗尼经并记 【沙门元秀撰记 正书光化二年 卫辉】

北平王再修文宣王庙院记 【高讽撰并书 正书天佑十五年 定州】

碑阴 【上十行行书 下有僚属题名正书】

纪裴晋公题名诗 【司空图撰 正书华阴】

尊胜陀罗尼经 【周德书 附徐师范题名 正书湖州】

尊胜陀罗尼经 【王宏书 正书郾城】

南诏碑 【郑回撰 正书】

蒙国大诏碑 【郑回撰 杜光庭书 正书】

（臣）等谨案唐自天宝以后云南为境外郑回所撰二碑俱在太和中今姑附唐

末

△五代

梁崇福侯庙记 【钱鏐撰 行书开平二年 绍兴】

（臣）等谨案云谷杂记称此碑为越州神庙碑金石文字记作镇东军城隍庙记今据碑额改正

梁刻裴说寄边衣诗 【僧彦修书 草书干化四年 西安】

（臣）等谨案碑后有李邕跋云干化中僧彦修善草书得张旭法模刻以贻同好宝刻类编作干化四年盖刻于末帝时也雍州金石记误作唐碑

梁龙兴寺石幢 【正书贞明三年 许州】

唐首阳庙题名 【丁约书 正书同光元年 蒲州】

唐开龙山慈云院记 【钱鏐撰 篆书同光二年 临安】

唐干峰禅院敕 【明宗御书 正书天成元年 泽州】

唐重修定晋院千佛邑碑 【僧崇仁撰 正书天成四年 武定】

唐华岳题名 【杨凝式书 行书清泰二年 华阴】

唐华岳题名 【张希崇书 正书清泰二年 华阴】

晋吴越文穆王碑 【和凝撰 行书天福八年 杭州】

周崇安公祭告岳庙题名 【正书广顺三年 华阴】

周任公屏盗碑 【李昉撰 张振书 行书显德二年 巨野】

南汉拓路题名 【正书大宝三年 潮州】

南汉资德石塔记 【正书大宝五年 广州】

△宋

重修令武庙碣 【毛元撰并书 正书建隆元年 泽州】

善才寺观音院记 【阳峻书 正书 淳化元年 禹州】

祷先圣文 【徐休复撰 彭宸书 分书淳化元年 曲阜】

谒岳祠记 【侯建中撰 正书淳化五年 华阴】

修文宣王庙记 【王汉撰 萧资书 分书咸平三年 临潼】

御制孔子赞 【真宗御制并书 正书咸平六年 济南】

陈总等题名 【刘起书 行书景德二年 肇庆】

祀文宣王庙题名记 【行书大中祥符元年 曲阜】

谒岳祠记 【宋世远撰 张绰书 分书大中祥符三年 华阴】

汾阴二圣配享碑 【真宗御制御书 正书大中祥符四年 太原】

灵显王庙赞 【真宗御制御书 正书大中祥符四年 泰安】

谒岳祠记 【任中正撰 正书大中祥符四年 华阴】

棣州防御使石保兴碑 【杨亿撰 尹熙古书 行书大中祥符四年 东平】
祀汾阴碑 【王旦撰 尹熙古书 行书大中祥符五年 汾州】
题西湖山诗 【王汉撰 正书大中祥符六年 潮州】
北岳醮告文 【真宗御制 白宪书 行书大中祥符八年 曲阳】
保宁寺碑 【冉曾撰并书 行书天禧二年 兴平】
后土庙记 【裴瑾撰 正书天禧四年 猗氏】
建灵佑观年月诏 【行书天禧五年 吴县】
谒华岳祠记 【范雍撰 正书干兴元年 华阴】
再谒华岳祠记 【范雍撰 正书天圣元年 华阴】
燕堂记 【富弼撰 陆经书 正书明道二年 宜阳】
延庆院修舍利塔记 【马元颖撰 杨虚巳书景佑三年 太原】
游七星岩诗 【杨备撰并书 正书景佑三年 肇庆】
郟州新学记 【张弼撰 韩缜书景佑五年 东平】
七星岩题名 【周湛书 行书庆历二年 肇庆】
游石室题名 【张才卿书 行书庆历六年 肇庆】
阅古堂记 【韩琦撰 正书庆历八年 定州】
北岳庙题名 【王鼎书 正书皇佑二年 曲阳】
阳春岩题名 【祖无择书 正书皇佑二年 肇庆】
北岳庙题名 【赵滋书 正书皇佑三年 曲阳】
谒岳祠记 【李■〈木巳〉书 正书皇佑三年 华阴】
浯溪题名 【王忬寿书 篆书皇佑三年 祁阳】
北岳庙题名 【楚执中书 正书皇佑三年 曲阳】
北岳庙题名 【刘兼济书 正书皇佑三年 曲阳】
崧台石室文 【陶翼撰并书 正书皇佑五年 肇庆】
庆丰堂记 【祖无择撰 柳淇书 行书皇佑五年 南雄】
仙岩题名 【陈求古书 正书至和二年 温州】
翊圣真君秘诰 【正书嘉佑五年 登封】
郭忠武王碑 【王彰撰 行书嘉佑六年 怀庆】
凉轩诗 【李某撰 吴东之书 正书嘉佑六年 芮城】
狄武襄神道碑 【王珪撰 宋敏求书 正书嘉佑七年 汾州】
孔林题名 【王纯臣书 正书嘉佑七年 曲阜】
北岳庙题名 【靳朴书治平元年 曲阳】
北岳庙题名 【王岩叟书治平二年 曲阳】
赠太尉孙宣公碑 【杨某撰 正书治平二年 衡州】

石鼓山题名 【薛佺书 正书治平二年 郾城】
石室题名 【许奇书 正书治平二年 肇庆】
菩提寺柱础题字 【正书治平四年 嘉定】
游金谷诸崑记 【夏希道撰并书 正书熙宁元年 池州】
阳春岩题名 【周敦颐书 正书熙宁二年 肇庆】
七星岩倡和诗 【康卫陈恠撰 陈恠书 正书熙宁二年 肇庆】
华岳庙题名 【杨遂书 正书熙宁三年 华阴】
谒西岳祠记 【张孝孙书 正书熙宁四年 华阴】
燕喜亭题名 【何宗道书 正书熙宁四年 连州】
游西湖题名 【梁立仪书 正书熙宁四年 连州】
石鼓山题名 【刘莘老书 正书熙宁五年 衡州】
燕喜亭题名 【金杰书 正书熙宁六年 连州】
孔林题名 【吕升卿书 正书熙宁六年 曲阜】
赐文彦博诗 【神宗御制 下附彦博记元丰三年 介休】
谒顺应祠题名 【范纯仁书 正书元丰四年 历城】
五台孙真人祠记 【王瓛撰 正书元丰四年 耀州】
浯溪题名 【刘黻书 正书元丰四年 祁阳】
蔡文忠神道碑 【张方平撰 孙永正书 正书元丰五年 万州】
释迦成道记 【僧元耀书 行书元丰五年 归安】
独秀峰题名 【高元溥书 正书元丰五年 历城】
惠明寺舍利塔碑 【吕惠卿撰并书 正书元丰八年 太原】
碑阴 【附王植李彦文大方王安礼等题名】
留题兴安王庙诗 【吕惠卿撰并书 行书元丰八年 阳曲】
碧落洞题名 【杨幡书 行书元丰八年 韶州】
静源山耽石院记 【余靖撰 正书元佑元年 琼州】
九曜石题名 【张升卿书 正书元佑元年 广州】
西溪题名 【张公绶书 正书元佑三年 肇庆】
游石室记 【郭祥正撰并书 正书元佑三年 肇庆】
李卫公墓题记 【游师雄撰 行书元佑四年 醴泉】
游淮渚祠记 【任永天书 正书元佑四年 桐柏】
韩魏公载祀典敕 【行书元佑五年 定州】
北岳庙题名 【侍其璇书 正书元佑五年 曲阳】
林虑山圣灯记 【张商英撰 正书元佑五年 林县】
法华寺诗 【苏轼撰 正书元佑六年 乌程】

游灵岩诗 【卞育撰 正书元佑七年 长清】
西溪题名 【张钧书 分书元佑七年 衡州】
重修臧大夫庙记 【僧德晏述并书 正书元佑八年 滋阳】
游碧落洞诗 【时孝孙撰并书 正书元佑八年 韶州】
圣寿寺题名 【苏轼书 正书 傅雱跋绍圣元年 英德】
蓄狸说 【黄庭坚撰并书 正书绍圣二年 太平】
行香子词 【苏轼撰并书 正书绍圣二年 定州】
大安圣寿寺碑 【刘觉撰 僧淇湛书 正书绍圣三年 芮城】
重建龙祠记 【危正撰 曾升书 正书纪圣四年 龙溪】
谒先圣记 【方■〈干，马代木〉书 正书绍圣四年 东平】
游南山题名 【李永言书 行书绍圣四年 英德】
涅槃经偈 【蔡卞书 行书元符二年 登封】
得利塔记 【赵宗辅撰 僧道雅书 正书元符二年 高陵】
临江仙词 【苏轼撰并书 正书袁州】
与佛印简 【苏轼书 行书太平】
天厖马券 【苏轼书 行书嘉兴】
书西湖诗 【苏轼书 行书钱塘】
郊行诗 【苏轼撰并书 郊县】
题贺水部诗并序 【苏辙撰 正书掖县】
晞阳岛题名 【吴仲虎书 正书崇宁元年 英德】
碧落洞题名 【张琬书 正书崇宁三年 英德】
赐仁济庙牒 【行书崇宁三年 安吉】
白雀寺题字 【米芾书 行书乌程】
书唐人诗四首 【米芾书 行书襄阳】
晞阳岛诗 【李丹书 正书大观二年 英德】
佛慧山题名 【梁彦书 行书大观二年 历城】
南山题名 【吴可书 正书大观三年 英德】
心经 【僧仁钦书 篆书大观三年 长清】
高明亭题名 【阮功远书 正书大观四年 顺德】
御制五礼碑 【正书政和元年 大名】
谒先圣庙题名 【程振书 正书政和元年 曲阜】
谒宣圣庙题名 【陈知存书 正书政和元年 曲阜】
浮邱庙灵泉记 【陈挺撰 正书政和二年 偃师】
佛慧山题名 【张劬书 行书政和二年 历城】

神应王扁鹊庙记 【董作撰 康修立书 正书政和四年 汤阴】
灵岩寺牒 【正书政和五年 长清】
祭淮渎记 【顿逢原书 正书政和五年 桐柏】
东山题名 【苏延构书 正书政和五年 潮阳】
谒韩文公庙题名 【陈国瑞书 正书政和五年 潮阳】
龙洞题名 【王有道书 行书政和八年 历城】
岳祠题名 【钱伯言书 行书宣和元年 泰安】
祭淮渎祠记 【蔡兴宗书 正书宣和元年 桐柏】
神霄宫诏 【徽宗御制并书 行书宣和元年 泰安】
长者龕记 【张商英撰并书 行书宣和二年 寿阳】
须弥塔题名 【刘宗书 正书宣和三年 历城】
祭汾东祠文 【姜中谦撰 赵令時书 正书宣和五年 阳曲】
御笔改修孟州门颁诏厅记 【正书宣和六年 怀庆】
大佛寺石幢 【王士宗记 正书宣和七年 永清】
灵岩寺题名 【高直臣书 正书靖康元年 长清】
浯溪题名 【贾仲举书 正书建炎三年 祁阳】
袁州城记 【阮阅撰 阎式书建炎三年 袁州】
越州显霁庙昭佑公牒 【行书绍兴元年 山阴】
草仓诗 【李纲撰并书 行书绍兴二年 霁化】
送紫岩北伐诗 【岳飞撰并书 行书绍兴五年 汤阴钱塘历城俱刻石】
游燕喜亭题名 【张浚书 正书绍兴十九年 连州】
永州学记 【汪藻撰并书 篆书绍兴二十年 祁阳】
御书无量寿阁碑 【高宗御书 正书乌程】
石鼓山题名 【王光祖书 正书干道八年 衡州】
七星岩题名 【詹仪之书 正书淳熙三年 肇庆】
七星岩诗 【赵雍撰并书 正书淳熙五年 肇庆】
李卫公庙记 【沈枢撰并书 正书淳熙十一年 安吉】
七星岩题名 【赵善择书 正书淳熙十五年 肇庆】
七星岩题名 【黄执矩书 正书淳熙十五年 肇庆】
易有太极一节 【朱子书 行书嘉定】
斋居感兴诗二十四首 【朱子撰 分书惠州】
白鹿洞赋 【朱子撰并书 行书九江】
幔亭记 【朱子书 行书崇安】
沧洲歌 【朱子书 行书崇安】

唐裴坦对杜黄裳语 【张安国书衡州】
重修府学记 【陆游撰 詹骕书 正书绍熙二年 会稽】
浯溪诗 【蔡说撰并书 正书绍熙三年 祁阳】
南山题名 【陈华书 正书庆元四年 英德】
南翔寺义井记 【龚大雅撰 正书庆元六年 嘉定】
赐常昭院牒 【正书嘉泰四年 乌程】
浯溪诗 【刘用行撰并书 正书嘉定八年 祁阳】
南翔院观堂记 【僧居简撰 林英发书 行书嘉定九年 嘉定】
浯溪题名 【林柏成书 行书嘉定九年 祁阳】
游浯溪诗 【曾燠撰 正书嘉定十三年 祁阳】
嘉应侯庙记 【陈夏撰 陈绎书 正书绍定二年 潮阳】
平黎颂 【游宠撰并书 正书绍定四年 琼州】
郡守邹公置学田记 【郑准撰 赵絺书 正书绍定六年 昆山】
七星岩倡和诗 【曾纯赵崇垓撰 行书端平二年 肇庆】
七星岩题名 【区永年书 正书嘉熙二年 肇庆】
游大云岩诗 【刘燧叔撰并书淳佑二年 连州】
南山亭题名 【缪梦远书 正书淳佑二年 英德】
白云寺记 【楼扶撰 正书淳佑十二年 余姚】
白水山题名 【施若撰 正书宝佑三年 余姚】
加封英济侯牒 【行书宝佑四年 仁和】
浚湖卫城记 【正书开庆元年 潮州】
浯溪诗 【李璋撰 正书景定五年 祁阳】
读中兴颂诗 【江琼撰 正书咸淳元年 祁阳】
△辽
舍刘佛牙石匣记 【僧志愿撰 正书天禄三年 京师】
奉国寺石幢记 【正书开泰二年 义州】
白川州陀罗尼幢记 【正书开泰六年 承德】
重修云居寺记 【僧智光撰 正书统和三年 房山】
独乐寺碑 【刘成撰 正书统和四年 蓟州】
佑唐寺讲堂碑 【李仲宣撰 僧德麟书统和四年 蓟州】
大广济寺塔记 【正书清宁三年 锦州】
奉佛寺石幢记 【僧真延撰 正书清宁九年 京师】
护国院石幢 【正书咸雍元年 京师】
感化寺澄方遗行塔铭 【僧志隆书 正书大安七年 蓟州】

安德州建灵岩寺碑 【耶律邵撰 僧恒劬书 正书寿昌元年 承德】

碑阴记 【僧恒劬撰 耶律邵书 篆书】

（臣）等谨案辽史纪年有寿隆而无寿昌然辽碑俱作寿昌无作寿隆者考圣宗名隆绪道宗为圣宗之孙如以寿隆纪年则不避祖讳矣当以碑刻为得其实

玉石观音像倡和诗 【僧性煦书 正书寿昌五年 朝阳】

（臣）等谨案此碑首倡者为沙门智化和之者为郑若愚韩资让赵庭睦梁援赵长敬马元俊刘瓌仲爱曲正夫王执中于复先王仲华张识杨涤瑕李师范李某张某寇某张墉韩汝砺沙门善制凡二十二人今诗句尚可辨姓名闲有残阙者未附僧性连僧性鉴二诗

报国寺石幢 【正书干统三年 京师】

感化寺碑 【南汴撰 僧肃回书干统七年 蓟州】

释迦定光佛舍利塔记 【僧慧材撰 正书天庆二年 承德】

兴中府灵感寺塔铭 【张嗣初撰 行书天庆六年 承德】

内兴寺石幢记 【正书天定二年 永清】

（臣）等谨案石幢首书大辽国燕京永清县末书天成二年九月考辽史本纪及契丹国志俱无天定纪年然辽史容有脱落如东都事略载辽初以龙德纪年而本纪不载疑系史家阙文也今存以备参考

△金

寿延寺石幢 【正书天会八年 永清】

定雨县水碑 【杨邦行撰 正书天眷二年 汾州】

华严寺记 【段子卿撰 僧法慧书 正书天眷三年 平遥】

汾州葬枯骨记 【李致尧撰并书 行书皇统二年 平遥】

白云庵义公碑 【穆某撰 正书皇统三年 历城】

灵峰寺千佛洞碑 【刘子初撰 杜彦臣书 正书皇统三年 太原】

重修微子庙记 【杨汉卿撰 正书天德三年 商邱】

兴福院修大殿三门记 【张怵撰 僧福崇书 正书正隆元年 汾州】

修紫虚元君庙记 【韩迪简撰 韩翊书 正书正隆二年 泰安】

鼓山常乐寺修佛殿记 【胡砺撰 翟炳书 正书正隆四年 武安】

重修碑院七贤堂记 【曹谊撰 郭孝忠书正隆四年 临潼】

香水寺灵塔记 【僧知心撰 僧善进书正隆六年 蓟州】

甘泉寺行道塔记 【僧圆照撰 正书大定五年 蓟州】

普照寺牒 【正书大定五年 沂州】

万卦山诗 【史某撰大定六年 交城】

兴中府改建三学记 【韩长卿撰并书 正书大定七年 朝阳】
日照寺圆霞塔记 【孙设撰 正书大定九年 蓟州】
大云禅院记 【姜尧仁撰 孙衍书大定十年 蔚州】
陇西李公墓志铭 【贾圻撰并书 正书大定十一年 解州】
昌宁公庙碑 【王遵古撰 正书大定十三年 汾阳】
灵岩院染公塔铭 【景某撰 李如珪书大定十四年 获鹿】
重建唐德宗诗碑记 【许安仁撰并书 行书大定十六年 泽州】
勅修大明禅院记 【白靖臣撰 殷建中书 正书大定十六年 怀庆】
灵泉观凝真成道记 【王镐撰 李辅书 正书大定十六年 西安】
拜孔庙题名 【李子易书 正书大定十七年 曲阜】
灵岩寺题名 【萧守中书 行书大定十八年 长清】
谒华岳庙记 【李成铎撰 正书大定十九年 华阴】
修应圣公庙碑 【仇守中撰 王纲书 正书大定二十年 赵城】
陀罗尼石幢 【正书大定二十年 永清】
重建郛国夫人殿碑 【党怀英撰并书 分书大定二十一年 曲阜】
重修灵峰寺记 【陈协用撰 李曦书 正书大定二十一年 蒲州】
杜天师碑 【谭处端书 正书大定二十四年 济阳】
谭真人踏云行 【行书大定二十四年 济阳】
华州城隍庙碑 【张建撰 蔚文书 正书大定二十四年 华阴】
骠骑园亭记 【范恠撰 李含德书 正书大定二十九年 益都】
祝圣寿碑 【党怀英撰并书 分书明昌元年 济宁】
开州刺史高公葺孔庙题记 【赫旒撰 正书明昌二年 曲阜】
宣圣庙题名 【赫旒书明昌二年 曲阜】
太原府学碑 【赵汾撰 正书明昌二年 阳曲】
林庙题名 【李几说书 正书明昌二年 曲阜】
范阳王谒庙记 【正书明昌二年 曲阜】
陇西郡开国伯李盘神道碑 【高德裔撰并书明昌三年 玉田】
南辛溜大寺石幢 【正书明昌三年 永清】
修王弼庙碑 【鲜于渊书明昌四年 偃师】
创建文庙记 【王世元撰 正书明昌五年 嵩县】
寿圣禅院牒 【正书明昌六年 诸城】
雷公寿堂记 【王昌期撰 李善治书 行书明昌六年 西安】
重修唐帝庙碑 【赵秉文撰并书 正书明昌六年 登封】
梁公画像记 【郝长卿撰 吴琢书承安二年 西安】

孔庙题名 【赵充书 正书承安二年 曲阜】
盖公行状塔 【赵秉文撰并书 正书承安五年 东昌】
游百家岩诗 【王宏撰 正书泰和四年 郛源】
伏牺庙碑 【舒穆鲁輓撰并书 正书泰和五年 鱼台】
重修岱岳观记 【苗某撰 正书泰和六年 泰安】
留题法轮院诗 【杨廷秀撰并书 草书泰和六年 漳州】
谒华岳庙记 【田牺撰 正书泰和七年 蒲州】
六聘山天开寺塔记 【王虚中撰 贾溉书大安元年 房山】
李温墓表 【孟宗彦撰 孙华书崇庆元年 嘉祥】
射虎记 【杨焕撰 谢某书 正书元光二年 郛县】
游方山诗碣 【王雷撰 行书元光二年 平定】
竹阁寺碑 【雷渊撰 陈仲谦书 分书元光二年 襄城】
改建题名碑 【孔叔利撰 吴昕书 正书正大三年 西安】
修孔庙碑 【李春岩撰 赵翠书 正书襄城】
△元
万卦山天厯寺疏 【耶律楚材撰 正书太宗三年 交城】
中书省公据 【正书太宗三年 交城】
谒孔庙诗 【谢彦石王万度撰 行书太宗七年 曲阜】
张公墓铭 【刘赞撰并书 正书太宗七年 新城】
神山洞圣旨碑 【正书太宗皇后称制四年 永清】
修太清观记 【杨宏道撰 谢良弼书 分书定宗三年 厯城】
龙洞灵惠公庙碑 【张泰亨撰并书 正书宪宗五年 厯城】
云峰真人康泰真碑 【正书宪宗六年 济南】
悬钟山觉慈寺记 【李衷撰 僧正许书中统三年 涉县】
先天观碑铭 【吕文蔚撰 陈志玉书中统三年 泰安】
天门铭 【杜仁杰撰 严忠范书 正书中统五年 泰安】
重立三城记 【正书中统五年 孟州】
纯孝伯庙碑 【王益撰 正书至元二年 登封】
大都城隍庙碑 【任棫撰 李郁书 正书至元五年 京师】
李氏迁祖之碑 【杨宏道撰 赵时中书至元七年 东平】
文庙瑞芝记 【杨成撰 荆干臣书 分书至元八年 曲阜】
修清凉国师塔记 【僧印撰 僧彧书 正书至元九年 咸厯】
谒孟庙碑 【赵文昌书 行书至元十二年 邹县】
大开元寺建普门塔碑 【王恽撰 商挺书 正书至元十六年 邢台】

乐安会记 【赵温撰 正书至元十七年 平遥】
修东岳行宫三门碑 【李珪撰 孟璋书 正书至元十八年 历城】
书徐世隆舜井诗 【张之翰跋并书 行书至元十八年 历城】
七佛阁记 【阎复撰 李谦书 正书至元二十一年 定州】
岳阳朝元观记 【徐世隆撰 刘惟一书 篆书至元二十二年 泰安】
卫志隐道行碑 【李谦撰 寇元德书 正书至元二十二年 济源】
修学记 【傅孟弼撰 正书至元二十三年 孟州】
三官庙记 【李孝纯撰 王德政书 正书至元二十四年 东平】
皇子北安王降香记 【秦良佐撰 徐秉忠书 正书至元二十四年 泰安】
重修三殿真君庙记 【岳泰撰 正书至元二十四年 益都】
五指山大轮禅师碑 【僧居宝撰 广纯书 正书至元二十四年 泉州】
玉京观地产记 【李察撰 张洪礼书至元二十四年 西安】
碑阴 【正书】
大岩洞石壁诗 【张显祖撰 行书至元二十五年 肇庆】
勅建法箴堂记 【陈南美撰 正书至元二十五年 亳州】
濮州学记 【吴衍撰并书 正书至元二十五年 濮州】
敌楼山天宫禅院记 【僧显月书 正书至元二十六年 汝宁】
游七星岩诗 【王显德撰 行书至元二十六年 肇庆】
古本道德经 【高翻书 篆书至元二十八年 盩厔】
加封北海广泽灵佑王记 【祁思问撰 正书至元二十九年 昌黎】
八大人觉经 【僧溥光书 正书至元三十一年 嘉兴】
天唐寺碑 【王恽书 正书京师】
石狻猊赞 【正书元贞元年 历城】
夷齐庙封号记 【柳谦撰 赵民书 正书元贞元年 蒲州】
石鼓山西溪题名 【史杠撰 正书元贞元年 衡州】
新迁庙学记 【王构撰 高原书 正书元贞二年 晋州】
云峰居士郑从龙墓志 【刘肩吾撰 正书元贞二年 福州】
芮王庙记 【何南卿撰 樊彦书 正书大德元年 芮城】
重修令武王庙记 【胡芳子撰 马份书 正书大德元年 冠县】
居竹记 【方回撰 赵孟俯书 行书大德二年 湖州】
林泉寺勅建地产四至碑 【僧性空书 正书大德三年 东阿】
灵贲碑 【史芝撰 张秉彝书 正书大德三年 泰安】
萧山县学碑阴记 【胡长孺撰 鲜于枢书 行书】
西由场新建庙学记 【傅梦弼撰 乔达书 正书大德三年 湖州】

重修汉李将军庙碑 【行书大德五年 永平】
大开元寺万安恩公碑 【王思廉撰并书 正书大德六年 太原】
古陶禅院题名 【元好问书 行书大德六年 太原】
重修逍遥观记 【田道育书 正书太德八年 新安】
绍兴路增置义田记 【曾纲撰 赵孟俯书 行书大德八年 会稽】
甘澍记 【颜守澹书 正书大德九年 华阴】
浯溪题名 【杜松书 正书大德九年 祁阳】
妙明禅师云公碑阴 【僧众题名 正书大德六年 历城】
重修儒学记 【牟巘撰 赵孟俯书 行书大德十年 嘉兴】
府学碑 【正书大德十一年 广州】
普岩大师宝公塔铭 【僧智澄巨源撰 正书大德十一年 历城】
石门题识 【李良杰书 正书大德十一年 永福】
重书秋风词 【董若冲书 行书大德十一年 汾州】
许文正公祠堂记 【郑冲霄撰 吕士文书至大二年 卫辉】
洞真观碑 【张仲寿撰并书 行书至大二年 新安】
重修昭济侯献殿舞亭记 【雷豫撰并书 正书至大三年 东平】
伊尹墓祠记 【张元中撰 高合丹书 正书至大四年 合阳】
崇教禅师演公碑 【赵孟俯撰并书 行书皇庆元年 京师】
洄溪先生游玉川诗 【王公孺撰 王笱书 正书皇庆二年 同州】
拜林庙题名 【王信题 正书皇庆二年 曲阜】
昆山州海窰寺碑 【赵孟俯撰并书 行书延佑二年 太仓】
敕赐龙兴寺帝师碑 【赵孟俯撰并书 行书延佑三年 京师】
敕封帝君诏 【行书延佑三年 泰安】
东平郡桓萧公碑 【赵孟俯撰并书 正书延佑四年 东阿】
五老堂记 【宫珪撰 侯浩书 行书延佑四年 郾城】
长明灯记 【揭傒斯撰 赵孟俯书延佑四年 郾城】
梁国公何玮神道碑 【程巨夫撰 赵孟俯书延佑四年 怀庆】
咏洗砚泉诗 【赵孟俯书 篆书历城】
庙学建两庑记 【张勛撰 正书延佑五年 丰润】
勅建永寿禅寺记 【吕师说撰 吕元规书延佑五年 嘉定】
番君庙碑 【元明善撰 赵孟俯书 正书延佑六年 南雄】
增修加号牌楼记 【朱德润撰 正书延佑六年 定州】
重修季文子庙碑 【王良弼撰 王作书 行书延佑六年 兰山】
飞英舍利塔记 【孟淳撰 赵孟俯书 行书延佑六年 归安】

广福寺建观音殿记 【胡应青撰 赵孟俯书 正书延佑七年 湖州】
告孔庙文 【于钦撰 正书延佑七年 曲阜】
加封师真人敕 【陈德定书 正书延佑七年 华原】
华不注诗 【赵孟俯书 篆书乌程】
兰亭十三跋 【赵孟俯书 行书乌程】
普觉堂三大字 【赵孟俯书 正书湖州】
天宁万寿禅寺六字 【赵孟俯书 正书湖州】
闲邪公家传 【周驰撰 赵孟俯书 正书海盐】
资圣禅寺长生修造局记 【僧如芝撰 赵孟俯书 正书至治元年 秀水】
拜孔林题名 【王庆题 正书至治元年 曲阜】
宝成寺造佛像题名 【伯嘉努题 正书至治二年 杭州】
磁州三瑞记 【萧某撰并书 正书至治三年 成安】
东岳庙圣旨碑 【正书泰定元年 泰安】
碑阴题名 【正书】
重修东岳庙记 【徐潜撰 张质书 正书泰定三年 承德】
护国寺大佛殿记 【杨弥昌撰 正书泰定四年 嘉定】
归安学记 【邓文原撰并书 行书泰定四年 湖州】
知州王庆碑 【李僊撰 朱泰亨书 行书泰定五年 宁海】
龙飞寺海渎记 【贡奎撰并书 正书天历元年 登州】
祀淮渎记 【李黼撰 正书天历三年 桐柏】
太师东平王德胜庙碑 【正书承德】
皇太后懿旨碑 【正书至顺二年 江甯】
碑阴 【蒙古字】
济南郡公张斯和神道碑 【张养浩撰 邓文原书 正书至顺二年 章邱】
碑阴记 【张起岩撰 魏谊书 正书】
大都城隍庙碑 【虞集撰 库库书至顺二年 京师】
重修帝尝庙记 【范溟撰 正书至顺二年 兖州】
加葺宣圣庙记 【富珠哩翀撰 虞集书 分书至顺二年 真定】
重建庙学记 【智玉成撰 朱炎书 正书至顺三年 永嘉】
平阳郡公姚天福碑 【虞集撰并书元统元年 汾州】
孝烈将军祠像辨正记 【侯有造撰并书 正书元统二年 东阿】
齐国武敏公乐实碑 【虞集撰 分书元统三年 莱州】
降香记 【于克绍撰 李景参书 正书元统三年 泰安】
兴中州平治道涂碑 【林某撰 正书元统三年 平泉】

读中兴颂诗 【姚黼撰并书 正书至元二年 祁阳】
宗圣宫碑 【元明善撰 正书至元二年 太原】
安定书院燕居堂铭 【富珠哩翀撰并书 正书至元二年 归安】
庐山重建兴龙寺记 【虞集撰并书 正书至元二年 南康】
重修宣圣庙碑 【张琬撰 朱融书 正书至元二年 考城】
题中兴颂诗 【燕莫白撰并书 正书至元三年 祁阳】
文庙重修从祀记 【易景升撰 杨益书 正书至元四年 南雄】
达噜噶齐竹君碑 【偈傒斯撰 库库书平泉州】
紫虚元君广惠碑 【石瑄撰 李德存书至元五年 南雄】
济渎重建灵异碑记 【正书至元五年】
重刻宋顺应侯碑并碑阴 【李敬简撰并书 正书 历城】
王氏先莹碑 【正书至元六年 历城】
拜林庙题名 【刘宗焕题 正书至元六年 曲阜】
县尹段君坟道铭 【行书至元六年 金坛】
祭孔林题名 【额森布哈题至正元年 曲阜】
庙学新垣记 【张起岩撰 文书纳书 行书至正二年 历城】
修宝泉寺记 【正书至正三年 松江】
敕赐元教宗传碑 【虞集撰 赵孟俯书 行书至正四年 东平】
东岳庙圣旨碑 【正书至正四年 泰安】
石刻佛经 【蒙古辉和尔女真梵汉五体字至正五年 居庸延庆州】
重建溪光寺记 【刘沂撰 李益书 行书至正六年 归安】
瑞州云溪观碑 【张道中撰 白道荣书 正书至正七年 瑞昌】
谒淮渎祠记 【孟芾撰 正书至正七年 桐柏】
井公道行碑 【何约撰 真圣努书至正八年 渭南】
实际川禅师影堂题事 【僧正印撰 行书至正八年 昆山】
雷山义泉四字 【篆书至正八年 西安】
儒学新建文会堂记 【汪文璜撰 郑文煜书 正书至正九年 余姚】
重书韩愈徐偃王庙记 【吴叡书 正书至正九年 西安】
寿安亭记 【刘杰撰 正书至正九年 宜阳】
祈泽治平寺佛殿碑 【僧伯元撰 台哈布哈书 正书至正九年 东平】
道山亭联句诗 【僧嘉努等撰 任允书至正九年 江甯】
曲阜县历代沿革记 【石普撰 分书至正十年 曲阜】
密州修学记 【秦裕伯撰 黄翔书 正书至正十年 诸城】
山东乡试题名碑 【毛元庆撰 许彘书 正书至正十年 济南】

重建景灵宫碑 【周伯琦撰并书 正书至正十一年 曲阜】
修县学记 【储惟贤撰 张世昌书 行书至正十一年 归安】
干盍儒学置书记 【罗益中撰 朱汝弼书 正书至正十一年 惠州】
儒学核田记 【孙元蒙撰 傅常书 正书至正十一年 余姚】
景德寺碑 【黄溍撰 周伯琦书 正书至正十一年 房山】
关王庙碑 【正书至正十二年 许州】
万卦山野云行业记 【郝忠撰并书 正书至正十二年 交城】
监郡阿旦实哩感雨记 【元思孝撰 郑颐书 正书至正十三年 益都】
重建五龙堂记 【赵本撰 邱世贤书 正书至正十三年 济南】
祥符寺碑 【方道猷撰 倪中书 正书至正十四年 秀水】
七聘堂记 【苏天爵撰 喻立书 正书至正十四年 济南】
张宓神道碑 【李国凤撰 张景德书 正书至正十四年 济南】
县学教谕题名记 【宇文公谅撰 钱用壬书至正十五年 归安】
义门王氏先莹碑 【欧阳元撰 危素书 正书至正十五年 蒲州】
董仲珪弭寇纪功碑 【张焕撰 陈佐爵书 正书至正十七年 潮阳】
山东乡试题名碑 【孙翥撰 赵恒书 正书至正二十一年 济南】
温州路总管陈志学圻志 【陈逢祥撰 正书至正二十二年 昆山】
官家石洞碑 【正书至正二十二年 三水】
县学记 【陈基撰并书 行书至正二十四 常熟】
圣寿院残碑 【行书 历城】
忠襄王张荣墓断碑 【篆书 历城】

△明

湖州孔子庙碑 【揭云撰并书 分书世武元年 归安】
山东行中书省城隍庙碑 【陈修撰 陈汝言书 正书洪武二年 历城】
祀南岳碑 【正书洪武三年 衡山】
修陆宣公祠记 【陈彦博撰并书 正书洪武六年 秀水】
遗祭南岳碑 【正书洪武十年 衡山】
征龙州过祷南岳碑 【正书洪武二十八年 衡山】
征安南祷南岳碑 【正书永乐五年 衡山】
游龙门记 【薛瑄撰 正书宣德元年 泽州】
祥符寺碑 【胡濙撰 聂大年书 正书正统七年 阳湖】
宝岩禅寺水陆崇圣殿记 【胡溶撰 正书正统八年 太原】
修东塔华严教寺记 【王英撰 朱祚书 正书正统八年 嘉兴】
重建胜果禅寺碑 【苗衷撰 朱孔暘书 正书正统九年 仁和】

新城记 【罗亨信撰 刘克彦书 正书正统十一年 宣化】
定远忠敬王沐晟碑 【王立撰 正书景泰三年 昆明】
城隍新庙记 【吕原撰 刘钺书 行书天顺三年 桐城】
重修城隍庙记 【薛瑄撰 陈文衡书 行书天顺四年 历城】
南山石壁诗 【黄谏撰并书 行书天顺四年 英德】
鲁义姑庙记 【许彬撰 王贤书 正书天顺五年 宁阳】
新开通济渠记 【项忠撰 张葢书 行书成化元年 略阳】
修二苏祠墓碑 【胡谧撰 张谨书 正书成化二年 郟县】
建圣庙碑 【王一夔撰 许颙书 正书成化六年 南康】
狄梁公像跋 【苏致中跋 正书成化六年 南康】
金明寺事迹碑 【祖昭录 正书成化七年 秀水】
精严寺建灵光井亭记 【胡英撰 施奎书 正书成化二十年 秀水】
壮哉亭诗 【陈献章撰并书 行书弘治元年 广州】
建学记 【张元祜撰 黄元龄书 正书弘治七年 南康】
修阳和楼记 【王宸书 行书弘治十三年 真定】
修庙学记 【张廉撰 陆珩书 正书弘治十三年 归安】
修儒学记 【张廉撰 吴琮书 正书弘治十三年 归安】
三平山广济大师碑 【施德辉书 正书弘治十五年 平和】
孔庙碑 【成祖御制 正书弘治十六年 曲阜】
主试题壁诗 【王守仁撰并书 草书弘治十七年 历城】
修静修书院记 【刘恺书 正书弘治十七年 新安】
重刻蜀山草堂记 【徐一夔撰 行书正德元年 清江】
钓台亭记 【李梦阳撰并书 正书正德六年 南昌】
彭蠡湖碑 【李梦阳撰 正书正德七年 彭泽】
黄山宫记 【康海撰 行书正德十六年 武功】
尊经阁记 【王守仁撰并书 正书嘉靖元年 会稽】
重建真武祠记 【蒋瑶撰 吴鹤书 行书嘉靖元年 归安】
烈士庙碑 【李濂撰 杨黼书 正书嘉靖元年 蒲州】
先圣先贤赞 【陈凤梧撰并书 正书嘉靖二年 诸城】
五帝三王周公孔子四配赞 【陈凤梧撰 正书嘉靖二年 济甯】
虹梯关铭 【夏言撰并书 正书嘉靖七年 蒲州】
修汝南太守宗资墓碑 【杨应奎撰 行书嘉靖七年 南阳】
咸阳新修河岸记 【王九思撰 马理书 正书嘉靖十年 西安】
北川桥碑记 【伍余福撰并书 正书嘉靖十二年 安吉】

正祀文 【伍余福撰并书 正书嘉靖十二年 安吉】
显忠祠记 【姚涑撰 正书嘉靖十四年 奉化】
修西吴季子庙记 【胡铎撰 行书嘉靖十四年 归安】
王衡斋传 【邓黻撰 文征明书 行书常熟】
过阙里诗 【杨维聪撰 正书嘉靖十五年 曲阜】
洞霄宫诗 【陈儒撰并书 草书嘉靖十六年 余杭】
学宫辟泮池记 【莫如爵撰 正书嘉靖二十一年 安吉】
岘山逸老堂记 【刘麟撰 文彭书 行书嘉靖二十六年 乌程】
县学义田记 【薛应旗撰 文征明书 行书丹徒】
赵考古祠记 【杨抚撰 杨珂书 行书嘉靖二十九年 余姚】
捕二虎诗 【张寰撰并书 行书嘉靖三十一年 乌程】
南山石壁诗 【戴有孚撰并书 正书嘉靖三十三年 英德】
吊夷齐赋 【王世贞撰 行书嘉靖三十五年 卢龙】
修天封塔碑 【王文禄撰 正书嘉靖三十九年 海盐】
重刻汉高祖庙记 【章平撰 张从实书 正书嘉靖四十年 西安】
西岳庙敕 【正书嘉靖四十年 华阴】
重书元宋西华山碑 【杨九经书 行书嘉靖四十一年 华阴】
一庵书院记 【陆稳撰 陆用车书 行书嘉靖四十三年 归安】
宋曹武惠王庙碑 【孙植撰 姜雨方书 正书隆庆五年 嘉兴】
吴山三官庙记 【邵琮撰 孙安书 正书隆庆六年 钱塘】
奉命祭轩辕陵记 【石星撰 正书万历元年 望都】
般若波罗经 【僧智山书 正书万历元年 漳浦】
登恒山诗 【熊纪撰 孙明诚书 行书万历四年 蔚州】
重修三过堂记 【锺庚阳撰 朱恒书 正书万历十二年 秀水】
火德市曹二庙记 【项笃寿撰并书 行书万历十二年 秀水】
书胡闰咏松诗 【程朝京书 行书万历十二年 东平】
重修儒学记 【范应期撰 正书万历十三年 归安】
长水法堂记 【龚勉撰并书 行书万历十五年 秀水】
书赵清猷词 【刘介龄跋并书 行书万历十五年 广州】
修天圣寺碑 【沈思孝撰 董嗣成书 行书万历二十一年 归安】
修城楼记 【袁宏德撰 正书万历二十四年 曲阳】
修城隍庙记 【王叔杲撰 李键书 行书万历二十五年 松阳】
修儒学记 【沈桐撰 沈节用书 正书万历二十六年 归安】
修张思叔祠记 【刘敏宽撰 行书宣城】

至喜桥碑 【王篆撰 左应麟书万历二十九年 江陵】
圆社千松禅院记 【沈桐撰 朱凤翔书 正书万历三十年 乌程】
佛偈八碑 【董其昌书 正书登封】
龙居寺碑 【朱国桢撰 李流芳书 行书万历三十一年 仁和】
嵩山题字 【邢侗书 正书登封】
绍庵尤公生祠记 【朱之蕃撰 正书万历三十四年 迁安】
戴侯学田碑 【徐銮书 正书万历三十四年 安吉】
僊源题识 【朱学熙书 分书万历三十六年 广州】
嵩山三十六峰诗 【傅梅撰 王正民书 行书万历三十七年 登封】
修定安桥记 【章嘉桢撰 邹思明书 正书万历三十七年 归安】
红石岩碑 【张守仁书 正书万历四十年 南安】
东岳宫记 【郑九炯撰 周举庠书 正书万历四十四年 松阳】
免起挑门题识 【正书泰昌元年 池州】
重建法华寺记 【屠隆书 分书潘大复立石天启元年 乌程】
黄帝庙重修记 【窦如芳撰 寇永清书 正书天启元年 西安】
东塔重建禅堂记 【朱国祚撰 吴中龙书 正书天启二年 嘉兴】
鲍村乐善庵记 【高道素撰 陈继儒书 行书天启二年 嘉兴】
弁山重建资福禅寺碑 【蔡善继撰 韩敬书 行书天启三年 乌程】
修城隍庙记 【沈傲炆撰 庞太元书 行书天启四年 归安】
重建崇圣禅院记 【洪瞻祖撰 严调御书 行书天启四年 钱塘】
楞严寺重建大殿记 【陈懿典撰 冯元鉴书 行书崇祯元年 秀水】
修学记 【唐际盛撰 金丽兼书 行书崇祯三年 嘉兴】
七星岩题识 【王应熊书 正书桐梓】
赠扬州都督张公庙记 【吴甡书 正书崇祯九年 芮城】
宏文馆记 【陈懿典书 行书崇祯十年 秀水】
重建儒学记 【陈懿典撰 陈继儒书 行书嘉兴】
安隐寺舍田方丈记 【劳永嘉撰 僧明纲书 正书崇祯十年 嘉兴】
神宗御制圣母施藏经跋 【王闾重书 行书崇祯十二年 秀水】
钦定续通志卷一百七十

●钦定续通志卷一百七十一 灾祥略一

灾祥略 【一】

（臣）等谨按五行述于洪范而春秋纪天变诸史相沿各为五行志自汉儒京房刘向诸人援引纬书好言占候术家因而衍之一象之

异一气之乖必推及于吉凶之应以验往迹语多传会矧人道至大臧否显然而求之杳冥不可知之征应离理失实本末倒置诬妄甚矣郑志灾祥略尽斥形象休咎之占验一归于实迹综春秋讫隋代千余年象纬之变志天而次日月星志地而次水旱水风较其所录得史志十之三而云雷雪雹之灾弗纪月与五纬不载辉食凌犯之异志撮其大者与史殊也至于草木之怪羽物之辞童谣之讖屏弃弗登所以壹听闻绝妖妄其亦择而后言者矣今纂续通志灾祥略臣等窃谓有宜增订者如日食以二曜同道同度月揜之而为食其行有常度则食有定时乃气差分积之验当食不食日官之失也阴云不见天道之适也故推日者宜书而志可不列河决天行之沴其决溢故道备见前史宜辑专条以资参考郑志既别列河清而于河决则附见大水于体例尚有未纯他如星象不取景星含誉周伯之属可谓当矣老人星形色有类含誉江以南常见而燕分必无见理郑志仍为采入则观象之法犹未为密盖自五行传托言出于伏生一变而为易之卦气再变而为诗之五际而公羊谷梁传者又互为新说依附圣经各持臆见汉唐诸儒即有心知其非者亦未敢讼言其失逮其说愈歧其验愈杳宋儒始议删正义中之识纬不使依托于六经郑志之述灾祥更能扩清从前矫诬之习其偶有因袭前史者固不能无待于厘正也今汇唐以来至于元明所纪灾祥踵郑志之体录为三卷凡五行家傅会之辞悉屏不录夫天与人一理也圣人敬天常慎于夙夜之先是故不待见灾而惧不因见祥而喜善乎宋臣欧阳修之言曰三辰五星不能无盈缩差忒之变占之有中不中有司之事也五行犹是矣又曰圣人不绝天于人亦不以天参人绝天于人则天道废以天参人则人事惑志灾祥者以厚生利用为本而不惑于襍祥神异之说斯为得九畴敷锡之要者欤

天

日

月

星

○天

天裂 【明穆宗隆庆二年八月甲辰绛州西北天裂自丑至寅乃合】 天鸣 【唐玄宗天宝十四载五月天鸣声若雷德宗贞元二十一年八月天鸣在西北僖宗中和三年三月浙西天鸣声如转磨 宋神宗熙宁元年七月戊子夜西南云闲有声鸣如风水相激寢周四方六年七月丙寅夜西北云闲有声如磨物七年七月庚子夜西北天鸣高宗绍兴二十一年

八月乙亥天有声如雷水响于东南四日乃止 宣宗开禧元年六月壬寅天鸣有声 金宣宗兴定四年正月戊辰二更天鸣有声 明太祖洪武二十八年三月戊午天鸣如风水相搏九月戊戌天鸣如泻水自东北而南 宣宗宣德元年八月戊辰天鸣如雨阵送至自东南而西南 辛未东南天鸣声如万鼓 英宗正统十年三月庚寅西北天鸣如鸟羣飞天 顺六年九月乙巳夜天无云西北方有声如雷 宪宗成化十四年六月辛亥临晋天鸣 武宗正德元年二月壬子夜东北天鸣如风水相搏 神宗万历十六年九月乙丑甘肃石灰沟天鸣云中如犬吠有声】 天变色 【宋光宗绍熙五年十月乙未天有黄赤色 金章宗泰和三年十月甲辰天色赤夜将旦复然 元顺帝至正十四年卫辉路有火光见于西方 明庄烈帝崇祯元年三月辛巳味爽天赤如血射窗牖皆红十年九月每晨夕天色赤黄】 无云而雷 【唐武后天授元年九月无云而雷 僖宗中和二年十月西北方无云而雷 宋高宗绍兴七年五月汴京无云而雷三十年十月壬戌画漏半无云而雷 癸未日过中无云而雷 元顺帝至正七年五月庚戌台州路黄岩州无云而雷十年六月戊申临桂县无云而雷十二年三月丙午国路无云而雷十三年十二月庚戌京师无云而雷是日怀庆之修武潞州之襄垣皆无云而雷 明宪宗成化十三年正月甲子化州无云而雷 孝宗弘治六年六月丁卯石州吴城驿无云而雷者再】 无云而雨 【唐宪宗元和十二年正月乙酉星见而雨 僖宗中和三年三月无云而雨】 雨土 【唐太宗贞观七年三月丁卯雨土 高宗永徽三年三月辛巳雨土中 宗景龙元年六月庚午陕州雨土十二月丁丑雨土 玄宗天宝十三载二月丁丑雨黄土 代宗大历七年十二月丙寅雨土 德宗贞元二年四月甲戌雨土八年二月庚子雨土 文宗太和八年十月甲子土雾昼昏至于十一月癸丑开成元年七月乙亥雨土 懿宗咸通十四年三月癸巳雨黄土 僖宗干符二年二月宣武雨土 中和二年五月辛酉雨土 昭宗天复三年二月雨土 天佑元年闰四月甲辰雨土 宋太宗淳化三年正月乙卯京师雨土 英宗治平元年三月壬戌雨土十二月己亥雨黄土 神宗熙宁五年十二月癸未雨黄土七年三月戊午亦如之八年五月丁丑雨黄土兼细毛 元丰二年十一月丁亥雨土五年三月乙巳如之六年四月辛未亦如之 哲宗元佑七年正月戊午雨土 徽宗宣和元年三月庚午雨土 著衣 孝宗干道四年三月己丑雨土 淳熙四年二月戊戌雨土五年二月壬午雨土甲申如之四月丁丑亦如之六年十一月乙丑雨土十一年正月辛卯雨土甲寅如之十三年正月壬寅雨土 光宗绍熙四年十月甲寅雨土

五年四月癸卯雨土十一月辛亥如之 寧宗庆元元年
二月己卯雨土十一月己丑如之三年正月丙子雨土四月丙午十二月甲申亦如之六
年正月己巳雨土闰月丁未九月辛丑十月己丑十一
月辛卯亦如之嘉泰元年六月己卯雨土九月己未十二月辛丑亦如之嘉定三年正月
丙午雨土八年二月己未雨土五月辛未亦如之九年
十二月癸巳雨土十年二月癸巳雨土十二年二月癸巳雨土十三年二月辛卯雨土十
六年二月戊子雨土理宗绍定三年三月丁酉雨土嘉
熙二年四月甲申雨土三年三月辛卯雨土淳佑五年二月丙寅朔雨土十一年五月乙
亥雨土宝佑三年三月己未雨土六年二月壬辰雨土
开庆元年三月辛酉雨土景定五年二月辛未雨土 金世宗大定十二年三月庚寅雨
土二十三年三月乙酉雨土四月庚子如之 元世祖
至元二十四年十二月癸酉雨土七昼夜英宗至治三年二月丙戌雨土文宗天历二年
三月丁亥雨土 纛至顺二年三月丙戌雨土 纛顺帝至
元五年三月庚寅信州雨土至正十八年五月雨白土 明宪宗成化九年四月乙亥雨
土孝宗弘治十年三月己酉雨土十一年四月辛巳雨
土世宗嘉靖十三年二月己未雨微土穆宗隆庆元年三月甲寅南郑雨土神宗万历四
十六年三月庚午雨土四十八年山东省城及泰安肥
城皆雨土】 雨沙 【宋高宗绍兴十一年三月庚申泾州雨黄沙恭宗德佑元年三月
辛巳黄沙蔽天 元成宗大德十年二月大同路雨沙
顺帝至元四年四月辛未京师雨红沙 明宪宗成化七年四月丙辰雨黑沙如漆孝宗
弘治十七年二月甲辰雨沙世宗嘉靖元年正月丁卯
雨黄沙神宗万历二十五年二月癸亥湖州雨黄沙四十七年二月甲戌尘沙涨天其色
赤黄庄烈帝崇祯十二年二月壬申浚县黄埃涨天十
四年正月壬寅黄埃涨天】 陨石 【唐高宗永徽四年八月己亥陨石十八同州之冯
翊有声如雷 宋真宗天禧三年正月晦沈邱县陨石
入地七尺许孝宗淳熙十六年三月壬寅陨石于宝应县散如火甚臭腥 元成宗大德
二年六月崇仁县星陨为绿石顺帝至正十年正月甲
戌棣州陨石十一月冬至夜星陨于耀州化为石形如斧十六年十一月大名县星坠化
为石状如狗头太史验视云天狗十九年四月己丑瓯
窰县星坠声如雷化为石二十三年六月庚戌益都临朐县星坠入地五尺得石如砖
明宪宗成化六年六月壬申阳信陨石一化为三外黑
内青十四年六月辛亥临晋陨石大如升二十三年五月壬寅束鹿青气坠地得黑石二
一如碗一如鸡卵孝宗弘治三年三月庆阳两石无数
大者如鸡卵小者如芡实四年十月丁巳光山县星陨入地化为石如斗十年二月丙申

修武黑气入地化为石状如羊首十二年五月戊寅朔
州有白气陨地为大石三武宗正德元年八月壬戌即墨陨火光化为绿石一九年五月
己卯滨州陨石十三年正月己未邻水陨石一世宗嘉
靖十二年五月丁未祁县有声如鼓火流坠地为石十九年五月辛丑星陨枣强为石四
四十二年三月癸卯怀庆陨石穆宗隆庆二年三月己
未保定新城陨黑石二神宗万历三年五月癸亥有二流星昼陨景州城北化为黑石十
七年九月戊午万载陨石十九年四月辛酉遵化陨石
二庄烈帝崇祯九年九月丁未太康陨石】 雨木冰 【一曰树介 唐高宗永徽二年
十一月甲申阴雾凝冻封树木数日不解麟德元年十
二月甲戌雨木冰仪凤三年十一月丙申雨木冰武后延载元年十月癸酉白雾木冰中
宗景龙四年三月庚申雨木冰玄宗开元二十九年十
一月己巳雨木冰数日不解代宗永泰元年三月庚子夜霜木有冰大历二年十一月纷
雾如雪木冰德宗贞元元年十二月雨木冰二十年冬
雨木冰穆宗长庆三年十一月丁丑雨木冰敬宗宝历元年十一月丙申雨木冰文宗太
和七年十二月丙戌夜雾木冰开成四年九月辛丑雨
雪木冰十月己巳亦如之武宗会昌元年十二月丁丑雨木冰四年正月己酉雨木冰庚
戌亦如之 汉高祖天福十二年十一月壬子雨木冰
辛酉癸酉亦如之 周太祖广顺三年十二月戊申雨木冰 宋真宗咸平六年十一月
庚戌雨木冰大中祥符五年正月戊寅雨木冰天禧五
年正月戊寅雨木冰仁宗庆历三年十二月丁巳雨木冰嘉佑元年正月雨木冰英宗治
平二年十月乙巳雨木冰神宗熙宁三年十月雨木冰
八年正月如之九年正月亦如之哲宗元佑八年二月雨木冰徽宗宣和五年十月乙酉
雨木冰钦宗靖康元年十月乙卯雨木冰二年正月丁
酉雨木冰高宗绍兴五年十一月辛亥雨木冰 金海陵贞元三年十二月己丑雨木冰
正隆四年十一月庚寅霜附木章宗明昌四年十一月
壬午雨木冰承安五年十月癸卯霜附木泰和四年正月壬申阴雾木冰十一月丁卯木
冰凡三日宣宗贞佑元年十二月乙卯雨木冰二年十
二月己酉雨木冰兴定三年十二月壬申雨木冰五年十二月丁丑霜附木 元成宗大
德七年十一月辛酉木冰文宗至顺二年十一月丁巳
雨木冰十二月癸亥雨木冰顺帝至元五年十一月癸酉瑞州路雨木冰至明年二月壬
寅始解至正四年正月汴梁路雨木冰十一月东平雨
木冰十二年九月壬午冀宁保德州雨木冰十四年冬龙兴雨木冰二十五年二月辛亥
汴梁雨木冰五日始解 明太祖洪武四年正月戊申
木冰六年十二月乙丑雨木冰十一年正月丁亥雨木冰二十二年正月甲戌雨木冰英

宗正统三年十月丁丑木介天顺七年十月甲辰雨木
冰八年正月乙丑雨木冰宪宗成化十六年正月辛卯雨木冰二十三年十二月戊辰木
介穆宗隆庆三年十一月癸巳木冰神宗万历十四年
冬苏松木冰庄烈帝崇祯元年十一月陕西木冰附枝尽折】 雨冰 【唐高宗龙朔三
年十一月癸酉雨冰】 雨红雾 【元顺帝至正五
年四月丹阳县雨红雾】 雨赤雪 【唐德宗贞元二十一年正月甲戌雨赤雪于京师
宋仁宗庆历三年十二月德博州降红雪】 雨黑
霜 【元世祖至元七年四月壬午檀州雨黑霜二夕仁宗延佑七年益津县雨黑霜】
雨黑水 【宋孝宗淳熙十一年二月临安府新城县
深浦雨黑水终夕 元顺帝至正十七年正月己丑杭州降黑雨河水皆黑 明太祖洪
武十年正月丁酉金华处州雨水如墨汁世宗嘉靖八
年十月癸巳杭州雨黑水神宗万历二十五年二月癸亥湖州黑雨庄烈帝崇祯十年山
东雨黑水新乡亦如之】 雨虫 【明孝宗弘治六年
八月己巳临晋雨虫如雪】 雨鱼 【唐宪宗元和十四年二月鱼坠于郢州市长尺余
僖宗光启二年扬州雨鱼 宋徽宗政和七年夏有二
鱼落殿中省厅屋上 元顺帝至正二十五年六月戊申京师雨鱼长尺许 明世宗嘉
靖四十一年二月乙亥德州九龙庙雨鱼大者数寸】
雨毛 【唐中宗神龙二年四月己亥雨毛于越州之鄞县 宋神宗熙宁元年荆襄闲天
雨白牦三月丁酉潭州雨毛八年五月丁丑雨黄毛
元仁宗皇庆元年六月丁卯雨毛顺帝元统二年六月彰德雨白毛至元三年三月彰
德雨毛如绵而绿六年七月延安路鄜州雨白毛至正
十三年四月余次县雨白毛十八年五月益都雨白牦十九年三月遵化路连日雨牦二
十五年五月甲子京师雨牦长尺许二十七年五月益
都雨白牦 明孝宗弘治元年五月丙寅长甯县雨毛】 雨米穀 【宋孝宗干道四年
春舒州雨黑米坚如铁破之米心通黑 元顺帝至正
十一年十月衢州东北雨米黍 明成祖永乐十六年正月乙丑同州雨穀及荞麦】 雨
黍粟 【宋哲宗元佑三年六月临江县雨白黍七月
又雨黑黍 元顺帝至正十一年十一月浦城县雨黑子如稗实邵武雨黑黍如芦稭信
州雨黑黍 明宪宗成化六年二月戊寅湖广应山雨
粟】 雨菽豆 【宋神宗元丰二年六月忠州雨豆七月南宾县雨豆徽宗大观元年三
月庐州雨大豆高宗绍兴十六年正月辛未泸州雨豆
金世宗大定十六年三月戊申雨豆于临潢之境其形上锐而赤 元顺帝至正十一
年十一月鄱阳县雨菽豆 明孝宗弘治八年六月甲
子黟县雨豆穆宗隆庆二年四月天雨黑豆神宗万历四十三年四月戊寅石首雨豆】

雨汤 【唐懿宗咸通八年七月泗州下邳雨汤杀鸟雀】 雨血 【唐高宗武德初突厥国中雨血三日宪宗元和十四年二月郢州从事院门前地有血尺余人以为自空而堕 宋仁宗庆历三年十二月二十六日天雄军德博州雨血理宗端平三年七月甲申天雨血宝佑三年蜀雨血 金哀宗天兴三年正月己酉京索之闲雨血十余里 元顺帝元统二年正月庚寅朔河南雨血至正十五年春蓟州雨血 明庄烈帝崇祯七年二月戊午海丰雨血】 雨水银 【宋高宗绍兴二十六年七月辛酉夜天雨水银】 雨药 【宋仁宗历元年二月丙午京师雨药】 雨水 【唐德宗贞元四年正月乙亥陈留雨水十里许大如指长寸余中空所下者立如植 宋光宗绍熙五年行都雨木】 雨桂子 【唐武后垂拱四年三月雨桂子于台州旬余乃止 宋神宗元丰三年六月己未饶州长山雨木子数亩状类山芋子味香而辛士人以为桂子明道中常有之】 雨金 【唐武后垂拱三年七年广州雨金】 雨钱 【宋高宗建炎二年天雨纸钱厚盈寸绍兴二年七月天雨钱明宪宗成化十三年六月甲子雨钱于京师世宗嘉靖六年五月甲午京师雨钱】 雨丝 【元顺帝至正十三年七月丁卯泉州路雨白丝】 雨絮 【明太祖洪武十九年九月丙午天雨絮】 雨线 【元顺帝至元三年正月己丑雨线】

（臣）等谨案郑志天变多采自历代史志而前后纪载详略互异如天雨螽蝗属言雨者记变此本春秋文也螽蝗代有后无言天雨者原志或载或否体例未纯今兹所录概从节焉雨草雨灰后史所无不遇此异也前史记雨谷宋以后有雨黍粟菽豆之事大抵物反常则为异后先所值不必尽同悉依前志而采辑之谨存史家据实直书之法焉

○日

众日并出 【唐太宗贞观初突厥有五日和照 周世宗题德七年正月癸卯日既出其下复有一日相掩黑光摩荡者久之 宋真宗景德元年十二月甲辰日有二影如三日状 元顺帝至正十六年三月两日相荡 明世宗嘉靖三十四年十二月庚申晦日忽暗有青黑紫日影如盘数十相摩久之成千百飞荡满天向西北而散神宗万历二十五年三月癸丑黑日二三十回绕日旁移时不见熹宗天启四年二月癸丑黑日摩荡日旁庄烈帝崇祯十一年十一月癸亥日入时日光摩荡如两日十三年九月己巳两日并出辰刻乃合为一入时又分为二】 日鬪 【唐文宗太和二年十二月癸亥有黑侵与日如鬪六年三月有黑侵与日如鬪僖宗干符六年十一月丙辰朔有两日并出而鬪三日

乃不见】 日中黑子 【唐敬宗宝历二年三月辛亥日中有黑子文宗太和六年三月庚戌日中有黑子开成二年十一月辛巳日中有黑子
大如鸡卵武宗会昌元年十一月庚戌日中有黑子僖宗干符元年日中有黑子 宋太祖开宝七年正月丙戌日中有黑子二神宗熙宁十年
二月辛卯日中有黑子如李至乙巳散元丰元年闰正月庚子日中有黑子如李至二月戊午散十二月丙午日中有黑子如李至丁巳散二年
二月甲寅日中有黑子如李至癸亥散徽宗崇宁三年十月壬辰日中有黑子如枣大政和二年四月辛卯日中有黑子乍二年三如栗大八年
十一月辛亥日中有黑子如李大宣和二年五月己酉日中有黑子如枣大三年十二月辛卯日中有黑子如李大高宗建炎三年三月己卯日
中有黑子至壬寅消绍兴元年二月己卯日中有黑子如李大三日乃伏六年十月壬戌日中有黑子如李大至十一月丙寅消七年二月庚子
日中有黑子如李大旬日消四月戊申日中有黑子至五月消八年二月辛酉日中有黑子十月乙亥亦如之十五年六月丁未日中有黑子孝
宗淳熙十二年正月癸巳日中生黑子大如枣戊戌至庚戌日中皆有黑子十三年五月庚辰日中生黑子大如枣光宗绍熙四年十一月辛未
日中有黑子至庚辰消宁宗庆元六年八月乙未日中有黑子如枣大至庚子消十二月乙酉又生至乙巳消嘉泰二年十二月甲戌日中生黑
子大如枣丙戌始消四年正月癸未日中有黑子开禧元年四月辛丑日中生黑子大如枣理宗嘉熙二年十月己巳日中有黑子恭宗德佑二
年二月丁酉朔日中有黑子如鹅卵相荡 辽道宗太康三年五月癸亥日中有黑子金海宁正隆五年八月庚午日中有黑子状如人 明
太祖洪武二年十二月甲子日中有黑子三年九月戊戌十月丁巳十一月甲辰皆日中有黑子四年三月戊戌五月壬子至辛巳九月戊寅皆
日中有黑子五年正月庚戌二月丁丑五月甲子七月辛未皆日中有黑子六年十一月戊戌朔日中有黑子七年二月庚戌至甲寅日中有黑
子八年二月辛亥九月癸未十二月癸丑皆日中有黑子十四年二月壬午至乙酉日中有黑子十五年闰二月丙戌十二月辛巳皆日中有黑
子熹宗天启四年正月癸未日旁有黑子二三相荡渐至百许凡四日庄烈帝崇祯十一年十一月癸巳日中有黑子及黑管白气】 日中黑气

【唐敬宗宝历二年三月甲午日中有黑气如杯 后唐明宗天成二年二月乙酉日中有黑气状如鸡卵 宋高宗建炎三年二月甲寅日出
初两黑气如人形来日至巳时乃散绍兴十五年六月丙午日中有黑气往来 明景帝景泰元年二月壬午有黑气四道长三丈贯日状如鱼

神宗万历四十四年八月戊辰日中有黑光四十六年闰六月丙戌至戊子日旁有黑气
出入日中摩荡熹宗天启四年四月癸酉日中黑气摩
荡庄烈帝崇祯十二年二月庚子有白芒黑气交掩日光摩荡】 日青无光 【宋徽宗
宣和三年春日青黑无光其中汹汹而动若铍金而涌
沸状日旁有黑气如水波旋绕将暮而止孝宗干道六年六月日青无光 明世宗嘉靖
元年正月丁卯日惨白变青无光庄烈帝崇祯十四年
正月壬寅日青无光】 日白无光 【宋真宗景德四年四月甲申日白无光 金哀宗
正大八年三月庚戌日忽白而失色左右有气似日无
光与日相凌日光四出摇荡至没 明宪宗成化十三年三月壬申日白无光十月辛卯
如之十四年三月庚午日白无光十六年三月丙戌日
白无光庄烈帝崇祯十二年正月己未朔日白无光】 日黄无光 【明熹宗天启四年
二月壬子日淡黄无光】 日赤无光 【唐太宗贞
观二十三年三月日赤无光高宗咸亨元年二月壬子日赤无光中宗景龙三年二月庚
申日色紫赤无光玄宗开元二十九年三月丙午日赤
无光德宗贞元六年正月甲子日赤如血无光宪宗元和十一年正月己卯日紫赤无光
敬宗宝历元年九月甲申日赤无光文宗太和九年二
月辛卯日赤如血壬辰亦如之开成二年十一月辛巳日赤如赭至于癸未武宗会昌四
年正月戊申日无光宣宗大中十三年四月甲午日暗
无光僖宗光启四年二月己丑日赤如血庚寅日赤无光 后唐明宗天成元年十月己
丑至庚子日赤无光 宋真宗景德四年四月甲申日
赤无光仁宗庆历八年正月乙未日赤无光徽宗崇庆二年五月癸卯日淡赤无光宣和
二年正月己未日无光四年二月癸巳日无光钦宗靖
康元年闰十一月庚申日赤如火无光高宗建炎元年二月日无光绍兴十五年六月丁
未日无光孝宗淳熙五年四月丁丑日无光宁宗嘉定
十年二月癸巳日无光 金章宗泰和四年三月丁卯日昏无光宣宗贞佑三年二月日
赤如血哀宗天兴三年正月己酉日大赤无光 元顺
帝至正十八年己亥朔日色如血 明英宗天顺二年闰二月己巳日无光旋赤如赭六
年十月丙子日赤如血七年四月癸未如之八年二月
己亥日无光宪宗成化十八年四月壬寅日赤无光孝宗弘治十八年八月癸酉至九月
甲午日无光神宗万历三十五年十一月丙午日赤无
光烛地如血四十二年三月庚辰日赤黄如赭如血者累日熹宗天启四年五月癸未日
赤无光庄烈帝崇祯四年正月戊戌日色如血照人物
皆赤二月乙巳朔日赤如血无光十七年三月壬寅日色无光者两旬】 日光四散 【
唐昭宗景福元年五月日色散如黄金天复元年十月

日色散如黄金十一月又如之】 日中飞燕者 【唐僖宗干符二年日中有若飞燕者】 日旁有物 【唐宪宗元和四年闰三月日旁有物如日十年正月辛卯日外有物如鸟 元世祖至元二十九年正月甲午朔有物渐浸入日中不能既日体如金环然有珥抱 明庄烈帝崇祯十二年二月庚子日旁有红白丸】 日中见斗 【唐昭宗天佑元年二月丙寅日中见北斗】 日五色 【晋天福初日傍有五色云如莲芰之状 宋真宗中日有五色气仁宗中日五色云八英宗中日五色云八神宗中日五色云二十六哲宗中日五色气晕二五色云十二 明成祖永乐元年六月甲寅日下五色云见八月日珥随五色云见八年二月庚戌日下五色云见宣宗宣德二年十一月乙未日下五色云见 英宗正统二年十月己丑日生五色云十二月癸亥如之十年九月丁酉日生五色云景帝景泰二年六月戊寅日上五色云孝宗弘治二年正月辛巳日生五色云世宗嘉靖十八年二月庚子朔当午日下有五色云见】 日气 【唐高宗咸亨元年二月癸丑四方蒙蒙日有浊气色赤如赭代宗大历二年七月丙寅日旁有青赤气长四丈余壬申日上有赤气长二丈九月乙亥至辛丑日旁有青赤气宪宗元和二年十月壬午日旁有黑气如人形跪手捧盘向日盘中气如人头文宗太和六年四月乙丑黑气蔽日开成五年十二月癸卯朔日旁有黑气来触懿宗咸通七年十二月癸酉白气贯日日有重晕甲戌亦如之僖宗广明元年日晕如虹黄气蔽日无光光启三年十一月己亥下晡日上有黑气昭宗光化二年三月乙巳日中有白气亘天自西南贯于东北三年冬日有赤气自东北至于东南天复三年二月丁丑日有赤气自东北至于东南 宋太祖建隆讫开宝末赤黄气三黄白气三青气二太宗太平兴国讫至道末赤黄气一青气三真宗咸平讫干兴末光气一黄气九赤黄气四紫气五赤黄交气二赤黄绿碧气二青赤气二十一黄白气一黑气二白气五仁宗天圣讫嘉佑末日黄耀有光一辉气一十九白气如绳贯日并晕一英宗治平中辉气二钦宗靖康元年九月戊寅有赤气随日出高宗绍兴七年二月辛丑氛气翳日二十七年七月壬申赤气随日入孝宗干道六年十月庚午赤气随日出七年七月壬寅十月乙巳丙午如之淳熙三年八月丁酉戊戌皆有赤气随日出入十四年十一月癸丑甲寅亦如之理宗宝庆三年十二月己酉日旁有气如珥 明英宗正统十四年十月壬申日上黑气如烟寻发红光散焰如火熹宗天启四年十二月辛巳非烟非雾覆压日上摩荡如盖如吞通天皆赤庄烈帝崇祯十二年正月辛酉日光摩荡竟日有气从日中出如镜黛喷花】 日晕

【唐德宗贞元二年闰五月壬戌日有黑晕僖宗中和三年三月丙午日有青黄晕四月丙辰亦如之丁巳戊午又如之昭宗天佑元年十一月癸酉日有黄晕旁有青赤气二二年二月己巳日有黄白晕如半环有苍黑云夹日既而云变如人马状乃消 宋太祖建隆讫开宝末日晕一百五十六半晕四十五交晕一十八太宗太平兴国讫至道末日晕五十九半晕二十三交晕三真宗咸平讫干兴末日晕一千二百三十一半晕六百五十三交晕一十三仁宗天圣讫嘉佑末日青黄紫晕八百五十五周晕五十六交晕五连环晕一英宗治平中日晕一百二十八周晕三交晕一神宗熙宁讫元丰末日晕一千三百五十六周晕二百七十七交晕四十九连环晕一哲宗元佑讫元符末日晕五百二十八周晕二百五十七交晕六十七徽宗建中靖国讫钦宗靖康末日晕九半晕一高宗建炎讫绍兴末日晕六赤黄晕三孝宗隆兴讫淳熙末日晕九赤黄晕七光宗绍熙中日晕二赤黄晕青赤黄晕各一宁宗庆元讫嘉定末日晕一赤黄晕二理宗宝庆讫景定末日晕八赤晕一赤黄晕四度宗咸淳七年三月辛巳日赤黄晕 金宣宗兴定五年四月丙子日黄晕 元仁宗延佑元年三月己亥白晕亘天连环贯日七年三月乙未日晕若连环英宗至治元年三月己丑交晕如连环贯日顺帝至正十七年七月己丑日有交晕连环贯之 明太祖洪武六年三月戊戌日交晕十二年四月庚申如之宣宗宣德三年十二月己卯亦如之五年正月癸亥亦如之景帝景泰二年二月丙戌亦如之宪宗成化十二年正月甲子日交晕孝宗弘治二年正月甲戌日晕白虹滔天神宗万历三十五年正月庚午日黑气蔽天】 日晕再重 【唐文宗开成五年二月丙辰日有重晕赤气夹日 宋太祖建隆讫开宝末重晕五十九重半晕七太宗太平兴国讫至道末重晕一十二真宗咸平讫干兴末重晕二十七仁宗天圣讫嘉佑末重晕一十六英宗治平中重晕十二神宗熙宁讫元丰末重晕七十四哲宗元佑讫元符末重晕六十八钦宗靖康中日半晕再重一孝宗隆兴讫淳熙末日半晕再重四光宗绍熙元年五月庚辰日半晕再重 金章宗太和八年四月癸卯日晕二重内黄外赤 元世祖中统三年十一月辛丑日重晕三珥】 日晕五重 【唐玄宗天宝三年正月庚戌日晕五重】 日晕及冠珥背诸气 【唐代宗大历三年正月丁巳日黄冠青赤珥辛丑亦如之文宗开成五年正月己丑日晕白虹在东如玉环贯珥昭宗光化三年冬日有虹蛻背璠弥旬昭宣帝天佑二年正月甲申日有黄白晕晕上有青赤背乙酉亦如之晕中生白虹渐东长百余丈三年正月辛未日有黄白晕上有青赤背二月癸巳

日有黄白晕如半环有青赤背庚戌日有黄白晕青赤背 宋太祖建隆讫开宝末凡冠
气七珥百抱气七承气六纓一背气二百三十一纽气
戟气三太宗太平兴国讫至道末冠气一十八戴气三抱气一十三珥七十七承气三璠
气一背气四十四纽气三戟气一直气一十五真宗咸
平讫干兴末重轮二十四冠气二百六十六珥四十一戴气一百九十七抱气五十七承
气一百八十四直气七十七纓三戟气一纽气二背气
二百九十九仁宗天圣讫嘉佑末珥八百四十七冠气一百四十戴气二百五十六承气
一百重承气一抱气一十八负气一背气一百七格气
二直气五百英宗治平中珥八十九冠气一十一戴气三十九承气五背气三十三白虹
贯珥一神宗熙宁讫元丰末珥八百八十二冠气四十
二戴气二百七十一承气五十抱气二背气二百四十六直气二戟气一纓五璠气一白
虹贯珥三哲宗元佑讫元符末珥五百五十六冠气六
十一戴气一百五十承气三十三背气一百七十四直气三戟气四纓气一格气五白虹
贯珥一徽宗建中靖国讫钦宗靖康末晕戴三晕珥背
一半晕重背一晕纓一珥背三珥十三晕珥七冠气七晕背四戴气六承气二抱气五背
气一十七直气四环气戴气二戟气一履气二半晕重
履一高宗建炎讫绍兴末日晕生抱气一晕生背气一赤黄晕背气一连晕生青赤黄戴
气及珥一背气六戴气五左右珥背气一孝宗隆兴讫
淳熙末珥一背气二戟气一承气戴气一珥戴二晕戴二晕珥二晕承气四晕背气二重
晕背气二晕格气一连晕戴承一半晕背直气一重晕
背珥一光宗绍熙中晕生背气二晕生青背气一戴气一背气一青赤黄戴气一宁宗庆
元讫嘉定末晕生承气一晕生青赤黄背气一赤黄晕
生青赤黄背气承气各一赤黄格气一青黄背气一戴气一背气一理宗宝庆讫景定末
晕珥一赤黄晕格气背气各一背气三承气二格气二
戴气一抱气承气一度宗咸淳元年六月壬午日生承气 金海陵天德二年正月甲辰
日晕白虹贯珥正隆六年二月甲辰朔日晕有珥戴背
世宗大定二十九年正月乙卯晕生珥上有青赤背皆白虹贯之东有戟气丁巳日生珥
青赤背二月辛酉朔重晕两珥抱背乙丑晕珥有背气
承气白虹亘天左右的有戟气章宗明昌四年九月癸未日有珥抱戴宣宗贞佑三年正月
日生珥上有冠元光二年五月辛酉日晕有背气哀宗
正大四年十一月乙未日上有背白虹贯之天兴元年正月壬午朔日有两珥 元世祖
中统三年十一月辛丑日有背气顺帝至元三年正月
丁巳日有交晕左右珥上有白虹贯之八月癸未如之五年正月丙寅亦如之至正二十
六年二月丁卯日晕上有背气 明太祖洪武十四年

正月壬子白虹贯珥二十三年正月壬辰日晕白虹贯珥二十八年十一月乙亥日半晕
生青赤直气背气白虹贯珥成祖永乐十八年闰正月
癸未重半晕有青赤背珥白虹贯之随生黄白璫气仁宗洪熙元年正月乙未交晕白虹
贯两珥七月己丑日生左右四珥宣宗宣德元年正月
庚戌赤黄交晕有青赤璫气二月己卯重半晕有珥背三年三月庚寅黄赤交晕有珥背
戟各一丁酉交晕有戟气二五年二月甲午晕生戟气
四月庚辰白虹贯珥六年二月甲寅重半晕有璫气八年九月戊戌晕有珥背十年十二
月辛亥日晕白虹贯珥有璫背英宗正统三年四月庚
辰白虹贯珥随晕十一年正月乙未日生背气十四年八月戊申日晕旁有戟气两珥戴
气东北虹霓如杵景帝景泰元年十二月甲午晕生背
戟二年正月癸卯白虹贯珥生背气三年正月丙辰日有珥及背白虹七年六月丁丑重
半晕生珥英宗天顺元年二月庚戌晕有珥生抱戟辛
亥如之二年二月乙卯晕有背宪宗成化二年四月壬寅晕有珥十一年六月己酉重晕
有珥及背二十年二月己未日生白虹东北亘天二十
一年十月癸巳晕生珥又生抱背二十三年十二月癸巳晕生珥背孝宗弘治二年正月
丙戌交晕有珥白虹弥天二月壬寅交半晕生珥背抱
格四年二月庚戌晕有珥戟气白虹弥天武宗正德元年正月乙酉晕有背珥白虹弥天
世宗嘉靖七年正月乙亥晕生珥戟白虹弥天十三年
二月壬辰如之十八年十二月壬午立春日晕有珥白虹四十一年十一月辛丑晕有珥
上抱下载白虹弥天穆宗隆庆五年三月辛巳晕有珥
白虹神宗万历四十八年二月癸丑连环晕生背戟白虹熹宗天启元年二月甲午晕有
珥白虹三年十月辛巳重半晕有珥】 白虹贯日 【
唐肃宗上元二年二月乙酉白虹贯日宪宗元和五年四月辛未白虹贯日穆宗长庆元
年六月己丑白虹贯日三年三月庚戌日虹贯日敬宗
宝历二年四月甲寅白虹贯日文宗太和五年二月辛丑白虹贯日七年正月庚戌白虹
贯日八年七月甲戌白虹贯日有交晕十月壬寅白虹
贯日东西际天上有背玦开成元年正月辛丑朔白虹贯日二月己丑亦如之武宗会昌
四年二月己巳白虹贯日如玉环懿宗咸通六年正月
白虹贯日中有黑气如鸡卵十四年二月癸卯白虹贯日 后唐闵帝应顺元年四月戊
寅白虹贯日 晋高祖天福二年十二月己卯朔日有
白虹二三年三月壬子日有白虹二出帝开运元年二月辛亥日有白虹二 周世宗显
德三年十二月庚午白虹贯日 宋仁宗天圣讫嘉佑
末白虹贯日四英宗治平中白虹贯日一神宗熙宁讫元丰末白虹贯日九哲宗元佑讫
元符末白虹贯日一十六高宗建炎四年二月辛丑白

虹贯日绍兴八年二月辛巳白虹贯日二十七年二月壬寅白虹贯日
宋宗庆元元年正月丙辰白虹贯日嘉泰三年七月壬午白虹贯日嘉定
十一年二月丙辰白虹贯日理宗嘉熙四年二月辛丑白虹贯日 金海陵天德二年十
一月丙戌白虹贯日三年正月丁酉白虹贯日 元世
祖至元二十四年七月癸丑日晕连环白虹贯之武宗至大二年正月丁亥白虹贯日八
月甲寅白虹贯日仁宗延佑元年二月己亥白虹贯日
泰定帝泰定四年二月辛卯白虹贯日文宗至顺元年九月癸巳白虹贯日二年正月己
酉白虹贯日顺帝至元四年八月丁酉白虹贯日至正
二十五年三月壬戌日青赤晕白虹如连环贯之二十六年三月丁亥白虹贯日二十八
年闰六月壬戌白虹贯日乙丑文水县有白虹贯日云
影中似日非日似镜者三色青白 明太祖洪武十年正月己巳白虹贯日十四年九月
甲辰白虹贯日十五年正月丁未白虹贯日十九年二
月己巳白虹贯日二十二年十二月戊午白虹贯日三十年二月辛亥白虹贯日英宗天
顺元年二月庚戌白虹贯日二年二月乙卯白虹贯日
宪宗成化二十年二月己未日生白虹东北亘天庄烈帝崇祯八年二月丙午白虹贯日
】 赤虹贯日 【唐敬宗宝历元年六月甲戌赤虹贯
日】 昼昏而黄黑雾 【唐高宗麟德元年十二月癸酉氛雾终日不解仪凤三年十一
月乙未昏雾四塞武后长寿元年九月戊戌黄雾四塞
中宗神龙二年三月乙巳黄雾四塞景龙二年八月甲戌黄雾昏浊三年正月丁卯黄雾
四塞玄宗开元五年正月戊辰昏雾四塞肃宗至德二
载四月南阳白雾四塞德宗贞元十年三月乙亥黄雾四塞日无光文宗太和二年二月
癸亥白雾昼昏日色无光懿宗咸通九年十一月甲辰
大雾昏塞至于丙午 晋高祖天福八年正月丙戌黄雾四塞 宋仁宗天圣四年十月
甲午昏雾四塞钦宗靖康元年正月丁未雾气四塞对
面不见高宗绍兴五年正月甲申雾气昏塞八年三月甲寅昼晦日无光阴雾四塞四月
氛雾四塞昼日无光孝宗干道五年正月甲申日色黄
白昏雾四塞 金海陵贞元三年四月丁丑朔昏雾四塞日无光凡十有七日乃霁世宗
大定五年十一月癸酉大雾昼晦宣宗贞佑元年八月
戊子大雾苍黑跂步无所见四年正月己未黑雾四塞 元顺帝元统二年正月庚寅黑
雾四塞至正二十六年四月乙丑奉天路黄雾四塞二
十八年七月乙亥京师黑雾昏暝旬有五】

（臣）等谨按宋史所纪日变自高宗南渡后与金史所载互有详略如宋建炎三
年日中有黑子推之金史为太宗天会七年两史并见
至宋绍兴六年即金熙宗天眷元年宋史纪十月壬戌日中有黑子至十一月丙寅消金

史但纪十一月丙寅不言其详当以宋史为实今从其
详者而纪之焉若金海陵天德二年十一月丙戌三年正月丁酉俱书白虹贯日正隆五
年八月庚午日中有黑子推之宋史俱未载录金史所
以补宋志之缺略也其余星变两史互异者仿此

○月

众月并见 【唐太宗贞观初突厥有三月并见 宋真宗天禧四年四月乙酉西南
方两月重见】 月昼见 【明太祖洪武十四年八
月辛未月昼见与日争明】 星入月中 【唐武后长安四年荧惑入月睿宗先天元年
八月甲子太白袭月肃宗干元二年正月癸未岁星蚀
月在翼宪宗元和三年三月乙未镇星蚀月在氐昭宗光化三年十一月丁未太白犯月
宋孝宗淳熙十四年五月有星大如日与月相摩荡
而入 金熙宗天会十四年正月壬辰荧惑入月世宗大定二十五年三月乙酉太白与
月相犯哀宗正大三年十二月荧惑入月】

○星

五星合聚 【唐玄宗天宝九载八月五星聚于尾箕代宗大历三年七月壬申五星
聚东井 宋太祖干德五年三月五星如连珠聚于
奎娄之次仁宗庆历三年十一月壬辰五星皆见东方孝宗干道四年二月壬子五星俱
见六月辛丑八月己亥如之六年五月乙亥五星俱见
十月庚申如之八年十月癸卯五星俱见淳熙十三年八月乙亥七曜俱聚于轸 金世
宗大定二十六年八月乙亥朔日月五星会于轸哀宗
正大三年十一月癸酉五星并见于西南 明太祖洪武十八年二月乙巳五星并见二
十年二月壬午朔五星皆见成祖永乐元年五月甲辰
五星俱见于东方世宗嘉靖三年正月壬午五星聚于营室熹宗天启四年七月丙寅五
星聚于张】 四星合聚 【唐肃宗至德二载四月壬
寅岁星荧惑太白辰星聚于鹑首从岁星也宪宗元和十年六月辛未岁星荧惑太白辰
星合于东井懿宗咸通中荧惑填星太白辰星聚于毕
昴 汉高祖天福十二年填星太白岁星荧惑聚于张 宋钦宗靖康元年六月丙辰填
星荧惑太白岁星聚高宗绍兴七年五月戊子辰星荧
惑太白岁星合于柳 元英宗至治元年正月甲辰辰星太白填星荧惑聚于奎 明英
宗天顺四年十月壬甲岁星荧惑辰星太白聚于氐世
宗嘉靖四十三年四月庚子岁星填星荧惑太白聚于柳】 三星合聚 【唐高祖武德
元年七月丙午填星太白辰星聚于东井二年三月丙
申亦如之肃宗干元元年四月荧惑填星太白聚于营室德宗贞元四年正月乙亥岁星
荧惑填星聚于营室宪宗元和十一年十二月填星太

白辰星聚于危十四年八月丁丑岁星太白辰星聚于轸文宗太和二年九月岁星荧惑
填星聚于七星六年十月太白荧惑填星聚于轸开成
四年正月丁巳荧惑太白辰星聚于南斗僖宗文德元年八月岁星填星太白聚于张
宋太祖开宝元年正月壬寅岁星填星太白聚于娄太
宗雍熙四年十二月丁巳太白填星岁星合于南斗魁真宗景德三年七月己酉辰星岁
星太白合于柳高宗绍兴二年十一月癸未太白岁星
荧惑合于室七年五月乙亥太白荧惑辰星合于井甲申荧惑岁星太白合于柳十六年
二月乙丑岁星填星太白合于昴十九年七月丁未太
白岁星辰星合于张二十年十月丙午太白岁星荧惑合于轸二十二年九月庚申太白
荧惑辰星合于角二十六年七月壬戌太白荧惑填星
合于轸二十七年三月辛卯太白荧惑岁星合于奎孝宗干道三年正月癸亥太白与填
星岁星合淳熙十一年九月乙卯太白辰星荧惑合于
亢宣宗庆元三年八月甲戌太白荧惑岁星合于翼嘉泰二年正月丁巳太白荧惑岁星
合于南斗开禧二年二月壬申太白填星岁星合于昴
嘉定元年六月戊寅太白填星荧惑合于井理宗宝庆二年正月壬午太白岁星填星合
于女十月辛亥荧惑岁星填星合于女淳佑六年十月
乙未填星岁星荧惑合于亢宝佑六年十二月辛丑填星太白荧惑合于室 金熙宗皇
统九年七月甲辰太白辰星岁星合于张世宗大定十
七年九月庚戌岁星荧惑太白聚于尾哀宗天兴元年七月乙巳太白岁星荧惑太阴俱
会于轸翼 元世祖至元十五年十一月辛亥太白荧
惑填星聚于房二十八年正月壬寅太白荧惑填星聚于奎成宗大德二年二月辛酉岁
星荧惑太白聚于尾六年七月癸巳朔荧惑填星辰星
聚于井九年十一月庚戌岁星太白填星聚于亢仁宗皇庆元年十二月甲申荧惑填星
辰星聚于井英宗至治元年二月壬子太白填星荧惑
聚于奎二年十二月乙丑太白荧惑岁星聚于室三年二月癸亥朔荧惑太白填星聚于
胃泰定帝泰定二年二月庚寅荧惑岁星填星聚于毕
三年三月庚午填星太白岁星聚于井顺帝至正二年十一月辛卯岁星荧惑太白聚于
尾十三年正月戊戌荧惑太白辰星聚于奎二十一年
六月丁未荧惑太白岁星聚于翼二十五年七月丁丑填星岁星荧惑聚于角亢闰十月
戊辰太白辰星荧惑聚于斗二十六年十一月丙申太
白岁星辰星聚于尾二十七年十月丁卯岁星太白荧惑聚于斗 明太祖洪武十四年
六月癸未辰星荧惑太白聚于井十七年六月丙戌岁
星填星太白聚于参十八年三月戊寅填星岁星太白聚于井二十四年七月戊子太白
荧惑填星聚于翼英宗正统十四年九月壬寅亦如之

景帝景泰二年九月庚申太白荧惑填星聚于轸英宗天顺八年二月丙午填星岁星太白聚于危孝宗弘治十三年四月癸丑荧惑太白辰星聚于井十六年八月庚申荧惑岁星填星聚于井武宗正德二年九月戊辰辰星岁星太白聚于亢世宗嘉靖十九年九月乙卯太白辰星填星聚于角二十三年正月癸卯荧惑岁星填星聚于房四十二年七月戊戌太白岁星填星聚于井神宗万历二十年六月壬子太白辰星填星聚于井三十二年九月辛酉岁星填星荧惑聚于危庄烈帝崇祯七年闰八月丙午至九月壬申填星荧惑星太白聚于尾】 流星 【唐太宗贞观十六年六月甲辰西方有流星如月西南行十八年五月流星出东壁声如雷高宗永徽三年十月有流星贯北极干封元年正月癸酉有星出太微东流有声咸亨元年十一月西方有流星声如雷调露元年十一月戊寅流星入北斗魁中中宗神龙三年三月丙辰有流星声如颓墙光烛天地元宗开元二年五月乙卯晦有星西北流或如瓮或如斗贯北极小者不可胜数天星尽摇至曙乃止十二年十月壬辰流星大如桃色赤黄光照地代宗广德二年十二月丙寅自乙夜至曙星流如雨大历三年九月乙亥有星大如斗北流光烛地六年九月甲辰有星出婺女西流大如斗尾迸光如珠长五丈八年六月戊辰有流星大如升尾长三丈余十二月壬申有流星大如升尾长二丈余出紫微入浊十年三月戊戌有流星出于西如二升器尾长二丈十三年二月辛亥有流星如桃出匏瓜尾长十丈宪宗元和二年十二月己巳西北有流星亘天尾散如珠四年八月丁丑西北有大星东南流声如雷鼓九年四月辛巳有大流星尾长五丈余光烛地十四年五月己亥有大流星出北斗魁长二丈余十五年七月癸亥有流星出钩陈穆宗长庆元年正月丙辰有大星出狼星北尾长三丈东北流七月乙巳有大流星出参西北尾长六七丈八月辛巳东北有大星自云中出前锐后大长二丈余西北流三年八月丁酉有大流星如数斗器东南流迸光散落坠地有声敬宗宝历二年五月癸巳西北有流星长三丈八月丙申有大流星出王良长四丈余文宗太和四年六月辛未流星或大或小观者不能数七年六月戊子四方流星大小纵横百余八年六月辛巳夜中有流星出河鼓尾迸光如散珠北行声如雷九年六月丁酉流星二十余纵横出没近天汉开成二年九月丁酉有星如斗长五丈自室壁西北流类枉矢小星数百随之四年二月己亥流星大小二百余并西流尾长二丈至五丈八月辛未流星出羽林尾长八丈声如雷武宗会昌元年六月戊辰小星数十纵横流散六年二月辛丑有流星如桃贯紫微懿宗咸通六年七月乙酉有

大流星长数丈羣小星随之自南徂北僖宗干符二年冬有二星一赤一白大如斗相随东南流光烛地四年七月有大流星如盂自虚危入羽
林灭昭宗光化三年三月丙午有星如二十斛船前锐后大西南行天复三年二月有大星如月自东西流声如雷尾迹横贯中天三夕乃灭
梁太祖干化元年十二月甲辰有流星出毕宿曳光三丈有声如雷 后唐庄宗同光二年六月甲申众星交流丙戌亦如之三年六月庚寅众星交流辛卯众小星流于西南明宗天成元年六月众小星交流二年三月庚申众小星流于西北长兴二年九月丙戌众星交流四年六月庚午众星交流七月乙亥朔亦如之闵帝应顺元年二月丁酉众星流于西北废帝清泰元年九月辛丑众星交驰 晋高祖天福三年三月壬申有大流星出河鼓东 周世宗显德三年正月癸亥有流星出南斗 宋太祖建隆元年正月戊午有星出东北方北行初小后大尾迹断续光烛地干德三年六月丁巳有星如桃出北斗魁尾迹凝天有光四年正月乙未有星出天社速行尾迹三丈余初小后大开宝三年九月庚午广州民见众星皆北流四年八月辛卯有星出织女西北行尾迹三丈余有声太宗太平兴国八年二月丙寅有星昼出西南尾迹二丈余雍熙四年八月乙亥有星出天阙东尾贯月端拱元年闰五月辛亥有星出奎如半月北行九月癸丑有星如太白出西南至中天旁出二小星随之淳化二年正月丙申有星出水府西经参旗分为三真宗咸平五年三月丙午有星昼出心赤光丈余九月戊戌有大星偕小星数十随至中台其闲两星一至狼一至南斗没丁未有星昼出紫微垣贯北斗六年十一月癸丑有星出毕尾迹缓行屈曲三丈余景德二年十月戊寅有星出太微垣分为三三年五月乙卯有星出天津东北分为四大中祥符元年二月戊申有星十余急流五月辛未有星如太白出天市垣慢流分为数星六月戊申有星出北斗魁北行迸为数星二年三月己未有星出天津南尾迹五丈余三年三月丁未有星出天市尾迹二丈迸为数星五年八月戊午有星大小二十余皆有尾迹北流庚申星出天耗北尾迹十丈六年十一月丁巳有星出太微迸为数星七年十一月癸未有星昼出日西南尾迹二丈余阔三寸西流天禧三年十二月壬寅有星出轩辕慢流声如雷五年四月丙辰有星出轩辕大如桃状若粉絮入太微凡七十五日没己未有星出南方如二升器北流尾迹三丈仁宗天圣六年四月甲申有星大如斗器自北至西南光照地声如雷曳尾迹长数丈久之散为苍白云明道元年八月乙丑星出胃大如杯有尾迹西北缓行迸为六七小星景佑四年七月戊申有星数百皆西南流最大一星至

东壁没光烛地不散康定元年十月壬戌有星大如盃有尾迹西南速行光照地有声如雷嘉佑四年九月己亥星出紫宫钩陈侧大如盃东北速行曳尾长五尺自后曲流至北辰东没后尾迹凝结如盘食顷散神宗熙宁二年六月辛酉昼出流星元丰元年六月甲辰东南方火烛地有星如盃出匏瓜分裂有声如雷哲宗元佑三年六月壬午昼有星出西南如盃向东急流有尾迹绍圣元年正月壬午昼有星出天中西南急流徽宗建中靖国元年正月癸亥星出西南如盃东北流青黑无尾迹崇宁元年闰六月癸酉星出斗向西南流有尾迹数小星从之十月壬子星出天船如盃急流青黑有尾迹声隆隆然五年十二月壬戌星出奎向南流有尾迹及三丈声散如裂帛高宗绍兴二十九年八月戊寅星出紫微垣西南长三尺西南流三十一年六月甲子星出氐流至角初小后大如太白后有星随之孝宗隆兴元年七月壬寅星出天市垣西北流炸散小星二十余有声有尾迹大如太白干道二年十二月星出天关急流有二小星随之七年七月戊戌星大如拳急流照地如电淳熙十一年四月乙丑星出自中天慢流向东北炸作小星相从有声理宗开庆元年六月己亥星出斗急流有音声光照地景定元年十月乙卯星出东北大如桃急流有音声 辽道宗咸雍元年十一月壬戌有星如斗逆行隐隐有声 金熙宗天会十四年九月癸未星大如缶起西南流于正西海陵正隆三年正月丁亥有流星出太微大如杯长二丈余章宗太和六年八月癸丑有流星如太白起于娄宿八年十一月庚子有流星起东北如太白者二光如炬几一丈卫绍王大安二年正月庚戌朔日中有流星出大如盃西行渐如车轮长数丈至地复起光散如火移刻灭宣宗兴定元年十月癸丑有流星出轩辕大如杯尾长丈余二年八月壬戌有流星出自建大如杯尾长丈余 元成宗大德三年九月壬辰流星起河鼓尾长丈余光烛地声如雷五年十月辛卯有流星大如杯尾长丈余自北起东行分为二星前大后小相离尺余武宗至大元年七月庚申流星起钩陈尾约三尺化为白气南行圆若车轮微锐泰定帝致和元年五月庚辰流星大如缶光烛地顺帝元统二年七月己酉流星出天津侧大如杯尾长五尺至正十六年十一月丁亥流星如杯尾长五尺余起西北向东南行声如雷十七年十二月己亥流星尾长三尺余起太阴近东往南行化为青白气十九年正月癸丑流星起南河大如盃尾长五尺余声如雷十月辛巳流星起危东大如桃离尺有小星随之尾长三尺二十年闰五月乙亥流星起房侧大如桃尾长丈余西行二十二年九月流星如杯大二十五年五月辛酉流星起房大如杯西行二十

六年六月癸酉流星如杯尾长尺余起心侧东南行十一月己丑流星如杯分为三星相
随前星色青后二星赤尾长二丈起东北往西南行
明太祖洪武三年十月庚辰有赤星如桃起天桴爆散有声五小星随之忽大如椀曳赤
尾至天仓没二十一年八月乙巳赤星如杯自北斗杓
东南行分为二旋分为三经昴宿仍为二经天廩合为一成祖永乐元年闰十一月丁卯
有星大如斗出中天西南行入云中有声二年五月丙
午有赤星大如斗出中天西北行入云中十六年有星大如斗自柳东行二十二年五月
己亥有星如盞起东南往西北行至云中有声如炮七
月庚寅有星如椀自奎入参炸散众星摇动英宗正统元年八月乙酉大小流星百余四
年八月癸卯大小流星数百十四年十月癸丑有星大
如杯长五尺余自三垣西北曲折行十二月戊申有星大如杯自太乙旁东南行丈余大
如斗四小星随之景帝景泰二年六月丙申大小流星
八十余八月壬午有赤星二一如桃一如斗一出紫微西藩北行三小星随之一出天津
东南行十余小星随之尾炸散声如雷英宗天顺三年
四月癸丑有星大如椀自左旗东南行尾炸散八年二月壬子有星如椀出天市尾如蛇
长丈余宪宗成化二十一年正月甲申朔西方有赤星
大如椀西行化白气曲如蛇良久轰如雷震孝宗弘治元年八月戊申流星如盞自南行
大如椀尾化白云屈曲蛇行而散九年闰三月戊午平
凉东南有流星如月十一年十月壬申晓东方赤星如椀东南行小星数十随之十六年
正月己酉南京有星昼流武宗正德五年四月丁亥雷
州有星如月自东南流分二尾如彗声如雷世宗嘉靖十二年九月丙子有流星如盞自
中台东北行四方大小流星纵横交行不计数十四年
九月戊子开封昼有星如椀东南流众小星从之如珠神宗万历三十年九月己未朔有
大赤星见东南大如椀忽化为五中星更明久之会为
一大如簏辛巳有大小星数百交错行十月壬辰流星起中天光散七道声如雷庄烈帝
崇祯十五年夏星流如织】 奔星 【元顺帝至元四
年九月癸酉奔星如酒杯大起右旗下西南行】 飞星 【宋哲宗绍圣元年六月丁丑
昼有飞星出东南如太白西北急流至中天没有尾迹
孝宗隆兴元年十一月丁未飞星出天船急流向紫微垣二年二月辛酉飞星出权星慢
流至太微垣内六月乙卯飞星出造父急流入紫微垣
金卫绍王大安元年正月辛丑有飞星如火起天市垣尾如赤龙状移刻散 元顺帝
至正十七年九月癸卯飞星如盂尾长丈余 明神宗
万历四年临漳有星长尺许白昼北飞二十年正月戊戌保定青山口有大飞星余光若
彗长二十余丈】 星陨 【唐高祖武德三年十月己

未有星陨于东都有声太宗贞观十四年八月有星陨于高昌城中高宗永徽四年十月崔义元讨睦州女贼陈硕真有星陨于贼营中宗景龙二年二月癸未有大星陨于西南声如雷睿宗延和元年孙佺讨奚契丹有大星陨于营中元宗天宝三载闰二月辛亥有星如月坠于东南有声肃宗至德二载贼将武令珣围南阳四月甲辰有大星长数十丈坠贼营代宗广德二年六月丁卯有妖星陨于汾州德宗建中四年八月庚申有星陨于京师兴元元年六月戊午星或什或伍而陨贞元十四年闰五月辛亥有星坠于东北光烛如昼声如雷宪宗元和六年三月戊戌有流星大如斛坠于兖郟闲有赤气丈余声震数百里野雉皆雊十二年九月己亥有流星起中天首如瓮尾如二百斛船长十余丈声如羣鸭明若火炬西流坠于陈蔡闲有大声如坏屋者三穆宗长庆元年四月有大星坠于吴声如飞羽二年六月丁酉小星陨于房心闲戊戌己亥如之四年四月紫微中星陨者众文宗开成二年十一月丁丑有大星陨于兴元府署武宗会昌四年八月丙午有大星如炬自奎娄扫北方七宿而陨懿宗咸通十三年春有二星从天际而上相从至中天状如旌旗乃陨僖宗干符三年昼有星如炬大如五斗器出东北徐行陨于西北中和元年八月己丑星陨如雨或如杯椀者交流如织庚寅亦如之至丁酉止三年十一月星陨于西北如雨光启二年九月有大星陨于扬州府署三年五月秦宗权拥兵汴州有大星陨于其营声如雷昭宗干宝三年六月有星大如椀起西南坠于东北色如鹤练声如羣鸭飞光化元年九月丙子有大星陨于北方 后唐明宗长兴元年九月辛酉朔众小星交流而陨二年九月丁亥众星交流而陨 周世宗显德元年正月庚寅大星坠有声如雷牛马皆逸 宋太宗端拱二年四月辛亥有星坠于氏房闲淳化元年十一月壬午流星出天关南行坠于地光四照声如隕墻至道元年四月乙巳常星未见有星出心北急行而坠二年五月辛丑有星出紫微北尾丈余如彗坠于壁室闲六月己卯有星出牵牛西芒丈余坠于东南又有星出翼坠于稷星东三年九月丁丑有星二陨于西南一出南斗一出牵牛真宗咸平五年九月丙申有星流于东方西南行大如斗声若牛吼小星数十随之而陨六年十二月乙酉威虏军有星遗迹长数里落蕃帐声若雷者三景德元年十月戊申有星陨于天雄军徽宗政和元年五月辛巳日未中星陨东南钦宗靖康元年六月癸丑星流大如五斗器众星随之起东南坠西北声如雷高宗绍兴元年三月甲戌星出东方昼陨七年八月壬寅星陨于汴二十六年六月戊戌星昼陨尾长三丈三十八年九月壬午星昼陨约长三丈熈宗庆元二

年九月甲午星昼陨四年六月甲午星昼陨嘉定三年九月己酉星夕陨六年五月癸亥
星昼陨九月癸卯星夕陨丁巳星昼陨十二月壬寅亦
如之理宗绍定元年六月己酉星昼陨三年十一月丁未四年九月甲辰亦如之五年八
月甲寅星夕陨端平二年六月庚辰星昼陨七月辛丑
亦如之三年六月癸巳星夕陨嘉熙元年二月己丑星夕陨二年八月癸亥星昼陨三年
三月甲戌四年三月癸未亦如之淳佑元年六月己卯
星昼陨三年八月乙卯如之十年四月丁酉朔星夕陨十一年八月己丑朔如之恭宗德
佑元年二月丁亥有星二鬪于中天顷之一星坠 辽
太祖天显九年五月甲辰大星昼陨九月庚子西南星坠如雨 金太宗天会十一年七
月己巳有大星陨于东南如散火宣宗贞佑四年正月
乙卯有流星大如日长丈余坠于西南声如雷兴定三年七月壬寅有星如月自西南来
小星千百环之若迸火然坠于东北声如鼓 明宣宗
宣德元年十二月己巳有星大如椀出卷舌东行过井坠地声如雷宪宗成化十二年十
一月乙丑延绥波罗堡有星二形如辘轴一坠樊家沟
一坠本堡红光烛天二十年五月丙申有大星坠番禺县东南声如雷散为小星十余孝
宗弘治四年十一月甲戌星陨真定天鸣如鼓又若奔
车七年五月宣府山西河南有星昼陨八年四月辛未有大星如轮陨于铅山县声如雷十
年正月壬子有星大如斗长三十余丈一小星随之陨
于宁夏西北天鸣如雷九月乙巳有星如斗陨于永平有声十一年正月癸亥有流星陨
于肃州大如房响如雷十四年闰七月辛巳山东有星
大如车轮自东南往西北陨于寿光武宗正德元年十二月庚午有星如椀陨宁夏中卫
空中有红光大二亩二年八月己亥宁夏有大星南流
而坠赤光阔三尺长五丈六年八月癸卯西北有流星如箕尾长四五丈三首一尾坠四
川崇庆卫十五年正月丁未有大星陨于山西龙舟谷巡
检厅事四月丙戌有星如日陨于巩昌世宗嘉靖十九年五月辛丑星陨于枣强神宗万
历四年十一月甲午有四星陨费县质明落赤点于城
西北色如朱砂长二里阔一二尺十三年七月辛巳有星如椀陨于沈邱莲花集十五年
六月丙寅平阳昼陨星丁卯有星如斗陨于平阴声如
雷十七年正月庚申有星陨西宁夏大如月二十年二月丙辰有三星陨闽县东南二十
七年三月庚子益州卫连陨大星三三十年九月戊子
有星如椀坠于南京龙江后营至地游走如萤移时灭明日复有星如月从西北流至阅
兵台分为三坠地有声十一月有星陨于南京教场三
十五年十一月癸巳有星陨于泾阳淳化诸县大如车轮尾长丈余三十八年二月癸酉
有星大如斗坠阳曲西北碎星不绝天鼓齐鸣四十一

年正月庚子真定流星昼陨有光四十三年三月戊申昼星坠清丰东流村声如雷四十六年十月辛酉有星如斗陨于南京安德门外声如霹
雳化为石熹宗天启三年九月甲寅固原州众星陨如雨庄烈帝崇祯十四年星陨高邮湖十六年五月有星陨于西南十七年三月己丑朔有
星陨于御河】客星【唐文宗太和三年十月客星见于水位开成二年三月甲申客星出于东井下至四月丙午没戊子客星别出于端门
内至五月癸酉没五月壬午客星如孛在南斗天钥旁昭宗干宝三年十月有客星三一大二小在虚危闲相随东行状如鬪经三日而二小星
没其大星后没光化三年正月客星出于中垣宦者傍大如桃天复二年正月客星如桃在紫宫华盖下渐行至御女丁卯有流星起文昌抵客
星客星不动己巳客星在扛守之至明年犹不去 梁太祖干化元年五月客星犯帝座
宋太祖建隆二年十二月己酉客星出天市垣有彗
三年七月没太宗太平兴国八年二月甲辰客星出太微垣端门东端拱二年七月丁亥
客星出北河星西北有彗指西南淳化元年正月辛巳
客星出軫七十日不见真宗景德二年八月甲辰客星出紫微天棂侧如粉絮稍入垣内
十一日没三年三月乙巳客星出东南方火中祥符四
年正月丁丑客星见南斗魁前天禧五年四月丙辰客星出轩辕前星西北大如桃入太
微垣七十五日没仁宗明道元年六月乙巳客星出东
北方有彗十三日没至和元年五月己丑客星出天关东南可数寸岁余没神宗熙宁二
年六月丙辰客星出箕七月丁卯散三年十一月丁未
客星出天困哲宗元佑六年十一月辛亥客星出参十二月入奎七年三月辛亥散高宗
绍兴八年五月客星守娄九年二月壬申客星守亢孝
宗干道二年三月癸酉客星出太微垣内五帝座大星西淳熙八年六月己巳客星出奎
一百八十五日灭熹宗嘉泰三年六月乙卯客星出东
南尾大如填甲子守尾嘉定十七年六月己丑客星守尾理宗嘉熙四年七月庚寅客星
出尾 辽道宗咸雍元年八月丙申客星犯天庙 金
世宗大定二十一年六月甲戌客星见于华盖凡百五十有六日灭卫绍王大安二年二
月客星入紫微中光散如赤龙状 元世祖至元十年
三月癸酉客星青白如粉絮起毕度贯斗杓凡二十一日灭仁宗皇庆二年十月丙子客
星见太微垣十一月丙午客星变为彗犯紫微垣明年
二月庚寅灭 明太祖洪武九年六月戊子有星大如弹入紫微垣七月乙亥灭十一年
九月甲戌有星见五车东北芒丈余入紫微宫天市垣
十月己未不见十八年九月戊寅有星见紫微垣彗长丈余二十一年二月丙寅有星出
东壁成祖永乐二年十月庚辰犇道东南有星如盏黄

润而不行二十二年九月戊戌有星出于斗大如椀声如撒沙石宣宗宣德五年八月庚寅有星见南河旁如弹二十六日灭十二月丁亥有星如弹见九旂旁黄白光润旬有五日隐六年三月壬午又见英宗天顺二年十一月癸卯客星见于星宿西行丙午状如粉絮庚戌生芒五寸十二月壬戌没五年六月壬辰天市垣宗正旁有异星见色粉白乙未化为白气而消六年六月丙寅有星见策星旁入紫微垣癸未形渐微孝宗弘治三年十二月丁巳有星见天市垣东南行七年十二月丙寅有星见天江旁十二年七月戊辰有星见天市垣宗星旁入紫垣东藩八月己丑灭十五年十月戊辰有星见天庙旁戊寅灭武宗正德十六年正月甲寅朔东南有星如火变白长六七尺横亘东西复变钩屈状良久乃散世宗嘉靖十一年二月壬午有星见东南有芒积十九日灭十三年五月丁卯朔有星见滕蛇入阁道二十四日灭十五年三月戊午有星见天格旁东行入天汉四月壬辰灭二十四年十一月壬午有星出天棊东北行逾月没神宗万历六年正月戊辰有大星如日出自西方众星皆西环三十二年九月乙丑尾分有星如弹见西南方至十月而隐十二月辛酉转出东南方明年二月渐暗八月丁卯灭二十七年有大星见西南芒刺四射四十六年十一月丙寅旦有花白星见东方熹宗天启元年四月癸酉赤星见于东方】彗星【唐高宗龙朔三年八月癸卯彗星见于左摄提长二尺余乙巳不见干封二年四月丙辰彗见于五车毕昴闲乙亥不见上元二年十二月壬午彗星见于角亢南长五尺三年七月丁亥彗起东并指北河长三尺余东北行光芒益盛长三丈扫中台指文昌九月乙酉不见开耀元年九月丙申彗见于天市垣长五丈癸丑不见永淳二年三月丙午彗星见于五车北四月辛未不见武后文明元年七月辛未有彗星见于西长丈余八月甲辰不见中宗景龙元年十月壬午彗星见于西十一月甲寅不见睿宗元和元年六月有彗星自轩辕入太微至大角灭玄宗开元十八年六月甲子彗星见于五车肃宗干道三年四月丁巳彗星见于东在娄胃闲长四尺东行凡五旬余不见闰月辛酉朔见于西长数丈至五月灭代宗大历元年十二月己亥彗星见于匏瓜长尺余经二旬不见五年四月己未彗见于五车长三丈五月己卯彗见于北方癸未车行六月己未不见宪宗元和十二年正月戊子彗星见于毕穆宗长庆元年六月彗星见于昴长一丈十日不见文宗太和二年七月甲辰彗星出于右摄提南长二尺八年九月辛亥彗星见于太微长丈余西北行庚申不见开成二年二月丙午彗出于危长七尺余西指南斗庚申在虚辛酉长丈余西行稍南指壬戌在女长二

丈余广三尺三月甲子在南斗乙丑长五丈其末两岐一指氐一掩房丙寅长六丈无岐北指在危丁卯西北行东指己巳长八丈余在张癸未
长三尺在轩辕右不见八月丁酉出于虚危三年十月乙巳彗见于轸魁长二丈余西指十一月乙卯见东方在尾箕东西亘天至十二月壬辰
不见四年正月癸酉彗出于羽林闰月丙午见卷舌西北至二月己卯不见五年二月庚申彗见营室东壁闲二十日灭十一月戊寅见东方武
宗会昌元年七月彗出于羽林十一月壬寅见于北落师门在营室十二月辛卯不见宣宗大中六年三月彗出于觜参十一年九月乙未彗出
于房长三尺懿宗咸通五年五月己亥彗出于东长三尺在娄九年正月彗见于娄胃十年八月彗星见于大陵东北指僖宗干符四年五月彗
见光启元年彗出积水积薪之闲昭宗大顺二年四月庚辰彗见于三台东长十丈余至五日甲戌不见景福二年四月乙酉彗出于上台长十
余丈东行三旬有七日益长至二十余丈因云阴不见天佑二年四月甲辰彗出于北河贯文昌长三丈余五月长亘天至辛未不见 梁太祖
干化二年四月壬申彗出于张甲戌彗出灵台 后唐明宗天成三年十月庚午彗出西南废帝清泰元年十一月丁未彗出虚危 晋高祖天
福五年九月壬子彗出于西扫天市垣八年十月庚戌彗出东方 宋太祖开宝八年六月甲子彗出柳长四丈西南指八十三日灭太宗端拱
二年七月戊子彗出井积水西三十日灭真宗咸平元年正月甲申彗出营室北十四日灭天禧三年六月辛亥彗出北斗魁第二星东北长三
尺许北行渐长三丈余三十七日没仁宗皇佑元年二月丁卯彗出虚西南指一百十四日没嘉佑元年七月彗出紫微长丈余八月癸未没英
宗治平三年三月己未彗出营室长七尺许西南指东行近日而伏辛巳夕有星出无芒别有白气一贯紫微极星益东行壬午复有芒长丈余
阔三尺余东北指白气横天癸未彗长丈五尺积六十七日灭神宗元丰三年七月癸未彗出太微垣白气长一丈斜指东南丙戌向西北行戊
子长三尺丁酉不见庚子复出三十六日灭哲宗绍圣四年八月己酉彗出氐如填白气长三丈九月长五尺庚申犯天市垣帝座戊辰不见徽
宗崇宁五年正月戊戌彗出西方如杯大光散如碎星长六丈阔三尺斜指东北大观四年五月丁未彗出奎娄长六尺北行入紫微垣钦宗靖
康元年六月壬戌彗出紫微垣闰十一月彗竟天高宗绍兴元年十二月戊寅彗星见二年八月甲寅彗见胃十五年四月戊寅彗见东方五月
丁巳化为客星六月丁亥消十六年十二月戊戌彗见西南危宿二十六年七月丙午彗见井长一丈三十一年六月己巳彗见北斗权星东北

宣宗嘉定十五年八月甲午彗见右摄提芒三尺余类岁星凡两月没理宗绍定五年闰九月彗见东方十月己未消嘉熙四年正月辛未彗见于营室三月辛未消景定五年七月甲戌彗见于柳长十余丈日高方敛凡四月灭 辽圣宗开泰三年正月丁酉彗星见西方道宗咸雍二年三月壬午彗星见于东方太康五年十二月丙午彗星犯尾寿隆三年八月乙巳彗星见西方 金太宗天会十年八月辛亥彗星出于文昌熙宗皇统五年四月丙申彗星见于西北长丈余至五月壬戌灭七年正月辛未彗出东方长丈余十五日灭宣宗兴定六年八月己卯彗出于角亢摄提周鼎之闲哀宗天兴元年九月己酉彗星见东方长丈余弯曲如象牙南行渐长二丈二十七日见东南约长四丈余至十月一日始灭 元世祖至元元年七月甲戌彗出舆鬼凡四十余日十四年二月癸亥彗出东北长四尺余三十年十月庚寅彗星入紫微垣抵斗魁一月乃灭成宗大德二年十二月甲戌彗出子孙星下五年八月彗出井直西北长五尺九月长丈余至天市垣四十六日灭七年十二月彗见于室约盈尺东南指渐长尺余复指西北八年三月灭凡七十四日仁宗皇庆二年三月丁未彗见东井顺帝至元三年五月丁卯彗见东北如天船星长尺余西南指六月辛未长二尺余己卯辰三尺余七月光微小渐南行至八月庚午不见六年二月己酉彗出于房状如粉絮尾长五寸余西南指渐往西北行至三月庚辰不见至正十六年八月甲戌彗出于东指西南长尺余至十月戊午灭二十二年二月乙酉彗见长尺余在危二月终长二丈余三月戊申不见星形有白气蟠曲竟天西指王子有形无芒如杯大在昴戊午灭六月辛巳彗见紫微垣东南指长尺余西南行七月乙卯灭二十三年三月辛丑彗见东方 明太祖洪武元年正月庚寅彗见于昴毕三月辛卯彗出昴北长八尺余四月己酉没六年四月彗星三入紫微垣二十四年四月丙子彗星二一入紫微垣闾阖门犯天床一犯六甲扫五帝内座成祖永乐五年十一月丙寅彗见宣宗宣德七年正月壬戌彗出东方长丈余东南行十月灭戊子又出西方十有七日灭八年闰八月壬子彗出天仓旁长丈余二十四日灭英宗正统四年闰二月己丑彗出张旁大如弹丁酉长五丈余西行六月戊寅彗见毕旁长丈余西南指五十五日灭九年七月庚午彗见太微东垣长丈许渐长至闰七月己卯没十四年十二月壬子彗见天市垣长二尺余至乙亥没景帝景泰元年正月壬午彗出天市垣外七年四月壬戌彗出于胃长二尺指西南五月癸酉长丈余戊子在柳长九尺余甲午在张长七尺余西南行六月壬寅入太微垣长五尺余十二月甲寅见于毕长五

寸东南行癸亥没英宗天顺元年五月丙戌彗出于危若动摇者东行长五寸西南指六月癸巳朔在室长丈余十月己亥见于角长五寸余北指五年六月戊戌彗见东方西南指七月丙寅没宪宗成化元年二月彗见三月又见西北长三丈三阅月而没四年九月己未异星见于星五度东北行五日长三丈余尾指西南变为彗出入天市垣至十一月庚辰灭七年十二月甲戌彗见天田西指寻北行己卯东西竟天北行正昼犹见自帝星北斗魁庶子后宫三师中台天皇大帝文昌上台无所不犯乙西南行至八年正月丙午渐微久之始灭孝宗弘治三年十一月戊戌彗见天津南尾指东北十二月戊申朔在室十三年四月甲午彗见垒壁阵渐长三尺余指离宫入紫微垣犯尚书六月丁酉没武宗正德元年七月庚子彗见长三尺越三日长五尺许入太微垣十五年正月彗见世宗嘉靖十年闰六月乙巳彗出于井长尺许至翼长七尺余入太微三十四日没十一年八月己卯彗出于井长尺许东北行渐至丈余扫太微垣诸星凡百十五日而灭十二年六月辛巳彗见于五车长五尺渐长丈余八月戊戌灭十八年四月庚戌彗见长三尺余指东南旬日不见三十五年五月癸亥彗见天权旁二十七日没三十五年正月庚辰彗见进贤旁长尺许西南指渐至三尺余四月二日灭三十六年九月戊辰彗见天市垣列肆旁东北指十月二十三日始灭穆宗隆庆三年十月辛丑朔彗见天市垣东北指至庚申没神宗万历五年十月戊子彗见西南长数丈由尾箕越斗牛逼女经月而灭八年八月庚申彗见东南方凡七十日有奇十年四月丙辰彗见西北尾指五车二十余日灭十三年九月戊子彗出羽林旁东行十月癸酉灭二十一年七月乙卯彗见于井乙亥逆行入紫微垣二十四年七月丁丑彗见西北长尺余西北行三十五年八月辛酉朔彗见于井指西南渐往西北壬午灭四十六年十月乙丑彗见于氏长丈余指东南渐指西北逼紫微垣右十一月甲辰灭四十七年正月彗见东南长数百尺末曲而锐未几见于东北未几见于西庄烈帝崇祯十二年秋彗见于参十三年十月丙戌彗见】 孛星 【唐高祖武德九年三月壬午有星孛于胃昴间丁亥孛于卷舌太宗贞观八年八月甲子有星孛于虚危历元柺乙亥不见十二年三月乙丑有星孛于毕昴十五年六月己酉有星孛于太微至七月甲戌不见中宗景龙二年二月丁酉有星孛于胃昴闲八月壬辰有星孛于紫宫玄宗开元十八年六月癸酉有星孛于毕昴二十六年三月丙子有星孛于紫宫垣历北斗魁旬余不见穆宗长庆元年正月己未有星孛于翼二月丁卯孛于太微西上将僖宗光启二年五月丙戌有星孛于箕尾历北

斗摄提昭宗景福元年十一月有星孛于斗牛 周世宗显德三年正月壬戌有星孛于参 宋真宗咸平六年十一月甲寅有星孛于井鬼长四尺三十余日没仁宗景佑元年八月壬戌有星孛于张翼长七尺阔五寸十二日没孝宗淳熙二年七月辛丑有星孛于西北当紫微垣外小如荧惑丙午消理宗绍定三年十一月丁酉有星孛于天市垣明年二月壬午消 辽太宗会同四年九月壬申有星孛于晋分 元顺帝至正十一年十一月辛亥孛星见于奎癸丑见于娄甲寅见于胃乙卯如之丙辰见于昴丁巳微见于毕二十六年九月庚子孛星见于紫微垣北斗权侧色如粉絮约斗大往东南行厯尾如虚轸东南行 明宣宗宣德六年四月戊戌有星孛于东井长五尺余景帝景泰三年三月甲午朔有星孛于毕世宗嘉靖二年六月有星孛于天市】 天狗 【唐太宗贞观二年天狗陨于夏州城中中宗景龙二年二月天狗坠于西南有声如雷野雉皆雊 后唐庄宗同光三年九月丁未天狗坠声如雷野雉皆雊 宋太祖建隆二年五月己丑天狗坠西南理宗端平二年春天狗坠怀安金堂县声如雷三州之人皆闻之化为碎石其色红 明庄烈帝崇祯九年天狗见豫分】 枉矢 【唐肃宗至德二载十一月壬戌有流星大如斗东北流长数丈蛇行屈曲有碎光迸出德宗贞元三年闰五月戊寅枉矢坠于虚危昭宗干宝元年夏有星陨于越州后有光长丈余状如蛇光化三年十一月中天有大星自东缓流如带屈曲光凝着天食顷乃灭天佑元年五月戊寅有星长二十丈出东方西南向首黑尾赤中白二年三月乙丑夜有大星出中天如五斗器流至西北去地十丈许而止上有星芒炎如火长丈五许蛇行小星皆动至东南其陨如雨少顷没后有苍白气如竹丛上冲天中色瞢亦枉矢也】 蚩尤旗见 【唐文宗开成四年十二月壬申蚩尤旗见懿宗咸通十三年九月蚩尤旗见昭宗景福元年五月蚩尤旗见初出有白彗形如发二尺许经数日乃从中天下如匹布至地如蛇 宋徽宗嘉靖十一年五月癸未蚩尤旗竟天】 长星 【唐懿宗咸通九年十一月丁酉长星出如匹练亘空化为云而没僖宗光启二年十月壬戌长星出于西方色白长一丈五尺屈曲而陨 明世宗嘉靖八年正月立春日长星亘天七日又如之】 蓬星 【明宣宗宣德五年十月蓬星见外屏南东南行经天仓天庾八日而灭】

钦定续通志卷一百七十一

●钦定续通志卷一百七十二

灾祥略 【二】

地 【山附】

水

○地 【山附】

地震 【陷裂附】 唐高祖武德二年十月乙未京师地震七年七月嵩州地震太宗贞观七年十月乙丑京师地震十二年正月壬寅松从二州地震坏庐舍二十年九月辛亥灵州地震声如雷二十三年八月癸酉朔河东地震晋州尤甚乙亥又震十一月乙丑又震高宗永徽元年四月己巳朔晋州地震己卯又震庚辰又震声如雷二年十月又震十一月戊寅定襄地震仪凤二年正月庚辰京师地震永淳元年十月甲子京师地震武后垂拱三年七月乙亥京师地震四年七月戊午又震八月戊戌神都地震延载元年四月壬戌常州地震大足元年七月乙亥扬楚常润苏五州地震二年八月辛亥剑南六州地震中宗景龙四年五月剡县地震睿宗景云三年正月甲戌并汾绛三州地震玄宗开元二十二年二月壬寅秦州地震坏庐舍殆尽二十六年三月癸巳京师地震肃宗至德元载十一月辛亥朔河西地震裂有声陷庐舍张掖酒泉尤甚至二载六月癸亥乃止代宗大历二年十一月壬申京师地震三年五月丙戌又震十二年恒定二州地大震三日束鹿宁晋地裂数丈德宗建中元年四月己亥京师地震三年六月甲子又震四年四月甲子又震五月辛巳又震贞元二年五月己酉又震三年十一月丁丑夜京师东都蒲陝地震四年正月庚戌朔夜京师地震辛亥王子丁卯戊辰庚午癸酉甲戌乙亥皆震金房二州尤甚二月壬午京师又震甲申乙酉丙申又震三月甲寅己未庚午辛未又震五月丙寅丁卯又震八月甲午甲辰如之九年四月辛酉又震声如雷河关中辅尤甚十年四月戊申京师地震癸丑又震十三年七月乙未又震宪宗元和七年八月京师地震九年三月丙辰嵩州地震昼夜八十动地陷三十里十年十月京师地震十一年二月丁丑又震十五年正月戊辰夜地震文宗太和二年正月壬申地震七年六月甲戌又震九年三月乙卯京师地震屋瓦皆坠开成元年二月乙亥又震二年十一月乙丑夜又震四年十月甲戌又震武宗会昌二年正月癸亥宋亳二州地震十二月癸未京师地震宣宗大中三年十月辛巳上都及振武河西天德灵武盐夏等州地震十二年八月丁巳太原地震懿宗咸通元年五月上都地震六年十二月晋绛二州地震地裂泉涌青泥八年正月丁未河中晋绛地大震十三年四月庚子浙东西地震僖宗干符三年六月乙丑雄州地震至七月辛巳止州城庐舍尽坏地陷水涌是月濮州地震十二月京师地震有声四年六月庚寅雄州地震六

年二月京师地震声如雷中和三年秋晋州地震光启
二年春成都地震月中数十动十二月魏州地震昭宗干寔二年三月庚午河东地震
梁太祖开平二年四月甲寅地震 后唐明宗天成二
年十一月地震十二月癸未又震长兴二年六月壬午太原地震 宋太祖干德三年京
师地震太宗至道二年十月潼关西至灵夏环庆等州
地震坏庐舍真宗咸平二年九月常州地震四年九月庆州地震者再六年正月益州地
震景德元年正月丙申夜京师地震癸卯丁未夜又震
癸丑冀州地震二月益黎雅州地震三月邢州地震不止四月己卯夜瀛州地震五月邢
州复震不止十一月壬子日南至京师地震癸丑石州
地震四年七月丙戌益州地震己丑渭州瓦亭砦地震者四大中祥符二年三月代州地
震四年六月昌眉州并地震七月真定地震坏城垒仁
宗天圣五年三月泰州地震七年京师地震景佑四年十二月甲子又震甲申忻代并地
震坏庐舍死者甚众宝元元年正月庚申并忻代地震
十二月甲子京师地震庆历三年五月忻州地大震四年五月庚午忻州又震五年七月
十四日广州地震六年二月戊寅青州地震三月庚辰
登州地震不已每震海底有声如雷五月甲申京师地震七年十月乙丑河阳许州地震
皇佑二年十一月丁酉夜秀州地震有声自西北起如
雷嘉佑二年雄州北界幽州地大震坏城郭覆压数万人五年五月己丑京师地震英宗
治平四年秋漳泉建州邵武兴化军地震潮州尤甚八
月己巳京师地震神宗熙寔元年七月甲申地震乙酉辛卯再震八月壬寅甲辰又震是
月须城东阿二县地震终日沧州清池莫州亦震坏庐
舍城壁是时河北复大震摧压死者甚众九月戊子莫州地震声如雷十一月乙未京师
及莫州地震十二月癸卯瀛州地大震丁巳冀州地震
辛酉沧州地震涌出沙泥船板胡桃螺蚌之属是月潮州再震是岁数路地震有一日十
数震或踰半年不止者二年十月庚戌南郊东墼门内
地陷元丰八年二月甲戌宾州岭方县地陷五月丙午京师地震哲宗元佑二年二月辛
亥代州地震四年春陝西河北地震七年九月己酉兰
州镇戎永兴军地震十月庚戌朔环州地再震绍圣元年十一月丙戌太原地震二年十
月十一月河南府地震是年苏州自夏迄秋地震者十
三年三月戊戌夜剑南东川地震九月己酉滁州沂州地震四年六月己酉太原地震元
符元年七月壬申夜云露蔽天地震良久二年正月壬
申恩州地震八月甲戌太原地震三年五月己巳又震徽宗建中靖国元年十一月辛亥
太原府潞晋代石岚隰等州岢岚威胜保化寔化军地
震弥旬坏城壁屋宇死者甚众政和七年熙河环庆泾原路地震宣和四年雄州地大震

六年正月京师连日地震宫殿门皆动有声七年七月
己亥熙河路地震裂数十丈兰州尤甚河东诸郡或震裂高宗建炎二年正月戊戌长安
地大震绍兴三年八月甲申地震平江府湖州尤甚四
年四川地震五年五月行都地震六年六月乙巳夜地震余杭为甚七年地震二十四年
正月戊寅地震二十五年三月壬申地震二十八年八
月甲寅夜地震三十一年三月壬辰地震三十二年七月戊申地震孝宗隆兴元年十月
丁丑地震干道二年九月丙午地震自西北方四年十
二月壬子石泉军地震三日声如雷屋瓦皆落淳熙元年十二月戊辰地震自东北方九
年十二月壬寅夜地震十年十二月丙寅又震十二年
五月庚寅又震宁宗庆元六年九月东北地震十一月甲子地震东北方嘉定六年四月
行都地震六月丙子淳安县地震九年二月辛亥东西
川地大震四日十年二月庚申地震自东南十二年五月地震六月西川地震十四年正
月乙未夜地震五月丙申西川地震理宗宝庆元年八
月己酉地震嘉熙四年十二月丙辰地震淳佑元年十二月庚辰地震宝佑三年蜀地震
度宗咸淳七年嘉定府城震者三 辽太宗天显十二
年四月甲申地震圣宗统和九年九月己酉南京地震太平二年三月地震云应二州屋
摧地陷道宗咸雍四年七月南京地震 金熙宗天会
十五年七月丙戌夜京师地震天眷三年十二月丁丑地震皇统四年十月甲辰地震海
陵正隆五年二月辛未河东陝西地震世宗大定四年
三月庚子夜京师地震五年六月丙午又震有声七月戊申又震七年九月庚辰地震二
十年五月丙寅京师地震二十七年四月辛丑微震章
宗明昌四年三月京师地震六年二月丁丑又震承安五年五月庚辰地震卫绍王大安
元年十一月丙申平阳地大震戊戌夜又震自此时复
震动二年二月乙酉地大震六年七月至九月晦其震不一宣宗兴定三年四月癸未陝
右黑气昼起有声如雷顷之地大震平凉镇戎德顺尤
甚庐舍倾压死者以万计哀宗正大四年六月丙辰地震 元世祖至元二十一年九月
戊子京师地震二十六年正月丙戌地震二十七年二
月癸未泉州地震丙戌复震八月癸未武平路地大震二十八年八月己丑平阳路地震
成宗元贞元年三月壬戌地震大德六年十二月辛酉
云南地震戊戌又震七年八月辛卯夕地震太原平阳尤甚平阳之赵城县范宣义郇堡
徙十余里太原之徐沟祁县及汾州平遥介休西河孝
义等县地震成渠泉涌黑沙汾州北城陷长一里东城陷七十余步八年正月平阳地震
不止九年二月平阳太原地震四月乙酉大同路地震
坏庐舍五千八百压死者一千四百余人怀仁县地裂二所涌水尽黑十一月壬子大同

复震十年正月晋窳冀窳地震不止十一年八月壬寅
开城路地震武宗至大元年六月丁酉巩昌陇西窳远地震云南乌撒乌蒙地三日而大
震者六九月己酉蒲县地震十月癸巳蒲县灵县地震
二年十二月壬戌阳曲地震三年十二月戊申冀窳路地震四年三月己亥窳夏路地震
七月癸未甘州地震闰七月甲子窳夏复震仁宗皇庆
二年六月京师地震壬寅丙辰己未连震延佑元年二月戊辰大窳路地震四月甲申朔
又震八月丁未冀窳汴梁等路陟县武安并地震十一
月戊辰大窳复震三年八月己未冀窳晋窳地震十月壬午河南地震四年正月壬戌冀
窳复震七月辛卯又震九月岭北地震三日五年正月
甲戌懿州地震二月癸巳和窳路地震三月己卯德庆路地震英宗至治二年九月癸亥
地震十一月癸卯又震泰定帝泰定元年十二月庚申
奉元路同州地震三年十二月丁亥窳夏路地震如雷发自西北连震者三四年三月癸
卯和窳路地震八月巩昌地震声如雷昼晦凤翔兴元
成都陝州江陵等郡同日震九月壬寅窳夏地震致和元年七月辛酉朔又震己卯大窳
地震十月壬寅又震文宗至顺二年四月丁亥真定陟
县地一日五震或三震月余乃止四月戊申大窳地震五月戊寅京师地震八月己酉陇
西地震顺帝元统元年十一月丙申巩昌成纪县地裂
癸卯灞山地震辛亥秦州地裂十二月德兴县余千乐平二州地震二年五月信州地震
八月辛未京师地震至元元年十一月壬寅兴国路地
震十二月丙子安庆路地震所属州县同日震庐州黄州蕲州饶州如之二年正月乙丑
宿松地震三年八月辛亥夜京师地震壬午又大震损
太庙神主西湖寺神御殿壁倾祭器皆坏辛巳顺州龙庆及怀来地震宣德亦震四年春
保安及瑞州路新昌州地震七月己酉保安地大震八
月丙午京师地震日二三动至乙酉止至正元年二月汴梁地震二年四月辛丑平晋地
震声如雷裂地尺余十二月乙酉京师地震三年二月
钧州新郑密县地震十二月胶西及高密地震四年八月蒙阴地震十二月东河阳谷平
阴及汉阳地震五年春蓟州四县及东平汶上地震十
二月己丑镇江地震六年二月益都昌乐寿光北海即墨地震三月高苑地震坏民居九
月戊午邵武地震翌日地中有声如鼓夜复如之七年
二月临淄临朐昌邑高密棣州地震三月东河阳谷平阴地震五月临淄又震七日十一
月丹阳地震九年六月台州地震十年徐州地震十一
年四月汾忻二州文水平晋榆次寿阳榆社河内修武及孟州皆地震坏屋宇死者甚众
八月丁丑公安松滋枝江三县峡荆门二州地震十二
年二月丙戌灵石地震闰三月丁丑陝西地震庄浪定西静窳会州尤甚移山湮谷陷没

庐舍十三年三月庄浪定西静宁会州地震十四年四月介休地震泉涌十一月宁国旌德海州地震十二月己酉绍兴地震十五年六月丁丑保德地震十六年春蓟州地震十日所领四县皆震六月雷州地大震十七年十月静江路东门地陷十八年二月临州地震五月益都地震十九年正月庆元地震二十年二月顺昌地震二十二年三月南雄路地震二十三年十二月台州地震二十五年十月壬申兴化路地震二十六年三月海州地震如雷六月介休地震七月辛亥徐沟石忻临及孝义平遥同日地震是月巩县地震二十七年五月山东地震十月丙辰福州地震十二月庚午又震声如雷二十八年六月文水徐沟孝义介休临州保德石楼及陕西地震十月辛巳陕西又震 明太祖洪武四年正月己丑巩昌临洮庆阳地震五年四月戊戌苍梧贺州恭城立山地震六月癸卯阳曲地震七月辛亥又震壬戌京师地震八月癸未徐沟地震凡三日戊戌阳曲地又震是年阳曲地凡七震八年七月戊辰京师地震十二月戊子又震十一年四月乙巳宁夏地震坏城垣十三年十二月甲戌福州广州河州地震十九年六月辛丑云南地震十一月己卯复震有声二十三年正月庚辰山东地震惠帝建文元年三月甲午京师地震成祖永乐元年十一月甲午北京地震山西宁夏亦震二年十一月癸丑京师济南开封并震有声六年五月壬戌京师地震十一年八月甲子京师复震十三年九月壬戌北京地震十四年九月癸卯又震十八年六月丙午又震二十二年六月壬申南京地震仁宗洪熙元年二月戊午六安卫地震七日是岁南京地震凡四十二宣宗宣德元年七月癸巳京师地震有声自东南迄西北是岁南京地震者九二年春复震者十三年复屡震四年两京地震五年正月壬子南京地震辛酉又震英宗正统三年三月己亥京师地震庚子又震甲辰又震者再四年六月乙未复震八月己亥又震五年十月庚午朔兰州庄浪地震十日十月十一月屡震坏城堡庐舍压死人畜十年二月丁巳京师地震景帝景泰二年七月癸丑京师地震三年七月永新珠坑村地陷十七所是年南京地震五年十月庚子京师地震有声起西北迄东南六年二月甲午安福白泉陂羊塘地陷英宗天顺元年十月乙巳南京地震宪宗成化元年四月甲申钧州地震二十三日乃止三年四川地震凡三百七十五五月壬申宣化大同地震威远朔州亦震坏墩台墙垣伤人四年八月癸巳京师地震十二月戊戌湖广地震五年十二月丙辰汝宁武昌汉阳岳州同日地震六年正月河南地震是年湖广亦震十年四月壬午鹤庆地震九月己巳自寅至申复十五震坏廨舍民居伤人畜十月丁酉灵州大沙井

驿地震声如雷自后昼夜屡震至十一月甲寅一日十一震城堞房屋多圯十二年正月辛亥南京地震十月辛巳京师地震十三年正月己巳凤阳临淮地震闰二月癸卯临洮巩昌地震四月戊戌甘肃地裂又震有声榆林凉州亦震宁夏大震城垣崩坏者八十三处甘州巩昌榆林凉州及沂州剡城滕费峯同日俱震九月甲戌京师地震十四年六月广西太平地震至八月乙巳凡七震七月四川盐井卫地连震倾廨宇人畜多死十六年八月丁巳四川越嶲卫一日七震越数日连震十七年二月甲寅南京凤阳庐州淮安扬州和州兖州及河南州县同日地震五月戊戌直隶蓟州遵化地震六月甲辰又震日三次永平及辽东宁远卫亦三震二十年正月庚寅京师及永平宣府辽东皆震宣府地裂天寿山密云古北口居庸关城垣墩堡多摧五月甲寅代州地七震九月辛巳费县地陷二十一年二月壬申泰安地震三月壬午复震泰山动摇后四日复微震癸巳乙未庚子连震闰四月癸未巩昌固原及兰河洮岷四州地俱震癸巳遵化地震越数日复连震五月壬戌京师地再震九月廉州梧州地连震十六日十一月京师地震二十二年六月壬辰汉中及宁羌卫地裂九月辛亥成都地日七八震孝宗弘治元年八月壬寅汉茂二州地震仆碉房三十七户戊申宣府葛峪堡地陷十二月辛卯四川地震三日二年五月庚申成都地震三日三年十二月己未京师地再震四年六月辛亥复三震八月乙卯南京地震屋宇皆摇淮扬二府同日震六年三月宁夏地震连三年共二十震四月甲辰开封卫辉东昌兖州同日地震七年二月丁丑曲靖地震坏房屋死军民是岁两京地并六震八年三月己亥宁夏地震十二次倾边墙屋宇九月甲午至辛丑安南卫地十二震十月壬戌至甲子海州地九震是岁南京再震九年两京地震各二十年正月戊午京师地震六月乙亥海丰地震是岁真定宁夏榆林镇番灵州太原皆震十一年六月丙子桂林地陷十三年七月己巳京师地震十月戊申两京凤阳同时震十四年正月庚戌延安庆阳二府同华诸州咸阳长安潼关诸县连日地震朝邑尤甚频震十七日摧城垣民舍死人畜甚众县东地坼水溢成河自夏至冬复七震是日永宁卢氏安邑荣河俱震有声蒲州自是日至戊午连震丁丑福州兴化泉州漳州俱地震二月乙未蒲州又震至三月癸亥凡二十九震八月癸丑四川可渡河巡检司地裂而陷癸酉贵州地三震十月辛酉南京地震十五年九月丙戌南京徐州大名顺德济南东昌兖州同日地震坏城垣民舍濮州尤甚地裂涌水是日开封彰德平阳泽潞亦震十月甲子应朔代三州山阴马邑阳曲等县地俱震丁卯南京地震十六年二月庚

申南京地震十八年六月癸亥宁夏地震城圯九月癸
巳杭州嘉兴绍兴宁波地震甲午南京及苏州松江常州镇江淮安扬州盛国通州和州
同日地震辛丑蒲解绛夏平陆荣河闻喜芮城猗氏地
俱震安邑万全尤甚武宗正德元年二月癸酉合阳地震者十余四月癸丑云南连日再
震木密关地震凡五坏城垣屋舍八月丁丑鳌山卫地
震城坏莱州自九月至十二月地震四十五二年九月庚午云南安州新兴连震三日四
年三月甲寅广盛大兴堡地陷五月己亥夜武昌见碧
光如电已而地震六年四月乙未楚雄地三日五震至明年五月又连震十三日十月甲
辰大理邓川剑川洱海地震鹤庆剑川尤甚十一月戊
午京师地震保定河闲及八县三卫山东武定州同日皆震霸州连三日十九震七年五
月壬子楚雄自是日至甲子地连震八月己巳腾冲卫
连震两日坏城楼廡宇赤水涌出没田禾死伤甚众八年十二月戊戌成都重庆潼川邛
州地震九年六月甲辰凤阳地震八月乙巳京师地震
十月壬辰叙州太原代平阳榆次等十州县大同应州山阴马邑俱地震十年五月壬辰
云南赵州永盛卫地震踰月地裂水涌死者数千人伤
倍之八月丁丑大理地震至九月乙未复大震四日十一年八月戊辰南京地震武昌亦
震二月己未楚雄大理蒙化景东俱震十二年四月甲
子抚州及余干丰城泉州俱地震浙江金乡卫自是日至七月己丑十五震六月戊辰云
南新兴及通海诸县地震九月己卯济南及青登莱地
震是岁泉州金华地数震十三年六月己巳大理及赵邓川二州浪穹县地震是日蒙化
亦震十月甲午十一月癸卯又震十四年二月丁丑京
师地震九月丙午昌平宣府开平亦震丙辰福兴泉地震十五年三月丙申安盛姚安宾
州蒙化鹤庆俱地震蒙化震二日仆城垣八月辛酉景
东地震声如雷地多坼裂世宗嘉靖二年正月南京凤阳山东河南陕西地震七月壬申
浙江定海诸卫地震城尽毁三年正月丙寅朔两畿河
南山东陕西同时地震辛巳苏常镇江地震是年南京震者再四年八月癸卯徐州凤阳
一卫三州县及怀庆开封二府俱地震五年四月癸亥
永昌腾冲腾越同日地震贵州安南地震坏城垣壬申复震六年十月戊辰京师地震十
二年八月丁酉京师地震十五年十月庚寅又震顺天
永平保定万全都司各卫所俱震十六年九月云南地震十八年七月楚雄临安广西地
震十九年四月庚午洮州甘肃地震二十一年九月甲
戌平阳固原宁夏洮州同日地震十一月丁巳巩昌固原西安凤翔地震二十二年三月
乙巳太原地震凡十日明年三月复如之四月庚辰福
兴泉漳地震二十三年三月太原地震有声者十日二十七年七月戊寅京师顺天保定

俱地震八月癸丑京师复震登州及广宁卫亦震三十年九月乙未京师地震三十一年二月癸亥凤阳地震三月山西地震三十四年十二月壬寅山西陝西河南同时地震渭南华州朝邑三原蒲州等处尤甚或地裂泉涌中有鱼物或城郭房屋陷入地中或平地突成山阜三十七年正月庚申陝西地震三月丁丑昌平地震五月丁卯蒲州连震三日六月甲申又震十月丙午华州地震壬子又震戊午复大震三十八年七月辛巳南京地震三十九年四月嘉湖地震屋庐摇动如帆河水撞激鱼皆跃起四十年二月戊戌山丹卫地震六月壬午太原大同榆林地地震宁夏固原尤甚城垣墩台屋宇皆摧地涌黑黄沙水压死军民无算四十一年正月丙申京师地震是岁宁夏地震倾边墙四十五年正月癸巳福州兴化泉州同日地震穆宗隆庆二年三月甲寅陝西庆阳西安汉中宁夏山西蒲州安邑湖广郟阳及河南十五州县同日地震戊寅京师及山东登州四川顺义等县同日震乐亭地裂三丈余者二黑沙水涌出宁夏远城崩四月癸未怀庆南阳汝宁宁夏同日地震乙酉凤翔平凉西安庆阳地震七月辛酉陵川地裂三年十一月庚辰京师地震四年四月戊戌又震五年二月丙午广西地陷六月辛卯朔京师地震者三神宗万历元年八月戊申荆州地震至丙寅方止二年二月癸亥长汀地震裂成坑陷没民居三年正月甲戌湖广江西地震五月戊戌襄阳郟阳及南阳府属地震三日信阳亦震六月戊子福汀漳等府及海阳县俱地震九月戊午京师地震十月丁卯又震岷州卫自己丑至壬午连百余震四年二月庚辰蓟辽地震辛巳又震五年二月辛巳腾越地二十余震六年二月辛卯临桂村田中青烟直上裂地丈余鼓声轰轰民居及大树石皆陷七年七月戊午京师地震八年五月壬午遵化数震七日乃止七月甲午井坪路地大震摧城垣数百丈九年四月己酉蔚州地震房屋震裂大同镇堡各州县同时地震有声十一年二月戊子承天地震十二年二月丁卯京师地震五年甲午又震十三年二月丁未淮安扬州庐州及上元江宁江浦六合俱地震三月戊寅山西山阴县地震旬有五日乃止八月己酉京师地震十四年四月癸酉又震十五年三月壬辰开封府属地震者三彰德卫辉怀庆同日震五月山西地震十六年六月庚申京师地再震十七年七月己未杭温绍地震十八年六月丙子甘肃临洮地震坏城郭庐舍人畜压死无算八月福建地屡震十九年闰三月己巳昌平地震十月戊戌山丹卫地震二十三年五月丁酉京师地震十二月癸亥陝西地震二十四年十一月福建地震二十五年正月壬辰四川地震三日八月己卯辽阳广宁诸卫地震涌水三日甲申京师地震

宣府蓟辽等处俱震十二月乙酉京师又震二十六年
正月丁亥朔宁夏地震次日长乐地陷五丈八月丁丑京师地震二十七年七月辛未承
天沔阳岳州地震二十八年二月戊戌京师地震自良
方西南行如是者再三十一年四月丙午承天锤祥县地震五月戊寅京师地震三十二
年闰九月庚辰巩昌及醴泉一日十余震白阳吴泉界
地裂三丈三十三年五月辛丑陆川地震坏城垣庐舍男妇压死无算六月庚午灵川社
坛有声地陷十余丈九月丙申京师地震者再自东北
向西南行三十四年六月丙辰陕西地震三十五年七月乙卯松潘茂州汶川地震数日
三十六年三月戊辰京师地震七月又震三十七年六
月辛酉甘肃地震红崖清水诸堡压死军民八百四十余人圯边墩八百七十里裂东关
地四十年二月乙亥云南大理武定曲靖地大震次日
又震缅甸亦震五月戊戌大理曲靖复大震四十二年九月庚午山西河南地震四十三年
二月己卯扬州地震狼山寺殿塔倾圯八月乙亥楚
雄地震人民惊殒十月辛酉京师地震四十五年五月甲戌凤翔地震乙亥又震八月济
南地裂者二四十六年六月壬午京师地震九月乙卯
复再震畿辅山西州县十有七及紫荆关马水沿河二日偏头神池同日皆震四十八年
二月庚戌云南及肇庆惠州荆襄承天沔阳京山皆地
震熹宗天启元年四月癸丑延绥孤山城陷三十五丈入地二丈七尺二年二月癸酉济
南东昌河南海盗地震三月癸卯济南东昌属县八连
震三日九月甲寅平凉隆德诸县镇戎平虏诸所马刚双峯诸堡地震如翻坏城垣七千
九百余丈屋宇万一千八百余区压死男妇万二千余
口十一月癸卯陕西地震三年四月庚申京师地震十月乙亥复震闰十月乙卯云南地
震十二月丁未南畿六府二州地震扬州尤甚是月戊
戌京师又震四年二月丁酉蓟州永平山海地屡震乐亭地裂涌黑水高尺余京师地震
宫殿动摇有声铜缸之水腾波震荡三月丙辰戊午又
震庚申又震者三六月丁亥保定地震八月己酉陕西地震十二月癸卯南京地震六年
六月丙子京师济南东昌及河南一州六县同日震天
津三卫宣府大同俱数十震死伤惨甚山西灵邱昼夜数震月余方止摧城郭庐舍死人
民无算七月辛未河南地震九月甲戌福建地震十二
月戊辰宁夏石空寺堡地大震礮山石殿倾压死僧人是年南京地亦震七年宁夏各卫
营屯堡自正月己巳至二月己亥凡百余震大如雷小
如鼓如风城垣房屋边墙墩台悉圯十月癸丑南京地震自西北迄东南隆隆有声庄烈
帝崇祯元年九月丁卯京师地震三年九月戊戌南京
地震四年六月乙丑临洮巩昌地震五年四月丁酉南京四川地震十月丁卯山西地震

十一月甲寅云南地震六年正月丁巳镇江地裂七月
戊戌陕西地震八年冬山西地震九年三月戊辰福建地震七月丁未清江城陷十年正
月丙午南京地震七月壬午云南地震十月乙卯四川
地震十二月陕西西安及海拉同时地震数月不止边墙墩台及民屋悉圯十一年九月
壬戌辽东地震十二年二月癸巳京师地震十三年十
一月戊子南京地震十四年三月戊寅福建地震四月湖广地震五月戊子甘肃地震六
月丙午福建又震九月甲午四川地震十五年五月丙
戌两广地震七月甲申山西地震十六年九月凤阳地震屡震十一月丙申山东地震十七
年正月庚寅朔凤阳地震乙卯南京地震三月辛卯广
东地震】

山崩

△山崩

山崩 【移涌附 唐太祖武德七年七月嵩州山崩太宗贞观八年七月陇右山崩
武后垂拱二年九月己巳新丰县大风雨山涌出高
二十丈有池周三百亩池中有龙凤之形米麦之异永昌中华州赤水南岸大山昼日忽
风昏有声如雷移东数百步壅赤水压张村民三十余
家山高二百余丈水深三十丈坡上草木宛然玄宗开元十七年四月乙亥大风震电蓝
田山崩代宗大历九年十一月戊戌同州夏阳有山徙
于河上声如雷十三年郴州黄岑山摧德宗建中二年霍山裂宪宗元和八年五月丁丑
大隗山摧十五年七月丁未苑中土山摧僖宗干符六
年二月蓝田山裂光启三年四月维州山崩壅江水逆流 后唐明宗长兴三年七月夔
州赤甲山崩 宋太宗雍熙三年阶州福津县常峡山
圯壅白江水逆流高十丈许坏民田淳化二年五月名山县登辽山圯江水逆流真宗咸
平元年七月盩化军汾水涨坏北水门山石摧圯军士
有压死者二年七月庚寅灵宝县暴雨崖圯压居民死者二十二户三年三月大泽县三
阳砦崖圯四年正月成纪县山摧景德四年七月成纪
县崖圯五年九月丙寅华州少华山前阜头峯越八盘岭及谷摧陷于石子坡东西五里
南北十里溃散坟裂涌起堆阜各高数丈是夜初昏略
无风雨山上忽雾起有声地震动不食顷而山摧神宗熙宁元年泽州益阳县山裂出米
哲宗元佑元年十二月郑县界小敷谷山摧光宗绍熙
四年秋南岳祝融峯山自摧剑门关山摧五年十二月临安南高峯山自摧宁宗庆元二
年六月台州黄岩县有山自徙五十余里声如雷临海
县清潭山亦自移嘉泰二年七月建安县山摧开禧三年五月庚寅东阳县山七百三十
余峯同日崩嘉定六年六月丙子严州淳安县长乐乡

山摧九年黎州山崩度宗咸淳十年天目山崩 辽圣宗太平二年三月隗白山裂数步泉涌成流 元成宗大德十一年三月道州营道县暴雨山裂百三十余处仁宗延佑二年五月乙丑秦州成纪县北山移至夕川河明日再移平地突如土阜陷没民居四年七月成纪县山崩五年二月秦安县山崩七月盩厔县山崩八月伏羌县山崩成纪县暴雨山崩覆没畜产泰定帝泰定元年八月成纪县大雨山崩四年八月通渭县山崩顺帝元统元年八月巩昌徽州山崩九月秦州山崩十月凤州山崩十一月成纪县山崩秦州山崩二年八月鸡鸣山崩陷为池方百里至元二年五月秦州山崩四年六月信州路灵山裂七月巩昌山崩六年六月成纪县山崩至正元年七月惠州罗浮山崩三年六月秦州奉安县南坡崩裂七月巩昌山崩六年六月广州增城县罗浮山崩九年七月庚寅永春县南象山崩十年五月甲子龙兴盩州山崩数十处丙寅上高县蒙山崩十二年十月丙午赵城县霍山崩涌石数里前三日山鸣如雷十三年七月汾州白彪山坼十五年四月盩国敬亭麻姑华阳诸山崩十七年十月静江路城东石山崩十二月丁酉象山县鹅鼻山崩二十六年六月赣榆县吴山崩六月山阴县卧龙山裂七月丙寅同安县三秀山崩是月巩县山崩十一月辛丑蒲城县洛岸崩十二月庚午蒲城县洛水和顺崖崩二十七年六月沂州山石崩裂七月丙戌灵川县大藏山石崖崩 明太祖洪武六年正月壬戌夜伏羌高山崩英宗正统八月十一月浙江绍兴山移于平田是岁陕西二处山崩十三年陕西通渭平凉华亭三县山倾天顺四年十月星子山裂宪宗成化十六年四月巨津州金沙江北岸白石雪山断裂里许两岸山合山上草木如故下塞江流久之渐开六月长乐平地出小阜明年复涌一高山十七年十二月寿阳县城南山崩声如牛吼孝宗弘治三年六月河州山崩九年六月山阴萧山二县同日雨山崩十四年闰七月乌撒军民府大雨山崩十五年八月宣府合河口石山崩十八年六月河州沙子沟太雷雨石岸山崩移七八里崩处裂为沟武宗正德元年十二月即墨三表山石崩四年三月辽东东山大家峪山崩五年六月秦州山崩龙王沟口山亦崩六年七月夔州獐子溪骤雨山崩十三年五月云南黑盐井山崩井塞十五年八月赵州大雨山崩世宗嘉靖四年七月清源贾家山崩五年四月贵州苏屯山崩二十一年六月归州沙子岭大雷雨石崖崩裂塞江流二里许二十六年七月澄城麻陂山界头岭昼夜吼数日忽中断移走东西三里南北五里穆宗隆庆二年五月永盩州山崩四年八月湖州山崩成湖神宗万历二十五年六月泰山崩二十七年八月狄道城东山崩

山南耕地涌出大小山五高二十余丈三十三年八月镇江西南华山裂三十七年六月
甘肃南山崩熹宗天启三年闰十月仁寿长山声震如
雷裂七里宽三尺深不可测庄烈帝崇祯九年十二月镇江金鸡岭土山崩十七年秦州
有二山相距甚远民居其闲者数百万家一日地震两
山合居民并入其中】 山鸣 【唐太祖武德三年三月太行山圣人崖有声玄宗开元
二十八年六月安戎城东山鸣 元顺帝至正十年十
月乙酉安溪县后山鸣 明宪宗成化八年七月陇州北山吼三日裂成沟长半里寻复
合世宗嘉靖十二年峨眉山宋皇观山鸣震裂涌泉八
日】

○水

大水 【江海泛滥附 唐太宗贞观三年秋贝谯郛泗沂徐濠苏陇九州岛水四年
秋许戴集三州水七年八月山东河南四十州大水八
年七月山东江淮大水十年关东及淮海旁二十八州大水十六年秋徐戴二州大水十
八年秋谷襄豫荆徐梓忠绵宋毫十州大水十九年秋
沁易二州水二十一年八月河北大水泉州海溢驩州水二十二年夏沪越徐交渝等州
水高宗永徽元年秋齐定等十六州水二年秋汴定濮
毫诸州水四年杭夔果忠等州水五年六月河北大水六年六月商州大水秋冀沂密兖
滑汴郑婺等州水洛州大水毁天津桥显庆元年七月
宣州泾县山水暴出平地四丈四年七月连州山水漂七百余家麟德二年六月鄜州大
水咸亨二年八月徐州山水漂百余家上元三年八月
青州海溢齐淄等七州大水永隆元年九月河南河北大水二年八月如之武后文明元
年七月温州大水长寿二年河阳十一州水万岁通天
元年八月徐州大水神功元年三月括州水是岁河南十九州岛水圣历三年三月鸿州
水久视元年十月洛州水长安四年八月瀛州水中宗神
龙元年六月河北十七州大水二年八月魏州水景龙三年七月泮水溢九月密州水玄
宗开元三年河南河北水五年六月巩县大水八年邓
州三鸦口大水十年河南许仙豫陈汝唐邓等州大水十二年六月豫州大水八月兖州
大水十四年秋天下五十州水河南北尤甚十五年五
月晋州大水七月邓州大水是秋天下六十三州大水十七年八月越州大水十九年秋
河南水二十年秋宋滑兖郛等州大水二十二年秋关
辅河南十余州水三十七年泮袁江等州水二十八年十月河南十三郡水二十九年秋
河南北二十四郡水天宝四载河南睢阳淮谯四郡水
代宗广德二年河南诸州水大历二年秋湖南及河东河南淮南浙东西福建等道五十
五州水七年二月江州江溢十年七月杭州海溢德宗

贞元三年东都河南江陵汴扬等州大水八年秋自江淮及荆襄陈宋至于河朔四十余
州大水十一年十月蜀朗二州江溢十二年四月福建
二州大水十八年春申光蔡等州大水顺宗永贞元年夏熊武五溪溢秋武陵龙阳江溢
京畿长安等九县山水害稼宪宗元和元年夏荆南及
寿徐等州大水四年十月渭南暴雨六年十月鄜坊黔中水七年五月饶抚虔吉信五州
暴雨虔州尤甚八年六月京师大水九年秋淮南及岳
安宣江抚袁等州大水十一年六月润常湖陈许五州及京畿水十二年六月河北河南
大水洛邢尤甚河中江陵幽泽路晋隰苏台越诸州水
害稼十五年秋洪吉信沧等州水穆宗长庆二年七月河南陈许蔡等州大水四年夏襄
均复郢四州汉水溢秋河南及陈许二州水敬宗宝历
元年秋鄜坊二州暴雨兖海华三州及京畿奉天等六县水文宗太和二年夏京畿及陈
滑二州水河南郛曹濮淄青齐德兖海等州并大水三
年四月同官县暴雨宋亳徐等州大水四年夏江溢没舒州三县田浙东西宣歙江西鄜
坊山南东道淮南京畿河南江南荆襄鄂岳湖南大水
五年六月玄武江涨淮西浙东西荆襄岳鄂东川大水六年二月苏湖大水七年秋浙西
及扬楚舒庐寿滁和宣等州大水八年秋江西及襄州
水滁州大水开成三年夏陈许鄜坊鄂曹濮襄魏博等州大水五年七月镇州及江南水
武宗会昌元年七月江南大水宣宗大中十二年八月
魏博幽镇兖郛滑汴宋舒寿和润徐泗等州水十三年夏大水懿宗咸通元年颍州大水
四年闰六月东都暴雨七月东都许汝徐泗等州大水
九月孝义山水深三丈六年六月东都大水七年夏江淮大水秋河南大水十四年八月
关东河南大水僖宗干符三年关东大水昭宗光化三
年浙江溢 梁太祖开平四年十月滑宋许亳水 后唐庄宗同光二年秋水灾明宗长
兴三年七月诸州大水宋亳颍尤甚 晋高祖天福四
年七月西京大水八月甘陵大水六年兖濮水 周太祖广顺三年六月诸州大水 宋
太祖建隆四年九月徐州水开宝二年青蔡宿宋及真
定澶博洛齐颖陈亳许等州水三年郑澶郛淄济虢蔡解徐岳州水四年七月青徐二州
水五年绛和庐寿诸州大水六年秋大名府宋亳淄青
汝澶滑诸州水七年卫亳二州水九年三月淄州水太宗太平兴国二年六月忠州兴州
江涨濮州大水颍州水涨七月复州蜀汉二州江涨集
州江涨四年三月河南府水五年五月颍州水溢七月复州江涨七年四月耀密博卫常
润诸州水六月均州潁水均水汉江并涨汉阳江涨五
丈七月南剑州江涨九月梧州水涨九年七月嘉州江涨八月雅州江涨九丈新州江涨
雍熙二年八月瀛莫州大水三年六月寿州大水端拱

元年二月博州水五月英州江涨淳化二年七月雄州塘水溢嘉州江涨复州蜀汉二州江涨八月藤州江涨十余丈九月邛州蒲江等县山水暴涨是秋荆湖北路江水注溢真宗咸平二年十月漳州山水泛溢三年七月洋州汉水溢四年七月同州洿谷水溢夏阳县五年二月雄霸瀛莫深沧诸州及干宁军水景德二年六月宁州山水泛溢三年八月青州山水坏石桥四年六月郑州索水涨邓州江水涨南剑州山水泛溢八月横州江涨大中祥符二年七月徐济青淄大水八月凤州大水三年六月吉州临江军江水溢四年七月洪州筠袁江涨九月苏州吴江溢七年六月泗州水九年六月秦州独孤谷水坏长道县盐官镇城桥及廨舍七月延州洎定平安塞门栲栳四砦山水泛干兴元年正月秀州水十月己酉夜盐山无棣海潮溢是岁京东淮南路水仁宗天圣元年徐州水三年十一月襄州汉水坏民田四年六月剑州邵武军大水是月河南府郑州大水五年三月襄颖许汝等州水七月盐官镇大水六年七月扬真润三州江水溢是月雄霸州大水八月临潼县山水暴涨七年六月河北大水明道元年四月大名冠氏等八县水二年京师水景佑元年八月分宁县山水暴发四年八月越州大水庆历八年河北大水皇佑二年镇定大水四年八月鄜州大水嘉佑二年六月开封府界及京东西河北水七月湖北路水五年七月苏湖二州水七年宝州山水壤城英宗治平元年庆许蔡颖唐泗濠楚庐寿杭宣鄂洪施渝州光化军水九月陈州水神宗熙宁元年秋霸州山水溢保定军大水四年八月金州大水八年四月潭衡邵道诸州江溢九年十月海阳湖阳二县海溢元丰元年舒州山水涨七年青田县大水哲宗元佑八年畿内京东西淮南河北诸路大水绍圣元年曹濮陈蔡诸州水元符元年河北京东等路大水二年六月陝西京西河北大水是岁两浙苏湖秀等州水徽宗大观元年夏京畿大水十月苏湖水三年七月阶州江溢四年夏邓州大水政和五年六月江宁太平宣州水八月苏湖常秀诸郡水重和元年夏江淮荆浙诸路大水宣和元年十一月东南州县水六年河北京东两浙水高宗建炎二年春东南郡县水绍兴二年徽严二州水三年七月泉州水五年秋西川郡县水十四年五月婺州水兰溪县水侵县市中夜水暴至死者万余人十六年潼川东南江溢十八年八月绍兴府明婺二州水二十二年淮甸水二十三年金堂县大水潼川江溢宣州大水二十七年镇江建康绍兴府真太平池江洪鄂州汉阳军大水二十八年九月江东淮南数郡水二十九年七月福州水三十年五月于潜临安吉安山水暴出坏田庐溺死甚众三十一年八月建始县大水三十二年六月浙西

郡县山涌暴雨漂舍坏田覆舟孝宗隆兴二年七月平江镇江建康盩国府湖常秀池太平庐和光州江阴广德寿春无为军淮东郡皆大水干道元年六月常湖二州水三年六月庐舒蕲三州水八月湖秀二州上虞县水九月江西诸郡水四年七月衢州诸暨大水江盩建康水是岁饶信亦水五年七月建盩府瑞应场大滌山枣等山暴雨涌出六年五月平江建康盩国府温湖秀太平州广德军及江西郡大水八年五月南安军山水暴出九年五月建康隆兴府严吉饶信池太平州广德军水六月湖北郡县水淳熙五年六月古田县大水闰月阶州水兴化军及福清县海口镇大水六年夏衢州水秋盩国府温台湖秀太平州水七年五月分宜县大水八年五月严州大水绍兴五县大水是岁徽江二州亦水十年五月信州襄阳大水江东浙东数郡亦水九月吉州大水十一年五月阶州白江水溢建康府太平州水十二年六月婺州富阳皆水八月吉安暴雨发是岁鄂州自夏徂冬水浸民庐九月台州水十四年三月汀州水十五年五月鄂州大水江陵常德德安府复岳澧州汉阳军水祁门县羣山暴汇为大水漂田禾庐墓桑麻人畜什六七浮斃甚众六月建盩隆兴府袁抚州临江军水七月黄岩县水十六年四月新昌县山水暴作五月沅靖州山水暴溢汀州大水分宜县水阶州白江溢六月潼川府东南二江溢光宗绍熙二年三月盩化县水五月建盩州水福州水利州东江溢七月嘉陵江溢潼川崇庆府绵合果金龙汉州怀安石泉大安军鱼关皆水古松州江水暴溢三年五月潼川府东南江溢六月建平县水祁门县水七月仙居县大水复州荆门军水镇江三县亦水四年四月上高县水五月安丰军大水诸暨萧山宣城盩国县大水广德军属县及筠州进贤县皆水六月兴国军及靖安县水是夏江赣二州江陵府亦水七月丰城县水临江军水八月隆兴府水吉州水秋江西九州岛三十七县皆水五年五月石埭贵池泾县皆水秦州大水七月慈溪县水八月吉安县水平江镇江盩国府明台温严常州江阴军皆水是秋武陵江溢盩宗庆元元年六月黄岩县水七月临安府水二年秋浙东郡县大水三年九月绍兴府属县二婺州属县二皆水五年秋台温衢婺水六年五月建盩府严衢饶婺信徽南剑州及江西郡县皆大水嘉泰二年七月上杭县水三年四月江南郡邑水开禧元年九月淮东郡县水二年五月东阳县大水三年江浙淮郡邑水鄂州汉阳军尤甚嘉定二年五月连州大水六月和州昭化成州同谷阆州皆水三年四月新城县大水五月行都大水四年七月慈溪县大水五年五月蕲州水六月台州及建德诸暨会稽县水六年六月于潜大小钱塘临安余杭安吉皆水九

年五月行都及绍兴府严衢婺台处信饶福漳泉州兴化军大水十年冬蜀汉二州江没城郭十一年六月武康吉安大水十二年盐官县海失故道潮冲平野蜀山沦入海中十四年建康大水十五年七月萧山大水十六年五月江浙淮荆蜀郡水秋余杭钱塘仁和大水福漳泉州兴化军水十七年五月福建大水建昌军大水理宗绍定二年仙居县大水四年沿江水端平三年英德府昭州及襄汉江皆大水嘉熙元年饶信州水二年浙江溢淳佑二年绍兴府处婺州水七年福建水十年严州水十一年八月汀州山水暴至漂人民九月江陵水是年江浙多水饶州亦水十二年六月建宁府婺严衢信台处南剑州邵武军皆大水宝佑元年七月温台处信饶大水开庆元年五月婺州水是岁滁严州水景定二年浙东大水度宗咸淳七年五月诸暨大水是月重庆江溢者三十年三月庐州水八月临安府安吉武康水 辽圣宗统和十二年正月癸丑朔潮阴镇水漂溺三十余村十六年四月崇德宫所隶州县被水二十九年八月南京平州水开泰元年十二月诸道水灾太平五年三月鱼儿泺水一夕有声如雷越沙冈四十里别为一陂道宗大安八年十一月丁酉通州潦水害稼 金太宗天会二年秋泰州潦害稼宣宗兴定四年七月河南大水 元世祖至元元年真定顺天河闲顺德大名东平济南等郡大水四年五月应天大水五年八月亳州大水六年十二月献莫清沧四州及丰州浑源县大水十三年十二月济宁及高丽溇州水十四年十二月冠州永年县水十六年十二月保定路水十七年正月磁州永平县水八月大都北京怀孟保定东平济宁等路水十八年二月辽阳懿州盖州水十一月保定清苑县水二十一年六月保定河闲滨棣大水二十二年秋高邮庆元大水二十三年夏大都涿潞檀顺蓟五州汴梁归德属县杭州平江二路属县水二十四年九月东京谊静威远博索等处水二十五年七月胶州大水二十六年二月绍兴大水六月平滦路水二十七年正月无为路大水五月江阴州大水八月清远县大水二十八年二月常德路水八月婺州水九月平滦保定河闲三路大水二十九年五月龙兴路南昌新建进贤三县水六月镇江常州平江嘉兴湖州松江绍兴等路府水扬州宁国太平三郡大水华容县水三十年五月静安县大水十月平滦路水三十一年八月宁晋县水十月辽阳路水成宗元贞元年五月建康溧阳州太平当涂县镇江金坛丹徒等县常州无锡州平江长洲县湖州乌程县鄞阳余干州常德沅江澧州安乡等县水六月泰安州奉符曹州济阴兖州磁阳等县水七月辽东和州大都武卫屯田水九月庐州平江二郡大水二年五月平晋交河乐寿任邱

莫亭等县醴陵州水六月大都路益津保定大兴三县水古城获鹿藁城归信新安束鹿汝宁颍州济宁沛县扬庐岳澧四郡建康太平镇江常州绍兴五郡皆水八月棣曹二州水十二月潜江玉沙海甯胸山盐城等县水大德元年五月龙兴南康澧州南雄饶州五郡水六月溧阳江溢七月耒阳鄱县大水温州路平阳瑞安二州水十一月武陵县大水二年大名东昌平滦等路水三年八月河闲郡水四年五月保真二郡通蓟二州水六月睢州大水五年五月宣德保定河闲属州水海甯州水六月济宁般阳益都东平济南襄阳平江七郡水七月辽阳大宁路水八月顺德路水六年四月上都大水五月济南路大水六月广平路大水七年五月济南河闲等路水九年六月龙兴抚州临川三郡水七月玉沙县江溢峰州泰兴山阳水八月大名元城水十年五月雄灞二州平江嘉兴二郡水六月大名益都定兴等路大水七月吴江州大水十一年六月靖海容城束鹿隆平新城等县水十一月卢龙滦河迁安昌黎抚宁等县水武宗至大元年七月彰德卫辉二郡水三年七月循惠二州大水四年七月东平济宁般阳保定等路大水江陵松滋县桂阳临武县水仁宗皇庆元年六月大宁硕达勒达路水宋瓦江溢民避居于山岭之上二年五月辰州路沅陵县水延佑元年七月沅陵卢溪二县水八月肇庆武昌建康杭州建德南康江州临江袁州建昌赣州安丰抚州等路水二年七月郑州昌平香河宝坻等县水四年正月解州盐池水六年六月辽阳广宁沈阳永平开元等路及大名路属县水七年四月城父县水五月江陵县水七月上蔡汝阳西平等县水英宗至治元年六月霸州大水七月平谷渔阳邢台沙河魏石城等县大水临漳县漳水溢固安元氏宝坻清河山阳等州县水奇尔吉斯部江水溢八月雷州海康遂溪海水溢九月京山长寿汉水溢十月辽阳肇庆等郡水二年二月濮州大水闰五月睢阳亳社皆大水六月郟县新平上蔡水八月六安舒城水十一月平江路大水三年五月东安州水武邑水九月漳州建昌南康等郡水泰定帝泰定元年五月灞州固定州水九月馆陶县水十二月盐官州海大溢二年正月巩昌路水闰正月归信县大水四月房山范阳水五月檀州大水江陵公安水六月虞城碭山单父丰沛水八月霸州涿州永清香河大水三年正月恩州水六月大同县大水光州水七月肤施县水八月蠡州蒲城历阳含山水十一月三沙镇海溢十二月辽阳大宁路瑞州大水四年七月云安县水致和元年四月盐官州海溢六月南宁开元永平等路水七月广西两江诸州水文宗天历元年八月杭州嘉兴平江湖州建德镇江池州太平广德九郡水二年六月永平昌国诸屯

水至顺元年六月曹州高唐州水七月海潮溢没河闲运司盐二万六千七百引闰七月平江嘉兴湖州松江三路一州大水杭州常州庆元绍兴镇江盩国等路望江铜陵长林宝应兴化等县水大都保定大盩益都属州县皆水二年五月莫亭河渠彭水及德安屯田水十二月深晋二州水三年五月江都泰兴云梦应城等县水六月汾州大水顺帝元统元年六月关中水七月潮州大水二年正月须城济州济阴水二月永平路瑞州路水四月东平益都水五月镇江路水宣德大水九月吉安路水至元二年五月邓州大水三年二月绍兴大水五月贺州大水六月黄州及衢州常山皆大水四年五月永丰大水六月邵武大水五年五月长汀县大水七月光泽县大水六年二月京畿五州十一县及福宁州大水六月西安龙游二县大水八月卫辉大水十月宜阳大水至正元年汴梁钧州大水崇明通泰海溢二年四月仪封大水六月济南山水暴涨三年七月汴梁中牟扶沟尉氏洧川四县及滎阳泛水河阴大水四年五月霸州大水六月兖州及鄆陵通许陈留临颖等县大水七月东河阳谷汶上平阴西安大水七年五月黄州大水八年四月平江松江大水五月宝庆大水六月胶州大水七月高密大水九年七月公安石首潜江监利等县及沔阳府大水夏秋蕲州大水十年五月龙兴瑞州大水七月静江荔浦大水十一年夏龙兴南昌新建大水七月平晋文水大水静江路大水十二年七月西安县大水十三年夏丰润玉田遵化平谷大水七月丁卯泉州海日三潮十四年秋蓟州大水十五年六月荆州大水十六年山东大水十七年广平郡邑皆水秋蓟州四县大水十八年秋京师及蓟州惠州广西四县贺州皆大水二十年七月通州大水二十二年三月光泽县大水二十三年济源温县水二十四年三月孟州河内武陟水七月寿光高密水二十五年秋蓟州大水二十六年七月蓟州四县卫辉汴梁钧州大水 明太祖洪武三年六月溧水县江溢四年七月南甯府江溢五年嵯县义乌余杭山谷水涌人民溺死者众六年二月潮没崇明八年七月淮安北平河南山东大水十二月直隶苏湖嘉松常太盩及杭州俱水九年江南湖北大水七月湖广山东大水十年永平滦漆二水没庐舍七月北平八府大水十一年七月苏松扬台海溢十二年五月青田山水没县治十三年十一月崇明潮决十五年北平大水十七年河南北平俱水十八年八月河南又水江浦大名水二十三年襄阳沔阳安阳水二十四年十月北平河闲水二十五年开封十一州俱水二十六年十一月青兖济三府水二十八年德州大水成祖永乐二年六月苏松嘉湖水七月湖广江西水三年三月温县水八月杭州属县

水七年五月安陆州江溢六月寿州水决城是岁泰兴江岸沦于江者三千九百余丈九年正月高邮甓社等九湖及天长诸水暴涨六月扬州属县五江涨七月海甯潮溢是岁湖广河南水十年七月卢沟水涨坏桥堤十三年六月北畿河南山东水十四年夏南昌诸府江涨七月福甯延平邵武广信饶州衢州金华七府俱溪水暴涨辽东辽河代子河水溢十八年夏秋仁和海甯潮涌二十年五月广东诸府潮溢二十一年五月峩眉溪水涨八月琼州海溢二十二年七月黄岩潮溢仁宗洪熙元年顺天河闲保定滦州俱水宣宗宣德元年六七月江水大涨三年五月永甯卫大水七月北畿七府俱水五年七月南阳山水泛六年六月顺天保定真定河闲等二十九州岛县水八年六月江西濒江八府江涨九年正月沁乡沁水涨五月甯海县潮决六月顺天顺德河闲水七月辽东大水英宗正统元年六月顺天真定保定济南开封彰德大水二年九月湖广沿江六县大水四年五月京师大水顺天真定保定三府州县及开封卫辉彰德三府俱大水八月苏常镇及江甯五县俱水五年五月至七月江西江溢八月潮决萧山塘六年五月泗州水溢八年八月台州松门海门潮溢九年七月扬子江沙洲潮溢闰七月北畿七府及应天济南岳州嘉兴湖州台州俱大水十年夏福建大水河南州县亦大水七月延安卫大水九月广东卫所大水十一年太原兖州武昌大水十二年春赣州临江大水五月吉安江涨七月甯夏大水十四年四月吉安南昌临江俱水景帝景泰元年七月应天大水三年八月徐州济甯水南畿河南山东陝西吉安袁州俱大水五年六月扬州潮决七月苏松淮扬庐凤六府大水八月东兖济三府大水六年六月开封保定大水闰六月顺天大水武昌诸府江溢七年畿内山东水英宗天顺元年夏淮安徐州怀庆卫辉大水三年六月谷城景陵襄水泛涌四年夏湖北江涨北畿及开封汝甯大水五年崇明昆山嘉定上海潮决浙江大水六月七月淮安大水七年七月密云山水涨宪宗成化三年夏江夏江水决五年湖广大水六年六月北畿大水七年山东及浙江杭嘉湖绍四府海溢九年六月畿南五府及怀庆俱大水八月山东大水十一年五月湖广水十二年八月浙江及淮凤扬徐大水十三年二月河南大水十四年四月襄阳江溢五月陝州大水七月北畿山东水十八年七月昌平大水孝宗弘治二年七月顺永河保四府州县大水四年八月苏松浙江水五年南畿浙江山东水七年七月苏常镇三府潮溢十四年五月贵池水涨蛟出旁邑十二皆大水七月廉州及灵山海涨八月安甯池太四府大水十五年七月南京江泛武宗正德三年九月延绥庆阳大水五年九月安

寔太三府大水十一月苏松常三府水六年六月泛水涨十二年顺天保定河闲真定大水凤淮苏松常镇嘉湖诸府皆大水荆襄江大涨十五年江西大水十六年辽阳汤跣堡大水世宗嘉靖二年七月徐扬大水夏秋山东州县大水八月苏松常镇大水开封亦如之五年六月陝西五郎坝大水六年秋湖广水十六年秋两畿山东河南陝西浙江湖广水二十七年正月沂阳大水穆宗隆庆元年夏京师大水襄阳郟阳水三年闰六月真定保定淮安济南浙江江南大水四年八月陝西大水五年山东河南大水神宗万历元年七月荆州承天大水二年六月福建永安大水是岁海盐海大溢三年四月淮徐大水六月杭嘉寔绍海涌八月淮扬徐凤大水九月苏松常镇水七年五月苏松凤徐大水八月又水是岁浙江大水九年七月福安洪水踰城八月泰兴海门如皋大水十年正月淮扬海涨七月苏松六州县潮溢十四年夏江南浙江江西湖广广东福建云南辽东大水十五年五月浙江大水是岁杭嘉湖应天太平五府江湖泛溢十七年六月浙江海沸十九年六月苏松大水七月寔绍苏松常五府海溢九月泗州大水二十年夏秋真顺广大四府水二十一年五月邳州高宝大水二十二年七月凤庐大水二十三年泗水浸祖陵二十四年秋杭嘉湖大水二十九年八月沔阳大水三十年六月京师大水三十一年六月泰安大水八月泉州诸府海涨三十二年六月昌平大水七月永真保三府俱水三十五年六月黄州蛟起武昌承天郟阳岳州常德大水徽寔太严四府山水大涌六月京师大水三十七年九月福建江西大水四十一年七月京师南畿江西河南大水八月山东广西湖广大水九月辽东大水四十二年浙江江西两广俱水四十四年七月江西广东水熹宗天启三年顺天永平大水庄烈帝崇祯元年七月壬午杭嘉绍海嘯萧山尤甚三年山东大水四年六月又大水七年五月眉叩诸州县大水十年八月叙州大水十三年五月浙江大水】 河决 【支河决溢附 唐太宗贞观十一年九月丁亥河溢坏河北县及太原仓毁河阳中潭高宗永徽五年六月滹沱河溢六年六月洛水毁天津桥十月齐州河溢永淳元年洛水溢坏天津桥及中桥二年七月河溢八月滹沱河溢武后如意元年四月洛水坏永昌桥七月洛水溢八月河溢河阳县长寿二年棣州河溢圣历二年洛水坏天津桥中宗神龙元年七月洛水溢二年四月洛水坏天津桥玄宗开元四年七月洛水溢五年六月灋水溢八年六月谷洛溢入西上阳宫十年五月伊水溢六月博棣河决十五年七月洛水溢八月涧谷溢十八年洛水坏天津永济二桥十九年七月伊洛及支川皆溢天宝十三载灋洛溢代宗广德二

年洛水溢大历元年七月洛水溢十二年秋河溢德宗建中元年易水滹沱横流贞元二年东都河南河溢八年淮水溢十三年七月淮溢于亳州宪宗元和七年正月振武河溢毁东受降城十一年八月渭水溢十三年六月淮水溢文宗太和二年河决坏棣州城开成元年七月镇州滹沱河溢三年夏河决浸郑滑外城昭宗干宝三年四月河泛于滑州朱全忠决其堤因为二河散漫千余里 后唐庄宗同光三年七月洛水泛涨御河涨于石炭窑口开河故道以分水势巩县河决注仓廩 晋高祖天福四年七月伊洛瀍涧皆溢八月河决博平六年九月河决中都入于沓河十月河决滑濮郛澶州出帝开运元年六月河决滑州环梁山入于汶济三年六月河决鱼池七月河决杨刘朝城武德八月河溢历亭九月河决澶滑怀州又决临黄十月河决卫州又决原武 汉隐帝干佑元年四月河决原武五月河决滑州三州六月河决原武 周太祖广顺二年七月河渠泛溢 宋太祖建隆元年十月棣州河决二年孟州河决四年八月齐州河决干德三年开封河溢阳武塞门县河中府孟州并河涨又溢于郛州四年四月河溢郛州东阿县又决澶州观城县注大名又决滑州灵河县堤东注卫南县境及曹州南华县城七月河决茌泽八月宿州汴水坏堤淄州清河水溢五年卫州河溢开宝元年八月集州河涨二年七月下邑河决四年六月汴水决郛州河及汶清河皆溢注东阿县及陈空镇又决原武县蔡州淮及白露舒汝颍庐五水并涨五年河决澶州又决阳武之小刘村六年郛州河决扬刘口怀州河决获嘉县七月历亭县御河决七年安阳县河涨八年濮州河决郭龙村澶州河决顿邱县太宗太平兴国元年孟州河溢又涨于澶州开封汴水坏大窰堤三年五月怀州河决获嘉县北注又汴水决窰陵县境十月滑州灵河决四年三月河决宋城县又决汲县五年五月徐州白沟河溢六年河中府河涨陷连堤鄆延窰州并三河水涨溢七年三月京兆渭水涨六月河决临邑县七月大名府御河涨十月河决武陟县八年五月河大决滑州房村径澶濮曹济东南流入淮六月陝州河涨谷洛伊瀍四水暴涨鄆州河涨八月徐州清河涨是年夏及秋开封浚仪酸枣阳武封邱长垣中牟尉氏襄邑雍邱河水害民田九年八月延州南北河溢淄州孝妇河溢孟州河涨坏桥梁端拱元年七月磁州漳滏二水涨淳化元年六月孟州河涨二年四月京兆陝州河涨六月溢于浚仪县又决于宋城县又博州河涨又溢于亳州东流七月许州沙河溢三年河南洛水涨四年六月陇城县牛头河涨九月澶州河涨十月又决西北流入御河浸大名府至道二年六月瀍涧洛三水涨七月郛州河坏连堤四处宋

州汴河决谷熟县闰七月陝州河涨真宗咸平元年齐州清黄河溢三年五月河决郢州
王陵扫五年六月惠民河涨景德元年九月宋州汴水
决河决澶州黄龙扫三年应天汴水决南注亳州合浪宕渠东入于淮四年七月河溢澶
州壬坝扫大中祥符元年尉氏县惠民河决二年十月
京畿惠民河决三年九月河决河中白浮梁村四年正月河决通利军大名御河溢合流
坏城九月河溢于孟州五年五月河决棣州聂家口六
年六月保定军河溢七年八月河决澶州十月滨州河溢于定镇八年七月坊州河溢九
年九月河溢雄霸界天禧三年六月河决滑州历澶濮
鄆济单至徐州与清河合明年复决于西北隅仁宗天圣四年汴水决陈留堤又决京城
西贾陂入护龙河以杀其势六年八月河决楚王埽景
佑元年七月河决横陇扫康定元年二月河北黄御二河决并注于干宁军三年七月河
决馆陶县郭同口八月汴河绝流嘉佑二年淮水自夏
秋环浸泗州城三年七月京索广济河溢七年七月河决北京第五扫神宗熙宁元年河
决恩冀州八月决沧州饶安移县治于张为村七年洮
河溢十年七月河决曹村下扫澶渊绝流河南徙又东汇于梁山张泽泝又洺州漳河决
河 阳河涨元丰元年章邱河溢四年临河县小吴河
溢北流五年河决阳武原武七年七月馆陶河溢八月赵邢洺磁相诸州河溢是年漳河
决临漳县黄沁河溢怀州滏河决临漳县斛律口哲宗
元佑四年夏秋河涨元符二年京陝西河北河溢徽宗大观元年河北京西河溢二年黄
河决陷巨鹿县政和七年河决沧州 辽太祖元年四
月准塔河暴涨民庐田稼悉被其灾圣宗统和十一年七月己丑桑干羊河溢居庸关西
害禾稼殆尽奉圣南京居民庐舍多被水垫没者二十
七年七月甲寅朔潢土鄂罗木阴凉四河皆溢漂没民舍太平十一年夏五月诸河横流
皆失故道垫没民田及庐舍千有余里道宗太康八年
七月沙河溢永清归义新城安次武清香河六县伤稼 金熙宗天眷元年七月丁酉爱
新河溢坏民庐舍世宗大定八年六月河决李固渡水
溢入曹州十七年七月滹沱卢沟水溢河决白沟二十年七月河决卫州二十六年秋河
决卫州二十九年六月河溢曹州章宗明昌四年六月
河决卫州五年七月河决阳武灌封邱而东 元世祖至元二十年六月太原怀孟河南
等路沁河溢卫辉清河溢南阳府唐邓裕嵩四州河溢
十月涿州巨马河溢二十五年十二月太原汴梁二路河溢二十七年六月河溢太康县
八月沁水溢十一月河决祥符义塘湾成宗元贞元年
六月历城大清河溢二年九月河决河南杞封邱祥符宁陵襄邑十月河决开封大德元
年三月河溢归德徐州邳州宿迁睢宁鹿邑河南许州

临颍鄆城睢州襄邑太康扶沟陈留开封杞等县五月又决汴梁二年六月河决蒲口五年八月滦河溢六年五月东安州浑河溢七年六月修武河阳新野兰阳等县赵河湍河七里河沁河潦河皆溢八年五月河溢阳武获嘉祥符九年六月河决武阳思齐口八月河溢归德宁陵陈留通许扶沟太康杞县武宗至大二年七月河决归德又决汴梁封邱仁宗皇庆元年五月睢阳河溢二年六月陈亳睢三州开封陈留等县河决延佑元年六月范阳房山浑河溢二年六月河决郑州三年四月河溢泰和县六年六月河闲路漳河溢七年四月安丰庐州淮水溢八月文安大成二县滹沱河溢是岁河决汴梁原武英宗至治元年六月霸州浑河溢七月临漳县漳水溢二年五月仪封河溢泰定帝泰定元年六月大同浑源河溢真定滹沱河溢陕西黑水河溢七月固安州清河溢朝邑楚邱濮阳河溢九月延安路洛水溢二年三月咸平清澗二河合流失故道隳堤堰五月河溢汴梁六月冀宁汾河溢七月河决睢州九月开元路三河溢三年二月河决归德七月河决郑州又东安檀顺灞四州浑河决四年七月北山黑水河溢八月扶沟兰阳河溢又溢虞城县十二月夏邑县河溢致和元年三月河决碭山虞城二县文宗至顺元年六月河决长垣东明二县三年五月汴梁河溢顺帝元统元年五月河溢阳武六月黄河大溢二年二月滦河漆河溢六月山阳县淮河涨至元元年河决封邱三年七月丹沁二河涨与御河通汴梁兰阳尉氏及归德河溢六年七月整屋县河溢至正三年五月河决白茅口四年七月滦河溢五年七月河决济阴十月黄河溢八年正月河决济宁路十一年七月河决永城县十六年河决河阴县十七年漳河溢十九年九月河决任城二十三年七月河决寿张二十五年二月河决小流口达于清河二十六年河北徙上自东明曹濮下及济宁皆被害八月棣州大清河决肥水县西黄水泛滥 明太祖洪武七年八月高密胶河溢十一年十月河决兰阳十四年八月河决原武十五年二月河南河决三月又决朝邑七月溢滎泽阳武十七年八月河决开封二十三年正月河决归德七月决开封二十五年正月河决阳武二十七年三月宁阳汶河决三十年八月河决开封成祖永乐元年五月章邱漯河决八月安邱红河决二年九月河决开封七年浑河决固安八年五月浮糠河决八月河溢开封十二月河决汴梁十年七月保定河决十二年十月临晋涑河逆流决姚暹渠流入硝池十四年七月开封十四州县河决永平滦漆二河溢二十年夏秋河南北及凤阳河溢二十二年九月河溢开封仁宗洪熙元年六月白河决河西务白浮宋家等口临漳漳滏二河决真定滹沱河溢七月

容城白沟河涨浑河决卢沟桥东狼窝口宣宗宣德元年七月黄汝二水溢三年六月浑河决卢沟堤六年九月浑河决徐家等口河决开封九年六月浑河决东岸自白狼河口至小屯厂英宗正统元年夏河淮泛涨九月河决阳武原武荥泽三年阳武河决武陟沁决广平顺德漳决通州白河溢四年七月滹沱沁漳三河决饶阳献县卫辉彰德八月白沟浑河决安州堤九月滹沱河决深州五年河南河溢六年七月白河决武清瀋县堤八年六月浑河决固安十年十月河决山东金龙口阳谷堤十一年浑河溢固安十三年六月大名河决又决河南济南青兖东昌七月决汉唐二坝又决河南八树口景帝景泰三年六月河决沙湾白马头四年春夏河连决沙湾八月东袞济河涨六年闰六月顺天滦河溢七年六月河决开封河南彰德英宗天顺元年夏淮徐怀庆卫辉河决三年七月淮水决五年七月河决开封宪宗成化十三年九月淮水溢十四年九月河决开封十八年八月卫漳滹沱溢孝宗弘治二年五月河决开封黄沙冈抵红船湾入沁河武宗正德二年六月固安河涨世宗嘉靖五年六月徐沛河溢二十六年七月曹县河决穆宗隆庆三年七月河决沛县九年淮小溢自清河至通济闸及淮安城西淤三十三里决二坝入海莒沂郯城之水又溢出邳州四年七月沙薛汶泗诸水骤溢八月河决邳州五年又决邳州自曲头集至王家口神宗万历二年八月淮扬徐河溢三年五月淮大决八月河决高邮碣山及邵家口曹家庄四年正月高邮清水堤决九月河决丰沛曹单淮黄交溢五年闰八月徐州河淤淮河南徙决高宝诸湖堤六年六月清河溢十一年四月金州河溢十五年七月开封及陕州灵宝县河决十六年八月河决东光魏家口三十年五月成安永年肥乡安州深泽漳滏沙燕河并溢决三十二年八月河决苏家庄淹丰沛黄水逆流灌济甯鱼台单县四十一年六月通惠河决熹宗天启三年睢宁河决六年秋河决匙头湾倒入骆马湖庄烈帝崇祯五年六月河决孟津十五年六月汴水决九月河决开封朱家寨

【河清】唐高祖武德九年二月蒲州河清太宗贞观十四年二月陕州秦州河清十六年正月怀州河清十七年十二月郑滑二州河清二十三年四月灵州河清高宗永徽元年正月济州河清二年十二月卫州河清五年六月济州河清调露二年夏丰州河清玄宗开元二十五年五月淄州棣州河清肃宗干元二年七月岚州合河关河清四日宝应元年九月秦州至陕州河清德宗建中四年五月滑濮二州河清十四年闰五月滑州河清穆宗长庆元年九月灵州河清宣宗大中八年正月陕州河清 宋太宗太平兴国四年八月滑州黎阳县河清端拱元年二

月澶濮二州河清真宗大中祥符二年十一月陕西河清十二月河再清徽宗大观元年八月干窰军河清二年十二月陕州河清自是迄政和宣和诸路数奏河清 辽道宗寿隆四年三月黄河清 金卫绍王大安元年徐沛界黄河清宣宗贞佑二年冬陕州至卫州黄河清 元世祖至元十五年十二月河清成宗元贞元年闰四月兰州河清顺帝至正二十年十一月原武荣泽二县黄河清三日二十一年十一月孟津至曲垣河清十二月石州河清二十四年夏卫辉路黄河清 明成祖永乐二年十月蒲城黄河清十二月韩城黄河清景帝景泰五年正月龙门至芮城黄河清光宗泰昌元年八月兰州黄河清三日】 水赤 【唐武后长安中晋州祠水赤如血德宗贞元十七年福州剑池水赤如血懿宗咸通七年郑州永福湖水赤三日僖宗光启元年正月润州江水赤凡数日宋真宗大中祥符元年五月泰山王母池水变红紫色 明宪宗成化十三年三月山阴县涌泉如血孝宗弘治十四年八月融县河水红神宗万历二十二年四月南京正阳门水赤三日四十六年四月宣武正阳门外水赤一月四十七年四月宣武门响闸至东御河水赤庄烈帝崇祯十三年华阴渭水赤十五年达州濠水变血】 水黑 【唐德宗贞元四年自陕至河阴河水黑 宋真宗咸平元年五月抚州王羲之墨池水色变黑 明庄烈帝崇祯十年河南汝水变色深黑】 水影 【唐中宗神龙二年二月壬子洛阳城东七里地色如水树木车马历历见影月余乃灭长安街中往往见水影代宗大历末束鹿县中有水影长七八尺遥望见人马来往如在水中至前则不见水】 井溢 【唐武后长安初醴泉坊太平公主第井水溢又文水县武氏井溢中宗景龙四年三月京师井水溢玄宗开元二十二年八月清夷军黄帝祠古井涌浪二十九年亳州老子祠九井涸复涌 宋高宗绍兴十四年五月乐平县程氏家井水溢高数尺 元顺帝至正二十四年三月益都县井水溢而黄 明孝宗弘治十五年八月濮州井溢庄烈帝崇祯十年窰远卫井鸣沸三日乃止】 水鬪 【唐德宗贞元二十一年朗州熊武五溪水鬪僖宗中和三年秋汴水入于淮水鬪 宋高宗绍兴十四年五月乐平县田水吸聚平地高数尺自西行里南程氏家井水亦溢高数尺天矫如长虹声如雷穿墙毁楼二水鬪于杉墩十刻乃解 明神宗万历二十五年八月蒲州池塘涌波三四尺临晋濠水忽涨南北相向而鬪】 大雨水 【唐高祖武德六年秋关中久雨太宗贞观十五年春霖雨高宗永徽元年六月新丰渭南大雨宣歙饶常等州大雨水五年五月丁丑夜大雨麟游县山水冲万年宫玄武门六年八月京城大雨显庆元年八

月霖雨更九旬乃止总章二年六月冀州大雨咸亨元年五月丙戌大雨四年七月婺州大雨永淳元年六月乙亥京都大雨水秋山东大雨水
武后圣历二年七月丙辰神都大雨长安三年六月盩州大雨水中宗神龙元年四月同官县大雨水玄宗开元二年五月壬子久雨禁京城门
十六年九月关中久雨天宝五载秋大雨十二载八月久雨十三载秋大霖雨肃宗至德二载三月癸亥大雨至甲戌乃止上元元年四月雨讫
闰乃止二年秋霖雨连月渠窦生鱼代宗广德元年九月大雨水二年五月东都大雨永泰元年九月丙午大雨至丙寅大历四年四月雨至九
月五年夏复大雨六年八月连雨十一年七月戊子夜京师澍雨十二年秋京畿及宋亳滑三州大雨水德宗建中元年幽镇魏博大雨贞元二
年五月乙巳雨至丙申六月丁酉京城大雨八年七月幽州大雨徐州雨自五月至七月十一年秋大雨十二年四月岚州暴雨十九年八月己
未大霖雨宪宗元和二年六月蔡州大雨六年七月霖雨八年五月陈许大雨十一年五月京畿大雨十二月六月京师大雨八月壬甲雨至九
月戊子十五年二月大雨八月久雨宋沧景等州大雨穆宗长庆二年七月处州大雨四年夏苏湖二州大雨水郛濮曹大雨水敬宗宝历元年
六月雨至八月文宗太和四年夏郛濮曹等州大雨六年六月徐州大雨开成元年夏麟游暴雨毁九成宫四年秋西川及沧景淄青大雨水五
年七月霖雨宣宗大中十年四月雨至九月懿宗咸通九年六月久雨禁明德门僖宗干符五年秋大霖雨广明元年八月大霖雨昭宗天复元
年八月久雨 后唐庄宗同光三年六月至九月大雨废帝清泰元年九月连雨 周太祖广顺二年诸州大雨 宋太祖干德三年二月全州
大雨水七月蕲州大雨水四年八月衡州大雨水开宝元年六月二十三府州大雨水八月集州霖雨二年九月京师大霖雨五年五月京师诸
州皆大雨霖六年七月单濮大雨水八年五月京师大雨水六月沂州大雨水九年三月京师大雨水太宗太平兴国四年三月泰州大雨水五
年五月京师雨连旬不止九年八月淄州霖雨雍熙三年八月京师大霖雨淳化元年六月吉州大雨二年六月博州大霖雨七月昭信县大雨
三年十月上津县大雨四年六月陇城县大雨七月京师大雨五年秋开封宋亳陈颖泗寿邓等州雨水至道元年四月京师大雨二年七月广
南诸州大雨水真宗咸平四年六月京师大雨五年六月京师大雨大中祥符六年六月保安军积雨八年七月坊州大雨天禧四年七月京师
连雨弥月仁宗干兴元年二月苏湖秀三州大雨天圣四年六月京师大雨九月京东江淮闽浙诸州雨水景佑三年六月虔吉诸州久雨四年

六月杭州大风雨宝元元年建州正月至四月雨不止庆历八年七月卫州大雨水嘉佑元年五月丁未大雨乙亥雨坏社稷坛二年五月大雨不止水冒安上门四年八月霖雨六年七月河北京西淮南江浙四路霪雨闰八月京师久雨七年六月代州大雨水英宗治平元年京师自夏及秋久雨不止二年八月庚寅京师大雨神宗熙宁七年六月熙州大雨九年七月太原霖雨元丰七年怀州大雨水哲宗元佑四年夏秋霖雨八年自四月雨至八月昼夜不息绍圣元年七月京畿久雨二年九月以久雨罢秋宴三年七月久雨元符二年六月久雨徽宗建中靖国元年二月久雨崇宁元年七月久雨三年六月久雨四年五月京师久雨七月至九月所在霖雨大观三年七月阶州久雨宣和元年五月大雨水六年秋京畿恒雨钦宗靖康元年四月京师大雨五月至六月雨伤稼高宗建炎二年春霖雨绍兴元年行都婺州雨并坏城三年正月元日雨至二月七月四川霖雨至越岁正月四年六月霪雨五年三月霖雨行都九月雨至明年正月六年冬饶州雨水七年十月建业久雨八年三月雨至四月二十一年夏襄阳大雨十余日二十三年七月光泽县大雨二十八年六月兴利二州及大安军大雨水三十一年四月久雨三十二年六月浙西大雨水孝宗隆兴元年三月行都霖雨二年七月浙西江东大霖雨干道二年正月雨至四月三年八月江浙淮润霖雨六年五月连雨六十余日十一月连雨辛巳郊开云于圜丘百步外有霪雨八年五月赣州南安军及隆兴府吉筠州临江军皆大雨水六月四川郡县大雨水淳熙三年五月淮浙积雨八月行都大雨水四年五月建宁府福州南剑州大雨水八年四月雨五月久雨十一年六月龙泉县大雨水十五年五月淮甸大雨水十六年五月浙西湖北福建淮东利西诸道大雨霖六月镇江大雨水光宗绍熙三年五月壬辰常德大雨水己亥池州大雨水庚子泾县大雨水七月襄阳江陵大雨水四年五月镇江大雨水五年八月钱塘临安新城富阳于潜余杭大雨水宁宗庆元元年正月霖雨二月又雨至三月五月霖雨又七月雨至八月二年八月行都霖雨三年七月雨连月五年五月行都雨六月浙东霖雨至八月嘉泰二年六月福建路连雨至七月开禧元年七月利路霖雨十月行都霪雨至明年三月嘉定三年五月严衢婺徽州富阳余杭盐官新城诸暨淳安县大雨水四年八月霖雨至九月五年春霪雨浙东西六月雨至七月六年六月诸暨县大雨七年九月阴雨至十月九年四月六月大霖雨十年三月连雨至四月十月霖雨十一年六月浙西大霖雨十二年六月霖雨弥月十五年七月浙东西霖雨十六年五月浙西湖北江东淮东霖雨十

七年八月霖雨理宗端平三年三月蕲州大雨水度宗咸淳六年五月大雨水十年四月绍兴府大雨水 辽太祖神册二年六月幽州霖雨潦
圣宗统和十一年六月大雨水太平十一年五月大雨水道宗咸雍四年七月南京霖雨
太康八年七月南京霖雨 金章宗明昌元年七月霪
雨六年八月大雨有龙起于浑仪鳌跌台俄仆宣宗兴定元年秋霖雨哀宗天兴二年六月归德暴雨 元世祖至元九年六月京师大雨十四
年六月济甯路雨水二十三年六月安西路华阴县大雨二十四年九月太原河闲河南等路霖雨二十五年七月霸漈二州霪雨八月嘉祥鱼
台金乡三县霪雨九月莫献二州及保定路霪雨二十六年六月济甯东平汴梁济南顺德真定平滦棣州霪雨二十八年八月大名清河南乐
诸县霖雨九月河闲霪雨成宗大德七年六月辽阳大甯平滦昌国沈阳开元六郡雨水八年五月滑州浚州雨水九年六月博平堂邑雨水十
年六月满城清苑雨水武宗至大元年七月济甯路雨水真定路霪雨大水三年六月峡州大雨水四年六月大都三河潞县河东祁门怀仁永
平丰盈屯雨水仁宗皇庆元年隆兴路新建县雨水二年六月涿州范阳东安宛平固安霸州益津永清永安等县雨水延佑元年五月武陵县
雨水二年七月京师大雨三年七月婺源大雨水五年四月合肥县大雨水六年六月益都般阳济南东昌东平济甯等路曹濮泰安高唐等州
大雨水汴梁归德汝甯彰德真定保定卫辉南阳等郡亦大雨水七年六月棣州德州大雨水英宗至治元年东平东昌二路高唐曹濮等州雨
水八月安陆大雨三年六月永清县雨水七月灤州雨水泰定帝泰定元年五月陇西县大雨水隆庆路雨水六月益都般阳济南东昌东平济
甯等郡三十二县曹濮高唐德州等处十县霪雨陈汾顺晋恩深六州雨水七月真保河广等郡三十七县大雨水二年正月宝坻高要二县雨
水二月甘州路大雨水四月岷洮文阶四州雨水六月汲县宿州雨水十月鸣沙州大雨水四年八月中牟陈留开封三县邳宿二州雨水致和
元年六月河闲林邑县及益都济南般阳济甯东平等郡三十县濮德泰安等州九县雨水文宗天历二年六月东安通蓟霸四州及靖海县雨
水至顺二年四月潞城县大雨水顺帝元统元年六月京畿大雨水二年三月山东霖雨至元二年五月邓州大霖雨八月大都至通州霖雨三
年六月卫辉霪雨至七月六年七月南平县雨水至正二年秋彰德路霪雨三年四月至七月汴梁滎泽县钧州新郑密县霖雨四年夏汴梁兰
阳许州长葛鄆城襄城睢州归德鹿邑虞城霪雨八月益都霪雨五年夏秋汴梁祥符尉氏洧州郑州钧州亳州久雨河闲路霪雨八年五月京

师大霖雨新郑县霪雨九年七月高唐州大霖雨归德府霪雨浹旬十年二月彰德路大雨二十年七月高苑龟池二县大雨二十三年七月
河内修武武陟三县及孟州霪雨二十四年秋安邱县大雨二十五年秋密州安邱潞州汴梁许州及钧州密县霪雨二十七年秋彰德路霪雨
明太祖洪武四年七月龙游县大雨水十三年七月海康县大雨水二十三年冬山东二十九州岛县久雨惠帝建文元年三月苏家桥大雨平地水三尺成祖永乐元年三月京师霖雨七月建宁卫霪雨二年七月新安卫霪雨八月北京霪雨六年七月思明霪雨十二年九月密云后卫霪雨二十年正月信丰雨水坏城瞿城卫亦如之二十一年二月六安卫霪雨是岁建昌守御所淮安怀来等卫皆霪雨二十二年寿州赣州振武密云苏州南北畿及山东州县霪雨仁宗洪熙元年夏苏松嘉湖积雨闰七月京师大雨九月密云久雨英宗正统元年七月顺天山东河南广东霪雨四年夏居庸关及定州卫霪雨六年宁夏久雨七年青莱济淮凤徐雨五月至六月十一年春江西七府十六县霪雨十二年六月瑞金霪雨十三年秋宁都大雨景帝景泰三年永平兖州及大嵩等二十卫所久雨四年南畿河南山东十府一州自五月雨至八月五年杭嘉湖大雨六旬不止七月京师久雨六年北畿五府河南二府及云南大理诸府久雨七年两畿江西河南浙江山东山西湖广共三十府恒雨英宗天顺元年济兖青大雨阅月四年南阳雨自五月至七月七年五月淮凤扬徐大雨宪宗成化元年六月畿东大雨水八月通州大雨二年定州积雨坏城墩台堞八年凤阳大雨坏陵垣十二年七月京城大雨十四年八月凤阳大雨没民居以千计十八年怀庆诸府夏秋霪雨三月孝宗弘治三年七月南京骤雨坏午门城垣七年五月至八月义州等卫大雨八年五月南京阴雨踰月十年七月安陆霪雨十八年京畿六月雨至八月武宗正德元年七月凤阳诸府大雨十二年苏松常镇嘉湖大雨十六年京师久雨世宗嘉靖十六年京师自夏及秋雨不绝二十五年八月京师大雨三十三年六月如之四十五年九月郟阳大霪雨穆宗隆庆元年六月京师大雨辽东自五月至七月雨不止神宗万历元年七月霪雨十一年四月承天大雨水十五年苏松五月至七月霪雨二十四年杭嘉湖三府霪雨二十八年七月兴化蒲田连江福安大雨二十九年春夏苏松嘉湖霪雨三十二年七月京师霪雨城崩熹宗天启六年闰六月大雨连旬是岁辽东霪雨坏山海关内外城垣七年山东二十八州县积雨庄烈帝崇祯五年六月大雨八月又雨冲损庆陵九月顺天二十七县雨水十一年夏雨浹旬十二年十二月浙江霪雨十三年四月至

七月盩池诸郡霪雨十五年十月黄蘄德安诸郡县霪雨】

（臣）等谨按水利之大者首在河防自殷时河水屡决历周以后势渐南徙至赵宋河患益大始则合泗入淮继复归于北流迨金元闲夺汴泗以合于淮而河流遂不复北趋明代乃障之使出于徐所谓修筑堤防莫不因其决溢之势而为之备其迁徙故道详着于历代史志观其已往之迹而因势利导之方可见郑志专叙河清而河决则附于大水条下体例殊有未当今特另标河决一条叙次历代决溢之迹则知河势由北而南为天行所自至而千余年河防得失之故可因以识其梗概也

钦定续通志卷一百七十二

●钦定续通志卷一百七十三 灾祥略三

灾祥略 【三】

旱

火

风

○旱

旱 【唐高祖武德三年夏旱四年春不雨至七月七年秋关内河东旱太宗贞观元年夏山东大旱二年春旱三年春夏旱四年春旱九年秋剑南关东二十四州旱十二年吴楚巴蜀二十六州旱十七年春夏旱二十一年秋陕绛蒲夔等州旱二十二年秋开万等州旱高宗永徽元年京畿雍同绛等州大旱二年九月不雨至明年二月四年夏秋旱显庆五年春河北二十二州旱总章元年京师山东江淮大旱二年七月剑南十州旱咸亨元年春秋旱仪凤二年夏河南河北旱三年四月旱永隆二年关中旱永淳元年关中大旱二年夏河南河北旱武后永昌元年三月旱神功元年黄随等州旱久视元年夏关内河东旱长安二年春不雨至六月三年冬无雪至明年二月中宗神龙二年冬不雨至明年五月京师山东河北河南旱睿宗太极元年春秋旱玄宗开元二年春大旱十二年七月河东河北旱九月蒲同等州旱十四年秋诸道州十五旱十五年诸道州十七旱十六年东都河南宋亳等州旱二十四年夏旱代宗永泰元年春夏旱二年关内大旱大历六年春旱至八月德宗建中三年五月不雨至七月兴元元年冬大旱贞元元年春旱至八月灞浐将竭六年春关辅大旱夏淮南浙西福建等道大旱七年扬楚滁寿沔等州旱十四年春旱十五年夏旱十八年夏申蔡光等州旱十九年正月不雨至七月顺宗永贞元年秋江浙淮南荆南湖南鄂岳陈许等二十六州旱宪宗元和三年淮南江南江西湖南广南山南东西皆旱四年春夏大旱秋淮南

浙西江西江东旱七年夏扬润等州旱八年夏同华二
州旱十五年夏旱敬宗宝历元年秋荆南淮南浙西江西湖南及宣襄鄂等州旱文宗太
和元年夏京畿河中同州旱六年河东河南关辅旱七
年秋大旱八年夏江淮陕华等州旱九年秋京兆河南河中陕华同等州旱开成二年春
夏旱四年夏旱武宗会昌五年春旱六年春不雨冬不
雨至明年二月宣宗大中四年大旱懿宗咸通二年秋淮南河南不雨至明年六月九年
江淮旱十年夏旱十一年夏旱僖宗广明元年春夏大
旱中和四年江南大旱昭宗景福二年秋大旱光化三年冬京师旱四年春旱 宋太祖
建隆二年京师夏旱冬又旱三年京师春夏旱河北大
旱又河南河中府孟津濮郛齐济滑延隰宿等州春夏不雨四年京师夏秋旱又怀州旱
干德元年冬京师旱二年正月京师旱夏不雨是岁河
南府陕虢麟博灵州旱河中旱甚四年春夏京师不雨江陵府华州涟水军旱五年正月
京师旱秋复旱开宝二年夏秋京师不雨三年春夏京
师旱邠州夏旱五年春京师旱冬又旱六年冬京师旱七年京师春夏旱冬又旱河南府
晋解州夏旱滑州秋旱八年春京师旱是岁关中旱甚
太宗太平兴国五年二年正月京师旱三年春夏京师旱四年冬京师旱五年夏京师旱
秋又旱六年春夏京师旱七年春京师旱孟虢绛密瀛
卫曹淄州旱九年夏京师旱秋江南大旱雍熙二年冬京师旱三年冬京师旱四年冬京
师旱端拱二年五月京师旱秋七月至十一月旱是岁
河南莱登深冀旱甚淳化元年正月至四月不雨河南凤翔大名京兆府许沧单汝干同
郑等州旱二年春京师大旱三年春冬如之是岁河南
府京东西河北河东陕西及亳建淮扬等三十六州军旱四年夏京师不雨河南府许汝
亳淮商州旱五年六月京师大旱至道元年春京师旱
二年春夏京师旱真宗咸平元年春夏京畿旱江浙淮南荆湖四十六军州旱二年春京
师及广南西路江浙荆湖曹单岚州淮扬军旱三年春
京师及江南旱四年京畿正月至四月不雨景德元年夏京师旱三年夏如之大中祥符
二年春夏京师河南府陕西路潭邢州旱二年夏京师
江南诸路宿润州旱八年京师旱九年秋京师大名府澶相州旱天禧元年春秋京师旱
仁宗天圣二年春不雨五年夏秋大旱六年四月不雨
明道元年五月畿县久旱二年南方大旱景佑三年六月河北大旱皇佑三年恩冀诸州
旱嘉佑五年梓州路夏秋不雨七年三月以久旱罢春
宴英宗治平元年春京师踰时不雨郑滑蔡汝颍曹濮洺磁晋耀登等州河中府庆成军
旱二年春不雨神宗熙宁二年三月旱三年诸路旱六
月畿内旱八月卫州旱五年五月北京自春至夏不雨七年春夏河北河东陕西京东西

淮南诸路久旱九月诸路复旱洮河亦旱八年四月真
定府大旱八月淮南两浙江南荆湖等路旱九年八月河北京东西河东陕西旱十年春
诸路旱元丰二年春河北陕西京东西路郡旱三年春
西北诸路旱五年亢旱六年夏畿内旱哲宗元佑元年春诸路旱冬复旱二年春旱三年
秋诸路旱四年春京师及东北旱八年秋旱绍圣元年
春旱三年江东大旱四年夏两浙旱元符元年东南旱二年春景畿旱徽宗建中靖国元
年衢信等州旱大观二年淮南江东西诸路大旱政和
元年淮南旱三年江东旱宣和元年秋淮南旱四年东平府旱五年夏秦凤路旱是岁燕
山府路旱高宗建炎二年夏旱绍兴二年常州大旱三
年四月旱至七月五年五月浙东西旱六月江东湖南旱秋四川郡县旱六年夔潼成都
郡县及湖南衡州皆旱七年春旱六月又旱八年冬不
雨九年六月旱十一年七月旱十二年三月旱秋京西淮东旱十二月陕西旱十八年浙
东西旱绍兴府大旱十九年常州镇江府旱二十四年
浙东西旱二十九年二月旱秋江浙郡县旱三十年春阶成凤西和州旱秋江浙郡县旱
孝宗隆兴元年江浙郡县旱京西大旱二年台州春旱
兴化军漳福州大旱干道三年春四川郡县旱四年六月旱五年夏秋淮东旱六年夏浙
东福建路旱七年春江西东湖南北淮南浙婺秀州旱
夏秋江洪筠潭饶州南康兴国临江军尤甚九年婺处温台吉赣州临江诸军江陵府久
旱淳熙元年浙东湖南郡县及蜀关外四州旱二年秋
江淮浙旱三年夏常昭复随郢金洋州江陵德安兴元府荆门汉阳军皆旱四年春襄阳
府旱五年常绵州镇江府及淮南江东西郡县旱六年
衡永楚州高邮军旱七年湖南春旱诸道自四月不雨行都自七月不雨皆至九月绍兴
隆兴建康江陵府台婺常润江筠抚吉饶信徽池舒蕲
黄和浔衡永州兴国临江南康无为军皆大旱八年七月不雨至十一月临安镇江建康
江陵德安府越婺衢严湖常饶信徽楚鄂复昌州江阴
南康广德兴国汉阳信阳荆门长宁军及京西淮郡皆旱九年夏五月不雨至七月江宁
德安襄阳府润婺温处洪吉抚筠袁潭鄂复恭合昌普
资渠利阆忠涪万州临江建昌汉阳荆门信阳南平广安梁山军江山定海象山上虞嵯
县皆旱十年江淮建康府和州兴国军恭涪泸合金州
南平军旱十一年兴元府吉赣福泉汀漳潮梅循邕宾象金洋西和州建昌军皆旱十五
年舒州旱光宗绍熙元年蕲池州旱二年真扬通泰楚
滁和普隆涪渝遂高邮盱眙军富顺监皆旱简资荣州大旱三年夏郢阳和州大旱秋简
资普荣叙隆富顺监亦大旱四年绵州大旱简资普渠
合州广安军镇江江陵府信婺台州江东淮西旱江浙六月不雨至八月五年浙东西镇

江常秀江阴军大旱庐和濠楚为甚江西七郡亦旱宁
宗庆元三年潼利夔路十五郡旱金蓬普州大旱六年镇江常州大旱京襄皆旱嘉泰元
年浙东西郡县及蜀十五郡大旱二年浙西湖南江东
旱四年浙东西江西郡县旱开禧元年衢婺严越鼎澧忠涪大旱二年南康军江西湖南
北郡县旱嘉定元年夏旱二年四月旱浙西常润淮东
西江东湖北皆旱四年资昌普合州旱六年江陵德安汉阳军旱八年江浙淮闽皆旱行
都百泉皆竭淮甸亦然十一年淮郡及镇江建宁常州
江阴广德军旱十四年浙闽广江西旱十五年岳州旱理宗嘉熙元年建康府旱四年江
浙福建旱淳佑七年旱十一年闽广及饶州旱度宗咸
淳六年江南大旱十年庐州旱长乐福清大旱 辽穆宗应历十二年五月旱十六年五
月旱十七年四月旱景宗干亨二年四月旱圣宗统和
十六年四月旱道宗咸雍三年南京旱太康六年五月旱 金熙宗皇统三年陕西旱世
宗大定十二年四月旱十六年中都河北山东陕西河
东等十路旱章宗明昌二年五月桓抚等州旱秋山东河北旱三年绥德旱承安元年正
月不雨至五月二年正月不雨至四月四年五月旱泰
和三年四月旱五年夏旱卫绍王大安二年四月山东河北大旱三年山东河北河东诸
路大旱崇庆元年河东陕西山东南京诸路旱二年河
东陕西大旱至宁元年河东陕西诸路旱宣宗贞佑二年冬不雨至明年四月四年七月
旱兴定二年六月旱三年夏旱四年六月旱五年三月
旱元光元年四月京畿旱哀宗正大四年四月旱五年四月京畿旱 元世祖中统三年
五月滨棣二州旱四年八月真定及洺磁等州旱至元
元年二月东平太原平阳旱五年十二月京兆大旱八年四月灵仙广灵二县旱十三年
十二月平阳路旱十六年七月赵州旱十八年二月广
宁北京大定州旱二十三年五月汴梁京畿旱二十四年春平阳旱二十五年东平路须
城等六县安西路商耀干华等十六州旱二十六年绛
州大旱成宗元贞元年六月环州葭州及咸宁伏羌通渭等县旱七月肃宁乐寿二县及
泗贺二州旱二年八月大名开州怀孟武陟河间肃宁
旱九月莫献二州旱十月化州旱十二月辽东开元二路旱大德元年六月汴梁南阳大
旱九月丹阳金坛旱十二月曲沃县旱二年五月卫辉
顺德平滦等路旱三年五月荆湖诸郡及桂阳宝应兴国三路旱十月扬庐随黄等州旱
四年平棘白马二县旱五年六月汴梁南阳卫辉大名
等路旱九月江陵旱八年六月凤翔扶风岐山宝鸡三县旱九年七月饶阳汉川二县旱
八月象融柳三州属县旱十年五月京畿旱安西春夏
大旱武宗至大三年夏广平亢旱仁宗皇庆元年六月宾棣德三州及蒲台阳信等县旱

二年九月京畿大旱延佑二年春檀蓟濠三州旱夏巩
昌兰州旱四年四月德安府旱五年七月真定河间广平中山大旱七年六月黄蘄二郡
及荆门军旱英宗至治元年六月大同路旱二年十一
月岷州旱三年夏顺德真定冀宁大旱泰定帝泰定元年六月景清沧莫等州临汾泾川
灵台寿春六合等县旱九月建昌郡旱二年五月潭州
茶陵州兴国永兴县旱七月随息二州旱三年夏燕南河南十四州县旱七月关中旱四
年二月奉元醴泉顺德唐山邠州淳化等县旱六月潞
霍绥德三州旱八月藤州旱致和元年二月广平彰德等郡旱文宗天历元年八月陕西
大旱二年夏真定河间大名广平等四州四十一县及
峡州二县旱八月浙西湖州江东饶州池州旱十二月冀宁路旱至顺元年七月肇州兴
州东胜州及榆次潞阳等十三县旱二年霍隰石三州
阜城平地二县旱顺帝元统元年夏绍兴旱淮东西皆旱二年三月湖广旱四月河南旱
秋南康旱至元元年夏河南及邵武大旱二年蕲州黄
州浙东衢州婺州绍兴江东信州江西瑞州等路及陕西皆旱六月夏南雄路旱至正二
年彰德大同二郡及冀宁平晋榆次徐沟汾州孝义沂
州皆大旱秋卫辉大旱三年秋兴国大旱四年福州大旱五年曹州禹城大旱夏高密旱
六年镇江及庆元奉化州旱七年怀庆卫辉河东及岐
山祥符孟津皆大旱八年三月临淄县大旱五月四川旱十年夏秋彰德旱十一年镇江
旱十二年蕲黄大旱浙东绍兴台州旱十三年蕲黄及
浙东庆元衢婺江东饶州江西龙兴瑞州建昌吉安广东南雄湖广永州桂阳皆大旱十
四年河内孟州汴梁祥符泉永宝庆梧州皆大旱十五
年卫辉大旱十六年婺处二州大旱十八年春蓟州旱莒州滨州般阳淄川霍州鄆州岐
山春夏皆大旱十九年晋宁凤翔梧州象州大旱二十
年通州旱介休县四月至秋不雨宾州大旱二十二年河南洛阳孟津偃师大旱二十三
年济南贺州大旱 明太祖洪武三年夏旱四年陕西
河南山西及直隶常州临濠北平河间永平旱五年夏山东旱七年夏北平旱二十三年
山东旱二十六年大旱成祖永乐十三年凤翔苏州浙
江湖广旱十六年陕西旱宣宗宣德元年夏江西旱湖广夏秋旱二年南畿湖广山东山
西陕西河南旱七年河南及大名夏秋旱人年南北畿
河南山东山西春夏不雨九年南畿湖广江西浙江及真定济南东昌兖州平阳重庆等
府旱十年畿辅旱英宗正统二年河南春旱顺德兖州
春夏旱平凉等六府秋旱三年南畿浙江湖广江西九府旱四年直隶陕西河南及太原
平阳春夏旱五年夏秋南畿湖广四川府五州卫各一
及江西旱六年陕西旱南畿浙江湖广江西十五府州县春夏并旱七年南畿浙江湖广

江西二十余府州县卫大旱十年夏湖广旱十一年湖
广及重庆等府夏秋旱十二年南畿及山西湖广等七府旱十三年直隶陕西湖广七府
州夏秋旱十四年六月顺天保定河间真定旱景帝景
泰元年畿辅山东河南旱二年陕西四府九卫旱三年江西旱四年南北畿河南及湖广
三府数月不雨五年山东河南旱六年南畿及山东山
西河南陕西江西湖广三十三府十五卫旱七年湖广浙江及南畿江西山西十七府旱
英宗天顺元年夏两京不雨杭州宁波金华均州旱三
年南北畿浙江湖广江西四川广西贵州旱四年济南青州登州肇庆桂林甘肃诸府卫
夏旱五年南畿四府一州及锦衣等卫连月旱七年北
畿旱宪宗成化三年湖广江西及南京十一卫旱四年两京春夏不雨湖广江西旱六年
直隶山东河南陕西四川旱八年京畿顺德真定武昌
九年彰德卫辉平阳旱十三年四月京师旱真定河间长沙皆旱十五年京畿大旱顺德
凤阳徐州济南河南湖广皆旱十八年两京湖广河南
陕西十五府二州旱山西大旱十九年复旱二十年京畿山东湖广陕西河南山西俱大
旱二十二年六月陕西旱八月北畿及江西三府旱九
月温台大旱长沙诸府亦旱孝宗弘治元年南畿河南四川及武昌诸府旱三年两京陕
西山东山西湖广贵州及开封旱四年浙江二府广西
八府及洮州卫旱六年北直山东河南山西及襄阳徐州旱七年福建四川山西陕西辽
东旱八年京畿陕西山西湖广江西大旱十年顺天淮
安太原平阳西安延安庆阳旱十一年河南山东广西江西山西十八府旱十二年夏河
南四府旱秋山东旱十三年庆阳太原平阳汾潞旱十
四年辽东镇春至秋不雨十六年夏京师大旱苏松常镇夏秋旱十八年北京及应天四
十二卫旱武宗正德元年陕西三府旱二年贵州山西
旱三年江南北旱四年陕西旱七年凤阳苏州松江常镇平阳太原临巩旱八年畿辅及
开封大同浙江六县旱九年顺天河间保定庐凤淮扬
旱十一年北畿及兖州西安大同旱十五年淮扬凤三十六州县及临巩甘州旱十六年
两京山东河南山西陕西正月不雨至六月世宗嘉靖
元年南畿江西浙江湖广四川辽东旱二年两京山东河南湖广江西及大同嘉兴成都
俱旱三年山东旱五年江左大旱六年北畿四府河南
山西及淮凤旱七年北畿湖广河南山东山西陕西大旱八年山西及临洮巩昌旱九年
应天苏松旱十年陕西山西大旱十一年湖广陕西大
旱十七年夏两京山东陕西福建湖广大旱十九年畿内旱二十年三月久旱二十三年
湖广江西旱二十四年南北畿山东山西陕西浙江江
南湖广河南旱二十五年南畿江西旱二十九年北畿山西陕西旱三十三年兖州东昌

淮扬徐武昌旱三十四年陕西五府及太原旱三十五年山东旱三十七年大旱三十九年太原延安庆阳西安旱四十年保定等六府旱四十一年西安等六府旱穆宗隆庆二年浙江福建四川陕西及淮凤大旱四年夏旱六年夏不雨神宗万历十一年八月河东解池涸十三年久旱十四年久旱十七年苏松连岁大旱震泽为平陆浙江湖广江西大旱十八年四月旱二十四年杭嘉湖旱二十六年四月旱二十七年夏旱二十九年畿辅山东山西河南及贵州黔东诸府卫旱三十年夏旱三十四年夏亢旱三十七年楚蜀河南山东山西陕西皆旱三十八年夏久旱济青登莱大旱三十九年京师大旱四十二年夏不雨四十三年三月不雨至六月山东春夏大旱四十四年陕西旱秋冬广东大旱四十五年夏南畿亢旱四十七年梧州旱光宗泰昌元年辽东旱僖宗天启元年久旱五年真顺保河三伏不雨秋复旱七年四川大旱庄烈帝崇祯元年夏畿辅旱三年三月旱五年杭嘉湖八月至十月七旬不雨六年京师及江西旱十年夏京师及河东不雨江西大旱十一年两京及山东山西陕西旱十二年畿南山东河南山西浙江旱十三年两京及登青莱旱十四年两京山东河南湖广及宣大边地旱】

○火

灾火 【唐太宗贞观四年正月武德殿北院火二十三年三月甲弩库火高宗永徽五年十二月尚书司勋库火显庆元年九月恩州吉州火十一月饶州火武后证圣元年正月明堂火是岁内库灾万岁登封元年三月抚州火久视元年八月平州火中宗景龙四年二月凌空观灾玄宗开元五年十一月定陵寝殿火是岁洪州潭州灾十五年七月兴教门楼柱灾是年衡州灾十八年二月左飞龙厩灾十月东都宫佛光寺火天宝二年六月应天门观灾九载三月华岳庙灾十载八月武库灾肃宗宝应元年十二月大府左藏库火代宗广德元年十二月鄂州大风火发江中焚舟延民居大历十年二月庄严寺浮图灾德宗贞元元年江陵度支院火十三年正月东都尚书省火十九年四月家令寺火顺宗永贞二年七月洪州火宪宗元和七年六月镇州甲仗库火八年江陵大火十一年十一月元陵火文宗太和二年十一月昭德寺火三年十月仗内火四年三月陈许二州火十月浙西火十一月扬州海陵火八年三月扬州火五月飞龙神驹中厩火十月扬州市火十二月昭成寺火开成二年六月徐州火四年十二月干陵火扬州市火武宗会昌元年五月潞州市火三年六月神龙寺火万年县东市火六年八月三原县行宫幔城火僖宗干符四年十月圣善寺火昭宗大顺二年六月幽州市楼灾七月相国寺

佛阁灾 后唐明宗长兴二年四月汴州封禅寺火黎
阳县亦火 晋高祖天福三年十一月襄州火 周世宗显德五年四月杭州火 宋太
祖建隆元年宿州火二年三月内酒坊火三年正月滑
州甲仗库火开封通许镇火二月显义军营火五月相国寺火海州火干德四年二月岳
州衙署廩库火三月陈州潭州火是春诸州言火者甚
众八月衡州火五月建隆观火开宝三年八月辰州廩火五年七月忠州火七年九月永
成县火八年四月洋州火永城县火太宗太平兴国七
年八月益州西仓灾雍熙元年五月干元文明二殿灾二年九月楚王元佐宫火三年光
化军火端拱元年二月云安军威棹营火二年三月衡
州火淳化三年十月蔡州怀庆军营火十二月建安军城西火四年二月永州保安津舍
火飞焰过江烧州门及民屋真宗咸平二年四月池州
仓火景德元年正月平虏军营火四年十一月郢州火大中祥符元年正月甲仗库灾二
年四月升州火四年八月徐州草场火十月镇州城楼
战棚火七年雄州甲仗库火八年二月宗正寺火四月荣王元俨宫火延左承天祥符门
内藏库朝天殿干元门崇文院秘阁天书法物内香藏
库九年五月左天厩坊草场火天禧二年二月北宅蔡州团练使德雍院火三年春京师
多火六月永州军营火五年四月事材场火仁宗天圣
三年二月蕲州榷货务火五年四月寿宁观火七年六月玉清昭应宫火明道元年八月
禁中火延崇德长春滋福会庆崇徽天和承明文德八
殿景佑三年七月太平兴国寺火十月横龙水口料物场火宝元二年六月益州火康定
元年六月鸿庆宫神御殿火庆历元年五月庆州草料
场火三年十一月上清宫火四年三月五台山寺火六月开宝寺灵感塔灾七月燕王宫
火六年七月洪福禅院火八年正月江宁府火皇佑五
年正月会灵观火至和元年四月祥元观火二年并州太宗神御殿火嘉佑三年正月温
州火英宗治平四年十二月睦亲宫广亲宫火神宗熙
宁六年二月永昌陵上宫火七年九月三司火十一月洞真宫火九年十月鲁王濮王宫
火十年正月仙韶院火元丰元年八月邕州火四年六
月衡州火五年二月洞真宫火八年二月开宝寺火哲宗元佑元年三月宗室宫院火六
年十二月开封府火绍圣三年三月内尚书省火四年
七月禁中火元符元年四月宗室宫院火徽宗建中靖国元年六月集禧观火崇宁二年
六月中太乙宫火三年三月大内火政和三年四月苏
州火五月封州火京师大盈仓火是岁成都府大慈寺温州绛州皆火重和元年九月掖
庭大火钦宗靖康元年十二月尚书省火延礼祠工刑
吏部二年三月天汉桥火都亭驿火康门火高宗绍兴元年十月临安府越州大火十二

月越州火二年正月宣州火五月临安大火十二月行都大火三年九月行都关门外火四年正月行都火六年二月行都屡火十二月行都大火七年正月平江府火二月镇江楚真扬太平州火是岁临安火八年二月太平大火九年二月行都火七月温州大火十一年七月婺州大火九月建康火十二年二月镇江府太平池州及芜湖县火三月行都火四月又火十四年正月行都火十五年大宁监火九月行都火十七年八月建康火十二月静江火二十年正月行都火二十五年汴京宫室悉焚二十六年潭州南岳庙火二十九年四月镇江火十二月夔州大火孝宗干道元年正月泰州火是年春应城县廐驿火二年冬六合县武锋军垒火十二月婺州火三年五月泉州火五年十二月太室东北垣外民舍火七年十一月禁垣外阍人私舍火九年九月台州火淳熙元年十二月泉州火二年六月潭州南岳庙火八月严州火十一月丽正门内东庑灾是岁泸州火九月大内射殿灾四年十月鄂州南市火五年四月兴州沙市火十一月和州牧营火七年二月江陵府沙市大火八月温州试士火作于贡闈八年正月扬州火九月行都火九年九月合州大火十一年二月兴元府义胜军垒舍火十二年八月温州火十月鄂州大火十四年五月大内武库灾六月行都宝莲山民居火十六年九月南剑州大火光宗绍熙元年八月处州火十二月浦城县火二年四月行都传法寺火徽州大火五月金州火三年正月行都火十一月又火十二月鄂州火宁宗庆元二年八月永州火三年五月金州都统司中军垒舍火六月又火冬绍兴府僧寺火六年八月徽州火嘉泰元年三月行都大火二年六月临安火三年正月襄阳火十一月福州火四年三月行都大火四月临安梵天寺火六月盱眙军天长县禁军营火八月鄂州南市火开禧二年二月寿慈宫灾四月行都火嘉定二年八月信州火九月吉州火是年泸州大火十一月政和县火四年闰二月岷县浦桥火三月滁州火十月抚州火福州一夕再火五年五月和州火八年八月湖州火九年七月南剑州沙县火十一年二月行都火九月万松岭民舍火十三年二月安丰军故步镇火八月庆元府火十一月行都火十七年四月西和州焚军垒及民居六月岳州火理宗绍定元年三月行都火嘉熙元年六月临安府火淳佑元年徽州火十二年十一月行都火景定四年绍兴火临安大火恭宗德佑元年玉牒所灾 辽道宗太康元年二月祥州火五年十一月南京火大安七年六月端拱殿门灾 金熙宗皇统元年十一月稽古殿灾九年四月雷电有火入寝殿烧帷幔海陵贞元二年五月南京大内灾世宗大定二年闰二月神龙殿十六位焚延及太

和厚德殿四年十一月尚书省火二十年四月大宁宫
门火二十三年正月广乐园灯火焚延及熙春殿章宗泰和四年四月万宁宫端门灾卫
绍王大安二年十一月京师民周修武宅前渠内火出
高二尺焚板桥又旬日大悲阁幡竿下石隙中火出高二三尺人近之即灭凡十余日自
是都城连夜燔爇二三十处三年二月大悲阁灾火五
日不绝宣宗贞佑二年六月南京镇宝阁灾兴定二年京师屡火三年吏部火四年十二
月火五年十一月相国寺火哀宗正大三年三月有火
自吏部中出大如斛流行辗转人皆惊避逾时而灭天兴元年七月兵刃有火 元世祖
至元十一年十二月淮西正阳火十八年二月扬州火
成宗元贞二年杭州火大德八年五月杭州火九年三月宜黄县火十年武昌路火仁宗
延佑元年二月真州扬子县火三年八月重庆路火六
年四月扬州火英宗至治二年四月扬真二州火十二月杭州火三年五月奉元路行宫
正殿火上都利用监库火九月江都县火泰定帝泰定
元年五月袁州火三年六月宁州高市火七月奉新州辰溪县火八月杭州火四年八月
龙兴路火十二月杭州火文宗天历二年三月四川绍
庆彭水县火四月重庆路火七月江夏县火十二月江夏火三年二月河内诸县火顺帝
元统元年六月杭州火至正元年四月台州杭州火二
年四月杭州又火六年八月延平路火十年兴国路春夏火灾不绝二十年惠州路屡火
二十三年正月广西贵州火二十八年二月京师武器
库灾陕西有飞火自华山下流入张弼营中焚兵库器仗六月大都大圣寿万安寺灾雷
雨中有火自空而下殿脊东鳌鱼口火出佛身上亦火
起 明太祖洪武元年闰七月京师火烧永济仓三年二月大河卫火七月乙未宝源局
火甲子凤台门军营火四年十一月京师大军仓灾五
年二月临濠府火京师火毁龙骧等六卫军民庐舍七月永清卫军器库火十二月京师
定远等卫火十七年十二月潮州火二十一年二月历
代帝王庙火上元县治亦灾天界能仁二寺灾二十九年二月通州火三十年四月广南
卫火惠帝建文二年八月承天门灾成祖永乐四年十
二月瓯宁王邸第火十三年正月北京午门灾十九年四月奉天谨身华盖三殿灾二十
年闰十二月干清宫灾宣宗宣德三年三月东岳泰山
庙火六年八月武昌火天津右卫北城外火飞焰入城烧仓廩九年二月京城东南楼火
英宗正统二年二月西镇吴山庙火三年八月顺天贡
院火十二月韩府承运殿灾四年三月代府寝殿火七年正月广昌木厂火南京内府火
三月赵城娲皇寝庙火十年正月忠义前后二卫灾是
月太仓屡火五月忠义后卫仓复火通州右卫仓亦火十一月御花房火十一年秋武昌

火十二月周府灾十二年六月南京山川坛灾十三年
二月忠义前卫仓火十四年六月南京谨身奉天华盖三殿灾景帝景泰二年六月青州
废齐府火三年八月秦府火五年春南京火七年九月
宁府火英宗天顺元年七月承天门灾二年五月器皿厂火三年九月肃州火四年八月
光禄寺大烹内门火是岁楚府频火五年三月南京朝
天宫灾六年六月楚府火七年正月南京西安门木厂火二月贡院火宪宗成化二年九
月南京御用监火六年十一月江浦火九年七月东直
门灾十一年四月干清宫门灾十三年十一月太仓米麦岁久蒸浥自焚十八年八月合
州火楚州火十一月南京国子监火十二月器皿厂火
宁河王府火二十年正月钦天监火二十二年六月临海县灾孝宗弘治元年三月南京
内花园火十一月南京甲字库灾二年四月南京神乐
观火三年三月仪陇空中有红白二火焰长三尺四年二月礼部官舍火六年四月刑部
官舍火南京旧内灾八年三月镇东等堡跃火星如斗
毁公馆仓廩人马多毙十年四月阜平有火光长八九尺大如辘轴有声十一年自春徂
夏贵州大火毁官民房舍千八百余所死伤者六千余
人十月清宁宫灾十二年六月阙里圣庙灾十二月建阳县书坊火古今书板皆毁十三
年二月礼部火七月南城县空中有火乍分乍合下坠
十余丈有声毁军民庐舍又永宁卫雁尾山至居庸关石纵山东西四十余里南北七十
余里烧七昼夜闰七月福州城楼毁八月潯府火十一
月宁河府火十六年三月铁岭卫坠火如斗烧房屋二千五百余闲四月宽河卫仓灾九
月广宁卫城火十七年四月淮安火五月正阳门内西
廊火武宗正德元年二月郟阳火是岁宁夏左屯卫红气亘天既而火作六月大同平虜
城灾十一月临海县火七年三月峰县有火如斗自空
而陨毁官民房逸城外延及邱木又成山卫秦皇庙火是月文登大桑树燔而枝叶无损
五月至闰五月懿城路火三作九月玉山火八年六月
丰城县西南连陨火星如盆如斗既而火作至七月初始熄七月火陨龙泉悬十月饶州
及永丰浮梁火临江亦火九年正月干清宫灾十一年
八月黔阳火十二年正月清宁宫小房火四月裕陵神宫监火八月南昌火九月建昌火
十三年二月夷陵火八月献陵门楼灾延平火十四年
四月淮安新城火七月泰宁火十五年五月静乐火世宗嘉靖元年正月清宁宫后三小
宫灾二月南京针线厂火通州城楼火二年五月荣府
火九月秦府火四年三月仁寿宫灾玉德安喜景福诸殿燬五年三月赵府家庙火七月
有火球三大五六尺从北坠于东其光烛天六年三月
四库火八年十月大内所房灾十年正月大内东偏火四月兵工二部公廨火十三年六

月南京太庙灾十五年四月山西神机库火十八年二月
月赵州及临洛镇行宫俱灾磁州行宫灾六月皇城北鼓楼灾二十年四月宗庙灾毁成
仁二庙主二十五年五月盔甲厂火二十六年十一月
宫中火三十一年四月南京试院火三十五年九月杭州大火三十六年四月奉天华盖
谨身三殿文武二楼午门奉天门俱灾三十七年正月
光禄寺火三十八年正月前军都督府火四十年十一月万寿宫灾四十四年大明门内
西干步廊火穆宗隆庆二年正月浙江火三月干清坤
宁二宫俱灾五年二月南京广惠二仓火神宗万历元年十一月慈宁宫后舍火三年四
月工部后厂火五年十月禁中火十一月宗人府火十
一年十二月慈宁宫灾十二年二月无逸殿灾十二月又灾十五年五月司设监火十八
年三月辽东寨山儿堡火十九年十二月万法宝殿灾
二十一年六月太仓公署后楼有炮声火药器械俱烬二十二年五月天火燔铁岭卫二
十四年二月潞府门火三月干清坤宁宫灾二十五年
二月杭州火三月泗州大火盱眙火六月三殿灾十二月吏部文选司署火二十七年十
一月内府火二十八年三月南阳火二十九年正月铁
岭卫火八月大光明东配殿灾三十年二月魏国公赐第火十月孝陵灾十二月南海普
陀山寺灾三十一年九月通州漕艘火三十三年二月
御马监火五月洗白厂火九月昭和殿灾又官军于盔甲厂支火药年久凝如石用斧劈
之火突发声若雷霆刀鎗火煎迸射百步外军民死者
无数十一月刑部提牢厅火三十五年二月易州神器库火四月通州西仓火十月南京
行人司署毁三十七年正月庆府火三月武昌火六月
庆府火十月朝日坛灾三十八年四月正阳门箭楼火三十九年四月怡神殿灾四十一
年五月蜀府火四十三年四月黄花镇御沟火蜀府殿
庭火辽东长宁堡二月至五月火五发闰八月通州粮艘火九月湖口税廨毁四十四年
十一月隆德殿灾南城延喜宫灾四十五年正月东朝
房火十一月宣禧宫灾四十六年闰四月开原殷家庄堡台杆八同时烬又暖阁厂膳房
火九月茂陵灾四十七年四月盔甲厂火光宗泰昌元
年十月啁鸾宫灾熹宗天启元年闰二月昭和殿灾三月杭州火七月复灾二年五月旗
纛庙正殿灾三年七月南京大内左傍宫灾六年五月
王恭厂火五月朝天宫灾七月登州城楼火七年十月宁远前屯火庄烈帝崇祯元年四
月左军都督府火五月鹰坊司火丁字库火七月公安
县火二年十一月火药局火三年三月又火入月头道关火六年正月济南舜庙灾七年
九月盔甲厂火十一年四月新火药局火六月安民厂
火八月火药局又火】

○风

大风 【唐高祖武德二年十二月壬子大风拔木太宗贞观十四年六月乙酉大风拔木高宗咸亨四年八月己酉大风落太庙鸱尾永隆二年七月雍州大风宏道元年十二月壬午晦宋州大风拔木武后嗣圣元年四月丁巳宁州大风拔木永昌二年五月丁亥大风拔木中宗神龙元年三月乙酉睦州大风拔木二年六月乙亥滑州大风拔木景龙元年七月彬州大风发屋拔本八月宋州大风二年十月辛亥滑州暴风发屋三年三月辛未曹州大风元宗开元二年六月京师大风四年六月辛未京师陕西大风九年七月丙辰扬润暴风雨发屋拔木十四年六月戊午大风端门鸱尾落十九年六月乙酉大风二十二年五月戊子大风天宝十一载五月甲子东京大风十三载三月辛酉大风代宗永泰元年三月辛亥大风大历七年五月乙酉大风十年五月甲寅大风德宗贞元元年七月庚子大风六年四月甲申大风雨八年五月己未暴风发太庙屋瓦毁门阙官署庐舍十年六月辛未大风十四年八月癸未广州大风宪宗元和元年六月丙申大风三年四月壬申大风毁含元殿栏槛四年十月壬午天有气如烟臭如燔皮日昝大风而止五年三月丙子大风毁崇陵上宫衙殿鸱尾及神门戟竿八年六月庚寅京师大风雨毁屋飘瓦十二年春青州暴风自西北天地晦冥空中有数旌旗状屋瓦上有蹂蹠声穆宗长庆二年正月己酉大风霾十月夏州大风飞沙为堆高城堞三年正月朔大风霾四年六月庚寅大风毁延喜景风门文宗太和八年六月暴风坏长安县署及经行寺塔九年四月辛丑大风坠含元殿鸱尾拔殿庭树三坏金吾仗舍发城门楼观开成三年正月戊辰大风五年四月甲子大风五月壬寅如之七月戊寅如之武宗会昌元年三月黔南大风懿宗咸通六年正月绛州大风十一月己卯晦潼关大风山如吼河喷石鸣鸟乱飞重关倾侧十二月大风僖宗干符五年五月丁酉大风广明元年四月甲申京师及东都汝州大风四年六月乙巳太原大风雨昭宗光化三年七月乙丑洛州大风天复二年升州大风 汉隐帝干佑三年闰五月京师西北暴风雨至戴娄门外坏营舍瓦木吹郑门扉起拔大树 宋太祖干德二年五月扬州暴风三年六月扬州暴风开宝二年三月太原大风八年十月广州飓风九年四月宋州大风太宗太平兴国二年六月曹州大风四年八月泗州大风六年九月高州大风七年八月琼州飓风八年九月太平军飓风十月雷州飓风九年八月白州飓风端拱二年京师暴风淳化二年五月通利军大风三年六月丁丑黑风自西北起天地晦暝至道二年八月潮州飓风真宗咸平元年八

月涪州大风四年八月丙子京师暴风景德二年六月
甲午大风八月福州飓风三年七月京师大风四年三月甲寅夕京师大风大中祥符二
年四月乙未大风起京师西北连日不止五年八月京
师大风七年三月戊辰京师大风八年六月辛亥京师风起己位天禧二年正月永州大
风三年五月徐州利国监大风四年四月丁亥大风五
月乙卯暴风仁宗天圣九年十二月辛酉大风三日景佑元年六月无锡县大风九月甲
寅夜风自丑起有声摆木鸣条二年六月戊寅平明风
自未来皇佑四年七月丁巳大风嘉佑二年正月元日有风从东北来徧天有苍黑云神
宗熙宁四年二月京东自濮州至河北大风六年四月
馆陶县黑风九年十一月海阳潮阳二县飓风十年六月武城县大风七月温州大风雨
元丰四年六月邕州飓风七月泰州海风作静海县大
风雨丹阳县大风雨丹徒县大风潮五年六月朱崖军飓风哲宗元佑八年福建两浙海
风驾潮害田绍圣元年秋苏湖秀等州有风害田钦宗
靖康元年正月望夜大风吹沙走石二月戊申大风三月己巳夜大风声如叫怒十一月
丁亥大风闰十一月甲寅大风二年正月己亥狂风阴
云中如有火光长二丈余阔数尺二月乙酉大风三月己亥大风四月庚申朔大风辛酉
北风若寒高宗建炎元年正月丁酉大风十二月乙酉
大风绍兴二十八年七月壬戌平江府大风雨三十二年七月戊申大风拔木温州大风
坛屋覆舟孝宗隆兴元年浙东西郡县风水伤稼三年
八月大风雨干道二年八月丁亥温州大风雨驾海潮五年十月台州大风水八年六月
惠州飓风淳熙三年六月大风四年九月甲寅明州大
风六月福清县兴化军大风雨五年正月庚戌大风六年十一月鄂州犬风七年二月江
陵府大风十年八月辛酉雷州飓风光宗绍熙二年三
月瑞安县大风四年七月兴化军海风害稼五年六月丙子大风七月乙亥行都大风绍
兴府秀州大风驾潮秋明州飓风十月甲戌行都大风
宁宗庆元二年六月壬申台州暴风雨驾海潮六年三月大风嘉泰三年十月丁未暴风
十一月癸未大风四年正月乙亥如之开禧元年四月
乙卯九月庚戌大风嘉定元年九月乙丑大风二年二月戊子大风七月壬辰台州大风
三年八月癸酉大风四年闰月丁未大风六年十二月
余姚县风潮七年正月庚辰江州放灯黑云暴风忽作十年正月乙未大风十一月丁丑
大风十一年二月甲寅大风十月戊午大风十三年十
一月庚戌壬子大风十二月戊午大风十四年六月辛巳大风十六年秋大风十七年秋
福州飓风冬鄂州暴风理宗嘉熙二年风雹三年如之
淳佑十一年泰州风景定四年十一月福州飓风度宗咸淳四年闰月丁巳大风七年五

月绍兴府大风十年四月绍兴府大风 辽太祖神册
四年十月乌库哩部大风拔木毁舍至于十数日乃止太宗天显七年八月沿柳湖大风
覆舟会同八年三月癸辛夕白团卫村大风至曙风益
甚昼晦如夜圣宗开泰六年六月戊辰朔大风起兔儿山西昼暝大雷电而雨不止者踰
月七年五月丙申必伞河大风飘四十三人飞旋空中
良久乃堕里外无复生者扬沙蔽日昼晦道宗太康八年九月丁未藕丝淀大风 金熙
宗皇统九年四月壬申夜大风雨丁丑有龙鬪于利州
榆林河上大风海陵正隆五年二月镇戎德顺等军大风六年六月壬戌大风坏承天门
鸱尾世宗大定四年七月辛丑大风雷雨拔木八年五
月甲子北望淀大风雨雹二十二年五月庆都一夕大风蝗皆不见章宗明昌六年二月
大风震应天门右鸱尾坏泰和三年十月己亥大风四
年三月丁卯大风毁宣阳门鸱尾卫绍王大安三年二月乙亥夜大风吹清夷门关折崇
庆元年七月辛未有大风从东来吹帛一段高数十丈宛
转如龙坠于拱辰门内宣宗贞佑三年二月戊午大风三月戊辰大风霾兴定元年五月
乙丑河南大风三年四月癸未陕右黑风昼起声如雷
四年四月丁丑大风吹河南府署飞百余步哀宗正大元年正月戊午大风飘端风瓦四
年八月癸亥大风吹左掖门鸱尾坠丹凤门扉坏 元
世祖至元二十年正月延津封邱二县大风仁宗延佑七年八月延津县大风英宗至治
元年三月大同路大风走沙没麦田百余顷三年三月
卫辉路大风泰定帝泰定三年七月宝坻房山二县大风八月大都昌平等县大风四年
五月辉州大风九日文宗天历三年二月胙城新乡二
县大风顺帝至正元年七月广西雷州飓风二年十月海州飓风十三年五月浚州飓风
十四年七月襄垣县大风二十一年正月癸酉石州大
风二十四年黄岩州飓风二十七年三月庚子京师大风起自西北沙尘蔽天逾时风势
八面俱至终夜不止如是者连日自后每日寅时风起
万窍争鸣戌时方息至五月癸未止 明宣宗宣德六年六月温州飓风英宗正统四年
七月苏松常镇四府大风天顺二年二月暴风拔孝陵
树懿文陵殿兽脊梁柱俱摧三年四月顺天河闲真定保定广平济南连日烈风宪宗成
化十四年八月南京大风拔太庙树十五年八月大风
拔孝陵木二十一年五月南京大风拔太庙树摧大祀殿及皇城各门兽吻孝宗弘治三
年六月靖虏卫大风七年三月广宁诸卫狂风沈阳锦
州城仆百余丈武宗正德元年六月辛酉暴风二年闰正月癸亥卢龙迁安大风乙丑大
风坏奉天门右兽吻三年二月大同暴风三日九年二
月长乐狂风五月曲阜暴风毁宣圣庙兽吻十二年四月来宾大风十一月南京大风十

二月大理卫大风十三年三月庆符大风十六年十二月辛卯甘肃行都司狂风世宗嘉靖元年七月南京暴风雨郊社陵寝宫阙城垣兽吻脊阑皆坏五年陕西屡大风卷掣庙宇民居百数十家了无踪迹神宗万历十八年三月大名狂风天色乍黑乍赤二十六年十月癸亥喜峰路台西北楼内旋风作黑气冲天楼内有火光三十四年七月大风拔朝日坛树四十一年八月青州大风熹宗天启元年三月大风四年五月癸亥干清宫东丹墀旋风骤作内官监铁片大如屋顶者盘于空中殒于西墀若雷八月蓟州寒风杀人庄烈帝崇祯十四年五月南阳大风七月福州大风十五年五月保定广平诸县怪风麦禾俱伤十六年正月丁酉大风五凤楼前门闩风断三截建极殿榱桷折】

钦定续通志卷一百七十三

●钦定续通志卷一百七十四 昆虫草木略一

昆虫草木略 【一】

（臣）等谨按郑樵通志二十略殿以昆虫草木盖约释诗名物志尔雅补注本草外类而成之者也樵尝惜陆玑毛诗疏孙炎郭璞尔雅注张揖广雅曹宪博雅音释支离疏略乃积五六年之勤为虫鱼草木之学以其所得者传诗释尔雅补本草且会而同之以入通志然去留分并之闲颇未精当采诸本经别录者固不能尽即诗尔雅所载亦多遗忘筱簞■〈竹总〉笋仅详其二松柏枌桧乃阙其三百蔬未列瓠匏九谷不收粦麦鱣鲔则存鱣佚鲔虎貔则有虎无貔此其疏也混菑■〈廿富〉于萑茅之菑合芸台于夫须之台指刘杙为石榴名鷓鴣为鸚鹄抑又误矣其自相乖异者一雀麦也既以为巨句麦又以为牡姓草一葑苳也既以为菰蔣根又以为芫菁菜有莽竹有宿莽草何以皆属莽草也有飞生鼠有飞生虫何以皆名鼯鼠也樵盖搜罗未广而又失于考核故不能无舛错耳今所续纂汇考羣书参稽众说以补其遗兼匡其谬如原书所引方外迂诞之言炼石煮丹之法刊落无遗援据众家标举姓氏又古时字少每多假借并仍原文不加点窜亦多闻之助其行闲分注则用樵旧例云

草类

○草类

芩见诗毛传云草也陆玑疏云茎如钗股叶如竹蔓生一名腐肠别录有空肠内虚经芩黄文四名吴普谓之妬妇又谓之印头广雅玉篇谓之■〈廿妊〉蓍记事珠谓之苦督邮苏恭谓之■〈彳屯〉尾芩陶宏景曰圆者名子芩破者名宿芩

菅 【考菅与葢通郭传山海经葢亦菅字宋玉赋藁菅菅亦作葢】 一名白华诗东门之池可以沤菅又曰白华菅兮白茅束兮毛传云白华野菅也已沤为菅郑笺云菅柔忍中用茅比于白华为脆陆玑疏云菅似茅而滑泽无毛郭璞注尔雅白华野菅云菅茅属 【据李时珍曰茅有白茅菅茅黄茅香茅芭茅数种白茅俗呼丝茅本经所用茅根黄茅古名黄菅别录所用菅根香茅一名瑯茅禹贡所谓包匭菁茅芭茅即芒尔雅所谓葢杜荣菅茅尔雅所谓白华野菅此辨最核郑志不采尔雅白华句而谓茅之叶如菅故亦名地菅且改诗白华菅兮为白茅菅兮以就其说疏矣及诗以薺荼蓼尔雅蓼委叶此原田芜秽之草郑志及尔雅补注误以为茅针补注于蓼蕪芳下又云菅花可为苕帚尤非】

莠诗毛传孟子赵注并云似苗说文禾粟下生莠 【吴师道国策注口作禾粟下旁生草】 罗愿曰先儒不适言何物唯韦昭解鲁语云莠似稷而无实又韦曜问荅云甫田维莠今之狗尾然后此物方显李时珍曰莠草秀而不实故字从秀穗形象狗尾故俗名狗尾方士称为光明草阿罗汉草

蒲诗凡三见扬之水不流束蒲毛传云草也郑笺云蒲柳陆佃曰似莞而褊有脊生于水涯柔滑而温可以为席周官司几筵有蒲筵左传臧文仲妾织蒲是也

莠一名隐苾 【案隐或作藎苾或作忍字有通用借用今各依本书之旧】 见尔雅郭璞注云似苏有毛今江东呼为隐苾藏以为菹亦可瀹食

（臣）等谨案陶弘景注桔梗言其叶名隐忍可煮食郑志从之李时珍则据葛洪肘后方而言隐忍非桔梗乃芥苾苗芥苾苗甘可食桔梗苗苦不可食但郭于隐苾言似苏有毛陶于芥苾言似人参无毛且苾苾隐苾并见尔雅宜依郭注分为二物

莠一名苾草 【山海经作苾列仙传博物志作紫罗愿曰苾紫古字通】 见尔雅郭璞注云可以染紫广雅一名苾■〈廿戾〉周官染草注谓之紫荊别录一名紫丹吴普谓之地血李时珍谓之紫芙 【考苾草有■〈廿戾〉草之名见说文续汉书舆服志注急就篇释名并作緌即诗之采绿尔雅之王刍也罗愿以当此苾草误矣】 ■〈廿遯〉一名牡茅见尔雅郭璞注云白茅属邢昺疏云茅之不实者也

苾一名杜荣 【考释文云杜舍人作牡】 见尔雅郭璞注云今亡草似茅皮可以为绳索履屨也寰宇志谓之芭芒本草纲目谓之芭茅陈藏器曰芒今东人多以为箔又曰石芒生高山如芒而节短江西呼为折草

茺一名天蒿一名红一名茺古大者名藟见尔雅有山隰二种诗隰有游龙淮南子水草之始海间生屈龙屈龙生容华广雅茺茺■〈卅
頔〉马蓼也玉篇云茺马藻也别录天蓼一名石龙此隰草也管子其山之浅有茺与斥注元茺斥并古草名此山草也

莎一名蒿其实别名媿见尔雅【尔雅谓侯莎者侯维也说文及张揖子虚赋注云蒿侯者失其句读也玉篇又倒其文曰莎侯】夏小

正正月缙縞【尔雅疏引此文作媿蒿】传云縞也者莎随也【尔雅疏作■〈卅隋〉】缙也者其实也广雅云地毛莎■〈卅隋〉

也又云其蒿青蓑也【郑樵尔雅补注云即莎草或云即香附子亦名莎草根生块如实尔雅误以为实也如莎草之类皆无实考旧说皆合

云台夫须为一惟罗愿分台莎二条郑注亦疑莎草有二皆考之不精至以入须为云台郑志编入蔬类则谬益甚芸薹即蔬谱沛菜胡洽谓

之寒菜】别录谓之夫须天宝方曰水香棱唐本草云根名香附子即江表传之雀头香图经云苗名香棱根名莎结亦名草附子河南淮南名

水莎陇西谓之地藪根蜀郡名续草根亦名水巴戟又名三棱草李时珍曰俗人呼为雷公头

■〈卅揭〉车【一作藹】一名芎藭见尔雅及离骚王逸郭璞并云芳草广志云■〈卅揭〉车香味辛生彭城高数尺黄叶白花齐

民要术云凡诸树木虫注者煎此香冷淋之即辟也李时珍曰与今兰香零陵相类【郑樵尔雅补注云芸蒿误】

权一名黄华见尔雅郭璞注云今谓牛芸草为黄华黄叶似■〈卅牧〉菴邢昺疏云牛芸者芸类也【王氏谈录云芸香草也文丞

相家庭砌下有草如苜蓿摘之尤香公曰此乃牛芸尔雅所谓权黄华者校之香烈于芸】

（臣）等谨按郑樵尔雅补注以黄华为野决明误今别出之

艾一名冰台见尔雅郭璞注云今艾蒿博物志削冰令圆举以向日以艾承其影则得火诗毛传云艾所以疗疾别录一名医草埤雅谓之

灸草

繁一名幡蒿见尔雅孙炎郭璞注并云白蒿也尔雅又云繁由胡夏小正二月采繁传云繁由胡繁由胡者繁母也繁方勃也广雅云繁母

蒨勃也陆玕毛诗草木疏云幡蒿一名游胡北海人谓之旁勃【郑志白蒿即茵陈蒿白兔食之仙此本神仙服食经考服食经自谓旁勃不

谓茵陈弘景已正本经之误旁勃茵陈俱有白蒿之名寔二物也李时珍曰白蒿有水陆二种尔雅通谓之繁曰繁幡蒿即诗食野之苹今陆生

艾蒿也辛熏不美曰繁由胡即诗于以采繁左传苹蘩蒹藻之菜今水生萋蒿也辛香而美曰繁之丑秋为蒿则通指水陆二种而言春时各有种名曰藋曰萧曰萩此说亦仍前人之误繁无艾蒿之名苹则藋萧不可与繁混萋蒿即蒿萋萧即萩虽均有蒿名实非蒿也】

蔚一名牡蒿尔雅郭璞注云无子者别录在下品苏恭曰齐头蒿也李时珍曰秋开细黄花结实大如车前实而内子微细不可见故人以为无子也【诗匪莪伊蔚陆玑曰蔚牡蒿也八月为角角似小豆角锐而长一名马薪蒿苏颂曰陆云有子与郭小异今当用有子者为正李时珍曰别录牡蒿马先蒿原是二条陆玑所谓有子者乃马先蒿而复引无子之牡蒿释之误矣考马先蒿葛洪陶弘景作马矢蒿别录又谓之练石草一名烂石草苏恭曰俗谓之虎麻一名马新蒿李时珍曰蒿气如马矢故名马矢马先乃马矢字讹马新又马先之讹也】

■〈廿购〉一名蒿萋见尔雅郭璞注云蒿萋萋蒿也生下田初出可啖江东用羹鱼诗作萋毛传云萋草中之翘翘然【楚辞吴酸蒿萋不沾薄只王逸注云蒿繁草也萋香草也蒿萋木二物自唐孟诜食疗本草以尔雅繁由胡为萋蒿而说家遂通皤蒿为一以为特有水陆之分郑志并以鹿鸣之苹为萋蒿皆谬也】

萧一名萩见尔雅郭璞注云即蒿说同诗毛传庄子司马彪注陆玑诗草木疏云今人所谓荻蒿者是也或云牛尾蒿似白蒿许慎以为艾蒿非也【考萧与艾异而萧艾均有蒿名实非蒿也其牛尾蒿则李时珍曰色青不白细叶直上状如牛尾者得之】

（臣）等谨按尔雅补注云即青蒿也或云牛尾蒿今药家谓之青葙子考青葙花叶似鸡冠嫩苗似苋故李时珍谓之野鸡冠又谓之鸡冠苋乃以青葙当萧萩误矣

藟一名牛■〈廿頽〉【作藟者误】见尔雅郭璞注云今江东呼草为牛■〈廿頽〉者高尺余许方茎叶长而锐有穗穗闲有华华紫缥色可淋以为饮李时珍曰茺蔚花红紫色亦有微白色者茎叶子穗皆一样诸家误分为二物陈藏器曰茺蔚人呼为臭草又曰璠菜似益母苏颂曰茺蔚实似鸡冠子即益母之白花者乃尔雅所谓菴是也闺阁事宜云紫花者为野天麻陈藏器曰天麻似马鞭草子如青葙子孙思邈千金方云天麻草茎如火麻花如鼠尾花即益母之紫花者乃尔雅所谓藟是也菴藟名本相同但以花色分别之【郭璞独指白花者为益母咎殷谓白花者非益母皆欠详审宋人重修本草以天麻草误注天麻尤为谬失】菴亦见尔雅毛茺郑康成作騮刘歆李巡谓之臭秽本

经别名火欂近效方谓之土质汗李时珍又谓之猪麻【魏博士周元明以为庵闾非也郑志合诗采蓴尔雅蓴菜与牛■〈廿頹〉为一列羊蹄之下盖因诗郑笺蓴牛■〈廿頹〉及陆蔬遂今人谓之羊蹄而误不知陆可从郑不可从也】

（臣）等谨按郑志止载白花一种而异名亦复不具今详着之

藜一名狗毒见尔雅樊光曰俗语苦如藜钩一名芡见尔雅郭璞注云大如拇指中空茎头有台似蓴初生可食邢昺疏云蓴类也说文云味苦江南食以下气是也别录名苦芡造化指南云大者名苦藉其无花实者名地胆草李时珍又谓之苦板

（臣）等谨按此与芡了不相似而郑志果类及尔雅补注合为一条谬矣今别出之

藟一名蘆见尔雅郭璞注云作履苴草邢昺疏云即蒯类也郑樵补注云苴草也可为屨生鹵地说文■〈廿魯〉或从藟云草也可以束

莽一名马帚见尔雅郭璞注云似着可以为扫帚邢昺疏云今俗谓著莽夏小正七月莽秀传莽也者有马帚也广雅马帚屈马第也本经有蠹实李时珍曰蠹乃荔字之误尔雅莽马帚此即荔草谓其可为马刷故名马帚今河南北人呼为铁扫帚

■〈廿廡〉一名鼠莞见尔雅郭璞注云亦莞属也纤细似龙须可以为席蜀中出好者别录有名未用有龙常草云生河水旁状如龙鬣

李时珍曰俚俗呼为粽心草尔雅■〈廿廡〉鼠莞恐即此盖龙须之小者尔

（臣）等谨按郭注纤细似龙须则鼠莞乃莞之小者非即龙须也神农本经明言石龙鬣一名龙须而陶弘景言龙鬣似龙须但多节尔

似以为二物郑志及尔雅补注因解鼠莞为龙须皆未详考本经与尔雅注也今别出之

莞一名苻藜其上谓之蒿见尔雅郭璞注云今西方人呼蒲为莞蒲蒿谓其头台首也今江东谓之苻藜西方亦名蒲中茎为蒿用之为席

诗下莞上簟郑笺云莞小蒲之席也孔疏云尔雅某氏注曰本草云白蒲一名苻藜楚谓之莞蒲广雅葱蒲【考汉书东方朔传注作葱蒲】

莞也【别录及郑志并合白芷为一盖因说文蕒■〈廿器〉楚谓之藜齐谓之苴而误遂改旧说白蒲为白芷也不知芷有萨名苻藜无芷

名也白蒲可以为席白芷岂可以为席乎本经有白芷无白蒲者疑后人妄改也一说莞即灯心草又云即芄兰皆非也或云莞苻二字成文呼

莞蒲者蒲苻音近晋书蒲洪改姓为苻其证也】

蓍一名王蓍见尔雅郭璞注云王帚也似藜其树可以为扫帚江东呼之曰落帚邢昺疏云此即藜之科大为树可以作帚蓍者本经上品

地肤陶弘景谓茎苗可为埽帚苏恭曰北人名涎衣草大明曰即落帚子也苏颂曰其苗即独帚也李时珍又谓之白地草云尔雅箭王萐即此

【尔雅补注云王萐椶櫚也郑志以为椶櫚之小而无须者而入木类误矣事物原始以诗南山有台之菜为一名落帚亦非也】

大菊一名蘧麦见尔雅郭璞注云一名麦句姜即瞿麦郭璞补注云丛生茎细弱今人多植庭院闲其花与叶皆可爱故有南天竹之名本
经瞿麦一名巨句麦李时珍亦谓之南天竹草 【此条注疏本草注郑志皆误郭云一名麦句姜乃巨句麦之误麦句姜是本经天名精之别名苏恭所谓其味甘辛故有姜称尔雅之茆蓺豕首也邢疏于茆蓺下引本经麦句姜于大菊下引本经巨句麦是矣然不敢驳郭注大菊一名麦句姜之误且从释文而改广雅以凑合之不知广雅误认陵苕为蘧麦未尝误认麦句姜为蘧麦也广雅误以蘧麦当茆蓺陵苕陶弘景因谓紫葳是瞿麦根不知本经紫葳一名陵苕一名茆华即诗苕之华尔雅苕陵苕吴普谓之瞿陵者也郑志于瞿麦下引尔雅齋雀麦乃承日华本草之误又重出雀麦一条而讹杜姥草为牡姓草不知雀麦即王焘外台秘要之牛星草也】

櫚一名乌阶见尔雅郭璞注云即乌把也子连相着状如把齿可以染皂邢昺疏云今俗谓之狼把 【郑注作稂■〈禾巴〉】 是也

【陈藏器曰狼把草与秋穗子并可染皂又曰郎耶草高三四尺叶作鴈齿如鬼钗苗李时珍曰狼把草即郎耶草也闽人呼爷为郎罢则狼把当作郎罢乃通若如李言则与郭注如把齿之说不同其云可以染皂则一也时珍又曰方士言此草即鼠尾草功用亦近之但无的据耳据孙炎郭璞陶弘景陈藏器李时珍并言鼠尾可染皂似即乌阶但郭不言乌阶即鼠尾而藏器分鼠尾狼把郎耶为三因别载之】

■〈木〈藿上又下〉〉一名橐含见尔雅释文及石经作攬又櫚乌阶石经亦作攬则橐含即乌阶也 【尔雅又云■〈木〈藿上又下〉〉橐含郭璞郑樵注俱未详考释文及石经作攬又櫚乌阶石经亦作攬或一物而异名欤】

蓼一名虞蓼见尔雅孙炎注云泽之所生郭璞注云虞蓼泽蓼苏恭曰水蓼生下湿地旁叶似马蓼大于家蓼茎赤色水授食之胜于蓼子

啮一名苦堇见尔雅郭璞注云今堇葵也叶似柳子如米泔食之滑诗堇荼如飴大戴礼夏小正二月荣堇小戴礼内则堇苴粉榆毛戴二传及陆氏释文并云堇菜也仪礼公食大夫礼翎苕有滑郑注云堇苴之属说文堇草也根如芥叶如细柳蒸食之甘

藟一名山莓见尔雅郭璞注云今之木莓也实似藟莓而大亦可食郑樵补注云树生其子可食俗呼桑莓陈藏器谓之悬钩子大明谓之树莓吴瑞谓之沿钩子【李时珍曰此类凡五种一种藤蔓繁衍者俗名割田藟即本草蓬蘽也一种蔓小于蓬蘽者俗名插田藟即本草覆盆子尔雅所谓葶藶益也又一种蔓小于蓬蘽者俗名■〈廿耨〉田藟即尔雅所谓藟藟也一种就地蔓生者即本草蛇莓也一种树生者今人亦通呼为藟子即尔雅所谓山莓陈藏器本草所谓悬钩子者也孟诜谓覆盆江东名悬钩子大明谓树生者是覆盆子并误今按郑志果类止引葶藶益藟藟两条而从大明说以树生者为覆盆子是误以山莓为藶益也陶弘景以蓬蘽为根覆盆为实马志苏颂以蓬蘽为苗覆盆为子苏恭以为一物亦并误也】

藟一名大苦见尔雅【藟诗作苓邢昺曰音义同】孙炎郭璞并云甘草沈括梦溪笔谈云此乃黄药也其味极苦谓之大苦非甘草也宋开宝本草有黄药子图经云施州谓之赤药纲目自木部移入草部谓之木药子（臣）等谨案说文藟大苦也昔甘草也分释凿然故尔雅补注云沈辨甚明而郑志尚沿旧说今补正之

苻一名鬼目见尔雅郭璞注云今江东有鬼目草茎似葛叶圆而毛子如耳珰也赤色丛生郑樵补注云茎叶如苦耽实似耳珰儿童或食之本经上品有白英陶弘景曰疑即斛菜花别录有名未用有鬼目云一名来甘实赤如五味弘景曰俗呼白草子苏恭陈藏器曰白英鬼目草也李时珍曰俗呼排风子吴志孙皓传天纪三年有鬼目菜生工人黄耆家依缘枣树长丈余茎广四寸厚三分东观按图名鬼目作芝草遂以耆为侍芝郎即此物也

拔一名茺葛见尔雅郭璞注云似葛蔓生有节江东呼为龙尾亦谓之虎葛细叶赤茎郑樵补注云其叶似凌霄花多蔓延篱落陶弘景曰

五叶莓一名茺草苏恭谓之乌藟莓李时珍谓之赤葛又谓之五爪龙又谓之赤泼藤

芫一名东蠡见尔雅郑樵补注云薜荔也【考广韵芫有刚杭二音并引尔雅此句集韵草名叶似蒲丛生居郎切】

薜一名牡■〈廿赞〉见尔雅字典云即薜荔管子在五臭之内楚辞王逸注云薜荔香草无根缘物而生山海经作藟荔云小华之山其草有藟荔状如乌韭而生于石上亦缘木而生食之已心痛【考说文作藟藟盖传写者失之系传作藟厯】陈藏器谓之木莲【考苏颂谓薜荔络石极相类茎叶粗大如藤状木莲更大于络石其实若莲房则木莲乃薜荔之尤大者也】又尔雅薜一名庾草【释文庾字或作

■〈廿庚〉】 郑樵补注云藤生蔓延墙树闲花生颇似薜荔 【考集韵以薜■〈廿庚〉二字为草名广韵作百莢盖薜字韵书有去入二声尔雅释文概从入声也】

帛似帛布似布华山有之见尔雅郭璞注云草叶有象布帛者因以名云郑樵补注云必藤蔓之类

蕘一名牛唇见尔雅郭璞注云毛诗传曰水葛也 【考诗集传作水葛】 如蕘断寸寸有节拔之可复邢昺云陆玑以为今泽葛也 【考尔雅释文于薜葛下引本草云泽葛一名水葛据今本经上品泽泻一名水泻无作葛者】 郭氏所不取 【考陆玑诗草木疏云今泽泻也其叶如车前草大其味亦相似徐州广陵人食之郑樵尔雅补注云状似麻黄亦谓之续断其节拔之复生生沙阪据毛传但云水葛陆玑以水泽同义谓今泽葛郭氏已正其误郑志于薜葛下引诗采蕘此误读毛传也郭注但云如蕘断郑志于续断下不引牛唇是矣而尔雅补注以拔续同形云亦谓之续断此又误读郭注也】

苗一名菴见尔雅类篇羊蹄草也诗言采其蓫释文蓫本又作蓄陆玑疏云蓫即蓄字扬州谓之羊蹄幽州人谓之蓫本经下品羊蹄一名蓄陶弘景曰今人呼为秃菜即蓄字音讹也然苗有蓄音而蓄无苗名弘景又曰一种极似羊蹄味醋呼为酸模陈藏器曰即是山大黄一名当药尔雅须菴无郭樵注云似羊蹄叶细味酢可食一名菴也李时珍谓之山羊蹄又谓之酸母然则苗菴即菴芜类篇以为羊蹄乃指酸模而言羊蹄之别种也 【考邢昺掌禹锡以菴无为蔓菁非也尔雅补注郑志并仍其误陆佃又误合温菘台菜而一之】

菴一名菴见尔雅郑樵补注云即苕也玉篇菴苗菴三字转相训集韵亦言菴苗也则菴亦酸模之别名非苕也

落一名糜舌见尔雅郭璞注云今糜舌草春生叶有似于舌释文糜作■〈鹿外木内〉别录有麇舌 【陆玑释麇云青州谓之糜】

藟一名藟董 【玉篇作藟葦误】 见尔雅郭璞注云似蒲而细邢昺疏云可为屨亦可絢以为索郑樵补注云亦可为席说文藟土林曰藕根 【考玉篇藟藕根也据尔雅释文藟本或作董】 广雅藟芳■〈廿〈卤又〉〉也

出隧一名蘧蔬见尔雅郭璞注云蘧蔬似土菌生菰草中今江东啖之甜滑邢郑并云菌类也韩保升谓之菰菜苏颂谓之菰手其中有黑脉者陈藏器谓之乌郁李时珍曰菰手俗名茭粳

（臣）等谨案郑志菰凡四见草类菰下引尔雅啮雕蓬菰根下引须葑苽蔬类茭

首下引须葍苳稻粱类菰蒋米下引啮雕蓬而出隧蓬
蔬之名反见遗焉于蔬类芡菁下亦引须葍苳今考尔雅葍苳郭注虽云未详而诗毛传
云葍须也方言广雅并云藟菰芡菁也说文云葍须从
也郑诗笺及坊记注云葍蔓菁也陆玑诗草木疏太平御览并云葍芡菁也则葍苳当为
芡菁非菰葍之葍可知尔雅补注以菰苳为蔓菁以葍
苳为菰葍是两误也至雕蓬之蓬即西京杂记上巳食蓬饵以袪邪魏略鲍出遇饥岁采
蓬实为母作食者邢昺漫引诗召南彼茁者蓬记月令
藜莠蓬蒿并兴不知蓬类不一雕蓬之外有黍蓬黄蓬飞蓬不可混也陆佃合雕蓬黍蓬
飞蓬为一皆非也今并正之

蓐一名牛藻见尔雅郭璞注云似藻叶大江东呼为马藻郑樵补注云水藻之类而
叶差大生水底诗采苹毛传云藻聚藻也孔疏云左传
曰苹蘩蕴【左传作蕴】藻之菜蕴聚也故言聚藻陆玑云藻生水底有二种其一种
叶如鸡苏茎大如箸长四五尺其一种茎大如钗股叶
如蓬蒿谓之聚藻【考颜之推曰说文蓐牛藻也即陆玑所谓聚藻叶如蓬者也郭璞注
三苍亦云蕴藻之类也细叶蓬茸生今水中有此物
一节长数寸细茸如丝围绕可爱长者二三十节犹呼为蓐李时珍曰有二种水藻叶长
二三寸两两对生即马藻也聚藻叶细如丝及鱼鳃状
节节连生即水蕴也俗名鳃草又名牛尾蕴尔雅蓐牛茛即蕴也考毛陆郭郑说藻为聚
藻牛藻为马藻如颜李说马藻别一物牛藻即聚藻非
也】

（臣）等谨按郑志但列藻名而未详其类今补辑

苳一名夫王见尔雅郭璞注云苳草生海边似莞藺今南越人采以为席释文云今
南人以此草作席呼为苳【音杜】陈藏器曰江苳

【字从土音吐】一名江藺子似莞生海边可为席【据郑樵补注云即咸草也可为
屨生鹵地考咸草是南史扶桑传叶如邪蒿而气香
味咸与莞藺不相似集韵苳徒故切海苳也海苳不识其形疑苳与莞通】

苳一名勃苳见尔雅郭璞注云本草一名石芸范子计然云石芸出三辅别录石芸
味甘一名螯烈一名顾喙苳【一作厉玉篇一作■

〈卅周〉】周官戎右郑注云苳帚记檀弓注云萑苳玉藻注云炎帚释文引尔雅蒹藻
注乌藻也说文云苳也

■〈卅鹵〉一名绶见尔雅郭璞注云小草有杂色似绶诗邶有旨鹵毛传云鹵绶
草也陆玑疏云鹵五色作绶文故曰绶草

苳萑一名菽藿见尔雅郭璞注云一名白萑【据邢疏云此草也本草苳萑一名无
姑一名■〈卅殿〉■〈卅塘〉唐本注云尔雅苳

蕘一名菽藿今作■〈廿殿〉■〈廿塘〉字之误也而在木部疑非是或者与草同气又释木无姑其实夷郭注云无姑姑榆也生山中叶圆而厚剥取皮合渍之其味辛香所谓芜蕘邢疏云本草芜蕘一名无姑也今考郭注于菽蕘云白蕘于无姑云姑榆释文菽有亡符常制户耕三反其实夷舍人本作槁本分草木两种自苏恭辈混菽蕘于芜蕘并疑■〈廿殿〉■〈廿塘〉乃菽藿二字之误邢昺不能据郭注陆音以正之尔雅补注及通志木类亦承其谬】

蕘一名窃衣见尔雅孙炎注云江淮之闲食之其花着衣故名郭璞注云似芹可食子大如麦两两相合有毛着人衣邢郑并云俗名鬼麦【考蕘王逸九思作蕘藜自注草名杨慎误合虎蓊为一】

傅一名横目见尔雅郭璞注云一名结缕俗谓之鼓箏草璞注司马相如赋专结缕云结缕蔓生如缕相结汉书音义云结缕似白茅蔓联而生颜师古曰结缕着地之处皆生细根如线相结故名结缕今俗呼鼓箏草者两幼童对衙之手鼓中央则声如箏也

胞一名九叶见尔雅舍人注云九枚共一茎郑樵补注云其草一丛九叶因叶命名望一名窠车见尔雅郭璞注云可以为索长丈余释文车作居

绵马一名羊齿见尔雅郭璞注云草细叶叶罗生而有毛似羊齿今江东呼为雁齿繅者以取茧绪

卷施草【坊本尔雅作卷旆据释文改正】拔心不死见尔雅郭璞注云离骚宿莽也王逸离骚注云草冬生不死者楚人名曰宿莽又曰宿莽遇冬不枯南越志曰宁乡草多卷施拔心不死江淮闲谓之宿莽【郑志合蒺藜春草莽数节及宿莽为一而入木类大谬又卷施释文玉篇广韵并作卷施李白诗赠君卷施草心断更何言亦谓此草】

菁茅见禹贡谷梁传郑康成曰茅之有毛刺者范宁曰香草所以缩酒左传谓之包茅管子封禅书谓一茅三脊晋书地道志谓之香茅其赤者尔雅楚辞谓之芻茅

【考文选作琼茅扬雄传亦作璠茅】

张晏孟康谓之灵茅其白者尔雅谓之菑终军传谓之白茅

（臣）等谨案郑志因尔雅芻茅之菑与菑■〈廿富〉之菑同名遂误合蒿藿菑■〈廿富〉蓬藿菑陆与琼茅为一今皆别出之

纆【亦作苳又作茅】书禹贡豫州贡纆颜师古汉书注云纆织纆为布及练也诗陈风沔纆陆玑疏云纆亦麻也广雅苳三棱也李时珍曰苳家苳也又有山苳野苳也有紫苳白苳【郑志引尔雅薜山麻而云苳野生者是混苳麻为一也后汉书哀牢国传有兰干华阳国志

云獠言纒也】

牡鞠见周官郑注云鞠不华者贾疏云月令季秋云鞠有黄华是牡鞠也

深蒲见周礼郑众曰蒲蒻入水深故曰深蒲郑康成曰蒲始生水中贾疏云史游急就章云蒲蒻兰席蒲蒻只堪为席不可为菹故后郑破之诗韩奕其■〈艹敕〉维何惟笋及蒲毛传云蒲蒲蒻也郑笺云深蒲说文深作■〈艹深〉云蒲蒻之类也本经有香蒲吴普谓之醮石苏恭曰甘蒲山南人谓之香蒲以昌蒲为臭蒲也

苧【一作■〈艹顷〉一作穎】礼杂记篇郑注穎草名周礼典泉麻草郑注草葛■〈艹顷〉之属类篇苧下云泉属■〈艹顷〉下云麻属麻即泉也【集韵絮属误说文作苧引诗褰衣不如郑义为长】李时珍曰今之白麻

荐见仪礼传疏屨者薦蒯之菲也贾疏云草名说文薦■〈艹〈卤又〉〉属玉篇薦蒯属可为席【■〈艹〈卤又〉〉即蒯字】蒯

见仪礼传记玉藻左氏传无弃菅蒯孔疏云蒯与菅连亦菅之类西京赋注蒯草中为索

昌歠【玉篇作昌■〈土上龟下〉欠】集韵作昌■〈艹歠〉】见左传【考释文正义及六书略不知歠为■〈土上龟下〉欠】字之误顾炎武辨之甚详】周官醢人昌木郑注云昌蒲根别录谓之白昌一名水昌蒲一名水宿一名荃蒲陶弘景谓之兰孙【庄

子楚辞俱作荃】陈藏器曰即今之溪荪也一名昌阳生水畔人亦呼为菖蒲与石上昌蒲都别【考李时珍曰菖蒲凡五种生于水石之闲

叶有剑脊瘦根密节高尺余者石菖蒲也高四五寸叶如韭根如匙柄粗者亦石菖蒲也根长二三分叶长寸许者钱蒲也生于池泽蒲叶根肥

白节疏慢高二三尺者泥菖蒲白蒲也生于溪涧蒲叶根瘦赤节稍密高二三尺者水菖蒲溪荪也白昌古人以根为菹实谓之昌本亦曰昌歠

文王好食之藏器混水昌蒲泥昌蒲为一郑志所载昌阳一条则石菖蒲之一种也】

留夷【一作菑蕘一作流夷】见离骚王逸注云香草也【汉书司马相如传注

张揖曰留夷新夷师古曰留夷香草非新夷新夷乃

树耳】

胡绳见楚辞王逸注云香草也洪兴祖补注云草有茎叶可作绳索

蘋见九歌王逸注云蘋草秋生今南方湖泽皆有之淮南子注云状如葳司马相如赋注云青蘋似莎而大生江湖鴈所食玉篇青蘋似苹

而大【山海经作蕃】

萍实见家语史记说苑陈藏器本草拾遗有萍蓬草李时珍曰即今水粟也俗呼水粟包又名水栗子或作水笠楚王所得葢此类也若小

萍安得有实耶

纁见史记货殖传注徐广曰纁纁属可以为布司马贞曰山中纁

萁【或从竹作箕郑语屣弧箕服】汉书五行志屣弧箕服刘向以为萁服盖以萁草为箭服颜注萁草似荻而细织之为服也收靡见

汉书地理志益州郡有收靡县李奇注云靡音麻即升麻杀毒药所出也酉阳杂俎建宁郡乌句山有收靡草鸟雀误食鸟喙中毒必急食此草以解之【案酉阳杂俎所说本酈道元水经若水注】

长松一名仙茆生关内山谷中草似松叶上有脂山人服之张天觉集云僧普明居五台山患大风眉发俱堕遇异人教服长松旬余毛发俱生颜色如故

天麻赤箭根也暴干坚白如羊角色呼羊角天麻蒸过黄皱如干瓜者俗呼酱瓜天麻抱朴子云根有大魁如斗有游子十二枚周环之以仿十二辰也去大魁数尺皆有细根如白发虽相须而实不相连但以气相属尔按此乃天麻之神异者犹人参中之神参也【陈藏器曰天麻似马鞭草节节生紫花花中有子如青箱子性寒李时珍曰此别一种天麻草是益母草之类非此也】

（臣）等谨按郑志已有赤箭而未详其根今补辑

巴戟天生巴郡及下邳山谷其苗俗名三蔓草叶似茗经冬不枯故又名不凋草又别录有巴棘生高地叶白有刺根连数十枚一名女木

百脉根形似苜蓿花黄根如远志李时珍曰唐书作柏脉根肃州岁贡之今不复闻地榆一名玉札叶似榆而长初生布地故名其花子紫黑色如鼓故又名玉鼓外丹方又名酸赭以其味酸而色赭也

三七一名金不换生广西南丹诸州番峒深山中土人言其叶左三右七故名三七或云本名山漆谓其配合金疮如漆粘物也此说近之

【李时珍曰近传一种草春生苗夏高三四尺叶似菊艾而劲厚有歧尖茎有赤棱夏秋开黄花蕊如金丝盘纽可爱而气不香花干则吐絮如苦苣絮根叶味甘治金疮折伤出血及上下血病甚效云是三七而根大如牛蒡根与南中来者不类恐是刘寄奴之属也】

秦艽本名秦紉【俗作秦胶】出秦中以根作罗纹交纠者佳故名萧炳谓之秦瓜

前胡【唐韵作湔胡】苗高一二尺色似斜蒿叶如野菊而细瘦嫩时可食秋月开黦白花类蛇床子花其根皮黑肉白有香气大抵北地者为胜故方书称北前胡云

土当归一名水白芷长近尺许白肉黑皮气亦芬香如白芷故名

都管草 【作菅者误】 生宜州田野根似羌活头岁长一节苗高一尺许叶似土当归有重台施州生者作夏又名香球蔓长丈余赤色秋结红实范成大桂海志云广西出之一茎六叶

白鲜一名白臄一名白羊鲜一名地羊鲜一名金雀儿椒叶似茱萸高尺余根白色作羊臄气花紫白色其子累累如椒

山慈始一名金灯一名鬼灯檠一名朱姑一名鹿蹄草根如水慈姑花如灯笼而朱色故有诸名段成式酉阳杂俎云金灯之花与叶不相

见人谓之无义草 【李时珍曰试剑草亦名鹿蹄草与此同名而异实】

石蒜古谓之乌蒜俗谓之老鸦蒜一枝箭是也图经谓之水麻纲目谓之蒜头草叶如蒜秧及山慈姑花红色如山丹而瓣长黄蘂长须根似蒜皮色紫赤肉白色一种叶如大韭花如小萱花黄白色谓之铁色箭此二物亦叶花不相见与金灯同

及己一名獐耳细辛其草一茎茎头四叶隙着白花根似细辛而黑有毒

白前一名石蓝一名■〈口敕〉药与白薇相似

草犀苗高二三尺独生根如细辛生水中者名水犀

钗子股一名金钗股生岭南及南海山谷根如细辛每茎三四十根岭表录异云广中多蛊毒彼人以草药金钗股治十救八七其状如石

斛也 【李时珍曰忍冬藤亦号金钗股与此同名】 吉利草因人得名嵇含南方草木状云此草生交广茎如金钗股形类石斛根类芍药吴

黄武中江夏李侯徙合浦遇毒其奴吉利偶得此草与服遂解而吉利遂遁去侯以此济人不知其数也又高凉郡产良耀草枝叶如麻黄花白

似牛李秋结子如小栗煨食解毒功不亚于吉利草始因梁耀得之因以为名转梁为良耳

辟虺雷一名辟蛇雷状如粗块苍朮节中有眼此物辟蛇虺有威故以雷名之

锦地罗李时珍云根似萆薢及栝楼根

徐黄草生泽中大茎细叶香如藁本

蜘蛛香草根也黑色有粗须状如蜘蛛及藁本芎藭气味芳香猫喜食之

木香一名蜜香一名青木香一名五木香一名南木香三洞珠囊云五香者即青木香也一株五根一茎五枝一枚五叶叶闲五节故名五

香烧之能上彻九天也古乐府云■〈毛瞿〉 ■〈毛俞〉 ■〈毛荅〉 ■〈毛登〉 五木香皆指此也

甘松香细叶引蔓丛生可合诸香及裊衣金光明经谓之苦弥哆山柰李时珍云俗误为三柰又误为三赖或云三赖乃三辣之误生广中

根叶皆如生姜作樟木香气土人食之古之所谓廉姜恐其类也段成式所云柰祇出拂

蒜国者似水仙亦似此

山姜一名美草岭表录异云茎叶皆姜也但根不堪食亦与豆蔻花相似而微小尔花生叶闲作穗如麦粒嫩红色南人取其未大开者谓之含胎花以盐水淹藏入甜糟中经冬如琥珀色辛香可爱用为鲙【李时珍曰与杜若之山姜名同物异也】

高良姜一名蛮姜子名红豆蔻【李时珍曰陶隐居言此姜始出高良郡故得此名按高良即今高州也汉为高凉县吴改为郡其山高而稍凉因以为名则高良当作高凉也】

白豆蔻一名多骨陈藏器曰出伽古罗国呼为多骨其草形如芭蕉叶似杜若长八九尺而光滑花浅黄色子作朵如葡萄初出微青熟则变白

萆拔本名萆菱见南方草木状番语也陈藏器本草作毕勃扶南传作逼拔明会典作毕蔞又段成式酉阳杂俎云摩伽陀国呼为萆拔梨拂菻国呼为阿梨诃陀唐太宗实录云贞观中上以气痢久未痊服名医药不应因诏访求其方有卫士进黄牛乳煎萆菱方御用有效刘禹锡亦记其事云后累试于虚冷者必效

（臣）等谨案南方草木状以蒟酱萆菱为一物郑志云蒟酱状似萆拔故有土萆拔之号则系二物矣故补辑于此

肉豆蔻一名肉果一名迦拘勒花实皆似豆蔻而无核故名

补骨脂一名破故纸一名婆固脂徐表南州记云是胡韭子也南番者色赤广南者色绿

荆三棱生荆楚地故名【开宝本草作京三陵者误】又名草三棱又名鸡爪三棱黑者名黑三棱其叶茎花实俱有三棱并与香附苗叶花实相同但长大尔其茎光滑三棱如椶之叶茎中有白穰剖之织物柔韧如藤吕忱字林云■〈廿琴〉早生水中根可缘器即此草茎非根也抱朴子言■〈廿琴〉根化鱗亦是此草

茅香即香茅也煎汤浴风甚良苏松图经谓之香麻闽人呼茅如麻姑尔金光明经谓之喞尸罗白茅香生广南山谷合诸名香甚奇妙尤胜舶上来者

（臣）等谨案茅香即本草所谓苗叶煮作浴汤令身香同藁本是也与晋书地道志所谓香茅名同实异白茅香亦与郑志所云白茅迥异故别出之

排草香出交趾今岭南亦或蒔之草根也白色状如细柳根人多伪杂之按范成大桂海志云排草香状如白茅香芬烈如麝香人亦用以

合香诸香无及之者

瓶香生南海山谷鬼魅邪精天行时气并宜烧之耕香生鸟许国茎生细叶主鬼气调中去臭二香皆草状亦排草之类也

迷迭香出大秦国古乐府云迷迭艾纳及都梁即此物也魏文帝时自西域移植庭中同曹植等各有赋

藿香一名兜娄婆香楞严经云坛前以兜娄婆香煎水洗浴即此法华经谓之多摩罗跋香金光明经谓之钵怛罗香皆兜娄二字梵言也

涅盘又谓之迦算香【嵇含南方草木状云出交趾九真武平兴古诸国吏民自种之丛生五六月采日干乃芬香金楼子及俞益期笺皆云

扶南国人言五香共是一木其根是旃檀节是沈香花是鸡舌叶是藿香胶是熏陆李时珍曰今南中藿香乃是香类与嵇含所说正相符合范

蔚宗合香方云零藿虚燥古人乃以合香即此扶南之说似涉欺罔也】

爵床一名爵麻一名香苏俗名赤眼老母草方茎对节与大叶香薷相似但香薷搓之气香而爵床搓之不香微臭以此为别

赤车使者一名小锦枝与爵床相类但以根色紫赤为别尔

假苏一名姜芥一名荆芥一名鼠蓂叶似落藜而细蜀中生噉之又有新罗荆芥又有石荆芥生山石闲体性相近

薄荷陈士良食性本草作菝■〈苜外可内〉扬雄甘泉赋作菱菝吕忱士林作菱■〈廿舌〉则薄荷之为讹称可知矣孙思邈千金方

作蕃荷又方音之讹也玉篇谓之萋■〈苜外可内〉今以苏州者为胜故陈士良谓之吴菝■〈苜外可内〉寇宗奭曰世称此为南薄荷为

有一种龙脑薄荷所以别之汪机曰小儿方称为金钱薄荷谓其叶小圆如钱也猫食薄荷而醉故陆佃云薄荷猫之酒也

积雪草一名地钱草一名连钱草一名海苏与薄荷相类但味少甘江浙闲多以作茶饮俗呼为新罗薄荷芥葶一名臭苏一名青白苏其

形似水苏而臭似白苏而青故有二名山人茹之味不甚佳石芥葶生山石闲细叶紫花高一二尺山人用之

野菊一名苦薏生泽畔茎如马蔺花如菊菊甘而薏苦语曰苦如薏是也景焕牧竖闲谈云真菊延龄野菊泄人

千年艾叶不似艾而作艾香搓之即碎不似艾叶成茸也

黄花蒿一名臭蒿与青蒿相似但色绿带淡黄气辛臭不可食人家采以罨酱黄酒曲者是也

曲节草一名六月凌一名六月霜一名绿豆青一名蛇蓝茎方色青有节叶似刘寄奴而青软花似薄荷

桃朱术细如芹花紫子作角以镜向旁敲之则子自发五月五日乃收子带之
番红花一名泊夫蓝一名撒法郎出西番回回地及天方国即彼地红蓝花也元时
以入食饌按张华博物志言张骞得红蓝花于西域则

即此一种或方域地气稍有异耳崔豹古今注云燕支中国谓之红蓝疑即此

（臣）等谨案郑志已有红蓝未详西域之种今补入

大青其茎叶皆深青故名又有小青见苏颂图经

悉实一名鼠粘一名牛蒡一名牛菜一名大力子一名蒟翁菜 【蒟类篇作■〈卅
膀〉】 一名便牵牛一名蝙蝠刺河南人呼为夜叉

头古人剪苗沟淘为蔬取根煮曝为脯云甚益人今人罕食之

箬 【一作蒟】 一名辽叶根茎皆似小竹蔞与叶皆似芦荻南人取叶作笠及裹
茶盐包米糗

甘蕉一名芭蕉一名天苴一名芭苴曹叔雅异物志云芭蕉结实其皮赤如火其肉
甜如蜜四五枚可饱人而滋味尝在牙齿闲故名甘蕉

是也其花红如火炬者谓之红蕉白者如蜡色谓之水蕉其花大类象牙故谓之牙蕉其
茎解散如丝闽人以灰汤练治纺绩为布谓之蕉葛又

有一种红蕉日拆一两叶其端有一点鲜绿可爱春开至秋尽犹芳俗名美人蕉又有一
种胆瓶蕉根出土时肥饱状如胆瓶也

麻黄一名龙沙其根谓之狗骨见广雅别录谓之卑相又名卑盐段成式酉阳杂俎
云麻黄茎头开花花小而黄丛生子如覆盆子可食又

有云花草状如麻黄而中坚实可治马疥见葛洪肘后方

木贼苗长尺许丛生每根一■〈车余〉无花叶寸寸有节色青治木骨者用之又
有问荆苗如木贼节节相接一名接续草

灯心草一名虎须草一名碧玉草吴人取瓢为灯炷以草织席及蓑

紫菀 【说文作茈菀】 一名青菀一名紫菀一名返魂草一名夜牵牛连根叶采
之醋浸入少盐收藏作菜辛香号曰仙菜白菀一名女

菀一名织女菀一名女肠一名茆即紫菀之色白者也雷斅言紫菀白如练色者名羊须
草即此物

淡竹叶根名碎骨子春生苗高数寸细茎绿叶一窠数十须结子如麦冬

鸭跖草一名芩鸡舌草一名碧竹子一名竹鸡草一名竹叶菜一名耳环草一名碧
蝉花一名篮姑草叶如竹高一二尺花深碧可为画色

有角如鸟嘴

龙珠一名赤珠即龙葵子赤者也掇去汁可食

蜀羊泉一名羊泉一名羊飴一名漆姑草叶似菊花紫色子类枸杞子根如远志无
心有糝黄蜂作窠衔漆姑草汁为蒂即此草也

鹿蹄草一名小秦王草一名秦王试剑草 【山慈姑亦名鹿蹄与此不同】

鼠曲草一名米曲一名鼠耳一名佛耳草一名无心草一名香茅一名黄蒿一名茸母荆楚岁时记云三月三日取鼠曲汁蜜和为粉谓之

龙舌■〈米半〉以压时气邵桂子瓮天语云北方寒食采茸母草和粉食

马鞭草一名龙牙草一名凤颈草

女青一名雀瓢其种有二一是藤生乃苏恭所说似萝摩者一种草生则别录所云蛇衔根也蛇衔有大小二种叶大者为龙衔用根即此

女青也张揖言女青是葛类指藤生者非此女青又罗浮山记云山有男青似女青

水英临汝人呼为牛荳草河北信都人名水节河内连内黄呼为水棘剑南遂宁等郡名龙移草淮南诸郡名海荏岭南亦有土地尤宜根

叶肥大名海精木亦名鱼精草

雀翘一名去母一名更生

甘蓝一名蓝菜

海金沙一名竹园荈

水杨梅生水边条叶甚多生子如杨梅状庚申玉册谓之地椒

地蜈蚣草左右蔓延叶密而对生如蜈蚣形其穗亦长俗呼过路蜈蚣其延上树者呼飞天蜈蚣

半边莲小草也生阴湿堞堑边就地细梗引蔓节节而生细叶秋开小花淡红紫色止有半边如莲花状故名又呼急解索

紫花地丁一名箭头草一名独行虎一名羊角子一名米布袋

鬼针草方茎叶有桎子作钗脚着人衣如针北人谓之鬼针南人谓之鬼钗

攀倒甌茎叶如薄荷一名斑杖一名接骨

泽漆一名漆茎一名猫儿眼睛草一名绿叶绿花草一名五凤草

木黎芦一名黄藜芦一名鹿骊

漏蓝子乃附子之琐细未成者一名木鳖子一名虎掌明时四川成都府岁贡漏蓝二十斤见会典

（臣）等谨案郑志详叙附子之名而不及漏蓝今补入

白附子因与附子相类故得此名实非附子类也楚国先贤传云孔休伤颊有癩王莽赐玉屑白附子香与之消癩即此

鸢尾射干苗也一名乌园其根谓之鸢头

（臣）等谨案郑志载射干甚详而不及其苗今补入

押不卢生回回地土人以少许磨酒饮即通身麻痹而死加以刀斧亦不知至三日别以少药投之即活见周密癸辛杂志

曼陀罗花一名风茄儿一名山茄子法华经言佛说法时天雨曼陀罗花又道家北

斗有罗陀星使者手执此花故后人因以名花曼陀罗
梵言杂色也茄乃因叶形尔李时珍曰相传此花笑采酿酒饮令人笑舞采酿酒饮令人
舞予尝试之饮酒半酣更令一人或笑或舞饮之乃验
也

（臣）等谨案山茶花亦名曼陀罗与此花不同今附识

醉鱼草一名闹鱼花一名鱼尾草一名橈木茎似黄荆有微棱叶似水杨对节而生
七八月开花成穗红紫色渔人采花及叶以毒鱼 【
考中山经云熊耳山有草焉其状如苏而赤华名曰葶■〈廿宁〉可以毒鱼其此草之
类与】

毛茛一名毛建草一名水茛一名毛堇一名天灸一名自灸一名猴蒜

牛扁一名扁特一名扁毒

荨麻一名毛■〈廿𦉳〉杜甫有除■〈廿𦉳〉草诗是也其草叶上有毛芒可畏
触人如蜂蛰螫以人溺濯之即解有花能毒鱼墨庄
漫录云川峡闲有恶草罗生于野土人呼为■〈廿𦉳〉麻

海芋一名观音莲一名天荷一名隔河仙方士云可变金小者名野芋宋祁海芋赞
云木干芋叶拥肿盘戾农经弗载可以治疔

透山根见峒嵎神书云透山根生蜀中山谷草类藤无 【物类相感志云叶类芫菁
互异】 可以点铁成金昔有人采药误斫此草刀或
黄软成金也又庚辛玉册云透山根出武都取汁点铁立成黄金有大毒人误食之化为
紫水 【又有金英草亦生蜀中状如马齿苋而色红
摸铁成金有大毒入口杀人须臾如紫水也又何远春渚纪闻云刘均父吏部罢官归成
都有水银一筐过峡筐漏急取渡旁丛草塞之开视尽
成黄金宋初有军士在泽州泽中割马草归镰皆成金以草然釜亦成黄金又临安僧法
坚言有客过于潜山中见一蛇腹胀嚙一草以腹磨之
而消念此草必能消胀取置筐中夜宿旅馆闻邻房有人病腹胀呻吟以釜煎药一杯与
服顷之不复闻声念已安矣至旦视之其人血肉俱化
为水独骸骨在床尔视其釜则通体成金矣观何氏所载则透山根乃金英草之类】

蛇莓一名蛇蔗一名地莓一名蚕莓以蚕老时熟红于地也其中空者为蚕莓中实
极红者为蛇残莓人不噉之恐有蛇残也 【考仇远
稗史讹作蛇缪草】

木鳖子一名木蟹苏颂曰岭南人取嫩实及苗作茹蒸食 【刘绩霏雪录云木鳖子
有毒不可食昔蓟门有人生二子恣食成痞其父得
一方以木鳖子煮豕肉食之其幼子当夜死长子明日死友人马文诚方书亦载此方因
着此为戒二说不同或者与豕肉不相得或犯他物而

然】

（臣）等谨案漏蓝子一名木鳖子与此同名异实

番木鳖一名马钱子一名苦实把豆一名火失刻把都能治一百二十种病或云能毒狗至死

榼藤子一名象豆一名榼子一名合子依树蔓生如通草藤子紫黑色三年方熟生南海解诸药毒

月季花蔷薇类也其花逐月开放故名一名月月红一名胜春一名瘦客一名鬪雪红

黄环一名凌泉一名大就一名就葛一名生乌一名根韭实名狼跋子一名度谷蜀都赋云青珠黄环即此范子计然云黄环出魏郡以黄色者为善

土茯苓一名土萆薢一名刺猪苓一名山猪粪一名草禹余粮一名仙遗粮一名冷饭团一名硬饭一名山地栗李时珍曰按陶弘景注石部禹余粮云南中平泽有一种藤生叶如菝契根作块有节似菝契而色赤味如薯蕷亦名禹余粮言昔禹行山乏食采此充粮而弃其余故有此名观陶氏此说即今土茯苓也故今尚有仙遗粮冷饭团之名亦其遗意俗又名过冈龙谬称也此草根状如菝契而圆其大若鸡鸭子连缀而生远者离尺许近或数寸其肉软可生啖去风湿东山经云鼓磴之山有草焉名曰荣莫其叶如柳其本如鸡卵食之已风即此也

女萎一名蔓楚

伏鸡子根一名承露仙人肝藤亦名承露仙而伏鸡子叶圆人肝藤叶有三桠

千金藤生北地者根大如指色似漆生南土者黄赤如细辛舒庐闲有一种藤似木蓼又有乌虎藤遶树冬生青亦名千金藤江西林闲有草生叶头有瘦子似鹤膝叶如柳亦名千金藤又名古藤岭南有陈思岌亦名千金藤皆名同而状异也

山豆根一名解毒一名黄结一名中药石鼠食其根故岭南人捕鼠取肠胃曝干解毒攻热效【考沈括笔谈云山豆根味极苦本草言味甘大误】

解毒子一名地不容一名苦药子

白药子能解野葛生金巴豆药毒又能止刀斧伤又有陈家白药甘家白药会州白药功用皆相似岭表录异云陈家白药善解毒诸家皆不及广府每岁充土贡也防己一名解离一名石解

钩藤状如葡萄根而有钩长八九尺或一二丈大如拇指其中空用致酒瓮中取酒以气吸之涓涓不断

赤地利一名赤薜荔一名五毒草一名五截一名蛇■〈卅网〉一名山荞麦

扶芳藤一名滂藤出吴郡隋稠禅师作青饮进炆帝止渴者即此

甘露藤蔓如筋人服之得肥故一名肥藤

含水藤状如瓠断之水出饮之清美故一名大瓠藤刘欣期交州记云含水藤多生路旁行人乏水处便吃此藤

鼠藤鼠爱食此藤故名顾微广州记云其咬处人取为药

紫金藤一名山甘草

清风藤一名青藤一名寻风藤太平清话云天台藤有数种含春藤石南藤清风藤耆婆藤天寿根藤俱可为杖省藤一名赤藤一名红藤大如指堪缚物疔疔自解也

紫藤四月生紫花可爱人种以饰庭江东呼为招豆藤其子作角角中仁熬香着酒中令酒不败其花掇碎拭酒醋自腐坏草木状云其茎置烟奁中成紫香可以降神

落鴈木亦藤也高丈余鴈过皆缀其中或云鴈衔至代州鴈门而生以此为名徐表南州记云落鴈木生南海山野中蔓生四边如刀削代州鴈门亦有之

千里及一名千里急一名千里光

藤黄树名海藤郭义恭广志云海藤出岳鄂等州诸山厓花有蕊散落石上彼人收之谓之沙黄就树采者轻妙谓之腊黄今人讹为铜黄铜藤音谬也画家及丹灶家时用品

石长生一名丹草一名丹沙草宋祁益部方物略云长生草生山阴蕨地修茎茸叶色似桧而泽经冬不凋即此又红茂草一名地没药一名长生草通泉草一名长生草皆石长生类也

虎儿草一名石荷叶

石胡荽一名天胡荽一名野园荽一名鹅不食草一名鸡肠草【李时珍曰此与藜■〈卅缕〉之鸡肠名同物异】

地锦小草也一名地噤一名夜光一名承夜一名草血竭一名血见愁一名血风草一名马蚁草一名雀儿卧草一名酱瓣草一名猢猻头草【掌禹锡曰石部有地锦是藤蔓之类与此同名异物】

离离草生人家阶庭湿处高二三寸苗叶似幕罨江东有之北地无也又有仙人草亦生阶庭闲高二三寸叶细有雁齿似离离草又有仙人掌草多于石上贴壁而生如手掌形故以名之

紫背金盘一名金盘藤

石松生名山石上似松高一二尺其少者名玉柏一名玉遂人皆采置盆中养数年

不死呼为千年柏万年松马勃一名灰菰一名牛屎菰

俗呼为马■〈穴上气下〉勃

神护草物类志谓之护门草一名百灵草出常山以置门上人夜过草必叱之王筠诗云霜被守宫槐风惊护门草即此也

双头莲一名催生草妇人产难左手把之即生

醉醒草见天宝遗事云元宗于兴庆池边植之丛紫而心殷醉客摘草嗅之立醒

刺蜜一名草蜜一名给■〈孛文〉罗出交河沙中草头有毛毛中生蜜北史云高昌有草名羊刺其上生蜜味甚甘美即此

水仙一名金盏银台李时珍云叶似薤及蒜茎头开花大如簪头状如酒杯五尖上承黄心宛然盏样一种千叶此花皱下轻黄而上淡白不作杯状水指为真水仙盖一物二种尔亦有红花者按段成式云柰祇出拂菻国根大如鸡卵苗长三四尺叶似蒜中心抽条茎端开花六出红白色花心黄赤不结子冬生夏死取花压油涂身去风气据此形状与水仙彷彿岂外国名谓不同耶

茉莉一名柰花【嵇含草木状作末利洛阳名园记作抹厉佛经作抹利王龟龄集作没利洪迈集作末丽】晋书都人簪柰花即此也

又有似末利而瓣大其香清绝者谓之狗牙亦名雪瓣

素馨西域谓之耶悉茗花即段成式所云野悉蜜花也有黄白二色

迎春花一名金腰带丛生高数尺正月初开小花状如瑞香

翦春罗一名翦红罗苗高尺余柔茎绿叶叶对生抱茎花深红花大如钱凡六出周回如剪成又有翦红纱花茎高三尺叶旋覆花状如石

竹花而稍大四围如翦鲜红可爱又有翦秋罗一名汉宫秋色八月开花又有翦罗花甚红出南越又有翦金罗黄色甚艳

玉簪亦名白鹤紫者名紫萼白者名曰萼并以花状命名

凤仙一名金凤花其花头翅羽足翘然如凤故名女人采花染指甲故又名染指甲草其实状如小桃老则迸裂故名小桃红一名夹竹桃

一名旱珍珠一名海纳

鸡冠花有红白黄三色其穗圆长而尖者俨如青葙之穗扁卷而平者俨如雄鸡之冠最耐久霜后始蔫

鴈来红茎叶穗子并与鸡冠同其叶九月鲜红望之如花故名吴人呼为老少年一种六月叶红者名十样锦天灵草状如鸡冠花叶亦如

之折之有液如乳

金盏草一名杏叶草一名长春花【苏颂曰金盏草秋后有子如鸡头实其中变生一小虫脱而能行李时珍曰夏月结实在萼内宛如

尺蠖虫数枚蟠屈之状故苏氏言其化虫实非虫也】

钦定续通志卷一百七十四

●钦定续通志卷一百七十五 昆虫草木略二

昆虫草木略 【二】

蔬类

稻粱类

○蔬类

藿一名山韭见尔雅许氏说文谓之鉞形性与家韭相类但根白叶如灯心苗耳苏颂曰韩诗云六月食郁及藿谓此也

水韭一名荃见吕忱字林野生水涯叶如韭而细长可食

葱一名藁薤见广雅又名朮又名菜伯凡四种曰冬葱曰汉葱曰蒜葱曰山葱冬葱一名冻葱一名慈葱或名大官葱汉葱一名木葱蒜葱元人饮膳正要名回回葱山葱一名茗见尔雅郭璞注所谓细茎大叶者也入药用山葱蒜葱食品用冬葱汉葱又有一种楼葱江南人呼为龙角葱即今之龙爪葱也又名羊角葱茎上生根移下蒔之

薤一名山■〈〈贞，去贝〉一贝，上中中下〉〈又上韭下〉〉见尔雅茎叶与家薤相类而根差长叶差大又有一种野薤俗名天薤生麦原中叶似薤而小味益辛亦可供食但不多有

（臣）等谨案李时珍云野薤即山薤考苏颂云山薤与家薤相类而叶差大王祯农书云野薤叶似薤而小则判然两种也今别出之

蒿一名山蒜见尔雅其生于泽者曰泽蒜生石闲者曰石蒜三者同一物因地异名耳

（臣）等谨案郑志所载韭葱薤蒜皆家种非山野所产今补辑

芥有数种曰青芥曰大芥曰马芥曰花芥曰紫芥曰石芥曰白芥青芥一名刺芥大芥一名皱叶芥白芥一名蜀芥芥心嫩薹谓之芥蓝子大如苏子而色紫味辛研末泡过为芥酱以侑肉食内则所谓芥酱即此岭表录异云南土芥高五六尺子大如鸡子又芥之异种也

姜【说文作■〈廿强〉】一名番韭小者谓之穰菜初生嫩者名紫姜或作子姜宿根谓之母姜以母姜去皮曝干者谓之干姜一名白姜又名均姜

同蒿一名蓬蒿其叶纹皆邪者名邪蒿北史儒林傅邢峙以经入授皇太子厨宰进邪蒿峙令去之即此

紫堇一名赤芹一名蜀芹一名苔菜一名水葡萄菜宝藏论谓之起贫草

蒔萝一名慈谋救一名小茴香实如马芹子唐李珣曰生波斯国马芹子色黑而重

蒟蒻子色褐而轻以此为别

白花菜一名羊角菜一种黄花者名黄花菜

草豉生巴西诸国草似韭状豉出花中彼人食之恭菜一名茗苳菜南人蒸苳食之大香美【李时珍曰恭与甜通其味甜也】

东风菜一名冬风菜【李舟切韵作蕞风】裴渊广州记云陆地生花叶似落妊妇茎紫宜配肉作羹味如酪香气似马蔺吴都赋云草则东风注云出九真即此

（臣）等谨案落妊妇本草误妊娠马蔺本草误马兰今据齐民要术纂入

苜蓿【尔雅注作■〈廿牧〉蓿汉书作目宿罗愿作木粟】本出大宛国汉通西域始得其种以归今处处有之葛洪西京杂记云乐游苑多苜蓿风在其闲常萧萧然日照其花有光采故名怀风又名光风茂陵人谓之连枝草

苋一名苋【案贝母亦名苋】见广雅其类有五一曰赤苋二曰白苋三曰人苋四曰紫苋五曰五色苋赤苋一名蕒见尔雅郭璞注所谓今苋菜之有赤茎者是也亦谓之花苋人苋白苋二种亦谓之细苋即野苋也北人呼为糠苋又名猪苋二苋本一但大者为白苋小者为人苋耳周易苋陆夬夬疏引董遇云苋人苋陆商陆即此紫苋茎叶通紫吴人用以染爪者诸苋中惟此无毒不寒五色苋今亦希有

（臣）等谨案马融郑康成王肃易注云苋陆一名商陆皆以苋陆为一物与董说异考商陆古无苋陆之名则马郑王之说皆非也又案郑志止载马齿苋而未及诸苋今补详之

莨苳一名莨菜一名千金菜彭乘墨客挥犀云莨菜自芮国来故名

（臣）等谨案彭乘云莨苳有毒百虫不敢近蛇虺触之则目瞑不见物人中其毒以姜汁解之又见续博物志李时珍曰莨苳四月抽薹高三四尺剥皮生食味如瓜糟食亦良江东人盐晒压实以备方物谓之莨笋也二说不同考陈藏器云莨苳有白紫二种紫者有毒入烧炼用据此则彭所称者乃紫莨苳李所称者乃白莨苳也入蔬当以白者为正

水苦菜一名谢婆菜一名半边山

翻白草楚人谓之湖鸡腿淮人谓之天藕

仙人杖草生剑南平泽叶似苦苳丛生昔唐陈子昂世服此草后从补阙乔知之北征次于张掖见仙人杖因言其功乔甘心食之或谓乔曰此白棘也乔乃讥之子昂因作观玉篇焉苏颂曰仙人杖乃作菜茹者白棘木类何因相似或曰乔所谓白棘乃拘棘是枸杞之有针者本经枸棘无白棘之名又其味苦此菜味甘乃知草木之类多而难识使人惑疑似之言以真

为伪宜乎子昂论著之详也

（臣）等谨案仙人杖有三一是菜类即子昂所食者一是枯死竹笋之色黑者一是枸杞之别名皆同名异物也又别有仙人草生阶除闲高二三寸又有仙人掌草生于石壁上皆与此异

蒲公英一名耩耨草蜀人谓之耳癩草关中谓之狗乳草土宿本草谓之金簪草又名黄花地丁寇宗奭曰四时常有花花罢飞絮絮中有子落处即生所以庭院闲皆有者因风而来又一种相类而无花者名地胆草【蒲公英孙思邈千金方作皂公英苏颂图经作仆公罌庚辛玉册作鵝鵝英野菜诸作白鼓丁俗呼蒲公英丁皆音之转也】

黄瓜菜一名黄花菜以其黄花其气如瓜故名野人茹之亦采以饲鹅生瓜菜其味作生瓜气故名

■〈廿祖〉一名蕺见埤苍【■〈廿祖〉今作菹】左思蜀都赋樊以菹圃即此刘渊林注曰亦名土茹叶覆地而生根可食人饥则以继粮又张衡南都赋注云蕊香菜根似茆根蜀人所谓■〈廿祖〉也

（臣）等谨案蕺蕺本二种郑志误合为一今别出之

■〈廿岂〉一名水蕺以其似蕺而生水中也吕览云菜之美者有云梦之■〈廿岂〉即此菜也

柱夫一名摇车见尔雅郭璞注所谓蔓生细叶紫花可食今俗呼曰翘摇车者是也一名野蚕豆一名小巢菜陆游诗序曰小巢生稻畦中所谓元修菜是也一名漂摇草以油煤之缀以米糝名草花食之佳作羹尤美

秦荻藜生下湿地所在有之山海经云秦山有草名曰藜如荻可以为菹此即秦荻藜也盖亦藜类其名亦由此得之

醍醐菜形似牛皮蔓生掐之有乳汁出香甜可透人顶故名

茅膏菜生茅中高一尺有毛如油腻黏人手子作角生鸡侯菜生岭南顾微广州记云似艾二月生苗宜鸡羹食之故名

臙脂藤菜出丰湖滑美大类莼见苏轼诗注

莖一名羊蹄见广雅字林云似冬蓝蒸食之本草云一名东方宿一名连虫陆又郭璞方言注云■〈廿酿〉菜莖菜也亦苏之类

燕蓐蔬一名燕窝菜王世懋闽部疏以为不辨是何物谢华启秀云味芳香在百蔬之上海燕拾海上无毒香蔬所结之巢也与今燕窝不同

土芋一名土卵一名土豆梁汉人名为黄独蔓生如芋人以灰汁煮食之

甘藷出交广有二种一曰番藷一曰山藷又名朱藷其根似芋亦有巨魁大者如鹅卵小者如鸭卵初时甚甜经久得风稍淡泊也南方草

木状云珠崖之不业耕者惟种此蒸切晒收以充粮糗名藟粮

草石蚕即今甘露子也一名地蚕一名土蛹一名滴露其根长大者谓之地瓜儿

茄子一名落苏见本草【五代贻子录作酪酥】一名小菰见晋书隋炀帝改为
昆仑紫瓜见大业拾遗录民闲呼昆味见清异录王隐

君名为草鳖甲见养生主论酉阳杂俎曰钱王有子跛足以茄声相近故呼落苏茄有紫
青白三种白者又名银茄紫者又名紫膨脖岭表录异

云交岭茄树经冬不凋有成大树者其实如瓜此又茄之异种者也

水茄形长味甘可以止渴亦有紫青白三色洪迈容斋随笔云浙西常茄皆皮紫其
白者为水茄江西常茄皆皮白其紫者为水茄亦一异
也

缅茄出缅甸滇南杂记云大而色紫蒂圆整蜡色者佳今会城多以小者于蒂上刻
人物鸟兽之形宋刘子翬诗云缅茄实如瓜垂金粲秋
色谁刻紫琼瑶玲珑投远客

瓠其种有五其长如越瓜首尾如一者为瓠【音护】味甘可食诗曰甘瓠累之
又曰幡幡瓠叶采之亨之是也瓠之一头有腹长柄者
为悬瓠世说新语刘道真所谓东吴有长柄壶卢是也【俗作葫芦非】可以为笙曲
沃者尤善悬瓠古谓之瓢今人以盛茶酒犹谓之茶酒
瓢论语一瓢饮国策百人舆瓢而趋不如一人持而走疾是也瓢又谓之浮淮南子百人
抗浮不若一人挈而趋是也瓢之无柄而圆大形扁者
为匏诗曰酌之用匏又曰匏有苦叶叔向曰苦匏不材与人共济而已是也匏之有短柄
大腹者为壶诗曰八月断壶鸛冠子曰中河失船一壶
千金是也壶之细腰者为蒲芦今之药壶卢是也郭义恭广志谓之约腹瓠以其腹有约
束也

（臣）等谨案壶匏瓢皆瓠类故训诂家互相注释而齐民要术有种瓠篇无种壶
匏瓢篇也然细绎经史其形名确有分别故总载而各
出之

越瓜种出越中故名一名稍瓜一名菜瓜越人当果食之一种长者至二尺许俗呼
羊角瓜

黄瓜本出西域张骞使西域始得其种以归今俗以月令王瓜生谓即此物误矣

丝瓜一名天罗絮一名布瓜昔人谓之鱼鱓或作虞刺始自南方来故又名蛮瓜

南瓜种出南番转入闽浙故名今诸处皆有矣王祜农书云浙中一种阴瓜宜阴地
种之秋熟色黄如金皮肤稍厚可藏至春食之如新疑
此即南瓜也

苦瓜一名锦荔枝一名癞葡萄

紫菜一名紫■〈廿奕〉【音软】出海中附石而生正青色取而干之则紫色
吴都赋云纶组紫绛即此注云临海常献之江赋注云
状似鹿角菜而细又有石莼似紫菜而色青其出蜀中者名绿菜宋黄庭坚绿菜赞云在
吴则紫在蜀则绿是也

海苔生海水中正青状如乱发干之赤盐藏有汁名曰濡苔临海出之吴都赋云海
苔之类江赋云绿苔鬢髻乎研上即此风土记谓之石
发

石花菜一名珊瑚枝生南海沙石闲高二三寸状如珊瑚有红白二色稍麤而似鸡爪
者谓之鸡脚菜二物久浸皆化成胶冻也

猴葵生东南海中石厓闲色赤南越谓之鹿角菜见沈怀远南越志土人采曝货为
海错以水洗醋拌则涨起如新久浸则化如胶状

龙须菜一名麒麟菜产东南海边石上丛生无枝叶状如柳根须长者尺余色始青
沃以水乃白花木考又名繒菜

（臣）等谨案郑志所载紫菜海苔海藻石花鹿角诸名俱未详言品类出产今补
辑

睡菜一名瞑菜一名绰菜一名醉草一名懒妇箴南方草木状云绰菜夏生池沼闲
叶类慈姑根如藕条南海人食之令人思睡呼为瞑菜
即此

合欢菜生番禺四叶相对昼开夜合故名见卢氏杂记菌大者名中馗小者名菌见
尔雅孙炎曰地蕈子也或云地鸡亦云獐头郭璞云地
蕈似盖今江东名为土菌亦曰馗厨可啖本草曰土菌一名杜蕈一名蕈子若烧灰地上
经秋雨生菌重台者名仙人帽陈仁玉菌谱一曰合蕈
又名台蕈生台之韦羌山其质外褐色肌理玉洁二曰稠膏蕈生孟溪诸山浅黄白色三
曰栗壳蕈色如栗壳者也四曰松蕈生松阴五曰竹蕈
生竹根味极甘六曰麦蕈俗名麦丹生溪边沙壤中七曰玉蕈初寒时生洁皙可爱俗名
寒蒲蕈八曰黄蕈丛生山中黄色俗名黄纒蕈又名黄
■〈彳屯〉九曰紫蕈俗名紫富蕈赭紫色产山中十曰四季蕈生林木中味甘而肌理
麤峭十一曰鹅膏蕈生高山中状类鹅子久而伞开味
殊甘滑

（臣）等谨案陈仁玉菌谱所载有十一种李时珍本草所引止列九种不免疏漏
附订于此又物类相感志引孙炎注云中馗闻雷即生
名地菌白如脂可食据此则即横州之雷蕈也广西古未隶中国其物岂遽载尔雅故郭
注不取今亦分列于后焉

杉菌出宜州生积年杉林上

皂荚蕈生皂荚树上不可食

香蕈生桐柳枳椇木上紫色正字通云冬春之交斫楮楠木以米汁沃之而生雨雪多则盛香

舵菜生海船舵上

天花蕈一名天花菜出山西五台山形如松花而大于斗香气如蕈白色食之甚美李时珍曰五台多蛇蕈感其气而生故美而无益

葛花菜一名葛乳诸名山皆有之惟太和山所采乃葛之精华也

蘑菰蕈一名肉蕈出山东淮北诸处埋桑楮诸木于土中浇以米泔待菰生采之俗名鸡腿蘑菰一种状如羊肚有蜂窠眼者名羊肚菜

鸡■〈土从〉【杨慎集作鸡■】一名鸡菌一名蚁■〈土从〉一名蚁夺出云南生沙地闲丁蕈也当即云仙杂记所谓铜钉蕈者

雷蕈出广西横州遇雷过即生须疾采之稍迟则腐或老不堪用故名

竹蓐一名竹肉一名竹菰一名竹蕈生慈竹林中地上者白色可食段成式酉阳杂俎云江淮有竹肉大如弹丸味如白树鸡即此生苦竹枝上者有毒

藿菌一名藿芦生芦苇下或以为鸛矢所化生者非也

（臣）等谨案杉菌以下十一物潘之恒所采以作广菌谱者也考陈藏器曰地生者为菌木生者为樗李时珍曰地生为菌木生为蕈二说最为明晰合蕈台蕈等物虽有蕈名而生于地故陈仁玉收入菌谱潘之恒广菌谱以香蕈皂角蕈杉菌舵菜杂入天花蘑菰等菌中殊非故各出之

地耳一名地踏菰春夏生雨中雨后即早采之

石耳一名灵芝生天台四明黄山庐山巴西边徼诸山石崖上远望如烟

■〈艸穀〉菜生水中

荇菜似蒜生水中

■〈艸羸〉菜叶似竹生水旁

■〈艸阅〉菜叶似竹生水旁

■〈艸揭〉菜似蕨生水中

■〈艸沓〉菜生水中大叶【■〈艸沓〉他合切】

■〈艸𦉳〉菜似■〈艸沓〉荃菜也一曰染草【■〈艸𦉳〉徐盐切】

（臣）等谨案墨庄漫录载川峡有草名■〈艸𦉳〉麻即白居易诗所谓■〈艸𦉳〉草四时青者也此别一种恶草非此菜也

藿菜似韭而黄【藿音唯】

■〈艸斯〉草生水中其花可食

（臣）等谨案自■〈廿穀〉菜至■〈廿斯〉草皆字林语载齐民要术中但俗本齐民要术■〈廿穀〉误谷染误深又脱■〈廿阅〉菜一条今悉依别本订正

羞菜出安南蔓生水上甘美可食人过池中以手指曰尔羞否实时憔悴待其人去渐青如初

真珠菜藤本蔓生每芽端缀一二蕊圆白如珠故名益部方物略记曰真珠菜戎泸等州有之生水中石上翠缕织蔓首贯珠即此

雪里蕻生四明山雪深诸菜冻损此菜独青故名【蕻音闕唐韵云草菜心长也类篇云吴俗谓草木萌曰蕻】

看麦娘菜名也随麦生陇上因名见野菜谱

燕子不来香菜名也早春采可熟食燕来时则腥不堪食故名见野菜谱

兔丝根一名兔丝苗春采苗叶秋冬采根蒸食甘美多食令人眩晕见野菜谱

（臣）等谨案此兔丝根乃菜也与药草兔丝名同物异

罗汉菜叶如豆苗因灵观尊者自江西南昌府西山持至故名汇苑云出蕲州三角山杂葷烹之即无味

根子菜惟湖广安陆县有之

龙颠菜生峨眉山似椿树头有刺似白芥生九龙洞者尤佳

高河菜出大理府点苍山高河中云南志云高河乃龙湫采时若高声则风雨猝至

莲花菜出大理府洱河东上沧湖云南志云相传蒙诏时观音大士化箭镞所成

○稻粱类

稷曰明粢粢即稷也禾之不黏者月令章句云稷秋种夏熟历四时备阴阳谷之贵者也

（臣）等谨案尔雅以稷为粢而郑志别以粱目之今据礼记文作证其说自明且云稷苗似芦此芦稷名蜀黍说见后

黍曰芑合【礼记孔疏云黍稷软而相合气息又香故曰芑合】禾属而黏者以大暑而种故谓之黍黍可为酒禾入水也见说文苏颂

图经云秫黍之黏者

丹黍一名红莲米即赤黍也

（臣）等谨案尔雅鬻赤苗郭注以为赤粱郑志因之本草以丹黍为鬻非

蜀黍【李时珍曰种始自蜀故名】一名蜀秫一名芦稷一名芦粟一名高粱盖黍稷类而高大如芦荻者广雅所云藿粱木稷即此又

有一种出西土名玉蜀黍

秬【同粳】稻属见说文广雅曰粳秬也郭义恭广志曰粳有乌秬黑穞【音矿】

青幽白夏之名陶弘景云有赤白二种可作廩

米

（臣）等谨案郑志云稻有粳糯二种古人谓糯为稻且引颜师古之说本草所谓稻米今之糯米而未详稻中之粳者今补

梁曰芡米名见说文有黄白青赤四种广志又有解梁具梁辽东赤梁之名尔雅翼云黄粱香味逾于诸梁人号为竹根黄

（臣）等谨案粱为米名乃稻谷之类郑志云黍之糯者谓之秫又云粱是秫粟非也李时珍云粱即粟也以大而毛长者为粱细而毛短者为粟不知粟是黍稷稻粱之总称取以配粱亦非

麦大曰𪎭小曰■〈禾来〉【说文云周所受瑞麦来𪎭一来二缝象芒束之形天所来也故为行来之来诗曰诒我来𪎭】芒谷秋种厚穉故谓之麦麦金也金王而生火王而死颜师古汉书注云岁冬种之经岁乃熟故云宿麦也性恶湿又有黑穉麦糯麦之名糯麦可以酿酒

（臣）等谨案麦种■〈禾来〉𪎭外更有荞麦雀麦瞿麦诸名荞麦尔雅未载雀麦瞿麦俱见释草文薺【音药】雀麦即燕麦也大菊蘧麦即瞿麦也郑志稻粱类未详麦种今补

青稞麦有大小二种似大小麦而粒大皮薄见王祯农书陈藏器曰青稞天生皮肉相离秦陇巴西种之

（臣）等谨案陶弘景苏恭皆云大麦即青稞麦考齐民要术大小麦外别立青稞麦一条则陶苏之合为一者非也今订正之

荞麦一名苽麦一名乌麦【李时珍曰荞麦茎弱而翘磨面如麦故名俗呼为甜荞】易长易收南北皆种之性畏霜又有似荞麦而味苦者名曰苦荞谷之最下者也

渠禾蔓生实如葵子米粉曰如面可为饘粥六月种九月熟见广志感禾扶疏生实似大麦见广志

火禾高丈余如小豆出粟特国见广志

大豆一名菽【李时珍曰篆文未象荚生附茎下垂之形豆象子在荚中之形张揖广雅云大豆菽也小豆荅也】角曰荚叶曰藿茎曰萁有黑白黄褐青斑数色黑者名乌豆可入药及充食作豉诗云荏菽尔雅云戎叔即此又名■〈豆彡〉■〈豆双〉见广雅

（臣）等谨案郑康成诗笺谓荏菽为大豆孙炎亦以戎菽为大豆古人训戎为大郑氏孙氏之说是也附识于此

小豆一名荅见广雅有数种赤豆白豆绿豆■〈𧀮豆〉豆【音劳野豆也】皆小豆也■〈𧀮豆〉豆一名治豆叶似葛而实长可蒸食一名■〈𧀮豆〉菽本草纲目一名鹿豆尔雅藿【音■〈宀君〉】鹿藿即鹿豆

也玉篇作■〈豆奈〉

稻【音吕】豆【李时珍曰稻乃自生稻名也此豆野生故名与稻同】科小粒细霜后乃熟即黑小豆也

豌豆一名脾【布兮反】豆一名■〈豆留〉【音留】豆一名青斑豆一名麻累【李时珍曰其苗柔弱宛宛故得豌豆名嫩时青色老则斑麻故有青斑麻累之名】一名回鹮豆一名■〈豆毕〉豆种出西域即青小豆也又有野豌豆粒小惟苗可茹名翹摇

蚕豆【李时珍曰豆荚状如老蚕故名王祜农书谓其蚕时始熟故名吴瑞以为豌豆误】种亦出西域张骞使外国得此种归见太平御览

豇【江绛二音】豆一名■〈豆彛〉■〈豆双〉【音绛双】多红色荚必双生嫩时可茹老则收子

菹豆一名沿篱豆一名蛾眉豆蔓延而上荚生花下其实有黑白二种白者入药黑者名鹊豆其黑闲有白道如鹊羽

刀豆一名挟剑豆酉阳杂俎云乐浪有挟剑豆荚生横斜如人挟剑即此豆也

樛一名虎鼻见尔雅郭璞注曰今虎豆缠蔓林树而生荚有毛刺今江东呼为■〈木巛〉樛古今注曰虎豆一名虎沙似狸豆而大

黎豆一名狸豆一名狸沙一名猎沙生江南蔓如葛子如皂荚作狸首文【按李时珍误合虎豆狸豆为一今据古今注别出之】

马豆一名马沙似虎豆而小实大如指亦可食见古今注

木豆出徐门子美似乌豆枝叶类柳一年种数年采见交州记

佛豆粒甚大而坚以盐渍食之见益部方物略

（臣）等谨案前载有言三谷者梁稻菽是也有言五谷者麻黍稷麦菽是也有言六谷者稻黍稷粱麦菽是也有言九谷者稷秫黍稻麻大小豆大小麦是也窃谓九谷之名宜取粱而去秫粱谷之美种数不可阙秫即黍之黏者郑志备载麻稻粱而黍稷之名未晰■〈禾来〉粦阙而菽类亦未详今补此以备考证

稗【音败李时珍曰稗乃禾之卑贱者也故字从卑】叶似稻节闲无毛实似蕒有水旱二种水稗名曰藨淮南子曰藨先稻熟而农夫薺之即此紫毛者即乌禾也

稭【衫惨二音】子名龙爪粟一名鸭爪稭【李时珍曰稭乃不黏之称亦不实之貌也龙爪鸭爪象其穗歧之形】生水田中及下湿地叶似稻差短稍头结穗

东廡【音墙】生河西苗似蓬粒似葵青黑色河西语曰贷我东廡尔田梁言

厚报也相如赋东廡雕胡即此

蒹草一名自然谷一名禹余粮生东海洲上有实食之如大麦七月熟民敛获至冬乃讫见博物志

钦定续通志卷一百七十五

●钦定续通志卷一百七十六 昆虫草木略三

昆虫草木略 【三】

木类

○木类

松一名道梓其叶有两鬣三鬣五鬣之分两鬣者常松也三鬣者为栝子松俗名孔雀松又名剔牙松五鬣者为松子松又谓之华山松产

高丽又有金松叶似麦门冬叶中一缕如金縷故名出台州有鱼甲松出洛中有小松长不过三四尺出黄山至赤松白松麈尾松秉性尤异松

叶一名松毛松皮一名赤龙皮松花一名松黄松脂一名松膏一名松香一名松胶一名松肪一名沥青烧取者名松■〈音诣〉 【音诣】

（臣）等谨案苏颂云松叶有两鬣五鬣七鬣而不详松之名李时珍云松叶三针者为栝子松五针者为松子松而不言鬣考癸辛杂识

云栝松每穗三鬣华山松每穗五鬣则三针五针犹三鬣五鬣耳鬣言其形针言其锐也又酉阳杂俎曰松今言两粒五粒粒当言鬣述异记曰

鬣者言如马鬣形言粒者非据此应从周说为正

落叶松塞外兴安岭多有之五台亦有其皮蒙古无茶时可以当茶木性最坚其刺有毒入肉即烂入木即沉所以木商不取其干直挺参

天枝叶蔚然恍若九檐羽盖以塞北高寒经秋叶脱至春复生松上寄生白脂厚五六寸光洁似玉微软而坚有用之为靴底者

杆松一名白松生塞外汗特穆尔岭五台亦有其干直上枝叶如盘下枝长以上渐短远望无异浮图其体最轻商人取之运至通州

条一名稻见毛传陆玕诗疏云稻今山楸也亦如下田楸耳宜阳共北山多有之尔雅曰稻山榎

栈木一名于木见尔雅郭璞注云榿木也江东呼木觔柎一名榿见尔雅郭璞注曰似棣细叶新生可饲牛材中车辘关西呼柎子一名土

榿陆玕诗疏云叶似杏而尖白色皮正赤为木多曲少直枝叶茂好二月中叶疏华如练而细蘂正白盖树今官园种之正名曰万岁既取名于

亿万其叶又好故种之共汲山下人或谓之牛筋或谓之榿材可为弓弩干也

柎 【一作楠】 一名梅见尔雅陆玕诗疏云梅树皮叶似豫樟叶大可三四叶一丛木理细致于豫樟子赤者材坚子白者材脆博物要

览曰楠有三种一曰香楠一曰金丝楠一曰水楠水楠色青而质脆如水杨又任昉述异记云黄金山有柟木一年东荣西枯一年西柟东枯张华谓之交让木亦见蜀都赋此盖柟中之殊异者欤

（臣）等谨案诗有二梅召南之梅杏类也子可调羹秦风之梅大木也材可作栋故毛萇摽有梅传云盛极则堕者梅也终南传云梅者柟也据此则判然二物郭璞于尔雅梅柟下注似杏实酢则误矣郑志合二梅为一入果类尚仍郭氏之讹今正之

楸 【音段】 一名栳见尔雅郭璞注曰白楸也树似白杨邢昺疏曰其材能湿 【能古通耐】

檀一名欃檀皇览云孔子墓有髡檀即此材可为车辐及斧柯树状与梓榆荚蒾相似故俚语云斫檀不谛得繫迷繫迷尚可得驳马驳马梓榆也又江南有一种木春不生叶夏月方萌黄梅过方舒叶叶既开则水定农人凭之以占水候号望水檀又有一种叶如檀高五六尺生高原四月开花正紫亦名檀树其根如葛

魄一名檉榼见尔雅 【诗疏作挈榼】 郭璞注曰魄大木细叶似檀今河东多有之齐人谚曰上山斫檀檉榼先殫郑樵注曰俗呼朴树一名繫迷一名荚蒾一名羿先

梓榆一名驳马其树皮青白驳萃遥视如驳马故名诗隰有六驳即此

漆树高二三丈 【漆俗作漆乃水名非木也今改】 以刚斧斫其皮开以竹管承之汁滴管中则漆矣以金州者为佳故世称金漆今广浙中出一种漆树似小榎而大六月取汁髹物黄泽如金即唐书所谓黄漆者也考工记曰漆欲测言贵清也

楸一名赤楸其白者名楸见尔雅郭璞注曰赤楸树叶细而歧锐皮理错戾好丛生山中中为车辋白楸叶圆而歧为大木

榿一名白榿见尔雅郭璞注曰校小木丛生有刺实如耳瑯紫赤可啖本草曰其核名蕤核

（臣）等谨按郑志依王苍说以柞为榿考诗柞榿并称明非一木故别出之

榿朴一名心见尔雅邢昺疏引某氏曰榿朴榿榿也有心能湿江河闲以作柱又曰诗林有朴榿此作榿朴文虽别其实一也或者传写误

桑有数种农书曰荆桑多椹鲁桑少椹李时珍曰白桑叶大如掌而厚鸡桑叶细而薄子桑先椹而后叶尔雅曰桑■〈辛片辛〉有萇榿舍人曰桑树一半有萇一半无萇为榿尔雅又曰女桑榿桑郭璞注曰今俗呼桑树小而条长者女桑树尔雅又曰檿桑山桑郭璞注曰似桑材中作弓及车辕叶可饲蚕其丝中琴瑟故禹贡曰厥篚檿丝

柘一名杆见广雅树高大如桑枝条婀娜叶大如掌蚕书曰柘叶饲蚕其丝作琴瑟弦清响胜凡丝周礼曰弓人辨六材柘为上古今注曰柘实曰佳【音锥】本草曰又有一种奴柘生江南山野似柘节有刺冬不凋亦可饲蚕

（臣）等谨按李时珍云柘叶饲蚕作茧即尔雅所谓棘茧也考尔雅棘茧注云食棘叶则李说非也附订于此

椿【一作■〈木熏〉一作榦一作椿】见禹贡今俗名春椿长而有寿南北皆有之木身大而实其干端直纹理细腻肌色赤皮有纵纹易起叶自发芽及嫩时皆香甜生熟盐腌皆可茹

枫一名樞樞见尔雅郭璞注曰枫树似白杨叶圆而歧有脂而香今之枫香是孙炎曰樞樞生江上有寄生枝高三四尺生毛一名枫子天旱以泥泥之即两【孙注见广韵及物类相感志于本草纲目所引不同今从广韵】

（臣）等谨按任昉述异记云南中有枫子鬼木之老者为人形亦呼为灵枫盖瘤瘿也荀伯子临川记云岭南枫木岁久生瘤如人形遇暴雨大雨则暗长三五尺谓之枫人二说皆以枫人为瘤瘿与孙炎寄生之说异附记于此

■〈木巳〉即诗所谓南山有■〈木巳〉是也陆机草木疏云■〈木巳〉树如樗一名狗骨木理白滑可为函板

（臣）等谨按郑志误合卫矛狗骨为一今据本草别出之又毛诗南山有■〈木巳〉陆德明释文引草木疏云其树如樗一名狗骨又诗南山有枸正义引陆机疏云枸树高太似白杨有子着枝端大如指长数寸噉之甘美如饴八月熟今官园种之谓之木蜜据此则木蜜之非狗骨审矣坊刻草木疏误合两条为一而没■〈木巳〉之名改樗为栌改狗骨为枸骨以就其说本草纲目亦仍其误今据诗释文乃正义改正

榧白理木也可为栲及■〈禾勺〉故礼记云栲用榧栲牺尊榧杓山海经曰风雨之山其木多榧榧即此

（臣）等谨按陈藏器云凿子木今之作梳者是也李时珍曰凿子木心理皆白色其木坚韧可为凿柄故名凿子木据此二说则榧盖即凿子木也方书以凿子木为柞木乃音近而讹非柞槫之柞也附正于此

桧柏叶松身见尔雅皮光叶尖硬如芒刺一名栝今人名圆柏罗愿尔雅翼曰又有一种别名桧柏不甚长其枝叶乍桧乍柏一枝之闲屡变人家庭宇植之以为玩枌松叶柏身见尔雅郭璞注曰今太庙梁材用此木尸子所谓松柏之鼠不知堂密之有美枌羣芳谱云千仞无枝叶

与身皆直枞桧树皆高丈余花叶皆同但实稍大而色黄绿肉虚为异耳初甚酸涩经霜乃可食

楛见书及诗禹贡注曰中矢干陆机诗疏云楛形似荆而赤茎似着上党人织以为牛管箱器又屈以为钗

掠一名即来见尔雅郭璞注曰今掠材中军辒邢昺疏引本草唐本注云叶似柿两叶相当子细圆如牛李子生青熟黑其木坚重煮汁赤色李时珍以为即松杨也

棫一名■〈木速〉其见尔雅郭璞注曰棫实似柰赤可食山海经曰堂庭之山多棫木即此

榆一名无疵见尔雅郭璞注曰榆梗属似豫章说文谓之母杅

豫一名钓樟章即樟木二木初生无异故淮南子云豫章二木七年乃辨郡名豫章因木得名樟脂名樟脑一名韶脑樟上寄生名占斯一名炭皮

（臣）等谨按郑志合榆与钓樟为一又合豫与章为一与淮南子及本草相背今正之

杙大木子似栗生南方皮厚汁赤中藏卵果见郭璞尔雅注

（臣）等谨按尔雅杙鱼毒陆德明释文云杙又作芄郭璞以大木之杙解之颜师古分芄杙为二以芄为鱼毒以杙为即吴都赋绵杙杙

栌之杙而以郭注为误考本草经草部有芄花【唐慎微移入木部李时珍仍移入草部】别录诸家但云可以毒鱼故一名毒鱼并不言可

以藏卵果沈莹临海异物志诸书但言杙可以藏卵果而不云可以毒鱼则颜说为不易之论矣但毒鱼之芄止一二尺亦不得云大木郭璞以

大木释鱼毒者以文在释木中耳然释草内亦有木槿则尔雅之分篇不可尽泥也郑志用本草文以芄为鱼毒是也而末又引郭璞皮汁藏果

之说以缀之非也今别出之

枸【音钩】 椴树直而高其用与栝桐同出广州见南越志

文木材密致无理色黑如水牛角日南有之见南越志桃榔一名姑榔一名面木一名董椶一名铁木见本草蜀志云兴古南汉县有桃榔

树有面大者至百斛

（臣）等谨按陈藏器云虎散桃榔冬叶蒲葵椰子槟榔多罗等与椶桐同类郑志袭用其语而未详其形与别名补辑之分见各类下

■〈廿纱〉木树高十余丈阔四五树颠生叶两边行围列如飞鸟翼皮中有白面石许磨屑可作饭呼为■〈廿纱〉面轻滑胜桃榔面

见蜀志

穰木出交趾皮中有如白米屑者干捣之以水淋之似面可作饼见吴录

（臣）等谨按穰木杨慎以为即桃榔李时珍以为即■〈廿纱〉木考蜀都赋云
面有桃榔吴都赋云文穰楨檀则杨慎之误审矣李时

珍合■〈廿纱〉穰为一亦无所据今仍依太平御览别出之

虎散一名古散木可作杖见本草

蒲葵如栟榈而柔薄可为葵笠出龙川 【葵笠或作扇笠】 见南方草木状

木棉有草木二种吴录云交趾安定县有木棉树高丈余实如酒杯皮薄中有如丝
棉者色正白破一实得数斤可作布此木本也一名斑

枝花一名琼枝作布名吉贝史照释文云木棉江南多有之以春二三月下种既生须一
月三薹至秋生黄花结实及熟时其皮四裂其中绽出

如绵土人以铁铤碾去其核取如棉者以竹为小弓长尺四五寸许牵弦以弹棉令其匀
细卷为筒就车纺之自然抽绪如纛丝状织以为布此

草本也作布名古终

檀树出永昌其华柔毳可绩为布见蜀都赋注

比闾木其华如羽伐其木以为车终行不败见逸周书注

■〈门外焦内〉木生水中黑色而光其坚若铁见孔晁逸周书注

水松叶如桧而细长出南海不大香故彼人无佩服者踰岭而北则其香殊胜在南
方时见南方草木状

竹柏生峨眉山中叶繁长而箨似竹其干类柏而亭直见益部方物略

合掌柏出汝西练溪暮秋叶敛故名见酉阳杂俎

蓊伯出敏山状如荆白花赤实服者不寒见山海经 【蓊广志作计】

石柏生海中一干极细上有一叶似侧柏根所附着如乌药大抵皆化为石见桂海
虞衡志

阴阳柏出高丽南宋时曾进之左花则右实右花则左实见昆山县志

岩桂一名木犀其花白者名银桂黄者名金桂红者名丹桂

天竺桂生闽粤两浙而台州天竺最多故名大树繁花结实如莲子状天竺僧人称
为月桂其花时常不绝故道经谓之不时花不以供献

（臣）等谨案宋之问诗云桂子月中落陈藏器本草拾遗云今江东诸处每至四
五月后尝于衢路闲得月桂子大于狸豆破之辛香故

老相传是月中下也余杭灵隐寺僧种得一株近代诗人多所论述南部新书杭州府志
涌幢小品诸书所载大略与陈说同考月中桂树之说

出虞喜安天论酉阳杂俎云或言月中蟾桂地影也空处水影也此语差近是月中本无
桂树也月无桂安所得子而下之而植之天竺桂之名

月桂因其四季有花犹胜春花之名月季花耳岂以种出月中而名哉然则桂子之雨何

也李时珍曰宋史元丰三年六月饶州雨木子数亩状
类山芋子味辛而香即此类也斯论可破羣说之诬今并录于此

沈香一名沈水香一名蜜香一名木蜜一名没香一名多木香一名阿■〈影，差代乡〉【音矧】沈怀远南越志云交趾蜜香树彼人取之先断其积年老木根经年其外皮干俱朽烂木心与枝节不坏坚黑沈水者即沈香也半浮半沈与水面平者为鸡骨香细枝紧实未烂者为青桂香其干为栈香其根为黄熟香其根节轻而大者为马蹄香此六物同出一树有精粗之异尔

（臣）等谨按本草拾遗沈香与蜜香分为二沈怀远南越志及李时珍本草纲目合为一考蜜香形状功用与沈水无少异盖一物也故今从沈李二说合之

檀香一名旃檀一名真檀叶庭珪香谱云皮实而色黄者为黄檀皮洁而色白者为白檀皮腐而色紫者为紫檀华严经云白旃檀涂身能除一切烦恼道书檀香谓之浴香不可烧供上真

羯布罗香树松身异叶花果亦别初采既湿尚未有香木干之后循理而析之其中有香色如冰雪似龙脑香见西域志

麝香树其老根焚之亦清烈号■〈食乞〉■〈食达〉香出江南山谷闲见清异录

没药一名末药生南海诸国广州亦有之根株皆如橄榄叶青而密岁久则有脂液流淌在地下凝结成块或大或小类安息香

穰香一名兜娄婆香楞严经云坛前安一小炉以兜娄婆香煎水沐浴即此香也

必栗香一名花木香一名詹香生商山中叶如老椿捣置上流鱼悉暴腮而死以为书轴白鱼不损书也

麒麟竭一名血竭树略如没药其肌赤色采法亦与没药同一云紫榴树之脂见五杂俎

安息香树一名辟邪树段成式酉阳杂俎云刻其树皮其胶如饴名安息香六七月坚凝乃取之烧之通神辟众恶

（臣）等谨按叶庭珪香谱云安息香不宜于烧而能发众香故人取以和香与段说小异又香录云今人和香有如饴者谓之安息油则后人之加名也

苏合香一名咄竭瑟剑其膏谓之苏合油梁书中天竺国出苏合香是诸香汁煎成非自然一物也又云大秦国采得苏合香先笮其汁煎为香膏乃卖其滓与诸国贾人是以展转来达中国者不大香也【李时珍曰刘梦得传信方言苏合香多薄叶子如金色按之即少放之

即起良久不定如虫动气烈者佳如此则全非今所用者】

詹糖香树似橘煎枝叶为香似沙糖而黑出交广以南软者为佳其花亦香气如茉莉花

笃耨香出真蜡国树之脂也色白而明透者名白笃振杂以树皮者则色黑名黑笃耨为下品

胆八香又名唵叭香生交趾南番诸国树如稚木犀其实压油和诸香蕪之辟恶气

龙脑香即今之冰片也一名片脑一名羯婆罗香膏名婆律香亦名脑油段成式西阳杂俎云龙脑香树名固不婆律无花实其树有肥有瘦瘦者出龙脑肥者出婆律膏香在木心中断其树翦取之膏于树端流出斫树作坎而承之

（臣）等谨按古今之言龙脑者其说不一苏恭苏颂皆云树形似杉而叶庭珪及苏恭所引或说则直以为杉木段成式云树无花实又云膏于树端流出而苏恭苏颂所引或说皆云实如豆蔻膏即根下清液盖传闻异词也今一以段说为正

阿魏一名阿虞一名熏渠一名合昔泥有草木二种草者出西域可晒可煎木者膏液滴酿结成

藁木一名黄藁 【俗作黄柏省写之谬】 其根结块如松下茯苓名檀桓陈藏器云百岁藁树之根如天门冬长三四尺别在一旁以小根缀之名檀桓芝此即陶隐居所云其根于道家入木芝品者也又有一种小树状如石榴俗呼为子藁亦名小藁又名山石榴又一种小树多刺者名刺藁 【案金樱子杜鹃花并名山石榴与小藁同名异物】

黄栌生商洛山谷四川界甚有之叶圆木黄可染黄色胡桐见前汉书西域传颜师古曰胡桐似桐虫食其树而沫出下流者俗名胡桐泪可以汗金银

折桐春来开花如玉簪而微红见洞天清录

■ 〈木郢〉桐状似青桐叶有极人取皮以沤丝 【■ 〈木郢〉而郢切】

楝一名苦楝实名金铃子荆楚岁时记言蛟龙畏楝故端午以楝叶包米作角黍投江中祭屈原也

紫檀一名紫旃木性坚新者色红旧者色紫有蟹爪纹新者以水湿浸之色能染物糊榆状如榆其皮有滑汁八月生荚 【考左传正义糊榆即櫟木】

皂树叶如槐叶实名皂荚又名皂角又名鸡栖子又名乌犀又名悬刀性能消铁皂树多刺难上采荚时以篋籬其树一夜自落亦一异也其刺名天丁

肥皂荚树叶如皂树叶荚长三四寸肥厚多肉内有黑子数颗采荚捣作丸澡身去

垢胜于皂荚物类相感志言肥皂荚水死金鱼辟马蚁

■〈麦失〉见之则不就亦物性相制耳

栾树叶似木槿而细薄花黄以染物甚鲜明亦可入药子名木栾子堪为数珠

苏方木一名苏木树似庵罗其木人用以染绛色博物要览云煎汁用铁器则色黯其木蠹屑名曰紫纳亦可用

乌木一名医木一名乌櫨木一名乌文木木色正黑如水牛角体重坚致可为器物其闲道者嫩木也南方人以繫木染色伪为之

桦木似山桃【桦王珉作■〈木昼〉又作櫨】皮堪为烛其皮上有紫黑花匀者以裹鞍及■〈革登〉谓之暖皮

缴木文侧戾故名

桐木性坚紫红色有花文者谓之花桐木【俗作花梨误】可作器物

磷木一名檀木又名磷■〈木勑〉木染绛用之烧灰淋汁可酿酒

柯树一名木奴生广南山谷波斯家用为船舫者也

黄杨木性坚致难长俗说岁长一寸闰年反缩一寸谓之厄闰以今验之但闰年不长耳木理细腻作梳剃印最良

石楠一名枫药南方记曰石楠树野生二月花实如燕卵七八月熟出九真

鬼目一名鹿目刘欣期交州记云鬼目出交趾九真武平兴古诸处树高大如棠梨二月生花仍连着子大者如木瓜小者如梅李而小斜不周正七八月熟【苻草一名鬼目与此同名异物】

（臣）等谨按郑志云石楠一名鬼目考本草诸书石楠与鬼目截然二种郑志所云非有脱文则错悞也今正之

榕树生南海桂林叶如木麻实如冬青其荫十亩故人以为息焉而其枝条既繁叶又茂细软条如藤垂下渐渐及地藤稍入地便生根节见南方草木状

■〈木夔〉木似松柏有刺细理见郭璞山海经注

机木似榆可烧以粪稻田出蜀中见郭璞山海经注

（臣）等谨按齐民要术合机与机为一考机树似梅机树似榆状既不同又机陆德明音求机郭璞音饥音亦各别齐民要术之同条或有脱悞附识于此

■〈木犛，木代犛〉木生蜀中七八月中吐穗穗成如盐粉见郭璞山海经注槭木可作大车輶见说文萧颖士诗序云二室之闲有槭木焉与江南枫形相类

桤【音欻】木一名蜀木见四川志益部方物略所云民家树桤不三年材可倍常故杜甫诗云饱闻桤树三年大

模木生周公冢上其叶春青夏赤秋白冬黑以色得其正也见淮南王木谱

楷木生孔子冢上其余枝疏而不屈以质得其直也见淮南王木谱酉阳杂俎曰蜀中有木类柞众木荣时如枯栝隆冬方萌芽布阴蜀人呼为楷木

棹树干叶俱似椿以其叶煮汁渍果呼为棹汁出高凉郡见南方草木状绀球云棹汁唯可染绛

大风子出海南诸国周达观真腊记云大风子乃大树之子状如椰子而圆其中有核数十枚大如雷丸子中有仁白色

相思子大树也材理坚邪斫之则文可作器其实如珊瑚历年不变东冶有之见南越志吴都赋云相思之树即此

石瓜出四川峨眉山中其树修干树端挺叶肥滑如冬青实长而不圆壳裂则子见其形如瓜其坚如石故名巴豆一名巴菽见广雅一名

刚子一名老阳子左思蜀都赋云巴菽巴戟即此

（臣）等谨按郑志以巴菽为巴椒盖刊本之讹今补其名目以正之

枸橘一名臭橘树叶并与橘同而实如弹丸不香

金樱子一名刺梨子一名山石榴一名山鸡头子【按林檎何褻子亦曰金樱子与此同名异物】

女贞一名贞木一名蜡树琴操鲁有处女见女贞木而作歌即此

冬青一名冻青一名万年枝盖女贞别种也宋时试画院诸生以万年枝上太平雀为题即此

（臣）等谨按女贞冬青古不分别故晋苏彦女贞颂云女贞之树一名冬青而方书所用冬青皆女贞也后人以叶长而子黑者为女贞叶微团而子赤者为冬青故苏恭苏颂咸云女贞叶似冬青至冬不雕今从二苏说别出之

水冬青叶细利于养蜡子见宋氏树畜部

乌药一名旁其一名鳊魮一名矮樟

石荆一名水荆似荆而小生水旁

玉蘂花一名散水花唐时唐昌观有之名人多赋咏焉玉兰一名迎春丛生花白微碧其未开时亦名木笔寄枝用辛夷体则花大而成树

（臣）等谨按胡仔云木笔迎春自是两种木笔色紫迎春色白李时珍云辛夷花有白色者人呼为玉兰二说互异伏读

御制含韵斋咏玉兰诗注云按玉兰取辛夷木本接植之即成花师皆云玉兰虽有白花而小且丛条不成树欲花朵大而成树必须取辛

夷接植而辛夷不以玉兰接之则仍紫花是辛夷玉兰本相近然羣芳谱及诗人率别辛

夷玉兰若涇渭而以木笔属之辛夷今观二花尖锐形态毕同独紫白异色耳若以拟笔不与白而与紫吾以为不然臣等紬绎之下恍悟胡仔以木笔专属辛夷尚仍前人之误而李时珍认为一物亦不知玉兰用辛夷接植而成皆未深考又伏读

御制咏紫白丁香诗云辛夷若谓玉兰别谓此分身抑合身尤为确证郑志但载辛夷而无玉兰殊为疏略今谨补入

琼花扬州后土庙有一株花洁白可爱树大而花繁不知实何木也俗谓之琼花见刘禹锡诗序又有一种聚八仙花与琼花相似而不同叶粗而有芒花小瓣薄其色渐青蘂低于花结子而不香

（臣）等谨按宋敏求等误以琼花即玉蘂刘攽等误以琼花为聚八仙杨慎等又误以玉蘂即山矾今据周必大郑兴裔辨证别出之

山矾一名芸香一名椴花一名■〈木〈义上右下〉〉花【■〈木〈义上右下〉〉音阵出南史】一名郑矾一名场花【场音畅】一名春桂一名七里香

绣球花有红白二种宜寄枝用聚八仙花体白者名雪球小者名玉团紫绣球惟蜀中有之

紫薇一名百日红一名满堂红一名怕痒树一名猴刺脱有数种紫者为紫薇其紫带蓝焰者名翠薇鲜红者名红薇白者名白微

山踯躅一名红踯躅一名山石榴一名映山红一名杜鹃花有红者紫者五出者千叶者其黄色者即羊踯躅也

（臣）等谨按郑志止载羊踯躅而未详其名类今补辑

瑞香花一名睡香一名麝囊花一名蓬莱紫即楚词所谓露甲也又有一种结香枝甚柔韧可绾结故名

佛桑一名扶桑枝柯柔弱叶深绿微濇如桑临漳志云花似槿四时常开

（臣）等谨按梁书扶桑国传云扶桑国地在中国之东其土多扶桑木叶似桐而初生如笋国人食之实如梨而赤与此同名异种

木芙蓉一名地芙蓉一名木莲一名华木一名栳木一名拒霜花类牡丹芍药有红白黄三种宋祁益部方物略云添色拒霜花生彭汉蜀州始开白色明日稍红又明日则若桃花然

（臣）等谨按花史邛州有弄色木芙蓉一日白二日淡红三日黄四日深红比落花紫人号为文官花此与宋祁所记一类而更异附识于此

山茶一名曼陀罗叶颇似茶而厚梗故名花有数种宝珠最胜

蜡梅原名黄梅花本非梅类以香气似梅而色黄似蜡故名有三种以子种不经接

者花小香澹名狗蝇梅 【狗蝇或作九英】 经接而

花疏开时含口者名馨口梅花蜜而香浓色深黄如紫檀者名檀香梅最佳

伏牛花一名虎刺花

蜜蒙花一名水锦花

君子树似桧松见广志晋宫阁记云华林园中有君子树三株即此

慎火树生广州可以御火山北谓之慎火或谓之戒火多种屋上以防火也但南中无霜雪故成树见南越志胜火木生东武城经野火烧

炭不灭故东方朔谓为不灰之木见伏琛齐地记太平寰宇记曰不灰木叶如蒲草束以为燎俗呼为万年火把

■ 〈廿哥〉母树皮有盖状似栝桐但脆不中用用之当裂作三四片见异物志及齐民要术广州记云■ 〈廿哥〉叶六七尺接之当覆

屋

梓椌大十围材贞劲非利刚截不能克堪作船其实类枣味美见异物志

播移树柯叶发根下虚中森罗望之似悬发见林邑记酒树出顿逊国似安石榴采花汁停瓮中数日即成酒见南史

摩厨生于斯调国其汁肥润其泽如脂膏馨香馥郁可以煎熬食物香美如中国所用油见南州异物志

纶木出威宁县似谷皮可以为绵见南越志

千岁木生佷山叶似枣色似桑冬夏青贞强少节目见宜都山川记

勾芒木生岭南容州可以为布里人斫之新条更生取之绩以为布见寰宇记

多罗树出南印建那补罗国北其叶长广其色光润诸国书写莫不采用见翻译名义集天中记谓之贝多树嵩山记谓之思罗树

菩提树出摩伽陀国此树有梵名二一曰宾拔梨婆刀义二曰阿湿曷咄婆刀义西域记谓之毕钵罗见酉阳杂俎

通脱木如婢麻生山侧花上粉主治恶疮如空中有瓢轻白可爱人取以饰物见酉阳杂俎

虎斑木出海南其纹理似虎斑故名见格古要论

色绫木生台山其理如绫纹人取为枕呼色绫枕见酉阳杂俎或谓之■ 〈木索〉

矜木

倒生木依山生根在上有人触则叶翕人去则叶舒出东海见酉阳杂俎

黝木节似虫兽可以为鞭见酉阳杂俎

独椏树出顿邱南应足山树高十余丈皮青滑似流碧枝干上耸子若五彩囊叶如镜世名之仙人独椏树见酉阳杂俎

思儻木生两江州洞坚实渍盐水中百年不腐见桂海虞衡志

抱木叶细如桧身竖类柏唯根软不胜刀锯今潮循人多用其根剝而为履轻如通草暑月着之隔卑湿地气力如杉木见岭表录异

沙罗树在峨眉山难移树叶似栉叶叶相让树皮如玉兰色葱白最洁鸟不栖虫不生见益部方物略花木考名七叶树又名娑婆树

锁锁木出回纥野马川烧之其火经年不灭且不作灰彼处人取根制帽入火不焚能辟寒见辍耕录

娑木出广西四川色黄纹理稍黑花纹细者可爱直理者多性最柔新者有香甚浊见格古要论

强木不沈木也方一寸以百斤巨石缒之终不没见花木考

楞木出湖广及江西南安万羊山木色白纹理黄花纹粗亦可爱谓之倭楞不花者多有一等稍坚理直而细谓之草楞俗呼曰棕木见格古要论

金刚子木出海南安南六楞遍身花纹深细可爱坚且实故名金刚子作数珠冬月不冷手大者如榛子小者如梧桐子亦有如圆眼大者见格古要论

赤水木色赤纹理细性稍坚且脆极滑净见格古要论鹮木出西番其木一半紫褐色内有蟹爪纹一半纯黑色如乌木有距者价高见格古要论

龙骨木根如杯棬干如臂而扁皮青翠花黄心红瓣根身有刺断之有汁可以编篱见事物紺珠

臙脂木色如臙脂坚致可旋作见事物紺珠

艾子木高竦花黄叶小子若萸糜之曰艾油见事物紺珠

慈母树高丈余叶如樱桃而小见事物紺珠

罗汉树有雌雄雄者开花雌者结子子细腰似葫芦见五侯鯖

黄葛木其形如众藤连理合而为一大者合抱高数丈叶如橡叶喜缘崖壁生臙肿屈曲不为材用寿可千岁见叙州府志

楂橡栗之属生闽广江右山谷闲树易成材亦坚韧实如橡斗无刺子或一二或三四似栗而壳薄仁皮色如榧肉如栗味苦多膏油见羣芳谱

不雕木叶似槐四时不雕

卖子木一名买子木花时便生子如椒目在花瓣中宋史渠州贡买子木并子即此

天蓼有三种木天蓼出信阳木高二三丈子作球形可藏作果食又有小天蓼生天目山四明山树如椀子冬月不凋野兽食之又有藤天蓼生江南淮南山子如枣放杖木树如木天蓼老人服之一月放杖故以为名

接骨木一名续骨木一名木蒴藿

榑木 【榑音忽】 一名鹊不蹈以其多刺而无枝也树顶生叶山人采食谓之吻头

木麻叶相对山人取以酿酒

念珠树生大理府每穗结实百八枚昔李贤者寓周城其家妇产难贤者摘念珠一枚使吞之珠在儿手中擎出弃珠之地丛生珠树见大理府志

净土树在鄂县三月开花如桃花八月结实状如小栗壳中皆黄土俗传鸠摩罗什憩此覆其屣土中所生

佛顶青其树碧翠翠异常生峯顶者尤具光彩见峨眉志

夜光木一名亮木塞外木经久而枯其根不朽蟠迴连理于土中水渍木根光辉透彻中外一色有类珠树夜光焰可以烛物取者昼日从朽株中验其渗湿昏黑往取去皮而光发则是矣泥沙净尽竟体晶莹经月水干光乃渐灭

钦定续通志卷一百七十六

●钦定续通志卷一百七十七 昆虫草木略四

昆虫草木略 【四】

果类

○果类

梅 【说文作棗】 一名■〈廿檠〉实似杏微甘酸可啖周礼馈食之笱其实干■〈廿檠〉注干■〈廿檠〉梅也夏小正五月煮梅为豆实其类不一范成大梅谱有江梅消梅绿萼梅杏梅鸳鸯梅诸名乌梅白梅可入药又有榑梅出均州太和山相传真武折梅枝插于榑树而生者榑乃榆树也后魏贾思勰齐民要术云梅实赤于杏而酢可生啖煮而曝干为腊置羹臠中又可含以香口亦蜜藏而食

（臣）等谨按郑志载梅之类一引尔雅梅柟一引时英梅柟属大木又别一种时英梅类而实小名雀梅不足以尽梅类明矣今增补

杏一名甜梅夏小正云四月囿有见杏管子云五沃之土木宜杏杏实形如弹丸其种多黄而圆者曰金杏深赭色核大而扁一名汉帝杏谓武帝上林苑遗种也大如梨黄如橘出济南味最胜其扁而色青黄者曰木杏味酢不及金杏又有白杏色青白或微黄味甘淡而不酢黄而酢者为梅杏青而黄者为柰杏甘而有沙者为沙杏山杏最下惟用其仁又有赤杏黄杏蓬菜杏之名其巴旦杏一名八担杏又名忽鹿麻出回回地树如杏而叶差小实尖肉薄其核如梅其仁甘美味如榛子

李【古文作杼】一名家庆子【唐韦述两京记云东都家庆坊有美李人称为家庆子】管子曰五沃之土宜梅李其类有绿李

紫李牛心李马肝李木李柰李杏李水李均亭李诸名梵书名李曰居陵迦齐民要术云李性耐久树得三十年虽枝枯子亦不细

（臣）等谨按郑志列李之类本尔雅所载无实李麦李赤李及陶隐居所云南居李此外有绿李以下诸名今增补

桃实甘子繁性热不宜多食于六果为下夏小正六月煮桃梅桃也梅桃山桃也煮以为豆实周礼以为馈食之笱盖古人所食惟此桃也

其类甚多味甘美出洛中者曰昆仑桃子可食而性热者新罗桃色黄多蠹用梯接者金桃色青肉白者银桃结实双者鸳鸯桃肉不黏核皮泽

如李者李桃亦曰光桃又有扁桃方桃水蜜桃诸名又洋州云台山生猕猴桃甚甘酸食之止渴见海录碎事齐民要术云桃性皮急四年以上

宜以刀竖■〈丽 卩〉其皮

（臣）等谨按郑志载桃之类引尔雅冬桃及山桃二种山桃酸苦味恶仁可入药冬桃又名十月桃至冬乃熟余桃无闻今增补

枣一名木蜜南北皆有生于青齐晋绛者佳齐民要术云旱涝之地不任稼穡者种枣则任矣周礼馈食之笱其实枣栗元柳贯枣谱有棣

枣红枣紫纹枣香枣圆爱枣火枣三寸枣金槌枣凤眼枣冻枣沙枣■〈山房〉嶮枣诸名不可枚举夏小正云八月剥枣齐民要术云枣实全

赤即收撼而落之为上史记货殖传云安邑千树枣

（臣）等谨按郑志载枣类甚详悉本尔雅此外如元柳贯枣谱所收名亦不一今增补

栗【说文作■〈𣎵，欠代义〉上木下】木高二三丈叶类栎长条似核桃房有刺如汇大者若拳小者若桃李陆玕诗疏云栗

五方皆有周秦吴扬特饶惟濮阳及范阳生者甚美味长他方不及其树之大者曰板栗锥栗又有似板栗而细如橡子者曰茅栗即尔雅所谓

栲栗也一名栲栗其顶圆末尖出湖北者为旋栗丛生实大如杏出桂阳者为莘栗西京杂记有上苑栗四侯栗榛栗瑰栗峰阳栗客燕杂记复

有霜前栗盘古栗鹰爪栗之名又天师栗似栗而美房若橡西蜀青城山中有之宋祁益部方物略云张天师学道于此所遗故名夏小正云八

月栗零零而后取之故不言剥也齐民要术云栗种而不栽史记货殖传云燕秦千树栗

（臣）等谨按郑志木类云橡实之类极多大体皆栗属也可食有似栗而圆者大小有三四种周礼笱人所谓榛实是也二三实作一掬

正似栗而小者大小有三四种尔雅所谓栲栳是也注云子如细栗郑志栗类祇载栲栳

余栗未详今增入此

橧 【与祖同】 一名木桃一名和圆子 【李时珍曰木瓜酸香而性脆木桃酢涩而多渣故谓之橧雷公炮炙论和圆子即此】 似

榲桲色微黄蒂核皆羸核中子小圆农书云橧似小梨西川唐邓闲多种之味劣于梨与木瓜同入蜜煮汤则香美过之庄子云橧梨橘柚皆可于口淮南子云树橧梨橘食之则美嗅之则香皆指此

（臣）等谨按郑志云木瓜短小者谓之榲桲榲桲乃木李埤雅谓之木梨生于吴越非橧也郑志以榲桲为礼记之橧梨误矣因识此以正之

山橧一名杙 【音求】 子一名槩 【音计】 梅一名棠棣子一名赤瓜子一名茅橧一名羊棣子尔雅云杙槩梅状似梅子如指头

赤色似小柰可食见郭璞注生高原有二种小者高数尺多枝柯叶有五尖桮闲有刺其华白其核状如牵牛子大者树高丈余花叶同而实大经霜乃赤

榲桲 【音温孛】 似橧子而小气香辟衣蠹树如林檎花白绿色味甘多毛食之宜去净出关陕沙苑者佳

梨一名快果一名果宗一名玉乳北地皆有之南方惟宣城为胜有乳梨鹅梨之名其余水梨紫梨赤梨青梨茅梨品类甚伙不可枚举梨树必棠梨桑树接者其结实早而佳

（臣）等谨按郑志载梨之类一引尔雅榲罗即鹿梨也一引山橧一引甘棠甘棠即杜梨别一种梨类未详今增补

沙棠状如棠黄华赤实其味如李而无核见山海经今岭外宁乡泷水罗浮山中皆有之吕氏春秋云果之美者沙棠之实西京杂记云上林苑有沙棠其木长千寻细枝为舟犹长十丈

柿 【侧里切俗作柿尔雅翼作柿】 赤实也有黄赤青三种有牛柿鸿柿山柿湖畔柿诸名南剑尤溪柿处州松阳柿为最礼记云枣栗

榛柿齐民要术云柿有小者栽之无则取枝于■〈木栗〉枣根上插之柿有七绝一寿二多阴三无鸟巢四无虫蠹五霜叶可玩六佳实可啖七落叶肥大可以临书见尔雅翼

（臣）等谨按郑志载柿祇云乌者谓之裊裊即漆柿也亦名青裊柿类未详今增补

软柿一名■〈木栗〉枣一名棣 【音逞】 枣一名牛奶 【女蟹切乳也】 柿一名丁香柿一名红蓝枣一名君迁子生海南树高丈余子中有汁如乳甘美吴都赋平仲君迁

柰树似林檎而实稍大味酸微涩性寒有青赤白三种皆夏熟西京杂记上林苑柰
三白紫绿又有紫柰大如斗甘如蜜核紫花青见洞冥
记梵人谓之频婆

林檎一名来禽一名文林郎果一名蜜果一名冷金丹似柰小而差圆其味酢者为
楸子生渤海闲多以柰树寄接有甘酸二种有金红水
蜜黑五色

柑一名瑞圣奴树似橘少刺实圆大霜后始熟味甘比橘稍厚理稍麤而不苦有温
州乳柑洞庭柑海红柑生枝柑平蒂柑之名又有名佛
手柑者一名飞穰木似朱栾枝闲有刺其实如人手有指皮如橙柚厚皱光泽熟黄色其
味虽不甚佳而清香不歇香椽本名枸椽柑橘之属大
如小瓜皮若橙肉厚白如莱菔置衣笥中经旬犹香晋太康五年大秦贡十岳帝以三岳
赐王恺助其珍味即此上林赋云黄甘橙榛

（臣）等谨按香椽与佛手柑异种本草指枸椽为佛手柑非是郑志枸椽已见果
类因辨正故再着之

橘一名木奴树高丈许枝多刺生茎闲实如柚而小其大者如杯味甘微酸其类有
蜜橘黄橘绿橘朱橘塌橘包橘绵橘沙橘冻橘早黄橘
穿心橘荔枝橘乳橘油橘自然橘诸名苏台荆州闽广皆有之而出温州者为上史记货
殖传蜀汉江陵千树橘张衡南都赋穰橙邓橘

（臣）等谨按橘柚柑橙俱见郑志柑橘之种未详今增补

金橘一名金柑一名夏橘一名山橘一名给客橙一名小木奴树似橘不甚高大秋
实冬熟大者径寸小者如指头形长皮坚肌理细润味
酸甘而芳香生吴越江浙川广闲

金豆一名山金柑一名山金橘比金柑更小生山径闲实多味酸不可食

枇杷树高丈余肥枝长叶大如驴耳形似琵琶故名秋萌冬花春实夏熟大者如鸡
子小者如龙眼味甘而酢白者为上黄者次之相如上
林赋枇杷燃柿周礼场人树果蓏珍异之物注云珍异葡萄枇杷之属

杨梅一名杔 【音求】 子树若荔枝叶细青如龙眼及紫瑞香冬月不凋实形如
楮肉在核上无皮壳有白红紫三色生江南岭南山谷
闲会稽产者为冠

平仲一名櫟 【音平】 一名火橐木一名玉精食其子得为仙相如上林赋华枫
櫟栌晋左思吴都赋平仲之木实白如银

山樱桃一名朱桃一名麦樱一名英豆一名李桃树如朱樱而叶尖长不团子尖小
味恶不可食

苹果树似林檎而大果如梨而圆滑光洁可爱玩香闻数步味甘松梵人亦谓之频

婆果

银杏一名白果一名鸭脚子树高二三丈大或至连抱可作栋梁叶薄纵理俨如鸭掌花开旋落人罕见之一枝子百十状如小杏经霜乃熟烂去皮肉取核为果其核尖中圆而微扁其仁色绿久则黄其树耐久生江南以宣城为盛宋初始入贡欧阳修诗云绛囊初入贡银杏贵中州即此果也

核桃树高丈许春初生叶长三寸两两相对花如栗花穗苍黄色实如青桃沔烂皮肉取核内仁为果北方多种之张骞使西域还得此见博物志梵书名播时罗又有名山核桃者底平如槟榔皮厚而坚多肉少仁出南方有名蔓核桃者出南诏大如扁螺两隔味如核桃或言蛮中藤子也

石榴出安石国汉张骞出使西域得涂林安石国榴种以归故名齐民要术云置僵石枯骨于根下则科圆滋茂又一种山石榴形类榴而绝小不作房生青齐闲用蜜渍以当果甚美

（臣）等谨按郑志误以尔雅刘杙为石榴郭注刘子生山中实如梨酢甜核坚出交趾别是一种因附后

刘子树生交广武平兴古诸州山中结实如梨色黄味甘酢核甚坚见荆扬异物志山龙眼出广州色青肉如龙眼而味酸见范成大桂海虞衡志

龙荔状如小荔枝而肉味似龙眼故名龙荔亦见虞衡志

槟榔一名宾门尖长有紫文者为槟圆而矮者为榔又名螺果一名仁频高十余丈皮似青桐节如桂竹叶似甘蔗实大如桃李以扶留藤古贡灰并食则滑美

■〈木邪〉子一名胥余【马司相如上林赋作胥余一作胥邪】状若海欖实大如椀外有羸皮如大腹子豆蔻之类内有浆饮之不醉见刘欣期交州记

榧实一名椀【音彼】子一名赤果一名玉榧一名玉山果生永昌土人呼为野杉木柏形松理细软可为器用实如枣核大如橄榄无棱一树不下数十斛尔雅云椀黏【音杉】即此宋梅尧臣诗榧树移皆活风霜不变青

余甘子二广诸郡闽之泉州及西川戎泸蛮界山谷皆有之南方草木状云花黄实似李青黄色核圆作六七棱食之先苦后甘梵书谓之庵摩勒晋左思吴都赋其实则丹橘余甘

（臣）等谨按槟榔■〈木邪〉子榧实余甘郑志已载木类今移入此

甘瓜一名甜瓜一名果瓜【农书云供果者为果瓜以别于菜瓜也在木曰果在地

曰蔴】 尔雅云瓠 瓠 【音雹】 其绍瓠埤雅云

瓜之继本为绍今验近本之瓜常小末则复大故曰其绍瓠也北土中州种蒟甚多有青
绿黄斑糝斑白路黄路诗名广志惟以辽东炖煌庐江

之瓜为胜然瓜州之大瓜阳城之御瓜西蜀之温瓜永嘉之寒瓜未可以优劣论也甘肃
甜瓜皮瓢皆甘胜饴蜜其皮曝干柔韧甘美浙中阴瓜

种宜阴处秋熟色黄如金藏至春食之如新凡瓜大曰瓜小曰瓠子曰■ 〈兼瓜〉 【音
廉】 肉曰瓢 【音穰】 跗曰环蒂曰■ 〈士

田疋，上中中下〉其畏麝诸瓜皆同

西瓜一名寒瓜蔓生花如甘瓜叶大多桎缺其色青绿其瓢或白或黄或红红者味
胜旧传来自西域故名五代合阳令胡峤于回纥得瓜

种以牛粪种之结实大如斗味甘名曰西瓜见杨慎丹铅总录

北瓜形如西瓜而小皮薄色白瓢红子亦如西瓜微小狭长味甘美

（臣）等谨按郑志蔬类止载白冬瓜各种未详今补入于此

荸荠一名地栗种浅水七修类藁云荸荠淹铜过夜即烂慈姑 【李时珍曰一根岁
生十二子如慈姑之乳诸子故名】 生水田中叶有

稭状如泽泻其根黄似芋而小煮之可啖

（臣）等谨按李时珍云慈姑与乌芋是二种慈姑有叶根散生乌芋有茎无叶根
下生气味不同其说是矣陶弘景苏恭因鳧茨慈姑字

音相近遂合为一考尔雅释草文芍鳧苳 【音疵】 郑志未指何物盖即慈姑也乌芋
则以为河鳧茨郑志固别为二特讹苳为茨耳今特着

之

落花生出闽广藤生花落地而结实故名

波罗蜜生交趾诸国今岭南滇南亦有之树类冬青而黑润倍之冬夏不凋不花而
实出于枝闲大如冬瓜外有厚皮裹之若栗壳内肉层

迭如橘囊食之味甘美如蜜果中之大者

无花果一名映日果树长丈余枝叶繁茂有稭如蔑麻无花而实色赤类棗柿味亦
如之见段成式酉阳杂俎广中谓之优昙钵波斯谓之

阿朮

文光果出景州形如无花果肉味如栗

天仙果树高八九尺叶似荔枝而小无花而实子如樱桃累累缀枝闲其味至甘

波斯枣一名无漏子一名海枣一名金果一名海梭一名凤尾蕉生波斯国状如枣
树若栗其实若橡子有三角

青田核出乌孙国状如桃核大如斗剖之盛水则变酒味甚醇美谓之青田酒汉末
蜀王刘璋得之见崔豹古今注

木威子生岭南山谷树高丈余叶似楝子如橄榄而坚亦似枣削去皮可为粽食见陈藏器本草拾遗

五敛子大如木瓜黄皮肉脆软味极酸上有五棱如刻出南人呼棱为敛故以为名以蜜渍之甘酢而美出南海见嵇含南方草木状

古度子出交广诸州树叶如栗不花而实枝闲生子大如石榴及榧子而色赤味酢煮以为粽食

海红豆树高二三丈宋祁益部方物略云结荚枝闲其子累累珠缀若大红豆而扁皮红肉白以似得名蜀人用为果钉

蒲颓子一名卢都子一名雀儿酥一名半含春一名黄婆奶树高丈余叶不凋冬花春熟小儿食之当果又有一种冬凋春实夏熟人呼为木半夏亦曰野樱桃

无食子一名没石子【没一作墨】一名麻茶泽树高六七丈围八九尺子圆如弹丸酉阳杂俎云其树一年生无食子一年生拔屨子长三寸中仁如栗黄可噉

椌【音蟾】子南越丹阳诸郡中皆有之其实如梨冬熟味酢见荆扬异物志左思吴都赋椌榴御霜是也

无名子生岭南山谷其实状如榛子波斯呼为阿月浑子

系弥子状圆而细赤如软枣其味初苦后甘可食见郭义恭广志

千岁子出交趾蔓生子在根下须绿色交加如织子一包二百余颗壳中有肉如粟味亦如之见南方草木状夫编子树野生花连着实入鸡鱼鸭羹中味美亦可盐藏见南州记

藟子藤生缘树实如梨赤如鸡冠核如鱼鳞生食味淡见齐民要术

山枣出广东肇庆府叶似梅果似荔枝可食见寰宇记隈支生邛州山谷中树高丈余枝条而弱实大若雀卵状似荔枝肉黄肤甘见宋祁益部方物略

杨摇子有七脊子生树皮中色青黄味甘见沈莹临海异物志

钦定续通志卷一百七十七

●钦定续通志卷一百七十八 昆虫草木略五

昆虫草木略【五】

虫类

○虫类

（臣）等谨按郑志合虫鱼为一部尔雅释虫释鱼各为一篇今谨依尔雅之例分为二部云

永嘉八辈蚕一曰蛭珍蚕三月绩二曰柘蚕四月初绩三曰蛭蚕四月末绩四曰爰

珍五月绩五曰爱蚕六月末绩六曰寒珍七月末绩七
曰四出蚕九月初绩八曰寒蚕十月绩凡蚕再熟者皆曰珍珍子为爱左思吴都赋乡贡
八蚕之绵即此又蚕褪一名马明退一名佛退凡蚕独
自成茧曰独茧二三以上曰同功茧其内溃而渍湿者曰阴茧茧外蒙戎之衣曰茧黄蚕
蛹一名蠹蚕蛾一名罗见尔雅

蛭一名螭何见尔雅谭埽雕虫赋注以为即蚕蛹之别名

枫蚕一名丝虫出横州枫叶始生有虫食叶如蚕赤黑色四月吐丝光明如琴弦海
滨人取作钓缗

石蚕一名石蠹蚕一名石下新妇今伊洛间水底石下有之状如蚕解放丝连缀小
石如茧春夏羽化作小蛾水上飞

海蚕生南海山石间状如蚕大如拇指

雪蚕一名雪蛆生阴山以北及峨嵋山大如瓠味极甘美癸辛杂志谓之冰蛆又江
邻几杂志云四川万山深雪中出雪蛆如小猪无口足
眼鼻俨如蛆形其身全脂切片而食此尤雪蛆之异者也

穿木蜂黑色在人家檐椽穿穴如刀锥所钻能螫人竹蜂一名留师 【方言注作笛
师】 蜂大如小指正黑色穴竹为巢蜜如稠糖酸甜

可食俗呼钻竹蜂

竹蜜蜂好于野竹上结窠大如鸡卵有带长尺许窠与蜜并绀色可爱甘倍于常蜜
赤翅蜂出岭南状如土蜂大如螃蟹穿土为房食蜘蛛蛸蜂出巴中在褰鼻蛇穴内
其毒倍常唐元稹诗云巴蛇蟠窟穴穴下有巢蜂即此

独脚蜂出岭南似小蜂黑色一足连树根不得去不能动摇物类相感志名独脚虫
火蜂其状如螽见五侯鯖

蠨蜂附橄榄树而生虽有首足与木叶无异人取之者先伐树仆候叶凋而自见

折腰蜂南蛮记云出益州沙中岸颓则蜂出土人烧冶以为琥珀

蛭一名乌蠹见尔雅郭璞注曰大虫如指似蚕诗蛭蛭者蠹毛传云桑虫也李时珍
曰乌蠹亦有五色者老则作茧化蛾孚子诸草木上皆
有之在枸杞上者名枸杞虫入药广志云藿蠹香槐蠹臭

蛭一名杜伯一名■〈蠹，束代春〉一名蝎见广雅常为蜗牛所食以迹规之不
能去人以气呵之亦不能动通俗文曰长尾为蛭短尾
为蝎本草云蝎紧小者名蚘■〈虫祁〉酉阳杂俎曰江南旧无蝎开元初有主簿以竹
筒盛过江至今往往有之为土气所蒸不能螫人南人
不识呼为主簿虫

草蛭在深山草中人行即着胫股不觉入于肉中产育为害石蛭生石上泥蛭生泥
中二蛭误食之令人眼中如烟渐致枯损

（臣）等谨按郑志止载水蛭一条而未及草蛭石蛭泥蛭诸名今补辑

蝇一名羊见方言有数种苍者名苍蝇声雄壮负金者声清聒青者名青蝇善败物巨者头赤如火号为景迹大而斑色者名大麻蝇茅根所化

蝇虎一名蝇狐一名蝇蝗一名蝇豹形似蜘蛛而色灰白善捕蝇

狗蝇赤色似苍蝇而扁冬藏狗耳中

蠹类甚繁桑蠹去气桃蠹治鬼柳蠹治瘀血柘蠹破血枣蠹及茶蛀虫治聃耳出汗芦蠹治小儿饮乳后吐逆苍耳蠹一名麻虫治疗肿恶

毒青蒿蠹治惊风皂荚蠹治蝇入人耳又有橘蠹大如小指首负特角桐蠹可入药

桂蠹形如新生小鼠产于桂树偷食蜂蜜人以入口即化为蜜甘香甚奇汉书南越王赵陀献桂蠹一器大业拾遗录隋时始安献桂蠹四瓶以蜜渍之皆指此

竹蠹生竹中状如小蚕老则化为蛾淮南万毕术云竹虫饮人自言其诚高诱注云以竹虫三枚竹黄十枚和匀每用一大豆许烧入酒中令人饮之勿至大醉叩问其事必得其诚李时珍以为即此竹蠹也

蝮有二种一曰螾蝮一曰蟪蝮见尔雅夏小正传曰螾蝮者五彩具蟪蝮者蝮也皆五月鸣郭璞曰蟪蝮俗呼蝉江南谓之蟪蝮 【螾蝮雅作■〈虫弟〉】

（臣）等谨按方言曰蝉谓之蝮宋卫之间谓之蟪蝮陈郑之间谓之螾蝮郑志取之考夏小正及尔雅则蟪蝮蟪蝮分明二物又按毛传云蝮蝉也蟪蝮也据此则蟪蝮又为二物矣故别出之

蝮一名虎悬 【虎一作窳】 四月鸣见夏小正一名蜻蜻见尔雅郭璞注曰如蝉而小方言云有文者谓之蝮

（臣）等谨案方言云蝉小者谓之麦札有文者谓之蜻蜻 【与郭注所引异】考尔雅札即蜻蜻方言分为二物误也又郑志云五月以前鸣者则正谓之蝮考五月以前鸣者惟有蝮不名蝮则郑志亦非也今并正之

■〈蝮，截代春〉一名茅蝮见尔雅郭璞注曰江东呼为茅截似蝉而小青色方言曰蝮蝮谓之茅蝮 【茅蝮分青红二种在茅管中亦五月时鸣】

蛭一名寒蝮见尔雅郭璞注曰寒蝮也似蝉而小青色月令曰寒蝉鸣

蛭蝮一名蝮蝮见尔雅郭璞注曰即蝮蝮一名蝮蝮方言曰秦谓之■〈虫多〉蝮自关而东谓之蝮蝮 【音貂劳】 陶弘景曰蝮蝮小紫青色四五月鸣

（臣）等谨按庄子云蝮蝮不知春秋而离骚云蝮蝮鸣兮啾啾岁暮兮不自聊故

陶弘景以离骚为误而郑志云螻蛄乃是寒蜚则又与陶说异考郭璞注螻蛄乃蜓蚰异名寒蜚乃寒蝮别号风土记曰螻蛄鸣于朝寒蜚鸣于夕则寒蜚螻蛄为两物明矣郑志牵合为一殊误今正之

金龟子大如小指甲俗呼红娘南人采之装以金翠为首饰之物

蠹一名蠹蝇一名盲蝇有数种木蠹最大而绿色如蝮蝉一名魂常一名王蠹一种蜚蠹状如蜜蜂黑色又一种小蠹名鹿蠹大如蝇皆能啖牛马血

（臣）等谨按晋语云蠹■〈维上虫下〉之既多韦昭注云大曰蠹小曰■〈维上虫下〉则鹿蠹当即■〈维上虫下〉也郑志诸蠹未详其类今补入

蠹【亦作蚊】一名白鸟一名暑蠹一名黍民一名昏虫一名门下虫其大而斑者曰花蚊更有长脚长喙颀然如鸢鸛者曰水蚊即所谓豹脚也埤雅云蚊有昏市

诸虑一名奚相见尔雅谭埽以为即蚊也

蚋【一作蛄】似蚊而小性喜乱飞望之如雾故一名瞽芮庄子所谓瞽芮生于腐蠹者是也因雨而生见阳而死与蚊实异

蠹子一名乌蚊形圆黑色大如菜子元稹长庆集云蚋之小而黑者名蠹子即此录异记以为即五倍子所化也

（臣）等谨按录异记云峡江至蜀有蠹子视其生处即麸盐树叶背上春间生之叶卷成窠大如桃李名为五倍子收者晒而干之即不化去不然者必窍穴而出飞为蠹子矣据此则五倍子亦系虫类郑志编入木类误今附订正

浮尘子出蜀中微不可见与尘相浮上下故名见元稹长庆集录异记曰色白昼夜害人又溪蛮丛笑云蛮地有虫极细拭目难覩黑点着身抓搔不可耐名鸡末子此亦浮尘子之类但色黑耳

焦冥【冥一作蠹】一名细蠹一名婴蛄【蛄一作蝮】见晏子列子及神异经所谓焦冥巢蚊睫者也

蝮■〈虫妾〉一名■〈虫务〉蝮见广雅状如小蜈蚣色青黑足多而长能溺人影令人发疮如痂一名蝮蝮一名蠹蝮一名搜夹子一名磔蛸周礼赤发氏凡隙屋除其狸虫郑康成注曰狸虫■〈庶外虫内〉肌球之属即此

（臣）等谨按李时珍曰蠹蝮喜伏■〈叟毛〉之下故得此名考陆德明经典释文云蝮音求又音俱则以蠹为蝮乃音之转非以伏

𧈧■〈叟毛〉而名也且蛭喜隐居墙壁隙未尝伏𧈧■〈叟毛〉今正之

蛭一名蝮蝮见尔雅刘歆曰蛭蚘蝮子外传曰虫舍蛭蛭

（臣）等谨案郭璞注尔雅以蛭为蝗子未有翅者而复引虫舍蛭蛭之文以证之夫蝗子恶物去之惟恐不尽岂有舍之之理考说文蛭

复陶也刘歆说蛭蚘蝮子董仲舒说蝗子也则蛭字原有二训春秋宣公十五年冬蛭生当从董说外传之蛭当从刘歆说而名蝮蝮也故韦昭

国语注云蛭蝮蝮可食郭注合二为一遂不可通今附正之

傅一名负版见尔雅柳宗元蝮蝮传云蝮蝮者善负小虫也行遇物辄持取印其首负之背愈重其背甚涩物积因不散卒蹶仆不能起人

或怜之为去其负苟能行又持取如故好上高极其力不已至坠地死

蚘一名缢女见尔雅郭璞注曰小黑虫赤头喜自经死故曰缢女异苑以为齐东郭姜所化

蝗类有四尔雅曰食苗心螟食叶蝻【诗作螽】食节贼食根蠹陆玕诗疏云螟似好舫而头不赤螽蝗也贼似桃李中蠹虫赤头身长

而细毛诗义疏云蠹长而细一名断螯许慎说文云吏冥冥犯法则生螟吏乞贷则生蝻吏抵冒取民财则生蠹

（臣）等谨按说文云螟虫食谷叶者与尔雅小异附记于此

蚝虫窠一名蛄蜥房又名躁舍又名雀儿饭瓮在石榴树上者名天浆子在棘枝上者名棘刚子

白蜡虫大如虬虱芒种后缘树枝食汁吐涎黏于嫩茎化为白脂乃结成蜡处暑后剥取以和油浇烛大胜蜜蜡也虫始白色老则赤黑色

乃结苞于树枝俗呼蜡种亦曰蜡子

（臣）等谨按蜡树大似冬青但蜡树子生青熟紫冬青树子则红色为异耳汪机本草汇编以为虫所食者即冬青树殊非今正之

紫■〈金 卅〉虫【■〈金 卅〉音矿】细如蚁出南海张勃吴录云九真移风县有土赤色如胶人视土知其有蚁因垦发以木枝插

其上则蚁缘而上生漆人折漆以染絮物其色正赤谓之蚁漆赤絮蚁漆即今紫■〈金 卅〉也又名赤胶又名紫梗紫■〈金 卅〉树名渴稟

云师雨虎霍山有之见遁甲开山图荣氏注云云师长五六寸雨虎长八九寸似蛭云雨则出在石内可炙食之

九香虫一名黑兜虫产贵州永宁卫赤水河中大如小指头状如水龟身青黑色至冬伏石下土人取之以充人事至惊蛰后即飞出不可用矣

藿香虫生藿香枝叶中状如尺蠖青色

庞降生岭南多在橄榄树上形如蝮蝉腹青而薄其鸣自呼但闻其声而鲜能得之
蛭蜨一名螫蛭见广雅一名胥一名■〈虫奄〉蝶一名胡蝶一名风蝶一名拊末

【末一作来】一名春驹其小者曰蛾蝶种甚繁唐

滕王蝶图有江夏斑大海眼小海眼村里来采花子等名

花胡蝶橘蠹所化大如蝙蝠名曰凤子一名风车一名鬼车宝波志谓是梁山伯祝
英台之魂又曰韩凭夫妇之魂黑而有彩者曰梁山伯

纯黄色者曰祝英台其黑者名元武蝉又名鬼蛭蝶又罗浮彩蝶世传葛仙遗衣所化人
得其茧悬之经年蝶出虽千万里外必归焉

枣猫生枣树上飞虫也大如枣子青灰色两角

芫青一虫而五变二三月在芫花上即呼为芫青四五月在王不留行草上即呼为
王不留行虫六七月在葛花上即呼为葛上亭长八月

在豆花上即呼为斑蝥九月十月复还地蛰即呼为地瞻芫青一名青娘子斑蝥一名斑
猫一名螫蝥一名龙蚝一名斑蚝地胆一名蚰要一名

青蝥一名青蠊一名青虹一名杜龙

度古一名土蛊类蚓长二尺许稍触则断常趁蚓蚓化唯腹泥如涎有毒鸡食辄死
见酉阳杂俎

独脚蚁出岭南一足连树根下止能动摇不能脱去

青腰虫大如中蚁赤色一尾而尖有短翅能飞

蛆蝇之子也凡物败臭则生之

虱一名蟻见南楚新闻或呼为琵琶虫其子曰虬头虱黑身虱白皆六足

蚤【一作■〈虫爪〉一作■〈虫造〉】一名疥蚤一名狗蚤一名跳蚤以其
黑色善跳也啮人血很于虱

壁虱身扁而臭状如药中酸枣仁啮人甚于蚤虱一名木虱一名扁虱一名芟虱一
名交蚤一名荐蠹一名壁驼今谓之臭虫语称寒叮木

夏叮肉元杨维桢有骂虱赋即指此

牛虱一名蠹见字林

豕虱一名濡需见庄子

狗虱似胡麻故韩愈诗云胡麻撮狗虱

鸡虱极细难见人呼为鸡翕虫伏雌夏月多有之

龙虱飞水田中与灶虫无别

沙虱一名■〈虫便〉■〈旋上虫下〉见广雅毒蛇甲中虫也一名蓬活一名地
肺

竹虱一名竹佛子一名天厌子生诸竹及草木上初如粉点久便能动百十成簇形
大如虱苍灰色蟬史云其矢成团如粟饭悬竹篙间人

取而洗烹食之甚益人

水虱一名鱼虱似人虱而大长寸许生水中能化蜻蛉飞生虫状如嚙发头上有角李时珍曰此天牛别类与鼯鼠同功故亦名飞生

丹戩状如鼠妇青股赤头

■〈庶外虫内〉虫一名地鳖一名土鳖一名地蟬虫一名簸箕虫一名蚶蚩虫逢申日则过街故又名过街状如鼠妇而大与灯蛾相牝

牡小儿多捕以负物为戏虎荟曰土鳖俗呼蚌虎蚌者屋蠹也此物气能禁蠹令蠹尽死故曰蚌虎

行夜一名负盘一名■〈尸外气内〉盘一名气蟻李时珍曰负盘有三行夜蜚蠊鼠蠹皆同名而异类又云行夜与蜚蠊形状相类但以

有廉姜气味者为蜚蠊触之气出者为■〈尸外气内〉盘

油葫芦如促织而三尾不鸣不鬪见事物紺珠

灶马一名灶鸡酉阳杂俎曰灶马状如促织稍大脚长好穴灶傍俗言灶有马足食之兆

吉丁虫背正缘有翅在甲下出岭南宾澄诸州人取带之令人喜好相爱

腆颡虫出岭南状如行夜褐色身扁带之令人相爱

叩头虫大如斑蝥而黑色按其后则叩头有声刘敬叔异苑云叩头虫呪令叩头又令吐血皆从所教杀之不祥佩之令人相爱

扁前生山中状如牛蠹赤翼

蛭【韩非子作虺俗作蛭】腹中长虫也见说文一名人龙韩非子曰虫有虺者一身两口争相齧也即此

蛭腹中短虫也见说文即蚘虫也【蚘一作■〈虫界〉】一名蜚谭埽雕虫赋注云形小于虻身圆白有红喙在人皮肉闲外有线路以针取之出尚能走

（臣）等谨按巢元方云人腹有九虫一曰伏虫长四分羣虫之主二曰虻虫长五六寸至一尺发则心腹作痛三曰白虫长一寸令人腰

疼四曰肉虫状如烂杏令人烦闷五曰肺虫状如蚕令人咳嗽成劳六曰胃虫状如虾蟇令人呕逆七曰弱虫又名膈虫状如瓜瓣令人多唾八

曰赤虫状如生肉动作腹鸣九曰蛭虫至微形如菜虫居腹中令人生痈疽疥癬痂疔痔瘻疝■〈蠹，匿代春〉齧齿诸病考九虫之说抱朴

子已有之但蛭蛭二虫载者不一余七虫惟见巢说故本草纲目诸书但以虺标题而以巢说附之今仍其例

金蚕一名食锦虫字典云屈如指食故绯帛锦如蚕之食叶南人取其矢以毒人谓之蛊药猬能捕之

砂俘一名砂授子生砂石中形如大豆背有刺能倒行旋干土为孔常睡不动故名睡虫又名倒行狗子蜀人号曰俘郁谭埽雕虫赋注名和尚虫

含毒生江岭间蚊蚋之属中毒者慎勿手搔以盐裹之即愈祝穆方輿胜览谓之黄蝇

山蛤在山石中似虾蟇而大黄色能吞气饮风露不食杂虫山人亦食之

山蝥虫生山林间状如百足而大鸟斑色长二三寸鸡犬皆不敢食之

葛蝥一名蚱蝥谭埽雕虫赋注曰状如蝗色似葛翼小不飞跳亦不远在田禾中往来不害稼

飞蛾一名火蛾一名扑灯蛾古今注名火化事物绀珠名霜蛾陶弘景曰蠹蠹诸虫至老各蜕大为蝶小为蛾一名慕光

蛤蚧状类蝮蜒蟄首细鳞长尾生岭南在古墙及榕木间一雌一雄行常相随海录云蛤蚧大月三声小月两声

（臣）等谨按物类相感志云蛤蚧生一岁每鸣一声二岁二声有至十声者考北户录云端州大厅有蛤蚧州吏云多年矣至今每鸣或

三声或一声不定据此则一岁一声之说非也惟海录大月三声小月二声之说得之

黄虫生地上赤头长足有角羣居见别录

地防生黄陵状如蠕居土中食之令人不饥不渴见别录

梗鸡味甘无毒主治痹见别录

益符一名无舌可疗闭疾见别录

虽虫名似蜥蜴而大见说文【考庄子唯虫能虫唯虫能天经典释文云一本唯作虽疑即指此虽虫也】

蜡【音皆】虫名淮南子曰蜡知将雨高诱注曰蜡大如笔管长三寸余世谓之猥狗知天雨则预于草木及桥下干处藏其身矣

■〈蠹，匿代春〉■〈蠹，能代春〉见广雅【■〈蠹，匿代春〉■〈蠹，能代春〉音匿耨】淮南子曰兔啮为■〈蠹，能代春〉许慎注云兔所啮沫著者为■〈蠹，能代春〉如蠹而斑色能啮人

■〈崇蚤〉【音最】虫名见说文墨客挥犀云■〈崇蚤〉虫状似蝉形小而扁隐屋壁及书册中前有两长足似蟹螯触后则旁行触前则却行一名恶虱

十二时虫出容州状如守宫身圆而颈长头有冠帻一日中随时变色青黄赤白黑未尝定嚙人不可疗见岭南异物志

避役出南方大如守宫足长身青肉鬣赤色其首随十二时变子时鼠丑时牛亥时猪性不伤人见者有喜庆见岭南异物志酉阳杂俎谓

之十二辰虫

恙毒虫也喜伤人古人草居露宿相劳问曰无恙见风俗通

窃虫大如半胡麻有两角白色振其头则有声甚响寻之卒不可见见续博物志

蛄蛄一名蟪蛄一头数尾长二三尺左右有脚如蚕可食见事物纪原

木朴尾若龟长数寸居木上食人见酉阳杂俎

土蛭生山石井坎间物类相感志云状类鳗黄灰色有两耳耸立脑后能偷水虽高山绝顶亦能引之江东人呼马土蛭或云凡发泄洪水

皆其兴妖天将雨或时见吐云气

雷蜺大如蚓以物触之乃■〈足戚〉缩圆转若鞠良久引首鞠形渐小后如蚓焉见酉阳杂俎

夜虎出岭南墨客挥犀云状如蚯蚓长尺余嘴利如锥多夜出半身着地半身指空而行或有人误触之者直入人心腹食人至死乃出土

人甚畏避之

谢豹虫出虢州酉阳杂俎云常在深土中小类虾蟇而圆如球见人以前两脚交覆首如羞状能穴地如鼯鼠顷刻深数尺或出地听谢豹

鸟声则脑裂而死俗因名之或曰谢豹人也抱耻死其魄为虫潜行地中羞见人屈出之犹以足覆面作忍耻状

贾拙生千岁木中状如豚食之如狗肉味见白泽图阳遂虫其背青黑腹下白有五足长短大小皆等不知首尾所在生时体软死则干脆

见感应经

鼃一名匿鼃见说文临海水土志云鼃似■〈句上鼃下〉一名鼃鼃一枚有三斛膏

■〈耳录〉听出魏兴郡似蜥蜴居树上下啮人见字林

佗负虫似促织而白色双须甚长无翼不能鸣佗背长股善跳好居下湿地雌雄未尝相离见山堂肆考

天社虫状如犬大腰食草木叶见别录

碎车虫状如唧聊苍色好栖高树上其声如人吟啸终南有之其大而黑者声亦呼唧聊俗呼没盐虫见酉阳杂俎

食胶虫夏月食松胶前脚傅之后脚聂之内之尻中见酉阳杂俎

结草虫一名结苇好于草末折屈草叶以为巢窟见古今注采兰杂志云结草虫一名水螺一名蓑衣丈人

蓑衣虫身黏细稻芒成壳形如枣核时黏立于壁间或时负壳徐徐而行整如毛羽壳中有茧甚幼中身细白如米蛀虫见谭埽雕虫赋注

郎君子生南海有雌雄青碧色状若两擘杏仁妇人临产手执之便生子见异物志

豆娘子如蜻蛉极小坚翅见事物纪原

钦定续通志卷一百七十八

●钦定续通志卷一百七十九 昆虫草木略六

昆虫草木略 【六】

鱼类

○鱼类

嘉鱼鲤质鱗鳞肌肉甚美食乳泉出于丙穴任豫益州记谓之拙鱼水经注曰丙水上承丙穴穴出嘉鱼常以三月出十月入穴口向丙故

曰丙穴山堂肆考曰丙穴在夔州府达县东北通明发县井峡中凡十穴皆出嘉鱼云南记曰雅州诸水多有嘉鱼

鱖一名鲢见广雅状如鱖而头小形扁细鳞肥腹其色最白故呼曰鱖

鮠 【鮠一作鱖】 一名鱖鱼见草本拾遗状似鲢而色黑其头最大俗名包头鱼山海经云鱖鱼似鲤而大首食之已疣即此礼记鱼去

乙郑康成注曰今东海鮠鱼有骨名乙在目旁状加篆乙食之鲛人不可出亦谓此鱼也

（臣）等谨案陆玑诗疏云鱖之头尤大而肥者徐州人谓之鲢或谓之鱖幽州人谓之鰮■〈鱼鸟〉考广雅云鲢鱖也司马相如上林

赋有鰮鮠鮠郭璞注曰鮠似鲢而黑李时珍曰鲢鮠二鱼首之大小色之黑白大不相侔则诗疏以鲢鱖为一物者误矣又山堂肆考云青鲢

曰鱖白鲢曰鱖其说与张揖郭璞异亦非今并正之

鱧一名扬见毛诗传陆玑诗疏云今黄颡鱼也似燕头鱼身形厚而长大鱼之大而有力解飞者今江东呼黄颡鱼大者长尺七八寸许本

草名黄颡鱼又名■〈鱼央〉■〈鱼匕〉又名黄■〈鱼匕〉

鮠■〈鱼臣〉一名河■〈鱼氏〉 【河玉篇作鮠■〈鱼氏〉类篇误鮠】 见广雅即河豚也一名鮠一名■〈鱼规〉 【或作鮠

】 一名鮠鮠一名嗔鱼一名乌狼一名探鱼一名黄■〈鱼规〉一名吹肚鱼又名气包鱼广志谓之鮠鱼山海经敦水多■〈鱼市〉■〈鱼

市〉之鱼 【■〈鱼市〉音沛】 食之杀人李时珍以为■〈鱼市〉■〈鱼市〉即河豚也河豚大者名■〈鱼佳〉鮠又名青郎君小者

名斑儿又名斑鱼又名■〈鱼朋〉鱼

鱼兽一名鱼狸似猪东海有之其皮背上斑天腹下纯青今以为弓鞬步义者也其皮虽干燥经年海水将潮及天将雨其毛皆起水潮还

及天晴其毛复如故虽在千里外可以知海水之潮气自相感也见陆玑诗疏诗之鱼服传之鱼轩皆指此

鰪大鱼也见毛诗传孔丛子曰卫人钓于河得鰪鱼其大盈车即此

（臣）等谨案郑笺云鰈鱼子也与毛传异正义云鯤鱼子释鱼文鯤鰈字异古盖通用或郑本作鯤也案鰈为大鱼孔丛子与毛说合正义谓或郑本作鯤乃揣度之辞未足为据故仍从毛传

鲸海鱼也大者长以里计小者亦数十丈一生数万子常以五月六月就岸生子至七月八月导引其子还大海中其雌曰鲛眼睛为明珠见崔豹古今注金楼子曰鲸鲛一名海鳅穴居海底

（臣）等谨案郑志云鲛即雌鲸而所述鱼形与古今注异故别出之

比目鱼不比不行其名谓之鰈见尔雅郭璞注曰状如牛脾鳞细紫黑色一眼两片相合乃得行上林赋谓之魈郑康成尚书中候注谓之东繇吴都赋谓之两魮刘逵注谓之左右魮临海异物志曰南越谓之版鱼亦谓之箬叶鱼岭表录异云南人谓之鞋屐鱼淮江谓之拖沙鱼

（臣）等谨案郭璞尔雅注云比目鱼江东呼为王余鱼其注上林赋无此句考王余即鲈残能孤游非若比目之不比不行也故孙绰望海赋曰王余孤逝比目双游则王余比目宜为二物又北户录云比目一名鰈考说文

■〈鱼菱〉一名鰈非比目鱼之别名也今并正之
鱮鮓一名鰈鯈见尔雅郭璞注云小鱼也似鲈子而黑俗呼为鱼婢江东呼为妾鱼崔豹谓之青衣鱼罗愿谓之鲙皮鲫李时珍谓之■〈鱼节〉鱼鼯鼠所化其行以三为率一前二后若婢妾然故有婢妾青衣等名

鮓一名鮓鮓见尔雅郭璞注曰鮓鱮属也大者名王鮓小者名鮓鮓今宜都郡自京门以上江中通出鱮鱮之鱼有一鱼状似鱮而小建平人呼鮓子即此鱼也李奇汉书注云周洛曰鮓蜀曰■〈鱼恒〉■〈鱼瞢〉【音亘瞢】毛诗疏曰东莱辽东人谓之尉鱼或谓之仲明鱼

鱮【一作鯈寻淫二音】似鱮鮓而大江湖皆有之鼻长如鹤嘴故又名鹤嘴鱼无鳞有青黑斑文口在颌下一名鯈鯈鱼见山堂肆考广州谓之鯈龙之鱼养鱼经曰鯈鯈鱼两颊之肉谓之鹿头

（臣）等谨案玉篇云鱮鮓也与山堂肆考异考字林云鱮长鼻鱼也重千斤陆玕诗疏云鮓大者不过七八尺郭璞曰鱮似鱮而短鼻鮓似鱮而小据此则身之大小鼻之长短迥然各别不可牵合也故从山堂肆考别出之

鯈有二种郭义恭广志曰犍为犍道县出膾骨黄鱼南中八郡志曰江出黄鱼鱼形颇似膾骨如葱可食此即海语所谓常鯈类鯈而小河海皆产者也刘欣期交州记曰武宁县秋九月黄鱼上化作鶉鸟南方草木状曰短细黄鱼九月中因秋风而变成鶉止园林捕取炙食滋味肥美倦游杂记曰黄鱼化为鸚鵡此即海语所谓海鯈身首差短腾于沙屿化为火鸚者也

【考广韵鯈字或作鱮或又省作黄故唐志诸书称

黄鱼也又鱧亦有黄鱼之名此同名异物】

（臣）等谨案山堂肆考及养鱼经皆统称鲟鳇鱼而海语云鳇类鲟而小微有不同考京口录云鲟鳇是两种鲟肉之色白鳇肉之色黄则海语是也世之并称鲟鳇者犹鹌鹑本二物特以形类相似而总称鹌鹑耳未可为典要也故别出之

鱧一名是鮓见尔雅郭璞注曰鱧属也体似鱣尾如■〈鱼冫〉鱼大腹喙小锐而长齿罗在上下相衔鼻在额上能作声少肉多膏胎生健啖细鱼大者长丈余江中多有之

鮓一名鮓见尔雅郭璞注曰出葦邪头国见吕氏字林

（臣）等谨案杨慎异鱼图赞注云■〈鱼冫〉鮓■〈鱼孛〉鱧五鱼皆出乐浪潘国见说文考说文鮓出葦邪头国■〈鱼冫〉■

〈鱼虜〉■〈鱼市〉鱧出乐浪潘国杨氏合为一非是又误■〈鱼虜〉为鮓误■〈鱼市〉为■〈鱼孛〉益非并附订于此

鱧【音善】一名黄■〈鱼旦〉【音旦】有二种一种黄鱧一种白鱧生溪边土穴中长五尺许大三寸滋味如黄鱧交址九真有之一种变蛇者名蛇鱧项下有白点昂首寸许故又名昂头鱧不可食陶隐居云■〈鱼旦〉鱼乃芹根所化

（臣）等谨案鱧字古多借鱧字为之荀子鱼鳖鳅鱧韩非子鱧似蛇是也后汉书杨震传有冠雀衔三鱧鱼飞集讲堂前注云鱧音善可证附识于此

鮓一名鱣见广雅即白鱼也状如鲤而色白故名说苑阳书谓宓子贱曰投纶错饵迎而吸之者阳鱣也肉薄而不美即此马缟中华古今注曰白鱼赤尾者曰魮【音红】一曰魮或曰雌者曰白鱼雄者曰■〈鱼虫〉鱼子好羣浮水上者名曰白萍

（臣）等谨案荀子儵■〈鱼本〉者浮阳之鱼也杨倞注曰今字书无■〈鱼本〉字当为鮓杨慎转注古音以为■〈鱼本〉即鮓也■〈鱼本〉从本本音叨故■〈鱼本〉音鮓案鮓性好浮水上就阳故名阳鮓则浮阳之鱼其为鮓审矣杨倞之改字盖未深考耳附订于此

石首鱼一名鰕见广雅似鮓而小脑中有骨如白石故名石首鱼鳞色甚黄如金故一名黄鱼又名金鳞又名黄瓜其鰕可作胶博物志谓之鮓魮是鱼初出水能鸣夜视有光每岁四月来自海洋绵亘数里有声如雷网师以长竹插水听之闻其鸣则下网截流取之谓之洋山鱼和莼菜作羹谓之金羹玉饭藁而食之谓之鮓张勃吴录云娄县有石首鱼至秋化为冠鳧临海异物志云石首异种又有石头长七八寸与石首

同

（臣）等谨案五杂组云韦昭春秋外传注石首成■〈鸟邑〉■〈鸟邑〉鸭也今海滨石首未闻有化鸭者考吴录有石首至秋化冠鳧之语本草一种野鸭头中有石云是石首鱼所化附识于此

梅鱼【一作■〈鱼某〉鱼】一名■〈鱼酋〉水【一作■〈鱼酋〉鱼】似石首而小黄金色味颇佳头大于身人呼为梅大头出四明梅山洋故名梅鱼或云梅熟鱼来故名见异物志又名黄花鱼临海水土记谓之黄灵鱼首亦有石雨航杂录云其次名春来最小者名梅首又名梅童

■〈鱼刳〉一名■〈鱼尊〉■〈鱼孚〉【音铺浮■〈鱼尊〉一作■〈鱼普〉】见广雅即江豚也逢风别涌有

两乳一名奔■〈鱼孚〉魏武四时食制谓之■〈鱼孚〉■〈鱼市〉【音敷沛】酉阳杂俎谓之灞南方异物志谓之水猪又名饞鱼俗呼拜江猪陈藏器曰取脂点灯照擣菹则明照读书工作即暗俗言懒妇所化也

海豚鱼一名海豨临海水土记曰海豨豕头身长九尺郭璞山海经注曰今海中有海豨体如鱼头似猪陈藏器本草拾遗曰海豚生海中候风潮出没形如豚鼻在脑上作声喷水直上百数为羣其子如蠡鱼子数万随母而行人取子系水中其母自来就而取之

（臣）等谨案李时珍合鬻与海豚为一考鬻鱼生于江鼻在额上而长丈余海豚生于海鼻在脑上而长九尺则判然二物也今别出之

鳄出南海其身土青色有四足修尾形状如鼉而举止躡疾口森锯齿往往害人鹿走崖岸之上羣鳄嗥叫其下鹿必怖惧落崖多为鳄鱼所得见岭表录异博物志曰鳄鱼斩其头而干之去其齿而更生如此者三乃止洽闻记云鳄鱼别号忽雷一名骨雷秋化为虎三爪

（臣）等谨案韩愈驱鳄陈尧佐戮鳄鱼文人艳称之伏读

御制读祭鳄鱼文诗跋云按唐史载韩愈驱鳄鱼西徙六十里夫一州幅员岂止六十里是仍在其境内若驱之他境是以邻国为壑也彼之民又将受鳄之暴矣而欧阳修作陈尧佐神道碑又称尧佐捕鳄鱼告以文而戮之云云夫鳄果能为害又岂能捕而戮之即捕获亦无庸告以文也且自二事之后潮州仍唐宋之潮州也何未闻鳄鱼之害文人好奇说项其不可信率如此因读韩文并辟之臣等紬绎之下不啻发蒙振聵千古虚词一朝尽辟今谨录之俾天下共祛惑焉

鲮一名鲤见王逸楚辞注及广雅本草谓之穿山甲临海水土记曰鲮背腹皆有刺如三角菱【李时珍引作尾刺如三角菱当从之】

临海异物志曰鯪鱼吐舌蚁附之因吞之又开鳞甲使蚁入其中乃奋近则舐取之

鯪一名■〈鱼鬲〉见广雅说文曰■〈鱼禺〉鱼皮有文出乐浪东晡【音移】
神爵四年初捕收输考工周成王时扬州献■〈鱼禺〉上林赋鯪鰮鰪鰻即此

鰪一名■〈鱼果〉见广雅

鰪【音托】一名■〈鱼唐〉见广雅郭璞上林赋注曰鰪一名鰪一名黄颊山
海经减水多鰪鱼即此状似鲸而腹平大者三四十斤

啖鱼最毒

■〈鱼争〉一名竹头见广雅杨慎曰滇池所饶一名竹丁

禺禺鱼皮有毛黄地黑文上林赋禺禺鰪鰻即此

鰪似鰪郭璞江赋云■〈鱼骨〉鰪■〈滕，鱼代月〉鰪即此【鰪音练】

虎鱼出东海见范子计然头似虎腹背皆有刺本草拾遗谓之鱼虎临海水土记谓
之土奴鱼倦游录谓之泡鱼吴都赋所称沈虎江赋所
称虎状皆指此述异记云老则变为蛟鱼陈藏器曰亦有变为虎者

鹿鱼一名鹿鲨一名白鲨临海异物志曰鹿鱼长二尺余头上有两角如鹿腹下有
脚如人足又有鹿子鱼赭色其尾鬣皆有鹿斑赤黄色
罗州图经云州南海中有洲每春夏此鱼跳出洲化而为鹿曾有人拾得一鱼头已化鹿
尾犹是鱼南人云鱼化为鹿肉腥不堪食

牛鱼有二种南越志曰天牛鱼方圆三丈眼大如斗在脾头口在肋中露齿无唇两
肉角如臂两翼长六尺尾长五尺此一种也陈藏器曰
牛鱼生东海其头似牛此又一种也

鰪鰪鱼出食水其状如犁牛其音如彘鸣见山海经楚辞鰪鰪短狐即此

（臣）等谨案王逸楚辞注云鰪鰪短狐类洪兴祖补注曰鰪鰪状如犁牛则引山
海经为说比王为有据但山海经作鰪鰪引作鰪鰪不
无小异附识于此

鲇鱼【一作■〈鱼资〉】状似鲤头扁而身圆目赤而口小其鳞黑故名鲇鱼
其子满腹故又名子鱼是食泥与百药无忌腹有黄脂
味美獭喜食之物产志曰凡海鱼多以大噬小惟鲇鱼不食其类又性慧不入网罟【扞
虱新话云泉州有通应侯庙其下临海出子鱼甚美
世呼通应子鱼者记所出也王荆公诗遂误用谓长鱼俎上通三印东坡又以通印子鱼
对披绵黄雀皆是传闻之误】

琵琶鱼无鳞长二尺形如琵琶故因为名见沈怀远南越志任昉述异记曰海中鱼
千岁为剑鱼一名乐鱼一名琵琶鱼左思吴都赋曰蛟
鲇琵琶曹毘扬都赋曰鱼则琵琶乌贼皆指此

印鱼无鳞形似■〈鱼昔〉形【■〈鱼昔〉音错】身中正方如印有文章诸
大鱼应死者印鱼先封之见临海异物志郭延之述征
记白城阳县南六里尧母庙前一池鱼头间有印文名印颊鱼非告祠者捕不可得左思
吴都赋曰鮓龟鱠【音藩】■〈鱼昔〉即此

■〈鱼昔〉鹿文青目见临海水土记一名鹿文鲨南越记曰■〈鱼昔〉鱼南越
谓为环雷鱼长一丈子朝出食暮还母腹常从脐中入
口中出腹内有两洞腹贮水以养子腹容二子两腹则四子也其鳃鳞皮有珠文可以饰
刀剑口孙绰望海赋曰劲■〈鱼昔〉扬鬣以排流即
此酉阳杂俎谓之河伯健儿异物志谓之出入■〈鱼昔〉

鱠鼻有横骨如鱠出则海中波浪为之涌海船逢之必断见南越志本草纲目谓之
锯鲨又曰挺额鱼又曰鱠■〈鱼昔〉谓鼻骨如鱠斧
也【据吴都赋注云有横骨在鼻前如斤斧形东人谓斧斤之斤为鱠故谓之鱠】

虎■〈鱼昔〉长五丈黄黑斑耳目齿牙有似虎形唯无毛或曰变乃成虎见临海
异物志一名胡鲨一名虎鲨一名虎头鲨本草以为虎
鱼所化又有鰕■〈鱼昔〉尾似鰕亦见异物志

蛟一名蛟■〈鱼昔〉一名蛟鲨出东海中鱼既生子子惊还入母腹寻复出见博
物志山海经曰漳水多蛟鱼即此郭璞曰蛟背上有甲
珠文尾长三四尺皮可以饰刀剑口

（臣）等谨案罗愿尔雅翼云蛟一名■〈鱼昔〉考左思吴都赋有蛟又有鱣
■〈鱼昔〉则罗说非也今正之

鲨其类甚多有犁头鲨头似犁铧而长尖锐刺人有香鲨体有香气有鬃斗鲨头如
鬃斗有丫髻鲨头如丫髻有剑鲨长嘴如剑对排牙棘
人不敢近又有名狗鲨者狗头鱼身声如狗吠形类弹涂而大大者长丈余好伏泥涂中
而吠见人则惊入水见山堂肆考又宁波府志所载有
白蒲鲨黄头鲨白眼鲨白荡鲨青顿鲨斑鲨牛皮鲨

（臣）等谨案古所谓鲨即尔雅之鮀也今所谓鲨乃■〈鱼昔〉之转音如鱣鱼
蛟鱼虎鱼皆■〈鱼昔〉类也故有鱣■〈鱼昔〉蛟
■〈鱼昔〉虎■〈鱼昔〉之称乃后之称者皆易为锯鲨蛟鲨虎鲨则其为转音明矣
山堂肆考及宁波府志所载诸鲨亦■〈鱼昔〉类耳
戴侗六书故以为其皮如沙故名鲨鱼又按异物志云■〈鱼昔〉有二十余种今以
■〈鱼昔〉鱼鬣鱼蛟鱼鱣■〈鱼昔〉虎■〈鱼昔〉
鹿■〈鱼昔〉印鱼而加以犁头等六鲨白蒲等十鲨正得二十三■〈鱼昔〉也郑志
已有鲨鱼而未详其类今补入

乌鲗一名乌贼鱼一名墨鱼陶隐居以为■〈暴鸟〉鸟所化也其骨名海螵蛸南

越记曰乌贼鱼有矜遇风浪便虬前一须下矜而往腹中血及胆正黑中以书也世谓乌贼怀墨而知礼故俗云是海若白事小吏酉阳杂俎又名河伯从事或曰鱼常浮水上乌见以为死便往啄之乃卷取乌故谓乌贼埤雅云乌鲗远岸则虬前一须为矜近岸则黏前一须于石为缆故又名缆鱼岭表录异曰乌贼鱼前有四足每潮来即以二长足捉石浮身于水上有小鰕鱼过其前即吐涎惹之取以为食左思吴都赋曰乌贼拥剑即此

鲭一名青鱼一名青鱈一名乌鰪鱼状似鲤而背青色其头中枕骨蒸令气通干之状如琥珀荆楚人以作酒器梳篦甚佳事物纪原曰鰪青黄色腮下有横骨如锯又青鱼之大者名■〈鱼娄〉一名鲤一名鳊见玉篇

（臣）等谨案李时珍曰南人多以青鱼作鲈古人所谓五侯鲭即此考广韵鲭有二音音征者乃煮鱼煎肉之名所谓五侯鲭也音青者乃鱼名即青鱼也李氏不考其字同音异而合为一条误矣今正之

脍残鱼状如银鱼而大冬月带子者谓之挨冰嗽博物志曰吴王江行食脍有余弃于江中流化而为鱼今江中有鱼名吴王余脍者长四寸大者如箸犹作脍形

银鱼似脍残而小古谓之白小今谓之面条鱼海中出者曰龙头鱼福州一种名水晶鱼

■〈鱼骨〉有二种山海经曰桃木多■〈鱼骨〉鱼【郭云■〈鱼骨〉音滑】其状如蛇而四足是食鱼此一种也经又云子桐之

水多■〈鱼骨〉鱼【郭云■〈鱼骨〉音骨】其状如鱼而鸟翼出入有光其音如鸳鸯此又一种也郭璞江赋之■〈鱼骨〉未知何种

李善则引子桐之■〈鱼骨〉以注之【考汉书地理志曰子桐之水其中泽多■〈鱼骨〉鱼与山海经异】■〈滕，鱼代月〉【■

〈滕，鱼代月〉音腾】出合水其状如鳧苍文赤尾食者不癯可以已痿见山海经文鳐出观水状如鲤鱼鱼身而鸟翼苍文而白首赤喙常行西海游于东海以夜飞其音如鸾鸡其味酸甘食之已狂见则天下大穰见山

海经吕氏春秋曰观水之鱼名曰鳐状如鲤有翼左思吴都赋曰文鳐夜飞而触纶皆指此

鱣【鱣音纶】出来需水黑文其状如鲈食者不肿【今本作睡】见山海经郭璞江赋鮫鳐鱣鲢即此

鱣似魮色白鼻长见广韵北史真腊国有鱼名建同四足无鳞鼻如象吸水上喷高五六十尺亦其类也

（臣）等谨案郭璞江赋或鹿貉象鼻所谓象鼻盖即此鱼也而注家皆阙今附识

于此

鮭出柢 【音蒂】 山之水其状如牛陵居蛇尾有翼其羽在肋下其音如留牛冬死夏生 【蛰类也】 食之无肿疾见山海经郭璞江赋曰鮭鮭踦局于垠隙又曰潜鹄鱼牛亦鮭也鱒 【音团】 有二种山海经曰暴水多鱒其状如鲋而彘尾其音如豚见则天下大旱此一种也仪礼曰鱒 【音专】 鲋九腊吕氏春秋曰鱼之美者洞庭之鱒此又一种也江赋作■〈虫专〉

鱒一名魮 【鱒音忿魮音烘】 临海水土物志曰鱒鱼似圆盘口在腹下尾端有毒兴化志曰魮首似燕故名燕魮鱼尾圆长如牛尾故又名牛尾鱼雨航杂录云鱼最大者曰鲛其次曰锦魮曰黄魮曰斑魮曰牛魮曰虎魮魮字或作■〈鱼共〉文选所谓鱒鱼是也海篇作■〈鱼忿〉又云即■〈敏上鱼下〉鱼也类篇又有白魮

海鳐鱼似鹞有肉翅能飞上石头一名石蜃一名邵阳鱼齿如石版生东海见本草拾遗雨航杂录曰海鳐出主风故谚曰海鳐风伯使白袋雨师奴白袋似牛而白白海入江则兆雨泽

鮪魮鱼益人尾有毒疗齿痛见陶隐居别录

地青鱼尾有刺甚长逢物则拨之毒能中人色白者曰地白与魮相类见宁波府志

（臣）等谨案本草纲目曰海鳐鱼一名鱒鱼一名鮪魮鱼宁波府志云地青鱼又名邵阳鱼鼠尾鱼案■〈鱼共〉鱼即鱒鱼邵阳鱼即海鳐鱼陈藏器本草拾遗曰■〈鱼共〉鱼 【音拱覬子】 鳅鱼 【鳅同音】 鼠尾鱼地青鱼鮪魮鱼 【鮪普胡反魮音毗】 邵阳鱼尾刺人者有大毒已上鱼并生南海总有肉翅尾长二尺刺在尾中逢物以尾拨之食其肉而去其刺据此则本草纲目及宁波府志皆误也

■〈如上鱼下〉魮鱼出濫 【音檻】 水其状如覆铍鸟首而无翼鱼尾其声如磬是生珠玉 【珠母蚌类】 见山海经南越志曰海中有文魮鸣似磬鸟头鱼尾而生玉即此故郭璞江赋曰文魮磬鸣以孕璆

龙鱼陵居其状如狸 【或曰龙鱼似狸一角也】 一曰虾 【音遐】 昔有神圣乘此以行九野一曰螯鱼其为鱼也如鲤见山海经

【案上作如狸下云如鲤二字互异海外经文法多如此今仍之】 括地图曰龙鱼一名鰲鱼状如龙有神圣乘此而行九野郭璞江赋曰龙鲤一角又曰或虎状龙颜皆指此

人鱼似人长三尺余有发不可食见临海异物志洽闻记云海人鱼东海有之大者长五六尺状如人眉目口鼻手爪头皆为美丽女子无不具足皮肉自如玉无鳞有细毛五色轻软长一二寸发如马尾长五六尺魏武四时食

制谓之发鱼

（臣）等谨案岭海异闻云人鱼长四尺许体发人也惟背有短鬣微红注云西海陵鱼即此考陵鱼有甲故山海经云鱼身此文云体发人也洽闻记云无鳞有细毛皆不云有甲又贤奕编云等制查道奉使高丽见沙中一妇人红裳双袖髻鬟纷乱肘后微有红鬣查命扶于水中拜手感恋而没乃人鱼也其状与岭海异闻脗合而亦不云有甲则注以人鱼为陵鱼者误也附详于此

飞鱼有数种山海经曰正回水多飞鱼其状如豚而赤文服之不畏雷可以御兵又曰劳水多飞鱼其状如鲋食之可以已痔林邑国记曰飞鱼身圆长丈余羽重沓翼如胡蝉出则羣飞游翔翳荟而沈则泳海底酉阳杂俎飞鱼朗山浪水有之鱼长一尺能飞飞则凌云空息即归潭底

■〈鱼巢〉 【■〈鱼巢〉音藻】 出濠泽水状如鲤而鸡足食之已疣见山海经 【考吴任臣曰张融海赋云■〈鱼飞〉魼■〈鱼菓〉■〈鱼骨〉疑■〈鱼菓〉即■〈鱼巢〉之误】

何罗鱼出谯水一首而十身其音如吠犬食之已癩见山海经张融海赋云何■〈卜罗〉鰓鰓即此又山海经云泚水多茈鱼其状如鲋一首而十身其臭如麋芫食之不■〈米费〉此亦何罗鱼之类也

（臣）等谨案杨慎云何罗鱼即今入带鱼考八带鱼即八稍鱼一首而八身与何罗鱼之十身者有别今特正之

鰓 【音诣】 出诸怀水鱼身犬首音如婴儿食之已狂见山海经

疏齿鱼味如猪肉出东海见魏武四时食制潘岳沧海赋曰比目疏齿即此

箴鱼 【箴或作鍼】 一名姜公鱼南越记谓之长针鱼或谓之针口鱼临海异物志谓之铜吮鱼状如鲙残而喙尖有一细黑骨如针故

名山海经■〈𩺰只〉 【音积】 水多箴鱼其状如儵其喙如箴食之无疫疾即此山堂肆考云针口鱼口似针头有红点腹两旁自头至尾有白路如银色身细尾歧长三四寸二月间出海中

鰓鰓 【音褶】 出罽水其状如鹄而十翼鳞皆在羽端其音如鹄可以御火食之不瘳见山海经雒书曰鰓鰓鱼状如鹄食之不瘳出涿光山即此

师鱼出厯号水食之杀人见山海经陈藏器本草拾遗云鱼师大者有毒杀人李时珍吴任臣皆以为即山海经之师鱼也 【考唐韵云

■〈鱼卧〉老鱼也又别一义非此】

文鱼出睢 【音疽】 水见山海经郭璞注曰文鱼有斑彩也

赤鱮【音儒】出英水其状如鱼而人面其音如鸳鸯食之已疥见山海经

■〈鱼丰〉出禺水其状如鳖鱼尾二足其音如羊食之益明见山海经

无遗鱼出洸水鱼身蛇首六足目如马耳食之使人不眯可以御凶见山海经【考无遗坊本作冉遗此从太平御览】

𩚑【音骚】出渭水其状如鱧鱼见山海经

羸鱼出蒙水鱼身而鸟翼声如鸳鸯见山海经

■〈鱼此〉【音紫】出晋水其状如儵而赤鳞其音如叱食之不骄【或作骚】见山海经

■〈鱼色〉【音陷】父鱼其状如鲋鱼首而彘身食之已呕见山海经豪鱼出渠猪水其状如鲭而赤喙尾赤羽可以已白疥【坊本作癬】见山海经

堪■〈予予〉鱼【■〈予予〉音序】出豸山水其状如夸父而彘毛其音如呼见山海经

𩚑【音蛤】出深泽其状如鲤而六足尾其鸣自叫见山海经及广雅

薄鱼状如鱧鱼而一目其音如欧出鬲水见山海经

修辟鱼出橐水状如龟而白喙其音如鸱食之已白癬见山海经

滑鱼出滑水其状如鱧【音善】赤背其音如梧食之已疣见山海经

鲜鱼出貉国见说文水经曰扶南象浦有鲜鱼色黑身长五丈头如马首伺人入水便来为害酉阳杂俎谓之马头鱼事物纪原云鮓鲜鱼

一名康郎云南人以为瘴药杨慎曰滇人呼为濂良鱼其鱼干而中空

𩚑状似虾无足长寸大如钗股出辽东见说文

望鱼侧如刀可以刈草出豫章明都泽【一云涂泽】见魏武四时食制

斑文鱼出东夷濊国汉时恒献其皮见郭义恭广志

斑鱼头中有石如珠出北海见魏武四时食制

蕃踰鱼一名蕃喝鱼状如鳖大如箕甲上边有髯无头口在腹下尾长数尺有节有毒螫人见魏武四时食制

（臣）等谨案李时珍误合蕃踰鱼邵阳鱼𩚑鱼海鵝鱼为一今各出之

横公鱼出北方荒外石湖中长七八尺形如鳧而目赤昼则居湖中夜化为人刺之不入煮之不死以乌梅二枚煮之乃熟食之可止邪病

【元黄经曰横公鱼不可杀惟加乌梅其气乃灭】

蒲鱼其鳞如粥出郟县见魏武四时食制【其鳞如粥杨慎作其形如粥】或曰蒲鱼一名■〈鱼为〉鱼尾如蛇口眼不相营

君鱼长三寸背上骨如笔管大者似口逢诸细鱼及鼃皆断之见沈怀远南越志

■〈鱼色〉一名生母鱼见岭表录异刘敬叔异苑曰凡诸鱼欲产■〈鱼色〉辄

以头冲其腹■〈鱼𩚑〉鱼自欲生者亦更相撞触故
世人谓为众鱼之生母也

（臣）等谨案李时珍本草纲目合鳃■〈鱼𩚑〉鰓为一考太平御览诸书未有
合者今分辑之

寄鱼长三寸似白鱼常附海船以济洪波一曰寄载鱼见沈怀远南越志临海水土
记谓之寄度鱼

黄雀鱼出南海常以六月化为黄雀到十月入海为鱼见临海异物志风土记曰六
月东南长风俗名黄雀风时海鱼化为黄雀因为名也

燕长五寸阴雨起飞高丈余见临海异物志

鸢鱼状如鸢头有两角唯无尾无足阴雨日亦飞高数丈见临海异物志

邵鱼状如鸢鱼见临海水土记

鱈鱼状如鸢鱼见临海水土记

槌额鱼似■〈鱼昔〉鱼长四尺见临海水土记

石■〈虫矛〉【音矛】鱼附石似锯错见临海水土记

井鱼头两角见临海异物志酉阳杂俎曰井鱼脑有穴每噏水辄于脑穴中蹙出如
飞泉散落海中舟人竞以空器贮之海水咸若经鱼脑
穴中出反淡如泉水焉

镜鱼如镜形体薄少肉见临海异物志

镊鱼长七寸头如镊见临海水土记

含光鱼一名蜡鱼黄而美故谓之蜡有光照如烛见临海异物志岭表录异曰黄蜡
鱼即江湖之横鱼头嘴长而鳞皆金色南人脔为炙虽
美而毒或煎煨干夜即有光如烛

■〈鱼辰〉细如指长七八寸但有脊骨可作羹大者如竹竿爆作烛极有光明见
临海异物志

■〈鱼宛〉正月生溪中裁长一寸至十月中东还归于海香气闻于水上到时月
辄复更生见临海水土记永嘉地志曰石堂水口多■

〈鱼宛〉鱼即此

（臣）等谨案雨航杂录曰鴈山有香鱼鳞细不腥春初生月长一寸至冬月长盈
尺则赴潮际子生已辄槁一名记月鱼盖即此■〈鱼
宛〉鱼而古今名称不同耳附识于此

金石鱼形圆如七寸样见南越志

婢屣鱼口近腹下形似妇人履见临海异物志

奴屣鱼长一尺如屣形见临海水土记

（臣）等谨案李时珍误合比目鱼婢屣鱼奴屣鱼为一今各出之

■〈沃上鱼下〉鱼似蒲鱼长三尺【■〈沃上鱼下〉音沃】见临海水土记
陶鱼长三尺似鰮鱼【鰮音绳】见临海水土记

戴星鱼状如鸢鱼背上有白点如指大见临海水土记

■〈鱼党〉似铁■〈鱼毕〉【音毕】尾上刺有如櫟树刺也见沈怀远南越志

鯿似白鱼而身稍短尾不偃清远江多此鱼盖不产于海也广人得之多为脍不腥而美诸鱼无过之者见岭表录异

织杼鱼背上正青见沈怀远南越志

新妇鱼似■〈鱼佳〉鱼长一尺见临海水土记养鱼经曰鰕虎鱼类土附而腮红若虎善食虾俗谓之新妇鱼

绯鱼一名红桃鱼出海中见异物志

鯿鲍似海印鱼见临海水土记本草图经云鲍鱼形类鲙鱼生溪中极臭额旁有骨名乙长尺许

鋤刀鱼似■〈沃上鱼下〉鱼见临海水土记

虾蟇鱼色似鸢鱼头如虾蟇尾又似鸢见临海水土记

鼈鱼长五寸见临海水土记

乌鵲鱼通身黑长二丈见南越志

鼠鱼长七寸头如鼠见临海异物志

弓鱼长三寸似鲩鱼见临海水土记【杨慎曰弓俗误作公】事物纪原云公鱼似鲩细鳞长不满尺有子美出大理

■〈鱼婴〉■〈鱼壹〉长一丈见临海水土记

黍鱼长尺似■〈鱼资〉■〈如上鱼下〉见临海水土记

真鱼如织杼鱼见沈怀远南越志临海水土记曰■〈鱼真〉鱼俗谓之鳅鱼

■〈鱼仓〉两肋下有大肉如炙脔大见临海水土记岭表录异曰■〈鱼仓〉鱼形似鳊鱼而脑上突起连背而圆身肉甚厚肉白如鳊

只有一脊骨治之以姜葱炆【音缶蒸也】之以粳米其骨亦软殄者无所弃本草

■〈鱼仓〉鱼一名鲳鳊一名鲳鱼一名鲳鱼

鸡子鱼口有嘴如鸮肉翅无鳞尾尖而长有风涛即乘飞于海上船稍类鲑鳊见岭表录异

竹鱼产江溪间形如鳊鱼大而少骨青黑色鳞下间以朱点可翫见岭表录异又西阳杂俎云负朱鱼每鳞有一点朱【据桂海虞衡志

云竹鱼出漓水状似青鱼又鸟兽考云竹鱼其色如竹青翠可爱与此名同而形异】

绩尾鱼有毒一名鳖鱼见南越志【据山海经龙鱼一名鳖鱼与此名同物异】土拌鱼长七寸白黑斑文见临海水土记

芦■〈鱼孚〉似鳅螯而有细文多膏肥美大如芦菅出水地中随水浮出俗名芦■〈鱼孚〉见异物志沈怀远南越志曰芦■〈鱼孚〉鱼生山曲之间穴地为窟泉源涌则此鱼出今庐陵以南至于南州有焉俗以为酱

鼃风鱼值冬数千万头共处大窟中藏上有白气或在鼃穴中皮黑如漆能潜知数里中空木所在因风而入空木化为蝙蝠其肉甚美见异物志

丹鱼出丹水常先夏至十日夜伺之鱼夜浮水侧赤光上照赫然如火也割其血涂足下则可步行水上长居渊中矣见抱朴子

缘鱼出赤土国南海中羣飞水上见北史

味鱼出黄河中状类嘉鱼潘淳诗话云河中府三面是黄河唯有味鱼似鲫而肥短味亦美故杜甫诗云黄河味鱼不易得【考黄河味鱼一本作河冻未渔】

鮓出葦邪头国见说文雨航杂录曰鮓鱼状似鲈而肉羸三腮曰鮓四腮曰茅鮓小者曰鮓姑乐清志所谓■〈敏上鱼下〉鱼是也一曰茅狂【考鮓亦名■〈敏上鱼下〉与此同名异物】

（臣）等谨案李时珍误合鮓鱼与石首鱼为一今各出之

鲈一名四腮鱼有二种曰脆鲈曰烂鲈谈苑云松江鲈鱼出长桥南者四腮味美肉紧出长桥北者三腮味带鹹肉稍慢

（臣）等谨案鸟兽考云海中四腮鲈皮紧脆而肉厚呼曰脆鲈有江鲈差小而两腮味淡有塘鲈虽巨而不脆考茅鮓状似鲈而四腮鸟兽考所云海中四腮鲈即茅鮓非真鲈也

锯鱼出惠州一名狼藉鱼身长二丈口长三尺广三寸左右齿如铁锯见寰宇记南越志作锯鱼渔书云此鱼惜齿挂于网则身不敢动恐伤其齿谚谓千斤之锯命悬一丝是也

勒鱼出东南海中腹下之骨如锯可勒故名出与石首同时海人以冰养之而鬻于诸郡谓之冰鲜见养鱼经冬月出者名映雪鱼干者谓之勒鲞头上有骨合之如鹤形称为养鹤前人多赋咏焉

鱮初夏从海中泝流而上长尺余腹下如刀项上细骨如鸟毛在肉中又有鸟肾二枚在腹立夏有白鸟似鹭羣飞谓之鱮鸟至仲夏鸟藏鱼出变化所生也见异物志

（臣）等谨案李时珍合鲚鱼望鱼鱮鱼为一考鲚出江湖望鱼出明都泽鱮鱼出海未可牵合又集韵合鱮鱮为一亦非今各出之

鲋一名箭鱼腹下有三角硬鳞如甲故广州谓之三鰲之鱼或以为即尔雅之鰲鯪也李时珍曰蜀人呼为瘟鱼畏而不食【考蜀人二

字杨慎异鱼图赞作界江而西今从本草】

（臣）等谨案尔雅鰮鰮郭汪未详郑樵以为即鰮鰮也考古书皆作鰮鰮无作鰮鰮者惟稽神录作鰮不足据也鰮鱼既有三鰮之名又鰮鰮古音相通则以鰮为鰮鰮者近是

鰮鱼一名■〈鰮，鱼代炎〉鱼一名水豚又名鰮豚生江溪间巨口细鳞黄质黑章刺凡十二以应十二月有肚能嚼特异常鱼夏月好藏石罅中人即而取之其斑文鲜明者雄也稍晦昧者雌也渔者以索贯一雄置之溪畔羣雌来啗曳之不舍掣而取之常得十数尾

杜父鱼一名渡父鱼一名黄■〈鱼幼〉鱼【■〈鱼幼〉音么】临海志谓之伏念鱼古今注谓之童子鱼吴兴谓之鲈鲤状如吹沙而短其尾歧见人则以喙插入泥中故又名船钉鱼又养鱼经云土附鱼似黑鲤而短小附土而行故名

石斑鱼一名石矾鱼一名高鱼生南方溪涧水石处长数寸白鳞黑斑浮游水面闻人声则划然深入南方异物志云高鱼似鳟有雌无雄常以二三月与蜥蜴合于水上其胎毒人

石鲋生南方溪涧中或云生南海方山中长一寸背里腹下赤南人以作鲙云甚美黄鲋一名黄姑鱼一名黄骨鱼状似白鱼长不近尺阔不踰寸扁身细鳞李时珍曰鱼肠肥曰鲋此鱼肠腹多脂渔人炼取黄油燃灯甚腥也

鹅毛鱼其细如针盐藏为脍其味甚美郭义恭云小鱼一斤千头未之过也见北户录岭表录异曰捕鱼者仲春望鲙鱼儿来如阵云遂桨船争前迎之鱼儿自惊跳入船逡巡而满以此为■〈鱼廷〉故名跳■〈鱼廷〉

（臣）等谨案李时珍曰鹅毛鱼即鲙鱼儿也或云即鳢鱼苗俗名春鱼与刘恂所谓鲙儿互异盖鹅毛鱼随处有之鲙鳢及鲙之鱼苗皆蒙此称附记于此

金鱼有鲤鲫鳊鰮四种鳊鰮难得独金鲫耐久红者名火鱼白者名银鱼五色者名手巾鱼

鲟一名■〈鱼赖〉鱼【■〈鱼赖〉音癩】一名水底羊今人以作假河豚者也

■〈鱼帝〉出休水状如螯雌【螯音周】而长距足白而对食之无蛊疾可以御兵见山海经寇宗奭曰■〈鱼帝〉鱼形微似獭四足腹重坠如囊身微紫色无鳞与鲑鮠相类尝剖视之中有小蟹小鱼小石数枚也

（臣）等谨案李时珍云■〈鱼帝〉鱼一名人鱼一名孩儿鱼考山海经人鱼郭注皆指鲋鱼鲋鱼音如小儿故名孩儿鱼李氏以名鲋

者名■〈鱼帝〉误矣今正之

竹夹鱼似比目而肉坚身圆尾尖青黑一名土鳢见雨航杂录

鲟出江湖尾有两歧如鞭鞘故名见陈藏器本草拾遗销管鱼似乌贼而小色紫兴化府志谓之净瓶鱼

柔鱼与乌贼相似而无骨越人重之

章鱼一名章举一名章拒一名章锯形似乌贼而差大足长二三尺足上戢戢如钉每钉有窍其大者名石拒临海异物志■〈侍上鱼下〉似乌贼肥食甘美李时珍以为即章鱼鯨似鳐鱼而腹稍起扁额长喙口在额下亦能噉鱼

（臣）等谨案李时珍误以鳐为鯨而石首反无鳐名皆与古戾今正之

金鱼出功婆塞江脑中有麸金见博物志

（臣）等谨案金鲫鱼亦名金鱼与此同名异物李时珍误合为一今正之

羊头鱼产四川云阳县巴乡邨溪中头似羊多肉少骨美于他鱼见酉阳杂俎

螃■〈虫会〉傍海大鱼也脊上有石应十二时一名篙头溺其溺甚毒见酉阳杂俎

八梢鱼长四五尺一首八身出朝鲜见事物纪原

■〈鱼翁〉似鲭鱼蛇首白目有眵而肥其脂在目至八月而流出即不见人因八月芦花涩水涨时归海取之甚多见事物原始

花浪鱼背青而腹白骨健而性刚游则成羣遇物则跃其味甚美见事物原始

鼈鱼色黄头大将寸者尾尖无鳞立冬方出至清明身骨俱腐俗呼烂草索见事物原始

■〈鱼巽〉色白如银体圆口阔味鲜长尺余骨肉俱爽若无盐制久则成水留骨而已见事物原始【考五音集类云■〈鱼巽〉鱼无骨与此小异】

黄脊鱼脊黄腹白骨细多■〈月兹〉无胆而味美见事物原始

■〈鱼敌〉鱼色赤头尖口小口在腹下大者二三百斤其尾尖长不满尺而圆其脂可熬油而燃灯力能敌潮故又名■〈鱼敌〉水端午水热而来立秋水冷藏于大海见事物原始棘鬣鱼其鬣刚如棘故呼棘鬣又其鬣赤亦呼赤鬣此鱼味丰在首首味丰在眼莆人多葱酒蒸之以为珍味十月此鱼得时正月以后则味拗不可食见宋志

短鱼项缩而短为鲞极美色微红见甯波府志

方头鱼似棘鬣而头方味美或曰方疑作芳言其头为味芳香也见兴化府志

麦鱼其形锐小如麦可爱出东流县四十里上溪潭遡流至石人濼下形渐大越此则化蜻蜓飞去见东流县志

油鱼出云龙州油鱼穴中秋则鱼肥长仅二三寸十月望则绝见云龙州志

马鳅生东海一名马交鱼见广志甯波府志曰马驳鱼形似鳙其肤似鲟而黑斑一曰社交鱼以其交社而生也事物原始谓摆锡鲛色白

如锡其小者名青箭鸟兽续考谓晒干者曰溜鱼

鸚鵡鱼出龙门江穴中色青绿口曲而红似鸚鵡嘴相传此鱼能化龙去见鸟兽考又北史云真腊国有浮胡鱼八足状如■〈鱼旦〉嘴

如鸚鵡亦斯类也

妾鱼出博白县南大荒山状似人有翼脐下有带长三尺白如练顾动光彩灿烂人虽见而取不得见鸟兽考

（臣）等谨案鱮鮓亦名妾鱼与此同名异物

钩鱼状类魮身少扁其唇甚长垂下数寸味皆在此见鸟兽考

抱石鱼出于山溪背偃而腹平其大如指常贴于石上土人取之为腊出建甯府见鸟兽续考

鹤鱼出南蕃大海中顶上魮红如血故名人以为带号曰鹤顶红见鸟兽续考

■〈鱼孺〉身柔如膏无骨鳞细口阔齿多一作■〈鱼戈〉海上人目人弱者曰■〈鱼孺〉见雨航杂录

绶鱼一名华脐其腹有带如帔子生附其上如科斗大者如盘无鳞冬初始出者俗重之见雨航杂录

阑胡一名弹涂如望潮而大如小鳅而短大者如人指长三五寸无鳞口阔而味肥头有斑点如星潮退数千百跳踉泥涂中土人施小钩

取之

带鱼出闽中长丈余无鳞而腥见五杂组

化水鱼生澄迈潭人取烹之化为水祷雨即应见五侯鯖

戴帽鱼出安南国锐首无鳞有骨若插箭然味似河豚见霏雪录

枫叶鱼出兴化府乃枫叶落水所化见海物异名记

黑隘鱼大者如山金山神鱼也每岁庙神诞日羣引海族来朝率午方退见涌幢小品

青郎鱼形类海鲫而大一名椀砖硬鳞刚骨齿如铁锯嚼螺蛤成粉味极佳海滨人取蚶苗养于塘泺之间谓之蚶田惟忌青郎随潮入田

吞嚼殆尽见山堂肆考

墨头鱼出嘉州状如鱠渔头黑如墨头上有白子二枚又名北斗鱼二三月出子人以火夜照乂之惟郭璞台前乃有或名墨鲈见本草及

异鱼图赞补

鬪鱼大如指长二三寸花身红尾善鬪人家盆盎多畜之呼为丁斑鱼见陈懋仁泉

南杂志汇苑详注谓之花鱼五杂组谓之钱斗鱼稗史

谓之波师鱼又谓之师婆鱼

■〈鱼永〉出蜀江背鳞黑而肤理似玉蜀人以为鲙味极美见汇苑详注

沙绿鱼鱼之细者生隈濑中状若鲷大不五寸味甚美蜀人珍之见汇苑详注

龙盘鱼出桂林府兴安龙蟠山岩潭中四足有角丹腹修尾状似守宫能致风雨见岭表录异

无肠鱼出天台山寺池中相传昔有僧治鱼欲食人见者讥其释家伤生僧辄放之池中而活至今相生如此见戒庵漫笔

钦定续通志卷一百七十九

●钦定续通志卷一百八十 昆虫草木略七

昆虫草木略 【七】

禽类

兽类

○禽类

鸾瑞鸟一曰鸡趣见师旷禽经张华注云凤鸟之亚始生类凤久则五彩变易故字从变省礼斗仪曰天下太平安谧则见其音如铃杳杳

然也周之文物大备法车之上缀以大铃如鸾之声也后改为鸾

鸞雏凤属山海经曰南禺之山有凤凰鸞雏

鷦■〈明鸟〉 【一作焦明】 凤属南方神鸟五彩备司马相如上林赋拂翳鸟捎凤皇捷鸞雏掩鷦■〈明鸟〉

桐花鸟一名么凤剑南彭蜀闲有之大如指五色毕具有冠似凤春暮集桐花极驯善

时乐鸟鸣云太平天下有道则见验其图丹首红臆朱冠绿翼莺领文背糝则五色见南海异物志

鹏大鸟也庄子云北溟有鱼其名为鲲化而为鸟其名为鹏

（臣）等谨按说文鹏即古凤字凤飞羣鸟从以万数故以为朋党字经未有别言鹏者言鹏自南华始集韵谓大鹏鸚属考玉篇但称鸚

似鸡而大则迥非鹏之可比也

鹤一名仙禽一名胎禽鹤字篆文象翘首短尾之形一云白色■〈白雀〉■〈白雀〉故名性善警其状大如鹅长三尺脚青黑高三尺

余赤顶赤目喙长四寸余多纯白仓色者谓之赤颊常夜半鸣淮南子云鸡知将旦鹤知夜半其鸣高亮闻八九里雌者声差下 【明李明珍

曰雄鸣上风雌鸣下风声交而孕亦啖蛇虺闻降真香烟则降其粪能化石皆物类相感也】 崔豹古今注鹤千载则变苍又千岁则变黑禽经

云鹤以声交而孕埤雅云雌雄相随如道士步斗履其迹而孕又名露禽禽经注云露下则鹤鸣也鹤之驯养于家庭者饮露则飞去

（臣）等谨按墨客挥犀云刘渊材好怪尝畜两鹤客至夸曰此仙禽也凡禽卵生此禽胎生语未毕园丁报鹤夜生一卵渊材呵之未几鹤复诞一卵渊材叹曰吾乃为刘禹锡嘉话所误据此鹤实卵生考浮邱伯相鹤经所云千六百年胎化而产为仙人骐驎则惟千余岁之鹤乃胎化耳

鹤一名负釜一名黑尻一名背灶一名皂裙诗鹤鸣于垤天将雨蚁封土为垤鹤鸣其上则雨将至也形似鸿而大长颈赤喙白身黑尾翅树上作巢大如车轮卵如三升杯张华博物志云鹤俯鸣则阴仰鸣则晴伏卵时取礬石绕卵以助燥气故方术家以鹤巢中礬石为真物酉阳杂俎云鹤影抱言抱卵以影也或云以声■〈目舌〉之陶弘景云鹤有二种似鹄巢树者为白鹤黑色曲颈者为乌鹤鹤亦多在殿阁鸱尾及人家屋作窠禽经云鹤生三子一为鹤巽极成震阴变为阳震为鹤巽为鹤

（臣）等谨按诗疏鹤泥其巢傍为池含水满之取鱼置池中以食其雏若杀其子则一村致旱宋寇宗奭云鹤在楼殿吻上作窠并无作池养鱼之说明李时珍云寥廓之大阴阳升降区区微鸟岂能使天壤赤旱况鹤乃水鸟可以候雨乎如此则取鹤子致旱之说亦未可信

阳鸟出建州似鹤而小身黑颈长白

秃鹫一名扶老一名鹫■〈老鸟〉出南方有大湖泊处状如鹤而大青苍色张翼广五六尺举头高六七尺长颈赤目头项皆无毛其项皮方二寸许红色如鹤顶其喙深黄色而扁直长尺余其喙下亦有胡袋如鹈鹕状其足爪如鸡黑色性极贪恶能与人鬪好啖鱼蛇及鸟雏禽经云扶老强力古今注云扶老秃鹫也【明李时珍曰凡鸟至秋毛脱秃此鸟头秃如秋毯又如老人头童及扶杖之状故名说文作秃■】

脯羞食之益人气力走及奔马也

■〈鸟蒙〉■〈鸟童〉一名越王鸟一名鹤顶一名■〈象鸟〉鷓出九真交趾大如孔雀喙长尺余黄白黑色光莹如漆南人以为饮器竺法真登罗山疏云越王鸟不践地不饮江湖不啜百草不食鱼惟啖木叶粪似熏陆香南人得之以为香可入药

■〈父鸟〉鷓越鸟见玉篇

■〈宅鸟〉■〈牢鸟〉毛备五色见广韵

雁阳鸟也禽经曰鵠以水言自北而南■〈斥鸟〉以山言自南而北注鵠音雁随阳鸟也冬适南方集于江干之上故字从千■〈斥鸟〉

）亦音雁中春寒尽雁始北向燕代尚寒犹集于山陆岸谷之闲故字从斤方言云雁自关而东谓之𪇧 【音加】 鹅南楚之外谓之鹅或谓之𪇧尔雅云鳧雁丑其足蹠其踵企脚指闲有幕蹠属相着故曰其足蹠飞则脚跟企直故曰其踵企古今注雁尝衔芦数寸以防缿缴雁从风而飞以爱气力见淮南子雁行斜步侧身霜降南翔冰泮北徂其性恶热故中国始寒而北至见埤雅

鸿雁类亦阳鸟也羽毛光泽纯白似鹤而大长颈肉美如雁又有小鸿如鳧色亦白今人直谓鸿也博物志云鸿鹄千岁皆胎产鸿雁大略相类以季秋而来宾一同也鸣如家鹅二同也进有渐而飞有序三同也雁色苍而鸿色白一异也雁多羣而鸿寡侣二异也雁飞不过高山而鸿薄云表三异也毛有粗细形有大小

鸛雁属罗愿尔雅翼云似雁而长颈绿色皮可为裘霜时乃来就暖故禽经云鸛飞则霜■〈雨鸟〉飞则雨■〈雨鸟〉即商羊也又西方之风亦名鸛鸛

鹄一名天鹅大于雁羽毛白泽其翔亟高而善步禽经云鹄鸣皓皓故谓之鹄庄子云鹄不日浴而白按淮南子览冥训鸿鹄鹄鹤莫不惊惮伏窳左思吴都赋鸟则鸛鹄鵠鹤皆分鹄鹤为二罗氏谓鹄即鹤殊不然

鷁 【一作鷁】 善高飞似雁目相视而孕吐而生子其毛苍白春秋书六鷁退飞过宋都即此

鸚一名独豹似雁而虎文连蹄性不树止树止则为苦其飞也肃肃其食也鹵郭璞曰鸚无后趾毛有豹文鸚性羣居有行列故从■〈七上十下〉■〈七上十下〉相次也闽语曰鸚无舌兔无脾礼记不食鸚奥奥臄 【音脾】 脰 【音臄】 也深奥之处也

鸳鸯类一名黄鸭一名匹鸟南方湖溪中有之栖于土穴中大如小鸭其质杏黄色有文彩红头翠鬣黑翅黑尾红掌头有白长毛垂之至尾交颈而感诗鸳鸯在梁戢其左翼张载注禽鸟并栖一正一倒戢左翼以依于内舒右翼以防患于外左不用而右便故也函史云浮游雄左雌右宿雄翼右掩左雌翼左掩右埤雅云雄鸣曰鸳雌鸣曰鸯禽经注云朝奇暮偶

溪鹭一名溪鸭一名紫鸳鸯埤雅云溪鹭五色尾有毛如船舵小如鸭性食短狐在山泽中无复毒气盖溪中之救邪逐害者故名说文作溪■〈式鸟〉其游于溪左雄右雌似有式度者

鸕■〈玉鸟〉似鸕鵡山溪有水毒处即有之三辅黄图曰似鸭而大长颈赤目紫绀色司马相如赋■〈鸟加〉鸕■〈玉鸟〉

鸕■〈春鸟〉 【音精春】 一名青翰一名青庄出蕲泽似鹭而大青色鹭 【古

历反】一名鷓鷯【玉篇作唐屠】见尔雅郭

璞云似乌苍白色三才藻异以为即阿滥堆骊山鸟也酉阳杂俎云鷓色黄一变为青鷓带灰色鷓之后乃至屡变横理相细臆前微微渐白又曰白唐唐黑色也一变为白鷓

鷓鷯比翼鸟见尔雅郭璞云似鳧青赤色一目一翼相得乃飞山海经亦谓之■〈蛮鸟〉■〈蛮鸟〉

鹖【音徒】鸟鼠同穴之鸟也见尔雅郭璞云似鷓而小黄黑色穴入地三四尺鼠在内鸟在外今在陇西首阳县鸟鼠同穴山中

鹑一名鹑■〈率鸟〉鸟今之鹑也似斑鸠差小颈有白点斑声若布谷尔雅云鷓鷯郭注未详通雅曰即鹑俗呼鹑姑子

（臣）等谨按鷓以下四鸟郑志未载今补

鸡知时畜也一名时夜一名烛夜刘向云鸡者小畜生司时起居人扬雄方言云鸡陈楚宋卫之闲谓之鷓■〈鸟氏〉【音避祇】桂

林之中谓之割鸡或曰■〈佳从〉【音从】北燕朝鲜洌水之闲谓伏鸡曰抱【房奥反】江东呼菴【央富反】爵子及鸡雏皆

谓之鷓【恪遘反关西曰鷓音顾】其卵伏而未孚始化谓之涅尔雅云鸡大者名蜀郭云今蜀鸡尔雅又云蜀子雏【音余】未成鸡

健【音练】三尺为鷓郭注云阳沟巨鷓古之名鸡埤雅云鸡有蜀鲁荆越诸种越鸡小蜀鸡大鲁鸡又其大者庄子曰越鸡不能伏鷓卵鲁

鸡固能矣

竹鸡一名山菌子一名鸡头鷓一名泥滑滑【李时珍曰菌子言味美如菌也蜀人呼为鸡头鷓南人呼为泥滑滑因其声也】生江南

川广有之多居竹林形比鷓差小褐色多斑赤文善啼见其俦必鬪捕者以媒诱其鬪因而网之又性好食蚁谚云家有竹鸡啼白蚁化为泥

杉鸡出闽越常居杉树下头有长黄毛冠颊正青色如垂缕见临海异物志

鷓一名越鸡飞必南翥晋安曰怀南江左曰逐影见禽经生江南形似母鸡鸣云钩辘格磔者是自呼其名畏霜露早晚稀出夜飞则以树叶覆其背

鷓一名鷓一名飞奴鷓类性喜合其颈若瘦其色有二十余种两两相匹伏必二卵释法显佛国记名波罗越

青■〈佳鸟〉【音佳】一名黄褐侯状如鷓绿褐色声如小儿吹竿

伯劳一名伯鷓一名博劳一名伯赵一名鷓一名鷓形似鷓鷓喙黄伯劳喙黑月令候时之鸟左传云伯赵氏司至以夏至鸣冬至止

故以名主二至之官淮南子云伯劳之血涂金人不敢取

（臣）等谨按尔雅鷓伯劳也汉书以鷓为子规方言谓鷓为鷓鷓李肇国史补谓鷓为布谷者皆非郑志梟或说即今伯劳夫梟乃恶鸟岂可以指伯劳其说亦误

鷓鷓一名鷓鷓一名唼唼鸟一名八哥一名寒皋【李时珍曰此鸟好浴水其睛瞿瞿然故名唼唼其声也天寒欲雪则羣飞如告故曰寒皋皋者告也】似鷓而有帙色纯黑金眼穴居周礼云鷓鷓不踰济春秋书鷓鷓来巢即此淮南万毕术云寒皋断舌使语禽经云鷓鷓剪其舌而语是也酉阳杂俎又云可使取火

（臣）等谨按鷓鷓非鷓类郑志以为鷓鷓者非雀一名瓦雀一名宾雀短尾小鸟也觜颌皆黑身褐色爪趾黄白埤雅曰雀好内反禽经云雀交不一雉交不再又曰雀以猜瞿蒿雀似雀青黑色在蒿闲塞外多有

石燕一名土燕乳于岩穴见郭义恭广记

鷓鷓【诗作盍旦礼作曷旦】一名独春一名寒号虫夜鸣求旦之鸟也鸣声似春形似鸡五色冬无毛赤裸昼夜鸣故曰寒号方言云自关西谓之鷓鷓自关而东谓之城旦谓之倒悬周魏齐宋楚之闲谓之独春月令仲冬之月鷓鷓不鸣淮南子时则训作鴝鷓又禽经云鷓不知死注云鷓鷓鸟也

百舌一名反舌一名鷓■〈葛鸟〉【音辖轧李时珍曰按易通云能反复如百鸟之音故名鷓■〈葛鸟〉亦象声也】状如鷓鷓而小苍毛尖喙好食蚯蚓居树孔窟穴中立春后则鸣夏至后则无声十月后则藏蛰月令仲夏反舌无声即此

画眉似莺而小黄黑色其眉如画巧作千声如百舌

白头翁形似鷓鷓其飞似燕之鷓颡头上有白毛身苍色云

报春鸟如鷓鷓色苍每至正二月作声云春起也至三四月云春去也故名又名唤春鸟见顾渚山茶记

惜春鸟大不踰燕其声曰莫摘花果人谓之护山鸡见海录碎事

■〈扎上鸟下〉似百舌喙长善食鱼见类篇

练鹊一名带鸟一名拖白练似山鹊而小头上披一带尾长色白雌者短尾雄者长尾禽经曰冠鸟性勇纓鸟性乐带鸟性仁张华云带鸟练鹊之类是也

慈乌一名慈鸦一名孝乌一名寒鸦乌字篆文象形鸦亦作鸦禽经鸦鸣哑哑故谓之鸦色纯黑小喙初生母哺六十日长则反哺六十日广雅云纯黑而反哺者谓之乌小而腹下白不反哺者谓之雅乌白项而羣飞者谓之燕

乌燕乌白脰乌也雅乌鸞也禽经云慈乌反哺白脰乌

不祥巨喙乌善警哀乌吟夜

鹊一名飞驳鸟一名喜鹊一名干鹊【李时珍曰鹊古文作𪛗象形鹊鸣啻啻故谓之鹊鹊色驳杂故谓之驳灵能报喜故谓之喜性最
悉湿故谓之干】大如鸦而长尾尖喙黑爪绿背白腹尾翻黑白驳杂上下飞鸣以音感而孕以视而抱季冬始巢开户背太岁向太乙知来岁
风多巢必卑下故曰干鹊知来狺狺知往尔雅云鹊𪛗丑其飞也𪛗【音宗】言其不能翱翔竦翅而已许氏说文以为𪛗敛足也尔雅又云
鸟鹊丑其掌缩飞缩脚腹下也

（臣）等谨按禽经云鸡鸞恶其类又云灵鹊兆喜明是二物且鸞丹觜鹊黑觜郑志以鸞为喜鹊者误

鸚■〈母鸟〉一名鸚鵡一名鸚哥一名干皋【李时珍曰按字说云鸚■〈母鸟〉如婴儿之学母语故字从婴母熊太古云大者为

鸚■〈母鸟〉小者为鸚哥则■〈母鸟〉义取乎此师旷谓之干皋李昉呼为陇客】

有数种绿者出陇蜀而滇海交广近海诸地益多大如

鸟鹊数百羣飞红者紫赤色大亦如之白者出西洋南番大如母鸡五色者出海外诸国

性慧利丹味钩吻长尾赤足金睛深目上下睑皆能眨

动似人目舌如婴儿其趾前后各二异于众鸟梵书谓之臊陀

秦吉了一名了哥唐书作结辽鸟番音也出岭南容管廉邕诸州峒中桂海虞衡志云似鸚鵡绀色丹觜黄距目下连项有深黄文项毛有

缝如人分发能人言比鸚鵡尤慧鸚声如儿女吉了声如丈夫

乌凤出桂海左右两江峒中大如喜鹊绀碧色项毛似雄鸡鬃头有冠尾垂二弱骨长一尺四五寸至杪始有毛羽其形略似凤鸣声清越

如笙箫能度曲妙合宫商又能为百鸟之音见虞衡志

孔雀一名越鸟文禽也出广益诸州大如雁高三四尺不减于鹤自背至尾有圆文五色金翠相绕如钱头戴三毛长寸以为冠足有距迎

晨则鸣相和其声曰都护禽经云孔雀见蛇则宛而跃博物志云孔雀不匹偶但以音影相接而有孕亦与蛇偶又云因雷声而孕又云雄鸣上

风雌鸣下风而孕梵书谓之摩由逻

鹰一名角鹰一名鸱鸺【李时珍曰鹰以膺击故谓之鹰其项有毛角故曰角鹰其性爽猛故曰鸱鸺考鹰与鸺同气禅化故得称为鸺

也】鸞杀之鸟也金眼钩觜铁爪剑翻善攫搏尔雅云鹰隼丑其飞也翬鼓翅翬翬然疾也埤雅云一岁曰黄鹰二岁曰鵟鹰【鹰色苍黄谓

之鵟】三岁曰鸱鹰鹰类甚众惟角雕黄者以鹰名雕鹰角鹰食麋鹿诸兽黄鹰食水鸞

雉鸡之属各随其力以相吞啖梵书谓之嘶那夜

鷗一名鷖一名鷖 【音团】 似鹰而大尾长翅短土黄色其飞上薄云汉其六翮
乘风轻劲鷖悍多力皂鷗即鷖也鷗出辽东鷖出西南
夷黄头赤目五色皆备其翮可用为箭梵书谓之揭罗阁

鸢一名鱼鹰一名雕鸡鷗类也似鹰而大黄色深目好峙雌雄相得鷖而有别交则
双翔别则异处禽经云鷖鸟之善搏者曰鸢

鸢鷗也见禽经注 【此别一鷗禽经所谓鷗以贪顾是也非尔雅鷗之鷗】 尔
雅鷗鸟丑其飞也翔布翅翱翔也禽经云鸢不击而贪
注云不善搏击贪于攫肉禽经又云风翔则风注云风禽鸢类飞翔则天大风

鸢有二种一玉爪一黑爪又有鸦鸢金眼鸦鸢兔鸢之别埤雅云鸢拳坚处大如弹
丸俯击鸢鸢食之鸢鸢中其拳坠空中即侧身自下承
之捷于鹰隼

隼鷖击之鸟也诗疏云鷖属齐人谓之击征或谓之题肩或谓之雀鹰春化为布谷
方言曰齐鲁闲谓题肩为鷖鸟 【鷖一作征】 月令
季冬征鸟厉疾

（臣）等谨按禽经云鷖以鷖之鸢以搯之隼以尹之鷗以周之言其捕击之异则
是各为类而未有分晰伏读御制七十二候诗按语云
禽经于鷖鷖鷖之属名类纠纷强为牵附且以小而鷖者为隼大而鷖者为鸢殊失实
矣尔雅翼又云在北曰鷖在南曰鸢尤支离无据试以
鷖鷖各种言之鷖则用以取雉者也鷖小于鷖止能捕鸢鸢较鷖为大善搏兔鷖又有一
种捕野鸭者谓之鸭鷖惟鷖之大数倍于鷖鸢故狗
与鷖皆可攫而致之隼则今无其名然曰小而鷖则于海东青为近其飞最高故能擒天
鹅第产于黑龙江故注禽经者未之知耳仰见

圣制正名辨物格致精详谨识于此

金鸟色纯白口与足如金其鸣自呼见广州记

吉祥鸟出五台山形翅甚大其飞也有四黄鸟导之四鸢从之见山堂肆考

半部乐形如黄雀数十为羣音中宫商有如鼓瑟见事物紺珠

珊瑚鸟大于画眉好鬪出岭南巧声之鸟也见山堂肆考

竹林鸟出同州色正青如雀善啼见紫桃轩杂缀 【杜诗竹林为我啼青画句本此
】

驼鸟一名驼蹄鸡一名食火鸡生西戎形高七尺张翅丈余其卵如瓮食铜铁后魏
书云波斯国有鸟形如驼能飞不高食草与肉亦噉火
曰行七百里

鸩一名■〈云鸟〉一名同力鸟生南海有毒食之杀人尔雅翼云似鹰而大状如

鸮紫黑色赤喙黑目颈长七八寸雄名运目雌名阴谐

食蛇及橡宝

冶鸟越中大鸟也越地深山有之其大如鸮青色穿树作窠大如五六升器口径数寸饰以土垩赤白相闲状如射侯伐木者见此树即避之犯之则能役虎害人烧人庐舍时或作人形长三尺入涧中取蟹就人闲火炙食山人谓之越祝之祖见干宝搜神记

姑获鸟一名乳母鸟一名鬼鸟一名諵嘻一名隐飞一名夜行游女一名钩星能收人魂魄衣毛为飞鸟脱毛为女人云是产妇所化故胸有两乳周礼庭氏以救日之弓救月之矢射天鸟即此

商羊【一作■〈商鸟〉鶖】一名山萧一名独足鸟闽广有之大如鹄文身赤口昼伏夜飞其色苍其声自呼如人啸将雨则飞鸣即孔子所谓一足之鸟商羊是也

木客鸟大如雀数千百头为羣飞集大度不与众鸟相厕见广陵异物志

○兽类

麒麟兽也说文云麋身牛尾一角张揖云牡曰麒麟牝曰麟

■〈鹿外生内〉【音生】似鹿广韵云大如兔

麋一名荒郟县宣君山出麋尾埤雅云似鹿而大其尾辟尘说文麋属

（臣）等谨按麋之为兽前人多未详或以为麋属或以为似鹿古来博物家亦仅拘守成编沿袭故见而已盖南人目未见麋惟据纸上陈言互相傅会北方之人又习而莫察无怪乎以讹传讹遂至误认麋为麋与鹿者纷纷矣伏读御制麋角解说始知冬至解角者非麋并知俗名长尾鹿为麋自此物类有分称名不混洵足辨谬证讹永垂格致之经而解千古之惑也

（臣）等又按以上三种郑志未载备录以补麋属之缺

獬豸神羊也【广雅作■〈豸角〉■〈豸弟〉】一名任法兽神异经东北荒中有兽如羊一角毛青四足似熊见人鬪则触不直闻人论则咋不正又说文獬豸似山牛一角论衡云魃【同解】■〈角虎〉【同豸】者一角之羊也

驺虞义兽也即白虎黑文尾长于身不食生物不履生草应信而至者也

白泽能言语出东望山有德明照幽远则至见山海经角端鹿形马尾绿色独角角在鼻上日行万八千里圣主明达方外幽远之事则奉书至见宋书

虎一名鸟乌■〈虎兔〉【音徒左传作于菟汉书作乌菟】一名大虫又名李耳状如猫而大如牛黄质黑章锯牙钩爪须健而尖舌

大如掌生倒刺项短鼻鬣夜视一目放光一目看物声吼如雷风从而生百兽震恐易通卦验云立秋虎始啸仲冬虎始交又云虎不再交孕七月而生

（臣）等谨按虎之为兽郑志未详今补

象之为兽形体特诡身倍数牛目不逾豕鼻为口役望头若尾驯良承教听言则跪素牙至洁载籍所美服重致远行如邱徙有灰白二色出交广云南及西域诸国鼻大如臂下垂至地鼻窍甚深可以开合中有小肉爪能拾针芥食物饮水皆以鼻春秋运斗枢云瑶光星散而为象又援神契神灵滋液百宝为用则白象至又说文云象南越之大兽三岁一乳

豹似虎而小长脊白面毛赤黄文黑如钱惟尾最贵其性勺物而取程度而食故又名曰程列子云青室生程是也又有金钱金线艾叶之分惟艾叶尤贵

貔白狐其子穀见尔雅郭璞云一名执夷虎豹之属陆玑云似虎或曰似熊

獠 【音桓亦作■〈豸原〉】 豪猪也自为牝牡说文豕之逸也逸周书周祝解云獠有爪而不敢以獠

野猪一名豨 【音邻】 生山中似豕而大毛黄而疏皮坚而厚好践食豆稼大者重二百斤能以头触人色褐而肉赤三岁胆中有黄

狈前足短能知食所在狼后足短负之而行故曰狼狈酉阳杂俎曰狼狈是两物狈前足绝短附狼而行失狼则狈不能动

狃 【音求】 狃 【音余】 似鱼蛇尾豕口见人则佯死

狃 【后】 北方兽似犬食人见集韵

狃 【戎】 似猴而大毛黄赤色生广南山谷闲皮可作鞍褥埤雅轻捷善缘木大小类猿甚爱其尾

獼 【鬻】 似猕猴而大色苍黑能攫持人好顾盼尔雅云獼父善顾

独似猿而大其性独一鸣即止故谚云独一鸣而猿散食獼

獼猴 【说文作■〈鼠斩〉■〈鼠胡〉】 猿雌之属黑身白腰手有长毛蜀地志云似猴而甚捷在树上欻然腾跃若飞鸟也

獼 【风】 母状似猿玉篇獼■〈豸母〉兽名小打即死因风更生

狙獼属或曰猿属性狡黠伺物必伏而候之庄子云伐巧恃便亦谓狙之黠也果然猿属颊有髯髯黑性好理髯又爱其类取一果然数十果然可得

（臣）等谨按狃以下七种皆猿獼类郑志未详载今补入以备参考

驴长颊广额磔耳修尾夜鸣应更性能旋磨及驮负一曰汉骊其子曰■〈马蒙〉低小不甚骏故称蹇驴一名为卫有褐黑白三色又有

海驴出海岛中入水不濡其皮可制雨具又滑国出野驴一角见南史

羸视马略小视驴则大其形甚健其力在腰取以驾车耐远行而不困股有锁骨不能开故不孳乳五杂组羸不见于三代至汉时始有之

其类有五为羸为趺【决】 騃【提】 为駝【它】 ■〈马百〉 【陌】 为■〈马商〉 【谿】 ■〈马蒙〉 【蒙】 为

駝【巨】 騃【虚】 俗则通以骡呼之又尔雅翼蜀中县有牛交马而生者故川广皆产羸生于广者蹄轻生于蜀者蹄重

橐驼一名骆驼因其负囊橐而驼物故名状似马头似羊长项垂耳脚有三节背有两峰有苍褐黄紫数色其声■〈口外曷内〉 【碣

】 其食齧【痴】 性耐寒恶热故夏至退毛至尽能知水脉过其处辄停不行其卧而腹不着地者曰明驼最能行远又于阗有风脚驼日

行千里吐蕃有独峰驼大月氏有一封驼俗呼封牛亦曰■〈牛庸〉 牛穆天子传谓之物牛尔雅谓之犛牛又两脚驼出滑国见南史山海经

阳光之山其兽多橐驼

獬【音陌】 似熊头小庠脚黑白驳能舐食铜铁及竹骨骨节强直中实少髓皮辟湿其齿骨极坚故又名嚙铁埤雅獬兽象鼻犀目狮

首豺鬣其皮辟湿以为坐毯则消膜外之气【獬一作貊】

（臣）等谨按苏颂曰尔雅有白豹即獬也是以豹与獬为一种矣然郭璞曰獬能食铜铁说文云獬似熊黄白色南中志云獬大似驴状

似熊苍白色多力舐铁消千斤以及嚙铁豸昆吾兔名虽不一并獬类也即尔雅注亦云豹白色别名獬疏云獬一名白豹由此观之盖豹亦有

獬之名獬亦有豹之称若竟混为一种非也

灵猫又曰香狸生南海山谷状似狸自为牝牡其气如麝刘郁西域记云香狸文似土豹其肉可食粪溺皆香似麝杨慎丹铅录大理府有

香猫其文如金钱豹楚辞乘赤豹兮载文狸王逸注为神狸盖即此也

猫捕鼠小兽处处畜之有黄黑白驳数色狸身虎面柔毛利齿以尾长腰短目如金银者为良性畏寒其鼻端常冷惟夏至一日则暖一名

乌圆或云一名蒙贵清异录武宗十玩图谓猫为鼠将又有魏猫见尔雅盖诗经所谓有猫有虎之猫又一类也

（臣）等谨按尔雅云蒙颂猯状注即蒙贵也状如雌而小紫黑色可畜健捕鼠胜于猫又考广东通志猯■〈犭贵〉有黑白黄狸状类

猫而大常猫见而避之盖蒙贵别是一种谓蒙贵即猫者非

獾形似家狗色黄而微黑尾短山陕辽东谓之狗獾吴越皆呼刁黄善为曲穴而避藏防人害也【李时珍曰獾又作貊亦状肥钝之貌

蜀人呼为天狗】 本草纲目獠猪獾也獾狗獾也二种相似而略殊

獠似小狗足短头与身尾俱褊毛色若故紫帛大者长三尺余食鱼居水中亦休木上江湖多有之其大者曰獠 【宾】 曰獠 【编】

此水獠也又有山獠出广之宜州岷峒及南丹州土人号曰插翘见虞衡志

海獠似獠而大如犬脚下有皮似骈拇着水不濡其肉可食又博物志注海獠头似马自腰以下似蝙蝠其毛似獠大者五六十斤可烹食亦海獠类也

豫 【曲礼作与】 象属其性进退多疑犹兽亦然故喻人之多疑惑者曰犹豫

兀儿鼠出甘肃凉州似鼠有鸟名不周儿常与同穴而处尚书云鸟鼠同穴盖因此为名尔雅释鸟云其鼠为鷯

香鼠出河南密县长寸余香类麝

鼯鼠状似鼠而大苍色在树木上 【鼯音睨】

■ 〈鼠臭〉 【耶】 鼠似鼠而马蹄一岁千斤为物残贼尔雅疏云身似鼠有长须而贼害于物秦人呼为小驴

（臣）等谨按鼯鼠■ 〈鼠臭〉 鼠俱载尔雅郑志误以鼯作■ 〈鼠臭〉 音古觅切非是今别出之

鼯 【魂】 鼠一名礼鼠一名拱鼠一名貔狸皮可为裘时暖则出坐穴口则人则交前两足于颈拱立似揖乃窜入穴淮南子圣人师拱鼠制礼是也

（臣）等谨按兀儿鼠以下五种郑志未载今补入

狗之属有田犬有吠犬有食犬四尺为獒五尺为豫多毛者庞吠不止者■ 〈彘兼〉 【檻】 短脰者獐 【薄懈切】 黄白色者■

〈彘器〉 【器】 黄身黑头者■ 〈彘主〉 【注】 猛曰■ 〈彘卓〉 狂曰獠 【制】 能逐虎者曰■ 〈彘开〉 尾短者曰■ 〈彘召〉

〉 【貂】 恶而健者曰■ 〈彘册〉 【讪】

（臣）等谨按郑志于兽类终以狗之属而所列种类尚未详备今补载之

猾海中兽名无骨入虎口虎不能噬处虎腹中自内啮之其髓入油中油即沾水水中生火不可救止故曰水中生火非猾髓而莫能

猾 【尔雅作汇俗作猾】 状以鼠攒毛外刺似栗房野中时有之人犯之便藏头足毛刺人不可得又广韵云似猾而赤尾者曰暨居

彭侯状似黑狗无尾可烹食食之辟邪令人志壮按白泽图云木之精名曰彭侯

■ 〈彘几〉 【几】 似兔玉篇云兔喙而蛇尾

麇鼠前而兔后趋则顿走则颠吕氏春秋曰北方有兽其名曰麇按此即比肩兽也王者德及幽隐鰥寡得所则至

蛩蛩状似马山海经云平邱有素兽曰蛩蛩

距虚似马而有青色尸子曰巨虚不择地而走

（臣）等谨按山海经注云蛩蛩即巨虚也沈括谓螭即蛩蛩巨虚刘勰亦谓蛩蛩巨虚其实一兽而论者又有蛩蛩前足长巨虚后足长之分诸说不同录以备考

犴【本作豺】北方野狗似狐而小陆佃曰黑喙善守

■〈豸 菊〉【菊】吠出江南武林山状似■〈豸 师〉子苍黑色常瞑目耸耳一足攀林杪猿猴逢之辄不能动久则推一猴与食之又杨慎外集云石■〈豸 菊〉俗名尖孙食猴者又有石谷似猪而形短常捕取猿猴盖亦■〈豸 菊〉之类也

獬豸一名獬狔猿狗头其雄喜与雌猿为牝牡见庄子注

狨■〈豸 居〉出西域噉熏陆香身无毛见集韵

■〈豸 毫〉【蒿】貉类白色尾小似狗北人谓之皮狐子亦曰■〈豸 毫〉子见通雅

狨兽出暹罗之崛陇短小精悍目圆睛黄木食似猿獠山居者恒畜之以备驱使见黄衷海语

蒲牢海畔兽名性畏鲸每食于海畔鲸跃则鸣声似钟今人多铸其形于钟上斲槿为鲸形击之

夔奇兽也状似牛苍身一足能走出入水则风雨其音似雷帝王世纪云黄帝于东海流波山得之

蜚遽天上神兽也鹿头而龙身上林赋曰栌蜚遽即此猛氏状如熊而小毛浅有光泽出蜀中

射干似狐能缘木子虚赋云腾远射干

舍利性吐金故曰舍利西京赋曰舍利颺颺化为仙车■〈豸 恙〉【恙】北方之兽状如狮子善食人吹人则病见神异经类状如狸而有发自为牝牡食者不妬见神异经

竹■〈豸 屯〉长一尺三寸在土穴中常食竹根味如鸭肉见徐京南方记

■〈豸 兔〉似兔青色大兔头而鹿足见说文

■〈豸 渠〉【渠】■〈豸 叟〉【搜】兽名食猛兽见山海经

穷奇出封山状如牛而猬尾食人或云穷奇闻人鬪乃助不直者又神异经云穷奇状如虎有翼

浑沌出昆仑西状如犬有目不见有耳不闻有腹而无五脏有肠胃而不旋食而径过人有德行则抵触之人有凶恶则依凭之一名无耳一名无心空居无常咋尾回转向天而笑见神异经

梲杙状似虎而大老毛长尺人面虎足有猪牙尾长一丈八尺食人见神异经
饕餮状似羊人面其目在腋下虎齿人爪其音似婴儿亦名狗鹑食人

周匝 【宋书作印】 神兽也知星宿之变化王者德盛则至见孙氏瑞应图
招贤兽出摩伽陀国性善不干人形似狮子若国人见贤良相访则出见天中记
草上飞西番兽也形大似犬身似斑猫性纯不恶狮豹等兽见之则伏于地此兽不
恶而严见庶物异名疏

钦定续通志卷一百八十

●钦定续通志卷一百八十一 宗室传一

宗室传

（臣）等谨按历代史传别立宗室一门所以重天潢也郑樵作通志自汉迄隋哀
而辑之其闲有史分而志合者若汉之淮南厉王长晋
之愍怀太子遹是也有史离而志续者若班史齐悼惠王肥诸子是也有史阙而志补者
若吴志孙桓传弟俊诸孙丞是也有史系之列传而志
入宗室者若魏志之曹仁曹洪梁书之萧景是也自隋而下史例互有异同唐书备载诸
王而新书遗殇帝重茂五代史统之宗人传宋史于皇
族诸子别为一编辽史表详而传略金史表略而传详元史则有表而无传后有作者奚
以折衷而归于一是哉今仿郑例汇辑成编分者合之
离者续之闲亦采诸列传参之皇子皇族表以补其所未备如宋濮安懿王金景睿显三
宗元睿裕显顺四宗则依郑志中汉宣帝父史皇孙桓
帝父蠡吾侯例依次而类叙之庶几以传记事之中仍不失以表系世之意至其列目之
次较之郑志稍从略焉盖参用新唐书之例也

唐 【一】

○唐一

太祖诸子

世祖诸子

△太祖诸子

毕王璋【道宗 孝基涵】 雍王绘【道玄汉】 郇王【祜叔良 孝协德良
幼良】 蔡王【蔚琛 孝恭 璵 瓌 瑗】 郑王
【亮神通 道彦 孝逸 国贞 嵩说 齐物 复 神符 从晦】

太祖八子长延伯次真次世祖皇帝次璋次绘次祜次蔚 【按世系表作蔡王冈序
谯王真下】 次亮

南阳公延伯蚤薨无嗣高祖武德中与六王同追封

谯王真从太祖战歿无嗣 【按世系表谯王子竟陵王道素以雍王第五男韶子继

】

毕王璋

雍王绘

郇王祹

蔡王蔚

郑王亮

毕王璋

毕王璋仕周为梁州刺史与赵王佑谋杀隋文帝不克死生二子曰韶曰孝基 【按吴缜纠谬云毕王璋转载生二子曰韶曰孝基世系

表毕王房止有孝基无东平王韶韶是雍王绘子世次甚明今考旧书考基传云无子以从兄韶子为嗣与新书世系表合是本传误也】 韶死

隋世武德时追封东平郡王生子道宗江夏郡王 【按旧唐书及世系表皆作江夏王】

道宗

孝基

涵

道宗

道宗字承范高祖即位授左千牛备身略阳郡公裴寂与刘武周战度索原寂败贼逼河东道宗年十七从秦王讨贼王登玉壁城以望谓

道宗曰贼怙众欲战尔计谓何对曰武周席胜剡然锋未可当正宜以计摧之且乌合之众惮持久若坚壁以顿其锐须食尽气老可不战禽也

王曰而意与我合既而贼粮匮夜引去追战灭之出为灵州总管时梁师都弟洛仁连突厥兵数万傅于垒道宗闭城守伺隙出战破之高祖谓

裴寂曰昔魏任城王彰有却敌功道宗似之因封任城王 【资治通鉴作任城郡王】

始突厥郁射设入居五原道宗逐出之震耀威武斥地

赢千里贞观元年召拜鸿胪卿迁大理太宗方经略突厥复授灵州都督三年为大同道行军总管助李靖破虏亲执颉利可汗赐封六百户 【

按吴缜纠谬云李靖突厥传禽颉利者张宝相也而道宗传以为道宗亲执未知孰是今考旧唐书转载遇李靖破颉利可汗可汗以十余骑来

奔其部道宗引兵逼之征其执送颉利颉利以数骑夜走匿于荒谷沙钵罗惧驰追获之遣使送于京师又考资治通鉴载颉利将奔吐谷浑大

同道行军总管任城王道宗引兵逼之使苏尼失执送颉利苏尼失惧驰追获之庚辰行军副总管张宝相帅众奄至沙钵罗营俘颉利送京师

是道宗引兵逼其执送而传误以为亲执耳】 还为刑部尚书吐谷浑寇边靖出昆邱道诏与侯君集为靖副贼闻兵且至走嶂山数千里诸将

欲止独道宗请穷追靖曰善君集未从道宗以单师进去大军十日及之吐谷浑拒险殊

死鬪道宗阴引十骑超山乘其后贼惊遂大溃徙封江夏
夏【旧唐书作十二年迁礼部尚书改封江夏王】授鄂州刺史久之坐贪赃帝闻怒曰人心无艺当以谊制之今道宗已王禀赐多而贪不止顾不鄙哉乃免官削封户以王就第明年诏为茂州都督未行拜晋州刺史迁礼部尚书侯君集破高昌还颇怨望道宗尝从容奉言君集智小言大同为戎首帝问所以知必反者对曰见其忌而矜功耻为房李下官尚书常郁郁不平帝曰君集诚有功材无不堪朕宁惜爵位耶第未及耳不宜轻亿度使自猜危既君集反帝笑曰如公素揣帝将讨高丽先遣营州都督张俭轻骑度辽窥形势俭畏不敢深入道宗请以百骑往帝许之约其还曰臣请二十日行留十日览观山川得还见天子因秣马束兵旁南山入贼地相易险度营阵便处将还会高丽兵断其路更走闲道谒帝如期帝曰贲育之勇何以过乃诏与李绩为前锋济辽拔盖牟城会贼救至道宗与总管张君义领骑截四千虏十倍皆欲浚沟保险须帝至道宗曰贼遽来其兵必疲我一鼓摧之必矣昔耿弇不以贼遗君父吾为前军当清道迎乘輿尚何待绩善之选壮骑数十突进贼营左右出入绩合击大破之帝至咨美乃筑拒闾攻安市城闾毁傅城道宗失部分反为贼据帝斩其果毅傅伏爱道宗跣行请罪帝曰汉武帝杀王恢不如秦穆公赦孟明遂置不问在阵伤足帝亲加砭治赐御膳还以疾辞剧就闲改太常卿高宗永徽初房遗爱以反诛长孙无忌褚遂良与道宗有宿怨诬与遗爱善流象州道病薨年五十四无忌等得罪诏复爵邑道宗晚好学接士大夫不倨于贵国初宗室唯道宗孝恭为最贤子景恒封卢国公相州刺史道宗弟道兴武德初爵广宁郡王以属疏降封县公贞观九年为交州都督以南方瘴疠恐不得年颇忽忽忧怅卒于官赠交州都督

孝基

永安壮王孝基武德初得王历陕州总管鸿胪卿以罪夺官二年刘武周寇太原夏人吕崇茂以县应贼诏孝基为行军总管攻之工部尚书独孤怀恩内史侍郎唐俭陕州总管于筠隶焉筠请急攻城绝外援且当有变时怀恩挟异计给说孝基曰夏城坚攻之引日宋金刚在近内拒外强一败涂地不如顿兵待秦王破贼则夏自孤此谓不战而屈人也孝基谓然会尉迟敬德至与崇茂夹■〈广外多内〉官师遂大败孝基及筠等皆执于贼谋亡归为贼所害高祖为发哀优赐其家晋阳平购尸不获招魂以葬赠左卫大将军及谥无子以兄子【旧书作从兄韶子】道立嗣封高平王后降封县公终陈州刺史曾孙涵

涵

涵简素忠谨为宗室隼累授赞善大夫郭子仪表为关内盐池判官肃宗至平凉未知所从朔方留后杜鸿渐等条士马仓廩使涵奉笺驰谒肃宗涵既见敷奏明辨肃宗悦除左司员外郎再迁宗正少卿宝应初河朔平涵方母丧夺哀持节宣慰所至州县非公事未尝言蔬饭水饮席地以瞑使还固请终制代宗见其瘠毁许之服除擢给事中迁兵部侍郎朱希彩杀李怀仙复宣慰河北还为浙西观察使居五岁入朝拜御史大夫京畿观察使德宗嗣位以涵和易无所绳举除太子少傅山陵副使以父讳徙光禄卿未几迁左散骑常侍以尚书右仆射致仕累封襄武县公卒赠太子太保子颉贞元初为饶州别驾妾高以善歌入宫颉因御医许泳通书坐诛

雍王绘

雍王绘为隋夏州总管子贄追爵河南王生道玄

道玄

汉

道玄

淮阳壮王道玄性谨厚习技击然进止都雅武德初例王年十五从秦王击宋金刚于介州先登王壮之赏予良厚讨王世充战多竄建德屯虎牢王轻骑致贼遣道玄伏以待贼至走之转战泛水登南坂贯贼阵出其背复引还贼皆靡所发命中王喜以副骑给之每赴敌飞矢着身如猬气益厉东都平为洛州总管府废更授刺史俄为山东道行军总管讨刘黑闥以多功见褒黑闥再乱道玄率史万宝战下博越泞驰约万宝继进万宝素少之不肯前曰吾被诏以王儿子名大将而军进退实在我今其轻鬪若大军竭驰必陷泞莫如以王啖贼我结阵待之虽不利王而利国也道玄遂战歿年十九万宝为贼所乘举军溃身独免太宗追悼曰自兵兴儿常从我每见我深入必克故慕之惜其少远图不究哀哉因流涕赠左骁卫大将军及谥无子以弟道明嗣王迁左骁卫大将军贞观十四年与武卫将军慕容宝节送弘化公主于吐谷浑坐漏言主非帝女夺王终郢州刺史六世孙汉

汉

汉字南纪少事韩愈通古学属辞雄蔚为人刚略类愈愈爱重以子妻之擢进士第累迁左拾遗敬宗侈宫室舶贾献沉香亭材帝受之汉谏曰以沉香为亭何异瑶台琼室乎是时王政谬僻汉言切多所救补坐婬讪出佐兴元幕府文宗立召为屯田员外郎史馆修撰论次宪宗实

录书宰相李吉甫事不假借子德裕恶之会李宗闵当国擢知制诰稍进御史中丞吏部侍郎初德裕贬袁州汉助为排挤后德裕复辅政汉坐宗闵党出为汾州刺史宗闵再逐改州司马诏有司不二十年不得用然不数岁徙絳州长史遂不复振大中时召拜宗正少卿卒始汉为中丞表孔温业为御史及汉晚见召温业己为中丞每燕集人以为荣

郇王祗

郇王祗为隋上仪同三司生子叔良德良幼良 【按世系表郇王祗子尚有武陵郡王伯良中山郡王仲良季良传皆不载】

叔良

孝协

德良

幼良

叔良

长平肃王叔良武德初例王镇泾州捍薛仁果仁果内史令翟长孙以众降 【吴缜纠谬曰薛仁果传作内史令翟长慈】 于是大饥米斗千钱叔良不恤士损粮以渔利下皆怨仁果知之赐言食尽去遣高塘人诡降叔良遣骠骑刘感受之未至城三烽发仁果兵自南原噪而还大战百里细川感为贼执叔良惧悉出金劳军委事于长孙乃克安久之突厥入寇诏叔良率五将军击之中流矢道薨赠左翊卫大将军灵州总管子孝协嗣

孝协

孝协始王范阳俄降为郇国公魏州刺史麟德中坐赃抵死司宗卿陇西王博义等为言于高宗求贷帝不许遂自杀弟孝斌为原州都督府长史生子思训为江都令武后多杀宗室思训弃官去中宗复位以耆旧擢宗正卿封陇西郡公历益州都督府长史开元初进彭国公加户满四百进右武卫大将军卒赠秦州都督陪葬桥陵思训善画世所谓李将军山水者弟思海为扬州参军事子林甫自有传

德良

新兴郡王德良少以疾不任职薨赠凉州都督孙晋先天中为雍州长史治有名袭王坐豫太平公主谋被诛改氏厉晋就刑僚吏犇解唯司功参军李擣从王如它日晋死哭其尸尽哀姚元崇叹曰栾向侑邪擢为尚书郎

幼良

长乐郡王幼良资暴急高祖数晓勒不悛有盗其马者辄杀之帝怒曰盗信有罪王而专杀可乎诏礼部尚书李纲召宗室即朝堂杖之乃

释去为凉州都督嘯不逞为左右市里苦之太宗立或告王阴养士交境外诏中书令宇文士及往代并按状士及绳之急左右恐欲劫王由闲道趋长安自明不即北奔突厥士及露劾帝复遣侍御史孙伏伽鞠视无异辞遂赐死六世孙回别有传

蔡王蔚

蔡烈王蔚为周朔州总管生子安哲

西平怀王安仕隋为右领军大将军封赵公武德时例王生子琛孝恭瑊瓌 【按世系表西平王安子长平原王琼次霍山王璉传皆不载】

琛

孝恭

瑊

瓌

瑗

琛

襄武郡王琛字仲宝木讷少文隋义宁初封襄武郡公与太常卿郑元璠持女伎聘突厥始毕可汗约和亲始毕礼之赠遗蕃渥遣骨吐禄

特勒随琛入献授刑部侍郎武德初始王历利蒲绛三州总管 【旧唐书作历蒲绛二州总管】 宋金刚陷涪州稽胡多叛诏琛镇隰州政宽

简为夷夏爱便薨子俭袭王例降为公

孝恭

河闲元王孝恭少沈敏有识量高祖已定京师诏拜山南招慰大使徇巴蜀下三十余州进击朱粲破之俘其众诸将曰粲徒食人鸩贼也

请坑之孝恭曰不然今列城皆吾寇若获之则杀后渠有降者乎悉纵之繇是腾檄所至辄下明年拜信州总管承制得拜假当时是萧铣据江

陵孝恭数进策图铣帝嘉纳进王赵郡以信州为夔州乃大治舟舰肄水战会李靖使江南孝恭倚其谋遂图江陵尽召巴蜀首领子弟收用之

外示引擢而内实质也俄进荆湘道总管统水陆十二军发夷陵破铣二镇纵战舰放江中诸将曰得舟当济吾用弃之反资贼奈何李恭曰铣

之境南际岭左薄洞庭地险士众若城未拔而援至我且有内外忧舟虽多何所用之今铣濒江镇戍见舳船蔽江下必谓铣已败不即进兵觐

候往返以引救期则吾既拔江陵矣已而救兵到巴陵见船疑不进铣内外阻绝遂降帝悦迁荆州大总管诏图破铣状以进孝恭治荆为置屯

田立铜冶百姓利之迁襄州道行台左仆射时岭表未平乃分遣使者绥辑安慰其款附

者四十有九州岛朝廷号令畅南海矣未几辅公柝反寇
寿阳诏孝恭为行军元帅讨之引兵趋九江李靖李绩黄君汉张镇州 【资治通鉴作张
镇周】 卢祖尚皆禀节度将发大飧士栝水变为血
坐皆失色孝恭自如徐曰祸福无基唯所召尔顾我不负于物无重诸君忧公柝祸恶贯
盈今仗威灵以问罪栝中血乃贼臣授首之祥乎尽饮
罢众心为安公柝将冯惠亮等拒嶮邀战孝恭坚壁不出遣奇兵绝饷道贼饥夜薄营孝
恭卧不动明日使羸兵扣贼垒挑之祖尚选精骑阵以
待俄而兵却贼追北且器遇祖尚军薄战遂大败惠亮退保梁山孝恭乘胜破其别镇贼
赴水死者数千计公柝穷弃丹阳东走追禽之江南平
玺书褒美赐甲第一区进授东南道行台左仆射行台废更为扬州大都督李恭再破巨
贼北自淮东包江度岭而南尽统之欲以威重夸远俗
乃筑第石头城陈庐徽自卫或诬其反召还颇为宪司镌诘既无状赦为宗正卿赐实封
千二百户历凉州都督晋州刺史贞观初为礼部尚书
改王河闲性奢豪后房歌舞伎百余然宽恕退让无矜伐色太宗用是亲重之宗室莫比
也尝谓人曰吾所居颇壮丽非吾心也当别营一区令
粗足充事而已吾歿后子也才易以守不才不为它人所利十四年中饮暴薨帝哭之恸
赠司空扬州都督及谥陪葬献陵始隋亡盗贼徧天下
皆太宗身自讨定谋臣骑帅并隶麾下无特将专勋者惟孝恭独有方面功以自见云子
崇义晦崇义嗣玉降封谯国公历蒲同二州刺史益州
都督府长史有威名终宗正卿

晦干封中为营州都督以治状闻玺书劳赐迁右金吾将军检校雍州长史摧摛奸
伏无留隐吏下畏之高宗将幸洛诏晦居守谓曰关中
事一以属公然法令牵制不可以成政法令外苟可以利人者行之毋须以闻故晦治有
异绩武后时迁秋官尚书卒赠幽州都督初晦第起观
阁下临肆区其人候晦曰庶人不及以礼然室家之私不愿外窥今将辞公晦惊遽毁彻
之子荣奉吴王恪祀

瑊

济北郡王瑊武德中为尚书左丞例王终始州刺史

瓌

汉阳郡王瓌始为郡公进王高祖使持币遗突厥颉利可汗言和亲事颉利始见瓌
倨甚瓌开说示以厚币乃大喜改容加礼因遣使随入
献名马后复聘颉利谓其下曰前瓌来悔不少屈之当使拜我瓌伺知之既见颉利即长
揖颉利怒留不遣瓌意象自若不为屈虏知不可劫卒
以礼遣迁左武侯将军代孝恭为荆州都督政务清静岭外酋豪数相攻瓌遣使谕威德

皆如约不敢乱后例为公长史冯长命者尝为御史大夫素贵事多专决瓌怒杖之坐免起为宜州刺史散骑常侍薨

瑗

济南郡王哲为隋柱国备身将军追王子瑗
庐江郡王瑗字德圭武德时例王累迁山东南道行台右仆射与河闲王孝恭合讨萧铣无功更为幽州都督瑗素懦朝廷恐不任职乃以右领军将军王君廓辅行君廓故盗也其勇绝人瑗倚之许结婚寄心腹时隐太子有阴谋厚结瑗太子死太宗令通事舍人崔敦礼召瑗瑗惧有变君廓内险贼欲以计陷瑗而取己功即谓瑗曰事变未可知大王国懿亲受命守边拥兵十万而从一使者召乎且赵郡王前已属吏今太子齐王又复尔大王势能自保邪因泣瑗信之曰以命累公乃囚敦礼勒兵召北燕州刺史王铣与计事兵曹参军王利涉说瑗曰王今无诏擅发兵则反矣当须权结众心若诸刺史召之不至将何以全瑗曰奈何对曰山东豪杰尝为窦建德所用今失职与编户夷此其思乱若旱之望雨王能发使使悉复旧职随在所募兵有不从得辄诛之则河北之地可呼吸而有然后遣王铣外连突厥繇太原南趋蒲绛大王整驾西入关两军合势不旬月天下定矣瑗从之以内外兵悉付君廓利涉以君廓多翻覆请以兵属瑗犹豫君廓密知之驰斩铣首狗于军曰李瑗与王铣反辄敕使擅追兵今铣已斩独瑗在无能为也诸君从之且族灭助我者富贵可得众曰愿讨贼乃出敦礼于狱瑗闻之率左右数百被甲出君廓呼曰瑗諄乱诸君皆诖误若何从之以取夷戮众反走瑗骂君廓曰小人卖我行自及即禽瑗缢之传首京师废为庶人绝属籍

郑王亮

郑孝王亮仕隋为海州刺史追王生子神通神符

神通

道彦

孝逸

国贞

暹

说

齐物

复

神符

从晦

神通

淮安靖王神通少轻侠隋大业末在长安会高祖兵兴吏逮捕亡命入鄂南山与豪英史万宝裴绩柳崇礼等举兵应太原约司竹贼帅何潘仁连和进与平阳公主兵合徇鄂下之自署关中道行军总管以万宝为副绩为长史崇礼为司马令狐德棻为记室从平京师为宗正卿典兵宿卫王永康郡俄徙淮安武德初拜山东安抚大使黄门侍郎崔干副之【资治通鉴作崔世干】进击宇文文化及于魏化及败走聊城神通追北贼粮尽愿降神通不肯受干请纳之神通曰师久暴露今贼食尽克不旦暮正当破之以玉帛酬战力若降吾何所藉手干曰竄建德已至而化及未平我转侧两贼闲势必危王又贪其玉帛败无日矣神通怒囚干军中会士及自济北馈军化及复振神通进兵薄其垒贝州刺史赵君德先登拔堞神通忌其功止军不进君德怒诟而还城复坚神通遣兵走魏州取攻具为莘人所乘引却后二日建德拔聊城势遂张山东州县靡然归之神通麾下多亡乃退保黎阳依李世绩俄为建德所虏后与同安公主自贼归及建德灭复授河北行台左仆射从平刘黑闥迁左武卫大将军薨赠司空神通十一子得王者七人道彦孝警孝同孝慈孝友孝节孝义后皆降王孝逸爵公孝锐不得封有子齐物显【旧书作孝锐曾孙齐物故世系表齐物乃孝锐孙也此处子字恐误】

道彦

胶东郡王道彦自幼孝谨初神通避吏于鄂被疾山谷闲累旬食尽道彦羸服丐人闲或采野实以进神通未食不敢先即有所分辞以饱乃藏弄以待高祖初封义兴郡公例得主贞观初为相州都督徙岷州以父丧解荷土就坟躬蒔松柏偃庐柴毁虽亲交不复识太宗嗟叹敕侍中王珪临谕服除复拜岷州都督闲遣入党项谕国威灵区落降从李靖击吐谷浑诏道彦为赤水道总管帝厚以利啖党项使为乡导其酋拓拔赤辞诣靖自言隋击吐谷浑我资其军而隋无信反见仇剽今将军若无它我愿资粮将复如隋乎诸将与敌血遣之道彦至阔水见无备因掠其牛羊诸羌怨即引兵障野孤峡道彦不得进为赤辞所乘军大败死者数万退保松州诏减死谪戍边久之召为妫州都督卒赠礼部尚书初武德五年同封者孝警为高密王孝同淄川王孝慈广平王孝友河闲王孝节清河王孝义胶西王于是唐始兴务广支蕃镇天下故从昆弟子自胜衣以上皆爵郡王太宗即位举属籍问大臣曰尽王宗子于天下可乎封德彝曰汉所封惟帝子若亲昆弟其属远者非有大功如周郇滕汉贾泽并不得滥封【原文云其属远非大功不王如周郇滕汉贾汉尚不得茅土按

吴缜纠缪曰周之郇滕汉之贾泽皆封国有土安得谓之尚不得茅土乎此盖因新书之文而误也今改从旧书】 所以别亲疏也先朝一切封之爵命崇而力役多以天下为私奉非所以示至公帝曰朕君天下以安百姓不容劳百姓以养己之亲于是疏属王者皆降为公唯尝有功者不降故道彦等并降封公

孝逸

孝逸少好学颇属文始封梁郡公高宗时四迁益州大都督府长史武后擅国入为左卫将军亲遇之徐敬业称兵以孝逸为左玉钤卫大将军扬州行军大总管帅师南讨至淮而敬业已攻润州遣弟敬猷壁淮阴伪将韦超据都梁山以拒孝逸超众凭险完屯孝逸会诸将议曰贼今负山攻则士无所用力骑不得骋寇救死伤夷必众不如偏旅缀之全军趋扬州势不数日可破度支使薛克构曰超虽据险然兵少若置小敌不击无以示威拔众以守则战有阙舍之则后忧不如击之若克超淮阴自震淮阴破楚诸县开门候官军矣由是以趋江都逆首可取孝逸从之登山争击超杀数百人薄暝解超夜走进击敬猷淮阴破之敬业回军下阿溪孝逸引兵直度敬业大败遂拔扬州以功进镇军大将军徙封吴国公威名棱然武承嗣等忌之以谗下迁施州刺史又使人腾恶语闻上武后信之以尝有功贷死流儋州薨 【按武后纪天授元年杀

梁郡公孝逸与传互异】 景云初赠金州 【旧书作益州】 大都督孝同曾孙国贞国贞

国贞父广业为剑州长史国贞刚鲠有吏才干元中由长安令迁河南尹史思明寇东都李光弼壁河阳国贞率官吏西走陕数月召为京兆尹上元初拜剑南节度使召为殿中监以户部尚书持节朔方镇西北庭兴平陈郑节度行营兵马及河中节度都统处置使治于绛寻加晋絳慈隰沁等州观察处置使既至粮乏而所储陈腐民贫不忍遽敛上书以闻而军中讟谤突将王振乘众怨给曰具畚鍤以待役事众皆怒夜烧牙门左右奔告请避之国贞曰吾被命为将其可弃城乎固请乃逃狱中振引众劫取之置食于前曰食是而役其力可乎国贞曰与尔等方讨贼何事役为正缘储食腐俭已请诸朝吾何所负众服其言且引去振曰都统不死吾曹殆矣遂害之并杀其二子及三大将有诏以郭子仪代之国贞清白善用法世称办吏然峻于操下故其众思得子仪而振因肆其恶及子仪至振自谓且见德子仪怒曰汝临贼境而害主将贼若乘虚是无绛矣又欲为功乎即斩以徇诏赠国贞扬州大都督子琦自有传

暹

孝节曾孙曷 【按世系表曷系孝节之孙传恐误】 少孤事母孝始为枝江丞荆州长史张柬之曰帝宗千里驹吾得其人累擢卫尉少卿居母丧柴瘠讫除家人未尝见言笑与兄升弟晕相友开元初为汝州刺史政严简有治称昆弟繇东都候之辄羸服往州人无知者其清慎举如此四迁至黄门侍郎检校太原以北诸军节度使太原俗为浮屠法者死不葬以尸弃郊饲鸟兽号其地曰黄坑有狗数百头习食鬻颇为患吏不敢禁曷至遣捕羣狗杀之申厉禁条约不再犯遂革其风二十一年以工部尚书持节使吐蕃既还金城公主请明疆扬表石赤岭上盟遂坚定还以奉使称旨再迁吏部曷美风仪以庄重称当时有宰相望累为太子少傅武都县伯卒赠益州大都督晕至太仆少卿晕子进亦知名好从当世贤士游颺人之急累擢给事中至德初从广平王东征以工部侍郎署雍王元帅府行军司马为回纥鞭之几死迁兵部卒赠礼部尚书

说

孝节四世孙说字岩甫父遇及天宝时为御史中丞东畿采访使说以荫补率府兵曹参军马燧节度太原辟署少尹迁汾州刺史李自良代燧复奏为少尹大将张瑶得士心尝请告未许而自良卒说与监军王定远秘其丧前给瑶告以毛朝阳代之然后告丧诏以通王为节度大使授说行军司马节度留后定远自以有劳于说颇横恣请别赐印监军有印自定远始于是擅补吏易置诸将彭令茵者以久劳不服定远怒杀之埋马屎中其家请尸不许举军怨说上其事德宗以奉天扈从功恕死免官诏未至定远谋刺说说走而免定远召诸将出笥中诏书给曰诏以李景略知留后召说还公等皆有除诸将欲拜大将马良辅呼曰妄言也不可受定远惧走干阳楼召麾下皆不至自投下死说尽斩同谋者乃安擢说检校礼部尚书节度使累封陇西县男说精于职筑天成军边备积完晚被疾不能事军几乱卒赠尚书右仆射

齐物

齐物字道用天宝初擢累陕州刺史开砥柱通漕路发重石下得古铁戟若铍然铭曰平陆上之诏因以名县迁河南尹坐与李适之善贬竟陵太守还迁京兆尹太子太傅兼宗正卿卒赠太子太师性苛察少恩喜发人私然洁廉自喜吏无敢欺者忿陕尉裴冕械而折愧之及冕当国除齐物太子宾客世善冕能捐怨云子复

复

复字初阳以荫仕累为江陵司录参军卫伯玉才之表江陵令迁少尹历饶苏二州

刺史李希烈叛荆南节度使张伯仪数为贼窘朝廷以复在江陵得士心即母丧夺为少尹充行军司马佐伯仪会伯仪罢改容州刺史兼本管招讨使先是西原乱吏获反者没为奴婢长役之复至使访亲戚一皆原纵在容三年人赖以安转岭南节度使时安南经略使高正平张应继卒其佐李元度胡怀义等因阻兵胁州县肆为奸赃复至诱怀义杖死流元度南裔肃然教民作陶瓦鑄谕蛮獠收琼州置都督府以绥定其人召拜宗正卿历华州刺史贞元十年郑滑节度使李融卒军乱以复检校兵部尚书代融节度复下令垦营田以禀其军而赋不及民众悦加检校尚书右仆射卒年五十九赠司空谥曰昭复更方镇所在称治然颇嗜财为世所讥从父若水为左金吾大将军兼通事舍人容貌瓌伟在朝三十年多识旧仪每宣劳揖赞进止闲华有可观者

神符

襄邑恭王神符字神符少孤事兄谨高祖兴兵神符留长安为卫文升所囚京师平封安吉郡公帝受禅例王迁并州总管颉利可汗盗边神符与战汾东斩级五百获马二千又战沙河获乙利达官得可汗所乘马及铠召为大府卿迁扬州大都督自丹阳度江治隋江都故郡扬人利之然少威严不为下所畏累擢宗正卿以足不良改光禄大夫归第月给羊酒太宗就第慰问又令乘小舆入紫微殿迁开府仪同三司永徽二年薨赠司空荆州都督陪葬献陵子七人并爵郡王例降公唯得懋文■〈日东〉知名德懋官少府监临川郡公五世孙从晦文■〈日东〉幽州都督魏国公垂拱中坐累贬藤州别驾诛子挺捷捷袭封挺督曾孙程捷曾孙石别有传

从晦

从晦祖模仕至德中为猗氏令史思明陷洛阳贼帅掠诸县模率众拒平之稍迁黔中观察使终太子宾客赠太子太保谥曰敬从晦宝历初及进士第累擢太常博士甘露之祸御史中丞李孝本被诛从晦以族昆弟贬朗州司户参军改澶王府咨议分司东都忌者重发前坐下迁亳州司马久乃转吏部郎中兼侍御史知杂事出为常州刺史镇海军节度使李琢表其政赐金紫历京兆尹工部侍郎山南西道节度使又以最就进银青光禄大夫卒年六十三赠吏部尚书从晦姿质伟岸所至以风力闻少与崔龟从李景让裴休善奖目后进步名知人杨收方布衣进谒从晦一见如雅识即待以公辅后果宰相

△世祖诸子

世祖 【按世系表及旧书俱称代祖高祖纪及资治通鉴并载武德元年追谥皇考

曰元皇帝庙号世祖与传相符今从传】 四子长曰

澄次湛次洪次高祖神尧皇帝 【按世系表长高祖次澄次湛次洪序次与传互异】

梁王澄蚤薨无嗣武德初与二王同追封

蜀王湛

蜀王湛

蜀王湛【博义 奉慈 戡】

蜀王湛生子博义奉慈

博义

奉慈

戡

博义

陇西恭王博义武德初与奉慈例王高宗时擢累礼部尚书特进骄侈不循法度伎妾数百曳罗紈甘粱肉放于声乐以自娱其弟奉慈亦荒纵皆为帝所鄙尝曰吾仇人有善且用之况亲戚乎王等昵小人专为不轨先王坟典不闻学何以为善哉各赐市书绢二百疋以愧切之然不自克也薨赠开府仪同三司荆州都督

奉慈

渤海敬王奉慈显庆时为原州都督薨七世孙戡

戡

戡字定臣幼孤年十岁余即好学大寒掇薪自炙夜无然膏默念所记年二十明六经举进士就礼部试吏唱名乃入戡耻之明日径返江东隐阳羨里阳羨民有鬪争不决不之官而诣戡以辨凡论著数百篇常恶元和有元白诗多纤艳不逞而世竞重之乃集诗人之类夫古者断为唐诗以讥正其失云平卢节度使王彦威表为巡官府迁还洛阳卒

钦定续通志卷一百八十一

●钦定续通志卷一百八十二 宗室传二

宗室传

唐 【二】

○唐二

高祖诸子

△高祖诸子

隐太子建成

卫王元霸

巢王元吉楚王智云

荆王元景

汉王元昌鄴王元亨

周王元方

徐王元

礼韩王元嘉 彭王元则 郑王元懿霍王元轨 虢王凤 道
王元庆邓王元裕 舒王元名 鲁王灵夔
江王元祥 密王元晓 滕王元婴

高祖二十二子窦皇后生建成太宗皇帝元霸元吉万贵妃生智云莫嫔生元景孙
嫔生元昌伊德妃生元亨张氏生元方郭婕妤生元礼
宇文昭仪生元嘉及第十九子灵夔王才人生元则张宝林生元懿张美人生元轨杨美
人生凤刘婕妤生元庆崔嫔生元裕小杨嫔生元名杨
嫔生元祥鲁才人生元晓柳宝林生元婴

隐太子建成

卫王元霸

巢王元吉

楚王智云

荆王元景

汉王元昌

酆王元亨

周王元方

徐王元礼

韩王元嘉

彭王元则

郑王元懿

霍王元轨

虢王凤

道王元庆

邓王元裕

舒王元名

鲁王灵夔

江王元祥

密王元晓

滕王元婴

隐太子建成

隐太子建成小字毗沙门资简弛不治常检荒色嗜酒畋猎无度所从皆博徒大侠
隋高祖被诏捕贼汾晋闲留建成护家居河东高祖已
起兵密召与元吉赴太原隋人购之急从闲道至授左领军大都督封陇西郡公引兵略
定西河从平京师唐国建为世子开府置官属又迁抚

军大将军为东讨元帅将万人 【旧唐书作将兵十万】 徇洛阳授尚书令高祖受禅立为皇太子诏率将军桑显和击司竹羣盗平之凉州人安兴贵杀李轨以众降 【按吴缜纠谬载李轨传安修仁兴贵执轨送之斩于长安又高祖纪武德二年五月庚辰凉州将安修仁执李轨以降然则非兴贵杀轨也今考资治通鉴所载与李轨传及高祖纪皆同】 诏趣原州应接建成素骄不恤士虽甚暑昼夜驰猎众不堪其劳亡者过半帝欲其习事乃敕非军国大务听裁决之又以李纲郑善果为宫官参谋议稽胡刘仝成寇边诏建成进讨破之鄜州斩虜千计引渠长悉官之使还招羣胡仝成与它大帅降建成畏其众给欲城州县者使降胡操筑阴勒兵杀六千人仝成奔梁师都尝循行北边遇贼四百出降馘其耳纵之中允王珪洗马魏征以帝初兴建成不知谋而秦王数平剧寇功冠天下英豪归之阴许立为皇太子势危甚会刘黑闥乱河北珪等进说曰殿下特以嫡长居东宫非有功德为人所称道今黑闥夷叛残孽众不盈万利兵麈之唾手可决请往讨因结山东英俊心自封殖建成遂请行黑闥败洺水建成问征曰山东其定乎对曰黑闥虽败杀伤太甚其魁党皆悬名处死妻子系虜欲降无繇虽有赦令获者必戮不大荡宥恐残贼啸结民未可安既而黑闥复振庐江王瑗弃洺州山东乱命齐王元吉讨之有诏降者赦罪众不信建成至获俘皆抚遣之百姓欣悦贼惧夜奔兵追战黑闥众犹盛及纵囚使相告曰褫而甲还乡里若妻子获者既已释矣众乃散或缚其渠长降遂禽黑闥帝晚多内宠张婕妤尹德妃最幸亲戚分事宫府建成与元吉通谋内结妃御以自固当是时海内未定秦王数将兵在外诸妃希所见及洛阳平帝遣诸妃驰阅后宫见府库服玩皆私有求索为兄弟请官秦王已封帑簿及官爵非有功不得妃媛曹怨之会为陕东道行台有诏属内得专处决王以美田给淮安王神通而张婕妤为父丐之帝手诏赐田诏至神通已前得不肯与婕妤妄曰诏赐妾父田而王夺与人帝怒召秦王让曰我诏令不如尔教邪佗日谓裴寂曰儿久典兵为儒生所误非复我昔日子秦府属杜如晦骑过尹妃父门恚其傲率家童摔殴折一指父惧即使妃前欣秦王左右暴其父帝不察大怒诘王曰儿左右乃凌我妃家况百姓乎王自辩晓讫不置繇是见疏帝召诸王燕秦王感母之不及有天下也偶独泣帝顾不乐妃媛因得中伤之为建成游说曰海内无事陛下春秋高当自娱秦王辄悲泣正为嗔忌妾属耳使陛下万岁后王得志妾属无遗类东宫慈爱必能全养乃皆悲不自胜帝惻然遂无易太子意突厥入寇帝议迁都秦王苦谏止建成见帝曰秦王欲外御寇沮迁都议以久其

兵而谋篡夺帝浸不悦初帝令秦王居西京承干殿元吉居武德殿与上台东宫昼夜往来皆携弓刀相遇如家人礼由是皇太子令秦齐二王教与诏敕杂行内外惧莫知所从建成等私募四方骁勇及长安恶少年二千人为宫甲屯左右长林门号长林兵又令左虞候率可达志募幽州突厥兵三百内宫中将攻西宫或告于帝帝召建成责之乃流达志嵩州华阴杨文干素凶讷建成昵之使为庆州总管遣募兵送京师欲为变时帝幸仁智宫秦王元吉从建成谓元吉曰秦王且徧见诸妃彼金宝多有以赂遗之也吾安得箕踞受祸安危之计决今日元吉曰善乃命郎将尔朱焕校尉桥公山赍甲遗文干趣兴兵焕等惧至豳乡白反状豳州人杜凤【资治通鉴作杜凤举】亦上变帝遣司农卿宇文颖驿召文干元吉阴结颖使告文干文干遽率兵反帝以建成首谋未忍治即诏捕王珪魏征及左卫率韦挺舍人徐师暮左卫骑冯世立欲杀之以薄太子罪乃手诏召建成建成惧不敢往师暮劝遂举兵詹事主簿赵弘智谏建成损车服速往谢罪乃诣行在所未至屏官属径入谒叩头请死投身于地不能起帝怒夜囚幕中使兵卫守会文干陷豳州帝惊以宫近贼夜率卫士南趣山行十余里明乃还宫召秦王问计对曰文干竖子耳官司当即禽之就使假刻漏之久正须遣一将可办帝曰事连建成恐应者众尔自行还吾以尔为太子使建成王蜀蜀地狭不足为变若不能事汝取之易也秦王率众趣豳州文干为其下所杀以其首降执宇文颖送京师秦王之行元吉及内嬖更为建成请封德彝亦阴说帝由是意解复诏建成居守但责兄弟不相容而谪王珪韦挺天策兵曹参军杜淹于远方【谨按通鉴辑览 御批高祖无卓识泥古而立建成即当有以处世民及至文干通谋事发已许废建成而立世民矣顾乃外惑佞臣内牵嬖妾濡忍酿祸谁执其咎哉】然怨猜日结建成等召秦王夜宴毒酒而进之王暴疾咯血数升淮安王扶掖还宫帝问疾敕建成秦王不能酒毋夜聚又谓秦王曰吾起晋阳平天下皆尔力将定东宫尔亟让故成而美志又太子立多历年吾重夺之观而兄弟终不相下同在京师忿阅且深尔还洛阳行台自陕以东悉主之建天子旌旗如梁孝王故事王泣曰非所愿也不可远膝下帝曰陆贾汉臣也犹递过诸子况我天下主东西两宫思汝即往何所悲邪王将行建成等谋曰秦王得土地甲兵必为患留之京师一匹夫耳因密使人说帝言秦王左右皆山东人闻还洛皆洒然喜观其意不复来矣事果寝俄而突厥寇边太子荐元吉北讨欲因其兵作乱长孙无忌房元龄杜如晦尉迟敬德侯君集等劝秦王先图之王乃密秦建成等与后宫乱因曰臣无负兄弟

今乃欲杀臣是为世充建德复仇使臣死虽地下愧见诸贼帝大惊报曰旦日当穷治而必早参张婕妤语建成乃召元吉谋曰请勒宫甲托疾不朝建成曰善然不共入朝事何繇知迟明乘马至玄武门秦王先至以勇士九人自卫时帝已召裴寂萧瑀陈叔达封德彝宇文士及窦诞颜师古等入建成元吉至临湖殿觉变遽反走秦王随呼之元吉引弓欲射不能彀者三秦王射建成即死元吉中矢走敬德追杀之俄而东宫齐府兵三千攻玄武门闭不得入接战久之疾及殿屋王左右数百骑至合击之众遂溃帝谓裴寂等曰事今奈何萧瑀陈叔达曰臣闻内外无限父子不亲失而弗断反蒙其乱建成元吉自草昧以来未始与谋既立又无功德疑贰相济为萧墙忧秦王功盖天下内外归心立为太子付军国大务陛下释重负矣帝曰此吾志也乃召秦王至慰抚之曰朕几有投杼之惑秦王号泣不能止建成死年三十八长子承宗为太原王早卒承道安陆王承德河东王承训武安王承明汝南王承义巨鹿王皆坐诛诏除建成元吉属籍其党疑惧更相告庐江王瑗遂反乃下诏建成元吉瑗支党不得相告讐由是遂安太宗立追封建成为息王谥曰隐以礼改葬诏东宫旧臣皆会帝于宣秋门哭之以子福为后十六年追今赠宇文颖者代人自李密所来降为农圃监封化政郡公性贪昏与元吉厚善故豫文干谋事败帝责曰朕以文干叛故遣卿乃同逆邪颖无以对斩之

卫王元霸

卫怀王元霸字大德幼辩慧隋大业十年薨年十六无子武德元年追王及谥又赠秦州总管司空以太宗子泰为宜都王奉其祀葬芷阳泰徙封越更以宗室西平王琼子保定嗣薨无子国除

巢王元吉

巢刺王元吉小字三胡高祖兵已西留守太原封姑臧郡公进齐国总十五郡诸军事加镇北将军太原道行军元帅帝受禅进王齐为并州总管初元吉生太穆皇后恶其貌不举侍媪陈善意私乳之及长猜鸷好兵居边久益骄侈常令奴客诸妾数百人被甲习战相击刺死伤甚众后元吉中创善意止之元吉恚命壮士拉死私谥慈训夫人刘武周略汾晋诏遣右卫将军宇文歆助守元吉喜鹰狗出常载置网三十车曰我盗三日不食不可一日不猎夜潜出淫民家府门不闭歆骤谏不纳乃显表于帝曰王数出与窦诞纵猎蹂民田纵左右攘斂畜产为尽每射于道观人避矢以为乐百姓怨毒不可与共守有诏召還元吉密讽民诣阙请得不归武周以五千骑屯黄蛇岭元吉使将军张达以步卒百人

尝寇达辞兵少强之至则尽没达怒导武周陷榆次元吉保祁贼急攻之遁还并州贼张甚元吉给司马刘德威曰公以老弱守吾率锐士拒贼因赍宝物携妻妾夜出委军奔京师并州陷帝怒自是尝令从秦王征讨不复颺军矣寻授侍中襄州道行台尚书令稷州刺史秦王围东都窦建德来援王以精骑逆战留元吉屈突通守而世充易之辄出兵元吉设伏劫之斩首八百级禽其将东都平拜司空赐袞冕服鼓吹二部班剑二十人黄金二千斤与太子秦王得三炉铸钱累进司徒兼侍中并州大都督时秦王有功而太子不为中外所属元吉喜乱欲并图之乃构于太子曰秦王功业日隆为上所爱殿下虽为太子位不安不早计还踵受祸矣请为殿下杀之太子不忍元吉数讽不已许之于是邀结宫掖厚赂中书令封德彝使为游说帝遂疏秦王爱太子元吉乃多匿亡命壮士厚赐之使为用元吉记室参军荣九思为诗刺之曰丹青饰成庆玉帛礼专诸元吉见之弗悟也其典签裴宣俨免官往事秦府元吉疑事泄鸩杀之自是人莫敢言秦王尝从帝幸元吉第伏护军宇文宝寝内将以刺王太子固止之元吉愠曰为兄计于我何害突厥郁射设入围乌城建成荐元吉北讨乃多引秦王府骁将秦叔宝尉迟敬德程知节段志元与行又籍秦府精兵益麾下帝知之不能禁元吉承闲密请害秦王帝曰是有定四海功杀之无名元吉曰王昔平东都顾望不即西散金帛树私惠岂非反邪帝不应太子与元吉谋兵行吾与秦王至昆明池伏壮士拉之以暴卒闻上无不信然后说帝付吾国吾以尔为皇太弟而尽击杀叔宝等率更令王胪【旧唐书作率更丞王胪】密以谋告秦王王召僚属谋皆曰元吉戾狠使得志且不能事其兄往者护军薛宝以元吉字合之其文成唐元吉喜曰但除秦王取东宫如反掌耳为乱未克已复倾夺大王不蚤正之社稷非复唐有秦王由是定计死年二十四子承业为梁郡王承鸾渔阳王承奖普安王承裕江夏王承度义阳王并伏诛贞观初改葬追爵海陵郡王及谥后改封巢以曹王明嗣

楚王智云

楚哀王智云初名稚詮善射工书突隋大业末从建成寓河东高祖初建成走太原吏捕智云送长安为阴世师所害年十四武德元年追王及谥母万贵妃性恭顺为帝所礼宫中事一一咨决三年以太宗子宽为嗣又赠凉州总管司徒宽早薨国除贞观三年复以济南公世都子灵龟嗣历魏州刺史为政威严盗贼不发凿永济渠通新市百姓利之薨子福嗣降为公卒子承况嗣神龙中为右羽林将军同节愍太子死于难

荆王元景

荆王元景武德三年始王赵与鲁酆二王同封贞观初累迁雍州牧十年徙封荆明年诏荆州都督荆王元景梁州都督汉王元昌徐州都督徐王元礼潞州都督韩王元嘉遂州都督彭王元则郑州刺史郑王元懿绛州刺史霍王元轨虢州刺史虢王凤豫州刺史道王元庆邓州刺史邓王元裕寿州刺史舒王元名幽州都督燕王灵夔苏州刺史许王元祥安州都督吴王恪相州都督魏王泰齐州都督齐王佑益州都督蜀王愔襄州刺史蒋王恽扬州都督越王贞并州都督晋王治秦州都督纪王慎所任州刺史并功臣令世袭会长孙无忌等固让遂废不行徙鄜州永徽初进位司徒赐实封至千五百户房遗爱谋反坐子则与往还系狱时吴王亦抵罪高宗谓大臣曰朕欲从公勾叔及兄死兵部侍郎崔敦礼曰陛下虽申恩不可诘天下法遂赐死久之追封沈黎王以渤海王奉慈子长沙嗣降为侯神龙初复王爵以孙元逖嗣 【旧唐书作封其孙逖为嗣】 薨无子国除

汉王元昌

汉王元昌初王鲁累迁梁州都督后徙封汉有勇力善骑射数触轨宪太宗手诏诲督乃怨望附太子承干通馈谢来朝京师宿东宫尝有丑语又见帝侧有宫人善琵琶乃曰事成幸赐我承干许之割臂血盟事败帝弗忍诛欲免死高士廉李绩等固争不奉诏乃赐死国除

酆王元亨

酆悼王元亨贞观二年授金州刺史之藩太宗怜其幼思之数遣使为劳问赐金醪以娱乐之六年薨无子国除

周王元方

周王元方武德四年始王与郑宋荆滕四王同封贞观三年薨无子国除

徐王元礼

徐康王元礼性恭畏善骑射始王郑即授郑州刺史后徙王徐迁徐州都督为绛州刺史有治名玺书劳勉实封至千户永徽中加司徒兼潞州刺史薨赠太尉冀州大都督陪葬献陵三子茂为淮南王余爵公茂险薄无行初元礼疾姬赵有美色茂逼烝之元礼切责茂恚屏侍卫药膳曰为王五十年足矣何服药为以不食薨茂嗣上元中事泄流死振州神龙初以茂子璿嗣开元中为宗正员外卿薨子延年嗣拔汗那王入朝延年将以女嫁之为右相李林甫劾奏贬文安郡别驾终余杭司马国除永泰初延年婿黔中观察使赵国珍言诸朝诏以其子讽嗣王

韩王元嘉

韩王元嘉始王宋后改王徐为潞州刺史母昭仪字文述女也宠于高祖既即位欲立为后固辞元嘉以母宠故特为帝爱后出诸子无及者在潞时年十五闻太妃病涕泣不食居丧毁甚太宗数慰勉少好学藏书至万卷皆以古文字参定同异与弟灵夔友爱燕见终日如布衣礼

闺门修整当世称之贞观九年【吴缜纠谬云按本纪乃贞观十年今考旧书亦作贞观十年】更封韩迁滑州都督【旧书作潞州都督】

高宗末为泽州刺史武后得政进授太尉徙定州刺史以霍王元轨为司徒舒王元名为司空滕王元婴开府仪同三司鲁王灵夔太子太师越王贞太子太傅纪王慎太子太保外示尊宠而内将图之垂拱中元嘉徙绛州刺史与子譔及越王子冲纠合宗室同举兵未发会武后诏宗室朝明堂元嘉遣使告诸王曰大享后太后必尽诛诸王不如先事起不然李氏无种矣乃为中宗诏督诸王发兵冲即以兵五千攻济州而诸王仓卒兵不至遂败元嘉至京师谋泄后逼令自杀年七十诏改氏元嘉鲁王越王为虺元嘉六子训颍川王谊武陵王【世系表并作郡公】

谏上党公蚤卒譔黄公工为词章孟利贞尝称其文曰刘麟之周思茂不过也出为通州刺史辞疾归且谋应越王也谏通音律历杭州别驾与谏俱死时籍没者众惟冲譔家书为多皆文句详正秘府所不及神龙初追复元嘉爵土以第五子讷嗣薨子叔璩嗣历国子司业薨子炜嗣建中初改王郢后懿宗以郢王即位复改嗣韩王云

彭王元则

彭思王元则字彝初王荆出为婺州刺史【旧书作豫州刺史】贞观十年徙王为遂州都督以冠服奢僭免久之为泮州刺史更折节厉行薨赠司徒荆州大都督陪葬献陵高宗登望春宫过其丧哭之恸无子以霍王子绚嗣龙朔中封南昌王薨子志陈嗣开元中为宗正卿

郑王元懿

郑惠王元懿始王滕贞观中出为兖州刺史徙王厯郑潞绛三州刺史实封千户喜经术数断大狱务宽平高宗嘉之玺诏褒锡薨赠司徒荆州大都督陪葬献陵十子长子璿嗣王为鄂州刺史【世系表作嗣王遂州刺史璜】薨子希言嗣开元中为右金吾大将军再为太子詹事弟察言生二子曰自仙■〈曾羽〉自仙为楚州别驾生夷简■〈曾羽〉为陈留公生宗闵璿弟琳安德郡公生择言择言生勉勉宗闵夷简皆位宰相别有传时称小郑王后亦曰惠郑王后以别郑王亮云

霍王元轨

霍王元轨武德六年始王蜀与豳汉二王同封后徙吴【按吴缜纠谬谓王蜀徙吴

高祖纪并作元璿因疑本传缺载改名一事今考旧书及资治通鉴并称元轨则是本纪之讹而非传有脱文也】多材艺高祖爱之太宗尝问羣臣曰朕子弟孰贤魏征曰臣愚不尽知其能唯吴王数与臣言未尝不自失帝曰朕亦器之然卿以为前代孰比对曰经学文雅汉河闲东平也至孝行曾闵不能过帝由是遇益厚诏纳征女为妃尝从猎遇羣豕帝使射之筈不虚彀豕为尽帝抚其背曰尔艺过人顾今无所施方天下未定得若岂不用乎贞观七年为寿州刺史高祖崩去官毁瘠甚服除遂菜食布衣终身至忌日辄累昼不食十年徙王厯絳徐定三州刺史实封至千户所至闭合读书以吏事委长史司马谦慎未尝与物忤数引见处士刘元平为布衣交或问王所长于元平答曰无长问者不解元平曰人有短所以见长若王无所不备吾何以称之突厥寇定州元轨令开城门偃旗帜虏疑不敢入夜遁州人李嘉运潜结贼诏穷诛支党元轨以寇近且强人心危但杀嘉运余无所诘因自劾帝喜曰朕固悔之非王之明几失定州矣王文操者与贼战败二子凤贤更以身蔽父得全二子死县抑不为言元轨廉知之遣使吊祭上其事诏赠凤贤朝散大夫旌其闾元轨每朝数上疏陈得失多所裨正帝尊重之有大事尝密驿咨逮帝崩与侍中刘齐贤同知山陵事元轨淹练故事齐贤叹曰是非吾等及己尝遣国令督封租令请贸易取赢答曰汝当正吾失反誅吾以利邪不纳进司徒出为襄青一州刺史越王败坐尝通谋徙黔州檻车载至陈仓薨六子【旧书作有子七人】绪为江都王纯安定王余皆爵为公绪有名誉为金州刺史诛神龙初并复官爵以绪孙暉嗣王【世系表失载】开元中为左千牛员外将军

號王凤

號庄王凤字秀成始王翽为邓州刺史俄徙王厯號豫青三州刺史实封千户喜畋游遇官属尤嫚薨赠司徒扬州大都督陪葬献陵七子【按吴缜纠谬云考世系表凤止六子而茂融第四本传称七子且云次子茂融未知孰是】长子翼嗣为平阳王薨子寓嗣寓无子爵不传次子茂融【按吴缜纠谬云传及世系表俱作茂融邢文伟传及武后纪并云东莞公融今考旧书亦无茂字则表及本传误也】以勇闻垂拱中为申州刺史黄公譔与越王谋举兵倚以为助时诏诸王公赴东都茂融私问所亲高子贡子贡报曰来必死乃称疾不朝以俟兵期及得越王书仓卒不能应僚属劝白其书擢太子右赞善大夫俄为党属所引诛中宗更以凤孙邕嗣王娶韦后妹累迁秘书监知陇右三使仗内诸厯徙王汴未几韦氏败邕杀其妻送首于朝议者鄙之削爵贬沁州刺史不事后复爵还

户二百累迁卫尉卿薨子巨嗣巨刚锐果决略通书史
好属辞天宝五载出为西河太守坐资给柳绩支党贬义阳司马明年御史中丞杨慎矜
得罪其附离史敬忠与巨善巨坐免官锢置南宾郡召
拜夷陵太守安禄山陷东京元宗方择将帅张垪言巨有谋可属大事召至京师杨国忠
忌之谓人曰小儿讷可使对天子踰月不得见帝知之
召对禁中称旨帝悦敕宰相与语久不得罢国忠厌之乃授淮南太守摄御史大夫河东
节度使明日谢帝惊曰何摄为即诏兼御史大夫巨奏
方艰难时贼多诈有如陛下召臣何以取信乃折契授之俄兼统岭南何履光黔中赵国
珍南阳鲁炆三节度使事时炆战数屈诏贬为果毅以
来瑱代之巨奏炆若能存孤城功足补过则何以处之帝曰卿随所处置巨至内乡贼将
毕思琛解围走遂趣南阳贬鲁炆白衣从军其暮称诏
复职京师平拜留守兼御史大夫明年拜太子少师兼河南尹东畿采访使征乘牛之出
入市者斥所得佐用度然稍自盗没其妃即张皇后从
女弟内不睦巨选府县官备使令妃亦引蒲博少年分党招货贿挠政事宗正卿李遵素
私张发巨赃事贬遂州刺史会段子璋反道遂州巨仓
卒不知所出即迎谒为子璋所杀子则之嗜学年五十余尚执经太学嗣曹王皋荐之贞
元二年繇睦王府长史迁左金吾卫大将军坐与从甥
窦申善贬昭州司马

道王元庆

道孝王元庆始王汉后徙陈出为赵州刺史贞观十年徙王授豫州刺史累实封千
户时诸王奉给薄于帝子王数寡乏大臣莫敢言十八
年黄门侍郎褚遂良为太宗从容言之不能行高宗时历滑州刺史以治绩闻数蒙褒贬
迁徐沁卫三州刺史事母谨及丧请躬修坟墓诏不听
薨赠司徒益州都督陪葬献陵九子诱为嗣王临淮为澧州刺史坐赃削爵更以次子询
之子微嗣终宗正卿子炼嗣广德中亦至宗正卿

邓王元裕

邓康王元裕贞观五年始王郅十一年徙王始王及徙皆与譙魏许密四王同封【
按吴缜纠谬云本纪贞观五年二月己酉封弟元裕
为郅王元名譙王灵夔魏王元祥许王元晓密王邓康王傅所书其始封皆是也至贞观
十一年则不然止书徙封丁亥徙封元裕邓王元名舒
王至六月己巳又书徙封元祥江王而已其灵夔元晓本纪皆不载其徙封疑其徙封则
不同而元裕传误云徙封皆同也今考资治通鉴及旧
唐书皆载灵夔贞观五年封魏王十年改封燕王十四年改封鲁王元晓贞观五年即封
密王本纪亦同】累实封至千二百户好学善谈名理

与典签卢照邻为布衣交五为州刺史迁兖州都督薨赠司徒益州大都督陪葬献陵无子以江王子广平公灵嗣薨子孝先嗣 【世系表失

载】 开元中为冠军大将军

舒王元名

舒王元名始王谯后徙王高祖在大安宫太宗晨夕使尚宫问起居元名纔十岁保媪言尚宫有品当拜元名曰此帝侍婢耳何拜为太宗壮之曰真吾弟也及长矜严疏财未尝问家人生业历五州刺史实封至千户子豫章王亶治江州有美政高宗以元名善训子手诏褒美又欲授元名大州辞曰臣乘属籍岂以州郡为仕进资邪治石州二十年数游山林有高蹈意垂拱中徙郑州境接东畿诸王贵戚为刺史者纵家人暴百姓元名至一革之为治廉威进加司空武后时亶为邱神绩所构系诏狱死元名坐迁利州寻被杀神龙初诏复官爵赠司徒时少子郾国公昭已卒乃以亶子津嗣开元中为左威卫将军薨子万 【世系表作左威卫将军津之孙】 嗣薨子藻嗣

鲁王灵夔

鲁王灵夔笃学善草隶通音律初王魏后王燕为幽州都督已而徙王实封至千户频历五州刺史迁太子太师垂拱元年徙相州 【旧书作邢州】 坐与越王谋起兵流振州自杀子诜为清河王早夭薨 【按吴缜纠谬云世系表亦作藹本纪垂拱四年杀范阳郡王藹藹藹不同今考旧唐书资治通鉴皆作藹】 为范阳王知越王必败白发其谋得不诛历右散骑常侍为酷吏所害神龙初悉追复王爵以藹子道坚嗣道坚方严有礼法闺门肃如也七为州刺史迁国子祭酒开元中选授汴州刺史河南道采访使州据水陆都会前后刺史多黷利唯道坚以清毅称入为宗正卿薨赠礼部尚书子宇嗣从元宗至蜀为右金吾将军宝应初以皇子适封鲁王更封宇为嗣邹王弟道邃封戴国公恭默自守以修山东婚姻故事数任清职终尚书右丞

江王元祥

江安王元祥始王许后徙王四为州刺史实封至千户性庸迷所至营财产无厌时滕蒋虢三王皆贪暴得其府官者恶之不愿行故时语曰窳向儋崖振白不事江滕蒋虢元祥魁大带十围食兼数人韩虢魏亦鸿伟然不逮也薨赠司徒并州大都督陪葬献陵七子暉为永嘉王有禽兽行诛死皎为武阳王余皆爵公武后时多及诛皎子丛以幼流死岭表葬南安人号其冢为天孙墓中宗立以丛子钦嗣王又以皎封绝更取弟子继宗嗣既而以郡王不袭降澧国公

密王元晓

密贞王元晓贞观中为虢州刺史实封至千户徙泽州薨赠司徒扬州都督陪葬献陵子颖嗣为南安王薨子勳嗣早薨神龙初以颖弟亮养子昱嗣开元五年更诏元晓再从孙东莞郡公彻嗣 【世系表失载】 徙封濮阳郡王历宗正卿金紫光禄大夫

滕王元婴

滕王元婴贞观十三年始王实封千户为金州刺史骄纵失度在太宗丧集官属燕饮歌舞狎昵厮养巡省部内从民借狗求置所过为害以丸弹人观其走避则乐城门夜开不复有节高宗以书切责曰朕以王至亲不忍致于法今署下上考冀媿王心久之迁洪州都督官属妻美者给为妃召逼私之后坐法削户及亲事帐内之半谪置滁州起授寿州刺史徙隆州复不循法录事参军事裴聿谏正其失元婴捽辱之聿入计具奏帝迁聿六品上阶帝尝赐诸王彩五百以元婴及蒋王贪黩但下书曰滕叔蒋弟不须赐给麻二车助为钱缙二王大惭武后时进拜开府仪同三司梁州都督薨赠司徒

钦定续通志卷一百八十二

●钦定续通志卷一百八十三 宗室传三

宗室传

唐 【三】

○唐三

太宗诸子

△太宗诸子

常山王承干 郁林王恪【千里 琨 祎 峘 祗】濮王泰 庶人佑

蜀王愔蒋王恽【之芳】 越王贞【冲】 纪

王慎【琮】曹王明【皋 象古道古】

太宗十四子文德皇后生承干又生第四子泰高宗皇帝后宫生宽杨妃生恪又生第六子愔阴妃生佑王氏生恽燕妃生贞又生第十子器韦妃生慎后宫生简杨妃生福杨氏生明

常山王承干

郁林王恪

濮王泰

庶人佑

蜀王愔

蒋王恽

越王贞

纪王慎

曹王明

常山王承干

常山愍王 【旧书作恒山王】 承干字高明生承干殿即以命之武德三年始王常山郡与长沙宜都二王同封俄徙中山太宗即位立为皇太子甫八岁特敏惠帝爱之在谅闇使裁决庶政右大体后每行幸则令监国及长好声色慢游然惧帝秘其迹临朝言谆谆必忠孝退乃与羣不逞狎慢左右或进谏危坐敛容痛自咎饰非辩给谏者拜答不暇故人人以为贤而莫之察后过恶渐闻宫臣若孔颖达令狐德棻于志宁张元素赵宏智王仁表崔知机等皆天下选每规诤承干帝必厚赐金帛欲以厉其心承干傲不悛往往遣人阴图害之时魏王泰有美名帝爱重而承干病足不良行且惧废与泰交恶泰亦谋夺长各树党东宫有侏儿善姿首承干嬖爱帝闻震怒收儿杀之坐死者数人承干意为泰告怨甚内念儿不已筑室图其像赠官树碑为起冢苑中朝夕祭承干至其处裴回涕数行下愈怨怼称疾不朝累数月又使户奴数十百人习音声学胡人椎髻翦彩为舞衣寻橦跳剑鼓鞞声通昼夜不绝造大铜炉六熟鼎 【资治通鉴作八尺铜炉六隔大鼎】 招亡奴盗取人牛马亲视烹爇召所幸厮养其食之又好突厥言及所服选貌类胡者被以羊裘辫发五人建一落张毡舍造五狼头纛分戟为阵系幡旗设弯庐自居使诸郡敛羊以烹抽佩刀割肉相啖承干身作可汗死使众号哭斫面奔马环临之忽复起曰使我有天下将数万骑到金城 【资治通鉴作猎于金城西注曰金城恐当作金河】 然后解发委身思摩当一设顾不快邪左右私相语以为妖又襞毡为铠列丹帜勒部阵与汉王元昌分统大呼击刺为乐不用命者披树扶之或至死轻者辄腐之尝曰我作天子当肆吾欲有谏者我杀之杀五百人岂不定又召壮士左卫副率封师进刺客张师政纥干承基等谋杀魏王泰不克遂与元昌侯君集李安俨赵节杜荷龔臂血歃之谋以兵入西宫贞观十七年齐王佑反齐州承干谓承基等我宫西墙去大内正可二十步棘耳岂与齐州等会承基连齐王事系狱当死即上变帝诏长孙无忌房元龄萧瑀李绩孙伏伽岑文本马周褚遂良杂治废为庶人徙黔州十九年死 【按吴缜纠谬云本纪十八年十二月壬寅庶人承干卒与本传差一年今考旧唐书作十九年资治通鉴及唐会要俱作十八年】 帝为废朝葬以国公礼子象为怀州别驾厥鄂州别驾开元中象子适之为宰相赠还承干始

王象越州都督郇国公楚王宽武德三年出后楚哀王蚤薨贞观初追封

郁林王恪

郁林王 【旧唐书及世系表皆作吴王】 恪始王长沙俄进封汉贞观二年徙蜀
【旧唐书作武德三年封蜀王今考新唐书帝纪及
资治通鉴皆载于贞观二年恐系旧书之误】 与越燕二王同封不之国久乃为齐州都
督帝谓左右曰吾于恪岂不欲常见之但令早有定分
使外作藩屏吾百岁后庶兄弟无危亡忧十年改王吴与魏齐蜀蒋越纪六王同徙封授
安州都督赐书曰汝惟茂亲勉藩王室以义制事以礼
制心外之为君臣内之为父子今当去膝下不遗汝珍而遗汝以言念之哉坐与乳媪子
博箠罢都督削封户三百高宗即位拜司空梁州都督
恪善骑射有文武才其母隋炀帝女地亲望高内外所向帝初以晋王为太子又欲立恪
长孙无忌固争帝曰公岂以非己甥邪且儿英果类我
若保护舅氏未可知无忌曰晋王仁厚守文之良主且举棊不定则败况储位乎帝乃止
故无忌常恶之永徽中房遗爱谋反以遂诛恪以绝天
下望临刑呼曰社稷有灵无忌且族灭四子仁玮琨境并流岭表显庆五年追王郁林为
立庙以河闲王孝恭孙荣为郁林县侯以嗣神龙初赠
司空备礼改葬

千里

琨

祗

峘

祗

千里

仁光宅中遇赦适会荣以罪斥故得袭郁林县男 【旧书作郁林县侯】 历岳州
则驾爵郡公尝使江左州人遗以金拒不纳武后遣使
者劳曰儿吾家千里驹更名千里自天授后宗室贤者多诛翦惟千里诡噪不情数进符
瑞诸异物得免中宗反正改王成节愍太子诛武三思
千里与其子天水王禧率数十人斩右延明门以入太子败诛死籍其家改氏蝮睿宗立
诏还氏及官爵玮蚤卒中宗追封朗陵王子炫出继蜀
王愔开元中以傍继国改封广汉郡王迁太仆卿同正员薨

琨

琨武后时历六州刺史皆有名圣历中为岭南招慰使安辑反獠甚得其宜卒赠司
卫卿神龙初赠张掖郡王开元中以子祗贵封吴王境
神龙初封归政郡王历宗正卿坐千里事贬南州司马

祎

祎少有志尚事继母谨抚异母弟祗以友称当袭封固让祗中宗嘉其志特封嗣江王以继器后开元时亦以傍继徙信安郡王累为州刺史治严辨迁礼部尚书朔方节度使初吐蕃据石堡城数盗塞诏祎与河西陇右议攻取既到屯谡日进师或谓城险贼所爱必固守今兵深入有如不捷吾军必奔不如持重伺贼势祎曰人臣之节岂惮险不进乎必众寡不敌者吾以死继之于是分兵遮贼路督诸将倍道进遂拔之自是河陇诸军游奕拓地至千里元宗喜更号其城曰振武军契丹牙官可突千叛诏拜忠王为河北道行军元帅讨之敕祎以副王不行故祎率裴耀卿诸将分道出范阳北击二蕃破之擒酋长以还余部窜伏加开府仪同三司领关内支度营田采访处置使授二子官祎功多执政害之赏不讎为当时所恨久之擢兵部尚书为朔方节度大使坐事下除衢州刺史历滑怀二州天宝初以太子少师致仕明年迁太师未拜薨祎治家严教子有法度故峘峰峴皆显

峘

峘性质厚历官有美名以王孙封赵国公杨国忠乱政悉斥不附己者峘由考功郎中拜睢阳太守以清简为二千石最方入计而玄宗入蜀即走行在除武部侍郎兼御史大夫俄拜蜀郡太守剑南节度采访使郭千仞反与陈元礼共讨平之上皇还京迁户部尚书改越国干元元年持节都统江淮节度宣慰观察使都统之号自峘始明年宋州刺史刘展有异志诏拜展为淮南节度使密诏峘与扬州长史邓景山图之时展强扈既受诏即悉兵度淮峘景山拒之战寿春败绩峘走丹阳诏贬袁州司马卒于官赠扬州大都督弟峴别有传

祗

祗封嗣吴王出为东平太守安禄山反河南陈留荥阳灵昌相继陷祗募兵拒贼元宗壮之累迁陈留太守持节河南道节度采访使历太仆宗正卿代宗大历时祗既宗室老以太子宾客为集贤院待制是时勋望大臣无职事者皆得待诏于院给殮钱署舍以厚其礼自左仆射裴冕等十三人为之子巘以荫补五品官祗薨兄峘得罪乃以巘嗣王累至宗正卿检校刑部尚书薨赠太子少保性介直而刺人短历官清白居室不能庇风雨收恤甥侄慈爱过人家无留储公卿合赙乃克葬

濮王泰

濮恭王泰字惠褒始王宜都徙封卫继怀王后又徙封越为扬州大都督再迁雍州牧左武侯大将军改王魏帝以泰好士善属文诏郎府

置文学馆得自引学士又以泰大腰腹听乘小舆至朝司马苏勗劝泰延宾客著书如古贤王泰乃奏撰括地志于是引著作郎萧德言秘书郎顾允记室参军蒋亚卿功曹参军谢偃等撰次卫尉供帐光禄给食士有文学者多与而贵游子弟更相因藉门若市然泰悟其过欲速成乃分道计州翻缉疏录凡五百五十篇历四替成诏藏秘阁所赐万段后帝幸泰延康坊第曲赦长安死罪免坊人一年租府僚以差赐帛又泰月廩过皇太子远甚谏议大夫褚遂良谏曰圣人尊嫡卑庶谓之储君故用物不会与王共之庶子不得为比所以塞嫌萌杜祸源先王法度本诸人情知有国家者必有嫡庶庶子虽爱不得过嫡子如当亲者疏当尊者卑则私恩害公惑志乱国今魏王禀料过东宫议者以为非是昔汉窦太后爱梁王封四十余城王筑苑三百里治宫室为复道费用巨万出警入蹕一不得意遂发病死宣帝亦骄淮阳王几至于败辅以太退让之臣乃克免今魏王新出合且当示以节俭自可在后月加岁增又宜择师傅教以谦让勉以文学就成德器此所谓圣人之教不肃而成也帝又敕泰入居武德殿侍中魏征亦言王为陛下爱子欲安全之不当使居嫌疑之地今武德殿在东宫之西昔海陵居之矣论者以为不可虽时与事异人之多言尚或可畏又王之心亦弗遑舍愿罢之成王以宠为惧之美帝悟乃止时皇太子承干病蹇泰以计倾之乃引驸马都尉柴令武房遗爱等布腹心而韦挺杜楚客相继摄府事二人者为泰要结中朝臣津介赂遗羣臣更附为朋党承干惧阴遣人称泰府典签诣玄武门上封帝省之书言泰罪帝怒即遣捕诘不获既而太子败帝阴许立泰岑文本刘洎请遂立泰为太子长孙无忌固欲立晋王帝以太原石文有治万吉复欲从无忌泰微知之因语晋王尔善元昌得无及乎王忧甚帝怪之以故对帝怩然悟会召承干谴勒承干曰臣贵为太子尚何求但为泰所图与朝臣谋自安尔无状之人教臣为不轨事若泰为太子正使其得计耳帝曰是也有如立泰则副君可诡求而得使泰也立承干治俱死治也立泰承干可无它即幽泰将作监解雍州牧相州都督左武侯大将军降王东莱 【谨按通鉴辑览 御批承干之废虽不尽由泰之构谗然其覬覦盖非一日至云杀爱子以传晋王冀以要宠则肺肝如揭矣太宗以两弃处之可谓得当然承干辈之阅墙与建成元吉如出一辙幸未至元武门之甚耳天道好还吁可畏哉】 因诏自今太子不道藩王窥望者两弃之着为令然帝犹谓无忌曰公劝我立雉奴雉奴仁懦得无为宗社忧奈何雉奴高宗小字泰寻改王顺阳居均州之郟乡帝尝持泰表语左右曰泰文辞可喜岂非才士我心念泰无已时但为社稷计

遣居外使两相完也二十一年进王濮高宗即位诏泰开府置僚属车服羞饘异等薨郟乡年三十五赠太尉雍州牧二子欣徽欣嗣王武后时为酷吏所陷贬昭州别驾薨子峤神龙初得嗣王开元中为国子祭酒以罪贬邓州别驾薨封徽新安郡王

庶人佑

庶人佑字赞武德八年王宜阳进王楚又王燕已乃封齐领齐州都督贞观十一年始归国明年入朝以疾留京师其舅尚乘直长阴宏智儉人也说佑曰王兄弟多即上万岁后何以自全要须得士自助乃引客燕宏亮【旧书作引其妻兄燕宏信宏亮宏信之兄也亦见旧书本传】 谒佑佑悦赐金帛使募剑客十五年还州初帝用王府长史司马必取骨鲠敢言者有过失辄闻而佑溺羣小好弋猎长史薛大鼎屡谏不听帝以辅王无状免之更用权万纪万纪性刚急以法绳佑有咎君薨梁猛虎【旧唐书作梁猛彪】 者骑射得幸万纪斥之佑私引与狎昵帝数以书让佑万纪恐并获罪即说佑曰王上爱子上欲王改悔故数教责王诚能飭躬引咎万纪请入朝言之上意宜解佑因上书谢罪万纪见帝言佑且自新帝悦厚赐万纪而仍譙戒佑佑闻万纪见劳而已蒙责以为卖己益不平会万纪又以疑贰系君薨等制佑不出国门悉暴佑罪于朝佑不胜忿有诏刑部尚书刘德威临讯颇实帝召佑万纪还京师佑与燕宏亮等谋射杀万纪支解之左右劝佑遂发兵乃募城中男子年十五以上悉发私署左右上柱国光禄大夫开府仪同三司拓东拓西等王斥库贲行赏驱人筑堞浚隍缮甲兵人恶之皆夜缢亡去诏兵部尚书李绩与刘德威发便道兵讨之佑日夜引宏亮等五人对其妃宴乐语官军则宏亮妄言王母忧右手持酒啖左手刀拂之佑信爱宏亮闻之喜帝手敕佑曰吾常戒汝勿近小人正为此往吾子今国讎我上惭皇天下愧后土题毕涕而遣佑檄诸县县辄以开佑穷蹙上表曰臣帝子也为万纪谗构上天降灵罪人斯得臣狂失心惆怅惊悸左右无兵即欲颠走所以颇仗械以自卫护时绩未至而青淄等州兵已集或劝佑虜子女走豆子■〈卤亢〉为盗计未决兵曹杜行敏夜勒兵凿垣入佑与宏亮等闭门拒至日中行敏叫曰吾为国讨贼不速降且焚土积薪佑乃出执送京师赐死内侍省贬为庶人葬以国公礼诏齐州给复一年擢行敏巴州刺史封南阳郡公佑喜养鬪鸭方未反狸齧四十余绝其头去及败牵连诛死者凡四十余人佑之乱州罗人石头数佑罪以刀直前刺佑不克杀之诏赠亳州刺史尝引骑徇邑聚野人高君状为上亲平寇难土地甲兵不胜计今王以数千人为乱犹一手摇泰山又如君父何佑击擒之愧其

言不能杀诏擢榆社令

蜀王愔

蜀悼王愔贞观五年始王梁与郟汉申江代五王同封【按吴缜纠谬云太宗纪贞观五年同封者六王今传止云五王盖脱晋王治一名也】徙王蜀实封八百户出为岐州刺史数畋游为非法帝频责教不悛禽兽可扰于人铁石可为器愔曾不如之乃削封户及国官半徙国州久之还户增至千复出驰弋败民稼典军杨道整叩马谏愔摔击之御史大夫李干佑劾愔罪高宗怒贬黄州刺史擢道整匡道府折冲都尉吴王恪得罪愔以母弟废为庶人徙巴州俄封涪陵王薨咸亨初复爵士赠益州大都督陪葬昭陵以子璠嗣王璠武后时谪死归诚州神龙初以朗陵王玮子瑜嗣【玮原文误祔吴缜纠谬云当作朗陵王玮子袞嗣今依世系表改祔从玮瑜则元之旧名也仍之】

蒋王恽

蒋王恽始王郟又徙王蒋拜安州都督赐实封千户永徽三年徙梁州恽造器物服玩多至四百车所经州县骚然护送为有司劾奏诏贷不问上元中迁箕州刺史录事参军张君彻诬告恽反诏使者按验恽惶惧自杀高宗知其枉斩君彻赠恽司空荆州大都督陪葬昭陵三子炜煌休道【按世系表载蒋王恽子十六人而本传止云三子表载蔡国公煜本传作煌彼此互异】炜初王汝南郡恽薨遂嗣王为武后所害神龙初以嫡孙绍宗为嗣蒋王薨子钦福嗣为率更令煌封蔡国公孙之芳

之芳

之芳

之芳有令誉安禄山奏为范阳司马安禄山反自拔归京师历工部侍郎太子右庶子广德初诏兼御史大夫使吐蕃被留二岁乃得归拜礼部尚书改太子宾客休道子琚神龙初封嗣赵王开元中改王中山

越王贞

越王贞始王汉后徙原已乃封越贞善骑射涉文史有吏干为宗室材王武后初迁累太子太傅豫州刺史【旧书作蔡州刺史】中宗废居房陵贞乃与韩王元嘉及王子黄公譔鲁王灵夔王子范阳王霭霍王元轨王子江都王绪及子琅邪王冲计议反正垂拱四年明堂成悉追宗室行享礼共疑后遂大诛戮不遗种事且急譔乃矫帝玺书赐冲曰朕幽繫诸王宜即起兵于是命长史萧德琮募兵告诸王师期八月冲先发诸王莫有应者独贞将兵攻上蔡破之而冲已败贞稍徇属县得士七千列五营贞为中营以裴守德为大将军领中营赵成美为左中郎

将领左营闾宏道为右中郎将领右营安摩诃为郎将领后军王孝志为右将军领前军以韦庆礼为司马署官五百然胁诱无鬪志家童皆佩符以辟兵九月后遣左豹韬卫大将军曲崇裕夏官尚书岑长情率兵十万讨之以凤阁侍郎张光辅为诸军节度乃下诏削贞父子属籍改氏虺崇裕等次豫州贞少子规及裴守德拒战兵溃贞乃闭门守守德骁勇士贞始起以女妻之委以腹心至是欲杀贞自赎会军薄城家人白贞今事乃尔王岂受戮辱者邪即仰药死规自杀守德与王俱缢起凡二十日败始贞临水自鉴不见其首恶之未几及祸

冲

冲

冲贞长子也好学勇而才累迁博州刺史初发有士五千渡河趣武水武水令告急魏州州遣莘令马元素领兵先乘城冲攻之因风积薪焚其门火作风反众心沮解其属董元寂诵言王与国家战乃反尔冲斩以徇众惧遂溃惟家僮数十从之乃走博州为当关刺死后命邱神绩讨之兵未至冲已死起七日败二弟蒨 【旧书作倩世系表作清】 温蒨常山公坐死温以前告流岭南初贞腾檄寿州刺史赵瓌谕以兴兵且假道瓌得檄许为应妻常乐长公主亦趣诸王蚤立功故瓌与主皆死济州刺史薛顓驸马都尉瓘之子母城阳长公主封河东县侯绍尚太平公主擢累右玉钤卫员外将军以主壻不加戮饿死河南狱神龙初敬暉等奏冲父子死社稷请复爵土为武三思等沮罢开元四年乃复爵土有司议以死不忘君谥曰敬五年又诏王嗣绝国朕甚悼焉其以贞从孙故许王子夔国公琳嗣王 【按世系表云嗣越王存绍】 奉王祀琳薨爵不传贞最幼息珍子谪岭表数世不能归开元中女孙持四世丧北还求祔王莹诏嘉悯敕宗正寺京兆府为访其兆非陪陵者听葬女名元真为道士

纪王慎

琮

琮

纪王慎始王申后徙纪食户八百贞观中迁襄州刺史以治当最天子玺书劳勉人为立石颂德二十三年进户至千来明初累迁太子太师贝州刺史慎少好学善星步与越王齐名当世号纪越初贞连诸王起兵慎知时未可独拒不与合将就诛而免改氏虺载以槛车谪巴州道薨七子续琮叡秀献钦澄 【按世系表纪王慎尚有憇庄旷三人叡作友叡献作友献并与传同】 续与秀最知名续王东平历和州刺史薨

琮义阳王叡楚国公秀襄阳郡公献广化郡公钦建平郡公五人并为武后所杀神龙初以澄嗣王【按世系表云嗣纪王定州刺史澄初名铁诚】擢左骁卫将军薨子行同嗣琮三子行远行芳行休始琮与二弟同死桂林开元四年行休请身迎柩既至无封树议者谓不可复得行休归地布席以祈是夜梦王乘舟舟判为二既而适野见东洲中断乃悟焉又灵堂锁一夕茎自屈管上有指迹一奇二并使卜人筮之曰屈于文为尸出指者示也一奇二并三殡也先王告之矣乃趣其所发之如言而一节独阙行休号而寝梦琮告曰在洛南洲明日直殡南得之于是以三丧归陪葬昭陵赠琮陈州刺史永昌时行远行芳斥嵩州六道使至行远遂就戮行芳幼留赦抱持请代遂与俱死西南人称冤悌云慎女东光县主始入岁闻慎有疾不食父哀之给云已愈主察颜色未平终不肯御内外称之长适太子司议郎裴仲将时妃主多恃贵以奢豫相矜主独俭素姊弟谓曰人生富贵在得志独勤苦何为答曰我幼好礼今行之不违非得志谓何且自古贤妃淑女以恭逊著名骄纵败德况荣宠贵盛傥来物也可恃以凌人乎及王死号恸呕血数升免丧绝膏沐者二十年始诸王妃主自垂拱后被害者皆藁掩之神龙初诏州县普加求访祭以牲牢复官爵诸王皆陪葬昭献二陵主闻感恸卒赦其子曰为我谢亲戚酷愤已雪下见先王无恨矣中宗为举哀章善门下诏褒扬江殇王器封之明年薨无后

代王简已封薨无后

赵王福贞观十三年始王出后隐太子累迁梁州都督实封八百户薨赠司空并州都督陪葬昭陵无子神龙初以蒋王恽孙思顺嗣王

曹王明

曹王明母本巢王妃帝宠之欲立为后魏征谏曰陛下不可以辰嬴自累乃止贞观二十一年始王曹累为都督刺史高宗诏出后巢王永隆中坐太子贤事降王零陵徙黔州都督谢佑逼杀之帝闻悼甚黔官吏皆坐免景云中陪葬昭陵三子俊杰备【按世系表载曹王明子俊杰备外尚有价偲二人本传失载】俊嗣王南州别驾杰为黎国公垂拱时并及诛神龙初以杰子允为嗣曹王是时诸三子孙自岭外还入见中宗皆号恸帝为泣下初武后时壮者诛死幼皆没为官奴或匿人闲佣保至是相继出帝随属远近封拜云后备自南还诏停允封而封备历卫尉少卿同正员薨开元十二年复封允薨子戢嗣位左卫率府中郎将子皋嗣

皋

象古

道古

皋

皋字子兰少补左司御兵曹参军天宝十一载嗣王事母太妃郑以孝闻安禄山反奉母逃民闲闲走蜀谒元宗由都水使者迁左领军将军上元初旱歉皋禄不足养请补外不许乃故抵轻法贬温州长史俄摄州事州大饥发官廩数十万石赈饿者既贷乃自劾优诏许就进少府监时殿中侍御史李钧与其弟京兆法曹参军锷宦既遂不肯还乡母穷不自给皋行县见之叹曰入则孝出则弟有余力则学若二子者可与事君哉举劾之并锢死【旧书作改处州别驾行州事】召还未得见即上书言治道诏授衡州刺史为观察使谩劾贬潮州会杨炎起道州为宰相知皋直复用为衡州刺史初御史覆讯皋惧忧其母出则囚服入乃衣冠貌言如平常及为潮以迁入告至是复位乃言其实建中元年进拜湖南观察使前帅辛京杲贪虐使部将王国良戍武冈赖其富即劾以死国良恐据县反敛荆黔洪桂兵讨之再岁不能下皋至遗书曰观将军非敢大逆者特逃逸抗死尔将军遇我可以降我固为京杲诬者幸蒙雪何忍以兵加将军哉以为不然我以阵术破将军阵以攻法屠将军城非将军所度也国良得书喜且畏因请降然尚首鼠皋即日单骑称使者造国良垒贼延使者入皋大呼其军曰有识曹王者乎乃我也来受良降良今安在一军愕眙不敢动国良迎拜叩头请罪皋执手约为昆弟则尽焚攻守具散其兵有诏赦之赐名惟新明年持母丧至江陵会梁崇义反夺为左卫大将军复观察湖南李希烈反迁江西节度使受命日不宿家至豫章令将吏曰有功未申与怀器谋不发者皆自言得裨校伊慎李伯潜刘旻悉补大将擢王锷为中军以马彝许孟容为幕府治战舰裒兵二万以士二千五百委慎等教之自将五百人教以秦兵团力法联其赏罚弛张如一乃约以五百击慎卒二千五百莫能当其锋即尽以教之初慎书从希烈平襄州至是希烈惧为皋用即反闲德宗信之将诛慎皋请赦之使自效会与贼夹江阵皋勉慎立功以所乘马及器铠赐之使将先锋斩贼数百级乃免贼栅蔡山不可攻皋声言西取蕲引兵舰循厓泝江上贼闻以羸师保栅悉军行江北与皋值西去蔡山三百里皋悉遣步士登舟顺流下攻蔡山拔之闲一日贼救至大败乃取蕲州降其将李良平黄州兵益振会舒王为元帅授皋前军兵马使俄而天子狩奉天盐铁使包佶为陈少游所窘以运漕沂江次蕲口希烈使杜少诚将步骑三万将绝江道皋遣伊慎兵七千御于永安走之以功进工部尚书帝驻梁州皋贡助相望以天子处外乃不敢居城府出屯西

塞山大洲徙郡县为军市改户部尚书【旧书作工部尚书】又遣伊慎王锷攻安州未下希烈遣刘戒虚以步骑八千援之皋命李伯潜迎击于应山俘之遂下安州斩伪刺史王嘉祥希烈别遣兵援隋州皋破之厉乡因下平静白雁关贼遂不敢南略迁荆南节度使赐实封三百户凡战大小三十二取州五县二十斩首三万三千禽生万六千【按旧书凡下州四县十七大小十余阵而韩愈曹成王碑云大小之战三十有二取五州十九县与二书又不相合也】未尝败师所过不敢伐桑枣践禾稼朝廷仰食江淮而西道出九江至大别皆与贼接皋转战数千里饷路遂通江汉倚皋为固淮西平乃请护丧归东都帝遣中人赙吊讫葬来朝还镇初江陵东北傍汉有古鄣不治岁辄溢皋修塞之得其下良田五千顷规江南废洲为庐舍构二桥跨江而流人自古者二千余家繇荆州抵乐乡二百里其闲墟聚凡数十不井饮皋使命凿井以便人贞元初吴少诚擅蔡故徙皋镇山南东道割隋汝以益军【按方镇表云增岭唐邓安与本传异】练兵峙粮市回鹘马以益战骑岁时大畋以教士少诚畏之皋性勤俭能知人疾苦参听微隐尽得吏下短长其赏罚必信所至常平物估豪举不得擅其利教为战舰挟二轮蹈之鼓水疾进驶千阵马有所造作皆用省而利长以物遗人必自视衡量库帛皆印署以杜吏谩扶风马彝未知名皋识之卒称正直张柬之有园囿在襄阳皋尝宴集将市取之彝曰汉阳有中兴功今遗业当百世共保奈何使其子孙鬻乎皋谢曰主吏失词以为君羞微君安得闻此言卒年六十赠尚书右仆射谥曰成皋尝自创意为欹器以髹木上出五觚下锐圆为孟形所容二豆少则水弱多则强中则水器力均虽动摇乃不覆云

子象古道古

象古

象古元和中自衡州刺史擢南安都护贪纵不法驩州刺史杨清蛮酋也象古忌其豪召为牙门将常郁郁思乱会讨黄贼象古发甲助之乃授清兵三千清与子志烈还袭安南杀象古并其家诏授清为琼州刺史以桂仲武为都护清拒命仲武分谕渠酋兵皆附破城斩清夷其族

道古

道古举进士献书阙下擢校书郎集贤院学士累迁司门员外郎历利隋唐睦四州刺史柳公绰镇鄂岳为飞潜上闻宪宗欲代之裴度言嗣曹王皋尝能以江汉兵制李希烈威惠在人今以其子将必有功会道古自黔中观察使入朝乃代公绰倍道入其军公绰惶遽出财货皆被夺元和十二年攻申州破其郭进围中城守卒夜驱女子登而噪发悬门以出道古众乱

多死于贼李昕守安州未尝败道古诬逐之【按吴
缜纠谬云柳公绰传元和十一年为李道古代还除给事中并无飞语及道古迫逐之事
又李昕传云徙安州会观察使柳公绰方讨蔡以昕典
军声振贼中召为羽林将军亦无道古迫逐之事今考旧书李皋传唯不载飞潜上闻之
事余皆同】自将出木陵【旧书作穆陵】关士
卒骄不能制又度支钱道古悉以馈权幸故赐不给其下怨怒战不甚力贼亦易之故再
入申不能下卒无功淮西平加检校御史大夫召为宗
正卿左金吾将军帝喜服饵道古欲自媚而所善柳泌自谓能化金为不死药乃因宰相
皇甫镈以闻俄会帝崩穆宗为太子恶之既立诛泌贬
镈斥道古为循州司马终以服丹呕血死长庆初诏还其官道古巧于宦便佞倾下游公
卿闲常与奕博伪不胜厚进所偿嗜利者多得其欢心
故少盗美名及死卖宅以葬

钦定续通志卷一百八十三

●钦定续通志卷一百八十四 宗室传四

宗室传

唐【四】

○唐四

高宗诸子

中宗诸子

睿宗诸子

△高宗诸子

高宗诸子

燕王忠 泽王上金 许王素节【璆】孝敬皇帝宏 章怀太子贤【

守礼 承宏承案】

高宗八子后宫刘生忠郑生孝杨生上金萧淑妃生素节武后生宏贤中宗皇帝睿
宗皇帝

燕王忠

泽王上金

许王素节

孝敬皇帝宏

章怀太子贤

燕王忠

燕王忠字正本帝始为太子而忠生贞观二十年始王陈永徽初拜雍州牧王皇后
无子后舅柳奭说后以忠母微立之必亲己后然之请

于帝奭又与褚遂良韩瑗长孙无忌于志宁等继请遂立为皇太子后废武后子宏甫三岁许敬宗希后旨建言国有正嫡太子宜同汉刘强故事于是降封梁王梁州都督赐甲第实封户二千物二万段俄徙房州刺史忠寢惧不聊生至衣妇人衣备刺客数有妖梦尝自占事露废为庶人囚黔州承干故宅麟德初宦者王伏胜得罪于武后敬宗乃诬忠及上官仪与伏胜谋反赐死年二十二无子明年太子宏表请收葬许之神龙初追封赠太尉扬州大都督原悼王孝永徽元年始王许与杞雍二王同封蚤薨神龙初追封及谥

泽王上金

泽王上金始王杞永徽三年遥领益州大都督历郾寿二州刺史文明元年徙王毕又徙王泽历五州刺史载初中武承嗣讽周兴诬上金素节谋反召系御史狱上金闻素节已被杀即雉经七子并流死显州神龙初追还官爵以子义珣嗣王义珣始被谪匿身为佣保而嗣许王瓘利其爵邑告义珣假冒复流岭外开元初以素节子璆为后而玉真公主表义珣实上金子乃夺璆爵复使义珣嗣王拜率更令薨子漉嗣

许王素节

许王素节始王雍授雍州牧方羈卅即诵书日千言师事徐齐聃淬勉自强帝爱之转岐州刺史更王郇母被谮死出素节为申州刺史干封初诏素节病无入朝而实不病乃着忠孝论自明仓曹参军张柬之以闻欲帝省其诬武后滋不悦坐受赅降王鄱阳削封户什七徙置袁州锢终身仪凤三年【旧书作永隆元年】为岳州刺史更王葛徙王许历三州刺史与上金同追逮赴都至龙门驿被缢年四十三葬以庶人礼子瑛等九人并诛惟琳瓘璆钦古尚幼长囚雷州中宗复位追故封又赠开府仪同三司许州刺史陪葬干陵诏瓘嗣王实封户四百开元初封琳为嗣越王璆嗣泽王琳至右监门卫将军子随封夔国公瓘为卫尉卿以抑上金子不得封贬鄂州别驾因诏外继嗣王者皆归宗乃以嗣江王祜为信安王嗣蜀王禴为广汉王嗣密王彻为濮阳王嗣曹王臻为济国公嗣赵王琚为中山王武阳王继宗为澧国公瓘累迁太子詹事薨赠蜀郡大都督二子解需皆幼以璆子益嗣天宝十四载解始袭封王

璆

璆

璆初封嗣泽王降为郢国公官宗正光禄卿进封褒信王天宝初复拜宗正卿性友悌聪敏宗子有一善无不荐延故宗室在省闼者多璆所启薨赠江陵郡大都督三子谦巽钦古谦郢国公梓州刺史巽汝南郡公钦古封巴国

公子贲嗣

孝敬皇帝宏

孝敬皇帝宏永徽六年始王代与潞王同封显庆元年立为皇太子受春秋左氏于率更令郭瑜至楚世子商臣弑其君喟而废卷曰圣人垂训何书此邪瑜曰孔子作春秋善恶必书褒善以劝贬恶以诫故商臣之罪虽千载犹不得灭太子曰然所不忍闻愿读它书瑜请改受礼太子曰善四年加元服又命宾客许敬宗右庶子许圜师中书侍郎上官仪中舍人杨思俭【按吴缜纠谬云艺文志摇山玉彩注曰太子少师许敬宗司议郎孟利贞崇贤馆学士郭瑜顾允右史董思恭等撰姓氏与传不同未知孰是】即文思殿摘采古今文章号摇山玉彩【吴缜纠谬本传摇山玉彩及裴光庭传摇山往则摇字并从木艺文志并从手宋知孰是今按山海经云祝融生太子长琴是处摇山始作乐风摇亦作瑶则字宜从木也】凡五百篇书奏帝赐物三万段余臣赐有差又诏五日一赴光顺门决事总章元年释菜国学请赠颜回为太子少师曾参太子少保制可会有司以征辽士亡命及亡命不即首者身殊死家属没官宏请条别其科无使沦胥诏可帝幸东都诏监国时关中饥宏视庖下兵食有榆皮蓬实者悄然命家令寺给米义阳宣城二公主以母故幽掖廷四十不嫁【按吴缜纠谬云高宗以贞观二年戊子岁生至孝敬皇帝薨时止四十八岁耳何缘有四十岁之女乎此史臣已甚之词也】宏闻胎测建请下降武后怒即以当上卫士配之由是失爱宏仁孝宾礼大臣未尝有过而后将聘志宏奏请数拂旨上元二年从幸合璧宫遇酖薨二十三【原文作二十四按吴缜纠谬云宏以癸丑岁生至上元二年岁在乙亥止二十三年不得云二十四也今改正】天下莫不痛之诏谥为孝敬皇帝葬缙氏墓号恭陵制度尽用天子礼百官从权制三十六日释服妃薨谥哀皇后无子永昌初以楚王隆基嗣中宗立诏以主祔太庙号义宗开元中有司奏孝敬皇帝宜建庙东都以谥名庙诏可于是罢义宗号妃即裴居道女有妇德居道以妃故拜内史纳言厯太子少保翼国公为酷吏所陷下狱死

章怀太子贤

章怀太子贤字明允容止端重少为帝爱甫数岁读书一览辄不忘始王潞厯幽州都督雍州牧徙王沛累进扬州大都督右卫大将军更名德徙王雍仍领雍州牧凉州大都督实封千户上元二年【原文作元年按吴缜纠谬云高宗纪及三宗诸子传并云皇太子以上元二年薨独此传以为元年盖误也今改正】复名贤是时皇太子薨其六月立贤为皇太子俄

诏监国贤于处决尤明审朝廷称焉帝手敕褒赐贤又招集诸儒左庶子张大安等共注范煜后汉书书奏帝优赐段物数万时正谏大夫明崇俨以左道为武后所信崇俨言英王类太宗而相王贵贤闻恶之宫人或传贤乃后姊韩国夫人所生贤益疑而后撰少阳政范孝子传赐贤数以书让责贤愈不安调露中天子在东都崇俨为盗所杀后疑出贤谋遣人发太子阴事诏薛元超裴炎高智周杂治之获甲数百首于东宫帝素爱贤薄其罪后曰贤怀逆大义灭亲不可赦乃废为庶人焚甲天津桥坐徙者十余人开耀元年徙贤巴州武后得政诏左金吾将军邱神绩检卫贤第迫令自杀年三十四后举哀显福门贬神绩送州刺史追复旧王神龙初赠司徒遣使迎丧陪葬干陵睿宗立追赠皇太子及谥三子光顺守礼守义光顺为乐安王 【旧书作安乐郡王】

】 徙义丰被诛守义为犍为王徙封桂阳 【世系表及旧书并作永安郡王】 薨先天中追封光顺莒王守义毕王

守礼

承宏

承窠

守礼

守礼嗣王始名光仁授太子洗马武后革命畏疾宗室而守礼以父得罪与睿宗诸子闭处宫中十余年睿宗封相王许出外邸于是守礼等始居外改司议郎中宗即位复故封拜光禄卿实封户五百韦后摄政进封邠王睿宗立兼检校左金吾卫大将军出为幽州刺史遥兼单于大都护迁司空开元初累为州刺史后还诸王京师守礼以外支为王不甚才而多宠嬖子六十余人 【旧书云男女六十余人】 无可称者岐王尝奏守礼知雨暘帝问故答曰臣无它当天后时太子被罪臣幽宫中岁被敕杖凡四三累创痕肤前雨则沈懣霁则佳以此知之因泣下帝为恻然薨年七十赠太尉子承宏承窠承窠可记者

承宏

承宏爵广武王坐交非其人贬房州别驾还为宗正卿广德元年吐蕃入京师天子如陕虜得宰相马重英立承宏为帝以翰林学士于可封霍璜为宰相贼退诏放承宏于华州死承窠封嗣邠王

承窠

承窠炖煌王拜宗正卿与仆固怀恩使回纥和亲即纳其女为妃封毗伽公主薨赠司空唐制嗣郡王加四品阶亲王子服绯开元中张九龄奏窠辞及邠王三子为王者赐紫余皆服绯官不越六局即王府椽属仍员外置后从

帝至蜀者皆服紫

△中宗诸子

懿德太子重润

譙王重福节愍太子重俊

殇皇帝重茂

中宗四子韦庶人生重润后宫生重福重俊殇帝

懿德太子重润

譙王重福

节愍太子重俊

殇皇帝重茂

懿德太子重润

懿德太子重润本名重照避武后讳改焉帝为皇太子时生东宫高宗喜甚乳月满为大赦天下改元永淳是岁立为皇太孙开府置官属

帝问吏部侍郎裴敬彝郎中王方庆对曰礼有嫡子无嫡孙汉魏太子在子但封王晋立愍怀子为皇太孙齐立文惠子为皇太孙皆居东宫今

有太子又立太孙于古无有帝曰自我作古若何对曰陛下肇建皇孙本支千亿之庆帝说中宗失位太孙府废贬庶人别囚之帝复位封邵王

大足中张易之兄弟得幸武后或谮重润与其女弟永泰郡主及主壻窃议后怒杖杀之年二十 【原文作年十九按吴缙纠谬云本传言重

润生改元永淳岁在壬午大足止有元年岁在辛丑则是已二十年也今改正】 重润秀容仪以孝爱称诛不缘罪人皆流涕神龙初追赠皇太

子及谥陪葬干陵号墓为陵

譙王重福

譙王重福高宗时王唐昌郡徙封平恩长安未乃进王神龙初韦庶人谮与张易之兄弟陷重润贬濮州员外刺史徙合均二州不领事景

龙三年中宗亲郊赦天下十恶者咸宥流人得还重福不得归自陈苍生皆自新而一子摈弃皇天平分固若此乎不报韦后得政诏左屯卫大

将军赵承恩辞思简以兵护守睿宗立徙集州未行洛阳男子张灵均说重福曰大王居嫡长当为天子相王虽平大难安可越居大位王若阴

幸东都杀留守拥兵西据陕徇河南河北天下可图也重福乃遣灵均与其党郑愔计愔亦密招重福为天子豫尊睿宗为皇季叔重茂皇太弟

制称中元克复元年愔自署左丞相知内外文武事以灵均为右丞相天柱大将军知出征事其余以次除署重福自均州与灵均乘驿趋东都

舍驸马裴巽家洛阳令候巽重福惊遽出欲劫左右屯营兵至天津桥愿从者数百人侍御史李邕遇之先驰至右屯营呼曰譙王得罪先帝擅

入都为乱公等勉立功取富贵稍稍闭皇城诸门以拒重福徇右营不能动趋左掖门已

阖怒纵火烧之左营兵寢逼众遂溃重福走山谷留守
裴谈总兵大索投漕渠死年三十一磔其尸帝诏以三品礼葬

节愍太子重俊

节愍太子重俊圣历三年王义兴神龙初王卫拜洛州牧实封千户俄领扬州大都督明年为皇太子重俊性明果然少法度既杨璠武崇训为宾客二人冯贵宠无学术惟狗马蹴鞠相戏昵左庶子姚珽数上疏诤导右庶子平贞慎又献孝经议养德等传太子纳而不克用武三思挟韦后势将图逆内忌太子而崇训又三思子尚安乐公主常教主辱重俊以非韦出詈为奴数请废自为皇太女三年七月重俊恚忿遂率李多祚泊左羽林将军李思冲李承况独孤祎之沙咤忠义矫发左羽林及千骑兵杀三思崇训并其党十余人使左金吾大将军成王千里守宫城自率兵趋肃章门斩关入索韦后安乐公主昭容上官所在后挟帝升元武门宰相杨再思苏瓌李峤及宗楚客纪处讷统兵二千余人守太极殿帝召右羽林将军刘仁景等率留军飞骑百人拒之多祚兵不得进帝据槛语千骑曰尔乃我爪牙忽为乱能斩贼者有赏于是士倒戈斩多祚余党溃重俊亡入终南山欲奔突厥楚客遣果毅赵思慎追之重俊憩于野为左右所杀诏殊首朝堂献太庙并以告三思崇训枢睿宗立加赠谥陪葬定陵初重俊被害官属莫敢视惟永和丞宁嘉勗号哭解衣裹其首时人义之楚客怒收付狱贬平兴丞卒至是亦赠永和令重俊子宗晖景云三年封湖阳郡王天宝中至太常员外卿薨

殇皇帝重茂

殇皇帝重茂初王北海神龙初进王温授右卫大将军领并州大都督中宗崩韦后立重茂为帝而自临朝称制韦氏败重茂遂逊位让叔父相王退居别所景云二年改王襄迁集州令中郎将率兵守卫开元二年转房州刺史薨年十七葬武功西原 【按新书不为重茂立传吴缜纠谬力言其非今依旧书增入】

△睿宗诸子

让皇帝宪【珽 瑀景俭】 惠庄太子撝惠文太子范【珍】 惠宣太子业【知柔】

睿宗六子肃明皇后生宪宫人柳生撝昭成皇后生元宗皇帝崔孺人生范王德妃生业后宫生隆悌

让皇帝宪

惠庄太子撝

惠文太子范

惠宣太子业

让皇帝宪

让皇帝宪始王永平文明元年武后以睿宗为皇帝故宪立为皇太子睿宗降为皇嗣更册为皇孙与诸王皆出合开府置官属长寿二年降王寿春与衡阳巴陵彭城三王同封【按吴缜纠谬云据武后纪当云与衡阳临淄巴陵彭城四王同封而止云三王者脱误也或谓临淄即明皇帝史家不欲死之降封之数缜亦非之今姑仍其旧】复诏入阁中宗立改王蔡固辞不敢当韦后摄政进封宋睿宗将建东宫以宪嫡长又尝为太子而楚王有大功故久不定宪辞曰储副天下公器时平则先嫡国难则先功重社稷也使付授非宜海内失望臣以死请因涕泣固让时大臣亦言楚王有定社稷功且圣庶抗嫡不宜更议帝嘉宪让遂许之立楚王为皇太子以宪为雍州牧扬州大都督太子太师实封至二千户赐甲第进尚书右仆射又兼司徒让司徒更为太子宾客时太平公主有异图姚元崇宋璟白帝请出宪及申王成义为刺史以销释阴计乃以司徒兼蒲州刺史进司空元宗既讨定萧岑之难进宪位太尉增千户固辞更授开府仪同三司解太尉扬州大都督徙王奘又兼太常卿开元十四年表解卿久之复为太尉历泽岐泾三州刺史累封至五千五百户二十九年薨初帝五子列第东都积善坊号五王子宅及赐第上都隆庆坊亦号五王宅元宗为太子尝制大衾长枕将与诸王共之睿宗知喜甚及先天后尽以隆庆旧邸为兴庆宫而赐宪及薛王第于胜业坊申岐二王居安兴坊环列宫侧天子于宫西南置楼其西署曰花萼相辉之楼南曰勤政务本之楼帝时时登之闻诸王作乐必亟召升楼与同榻坐或就幸第赋诗燕嬉赐金帛侑欢时以鹤鸽千数集麟德殿庭树翔栖浹日左清道率府长史魏光乘作颂以为天子友悌之祥帝喜亦为作颂宪尤谨畏未尝干政而与人交帝益信重后申王等相继薨唯宪在帝亲侍益厚薨年六十三帝失声号恸左右皆泣下帝以宪实推天下有高世之行非大号不称乃追谥让皇帝遣尚书左丞相裴耀卿太常卿韦绦持节奉册其子璿表陈宪宿素退让不敢当大号制不许及斂出天子服一称诏右监门大将军高力士以手书寘灵坐赠妃元氏为恭皇后葬桥陵旁及葬敕中使谕璿等送终之具使众见之示以俭薄既发引大雨有诏庆王潭等涉途泥步送十里号其墓曰惠陵宪常从帝按舞万岁楼从复道上见卫士已食弃其余囊中帝怒诏高力士杖杀之宪从容曰从复道上窥人之私恐士不自安且失大体岂以性命轻于余殮乎帝遽止谓力士曰王于我可谓有急难也不然且误杀士又凉

州献新曲帝御便坐召诸王观之宪曰曲虽佳然宫离而不属商乱而暴君卑逼下臣僭犯上发于忽微形于音声播之咏歌见于人事臣恐一

日有播迁之祸帝默然及安史乱世乃思宪审音云宪本名成器避昭成太后谥与申王成义俱改今名宪子十人 【按世系表宪九子璿嗣

庄琳珣珽管玠璿瑀旧书宪凡十子琳下有璿原文误作十九人今改从旧书】 其闻者璿嗣庄琳瑀

璿

瑀

景俭

璿

璿眉宇秀整性谨洁善射帝爱之封汝阳王历太仆卿与贺知章褚庭诲梁涉等善薨赠太子太师嗣庄幼有令名为太子左谕德封济阴

王薨赠幽州大都督琳以秘书监为嗣宣王从天子幸蜀薨

瑀

瑀早有材望伟仪观始封陇西郡公从帝幸蜀至河池封汉中王山南西道防御使开元初宣国公主降回纥诏瑀以特进太常卿持节册

拜回纥为威远可汗肃宗诏收羣臣马助战瑀与魏少游等持不可帝怒贬蓬州长史薨赠太子太师谥曰宣孙景俭

景俭

景俭字宽中及进士第强记多闻善言古成败王霸大略高自负于士大夫无所屈王叔文等更誉之以为管仲诸葛亮比叔文败景俭以

母丧得不坐韦夏卿守东都辟幕府窦羣任中丞引为监察御史羣贬景俭亦为江陵户曹参军累擢忠州刺史元和末入朝不见用复为澧州

刺史素与元稹李绅善二人方在翰林言其才及延英奉辞景俭自陈见抑远穆宗怜之追诏为仓部员外郎不遣阅月拜谏议大夫性矜诞使

酒纵气语侵宰相萧俛段文昌诉于帝贬建州刺史稹得君为之助故还为谏议大夫与冯宿杨嗣复温造李肇等集史官独孤朗所景俭醉至

中书慢骂宰相王播崔植杜元颖更为逊言厚谢乃去坐贬漳州刺史宿等皆逐矣未及漳稹辅政改楚州刺史议者谓景俭辱丞相贬未至即

迁非是稹惧改少府监悉还宿等景俭既湮阨不得志卒然其为人轻财笃于义既没士悵悼之

惠庄太子擢

惠庄太子擢本名成义垂拱三年始王恒与卫赵二王同封俄改王衡阳睿宗立进王申与岐薛二王同封累迁右卫金吾二大將軍实封

至千户进司徒兼益州大都督四为州刺史开元八年停刺史复为司徒薨册书赠太子及谥陪葬桥陵擢性宽裕仪貌瓌重无嗣诏以让帝子珣嗣为怀宁王徙封同安薨天宝中复以让帝子璿嗣

惠文太子范

惠文太子范始名隆范元宗立与薛王隆业避帝讳去二名初王郑改封卫俄降封巴陵进王岐为太常卿并州大都督左羽林大将军从元宗诛太平公主以功赐封与薛王业并满五千户历为州刺史迁太子太傅开元十四年薨册书赠太子及谥陪葬桥陵帝哭之恸彻常膳至累旬羣臣勉请乃复范好学工书爱儒士无贵贱为尽礼与阎朝隐刘延琦张谔郑繇等善常饮酒赋诗相娱乐又聚书画皆世所珍者初隋亡禁内图书湮放唐兴募访稍稍复出藏秘府长安初张易之奏天下善工潢治乃密使摹肖殆不可辨窃其真藏于家既诛悉为薛稷取去稷又败范得之后卒为火所焚驸马都尉裴虚己善讖纬坐私与范游徙岭南延琦贬雅州司户谔为山荏丞然帝于范无少闲也时王毛仲等起贱微暴贵诸王见必加礼独范接之自如子瑾嗣落魄不饬名检沈酒色历太仆卿封河东王暴薨赠太子少师 【世系表尚有河西郡王玠】

天宝中复以薛王子略阳公珍为嗣岐王

珍

珍

珍仪观丰伟为宗正员外卿与蔚州镇将朱融善融尝言珍似上皇因有阴谋往语金吾将军邢济曰关外寇近京师草草奈何济曰我金吾天子押衙以死生从安自脱融曰见嗣岐王无虑矣济以闻肃宗诏废珍为庶人赐死融党皆诛擢济为桂管防御使

惠宣太子业

惠宣太子业始王赵降封中山授都水使者徙彭城兼陈州别驾进王薛为羽林大将军荆州大都督以好学授秘书监开元初进太子少保即拜太保累历州刺史初母早终从母贤妃鞠之八年迎贤妃外邸事之甚谨其女弟淮阳凉国二公主亦早卒抚甥与己子均帝益爱之尝被疾帝自祝禴既愈幸其第置酒赋诗为初生欢帝尝不豫业妃弟内直郎韦宾与殿中监皇甫恂妄言休咎事宾坐死恂贬锦州刺史妃恐降服待罪业亦不敢入谒帝闻遽召之业伏殿下请罪帝趋就执其手曰吾所猜于兄弟者天地共咎之遂复燕欢仍谕妃复位俄进司徒二十二年业有疾帝爱之一夕容发为变及薨帝悲不能食册书加赠及谥陪葬桥陵十一子 【世系表祇载十人】 其闻者瑗瑒瑛帝后追思业引

见瑗等伤之乃下诏共赐实封千户瑗为乐安王瑒荣阳王宗正卿瑁为嗣薛王厯鸿胪卿天宝中瑁舅韦坚为李林甫所构坐贬夷陵别驾徙置夜郎南浦及安禄山乱乃还京师

知柔

知柔

曾孙知柔嗣王再为宗正卿久之擢京兆尹始郑白渠梗壅民不得岁知柔调三辅治复旧道灌浸如约遂无旱虞民诣阙请立石纪功知柔固让得止累检校司徒同中书门下平章事又诏营缉太庙判度支充诸道盐铁转运使昭宗出莎城独知柔从乘輿器用庖顿皆主之大细毕给性俭约虽位通显无居第未几出拜清海军节度使在镇廉洁贡献时入进检校太傅兼侍中仕凡四纪常为宗室冠卒于镇

隋王隆悌始封汝南王早薨睿宗追王赠荆州大都督爵不传

钦定续通志卷一百八十四

●钦定续通志卷一百八十五 宗室传五

宗室传

唐 【五】

○唐五

元宗诸子

肃宗诸子

△元宗诸子

奉天皇帝琮 太子瑛 棣王琰鄂王瑶

靖恭太子琬 光王琚颖王璈

永王璘 寿王瑁延王玢 盛王琦

丰王珙汴王璈

元宗三十子刘华妃生琮第六子琬第十二子璿赵丽妃生瑛元献皇后生肃宗皇帝钱妃生琰皇甫德仪生瑶刘才人生琚武惠妃生一第十五子敬第十八子瑁第二十一子琦高婕妤生璈郭顺仪生璘柳婕妤生玢鍾美人生环卢美人生璿阎才人生玢王美人生珪陈才人生珙郑才人生璘武贤仪生璿第三十子璈余七子天母氏失传

奉天皇帝琮

太子瑛

棣王琰

鄂王瑶

靖恭太子琬

光王琚

颍王璈
永王璘
寿王瑁
延王玢
盛王琦
丰王珙
汴王璈

奉天皇帝琮

奉天皇帝琮景云元年王许昌郡与真定王同封先天元年进王郾与郢王同封开元四年领安西大都护安抚河东关内陇右诸蕃大使十三年徙王庆与忠棣荣光仪颍永寿延盛济十一王同封十五年与十王并领节度不出合琮以凉州都督兼河西诸军节度大使天宝元年改节河东十载薨【旧书亦作十载按吴缜纠谬云元宗纪天宝十一年五月戊申庆王琮薨传恐误】赠太子谥靖德肃宗立进谥奉天皇帝妃窦为恭应皇后诏尚书右仆射裴冕持节改葬羣臣素服临送达礼门帝御门哭墓号齐陵无子以太子瑛子侁嗣王琮始名嗣直太子嗣谦棣王嗣直鄂王嗣初靖恭太子嗣玄开元十三年更名曰潭曰鸿曰洽曰涓曰滉后十年改今名

太子瑛

太子瑛始王真定进王郾开元三年立为皇太子七年诏太子诸王入阁学行齿胄礼太常择日谒孔子太子献诏右散骑常侍褚无量执经羣臣学官诸生以差赐帛明年瑛加元服见太庙十六年诏九品官息女可配太子者有司采阅待进止以太常少卿薛绦女为妃帝种麦苑中瑛诸王侍登帝曰是将荐宗庙故亲之亦欲若等知稼穡之难初瑛母以倡进善歌舞帝在潞得幸及即位擢妃父元礼兄常奴皆至大官鄂光二王母亦帝为临淄王时以色选及武惠妃宠幸倾后宫生寿王爱与诸子绝等而太子二王以母失职颇怏怏惠妃女咸宜公主壻扬洄揣妃旨伺太子短俾为丑语惠妃诉于帝且泣帝大怒召宰相议废之中书令张九龄谏曰太子诸王日受圣训天下共庆陛下享国久子孙蕃衍奈何一日弃三子父子之道天性也虽有失尚当掩之惟陛下裁赦帝默然太子得不废俄而九龄罢李林甫专国数称寿王美以动妃意妃果德之二十五年洄复构瑛瑶琨与妃之兄薛锈异谋惠妃使人诡召太子二王曰宫中有贼请介以入太子从之妃白帝曰太子二王谋反甲而来帝使中人视之如言遽召宰相林甫议答曰陛下家事非臣所宜豫帝意决乃诏太子

瑛鄂王瑶光王琚同恶均罪并废为庶人琇赐死瑛瑶

琚寻遇害天下冤之号三庶人宝应元年诏赠瑛皇太子瑶等复王瑛子五人俨伸倩侏备【旧书瑛有六男俨伸倩侏备倣按世系表亦载

六人传恐误】瑛之废帝使庆王畜俨等为子俨封新平郡王伸平原郡王侏嗣庆王备太仆卿倩失传

棣王琰

棣王琰开元二年始王郾与鄂鄆二王同封后徙王棣领太原牧太原以北诸军节度大使天宝初为武威郡都督经略节度河西陇右会

妃韦以过置别室而二孺人争宠不平求巫者密置符琰履中以求媚讎人告琰厌魅上帝伺其朝使人取履视之信帝怒责琰琰顿首谢曰臣

罪宜死然臣与妇不相见二年有二孺人争长臣恐此三人为之及推果验然帝犹疑琰怒未置太子以下皆为请乃囚于鹰狗坊以忧薨妃縗

之女无子还本宗琰凡五十五子得王者四人【按旧书不载顺化王佺故云封为王者三人与此互异】僖王汝南郡侨宜都俊济南佺顺

化僚太仆卿侠国子祭酒仁殿中监僊秘书监宝应元年诏复琰王爵

鄂王瑶

鄂王瑶既封遥领幽州都督河北节度大使开元二十三年与荣光仪颍永寿延盛济信义十一王并授开府仪同三司实封二千户诏诣

东宫尚书省上曰百官集送有司供张设乐是日悉拜王府官属然未有府也而选任冒滥时不以为荣

靖恭太子琬

靖恭太子琬始王鄆徙王荣为京兆牧领陇右节度大使又诏亲巡按陇右选关内河东飞骑五万防盛秋累兼单于安北大都督安禄山

反诏琬为征讨元帅募河陇兵屯陕以高仙芝副之会薨琬风格秀整有素望中外倚之及薨莫不为国怅恨诏加赠谥琬男女五十八人得王

者三人【按旧书云封为郡王者二而不载陈留王倩世系表则尚有文安郡王像而不止三人与此互异】俯王济阴郡偕北平倩陈留偃

卫尉卿僊秘书监佩鸿胪卿

光王琚

光王琚开元十三年始王与仪颍永寿延盛济七王同封俄领广州都督勇力善骑射帝爱之与鄂王同居友睦甚皆笃学既废无嗣初琚

名琚仪王濉颍王澧永王泽寿王清延王洄盛王沐济王溢信王沔义王灌陈王沘丰王澄恒王漉凉王澶汴王滔至二十三年诏悉改今名

夏悼王一生韶秀以母宠故钟爱命之曰一未免怀薨追爵及谥时帝在东都故葬

龙门东岑欲宫中望见云仪王璿既封授河南 【旧书作河西】 牧薨赠太傅子侁王锺陵郡健广陵 【按世系表有嗣仪王倓】

颍王璿

颍王璿喜读书好文辞开元十五年遥领安东都护安禄山反诏领剑南节度大使以杨国忠为之副帝西出令御史大夫魏方进为置顿使移书剑南属郡托璿之藩大设储侍璿先即镇更以蜀郡长史崔圆为副璿济江舟中以彩席藉步命彻之曰此可寝柰何践之璿之出遽不及受节司马史贲请建大槩蒙油囊先驱以威道路璿笑曰既为真王矣安用假节为将至成都崔圆迎拜马前璿不为礼圆衔之璿视事再踰月人便其宽圆奏罢居内宅乃诏宣慰肃宗于彭原从还京师建中四年薨年六十六子伸为荣阳王儻高邑王倪楚国公僂夔国公

怀思 【旧书作怀哀】 王敏貌丰秀若图画帝爱之甫晬薨追爵及谥祔葬敬陵永王璿

永王璿少失母肃宗自养视之长聪敏好学貌陋甚不能正视既封领荆州大都督安禄山反帝至扶风诏璿即日赴镇俄又领山南江西岭南黔中四道节度使以少府监竇昭为副璿至江陵募士得数万补署郎官御史时江淮租赋巨亿万在所山委璿生宫中于事不通晓见富且强遂有关江左意以薛镠李台卿韦子春刘巨鳞蔡駟为谋主肃宗闻之诏璿还覲上皇于蜀璿不从其子襄城王伤刚鸷乏谋亦乐乱劝璿取金陵即引舟师东下甲士五千趋广陵以浑惟明季广琛高仙琦为将然未敢显言取江左也会吴郡采访使李希言平牒璿璿因发怒曰寡人上皇子皇帝弟地尊礼绝今希言乃平牒抗威落笔署字何邪乃使惟明袭希言而令广琛趋广陵攻采访使李成式璿至当涂希言已屯丹阳遣将元景曜等拒战不胜降于璿江淮震动明年肃宗遣宦者啖廷瑶等与成式谋招谕之时河南招讨判官李铣在广陵有兵千余 【旧书作有骑一百八十人】 廷瑶邀铣屯杨子成式又遣裴戎以广陵卒三千戍伊娄埭张旗帜大阅士璿与傷登陴望之有惧色广琛知事不集乃召诸将割臂而盟以贰于璿于是惟明奔江甯冯季康奔白沙广琛以兵六千奔广陵璿使琦追蹶之广琛曰我德王故不忍决战逃命归国耳若逼我且决死追者止乃免是夜铣阵江北夜然束苇人执二炬景乱水中覘者以倍告璿军亦举火应之璿疑王师已济携儿女及麾下遁去迟明觉其给复入城其舟楫使傷驱众趋晋陵谍者告曰王走矣成式以兵进先锋至新丰璿使傷伸琦逆击之铣合势张左右翼射伤中肩军遂败仙琦与璿奔鄱阳司马闭城拒璿怒焚城门入之收库兵掠余千将南走岭外皇

甫旆兵追及之战大庾岭璘中矢被执旆杀之傷为乱
兵所害仙琦逃去璘未败时上皇下诰降为庶人徙置房陵及死旆送妻子至蜀上皇伤
悼久之肃宗以少所自鞠不宣其罪谓左右曰皇甫旆
执吾弟不送之蜀而擅杀之何邪由是不复用薛鏐等皆伏诛子攒为余姚王慎莒国公
儼郾国公伶仪并国子祭酒

寿王瑁

寿王瑁母惠妃频妊不育及瑁生宣王请养邸中元妃自乳之名为己子故封比诸
王最后开元十五年遥领益州大都督初帝以永王等
尚幼诏不入谒瑁七岁请与诸兄众谢拜舞有仪矩帝异之宣王薨请制服以报私恩诏
可大历十年薨赠太傅子王者三人僊王德阳郡怀济
阳郡偃广阳郡伉薛国公杰国子祭酒 【世系表尚有胜国公侑嗣寿王存志】

延王玢

延王玢母尚书左丞范之孙帝重其名家而玢亦仁爱有学既封遥领安西大都护
帝入蜀玢凡三十六子不忍弃故徐进数日见行在所
帝怒汉中王瑀申救得解听归灵武兴元元年薨子倬王彭城郡偃平阳儼鲁国公偃荆
国公优太仆卿

盛王琦

盛宣王 【旧书及世系表俱无宣字】 琦既封领扬州大都督帝之西诏为广陵
大都督淮南江东河南节度大使以刘洸为副李成式
为副大使琦不行广德二年薨赠太傅子偿封真定王佩武都王 【世系表作信都王佩
】 裕徐国公系许国公

济王环逸其薨年子僊王永嘉郡僊平乐郡

信王璿开元二十一年始王与义陈丰恒凉汴六王同封子佟封新安王侗晋陵王
义王玘与信王并失薨年子仪为舞阳王僊高密王

陈王珪二十一子得王者三人 【按旧书云封为王者二人而不载安南郡王伦世
系表尚有宣城郡王俨则又不止三人也彼此互异

】 伦王安南郡佗临淮佼安阳

丰王珙

丰王珙已封为左卫大将军帝至普安授珙武威都督河西陇右安西北庭节度大
使 【旧书作度支采访使】 以陇西太守邓景山为
副珙不行广德初吐蕃入京师代宗幸陕将军王怀忠闭苑门以五百骑劫诸王西迎吐
蕃遇郭子仪怀忠曰帝东迁宗社无主今仆奉诸王西
奔以系天下望公为元帅惟所废置子仪未对珙辄曰公何如司马王延昌质责珙曰帝
虽蒙尘未有失德王为藩翰安得狂悖之言子仪亦让

之即护送行在所帝赦不责珙语不逊羣臣恐其乱请除之乃赐死子佻为齐安王

恒王瑱好方士常服道士服从幸蜀还代宗时薨

凉王璇母高平王重规之女宫中号小武妃者璇薨代宗时子佻为泸州郡王

汴王璈

汴哀王璈于诸子为最少初封纔数岁容貌秀澈有成人风帝爱之开元二十三年授右千牛卫大将军明年薨

△肃宗诸子

越王系 承天皇帝倓 彭王仪 襄王僂 【燼】 恭懿太子佻

肃宗十四子章敬皇后生代宗皇帝宫人孙生系张生倓王生佻陈婕妤生仪韦妃生僂张美人生佻后宫生荣裴昭仪生僂段婕妤生倓

崔妃生佻张皇后生佻侗后宫生僂

越王系

承天皇帝倓

彭王仪

襄王僂

恭懿太子佻

越王系

越王系生开元时玄宗末年悉王太子子故系王南阳郡帝即位至德二载进王赵与彭兖泾郢襄杞召兴定九王同封干元二年九节度

兵溃河北朝廷震骇乃以李光弼代郭子仪总兵关东而光弼请贤王为帅于是诏系充天下兵马元帅而光弼以司空兼侍中蓟国公副知节

度行营事系留京师史思明陷落阳系请行不听明年徙王越帝寝疾皇太子监国张皇后与中人李辅国有隙因召太子入宫令除辅国及程

元振太子泣曰此二人者陛下勋旧而帝体不豫重以此事得无震惊乎愿出外徐计之后曰是难与共事者乃召系曰汝能行此乎系许诺即

遣内谒者监段恒俊选材勇宦者二百人授甲辰生殿以帝命召太子元振以告辅国乃相与勒兵凌霄门迎太子以难告太子曰帝疾亟吾可

惧死不赴乎元振曰赴则及祸乃以兵护太子止飞龙厩勒兵夜入三殿收系及恒俊等百余人系之幽后别殿后及系皆为辅国所害系三子

建王武威郡适兴道逾齐国公

承天皇帝倓

承天皇帝倓始王建窳英毅有才略善骑射禄山乱典亲兵扈车驾度渭百姓遮道留太子太子使喻曰至尊播迁吾可以违左右乎倓进

说曰大孝莫若安社稷殿下当募豪杰趣河西收牧马今防边屯士不下十万而光弼子

仪全军在河朔与谋兴复策之上者广平王亦赞之于
是议定太子北过渭兵杖盪恶士气崩沮日数十战倓以骁骑数百从每接战常身先血
殷袂不告也太子或过时未食倓辄涕泗不自胜三军
皆属目至灵武太子即帝位议以倓为天下兵马元帅左右固请广平王帝曰广平既蒙
嗣安用元帅答曰太子从曰抚军守曰监国元帅抚军
也莫宜于广平王帝从之更诏倓典亲军以李辅国为府司马时张良娣有宠与辅国交
构欲以动皇嗣者倓忠睿数为帝言之由是为良娣辅
国所譖妄曰倓恨不总兵郁郁有异志帝惑偏语赐倓死 【谨按通鉴辑览 御批孟
子称德慧术智存乎疾疾肃宗为太子受困杨李疾
疾已甚宜其操心虑患矣乃即位以后宦妾交煽甘蹈前车既不能保其子且不能安其
父岂所谓下愚不移者乎】 俄悔悟明年广平王收二
京使李泌献捷泌与帝雅素从容语倓事帝改容曰倓于艰难时实自有力为细人闲阍
欲害其兄我计社稷割爱而为之所泌曰尔时臣在河
西知其详广平于兄弟笃睦至今言建宁呜咽不自己陛下此言得之谗口耳帝泣下曰
事已尔末耐何泌曰陛下尝闻黄台瓜乎高宗有八子
天后所生者四人自为行而睿宗最幼长曰宏为太子仁明孝友后方图临朝鸩杀之而
立次子贤贤日忧惕每侍帝不敢有言乃作乐章使工
歌之欲以感悟帝及后其曰种瓜黄台下瓜熟子离离一摘使瓜好再摘令瓜稀三摘尚
云可四摘抱蔓归而贤终为后所斥死黔中陛下今一
摘矣慎无再帝愕然曰公安得是言是时广平有大功亦为后所构故泌因对及之广平
遂安及即位追赠倓齐王大历三年进谥承天皇帝以
兴信公主季女张为恭顺皇后冥配焉葬顺陵祔主奉天皇帝庙同殿异室云初李沁请
加赠倓代宗曰倓性忠孝而困于谗追帝之若何答曰
开元中上皇兄弟皆赠太子帝曰是特祖宗友爱耳岂若倓有功乎于是追帝号遣使迎
丧彭原观者皆为垂泣

卫王佖始王西平蚤薨宝应元年与郢王同追封

彭王仪

彭王仪始王新城进封彭史思明陷河洛人心震骚羣臣请以诸王临统方镇兵遥
相维压于是诏仪充河西节度兖王北庭泾王陇右杞
王陕西兴王凤翊并为大使是岁伟薨小镇常山郡王

兖王僩始王颍川进王兖宝应元年薨

泾王佺始王东阳进王泾兴元元年薨

郢王荣始王灵昌蚤薨追封

襄王僭

襄王僭至德二载始王与杞召兴定四王同封贞元七年薨子宣为伊吾郡王宗乐安王宣裔孙熿

熿

熿

熿性谨柔材无过人者光启二年田令孜逼僖宗幸兴元邠宁节度使朱玫以五千骑追乘輿不及熿以疾不能从玫劫之驻凤翔得台省官百余乃胁宰相萧遘等率羣臣盟石鼻驿奉熿为嗣襄王监军国事因还京师即封拜官属初遘执不可于是罢遘而玫自为侍中以裴澈为门下侍郎郑昌图中书侍郎皆平章事遣柳陟等十余人分谕天下嗣襄王所以监国意皆得进官玫又胁太子太师裴璩等奉笏劝进熿五让乃即位改元建贞尊僖宗为太上元皇圣帝河中节度使王重荣率诸藩贡奉归者十八九而蔡州秦宗权自僭号惟太原李克用不从时帝遣使喻重荣克用故二人听命枢密使杨复恭等传檄三辅募能斩玫者以邠宁节度畀之其伪将王行瑜自凤州入京师杀玫而熿与澈昌图并官属奔东渭桥重荣给使迎之至蒲执杀之因械澈等于狱诛杀伪官函熿首至行在所熿即伪位凡九月败始熿首至羣臣白帝御兴元南门受之百官称贺太常博士殷盈孙奏言熿皇族以不能固节追胁至此宜废为庶人绝属籍葬以庶人礼大捷之庆须朱玫首至乃贺诏可

■ 〈木巳〉王僊贞元十四年薨

召王僊元和元年薨

恭懿太子召

恭懿太子召始封兴王上元元年薨召生后方专爱帝最怜之后数撼储嫡欲以召嗣会薨计塞册赠皇太子定王侗宝应初薨宋王僖初王淮阳早薨追封 【新书不载今依旧书补】

钦定续通志卷一百八十五

●钦定续通志卷一百八十六 宗室传六

宗室传

唐 【六】

○唐六

代宗诸子

德宗诸子

顺宗诸子

宪宗诸子

穆宗诸子

敬宗诸子

文宗诸子

武宗诸子

宣宗诸子

懿宗诸子

僖宗诸子

昭宗诸子

△代宗诸子

昭靖太子邈 睦王述

代宗二十子睿真皇后生德宗皇帝崔妃生邈贞懿皇后生迥十七王史亡其母之氏位

昭靖太子邈

睦王述

昭靖太子邈

昭靖太子邈好学以贤闻上元二年始王益昌帝即位宝应元年进王郑与韩王同封淄青牙将李怀王逐其师侯希逸诏邈为平卢淄青

节度大使以怀玉知留后大历初代皇太子为天下兵马元帅八年 【旧书作九年】

薨遂罢元帅府

均王遐早薨贞元八年追封

睦王述

睦王述大历十年 【旧书作九年】 田承嗣不臣而昭靖大无强王帝乃悉王诸子领诸镇军威天下于是以述为睦王领岭南节度逾

郴王渭北鄜坊节度迥韩王汴宋节度造忻王昭义节度皆为大使连为恩王遘鄜王暹韶王遇端王逖循王通恭王逵原王逸雅王并开府仪

同三司然不出合德宗建中初周天下访太后所在述于诸王最长故拜奉迎太后使以工部尚书乔琳副之贞元七年薨丹王逾始王郴建中

四年与简王同徙封元和十五年薨

恩王连元和十二年薨

韩王迥始王延庆郡以母宠故与郑王先徙封贞元十二年薨

简王遘始王鄜徙封简元和四年薨

益王乃大历十四年始王亡薨年

隋王迅兴元元年薨

荆王选蚤薨建中二年追王

蜀王邈本名遂大历十四年始王建中二年改今名

忻王造元和六年薨

韶王暹贞元十二年薨

嘉王运贞元十七年薨

端王遇贞元七年薨

循王遒亡薨年

恭王通亡薨年

原王逵太和六年薨

雅王逸贞元十五年薨

△德宗诸子

舒王谊

通王谌

虔王谅肃王详

文敬太子諲

德宗十一子昭德皇后生顺宗皇帝帝取昭靖太子子谊为第二子又取顺宗子諲为第六子余八王史亡其母之氏位

舒王谊

通王谌

虔王谅

肃王详

文敬太子諲

舒王谊

舒王谊初名谔帝爱其幼取为子大历十四年始王舒与通虔肃资四王同封拜开府仪同三司诏有司给奉稍俄以军兴罢谔于诸王最长帝欲试以事故拜泾原节度大使时尚父郭子仪病笃帝临轩遣谔持诏往视谔冠远游冠御绛袍乘象辂四马飞龙士三百国府官皆袴褶以从子仪手叩头谢恩谔宣诏已乃易服劳问还于是李希烈反招讨使李勉战不胜奔宋州朝廷大震乃拜谔扬州大都督荆襄江西沔鄂节度使诸军行营兵马都元帅改名谊军中以哥舒翰由元帅败而王所封同之帝乃使徙王晋未及行泾原兵士反谊从帝出奉天朱泚攻城谊昼夜传劳诸军不解甲帝还京师复故封扬州大都督如故永贞元年薨

通王谌

通王谌始王拜开府仪同三司贞元九年领宣武节度大使以李万荣为留后二年徙河东以李说为留后皆不出合

虔王谅

虔王谅以王拜开府仪同三司贞元二年领蔡州节度大使以吴少诚为留后十年徙节朔方灵盐以李栾为留后明年领横海又徙徐州以程怀信张愔为留后不出合

肃王详

肃王详资秀异帝受之建中二年【按吴缜纠谬云德宗纪建中三年十月肃王详薨与传差一年今考旧书亦作三年传误】 薨甫四

岁帝欲用浮屠说塔而不坟礼仪判官李岩谏非礼乃止诏赠扬州大都督

文敬太子諲

文敬太子諲见爱于帝命为子贞元初【旧书作贞元四年】先诸王王邕历义武昭义二军节度大使以张茂昭王虔休为留后不出

合十五年薨年十八追赠及谥

资王谦亡薨年

代王諲始王縉云郡蚤薨建中二年追王

昭王诚贞元二十一年始王亡薨年

钦王諤顺宗即位与珍王同封亡薨年

珍王誠太和六年薨

△顺宗诸子

郟王经

顺宗二十七子庄宪皇后生宪宗皇帝及绾张昭训生经赵昭仪生结王昭仪生总约緄【按世系表作二十二子旧书作二十三子又

云王昭仪生郟王经王昭训生衡王绚并与此异】余二十王史亡母之氏位四王蚤薨亡官谥

郟王经

郟王经

郟王经本名涣贞元四年始王建康郡与广陵洋川临淮弘农汉东晋陵高平云安宣城德阳河东洛交十二王同封二十一年又与均淑

莒密郟邵宋集冀和衡钦会珍福抚岳袁桂翼二十王皆进王王二十九年太和八年薨

均王纬初名沔王洋川后进王王三十三年开成二年薨

淑王纵初名洵王临淮后进王王三十二年开成元年薨

莒王紆初名俛为秘书监王弘农后进王王二十九年太和八年薨

密王绸初名泳王汉东后进王王三年元和二年薨

郟王总初名湜授少府监王晋陵后进王王四年元和三年薨

邵王约初名淑为国子祭酒王高平后进王王二年元和元年薨

宋王结初名滋王云安进王王十八年长庆二年薨

集王縑初名淮王宣城进王王十八年长庆二年薨

燕王綵初名湑为太常卿王德阳进王王三十年太和九年薨

和王绮初名浥王河东进王王二十八年太和七年薨

衡王绚王二十二年宝历二年薨

会王纁王六年元和五年薨

福王绾历魏博节度大使咸通元年进拜司空王五十七年咸通二年薨

珍王缮初名况王洛交后进王亡薨年

抚王紘咸通初历司空又进司徒太尉王七十三年干符三年薨

岳王緄王二十三年太和二年薨

袁王绅王五十六年咸通元年【旧书作太和十四年】薨

桂王纶王十年元和九年薨

翼王绰王五十八年咸通三年薨

蕲王緝王六年咸通八年薨【旧书作咸通八年封误】钦王绩亡薨年

△宪宗诸子

惠昭太子寔 澧王恇 绛王悟建王恪

宪宗二十子纪美人生寔懿安皇后生穆宗皇帝孝明皇后生宣宗皇帝余十七王皆后宫所生史逸其母之号氏

惠昭太子寔

澧王恇

绛王悟

建王恪

惠昭太子寔

惠昭太子寔贞元二十一年始王平原与同安彭城高密文安四王同封帝即位进王邓与澧深洋绛四王同封于是国嗣未立李绛等建言陛下受命四年而冢子未建是开窥觐之端乖慎重之义非所以承列圣示万世帝曰善以寔为皇太子更名宙未几复初名册礼用孟夏雨不克改用孟秋亦雨冬十月克行礼明年薨年十九

澧王恇

澧王恇始王同安后进王澧惠昭之丧吐突承璀议复立储副意属恇帝自以穆宗为太子帝崩之夕承璀死王被杀秘不发丧久之以告废朝三日三子曰汉王东阳郡曰源安陆曰演临安初恇名宽深王察洋王寰绛王寮建王审元和七年并改今名

深王惊始王彭城郡进王深子潭王河内淑吴兴

洋王忻始王高密进王洋太和二年薨子沛王颍川郡

绛王悟

绛王悟始王文安进王敬宗崩苏佐明等矫诏以王领军国事王守澄等立文宗王见杀二子洙王新安滂高平

建王恪

建王恪元和元年始封时淄青节度使李师古死其弟师道勾符节故诏恪为郢州大都督平卢军淄青等州节度大使以师道为留后然

不出合长庆元年薨无嗣郾王憬长庆元年始王与琼沔婺茂淄衢澶七王同封开成四年薨子溥平阳郡王

琼王悦子津河闲郡王

沔王恂子瀛晋陵郡王

婺王恠子清新平郡王

茂王愔子漉武功郡王

淄王协开成元年薨子澣许昌郡王涣冯翊郡王

衢 【吴缜纠谬云穆宗纪及郾王憬传俱作衢今考世系表亦作衢本传盖仍旧书之误也】 王愔子涉晋平郡王

澶王■〈卜 充〉子泞雁门郡王

棣王愷大中六年始王与彭信二王同封 【按吴缜纠谬云本纪大中三年封弟惕为彭王六年封弟愷为棣王咸通元年封叔■〈卜 巧〉

为信王则非同时受封也今考旧书诸王传与新书纪相符本传误】 咸通三年薨无嗣

彭王惕干宁中韩建杀之石堤谷无嗣

信王愔 【按吴缜纠谬云懿宗纪作■〈卜 巧〉与传不同必有一误今考旧书亦作愔当以传为是】 咸通八年薨无嗣

荣王■〈卜 责〉咸通三年始王广明初拜司空子令平嗣王凡八王史失其薨年 【按吴缜纠谬云八王深王琼王沔王婺王茂王衢王愔王荣王也然僖宗纪载广明元年八月癸卯荣王■〈卜 责〉薨而本传亦谓史失之误矣今考旧书荣王传亦载薨年但月日不同耳】

△穆宗诸子

怀懿太子湊 安王溶

穆宗五子恭僖皇后生敬宗皇帝贞献皇后生文宗皇帝宣懿皇后生武宗皇帝余二王亡其母之氏位

怀懿太子湊

安王溶

怀懿太子湊

怀懿太子湊少雅裕有寻矩长庆元年始王漳与安王同封文宗即位疾王守澄颀很引支党挠国谋欲尽谋之密引宰相宋申锡使为计

守澄客郑注伺知之以告谋光事杀申锡又以王贤有中外望因欲株联大臣族夷之乃

令神策虞侯豆卢着上飞变且言宫史晏敬则宋训与
申锡昵吏王师文图不轨即捕训等系神策狱榜掠定其辞谏官羣伏合极言出狱牒付
外杂治注等惧事泄乃请下诏贬王帝未之悟因黜奏
为巢县公时太和五年也命中人持诏即赐且慰曰国法当尔无它忧八年 【文宗纪作
九年】 薨赠齐王注后以罪诛帝哀奏被谗死不自
明开成三年追赠

安王溶

安王溶初杨贤妃宠于文宗晚稍多疾妃阴请以王为嗣密为自安地帝与宰相李
珣谋珣谓不可乃止及帝崩仇士良立武宗欲重己功
即撻溶尝欲以为太子事杀之

△敬宗诸子

悼怀太子普 陈王成美

敬宗五子妃郭氏生普余四王亡母之氏位

悼怀太子普

陈王成美

悼怀太子普

悼怀太子普姿性韶悟宝历元年始王晋文宗爱之若己子尝欲为嗣太和二年薨
帝恻念不能已故赠恤加焉

梁王休复文宗开成二年与襄纪陈三王同封

襄王执中子案为乐平郡王

纪王言扬

陈王成美

陈王成美初文宗以庄恪薨大臣数请建东宫开成四年帝乃立成美为皇太子典
册未具而帝崩仇士良立武宗杀之于邸子俨王宣城
郡 【按宣城郡王俨世系表列元宗子陈王珪下而珪传不载本传载俨而世系表无嗣
彼此互异考旧唐书亦载入本传中则世系表误也
】

△文宗诸子

庄恪太子永

文宗二子王德妃生永后宫生宗俭

庄恪太子永

庄恪太子永

庄恪太子永太和四年始王鲁帝以王幼宜得贤辅因召见傅和元亮元亮以卒史
进有所问不能答帝责谓宰相王可教宫属应任士大

夫贤者盍元亮比邪于是剧选户部侍郎庾敬休兼王傅太常卿郑肃兼长史户部郎中李践方兼司马六年遂立为皇太子帝承宝历荒怠身勤俭率天下谓晋王生谨敏欲引为嗣会蚤天故久不议东宫事及太子立天下属心焉开成三年诏宫臣议崇明门谒朔望侍读偶曰入对太子稍事燕豫不能壹循法保傅戒告愬不约又母爱弛杨贤妃方幸数譖之帝它日震怒御延英引见羣臣议废之羣臣顿首谏御史中丞狄兼謩流涕固争帝未决罢羣臣又连章论救意稍释诏太子还少阳院以中人护视诛幸昵数十人刺侍读窦宗直周敬复诣院授经然太子终不能自白其说而行己亦不加修也是年暴薨帝悔之明年下诏以陈王为太子置酒殿中有俳儿缘橦父畏其颠环走橦下帝感动谓左右曰朕有天下返不能全一儿乎因泣下即取坊工刘楚才等数人付京兆榜杀之及禁中女倡十人毙永巷皆短毁太子者

蒋王宗俭开成二年始王亡薨年

△武宗诸子

武宗五子其母氏位皆不传

相王峻开成五年始王

益王岷会昌二年始王与兗德昌三王同封

兗王岐

德王峰

昌王嵯并逸其薨年

△宣宗诸子

通王滋

宣宗十一子元昭太后生懿宗皇帝余皆亡其母之氏位

靖怀太子汉会昌六年始王雍与夔庆二王同封大中六年薨有诏追册

雅王涇大中元年始王亡薨年

通王滋

通王滋

通王滋会昌六年始王夔与庆王沂同封帝初诏郢王居十六宅余五王处大明宫内院以谏议大夫郑漳兵部郎中李邺为侍读五日一谒干符门为王授经郢王立为懿宗乃罢滋徙为通王昭宗干盍三年领侍卫诸军是时诛王行瑜而李茂贞怨以兵入覲诏滋与诸王分统安圣奉宸保盍安化军卫京师天子将狩太原韩建道迎之留次华州建畏王等有兵遣人上急变告诸王欲杀建胁帝幸河中帝惊召建谕之称疾不肯入敕滋与睦王济王韶王彭王韩王沂王陈王谒建自解建留军中奏言中外异

体臣不可以私见又言晋八王擅权卒败天下请归十六宅悉罢所领兵帝不许建以兵环行在请诛大将李筠帝惧斩筠以谢建尽逐卫兵自是天子孤弱矣初帝使嗣延王戒丕嗣丹王允往见李克用二王还建恶之又嗣覃王尝督军伐茂贞于是劾奏比岁兵缠近辅诸王阶其祸使乘舆越王在下藩不得安臣已请解其兵今延覃丹三王尚阴计以危国请诛之帝曰渠至是邪后三日与刘季述矫诏以兵攻十六宅诸王被发乘垣走或升屋极号曰帝救我建乃将十一王并其属至石堤谷杀之徐以谋反闻天下冤之济韶彭韩沂陈延覃丹九王史逸其系胄云【按吴缜纠谬云昭宗纪韩建所害九王彭王名惕宪宗子沂王名湮昭宗子此二王举其名其系胄皆可考安得槩云史逸之也传文恐误】

庆王沂大中十四年薨

濮王泽大中二年始王亡薨年

鄂王润大中五年始王干符三年薨

怀王洽大中八年与昭康二王同封亡薨年

昭王纳干符三年薨

康王汶干符四年薨

广王灃大中十一年始王与卫王同封干符四年薨

卫王灌大中十四年薨

△懿宗诸子

吉王保

懿宗八子惠安皇后生僖宗皇帝恭宪皇后生昭宗皇帝余六王亡其母氏位

魏王侑咸通三年始王与凉蜀二王同封

凉王挺干符六年薨

蜀王佶

威王偁咸通六年始王郢十年徙王

吉王保

吉王保

吉王保咸通十三年始王与睦王同封王于兄弟为最贤始僖宗崩王最长将立之杨复恭独议以昭宗嗣干宝元年李茂贞等以兵入京师谋废帝立王会李克用以兵逐行瑜乃止

恭哀太子倚初封睦王为刘季述所杀天复初追赠

△僖宗诸子

僖宗二子史失其母氏位

建王震中和元年始王

益王升光启三年始王并亡薨年

△昭宗诸子

德王裕

昭宗十七子 【旧书作十子】 积善皇后生裕及哀皇帝余皆失母之氏位

德王裕

德王裕

德王裕大顺二年始王帝幸华州韩建已夺诸王兵不自安乃请王皇子之未王者既又杀诸王因请立裕为皇太子释言于四方时干宁四年也刘季述等幽帝东内奉裕即皇帝位季述诛裕匿右军或请杀之帝曰太子冲孺贼强立之且何罪诏还少阳院复为王朱全忠自凤翔还见王春秋盛标字轩秀忌之密语崔允曰王既窃帝矣大义灭亲渠可留公任宰相盖启之允从容言如全忠意帝不许他日以语全忠全忠曰此国大事臣安敢与此必允卖臣也乃免帝还洛他日谓蒋元晖曰德王朕爱子全忠奈何杀之言已泣下自啮指流血元晖即撻语全忠全忠恚帝被弑元晖置酒邀诸王九曲池饮酣皆杀之投尸水中

棣王栩干宁元年始王与虔沂遂三王同封

虔王禊

沂王禔

遂王禕

景王秘干宁四年始王与祁王同封

祁王祺

雅王稹光化元年始王与琼王同封

琼王祥光化元年始王与雅王同封

端王禎天佑元年始王与丰和登嘉四王同封

丰王祁

和王福

登王禧

嘉王祐

颍王禔天佑二年始王与蔡王佑同封

蔡王佑

钦定续通志卷一百八十六

●钦定续通志卷一百八十七 宗室传七

宗室传

五代

○五代

梁

后唐

晋

汉

周

△梁

太祖二兄

太祖诸子

太祖二兄

金昱 存

太祖二兄曰全昱曰存皆文惠皇后出

全昱

存

全昱

广王全昱太祖即位封太祖与仲兄存俱亡为盗全昱独与母寄食刘崇家太祖贵乃归宣武领岭南西道节度使以太师致仕太祖将受禅有司备礼前殿全昱视之顾太祖曰朱三尔作得否太祖燕居宫中与诸王饮博全昱酒酣取骰子击盆而迸之呼曰朱三尔殒山一百姓尔天子用汝为四镇节度使于汝何负而灭唐家三百年社稷吾见汝族矣安用博为太祖不悦罢会全昱亦不乐在京师常居殒山故里三子皆封王友谅衡王友能惠王友海邵王干化元年升宋州为宣武军以友谅为节度使【按唐藩镇宣武军治汴州而宋州属焉梁既篡唐建汴为东都徙宣武军于宋州前全昱归宣武乃汴此友谅镇宣武乃宋也】友谅进瑞麦一茎三穗太祖怒曰今年宋州大水何用此为罢友谅居京师太祖卧病全昱来视疾与太祖相持恸哭太祖为释友谅使与东归贞明二年全昱卒谥德靖【谥法据通鉴增】徒衡王友谅嗣封广王友能为宋滑二州留后【按通鉴友谅罢镇以兖海留后友能代之是友能先为兖海留后也新旧史皆失载】陈州刺史所至为不法奸人多依倚之左道毋乙董乙聚众称天子建官属友能纵不问乙等攻劫州县朝廷发兵始击灭之康王友孜谋反诛末帝始疏宗室皆反贞明四年友能以陈州反犯京师至陈留兵败降末帝赦之降为房陵侯友海为陕州节度使欲以州兵为乱召还京师与友谅友能皆被幽唐庄宗人汴并见杀

存

朗王存初与太祖俱从黄巢攻广州存战死子友宁友伦友宁字安仁太祖以为军校太祖围凤翔遣友宁东备宣武王师范来袭围齐州友宁引兵击退之昭宗还京师拜友宁建武军节度使太祖复遣攻师范屠博昌战于石楼兵败坠马见杀友伦为元从马军指挥使表右威武将军燕人攻魏内黄友伦以前锋夜渡河夺马千匹李罕之以潞州降梁晋人攻潞友伦以兵入取罕之以归太祖围凤翔晋人来袭友伦却之西会太祖于凤翔昭宗还长安拜友伦宁远军节度使太祖东归留友伦宿卫伺昭宗友伦击鞠坠马死太祖大怒以兵七万至河中遣友谅至京师杀宰相崔允等太祖即位追封存朗王友宁安王友伦密王

太祖诸子

友裕 友珪 友璋 友孜

太祖八子长曰友裕次曰友珪友璋末帝友雍友徽友孜其一养子曰友文 【按欧史于唐太祖养子勰立义儿传而梁祖养子若朱友恭友谦皆别传独以友文入家人传变例见议论所谓着祸本也】

友裕

友珪

友璋

友孜

友裕

友裕字端夫幼善骑射从征伐能以宽厚得士心太祖与晋围黄邨于西华邨卒荷稍登城骂敌晋王使骑连射不能中太祖顾友裕一发中之军中皆大驩呼晋王喜遗友裕良弓百矢太祖镇宣武以为衙内都指挥使景福元年太祖攻郢时朱宣在濮州遣友裕取之遂围时溥于徐州朱瑾以兵二万救溥友裕败瑾于石佛山瑾走朱友恭谗之太祖以为瑾可追而友裕不追太祖大怒夺其兵属庞师古以友裕属吏使者误致书于友裕友裕惶恐不知所为赖张皇后教之得免权知许州招抚流散增户三万余迁诸军都指挥使与平兖郓崔洪奔淮南友裕引兵定蔡州太祖兼镇护国军以友裕为留后迁忠武军节度使太祖攻邠州友裕破灵台长原下陇州杨崇本以邠州降复叛遣友裕攻之卒于军开平三年追封郴王

友珪

庶人友珪者太祖初镇宣武略地宋亳闲与逆旅妇人野合而生长而辩黠多智开平元年封郢王友文者木姓康名勤太祖养以为子为

度支盐铁制置使太祖用兵四方友文征赋聚敛以供军费太祖即位以故所领宣武宣义天平护国四镇征赋置建昌宫总之以友文为使封博王太祖幸西都友文留守东京时友裕已卒嫡嗣未立心尝属友文太祖自张皇后崩无继室诸子在镇皆邀其妇入侍友文妻王氏有色尤宠之太祖病久王氏与友珪妻张氏尝专房侍疾太祖病少闲谓王氏曰吾知终不起汝之东都召友文来吾与之决以友珪为莱州刺史趣之任太祖素刚暴既病而喜怒难测时左降者必有后命友珪大惧张氏曰官家以传国宝与王氏使如东都召友文君今受祸矣夫妇相对泣左右劝友珪曰事急计生何不早自图友珪乃微服入左龙虎军见统军韩勅计事夜以牙兵五百杂控鹤卫士人漏三鼓斩关入万春门至寝中侍疾者皆走太祖惶骇起呼曰逆贼忍杀父乎友珪亲吏冯廷谔以剑犯太祖太祖旋柱而走剑击柱者三太祖惫仆于床廷谔以剑中之洞其腹肠胃皆流友珪以裯褥裹之瘞寝中秘丧四日乃出府库大赉羣臣及诸军矫诏杀友文于东都乃发丧以干化二年六月既望于柩前即皇帝位拜韩勅忠武军节度使明年正月祀天于洛阳南郊改元凤历末帝与袁象先赵岩等谋讨贼二月象先以禁兵入宫友珪与妻趋北垣楼下将踰城走不果使冯廷谔进刃廷谔亦自杀末帝即位复友文官爵废友珪为庶人

友璋

友璋开平元年与友雍友徽同封友璋福王友雍贺王友徽建王友璋初为寿州团练使押左右番殿直监丰德库友珪时为郢州留后末帝时为忠武武宁节度使皆不知其所终友孜【按通鉴及五代会要皆作友敬】末帝初封康王目重瞳子尝自负当为天子贞明元年末帝德妃薨将葬友孜使刺客夜入寝中末帝方寐梦人害己既寤闻榻上宝剑鎗然有声跃起抽剑曰将有变邪索寝中得刺客手杀之遂诛

友孜

友孜

△后唐

太祖四弟

太祖诸子

庄宗诸子

明宗诸子

明宗诸侄

废帝诸子

太祖四弟

克让 克修 克恭 克窋

太祖四弟曰克让克修克恭克窋克修父德成于太祖为从兄弟 【从薛史增】

余不知其父母名号 【按李嗣昭传太祖命弟克柔

养以为子则四人外尚有克柔史阙载又懿祖纪年录载克用兄克恭克俭皆伏诛克恭事见后非太祖起兵时诛克俭亦无考录似有误】

克让

克修

克恭

克窋

克让

克让少善骑射为振武军校从讨王仙芝以功拜金吾卫将军留京师李氏自宪宗时以部族归唐唐处之河西尝遣一子宿卫京师赐第

亲仁坊太祖起兵云中杀唐守将段文楚唐发兵讨太祖遣王处存以兵围亲仁坊捕之克让与其仆何相温石的历等十骑余弯弧跃马突围

而出处存以千余人追至渭桥克让等射杀百余人追兵乃止克让奔雁门明年太祖复归唐克让还宿卫京师黄巢犯长安克让守潼关为贼

所败奔南山佛寺为寺僧所杀 【按克让奔雁门事见太祖纪年录及薛史守潼关事亦见薛史通鉴考异云国昌犹自请讨克用朝廷未必

诛其子又云国昌以干符五年不受代发兵讨之六年未尝昭雪克让何从得入宿卫广明元年国昌父子兵败逃入鞑鞑其年冬黄巢陷长安

克让何尝守潼关事甚难明考异所驳皆有依据欧史盖仍薛史旧文而朱加深考耳】

克修

克修字崇远从讨庞勋以功拜朔州刺史太祖镇雁门以为奉诚军使从讨黄巢为先锋迁左营军使孟方立迁于邢州晋取潞表为昭义

军节度使数出山东击方立又与李罕之攻战怀孟闲太祖自将击方立还军过潞克修性俭嗇供馈甚薄太祖大怒诟而笞之克修惭愤发疾

卒子嗣弼嗣肱嗣弼为涿州刺史天佑十一年契丹破涿州歿于虏嗣肱少有胆略从周德威数立战功为马步军都虞候从李存审败梁军于

胡璧解蓑县之围以功历蔚泽代三州刺史新州王郁叛晋人契丹山后诸州皆叛嗣肱取妫儒武三州拜新州刺史山北都团练使同光元年

卒

克恭

克恭初为决胜军使克修卒以克恭代克修为人简俭潞人素安其政且哀其见笞以死而克恭横暴多不法又不习军事潞人皆怨克恭

选后院劲兵五百人献于太祖行至铜鞮其将冯霸以其徒叛太祖遣李元审讨之战于沁水元审大败奔入潞州牙将安居受亦叛杀克恭及元审使人召霸霸不受命居受惧而出奔行至长子为野人所杀传首于霸霸乃入潞州自称留后以附于梁

克窋

克窋为人仁孝居诸兄弟中最贤事太祖小心不懈太祖与赫连释李可举战云蔚闲后奔鞞鞞入破黄巢克窋未尝不从太祖镇太原以为内外都制置蕃汉都知兵马使检校太保振武军节度使军中事大小皆决焉太祖病召庄宗属张承业与克窋曰以亚子累公等太祖崩庄宗告于克窋曰儿孤稚恐不足当大事季父勋德俱高敢以军府烦季父以待儿之有力克窋曰吾兄以儿属我谁敢易之因北面再拜贺庄宗乃即晋王位太祖初起时所得骁勇士多养以为子诸养子亦多立战功故尤宠爱之衣服礼秩如嫡麾下皆有精兵恃功自恣自先王时常见优假及王新立年少或托疾不朝或见而不拜养子存顥存实告克窋曰兄亡弟及古之道也以叔拜侄理岂安乎人生富贵当自取之克窋曰吾家三世父慈子孝先王土宇苟有所归吾复何求克窋妻孟氏素刚悍存顥等各遣其妻入说孟氏数以迫克窋克窋仁而无断惑羣言遂至于祸克窋素与张承业李存璋有隙会以事杀都虞候李存质又求兼领大同军节度使于是幸臣史敬谿见太后告克窋与存顥将谋执王及太后以降梁庄宗召承业存璋告之承业等请诛克窋乃伏兵于府置酒大会克窋至执而杀之

太祖诸子

太祖子八人庄宗长子也次曰存美存霸存礼存渥存义存确存纪【按通鉴氏叔琮晋绛之胜禽克用子廷鸾盖据梁太祖实录又罗宏信传洹水之役梁禽晋王子落落送宏信杀之通鉴载其官为铁林指挥使则太祖子尚有延鸾落落二人且既能历战阵为军使必非幼稚史不为立传乃阙笔】盖存霸存渥存纪与庄宗同母存美存义存确存礼不知其母名氏号位同光三年诏存美封邕王存霸永王存礼辞王存渥申王存义睦王存确通王存纪雅王存义历建雄保大二军节度使娶郭崇韬女时魏州妖人杨于郎自言有墨子术能役使鬼神化丹砂水银庄宗神之拜检校尚书郎赐紫其妻出入宫禁承恩宠士或因以求官爵存义及存渥等往往朋淫于其家及崇韬被族庄宗遣宦官阴察外议宦官欲尽诛崇韬亲党以绝后患乃诬言存义过千郎家酒酣攘臂号泣为妇翁称冤言甚怨望庄宗大怒以兵围其第而族之并诛千郎

存霸历昭义天平河中三军节度使存渥义成天平二军节度使皆居京师食其俸禄而已赵在礼作乱乃遣存霸之河中庄宗再幸泛水徙存霸北京留守存渥河中节度使宣麻未讫郭从谦反攻兴教门存渥从庄宗拒贼庄宗中流矢崩存渥与刘皇后同奔太原至风谷为部下所杀存霸闻乱亦自河中奔太原麾下皆散走乃剪发为僧亦为军众所杀存纪存确闻郭从谦反奔匿南山民家明宗诏诸王出奔所至送赴阙如不幸物故者收瘞以闻存纪等所匿民家以告安重诲重诲与霍彦威谋即民家杀之存美素病风居太原与存礼皆不知其所终【徐无党曰庄宗七弟所书事迹不以长幼为次者各因其死之先后而书之以便于述事耳无定法也】

庄宗诸子

继岌

庄宗五子长曰继岌其次继潼继嵩继蟾继峣继岌母曰刘皇后其四皆不着其母名号

继岌

继岌

继岌庄宗即位为北都留守判六军诸卫事迁检校太尉同中书门下平章事豆卢革为相建言唐故事皇子皆为宫使因以邺宫为兴圣宫以继岌为使同光三年封魏王是岁伐蜀以继岌为西南面行营都统郭崇韬为都招讨使工部尚书任圜翰林学士李愚皆参军事九月戊申将兵六万自凤翔入大散关军无十日粮而所至州镇皆迎降遂食其粟至兴州蜀将程奉连以五百骑降因修合道以过唐军王衍以五千人逆战于三泉为先锋康延孝所败衍惧断吉柏江浮桥奔归成都军自文州闲道入十月己酉至绵州衍上笺请降丙辰入成都自出师至受降凡七十五日继岌虽为都统而军政号令一出崇韬初庄宗遣宦者供奉官李从袭监中军高品李延安目知柔为典谒从袭等素恶崇韬又见其专军事益不平之及破蜀王宗弼等争以蜀宝货妓乐奉崇韬父子而魏王所得匹马束帛唾壶尘柄而已崇韬日决事将吏宾客趋走盈庭而都统府唯大将晨谒衙门闾然从袭等不胜愤已而宗弼率蜀人见继岌请留崇韬镇蜀从袭等因言崇韬有异志劝继岌为备继岌谓崇韬曰陛下倚侍中如衡华尊之庙堂之上期以一天下而制四夷必不弃元老于蛮夷之地此事非予敢知也庄宗闻崇韬欲留蜀亦不悦遣宦者向延嗣趣班师崇韬不礼于延嗣从袭等因其构之延嗣还具言崇韬有异志恐危魏王刘皇后泣涕请保全继岌庄宗遣宦官马彦珪往祖

崇韬去就时两川新定孟知祥未至所在盗贼亡聚山林崇韬方遣任圜等分出招集恐后生变故师未即还彦珪将行刘皇后自为教与继岌使杀崇韬明年正月崇韬留任圜守蜀以待知祥之至班师有曰彦珪至出皇后教示继岌继岌曰今大军将发未有衅端岂可作此负心事从袭等泣曰今有密敕苟不行崇韬知之吾属无类矣继岌曰上无诏徒以皇后手教安能杀招讨使从袭等力争不得已从之诘旦乃以都统命召崇韬继岌登楼避之崇韬入升阶继岌从者李环挝碎其首遂班师二月军至泥溪先锋康延孝叛据汉州继岌遣任圜讨平之四月至兴平闻明宗兵入京师欲退保凤翔至武功从袭劝驰归京师以救内难行至渭河西都留守张籛断浮桥不得渡乃循河而东至渭南左右皆溃从袭谓继岌曰大事已去福不可再王宜自图继岌徘徊泣下命李环缢之而死任圜从后至葬继岌于华州西南继岌少病阉无子明宗已即位圜率征蜀之师二万还京师明宗问继岌何在圜具言死状继嵩继潼继蟾继峣同光三年皆为光禄大夫检校司徒后不知所终

明宗诸子

从璟 从荣 从益

明宗四子曰从璟从荣愍帝从益

从璟

从荣

从益

从璟

从璟初名从审骁勇善战而谦退谨敕从庄宗战数有功为金枪指挥使明宗兵变于魏庄宗谓从璟曰尔父于国有大功忠孝之心朕自明信今为乱军所逼尔宜往宣朕意从璟驰至卫州为元行钦所执将杀之从璟愿归卫天子乃释之庄宗怜之赐名从璟以为己子从庄宗如汴州将士多道亡独从璟不去左右或劝其逃祸从璟不听庄宗闻明宗已渡黎阳复欲遣从璟通问行钦以为不可遂杀之明宗即位赠太保

从荣

从荣天成元年以检校司徒兼御史大夫拜天雄军节度使同中书门下平章事三年徙镇河东长兴元年拜河南尹兼判六军诸卫事从璟死从荣于诸皇子次最长又握兵柄为人轻脱而鹰视多招后生浮薄之徒日进谀佞以骄其心时将相大臣皆患之明宗颇知其非而不能裁制是岁秋封秦王故事诸王受封不朝庙有司希旨欲重其礼乃建议告庙于是从荣朝服乘辂车具卤簿至朝堂受册出载册以车朝于太

庙三年加兼中书令有司又言故事亲王班宰相下今秦王位高而班下不称于是与宰相分班而居右四年加尚书令太仆少卿何泽请立从荣为皇太子时明宗已病得泽书不悦召大臣议皆莫敢可否从荣入白曰臣闻奸人言欲立臣为太子臣实不愿也明宗曰此羣臣之欲尔从荣出见范延光赵延寿等曰诸公议欲立吾为太子是欲夺吾兵柄而幽之东宫耳延光等患之乃加从荣天下兵马大元帅有司又请自节度使以下凡领兵职者皆具橐鞬以军礼庭参其兼同中书门下平章事者初见亦如之后许如客礼凡元帅府文符行天下皆用帖文班在宰相上从荣大宴元帅府诸将颁赆有差又请严卫捧圣千人为牙兵每入朝以数百骑先后张弓挟矢驰走道上见者震慑从荣又命其僚属及四方游士试作征淮檄陈己所以平一天下之意言事者请为诸王择师傅宰相请从荣自择从荣乃请翰林学士崔胤刑部侍郎任赞为元帅判官明宗曰学士代子言不可也从荣出而恚曰任以元帅而不得请属寮非吾所谕也将相大臣见从荣权位益隆而轻脱如此皆知其祸莫敢言延光延寿数见明宗泣涕求解枢密二人皆引去而从荣之难作十一月戊子雪明宗幸宫西士和亭得伤寒疾己丑从荣与枢密使朱宏昭冯赞入问起居于广寿殿帝不能知人王淑妃告曰从荣在此又曰宏昭等在此皆不应从荣等去乃迁于雍和殿宫中皆恸哭夜半而苏至旦疾少愈从荣称疾不朝初从荣忌宋王从厚贤于己惧不得为嗣其入问疾也见帝己不知人既去而闻宫中哭声乃谋以兵入宫使其押衙马处钧告宏昭等欲以牙兵入宿卫问何所可居宏昭等对以王自择因私谓处钧曰圣上万福王宜竭力忠孝不可草草处钧具以告从荣还遣处钧语宏昭等曰尔辈不念家族乎宏昭赞及宣徽使孟汉琼等入告王淑妃谋曰此事须得侍卫兵马为助乃召侍卫指挥使康义诚谋于竹林之下义诚有子在王府未敢决其谋乃曰仆为将校惟公使宏昭大惧明日从荣遣处钧告赞曰吾今日入居兴圣宫又告义诚义诚许诺赞即驰入内见义诚及宏昭汉琼等坐中兴殿合议赞责义诚曰主上畜养吾徒为今日尔今安危之机闲不容发奈何以子故怀顾望使秦王得至此门主上安归乎吾辈复有种乎汉琼曰贱命不足惜吾自率兵拒之即入见曰从荣反兵已攻端门明宗问宏昭等皆曰实有之明宗以手指天泣下良久曰义诚自处置毋令震京师命潞王子重吉以控鹤兵守宫门是日从荣自河南府拥兵千人出从荣僚属甚众以正直见恶者刘赞王居敏而昵刘徒高攀兵出与陟攀并轡耳语行至天津桥南指日景谓攀曰明日而今诛王居敏矣因阵于桥北据胡床坐使人召康义

诚而端门已闭叩左掖门亦闭于隙中见捧圣指挥使朱宏实率骑兵从北来从荣惊惧皇城使安从益率骑兵冲之从荣兵射之从益稍却宏实兵自左掖门出方渡河后军来者甚众从荣乃走归河南府夫妻匿床下从益杀之明宗闻从荣已死悲咽几堕于榻绝而苏者再冯道率百僚入见明宗曰吾家事若此惭见羣臣君臣相顾泣下从荣二子尚幼皆从死后六日而明宗崩

从益

从益不知其所自出明宗命王淑妃母之长兴四年封许王从益乳母司衣王氏见明宗老而秦王握兵心欲自托为后计乃曰儿思秦王时将从益往来秦府遂与从荣通从荣因使伺宫中动静从荣诛王氏出怨言愍帝闻之大怒赐王氏死待从益甚薄晋高祖入从益从其母匿以免天福四年诏以郟国三千户封唐许王从益为郟国公以奉唐祀常从其母往来京师洛阳耶律德光之北归也留萧翰守汴州汉高祖起太原翰欲北去乃使人召从益委以中国从益子母俱逃徽陵域中使者追以东遂以从益权知南朝军国事从益御干元殿翰率契丹诸将拜殿上晋羣臣拜殿下羣臣入谒太妃妃曰吾家子母孤弱为翰所迫此岂福耶祸行至矣乃以王松赵上交为左右丞相李式翟光邺为枢密使燕将刘祚为侍卫亲军都指挥使翰留契丹兵千人属祚而去汉高祖拥兵而南从益召高行周武行德等为拒皆不至乃谋以燕兵闭城自守妃曰吾家亡国之余安敢与人争天下乃遣人上书迎汉高祖高祖闻其尝召行周遣郭从义先入京师杀妃母子妃临死呼曰吾家母子何罪何不留吾儿使每岁寒食持一盂饭酒明宗坟上闻者悲之从益死时年十七

明宗诸侄

从璨 从璋 从温 从敏

明宗兄弟皆不见于世家而有侄四人曰从璨从璋从温从敏

从璨

从璋

从温

从敏

从璨

从璨 【按五代会要作明宗第四子】 初为右卫大将军安重诲用事诸王将相皆下之从璨不为屈而性倜傥好施重诲忌之明宗幸汴州以从璨为大内皇城使尝于会节园饮酒酣戏登御榻重诲奏其事贬房州司户参军赐死重诲诛诏复其官赠太保

从璋

从璋字子良少善骑射庄宗时将兵成常山闻明宗兵变于魏乃亦起兵据邢州明宗即位累拜彰国军节度使徙镇义成坐引弓射其从事罢为右饶卫上将军久之出镇保义徙河中兴四年封洋王晋高祖立徙镇南阳颇有遗爱天福二年卒子重俊出帝时为刺史坐赃以太后故不问复坐与姝奸又杀仆掠其妻赐死

从温

从温字德基初为北京副留守历安国忠武义武成德武宁五节度使封兗王晋高祖立复为忠武军节度使从温贪鄙多僭作天子器服宗族宾客谏之不听其妻关氏大呼于牙门曰从温欲反而造天子服器从温大恐乃悉毁之明宗诸子八人至晋出帝时六已亡歿惟从温从敏在【按明宗子侄合计适符八人之数然此时所存者从温从敏而外尚有许王从益不得云六已亡歿且愍帝即位成君亦未便下齿诸子也若专指兄弟之子则前已云有侄四人矣璋璨而外更无可举此处必有阙讹】太后常曰吾惟一兄岂可绳以法从温由此益骄尝诬亲吏薛仁嗣等为盗悉籍没其家资数千万仁嗣等诣阙诉具伏竟以太后故不问开运二年徙河阳三城卒于官

从敏

从敏字叔达初从庄宗为马步军都指挥使兼行军司马明宗入立迁皇城保义军节度使与讨王都历镇横海义武成德归德保义昭义河阳封泾王汉高祖时为西京留守封秦国公周广顺元年卒赠中书令谥恭惠

废帝诸子

重吉 重美

废帝二子曰重吉重美

重吉

重美

重吉

重吉明宗时为控鹤指挥使废帝镇凤翔有女为尼号幼澄【通鉴作惠明】与重吉俱留京师控鹤亲兵也愍帝即位不欲重吉掌亲兵乃出为亳州团练使居幼澄于禁中又徙废帝北京废帝自疑乃反愍帝遣人杀重吉于宋州幼澄亦死

重美

重美幼明敏如成人废帝即位自左卫上将军领成德军节度使兼河南尹判六军诸卫事改领天雄军节度使同中书门下平章事封雍

王石敬瑭反废帝欲北征重美谓宜持重固请毋行废帝心不欲往以重美为然而为刘延皓等所迫遂如河阳留重美守京师京师居民震恐皆出城藏窬门者禁之重美曰国家多难不能与民为主而禁其避祸乎因纵民出及晋兵将至刘皇后欲焚宫重美曰新天子至必不露坐他日重劳民力取怨身后耳后以为然废帝自焚后及重美与俱死

△晋

高祖从父

高祖兄弟

高祖诸子

出帝诸子 延煦 延宝

高祖从父

高祖二叔父一兄六弟七子二孙或失其事实抑亦无足称焉者粗存其见者以备阙云二叔父曰万友万詮兄曰敬儒弟曰敬威敬德敬殷敬赆敬晖重允子曰出帝重信重义重英重进重睿重杲孙曰延煦延宝

高祖兄弟

敬威 敬赆 敬晖

孝平皇帝生孝元皇帝万友万詮孝元皇帝生高祖万友生敬威敬赆万詮生敬晖而敬儒敬德敬殷重允皆不知其于高祖为亲疏也高祖孝元皇帝第二子也而敬儒为兄疑其长子也则于高祖属长而亲然赠官反最后于诸弟而高祖世独不得追封此又可疑也重允高祖弟也高祖爱之养以为子故于名加重而下齿诸子高祖叔兄与弟敬殷子重进皆前即位卒而敬威敬德重允重英高祖反时死高祖少子曰冯六而旧说以重允为幼子者非也石氏世事军中万友万詮职卑不见天福二年万友自故金紫光禄大夫检校司徒兼御史大夫上柱国赠太师万詮亦自金紫光禄大夫检校司空兼御史大夫上柱国赠太傅出帝天福八年追封万友秦王万詮加赠太师封赵王

敬威

敬赆

敬晖

敬威

敬威字奉信少善骑射事后唐庄宗以战功历官兵部尚书 【据辞史增】 废帝时以都指挥使领常州刺史闻高祖举兵太原谓人曰人生孰不死吾兄方举大事吾不可偷生取辱遂自杀敬德时为沂州马步军指挥使以高祖反诛天福三年赠敬威敬德皆为太傅并敬殷亦

以检校太子宾客赠太傅而不及敬儒七年追封敬威广王敬德福王敬殷通王皆赠太尉敬儒始以故金紫光禄大夫检校尚书左仆射兼御史大夫上柱国赠太傅而独不得封出帝天福八年加赠三皇叔皆为太师而皇伯敬儒始追封宋王亦加赠太师

敬贇

敬贇字德和少无赖窜身民闲高祖求得之补太原牙将即位累拜河阳三城节度使性贪暴高祖为择贤佐吏敬贇亦恇高祖严未尝敢犯法岁余徙镇保义出帝时始渐骄恣帝常遣使者至必问小侄安否陕人苦其暴召还京师不能责也契丹侵边使以兵备汶阳守麻家渡皆无功开运初以曹州为威信军复授为节度使在曹贪暴尤甚久之召还张彦泽兵入京师敬贇夜踰城堕濠溺死

敬暉

敬暉字德昭高祖尤爱之张敬达围晋阳敬暉为突骑都将尝以所部出敌不意邀战高祖壮之【据册府元龟增】即位以为曹州防御使以廉俭见称卒于官赠太傅天福八年加赠太师追封韩王子■〈目羲〉嗣

高祖诸子

重信 重义 重睿

高祖李皇后生楚王重信其诸子皆不知其母当高祖起太原重英【通鉴作重殷】为右卫将军重允为皇城副使居京师闻高祖举事匿民家井中捕得诛之天福二年高祖为二子发哀皆赠太保并重进亦以故左金吾卫将军赠太保七年皆加赠太傅追封重英虢王重允郑王重进夔王出帝天福八年皆加赠太师

重信

重义

重睿

重信

重信字守孚天福二年拜河阳三城节度使有善政是岁范延光反诏前灵武节度使张从宾发河阳兵讨延光从宾亦反重信见杀高祖欲赠重信太保大臣引汉故事皇子无为三公者高祖曰此儿为善被祸吾哀之甚自我而已岂有例耶乃赠太尉七年加赠太师追封沂王出帝天福八年易封楚王

重义

重义【辞史通鉴会要皆作重义】字弘理高祖即位拜左骁卫将军高祖幸汴州以为东都留守张从宾反攻河南见杀赠太傅天福

七年加赠太尉追封寿王出帝天福八年加赠太师皆无子

重睿

重睿貌类高祖高祖卧疾宰相冯道见卧内重睿尚幼高祖呼出拜道使宦者抱寘道怀中高祖崩晋大臣以国家多事议立长君而景延广已阴许立出帝重睿遂不得立出帝以重睿为太保检校开封尹开运二年拜雄武军节度使徙忠武皆不之镇契丹灭晋从出帝北迁不知所终

重杲高祖幼子也小字冯六未名而卒赠太傅追封陈王赐名重杲出帝天福八年加赠太师

出帝诸子 延煦 延宝

延煦 延宝

延煦延宝高祖诸孙也出帝以为子开运二年以延煦为郑州刺史少不能视事以一宦者从之又选尚书郎路航参知州事宦者专政每诟辱航乃召航还已而徙延煦齐州防御使以延宝代三年拜延煦镇宁军节度使时河北用兵天下旱蝗民饿死者百万计而诸镇争为聚敛赵在礼所积巨万出帝利其费乃以延煦娶在礼女遣宗正卿石光赞以聘币一百五十床迎于其第出帝宴在礼万岁殿赐予甚厚在礼谓人曰吾此一婚其费千万十一月徙镇保义契丹灭晋出帝与皇太后遣延煦延宝赍降表玉玺金印以归契丹延宝时已为威信军节度使矣契丹得玺以为制作非工与前史所传异命延煦等还报求真玺出帝以状答曰顷王从珂自焚于洛阳玉玺不知所在疑已焚之先帝受命命玉工制此玺在位羣臣皆知之乃已后延煦等从帝北迁不知所终

△汉

高祖诸弟

高祖诸子

高祖诸弟

信

高祖二弟曰崇曰信崇事具载记

信

信

信高祖从弟也高祖镇太原以为兴捷军都指挥使领义成军节度使徙领许州高祖寝疾隐帝当立为嗣杨邠等不欲信在京师乃遣就镇信涕泣而去信所至黻货好杀戮军士有犯法者信召其妻子对之割剔支解使自食其肉血流盈前信命乐饮酒自如也杨邠等死信大喜

谓其僚佐曰吾尝谓天无眼而使我郁郁于此者三年矣主上孤立几落贼手诸公可劝我一杯矣已而闻难作忧不能食周太祖军变于澶州王峻遣马铎以兵巡检许州信乃自杀周太祖即位追封蔡王

高祖诸子

承勋 赞

高祖三子曰承训隐帝承勋以弟崇之子为子曰赞

承训长而贤高祖爱之方属以为嗣而薨追封魏王

承勋

赞

承勋

承勋为开封尹隐帝遇弑羣臣请立承勋太后以承勋久病不任为嗣羣臣请见承勋视起居太后命以卧榻舁出见羣臣视之信乃不立周广顺元年以疾卒追封陈王

赞

赞隐帝时为徐州节度使周太祖入京师以谓汉大臣必相推戴及见宰相冯道等殊无意太祖不得已见道犹下拜道受太祖拜如平时徐劳之曰公行良苦太祖意色皆沮【通鉴考异云周祖举兵既克京城所以不即为帝者盖以汉之宗室崇在河东信在许州赞在徐州若遽代汉虑三镇举兵以兴复为辞则中外必有响应者故阳称辅立崇子信素庸愚不足畏赞乃崇子故迎赞而立之使两镇息谋俟其离徐已远去京稍近然后并信除之则三镇去其二矣然后自立则所与为敌者唯崇而已此其谋也岂冯道受拜之所能沮乎案考异此说能得当日情势且足关一时推服冯道之谬】因白汉太后择立汉嗣乃遣太师冯道率羣臣迎赞道揣周太祖意不在赞谓太祖曰公此举由衷乎太祖指天为誓道见赞传太后意召之赞至宋州太祖自澶州为兵士拥还京师王峻虑赞左右生变遣侍卫马军指挥使郭崇以兵卫赞夺赞部下兵召道先归留其副赵上交王度奉赞入朝太后道乃先还赞谓道曰寡人此来所恃者公三十年旧相是以不疑道默然赞客将事正等数目道欲图之赞曰勿草草事岂出于公道已去崇幽赞外馆太祖已监国以太后诏降授赞开府仪同三司检校太师上柱国封湘阴公寻以幽死赞之入也以都押衙巩庭美教练使杨温守徐州庭美等闻赞不得立乃闭城拒命太祖拜王彦超徐州节度使下诏谕庭美等许以刺史并诏赞赦庭美等广顺元年三月彦超克徐州庭美等皆见杀

△周

太祖诸子

世宗诸子

太祖诸子

柴守礼

太祖子二人曰青哥意哥不知其母谁氏太祖举兵于魏汉以兵围太祖第青哥意哥侄守筠奉超定哥皆被诛太祖遂无子养后兄柴守

礼之子为子是谓世宗太祖即位诏故第二子青哥赠太尉赐名侗第三子意哥赠司空赐名信皇侄守筠赠左领军大将军更名守愿奉超赠

左监军卫将军定哥赠左千牛卫将军赐名逊显德四年追封侗剡王信■〈木巳〉王

柴守礼

柴守礼

柴守礼字克让以后族拜银青光禄大夫检校吏部尚书兼御史大夫世宗即位加金紫光禄大夫检校司空光禄卿致仕居于洛阳终世

宗世未尝至京师左右亦莫敢言第以元舅礼之守礼颇恣横尝杀人于市有司以闻世宗不问时王溥汪晏王彦超韩令坤等同时将相皆有

父在洛阳与守礼朝夕往来洛阳人多最避之号十阿父守礼卒年七十二官至太傅【

按守礼为世宗之父欧史比于宗室列之家人传中

今仍其旧】

世宗诸子

世宗子七人长曰宜哥次三皆未名次恭帝次熙让熙谨熙诲皆不知其母氏宜哥与其二皆为汉诛太祖即位诏赐皇孙名谊赠左骁卫

大将军诚左武卫大将军誠左屯卫大将军显德四年追复谊越王诚与王誠韩王而皇子在者皆不封六年北复三关遇疾还京师始封宗训

为梁王宗让亦封燕国公后十日而世宗崩梁王即位是为恭帝宗让更名熙让封曹王熙谨纪王熙诲蕲王宋干德二年熙谨卒熙让熙诲不

知所终

钦定续通志卷一百八十七

●钦定续通志卷一百八十八

宗室传

宋【一】

○宋一

宣祖诸子

太祖诸子

△宣祖诸子

魏王廷美【叔近 彦倓彦櫛 彦逾】

宣祖五子昭宪杜太君生曹王光济太祖太宗岐王光赞陈国夫人耿氏生魏王廷美【按宋史于魏王传首总叙太祖兄弟今依郑例录为标题以昭画一】曹王光济蚤薨宋兴追封邕王后改封

魏王廷美

魏王廷美

魏悼王廷美字文化本名光美太平兴国初改今名建隆元年授嘉州防御使迁兴元尹山南西道节度使干德二年加同中书门下平章事徙永兴军节度使太宗即位加中书令开封尹封齐王进封秦王七年柴禹锡等告廷美骄恣将有阴谋窃发罢开封尹授西京留守诏枢密使曹彬钱廷美于琼林苑柴禹锡等以告阴谋升擢有差陈从龙等坐交通廷美及受其燕犒皆贬责赵普再相廉得卢多逊与廷美交通事上闻帝怒多逊下御史狱捕系中书守堂官赵白秦府孔目官阎密小吏王继勋樊德明赵怀禄阎怀忠等杂治之皆伏罪太子太师王溥等议奏多逊及廷美顾望呪诅大逆不道宜加诛灭诏削夺多逊官爵并家属流崖州廷美勒归私第赵白阎密等皆斩于都门外又诏廷美男女等宜正名称德恭等仍为皇侄皇侄女去云阳公主号降韩崇业右千牛卫率府率去驸马都尉号并发遣西京赵普以廷美谪居西洛非便复令知开封府李符上言廷美不悔过怨望乞徙远郡以防他变诏降为涪陵县公房州安置八年廷美母陈国夫人耿氏卒雍熙元年廷美至房州忧悸成疾卒年三十八帝闻之悲泣追封浩王谥曰悼初昭宪太后不豫命太祖传位太宗赵普于榻前为誓书藏之金匱欲太宗传廷美而廷美复传德昭故太宗既立既令廷美尹开封德昭实称皇子德昭不得其死德芳相继夭绝廷美始不自安已而禹锡等告廷美阴谋帝召问普普愿备枢轴以察奸变复密以昭宪太后顾命及先朝自愬事上之帝访得普前所上章并发金匱得誓书遂大感悟他曰太宗尝以传国之意访普普曰太祖已误陛下岂容再误邪于是廷美遂得罪【谨按通鉴辑览 御批廷美之得罪皆成于普其始因多逊之毁请备枢轴察奸变以自救不过患疾之一念继乃构成冤狱坐以大逆止图报复多逊夙嫌而于廷美毫无顾忌老奸伎俩日甚一日至讽李符上言必欲置廷美于死而后已则天良澌灭尽矣普尝自负读论语鄙夫无所不至之句岂未经见乎】至道初命司门员外郎孙贻为皇侄诸孙教授廷美诸子之在京者肆业焉真宗即位追复故官仁宗时赠太师尚书令徽宗即位改封魏王子十人德恭衡州防御使赠护国军节度使封赠高密郡

谥慈惠德隆官沂州守赠崇信军节度使同平章事临沂郡公 【按世系表作赠广平郡王东都事略作左武卫大将军赠平阳郡王】 德彝
保信军留后赠昭信军节度使颍川郡王谥安简德雍天平军留后赠宣德军节度使同平章事广陵郡王谥康简德钧右监门卫大将军赠河
州观察使安乡侯德钦右羽林将军赠云州观察使云中侯德润右羽林将军赠应州观察使金城侯德文武胜军节度使同平章事封东平郡
王兼侍中赠太尉中书令申王谥恭裕德原左武卫大将军赠凉州观察使姑臧侯德存左羽林将军赠洮州观察使洮阳侯故事皇族封王者
物故则本宫之长封国公其后以次受封于是德钧子承简属最长袭封徐国公官至保康军留后赠彰化军节度使安定郡王谥和懿承简薨
德雍子承亮袭封昌国公神宗即位改封荣熙熈二年诏宣祖太祖太宗之子皆择其后一人为宗世世封公以奉祀承亮以传嫡承袭封秦国
公奉廷美祀赠乐平郡王谥恭静子克愉卒子叔牙嗣

岐王光赞蚤薨追封岐王后改封

叔近

彦倓

彦櫛

彦逾

叔近

叔近魏王元孙荣良公克类子建炎元年为秀州守杭卒陈通反诏辛道宗将西兵讨之兵溃为乱抵秀州叔近乘城谕祸福乱兵乃去未
几差权两浙提刑招通通听命及入城贼众犹不解甲叔近置酒推诚待之遂皆感服因奏通初无叛心缘叶梦得赏不时给遂至纷争今已就
招请赦其徒二百余人会台谏皆言不可遂寢己而王渊兵至杭诈传呼赵秀州来给通郊迎遂诛之初渊在汴狎娼周氏后归叔近渊衔之诬
以通贼夺职拘于州以朱芾代之芾肆残虐军民怨愤小卒徐明率众囚芾迎叔近领郡事叔近不得辞因抚定之请择守于朝奏未达朝廷命
张俊致讨俊渊部曲也辞行渊谓之曰叔近在彼俊喻意领兵至郡叔近出迎俊叱令置对方操笔羣刀遽前杀之明等反戈婴城纵火驱掠俊
捕诛之取周氏归于渊绍兴九年御史讼其冤赠集英殿修撰有叔向者魏王之系也方汴京破时潜出之京西金人退引众屯青城入至都堂
叱王时雍等速归政置救驾义兵其后为部将王涣上变舌叔向谋为乱诏刘光世捕诛之

彦倓

彦倓字安卿魏王七世孙父公广饶州太守彦倓初调溧阳尉邑民潘氏兄弟横邑中号三虎畜童仆数百邑官莫敢谁何彦倓白守治之正其罪厯平江府推官摄宜兴县县自中兴后预借民明年税民挟此得慢其令彦倓请禁之邑遂易治知于潜县县胥往往通台省吏得肆其奸彦倓执其黠者械送抵罪开禧初知兴国军岁旱蝗军需益急属邑令吴格负上供银彦倓坐累贬吴格愧谢彦倓曰属时多艰宜宽民力以崇根本何谢为溃卒据外城为变彦倓募人斩捕之散其余党累迁湖南运判獠人罗孟传反累岁不能平彦倓谓帅臣曰獠人雠杀乃其常情况主断不平是激之使叛也能遣谋者离其党与俾还自相雠破之易矣帅从其计遂降之寻知绍兴府复鹿鸣礼置兴贤庄以资其费筑捍海石塘亦置庄以备增筑会旱饥彦倓第民高下捐其税免输湖籍田米举缗钱四十万以助荒政民赖以济厯知太平州调江西转运使嘉定十一年卒

彦橐

彦橐字文长魏王七世孙祖训之在忠义传彦橐登干道二年进士第尉乐清会大旱令循故事祷雨而责租益急彦橐曰捐敛已责所以招和气何祷为庆元中擢监登闻检院时韩侂胄方柄用朝士悉趋其门彦橐窃叹惋出知汀州州民叶姓者啸聚汀赣间彦橐遣将捕戮之累迁广西提刑侂胄死诏检详士大夫前与兵议者坐侂胄党将并逐之彦橐叹曰士方以伪学废今又以兵端斥苟欲锢士何患无名每见帝必言才难迁湖广总领旧士卒物故大将不落其籍而私其月请彦橐置别籍稽核之或传军中有怨言彦橐曰不乐者主帅耳何损士卒持之三年挂虚籍者赢三万额减钱百万缗用度以饶知平江府郡之昆山并大海盗出没莫可踪迹彦橐奏外其半置嘉定县屯兵以守转宝谟阁待制卒

彦逾

彦逾字德先魏王七世孙绍兴三十年登第淳熙五年知秀州累迁太府少卿四川总领初入境利西帅吴玠遣属吏安丙来迓彦逾从容问之曰太尉统众六万得无虚籍乎丙以情告彦逾俾损虚籍以宽民赋挺不敢隐累迁工部尚书孝宗崩光宗疾不能持丧枢密赵汝愚议立嘉王欲倚殿帅郭杲为用遣中郎将范任告之杲不应杲尝被诬彦逾为白于帝杲德之遂驰告杲曰枢密第能谋之太尉为国虎臣当任其责杲未及对彦逾急责之杲遂领兵为卫熈宗即位以端明殿学士出知建康兼江东安抚使未行改四川安抚制置使兼知成都府以定策勋累

迁资政殿大学士嘉泰间知明州兼沿海制置使嘉定间乞祠以归卒彦逾始与汝愚协济大计冀汝愚引兵共政及外际颇缺望乃疏当时名臣上之目为汝愚党帝由是疑汝愚吴氏世守武兴兼利西安抚操重权吴挺卒朝廷用邱密议并利西安抚于东路以革世将之弊而彦逾奏复利西安抚后吴曦因之以生变人以是咎彦逾云

△太祖诸子

燕王德昭【子洎 子崧 子栎 子砥子昼 师■〈罍上卅下〉 希言 希恠】

秦王德芳【子偁子澍】

太祖四子孝惠贺皇后生滕王德秀燕王德昭舒王德林孝明王皇后生秦王德芳【按宋宗室传标题俱不载其母氏今据文献通考辑补以符郑例】 滕王德秀蚤亡徽宗时追赐名及王封

燕王德昭

秦王德芳

燕王德昭

燕懿王德昭字曰新干德二年出阁故事皇子出阁即封王太祖以德昭幼冲欲其由渐而进授贵州防御使开宝六年授兴元尹山南西道节度使同中书门下平章事终太祖世竟不封以王爵太宗太平兴国元年改京兆尹移镇永兴始封武功郡王诏与齐王廷美班宰相上四年从征幽州军中尝夜惊不知帝所在有谋立德昭者帝闻之不悦及归以北征不利久不行太原之赏德昭以为言帝大怒曰待汝自为之赏未晚也德昭退而自刎帝闻惊悔往抱其尸大哭曰痴儿何至此邪赠中书令追封魏王

【谨案通鉴辑览 御批军中谋立德昭并无形迹可指或谗人构衅揣测猜嫌而为之亦未可定太宗遽责以待汝自为则德昭虽欲不死而不能可知太宗传子私念不待赵普赞成而早定于胷中矣抱哭追封固无解于渝盟之过所谓欲盖弥彰耳】 赐谥后改吴王治平元年改越王 【案东都事略德昭改封越王在治平元年今据补】

徽宗即位改燕王子五人惟正惟吉惟固惟忠惟和惟正由保信军节度观察留后特拜建宁军节度使卒追封同安郡王谥僖靖无子以惟忠子从谠为嗣惟吉字国祥生甫弥月太祖命攀至内廷择二女媪养视之出入常从太祖崩惟吉纔六岁昼夜哀号孝章皇后慰谕再三始进饘粥太宗即位犹在禁中日侍中食太平兴国八年始出居东宫授左监门卫将军封平阳郡侯进安定郡公至道二年授阆州观察使

凡邸第供亿车服赐与皆与诸王埒其余王子不得偕也真宗即位授武信军节度加同

平章事大中祥符初改感德军节度三年薨追封南阳郡侯谥康孝惟吉好学善属文性至孝孝章皇后抚养备至亲为栉沐咸平初以太祖孝章画像服玩器用赐惟吉岁时奠享哀慕甚至每诵至蓼莪篇涕泗交下宗室推其贤孝雅善草隶飞白真宗命藏秘阁明道二年封冀王子守节守约守巽守度守廉守康惟固字宗干本名元宸太平兴国八年与惟忠并改赐名授左千牛卫将军是冬卒惟忠字令德初名文起四迁右龙武军真宗即位改右千牛卫大将军大中祥符二年进左监门卫大将军叙州刺史五年进昌州团练使八年卒赠鄂州观察使追封江夏侯明道二年加赠彰化军节度使追封舒国公子从恪从藹从秉从颖从谨从质从信从谏惟和子礼端拱元年授右武卫将军历右骁卫神武龙武军右卫将军大中祥符四年迁右千牛卫大将军六年卒赠临汝侯明道二年追封清源郡公惟和好学工笔札优游典籍以礼法自居宗室推重及卒帝谓宰相曰惟和好文力学加之谨愿皇族之秀也不幸一命嗟悼久之子从审从诲庆历四年诏封十王后以惟忠从藹袭封颍国公而惟吉子守巽以冀王后最长与从藹同封守巽和州防御使赠楚国公从藹齐州防御使赠韩国公守巽从藹卒以惟忠子从信【按东都事略从信作惟固子考世系表惟固无后从信亦作惟忠子事略误】袭封荥国公官雄州防御使赠楚国公从信卒以惟忠之孙从恪子世规袭封崇国公官沂州防御使卒守巽子世清茂州防御使封申国公熙宁中迁越州观察使袭封越国公进会稽郡王终保信军留后赠虢王子令廓嗣先是熙宁中诏封秦王孙从式为安定郡王奉太祖祀从式薨改封越王曾孙世准【按文献通考作从式薨改封德昭曾孙世清为安定郡王秦王德芳传及东都事略亦俱作世准考世清乃守巽子世准乃从藹子皆越王曾孙本传止云世清于熙宁中袭封越国公进封会稽郡王无袭封安定郡王之文而通考则云世清以熙宁五年嗣封世准以元丰七年嗣封是世清薨后以世准袭封也传或有脱略今附识于此】薨从诲子世开袭薨复以从藹子世雄袭薨以从信子世福袭薨又以秦王元孙令荡袭薨令庇以年长争袭朝廷用礼官言燕王太祖长子正当袭封令庇小宗不当与之并议遂定自宣和末停封至绍兴元年令话始得袭封自是至嘉定袭封者十五人惟令时令愿令玘令衿迹颇着余俱无足称

子洎

子崧

子栎

子砥

子昼

师■〈罍上升下〉

希言

希怪

子洳

子洳字正之燕王五世孙宝文阁待制令铄子以荫补承务郎迁河南少尹累进龙图阁秘阁修撰除陕西转运副使初蔡京铸夹锡钱民病壅滞子洳请铸小铁钱以权之既成子洳奏令民以旧铜钱入官易新铁钱旬日易百余万缗帝手札以新钱百万缗付五路均糶细麦命子洳领其事蔡京再相言者希京意论子洳乱钱法落职奉祠靖康初复秘阁修撰金人侵洛子洳奔荆南溃兵祝靖盛德破荆南城时京城已破子洳泣说之曰君辈宜亟还都城护社稷取功名无贪财扰州县也皆应曰诺子洳因草檄趣之靖等遂北行绍兴元年召见复徽猷阁直学士知西外宗正司改江西都转运使会建督府军需浩繁子洳值运饷不绝以功进宝文阁直学士三京新复除京畿都转运使以疾卒

子崧

子崧字伯山燕王五世孙登崇宁五年进士第【按徐梦莘北盟会编作崇宁二年贡礼部奏名第一】宣和闲累除徽猷阁直学士知淮宁府汴京失守起兵勤王闻张邦昌僭位以书白康王宜遣师邀金人河上迎请两宫问罪僭逆若议渡江恐误大计遂与知颍昌府何志同等盟传檄中外已而闻金人退引兵趋襄邑遣范坝徐文中诣济王请王进兵南京王命子崧充大元帅府参议官东南道都总管移书责邦昌速宜反正邦昌家在庐州子崧檄通守赵令儵几察之且请诛其母子以绝奸心又遗书责王时雍会邦昌遣使迎王子崧即贻王书请先谒宗庙覲母后明正诛赏降霈四方遂传檄京师寻以所部兵会济州高宗即位子崧请放诸路常平积谷钱又言台谏为人主耳目近年用非其人率取旨言事请遵旧制听学士中丞互举因建三屯之议一屯澶渊一屯河中陕华一屯青郛间以备敌除延康殿学士知镇江府两浙路兵马钤辖复论列王时雍徐秉哲吴升莫俦范琼胡思王绍王及之颜博文余大钧等左右卖国宜明正其罪【按子崧家传载高宗即位授延康殿学士因建三屯之议复论列王时雍等为其党所忌用阴谋使出知镇江据此则除学士在建三屯议之前知镇江在论列王时雍等之后今姑仍原文】贼赵万犯镇江子崧遣将击万于丹徒调乡兵乘城为备官军败乡兵惊溃

子崧率亲兵保焦山贼遂据镇江后与御营统制辛道宗有隙道宗求得其起兵檄文上之语涉不逊帝震怒不欲暴其罪坐擅弃城降单州团练副使谪居南雄州绍兴二年复其集英殿修撰而子崧已卒于贬所

子栎

子栎燕王五世孙登元佑六年进士第靖康中为汝州太守金人再渝盟破荆湖诸州独子栎能保境土李纲言于朝迁宝文阁直学士寻提举万寿观绍兴七年卒

子砥

子砥燕王五世孙令珣子官鸿胪丞北迁至燕山久之遣其徒朱国宝王孝安至中京求得上皇宸翰怀之以归建炎二年六月至行在帝命辅臣召问于都堂子砥言金人讲和以用兵我国敛兵以待和譬人畏虎啖虎以肉食尽终必食人若设陷弃待之庶能制虎因复故官已而赐对称旨命知台州卒

子昼

子昼字叔问燕王五世孙累官宪州通判宣和初充详定九域图志编修官诏为刑部员外郎建炎四年迁吏部员外郎寻用太宗正士■

〈亻 裹〉荐迁尚书左司员外郎以功进秩一阶试太常少卿集太常因革礼八十篇为二十七卷上言复春分祀高禘礼除权礼部侍郎累求补外迁徽猷阁直学士知秀州既而奉祠以归卒

师■ 〈罍上卅下〉

师■ 〈罍上卅下〉字从善燕王七世孙和州防御使伯骕子举进士第除司农簿迁金部郎中孝宗朝尝奏左右曹度支仓部宜立总计司归并财物之数以绝吏奸制可知吉州即山炼铜补欠额二十万光宗初历太府少卿知秀州改淮南运判时郡铁钱不行盐商弗至师■ 〈罍上卅下〉请发度牒出仓粟以收铁钱盐利遂通累迁司农卿知临安府韩侂胄用事师■ 〈罍上卅下〉附之遂得尹京转工部侍郎侂胄尝饮南园过山庄顾竹篱茅舍谓师■ 〈罍上卅下〉曰此真田舍闲气象但欠犬吠鸡鸣耳俄闻犬噪丛薄间视之乃师■ 〈罍上卅下〉也侂胄大笑久之以工部尚书知临安府侂胄将用兵师■ 〈罍上卅下〉度侂胄必召祸乃持异论侍御史邓友龙劾罢之侂胄死其党多坐谪以师■ 〈罍上卅下〉尝与侂胄异故获用除宝谟阁直学士知镇江府未几诏为兵部尚书知临安府会武学生柯子冲卢宣德以事至府师■ 〈罍上卅下〉擅挾遣之坐是罢免奉祠卒师■ 〈罍上卅下〉四尹临安有能声尝

钩致民罪没其家费谄事权贵人以是鄙之

希言

希言字若讷燕王八世孙淳熙中登第调衢州司户合郡民以计表其坊里标其户数
为图献于守守才之厯知临安仁和县辟学宫四百余亩适大旱蝗集御前芦场中亘数里希言欲去芦以除害中使沮其策希言驱卒燔之
临平塘堤决希言督役亲捧土投石兵民争奋堤成因筑重堤后不复决累迁枢密院编修官兼右司上言诸将但务城守敌来不拒去不复追
异时之忧殆不止保江而已宣谕诸将一军受围诸军共守敌不渡准则均受赏以战为守毋以守为守迁宗正丞厯军器少监又充密院检详
后奉祠去嘉定十七年卒封越国公谥忠宪子与权至开府仪同三司

希恠

希恠字伯和燕王八世孙登淳熙十四年进士第赵汝愚帅福建希恠为属吏尝言
治人如修身治政如理家爱民如处昆弟汝愚嘉之荐于辛弃疾弃疾尚气僚吏不敢与可否希恠独尽言无所避弃疾亦器其能汝愚当国调
江东运司干办改太平州通判迁江西茶盐提举岁饥悉少聚劫希恠发粟赈给禽首谋者治之其党遂散升本路帅兼漕事黑风峒罗世传寇
郴阳奸民潜通贼阴济以粮希恠捕治之贼乏食乃去未几李元砺寇郴陈廷佐寇南安复诱罗世传与合劫掠龙泉希恠诱世传诛元砺自赎
世传縛元砺以献廷佐亦降移知太平州希恠为倅日习知利病遂损折市价减榷酤额以苏民力已而乞祠迁端明殿学士授昭信军节度使
开府仪同三司致仕嘉定五年卒封成国公

舒王德林蚤亡徽宗时追赐名及封王

秦王德芳

秦康惠王德芳开宝九年出阁授贵州防御使太平兴国元年授兴元尹山南西道
节度使同平章事寻加检校太尉六年薨年二十三赠中书令岐王及谥后改楚王徽宗即位改秦王子三惟叙惟宪惟能惟叙字懋功端拱初
授左武卫将军四迁左卫将军领勤州刺史大中祥符四年从祀汾阴拜左千牛卫大将军八月卒赠怀州防御使追封河内侯明道二年加赠
保静军节度观察留后高平郡公【世系表作高平郡王】子从照【按从照世系表作从贶东都事略及文献通考并作从煦与此互异】
从溥惟宪字有则少颇纵肆长修谨善射好吟咏端拱初授左屯卫将军累迁左羽林将军领贺州团练使真拜资州团练使大中祥符九年
卒赠安德军节度使兼侍中英国公子从式从演从

戎从戒从湜从贲惟能字若拙端拱初授右屯卫将军累迁右神武军将军大中祥符元年卒赠蔡州防御使张掖候明道二年加赠集庆军节度观察留后南康郡公子从古庆历四年以惟叙子从照封安国公终左金吾卫大将军归州团练使赠齐国公从照卒以惟能子从古封安国公终延州观察使赠楚国公【按世系表作遂宁郡王】 谥惠恪从古卒惟宪子从式袭封舒国公神宗即位封安定郡王终保康军节度使赠恭王谥安僖从式薨以越王曾孙世准袭封而以从式子世恩为楚国公主德芳祀终楚州防御使赠奉国军节度使谥良僖

子偁

子瀟

子偁

安僖秀王子偁秦王五世孙东头供奉官令僧子高宗族兄也宣和元年舍试合格调嘉兴丞是年子伯琮生后被选入宫是为孝宗子偁

召赴都堂审察改宗教郎通判湖州寻除直秘阁赐五品服孝宗既封建国公就傅子偁召对言宗室之寓于外者当聚居官舍选尊长钤束年

未十五附入州小学十五入大学许依进士就举未出官者亦许入学听读及二年听参选高宗纳之迁秘阁修撰知处州已而乞祠许之累官

左朝奉大夫绍兴十四年卒时孝宗为普安郡王疑所服诏侍从台谏议秦熺等请解官如南班故事及普安为太子赠太师中书令封秀王谥

安僖配张氏封王夫人孝宗即位称皇伯绍熙元年即湖州秀园立庙奉神主建祠临安府以藏神貌如濮王故事仍班讳嗣秀王伯圭字禹锡

孝宗同母兄也以恩补将仕郎调秀州华亭尉孝宗受禅除集英殿修撰知台州历知明州时诏徙戍定海兵于许浦伯圭奏定海当控扼之冲

不可撤备请摘制司军以实许浦从之海寇猖獗伯圭遣人谕降其豪葛明禽其党倪德抚而用之贼党遂散以功迁龙图阁学士淳熙三年授

安德军节度使寻加开府仪同三司封荥阳郡王光宗即位迁太保封嗣秀王绍熙二年【原文作绍兴二年绍兴乃高宗年号考光宗本纪

伯圭判大宗正事在封嗣秀王后系光宗绍熙二年事原传误今据改正】判大宗正事累加太师免奉朝请兼崇信军节度使寻薨追封崇正

谥宪靖伯圭性谦逊不以近属自居每日见行家人礼虽宴私隆洽执臣节愈恭一日孝宗问潜龙时事伯圭辞曰臣老矣不复能记问至再三

终不言帝尝欲广其居有司既度材矣伯圭固辞而止子九人师夔师揆师垂师高师禹师皋师岩师弥师贡师夔字汝一以祖恩补官调太平

州芜湖簿历台州秀州通判寻知徽州除直龙图阁迁江东运判建康务场往往夺民利

为害滋甚师夔首罢之池州军帅霍政遂与守臣交上
书相攻诏师夔究曲直政密遣人求庇师夔斥之政坐罢去绍熙元年侍父入覲除兴宁
军节度使宁宗即位加检校少保阜陵成迁开府仪同
三司侍父归父薨师夔亦卒追封新安郡王师揆字符辅初补右丞务郎奉祠除婺州通
判加直秘阁守臣韩元吉荐其材上以问史浩浩言其
聪爽可任召对除江东提举奏免失陷常平人毋责偿寻迁淮西提刑兼提举领屯田事
奏以荒圩给军士其屯田为民世业者勿夺从之绍兴
元年授观察使宁宗即位除奉国军承宣使寻升节度使嘉定七年薨追封澧王谥恭惠
弟师禹由保康军节度使除开府仪同三司薨追封和
王谥端肃

子瀟

子瀟字清卿秦王五世孙孝靖公令奥子 【世系表作令兴】 登宣和中进士第
调真州刑曹掾与守争狱事解官去改衢州推官胡唐
老奇其才任之佐唐老缮完城具苗刘兵至城下不能攻以功进一秩累除直秘阁两淮
转运副使时议者言田之并太湖者被水患宜分道诸
浦注之江诏子瀟往案视还言太湖当数州巨浸岂淞江一川所能独泄昔人于常熟北
开浦二十四以达大江又开浦十于昆山东南以入海
今皆湮塞宜加疏浚从之水患用息除直敷文阁知临安府诏权户部侍郎升文华阁待
制复知临安府调三衙卒修筑都城不扰而办帝幸建
康充行宫留守参谋官扈蹕还复知临安府金人来议和子瀟请事情叵测宜以军礼待
之孝宗嗣位移知明州沿海制置使初海寇以赂通郡
胥吏吏反为之用匿其踪迹贼遂大炽商舶不过子瀟延土豪俾率郡胥分道入海告之
曰用命者有厚赏不则杀无贷众震恐争指贼处悉禽
获海道遂平历进龙图阁学士移知泉州干道二年卒

钦定续通志卷一百八十八

●钦定续通志卷一百八十九 宗室传九

宗室传

宋 【二】

○宋二

太宗诸子

△太宗诸子

汉王元佐

昭成太子元僖商王元份 【濮王允让 士晤 士■ 〈

亓襄〉 士■ 〈山穹〉 士晴 不羣 不弃 不尤

不■ 〈百上心下〉 善俊 善誉汝述】

越王元杰镇王元偃

楚王元偁周王元俨

崇王元亿

太宗九子元德李皇后生汉王元佐及真宗昭成太子元僖商王元份越王元杰镇王元偃楚王元偁周王元俨崇王元亿史不详其母氏

汉王元佐

昭成太子元僖

商王元份

越王元杰

镇王元偃

楚王元偁

周王元俨

崇王元亿

汉王元佐

汉恭宪王元佐字惟吉初名德崇性聪警貌类太宗帝钟爱之太平兴国中拜检校太傅同中书门下平章事封卫王改今名进封楚王初秦王廷美迁涪陵元佐独申救之廷美死元佐遂发狂疾雍熙二年疾少间帝喜为赦天下重阳日内宴元佐疾新愈不与恚曰诸王侍宴我独不与是弃我也遂发忿被酒夜纵火楚宫诏遣御史捕元佐诣中书劾问废为庶人居南宫使者守护真宗即位起为左金吾卫上将军复封楚王听养疾不朝累加太师尚书令兼中书令拜天策上将军兴元牧赐剑履上殿诏书不名仁宗即位兼江陵牧薨年六十二追封齐王陪葬永熙陵明道二年改封潞王治平元年改魏王徽宗即位改汉王子三人允升允言允成允升字吉先养明德太后宫元佐有疾始出第真宗赐名元中授右监门卫将军更赐今名封延安郡公历安德建雄安国军节度使景佑二年卒赠平阳郡王谥懿恭子十三人宗礼宗旦宗悌宗惠知名允言历左监门卫大将军黄州刺史赠奉化侯明道二年追封密国公子宗说宗正宗育允成终右神武将军濮州防御使赠郟国公明道二年加赠镇江军节度使兼侍中子宗颜宗讷宗鼎宗严宗鲁宗儒宗奭仁宗封十王后以允言子宗说嗣封祁国公皇佑中坐帷簿不修除名熙宁三年以允升子宗惠袭封魏国公中书言宗惠不应封以恭宪庶长孙允言子宗立袭封终武宁军节度观察留后赠南康郡王子仲来嗣终金州刺史子不佺嗣不佺卒子彦清乞袭父爵奉元佐祀诏从之

昭成太子元僖

昭成太子元僖初名德明太平兴国七年出阁授检校太保同平章事封广平郡王八年进封陈王改名元佑帝以诸王尚幼欲其知谦逊

之道诏自今宰相班在亲王上雍熙二年为开封尹兼侍中改今名帝将大举征幽蓟遣使往河北诸州科乡民为兵元僖论其不便时赵普为朋邪所嫉元僖力言普开国良臣宜复以为相帝纳之【按元僖论科乡民为兵不便事见东都事略其荐赵普云云亦详载普传中宋史本传俱失载以事系元僖增补于此】进封许王加中书令淳化三年薨赠皇太子谥恭孝干兴初改谥无子仁宗时诏以允成子宗保【按东都事略作宗达考楚王元偁传宗达乃平阳郡王允升之子出继楚王元偁为孙非出后昭成太子也事略误】出后昭成太子为孙袭封燕国公性仁恕尝书忍字于座右以为戒熙宁七年卒赠静难军节度使新平郡王谥恭静子仲恕嗣官至忠州团练使卒子士盍嗣

商王元份

商恭靖王元份初名德严太平兴国八年出阁改名元俊拜同平章事封冀王雍熙三年改今名加兼侍中威武军节度使进封越王真宗即位加中书令历镇永兴凤翔改雍王加太傅真宗北征为东京留守薨年三十七赠太师尚书令郢王改陈王又改润王治平中封鲁王徽宗即位改商王元份宽厚言动中礼子三人长允懿次允中右屯卫将军【按宋史本传不载允中官传今据东都事略补】早卒次则濮王允让也允让薨以允懿子宗谔袭虢国公熙宁三年以宗肃嗣封鲁国公子仲先嗣改封商国公允懿字德之性至孝因父感疾恍惚失常嗜学通知近朝典故工虞世南楷法初授右千牛卫将军四迁右武卫历彰信军节度观察留后武定军【东都事略作懿武军】节度使景佑元年卒赠太尉信安郡王谥僖简子宗谔宗敏宗孟宗肃

濮王允让

士瑋

士■〈亻 裹〉

士■〈山 穹〉

士晴

不羣

不弃

不尤

不■〈百上心下〉

善俊

善誉

汝述

濮王允让

濮安懿王允让字益之商王元份子也天资浑厚外庄内宽喜愠不见于色始为右千牛卫将军周王佑薨真宗迎养禁中仁宗生送还邸官卫州刺史仁宗即位授汝州防御使累拜盩厔江军节度使上建睦亲宅命知大宗正寺宗子有好学者勉进之不率教则劝戒之不变始正其罪人皆畏服庆历四年封汝南郡王拜同平章事改判大宗正司嘉佑四年薨年六十五赠太尉中书令追封濮王仁宗久无子乃以王第十三子宗实为皇子是为英宗治平元年宰相韩琦等奏请下有司议濮安懿王及谯国夫人王氏襄国夫人韩氏仙游县君任氏合行典礼诏须大祥后议之二年乃诏礼官与待制以上议翰林学士王珪等议久未决 【谨案通鉴辑览御批英宗崇奉濮王事由韩琦等申请且所议并非加尊帝号更无嫌疑陵僭之虞必执为人后者不得复顾私亲以相辨折既与大记所云不合使濮王尚在又将何处以之乎且以本生之亲改称伯父固非所安而加皇于角势自不若欧阳修援引礼经之得也原转载王珪奏而不录欧阳修之议今谨从删】 既而内出皇太后手诏令皇帝称亲濮安懿王称皇王氏韩氏任氏并称后事方施行而英宗即日手诏曰称亲之礼谨遵慈训追崇之典岂易克当且欲以莹为园即园立庙俾王子孙主奉祠事寻罢议神宗元丰二年诏以濮安懿王三夫人并称王夫人云王二十八子长宗懿宿州团练使封和国公神宗以宗懿濮安懿王元子追封舒王次宗朴陇州防御使封岐国公治平中建濮王园庙拜宗朴彰德军节度使封濮国公奉王后神宗即位加同平章事兼侍中进封濮阳郡王薨追封定王宗谊袭封终昭化军节度使同中书门下平章事薨赠广陵郡王宗暉元丰中以淮康军节度使袭封濮国公安懿王及三夫人改祔命为志并题神主加同中书门下平章事进嗣濮王薨赠怀王 【按世系表作和王】 先是濮国嗣王四孟诣洛享园庙以河南府县官充亚终献宗暉之袭封也神宗始命其子仲璲为之遂以终献侍祠宗晟昌王宗愈襄王宗绰荥王宗楚惠王宗佑钦王宗汉景王以次袭封徽宗幸濮邸迁其子孙官时安懿王诸子独宗汉在恩礼隆腆宗汉薨仲增嗣仲增濮王孙于属为长得袭封薨仲御仲爰仲理以次嗣高宗南迁奉濮王神主于绍兴府光孝寺时嗣濮王仲理北迁诏楚荥王宗辅子仲湜袭封仲湜薨以宗汉子仲偃袭仲偃薨秦桧专政罢袭桧死始以安懿王曾孙士儉袭踰年薨士鞞士歆以次嗣士歆薨安懿王元孙不■〈禾去〉袭时不■〈禾去〉为武功郎以年最高得袭封由庶官袭封自不■〈禾去〉始不■〈禾去〉薨不壘不俦不标不凌

以次袭封

士瑀

士瑀 【世系表及建炎要录并作士晤】 字公美商王元孙弱冠为右监门卫大将军贵州团练使从上皇北迁次洺州东与诸宗室议欲遁还据城谋未就而金人围合皆散走士晤西亡抵武安募得少壮百余人从至磁州招集义兵以解洺围旬日间得胜兵五千人归附者数万时洺州守臣王麟欲叛降敌军民怒杀之推统制韩一为主士晤夜半薄城下力战破围翌日入城部分守御砺将士死守敌治壕堑树鹿角示以持久因飞火礮碎其攻具以计生得其首领敌乃解去以功迁权知洺州仍兼防御使绍兴五年迁泉州观察使再迁平海军承宣使知南外宗正事卒赠少师 【世系表作太师】 追封和义郡王淳熙中谥忠靖子不流历临安绍兴帅治有声

士■ 〈亻 裹〉

士■ 〈亻 裹〉 字五之商王元孙郇康孝王仲御第四子 【世系表作第六子】 有大志好学善属文初补右班殿直累迁忠州防御使郑州观察使由盩厔军承宣使转权同知大宗正事时康王建大元帅府士■ 〈亻 裹〉 请于孟太后乞命帅府得承 制便宜行事又请奉王承大统太后从之高宗即位除光山军节度使扈跸南幸黄潜善用事士■ 〈亻 裹〉 论其误国潜善斥之出知南外宗正事会苗傅刘正彦作乱士■ 〈亻 裹〉 以蜡书遗张浚趣其勤王复遗吕颐浩书勉其与浚同济国难事平以功累加检校少师判大宗正事入覲劝帝留意恤民金人既归河南陕西地命士■ 〈亻 裹〉 谒陵寝特封齐安郡王寻权主奉濮安懿王祠事士■ 〈亻 裹〉 数言事忤秦桧及岳飞被诬士■ 〈亻 裹〉 力辨曰中原未靖祸及忠义是忘二圣不欲复中原也臣以百口保飞无他桧大怒讽言者论士■ 〈亻 裹〉 与飞交通遂夺官中丞万俟卨复希旨连击之谪居于建凡十二年而薨赠太傅 【世系表作太师】 追封循王子六人长子不凡方苗傅之乱刳股纳蜡书特告张浚以功转两官易文资从赵哲收复建州杀叶浓以功赐爵二级

士■ 〈山 穹〉

士■ 〈山 穹〉 字仰夫商王元孙初以荫补官累转太子率府副率建炎初隆佑太后幸洪州敌奄至百司散走士■ 〈山 穹〉 躬负二帝御容遇溃兵数百同行至山中众欲为盗士■ 〈山 穹〉 出御容示之曰盗不过求为朝夕计耳孰若仰给州县士■ 〈山 穹〉 以近属谕之必从众听命乃走谒太后虔州会虔民作乱乡兵在外为应与官军相持士■ 〈山 穹〉 诣

执政请太后急肆赦人知急死庶可安集又请急谕城

中安戢之城中定则外寇可弭赦既下城中遂定迁右监门卫大将军惠州防御使绍兴二十一年卒赠建安郡王 【世系表作建安郡公】

士晴

士晴商王元孙从上皇俱北迁乘间变姓名入僧寺中落发衣僧衣以行抵会稽扈驾循幸以覃恩转千牛卫将军奉朝请而卒

不羣

不羣字介然商王五世孙宣和中量试授承事郎靖康初宰章邱县当山东河北之冲不羣募五千人增城浚濠为战守备敌攻围两月不能下累迁直秘阁通判镇江府辟充两浙宣抚司主管机宜文字高宗在越诏改郴州时羣盗出没湖湘间不羣严备御盗不能犯会岳飞破曹成成遁因犯郴不羣乘城固守拒御之进直宝文阁移知宣州军需以时办而民不扰知庐州郈琼叛拥不羣北去寻释归除知荆南府累迁两浙路转运副使卒

不弃

不弃字德夫太宗之裔绍兴中为江东转运判官秦桧忌四川宣抚使郑刚中以不弃能制之除四川宣抚司总领官不弃至官用张宪成故事以平牒见刚中刚中愕然久之始悟其不隶已遂有隙不弃欲尽取宣抚司所储刚中不与不弃怒刚中辟利州转运使王陟兼本司参议不弃劾罢之二人愈不相能桧并召还刚中在蜀服用颇踰制不弃复文攻其事桧乃罢刚中升不弃敷文阁待制知临安府踰年改兵部侍郎寻除敷文阁直学士知绍兴府未几卒

不尤

不尤有武力靖康之难与王明等募义兵与金人战雄张河南北盗皆避其锋曰此小使军也高宗即位引众归补武翼郎从岳飞平湖寇飞死桧夺其兵遣守横州而卒子善悉登进士第累官两浙转运副使

不■〈百上心下〉

不■〈百上心下〉字仁仲商王五世孙父士圃从上皇北迁遥拜集庆军节度使不■〈百上心下〉初补保义郎绍兴二十七年登第易左宣义郎调婺州金华丞除知开州开在巴东俗鄙陋不■〈百上心下〉为兴学俾民知孝义在开二年民绝鬪争夜户不闭诸司交荐转夔州转运判官累迁成都路转运判官岁饥不■〈百上心下〉行抵泸南贷官钱五万缗遣使分余比至下令曰米至矣富民争发粟米价遂平黎州青羌诺尔嘉勒反朝廷命不■〈百上心下〉摄制司酋豪莽苏尔吹喇率数千

人入汉地二百余里成都大恐不■〈百上心下〉静以镇之召僚属饮夜遣步将领飞山军径赴沉黎又徙绵州兵戍邛州为后援令坚守勿动密檄诸蕃部生获吐蕃一人赏十缣杀一人二缣遂大破吐蕃于汉源斩莽苏尔吹喇首来献凡十有六日而平嘉州虚恨蛮入寇不■〈百上心下〉标吐蕃首境上蛮惧一夕遁去不■〈百上心下〉乃令缘边家出丁夫一人分戍诸堡复其家擢右监门卫大将军惠州防御使知大宗正事进昭庆军承宣使金人完颜烈来聘充馆伴副使金使从者旧见馆使皆对揖不■〈百上心下〉不为礼宴玉津园不■〈百上心下〉连射皆中使者惊服不官以文行训勉族属荐其秀杰者奏新学宫增广弟子员仿大学校定法置自讼斋使有过者读书其中人人感砺淳熙十四年卒赠崇国公不■〈百上心下〉性笃孝居官所至有声立朝好言天下事其论王抃不宜拣选诸路军王友直不可为调都指挥使尤人所难言者遇大旱一日九疏劝上求直言通下情时布衣上书狂悖多抵罪不■〈百上心下〉谓太上皇帝不罪言者此宜书之御座右帝悚然可之一日坐待漏完有给事中白英国公借击球马不■〈百上心下〉正色曰上惟一皇孙万一马惊堕斩汝辈无益也马竟不可得所敬者朱熹张栻张栻死为请谥又请用熹其好尚如此

善俊

善俊字俊臣商王六世孙闽路兵马钤辖【世系表云赠正义大夫】不衰子初补承节郎绍兴二十七年登第换左承务郎调南城丞改昭信军虞允文荐其有边帅才干除办诸司审计司知郴州寻摄帅知庐州会岁旱江浙饥民麋至善俊括境内官田均给之贷牛种僦屋以居州城旧毁于兵善俊葺完之募乡兵保孤姥二山治屋储粟以为御敌计累迁龙图阁直学士移知建州建俗生子往往不举善俊痛绳之给金谷损己俸以助其费再知庐州首言和好不可恃当高城浚池以为备复芍陂七门堰农政用修再知建州岁饥民羣趋富家发其廩监司议调兵掩捕善俊曰是趣乱也谕许自新平米价民乃定历江西转运副使时朝廷议减月桩钱善俊言及州不及县则县仍迫取于民犹不减也宜一路通裁其额下之漕臣科郡县轻重均减之又奏和买已是白科从而折变益加糜费其数反重于正绢并乞蠲减所言多见用转湖南师移知镇江府卒善俊喜功名好论事孝宗英武独运缺相者累年善俊极言相位不可无人尤人所难言者

善誉

善誉字静之父不倚 【按世系表商王房有四不倚而其子俱无名善誉者善誉之父则不晦也表传必有一误】 商王后也善誉幼敏慧力学干道五年试礼部第一初调昌国簿摄邑事劝编户哀金买田以明嫁娶丧葬捕得海盗全党守欲上其功善誉曰奈何以人命希赏守益贤之荐于朝授两浙运干改知抚州临川县改常州添差通判史浩言其贤诏赴部堂审察累迁大理丞湖北常平茶盐提举奏罢税场十余渡四十五民便之俾诸郡售田委郡文学董其入以给计偕者移潼川路提刑转运判官遂宁守徐诩乏廉声部使者以其故御史宽假之善誉过遂宣诩出迎善誉抑使循廊诩大沮郡人闻之争讼其过善誉劾诸朝宰相王淮善诩寝其章善誉径以闻罢诩又以羨费给诸郡置庄民宗子寓蜀者少业儒善誉即郡庠立学以教之人始感砺引年乞祠归处一室以图书自娱无疾而卒善誉早失怙恃抚育诸季备至居官廉靖自将多所著述郭雍朱熹尝取其易说云

汝述

汝述字明可商王七世孙曾祖士说从二帝北迁临河骂敌而死汝述登淳熙十一年进士第调南剑州顺昌尉嘉定六年诏主管官告院自是常兼宰士八年除起居郎兼密院都承旨俄迁兵部侍郎改刑部侍郎迁尚书知平江府卒汝述为尉应诏上封事论议恳恻立朝荐引多知名之士然为时相所亲躐跻通显人亦以此少之

越王元杰

越文惠王元杰字明哲初名德和太平兴国八年出阁改今名授检校太保同平章事封益王端拱初加兼侍中成都尹剑南东西川节度使淳化中改封吴王真宗即位加检校太尉兼中书令徐州大都督历镇武宁泰宁改封兖王咸平中再郊祀皆为终献加守太保六年七月薨年三十二元杰颖悟好学善属词工草隶飞白建楼贮书二万卷及为亭榭游息之所尝作假山既成置酒召僚属观之翊善姚坦独俯首不视元杰强之坦曰坦见血山安得假山语见姚坦传中及薨真宗闻之震悼赠太尉尚书令追封安王后改邢王治平中改陈王徽宗即位改越王无子仁宗以恭宪王之孙允言子宗望为之后宗望终右武卫大将军舒州防御使赠安化军留后高密郡公子伸合嗣熙宁三年封陈国公官陈州观察使卒子士关 【东都事略作士开】 嗣

镇王元偃

镇恭懿王元偃字希道端拱元年出阁授检校太保左卫上将军封徐国公至道二年拜镇南军节度使真宗即位加同平章事封彭城郡

王徙镇静难彰化进封宁王郊祀东封悉为亚献三年文武官诣阙请祠后上元偃以领
节帅亦奏请诏许之改封相王真宗自即位以来屡以
学术勸宗子元偃首冠藩戚益自修励上谓宰相曰朕每戒宗子作诗习射如闻颇精习
将临观焉因幸元偃邸第宴从官宫僚元偃奉觞上寿
如家人礼累拜太尉兼尚书令天禧元年徙镇成德镇宁进封徐王二年薨年四十二赠
太师尚书令邓王改封密王又改苏王治平中追封韩
王徽宗即位改镇王子允弼仁宗时累迁武宁军节度使兼侍中判大宗正事封北海郡
王英宗时拜中书令徙王东平神宗即位拜太保熙宁
二年丁母忧悲痛不胜丧固辞起复母葬有日而允弼病笃顾诸子以不得终大事为恨
薨赠太师尚书令兼中书令追封相王谥曰孝定子宗
绩袭封韩国公赠南康郡王子仲磨嗣

楚王元偁

楚恭惠王元偁字令闻七岁授检校太保右卫上将军涇国公久之领鄂州都督武
昌军节度使真宗即位加同平章事安定郡王迁宣德
保宁两镇进封舒王累加兼中书令历镇南宁国节度使拜太保自景德后每有大事皆
为终献大中祥符七年薨年三十四赠太尉尚书令追
封曹王治平中封蔡王徽宗即位改楚王子允则右千牛卫大将军先是诸王子授官即
为诸卫将军余以父官及族属亲疏差等天禧元年令
宗正卿赵安仁议定制安仁请以宣祖太祖太宗孙初荫授将军曾孙授右侍禁元孙授
右班殿直内父爵高者听从高荫其事缘特旨者不以
为例诏中书门下枢密院参定行之允则无子以平阳懿恭王允升子宗达为后熙宁三
年袭封蔡国公累武信军留后卒赠高密郡王子仲约
嗣

周王元俨

周恭肃王元俨少奇颖太宗特爱之不欲令早出宫期以年二十始就封真宗即位
授检校太保左卫上将军封曹国公明年为平海军节
度使拜同中书门下平章事封广陵郡王进封荣王历镇安静武信加兼中书令坐侍婢
纵火延燔禁中夺武信节降封端王寻拜镇海安化军
节度使封彭王改通王涇王仁宗即位拜太尉尚书令兼中书令封定王天圣七年封镇
王明道初拜太师改封孟王历永兴凤翔京兆尹封荆
王景佑二年授荆南淮南节度大使行荆州扬州牧元俨严毅不可犯天下崇惮之名闻
外夷事母王德妃孝妃每有疾躬侍药晨夕盥洁焚香
以祷至忧念不食平生寡嗜欲惟喜聚书好为文词仁宗冲年即位章献皇后临朝自以
属尊望重恐为太后所忌因阖门却绝人事谬语阳狂

不预朝谒及仁宗亲政益加尊宠尝问翊善王涣曰元昊平未对曰未也曰如此安用宰相为闻者畏其言庆历三年疾甚帝亲临问所对多忠言赐白金五千两固辞不受【按邵氏闻见录周恭肃王数取金钱于有司积数百万有司以闻诏除之御史沈邈言其不可帝惨然曰太子八人惟王一人在耳朕当以天下为养数百万钱不足计也与本传所载异】明年薨赠天策上将军徐兖二州牧燕王治平中改封吴王徽宗即位改周王【按元俨治平中改封吴徽宗即位复改封周宋史所载未晰今据东都事略补辑】子十三人允熙允良允迪允初余皆早卒熙宁中以允良子宗绛嗣允熙终右监门卫将军滁州刺史赠博州防御使博平侯允良历五节度领宁海平江两军封华原郡王改襄阳允迪累官耀州观察使居父丧不哀制降右监门卫大将军绝朝谒【按东都事略允迪为安静军节度使以居父丧不哀责授右监门卫大将军久之迁密州观察复镇安静卒赠永嘉郡王与传互异】允初累迁宁国军节度使同中书门下平章事治平元年卒赠中书令博平郡王无子以允成孙仲连为后

崇王元亿

崇王元亿早亡追赐名封代国公治平中封安定郡王徽宗时改封
钦定续通志卷一百八十九

●钦定续通志卷一百九十 宗室传十

宗室传

宋【三】

○宋三

真宗诸子

仁宗三子

英宗诸子

神宗诸子

哲宗一子

徽宗诸子

钦宗诸子 皇太子湛训

高宗诸子

孝宗诸子

光宗二子

宁宗诸子

△真宗诸子

悼献太子佑

真宗六子章穆郭皇后生太子佑 【文献通考作元佑】 章懿李皇后生仁宗温王禔昌王祗信王祉钦王祈不详言母氏温王禔蚤薨

徽宗时赐名追封

昌王祗

信王祉

钦王祈皆蚤薨徽宗时赐名追封 【按宋史不载人信王祉蚤薨事今依东都事略补辑】

悼献太子佑

悼献太子佑

悼献太子佑咸平初封信国公生九年而薨追封周王赐谥仁宗即位赠太尉中书令明道二年追册为皇太子

△仁宗三子

仁宗三子俞才人生扬王昉苗昭仪生雍王昕朱才人生荆王曦英宗以濮安懿王子为子

扬怀靖王昉生未踰月而薨追封褒王赐名及谥后封魏王治平中封周王徽宗追赠

雍恒穆王昕封寿国公三岁而薨追封豫王赐谥改封魏王治平中封唐王徽宗时追赠

荆悼懿王曦庆历三年生五年赐名封鄂王未及宣制而薨赐谥改封陈治平中封燕王徽宗时追赠 【以上三王并据东都事略补】

△英宗诸子

吴王顥 益王顥

英宗四子神宗吴王顥润王颜益王顥皆宣仁圣烈高皇后生

吴王顥

益王顥

吴王顥

吴荣王顥字仲明初名仲紉自右内率府副率为和州防御使封安乐郡公转明州观察使进祁国公赐今名 【按东都事略仲紉封祁

国公后英宗始赐名顥今据补】 拜保宁军节度使同中书门下平章事封东阳郡王治平三年出阁神宗即位进封昌王改岐王 【按顥先

改封岐复改封雍史称岐嘉二王本传不载封岐事今据神宗本纪及东都事略补】 复徙王雍哲宗即位加太保移成德横海二镇封扬王元

丰末移镇京兆凤翔 【按续通鉴长编作移镇永兴凤翔事在元佑元年与此互异】

自熙宁以来颢屡请居外至元佑初乃赐咸宜坊第一
区榜曰亲贤与弟颜对邸拜太尉诸子皆命赐官徙封徐王宣仁祔庙累拜太师徙王冀
改镇淮南荆南封楚王薨年四十七赠尚书令兼中书
令封燕王陪葬永厚陵徽宗即位改封吴王颢天资颖异尤嗜学神宗每得异书亟驰使
以示尝赐方团玉带俾服而朝颢辞乃为制玉鱼以别
之自后亲王遂踵为故实初居英宗丧丐解官终制慈圣光献太后之服易月当除颢请
如心丧礼须上禫除即吉从之子孝騫嗣终宁国军节
度使晋康郡王孝锡终嘉州团练使赠永国公

润王颜蚤薨徽宗赐名追赠

益王頵

益端献王頵初名仲恪 【东都事略作仲恪】 封大宁郡公进鄂国公改赐今名
进安乐郡王徙封高密 【按頵徙封高密郡王本传
失载今据神宗本纪补】 熙宁四年进嘉王历武胜山南西保信保静武昌武安武宁镇
海成德荆南十节度徙王曹累拜太尉元佑三年薨年
三十三赠太师尚书令魏王徽宗即位改封益王子九人孝哲右骁卫将军早亡孝弈彰
化军节度观察留后赠司空平原郡王孝参终武胜军
节度使豫章郡王孝永邢州观察使赠司空广陵郡王孝诒孝鹭孝悦孝颖孝愿皆至节
度使 【按东都事略无孝永即以孝哲为邢州观察
使广陵郡王据此则与九人之数不符当以宋史为正又孝诒作孝怡孝悦作孝忱亦与
传互异】

△神宗诸子

吴王佖 燕王俟 楚王似

神宗十四子钦成朱皇后生哲宗楚王似钦慈陈皇后生徽宗宋夫人生成王侑邢
贤妃生惠王仅冀王僩徐王侑宋婕妤生唐王俊向夫
人生褒王伸邢婉仪生豫王价武贤妃生吴王佖郭夫人生仪王伟林婕妤 【文献通考
作贤妃】 生燕王俟越王偲

成王侑惠王仅皆蚤薨徽宗时赐名追封

唐哀献王俊熙宁七年封永国公十年薨赠兖王徽宗时追封

褒王伸蚤薨徽宗时赐名追封

冀王僩熙宁八年封景国公是岁薨徽宗追赠

豫王价熙宁十年封建国公元丰元年薨赠卫王徽宗时改封

徐冲惠王侑早薨赠郟王徽宗改封 【以上七王据东都事略及文献通考增辑】

吴王佖

燕王俟

楚王似

吴王佖

吴荣穆王佖初授山南东道节度使封仪国公哲宗即位封大宁郡王进申王拜司空帝崩佖于诸弟为最长以有目疾不得立徽宗即位加太师历京兆真定尹荆扬太原兴元牧徙王陈崇宁五年薨赠尚书令兼中书令燕王又加赠侍中改封吴王子有奕武信军节度使和义郡王

燕王俛

燕王俛越王偲同母初授武定军节度使封成国公偲初授武成军节度使祁国公哲宗朝俛封咸宁郡王偲永宁郡王是后累换节钺历任尹牧俛进封莘王偲封睦王徽宗即位俛改封卫王魏王燕王偲改封定王邓王越王靖康元年同迁太师俛授河东剑南西川节度使成都牧偲授永兴成德军节度使雍州真定牧上皇幸青城父老邀之不及道遇二王哭曰愿与王俱死徐秉哲益兵卫送于金营至庆源境上俛乏食薨偲至韩州而薨

仪王伟蚤薨徽宗时赐名追赠

楚王似

楚荣宪王似初授集庆军节度使封和国公进普宁郡王元符元年出阁封简王似于哲宗为母弟哲宗崩皇太后议所立宰相章惇以似对后曰均是神宗子何必然乃立端王徽宗即位徙封蔡拜太保历镇凤翔雄武以王府史语言指斥送大理寺验治似上表待罪左司谏江公望上疏极谏帝罢公望知淮阳军然颇思其言止治其左右崇宁中徙镇荆南武宁崇宁五年薨赠太师尚书令兼中书令韩王改封楚王子有恭定国军节度使永宁郡王

△哲宗一子

哲宗一子献愍太子茂昭怀刘皇后所出三月而夭追赐名封越王谥冲献宗时改谥献愍

△徽宗诸子

郢王楷 肃王枢 景王木明巳 济王栩 徐王隶 沂王■〈木
𠂔〉 和王棡 信王榛

徽宗三十一子显恭王皇后生钦宗显仁韦皇后生高宗明达刘皇后生益王【文献通考作济阳郡王】 棣祁王模信王榛明节刘皇后生建安郡王模嘉国公椅英国公榑诸姬生兖王桎郢王楷荆王楫肃王枢景王■〈木巳〉 济王栩邠王材莘王植仪王【文献通考作

华原郡王皆从其始封也】 朴徐王棣沂王■〈木𠂔〉郢王栢和王栻汉王椿安康郡王握广平郡王榘陈王 【东都事略作陈国公】

机相国公槌 【大金国志作槌东都事略次于陈王机之前与此互异】 瀛国公槪温国公栋仪国公桐昌国公柄润国公枞

兗冲僖王桎建中靖国元年九月生一夕而陨追赐名赠王及谥 【据东都事略补】

郢王楷

肃王枢

景王■〈木巳〉

济王栩

徐王棣

沂王■〈木𠂔〉

和王栻

信王榛

郢王楷

郢王楷初名焕封魏国公进高密郡王嘉王历奉宁镇安镇东武宁保平荆南宁江剑南西川镇南河东宁海十一节度使政和八年拜太傅改王郢仍提举皇城司出入禁省不复限朝暮于外第作飞桥复道以通往来北伐之役将以为元帅会白沟失利而止钦宗即位改镇凤翔彰德军靖康初与诸王皆北迁

荆悼敏王楫崇宁间封楚国公进南阳郡王改王安乐薨追赠及谥 【据东都事略补】

肃王枢

肃王枢初封吴国公进建安郡王肃王历节度六镇靖康初金兵围京城要帝子弟为质于是遣宰臣张邦昌从王使斡喇布军 【按钦宗纪及高宗纪载靖康元年命张邦昌副康王使金军斡喇布留之肃王至康王始还邦昌留质是邦昌先从康王使金也与传互异】 为金人所留挟以北去

景王■〈木巳〉

景王■〈木巳〉初授武安军节度使封冀国公大观二年封文安郡王政和中进封王靖康元年历镇荆南镇东累迁太傅二年遣诣金营充贺正旦使既归又从帝幸青城及上皇出郊■〈木巳〉日侍左右衣不解带食不食肉上皇制发愿文述祈天请命之意以授■〈木巳〉■〈木巳〉顿首泣及北行须发尽白

济王栩

济王栩初授镇洮军节度使封鲁国公大观二年封安康郡王政和中进封王靖康元年历镇护国宁海累迁太傅同景王■〈木巳〉为贺金人正旦使既还又与何■〈卤上木下，欠代义〉为请命使金帅给栩曰自古有南即有北不可相无今所欲割地而已栩归言金帅请与上皇相见帝曰岂可使上皇蒙尘遂自出以栩从行

益王榘大观元年封杨国公进淮南郡王徙济阳后以横海军节度使进封

邠冲穆王材大观二年封魏国公薨加封及谥

祁王模大观二年封镇国公进乐安郡王历武胜兴宁军节度使进封王靖康元年改镇青海庆源

莘王植大观二年封吴国公进信安郡王授宁江军节度使进封王靖康元年改镇保平崇信 【以上四王并据东都事略补】

徐王棣

徐王棣初授镇江军节度使封徐国公宣和中徙镇镇南封高平郡王改山南东道河阳三城节度使进封王从帝北迁

沂王■〈木号〉

沂王■〈木号〉初授横海军节度使封冀国公宣和中封河间郡王历徙剑南东川威武军节度使迁太保进封王从帝北迁后与驸马

刘彦文告上皇左右谋变金遣人按问■〈木号〉彦文气折金人诛之 【谨按通鉴辑览 御批■〈木号〉身为俘系固难责其誓志

枕戈而值邦家倾覆亦当怀生还故国之念乃无端告变图害父兄金人按问而正其罪深合春秋乱臣贼子之诛不特为宗族除害獍而已也

然颠沛流离至此而尚有操室中之戈者则其家教人心从可知矣非徽钦之罪其谁之罪乎】

邠冲懿王拱政和元年封定国公二年薨追封及谥 【据东都事略补】

和王栻

和王栻初授静江军节度使封广国公宣和中封南康郡王靖康元年历徙瀛海安化军节度使加检校太傅进封王从帝北迁

信王榛

信王榛初授建雄军节度使封福国公宣和末封平阳郡王靖康元年历徙庆阳昭化军节度使加检校太傅进封王后从帝北行至庆源

亡匿真定境中时马广与赵邦杰聚兵保五马山砦阴迎榛归奉为主两河遗民闻风响应榛遣广诣行在奏愿总大将与诸砦乡兵约日大

举广既至黄潜善汪伯彦疑其非真上识榛于书遂除河外兵马都元帅潜善伯彦终疑

之广将行密授朝旨使察榛复命广听诸路节制广知
事不成遂留大名府不进金人恐广以援兵至急发兵攻诸砦断其汲道诸砦遂陷榛亡
不知所在或曰后与上皇同居五国城

汉王椿政和二年封庆国公薨追封

安康郡王樞政和二年封卫国公复改封郛靖康二年进封

广平郡王榘政和三年封韩国公靖康元年进封

陈王机政和五年与瀛国公榘同封

相国公榘政和四年封

建安郡王模政和五年封惠国公宣和中进封

嘉国公椅政和八年封

温国公栋宣和元年封

英国公榘宣和二年封

仪国公桐宣和二年封

昌国公柄宣和四年封

润国公杻宣和七年封 【以上十三王并据东都事略补】

△钦宗诸子 皇太子谿训

皇太子谿训

钦宗二子仁怀朱皇后生太子谿次子训不详其母氏 【按宋史自徽宗以上俱标
某宗儿子自钦宗以后俱不列标题今据东都事略
文献通考补辑之以符史例】

太子谿政和七年生为嫡皇孙徽宗喜蔡京奏除检校少保常德军节度使封崇国
公从之会王黼谋倾京言其以东宫比人主遂降为高
州防御使靖康元年还昭庆军节度使大窳郡王进检校少傅窳国军节度使四月立为
皇太子帝幸青城命孙傅谢克家辅太子监国称制未
几金人胁二帝谕太子出城统制吴革力请留欲以所募士微服卫太子溃围以出傅不
许乃谋匿民间别求状类太子者并宦者二人杀之给
以宦者窃太子欲投献都人争之并伤太子迟疑不决者五日吴升莫俦督胁甚急范琼
恐变生遂拥太子与皇后共车以出百官军吏奔随之
哭太子呼云百姓救我哭声震天已而北去

训北地所生有碭山人留遇僧者金人见之曰全似赵家少帝遇僧窃喜绍兴十年
三京路通诏求宗室遇僧自言少帝第二子守臣遣赴
行在过泗州州官孙守信白其守请于朝诏守信劾治遇僧伏罪后有自北至者曰渊圣
小大王训见居五国城

△高宗诸子

元懿太子勇 信王璩

高宗一子太子勇潘贤妃生信王璩孝宗皆以宗室子为子

元懿太子勇

信王璩

元懿太子勇

元懿太子勇建炎元年生于南京拜检校少保集庆军节度使封魏国公金人侵淮南帝幸临安会苗傅刘正彦作乱逼帝禅位于勇改元明受既而傅等伏诛帝复位以为皇太子从幸建康薨

信王璩

信王璩字润夫初名伯玖太祖七世孙秉义郎子彦子也生而聪慧初伯琮以宗子被选入宫高宗命鞠于婕妤张氏吴才人亦请于帝遂以伯玖命才人母之赐名璩除和州防御使时生七岁矣伯琮以建国公就傅璩独居禁中俄拜节度使封吴国公宰执赵鼎刘大中王庶等坚持之命不果行会秦桧专政遂除保大军节度使封崇国公绍兴十五年进封思平郡王出就外第时伯琮已封普安郡王璩官属礼制相埒号东西府踰年改镇武昌子彦卒璩去官持服终丧还旧官显仁太后崩普安郡王立为皇太子璩因加恩称皇侄名位始定判大宗正事孝宗即位授少保改镇静江判西外宗正司璩累章乞间改醴泉观察使淳熙中进少傅【朝野杂记作进少保】高宗崩奔赴得疾踰年薨追封信王累赠太师子四人师淳熙永州防御使师灏师澹师厯并武翼大夫【按朝野杂记载师淳绍熙初换南班师澹真除刺史师路作师潞以通州团练使奉祠与传所载详略互异附识于此】

△孝宗诸子

庄文太子愔 魏王恺

孝宗四子太子愔魏王恺光宗邵王恪皆成穆郭皇后所生

庄文太子愔

魏王恺

庄文太子愔

庄文太子愔初名愉补右内率府副率寻赐名愔除右监门卫大将军荣州刺史孝宗为皇子时愔拜蕲州防御使及即位除少保永兴军节度使封邓王故事皇子出阁封王兼两镇然后加司空愔自防御使躡拜少保异数也干道元年立为皇太子三年薨年二十四子挺生甫晬除福州观察使封荣国公干道九年卒追封豫国公宁宗时命宗子希璘为太子后希璘太祖九世孙也赐名搢厯忠州防御使后更名思正

魏王愷

魏惠宪王愷初补右内率府副率转右监门卫大将军贵州团练使孝宗即位拜雄武军节度使封庆王庄文太子薨愷次当立帝意未决既而以恭王英武类己竟立之加愷雄武保宁军节度使封魏王判宁国府命宰执设祖于玉津园王登车顾谓虞允文曰更望相公保全比至镇奏朝天申节许之府长史上言欲与司马分治郡俾王受成愷奏曰臣被命判府今专委长史司马是处臣无用之地况一郡置三判府臣恐吏民纷竞不一徒见其扰长史司马宜主钱谷讼牒卑拟呈臣臣依而判之庶上下安事益易治又请增士人贡额朝廷悉从之愷究心民事筑圩田之隳圯者帝手诏嘉劳之淳熙元年徙判明州辍属邑田祖以瞻学加荆南集庆军节度使行江陵尹寻改永兴成德军节度使扬州牧七年薨年三十五赠淮南武宁军节度使扬州牧兼徐州牧子二人摠早卒柄封吴兴郡王领昭庆军节度使开禧三年薨封沂王子垓早夭诏立宗室希瞿子为其后加福州观察使即镇王竑也

邵悼肃王恪早薨追封及谥

△光宗二子

光宗二子挺宁宗皆慈懿李皇后生

挺保宁军节度使蚤薨

△宁宗诸子

景献太子询 镇王竑

宁宗九子长子未名而夭莫详母氏恭淑韩皇后生 兗 王垓 邠王坦 郢王增 【按世系表阙郢王名今据本纪补】 华王垧 锺夫人生 顺王圻 申王壙 次肃王垧 邠王坻 史不言其母氏景献太子询理宗镇王竑皆以宗室为子

兗冲惠王垓

邠冲温王坦

郢冲英王增

华冲穆王垧

顺冲怀王圻

申冲懿王壙

肃冲靖王垧

邠冲美王坻皆早薨追封及谥 【光宗二子宁宗九子并据文献通考增辑】

景献太子询

镇王竑

景献太子询

景献太子询燕王后太祖十一世孙也初名与愿宣宗既失兖王从宰执京镗等请取与愿养于宫中年六岁赐名曦除福州观察使拜威武军节度使封卫国公禧元年时边事益急金人请诛首谋用兵者曦用翊善史弥远计奏韩侂胄轻起兵端上危宗社宜黜罢以安边境从之立为皇太子封荣王更名昉诏御朝太子侍立宰执日赴资善堂会议出居东宫更名询嘉定十三年薨年二十九

镇王竑

镇王竑希瞿子也初沂王薨无嗣以竑为之后赐名均寻改赐名贵和太子询薨立为皇子赐今名授宣武军节度使封祁国公嘉定十五年封齐国公十七年六月辛未竑生子诏告天地宗庙社稷宫观八月赐名铨丁亥铨薨追封永宣侯竑好鼓琴丞相史弥远买美人善鼓琴者纳诸御使矚竑动息美人知书慧黠竑嬖之宫壁有舆地图竑指琼崖曰吾他日得志置史弥远于此又尝呼弥远为新恩以他日非新州则恩州也弥远闻之因七月七日进乞巧奇玩以覘之竑乘酒醉于地弥远大惧日夕思倾竑而竑不知也时沂王犹未有后理宗方选人沂邸赐名昀一日弥远独与国子学录郑清之语曰皇子不堪负荷闻后沂邸者甚贤今欲择讲官君其善训迪之事成弥远之坐即君坐也乃以清之兼魏惠宪王府教授清之即以昀诗文翰墨示弥远誉之不容口弥远问大要竟何如清之曰人之贤更仆不能数然一言以断之曰不凡弥远颔之策立之意益坚宣宗崩弥远始遣清之往告昀以将立之之意时竑跂足以需宣召久而不至弥远在禁中遣快行宣皇子令之曰今所宣是沂靖惠王府皇子非万岁巷皇子苟误则汝曹皆处斩竑不能自己属目墙壁间见快行过其府而不入疑焉已而拥一人径过天已暝不知其为谁甚惑昀既至弥远引入枢前举哀毕然后召竑竑闻命亟赴至则每过宫门禁卫拒其从者弥远亦引入枢前举哀毕引出帷殿帅夏震守之既而召官立班听遗制则引竑仍就旧班竑愕然未几遥见烛影中一人已在御坐宣制毕合门赞呼百官拜舞贺新皇帝即位竑不肯震捽其首下拜皇后矫遗诏竑进封济阳郡王判宣国府帝因加竑少保进封济王令就赐第宝庆元年湖州人潘壬与其弟丙谋立竑竑闻变匿水窦中壬等得之拥至州治以黄袍加身竑号泣不从不获己与之约曰汝能勿伤太后官家乎众许诺遂发军资库金帛会子犒军命守臣谢周卿率官属入贺伪为李全榜揭于门数弥远废立罪比明视之皆太湖渔人及巡尉兵卒不满百人竑知谋不成率州兵讨之遣王元春告于朝

弥远命殿司将彭任讨之至则事弥远令客泰天锡【宋元通鉴作余天锡】托召医治竝疾天锡逼竝缢于州治赠少师保静镇潼军节度使右正言李知孝累奏追夺王爵降封巴陵县公端平元年诏复官爵景定五年度宗追复节度使德佑元年赠太师尚书令封镇王谥昭肃

钦定续通志卷一百九十

●钦定续通志卷一百九十一 宗室传十一

宗室传

辽【一】

○辽一

肃祖诸子

懿祖诸子

元祖诸子

德祖诸子

△肃祖诸子

肃祖四子长学顺次懿祖次哈喇次辖哩皆昭烈皇后生【案原史太祖以上诸子不为立传今依皇祖表增辑冠以标题以着二院三父房之始其子孙散见于列传者酌为增辑附于其后】

学顺字雅逊为德呼勒部额尔奇木分五锡林为七六昭为十一【案辽国语解五锡林即五院以五锡林为一院也昭百数也辽有六百家奚后为院又按营卫志天赞元年太祖以德呼勒部强大难制析五锡林为五院六昭为六院则又似太祖时始分也】其后为五院额尔奇木房

哈喇字古昆洽礼字达年皆为锡里其后为六院郎君房

△懿祖诸子

懿祖四子长苏拉次塔拉次元祖次尼古察皆庄敬皇后生

苏拉为锡林早卒

塔拉字赫德九任额尔奇木其后为六院额尔奇木房尼古察字页卜肯为锡林善射年几冠堕马卒其后为六院房

△元祖诸子

扬珠【托云 硕格 达鲁 希达 善补 华格鸿果 玛鲁 和啰木萨葛】

实鲁【斡 罗卜科 资忠 达鲁哈溜 仙童

穆济】

元祖四子长玛鲁次扬珠次实鲁次德祖皆简献皇后生

玛鲁为锡林早卒

扬珠

实鲁

扬珠

扬珠字达年身長八尺多力能裂■〈鹿外加内〉皮语音如钟三为德呼勒部额尔奇木年四十五薨重熙中追封蜀国王子二和尔果勒济摩绰其后为孟父房

托云

硕格

达鲁

希达

善补

华格

鸿果

玛噜

和啰本萨噶

托云

托云字托纽父摩绰尝为额尔奇木托云性端直会同中领九锡林部政济宽猛世宗即位为特哩袞大祿三年兼政事令封漆水郡王及穆宗立以匡赞功尝许以本部大王后将葬世宗托云恳言于帝曰臣蒙先帝厚恩未能报及大葬臣请陪位帝由是不悦寢其议薨

硕格

硕格字穆克迪横帐孟父之后幼为太祖所养既冠为右皮室详袞从伐渤海战有功天显七年授三河乌尔古部都详袞平易近民民安之以故久其任会同闲为特哩袞时晋主石重贵渝盟帝亲征晋将杜重威拥众拒溁沱月余帝由他渡济硕格与赵延寿据中渡桥重威兵却遂降是岁入汴世宗即位硕格奉太宗丧归上京佐皇后出师坐是免官卒

达鲁

达鲁字阳隐孟父楚国王之后性质直多膂力察克作乱达鲁闻之入见寿安王慷慨言曰愿得精兵数百破贼党王嘉其忠穆宗即位为北院宣徽使帝以飞狐道狭诏达鲁广之明年将兵援河东至太原与汉王会于高平击周军败之仍降其众忻代二州叛将兵讨之会搭喇至败周师于忻口师还卒

希达

希达孟父楚国王之后便弓马勇于攻战景宗时多任以军事统和四年为右皮室

详袞时宋将杨继业陷山西郡县希达从枢密使色珍
讨之凡战必以身先矢无虚发继业败于朔州之南匿深林中希达望袍影而射继业堕
马先是军令须生禽继业希达以故不能为功后太后
南伐屡有战绩以病卒

善补

善补字瑶升孟父楚国王之后纯谨有才智景宗即位授千牛卫大将军迁大同军
节度使及伐宋韩匡嗣与耶律刷将兵由东路进善补
以南京统军使由西路进善补闻匡嗣失利敛兵还干亨末与宋军战于满城为伏兵所
围色珍救之获免以失备大杖决之统和初为特哩袞
会宋来侵善补为都元帅逆之不敢战故岭西州郡多陷罢特哩袞以其叔安图【按此
安图乃扬珠曾孙事详列传非德帝子安图也原文
误】有匡辅世宗功帝愍之征善补为南府宰相迁南院大王会再举伐宋欲攻魏府召
众集议将士以魏城无备皆言可攻善补曰攻固易然
城大叵量若克其城士卒贪俘掠势必不可遏且傍多巨镇各出援兵内有重敌何以当
之帝乃止善补性懦守静凡征讨惮攻战急还以故战
多不利年七十四卒

华格

华格字宏隐孟父楚国王之后善骑射干亨初为北院林牙统和四年南侵宋华格
擒谍者知敌由海路来袭即先据平州要地事平拜上
京留守迁北院大王十六年复侵宋为先锋破敌于遂城以功迁南院大王寻改北院枢
密使开泰元年伐准布俘获甚多帝嘉之封幽王后边
吏奏自华格还阙粮乏马弱勢不可守帝复遣华格经略西境华格与边将深入闻番部
逆命居伊济水华格徐以兵进敌望风奔溃获羊马及
辎重路由白拔烈遇阿尔斯兰回鹘掠之都监纽干哩继至谓华格曰尹误矣此部实效
顺者华格悉还所俘诸蕃由此不附帝使案之削王爵
以侍中遥领大同军节度使卒弟鸿果

鸿果

鸿果字和多沁统和闲累迁顺义军节度使入为北面林牙太平元年加同政事门
下平章事出为彰国军节度使兼山北道兵马都部署
徙武定军节度使拜特哩袞六年讨准布有功圣宗尝刺臂血与鸿果盟为友礼遇尤异
拜南府宰相改上京留守重熙六年迁南院大王御制
诰辞以宠之十三年加裕悦帝悯其劳复授武定军节度使卒讣闻帝哭曰惜哉善人丧
至亲临奠焉

玛噜

玛嚕字扬隐孟父楚国王之后性宽和善谐谑凡亲朋会遇一坐尽倾恬于荣利与
鸿果为刺血友鸿果为特哩袞荐补为宿直官重熙初
迁旗鼓伊喇详袞为人畏慎容物或有面相陵折者恬然若弗闻不臧否世务以故帝益
亲狎三年迁崇德宫使为特哩袞御制诰辞以袞之拜
北院宣徽使宠遇过宰辅帝常以兄呼之改辽兴军节度使卒子努克特终南京宣徽使
和啰本萨噶

和啰本萨噶字乌库哩孟父房之后重熙末补祗候郎君清宁初加安州团练使大
康中历怀德军节度使奚六部图哩太尉诏与枢密官
措画东北边事改左护卫太保侍帝言多率易察无他肠以故帝优贷之八年知西北路
招讨使事时边部尼都格尔等来侵和啰木萨噶诱北
准布豪默古斯攻之俘获甚众以功加左仆射复讨尼都格尔等误击默古斯北准布由
是叛命遣都监张九讨之不克二室韦与六院部特默
羣牧宫分等军俱陷于敌坐不以实闻削官寿隆闲累迁特哩袞兼侍中赐保节功臣道
宗崩与宰相耶律俨总山陵事干统中为南院大王 【
据天祚纪增】 致仕卒

实鲁

实鲁字苏呼骈肋多力贤而有智初约尼氏可汗岁贡于突厥至实鲁为裕悦免焉
始教民种树桑麻年五十七为子华格所弑重熙中追
封隋国王其后为仲父房孙斡

斡

罗卜科

资忠

达鲁

哈瑠

仙童

穆济

斡

斡字达年南院额尔奇木乌苏子少有器识人以公辅期之太祖时虽未官常任以
事太宗即位为特哩袞天显末帝援河东斡为先锋败
张敬达军于太原北会同中迁北院大王及伐晋复为先锋与梁汉璋战于瀛州败之太
宗崩于栾城斡与厚定策立世宗令诸将曰有不从者
以军法从事诸将皆曰诺世宗即位赐宫户五十拜裕悦卒

罗卜科

罗卜科字信盛太宗从侄初太祖制契丹国字罗卜科以赞成功授林牙监修国史

后率偏师为西南边大详袞从伐党项有功会河东节度使石敬瑭为其主所讨遣人求援罗卜科导送于朝如其请帝亲率师往援罗卜科从击唐将张敬达于太原北败之会同初从讨党项俘获最诸将师还天册中拜裕悦六年为北院大王卒子贤适有传

资忠

耶律资忠字乌延系出仲父房兄果罗善属文圣宗重之时妻弟之妻阿古与奴通将奔女真国果罗追及奴杀之阿古自经阿古母有宠于太后事闻太后怒将杀之帝度不能救遣人诀别问以后事果罗谢曰陛下悯臣无辜死且不朽既死人多冤之资忠博学工辞章年四十未仕圣宗知其贤召补宿卫数问以古今治乱资忠对无隐开泰中授中丞眷遇日隆初高丽内属取女真六部地以赐至是贡献不时至诏资忠往问故高丽无归地意由是权贵数短之出为上京副留守四年【按高丽传资忠再使高丽在开泰三年与本传异】再使高丽留弗遣资忠每怀君亲辄有著述号西亭集帝与羣臣宴时一记忆曰资忠亦有此乐乎九年高丽上表谢罪始送资忠还帝郊迎同载以归命大臣宴劳留禁中数日谓曰朕将屈卿为枢密何如资忠对曰臣不才不敢奉诏乃以为林牙特哩袞事初资忠在高丽弟昭为着帐郎君坐罪没家产至是乃复横帐且还旧产诏以外戚女妻之是时枢密使萧和卓少师萧巴噶有宠资忠不肯俛附诋之帝怒夺官数岁出知来远城事历保安昭德二军节度使圣宗崩表请会葬既至伏梓宫大恸气绝而苏兴宗命医治疾久之言国舅侍中无忧国心陛下不当复用唐景福旧号于是用事者恶之遣归镇卒弟昭有传

达鲁

达鲁字伊聂仲父房之后习兵事为左皮室详袞统和二十八年伐高丽达鲁率本部军与博诺等擒康肇李元蕴于铜州帝壮之曰以卿英才为国戮力真吾家千里驹也明年为北院大王出为乌尔固迪里部都详袞卒

哈瑠

哈瑠字索纽仲父隋国王之后有明识笃行义举止严重工为诗统和闲召摄御院通进开泰三年稍迁乌尔固迪里部都监俄知详袞事通里部叛将宫分军从枢密使世良讨平之加千牛卫大将军重熙元年累迁至同知上京留守改奚六部图噜太尉为枢密使萧嘉哩所忌帝欲召用哈瑠嘉哩言目病不能视议遂寝四年召为北面林牙帝曰朕早欲用卿闻有疾故待之至今哈瑠对曰臣昔有目疾才数月耳然亦不至于昏第臣弩拙不能事权贵是以不获早覩天颜非陛下圣察则愚臣岂有今日邪诏

进述怀诗帝嘉叹方将大用卒

仙童

仙童仲父房之后重熙初为宿直官累迁特里袞都监以宽厚称富珠哩叛仙童为五国节度使率师讨之擒其帅托多罗又击威叛众降之改彰国军节度使拜北院大王清宁二年知黄龙府事迁侍卫亲军马步军都指挥历忠顺武定二军节度使致仕封蒋国公咸雍初徙封许国卒

穆济

穆济字留隐仲父隋国王之后初以皇族入侍景宗即位为林牙以干结称保宁闲迁枢密副使宋攻河东南府宰相刷为都统将兵往援穆济监其军及白马岭之败仅以身免宋乘锐攻燕将奚兵翊休格击败之以功释前过十一年从都统韩匡嗣伐宋战于满城为宋将所给诸军奔溃独穆济部伍不乱徐整旗鼓而归玺书褒谕改南海军节度使干亨二年拜枢密副使统和初为东京留守宋将曹彬米信等侵边穆济引兵至南京先缮守御备及车驾临幸穆济与休格逆战于涿之东克之迁开远军节度使故事州民岁输税斗粟折钱五穆济表请折钱六部民便之统和末卒

△德祖诸子

埒克【巴哩岱哈里雅】 达喇【和卓】 伊德实 安图 苏【诺袞 博迪 布库 华善特默 章努 庶成 庶箴】

德祖六子长太祖次埒克次达喇次伊德实次安图皆宣简皇后生次苏不详其母氏后并为季父房

埒克

达喇

伊德实

安图

苏

埒克

埒克字绥兰性愚险太祖即位为特哩袞讨聂哱部破之因与弟达喇安图等谋乱事觉按问具伏太祖令誓而舍之曰汝谋此事不过欲富贵耳出为德哱勒部额尔奇木从太祖亲征统本部兵攻下平州复谋为乱诱羣弟据西山以阻归路太祖闻而避之次赤水城埒克诈降复使舒苏焚明王楼大掠而去至布扎尔哈尔吉二河与追兵战众溃及雅里河孟古部人

邀击之埒克轻骑遁去至榆河先锋达鲁生擒之太祖
不忍加刑杖而释之神册二年自幽州南奔为人所杀【按资治通鉴云埒克达喇率其
众奔晋晋王厚遇之养为假子仕至刺史后复奔梁
同光元年唐灭梁与赵岩等族诛于市本传失载附录于此】子赛保巴哩岱

巴哩岱

哈里

巴哩岱

巴哩岱字海兰太宗即位以亲爱见任会同七年讨石重贵巴哩岱进围德州下之
擒刺史师居璠等二十七人九年再举兵次溇沱河降
杜重威战功居多太宗入汴以功授安国军节度使总领河北道事师还州郡往往叛以
应刘知远巴哩岱不能守而归世宗即位迁中京留守
卒子哈里

哈里

哈里【此与前哈里非一人】字留隐察克之乱其母达鲁与焉遣人召哈里哈
里拒之乱平达鲁以子故获免哈里俭素不喜声利以
射猎自娱虽居闲人敬之若贵官保宁初拜彰国军节度使迁特哩衮秩满称疾不仕久
之复为南院大王及曹彬米信等来侵哈里有却敌功
赐资忠保义匡国功臣帝屡亲征哈里在南院十余年镇以宽静户口增给时议重之封
漆水郡王迁上京留守薨诏以家贫给葬具

达喇

达喇字伊勒都堪天显元年为中台省左丞相性敏给太祖曰达喇之智卒然图功
吾所不及回鹘使至无能通其语者太祖曰达喇聪敏
可使迓之相从二旬能习其言语书契因制契丹小字数少而该贯后与兄埒克谋反埒
克遁达喇与安图降太祖杖而释之孙和卓

和卓

和卓

和卓字诺衮幼不好弄临事明敏善谈论初以近族入侍每从征伐有功保宁初加
右龙虎卫上将军以宋师屡梗南边拜涿州刺史西南
兵马都监招安巡检等使赐推忠奉国功臣和卓久任边防务镇静不妄生事以邀近功
邻壤敬畏属部又安宋数遣人结欢冀达和意和卓表
闻其事帝许议和安边怀敌多有力焉拜左金吾卫上将军秩满遥摄镇国军节度使卒
和卓智而有文晓畅戎政镇范阳时尝领数骑径诣雄
州北门与郡将立马陈两国利害及周师侵边本末辞气慷慨左右壮之自是边境数年
无事识者以为和卓一言贤于数十万兵

伊德实

伊德实字爱新与埒克作乱兵败太祖赦之后与埒克遁至榆河自刺不死被擒释之太祖崩遗诏守太师政事令辅东丹王淳钦皇后遣

司徒华沙杀于路重熙闲追封许国王子四人瑠格帕克哈噶哩实奇具见逆臣传

安图

安图字猥隐神册元年讨平云州二年为特哩袞天赞元年征渤海破考相兵三万余人安边郑颀定理三府叛平之太宗即位有定策功

会同中伐晋率兵先出雁门下忻代世宗初立以兵往应及鲁呼战于泰德泉败之封东丹国赐号明王初安图与兄埒克谋乱其妻黏睦姑告

变太祖誓而免之复叛被擒杖而释之及其子察克以弑逆被诛穆宗赦其罪放归田里

苏

苏字伊勒都堪性柔顺事上忠谨言无隐情太祖尤爱之神册五年为特哩袞六年为南府宰相以贿闻民颇怨焉沧州节度使刘守文求

救太祖命苏往解沧州围埒克诈降往来其闲既平苏力为多天赞三年与迪里略地西南天显初从征渤海师还薨太祖二十功臣苏其一也

孙诺袞

诺袞

博迪

布库

华善

特默

章努

庶成

庶箴

诺袞

诺袞字延寔统和四年宋杨继业来侵诺袞为黄皮室乱都监击败之尽复所陷城邑军还加诸卫小将军及伐宋有功迁黄皮室详袞六

年再举将先锋军败宋游兵于定州为东京统军使加金叶崇禄大夫从奚王和硕鼐伐乌舍以战失利削金紫崇禄阶十九年拜南府宰相二

十一年复伐宋擒其将王继宗于望都俘杀甚众以功加同政事门下平章事二十六年为辽兴军节度使寻复为南府宰相开泰初加尚父卒

孙博迪

博迪

博迪字萨巴重熙初补牌印郎君清寔初稍迁知易州去官部民请留许之咸雍八

年改彰国军节度使上猎达里库山博迪谒于行宫帝问边事对曰自应州南境至天池皆我耕牧之地清宁闲边将不谨为宋所侵烽堠内移似非所宜道宗然之拜北面林牙后遣人使宋得其侵地命博迪往定疆界还拜南院宣徽使大康四年迁忠顺军节度使寻为南院大王改同知南京留守事召拜南府宰相赐贞良功臣封吴国公为北院枢密使廉谨奉公知无不为大安中致仕卒子哈玛尔北院枢密副使

布库

布库字提隐太祖弟苏四世孙以武勇称统和初为涿州刺史从伐高丽有功开泰末为上京内客省副使太平二年城鸭绿江布库守之在镇有治绩五年改广德军节度使寻迁东京统军使莅政严肃诸部慑服九年大延琳叛以书结保州夏行美执其人送布库布库入据保州延琳气沮以功拜特哩袞十一年为子铁骊所弑

华善

华善字特哩系出季父房重熙初补祗候郎君时常笃于亲亲凡三父之后皆序父兄行第于华善尤狎爱然每侍宴饮虽诙谐未尝有一言之过由是帝益重之厯积庆永兴宫使累迁至同知南院宣徽使事南面林牙十六年出为怀化军节度使罢召为御史大夫二十三年因大册加天平军节度使检校太师徙中京路案问使卒华善雅有美行数以财恤亲友人皆爱重然嗜酒不事事晚年沈湎尤甚人称为酒仙云

特默

特默季父房之后重熙闲为北克累迁六部图噜太尉大安四年为倒挾岭节度使顷之为禁军都监是冬讨默古斯斩首二千余级十年复讨之既捷授南院宣徽使寿隆元年为北院大王四年知黄龙府事卒

章努

章努字塔玛雅季父房之后父扎拉养高不仕章努明敏善谈论大安中补牌印郎君干统元年累迁右中丞兼领牌印宿直事六年以直宿不谨降知内客省事天庆四年授东北路统军副使五年改同知咸州路兵马事及天祚伐金萧呼敦为先锋都统章努为都监渡鸭子河章努与魏国王淳妻兄萧迪里及其甥萧雅里等谋立淳诱将卒三百余人亡归既而天祚为金所败章努乃遣迪里雅里以废立事驰报淳淳犹豫未决会行宫使者伊苏持天祚御扎至备言章努叛命淳对使者号哭即斩迪里雅里首以献天祚章努见淳不从诱草寇数百攻掠上京取府库财物至相州率僚属告太祖庙西至庆州复祀诸庙仍述所以举兵之意移檄州县诸陵官僚士卒稍稍属心时饶州渤海乃侯槩等相继

来应众至数万趋广平淀其党耶律寔古等暴横不法劫掠妇女财畜章努度不能制内怀悔恨又攻上京不克北走金将阿固济率兵追败之杀其将耶律穆尔济擒贵族二百余人其妻女配役绣院或散诸近侍为婢余得脱者皆遁去章努诈为使者欲奔金为逻者所获缚送行至伏诛

庶成

庶成字喜隐季父房之后父乌津检校太师庶成幼好学书过目不忘善辽汉文字于诗尤工重熙初补牌印郎君累迁枢密直学士与萧罕嘉努各进四时逸乐赋帝嗟赏初契丹医人鲜知切脉审药帝命庶成译方脉书行之自是人皆通习虽诸部族亦知医事时入禁中参决疑议偕林牙萧韩家努等撰实录及礼书与枢密副使萧德【按萧德传云迁枢密副使诏与耶律庶成同修律令当即此事也原文作耶律德误今改正】修定法令帝诏庶成曰方今法令轻重不伦法令者为政所先人命所系不可不慎卿其审度轻重从宜修定庶成参酌古今刊正讹谬成书以进帝览而善之庶成方进用为妻呼图克所诬以罪夺官绌为庶耶律使吐蕃历十二年清寔闲始归帝知其诬诏复本族仍迁所夺官卒弟庶箴

庶箴

庶箴字辰甫善属文重熙中为本族将军咸雍元年同知东京留守事俄徙乌衍突厥部节度使九年知苏州事明年迁都林牙上表乞广本国姓氏曰我朝创业以来法制修明惟姓氏止分为二耶律与萧而已始太祖制契丹大字取诸部乡里之名续作一篇着于卷末臣请推广之使诸部各立姓氏庶男女婚媾有合典礼帝以旧制不可遽厘不听太康二年出耶律伊苏为中京留守庶箴与耶律孟简表贺顷之伊苏复为枢密使事专权恣虐庶箴私见伊苏泣曰前抗表非庶箴之愿也伊苏信其言乃得自安闻者鄙之八年致仕卒子富鲁富鲁字努展幼聪悟好学甫七岁能诵契丹大字习汉文未十年博通经籍重熙中举进士第主文以国制无契丹试进士之条闻于帝以庶箴擅令子就科目鞭之寻命富鲁为牌印郎君应诏赋诗立成以进帝嘉赏顾左右曰文才如此必不能武事富鲁奏曰臣自蒙义方兼习骑射在流辈中亦可周旋帝未之信会从猎三矢中三兔帝奇之转通进是时父庶箴尝寄戒谕诗富鲁答以赋众称其典雅宠遇渐隆清寔初卒

钦定续通志卷一百九十一

●钦定续通志卷一百九十二 宗室传十二

- 2062 -

宗室传

辽【二】

○辽二

太祖诸子

太宗诸子

世宗诸子

景宗诸子

圣宗诸子

兴宗诸子

道宗一子

天祚诸子

△太祖诸子

义宗倍【隆先道隐】 章肃皇帝鲁呼【喜隐】 雅勒呼

太祖四子淳钦皇后生倍次太宗次鲁呼宫人萧氏生雅勒呼【按原史旧无标题今依皇子表补】

义宗倍

章肃皇帝鲁呼

雅勒呼

义宗倍

义宗倍小字托云聪敏好学外宽内挚神册元年立为皇太子时太祖问侍臣曰受命之君当事天敬神有大功德者朕欲祀之何先皆以佛对倍曰孔子大圣万世所尊宜先太祖大悦即建孔子庙诏皇太子春秋释奠尝从征乌尔克党项为先锋都统及经略燕地太祖西征留守京师因陈取渤海计天显元年从征拔扶余城帝欲括户口谏曰今始得地而料民民必不安若乘破竹之势径造辉罕城克之必矣太祖从之倍与大元帅德光为前锋夜围城大譟譟降复叛太祖破之改其国曰东丹名其城曰天福以倍为人皇王主之仍赐天子冠服建元甘露称制置左右大次四相百官一用汉法岁贡布十万端马千匹谕之曰此地濒海非可久居留汝抚治以见朕爱民之心驾将还倍作歌以献陛辞号泣而出遂如仪坤州未几诸部多叛大元帅讨平之太祖讣至奔赴山陵知皇太后意欲立德光乃与羣臣请于太后而让位焉太宗既立见疑以东平为南京徙倍居之尽迁其民又置卫士阴伺动静倍既归国起书楼于西宫作乐田园诗唐明宗闻之遣人跨海持书密召倍倍因畋海上使再至倍谓左右曰我以天下让主上今反见疑不如适他国以成吴泰伯之名立木

海上刻诗曰小山压大山大山全无力羞见故乡人从
此投外国携高美人载书浮海而去唐以天子仪卫迎倍至汴明宗以庄宗后宫 【原作
庄宗后考五代会要夏氏实庄宗昭容封虢国夫人
非后也契丹国志作后宫今据改】 夏氏妻之赐姓东丹名之曰慕华改瑞州为怀化军
拜怀化军节度使瑞慎等州观察使复赐姓李名赞华
移镇滑州遥领虔州节度使倍虽在异国常思其亲问安之使不绝后从珂弑其君自立
倍报太宗请讨之及太宗立石敬瑭为晋主加兵于洛
从珂欲自焚召倍与俱倍不从遣壮士李彦绅害之时年三十八敬瑭入洛丧服临哭以
王礼权厝后太宗改葬于医巫闾山谥曰文武元皇王
世宗即位谥让国皇帝陵曰显陵统和中更谥文献重熙二十年增谥文献钦义皇帝庙
号义宗又谥二后曰端顺曰柔贞 【按柔贞后实生
世宗天禄初加尊皇太后察克反同遇害】 倍初市书至万卷藏于医巫闾绝顶之望海
堂通阴阳知音律精医药砭熨之术工辽汉文章善画
然性刻急好杀婢妾微过常加刳灼夏氏惧而求削发为尼五子长世宗次隆科舒隆先
道隐各有传

隆先

道隐

隆先

平王隆先字团隐母大氏景宗即位封平王未几兼政事令留守东京薄赋税省刑
狱恤鰥寡数荐贤能之士后与统军耶律实鲁同讨高
丽有功还薨葬医巫闾山之道隐谷平王博学能诗有闾苑集行于世保宁之季其子辰
格与渤海官属谋杀其父举兵作乱帝命轘裂于市

道隐

晋王道隐字留隐母高氏道隐生于唐人皇王遇害时年尚幼洛阳僧匿之因名道
隐太宗灭唐还京赐外罗山地居焉性沈静有文武才
时人称之为景宗即位封蜀王为上京留守干亨元年迁守南京号令严肃民获安业徙封
荆王统和初薨追封晋王

章肃皇帝鲁呼

章肃皇帝鲁呼一名鸿观字奚隐少勇悍多力而性残酷太祖尝观诸子寝鲁呼缩
项卧内曰是必在诸子下又尝大寒命三子采薪太宗
不择而取最先至人皇王取其干者束而归后至鲁呼取少而弃多太祖曰长巧而次成
少不及矣而母笃爱鲁呼天显五年遣徇地代北攻寰
州多俘而还遂立为皇太弟 【按太宗纪册为寿昌皇太子与此互异】 兼天下兵马
大元帅太宗亲征留守京师世宗即位镇阳太后遣鲁

呼将兵击之至泰德泉为安图瑠格所败耶律乌哲入谏太后鲁呼在侧作色曰我在乌云安得立乌哲曰柰公酷暴失人心何太后顾鲁呼曰昔我与太祖爱汝异于诸子谚云偏怜之子不保业难得之妇不主家我非不欲立汝汝自不能矣和约既定趋上京会有告鲁呼与太后谋废立者徙鲁呼祖州禁其出入穆宗时其子喜隐谋反辞连鲁呼囚之死狱中年五十葬玉峰山西谷统和中追谥钦顺皇帝重熙二十一年更谥章肃后曰和敬二子宋王喜隐卫王完

喜隐

喜隐

喜隐字完德雄伟善骑射封赵王应历中谋反事觉以亲释之未几复反下狱景宗即位闻有赦自去其械而朝帝怒诛守者复置于狱保宁改元乃宥之妻以皇后之姊复爵宋王喜隐轻僇无恒小得志即骄帝尝召不时至怒而鞭之由是愤怨谋乱贬而复召适是帝与刘继元书辞意卑逊谏曰本朝于汉为祖书旨如此恐亏国体帝寻改之授西南面招讨使命之河东索吐蕃户稍见进用复诱羣小谋叛上命械其手足筑圜土囚祖州宋降卒二百余人欲劫立喜隐以城坚不得入立其子留礼寿上京留守楚实勒擒之留礼寿伏诛赐喜隐死

雅勒呼

雅勒呼字达年性沉默善骑射天显三年救耶律刷于定州为李嗣源所获石晋立始得还为特哩袞薨子迪里南府宰相希达北院大王

△太宗诸子

雅斯哈 天德 迪里 必舒

太宗五子靖安皇后生穆宗次雅斯哈宫人萧氏生天德次迪里次必舒

雅斯哈

天德

迪里

必舒

雅斯哈

雅斯哈会同初封太平王世宗立诏许与晋主往还以昆弟礼穆宗委以国政应历三年与鲁呼子完谋乱令司天魏璘卜日事觉贬戍西北边景宗即位亡入沙陀召还释其罪封齐王保宁四年薨赠皇太叔谥钦靖

天德

天德字必伞强悍趯捷人望而畏之太宗讨石重贵至望都晋将杜重威率兵十万先据河梁上募能断粮道者天德请以五千骑行从闲

道击走卫送之军火其辎重重威穷蹙乃降会同三年与邸用和使晋世宗即位遣天德护太宗梓宫赴上京太后遣鲁呼拒世宗遇于泰德泉战甚力败之太后不悦后不复用天禄二年与萧翰瑠格等谋反系狱伏诛

迪里

迪里字博斯济多力善射应历八年与宣徽使耶律哈斯谋反释之保宁初封冀王宋人侵汉与南府宰相耶律刷往援却敌而还干亨元年复与宋人战于白马岭先锋渡涧未半宋军迎击师溃没于阵子斡格并死焉

必舒

必舒穆宗时族人和特及萧卓琳有罪欲亡必舒密以闻帝以为忠常命侍从帝轻杀左右会欲诛监鹿官必舒谏而免保宁初封越王 【

按皇子表作穆宗时封考穆宗纪不载景宗纪保宁元年实始封越王今据改】 讨党项有功后以疾薨

△世宗诸子

扎木

世宗三子怀节皇后生和尔鄂博 【按皇子表原注云旧史皇族传书在第三且云未详所出按景宗纪云景宗皇帝世宗第二子又旧

史本传云景宗立亲祭于墓追册为太子当是世宗嫡长子也今从之】 宗妃甄氏生扎木

和尔鄂博蚤薨景宗立追册为皇太子谥庄圣墓号太子院

扎木

扎木

扎木字呼喇济敏给好学通契丹汉字能诗尝与宫人私通穆宗怒榜掠系狱景宗立释之封为宁王保宁八年妻造蛊毒夺爵贬乌尔古

部赋放鹤诗征还统和初皇太后称制命赋芍药诗复旧爵

△景宗诸子

隆庆 隆佑

景宗四子长圣宗次隆庆次隆佑皆睿智皇后生次药师努未详所出

隆庆

隆佑

隆庆

隆庆字燕隐小字普贤努八岁封恒王兼侍中统和中拜南京留守徙梁王十七年南征为先锋至瀛州遇宋将范廷召列陈以待隆庆遣

萧柳击败之十九年复败宋人于行唐开泰初加守太师兼政事令更封晋国王寻拜大元帅南京留守赐金券进封秦晋国王五年入觐帝亲

出迎劳因同猎于松山还至北安州薨追赠皇太弟子扎喀魏国王 【按契丹国志云扎洛名宗懿少有气局干量过人圣宗时封中山王改封晋王所载颇详其封国之号亦与此异】 苏克鹵王释嘉努陈王埒富辽西郡王苏色漆水郡王

隆佑

隆佑 【通考作隆裕】 小字果勒齐一字和多沁干亨初封郑王统和中伐宋留守京师二十一年拜西南面招讨使徙王吴及征高丽复为留守权知北院枢密使事出守东京更王楚开泰初改王齐薨赠太师谥仁孝重熙闲改谥孝靖子呼图克封周王临海军节度使合禄封魏王塔卜陈王西京留守后为重元所胁削爵流镇州

△圣宗诸子

布古德【博诺】

圣宗六子钦哀皇后生兴宗及重元次布古德未详所出普尔氏生吴格次格尔姜氏生海古勒重元见逆臣传

布古德

布古德

布古德字萨兰圣宗第三子明敏善射太平七年遥领彰信军节度使为王子郎君班详袞重熙中累迁契丹行宫都部署封柳城郡王讨夏国督战有功军还薨

博诺

博诺

博诺字和多沁特哩袞尼噜古之孙景宗时为乌尔古部详袞政尚严急民苦之有司以闻诏曰博诺任方面寄以细故究问恐损威望寻迁马羣太保统和十六年奏核燕军之不任事者汰之二十八年驾征高丽博诺为先锋至铜州高丽将康肇分兵为三以抗辽军博诺率耶律鸿果击破三水营擒肇李玄蕴等军望风溃会大军至斩三万余级追至开京破敌于西岭高丽王询遁去博诺入开京焚其王宫抚慰其民人以功迁北院大王薨 【本传旧在列传第十八卷今移附于此】

吴格字洪隐开泰二年为特哩袞出为南京留守薨封燕王

格尔字图勒琿太平元年为南府宰相薨

海古勒字额勒本重熙初为王子郎君班详袞七年封饶乐郡王咸雍中徙混同郡王为上京留守薨

△兴宗诸子

和啰噶【淳】 阿林

兴宗三子长道宗次和啰噶次阿林皆仁懿皇后生

和啰噶

阿林

和啰噶

和啰噶字阿尼雅兴宗第二子与阿林皆道宗同母弟重熙十七年封越王清宁初徙鲁王拜上京留守改南京加宋魏国王干统初以为天下兵马大元帅加守太师免拜不名三年册为皇太叔加号曰义和仁寿六年兼特哩袞复守南京重元乱夜赴战初天祚立未几诏弛围场之禁和啰噶奏曰天子以巡狩为大事虽居谅阴不可废也帝于是复命有司促备春水之行十年从猎庆州薨子实笃漆水郡王次远匡义军节度使次涪 【按太宗世宗景宗圣宗兴宗诸子原史无传今并依皇子表增辑唯穆宗之子表亦不载阙之】

涪

涪

涪小字聂埒自幼太后鞠育之既长好文学昭怀太子废后欲立为嗣帝怒耶律拜萨巴知与涪善出涪为彰圣军节度使天祚即位封郑王干统二年加越王六年拜南府宰相首议制两府礼仪徙王魏其父和啰噶薨袭守南京天庆五年东征都监章努济鸭子河与涪子阿萨尔等三百余人亡归先遣迪里等以废立之谋报涪涪斩迪里首以献进封秦晋国王拜都元帅赐金券许自择将士乃募燕云精兵东至锦州队长武朝彦作乱劫涪涪匿而免收朝彦诛之会金兵至聚兵战于阿喇扎图败绩复收散卒拒之保大二年天祚入夹山奚王和勒博林牙耶律达实等引唐灵武故事议欲立涪遂即位百官上号天锡皇帝改保大二年为建福元年大赦放进士李宝信等一十九人遥降天祚为湘阴王以燕云平上京中京辽西六路涪主之沙漠以北南北路两都招讨府诸蕃部族等仍隶天祚自此辽国分矣封其妻普贤女为德妃以和勒博知北院枢密使事军旅之事悉委达实又遣使报宋免岁币结好宋人发兵问罪击败之寻遣使奉表于金乞为附庸事未决涪病死年六十百官伪谥曰孝章皇帝庙号宣宗 【按三朝北盟会编云涪守燕十二年得人心号燕王又谓九大王又谓覃湘大王本传不载】 葬燕西香山永安陵遗命遥立秦王定以存社稷德妃为皇太后称制改建福为德兴元年时宋兵来攻李处温父子惧祸欲挟德妃纳土于宋复欲北通于金以拥立大功自陈德妃骂曰误秦晋国王者皆汝父子何功之有悉数其过恶数十赐死金兵入居庸关德妃奔天德军天祚诛之降涪庶人

除其属籍 【按本传及天祚子雅里传旧附天祚纪末今改归宗室】

阿林

阿林字额勒本重熙十七年封许王清室中徙陈王秦王出为辽兴军节度使进封秦越国王咸雍闲厯西京上京留守从车驾秋猎薨追

封秦魏国王谥钦正

△道宗一子

顺宗浚

道宗一子浚宣皇后生

顺宗浚

顺宗浚

顺宗名浚小字伊啰斡幼而能言好学知书道宗尝曰此子聪慧殆天授欤六岁封梁王明年从帝猎遇十鹿射获其九帝喜设宴八岁立

为皇太子太康元年兼领北南枢密院事及母后被害太子有忧色耶律伊苏为北院枢密使不自安副点检萧实沙谓伊苏曰臣民心属太子

一日若立吾辈措身何地乃与同知北院宣徽事萧特尔格谋构陷太子阴令护尉太保扎拉诬告都宫使萨喇知院苏色护卫肃和克谋废立

诏按无迹不治伊苏复令牌印郎君萧额都温等言扎拉前告非妄臣实与谋若不言恐事发连坐帝信之幽太子于别室以雅克鞠案太子具

陈枉状曰吾为储副尚何所求公当为我辨之雅克乃伊苏之党易其言为款伏帝大怒废太子为庶人将出曰我何罪至是实沙叱登车遣卫

士阖其扉徙于上京囚圜堵中伊苏寻遣达噜噶萨巴往害之太子年方二十上京留守萧达德以疾薨闻帝哀之命有司葬龙门山欲召其妃

伊苏阴遣人杀之后知其冤悔恨无及谥曰昭怀太子以天子礼改葬玉峰山干统初追尊大孝顺圣皇帝庙号顺宗妃萧氏贞顺皇后一子延

禧即天祚皇帝

△天祚诸子

晋王额噜温 雅里

天祚六子文妃生额噜温元妃生雅里次塔鲁次实讷埒次定次室未详所出

晋王额噜温

雅里

晋王额噜温

晋王小字额噜温甫髻鬣驰马善射出为大丞相耶律隆运后封晋王乐道人善而矜人不能时宫中见读书者辄斥去额噜温尝入寝殿

见实达尔扎拉阅书因取观会诸王至阴袖而归之曰勿令他人见也一时号称长者及

长积有人望内外归心保大元年南军都统耶律伊都
与其母文妃密谋立之事觉伊都降金文妃伏诛额鲁温不与谋免二年耶律萨巴等复
谋立不克帝知额鲁温得人心不忍加诛令缢杀之或
劝之亡额鲁温曰安忍为蕞尔之躯而失臣子之大节就死闻者伤之

雅里

雅里字萨兰七岁封梁王欲立为皇太子别置警卫保大三年金师围青冢雅里在
军中太保特默格挟之出走闲道至阴山闻天祚趋云
内趋赴行在时扈从者千余人多于天祚天祚虑特默格生变欲诛之责以不能金救诸
王仗剑召雅里问曰特默格教汝何为雅里对曰无他
言乃释之天祚渡河奔夏队帅耶律迪里劫雅里北走至沙岭见蛇横道而过识者以为
不祥后三日羣僚共立雅里为主遂即位改元神历雅
里性宽大悉诛杀获亡者笞之而已有自归者即官之因谓左右欲附来归不附则去何
须威逼每取唐贞观政要及林牙资忠所作治国诗令
侍从读之乌尔古节度使吉勒展迪里部都统托卜嘉都监图鲁卜各率众来附自是诸
部继至而雅里日渐荒怠好击鞠特默格切谏乃不复
出以耶律迪里为枢密使特默格副之从行人有疲困者辄赈给之直长保德谏曰今国
家空虚赐赉若此将何以给雅里怒曰若无诸部我将
何取不纳初令羣牧运盐冻仓粟而民盗之议籍以偿雅里乃自为直每粟一车偿一羊
三车一牛五车一马八车一驼左右曰今一羊易粟二
斗且不可得乃偿一车雅里曰民有则我有若令尽偿民何堪后猎扎拉山一日而射黄
羊四十狼二十一因致疾卒年三十

塔鲁封燕国王蚤薨

实讷埒封赵王

定封秦王

寔封许王俱为金师所获

钦定续通志卷一百九十二

●钦定续通志卷一百九十三 宗室传十三

宗室传

金【一】

○金一

始祖以下宗室诸子

△始祖以下宗室诸子

呼实默

和卓【布呼福寿】

实图美【实实思敬】

忠

萨布

珠噜

呼实哈

宗贤

- 2070 -

达兰 卞 膏 奕 爱实 托克索 实
图美 承裕 额尔克 【二】 萨哈
连 哈昭 罗索 【三】

始祖兄弟三人兄阿库纳之后为呼实默和卓弟博和哩之后为实图美都古噜讷

呼实默

和卓 【布呼】

实图美

忠

萨布

珠噜

呼实哈

宗贤

达兰

卞

膏

奕

爱实

托克索

实图美

承裕

额尔克 【二】

萨哈连

哈昭

罗索 【三】

呼实默

呼实默哈斯罕人父托卞嘉事辽为太尉呼实默善汉语通契丹大小字勇而善战高永昌据东京招哈斯罕人呼实默召其族人谋曰吾远祖兄弟三人同出高丽大圣皇帝之祖入女真吾祖留高丽自高丽归于辽吾与皇帝皆三祖之后皇帝受命即大位辽之败亡有征吾岂能为永昌之臣哉于是率其族属部众诣萨哈乌珍降营于托辉山之下永昌攻之呼实默力战不能敌奔于萨哈及攻开州以粮饷给军后攻保州击败辽将降其士卒以为哈斯罕七部贝勒天辅二年卒赠监门卫上将军再赠骠骑卫上将军子果实尝从攻显州领四穆昆军破鱼梁务功最以其父所管十部为哈斯罕达贝勒有和卓者亦称始祖兄苗裔但不知与呼实默

相去几从耳

和卓 【布呼】

和卓哈斯罕必勒哈水人仕辽领辰复二州汉人渤海子富色克袭父职再迁静江中正军节度使子额哩页与呼实默同时归朝屡以粮饷助伐高永昌及高丽新罗后从宗望伐宋以功迁真定府路安抚使兼曹州防御使授必勒哈水世袭明安子布呼识女真契丹汉字善骑射睿宗闻其才召置麾下从经略山东河北陕西袭其父明安授昭勇大将军海陵伐宋以本明安兵从半道与南征万户完颜福寿等俱亡归谒世宗于辽阳世宗即位除同知哈斯罕节度使事刑部侍郎色克为都统布呼副之坐擅署置官吏私用官中财物削两阶解职未浹句克实鄂伦完颜璋等谋反欲因帝谒山陵举事鄂伦与布呼亲旧与之谋议乃与克实璋执鄂伦等上变克实不肯以始谋尽首遂并诛之除布呼浚州防御使累迁顺天军节度使致仕卒

福寿

福寿

福寿哈斯罕人父和卓国初来归授明安天眷二年福寿袭父职授定远大将军累加金吾卫上将军海陵省并明安穆昆遂停封正隆末伐宋福寿领罗索塔坦二明安由山东道进至泰安既受甲诱将校北还而高忠建卢万嘉努等亦各率众万余俱归东京欲共立世宗至辽口世宗遣图克坦思忠府吏张穆喇斡等来迎察其去就思忠见福寿福寿等言正隆失道不能保天下我辈欲推戴国公为主为书以授思忠于是督诸军渡辽水径至东京城下即谕军士擐甲入卫宫城杀高存福等明日与诸将及东京吏民从博索路兵马都总管默音劝进世宗即位以福寿为元帅右监军从默音讨白彦敬赫舍哩志窳于北京是冬世宗闻乌哲库等与斡罕战不利命福寿将兵进讨俘获生口万计寻赫舍哩召还授兴平军节度使复其世袭明安寻领浚州路诸军事大定三年卒

实图美

实图美扎兰路完门部人世为部长父卓巴纳始祖弟博和哩四世孙景祖时使部人密逊来请通宗系景祖留密逊岁余善遇之及还以币帛为赠久之扎兰岁饥景祖与之马牛为助余费使世祖往致之会世祖有疾实图美日夕不离左右世祖疾愈辞归握手为别约它日无相忘实图美体貌魁伟勇敢善战质直孝友强记辩捷临事果断世祖袭位交好益深邻部不悦合兵攻之实图美使弟阿索美率二百人南下扼敌敌兵于人出其东据高泉实图美将五千人迎击之敌将阿尔本勇士也出挑战射中

其马阿尔本反射实图美中腹实图美拔箭战愈力阿
索美与勇士七人步战杀阿尔本诸部兵遂败因招谕诸部使附于世祖世祖嘉之后伐
乌春乌木罕及通恩达萨塔等皆以所部从战有功弟
阿索美寻卒及终丧大会其族太祖率官属往以伐辽之议访之后以本部兵从击高丽
及伐辽功尤多太祖阿征诸将皆从实图美率善射者
三百人来卫京师时太宗居守喜其至亲出郊劳继闻黄龙府叛与睿宗讨平之师还赏
赉良渥寻卒正隆二年封金源郡王子实实思敬

实实

思敬

实实

实实康宗时从乌色破高丽军太祖攻盩江州实实摧锋力战授明安后从舍音克
中京袭辽主于鸳鸯濠略定山败夏将李良辅兵与罗
索获辽帝于伊都谷宗翰伐宋与尼楚赫围太原明年攻襄垣下潞城降西京至汴元帅
府以怀孟北阻太行南濒河控制险要使实实统十二
明安军镇抚之于是殄平寇盗招集流亡四境以安天会四年薨熙宗时赠特进大定闲
谥威敏世宗思太祖太宗创业艰难求当时羣臣勋业
最著者图像于衍庆宫自辽王舍音而下凡二十一人实实与焉初海陵罢诸路万户军
苏伯路节度使世宗时近臣奏请改苏伯为扎兰节度
使帝曰苏伯扎兰二水相距千里节度使恰苏伯不必改实图美亲管明安子孙袭封者
可改为扎兰明安以示不忘其初

思敬

思敬本名萨哈 【原文作希卜苏弟误今从删】 初名思恭避显宗讳改焉年十
一从父谒见太祖诏从猎射黄羊获之赐以从马宗翰
伐宋从其兄实实攻太原又从完颜和尼下洛阳围汴皆有功师还隶辽正宗干麾下太
宗幸东京温汤思敬权护卫押卫卒百人从行领穆昆
从征珠格麟有功遂充护卫天眷二年以捕宗盘宗隼功迁显武将军擢右卫将军袭扎
兰路万户授世袭穆昆七年入为工部尚书迁吏部天
德初为报谕宋国使还拜尚书右丞大定二年封济国公兼天德军节度使俄为西北路
招讨使唐古布古岱副之将本路兵二千会布古岱视
地形冲要伺契丹贼出没之地置守御远斥候贼至则战不以昼夜为限布萨忠义败斡
罕于陷泉诏思敬选新马三千备追袭斡罕入于奚中
思敬为元帅右都监以旧领军入奚地张格宅会大军讨之贼降将硕和卓与其党锡勒
塔执斡罕并其母及家属诣思敬降思敬献俘于京师
拜右副元帅经略南边驻山东初明安穆昆屯田山东各随所受地主散处州县世宗不

欲明安穆昆与民户杂处欲使相聚居之遣户部郎中完颜让往元帅府议之思敬与山东路总管图克坦克窳议之曰大军方进伐宋宜以家属权寓州县量留军众以为备御俟边事窳息明安穆昆各使聚居则军民俱便还奏从之其后遂以明安穆昆自为保聚其田土与民田犬牙相入者互易之三年四月召还京都以为北京留守七年召为平章政事先是省并明安穆昆及海陵时无功授穆昆者皆罢之失职者甚众思敬请量才用之帝从其请九年拜枢密使上疏论五事一女真人可依汉人以文理选试二契丹人可分隶女真明安三盐溲官可罢去四与明安同句当副千户官亦可罢五亲王府官属以文资拟注教以女真语言文字皆从之其后女真人试进士瓜尔佳衡尼玛哈鉴图克坦鉴完颜匡辈皆由此致宰相实思敬启之也久之帝谓思敬曰朕欲修熙宗实录卿尝为侍从必能记其事迹对曰熙宗时内外皆得人风雨时年谷丰盗贼息百姓安此其大概也何必余事帝大悦世宗喜立事故其微谏如此十三年薨孙乌呼肯札塔大定二十四年除明威将军授苏伯路宝邻山明安

忠

忠本名都古噜讷字鄂斯欢实图美之弟太祖器重之将举兵伐辽而未决也因与都古噜讷计事宗翰宗干完颜希尹皆从都古噜讷曰以主公英武士众乐为用辽帝荒于畋猎政令无常易与也太祖然之明年伐辽都古噜讷以兵会收国元年与尼楚赫守达噜噶路二年与斡鲁芬彻会乌楞古讨高永昌破其兵东京降遂其乌楞古等败耶律聂埒于蒺藜山天辅二年与罗索俱入见太祖曰辽主近在中京而敢辄来各杖之太祖驻军草泺都古噜讷取奉圣州破其兵五千于鸡鸣山太祖入燕京都古噜讷出德胜口代实图美为扎兰路达贝勒三年【按太祖纪帝伐燕京都古噜讷出德胜口事在天辅六年本传类叙于二年之下而此处复称三年疑有脱误】以扎兰地薄斥鹵迁其部于苏伯水益以珠苏尔之田熙宗即位加太子太师天会十四年加保大军节度使同中书门下平章事薨天德二年配飨太祖庙廷大定二年追封金源郡王

萨布

萨布始祖弟博和哩之后初补亲卫军章宗时选充护卫明昌元年为宁化州刺史累官殿前左副都点检及平章布萨揆伐宋为右翼都统泰和六年宋将皇甫斌率步骑数万由确山褒信分路侵蔡闻郭倬李爽之败阻溱水不敢进于是揆遣萨布及副都统尚厩局使布什万努

深州刺史完颜达希布等以骑七千往击之会溱水涨 【按布萨揆传云揆出颍寿至淮宋人拒于水南揆测淮水八迭滩使萨布等潜渡本传所云溱水恐是淮水之误】 宋兵扼桥以拒萨布等谋潜师夜出达希布以骑涉水出其右万努出其左萨布率精兵直趋桥宋兵大溃还进爵一级贞佑闲知临洮府事兼陕西路副统军改知凤翔府事兼本路兵都总管俄为元帅右都监夏人来寇屡击走之兴定初以宋岁币不至且复侵盗诏萨布讨之破宋人于信阳陇山等处斩获甚众寻遣兵渡淮略中渡店拔光山罗山定城等县七月上章言京都天下之根本窃见城中子城故基宜于农隙筑而新之为国家久长之利及河南陕西州府皆乞量修从之二年破宋人于铁山及上石店唐县奉诏攻枣阳败之三年夺宋白石关破宋兵于七口仓又夺宋小鹞仓复败宋兵于石鹞崖四年奉诏出兵河北招降晋安时河北义军官民坚守堡寨力战破敌者众萨布上章言此类忠赤可嘉若不旌酬无以激人心乞量加官赏从之迁枢密副使五年奉诏引兵救河东战屡捷复晋安平阳元光二年复河中正大元年拜平章政事未几转尚书右丞相三年宣宗庙成将禘祭议配享功臣论者纷纷萨布为大礼使因言丞相福兴死王事齐锦谨守河南以迎大驾功宜配享议遂定吏部郎中杨居仁上封事言宰相宜择人帝语大臣相府非人御史谏官当言彼吏曹何与左丞延扎舒噜素嫉居仁亦以为僭萨布徐进曰天下有道庶人犹得献言况在郎官使其言可用则行之不可用不必示臣下也帝是之五年行尚书省于京兆谓都事商衡曰古来宰相必用文人以其知为相之道萨布何所知使居此位吾恐他日史官书之某时以某为相而国乃亡即促衡草表乞致仕平章政事侯摯朴直无蕴藉天兴元年兵事急都堂会议摯以国势不支因论数事曰只是更无擘画博索怒曰平章出此言国家何望邪萨布顾谓博索曰侯相言甚当博索含愤而罢时元兵薄汴博索策后日讲和或出质必首相当行力请萨布领省事 【谨按通鉴辑览

御批萨布谓宰相必用文人袭世俗迂腐之说而忘金源芟臣之本夫金源初起大东尔时岂有文人辅成创业乎况国家有事之日尤当与共安危若止洁身独善而置国事于不顾与国休戚之谓何然萨布后此尚能殉义以全大节若博索虑议和为质力荐萨布以避患更为小人之尤而不足责矣】 拜为左丞相寻致仕哀宗迁归德起复为右丞相封寿国公扈从以行诏行尚书省事于徐州元帅郭恩密与河北叛将郭野驪辈谋归国用安萨布疽重为贼党所制页噜乃约源州叛将麻琮袭破徐州时蔡已被围徐州将士以朝命阻绝且逼元兵议出降萨布

弗从投河求死不没军士援出之自缢于州第麻琮乃遣人以州降元子按春正大中充护卫以事系居许州元兵至许按春开南门以降诏令押入省问事萨布附奏曰老臣不幸生此贼恨不手刃之十二月车驾东狩留后二相下开封擒捕斩之狱中

珠噜

珠噜宗室子从郑王乌色败高丽于海兰取雅鲁城克宁江州收黄龙府珠赫店达噜噶城呼岱巴冈诸役皆力战有功东京降为本路招安副使败辽兵破通古营蓟州汉民叛走珠噜追复之以功为穆昆天辅四年卒皇统中赠镇国上将军

呼实哈

呼实哈宗室子从太祖攻宁江败辽兵于达噜噶城破辽主亲兵皆有功辽军来援济州呼实哈与其兄实古纳以兵迎击败之还攻济州中流矢战益力克其城从攻春泰州降之并降境内诸部族其不降者皆攻拔之辽主西走呼实哈追至中京获其宫人辎重凡八百两德州复叛呼实哈以兵五千克其城从罗索击败敌兵于归化降其城从取居庸关并燕之属县及其山谷诸屯伊实部既降复叛呼实哈引兵追及战败之俘获甚众泽州诸部有逃者皆追复之又败叛人于临潢诛其酋领而安抚其人民天眷二年迁永定军节度使改武定军徙汴京留守天德三年授世袭明安卒

宗贤

宗贤本名阿噜太祖伐辽从攻宁江州临潢府太宗监国选侍左右甚见亲信临潢复叛从宗望复取之迁归德军节度使政宽简境内大治秩满士民相率诣朝廷请留及改武定军百姓扶老携幼送数十里悲号而去改永定军秉德廉访官吏士民持盆水与镜前拜言曰使君廉明清直类此民实赖之用是超迁两阶天德初授世袭穆昆驰骤召之雄州父老相率张青绳悬明镜于公署老幼填门三日乃得去封定国公再除忠顺军节度使捕盗司执数人至府宗贤阅其案谓僚佐曰吾察此辈必冤不数日贼果得人服其明改海兰路兵马都总管封广平郡王崇义军节度使兼领北京宗室事正隆例夺王爵加金紫光禄大夫改临海军大定初遣使召之宗贤率诸宗室见于辽阳除同签大宗正事封景国公致仕起为博索路兵马都总管复致仕卒

达兰

达兰宗室子年十六事太祖未尝去左右珠赫店之役太祖欲亲战达兰控其马而止之曰主君何为轻敌臣请效力即挺枪手杀七人已

而枪折骑士曳而下者九人太祖壮之曰诚得此辈数十虽万众不能当也及战于达噜噶城辽兵陈于营外太祖遣达兰往击之冲出敌阵大败其众攻临潢府春泰州中西二京皆有功天辅六年授穆昆天会四年从伐宋屡以功受赏明年再举至汴宗望闻宋人会诸路援兵于睢阳遣达兰与阿里库将兵二千往拒之败其前锋军于杞县又破三寨擒宋京东路都总管胡直孺南路都统制隋师元及其三将并直孺二子遂取拱州降盩厔复破宋兵于睢阳进取亳州闻宋兵十万且至会宗望益兵四千合击大败之擒其将石瑱而还【按本传自达兰与阿里库将兵以下数行与穆宗子达兰传人同事同文同未知究当谁属也姑两存之】帅府嘉其功赏赉优渥睿宗驻兵熙州分遣诸将略地达兰以军五百人入六盘山十六寨降其官民皇统中累加银青光禄大夫天德初加特进授世袭明安卒

卞

卞本名鄂摩上京司属司人大定二年收充护卫积劳授彰化军节度副使入为都水监丞累迁中都西京路提刑使徙知归德府河平军节度使导河有劳除北京留守未几改知大兴府事时有言瓜尔佳衡在军不法诏刑部问状事下大兴府卞辄令追摄帝以为失体杖四十久之乞致仕不许拜御史大夫先是司谏言御史大夫久阙宪纪不振宜选刚正疾恶之人肃清庶务上由是用卞既而以金吾卫上将军致仕卒

膏

膏本名额哩埒隶上京司属司大定十年以皇家近亲收充东宫护卫授御院通进从世宗幸上京会皇太子守国薨特命与滕王府长史台驰驿往护丧时章宗为金源郡王亦留中都且命膏等保护世宗还都迁符宝郎除吏部郎中章宗即位坐与唐古贡为寿犯夜禁夺官一阶罢明昌元年起为同知棣州防御使事坐讥讪宰辅杖罢之明年降授同知宣德州事召授武卫军副都指挥使四迁知大兴府事转左右宣徽使承安二年拜尚书右丞出为泰定军节度使移知济南府卒

奕

奕本名三宝隶默音赛音司属司大定七年以近亲充东宫护卫十人长转营厩局使章宗即位迁左卫副将军累迁右副都点检兼提点尚厩局使谕旨曰汝非有过人才第以久次迁授当谨乃职未几坐厩马瘦杖三十承安二年改左司都点检兼职如旧俄授同签大睦亲府事卒奕为人贪鄙数以赃败帝爱其能治围场故进而委信之

爰实

爰实宗室子好学问袭父北京路筈柏山明安听讼明决人信而安之察廉能除彰国军节度副使改上京留守判官提刑司奏彰国军治状迁同知率宾路节度事改归德军历海邳二州刺史皆兼总押军马宋统领刘文谦以兵犯宿迁迎击破之复破戚春夏兴国舟兵万余人斩夏兴国于阵迁镇国上将军为赫舍哩执中前锋渡淮破宝应天长二县师还迁同知归德府事改泗州防御使大安二年改华州防御使迁镇南军节度使累迁河南统军使兼昌武军节度使卒

托克索

托克索宗室子纳罕塞人初隶万户实嘉努麾下尝领偏师破云中诸山寇盗宗望攻平州遣托克索讨应州贼平之抚安其民而还及伐宋在宗翰军以八穆昆破石岭关屯兵数万祁县降而复叛托克索攻下之进取文水县后从诸帅列屯汾州之境宋河东军帅郝仲连张思正陕西军帅张关索及其统制马忠合兵数万来援皆败之宗翰南伐至潞还太原犹未下即留尼楚赫总督诸军于是宋援兵大至托克索从玛武乌噜破宋兵四千于文水宋将黄迪等以兵三十万栅于县之西山复与耿守忠合兵九千击之获马及资粮甚众宋制置使姚古率兵至隆州谷托克索与巴尔斯以步骑万余御之种师中兵十万据榆次尼楚赫使托克索与和尼等合兵八千击败之斩师中宋将张灏以兵十万营于文水近郊复与巴尔斯击破之潞州复叛宋兵号十七万固纳托克索巴尔斯皆被围托克索麾军士下马力战遂溃围而出及再举伐宋宗翰命罗索率军先趋汴罗索至泽州托克索乌噜以五百骑为前驱往招河阳先据黄河津宋兵万余背水阵进击败之遂降河阳汴京平诸将西趣陕津略定河东郡县托克索取宪州遇其援军击败之贝勒温温珠噜等攻保德未下托克索进兵助击梯冲并进遂克其城贝勒舍哩执中石州屡败亡其三将军士死者数百人托克索令诸军去马力战尽殪之天会六年宗辅驻师邓州托克索玛武已尔斯西取均房下其城遂克唐蔡陈州及颍昌府天眷初除彰德军节度使三年为元帅左监军皇统八年改济南尹天德闲封定国公授世袭千户卒正隆二年赠应国公

实图美

实图美本宗室和索哩改子也年十五事太宗为左奉宸皇统二年充护卫除武器署丞累官肇州防御使大定初除元帅右都监与咸平尹乌哲库率秦州兵及海兰路兵千五百人会临潢尹伊苏玛勒讨契丹契丹犯临潢伊苏玛勒死攻之不能克乃引众东行实图美表乞济师

会右副元帅默音以大军至实图美改哈斯罕节度使隶右翼与赫舍哩志盩败贼于长
泆战霪■〈雨上松下〉河皆有功改博索路兵马都
总管卒

承裕

承裕本名和硕以宗室子充符宝祗候除中都左警巡副使通括户籍百姓称其平
累迁东北路招讨副使以病免起为西南招讨副使泰
和六年伐宋迁陕西路统军副使俄改通远军节度使陕西兵马都统副使与秦州防御
使完颜璘屯成纪界宋吴曦兵五万由保岔姑苏等谷
袭秦州承裕璘以骑兵千余人击走之追奔四十里凡六战宋兵大败斩首四千余级宋
吴曦使其将冯兴杨雄李珪以步骑八千入赤谷承裕
璘及河州防御使富察秉铉逆击破之宋步兵保西山骑兵走赤谷承裕遣部将唐古安
塔哈率骑二百驰击宋步兵宋步兵大溃追奔至阜郊
城斩二千余级明安巴恬努追宋骑兵杀千余人斩杨雄李珪于阵冯兴仅以身免承裕
进兵克成州八年罢兵迁河南东路统军使兼知归德
府事俄改知临潢府事大安初召为御史中丞三年拜参知政事与平章政事通吉思忠
行省戍边乌沙堡之败朝廷独坐思忠诏承裕主边事
八月元兵至野狐岭承裕丧气不敢拒战退至宣平县中土豪请以土兵为前锋以行省
兵为声援承裕畏怯不敢用但问此去宣德闲道而已
其夜承裕率兵南行元兵踵击之明日至会河州 【卫绍王纪乍会河堡】 兵大溃承
裕脱身走入宣德元游兵入居庸关中都戒严识者谓
金之亡决于是役卫绍王薄其罪除名而已崇庆元年起为陕西安抚使至宣元年迁元
帅右监军兼咸平府路兵马都总管与契丹埒克战败
绩改同判大睦亲府事辽东宣抚使贞佑初改临海军节度使卒

额尔克 【二】

额尔克内族也时有两额尔克皆护卫出身一曰草火额尔克每得贼好以草火燎
之一曰板子额尔克尝讹以官中牙牌报班齐者为板
子故时人各以是目之正大八年九月大兵攻河中以内族两额尔克将兵三万守之初
元兵期以明年正月合南北军攻汴梁故自将攻河中
河中告急哈达布哈遣王敢率步兵一万救之十二月河中破初河中主将知元兵将至
惧军力不足截故城之半守之及被攻行帐命筑松楼
高二百尺下瞰城中土山地穴百道并进至十一月攻愈急王敢救军至军士殊死鬪日
夜不休西北楼橹俱尽白战支半月力尽乃陷草额尔
克被擒寻杀之板额尔克提败卒三千夺船走北兵追及鼓噪北岸上矢石如雨数里之
外有战船横截之败军不得过有赍火礮名震天雷者

连发之礮火明见船军无几人力斫横船开得至潼关遂入口乡寻有诏责额尔克不能死事车载入陕州决杖而死识者谓河中城守力竭而陷非战之罪故额尔克之死人咸冤之初额尔克奉诏于邠泾凤翔往来防秋其族孙奉御努尔监战额尔克动为所制意颇不平渐生猜隙七年召赴京师时努尔同赴召谮额尔克畏怯帝意颇罪额尔克及河中陷苦战力尽而元兵百倍临之人谓虽至不守犹可以自赎竟杖而死

萨哈连

萨哈连字安之内族也宣宗朝累迁同签枢密院事元光二年十二月宣宗病笃英王帮图先入侍哀宗后至勒兵东华门萨哈连解都点检和卓佩刀从哀宗入由是见亲信正大元年以萨哈连同判大睦亲府事兼前职四年元既灭西夏进军陕西四月丙申召萨哈连等同议西事羣臣多主和独萨哈连力破和议八月朝廷得清水之报令有司罢防城及修城丁壮凡军需租调不急者权停帝谓之曰朝臣或欲我一战汝独言当静以待之与朕意合今日有太平之望皆汝谋也未几李大节陈规等言其谄佞纳贿及不公事奏帖留中不报明惠皇后传旨戒曰汝谄事帝帝之骑鞠皆汝所教亦极言之帝颇悟出为中京留守九年元兵至洛洛中初无军得三峯溃卒三四千与忠孝军百余人守御时萨哈连疽发于背不能军三月忠孝军百余人入使宅强拥之出奔萨哈连不得已从之出南里城门城上军觉闭之瓮城中矢石乱下萨哈连仰呼求救军士知出奔非其意以绳引而上送入其宅不敢出丙戌夜城破萨哈连夺南门出不得投濠水死

哈昭

哈昭一名永锡贞佑中为元帅左监军失援中都宣宗削除官爵杖之八十已而复用四年以御史大夫权尚书右丞总兵陕西留澠池数日进及京兆元兵已至哈昭竟不出战遂失潼关有司以敌至不出兵当斩诸皇族百余人上章救之遂再夺爵免死除名久之起为参知政事性好作诗词语鄙俚自草括粟榜文有雀无翅儿不飞蛇无头儿不行等语京城目之曰雀儿参政哀宗用而不悟卒致败事

罗索 【三】

罗索三人皆内族时以其名同故各以长幼别之正大八年庆善努弃京兆适鹰扬都尉大罗索运军器至白鹿原遇元兵与战兵刃既尽以绦系掉金牌力战而死九年正月元兵至襄城元帅中罗索小罗索遇于汝坟两罗索以正旦饮将校皆醉不能军遂败退走许州天兴二年正月河朔军溃哀宗走归德中罗索为北面总帅小罗索左翼元帅收溃卒及将军瓜尔

佳玖实奔蔡州蔡帅乌库哩栲栳知其跋扈不纳遂走
息州息帅舒穆鲁玖珠纳之时白华以帝命送虎符于玖珠为息州行帅府事玖珠出近
侍好自标致驸从盈路三人皆妬之渐生猜贰因诬玖
珠反使人锁之以瓜尔佳玖实为帅兼权息州六月赦至蔡蔡帅栲栳惧玖珠为三帅所
诛驰送诏书于息乃得免及帝将幸蔡密召中罗索引
兵来迓罗索迟疑久之乃奉迎七月召玖珠至与中罗索辨于帝前时中罗索已授同签
枢密院事不欲使之终讼乃罢玖珠帅职既而觐知宋
人有窥息意息帅惧奏请益兵为备朝廷以参知政事穆延乌登行省事于息州中罗索
以同签枢密院事为总帅小罗索以副点检为元帅王
进为弹压帅瓜尔佳玖实为都尉以忠孝马军二百步军五百属之乌登赴息夜遣忠孝
军百余骑袭宋营于中渡宋人望之骇愕奔溃斩获甚
众复奏元帅张闰不遵约束乞正典刑罗索表闰无罪帝遣人赦之比至已死狱中闰为
罗索腹心玖珠之狱皆闰发之乌登廉得其事因失律
诛之十一月宋军二万来攻城城中食尽乃和余既而括之并括金帛衣物城中皆无聊而
行省及诸帅日以歌酒为事声乐不绝下及军士强娶
寡妇幼女无所不至 【按大金国志载天兴二年十二月权参政罗索选精锐衔枚夜出
人荷束藁将烧敌营元军觉于隐处伏强挽弩杀伤
甚众罗索中矢流血昏愤翌日乃苏未知其为中罗索欤小罗索欤本传失载附录于此
】 三年正月蔡凶问至诸帅杀之以灭口数日蔡信哄
然诸帅屏人聚议乃使送款于宋遂发丧设祭谥哀宗曰昭宗举城南迁宋人焚州楼榭
州老幼渡淮元兵追及之无有免者且诛索行省以下
官属于宋宋人令官属入城托以犒赏从万户以上六七百人皆杀之既而与元军接南
军敛避一军悉为所杀

钦定续通志卷一百九十三

●钦定续通志卷一百九十四 宗室传十四

宗室传

金 【二】

○金二

始祖子

德帝子

安帝诸子

献祖诸子

昭祖诸子

景祖诸子

△始祖子

始祖二子明懿皇后生德帝名乌噜季名干鲁皆福寿之语也以六十后生子异之故皆以嘉名命之

△德帝子

博啰

德帝二子思皇后生安帝季曰博啰

博啰

博啰

博啰与猷祖俱徙海古勒水置屋宇焉博啰之孙和硕和硕之子和卓与景祖长子韩国公和卓同名穆宗四年伐阿苏阿苏走辽辽使使来止伐阿苏军穆宗阳受辽帝约束先归国留和卓守阿苏城凡三年卒攻破之天会十五年赠特进

△安帝诸子

锡赫特【巴达】 锡哩布【博诺】 锡里库

安帝五子节皇后生猷祖绥赫次信德次锡赫特次锡哩布次锡里库

锡赫特【巴达】 锡哩布【博诺】

锡里库

锡赫特【巴达】 锡哩布【博诺】

锡赫特之孙巴达锡哩布之子博诺皆佐世祖有功博诺勇毅善射当时有与同名者尝有贰志目之曰恶博诺天会十五年巴达赠仪同三司博诺赠开府仪同三司在世祖时罕都伊克及和卓巴达博诺五人者不离左右亲若手足元勋之最著者也明昌五年皆配飨世祖庙庭

锡里库

锡里库者昭祖将定法制诸父国人不悦已执昭祖将杀之锡里库亟往弯弓注矢射于众中众乃散去昭祖得免昭祖征乌苏展部大有所获颁之于诸父昆弟而不及锡里库锡里库曰前日免汝于死者吾之力生治乌苏展部者吾之谋也分不及我何邪昭祖于是早起自赍问金列鞞往馈之时锡里库犹未起拥寝衣而问曰尔为谁昭祖曰舒噜先择此宝而后颁及他人敢私布之锡里库既扬言初不自安至是乃大喜列鞞者腰佩也

△猷祖诸子

猷祖七子恭靖皇后生昭祖次巴图次阿布哈次图库次都古噜讷次萨里罕次萨克苏

△昭祖诸子

乌肯彻 伯赫【崇成 国保】

昭祖六子威顺皇后生景祖次乌肯彻次室达呼默生伯赫伯勒赫干里延次室高丽人生和硕台

乌肯彻

伯赫

乌肯彻

乌肯彻昭祖次子初昭祖无子祷于巫巫告以男女之兆久之曰男子之兆复见然性不驯良残忍无亲亲之恩不可受也昭祖方念后嗣未立乃曰虽不良亦愿受之巫者曰当名之曰乌肯彻既生以巫所命名名之景祖初立乌肯彻酗酒屡悖威顺皇后后曰巫言验矣悖乱之人终不可留遂与景祖谋而杀之部人怒欲杀景祖后乃匿景祖出谓众曰为子而悖其母率是而行将焉用之吾割爱而杀之乌古鼐不知也汝辈盍杀我乎众乃罢去子希卜苏自有传

伯赫

伯赫及同母弟二人自幼时每争攘饮食昭祖见而恶之曰吾生子如此后必为子孙之累世祖初立伯赫果有异志诱和诺克萨克达乌春乌木罕离闻部属使贰于世祖世祖加意事之使为贝勒而不令典兵伯赫既阴与和诺克乌春谋计国人皆知之而童谣有欲生则附于伯赫欲死则附于和哩布颇拉淑之语世祖亦以策探得兄弟部人向背乌春和诺克相次以兵来攻世祖外御强兵而内畏伯赫之变将行闻伯赫食于其爱妾之父家肉胀咽而死且喜且悲乃迎尸而哭之

崇成

国保

崇成

崇成本名布呼泰州司属司人昭祖玄孙也大定十八年收充奉职改东宫入殿实达尔转护卫二十五年章宗为原王充本府祗候郎君明年章宗为皇太孙复为护卫章宗即位授河闲府判官以忧去职起复为宿直将军累迁武卫军都指挥使泰和三年卒崇成谨饬有守宿卫二十余年未尝有过故久侍密近云

国保

国保昭祖族人从昭祖耀武于青岭白山还至古哩甸昭祖得疾寝于村舍洞无门扉乃以车轮当门为蔽国保卧轮下为捍御已而贼至刃交于轮辐闲国保洞腹见膏恐昭祖知之乃然薪取膏以为炙中夜启行

△景祖诸子

和卓 噶顺【普嘉努】 满丕【满都布们都】 鄂兰哈玛尔【晏宗尹宗室 宗道】 们图琿【阿里布方】

景祖九子昭肃皇后生韩国公和卓次世祖次沂国公噶顺次肃宗次穆宗次室绰斯和生代国公赫色本次室温特赫氏生虞国公满丕隋国公鄂兰哈玛尔郑国公们图琿

和卓

噶顺 【普嘉努】

满丕 【满都布】

鄂兰哈玛尔

们图琿

和卓

和卓世祖兄 【按原史别为萨哈列传而以和卓附于传首今考和卓为景祖长子仍节入宗室而萨哈则仍其旧云】 景祖方计定诸部爱世祖胆勇材略及诸子长国俗当异宫居而命和卓与世祖同邸和卓专治家务世祖主外事世祖袭节度使越噶顺而传肃宗穆宗皆景祖志也子萨哈斡鲁自有传

噶顺 【普嘉努】

噶顺天会十四年大封宗室噶顺追封王爵正隆例降封沂国公子普嘉努又名昱尝从太祖伐埒克马塔太祖使普嘉努招卓多卓多即降康宗八年系辽籍女真赫舍哩部阻兵招纳亡命边民多亡归之普嘉努以偏师夜行昼止抵实埒水袭破之尽俘其孥而还天辅五年普嘉努为温贝勒遂为都统使袭辽帝以雨潦不果行既而乌赫哩贝勒果都统内外诸军以取中京普嘉努等皆为之副辽帝西走都统杲使普嘉努以兵 千助达兰击辽都统玛格与达兰不相及普嘉努与色哩舍音降其西北居延之众而降民稍复逃散布什部亦叛遂率兵袭之至德里川遇敌八千遂力战兵败察喇以兵来会追及敌兵于黄水获畜产甚众萨里亦以兵会太祖自草泺追辽帝普嘉努宗望为先锋戒之曰彼若深沟高垒未可与战即侦伺巡逻勿令遯去以俟大军若其无备便可击也太祖次古尔珍川乌舍马和尚至小鱼泺夜潜入辽主营执锡喇努以还遂知辽帝所在普嘉努等昼夜兼行追及于石辇铎我兵至者才千人辽兵围之伊都指辽帝麾盖骑兵驰之辽帝遯去兵遂溃所杀甚众宗翰为西北西南两路都统普嘉努斡鲁为之副乌琿部叛普嘉努讨平之天会闲为司空封王天眷二年薨天德初配享太祖庙庭正隆二年例封豫国公

满丕 【满都布】

满丕天会十五年封王正隆例封虞国公长子满都布孝友恭谨多谋而善战年十五隶军中从攻鄂勒欢及系辽女真和硕台等为变满都布自为质遂从和硕台归中途以计杀守者而还攻盩江州取黄龙府破高永昌取春泰州皆有功遂为穆昆讨岭东未服州郡过土河东山败贼三千人奚契丹寇土河西与明安蒙克玛奇击之摧锋力战破其众九万人奚众万余保阿林甸复击败之降其旁近居人复以五百骑破辽兵一千生擒其将以归与栋摩攻兴中府中流矢卒天眷中赠金紫光禄大夫谥英毅弟们都

们都

们都

们都袭父满丕明安卒子素赫袭素赫卒子萨哈连袭萨哈连卒子惟镕袭惟镕本名默呼字子铸骈肋多力喜周给人至盩初守杨文关有功兼都统护漕运贞佑二年护亲军家属迁汴遥授同知祁州军州事充提控三年破红袄贼于大沫堙惟镕入自北门诸军继进生获刘二祖功最迁泰安军节度副使改遂王府尉都水少监东平府治中坐误以刃伤同知府事赫舍哩约赫德当削降仍从军自效讨花帽贼于曹济闲行省蒙古纲奏其功复前职迁邳州经略使卒子从杰袭明安累功遥授镇南军节度副使

鄂兰哈玛尔

鄂兰哈玛尔健捷善战拉必玛察据穆棱水乌春乌木罕以古哩甸兵助之世祖擒拉必穆棱水人尚反侧不自安鄂兰哈玛尔往察之与萨布合兵攻乌木罕乌春已死乌木罕弃城遁去后从萨哈讨平埒克太祖擒萧哈里使鄂兰哈玛尔献馘于辽太祖谋伐辽鄂兰哈玛尔实赞成之及举兵屡战有功收国元年太祖即位鄂兰哈玛尔与宗翰以耕具九为献祝曰使陛下毋忘稼穡之艰难太祖敬而受之顷之为古伦英实贝勒为人聪敏辨给凡一闻见终身不忘始未有文字祖宗族属时事并能默记与色克同修本朝谱牒见人旧未尝识闻其父祖名即能道其部族世次所出天辅三年寝疾宗翰曰往问之尽得祖宗旧俗法度疾革太祖幸其家问以国事对曰马者甲兵之用今四户未平而国俗多以良马殉葬可禁止之乃献平生所乘战马并以马献太宗薨太祖哭之恸及葬复亲临熙宗时追封隋国王天德中改赠开府仪同三司隋国公大定闲配飨太祖庙庭谥刚宪子赛音鄂伦赛音子宗尹鄂伦子宗室宗道

晏

宗尹
宗奩
宗道
晏

晏本名鄂伦明敏多谋略通契丹字天会初乌达噶叛太宗幸北京以晏有筹策召问称旨命督扈从诸军往讨之至混同江谕将士曰今叛众依山谷地势险阻吾骑卒不得成列未易破也乃令诸军据高山连木为栅多张旗帜示以持久计声言俟大军毕集而发潜以舟师浮江而下直捣其营遂大破之月余一境皆定师还授左监门卫上将军为广宁尹入为吏礼两部尚书皇统元年为北京留守改咸平尹徙东京天德初封葛王又拜同判大宗正事进封宋王授世袭明安海陵迁都晏留守上京累封豫王许王越王贞元初进封齐王正隆二年例削王爵改西京留守未几为临潢尹遂致仕还居会宁海陵南伐世宗为东京留守晏之子伊呀讷自军前率众来归白彦敬等在北京闻伊呀讷等逃还使会宁同知高国胜拘晏家族世宗既即位遣使召晏晏率宗室数人入见即拜左丞相封广平郡王寻兼都元帅大定二年正月世宗如山陵礼毕将猎有司已夙备晏谏曰边事未宁畋游非所宜也世宗嘉纳之进拜太尉复致仕还乡里是岁薨诏有司致祭赙赠银币甚厚

宗尹

宗尹本名阿里罕充护卫改牌印祇候授世袭穆昆为右卫将军历顺天归德彰化唐古部族横海军节度使正隆南伐领神略军都总管先锋渡淮取扬州及瓜洲渡大定二年改河南路副都统时宋陷汝州杀刺史乌克逊满丕及汉军二千人宗尹遣万户富珠哩定方完颜阿呼喇瓜尔佳清臣乌库哩萨哈克楚额哲将骑四千往攻之复取汝州除大名尹副统如故顷之为河南路统军使迁元帅左都监除南东留守八年置山东路统军司宗尹为使迁枢密副使录其父功授世袭扶余路屯河明安并亲管穆昆除太子太保枢密副使如故世宗以宗尹虽才无大过人者而性行醇厚且国之旧臣遂拜平章政事封代国公兼太子太傅时民闲苦钱币不通世宗以问宗尹对曰钱者有限之物积于上者滞于下所以不通海陵军兴为一切之赋有菜园房税养马钱大定初军事未息调度不继故因仍不改今天下无事府库充积悉宜罢去于是养马等钱始罢有顷北方岁饥军食不足廷议输粟赈济或谓此虽不登而旧积有余秋成在近不必更劳输挽宗尹曰国家平时积粟本以备凶岁也必待秋成则惫者众矣人有损瘠其如防戍何从之宗尹乞令子尼楚赫袭其明

安会太尉守道亦乞令其子神果努袭其穆昆故事承袭人不识女真字者勒令习学世宗曰此二子吾识其一习汉字未习女真字自今女真契丹汉字曾学其一者即许承袭遂着于令二十四年世宗将幸上京谓宗尹等曰临潢乌库哩实垒岁皆不登朕欲自南道往三月过东京谒太后陵寝五月可达上京春月鸟兽孳孕东作方兴不必搜田讲事卿等以为何如宗尹曰南道岁熟宜如圣旨世宗至上京闻同签大宗正事宗室不能抚治上京宗室宗室子往往不事生业令宗尹察其事惩戒之宗尹奏曰随仕之子父没不还本土以此多好游荡乃命召还宴宗室于皇武殿击球为乐世宗问其闲人材孰可用者宗尹以奉国威准之子按春豫国公昱之曾孙阿噜对皆以为奉御诏访其余以闻二十七年乞致仕世宗谓宰臣曰宰相总天下事非养老之地若负其职朕亦有愧焉如贤者在朝利及百姓四方瞻仰朕亦与其光美乃诏宗尹曰卿久任外官不闻有过失但恨用卿稍晚今精力似衰矣若勉留卿则四方以朕为私卿亦不自安也顷之遣使问宗尹曰朕欲留卿时相从游如何宗尹曰圣主既衰老臣不忍摈弃臣岂敢他往于是赐甲第一区凡宴集畋猎皆从焉明年薨

宗室

宗室本名阿多古性勤厚有大志起家为海陵征南都统战瓜洲渡功最历祁州刺史大定二年为会室府路押军万户擢归德军节度使时方旱蝗督民掩捕数日捕绝改知临潢府事移天德军俄命为行军右翼都统为贺宋正旦使累迁兵部尚书授隆州路和屯明安罗里茂世袭穆昆出知大名府事徙镇利涉军寻同签大睦亲府事因病俾知咸平诏以其子符宝郎稟为韩州刺史以便养无几入授同判大睦亲府事拜平章政事明昌三年薨宗室居家约俭临事明敏其镇临潢邻国有警宗室知民乏粮即出仓粟令以牛易之敌知得粟即遁去边人以斡罕乱后苦无牛宗室复令民入粟易牛既而民得牛而仓粟倍于旧其经画如此

宗道

宗道本名八十通周易孟子善骑射大定五年充合门祗候累除近侍局使授右卫将军出为西南路副招讨章宗即位改同知平阳府事陕西路副统军左宣徽使伊喇仲方举以自代除西北路招讨使故事诸部驾马八百匹宗道辞不受诸部悦服边鄙咸治提刑司察廉召为殿前右副都点检寻除陕西路统军使以镇静得军民心特迁三阶兼知京兆府事时夏旱长安令取太白湫水步迎于远郊及城而雨是岁大稔承安二年为贺宋正旦使寻授河南路统军使泗州民张伟获宋人王万言彼界事

情宗道疑其冤廉问得实万楚州贾人伟负万货五千
余贯三年不偿万理索为伟所诬乃坐伟而归万改知河中府有惠政民立像于层观以
时祭之移知临洮以病解泰和四年卒赠龙虎卫上将军

们图瑋

们图瑋屡从征伐天会二年为爱锡贝勒参议国政明年薨天会十五年追封王正
隆例封郑国公明昌五年谥定济

阿里布

方

阿里布

阿里布系出景祖屡从征伐灭辽举宋皆有功天会九年睿宗经略陕西阿里布为
左翼都统与右翼都统宗弼抚定巩洮河西窰兰廓等
州军来宾定远和政甘谷窰洮陇安【按金史地理志凤翔路秦州下有甘谷城陇州下
有陇安寨此作甘谷安陇误今据改】等城寨及镇
堡蕃汉营部四十余处汉官军民蕃部酋长甚众于是泾原熙河两路皆平诏以兄明安
萨勒扎亲管穆昆之余户以阿里布为世袭穆昆十二
年为元帅右都监十五年迁左监军天眷三年从宗弼征河南迁左副元帅皇统三年封
谭国公六年为行台左丞相元帅如故是岁薨大定闲
大褒功臣图像衍庆宫定衍庆亚次功臣代国公罕都金源郡王实图美徐国公瑋楚郑
国公们图瑋濮国公实古纳济国公芬彻韩国公锡默
阿里元帅左监瑋巴尔斯鲁国公富察实嘉努银青光禄大夫蒙克隋国公和尼特进托
克索济国公博勒和开府仪同三司乌雅富埒瑋仪同
三司阿里布镇国上将军乌凌阿托云大师领三省事勳太傅大臭大兴尹特嘉瑋金吾
卫上将军耶律玛武骠骑卫上将军韩常并阿里布咸
着勋焉子乌达方乌达见逆臣传【按宗室表阿里布二子乌达及方无名言者乌达载
在逆臣传亦别无言之名本传云于言别有传所载
似误今改正】

方

方累官京兆少尹迁陕西路统军都监专事财贿不恤军旅大定三年迁元帅右都
监转元帅左监军改顺天军节度使帝曰卿本无功历
显仕不能接僚友往往交恶在京兆贪鄙彰闻至无谓也卿必悛改慎勿复尔除西南路
招讨使以兵部郎中高通为招讨都监佐之诏通曰卿
到天德毋以其官长曲从之简阅沿边士卒毋用孱弱之人毋以仆隶代役女真旧风酒
食会聚以骑射为乐今则奕碁双陆宜悉禁止令习骑

射从其居处之便勿以召集扰之久之方坐强买部人马二匹削一阶解职降耀州刺史通亦坐赃除名方后迁横海军节度使入为同签大宗

正事签书枢密院事诏袭父穆昆云

钦定续通志卷一百九十四

●钦定续通志卷一百九十五 宗室传十五

宗室传

金 【三】

○金三

世祖诸子

△世祖诸子

威泰

杲宗【义】

乌色【宗永】

乌哲【璋】

栋摩

【宗叙】 昂【郑嘉 衷庆善努】

世祖十一子翼简皇后生康宗次太祖次魏王威泰次太宗次辽王舍音次室图克坦氏生卫王乌色次鲁王乌哲次室布萨氏生汉王阿

库纳次室珠格氏生鲁王栋摩次室珠格氏生沂王扎拉次室乌库哩氏生郢王昂

威泰

杲

乌色

乌哲 【璋】

栋摩

昂

威泰

威泰年二十余萨哈伐埒克为裨将时诸将议攻取未定太祖将至军威泰迎之谓太祖曰埒克城且下勿惑他议太祖从之至军中众议

乃决威泰急起治攻具其夜进兵攻城迟明破之因尽平二额讷斯珲路二恩楚路寇盗康宗二年苏伯水诸部不听命使威泰等往治之行次

呼尔哈川萨合村召诸部惟沃赫不至达萨塔萨克苏既至复遯去乌塔遇于玛奇岭遂执二人以降于是使威泰伐沃赫沃赫完聚固守攻而

拔之进师博齐赫攻拔欢塔城取畔者以归太祖自宁江州还威泰已寝疾太祖过家门不入径至威泰所问疾未几薨威泰刚毅果断服用整

肃临战决策有世祖风太祖平辽叹曰恨威泰之不及见也天会十五年追封仪同三司魏王谥定肃

杲

杲本名舍音收国元年为温贝勒天辅元年以兵一万攻泰州下金山县降孟古皮

室四部及渤海人遂克泰州城中积粟转致乌哩页赆
先降诸部因徙之内地五年为乌赫哩贝勒都统内外诸军取中京普嘉努宗翰宗干宗
盘副之宗峻领罕扎明安耶律伊都为向导辽人守中
京者闻知师期焚刍粮欲徙居民遁去奚王锡默欲视我兵少则迎战若不敌则退保山
西杲知辽人无鬪志乃委辎重以轻兵击之六年正月
克高恩回纥三城进至中京辽兵溃遂克之乃分兵屯守要害驻兵中京使使奏捷献俘
罕都游兵出中京南遇骑兵三十余给曰乞明旦来降
于此杲信之使温特赫额埒春纳哈塔通恩富察布垒珠嘉拜塔兰往迎之奚王锡默兵
围额埒春等遂据坂去马皆殊死战败锡默兵追杀至
暮而还是役纳哈塔通恩功为多宗翰降北安州移书于杲请进兵杲乃约宗翰会奚王
岭期羊城泺会军时辽主在草泺宗翰与宗干率精兵
六千袭之辽主西走其都统玛格趋达兰宗翰遣达兰以兵一千往击之达兰请益兵于
杲而获辽枢密使德勒岱父子西京已降复叛杲使招
之不从遂攻之留守萧察喇踰城降四月复取西京杲率大军趋白水泺分遣诸将招抚
未降州郡及诸部族于是辽秦晋国王耶律聂呼自立
于燕京山西诸城虽降而人心未固杲遣宗望奏事仍请太祖临军耶律坦招西南招讨
司及所属诸部西至夏境皆降耶律佛德亦降于坦金
肃西平二郡汉军四千叛去坦与爱绅鄂约托卜嘉简料新降丁壮迨夜袭之诘旦战于
河上大败其众皆委仗就擒耶律聂呼移书于杲请和
杲复书责以不先禀命上国辄称大号若能自归当以燕京留守处之六月太祖发京师
杲使马和尚奉迎于塔鲁河斡鲁罗索败夏将李良辅
杲使完颜希尹等奏捷且请徙西南招讨司诸部于内地希尹等见太祖于大泺西南太
祖嘉赏之至鸳鸯泺杲上谒太祖追辽主至古尔珍川
南伐燕京次奉圣州诏曰自今诸诉讼书付都统杲决遣若有大疑即命闻奏太祖定燕
京还次鸳鸯泺以宗翰为都统杲从太祖还京师太宗
即位杲为安班贝勒与宗干俱治国政天会三年伐宋杲领都元帅居京师八年薨皇统
三年追封辽越国王天德二年配享太祖庙庭正隆例
封辽王大定十五年谥曰智烈子博济

宗义

宗义

宗义本名博济舍音第九子天德闲为平章政事海陵已杀太宗子孙忌舍音诸子
盛强欲尽除之时左副元帅萨里罕在汴京与托卜嘉
有隙托卜嘉女为海陵妃海陵阴使托卜嘉图萨里罕于是都元帅府令史约索迎合风
旨诈为萨里罕与其子宗安家书宗安误遗宫外约索

因拾得之以上变因是误杀宗义穆里延并杀宗安及太祖妃萧氏尽杀舍音子孙百余人穆里延子孙二十余人穆里延景祖孙们图珲次子舍音有幼子阿古尔其妻亦托卜嘉女遂得赦免后封为王授世袭千户大定初追复宗义官爵赠特进弟富尼玛博勒准阿鲁威赫并赠龙虎卫上将军

乌色

乌色穆宗初讷格纳擅募苏伯水人为兵使乌色及伊克往问状讷格纳遁去伊克等皆不欲追乌色督军而进至巴固岭西茂密水及之大破其众讷格纳死焉乌色抚定苏伯水部执讷格纳之母及其妻子而归穆宗曰乌色年尚幼已能集事可嘉也康宗二年威泰治苏伯水诸部乌色斡鲁佐之定诸部而还久之高丽杀行人阿古双宽而筑九城于海兰甸乌色将内外兵海古勒和尼齐富察都古噜纳佐之高丽兵数万来拒乌色分兵为十队更出迭入遂大破之会乌色母疾笃召还以斡鲁代之未几乌色复至再破高丽军进围其城高丽请和尽归前后亡命及所侵故地退九城之戍遂与之和皇统五年追封卫国王子宗永

宗永

宗永

宗永本名塔塔天眷中以宗室子预诛宗盘擢懿远大将军皇统初充牌印祇候五年出为赵州刺史累迁工部尚书与苏保衡完颜额哩页迁加伐宋士官赏凡与土贼战者宗永一槩加之世宗谓宰相曰若一槩追还必生怨望若因循不问则爵赏滥矣其与土贼战有一人敌三十以上者依已迁为定改同签太宗正事震武军节度使卒

乌哲 【璋】

乌哲天会十五年追封鲁王正隆例改封公子实都美骠骑卫上将军孙璋本名呼密多勇略通女真契丹汉字年十八左副元帅萨里罕引在麾下以事如京师见梁王宗弼与语宗弼悦之皇统六年父实都美卒宗弼奏璋可袭穆昆诏从之天德三年充牌印祇候以罪免寓居中都海陵伐宋富察萨勒扎掌留府事世宗即位于辽阳璋劝萨勒扎归世宗不从璋与守城军官乌凌阿实嘉努乌凌阿愿图克坦三胜富察芬彻等以兵晨入留守府杀萨勒扎及判官玛延萨里罕推宗强子阿苏为留守璋行同知留守事遣实嘉努佩萨勒扎金牌与愿芬彻中都转运使左渊子贻庆大兴少尹李天吉子盘奉表如东京贺即位世宗嘉之以璋为同知中都事璋以杀萨勒扎自摄同知留守心不自安遂与兵部尚书克实谋因世宗谒山陵作乱大定二年璋等会于克实家说万户高松不从璋知事

不成乃与克实诣有司自陈帝诛克实以璋为彰化军
节度使宋将吴璘出散关据宝鸡以西诏璋赴元帥都監圖克坦喀齊喀軍前時宋人据
原州靈州刺史延扎們都以兵四千攻之不克宋將姚
良輔以兵十萬至原州諸將不敢與戰璋至會平涼涇州潘原長武等戍兵合二萬人錫
喇布以兵二千軍于城北實訥埒以兵三千軍于城西
北麥子原皆据高阜為陣璋以本部兵陣于城西姚良輔出自北嶺先遣萬人攻錫喇布
自以軍九萬陣麥子原下分為八陣而別以騎二千襲
璋軍璋遣兵二千援錫喇布以二千益實訥埒錫喇布與宋人戰敗之宋兵在麥子原者
最堅實訥埒以兵五千沿濠為伏餘兵皆步戰擊其前
行騎士走之于是行馬以前冲以長槍行馬以後射以勁弓良輔兵稍挫實訥埒乘勝麾
兵破其七陣良輔重整兵出實訥埒少却而璋已破城
下兵與實訥埒會使布格以伏兵擊良輔實訥埒亦整兵奮擊之大破良輔軍斬首萬餘
級墜濠死者不可勝數良輔亦中兩創脫去遂圍原州
穴其西城城圯宋人宵遁璋入原州宋戍軍在宝鸡以西聞之皆自散關遁去宋吳璘復
据德順州璋與實訥埒將兵攻之璋率騎兵前行與璘
戰于張義堡遂沙山下敗之追北四十餘里璋至德順璘据城北險要為營璋亦筑營與
璘相望兩軍遇于城東凡五戰璘軍敗走璋追至城下
璘軍据城北岡阜與其城上兵相應以弩夾射璋軍璋軍佯却城中出兵來追璋反旆與
戰大敗之璘遣兵据東山堡欲樹柵璋與實訥埒議
曰敵若据東山堡此城必不可拔宜急擊之于是璋先据要地實訥埒以兵逼東山堡
璘兵恃濠相拒短兵接璘兵退走實訥埒追击之璘城
北營兵登北岡來戰璋軍少却璘遂焚璋軍攻城具實訥埒望見北原火发自東山堡來
赴引善射者先登擊敗之璘据險作三陣皆環以劍盾
行馬璋遣舒穆魯迪里自後擊之伊喇補以二千人當其前以強弓射之璘兵大敗墮溝
壑者甚眾璋復渡澗追之斬數千級而還璘軍雖敗猶
恃其眾都監喀齊喀使副總管瓜爾佳扎拉來問策諸將皆曰吳璘恃險不善野戰我退
軍平涼彼必棄險就平地然後可圖也璋曰不然彼恃
其眾非恃險也我退軍平涼彼軍深入吾地固壘以拒我則如之何扎拉還報喀齊喀
率四萬人赴之詰旦陰霧晦冥璘分兵四道來襲戰于
城東離而复合者數四漢軍千戶李展率麾下兵先登奮擊之璘軍陣動璋乘勝踵擊璘
走險璋急擊之殺略殆盡璘分半軍守秦州喀齊喀駐
軍水洛城東自六盤山至石山頭分兵守之斷其餉道璘乃引歸璋兵至上八節宋兵据
險為陣璋舍馬步戰地險不得接宋兵動璋乘之追至
甘谷城實訥埒兵亦至宋兵宵遁璋遂班師帝使御史中丞德濟視諸軍功狀德濟旧與

璋有隙故抑其功诏璋将士赏比诸军半之璋兼陕西
路都统进官一阶及元帅府上功璋居多因复赏璋及将士如诸军以璋为西北路招讨
使召为元帅左都监兼安武军节度使改益都尹左都
监如故宋人弃海州遁去焚官民庐舍且尽璋至海州得所弃粮三万六千余石安集其
人复其屯戍五年宋人约和罢三路都统复置陕西路
统军司璋为统军使寻召为御史大夫璋奏文武百官有相为朋党者今在台自臣外无
女真人乞不限资考虑材奏拟顷之改大兴尹为贺宋
正旦使璋至临安宋人请以太子接书不从宋人就馆迫取书璋与之且赴宴多受礼物
有司以闻将寘之极刑左丞相良弼奏曰璋为将大破
宋军宋人讎之久矣将因此陷之死地今若杀璋或者堕其计中耳乃杖璋百五十除名
后以征伐功起为武定军节度使授山东西路博迪山
纳古尔河穆昆改临洮尹十九年卒

栋摩

栋摩世祖第九子也斡鲁征高永昌栋摩等佐之克浑州城中出奔者栋摩邀击殆
尽与永昌隔鄂尔和水众遇淖不敢进栋摩以所部先
济诸军毕济军东京城下城中出战栋摩破之于首山歼其众拜咸州副都统太祖伐辽
诏咸州路都统司令色克留兵一千镇守栋摩以余兵
会于浑河太祖攻上京谕之不下栋摩以众先登克其外城留守托卜嘉率众出降都统
杲兵至中京栋摩自城西沿土河以进遂克之宗翰等
攻西京栋摩罗索等于城东为木洞以捍矢石于北隅以刍茭塞其隍城中出兵万余将
烧之温特赫博悟率众力战击却之又为四轮革车高
出于堞栋摩与摩下乘车先登诸军继之遂克西京与辽步骑五千战朔州境斩首三百
级复败辽骑三百于河阴辽兵五千屯马邑县南反击
破之尽得其车马器械辽兵三万列营于西京之西栋摩以三千兵击之使士卒皆去马
阵于沟堑之闲人皆殊死战辽兵大败追至其营而止
明日复败其兵七百余人兴中府宜州复叛栋摩讨之贝勒蒙克萨布乌达等获契丹纠
坚兴中平栋摩为南路都统讨和勒博耶律阿固齐等
杀和勒博于景蓟之闲其众遂溃张觉 【续通鉴作张毅】 据平州叛入于宋栋摩自
锦州往讨之觉将以兵胁迁来润隰四州之民栋摩至
润州击走张觉军逐至榆关复败之于营州东北欲乘胜进取南京时方暑雨退屯海墉
逐水草休息使布呼孟克两明安屯润州制未降州县
不得与觉交通九月栋摩破觉将王孝古于新安败觉军于楼峰口复与觉战于兔耳山
栋摩大败 【按续通鉴及纪事本末云栋摩以兵少
不交兵而退毅遂妄以大捷闻所载互异】 太宗使宗望问状宗望遂以栋摩军讨觉及

宗望破张觉太宗乃赦栋摩召宗望赴阙栋摩连破伪都统张敦固克南京执敦固杀之太宗遣使迎劳之又命屯兵镇南京有司运米五万石于广宁给南京润州戍卒遂下宜州坂又牙山杀其节度使韩庆民得粮五千石诏以南路岁饥许田猎其后宋童贯郭药师治兵栋摩因降人知之即具奏于是副宗望伐宋宗望以栋摩属尊请以为都统而自监战事于是栋摩为都统素赫副之败郭药师兵于白河遂降燕山以先锋渡河围汴宋人请盟将士分屯于安肃雄霸广信之境宗望还山西栋摩与刘彦宗留燕京节制诸军八月复伐宋大兵克汴州诸军屯于城上城中诸军溃而四出者十三万人栋摩达兰分击大败之师还栋摩为元帅左都监攻河闲下之大破敌兵万余于莫州又与宗弼分兵破山谷诸屯进克潍州及 议伐康王栋摩欲先定河北然后进讨太宗乃酌取羣议之中使罗索取陕西宗翰宗辅南伐天会六年薨熙宗时追封吴国王天德二年配享太祖庙庭正隆改封谭王大定二年徙封鲁王谥庄襄子宗叙

宗叙

宗叙

宗叙本名德寿天德二年充护卫授武义将军明年授世袭穆昆擢御院通进迁翰林待制兼修起居注转国子司业兼左辅阙正隆初转符宝郎在官职凡五年皆带剑押领宿卫迁大宗正丞改左骁骑都指挥使海陵幸南京宗叙至汴契丹萨巴反宗叙为咸平尹兼本路兵马都总管以甲仗四千付之许以便宜出松亭关闻世宗即位乃还兴中见世宗于梁鱼务授宁昌军节度使明年二月契丹攻宁昌宗叙止有女真渤海骑兵三十汉兵百二十人自将击之遇贼千余骑汉兵皆散走宗叙与三十骑尽锐力战身被二创所乘马中箭而仆遂为所执居百余日会贼中有临潢民伊喇阿达等盗马授之得脱归见元帅完颜默音平章政事完颜元宜谓之曰贼众乌合无纪律破之易尔于是帅府欲授军职宗叙见默音贪卤掠失事机不肯受职乃遁去至广宁矫取驿马驰至京师帅府先以闻世宗遣中使诘之且令还军并力破贼宗叙附奏曰臣非辞难者事须面奏不得从来遂召入乃条奏贼中虚实及诸军进退不合事机状诏大臣议皆以其言为然是时已诏布萨忠义代默音为元帅进讨于是拜宗叙为兵部尚书以本职领左翼都统率宗宁乌雅扎拉乌凌阿喇实兵各十人佐忠义军至花道遇贼与战右翼都统宗亨先败走忠义亦引却宗叙勒本部遮击之麾帐下士三百舍马步战贼不得逞大军整列复至合势击之贼遂败去复与赫舍哩志宁等追至七

渡河又大败之元帅忠义遂留宗叙自从贼平入为右宣徽使宋兵据海州将谋深入诏以宗叙为元帅右监军驻山东分守要害敌不得西四年入朝奏曰暑月在近顿兵边陲飞挽颇艰乞俟秋凉进发乃从其请九月渡淮宗叙出唐邓北至襄阳屡战皆捷明年宋人请和军还除河南路统军使河决李固渡分流曹单之闲诏遣都水监梁肃视河决宗叙言河道填淤不受水故有决溢之患今欲河复故道卒难成功沿河数州骤兴大役人心动摇恐宋人乘闲构为边患梁肃亦请听两河分流以杀水势遂止不塞十年召至京师拜参知政事十一年奉诏巡边六月至军中将战有疾诏以右丞相赫舍哩志壹代宗叙还七月疾甚遗表言朝政得失及边防利害使其子上之薨初宗叙尝请募贫民戍边屯田给以廩粟使贫者无艰食之患而当家免更代之劳世宗善其言而未行也十七年上谓宰臣曰戍边之卒冒寒暑往来朕甚闵之往岁参政宗叙尝言此事可谓尽心于国者今诏以两路招讨司乌库哩实全部族临潢泰州等路分置堡戍详定以闻世宗追念宗叙闻其子孙家用不给诏赐钱三千贯明昌五年配享世宗庙庭

昂

郛王昂本名乌达布世祖最幼子也常从太祖征伐天辅六年昂与素赫以兵四千监护诸部降人处之岭东就以兵守临潢府抑不能抚御降人苦之多叛亡者帝闻之诏安班贝勒乌奇迈曰比遣昂徙诸部多致怨叛素赫驻兵不与讨袭致使降人复归辽主违命失众当寘重法若有所疑则禁锢之俟师还定议时太宗居守希卜苏副之希卜苏劝太宗因国庆可薄其罚于是杖昂七十拘之泰州而杀素赫天会六年权元帅左都监十五年为西京留守天眷三年为平章政事皇统元年封漆水郡王二年制诏昂署衔带皇叔祖字封郛王是岁薨【按熙宗纪皇统二年漆水郡王昂薨追封郛王此云封郛王后乃薨所载互异】子郑嘉鹤寿鹤寿在忠义传

郑嘉

衷

庆善努

郑嘉

郑嘉皇统初以宗室子授定远大将军除磁州刺史天德闲为右谏议大夫累迁会壹尹安化军节度使改益都尹海陵伐宋为浙东道副统制与工部尚书苏保衡以舟师自海道趋临安至松林岛【续通鉴纲目及宋史俱作陈家岛】舟人望见敌舟请为备郑嘉问去此几何

舟人曰以水路测之且三百里风迅行即至矣郑嘉不晓海路舟楫不之信有顷敌果至见我军无备即以火礮掷之郑嘉顾见左右舟中皆火发度不得脱赴水死子承晖自有传

衷

衷本名绰哈中都司属司人世祖曾孙祖巴噶布琳封郢王 【按本传载衷世祖曾孙祖巴噶布琳封郢王是巴噶布琳乃世祖子也考

世系表世祖子十一人无巴噶布琳其封郢王者为昂昂之名则乌达布也本传恐有误

】父乌里官至特进大定中收衷充合门祗候授代州

宣锐军都指挥使历宁海蠡州刺史除顺义军节度使移镇镇西泰和六年致仕衷孝悌贞谨深悉本朝婚礼皇族婚嫁每令衷相之治复有能

称其在宁海蠡州赋役无扰大安初追赠辅国上将军

庆善努

庆善努名承立字献甫统军使古绅之子平章博索之从弟也贞佑初为武卫军副都指挥使兼提点近侍局言呼沙呼专权僭窃后呼沙

呼伏诛愈见宠幸以为殿前右副都点检三年元兵围中都诏以庆善努为宣差便宜都提控率所募兵往援俄为元帅右都监兴定元年元兵

及夏人回经宁海庆善努以兵邀击败之进元帅左都监行帅府事于鄜州二年败夏人于玛吉峰三年夏人据通秦寨遣提控纳哈塔迈珠击

败之夏人遁去四年破夏兵于宥州遂围神堆府援兵大至复击走之正大四年李全据楚州诏以庆善努为元帅同总帅额尔克将兵守盱眙

已而全军盱眙界二帅迎敌大败死者万余委弃资仗甚众时军无见粮民疲奔命诸相不肯正言枢密判官白华拜章乞斩之以谢天下不报

降为定国军节度使八年正月凤翔破两行省徙京兆居民于河南令庆善努守之时止有病卒八百瘦马二百惧不能守屡上奏请还不许十

月弃京兆还朝行至阆乡不听入见未几代图克坦乌登行省事于徐州天兴元年 【原文作正大九年按是年正月改元开兴四月改元天

兴哀宗纪以天兴纪元今依纪改正】自徐引兵入援选精锐一万五千与徐帅完颜鄂伦统之行次杨驿店遇萨纳台军遂溃鄂伦战死庆善

努被擒诱之使招京城不从左右以刀砍其足亦不降即杀之鄂伦丞相萨布之侄元光闲例以诸帅为总领鄂伦以丞相故独不罢金朝防近

族而用疏属故博索鄂伦辈皆心腹倚之

钦定续通志卷一百九十五

●钦定续通志卷一百九十六

宗室传

金【四】

○金四 宗室传十六

肃宗诸子

穆宗诸子

康宗诸子

△肃宗诸子

肃宗二子温国公讷古库崇国公富勒呼

△穆宗诸子

昌 勛【宗秀齐】

穆宗五子长达兰次乌页次富察次富埒赫次萨古【按宗室传例有标题肃宗穆宗子原史失载今据宗室表补】

昌

勛

昌

昌本名达兰【按宗室表勛先而达兰次之今考本传称弟勛则是达兰兄也故列之勛传之前】宗翰袭辽主于鸳鸯泺辽都统玛格奔使达兰追及之获辽枢密使德勒岱及其子摩格纳颜以还太祖自将袭辽主于大鱼泺留辎重于草泺使达兰雅穆守之奚路兵官琿楚不能安抚其众遂以达兰为奚六路军帅镇之久之讨噶珊苏库部奚人奚人据险战杀且尽苏库卓琳括纽十三岩皆平其后抚定奚部及分南路边界表请设官镇守诏依东京渤海列置千户穆昆辽外威约尼扎古雅部族在建州达兰击之擒其队将克尔叟博斯呼降民户千余进降约尼二部再破兴中兵降建州官属扎古雅势蹙亦降兴中建州皆平诏第将士功赏抚安新民达兰请以约尼九营为九明安帝以都林有功使领四明安扎古雅仍为亲管明安五明安之都帅命达兰择人授之达兰与刘彦宗举萧公翊为兴中尹郡府各以契丹汉官摄治皆从之及宗翰宗望伐宋达兰为六部路都统达兰阿里康破宋兵二万于杞覆其三营获京东路都总管胡直孺及其二子与南路都统制随师元及其三将遂克拱州降宁陵破睢阳下亳州宋兵来复睢阳又击走之擒其将石瑱大军北还达兰为元帅左监军徇地山东取密州又取巨鹿刘豫以济南府降诏以豫为安抚使治东平达兰以左监军镇抚之大事专决焉天会十五年为左副元帅封鲁国王初朱人既诛张邦昌太宗诏诸将复求如邦昌者立之或举折可求达兰力举刘豫豫立为帝号大齐数年无尺寸功遂降豫为蜀王达兰为右副元帅宗弼俱在河南宋使王

伦求河南陕西地于达兰明年达兰朝京师倡议以废齐旧地与宋熙宗命羣臣议会东京留守宗隽来朝与达兰合力宗干等争之不能得达兰弟勛亦以为不可既退达兰责之勛曰苟利国家岂敢私邪是时太宗长子宗盘为宰相位在宗干上达兰宗隽附之竟执议以河南陕西地与宋久之宗盘跋扈尤甚宗隽亦为丞相达兰持兵柄谋反有状宗盘宗隽皆伏诛诏以达兰属尊有大功因释不问出为行台尚书左丞相手诏慰遣达兰至燕京愈骄肆不法复与翼王呼兰谋反熙宗乃下诏诛之达兰自燕京南走追而杀之于祁州并杀翼王及宗人胡勒希图达兰二子威泰乌达布而赦其党与 【按大金国志云达兰庶子名勛字勉道后为平章今考达兰弟实名勛拜平章政事志恐误】

勛

勛本名乌页好学问国人呼为秀才年十六从太祖攻宁江州太宗嗣位召与谋政事宗翰宗望定汴州太宗使勛往劳之宗翰等问其所欲曰惟好书耳载数车而还女真初无文字及破辽获契丹汉人始通契丹汉字于是诸子皆学之天会六年诏求访祖宗遗事以备国史命勛与邪律迪延掌之勛等采摭遗言旧事自始祖以下十帝综为三卷详略咸得其实自太祖与高丽议和凡女真入高丽者皆索之至十余年不已勛上书以谏从之十五年同中书门下平章事预平宗盘之难诏以皇叔祖字冠其衔勛力辞皇统元年撰定熙宗尊号册文召勛饮于便殿祖宗实录成进入帝焚香立受之诏职俸外别给二品亲王俸兼进拜平章政事时帝日与近臣酣饮或继以夜勛上疏谏乃为止酒进拜左丞相兼侍中监修如故八年奏上太祖实录二十卷封鲁国王勛刚正寡言海陵方用事朝臣多附之一日大臣会议海陵后至勛面责之海陵跪谢九年进拜太师进封汉国王海陵篡立加恩大臣以收人望封秦汉国王领三省监修如故及宗本无罪诛勛髭鬣顿白因上表请老海陵不许优诏谕之有大事令宰臣就第商议入朝不拜勛遂称疾笃表请愈切海陵不悛从之以本官致仕进封周宋国王正隆元年与宗室俱迁中都二年例降封金源郡王薨子宗秀

宗秀

齐

宗秀

宗秀字实甫本名锡里库涉猎经史通契丹大小字善骑射与平宗盘宗隽之乱授定远大将军以宗盘世袭明安授之宗弼复取河南宗秀与海陵俱赴军前宋将岳飞军于亳宿之闲宗秀率步骑三千扼其冲要击败之师还

为太原尹天德初历平阳尹昭义军节度使封广平郡

王正隆二年卒于官

齐

齐本名素赫穆宗曾孙父哈布尔宁州刺史大定中以内族充司属司将军授同知复州军州事累迁刑部员外郎谕曰本朝未尝有内族为六部郎官者以卿历职廉能故授之先是复州哈斯罕关地方七百余里因围猎禁民樵捕齐言其地肥衍赋民开种则公私有益诏弛其禁章宗立改户部员外郎出为磁州刺史治以宽简未尝留狱磁名郡刺史皆朝廷遴选郡人以前政有声如刘徽柔程辉高德裕皆不及也明昌三年议置诸王傅乃以齐傅克王王将至任郡明安迎接齐峻却之王怪问故曰三国藩辅明安皆总戎职于王何利焉却之以远嫌也王府家奴为不法辄发还本明安终更无敢犯者明年授山东东西路副统军兼同知益都府事有惠爱转彰化军节度使六年移利涉军召见劳慰有加诏留守上京承安二年致仕卒齐明法识治体内族中兴丞相承晖并称云

△康宗诸子

宗雄【安塔哈阿林】 威赫

康宗三子敬僖皇后生楚王摩啰欢次室温都氏生昭武大将军胜格彻次室布萨氏生威赫

宗雄

威赫

宗雄

宗雄本名摩啰欢康宗长子其始生也世祖见而异之因解佩刀使常置其侧曰俟其成人佩之九岁能射逸兔年十一射中奔鹿既长善

谈辩多智略孝敬谦谨人爱敬之康宗没辽使阿息保来乘马至灵帷阶下择取帽赠之马太祖怒欲杀阿息保宗雄谏止之太祖攻宁江州渤

海兵锐甚宗雄以所部败渤海兵授世袭千户穆昆太祖败辽兵于珠赫店宗雄战功为多达噜噶城之役宗雄将右军身先士卒辽兵当右军

者已却复助左军绕辽兵后击之辽兵大溃乘胜逐北日暮围之黎明辽兵突围出追至页噜伯奇【按太祖纪载达噜噶城之役逐北至阿

噜冈此云页噜伯奇所载互异】而还及辽帝以七十万众至图们诸将皆曰辽军势甚盛不宜速战宗雄曰辽兵虽众皆庸将不足畏也帝曰

善追及辽帝于呼岱巴冈宗雄率众直前令前行持挺击辽兵马首后行者射之大败辽兵帝嘉其功以御介冑及御战马赐之舍音攻泰州宗

雄与宗干罗索取金山县行近白鹰林获候者七人纵一人使归县人闻大军至乃溃遂

下金山县与舍音俱取泰州太祖自将取临潢府遣宗雄先启行遇辽兵五千与战大军亦至大破之既而与普嘉努按视泰州地土宗雄奏其土可种植从之由是徙万余家屯田泰州西京既降复叛时粮饷垂尽议欲罢攻宗雄曰西京都会也若委而去之则降者离心辽之余党与夏人得以窥伺矣乃立重赏以激士心及克西京与宗翰等击耿守忠兵七千于西京之东四十里大破之迎谒太祖于鸳鸯泺从至归化州疾笃天辅六年薨赠增加等诏哈济千户驸马实嘉努护丧归宗雄好学嗜书尝从太祖猎误中流矢恐太祖知之罪及射者托疾归家卧两月因学契丹大小字尽通之国初立法定制皆与宗干建白行焉及与辽议和书诏契丹汉字亦与宗翰希尹主其事而材武蹻捷挽强射远几二百步尝走马射三麋已中其二马蹶跃而下复彀满步射获之天眷中追封太师齐国公天德二年加秦汉国王正隆二年改太傅金源郡王大定二年追封楚王谥威敏配享太祖庙庭十五年诏图像于衍庆宫子富勒呼安塔哈阿林孙常春呼喇勒呼喇呼噜彻珍帕克巴恩楚初宗干纳宗雄妻海陵衔之及篡位杀宗雄妻与其子妇及常春兄弟彻珍之子七人皆弃其骨于濠水大定十七年诏有司收葬初富勒呼袭明安富勒呼卒子和勒端袭和勒端卒章宗命宗雄孙富德袭之

安塔哈

阿林

安塔哈

安塔哈又名鄂勒欢性端重有父风天眷二年袭明安除大宗正丞以明安让兄子和勒端加武定军节度使奉朝请改侍卫亲军都指挥使封金源郡王进封谭王迁同判大宗正事别授世袭明安海陵将迁中都谏曰弃祖宗兴王之地而他徙非义也海陵不悦留之上京久之进封郟王改封魏王除济南尹不堪卑湿以病告改西京留守正隆例夺王爵改广宁尹世宗即位赦令至广宁弟雅尔劝弗受安塔哈受之及诸郡皆诣东京安塔哈兄弟亦上谒有司请并诛之世宗曰正隆翦刈宗室朕不可效尤于是释安塔哈而诛雅尔复判大宗正事迁太子太保封兰陵郡王改劝农使海陵时自上京徙河闲土瘠诏安塔哈族二十五家徙平州至是诏给平州官田三百顷屋三百闲宗州官田百顷进金源郡王致仕十四年薨临终戒诸子曰汝辈勿以生富贵中而为暴戾宜自谦退海陵以猜忌翦灭宗室我以纯谨得免汝辈惟日为善勿坠吾家

阿林

阿林颖悟辩敏通女真契丹大小字及汉字年十八授定远大将军历泰宁定海镇

西安国等军节度海陵南代以为神勇武平等军都总管由寿州渡淮与劝农使伊喇元宜合兵三万为先锋十月至庐州败宋将王权于渭子桥【海陵纪作蔚子桥】至和州南复与权战又败之世宗即位辽阳海陵死大军北还将渡淮舟楫甚少军士争舟不得亟渡阿林得生口知可涉处命本部涉济以全军还入见迁兵部尚书监督经画征斡罕诸军粮饷斡罕败还至懿州以疾卒

威赫

威赫勇健有材略从太祖伐辽取宁江州战出河店天眷二年授骠骑上将军除纥纥累迁忠顺兴平军节度使天德二年入为大宗正丞四年出为昭德军节度使寻改德昌军节度使封广平郡王正隆二年例夺王爵改哈斯罕节度使大定元年封宗国公为劝农使卒于官

钦定续通志卷一百九十六

●钦定续通志卷一百九十七 宗室传十七

宗室传

金【五】

○金五

太祖诸子

△太祖诸子

景宣帝宗峻【元】宗杰 宗干【充 充襄 袞】宗望【齐
文京】宗隽 睿宗宗辅 宗弼
【亨】宗强【阿林 克实阿苏】宗敏

太祖十六子圣穆皇后生景宣帝豊王乌里赵王宗杰光懿皇后生辽王宗干钦宪皇后生宋王宗望陈王宗隽浑王额鲁宣献皇后生睿宗幽王鄂尔多元妃乌库哩氏生梁王宗弼卫王宗强曹王宗敏崇妃萧氏生纪王实讷埒息王宁吉莒王燕逊娘子时讷克生邳王干瑋

景宣帝宗峻

宗杰

宗干

宗望

宗隽

睿宗宗辅

宗弼

宗强

宗敏

景宣帝宗峻

景宣皇帝讳宗峻本讳胜额天辅五年都统杲取中京帝别领罕扎明安既克中京遂与杲俱袭辽主于鸳鸯泺辽主走阴山耿守忠救西京帝与宗翰等击走之敌据西京城南浮图射士卒多伤帝曰先取是则西京可下既而攻浮图克之遂下西京太祖崩帝与兄宗干率宗室羣臣立太宗天会二年薨妃富察氏生熙宗熙宗即位追上尊谥曰景宣皇帝庙号徽宗富察氏为惠昭皇后改葬兴陵海陵弑立降帝为豊王世宗尊帝为景宣皇帝子熙宗常胜扎拉【按景宣帝睿宗显宗原史别立世纪补其妃则列之后妃传中今依郑例并改归宗室而以追尊诸后删附于后】

元

元

胙王元本名常胜为北京留守弟扎拉为安武军节度使皇统七年四月戊午左副点检富察阿固岱子尚主赐宴便殿熙宗被酒酌酒赐元元不能饮熙宗怒仗剑逼之元逃去命左丞宗宪召元宗宪与元俱去熙宗益怒时户部尚书宗礼在侧使之跪手杀之海陵与唐古辩谋废立曰若举大事谁当立者辩荅曰其胙王常胜乎海陵复问其次曰邓王子阿兰由是海陵之心忌常胜并阿兰时河南军士孙进自称皇弟按察大王熙宗疑皇弟或在常胜也使塔斯鞫之无状海陵知熙宗有疑常胜心因此可以除之谓熙宗曰孙进反有端不称他人乃称皇弟大王陛下弟止有常胜札拉塔斯鞫不以实故出之矣熙宗以为然使唐古辩萧肄按问塔斯塔斯诬服于是乃杀常胜及其弟扎拉并杀塔斯海陵乘此并挤阿兰及其弟达兰杀之海陵篡立追封常胜扎拉阿兰官爵亲临葬所致祭元子育本名和卓大定二十七年自南京副留守迁大宗正丞兼劝农副使为人清廉干治世宗尝曰蒲阳温胙王元外若愚讷临事明敏过人朕于兄弟闲于元尤款密云

宗杰

宗杰本名穆里延天会五年薨谥孝悼天眷元年追封越王以其长子奭为会盗牧封邓王厯上京燕京西京留守皇统三年薨子阿兰达兰海陵将谋弑立构而杀之并杀宗杰妻大定闲赠宗杰太师进封赵王

宗干

宗干本名干布太祖伐辽辽人来御遇于境上使宗干率众先往填堑士卒毕渡渤海军驰突而前左翼七穆昆少却遂犯中军杲辄出战太祖曰遇大敌不可易也使宗干止杲宗干驰出杲前控止导骑斋达之马杲乃还达噜

噶城之战宗干以中军为疑兵太祖既攻下黄龙府即欲取春州宗干劝太祖休息士卒遂班师寻得降人言春泰州无守备可取于是舍音取春泰州宗雄宗干等下金山县宗雄即以兵三千属宗干招集未降诸部太祖克临潢府至沃赫河宗干谏曰地远时暑士罢马乏若深入敌境粮餽不继恐有后艰帝从之遂班师从都统杲取中京宗翰自北安州移书于杲请袭辽主杲不能决宗干请从其策再三言之杲乃报宗翰会奚王岭太宗即位以宗干为古伦贝勒与舍音同辅政天会三年获辽主于应州西伊都谷始议礼制度正官名定服色兴庠序设选举皆自宗干启之十年为古伦左贝勒熙宗即位拜太傅与宗翰等并领三省事天眷二年进太师封梁宋国王无何监修国史皇统元年赐宗干辇舆上殿制诏不名从幸燕京遇疾还至野狐岭疾亟不行居数日薨辍朝七日大臣死辍朝自宗干始海陵篡立追谥宪古弘道文昭武烈章孝睿明皇帝庙号德宗以故第为兴圣宫大定二年除去庙号改谥明肃皇帝及海陵废为庶人削去明肃帝号从太祖诸王有功例封为皇伯太师辽王谥忠烈妻子诸孙皆从降明昌四年配享太祖庙庭子充亮充襄袞亮是为海陵庶人

充
充
襄
袞
充

充本名实图美熙宗初加光禄大夫天眷闲为汴京留守皇统闲封淄国公为吏部尚书进封代王拜右丞相薨追封郑王大定二十二年追降仪同三司左丞相子塔纳元努额布勒阿里布塔纳为归德军节度使阿里布定远大将军和啰噶图明安和琳河穆昆海陵弑图克坦氏以充尝为图克坦养子因并杀塔纳及阿里布元努额布勒逃归世宗塔纳赠荣禄大夫阿里布辅国上将军诏有司改葬世宗时额布勒为镇国上将军元努字惇礼后名永元幼聪敏日诵千言通左氏春秋皇统元年试宗室子作诗中格天德初授博诺山世袭穆昆世宗即位于辽阳与弟额布勒俱来归帝慰劳甚厚授永元宗正丞改符宝郎为滦州刺史世袭明安乞以穆昆与额布勒诏许之转棣州防御使时张弘信通检山东督责苛急永元面责弘信曰朝廷以差调不均立通检法今使者所至残酷农民故官子孙闭门自守使与商贾同处上役岂立法本意哉弘信无以对于是棣州赋税得以实自占迁震武军节度使徙顺义军朔州西境多盗而

猾吏大姓蠹狱讼警乱赋役永元剔其宿奸百姓安之
坐卖马与驿人取赢利解职顷之起为保大军节度使历昭义绛阳震武军迁济南尹改
兴中尹为彰德军节度使卒于官永元历典大藩多知
民闲利害相棣顺义政迹尤着其民并为立祠

兗

兗本名梧桐累官左宣徽使海陵篡立兗使宋还拜司徒兼都元帅领三省事进太
尉及杀太祖妃萧氏尽以其财产赐兗罢都元帅府立
枢密院以兗为枢密使天德四年十二月薨进赠王爵大定二十二年追降特进子阿哈
大定中为符宝祗候选同知定武军节度使

襄

襄本名永庆海陵母弟为辅国上将军卒天德二年追封卫王再赠司徒大定二十
二年追降银青光禄大夫子和尚封应国公赐名乐善
大定闲家奴小僧月一妄言和尚寝熟有异征襄妃松科以为信然召日者李端卜之端
云当为天子司天张友直亦云当大贵家奴李添寿上
变松科和尚下吏验问有状皆伏诛

袞

袞本名富勒坚亦作博恰桀鳌强悍海陵忌之初为辅国上将军天德初加特进封
王为吏部尚书判大宗正事坐语禁中起居状与翰林
学士承旨宗秀护卫玛奇实达尔王之章皆决杖有差未几授明安及迁中都道中以袞
为西京留守袞与西京兵马完颜穆喇斡有旧同在西
京遂相往来袞尝遗以玉带编修官元福努之妻与袞姻戚元福努尝戒袞曰大王名太
着宜少谦晦袞心知海陵忌之召日者问休咎家奴哈
里乃上变言与穆喇斡等谋反尝召日者问天命御史大夫高禎刑部侍郎耶律赛音舒
噜就西京鞫之无状海陵怒使人械袞等至中都不复
究问斩之于市穆喇斡元福努并日者皆凌迟处死

宗望

宗望本名斡里雅布太祖征伐尝在左右都统杲已克中都宗望欲审辽主所在遂
与宗弼率百骑进骑多罢乏独与马和尚逐页噜布呼
伊勒希等驰击败之生擒五人审辽主尚在鸳鸯泺于是进兵追之辽主走阴山杲使宗
望请太祖临军宗望至京师太祖曰悬军远伐授以成
算岂能尽合机事朕以六月朔启行既次大泺西南杲使希尹奏请徙西南招讨司诸部
于内地太祖问徙诸部人当出何路宗望对曰中京残
敝刍粮不给由上京为宜然新降之人遽尔骚动未降者必皆疑惧乃下其议命军帅度
宜行之太祖闻辽主在大鱼泺自将精兵万人袭之普

嘉努宗望率兵四千为前锋昼夜兼行追及辽主于石辇驿军士至者才千人辽军二万余力治营垒伊都曰我军未集人马疲剧未可战宗望曰不亟战辽主且遯遂战辽兵围之数重辽主谓宗望兵少必败遂与嫫御自高阜下临平地观战伊都示诸将曰此辽主麾盖也若萃而薄之可以得志骑兵驰赴之辽主大惊遯去兵遂溃宗望骑兵千余追之普嘉努为后继太祖已定燕京斡鲁为都统宗望副之袭辽主于阴山青冢之闲将至青冢遇泥泞众不能进以绳系辽都统林牙达实使为乡导直至辽主营时辽主往应州其嫫御诸女惊骇欲奔命骑下执之辽太叔呼拉哈妃国王聂呼次妃辽汉夫人并其子秦王许王女古裕伊林斡里延大额页次额页赵王妃斡里延招讨达鲁详袞禄锦节度使伯特彻格尔皆降得车万余乘惟盍王雅里及其长女乘军乱亡去辽主自金城来知其族属皆见俘率兵五千余决战宗望击败之辽主遯去获其子赵王实讷埒及传国玺追二十余里尽得其从马献传国玺于行在太祖寘玺怀中东面恭谢天地录功行赏辽主乃使穆喇斡持兔钮金印请降视其文乃元帅燕国王之印也宗望复以书招之遂使使谕夏国宗望趋天德辽耶律慎思降及候人乌舍回皆言夏国迎护辽主渡大河矣宗望乃传檄夏国令执送辽主及辽秦王等以俘见太祖太祖嘉宗望功以辽蜀国公主伊林赐之张觉叛太祖使宗望以栋摩军讨之降濒海郡县遂与觉战于南京城东觉败皆遯奔宋城中人执觉父及其二子来献宗望杀之张敦固等出降使使与敦固入城城中人杀使者立敦固为都统乘城扼守初张觉奔宋入于燕京宗望责宋纳叛人且征军粮请空名宣头千道增信牌安抚新降之民诏以新附长吏职员仍旧已命诸路转输军粮勿督于宋给空名宣头五十道迁润来隰四州人徙于洵州者俟毕农各复其业张敦固以兵八千分四队出战大败宗望再三开谕敦固乃开其一门宗望使栋摩奏其事乃诏赦南京官民官职如旧别敕有司轻徭赋劝稼穡疆场之事一法于宗望又诏选勋贤及有民望者为南京留守及诸阙员仍具姓名官阶以闲召宗望赴阙宋兵三千自海道来破九寨杀马城县戍将节度使图尔噶取其银牌兵仗及马而去宗望索户口宋人弗遣且闻童实郭药师治军燕山宗望等奏请伐宋乃以栋摩为都统宗望监栋摩刘彦宗两军战事至三河破郭药师兵四万五千于白河药师降遂取燕山府尽放其军实州县悉平破宋真定兵五千人遂克信德府下邯郸宋李邺请修旧好宗望留军中不遣自郭药师降益知宋之虚实宗望请以为燕京留守及董才降益知宋之地理宗望请任以军事太宗俱赐姓完颜氏给以金牌天会四年正月

己巳诸军渡河取滑州使吴孝民入汴以诏书问纳平州张觉事令执送童贯谭稹詹度以黄河为界纳质奉贡癸酉诸军围汴宋少帝请为伯
侄国效质纳地增岁币请和遂割太原中山河闲三镇沈晦以誓书地图至军中书用伯侄礼以康王构太宰张邦昌为质二月丁酉朔与宋平
退军孟阳是夜姚平仲兵四十万【按续通鉴云姚平仲率涉骑万人夜袭敌营本传云四十万其史家张大之词欤】来袭候骑觉之分遣
诸将迎击大破平仲军复进攻汴城问举兵之状少帝大恐使宇文虚中来辨曰初不知其事且将加罪其人宗望辍弗攻改肃王枢为质康王
构遣归师还河北两镇不下遂分兵讨之宗望罢常胜军给还燕人田业命将士分屯安肃雄霸广信之境宗望还山曰未几为右副元帅有功
将士迁赏有差顷之宋少帝以书诱伊都萧仲恭献其书诏复伐宋八月宗望会诸将发自保州耶律铎破敌兵三万于雄州杀万余人纳颜败
宋军七千于中山高六董才破宋兵三千于广信宋种师闵军四万人驻井陘宗望破之取天威军还克真定杀知府【北盟会编作安抚使
靖康小雅作观察使】李邈得户三万降五县遂自真定趋汴十一月戊辰宗望至河上降魏县诸军渡河留诸将分出大名之境降临河县至
大名县德清军开德府皆克之阿里库以骑兵三千先趋汴破宋军六千于路取胙城抵汴城下覆宋兵千人擒数将宗望至汴分遣瑄都纳颜
萨喇达实连破宋援兵闰月壬辰朔宋兵一万出城来战宗望选劲勇五千使当堪呼噜楚古尔苏击败之五年四月以宋二主北还宗望分诸
将镇守河北乃西上凉陘是月薨十三年封魏王皇统三年进许国王又改封晋国王天德二年赠太师加辽燕国王配享太宗庙庭正隆二年
例降封大定三年改封宋王谥桓肃【大金国志作忠武】子齐文京【原文作齐京文宗室表及二传叙次皆京先而文后今考文传云
弟京得罪京传云兄德州防御使文则是文兄而京弟也因并加改正】初辽节度使和尚与林牙玛格男慎思俱被擒和尚弟道温为兴中尹
太祖使满都市以兵千人与和尚往招之和尚欲亡去不克至兴中城下以矢系书射城中教道温毋降事泄满都布责其反复对曰以忠报国
虽死不恨乃杀之既而宗望军遇辽都统伯特等道温在其中相与隔水而语宗望承制招之伯特无降意宗望谓道温曰汝兄和尚因战而获
未尝加罪后以叛诛能无痛悼道温曰吾兄辱于见获荣于死国宗望顾马和尚曰能为我取此乎对曰能遂以所部渡水击败其众直趋道温
射中其臂获而杀之

齐

文
京
齐

齐本名舒苏天眷三年授镇国上将军世宗初迁特进加安武军节度使齐以近属被宠遇而性庸滞无材能大定三年罢节度给随朝三品俸卒弟文弟京皆以谋反诛世宗尽以其家财产与齐之子耀珠诏齐妻曰汝等皆当缘坐朕念宋王故置而不问十五年命英王爽于诸公主女子中为耀珠择婚其礼币命有司给之俄袭叔父京山东西路特默齐明安

文

文本名呼喇皇统闲授世袭穆昆加奉国上将军居中京时市中有秽术强谦者文与左渊皆与之游海陵还中京召强谦诘问 【原文
作文召强谦诘问误今删正】 穷竟本末杀之于市责让文渊贞元初除秘书坐淫乱杖二百除名俄复为秘书监封王正隆例封郟国公大定初还武定军节度使留京师奉朝请三年除广宁尹召为判大宗正事封英王是时弟京得罪世宗谓文曰朕待京不薄乃图不轨朕念骨肉遂从轻典卿亦骄纵无度自今惩咎悔过赤心事朕无患朕不知也除真定尹赐以衣带改大名尹徙封荆王文至大名多取明安穆昆良马或以驽马易之买民物不尽与直寻常占役弓手四十余人诡纳税草十六万束公用阙取民钱一万九千余贯坐是夺爵降德州防御使僚佐皆坐不矫正解职监察御史董师中失纠察已除尚书省都事降沁南军节度副使文既失职居常怏怏日为怨言和卓揣知其意因言南京路明安阿古和卓穆昆伯哩尼楚赫与大王厚善果欲举大事彼皆愿从文信其言乃召日者康洪占休咎密以谋告洪洪言来岁甚吉文厚谢洪使家僮纲格等往南京以书币遗阿古等纲格到南京见阿古等不言其事及还给文曰阿古从大王矣文乃造兵仗使家奴斡尔达画阵图家奴重喜诣河北东路上变府遣总管判官伯特捕文伯特至德州日已晚召防御判官绰鄂谋绰鄂言明日文生日可就会上执之是夜文知本府使至意其事觉乃与和卓呼尔察等俱亡去世宗闻文不获诘误者多督所在捕之诏募获文者迁官五阶赐钱三千贯被获伏诛康洪论死余皆坐如律诏释其妻珠尔苏埒诏曰德州防御使文北京曹贵郟州李方皆因术士妄谈禄命陷于大戮自今宗室宗女有属籍及官职三品者除占问嫁娶修造葬事不得推算相命违者徒二年

京

京本名呼噜累迁特进天德二年除翰林学士承旨兼修国史加开府仪同三司迁

工部尚书改礼部兵部判大宗正事封曹王除河闲尹
正隆二年例封溥国公北京留守六年坐违制与图克坦贞饮酒降滦州刺史未几改絳
阳军节度使海陵遣使护卫呼噜往杀之京闲道走汾
州得免世宗即位来见于桃花坞复判大宗正事封寿王世宗惩创海陵疏忌宗室加礼
京兄弟情若同生时伐宋未罢兵用度不足百官未给
全俸京家数百口财用少赐金一百五十两改西京留守京妻公寿尝召日者孙邦荣推
京禄命邦荣言留守官至太师爵封王京问此上更无
否邦荣察其意乃诈为图讖以献于东京曰后诚如此乎再使卜之邦荣称所得卦有独
权之兆京复使邦荣推世宗当生年月家人孙小哥妄
作谣言诳惑京如邦荣指京信之大定五年三月邦荣上变诏刑部侍郎高德基户部员
外郎完颜乌肯彻往鞫之京等皆款伏狱成还奏诏京
夫妇特免死杖一百除名岚州楼烦县安置以奴婢百口自随官给土田遣乌肯彻刘琉
宣谕京曰朕与汝皆太祖孙海陵失道翦灭宗支朕念
兄弟无几于汝尤为亲爱何为而怀此心朕念骨肉不忍尽法汝若尚不思过天地岂能
容汝也十年四月诏于楼烦县为京作第一区月给节
度廩俸十二年其兄德州防御使文谋反京当缘坐宰臣或言京图逆今不除之恐为后
患世宗曰天下大器归于有德海陵失道朕乃得之但
务修德余何足虑乃遣使宣谕京免其缘坐久之世宗以太祖诸孙存者无几欲召京不
使任职但廩给之以问宰臣皆以为非宜乃止

宗隼

宗隼本名额尔袞天会十四年为东京留守天眷元年入朝与左副元帅达兰建议
以河南陕西地与宋俄为尚书左丞相加开府仪同三
司兼侍中封陈王二年拜太傅【熙宗纪作太保】领三省事进封兗国王既而以谋
反诛

睿宗宗辅

睿宗皇帝讳宗尧初讳宗辅本讳鄂尔多大定上尊谥追上今讳太祖征伐四方诸
子皆总戎旅帝常在帷幄天辅六年太祖亲征太宗居
守黄龙府安福格叛帝与乌古鼐讨平之南路军帅和硕台以赃败帝往阅实之咸称平
允天会五年宗望薨帝为右副元帅驻兵燕京十一月
诸将伐宋帝发自河闲徇地淄青宋括马兵二十万至乐安帝率师击破之闻宋主在扬
州时东作方兴留大军夹河屯田而还军山西六年诏
伐宋帝发自河北降滑州取开德府【本纪作宗弼事】攻大名府克之河北平八年
罗索所下陕西城邑辄叛宗翰等曰前讨宋故分西师
合于东军而陕西五路兵力雄劲当并力攻取和塔拉抚定江北宗弼以精兵二万先往

洛阳以八月往陕西或使宗弼遂将以行或宗辅宗翰
宗尹中以一人往由是诏帝往焉是时宋张浚兵取陕西帝至洛水治兵张浚骑兵六万
步卒十二万壁富平帝率诸将破之耀州凤翔府皆来
降遂下泾渭二州败宋经略使刘侁军于瓦亭原州降萨里噶破德顺军静边寨宋泾原
路统制张中孚知镇戎军李彦琦以城降帝进兵降甘
泉等三堡取保州城破宋熙河路副总管军三万获马千余拔安西等二寨熙州降分遣
左翼都统阿里布右翼都统宗弼招抚城邑之未下者
遂得巩洮河乐西窰兰廓积石等州定远和政甘■〈山苔〉窰洮安陇等城寨及镇堡
蕃汉营部四十余于是泾原熙河两路皆平既定陕西
五路乃选骑兵六千使萨里罕列屯冲要于是班师与宗翰俱朝京师立熙宗为安班贝
勒帝为左副元帅十三年行次妨州薨陪葬睿陵追封
潞王谥襄穆皇统六年进冀国王正隆二年追赠太师上柱国改封许王妃富察氏李氏
李氏生世宗睿宗薨世宗尚幼妃教之以义方宗室中
甚敬之已乃祝发为比丘尼号通慧圆明大师正隆六年薨世宗即位追上尊谥立德显
仁启圣广运文武简肃皇帝庙号睿宗富察氏为钦慈
皇后李氏为贞懿皇后改葬于大房山号景陵

宗弼

宗弼本名斡啜又作乌珠都统杲出青岭与兄宗望及马和尚逐伊埒巴噶伊勒希
等败之宗弼矢尽遂夺辽兵士枪独杀八人生获五人
及宗望伐宋宗弼从军取汤阴县以三千骑薄汴城宋上皇出奔选百骑追之弗及宗望
薨宗辅为右副元帅徇地淄青宗弼败宋郑宗孟数万
众遂克青州复破贼将赵成及黄琼军取临朐宗辅军还遇敌三万于河上宗弼击败之
诏伐宋康王宗辅发河北宗弼攻开德府粮乏转攻濮
州克之降旁近五县攻开德府及大名宗弼军皆先登破其城河北平宋主自扬州奔江
南宗弼等分道伐之进兵归德绝隍筑道列炮隍上将
攻之城中人惧遂降先遣阿里富埒瑋至寿春宗弼军继之宋安抚使马世元率官属出
迎进下庐州再降巢县王善军遂自和州渡江至江窰
宋杜充率步骑六万来战呼拉布当堪达呼大■〈白上大下〉合击破之宋陈邦光以
江窰府降留长安努乌哩页守江窰使阿里布乌哩页
别将兵徇地下太平濠州及句容溧阳等县泝江而西屡败张永等兵杜充遂降宗弼自
江窰取广德军路追袭宋主于越州又取湖州及杭州
宋主自越奔明宗弼留杭州使阿里富埒瑋以精兵四千袭之宋主走入于海宗弼分兵
会攻明州克之阿里富埒瑋追宋主不及乃还宗弼自
杭州取秀州出平江趋镇江宋韩世忠以舟师扼江口宗弼战不利遂自镇江泝流西上

世忠袭之宗弼循南岸世忠循北岸且战且行世忠艨
艟大舰数倍宗弼军出宗弼军前后数里击柝之声自夜达旦世宗以轻舟挑战一日数
接将至黄天荡宗弼因老鹳河故道开三十里通秦淮
一日夜而成乃得至江甯达兰使伊喇古自天长趋江甯援宗弼乌凌阿托云亦以兵来
会连败宋兵宗弼发江甯将渡江而北与世忠战于江
口世忠分舟师绝江流上下舟皆张五繒宗弼选善射者乘轻舟以火箭射之五繒皆自
焚烟焰满江世忠不能军追北七十里舟军歼焉世忠
仅以身免宗弼渡江北还从宗辅定陕西与张浚战于富平宗弼陷重围中韩当流矢中
自拔矢以土塞创跃马奋呼博战与宗弼突围出既败
张浚军遂与阿里布招降熙河泾原两路及攻吴玠于和尚原抵险不可进乃退军伏兵
起且战且走行三十里将至平地宋军阵于山口宗弼
大败将士多战没明年复攻和尚原克之天会十五年为右副元帅封浑王天眷元年达
兰宗盘执议以河南地与宋明年宗弼入朝拜都元帅
奏达兰与宋人交通赂遗请诛达兰时宗盘已诛达兰在行台复与呼兰谋反会置行台
于燕京诏宗弼为太保领行台尚书省往燕京诛之遂
议南伐命宗弼由黎阳趋汴右监军萨里罕出河中趋陕西宋岳飞韩世忠分据河南州
郡要害复出兵涉河东驻岚石保德之境以相牵制宗
弼遣孔彥舟下汴郑两州王伯龙取陈州李成取洛阳自率众取亳州及顺昌府嵩汝等
州时暑还军于汴岳飞等军皆退去河南平时天眷三
年也 【按续通鉴宗弼顺昌之败鄜城之败并在是年本传讳言其败故略言之】 熙
宗使劳问宗弼凡有功军士并加忠勇校尉攻岚石保
德皆克之时熙宗幸燕京宗弼见于行在所居再旬宗弼还军熙宗酌酒饮之进伐淮南
克庐州复朝于燕京命与宰相同入奏事俄为尚书左
丞相兼侍中太保都元帅领行台如故诏以燕京路隶尚书省西京及山后诸部族隶元
帅府乃还军遂伐江南既渡淮以书责让宋人宋人答
书乞先敛兵宗弼以便宜约以画淮水为界皇统二年 【按照宗纪进誓表及册封宋帝
俱系皇统二年本传承上文天眷称三年今改正】
二月宋主遣端明殿学士何铸等进誓表宗弼进拜太傅乃遣左宣徽使刘箬使宋以袞
冕圭宝佩璲玉册册康王为宋帝仍诏天下宗弼乞致
仕不许优诏答之赐以金券七年 【按照宗纪皇统七年九月以宗弼为太师此处误作
三年今据改】 为太师领三省事都元帅领行台尚
书省事如故八年薨大定十五年谥忠烈十八年配享太宗庙庭子伯特

亨
亨

亨本名伯特熙宗时封芮王为明安加银青光禄大夫天德初加特进海陵赐良弓
亨性直材勇绝人喜自负辞曰所赐弓弱不可用海陵
遂忌之出为真定尹历中京东京留守家奴梁遵告亨与卫士符公弼谋反考验无状遵
坐诛海陵益疑之改广宁尹使李老僧伺察亨动静且
令构其罪状亨家奴禄锦颇黠给使总诸奴老僧谓之曰尔渤海大族坐累为奴宁不念
为良乎禄锦识其意禄锦尝与事侍妾私通亨知之禄
锦惧密与老僧谋遂诬亨欲因闲刺海陵老僧即捕系亨以闻工部尚书耶律安礼大理
正图哩等鞫之复无验海陵怒复遣老僧同鞫之皆不
伏老僧夜至亨囚所使人蹴杀之亨击鞫为天下第一常独当数人马无良恶皆如意马
方驰辄投杖马前侧身俯地取杖而去终以勇力见忌
焉正隆六年海陵遣使杀诸宗室于是杀亨妃图克坦氏次妃大氏及子音德等三人大
定初追复亨官爵封韩王十七年诏有司改葬亨及妻
子

宗强

宗强本名阿噜天眷元年封纪王三年代宗固为燕京留守封卫王皇统二年十月
薨子阿林克实阿苏

阿林

克实

阿苏

阿林

爽本名阿林天德三年授世袭明安正隆二年除横海军节度使改安武军留守司
奉朝请海陵将伐宋严酒禁爽坐会饮被杖谪归化州
刺史夺明安未几复除安武军节度使海陵渡淮分遣使者翦灭宗室爽忧惧不知所出
会世宗即位东京宗室漳推爽弟阿苏行中都留守遣
人报爽爽弃妻子来奔与弟克实俱至中都东迎车驾至梁鱼务入见世宗大悦即除殿
前马少军都指挥使封温王改秘书监迁太子太保进
封寿王顷之判太宗正事太子太保如故爽有疾诏除其子符宝祗候色埒为忠顺军节
度副使疾少闲从驾如凉陞进封英王转太子太傅复
世袭明安进封荣王改太子太师二十三年薨诏陪葬山陵

克实

克实累官唐古部族节度使降忻州刺史海陵遣使杀之克实闻世宗即位即弃州
来归时弟阿苏权中都留守事克实欲留以助之乃留
中都闻世宗发东京迎见于玛奇铺除兵部尚书将兵往东京行至中都闻南京已定遂
止克实材武过人狠戾好乱自以太祖孙颇有异志世

宗初至中都倥偬多事扈从诸军未暇行赏或有怨言昭武大将军鄂伦监古云军于归化次彰德会通吉和尚持大定赦文至使人招之鄂伦不听率兵来迎和尚亦以所将佛室兵列阵待之鄂伦兵皆不肯战遂请降和尚邀入相州收其甲兵置酒相劳鄂伦托疾不饮与其心腹请执和尚和尚觉使其从者迫而伺之鄂伦不得发世宗至中都近郊鄂伦上谒世宗抚慰之河南统军司令史鄂尔多为人狡险鄂伦取兵于河南统军使图们额哩页鄂尔多与俱来皆不自安同知延安尹李惟忠与弑熙宗构杀韩王亨世宗疏斥之同知中都留守璋初自领其职因而授之完颜布呼为副统以罪解职居京师于是克实鄂伦李惟忠鄂尔多璋布呼谋欲因扈从军士怨望作乱惟忠尝为神翼军总管有两银牌尚在欲以矫发内藏赏士鄂伦往约押军明安阿古喇阿古喇从之惟忠往说万户高松高松不听大定二年正月甲戌世宗谒山陵克实中道称疾而归乙亥夜召鄂伦惟忠鄂尔多璋布呼会其家阿古喇以兵赴之璋曰今不得高松军事不可成矣克实璋布呼乃擒鄂伦惟忠鄂尔多阿古喇诣有司自首既下诏狱克实不肯自言其始谋及与鄂伦面质然后款伏世宗念兄弟少太祖孙惟数人在恻然伤之诏罪止克实一身其兄弟子孙皆不缘坐遂诛鄂伦惟忠鄂尔多阿古喇等除璋彰化军节度使布呼浚州防御使

阿苏

阿苏天德二年授奉国上将军累加金吾卫上将军居中都世宗即位东京阿苏与璋率守城军官乌凌阿实嘉努等杀留守萨勤扎府判穆延萨里罕众以阿苏行留守事璋自署同知留守事即遣穆昆实嘉努乌凌阿愿富察芬彻大兴少尹李天吉予盘等奉表东京大定二年授横海军节度使改武定军迁广宁尹坐赃解职入见于常武殿谕曰朕谓汝有才力使之临民今汝在法当死朕以亲亲之故曲为全贷当思自今戒惧勿复使恶声达于朕听改平凉济南尹卒于官

宗敏

宗敏本名阿里布天眷元年封邢王皇统三年为东京留守拜左副元帅兼会宁牧进都元帅兼判大宗正事加太保领三省事兼左副元帅领行台尚书省事封曹国王海陵谋弑立畏宗敏属尊且材勇欲构诬除之及弑熙宗使葛王召宗敏葛王者世宗初封也宗敏闻召疑惧不敢往葛王曰叔父今不即往至明日如何与之相见宗敏入宫海陵犹豫以问左右乌达曰彼太祖子也不杀之众人必有异议不如除之乃使布萨呼图杀之呼图刃击宗敏宗敏左右走避肤发血肉狼藉遍地天德三年海陵追封

宗敏为太师进封爵妃富察氏进国号封子萨哈连舒

国公赐名褒进封王阿里罕封密国公正隆六年见杀大定闲诏复官爵

钦定续通志卷一百九十七

●钦定续通志卷一百九十八 宗室传十八

宗室传

金 【六】

○金六

太宗诸子

熙宗诸子

海陵诸子

世宗诸子

章宗诸子

卫绍王子

宣宗诸子

△太宗诸子

宗盘

宗固

宗本

太宗十四子富勒呼呼噜呼拉布阿噜岱阿里布呼沙呼阿林阿噜呼兰呼尔察实图美哈必苏沃哩和硕

宗盘

宗固

宗本

宗盘

宗盘本名富勒呼天辅五年从都统杲取中京天会十年为古伦乌赫哩贝勒熙宗即位为尚书令封宋国王未几拜太师与宗干宗翰并

领三省事熙宗优礼宗室宗翰没后宗盘日益跋扈尝与宗干争论熙宗前即上表求退熙宗因为两解宗盘愈骄恣其后于熙宗前持刀向宗

干都点检萧仲恭呵止之既而左副元帅达兰东京留守宗隽入朝宗盘阴相党与宗隽

【按此下至宗固传为太保右丞相并系原史阙文今据永乐大典辑补】 时为右丞相用事达兰属尊功多先荐刘豫立为齐帝至是倡议以河南陕西与宋使称臣熙宗命羣臣议宗室大臣言

其不可宗盘宗隽助之卒以与宋天眷二年宗盘宗隽达兰谋作乱宗干希尹发其事熙宗下诏诛之赦其弟呼拉布等九人并赦达兰

宗雅本名呼拉布皇统二年封代王大定二年追封曹王

宗伟本名阿里布天眷元年封虞王

宗英本名呼沙呼封滕王

宗懿本名阿林初封薛王追封郑王

呼兰天眷元年封翼王与达兰谋反伏诛

宗美本名呼尔察初封丰王追封卫王

实图美初封郢王追封幽王

哈必苏初封霍王追封溥王

沃哩初封蔡王追封鄂王

宗哲本名和硕初封毕王追封韩王

宗顺本名阿噜岱天会二年薨皇统五年赠金紫光禄大夫后封徐王

宗固

宗固本名呼噜天会十五年为燕京留守封幽王宗盘既诛熙宗使宗固子京往燕京慰谕宗固及翼王呼兰伏诛或谓宗固等当绝属籍

熙宗不忍诏宗固等但不得称皇叔其母妻封号从而降者审依旧典皇统二年宗固判太宗正六年为太保右丞相兼中书令明年薨海陵在

熙宗时见太宗诸子势强而宗盘尤跋扈与呼兰相继谋逆心忌之及篡位谒奠太庙韩王亨素号材武使摄右将军阴备太宗诸子遂与秘书

监萧裕谋去宗本兄弟太宗子孙于是焉尽

宗本

宗本本名阿噜皇统九年为右丞相兼中书令进太保领三省事海陵篡立进太傅领三省事初海陵心忌宗本等势强及篡立猜忌益深

遂与秘书监萧裕谋杀太宗诸子诬以秉德出领行台与宗本别因会饮约内外相应使尚书省令史萧玉告宗本亲谓玉言宗美北京留守卞

俱言事不可迟只于日近围场内予决因以马一匹袍一领与玉充表识物玉恐围场日近身縻于外不能亲奏遂以告萧裕裕具以闻萧玉出

入宗本家亲信如家人海陵既与萧裕谋恐天下以宗本秉德辈皆懿亲大臣本无反状裕构成其事使玉上变庶可示信于是使人召宗本等

击鞠海陵先登楼命左卫将军图克坦塔斯及萧裕妹婿近侍局副使耶律必埒哩实达尔密伺宗本及判太宗正事宗美至即杀之宗美呼尔

察临死神色不变宗本已死萧裕使人召萧玉附耳告之曰主上以诛宗本诸人欲加以反罪令汝主告其事今书汝告款已具帝即问汝汝但

言宗本辈反如状勿复异词乃引见海陵玉具如裕所教海陵遣使杀东京留守宗懿北京留守卞及迁益都尹毕王宗哲平阳尹稟左宣徽使

京等家属分置别所止听各以奴婢五人自随既而使人要之于路并其子男无少长皆杀之中京留守宗雅喜事佛海陵知其无能将存之以

奉太宗后召至阙竟杀之太宗子孙死者七十余人海凌遂以宗本秉德等罪诏天下以玉上变实之使太府监完颜冯六籍宗本诸家大定二年追封潞稟京卞并赠金吾卫上将军

△熙宗诸子

济安 道济

熙宗二子悼平皇后生太子济安贤妃生魏王道济

济安

道济

济安

济安以皇统二年二月戊子生于天开殿熙宗年二十四始有皇子喜甚五日命名大赦天下三月甲寅告天地宗庙戊午册为皇太子国初制度未立太宗熙宗皆自安班贝勒即帝位至是始正名定制焉封皇后父太尉和坦为王随朝职官并迁一资十二月济安病剧熙宗与后幸佛寺焚香流涕哀祷曲赦五百里内罪囚是夜薨谥英悼太子葬兴陵侧

道济

道济皇统三年命为中京留守以直学士阿兰为都提点张玄素为同提点左右辅导之俄封魏王封其母为贤妃初居外至是养之宫中未几熙宗怒杀之

△海陵诸子

光英 元寿 舒苏鄂博 广阳

海陵四子后图克坦氏生太子光英元妃大氏生崇王元寿柔妃唐古氏生宿王舒苏鄂博才人南氏生滕王广阳

光英

元寿

舒苏鄂博

广阳

光英

光英本名阿哩布图克坦养于同判太宗正方之家天德四年二月立为皇太子其后养于永宁宫及图克坦舍音家贞元元年诏朝官京官五品以下奉引自通天门入居于东宫光英颇警悟海陵谓侍臣曰上智不学而能中性未有不由学而成者太子宜择硕德宿学之士使辅导之庶知古今防过失诗文小技何必作耶至于骑射之事亦不可不习恐其懦弱也及将亲征后与光英挽衣号恸后诵孝经忽谓人曰经言三千之罪莫大于不孝何为不孝对者曰今民家子博奕饮酒不养父母皆不孝也光英

默然良久曰此岂足为不孝耶盖指言海陵弑母事及
伐宋光英居守以图们额哩页为太子少师兼河南路统军使以卫护之完颜元宜军变
海陵遇害都督府移文额哩页杀光英于汴京死时年
十二后与海陵俱葬于大房山诸王墓次

元寿

元寿天德元年封崇王三年薨

舒苏鄂博

舒苏鄂博正隆元年四月生实达尔东胜家保养之封其母唐古氏为柔妃三年正
月五日舒苏鄂博薨海陵杀太医副使谢友正医者安
宗义及其乳母杖东胜一百除名明日追封舒苏鄂博为宿王葬大房山

广阳

滕王广阳母南氏本大臭家婢随元妃大氏入宫海陵幸之及有娠即命为殿直正
隆二年九月二十六日生广阳三年二月封南氏为才
人七月封广阳为滕王九月薨

△世宗诸子

显宗允【恭 琮 瓌 从彝 从宪 玠】 永中 永蹈 永功【
璫】 永德 永成 永升

世宗十子昭德皇后生显宗赵王苏尼越王萨鲁元妃张氏生郾王允中越王允功
【按张元妃传云生郾王允中而卒则允功疑非张
氏所生与此互异】元妃李氏生郑王允蹈卫绍王允济潞王允德照仪梁氏生豫王允
成才人舒穆鲁氏生夔王允升章宗时避显宗讳诏改
允为永苏尼萨鲁皆早卒

显宗允恭

永中

永蹈

永功

永德

永成

永升

显宗允恭

显宗皇帝讳允恭本讳呼塔噶皇统六年丙寅岁生大定元年世宗即位封楚王二
年赐名允迪五月壬寅立为皇太子专心学问与诸儒
臣讲义于承华殿燕闲观书乙夜忘倦翼日辄以疑字付儒臣校证九月庚子诏东宫三
师对皇太子称名少师以降称臣十二月辛卯奏曰东

宫贺礼亲王及一品皇族皆北面拜伏伏望天慈听臣答拜庶悖亲亲友爱之道世宗从之以为定制世宗闻儒者郑松贤起为左谕德诏免朝
参令辅太子读书松以左谕自处帝尝顾松使取服带松对曰臣忝谕德不敢奉命帝改容称善自是益加礼遇四年九月纳妃图克坦氏十月
甲申祫享于太庙行亚献礼七年帝有疾诏左丞守道侍汤药徙居琼林苑临芳殿调治八年正月甲戌改赐名允恭庚戌受皇太子册宝帝上
表谢九年五月世宗命避暑于草泺帝奏曰远去阙廷独就凉地非臣子所安愿罢行世宗曰汝体羸弱山后高凉故命汝往八月至自草泺丙
戌入见世宗曰吾儿相别经夏极甚思忆也帝在承华殿经筵太子太保寿王爽启曰殿下颇未熟本朝语何不屏去左右汉官皆用女真人帝
曰谕德赞善及侍从官曷敢辄去爽揖而退帝曰宫官四员谓之谕德赞善义可见矣而反欲去之无学故也有使者自山东还帝问民间何所
苦使者曰钱难最苦官库钱满有露积者而民间无钱以此苦之帝谓户部尚书张仲愈曰天子富藏天下何必独在府库也因奏乞流转使公
私俱利世宗诏有司议行之十二年德州防御使呼喇谋叛帝奏曰叔呼喇性荒纵耽娱乐而无子嗣忽如此狂谋望更阅实之十四年四月乙
亥世宗御垂拱殿帝及诸王侍侧论及兄弟妻子之际世宗曰妇言是听而兄弟相违甚哉帝举思齐之诗以对曰臣等愚昧愿相励而修之因
引棠棣华萼相承脊令急难之义为文见意以诫兄弟焉十九年詹事乌陵阿愿入谢帝命取幞头腰带官属请曰此见宰相师傅之礼也帝曰
愿事陛下久以此加敬尔十一月改葬明德皇后于坤厚陵帝徒行挽灵车遇大风雪左右进雨具却之比至坟所衣尽沾湿观者无不下泪海
陵虽贬出为庶人宗干尚称明肃皇帝议者以为未尽帝具表奏论世宗嘉纳之宗干降封辽王二十四年世宗将幸上京诏帝守国作守国之
宝以授之其遣使祭享五品以上官及事利害重者遣使驰奏其余常事并听裁决每三日一次于集贤殿受尚书省启事世宗曰今巡幸或能
留三二年以汝守国譬之农家种田商人营利但能不坠父业即为克家子也太尉左右丞参政皆国家旧人可与商议且政事无难但用心公
正无纳谗邪一月之后政事自熟帝流涕坚辞左右为之感动初帝在东宫中侍出入未尝限阻及监国谕诸中侍曰我向在东宫不亲国政日
与汝辈语今既守国汝等有召命然后得入五月世宗至上京赐敕书曰省方观民古之制也汝守国任重夏暑方炽益当自爱无貽朕忧帝谓
图克坦克盩曰车驾巡幸以国事见属刑名最重人之死生系焉凡有可议当尽至公勿有废事自是凡启禀刑名帝自披阅召都事委曲折正

移晷忘倦或赐之食七月遣子金源群王玛达格奉表问起居请世宗还都二十五年正月乙酉免羣臣贺礼帝自守国深怀谦抑宫臣不庭拜
启事时不侍立免朔望礼二月遣子金源郡王玛达格奉表贺万春节四月久不雨帝亲祷即曰沾足六月甲寅帝不豫庚申薨于承华殿世宗
自上京还次天平山好水川讣闻为位临奠大恻亲王百官皇族命妇及侍卫皆会哭比至中都为位奠哭者凡七焉谥宣孝太子殡于南园熙
春殿帝事世宗凡巡幸西京凉陁及上陵祭庙谒衍庆宫田猎观稼拜天射柳未尝去左右上有事于圜丘及亲享于太庙则行亚献礼不亲祀
则摄行祀事国有大庆则率百官上表贺正旦万春节则总班上寿十月庚戌朔宰相以下朝见于庆和殿太尉完颜守道上寿世宗追悼凄怆
者久之十一月庚寅葬于大房山妃图克坦氏生章宗次妃刘氏生宣宗二十六年子璟立为皇太孙二十九年世宗崩太孙即位是为章宗五
月甲午追谥体道弘仁英文睿德光孝皇帝庙号显宗丁酉祖于太庙陵曰裕陵章宗尊谥图克坦氏为孝懿皇后宣宗尊谥刘氏为昭圣皇后
庶子承庆罕都阿林沃哩布摩啰欢

琮

瓌

从彝

从宪

玠

琮

郛王琮本名承庆母田氏后封裕陵充华性宽厚好学世宗选进士有名行者纳塔谋嘉教以女真小字及汉字皆通习及长轻财好施不
喜闻人过善吟咏至于骑射绘塑之艺皆造精妙大定十八年封道国公二十六年加崇进章宗即位迁开府仪同三司封郛王明昌元年授博
索路乌赫哩哈达也袭明安留京师五年薨谥庄靖改庄惠

瓌

瀛王瓌本名罕都琮同母弟工诗精于骑射书艺女真大小字大定二十二年封崇国公加崇进章宗即位迁开府仪同三司封瀛王明昌
三年薨谥文敬其后帝谓辅臣曰王性忠孝兄弟中最为善人故朕尝令在左右温王虽幼亦佳不二旬俱逝良可哀悼

从彝

霍王从彝本名阿林母田氏早卒温妃舒穆鲁氏养为己子大定二十五年封宿国公加崇进赐名瓚章宗即位封沂王明昌四年诏追封

故鲁王永功为赵王以从彝为赵王后 【按越王永功薨于宣宗兴定五年子三人福孙寿孙尼玛哈本传所载与永功传殊不相符永功字

当属讹误】 承安元年为兵部尚书改封蔡四年除秘书监泰和五年赐今名八年封霍贞佑二年薨

从宪

瀛王从宪本名沃哩布母刘氏后封裕陵茂仪大定二十六年赐名琦章宗即位加开府仪同三司封寿王承安元年以郊祀恩进封英四

年改封瀛泰和五年更赐今名六年授秘书监八年薨从宪风仪秀峙性宽厚善骑射待府僚以礼秩满去者皆有赆帝尤爱重及薨帝谕判大

睦亲府事宛王永升曰瀛王家事叔宜规画闻其二姬方孕若生子即以付之谥敦懿

玠

温王玠本名摩啰欢母王氏后封裕陵婉仪玠温厚好学章宗即位加开府仪同三司封温王明昌三年薨谥悼敏

永中

镐王永中 【按卫绍王纪云章宗时避显宗讳改允为永故宗室表及诸传俱从改名】 本名萨喇勒又名乌逊大定元年封许王五年

判大兴尹进封越王赵王拜枢密使十九年子实古纳加光禄大夫是岁改葬明德皇后于坤原陵永中母元妃张氏陪葬十一月庚申永中以

元妃柩先发使执黄伞者前导俄顷皇后柩出盘盂宫显宗徒跣少府监张谨言呼执黄伞者不应既葬谨言欲奏其事显宗解之乃止二十一

年改判大宗正事永中不悦显宗劝之曰宗正之职自亲及疏自近及远此亲贤之任也且皇子之贵岂以官职闲剧为计邪永中乃喜二十四

年世宗幸上京显宗居守并留永中显宗先遣章宗宣宗奉表问起居于上京既而遣永中子实古纳奉表世宗喜谓豫国公主曰皇太子教德

天成兄弟之际相友爱如此也二十五年六月世宗在天平山显宗薨于中都诏曹王永功视章宗召永中赴行在加开府仪同三司明年复为

枢密使是岁世宗赐诸孙名永中四子实古纳曰瑜实图美曰璋阿索美曰玘鄂兰哈玛尔曰瑒章宗即位以永中判西京留守进封汉王加实

古纳银青荣禄大夫鄂兰哈玛尔奉国上将军明昌二年正月辛酉孝懿皇后崩吴王永成隋王永升奔丧后期各罚俸一月杖其长史五十永

中适有寒疾不能至帝怒颇意诸王有轻慢心遣使责永中二月丙戌禫祭永中始至壬辰及诸王朝辞赐遗留物礼遇虽在而嫌忌自此始矣

四月进封并王三年判平阳府事进封镐王初置王傅府尉官名为官属实检制之府尉希望风旨过为苛细永中自以世宗长子且老矣动有

掣制情思不堪乃表乞闲居诏不许四年郑王永蹈以谋逆诛增置诸王司马一员检察门户出入球猎游宴皆有制限家人出入皆有禁防河
东提刑判官伯勒赫坐私谒永中杖一百解职前近侍局副使费摩克尔森尝受永中请托为实古纳求除官克尔森坐免故尚书右丞张汝弼
永中母舅也汝弼妻高托噶自大定闲画永中母像奉之甚谨挟左道为永中求福希覬非望五年高托噶坐诅祝诛帝疑事在永中未有以发
也会饷王傅尉奏永中第四子鄂兰哈玛尔因防禁严密语涉不道诏同签大睦亲府事并御史中丞孙即康鞠问并求得第二子实图美所撰
词曲有不逊语家奴德格首永中尝与侍妾瑞雪言我得天下子为大王以尔为妃诏遣官覆按状同再遣礼部尚书张暉兵部侍郎乌库哩庆
裔覆之帝谓宰臣曰镐王祇以语言得罪与永蹈罪异参知政事马琪曰永中与永蹈罪状虽异人臣无将则一也诏以永中罪状宣示百官杂
议皆请论如律诏赐永中死实图美鄂兰哈玛尔等皆弃市敕有司用国公礼收葬永中
平阳府监护官给葬具妻子威州安置泰和七年诏复
永中王爵谥曰厉敕实古纳于威州择地以礼改葬岁时祭奠贞佑二年诏徙永中妻子
实古纳等于郑州三年太康县人刘全尝为盗亡入卫
真界诡称爱王所谓爱王妄指实古纳也全欲为乱因假以惑众诱王氏女为妻又加东
平妖人李寗于嵩山寗至推为国师议僭立事觉皆伏
诛四年潼关破徙永中子孙于南京兴定二年亳州谯县人孙学究私造妖言云爱王终
当奋发宥刘二者出而当之结构逆党市兵仗大署旌
旗谋僭立事觉诛死者五十二人永中子孙禁锢自明昌至正大末几四十年天兴初诏
弛禁锢未几南京亦不守云

永蹈

郑王永蹈本名尼楚赫大定十一年封滕王进封徐王二十五年加开府仪同三司
明年为大兴尹章宗即位判彰德军节度使进封卫王
明昌二年徙封郑王二年改判定武军初崔温郭谏马太初兴永蹈家奴毕庆寿私说讖
记灾祥毕庆寿以告永蹈郭谏颇能相人永蹈召相己
及妻子谏言大王相貌非常王妃及二子皆大贵永蹈又召崔温马太初谕讖记天象崔
温曰五年有兵灾属兔命者来年春当收兵得位郭谏
曰昨见赤气犯紫微白虹贯月皆主丑后寅前兵戈僭乱事永蹈深信其说乃阴结内侍
郑两儿伺起居以崔温为谋主郭谏马太初往来游说
河南统军使布萨揆尚永蹈妹韩国公主永蹈谋取河南军为助与妹泽国公主长乐谋
使驸马都尉富拉塔致书于揆且先请婚以观其意揆
拒不许使者不敢复言不轨事永蹈家奴董寿谏永蹈不听董寿以语同辈奴迁嘉努上

变时永蹈在京师诏平章政事完颜守贞参知政事胥
持国户部尚书杨伯通大兴府事尼玛哈鉴鞠问连引甚众久不能决右丞相瓜尔佳
清臣奏曰事贵速决以安人心于是赐永蹈及妃卞玉
二子安春爱绅公主长乐自尽富拉塔崔温郭谏马太初等皆伏诛布萨揆虽不闻问犹
坐除名董寿免死隶监籍迁嘉努特迁五官自是诸王
制限防禁密矣泰和七年诏复王封备礼改葬赐谥曰刺以卫王永济子阿禅为永蹈后
奉其祭祀

永功

越王永功本名桑阿又名广孙贞元二年生沉默寡言笑勇健绝人涉书史好法书
名书大定四年封郑王七年进封隋王十一年进封曹
王十五年除刑部尚书谕曰侍郎张汝霖汝外舅行也可学为政十七年授库图世袭
明安十八年改大兴尹世宗幸金莲川始出中都亲军
二苍头纵马食民田诏永功杖苍头各一百弹压百户二人失觉察勒停永功奏曰亲军
人止一苍头尔弹压服勤为日久矣请量决苍头使弹
压待罪偿其田直皆从之有嫖姬与男妇憩道傍妇与所私亡去姬告伍长踪迹之有男
子私杀牛手持血刃望见伍长意其捕已走避之伍长
疑是杀若妇也捕送县问尸安在诡曰弃之水中矣求之果获一尸也半腐县吏具狱上
永功曰妇死几何日而尸遽半腐哉顷之得若妇于所
私者永功曰是男子以杀人就狱其拷掠足以称杀牛之科矣遂释之武清黄氏望云王
氏豪猾不逞永功发其罪畿内肃然二十三年判东京
留守改河闲尹阅月改北京留守帝以永功在北京为政无良戒敕永功谕其长史俾匡
正之改东京留守从幸上京明年皇太子薨诏永功护
丧事寻拜御史大夫与章宗及赵王永中皆加开府仪同三司明年判大宗正事应州僧
与永功有旧将诉事于彰国军节度使伊喇呼喇求永
功手书与呼喇为地呼喇得书奏之帝谓宰臣曰永功以书嘱事虽细微不可不惩也凡
人小过不治遂至大咎有犯必惩庶几能改是亦教也
于是解职未几复判大宗正事章宗即位除判平阳府事进封冀王永功之官随引医人
沈思存过制限当解职帝曰此时当痛断监奴及治府
掾长史管辖府事者罪仍着于令家奴王唐犯罪至徒永功曲庇之平阳治中高德裔失
觉察笞四十于是永功改判济南府寻授山东西路博
罗科世袭明安二年判广宁府事进封鲁王明年判彰德府事承安元年进封郢王明年
判太原府事泰和七年改西京留守八年复判平阳府
事大安元年进封谯王判中山府事明年进封越王 【按卫绍王纪大安元年十二月进
封兄越王永功为谯王是由越而改谯也与传互异

】宣宗即位免常参明年从迁汴京兴定五年有疾赐尚医诊视是岁薨谥忠简子福孙寿孙尼玛哈大定二十六年诏赐福孙名璐寿孙名璫

尼玛哈名琳璫加奉国上将军章宗即位加银青荣禄大夫封萧国公

璫

璫

璫本名寿孙字仲实一字子瑜【按归潜志云密国公璫世宗之孙越王永常之子考世宗子无名永常者则志误也】资质简重博学

有俊才喜为诗工真草书大定二十七年加奉国上将军明昌初加银青荣禄大夫卫绍王时加开府仪同三司贞佑中封胙国公正大初进封

密国公璫奉朝请四十年日以讲诵吟咏为事时时潜与士大夫唱酬然不敢明白往来永功薨后稍得出游与文士赵秉文杨云翼雷渊元好

问李汾王飞伯辈交善初宣宗南迁诸王宗室颠沛奔走璫乃尽载其家法书名画居汴中家人多俸少客至贫不能具酒肴蔬饭共食焚香煮

茗尽出藏书谈大定明昌以来故事终日不听客去乐而不厌也天兴初璫已卧疾论及时事辄慨叹时曹王出质璫见哀宗于隆德殿奏曰闻

额尔克欲出议和额尔克年幼不谙练恐不能办大事臣请代其行哀宗慰止之于是君臣相顾泣下未几以疾薨年六十一平生诗文甚多自

删其诗存三百首乐府一百首号如庵小藁第五子守禧字庆之风神秀彻璫特钟爱年未三十而卒

永德

潞王永德本名恩楚大定二十五年加开府仪同三司二十七年封薛王二十九年判秘书监进封潞王明昌时授山东东路博罗科必喇

明安进封幽王迁劝农使承安二年进封潞王三年再任劝农使卫绍王时累迁太子太师宣宗即位改同判大睦亲府事兴定五年迁判大睦

亲府事子鄂伦赐名琰

永成

豫王永成本名鹤野又曰罗索风姿奇伟博学善属文世宗尤爱重之大定七年封潞王以太学博士王彦潜为府文学永成师事之十一

年进封幽十五年就外第累迁翰林学士承旨判定武军节度使事寻改判广宁府二十五年世宗幸上京命留守中都判吏部尚书进开府仪

同三司为御史大夫章宗即位进封吴判真定府事明昌元年改山东西路佛们必喇明安明年进封兗坐率军民围猎解职未几授沁南军节

度使历判太原平阳府事承安改元以覃恩进封豫明年冬进马入十匹以资守御之备赐诏加奖五年召还泰和四年薨谥曰忠献永成自幼

喜读书晚年所学益醇每暇日引文士相与切磋接之以礼未尝见骄色自号曰乐善居士有文集行于世 【按归潜志云豫王永中好文善

歌诗有乐善老人集行于世今考宗室表及本传豫王实名永成永中乃镐王也】

永升

夔王永升本名锡卜察一名鹤寿大定十一年封徐王进封虞王二十六年加开府仪同三司章宗即位加恩宗室徙封隋王除定武军节度使明昌二年改封曹又改封宛卫绍王即位徙今封贞佑元年薨

△章宗诸子

洪裕

洪靖

洪熙

洪衍

洪辉

德里

章宗六子钦怀皇后生绛王洪裕资明夫人林氏生荆王洪靖诸姬生荣王洪熙英王洪衍寿王洪辉元妃李氏生葛王德里

洪裕

洪靖

洪熙

洪衍

洪辉

德里

洪裕

洪裕大定二十六年生是时显宗薨逾年世宗深戚及闻皇曾孙生喜甚满三月宴于庆和殿御酒歌欢乙夜方罢二十八年十月丙寅薨明昌三年追封绛王赐名

洪靖

洪靖本名阿古喇明昌三年生王生而警秀章宗所钟爱四年薨承安四年追封荆王赐名加开府仪同三司

洪熙

洪熙本名额特藏布明昌三年生未弥月薨承安四年追封荣王赐名加开府仪同三司

洪衍

洪衍本名撒改明昌四年生未几薨承安四年追封英王赐名加开府仪同三司

洪辉

洪辉本名讹论承安二年五月生弥月封寿王十月丁亥薨备礼葬

德里

德里泰和二年八月生帝久无皇嗣祈祷于郊庙衍庆宫亳州太清宫至是喜甚弥

月将加封三等国号无愜帝意者念世宗在位最久年

最高初封葛王遂封为葛王三年薨

△卫绍王子

从恪

卫绍王六子从恪琚瑄璪余二人名不传 【依宗室表补】

从恪

从恪

从恪卫绍王长子大定二十六年赐名又赐名明安曰琚安春曰瑄阿禅曰璪泰和七年诏追复郑王永蹈王爵备礼改葬命阿禅为郑王

后守其祭祀大安元年封子六人为王从恪胙王有任王巩王余弗传是岁从恪为左丞相二年八月立从恪为皇太子至盗末呼沙呼弑卫王

从恪兄弟皆废居中都贞佑二年徙郑州四年徙居南京天兴元年崔立以从恪为梁王汴京破死焉

△宣宗诸子

庄献太子 玄龄 守纯

宣宗四子庄献太子守忠哀宗守绪玄龄荆王守纯 【依宗室表补】

庄献太子

玄龄

守纯

庄献太子

庄献太子名守忠呼沙呼既废卫绍王时宣宗未至即迎守忠人居东宫贞佑元年闰九月甲申立为皇太子十月己未以镇国上将军太子

少保阿娄罕为太子少师庚申谕曰朕宫中每事裁减汝亦宜知撙节又谓曰时方多艰每事当从贬损吾已放宫人百余矣东宫无用者亦

宜出之二年五月 【按宣宗纪迁汴在贞佑二年五月此讹作四月今据改】 宣宗迁汴留守中京七月召至汴三年正月薨葬迎朔门外谥

庄献五月立其子鉴为皇太孙始二岁十二月薨四年正月赐谥冲怀大孙

玄龄

玄龄早卒未封爵或曰庄献太子母弟或曰丽妃史氏所生

守纯

荆王守纯本名帮图贞佑元年封濮王二年为殿前都点检兼侍卫亲军都指挥使权都元帅上谕帅府曰濮王年幼公事殊未谙卿等毋

以朕子故不相规戒凡见将校令谦和接遇可也三年为枢密使四年拜平章政事兴定元年授世袭东平府路三屯明安三年进封英王时监

察御史程震言其不法宣宗切责杖司马及大奴尤不法者数人初 【原文作四年九月按宣宗纪兴定三年十二月诛高琪四年九月讷本舍布坐诛本传总系之四年殊误今改正】 守纯欲发丞相高琪罪密召知案布什萨喇勒令史富察呼噜员外郎王阿里谋之属今勿泄而萨喇勒呼噜辄以告都事布萨讷木舍布讷木舍布白高琪及高琪伏诛守纯劾三人者泄密事讷木舍布处死除名萨喇勒呼噜各杖七十勒停元光二年三月壬子谕守纯曰始吾以汝为相者庶几相辅不至为人讥病耳汝乃惟饮酒耽乐公事漫不加省何耶今诸相皆老臣每事与之商略年贻物议足矣十二月庚寅宣宗病笃守纯趣入侍哀宗后至闻守纯在宫分遣枢密院官及东宫亲卫军总领伊喇布哈集军三万余屯东华门外部署扣定门入宰相巴古喇已遣人止丞相高汝砺不听入宫以护卫四人监守纯于近侍局是夕宣宗崩哀宗即位进封荆王罢平章政事判睦亲府封真妃庞氏为荆国太妃或告守纯谋不轨下狱推问慈圣宫皇太后言于帝由是获免守纯三子长曰额尔克封萧国公天兴元年二月进封曹王出质于军前次曰某封戴王次曰伯特封巩王守纯及宗室皆死青城

钦定续通志卷一百九十八

●钦定续通志卷一百九十九 宗室传十九

宗室传

元 【一】

○元一

列祖诸子

太祖诸子

太宗诸子

定宗诸子

宪宗诸子

△列祖诸子

伯勒格台

烈祖五子长太祖皇帝次楚齐格尔王次哈准大王次特默格鄂齐锦所谓皇太弟国王鄂尔齐诺延者也次伯勒格台王 【按元史以

四宗为一卷诸弟子孙为一卷俱不列标题今依世次列叙而以世系表标题冠于其首并无传者亦备为录入以补其阙略云】

伯勒格台

伯勒格台

宗王伯勒格台性纯厚明敏多智略不喜华饰勇力绝人幼从太祖平诸部落掌从马其子孙最多尝从太祖宴诸部族或潜图害之以刀砍其臂伤甚帝大怒欲索而诛之王曰今将举大事于天下岂可以臣故而生衅隙哉请弗治帝尤贤之当创业之初征取诸国王摧锋陷阵不避艰险帝尝曰有伯勒格台之力哈扎尔之射此朕所以取天下也尝立为国相又长札尔古齐别授之印赐以蒙古百姓三千户及广宁路恩州二城又以鄂诺奇噜之地建营以居江南平加赐信州路及鈇山州二城王薨子曰罕都呼曰伊苏布哈曰昆布哈【按世系表伯勒格台子长曰伊苏布哈次昆布哈次罕都呼与此互异】罕都呼性刚猛知兵从宪宗征伐多立战功罕都呼子曰呼喇济以疾废世祖俾居于恩以统其藩人至大三年呼喇济薨子达春嗣达春性谦厚通经史能抚恤其民云伊苏布哈子卓多中统三年始以推戴功封广宁王昆布哈领兵河南屡建大功子二曰默尔格特曰昂吉尔台

△太祖诸子

卓沁【图喇】 睿宗图类【伊克图】

太祖六子长卓沁太子次察罕台太子次太宗皇帝次图类即睿宗也次乌拉齐无嗣次科尔戡太子

卓沁

睿宗图类

卓沁

卓沁太祖长子也国初以亲王分封西北其地去京师数万里故其郡邑风俗皆莫得而详焉【按皇子卓沁攻城略地之功详见太祖纪故本传略而不载】卓沁薨子巴图嗣巴图薨弟萨喇达嗣萨喇达薨弟孟克特穆尔嗣孟克特穆尔薨弟托克托蒙克嗣托克托蒙克薨弟托克托嗣托克托薨弟布呼嗣布呼薨弟伊济贝嗣至元二年伊济贝遣使来求分地岁赐以赈给军站三年中书请置总管府至大元年伊济贝薨【按世系及诸王表宁肃王托克托至大元年封今考本传托克托再传至伊济贝而伊济贝实薨于至大元年必有一误】子嘉鼐巴嗣其位下旧赐平阳晋州永州分地岁赋中统钞两千四百锭自至元五年使给之

图喇

图喇

图喇太祖次子察罕台四世孙也少以勇力闻大德十一年春成宗崩左丞相阿固台等潜谋立安西王阿南达而推皇后巴约特氏称制仁宗归自怀孟引图喇入内缚阿固台等以出诛之大事遂定武宗即位第功封越王以

绍兴路为其分地图喇居常怏怏有怨望意至大元年秋武宗幸凉地将御舟图喇前止之言涉不逊帝衔焉既而大宴万岁山图喇醉解其腰带掷诸地瞋目谓帝曰尔与我者止此尔帝益疑其有异志二年春命楚王伊克图等鞫之辞服遂伏诛子西安王喇特纳实哩天历初以推戴功进封豫王

睿宗图类

睿宗景襄皇帝讳图类方太祖崩时太宗留和博之地国事无所属图类实身任之闻燕京盗贼白昼剽掠遣塔齐尔乌尔图萨哈勒往穷治之盗始息己丑八月太宗即位明年伐金命图类帅师以从破天城堡拔蒲城县闻金平章哈达参政布哈守西边遂渡河攻凤翔会前兵战不利从太宗援之辛卯春破洛阳河中诸城太宗还宫山大会诸侯王谓曰人言耗国家者实由寇敌金未殄实我敌也诸君盍无计乎图类进曰臣有愚计非众可闻太宗屏左右问之其言秘人莫知也凤翔既有降人李昌国者言金所恃黄河潼关之险尔若出宝鸡入汉中不一月可达唐邓图类然之言于太宗太宗大喜遂以中军自碗子城南下渡河由洛阳进汪沁诺延以左军由济南进而图类总右军自凤翔渡渭水过宝鸡入小潼关沿汉水而下期以明年会于汴遣绰绰布于诣宋假道且约合兵宋杀使者图类怒曰彼昔遣苟梦玉来通好遽自背盟乎乃分兵攻宋诸城堡长驱入汉中进袭四川陷阆州过南部而还遂由金取房千锋三千人破金兵十余万于武当山趋均州渡汉水遣贵彻讷率千骑驰白太宗太宗遣慰谕图类亟合兵焉图类既渡汉金将哈达设伏二十余万于邓州之西据隘待之时图类兵不满四万得谍报乃轻骑以进及金人战于禹山佯北以诱之金人不动图类举火夜行金哈达闻其且至退保邓州攻之三日不下遂将而北为金人所袭杀伤相当壬辰春哈达等知图类已北合步骑十五万蹙其后图类按兵遣将呼图克等诱之日且暮令军中曰毋令彼得休息宜夜鼓噪以扰之太宗时亦渡河遣亲王昆布哈等将万余骑来会天大雨雪金人僵冻几不能军图类即欲击之诸将请俟太宗至图类曰机不可失遂奋击于三峯山大破之追奔数十里流血被道资杖委积余众并走睢州伏兵起又败之哈达走钧州仅遗数百骑布哈走汴复擒获之太宗寻至顾谓图类曰微汝不能致此捷图类从容对曰臣何功之有此天之威皇帝之福也闻者服其不伐从太宗攻拔钧州获哈达攻许州又拔之收定河南诸郡四月由半渡入真定过中都由北口住夏于官山会太宗疾甚图类祷于天地请以身代居数日太宗疾愈图类从北还至阿尔哈达逊之地遇疾

而薨子十一人妃奇■〈口末〉氏生宪宗及世祖宪宗立追谥曰英武皇帝庙号睿宗二年合祭昊天后土以太祖睿宗配享世祖至元三年

【按睿宗改谥及庄圣皇后追谥世祖纪书至元三年祭祀志所载亦因本传原文均误作二年今改正】改谥景襄皇帝【按睿宗以至

大二年复加尊谥曰仁圣景襄皇帝其册文见元文类本传未载今附识】

追谥奇■〈口末〉氏曰庄圣皇后升祔睿宗庙室至大二年十二月加谥显懿庄圣皇后

伊克图

伊克图

伊克图祖父博绰睿宗庶子也博绰之母曰玛克实尼玛察氏博绰骁勇善骑射宪宗时北征有功赐号巴图尔赐蠡州三千三百四十七

户为其食邑博绰取察罕默尔奇氏生实喇卜嘉勒实喇卜嘉勒取鸿吉哩氏生伊克图伊克图年十三世祖命袭其祖父统军至元十二年从

北平王北征十三年锡里济叛遗人诱胁之伊克图不从事王益忠谨博尔欢巴图鲁尼堪与海都通相率引去王遣伊克图追之擒博尔欢等

以献未几锡里济永和尔图卜特穆尔等反以兵攻王生致伊克图拘系之困辱备至十四年鄂尔和达巴延帅师讨叛锡里济永和尔迎战伊

克图潜结齐勒特穆尔托克托呼乱其阵因得脱走帝闵之赏赉甚厚十八年加封耒阳州二十一年命与托克托呼同讨海都伊客图先进

得谍人知其虚实直前冲敌阵破其精兵海都败走以功赐钞币铠甲弓矢其后北安驻特穆尔河纳颜额布根有异图引兵趋吉鲁尔河大帐

伊克图将三百骑进至阿哈齐地会王帐下苏达苏部兵逃去伊克图谕之使还时彻伯尔图呼噜古台诱蒙古军两万从纳颜伊克图围知之夜

袭其军突入帐中遇呼敦默尔根几获之闲道逸去二十七年海都入寇时托多尔海居守大帐诏伊克图同力备御军未战而溃妻帑辎重悉

为永和尔莽赉特穆尔所掠伊克图与其子托里特穆尔相失独与十三骑奔还世祖抚慰嘉叹赐爵镇远王【按诸王表伊克图于至元二

十一年封镇远此云二十七年互异】以鸿吉哩氏女赐之又命居北安王第二帐王薨帝命掌大帐固辞成宗立命常侍左右武宗抚兵漠北

请以子托里特穆尔从大德五年海都都勒斡合军入寇托里特穆尔将兵拥护力战功多成宗崩安西王阿南达与莽赉特穆尔窥望神器伊

克图曰世祖皇帝之嫡孙在神器所当属安西藩王也入继非制武宗即位以其父子劳效忠勤益厚遇之进封楚王以鸿吉哩氏为楚王妃托

里特穆尔袭封镇远王至大三年彻伯尔来归宗亲皆会伊克图进约昔我太祖有训世

祖诵之臣与有闻治乱国者宣以法齐之所以辨上下
定民志今请有以整饬之则人有所劝惩惟陛下鉴之帝嘉纳其言伊克图薨仁宗命托
里特穆尔嗣楚王延佑中明宗西出托里特穆尔坐累
徙西蕃没入其家赀之半明宗即位诏复故号人民赀帑悉归之托里特穆尔薨子巴图
尔立巴图尔薨有子三人曰雅克特穆尔曰苏克特穆
尔曰多罗布哈雅克特穆尔嗣时年十有二妃鸿吉哩氏哈扎尔驸马之女孙苏喀实哩
皇后之从妹也

△太宗诸子

太宗七子长定宗皇帝次聿腾太子次库春太子次哈喇彻尔王次哈斯大王次哈
坦大王次默呼大王 【宪宗纪有云太宗以子永隆
不材故不立为嗣今考经世大典帝系篇及岁赐录并不见永隆名字次序故不识】

△定宗诸子

定宗三子授呼察大王次诺果太子次和和大王

△宪宗诸子

宪宗五子授巴尔图大王次乌苏岱大王次永隆喇实大王次河平王锡里济次璜
都早卒无嗣

钦定续通志卷一百九十九

●钦定续通志卷二百 宗室传二十

宗室传

元 【二】

○元二

世祖诸子

成宗一子

武宗诸子

仁宗诸子

段

泰定帝诸子

段

文宗诸子

段

顺帝诸子

△世祖诸子

裕宗珍戩【显宗噶玛拉 顺宗达尔玛巴拉库春布哈 特穆尔布哈】

世祖十子长多尔济王次皇太子珍戩即裕宗也次安西王莽噶拉木次北安王诺

木罕无后次云南王和克齐次阿雅噶齐大王次西平
王鄂啰齐次窟王库库楚次镇南王托欢次和塔拉特穆尔王

裕宗珍馐

裕宗珍馐

裕宗文惠明孝皇帝讳珍馐母昭睿顺圣皇后鸿吉哩氏少从姚枢窦默授孝经中
统三年封燕王守中书令丞相史天倪入启事王曰我
幼未尝习祖宗典则一旦当大任惟汝耆德是赖复谕赞善王恂曰省臣所启国事也尔
宜入与闻之四年兼判枢密院事尝从幸宜兴世祖违
豫忧形于色夕不能寐闻母皇后暴得风疾即悲泣衣不解带而行至元七年秋受诏巡
抚青海至冬还京闲谓诸王扎拉呼及从官巴延等曰
吾属适有兹暇宜各悉乃心慎言所守俾吾闻之于是色埽默曰太祖有训欲治身先治
心欲责人先责己巴延曰皇上有训欺罔盗窃人之至
恶一为欺罔则后虽出善言人终弗信一为盗窃则事虽未觉心常惴惴若捕者将至札
拉呼曰我祖有训长者稍深者底盖言贵有终始长必
极其杪深必究其底不可中辍也王曰皇上有训毋持大心大心一持事即隳败吾观孔
子语与圣训合也十年二月 【续通鉴作三月】 立
为皇太子仍兼中书令判枢密院事九月诏立宫师府设事属三十有八员起处士杨恭
懿于京兆太子尝有疾世祖临幸亲和药以赐之遣侍
臣李众驰祀岳渎名山川太子戒其所至郡邑毋烦吏迎送重扰民也诏以侍卫亲军万
人益隶东宫太子命王庆端董士亨选其骁勇者教以
兵法时阅试焉太子服绫衿为渾所渍命侍臣重加染治侍臣请更制之太子弗许东宫
香殿成工请凿石为池如曲水流觞故事太子曰古有
肉林酒池尔欲吾效之也每与诸王近臣习射之暇辄讲论经典若资治通鉴贞观政要
王恂许衡所述辽金帝王行事要略下至武经等书片
言之闲苟有允惬未尝不改容时侍经幄者如王恂白栋皆朝夕不出东宫而待制李谦
太常宋衢尤加咨访焉十八年正月 【世祖纪作二
月】 昭睿顺圣皇后崩太子自猎所奔赴勺饮不入口者终日设庐帐居之命宋衢择可
备顾问者衢以郭佑何玮徐琰马绍杨居宽何荣祖杨
仁风等为言太子曰尽为我致之宜自近者始遂召玮于易州琰于东平及王恂卒太子
闻之嗟悼尝顾谓左右曰王赞善随事规正良多裨补
今鲜其匹也时阿哈玛特擅国重柄太子恶其奸恶未尝少假颜色及盗杀阿哈玛特和
尔果斯入相太子戒之曰阿哈玛特死于盗手汝任中
书诚有便国利民者毋惮更张中书启以何玮参议省事徐琰为左司郎中玮琰入见太
子谕之曰汝等学孔子之道今始行宜尽平生所学辟

杨仁风于潞州马绍于东平复辟杨恭懿同置省中议事以卫辉总管董文用练达官政与恭懿同置省中诏割江西龙兴路为太子分地太子谓左右曰安得治民如邢州张耕者乎于是召宋衢大选署守长江西行省以岁课羨余钞四十七万缗献太子怒曰朝廷令汝等治百姓百姓安钱粮何患不足尽却之阿里以民官兼课司请岁附输羊三百太子以其越例罢之参政刘思敬遗其弟思恭以新民百六十户来献太子问民所从来对曰思敬征重庆时所俘获者太子蹙然曰归语汝兄此属宜随所在放遣为民毋重失人心乌蒙宣抚司进马踰岁献之额即谕之曰去岁尝敕勿多进马恐道路所经数劳吾民也自今其勿复然二十年春辟刘因于保定拜右赞善大夫以吏都郎中瓜尔佳之奇为左赞善大夫是时已立国子学李栋宋衢李谦皆以东宫僚友继典教事至是命因专领之而以衢等仍备咨访尝曰吾闻金章宗时有司论太学生廩费太多章宗谓养出一范文正公所偿顾岂少哉其言甚善会刘因以疾乞去二十二年以长史耶律有尚为国子司业遣使辟宋工部侍郎倪坚于开元既至访以古今成败得失赐酒日昃乃罢太子在中书日久明于听断四方州郡科征挽漕造作和市有系民休戚者闻之即日奏罢至元以来天下太平人才辈出太子优礼遇之在师友之列者非朝廷名德则布衣节行之士德意未尝稍衰其大雅不羣本于天性中外归心焉于时世祖春秋高江南行台监察御史言事者请禅位于太子太子闻之惧台臣寝其奏不敢遽闻而小人以台臣隐匿乘闲发之世祖怒甚太子愈惧未几薨年四十有三成宗即位追谥曰文惠明孝皇帝庙号裕宗祔于太庙

显宗噶玛拉

顺宗达尔玛巴拉

库春布哈

特穆尔布哈

显宗噶玛拉

显宗光圣仁孝皇帝讳噶玛拉裕宗长子也母曰徽仁裕圣皇后鸿吉哩氏噶玛拉少育于祖母昭睿顺圣皇后日侍世祖畏慎不妄言言必无隐至元中奉旨镇北边叛王永和尔等望风请降既而都勒斡彻伯尔诸王遣使求和边境以窳尝出征驻金山会大雪拥火坐帐内谓左右曰今日风雪如是吾与卿处此犹有寒色彼从士腰弓矢荷刃周庐之外其苦可知遂命饗人大为肉糜亲尝而徧赐之抚循部曲之暇则命默额根以国语讲通鉴戒其近侍台哈布哈曰朝廷以藩屏寄我事有不逮正在汝辈辅助其或依势作威不用我命轻者论遣大者奏闻宜各

慎之使百姓安业主上无北顾之忧则予与卿等亦乐处于此乃所以报国家也二十六年世祖以其居边日久特命猎于柳林之地率众至潮州恐廩膳不均令左右司之分结从士仍饬其众曰汝等饮食既足若复侵渔百姓是汝自取罪谪无悔众皆如约民赖以安北还覲世祖于上京世祖劳之曰汝在柳林民不知扰朕实嘉焉明年冬封梁王出镇云南所至未尝横取于民二十九年改封晋王移镇北边统领太祖四大鄂尔多及军马达勒达国土中书省臣请为王置内史世祖从之遂以北安王傅托辉梁王傅茂巴尔斯云南行省平章赛音并为内史明年置内史府又明年世祖崩王闻讣奔赴上都诸王大臣咸在王曰昔皇祖命我镇抚北方以卫社稷久历边事愿服厥职母弟特穆尔仁孝宜嗣大统于是成宗即位而王复归藩邸大德六年正月薨年四十王天性仁厚御下有恩尤为朝廷所重然崇尚浮屠岁耗财不可胜计子三人元妃生伊苏特穆尔次苏克伞次德勒格尔布哈仁宗即位谥王献武英宗遇弑伊苏特穆尔以嗣晋王即皇帝位是为泰定帝追尊曰光圣仁孝皇帝庙号显宗祔享太室上元妃尊谥曰宣懿淑圣皇后升祔显宗庙文宗即位乃毁其庙室

顺宗达尔玛巴拉

顺宗昭圣衍孝皇帝讳达尔玛巴拉裕宗第二子也母曰徽仁裕圣皇后鸿吉哩氏至元初裕宗为燕王达尔玛巴拉生于燕邸明年诏裕宗居潮河八月召至京师凡乘輿巡幸及岁时朝贺未尝不侍裕宗以行二十二年裕宗薨达尔玛巴拉以皇孙钟爱两宫优其出合之礼二十八年给诏出镇怀州行至赵州从卒有伐民桑枣者民遮诉于道达尔玛巴拉怒杖从卒以惩众未至以疾召还明年春世祖北幸留治疾京师越两月而薨年二十有九子三人长曰阿穆尔克封魏王曰哈尚是为武宗曰阿裕尔巴里巴特喇是为仁宗大德十一年夏 【按本纪武宗即位在大德十一年五月其上顺宗尊谥即系是时本传作十一年秋今改正】 武宗即位追谥曰昭圣衍孝皇帝庙号顺宗祔享太庙

库春布哈

库春布哈世祖之孙镇南王托欢子也 【按世系表托欢长子曰娄章娄章次子曰库春布哈则是托欢之孙也与传互异】 泰定三年封威顺王镇武昌文宗天历初诏赐金币仍镇湖广纵集赛等官侵夺民利民颇患苦之至元五年太师巴延矫制召赴京贬之及托克托为相始明其无辜命复还镇至元二年湖北廉访司纠言库春布哈恃宗室恣行不法不报十一年徐寿辉乱库春布哈与其子拜特穆尔塔斯特穆尔引兵至金刚台寿辉部将倪文俊败之执拜特穆尔十二年寿辉伪将邹普胜陷武昌

库春布哈弃城走诏追夺其印十三年克复武昌及汉阳十四年诏库春布哈讨贼有功复镇武昌还其印十六年命与宣让王特穆尔布哈以兵镇遏怀庆未几复还武昌命其子报恩努接岱努佛嘉努以大船四十余水陆并进至沔阳攻徐寿辉伪将倪文俊且载妃妾以行兵至汉川县鸡鸣汉水浅不能行文俊以火焚其船接岱努佛嘉努皆遇害报恩努自死妃妾皆陷库春布哈走陕西【按顺帝纪汉川之败在至正十五年本传叙于十六年镇遏怀庆之后与纪互异】二十五年侯巴延达实奉库春布哈自云南经蜀转战而去至成州欲之京师李思齐以取蜀为名拒不令行俾屯田于成州以没其子曰和尚者封义王侍从顺帝左右多着劳效至正二十四年博啰特穆尔称兵犯阙遂为中书右丞相总握国柄恣为淫虐和尚忿其无君数言于帝受密旨与儒士徐士本谋交结勇士上都玛勒巴延岱尔等阴图刺博啰特穆尔明年七月博啰特穆尔入奏事行至延春合巴延岱尔奋出斫中其脑上都玛勒等竞前斫死之二十八年顺帝将北奔诏淮王特穆尔布哈监国而以和尚佐之及京城将破即先遁不知所之

特穆尔布哈

特穆尔布哈世祖孙镇南王托欢第四子也【按宗室表托欢止生三子曰娄章曰曼济曰布达实哩至特穆尔布哈则娄章之子也与此传异】初世祖第九子托欢封镇南王出镇扬州薨子娄章袭封娄章薨弟图卜布哈袭图卜布哈薨子博啰布哈幼特穆尔布哈乃嗣为镇南王文宗天历二年博啰布哈已长特穆尔布哈请以其位复还之朝廷嘉其让改封宣让王移镇庐州顺帝至元五年巴延擅权矫制贬特穆尔布哈及威顺王库春布哈至托克托为相言两王皆无辜诏令复还镇至正十二年庐州境内贼起特穆尔布哈用廉访使陈思谦言命以所部兵及诸王奇塔特等分道击贼擒其巨帅境内俱平帝赐金带银钞以赏其功十六年命与库春布哈以兵镇遏怀庆路既而汝颍而寇南渡淮特穆尔布哈复以便宜调芍陂屯军拒之及庐州不守乃挈身北归留京师二十七年进封淮王二十八年明兵逼京师顺帝北奔诏以特穆尔布哈监国城破死之年八十三

△成宗一子

成宗一子皇太子德寿蚤薨

△武宗诸子

武宗二子长明宗皇帝次文宗皇帝

△仁宗诸子

仁宗二子长英宗皇帝次安王乌特古斯布哈蚤殒

英宗皇帝无子

△泰定帝诸子

泰定帝四子长皇太子阿勒济雅巴次晋王巴特玛玛雅尔藏布次锡锡太子次允丹藏布太子俱早殒

明宗二子长顺帝次宁宗皇帝

△文宗诸子

文宗三子长皇太子喇特纳达喇蚤薨无后次雅克特古斯太子次太平讷太子俱蚤殒

宁宗皇帝无子

△顺帝诸子

顺帝三子长皇太子阿裕实哩达喇余二子蚤世

钦定续通志卷二百

●钦定续通志卷二百一 列传一

列传

（臣）等谨按司马迁序公侯以下有世家列传之别彪固继作并为一科郑氏通志本取法史记而世家止录周人列传下终隋代盖以汉晋以后虽有封爵之制究与三代分民胙土传序相授者不同不可更立世家故一以列传概之从班书立也臣等今奉诏续修自唐迄元以次纂辑亦准夹漈之例一概称传惟是唐及五代皆有新旧二书体例各殊详略互见其中事迹彼此矛盾者未易枚举苟非折衷以归于一无以传后而信今至于宋元诸史卷帙尤繁其中或一事而屡书一人而两传倘如郑氏原书抄袭旧文略无增损窃恐迭床架屋徒多而不适于用无以称圣朝述作之旨昔司马之为列传事越千年其卷裁七十李延寿修南北二史列传卷帙减原书什六则夫通史之作体尚简严其来久矣臣等窃取斯义裁割众家凡正史所载事之无关法戒人之无足重轻者稍芟薙之且史以纪治忽之迹非取辞章之工如魏征陆贽之论事刘蕡之对策皆经国名言所宜备录至韩愈进学解平淮西碑柳宗元贞符与许孟容书之类文虽工而无裨于政治亦概从删若夫载籍极博传闻或殊自正史而外遗文古事足资考证者靡不参核异同折衷至当其可征信者则增入正文其当两存者则附之分注其或史文舛伪加以驳正亦必依据古书匪敢自逞臆见事增而文省择精而语详以期仰副我皇上稽古右文实事求是之盛意是则臣等郑氏之书而未敢规规学步者也

唐一

○唐一

窦建德

薛举【仁果】

李轨

刘武周【苑君璋高开道】

刘黑闼【徐圆朗】

（臣）等谨按班孟坚汉书改史迁之例以陈胜项籍为列传之首自后史家咸宗之范蔚宗后汉书首列圣公益子以及公孙述隗嚣等传陈承祚魏志亦首列董袁刘吕诸传盖草昧羣雄皆为兴朝驱除史家叙述其事以见创业之艰难于例固不可略也唐新旧二史以李密王世充窦建德等为列传首盖取斯例但考李密王世充二人隋书已为列传郑樵通志业经采入兹既续郑氏之书不宜复载自窦建德以下则以类叙次分为二卷云

窦建德

薛举

李轨

刘武周

高开道

刘黑闼

△窦建德

窦建德贝州漳南人【按新史建德自言汉景帝太后父安成侯之裔及僭号使人祠观津先墓事涉附会今不取】少重然诺材力绝人乡人丧亲贫无以葬建德方耕闻之太息遽解牛以给丧事盗夜劫其家建德立户下盗入击三人死余不敢进请其尸建德曰可投绳系取之盗投绳建德乃自縻使盗曳出跃起捉刀复杀数人繇是益知名为里长犯法亡会赦归久之父卒里中送葬千余人所赠予皆让不受隋大业七年募兵伐辽东建德补队长方如军会邑人孙安祖盗羊为县令补劾笞辱【按旧书及通鉴皆云安祖家为水所漂妻子餓死县以安祖骁勇亦选在行中安祖辞贫白言漳南令令怒笞之与此异此据新书及隋季革命记】安祖刺杀令亡抵建德建德阴舍之时山东饥羣盗起乃谋曰今水潦为灾民力凋敝主上不是恤而亲驾临辽且往岁西征十不一返创夷未复又重发兵人情危骇易以摇动丈夫当建功于世讵为亡命虏乎我闻高鸡泊广袤数百里葭藪阻奥可以违难乘闲窃出掠斂足以自资因得聚豪杰且观时变以就大计安祖然之建德为招无赖少年数百人使安祖率之入高鸡泊为盗安祖号摸羊公【旧书自称将军通鉴同】时郟人张金称亦结众万余依河渚闲蓼人高士

达兵千余屯清河鄙上诸盗往来漳南多杀掠独不入建德闲郡县意建德与贼通捕族其家建德至河闲闻家屠灭即率麾下二百人亡归士达士达自称东海公以建德为司兵安祖为金称所杀其下数千人归建德众益盛至万人犹保高鸡泊倾身接物执苦与士卒均由是能致人死力十二年涿郡通守郭绚率兵万人讨士达士达自以智力不及建德乃推为军司马以兵属焉建德使士达守辚重自以精兵七千迎绚诈为亡状遣绚书约条请前驱执贼自効绚信之引兵从建德至长河界兵懈不设备建德袭杀其军数千人绚以数十骑去追斩于平原隋遣太仆卿杨义臣讨破张金称于清河乘胜欲遂入高鸡泊建德谓士达曰隋善将独义臣耳新破金称其锋不可当引兵避之彼欲战不得军老食乏乘之可有功士达不纳留建德守壁身将兵逆战置酒享士建德闻曰东海公未捷遽自矜大祸至不日矣隋兵胜必长驱而来吾不能独支乃留众保壁帅锐士据险待后五日义臣斩士达于阵追北薄垒守兵溃建德以百余骑走饶阳饶阳无备因取之义臣已杀士达谓余党不足忧引去故建德得还平原为士达发丧招溃卒得数千人军复振自称将军初佗盗得隋官及士人必杀之惟建德恩遇甚备引故饶阳长宋正本为客尊任之参决军议隋郡县吏多以地归之势益张众至十余万十三年正月筑坛场于河闲乐寿自立为长乐王建元丁丑【按大业十三年岁在丁丑建德以丁丑纪元必在其岁新书系之十四年误又大业十四年即唐武德元年也新书建德传先书大业十四年又书武德元年亦误今并考正】署官属分治郡县七月隋右翊卫将军薛世雄【通鉴作左御卫大将军涿郡通守】督兵三万讨之屯河闲七里建德以劲兵伏旁泽中悉拔诸城伪遁世雄以为畏稍弛备建德率敢死士千人袭之会大雾昼冥隋军惊溃相腾藉死者如邱世雄自变量百骑亡去尽得其众获河闲丞王琮劳遣之琮复婴城建德进攻未下明年河闲食尽闻炀帝遇弑琮率吏发丧乘城大临建德遣使八吊琮因请降建德为退舍饬僎具琮率郡属素服面缚军门建德亲释之麾下或言河闲久拒守多杀士今力穷而下请烹之建德曰琮谊士也吾方旌擢以励事君者且往为盗可妄杀人今将安百姓安天下而害忠臣乎即令其军曰先与琮有隙敢妄动者罪三族乃授琮瀛洲刺史始都乐寿号金城宫冬至大会僚吏有五大鸟集其宫羣鸟从之又京城人献玄圭一景城丞孔德绍曰昔天以是授禹今瑞与之侔国宜称夏建德然之【按是时始改国号曰夏新书于建元丁丑之前已书更号夏王者误也今删彼存此】改元五凤以德绍为内史侍郎初上谷贼王须拔自号漫

天王以兵略幽州战死其将魏刀儿领其众壁深泽众十万建德以计袭取之并有其地

【新书载在大业十二年今从旧书】 武德二年

【新书作元年误】 宇文化及至魏县建德谓其纳言宋正本及德绍曰化及大逆不道吾欲为天下诛之何如正本等皆曰善 【按建德

起于羣盗非真为隋报讎新旧书载建德与其臣语甚详今皆删】 即引兵讨化及连战破之化及保聊城乃纵撞车机石四面乘城拔之建德

人先谒萧皇后语称臣执宇文智及杨士贤元武达许宏仁孟景等召隋文武官共临斩之梟首辕门囚化及并其子载以槛车至大陆县斩之

【按隋书云载之河闲斩之通鉴云至襄国杀之今据新旧唐书】 建德性约素不喜食肉饭脱粟加蔬具妻曹未尝衣纨绮每下城破敌贖

宝并散贖将士至是得隋宫人千数皆放去乃以诛化及报越王侗侗封为夏王以隋黄门侍郎裴矩为尚书右仆射 【旧书作左仆射】 兵

部侍郎崔君肃为侍中少府令何稠为工部尚书余随才署职委以政事有愿往关中及东都者听仍给道里费以兵护出于境八月攻洛州陷

之遂迁都焉更号万春宫遣使朝侗与王世充结欢俄而世充废侗乃绝之始建天子旌旗出入警蹕书称诏追谥隋炀帝为闵帝以齐王暕子

政道 【宰相世系表杨慎矜突厥传作正道】 为郕公义成公主在突厥遣使迎萧后建德自将千余骑送之并献化及首未几连突厥侵相

州刺史吕珉死之进攻卫州执河北大使淮安王神通同安长公主黎阳守将李世绩释之复使世绩守黎阳馆王公主馈以客礼滑州刺史王

轨为奴所杀以首奔建德建德曰奴杀主大逆命斩奴而返轨首滑人德之遂降齐济二州亦降兗贼徐圆朗闻风送款三年世绩自拔归国吏

白建德诛其父建德曰世绩唐臣不忘其主忠也父何罪释不问高祖遣使修好建德即以公主等归京师尝执赵州刺史张志昂 【旧书作

张昂】 邢州刺史陈君宾大使张道源等将杀之国子祭酒凌敬谏曰彼悉力坚守以穷就禽仗节士也今杀之无以劝建德怒曰我傅其城犹

不下劳费士旅何可赦敬曰王之上将高士兴抗罗艺于易南兵未交士兴即降可乎建德悟即释之建德大将王伏宝数持兵功略在诸帅上

或谗其反建德杀之伏宝临死呼曰我无罪王何信谗自刘左右手乎后战数不利纳言宋正本好直谏建德复听谗言杀之政教益衰 【据

旧书增】 九月建德自帅师围幽州为罗艺所败艺乘胜袭其营建德阵营中填堑而出败艺众进薄其城不能拔乃还 【通鉴载此事在十

月】 济阴贼孟海公兵三万据周桥城以掠河南建德自击之会秦王伐东都其中书舍人刘斌 【通鉴一作刘梆】 献说曰唐据关内郑

王河南夏有冀方此鼎足相持势也今唐郑二国兵不解唐强郑弱勢必举郑郑灭则夏有齿寒之忧为大王计莫若援郑使郑抗其内我攻其外唐之兵必却唐却而郑完然后徐观其变郑若可图因而取之并二国乘唐师老长驱而西关中可遂有也建德曰善会世充遣兄子琬及长孙安世乞师建德即令其臣李大师魏处绘诣唐请解郑围秦王留之不答四年建德克周桥虜海公留其将范愿戍之悉发海公徐圆朗之众并兵号三十万救世充至滑州世充行台仆射韩洪开城纳之进逼元梁管三州皆陷遂屯荥阳运粮泝河西上舟相属不绝壁成皋东原筑营板渚遣使与世充约期三月秦王进据虎牢翌日以骑五百觜建德营设伏道侧独与数骑进未至贼营三里觉贼出骑追之王渐却诱至伏所卒起奋击贼骑惊引去追斩三百级获其将殷秋石瓚建德失二将又闻唐兵精顿六十日不敢西其诸将又新破海公掠获盈给日夜思归凌敬说建德曰今唐以重兵守虎牢我若悉兵济河取怀州河阳以重将戍之然后鸣鼓建旗踰太行入上党传檄旁郡进壶口以骇蒲津收河东地此上策也且有三利乘虚捣境师有万全一也拓土得众二也郑围自解三也建德将从之而王琬长孙安世曰请兵西又阴赉金王啖诸将以乱其谋众乃曰凌敬书生岂知战建德乃谢敬曰今士心锐天赞我也方用众议不得如公言敬固争建德怒命扶出其妻谏曰祭酒计甚善夫自滏口道乘唐之虚连营渐进以取山北因招突厥西抄关中唐必还师自救郑难舒矣今顿兵虎牢下徒自苦恐无功建德曰此非女子所知且郑朝暮待吾来既许之岂可见难而退 【谨按通鉴辑览 御批胡寅以凌敬之策虽善而汾晋蒲坂非不战所能下若延引日月世充破而建德仍不免于亡此老生常谈耳使建德是时果集兵向秦如孙臆之直趋大梁未必不足以夺洛阳城下诸军之气特为诸将所惑一战被擒所谓神昧当几非天夺其魄者欤】 五月自板渚出为阵西薄泛南属鹞山亘二十里鼓而前秦王登虎牢城望其军按甲不战曰贼起山东未尝见大敌今度险士器令不肃也逼城而阵有轻我心待其饥破之果矣日中建德士皆坐列渴争饮意益怠王麾军先登骑怒尘大涨乃率史大奈秦叔宝缠麾帜驰出贼阵后建德军顾而惊遂大溃建德被重创甯牛口谷车骑将军白士让杨武威获之传而西斩长安市年四十九建德妻与其左仆射齐善行以骑数百遁还洺州余党欲立其养子为主善行曰夏王奄定河朔号为威强今一出不复非天命有归哉不如委心请命无为涂炭生民也遂分府库散给将士令各解去善行乃与右仆射裴矩行台曹且率官属及建德妻并传国玉玺来降建德起兵

至灭凡六年

△薛举

薛举兰州金城人【旧书云河东汾阴人父汪徙居金城】善射殖产巨万好结纳边豪为长雄隋大业末任金城府校尉陇西盗起金城令郝瑗将讨贼募兵数千檄举将始授用大会置酒举与子仁果【通鉴考异曰唐高祖实录先作仁果后作仁杲新旧高祖太祖纪薛举传柳芳唐历柳宗元集皆作仁杲太宗实录吴兢太宗勋吏革命纪焦璐唐朝年代记陈岳唐统记皆作仁果今醴泉昭陵前有石马六匹其一铭曰白蹄乌平薛仁果时所乘此最可据今从之】及其党劫瑗于坐矫称捕反省即起兵囚郡县官发粟以赈贫乏自号西秦霸王建元秦兴以仁果为齐公少子仁越为晋公它贼宗罗■〈日侯〉帅众下之以为义兴公更招附余盗剽马牧兵锋甚锐所徇皆下隋将皇甫绾兵万人屯枹罕举以精卒二千袭之遇于赤岸大风且澍逆举阵绾不击俄反风绾屯气色噎冥部伍错乱举介骑先众乘之绾阵大溃进陷枹罕岷山羌锤利俗以众二万降举大振进仁果为齐王东道行军元帅罗■〈日侯〉为义兴王副之【通鉴作兴王】仁越晋王河州刺史因徇下鄯廓二州不阙旬尽有陇西地众十三万【按隋书炀帝纪通鉴薛举率众反在大业十三年四月新旧书本传但书大业末至僭号兰州始书十三年未详孰是】十三年僭帝号于兰州【通鉴考异曰唐高祖实录武德元年四月辛卯举称尊号今从唐书举传】以妻鞠为后仁果为太子使仁果围秦州仁越趋剑口掠河池太守萧瑀拒却之遣将常仲兴渡河击李轨与轨将李贲战昌松仲兴败军没于轨仁果克秦州举往都之仁果寇扶风汧源贼唐弼拒之不得进初弼立李宏芝为天子有众十万举遣使招弼弼杀宏芝从举仁果闻弼无备袭之尽夺其众弼以数百骑走军益张号二十万将窥京师会高祖入关遂留攻扶风秦王击破之斩首数千级逐北至陇还举畏王踰陇追之问其下曰古有降天子乎黄门侍郎褚亮曰赵佗归汉刘禅仕晋近世萧琮其家今存转祸为福自古有之卫尉卿郝瑗曰亮之言非也昔汉祖兵屡败蜀先主尝亡其妻子卒成大业岂可一不胜便为亡国计乎举亦悔其言乃曰聊试公等即厚赐瑗以为谋主瑗请连梁师都厚赂突厥合从东向举从之约突厥莫贺咄设犯京师会都水监宇文歆使突厥歆说止其兵故举谋塞武德元年丰州总管张长逊【一作悉悉逊古通用】击罗■〈日侯〉举悉兵拔之屯析塘以游军掠岐豳秦王御之次高塘度举粮少利速鬪坚壁老其兵会王疾卧屯不出而举数挑战行军长史刘

文静殷开山观兵于高墟 【殷开山传作析墟误析墟在泾州保定县仁果嗣立都此】
恃众不设备举兵掩其后遂大败死者十六大将慕
容罗■〈日侯〉李安远刘宏基皆没王还京师举拔高墟仁果进逼宁州郝瑗谋曰今
唐新破将卒禽俘人心摇矣可乘胜直趋长安举然之
方行而病召巫覘视言唐兵为崇举恶之未几死仁果立伪谥举武皇帝未及葬而仁果
灭

薛仁果

薛仁果

仁果多力善骑射号万人敌性贼悍每破阵军获俘必断舌刈鼻或舂斮之尝得庾
信子立怒其不降磔之火渐割以啖士拔秦州取富人
倒悬以酢注鼻或杙其隐以求财举每戒曰汝才略足办事而伤于虐终覆吾宗及继立
诸将素有隙者咸猜惧郝瑗哭举病不起繇是兵稍衰
秦王率诸将复壁高墟诸将请战王曰我军新衄锐气少贼骤胜而骄有轻我心我闭壁
以折之伺衰而击可一战禽也因令军中曰敢言战者
斩久之仁果粮乏挑战不许 【谨按通鉴辑览 御批秦王用兵之长大约始以持重
养锐继以深入赴机前后屡战屡胜历历不爽虽英
略天授然兵家言静若处女狡若脱兔者正复不外此道】 其将牟君才内史令翟长穉
【旧书作长孙或作长逊】 以众降左仆射锺俱
仇以河州降王策贼可破遣将军庞玉击宗罗■〈日侯〉于浅水原战酣王以劲兵捣
其背罗■〈日侯〉败王悉军驰之夜半至析墟迟明
围合仁果率伪官属降王受之以仁果归京师及酋党数十人皆斩之举父子盗陇西五
年灭 【按举以隋大业十三年丁丑据陇西唐武德
元年戊寅仁果亡实止二年新旧本传俱作五年疑传写之讹或僭号在十三年而起事
实在十年乎】 初仁果降诸将贺且问曰罗■〈日侯〉
虽破而贼城尚坚王能下之何也王曰罗■〈日侯〉健将非急追之使得还城未可
取也故吾使贼不及计是以克之诸将悦服初羌豪旁
岍地 【通鉴作企地】 附薛举及仁果败亦来降留长安岍地不乐帅其众叛 【新书
岍地降诏即统其众未几复叛今从通鉴】 入南
山县商洛出汉川所过剽害至始州掠王氏女醉寝于野王取岍地所佩刀斩之送首梁
州诏封女为崇义夫人

△李轨

李轨字处则凉州姑臧人以财雄边好调人急隋大业中补鹰扬府司兵薛举乱金
城轨与同郡曹珍关谨梁硕李贲安修仁等计曰举暴
悍今其兵必来吏孱怯无足与计者欲相戮力据河右以观天下变庸能束手以妻子饵

人哉众允其谋共举兵然莫适敢主曹珍曰我闻讖书
李氏当王今轨贤非天启乎遂共降拜以听命修仁夜率诸胡入内苑城建旅大呼轨集
众应之执虎贲郎将谢统师郡丞韦士政遂自称河西
大梁王署官属 【据隋书炀帝纪及通鉴事在大业十三年】 初突厥曷拏那可汗弟
达度阙设内属保会窳川至是称可汗降于轨谨等议
尽杀隋官分其产轨曰诸公既见推当禀吾约今军以义兴意在救乱杀人取财是为贼
何以求济乎乃以统师为太仆卿士政太府卿会辞举
进兵来侵轨遣将败之昌松斩首二千级悉虏其众轨纵还之李贲曰今力战而俘又纵
以资敌不如尽坑之轨曰不然若天命归我当禽其主
此皆我有也不者留何益未几拔张掖炖煌西平枹罕悉有河西武德元年高祖方事辞
举遣使慰结谓轨为从弟轨喜乃遣弟懋入朝帝拜懋
大将军还之诏鸿胪寺少卿张俟德执节册拜轨凉王会轨僭帝位建元安乐 【按隋书
炀帝纪及旧书轨传初称凉王即改元安乐今据新
书及通鉴】 以其子伯玉为太子长史曹珍为尚书左仆射攻陷河州俟德至轨召其下
议曰一姓不可竞王今欲去帝号东向受册可乎曹珍
曰业已为天子奈何受人官必欲以小事大请行萧警故事称梁帝而臣于周轨从之乃
遣其尚书左丞邓晓来朝奉书称从弟大凉皇帝臣轨
而不受官爵帝怒囚晓不遣初轨以梁硕为谋主授吏部尚书硕有算略见故西城胡种
族盛劝轨备之因其户部尚书安修仁交怨又轨子仲
琰尝候硕硕不为起仲琰憾之乃相与譖硕轨不察齐鸩其家杀之繇是故人稍疑惧不
为用有胡巫妄曰上帝将遣玉女从天来遂召兵筑台
以候女多所糜损属荐饥人相食轨毁家赈之不能给议发仓粟曹珍亦劝之谢统师
等故隋官内不附欲离沮其众乃廷诘珍曰百姓多饥
死皆弱不足事者壮勇士终不肯困且储廩以备不虞岂宜妄散仆射苟悦人情非国计
轨曰善乃闭粟下益怨修仁兄兴贵在长安自表诣凉
州招轨帝曰轨据河西连吐谷浑突厥今兴兵讨击尚为难单使弄颊可下邪兴贵曰轨
盛强诚然若晓以逆顺祸福宜听如凭固不受臣世凉
州豪望多识其士民而修仁为轨信任典事枢者数十人若候隙图之无不济帝许之兴
贵至凉州轨授以左右卫大将军因闲访以自安策兴
贵对曰凉州地不过千里无险固自守又滨接戎狄非我族类若举河西地奉图东归虽
汉窦融未足吾比轨不答久之曰昔吴王濞以江左兵
犹称己为东帝我今居河右不得为西帝乎君无为唐诱致我兴贵惧谢曰窃闻富贵不
归故乡如衣锦夜行今合宗蒙任敢有他志兴贵知轨
不可以说乃与修仁等潜引诸胡兵围其城轨以步骑千余出战先是辞举柱国奚道宜

率羌兵奔轨许以刺史而不与道宜怨故共击轨轨
败人城引兵登陴须外援兴贵传言曰唐使我来取轨不从者罪三族于是诸城不敢动
轨叹曰人心去矣携妻子上玉女台属酒为别修仁执
送之斩于长安自起至亡凡三年招以兴贵为右武侯大将军封凉国公 【李愷传称右
骁卫大将军归国公按兴贵与此小异】 修仁左武
侯大将军申国公邓晓闻轨亡入贺帝曰而委质李轨闻其亡不少蹙乃蹈扑以悦我不
尽心于轨能竭节于我乎遂废不齿

△刘武周

刘武周瀛州景城人父匡徙马邑武周骁悍善骑射喜交豪杰兄山伯尝詈辱之曰
汝不择所与必灭吾宗武周因去至洛为太仆杨义臣
帐下募征辽有功补建节校尉还马邑为鹰扬府校尉太守王仁恭以其州里雄颇爱遇
之令总虞候直阁下久之盗仁恭侍儿惧觉诛又见天
下已乱阴有异计因宣言于众曰今岁饥死者骨相枕于野府君闭仓不恤岂忧百姓意
乎军皆愤怒武周知众心摇动因称疾卧家豪杰往候
谒遂大言曰壮士岂能死沟壑今官粟红腐于仓谁能与共取之诸恶少年皆愿从隋
大业十三年与其徒张万岁等十余人候仁恭视事武
周上谒万岁目后人斩仁恭持首出徇郡中无敢动者遂开仓赈穷绝驰檄属城皆下得
兵万余自称太守 【通鉴考异曰创业注云二月己
丑马邑军人刘武周杀太守王仁恭据其郡自称天子国号定杨按唐书武周据汾阳宫
乃僭号于时未也】 遣使附突厥雁门丞陈孝意虎贲
郎将王智辩合兵围其桑干镇会突厥至武周与共击智辩破之孝意奔还雁门雁门人
杀之以城归武周武周因袭破楼烦进据汾阳宫取宫
人赂突厥始毕可汗报以马其众遂入攻得定襄突厥以狼头纛立武周为定杨可汗僭
称皇帝以妻沮为后建元天兴初上谷贼宋金刚有众
万余与魏刀儿连和刀儿为窦建德所攻金刚救之大败率余众四千归武周武周素闻
金刚善兵得之喜封为宋王属以军分家赀半遗之金
刚亦自结出其妻而聘武周妹说武周取晋阳南向平天下武周授金刚西南道大行台
武德二年总兵二万侵并州次黄蛇镇又连突厥锋无
前遂破榆次拔介州进围太原诏遣太常少卿李仲文御之为贼所执举军没仲文逃还
贼因破平遥取石州杀刺史王俭略浩州诏右仆射裴
寂为晋州道行军总管拒之寂战败绩齐王元吉委并州遁武周入据之遣金刚攻陷晋
州执右骁骑卫将军刘宏基进破涪州夏县人吕崇茂
杀其令自号魏王以应贼隋河东守将王行本与武周合关中震动高祖诏秦王督兵进
讨自龙门渡河屯栢壁与金刚相持 【据通鉴增】

又诏永安王孝基等攻夏县不克贼将尉迟敬德袭破孝基军 【详见李基传】 将还涇州秦王邀战破之于美良川敬德复与别帅寻相援王行本于蒲正又破却之蒲州降武周攻李仲文于浩州不胜遣将黄子英护饗道骠骑大将军张德政袭斩之虜其众武周部将稍离金刚以粮道乏卒饥引去王追至雀鼠谷一日八战皆破之斩级数万金刚走介州官军追之以余众二万出西门背城陈亘七里王令李世绩程知节秦叔宝为北军翟长慈秦武通为南军既战小却王以精骑突击破之金刚将轻骑去贼将尉迟敬德寻相张万岁降收其精兵遂复介州武周闻金刚败大惧弃并州北走突厥金刚收散卒将复战众不为用亦奔突厥并州平未几金刚背突厥欲还上谷为追骑所斩武周亦谋归马邑计露突厥杀之起兵六年而灭

苑君璋

苑君璋

苑君璋者武周妹婿也武周将南侵君璋谏曰唐以一州兵掇取三辅所向风靡此殆天命不可争也太原而南多岩阻若悬军深入恐后无继不如连突厥与唐合从南面称孤是为上策武周不听使君璋守朔州引众内侵及败泣曰不用君言乃至此武周死突厥以君璋为大行台统武周部曲使郁射设监其兵高祖遣使招之部将高满政劝君璋尽杀突厥以降唐君璋不从满政因众心夜胁君璋君璋奔突厥满政以马邑来降拜朔州总管荣国公君璋复引突厥攻陷马邑杀满政夷其党乃去退保恒安所部多叛去势蹙请降高祖遣使赐之金券会颉利亦召之意犹豫子孝政谏曰大人许降唐又贰颉利自取亡也今粮尽众携不即决恐衿肘变生即单骑南奔君璋论返之召众与议恒安人郭子威曰恒安山川形胜足以自固突厥方强我倚之可观天下变何遽降唐君璋然之执唐使送突厥与突厥寇马邑犯太原边人苦之久之见颉利政乱率所部降入朝拜安州都督 【通鉴作隰州都督今从新旧二史】 封芮国公食五百户君璋不晓书然天资习事历职有惠称贞观中卒 【按君璋降唐以后无他表见又翻覆持两端非唐功臣可比新书与子和等别为立传今从旧书附武周传】

△高开道

高开道沧州阳信人世煮盐为生少趫勇走及奔马隋大业末依河闲贼格谦谦为隋兵围捕左右奔散开道独身决战杀数十人谦得免遂引为将军谦灭与其党百余人亡海曲后出剽沧州众稍附因北掠戍保自临榆至怀远皆破有之复引兵围北平隋守将李景度不能支拔

城去武德元年陷渔阳郡有铠马数千众万人自号燕王改元始兴 【通鉴考异曰实录唐书皆无开道年号柳璨注正闰位历云年号天成宋庠纪年通谱开道年号始兴未知孰是】 先是怀戎浮图高昙晟者因县令具供与其徒袭杀令伪号大乘皇帝以尼静宣为耶轮皇后建元法轮遣使约开道为兄弟封齐王开道引众从之居三月杀昙晟并其众窦建德围罗艺于幽州艺求救开道以骑二千赴之建德解去乃因艺使请降诏以为蔚州总管北平郡王赐姓李氏开道以轻骑五百抵幽州欲图艺自从数骑入都督府且观艺艺与张饮尽欢知不可图遂去五年幽州饥开道许输以粟艺遣老弱凑食皆厚遇之艺悦不为虞更发兵三千车数百及马驴千往请粟开道悉留不遣遂北连突厥告绝于艺复称燕与刘黑闥联兵入寇开道攻易州不克遣将谢棱诡降于艺请兵应接艺众至棱纵击破之因道突厥俱南恒定幽易等骚然罹患颉利以开道善攻具与俱攻马邑拔之时羣盗相继平开道欲降自疑反复得罪犹恃突厥自安然将士多山东人思归众益厌乱初开道募壮士数百为养子卫合下及刘黑闥将张君立亡归开道命与爱将张金树分督之金树潜令左右数人伪与诸养子戏至夕入合绝其弓弦又取刀稍聚床下既暝抱之趋出金树以其徒噪攻之诸义子将搏战亡弓稍君立举火外城应之帐下大扰开道顾不免擐甲挺刃据堂坐与妻妾奏妓饮酒金树畏不敢前天且明开道先缢其妻妾及诸子而后自杀金树罗兵取养子皆斩之亦杀君立而归开道起兵凡八年灭诏以金树为北燕州都督

△刘黑闥

刘黑闥贝州漳南人嗜酒亡赖父兄患苦之与窦建德少相友隋末亡命从郝孝德为盗后事李密为裨将密败王世充虏之以其武健补马军总管镇新乡窦建德攻新乡虏黑闥用为将封汉东郡公建德有所经略常委以斥候阴入敌中觐虚实乘隙夺奇兵出不意多所摧克军中号为神勇武德四年建德败还匿漳南杜门不出会高祖召建德故将范愿董康买曹湛高雅贤将用之愿等疑畏谋曰王世充举洛阳降骁将杨公卿单雄信之徒皆夷灭今召吾等若西入关必无全且夏王于唐固有德往禽淮安王同安公主皆厚遣还之今唐得夏王即加害我不以余生为王复讎无以见天下义士于是谋反卜所主刘氏吉共往见故将刘雅告之不从众怒杀雅去范愿曰汉东公黑闥果敢多奇略今欲收夏王亡众集大事非其人莫可乃之漳南谒黑闥以告黑闥喜椎牛飨士得兵百余人袭漳南县破之贝州刺史戴元祥魏州刺史权威合兵

讨击皆败死建德故时左右稍归之兵寔盛乃设坛漳南祭建德自称大将军陷历亭杀守将王行敏饶阳贼崔元逊攻陷深州杀刺史裴晞应之兖州贼徐圆朗亦相连和遂取瀛州攻定州残之乃移檄赵魏建德将卒往往杀官吏附贼进至宗城众数万黎州总管李世绩战败走洛州黑闥追之步卒五千皆覆世绩挺身免黑闥遣使北结突厥颉利颉利遣俟斤宋邪那率骑从之军大振不半年尽有建德故地高祖诏秦王及齐王元吉讨之五年黑闥陷相州号汉东王建元天造以范愿为左仆射董康买兵部尚书高雅贤为左领军王小胡为右领军召建德僚属悉复用之都洺州秦王率兵次汲数困贼进下相州二月秦王破之于列人取洺水使总管罗士信守之黑闥攻陷洺水土信死王阻水为连营分奇兵绝其馈路黑闥数挑战坚壁不为动三月贼粮尽王度必欲战豫壅洺水上流敕吏曰须贼渡亟决之黑闥果率骑二万绝水阵与王师大战众溃水暴至贼众不得还斩首万余级溺死数千黑闥与范愿等以残骑奔突厥山东平秦王还黑闥藉突厥兵复入寇攻定州旧将曹湛【新书作曹该今从旧史及通鉴】董康买先逃鲜虞聚兵应之诏淮阳王道玄为河北总管讨黑闥战败死【详见道玄传】繇是河北复叛黑闥仍都洺州九月诏齐王元吉击之【通鉴在十月道建成将兵则在十一月】不进又诏皇太子建成督兵并力频战皆捷十二月与黑闥战于魏州城下破之追北至毛州【新书传皇太子齐王悉兵战馆陶黑闥大败引军走■〈目聂〉北至毛州按馆陶即毛州新史分为二地误今从高祖实录】黑闥整众背水济渠阵纵骑搏之贼赴水者数千黑闥遁去骑将刘弘基追蹙贼不得休明年正月驰至饶阳骑能属者纔百余困且馁黑闥所署总管崔元逊迎拜延之入黑闥不许元逊固请且泣乃进城下元逊馈之方饭车骑诸葛德威【旧书本传及高祖纪作葛德威】勒兵前黑闥骂曰狗辈负我遂执诣皇太子所斩之德威举郡降山东遂定余党及突厥兵间道亡定州总管双士洛邀战破平之

徐圆朗

徐圆朗

徐圆朗者兖州人隋末为盗据本郡以兵徇琅琊以西北至东平尽有之胜兵二万附李密密败归窦建德山东平授兖州总管鲁郡公会黑闥兵起圆朗执安抚使盛彦师应之自号鲁王黑闥以为大行台元帅兖郛陈杞伊洛曹戴等州豪杰皆杀吏应贼秦王已破黑闥遣兵屯济阳经略之圆朗惧河间人刘复礼说圆朗曰彭城有刘世彻才略不常将军欲自用恐败

不如迎世彻立之功无不济圆朗谓然乃迎之或说圆朗曰闻公迎刘世彻信乎公亡无日矣独不见翟让用李密哉【通鉴考异曰革命记云盛彦师以世彻有虚名恐二人相得为患益深因说圆朗使不纳按实录彦师奔王薄与薄共杀李义满三月戊戌王薄死丁未黑闥乃败彦师在圆朗所时黑闥未败也今称或说以阙疑按新书亦以为彦师语今从通鉴】圆朗信之世彻至夺其兵以为司马遣徇地所至皆下复忌而杀之淮安王神通李世绩合兵攻圆朗圆朗数败穷蹙弃城与数骑夜亡为野人所杀
钦定续通志卷二百一

●钦定续通志卷二百二 列传二

列传

唐【二】

○唐二

萧铣 杜伏威【阡棱王雄诞】辅公祐【张善安】 沈法兴 李
子通 朱粲 林士弘 梁师都
刘季真 李子和 罗艺

萧铣

杜伏威

辅公祐

沈法兴

李子通

朱粲

林士弘

梁师都

刘季真

李子和

罗艺

△萧铣

萧铣后梁宣帝曾孙也祖岩梁安平王开皇初降陈陈亡文帝诛之铣少贫佣书事母孝炀帝以外戚擢为罗川令大业十三年岳州校尉董景珍雷世猛族师郑文秀许玄彻万瓚徐德基郭华沔人张绣等谋反隋且推景珍为王景珍曰吾素微虽假名号众不厌罗川令故梁裔也宽仁大度有武皇遗风且吾闻帝王之兴必有符命隋冠带悉号起梁萧氏中兴象也乃

遣人告铣铣即募兵数千扬言迹盗将以应景珍会颍州贼沈柳生寇县铣山战不利谓其下曰岳阳豪杰将推我为主今天下叛隋吾能守节独完哉且吾先人国于此若徇其请复梁祚因以手纸檄召羣盗谁敢不从众悦乃以十月称梁公旗帜服色悉用其旧柳生即以众归铣用为车骑大将军不五日远近争附众数万乃趋巴陵景珍遣徐德基郭华率强姓数百迎谒未及见铣柳生与其下谋曰梁公起我最先附功第一今岳阳兵众而位多谁肯为我下不如杀德基质其人独挟梁公以进因杀德基诣军中白铣铣惊曰今欲拨乱遽自相屠我不能为若主矣步出军门柳生惧伏地请罪铣宥之陈兵而进景珍曰德基倡义竭诚柳生擅杀之不诛无以为政铣因杀柳生于是筑坛城南柴上帝自称梁王有异鸟至建元为凤鸣【通鉴作乌凤】义宁二年僭称皇帝署百官一用梁故事追谥从父琮为孝靖帝祖岩河间忠烈王父璇文宪王封景珍晋王雷世猛秦王郑文秀楚王许玄彻燕王万瓚鲁王张绣齐王杨道生宋王隋将张镇州【通鉴作镇周】王仁寿击铣不能克闻炆帝弑乃与宁长镇等率岭南州县降于铣铣遣将苏胡儿拔豫章使杨道生取南郡张绣略定岭表西至三峡南交趾北距汉水皆附属胜兵四十万徙都江陵复园庙【按铣僭号徙都本是一时事新史先书义宁二年僭称帝后书武德元年徙都江陵误分为二虽武德改元即是义宁之二年然两号前后重出易于疑误学者今为删正】武德二年遣道生攻峡州刺史许绍击破之士死过半【新史系之武德元年今从通鉴】三年高祖诏夔州总管赵郡王孝恭讨之拔通开二州斩伪东平王阉提时诸将擅兵横恣铣恐寢不制乃阳议休兵营农以黜其权董景珍之弟谋作乱事泄被诛景珍方镇长沙铣下书赦之召还江陵景珍惧遣使诣孝恭降铣遣张绣攻之景珍曰前年醢彭越往年杀韩信独不见乎柰何相攻绣不答围之景珍溃而走麾下杀之铣进绣为尚书令绣恃功骄蹇铣又诛之于是大臣旧将皆疑间多叛去铣不能禁四年诏孝恭与李靖率巴蜀兵顺流下庐江王瑗繇襄阳道黔州刺史田世康出辰州道黄州总管周汰明趋夏口会兵图铣【新史称法明为伪将按通鉴法明以前真定令袭拒黄梅等四郡五月来降授黄州总管非铣将也今从旧书】铣乃遣将文士宏拒孝恭战清江口孝恭皆破之获鬪舰千艘拔宜昌当阳枝江松滋伪江州将盖彦举以城降孝恭靖直逼其都初铣放兵止留宿卫数千人及仓卒追集江岭回远未及赴孝恭布长围守之数日破其水城取楼船数千铣度救不至谓其下曰天不祚梁乎待穷而下必害百姓今城未拔先出降可免乱诸人何患无

君乃麾而令守陴者皆恸以太牢告于庙率官属总衰布帨诣军门谢曰当死者铄尔百姓非罪也请无杀掠孝恭受之护送京师后数日救兵至且十余万知铄降乃送款铄至高祖让之封曰隋失其鹿英雄竞逐铄无天命故为陛下禽犹田横南面岂负汉哉诏斩都市 【谨按通鉴辑览 御批唐于割据诸雄擒则无赦若薛仁果窦建德辈其人固非能终为人下者即铄之出降情哀词迫而迄难逃都市之戮盖以绝人望而靖乱源势固不得不尔所谓谋大事者不顾小信即世充虽一时蒙贷而终为独孤修德所戕又安知非明以稽诛全秦王许以不死之言而阴授其指于修德欤】 自僭国至灭凡五年

△杜伏威

杜伏威齐州章邱人少豪荡不治生货与里人辅公祐约刎颈交公祐数盗姑家牧羊以馈伏威县迹捕急乃相与亡命为盗时年十六狡诈多算尝营护诸盗出为导入为殿其党咸服之隋大业九年入长白山依贼左君行不得意舍去转剽淮南称将军下邳贼苗海潮拥众钞暴伏威遣公祐胁谕曰天下共苦隋豪杰相与兴义然力弱勢分不相统若合以为强则无事隋矣公能为王吾且从不然一战以决海潮惧即以众下之江都留守遣校尉宋颢将兵捕伏威数与战伪北诱颢堕葭榛泽中顺风纵火迫之步骑烧死几尽海陵贼赵破阵闻伏威兵少轻之召使并力伏威令公祐严兵居外自引亲将十人操牛酒入谒破阵置酒召酋首高会伏威突斩破阵众眙骇不及救公祐兵亦至遂并其众至数万攻安宜屠之伏威养壮士三十余人假子分领军马而阚棱王雄诞尤知名棱年长于雄诞军中号棱大将军雄诞小将军李子通始与伏威合后惮其才袭之伏威被创堕马雄诞负逃葭泽中得免隋遣虎牙郎将来整讨之伏威大败身重创别将西门君仪妻王勇决而力负伏威走雄诞率麾下壮士十余人从之追兵至雄诞还拒数被创气弥厉伏威遂脱收卒得八千与虎牙郎将公孙上哲战盐城覆其军炀帝遣右御卫将军陈棱以精兵讨之棱不敢战伏威遗以妇人服书称陈姥棱怒果悉兵至伏威迎出挑战棱军射中其额伏威怒曰不杀汝矢不拔遂入棱阵大呼冲击众披靡获所射将使拔箭已斩之携其首入棱军示之又杀数十人遂大溃棱走而免进破高邮引兵渡淮攻历阳据之自称总管分兵徇属县皆下伏威选敢死士五千号上募宠厚之与均甘苦每攻取必先登战罢阅创在背者杀之所虏获必分与麾下士有战死以其妻殉故人皆自奋宇文化及以为历阳太守不受徙丹阳自称大行台始进用士人缮利兵械薄赋敛除殉葬法民奸若盗及吏受赇虽轻皆杀

无赦上表越王侗以为东南道大总管封楚王是时秦王方讨王世充遣使招怀伏威乃献款高祖授以东南道行台尚书令江淮安抚大使上柱国吴王赐姓李属籍以其子德俊为山阳公伏威遣其将陈正通徐绍宗以兵会取世充之梁郡又遣王雄诞讨李子通禽之破汪华于歙州尽有江东淮南之地秦王已平刘黑闥师次曹兗伏威惧乃入朝以公祐居守诏拜太子太保兼行台尚书令留京师位在齐王元吉上以宠之伏威好神仙长年术饵云母被毒武德七年二月暴卒公祐反矫伏威令以给众赵郡王孝恭既平公祐得反书以闻高祖追其官削属籍没入家产贞观元年太宗知其冤诏复官爵以金礼葬仍还其子封

阚棱

王雄诞

阚棱

阚棱者伏威邑人善用两刃刀其长丈名曰拍刀一挥杀数人前无坚对伏威署为左将军部兵皆羣盗横相侵牟棱案罪杀之虽亲故无脱者从伏威入朝拜左领军将军越州都督公祐反棱与南讨青山之战与陈正通遇阵方接棱脱兜鍪谓众曰不识我耶何敢战其徒多棱旧部气遂索至有拜者棱功多颇自伐公祐既禽诬棱与己通谋又伏威王雄诞及棱贖产在丹阳者当原而赵郡王孝恭悉籍入之棱自诉忤孝恭遂以谋反诛

王雄诞

王雄诞者曹州济阴人伏威署为骠骑将军伏威令辅公祐击李子通以雄诞棱为副战溧水子通败公祐乘胜追之反为所挤士皆走壁雄诞曰子通狃于胜无营垒今急击之必克公祐不从雄诞独提私卒数百衔枚夜往乘风火之子通大败走渡太湖武德四年与子通战苏州却之子通以精兵保独松岭雄诞遣将陈当率千兵出不意乘高张疑帜夜缚炬于树徧山泽子通惧烧营遁保余杭雄诞追擒之歙守汪华在郡称王且十年雄诞还师攻之华以劲甲出新安洞拒战雄诞伏兵山谷以弱卒数千鬪辄走壁华来攻壁中奋殊死不可下会暮还雄诞伏兵已据洞口不得归遽面缚降苏贼闻人遂安据昆山无所属伏威使讨之雄诞以邑险而完攻之引日遂单骑造垒开晓祸福遂安即降以前后功授歙州总管封宜春郡公伏威入朝以兵属雄诞辅公祐反雄诞不从遂缢杀之雄诞爱人善抚士每破城邑无丝毫犯死之日江南土庶为流涕高祖嘉其节以子世果袭封太宗立赠左骁卫大将军越州都督谥曰忠世果垂拱初至广州都督安西大都护

△辅公柝

辅公柝齐州临济人隋季与杜伏威为盗转掠淮南伏威自号总管以公柝为长史李子通据江都公柝以精卒数千渡江击之子通拒战众十倍锐甚公柝选甲士千人操长刀居前别以千人随之令曰却者斩公柝以众殿俄而子通方阵而通长刀千人皆决死鬪公柝纵左右翼搏之子通大溃降其众数千伏威既遣使归国武德二年诏授公柝淮南道行台尚书左仆射封舒国公伏威与公柝少相爱又兄事之故军中呼辅伯尊礼略等伏威稍忌之乃署养子阚陵为左将军王雄诞为右将军推公柝仆射阴解其柄公柝内怏怏不平乃与故人左游仙伪学辟谷以自晦六年伏威入朝留公柝居守复令雄诞握兵副之阴诫曰吾至京若不失职无令公柝为变既行左游仙说公柝反公柝乃诈称得伏威书责雄诞贰雄诞信之称疾不视事公柝因夺其兵使其党西门君仪谕以反计雄诞悔悟曰天下幸方靖吴王在京师当谨守藩柝何为夷族事雄诞虽死义不从公柝知不可屈缢杀之乃给言伏威移书令举事八月遂僭位国称宋建元天明即陈故宫都之以左游仙为兵部尚书东南道大使越州总管增修器械转廩食遣将徐绍宗侵海州陈正通寇寿阳诏赵郡王孝恭趋九江岭南大使李靖下宣城怀州总管黄君汉出谯齐州总管李世绩由淮泗讨之孝恭取芜湖下梁山三镇公柝遣将拒战孝恭等击破之【详见李靖传】乘胜遂北至丹阳公柝惧弃城将奔左游仙于会稽兵尚数万至毗陵能从者裁五百其将吴骚孙安谋执之公柝弃妻子与腹心士数十走武康野人执送丹阳孝恭斩之传首京师始公柝佐伏威据江东距公柝死凡十三年

张善安

张善安

张善安兖州方与人年十七亡命为盗转掠淮南会孟让败得其散卒八百袭破庐江郡依林士宏不见信憾之反袭士宏焚其郛去南康萧铣取豫章遣将苏胡保儿守之善安夺其城据以归国授洪州总管武德六年反辅公柝以为西南道大行台善安掠孙州【唐书地理志武德五年以南昌县置孙川】执总管王戎袭杀黄州总管周法明会安抚使李大亮兵至谕以祸福答曰善安初不反为部下诬误降今易耳恐不免奈何大亮曰总管定降吾固不疑因独入其阵与善安握手语善安大喜将数十骑诣大亮营大亮引入命壮士执之骑皆惊引去悉兵来战大亮使人谕之曰吾不留总管总管赤心归国谓我曰若还营恐为将士所执故自留不去耳【新书叙大亮语大略今从通鉴】其党

骂曰总管卖我遂溃送善安京师自称不与公柘谋高祖赦之公柘破得其书遂伏诛

△沈法兴

沈法兴湖州武康人父恪陈广州刺史法兴隋大业末为吴兴郡守东阳贼楼世干略其郡炀帝诏与太仆丞元佑讨之义宁二年江都乱法兴自以世南土属姓数千家远近向服乃与佑将孙士汉陈果仁【通鉴作陈杲仁】执佑以诛宇文化及为名三月发东阳行收兵趋江都下余杭比至乌程众六万毗陵通守路道德拒之法兴约连和因袭杀之据其城遂定江表十余州自署江南道总管闻越王侗立乃上书称大司马录尚书事天门公承制置百官以陈果仁为司徒孙士汉司空蒋元超尚书左仆射殷芊左丞徐令言右丞刘子翼选部侍郎李百药为掾武德二年自称梁王建元延康易隋官仪颇用陈氏故事然专事威戮下有细故即诛之繇是将士携解俄遣子纶【新书作伦误】救陈棱击李子通反为所败子通乘锋渡江破京口法兴使将蒋元超战陵亭大败死之法兴惧弃城奔吴郡贼帅闻人遂安【新书作嗣安】遣将叶孝辩迎之法兴中悔将杀孝辩趋会稽为所觉惧自沈于江起义宁至武德凡三年灭

△李子通

李子通沂州丞人少贫以渔猎为生有余则以饷人喜报仇隋大业末长白山贼左才相自号博山公子通依之羣盗皆暴忍独子通仁爱归者遂多不半岁有徒万人才相畏忌子通乃引众渡淮与杜伏威合为隋将来整所破奔海陵得众二万自称将军大业十一年僭号楚王宇文化及之弑炀帝也以右御卫将军陈棱为江都太守已而棱降高祖授以总管子通攻棱棱穷乞师于沈法兴杜伏威伏威自将屯清流法兴遣子纶屯杨子间数十里子通纳言毛文深请募吴人诈为法兴兵夜袭伏威二人遂交恶无敢先战者子通得悉力攻江都克之棱奔而免于通僭即皇帝位国号吴建元明政丹阳贼帅乐伯通以众万余降之子通又败法兴兵遂取晋陵以法兴所署掾李百药为内史侍郎典文徽尚书左丞殷芊为太常卿司礼乐繇是江南士人多归之会伏威命辅公柘拔丹阳进屯溧水子通战败粮且尽弃江都保京口伏威尽得其地俄东走太湖裒散兵二万人复张袭法兴吴郡破之徙都余杭东举会稽南距岭西抵宣城北太湖悉有之武德四年伏威遣将王雄诞讨子通战苏州败绩退保余杭雄诞进傅城子通穷乃降伏威受之并乐伯通送京师高祖释之赐宅一区田五顷及伏威来朝子通语伯通曰伏威既来江东未定我故兵多在江外若取之可建大功遂皆亡及蓝田为关吏所获并伏诛

△朱粲

朱粲亳州城父人初为县吏大业中从军伐贼长白山亡命去为盗号可达寒贼自称迦楼罗王众十万渡淮屠竟陆沔阳转剽山南所至残戮无遗噍僭号楚帝建元昌达攻拔南阳义宁末与山南抚慰使马元规战大败收其余复振至二十万粲所克州县皆发藏粟以食去辄燔屠聚毁城郭专以劫为资于是人大馁死者蔽路其军亦匮乃掠小儿蒸食之戒其徒曰味之珍盍有加人者第使他人有人我恤无储哉隋著作佐郎陆从典通事舍人颜愨楚谪南阳粲初引为宾客后尽食两家显州首领杨士林田瓚起兵攻粲旁郡响赴战淮源桀大败挈残士奔菊潭遣使乞降高祖以为楚王遣散骑常侍段确劳之确醉戏粲曰闻君噉人人作何味粲曰噉醉人正似糟豚确骂曰狂贼归朝乃一奴耳复得噉人乎粲惧收确于坐并从者数十悉饗之以飧左右遂屠菊潭奔王世充署龙骧大将军东都平斩洛水上士庶掷瓦砾系其尸须臾若冢 【按新旧二史并以朱粲林士弘张善安三人附李子通传未考粲士弘皆自立名号与子通不相下不当在附书之例善安与辅公祐通谋今改列辅公祐传后】

△林士弘

林士弘饶州鄱阳人隋季与乡人操师乞起为盗师乞自号元兴王建元天成 【按隋书炀帝纪大业十二年鄱阳贼操天成举兵反自号元兴王建元始兴攻陷豫章今从新唐书】 据豫章以士弘为大将军隋遣治书侍御史刘子翊讨贼射杀师乞士弘收其众复战彭蠡子翊败死之 【按隋书诚节传子翊由治书侍御史为丹阳留守寻遣于上江督运为贼吴綦子所虏闻炀帝被弑贼欲请以为主不从贼执子翊至临川城下使告城中曰帝已崩子翊反其言子是见害此云与士弘战死事迹迥异年月先后亦不合未知孰是】 遂大振众十余万据虔州自号南越王俄僭号楚称皇帝建元太平 【按唐高祖实录士弘僭号建元延康今据新唐书及隋书】 临川庐陵南康宜春豪杰皆杀隋守令以附北尽九江南番禺悉有之后萧铣以舟师破豫章士弘独有南昌 【南昌即建昌】 虔循潮之地铣败其亡卒稍归之复振赵郡王孝恭招慰降循潮二州武德五年士弘弟药师以兵二万围循州总管杨世略故斩之士弘惧请降其将王戎亦献南昌地士弘复遁保安城山洞袁入相聚应之为张善安所察以兵赴讨会士弘死其众遂散 【按旧书王戎以南昌降拜南昌州刺史戎召士弘藏之于宅招诱旧兵更谋作乱洪州总管张善安密知其事发兵讨之通鉴云士弘保安城山洞洪州总管张善安

遣兵击破之未知孰是今据新书】

△梁师都

梁师都夏州朔方人仕隋鹰扬府郎将大业末罢归结徒杀郡丞唐世宗【旧事作唐宗避太宗讳】据郡称大丞相联兵突厥与隋将张世隆战败之因略定淮阴弘化延安僭皇帝位国号梁建元永隆始毕可汗遗以狼头纛号大度毗伽可汗解事天子遂道突厥兵居河南地拔盐川郡武德二年寇灵州长史杨则击走之又与突厥千骑营野猪岭延州总管段德操勒兵不战伺师都气懈遣兵进击战酣德操自以轻骑出其旁乘之师都大溃未几以步骑五千入寇德操又尽屠其军及刘武周败师都将张举刘旻相继降唐师都惧遣尚书陆季览说处罗可汗曰隋亡中国裂为四五势均力弱皆争附突厥今唐灭刘武周兵方四出师都将朝夕亡然次亦及突厥愿可汗如魏道武【新旧书皆作孝文按魏取中原在道武时今从通鉴】引兵而南师都请为乡导处罗讷之将出师而处罗死五年德操又悉兵攻师都克其东城师都保西城不敢出求救于突厥颉利颉利以劲兵万骑赴之德操乃还【通鉴载此事在武德五年新书系之六年恐误】先是稽胡大帅刘仝成以众赴师都因谗见杀其下疑惧乃多叛师都日益蹙遂往朝颉利教使南略故突厥盗边无宁岁后颉利政乱太宗以师都势危谕之以书不从语夏州长史刘旻司马刘兰【通鉴作刘兰成】经略之多纵反间离其君臣数出轻骑蹂其稼城中饥虚其将辛獠儿李正宝冯端谋执师都降不果正宝挺身归贞观二年旻等表可取状诏柴绍薛万均并力令旻以劲卒直据朔方东城颉利来援绍逆战破之进屯城下其从父弟洛仁斩师都降擢洛仁为右骁卫将军朔方郡公师都自起至灭十三年

△刘季真

刘季真离石胡人父龙儿隋末举兵自称王以季真为太子第六儿为永安王将军潘长文连年击不能下后虎贲郎将梁德破杀龙儿众乃散唐兵起季真与六儿复聚众附刘武周季真自号太子王【旧书季真北连突厥自称突利可汗】六儿为拓定王迭为边害武德二年六儿遣使请降诏以为岚州总管【本传失载六儿降事据通鉴增】明年西河公张纶真乡公李仲文合兵讨季真亦降授石州总管赐姓李封彭山郡王【旧书作彭城郡王】寻复从宋金刚金刚败秦王执六儿斩之季真弃石州奔高满政俄被杀

△李子和

李子和同州蒲城人方郭氏为隋左翊卫以罪徙榆林大业末郡饥子和与死士十

八人执郡丞王才数以不恤下斩之开仓赈穷乏自号
永乐王建元五年号其父为太公有骑二千南连梁师都北事突厥纳弟为质始毕可汗
册子和为平阳天子不敢当乃更署为屋利设武德元
年献款授灵州总管金河郡公徙郿国公袭师都窳朔城克之又伺突厥虚实阴以章闻
为虜逻骑所获处罗可汗怒囚其弟子升于是子和危
畏举部南徙诏内延州故城五年从平刘黑闥有功赐姓拜右武卫将军贞观六年静川
山獠反子和奉诏击败之 【从本纪增】 十一年为
婺州刺史徙夷国公显庆初转黔州都督乞骸骨许之进金紫光禄大夫卒

△罗艺

罗艺字子延襄州襄阳人家京兆之云阳父荣隋监门将军艺勇战攻善用槊大业
中补虎贲郎将辽东之役李景以武卫大将军督饜北
平诏艺以兵属分部严一然任气尝侮慢景颇为景辱艺衔之时涿郡号富饶伐辽兵役
多在又临朔宫多珍宝屯师数万苦盗贼侵掠留守将
赵什住贺兰谊晋文衍等不能支艺捍寇数破却之勇常冠军为诸将忌畏艺阴自计因
出师诡说众曰吾军讨贼数有功而食乏官粟若山而
留守不赈恤岂安人强众意耶士皆怨既还郡丞出郊谒艺执之陈兵入什住等惧争听
命艺即发库赀赐战士仓粟给穷人境内大悦杀异己
者渤海太守唐祜等威动北边柳城怀远并归附黜柳城太守杨林甫改郡曰营州以襄
平太守邓暹为总管艺自称幽州总管宇文化及遣使
招艺艺曰我隋旧臣义不辱贼斩使者为炀帝发丧三日竇建德高开道亦遣使于艺艺
谓官属曰建德等皆剧贼不足共功名唐公起兵据关
中民望所系王业必成吾决归之敢异议者戮会张道源抚辑山东亦谕艺降武德二年
乃奉表以地归 【按旧书艺在三年中通鉴据实录
以为元年十二月事未知孰是今从新书】 诏封燕王赐姓预属籍数与建德战多所会
馘秦王击刘黑闥高祖诏艺弟监门将军寿以兵从艺
自率众数万破刘什善张君立于徐河黑闥引突厥入寇艺复以兵与皇太子建成会洺
州遂请入朝帝厚礼之拜左翊卫大将军艺恃功骄倨
秦王左右尝至其营艺痕辱之高祖怒以属吏久乃释时突厥放横籍艺威名欲惮虜诏
以本官领天节军将镇涇州太宗即位进开府仪同三
司艺内惧乃图反谎言阅武兵既集称被密诏入朝军至豳治中赵慈皓出谒遂据州帝
命长孙无忌尉迟敬德击之未至慈皓与统军杨岌谋
诛艺艺觉执慈皓岌居外觉变即勒兵攻之艺败弃妻子将奔突厥抵涇州左右斩之传
首梟于都市寿时为利州都统亦及诛先是济阴女子
李 【通鉴作曹州妖巫李五戒五戒盖其名】 自言通鬼道能愈疾尝往来艺家谓艺

妻孟曰妃相贵当母天下孟令视艺又曰妃之贵由于王贵色且发艺妻信之亦赞以反既败与李皆斩【按杜伏威李子和起于羣盗自立名号后虽降唐终非纯臣之谊罗艺专制幽州归朝未久卒以反诛新史别为传列于开国功臣之间于论世之义有所未尽今从旧史与辅公柘合传】

钦定续通志卷二百二

●钦定续通志卷二百三 列传三

列传

唐【三】

○唐三

刘文静 裴寂 刘弘基 殷开山 刘政会【奇】

唐俭【宪】 长孙顺德 柴绍【赵

文恪 李思行李高迁 姜宝谊许世绪 刘师立 刘义节 钱九陇樊

兴 公孙武达 庞卿恇 张长逊张平高

李安远 马三宝李孟尝 元仲文 秦行师】

（臣）等谨按吕夏卿唐书直笔言新史修列传之例以年时为序次以事迹为联合此例本不独唐书为然而求之新史亦不尽协今参用旧书略为裁定刘文静裴寂倡建大计固为佐命之冠而刘弘基以下六人附义起事名迹尤着高祖所定为太原首功者也故以类叙为一卷其余武德诸臣稍以文武功罪差次定之着为四卷贞观以下并用此例汇聚区分庶几不失作者之初指云

刘文静

裴寂

刘弘基

殷开山

刘政会

唐俭

长孙顺德

柴绍

△刘文静

刘文静字肇仁京兆武功人父韶仕隋战死赠上仪同三司文静以死难子袭仪同侑儻有器略大业未为晋阳令与晋阳宫监裴寂善寂夜见逻堞传烽咤曰天下方乱吾将安舍文静笑曰如君言豪杰所资也吾二人相得何忧贫贱高祖为唐公镇太原文静察有大志深自结既

又见太宗 【新书本传称太宗为秦王按是时太宗未受秦封高祖止称唐公而子先称秦王于义未安今从旧书之例皆称庙号】 谓寂曰唐公子非常人豁达类汉高神武同魏祖殆天启之也寂未谓然文静俄坐李密姻属系狱太宗私入视之文静喜挑言曰丧乱方剡非汤武高光不能定太宗曰安知无其人哉今过此非儿女子恂恂相忧者欲与君议大事也计将安出文静曰上南幸兵填河洛羣盗以万数须真主取而用之诚能应天顺人奋襁大呼则四海不足定也今汾晋避盗者皆在文静素知其豪杰一朝号召十万众可得也尊公所领兵复且数万一下令谁不愿从鼓而入关以震天下王业成矣太宗笑曰君言正合我意乃阴部署宾客将发恐高祖不从文静谋因裴寂开说于是介寂以交太宗遂得进议及突厥败高君雅兵高祖被劾太宗遣文静寂共说曰公据嫌疑之地方以罪见收事急矣尚不为计乎晋阳兵精马强宫库饶富大事可举也今关中空虚代王弱贤豪并兴未有适归愿公引兵西诛暴除乱乃受单使囚乎高祖私可会得释而止太宗教文静伪为诏发太原西河雁门马邑男子年二十至五十悉为兵期岁尽集涿郡以伐辽繇是人心愁扰益思乱文静谓寂曰先发制人后发制于人且公为宫监以宫人侍客公死何憾柰何累唐公寂惧乃劝起兵太宗委文静长孙顺德等募士声讨刘武周文静与寂作符敕发宫监库物佐军兴会副留守王威高君雅猜贰文静与刘政会为急变书诣留守告二人反候高祖与威君雅视事文静进曰有密牒言反者高祖目威等省牒政会不肯曰所告乃副留守唯唐公得观高祖阳惊曰诘有是乎读已语威曰人告公等信乎君雅诟曰反人欲杀我耳文静叱左右执之由是举兵开大将军府以文静为司马文静劝改旗帜又请与突厥连和皆从之遣文静使始毕可汗请兵且与之约 【通鉴考异曰文静传始毕问唐公起事今欲何为文静曰皇帝废冢嫡传位后主致斯祸乱唐公国之懿戚起义军欲黜不当立者按创业起居注先已再遣使至突厥不容始毕方有此问今不取】 曰若入京师金币子女尽以归可汗始毕大喜即遣二千骑随文静至又献马千匹高祖喜曰非君何以致之寻拒屈突通于潼关与其将桑显和苦鬪死者数千文静度显和兵怠以奇兵从其后掩之显和败绩 【详见屈突通传】 通兵尚数万欲引而东文静命将追执之徇新安以西皆下转大丞相府司马进光禄大夫鲁国公高祖即位擢纳言帝多引贵臣共榻坐文静谏曰今率士莫不臣而延见羣下言尚称名帝坐严尊屈与臣子均席此王导所谓太阳俯同万物者也帝曰我虽应天受命宿昔之好何可忘公其无嫌辞举寇泾州以元帅

府长史与司马殷开山出战大败奔还京师坐除名与讨仁杲平之复爵邑授民部尚书
陕东道行台左仆射文静自以材能过裴寂远甚又屡
有战功而寂独用故旧恩居其上意不平每论多戾驳遂与有隙尝与弟散骑常侍文起
饮酣有怨言拔刀击柱曰当斩寂首会家数有怪文起
忧召坐巫夜发衔刀为襁厌文静妾失爱告其兄上变遂下吏帝遣裴寂萧瑀讯状对曰
昔在大将军府司马与长史略等今寂已仆射居甲第
宠赉不贲臣官赏等众人诚不能无少望帝曰文静此言反明甚李纲萧瑀明其不反秦
王亦以文静首决非常计事成乃告寂今任遇弗等故
望怨非敢反宜赐全宥帝素疏忌之寂又言文静多权诡而性猜险今天下未靖留之恐
为后忧帝遂杀之 【通鉴考异曰高祖实录唐书唐
历等皆以文静之死由于裴寂今据实录此年六月裴寂为晋州道行军总管讨刘武周
此月丁丑为宋金刚败于介州去文静死才七日此时
不当在京师盖寂未行时先有此言高祖未忍杀此时始决意耳】 年五十二文起亦死
籍其家文静临刑抚膺曰高鸟尽良弓藏果不妄贞观
三年追复官爵以子树义袭鲁国公诏尚主然怨父不得死谋反诛

△裴寂

裴寂字玄真 【宰相世系表字真玄】 蒲州桑泉人年十四补郡主簿及长伟容
貌涉知书传隋开皇中调左亲卫家贫徒步走京华过
华山祠祈梦自卜夜梦老人谓曰君年踰四十当贵 【旧书夜梦白头翁谓寂曰卿年三
十以后方可得志终当位极人臣耳按寂以贞观三
年免官未几卒年六十以是推之寂佐高祖起事时年已四十七八矣今从新书】 大业
中历侍御史晋阳宫副监高祖雅与厚及留守太原契
分愈密至蒲酒通昼夜太宗与刘文静方建大计未敢白欲因寂关说乃出私钱数百万
饷龙山令高斌廉俾与寂博阳不胜寂得进多大喜日
滋昵太宗以情告之许诺寂尝以宫人侍高祖恐事发诛间饮酣乃白太宗将举兵状因
言今盗徧天下城闔外即战场虽徇小节犹不脱死若
举义师不特免祸且就大功高祖然所计兵起寂进宫女五百米九百万斛杂彩五万段
铠四十万首大将军府建为长史下临汾封闻喜县公
至河东屈突通未下而三辅豪杰多归者高祖欲先取京师恐通掎其后犹豫未决寂说
曰今通据蒲关未下而西我腹背支敌败之符也不若
破通而后趋京师太宗曰不然兵贵神速且关中羣盗处处屯结易以招怀抚而有之众
附兵强何向不克通自守贼耳庸能患我一失其机胜
负未可计也高祖两从之留兵围蒲而遣太宗入关长安平赐寂田千顷甲第一区物四
万段迁大丞相府长史进魏国公邑三百户隋帝禅位

寂陈符命劝进又督太常具仪撰日高祖即位曰使我至此者公也拜尚书右仆射诏尚食日给御膳视朝必引与同坐入合则延卧内言无不从呼为裴监不名也武德二年刘武周寇太原寂请行授晋州道行军总管以便宜决事贼将宋金刚据介州寂屯度索原贼埭水上流寂徙屯为贼所搏兵大溃死亡略尽寂昼夜驰抵平阳镇戍皆没上书谢罪高祖慰谕俾留抚河东寂无他才惟飞檄郡县促入屯垒相保燹焚积聚人益惴骇思乱夏人吕崇茂杀其令反为贼守寂攻之复为所败召还帝责让良久以属吏俄释之遇待如初帝每巡幸必委以居守麟州刺史韦云起告寂反【吴缜纠谬曰按云起传云起未尝为麟州亦无告裴寂反之事又地理志麟州乃开元十二年始置则方武德时固未有麟州也今按唐书地理志麟游县武德元年曰麟州贞观元年州废是唐初固有麟州矣吴氏纠之非是】按讯无状帝谓曰朕有天下公推毂成之也容有贰哉所以讯吏欲天下人信公不反耳诏贵妃三人赍玉食宝器宴其家经宿去帝尝从容夸语曰前王多与细微间关行阵而后成功我家陇西旧族世姻姬帝室一呼倡义不三月有天下公复华胄职宦光显非刘季亭长萧曹刀笔吏比也我与公无媿焉四年改铸钱赐一炉得自铸又聘其女为赵王元景妃迁左仆射帝置酒含章殿欢甚寂顿首请赐骸骨归里帝泣下曰未也要当相与老尔公为宗臣我为太上皇逍遥晚岁不亦善乎九年册拜司空遣尚书员外郎日一人直第贞观初太宗亲郊命寂与长孙无忌升金辂寂辞帝曰公有佐命勋无忌宣力王室非二人谁可参乘者遂同载归三年浮图法雅坐妖言诛辞连寂坐免官削封邑半归故郡寂请留京师帝让曰公勋不称位徒以恩泽居第一武德之间政或弛紊职公为之今归扫坟墓尚何辞寂遂归未几汾阴狂男子谓寂奴曰公有天分寂惶惧不敢闻遣监奴杀所言者奴盗寂封邑钱百万寂捕急遂上变帝怒曰寂有死罪四为三公与妖人游一也既免官乃恚称国家之兴皆其所谋二也匿妖人言不奏三也专杀以灭口四也我戮之非无辞议者多请贷朕其从众乎乃放静州会山羌反或言劫寂为主帝曰国家于寂有恩必不尔既而寂率家僮破贼帝念寂功诏入朝会卒年六十赠相州刺史工部尚书河东郡公子律师嗣尚临海长公主终汴州刺史律师子承先【宰相世系表作承光其官检校左羽林将军郕国公与本传异】武后时为殿中监为酷吏所杀

△刘弘基

刘弘基雍州池阳人少以荫补隋右勋侍大业末从征辽赍乏行及汾阴度后期且诛遂与其属椎牛犯法讽吏甫系岁余以赎论因亡命

盗马自给至太原阴事高祖又察太宗资度非常益自托由是蒙亲礼兵将举弘基募士得二千人王威等颺大事弘基与长孙顺德伏合后麾左右执之从攻下西河宋老生败弃马投堑弘基斩其首拜右光禄大夫师至蒲引兵先济河下冯翊为渭北道大使命殷开山副之西徇扶风众至六万两度渭次长安故城振队金光门隋将卫文升求拒弘基逆击禽甲士千余马数百时诸军皆未至弘基最先胜高祖悦赐马二十匹京师平功第一封河间郡公授右骁卫大将军讨薛举战浅水原八总管军皆没【按吴缜纠谬谓浅水原乃太宗战胜之地曷尝有八总管败没此弘基之没亦高塘之战耳因诋此传为大误今考薛举传云秦王壁高塘策贼可破遣将庞玉击宗罗■〈目侯〉于浅水原战方酣王以劲兵捣其背是浅水原之与高塘地本相近太宗壁高塘而破贼于浅水原刘文静等观兵高塘而八总管败于浅水原两事正相类非史家之误也】唯弘基一军战力矢尽为贼拘帝以临难不屈优护其家仁杲平乃克归官之如初刘武周犯太原弘基屯平阳复陷贼俄自拔归授左一总管从秦王屯栢壁以劲卒二千由隰州趋西河蹶贼归路贼锐甚弘基坚壁不进及宋金刚遁走率骑尾之介休与王合击大破之累封任国公从击刘黑闥还除并钺将军【旧书作秉钺将军】会突厥患边督步骑万人备塞自幽北东拒子午岭西抵临泾筑障遮虏贞观初年李孝常等谋反坐与交除名为民岁余起为易州刺史复封爵召授卫尉卿改封夔国以老乞骸为辅国大将军朝朔望禄赐同职事太宗征辽召为前军大总管战驻驂山有功累加封户至千一百卒赠开府仪同三司并州都督陪葬昭陵谥曰襄遗令给诸子奴婢各十五人田五顷谓所亲曰使贤固不籍多财即不贤守此可以脱饥冻余悉散之亲党子仁实袭封

△殷开山

殷开山名峤以字行京兆鄠人涉书工为尺牍为隋太谷长高祖起兵召补大将军掾从攻西河为渭北道元帅长史招慰关辅羣盗皆下与刘弘基破卫文升兵赐爵陈郡公迁丞相府掾以吏部侍郎从秦王讨薛举会王疾甚卧营委军于刘文静诫曰贼方炽邀速战利公等毋与争粮尽众枵乃可图开山锐立事说文静曰王属疾忧公弗克济故不欲战今宜因机制敌无专以贼遗王也请勒兵以怖之遂战高塘【新旧史作折塘折盖析字之误析塘乃仁杲所都此时唐兵未能至此今据通鉴作高塘】为举所乘大败下吏当死诏贷之除名为民顷之从平仁杲复爵位兼陕东道行台兵部尚书迁吏部从讨王世充以功进爵郟国公征刘黑闥道疾卒王哭之恸诏赠陕东道大行台右仆射谥曰节

贞观十四年与淮安王神通河间王孝恭民部尚书刘政会俱配飨高祖庙庭永徽中加赠司空

△刘政会

刘政会滑州胙人隋太原鹰扬府司马以兵隶高祖麾下高祖将举兵遣政会为急变书告王威等反执威等囚之 【详见刘文静传】

大将军府建为户曹参军迁丞相府掾武德初授卫尉少卿留守太原调辑戎政远近欢服刘武周寇并州政会为武周所擒每密表贼形势既

平复官爵历光禄卿封邢国公贞观初转洪州都督卒太宗手诏政会昔预义举有殊功葬宜异等于是赠民部尚书谥曰襄后追徙渝国子玄

意袭爵尚南平公主高宗时为汝州刺史

刘奇

刘奇

次子奇长寿中为天官侍郎荐张鷟司马隍为监察御史二人因申屠瑒以谢奇正色曰举贤本无私何见谢后为酷吏陷被诛政会七世

孙崇望崇龟崇鲁自有传 【按刘政会之七世孙崇望崇龟崇鲁段志玄之五世孙文昌六世孙成式旧史俱各为传新史改附于政会志玄

传考史家附传之例本以其父子相承兄弟踵美恩泽由于勋旧时代未甚辽隔故汇于一篇俾后世易于检阅或其人事实无多不能别为立

传虽世代稍远亦可从附出之例至如褚遂良为亮之子裴耀卿为守真之子李德裕为栢筠之孙功名显于前人则各自为传卢奕为怀慎之

子■（木巳）又为奕之子贤否回殊则亦各自为传新旧书中如此类者不一而足此刘崇望段文昌等并由文学以义通显虽谱系有承实

与崛起无异且世代悬隔事迹亦绝不同新史附于政会志玄传遂使一篇之中甫叙开舫之功忽及叔季之事读者既难寻其端绪且于本书

义例未符画一今从旧史区而别之文昌与穆宗朝诸宰相合传而成式附见焉崇望与昭宗朝与宰相合传而崇龟崇鲁附见焉他传有类此

者亦皆析出以年代事迹相氏附而着其说于此】

△唐俭

唐俭字茂约 【新书作茂系人从旧书及俭神道碑】 并州晋阳人祖邕北齐尚书左仆射父鉴隋戎州刺史与高祖善尝偕典军卫故

俭雅与太宗游同在太原俭见隋政寝乱阴说太宗建大计高祖尝召访之俭曰公日角龙廷姓协图讖若外啸豪杰北招戎狄右收燕赵济河

而南以据秦雍汤武之业也高祖曰汤武之事岂可几在私则图存在公则拯乱卿故自重吾方思之及大将军府开授记室参军渭北道元帅

司马从定京师为相国府记室晋昌郡公武德初进内史舍人迁中书侍郎散骑常侍吕崇茂以夏县反与刘武周连和诏永安王孝基独孤怀恩于筠率兵致讨俭以使适至军会孝基等为武周所虏俭亦见擒始怀恩屯蒲州阴与部将元君实谋反【独孤怀恩传作元君宝】会俱在贼中君实私语俭曰独孤尚书将举大事犹豫不发故及此俄而怀恩脱归复守蒲俭密遣刘世让【独孤怀恩传作刘让避太宗讳】归白发其谋【互见刘世让独孤怀恩传】怀恩自杀余党皆诛及武周败俭封府库籍兵甲以待秦王帝嘉俭身幽辱而不忘朝廷诏复旧官仍为并州道安抚大使尽簿怀恩赀产赐俭还为礼部尚书天策府长史检校黄门侍郎莒国公仍为遂州都督食绵州六百户贞观初使突厥还太宗谓俭曰卿观颉利可取乎对曰衞国威灵庶有成功四年驰传往诱使归款颉利许之兵懈弛李靖因袭破之俭脱身还岁余为兵部尚书从猎洛阳苑羣豕突出于林帝射四发辄殪四豕一豕跃及镫俭投马搏之帝拔剑断豕顾笑曰天策长史不见上将击贼耶何惧之甚对曰陛下以神武定四方岂复逞雄心于一兽帝为罢猎诏其子善识【按公主传作义识神道碑作尚识未详孰是】尚豫章公主俭居官不事事与宾客纵酒为乐坐小法贬光禄大夫永徽初致仕加特进显庆初卒年七十八赠开府仪同三司并州都督陪葬昭陵谥曰襄少子观为河西令知名孙从心神龙中以子峻娶太平公主女累擢殿中监峻太常少卿坐太平党诛裔孙次扶持彦谦见文苑传【新书并附俭传今从旧书】

唐宪

唐宪

俭弟宪字茂彝仕隋为东宫左勋卫太子废罢归好驰猎藏亡命交博徒轻侠高祖领太原颇亲遇之参与大议封安富县公武德中累进云麾将军加郡公终金紫光禄大夫

△长孙顺德

长孙顺德文德皇后之族叔也仕隋为右勋卫征辽当行亡命太原素为高祖亲厚太宗将起兵令与刘弘基募士于外旬日间至数万人大将军府建授统军从平霍邑临汾绛郡有功与刘文静击突厥通于潼关通将奔洛阳顺德跳追桃林执通以献遂定陕县功多进左骁卫大将军封薛国公与秦叔宝共讨建成余党增食邑赐宫女诏宿内省俄以受赇为有司劾发帝曰顺德元勋外戚爵隆位厚至矣若令观古今自鉴有以益国家者朕当与共府库何至以贪冒闻乎因赐帛数十媿切之大理少卿胡演

曰顺德以赂破法不可赦柰何又赐之帝曰使有耻者
得赐甚于戮如不能乃禽兽也杀之何益李孝常谋反坐与交削籍为民岁余帝阅功臣
图见其象怜之召为泽州刺史复爵邑顺德素少检至
此折节为政以严明称先时守长多通饷问顺德绳撻无所容前刺史张长贵赵时达占
部中腴田数十顷夺之以给贫单寻坐累还第未几卒
赠荆州都督谥曰襄贞观十三年封邳国公永徽中加赠开府仪同三司 【按长孙顺德
新唐书附长孙无忌传后详顺德亦佐命功臣名位
足自表见不当从附出之例今从旧书列于唐俭之次】

△柴绍

柴绍字嗣昌晋州临汾人幼趯悍有武力补隋太子千牛备身高祖妻以平阳公主
将起兵绍走间道迎谒时太子建成齐王元吉亦自河
东往遇诸涂建成曰追书急恐吏逮捕请依剧贼冀自全绍曰不可贼知君唐公子必执
以为功徒死尔不如疾走太原既入雀鼠谷闻已起兵
乃相贺授右领军大都督府长史领毅骑发晋阳先抵霍邑城下觐形势还白宋老生一
夫敌我兵到必出战可虏也大帅至老生果出绍力战
有功从下临汾绛郡隋将桑显和来战绍引兵繚其背与史大柰合攻之显和败遂平京
师进右光禄大夫封临汾郡公高祖即位拜左翊卫大
将军累从征讨以功多进封霍国公迁右骁卫大将军吐谷浑党项寇边敕绍讨之虏据
高射绍军矢下如雨将士失色绍安坐遣人弹胡琵琶
使二女子舞虏疑之休射观绍伺其懈以精骑从后掩击虏大溃斩首五百级贞观二年
平梁师都转左卫大将军出为华州刺史加镇军大将
军徙谯国既病太宗亲问之卒赠荆州都督谥曰襄二子哲威令武哲威为左屯卫将军
袭封坐弟谋反免死流邵州起为交州都督卒令武尚
巴陵公主迁太仆少卿卫州刺史襄阳郡公与房遗爱谋反贬岚州刺史自杀始高祖论
太原首功诏尚书令秦王尚书左仆射裴寂纳言刘文
静恕二死左骁卫大将军长孙顺德右骁卫大将军刘弘基右屯卫大将军窦琮左翊卫
大将军柴绍内史侍郎唐俭夷部侍郎殷开山鸿胪卿
刘世龙卫尉少卿刘政会都水监赵文恪库部郎中武士護骠骑将军张平高李思行李
高迁左屯卫长史许世绪等十四人恕一死武德九年
十月太宗定功臣封户时文静已死乃自寂而下差功大小第之总四十三人寂户千五
百长孙无忌王君廓尉迟敬德房玄龄杜如晦户千三
百长孙顺德柴绍罗艺赵郡王孝恭户千二百侯君集张公谨刘师立户千李绩刘弘基
户九百高士廉宇文士及秦叔宝程知节户七百安兴
贵安修仁唐俭窦轨屈突通萧瑀封德彝刘义节户六百钱九陇樊兴公孙武达李孟尝

段志玄庞卿恽张亮李靖杜淹元仲文户四百张长逊

张平高李安远李子和秦行师马三宝户三百赵文恪等十八人功不甚显今次第其名
附出左方云 【安修仁安兴贵事在李轨传】

赵文恪

李思行

李高迁

姜宝谊

许世绪

刘师立

刘义节

钱九陇

樊兴

公孙武达

庞卿恽

张长逊

张平高

李安远

马三宝

李孟尝

元仲文

秦行师

赵文恪

赵文恪并州人为隋鹰扬府司马高祖起兵 【新旧史书高祖起兵多云义兵或云
义师郑樵云隋书称唐兵为义兵伐人之君可以为
义乎此说最正今皆刊改后仿此】 授右三统军武德二年擢都水监封新兴郡公时中
国经大乱马耗诏文恪至并州与齐王诱市边马以备
军刘武周寇太原属城尽没李仲文守浩州兵力孤绝齐王使文恪率步骑千余助守会
太原陷遂弃城遁诏下狱死

李思行

李思行赵州人避仇太原高祖将起兵使覘谕长安还具论机策称旨授左三统军
从破霍邑平京师累擢嘉州刺史乐安郡公卒赠洪州

都督谥曰襄

李高迁

李高迁岐州岐山人客太原高祖引致左右执高君雅等有功以右卫统军从下霍

邑围长安力战迁左武卫大将军江夏郡公检校西麟
州刺史突厥寇马邑高满政请救诏高迁督兵助守贼盛乃夜斩关走所将皆没坐除名
徙边后历资州刺史【旧书作陵州刺史】卒赠凉
州都督【旧书凉作梁】

姜宝谊

姜宝谊秦州上邽人父远仕周为秦州刺史朝邑县公宝谊为隋鹰扬郎将领府兵
从高祖督盗太原及起兵授左统军下西河霍邑功多
爵至永安县公历右武卫大将军刘武周使黄子英数盗雀鼠谷帝遣宝谊击之贼轻甲
挑师战接而三遁逐之伏发宝谊为贼执俄亡归与裴
寂拒宋金刚战汾州兵合寂弃兵走宝谊复为所禽帝闻为泣下曰彼烈士必不下贼死
矣赐其家物千段米三百斛果谋还被害且死西向大
呼曰臣无状负陛下贼平诏迎其柩赠左卫大将军幽州总管谥曰刚子协字寿善篆籀
历燕然都护夏州都督封成纪县侯谥曰威

许世绪

许世绪并州人【按许景先传常州义兴人曾祖绪武德时以佐命功历左散骑常
侍封真定公遂家洛阳所云绪者即世绪也避太宗
讳故祇称下一字但里居官称互异未详孰是】隋鹰扬府司马知隋将亡请高祖曰公
姓名着谣箴今擎五郡之兵据四战之冲苟无奇计祸
不反踵若收取英俊为天下倡帝王业也高祖奇之兵起授右一府司马累除蔡州刺史
真定郡公弟洛仁亦从起晋阳录功至冠军大将军卒
赠代州都督谥曰勇陪葬昭陵

刘师立

刘师立宋州虞城人始事王世充为亲将洛阳平当诛秦王壮其才释不死引为左
亲卫与尉迟敬德庞卿恽李孟尝等九人同诛建成录
功拜左卫率迁左骁卫将军襄武郡公有告师立姓在符讖欲反者太宗谓曰人言卿将
反果乎对曰臣为隋官不过六品今位将军顾已极矣
何敢反帝笑曰朕知妄耳赐束帛召入卧内慰勉罗艺反京师震骇诏师立检校右武侯
大将军勒兵备非常艺平师立坐与艺善除名寻以藩
邸旧检校岐州都督【党项传作岷州都督】上书请讨吐谷浑未报即遣使开谕部
落多降附者列其地为开桥二州又党项酋拓拔赤辞
先附吐谷浑倚险自守亦遣说下之师立以母丧解岐人表留遂不得赴哀时西河党项
破丑氏【旧书作破刃氏党项传亦作丑】尝苦边
又阻新附师立讨之军未至破丑惧遁去师立穷追之抵恤于真山而还又战吐谷浑于
小莫门川破之转始州刺史卒谥曰肃

刘义节

刘义节并州人隋大业末补晋阳乡长富于财裴寂荐之高祖又与王威高君雅游兵将起威君雅疑之义节刺知其情得先事禽威等从平京师为鸿胪卿时倾府库为军赏格财大乏义节曰今京师屯兵多樵贵帛贱若伐六街及苑中树为薪以易布帛岁数十万可致又请轴正藏内见缿取羨尺补杂费得十余万段调度遂给迁太府卿封葛国公义节本名世龙或言世龙子名凤昌父子非人臣兆高祖不听更赐今名贞观初转少府监坐贵入贾人珠及故出署丞罪废为民徙岭南终钦州别驾从子思礼武后时为箕州刺史少学相人于张憬藏相已必历刺史位至太师【新书谓憬藏相思礼今从旧唐书】及授箕州益喜以为太师位尊非佐命不可得乃结洛州录事参军綦连耀谋反谓耀曰君体有龙气耀亦曰公金刀当辅我思礼因以术眩众见者必曰当三品俟其意悦然后云綦连耀当受命公等皆因之事败武懿宗按之弛思礼禁使多逮引思礼冀自脱悉引素相忤者将刑犹不寤与众人斩于市其知名者如李元素孙元亨石抱忠王勳勳兄勔路敬淳等三十余族窜逐千余人

钱九陇

钱九陇字永业湖州长城人【旧书晋陵人】父文强为吴明彻裨将与明彻俱败彭城入隋以罪没为奴故九陇事高祖善骑射常备左右兵起以功授金紫光禄大夫从战薛仁杲刘武周累擢为右武卫将军从平洛阳佐皇太子建成讨刘黑闥魏州以功最封郇国公以本官为苑游将军贞观初为眉州刺史改巢国公卒赠左武卫大将军潭州都督谥曰勇陪葬献陵

樊兴

樊兴安州人以罪为奴从高祖平长安授左监门将军从秦王积战多封营国公【李愷传作荣国公】坐事削爵贞观六年陵州獠反命讨之拜左骁卫将军又从李靖击吐谷浑为赤水道行军总管后军期士多死亡失器械以勋减死后为左监门大将军襄城郡公太宗征辽以兴忠谨副房玄龄留守京师检校右武侯将军卒赠左武侯大将军洪州都督陪葬献陵

公孙武达

公孙武达京兆栌阳人以豪侠称为隋骁果兵兴武达至长春宫上谒从秦王讨刘武周功多累迁秦王右三军骠骑封清水县公贞观初为肃州刺史突厥骑数千入寇谋南趋吐谷浑武达以精兵二千人与战虏稍却复殊死

鬪薄之张掖河潜命上流度兵虜已半济乃两岸夹击
斩溺略尽玺书劳之迁左监门将军盐州突厥叛诏武达趋灵州追及贼贼方渡河乃据
南涯陈武达击之斩其帅可逻拔扈进封东莱郡公 【
李愷传作沔阳县公】 终右武卫大将军赠荆州都督陪葬昭陵谥曰壮

庞卿恇

庞恇卿并州太原人从讨隐太子有功拜右骁卫将军邾国公卒追改濮国公子同
善右金吾大将军同善子承宗开元初仕至太子宾客

张长逊

张长逊京兆栌阳人隋末为五原通守遭乱附突厥号为割利特勒唐兵起以郡降
即拜五原太守安化郡公徙封范阳时梁师都辞举请
突厥兵南渡河长逊矫作诏与莫贺咄设以伐其谋会唐使亦至突厥兵不出武德元年
诏右武骠骑将军高世静 【旧书作高静避太宗讳

】 聘始毕可汗至丰州而始毕俄死诏留金币不遣突厥怒引兵南至河长逊遣世静出
塞劳之且若专致贖赐者突厥引还授总管改杨国公

【旧书唐进封巴国公】 及讨辞举不待命辄引兵会赐锦袍金甲或潜长逊居丰久与
突厥为唇齿长逊惧请入朝授右武侯将军徙息国
公属有疾高祖亲问之后宝轨率巴蜀兵击王世充以长逊检校益州行台左仆射厯遂
夔二州总管政以惠称贞观十一年卒

张平高

张平高 【金石录唐丹州刺史张崇碑云公讳崇字平高传以字为名】 绥州肤
施人为隋鹰扬府校尉戍太原遂预谋议从高祖平京
城累授左领军将军封萧国公贞观初为丹州刺史坐事以右光禄大夫还第卒追封罗
国公赠潭州都督

李安远

李安远夏州朔方人父彻隋云州刺史安远少无检与博徒游至破产晚乃折节向
书袭父爵城阳公与王珪善珪坐王颇得罪当流安远
为营护免后补正平令高祖起兵攻绛州安远与通守陈叔达婴城拒高祖与安远有旧
及拔绛抚慰其家引与同食授右翊卫统军正平县公

后从破屈突通进右武卫大将军数从秦王征讨积功累封至广德郡公 【按石刻秦王
告少林寺教作德广郡开国公新旧史俱作广德疑

误】 奉使吐谷浑与约和请为互市边场利之隐太子将乱欲引为援安远介无贰志秦
王益亲重贞观初尝命统逻骑都下督盗贼厯潞州都

督怀州刺史皆以干用显然急刻少恩由是损名卒赠凉州都督谥曰安 【旧书谥曰密
】 追封遂安郡公

马三宝

马三宝柴绍家僮也高祖起兵三宝奉平阳公主遁司竹园说贼何潘仁与连和三宝自称总管抚接羣盗兵至数万 【互见公主传】

高祖济河授左光禄大夫秦王至竹林宫三宝以兵诣军门谒遂从平京师拜太子监门率别击叛胡刘拔真于北山破之从平薛仁杲与柴绍

击吐谷浑于岷州先锋陷阵斩名王俘执数千以功封新兴县男贞观初拜左骁卫大将军 【李愷传作右领军大将军】 进爵为公卒谥曰

忠

李孟尝

李孟尝赵州平棘人终右威卫大将军汉东郡公 【李愷传作济东郡公】

元仲文

元仲文洛州人终右监门将军河南县公

秦行师

秦行师并州太原人终右监门将军清水郡公 【按赵文恪以下十八人旧附刘裴传后今以缀于本传之末】

钦定续通志卷二百三

●钦定续通志卷二百四 列传四

列传

唐 【四】

温大雅【彦博彦将】 陈叔达 窦威【轨 琮 抗 静 诞孝谌 珽 德明 德玄】李纲 郑善果【元璠】 裴矩

皇甫无逸 崔善为 高士廉【履行】

○唐四

温大雅

陈叔达

窦威

李纲

郑善果

裴矩

皇甫无逸

崔善为

高士廉

△温大雅

温大雅字彦宏 【按大雅兄弟三人名大者字彦名彦者字大欧阳修集古录尝疑

之洪适据大雅所撰唐创业起居注书隋炀帝遣使
夜至大原温彦将宿于城西门楼上首先见之报兄彦宏驰启帝帝方卧闻而惊起执彦
宏手是温氏昆弟皆以彦为名明矣其书首题大雅奉
敕撰乃后人避孝敬皇帝讳追改之其说是矣又唐初人多以字行故新旧史亦以大有
为彦将名耳】并州祁人父君攸隋泗州司马见朝政
不纲谢病归大雅性至孝与弟彦博大有皆知名辞道衡见之叹曰三人者皆卿相才也
初为东宫学士长安尉以父丧皆不复仕高祖镇太原
厚礼之兵兴引为大将军府记室参军主文檄帝受禅与窦威陈叔达讨定仪典迁黄门
侍郎而彦博亦为中书侍郎对管华近帝尝从容谓曰
我起晋阳为卿一门耳进工部侍郎陕东道大行台尚书隐太子图乱秦王表大雅镇洛
阳须变数陈秘画多所嘉纳太宗即位转礼部尚书封
黎国公将改葬其祖占者曰弟则吉不利于君大雅曰如子言我含笑入地矣岁余卒谥
曰孝永徽五年赠尚书右仆射五世孙造自有传

温彦博

温彦将

温彦博

彦博字大临开皇末对策高第授文林郎直内史省隋乱幽州总管罗艺引为司马
艺以州降彦博与有谋授总管府长史封西河郡公召
入为中书舍人迁侍郎彦博善辞令每问四方风俗胪布诏令若成诵然进止详华人皆
拭目观高祖尝宴近臣遣秦王谕旨既而顾左右曰何
如温彦博高丽贡方物高祖欲让而不臣彦博执不可曰辽东本周箕子国汉玄菟郡不
使北面则四夷何所瞻仰帝纳而止突厥入寇彦博以
并州道行军长史战大谷败被执突厥知近臣数问唐兵多少及国虚实彦博不肯对囚
阴山苦寒地太宗立突厥归款得还授雍州治中寻检
校吏部侍郎彦博欲汰择士类寡术不能压众讼谍满廷时讥其烦碎复为中书侍郎迁
御史大夫检校中书侍郎事贞观四年迁中书令封虞
国公【新旧书本传载议突厥事详四夷传今不重出】十年迁尚书右仆射明年卒
年六十三彦博性周慎既掌机务谢宾客不通进见必
陈政事利害卒后帝叹曰彦博以忧国故耗思殫神我见其不逮再稊矣恨不许少闲以
究其寿家贫无正寝殡别室帝命有司为构寝赠特进
谥曰恭陪葬昭陵子振挺振厯太子舍人居丧以毁卒挺尚千金公主官延州刺史彦博
曾孙曦尚凉国长公主裔孙庭筠见文苑传

温彦将

彦将字大有【新旧书本传俱云大有字彦将今从宰相世系表】隋仁寿中李

纲荐授羽林骑尉高祖举兵引为太原令从秦王徇西河令参谋军事西河下摄大将军府记室与兄大雅同掌机近不自安请徙他职帝曰我虚心待卿何所自疑武德初累迁中书侍郎封清河郡公卒赠鸿胪卿谥曰敬

△陈叔达

陈叔达字子聪陈宣帝子也少封义阳王历丹阳尹都官尚书隋大业中授内史舍人出为绛郡通守高祖西师以郡听命授丞相府主簿封汉东郡公与温大雅同莞机秘方禅代时书册诰诏皆其笔也武德初授黄门侍郎判纳言封江国公叔达明辩善容止每占奏搢绅属目江左士客长安者多所荐拔尝赐食得蒲萄不举帝问之对曰臣母病渴求不能致愿归奉之帝流涕曰卿有母遗乎因赐之又赉物百段贞观初与萧瑀争殿中坐忿谗不恭免官【事在武德九年太宗即位之后】未几居母丧又有疾太宗忧之遣使禁却吊者丧除为遂州都督病不拜顷之擢礼部尚书始太子建成等阍间太宗帝惑之叔达极意救辩至是谓曰武德内难卿有言故有此报叔达谢曰岂独为陛下乃社稷计耳后帑薄汗漫为有司露劾帝以名臣为护掩授散秩归第卒谥曰缪久之赠户部尚书更谥曰忠

△窦威

窦威字文蔚岐州平陆人隋太傅焮之子太穆皇后其从兄弟女也【旧书作太穆皇后从父兄按隋书犹弟岳生毅即太穆皇后父也字衍】家世勋贵喜武力而威独尚文诸兄诋为书痴李德林举秀异射策甲科授秘书长郎十余岁不肯调官所学益博蜀王秀辟为记室见秀行事不法谢病去秀废府属皆得罪威独免大业中累迁内史舍人数谏忤旨转考功郎中坐事免高祖入关召补大丞相府司录参军时军旅革创典礼湮缺威多识朝廷故事乃裁定制度帝语裴寂曰威今之叔孙通也武德元年拜内史令每论政事必引古为谕帝益亲重之或引入卧内常为膝席后寝疾帝自临问及卒家无余财帝哭之恻赠同州刺史追封延安郡公谥曰靖有文集十卷子恽嗣官岐州刺史兄子轨从兄子抗并知名

窦轨【窦琮】

窦抗

窦静

窦诞

窦孝谌【窦璉】

窦德明

窦德玄

窦轨 【窦琮】

轨字士则父恭周雍州牧鄜国公轨大邳中为资阳郡东曹掾去官归高祖起兵轨募众千余人谒长春宫帝大悦赐良马十匹使略地渭

南下永丰仓收兵五千人从平京师封赞皇县公为大丞相咨议参军稽胡贼五万余掠宜春诏轨讨之次黄钦山遇贼乘高丛射师却轨斩部

将十四人拔其次代之令曰闻鼓不进者斩暨鼓士争赴贼贼射不能遏遂大破之武德元年授太子詹事赤排羌与薛举叛将锺俱仇寇汉中

拜轨秦州总管尽破降之封鄜国公三年迁益州道行军左仆射许便宜从事党项引吐谷浑寇松州诏轨与扶州刺史蒋善合援之善合先至

败之钳川轨复进军临洮击左封走其众度羌必为患始屯田松州寻率所部从秦王讨王世充于洛阳明年还蜀轨既归益严酷然能自勤苦

出师临敌或旬月不解甲其下不用命即诛小过亦鞭笞流血由是蜀盗悉平初以其甥为腹心尝夜出呼不时至即斩之又戒家奴毋出外忽

遣奴取浆公厨既而悔之命斩奴奴呼冤监刑者疑不时决并斩之后入朝赐坐御榻容不肃又坐而对诏帝怒曰公入蜀时车骑骠骑从者二

十人为公所诛略尽我陇种车骑未足给公因系诏狱俄释还轨与行台尚书韦云起郭行方素不协竟杀云起 【详云起传】 行方奔京师

是岁行台废即授益州大都督贞观元年征授右卫大将军二年出为洛州都督洛阳因隋乱人不土著轨下令诸县有游手末作者按之由是

威信大行人皆务本卒赠并州都督子承节尚永嘉公主厯左卫将军秦州都督轨弟琮琮有武干大业末犯法亡命太原依高祖与秦王有宿

憾不自安王降礼接之与出入卧内意乃释大将军府建为统军从平西河破霍邑封扶风郡公寻从刘文静击屈突通于潼关败其将桑显和

通走以轻骑追获之进兵下陕县拔太原仓迁右领军大将军隋河阳都尉独孤武归款 【按李密传作河阳都尉独孤武都通鉴于其见杀

称马军统管独孤武都此处脱都字河阳都尉则又其前举官也】 诏琮以兵迎之逗遛不进武见杀坐除名武德初为右屯卫大将军讨王世

充命守陕城世充将罗士信数钞绝饷道琮使人说降之东都平检校晋州总管从隐太子平刘黑闥以功封谯国公未几卒赠左卫大将军谥

曰敬永徽五年加赠特进

窦抗

威从兄子抗字道生父荣定 【旧书作荣新书旧刻作荣定与隋书本传合】 隋

洺州总管母文帝姊安成公主也 【旧书作万安公

主】 以帝甥早贵人太学涉猎书史释褐千牛备身仪同三司父疾五旬不解带居丧哀毁过礼袭爵陈国公转梁州刺史母卒数号绝帝遣宫

人节哭岁余起为岐州刺史转幽州总管所至以宽惠闻汉王谅反炆帝疑抗与通遣李子雄驰代之子雄诬抗得谅书不奏按验无状然竟坐

除名初抗与高祖少亲狎太业未炆帝遣抗出灵武巡护长城闻高祖已定京师曰此真拨乱主也遂归长安帝喜握手引坐置酒为乐初杨玄

感反抗谓高祖曰玄感为我先耳李氏名在图录可乘其便帝曰为祸始不祥公无妄言至是帝谓抗曰李氏竟能成事何如授将作大匠兼纳

言寻罢为左武侯大将军帝听朝或引升御坐既退入卧内谈笑极平生欢或留宿禁中以兄呼之宫中并称为舅然未尝干朝廷事后从秦王

平薛仁杲功第一又从平东都赐女乐一部珍币不赀武德四年卒赠司徒 【旧书作司空】 谥曰密子衍静诞衍袭爵官至左武卫将军

窦静

静字符休隋佐亲卫武德初累擢并州大总管府长史时突厥数为边患粮道不属静请屯田太原以省馈运议者以流亡未复不宜重困

于是征静入与裴寂萧瑀封伦等议寂等不能屈乃从之岁收谷十万斛诏检校并州大总管又请断石岭以为鄣塞制突厥之入复从之太宗

即位授司农卿封信都县男少卿赵元楷事聚敛静会官属责之曰如炆帝奢侈竭四海自奉司农须公矣今天子躬节俭屈一人安兆庶恶用

公哉元楷大惭改夏州都督时方征突厥诸将多过静所静为陈虚实由是大克获静又间其郁射设所部郁孤尼等九俟斤来归帝嘉之赐以

羊马及突厥平将处其众于河南静上疏以为损有用之民资无知之虏况彼首邱未忘恐一旦变生犯我王略如臣计者莫如因其破亡之后

假以贤王之号妻之宗女公其土地析其部落使权弱勢分易为羁制自可永保边塞俾为藩臣矣帝虽不从然嘉其忠优诏答之再迁民部尚

书贞观九年卒谥曰肃子逵尚遂安公主袭爵

窦诞

诞隋末起家朝请郎义宁初辟丞相府祭酒转殿中监封安丰郡公尚高祖女襄阳公主从秦王征薛举为元帅府司马累迁太常卿高祖

幼子未出宫者十余王国司家事皆诞主之出为梁州都督贞观初召拜右领军大将军进莘国公为宗正卿太宗与语昏妄不能对乃诏以光

禄大夫就第卒赠工部尚书荆州刺史谥曰安子孝慈嗣官至左卫将军孝慈子希玠少袭爵中宗时为礼部尚书以恩泽赐实封开元中为太

子少傅诞少子孝谌

窦孝谌 【窦璉】

孝谌则天时历太常少卿润州刺史女即玄宗母昭成皇后也后为则天所杀母庞氏亦被诬陷孝谌左迁罗州司马卒睿宗即位追赠太尉邠国公玄宗加赠太保孙锷尚永昌公主 【按新书公主传玄宗女昌乐公主下嫁窦锷二号不同盖徙封 新书无孝谌传据旧书外戚传补入】 璉字之推抗弟大业末为扶风太守以郡归高祖历民部尚书从秦王平薛仁果赐锦袍寻镇益州讨平羣盗皇甫无逸在蜀璉与不协因请入朝至半道诏还之璉忧恐会使者至璉与宴卧内饷以绫绮无逸奏其事坐免官未几授秘书监封邓国公贞观初迁将作太匠奉诏修洛阳宫璉于宫中凿池起山务极侈丽浮费不貲帝怒遽令毁之免璉官会纳其女为酆王妃复位卒赠礼部尚书谥曰安璉颇晓音律武德中尝与祖孝孙受诏定雅乐璉讨论故实撰正声调一卷行于代

窦德明

威从孙德明 【按宰相世系表德明德玄皆毅孙】 父彦隋西平太守德明师事陈留王孝逸通知文史汉王谅反遣将攻黎州德明时年十八募兵击破之擢齐王府属坐事免高祖兵叩长安留守官欲杀宗室孝基神符道宗及窦诞赵慈景等德明谏止之后谒高祖终不自言时称长者拜考功郎中从秦王世民击王世充封显武男历常爱二州刺史卒弟德玄

窦德玄

德玄始为高祖丞相府千牛历太宗时不甚显高宗以其旧臣自殿中少监迁御史大夫迁司元太常伯麟德初进检校左相居位勤职约己未尝有过又尝分封爵与其弟德远然迎时取合无所补益卒赠幽州都督谥曰恭子怀贞自有传

△李纲

李纲字文纪观州蓀人少慷慨尚风节始名瑗慕张纲为人改焉仕周为齐王宪参军事宣帝将杀宪召僚属诬左其罪纲矢死无挠辞及宪诛露车载尸故吏彝匿纲抚棺号恸为瘞讫乃去仕隋为太子洗马太子勇宴宫臣左庶子唐令则奏琵琶歌武媚娘曲纲曰令则官调护乃自比倡优进淫声惑视听诚使上闻之岂不为殿下累乎臣请正其罪勇曰置之我欲为乐耳后勇废文帝切让官属无敢对纲独曰陛下不素教故太子至此太子资中人得贤者辅而善得不肖导而恶奈何歌舞鹰犬纤儿使日侍侧何特太子罪耶帝曰朕过矣擢尚书右丞时杨素苏威用事纲居正不诡迎随素等多憾会大将军刘方讨林邑素言非纲不可任遂署行军

司马方揣素指数危辱之几死军还不得调稍除齐王
府司马复诏出南海应接林邑久不召乃身入奏威劾纲擅去所部以属吏会赦免屏居
鄠大业末贼帅何潘仁劫为长史高祖入长安纲上谒
授丞相府司录参军封新昌县公领选举即位拜礼部尚书兼太子詹事齐王元吉为并
州总管纵左右攘夺宇文歆谏不听腾状显言王坐免
俄而复留刘武周入太原元吉惧弃军奔京师并州陷帝怒谓纲曰王年少不习事故以
歆及窦诞佐之太原兴王地兵十万粟支十年奈何一
旦弃去歆建此计我当斩于军纲曰王过恶诞养成之歆事王浅有阙必诤今赖歆计使
陛下不失爱子且有功又可加罪乎异日帝悟引纲升
御榻劳曰卿不言我几滥罚于是释歆帝以舞工安叱奴为散骑常侍纲谏曰周家均工
乐胥不得预士伍故魏武使祢衡击鼓衡先解朝衣故
不敢以先王法服为伶人衣齐高纬封曹妙达为王以安马驹开府可为殷鉴今新造天
下开太平之基功臣赏未及徧高才犹伏草茅而先令
舞胡鸣玉曳组位五品趋丹地殆非创业垂统贻子孙之道也帝不纳纲在东宫太子尤
加礼尝游温汤纲疾不从有进鱼者太子使脍之唐俭
赵元楷自言其能太子曰操刀和味公等善之若弼谐审谕固属纲矣遣使赐绢二百匹
后太子狎亡赖猜间朝廷纲频谏不见听遂乞骸骨帝
骂曰卿为潘仁长史而羞殷尚书耶纲顿首曰潘仁贼也志残杀然每谏辄止为其长史
故无愧陛下功成厚自伐臣言如持水内石敢久为尚
书乎且臣事东宫东宫又与臣忤是以上印绶帝谢曰知公直士幸卒辅吾儿乃拜太子
少保尚书詹事如故纲上书太子曰纲老矣幸未就木
愿劾愚直日殿下饮酒过量非养生之道凡为人子务孝谨以慰上心不宜听受邪说与
朝廷生恚间太子览书不恚所为益纵纲悒悒不自赖
固请老忧诏解尚书帝以纲隋名臣手敕未尝名贞观四年复为少师以足疾赐步舆听
乘至合问以政事诣东宫太子承干为拜每听政必诏
纲与房玄龄王珪侍坐尝言曰托六尺之孤寄百里之命古以为难纲以为易故发言陈
事辞色慷慨毅然不可夺及疾帝遣玄龄至家存问明
年卒年八十五赠开府仪同三司谥曰贞太子为立碑初齐王宪女嫠居纲厚恤之及卒
女被发号哭如丧其亲纲在隋宦不进筮之得鼎筮人
曰君当为卿辅然待易姓乃如志仕不知退折足为败故纲虽显于唐数称疾辞位云孙
安仁安静安仁永徽末为太子左庶子太子忠废还邸
寮属奔散独安仁泣拜而去终恒州刺史安静见忠义传

△郑善果

郑善果郑州荥泽人父诚周大将军开封县公讨尉迟迥战死善果方九岁以死事

子袭爵隋开皇初进封武德郡公年十四为沂州刺史
累转鲁郡太守母崔贤明晓政治尝坐合内听善果处决当理则悦有不可则引至床下
责媿之 【善果母见隋书列女传】 故善果所至有
绩号清吏与武威太守樊子盖考为天下第一炀帝赐物千段黄金百两再迁大理卿突
厥围帝鴈门以守御功拜右光禄大夫从幸江都宇文
化及弑逆署民部尚书从至新城 【新旧书并作辽城误】 淮安王神通攻之善果督
战中流矢神通解俄为窦建德将王琮所获让之曰公
隋室大臣自尊夫人亡名称衰且以忠臣子为逆贼徇命伤夷至此谓何善果惭欲自杀
或止之得不死建德不之礼乃归神通送京师擢太子
左庶子更封荥阳郡公数为太子陈得失未几检校大理卿兼民部尚书奉法持正风绩
显公卿间诏与裴寂等十人每奏事若侍得升殿而从
父兄元璠亦与时以为荣坐事免会山东平持节为招抚大使以选举失实除名后历刑
部尚书贞观中以江州刺史卒

郑元璠

郑元璠

元璠字德芳隋沛国公译之子以父功拜仪同袭爵累迁右卫将军更封莘国公大
业末出为文城郡守高祖兵兴遣将张纶西略地攻拔
其城系致军门释之授太常卿与襄武王琛使突厥还为参旗将军元璠习军旅事帝令
教习屯军法宋金刚与突厥处罗可汗犄角寇汾晋诏
元璠谕罢可汗兵不听会可汗暴疾其下意元璠寘毒囚之处罗死颉利立留帐中数年
帝既许可汗婚元璠始得还帝劳曰卿不辱于虏可辈
苏武张骞矣拜鸿胪卿母丧免会突厥攻太原诏起元璠持节往劳颉利以失信咎中国
元璠随语折让无所屈徐乃数其背约突厥愧服因好
谓颉利曰突厥得唐地无所用唐得突厥不可使且掠财资劫人口皆入所部可汗一不
得岂若仆旗接好则金玉重币一归可汗顾不肯坐受
其利蔑德貽怨自取劳苦若何颉利善其言引还太宗赐书曰知公口伐可汗遂使边烽
息警虽魏绛之功何以加贞观元年 【新旧书并作
贞观三年按通鉴在元年至四年颉利被擒即下所云将亡之兆不出三年也今从通鉴
】 复使突厥还言夷狄兴衰以马羊为候今突厥民饥
畜瘦将亡之兆也不出三年已而突厥果败后转左武侯大将军坐事免起为宜州刺史
复封沛国公以老致仕卒赠幽州刺史谥曰简元璠干
敏所至常有誉五聘绝域危不脱终不自为解然译事后母不谨隋文帝尝赐孝经愧勩
之至元璠亦不以孝闻士丑其行从孙杲知名武后世
终天官侍郎

△裴矩

裴矩字弘大绛州闻喜人初仕北齐后入隋官至右光禄大夫又事宇文化及竇建德建德败乃降唐擢殿中侍御史封安邑县公累迁太子詹事预撰吉凶书仪八年检校侍中隐太子败余党保宫城不解秦王遣矩谕之乃听命迁民部尚书太宗即位疾贪吏欲痛惩义之乃间遣人遗诸曹一吏受馈缣帝怒诏杀之矩曰吏受赇死固宜然陛下以计给之因即行法所谓罔人以罪非道德齐礼之意帝悦为羣臣言之曰矩遂能廷争不面从凡事若此天下有不治哉年八十精明不衰多识故事见重于时贞观元年卒赠绛州刺史谥曰敬子宣机高宗时官太子左中护【按裴矩隋书有传其仕竇建德以前事已采入郑氏通志今不复载惟取降唐后事着于篇】

△皇甫无逸

皇甫无逸字仁俭京兆万年人【隋书皇甫诞传安定乌氏人于志宁撰诞碑云安定朝口人今据新书本传】父诞隋并州司马汉王谅反不从见杀无逸在长安闻变即号恸曰吾父平生重节义必无苟免者顷讫至果然时五等废炆帝嘉诞忠特封无逸平舆侯历涇阳太守治为天下最再迁右武卫将军居守洛阳炆帝被弑乃与段达元文都立越王侗及王世充篡弃母妻斩关自归追骑及无逸解金带投之地曰以与尔无相困骑争下取由是获免高祖以隋勋旧尊遇之拜刑部尚书封滑国公历陕东道行台民部尚书迁御史大夫益州新定诏无逸持节巡抚得承制除吏既至黜贪暴用廉善法令严明蜀人以安皇甫希仁儉人也诬告无逸为母故阴交世充帝审其诈斩希仁又有告无逸交通萧铣者时无逸与行台仆射竇璡不协因表自陈并上璡罪有诏刘世龙温彦博按之无状遂斩告者而黜璡及还帝劳曰比多譖毁但以正直为佞人憎尔拜民部尚书出为同州刺史徙益州刺史所至闭合不通宾客左右无敢出入者所须皆市易他境常按部宿民家鐙炷尽主人将续进无逸抽佩刀断带为炷其廉介类如此然过自畏慎每上表疏读数十犹惧未审使者上道追省再三乃得遣母在长安疾笃太宗命驰驿召还承问忧悸不能食道病卒赠礼部尚书谥曰孝王珪驳曰无逸入蜀不能与母俱留卒京师子道未足称不可谓孝乃更谥良

△崔善为

崔善为贝州武城人善术数仕隋调文林郎督工徒五百营仁寿宫总监杨素索簿阅实善为执板暗唱无一差谬素大惊自是四方有疑狱悉令按讯皆究其情仁寿中迁楼烦司户书佐高祖为太守尤礼接善为见隋政日紊

密劝高祖图天下及兵起署大将军府司户参军封清河县公擢累尚书左丞用清察称最曹史恶之以其短而伧乃为谤书曰崔子曲如钩随时待封侯【唐书载此词小异今从大唐新书】帝闻勉之曰昔齐末奸吏歌斛律明月而高纬闇不察至灭其家朕虽不德幸免是因下令购谤者谤乃止傅仁均撰戊寅历李淳风诋其疏帝令善为考二家得失多所裁正贞观初为陕州刺史时议户猥地狭者徙宽乡善为奏畿内户众而丁壮悉籍府兵若听徙皆在关东虚近实远非经通计诏可厯大理司农二卿坐与少卿不平出为秦州刺史卒赠刑部尚书谥曰忠初天下既定羣臣居丧者皆夺服善为建言其敝武德二年始许终丧然犹时以权迫不能免如房玄龄褚遂良者众矣【按崔善为李嗣真二人旧史俱入方技传新史别为传列于李袭志姜暮之次今考善为仕高祖朝屡有建白不徒以技术名家当与开国诸臣并列嗣真仕于高祖武后之世以妙解乐律称列之武德勋臣之间似非其伦宜从旧史仍入艺术】

△高士廉

高士廉名俭【宰相世系表作宗俭】士廉其字也渤海蓀人北齐清河王岳之孙隋洮州刺史劼之子【劼新旧书并作励作从隋书木传作励】少有器局观书一过辄诵辞道衡崔祖浚与为忘年交由是知名大业中为治礼郎坐与斛斯政善贬朱鸢主簿以母老不可居瘴疠地留妻鲜于氏奉养而行会世大乱京师阻绝交趾太守邱和署为司法书佐会俚帅窳长真来侵和惧欲出迎士廉策其不能持久乃署行军司马逆击破之武德五年与和上表归国初士廉妹适长孙晟生子无忌及一女晟卒士廉迎妹及甥于家抚之甚有恩旋以其女妻太宗即文德皇后也时太宗方为秦王领雍州牧因荐为治中亲重之隐太子与王隙已成士廉与无忌并预密谋至期率吏卒释系囚授用趋芳林门助战王为太子授右庶子贞观元年进侍中封义兴郡公坐匿王珪奏不时上出为安州都督进益州大都督府长史蜀人畏鬼父母疾或不亲扶持望舍投饵哺之又兄弟不相假财士廉随方训诱风俗顿改秦时李冰守蜀导汶江水灌山濒水者顷值千金士廉附故渠厮引旁出以广溉道民用富饶与诸生讲授经艺以兴学校又礼致隐士朱桃椎蜀人以为美谈五年入地为吏部尚书进许国公雅负鉴裁又详氏谱所署用人地无不当者加特进寻同中书门下三品十二年改封申国公拜尚书右仆射帝幸洛阳太子监国命摄少师久之请致仕听解仆射仍以开府仪同三司平章事十九年太宗代高丽太子监国定州又摄太傅同掌机务还至并州

有疾帝即所舍问之二十一年疾甚帝幸其第为流泣
卒年七十一【旧书作七十二】 赠司徒并州都督谥曰文献高宗即位加赠太尉配
享太宗庙庭士廉进止详华每有献纳缙绅属目奏上
辄焚其藁家人无见者初太宗以山东士人尚阀阅虽累叶陵迟子孙犹负世望嫁娶必
多索聘财人谓之卖昏由是诏士廉与韦挺岑文本令
狐德棻责天下谱牒参考史传正其真伪第其甲乙分为九等舍名取实专以今朝品秩
为高下皇族为首外戚次之凡二百九十三姓六百五
十一家号曰氏族志颁行天下【谨按通鉴辑览 御批当涂以九品衡人致士大夫
矜其地望遂有上品无寒门下品无势族之讥自晋
及隋相沿不变太宗颁姓谱使天下知衰世旧门不敢与王朝勋阀相抗而天潢为氏族
弁冕亦犹周家之辞不先滕刘友益不以为然失之吹
求矣】 又尝受瑞与魏征等集文学之士撰文思博要一千二百卷上之士廉六子履行
真行知名

高履行

高履行

履行【宰相世系表名文敏盖亦以字行】 居丧以孝闻尚太宗女东阳公主袭
申国公永徽初拜户部尚书后出为益州大都督府长
史士廉先居此职履行继之亦有政声及长孙无忌得罪贬洪州都督改永州刺史真行
官至左卫将军其子典膳丞岐连章怀太子事诏付真
行自惩诫真行手刃之弃其尸帝鄙之贬睦州刺史士廉五世孙重见文苑传

钦定续通志卷二百四

●钦定续通志卷二百五 列传五

列传

唐【五】

○唐五

李靖【客师 令问 彦芳】 李绩【敬业】

李靖

李绩

△李靖

李靖字药师京兆三原人姿貌魁秀通诸史尝谓所亲曰丈夫要当以功名取富贵
何至作章句儒其舅韩擒虎每与论兵辄叹曰可与语
孙吴者非斯人尚谁哉仕隋为殿内直长【旧书仕隋为长安县功曹复历驾部员外郎
】 吏部尚书牛弘见之曰王佐才也左仆射杨素拊
其床谓曰卿终当坐此大业末为马邑丞高祖击突厥靖察有非常志自囚上急变传送

江都至长安道梗高祖已定京师将斩之靖呼曰公欲就大事以私怨杀谊士乎秦王亦为请得释【按刘肃大唐新语云高祖举义大原李靖与卫文升为隋守长安收皇族害之及关中平诛文升等次及靖靖言曰公定关中难复私讎若为天下未得杀靖乃赦之与新旧史所载互异疑肃得于传闻不若正史之可据】吊为三卫从平王世充以功授开府萧铣据江陵诏靖安辑轻骑道金州会蛮贼邓世洛兵数万屯山谷间庐江王瑗讨不胜靖为瑗谋击却之进至峡州阻铣兵不得前帝谓逗遛诏都督许绍斩靖绍为请而免【按大唐新语靖为岐州刺史或为旨告其谋反高祖命一御史按之曰李靖反且实便可处分御史知其诬罔与告事者行数驿佯失告状惊惧鞭挞行典乃祈求于告事者曰李靖反状分明亲奉进止今失告状幸救其命更请状告事者乃疏状与御史验与本状不同即日还以闻高祖大惊御史具奏靖不坐所谓御史者失其名氏盖传闻之词靖亦未尝为岐州刺史也疑好事者因许绍事而傅会之故不取】开州蛮再肇则寇夔州赵郡王孝恭战未利靖率兵八百破其屯要险设伏斩肇则俘禽五千帝谓左右曰使功不如使过果然因手敕劳之靖遂陈图铣十策诏拜行军总管兼摄李恭行军长史军政一委焉武德四年八月大阅兵夔州时秋潦涛濊涨恶铣以靖未能下不设备诸将亦请江平乃进靖曰兵机事以速为神今士始集铣未知若乘水傅垒是疾雷不及掩耳纵使仓卒召兵无以御我此必禽也孝恭从之九月舟师叩夷陵铣将文士宏以卒数万屯清江孝恭欲击之靖曰不可士宏健将下皆勇士今新失荆门悉锐拒我此救败之师不可当宜驻南岸待其气衰乃取之孝恭不听留靖守屯自往与战大败还贼委舟散掠靖视其乱纵兵击破之取四百余艘溺死者万人即率轻兵五千为先锋趋江陵薄城而营破其将杨君茂郑文秀俘甲士四千孝恭军继进铣大惧檄召江南兵不及到遂降靖入其都号令静严军无私焉或请靖籍铣将拒战者家货以赏军靖曰王者之兵吊人而取有罪彼胁驱以来不容以叛逆比之今新定荆郢宣示宽大若降而籍之恐自荆而南坚城剧屯驱之死守非计之善也止不籍由是江汉列城争下以功封永康县公检校荆州刺史乃度岭至桂州分道招慰酋领冯盎等皆以子弟来谒南方悉定得郡凡九十六户六十余万诏书劳勉授岭南抚慰大使检校桂州总管以岭海陋远久不见德非震威武示礼义则无以变风即率兵南巡所过问疾苦延见长老宣布天子恩意远近欢服辅公柘据丹阳及召孝恭为帅召靖入朝受方略副孝恭东讨李世绩等七总管皆受节度公柘遣冯惠亮以舟师三万屯当涂陈正通

步骑二万屯青林自梁山连锁以断江道筑却月城延
袤十余里为犄角诸将议曰彼劲兵连栅将不戢疲老我师若直取丹阳空其巢窟惠亮
等自降靖曰不然二军虽精而公佑所自将亦锐卒也
既保石头则牢未可拔我留不得志退有所忌腹背蒙患非百全计且惠亮正通百战余
贼非怯野鬪今方持重特公祐立计尔若出不意挑攻
其城必破之惠亮拔公祐禽矣孝恭听之靖率黄君汉等水陆皆进苦战杀伤万余人惠
亮等亡去靖将轻兵至丹阳公祐惧众尚多不能战乃
出走禽之江南平置东南道行台以为行台兵部尚书行台废检校扬州大都督府长史
帝叹曰靖乃铕公祐之膏肓也古韩白卫霍何以加八
年突厥寇太原为行军总管以江淮兵万人屯太谷时诸将多败独靖完军归俄权检校
安州大都督太宗践阼授刑部尚书兼检校中书令突
厥诸部离畔帝方图进取以兵部尚书为定襄道行军总管率劲骑三千繇马邑趋恶阳
岭颉利可汗大惊曰【旧书作突利可汗误】兵不
倾国来靖敢提孤军至此由是帐部数恐靖纵谍者离其腹心夜袭定襄破之颉利脱身
遁进封代国公颉利保铁山遣使者谢罪请内附以靖
为定襄道总管往迎之又遣鸿胪卿唐俭将军安修仁慰抚靖谓副将张公谨曰诏使到
虏必自安若万骑赍二十日粮自白道袭之必得所欲
公谨曰上已与约降行人在彼奈何靖曰机不可失韩信所以破齐也如唐俭辈何足惜
哉督兵疾进行遇候逻皆俘以从去其牙七里乃觉部
众震溃斩万余级俘男女十万禽其子迭罗施杀义成公主颉利亡去为大同道行军总
管张宝相禽以献【互见突厥传】于是斥地自阴
山北至大漠矣帝因大赦天下赐民五日酺御史大夫萧瑀劾靖持军无律纵士大掠散
失奇宝【通鉴考异曰旧传御史大夫温彦博害其
功潜靖云据实录彦博二月己为中书令三月始擒颉利今从实录】帝召让靖顿首谢
帝徐曰隋史万岁破达头可汗不赏而诛朕不然赦公
之罪录公之功乃进左光禄大夫赐绢千匹增户至五百既而曰向人潜短公朕今悟矣
加赐帛二千匹迁尚书右仆射靖每参议恂恂似不能
言以沈厚称时遣使十六道巡察风俗以靖为畿内道大使会足疾乞骸骨帝遣中书侍
郎岑文本谕旨曰自古富贵而知止者盖少虽疾顿惫
犹力于进公今引大体朕深嘉之欲成公美为一代法乃授特进就第禄赐吏卒并依旧
给若疾少间三日至门下中书平章政事加赐灵寿
杖顷之吐谷浑寇边帝谓侍臣曰靖能复起为帅乎靖往见房玄龄曰吾虽老尚可一行
帝喜以为西海道行军大总管任城王道宗侯君集李
大亮李道彦高甑生五总管兵皆属军次伏俟城吐谷浑尽火其莽退保大非川诸将议

春草未芽马弱不可战靖用侯君集计【语见君集
传】决策深入遂踰积石山大战数十所杀获吐谷浑伏允愁蹙自经死靖更立大寔王
慕容顺而还【详吐谷浑传】甌生军由盐泽道
后期靖簿责之既归与广州长史唐奉义告靖谋反有司按验无状甌生等以诬罔论靖
乃阖门自守宾客亲戚一谢遣改卫国公其妻卒诏坟
制如卫霍故事筑阙象铁山积石山以旌其功进开府仪同三司帝将伐辽召靖入谓曰
公南平吴北破突厥西定吐谷浑惟高丽未服亦有意
乎对曰往凭天威得效尺寸功今疾虽衰陛下诚不弃病且瘳矣帝悯其老不许二十三
年病甚帝幸其第流涕曰公乃朕生平故人于国有劳
今疾如此为公忧之薨年七十九赠司徒并州都督给班剑羽葆鼓吹陪葬昭陵谥曰景
武世言靖精风角鸟占云祲孤虚之术传着怪诡襍祥
皆不足信论其所设施如此【按华阴县有石刻靖告西岳文大略言意在取天下次则
择主而仕朱彝尊尝诋其为又杜光庭撰虬须客传
说尤怪妄洪迈容斋随笔亦辨之皆史臣所谓怪诡襍祥不足信者也】子德謩嗣官至
将作少匠坐善太子承干流岭南以靖故徙吴郡靖兄
端字药王以靖功袭永康公梓州刺史

李客师

李令问

李彦芳

李客师

弟客师右武卫将军累战功封丹阳郡公致仕居昆明池南喜射猎虽老犹未衰自
京南属山西际泮水鸟鹄皆识之每出从之翔噪人谓
之乌贼卒年九十赠幽州都督

李令问

孙令问明皇为临淄王时与雅旧及即位以协赞功迁殿中少监预诛窦怀贞封宋
国公实封五百户进散骑常侍知尚食事恩待甚渥然
未尝辄干政率游畋自娱厚奉养侈饮食后坐其与回纥部酋承宗连昏【旧书开元
十五年凉州都督王君■〈鼈，大代兔〉奏回纥
部落叛令问坐与连昏左授今据新书】贬抚州别驾卒

李彦芳

靖五代孙彦芳【按新书以彦芳为靖五代孙旧书客师孙令问令问孙彦芳则于
靖为五代从孙宰相世系表无彦芳名未知孰是】
太和中为凤翔司录参军家故藏高祖太宗赐靖诏书数函上之一曰兵事节度皆付公
吾不从中治也一曰有昼夜视公疾大老姬遣来吾欲

熟知公起居状皆太宗手墨他大略如此文宗爱之留禁中敕摸诏本还赐彦芳并束帛衣服权德舆尝读太宗手诏至流涕曰君臣之际乃尔耶

△李绩

李绩字懋功曹州离狐人本姓徐氏客卫南家富与其父盖皆喜施贷年十七从翟让为盗说曰公乡人不宜自剽残宋郑商旅之会御河在中舟舰相属往邀取之可以自资让然之劫公私船取财由是兵大振李密亡命雍邱绩与浚仪王伯当共说让推密为主密署绩右武侯大将军东海郡公是时河南山东大水隋帝令饥人就食黎阳仓史不时发死者日数万绩说密曰天下之乱本于饥今若取黎阳粟以募兵大事济矣密以兵五千付绩与郝孝德等济河袭黎阳守之开仓纵食旬日胜兵至二十万宇文文化及拥兵北上密使绩守仓周掘堑以自环化及攻之绩为地道出鬪化及败引去武德二年密归朝廷其地东属海南至江西直汝北抵魏郡绩统之未有所属谓长史郭孝恪曰此人众土宇皆魏公有也吾若献之是利主之败为己功乃录郡县户口以启密请自上之使至高祖诩无表使者以意闻帝喜曰纯臣也 【谨按通鉴辑览

御批世绩不以李密土地邀功颇见志节唐太宗所云公不负李密岂肯负朕诚非虚语后于立武后事乃慎忍依阿毫无匡救则暮年门户计重竟尔易操非独廉谨有余刚方不足实亦有负太宗之知己矣】 诏授黎州总管封莱国公赐姓附宗正属籍徙封曹封盖济阴王辞改舒国公诏绩总河南山东兵以拒王世充及密诛帝遣使示密反状绩北面拜伏号恸表请收葬从之绩为密服缞经葬讫乃释俄为窦建德所陷质其父使复守黎阳三年自拔来归从秦王伐东都战有功乃振旅还秦王为上将绩为下将皆服金甲乘戎辂告捷于庙盖亦自洺州入朝诏复其官又从破刘黑闥徐圆朗累迁左监门大将军圆朗复反诏绩为河南大总管讨平之赵郡王孝恭讨辅公柘也遣绩以步卒一万度淮拔寿阳攻江西贼冯惠亮陈正通相次溃公柘平太宗即位拜并州都督贞观三年为通漠道行军总管 【通漠通鉴作通汉误】 出云中与突厥战走之引兵与李靖合因曰颉利若度碛保于九姓果不可得我若约赆薄之不战缚虜矣靖大喜以与己合于是意决靖率众夜发绩勒兵从之颉利欲走碛绩前屯碛口不得度降其部落五万诏拜光禄大夫行并州大都督府长史父丧解夺哀还官徙封英治并州十六年以威肃闻帝尝曰炀帝劳中国筑长城以备虜今我用绩守并突厥不敢南贤长城远矣召为兵部尚书未至会辞延陀子大度设以八万骑侵李思

摩诏绩为朔方道行军总管将轻骑六千【旧书作三千】击度设青山斩名王一俘口五万以功封一子为县公晋王为皇太子授詹事兼左卫率俄同中书门下三品帝曰吾儿方位东宫公旧长史以宫事相委勿以资屈为嫌也后帝自将征高丽以绩为辽东行军大总管破盖牟辽东白崖等城从战驻蹕山功多封一子为郡公延陀部落乱诏将二百骑发突厥兵讨之大战乌德鞬山破之降其首领梯真达千而可汗咄摩支遁入荒谷磧北遂定改太常卿仍同中书门下三品复为詹事绩既忠力帝谓可托大事尝暴疾医曰用须灰可治帝乃自剪须以和药及愈入谢顿首流血帝曰吾为社稷计何谢为【谨按通鉴辑览 御批剪须和药事属不经即云优恤功臣亦自有道何至毁发肤以佐刀圭设他日复有类是者安得如许须髯疗疾乎或由太宗欲倚绩为顾托因设词以结其心而其家遂记之志状史官不察摭拾成编白居易七德舞辞复从而艳称之后世因据为盛事其说无足深信即有之亦非情理之正吾所不取】后留宴顾曰朕思属幼孤无易公者公昔不遗李密岂负朕哉绩感涕因嚙指流血俄大醉帝亲解衣覆之帝疾谓太子曰尔于绩无恩今以事出之我死宜即授以仆射彼必致死力矣乃授迭州都督【谨按通鉴辑览 御批太宗之待臣下未尝不任权术厥后陛下家事一言致貽宗社之祸究之权术有何益乎】高宗立召授检校洛州刺史洛阳宫留守进开府仪同三司中书门下参掌机密遂为尚书左仆射永徽元年求解仆射听之仍以开府仪同三司知政事四年拜司空始太宗时绩已画象凌烟阁至是帝复命图其形自序之又诏得乘小马出入东西台卑官日一人迎送帝欲立武昭仪为后召绩与长孙无忌于志宁褚遂良计之遂良等持不可【详长孙无忌褚遂良诸传】绩称疾不至帝后密访绩曰将立昭仪而顾命之臣皆以为不可今止矣答曰此陛下家事无须问外人帝意遂定诏绩志宁奉册立武后帝东封泰山为封禅大使尝坠马伤足帝以所乘马赐之高丽莫离支男生为其弟所逐遣子乞师诏绩为辽东道行军大总管率兵二万讨之破其国执高藏男建等裂其地州县之献俘昭陵具军容告于庙进位太子太师增食千一百户总章二年卒年八十六【旧书年七十六神道碑亦同】帝曰绩奉上忠事亲孝性廉慎不立产业今亡当无赢货有司其厚赠恤之因泣下举哀光顺门七日不视朝赠太尉扬州大都督谥贞武给秘器陪葬昭陵起冢象阴铁乌德鞬山以旌功烈葬日帝与皇太子幸未央古城哭送初绩拔黎阳仓高季辅杜正伦往客焉及平虎牢获戴胄咸引见卧内推礼之后皆为名臣世以绩为知人平洛阳

得单雄信故人也表其材武请尽纳官爵以赎不许乃号恻割股肉啖之曰使此肉随兄
为土庶不负昔誓也仍收养其子焉绩姊病尝自为粥
而燎其须姊戒止答曰姊多疾而绩且老虽欲数进粥尚几何其用兵料敌应变皆契事
机战胜必推功于下得金帛尽散之士卒然持法严故
人为之用临事选将必訾相其奇庞福艾者遣之或问故答曰薄命之人不足与成功名
既没士皆为流涕自属疾帝及皇太子赐药即服家欲
呼医巫不许诸子固以药进辄曰我山东田夫耳位三公年踰八十非命乎生死系天盍
服药求活耶弟弼始为晋州刺史以绩疾召为司卫卿
使省视忽语曰我似少愈可置酒相乐于是奏乐宴饮列子孙于下将罢谓弼曰我见房
玄龄杜如晦高季辅皆辛苦立门户悉为不肖子败之
我子孙今以付汝汝可慎察有不厉言行交非类者急榜杀以闻毋令后人笑吾犹吾笑
房杜也我死布装露车载柩敛以常服加朝服其中僮
死有知庶着此奉见先帝众妾愿留养子者听余出之乃不复语弼等遵焉本名世绩永
徽中避太宗偏讳故但名绩后配享高宗庙庭季弟感
年十五有奇操李密败陷于世充令作书召绩对曰兄尚节义今已事主昆弟不能移也
固不从杀之绩子震嗣桂州刺史震子敬业敬猷

李敬业

李敬业

敬业少从绩征伐有勇名历太仆少卿袭英国公为眉州刺史嗣圣元年坐赃贬柳
州司马会给事中唐之奇贬括苍令詹事府司直杜求
仁贬黜令【旧书作黜县丞今从新书黜作黜传写之误】长安主簿骆宾王贬临海
丞敬猷自整屋令坐事免俱客扬州失职怏怏时武后
既废中宗诛戮唐子孙天下愤之敬业等乘人怨谋起兵先谕其党监察御史薛璋【通
鉴作薛仲璋】求使江都及至令雍人韦超告州长
史陈敬之反璋乃收系之居数日敬业乘传至矫制杀敬之自称州司马且言奉密诏募
兵讨高州叛酋即开府库令参军李宗臣释系囚役工
数百人授甲斩录事参军孙处行以徇乃开三府一曰匡复府二曰英公府三曰扬州大
都督府自称匡复府上将领扬州大都督以之奇为左
长史求仁为右长史宗臣左司马璋右司马宾王为艺文令前整屋尉魏思温为军师旬
日兵十余万传檄州县疏武氏过恶复称嗣圣元年又
索状类太子贤者奉之诡众曰贤不死楚州司马李崇福率所部三县应之武后遣左玉
铃卫大将军李孝逸兵三十万往击之削其祖父官爵
毁冢藏除属籍购得敬业首者授官三品赏帛五千敬业问计于思温对曰公以匡复为
辞宜身自将兵直趋洛阳山东韩魏知公勤王附者必

众天下指日定矣璋曰不然金陵负江其地足以为固且王气尚在宜先并常润为霸基
然后鼓行而北思温曰山东豪杰不愿武后居上蒸麦
为饭以待我师奈何欲守金陵投死地乎敬业不从使敬猷屯淮阴韦超屯都梁山自引
兵击润州下之署宗臣为刺史始回兵屯高邮下阿溪
思温叹曰兵忌分今敬业不知扫地度淮率山东士先袭东都吾知无能为也武后又使
黑齿常之将江南兵为孝逸援进击淮阴都梁兵皆败
后军总管苏孝祥率奇兵五千夜度击敬业孝祥死兵溺者过半孝逸军退守石梁有乌
羣噪敬业营上监军御史魏真宰曰【通鉴作魏元
忠按元忠传是时以殿中侍御史监孝逸军真宰即元忠也】 贼其败乎风顺获干火攻
之利也固请战遂度溪击之敬业置阵久士疲皆顾望
不正列孝逸乘风纵火逼其军军稍却敬业麾精兵居前弱者在后阵乱不能制乃败斩
七千余级敬业等轻骑遁江都携妻子奔润州潜蒜山
下将入海逃高丽抵海陵阻风遗山江中其将王那相斩之传首东都夷其家中宗反正
诏还绩官封属籍葺完莹冢焉初敬业之叔思文为润
州刺史敬业兵起以使间道闻固守踰月城陷敬业责曰叔党于武氏宜改姓武思温等
欲杀之敬业不许及扬楚平乃独免后遂赐武姓厯春
官尚书或言本与敬业谋者乃复徐氏卒子钦宪开元中仕至国子祭酒【按思文钦宪
二人宰相世系表皆不载亦阙漏也】

钦定续通志卷二百五

●钦定续通志卷二百六 列传六

列传

唐【六】

○唐六

尉迟敬德 秦叔宝 程知节 段志玄 任瓌 张
公谨 许绍【圉师 钦寂钦明】邱和【行恭】

李袭志【袭誉】 姜晷【行本 皎晦庆初】张士贵

尉迟敬德

秦叔宝

程知节

段志玄

任瓌

张公谨

许绍

邱和

李袭志

姜暮

张士贵

△尉迟敬德

尉迟敬德名恭以字行朔州善阳人隋大业末从军高阳积阅为朝散大夫刘武周乱以为偏将与宋金刚南侵陷晋浍等州【详见刘武周传】武德二年金刚败奔突厥敬德合余众守介休秦王遣任城王道宗字文士及谕之乃与寻相举地降引为右一府统军使将其旧众八千屈突通虑其变骤言之王不听【据通鉴增】从击王世充会寻相叛诸将疑敬德且乱囚之屈突通殷开山言敬德慄敢今执之心必怨望不即杀后悔无及王曰不然敬德必叛盍肯后寻相者耶释之引见卧内曰丈夫以气相许小嫌不足置胸中我终不以谗害良士因赐之金曰必欲去以为汝资是日猎榆窠世充自将兵数万来战单雄信者贼骁将也骑直趋王敬德跃马大呼横刺雄信坠乃翼王出率兵还战大败之擒其将陈智略获排稍兵六千王顾曰何相报之速也赐金银一篋敬德善避稍每单骑入贼虽羣刺之不能伤又能夺取贼稍还刺之齐王元吉以善马稍自负使去刃与之校敬德请王加刃而独去之卒不能中秦王尝问夺稍与避稍孰难对曰夺稍难试使与齐王戏少选王三失稍遂大愧服窦建德营板渚王命李绩等为伏亲挟弓令敬德执稍略其垒大呼致师建德兵出乃稍引却杀数十人众益进伏发大破之时世充足子琬使于建德乘隋炀帝厩马出入车中以夸众王望见问谁可取者敬德请与高甑生梁建方三骑驰往擒琬引其马以归贼不敢动从讨刘黑闼贼以奇兵袭李绩王勒兵掩其后俄而贼众四面合敬德率壮士驰入贼王乘阵乱乃得出又破徐圆朗以功授王府左二副护军太子建成尝以书招之赠金银器一车辞曰敬德于殿下无功其敢当赐若怀二心殿下亦焉用之太子怒而止敬德以闻王曰公之心如山岳虽积金至斗岂能移之然恐非自安计齐王元吉遣壮士刺之敬德开门安卧贼至不敢入因谮于高祖将杀之王固争得免其后建成等计日急敬德与长孙无忌入白曰大王不先决社稷危矣王曰我惟同气所未忍伺其发而后以义讨之如何敬德曰人情畏死众以死奉王此天授也天与不取反得其咎大王即不听请从此亡不能交手蒙戮无忌曰王不从敬德言敬德亦非王有今败矣王曰寡人之谋未可全弃公更图之敬德曰处事有疑非智临难不决非勇今勇士八百人悉入宫控弦被甲矣尚何辞又与侯君集等日夜进劝计乃定时房玄龄杜如晦被斥

在外召不至王怒曰是背我耶因解所佩刀授之谓曰即不从可斩其首以来敬德遂往
谕玄龄等与入计议及建成死敬德领骑七十人趋玄武门王马逸坠林下元吉将夺弓窘王敬德驰叱之元吉走遂射杀之宫府兵屯玄武门
战不解敬德持二首示之乃去时帝泛舟海池王命敬德往待不解甲趋行在帝惊曰今日之乱为谁尔来何邪对曰秦王以太子齐王作乱举
兵诛之恐陛下不安遣臣宿卫帝意乃安于是南衙北衙兵与府兵尚杂鬪敬德请帝手诏诸军听秦王节度内外始定王为皇太子授左卫率
时坐建成元吉得罪者百余家将尽没入之敬德曰为恶者二人今已诛若又穷支党非取安之道由是普原论功为第一以齐府金币什器赐
焉除右武侯大将军封吴国公 【新书本传实封千三百户按太宗定诸功臣封户已载柴绍传末毋庸复出诸传或书或不书于例亦不画
一今皆从删后仿此】 突厥入寇授泾州道行军总管
虜至泾阳轻骑与战败之敬德所得财必散之士卒然婞直颇以功自负与宰相不平出
为襄州都督累迁同州刺史常侍宴庆善宫有班其上
者敬德曰尔何功坐我上 【通鉴考异曰唐历云尝因内宴于御前殴宇文士及曰汝有何功合居吾上太宗慰谕之乃正今从旧传】 任城
王道宗解喻之敬德勃然击道宗目几眇太宗不怪罢召让曰朕观汉史尝恠高祖时功臣少全者今视卿所为乃知韩彭夷戮非高祖过国家
纲纪惟赏与罚旷恩不可数得勉自修饬毋貽后悔敬德顿首谢由是惧而自戢后改封
鄂国历鄜夏二州都督 【通鉴载太宗尝谓敬德人言卿反敬德解衣投地出其瘢痍帝为之流涕云云又尝欲以女妻敬德叩头谢曰臣闻
古人富不易妻帝乃止此二事新旧书本传并不载通鉴杂采它书未免失实 御批辨之甚悉今皆不取】 老就第授开府仪同三司朝朔
望帝将讨高丽敬德上言乘輿至辽太子次定州两京空虚恐有玄感之变夷貊小国不足枉万乘愿委之将臣帝不纳诏以本官行太常卿为
左一马军总管师还复致仕谢宾客不与通饷云母粉为方士术延年显庆三年卒年七十四高宗为举哀废朝三日诏京官五品以上及朝集
使赴第临吊册赠司徒并州都督谥曰忠武给班剑羽葆鼓吹陪葬昭陵

△秦叔宝

秦琼字叔宝以字显齐州历城人始为隋将来护儿帐内母丧护儿遣使襚吊吏怪曰士卒死丧将军未有所问今独吊叔宝何也护儿曰是予志节完整岂久居卑贱耶俄从守张须陀击贼卢明月于祝阿 【通鉴考异曰唐书叔宝传作下邳今从隋书】 粮尽欲引去须陀曰贼

见兵却必悉众追我得锐士袭其营且有利谁为我行者众莫对惟叔宝与罗士信奋行
乃分劲兵千人伏莽间须陀委营遁明月悉兵追蹶叔
宝等驰叩贼营门闭不得入乃升楼拔贼旗帜杀数十人营中乱即斩关纳外兵纵火焚
三十余屯明月奔还须陀回击大破之又与孙宣雅战
海曲先登以前后功擢建节尉从须陀击李密荥阳须陀死率残兵附裴仁基仁基降密
密得叔宝大喜以为帐内骠骑待之甚厚密与宇文化
及战黎阳中矢堕马追兵至叔宝捍卫得免后归王世充署龙骧大将军与程知节计曰
【按旧书载入程知节传以为知节语刘肃大唐新
语同旧书今据新语】世充多诈数与下呪誓乃巫妪非拨乱主也因约俱西走策其马
谢世充曰自顾不能奉书请从此辞贼不敢逼于是来
降高祖俾事秦王府王尤奖礼从镇长春宫拜马军总管战美良川破尉迟敬德功多帝
赐以黄金瓶劳曰卿不恤妻子而来归我且又立功使
朕肉可食当割以啖尔况子女玉帛乎寻授秦王府右三统军走宋金刚于介休拜上柱
国从讨世充建德黑闥常为先锋积赐金帛以千万计
进封翼国公每敌有骁将锐士震耀出入以夸众者秦王辄命叔宝往取之跃马挺枪刺
于万众中莫不如志从平建成元吉拜左武卫大将军
后稍移疾尝曰吾少长戎马间历二百余战数重创出血且数斛安得不病乎贞观十二
年卒赠徐州都督陪葬昭陵诏有司琢石人马立墓前
以旌战功明年改封胡国公后四年诏司徒赵国公无忌司空河间王孝恭司空莱国公
如晦司空太子太师郑国公征司空梁国公玄龄开府
仪同三司申国公士廉【新史脱士廉名据通鉴增】开府仪同三司鄂国公敬德特
进卫国公靖特进宋国公瑀辅国大将军褒国公志玄
辅国大将军夔国公弘基尚书左仆射蒋国公通陕东道行台右仆射郟国公开山荆州
都督谯国公绍【按唐初功臣有柴绍又有许绍俱
封谯国公俱赠荆州都督惟柴绍谥曰襄而许绍传不载其谥为异通鉴书凌烟阁功臣
有谯襄公柴绍胡三省注柴绍当作许绍考新唐书李
愷传未具列武德以来功臣姓名首载凌烟阁图像诸人惟张亮侯君集以罪诛不预中
有右骁卫大将军驸马都尉谯国公柴绍而无许绍名
可证通鉴所书不误胡注疑其当为许绍者非也】荆州都督邳国公顺德洛州都督郟
国公亮吏部尚书陈国公君集左骁卫大将军郟国公
公谨左领军大将军卢国公知节礼部尚书永兴郡公世南户部尚书渝国公政会户部
尚书莒国公俭兵部尚书英国公绩并叔宝并图形凌
烟阁【赵明诚跋河间元王碑云唐初功臣皆图形凌烟阁此碑乃作戢武阁戢武之名
不见于他书惟石刻数数有之岂凌烟先名戢武而

后改之耶】高宗永徽六年遣使致祭名臣图形凌烟阁者凡七人征士廉瑀志玄弘基世南叔宝皆始终著名者也

△程知节

程知节本名■〈齿尧〉金济州东阿人善马稍隋末盗起聚众数百保乡里后事李密密料士八千隶四骠骑分左右以自卫号内军常曰此可当百万知节领骠骑之一恩遇隆特王世充与密战知节以内骑营北邨单雄信以外骑营偃师世充袭雄信密遣知节与裴行俨助之行俨中流矢坠马知节驰救之杀数人军辟易乃抱行俨重骑驰追之以槊撞之知节折其槊斩追者乃免后密败为世充所获知节恶其为人与秦叔宝来奔授秦王府左三统军从破宋金刚窦建德王世充并领左一马军总管塞旗先登者不一以功封宿国公太子建成潜之出为康州刺史白秦王曰大王去左右手矣身欲久全得乎知节有死不敢去事平拜太子右卫率寻迁右武卫大将军贞观中历泸州都督左领军大将军改封卢国显庆二年授葱山道行军大总管以讨贺鲁师次怛笃城【通鉴作恒笃城】胡人数千出降知节屠其城去贺鲁因远遁军还坐免未几起为岐州刺史致仕卒赠骠骑大将军益州大都督陪葬昭陵子处默袭爵处亮【公主传作怀亮】尚清河公主终窋远将军

△段志玄

段志玄齐州临淄人【按神道碑作邹平人】父偃师仕隋为太原司法书佐从高祖起兵官至郢州刺史志玄少无赖数犯法从父客太原为太宗所识兵兴募千人从授右领大都督府军头下霍邑绛郡攻永丰仓摧锋最历左光禄大夫从刘文静拒屈突通于潼关文静为桑显和所袭军且溃志玄率壮骑驰贼杀十余人中流矢忍不言突击自如贼众乱军乘之唐兵复振通败走与诸将蹶获于稠桑以功多授乐游府车骑将军从讨王世充深入马跌为贼擒两骑夹持其髻将度洛志玄忽腾而上二人者俱堕夺其马驰归尾骑数百不敢近东都平迁秦王府右二护军太子建成尝以金帛诱之拒不纳太宗即位累迁左骁卫大将军封樊国公诏率兵至青海夺吐谷浑牧马逗遛免【互见吐谷浑传】未几复职文德皇后之葬与宇文士及勒兵卫章武门【旧书作肃章门】太宗夜遣使至二将军所士及开营内使者志玄拒曰军门不夜开使者示手诏志玄曰夜不能辨不纳比曙帝叹曰周亚夫何以加改封褒国公历镇军大将军贞观十六年疾帝临视泣顾曰当与卿子五品官顿首谢请与母弟乃拜志感左卫郎将及卒帝哭之恻赠辅国大将军扬州都督陪葬昭陵谥曰忠壮【新书作壮肃误今从旧

唐书及志玄神道碑】 三世孙文昌自有传

△任瓌

任瓌字玮庐州合肥人父七宝【一本作他宝】陈将忠之弟为陈定远太守瓌早孤忠抚爱甚每曰吾子虽多庸保耳所以寄门户者瓌也年十九试守灵溪令迁衡州司马都督王勇尽以州务属瓌陈亡瓌劝勇据岭外立陈后辅之勇不从以地降隋瓌弃官去仁寿中调韩城尉未几罢高祖讨捕于汾晋瓌上谒辕门承制署河东县户曹高祖之晋阳留隐太子托之及起兵瓌至龙门见高祖曰今主政残酷兵役不止公天付神武仗顺而起关中起兵者跂踵而待瓌在冯翊久悉其人情愿为一介使入关宣布威灵以收左辅由梁山济河直趋韩城逼合阳徇朝邑萧造文吏势当自下次招诸贼然后鼓行而前据永丰积粟虽未得京师关中固已定矣高祖曰是吾心也乃授银青光禄大夫遣陈演寿史大柰步骑六千趋梁山以瓌及薛献为招慰大使谓演寿曰阆外事与任瓌筹之贼孙华白元度等果降且具舟于河以济师瓌行说下韩城与诸将进击饮马泉破之拜左光禄大夫留戍永丰仓高祖即位授谷州刺史王世充数攻新安瓌拒破之以功封管国公秦王东讨瓌从至邙山主水运饷军关中平为河南安抚大使至宋州会徐圆朗反副使柳浚劝退保汴瓌笑曰公何怯也俄而贼陷楚邱将围虞城瓌遣部将崔枢张公谨自鄆陵领诸州豪质子百余守之浚曰枢等故世充将且诸州质子父兄皆反奈何令保城瓌不答枢至则分质子与土人合队贼稍近质子有叛者枢即斩其队帅于是诸队帅皆惧各杀质子梟首门外枢不禁遣使报瓌瓌阳怒曰去者遣招慰何乃杀之退谓浚曰固知崔枢能办此也县杀贼子为怨已大人今自为战矣圆朗攻虞城不能拔贼平迁徐州总管仍为大使瓌补吏多私亲故或倚其势多所求纳瓌知而不禁为世所讥辅公祐反诏以兵自扬子津济江讨之降其将龙龕公祐平拜邗州都督迁陕州瓌弟璨为隐太子典膳监太子废璨得罪瓌亦左授通州都督贞观四年卒有司可以在外对仗白奏太宗怒曰昔杜如晦亡朕不能事者数日今瓌丧所司不以状言岂朕意乎有如朕子弟不幸死当此奏耶自是大臣丧遂不对仗奏云

△张公谨

张公谨魏州繁水人为王世充涑州长史与刺史崔枢挈城归唐授邹州别驾累迁右武侯长史未知名李绩尉迟敬德数启秦王乃引入府王将讨建成元吉使卜人占之公谨自外至投龟于地曰卜以决疑今事无疑何卜之为卜而不吉其可已乎王曰善建成死其徒攻玄武门

锐甚公谨独闭关拒之以功授左武侯将军封定远郡公贞观初为代州都督置屯田以省馈运数言时政得失多所采纳后副李靖经略突厥条可取状言颉利纵欲肆凶诛害善良昵近小人一也别部同罗仆骨回纥延陀之属皆叛二也突利被疑以轻骑免拓设出讨众败无余欲谷丧师无托足之地三也北方霜旱禀粮乏绝四也颉利疏突厥亲诸胡胡性翻覆大军临之内必生变五也华人在北者甚众比闻屯聚保据山险王师之出当有应者六也帝然所谋及破定襄败颉利玺诏慰劳进封邹国公改襄州都督以惠政闻六年卒官年四十九 【旧唐书作三十九】 帝将出次哭之有司奏日在辰不可帝曰君臣犹父子也情感于内安有所避遂哭之赠左骁卫大将军谥曰襄十三年追改郟国公永徽中加赠荆州都督子大象嗣次大素龙朔中历东台舍人兼修国史著书百余篇终怀州长史次大安上元中同中书门下三品章怀太子令与刘讷言等共注范晔汉书太子废贬普州刺史终横州司马子悱仕明皇时为集贤院判官诏以其家所著魏书说林入院缀修所阙累擢知图书括访异书使进国子司业以累免官

△许绍

许绍字嗣宗安州安陆人父法光隋楚州刺史大业末绍为夷陵通守盗起州境独完流人自古数十万开仓赈给炀帝崩问至绍率人吏三日临以所部遥属越王侗王世充篡立乃以黔安武陵澧阳归国授峡州刺史 【峡或作陕误】 封安陆郡公绍儿时与高祖同学赐书道平生旧以加■〈卩 尉〉萧铣将董景珍降命绍率兵应接以破铣功擢其子智仁为温州刺史铣遣杨道生围峡州绍击走之铣将陈普环具大舰溯江规取巴蜀绍遣智仁及婿张元靖掾李宏节追战西陵覆其兵擒普环悉获战舰江之南有安蜀城地直夷陵荆门城峙其东皆峭险处铣以兵戍守绍遣智仁等攻荆门取之制书褒美绍境连王世充及铣其下为贼剽者皆见杀绍得敌人独资遣之二邦感义杀掠为止进谯国公赐帛千段赵郡王孝恭等伐铣复诏督兵图荆州会病卒于军帝为流涕贞观中赠荆州都督绍长子早卒以嫡孙力士嗣终洛州长史次子智仁初以勋封孝昌县公绍卒继守夷陵终凉州都督少子圜师 【新书以为绍次子今据宰相世系表】

许圜师

许钦寂

许钦明

许圜师

圉师有器干研涉艺文擢进士第累迁给事中黄门侍郎同中书门下三品龙朔中为左相高宗自书诏赐辽东诸将谓许敬宗曰圉师爱书可示之圉师子奉辇直长自然游猎犯人田田主怒自然以鸣镝射之圉师杖自然一百掩不奏为人所撻帝让曰宰相而暴百姓非作威福乎圉师谢且言作威福者强兵重镇慢天子法臣文吏何敢然帝曰慊无兵邪敬宗因是劾抵【旧书文为李义府所挤今从新书】遂免官久之为虔州刺史稍迁相州专以宽治部有受赇者圉师不忍按但赐清白箴其人自愧后修餽更为廉士进户部尚书卒赠幽州都督谥曰简陪葬泰陵【旧书作恭陵】

许钦寂

力士子钦寂嗣父封万岁通天元年契丹入寇诏为陇山军讨击副使【陇山通鉴作龙山胡三省注龙山即慕容氏和龙之山也以下崇州证之疑当以龙山为是】战崇州败为虏所擒方围安东胁令说属城未下者钦寂呼安东都护裴元珪曰贼朝夕当灭幸谨守贼怒害之赠蕲州刺史谥曰忠子辅干以父死难授左监门卫中候为海东■〈卜尉〉劳使使迎柩还葬

许钦明

钦寂弟钦明以军功擢左玉钤卫将军西安大都护盐山郡公出为凉州都督尝轻骑按部突厥默啜兵奄至被执贼与皆至灵州使说之降钦明至城下呼曰我乏食有美酱有粱米乎并乞墨一枝时贼营四面阻水惟一路得入钦明欲选将乘夜袭贼也而城中无寤其度者遂见害兄弟同时死王事世名其忠

△邱和

邱和河南洛阳人后徙家郿少重气侠闲弓马仕周开府仪同三司入隋为右武卫将军封平城郡公历蒲州刺史汉王谅反使卒衣妇人衣袭取蒲州和挺身免坐废为民宇文述有宠和倾心附纳复拜代州刺史炀帝北巡和馈献精腆至朔州刺史杨廓无所进帝不悦述甚称和美帝用为博陵太守诏廓就视和为式后帝过博陵和上食加丰愈喜由是所过竟为珍侈献自和发也迁天水郡守入为左御卫将军大业末海南苦吏侵数怨畔帝以和所莅称淳良而黄门侍郎裴矩亦荐之遂拜交趾太守抚接尽情荒境安之是时鸿胪卿盖长直举郁林附萧铣冯盎举珠崖番禺附林士弘各遣使招和不从林邑西诸国职遣和明珠文犀金宝铣闻利之命长真以南粤蛮俚攻交趾和遣长史高士廉率兵击走之【高士廉传和命为行军司马】会隋骁果自江都来审隋亡乃附铣平遂

归国授交州大总管谭国公和遣士廉奉表请入朝诏

其子师利迎之及谒见高祖为兴引入卧内语平生欢甚奏九部乐飨之授左武侯大將軍和时已老以稷州其故乡也令为刺史以自养寻除

特进贞观十一年卒年八十六赠荆州总管谥曰襄陪葬献陵有子十五人行恭知名

邱行恭

邱行恭

行恭善骑射大业末与兄师利聚兵万人保郿城原州奴贼围扶风不下食尽无所掠众稍散归行恭遣使说贼共迎高祖自率五百

人持牛酒诣贼营奴帅长揖守恭手斩之谓众曰若皆豪杰何为事奴乎众皆服曰愿改事公行恭乃率其众与师利迎谒秦王于渭北拜光禄

大夫累从战伐功多迁左一府骠骑隐太子诛以功擢左卫将军贞观中坐与兄争葬所生母废为民从侯君集平高昌封天水郡公进右武侯

将军刘兰生谋反腰斩行恭希旨探心肝食之太宗闻而让之曰法有常科何至如此若以为忠孝则太子诸王先食之矣岂到汝乎行恭惭谢

【据大唐新语及通鉴增】高宗立迁大将军冀陕二州刺史致仕卒年八十赠荆州刺史谥曰襄陪葬昭陵太宗讨王世充战邙山欲尝贼

虚实与数十骑冲出阵后与诸骑相失唯行恭从贼骑追及流矢着太宗马行恭回射之发无虚镞贼不敢前遂下拔箭以己马进太宗步执长

刀大呼导之斩数人突阵而还贞观中诏斲石为人马象拔箭状立昭陵阙前以旌武功云子神绩见酷吏传

△李袭志

李袭志字重光金州安康人仕隋始安郡丞大业末盗贼起倾私产募士得三千人乘城拒盗萧铣林士弘屡攻之不下闻炀帝丧与士民

缟素三日临或说曰公临郡久蛮夷畏威今四海分裂自王者非一姓宜遂据岭表取百粤岂不若尉陀乎袭志曰今江都虽沦宗社尚有奉诸

君当相与戮力刷仇耻岂怙乱图不义哉欲斩说者众谏乃止固守凡二年力穷援绝为铣所陷伪署工部尚书桂州总管武德初高祖赐书命

其子元嗣召之袭志约岭南酋永平郡守李光度潜图归国帝复以书谕曰公朕之宗不可与异姓比宜及子孙并预宗正属籍及铣平岭南六

十余州皆送款袭志诱而致云赵郡王孝恭承制授桂州总管五年来朝封始安郡公江州都督后讨辅公柝为水军总管授桂州都督袭志守

桂二十八年政尚清省南荒便之表请入朝以光禄大夫汾州刺史致仕卒

李袭誉

李袭誉

弟袭誉字茂实通敏有识度仕隋为冠军将司兵阴世部辅代王守京师也三辅盗
蚁聚袭誉请以兵据永丰仓发粟赈穷乏出库物赏战士驰檄郡县共捕盗贼世师
不从乃求出募山南兵至汉中高祖已定长安召授太府少卿安康郡公拜潞州总
管【按金石录据袭誉墓志武德初初拜太仆卿出为潞州总管征拜太府卿谓此
传为误疑不然当是武德初为太府少卿迁太仆卿及自潞州召还拜太府卿传虽
不载已该于累擢之中矣】时突厥已和亲又通使王世充袭誉捕斩之诏委典运
以饷东军累擢扬州长史江南巡察大使多所黜陟扬州俗喜商贾不事农业袭
誉为引雷陂水筑句城塘溉田八百顷民多归本召为太府卿为人严愆以威
肃闻居家俭厚于宗亲禄廩随多少散之以余资写书罢扬州载书数车谓子
孙曰吾性不喜财然负京有赐田十顷耕之足以食河内千树桑蚕之可以衣江
都书读之可进求宦吾歿后尔曹能勤此无资于人矣迁凉州都督改同州刺
史坐在凉州以私憾杖杀番禾丞刘武当死废为民流泉州卒

△姜暮

姜暮秦州上邽人隋大业末为晋阳长高祖在太原暮谓所亲曰隋政乱将亡唐
公负王霸资度必拨乱得天下乃深自结及大将军府建引为司功参军从平
霍邑绛郡兵遂渡河暮部勒一夕济高祖叹其略进平长安除相国冑曹参军
【旧书作兵曹】长道县公辞举寇秦州以暮山西豪望诏安抚陇外委以便宜
将行请曰公天人之望已属暮老矣恐先朝露幸一见践阼死不恨高祖嘉纳
乃与窦轨出散关下河池汉阳遇辞举与战轨败召暮还朝为员外散骑常侍
仁杲平擢秦州刺史帝曰昔人称衣锦故乡今以本州岛相授所以偿功凉州
荒梗宜有以靖之暮至抚以恩信盗贼衰止人喜曰不意复见太平官府改守
陇州以老去职贞观元年卒赠岷州都督谥曰安子确

姜行本【姜皎】

姜晦

姜庆初

姜行本【姜皎】

确字行本以字显贞观中为将作少匠护作九成洛阳宫及诸苑籞以干力称多所
赉赏游幸无不从迁宣威将军太宗选翘才衣五色袍乘六闲马直屯营宿卫
仗内号曰飞骑每出幸即以从拜行拜左屯卫将军分典之高昌之役为行军
副总管出伊州距柳谷百里依山造攻器增损旧法械益精其处有汉班超纪
功碑行本磨去古刻更刊颂陈国威德遂与侯君集

进平高昌战有功玺书慰劳还为金城郡公帝将征高
丽行本谏未宜轻用师不从至盖牟城中流矢卒帝赋诗悼之赠左卫大将军郕国公谥
曰襄陪葬昭陵行本有巧思凡朝之营缮所司必谘而
后行魏征恐寝启侈端劝帝斥之帝赖其强济不斥也子简嗣永徽中官至安北都护卒
子晞嗣开元中左散骑常侍简弟柔远美姿容敷奏详
辩武后时至左鹰扬卫将军摄地官尚书通事舍人子皎长安中为尚衣奉御明皇在藩
邸皎识其有非常度委心焉及即位自润州长史召授
殿中少监出入卧内陪燕私与妃嫔连榻间击球鬪鸡呼姜七而不名赐宫女厩马及他
珍物不胜计帝在殿廷玩一嘉树皎盛赞之帝遽令徙
植其家与诛窦怀贞等进殿中监楚国公食封四百户议者讥皎任遇太过帝乃下诏曰
殿中监楚国公皎往事朕藩国数谓朕曰相王必登天
位王且储副朕叱而后止复言于朕兄弟近戚语闻太上皇太上皇奏之中宗遣嗣虢王
邕等鞫问皎一意保护罔或贰言宗楚客纪处讷等请
投皎炎荒中宗特诏贬润州长史专以忠力戴朕履危蹈难而无变焉朕既即位又参诛
奸臣将厚以光宠每所撝逊造膝匪躬举多规益而悠
悠之谈丑正恶直天下之人其未及识皎之功何见之异也且否当其悔则必灭乃宗泰
至于亨则所酬未补岂流言之听而厚德之忘哉乃谋
始有之图终可也迁太常卿监修国史弟晦又为吏部侍郎有权宠宋璟以为非久安计
请抑损之开元五年诏放归田里使自娱久之复为秘
书监十年坐泄禁中语为嗣濮王峤所劾敕中书门下究状峤亦王守一姻家 【王守一
见外戚传】 中书令张嘉贞阴希其意傅致皎狱诏
免殊死杖之流钦州道病死年五十亲厚坐谪死者数人世以为冤帝后思皎旧勋令递
枢还以礼葬之存问其家追赠泽州刺史后以子尚主
更赠吏部尚书仍赐封二百户为祠享费

姜晦

晦起家蒲州参军累为高陵令治有声迁长安令人畏爱之开元初擢御史中丞先
是永徽显庆时御史不拜宰相衔命使四方者廷中揖
见后稍屈下至晦独循旧体谓御史曰不如故事且奏谴公等由是台仪复振转太常少
卿时国马乏晦请以诏书市马六胡州率得马三千署
游击将军诏可闲厩乃稍备除黄门侍郎辞不拜改兵部满岁为吏部侍郎主选曹史尝
请托为奸前领选者周棘扈藩检室内外犹不禁至晦
悉除之示无防限然处事精明私相属诿罪辄得皆以为神皎被放晦亦左除宗正卿贬
春州司马徙海州刺史卒

姜庆初

皎子庆初生方晬帝许尚主后沦谪二十余年天宝初皎甥李林甫为宰相从容言之始命以官袭楚国公十载尚新平公主【详公主传】 历肃代朝主恩礼加重庆初亦得幸旧制驸马都尉多不拜正官特拜庆初太常卿会修植建陵误毁连冈代宗怒下吏论不恭赐死故事太常职奉陵庙开元末濮王彻为宗正卿有宠始请宗正奉陵天宝中张垪以主壻任太常改复旧及庆初败又以陵庙归宗正云

△张士贵

张士贵虢州卢氏人本名忽帗弯弓百五十斤左右射无空发隋大业末起为盗攻剽城邑高祖移檄招之即降拜右光禄大夫从征伐有功赐爵新野县公又从平洛授虢州刺史帝曰顾令卿衣锦昼游耳进封虢国公右屯卫大将军贞观七年为龚州道行军总管破反獠还太宗闻其冒矢石先登劳之曰尝闻以忠报国者不顾身于公见之累迁左领军大将军太宗尝自临治兵以部陈不整令士贵杖中郎将等怒其杖轻下士贵吏魏征谏曰将军为国爪牙使之执杖已非国法况以杖轻下吏乎帝即释之【据通鉴增】 显庆初卒赠荆州都督陪葬昭陵

【按张士贵新旧史俱有传旧史列于薛仁贵程务挺之次新史改与杜伏威李子和罗艺诸人合传似非其伦今移于此】

钦定续通志卷二百六

●钦定续通志卷二百七 列传七

列传

唐【七】

○唐七

侯君集 张亮 薛万均【万彻 盛彦师卢祖尚 刘世让 刘兰李君羨 王君廓】

侯君集

张亮

薛万均

△侯君集

侯君集幽州三水人以材雄入秦王幕府数从征累擢左虞候车骑将军封全椒县子除隐太子用其策居多王即位拜左卫将军进潞国公贞观四年以检校吏部尚书参议朝政李靖讨吐谷浑君集为之副师次鄯州议所向君集曰王师已至而贼未走险宜以精兵掩其不备必有大利若遁阻山谷克之实难靖从其计遂简锐士深入追及其众于库山大战破之进会大非川平其国改封陈进吏部尚书君集起行伍不

知学及贵始读书典选有誉于时高昌王曲文泰不朝诏为交河道行军大总管讨之师次碛口而文泰死子智盛袭位君集行至柳谷候骑言文泰克日将葬诸将请袭之君集不可曰天子以高昌无礼故讨之今袭人于墟墓之闲非问罪之师也于是鼓行而前贼婴城自守攻拔之进围其都城初文泰与西突厥欲谷设约有急相援及是欲谷设益惧西走智盛穷蹙出降高昌地尽平刻石纪功而还至京师有司劾其在高昌时配没罪人不以闻且私其珍宝妇女诏诣狱对簿岑文本上疏请宥之以劝有功乃释不问然君集自此常怏怏不平会张亮出为洛州都督君集语以欲反亮密以闻帝以君集独与亮语无他左证秘不发待之如初时太子承干数有过虑废知君集怨望因其壻贺兰楚石为千牛私引入内问自安计君集遂赞以异谋然畏泄忽忽不自安或中夕惊咤其妻怪之曰公国大臣何为尔若有所负宜自归首领尚可全君集不从及承干事发被收楚石又告其事帝亲临问君集辞穷不能对帝犹以君集有功语羣臣欲勾其命羣臣固请论如法帝乃谓曰与公诀矣因泣下遂斩之而特原其妻及一子徙岭表初帝命李靖教君集兵法既而君集奏靖且反兵之隐微不以示臣帝以让靖靖曰今中原无事臣之所教足制四夷而固求尽臣之术此君集欲反耳又二人尝偕还省君集马过门数步乃觉靖语人曰君集将有异志果如其言

△张亮

张亮郑州荥阳人初从李密署骠骑将军隶李绩绩以黎阳归国亮颇赞其谋授郑州刺史会王世充取郑亮不敢入亡命共城山房玄龄以亮沈果有谋白秦王引为府车骑将军隐太子将作难王以洛阳形胜之地一朝有变将出保之命亮统左右千余人往阴结山东豪杰以备变齐王告亮图不轨下吏诘讯亮终无所言得释王即位除右卫将军封长平郡公贞观五年累迁御史大夫进鄜国公后历幽夏鄜三州都督相州大都督长史徙封郿亮为政能发摘奸隐抑强恤弱所至有声召拜工部尚书又出为洛州都督侯君集已诛以刑部尚书参预朝政帝将伐高丽亮频谏不纳因自请行诏为平壤道行军大总管【平壤道旧书作泝海道】率舟师自东莱渡海袭卑沙城破之进至建女营壁未立贼奄至亮踞胡床直视不知所为赖副将张金树等奋击贼乃破及从帝还至并州竟得罪初亮弃故妻更娶李氏有淫行且喜左道交通巫覡挠政事亮在相州有术士程公颖谓曰君卧似龙形当大贵亮惑之阴有异志又有公孙常者以讖文有弓长之君当别都谓亮姓应之亮大悦陕人常德玄发其事且言亮养假子五百人帝使马周案之亮不承帝谓侍臣曰亮养

子五百何为正欲反耳诏百官议其狱多言当诛推将
作少匠李道裕言亮反形未具明其无罪帝不听竟斩西市籍其家岁余刑部侍郎阙员
帝曰朕得其人矣往者李道裕议张亮云反形未具此
言当矣朕不即从至今追悔遂授道裕刑部侍郎 【按张亮之死纲目书杀而不去其官
盖取道裕之议及太宗之悔断为疑狱也新书将此
段削去平反遂无所据今仍旧书】

△薛万均

薛万均焜煌人后徙京兆咸阳父世雄大业末为涿郡守万均因与弟万彻客幽州
并以材武为罗艺所厚与艺归款高祖授万均上柱国
永安郡公窦建德以十万众寇幽州万均请艺以羸兵背城阻水诱之而自以精骑百人
匿城侧邀其半渡击败之明年建德又以二十万众来
攻兵已缘堞万均与万彻率死士百人从地道掩击其背复惊溃去及太宗平刘黑闥引
万均为右二护军恩顾甚至贞观初历殿中少监副柴
绍讨梁师都万彻亦从未至朔方数十里突厥奄至王师却万均兄弟横出击之斩其骁
将虜阵讙乘之俘杀相藉突厥走师都遂平拜左屯卫
将军俄以沃沮道行军副总管从李靖讨吐谷浑次青海万均兄弟各以百骑前行卒与
敌遇万均单骑驰突 【旧书作万彻单骑驰击之】
无敢当者还语诸将曰贼易与复驰进击斩数千级追奔至积石山大风折旗万均曰虜
且来仍勒兵俄而虜至万均直前斩其将众遂溃追至
图伦磧乃还与靖会青海玺书勉劳迁本卫大将军又副侯君集击高昌进潞国公有诉
万均与高昌女子乱者帝欲穷治以魏征言而止后帝
幸芙蓉园坐清宫不谨下狱忧愤卒帝惊悼举哀诏陪葬昭陵后尝赐羣臣膜皮及万彻
而误呼万均帝怆然命焚赐之众皆感叹弟万彻万淑
万备 【按旧书此传以万彻标题而取万均事互载其中新书则两人分传而以万均为
首今从新书】

薛万彻

盛彦师

卢祖尚

刘世让

刘兰

李君羨

王君廓

薛万彻

万彻初与万均归高祖授车骑将军武安县公后事隐太子玄武门之变万彻督宫

兵来战知太子死乃去亡南山中秦王谕出之以其忠
于所事不罪也从李靖讨突厥颉利可汗以功授统军进爵郡公历右卫将军蒲州刺史
副李绩讨薛延陀与虏战碛南率数百骑为先锋绕击
阵后虏顾见遂溃斩首三千级获马万五千封一子县侯改左卫将军尚丹阳公主拜驸
马都尉寻迁代州都督右武卫大将军太宗尝曰当今
名将惟李绩江夏王道宗及万彻三人绩道宗不大胜亦不大败万彻非大胜即大败矣
贞观二十一年以青邱道行军总管伐高丽渡海入鸭
绿水高丽泊沟城主所夫孙拒战击斩之又破其援兵遂拔其城万彻在军中任气不能
下人或上书言状帝不之罪已而副将裴行方言其怨
望李绩亦言万彻位大将军亲主壻而内怀不平罪当诛因除名徙边会赦还永徽二年
授益州刺史入朝与房遗爱昵其遗爱谋立荆王事连
万彻遂下狱诛临刑大言曰万彻大健儿留为国效死固好岂得坐遗爱杀之乎斩之不
殊叱曰胡不力三斩乃绝万淑 【新书以万淑为万
均弟列万彻下旧书以为万彻长兄】 亦有战功历右领军将军畅武道行军总管 【
旧书作营州都督检校东夷校尉】 封梁郡公万备
有孝行母丧庐于墓太宗诏旌其门以尚辇奉御从伐高丽李绩围曰岩虏遣兵万余来
援契苾何力中槩创甚为贼所窘万备单马进救何力
获免仕至左卫将军 【万淑万备新书不载其卒旧书云皆先万彻卒按通鉴万彻之诛
万备坐流交州则万备非先万彻卒也】 当武德贞
观时又有盛彦师卢祖尚刘世让刘兰李君羨王君廓者并有功名而不终其位

盛彦师

盛彦师宋州虞城人大业末为澄城长高祖兵至汾阴彦师率宾客上谒授行军总
管从平京师与史万宝镇宣阳以遏东寇李密叛将出
山南万宝惧不敌彦师笑曰请以数千兵为公梟之万宝问计荅曰兵诡道也难预言即
引众踰洛水入熊耳山布弓弩夹道伏短兵溪谷闲令
曰贼半渡乃击所部笑曰贼趋洛州何为备此彦师曰密声言入洛其实走襄城就张善
相耳若入谷口自后追之山路险隘无所展力一夫殿
后必不能制今我得先至此擒之必矣密果至彦师击之密首尾断绝不能相救遂斩密
及王伯当以功封葛国公授武卫将军秦王讨王世充
彦师与万宝军伊阙绝山南路世充平除宋州总管其乡郡也以前王世充所署刺史陈
宝遇待其家不以礼因事杀之又杀平生所恶数十家
州人震骇会徐圆朗反诏为安抚大使战败被执圆朗厚待之令作书招其弟使举虞城
叛彦师为书曰吾奉使无状为贼所擒誓死报国汝善
侍老母勿以我为念圆朗笑而置之寻逃诣王薄与薄攻须昌征军粮于潭州刺史李义

满不与因收系义满愤死狱中彦师坐诛 【按新书
皆称彦师以罪诛不言所坐今从通鉴补】

卢祖尚

卢祖尚字季良光州乐安人家饶财好施以侠闻大业末募壮士捕盗有功江都乱州人请为刺史时年十九越王侗立遣使归地署本州岛
总管王世充僭位乃以州归高祖授刺史封弋阳郡公武德六年从赵郡王孝恭讨辅公佑为前军总管下教歛进击贼师冯惠亮陈正通破之
历蒋州刺史寿州都督瀛州刺史并有能名贞观初交州都督以赃败帝方择人众咸谓祖尚才兼文武可任乃召至京面授之祖尚既奉诏已
而畏其地瘴疠托疾辞帝遣杜如晦等谕意祖尚固辞又遣其妻兄周范谕之且示以还期祖尚终不肯行帝大怒命斩于朝堂时年三十余寻
悔之复其官荫

刘世让

刘世让字符钦京兆醴泉人仕隋为征仕郎高祖入长安以漳川归授通议大夫唐弼余党寇扶风世让自请安辑得其众数千因授安定
道行军总管率兵拒薛举为举所败与弟宝皆没于贼举将至城下令给说城中降世让伪许之至则告守者曰贼兵极于此矣善自固举重其
节不加害世让又遣宝闲走以贼虚实告秦王于高塘帝嘉之赐其家帛千匹及贼平授彭州刺史寻领陕东道行军总管从永安王孝基讨吕
崇茂于夏县军败与唐俭俱被囚俭闻独孤怀恩逆谋使还以告时帝方将幸怀恩营惊曰世让之来天也 【互见唐俭独孤怀恩传但本传
言逃归而怀恩传则称俭说刘武周使世让归请罢兵稍异】 封宏农郡公赐庄一区钱百万累检校并州总管突厥入寇诏屯雁门世让以八
百骑赴之突厥兵大至乃保武州处罗可汗与高开道苑君璋合众攻之城数坏辄立栅完拒久之虏引去诏赐良马金带 【新旧书皆云郑
元璠先在突厥可汗使来说降世让拒之及元璠还具道其忠诏赐良马金带通鉴考异曰高祖称元璠苏武弗之过安肯及可汗游说据实录
亦无此事今不取】 襄邑王神符镇并州世让数以气凌之坐是削籍旋召授广州总管将行帝问以备边策对曰突厥数南寇者恃马邑为中
顿耳宜遣一智勇之将屯崞城厚储金帛以招降者数出奇兵略其城下芟践禾稼不踰岁马邑可图也帝曰非公无可任者 【旧书作高祖
无可任者无曰非公三字】 使往经略已而高满政竟以马邑降突厥患之纵反闲云世让通可汗将为乱帝不察遂诛之籍其家贞观初突厥
来降者言世让无逆谋乃原其妻子

刘兰

刘兰字文郁青州北海人仕隋鄆阳郡书佐性阴狡尝引贼蹂其乡邑淮安王神通安抚山东率宗党归之累迁尚书员外郎贞观初梁师都尚据朔方兰上书陈方略帝以为夏州都督府司马师都以突厥兵顿城下兰优旗卧鼓不与争贼疑夜引去兰追击破之遂进军夏州师都平以功迁丰州刺史召为右领军将军十一年为夏州都督长史领府事时突厥郁射设阿史那摸末居河南兰纵反闲于颉利颉利果疑摸末惧来降颉利遣兵急追兰又逆击败之帝嘉其能【旧书此句下有超拜丰州刺史句误】封平原郡公俄检校代州都督贞观末以谋反腰斩

李君羨

李君羨洺州武安人初事李密后为王世充驃骑恶世充为人率其属归高祖授上轻车都尉秦王引置左右从破宋金刚于介休加驃骑将军从讨王世充为马军副总管世充子玄应自武牢转粮入洛君羨俘其军玄应走从破窦建德刘黑闥等所向必先登陷阵前后赐宫女马牛黄金杂彩不胜计授左卫府中郎将又与尉迟敬德破突厥于渭桥太宗曰使皆如君羨者虏何足忧改左武侯中郎将封武连县公【旧书作郡公】北门长上在仗读书不休历兰州都督左监门卫将军【旧书君羨所历官皆不书淮书云太宗即位累迁华州刺史封武进郡公按君羨以谣言见忌始出华州刺史封不应在此时今从新书】先是贞观初太白数昼见太史占曰女主昌又谣言当有女武王者帝恶之会内宴为酒令各言小名君羨自称曰五娘子帝愕然因大笑曰何物女子乃尔健耶又君羨封邑及属县皆有武字忌之出为华州刺史会御史奏君羨与狂人为妖言谋不轨遂下诏诛之天授中家属诣阙诉冤武后方欲自神乃复其官爵以礼改葬

王君廓

王君廓并州石艾人少驯佻无行大业末欲聚兵为盗其叔不从乃诬邻人通叔母与叔共杀之遂皆亡命众稍集至数千人掠夏长平河东丞丁荣拒之君廓谬为欲归首者而伏甲山谷中掩击荣败之又与贼韦宝邓豹等掠虞乡为宋老生所败保方山老生列营迫之君廓粮尽诈请降一夕遁去高祖兵起召之不从归李密密不甚礼乃归国假河内太守常山郡公迁辽州刺史以右武卫将军从征王世充自洛口断其饷道攻轘辕拔之世充将魏隐击君廓君廓伪道设伏大破之诏劳之曰卿以十三人破贼一万自古以少制众未之有也寻又袭拔虎牢以轻

骑千余抄突厥建德粮运又破之【本传叙战功前后失次今据通鉴】进爵彭国公镇幽州击突厥俘斩二千获马五千匹入朝赐以御马令自廷中乘以出仍赐锦袍金带还镇都督庐江王瑗反以内外兵付君廓或言君廓翻覆不可委以机柄欲以王洗代之君廓知之即往见洗诈言有急变当白洗方沐握发出即手斩之因执瑗【详见庐江王瑗传】以功授幽州都督进左光禄大夫在州骄纵不法长史李玄道数以法绳之君廓不自安贞观初征入朝玄道寓书于房玄龄【按通鉴以玄道为玄龄从甥考唐书则玄龄为玄道之甥今阙之】君廓私发之不识草字疑其谋已益惧行至渭南遂杀驿吏亡奔突厥为野人所杀太宗顾前功令收葬待其家如初御史大夫温彦博言君廓叛臣不宜食封邑乃贬为庶人【按旧史王君廓附见庐江王瑗传新史始别立传列于李子和罗艺之次今移于盛彦师诸人之后皆有功而不终者也】

钦定续通志卷二百七

●钦定续通志卷二百八 列传八

列传

唐【八】

○唐八

房玄龄 杜如晦【淹】 魏征

房玄龄

杜如晦

魏征

△房玄龄

房玄龄字乔【旧书作房乔字玄龄宰相世系表又作字乔松】齐州临淄人父彦谦隋司隶刺史【旧书作泾阳令按隋书彦谦传先为司隶刺史后以泾阳令终】玄龄幼警敏博学工书善属文开皇中天下混一咸谓国祚方永玄龄密启父曰帝以后父窃神器本无功德又不为子孙长久计使嫡庶相倾阅终当内自诛夷亡可翘足待也彦谦惊异之年十八举进士吏部侍郎高孝基名知人谓裴矩曰仆阅人多矣未见如此郎者必为国器恨不见其耸壑凌霄耳父疾视药膳十旬不解衣及卒勺饮不入口者五日补隰城尉坐累徙上郡会中原丧乱慨然有忧天下之志太宗以焯公徇渭北杖策谒军门一见如旧署渭北道行军记室参军及为秦王仍授府记室封淄临侯玄龄既遇知己罄竭心力知无不为每平寇贼众竞取珍玩玄龄独数人物致之幕府与诸将密相申结人

人愿尽力太宗尝曰汉光武得邓禹门人益亲今我有玄龄犹禹也以本职兼陕东道大行台考功郎中文学馆学士居府十年军书表奏驻马立成文约理尽初不着草高祖尝谓侍臣曰此人深识机宜为吾儿陈事虽千里外犹对面语隐太子既与王有隙计未有所出玄龄因长孙无忌进言请行周公之事无忌入白之乃召与谋玄龄又引杜如晦共其事太子深忌二人潜之帝皆斥出府及变作王令无忌召二人以道士服入夜计事太子死王为太子擢右庶子贞观元年进中书令论功与无忌如晦尉迟敬德侯君集皆第一进爵邢国公时帝亲定诸功臣封邑命有不当各许自陈淮安王神通自谓首应义旗而玄龄等以刀笔吏居其上不服帝曰玄龄等运筹帷幄有定社稷之功此萧何所以先诸将也于是神通不敢争三年进尚书左仆射【旧书作长孙无忌为左仆射按无忌传止为右仆射考宰相年表贞观元年书以萧瑀为左仆射自后未尝别除人则元龄之所代者乃瑀也】监修国史帝以仆射任总百司宜访贤才以助耳目不应日阅讼牒因敕自今细务属左右丞大事如关仆射而玄龄亦夙夜勤励任公竭节不以求备取人不以己长格物闻人善若己有之随能收叙无隔卑贱明达吏治饰以文雅审定法令务为宽平时称良相焉改封梁国公加太子少师居宰相积十五年女为王妃男尚主自以权宠过盛累表辞位不许顷之进司空仍总朝政复固辞帝遣使谓曰国家倚公如左右手且公筋力未衰无多让晋王为太子加太子太傅知门下省事母丧赐莹昭陵园起复其官帝伐高丽诏留守京师军械士廩并令处分发遣玄龄数上书劝帝毋轻敌久事外夷二十三年帝幸玉华宫时玄龄旧疾发诏令居守听卧治事疾渐甚追赴宫所命肩輿入殿对之流涕玄龄亦感咽不自胜命尚医临候尚食供膳日奏起居状疾少损即喜见于色玄龄顾诸子曰今天下无事唯讨高丽未止帝意既决羣臣莫敢谏吾不言抱愧入地矣遂上疏力陈武功已盛当思知足知止之诫且高丽未失臣节愿下诏许其自新帝览之谓其子妇高阳公主曰是已危憊尚能忧吾国事乎疾笃命凿苑垣以便通问又亲临握手与诀擢子遗爱右卫中郎将遗直朝散大夫令及见之卒年七十一【旧书作七十】赠太尉并州都督谥曰文诏给东园秘器陪葬昭陵高宗立诏配享太宗庙庭初玄龄尝以谴归第褚遂良上疏言其忠勤遽召之后避位久不出适帝幸芙蓉园玄龄敕子弟汛扫庭堂曰乘輿且临幸有顷帝果至因载还宫帝在翠微宫以李纬为民部尚书右使自京师至帝问玄龄谓何曰但称李纬好须无他语帝遽改纬洛州刺史【新书作太子詹事】玄龄留守时人有上急变告之

者玄龄送行在帝视奏已即斩告者而下诏责玄龄曰
公何不自信也其见委任如此治家有法度尝集古今家诫书为屏风令诸子各取一具
曰留意于此足以保躬矣子遗直嗣永徽初为礼部尚
书汴州刺史次子遗爱尚高阳公主官至大府卿 【新书作右卫将军然宰相世系表亦
作太府卿】 诞率无学公主行亦不谨后竟以谋反
诛遗直坐贬铜陵尉 【旧书作除名为庶人】 罢玄龄配享

△杜如晦

杜如晦字克明京兆杜陵人祖果隋工部尚书义兴公父咤昌州长史 【新书本传
止书祖果旧书并及高祖徽曾祖皎父咤至宰相世
系表则又云秀二子果皎皎子徽徽二子咤淹世次俱不合且以咤为咤未详孰是】 如
晦少英爽喜书负大节临机辄断大业中预吏部选侍
郎高孝基异之曰君有应变材当为栋梁之用补滏阳尉寻弃归高祖平京师秦王引为
府兵曹参军徙陕州长史时府属方多外迁王患之房
玄龄曰余人不足惜如晦王佐才也王欲经营四方舍若人无可共功者王惊曰微公言
我几失之因表留幕府从征薛仁果刘武周王世充
建德常参秘谋军国多事剖断如流僚属共才之莫见所涯进陕东道大行台司勋郎中
封建平县男兼文学馆学士时画像者十八人如晦为
首天策府建为从事中郎王为太子授左庶子即位迁兵部尚书进封蔡国公贞观二年
检校侍中摄吏部尚书总监东宫兵马三年进尚书右
仆射仍知选事与玄龄共筦朝政进退人才咸得其当有御史陈师合者上拔士论谓一
人不可兼数职阴讽切如晦等帝曰玄龄如晦非以勋
旧进特其才可与治天下者师合欲以此离闲吾君臣耶斥之岭表 【按唐会要载此事
在元年考如晦以兵部摄它职在二年正月以后会
要误】 久之以疾辞职诏给常俸就第医候之使相望于道疾笃帝亲幸其家抚之流涕
擢其子左千牛构兼尚舍奉御卒年四十六帝哭之恸
赠司空谥曰成手诏虞世南勒文于碑帝他日食瓜美辍其半奠焉又尝赐玄龄黄银带
谓曰昔如晦与公同心辅朕今独见公因流涕命取金
带送其家后忽梦如晦若平生以告玄龄彻御馔往祭之及小祥遣尚宫尉问其妻子国
府官佐亦不之罢恩礼始终无与比者后诏功臣世袭
改封莱国公初如晦与玄龄共政值天下新定台阁规模及典章文物率二人讨裁每议
政帝前玄龄必曰非如晦莫能决及如晦至亦卒用玄
龄策也盖玄龄善谋而如晦善断两人相需共济故唐世称良相必曰房杜云子构袭爵
官至慈州刺史次子荷尚城阳公主赐爵襄阳郡公与
太子承干谋反坐诛构以累贬死岭表弟楚客见孝友传如晦五世孙元颖自有传

杜淹

杜淹

如晦叔父淹字执礼开皇中与韦福嗣伪隐大白山谪江表赦还授承奉郎累御史中丞王世充僭号署少吏部亲近用事洛阳平不得调欲往事隐太子时封德彝典选以告房玄龄玄龄白秦王引为天策府兵曹参军文学馆学士杨文干反辞连太子归罪淹及王珪韦挺并流嶲州太宗知其诬及即位召为御史大夫封安吉郡公以淹多识典故诏东宫仪式簿领听淹裁订寻检校吏部尚书参预朝政表荐四十余人后皆知名尝荐郅怀道可用帝问故淹曰隋炀帝将幸江都众皆阿旨独怀道谏不可帝曰卿知怀道谏为是何不自言对曰臣位卑又知谏不听徒死无益帝曰卿仕世充位不卑矣何亦不谏对曰臣尝谏不见听耳帝曰世充悞谏卿何以得全淹不能对帝勉曰朕今任卿可以谏未答曰愿尽死淹历典台省贵重于朝而无清白名为世所讥贞观二年卒赠尚书右仆射谥曰襄子敬同袭爵官至鸿胪卿

△魏征

魏征字玄成魏州曲城人父长贤北齐屯留令征少孤贫有大志尤留意纵横之术隋乱诡为道士武阳郡丞元宝藏举兵应李密以征典书记密得宝藏书辄称善既闻征所为促召之因进十策密不能用密败从至京既久之未知名乃自请安辑山东擢秘书丞驰驿至黎阳与李绩书劝其早归绩计遂决因大发粟馈淮安王神通军窦建德陷黎阳征被获署起居舍人建德擒乃与裴矩西入关隐太子引为洗马甚礼之征见秦王功高阴劝太子早为计太子败王责之曰尔闲吾兄弟奈何征曰太子早从征言不死今日之祸【谨按通鉴辑览 御批魏征之对正如陈琳之对操所谓矢在弦上不得不发虽云各忠其主然岂得谓之善处人骨肉之闲者哉】王素器之引为詹事主簿即位拜谏议大夫封巨鹿县男时河北州县事建成元吉者多不自安征白帝曰不示至公人必思乱帝即命征往宣慰许便宜行事至磁州遇太子千牛李志安齐王护军李思行锢送京师征谓其副曰前官齐府旧人已有诏普原之今复执送志安等人谁不自疑吾属虽往必不信矣实时释遣志安等而后启闻帝甚悦由是日亲数引入卧内访天下事征亦自以为不世之遇展尽底蕴无所隐凡二百余奏无不剴切当帝心者拜尚书右丞兼谏议大夫有谮征私所亲者帝使温彦博按验无状彦博曰征为人臣不能远嫌疑而被飞谤亦可罪也帝使彦博让征且曰自后当存形迹征入奏曰臣闻君臣同心是谓一体岂有舍至公而反事形迹者若上下共由兹路邦

之兴丧未可知也帝为矍然曰吾悟矣征顿首曰愿陛下俾臣为良臣毋俾臣为忠臣帝曰忠良异乎对曰良臣稷契皋陶是也忠臣龙逢比干是也良臣臣主皆荣流祚永世忠臣家国并丧徒取空名帝曰善因问为君者何道而明何失而暗征曰君所以明兼听也所以暗偏听也尧舜明四目达四聪虽有共鯀不能惑秦二世偏听赵高梁武帝偏信朱异隋炀帝偏信虞世基天下已乱而三主不闻人君但能兼听则奸臣不能壅蔽下情通矣贞观三年迁秘书监参预朝政高昌王曲文泰入朝西域诸国皆欲因文泰遣使贡献帝令文泰使人厌怛纥千迎之征曰异时文泰入朝劳费已甚更加此辈何以堪之汉建武时西域诸置都护送侍子光武皆不许不以蛮夷敝中国也帝善其议时厌怛纥千已发遽追止之帝尝问羣臣创业守成熟难房玄龄谓创业难征谓守成难帝曰玄龄从我定天下冒百死遇一生故以创业为难征与我安天下念富贵之既溢恐骄怠之易生故以守成为难然创业之难既往矣守成之难方与公等慎之 【此条新书见玄龄传然帝意实与征合今改入征传】又尝叹曰今大乱之后其难治乎征曰大乱之易治犹饥者之易食也封德彝曰三代之后浇诡日滋秦任法律汉杂霸道皆欲治而不能岂能治而不欲征书生好虚论耳征曰五帝三王不易民而治顾所行何如尔桀纣为乱汤武代之皆身致太平若人渐浇诡不复返朴则今且为鬼魅矣德彝不能对至是天下岁断死刑二十九米斗三钱户阖不闭行旅不赍粮帝谓羣臣曰此魏征劝我行仁义之效也惜不令封德彝见之羣臣请封禅帝欲从之征不可帝曰公不欲封禅者功未高耶德未厚耶中国未安耶四夷未服耶年谷未丰耶符瑞未至耶征曰今虽有此六者然隋乱踰十年今稍又安未甚充实自伊洛抵海岱千里萧条若车驾东巡远夷皆当扈从恐示虚弱以启戎心且赏赉不赍百姓劳敝是崇虚名而受实害也事竟寢帝幸九成宫有宫御馆于漳川宫舍 【新书作舍围川宫下】 李靖王珪继至吏改馆宫御以舍之帝闻之怒诏并按之征曰靖等陛下腹心大臣宫人皇后扫除隶耳且大臣出外宣宗朝廷法式访问人闲疾苦必赖宫舍至宫人则供馈之外无所参承以此按吏恐骇天下耳目帝寢不问后宴丹霄楼酒中帝曰魏征每谏我不从我发言辄不应何也征曰臣以事有不可故谏若不从辄应恐遂行之帝曰姑应后谏若何征曰昔舜戒羣臣尔无面从退有后言若心知其非而口应陛下是即面从非稷契所以事尧舜也帝大笑曰人言魏征举动疏慢我但觉妩媚耳进爵郡公七年迁侍中尚书省滞讼不决者诏征平治征素不习法但存大体以情处断人皆悦服帝聘郑仁基女为

充华或言已许嫁矣征谏曰陛下处台榭则欲民有栋
宇食膏粱则欲民有菽粟顾嫔御则欲民有家室今仁基女已约婚而陛下取之岂为
民父母意耶帝大惊自咎命停册使加左光禄大夫进郑
国公十年以目疾频表辞位帝曰金之在矿未尝为宝及良冶锻而成器人始贵之朕方
自比于金以卿为良匠毋遽辞征恳请乃拜特进仍知
门下省事诏朝章国典参议得失文德皇后既葬昭陵帝即苑中作层观望之引征同升
征熟视曰臣眊昏不能见帝指示之征曰臣以为陛下
望献陵若昭陵臣固见之矣帝泣为毁观 【谨按通鉴辑览 御批苑中作观登而望
之必非一日之事征宜早进谏即秘不使征知其引
登使视之时亦当正谏乃谬为不见而有献陵昭陵之讥使太宗何以为人岂纯臣而宜
出此哉】 帝幸洛阳次昭仁宫多所谴责征曰隋惟责
不献食或供奉不精为此无限以至于亡陛下正宜兢惧戒约奈何令人悔为不奢乎若
以为足今不啻足矣以为不足万此宁有足耶帝惊曰
非公不闻此言征退又上疏言刑赏之本在乎劝善而惩恶帝王所与天下画一不以亲
疏贵贱而殊者也今之刑赏或由喜怒或由好恶昔州
犁上下其手而楚法敝张汤轻重其心而汉刑谬况以人君而意为高下民将何所昔其
手足乎顷者罚人或以供给不瞻或以人不从欲是乃
骄奢之渐非致治之道且我之所代实在有隋隋氏府库甲兵户口视今何若然隋据富
强而丧动之也我以贫寡而安静之也臣愿当今之动
静以隋为鉴则存亡治乱可得而知矣存亡之所在在节嗜欲省游畋息靡丽罢不急慎
偏听近忠厚迁便佞而已夫守之则易取之实难今既
得其所难岂不能保其所易乎帝宴羣臣积翠池酒酣各赋一事征赋西汉卒章曰终藉
叔孙礼方知皇帝尊帝曰征每事必约我以礼他日帝
从容问曰比来政治若何对曰陛下贞观之初导人使谏三年之后见谏者悦而从之比
一二年勉强受谏而终不平也帝曰何以验之曰陛下
初即位律师论死孙伏伽谏陛下赐以兰陵公主园直百万曰朕即位未有谏者故赏之
此导人使谏也后柳雄妄诉隋资论死戴胃奏罪当
徙执之四五陛下曰守法当如此此悦而从之也近皇甫德参言修洛阳宫劳人收地租
厚敛俗尚高髻盖宫中所化陛下恚曰德参欲使国家
不役一人不收一租宫人皆无发可乎夫人臣言事不激切不能动主听激切则近谤时
陛下虽从臣言赐帛罢之意终不平此难于受谏也帝
曰非公无能道此人苦不自觉耳帝作飞仙宫征上疏曰隋有天下三十余年恃其富强
不虞后患驱天下役万物以自奉养民不堪命致殒匹
夫之手圣哲乘机拯其危溺今宫观台榭尽居之矣奇珍异物尽收之矣姬姜淑媛尽侍

于侧矣若能鉴彼之所以亡念我之所以得焚宝衣毁
广殿安处卑宫德之上也若成功不毁仍其旧制德之次也不惟王业之艰难增饰旧基
甘心侈靡使人不见德而劳役是闻斯为下矣夫以暴
易暴与乱同道则人怨神怒灾害并至而能以身名令终者鲜矣是岁大雨谷洛溢毁民
居帝于是废明德宫及飞仙宫之玄圃苑赐被水者征
又尝上疏曰人主承天景命莫不殷忧而道着功成而德衰岂取之易而守之难乎盖在
殷忧则竭诚以待下既得志则纵情而傲物耳君人者
诚能见可欲则思知足以自戒将有作则思知止以安人念高危则思谦冲而自牧惧满
溢则思江海下百川乐游盘则思三驱以为度恐懈怠
则思慎始而敬终虑壅蔽则思虚心以纳下想谗邪则思正身以黜恶恩所加则思无因
喜以谬赏罚所及则思无因怒而滥刑总此十思宏兹
九德简能而任之择善而从之则智者尽其谋勇者竭其力仁者播其惠信者效其忠又
何必劳神苦思下代庶职者哉已复上疏曰传曰同言
而信信在言前同令而行诚在令外然则言而不行言不信也令而不从令不诚也自王
道休明历十余载仓廩愈积土地益广然而道德不日
博仁义不日厚何哉由待下之情未尽诚信虽有善始之勤而无克终之美故便佞之徒
得肆其功谓同心为朋党谓告讦为至公谓强直为擅
权谓忠谏为诽谤至于窃斧生疑投杼致惑妨化损德无甚于斯且今将致治则委之君
子事有得失或访之小人待君子则敬而疏待小人则
轻而狎狎则言无不尽疏则情或不通是小人常操毁誉之权而君子终处危疑之地也
夫谓之善人矣复虑其有不可信何异直木而疑其影
之曲乎人君诚令君子小人是非不杂善善而恶恶审罚而明赏则小人绝其佞邪君子
自强不息无为之化何远之有帝手诏嘉纳他日宴羣
臣帝曰贞观以前闲关草昧从朕定天下玄龄功也贞观之后纳忠进谏为国家长利唯
征而已亲解佩刀以赐二人帝尝问羣臣征与诸葛亮
孰贤岑文本曰亮才兼将相非征可比帝曰征履蹈仁义欲致君尧舜虽亮何以加时上
封事者众言或不当帝欲加谴征曰古者立谤木欲闻
己过封事其谤木之遗乎且所言是有益于国所言非无损于事宜恣其所陈帝悦皆劳
遣之薛万均破高昌还或言私其妇女帝命质讯征曰
使大将军与亡国妇人对辨帷薄之私实则所得者轻虚则所失者重矣帝遽止十三年
阿史那结社率作乱云阳石然自冬至五月不雨征上
疏极言曰臣奉侍帷幄十有余年陛下许臣行仁义之道守俭约之节顷年以来渐不克
终其端有十陛下贞观初清净寡欲今则遣使万里市
骏马访珍怪一也贞观初护民如子今则托言百姓无事则易骄劳役罔恤二也贞观初

所为唯恐不利物今则惟恐不便身虽忧人之言不绝
于口而乐身之事实切于心三也贞观初斥小人亲君子今则敬君子而远之狎小人而
近之四也贞观初不贵异物不作无益今则难得之货
并进玩好之营不息五也贞观初求士如恐不及今则任情好恶谗佞得行六也贞观初
无田猎毕弋之好今则晨出夕返驰骋为乐七也贞观
初遇下有礼羣情上达今则外官奏事颜色不接时或诘其细过忠款莫伸八也贞观初
孜孜治道常若不足今则长傲纵欲无事兴兵亲狎者
阿旨疏远者畏威谏诤无闻九也贞观初频年霜旱民无逃亡今则疲于徭役关中尤甚
设岁有不登岂尚能如前日之窳帖十也今旱燠之灾
远被郡国凶丑之孽起于毂下愿陛下恐惧振兴以上答天戒书奏帝曰朕闻过矣愿改
之以终善道乃列疏为屏障仍录付史官厚赐之帝遣
使者至西域立叶护可汗 【通鉴作沙钵罗叶护可汗西突厥之长也】 未还复遣使
赍金帛往诸国市马征曰今立可汗未定即使市马彼
必以为意在马不在立可汗可汗必不甚怀恩诸国且谓中国薄义重利昔汉文时有献
千里马者赐道里费还之光武时有献者以驾鼓车陛
下凡事必法三代今奈何出孝文光武下乎帝乃止时太子承干失德魏王泰有宠中外
颇有疑议帝患之谓侍臣曰今忠蹇无踰魏征我遣傅
太子用绝天下之望即拜太子太师征以疾辞诏答曰汉太子以四皓为羽翼我之用公
即此意也虽病可卧护之十七年 【按旧书拜太子
太师上书十六年下即云其年称绵憊是以征之卒亦在六年也新书添此三字与通鉴
所书合】 疾甚征家无正寝帝命辍小殿材构之并赐
素褥布被以从所尚令中郎将宿其第动静辄以闻药膳赐遗相继帝亲临问屏人语终
日乃还后复与太子至征第征加朝服拖绅帝抚之流
涕指衡山公主将以妻其子叔玉谓曰公强视新妇征不能谢是夕帝梦征若平生及旦
卒帝临哭为之恻赠司空相州都督谥曰文贞给羽葆
鼓吹班剑陪葬昭陵将葬其妻裴氏辞曰征素俭约今用一品礼仪物褻大非征志乃以
布车载柩帝登苑西楼望哭亲撰碑文并为书石帝后
临朝谓侍臣曰朕闻以铜为镜可正衣冠以古为镜可知兴替以人为镜可明得失今魏
征逝朕亡一镜矣比使人索其家得半藁曰天下之人
有善有恶用善人则国安用恶人则国乱公卿之内情有爱憎爱憎之闲所宜详慎爱而
知其恶憎而知其善去邪勿疑任贤勿贰邦可兴矣朕
恐不免斯过卿辈可书于笏知则必谏也征状貌不逾中人然有志胆进谏虽逢盛怒神
色不改天子亦为霁威议者谓贲育不能过尝上冢还
奏曰闻陛下有关南之行既办而止何也帝曰畏卿嗔故中撤耳帝晚年数经略四夷征

每侍宴奏破陈乐辄俯首不视至庆善乐则谛观之其
意盖以讽隋氏之乱典章湮散征奏引诸儒校定四部书图籍粲然复备又以小戴礼编
次不伦作类礼二十篇太宗览而善之录藏秘府帝思
征不已尝登凌烟阁观其昼像赋诗伤悼闻者嫉之初征荐杜正伦侯君集才任宰相及
正伦以罪黜君集谋逆诛人遂指为阿党又有言征录
前后谏疏示史官褚遂良者帝益不悦遂停叔玉尚主并仆所撰碑顾其家衰矣其后帝
伐高丽不能成功军还怅然曰魏征在不使吾有此行
也使以少牢祠征墓复所仆碑而厚恤其家徽四子叔玉叔琬叔璘叔瑜叔玉袭爵官至
光禄少卿神龙初以其子膺绍封叔璘礼部侍郎武后
时为酷吏所杀叔瑜豫州刺史【旧史作潞州刺史】善草隶子华及甥薛稷并传其
法华开元初为太子右庶子征五世孙蕃【按宰相
世系表征子璘生殷殷生明明生冯冯生蕃实六世孙】自有传

钦定续通志卷二百八

●钦定续通志卷二百九 列传九

列传

唐【九】

○唐九

王珪 薛收【元超 元敬稷】马周 李大亮 戴胄【至德】

刘洎【乐彦玮】 崔仁师【湜 液澄】

王珪

薛收

马周

李大亮

戴胄

刘洎

崔仁师

△王珪

王珪字叔玠梁太尉僧辩之孙北齐乐陵太守顓之子世居郿性恬澹交不苟合开
皇末为治礼郎季父颇【隋书文学传作■】与汉
王谅作乱珪亡命南山者十余年高祖入关李纲荐为世子府咨议参军东宫建累迁中
允甚被礼遇太子与秦王有隙帝责珪不能辅导流嶠
州太子死秦王即位召为谏议大夫帝尝曰正主御邪臣不能治正臣事邪主亦不能治
唯君臣同德则海内安朕虽不明幸诸公数谏正致太
平珪进曰古者天子有诤臣七人今陛下开圣虑纳刍蕘臣处不讳之朝愿罄其狂瞽帝

称善因敕自今宰臣及三品以上官入阁谏官辄随之
封永宁县男迁黄门侍郎二年进侍中尝入见有美人侍侧本庐江王瑗姬也帝指之曰
庐江不道杀其夫而纳之能不亡乎珪避席曰陛下谓
庐江是耶非耶帝曰杀人而取其妻卿何问是非对曰昔郭公善善不能进恶恶不能退
故亡今陛下不知庐江所以亡而此妇人犹在侧窃以陛下为是之也帝嗟美其言帝使祖孝孙教宫人乐不称旨被让珪及温彦博进曰孝孙雅
士陛下使教女乐又譙责之天下将谓轻士帝怒曰卿等何附下罔上耶彦博拜谢珪独不拜曰陛下不以臣不肖置之枢近责以忠効今所言
非私而陛下疑臣是陛下负臣臣不负陛下帝默然明日语房玄龄曰朕昨责王珪等今甚悔之公等勿愆是不言也时珪与房玄龄李靖温彦博戴胄魏征同辅政帝尝因侍宴谓曰卿识鉴清通尤善谈论自玄龄以下宜悉加品藻且自谓孰与诸子贤对曰孜孜奉国知无不为臣不如
玄龄才兼文武出将入相臣不如靖敷奏详明出纳惟允臣不如彦博济繁治剧众务毕举臣不如胄以谏诤为心耻君不及尧舜臣不如征至激浊扬清嫉恶好善臣于数子亦有微长帝深以为然
玄龄等亦服为确论进爵郡公七年坐泄禁中语左迁同州刺史明年召为礼部尚书寻兼魏王泰师王见珪常先拜珪亦以师道自居王问珪以忠孝荅曰陛下王之君父能尽忠孝可以立身成名矣王曰愿闻所习珪曰汉东平王
苍称为善最乐愿王志之其子敬直尚南平公主时帝女下嫁不行见舅姑礼珪曰主上动循礼法吾当受公主谒见岂为身荣将以成国家之美耳遂与其妻坐堂上令公主执笄行盥馈仪其后公主有舅姑者礼皆如之十三年卒年六十九帝素服举哀别次悼惜久之赠吏部尚书谥曰懿珪临官务举大纲不苛察事寡嫂尽礼抚孤侄如其子然俭不中礼既贵不立家庙为有司所劾帝为立庙以愧之初隐居时与房玄龄杜如晦善其母李氏曰儿必贵然未知所与游者何如人
后玄龄等过其家母窥见大惊敕具酒食尽欢谓珪曰二客皆公辅才汝贵无疑 【杜甫集有送表侄王砮诗述其事甚详篇首云我之曾祖姑尔之高祖母乃谓珪之妻杜氏后又云秦王时在座真气惊户牖则太宗亦与珪旧识不独玄龄等矣与新书本传所载颇异附记于此】 长子崇基袭爵官至主爵郎中少子敬直以尚主拜驸马都尉坐交太子承干徙岭表崇基子齐望茂时齐望子旭见酷吏传茂时子焘性至孝为徐州司马母有疾弥年不解带数从高医游遂穷其术因作书号外台秘要世咸宝之历给事中邳郡太守 【新书不载崇基又以焘旭为珪孙今从旧书及宰相世系表改旧书不载焘事则仍从新书】

△薛收

薛收字伯褒蒲州汾阴人隋内史侍郎道衡子出继从父孺年十二能属文以道衡死非罪不肯仕闻高祖举兵遁入首阳山将应之通守尧君素觉之迎其母置城中不得发及君素东连王世充遂挺身入关房玄龄亟言之秦王即召见问方略收对合旨授府主簿判陕东道大行台金部郎中时方讨王世充收为书檄或马上占辞该敏如宿构窦建德以兵授世充诸将请退军以观形势收献策曰世充府库充实所将皆江淮精锐但乏粮食故为我持建德自将远来亦当尽其精锐若纵之至此两寇合纵转河北之粟以馈洛阳则战争方始混一无期今宣分兵以守洛阳深沟高垒勿与战王亲率猛锐先据成皋以逸待劳必可克也建德既克世充自下不过二旬两主就缚矣王从之遂擒建德降世充军还授天策府记室参军从平刘黑闥封汾阴县男寻以本官兼文学节学士与房玄龄杜如晦特蒙殊礼受心腹之寄又尝上书谏猎王荅曰览所陈知卿之成我也武德七年寝疾王问使相望于道又命舆疾至府亲举袂抚之论叙平生感慨流涕卒年三十三王哭之恸与其从兄子元敬书令善抚其子遣使吊祭其后遍图学士像叹其早亡不得与及即位语房玄龄曰薛收在当以中书令处之贞观七年赠定州刺史永徽中再赠太常卿陪葬昭陵有集十卷子元超

薛元超

薛元敬

薛稷

薛元超

元超【按宰相世系表名振字符超】九岁袭爵及长好学善属文尚巢刺王女累太子舍人高宗即位擢给事中数上书陈得失帝嘉纳之转中书舍人弘文馆学士省中有盘石道衡为侍郎时常据以草制元超每见辄流涕母丧起授黄门侍郎检校太子左庶子所荐任希古高智周郭正一王义方孟利贞郑祖玄邓玄挺崔融等十余人并有时名拜东台侍郎李义府流嶲州旧制流人不得乘马元超为请坐贬简州刺史又坐与上官仪文章款密流嶲州上元初赦还拜正谏大夫三年迁中书侍郎同中书门下三品帝校猎温泉诸蕃酋长并执弓矢从元超以为非宜上疏谏帝纳之元超既以文学政理被遇帝深重其才尝谓曰长得卿在中书固不藉多人也永隆二年拜中书令兼左庶子帝幸东都命辅太子监国太子数射猎元超上疏谏帝知之遣使慰谕厚赐之时政出武后因阳暗乞骸骨加金紫光禄大夫致仕卒年六十二赠秦州

都督陪葬干陵有文集四十卷子曜亦以文学名善张易之官至正谏大夫

薛元敬

元敬隋选部郎迈之子少与收及族兄德音齐名【按德音仕王世充东都平被诛】世称河东三凤武德中为秘书郎秦王召为天策府参军直记室又与收同为文学馆学士时与收房杜处心腹之寄深相托附而元敬畏远权势未尝申款如晦叹曰小记室不可得而亲不可得而疏王为太子除舍人时国事总于东宫而元敬专掌文翰号为称职卒于官

薛稷

稷字嗣通道衡曾孙【按宰相世系表道衡子大年生行成行成生仁伟仁伟生稷当作五世孙】举进士累迁中书舍人景龙末为谏议大夫昭文馆学士好古博雅尤工隶书外祖魏征家多藏虞褚旧迹稷锐精模仿笔态遒丽遂以书名天下书又绝品睿宗在藩喜之以其子伯阳尚仙源公主及即位迁太常少卿帝以锺绍京为中书令稷讽使让因入言于帝曰绍京虽有功然出自胥史恐难副具瞻之望绍京遂改户部尚书而稷以黄门侍郎参知机务后与崔日用争事上前迭相訾毁罢为左散骑常侍历礼部尚书太子少保窦怀贞诛稷以知本谋赐死伯阳以尚主封安邑郡公别食实封四百户稷死贬晋州员外别驾寻徙岭表自杀伯阳子谈尚玄宗女常山公主授光禄员外卿俄暴卒

△马周

马周字宾王博州茌平人【按宰相世系表父瑗本郡户曹从事】少孤贫好学尤精诗传落拓不为州里所敬武德中补州助教沈饮不治事数为刺史达奚恕诮让乃去客曹汴闲又为浚仪令崔贤所辱遂感激西游至新丰宿逆旅主人方供他客不顾周周命酒一斗八升悠然独酌见者异之至京师舍中郎将常何家贞观三年【新旧书皆作五年通鉴考异云据实录在三年按太宗本纪三年六月以早诏文武官言事而五年无之今从通鉴】诏百官言得失何武人不知书周为陈二十余事皆切事务帝怪问何何曰此非臣所能家客马周教臣客忠孝人也帝即召之闲未至遣使者四辈敦趣及谒见与语大悦令直门下省明年拜监察御史奉使称职帝嘉何知人赐帛三百匹是岁周上疏曰伏见大安宫在宫城西制度方之紫极尚为卑小四方观听有所不足愿筑雉堞起门楼务从高显以昭圣孝又诏二月幸九成宫窃惟太上皇春秋高陛下宜朝夕视膳今所幸宫去京三百里非能旦发夕至也假如太上皇思感欲即见陛下何以赴之且此行本为避暑是太上皇尚留热处而陛下自逐凉处温清之道深所未安又诏宗室功臣并袭刺史夫尧舜之父尚

有朱均之子假或童駿嗣职骄侈貽殃是所谓爱之适以伤之也臣谓宜赋以茅土畴以户邑必有材行随器授官既可免于尤累亦得终其福祿又陛下即位以来宗庙之享未尝亲事将使一代之史不书皇帝入庙何以垂示来叶又王长通白明达本自乐工韦盘提斛斯正惟解调马虽术踰侪辈止可厚赐金帛以富其家今乃超授高爵遂使驹子倡人得与朝士比肩臣窃耻之帝深纳其言除侍御史十一年又上疏曰自古明王圣主虽因人设教而大要节俭于身恩加于是以卜祚遐长祸乱不作今百姓承丧乱之后比于隋时纔十分一而徭役相望兄去弟还远者五六千里春秋冬夏略无休时四五年来百姓颇有嗟怨之言且京师及益州诸处营造供奉器物并诸王妃主服饰皆过丽臣闻昧旦丕显后世犹怠陛下少处人闲知百姓辛苦前代成败目所亲见尚犹如此而皇太子生长深宫不更外事此圣虑之所当忧也往贞观初率土荒俭一匹绢纔易斗米而天下帖然者百姓知陛下忧怜之故人人自安无谤讟也五六年来频岁丰稔一匹绢易粟十余斛而百姓咸怨以为陛下不忧怜之何则今营为者多不急之务故也陛下诚欲厉精为政不烦远采上古但及贞观初则天下幸甚臣窃观汉晋以来乱天下者未尝不在诸王皆由树置失宜不预为节制前车已覆而后车不改辙也今百姓极少而诸王甚多宠遇之恩有过厚者臣之愚虑不唯恃恩骄矜而已且帝子身食大国何患不富而岁别优赐曾无限极里语曰贫不学俭富不学奢言自然也大圣创业当制长久之法使万代奉行臣闻临天下者使百姓安乐在刺史县令尔县令既众不能皆贤但州得良刺史可矣古者郡守县令皆选贤德欲有所用必先试以临人或由二千石高第入为宰相今独重内官而县令刺史顾轻其选又刺史多武夫勋人或京官不称职始出补外其以德行才术擢者十不能一百姓未安殆在于此疏奏帝称善久之擢给事中转中书舍人周善敷奏明辩周密中事机帝每曰我暂不见周即思之岑文本曰马君论事会文切理无一言可增损听之纚纚令人忘倦然鸢肩火色腾上必速恐不能久耳迁治书侍御史检校晋王府长史王为太子拜中书侍郎兼太子右庶子十八年迁中书令犹兼庶子帝征高丽留辅太子监国定州还以本官摄吏部尚书赐飞白书宠之周病消渴弥年帝亲为调药遣太子问疾疾甚取所上章奏悉焚之曰彰君之过求身后名吾不为也卒年四十八帝为举哀赠幽州都督陪葬昭陵初帝遇周厚周颇自负为御史时遣人以图购宅众以其素无费皆窃笑它日曰有佳宅直二百万周遽以闻诏有司给直并赐奴婢什物由是人乃悟先是京师晨暮传呼以警众后置鼓

代之品官旧服黄紫二色后三品服紫四五品朱六七
品绿八九品青城门入由左出由右飞驿以达警急纳居人地租宿卫大小番直截驿马
尾城门卫舍守捉士月散配诸县各取一以防其过皆
周建白自周亡帝思之甚将假方士求见其仪形高宗即位加赠尚书右仆射高唐县公
垂拱中配享高宗庙廷子载咸亨中为司列少常伯 【
旧书作吏部侍郎按司列少常伯即吏部侍郎改名旧书纪其旧耳】 与裴行俭分掌选
事有名时称裴马终雍州长史

△李大亮

李大亮京兆泾阳人父充节隋朔州总管武阳公 【新书云祖琰魏度支尚书不载
其父旧书称为琰曾孙祖纲魏南岐州刺史父充节
云云与宰相世系表合今从之】 大亮有文武才隋末署庞玉行军兵曹与李密战被擒
同辈百余人皆死贼帅张弼独异大亮释与语遂定交
高祖入阙大亮自归授土门令岁饥盗起大亮招流亡抚贫弱卖所乘马稍资给之劝垦
田岁大稔闲出击盗所至辄平秦王行北境下书劳之
赐马五乘帛五十段顷之胡寇大至大亮度不能拒乃单马诣贼营召其豪帅谕以祸福
皆感悟请降大亮杀所乘马与之食步而返县境以清
超拜金州总管府司马时王弘烈据襄阳 【世充兄子】 诏大亮安抚樊邓进兵下十
余城迁安州刺史复使徇广州行次九江辅公祐反以
计擒其将张善安贼围猷州进击破之迁越州都督贞观初改交州封武阳县男召拜太
府卿复出为凉州都督尝有名鹰台使至讽献之大亮
密表曰陛下久绝畋猎而使者求鹰信陛下意乃乖昔旨如其擅求则使非其人帝报书
曰有臣如此朕复何忧赐胡瓶一及荀悦汉纪曰悦议
论深博极为政之体公宜寻味之颡利败亡北方诸部相率内属有大度设拓设泥熟特
勒及七姓种落尚在伊吾诏以大亮为西北道安抚大
使仍峙粮碛口以赈其饥大亮上疏曰臣闻欲绥远者必先安近中国天下根本四夷犹
枝叶也残本根厚枝叶而欲求安未之有也迺者突厥
倾国入朝陛下置于内地去京师不远此非久安之计也一人来降赐物五匹袍一领首
帅悉授大官糜厚禄亦非中国之利也今伊吾虽已臣
附远在蕃碛臣以为诸称藩请附者宜羁縻受之使居塞外则行虚惠而受实福矣西河
积困蕃夷重以隋乱残耗已甚未宜劳役臣请停招慰
使边人得就农田帝纳其计八年为剑南道巡省大使讨吐谷浑为河东道行军总管与
李靖等俱出北道涉青海观河源破贼于蜀浑山俘获
而还进爵为公拜左卫大将军晋王为太子兼右卫率又兼工部尚书大亮每直宿必通
宵假寐帝劳之曰公在直我寝便安十八年帝幸洛阳

诏副房玄龄留守玄龄称其有王陵周勃之节可任大事甚重之俄寝疾帝亲调药驰赐遗表请罢辽东之役又言京师宗庙所在愿深留意表成叹曰吾闻礼男子不死妇人之手命屏左右言终而卒年五十九将殓无珠玉为含唯贮米五石布三十端帝哭为恸赠兵部尚书秦州都督谥曰懿陪葬昭陵大亮性忠谨外若不能言内刚烈不可干廷诤是非无所隐挠家居虽妻子不见情容事兄嫂尽礼位通显自奉俭甚在越州写书数百卷及去留之都督署初破辅公祐赐奴婢百口谓曰汝辈多衣冠子女吾何忍以为贱隶悉纵之帝闻咨美更赐俚婢二十后破吐谷浑复赐奴婢百五十口悉以遗其亲戚葬宗族无后者三十余丧尝念张弼脱其死求报之弼为将作丞匿不见一日遇诸途持之泣悉推家财与之弼不受乃言于帝曰臣得事陛下张弼力也愿悉臣官爵授之帝擢弼至代州都督世并贤之歿后所育孤姓为大亮行服如父者十五人兄子道裕【按宰相世系表道裕父名大通】贞观末为将作少匠尝代韦挺督运幽州【见挺传】后以议张亮狱受知擢刑部侍郎【详亮传旧书不载议狱事而云永徽中为大理卿】

△戴胄

戴胄相州安阳人性贞正有干局隋末为门下录事苏威裴知咸重之越王侗立于东都以为给事郎胄说王世充尊辅王室世充阳善之俄受九锡胄又切谏不听出为郑州长史秦王拔武牢得之引为府士曹参军封武昌县男贞观元年迁大理少卿长孙无忌尝被召不解佩刀入东上阁封德彝论监门校尉不觉当死无忌误带罚铜胄驳曰校尉与无忌罪均臣子于尊极不称误虽误亦死陛下若录无忌功非宪司所决若据法罚铜未为得衷【新书末二句作若罚无忌杀校尉不可谓刑按胄初言止论无忌罚铜之非法不当独杀校尉意尚在下文】帝令复议德彝奏如初帝将从之胄又曰校尉缘无忌致罪法当轻若皆误不得独死由是校尉亦免时选者盛集或有诈伪资荫者诏许自首不首则罪至死俄有犯者胄据法断流帝曰朕诏不首者死而今断流卿卖狱耶胄曰陛下当即杀之非臣所及今既付所司臣不敢亏法帝曰卿自守法而令我失信耶胄曰法者所以布大信于天下言者一时喜怒所发耳陛下以一朝之忿将杀之既知不可而寘于法此忍小忿存大信也帝感悟从其言【按此即魏征传所云柳雄妄诉隋资事但彼云罪当徙而此云据法断流稍异】胄前后犯颜执法多类此累迁尚书左丞二年胄上疏言隋开皇时令天下人节级输粟名曰社仓故终文帝世得免饥馑今宜令王公下及众庶计所垦田顷亩每至秋熟尽令出粟

及稻麦各纳所在立为义仓帝从之以其家贫赆钱十万仆射萧瑀免封德彝卒帝调胄曰尚书总国纲维失一事天下且受其弊今以令仆委卿当称朕望胄性明敏处事速且当议者谓武德来左右丞无能及者拜谏议大夫与魏征更日供奉三年进民部尚书兼检校太子右庶子杜如晦遗言请以选举委胄由是检校吏部尚书然好抑文学奖法吏时以寡学为訾四年罢吏部尚书以本官参预朝政进爵郡公帝将修复洛阳宫胄上疏谏曰比见关中河外尽置军团重以九成作役余丁无几乱离甫定户口单弱一人就役举家废业且七月以来霖潦过度岁之丰歉尚未可知洛阳宫殿足蔽风雨稍待数年成之未晚帝览奏为罢役胄每奏必削草是以外鲜知之帝尝谓左右曰胄于我非肺腑亲然事之机切无不闻唯其忠槩所激耳七年卒帝为举哀赠尚书右仆射追封道国公谥曰忠诏虞世南撰其碑有司为立庙胄无子以兄子至德为后

戴至德

戴至德

至德干封中累迁西台侍郎同东西台三品转户部尚书仍知政事父子十数年闲继为宰相世谥其荣俄迁尚书右仆射时刘仁轨为左每遇申诉冤滞者辄啖以美言至德必先究诘本末理直者密为表奏终不显己之与夺由是时誉多归仁轨号为解事仆射尝更日听讼有姬诣省至德已受牒姬曰初以为解事仆射今乃非是复取牒至德笑还之人服其长者或以问至德荅曰庆赏刑罚人主之柄凡为人臣岂得与人主争哉帝闻叹美之仪凤四年卒赠开府仪同三司并州大都督谥曰恭

△刘洎

刘洎字思道荆州江陵人初为萧铣黄门侍郎略地岭表得五十余城未还而铣败遂以城自归授南康州都督府长史贞观七年擢给事中封清苑县男转治书侍御史时尚书省诏敕稽壅洎言尚书万机本贞观初未有令仆职并务繁左丞戴胄右丞魏征应事弹举无所回挠百司虔肃不敢懈比者勋亲在位势力相倾虽欲自强先惧器谤郎中则唯事谄禀尚书又不敢断决管辖玩弛纲纪不振今宜精选左右丞两司郎中使皆得人非唯救旷滞之弊亦足矫趋竞之习未几拜尚书右丞洎健于职省事复治十七年除散骑常侍寻摄黄门侍郎太宗好持论与公卿言古今事必辨诘究难洎谏曰帝王之与臣度圣哲之与庸愚等级相悬势不伦拟陛下降慈旨假柔颜虚心听纳犹恐羣臣惴缩不敢自进况以神机天辩饰辞援古以排其议哉夫多记损心多语耗气初虽不觉久必为弊且今之治安皆陛下力行所致欲求长久非由辩博但当

忘爱憎慎取舍若贞观之初可矣帝优诏答之太子初立洎上书曰太子宗祧是系善恶之习兴亡在焉不勤于始将悔于终是以晁错上书令通政术贾谊献策务知礼教今太子春秋鼎盛而不务学业不亲正人此臣所未喻也古者问安而退以广敬也异官而处以远嫌也闲者太子一入侍逾旬不出师傅寮案备员而已非所谓爱之也伏愿授以良书娱之嘉客闻所未闻见所未见储德愈光羣生之福也帝于是敕洎与岑文本马周递日直东宫帝常怒苑西监穆裕诏斩于朝堂太子骤谏帝悦曰朕初得魏征朝夕进谏征亡刘洎岑文本马周褚遂良继之儿在吾膝前熟吾悦谏故有今日之言此习以性成也十八年迁侍中帝一日谓侍臣曰朕今欲闻己过卿等为朕言之长孙无忌李绩杨师道咸曰陛下以盛德致太平臣等不见其过洎曰诚如无忌等言然顷上书人不称旨或面加穷诘恐非所以广言者路帝曰卿言善朕能改之帝征高丽诏兼太子左庶子检校民部尚书与高士廉马周辅太子监国定州帝曰以卿辅太子社稷安危所寄宜深识朕意洎曰陛下无忧大臣有罪臣谨即行诛帝以其妄发怪之谓曰卿性疏而果恐以此败宜诫慎以保终吉十九年帝还在道不豫洎入谒出语同列曰疾势如此圣躬可忧色甚悲惧或谮之帝曰洎言国家事不足忧但当辅幼主行伊霍故事大臣有异志者诛之自定矣上以为然诏赐自尽 【按刘洎之死新旧书并云褚遂良谮之且云帝病愈召洎问状洎引马周自明帝问周周对与洎同遂良执证不已乃赐死通鉴改为或谮于帝不言遂良亦不载引马周自明等语纲目从之通鉴考异云此事中人所不为遂良忠直之臣且素无怨仇何至如此盖许敬宗恶遂良忠修实录时以洎死归咎遂良耳纲目记载孙甫等辨语大意皆同今十九年以下并从通鉴纲目】 将死请纸笔欲有言有司不与帝后知之有司皆得罪显庆中子宏业诣阙讼冤言为褚遂良诬死李义府助之帝问近臣给事中乐彦玮曰若雪洎则先帝用刑为不当矣乃止文明初诏复官爵

乐彦玮

乐彦玮

乐彦玮字德珪长安人以给事中忧去起唐州刺史累西台侍郎同东西台三品干封初改大司宪卒赠齐州都督 【旧书作泰州】 子思晦武后时为鸾台侍郎兼检校天官尚书同凤阁鸾台平章事为酷吏所杀 【按乐彦玮旧书自有传而新书则附洎传又不载其子思晦事今仍新书而兼取旧书思晦事附于末】

△崔仁师

崔仁师定州安喜人武德初应制举授管州录事参军陈叔达荐才任史官迁右武卫录事参军预修梁魏史贞观初擢殿中侍御史青州有男子谋逆支党捕系满狱诏仁师按覆以情讯之坐止魁首十余人余皆原纵孙伏伽谓曰雪免者众谁肯让死倘临决事变奈何仁师曰治狱主仁恕岂有知其枉而不申自为身谋哉及敕使覆讯囚皆叩头曰崔公仁恕无见枉者请伏罪由是知名迁度支郎中尝奏移用费数千名手不执本太宗怪之令杜正伦赍本使仁师对唱无一谬帝奇之校书郎王玄度注尚书毛诗诋孔郑旧学请废之行己所注诏诸儒议博士以下不能诘仁师条其不合大义者上之遂报罢十六年迁给事中有司以律反逆者兄弟没官为轻诏八座议咸言汉魏晋谋反皆夷三族请改从死仁师曰父子天属从诛足累其心此而不恤何爱兄弟帝从仁师议遂不改后密请立魏王泰为太子失帝旨左迁鸿胪少卿稍进民部侍郎及征高丽诏副韦挺知海运又别知河南运事仁师以漕路远恐所输不时至以便宜发近海租赋充之坐运夫亡命不以闻除名帝还至中山起为中书舍人检校刑部侍郎幸翠微宫上清暑赋以讽帝称善二十二年迁中书侍郎参知机务会有伏阁诉冤者仁师不奏帝怒以为罔上流连州【新旧书本纪皆同旧书本传作龙州】永徽中起简州刺史卒子挹户部尚书挹子湜

崔湜

崔液

崔澄

崔湜

湜字澄澜少举进士累迁考功员外郎时桓彦范等秉政畏武三思憚引湜为耳目使伺之湜见帝疏彦范等而亲三思反以彦范等谋告之骤迁中书舍人彦范等既徙岭外又说三思速杀之以绝人望且举外兄周利贞往使于是彦范等皆死景龙二年迁兵部侍郎时上官昭容屡出外宅湜托附之俄拜中书侍郎检校吏部侍郎同平章事与郑愔同典选赃贿狼藉为李尚隐所劾贬江州司马上官与安乐公主从中护之改襄州刺史未几入为尚书左丞韦庶人临朝复以吏部侍郎同中书门下三品睿宗立出为华州朝史又拜太子詹事初景龙中湜献策开南山新路以通商州水陆之运役徒数万死者十三四而夏潦冲突道竟不通至是论功加银青光禄大夫太平公主引为同三品先天元年拜中书令玄宗在东宫数至其第意甚款密而湜阴附公主时人危之门客陈振鹭献海鸥赋以讽湜称善而不自悛帝将诛萧至忠等召湜示

腹心弟澄谓曰上有所问慎无隐湜不从至忠等诛坐私侍太平公主流襄州宫人元氏称尝与湜谋进酖于帝追至荆州赐死初湜在襄州与
谯王数相问遗王败湜当死刘幽求张说护之得免及为相陷幽求岭表讽都督周利贞杀之不克又与太平公主谋逐说其天性险毒如此与
弟液澄从弟莅 【按宰相世系表莅澄皆挹子液乃挹兄擢之子】 并以文翰居要官每宴集自比东晋王谢尝曰吾门入仕历官未尝不为
第一丈夫当先居要路制人岂能默默受制于人哉以是进趣不已以及于败死时年纔四十三

崔液

液字润甫工五言诗湜尝叹曰海子 【液小名】 我家龟龙也官至殿中侍御史坐湜当流亡命郢州作幽征赋以见意遇赦还卒子论
有吏干干元中屡典郡以治行称后刺同州为黜陟使庾何按免议者不直何复授衢州德宗以旧族耆年擢大理卿卒

崔澄

澄本名滌玄宗改焉帝在藩与同里居相亲善及即位用为秘书监出入禁中与诸王侍宴不让席性滑稽善辩帝恐漏禁中语以慎密字
亲署笏端累加金紫光禄大夫封安喜县子卒赠兖州刺史

钦定续通志卷二百九

●钦定续通志卷二百十 列传十

列传

唐 【十】

○唐十

岑文本 【羲 长倩格辅元】 虞世南 李百药 【安期】 褚亮

【刘孝孙 李玄道李守素】 姚思廉

【璿班】 令狐德棻 【峘 邓世隆 顾胤李延寿 李仁实】

岑文本

虞世南

李百药 【李安期】

褚亮

姚思廉

令狐德棻

△岑文本

岑文本字景仁邓州棘阳人家江陵父之象仕隋为邯鄲令尝被讼不得伸文本年十四请司隶理冤辨对哀畅无所诎众异之命作莲花

赋下笔立成合台嗟赏父冤遂白萧铣据荆州召为中书侍郎主文记河闲王孝恭平荆州其下欲大掠文本说孝恭曰隋室无道四海延颈以望真主萧氏君臣决策归命者诚欲去危就安若纵兵剽虏恐阻江岭以南向化之心孝恭称善遽止之署文本别驾进讨辅公佑召典军书复署行台考功郎中贞观元年除秘书郎兼直中书省帝行籍田礼又元日宴羣臣上籍田三元颂二篇文本才名既着李靖复荐之擢中书舍人初武德中诏诰及军国大事皆颜师古草定至文本尤为敏速或众务丛遽敕吏六七人泚笔口占授之须臾悉成师古罢遂代为中书侍郎专与机密封江陵县子谷洛水溢文本上封事言甚切要魏王泰有宠盛修第宅文本上疏劝崇节俭且陈嫡庶之分谓宜有损抑帝并嘉之赐帛三百段十八年进中书令明年从伐高丽凡资粮器械簿书悉以委之文本夙夜勤力精神顿竭容止失常帝忧之曰文本与我同行恐不与我同返至幽州暴病帝临视流涕卒年五十一是夕帝闻严鼓声曰文本逝所不忍闻命停之赠侍中广州都督谥曰宪陪葬昭陵有集六十卷文本兴自书生每怀撝损平生故人虽微贱必与抗礼居室卑陋无茵褥帷帐之饰事母以孝闻抚弟侄恩义甚笃帝每称其忠谨亲信之晋王为太子大臣多兼宫官帝以命文本辞曰臣守一职尚惧满盈不愿希恩东宫请一心事陛下帝乃止始为中书令归家有忧色母问之对曰非勋非旧责重位高是以忧有来贺者辄曰今受吊不受贺也或劝其营产业文本叹曰吾汉南一布衣徒步入关所望不过秘书郎县令耳今无汗马劳以文墨位宰相奉稍已过尚何殖产业耶口未尝言家事财物皆委弟文昭主之文昭任校书郎多交轻薄帝知之谓文本曰卿弟多过朕将出之文本曰臣弟少孤母所锤念若无此弟是无老母也泣下呜咽帝感其意而止唯召文昭诫约后竟无过孙羲从子长倩

岑羲

岑长倩

格辅元

岑羲

羲字伯华【按宰相世系表父名曼倩】第进士累迁太常博士伯父长倩得罪贬郴州司法参军迁金坛令时弟仲翔仲休并为令各有名号江东三岑擢汜水令韦嗣立荐之且言惟长倩为累后曰苟材何拘拜天官员外郎于是坐亲废者皆得进迁中书舍人中宗时敬晖欲上表请削诸武封王者众畏三思不敢为草羲竟操笔为之词义劲切由是下迁秘书少监进吏部侍郎掌选者皆以贿闻羲独守正时议美之

韦庶人弑帝擢右散骑常侍同中书门下三品睿宗立罢为陕州刺史【按通鉴韦后时以羲为中书侍郎同平章事睿宗立诸相罢为刺史独不及羲至七月始罢为右散骑常侍与本传异】再迁户部尚书先天元年【新书本传作景云中误今从本纪及宰相表】复召同三品进侍中封南阳郡公初太子重俊之变冉祖雍诬帝预谋赖羲与萧至忠保护得免羲监修中宗实录自着其事帝见之下诏褒美仍厚赐之时羲家门贵盛居清要者数十人叹曰物极则反可以惧矣然竟不能有所抑退遂坐预太平公主逆谋伏诛籍其家

岑长倩

长倩文本兄文叔子少孤为文本所鞠爱永淳中累官兵部侍郎同中书门下平章事垂拱初自夏官尚书迁内史知夏官事俄拜文昌右相封邓国公武后革命好符瑞长倩颇有陈奏又请改皇嗣姓为武氏后许之赐实封五百户天授二年加特进辅国大将军会张嘉福王庆之等请立武承嗣为太子长倩谓皇嗣在东宫不宜有此议与格辅元不署奏请切责嘉福等由是大忤诸武意罢为武威道行军大总管征吐蕃未至召还下狱来俊臣又胁长倩子灵源诬辅元欧阳通等数十人同谋反【新书言胁诬长倩不言其子灵源数十人作数十族】并斩于市五子皆赐死发其先墓睿宗立追复官爵以礼改葬

格辅元

格辅元者汴州浚仪人父处仁【旧书作伯父德仁】隋剡县丞与同郡王孝逸繁师元靖君亮郑祖咸郑师善李行简卢协等皆擅辞学号陈留八俊辅元举明经累迁御史大夫地官尚书【新书本传作中丞今从宰相表】同凤阁鸾台平章事以忤武氏诛子遵亦举明经为太常寺太祝亡命匿中牟神龙初出诉父冤擢赞善大夫辅元兄希元恪州司法参军章怀太子尝召令与洗马刘讷言等注解后汉书先辅元卒

△虞世南

虞世南越州余姚人陈太子中庶子荔之子出继叔中书侍郎寄故字伯施性沈静寡欲与兄世基同受学于顾野王精思十余年不倦文章慕徐陵笔法则得之沙门智永声名籍甚天嘉中荔卒世南毁不胜丧文帝召为建安王法曹参军时寄陷于陈宝应世南常衣布食蔬至寄还始释布噉肉至德初除西阳王友陈灭与世基入隋炀帝在藩与秦王俊交辟之大业中累迁秘书郎帝虽爱其才然嫉其峭直弗甚用也世基以佞敏日贵盛自奉奢肆而世南躬贫约不改素业宇文化及已弑帝因杀世基世南

抱持号泣请代不得自是哀毁骨立从至聊城为寔建
德所获署黄门侍郎秦王擒建德引为府参军转记室尝命写列女传于屏风时无本暗
疏之不失一字王为太子迁太子中舍人即位拜员外
散骑侍郎【旧书作转著作郎】兼弘文馆学士时世南已衰老屡乞骸骨不许迁太
子右庶子固辞改秘书监【旧书先为秘书少监七
年进秘书监】封永兴县子世南貌儒谨外若不胜衣而中抗烈议论持正帝尝曰朕与
世南商略古今有一言之失未尝不恹恹其诚恳若此
八年进封县公会陇右山崩大蛇屡见山东江淮大水帝忧之以问世南世南历举古山
崩蛇见事唯修德可弭至阴霖为患恐有冤狱宜省系
囚帝然之遣使赈饥民申听讼狱多所原宥后有星孛于虚危历氏百余日【按天文志
贞观八年八月甲子有星孛于虚危及元柁乙亥不
见自甲子至乙亥止十二日与此互异未知孰是】帝以问羣臣世南曰昔齐景公时彗
见晏婴以为高台深池严刑峻罚故上天见诚景公修
德而彗灭臣愿陛下勿以功高而自矜勿以太平久而自怠慎终如始彗虽见不足忧也
帝曰诚然吾年十八起义兵二十四平天下未三十即
大位自谓古来拨乱之主无我若者故负而矜之上天见变其为是乎昔始皇平六国炀
帝富有四海皆以骄逸一朝而败吾何得不戒耶高祖
崩诏山陵准汉长陵故事务从隆厚程限既迫功役劳弊世南谏曰古圣王薄葬其亲非
不孝也深思远虑以厚葬适足为亲累故不为耳愿陛
下依白虎通为三仞之坟节损制度刻石陵旁藏书宗庙为子孙之法书奏未报又上疏
曰汉家即位之初便营陵墓近者十余岁远者五十年
今以数月之程谋数十年之事恐人力有所不逮时议者亦颇言宜奉遗诏从节俭于是
下其书诏有司详议制度稍裁省焉帝尝作宫体诗命
世南和辞曰圣作诚工然体非雅正恐此一传天下风靡帝曰朕试卿耳帝数出猎世南
以为言帝纳之帝每称世南有五绝一德行二忠直三
博学四文辞五书翰十二年致仕授银青光禄大夫弘文馆学士如故禄赐防合并同京
官职事卒年八十一帝举哀别次赠礼部尚书谥曰文
懿陪葬昭陵帝手诏魏王泰曰世南于我犹一体也拾遗补阙无日忘之盖当代名臣人
伦准的今其云亡石渠东观中无复人矣后为述古诗
一篇叹曰锺子期死伯牙不复鼓琴朕此诗将谁示耶敕褚遂良即其灵坐焚之居数岁
帝梦见之进谗言若平生翌日下制厚恤其家集三十
卷子昶终工部侍郎

△李百药【李安期】

李百药字重规规定州安平人隋内史令德林子幼多病祖母赵因以百药名之七岁

解属文父友陆义等尝造德林宴集有读徐陵文者至籍琅邪之稻不得其事百药进曰春秋传邠人籍稻杜预注邠国在琅邪义等大惊异之开皇初授太子通事舍人兼学士被谗谢病去十九年袭爵安平公授礼部员外郎定五礼律令阴阳书初炀帝镇扬州召不赴及即位夺爵为桂州司马官废还乡里大业九年以步兵校尉戍会稽

【新书不言为步兵校尉今依旧书增改】 管崇乱城守有功帝见其名憎之授建安郡丞至乌程江都难作时沈法兴李子通杜伏威递相吞灭百药在江南数被伪署最后为伏威行台郎中高祖遣使招伏威百药劝朝京师伏威行至历阳中悔欲杀百药饮以石灰酒因大利而宿疾皆除伏威又兴辅公柘书命杀之赖王雄诞保护得免公柘反署吏部侍郎或请百药与公柘同反帝怒及公柘平得伏威所与公柘令杀百药书意稍解乃贬涇州司户 【旧书作配流涇州】 秦王至涇州与语说之即位召拜中书舍人封安平县男二年除礼部侍郎时方议封建百药作论盛言侯伯之害守宰之利上之帝纳其言而止四年授太子右庶子太子戏嫖无度百药作赞道赋以讽帝见之谓曰卿述古储贰事以诫太子甚善固朕所望也赐彩物三百段迁散骑常侍行左庶子又迁宗正卿进爵为子久之固请致仕帝尝与偕赋帝京篇叹其工手诏曰卿何年之老而才之壮齿之宿而意之新乎二十二年卒年八十四谥曰康百药名臣子才行为世推重侍父母丧还乡徒跣数千里容貌癯瘠者累年奖荐后进禄赐与亲党共之翰藻沈郁尤长于诗所撰齐史行于世子安期安期亦幼慧七岁能属文百药贬桂州遇盗将刃之安期跪泣请代盗舍去贞观初为符玺郎累除主客员外郎高宗即位迁中书舍人龙朔中为司列少常伯参知军国事帝屡责侍臣不能进贤安期进曰天下至广不为无贤但比来公卿有所荐进皆以朋党被劾是以人争噤默以避谤议若陛下忘其亲讎旷然受之塞谗毁之路谁敢不竭忠以上闻哉帝纳其言寻检校东台侍郎同东西台三品出为荆州大都督长史卒谥曰烈自德林至安期三世皆掌制诰孙羲仲又为中书舍人

△褚亮

褚亮字希明杭州钱塘人父玠陈秘书监亮少警敏博览图史经目辄记年十八诣徐陵陵与语异之后主召见使赋诗江总等皆服其工累迁尚书殿中侍郎入隋为东宫学士迁太常博士炀帝将改宗庙之制亮请依古七庙太祖高祖各一殿法周文武二祧与始祖而三余则分室而祭始祖二祧不从迭毁未及行坐与杨玄感善贬西海郡司户时博士潘徽亦贬威定主簿亮与俱至陇山徽死亲敛瘞之后为薛举黄门

侍郎举灭秦王深加礼接赐乘马帛二百段即授王府文学帝冬猎尝亲格虎亮疏谏帝纳之秦王每征伐亮常在军中宴赏必预从容讽议多所裨益贞观中累迁散骑常侍封阳翟县侯后致仕归帝征高丽子遂良从手诏慰勉及疾赐医药中使候问相继卒年八十八赠太常卿陪葬昭陵谥曰康长子遂贤雍王友次子遂良自有传初武德四年秦王于宫城西起文学馆以待贤俊于是大行台司勋郎中杜如晦记室考功郎中房玄龄于志宁军谘祭酒苏世长天策府记室薛收文学褚亮姚思廉太学博士陆德明孔颖达主簿李玄道天策仓曹参军李守素王府记室参军虞世南参军蔡允恭颜相时著作郎 【旧书作著作佐郎】 摄记室许敬宗薛元敬太学助教盖文达军谘典签苏勔并以本官为学士七年收卒召东虞州录事参军刘孝孙补之分为三番递宿阁下每暇日辄引见访以政事讨论坟籍又命阎立本图像而亮为之赞各题名字爵里号十八学士藏之书府当时艳之谓之登瀛州

刘孝孙

李玄道

李守素

刘孝孙

刘孝孙荆州人祖贞周石台太守孝孙大业末为王世充弟辩行台郎中辩降众散独孝孙攀号送之郊贞观六年迁著作佐郎吴王友为王撰古今类序诗苑四十卷历咨议参军擢太子洗马未拜卒

李玄道

李玄道陇西人居郑州父行之随都水使者玄道隋时为齐王府属后为李密记室密败又为王世充著作佐郎世充平秦王引为府主簿贞观初累迁给事中封姑臧县男王君廓为幽州都督出玄道为长史佐之每持正议裁其不法君廓掠良家女为婢遗玄道玄道遣去君廓不说后入朝玄道寓书房玄龄君廓疑其谋已遂反 【事详君廓传】 玄道坐流蕲州起为常州刺史在职清简诏褒之赐缙帛以银青光禄大夫禄致仕归卒子云将官尚书左丞

李守素

李守素赵州人王世充平秦王引为天策府仓曹参军通姓氏学世号肉谱 【旧书作时号为行谱】 虞世南与论人物始言江左山东尚相酬对至北地则笑而不言叹曰肉谱定可畏也许敬宗曰仓曹此名非雅宜有以更之世南曰昔任彦升通经称五经笥今以仓曹为人物志可乎时渭州刺史李淹亦明谱学与守素埒守素贞观初卒

△姚思廉

姚思廉名简以字行 【旧书作姚思廉字简之】 父察陈吏部尚书入隋官秘书丞北绛公自吴兴迁京兆遂为万年人思廉少受汉书于父尽传其业为陈会稽王主簿入隋授汉王府参军以父丧免服除补河闲郡司法书住初察修梁陈二史未就将卒以属思廉思廉表父遗意有诏听续炀帝又诏与起居舍人崔祖浚修区宇图志迁代王侍读高祖入长安府僚皆散独思廉侍侧兵将上殿思廉呵曰唐公起义本安王室若辈不得无礼众始却立阶下帝义之听扶王至顺阳阁泣拜去武德初授秦王府文学王讨徐圆朗时思廉在洛阳王尝语隋事叹曰姚思廉冒白刃以明大节古人所难以彩三百段遗之王为太子迁洗马即位改著作郎弘文馆学士诏与魏征共撰梁陈书思廉因采谢灵运诸家及顾野王所修旧史成梁书五十卷陈书三十卷上之以卒父业诏赐杂彩五百段加通直散骑常侍帝以藩邸旧人凡政事得失许密闻思廉亦展尽无所隐帝幸九成宫思廉谏甚切直帝虽不从以帛赐之九年拜散骑常侍封丰城县男卒赠太常卿谥曰康陪葬昭陵子处平官通事舍人处平子璿班 【班通鉴作珽旧书思廉传同本传及新书并作班】

姚璿

姚班

姚璿

璿字令璋少孤力学永徽中举明经补太子宫门郎累迁中书舍人封吴兴县男武后时擢夏官侍郎坐从弟敬节从李敬业起兵贬桂州长史后方以符瑞自神璿取山川草木名有武字者类上之以为应国姓后大喜累擢文昌左丞同凤阁鸾台平章事永徽后左右史唯对仗承旨仗下谋议不得与闻璿言史不可阙请仗下所言军国政要责宰臣自撰号时政记以付史官从之时政有记自璿始坐事降司宾少卿延载初拜纳言证圣初加秋官尚书明堂火后欲避正殿应天变璿言此人火非天火且明堂布政之所非宗庙比不宜贬损后遂御端门大酺宴羣臣因造天枢着己功德命璿为使铜铁不足赋民闲农器益之璿以功赐爵一级寻封嵩山造明堂璿尽预其役加银青光禄大夫大食献师子璿谓是兽非肉不食路远多费请停其献从之九鼎成后欲涂以黄金璿奏鼎者神器贵质朴不待外饰后亦止契丹李尽忠犯塞副武三思为榆闕道安抚大使坐累贬益州长史属吏贪暴璿纠撻无所贷降玺书劳之新都丞朱待辟坐赃应死所善浮屠理中谋杀璿据剑南有密告后者诏璿穷治璿深探其狱捕逮数千人狱具后遣宋元爽霍献可覆治无所省释凡没入

五十余族流徙者什八九冤号载路御史袁怒已劾之
诏勿治召拜地官冬官两尚书致仕卒赠越州都督谥曰成

姚班

班笃学有立志擢明经历六州刺史皆有政绩数被褒赐累封宣城郡公迁太子詹事兼左庶子时太子重俊稍失道班凡四上书谏其一
言内置作坊诸工伎得入宫禁或言语内出或事状外通恐小人因为诈伪有玷盛德望
悉出宫内造作付所司其二言圣贤以简素为贵皇王
以菲薄为德愿留心恭俭损省玩好其三言前世东宫门合往来皆有簿籍今惟司门宣
令恐奸伪乘之因缘增损近吕升之代署宣敕赖殿下
摘发其奸以后墨令及覆事并请内印画署以防诈伪其四言经所以立行修身史所以
谕识成败今司经无学士供奉无侍读宜面请其人俾
奉劝讲太子称善然不能用其言及败索宫中得其书中宗嘉叹于是宫臣皆得罪班独
擢右散骑常侍迁秘书监睿宗立拜户部尚书卒始班
曾祖察尝撰汉书训纂后之注汉书者多窃取为己说班着绍训以发明旧义云

△令狐德棻

令狐德棻宜州华原人其先焮焮着姓父熙隋鸿胪卿德棻博贯文史大业末授药
城长属乱不就官淮安王神通据太平宫起兵署总管
府记室高祖入关以为大丞相府记室武德初为起居舍人迁秘书丞帝尝问男妇冠髻
比来何以高大对曰冠髻君象也晋末君弱臣强江左
士女衣小而裳大宋武帝受命君德尊严衣冠随亦变改此近事之验也帝然之时大乱
之后经籍散亡德棻请帝购天下遗书置吏补录不数
年图典略备又建言近代无正史梁陈齐文籍犹可据周隋事多缺遗宜及今耳目尚相
及早为论次且本朝二祖功业皆在周时不可使后世
无传帝从之于是诏萧瑀王敬业殷闻礼主魏封德彝颜师古主隋崔善为孔绍安萧德
言主梁裴矩祖孝孙魏征主齐窦璡欧阳询姚思廉主
陈陈叔达庾俭及德棻主周谕选数年竟不能就而罢贞观三年复诏撰定以魏书已有
魏收魏澹二家不复修【魏澹旧书作魏彦】更令
德棻与岑文本崔仁师次周李百药次齐姚思廉次梁陈魏征次隋而房玄龄总监其事
修史之议实自德棻发之书成赐绢四百匹迁礼部侍
郎兼修国史累进爵彭城县子转太子右庶子太子废坐除名召拜雅州刺史又坐事免
会修晋史房玄龄奏起之同事十八人德棻为首体制
多取决焉除秘书少监永徽初复为礼部侍郎弘文馆学士监修国史迁太常卿帝尝问
宰臣及学士以王道霸道之分当孰为先后德棻对曰
王任德霸任刑三代纯用德而王秦专用刑而霸汉杂用之魏晋以下两失之如用之则

王道为先而最难帝曰今政以何为要对曰古者为政

清心简事为本今天下无虞年谷丰稔惟薄赋敛省征役为要帝悦其言厚赐之迁国子祭酒崇贤馆学士进爵为公寻以金紫光禄大夫致仕

干封元年卒年八十四谥曰宪时又有邓世隆顾胤李延寿李仁实者皆以史学称当世德棻五世孙岨

令狐岨

邓世隆

顾胤

李延寿

李仁实

令狐岨

岨博学有口辨天宝末进士会禄山乱隐南山豹林谷杨绾数从之游及为礼部侍郎修国史荐岨自华原尉拜右拾遗兼史职累迁起居

舍人撰玄宗实录时起居注散失岨哀掇诏策备一朝之遗然拙于弃取又多漏略不称良史代宗时以刑部员外郎判南曹迁司封郎中知制

诰兼史馆修撰德宗立诏元陵制度务极优厚岨举刘向论昌陵事以谏请诏有司遵遗制从俭约优诏褒荅从之初岨之得吏部尚书刘晏有

力岨德之时杨炎为侍郎每分阙以善者奉晏恶者与炎炎心不平然未甚憾也建中初岨为礼部侍郎炎执政炎故出杜鸿渐之门为其子求

弘文生以属岨岨愿得炎手署炎不疑与之岨即奏言宰相迫臣以私帝以诘炎炎具陈所以帝怒曰此奸人欲杀之炎苦救乃贬衡州别驾迁

刺史李泌执政召拜太子右庶子复为修撰性介且愎人人与为怨寻坐守衡州时冒前刺史户口为己最贬吉州别驾又迁刺史齐映以故相

观察江西岨轻其后进及按部至当迎谒岨遂不以属礼见映怒摘其举奏前刺史过失无状不宜治郡贬衢州别驾在衢十年顺宗立召为秘

书少监未至卒初岨尝受诏撰代宗实录未就会贬诏听在外成书 【按在外修史自张说始其后沈传师修宪宗实录亦授此例见唐会要

】 元和中其子太仆丞丕上之乃赠工部尚书

邓世隆

邓世隆相州人大业末王世充兄子太戍河阳引为宾客秦王攻洛阳遣书谕太世隆为报书不逊洛阳平变姓名亡命白鹿山贞观初召

授国子主簿与崔仁师慕容善行刘顓庾安礼敬播俱为修史学士世隆负夙罪不自安太宗遣房玄龄谕曰尔为人作书各忠其主耳朕为天

子岂甘心匹夫耶毋有后疑改著作佐郎历卫尉丞初帝以武功定天下晚始向学多属

文赋诗世隆上疏请加集录帝不许世隆又采隋代事
为东都记三十卷迁著作郎卒

顾胤

顾胤苏州吴人父览隋秘书学士胤永徽中累迁起居郎兼修国史以撰太宗实录
劳加朝散大夫弘文馆学士又以撰武德贞观两朝国
史加朝请大夫封余杭县男终司文郎中有汉书古今集二十卷行于时子琮武后时以
天官侍郎同凤阁鸾台平章事

李延寿

李延寿相州人父太师为窦建德侍郎坐徙西会州后赦还 【太师事迹新旧书皆
不载今从延寿自序补入】 尝谓宋齐梁陈魏齐周
隋天下分隔南方谓北为索虏北方谓南为岛夷其史于本国详他国略往往毁誉失实
思欲改正拟吴越春秋编年以备南北史未竟而卒延
寿贞观中补太子典膳丞崇贤馆学士预修梁陈等五代史志及晋书转御史台主簿兼
修国史延寿既数与论譔所见益广乃追终先志北史
自魏登国元年讫隋义宁二年南史自宋永初元年讫陈祯明三年凡八代共百八十篇
表上之其书颇有条理删落繁辞过本书远甚时人见
其年少位下不甚称也迁符玺郎兼修国史卒延寿又尝撰太宗政典三十卷调露中高
宗观之嘉其直笔赐其家帛五十段藏之秘阁

李仁实

李仁实魏州顿邱人官至左史着格论通历等书行于时
钦定续通志卷二百十

●钦定续通志卷二百十一 列传十一

列传

唐 【十一】

○唐十一

苏世长【良嗣 弁】 韦云起 孙伏伽 张玄素

苏世长

韦云起

孙伏伽

张玄素

△苏世长

苏世长京兆武功人父振周宕州刺史建威县侯世长十余岁上书周武帝帝问读
何书以孝经论语对令举其词对曰孝经曰为国者不
敢侮鰥寡论语曰为政以德帝善之使卒学虎门馆父死王事有诏袭爵世长号踊不自

胜帝为改容入隋为长安令数条上便宜大业末为都
水少监督漕上江会炀帝被弑发丧恸闻道路王世充僭号以为行台右仆射与豆卢行
褒辅兄子弘烈镇襄阳高祖与二人有旧数遣使谕降
行褒杀之洛阳平始与弘烈来归帝诛行褒而责世长世长曰古帝王受命比之逐鹿岂
有获鹿后忿同猎者问争肉罪耶今陛下应天顺人安
可忘管仲雍齿事且武功旧人乱离后死亡畧尽唯臣幸存若杀之是绝其类也帝笑释
之授五山屯监引见玄武门与语平生调之曰卿自谓
佞耶直耶对曰愚且直帝曰然则何为背世充归我曰世充平天下为一臣智穷力屈乃
归陛下使世充不死臣据汉南犹为勅敌帝大笑复嘲
之曰卿名长意短口正心邪世长曰名长意短诚如圣旨口正心邪未敢奉诏昔窦融以
河西降汉十世封侯臣举山南归国唯蒙屯监帝悦拜
谏议大夫从猎涇阳大获帝谓左右曰今日畋乐乎世长曰不满十旬未为乐也帝色变
既而笑曰狂态发耶对曰为臣计则狂为陛下计忠矣
时帝将遂猎武功世长谏曰武功新经突厥寇暴陛下未之救恤又猎其地百姓何以堪
不听侍宴披香殿酒酣进曰此殿炀帝作耶帝曰卿言
似忠实诈岂不知此殿我所营对曰臣实不知但见倾宫鹿台非受命帝王节用爱人者
所为且陛下武功旧宅纔庇风雨时以为足今承隋之
后正宜刘奢侈复素朴今乃即其宫加雕饰欲易其乱得乎帝深然之后历陕州长史天
策府军谘祭酒文学馆学士贞观初使突厥与颉利争
礼不受赂遗朝廷称之出为巴州刺史舟败溺死世长有机辩浅于学嗜酒简率无威仪
初在陕邑里犯法不能禁乃引咎自挝于都街伍伯嫉
其诡鞭之见血世长不胜痛呼而走人笑其不情子良嗣

苏良嗣

苏弁

苏良嗣

良嗣高宗时为周王府司马王年少举事不法良嗣数匡谏且绳府属之不职者帝
异之迁荆州长史宦者采竹江南将蒔上苑所过横暴
至荆良嗣囚之上书言状帝下语慰奖取竹弃之徙雍州长史时关内大饥人相食良嗣
为政严盗发三日必获人不敢犯武后临朝迁工部尚
书拜纳言封温国公留守西京赏遇尤渥尚方监裴匪躬请鬻苑中蔬果收其利良嗣曰
公仪休一鲁相犹能拔葵去织岂有天子而卖蔬果与
人争利遂止入为文昌左相同凤阁鸾台三品遇僧怀义于朝怀义偃蹇良嗣叱左右批
其颊曳去武后闻之戒曰阿师第于北门出入南衙宰
相往来勿犯也载初元年罢左相加特进仍知政事与韦方质素不协方质坐事当诛辞

引良嗣后办其非良嗣悸谢不能兴舆还第卒赠开府
仪同三司益州都督良嗣在荆州时州有河东寺本后梁萧誉为兄河东王誉建也良嗣
曰江汉间与河东何与奏易之人恨其少学云子践言
官太常丞为酷吏所构贬死岭南追削良嗣官爵籍其家神龙初复赠司空以践言子务
元袭温国公终邠王府长史

苏弁

弁字符容世长五世从孙第进士授奉天主簿德宗出狩县令在府官属惶惧欲遁
弁曰昔肃宗幸灵武新平安定二郡守坐避匿斩君知
之乎众乃定车驾至储侍毕给帝嘉之朱泚平累擢仓部郎中判度支案裴延龄死以度
支郎中副知度支事度支有副自弁始弁通学术吏事
精明承延龄后平赋缓役略去烦苛人颇赖之久之迁户部侍郎仍判度支改太子詹事
旧制詹事班在太常宗正卿下窦参卑之徙置河南太
原尹下弁造朝辄就旧位被劾诏原之坐前以腐粟给边贬汀州司户参军兄袞时为赞
善大夫冕京兆士曹参军皆坐贬袞以年老失明听还
冕尝集本朝事着会要四十卷既贬有荐其才者亦追还然竟不用弁后起滁州刺史卒
弁聚书至二万卷手自校定当时称与秘府埒判度支
时方旱州县有贞元八年前逋米三百八十斛人亡数在奏请出以贷贫民至秋而偿
诏可当时罪其欺罔云 【案旧书弁与兄袞冕并在
儒学传今从新书附世长传后】

△韦云起

韦云起京兆万年人隋开皇中以明经补符玺直长尝奏事文帝前令言外事不便
者时柳述侍侧云起即奏述性奢侈未更事特以主壻
故握兵要议者谓陛下官不择贤亦不便之大者帝顾述曰云起之言汝药石也可师之
仁寿初诏百官举所知述荐云起授通事舍人大业初
改谒者契丹寇营州诏云起汉突厥兵讨之启民可污发骑二万授节度云起分为二十
营营相去一里四道并进下令闻鼓行闻角止非公使
毋走马己而纒斤一人犯法 【纒斤旧书作纒千】 斩以徇于是酋长皆膝行而进莫
敢仰视契丹本事突厥不虞有他云起既入其境使突
厥诈云诣柳城与高丽交易令营中敢言有隋使者斩去贼营百里伪引而南夜还陈迟
明掩击之获男女四万以女子及畜产之半赐突厥余
将入朝而尽杀其男子炀帝大喜擢治书侍御史因劾奏虞世基裴蕴怙宠放命四方有
变不以闻闻不以实朝议以贼少发兵不多数致败北
请付有司论罪郑善果奏云起訾大臣毁朝政妄作威权左迁大理司直帝幸江都请告
归高祖入关上谒长乐宫授司农卿封阳城县公武德

初进上开府仪同三司判农圃监时议将讨王世充云起上言京邑初平物情未附频年饥馑寇盗尚多梁师都北连突厥尤为腹心之患若舍此东讨恐奸人乘虚为祸不若戢兵务农先安关中从之寻命总幽冀以北九州岛兵御突厥累迁遂州都督转益州行台兵部尚书仆射窦轨数奏生獠反冀得集兵以威众云起每执不从而窦轨亦宣言云起交通生獠规利由是有隙云起弟庆俭庆嗣并事隐太子太子死诏轨子驰驿报轨轨疑云起有变先设备而后告之云起不信曰诏安在轨曰公建成党今不奉诏同反明矣遂杀之初云起师博士王颇 【即隋书文学传中王颇】 尝言韦生识悟富贵可自致然疾恶太甚恐不得其死讫如言子师实官太子少詹事封扶阳郡公师实子方质武后初为凤阁侍郎同凤阁鸾台平章事迁地官尚书尝有疾武承嗣兄弟往候方质据床自若或曰倨见权贵且速祸方质曰吉凶命也丈夫岂能折节近戚以苟免哉俄为酷吏所构流儋州卒 【按新书本纪方质亦被杀】 籍其家神龙初复官
△孙伏伽

孙伏伽贝州武城人仕隋为万年县法曹武德初上言三事其一谓隋之所以失天下者以不闻其过也穷奢极欲使天下肝脑涂地户口减耗盗贼日滋而朝臣不敢言向使开不讳之路选贤授能赏罚得中人人乐业谁能摇动者乎陛下勿以唐得天下之易遂忘隋失天下之不难今闻陛下即位之明日有献鹞者受而不却卢牟子献琵琶张安道献弓箭并蒙赏劳陛下所少者岂此物哉其二谓百戏散乐并非正声隋末始见崇用近太常假民闲褻襦五百将以衣妓工待五月五日玄武门游戏臣以为非治子孙之谋论语云放郑声今散妓是也臣愚请并废之其三谓性相近习相远今太子诸王左右不可不择夫不义无赖及驰骋射猎歌舞声色慢游之人望以拾遗补阙必不能也泛观前代子孙不孝兄弟离闲莫不由左右乱之愿选贤才澄僚友之选帝自即位未有谏者至是得伏伽疏大悦超擢治书侍御史赐帛三百匹仍下诏奖其诚恳以风励羣臣时军兴赋敛重伏伽数请厘损帝谓裴寂曰隋为无道主骄臣谄上不闻过下不尽忠以至于亡我今不然平乱任武守成任文比每虚心接待冀闻谏言然唯李纲能尽忠欵孙伏伽可谓诚直余则仍踵敝风岂朕所望哉王世充窦建德平大赦天下既又欲徙其支党伏伽谏曰臣闻王言无戏故书曰尔无不信朕不食言陛下制诏曰常赦不免皆原之是非直赦有罪乃亦与天下更新辞也何以世充建德部下赦后又欲迁之书曰歼厥渠魁胁从罔治今世充尚免其下何辜往者天下未平自须应机制变今四方已定设法当与天下共守之若自为

不信欲人之信岂可得哉臣谓贼党于赦合免者宜一切加原又请置谏官帝皆纳之太宗即位封乐安县男迁大理少卿帝数出马射伏伽谏曰臣闻天子之居禁卫九重动则出警入蹕此非徒示尊严为社稷生人计也比闻陛下走马射帖殆非所以导养圣躬垂宪后代帝悦曰卿能言朕非朕能改之后坐奏囚误失免官寻起为刑部郎中累大理卿司农市木槿倍直与民右丞韦惊劾吏隐没下大理讯伏伽曰缘官市贵故民直贱臣见司农识大体不见其罪帝悟顾惊曰卿不逮伏伽远矣久之出为陕州刺史致仕显庆三年卒

△张玄素

张玄素蒲州虞乡人仕隋为景城县户曹窦建德陷景城将杀之县人千余号泣请代曰此清吏杀之是无天也建德命释缚署治书侍御史不拜闻江都之变始为建德黄门侍郎建德平授景州录事参军太宗即位召问政对曰自古未有如隋乱者岂非君自专法日乱乎夫人主身决庶务纵十中其五信善矣其如五之不中者何一日万几积其失不亡何为若上贤右能使百司各善其职则高居深拱谁敢犯之隋末盗起争天下者不十数人余皆保城邑以归命有道是背上怙乱者鲜特人主不能安之而挺之乱耳陛下近鉴危亡日慎一日虽尧舜何以加帝曰善拜侍御史迁给事中贞观四年诏发卒修洛阳宫干阳殿以备巡幸玄素上疏陈五不可谓东都未有幸期前事土木诸王出藩又当营构科调烦一也向平东都层观广殿皆撤毁之今复兴筑顿乖初意二也国无兼年之储又兴不急之务【时尚未幸东都故云不急之务新书云陛下每言巡幸者不急之务徒焉劳费似失其意今从旧书】劳役过度怨讟将起三也百姓承乱离之后财力凋尽三五年闲恐未平复而又重耗其力四也汉高祖将都洛阳娄敬一言即日西驾以洛阳形胜不及关内也陛下化凋弊之俗为日尚浅詎可东巡以摇人心五也又言隋家营殿伐木豫章二千人挽一材以铁为毂不数里辄坏别数百人赍毂随之终日行不三十里计一材费数十万工揆其余可知已昔阿房成秦人散章华就楚众离干阳毕功隋人解体今民力未及隋日而役残创之人袭亡国之轨臣恐陛下之过甚于炀帝矣帝曰卿谓我不如炀帝何如桀纣对曰若此役不息亦同归于乱耳帝顾房玄龄曰洛阳朝贡道均朕营之将以便四方百姓今玄素言如此后虽当往露坐亦无伤也即诏罢役赐玄素彩二百匹魏征闻之叹曰张公论事遂有回天之力可谓仁人之言哉历太子少詹事迁右庶子时太子承干事游畋不悦学玄素上书曰古者三驱非以教杀除民害也今反以猎为娱岂不损盛德哉书曰事

不师古匪说攸闻然则明道在学古学古在师训孔颖
 达奉诏劝讲宜数延问更博选贤杰朝夕与相观摩日知所无月无忘所能斯善矣凡人
 性不胜情耽惑成乱忠信既塞君道乃亏古人云勿以
 恶小不去善小不为祸福之来皆根于初初尚不慎终将焉保太子不纳又上书曰周公
 大圣人犹握发吐餐以延白屋况下于周公者哉殿下
 睿质已隆尚须充以学力孔颖达赵弘智等皆宿德鸿儒兼达政要望数召见讲论古今
 必多裨益至雕虫小技之流祇可闲取以代博弈耳骑
 射游畋酣歌戏玩虽悦耳目实秽心神夫心为万事主动而无节则乱臣恐殿下败德之
 源在此矣十四年擢银青光禄大夫行左庶子太子久
 不见宾友玄素曰宫中祇妇人耳不知如樊姬者有几主上妙简贤才以为寮佐乃经时
 不得一见将谁为纳海哉太子嫉其数谏遣户奴夜以
 马挝击之几死又尝闻宫中击鼓叩阁正言太子出鼓对玄素破之既而败德日闻玄素
 又上书谏举周宣帝为太子时失德终致覆国及隋太
 子勇骄侈被逸见废事为近事之鉴且言主上以父子之亲诏殿下资用不为节限 【诏
 在贞观十六年】 乃诏未六旬而用踰七万骄奢无
 艺孰有过此龙楼望苑为工匠之肆所施与者非游手杂色则图画雕镂之人既阙问安
 视膳之宜又无爱学好道之实在外已有此失隐密之
 中尚可胜计哉书入太子怒遣刺客伺之俄太子废玄素坐除名十八年起潮州刺史徙
 邓州高宗时致仕卒始玄素与孙伏伽在隋皆为令史
 帝尝问玄素历官所由玄素深自愧耻褚遂良谏曰臣闻圣主不戏言于臣陛下以玄素
 任三品佐储闱岂宜复对羣臣穷其门户使置身无地
 乎帝曰朕亦悔之伏伽虽广坐陈说往事无所隐焉

钦定续通志卷二百十一

●钦定续通志卷二百十二 列传十二

列传

唐 【十二】

○唐十二

韦挺【待价 武万石】 杨弘礼【弘武纂】 刘德威【审礼延嗣】 赵弘
 智 权万纪【怀恩】 阎立德【立本 知微
 用之】 蒋俨 韦机 姜师度【强循】 张知睿

韦挺

杨弘礼

刘德威

赵弘智

权万纪
阎立德
蒋俨
韦机
姜师度
张知謩
△韦挺

韦挺京兆万年人父冲仕隋为民部尚书挺少与隐太子善高祖入长安署陇西公府祭酒累迁太子左卫骠骑检校左卫率太子遇之厚
宫臣无与比武德七年帝避暑仁智宫或言太子与宫臣谋逆又杨文干反乱连东宫帝
责宫臣由是挺与杜淹王珪等皆流裔州未几召拜主
爵郎中贞观初王珪数荐之累迁黄门侍郎拜御史大夫扶阳县男太宗谓曰卿之任大
夫独朕意左右无为卿地者挺曰臣弩下不足辱高位
且非勋旧愿后臣以劝立功者不听是时承隋大乱风俗薄恶人不知教挺上言父母之
丧创已痛深今衣冠士族辰日不哭谓为重丧亲宾来
吊辄不临举又闾里细人每有重丧不即发问先造邑社待营办具乃始发哀至假车乘
雇棺槨以荣送葬既葬邻伍会集相与酣醉名曰出孝
夫妇之道王化所基故有三日不息烛不举乐之感今昏嫁之初杂奏丝竹以穷宴欢并
乖礼宪请一切惩革俄复为黄门侍郎兼魏王泰府事
泰贬改太常卿初挺为大夫时马周为监察御史挺不甚礼及周为中书令帝欲用挺周
言挺很于自用非宰相器遂止帝将讨高丽择主饷运
者周言挺才任羸使帝谓然挺父故为营州总管尝经略高丽故札藏家挺上之帝悦曰
自幽距辽二千里无州县吾军靡所仰食卿为朕图之
苟吾军用不乏是公之功其自择文武官四品十人为子使取幽易平三州锐士若马各
三百以从即诏河北列州皆取挺节度许以便宜帝亲
解貂裘及中厩马赐之挺遣燕州司马王安德行渠作漕舩转粮自桑干水抵卢思台行
八百里渠塞不可通挺以方苦寒未可进遂下米台侧
廡之待冻泮乃运以为解即上言度王师至食且足帝不悦曰兵益拙速无工迟我明年
师出挺乃度它岁运何哉即诏韦怀质驰按怀质还劾
挺在幽州日置酒弗忧职不前视渠即造船行粟及至卢思台乃悟非是欲进则不得还
且水涸六师所须恐不如陛下之素帝怒遣李道裕代
之传唐临驰传械挺赴洛阳废为民以白衣从军帝破盖牟城诏挺将兵镇守示复用城
与贼新城接日夜转鬪无休时挺以失职内不平作书
谢所善术士公孙常会常以他事系狱死索橐中得挺书意怨望贬象州刺史岁余卒年

五十八子待价万石

韦待价

韦武

韦万石

韦待价

待价初为左千牛备身永徽中江夏王道宗得罪待价以壻贬卢龙府果毅时将军辛文陵招慰高丽次咤护真水为虏所袭待价与薛仁贵率所部兵救之文陵亦苦战遂免待价重创矢着左足隐不言卒以疾免起为兰州刺史吐蕃盗边为凉州大都督府司马俄迁肃州刺史以功召拜右武卫将军仪凤三年吐蕃复入寇以待价检校凉州都督兼知镇守兵马事召还封扶阳侯武后临朝摄司空护营干陵改天官尚书同凤阁鸾台三品待价起武力典选无铨总才朝野共蚩薄之俄为燕然道行军大总管御突厥踰年还拜文昌右相仍同三品累表辞不听且谓尽力行阵许之于是拜安息道行军大总管督三十六总管以讨吐蕃进爵为公军至寅识迦河与吐蕃合战胜负略相当会其副阎温古逗留又天大寒待价不善抚御师人多死饷乏乃旋师顿高昌后大怒斩温古流待价绣州卒曾孙武

韦武

武年十一荫补右千牛累迁长安丞德宗幸梁州委妻子奔行在除殿中侍御史元琇为水陆转运使表武以仓部员外郎充判官谋不用杜门数月而琇败转刑部员外郎是时帝以反正告郊庙大兵后典章不完执事者时时咨武武酌宜约用得礼之衷羣司奉焉后为绛州刺史

凿汾水灌田万三千余顷玺书劳勉宪宗时入为京兆尹护治丰陵未成卒赠吏部尚书

韦万石

万石善音律上元中迁累太常少卿当时郊庙无会乐曲皆万石与太史令姚元辩增损之号任职始万石奏太乐博士弟子遭丧者请卒哭追集侍御史刘思立劾奏万石官太常首紊风化请付吏论罪高宗方委任万石罢其奏后知吏部选事卒于官

△杨弘礼

杨弘礼字履庄隋尚书令素弟之子与玄感不协尝表其必乱玄感诛父岳系长安狱煬帝使赦之比王岳已死高祖即位诏弘礼袭清河郡公除太子通事舍人贞观中累迁中书舍人太宗征高丽拜兵部侍郎驻蹕之役领步骑二十四军跳出贼背所向摧靡帝自山下望其众袍仗精整人人尽力壮之谓许敬宗曰越公儿郎故有家风时宰相悉留定州辅皇太子唯

褚遂良敬宗弘礼掌行在机务还拜中书侍郎迁司农卿为昆丘道副大总管破处密杀焉耆王降馱支部获龟兹于阆王凯旋会帝崩大臣疾之下迁泾州刺史永徽初追论其功迁胜州都督改太府卿卒赠兰州都督谥曰质弟弘武

杨弘武

杨纂

杨弘武

弘武少修谨永徽中累为吏部郎中太子中舍人高宗东封秦山自荆州司马擢司戎少常伯从帝还迁西台侍郎帝尝让曰尔在戎司授官多非其才何邪弘武曰臣妻刚悍此其所属不敢违以讽帝用后言也帝笑不罪干封二年同东西台三品弘武无他才特谨慎自守然居职以清简称卒赠汴州刺史谥曰恭三子元亨元禧元祗元禧为尚舍奉御善医武后所信爱尝忤张易之易之奏素在隋有逆节子孙不可供奉后乃诏素及兄弟子孙不得仕京宫及侍卫贬元亨睦州刺史元禧资州刺史元禧榜州司马易之诛复任京官并至刺史

杨纂

纂字续卿弘礼族父大业时第进上为朔方郡司法书佐坐玄感近属废居蒲城高祖度河上谒长春宫迁累侍御史数上书言事称旨除考功郎中贞观初为长安令赐爵长安县男有告女子袁妖逆者纂按之情不得袁败太宗恶其不忠将杀之温彦博救得免后为吏部侍郎抑文雅进黠吏度时舞数以自进终户部尚书赠幽州都督谥曰恭纂从子昉武后时为肃机字文化及子诉治先荫昉方食未即判遽曰肃机而未食庸知天下有冤而求食乎昉怒取牒署曰父弑隋主子诉隋资可乎人服其敏终工部尚书

△刘德威

刘德威徐州彭城人有干略隋大业末从裴仁基讨淮贼手剑贼酋传行在后归李密使守怀州密降俱入朝授左武侯将军封滕县公诏将兵击刘武周因判并州总管府司马齐王元吉弃州遁德威总留府事贼薄城民皆叛附贼遂为武周所获使率本部徇地浩州得自拔归尽上贼中虚实高祖嘉纳改彭城县公未几检校大理少卿从平洛阳有功转刑部侍郎加散骑常侍妻以平寿县主贞观初历大理卿绵州刺史政号廉平百姓立石颂德寻检校益州大都督府长史入为大理卿太宗问曰比刑网寢密咎安在德威曰在君不在臣下之宽猛视主之好律失人者减三失出者减五今坐入者无辜坐出者有罪所以吏务深文为自营计非有教

使然也帝然其言后迁刑部尚书检校雍州别驾诏至
齐州按齐王佑狱还半道闻佑反入据济州诏德威就发河南兵经略之会母丧免既除
为同州刺史永徽三年卒官年七十一赠礼部尚书幽
州都督谥曰襄陪葬献陵德威于闺门友睦为人宽平生所得奉禄以分宗亲无留藏

刘审礼

刘延嗣

刘审礼

子审礼审礼少丧母为祖母元所养隋末大乱道不通审礼尚少自乡里负祖母度
江转侧避地及天下平西入长安元每疾病必亲煮药
尝而进元曰儿孝通幽显吾一顾念疾辄闲贞观中历左骁卫郎将父丧免比葬徒跣血
流行路咨叹服除当袭爵让其弟不听事继母尤谨与
弟延璟友爱得禄多资之而妻子执寒苦晏如也再从皆同居合二百口内外无闲言迁
工部尚书检校左卫大将军仪凤三年吐蕃寇凉州副
中书令李敬玄讨之遇虜青海上与战敬玄逗挠不前审礼败为虜执其子尚乘直长殆
庶及延景诣阙待罪请入贼以赎有诏审礼徇忠以没
非有罪宜各还职特诏殆庶弟易从省之既至而审礼卒易从昼夜哭不止吐蕃哀其志
乃还父尸徒跣万里扶护以归当时号孝义刘家审礼
赠工部尚书谥曰僖延景字冬日终陕州刺史睿宗初以后父追赠尚书右仆射陪葬干
陵易从累迁彭城长史任城县男永昌中为酷吏周兴
诬构坐死将刑百姓奔走争解衣投地曰为长史祈福有司平直乃十余万天下冤之子
升年十余岁流岭表六道使诛流人升以信爱为首领
所庇免后易姓温北归洛景云中特授右武卫骑曹参军开元中累迁中书舍人太子右
庶子升能文善草隶

刘延嗣

审礼从弟延嗣为润州司马徐敬业攻润州延嗣与刺史固守城陷敬业邀以降延
嗣曰吾世蒙恩今城不守所负多矣讵能苟生为宗族
羞敬业怒将斩之其党魏思温救止系江都狱敬业败录忠当叙以裴炎近亲裁迁梓州
长史转汾州刺史宗族至刺史者二十余人

△赵弘智

赵弘智河南新安人元魏车骑大将军肃之孙以孝闻仕隋为司隶从事武德初大
理卿郎楚之白为詹事府主簿太宗时预论譔累迁黄
门侍郎兼弘文馆学士移病出为莱州刺史稍迁太子右庶子父事兄弘安俸禄归之不敢私弘安卒哀恸过期奉嫂谨甚抚兄子慈均所生会
太子废免官俄拜光州刺史永徽初入为陈王师讲孝经百福殿诸儒诘难随问酬悉舌

无留语高宗喜曰试为我陈经之要对曰天子有争臣
七人虽无道不失天下愿以此献帝悦赐绢二百名马一四年进国子祭酒仍为学士卒
年八十二谥曰宣弘安亦终国子祭酒曾孙矜举明经
调舞阳主簿吴少诚反以县归历襄阳丞客死柳州官为敛葬后十七年子来章始壮自
襄阳往求其丧不得野哭再阅旬卜人秦訶为筮曰金
食其墨而火以贵其墓直丑在道之右南有贵神冢土是守宜遇西人深目而髯乃得其
实明日有老人过其所问之得矜墓直社北遂归葬弘
安墓次时人哀来章孝皆为出涕云

△权万纪

权万纪其先出天水后徙京兆万年父琢玠隋匡州刺史万纪性悻直自潮州刺史
擢治书侍御史房玄龄王珪掌内外官考万纪奏其不
平帝命推之魏征曰玄龄等皆大臣所考有私万纪在朝堂无驳正今始弹奏非诚心为
国也帝乃止然以万纪不阿贵近颇奖礼之又建言宇
文智及隋逆臣其子不宜任千牛帝从之河内人李好德以心疾为妖言张蕴古案其狱
言不当坐万纪劾其阿纵蕴古坐斩【事详蕴古传
本传不载】时万纪与侍御史李仁发皆以敢言进大臣数被谴怒魏征谏曰小人以讦
为直以谗为忠陛下欲以警策羣臣而彼挟恩依势所
弹射皆不实深恐上损圣明帝悟徙万纪散骑常侍而免仁发数年召复故官奏言宣饶
部中每岁凿山冶银可得数百万帝曰朕所乏者嘉谋
贤士今卿以利规我欲方我汉桓灵耶斥使还家久之由御史中丞进尚书左丞出为西
韩州刺史徙吴王长史王畏其直善待之会齐王佑不
奉法帝以万纪能左右吴王因徙为佑长史佑比昵羣小万纪骤谏不入遂以闻帝遣刘
德威案问因征佑及万纪入京佑恐会万纪先发即遣
所亲燕宏亮追杀之支解投圜中【事详佑传】并杀典军韦文振文振亦尝谏佑不
听以告万纪故并戕之佑诛赠万纪齐州都督武都郡
公谥曰敢【旧书作敬】文振亦赠左武卫将军襄阳县公万纪子玄初【旧书作玄
福】高宗时兵部侍郎

权怀恩

权怀恩

怀恩万纪族孙祖弘寿为隋临汾司仓书佐高祖入长安擢太仆卿封卢国公卒谥
曰恭怀恩袭爵累迁尚乘奉御御人安毕罗为高宗所
宠见帝戏慢不恭怀恩奏事见之退杖之四十帝嗟赏曰良吏也擢万年令赏罚明见恶
辄取时人语曰盍饮三斗尘无逢权怀恩历庆莱卫邢
宋五州刺史洛州长史所居威名赫然吏重足立姿状沈毅每盛服妻子不敢仰视尝过

汴州时刺史杨德干亦以严称汴桥新成立木中途以止过车怀恩适见之谓德干曰民不可止耶焉用此德干惭服迁益州大都督府长史卒从子楚璧为左领军卫兵曹参军玄宗在东都楚璧与李齐损等拥兵夜入宫城作乱伏诛籍其家 【按新书为万纪立传附载怀恩旧书以怀恩入循吏传而万纪附今从新书】

△阎立德

阎立德名让以字行京兆万年人父毗隋殿内少监本以工艺进故立德与弟立本并机巧习艺事武德初为秦王府士曹参军从平东都迁尚衣奉御制袞冕等皆有典法贞观初擢将作少匠封大安县男护治献陵迁大匠文德皇后崩营昭陵坐弛职免起为博州刺史太宗幸洛阳诏立德择爽垲地建离宫清暑乃起襄城宫于汝州西山费百余万既成烦燠不可居坐免未几复为大匠就洪州造浮海大航遂从征高丽车驾至辽泽泥淖亘二百里不可通立德布土作桥军无留行 【按新书布土作桥事载在还军时但车驾已过则此路便当通使命转军饷安得复有二百里泥淖未除旧书载在初至辽泽时与通鉴合今从之】 帝悦厚赐之又规筑土山以攻安市城不克 【传作破安市城误】 从还营翠微玉华二宫进工部尚书帝崩复典陵事进爵县公永徽五年帝幸万年宫立德留守因领徒四万治京城卒赠吏部尚书并州都督陪葬昭陵谥曰康

阎立本

阎知微

阎用之

阎立本

立本显庆中以将作大匠代立德为工部尚书总章元年以司平太常伯拜右相封博陵县男初为王爵郎中时太宗泛舟西苑见异鸟容与波上命侍臣赋诗而召立本图状传呼者目为画师既至俯伏池左研吮丹粉望坐者甚惭归戒其子勿习然性所好竟不能罢也既辅政但以俗材应务无所称述时姜恪以军功为左相人因有左相宣威沙漠右相驰誉丹青之嘲咸亨中官名复旧改中书令卒谥曰文贞

阎知微

知微立德孙圣历中为豹韬卫将军默啜请婚武后遣知微持金帛送武延秀往默啜谓延秀非天子儿囚之挟知微入寇以为南面可汗破赵定等州及中宗自房陵还东宫始弃赵州去因纵知微还后命磔之天津桥南夷其三族 【新书言默啜挟知微入寇朝廷以知微卖国

夷其旅知微不知逃还武后业已然乃赐百官甘心焉与旧书所载颇异然通鉴所载知微事尤详纲目亦多采之大意皆与旧书合通鉴出于实录其言较为可据今从之】子则先以武三思壻免死

阎用之

用之立德曾孙初为彭州参军摄录事一日纠不法及愆谬数十事太守知其才举通事舍人累迁右卫郎将知引驾仗金吾将军李质升殿不解刀呵却之请按法行罚左右震悚初有司以三卫执扇登殿用之奏三卫皆趋悍不宜迓御座请以宦者代之遂为故事终左金吾将军

△蒋俨

蒋俨常州义兴人举明经为右屯卫兵曹参军太宗将征高丽募为使者莫应俨奋请行既至莫离支以兵胁之不屈囚土窟中高丽平乃得归授朝散大夫迁幽州司马巡察使刘祥道奏最状擢会州刺史入为殿中少监数陈时政利病高宗纳之迁蒲州刺史州户众狱繁刺史多以罪去俨至发隐禁奸号为良吏永隆二年以老致仕寻召为太仆卿以父讳辞改太子右卫副率中宗在东宫有过俨辄谏不见用时田游岩起处士为洗马太子所尊礼俨贻书责其不言游岩愧不能荅迁右卫大将军封义兴县子以太子詹事致仕卒年七十八中宗立以旧恩赠礼部尚书

△韦机

韦机【新书作弘机】京兆万年人父恪洛州司马机贞观时为左千牛胄曹参军使西突厥册同俄设为可汗会石国叛道梗二年不得归因录所过风俗物产为西域记还朝上之帝大悦累迁殿中监显庆中为檀州刺史边人不知重儒乃修学宫画孔子七十二子及汉晋诸儒像自为赞敦劝生徒俗以大化契苾何力讨高丽值滦水涨留军三日机输粮无阙擢司农少卿主东都营田受诏完葺宫苑宦者犯法杖之后奏帝善之赐绢五十匹曰后有犯者治勿奏也进司农卿时东都宫室日圯帝欲更作之而惜其费机曰臣任司农省常费积二十万缗足以集事帝大悦诏兼将作少府二职督营宿羽高山上阳等宫上阳制度尤壮丽帝幸东都徙居之仆射刘仁轨以为非侍御史狄仁杰劾机导上奢泰会机家人犯盗竟坐免官【按机之免通鉴言仁杰劾奏本传言坐家人犯盗今兼取之】初方士朱钦遂为武后所宠奸赃狼籍机以白帝帝遣中使慰谕遂谪钦遂于边后衔之永淳中帝召机以布衣检校园苑将复用之后倚之而止终检校司农少卿孙岳武后时为汝州司马以辨治称召授尚舍奉御出为太原尹以不习武辞忤旨下迁宋州长史历庐海等州

刺史并着风迹睿宗立召为殿中少监窦怀贞等诛坐

贬渠州别驾起陝州刺史卒子景骏别有传 【旧书称韦机子余庆余庆子岳岳子景骏
新书作机孙岳子景骏机孙岳句下脱一岳字遂以

景骏为机孙且称岳为岳子并误又新书传未有岳孙皋别有传句韦皋传不载未知是
否今附于此】

△姜师度

姜师度魏州魏人举明经歷丹陵尉龙冈令有清白称神龙初试易州刺史兼河北
遂巡察度支营田使始治沟于蓊门以限奚契丹又循

汉末故迹并海凿渠以通饷路罢海运迁司农卿出为陝州刺史太原仓为水陆运所凑
师度使依高为廩注米于舟以达诸河人得不劳拜太

子詹事玄宗移营州治柳城拜营田度支修筑使进河中尹安邑盐池涸发卒浚之置盐
屯收利不费徙同州刺史引洛水以灌朝邑河西二县

遏河以灌通灵陂收弃地二千顷为上腴置十余屯帝嘉其功加金紫光禄大夫赐帛三
百匹进将作大匠左拾遗刘彤请榷盐铁代贫民赋诏

强循与师度会天下按察使议其法后不行卒年七十余师度好兴作所至繇役纷纭不
能皆便然所就必为后世利时太史令傅孝忠以知星

名人为语曰孝忠知仰天师度知相地嘲所嗜也

强循

强循

强循字季先凤州人歷雍州司士参军华原无并人畜多喝死循始教人治渠灌田
人号强公渠歷大理少卿太子右庶子为政不事威严

遇人尽信不疑然当时恨其少文云

△张知謩

张知謩字匪躬幽州方城人 【旧书作蒲州河东人】 徙家岐兄弟五人知玄知
晦知泰知默皆明经高第晓吏治调露后知謩知泰知

默并官台省知謩又歷十一州刺史所至有威严万岁通天中知謩自德州入计武后奇
其貌诏工图之以其兄弟容而才谓之两绝中宗在房

州禁察严苛知謩与董元质崔敬嗣相继为刺史独供奉不少懈帝复位召知謩为左卫
将军封范阳郡公而以知泰为御史大夫封渔阳郡公

知泰后以忤武三思出为并州刺史改魏州卒謩曰定知謩歷东都副留守左右羽林大
将军同华州刺史大理卿致仕年八十开元时卒知謩

敏且亮尤恶干谒求进诫子孙经不明毋得应举世称其家法知泰武后初尝奏置东都
诸门十七所百姓惊扰识者薄之知默与来俊臣周兴

等掌诏狱数陷大臣其后以酷吏子孙禁锢为张氏羞知玄子景升知泰子景佚开元中

并至显官 【蒋伊韦机姜师度强循张知睿等旧书

并入循吏传新书改附于此盖以与循吏之实不甚应也今从之】

钦定续通志卷二百十二

●钦定续通志卷二百十三 列传十三

列传

唐 【十三】

○唐十三

长孙无忌【敞 操 诠】褚遂良【璆】 韩瑗 来济 李义
琰【义琛】 上官仪

长孙无忌

褚遂良 【褚璆】

韩瑗

来济

李义琰

上官仪

△长孙无忌

长孙无忌字辅机性通悟博涉书史始高祖兵渡河进谒长春宫授渭北道行军典
签从秦王征讨有功累擢比部郎中上党县公太子毒

王王病举府危骇房玄龄谓无忌曰祸隙已芽败不旋踵矣夫就大计者遗细行周公所
以细管蔡也遂俱入白王请先事诛之王未许无忌引

舜浚井涂廩事喻之王未决事益急乃遣无忌房玄龄杜如晦定计无忌与尉迟敬德侯
君集张公谨刘师立公孙武达独孤彦云杜君绰郑仁

恭李孟尝计兼平之王为皇太子授左庶子即位迁吏部尚书以功第一进封齐国公帝
以无忌佐命元勋地兼外戚又少相友善倚日厚常出

入卧内进尚书右仆射突厥颉利可汗已盟而政乱诸将请遂讨之帝顾新盟不取为失
机取之失信计犹豫以问大臣萧瑀曰兼弱攻昧讨之

便无忌曰今我务戢兵待其至乃可击使遂弱且不能来我又何求臣谓按甲存信便帝
曰善然卒取突厥或有言无忌权大盛者帝持表示无

忌曰我与公君臣闲无少疑使各怀所闻不言则蔽矣因普示羣臣曰朕子幼无忌于我
有大功视之犹子也疏闲亲新闲旧谓之不顺朕无取

焉无忌深以盈满为诫恳辞机密后又数言之遂解仆射授开府仪同三司与房元龄杜
如晦尉迟敬德皆以元勋封一子郡公进册司空知门

下尚书省事无忌辞又因高士廉口陈以外戚位三公谦议者谓天子私后家帝曰朕任
官必以才否则虽亲若襄邑王神符不妄授若才虽仇

如魏征不弃也夫缘后兄爱昵厚以子女玉帛岂不可以其兼文武两器朕故相之公等孰不曰然无忌固让优诏答之帝又思所与共艰难赖无忌以免作威凤赋以赐且况其功帝欲功臣并世袭刺史贞观十一年乃诏以无忌为赵州刺史以赵为公国房玄龄为宋州刺史国于梁杜如晦赠密州刺史国于莱李靖濮州刺史国于卫高士廉申州刺史国于申侯君集陈州刺史国于陈道宗鄂州刺史王江夏孝恭观州刺史王河闲尉迟敬德宣州刺史国于鄂李绩蕲州刺史国于英段志玄金州刺史国于襄程知节普州刺史国于卢刘弘基朗州刺史国于夔张亮澧州刺史国于郾凡十有四人余官食邑并如故无忌等辞曰羣臣披荆棘事陛下今四海混一诚不愿违远左右而使世牧外州与迁徙等又与玄龄上表固辞遂止后帝幸其第自家人姻娅劳赐皆有差久之进位司徒十七年令图画无忌等二十四人于凌烟阁优诏褒之太子承干废帝欲立晋王未决坐两仪殿羣臣已罢独留无忌玄龄绩言东宫事因曰我三子一弟未知所立吾心无聊即投床取佩刀自向无忌等惊争抱持夺刀授晋王而请帝所欲立帝曰我欲立晋王无忌曰谨奉诏异议者斩帝顾王曰舅许汝矣宜即谢王乃拜帝复曰公等与我意合天下其谓何答曰王以仁孝闻天下久矣固无异辞有如不同臣负陛下百死于是遂定以无忌为太子太师 【按新书载无忌以太子太师同中书门下三品且谓同三品自此始考其实不然无忌为太子太师玄龄为太傅萧瑀为太保李绩为詹事皆十七年四月己丑日事是时无忌玄龄已为宰相其同中书门下三品者谓瑀绩耳本纪及宰相表书以瑀绩同三品而不及无忌玄龄最可据即百官志亦谓同三品之名自绩始不云自无忌始也旧书本无此二句今改正】 帝又欲立吴王恪无忌密争止之帝征高丽诏摄侍中还辞师傅官听罢太子太师遥领扬州都督帝常从容问曰朕闻君圣臣直人常苦不自知公宜面攻朕得失无忌曰陛下神武圣文冠卓千古诚不见有所失帝曰朕冀闻过公等乃相谏说朕当评公等可否以相规谓高士廉心术警悟临难不易节所乏骨鲠耳唐俭有辞善和解人酒杯流行发言可意事朕二十年未尝一言国家事杨师道性谨审自能无过而懦不更事缓急非可倚岑文本敦厚文章论议其所长也谋长经远自当不负于物刘洎坚正其言有益不轻然诺于人能自补阙马周敏锐而正评裁人物直道而行所任皆称朕意褚遂良鲠亮有学术竭诚亲于朕若飞鸟依人自加怜爱无忌应对机敏善避嫌求于古人未有其比总兵攻战非所善也二十三年帝疾甚召入卧内帝引手扞无忌颐无忌哭帝感塞不得有所言翊日与遂良入

受诏顾遂良曰我有天下无忌力也尔辅政勿令谗毁者害之有顷崩方在离宫皇太子悲恸无忌曰大行以宗庙社稷属殿下宜速即位因秘不发丧请还宫太子即位是为高宗进无忌太尉检校中书令兼知门下尚书二省固辞尚书省许之帝欲立武昭仪为后无忌固言不可帝密以宝器锦帛十余车赐之又幸其第擢三子皆朝散大夫昭仪母复诣其家中请许敬宗数劝之无忌厉色折拒帝后召无忌遂良及于志宁言后无息昭仪有子必欲立之者无忌已数谏即曰先帝付托遂良愿陛下访之遂良极道不可帝不听后既立以无忌受赐而不助己衔之敬宗揣后指阴使洛阳人李奉节上无忌变事与侍中辛茂将临按傅致反状帝惊曰将妄人构闲殆不其然敬宗具言反迹已露陛下不忍非社稷之福帝泣曰我家不幸高阳公主与我同气往谋反今舅复尔使我重愧天下奈何对曰房遗爱口乳臭与女子反安能就事无忌奸雄天下所畏服一旦窃发陛下谁使御之今即急恐攘袂一呼以啸同恶且为宗庙忧陛下不见隋室乎宇文化及父宰相弟尚主而身掌禁兵炀帝处之不疑然而起为戎首遂亡隋愿陛下决之帝犹疑更诏审核明白敬宗言无忌反明甚请逮捕帝泣曰舅果尔我决不忍杀后世其谓我何敬宗曰汉文帝舅薄昭从代来有功后坐杀人帝惜挠法令羣臣丧服就哭之昭自杀良史不以为失今无忌忘先帝之德舍陛下至亲乃欲移社稷败宗庙岂特昭比邪在法夷五族臣闻当断不断反受其乱乘机亟行缓必生变无忌与先帝谋取天下天下伏其智王莽司马懿之流今逆徒自承何疑而不决帝终不质问遂下诏削官爵封户以扬州都督一品俸置于黔州所在发兵护送流其子秘书监冲等于岭外从弟渝州刺史知仁贬翼州司马后数月又诏司空绩中书令敬宗侍中茂将等覆按反狱敬宗令大理正袁公瑜御史宋之顺等即黔州暴讯无忌投缳卒冲免死杀族子祥流族弟思于檀口大抵替亲皆谪徒初无忌与遂良悉心奉国以天下安危自任故永徽之政有贞观风帝亦宾礼老臣拱己以听纲纪设张此两人维持之也既二后废立计不合奸臣阴图帝暗于听受卒以屠覆自是政归武氏几至亡国上元元年追复官爵以孙元翼袭封【旧书载是年以孙延主齐献公之祀而不及元翼袭封事又考宰相世系表元翼即延之子于无忌为曾孙疑本传作孙者误】初无忌自作墓昭陵莹中至是许还葬文宗开成三年诏曰每览国史至太尉无忌未尝不废卷而叹其以裔孙均为猗氏令

长孙敞

长孙操

长孙詮

长孙敞

无忌从父敞字休明隋炀帝为晋王敞以库直从畋骊山王凌危逐鹿因敞諫乃止即位颇见识擢及幸江都留守禁籞高祖入关率子弟谒新丰授将作少监出为■〈木巳〉州刺史贞观初坐受赇免太宗以后属岁私给廩偿其费累封平原郡公卒赠幽州都督谥曰良陪葬昭陵

长孙操

从父弟操字符节父览为周大司徒辞国公操有学术初高祖辟署相国府金曹参军未几检校虞州刺史从秦王征讨尝侍旁与闻秘谋徙陕州城中无井人勤于汲操为酃河溜入城百姓利安以母丧解长老守阙颂遗爱服除封乐寿县男为齐扬益三州刺史课皆最下诏褒扬永徽初以陕州刺史卒赠吏部尚书赐谥曰安葬给鼓吹至虞罢

长孙詮

子詮尚新城公主詮女兄为韩瑗妻无忌得罪詮流嶠州有司希旨杀之詮有甥赵持满者工书善骑射力搏虎走逐马而仁厚下士京师无贵贱爱慕之为凉州长史常逐野马射之矢洞于前边人畏伏詮之贬许敬宗惧持满才能仇己追至京属吏讯擄色不变曰身可杀辞不可枉遂死狱中

△褚遂良 【褚璆】

褚遂良字登善通直散骑常侍亮子隋大业末为辞举通事舍人仁杲平授秦王府铠曹参军贞观中累迁起居郎博涉文史工隶楷太宗尝叹曰虞世南死无与论书者魏征白见遂良帝令侍书帝方博购王羲之故帖天下争献莫能质真伪遂良独论所出无舛冒者十五年帝将有事泰山至洛阳星孛太微犯郎位遂良諫曰陛下方告成岱宗而彗辄见此天意有所未合昔汉武帝行岱礼优柔者数年臣愚愿加详虑帝寤诏罢封禅迁諫议大夫兼知起居事帝曰卿记起居大抵人君得观之否对曰今之起居古左右史也善恶必记戒人王不为非法未闻天子自观史也帝曰朕有不善卿必记邪对曰守道不如守官臣职载笔君举必书刘洎曰使遂良不记天下之人亦记之矣帝以为然 【谨按通鉴辑览 御批居室出言应违决于千里之外鹤鸣声闻理固不爽太宗亟欲观起居注其于易义固未津逮即遂良秘不与观何如刘洎一言之中綮要乎】 是时魏王泰礼秩如嫡羣臣未敢諫帝从容访左右曰方今何事尤急遂良曰今四方仰德谁弗率者唯太子诸王宜有定分

帝曰有是哉朕年五十日以衰怠虽长子守器而弟支子尚五十人心常念焉公等为我简贤者保傅之且事人久则情媚熟非意窥窬多由此作于是限王府官僚不得过四考帝尝问舜造漆器禹雕其俎当时谏者十余人小物何必尔邪遂良曰奢靡之始危亡之渐也漆器不止必金为之金又不止必玉为之是以谏者救其渐帝咨美之于时皇子虽幼皆外任都督刺史遂良谏曰陛下诚以至亲扞四方虽然刺史民之师帅也得人则一部苏息失人则合州劳弊故汉宣帝曰与我共治惟良二千石乎臣谓皇子未冠者可且留京师教以经学仰畏天威不敢犯禁养成德器审堪临州然后敦遣昔东汉明章诸帝友爱子弟虽各有国幼者率留京师训饬以礼讫其世诸王数十百惟二人以恶败自余食和染教皆为善良此前事已验惟陛下省察帝嘉纳太子承干废魏王泰闲侍帝许立为嗣因谓大臣曰泰昨日投我怀中云臣今日始得为陛下子更生之日也臣惟有一子百年后当杀之传国晋王朕甚怜之遂良曰陛下失言安有为天下主而杀其爱子传国晋王乎陛下昔以承干为嗣复宠爱泰嫡庶不明纷纷至今若必立泰非别置晋王不可帝泣曰我不能即诏长孙无忌房玄龄李绩与遂良等定策立晋王为皇太子时飞雉数集宫中帝问此何祥也遂良曰昔秦文公时有侏子化为雉雌鸣陈仓雄鸣南阳侏子曰得雄者王得雌者霸文公遂雄诸侯始为宝鸡祠汉光武得其雄起南阳有四海陛下本封秦故雌雄并见以告明德帝悦曰人之立身不可以无学遂良所谓多识君子哉俄授太子宾客辞延陀请昏帝已纳其聘复绝之遂良以为亏信夷狄且生嫌隙不纳帝欲自征高丽遂良固劝无行一不胜师必再兴为忿兵兵忿者胜负不可必帝然之会李绩诋其计帝意遂决遂良惧上言请譬诸身两京腹心也四境手足也殊裔绝域殆非支体所属高丽王陛下所立莫离支杀之讨其送夷其地固不可失但遣一二勇将付锐兵十万唾手可取臣闻涉辽而左或水潦平地淖深三尺海壤荒漫决非万乘所宜行是时帝锐意荡平不见省进黄门侍郎参综朝政莫离支遣使贡金遂良曰古者讨弑君之罪不受其赂鲁纳郟鼎太庙春秋讥之今莫离支所贡不臣之筐不容受诏可以其使属吏帝既平高昌岁调兵千人往屯遂良谏不可帝志取西域置其言不用西突厥寇西州帝曰往魏征褚遂良劝我立曲文泰子弟不用其计乃今悔之帝于寝宫侧别置院居太子遂良谏以为朋友深交者易怨父子溺爱者多愆宜许太子闲还东宫近师傅专学艺以广懿德帝从其言父丧免起复拜中书令帝寝疾召遂良长孙无忌曰汉武帝托霍光刘备托诸葛亮朕今委卿矣谓太子曰无忌遂良在

而无忧因命遂良草诏高宗即位封河南县公进郡公坐事出为同州刺史再岁召拜吏部尚书同中书门下三品监修国史兼太子宾客进拜尚书右仆射帝将立武昭仪召长孙无忌李绩于志宁及遂良入或谓无忌当先谏遂良曰太尉国元舅有不如意使上有弃亲之讥又谓绩上所重当进曰不可司空国元勋有不如意上有斥功臣之嫌吾奉遗诏若不尽愚无以下见先帝既入帝曰罪莫大于绝嗣皇后无子今欲立昭仪谓何遂良曰皇后本名家奉祀先帝先帝疾执陛下手语臣曰我儿与妇今付卿且德音在陛下耳可遽忘之皇后无他过不可废帝不悦翊日复言对曰陛下必欲改立后者请更择贵姓昭仪昔事先帝身接帷第今立之奈天下耳目何帝羞默遂良因致笏殿阶叩头流血曰还陛下此笏归田里帝大怒命引出武氏从幄后呼曰何不扑杀此獠无忌曰遂良受顾命有罪不加刑会李绩议异武氏立乃左迁遂良潭州都督

【吴缜纠谬曰案高宗纪永徽六年九月庚午贬褚遂良为潭州都督十月乙卯立宸妃武氏为皇后宰相表载遂良贬官月日亦同然则传所云误也】显庆二年徙桂州未几贬爱州刺史遂良内忧祸恐死不能自明乃上表曰往者承干废岑文本刘洎奏东宫不可少旷宜遣濮王居之臣引义固争明日仗入先帝留无忌玄龄绩及臣定策立陛下当受遗诏独臣与无忌二人在陛下方草上号恸臣即奏请即位大行柩前当时陛下手抱臣颈臣及无忌请即还京发哀大告内外盍谧臣力小任重动貽伊戚蝼蚁余齿乞陛下哀怜帝昏懦牵于武后讫不省岁余卒年六十三后二岁许敬宗李义府奏长孙无忌逆谋皆遂良驱扇乃削官爵二子彦甫彦冲流爱州杀之帝遗诏听其家北还神龙中复官爵德宗追赠太尉文宗时诏以遂良五世孙虔为临汝尉安南观察使高骈表遂良客窆爱州二男一孙祔咸通九年诏访其后护丧归葬阳翟云遂良曾孙璆字伯玉擢进士第累拜监察御史裹行先天中突厥围北廷诏璆持节监总督诸将破之迁侍御史拜礼部员外郎卒

△韩瑗

韩瑗字伯玉京兆三原人父仲良武德初与定律令建言古法繁紊请崇宽简以示惟新于是采开皇律宜于时者定之终刑部尚书秦州都督府长史颍川县公瑗少负节行博学晓吏事贞观中以兵部侍郎袭爵永徽三年迁黄门侍郎俄同中书门下三品监修国史加银青光禄大夫进侍中兼太子宾客王皇后之废瑗雪泣言曰皇后乃陛下在藩时先帝所娶今无罪辄废非社稷计不纳明日复谏曰王者立后配天地象日月匹夫匹妇尚知相择况天子乎诗云赫赫宗周褒姒灭之臣读至此尝辍卷太息

不图本朝亲见此祸帝大怒诏引出褚遂良贬潭州都督明年瑗上言遂良受先帝顾托一德无二况被迁已阅寒暑其责塞矣愿宽无辜以顺众心帝曰遂良之情朕知之矣其悖戾好犯上朕责之讵有过邪瑗对曰遂良社稷臣臣恐苍蝇点白损陷忠贞非国家之福帝愈不听瑗忧愤自表归田里不报显庆二年许敬宗李义府奏瑗以桂州授遂良桂用武地倚之谋不轨于是更徙遂良爱州贬瑗振州刺史踰年卒年五十四长孙无忌死义府等复奏瑗与通谋遣使即杀之既至瑗已死发棺验视乃还追削官爵籍其家子孙谪广州官奴神龙初武后遗诏复官爵自瑗与遂良相继死内外以言为讳将二十年帝造奉天宫御史李善感始上疏极言时人喜之谓为凤鸣朝阳

△来济

来济扬州江都人父护儿隋左翊卫大将军字文化及难阖门死之济幼得免转侧流离而笃志为文章善议论晓畅时务擢进士贞观中累迁通事舍人太子承干败太宗问侍臣何以处之莫敢对济曰陛下上不失为慈父太子得尽天年则善帝纳之除考功员外郎十八年初置太子司议郎高其选而以济为之兼崇贤馆直学士迁中书舍人永徽二年拜中书侍郎兼弘文馆学士监修国史俄同中书门下三品加银青光禄大夫封南阳县男迁中书令检校吏部尚书武氏有宠特号宸妃济与韩瑗谏妃有常员今别立号不可及将立为后又上疏引周汉故事开陈祸福武氏已立不自安后更谩言济等忠鯁恐前经执奏辄怀反仄请加赏慰而实衒之帝示济及瑗济等益惧显庆初兼太子宾客进爵为侯帝尝从容问馭下所宜济曰昔齐桓公出游见老人命之食曰请遗天下食遗之衣曰请遗天下衣公曰吾府库有限安得而给老人曰春不夺农时即有食夏不夺蚕工即有衣由是言之省徭役馭下之宜也于时山东役丁岁别数万人又议取庸以偿雇纷然烦扰故济对及之二年兼詹事寻坐褚遂良事贬台州刺史久之徙庭州龙朔二年突厥入寇济总兵拒之谓其众曰吾尝絀刑网蒙赦不死今当以身塞责遂不介胄而驰贼没焉年五十三赠楚州刺史给灵輶还家初济与高智周郝处俊孙处约客宣城石仲览家仲览衍于财有器识待四人甚厚私相与言志处俊曰愿宰天下济及智周亦然处约曰宰相或不可冀愿为通事舍人足矣后济领吏部处约始以瀛州书佐入调济遽注曰如志遂以处约为通事舍人皆至公辅济异母兄恒上元中为黄门侍郎同中书门下三品兄弟俱以学行称

△李义琰

李义琰魏州昌乐人其先出陇西望姓及进士第补太原尉李绩为都督僚吏惮其威义琰独敢廷辨曲直绩甚礼之徙白水令有能名擢司刑员外郎义琰姿体魁秀博学有智识累迁中书侍郎上元中进同中书门下三品兼太子右庶子高宗欲使武后摄国政义琰与郝处俊固争事得寝章怀太子之废尽赦宫臣罪庶子薛元超等皆舞蹈义琰独引咎涕泣搢绅义之帝每顾问必鲠切不回宅无正寝弟义璡市堂材送之义琰曰以吾为国相且自愧尚营美宇是速吾祸义璡曰凡仕为丞尉且崇第舍兄位高安可偪下哉答曰事难全遂物不两兴既处贵仕又广居宇非有令德必受其殃卒不许后其木久腐乃弃之义琰改葬其先使舅家移莹而兆其所帝闻怒曰是人不可使秉政义琰惧以疾乞骸骨迁银青光禄大夫听致仕乃归田里公卿以下悉祖饯通化门外时人比汉疏广垂拱初起为怀州刺史自以失武后意辞不拜卒子巢幼豪俊善骑射而不洽细行义琰绝其交游后亡走阙下献书陈利害拜监察御史与李义府同按柳奭韩瑗狱迁殿中上书忤旨贬龙编主簿义琰从祖弟义琛

李义琛

李义琛

义琛擢进士第历监察御史贞观中文成公主贡金遇盗于岐州主名不立太宗召羣御史至目义琛曰是人神情爽拔可使推捕义琛往数日获贼帝喜为加七阶初义琰使高丽其王据榻召见义琰不拜曰吾天子使可当小国之君奈何倨见我王词屈为加礼及义琛再使亦坐召之义琛匍匐拜伏时人由是见兄弟优劣累迁刑部侍郎为雍州长史时关辅大饥诏贫人就食商邓义琛恐流徙不还上疏固争左迁黎州都督降岐州刺史子绾为柏人令有仁政县为立祠

△上官仪

上官仪字游韶陕州陕人父弘为隋江都宫副监为陈棱所杀仪幼匿免冒为沙门服寢工文词涉贯坟典贞观初擢进士第召授弘文馆直学士迁秘书郎太宗每属文遣仪视稿宴私未尝不预转起居郎高宗即位为秘书少监进西台侍郎同东西台三品仪工诗其词绮错婉媚及贵显人多效之谓之上官体麟德元年梁王忠抵罪许敬宗构仪与忠通谋下狱死籍其家【详见武后传】子庭芝历周王府属亦被杀庭芝女中宗时为昭容追赠仪为中书令秦州都督楚国公庭芝黄门侍郎岐州刺史天水郡公以礼改葬

钦定续通志卷二百十三

●钦定续通志卷二百十四 列传十四

列传

唐【十四】

○唐十四

于志宁【休烈 敖琮 庞严】高季辅 张行成杜正伦【求仁 咸】崔知温【知悌】 高智周郭正一 崔敦礼

卢承庆【承泰】刘祥道【齐贤 从一】李敬玄【元素】 张处约【侗】邢文伟【高子贡】

于志宁

高季辅

张行成

杜正伦

崔知温

高智周

郭正一

崔敦礼

卢承庆

刘祥道【刘齐贤】

李敬玄

孙处约【孙侗】

邢文伟

△于志宁

于志宁字仲谧京兆高陵人曾祖谨周太师燕国公父宣道隋内史舍人大业末志宁调冠氏县长山东盗起弃官归高祖入关迎谒长春

宫授银青光禄大夫太宗为渭北道行军元帅补记室与殷开山等参谋议辞仁杲平识褚亮于囚虏中迁天乐府中郎文学馆学士引亮与同

列贞观三年为中书侍郎太宗尝宴近臣问志宁安在有司奏敕召三品志宁品第四【按旧书职官志中书侍郎旧班正四品上大历二年

升正第三品】帝悟特诏预宴因加散骑常侍太子左庶子黎阳县公是时议立七庙羣臣请以凉武昭王为始祖志宁以凉非王业所因独建

议违之帝诏功臣世袭刺史志宁以古今事殊非久安之道帝皆从之尝谓志宁曰太子幼卿当辅以正道无使邪僻启其心太子数有过恶志

宁欲止之上谏苑以讽帝见大悦赐黄金十斤绢三百匹俄兼詹事以母丧免有诏起复本官固请终丧帝遣岑文本敦譬乃就职时太子以农

时造曲室累月不止又好音乐过度志宁谏以为今东宫乃隋所营当时号为侈丽岂容复事磨砢采饰于其闲丁匠官奴皆犯法亡命钳凿锤杵往来出入监门宿卫直长千牛不得苛问牙爪在外厮役在内其可无忧乎又宫中数闻乐声太乐官伎辄留不出往年口敕丁宁殿下可不思之太子不纳而左右多任宦官志宁复谏以为奄宦之徒体气非全托亲近为威权假出纳为祸福杜渐防萌不可不慎太子益不悦东宫仆御旧得番休而太子不听又私引突厥与相狎比志宁怀不能已上疏极言太子大怒遣张师政纥千承基往刺之二人潜入其第见志宁憔悴在苦块中不忍杀乃去太子败帝知其状谓曰闻公数谏承干不听公故至此是时宫臣皆罪废独志宁蒙劳免晋王为皇太子复拜左庶子迁侍中永徽元年加光禄大夫封燕国公监修国史三年洛阳人李宏泰诬告长孙无忌反有诏不待时斩之志宁以为方春少阳用事不宜行刑且诬谋非本恶逆请依律待秋分乃决从之衡山公主既公除将下嫁长孙氏志宁以为礼女十五而笄二十而嫁有故二十三年而嫁固知遇丧须终三年春秋鲁庄公如齐纳币母丧未再朞而图婚二家不讥以其失礼明也今议者云公除从吉此汉文创制为天下百姓耳公主身服斩衰服可以例除情不可以例改心丧成婚非人情所忍于是诏公主待服除乃婚拜尚书左仆射同中书门下三品顷之兼太子少师显庆元年迁太傅尝与右仆射张行成中书令高季辅俱赐田志宁奏臣家自周魏来世居关中贲业不坠今行成季辅始营产土愿以臣有余赐不足者帝嘉之分其田以与二人显庆四年以老乞骸骨诏解仆射拜太子太师仍同中书门下三品王皇后之废长孙无忌褚遂良固争不见从志宁不敢言武后以其不右己衔之后因杀无忌坐免官出为荣州刺史改华州听致仕卒年七十八赠幽州都督谥曰定后追复左光禄大夫太子太师志宁爱宾客乐引后进然多嫌畏不能有所荐达士议少之前后预撰格式律令礼典五经诸史赏赐不可胜计又尝与李绩修定本草并图合五十四篇行于代玄孙休烈 【按新书作曾孙今从旧书及宰相世系表】

于休烈

于敖

于琮

庞严

于休烈

休烈善文章与会稽贺朝万齐融延陵包融齐名开元初第进士又擢制科历秘书省正字吐蕃金城公主请文籍四种玄宗诏秘书写赐

休烈上疏曰昔东平王求史记诸子汉不与之以史记多兵谋诸子杂诡术也东平汉之懿戚尚不示征战之书今西戎国之寇讎安可贻以经典公主下嫁异国反求良书殆有奸人劝导其中若陛下虑失其情示不得已请去春秋夫春秋当周德既衰诸侯强盛征伐竞兴情伪于是乎生变诈于是乎起诚与之国之患也疏入诏中书门下议侍中裴光庭曰吐蕃不识礼经孤背国恩今渐以诗书陶以声教斯可致也休烈但见情伪变诈于是而生不知忠信节义亦于是乎在帝曰善遂与之 【谨按通鉴辑览御批欲假礼义以为渐陶与虑资权略而生变诈书生迂阔之论真不值一噓且求书者乃唐之公主非吐蕃也彼吐蕃即欲生变诈亦何藉于观汉书哉记载者不特不达事机亦且昧于文义矣今录识于此】 累迁起居郎直集贤殿学士比部郎中杨国忠为宰相斥不附己者出为中都郡太守肃宗立休烈奔行在擢给事中迁太常少卿知礼仪事兼修国史帝尝谓曰良史者君举必书朕有过失顾卿何如对曰禹汤罪己其兴也勃焉有德之君不忘规过于时经大盗后史籍燔阙休烈奏国史开元实录起居注及余书三千八百余篇藏兴庆宫兵兴焚炆殆尽请下御史核史馆所少购府县有得者许上送官一书进官一资一篇绢十匹凡数月止获一二篇唯韦述以其家藏国史一百三十篇上献中兴文物未完休烈献五代论讨论着旧章天子嘉之转工部侍郎仍修国史宰相李揆嫉其与己齐列奏徙休烈为国子祭酒权留史馆修撰以卑下之休烈安然无屑意干元初始诏百官元旦冬至于光顺门贺皇后休烈奏周礼有命夫朝人君命妇朝女君自显庆以来则天皇后甫行此礼而命妇与百官杂处在礼不经帝罢之代宗嗣位甄别名品元载称其清谅拜左散骑常侍兼修国史加礼仪使迁太常卿累迁工部尚书封东海郡公虽历清要不治产性恭俭仁爱无喜愠之容乐贤下士善推毂甚众年老笃意经籍嗜学不厌卒年八十一帝为叹息赠尚书左仆射谥曰元二子益肃及休烈时相继为翰林学士益天宝初及进士第肃终给事中赠吏部侍郎肃子敖

于敖

敖字蹈中以高才擢进士为秘书省校书郎于时杨凭李墉吕元膺相继辟幕府元和初拜监察御史五迁至右司郎中进给事中左拾遗庞严为元稹李绅所厚与蒋防俱荐为翰林学士李逢吉诬绅罪逐之而出严为信州刺史防江州刺史敖封还诏书搢绅意申严枉及驳奏下乃论贬严太轻众皆嗤噪逢吉乃厚敖三迁至户部侍郎出为宣歙观察使敖修谨家世用文学进初为时所称及居官无所建明不

午代亏)物以自容名益减卒赠礼部尚书四子球珪瓌琮皆清显琮知名

于琮

琮字礼用落魄不事事以门资为吏久不调驸马都尉郑颢独器之宣宗诏选士人尚公主者颢语琮曰子有美才不饰细行为众毁所抑能为之乎琮许诺中书舍人李潘知贡举颢以琮托之擢第授左拾遗初尚永福公主主未降食帝前以事折匕箸帝知其不可妻士大夫更诏尚广德公主咸通中以水部郎中为翰林学士迁中书舍人阅五月转兵部侍郎判户部八年同中书门下平章事进中书侍郎兼户部侍郎为韦保衡所构检校司空山南东道节度使三贬韶州刺史保衡败僖宗以太子少傅召未几复为山南节度使入拜尚书右仆射黄巢陷京师以病卧家巢欲起为相琮辞疾贼迫胁不止乃曰吾死在旦夕位宰相义不受污贼遂害之

庞严

庞严字子肃寿州寿春人第进士举贤良方正策第一拜拾遗辞章峭丽累迁驾部郎中知制造坐累出复入稍迁太常少卿太和五年权京兆尹强干不阿贵势然贪利溺声色卒于官

△高季辅

高冯字季辅以字行德州蓀人居母丧以孝闻兄元道仕隋为汲令县人反城应贼杀元道季辅率其党与县人战擒之斩首以祭贼众畏服更归附之至数千人俄与武陟李厚德将其众降授陟州总管府户曹参军贞观初拜监察御史弹治不避权要累转中书舍人列上五事以为今天下大定而刑未措何哉良出谋猷之臣不崇简易之政台阁之吏昧于经远之道执宪者以深刻为奉公当官者以侵下为益国如尚书八座人上所责成者也宜择温厚修洁者任之敦朴素革浮伪使家议慈孝人知廉耻自然礼节兴而祸乱息矣窃见陛下躬行节俭而营缮未息正丁正匠不能给驱使又和雇以重劳费人主所欲何求而不得愿爱其财毋使殫惜其力毋使敝畿内数州京师之本土狭人庶储蓄少而科役多宜蒙优贷令得休息强本弱支之义也至江南河北人颇舒闲宜为差等均量劳逸公侯勋戚之家邑入俸稍足以奉养而贷息出举争求什一下民化之竞为锥刀宜加惩革仕以代耕而今外官卑品皆未得禄夫饥寒切身虽夷惠不能全其行不恤其匮而责其廉正恐巡察岁出輶轩继轨而侵渔不息也宜及户口渐繁仓庾日实稍加廩赐使得事父母养妻子然后督责其效则庶官毕力矣密王元晓等俱陛下懿亲当正其礼比见帝子拜诸叔诸叔答拜爵封既同当明昭穆愿垂训正以为彝法书奏帝称善进授太子右庶子数上书切言得失帝赐锤乳一

剂曰尔进药石之言朕以药石相报后为吏部侍郎善铨叙人物帝赐金背镜一况其清
鉴焉久之迁中书令检校吏部尚书监修国史进爵蓀
县公永徽初加光禄大夫侍中兼太子少保感疾归第有诏以其兄虢州刺史季通为宗
正少卿视疾遣中使日候增损卒年五十八赠开府仪
同三司荆州都督谥曰宪子正业仕至中书舍人坐善上官仪贬岭表

△张行成

张行成字德立定州义丰人少师事刘炫炫谓门人曰行成体局方正廊庙才也大
业末察孝廉为谒者台散从员外郎后为王世充度支
尚书世充平以隋资补谷熟尉家贫代计吏集京师擢制举乙科调富平主簿有能名召
补殿中侍御史纠劾严正太宗以为能谓房玄龄曰古
今用人未有不因介绍若行成者朕自举之无先容也常侍宴帝语山东及关中人意有
同异行成曰天子四海为家不容以东西为限是示人
以隘矣帝称善赐名马一钱十万衣一称自是有大政事令与议焉累迁给事中帝尝谓
羣臣朕为人主兼行将相事岂不是夺公等名行成退
上疏以为左右文武诚无将相才奚用大庭广众与之量较损万乘之尊与臣下争功哉
帝嘉纳之转刑部侍郎太子少詹事太子驻定州监国
谓曰吾乃送公衣锦过乡耶令有司祠其先墓行成荐其里人魏唐卿崔宝权马龙驹张
君劼皆以学行闻太子召见以其老不可任以事厚赐
遣之太子使行成诣行在帝见悦甚赐劳尤渥还为河南巡察大使称旨检校尚书左丞
是岁帝幸灵州诏皇太子从行成谏曰皇太子宜留监
国对百寮日决庶务既为京师重且示四方盛德帝以为忠迁侍中兼刑部尚书高宗即
位封北平县公监修国史时晋州地震不息帝问之对
曰天阳也君象地阴也臣象君宜动臣宜静今静者顾动恐女谒用事大臣阴谋又诸王
公主参承起居或伺闲隙宜明设防闲且晋陛下本封
应不虚发伏愿深思以杜未萌帝然之诏五品以上极言得失俄拜尚书左仆射太子少
傅永徽四年自三月不雨至五月行成惧以老乞身制
答曰古者策免乖罪己之义此在朕寡德非宰相咎行成固请帝泣留之不得已复视事
未几卒于尚书省舍年六十七诏九品以上就第哭比
敛三遣使赐内衣服尚宫宿其家护视赠开府仪同三司并州都督谥曰定弘道元年诏
配享高宗庙廷 【按新旧书皆以张易之昌宗附行
成传后今改入佞幸此从删】

△杜正伦

杜正伦相州洹水人隋世重举秀才天下不十人而正伦一门三秀才皆高第为世
歆羨调武骑尉太宗素知名表直秦王府文学馆贞观

元年魏征荐其才擢兵部员外郎俄迁给事中知起居注帝尝曰朕坐朝不敢多言必待有利于民乃出诸口正伦曰臣职左史陛下一言失非止损百姓且笔之书千载累德帝悦赐采缎二百进累中书侍郎与韦挺虞世南姚思廉论事称旨帝为设宴具召四人者谓曰我闻神龙可扰以驯然颌有逆鳞婴者死人君亦有之卿属遂犯吾鳞补阙失朕其虑危亡哉思卿至意故举酒以相乐也各赐帛有差太子监国诏正伦行左庶子兼崇贤馆学士帝谓正伦吾儿幼未有就德我尝物物戒之今当监国不得朝夕见故辍卿于朝以佐太子擢中书侍郎封南阳县侯仍兼太子左庶子出入两宫典机密以办治称后太子稍失道帝语正伦太子数私小人卿可审喻之教而不从其语我来故正伦显谏无所避太子不从辄道帝语督切太子即表闻帝责曰何漏泄我语对曰开示不入故以陛下语怖之帝怒出为谷州刺史再贬交州都督太子废坐受金带流驩州久之授郢石二州刺史显庆元年擢黄门侍郎兼崇贤馆学士进同中书门下三品又兼度支尚书仍知政事迁中书令封襄阳县公初正伦已通贵李义府官尚微及同执政不能下中书侍郎李友益义府族也晚附正伦同摭义府衅缺义府使人告正伦友益交通罔上有异计高宗恶之出正伦为横州刺史流友益峰州正伦卒于贬所 【按新书称正伦凿杜固以通水利川流如血十日乃止其事近怪且谓城南诸杜自此不振尤迂诞不足信殆类世之为形家言者托此以神其术而史官无识攬摭及之今削不载】 正伦工属文尝与中书舍人董思恭夜直论文思恭归谓人曰与杜公评文今日觉吾文顿进无子以兄子志静为嗣从子求仁孙咸皆显名

杜求仁

杜咸

杜求仁

求仁有雅才永淳中授监察御史坐事为黜令与徐敬业举兵为兴复府长史死于难

杜咸

咸擢进士第累迁右台监察御史牂牁反咸监军出讨贼保垒自固道荒漫师不能进咸乃息士示不欲战阴伺之时旱暑风炽咸纵火噪

而前贼眩怖相失自腾践死擒其酋遂平之迁侍御史出为汾州长史开元中为河北按察使坐用法深刻贬睦州司马

△崔知温

崔知温字礼仁许州鄢陵人仕为左千牛稍迁灵州司马境有浑斛萨万帐数扰齐

民农皆释耒习骑射以扞贼知温表徙河北虏不乐迁
将军契苾何力为言乃止知温固请疏上十报卒徙河北自是人得就耕浑斛萨至徙地
顾善水草亦忘迁后入朝过州谢曰初徙且怨公今地
膏腴众孳息更荷公恩皆再拜四迁兰州刺史党项羌三万入寇州兵寡众惧不知所出
知温开关不设备羌怪之不敢进俄会将军权善才率
兵至大破其众善才欲穷追取之知温曰古善战弗逆奔且溪谷复深草木荒延万一有
变恐悔善才曰善分降口五百赠知温辞曰我议公事
图私利耶累迁尚书左丞转黄门侍郎修国史永隆初以秩卑特诏同门下三品兼修国
史迁中书令卒年五十七赠幽州大都督谥曰忠子泰
之开元时为工部尚书谩之为将作少匠与诛二张功封博陵县侯实封二百户终少府
监

崔知悌

崔知悌

兄知悌亦至中书侍郎与戴至德郝处俊李敬玄等同赐飞白书赞而知悌敬玄以
忠勤见表迁尚书左丞裴行俭之破突厥斩泥孰匐残
落保狼山诏知悌驰往定襄慰将士佐行俭平夷寇有功终户部尚书

△高智周

高智周常州晋陵人第进士补越王府参军迁费令与丞尉均取俸民安其化刻石
颂美入擢秘书郎弘文馆直学士三迁兰台大夫孝敬
在东宫与司文郎中贺斡司经大夫王真儒并为侍读得告还乡里叹曰进不知退取祸
之道也即移病去俄拜寿州刺史其治尚文雅行部先
见诸生质经义及政得失既乃录狱讼考耕饷勤惰以为常迁正议大夫黄门侍郎仪凤
初进同中书门下三品迁太子左庶子是时崔知温刘
景先修国史故智周与郝处俊监莅久之罢为御史大夫与薛元超裴炎同治章怀太子
狱无所同异因表去位高宗美其槩授右散骑常侍请
致仕听之卒年八十二赠越州都督谥曰定 【按新书智周传附载石仲览蒋子慎二事
仲览事已见于来济传中无庸复出至蒋氏子孙在
安史及朱泚时皆污伪官而此称其累叶贵显有清白名与乔琳传所记尤乖异吴氏纠
缪砭之甚当今不取】

△郭正一

郭正一定州鼓城人贞观时由进士第历中书舍人弘文馆学士永隆中迁秘书少
监检校中书侍郎诏与郭待举岑长倩魏玄同并同中
书门下承受进止平章事平章事自正一等始 【按本纪及宰相表此事在永淳元年传
误】 永淳中真迁中书侍郎执政久明习故事文辞

诏敕多出其手刘审礼与吐蕃战青海大败高宗召羣臣问所以制戎正一曰吐蕃旷年梗寇师数出坐费粮费近讨则丧威深入则平能得其巢穴今上策莫如少募兵且闭烽埃勿事侵扰须数年之迟力有余人思战一举可破矣刘齐贤皇甫文亮等议亦与正一合帝纳之武后专国罢为国子祭酒出检校陕州刺史与张楚金元万顷皆为周兴所诬构杀之籍入其家妻息流放文章无存者

△崔敦礼

崔敦礼【旧书本名元礼高祖改今名】字安上祖仲方在隋为礼部尚书其先博陵着姓魏末徙为雍州咸阳人敦礼涉书传矜节义武德中官通事舍人善词令进止观者皆竦动尝持节幽州召庐江王瑗瑗已举兵执之胁问朝廷事敦礼不为言太宗壮之还为左卫郎将赐金币良马擢中书舍人累迁兵部侍郎出为灵州都督召还拜兵部尚书诏辑抚回纥铁勒部姓会薛延陀寇边与李绩合兵破之置祁连州处其余众瀚海都督回纥吐迷度为下所杀诏往绥定立其嗣而还敦礼通知外国情伪少慕苏武为人故屡使突厥前后建明允会事机永徽四年拜侍中监修国史累封固安县公进中书令兼检校太子詹事以久疾自言不任事奉两宫更拜太子少师同中书门下三品弟余庆时为定襄都督府司马召使侍疾卒年六十一高宗为举哀东云龙门赙布秘器尤厚赠开府仪同三司并州大都督谥曰昭陪葬昭陵余庆位亦至兵部尚书

△卢承庆

卢承庆字子余幽州涿人隋散骑侍郎思道之孙父赤松为河东令与高祖雅故闻兵兴迎见霍邑拜行台兵部郎中终率更令范阳郡公承庆美仪矩博学而才少袭爵贞观初为秦州参军入奏军事太宗伟其辩擢考功员外郎累迁民部侍郎帝问历代户版承庆叙夏商至周隋增损曲折引据该详帝嗟赏俄兼检校兵部侍郎知五品选辞曰选事在尚书臣掌之为出位帝不许曰朕信卿卿何不自信历雍州别驾尚书左丞永徽时坐事贬兰州司马阅岁改洪州长史帝将幸汝州汤泉拜汝州刺史显庆四年以度支尚书参知政事寻同中书门下三品坐调非法免俄拜润州刺史进拜刑部尚书以金紫光禄大夫致仕卒临终戒其子曰死生至理犹朝有暮吾死敛以常服晦朔无荐牲葬勿卜日器用陶漆棺而不椁坟高可识碑志着官号年月无用虚文赠幽州都督谥曰定初承庆典选校百官考有坐漕舟溺者承庆以失所载考中下以示其人无愠也更曰非力所及考中中亦不喜承庆嘉之曰宠辱不惊考中上其能恕人之

过着人之善类皆如此也 【谨按通鉴辑览 御

批监运损粮当有定考乃以容色之闲屡为改注直舞文馱法耳此盖踵六朝恶习而不知其蠹政之甚挠政体者所不取也】 弟承业承泰承

业为雍州长史尚书左丞有能名

卢承泰

卢承泰

承泰字齐卿长安初为雍州参军武后诏长史薛季昶择僚吏堪御史者季昶访于齐卿齐卿曰长安尉卢怀慎李休光万年尉李义崔湜咸阳丞倪若水整屋尉田崇璧新丰尉崔日用季昶用其言后皆为通显巨人及拜幽州刺史而张守珪隶果毅齐卿厚遇之曰君十年之后必至节度使已而果然喜饮酒踰斗不乱宽厚乐易士友以此亲之终太子詹事广阳县公承庆从孙藏用别有传

△刘祥道 【刘齐贤】

刘祥道字同寿魏州观城人父林甫武德时为内史舍人典机密以才称与萧瑀等撰定律令着律议万余言历中书吏部二侍郎赐爵乐平县男唐沿隋制十一月选集至春停日薄事丛有司不及研谛林甫建请四时听选隋到辄拟于是官无滞人始天下初定州府及诏使以赤牒授官至是罢悉集吏部调至万员林甫随才铨录咸以为宜论者方隋高孝基祥道少袭爵历御史中丞显庆中迁吏部黄门侍郎知选事既世职乃厘补敝阙上疏陈六事一曰今取士多且滥入流岁千四百多也杂色入流未始铨汰滥也故共务者善人少恶人多臣谓应杂色进者切责有司试判为第四第一付吏部二付兵部三付主爵四付司勋若坐负当责虽经赦仍配三司不者还本贯则官不杂矣二曰内外官一品至九品万三千四百六十五员大抵三十而仕六十而退取其中数不三十年存者略尽若岁入流五百人则三十年自相充补况三十年外在官犹多不虑其少今入流岁千四百其倍两之又停选六七千人复年别新加其类寔广殆非经久之制三曰永徽以来在官者或以善政擢论事者或以单言进而庠序诸生未闻甄异是奖劝之道未周也四曰唐有天下四十年未有举秀才者请自六品以下至草野审加搜访无令赫赫之辰斯学遂绝五曰唐虞三载考绩黜陟幽明二汉用人亦久其职今任官率四考罢官知秩满则怀去就民知迁徙则苟且以去就之官临苟且之民欲移风振俗乌可得乎请四考进阶八考听选以息迎新送故之弊六曰三省都事主事主书比选补皆取流外有刀笔者虽欲参用士流率以俦类为耻前后相沿遂成故事且掖省崇峻王言秘密尚书政本人物所归专

责曹吏理有未尽宜稍革之以清其选会中书令杜正伦亦言入流者众为官人蔽乃诏与祥道参议而执政惮改作又以勋戚子进取无他门遂格稍迁司刑太常伯每覆大狱必歔歔累叹奏决曰为再不食诏巡察关内道多振冤滞兼沛王府长史麟德元年拜右相祥道性审谨居宰相忧畏不自堪数陈老病旬解坐与上官仪善罢为司礼太常伯高宗封泰山有司请太常卿亚献光禄卿终献祥道建言三代六卿重故得佐祠汉魏以来权归台省九卿为常伯属官今封岱大礼不以八座用九卿无乃徇古名亡实事乎帝可其议以司徒徐王元礼亚献祥道终献礼成进爵广平郡公干封元年以金紫光禄大夫致仕卒年七十一赠幽州都督谥曰宣子齐贤袭爵齐贤后改名景先由侍御史出为晋州司马帝以其方直尊惮之时将军史兴宗从猎苑中言晋州出佳鹞可捕取帝曰齐贤岂捕鹞人耶累迁黄门侍郎永淳元年进同中书门下平章事武后时代裴炎为侍中办炎不反后怒左迁晋州刺史道贬吉州长史永昌中为酷吏所陷系州狱自经死建中三年赠太子太保齐贤三世皆为两省侍郎及典选叔父应道从父弟令植等八人前后为吏部郎中员外世以为罕

刘从一

刘从一

令植孙从一擢进士宏词第调渭南尉为常袞卢杞所厚荐授监察御史普王讨李希烈表为元帅判官德宗居奉天超拜刑部侍郎同中书门下平章事从幸梁州改中书侍郎贞元初以疾自劾罢为户部尚书卒赠太子太傅

△李敬玄

李敬玄亳州谯人该览羣籍善于五礼高宗在东宫马周荐其才召入崇贤馆侍读假中秘书读之为人峻整然造请不惮寒暑许敬宗颇荐延之历西台舍人弘文馆学士迁右肃机检校太子右中护总章二年拜西台侍郎同东西台三品兼检校司刑少常伯时员外郎张仁纬有敏才敬玄委以曹事仁纬为造姓历状式铨簿钳键周密病心太劳死敬玄因其法衡综有序自永徽后选员寢多惟敬玄居职有能称性强记虽官万员遇诸道未尝忘姓氏有来诉者口论书判参舛及殿累本末无少缪天下服其明杭州参军徐太玄有同僚张惠以赃抵罪太玄哀惠母老乃诣狱自言与惠偕受薄其罪惠得不死太玄坐免官十年敬玄廉知之擢为郑州司功参军太玄由是知名后仕至秘书少监申王师以德行闻其鉴拔率若此咸亨二年转中书侍郎又改吏部兼太子右庶子同中书门下三品监修国史进吏部尚书居选部久人多附向凡三娶

皆山东旧族又与赵李氏合谱故台省要职多族属姻家高宗知之不悦仪凤元年拜中书令封赵国公刘仁轨西讨吐蕃有所建请敬玄数持异由是有隙因奏河西镇守非敬玄不可敬玄辞以非将帅才且仁轨逞憾故强臣以不能帝厌之因曰仁轨若须朕朕且行卿安得辞乃拜洮河道大总管兼镇抚大使检校鄯州都督统兵十八万代仁轨与吐蕃将论钦陵战青海使刘审礼为先锋麤虜敬玄按军自如审礼战歿尚首鼠不进乃屯承风岭又阻沟淖莫能前贼屯高压其营偏将黑齿常之率死士夜击贼敬玄始得至鄯州又战湟州遂大败数称疾求罢归许之既入见不引谢即还府视事帝察之实不病贬衡州刺史久之迁扬州长史卒官赠兖州都督谥曰文宪撰次礼论及它书数十百篇二子思冲守一思冲神龙初历工部侍郎左羽林军将军从节愍太子诛武三思见杀籍其家守一郾令孙绅别传

李元素

李元素

敬玄弟元素为武德令刺史李文■〈日东〉横调民黄金造常满尊以献官属无敢谏元素固争文■〈日东〉为少损更以私财助之延载初繇文昌左丞迁凤阁侍郎同凤阁鸾台平章事为武懿宗所构与綦连耀等同诛神龙中追洗其辜

△孙处约 【孙佺】

孙处约始名道茂汝州郟城人贞观中为齐王佑记室佑多过失数上书切谏王诛帝得其书咨叹之擢中书舍人高宗即位杜正伦请增舍人员帝白处约一人足办我事止不除以论撰劳数赐段物再迁司礼少常伯麟德元年以西台侍郎同东西台三品为少司成以老致仕卒

【按旧传载处约与李绩许敬宗同知国政在永徽年闲而显庆中即以老致仕与新书叙次先后迥异考新旧本纪及通鉴皆与新传合知旧史误也】子佺延和初为羽林将军幽州都督率兵十三万讨奚李大酺分三屯以副将李楷洛周以悌领之次冷硎楷洛与大酺战不胜壮校多没佺气褫乃给言天子诏我招慰楷洛违诏妄战当斩遣人谢大酺大酺曰审尔愿出天子赐明不欺佺攀聚军中帑万余匹悉袍带并与之大酺知佺诈好语劝引还而佺部伍离沮奚逼之大败死者数万佺以悌同见获送默啜所杀之

△邢文伟

邢文伟滁州全椒人与历阳高子贡寿春裴怀贵俱以博学闻咸亨中历太子兴膳丞时孝敬罕见宫臣文伟辄减所供膳上书曰古者太

子既冠则有司过之史亏膳之宰史不书过死之宰不彻膳死之皇帝简料英俊自庶子至司议舍人学士侍读使佐殿下成就圣德比者不甚
廷议谒对稀简三朝之后与内人独居何由发挥天资使浚哲文明哉今史既阙官宰得奉职谨守礼经以闻太子答曰幼嗜坟典耽诵致劳比
苦风虚奉陛下恩旨不许强勉加以趋侍朝夕屡阙坐朝乖废学绪观寻求请良符宿志自非义均弼谐渠能进此药石文伟由是益知名后右
史缺高宗谓侍臣曰文伟切谏吾儿此直臣也遂授之武后时累迁凤阁侍郎兼弘文馆学士载初元年为内史 【按宰相表载初元年文伟同凤阁鸾台平章事其守内史则在天授元年二月也】 宗秦客以奸赃抵罪文伟坐所善贬珍州刺史会它使者至文伟内悸自经死

高子贡

高子贡

高子贡善太史书与朱敬则善擢明经历秘书省正字弘文馆直学士不得志因弃官去徐敬业起兵弟敬猷统兵五千逼和州子贡率乡人数百拒之贼引去以功擢朝散大夫为成均助教东莞公融尝为和州刺史从子贡受业及融谋举兵令黄公譔见子贡推为谋主书疏往返因结诸王内应谋泄坐死

钦定续通志卷二百十四

●钦定续通志卷二百十五 列传十五

列传

唐 【十五】

○唐十五

傅奕 吕才 陈子昂 【王无竞赵元】

傅奕

吕才

陈子昂

△傅奕

傅奕相州邺人隋开皇中以仪曹事汉王谅反问奕今兹荧惑入井果若何对曰东井黄道所由荧惑之舍乌足怪耶若入地上井乃为灾谅怒俄及败奕以对免徙扶风高祖为扶风太守礼之及即位拜太史丞会令庾俭以父质言占候忤炀帝死惩其事耻以术宦荐奕自代奕迁令与俭同列数排毁之俭不为恨于是人多俭仁厚而称奕之率直时国制草创多仍隋旧奕谓承乱世之后当有变更请改正朔易服色变律令革官名太仆卿张道源建言官曹文簿繁总易欺请减之以铃吏奸公卿举不为然

奕独是之为众沮讟不得行武德七年上疏极诋浮图
法曰西域之法无君臣父子以三涂六道吓愚欺庸追既往之罪窥将来之福至有身陷
恶逆狱中礼佛口诵梵言以图偷免且生死寿夭本诸
自然刑德威福系之人主今其徒矫托皆云由佛攘天理窃主权书曰惟辟作福惟辟作
威惟辟玉食臣有作福作威玉食害于而家凶于而国
五帝三王未有佛法君明臣忠年祚长久至汉明帝始立胡祠然惟西域桑门自传其教
西晋以上不许中国髡发事胡至石苻乱华乃弛厥禁
主庸臣佞政虐祚短事佛致然梁武齐襄尤足为戒昔褒姒一女荧惑幽王能亡其国况
今僧尼十万刻绘泥像以惑天下有不亡乎陛下以十
万之众自相夫妇十年滋产十年教训兵农两足利可胜纪耶昔高齐章仇子他言僧尼
塔庙外见毁宰臣内见疾妃嬙阳谗阴谤卒死都市周
武帝入齐封宠其墓臣窃贤之又上十二论言益痛切帝下奕议有司唯道源佐其请中
书令萧瑀曰佛圣人也非圣人者无法请诛之奕曰礼
始事亲终事君而佛逃父出家以匹夫抗天子以继体悖所亲瑀非出空桑乃尊其言盖
所谓非孝者无亲瑀不答但合掌曰地狱正为是人设
矣帝善奕对未及行会传位止初九年太白躔秦分奕奏秦王当有天下帝以奏付王及
太宗即位召赐食谓曰向所奏几败我虽然自今毋有
所讳而不尽言又尝问卿拒佛法奈何奕曰佛西胡黠人尔欺诛夷狄以自神至入中国
而嬖儿幻夫模象庄老以文饰之有害国家而无补百
姓也帝异之 【按通鉴云时有西域僧善咒术能令人立死复咒令苏屡试皆验奕请试
之竟无所觉僧旋僵仆遂不复苏盖邪不胜正理或
有之然新旧书本传并不载其事今亦不复采入】 贞观十三年卒年八十五遗言戒其
子习六经名教言勿为妖胡之法死当裸葬奕虽善数
然尝自言其学不可以传又注老子并集晋魏以来与佛议驳者为高识篇武德时改漏
刻法又十二军号皆奕所定云

△吕才

吕才博州清平人贞观时祖孝孙增损乐律与音家王长通白明达更质难不能决
太宗诏侍臣举善音者中书令温彦博白才天悟绝人
闻见一接辄究其妙侍中王珪魏征盛称才制尺八凡十二枚长短不同与律谐契即召
才直弘文馆参论乐事帝尝览周武帝三局象经不能
通或言太子洗马蔡允恭能之召问允恭少通其略老乃忘试问才退一夕即解具图以
闻允恭记其旧与才正同由是知名擢累太常博士帝
病阴阳家所传书多谬伪浅恶世益拘畏命才与宿学老师删落烦讹掇可用者为五十
三篇合旧书四十七凡百篇诏颁天下才于持议儒而

不但推本经谊以救俗失辞指明切有益时事故剝其三篇卜宅篇曰诗称相其阴阳书云惟洛食卜宅吉凶其来尚矣至于近世乃有五姓之说谓宫商角征羽天下万姓悉配属之以处吉凶然言皆不类如张王为商武庚为羽是以音相谐附至柳为宫赵为角则又不然其闲一姓而两属复姓数字不得所归是直野人巫师说尔按堪舆经黄帝对天老始言五姓且黄帝时独姬姜数姓耳后世赐族者寔多管蔡邲霍鲁卫毛聃郤雍曹滕毕原酆郇本之姬姓孔殷宋华向萧亳皇甫本之子姓至因官命氏因邑赐族本同末异亦为配宫商哉春秋以陈卫秦为水姓齐郑宋为火姓或所出之祖所分之星所居之地以着由来非宫商角征羽相管摄也禄命篇曰汉宋忠贾谊讥司马季主曰卜筮者高人禄命以悦人心矫言祸福以规人财王充曰见骨体知命禄见命禄知骨体此则禄命之书行之已久推索本原固不其然积善之家必有余庆岂建禄而后吉乎积恶之家必有余殃岂劫杀而后灾乎学也禄在其中不必生当建学文王忧勤损寿初非月值空亡长平坑降卒非俱犯三刑南阳多近亲非俱当六合历阳成湖不共河魁蜀郡炎火不尽灾厄世有同建与禄而贵贱殊域共命若胎而夭寿异科鲁桓公六年七月庄公生按历岁在乙亥月建申然则值禄空亡据法应穷贱又触句绞六害借驿马身克驿马三刑法无官火命七月生当病乡法曰为人尪弱矬陋而诗言庄公曰猗嗟昌兮颀而长兮美目扬兮巧趋跄兮唯向命一物法当寿而公薨止四十五一不验秦庄襄王四十八年始皇帝生以正月故名政是岁壬寅正月命偕禄于法无官假得禄奴婢应少又破驿马三刑身克驿马法望官不到金命正月生当绝为人无始有终老而吉又建命生法当寿帝崩时不过五十二不验汉武帝以乙酉岁七月七日平旦生当禄空亡于法无官虽向驿马乃隔四辰法少无官老而吉武帝即位年十六末年户口减耗三不验后魏高祖孝文皇帝生皇兴元年八月是岁丁未为背禄命与驿马三刑身克驿马于法无官又生父死中法不见父而孝文受其父显祖之禅礼君未踰年不得正位故天子无父事三老也孝文受禅异于常礼躬率天下以事其亲而法不合识父四不验宋高祖癸亥三月生禄与命皆空亡于法无官又生子墓中法宜嫡子虽有次子当早卒而高祖长子先被弑次子义隆享国又生祖禄下法得嫡孙财若禄其孙劭浚皆篡逆几失宗祧五不验葬篇曰经曰葬者藏也欲人之弗得见也又曰卜其宅兆而安厝之朝市贸迁不可知泉石颓啗不可常是以谋及卜筮庶无后难斯则备于慎终之礼也后代葬说出于巫史或选年月便利或量墓田远近一物有失便谓灾及死生多为

妨禁以售其术附妄凭妖至有百二十家春秋王者七日而殡七月而葬诸侯五日而殡五月而葬大夫三月士庶人逾月贵贱不同礼亦异数故先期而葬谓之不怀后期不葬谓之殆礼此则葬有定期不择年与月一也又曰丁巳葬定公雨不克葬至于戊午襄事君子善之礼卜葬先远日者自末而进避不怀也今葬书以己亥日最凶谨按春秋是日葬者凡有二十余族此葬不择日二也礼周尚赤大事用旦殷尚白大事用日中夏尚黑大事用昏大事者何丧葬也此直取常代所尚而不择时早晚也子产及子太叔葬郑简公于是司墓大夫室当枢路若坏其室即平旦而棚不坏其室即日中而棚子产不欲坏室欲待日中子太叔曰若日中而棚恐久劳诸侯大夫来会葬者此惟论人事可否不问时之得失也曾子曰葬逢日蚀舍于路左待明而行所以备非常也依旧书多取干艮二时乃近夜半今推检礼传葬不择时三也葬书以官爵富贵年寿修促子姓蕃衍皆葬之所致易曰圣人之大宝曰位何以守位曰仁书曰立功立事可以永年未闻舍人事而责地形臧孙有后于鲁不闻葬得吉也若敖绝嗣于荆不闻葬得凶也此葬有吉凶不可信四也今葬法皆据五姓便利而古之葬并在国都之北赵氏之葬在九原汉家山陵或散处诸域又何上利下利大墓小墓为哉然刘之子孙本支不绝赵后与六国等王此则葬用五姓不可信五也且人有初贱而后贵始泰而终否者子文为令尹三仕三已展禽三黜于士师彼冢墓已定而不改此名位不常何也故知荣辱升降不由于葬六也世之人为葬巫所欺忘擗踊荼毒以期徼幸于是相莹陇希官爵择日时规财利谓辰日不哭遂欣然而受吊谓同属不得临圻乃吉服不送其亲诡戮礼俗不可以法七也帝又诏造方域图及教飞骑战陈图屡称旨擢太常丞麟德中以太子司更大夫卒生平预修书及著述甚多子方毅七岁能诵经太宗闻其敏召见奇之赐束帛长为右卫铠曹参军母丧以毁卒布车从母葬通人郎余令以白粥玄酒生刍祭路隅世共哀之

△陈子昂

陈子昂字伯玉梓州射洪人家世豪富年十八未知书他日入乡校感愤痛自修饬文明初举进士时高宗崩将迁梓宫长安于是关中无岁子昂盛言东都胜垵可营山陵上书曰臣闻秦据咸阳汉都长安山河为固而天下服者以北假胡宛之利南资巴蜀之饶转关东之粟而收山西之储故能长驱利策横制宇宙今则不然燕代迫匈奴巴陇婴吐蕃秦之首尾不完所余独三辅闲耳顷遭荒馑百姓荐饥薄河而右惟有赤地循陇以北不逢青草父兄转徙妻子流离赖天悔祸去年薄稔羸耗之余得保性命

然流亡未还阡陌无主至于蓄积尤可哀伤陛下以先帝遗意方欲长驱大驾按节西京千乘万骑何从仰给山陵穿复必资徒役率羸敝之众兴数万之军调发近畿督扶稚老铲山辇石驱以就功春作无时秋成绝望雕甍遗噍再罹艰苦有不堪其困则逸为盗贼揭挺叫噉可不深图哉且天子以四海为家舜葬苍梧禹葬会稽岂爱夷裔而鄙中国邪示无外也周平王汉光武都洛而山陵寝庙并在西土者实以时有不可故遗小存大去祸取福也今景山崇秀北对嵩邱右眇汝海祝融太昊之故墟在焉园陵之美复何以加且太原廩巨万之仓洛口储天下之粟乃欲舍而不顾俛鼠窃狗盗西入陕郊东犯虎牢取敖仓一抔粟陛下何与遏之武后奇其才召见金华殿擢麟台正字垂拱初条上利害三事其一言九道出大使巡按天下申黜陟求人瘼臣谓计有未尽也且陛下发使欲使百姓知天子夙夜忧勤之也羣臣知考绩而任之也奸暴不逞知将除之也则莫如择仁可以恤孤明可以振滞刚可以折强御者然后为之故轺轩未动而天下翘然待之矣今使且未出道路之人皆已指笑欲望进贤退不肖岂可得邪宰相奉诏书有遣使之名无任使之实使愈出天下愈敝徒令百姓治道路送往迎来不见其益其二言刺史县令政教之首陛下布德泽下诏书必待刺史县令谨宣而奉行之不得其人则委弃有司挂墙屋耳故宰相者陛下之腹心刺史县令者陛下之手足国家兴衰在此职也今吏部调县令如补一尉但计资考不求贤良有如不次用人则天下嚣然相谤故庸人任职教化陵迟欲兴太平宜革斯弊其三言天下有危机祸福因之而生机静则有福动则有祸今军旅之弊夫妻不得安父子不相养五六年矣自剑南尽河陇山东由青徐曹汴河北举沧瀛赵郑或困水旱或顿兵疫死亡流离略尽尚赖陛下悯其失职凡兵戍调发一切罢之使人得妻子相见父兄相保可谓能静其机也然臣恐将相有贪夷狄利以广地强武说陛下者欲动其机机动则祸构宜修文德去刑罚劝农桑以息疲民于时吐蕃九姓叛诏田扬名发金山道十姓兵讨之十姓君长以三万骑战有功遂请入朝后责其尝不奉命擅破回纥不听子昂上疏曰国家能制十姓者繇九姓强大臣伏中国故势微弱委命下吏今九姓叛亡北蕃丧乱君长无主回纥残破磧北诸姓已非国有欲犄角亡叛唯金山诸蕃共为形势有司乃以扬名擅破回纥归十姓之罪拒而遣还不使入朝恐非羈戎之长策也十姓内无国家亲信之恩外有回纥报讎之患怀不自安鸟骇狼顾则河西诸蕃自此拒命矣且夷狄相攻中国之福今回纥已破既无可言十姓非罪又不当绝罪止扬名足以慰其酋领矣近诏同城权置安北府

其地当磧南口制匈奴之冲常为剧镇臣顷闻磧北突厥之归者已千余帐来者未止甘州降户四千帐亦置同城今磧北丧乱荒馑之余无所存仰陛下开府招纳诚覆全戎狄之仁也然同城本无储峙而降附蕃落不免寒饥更相劫掠今安北有官牛羊六千粟麦万斛城孤兵少降者日众不加救恤盗劫日多夫人情以求生为急今有粟麦牛羊为之饵而不救其死安得不为盗乎盗兴则安北不全甘凉以往躄以待陷后为边患祸未可量且夷狄代有雄杰与中国抗有如勃起招合遗散众或归之此国家大机不可失也又谓河西诸州军兴以来公私储蓄尤可嗟痛凉州岁食六万斛屯田所收不能偿垦陛下欲制河西定乱戎此州空虚未可动也甘州所积四十万斛观其山川诚河西咽喉地北当九姓南逼吐蕃奸回不测伺我边罅故甘州地广粟多左右受敌但户止三千胜兵者少屯田广夷仓庾丰衍瓜肃以西皆仰其饘一旬不往士已枵饥是河西之命系于甘州矣且其四十余屯水泉良沃不待天时岁取二十万斛但人力寡乏未尽垦发异时吐蕃不敢东侵者繇甘凉士马强盛以抗其入今甘州积粟万计兵少不足以制贼致吐蕃敢大入燔蓄谷蹂诸屯则河西诸州我何以守宜益屯兵外得以防盗内得以营农取数年之收可饱士百万则天兵所临何求不得哉其后吐蕃果入寇终后世为边患最甚后方谋开蜀山由雅州道翦生羌因以袭吐蕃子昂上书以七验谏止之曰臣闻乱生必由于怨雅州边羌自国初以来未尝一日为盗今无罪蒙戮怨必甚怨甚则蜂屯蚁聚相煽以变而边邑连兵守备不解蜀之祸构矣东汉丧败乱始诸羌一验也吐蕃黠狁抗天诛者二十余年前日薛仁贵郭待封以十万众败大非川一甲不返李敬玄刘审礼举十八万众困青海身执贼廷关陇为空今乃欲建李处一为上将驱疲兵袭不可幸之吐蕃举为贼笑二验也夫事有求利而得害者昔蜀与中国不通秦以金牛美女啖蜀侯侯使五丁力士栈褒斜凿通谷迎秦之馈秦随以兵而地入中州三验也吐蕃爱蜀富思盗之矣徒以障隧隘绝顿饿喙不得噬今撤山羌开阪险使贼得收奔亡以攻边是除道待贼举蜀以遗之四验也蜀为西南一都会国之宝府又人富粟多浮江而下可济中国今图侥幸之利以事西羌得羌地不足耕得羌财不足富是过杀无辜之众以伤陛下之仁五验也蜀所恃有险也蜀所安无役也今开蜀险役蜀人险开则便寇人役则伤财臣恐未及见羌而奸盗在其中矣异时益州长史季崇真托言吐蕃寇松州天子为盛军师趣转饷以备之不三年巴蜀大困不见一贼而崇真奸赃已巨万今得非有奸臣图利复以生羌为资六验也蜀士佺孱不知兵一虏持矛百人

不敢当若西戎不即破灭臣见蜀之边陲且不守而为
羌夷所暴七验也国家近废安北拔单于弃龟兹放疏勒天下翕然以为务仁不务广务
养不务杀今徇贪夫之议诛无罪之羌遗全蜀患此臣
所未谕方今山东饥关陇弊生人流亡诚陛下宜静思和天人之时安可动甲兵兴大役
以自生乱又西军失守北屯不利边人骇情今复举舆
师投不测小人徒知议夷狄之利非帝王至德也后复召见使论为政之要适时不便者
子昂乃奏八科一措刑二官人三知贤四去疑五招谏
六劝赏七息兵八安宗子俄迁右卫胄曹参军后既称皇帝改号周子昂上周受命颂母
丧去官服终擢右拾遗子昂多病居职不乐会武攸宜
讨契丹表子昂参谋次渔阳前军败举军震恐攸宜轻易无将略子昂谏曰陛下发天下
兵以属大王安危成败在此举安可忽哉今大王法制
不立有如儿戏愿审智愚量勇怯度众寡以长攻短此刷耻之道也能听愚计分麾下万
人为前驱契丹小丑指日可禽攸宜以其儒者谢不纳
居数日复进计攸宜怒徙署军曹子昂知不合不复言圣历初以父老表解官归侍诏以
官供养会父丧庐冢次每哀恸闻者为涕县令段简贪
暴闻其富欲害之家人纳钱二十万缗简薄其赂捕送狱中忧愤死年四十三子昂资褊
躁然轻财好施笃朋友与陆余庆王无竞房融崔泰之
卢藏用赵元最厚唐兴文章承徐庾余风子昂始变雅正初为感遇诗三十八章王适曰
是必为海内文宗乃请交子昂所论著当世以为法子
光与赵元子少微俱以文称光终商州刺史子易甫简甫皆位御史

王无竞

赵元

王无竞

王无竞者字仲列世居东莱宋太尉弘之远裔家富于财颇负气豪纵擢下笔成章
科调栾城尉三迁监察御史改殿中会朝宰相宗楚客
杨再思离立偶语无竞扬笏曰朝礼尚敬公等大臣不宜慢常典楚客怒徙无竞太子舍
人神龙初诋权幸出为苏州司马张易之等诛坐常交
往贬广州仇家矫制榜杀之

赵元

赵元者字贞固河闲人祖揆号通儒在隋与同郡刘焯俱召至京师补黎阳尉徙居
汲元少负志略好论辨来游雒阳士争慕向所与造谢
皆缙绅选调宜禄尉到职非公事不言弹琴蒔药如隐者之操卒年四十九其友魏元忠
孟洗宋之问崔璩等共谥昭夷先生

钦定续通志卷二百十五

●钦定续通志卷二百十六 列传十六

列传

唐 【十六】

○唐十六

刘仁轨 裴行俭 【光庭 稹均姿】 师德

刘仁轨

裴行俭

姿师德

△刘仁轨

刘仁轨字正则汴州尉氏人少贫贱好学值乱不能安业每动止画地书空寓所习卒以通博闻武德初河南道安抚大使任瓌上疏有所论奏仁轨见其藁为窜定数言瓌惊异赤牒补息州参军转陈仓尉部人折冲都尉鲁窳者豪纵犯法县莫敢屈仁轨约不再犯而窳暴横自如仁轨擄杀之州以闻太宗曰尉而杀吾折冲可乎召诘让仁轨对曰窳辱臣臣故杀之帝以为刚正夏擢咸阳丞贞观十四年校猎同州时秋斂未讫仁轨谏曰今兹澍泽沾足百谷炽茂收纔十二常日征调已有所妨又供猎事缮桥治道役虽简省犹不损数万少延一旬使场圃毕劳陛下六飞徐驱公私交泰玺书褒纳拜新安令累迁给事中为李义府所恶出为青州刺史显庆五年伐百济义府欲斥以罪使督漕而船果覆没坐免官白衣随军 【按旧书载仁轨监统水军征辽以后期坐免新书及张鷟朝野僉载皆云督运覆船今从之又通鉴考异云仁轨从军乃在百济非征辽也新旧书并误今改从通鉴】 初苏定方既平百济留郎将刘仁愿守其城左卫中郎将王文度为熊津都督抚纳残党文度死有济故将福信及浮屠道琛迎故王子扶余丰立之引兵围仁愿诏仁轨检校带方州刺史统文度之众并发新罗兵为援仁轨将兵严整转鬪陷阵所向无前信等释仁愿围退保任存城既而福信杀道琛并其众招还叛亡势张甚仁轨与仁愿合则解甲休士时定方伐高丽围平壤不克高宗诏仁轨拔军就新罗与金法敏议去留计将士咸欲还仁轨曰春秋之义大夫出疆有可以安社稷便国家者得专之今天子欲灭高丽先诛百济留兵镇守制其心腹宜厉兵秣马乘无备击不意百下百全战胜之日开张形势腾檄济师声援接虏亡矣今平壤不胜熊津又拔则百济之烬复炎高丽之灭无期吾等虽入新罗正似坐客有不如志悔可得邪扶余丰猜贰表合内携势不支久宜坚守伺变以图之不可轻动众从其议乃请益兵时贼守真岷城仁轨夜督新罗兵薄城扳堞比明入之遂通新罗饌

道而丰果袭杀福信遣使至高丽倭勾援会诏遣右威
卫将军孙仁师率军浮海而至士气颇振于是诸将议所向或曰如林城水陆之冲盍先
击之仁轨曰兵法避实击虚如林险而固攻则伤士守
则旷日周留城贼巢穴羣凶聚焉若克之诸城自下于是仁师仁愿及法敏帅陆军以进
仁轨与仕爽扶余隆繇熊津白江会之遇倭人白江口
四战皆克焚四百艘海水为丹扶余丰脱身走伪王子扶余忠胜忠志等率其众与倭人
降独酋帅迟受信据任存城未下始定方破百济酋领
沙咤相如黑齿常之啸亡散据险以应福信至是皆降仁轨以赤心示之俾取任存自效
即给铠仗粮糗仁师曰夷狄野心难信若授甲济粟资
寇便也仁轨曰吾观相如常之忠勇有谋因机立功尚何疑二人讫拔其城迟受信委妻
子奔高丽百济余党悉平仁师等振旅还诏留仁轨统
兵镇守百济时被乱殍尸如莽仁轨始命瘞埋吊祭焉葺复户版署官吏开道路营聚落
复防堰振贫贷乏劝课耕种为立官社民皆安其所遂
营屯田以经略高丽仁愿至京师帝劳曰卿本武将军中奏请皆有文理何道而然对曰
仁轨之辞非臣所能帝叹赏之超进仁轨六阶真拜带
方州刺史赐第一区厚赉妻子玺书褒勉先是贞观永徽中士战歿者皆诏使吊祭或以
赠官推授子弟显庆后讨伐恩赏殆绝及破百济平壤
有功者皆不甄叙州县购募不愿行身壮家富者以财参逐率得避免所募皆傭劣寒惫
无鬪志仁轨具论其弊请加慰赉以鼓士心又表用扶
余隆使绥定余众帝乃以隆为熊津都督时刘仁愿为卑列道总管诏率兵度海使代旧
屯与仁轨俱还仁轨曰国家悬军海外欲以经略高丽
方农时而吏与兵悉被代新至者未习万一蛮夷生变谁与捍之不如留旧兵令收获办
具资粮节级遣还仁轨当留未可去仁愿不可曰吾但
知准诏耳仁轨曰不然苟利国家知无不为臣之节也因陈便宜愿留屯诏可由是以仁
愿为不忠始仁轨任带方州谓人曰天将富贵此翁邪
乃请所颁历及宗庙讳或问其故答曰当削平辽海颁示本朝正朔卒皆如言及封泰山
仁轨乃率新罗百济儋罗倭四国酋长赴会天子大悦
擢为大司宪迁右相兼检校太子左中护累功封乐城县男总章元年为熊津道安抚大
使兼浞江道总管副李绩讨高丽平之以疾辞位进金
紫光禄大夫听致仕俄召为陇州刺史拜太子左庶子同中书门下三品监修国史咸亨
五年为鸡林道大总管东伐新罗仁轨率兵绝瓠芦河
攻大镇七重城破之进爵为公子及兄子授上柱国者三人州党荣之号所居为乐城乡
三柱里俄拜尚书左仆射兼太子宾客仍知政事吐蕃
入寇命为洮河道行军镇守大使永隆三年加太子少傅数乞骸骨听解左仆射帝幸东

都太子监国诏仁轨与裴炎薛元超留辅及太子赴东
都又诏太孙重昭留守仁轨副之武后临朝复拜左仆射太孙废仁轨专知留守事上疏
辞疾因陈吕后禄产祸败事以规后后遣武承嗣赉玺
书慰勉改文昌左相同凤阁鸾台三品卒年八十五诏百官赴哭册赠开府仪同三司并
州大都督陪葬干陵赐其家实封三百户仁轨虽贵显
不自矜倨接旧故如布衣时尝为御史袁异式所劾慢辱之胁使引决及拜大司宪异式
尚在台不自安因醉以情自解仁轨持觞曰所不与公
者有如此觞后既执政荐为司元大夫然官由州县至宰辅善致声誉得吏下欢心及镇
洮河奏请机急多为李敬玄抑却仁轨乃表敬玄为帅
以代己果覆其众裴炎下狱仁轨方留守京师郎将姜嗣宗以使来因语炎事且曰炎异
于常久矣仁轨曰使人知邪曰知及还表嗣宗知炎反
状不告武后怒拉杀之子璇官太子舍人垂拱中为酷吏所杀中宗即位以仁轨有东宫
旧再赠司空璇子晃开元中为给事中表请立碑追谥
曰文献

△裴行俭

裴行俭字守约绛州闻喜人父仁基隋光禄大夫自王世充所谋归国被害赠原州
都督谥曰忠行俭幼引荫补弘文生贞观中举明经调
左屯卫仓曹参军时苏定方为大统军谓曰吾用兵世无可教者子其人乎乃尽畀以术
迁长安令高宗将立武昭仪行俭以为国家忧从此始
与长孙无忌褚遂良秘议大理袁公瑜摘语昭仪母左除西州都督府长史麟德二年擢
累安西都护西域诸国多慕义归附召为司文少卿迁
吏部侍郎与李敬玄马载同典选有能名时号裴马【旧书云时称裴李】行俭始设
长名榜铨注等法又定州县升降资拟高下为故事上
元三年吐蕃叛出为洮州道左二军总管改秦州右军并受周王节度仪凤二年十姓可
汗阿史那都支及李遮鬲诱蕃落以动安西与吐蕃连
和朝廷欲讨之行俭议曰吐蕃叛涣方炽敬玄失律审礼丧元安可更为西方生事今波
斯王死其子泥涅师质京师有如遣使立之即路出二
蕃若权以制事可不劳而功也帝因诏行俭册送波斯王且为安抚大食使经莫贺延碛
风砾昼冥导者迷将士饥乏行俭止营致祭令曰水泉
非远众少安俄而云彻风恬行数百步水草丰美后来者莫识其处众皆惊以方汉贰师
将军至西州诸蕃郊迎行俭召豪杰千余人自隋扬言
大热未可以进宜驻军须秋都支觚知之不设备行俭徐召四镇酋长伪约畋谓曰吾念
此乐未始忘孰能从吾猎者于是子弟愿从者万人乃
阴勒部伍数日倍道而进去都支帐十余里先遣其所亲问安否外若闲暇非讨袭者又

使人趣召都支都支本与遮匐计及秋拒使者已而闻
军至仓卒不知所出率子弟五百余人诣营谒遂禽之是日传契箭召诸部酋后悉来请
命并执送碎叶城简精骑约赍袭遮匐道获遮匐使者
释之俾前往谕其主并言都支已禽状遮匐乃降悉俘至京师将吏为刻石碎叶城以纪
功帝遣劳宴曰行俭提孤军深入万里兵不血刃而叛
党禽夷可谓文武兼备矣其兼授二职即拜礼部尚书兼检校右卫大将军调露元年突
厥阿史德温傅反单于管二十四州叛应之众数十万
都护萧嗣业讨贼不克死败系踵诏行俭为定襄道行军大总管讨之率太仆少卿李思
文营州都督周道务部兵十八万合西军程务挺东军
李文■〈日东〉等总三十余万旗帜亘千里行俭咸节制之先是嗣业馈粮数为虏钞
军馁死行俭曰以谋制敌也可因诈为粮车三百乘车
伏壮士五辈赍陌刀劲弩以羸兵挽进又伏精兵踵其后虏果掠车羸兵走险贼驱就水
草解鞍牧马方取粮车中而壮士突出伏兵至杀获几
尽自是粮车无敢近者大军次单于比暮已立营堑壕既周行俭更命徙营高冈吏白士
安堵不可扰不听促徙之比夜风雨暴至前占营所水
深丈余众莫不骇叹问何以知之行俭曰自今第如我节制毋问我所以知也 【谨案通
鉴辑览 御批行俭于当时固为诸将巨擘然三
百乘乘各五壮士当为一千五百人虏以为粮车驱去当必纷纷散行前后不齐且此驱
行之际虏岂不觉必待取粮而后千五百人者齐自车
中跃出奋击是谁为之期会记载者欲奇其事而不自觉其必无是理致人疑笑矣又下
营当避溪壑水潦必至之处行围亦然有何奇而致诸
将之惊服行俭且自以为神益足鄙耳】 贼拒黑山数战皆败行俭纵兵前后杀虏不胜
计伪可汗泥熟匐为其下所杀持首来降又擒大首领
奉职而还余党走狼山行俭既还阿史那伏念伪称可汗复与温傅合明年行俭还总诸
军顿代州之陁口纵反闲说伏念令与温傅相贰伏念
惧密送款且请缚傅自效行俭秘不布密以闻后数口烟尘涨天而南斥堠惶骇行俭曰
此伏念执温傅来降非他也且受降如受敌乃敕严备
遣单使往劳既而果然于是突厥余党悉平帝悦遣户部尚书崔知悌劳军初行俭许伏
念以不死侍中裴炎害其功建言伏念为程务挺张虔
勔胁逐又磧北回纥逼之计穷而降卒斩伏念及温傅于都市行俭之功不录封闻喜县
公行俭叹曰浑浚之事古今耻之但恐杀降则后无复
来矣遂称疾不出永淳元年十姓突厥车薄叛复为金牙道大总管未行卒年六十四赠
幽州都督谥曰献诏皇太子遣官护视家事子孙自立
乃停中宗即位再赠扬州大都督行俭工草隶名家帝尝以绢素诏写文选览之秘爱其

法賚物良厚行俭每曰褚遂良非精笔佳墨未尝辄书
不择笔墨而妍捷者余与虞世南耳所撰选谱草字杂体数万言又为营阵部伍料胜负
别器能等四十六诀武后诏武承嗣就第取去不复传
行俭通阴阳历术每战豫意胜日善知人在吏部时见苏味道王勳谓曰二君后皆掌铨
衡李敬玄盛称王勃杨炯卢照邻骆宾王之才引示行
俭行俭曰士之致远先器识后文艺如勃等虽有才而浮躁衒露岂享爵禄者哉炯颇沉
默可至令长余皆不得其死所引偏裨若程务挺张虔
勳崔智■〈癸，言代夫〉王方翼党金毗刘敬同郭待封李多祚黑齿常之类为世名
将兼奏至刺史将军者数十人尝赐马及珍鞍令史私
驰马马蹶鞍坏惧而逃行俭招还之不加罪初李都支遮匐获瓌宝不费蕃酋将士愿观
焉行俭因宴徧出示坐者有码碯盘广二尺文采粲然
军吏趋跌盘碎惶怖叩头流血行俭笑曰尔非故也何至是色不少吝帝赐都文资产皿
金三千余物橐驰马牛称是行俭分给亲故泊麾下数
日辄尽子光庭

裴光庭

裴稹

裴均

裴光庭

光庭字连城早孤母庠狄氏有妇德武后召入宫为御正甚见亲宠光庭中是累迁
太常丞以武三思壻坐贬郢州司马开元中擢兵部郎
中鸿胪少卿性静默寡交游虽骤历台省人未之许既而以职业称议者更推之玄宗有
事岱宗张说以天子东巡京师空虚恐夷狄乘闲窃发
议欲加兵守边召光庭与谋对曰封禅者所以告成功也夫成功者德无不被人无不安
万国无不怀今将告成而惧夷狄非昭德也大兴力役
用备不虞非安人也方谋会同而阻戎心非怀远也此三者名实乖矣且诸蕃突厥为大
费币往来愿修和好有年矣若遣一使召其大臣使赴
行在必欣然应命突厥受诏则诸蕃君长必相率而来我偃旗息鼓不复事矣说曰善吾
所不及因奏用其策突厥果遣使来朝东封还迁兵部
侍郎久之拜中书侍郎同中书门下平章事兼御史大夫迁黄门侍郎拜侍中兼吏部尚
书弘文馆事士撰摇山往则维城前轨二篇献之手制
褒美诏皇太子诸王于光顺门见光庭谢所以规讽意光庭又引寿安丞李融拾遗张琪
著作佐郎司马利宾直弘文馆撰续春秋经传自战国
讫隋表请天子修经光庭等作传书久不就时有建言唐应为金德者中书令萧嵩请百
官普议光庭以唐符命表着天下久矣不可改亟奏罢

之二十年封正平县男初知星者言上象变不利大臣请禳之光庭曰使祸可禳而去则福可祝而来也论者以为知命卒年五十八赠太师初吏部求人不以资考为限所奖拔惟其才往往得俊又任之士亦自奋其后士人猥众专务趋竞铨品枉挠光庭惩之因行俭长名榜乃为循资格无贤不肖一据资考配拟又促选限尽正月任门下省主事阎麟之专主过官凡麟之裁定光庭辄然可时语曰麟之口光庭手素与萧嵩轻重不平及卒嵩奏一切罢之光庭所引尽斥外官博士孙琬以其用循资格非奖劝之谊谥曰克平【旧书通鉴并无平字按谥法爱民在刑曰克执事有制曰平孙琬正取执事有制之义当有平字为是唐会要亦是克平】时以为希嵩意帝闻特赐谥曰忠宪【旧书通鉴会要并作忠献】诏张九龄文其碑

裴稹

子稹以荫仕累迁起居郎开元末寿王瑁以母宠欲立为太子稹陈申生戾园祸以谏玄宗改容谢之诏授给事中稹曰陛下绝招谏之路为日滋久今臣一言而荷殊宠则言者将众何以锡之帝善其让止不拜俄授祠部员外郎卒子倩字容卿历信州刺史劝民垦田二万亩以治行赐金紫服代第五琦为度支郎中卒谥曰节子均

裴均

均字君齐以明经为诸暨尉数从使府辟以才显张建封镇濠寿表团练判官时李希烈以淮蔡叛建封扞贼均参赞之以劳加上柱国袭正平县男迁累膳部郎中擢荆南节度行军司马就拜荆南节度使刘辟叛先骚黔巫肋荆楚以固首尾均发精甲三千逆击之贼望风奔却加检校吏部尚书初均与崔太素俱事中人窦文场太素尝晨省文场入卧内自谓待己至厚徐观后榻有频伸者乃均也德宗以均任方镇欲遂相之谏官李约上疏斥均为文场养子不可污台辅乃止元和三年入为尚书右仆射判度支俄检校左仆射同中书门下平章事为山南东道节度使累封郾国公以财交权幸任将相凡十余年荒纵无法度卒年六十二赠司空

△娄师德

娄师德字宗仁郑州原武人第进士调江都尉扬州长史卢承业异之曰子台辅器也当以子孙相诤论僚吏哉上元初为监察御史会吐蕃盗边刘审礼战歿师德奉使收败亡于洮河因使吐蕃其首领论赞婆等自赤岭操牛酒迎劳师德喻国威信开陈利害虏为畏悦后募猛士讨吐蕃乃自奋戴红抹额来应诏高宗假朝散大夫使从军有功迁殿中侍御史兼河源军司马并知营田事与虏战白水涧八遇八克天授

初为左金吾将军检校丰州都督衣皮袴率士屯田积谷数百万兵以饶给无转饷和余之费武后降书劳之长寿元年召授夏官侍郎判尚书事进同凤阁鸾台平章事后尝谓师德师在边必待营田公不可以劬劳惮也乃复以为河源碛石怀远军及河兰鄯廓州检校营田大使入迁秋官尚书原武县男改左肃政御史大夫并知政事证圣中与王孝杰拒吐蕃于洮州战素罗汗山败绩贬原州员外司马万岁通天二年入为凤阁侍郎同凤阁鸾台平章事后与武懿宗狄仁杰分道抚定河北进纳言更封谯县子陇右诸军大使复领营田圣历三年突厥入寇诏检校并州长史天平军大总管九月卒于会州年七十赠幽州都督谥曰贞葬给往还仪仗师德长八尺方口博唇深沈有度量人有忤己辄逊以自免不见容色尝与李昭德偕行师德素丰颀不能遽步昭德迟之恚曰为田舍子所留师德笑曰吾不田舍复在何人其弟守代州辞之官教之耐事弟曰人有唾面洁之乃已师德曰未也洁之是违其怒正使自干耳 【谨按通鉴辑览 御批高而不危满而不溢处荣宠者自有正道笑而受唾岂以直报怨之义师德之言鄙极矣】 在夏官注选选者就按阅簿师德曰容我择之可乎选者不去乃洒笔曰墨污尔狄仁杰未辅政师德荐之及同列数挤令外使武后觉问仁杰曰师德贤乎对曰为将谨守贤则不知也又问知人乎对曰臣尝同僚未闻其知人也后曰朕用卿师德荐也诚知人矣出其奏仁杰惭已而叹曰娄公盛德我为所容乃知吾不逮远矣总边要为将相者三十年恭勤朴忠心无适莫方酷吏残鹯人多不免独能以功名始终与郝处俊相亚世之言长者称娄郝

钦定续通志卷二百十六

●钦定续通志卷二百十七 列传十七

列传

唐 【十七】

○唐十七

史大奈 冯盎【智戴】 阿史那社尒【忠】 执失思力 契苾何力

【明】 黑齿常之李谨行 泉男生【献诚】

李多祚【李湛】 论弓仁【惟贞】 尉迟胜 尚可孤裴玢

史大奈

冯盎

阿史那社尒

执失思力

契苾何力

黑齿常之

李谨行

泉男生

李多祚

论弓仁

尉迟胜

尚可孤

裴玢

△史大奈

史大奈本西突厥特勒也与处罗可汗入隋事炀帝从伐辽积劳为金紫光禄大夫后分其部于楼烦高祖兴太原大奈提其众隶麾下桑显和战饮马泉诸军却大奈以劲骑数百背击显和破之军遂振授光禄大夫从平长安赏帛五千匹赐姓史从秦王平薛举王世充窦建德刘黑闥功殊等积前后赐侍女三杂采万段贞观初擢累右武卫大将军检校丰州都督封窦国公食封户三百卒赠辅国大将军

△冯盎

冯盎字明达高州良德人本北燕冯弘裔孙弘不能以国下魏亡奔高丽遣子业以三百人浮海归晋弘已灭业留番禺至孙融事梁为梁州刺史子宝聘越大姓冼氏女为妻遂为首领授本郡太守至盎三世矣隋仁寿初盎为永康令潮成等五州獠叛盎驰至京师请讨之文帝诏左仆射杨素与论贼形势素奇之曰不意蛮夷中乃生是人即诏盎发江岭兵击贼平之拜汉阳太守从炀帝伐辽东迁左武卫大将军隋亡奔还岭表啸署酋领有众五万番禺新兴名贼高法澄冼宝彻等受林士弘节度杀官吏盎率兵破之宝彻兄子曰智臣复聚兵拒战盎进讨兵始合辄释胄大呼曰若等识我邪众委戈袒拜贼遂溃禽宝彻智臣等遂有番禺苍梧朱崖地自号总管或说盎曰隋季崩荡海内震骚唐虽应运而德教未孚岭越无所系属公克平二十州地数千里名位未正请上南越王号盎曰吾居越五世矣牧伯惟我一姓子女玉帛吾有也人生富贵如我希矣常恐忝先业尚自王哉武德五年【按通鉴亦作五年旧书作四年】始以地降高祖析为高罗春白崖儋林振八州授盎上柱国高州总管封越国公【旧书作封吴】拜其子智戴为春州刺史智彘为东合州刺史盎徙封耿贞观初盎与酋长谈殿等迭相攻击久未入朝诸州奏称盎反前后以数十太宗召右武卫将军兰馥发江淮卒将讨之魏征谏曰天下初定岭南瘴疠险远不可以宿大兵且盎反状未

成不宜动众帝曰告者道路不绝何云反状未成对曰盍若反必分兵拒险抢掠州县今告者已数年而兵不出境此不反明矣彼为诸州所告惧死故不敢入朝若遣信臣示以至诚彼喜于免祸必自归 【按此事旧书不载新书所记亦不如通鉴之详尽其新书云人告盍反盍举兵拒境故太宗出师以魏征之言考之亦不合通鉴据太宗实录及魏文贞公故事当得其实今用之以易本传】 帝乃遣散骑常侍韦叔谐 【通鉴作散骑侍郎李公掩】 喻盍盍遣智戴入侍帝曰征一言贤于十万众时蕃兵已出欲遂有功遣副将上盍可击状帝不许罢之五年盍来朝宴赐甚厚俄而罗窈诸洞獠叛诏盍率众二万为诸军先锋贼据险不可攻盍持弩语左右曰矢尽胜负可知矣发七矢毙七人贼退走盍纵兵乘之斩首千余级帝诏智戴还慰省赏予不可计奴婢至万人盍善为治阅簿最撻奸伏得民欢心卒赠左骁卫大将军荆州都督子三十人

冯智戴

冯智戴

智戴勇而有谋能抚众得士死力酋帅皆乐属之尝随父至洛阳统本部锐兵宿卫炆帝遇弑引其下逃归时盗贼多岭峽路绝智戴转战而前至高源俚帅胁为谋王会盍至智戴得与盍俱去后入朝帝劳赐加等授卫尉少卿闻其善兵指云问曰下有贼今可击乎对曰云状如树方辰在金金利水柔击之胜帝奇其对累迁左卫将军卒赠洪州都督

△阿史那社尔

阿史那社尔突厥处罗次子也年十一以智勇闻拜拓设建牙碛北与颉利子欲谷设分统铁勒回纥仆骨同罗诸部处罗卒哀毁如礼治众十年无课敛或劝厚赋以自奉荅曰部落丰余于我足矣故首领咸爱之颉利数用兵社尔谏弗纳贞观元年铁勒回纥薛延陀等叛败欲谷设于马猎山社尔助击之弗胜明年将余众西保可汗浮图城会颉利灭西突厥统叶护又死奚利必咄陆可汗与泥孰争国社尔引兵袭之得其半国有众十余万乃自号都市可汗谓诸部曰始为乱破吾国者延陀也今我据西方而不平延陀是忘先可汗非孝也事脱不胜死无恨酋长皆曰我新得西方须留抚定今弃之远击延陀延陀未禽叶获子孙将复吾国社尔不从选骑五万讨延陀碛北连兵十旬士苦久稍溃去延陀纵击大败之乃走保高昌众纔万人又与西突厥不平由是率众内属十年入朝 【旧书作九年】 授左骁卫大将军处其部于灵州诏尚衡阳长公主为驸马都尉典卫屯兵十四年以交河道行军总管平高昌诸将咸受赏社尔以未奉诏秋豪不敢取见别诏然后受又所取皆老

弱陈弊太宗美其廉赐高昌宝刀杂采千段诏检校北门左屯营封毕国公从征辽东中流矢握去复战所部奋厉皆有功还擢兼鸿胪卿二十一年以昆邱道行军大总管与契苾何力郭孝恪杨弘礼李海岸等五将军发铁勒十三部及突厥骑十万讨龟兹师次西突厥击处密处真败之【处真通鉴作处月】入自焉耆西兵出不意龟兹震恐进屯磧石伊州刺史韩威以千骑先进右骑卫将军曹继叔次之至多褐城其王率众五万抵战威阳却王悉兵逐北威与继叔殊死战大破之社尔因拔都城王轻骑遁社尔留孝恪守自率精骑追蹶行六百里王据大拨换城婴险自固社尔攻凡四十日下之擒其王并下五大城遣左卫郎将权祗甫狗酋长示祸福降者七十余城宣谕威信莫不欢服刻石纪功而还因说于阗王入朝献马畜三百饷军西突厥焉耆安国皆争犒师孝恪之在军床帷器用多饰金玉以遗社尔社尔不受帝闻曰二将优劣不复问人矣帝崩请以身殉卫陵寝高宗不许迁右卫大将军永徽六年卒赠辅国大将军并州都督陪葬昭陵治冢象葱山谥曰元子道真厯左屯卫大将军咸亨初为逻娑道副大总管薛仁贵讨吐蕃以援吐谷浑为论钦陵所败尽失其兵诏有司问状免死为民

阿史那忠

阿史那忠

阿史那忠者字义节苏尼失子也资清谨以功擢左屯卫将军尚宗室女定襄县主始诏姓独着史居父丧哀慕过人会立阿史那思摩为突厥可汗以忠为左贤王及出塞不乐见使人必泣请入侍许焉封薛国公擢右骁卫大将军四十八年无纤隙人比之金日殫卒赠镇军大将军谥曰贞陪葬昭陵

△执失思力

执失思力突厥酋长也贞观中护送隋萧后入朝授左领军将军会颉利败太宗令思力谕降浑斛萨部落稍亲近帝逐兔苑中思力谏曰陛下为四海父母乃自轻臣窃殆之帝异其言后复逐鹿思力脱巾带固谏帝为止及讨辽东诏思力屯金山道领突厥扞辞延陀延陀兵十万寇河南思力示羸不与确贼深入至夏州乃整阵击败之追蹶六百里会毗伽可汗死耀兵磧北而归复从江夏王道宗破延陀余众与平吐谷浑诏尚九江公主拜驸马都尉封安国公坐交房遗爱高祖以其战多赦不诛流嵩州主请削封邑偕往主前卒龙朔中以思力为归州刺史卒麟德元年复公主封邑赠思力胜州都督谥曰景

△契苾何力

契苾何力铁勒哥论易勿施莫贺可汗之孙父葛隋末为莫贺咄特勒以地近吐谷
浑隘狭多厉喝徙去热海上何力九岁而孤号大俟利
发贞观六年与母率众千余诣沙州内属太宗处其部于甘凉二州擢何力左领军将军
九年【旧书作七年】与李太白亮辞万彻万均讨吐
谷浑于赦水川万均率骑先进为贼所包兄弟皆中创堕马步鬪士死十七八何力驰壮
骑冒围奋击虏披靡去是时吐谷浑王伏允在突论川
何力欲袭之万均愆前败以为不可何力曰贼无城郭逐荐草美水以为生不乘其不虞
正恐鸟惊鱼骇后无以窥其巢穴乃阅精骑千余直捣
其牙斩首数十级获橐驼马牛羊二十余万俘其妻子伏允身免有诏劳军于大斗拔谷
万均耻名出其下乃排何力引功自名何力不胜愤挺
刀起将杀之诸将劝止及还帝问其故何力具言万均败状帝怒将解其官授何力何力
顿首曰以臣而解万均官恐四夷闻者谓陛下重夷轻
汉则诬告益多又夷狄无知谓汉将皆然非示远之义帝重其言乃止有诏宿卫北门检
校屯营事尚临洮县主十四年为葱山道副大总管与
讨高昌平之始何力母姑臧夫人与弟沙门在凉州沙门为贺兰都督十六年诏何力往
视母于是辞延陀毗伽可汗方强契苾诸酋争附之乃
胁其母弟使从何力惊谓其下曰上于尔有大恩且遇我厚何遽反皆曰可敦都督去矣
尚何顾何力曰弟往侍足矣我义许国不可行众执之
至毗伽牙下何力箕踞拔佩刀东向呼曰有唐烈士受辱贼廷邪天地日月临鉴吾志即
割左耳誓不屈毗伽怒欲杀之其妻谏而止何力之被
执也或谗帝曰何力入延陀如涸鱼得水其脱必遽帝曰不然若人心如铁石殆不背我
会使至言状帝泣下即诏兵部侍郎崔敦礼持节许延
陀尚主因求何力乃得还授右骁卫大将军公主行有日何力陈不可帝曰天子无戏言
既许之叵奈何何力曰礼有亲迎宜诏毗伽身到京师
或诣灵武彼畏我必不来则媼不成而忧愤不知所出下必携贰不及一年交相疑沮毗
伽素狼戾必死死则二子争国内叛外携不战而擒矣
帝然之毗伽果不敢迎郁悒不得志恚而死少子拔酌杀其庶兄突利失自立国中乱如
其策云帝征高丽诏何力为前军总管次白崖城中贼
稍创甚帝自为傅药城拔得刺何力者高突勃驸使自杀之辞曰彼为其主冒白刃以刺
臣此义士也犬马犹报其养况于人乎卒舍之俄以昆
邱道总管平龟兹帝崩欲以身殉高宗谕止永徽中西突厥阿史那贺鲁以处月处密姑
苏歌逻禄卑矢五姓叛寇延州陷金岭略蒲类诏何力
为弓月道大总管率左武卫大将军梁建方统秦成岐雍及燕然都护回纥兵八万讨之
处月酋朱邪孤注遂杀招慰使果毅都尉单道惠据牢

山以守何力等分兵数道攀藟而上争攻之贼大溃孤注夜遁轻骑穷蹶行五百里孤注战死虜渠帅六十俘斩万余牛马杂畜七万取处密时健俟斤合支贺等以归迁左骁卫大将军封郟国公显庆中为淇江道行军大总管与苏定方及右骁卫大将军刘伯英伐高丽不克龙朔初复拜辽东道行军大总管率诸蕃三十五军进讨帝欲自率师继之次鸭绿水盖苏文遣泉男生以精兵数万拒险众莫敢济会冰合何力引兵噪而济贼惊遂溃追奔斩首三万余级众降男生脱身走有诏班师时铁勒九姓叛诏何力为安抚大使何力以轻骑五百驰入其部虜大惊人何力谕曰朝家知而诘误遂反翻动使我贯尔过得自新罪在凶渠取之则已九姓大喜共擒伪渠护及特勒等二百余人何力数其罪诛之余众遂安士卒道死者令所在收瘞蠲护其家未几盖苏文死男生为弟所逐使子诣阙请降乃拜何力为辽东道行军大总管安抚大使经略之副李绩同趋高丽绩已拔新城留何力守时高丽兵十五万屯辽水引靺鞨数万众背南苏城何力奋击破之斩首万级乘胜进拔入城引兵还与绩会合攻辱夷大行二城克之进拔扶余绩勒兵未进何力率兵五十万先趋平壤绩继进攻凡七月拔之虜其王以献进镇军大将军行左卫大将军徙封凉总章仪凤闲吐蕃灭吐谷浑势益张入寇鄯庙河坊等州诏周王为洮州道相王为凉州道行军元帅率何力等讨之二王不行亦会何力卒赠辅国大将军并州大都督陪葬昭陵谥曰毅 【旧书云谥烈】

明

明

子明字若水孺裸授上柱国封渔阳县公年十三迁奉犖大夫李敬玄征吐蕃明为柏海道经略使以战多进左威卫大将军袭封赐锦袍宝带它物蕃伙擢嫡子三品官再迁鸡田道大总管至乌德鞬山诱附二万帐武后时明及母临洮县主皆赐姓武以左鹰扬卫大将军卒年四十六赠凉州刺史谥曰靖明性淹厚喜学长辩论子聿袭爵

△黑齿常之

黑齿常之百济西部人长七尺余骁毅有谋略为百济达率兼风达郡将犹唐刺史云苏定方平百济常之以所部降而定方囚老王纵兵大掠常之惧与左右酋长十余人遁去啸合逋亡依任存山自固不旬日归者三万定方勒兵攻之不克常之遂复二百余城龙朔中高宗遣使招谕乃诣刘仁轨降累迁左领军员外将军洋州刺史仪凤三年从李敬玄刘审礼击吐蕃审礼败敬玄欲引还阻泥沟兵不得出贼屯高压官军常之夜率敢死士三百人掩其营杀数百人贼酋跋地设弃军走敬玄出此得还帝叹

其才擢左武卫将军检校左羽林军赐金帛殊等进为河源军副使调露中吐蕃使赞婆等入寇屯良非川李敬玄御之败常之引精骑三千夜袭其军斩首二千余级获羊马数万赞婆等单骑去即拜河源道经略大使因建言河源当贼冲宜增兵镇守而运饷须广乃斥地置烽七十所垦田五千顷岁收粟百余万斛由是食衍士精戍逻有备永隆二年赞婆营青海常之驰掩其屯破之悉烧粮廩获羊马甲首不计诏书劳赐凡莅军七年吐蕃畏惧不敢盗边封燕国公垂拱中突厥复犯塞常之率兵追击至两井忽与贼遇贼骑三千方擐甲常之见其器以三百骑突之贼皆弃甲去其暮贼大至常之潜使人伐木列炬营中若烽燧然会风起贼疑救至遂夜遁久之为燕然道大总管与李多祚王元言等击突厥骨咄禄元珍于黄花堆破之追奔四十里贼溃归碛北会左监门卫中郎将爨宝璧欲穷追要功诏与常之共计宝璧独进为虏所覆举军没宝璧下吏诛常之坐无功会周兴等诬其与右鹰扬将军赵怀节反捕系诏狱投缲死常之御下有恩所乘马为士所捶或请罪之答曰何遽以私马鞭官兵乎前后赏赐分麾下无留货及死人皆哀其枉

△李谨行

李谨行靺鞨人父突地稽部酋长也隋末率其属千余内附居营州授金紫光禄大夫辽西太守武德初奉朝贡以其部为燕州授总管刘黑闼叛突地稽身到定州上书秦王请节度以战功封耆国公徙部居昌平高开道以突厥兵攻幽州突地稽邀击败之贞观初进右卫将军赐氏李谨行伟容貌勇盖军中累迁营州都督家童至数千以货自雄夷人畏之为碛石道经略大使钦陵众十万寇湟州堠逻不知谨行闻虜至即植旗伐鼓开门以伺钦陵疑有伏不敢进上元三年破吐蕃于青海玺书劳勉封燕国公卒赠幽州都督陪葬干陵

△泉男生

泉男生字符德高丽盖苏文子也九岁以父任为先人迁中里小兄犹唐谒者也又为中里大兄知国政凡辞令皆男生主之进中里位镇大兄久之为莫离支兼三军大将军加大莫离支出按诸部而弟男建男产知国事或曰男生恶君等逼己将除之建产未之信又有谓男生将不纳君男生遣谍往男建捕得即矫高藏命召男生惧不敢入男建杀其子献忠男生走保国内城率其众与契丹靺鞨兵内附遣子献诚诉诸朝高宗拜献诚右武卫将军赐乘輿马瑞锦宝刀使还报诏契苾何力率兵援之男生乃免授平壤道行军大总管兼持节安抚大使举哥勿南

苏仓岩等城以降帝又命西台舍人李虔绎就军慰劳赐袍带金扣七事明年召入朝诏所过州县传舍作鼓吹右羽林将军李同以飞骑仗迎之迁辽东大都督玄菟郡公赐第京师因诏还军与李绩攻平壤使浮屠信城【旧书高丽传作信成】为内闲引高丽锐兵潜入禽高藏诏遣子赍手制金皿即辽水劳赐还进右卫大将军下国公赐宝器宫侍女二马八十仪凤二年诏安抚辽东并置州县招流亡平敛赋罢力役民悦其宽卒年四十六帝为举哀赠并州大都督丧至都诏五品以上官哭之谥曰襄勒碑着功男生纯厚有礼奏对明辨善射艺其初至伏斧钺待罪帝宥之世以此称焉

泉献诚

泉献诚

献诚天授中以右卫大将军兼羽林卫武后尝出金币命宰相南北牙郡臣举善射五辈中者以赐内史张光辅举献诚献诚让右玉铃卫大将军辞吐摩支摩支固辞献诚曰陛下择善射者然皆非华人臣恐唐官以射为耻不如罢之后嘉纳来俊臣尝求货献诚不答乃诬谋反缢杀之后后知其冤赠右羽林卫大将军以礼改葬

△李多祚

李多祚其先靺鞨酋长号黄头都督后入中国世系湮远至多祚骁勇善射以军功累迁右鹰扬大将军讨黑水靺鞨诱其渠长置酒高会因醉斩之击破其众室韦及孙禹荣之叛多祚与诸将进讨以劳改右羽林大将军遂领北门卫兵张柬之将诛二张以多祚素感槩可动以义乃从容谓曰将军居北门几何曰三十年矣将军击钟鼎食贵重当世非大帝恩乎多祚泣数行下曰死且不忘柬之曰将军知感恩则知所以报今在东宫乃大帝子而嬖竖擅朝危逼宗社国家废兴在将军将军诚有意乎舍今日尚何在答曰苟援王室惟公所使乃引天地以自誓辞气毅然柬之遂定谋以敬暉李湛为右羽林将军命总禁兵与多祚王同皎请太子至玄武门斩关入及长生殿【按桓彦范传云时后处迎仙宫之集仙殿二处不同未知孰是】白武后曰诸将诛逆臣易之昌宗恐漏大谋不敢豫奏顿首请归死后病卧顾湛曰我于尔父子不薄亦豫是邪中宗复位封多祚辽阳郡王食实户五百帝祠太庙特诏多祚与相王登輿夹侍监察御史王觐谓多祚人虽有功不宜共輿帝曰朕推以心腹卿无复言崔玄暉等得罪多祚畏祸及故阳厚韦氏节愍太子诛武三思多祚与成王千里率兵先至玄武楼下具言所以诛三思状按兵不战宫闈令杨思勳方侍帝即挺刀斩其壻羽林中郎将野呼利兵因沮溃多祚为

其下所杀二子亦见害籍没其家景云初追复官爵并宥家属

李湛

李湛

李湛者义府最幼子字兴宗沈厚有度六岁授周王府文学累迁右散骑常侍袭河闲郡公武后徙上阳宫留湛宿卫顷之复为右散骑常侍赐铁券三思恶之贬果州刺史历洛绛二州累迁右领军大将军开元十年卒赠幽州都督初义府以立武后故得宰相而湛为中兴功臣不以其父恶为贬云

△论弓仁

论弓仁本吐蕃族也父钦陵世相其国圣历二年弓仁以统吐浑七千帐自归授左玉钤卫将军封酒泉郡公神龙三年为朔方军前锋游奕使时张仁愿筑三受降城弓仁以兵出诺真水草心山为逻卫开元初突厥九姓乱弓仁引军渡漠踰白怪林收火拔部喻多真种落降之■

〈足夹〉跌思太叛战赤柳涧弓仁骑才五百自新堡进时贼四环之众不敌弓仁椎牛誓士自若再宿溃围出人服其壮凡阅大小战数百未尝负赐宝玉甲第良田等同列莫与比累迁左骁卫大将军朔方副大使会病玄宗遣上医驰视卒年六十六赠拔川郡王谥曰忠孙惟贞

论惟贞

论惟贞

惟贞名瑀以字行志向恢大开元末为左武卫将军肃宗在灵武以卫尉少卿募兵绥银闾旬众数万从还凤翔迁光禄卿为元帅前锋讨击使战陕州以功进殿中监史思明攻李光弼于河阳周摎以兵二十万阵城下惟贞请锐卒数千凿数门出自旦及午苦战破之光弼表为开府仪同三司光弼讨史朝义以惟贞守徐州贼将谢钦让据陈乃假惟贞颍州刺史斩贼将降者万人封萧国公实封百户光弼病表以贞代擢左领军卫大将军为英武军使卒

△尉迟胜

尉迟胜本王于阗国天宝中入朝献名玉良马玄宗以宗室女妻之授右威卫将军毗沙府都督归国与安西节度使高仙芝击破萨毗播仙累进光禄卿禄山反胜使弟曜摄国事身率兵五千赴难国人共留胜胜以少女为质而行肃宗嘉之拜特进兼殿中监广德中进骠骑大将军遣还固请留宿卫加开府仪同三司封武都郡王实封百户胜请授国于曜诏可胜既留乃穿筑池观厚宾客士大夫多从之游从德宗之兴

元为右领军将军 睦王傅 贞元初 曜上言 国中以嫡承嗣 今胜让国 请立其子 锐帝欲遣锐袭王胜 固辞以曜久行国事 人安之 锐生京华 不习其俗 不可遣 当是时 兄弟让国人 莫不贤之 睦府除 徒原王傅 卒赠凉州都督

△尚可孤

尚可孤字可孤 东郡鲜卑 宇文之别种 世处松漠 闲天宝末 隶范阳节度使安禄山 复事史思明 上元中 自贼所归 累受左右威卫大将军 封白水县伯 为神策大将 以功试太常卿 徙封冯翊郡王 食实户一百五十 鱼朝恩主卫兵器 其勇养为子 名智德 使将兵三千屯扶风 武功 历十余年 队伍闲整 朝恩死 诏赐氏李名 嘉勋 李希烈叛 擢为招讨 应援荆襄 使复本姓名 累战有功 朱泚之难 召可孤 可孤率兵三千道襄邓 而西属贼锐 乃壁七盘 伪将仇敬忠等来寇 可孤击却之 遂收蓝田 德宗将迁梁州 命引兵守灞上 拜神策京畿渭南商州节度招讨使 敬忠拒战 可孤急击 斩之 进军与李晟收长安 为先锋 以功加检校尚书右仆射 封冯翊郡王 食实户二百 又会诸军 进讨李怀光 次沙苑 卒于军 赠司空

【旧书作司徒】 可孤性谨 审沈壮 既有勋劳 未尝自谕功 御众公严 晟数称之

△裴玠

裴玠五世祖 纠本王 疏勒 武德中来 朝拜鹰扬大将军 封天山郡公 留不去 遂籍京兆 玠初事金吾将军 论惟明 为廉力 德宗在奉天 以功封忠义郡王 从惟明镇鄜坊 署牙将 后节度使王栖曜 卒中 军将何朝宗 夜纵火作乱 玠独匿不出 迟明 禽朝宗 以待命 有诏 并军司马崔略 斩之以同州刺史 刘公济 领节度 擢玠为司马 踰年 公济卒 乃授玠节度使 元和三年 徙山南西道 玠为治 严棱畏 远权势 不务贡奉 蔬食敝衣 居处取避风雨而已 仓库完实 百姓安之 当世将帅 未有及者 以疾辞位 入朝 不事 驺仗 妻乘竹舆 二侍婢 黄碧 缣服 七年 卒 赠尚书左仆射 谥曰节

钦定续通志卷二百十七

●钦定续通志卷二百十八 列传十八

列传

唐 【十八】

○唐十八

郭孝恪 张俭 王方翼【珣】 苏定方 薛仁贵【讷】 嵩平

从】程务挺 王孝杰 唐休璟 张仁愿

王峻

郭孝恪

张俭

王方翼

苏定方

薛仁贵

程务挺

王孝杰

唐休璟

张仁愿

王峻

△郭孝恪

郭孝恪许州阳翟人少有志节隋乱率少年数百附李密密喜谓曰世言汝颍多奇士不谬也使与李绩守黎阳密败绩遣孝恪送款封阳翟郡公拜宋州刺史诏与绩经略武牢以东所定州县委以选补窦建德之援洛也孝恪上谒秦王进计曰王世充力竭计穷其面缚可跂足待建德悉众远来粮饷阻绝殆天亡时也若固守武牢以军泛水逐机应变禽殄必矣王然之贼平置酒大会洛阳宫语诸将曰孝恪策禽贼王长先下漕功固在诸君右迁上柱国历真赵江涇四州刺史所至有能名改左骁卫将军累加金紫光禄大夫贞观十六年拜凉州都督改安西都护西州刺史其地高昌旧都流徙罪人与镇兵杂处限以沙碛隔绝中国孝恪推诚抚御尽得其欢心初王师灭高昌诏以所虏焉耆生口七百还焉耆王王叛归欲谷设可汗孝恪请击之即拜西州道行军总管率步骑三千出银山道夜袭其王龙突骑支虏之帝悦降玺书褒劳俄拜昆邱道副大总管进讨龟兹破其国城乃自留守遣余军分道进龟兹国相那利遁去孝恪以余部未平出营于外国人有谓孝恪曰那利得士心今亡在外势必为变城中颇有异志愿公备之孝恪忽其言不设备那利果率众阴与城内胡为应薄城鼓噪始觉之乃率千余人合战城中举应那利孝恪殊死鬪中流矢卒子待诏亦歿将军曹继叔进兵复拔其城太宗责孝恪斥堠不明至颠覆夺其官后愍死战更为举哀高宗即位追还官爵赠待诏游击将军贖物三百段次子待封官左豹韬卫将军咸亨初副薛仁贵讨吐蕃战大非川败绩贷死为民

△张俭

张俭字师约京兆新丰人隋相州刺史皖城郡公威孙父植车骑将军连城县公俭高祖从外孙也 【旧书作从甥】 高祖起俭以功除右卫郎将迁朔州刺史时颉利可汗方强每有求取所遗书辄称诏敕边吏奉承不敢却

及俭独拒不受大教民营田岁收谷数十万斛虽霜旱
劝百姓相振赡免饥殍州以完安李靖既平突厥有思结部者穷归于俭俭受而安辑之
其在碛北者亲戚私相过省俭不禁示羁縻而已俭徙
胜州后将不察其然遽奏思结叛朝廷议进讨时俭以母丧夺服为使者抚纳之俭单骑
入其部召酋帅慰谕推腹心咸匍匐归命因举徙代州
遂检校代州都督俭劝垦田力耕岁数稔私蓄富贵俭恐虜易骄乃建平余法入之官虜
悦喜由是储斛流赢迁营州都督兼护东夷校尉坐事
免诏白衣领职营州部与契丹奚靺鞨诸蕃切畛高丽引众入寇俭率兵破之俘斩略
尽复拜营州都督太宗将征辽东遣俭率蕃兵先进略
地至辽西川涨久未渡帝以为畏懦召还见洛阳宫陈水草美恶山川险易并久不进状
帝悦拜行军总管使领诸蕃骑为六军前锋时高丽候
者言莫离支且至帝诏俭自新城路邀击虜不敢出俭进度辽趋建安城破贼斩数千级
累封皖城郡公后改东夷校尉官为都护府即以俭为
都护永徽初加金紫光禄大夫卒年六十谥曰密俭兄大师太仆卿华州刺史武功县男
弟延师左卫大将军范阳郡公性谨畏典羽林兵三十年未尝有过卒赠荆州都督谥曰敬陪葬昭陵俭兄弟三人门皆立戟时号三戟张家

△王方翼

王方翼字仲翔并州祁人祖裕隋州刺史尚同安大长公主官开府仪同三司卒谥
曰文方翼早孤哀毁如成人时号孝童母李为主所斥
居凤泉墅方翼尚幼杂佣保执苦不弃日垦田植树治林垠墾完墙屋燎松丸墨为富家
主薨还京师尝夜行见长人丈余引弓射仆之乃朽木
也太宗闻擢右千牛高宗立而从祖女弟为皇后调安定令诛灭大姓奸豪胁息徙瀚海
都护司马坐事下迁朔州尚德府果毅岁余代还居母
丧哀瘠甚帝遣侍医疗视其友赵持满诛死尸诸道亲戚莫敢视方翼曰栾布哭彭越义
也周文王掩骼仁也绝友义蔽主仁何以事君遂往哭
其尸具礼收葬金吾劾系帝恕之不罪再迁肃州刺史州无隍堑寇易以攻方翼乃发卒
建楼堞厮多乐水自环烽逻精明仪凤闲河西蝗独不
至方翼境而它郡民或馁死皆重茧走方翼治下乃出私钱作水碓簿其赢以济饥瘵构
舍数十百楹居之全活甚众芝产其地裴行俭讨遮匐
奏为副兼检校安西都护徙故都护杜怀宝为庭州刺史方翼筑碎叶城面三门纒还多
趣以诡出入五旬毕西域胡纵观莫测其方略悉献珍
货未几徙方翼庭州刺史而怀宝自金山都护更镇安西遂失蕃戎之和永淳初十姓阿
史那军簿啜叛围弓月城方翼引军战伊丽河败之斩
首千级俄而三姓咽面兵十万踵至方翼次热海进战矢着臂引佩刀断去左右莫知所

部杂虏谋执方翼为内应方翼悉召会军中厚赐以次
出壁外缚之会大风杂金鼓而号譟无闻者杀七千人即遣骑分道袭咽面等皆惊溃乌
鹘引兵遁去禽首领突骑施等三百人西戎震服初方
翼次葛水暴涨师不可度沈祭以禱师涉而济又七月次叶河无舟而冰一夕合时以为
祥西域平以功迁夏州都督属牛疫民废田作方翼为
耦耕法张机键力省而见功多百姓顺赖明年召方翼议西域事引见奉天宫赐食帝前
帝见衣有汗濯处问其故具对热海古战状视其创帝
咨嗟久之赐赆良厚俄而妖贼白铁余以绥州反诏方翼与程务挺讨之飞旛击贼火其
栅平之封太原郡公阿史那元珍入寇被诏进击时库
无完铠方翼断六板画虎文钩联解合贼马忽见奔骇遂败获大将二因降桑干舍利二
部武后时王后属无在者方翼自视功多冀不坐而后
内欲固罪除之未得也及务挺被杀即并坐方翼追入朝捕送狱崖州卒于道年六十
二神龙初复官爵方翼善书与魏叔琬齐名

王珣

王珣

子珣字伯玉与兄珣弟璿以文学称时号三王天授初珣及进士第应制科迁蓝田
尉以拔萃擢长安尉因进见武后召问刑政嘉之询其
族氏对曰废后臣之姑也后不悦左迁亳州司法参军神龙初为河南丞武三思矫制贬
临川令宋璟辅政召授侍御史出许州长史岁旱珣时
假刺史事开廩振民即自劾玄宗赦之累迁工部侍郎而璿至中书舍人珣尝为秘书少
监数年而璿继职终右散骑常侍卒赠户部尚书谥曰
孝子錡天宝中厯右补阙殿中侍御史璿子鉷自有传

△苏定方

苏烈字定方以字行冀州武邑人后徙始平父邕当隋季率里中数千人为本郡讨
贼定方骁悍有气决年十五从父战数先登陷阵邕卒
代领其众破剧贼张金称杨公卿追北数十里自是贼不舍境乡党赖之贞观初为匡道
府折冲从李靖袭突厥颉利于碛口率二百骑为前锋
乘雾行去贼一里许雾霁见牙帐驰杀数十百人颉利及隋公主惶窘各遁去靖亦寻至
余党悉降再迁左卫中郎将与程名振讨高丽破之拜
右屯卫将军临清县公从程知节征贺鲁至鹰娑川贺鲁率二万骑来拒总管苏海政连
战未决鼠尼施等复引二万骑为援定方始休士见尘
起率精骑五百踰岭驰捣贼营贼众大溃杀千余人所弃铠仗牛马藉藉山野不可计副
总管王文度嫉其功谬谓知节曰贼虽走军死伤者众
今当结阵外向置鞬重于中人马被甲贼来即战是谓万全又矫称别奉圣旨以知节恃

勇轻敌使文度节制遂收军不许深入于是马羸卒劳
无鬪志定方说知节曰天子诏讨贼今反自守何功之立且公为大将而阃外之事不得
专顾副将乃得专之理有不其然胡不囚文度待天子
命不从至怛笃城有胡人降文度猥曰比我师还此辈复作贼不如杀之取其货定方曰
此乃自作贼耳及分财定方一不取高宗知之 【吴
缜纠谬曰此乃高宗显庆元年事新书作太宗误今改】 比知节等还悉下吏当死贷为
民擢定方伊丽道行军大总管复征贺鲁以任雅相回
纥婆润为副出金山北先击处木昆部破之俟斤懒独禄拥众万帐降定方抚之发其千
骑并回纥万人进至曳咥河贺鲁率十姓兵十万拒战
轻定方兵少舒左右翼包之定方令步卒据高攢稍外向亲引劲骑阵北原贼三突步阵
不能入定方因其乱击之鏖战三十里斩首数万级贼
大奔明日振兵复进五弩失毕举众降贺鲁独与处木昆屈律啜数百骑西走定方令副
将萧嗣业回纥婆润率杂虏兵趋邪罗斯川追北定方
与雅相领新附兵绝其后会大雪吏请少休定方曰虏恃雪方止舍谓我不能进若纵使
远遁则莫能禽遂勒兵进至双河与弥射步真合距贺
鲁所百里下令阵而行薄金牙山贺鲁将斲定方纵击破其牙下数千人悉归所部贺鲁
走石国弥射子元爽以兵与嗣业会缚贺鲁以还由是
修亭障列蹊隧定疆畛问疾收鬻唐之州县极西海矣高宗临轩定方戎服奉贺鲁以献
策功拜左骁卫大将军邢国公别封子庆节为武邑县
公会思结阙俟斤都曼先镇诸胡劫所部及疏勒朱俱波喝盘陀三国复叛诏定方还为
安抚大使率兵至叶叶水而贼保马头川定方选精卒
万人马三千袭之昼夜驰三百里至其所都曼惊战无素遂大败走马保城师进攻之都
曼计穷遂面缚降俘献于干阳殿有司请论如法定方
顿首请曰臣向谕陛下意许以不死愿苟其命帝曰朕为卿全信乃宥之葱岭以西遂定
加食邢州巨鹿三百户迁左武卫大将军出为神邱道
大总管 【通鉴考异云旧书定方传新罗传皆云定方为熊津道大总管今从此年实录
及新唐书本纪】 率师讨百济自城山济海至熊津
口贼濒江屯兵定方出左涯乘山而阵与之战贼败死者数千王师乘潮而上舳舻衔尾
进鼓而噪定方将步骑夹引直趋真都城贼倾国来酣
战破之杀虏万人乘胜入其郛王义慈及太子隆北走定方进围其城义慈子泰自立为
王率众固守义慈之孙文思曰王与太子出而叔岂得
擅为王若王师还我父子安得全遂率左右縋城下人多从之泰不能止定方使士登城
建唐旗帜于是泰开门请命其将祢植与义慈降隆及
诸城送款百济悉平俘义慈隆泰等献东都定方所灭三国皆生执其王赏赉珍宝不胜

计加庆节尚辇奉御未几定方为辽东道行军大总管
俄徙平壤道破高丽之众于溟江夺马邑山为营遂围平壤会大雪解围还拜凉州安集
大使以定吐蕃吐谷浑干封二年卒年七十六帝悼之
责谓侍臣曰定方于国有功当褒赠若等不言何邪乃赠左骁卫大将军幽州都督谥曰
庄

△薛仁贵

薛仁贵绛州龙门人少贫贱以田为业将改葬其先妻柳曰夫有高世之材要须遇
时乃发今天子自征辽东求猛将此难得之时君盍图
功名以自显富贵还乡葬未晚仁贵乃往见将军张士贵应募至安地会郎将刘君邛为
贼所围仁贵驰救之斩贼将系首马鞍贼皆慑伏由是
知名王师攻安市城高丽莫离支遣将高延寿等率兵三十万拒战倚山结屯太宗命诸
将分击之仁贵恃骁悍欲立奇功乃着白衣自标显持
戟腰鞬两弓大呼赴贼所向披靡军乘之贼遂奔溃帝望见遣使驰问先锋白衣者谁曰
薛仁贵帝召见嗟异赐金帛口马甚众授游击将军云
泉府果毅令北门长上师还帝谓曰朕旧将皆老欲擢骁勇付阃外事莫如卿者朕不喜
得辽东喜得卿也迁右领军中郎将高宗幸万年宫山
水暴至夜突玄武门宿卫皆散走仁贵曰当天子缓急安可惧死遂登门大呼以警宫内
帝遽出乘高俄而水入帝寝帝曰赖卿以免始知有忠
臣也赐以御马苏定方讨贺鲁仁贵上疏曰臣闻兵出无名事故不成明其为贼敌乃可
服今泥熟为贺鲁所破虏系妻子汉兵有于贺鲁部落
转得其家口者宜悉取以还厚加赉遣使百姓知贺鲁为暴而陛下至德也帝纳之遂还
其家属泥熟请随军效死显庆三年诏副程名振经略
辽东破高丽于贵端城斩首二千级明年与梁建方契苾何力遇高丽大将温沙多门战
横山仁贵独驰入所射皆应弦仆又战石城有善射者
杀官军十余人仁贵怒单骑突击贼弓矢俱废遂生禽之俄与辛文陵破契丹于黑山执
其王阿卜固献东都拜左武卫将军封河东县男诏副
郑仁泰为铁勒道行军总管将行宴内殿帝曰古善射有穿七札者卿试以五甲射焉仁
贵一发洞贯帝大惊更取坚甲赐之时九姓众十余万
令骁骑数十来挑战仁贵发三矢辄杀三人于是虏气慑皆降仁贵虑为后患悉坑之转
讨碛北余众禽伪叶护兄弟三人以归军中歌曰将军
三箭定天山壮士长歌入汉关九姓遂衰铁勒有思结多览葛等部先保天山及仁泰至
惧而降仁泰不纳虏其家以赏军贼相率遁去有候骑
言虏辎重畜牧被野可往取仁泰选骑万四千卷甲驰绝大漠至仙萼河不见虏粮尽还
人饥相食比入塞余兵纔二十之一仁贵亦取所部为

妾多纳赇遗为有司劾奏以功见原干封初高丽泉男生内附遣将军庞同善高偁往慰纳弟男建率国人拒击乃诏仁贵率师为后援同善至新城夜为虏袭仁贵击之斩首数百级同善进次金山军败高丽乘胜进仁贵击虏断为二众即溃斩馘五千拔南苏木底苍岩三城遂会男生军手诏劳勉仁贵负锐提卒二千进攻扶余城诸将以兵寡劝止仁贵曰在善用不在众身帅士遇贼辄破杀万余人拔其城因旁海略地与李绩军合扶余既降它四十城相率送款威震辽海有诏仁贵率兵二万与刘仁轨镇平壤拜本卫大将军封平阳郡公检校安东都护移治新城抚孤存老检制盗贼随材任职褒崇节义高丽士众皆欣然忘亡咸亨元年吐蕃入寇命为逻娑道行军大总管率将军阿史那道真郭待封击之以援吐谷浑待封尝为鄯城镇守与仁贵等夷及是耻居其下颇违节度初军次大非川将趋乌海仁贵曰乌海地险而瘴吾入死地可谓危道然速则有功迟则败今大非岭宽平可置二栅悉内辎重留万人守之吾倍道掩贼不整灭之矣乃约赆至河口遇贼破之多所杀掠获牛马万计进至乌海城以待后援待封初不从领辎重踵进吐蕃率众二十万邀击取之粮仗尽没待封保险仁贵退军大非川吐蕃益兵四十万来战王师大败仁贵与吐蕃将论钦陵约和乃得还吐谷浑遂没仁贵叹曰今岁在庚午星在降娄不应有事西方邓艾所以死于蜀吾固知必败有诏原死除名为庶人未几高丽余众叛起为鸡林道总管复坐事贬象州会赦还帝思其功乃召见曰畴岁万年宫微卿我且为鱼前日殄九姓破高丽尔功居多人有言向在乌海城下纵虏不击以至失利此朕所恨而疑也今辽西不窳瓜州路绝卿安得高枕不为朕指麾邪于是拜瓜州长史右领军卫将军检校代州都督率兵击突厥元珍于云州突厥问曰庚军为谁曰薛仁贵突厥曰吾闻薛将军流象州死矣安得复生仁贵脱兜鍪见之突厥相视失色下马罗拜稍稍遁去仁贵因进击大破之斩首万级获生口三万牛马称是永淳二年卒年七十赠左骁卫大将军幽州都督官给輿护丧还乡里

薛讷

薛嵩

薛平

薛从

薛讷

子讷字慎言起家城门郎迁蓝田令富人倪氏讼息钱于肃政台中丞来俊臣受赇发义仓粟数千斛偿之讷曰义仓本备水旱安可绝众

人之仰私一家报上不与会俊臣得罪亦止后突厥扰河北武后以讷世将诏摄左威卫将军安东道经略使对同明殿具言丑虏冯暴以庐陵王藉言今虽还东宫众未坚信若此命不易贼不讨而解后纳其言俄迁幽州都督安东都护改并州长史检校左卫大将军讷久处边有战功开元初玄宗讲武新丰诏讷为左军节度时诸部颇失序唯讷与解琬军不动帝令轻骑召之至军门不得入礼成尤见慰劳明年契丹奚突厥连和数入边讷建议请讨诏监门将军杜宾客定州刺史崔宣道与讷帅众二万出檀州宾客议方暑士负戈赢粮深入寇境虑无功姚元崇亦持不可讷独曰夏草荐茂羔犊方息不费馈饷因盗资振国威灵不可失也天子方欲夸威四夷喜奇功乃听讷言而授紫微黄门三品以重之师至滦河与贼遇诸将不如约为虏覆尽亡其军讷脱身走而罪宣道及大将李思敬等八人有诏斩以徇独宾客免尽夺讷官爵俄而吐蕃大酋盆达延乞力徐等众十万寇临洮入兰州剽牧马诏讷白衣摄羽林将军为陇右防御使与王峻击之追及贼战武阶驿犄角劫之破其众尾北至洮水又战长城堡杀虏数万禽其酋六指乡弥洪悉收所掠及仗械不费时帝欲自将北伐及讷大克乃止行命紫微舍人倪若水即军陟功状拜讷左羽林大将军复封平阳郡公以子畅为朝散大夫又授凉州镇军大总管赤水建康河源边州皆隶节度俄为朔方行军大总管久之以老致仕卒年七十二赠太常卿谥曰昭定讷性沈勇寡言其用兵临大敌益壮弟楚玉开元中为范阳节度使以不职废生子嵩

嵩

嵩生燕蓟闲气豪迈不肯事产利以膂力骑射自将豫安禄山乱晚为史朝义守相州仆固怀恩破朝义长驱河朔嵩震惧迎拜军门怀恩释之奏为检校刑部尚书相卫洺邢等州节度使方大乱后人亦厌祸嵩谨奉职颇有治名大历初封高平郡王实封二百户号其军为昭义迁检校尚书右仆射更封平阳七年卒赠太保诏其弟■〈山上罌下〉知留后事累加检校太子少师十年为其将裴志清所逐以兵归田承嗣■〈山上罌下〉奔洺州请入朝降服待罪银台门赦之乃分其地以嵩族子择为相州刺史雄卫州刺史坚洺州刺史承嗣诱雄乱不从遣刺客杀之初嵩好蹴鞠隐士刘钢劝止曰为乐甚众何必乘危邀晷刻欢嵩悦图其形坐右嵩子平

平

平字坦涂年十二为磁州刺史父丧军吏以故事胁知留务伪许之已而让■〈山上罌下〉夕以丧归累授右卫将军宿卫三十年宰相

杜黄裳擢为汝州刺史治有风绩王师讨蔡繇左龙武大将军授郑滑节度使数战有功始河溢瓠子东泛滑距城纔二里所平按求故道出黎阳西南因命其左裴弘泰往请魏博节度使田弘正弘正许之乃籍民田所当者易以它地疏道二十里以酺水悍还墾田七百顷于河南自是滑人无患入为左金吾卫大将军未几复帅郑滑李师道平诏分淄青齐登莱五州为平卢军徙平为节度使王庭凑围牛元翼棣州危诏平出援平遣将李叔佐率兵二千往刺史王稷馈餉陋狭众溃而归推突将马士端为帅劫屯士万人薄州堞城中兵寡平悉公帑家资募锐卒二千迎战以奇兵掩贼辎重贼狼顾遂大败降余党平引谋乱者二千人斩堂皇下胁从皆纵还田里威震一方诏迁检校尚书右仆射封魏国公在镇六年兵铠完砺徭赋均一宝历初入朝民鄣路愿留数日得出拜检校司空河中绛隰节度使复得隶晋慈二州益兵三千进检校司徒更封韩召拜太子太保以司徒致仕卒年八十赠太傅

辞从

子从字顺之以荫授左清道率府兵曹参军累迁汾州刺史堤文谷滹河二水引溉公私田汾人利之徙濮州储粟二万斛以备凶灾于是山东大水诏右司郎中赵櫟为振恤使櫟表其才擢将作监终左领军卫上将军赠工部尚书

△程务挺

程务挺洺州平恩人父名振隋大业末仕窦建德为普乐令盗不迹境俄弃职自归高祖诏授永宁令使率兵经略河北即夜袭邺县俘男女千余人以归去数舍阅妇人方乳者九十余人还之邺人感其仁刘黑闥陷洺州名振与刺史陈君宾自拔归母妻为贼所得名振率众千余掠冀贝沧瀛等州邀击粮道悉毁贼水陆饷具黑闥怒杀其母妻贼平请手斩黑闥以其首祭母拜营州长史封东平郡公赐物二十段黄金三百两转洺州刺史太宗征辽东召问方略不合旨帝勃然诘之名振辩对益详帝意解谓左右曰房玄龄常在朕前见朕嗔余人色不能主名振生平未识我一旦谄让而辞吐不屈奇士哉拜右骁卫将军平壤道行军总管攻沙卑城破独山阵皆以少击众号为名将迁营州都督兼东夷都护击高丽于贵端水焚其新城历晋蒲二州刺史镋方道总管卒赠右卫大将军谥曰烈务挺少从父征讨以勇力闻拜右领军卫中郎将破突厥六万骑于云州会伪可汗阿史那伏念叛总管李文暕等三将以次奔败诏裴行俭讨之以务挺副检校丰州都督时伏念屯金牙山务挺与副都总管唐玄表引兵赴之伏念惧乃闲道降于行俭故裴炎以为非行俭功迁务挺右

武卫将军封平原郡公绥州部落稽白铁余据城平叛
建伪号署置百官进攻绥息大斌杀官吏火区舍诏务挺与夏州都督王方翼讨之务挺
生禽白铁余进左骁卫大将军检校左羽林军嗣圣初
与右领军大将军张虔勖等豫废中宗立豫王为皇帝累被褒赉以左武卫大将军为单
于道安抚大使御突厥务挺善绥御士服其威爱突厥
惮之不敢盗边裴炎下狱务挺密表申治又素与唐之奇杜求仁善或言务挺与炎及徐
敬业潜相援结后遣左鹰扬将军裴绍业即军中斩之
籍其家突厥闻务挺死率相庆为立祠每出师辄祷焉

△王孝杰

王孝杰京兆新丰人少以军功进仪凤中刘审礼讨吐蕃孝杰以副总管战大非川
为虏执赞普见之曰貌类吾父故不死归之武后时为
右鹰扬卫将军孝杰居虏中久悉其虚实长寿元年为武威道总管与阿史那忠节讨吐
蕃克龟兹于阗疏勒碎叶等城武后曰贞观中西境在
四镇其后不善守弃之吐蕃今故土尽复孝杰功也乃迁左卫大将军进夏官尚书同凤
阁鸾台三品清源县男证圣初复为朔方道总管与吐
蕃战不利免会契丹李尽忠等叛有诏起白衣为清边道总管将兵十八万讨之军至东
碛石谷与贼接道隘虏众孝杰率锐兵先驱出谷整阵
与贼战而后军总管苏宏晖以其军退援不至为虏所乘军溃孝杰堕谷死士相蹂且尽
时张说以管记还白状具陈孝杰乃心国家敢深入以
少当众虽败功可录也乃赠夏官尚书耿国公以其子无择为朝散大夫遣使者斩宏晖
使未至而宏晖已立功遂赎罪

△唐休璟

唐璇字休璟以字行京兆始平人曾祖规为后周骠骑大将军休璟少孤授易于马
嘉运传礼于贾公彦举明经高第为吴王府典签改营
州户曹参军会突厥诱奚契丹叛都督周道务以兵授休璟破之于独护山数馘多迁朔
州长史永淳中突厥围丰州都督崔智辩战死朝廷议
弃丰保灵夏休璟以为不可上疏曰丰州控河遏寇号为襟带自秦汉以来常郡县之土
田良美宜耕牧隋季丧乱不能坚守乃迁就窳庆戎羯
交侵始以灵夏为边界贞观末募人以实之西北一隅得以完固今而废之则河傍地复
为贼有而灵夏亦不足自安非国家利也高宗从其言
垂拱中迁安西副都护会吐蕃破焉耆安息道大总管韦待价等败休璟收其溃亡以定
西土授灵州都督乃陈方略请复四镇武后遣王孝杰
拔龟兹等城自休璟倡之圣历中授凉州都督右肃政御史大夫持节陇右诸军副大使
吐蕃大将趋莽布支率骑数万寇凉州入洪源谷休璟

以兵数千临高望之见贼旗铠鲜明谓麾下曰吐蕃自钦陵死赞婆降莽布支新将兵欲以示武且其下皆贵臣酋豪子弟骑虽精不习战吾为诸君取之乃被甲先登六战皆克斩二将获首二千五百筑京观而还吐蕃来请和既宴使者屡觐休璟后问焉对曰洪源之战是将军多杀臣士卒其勇无比今愿识之后嗟异擢为右武威金吾二卫大将军西突厥乌质勒与诸蕃不和举兵相攻安西道闭武后诏休璟与宰相计议不少选画所当施行者既而边州建请屯置尽如休璟策后曰恨用卿晚进拜夏官尚书同凤阁鸾台三品后谓杨再思李峤姚元崇等曰休璟练知边事卿辈十不当一改太子右庶子仍知政事会契丹入塞复以夏官尚书检校幽营等州都督安东都护时中宗为皇太子休璟将行进启曰易之兄弟恩宠过幸数入禁闼非人臣所宜愿加防察帝复位召授辅国大将军同中书门下三品酒泉郡公谓曰初欲召公计事以有北狄忧前日直言今未忘也加特进尚书右仆射赐邑户三百封宋国公是岁大水上疏自劾免不许累迁检校吏部尚书景龙二年致仕未几复起为太子少师同中书门下三品监修国史景云初以特进为朔方行军大总管备突厥停旧封别赐百户明年复请老给一品全禄延和元年卒年八十六赠荆州大都督谥曰忠休璟以儒者号知兵自碣石踰四镇其闲绵地几万里山川夷坦障塞之要皆能言之故行师料敌未尝败初得封以赋绢数千散调其族又出财数十万大为莹墓尽葬其五服亲当时称重惟张仁愿议筑受降城而休璟独谓不可卒就之而漠南无虏患始致仕已踰八十犹托倚权近求复用于是贺娄尚宫方用事附者辄荣赫休璟乃为子娶其义女故复起宰相颇为时所讥其当国亦无它裨益云子先慎至陈州刺史先择为右金吾卫将军

△张仁愿

张仁愿华州下邽人本名仁亶以睿宗讳音近避之有文武材武后时累迁殿中侍御史御史郭弘霸者【旧书作郭霸】称后乃弥勒佛身又凤阁舍人张嘉福王庆之请以武承嗣为皇太子邀仁愿联章仁愿正色拒之后王孝杰为吐刺军总管与吐蕃战不利仁愿监其军因入言状孝杰坐免擢仁愿侍御史万岁通天中监察御史孙承景监清边军战还自图先锋当矢石状武后叹曰御史乃能如是乎擢为右肃政台中丞诏仁愿即叙其麾下功仁愿先问承景破敌曲折承景实不行所问皆穷仁愿劾奏承景罔上虚列虏级贬为崇仁令以仁愿代为中丞检校幽州都督默啜寇赵定还出塞仁愿以兵邀之贼引去矢着其手武后遣使劳问赐药傅注迁并州都督长史神龙中进左屯卫大将军兼

检校洛州长史会谷贵多盗仁愿一切捕杀鬻积府门畿甸震慑无敢犯先是贾敦颐尝为长史有政绩时人为之语曰洛有前贾后张敌京兆三王三年朔方军总管沙咤忠义为突厥所败诏仁愿摄御史大夫代之既至贼已去引兵踵击夜掩其营破之始朔方军与突厥以河为界北厓有拂云祠突厥每犯边必先谒祠祷解然后纠兵度河时默啜悉兵西击突骑施娑葛仁愿请乘虚取漠南地于河北筑三受降城绝虜南寇路唐休璟以为两汉以来皆北守河今筑城虜腹中终为所有仁愿固请中宗从之表留岁满兵以助功咸阳兵二百人逃归仁愿禽之尽斩城下军股栗役者尽力六旬而三城就以拂云为中城南直朔方西城南直灵武东城南直榆林三垒相距各四百余里其北皆大磧也斥地三百里而远又于牛头朝那山北置烽埃千三百所自是突厥不敢踰山牧马朔方益无寇岁损费亿计减镇兵数万初建三城也不置壅门曲敌战格或曰边城无守备可乎仁愿曰兵贵攻取贱退守寇至当并力出拒敢回望城者斩何事守备退忸其心哉后常元楷代为总管始筑壅门议者益重仁愿而轻元楷景龙二年拜左卫大将军同中书门下三品封韩国公春还朝秋复督军备边帝为赋诗祖道赏赉不费迁镇军大将军睿宗立乃致仕加兵部尚书廩禄全给开元二年卒赠太子少保仁愿为将号令严将吏信伏按边抚师赏罚必直功罪后人思之为立祠受降城出师辄享焉宰相文武兼者当时称李靖郭元振唐休璟仁愿云在朔方奏用御史张敬忠何鸾长安尉寇泚鄂尉王易从始平主簿刘体微分总军事太子文学刘彦昭为管记义乌尉晁良贞为随机皆著称后至大官世名仁愿知人子之辅至赵州刺史张敬忠自监察御史累迁吏部郎中开元七年拜平卢节度使

△王峻

王峻沧州景城人后徙洛阳父行果为长安尉知名峻弱冠擢明经第调清苑尉历除殿中侍御史会朔方元帅魏元忠讨贼不利劾奏副将韩思忠败律当诛峻以思忠偏裨权不己制且其人勇智可惜不宜独诛固争得释峻亦出为渭南令景龙末授桂州都督州有兵旧常仰饷衡永峻始筑罗郭罢戍卒埭江水开屯田数千顷以息转漕百姓赖之后求归上冢州人诣阙留有诏桂往罗寇暴户口雕瘵宜即留以须政成在桂踰期年州人勺刻石颂德初刘幽求放封州广州都督周利贞必欲杀之道出峻所峻知其故留不遣利贞移书督趣幽求惧曰势且难全正恐累君奈何峻曰公之坐非朋友所绝峻在终不忍公无罪就死俄崔湜等诛幽求复执政故诏幽求为刻石辞迁鸿胪少卿充朔方军副大

总管安北大都护丰安定远等城并受节度进太仆少卿陇右羣牧使开元二年吐蕃以精甲十万寇临洮次大来谷其酋盆达延以兵踵而前
暎率所部二千与临洮军合料奇兵七百易胡服夜袭去贼五里令曰前遇寇士大呼鼓角应之贼惊疑伏在旁自相鬪死者万计俄而薛讷至
武阶距大来二十里贼阵两军闲亘一舍而近暎往迎讷夜使壮士衔枚麇突虏骇引去追至洮水败之俘获如积以功加银青光禄大夫清源县男兼原州都督以子班为朝散大夫又进并州都督长史明年突厥默啜为拔曳固所杀其下多降分置河曲既而小杀继降降者稍稍叛去
暎上言突厥向以国乱款塞降附与部落本无嫌隙今徙处河曲使内伺边罅久必为患比者不受要约兵已屡动擅作烽区闭障行李虏脱南牧降帐必与连衡以相应接表里有敌虽韩彭孙吴无所就功请至农隙令朔方军大陈兵召酋豪告以祸福啖以金缯且言南方麋鹿鱼米之饶并迁置淮右河南宽乡给之程粮虽一时之劳然不二十年渐服诸华料以充兵则皆劲卒议者若谓降狄不可以南处则高丽旧俘置之沙漠之曲西域编夷散在青徐之右何独降胡不可徙欤臣复料议者必曰故事置于河曲前日已寔今无独异且往者颉利破亡边鄙安定故降户不生他心今虏未殄灭此降人又皆戚属固不与往年同臣请以三策料之悉其部落置内地获精兵之实闭黠虏之患此上策也亭障之下蕃华参处广屯戍为备拟费甚人劳下策也置之胡塞滋成祸萌此无策也留待河水恐即有变书未报而虏已叛乃敕暎将并州兵济河以讨之暎闲行倍道卷甲舍幕夜趋山谷中遇雪盛恐失期仰天誓曰暎若事君不忠不讨有罪天所殛者当自蒙罚士众何辜心诚忠而天监之则止雪反风以济戎事须臾雪止时叛胡分二道走暎自东道追及之获级三千以功迁左散骑常侍朔方行军大总管改御史大夫■〈足夹〉
跌部及仆固都督勺磨等散保受降城左右潜引突厥内扰暎密言上尽诱而诛之拜兵部尚书复为朔方军大总管九年兰池胡康待宾据长泉反陷六州诏郭知运与暎讨平之封清源公官一子玄宗以宫人赐知运等暎独不敢取曰臣之事君犹子事父詎有常近闾掖而臣子敢当乎誓死以免见听初暎奏朔方兵力有余愿罢知运独当戍未报而知运至故不协暎所降附知运辄纵击贼意暎卖己乃复叛暎坐贬梓州刺史改太子詹事中山郡公进吏部尚书太原尹代张说为兵部尚书同中书门下三品充朔方军节度大使河北河西陇右河东之军尽属是冬帝亲郊追会大礼暎以水壮请留将兵待边手敕慰勉会有人告许州刺史王乔谋反辞逮暎诏源干曜张说噪声无状以党与贬蕲州刺史迁

定州复以户部尚书为朔方军节度使卒赠尚书左丞相谥曰忠烈峻气貌伟特时谓为熊虎相感慕节义有古人风其操下肃壹吏人畏爱始二张之诬魏元忠峻独上疏申治宋璟曰魏公全矣子再触逆鳞其殆乎峻曰魏公以忠获罪苟得辩虽死弗悔峻卒后信安王祗讨奚于幽州告捷且言战时士咸见峻与部将高昭麾兵赴敌天子嗟异户部郎中阳伯成上疏请封峻墓表异之优其子孙帝乃遣使祭峻庙进诸子官

钦定续通志卷二百十八

●钦定续通志卷二百十九 列传十九

列传

唐 【十九】

○唐十九

王义方 员半千 韩思彦【琬】 苏安恒 薛登 王求礼
柳泽【范奭】 冯元常【元淑】 蒋钦绪

【沈清】

王义方

员半千

韩思彦

苏安恒

薛登

王求礼

柳泽

冯元常

蒋钦绪

△王义方

王义方泗州涟水人客于魏孤且娶事母谨甚淹究经术性睿特高自标树举明经诣京师客有徒步疲于道者自言父宦远方病且革欲往省困不能前义方哀之解所乘马以遗不告姓名去由是誉振一时不肯造请贵势太宗使宰相听其论于是尚书外郎独孤慙以儒显义方引逮百家异同连折慙直出其上补晋王府参军直宏文馆魏征异之欲妻以夫人之侄辞不娶俄而征薨乃娶人问其然曰初不附宰相今感知己故也素善张亮亮抵罪故贬吉安丞道南海舟师持酒脯请福义方酌水誓曰有如忠获戾孝见尤四维廓氛千瑞安流神之听之无作神羞是时盛夏涛雾蒸涌既祭天云开露人壮其诚吉安介蛮夷梗悍不驯义方召首领稍选生徒为开陈经书行释奠礼清歌吹钥登降跽立人

人悦顺久之徙洹水丞而亮兄子皎自朱崖还依义方将死诿妻子愿以尸归葬义方许之以皎妻少故与之誓于神使奴负柩辍马载皎妻身步从之既葬皎原武归妻其家而告亮墓乃去迁云阳丞显庆元年擢侍御史不再旬会李义府私纵囚妇淳于追大理丞毕正义缢死【详见义府传】无敢白其奸义方自以兴县属不三时拜御史且疾当世附离匪人以欺朝廷内决劾奏意必得罪即白母母曰昔王母伏剑成陵之谊汝能尽忠吾死不恨义方即上言义府于辇毂之下作奸肆虐擅杀六品寺丞就令正义自缢亦由畏义府权势杀身灭口如此则生杀之威不自主出履霜坚冰渐不可长请下有司杂治正义死状即具法冠对仗叱义府下跪读所言帝方安义府狡佞恨义方以孤士触宰相贬莱州司户参军岁满不复调往客昌乐聚徒教授母丧隐居不出卒年五十五义方为御史时买第后数日爱庭中树复召主人曰此佳树得无欠偿乎又子之钱其不贪类此始魏征爱其材也每恨太直后卒以疾恶不容于时既死门人员半千何彦先行丧庐冢侧三年乃去彦先齐州全节人武后时位天官侍郎

△员半千

员半千字荣期齐州全节人其先本彭城刘氏十世祖凝之事宋起部郎及齐受禅奔元魏以忠烈自比伍员因自姓员终镇西将军平凉郡公半千始名余庆羁尹通书史客晋州州举童子房玄龄异之对诏高第已能讲易老子长与何彦先同事王义方以迈秀见赏义方常曰五百岁一贤者生子宜当之因改今名凡举八科皆中咸亨中上书高自称誉不报调武陟尉岁旱劝令殷子良发粟振民不从及子良谒州半千悉发之下赖以济刺史大怒囚半千于狱会薛元超持节渡河让太守曰君有民不能恤使惠出一尉尚可罪邪释之俄举岳牧高宗御武成殿问兵家有三阵何谓邪众未对半千进曰臣闻古者星宿孤虚天阵也山川向背地阵也偏伍弥缝人阵也臣谓不然夫师以义出沛若时雨得天之时为天阵定食约费且耕且战得地之利为地阵举三军士如子弟从父兄得人之和为人阵舍是则何以战帝曰善既对策擢高第历华原武功尉厌卑剧求为左卫胄曹参军使吐蕃将行武后曰久闻尔名谓为古人乃在朝邪境外事不足行宜留待制即诏入合供奉迁司宾寺主簿稍与邱悦王勳石抱忠同为宏文馆直学士又与路敬淳分日待制显福门下累擢正谏大夫兼右控鹤内供奉半千以控鹤在古无有而授任者皆浮侠少年非朝廷德选请罢之忤旨下迁水部郎中会诏择牧守除棣州刺史复入为宏文馆学士武三思用事以贤见忌出豪蕲二

州刺史半千不颀任吏常以文雅粉泽故所至礼化大行睿宗初召为太子右谕德仍学士职累封平原郡公表骨有诏听朝朔望半千事五君有清白节开元九年游尧山沮水闲爱其地遂定居卒年九十四即葬焉吏民哭野中抱忠长安人善属文初置右台【职官志光宅元年分台为左右】自清道率府长史为殿中侍御史进检校天官郎中领选清平坐蓁连耀伏诛悦河南人亦善论譔仕至岐王傅

△韩思彦

韩思彦字英远邓州南阳人游太学事博士谷那律律为匪人所辱思彦欲杀之律不可举下笔成章志烈秋霜科擢第授监察御史昌言当世得失高宗夜召加二阶待诏宏文馆仗内供奉巡察剑南益州高资兄弟相讼累年不决思彦敕厨宰饮以乳二人啮肩相泣曰吾乃夷獠不识孝义赖公寤我乃请辍讼至西洱河诱叛蛮降之会蜀大饥开仓振民然后闻玺书褒美使并州有贼杀人主名不立醉胡怀刀而污讯掠已服思彦疑之晨集童儿数百暮出之如是者三因问儿出亦有问者乎皆曰有之乃物色推讯遂禽真盗后太白昼见劝帝修德荅天谴帝让中书令李义府曰八品官能言得失而卿冒没富贵主何事邪义府谢罪司农武惟良擅月并州赋二百万缗思彦劾处死武后为请而免义府与诸武共譖思彦出为山阳丞初尉迟敬德子姓陷大逆思彦按释其冤至是赠黄金良马思彦不受至官阅月自免去放迹江淮闲久之补建州司户参军帝召问不见卿久今何官邪思彦泣道所以然帝谓宰相此亦太屈复召为御史俄出为江都主簿又徙苏州录事参军罢客汴州张僧彻者庐墓三十年诏表其闾请思彦为颂饷缣二百不受固请为受一匹命其家曰此孝子缣不可轻用上元中复召见思彦久去朝仪矩梗野拜忘蹈舞又诋外戚擅权后恶之中书令李敬玄劾奏思彦见天子不蹈舞负气鞅鞅不可用时已拜干封丞故徙朱鸢丞迁贺州司马卒始思彦在蜀引什邡令邓恽右坐曰公且贵愿以子孙诿公比其斥而恽已为文昌左丞子琬

韩琬

韩琬

琬字茂贞州举茂才擢第又举文艺优长贤良方正连中拜监察御史景云初【按唐会要载此疏在景云二年】上言国安危在于政政以法暂安焉必危以德始不便焉终治故以智治国国之贼不以智治国国之福贞观永徽之闲农不劝而耕者众法施而犯者寡在位忠正清白者比肩立罚虽轻而不犯赏虽薄而劝位尊不倨家富不奢学校不厉而勤道佛不

惩而戒其故奈何维以王道也自兹以来任巧智斥蹇
谲趋势者进守道者退贪冒者谓能清贞者谓孤浮沈者谓黠刚正者谓愚人趋家竞风
俗沦替其故奈何行以霸道也贞观永徽之天下亦今
日天下淳薄相反由治则然今为治者不务省事而务捉搦夫捉搦者法也法而益国设
之可也此法令数改行未见益止未见损譬奕者一碁
为善而复之者愈善故曰设法不如息事事息则巧不生又言臣窃闻永淳时雍邱令尹
元贞坐妇女治道免官令妇女女役所在有之不知怪
也调露时河内尉刘宪父丧人有请其员者有司以为名教不取今且谓为见机太宗朝
司农以市木槿倍价抵罪大理孙伏伽言官直贵故百
姓直贱臣见司农识大体未闻其过太宗曰善今和市颡刻剥名为和而实夺之往者学
生佐史里正每一员阙拟者十人今当选者亡匿以免
往选司从容有礼今如仇敌贾贩耳往官将代储什物俟其至今交罢执符纷竞校在亡
往商贾出入万里今市井至失业往家藏糴积粟相夸
今匿货以示羸往召募人贾其勇今差勒阖宗逃亡往仓储盈衍今所在空虚若此者臣
麤言之不可悉数夫乱绳已结急引之则不可解今刻
薄吏能结者也举劾吏能引者也而解者卒未见其人愿取奇材卓行者量能授官庶有
益风化又言仕路太广故弃农商而趋之一夫耕一妇
蚕衣食百人欲储蓄有余安可得乎书入不报出监河北军兼按察使先天中赋绢非时
于是谷贱缣益贵丁别二缣人多徙亡琬移檄罢督乃
闻诏可开元中迁殿中侍御史坐事贬官卒

△苏安恒

苏安恒冀州武邑人博学尤明周官春秋左氏学武后末年太子虽还东宫政事一
不与大臣畏祸无敢言安恒投匭上书曰陛下膺先圣
顾托受嗣子揖让应天顺人二十余年岂不闻虞舜褰裳周公复辟事乎今太子孝谨春
秋盛壮使统临宸极何异陛下身抚天下哉胡不传位
东宫休养圣躬自昔天下无二姓并兴且梁河内建昌诸王以亲得封恐万岁后不能良
计宜退就公侯任以闲简又陛下二十余孙无尺土封
非长久计也请以都督府要州分而王之纵今尚幼且择立师傅养成德器藩屏皇家书
奏后虽猜克不能无感乃召见赐食厚慰遣之明年复
谏曰天下者高祖太宗之天下陛下虽居正统实唐旧基今太子年德已盛尚贪有大宝
忘母子之恩何施颜面见唐家宗庙大帝陵寝哉臣谓
天意人事还归李氏物极则复器满则倾陛下以臣为忠则择是而用以为不忠则斩臣
头以令天下书闻不报于是魏元忠为张易之兄弟所
构狱方急安恒独申救曰陛下始革命勤政博谋天下皆以为明王暮年厌怠天下以为

暗君元忠位宰相履忠正邪佞之徒嫉之若讎易之兄
弟无功无德位势隆极指马献蒲先害善良自元忠下狱人人偶语谓易之交乱且及四
国烈士抚髀忠臣钳口惧迁易之等意徒死无益况贼
虜方强赋敛重困而自纵谗慝摇变遐迩臣恐四夷拭目窥覩为边鄙患百姓托义以清
君侧逐鹿之人叩关而至陞卫左右从中以应争锋朱
雀之门问鼎大明之宫陞下何以谢之臣今计者莫若收雷电之威解恢恢之网复爵还
位君臣如初则天下幸甚陞下纵不能斩佞臣塞人望
且当抑夺荣宠翦其羽翼无使骄横为社稷之忧疏奏易之等大怒欲杀之赖凤阁舍人
桓彦范等悉力营解乃免神龙初为习艺馆内教节愍
太子难或谗安恒豫谋死狱中睿宗立知其枉诏赠谏议大夫

△辭登

辭登常州义兴人父士通为隋鷹扬郎将江都乱与州民间人嗣安据城拒贼武德
初持地自归授东武州刺史辅公祐反士通与贼将西
门君仪战破之及平封临汾侯终泉州刺史登贯通文史善议论根证该审与徐坚刘子
玄齐名调闾中主簿天授中累迁左补阙时选举滥甚
乃上疏曰比观举荐类不以才驰声假誉互相推引非所谓报国求贤者也古之取士考
素行之原询乡邑之誉崇礼让明节义以敦朴为先雕
虫为后故人崇劝让士去轻浮盖冀缺以礼让升而晋人知礼文翁以经术教而蜀士多
儒未有上好而下不从者也汉世求才犹征百行闾里
推高然后府寺交辟魏取放达晋先门阀梁陈荐士特尚词赋隋文帝纳李谔之言诏禁
文章浮词时泗州刺史司马幼之表不典实得罪由是
风俗稍改炀帝始置进士等科后生复相驰竞赴速趋时缉綴小文名曰策学不以指实
为本而以浮虚为贵方今举士尤乖其本明诏方下固
已驱驰府寺之廷出入王公之第陈篇希恩奏记誓报故俗号举人皆称觅举觅者自求
也循常之人弃疏取附戚施拜伏寢以成风愿陞下降
明制颁峻科断无当之游言收实用之良策文试效官武阅守御昔吴起将战左右进剑
吴子辞之诸葛亮临阵不亲戎服盖不取弓剑之用也
汉武帝闻司马相如之文恨不与同时及其至也终不处以公卿之位非所任故也汉法
所举之主终身保任扬雄之坐田仪成子之得魏相赏
罚之令行则请谒之心绝退让之义着则贪竞之路销请宽年限以容简汰不实免官得
人加赏自然见贤不隐贪禄不专矣时四夷质子多在
京师及还并为边害登諫曰伏见突厥吐蕃契丹往因入侍并被奖遇官戎秩步黉门窥
图史成败熟山川险易狼子辜恩惧为后患昔申公奔
晋使子狐庸为吴行人教吴战阵使之叛楚汉迁五部匈奴于汾晋卒以刘石作难今皇

风所覃含识革面由余效忠日殫尽节然臣虑备豫不
谨则夷狄称兵不在方外非貽谋之道窃谓愿充侍子可一切禁绝先在国者不使归蕃
则夷人保疆边邑无事武后不纳久之出为常州刺史
属宣州贼锺大眼乱百姓溃震登严勒守备阖境赖安再迁尚书左丞景云中为御史大
夫僧慧范怙太平公主势夺民邸肆官不能直登将治
之或劝以自安荅曰宪府直枉朝奏暮黜可矣遂劾奏反为主所构出岐州刺史迁太子
宾客开元初为东都留守再为太子宾客登本名谦光
以与皇太子名同诏赐今名坐子累归田里家苦贫诏给致仕禄卒年七十三赠晋州刺
史

△王求礼

王求礼许州长社人武后时为左拾遗监察御史后方营明堂珻饰譎怪侈而不法
求礼以为琼台瑶室之比非所谓茅茨采椽者自轩辕
以来服牛乘马今辇以人负则人代畜上书讥切不报契丹叛使孙万荣寇河北诏河内
王武懿宗御之懦缩不进贼掠数州去懿宗乃条华人
为贼诖误者数百族请诛之求礼奏曰诖误之人为虜胁制寔素持叛心哉懿宗拥兵数
十万闻敌至走保城邑乃更移祸无辜之人请斩懿宗
首以谢河北懿宗大惧后尽赦其人当是时契丹陷幽州馈挽屈竭左相豆卢钦望请停
京官九品以上两月俸助军兴求礼曰公禄万锺正可
辍仰禄之人可奈何钦望拒不应既奏求礼厯阶进曰天子富有四海何待九品俸使宰
相夺之以济军国用乎姚璠曰秦汉皆有税算以佐军
求礼不识大体对曰秦汉虚天下事边奈何使陛下效之后乃止久视元年三月大雨雪
【按新书作久视二年三月吴缜纠谬曰久视止有
元年至次年正月丁丑改元大定至十月又改元长安无久视二年三月也五行志久视
元年三月大雪疑即此事而误以为二年尔今据改】
苏味道等以为瑞率羣臣入贺求礼让曰季春雨雪为瑞雪则冬月雷岂为瑞雷邪味道
不从既贺者入求礼即厉言今阳气僨升而阴冰激射
此大灾也主荒臣佞瑞何自来羣臣震恐后为罢朝然以刚正故仕不达神龙初终卫王
府参军

△柳泽

柳泽蒲州解人曾祖亨字嘉礼大业末为王屋长陷李密已而归京师高祖以外孙
窦妻之三迁左卫中郎将寿陵县男以罪贬邛州刺史
进散骑常侍代还数年太宗召见拜光禄少卿亨射猎无检帝谓曰卿于朕旧且亲然多
交游自今宜少戒亨由是痛飭厉谢宾客力吏事终检
校岐州刺史赠礼部尚书幽州都督谥曰恭 【旧书作谥敬】 泽风度方严景云中为

右率府铠曹参军四岁不迁先是中宗时长安宜城安
定诸公主及后女弟昭容上官与其母郑尚宫柴陇西夫人赵及姻联数十族皆能降墨
敕授官号斜封及姚元崇宋璟辅政白罢斜封官数千
员元崇等罢去太平公主尽奏复之泽诣阙上疏曰臣窃见神龙以来纪纲大坏内宠专
命外嬖制权因贵凭势卖官鬻爵天下溷乱几危社稷
陛下耳目所亲岂可忘诫且斜封官者皆仆妾私谒迷谬先帝陛下即位之初用元崇等
计悉以停废今又收用天下咸称太平公主与胡僧慧
范以此误陛下又尚医奉御彭君庆以巫覡小伎超授三品轻用名器加非其人臣闻赏
一人而千万人悦者赏之罚一人而千万人劝者罚之
惟陛下裁察疏入不报泽入调会有诏选者得言事乃上书曰臣闻危者保其存也乱者
有其理也安不忘危理不忘乱则克享天心国家长保
夫骄奢起于亲贵纲纪乱于宠幸禁之于亲贵则天下从制之于宠幸则天下畏亲贵为
而不禁宠幸挠而不制故政不常令不一则奸诈起而
暴乱生焉虽朝施暮戮而法不行矣陛下欲亲与爱莫若安之福之宠禄之过罪之阶也
非安之也骄奢之淫危之梯也非福之也今储宫肇建
王府复启愿采温良博闻恭俭忠鲠者为之僚友仍请东宫置拾遗补阙使朝夕讲论出
入侍从交修不逮又今贵戚打球击鼓飞鹰奔犬狎比
宵人盘游藪泽书曰内作色荒外作禽荒惟陛下诞降谋训劝以学业示之以好恶陈之
以成败则长享福禄矣顷韦庶人安乐公主武延秀等
可谓贵且宠矣权侔人主威震天下然怙侈灭德神怒人弃岂不谓爱之太极富之太多
乎殷鉴不远在夏后之世睿宗善之拜监察御史开元
中转殿中侍御史监岭南选时市舶使右威卫中郎将周庆立造奇器以进泽上书曰庆
立雕制诡物造作奇器乃治国之巨蠹明王所宜严罚
者也陛下新即位固宜昭宣菲薄广示节俭岂可以怪好示四方哉书奏玄宗称善厯迁
太子右庶子为郑州刺史未行卒赠兵部侍郎泽从祖
范奭

柳范

柳奭

柳范

范贞观中为侍御史时吴王恪好田猎范弹治之太宗曰权万纪不能辅道恪罪当
死范进曰房玄龄事陛下犹不能谏止畋猎岂宜独罪
万纪帝怒拂衣起顷之召谓曰何廷折我范谢曰主圣则臣直陛下仁圣敢不尽愚帝乃
解高宗时厯尚书右丞扬州大都督府长史

柳奭

奭字子邵父隋时使高丽卒故往迎丧号踊尽哀为夷人所慕贞观中累迁中书舍人外孙为皇后迁中书侍郎进中书令皇后挟媚道觉罢为吏部尚书后废贬爱州刺史许敬宗等构奭通宫掖谋行鸩毒与褚遂良朋党罪大逆遣使杀之没其家神龙初乃复官爵子孙亲属缘坐者悉免开元初泽兄涣为中书舍人上言臣从伯祖奭去显庆三年与褚遂良等五门同被谴戮虽被原雪而子孙殆尽唯曾孙无忝客籍龚州陛下先天后诏书尝任宰相并录其后况臣之伯祖无辜被诛今藁窆未还后嗣侨处愿许伯祖归葬孤孙北迁于是诏无忝护奭柩归乡里官给丧事无忝后历潭州都督

△冯元常

冯元常相州安阳人曾祖子琮北齐右仆射叔祖慈明仕隋为内史舍人奉诏讨李密为密将所缚身数创密厚礼之情谓曰东都危蹙我欲率四方贤豪建功业幸公同之慈明曰公家事先帝名在王室乃挟玄感举兵亡命至今复图反噬何邪密囚之俄为翟让所杀武德初赠吏部尚书谥壮武元常举明经及第调浚仪尉高宗时擢累监察御史剑南道巡察使兴利除害蜀人甚赖历尚书左丞尝密谏帝中宫权重宜少抑帝虽置其计而内然之由是为武后所恶元常在职修举识鉴澄远帝委遇特厚帝不豫诏平章百司奏事武后擅朝嵩阳令樊文进瑞石后暴石朝堂示百官元常奏石妄伪不可以示羣臣后怒出为陇州刺史会天下岳牧集干陵后不欲元常得会故道徙眉州刺史剑南有光大盗夜掠人昼伏山谷元常喻以恩信约悔过自新贼相率脱甲面缚贼平转广州都督安南酋领李嗣仙劫州县诏元常讨之率士卒航海驰檄先示祸福贼党多降元常斩首恶而还虽有功犹以拂旨见怨不录功凡三徙终不得至京师卒为酷吏周兴所陷追赴都下狱死元常闺门雍睦有礼法虽小功丧不御私室神龙中旌其家大署曰忠臣之门天下高其节凡名族皆愿通婚

冯元淑

冯元淑

从弟元淑天后时历清漳浚仪始平三县令右善去恶人称为神明与奴仆日一食马日一秣所至不挈妻子斥俸余以给贫穷咸讥其近名元淑曰吾性也不为苦中宗降玺书劳勉付状史馆元淑约洁过于元常然刚直不及也终祠部郎中

△蒋钦绪

蒋钦绪莱州胶水人工文辞擢进士第累迁大常博士中宗始亲郊国子祭酒祝钦

明建言皇后应亚献帝疑之诏礼官议众曲意阿徇钦
绪独抗言不可诸儒壮其节历吏部员外郎始韩琬为高邮主簿使京师自负其才有不
遇之言题客舍它日钦绪见之笑曰是子叹后时邪久
之琬举贤良方正钦绪擢其文异等其务荐引士类此钦绪精治道驭吏整严虽铍杪罪
不贷出为华州长史萧至忠自晋州被召过钦绪钦绪
本姻家因戒曰以君才不患不见用患非分而求耳至忠竟及祸开元十三年以御史中
丞录河南囚宣慰百姓振穷乏徙吏部侍郎历汴魏二
州刺史卒

蒋沆

蒋清

蒋沆

子沆亦博学以孝廉授洛阳尉迁监察御史与兄演溶弟清俱为才吏有名天宝闲
始尹河南【旧书作长史按是时已改为尹】韩朝
宗裴回尝委以讯覆检句处事平允剖断精当羣僚莫能望也干元中历陆浑整屋咸阳
高陵四县令美政流行长老纪焉郭子仪军出其县敕
麾下曰蒋沆贤令供亿当有素得蔬饭足矣毋挠其清也迁长安令以刑部郎中兼侍御
史领渭桥运出纳使元载持政守道士类不迁沆以故
滞郎位不得调常袞代相闻士议恨沆屈擢御史中丞东都副留守再迁大理卿持法明
审号称职德宗出奉天沆奔行在为贼所拘欲诱署伪
职沆绝食不应命窜伏里中不复见京师平乃出擢右散骑常侍卒年七十四赠工部尚
书

蒋清

清举明经中第调巩丞东京留守李愷贤之表为判官与愷同死安禄山乱赠礼部
侍郎敬宗时录其孙郾为伊阙令初清蒙难以秩卑不
及谥大和初吏部郎中王高言之朝追谥曰忠

钦定续通志卷二百十九

●钦定续通志卷二百二十 列传二十

列传

唐【二十】

○唐二十

唐临【皎绍】

张文瓘【文琮锡】

徐有功

唐临

张文瓘

徐有功

△唐临

唐临字本德京兆长安人周内史瑾之孙其先自北海内徙武德初隐太子讨王世充临以策进说太子引直典书坊授右卫率府铠曹参军太子废出为万泉丞有轻囚久系方春农事兴临说今可且出囚使就畎亩不许临曰若有所疑临请执其罪令移疾临悉纵归与之约囚如期还再迁侍御史大夫韦挺责着位不肃明日挺越次与江夏王道宗语临进曰王乱班道宗曰与大夫语何至尔临曰大夫亦乱班挺失色众皆悚伏俄持节按狱交州出冤系三千人累迁大理卿高宗尝录囚临占对无不尽帝喜曰为国之要在用法刻则人残宽则失有罪惟是折中以称朕意他日复讯余司断者辄纷诉不已独临所讯无一言帝问故荅曰唐卿断囚不冤所以绝帝意叹曰为狱者不当若是邪永徽元年拜御史大夫萧龄之尝任广州都督受赇当死诏羣臣议请论如法诏戮于朝堂临建言羣臣不知天子所以议之之意在律有八王族戮于隐议亲也刑不上大夫议贵也今龄之贪赃狼戾死有余咎陛下以异于他囚故议之有司又令入死非尧舜所以用刑者不可为后世法帝然之龄之齐高帝五世孙由是免死临累迁吏部尚书初来济谪台州李义府谪普州临奏许祎为江南巡察使张伦剑南巡察使祎与济善而伦与义府有隙武后常右义府察知之谓临遗所私督其过坐免官起为湖州刺史卒年六十临俭薄寡欲不治第宅性宽简专务掩人过见妻子必正衣冠

唐皎

唐绍

唐皎

兄皎武德初为秦王府记室从王征讨掌书檄贞观中官吏部侍郎先是选集四时补拟不为限皎请以冬初集尽季春止后遂为法 【按唐会要武德初因隋旧制以十一月起选至春即停至贞观二年刘林甫为吏部侍郎以选限既促多不究悉遂奏四时选随到注拟当时以为便贞观十九年十一月马周为吏部尚书以四时持衡略无暇休遂奏请取所由文解卜月一日赴省三月三十日铨毕按韦述唐书云贞观八年唐皎为吏部侍郎以时渐太平选人稍众请以冬初一时大集季春而毕至今行用之诸史又云是马周未知孰是两存焉据此则唐代史官已有二说故会要兼存之以示传疑今新旧唐书并用韦述之说以为皎事而新书选举志又以为周事盖由欧宋分撰各据所闻取舍不同致有此差互耳】 终益州长史赠太常卿子之奇给事中坐章怀太子属徙边后除括苍

令与徐敬业起兵诛临孙绍

唐绍

绍神龙时为太常博士迁左台侍御史度支员外郎常兼博士韦庶人请妃公主命妇以上葬给鼓吹诏可绍言鼓吹本军容黄帝战涿鹿以为警卫故曲有灵夔吼鸱鸢争石坠崖壮士怒之类惟功臣备礼得兼用之男子有四方功所以加宠郊祀虽重不设军乐奈何令钲鼓之音得接于闾阃哉且在令五品官昏葬无给鼓吹者唯京官五品得假四品用鼓吹为仪今五品官不得给五品官母妻得给便是班秩未因夫子仪饰乃复过之事非伦次难为定制请置前诏用旧典 【按新书载此疏删削太甚不成文理旧书全载本文而脱去十余字辞意断续不可寻究今用音乐志参补】 不省中宗始郊国子祭酒祝钦明等欲谄韦后即奏以皇后亚献安乐公主终献又四时及列帝诞日遣使者诣陵如事生绍以为非礼引正谊固争又以武氏昊陵顺陵置守户五百与昭陵数同三思及子崇训墓守户多于亲王五倍韦氏褒德庙卫兵多于太庙上疏请量裁减又言比羣臣务厚葬眩耀相矜下逮众庶流宕成俗愿按令切敕裁损凡明器不许列衢路惟陈墓所昏家盛设障车拥道为戏乐损费动万计伤化紊礼不可示天下事虽不从议者美叹睿宗即位言政损益再迁给事中兼太常少卿先天二年玄宗讲武骊山绍以典仪坐失军容当斩帝怒甚执纛下左右犹冀少贷金吾将军李邕遽传诏斩之时深咎邕帝亦悔俄诏罢邕官殡死于家

△张文瓘

张文瓘字稚圭贝州武城人大业末徙家魏州之昌乐幼孤事母兄以孝友闻贞观初第明经补并州参军时李绩为长史尝叹曰稚圭今之管萧吾所不及绩入朝文瓘与属僚二人皆饯绩赠二人以佩刀玉带而不及文瓘文瓘以疑请绩曰子无为嫌若某犹豫少决故赠以刀欲其果于断某放诞少检故赠以带俾其守约束若子才无施不可焉用赠因极推引再迁水部员外郎时兄文琮为户部侍郎于制兄弟不并台阁出为云阳令累授东西台舍人参知政事总章二年迁东台侍郎同东西台三品 【按新书本传作干封二年考本纪及宰相表皆云干封二年文瓘以东台舍人参知政事总章二年以东台侍郎同东西台三品本传云干封乃总章之误今改正之】 遂与绩同为宰相俄知左史事时高宗造蓬莱上阳合璧等宫复征讨四夷京师养厩马万匹帑廩寢虚文瓘谏曰王者养民逸则富以康劳则怨以叛秦汉广事四夷造宫室至二世土崩武市末年户口减半夫制治于未乱保邦于未危隋监未远不可不察帝善

其言赐缯锦百段为减厩马数千改黄门侍郎兼太子右庶子又兼大理卿不旬日断疑狱四百抵罪者无怨言尝有小疾囚相与斋祷愿亟视事时以执法平恕方戴胄后拜侍中兼太子宾客诸囚闻其迁皆垂泣其得人心如此性严正未尝回容诸司奏议悉心糺驳故帝委之或时移疾他宰相奏事帝必问与文瓘议未若不者曰往其筹之或曰已议即皆报可新罗叛帝将出兵讨之时文瓘病卧家自力请见曰吐蕃盗边兵屯境未解新罗复叛议者欲出师二虏俱事臣恐人不堪弊请息兵修德以怀异俗诏可初同列以堂馔丰余欲少损文瓘曰此天子所以重枢务待贤才也吾等若不任职当自引避不宜节减以自取名众乃止卒年七十三赠幽州都督谥曰懿以尝事孝敬皇帝诏陪葬恭陵四子潜为魏州刺史沛同州刺史治卫尉卿涉殿中监父子皆至三品时谓万石张家韦温诛涉为乱兵所杀

张文琮

张锡

张文琮

文琮好自写书笔不释手子弟谏止曰吾好此不为倦贞观中为治书侍御史迁亳州刺史永徽初献文皇帝颂优制褒美拜户部侍郎坐房遗爱从母弟出为建州刺史州尚淫祀不立社稷文琮下教建坛壝民悦从之卒于官

张锡

子锡久视初为凤阁侍郎同凤阁鸾台平章事代其甥李峤为宰相请还庐陵王不为张易之所右与郑杲俱知选坐泄禁中语又赋谢巨

万下狱武后将斩之既而流循州神龙中累迁工部尚书兼修国史东都留守韦后临朝诏同中书门下三品未几出为绛州刺史 【按新书

云旬日出绛州吴缜纠缪曰据睿宗纪张锡以景云元年六月壬午同三品至七月壬戌贬绛州刺史乃四十日非旬日也今据改】 累封平原

郡公卒文琮从父弟文收终太子率更令善音律着新乐书十余篇

△徐有功

徐有功名弘敏避孝敬皇帝讳以字行国子博士文远孙也举明经累补蒲州司法参军袭封东莞县男为政仁不忍杖罚民服其恩更相

约曰犯徐参军杖者必斥之讫代不辱一人载初元年累迁司刑丞时酷吏周兴来俊臣邱神绩王弘义等构陷无辜皆抵极法朝野震恐莫敢

正言独有功数犯颜争枉直后厉语折御有功争益牢时博州刺史琅邪王冲责息钱于贵乡遣家奴督敛因遗书与尉颜余庆相闻会冲坐逆

诛魏州人告余庆豫冲谋后令俊臣鞠治以反状闻有司议余庆更永昌赦法当流侍御

史魏元忠谓余庆为冲督偿通书合谋明甚请诛死籍
其家诏可有功曰永昌赦令与虺贞同恶魁首已伏诛支党未发者原之书曰歼厥渠魁
律以造意为首寻赦文云已伏诛则魁首无遗余庆赦
后被言是谓支党今以支为首是以生入死赦而复罪不如勿赦生而复杀不如勿生窃
谓朝廷不当尔后怒曰何谓魁首答曰魁者大帅首者
元谋后曰余庆安得不为魁首答曰若魁首者虺贞是已既已伏诛余庆今方论罪非支
党何后意解乃曰公更思之遂免死当此时左右及卫
仗在廷阶者数百人皆缩项不敢息而有功气定言详巍然不挠有韩纪孝者受徐敬业
伪官前已物故推事使顾仲琰籍其家诏已报可有功
追议曰律谋反者斩身亡即无斩法无斩法则不得相缘所缘之人亡则所因之罪减诏
从之如此护宥者数十百姓累转秋官郎中凤阁侍郎
任知古冬官尚书裴行本等七人被诬当死后谓宰相曰古人以杀止杀我今以恩止杀
就羣公句知古等赐以再生可乎俊臣张知默固请如
法后不许俊臣独引行本更验前罪有功奏曰俊臣违陛下再生之赐不可以示信于是
悉免死道州刺史李仁褒兄弟为人诬构有功争不能
得秋官侍郎周兴劾之曰汉法附下罔上者斩面欺者亦斩在古析言破律者杀有功故
出反囚罪当诛请按之后不许犹坐免官俄起为左肃
政台侍御史天下闻有功复进皆欣然相贺时有诏公坐流私坐徒以上会赦免踰百日
不首者复论有功奏曰陛下宽殊死罪已发者原之是
通改过之心自新之路故律告赦前事以其罪坐之若无告言所犯终不自发如告言赦
前事则与律乖今赦前之罪不自言者还以法论恩虽
布天下而一罪不能贷臣窃为陛下不取后更诏五品以上议可又上疏论天官秋官及
朝堂三司理匭使愆失言今选曹诿嘱公行器谤满路
狱吏行酷法妄劾断事表生情法外构理虽朝堂进表列匭内牒叫阍弗听叩歧弗闻使
申其冤正增其枉诚令天官铨注有所不平法司推断
舞法深诋三司理匭受所上章拥塞不白者皆许臣按验劾发夺禄贬劳不越月踰时可
致刑措后纳之窦孝湛妻庞为其奴怖以妖崇教为夜
解因告以厌诅给事中薛季昶鞫之庞当死子希城讼冤有功明其枉季昶劾有功党恶
逆当弃市有功方视事令史泣以告有功曰岂独吾死
而诸人长不死邪安步去后召诘曰公比断狱多失出何邪对曰失出臣小过好生陛下
大德后默然庞得减死有功免为民起拜右司郎中
司刑少卿与皇甫文备同按狱诬有功纵逆党久之文备坐事下狱有功出之或曰彼尝
陷君于死今生之何也对曰不可以私害公尝谓大理
人命所系若阿旨诡辞以求苟免天下何望故持平守正执志不渝凡三坐大辟将死秦

然不忧赦之亦不喜后以此重之所全浩甚众酷吏由是少衰改司仆少卿卒年六十八赠司刑卿中宗即位加赠越州都督【旧书作越州刺史唐会要亦作都督】遣使就第吊祭赐物百段授一子官开元初窦希瑊等请以己官让有功于愉以报旧德由是自大理司直迁恭陵令会昌中追谥忠正或称有功仁恕过汉于张起居舍人卢若虚曰徐公当雷霆之震而能全仁恕虽千载未见其比五世孙商别有传
钦定续通志卷二百二十

●钦定续通志卷二百二十一 列传二十一

列传

唐【二十一】

○唐二十一

崔义玄【神基 神庆琳】杨再思【季昭】 苏味道李峤 崔融

徐彦伯李迥秀 韦巨源 窦怀贞【

统】宗楚客【纪处讷】祝钦明【郭山恠】萧至忠卢藏用 赵彦昭【和逢尧】

崔义玄

杨再思

苏味道

李峤

崔融

徐彦伯

李迥秀

韦巨源

窦怀贞

宗楚客

祝钦明

萧至忠

卢藏用

赵彦昭

△崔义玄

崔义玄贝州武城人隋乱往见李密密不用河内贼黄君汉为密守柏崖义玄见羣鼠度河稍刃有华文曰此王敦亡兆也因说君汉以城归乃拜君汉怀州刺史行军总管以义玄为司马王世充将高毗寇河内义玄击走之多

下屯堡君汉以所掠子女金帛分之拒不受以功封清
邱县公太宗讨世充数用其谋东都平转隰州都督府长史贞观初历左司郎中兼韩王
府长史与王友孟神庆俱以介直任永徽中累迁婺州
刺史时睦州女子陈硕真举兵反破睦州攻歙残之分遣其党围婺州义玄发兵拒之时
百姓讹言硕真尝升天能役使鬼物犯其兵马者辄灭
宗众皆汹惧司功参军崔玄籍曰仗顺起兵犹无成此乃妖人势不持久义玄乃署玄籍
先锋而自统众继之至下淮戍禽其谍数十人有星坠
贼营义玄曰贼必亡诘朝奋击左右有以盾障者义玄曰刺史而有避邪谁肯死敕去之
由是众为用斩首数百级降其众万余贼平拜御史大
夫义玄有章句学先儒疑谬或音故不通者辄采诸家条分节解能是正之高宗诏与博
士讨论五经正义武氏为皇后义玄赞帝决又以后旨
按长孙无忌等诛之终蒲州刺史年七十一赠幽州都督谥曰贞后持政赠扬州大都督
赐其家实封户二百子神基神庆

崔神基

崔神庆

崔琳

崔神基

神基袭爵长寿中为司宾卿同凤阁鸾台平台事为酷吏所构流岭南中宗初稍用
为大理卿卒

崔神庆

神庆举明经武后时累迁莱州刺史入朝待制亿岁殿奏事称旨后以历官有佳政
且其父子已有功擢拜并州长史谓曰并州朕乡里宿
兵多前长史皆尚书为之今授卿宜知所以委重者乃亲为按行图择日而遣之神庆始
至有诏改钱币法州县布下俄而物价踊昂百姓惊扰
神庆质其非于朝果豪猾妄为之后喜下制褒美初州隔汾为东西二城神庆跨水联堞
合而一之岁省防御兵数千神基既下狱驰赴都告变
得召见后出具狱示之神庆为申理得减死然用是贬歙州司马长安中累转礼部侍郎
数上疏陈时政转太子右庶子封魏县子是时突厥使
者入见皇太子合预朝参有司移文东宫召太子神庆谏曰五品以上佩龟者盖防征召
之诈内出龟以合之况太子乎古者召太子用玉契此
诚重慎防萌之意不可不察凡虑事于未萌之前故长无悔吝之咎今太子与陛下异宫
非朝朔望而别唤者请降墨敕玉契诏可寻诏与詹事
祝钦明更日侍读东宫历司刑司礼二卿神庆尝受诏推张昌宗狱颇阔略神龙初昌宗
伏诛坐流钦州卒五王得罪缘昌宗被流者皆诏原雪

赠神庆幽州都督

崔琳

神庆子琳明政事开元中与高仲舒同为中书舍人侍中宋璟亲礼之每所访逮尝曰古事问仲舒今事问琳尚何疑累迁太子少保天宝二年卒秘书监琳长子俨谏议大夫其羣从数十人自兴宁里谒大明宫冠盖驺呵相望每岁时家宴以一榻置笏犹重积其上琳与弟太子詹事珪光禄卿瑶俱列荣戟世号三戟崔家开元天宝闲中外宗属无缙麻丧初玄宗每命相皆先书其名一日书琳等名覆以金瓿会太子入帝谓曰此宰相名若自意之谁乎即中且赐酒太子曰非崔琳卢从愿乎帝曰然赐太子酒时两人有宰相望帝欲相之数矣以族大恐附丽者众卒不用

△杨再思

杨再思郑州原武人第明经调玄武尉累迁天官员外郎历左右肃政台御史大夫【新书作御史中丞按本纪及宰相表皆云延载元年八月己巳以左肃政台御史大夫杨再思为鸾台侍郎同凤阁鸾台平章事与旧书本传合今从之】延载初擢鸾台侍郎同凤阁鸾台平章事寻转凤阁侍郎封郑县侯迁内史居宰相十余年阿匡取容无所荐达人主所不喜毁之所善誉之畏慎足恭未尝忤物或曰公位尊何自屈折答曰世路孔艰直者先祸不尔岂全吾躯于时水沴闭坊门以襁再思入朝有车陷于泞叱牛不前恚曰痴宰相不能和阴阳而闭坊门遣我艰于行再思遣吏谓曰汝牛自弱不得独责宰相张昌宗坐事司刑少卿桓彦范劾免其官昌宗诉诸朝武后意申释之问宰相昌宗于国有功乎再思曰昌宗独陛下治丹饵服之有效此实莫大之功后悦昌宗还官自是天下贵彦范而贱再思左补阙戴令言作两脚狐赋以讥之再思怒谪令言为长社令士愈蚩噪易之兄司礼少卿同休请公卿宴其寺酒酣戏曰公面似高丽再思欣然翦縠缀申上反披紫袍为高丽舞萦头舒手举动合节满坐鄙笑昌宗以姿貌幸再思每曰人言六郎似莲华非也正谓莲华似六郎耳其巧谀无耻类如此俄检校右庶子中宗立拜户部尚书同中书门下三品京师留守封弘农郡公加兼扬州长史检校中书令改侍中郑国公赐实封户三百为顺天皇后奉册使武三思诬陷王同皎再思与李峤韦巨源按狱希意抵同皎死众以为冤复拜中书令监修国史迁尚书右仆射仍同三品卒赠特进并州大都督陪葬干陵谥曰恭

杨季昭

杨季昭

弟季昭中茂才第为殿中侍御史武后诛驸马都尉薛绍绍兄顓为齐州刺史命季昭按之不得反状后怒放于沙州赦还为怀州司马

△苏味道

苏味道赵州栾城人九岁能属辞与里人李峤俱以文翰显时号苏李逮冠州举进士中第累调咸阳尉吏部侍郎裴行俭才之会征突厥引管书记裴居道为左金吾卫将军倩味道作章揽笔而具闲彻清密当时盛传延载中以凤阁舍人检校侍郎同凤阁鸾台平章事岁余为真坐事出为集州刺史俄召拜天官侍郎圣历初复以凤阁侍郎同平章事长安元年与张锡俱坐法系司刑狱锡虽下吏气象自如味道独席地饭蔬为危惴可怜者武后闻之放锡岭南释味道 【案味道与张锡系狱事旧书不载新书本传以为证圣元年贬集州刺史时事以本纪及宰相表二人历官始末考之知本传误也吴缜纠谬曰当证圣之初张锡犹未为相味道贬集州自有所坐耳与张锡同下狱自是再入相之后久视长安之闲锡虽流窜味道获免未尝被责也论甚允协今依通鉴载在长安元年】奉使幽平等州按察兵马二年进同凤阁鸾台三品更葬其亲有诏州县治丧事因庸役过程又侵毁乡人墓田为萧至忠所劾贬坊州刺史迁益州大都督府长史张易之败坐党附贬眉州刺史复还益州长史未就道卒年五十八赠冀州刺史味道练台阁故事善占奏然其为相特具位未尝有所发明脂韦自营而已常谓人曰决事不欲明白误则有悔模棱持两端可也故世号苏模棱手性友爱其弟太子洗马味元尝请托不遂因慢折之味道怡然不以为忤有文集行于世

△李峤

李峤字巨山赵州赞皇人早孤事母孝为儿时梦人遗双笔自是有文辞十五通五经薛元超称之二十擢进士第始调安定尉举制策甲科迁长安时畿尉名文章者骆宾王刘光业峤最少与等夷授监察御史高宗击邕岩二州叛獠诏峤监军事入洞喻降之由是罢兵稍迁给事中会来俊臣构狄仁杰李嗣真裴宣礼等狱将抵死敕峤与大理少卿张德裕侍御史刘宪覆验德裕等内知其冤不敢异峤曰知其枉不申是谓见义不为者卒与二人列其枉忤武后后出为润州司马久乃召为凤阁舍人文册大号令多诏为之初置右御史台察州县吏善恶风俗得失峤上疏曰禁网上疏法象宜简简则法易行而不烦杂疏则所罗广而不苛碎伏见垂拱时诸道巡察使科条四十有四到别敕令又三十余条而使以三月出都十一月奏事时限迫促簿书填委奔逐不暇而每道所察吏多者二

千少亦千计欲令品核褒贬曲尽行能不亦难哉臣愿
量其功程与以节制使器周于用力济于时然后得失可以精核矣又言今所察按准汉
六条推而广之则无不包矣无为多张事目空费簿书
且朝廷凡事常在四方故冠盖相望邮驿继踵今巡使已出使凡外州之事悉得专之则
传驿大减矣请率十州置一御史以替岁为之限容其
身到属县过闾里督察奸讹采访风俗然后可课其成功且御史出入天禁其于励己自
修奉职存宪比他吏相百也按劾回庸纠擿隐欺比他
吏相十也陛下诚用臣言妙择贤能委之心膺莫不尽力效死矣武后善之下制析天下
为二十道择堪使者为议者所沮竟不行俄知天官侍
郎事进麟台少监同凤阁鸾台平章事迁鸾台侍郎会张锡辅政峤其出也罢为成均祭
酒俄检校文昌左丞留守东都长安三年以本官复为
平章事知纳言迁内史峤辞烦剧复为成均祭酒平章事如故武后将建大像于白司马
坂峤谏造像虽俾浮屠输钱然非州县承办不能济是
名虽不税而实税之臣计天下编户贫弱者众有卖舍帖田供王役者今造像钱积十七
万缗若颁之穷人家给千钱则纾十七万户饥寒之苦
德无穷矣不纳张易之败坐附会贬豫州刺史未行改通州数月以吏部侍郎召俄迁尚
书神龙二年代韦安石为中书令峤在吏部时阴欲籍
时望复宰相乃奏置员外官数千既见官僚猥众府库虚耗乃上书引咎辞职并陈利害
十余事略曰元首之尊居有重门击柝之卫出有清警
戒道之禁所以备非常息异望也陛下厌崇邃轻尊严微服潜游闾廛过市行路私议朝
廷惊惧如祸产意外纵不自惜奈宗庙苍生何又分职
建官不可以滥自帝室中兴以不慎爵赏为惠冒级躐阶朝升夕改正阙不给加以员外
内则府库为殫外则黎庶蒙害非求贤助治之道也请
敕有司料其可用者进不可用者退又远方夷人不堪治事国家向务抚纳而官之非立
功酋长类糜俸禄愿商度非要者一切放还又易称何
以守位曰人何以聚人曰财今百姓乏窶不安居处不可以守位仓储荡耗财力倾殫不
足以聚人山东病水潦江左困输转国匱于上人穷于
下如令边场少疏盗贼辈起何财召募何众闲遏乎又崇作寺观功费浩广今山东岁饥
糟糠不厌而投难隄之会收庸调之半用吁嗟之物以
荣土木恐怨结三灵谤蒙四海又比缘征戍巧诈百出破役隐身规脱租赋今道人私度
者几数十万其中高户多丁黠商大贾跪作台符麤名
伪度且国计军防并仰丁口今丁皆出家兵悉入道征行租赋何以备之又重赂贵近补
府若史移没籍产以州县甲等改为下户当道城镇至
无捉驿者役逮小弱即破其家愿许十道使访察括举使奸猾不得容隐又太常乐户已

多复求访散乐独持鼗鼓者已二万员愿量留之余勒
还籍以杜妄费中宗以其身宰相乃自陈失政勾罢官无所嫁非手诏诘让峤惶恐复视
事【旧书中宗以峤昌言时政之失自请罢免手
制慰谕而不允与此异】三年加修文馆大学士封赵国公以特进同中书门下三品睿
宗立罢政事下除怀州刺史致仕初中宗崩峤尝密请
相王诸子不宜留京师及玄宗嗣位获其表宫中或请诛之张说曰峤诚懵逆顺然为当
时谋吠非其主不可追罪天子亦顾数更赦遂免贬滁
州别驾听随子虔州刺史畅之官改庐州别驾卒年七十峤富才思有所属缀人多传讽
武后时汜水获瑞石峤为御史上皇符一篇为世讥薄
然其仕前与王勃杨炯接中与崔融苏味道齐名晚诸人没而为文章宿老一时学者取
法焉

△崔融

崔融字安成齐州全节人擢八科高第累补宫门丞崇文馆学士中宗为太子时选
侍读典东朝章疏武后宰嵩岳见融铭启母碣叹美之
及已封即命铭朝覲碑授著作佐郎迁右史进凤阁舍人时有司议关市行人尽征之融
上疏谓周官九赋其七曰关市以市多淫巧而关通末
游欲止抑之故加税耳然唯敛工商而不及往来今一切通取则事不师古且四人异业
旧矣复动而摇之市者兼受善恶也若甚则细人无所
容细人无所容久必为乱天下之关必险道市必要津豪宗恶少在焉闻一旦变法或致
骚动恐南走蛮北走狄今江津河汴列铺纳税检复稽
留加以主司僦赂触途淹久失时废业人不聊生魏晋齐隋亦所不行况陛下乎后纳之
除司礼少卿仍知制诰张易之兄弟颇延文学士融与
李峤苏味道麟台少监王绍宗降节佞附易之诛贬袁州刺史召授国子司业与修武后
实录劳封清河县子融为文华婉当时未有辈者朝廷
大笔多手敕委之其洛出宝图颂尤工撰武后哀册最高丽绝笔而死时谓思苦神竭云
年五十四赠卫州刺史谥曰文膳部员外郎杜审言为
融所奖引为服纁麻六子其闻者禹锡翹禹锡开元中中书舍人翹礼部尚书孙巨右补
阙亦有文曾孙从自有传

△徐彦伯

徐彦伯兖州瑕丘人名洪以字显七岁能为文结庐太行山下薛元超安抚河北表
其贤对策高第调永寿尉蒲州司兵参军时司户韦曷
善判司士李亘工书而彦伯属辞时称河东三绝迁职方员外郎奉迎中宗房州进给事
中武后撰三教珠英取文辞士皆天下选而彦伯李峤
居首迁宗正卿出为齐州刺史帝复位改太常少卿以修武后实录劳封高平县子为卫

州刺史政有善状玺书嘉劳移蒲州以近畿会郊祭上南郊赋一篇辞致典缛擢修文馆学士工部侍郎历太子宾客以病乞骸骨许之开元二年卒彦伯事寡嫂谨抚诸侄同己子秉笔累朝后来翕然慕效晚为文稍强涩然当时不及也始武后时大狱兴王公卿士以语言为酷吏所引死徙不可计彦伯着枢机论谓否泰荣辱一系于言言以济身亦以覆身无常阶乱不密致危不可不慎以为世戒云

△李迥秀

李迥秀字茂之大亮族孙也及进士第又中英才杰出科调相州参军事累转考功员外郎武后爱其材迁凤阁舍人大定初检校夏官侍郎领选铨汰文武号称职进同凤阁鸾台平章事张易之兄弟贵骄因挠意谐媚士论顿减俄坐赃贬庐州刺史易之诛贬衡州长史中宗即位召授将作少监累迁鸿胪卿修文馆学士出朔方道行军大总管还拜兵部尚书卒年五十赠侍中迥秀少聪悟多通宾客喜饮酒虽多不乱当时称其风流母少贱妻尝詈媵婢母闻不乐迥秀即出其妻或问之答曰娶妇要欲事姑苟违颜色何可留武后尝遣内人候其母或迎置宫后所居堂产芝草犬乳邻猫中宗以为孝感旌大门闾子齐损开元中以谋逆诛

△韦巨源

韦巨源与安石同系后周京兆尹总曾孙祖贞伯【旧书作匡伯】袭郟国公入隋改舒国巨源有吏干武后时累迁夏官侍郎同凤阁鸾台平章事其治委碎无大体句校省中遗隐下符敛克虽收其利然为下所怨苦坐李昭德累贬麟州刺史寻拜地官尚书神龙初以吏部尚书同中书门下三品时要官缺执政以次用其亲巨源秉笔当除十人杨再思得其一试问余授皆诸宰相近属再思喟然曰吾等诚负天下巨源曰时当尔耳是时虽贤有德终莫得进士大夫莫不解体会安石为中书令避亲罢政事寻迁侍中舒国公韦后与叙昆弟附属籍三思封户在贝州属大水刺史宋璟议免其租巨源以为蚕桑可输繇是河朔人多流徙者景龙二年韦后自言衣笥有五色云巨源倡其伪劝中宗宣布天下帝从其言因是大赦巨源见帝昏惑乃与宗楚客郑愔赵延禧等推处祥妖阴导韦氏行武后故事俄迁尚书左仆射仍知政事帝方南郊巨源请后为亚献而自为终献及临淄王平诸韦为乱兵所杀年八十睿宗立赠特进荆州大都督博士李处直请谥为昭户部员外郎李邕以巨源附武三思为相托韦后亲属谥昭为非处直执不改邕列陈其恶不见用然世皆直邕韦氏自安石及武后时宰相待价巨源皆近亲其族至大官者又数十人

△窦怀贞

窦怀贞字从一左相德元子少诡激兄弟宗族舆马奢侈怀贞独羸俭致名誉仕累清河令有治状后迁越州都督扬州长史神龙中进左御史大夫兼检校雍州长史韦后干预朝政避后父之讳以字称会岁除中宗夜宴近臣谓曰闻卿丧妻今欲继室可乎怀贞唯唯俄而禁中宝扇鄣卫有衣翟衣出者已乃后乳媪王所谓莒国夫人者故蛮婢也怀贞纳之不辞世谓媪婿为阿■〈父上者下〉怀贞每谒见奏请辄自署皇后阿■〈父上者下〉而人或谓为国■〈父上者下〉轩然不惭以自媚于后又附宗楚客安乐公主等以取贵位为素议所斥名称尽矣韦后败斩妻献其首贬濠州司马再徙益州长史乃复故名景云初以殿中监召阅月迁左御史大夫同中书门下平章事对中山县公再迁侍中方太平公主用事怀贞倾已附离日视事退辄诣主第刺取所欲睿宗为金仙玉真二公主营观费巨万谏者交疏不止唯怀贞劝成之躬护役作族弟维縻谏曰公位上衮当思献可替否辅天子而计较瓦木杂厕工匠闲使海内何所瞻仰乎不答督缮益急时语曰前作后国■〈父上者下〉后为主邑丞言事公主如邑官属也俄罢为左御史大夫踰年复同中书门下三品兼太子詹事监修国史又以尚书右仆射兼御史大夫军国重事宜共平章玄宗受内禅进左仆射封魏国公与太平公主谋逆既败投水死追戮其尸改姓毒氏然生平所得俸禄悉散亲族无留畜败时家惟粗米数石而已性谄诈善谐结权贵宦者用事尤所畏奉或见无须者误为之礼监察御史魏传弓嫉中人辅信义欲劾奏其奸怀贞曰是安乐所信任者柰何绳之传弓曰王纲坏矣正坐此属今日杀之明日诛无所悔怀贞犹固止之传弓者巨鹿人忠谏士也终司农丞

窦兢

窦兢

怀贞从子兢字思慎举明经为英王府参军尚乘直长调鄆令修邮舍道路设冠婚丧纪法百姓德之

△宗楚客

宗楚客字叔敖其先南阳人曾祖丕后梁南弘农太守梁亡入隋居河东之汾阴故为蒲州人父岌仕魏王泰府与谢偃等撰括地志楚客武后从姊子及进士第累迁户部侍郎兄秦客垂拱中劝武后革命进为内史而弟晋卿典羽林兵后兄弟并坐奸赃流岭外岁余秦客死而楚客等还俄检校夏官侍郎同凤阁鸾台平章事与武懿宗不协会赐将作材营第僭侈过度为懿宗所劾自文昌左丞贬播州司马晋卿流峯州

稍为豫州长史迁少府少监岐陕二州刺史久之复以夏官侍郎同凤阁鸾台平章事坐聘邵王妓贬原州都督神龙初为太仆卿郢国公武三思引为兵部尚书以晋卿为将作大匠节愍太子被杀以其首祭三思等枢楚客请之也俄同中书门下三品韦后安乐公主亲赖之与纪处讷为党世号宗纪景龙二年诏突厥娑葛为金河郡王而其部阙啜忠节赂楚客等罢之娑葛怨将兵患边监察御史崔琬廷奏楚客处讷专威福有无君心纳境外交为国取怨晋卿专徇赃私骄恣跋扈并请收付狱三司推鞠故事大臣为御史对仗弹劾必趋出立朝堂待罪楚客乃厉色大言性忠鲠为琬诬诋中宗不能穷也诏琬与楚客处讷约兄弟两解之故世谓帝为和事天子寻迁中书令韦氏败与晋卿同诛楚客性明达武后时降突厥沓实力吐敦者部落在平夏会边书至言吐敦反楚客为兵部员外郎后召问方略对曰吐敦者臣昔与之言其为人忠义和厚且国家与有恩必不反其兄之子默子者焚悼与吐敦不和今言叛疑默子为之然无能为俄而夏州表默子劫部落北奔为州兵及吐敦所擒后张仁愿请筑三城议者或不同独楚客言万世利也然冒于权利干进不止尝密语其党曰始吾在卑位尤爱宰相及居之又思天子南面一日足矣虽外附韦氏而内畜逆谋故卒以败晋卿虽不学然性倜傥垂拱后武后任之宫苑闲厩内外众作无不总开中岳造明堂铸九鼎有力焉

纪处讷

纪处讷

纪处讷者秦州上邽人其妻武三思妇之姊纵使通三思繇是款昵进为太府卿神龙元年夏大旱谷价腾踊中宗召问所以救人者三思知之阴讽太史迦叶志忠奏是夜摄提入太微近帝座此天子与大臣接有纳忠之符帝信之下诏褒美赐处讷衣一副采六十段与楚客并同三品进侍中后伏诛

△祝钦明

祝钦明字文思京兆始平人父緄字叔良少通经颇著书质诸家疑异门人张后胤既显宦荐于朝诏对策高第终无极尉钦明擢明经为东台典议永淳天授闲又中英才杰出业奥六经等科拜著作郎为太子率更令中宗在东宫钦明兼侍读授太子经兼弘文馆中士中宗复位擢国子祭酒同中书门下三品进礼部尚书封鲁国公食实封户三百桓彦范崔玄暉表恕己敬暉等皆从受周官大义朝廷尊之以匿亲忌日为御史中丞萧至忠所劾贬申州刺史入为国子祭酒景龙三年天子将郊钦明与国子

司业郭山恇阴迎韦后意谬立议曰周官天神曰祝地祇曰祭宗庙曰享太宗伯曰凡大祭祀王后不预则摄而荐豆筮彻追师掌后首服以待祭祀内司服掌后六服祭祀则供又九嫔凡大祭祀后裸献则赞瑶爵然则后当助天子祀天神祭地祇明矣郑玄称阙狄后助王祭羣小祀之服小祀尚助况天地哉阙狄之上犹有两服一祔衣二褕狄若是而阙狄既助祭小祀知褕狄助祭中祀祔衣助祭大祀郑举一隅故不委说且周礼正文凡大祭祀不专言宗庙故云凡也世妇职但云诏后之礼事亦不专言宗庙又春秋外传云禘郊天子亲射其牛王后亲舂其粢祭统曰祭也者必夫妇视之所以备内外之官哀公问孔子曰冕而亲迎不己重乎答曰合二姓之好以继先圣之后以为天地宗庙社稷主君何谓己重焉则知后宜助祭臣请因经谊制仪典帝颇以为疑召礼官质问于是太常博士唐绍蒋钦绪对钦明所引皆宗庙礼非祭天地者周隋而上无皇后助祭事帝令宰相参订绍钦绪又引博士彭景直共议曰周官所云祀祭享皆互言典瑞两圭有邸以祀地则地亦称祀司几筮设祀先王之胙席则宗庙亦称祀内宗掌宗庙祭祀此又非独天称祀地称祭也传曰圣人为能飨帝春秋祭祀以时思之皆互言也据此则钦明所执天曰祀地曰祭庙曰享未得为定明矣又周礼凡言大祭祀者祭天地宗庙之总名不独天地为大祭也郁人大祭祀与量人受举斝之卒爵尸与斝皆宗庙之事九嫔职大祭祀后裸献则赞瑶爵祭天无裸亦无瑶爵此乃宗庙称大祭祀之明文钦明所执大祭祀即为祭天地未得为定明矣钦明据大宗伯之职以谓后有祭天地之礼按经凡祀大神祭大祇享大鬼若王不与祭祀则摄位此已上一凡兼言王祭天地宗庙之事下文云凡大祭祀王后不与则摄而荐豆筮彻此一凡直是后祭宗庙之事为嫌后有祭天地之疑故重起后凡以别之耳此足本经科断明白且内宗外宗所掌皆佐王后庙荐无佐祭天地语有如助祭天地谁当赞佐者是则摄荐为宗庙明甚内司服掌后祭服无祭天服三礼义宗云后不助祭天地五岳故无其服又言后有五辂以重翟从祭先王先公以厌翟从飨诸侯以安车朝夕见王以翟车采桑以鞶车游宴按此若无祭天车明甚历代史籍郊天祭地代有其礼并不见皇后助祭之事请稽古志遵旧典时左仆射韦巨源更傅钦明议帝果用其言以皇后为亚献取大臣李峤等女为斋娘奉豆筮礼成诏斋娘有夫者悉进官初后属婚上食禁中帝与羣臣宴钦明自言能八风舞帝许之钦明体肥丑据地摇头睨自左右顾眄帝大笑吏部侍郎卢藏用叹曰是举五经扫地矣景云初侍御史倪若水劾奏钦明山恇等腐儒无行以谄佞乱常改

作使曲台之礼圜丘之制百世所传一朝墮放今圣德
中兴不宜使小人在朝请斥远之以肃周行乃贬钦明饶州刺史山恠括州刺史钦明于
五经为该淹自见坐不孝免无以澡祓乃阿附韦氏图
再用又坐是见逐诸儒共羞之后徙洪州都督入为崇文馆学士卒

郭山恠

郭山恠

郭山恠者河东人善治礼景龙中累迁国子司业帝昵宴近臣及修文学士诏徧为
伎工部尚书张锡为澹容娘舞将作大匠宗晋卿为浑
脱舞左卫将军张洽为黄麀舞给事中李行言歌驾车西河曲余臣各有所陈皆鄙黷而
山恠奏无所习惟知诵诗乃诵鹿鸣蟋蟀二篇未毕中
书令李峤以其近规讽止之帝嘉其直下诏褒答赐服一称其后与钦明僻论阿世不能
终其守久之复拜国子司业

△萧至忠

萧至忠沂州丞人曾祖德言为秘书少监【按新书云祖德言非也据宰相世系表
至忠为德言曾孙旧书亦并作曾孙】至忠少与友
期诸路会雨雪人引避至忠曰盍有与人期可以失信卒友至乃去众叹服仕为伊阙洛
阳尉迁监察御史劾奏凤阁侍郎苏味道赃贪超拜吏
部员外郎至忠长击断誉闻当时中宗神龙初为御史中丞始至忠为御史而李承嘉为
大夫尝让诸御史曰弹事有不咨大夫可乎众不敢对
至忠独曰故事台无长官御史天子耳目也其所请奏当专达若大夫许而后论即劾大
夫者又谁白哉承嘉惭至是承嘉为户部尚书至忠劾
祝钦明窦希玠与承嘉等罪百寮震悚迁吏部侍郎犹兼中丞节愍太子以兵诛武三思
而败宗楚客等讽侍御史冉祖雍上变言相王与太子
谋帝欲按之至忠泣曰往者天后欲以相王为太子而王不食累日独请迎陛下其让德
天下莫不闻陛下贵为天子不能容一弟受人罗织邪
窃为陛下不取帝纳其言止寻授中书侍郎同中书门下平章事上疏陈时政曰求治之
道首于用贤苟非其才则官旷官旷则事废事废则人
残历代所以陵迟者此也今授职用人多因贵要为粉饰上下相蒙苟得是竞夫官爵公
器也恩幸私惠也金帛富之梁肉食之以存私泽可也
若公器而私用之则公义不行而劳人解体私谒开而正言塞日朘月削卒见雕弊今列
位已广冗员复倍台阁之内朱紫充满官秩益轻恩赏
弥数才者不用用者不才又宰相要官子弟并罕才艺而更相谗托列试荣班臣愿陛下
爱惜爵赏官无虚授进大雅于枢近退小人于闲左使
政令惟一私不害公则天下幸甚且贞观故事宰相子弟多居外职非直抑强宗亦以择

贤才尔请自宰相己下及诸司长官子弟并授外官共
窳百姓表里相统帝不纳俄为侍中中书令时楚客怀奸植党而韦巨源杨再思李峤务
自安无所弼正至忠介其闲独不诡随时望翕然归重
帝亦曰宰相中至忠最怜我韦后尝为其弟洵与至忠殇文冥婚至忠又以女妻后舅崔
从礼子无诤两家合礼帝主萧后主崔时谓天子嫁女
皇后娶妇唐隆元年以后党应坐而太平公主为言出为晋州刺史治有名默啜遣大臣
来朝见至忠风采逡巡畏俯谓人曰是宜相天子何乃
居外乎太平寢用事至忠乃自附纳且勾还主以至忠子任千牛死韦氏难意其怨望能
助己即请于帝拜刑部尚书复为中书令封鄴国公乃
参主谋逆先天二年主败至忠遁入南山数日捕诛之籍其家至忠始在朝有风望容止
闲敏见推为名臣外方直纠擿不法而内无守观时轻
重而去就之始为御史桓彦范等颇引重五王失政更因武三思得中丞附安乐公主为
宰相及韦氏败遽发韦洵垄持其女枢归后依太平复
当国尝出主第遇宋璟璟戏曰非所望于萧傅至忠曰善乎宋生之言然不能自返也娣
嫁蒋钦绪钦绪每戒之至忠不听叹曰九世卿族一举
而灭之可哀也已不喜接宾客以简俭自高故生平奉赐无所遗施及籍没珍宝不可计
然玄宗贤其为人后得源干曜亟用之谓高力士曰若
知吾进干曜遽乎吾以其貌言似萧至忠力士曰彼不尝负陛下乎帝曰至忠诚国器但
晚谬尔弟元嘉工部侍郎广微工部员外郎

△卢藏用

卢藏用字子潜幽州范阳人父璪魏州长史号才吏藏用能属文举进士不得调与
兄征明偕隐终南少室二山学练气辟谷术长安中诏
授左拾遗武后作兴泰宫于万安山上疏谏曰陛下离宫别观固多矣又穷人力以事土
木臣恐议者以陛下为不爱人而奉己也且顷岁谷虽
颇登而百姓未有储蓄陛下东巡西幸乞靡休息斤斧之役岁月不空不因此时施德布
化而又广宫苑臣恐下未易堪今左右近臣以谀意为
忠犯忤为患至令陛下不知百姓失业百姓亦不知左右伤陛下之仁也忠臣不避诛震
以纳君于仁明主不恶切诋以趋名于后乞下臣此章
与执事者共议可否不从姚元崇持节灵武道奏为管记还应县令举甲科为济阳令神
龙中累擢中书舍人数纠驳伪官历吏部黄门侍郎修
文馆学士坐亲累降工部侍郎进尚书右丞附太平公主主诛玄宗欲捕斩藏用顾未执
政意解乃流新州或告谋反推无状流驩州会交趾叛
藏用有捍御劳改昭州司户参军迁黔州长史判都督事卒于始兴藏用善蓄龟九宫术
工草隶大小篆八分善琴奕士贵其多能尝以俗徇阴

阳多拘畏乖至理乃为折滞论以畅其方世谓知言少与陈子昂赵贞固友善二人前死
藏用抚其孤有恩人称能终始交始隐山中时有意当
世人目为随驾隐士晚乃徇权利务为骄纵素节尽矣司马承祜尝召至阙下将还山藏
用指终南曰此中大有佳处承祜徐曰以仆视之仕宦
之快捷方式耳藏用惭无子弟若虚多才博物陇西辛怡谏为职方有获异鼠者豹首虎
臆大如拳怡谏谓之鼯鼠而赋之若虚曰非也此许慎所谓
鼯鼠豹文而形小一坐惊服终起居郎集贤院学士

△赵彦昭

赵彦昭字奂然甘州张掖人父武孟少游猎以所获馈其母母泣曰汝不好书而敖
荡如是吾安望哉不为食武孟感激遂力学淹该书记
自长安丞为右台侍御史着河西人物志十篇彦昭少豪迈风骨秀爽及进士第调为南
部尉与郭元振薛稷萧至忠善自新丰丞为左台监察
御史景龙中累迁中书侍郎同中书门下平章事金城公主嫁吐蕃以彦昭为使彦昭顾
已处外恐权宠夺移不悦司农卿赵履温曰公宰相而
为一介使不亦鄙乎彦昭问计安出履温乃为请安乐公主留之遂以将军杨矩代睿宗
立出为宋州刺史坐累贬归州俄授凉州都督为政严
下皆股栗入为吏部侍郎持节按边迁御史大夫萧至忠等诛郭元振张说言彦昭与秘
谋改刑部尚书封耿国公实封百户彦昭本以权幸进
中宗时有巫赵挟鬼道出入禁掖彦昭以姑事之尝衣妇服乘车与妻偕谒其得宰相巫
力也于是殿中侍御史郭震劾暴旧恶会姚崇执政恶
其人贬江州别驾卒

和逢尧

和逢尧

和逢尧岐州岐山人武后时负鼎诣阙下上书自言愿助天子和饪百度有司让曰
昔桀不道伊尹负鼎于汤今天子圣明百司以和尚何
所调逢尧不能答流庄州十余年乃举进士高第累擢监察御史突厥默啜请尚公主逢
尧以御史中丞摄鸿胪卿报可默啜遣贵近颉利来曰
诏送金缕具鞍乃涂金非天子意使者不可信虽得公主犹非实请罢和亲欲驰去左右
色动逢尧厉声曰汉法重女壻而送鞍具欲安且久不
以金为贵可汗乃贪金而不贵信邪默啜闻曰汉使至吾国众矣斯食铁石人不可易因
备礼以见逢尧说之曰天子昔为单于都护思与可汗
通旧好可汗尚向风慕义袭冠带取重诸蕃默啜信之为敛发紫衣南面再拜称臣遣子
入朝逢尧以使有朗擢户部侍郎坐善太平公主斥朗
州司马终柘州刺史逢尧诙诡当大事敢微福故卒以附丽废然唐兴奉使者称逢尧

钦定续通志卷二百二十一

●钦定续通志卷二百二十二 列传二十二

列传

唐 【二十二】

○唐二十二

郝处俊【象贤】 狄仁杰【光嗣兼蕃】 朱敬则【仁轨】

郝处俊 【郝象贤】

狄仁杰

朱敬则

△郝处俊 【郝象贤】

郝处俊安州安陆人父相贵与妇翁许绍据峡州归国拜滁州刺史封甑山县公处俊十岁而孤故吏归千缣赙之让不受及长好学嗜汉书略能暗诵贞观中第进士解褐著作佐郎袭父爵兄弟友睦事诸舅谨甚再转滕王友耻为王府属弃官去久之召拜太子司议郎累迁吏部侍郎高丽叛诏李绩为涇江道大总管处俊副之师入虜境未阵贼遽至举军危骇处俊方据胡床餐干糒不顾密料简精锐击却之众壮其胆略入拜东台侍郎时浮屠卢伽逸多治丹曰可以续年高宗欲遂饵之处俊谏曰修短有命异方之剂安得轻服昔先帝诏浮屠那罗迺婆寐案其方书为秘剂取灵藿怪石历岁乃能就先帝饵之大渐上医不知所为议者请申显戮又恐取笑夷狄法遂不行前鉴不远惟陛下深察帝纳其言进同东西台三品咸亨初幸东都皇太子监国诸宰相皆留而处俊独从帝尝曰我尝疑秦法为宽荆轲匹夫耳七首窃发羣臣荷戟莫敢拒岂非习慢使然处俊对曰此乃法急耳秦法辄升殿者夷三族人皆惧族安敢拒曹操着令曰京城有变九卿各守其府后严才乱与徒数十人攻左掖门操登铜爵台望之无敢救者时王修为奉常闻变召车骑未至领官属步至宫门操曰彼来者必王修乎此由修察变识机故冒法赴难向若拘常则遂成祸矣故王者设法不可急亦不可慢帝曰善转中书侍郎监修国史初显庆中令狐德棻刘胤之撰国史其后许敬宗复加叙次帝恨敬宗所纪失实更命宰相刊正且曰朕昔从幸未央宫辟仗既过有横刀伏草中者先帝敛辔却谓朕曰事发当死者数十人汝可命出之史臣惟叙此为实处俊曰先帝仁恩溥博类非一臣之弟处杰被择供奉时有三卫误拂御衣者惧甚先帝曰左右无御史我不汝罪帝曰此史臣应载处俊乃表左史李仁实欲删整伪辞会仁实死而止上元初帝观酺翔鸾阁时赤县与太常音技分东西册帝诏雍王贤主东周

王显主西因以角胜处俊曰礼所以示童子无诳者恐其欺诈之心生也二王春秋少意操未定乃分朋造党使相夸竞彼佻儿优子言辞无度争胜负相讥诮非所以导仁义示雍和也帝遽止叹曰处俊远识非众臣所逮迁中书令兼太子宾客检校兵部尚书帝多疾欲令武后摄知国事处俊谏曰天子治阳道后治阴德帝之与后犹日之与月阳之与阴各有所主不相夺也天下者高祖太宗之天下非陛下之天下正应谨守宗庙传之子孙不宜持国与人中书侍郎李义琰曰处俊言可从惟圣虑无疑则苍生幸甚事遂阻又兼太子左庶子拜侍中罢为太子少保开耀元年卒年七十五赠开府仪同三司荆州大都督帝哀叹其忠举哀光顺门祭以少牢赙绢布八百段米粟八百石诏百官赴哭官庀葬事子北叟固辞未听裴炎为白帝曰处俊陆死倭臣曰生无益于国死无烦费凡诏赐愿一罢之帝闻恻然答其意止赙物而已处俊资约素土木形骸然临事敢言自秉政在帝前议论谆谆必傅经义凡所规献得大臣体武后虽忌之以其操履无玷不能害与舅许圜师同里俱宦达乡人田氏彭氏以高赀显故江淮闲为语曰贵如郝许富如田彭 【新书郝处俊传在狄仁杰后按处俊相高宗仁杰相武后相去二十余年新书叙次失伦今易之】 孙象贤垂拱中为太子通事舍人后素衔处俊故因事诛之临刑极骂乃死后怒令离磔其尸斲夷祖父棺冢自是将刑人必先以木丸窒口讫于则天之世

△狄仁杰

狄仁杰字怀英并州太原人祖孝绪贞观中尚书左丞父知逊夔州长史仁杰儿时门人有被害者县吏就诘众皆按对仁杰诵书不置吏让之答曰黄卷中方与圣贤对何暇偶俗吏语耶举明经调汴州参军为吏诬诉黜陟使阎立本召讯异其才谢曰仲尼称观过知仁君可谓沧海遗珠矣荐授并州法曹参军亲在河阳仁杰登太行山反顾见白云孤飞谓左右曰吾亲舍其下瞻怅久之云移乃去同府参军郑崇质母老且疾当使绝域仁杰谓曰君可贻亲万里忧乎诣长史蔺仁基请代行仁基咨美其谊时方与司马李孝廉不平相语曰吾等可少愧矣则相待如初每曰狄公之贤北斗以南一人而已稍迁大理丞岁中断滞狱万七千人无冤诉者左威卫大将军权善才右监门中郎将范怀义坐误斧昭陵柏罪当免 【旧书止权善才一人今从新书及通鉴】 高宗诏诛之仁杰奏不应死帝怒曰是使我为不孝子耶仁杰曰汉有盗高庙玉环文帝欲致之族张释之廷诤曰假令取长陵一抔土法何以加于是罪止弃市陛下作法县之象魏固有差等犯不至死而致之死万姓何所

措其手足伐一柏杀二臣千载之后谓陛下为何如主帝意解遂免死数日授侍御史左
司郎中王本立怙宠自肆仁杰劾奏其恶有诏原之仁
杰曰朝廷惜乏贤如本立者不少陛下惜有罪亏成法曲赦本立臣愿先斥为羣臣戒本
立竟抵罪繇是朝廷肃然使岐州亡卒数百剽行人道
不通官捕击盗党穷讯而余曹纷纷不能制仁杰曰是其计穷且为患乃明开首原格出
系者稟而纵之使相晓皆自缚归帝叹其达权宜迁度
支郎中帝幸汾阳宫为知顿使并州长史李冲玄以道出妬女祠俗言盛服过者致风雷
之变更发卒数万别开驰道仁杰曰天子之行风伯清
尘雨师洒道何妬女避邪止其役帝壮之曰真丈夫哉出为宁州刺史抚和戎落得其欢
心郡人勒碑以颂入拜冬官侍郎持节江南巡抚使吴
楚俗多淫祠仁杰一禁止凡毁千七百所止留夏禹吴太伯季札伍员四祠而已转文昌
右丞出豫州刺史时越王兵败支党余二千人论死仁
杰释其械密疏曰臣欲有所陈似为逆人申理不言且累陛下钦恤意表成复毁自不能
定然此皆非本恶伏望哀其诘误有诏悉谪戍边囚出
宁州父老迎劳曰狄使君活汝邪相与哭碑下囚斋三日乃去至流所亦为立碑初宰相
张光辅讨越王军中恃功多暴索仁杰拒之光辅怒曰
州将轻元帅邪仁杰曰乱河南者一越王贞耳公董士三十万以平乱纵使暴横使无辜
之人咸坠涂炭是一越王死万越王生也且王师之至
民归顺以万计自縊而下四面成蹊柰何纵邀赏之人杀降以为功冤声腾沸所不忍闻
如得上方斩马剑加君颈虽死不恨光辅不能诘还奏
仁杰不逊左授复州刺史徙洛州司马天授二年以地官侍郎同凤阁鸾台平章事武后
谓曰卿在汝南有善政然有谮卿者欲知之乎谢曰陛
下以为过臣当改之以为无过臣之幸也谮者乃不愿如后叹其长者时太学生乞假后
亦报可仁杰曰人君惟生杀柄不以假人至簿书期会
宜责有司尚书省决事左右丞不句杖左右丞相不判徒况天子乎学徒取告丞簿事耳
若天子为之发敕天下事几敕可尽乎为定令示之而
已后纳其言会为来俊臣所构捕送制狱于时讯反者一问即承听减死俊臣引仁杰置
对答曰有周革命我乃唐臣反因实俊臣乃少宽之判
官王德寿以情谓曰我意求少迁公为我引杨执柔为党公且免死仁杰叹曰皇天后土
使仁杰为此乎即以首触柱血流沫面德寿惧而谢守
者寢弛即丐笔裂衾帛书冤置褚衣中好谓吏曰方暑请付家彻絮仁杰子光远得书上
变后览之以问俊臣对曰仁杰下狱未褫巾带寝处甚
安苟无事实安肯承反后遣使案视俊臣命仁杰巾带见使者为作谢死表附使以闻后
乃召见仁杰谓曰承反何耶对曰不承反死答掠矣示

其表曰无之后知表诈因免死 【谨按通鉴辑览 御批仁杰不承则死于拷掠之对明是贪生论者以为留其身以复唐祚然终仁杰之世唐祚何尝复哉虽云善善欲长未免阿其所好】 武承嗣屡请诛之后曰命已行不可返时同被诬者凤阁侍郎任知古等七族悉得贷御史霍献可以首叩殿陛苦争欲必杀仁杰等乃贬仁杰彭泽令邑人为置生祠万岁通天中契丹陷冀州河北震动擢仁杰为魏州刺史前刺史惧贼至驱民保城修守具仁杰至悉放归农田曰贼在远何自疲民万一虜来吾自办之何预若辈虜闻亦引去民爱仰之复为立祠俄转幽州都督赐紫袍龟带后自制金字十二于袍以旌其忠召拜鸾台侍郎复同凤阁鸾台平章事时发兵戍疏勒四镇百姓怨苦仁杰谏曰天生四夷皆在先王封域之外东距沧海西隔流沙北横大漠南阻五岭天所以限中外也自典籍所纪声教所暨三代不能至者国家既已兼之乃复用武荒外邀功绝域竭府库之实以争硤确不毛之地得其人不足以增赋获其土不可以耕织苟求远抚长驾之名不务固本安人之术此秦皇汉武之所行非五帝三王之事业也今国家师旅岁出所费浸广右戍四镇左屯安东调发日加百姓虚弊且关东饥馑蜀汉流亡江淮而南赋敛不息人不复本则相率为盗本根一摇忧患非浅昔汉元帝纳贾捐之之谋而罢珠崖宣帝用魏相之策而弃车师田贞观中克平九姓册拜李思摩为可汗使统诸部夷狄叛则伐降则抚得推亡固存之义无远戍劳人之役此近日之令典经边之故事也今阿史那斛瑟罗皆阴山贵种代雄沙漠若委之四镇以统诸蕃建为可汗遣御寇患则国家有继绝之美无转输之苦省军费于远方并甲兵于要塞敕边吏谨守备待其自至然后击之以逸待劳则战士力倍以主御客则我得其便坚壁清野则寇无所得自知深入有颠蹶之虑浅入无虜获之益如此数年二虜不讨而服矣又请废安东复高姓为君长省江南转饷以息民不见纳武承嗣三思营求为太子后意未决仁杰尝从容奏曰文皇帝栉风沐雨亲冒锋镝以定天下传之子孙先帝以二子托陛下今乃欲移之他族无乃非天意乎且姑侄之与母子孰亲陛下立子则千秋万岁后配食太庙承继无穷立侄则未闻侄为天子而祔姑于庙者也它日后谓曰朕梦大鸚鵡两翼皆折何也对曰武者陛下之姓两翼二子也陛下起二子则两翼振矣后由是无立承嗣三思意仁杰每宴见言及庐陵王辄以母子恩情委曲开譬后虽忤忍不能无感卒召还 【按新书本传后欲以三思为太子以问宰相众莫敢对仁杰曰臣观天人未厌唐德比匈奴犯边使三思募兵踰月不及千人庐陵王代之不浹日辄五万今欲继统

非庐陵王莫可后怒罢议久之召谓曰朕数梦双陆不胜何也仁杰与王方庆同辞对曰双陆不胜无子也天其意者以儆陛下乎此二事并出李邕所撰狄梁公传通鉴考异以其辞鄙诞决非邕所为又谓庐陵王为河北元帅在立为太子后且当是时睿宗为皇嗣若仁杰请以庐陵王继统则是劝太后废立也既皇嗣见在宫中亦不得言无子也考异此辨甚分明可据又旧书本传云中宗自房陵还宫后匿之帐中召仁杰以庐陵为言仁杰慷慨敷奏言发涕流后遽出中宗见之曰还卿储君仁杰降阶泣贺已而奏曰太子还宫人无知者物议安审是非后以为然乃复置中宗于龙门具礼迎归人情感悦新书所载略同云后感仁杰言即日遣徐彦伯迎庐陵王于房州既至匿之帐中乃召见仁杰云云按此事亦出狄梁公传均未可信然旧书谓密召庐陵而仁杰不知犹之可也令彦伯以六品郎官衔命奉使事经旬月而为宰相者曾漫无闻见有是理乎新书兼采实录及狄梁公传并为一事而不悟其抵牾今皆削之而存其近是者】

寻拜纳言兼右肃政御史大夫突厥入赵定杀掠甚众诏仁杰为河北道行军元帅假以便宜突厥尽杀所得男女万计由五回道去仁杰追不能逮更拜河北安抚大使 【按以上皆圣历元年事宰相表丁酉戊戌两年重复列之大误】 时民多胁从于贼贼已去惧诛逃匿仁杰上疏言山东比缘军兴调发烦重伤破家产又官吏侵渔州县科役督趣鞭笞情危事迫不循礼义有利则归且图賂死此君子所愧而小人之常民犹水也壅则为渊疏则为川通塞随流岂有常性今负罪之伍潜窜山泽赦之则出不赦则狂山东羣盗缘兹聚结臣以为边鄙暂警不足为忧中土不宁此为大事罪之则众情恐惧恕之则反侧自安伏愿曲赦河北诸州一无所问诏可还除内史后幸三阳宫王公皆从独赐仁杰第一区眷礼卓异时无辈者是时李楷固骆务整讨契丹克之献俘含枢殿后大悦二人者本契丹李尽忠部将尽忠入寇楷固等数挫王师后降有司请论如法仁杰称其骁勇可任若贷死必感恩效节又请授以官爵委之专政至是凯旋后举酒属仁杰赏其知人授楷固左玉钤卫将军燕国公赐姓武务整右武威卫将军后将造浮屠大像度费数百万官不能足更诏天下僧日施一钱助之仁杰言今之伽监制过宫阙穷奢极壮工不使鬼不免役人物不天降终须地出不损百姓且将何求今边垂永宁宜宽征镇之徭省不急之务就令雇作以济穷人既失农时是为弃本且无官助理不得成既费官财又竭人力一方有难何以救之后由是罢役久视元年九月卒 【新书作圣历三年五月即改元久视而仁杰之卒在九月不得称圣历三年也今改正】 年七

十一赠文昌右相谥曰文惠仁杰所荐进若张柬之桓彦范敬晖姚崇等皆为中兴名臣始居母丧有白鹤驯扰之祥中宗即位追赠司空睿宗

又封梁国公【谨按通鉴辑览 御批武氏之罪实浮于吕氏盖武氏革命而吕氏未革命也为当世之臣者不能为徐敬业之讨贼则惟

有弃冠服而逃耳如狄仁杰一再相彼尽心乃事而后世反以复唐之功归之是皆托于明哲保身宽柔以教之论而未终读夫子至死不变之

语是非倒置莫甚于此余故表而正之】子光嗣景晖

狄光嗣

狄兼謩

狄光嗣

光嗣圣历初为司府丞武后诏宰相各举尚书郎一人仁杰荐光嗣由是拜地官员外郎以称职闻后曰祁奚内举果得人历淄许贝三州

刺史母丧夺为太府少卿固让睿宗嘉其诚许之累迁扬州长史以罪贬歙州别驾卒景晖官魏州司功参军贪暴民苦之因共毁其父生祠不

复奉至元和中田弘正镇魏博始奏葺之血食不绝族孙兼谟

狄兼謩

兼謩字汝谐及进士第辟襄阳府使刚正有祖风令狐楚执政荐授左拾遗数上书言事历刑部郎中蕲邓郑三州刺史岁旱饥发粟赈济

民人不流徙改苏州以治最擢给事中左藏史盗度支缣帛文宗以经赦诏勿治兼谟封还诏书帝谕之曰嘉卿举职然朕已赦其长官吏亦宜

宥顾此后事有不可勿以还诏为惮迁御史中丞帝曰御史台朝廷纲纪二台正则朝廷治朝廷正则天下治畏忌顾望则职业废矣卿梁公后

当嗣家声兼谟顿首谢江西观察使吴士矩加给其军擅用上供钱数十万兼谟劾奏观察使为陛下守土宣国诏条知临戎赏士州有定数而

与夺由己贻弊一方为诸道缺望请付有司治罪士矩繇是贬蔡州别驾兼谟历兵部侍郎河东节度使还为尚书左丞武宗时为益王傅俄领

天平节度使辞疾以秘书监归洛阳迁东都留守卒

△朱敬则

朱敬则字少连亳州永城人以孝义世被旌显一门六阙相望敬则志尚恢博好学重节义然诺善与人交振其急难不责报于人与左史

江融左仆射魏元忠善咸亨中高宗闻其名召见异之将加擢用为李敬玄所毁故授洹水尉累除右补阙初武后称制天下颇多异议遂开告

密罗织之路兴大狱诛将相大臣至是已革命事渐寔敬则谏曰臣闻李斯之相秦也行申商之法重刑名之家杜私门张公室弃无用之费损

不急之官惜日爱功亟战疾耕既庶而富遂屠诸侯此救弊之术也故曰刻薄可施于进趋变诈可陈于攻战天下已平故可易之以宽简润之
以淳和秦乃不然淫虐滋甚往而不反卒至土崩此不知变之祸也陆贾叔孙通事汉祖当荥阳成皋闲粮饷穷智勇困未尝敢开一说效一奇
惟进豪猾贪暴之人及区宇适定乃陈诗书说礼乐开王道高帝忿然曰吾以马上得之安事诗书对曰马上得之可马上治之乎帝默然于是
贾着新语通定礼仪此知变之善也向若高帝斥二子置诗书重攻战尊首级则复道争功拔剑击柱晷漏不保何十二帝二百年乎故曰祠祝
毕刍狗捐淳精流糟粕弃国家自文明以来天地草昧内则流言外则构难不设钩距无以顺人不切刑罚无以息暴于是置神器开告端故能
不出房闱而天下晏然臣闻急趋者无善迹促柱者无和声拯溺不规行疗饥不鼎食向时之秘策乃当今之刍狗也愿鉴秦汉之失考时事之
宜下宽大之令流旷荡之泽去萋斐之角牙顿奸险之芒刃塞罗织之妄源埽朋党之险迹旷然使天下更始岂不乐哉后善其言迁正谏大夫
兼修国史乃请高史官选以求名才侍中韦安石尝阅其史稟叹曰董狐何以加时赋敛繁重民多荡析后数召入禁中访得失进同凤阁鸾台
平章事张易之构魏元忠张说欲诛之无敢言者敬则独奏曰元忠说秉心忠一而所坐无名杀之失天下望乃得不死以老疾还政事俄改成
均祭酒冬官侍郎易之等集名儒譔三教珠英又绘武三思李峤苏味道李迥秀王绍宗等十八人像以为图欲引敬则固辞不与世洁其为人
出为郑州刺史遂致仕待御史冉祖雍诬奏与王同皎善贬涪州刺史既明非其罪改庐州代还无淮南一物所乘止一马子曹步从以归卒年
七十五敬则与三从昆弟居四十年货产无异及执政每以用人为先细务不省也岭表蛮叛以裴怀古有文武才用为桂州都督蛮服其威惠
相率降荐魏知古为凤阁舍人张思敬为右史皆称职初二张权宠盛敬则密谓敬晖曰公若假太子令举北军诛易之兄弟两飞骑力耳晖卒
用其策始崔寔仲长统王郎曹冏论封建指秦为失敬则以为秦汉世礼义陵迟不可复用周制封诸侯着论明之儒者以为知言睿宗嗣位尝
曰神龙以来忠于本朝者李多祚王同皎韦月将燕钦融并褒复矣尚有遗者耶刘幽求曰朱敬则忠正义烈天下所推往为宗楚客冉祖雍等
所诬谪守刺史长安中尝语臣曰相王必受命当悉心事之及韦氏千纪臣遂见危赴难虽天诱其衷亦敬则启之于是追赠秘书监谥曰元

朱仁轨

朱仁轨

敬则兄仁轨字德容隐居养亲尝诲子弟曰终身让路不枉百步终身让畔不失一段有赤乌白鹊栖所居树按察使赵承恩表其异及卒

郭山恠员半千魏知古共谥为孝友先生

钦定续通志卷二百二十二

●钦定续通志卷二百二十三 列传二十三

列传

唐 【二十三】

○唐二十三

王方庆【甫遂】 韦思谦【承庆 嗣立 恒济 宏景】陆元方【象先
景倩 景融希声 余庆 璪】 王及善李日知

杜景俭 李怀远【景伯彭年】豆卢钦望【史务滋 崔元综周允元】

王方庆

韦思谦

陆元方

王及善

李日知

杜景俭

李怀远

豆卢钦望

△王方庆

王綝字方庆以字显其先自丹阳徙雍咸阳父宏直为汉王元昌友王好畋游上书切谏王稍止然益疏斥终荆王友 【按宰相世系表

宏直字长宗魏州刺史谥曰孝与此不同】 方庆起家越王府参军受司马迁班固二史于记室任希古希古他迁就卒其业武后时累迁广州

都督南海岁有昆仑舶市外区琛琲前都督路元叟冒取其货舶酋不胜忿杀之方庆至秋毫无所索始部中首领多贪纵民有诣府诉者府官

以先受首领参饷未尝治方庆约官属不得与交通犯者痛论以法境内清畏议者谓有唐以来治广未有如方庆者号第一下诏赐瑞锦杂彩

以着善政转洛州长史封石泉县子迁鸾台侍郎同凤阁鸾台平章事进凤阁侍郎神功初清边道大总管武攸宜破契丹凯还且献俘内史王

及善以孝明帝忌月请鼓吹备而不作方庆曰晋穆帝纳后当康帝忌月时以为疑荀讷谓礼有忌日无忌月自月而推则忌时忌年愈无理据

世用其言臣谓军方大凯作乐无嫌诏可武后幸玉泉祠以山道险欲御腰輿方庆奏昔汉元帝御楼船张猛进谏今山阿危峭隘道曲狭比于

楼船危乃更甚陛下柰何轻践畏涂哉后为罢行方庆尝以令晷及大功丧未葬不听朝贺未除弗豫享宴比羣臣不遵用颓紊教谊不可长有诏申责内外畏之后尝就求羲之书方庆奏十世从祖羲之书四十余纸太宗求之先臣悉上进今所存惟一轴并上十一世祖导十世祖洽九世祖珣八世祖昱首七世祖僧绰六世祖仲宝五世祖騫高祖规曾祖褒并九世从祖献之等凡二十八人书共十篇后御武成殿徧示羣臣诏中书舍人崔融序其代阙号宝章集复以赐方庆士人歆其宠以老乞身改麟台监修国史中宗复为皇太子拜方庆检校左庶子后欲季冬讲武有司不时办遂用明年孟春方庆曰按月令孟冬天子命将帅讲武习射御角力此乃三时务农一时讲武安不忘危之道孟春不可以称兵兵金也金胜木方春木王而举金以害盛德逆生气孟春行冬令则水潦为败雪霜大摯首种不入今孟春讲武以阴政犯阳气害发生之德臣恐水潦败物霜雪损稼夏麦不登愿陛下不违时令前及孟冬以顺天道手制褒允是岁真拜左庶子进封公奉入同职事三品兼侍太子读书方庆奏人臣于天子未有斥太子名者晋山涛启事称皇太子而不名孝敬为太子更弘为崇沛王为太子更贤为文今东宫门殿名多触犯请一改之以协旧典制可初方庆为相时子为眉州司士参军后曰君在相位何子之远对曰庐陵是陛下爱子今尚在远臣何敢近人以比仓唐之悟魏文侯焉长安二年卒赠兖州都督谥曰贞中宗复位以东宫旧臣赠吏部尚书方庆博学练朝章著书二百余篇尤精三礼学者有所咨质酬复渊诣故门人次为礼杂答问【艺文志王方庆礼杂问答十卷本传作杂礼非】家聚书多不减秘府图画皆异本方庆歿后诸子不能业随皆散亡孙甫六世孙珣珣曾孙抃皆别传

王甫

王遂

王甫

甫字灵龟明经调莫州参军辟范阳节度使张守珪幕府时契丹屈烈部将谋入寇河北骚然甫至虏中胁说祸福虏乃不入天宝末拜博陵常山二太守副河北招讨卒赠太常卿自褒至甫六世封石泉云甫孙遂

王遂

遂好兴利操下以严累迁邓州刺史太府卿西北供军使与度支潘孟阳争营田事宪宗怒出遂为柳州刺史会用兵淮西亟财赋藉遂强干拜宣歙观察使淮蔡平师东讨李师道召为光禄卿淄青行营粮料使辞卿职换检校左散骑常侍兼御史大夫始调兵食岁三百万俄而贼

诛遂簿羨贲百万以献帝高其能于时析齐为三镇即拜遂沂兖海观察使遂资褊刻杖扑皆踰制盛夏治署舍墙垣程督惨峭将吏素悍戾遂辄骂曰反残贼人人羞忿裨校王弁与役人浴于川语曰天方雨墙且毁等罪耳乃谋乱明日遂万燕集弁率其党挟兵进遂惊匿厕下执而数其罪杀之其副张敦实官属李矩甫皆死弁自知留事帝以沂海新定畏青郛亦摇乃拜弁开州刺史至徐州械送京师斩东市监军上遂所制杖出示于朝为戒云

△韦思谦

韦思谦名仁约以近武后父讳为嫌遂以字行郑州阳武人八岁丧母以孝闻及进士第累调应城令负殿不得进官吏部尚书高季辅曰自居选部始得此一人岂以小疵弃大德耶擢监察御史常曰御史出都不能动摇山岳震慑州县诚旷职耳中书令褚遂良市地不如直思谦劾之罢为同州刺史及复相出思谦清水令或吊之答曰吾狷直之性触机辄发暇恤身乎丈夫当敢言地要须明目张胆以报天子焉能碌碌保妻子耶沛王府长史皇甫公义引为仓曹参军谓曰公非池中物屈公为数旬客以重吾府改侍御史高宗贤之每召与语虽甚倦徙倚轩槛犹数刻罢疑狱剧事多与参裁武侯将军田仁会诬奏御史张仁祎帝廷诘仁祎懦不得对思谦历阶而进曰臣与仁祎连曹素知状因言仁会荧惑圣聪陷人不测词旨详畅帝善之仁祎得不坐累迁右司郎中尚书左丞振明纲辖朝廷肃然进御史大夫性蹇谔颜色庄重不可犯见王公未尝行拜礼或劝之答曰耳目官固当特立鷖鸢鸕鹚岂众禽之偶柰何设拜以狎之帝崩思谦扶疾入临俯伏号绝诏给扶持转司属卿复为右肃政大夫故事大夫与御史钧礼思谦独坐受拜或以为疑思谦曰班列固有差柰何尚姑息耶垂拱初封博昌县男同凤阁鸾台三品转纳言辞疾不许诏肩舆以朝听子孙侍以大中大夫致仕卒赠幽州都督子承庆嗣立

韦承庆

韦嗣立

韦恒

韦济

韦宏景

韦承庆

承庆字延休性谨畏事继母为笃孝擢进士第补雍王府参军府中文翰悉委之王为太子迁司议郎仪凤中诏太子监国太子稍嗜声色兴土功承庆见造作玩好浮广倡优鼓吹讙哗户奴小人皆得亲左右承颜色恐因是作

威福宜加绳察乃上疏极陈其端又进谏善箴太子颇
嘉纳太子废出为乌程令累迁凤阁舍人掌天官选属文敏无留思虽大诏令未尝着稟
忤大臣意出为沂州刺史明堂灾上疏谏以文明垂拱
后执政者未几岁率以罪去大抵皆恶逆不道夫构大厦济巨川必择文梓求舳舻若亟
毁而败则是用朽木乘胶船也臣谓陛下求贤之意切
而取人之路宽故一言有合而付大任夫以尧举舜犹历试诸难况庸庸者可超处辅相
以百揆万几轻畀小人哉书不报未几复为舍人掌选
病免改太子谕德历豫虢二州刺史有善政转天官侍郎修国史凡三掌选铨授平允议
者公之长安中拜凤阁侍郎同凤阁鸾台平章事张易
之诛承庆以素附离免冠待罪时议草赦令咸推承庆召使为之无挠色误辞援笔而就
众叹其壮然犹流岭表岁余拜辰州刺史未行以秘书
员外少监召兼修国史封扶阳县子诏撰武后纪圣文中宗善之迁黄门侍郎未拜卒帝
悼之召其弟相州刺史嗣立会葬因拜黄门侍郎继其
位赠礼部尚书谥曰温

韦嗣立

嗣立字延构与承庆异母少友悌母遇承庆严每笞辄解衣求代母不听即遣奴自
捶母感寤为均爱世比晋王览第进士累调双流令政
为二川最承庆解凤阁舍人武后召嗣立谓曰尔父往日尝称二子忠且孝堪事朕比兄
弟称职如而父言今使卿兄弟自相替代以为美谈即
拜凤阁舍人时学校荒废刑罚滥酷乃上书极陈永淳已来庠序隳散胄子衰缺轻儒学
之官弛章句之选贵阙后生以徼幸升寒族平流以替
业去垂拱后仕入弥多请托公行选补逾滥故使海内黔首骚然不安州县官寮贪鄙未
息陛下诚下明诏追三馆生徒敕王公以下子弟一入
大学崇饰馆庙尊尚师儒发扬观听海内向风然后审畀铨总妙择良能以之临人则官
无侵暴之政民有安乐之心矣又曰扬豫之后大狱屡
兴穷治连捕数年不绝大猾伺闲巧相影会构似是之言成不赦之罪恣行楚惨类自诬
服王公士人至连颈就戮道路藉藉咸知非辜而锻炼
已成不可翻动小则身诛大败族夷相缘共坐者庸可胜道彼皆报讎复嫌苟图功效求
官赏耳且如仁杰元忠俱罹枉陷勘鞫之际皆自诬严
向非陛下明赏则菹醢之戮已及其身今擢而升之并称良辅可知往之得罪者冤滥良
多矣臣愿陛下廓天地之量施雷雨之仁取垂拱以来
罪无重轻所不赦者普皆原洗死者还官生者丐命则天下了然知向所陷罪原非陛下
之意幽明欢欣感召和气太平之美亦何远哉长安中
拜凤阁侍郎同凤阁鸾台平章事时州县非其人后以为忧李峤唐休璟曰今朝廷重内

官轻外职每除牧守皆诉不行比所遣外任多是贬累
风俗不澄实由于此请选台阁贤者分典大州自近臣始后曰谁为朕行嗣立曰内典机
要非臣所堪请先行以示羣臣后悦以本官检校汴州
刺史由是左肃政大夫杨再思等十八人悉补外未几承庆知政事嗣立以成均祭酒徙
魏洛二州政无它异坐承庆左授饶州刺史 【按新
书云坐善二张贬饶州疑非是盖承庆坐附会二张嗣立则止缘亲累耳不然承庆流岭
表而嗣立裁得左迁何轻重相悬乃尔耶今从旧书】
繇相州刺史入为黄门侍郎转太府卿修文馆大学士中宗景龙中拜兵部尚书同中书
门下三品时崇饰观寺用度百出又恩幸食邑者众嗣
立建言今廩帑耗竭无一岁之储假遇水旱人须赈给征发时动士待资装陞下何以具
之伏见营立寺观累年不绝鸿侈繁丽务相矜胜大抵
费常千万以上转徙木石人牛不停费功害农怨嗟盈路即有水旱为灾戎狄构患虽龙
象如云何救万分之一又食封之家日月猥众昨略问
户部云用丁六十余万丁课二绢即是一百二十万已上臣见太府每岁庸调绢纒百万
少则七八十万比诸封家所入已寡国初功臣共定天
下食封者不过三二十家今横恩特赐至百四十家以上天下租赋大半私门私门有余
徒益奢侈公家不足坐致忧危制国之方岂谓为得又
封家征求各遣奴阜凌戾侵渔百姓怨叹裹头中物诛责纷纭曾无少息下民窶乏何以
堪命臣愿以丁课一送太府封家诣左藏请受禁止自
征以息重困臣闻古者取士必先乡曲之誉然后辟于州郡州郡有声然后辟于五府五
府着闻乃升诸朝得不谓所择悉而所历深乎今之取
人未试而遽迁进趋徼幸比肩系踵故文者治官则回邪赃污武者治军则庸懦怯弱补
授亡限员外置官数倍正缺吏困供承官竭资奉国家
大事岂甚于此刺史县令治人之首比年已来不加简择京官有犯及声称下者方遣牧
州吏部选人年高不善刀笔者乃拟县令以此理人何
望率化愿下有司精加汰择自今应除诸曹侍郎两省二台及五品以上清望官先于刺
史县令中选用所冀守宰称职以兴太平帝不听嗣立
与韦后属疏帝特诏附属籍顾待甚渥营别第骊山鹦鹉谷帝临幸命从官赋诗制序冠
篇赐贖优备因封嗣立逍遥公名所居曰清虚原幽栖
谷嗣立献木栝藤盘数十物唐隆初拜中书令韦后败几死于乱宁王为救免出为许州
刺史以定策立睿宗赐封百户徙汝州入为国子祭酒
太子宾客坐宗楚客等削遗制事不执正贬岳州别驾再徙为陈州刺史开元中河南道
巡察使表其廉欲复用会卒年六十六赠兵部尚书谥
曰孝初嗣立代承庆为凤阁舍人黄门侍郎承庆亦代为天官侍郎及知政事父子兄弟

并为宰相世罕其比二子恒济知名

韦恒

恒开元初为碭山令政宽惠吏民爱之天子东巡州县供张皆鞭扑趣辨恒不立威而事给姑子御史中丞宇文融荐恒有经济才让以其位擢殿中侍御史累转给事中为陇右河西黜陟使时河西节度使盖嘉运恃左右援横恣不法妄列功状恒劾奏之人代其恐出为陈留太守卒

韦济

济开元初调鄆城令或言吏部选县令非其人及谢官日引入殿廷问安人策一道试者二百余人惟济居第一不能对者四五十人悉免官于是擢济醴泉令侍郎卢从愿李朝隐并贬为刺史济四迁户部侍郎为太原尹着先德诗四章世服其典懿天宝中授尚书左丞凡三世居之济文雅颇能修饰政事所至有治称终冯翊太守子奥夏令亦以能政闻

韦宏景

嗣立孙宏景擢进士第数佐节度府以左补阙召为翰林学士苏光荣为泾原节度使宏景当草诏书辞不如旨罢学士累迁度支郎中出为绵州刺史李夷简镇淮南奏以自副召入再迁给事中驸马都尉刘士泾赂权近擢太仆卿宏景上诤诏书穆宗使喻其先人昌有功朕所以念功睦亲者宏景固执帝怒使宣慰安南由是有名【按此事宏景及刘士泾传两载之而一以为宪宗一以为穆宗未知孰是】时萧俛辅政宏景议论常佐佑之再迁吏部侍郎铨综平序贵幸惮其严不敢恩以私厯陕虢观察使召拜尚书左丞驳正吏铨所除六十余官不当进资于是郑綰丁公着杨嗣复皆夺俸郎吏肃然望风修整吏部员外郎杨虞卿以累下吏诏宏景与御史详谏虞卿私造门宏景厉言曰有诏按公尚私谒邪虞卿多朋助自谓必见纳及是惶恐去迁礼部尚书东都留守卒年六十六赠尚书左仆射宏景以直道进议论持正有守当时风教所倚赖为长庆名卿

△陆元方

陆元方字希仲苏州吴人陈给事中黄门侍郎琛之曾孙元方初明经后举八科皆中累转监察御史武后时使岭外方涉海风涛惊壮舟人惧元方曰吾受命不私神岂害我趣使济而风讫息使还除殿中侍御史擢凤阁舍人秋官侍郎为来俊臣所陷后置不罪迁鸾台侍郎同凤阁鸾台平章事坐附会李昭德贬绥州刺史擢天官侍郎兼司卫卿或言其荐引皆亲党后怒免官令白衣领职元方荐人如初后召让之对曰

举臣所知不暇问讎党又荐其友崔玄暉有宰相才后知无他复拜鸾台侍郎同凤阁鸾台平章事后尝问外事对曰臣备位宰相大事当白奏
民闲碎务不敢以闻忤旨下除太子右庶子进文昌左丞卒元方素清慎再执政每有迁除后必先访问外秘莫知临终取奏藁焚之曰吾阴德
在人后当有兴者又有一桺生平所緘钥者歿后家人发之乃前后诏敕赠越州都督诸子皆美才而象先景倩景融尤知名

陆象先

陆景倩

陆景融

陆希声

陆余庆

陆瓌

陆象先

象先器识沈邃举制科高第为扬州参军事时吉顼与元方同为吏部侍郎顼擢象先为洛阳尉元方不肯当顼曰为官择人岂以吏部子
废至公邪卒以授俄迁监察御史累授中书侍郎景云中进同中书门下平章事监修国史初太平公主谋引崔湜为宰相湜固让象先主不得已为言之遂并知政事然其性恬静寡欲议论高简为时推尚湜尝曰陆公加于人一等
公主既擅权宰相争附之象先未尝往谒及谋逆召宰相议曰盗王长不当废嫡立庶象先曰帝得立何也主曰帝有一时功今失德安可不废对曰立以功者废必以罪今不闻天子过失安得废主
怒更与窦怀贞等谋卒诛死时象先与萧至忠岑羲等坐为主所进将同诛玄宗遽召免之曰岁寒然后知松柏之后凋也以保护功封兗国公
赐封户二百初难作睿宗御承天楼羣臣稍集帝麾曰助朕者留不者去于是有投名自验者事平玄宗得所投名诏象先收按象先悉焚之帝大怒欲并加罪顿首谢曰赴君之难忠也陛下方以德化天下柰何杀行义之人故臣违命安反侧者其敢逃死帝寤善之时穷治至忠羲等党
与象先密为申救保全甚众当时无知者 【谨按通鉴辑览 御批象先于穷治私党时从中密赞外人岂能与闻既未自言则其申理之事何由得传于后纪载家阿其所好自相矛盾大率如是】 罢为益州大都督府长史剑南按察使为政尚仁恕司马韦抱真谏曰公当稍行扑罚以立威名不然民慢且无畏答曰政在治之而已何必树威卒不从而蜀自化累徙蒲州刺史兼河东按察使小吏有罪诚遣之录事白曰法宜杖象先曰人情大抵不相远彼岂不晓吾言若必行杖当以汝为始录事惭而退尝曰

天下本无事庸人扰之为烦耳第澄其源何忧不简邪
故所至民吏怀之入为太子詹事历户部尚书 【旧书作工部】 知吏部选事母丧免
起为扬州大都督府长史 【旧书作同州刺史】

迁太子少保卒年七十二赠尚书左丞相谥曰文贞始象先名景初睿宗改赐今名

陆景倩

弟景倩为扶沟丞河南按察使毕构覆州县殿最欲必得实有吏言状曰某强清某
诈清惟景倩曰真清终监察御史

陆景融

景融长七尺美姿质宽中而厚外博学工笔札以荫补千牛转新郑令政有风绩累
迁工部尚书东京留守卒赠广陵郡都督景融于象先

后母弟也象先被笞景融谏不入则自楚母为损威人多其友四世孙希声

陆希声

希声博学善属文通易春秋老子论著甚多商州刺史郑愚表为属后去隐义兴久
之召为右拾遗时儉腐秉权岁数歉梁宋尤甚希声见

州县剝敝上言当谨视盗贼明年王仙芝反株蔓数十州遂不制累擢歙州刺史昭宗闻
其名召为给事中拜户部侍郎同中书门下平章事在

位无所轻重以太子少师罢李茂贞等兵犯京师輿疾避难卒赠尚书左仆射谥曰文

陆余庆

元方从父余庆陈右卫将军珣孙方雅有祖风已冠名未显兄玄表喟曰尔名宦不
立柰何余庆感激闭户诵书三年以博学称举制策甲

科补萧尉累迁阳城尉武后封嵩山以办具劳擢监察御史圣历初灵胜二州党项诱北
胡寇边诏余庆招慰喻以恩信蕃酋率众内附迁殿中

侍御史凤阁舍人尝命草诏殿上恐惧不能得一词降左司郎中久之封广平郡公太子
右庶子余庆于寒品晚进必悉力荐藉人有过辄面折

退无一言开元初为河南河北宣抚使荐富春孙逖京兆韦述吴兴蒋洌河南达奚珣后
皆为知名士迁大理卿终太子詹事谥曰庄雅善赵贞

固卢藏用陈子昂杜审言宋之问毕构郭袭微司马承祜释怀一时号方外十友余庆才
不逮子昂等而风流敏辩过之初武后时酷吏用事中

宗朝幸臣贵主斜封大行啖利嗇祸之人相干没虽亟贵骤用而戮不反踵余庆以道
自将虽仕不赫赫讫无悔尤

陆璟

子璟字仲采举明经补长安尉以清干称开元初中朝臣子弟不任京畿改新乡令
人为立祠用按察使宇文融荐迁浞池令累迁兵部郎

中东骥骑使还除洛阳令时车驾在洛摧勒奸豪人不敢犯为中书令萧嵩所器嵩罢佗

宰相俾阴廉嵩短璪曰与人交过且不可言况无有邪
以是忤贵近出为太原少尹累徙西河太守封平恩县男属邑多虎前守设槛弃璪至彻
之而虎不为暴

△王及善

王及善洺州邯郸人父君愕有沈谋王君廓掠邯鄲君愕往说曰隋氏失御豪俊共
救其乱宜抚纳遗氓而保全之观时变待真主足下无
尺寸之地兼旬之粮劫众而兴但恣残剽所过失望窃为足下羞之君廓谢曰计安出答
曰井陘之险可先取君廓从其言遂屯井陘山高祖入
关与君廓偕来拜君愕大将军封新兴县公累迁左武卫将军从太宗征辽领左屯营兵
与高丽战驻蹕山死于阵赠左卫大将军幽州都督邢
国公陪葬昭陵及善以父死事授朝散大夫袭邢国公爵皇太子弘立擢及善左奉裕率
太子宴于宫命宫臣掷倒及善辞曰殿下自有优人臣
苟奉令非羽翼之美太子谢之高宗闻赐绢百匹除右千牛卫将宣帝曰以尔忠谨故擢
三品要职羣臣非搜辟不得至朕所尔佩大横刀在朕
侧亦知此官贵乎病免召为卫尉卿垂拱中厯司属卿山东饥诏为巡抚赈给使拜春官
尚书出为秦州都督益州长史加光禄大夫以老病致
仕神功元年契丹扰山东擢魏州刺史武后劳曰逆虏盗边公虽病可与妻子行日三十
里为朕卧治为屏蔽也因延问朝政得失及善陈治乱
所宜后悦曰御寇末也辅政本也公不可行留拜内使来俊臣系狱当死后欲释不诛及
善曰俊臣凶狡不道引亡命污戮善良天下疾之不剿
绝元恶且摇乱胎祸忧未既也后纳之庐陵王之还密赞其谋既为皇太子又请出外朝
以安羣臣及善不甚文而清正自持临事不可夺有大
臣节时二张怙宠每侍宴无人臣礼及善数裁抑之后不悦曰卿年高不宜侍游燕但检
校阁中及善即移病月余后不复问叹曰中书令可一
日不见天子乎遂乞骸骨犹不许改文昌左相同凤阁鸾台三品卒年八十二赠益州大
都督谥曰贞陪葬干陵

△李日知

李日知郑州荥阳人及进士第天授中厯司刑丞时法令严吏争为酷日知独平宽
无文致尝免一囚死少卿胡元礼执不可曰吾不去曹
囚无生理日知曰仆不去曹囚无死法皆以状献而武后用日知议神龙初为给事中母
老病取急调侍数日须发辄白母未及封而卒方葬吏
乃赙赠制日知殒绝于道左右为泣莫能视巡察使路敬潜欲表其孝使求状辞不报服
除累迁黄门侍郎景云初同中书门下三品 【新书
本传作景龙初同中书门下平章事今从睿宗纪及宰相表】 转御史大夫仍知政事初

安乐公主馆第成中宗临幸燕从官赋诗日知卒章独以规诫睿宗佗日谓曰向日虽朕亦不敢谏非公挺直何能尔二年拜侍中寻罢为户部尚书【按宰相表日知以景云元年同中书门下三品二年四月守侍中十月罢为户部尚书验之睿宗纪皆合本传以为先天初转刑部尚书疑本传误也今从纪表改】屡乞骸骨许之日知将有请不谋于家归乃治行妻惊曰产利空空何辞之遽日知曰仕至此已过吾分人亦何厌之有若厌于心无日而足也既罢不治田园唯饰台池引宾客与娱乐开元三年卒日知贵诸子方总角皆通婚名族时人讥之后少子伊衡以妾为妻鬻田宅至兄弟讼闻家法遂替云

△杜景俭

杜景俭【新书作景佺今从旧书及通鉴】冀州武邑人性严正举明经中第累迁殿中侍御史出为益州录事参军时隆州司马房嗣业徙益州司马诏未下欲即视事先笞责吏以示威景俭谓曰公虽为司马此州未受命何急数日禄邪嗣业怒不听景俭曰公持咫尺制真伪莫辨即欲搅乱一府敬业扬州之祸非此类邪叱左右罢去既乃除荆州司马吏歌之曰录事意与天通州司马折威风由是寢知名入为司刑丞与徐有功来俊臣侯思止专治诏狱时称遇徐杜者生来侯者死改秋官员外郎与侍郎陆元方按员外郎侯味虚罪已推辄释之武后怒其不待报元方大惧景俭独曰陛下明诏六品七品官文辨已定待命于外今虽欲罪臣柰明诏何宰相曰诏为司刑设何预秋官邪景俭曰诏令一布无台寺之异后以为守法擢凤阁舍人迁洛州司马延载元年检校凤阁侍郎同凤阁鸾台平章事后尝季秋出黎华示宰相以为祥众贺曰陛下德被草木故秋再华周家仁及行苇之比景俭独曰阴阳不相夺伦渎即为灾故曰冬无愆阳夏无伏阴春无凄风秋无苦雨今花木黄落而木复华渎阴阳也窃恐陛下布德施令有所亏紊臣位宰相助天治物治而不和臣之咎也顿首谢罪后曰真宰相也【谨按通鉴辑览

御批景俭不以秋月梨花为瑞虽似优于阿谀者然是时女主临朝阴阳倒置此即吕后时桃李秋华之辙景俭腩颜为相尚何燮理之足云乃以草木荣落非时引咎自责显附于方正之操而阴售其固宠之术此与模棱者流相去无几胡寅责其浅言以盗小名为无足称尚未尽窥其底里而为色庄所愚耳】会李昭德下狱景俭苦申救后以为面欺左迁秦州刺史入拜司刑卿圣历元年复以凤阁侍郎同凤阁鸾台平章事【旧书作圣历二年本纪及宰相表以为神功元年闰十月事】契丹入寇陷河北数州虜已去武懿宗欲尽论其罪景俭以为胁从可

原后如其议罢为秋官尚书坐漏省内语降司刑少卿出为并州长史道病卒赠相州刺史初名元方垂拱中改今名

△李怀远

李怀远字广德邢州柏仁人少孤嗜学宗人欲藉以高荫怀远辞退曰因人之势高士耻之假荫而官岂吾志耶擢四科第累转司礼少卿出为本州岛刺史改冀州迁扬益二都督府长史徙同州刺史治尚清简累迁鸾台侍郎进同凤阁鸾台平章事封平乡县男以左散骑常侍同中书门下三品爵赵郡公赐实封户三百以老听致仕中宗还京师召知东都留守复加同中书门下三品怀远久贵益素约不治居室尝乘款段马仆射豆卢钦望谓曰公贵显顾当然邪答曰吾幸其驯不愿它骏神龙二年卒帝赐锦衾敛自为文祭之赠侍中谥曰成

李景伯

李彭年

李景伯

子景伯景龙中为谏议大夫中宗宴侍臣及朝集使酒酣各命为回波词或以谄言媚帝或要丐恩宠至景伯独为箴规语以讽帝帝不悦中书令萧至忠曰真谏官也景云中进太子右庶子时有建言置都督府非是诏羣臣普议景伯与太子舍人卢甫议今天下诸州分隶都督专生杀刑赏使授非其人则权重衅生非强干弱枝经邦轨物之谊愿罢都督留御史以时按察秩卑任重以制奸宄便繇是停都督终右散骑常侍

李彭年

子彭年有才剖析明悟历迁中书舍人吏部侍郎与李林甫善以赃败长流临贺郡天宝十二载擢为济阴太守徙冯翊天子幸蜀陷于贼胁以伪官忧愤死赠礼部尚书

△豆卢钦望

豆卢钦望雍州万年人祖宽隋文帝外孙为梁泉令高祖定关中与郡守萧瑀率豪姓进款累擢殿中监子怀让尚万春公主诏宽用魏太和诏去豆姓着卢贞观中迁礼部尚书左卫大将军芮国公卒赠特进并州都督陪葬昭陵谥曰定复其旧姓钦望累官越州都督司宾卿长寿二年拜内使封芮国公李昭德被罪有司劾奏钦望阿顺昭德不执正附臣罔君贬赵州刺史入为司礼卿迁秋官尚书中宗还东宫拜太子尹进文昌右相同凤阁鸾台三品罢为太子宾客帝复位擢尚书左仆射平章军国重事钦望居宰相积十余年方易之三思等怙势宣烝窥闲

王室舛冀非常不能有所裁抑独谨身自全进开府仪同三司检校安国相王府长史卒年八十赠司空并州大都督陪葬干陵谥曰元武后时宰相又有史务滋崔元综周允元略可述者附左方

史务滋

崔元综

周允元

史务滋

史务滋宣州溧阳人累吏劳迁司宾卿进拜纳言后革命诏务滋等十人分行天下雅州刺史刘信实兄弟为侍御史来子珣诬其反诏务滋与来俊臣杂治俊臣言务滋与囚善掩其反状后命俊臣并治遂自杀

崔元综

崔元综郑州新郑人祖君肃武德中为黄门侍郎鸿胪卿元综天授初以鸾台侍郎同凤阁鸾台平章事性格慎坐政事堂束带终日不休偃尤护细行然外若谨厚而中刻薄每受制鞫狱必澡垢索疵不入死不肯止人畏鄙之未几坐事流振州搢绅为庆会赦还除监察御史迁蒲州刺史致仕善摄生年九十余卒

周允元

周允元字汝良豫州安城人自右肃政御史中丞拜检校凤阁侍郎同凤阁鸾台平章事武后宴宰相诏陈书传善言允元曰耻其君不如尧舜武三思劾奏语指斥后曰闻其言足以诫安得为过卒赠贝州刺史

钦定续通志卷二百二十三

●钦定续通志卷二百二十四 列传二十四

列传

唐 【二十四】

○唐二十四

裴炎 【仙先】 刘祎之 【郭翰】 元同 李昭德 吉頊

裴炎

刘祎之

魏元同

李昭德

吉頊

△裴炎

裴炎字子隆绛州闻喜人宽厚寡言笑有奇节补弘文生休澣他生或出游炎读书不废有司欲荐状以业未就辞在馆十年尤通左氏春

秋举明经及第补濮州司仓参军寢历御史起居舍人迁黄门侍郎调露二年同中书门下三品进拜侍中高宗幸东都留皇太子京师以炎调护帝不豫太子监国诏炎与刘齐贤郭正一于东宫平章政事及大渐受遗辅太子是为中宗改中书令旧宰相议事门下省号政事堂长孙无忌以司空房玄龄以仆射魏征以太子太师皆知门下省事至炎以中书令执政事笔故徙政事堂于中书省中宗欲以后父韦玄贞为侍中及授乳媪子五品官炎固执不从帝怒曰我意让国与玄贞岂不可何惜侍中邪炎惧因与武后谋废帝后命炎泊刘祎之率羽林将军程务挺张虔勳勒兵入宫宣太后令扶帝下殿帝曰我何罪后曰以天下与玄贞安得无罪乃废帝为庐陵王 【谨案通鉴辑览 御批武氏窥窃神器已非一朝废立之谋固不俟中宗失言而后定然中宗嗣位日浅他务未遑亟欲官后父且轻视以天下与人为怒时泄愤语其父子昏闇如出一辙而受制房帷之病亦见端于此矣】 更立豫王为皇帝以定策功封永清县男后已持政稍自肆于是武承嗣请立七庙追王其先炎谏曰太后天下母以盛德临朝宜存至公不容追王祖考示自私且独不见吕氏事乎后曰吕氏之王权属生人今乃追崇先世存亡迹异安得同哉炎曰蔓草难图渐不可长后不悦而罢承嗣又讽太后诛韩王元嘉鲁王灵夔以绝宗室望刘祎之韦仁约畏默不敢言炎独固争后愈衔怒未几赐爵河东县侯徐敬业兵兴后议讨之炎曰天子年长矣不豫政故竖子有辞今若复子明辟贼不讨而解御史崔警曰炎受顾托身总大权闻贼不讨乃请太后归政此必有异图后乃捕炎送诏狱遣御史大夫鞠味道御史鱼承晔参鞠之 【通鉴考异曰新传云炎谋乘太后出游龙门以兵执之还政天子会久雨太后不出而止若炎实有此谋则太后杀之宜矣且炎为此谋必有同党当炎下狱崔警李景谌辈无事犹欲陷之况有此迹其同党能不首告乎今不取】 凤阁侍郎胡元范奏曰炎社稷臣有功于国悉心事上天下所知臣明其不反纳言刘齐贤左卫率蒋俨继辨之后曰炎反有端顾卿未知耳元范齐贤曰若炎反臣辈亦反矣后曰朕知炎反卿辈不反遂斩于都亭驿炎被劾或勉其逊辞炎曰宰相下狱焉有更全之理卒不折节籍其家无担石之赢初炎见裴行俭破突厥有功沮薄之乃斩降虏阿史那伏念等五十余人议者恨其媚克且使国家失信四夷以为阴祸有知云睿宗立赠太尉益州大都督谥曰忠元范申州义阳人廉介有才以救炎故流死嵩州 【旧书作琼州】 炎从子佑先

裴佑先

裴佑先

佑先未冠推荫为太仆丞炎死坐流岭南上变求面陈得失后召见盛气待之曰炎谋反法当诛尚何道佑先对曰陛下唐家妇身荷先帝顾命今虽临朝当责任大臣须东宫年就德成复子明辟奈何遽任诸武斥宗室炎为唐忠臣而戮逮子孙海内愤怨臣愚谓陛下宜还太子东宫罢诸武权不然豪杰乘时而动不可不惧后怒命曳出杖之朝堂长流灊州岁余逃归为吏迹捕流北廷无复名检专居贿以财自雄养客数百人自北廷属京师多其客诃知朝廷事闻知十常七八时补阙李秦授为武后谋曰讖言伐武者刘刘无强姓殆流人乎今大臣流放者数万族使之叶乱社稷忧也后谓然遣使者慰安流人实命杀之佑先前知奔突厥都护遣兵追之为所执械系狱以状闻会武后有诏赦流人佑先得不死中宗复位求炎后授佑先太子詹事丞迁秦桂广三州都督坐累且诛赖宰相张说右之免官久乃擢范阳节度使太原京兆尹以京师官冗奏罢畿县员外及试官进工部尚书累封翼城县公年八十六以东京留守卒

△刘祎之

刘祎之字希美常州晋陵人父子翼在隋为著作郎峭直有行尝面折僚友短退无余訾李伯药曰刘四骂人人多不恨贞观初召之辞以母老诏许终养江南道巡察使李袭誉表所居为孝慈里母丧除召拜吴王府功曹参军终著作郎弘文馆直学士祎之少与孟利贞高智高郭正一俱以文辞称号刘孟高郭并直昭文馆俄迁右史弘文馆直学士上元中与元万顷等偕召入禁中论次新书凡千余篇高宗又密与参决时政以分宰相权时谓北门学士兄懿之亦给事中并居两省时人荣之先是姊为内官武后遣至外家问疾祎之因贺兰敏之私省之坐流嶠州后为丐还除中书舍人仪凤中土蕃寇边帝访侍臣人人异谋祎之独劝帝戢威纾百姓之急帝内其言俄拜相王府司马检校中书侍郎帝谓曰以卿忠孝门故藉师范冀蓬在麻不扶自直也后既立王为帝以其参预大议愈亲之擢中书侍郎同中书门下三品赐爵临淮县男方是时诏令丛繁祎之思致华敏裁可占授少选可待也司马员外郎房先敏坐累贬卫州司马诉于相府蹇味道谓曰太后旨祎之曰乃上从有司所奏云后闻以味道归非于上贬青州刺史加祎之太中大夫赐物百段后私语凤阁舍人贾大隐曰后能废昏立明盍反政以安天下大隐表其言后怒曰祎之乃负我垂拱中或告祎之受归诚州都督孙万荣金与许敬宗妾私通太后遣肃州刺史王本立鞠治以敕示祎之祎之曰不经凤阁鸾台何谓之敕后以为拒制使赐死于家年五十七初祎之得罪睿宗以旧属申

理之姻友冀得释祔之曰吾死矣太后威福由已而帝
营救速吾祸也在狱上疏自陈临死洗沐神色自若命其子执笔占为表子号塞不能书
祔之乃自捉笔得数纸词恳哀到人皆伤之麟台郎郭
翰太子文学周思钧怅叹其文后恶之贬翰巫州司法参军思钧播州司仓参军睿宗嗣
位赠祔之中书令

郭翰

郭翰

翰尝为御史巡察陇右多所按劾次宁州时狄仁杰为刺史民争言有异政翰就馆
以笔纸置于案谓僚属曰入其境其政可知愿荐使君
美于朝毋久留即命驾去后改麟台郎

△魏元同

魏元同字和初定州鼓城人进士擢第调长安令累官司列大夫坐与上官仪善流
岭外上元初会赦还工部尚书刘审礼表其材拜岐州
长史再迁吏部侍郎永淳元年诏与中书门下同承受进止平章事封巨鹿男上疏言选
举法弊曰周礼太宰内史并掌爵禄废置司徒司马别
掌兴贤诏事分任于羣司而统之以数职王命其大者而自择其小者汉制诸侯得自置
吏四百石以下州郡掾吏督邮从事悉任之于牧守爰
自魏晋始归吏部递相祖袭以迄于今用刀笔以量才按簿书而察行法与世敝其来久
矣又居此任者闲非其选为人择官为身择利下笔系
亲疏措情观势要游宦之途同乎市井夫听言观行圣者难之今使百行九能折之于一
面具僚庶品专断于一司不亦难乎且臣闻从政莅官
不可以无学今贵戚子弟例早求官弘文崇贤千牛犂脚之类程较既浅技能亦薄而门
阀有素资望自高少仕则废学轻试则无才又勋官三
卫流外之属不待州县之举直取书判非先德后言之谊臣闻国之用人如人之用财贫
者厌糟糠富者余梁肉故当衰敝乏贤则磨策朽钝而
乘馭之太平多士则遴柬髦俊而任使之今选者猥多宜以简练为急窃见制书三品至
九品并得荐士此诚仄席旁求意也但褒贬不明故上
不忧黜责下不尽搜剔苟以应命莫慎所举耳惟贤知贤圣人笃论身且滥进鉴岂知人
不择举者之行能而责所举之庸滥不可得已以陛下
圣明国家德业而不建经久之策为无穷之基但顾望魏晋遗风臣窃惑之愿少遵周汉
之规以分吏部选即所用详所失鲜矣不纳进拜文昌
左丞鸾台侍郎同凤阁鸾台三品迁地官尚书检校纳言元同与裴炎缔交能保终始故
号耐久朋先是狄仁杰督太原运失米万斛将坐诛元
同救免而河阳令周兴未知也数于朝堂听命元同曰明府可去矣毋久留兴以为沮己

銜之至是诬元同言太后老矣当复皇嗣后不察赐死
于家年七十三初监察御史房济监刑谓曰丈人盖上变冀召见得自陈元同曰人杀与
鬼杀等耳不能为告事人元同子恬字安礼事亲以孝
闻第进士为御史主簿开元中至颍王傅

△李昭德

李昭德雍州长安人父干佑贞观初为殿中侍御史郾令裴仁轨私役门卒太宗欲
斩之干佑曰法令与天下共之非陛下独有也仁轨以
轻罪致极刑非画一之制刑罚不中则民无所措手足帝意解繇是免死迁侍御史母卒
庐墓侧负土成坟帝遣使就吊表异其闾厯治书侍御
史有能名永徽初擢御史大夫为褚遂良所恶出为邢魏二州刺史干佑虽强直而昵小
人尝为书与所善吏刺取朝廷事迷隐其辞遂良白发
于朝坐流驩州召拜沧州刺史【旧书云坐流爱州干封中起为桂州都督】入为司
刑太常伯坐漏禁中语免官卒昭德强干有父风擢明
经累官御史中丞永昌初坐事贬振州陵水尉还为夏官侍郎如意元年拜凤阁侍郎同
凤阁鸾台平章事武后营神都昭德规创文昌台及定
鼎上东诸门标置华壮洛有二桥司农卿韦机徙其一直长夏门民利之然洛水岁潦啮
之缮者告劳昭德始累石代柱锐其前厮杀暴涛水不
能怒自是无患俄检校内史辞怀义讨突厥以昭德为行军长史不见虜还武承嗣任文
昌左相昭德谏曰承嗣已王不宜典机衡以惑众庶且
父子犹相篡夺况姑侄乎后矍然曰我未之思也乃罢承嗣为太子少保洛阳人王庆之
率险佞数百人请以承嗣为皇太子后不许固请后遣
昭德诘其故昭德答杀庆之余党散走【谨案通鉴辑览 御批武氏此时已悍然无
所顾忌独于皇嗣一节良心未尽澌灭犹徘徊观望
庆之欲逢恶而适以逢怒天网恢恢于此亦可见矣】因奏曰自古有侄为天子而为姑
立庙乎以亲亲言之天皇陛下夫也皇嗣陛下子也当
传之子孙为万世计陛下承天皇顾托而有天下若立承嗣臣见天皇不来食矣后乃止
承嗣譖短之后曰吾任昭德而获安枕是代我劳非而
所及也时朝廷进用谀佞幸恩者众有人获洛水白石而赤文者献阙下曰此石赤心故
以献昭德叱曰洛水余石岂尽能反邪左右皆笑时来
俊臣侯思止舞文法数诛陷大臣人皆畏惧昭德每奏其诬罔不道状卒榜杀思止其党
稍摧沮然昭德颇怙权为众指目鲁王府功曹参军邱
愔上疏曰陛下天授以前万几独断公卿百执事具职而已自长寿以来厌怠细政擢委
昭德秉总权纲而才小任垂负气强愎聋盲下民刍狗
同列作福专威横绝朝野臣伏见南台敕目羣臣奏请陛下制已曰可而昭德建言不可

制又从之昭德参奉机密不预申献替而画可已行方
兴驳异是阳露专权以示于人归美引咎谊不如此台寺庶官望尘慑气一切奏献与夺
事宜皆承风指臣观其胆乃大于身鼻息所冲上拂云
汉履霜坚冰须防其渐大权一去收之良难愿陛下鉴察又果毅邓注着石论数千言述
其专恣凤阁舍人逢弘敏以闻后由是恶之谓姚璠曰
诚如所言昭德固负国矣乃贬钦州南宾尉俄召授监察御史万岁通天二年来俊臣诬
以逆谋既而俊臣亦下狱同日诛时甚雨众庶莫不冤
昭德而快俊臣神龙二年赠左御史大夫建中三年加赠司空

△吉瑱

吉瑱洛州河南人性阴克敢言事举进士及第调明堂尉父哲为易州刺史坐贼当
死瑱以二女弟进武承嗣承嗣表贷哲死迁瑱龙马监
刘思礼谋反瑱上变事后命武懿宗噪声因讽囚引生平所悟者三十六姓捕系诏狱拷
楚百惨以成其狱同日论死天下冤之擢右肃政台中
丞来俊臣下狱当死状三日不下瑱从武后游苑中因闲言俊臣诬杀忠良罪恶如山国
蠹贼也尚何惜于是后斩俊臣突厥陷赵定授检校相
州刺史且募兵制虏南向瑱辞不知武后曰贼方走藉卿坐镇耳初太原温彬茂临死封
一笥书诿妻曰吾死后须年及垂拱献之垂拱初妻上
其书言后革命及突厥至赵定事故后知虏且还瑱至募士无应者俄诏以皇太子为元
帅应募日数千瑱还言状后曰人心若是邪卿可为羣
臣道之瑱诵语于朝诸武恶之始瑱善张易之与田归道薛稷员半千李迥秀皆为控鹤
内供奉瑱又强敏故后倚为腹心圣历二年进天官侍
郎同凤阁鸾台平章事尝与武懿宗争论殿中懿宗陋短俯俛瑱严语侵之无所容假后
怒曰我在乃藉诸武他日安可保衔之张易之兄弟以
宠盛思自全问瑱计安出瑱曰公家以幸进非有大功于天下势必危吾有不朽策愿效
之非止保身且世世不绝胙易之流涕请瑱曰天下思
唐久矣庐陵斥外相王幽闭上春秋高诸武非海内属意公益从容请相王庐陵以副人
望易吊为贺之资也易之昌宗乘闲如瑱教后意乃定
既而知瑱与谋召见问状瑱对庐陵相王皆陛下子先帝顾托于陛下当速有所付乃还
中宗明年瑱坐弟冒伪官贬琰川尉及辞召见泣曰臣
去国无复再谒愿有所言然疾棘请须臾闲后命坐瑱曰水土皆一盍有争乎曰无曰以
为涂有争乎曰无曰以涂为佛与道有争乎曰有之瑱
首谢曰虽臣亦以为有夫皇子外戚有分则两安今太子再立而外家诸王并封陛下何
以和之贵贱亲疏之不明是驱使必争臣知两不安矣
后曰朕知之业已然且奈何瑱寻徙始丰尉客江都卒中宗之立瑱实倡之会得罪无知

者睿宗初有发明其忠乃下诏赠御史大夫

钦定续通志卷二百二十四

●钦定续通志卷二百二十五 列传二十五

列传

唐 【二十五】

○唐二十五

张廷珪 韦湊【见素 谔维 虚心】 韩思复【朝宗欣】 宋务光
 辛替否 武平一 李义 贾曾

至

张廷珪

韦湊

韩思复

宋务光

辛替否

武平一

李义

贾曾

△张廷珪

张廷珪河南济源人慷慨有志尚第进士补白水尉举制科异等累迁监察御史按劾平直武后税天下浮屠钱营佛祠于白司马坂作大象廷珪谏以为倾四海之财殫万民之力穷山之木为塔极冶之金为象然犹佛氏所谓有为之法不足高也填塞涧穴覆压虫蚁且巨亿计工员穷窳驱役为劳饥渴所致疾疹方作又僧尼乞匄自贍而州县督输星火迫切鬻卖以充非所谓随喜者也今天下虚竭苍生雕弊宜先边境实府库养人力后善之召见长生殿赏慰良厚因是罢役会诏市河南河北牛羊荆益奴婢置监登莱以广军资廷珪上书曰今河南牛疫十不一存诏虽和市甚于抑夺并市则价难准简择则吏求贿是牛再疫农重伤也高原耕地夺为牧所两州无复丁田牛羊践暴举境何赖荆益奴婢多国家户口奸豪掠买一入于官永无免期南北异宜至必生疾此有损无益也抑闻之官所恃在民民所恃在食食所资在耕耕所资在牛牛废则耕废耕废则食去食去则民亡民亡则何恃为君羊非君国切要假令蕃滋不可射利后乃止张易之诛议穷治党与廷珪言易之盛时趋附奔走半天下尽诛则已暴罚一二则治不平宜一切洗贷中宗纳之神龙初诏白司马坂复营佛祠廷珪方奉诏抵河北道出其所见营筑

劳亟怀不能已上书切争且言自中兴之初下诏书弛不急斥少监杨务廉以示中外今
土木复兴不称前诏愿罢之以纾穷乏帝不省寻为中
书舍人再迁礼部侍郎玄宗开元初大旱关中饥诏求直言廷珪上疏曰古有多难兴国
殷忧启圣盖事危则志锐情苦则虑深故能转祸为福
也景龙年闲凶党构乱陛下神武迅扫氛垢日月所烛无不泽濡明明上帝宜锡介福而
顷阴阳愆候九谷失稔关辅尤剧臣思天意殆以陛下
春秋鼎盛不崇朝有大功轻尧舜而不法思秦汉以自高故昭见咎异欲日慎一日永保
太和愿陛下畏天戒恤人穷约心削志考前王之书敦
素朴之道登端士放佞人屏后宫减外厩去淫巧捐珠璧场无蹴鞠之玩野绝从禽之乐
休远境罢县戍矜惠惇独蠲薄徭赋自然和气上通珍
祥下降况今陛下受命伊始华夷百姓清耳以听刮目以视冀有闻见安可怠弃典则坐
孤其望哉再迁黄门侍郎监察御史蒋挺坐法诏决杖
朝堂廷珪执奏御史有谴当杀杀之不可辱也士大夫服其知体王琚持节巡天兵诸军
方还复诏行塞下议者皆谓将袭回纥廷珪陈五不可
且言中国步多骑少人赍一石粮负甲百斤盛夏长驱昼夜不休劳逸相绝其势不敌一
也出军掩敌兵不数万不可以行废农广馈饥岁不支
二也千里远袭其谁不知贼有斥候必能预防三也狄人兽居碛漠譬之石田克而无补
四也天下无年当养人息兵五也又请复十道按察使
巡视州县帝然纳之因诏陆象先等分使十道时遣使赉缯锦至石国市犬马廷珪言不
宜劳远人致异物俄坐漏禁内语出为沔州刺史频徙
苏宋魏三州初景龙中宗楚客纪处讷武延秀韦温等封户多在河南河北讽朝廷诏两
道蚕产所宜虽水旱得以蚕折租廷珪谓两道倚大河
地雄奥股肱走集宜得其欢心安可不恤其患而殫其力若以桑蚕所宜而加别税则陇
右羊马山南椒漆山之铜锡铅锴海之蜃蛤鱼盐水旱
皆免盗独河南北外于王度哉愿依贞观永徽故事准令折免诏可在官有威化入为少
府监封范阳县男以太子詹事致仕卒赠工部尚书谥
贞穆廷珪伟姿仪善八分书与李邕友善及邕蹶于仕屡表荐之人尚其方介去

△韦湊

韦湊字彦宗京兆万年人祖叔谐贞观中为库部郎中与弟吏部郎中叔谦兄主爵
郎中季武同省时号三列宿湊永淳初解褐授婺州参
军徙资州司兵观察使房昶才之表于朝迁扬州法曹州人孟神爽罢仁寿令豪纵数犯
法交通贵戚吏莫敢绳湊按治杖杀之远近称服入为
相王府属时姚崇兼府长史尝曰韦子识远文详吾恨晚得之六迁司农少卿忤宗楚客
出为贝州刺史睿宗立授鸿臚少卿徙太府兼通事舍

人时改葬故太子重俊有诏加谥又诏雪李多祚等罪议赠官奏上言王者发号出令必法天道善善着恶恶明也赏罚所不加则考行立谥以褒贬之臣议其君子议其父曰灵曰厉者不敢以私乱公也臣伏见故太子与多祚等挺北军犯宸居破扉斩关兵指黄屋骑腾紫微和帝御元武门亲谕逆顺太子据鞍自若督众不止逆党悔非回兵执贼多祚伏诛太子乃遁明日帝见羣臣涕数行下曰几不与公等相见其为危甚矣臣子之礼过位必趋蹙路马刍有诛昔汉成帝为太子行不敢绝驰道秦师免胄过周北门王孙满策其必败推此则太子称兵宫中为悖已甚以斩三思父子而嘉之乎则弄兵讨逆以安君父可也因欲自立则是为逆又奚可褒此时韦氏逆未明义未绝于太子母也子无废母之理非中宗命废之则又劫父废母且君或不君臣安可不臣父或不父子安可不子晋太子申生谥曰恭汉太子据谥曰戾今太子乃谥节闵臣所未谕请易谥以合礼经其多祚等罪云免而不云雪帝瞿然引内合中劳曰诚如卿言业已尔奈何对曰太子实逆不可以褒请质行以示时大臣亦重改唯罢多祚等赠官景云初作金仙等观奏谏以为方农月兴功虽贲出公主然高直售庸则农人舍耕取雇趋末弃本恐天下有受其饥者不听奏执争以万物生育草木昆虫伤伐甚多非仁圣本意帝诏外详议崔湜岑羲谓曰公敢言此大是难事湊曰食厚禄死不敢顾况圣世必无死乎朝廷为减费万计出为陕汝岐三州刺史开元初欲建碑靖陵湊以古园陵不立碑又方旱不可兴工谏而止迁将作大匠诏复孝敬皇帝庙号义宗湊谏曰传云必也正名礼祖有功宗有德其庙百世不毁商有三宗周宗武王汉文帝为太宗武帝为世宗历代称宗者皆方制海内德泽可尊列于昭穆是谓不毁孝敬皇帝未尝南面且别立寝庙无称宗之义遂罢迁右卫大将军玄宗谓曰故事诸卫大将军与尚书更为之近时职轻故用卿以重此官其母辞寻徙河南尹封彭城郡公会洛阳主簿王钧受赇抵法因出湊曹州刺史久之迁太原尹兼北都军器监边备修举及病遣上医临治卒年六十五赠幽州都督谥曰文子见素

韦见素 【韦谔】

韦顓

韦维

韦虚心

韦见素 【韦谔】

见素字会微质性仁厚及进士第授相王府参军袭父爵擢累谏议大夫天宝五载为江西山南黔中岭南道黜陟使绳纠吏治所至震畏

迁吏部侍郎【新书作文部侍郎按天宝十一载始改吏部曰文部而见素为侍郎乃九载事时尚未称文部也今从旧书】平判皆诵于口
铨叙平允官有勾求辄下意听纳人多德之十三载秋雨潦阅六旬帝谓宰相非其人罢左相陈希烈诏杨国忠审择大臣时吉温得幸帝欲用之温为安禄山所厚国忠惧其进沮止之谋于中书舍人窦华宋昱皆以见素安雅易制国忠入白帝帝亦以相王府属有旧恩遂拜武部尚书同中书门下平章事集贤院学士知门下省事明年禄山表请蕃将三十二人代汉将帝许之见素不悦谓国忠曰禄山反状暴天下今又以蕃代汉难将作矣国忠不应见素曰知祸之芽不能防见祸之形不能制焉用彼相明日当悬论之既入帝迎谕曰卿等有疑禄山意耶国忠见素趋下流涕且陈禄山反明甚诏复位因以禄山表置帝前乃出帝令中官袁思艺传诏曰此姑忍朕徐图之由是奉诏然每进见未尝不为帝言之帝不入其语未几禄山反从帝入蜀陈玄礼之杀国忠也兵伤其首众传声曰毋害韦公父子获免帝令寿王赐药傅创次巴西诏兼左相封豳国公肃宗立与房管崔涣持节奉传国玺及册宣扬制命帝曰太子仁孝去十三载已有传位意属方水旱左右劝我且须丰年今帝受命朕如释负矣烦卿等远去善辅导之见素涕泣拜辞又命见素子谔及中书舍人贾至为册使判官谒见肃宗于顺化郡肃宗闻管名且旧虚怀待之以见素尝附国忠礼遇独减是岁十月丙申有星犯昴见素言于帝曰昴者胡也天道谪见所应在人禄山将死矣帝曰日月可知乎见素曰福应在德祸应在刑昴金忌火行当火位昴之昏中乃其时也既死其月亦死其日明年正月甲寅禄山其殪乎帝曰贼何等死答曰五行之说子者视妻所生昴犯以丙申金木之妃也木火之母也丙火为金子申亦金也二金本同末异还以相克贼殆为子与首乱者更相屠戮乎及禄山死日月皆验【按肃宗本纪至德二载正月乙卯安庆绪杀其父禄山通鉴称李猪儿夜杀禄山至乙卯旦庆绪即皇帝位然后发丧然则禄山实以甲寅死本纪据其发丧之日书之耳】明年三月至凤翔拜尚书左仆射罢知政事初行在所承丧乱后兵吏三铨簿领炆散选部文簿伪滥帝欲广怀士心至者一切补官不加检复见素奏宜明条纲以为持久帝未及从既还都选者猥集补署无所日诉于朝乃追行其言会郭子仪亦为仆射徙见素太子太师诏至蜀郡奉迎太上皇以功食实封三百户上元初以疾求致仕许之诏朝朔望宝应元年卒年七十六赠司徒谥忠贞子谔谔历京兆府司录参军国忠之死军聚不解陈玄礼请杀贵妃以安众帝意犹豫谔谏曰今宗庙震惊陛下弃神器奔草莽惟

割恩以安社稷因叩头流血帝寤赐妃死军乃大悦擢諤御史中丞为置顿使乘輿将行或曰国忠死不可往蜀请之河陇或请幸太原朔方凉州或曰如京师杂然不一帝心向蜀未能言諤曰今兵少不能捍贼还京非万全计不如至扶风徐图去就帝问于众众然之还至扶风乃决西幸后终给事中

韦顥

顥字周仁諤弟益之子通阴阳象纬博知山川风俗论议典据以门调补千牛备身自鄆尉判入等授万年尉历御史补阙与李约李正辞更进讽谏数移大事裴垪韦贯之李绛崔羣萧俛皆布衣旧继为宰相朝廷典章多所咨逮尝曰吾侪五人智不及一韦公长庆初为大理少卿累迁给事中敬宗立授御史中丞为户部侍郎徙吏部卒赠礼部尚书所著易缊解推演终始有深谊既喜接士后士莫不造门而李逢吉方结党与擅国政颇傅会之素议遂衰然节俭自居天下推其尚云

韦维

维字文纪叔谦孙进士对策高第擢武功主簿督役干陵会岁饥均力劝功人不知劳坐徐敬业亲贬五泉主簿徙内江令教民耕桑县为刻颂迁户部郎中善裁剖时员外宋之问善诗故时称户部二妙终太子右庶子弟绳长文辞举孝廉以母老不肯仕踰二十年乃历长安尉威行京师擢监察御史更泗涇鄜三州刺史天宝初入为秘书少监玄宗尚文视其职如尚书丞郎绳刊正图籍以善职称终陈王傅

韦虚心

虚心字无逸维子举孝廉迁大理丞侍御史神龙中按大狱仆射窦怀贞侍中刘幽求有所轻重虚心据正不挠景龙中属羌叛既禽捕有诏悉诛虚心惟论酋长死原活其余迁御史中丞历荆潞扬三大都督府长史荆州有乡豪负势干法虚心香其贄入之官以庐江多盗遂县舒城盗贼为衰入为工部尚书东京留守累封南皮郡子卒赠扬州大都督谥曰正弟虚舟历洪魏二州刺史有治名入为刑部侍郎初维为郎蒔柳于廷及虚心兄弟居郎省对之辄敛容自叔谦后至郎中者数人世号郎官家

△韩思复

韩思复字绍出京兆长安人祖伦贞观中历左卫率封长山县男思复少孤年十岁母为语父亡状感咽几绝故伦特爱之尝曰吾儿必大吾宗家富有金玉车马玩好未尝省笃学举秀才高第袭祖封永淳中家益窳岁饥京兆杜瑾者以百绫饷思复思复方并日食而绫完封不发调梁府仓曹参军会大旱辄开仓赈民州劾责对曰人穷则滥不如因而活之无趣为盗

贼州不能讫转汴州司户仁恕不行鞭罚以亲丧去官
鬻薪自给姚崇为夏官侍郎识之擢司礼博士五迁礼部郎中武攸壹母亡请鼓吹思复
持不可而止坐为王同皎所荐贬始州长史迁滁州刺
史州有铜官人铲凿尤苦思复为贾他鄙费省获多有黄芝五生州署民为刻颂其祥徙
襄州入拜给事中帝作景龙观思复谏曰祸难初弭土
木遽兴非忧物恤人所急不见省严善思坐譙王重福事捕送诏狱有司劾善思任汝州
刺史与王游至京师不暴王谋但奏东都有兵气匿反
罔上宜伏诛思复曰往韦氏擅内谋危社稷善思诣相府曰陛下必即位今诏追善思书
至即发使有逆节者肯遽奔命哉请集百官议议多同
善思得免死流静州迁中书舍人数指言得失颇见纳用开元初为谏议大夫山东大蝗
宰相姚崇遣使分道捕瘞思复上言夹河川县飞蝗所
至苗辄尽今游食至洛使者往来不敢显言且天灾流行庸可尽瘞望陛下悔过责躬损
不急之务任至公之人持此诚实以答谴咎其驱蝗使
一切宜罢玄宗然之出其疏付崇崇请遣思复使山东按所损还以实言崇又遣监察御
史刘沼覆视沼希宰相意悉易故牒以闻故河南数州
赋不得蠲崇恶之出为德州刺史拜黄门侍郎帝北巡为行在巡问赈给大使迁御史大
夫性恬澹不喜为绳察徙太子宾客进爵伯累迁吏部
侍郎复为襄州刺史治行名天下代还仍拜太子宾客卒年七十四谥曰文天子亲题其
碑曰有唐忠孝韩长山之墓故吏卢僎邑人孟浩然立
石岷山初郑仁杰李无为者隐居太白山思复少从二人游尝曰子识清貌古恨仕不及
宰相也子朝宗

韩朝宗

韩欣

韩朝宗

朝宗初厯左拾遗睿宗诏作乞寒胡戏谏曰昔辛有过伊川见被发而祭知其必戎
今乞寒胡非古不法无乃为狄又道路籍籍咸言皇太
子微服观之且匈奴在邸刺客卒发大忧不测白龙鱼服可深畏也况天象变见疫疠相
仍压兵助阴是谓无益帝称善特赐中上考帝传位太
子朝宗与将军庞承宗谏曰太子虽睿圣宜且养成盛德帝不听累迁荆州长史开元二
十二年初置十道采访使朝宗以襄州刺史兼山南东
道襄州南楚故城有昭王井传言汲者死行人虽渴困不敢视朝宗移书谕神自是饮者
亡恙人更号韩公井坐所任吏擅赋役贬洪州刺史天
宝初召为京兆尹分渭水入金光门汇为潭以通西市材木出为高平太守始开元末海
内无事讹言兵当兴衣冠潜为避世计朝宗庐终南山

为长安尉霍仙奇所发玄宗怒使侍御史王鉷讯之贬吴兴别驾卒朝宗喜识拔后进尝荐崔宗之严武于朝当时士咸归重之

韩偓

朝宗孙偓字相之性清简元和初第进士自山南东道使府入为殿中侍御史累迁桂管观察使部二十余州自参军至县令无虑三百员吏部所补纔十一余皆观察使商才补职偓下车悉来谒一吏持籍请补缺员偓下教曰居官治吾不夺其不奉法无望纵舍缺者须按籍取可任任之会春服使至乡有豪猾厚进贿使者求为县令使者请偓偓许之既去召乡豪责以挠法笞其背以令部中自是豪右畏戢时诏置五管监兵尽境赋不足充其费偓处以俭约遂为定制众以为难卒赠工部侍郎

△宋务光

宋务光字子昂一名烈汾州西河人举进士及第调洛阳尉迁右卫骑曹参军神龙元年大水诏文武九品以上官直言极谏务光上书曰后王乐闻过罔不兴拒谏罔不乱乐闻过则下情通下情通则政无缺此所以兴也拒谏则羣议壅羣议壅上孤立此所以乱也臣尝观大人相与之际有感必应其闲甚密是以教失于此变生于彼易曰天垂象见吉凶圣人象之窃见自夏以来水气勃戾天下多罹其灾洛水暴涨漂损百姓传曰简宗庙废祠祀则水不润下夫王者即位必郊祀天地严配祖宗自陛下御极郊庙山川不时荐见又水者阴类臣妾之道阴气盛则水泉溢后廷近习或有离中馈之职以干外政愿深思天变杜绝其萌又自春及夏牛多病死疫气浸淫传曰思之不睿时则有牛祸意者万几之事陛下未躬亲乎晁错曰五帝其臣不及则自亲之今朝廷贤佐虽多然莫能仰陛下清光愿勤思法宫凝就大化以万方为念不以声色为娱以百姓为忧不以犬马为乐臣闻三五之君不能免淫亢顾备御存乎人耳灾兴细微安之不怪及祸变已成骇而图之犹水决治防病困求药虽复僂俛尚何救哉且数年以来公私乏竭户口减耗家无接新之储国乏俟荒之蓄陛下近观朝市则以为既庶且富试践阡陌则百姓衣马牛之衣食犬彘之食十室而九丁壮尽于边塞孀孤转于沟壑猛吏奋毒急政破资马困斯佚人穷斯诈起为奸盗从而刑之良可叹也今人贫而奢不息法设而伪不止长吏贪冒选举以私稼穡之人少商旅之人众愿坦然更化以身先之凋残之后缓其力役久弊之极训以敦庞十年之外生聚方足臣闻太子者君之贰国之本愿择贤能早建储副安社稷慰黎元姻戚之闲谤议所集积疑成患凭宠生灾爰之适以害之也如武三思等诚不宜任以机要国家利器庸可久假于人秘书监郑普思国子祭酒叶静

能挟小道浅术列朱紫取银黄亏国经悖天道此诚治
乱安危所系愿陛下远佞人亲有德乳保之母妃主之家以时接见无令媠黜疏奏不省
俄以监察御史巡察河南道时滑州输丁少而封户多
每配封人皆亡命失业务光建言通邑大都不以封今命侯之家专择雄奥滑州七县而
分封者五王赋少于侯租入家倍于输国请以封户均
余州又请食赋附租庸岁送停封使息传驿之劳不见纳以考最进殿中侍御史迁右台
尝荐汝州参军事李钦宪后为名臣卒年四十二时又
有清源尉吕元泰亦上书言时政曰国家者至公之神器一正则难倾一倾则难正今中
兴政化之始几微之际不可不慎自顷营寺塔度僧尼
施与不绝非所谓急务也林胡数叛獯虏内侵帑藏虚竭户口亡散天下人失业不谓太
平边兵未解不谓无事水旱为灾不谓年登仓廩未实
不谓国富而乃驱役饥冻雕镌木石营构不急劳费日深恐非陛下中兴之要也比见坊
邑相率为浑脱队骏马胡服名曰苏莫遮旗鼓相当军
阵势也腾逐喧噪战争象也锦绣夸竞害女工也督敛贫弱伤政体也胡服相欢非雅乐
也浑脱为号非美名也安可以礼义之朝法胡虏之俗
诗云京邑翼翼四方是则非先王之礼乐而示则于四方臣所未谕书闻不报

△辛替否

辛替否字协时京兆万年人景龙中为左拾遗时置公主府官属而安乐府补授尤
滥武崇训死主弃故宅别筑第侈费过度又盛兴佛寺
公私疲匮替否上疏曰古之建官员不必备九卿已下或有其位而阙其选故赏不僭官
不滥士有完行家有廉节朝廷有余奉百姓有余食下
忠于上上礼于下委裘而无仓卒之危垂拱而无颠沛之患夫事有惕耳目动心虑而行
之于今不以为怪者臣得言之陛下百倍行赏十倍增
官金银不供于印束帛不充于锡何所媿于无用之臣何所歉于无力之士而使富商豪
贾尽居纓冕之流鬻伎行巫咸涉膏腴之地古语曰福
生有基祸生有胎且公主陛下爱子也选贤嫁之设官辅之倾府库以赐之壮第观以居
之广池籞以嬉之可谓至重至怜也然用不合古义行
不根人心将变爱成憎转福为祸何者竭人之力怨也费人之财怨也夺人之家怨也爱
一女取三怨于天下使边疆之士不尽力朝廷之士不
尽忠人心散矣独持所爱安归乎向使鲁王赏同诸壻则亦有今日之福无曩日之祸人
徒见其祸不知祸所自来去年七月五日已见其征矣
而今事无改易尚更因循弃一宅造一宅忘前悔忽后祸臣窃谓陛下乃憎之非爱之也
臣闻君以人为本本固则邦宁邦宁则陛下夫妇母子
长相保也微不可不防远不可不虑今疆场危骇仓廩空虚卒输不充士赏不及而大建

寺宇广造第宅伐木空山不给栋梁运土塞路不充墙
壁所谓佛者清净慈悲体道以济物不利己以损人不荣身以害教今三时之月掘山穿
地损命也殫府虚帑损人也广殿长廊荣身也损命则
不慈悲损人则不爱物荣身则不清净盪佛者之心乎昔夏为天子二十余世而商受之
商二十余世而周受之周三十余世而汉受之由汉而
后历代可知岂穷金玉修塔庙方得享久长之祚乎臣以为减雕琢之费以调不足是有
佛之德息穿掘之苦以全昆虫是有佛之仁罢营构之
直以给边垂是有汤武之功回不急之禄以购廉清是有唐虞之治陛下绥其所急急其
所缓亲未来疏见在失真实冀虚无重俗人之所为而
轻天子之业臣窃痛之陛下常欲填池壑损苑囿以赈贫人今天下之寺无数一寺当陛
下一宫壮丽甚之用度过之十分天下之财而佛有七
八陛下何有之矣百姓何食之矣虽以阴阳为炭万物为铜役不食之人使不衣之士犹
尚不给况必待天生地养风动雨润而后得之乎臣闻
国无九年之储曰非其国今计仓廩度府库百僚共给百事用度臣恐不能卒岁一旦风
尘再扰霜雹荐臻沙门不能擐甲胄寺塔不足攘饥馑
臣窃危之帝不省睿宗立罢斜封官千余人俄诏复之方营金仙玉贞观替否以左补阙
上疏曰臣谓古之用度不时爵赏不当国破家亡者口
说不若身逢耳闻不若目见臣请以有唐治道得失陛下所及见者言之太宗陛下之祖
拨乱立极得至治之体省官清吏举天下职司无虚授
用天下财帛无枉费赏必待功官必得才为无不成征无不服不造寺观而福禄至不度
僧尼而咎殃灭阴阳不愆五谷遂成粟腐帛烂万里贡
赋百蛮归款享国久长多历年所自帝皇以来未有若斯神圣者也陛下何不取而则之
中宗陛下之兄居先帝之业忽先帝之化不听贤臣之
言而悦子女之意虚食禄者数千人妄食土者百余户造寺蠹财数百亿度人免租庸数
十万是故国家所出日加所入日减仓不停半岁之储
库不贮一时之帛所恶者逐逐必忠良所爱者赏赏皆谗慝朋佞喋喋交相倾动夺百姓
之食以养残凶剥万人之衣以涂土木人怨神怒亲忽
众离水旱疾疫六年之闲三祸为变享国不永受终于凶妇取讥万代诒笑四夷陛下之
所亲见也何不鉴而改之法太宗治国泰山之安立可
致矣法中宗治国累卵之危亦立可致矣顷自夏已来淫雨不解谷荒于垄麦烂于场入
秋亢旱霜损虫暴草木枯黄下人咨嗟未知所济而营
寺造观日继于时道路流言计用缗钱百余万陛下知仓有几岁储库有几岁帛百姓何
所活三边何所输而以百万缗钱构无用之观受天下
之怨陛下忍弃太宗之治本不忍弃中宗之乱阶忍弃太宗长久之谋不忍弃中宗短促

之计何以继祖宗观万国耶往见明敕自今已后一用
贞观故事且贞观之时有如今日营寺观加浮屠道士益无用之官行不急之务者乎陛下在韦氏时切齿羣凶今贵为天子不改其事臣恐复
有切齿于陛下者也往者和帝之怜悖逆也 【时追贬安乐公主为悖逆庶人】 宗晋卿劝为第宅赵履温劝为园亭工徒未息义兵交驰亭
不得游宅不得息信邪佞之说成骨肉之刑此陛下之所亲见也今兹二观臣必知非陛下公主之本意得无晋卿之徒阴劝为之冀误骨肉不
可不察伏惟陛下权停二观以须丰年以所费之财为公主给贫穷填府库则公主福德无穷矣疏奏帝不能用然嘉其切直稍迁右台殿中侍
御史雍令刘少微恃权贪赃替否按之岑羲屡以为请替否曰我为宪司惧势以纵罪谓王法何少微坐死累迁颍王府长史卒年八十余

△武平一

武平一名甄以字行颍川郡王载德子也博学通春秋工文辞武后时畏祸不敢与事隐嵩山修浮图法屡诏不应中宗复位平一居母丧
迫召为起居舍人丐终制不见听景龙二年兼修文馆直学士时天子暗柔不君韦后烝乱外戚盛平一重斥语即自请抑母党上言去岁荧惑
入羽林太白再经天太阳亏月犯大角臣闻灾不妄生上见下应信如景响陛下天性孝爱戚属外家恩洽泽濡臣一宗阶三等家数侯朱轮华
毂过许史梁邓远甚恩崇者议积位厚者衅速故月满必亏日中则移时不再来荣难久藉昔永淳之后王室多难先圣从权故臣家以宗子窃
禄疏封今上圣复辟宜退守园庐乃再假光宠爵封如初高班厚位遂超涯极故阴气僭阳沔洛泛溢昔王族骄盈梅福上书窦氏专纵丁鸿进
谏且后妃之家恩过宠深一朝覆没遂无噍类愿思抑损之宜长远之策推远时权以全亲亲帝慰勉不许迁考功员外郎于时太平安乐公主
各立党相报毁亲贵离间帝患之欲令敦和以访平一因上书曰病之在四体者迹分而易逐居心腹者候遽而难治刑政乖舛四支疾也亲权
猜闲心腹患也自顷权贵猜防外和内离怨结姻娅疑生骨肉邀荣之徒诡献忠款膏唇之伍苟输谗计故过从绝猜嫌构亲爱乖党与生积霜
成冰祸不可既愿悉召近亲贵人会宴内殿告以辑睦申以恩勤斥奸人塞谗路若犹未已则舍近图远抑慈示严惟陛下之命帝美其忠切卒
不用初崔日用自言明左氏春秋学它日学士大集日用问鲁三桓郑七穆云何平一诵答如流因问日用曰公言齐桓公楚庄王时诸侯属齐
若楚凡几平公灵王时诸侯属晋楚凡几晋六卿齐楚执政几何人日用谢以不知平一条举始末无留语一坐惊服后宴两仪殿帝命后兄光

禄少卿婴监酒婴滑稽敏给诏学士嘲之婴能抗数人酒酣胡人袜子何懿等唱合生歌
言浅秽因倨肆欲夺司农少卿宋廷瑜赐鱼平一上书
谏曰伏见胡乐施于声律本备四夷之数比来日益流宕异曲新声哀思淫溺始自王公
稍及闾巷妖伎胡人街童市子或言妃主情貌或列王
公名质咏歌蹈舞号曰合生昔齐衰有行伴侣陈灭有玉树后庭花趋数鹜僻皆亡国之
音夫礼慊而不进即销乐流而不反则放臣愿屏流僻
崇肃雍凡胡乐备四夷外一皆罢遣况两仪承庆殿者陛下受朝听讼之所比大飨羣臣
不容以倡优媠狎亏污邦典不纳玄宗立贬苏州参军
徙金坛令平一见宠中宗时虽宴豫尝因诗颂规诫然不能卓然自引去故被谪既谪而
名不衰开元末卒孙元衡儒衡别传

△李义

李义字尚真赵州房子人年十二工属文中书令薛元超曰是子且有海内名第进
士茂才异等累调万年尉长安三年诏雍州长史辞季
昶选部吏才中御史者季昶以义闻擢监察御史劾奏无避景龙初叶静能怙势义条其
奸中宗不纳迁中书舍人修文馆学士帝遣使江南发
在所库赀以赎生义上疏以为江南鱼鳖之利衣食所赀江湖之生无既而府库之财有
限与其拯物不如忧民且鬻生之徒惟利所视钱刀日
至网罟岁广施之一朝营之百倍若回所赎之赀减方困之徭其泽多矣韦氏之变诏令
严促多义草定进吏部侍郎仍知制诰与宋璟等同典
选事请谒不行时人语曰李下无蹊径改黄门侍郎封中山郡公制敕不便辄驳正贵幸
有求官者睿宗曰朕非有靳顾李义不可耳谏罢金仙
玉贞二观帝虽不从优容之太平公主干政欲引义自附义深自拒绝开元初姚崇为紫
微令荐为侍郎外托引重实去其纠驳权畏义明切也
未几除刑部尚书卒年六十八赠黄门监谥曰贞义沈正方雅识治体时称有宰相器事
兄尚一尚贞孝敬甚兄弟俱以文章名同为一集号李
氏花萼集尚一终清源尉尚贞博州刺史

△贾曾

贾曾河南洛阳人父言忠事母以孝闻补万年主簿护役蓬莱宫或短其苛高宗廷
诘辨列详谛异之擢监察御史方事辽东奉使禀军饷
还奏上山川道里并陈高丽可破状帝问诸将材否对曰李绩旧臣陛下所自悉庞同善
虽非鬪将而持军严整薛仁贵勇冠三军高侃忠果有
谋契苾何力性沉毅持重有统御才然夙夜小心忘身忧国莫逮于绩者帝然所许众亦
以为知言累转吏部员外郎李敬玄兼尚书言忠尚气
及主选不能下贬邵州司马失武懿宗意下狱几死左除建州司户参军卒曾少有名景

云中为吏部员外郎玄宗为太子遴选宫僚以曾为舍人太子数遣使采女乐就率更寺肆习曾谏曰昔齐以女乐馈鲁而孔子行秦以女妓遗戎而由余出良以冶容哇姣蛊心丧志上行下效淫俗将成败国乱伦实由兹起故大圣名贤疾之最甚殿下监抚余闲宴私多豫后廷伎乐古或有之犹当秘隐不以示人至于所司教习章示羣寮慢伎淫声实亏睿化愿下教令屏倡优女子诸使者采召一切罢止太子手令嘉答俄擢中书舍人以父嫌名不拜徙谏议大夫知制诰【旧书云拜谏议之明年有事南郊按睿宗亲郊在太极元年则曾之徙官是景云二年事也唐会要载曾以太子舍人谏女乐为先天元年正月事先天元年即太极元年曾是时已迁谏议矣会要误】天子亲郊有司议不设皇地祇位曾请合享天地如古制并从祀等坐睿宗诏宰相礼官议皆如曾请开元初复拜中书舍人曾固辞议者谓中书乃曹司非官称且嫌名在礼不讳乃就职与苏晋同掌制诰皆以文辞称时号苏贾后坐事贬洋州刺史历虔郑等州刺史迁礼部侍郎卒子至

贾至

贾至

至字幼邻擢明经第解褐单父尉从玄宗幸蜀拜起居舍人知制诰帝传位至当撰册既进稟帝曰昔先天诰命乃父为之辞今兹命册又尔为之两朝盛典出卿家父子手可谓继美矣至顿首呜咽流涕历中书舍人至德中将军王去荣杀富平令杜徽【去荣富平人故通鉴云本县令】肃宗新得陕且惜去荣善用炮【从通鉴补】诏贷死以流人使自效至谏曰去荣挟私怨杀县令有犯上之逆易曰臣弑君子弑父非一朝一夕之故其所由来者渐矣若纵去荣可谓生渐矣议者谓陕郡初复非其人不可守然则它无去荣者何以亦能坚守乎若以一能免殊死彼弧矢绝伦剑术无前者恃能犯上何以止之若舍去荣诛将来是法令不一诱人入罪也惜一去荣杀十去荣之材其伤盖多且逆乱之人彼此一也乱于富平能治于陕乎悖于县令能不悖于君乎律令者太宗之律令陛下不可以一士小材废祖宗大法帝诏羣臣议太子太师韦见素文部郎中崔器皆以为法者天地大典王者不敢专也于律杀本县令列于十恶而陛下宽之王法不行人伦道屈臣等奉诏不知所从去荣末技陕郡不以之存亡王法有无国家乃为之轻重请论如法诏可【按杀人者死固不可赦而去荣乃杀本县令故贾至等所争尤大新旧载此事殊不得其要领今颇以通鉴易之至通鉴谓肃宗竟舍去荣而新书云诏可未知孰是姑仍新书】蒲州刺史以河东濒贼

彻傅城庐舍五千室不使贼得保聚民大扰诏遣至慰抚官助营完蒲人乃安坐小法贬岳州司马宝应初召复故官迁尚书左丞杨绾建请依古制县令举孝廉于刺史刺史升天子礼部诏有司参议多是绾言至议以为自晋后衣冠迁徙人多侨处因缘官族所在占籍今乡举取人未
尽请广学校增国子博士员十道大州得置大学馆诏博士领之召置生徒使保桑梓者乡里举焉在流寓者庠序推焉议者更附至议转礼部侍郎待制集贤院大历初徙兵部累封信都县伯进京兆尹七年以右散骑常侍卒年五十五赠礼部尚书谥曰文

钦定续通志卷二百二十五

●钦定续通志卷二百二十六 列传二十六

列传

唐 【二十六】

○唐二十六

桓彦范【薛季昶 杨元琰杨仲昌】 敬晖 崔元暉【涣 纵碣】

张柬之 袁恕己【高】

桓彦范

敬晖

崔玄暉

张柬之

袁恕己

△桓彦范

桓彦范字士则润州丹阳人以门荫调右翊卫迁司卫主簿狄仁杰曰君才识必能自致远大厚为礼寻擢监察御史累迁中丞长安中为司刑少卿张昌宗引妖人占己有天分宋璟请穷治其奸武后以昌宗尝自归不许彦范谏曰昌宗包藏祸心亿测天命事败得引首以免未败则候时为逆此凶诡之臣荧惑圣心且既自归露而尚与妖人祈福禳厄则果于必成初无悔意今而宥之诚恐昌宗自谓得计人亦以为应运浩然从之是纵成其乱也父在子称尊为逆子君在臣图位为逆臣请付三司考治不纳时内史李峤等屡奏往为酷吏破家者请皆宥雪依违未从彦范复上言自文明后得罪惟扬豫博三州不免它可悉赦疏十上卒见听尝曰天理人命所县必不能顺旨诡辞以求苟免张柬之将诛易之等引与定策于是以彦范敬晖为左右羽林将军属以禁兵时中宗每北门起居因得谒陈秘计神龙元年正月彦范晖率羽林兵与将军李湛李多祚杨元琰薛思行等千牛骑五百人讨贼令湛多祚就东宫迎中宗至玄武门

彦范等斩关入士皆鼓噪时武后处迎仙宫之集仙殿
斩易之等庑下后闻变而起见中宗曰乃汝耶竖子诛可还宫彦范进曰太子今不可以
归往天皇弃羣臣以爱子托陛下今久居东宫羣臣思
天皇之德不血刃清内难此天意人事归李氏臣等谨奉天意惟陛下传位万世不绝天
下之幸后乃卧不复言明日中宗复位以彦范为侍中
封谯郡公赐实封五百户上书曰伏见陛下临朝视政皇后必施帷殿上预闻政事臣愚
谓古王者谋及妇人皆破国亡身倾辘继路且以阴乘
阳违天也以妇凌夫违人也违天不祥违人不义故书曰牝鸡之晨惟家之索易曰无攸
遂在中馈言妇人不得预外政也愿令皇后无居正殿
干外朝深居宫掖修阴教以辅佐天子又道路籍籍皆云胡僧慧范托浮屠法诡惑后妃
出入禁奥渎挠朝政陛下常轻骑微服数幸其居上下
污慢君臣亏替孔子曰执左道以乱政者杀假鬼神以危人者杀今慧范之罪不殊于此
不急诛且有变愿早裁之帝不省纳俄墨敕以方士郑
普思为秘书监叶静能为国子祭酒彦范执不可帝曰要己用之不可止彦范曰陛下始
复位制诏军国皆用贞观故事贞观时以魏征虞世南
颜师古为监以孔颖达为祭酒如普思等方伎猥下安足继踪前烈臣恐物议谓陛下官
不择才以天秩加私爱不从时武三思以迁太后衔恚
虑不利诸武而韦后雅为帝宠畏且三思与烝乱由是朋谗奇中未几罢彦范等政事五
月加特进封扶阳郡王赐姓韦同后属籍锡金银锦绣
皆以铁券恕十死令朝朔望寻出为洺州刺史改濠州王同皎谋诛三思事泄三思诬彦
范等同逆阴令许州司功参军郑愔上变乃贬彦范泷
州司马敬晖崖州司马袁恕己窦州司马崔元暉白州司马张柬之新州司马悉夺勋封
三思又疏韦后隐秽榜于道请废之帝震怒三思猥曰
此殆彦范辈为之命御史大夫李承嘉鞫状物色其人承嘉郎奏彦范晖柬之恕己元暉
暴讪摇变内托废后而实危君人臣无将当伏诛诏有
司议罪大理丞李朝隐执奏彦范等未讯即诛恐为讎家诬蔑请遣御史按实卿裴谈请
即诛斩家籍没帝业尝许以不死遂流灋州禁锢终身
子弟年十六以上谪徙岭外擢承嘉金紫光禄大夫襄武郡公后又赐彩五百段锦被一
张进谈刑部尚书而贬朝隐闻喜令三思又讽节愍太
子请夷彦范等三族帝不从三思虑五人者且复用乃纳崔湜计遣周利贞矫制杀之利
贞至贵州逢彦范即缚曳竹槎上肉尽杖杀之年五十
四睿宗即位彦范等并追复官爵赐实封二百户还其子孙谥曰忠烈开元六年诏与晖
元暉柬之恕己皆配享中宗庙庭建中三年复赠彦范
为司徒晖太尉元暉太子太师柬之司徒恕己太子太傅彦范工属文然不甚喜观书所

志惟忠孝大略居若不能言及议论帝前虽被诘让而安辞定色辩争愈切诛二张也柬之勒兵景运门将遂夷诸武洺州长史薛季昶劝曰二凶虽诛产禄犹在请除之会日暮事遽彦范不欲广杀因曰三思机上肉尔留为天子藉手季昶叹曰吾无死所矣俄而三思窃入宫因韦后反盗朝权同功者叹曰死我者桓君也彦范亦曰主上昔为英王故吾留武氏使自诛定今大事已去得非天乎 【通鉴考异曰旧唐书薛季昶传敬晖传唐统纪唐历狄梁公传皆云张柬之敬晖不欲诛武三思唯御史台记以为柬之固争而彦范不从新唐书彦范传亦云彦范不欲广杀按柬之时为宰相首建此谋当是与桓敬等皆不可不应独由彦范也按此事传闻异辞未易偏定今姑仍新书本文而附着考异之说以俟论古者择焉】 初将起事告其母母曰忠孝不并立义先国家可也御史李福业者尝与彦范谋及被杀福业亦流番禺后亡匿吉州参军敬元礼家吏捕得元礼俱坐死福业将刑谢元礼曰子有亲吾甚愧恨元礼曰公穷而归我我不得已乎见者伤之时监察御中卢袭秀亦坐与桓敬善为冉祖雍所按不屈或报曰南使至桓敬已死袭秀泫然祖雍怒曰彦范等负国君乃流涕且君下狱诸弟皆纵酒无忧色何邪对曰我何负哉正坐与彦范善耳今尽杀诸弟则已如独杀袭秀恐公不得高枕而瞑祖雍色动握其手曰当活公遂得不坐袭秀者其祖方庆武德中为察非掾秦王器之尝引与议建成事方庆辞曰母老矣勺身归养王不逼也贞观中为橐城令彦范弟玄范官至常州刺史臣范工部侍郎

薛季昶

杨元琰

杨仲昌

薛季昶

薛季昶者绛州龙门人武后时上书自布衣擢监察御史以累左迁平遥尉复拜御史擢给事中夏官郎中侯味虚将兵讨契丹不利妄言贼行有蛇虎导军拜季昶为河北道按察使季昶驰至军斩味虚以闻威震北方橐城尉吴泽射杀驿使髡民女发为髡州不能劾季昶杖杀之然后布恩信甄表善良数月为御史中丞坐事左迁久乃入为雍州长史迁文昌左丞为洺州长史预诛易之等功进户部侍郎五王失柄出季昶荆州长史贬儋州司马初季昶与昭州首领周庆立广州司马光楚客不叶惧二怨不敢往仰药死葬昭州睿宗立诏赠左御史大夫同彦范等赐一子官

杨元琰

杨元琰者字温虢州閩乡人汉太尉震十八代孙居父丧七日不食服除补梓州参军平棘令课第一御史府表其政再擢永宁军副使忤用事者免载初中为安南副都护三徙为荆府长史五迁州刺史咸有风绩初张柬之代荆州共乘舡江中私语外家革命元琰悲涕慷慨有匡复之志柬之执政故引为右羽林将军谓曰江上之言君叵忘之今可以勉乃与李多祚等定计斩二张进云麾将军封弘农郡公实户五百赐铁券恕十死敬暉等为武三思所构元琰知祸未已乃请祝发事浮屠悉还官封中宗不许暉闻尚戏曰胡头应祝以多鬣似胡云元琰曰功成不退惧亡暉感之然已不及计暉等死独元琰全再迁卫尉卿又上官封愿追宠其亲帝哀怜赠越州都督长史李多祚死太子难元琰坐厚善系狱萧至忠救之免睿宗立数上书乞骸骨不听四迁刑部尚书封魏国公徙太子宾客诏设位东宫太子为拜俄致仕开元六年卒年七十九谥曰忠生平无留蓄中外食其家常数千人临终敕诸子薄葬

杨仲昌

子仲昌字蔓以通经为修文生累调不甚显以河阳尉对策玄宗擢第一授蒲州法曹参军判入异等迁监察御史坐累为孝义令太守萧恕表其政徙下邳终吏部郎中仲昌资长子吏常分父邑租振宗党御身俭约善与人交士乐从之游云

△敬暉

敬暉字仲晔绛州平阳人弱冠举明经圣历初为卫州刺史是时河北经突厥所骚方秋而城暉曰金汤非粟不守岂有弃农亩事池隍哉纵民归敛阖部赖安迁夏官侍郎出为泰州刺史改洛州长史武后幸长安为副留守以治干闻长安二年授中台右丞以诛二张功加金紫光禄大夫为侍中平阳郡公实封五百户进封齐国暉表请降诸武王爵繇是皆为公三思愤俄封平阳郡王加特进罢政事初易之已诛薛季昶请收诸武暉亦苦谏不从三思浊乱暉每椎坐帐恨弹指流血寻及贬又放琼州【按本纪云流敬暉于嘉州宰相表同今从本传及通鉴】为周利贞所害睿宗时追复官爵又赠泰州都督谥曰肃愍

△崔玄暉

崔玄暉博陵安平人本名晔武后时有所避故焉少以学行称叔父秘书少监行功器之举明经为高陵主簿居父丧尽礼庐有燕来巢共乳母卢有贤操常戒曰吾闻姨兄辛元驭云子姓仕宦有言其贫窶不自存此善也若货盈衍恶也吾尝以为确论比见亲表仕者务多财以奉亲而亲不究所从来必出于禄廩则善如其不然何异盗乎若今为吏宜识吾意故元

暉所守以清白名母亡哀毀甘露降庭樹后以庫部員外郎累遷鳳閣舍人長安元年為天官侍郎當公不受私謁執政忌之改文昌左丞不踰月武后曰卿向改職乃聞令史設齋相慶此欲肆其貪耳卿為朕還舊官乃復拜天官侍郎厚賜彩物三年授鸞台侍郎同鳳閣鸞台平章事兼太子左庶子四年遷鳳閣侍郎先是酷吏誣籍數百家元暉開陳其枉后感悟皆為原洗宋璟劾張昌宗不軌事元暉頗助璟及有司正昌宗罪而元暉弟升為司刑少卿執論大辟兄弟守正如此后久疾宰相不召見者累月及少閑元暉奏言皇太子相王皆仁明孝友宜侍醫藥不宜引異姓出入禁闥后慰納以誅二張功為中書令博陵郡公后遷上陽宮顧元暉曰諸臣進皆因人而元暉我所擢何至是對曰此正所以報陛下也俄拜博陵郡王罷政事冊其妻為妃賜實封五百戶檢校益州大都督府長史知都督事會貶又流古州道病卒年六十九謚曰文獻元暉三世不異居貧寓郊墅羣從皆自遠會食無它爨與升尤友愛族人貧孤者抚养教勵后雖秉權而子弟仕進不使踰常資當時稱重少頗屬辭晚以非己長不復構思專意經術子璩亦有文開元二年詔與柬之孫毖並為朝散大夫璩終禮部侍郎璩子渙

崔渙

崔縱

崔碣

崔渙

渙博綜經術長論議十歲居父喪毀辟加人陸元方異之起家亳州司功參軍還調于是入判者千余吏部侍郎嚴挺之施特榻試彝尊銘謂曰子清廟器故以題相命累遷司門員外郎楊國忠惡不附己出為巴西太守玄宗西狩迎謁于道帝見占奏以為明治體恨得之晚房管亦荐之即日拜門下侍郎同中書門下平章事肅宗立與韋見素等同赴行在時京師未復舉選不至詔渙為江淮宣諭選補使收采遺逸不以親故自嫌常曰抑才虞謗吾不忍為然聽受不甚精以不職罷為左散騎常侍兼余杭太守江東采訪防禦使入遷吏部侍郎集賢院待制簡淡自處時望尤重遷御史大夫元載輔政與中官董秀盤結固寵渙疾之因進見極論載怙權樹黨毀法鬻恩帝默然會渙兼稅地青苗錢物使以錢給百官而吏用下直為使料上直為百司料載諷皇城副留守張清撻其非詔尚書左丞蔣渙按實由是貶道州刺史卒贈太子太傅謚曰元子

崔縱

纵繇协律郎三迁监察御史会诏择令长授蓝田令德化大行人立碑颂德累迁金部员外郎涣之贬纵弃官就养后为汴西水陆运两税盐铁等使王师围田悦乏食诏纵饷四节度粮军无乏德宗出奉天方镇兵未至纵劝李怀光奔命悉军财称所须怀光兵疲久战次河中迁延不进纵以金帛先度曰济者即赐众趋利争西遂及奉天迁京兆尹上言怀光反复不情宜备之及帝徙梁州追扈不及左右短纵殆不来帝曰知纵者朕也非尔辈所及后数日至授御史大夫处大体不急细事狱诉付成僚属而已自兵兴内外官冗溢时议并省纵奏兵未息朝廷频诏录劳诸道叙优日广若停减吏员非但承优者无官可叙亦恐序进者无路胜置矣诏可贞元元年天子郊见为大礼使岁旱用屈纵搏裁文物俭而不陋徐吏部侍郎寻为河南尹时兵虽定民雕耗纵治简易蠲略细苛先是戍边者道由洛储饷取于民纵始令官办使五家相保自占发敛以绝胥吏之私又引伊洛溉高仰通利里闲人甚宜之入为太常卿封常山县公卒年六十二赠吏部尚书谥曰忠初涣为元载所抑纵讫载世不求闻达涣有嬖妾纵以母事之妾刚酷虽纵显官而数笞诟然率妻子候颜色承养不懈时以为难孙碣

崔碣

碣字东标及进士第迁右拾遗武宗方讨泽潞碣建请纳刘稹降忤旨贬邓城令稍转商州刺史擢河南尹右散骑常侍再为河南尹邑有大贾王可久转货江湖闲值庞勋乱尽亡其资不得归妻诣卜者杨干夫咨存亡干夫悦其色且利其富既占阳惊曰乃夫殆不还矣即阴以百金谢媒者诱娶之遂为富人徐州平可久丐而归往见妻干夫诟逐之妻诣吏自言干夫厚纳贿反罪可久再诉复坐诬可久恨叹遂失明碣得其情即敕吏掩干夫并前狱吏下狱悉发赅奸一日杀之以妻还可久时淫潦狱决而霁都民歌舞之徙陕虢观察使军乱贬怀州司马卒

△张柬之

张柬之字孟将襄州襄阳人少涉经史补太学生祭酒令狐德棻异其才以王佐期之中进士第调清源丞永昌元年以贤良召年七十矣对策者千余柬之第一授监察御史迁凤阁舍人时突厥默啜有女请和亲武后欲令武延秀娶之柬之奏古无天子取夷狄女者忤旨出为合蜀二州刺史故事岁以兵五百戍姚州地险瘴到屯辄死柬之论其弊曰姚州古哀牢国唐蒙开夜郎滇笮而哀牢不附光武末始请内属置永昌郡统之赋其盐布毡罽以利中土诸葛亮五月渡泸收其产入以益军储使张伯岐选其劲兵以增武备故蜀志称亮南征后国以富饶此

前世置郡以其利之也今盐布之税不供珍奇之贡不入戈戟之用不实于戎行宾货之资不输于大国而空竭府库驱率平人受役蛮夷肝脑涂地臣窃为陛下惜之昔汉历博南山涉兰仓水更置博南哀牢二县蜀人愁苦行者作歌曰历博南越兰津度兰仓为他人盖讥其贪珍奇之利而为蛮夷所驱役也汉获其利人且怨歌今减耗国储费调日引朝廷无丝发之利而百姓蒙终身之酷臣窃为国家痛之往诸葛亮破南中即用渠率统之不置汉官不留戍兵言置官留兵有三不易置官必夷汉杂居猜嫌将起留兵转粮为患滋重后忽反叛劳费必甚故粗设纲纪自然久定臣谓亮之策诚尽羁縻蛮夷之要今姚州官属既无固边厌寇之心又无亮且纵且擒之伎唯诡谋狡算恣情割剥扇动酋渠遣成朋党折支谄笑取媚蛮夷提挈子弟聚会蒲博凡逋逃亡命在彼州者户赢二千专事剽夺且姚州本龙朔中武陵主簿石子仁奏置其后长史李孝让辛文协死于羣蛮诏遣郎将赵政贵讨击兵无譙类又以将军李义总继往而郎将刘惠基战死其州遂废垂拱中蛮郎将王善宝昆州刺史爨干福复请置州言课税自支不旁取于蜀及置州后掾李棱为蛮所杀延载中司马成琛更置泸南七镇戍以蜀兵蜀史骚扰于今不息宜罢姚州隶嶲府岁时朝覲同蕃国废泸南诸镇而设关泸北非命使不许交通增嶲屯兵择清良吏以统之臣愚以为便疏奏不纳俄为荆州大都督府长史先是武后谓狄仁杰曰安得一奇士用之仁杰曰陛下求文章资历则李峤苏味道足矣若与成天下务荆州长史张柬之虽老宰相才也【按仁杰荐柬之事新书系之长安中考仁杰以久视元年卒次年始改元长安新书误也吴缜纠谬亦尝讥之今从节删】即召为洺州司马它日又求人仁杰曰臣尝荐张柬之未用也后曰迁之矣曰臣荐宰相而为司马非用也乃授司刑少卿迁秋官侍郎后姚崇为灵武军使将行后诏举外司可为相者崇曰张柬之沈厚有谋能断大事其人老惟亟用之即日召见拜同凤阁鸾台平章事进凤阁侍郎诛二张也柬之首发其谋以功擢天官尚书同凤阁鸾台三品汉阳郡公实封五百户不半岁以汉阳郡王加特进罢政事柬之既失权愿还襄州养疾乃授襄州刺史中宗为赋诗祖道又诏羣臣餞定鼎门外至州持下以法虽亲旧无所纵贷会汉水涨啮城郭柬之因垒为堤以遏湍怒阖境赖之又恳辞王爵不许俄及贬又流泷州忧愤卒年八十二景云元年赠中书令谥曰文贞授一子官柬之刚直邃于学论次书数十篇子愿漪愿仕至襄州刺史漪以著作佐郎侍父襄阳恃其家立功简接乡人乡人怨之

△袁恕己

袁恕己沧州东光人仕累司刑少卿知相王府司马与诛二张又从相王统南衙兵备非常以功加银青光禄大夫中书侍郎同中书门下三品封南阳郡公实封五百户将作少匠杨务廉者以工巧进恕己恐其复启游娱侈丽之渐言于中宗曰务廉位九卿忠言嘉谏不闻而专事营构以媚上不斥之亡以昭德乃出为陵州刺史未几恕己拜中书令特进南阳郡王罢政事及贬又流环州为周利贞所逼恕己素饵黄金至是饮野葛数升不死愤懣抔土以食爪甲尽不能绝乃击杀之谥曰贞烈孙高

袁高

袁高

高字公颐少慷慨有节尚擢进士第代宗时累迁给事中建中中拜京畿观察使坐累贬韶州刺史复拜给事中德宗将起卢■〈木巳〉为饶州刺史高当草诏见宰相卢翰刘从一曰■〈木巳〉当国矫诬阴贼使宗祏失守朝廷不寘以法才示贬黜今还授大州天下其谓何翰等不悦命舍人作诏诏出高执不下奏曰■〈木巳〉罪万诛陛下赦不诛今复拜刺史诚失天下望愿问外廷并敕中人听于民若亿兆异臣之言臣请前死谏官亦力争帝前乃与■〈木巳〉上佐翌日遣使慰高曰朕惟卿言切至已如奏太子少保韦伦曰高言劲挺自是陛下一良臣宜加优礼贞元二年帝以大盗后关辅百姓贫田多荒蕪诏诸道上耕牛委京兆府劝课量地给牛不满五十亩不给高以为圣心所忧乃在穷乏今田不及五十亩即是穷人请两户共给一牛从之卒年六十中外怅惜宪宗时李吉甫言其忠睿特赠礼部尚书文宗开成三年又诏元暉曾孙郢为监察御史暉曾孙元膺河南丞柬之四世孙憬寿安尉恕己曾孙德文校书郎始帝访御史中丞狄兼善以仁杰功且言五王遗烈乃求其后秩以官唯彦范后无闻

钦定续通志卷二百二十六

●钦定续通志卷二百二十七 列传二十七

列传

唐【二十七】

○唐二十七

刘幽求

锺绍京

崔日用【日知】

王琚

王毛仲【

陈元礼】

刘幽求

锺绍京

崔日用

王琚

王毛仲

△刘幽求

刘幽求冀州武强人圣历中举制科中第调闾中尉刺史不礼弃官去久之授朝邑尉桓彦范等诛二张而不杀武三思幽求谓曰公等无葬地矣不早计后且噬脐不从既五王皆为三思构死临淄王入诛韦庶人预参太策是夜号令诏敕一出其手以功授中书舍人参知机务爵中山县男实封二百户授二子五品官二代俱赠刺史睿宗立进尚书右丞徐国公增封户至五百赐物千段奴婢二十人第一区良田千亩金银杂物称是景云二年以户部尚书罢政事不旬月迁吏部拜侍中加赠实封二百户赠铁券免十死先天元年为尚书右仆射同中书门下三品监修国史而窦怀贞为左仆射崔湜为中书令附太平公主有逆计幽求与右羽林将军张暉定计使暉说玄宗曰湜等皆太平党与日夜阴计若不早图且产大害太上不得高枕矣臣请督羽林兵除之 【通鉴考异曰旧传云幽求自谓功在朝臣之右志求左仆射崔湜为中书令心甚不平形于言色乃与张暉请诛之按幽求素尽心于玄宗湜等附太平非幽求因私忿而害之也考异之言甚是新书亦承用旧传今从节删】 帝许之未发也而暉漏言于侍御史邓光宾帝惧即列其状睿宗以幽求等属吏劾奏以疏闲亲罪应死帝密申右之乃流幽求封州暉峰州光宾绣州明年太平公主诛即日召复旧官知军国事还封户赐锦衣一袭开元初进尚书左丞相兼黄门监俄以太子少保罢姚崇素忌之奏幽求郁怏散职有怨言诏有司鞫治宰相卢怀慎等奏言幽求轻肆不恭失大臣体贬睦州刺史削实封户六百迁杭郴二州恚愤卒于道年六十一赠礼部尚书谥曰文献六年诏与苏瓌配享睿宗庙庭建中中追赠司徒

△锤绍京

锤绍京虔州赣人初为司农录事以善书直凤阁武后时署诸宫殿明堂及铭九鼎皆其笔也景龙中为苑总监会讨韦氏难绍京师户奴丁夫从事平夜拜中书侍郎参知机务明日进中书令越国公实封五百户赉赐与刘幽求等既当路以赏罚自肆当时恶之因上疏让官睿宗用薛稷谋进户部尚书出为彭州刺史玄宗即位复拜吏部尚书增实封改太子詹事不为姚崇所喜与幽求并以怨望得罪贬果州刺史赐封邑百户后坐它事贬怀恩尉悉夺阶封再迁温州别驾十五年入朝见帝泣曰陛下忘畴日事邪忍使弃死草莽且同时立功者今骨已朽而独臣在陛下不垂愍乎帝惻然即日授太子右谕德久之迁小詹事年踰八十以官寿卒绍

京嗜书画如王羲之献之褚遂良真迹藏家者至数百卷建中中追赠太子太傅

△崔日用

崔日用滑州灵昌人擢进士第为芮城尉大足元年武后幸长安陕州刺史宗楚客委以顿峙馈献丰甘称过宾使者楚客叹其能亟荐之擢为新丰尉迁监察御史阴附安乐公主得稍迁神龙中郑普思纳女后宫日用劾奏中宗初不省廷争切至普思竟得罪时诸武及楚客等权宠交煽日用多所结纳骤拜兵部侍郎宴内殿酒酣起为回波舞求学士即诏兼修文馆学士帝崩韦后专制畏祸及更因僧普润道士王晔私谓临淄王以自托且密赞大计王曰谋非计身直纾亲难尔日用曰至孝动天举无不克然利先发迟恐生变及韦氏平夜诏权雍州长史以功授黄门侍郎参知机务封齐国公赐实户二百坐与薛稷忿竞罢为婺州长史历扬汧三州刺史由荆州长史入奏事因言太平公主逆节有萌陛下往以宫府讨有罪须臣子与谋今据大位一下制书定矣帝曰畏惊太上皇奈何日用曰庶人之孝承顺颜色天子之孝惟安国家定社稷若令奸宄窃发以亡大业可谓孝乎请先安北军而后捕逆党于太上皇固无所惊帝纳之讨逆诏权检校雍州长史以功益封二百户进吏部尚书会帝诞日日用采诗大小雅二十篇及司马相如封禅书献之借以讽谕且劝告成事诏赐衣一副物五十段坐兄累出为常州刺史后以例减封户三百徙汝州开元七年诏以日用曾赞大谋功多不宜减封复食二百户徙并州长史卒年五十并人怀其惠吏民数百皆缟服送丧赠吏部尚书谥曰昭再赠荆州大都督日用才辩绝人见事敏速能乘机反祸为福以取富贵先天后求复相然亦不获也尝谓人曰吾平生所事皆适时制变不专始谋然每一反思若芒刺在背云子宗之袭封亦好学宽博有风检与李白杜甫以文相知者

崔日知

崔日知

从父兄日知字子骏少孤贫力学以明经进至兵部员外郎与张说同为魏元忠朔方判官称健吏迁洛州司马会譙王重福之变官司逃日知独率吏卒助屯营击贼以功加银青光禄大夫迁殿中少监建言厩马多请分收陇右省关畿刍调授荆州长史四迁京兆尹封安平县侯坐赃为御史李如璧所劾贬歙县丞后历殿中监进中山郡公说执政荐为御史大夫帝不许遂为左羽林大将军俄授太常卿自以处朝廷久每入谒必与尚书齿时谓尚书里行终潞州长史谥曰襄

△王琚

王琚怀州河内人少孤敏悟有才略明天文象纬以从父隐客尝为凤阁侍郎故数与贵近交时年甫冠见驸马都尉王同皎同皎器之会谋刺武三思琚义其为即与周璟张仲之等共计事泄亡命自佣于扬州富商家识非庸人以女嫁之厚给以贄睿宗立琚自言本末主人厚贄使还长安玄宗为太子闲游猎韦杜闲休树下琚以儒服见且请过家太子许之至所庐乃萧然窳陋坐久杀牛进酒殊丰厚太子骇异自是每到韦杜辄止其庐初太子在路州襄城张暉为铜鞮令性豪殖喜宾客弋猎事厚奉太子数集其家山东倡人赵元礼有女善歌舞得幸太子止暉第其后生子瑛者也太子己平内难召暉拜宫门郎与姜皎崔涤李令问王守一薛伯阳等并侍左右令问累擢殿中少监守一太仆少卿此数人以东宫皆势重天下琚是时方补诸暨县主簿过谢东宫至廷中徐行高视侍卫呵止曰太子在琚曰在外惟闻太平公主不闻有太子太子本有功于社稷孝于君亲安得此声太子遽召见琚曰韦氏躬行杀逆天下动摇人思李氏故殿下取之易也今太平凶狡无比左右大臣多为其用天子以元妹能忍其过臣窃为殿下寒心太子命坐且泣曰计将安便琚曰诚召张说刘幽求郭元振等计之忧可纾也太子曰先生何以自隐而日与寡人游琚曰臣善丹砂且工谐隐愿比优人太子喜恨相知晚翌日授詹事府司直内供奉兼崇文学士日与诸王及姜皎等入侍独琚常豫秘谋不踰月迁太子舍人兼谏议大夫太子授内禅擢中书侍郎公主谋益甚时刘幽求张暉皆得罪琚见事迫请帝决策先天二年七月乃与岐王薛王姜皎李令问王毛仲王守一以铁骑至承天门太上皇闻外哗噪召郭元振升承天楼闭关以拒侍御史任知古在朝堂募数百人不得人少选琚从帝至楼下诛萧至忠岑羲窦怀贞常元楷李慈北阙下贾膺福李猷于内容省事平琚进户部尚书封赵国公皎工部尚书楚国公毛仲辅国大将军霍国公守一太常卿晋国公各食实户五百令问殿中监宋国公实户三百琚皎令问辞不就以旧官增户二百帝召燕内殿赐金银杂皿皆一床帛二千第一区帝于琚眷委特异豫大政事时号内宰相每见阁中视日薄乃得出遇休日使者至第召之而皇后亦使尚宫劳琚母赐贄接足羣臣不能无望或说帝曰王琚麻嗣宗皆譎诡纵横可与履危不可与共安天下己定宜益求纯朴经术士以自辅帝稍疏之俄拜御史大夫持节巡天兵以北诸军改紫微侍郎未至拜泽州刺史削封户百厯九刺史复封户又改六州二郡琚性豪侈其处方面受馈遗至数百万侍儿数十宝帐备具阖门三百口既失志稍自放不能遵法

度在州与官属小史酋豪饮谑樗博藏钩为乐每徙官
车马数里不绝从宾客女伎驰弋凡四十年李邕故与琚善皆华省外迁书疏往复以谴
谪留落为嫌李林甫恨琚恃功使气欲除之使人劾发
琚宿赃削封阶贬江华员外司马又使罗希奭深按其罪琚惧仰药不及死希奭缢之时
人哀其无罪始琚为中书侍郎母居洛阳来京师让琚
曰尔家上世皆州县职今汝无攻城野战劳以谄佞取容海内切齿吾恐汝家坟墓无人
复扫除也琚卒不免宝应元年赠太子少保太平之诛
张暉召还为大理卿封邓国公实封户三百进京兆尹入侍宴乐出主京邑时人以为宠
然自以干治称累迁太子詹事判尚书左右丞再为羽
林大将军三至左金吾大将军以年高加特进子履冰季良弟晤仕皆清近暉尝还乡上
冢帝赐诗及锦袍繒彩乘驿就道敕州县供馔卒年九
十赠开府仪同三司履冰历金吾将军季良殿中监

△王毛仲

王毛仲高丽人父坐事没为官奴生毛仲长事临淄王王出潞州有李守德者为人
奴善骑射王市得之并侍左右而毛仲为明悟景龙中
王还长安二人常负房箬以从王数引万骑帅长及豪俊赐饮食金帛得其驩心毛仲晓
旨亦布诚结纳王嘉之韦后称制令韦播高嵩为羽林
将军押万骑以苛峭树威果毅葛福顺陈玄礼诉于王王方与刘幽求等谋举大计幽求
讽之皆愿効死遂入讨韦氏守德从帝止苑中而毛仲
匿不出事定数日乃还不之责例擢将军王为皇太子以毛仲知东宫马驼鹰狗等坊不
旬岁至大将军阶三品与诛萧至忠等以功进辅国大
将军检校内外闲厩知监收使进封霍国公实户五百与诸王及姜皎等侍禁中至连榻
而坐帝暂不见惘惘若有失见则释然开元九年诏持
节为朔方道防御讨击大使与左领军大总管王峻天兵军节度使张说幽州节度使裴
奂先等数计事毛仲始见饰擢颇持法不避权贵两管
万骑及闲厩官吏惮之无取犯于牧事尤力婉息不訾初监马二十四万后乃至四十三
万牛羊皆数倍蒔苜蓿千九百顷以御冬市死畜
售绢八万募严道僦僮千口为牧圉检勒刍菽无漏隐岁赢数万石从帝东封取牧马数
万匹每色一队相闲如锦绣帝才之还加开府仪同三
司自开元后唯王仁皎姚崇宋璟及毛仲得之然资小人志既满不能无骄遂求为兵部
尚书帝不悦毛仲鞅鞅又与葛福顺为姻家而守德及
左监门将军卢龙子唐地文左右威卫将军王景耀高广济数千人与毛仲相倚仗为奸
毛仲恃旧最不法中使至其家称诏毛仲不甚恭位卑
者或踞见迕意即侮谗以气凌之高力士杨思最等衔之尝生子帝命力士就赐仍授子

五品官还问曰毛仲喜乎力士奏毛仲熟视臣曰是子亦何辱三品官帝大怒力士等知帝怒它日从容曰北门奴官皆毛仲所与不除之必起大患后毛仲移书太原索甲仗少尹严挺之以闻帝恐毛仲遂乱匿其状十九年有诏贬灊州福顺璧州守德严州卢龙子唐地文振州王景耀党州高广济道州并为别驾员外置毛仲四子悉夺官贬恶地缘坐数十人有诏缢毛仲于零陵守德位武卫将军尝遇故主于道主走避守德命左右迎之至第亲上食奉酒主流汗不敢当数日入奏曰臣蒙国恩过分而故主无寸禄请解官授之帝嘉其志擢为郎将

陈元礼

陈元礼

陈元礼宿卫宫禁以淳笃自检帝尝欲幸虢国夫人第谏曰未宣敕不可轻去就帝为止后在华清宫正月望夜将出游复谏曰宫外旷野无备豫陛下必出游愿归城阙帝不能夺安禄山反谋诛杨国忠阙下不克至马嵬卒诛之从入蜀还封蔡国公及李辅国迁帝西内元礼以老卒

钦定续通志卷二百二十七

●钦定续通志卷二百二十八 列传二十八

列传

唐 【二十八】

○唐二十八

魏元忠 韦安石【陟 斌 叔夏 绛 抗】 郭元振

魏元忠

韦安石

郭元振

△魏元忠

魏元忠宋州宋城人为太学生跌荡少检久不调整屋人江融晓兵术元忠从之游尽传所学仪凤中吐蕃数盗边元忠上封事洛阳宫言命将用兵之要曰天下之柄有二文武而已至制胜御人其道一也今言武者先骑射而不稽之以权略言文者首篇章而不取之以经纶养由基射能穿札不止鄢陵之奔陆机识能辨亡无救河桥之败本末之效断可知矣夫才生于世世实须才何世而不生才何才而不资世故物有不求未有无物之岁士有不用未有无事之时汉拜韩信举军惊笑蜀用魏延羣臣觖望此富贵者易为善贫贱者难为功也昔汉文帝时魏尚李广并身任边将位为郡守夫以李广才气天下无双尔时胡骑冯陵足申其用而文帝

不能大任反叹其生不逢时削魏尚之爵而罚作之乃
远想廉颇李牧此身为时主所知而不得尽其才也晋羊祜献计平吴贾充荀勖沮之祜
叹曰天下事不如意十常七八缘荀贾不同竟不大举
此位据立功之地而不获展其志也况布衣韦带之人怀奇抱策上书阙下望朝奏而夕
召岂易得哉臣愿历访文武五品以上得无有智如羊
祜武如李广而不得骋其才略者乎使各言其志毋令久失职又曰语有之人无常俗政
有治乱军无常胜将有能否由此观之安边境立功名
在于良将也且上智下愚明暗异等多算少谋众寡殊科故魏用栢直以拒汉韩信轻为
竖子燕任慕容评以抗秦王猛谓之奴才今朝廷用人
类取将门子弟亦有死事之家而蒙抽擢者此等本非干略若之何使当问外之任哉且
建功者言其所济不言所起言其所能不言所藉若陈
汤吕蒙马隆孟观悉出贫贱而勋伐甚高不闻其家世将帅也故阴阳不和擢士为相蛮
貊不共拔卒为将今以四海之广亿兆之众其中岂无
卓越奇绝之士臣恐未之思也夫何远之有又曰赏者礼之基罚者刑之本礼崇谋夫竭
其能赏厚义士轻其死刑正君子勗其心罚重小人惩
其过赏罚者军国之纲纪政教之药石吐蕃本非勍敌而薛仁贵郭待封至弃甲丧师脱
身以免国家宽政罪止削除漏网吞舟何以过此虽陛
下迟念旧恩顾收后效然朝廷所少岂此一二人乎夫赏不劝谓之止善罚不惩谓之纵
恶臣诚疏贱干非其事岂欲闲陛下君臣生厚薄哉正
以刑赏一亏百年不复今罚既不行赏复难信故议者皆谓此日征行虚立赏格而无其
实良由中才之人不识大体恐赉勋庸竭府库留意锥
刀以为益国所谓惜毫厘失千里者也自苏定方平辽东李绩破平壤赏既不行勋亦淹
滞岁月纷淆真伪相错臣以吏不奉法慢自京师伪勋
所由主司之过其则不远近在尚书省中然未闻斩一台郎戮一令史使天下闻知陛下
何照远而不照近哉神州化首文昌政本治乱攸在臣
故冒死而言夫明鉴所以照形往事所以知今臣请借今以为喻贞观中万年尉司马玄
景舞文邀利弃之都市后征高丽总管张君又击贼不
进斩之旗下臣以为伪勋之罪多于玄景仁贵等败重于君又向使早诛仁贵待封则诸
将岂敢失利于后哉慈父多败子严家无格虏此言虽
小可以喻大又今之将吏率多贪暴所务惟狗马财物无赵奢吴起散金养士之风以此
行军臣恐戎敌之平未可旦夕望也又师行必藉马力
不数十万不足与虏争臣请天下自王公及齐人挂籍之口人税百钱又弛天下马禁使
民得乘大马不为数限官籍其凡勿使得隐不三年人
闲畜马可五十万即诏州县以所税口钱市之若王师大举一朝可用且虏以骑为疆若

一切使人乘之则市取其良以益中国使得渐耗亦国家之利也高宗善之授秘书省正字直中书省仗内供奉迁监察御史帝常从容曰外以朕为何如主对曰周成康汉文景也然则有遗恨乎曰有之王义方一世豪英而死草莱议者谓陛下不能用贤帝曰我适用之闻其死顾已无及元忠曰刘藏器行副于才陛下所知今七十为尚书郎徒叹彼而又弃此帝默然惭又明年迁殿中侍御史徐敬业举兵诏元忠监李孝逸军至临淮而偏将雷仁智军败孝逸惧其锋未敢前元忠曰公以宗室将天下安危所系且海内承平日久闻狂狡窃发皆注心倾耳以待其诛今军不进使远近解情万一朝廷以他将代公将何辞以逃逗挠之罪孝逸然之乃部分进讨时敬业保下阿溪弟敬猷屯淮阴咸请先击下阿下阿败淮阴自破今淮阴急敬业必救是腹背受敌也元忠曰不然贼劲兵尽守下阿利在一决万一失捷则大事去矣敬猷博徒不知战且兵寡易摇大军临之其势必克既克敬猷乘胜而进彼引救不及又恐我之直捣江都必邀我于中路吾乃以逸击劳破之必矣譬之逐兽弱者先擒今舍必擒之弱而趋难敌之强非计也孝逸乃引兵击淮阴敬猷脱身遁遂进击敬业平之还授司刑正迁洛阳令陷周兴狱当死以平杨楚功得流岁余为御史中丞复为来俊臣所构将就刑神色不动前死者宗室子三十余尸相枕籍元忠顾曰大丈夫行居此矣俄敕凤阁舍人王隐客驰骑免死传声及于市诸囚欢叫元忠独坚坐左右命起元忠曰未知实否既而隐客至宣诏已乃徐谢亦不改容流费州复为中丞岁余陷侯思止狱仍放岭南酷吏诛人多讼元忠者乃诏复旧官因侍宴武后曰卿累负谤铍何耶对曰臣犹鹿也罗织之吏如猎者苟须臣肉为羹耳彼将杀臣以求进臣顾何辜圣历二年为凤阁侍郎同凤阁鸾台平章事俄检校并州长史天兵军大总管以备突厥迁左肃政台御史大夫兼检校洛州长史治号威明张易之家奴暴百姓横甚元忠笞杀之权豪惮服俄为陇右诸军大使以讨吐蕃又为灵武道行军大总管御突厥元忠驭军持重虽无赫然功而亦未尝败中宗在东宫为检校左庶子时二张势倾朝廷元忠尝奏曰臣承先帝之顾且受陛下厚恩不能狗忠使小人在君侧臣之罪也易之等恨怒因武后不豫即共谓元忠与司礼丞高戡谋挟太子令天下遂下制狱诏皇太子相王及宰相引元忠等廷辩不能决昌宗乃引张说为证说初伪许之至是迫使言状不应后又促之说曰臣不闻也易之等遽曰说与同逆说曩尝谓元忠为伊周夫伊尹放太甲周公摄王位此反状明甚说曰易之昌宗安知伊周臣乃能知之伊尹周公历古以为忠臣陛下用宰相不遣学伊周将何效焉且臣

岂不知附易之立取台衡附元忠立致灭族但惧元忠
之冤不敢面欺耳后寤其谗然重违易之故贬元忠高要尉中宗复位召为卫尉卿同中
书门下三品不阅旬迁兵部尚书进侍中武后崩帝居
丧军国事委元忠裁可拜中书令封齐国公神龙二年为尚书右仆射知兵部尚书当朝
用事羣臣莫敢望谒告上冢诏宰相诸司长官祖道上
东门赐锦袍给千骑四人侍赐银千两元忠到家于亲戚无所赈施及还帝为幸白马寺
迎劳之安乐公主私请废太子求为太女帝以问之元
忠元忠曰公主而为太女驸马都尉当何名主恚之曰山东木强安知礼阿母子尚为天
子我何嫌宫中谓武后为阿母子故主称之元忠固称
不可乃止武三思用事韦月将高轸上书言其恶帝擄杀之后莫敢言王同皎谋诛三思
不克反被族元忠居其闲依违无所建明初元忠相武
后有清正名天下倾望冀干正王室武后之崩也三思矫遗制慰谕之赐实封百户元忠
捧制感咽涕泗见者曰事去矣至是誉望大减陈郡男
子袁楚客者【通鉴作酸枣尉】以书规之曰主上新服厥命维新厥德当进君子退
小人以兴大化岂可安其荣宠循默而已今不早建太
子择师傅而辅之一失也公主开府置僚属二失也崇长缙衣使游走权门借势纳赂三
失也俳优小人盗窃品秩四失也有司选进贤才皆以
货取势求五失也宠进宦者殆满千人为长乱之阶六失也王臣贵戚赏赐无度竞为侈
靡七失也广置员外官伤财害民八失也先朝宫女得
自便居外出入无禁交通请谒九失也左道之人荧惑主听盗窃禄位十失也凡此十失
者君侯不正谁与正之哉元忠得书益惭【谨按通
鉴辑览 御批元忠素负重望颇能不为利害动心乃自岭表召还顿改前辙捧制感
咽时名节扫地盖不特酸枣尉责以十失已知其无能
为矣行百里者半九十里晚节可不慎哉】以三思权专思有以诛之会节愍太子起兵
与闻其谋太子已诛三思引兵走阙下元忠子太仆少
卿升遇于永安门太子胁使从战已而被杀议者未辨逆顺元忠诵言曰既诛贼谢天下
虽死鼎镬所甘心惟皇太子没为恨耳帝以其尝有功
且为高宗武后素所礼置不问宗楚客纪处讷大怒固请夷其族不听元忠不自安上政
事及国封诏以特进齐国公致仕朝朔望楚客等引姚
廷筠为御史中丞暴奏反状由是贬渠州司马杨再思李峤皆傅致元忠罪唯萧至忠议
当申宥之楚客复遣再思与冉祖雍奏元忠缘逆不宜
处内地监察御史袁守一固请行诛遂贬务川尉守一又劾天后尝不豫狄仁杰请陛下
监国元忠止之此其逆久萌帝谓杨再思曰事君者当
一其心岂有主上小疾遽请太子知事者朕未见元忠过也元忠至涪陵卒年七十余景

龙四年赠尚书左仆射齐国公本州岛刺史睿宗诏陪葬

定陵以实封一百五十户赐其子晃开元六年谥曰贞元忠始名真宰以诸生见高宗高宗慰遣不知谢即出仪奉自安帝目送之谓薛元超曰

是子未习朝廷仪然名下不虚意谓是真宰相也避武后母讳改今名

△韦安石

韦安石京兆万年人曾祖孝宽为大司空郟国公祖津大业末为民部侍郎与元文都等留守洛拒李密战上东门为密禽密败复归洛世

充平高祖素与津善授谏议大夫检校黄门侍郎陵州刺史卒父琬仕为成州刺史安石举明经调干封尉永昌元年迁雍州司兵参军苏良嗣

当国谓安石大才当大用徒劳州县可乎荐于武后擢膳部员外郎迁并州司马有善政后手制劳问陟拜德郑二州刺史安石性方重不苟言

笑其政尚清严吏民尊畏久视中迁文昌右丞以鸾台侍郎同凤阁鸾台平章事兼太子左庶子仍侍读寻知纳言事时二张及武三思宠横安

石数折辱之会侍宴殿中易之引蜀商宋霸子等博塞后前安石跪奏商等贱类不当戏殿上顾左右引出坐皆失色后以安石辞正改容慰勉

凤阁侍郎陆元方自以为不及退告人曰韦公真宰相后尝幸兴泰宫议趋疾道安石曰此道板筑所成非自然之固千金子且诚垂堂况万乘

可轻乘危哉后为回辇长安二年同凤阁鸾台三品俄又知纳言检校扬州大都督府长史神龙元年罢政事俄复同三品迁中书令兼相王府

长史封郟国公赐封三百户加特进为侍中中宗与韦后以正月望夜幸其第赉赐不赀帝尝幸安乐公主池主请御船安石曰御轻舟乘不测

非帝王事乃止睿宗立授太子少保改封郟国复为侍中中书令进开府仪同三司太平公主有异谋欲引安石数因其壻唐峻邀之拒不往帝

一日召安石曰朝廷倾心东宫卿胡不察对曰太子仁孝天下所称且有大功陛下今安得亡国语此必太平公主计也帝矍然曰卿勿言朕知

之主窃闻乃构飞变欲讯之赖郭元振保护免迁尚书右仆射兼太子宾客同三品俄罢政事留守东都会妻薛怨壻婢笞杀之为御史中丞杨

茂谦所劾下迁蒲州刺史徙青州安石在蒲太常卿姜皎有所请拒之皎弟晦为中丞以安石昔相中宗受遗制而宗楚客韦温坛削相王辅政

语安石无所建正讽侍御史洪子舆劾举子舆以更赦不从监察御史郭震奏之有诏与韦嗣立赵彦昭等皆贬安石为汪州别驾皎又奏安石

护作定陵有所盗没诏藉其赃安石叹曰祇须我死乃已发愤卒年六十四开元十七年赠蒲州刺史天宝初加赠左仆射郟国公谥文贞二子

陟斌

韦陟

韦斌

韦叔夏

韦绛

韦抗

韦陟

陟字殷卿与弟斌俱秀敏神龙二年安石为中书令陟甫十岁授温王府东阁祭酒朝散大夫善文辞书有楷法一时知名士皆与游开元中居丧以父不得志歿乃与斌杜门不出八年亲友更往敦晓乃强出为洛阳令宋璟见陟叹曰盛德遗范尽在是矣累除礼部郎中中书令张九龄引为舍人与孙逖梁陟并司书命时号得才迁礼部侍郎陟于鉴裁尤长故事主司取人以一日试为高下陟许自通所工先就其能试之已乃程考由是无遗材迁吏部侍郎选人多伪集与正调相冒陟风采严正擿辨无不首伏每岁黜正数百员号为精敏自以才地可坐阶三公居常简贵视僚党警然其以道谊合虽后进布衣与均礼李林甫忌之出为襄阳太守徙河南采访使以判官员锡善讯覆支使韦元甫工书奏时号员推韦状陟皆倚任之俄袭郇国公坐事贬守锺离义阳后为河东太守兼本道采访使以失职内怏怏颇饷谢权幸欲自结天宝十二载入考华清宫杨国忠恶其才望讽拾遗吴豸之使发陟罪豸之乃劾陟馈遗事国忠又使韦元忠左验陟惶悸赂吉温求掾由是俱得罪陟贬桂岭尉【按通鉴以此为十二载事盖陟以十二载诣行在二贬官则右明年也】再贬平乐会安禄山陷洛阳弟斌没贼国忠欲构陟与贼通密谕守吏令胁陟使忧死州豪杰共说曰昔张说被窜匿陈氏以免今若诏书下谁敢庇公愿公乘扁舟遁去事寔乃出不亦美乎陟慨然曰命当尔其敢逃刑因坚卧不出岁余肃宗即位起为吴郡太守会永王兵起委陟招谕乃授御史大夫江东节度使与高适来瑱会安州陟为载书登坛誓众辞旨慷慨士皆陨泣永王败帝趣陟赴凤翔初季广琛从永王乱非其本谋陟表广琛为历阳太守慰安之至是恐广琛有后变乃驰往慰谕而后赴征帝雅闻陟名欲倚以相及是迁延疑有顾望意止除御史大夫会杜甫上表论房管词意迂慢帝令陟与崔光远颜真卿按之陟奏甫言虽狂不失谏臣体帝繇是疏之将军王去荣杀其本县令帝将宥之陟又以为不可时朝臣着位不肃殿中有相吊哭者帝以陟不任职用颜真卿代之更拜吏部尚书久之宗人伐墓栢坐不相教贬絳州刺史迁授太常卿吕諲入辅荐为礼部尚书东京留守史思明逼伊洛李

光弼议守河阳陟率东京官属入关避之诏授吏部尚书就保永乐不许至京卒年六十五赠荆州大都督陟早有名而为林甫国忠摈废及肃宗择相自谓必得以后至不用郁郁不得志疾且卒叹曰吾道穷于此乎性侈纵喜饰服马侍儿阉童列左右常数十倍于王宫主第穷治饌羞择膏腴地艺谷麦以鸟羽择米每食视庖中所弃其直犹不减万钱宴公侯家虽极水陆曾不下筯常以五采笺为书记使侍妾主之陟惟署名自谓所书陟字若五朵云时号郇公五云体永泰元年赠尚书左仆射太常博士程皓议谥忠孝颜真卿以为许国养亲不两立不当合二行为谥主客员外郎归崇敬亦驳正之右仆射郭英义卒用太常议云

韦斌

斌父为相时授太常通事舍人少修整好文艺容止严峭有大臣体与陟齐名开元中薛王业以女妻之迁秘书丞天宝中为中书舍人兼集贤院学士改太常少卿李林甫构韦坚狱斌以宗累贬巴陵太守移临汝久之拜银青光禄大夫列五品时陟守河东而从兄由为右金吾卫将军绦为太子少师四第同时列戟衣冠罕比者禄山陷洛阳斌为贼得署以黄门侍郎忧愤卒干元元年赠秘书监斌天性质厚每朝会不敢离立笑言尝大雪在廷者皆振裾更立斌不徙足雪甚几至鞞亦不失恭子况少隐王屋山孔述睿称之及述睿以谏议大夫召荐况为右拾遗不拜未几以起居郎召半岁辄弃官去徙家龙门除司封员外郎称疾固辞元和初授谏议大夫勉谕到职数月乞骸骨以太子左庶子致仕卒况虽世贵而志冲远不为声利所迁当时重其风操

韦叔夏

叔夏安石兄通礼家学擢明经第历太常博士高宗崩恤礼亡缺叔夏与中书舍人贾大隐博士裴守真譔定其制擢春官员外郎武后拜洛享明堂凡所沿改皆叔夏祝钦明郭山恽等所裁讨每立一议众咨服之累迁成均司业后又诏五礼仪物司礼博士有所修革须叔夏钦明等评处然后以闻进位春官侍郎中宗复位转太常少卿为建立庙社使进银青光禄大夫累封沛郡公国子祭酒卒赠兖州都督修文馆学士谥曰文子绦

韦绦

绦开元时历集贤修撰光禄卿迁太常唐兴礼文虽具然宗庙制度时有缪缺至显庆中许敬宗建言筮豆以多为贵宗庙之数不可踰郊请大祀十二中祀十小祀八大祀中祀簠簋■〈登瓦〉俎皆一小祀无■〈登瓦〉诏可【按唐会要敬宗此奏在永徽二年而新书以为

显庆未知就是】 开元二十二年 【新书于礼器服制二议迭书二十三年知此为二十二年之误也旧书礼仪志作二十二年会要作二十三年通鉴并两事皆系之二十四年今从旧书】 敕令以笾豆之荐未能备物宜诏礼官学士共议以闻绦请宗庙笾豆每室皆加十二又言酌献酒爵制度全小仅无一合执持甚难宜稍大之兵部侍郎张均职方郎中韦述议曰礼天之所生地之所长苟可荐者莫不咸在圣人知孝子之情深而物类无限故为之节使物有品器有数贵贱差降不得踰越左传曰享以训恭俭宴以示慈惠恭俭以行礼慈惠以布政享之与宴犹且异文祭尊所陈固不同矣且人之嗜好本无凭准燕私之饌与时迁移故圣人一约以礼屈到嗜芟屈建不以荐以为不以私欲干国之典今欲取甘旨肥浓皆充祭用苟踰旧制其何极焉虽笾豆有加岂能备也若以今之珍饌平生所习求神无方何必师古是簠簋可去而盘盂栝案当御矣韶濩可息而箜篌笙笛应奏矣且自汉以来诸陵皆有寝宫岁时朔望荐以常饌固可尽孝子之心至宗庙正礼宜依典故又按旧制一升曰爵五升曰散礼称贵者献以爵贱者献以散此贵小贱大以示节俭请如故太子宾客崔沔曰祭祀之典肇于太古人所饮食必先严献未有火化则有毛血之荐未有曲蘖则有元酒之奠施及后王礼物渐备然以神道致敬不敢废也铏俎笾豆簠簋尊壘周人时饌也其用通于燕享宾客周公制礼乃与毛血元酒同荐鬼神国家由礼立训因时制范清庙时享礼饌备进用周制也园寝上食时膳具陈遵汉法也职贡助祭致远物也有新必荐顺时令也苑囿之内躬稼所收搜田之时亲发所中莫不荐而后食尽诚敬也若此至矣复何加焉但当申敕有司无或简怠则浓腴鲜美尽在矣不必加笾豆之数也至于祭器视物所宜故大羹古饌也盛以■〈登瓦〉■〈登瓦〉古器也和羹时饌也盛以铏铏时器也亦有古饌而用时器者故毛血于盘元酒于尊未有进时饌用古器者古质而今文有所不称也礼部员外郎杨仲昌户部郎中杨伯成左卫兵曹参军刘秩等请如旧便帝乃诏太常择品味可增者稍加焉绦又请每室加笾豆各六四时以新果珍羞实之制可又诏献爵用药升一升 【按食货志调钟律测晷景合汤药及冠冕制用小升小两自余公私用大升大两药升即小升也别本作龠升误】 以合古义二十三

年诏书服纪所未通者令礼官学士详议绦上言外祖父母正尊请进至大功九月姨舅侪亲服宜齐等请进舅至小功五月堂姨舅亲舅母古未有服并望加至袒免于于是韦述议曰自高祖至元孙谓之九族由近及远差其轻重遂为五服传曰外亲之服皆缌郑玄曰异姓正服不过缌

外祖父母小功以尊加从母小功以名加舅甥外孙中外昆弟皆依本服总麻若以匹敌外祖则祖也舅则伯叔也父母之恩不殊而独杀于外者有以也禽兽知母而不知父野人则父母等都邑之士则知尊祿大夫学士则知尊祖家无二尊丧无二斩人之所奉不可二也持重于大宗者降其小宗为人后者降其父母女子出嫁杀其本宗盖所存者远所抑者私也今若外祖及舅加服一等堂舅及姨列于本服则中外之制相去几何且五服有上杀之义出于祖者服不得过于祖出于曾祖者服不得过曾祖堂姨舅出于外曾祖若为之服则外曾祖父母外伯叔祖父母亦宜制服矣外祖至大功则外曾祖小功外高祖总推而广之是与本族无异矣且服皆有报则堂甥外曾孙侄女之子皆当制服矣圣人岂薄其骨肉恩爱哉本于公者末于私议有所断不得不然苟可加也亦可减也先王之制谓之彝伦一紊其叙庸可止乎请依仪礼丧服为定杨仲昌又言魏征始议加舅服至小功五月虽征贤也而周孔圣也以贤改圣后学何从外祖父母进至大功则岂无加报于外孙乎外孙而报以大功则本宗之庶孙用何等耶帝手敕曰议既为姨舅服小功则舅母不得全降宜服总堂姨舅宜袒免若谓所服不得过本宗复为外曾祖父母外伯叔父母制服亦何伤皆亲亲意也侍中裴耀卿中书令张九龄礼部尚书李林甫奏言外服无降甥为舅母报之夫之甥既报则夫之姨舅又当服恐所引益疏诏曰姨舅属近以亲言之亦姑伯之匹可曰所引疏耶妇人从夫者也夫于姨舅既服矣从夫而服是谓睦亲卿等宜熟计耀卿等奏言舅母总堂姨舅袒免请准制旨自我为古罢诸儒议制曰可二十六年诏绦每月奏月令一篇每孟月朔日于宣政侧设榻东向置案绦坐读之诸司官长悉升殿坐听岁余罢高宗上元三年将祫享议者以礼纬三年祫五年禘公羊家五年再殷祭二家舛互莫能断决太学博士史璨【新书作史元会要作史元璨】议曰春秋僖公三十三年十二月薨文公二年八月丁卯大享于太庙公羊曰祫也则三年丧毕新君之二年当祫明年当禘羣庙僖公宣公八年皆有禘则后禘距前禘五年以此定之则新君之二年祫三年禘己后五年再殷祭则六年当祫八年当禘昭公十一年齐归薨十三年丧毕当祫为平邱之会冬公如晋至十四年祫十五年禘传曰有事于武宫是也至十八年祫二十年禘二十三年祫二十五年禘昭公二十五年有事于襄公是也则禘后三年而祫又二年而禘合于礼经议遂定睿宗丧毕祫于太庙自后三年一祫五年一禘至开元二十七年经五禘七祫是岁绦奏四月己禘孟冬又祫祭数而黜请以今年夏禘为大祭之源是后二年而冬祫又三

年而夏禘五年再殷周而复始制从之 【按史璨之议依郑康成禘禘志为说禘后三年而禘又二年而禘如此则五年之中止有一禘一禘尔至开元时不用璨议三年一禘五年一禘各自计年不相通数故二十七年而有五禘七禘也六年睿宗丧毕始禘七年始禘推至二十七年应有五禘八禘是岁夏禘已过而冬禘未行故止有七禘也自此以后又明韦绦之议禘后二年而禘又三年而禘五年再祭与史璨议同然璨则前三而后二绦则前二而后三此为异矣新书备记其事而径省其辞于沿革之故全不分明今颇为是正而疏通之】 绦终太子少师

韦抗

抗者安石从父兄子弱冠举明经累官吏部郎中景云初为永昌令不事威刑而治前令无及者迁右御史台中丞邑民诣阙留不听乃立碑着其惠开元三年自太子左庶子为益州长史授黄门侍郎河曲胡康待宾叛诏持节慰抚抗于武畧非所长称疾逗留不及贼而返俄代王峻为御史大夫兼按察京畿授安州都督累迁刑部尚书分掌吏部选卒抗清俭不治产及终无以葬元宗闻之特给槽车赠太子少傅谥曰贞

△郭元振

郭震字符振魏州贵乡人以字显长七尺美须髯少有大志年十六与薛稷赵彦昭同为太学生家尝送资钱四十万会有縗服者叩门自言五世未葬愿假以治丧元振举与之不问名氏稷等叹骇十八举进士为通泉尉任侠使气拨去小节尝盗铸及掠卖部中口千余以饷遗宾客百姓厌苦武后知所为召欲诘责既与语奇之索所为文章上宝剑篇后览嘉叹即授右武卫铠曹参军进奉宸监丞会吐蕃乞和其大将论钦陵请罢四镇兵披十姓之地乃以元振充使因覘虜情还上疏曰臣闻利或生害害亦生利国家所患唯吐蕃与默啜耳今皆和附是将大利于中国也然图之不审害且随之钦陵欲裂十姓地解四镇兵此动静之机不可轻也今若直遏其意恐边患之起必甚于前宜为计以缓之藉事以诱之使彼和望勿绝则恶意亦不得顿生且患在外者十姓四镇是也患在内者甘凉瓜肃是也关陇屯戍向三十年力用困竭脱甘凉有一日警岂堪广调发耶善为国者先料内以敌外不食外以害内然后夷夏晏安升平可保钦陵以四镇近已畏我侵掠此吐蕃之要然青海吐浑密迤兰鄯易为我患斯亦国家之要今宜报钦陵曰四镇本扼诸蕃走集以分其力使不得并兵东侵今委之则蕃力益强易以扰动必实无东侵意当以吐浑诸部及青海故地归于我即俟斤部落亦还吐蕃如此则足杜钦陵之口而和议未绝也且西边诸国款附岁久论其情义岂

可与吐蕃同日语今未知利害未审情实而遽分裂之亦恐伤诸国意非制御之畏算也
后从之又言吐蕃倦徭戍久矣咸愿解和以钦陵欲裂
四镇专制其国故未归欵陛下诚能岁发和亲使而钦陵常不从则其下必怨斯亦离闲
之渐也后然其计后数年吐蕃君臣相猜携卒诛钦陵
而其弟赞婆等来降因诏元振与河源军大使夫蒙令乡率骑往迎授主客郎中久之突
厥吐蕃联兵寇凉州拜元振凉州都督即遣之初州境
轮广纔四百里虏来必傅城下元振始于南硤口置和戎城北磧置白亭军制束要路遂
拓境千五百里自是州无虏忧又遣甘州刺史李汉通
阙屯田尽水陆之利旧凉州粟斛售数千至是岁数登至匹缣易数十斛积军粮支数十
年牛羊被野治凉五岁善抚御夷夏畏慕令行禁止道
不举遗河西诸郡置生祠碣碑颂德神龙中迁左骁卫将军安西大都护西突厥酋乌质
勒部落盛强欵塞愿和元振即其牙帐与计事会大雨
雪元振立不动乌质勒已老数拜伏不胜寒会罢即死其子娑葛以元振计杀其父谋勒
兵袭击副使解琬知之劝元振夜遁元振不听坚卧帐
中为不疑者明日素服往吊道逢娑葛兵虏不意元振来遂不敢逼扬言迎卫进至其帐
修吊赠礼哭甚哀为留数十日助丧事娑葛感义更遣
使献马五千驼二百牛羊十余万制诏元振为金山道行军大总管乌质勒之将阙啜忠
节与娑葛交怨屡相侵而阙啜兵弱不支元振奏请追
阙啜人宿卫徙部落置瓜沙闲诏许之阙啜遂行至播仙城遇经略使周以悌以悌说之
曰国家厚秩待君以部落有兵故也今独行入朝一羈
旅胡人耳何以自全乃教以重宝赂宰相无入朝请发安西兵导吐蕃以击娑葛求阿史
那献为可汗以招十姓请郭虔瓘使拔汗那搜其铠马
以助军既得复讎部落更存阙啜然之即勒兵击于阗坎城下之因所获遣人闲道赍黄
金分遗宗楚客纪处讷使就其谋元振知之上疏曰往
岁吐蕃犯边正以求十姓四镇之地不获故耳比以国多内难人畜疲瘠恐中国乘其敝
故屈志请和非实忘十姓四镇也国力殷足势且必争
今忠节不论国家大计且欲为吐蕃乡导四镇危机恐从此启吐蕃得志忠节亦当在贼
掌股彼岂得复事唐也往吐蕃于国无恩力犹欲争十
姓四镇今若效力树恩则请分于阗疏勒不知以何理抑之且其国诸蛮及婆罗门方自
嫌阻藉令求我助讨亦不知以何辞拒之是以古之贤
人不愿夷狄忘惠非不欲其力惧后求无厌益生中国事也臣愚以为用吐蕃之力不见
其便又请阿史那献者其非以可汗子孙能招绥十姓
乎但献父元庆叔朴罗兄倭子并斛瑟罗及怀道等俱可汗子孙也往者徧曾立之欲以
招抚十姓皆不能致寻自破灭何则此属非有过人之

才思威不足以动众况献又疏远于其父兄乎若兵力足取十姓不必要须可汗子孙也
又请以郭虔瓘搜兵税马于拔汗那往虔瓘已尝与忠
节擅入其国臣时在疏勒不闻得一甲一马而拔汗那挟忿侵扰南导吐蕃将倭子以扰
四镇且虔瓘往至拔汗那国四面无助若履虚邑犹引
倭子为蔽况今北有娑葛知虔瓘之西必引以相援拔汗那倚坚城而抗于内突厥邀伺
于外虔瓘等岂能复如往年得安易之幸哉疏奏不省
楚客等因建遣摄御史中丞冯嘉宾持节安抚阙啜以御史吕守素处置四镇以牛师奖
为安西副都护代元振领甘凉兵召吐蕃并力击娑葛
娑葛之使娑腊知楚客谋驰报之娑葛怒即发兵出安西拔换焉耆疏勒各五千骑于是
阙啜在计舒何与嘉宾会娑葛兵奄至禽阙啜杀嘉宾
又杀吕守素于僻城牛师奖于火烧城遂陷安西四镇路绝元振屯疏勒水上未敢动楚
客复表周以悌代元振且以阿史那献为十姓可汗置
军焉耆以取娑葛娑葛上表请斩楚客且遗元振书自言无仇于唐而楚客等受阙啜金
欲加兵击灭我岂得坐而待死元振奏之楚客大怒诬
元振有异图召将罪之元振使子鸿闲道具奏其状乞留定西土不敢归京师以悌乃得
罪流白州复以元振代之而赦娑葛睿宗立召为太仆
卿将行安西酋长有髡面哭送者旌节下玉门关去凉州犹八百里城中争具壶浆欢迎
都督嗟叹以闻景云二年进同中书门下三品迁吏部
尚书封馆陶县男先天元年为朔方军大总管筑丰安定远城兵得保顿明年以兵部尚
书复同中书门下三品玄宗诛太平公主也睿宗御承
天门诸宰相走伏外省独元振总兵扈帝事定宿中书者十四昔乃休进封代国公实封
四百户赐一子官物干段俄又兼御史大夫复为朔方
大总管以备突厥未行会玄宗讲武骊山帝怒军容不整引坐熏下将斩之刘幽求张说
跪马前谏曰元振有大功虽得罪当宥乃赦死流新州
开元元年帝思旧功起为饶州司马怏怏不得志道病卒年五十八十年赠太子少保元
振虽少雄迈及贵居处俭约手不置书人莫见其喜愠
朝还对亲欣欣退就室俨如也距国初仕至宰相而亲具者唯元振云

钦定续通志卷二百二十八

●钦定续通志卷二百二十九 列传二十九

列传

唐 【二十九】

○唐二十九

姚崇【奕 合 勛】宋璟

姚崇

宋璟

△姚崇

姚崇字符之陕州硤石人父善懿 【新书名懿字善懿世系表云字善意】 贞观中为虢州都督崇少倜傥尚气节长乃好学仕为孝敬
挽郎举下笔成章授濮州司仓参军五迁夏官郎中契丹扰河北兵檄填委崇奏决若流
武后贤之即拜侍郎后尝语左右往周兴来俊臣等数
治诏狱朝臣相逮引一切承反朕意其枉更畀近臣临问皆得其手牒不冤朕无所疑即
可其奏自俊臣等诛遂无反者然则向论死得无冤邪
崇曰自垂拱后被告者类自诬当是时以告言为功故天下号曰罗织甚于汉之钩党虽
陛下使近臣覆讯彼尚不自保敢一摇手以悖酷吏意
哉且被问不承则重罹其惨如张虔勖李安静等皆是也今赖天之灵发寤陛下凶竖歼
夷朝廷又安今日己后臣以一门百口保内外官无复
反者乞陛下得告牒置弗推若后反逆有实臣请坐知而不告之罪后悦曰前宰相务顺
可陷我为淫刑主闻公之言乃得朕心赐银千两圣历
元年 【新书本传作三年误】 进同凤阁鸾台平章事迁凤阁侍郎长安四年以母老
请纳政诏拜相王府长史归侍疾 【宰相表四年六
月罢为相王府长史旧书亦同新书本传兼相王府长史在归养之前未知其审】 月余
复兼夏官尚书同凤阁鸾台三品崇建言臣事相王而
夏官本兵臣非惜死恐不益王乃诏改春官张易之私有请于崇崇不纳易之譖于后降
司仆卿犹同凤阁鸾台三品出为灵武道大总管张柬
之等谋诛二张崇适自屯所还遂参计议以功封梁县侯实封二百户后迁上阳官中宗
率百官起居王公更相庆崇独流涕柬之等曰今岂涕
泣时邪恐公祸由此始崇曰比与讨逆不足以语功然事天后久违旧主而泣亦人臣终
节也由此获罪甘心焉俄为亳州刺史历宋常越许四
州睿宗立拜兵部尚书同中书门下三品进中书令玄宗在东宫太平公主干政宋王成
器等分典闲厩禁兵崇与宋璟建请主就东都出诸王
为刺史以一人心帝以谓主主恐太子惧上疏以崇等憇闲王室请加罪贬为申州刺史
移徐潞二州迁扬州长史政条简肃人为纪德于碑徙
同州刺史先天二年玄宗讲武新丰故事天子行幸牧守在三百里者得诣行在时帝亦
密召崇见之甚欢因咨天下事衮衮不知倦帝曰卿宜
遂相朕崇知帝大度锐于求治乃先设事以坚帝意即阳不谢帝怪之崇因跪奏臣愿以
十事闻陛下度不可行臣敢辞帝曰试为朕言之崇曰
垂拱以来以峻法绳下臣愿政先仁恕可乎朝廷覆师青海未有牵复之悔臣愿不幸边
功可乎比来任佞冒触宪网皆得以宠自解臣愿法行

自近可乎后氏临朝喉舌之任出阉人之口臣愿宦竖不与政可乎戚里贡献以自媚于上公卿方镇寢亦为之臣愿租赋外一绝之可乎外戚
贵主更相用事班序荒杂臣请戚属不任台省可乎先朝褻狎大臣亏君臣之严臣愿陛下接之以礼可乎燕钦融韦月将以忠被罪自是诤臣
沮折臣愿羣臣皆得批逆鳞犯忌讳可乎武后造福先寺上皇造金仙玉真二观费巨百万臣请绝道佛营造可乎汉以禄莽阎梁乱天下国家
为甚臣愿推此鉴戒为万代法可乎帝曰朕能行之崇乃顿首 【谨按通鉴辑览 御批姚崇以十事坚上意史书皆为艳称今就其事核
之曰不幸边功而薛讷王峻何以屡致败衄曰宦竖不与政事而高力士杨思勳何以宠任不衰且崇于玄宗之不应惧而趋出赖高力士为之
周旋更私出道士语崇心乃安则崇之所要与玄宗之所谓能行者果安在而崇岂真能不结内侍者哉】 翌日拜兵部尚书同中书门下三品
进封梁国公迁紫微令固辞实封乃停旧食赐新封百户先是中宗时公主外戚皆奏度僧尼温户强丁因避赋役至是崇建言佛不在外悟之
于心行事利益使苍生安稳是谓佛理乌用奸人以汨真教帝善之诏天下汰僧伪滥万二千余人崇尝于帝前序次郎吏帝仰视殿屋再三言
之卒不荅崇惧趋出内侍高力士曰陛下新即位宜与大臣裁可否今崇亟言柰何不一省察帝曰我任崇以政大事吾当与决至用郎吏崇顾
不能而重烦我邪会力士宣事至省中为道上语崇乃安由是进贤退不肖而天下治开元四年 【按旧书本纪三年四年皆有崇奏请捕蝗
事通鉴亦分载之新书并入四年盖承旧传之误】 山东大蝗民不敢捕崇奏诗云秉彼螽蟊付畀炎火汉光武诏曰勉顺时政劝督农桑去彼
螟蟊以及螽蟊此除蝗义也且蝗畏人易驱又田皆有主使自救其地必不惮勤请夜设火坎其旁且焚且瘞乃可尽乃出御史为捕蝗使分道
杀蝗汴州刺史倪若水上言除天灾者当以德昔刘聪除蝗不克而害愈甚拒御史不应命崇牒报若水曰刘聪伪主德不胜袄今日圣朝袄不
胜德古者良守蝗不入境若其修德可免彼岂无德致然坐视不救因以无年刺史其谓何若水惧乃纵捕蝗十四万石时议者喧哗帝疑复以
问崇对曰今蝗满山东日渐蕃息河南河北家无宿藏一不收获则流离相踵安危所系何可不图纵使除之不尽犹胜养以成灾帝然之卢怀
慎曰杀虫太多恐戾和气愿公思之崇曰昔楚王吞蛭而愈疾叔敖断蛇以致福今蝗幸可驱若纵之谷且尽如百姓何杀虫救人祸归于崇不
以诿公也蝗害乞息于是帝方躬万几朝夕询逮它宰相畏帝威决皆谦惮唯独崇佐裁决故得专任会怀慎卒崇病店移告凡大政事帝必令

源干曜就咨焉干曜所奏善帝则曰是必崇画之有不合则曰胡不问崇干曜谢其未也乃已帝欲崇自近诏徙寓四方馆日遣问食饮起居尚医尚食踵道崇以馆局华大不敢居帝使语崇曰恨不使卿处禁中此何足辞久之紫微史赵诲受夷人赍当死崇素亲倚署奏营减帝不悦时曲赦京师特敕杖诲流岭南崇惶惧上还宰政引宋璟自代乃以开府仪同三司罢政事帝将幸东都而太庙屋自坏帝问宰相宋璟苏颋同对曰三年之丧未终不可以行幸坏压之变天所以示教戒陛下宜停东巡修德以答天谴帝以问崇对曰隋取符坚故殿以营庙而唐因之木久当毁偶与行会何足异也且陛下以关中无年输饷告劳因幸东都百司供拟既具不可失信臣以为旧庙难复完可奉神主于太极殿更作新庙以申诚敬车驾依前进发帝曰卿言正契朕意赐绢二百匹诏所司如崇言天子遂东因诏五日一参入阁供奉八年授太子少保以疾不拜明年卒年七十二赠扬州大都督谥曰文献遗令诫子孙薄葬勿用浮屠法十七年追赠太子太保崇尤长吏道处决无淹思三为宰相常兼兵部故屯戍斥候士马储械无不谙记玄宗初立宾礼大臣故老雅尊遇崇每见便殿必为之兴去辄临轩以送它相莫如也时承权戚干政之后纲纪大坏先天末宰相至十七人台省要职不可数崇常先有司罢冗职修制度择百官各当其材繇是天子责成于下而权归于上矣然资权谄始为同州张说以素憾讽赵彦昭刻崇及当国说惧潜诣岐王申款崇它日朝众趋出崇曳踵为有疾状帝问损足乎对曰臣心有忧痛不在足问以故曰岐王陛下爱弟张说辅臣而密乘车出入王家恐为所误故忧之于是出说相州魏知古崇所引及同列稍轻之出摄吏部尚书知东都选知古憾焉时崇二子在洛通宾客馈遗凭旧请托知古归悉以闻他日帝召崇曰卿子才乎皆安在崇揣知帝意曰臣二子分司东都其为人多欲而寡慎是必尝以事干魏知古臣未及问之帝始以崇必为其子隐及闻乃大喜问安从得之对曰知古臣所荐也臣子必谓其见德而请之帝于是爱崇不私而薄知古欲斥之崇曰臣子无状挠陛下法而逐知古外必谓陛下私臣乃止然卒罢为工部尚书崇始名元崇以与突厥啗刺同名武后时以字行至开元世避帝号更以今名 【谨按通鉴辑览 御批崇之改名真所谓不通经义夫开元乃年号非讳名可比且尊号有嗣世递加者势必至无名可取又崇直韩愈二名嫌名之讥足以尽之】三子彝异奕皆至卿刺史

姚奕

姚合

姚勔

姚奕

奕少修谨崇欲使习知吏部故自右千牛进至太子舍人皆平迁开元中有事五陵有司以鹰犬从奕曰非礼也奏罢之请治剧为睢阳太守召授太仆卿后为尚书右丞子闾【按旧书以闾为彝子新书世系表以为异子本传又以为奕子未知孰是】居右相牛仙客幕府仙客病甚闾强使荐奕及卢奂为宰相仙客妻以闻闾坐死奕贬永阳太守卒曾孙合勔【按世系表以勔为彝之曾孙合为崇弟元表之曾孙与本传异】

姚合

合元和中进士及第调武功尉善讨世号姚武功者迁监察御史累转给事中奉先冯翊二县民诉牛羊使夺其田诏美原主簿朱侑覆按猥以田归使合劾发其私以地还民历陕虢观察使终秘书监

姚勔

勔字斯勤长庆初擢进士第数为使府表辟进监察御史佐盐铁使务累迁谏议大夫更湖常二州刺史为宰相李德裕厚善及德裕为令狐绀等譖遂摛索支党无敢通劳问既居海上家无资病无汤剂勔数馈饷候问不傅时为厚薄终夔王传

△宋璟

宋璟邢州南和人七世视弁为元魏吏部尚书璟耿介有大节好学工文辞举进士中第调上党尉为监察御史迁凤阁舍人居官鲠正武后高其才张易之诬御史大夫魏元忠有不臣语引张说为验将廷辩说惶遽璟谓说曰名义至重不可陷正人以求苟免缘此受谪芬香多矣若有不测吾且叩合救将与子偕死说感其言以实对元忠免死璟后迁左台御史中丞会飞书告张昌宗引相工观吉凶者璟请穷治后曰昌宗已自言于朕璟曰昌宗事露始自陈且谋反大逆无容首免请正国法后温言解之璟声色愈厉曰昌宗分外承恩臣知言出祸从然义激于心虽死不恨后不怵姚璿【旧书及通鉴俱作杨再思】遽传诏令出璟曰天颜咫尺亲奉德音不烦宰相擅宣王命后不得已遣昌宗诣台璟庭立而按之事未毕特诏原之敕昌宗诣璟谢璟不见曰公事公言之若私见法无私也叹曰不先击豎子脑裂负此恨矣【新旧书并云收按易之等通鉴考异云璟止鞠昌宗占相事耳无缘及易之今据改】尝宴朝堂二张列卿三品璟阶六品居下坐易之谄事璟虚位揖曰公第一人何下坐璟曰才劣品卑卿谓第一何邪是时朝廷以易之等内宠不名其官呼易

之五郎昌宗六郎郑善果谓璟曰公柰何谓五郎为卿
璟曰以官正当为卿君非其家奴何郎之云自是易之等积怨常欲中伤后知之得免尝
诏按狱扬州辞曰此监察御史职也又诏按幽州都督
屈突仲翔璟言御史中丞非军国大事不出使仲翔罪止赃今使臣往此必有危臣者既
而诏副李峤使陇蜀璟复言陇右无变臣以中丞副李
峤非朝廷故事终辞易之初冀璟出则劾奏诛之计不得行俄二张死乃免 【按新书云
二张伺璟家婚礼将遣客刺杀之有告璟者璟乘庖
车舍他所刺不得发此事旧书不载盖出御史台记通鉴考异云若实有其迹璟安得不
自陈于太后若无其迹则人妄言耳今不取】 神龙初
为吏部侍郎中宗嘉其直令兼谏议大夫内供奉仗下与言得失迁黄门侍郎武三思怙
宠数有请于璟璟厉答曰今复子明辟王宜以侯就第
安得尚于朝政独不见产禄事乎后韦月将告三思乱宫掖三思讽有司论大逆不道帝
诏诛之璟请付狱按罪帝怒璟曰人言后私三思陛下
不问即斩之臣恐有窃议者请按而后刑帝愈怒璟曰请先诛臣不然终不奉诏帝乃流
月将岭南会车驾还西京诏璟权检校并州长史未行
又检校贝州刺史时河北水岁大饥三思封邑在贝州专使督其租璟拒不与故为所挤
历杭相二州政清毅吏下无敢犯者迁洛州长史睿宗
立以吏部尚书同中书门下三品玄宗在东宫兼右庶子先是崔湜郑愔典选为戚近千
夺至豫用二年员阙犹不能给更置比冬选流品潘并
璟与侍郎李义卢从愿澄革之铨总平允太平公主不利东宫尝驻辇光范门伺执政以
讽之璟昌言曰太子有大功宗庙社稷主也安得异议
乃与姚崇白奏出公主诸主于外帝不能用贬楚州刺史历兖冀魏三州河北按察使进
幽州都督以国子祭酒留守东都迁雍州长史玄宗开
元初以雍州为京兆府复为尹进御史大夫坐小累为睦州刺史 【按通鉴开元三年璟
坐监朝堂杖轻贬睦州刺史四年始内召旧书本传
为开元初即名拜刑部尚书非也】 徙广州都督广人以竹茅茨屋多火璟教之陶瓦筑
堵列邸肆越俗始知栋梁利而无延烧患召拜刑部尚
书四年迁吏部兼侍中帝幸东都次崤谷驰道隘稽拥车骑帝命黜河南尹李朝隐知顿
使王怡等官璟曰陛下富春秋今始巡守以道不治而
罪二臣繇此相饬后有受其敝者帝遽命舍之璟谢曰陛下向以怒责之以臣言免之是
过归于上而恩在下姑听待罪于朝然后诏还其职进
退得矣帝善之累封广平郡公广人为璟立遗爱颂璟上言臣之治不足纪广人以臣当
国假之光宠成彼谄谀欲革此风望自臣始有诏许停
帝尝命璟与苏颋制皇子名与公主号遂差次所封且诏别择一美称及佳邑封上璟奏

言七子均养诗人所称今若同等别封或母宠子爱恐
伤鸣鸪之平臣不敢奉诏帝叹重其贤皇后父王仁皎卒将葬用昭成皇后父窦孝谌故
事坟高五丈一尺璟与苏颋请如着令帝已然可明日
复诏如孝谌者璟遗诏曰孝谌踰制当时无人极言其失岂可今日复踵而为之贞观时
嫁长乐公主资送欲倍长公主魏征不可太宗欣纳又
文德皇后降使厚谢韦庶人追王其父擅作酆陵而祸不旋踵今以后父之尊欲高大其
坟何足为难而臣等再三进言者欲成朝廷之政中宫
之美尔帝曰朕常欲正身率下况于妻子何敢私之然此乃人所难言公等乃能之即可
其奏又遣使赉彩绢四百匹会日食帝素服俟变录囚
多所贷遣赈恤灾患罢不急之务璟曰臣闻日蚀修德月蚀修刑亲君子远小人止女谒
放逸夫此所谓修德也圉圉不扰兵甲不渎官不苛治
军不轻进此所谓修刑也君子耻言浮于行愿陛下推至诚行之无事空文帝嘉纳后以
开府仪同三司罢政事京兆人权梁山谋逆敕河南尹
王怡驰传往按牢械充满久未决乃命璟为京兆复按其狱璟至惟罪元谋数人其余缘
梁山诡称婚集因假贷得罪及胁从者悉奏原之十三
年东巡泰山【新旧本传作十二年误】璟复为留守帝将发谓曰卿国元老别方历
时宜有嘉谋以遗朕璟因极言得失手制答曰所进当
书之坐右出入观省以诫终身赐赉优渥进兼吏部尚书十七年为尚书右丞相而张说
为左丞相源干曜为太子少傅同日拜有诏太官设饌
太常奏乐会百官尚书省东堂帝赋三杰诗自写以赐二十年请致仕许之仍赐全禄退
居洛乘輿东幸璟谒道左诏荣王劳问别遣使赐药餌
二十五年卒年七十五赠太尉谥文贞璟风度凝远人莫涯其量始自广州入朝帝遣内
侍杨思勳驿迓之未尝交一言思勳自以将军贵幸诉
之帝帝益嗟重璟为宰相务清政刑使官人皆任职圣历后突厥默啜数窥边九姓拔曳
固斩之其首与入蕃使郝灵佺传诣京师灵佺自谓还
必厚见赏璟顾天子方少恐后干宠蹈利者夸威武为国生事故抑之踰年纔授右武卫
郎将灵佺恚愤死张嘉贞后为相阅堂按见其危言切
议未尝不失声叹息六子升尚浑恕华衡升太仆少卿尚汉东太守浑与李林甫善历谏
议大夫平原太守御史中丞东京采访使在平原暴敛
求进至重取民一年庸租使东京时薛稷甥女郑寡而美浑使河南尉杨朝宗聘而已纳
之荐朝宗为赤尉恕以都官郎中为剑南采访判官数
贪纵不法阴养刺客天宝中浑恕尚并以赃败浑流高要恕流海康尚贬临海长史华衡
亦皆坐贪得罪广德中浑起为太子谕德物议秽薄之
昆弟皆荒饮俳嬉而衡最险悖广平之风衰焉

钦定续通志卷二百二十九

●钦定续通志卷二百三十 列传三十

列传

唐 【三十】

○唐三十

苏瓌【颀 洗 干】张说【均埒】

苏瓌

张说

△苏瓌

苏瓌字昌容雍州武功人隋尚书仆射威之曾孙父亶台州刺史【旧书云父勣按世系表勣乃瓌之伯父旧书误】瓌擢进士第补恒州参军居母丧哀毁加人左庶子张大安表举孝悌擢豫王府录事参军历朗歙二州刺史时来俊臣贬州参军人惧复用多致书请瓌瓌叱其使曰吾忝州牧高下自有体能优待小人乎遂不发书俊臣未至追还恨之由是连外徙不得入久之转扬州大都督府长史州据都会多名珍怪产前长史张潜于辩机赍取巨万瓌单身幞被自将徙同州刺史岁旱兵当番上者不能赴瓌奏宿卫不可阙宜月赐增半粮俸相给足则不阙番又请却进献罢营造不省时十道使括天下亡户初不立籍人畏搜括即流入比县旁州更相掩蔽瓌请罢十道使专责州县豫立簿籍天下同日检正尽一月止岁一括实以免劳弊武后铸浮屠立庙塔役无虚岁瓌以为糜损浩广又天下僧尼滥伪相半请并寺着僧常员数缺则补后善其言神龙初入为尚书右丞封怀县男【旧书云封淮阳县子进淮阳县侯与此异】瓌明晓法令多识台省旧章一朝格式皆所删正再迁户部尚书拜侍中留守京师郑普思以妖幻位秘书员外监支党徧岐陇间相煽誅为乱瓌捕系普思穷讯普思妻以左道得幸韦后出入禁中有诏勿治瓌廷争帝犹依违司直范献忠进曰瓌为大臣不能前诛逆竖而报天子罪大矣臣请先斩瓌于是仆射魏元忠顿首曰瓌长者用刑不枉普思法当死帝不得已流普思于儋州余党论死累拜尚书右仆射同中书门下三品进封许国公帝南郊祝钦明建白皇后为亚献安乐公主为终献瓌以为非礼帝前折愧之帝昏懦不能从时大臣初拜官献食天子名曰烧尾瓌独不进及侍宴宗晋卿嘲之帝默然瓌曰宰相燮和阴阳代天治物今粒食踊贵百姓不足卫兵至三日不食臣诚不称职不敢烧尾帝崩遗诏皇太后临朝相王以太尉辅政后诏宰相议禁中宗楚客曰太后临朝相王有不通问之嫌不宜辅政瓌正色曰遗制乃先帝意安

得辄改楚客等怒卒削相王辅政事瓌称疾不朝是月
韦氏败睿宗即位进左仆射景云元年老病罢为太子少傅是冬卒年七十二赠司空荆
州大都督谥曰文贞遗令薄葬布车一乘瓌治州考课
常最为宰相陈当世病利甚多韦温始为汴州司仓参军以赇被杖及用事惮瓌正卒不
敢伤开元二年赐其家实封百户长子颀固辞乃擢中
子义左补阙六年诏与刘幽求配享睿宗庙庭文宗太和中录旧德官其四代孙翔 【按
世系表无翔名】 瓌六子颀洗尤显

苏颀

苏洗

苏干

苏颀

颀字廷硕少敏悟一览千言辄覆诵第进士调乌程尉武后封嵩高举贤良方正异
等除左司御率府胄曹参军吏部侍郎马载曰古称一
日千里苏生是已再迁监察御史长安中诏覆来俊臣等冤狱颀验发其诬多从洗宥迁
给事中修文馆学士拜中书舍人时瓌同中书门下三
品父子同在禁筮朝廷荣之玄宗平内难书诏填委独颀在太极后合口所占授功状百
绪轻重无所差中书令李峤曰舍人思若涌泉吾所不
及迁太常少卿仍知制诰父丧起为工部侍郎辞不拜终制乃就职帝问宰相有自工部
侍郎得中书侍郎乎对曰陛下任贤惟所命何资之计
乃诏以颀为中书侍郎帝劳曰方美官缺辄欲用卿然宰相议无及者朕为卿恨陆象先
歿紫微侍郎未尝补朕思其人无易卿者颀顿首谢明
日加知制诰给政事食给食自颀始时李义对掌书命帝曰前世李峤苏味道文擅当时
号苏李今朕得颀及又何愧前人哉俄袭封许国公吐
蕃盗边诸将数败虜益张秣骑内侵帝欲自将兵讨之颀谏曰古称荒服取荒忽之义非
常奉职贡也故来则拒去则勿逐远夷左衽不足以辱
天子虽然兵法先声后实陛下如班亲征之诏而敕虜将谋夫投会济师则吐蕃不日崩
破亦无待躬致天讨也臣谓岐陇凋弊积年若千乘万
骑供亿不涯诚恐徭役内兴寇京外虞斯人不堪一也戎虜之性骤往倏来败不耻奔胜
不让成若大军一临边怖震鸟散彼出多方我受其悞
二也太上皇闻陛下身对寇场不能无忧蒸蒸之思何以自安三也帝不省颀复上言王
者之师有征无战不当屈万乘之尊为一日之敌愿稍
迁延以须西音会薛讷大破吐蕃俘获不赀由是帝止不行时诏立靖陵碑命颀为之词
辞曰前世帝后不志碑事弗稽古谓之法若靖陵独
建即祖宗诸陵皆须追造帝乃止 【按旧书及会要并云帝欲建碑因颀言而止新书云

帝不纳其言非也】 开元四年进同紫微黄门平章
事修国史与宋璟同当国璟刚正多所裁决颺能推其长在帝前敷奏璟有未及或少屈
颺辄取成之故帝未尝不从二人相得欢甚璟尝曰吾
与苏氏父子同为宰相仆射长厚自是国器若献可替否事至即断尽公不顾私则今丞
相为过之八月罢为礼部尚书俄检校益州大都督长
史按察节度剑南诸州时属雕边人流亡诏颺收剑南山泽盐铁自贍颺尚简静重兴力
役即募戍人输雇直开井置炉量入计出分所赢市谷
以广见粮时前司马皇甫恂使蜀檄取库钱市锦半臂琵琶捍拨玲珑鞭颺不肯予因上
言遣使衔命先取不急非陛下以山泽瞻军费意或谓
明公在远岂得忤上意颺曰不然明主不以私爱夺至公我可以远近废忠臣节邪嵩州
蛮直院与吐蕃连谋入寇获谍者吏请讨之顾不听移
书还其谍曰毋得尔直院羞悔不敢侵边从封泰山诏颂朝覲坛世咨其文还分主十铨
事卒年五十八帝犹视朝起居舍人韦述上疏曰贞观
永徽时大臣薨辄置朝举哀成终始恩上有旌贤录旧之德下有生荣死哀之美故礼部
尚书颺累叶辅弼奉事轩陛二十余年今奄忽不还邦
人痛嗟惟帷盖之旧股肱之戚宜节废朝明君臣之谊帝曰固朕意也即日帐次哭洛城
南门不朝诏赠右丞相谥曰文宪葬日帝游咸宜宫将
猎闻之半道而还颺性廉俭奉禀悉推散诸弟亲族储无长贖自景龙后与张说以文章
显称望畧等故时号燕许大手笔帝爱其文曰卿所为
诏令别录副本署臣某撰朕当留中后遂为故事其后李德裕着论曰近世诏诰惟颺叙
事外自为文章云

苏洵

洵字廷言举贤良方正高第补汾阴尉迁秘书详正学士累转给事中时颺为紫微
侍郎固辞帝曰古者内举不避亲今朕自用洵卿何辞
颺之出徐州刺史治有迹卒赠吏部侍郎 【世系表洵封魏县男】 洵子震 【按世系
表震为颺之六世系盖旁行之误】 以荫补千牛
十余岁强学有成人风颺曰吾家有子累迁殿中侍御史长安令安禄山陷京师震与尹
崔光远杀开远门吏弃家出奔会肃宗兴师灵武震昼
夜驰及行在帝嘉之拜御史中丞迁文部侍郎广平王为元帅以震为粮料使二京平封
岐阳县公改河南尹九节度兵败相州震与留守崔圆
奔襄邓贬济王府长史起为绛州刺史进户部侍郎判度支为泰陵建陵鹵簿使以劳封
岐国公拜太常卿代宗将幸东都复以震为河南尹未
行卒赠礼部尚书

苏干

干瓌从父兄也父勛武德中为秦王咨议典签文学馆学士尚南康公主拜驸马都尉迁魏王泰府司马博学有美名泰重之劝开馆引文学士撰括地志历吏部侍郎太子左庶子卒干擢明经授徐王府记室参军王好畋每谏止之垂拱中迁魏州刺史河朔饥前刺史苛暴百姓流徙干检吏督奸劝课农桑由是流冗尽复以治称拜右羽林军将军迁冬官尚书来俊臣素忌之诬干与琅邪王冲通书系狱发愤卒

△张说

张说字道济或字说之其先范阳人后徙洛阳永昌中武后策贤良方正说所对第一后署乙等授太子校书郎迁左补阙【旧书作右补阙】久视中后避暑三阳宫沆秋未还说上疏曰宫距洛城百六十里有伊水之隔崿坂之峻过夏涉秋水潦方积道坏山险不通转运河广无梁咫尺千里扈从兵马日费资饷连雨弥旬即难周济陛下太仓武库并在都邑红粟利器蕴若山邱柰何去宗庙之上都安山谷之僻处是犹倒持剑戟示人罇柄臣窃为陛下不取夫祸变之生在人所忽故曰安乐必戒无行所悔此不可一也宫城褊小万方辐凑填郭溢郭并锺无所排斥居人蓬宿草次风雨暴至不知庇托孤嫠老病流转衢巷陛下作人父母将若之何此不可二也池亭奇巧荡诱上心削峦起观竭流涨海俯贯地脉仰出云路易山川之气夺农桑之土延木石运斧斤山谷连声春夏不辍劝陛下作此者岂正人邪诗云人亦劳止迄可小康此不可三也御苑东西二十里外无墙垣扃禁内有榛丛溪谷猛兽所伏暴慝所凭陛下往往轻行警蹕不肃历蒙密乘险巘卒有逸兽狂夫惊犯左右岂不殆哉易曰思患豫防愿为万姓持重此不可四也今北有胡寇觊边南有夷獠骚徼关西小旱耕稼是忧安东近平输漕方始臣愿及时旋辘深居上京息人以展农修德以来远罢不急之役省无用之费天下幸甚后不省擢凤阁舍人张易之诬陷魏元忠也授说证其事说廷对言元忠实无后言乃易之诬构耳忤后旨坐流钦州中宗立召为兵部员外郎累迁工部兵部二侍郎以母丧免既替诏起为黄门侍郎固请终制祈陈哀到时礼俗衰薄士以夺服为肖而说独以礼终天下高之除丧为兵部兼修文馆学士【旧书作弘文馆按会要神龙元年改弘文馆为昭文馆二年又改为修文馆此当作修文为是】睿宗即位擢中书侍郎兼雍州长史譙王重福死东都支党数百人狱久不决诏说往按一宿而罪人得乃诛张灵均郑愔余詿误悉原帝嘉其不枉直不漏恶慰劳之元宗为太子说与褚无量侍读尤见亲礼踰年进同中书门下平章事监修国史景云二年帝谓侍臣曰术者言五日内有急兵入宫为我备之左右莫对

说进曰此谗人谋动东宫耳陛下若以太子监国则名
分定奸胆破蜚祸塞矣帝悟下制如说言明年皇太子即皇帝位太平公主引萧至忠崔
湜等为宰相以说不附己授尚书左丞罢政事为东都
留守说知太平公主等怀逆因以佩刀献元宗请先决策帝纳之至忠等已诛召为中书
令封燕国公实封二百户始武后末年为泼寒胡戏中
宗尝乘楼纵观至是因四夷来朝复为之说上疏曰韩宣适鲁见周礼而叹孔子会齐数
倡优之罪列国如此况天朝乎今四夷请和使者入谒
当接以礼乐示以兵威虽曰戎夷不可轻易焉知无驹支之辩由余之贤哉且乞寒泼胡
未闻典故裸体跳足汨泥挥水盛德何观焉恐非干羽
柔远樽俎折冲之道纳之自是此戏遂绝素与姚元崇不平罢为相州刺史河北道按察
使坐累徙岳州停实封说既失执政意内自惧雅与苏
瓌善时瓌子颀为相因作五君咏献颀其一纪瓌也候瓌忌日致之顾览诗呜咽未几见
帝陈说忠谏有勋不宜弃外遂迁荆州长史俄以右羽
林将军检校幽州都督入朝以戎服见帝大喜授检校并州长史兼天兵军大使修国史
敕赉橐即军中论譔朔方军大使王峻诛河曲降虜阿
布思也九姓同罗拔野固等皆疑惧说持节从轻骑二十直诣其部宿帐下召见酋豪慰
安之副使李宪以虜难信不宜涉不测驰状以谏说报
曰吾肉非黄羊不畏其食血非野马不畏其刺士当见危致命亦吾效死秋也由是九姓
遂安峻后讨兰池叛胡康待宾诏说相闻经畧时党项
羌亦连兵攻银城说将步骑万人出合河关掩击破之追北至骆駝堰羌胡自相猜夜鬪
待宾遁入铁建山余众奔溃说招纳党项使复故处副
使史献请尽诛之说不从奏置麟州以安羌众召拜兵部尚书同中书门下三品让宋璟
陆象先不许明年诏为朔方节度大使亲行五城督士
马时庆州方渠降胡康愿子反自为可汗掠牧马西涉河出塞说进讨至木盘山禽之俘
获三千余人乃议徙河曲六州残胡五万余口于唐邓
仙豫闲空河南并朔方千里之地以功赐实封三百户故时边镇兵嬴六十万说以时平
无所事请罢二十万还农天子以为疑说曰边兵虽广
诸将但欲自卫及杂使营私尔若御敌制胜实不在多耳以陛下之明四夷畏威不虑减
兵而招寇帝乃从之时卫兵贫弱番休者亡命畧尽说
建请一切召募强壮优其科条不问色役不旬日得胜兵十三万分补诸卫以强京师后
所谓彍骑者也帝自东都将还京因幸并州说见帝曰
太原王业所基陛下巡幸振耀威武以申永思繇河东入京师有汉武睢上祠此礼废阔
历代莫举愿为三农祈谷诚四海之福帝纳其言过祠
后土乃还进中书令说又倡封禅议受诏与诸儒草议多所裁正帝召说与礼官学士置

酒集仙殿曰朕今与贤者乐于此当遂为集贤殿乃下制改丽正书院为集贤殿书院而授说学士知院事东封还为尚书右丞相兼中书令诏撰封禅坛颂刻之泰山以夸成功初源干曜不欲封禅说固请乃不相平及升山执事官当从者说皆引所厚超阶入五品从兵唯加勋而无赐物众怨其专宇文融先献策括天下游户及籍外剩田置十道劝农使分往检察说畏其扰数沮格之至是融请吏部置十铨与苏颋等分治选事每有论请皆为说所抑于是铨综失叙融恨之乃与崔隐甫李林甫其劾奏说引术士夜解及受赃等状其言丑惨帝怒诏干曜隐甫刑部尚书韦抗即尚书省鞫之发金吾兵围其第说兄左庶子光诣朝堂割耳称冤帝遣高力士往视还奏说蓬首垢面席藁于瓦器中食惟惧待罪帝意怜之力士因言说有功于国帝以为然乃止停说中书令在集贤院专修国史又乞停右丞相不许然每军国大务帝辄访焉隐甫等恐说复用巧文诋毁素忿说者又着疾邪篇帝闻因令致仕始为相时帝欲事吐蕃说密请讲和以休息鄯塞帝曰朕待王君■〈鼯，大代兔〉计之说告源干曜曰君■〈鼯，大代兔〉好兵以求利彼入吾言不用矣后君■〈鼯，大代兔〉破吐蕃于青海西说策其且败因上鬻州鬪羊于帝以申讽谕【按开元十五年正月王君■〈鼯，大代兔〉破吐蕃于青海西九月瓜州陷新书献鬪羊在瓜州未失之前见说先事纳忠之意旧传叙在瓜州失守后非是】曰使羊能言必将曰鬪而不解立有死者所赖至仁无残量力取欢焉帝识其意纳之赐彩千匹后瓜州失守君■〈鼯，大代兔〉死十七年复为右丞相迁左丞相上日敕所司供帐设乐内出醪饌帝为赋诗以修谒陵仪注功授开府仪同三司十八年十二月卒年六十四为停元正朝会赠太师谥曰文贞帝为自制碑文说敦气节立然许喜推藉后进于君臣朋友大义甚笃帝在东宫所与秘谋密计甚众后卒为宗臣朝廷大述作多出其手帝好文辞有所为必使视草善用人之长多引天下知名士以佐佑王化粉泽典章成一王法天子尊尚经术开馆置学士修太宗之政皆说倡之为文属思精壮长于碑志既谪岳州而诗益凄婉人谓得江山助云常典集贤图书之任闲虽致仕一岁亦修史于家始帝欲授说大学士辞曰学士本无大称中宗崇宠大臣乃有之臣不敢以为称固辞乃免中书舍人陆坚【旧书作徐坚误】以学士或非其人而供儼太厚无益国家议白罢之说闻曰古帝王功成则有奢满之失或兴池观或尚声色今陛下崇儒向道躬自讲论详延豪俊则丽正乃天子礼乐之司所费细而所益者大陆生之言盖未达邪帝知遂薄坚说尝自为其父碑帝为书其额曰

呜呼积善之墓说歿后帝使就家录其文行于世开元

后宰相不以姓著者曰燕公云大历中诏配享玄宗庙廷子均均塉

张均

张塉

张均

均亦能文自太子通事舍人累迁主爵郎中中书舍人开元十七年说授左丞相校京官考注均考曰父教子忠古之善训王言帝载尤难

以任庸以嫌疑而挠纪纲考上下当时亦不以为私后袭燕国公累迁兵部侍郎以累贬饶苏二州刺史久之复为兵部侍郎自以己才当辅相

为李林甫所抑林甫卒倚陈希烈冀得其所既而杨国忠用事希烈罢而均为刑部尚书坐塉贬建安太守还授大理卿居常缺望不平禄山盗

国为伪中书令肃宗反正兄弟皆论死房管闻之惊曰张氏灭矣乃见苗晋卿营解之帝亦顾说有旧诏免死流合浦建中初赠太子少傅子蒙

事德宗为中书舍人

张塉

塉尚宁亲公主时说居中秉政均为舍人诸父光为银青光禄大夫荣盛冠时玄宗眷塉厚即禁中置内宅侍为文章珍赐不可数均供奉

翰林而塉以所赐夸均均曰此妇翁遗婿非天子赐学士也帝尝幸塉内宅顾塉曰希烈辞宰相孰可代者塉错愕未得对帝曰无踰吾爱塉矣

塉顿首谢既而不果用塉始怨望 【新旧书并云希烈罢相国忠举韦见素代之塉深缺望按天宝十三载三月禄山还镇塉因国忠之谮贬

卢溪司马八月韦见素乃知政事而云塉为此缺望非也今从通鉴改正】 天宝十三载禄山入朝帝欲加同平章事国忠曰禄山有军功然不

识字与之恐四夷轻汉乃止及还范阳诏高力士饯浚坡力士归曰禄山意怏怏若伺知宰相之命不行也帝以语国忠国忠曰必张塉告之 【

新旧书并云禄山以破奚契丹功求带平章事按禄山若有是请而玄宗不与则禄山之怏怏固宜不待张塉告之而始缺望也通鉴以为出自

帝意于情事较合今据改】 帝怒尽逐其兄弟以均守建安而塉为卢溪郡司马塉自给事中为宜春郡司马岁中还塉为太常卿帝西狩至咸

阳惟韦见素杨国忠魏方进从帝谓力士曰若计朝臣当孰至者力士曰张塉兄弟世以恩戚贵其当即来房管有宰相望而陛下久不用又为

禄山所器此不来矣帝曰未可知也后管至召见流涕帝抚劳且问均塉安在管曰臣之西亦尝过其家将与偕来均曰马不善驰当继行然臣

观之恐不能从陛下矣帝嗟怅顾力士曰非若所料也塉遂与希烈皆相禄山塉死贼中

钦定续通志卷二百三十

●钦定续通志卷二百三十一 列传三十一

列传

唐 【三十一】

○唐三十一

魏知古 卢怀慎 【免】 李元纁 杜暹 【鸿渐】 张九龄

【仲方】 韩休 【混皋洞】

魏知古

卢怀慎

李元纁

杜暹

张九龄

韩休

△魏知古

魏知古深州陆泽人方直有雅才擢进士第以著作郎修国史累迁卫尉少卿检校相王府司马神龙初为吏部侍郎以母丧解服除为晋州刺史睿宗立以故属拜黄门侍郎兼修国史会造金仙玉真观虽盛夏工程严促知古谏曰臣闻古之君人必时视人之所勤人勤于力则功筑罕人勤于财则贡赋少人勤于食则百事废故曰不作无益害有益又曰罔拂百姓以从己之欲礼季夏之月树木方盛无有斩伐不可以兴土功今为公主造观将以树功祈福而地皆百姓所宅卒然迫逼令其转徙扶老携幼剔椽发瓦呼嗟道路乖人事违天时起无用之作崇不急之务羣心震摇众口藉藉陛下为人父母欲何以安之且国有简册君举必记言动之微可不慎欤愿下明诏顺人欲除功役收之桑榆其失不远不纳复上疏言今风教颓替日甚一日府藏空屈人力劳敝营作无涯吏员寔增诸司试补员外检校官已赢二千太府之帛为殫太仓之米不支臣前请停金仙玉真讫亦未止前水后旱五谷不立繇兹向春必甚饥馑陛下欲何方以赈之又突厥于中国为患日久其人非可以礼义诚信约也虽遣使请婚恐豺狼之心弱则顺伏强则骄逆月满骑肥乘中国饥虚讲亲际会窥犯亭鄯复何以防之帝嘉其直以左散骑常侍同中书门下三品玄宗在春宫又兼左庶子先天元年为侍中从猎渭川献诗以讽手制褒答明年封梁国公窦怀贞等诡谋乱国知古密发其奸怀贞诛赐封二百户玄宗恨前赏薄手敕更加百户是冬诏知东都吏部选事以称职闻优诏赐衣一副自是恩意尤渥由黄门监改紫微令 【

宰相表失载】与姚元崇不协除工部尚书罢政事开元三年卒年六十九宋璟闻而叹曰叔向古遗直子产古遗爱兼之者其魏公乎赠幽州都督谥曰忠所荐洹水令吕太一蒲州司功参军齐澣右内率骑曹参军柳泽密县尉宋遥左补阙袁晖右补阙封希颜伊阙尉陈希烈皆有闻于时文宗太和二年求其曾孙处讷授湘阳尉与魏征裴冕后擢任之

△庐怀慎

庐怀慎其先范阳着姓祖愨仕为灵昌令遂为县人怀慎童卯时父友韩思彦见之叹曰此儿器不可量及长第进士历监察御史神龙中迁侍御史中宗谒武后上阳宫后诏帝十日一朝怀慎谏曰昔汉高帝五日一朝太公于栢阳宫以起布衣登皇极子有天下尊归于父故行此耳今陛下守文继统何所取法况应天去提象纚二里所骑不得成列车不得方轨于此屡出万有一犯属车之尘虽罪之何及臣愚谓宜遵内朝以奉温清无烦出入不省迁右御史台中丞上疏陈时政曰臣窃见比来州牧上佐及两畿县令多者一二岁少者三五月遽即迁除不论课最使人皆争求冒进不顾廉耻尚何暇为陛下宣风化恤人瘼哉人知吏之不久不率其教吏知迁之不遥不究其力偷处爵位以养资望虽明主有勤劳天下之意然侥幸路启上下相蒙共为苟且而已汉宣帝综核名实兴治致化黄霸良二千石也加秩赐金就旌其能终不使迁前代之美政也臣请都督刺史上佐畿令任未四考不得迁除察其治效尤异者或赐车裘或加禄秩或降使临问玺书慰勉须公卿阙则擢之以励能者其不职或贪暴者免归田里以明圣朝赏罚之信又窃见今京诸司员外官所在委积多者数十余倍近古以来未之有也奉廩之费岁巨亿万徒竭府藏岂致治意哉方今仓库空虚民力敝极河渭漕挽不给京师公私耗损不可胜计况边隅未静兵革犹兴一旦水旱成灾租税减入军国急务何以济之臣请诸司员外官有才能器识堪为州牧县令及上佐者并加迁擢使宣力四方责以治状有老病若不任职者一废省之使贤不肖较然殊贯此济时之切务也又窃见内外官有赍饷狼籍鞠按非虚刑究已极者虽坐流黜旋复旧资还为牧宰或江淮岭磧粗示惩贬夫以犯罪之吏牧遐方是谓屈法惠奸恤近遗远凡左降之人鲜能省过必怀自弃长恶滋深则小州远郡蛮陬夷落何负圣化而独受其弊政乎况边徼之地夷夏杂处凭险恃远易扰难安官非其才凌虐侵剥小则黎庶流亡大则起为盗贼由此言之不可用凡才而况于猾吏乎臣请内外官犯赃论废者并削迹簪裾不数十年不赐齿录疏奏不报迁黄门侍郎赐爵渔阳县伯与魏知古分领东都选开元元年进同紫微

黄门平章事三年改黄门监 【通鉴作二年】 薛王舅王仙童暴百姓宪司按得其罪有诏紫微黄门覆实怀慎与姚崇执奏仙童罪状明甚若御史可疑则它人何可信由是狱决怀慎自以才不及崇故事皆推而不专时议为伴食宰相四年兼吏部尚书以疾乞骸骨许之卒赠荆州大都督谥曰文成遗言荐宋璟李杰李朝隐卢从愿帝悼之怀慎清俭不营产服器无金玉文绮之饰虽贵而妻子犹寒饥所得禄赐予故人亲戚随散辄尽赴东都掌选奉身之具止一布囊既属疾宋璟卢从愿候之见敝箠单藉门不施箔会风雨至举席自障日晏设食蒸豆两器菜数栝而已临别执二人手曰帝求治切然享国久稍倦于勤将有憺人乘闲而进矣公第志之及治丧家无留储帝时将幸东都四门博士张星上言怀慎忠清以直道始终不加优锡无以劝善乃下赐其家物百段米粟二百斛帝后还京因校猎鄂杜间望怀慎家环堵庳陋以缣帛赐之值怀慎大祥为罢猎经其墓碑表未立停辔临视泫然流涕诏官为立碑令中书侍郎苏颋为之文帝自书子免奕

卢免

卢免

免早修整为吏有清白称历御史中丞出为陕州刺史开元二十四年帝西还次陕嘉其美政题赞于听事曰专城之重分陕之雄亦既利物内存匪躬斯为国宝不坠家风寻召为兵部侍郎天宝初为南海太守南海水陆都会物产瓌怪前守刘巨麟彭杲皆以赃败故以免代之污吏敛手中人之市舶者亦不敢干其法远俗为安时谓自开元后四十年治广有清节者宋璟李朝隐免三人而已终尚书右丞奕见忠义传

△李元紘

李元紘字大纲其先滑州人后世占京兆万年本姓丙氏曾祖粲仕隋为屯卫大将军炀帝使督京师之西二十四郡盗贼善抚循能得士心高祖与之厚及兵入关以众归授宗正卿应国公赐姓李后为左监门大将军以其老听乘马按视宫禁八十余卒谥曰明祖宽高宗时为太常卿陇西公父道广武后时为汴州刺史有善政突厥契丹寇河北议发河南兵击之百姓震扰道广悉心抚定人无离散迁殿中监同凤阁鸾台平章事封金城侯卒赠秦州都督谥曰成元紘早修谨仕为雍州司户参军时太平公主势震天下百司顺望风指尝与僧寺争碾硖元紘断还僧寺长史窦怀贞大惊趣改之元紘大署判后曰南山可移此判不可动怀贞不能夺改好时令迁润州司马以办治得名开元初为万年令赋役称平擢京兆少尹诏决三辅渠时王主权家皆旁渠立硖潴竭争利元紘敕吏尽毁

之分溉渠下田民赖其恩三迁吏部侍郎会户部杨珣
白知慎坐支调失宜贬刺史帝求可代者公卿多荐元紘帝欲擢为尚书宰相以资薄乃
为户部侍郎条陈利害及时政得失帝才之谓可丞辅
赐衣一称绢二百疋明年遂拜中书侍郎同中书门下平章事封清水县男元紘当国务
浚涯检抑奔竞夸进者惮之五月五日宴武成殿赐羣
臣袭衣特以紫服金鱼锡元紘及萧嵩羣臣无与比是时废京师职田议者欲置屯田元
紘曰军国不同中外异制若人闲无役地弃不垦以闲
人耕弃地省馈运实军粮于是有屯田其为益多矣今百官所废职田散在诸县弗可聚
也百姓私田皆力自耕不可取也若置屯即当公私相
易调发丁夫调役则业废于家免庸则赋阙于国内地为屯古未有也恐得不补失徒为
烦费遂止初左庶子吴兢为史官譔唐书及唐春秋未
成以丧解后上书请毕其功诏许就集贤院成书张说致仕诏在家修史元紘因言国史
记人君善恶王政损益褒贬所系前圣尤重今国之大
典分散不一且太宗别置史馆禁中所以秘严之也请敕说等以书就馆参会譔录诏可
后与杜暹不协数辨争帝前帝不怿皆罢之以元紘为
曹州刺史徙蒲州引疾去后以户部尚书致仕复起为太子詹事卒赠太子少傅谥曰文
忠元紘再世宰相有清节当国累年未尝改治第宅僮
马敝弱得封物凋给亲族宋璟尝叹曰李公引宋遥之美黜刘晁之贪为国相家无留储
虽季文子之德何以加之

△杜暹

杜暹濮州濮阳人父承志武后时为监察御史怀州刺史李文暉为人所告诏承志
推验无实文暉宗室近属也卒得罪承志坐贬为方义
令迁天官员外郎见罗织狱兴移疾去卒于家自高祖至暹五世同居暹尤恭谨事继母
孝擢明经第补婺州参军秩满归吏以纸万番赆之暹
为受百番众叹曰昔清吏受一大钱何异哉为郑尉复以清节显华州司马杨孚公直士
也每咨重暹会孚迁大理正暹适以累当坐孚曰使若
人得罪众安劝孚以状言执政繇是擢大理评事开元四年以监察御史覆屯碛西会安
西副都护郭虔瓘与西突厥可汗阿史那献镇守使刘
遐庆更相讼诏暹即按暹入突骑施帐究索左验虜以金遗暹暹固辞左右曰公使绝域
不可失戎心乃受焉阴埋幕下已出境乃移文令收取
之突厥大惊度碛追之不及去迁给事中以母丧解会安西都护张孝嵩迁太原尹或言
暹往使安西虜伏其清今犹慕思乃夺服拜黄门侍郎
兼安西副大都护明年于阗王尉迟眺约突厥诸国叛暹觉其谋发兵讨斩之支党悉诛
更立君长于阗遂安以功加光禄大夫守边四年 【

按暹以开元十二年三月起为安西都护十四年九月入相首尾仅三年耳新旧书皆云在边四年疑误】 抚戎练士能自勤励为夷夏所乐十四年召同中书门下平章事遣中使往迎谒见赐绢二百马一匹第一区与李元纁不相得罢为荆州都督长史历魏州刺史太原尹帝幸北都进户部尚书许扈蹕还复东幸以暹为京留守暹率当番卫士缮修三宫增城浚池督役不少懈帝闻嘉之数赐书褒劳进礼部尚书封魏县侯二十八年卒赠尚书右丞相太常谥曰贞肃右司员外郎刘同升等以暹行忠孝谥有未尽博士裴总谓暹往以墨衰受命安西虽勤劳于国不得尽孝其子列诉帝更敕有司考定卒谥贞孝暹友爱抚异母弟昱甚厚其为人少学术当朝议论时失浅薄然能以公清勤约自将自弱冠誓不通亲友献遗以终身既卒尚书省及故吏致赙其子孝友一不受以行暹素志云暹族子鸿渐

杜鸿渐

杜鸿渐

鸿渐字之巽父鹏举与卢藏用隐白鹿山以母疾与崔沔同受医于兰陵萧亮遂穷其术历右拾遗玄宗东行河因游畋上赋以风终安州刺史鸿渐第进士解褐延王府参军安思顺表为朔方判官禄山乱皇太子按军平凉未知所适议出萧关趣丰安鸿渐与六城水运使魏少游节度判官崔漪支度判官卢简金关内盐池判官李涵谋曰平凉散地非屯兵之所灵武兵食完富若奉迎太子西诏河陇北结回纥收其劲骑与大兵合鼓而南雪社稷之耻此大计也即具上兵马招辑之势且录军资器械储廩凡最使涵诣平凉见太子太子大悦会裴冕至自河西亦劝之朔方而鸿渐与漪至白草顿迎谒说曰朔方天下劲兵处也今回纥请和吐蕃结附天下列城坚守以俟兴废殿下治兵灵武按辔长驱移檄四方收览忠义则逆贼不足屠也太子喜曰灵武我之关中卿乃吾之萧何也既至灵武鸿渐即与冕等劝即皇帝位以系中外望六请见听

【通鉴云笈五上太子乃许】 鸿渐明习朝章采旧仪设坛壝城南先一日草其仪上之太子曰圣皇在远寇逆方结宜罢坛场它如奏太子即位授鸿渐兵部郎中知中书舍人事俄为武部侍郎迁河西节度使两京平又节度荆南干元二年襄州大将康楚元等反伪称南楚霸王袭荆州鸿渐弃城遁人皆南奔争舟溺死者甚众澧朗复郢等州闻鸿渐出皆窜伏山谷俄而商州刺史韦伦平其乱久之乃召鸿渐为尚书右丞太常卿充礼仪使泰建二陵制度皆鸿渐综正以优封卫国公又建言周官凶荒杀礼今承大乱民人夷残其婚葬卤簿非于国有大功及二等

以上亲皆不许给诏可代宗广德二年以兵部侍郎同中书门下平章事寻进中书侍郎崔旰杀郭英又据成都邛州牙将柏贞节 【通鉴作柏茂林】 泸州牙将杨子琳剑州牙将李昌夔以兵讨旰蜀剑大乱命鸿渐以宰相兼成都尹山南西道剑南东川副元帅剑南西川节度副大使往镇抚之鸿渐性怯懦而晚节溺浮图道畏杀戮及逾剑门惩艾张献诚败且惮旰雄武先许以不死既见礼遇之不敢加譙责反委以政因荐旰为成都尹而授贞节邛州刺史子琳泸州刺史 【通鉴茂琳子琳昌夔各为本州岛刺史】 各罢兵大历二年还朝盛言旰威略可任宜为留后议者疾其长乱进门下侍郎仍知政事三年兼东都留守河南淮西山南东道副元帅辞疾不行又让山南剑南副元帅听之四年疾甚辞宰相罢三日卒年六十一赠太尉谥曰文宪鸿渐自蜀还食千僧病甚令僧剔顶发遗命依浮图葬不为封树

△张九龄

张九龄字子寿 【旧书一名博】 韶州曲江人七岁知属文十三以书干广州刺史王方庆方庆叹曰是必致远会张说谪岭南一见厚遇之居父丧哀毁庭中木连理擢进士始调校书郎以道侔伊吕科策高第为左拾遗时玄宗即位未郊见九龄建言天百神之君王者所由受命也自古继统之王必有郊配盖敬天命报所受也不以德泽未洽年谷未登而阙其礼汉丞相匡衡曰帝王之事莫重乎郊祀董仲舒亦言不郊而祭山川失祭之序逆于礼故春秋非之陛下绍休圣绪于今五载而未行大报考之于经义或未通愿以迎日之至升紫坛陈采席定天位则圣典无遗矣又言乖政之气发为水旱天道虽远其应甚速昔东海枉杀孝妇天旱久之县命于县令宅生于刺史陛下所与共治尤亲于民者乎若非其任水旱之繇岂唯一妇而已今刺史京辅雄望之郡犹少择之江淮陇蜀三河大府之外稍非其人繇京官出者或身有累或政无状用牧守之任为斥逐之地武夫流外积资而得不计于才刺史乃尔县令尚可言哉古者刺史入为三公郎官出宰百里今朝廷士入而不出其于计私甚自得也京师衣冠所聚身名所出从容附会不勤而成是大利在于内而不在外也智能之士欲利之心安肯复出为刺史县令哉臣愚谓欲治之本莫若重守令守令既重则能者可行宜遂科定其资凡不历都督刺史虽有高第不得任侍郎列卿不历县令虽有善政不得任台郎给舍都督守令虽远者使无十年任外如不为此而救其失恐天下犹未治也 【

按通鉴开元二年正月制选京官有才识者除都督刺史都督刺史有政绩者除京官使

由入常均永为恒式新书选举志以为从九龄之请也

】又古之选士惟取称职是以士修素行而不为侥幸奸伪日止流品不杂今天下不必治于上古而事务日倍于前诚以不正其本而设巧于末也所谓末者吏部条章举赢千百刀笔之人溺于文墨巧史猾徒缘奸而奋臣以为始造簿书备遗忘耳今反求精于案牘而忽于人才是所谓遗剑中流楔舟以记者也夫吏部尚书侍郎以贤而授者也岂不能知人如知之难拔十得五斯可矣今胶以格条据资配职故时人有平配之谓官曹无得贤之实臣谓选部之法敝于不变今若刺史县令精核其人则管内岁当选者使考才行可入流品然后送台又加择焉以所用众寡为州县殿最则州县慎所举可官之才多吏部因其成无庸人之繁矣今岁选乃万计京师米物为耗岂多士哉盖冒滥抵此尔方以一诗一判定其是非适使贤人遗逸此明代之阙政也如知其贤能各有品第每一官缺不以次用之岂不可乎朝廷以令名进人士亦以修名获利利之出众之趋也不如此则小者得于苟求一变而至阿私大者许以分义再变而成朋党矣故用人不可不第其高下高下有次则不可以妄干天下之士必刻意修饰而刑政自清此兴衰之大端也俄迁左补阙九龄有才鉴吏部试拔萃选人及应举者常与右拾遗赵冬曦考次号称详平改司勋员外郎时张说为宰相亲重之与通谱系常曰后出词人之冠也迁中书舍人内供奉封曲江男进中书舍人会帝封泰山说多引两省录事主书及所亲摄官升山超阶至五品九龄当草诏谓说曰官爵者天下公器先德望后劳旧今登封告成千载之绝典而清流隔于殊恩胥史滥加章褻恐制出四方失望方进草尚可以改公宜审计说曰事已决矣悠悠之言不足虑既而果得谤御史中丞宇文融方事田法有所关奏说辄建议违之融积不平九龄复劝说为备说不听俄为融等痛诋几不免九龄亦改太常少卿出为冀州刺史以母不肯去乡里故表换洪州都督徙桂州兼岭南按察选补使始说知集贤院尝荐九龄可备顾问说卒天子思其言召为秘书少监集贤院学士知院事会赐渤海诏而书命无足为者乃诏九龄为之被诏辄成迁工部侍郎知制诰数乞归养诏不许以其弟九皋九章为岭南刺史岁时听给驿省家迁中书侍郎以母丧解毁不胜哀有紫芝产坐侧白鸠白雀巢家树是岁夺哀拜中书侍郎同中书门下平章事固辞不许明年迁中书令始议河南开水屯兼河南稻田使上言废循资格复置十道采访使李林甫无学术见九龄文雅为帝知内忌之会范阳节度使张守珪以斩可突于功帝欲以为侍中九龄曰宰相代天治物有其人然后授不可以赏功帝曰假其名若何对曰名

器不可假也有如平东北二虜陛下何以加之遂止又
将以凉州都督牛仙客为尚书九龄执曰不可尚书古纳言唐家多用旧相及厯内外贵
任有德望者为之仙客河湟一使典耳使班常伯天下
其谓何又欲赐实封九龄曰汉法非有功不封唐遵汉法太宗之制也边将积谷帛缮器
械职耳陛下赏之金帛可也不宜裂地以封帝怒曰岂
以仙客寒士嫌之邪卿固素有门阅哉九龄顿首曰臣荒陬孤生陛下过听以文学用臣
仙客擢胥史目不知书韩信淮阴一壮夫羞绛灌等列
陛下必用仙客臣实耻之帝不悦翌日林甫进曰仙客宰相材也乃不堪尚书邪九龄文
吏拘古义失大体帝因是决用仙客不疑九龄既戾帝
旨固内惧恐遂为林甫所危因帝赐白羽扇乃献赋自况其末曰苟效用之得所虽杀身
而何忌又曰纵秋气之移夺终感恩于篋中帝虽优答
然卒以尚书右丞相罢政事而用仙客自是朝廷士大夫持禄养恩矣尝荐长安尉周子
谅为监察御史子谅劾奏仙客语援讖书帝怒杖子谅
于朝堂流灋州死于道九龄坐举非其人贬荆州长史虽以直道黜不戚戚望惟文史
自娱久之封始兴县伯请还展墓病卒年六十八赠荆
州大都督谥曰文献九龄体弱有酝借故事公卿皆搢笏于带而后乘马九龄独常使人
持之因设笏囊自九龄始帝虽罢九龄每用人必曰风
度得如九龄否初千秋节王公并献宝镜九龄上事鉴十章号千秋金鉴录以伸讽谕与
严挺之袁仁敬梁升卿卢怡善世称其交能终始者及
为相谔谔有大臣节当是时帝在位久稍怠于政故九龄议论必极言得失所推引皆正
人武惠妃谋陷太子瑛九龄执不可妃密遣宦奴牛贵
儿告之曰废必有兴公为援宰相可长处九龄叱曰房幄安有外言哉遽奏之帝为动色
故卒九龄相而太子无患 【按九龄以二十四年十
一月罢政事太子瑛以二十五年四月废故云卒九龄相而太子无患文义甚明事实甚
合而吴缜纠谬妄下訾议以为似实而虚殊不可解】
安禄山初以范阳偏校入奏气骄蹇九龄谓裴光庭曰乱幽州者此胡雏也及讨奚契丹
败张守珪执如京师九龄署其状曰穰苴出师必诛庄
贾孙武习战犹戮宫嫔守珪法行于军禄山不容免死帝赦之九龄曰禄山狼子野心有
逆相宜即事诛之以绝后患帝曰卿无以王衍知石勒
而害忠良卒不从帝后在蜀思其先见为泣下且遣使祭于韶州厚恤其家开元后天下
称曰曲江公而不名云建中元年德宗贤其风烈复赠
司徒 【事见旧书德宗本纪与新书本传合旧传云上皇幸蜀诏赠司徒非是】 子拯
居父丧有节行后为伊阙令禄山盗河洛陷焉终不受
伪官贼平擢太子赞善大夫九龄弟九皋亦有名终岭南节度使其曾孙仲方

张仲方

张仲方

仲方生岐秀父友高郢异之曰是儿必为国器使吾得位将振起之贞元中擢进士宏辞为集贤校理以母丧免会郢拜御史大夫表为御史进累仓部员外郎吕温等以劾奏宰相李吉甫不实坐斥去仲方以温党补金州刺史宦人夺民田仲方三疏申理卒与民直入为度支郎中吉甫卒太常谥恭懿博士尉迟汾请谥敬宪仲方挟前怨建议驳之其言丑诮宪宗恶之贬遂州司马稍进河南少尹郑州刺史敬宗立李程辅政引为谏议大夫帝时诏王播造竞渡舟三十艘度用半岁运费仲方见延英论诤坚苦帝为减三之二又诏幸华清宫仲方曰万乘之行必具葆卫易则失威重不从犹见慰劳郢令崔发以辱小黄门系狱逢赦不见宥仲方曰恩被天下而不行御前乎发繇是不死太和初出为福建观察使召还进至左散骑常侍李德裕秉政以太子宾客分司东都德裕罢复拜常侍李训之变大臣或诛或系翌日羣臣谒宣政殿阖不启羣臣错立朝堂无史卒赞候久乃半扉启使者传召仲方曰有诏可京兆尹然后门辟唤仗于时族夷将相醜足旁午仲方皆密使识其尸俄许收葬故骸不相乱已而禁军横恣仲方不能有所绳劾宰相郑覃更以辞元赏代之出为华州刺史召入授秘书监封曲江县伯卒年七十二赠礼部尚书谥曰成仲方确正有风节既驳吉甫谥世不直其言卒不至显既歿人多伤之

△韩休

韩休京兆长安人父大智洛州司功参军其兄大敏【按世系表大敏乃大智之弟】仕武后为凤阁舍人梁州都督李行褒为部人告变诏大敏鞫治或曰行褒诸李近属后意欲除之无列其冤恐累公大敏曰岂顾身枉人以死乎至则验出之后怒遣御史覆按卒杀行褒而大敏赐死于家休工文辞举贤良玄宗在东宫令条对国政与校书郎赵冬曦并中乙科擢左补阙判主爵员外郎进至礼部侍郎知制诰出为虢州刺史虢于东西京为近州乘輿所至常税厩刍休请均赋它郡中书令张说曰免虢而与它州此守臣为私惠耳休复执论吏白恐忤宰相意休曰刺史不能救百姓之敝何以为政虽得罪所甘心焉讫如休请以母丧解服除为工部侍郎知制诰迁尚书右丞侍中裴光庭卒帝敕萧嵩举所以代者嵩称休志行遂拜黄门侍郎同中书门下平章事休直方不务进趋既为相天下翕然宜之万年尉李美玉有罪帝将放岭南休曰尉小官所犯非大恶今朝廷有大奸请得先治金吾大将军程伯献恃恩而贪室宅舆马僭法度臣请先伯献后美玉帝不许休固争曰细罪且

不容巨猾岂得不问陛下不出伯献臣不敢奉诏帝不能夺初嵩以休柔易故荐之休临事或折正嵩嵩不能平宋璟闻之曰不意休能尔仁者之勇也嵩宽博德可休峭鲠时政得失言之未尝不尽帝尝猎苑中或大张乐稍过差必视左右曰韩休知否已而疏辄至尝引鉴默不乐左右曰自韩休为相陛下殊瘦于昔何不逐之帝曰吾虽瘦天下肥矣且萧嵩每启事必顺旨我退而思天下不安寝韩休敷陈治道多讫直我退而思天下寝必安吾用休社稷计耳后以工部尚书罢迁太子少师封宜阳县子卒年六十八赠扬州大都督谥曰文忠宝应元年赠太子太师子浩洽洪泂混浑洄皆有学尚浩万年主簿坐籍王鉷家赀有隐入为尹鲜于仲通所劾流循州洪为司库员外郎与泂皆以累贬洪后为华州长史浑大理司直安禄山陷京师逼以官浩与洪泂混浑出奔将走行在浩泂浑及洪四子复为贼禽杀之洪善与人交有节义藉甚于时见者为流涕肃宗以大臣子能死难诏赠浩吏部郎中洪太常卿浑太常少卿泂上元中终谏议大夫洽终殿中侍御史

韩混

韩皋

韩洄

韩混

混字太冲以荫补左威卫骑曹参军至德初避地山南采访使李承昭表为通州郡长史改彭王府咨议参军初泂知制诰当草王玙诏无借言衔之及当国混兄弟皆斥冗官玙罢乃擢殿中侍御史三迁吏部员外郎性强直明吏事莅南曹五年簿最详致再迁给事中知兵部选时盗杀富平令韦当贼隶北军鱼朝恩庇之请原死混执奏卒伏辜迁右丞知吏部选以户部侍郎判度支自至德已后所在军兴赋税无艺帑司给输多务因循混清勤检辖吏下及四方输将犯者痛报以法会岁数稔兵革少息故储积谷帛稍丰实然覆治案牘深文钩剥人亦咨怨大历十二年秋大雨害稼京兆尹黎干言状混恐有所蠲贷固表不实代宗令御史行视诸县凡损田三万余顷始渭南令刘藻附混言部田无害御史赵计按验如藻言帝又遣御史朱敖核实害田三千顷帝怒曰县令职在养民而田损不问岂恤隐意邪贬藻南浦员外尉计斥为丰州司户员外参军方是时潦败河中盐池混奏池产瑞盐帝疑遣谏议大夫蒋镇廉状镇畏混还乃贺帝且请置祠诏号宝应灵庆池德宗立恶混掊刻徙太常卿议者不厌乃出为晋州刺史未几迁浙江东西观察使寻检校礼部尚书为镇海军节度使 【唐会要建中二年六月置浙江东西

节度使寻改为镇海军以团练为节度徙理润州】 绥辑百姓均租调不踰年境内称治
帝在奉天淮汴震骚滉训士卒分兵戍河南既狩梁州
又献缣十万匹请以镇兵三万助讨贼有诏嘉劳进检校尚书右仆射封南阳郡公李希
烈陷汴州滉遣裨将王栖曜李长荣柏良器以劲卒万
人进讨次睢阳而贼已攻盩厔栖曜等破走之漕路无梗完靖东南滉功居多自京都乱
即于所部闭关梁禁牛马出境筑石头五城穿井近百
所缮馆第数十修坞壁起建业抵京岷楼雉相属以备车驾渡江且申儆自守也自德宗
出狩及还京师军用既繁道路又阻关中饥馑加之蝗
旱江南两浙转输粟帛府无虚月军国皆仰给焉李晟屯渭北滉运米百艘馈之临江顾
僚吏曰天子蒙尘臣下之耻也乃自举一囊将佐以下
争负之须臾而毕船置十弩手有寇则扣舷相警贼不能剽时关中斗米五百及滉米至
价减十之八贞元元年加检校左仆射同中书门下平
章事江淮转运使封郑国公以缮治石头城人颇言有窥望意虽帝亦惑之会李泌闲关
辨数帝意乃解二年更封晋是岁入朝献羨钱五百余
万缙诏加度支诸道转运盐铁等使右丞元琇判度支也以关辅旱请运江南租米西给
京师帝委滉专督之而琇畏其刚愎难共事请自江至
扬子滉主之扬子以北自主之滉由是衔琇会琇以京师钱重货轻发江东监院钱四十
万缙入关滉给奏运钱至京师率费万致千不可从帝
责谓琇琇曰千钱之重与斗米均费三百可致帝以谕滉滉执不可至是诬劾琇馈米与
淄青李纳河中李怀光帝怒贬琇雷州司户参军左丞
董晋白宰相刘滋齐映曰昨关辅用兵琇不增一赋而军兴皆济可谓劳臣今被谪无名
刑滥人惧且令权臣逞志公胡不请三司鞫之滋映不
能用给事中袁高抗疏申执滉指为党与寝不报刘玄佐不朝帝密诏滉讽之及过汴玄
佐素惮滉修属吏礼滉结为兄弟入拜其母置酒设女
乐酒行滉曰宜早见天子不可使夫人白首与新妇子孙填宫掖也玄佐泣悟滉以钱二
十万缙为办装又以绫二十万犒军玄佐入朝滉荐可
任边事时两河罢兵滉上言吐蕃盗河湟久近岁寢弱而西迫大食北抗回鹘东抗南诏
分军外战兵在河陇者不过五六万若朝廷命将以十
万众城凉鄯洮渭各置兵二万为守御臣请以本道财赋馈军给三年费然后营田积粟
且耕且战则河陇之地可翹足而复帝善其言因访玄
佐玄佐请行会滉病甚张延赏奏减州县冗官收禄俸募战士西讨玄佐虑延赏靳削资
储辞犬戎未衅不可轻进因称疾延赏知不可用乃止
滉寻卒年六十五赠太傅谥曰忠肃滉幼有美名所与游皆天下豪俊性节俭衣裘茵衽
十年一易甚暑不执扇居处陋薄取庇风雨门当列戟

以父时第门不忍坏乃不请堂先无挟庖弟洄稍增补之混见即彻去曰先君容焉吾等奉之常恐失坠安敢改作以伤俭德居重位不为家人资产自始仕至将相乘五马无不终枵下好鼓琴书得张旭笔法画与宗人干相埒以非急务故自晦不传于人善治易春秋着通例及天文事序议各一篇初判度支李晟以裨将白军事混待之加礼使其子拜之厚遗器币鞍马后晟终立大功其在浙右政令明察然颇苛惨晚节尤甚诛杀残忍一判辄剿数十人尝遣官分察境内情涉疑似必寘极法婺州属县有犯令者诛及邻伍坐死数十百人及入朝自以宿齿早达稍薄后进丞郎卿佐接之简倨人以此怨之【按李泌称混公忠清俭请以百口保之而混亦卒能以臣节始终不媿其语特其刚强刻急取怨于众故一时议论无右之者石头之役谤语沸腾而本传载其耀武海上会兵金山与陈少游以金缗相饷遣兵还李长荣以亲吏卢复为宣州刺史等事皆微文刺讥疑是当时秉笔者媒檠之辞而新旧书相承载之不及致察耳今皆削之以祛后世之惑】子羣皋羣终国子司业

韩皋

皋字仲闻资质重厚有大臣器由云阳尉策贤良方正异等拜右拾遗累迁考功员外郎父丧德宗遣使吊问俾论譔混行事号泣承命立草数千言以进帝嘉之服除宰相拟考功郎中帝为加知制诰迁中书舍人御史中丞兵部侍郎号称职俄拜京兆尹奏署郑锋为仓曹参军锋苛敛吏乃说皋悉索府中杂钱折余粟麦三十万石献于帝皋悦之奏为兴平令贞元十四年大旱民请蠲租赋皋府帑已空内忧恐奏不敢实会中人出入百姓遮道诉之事闻贬抚州员外司马未几改杭州刺史入拜尚书右丞王叔文用事皋嫉之谓人曰吾不能事新贵从弟晔以告叔文叔文怒出为鄂岳蕲沔观察使叔文败即拜节度徙镇海入为户部尚书历东都留守忠武军节度使以简俭为治所至有绩召拜吏部尚书兼太子少傅庄宪太后崩充大明宫留守穆宗立以旧傅恩加检校尚书右仆射俄为真又进左仆射长庆四年复为东都留守卒于道年七十九赠太子太保谥曰贞皋貌类父既孤不复视鉴生知音律常曰长年后不愿听乐以门内事多逆知之闻鼓琴至止息叹曰美哉稽康之为是曲其当晋魏之际乎其音主商商为秋秋者天将摇落肃杀其岁之晏乎晋乘金运商又金声此所以知魏方季而晋将代也缓其商弦与宫同音臣夺君之义知司马氏之将篡也王陵母邱俭文钦诸葛诞继为扬州都督咸有兴复之谋皆为司马懿父子所杀康以扬州故广陵地陵等皆魏大臣故名其曲曰广陵散言魏散亡自广陵始止息者晋虽暴兴终止息于此其

哀愤躁蹙憯痛迫胁之音尽于是矣永嘉之乱其兆乎
康避晋魏之祸托以鬼神以俟后世知音云

韩洄

洄字幼深荫补弘文生满岁参调吏部侍郎达奚珣以地望抑之除章怀太子陵令
安禄山乱家七人遇害洄避难江南蔬食不听乐开元
中授睦州别驾刘晏表为屯田员外郎知扬子留后召拜谏议大夫与补阙李翰数上章
言得失擢知制造坐与元载善贬邵州司户参军德宗
即位起为淮南黜陟使复为谏议大夫晏被罪天下钱谷归尚书省而省司失职久无纲
纪莫总其任乃擢洄户部侍郎判度支洄上言江淮七
监岁铸钱四万五千缗输京师工用运转每缗度二千是本倍于子今商州红崖冶产铜
而洛源监久废请凿山取铜即冶旧监置十炉铸之岁
得钱七万二千缗度费每缗九百则得可浮本矣江淮七监请皆罢又言天下铜铁冶乃
山泽利当归王者请悉隶盐铁使从之复罢省胥史冗
食二千人积米长安万年二县各数十万石视年丰耗而发敛焉故人不艰食洄与杨炎
善炎得罪不自安无何皋上疏理炎罪帝意洄教之贬
蜀州刺史兴元元年入为兵部侍郎转京兆尹贞元十年终国子祭酒赠户部尚书

钦定续通志卷二百三十一

●钦定续通志卷二百三十二 列传三十二

列传

唐 【三十二】

○唐三十二

张嘉贞【延赏宏靖】 源干曜【光裕】 萧嵩【华复】 裴耀卿【佶】

李适之

张嘉贞

源干曜

萧嵩

裴耀卿

李适之

△张嘉贞

张嘉贞本范阳旧姓高祖子咤【世系表作咤子】仕隋终河东郡丞遂家蒲州
为猗氏人以五经举补平乡尉坐事免长安中侍御史
张循宪使河东事有未决病之问吏曰若颇知有佳客乎吏以嘉贞对循宪召见咨以事
嘉贞条析理分莫不洗然循宪大惊试命草奏皆意所
未及及还武后以为能循宪对皆嘉贞所为因请以官让后曰朕宁无一官自进贤邪召

见内殿嘉贞仪止秀伟奏对侃侃后异之拜监察御史
擢循宪司勋郎中酬其得人累迁兵部员外郎时功状盈几郎吏不能决嘉贞为详处不
阅旬廷无稽牒进中书舍人历梁秦二州都督并州长
史政以严办吏下畏之奏事京师玄宗善其政数慰劳嘉贞自陈少孤与弟嘉佑相恃以
长今为鄯州别驾愿内徙使少相近冀尽力报死无恨
帝为徙嘉佑忻州刺史突厥九姓新内属杂处太原北嘉贞请置天兵军绥护其众即以
为天兵使明年入朝或告其反【旧书云或告其在
军奢僭及赃贿御史大夫王峻因劾奏之】按无状帝令坐告者嘉贞辞曰国之重兵利
器皆在边今告者一不当即罪之臣恐塞言路且为未
来之患遂得减死天子以为忠且许以相嘉贞因曰昔马周起徒步谒人主血气方壮太
宗用之能尽其才甫五十而没向使用少晚则无及己
陛下不以臣不肖必用之要及其时后衰老无能为也帝曰第往行召卿及宋璟等罢即
以为中书侍郎同中书门下平章事迁中书令居位二
年善敷奏敏于裁遣然强躁论者恨其不裕帝数幸东都洛阳主簿王钧者为嘉贞缮第
会以赃闻有诏杖之朝堂嘉贞畏蔑染促有司速毙以
灭言秘书监姜皎得罪嘉贞希权幸意请加诏杖已而皎死会广州都督裴旻先抵罪帝
问法如何嘉贞复援皎比张说曰不然刑不上大夫以
近君也士可杀不可辱皎官三品且有功若罪应死即杀独不宜廷辱以卒伍待也况勋
贵在八议乎事往不可咎旻先岂容复滥哉帝然之嘉
贞退不悦曰何言事之深也说曰宰相时来则为非可长保若贵臣尽杖正恐吾辈及之
渠不为天下士君子地乎初嘉贞在兵部而说已为侍
郎及皆相说位其下议论无所让故说不平未几嘉佑拜金吾将军兄弟要近人颇惮媚
帝幸太原嘉佑以赃闻说誅嘉贞素服待罪不复入谒
遂出为幽州刺史【旧书通鉴俱作幽州】说代其处嘉贞衔悔谓人曰中书令幸二
员何相迫邪踰年为户部尚书益州长史判都督事诏
宴中书省与宰相会嘉贞衔说不已于坐慢骂说源干曜王峻共平解乃得去明年王守
一死坐与厚善贬台州刺史俄拜工部尚书为定州刺
史知北平军事封河东侯及行帝赋诗诏百官祖道上东门久之以疾丐还东都诏医驰
驿护视卒年六十四赠益州大都督谥曰恭肃嘉贞性
简疏与人不疑内旷如也或时以此失有嗜进者汲引之能以恩终始所荐中书舍人苗
延嗣吕太一考功员外郎员嘉静殿中侍御史崔训皆
位清要日与议政事故当时语曰令君四俊苗吕崔员其始为中书舍人崔湜轻之后与
议事正出其上湜惊曰此终其坐后十年而为中书令
嘉贞虽贵不立田园有劝之者答曰吾尝相国矣未死岂有饥寒忧若以谴去虽富田产

犹不能有也近世士大夫务广田宅为不肖子酒色费
我无是也引万年主簿韩朝宗为御史卒后十余岁朝宗以京兆尹见帝曰陛下待宰相
进退皆以礼身虽没子孙咸在廷张嘉贞晚一息宝符
独未官帝惘然召拜左司御率府兵曹参军赐名曰延赏

张延赏

张宏靖

张延赏

延赏虽蚤孤而博涉经史通吏治苗晋卿尤器许以女妻之肃宗在凤翔擢监察御
史辟署关内节度使王思礼从事思礼守北都表为副
入迁刑部郎中始元载被用以晋卿力故厚遇延赏荐为给事中御史中丞大历初除河
南尹诸道营田副使河洛当兵冲邑里墟榛延赏政简
约轻徭赋疏河渠筑宫庙数年流庸归附都阙完雄有诏褒美时罢河南山南等副元帅
兵屯东都诏延赏知留守以兵属居五年治行第一召
还会李少良劾元载阴罪载斥其狂下御史台治讯而延赏适拜大夫不满所私出为淮
南节度使岁旱民它迁吏禁之延赏曰食者人恃以活
拘此而毙不如适彼而生苟存吾人何限为乃具舟遣之敕吏为修室庐宽逋债已而归
更增于旧瓜步舟舳津凑而遥系江南延赏请度属扬
州自是行无稽壅会母丧免服除累拜荆南剑南西川节度使建中中西山兵马使张朏
袭成都为乱延赏奔鹿头戍朏酣乱不设备延赏谋知
之遣将叱干遂捕斩朏复成都自杨国忠讨南蛮三蜀疲罄及乘舆临狩糜用百出后更
郭英义崔窳杨子琳乱公私萧然延赏事为之制簿入
谨出府库遂实德宗在奉天贡献踵道及次梁倚剑蜀为根本即拜中书舍人同中书门
下平章事帝还诏入秉政初李晟总神策军戍成都及
还以营妓自随延赏遣吏夺取故晟衔之 【谨按通鉴辑览 御批延赏儉邪原不可
相然晟为大将不宜取妓又以私憾酿成衅端则取
祸不得谓无因自不待尚结赞之反闲耳】 至是镇凤翔帝所倚重表陈宿憾帝不得已
罢延赏为尚书左仆射然雅意决用之以晟尝为韩滉
识擢命滉移书道意及俱入朝滉从容邀晟平憾且使荐延赏于帝于是复拜平章事既
而宴禁中帝出瑞锦一端分系之以示和解晟因为子
请婚延赏不许晟曰吾武夫虽有旧恶杯酒闲可解儒者难犯外睦而内含怒今不许婚
衅未忘也先时吐蕃尚结赞请和晟奏戎狄无信不可
许滉亦请调军食峙边无听和帝疑将帅邀功生事议未决会滉卒延赏揣帝意遂罢晟
兵奏以给事中郑云逵代之帝曰晟有社稷功俾自择
代者乃用邢君牙而拜晟太尉兼中书令奉朝请是夏吐蕃背约劫浑瑊将校多没如晟

等策故事临轩册拜三公中书令读册侍中赞礼或阙
则宰相摄事晟当拜而延赏薄其礼用尚书崔汉衡刘滋代摄 【唐会要兵部尚书崔汉
衡读册左散骑常侍刘滋奏礼毕宰相不亲行事自
此始】 时议遣刘元佐复河湟延赏因建言今官繁费广宜并省其员悉收禀料粮课输
京师赏战士帝许之即诏上州留上佐录事参军司户
司兵司士各一员余参军留半中州减司土上县令尉具中县省尉京兆河南府司录判
官赤县丞簿尉各省半余府准上州诏下内外始怨元
佐辞西讨延赏更用李抱真抱真怨延赏夺晟兵不肯行田是功臣解体是年除吏千五
百员当省者千余道路訾谤浸淫闻于帝延赏惧请诏
州县或考先满或摄掌遇停限而官见乏者听在所择省员有干誉者权补以才不以资
而大臣马燧白志贞韦伦表言省官太甚不可行会延
赏疾宰相李泌一切奏复卒年六十一赠太保谥曰成肃延赏更四镇所至民颂其爱及
当国饰情复怨不称所望然帝待遇厚称其奏议有宰
相体专属以吏事而以军食委李泌刑法委柳浑时以为任职子宏靖

张宏靖

宏靖字符理 【世系表初名调】 雅厚信直以荫为河南参军杜亚辟佐其府亚
疑牙将令狐运劫饷绢宏靖直其枉亚怒斥出府裴延
龄为德阳公主治第欲徙宏靖先庙上疏自言德宗异之擢监察御史累迁户部侍郎陕
州观察使徙河中节度使元和九年拜刑部尚书同中
书门下平章事吴少阳死其子元济擅总留务宪宗欲诛之宏靖请先遣使吊赠待不恭
乃加兵诏可进中书侍郎封高平县侯武元衡遇害贼
未得王承宗邸厮卒张晏被告诏付御史台劾验有状宏靖疑御史傅致晏罪言之帝不
听遂诛晏并讨承宗宏靖曰戎事并兴鲜有济不如悉
力淮西已乃治河朔议再迁乃归政以检校吏部尚书同平章事为河东节度使未及镇
诏伐承宗宏靖自以谏不听思自劾乃大阅兵请身讨
贼诏许出军毋亲往既王师无功帝忆曩言下诏褒美宏靖亦遣使闲道喻承宗承宗款
附 【是时布衣柏耆奉裴度书往说承宗事见度耆
二傅非特宏靖力也】 召拜吏部尚书徙节宣武宣武承韩宏虐政代以宽简民便安之
长庆初刘总举所部内属请宏靖为代进检校司空仍
同中书门下平章事充卢龙节度使始入幽州老幼夹道观河朔旧将与士卒均寒暑无
障盖安舆宏靖素贵肩舆而行人骇异俗谓禄山思明
为二圣宏靖惩始乱欲变其俗乃发墓毁棺众滋不悦旬一决事宾客将吏罕闻其言委
成于参佐韦雍张宗厚 【通鉴作张宗元】 又不通
大体腴刻军赐专以法根治之官属轻佻酣肆夜归烛火满街前后呵止其诟责士皆曰

反虜嘗曰天下無事而輩挽兩石弓不如識一丁字軍
中以氣自任銜之總之朝詔以錢百萬緡賚將士宏靖取二十萬充府雜費有怨言會雍
欲鞭小將蓊人未嘗更笞辱不伏宏靖系之是夕軍亂
囚宏靖蓊門館掠其家賫婢妾執雍等殺之判官張徹始就職【按韓愈作徹墓志稱徹
先在宏靖府中牛僧孺表為御史而宏靖密奏留之
發半道詔還鎮數日軍亂新書云始就職舊書云自遠使歸皆未核其實】得不殺與宏
靖同被囚尋畏其謀欲遷別館徹大罵曰汝何敢反行
且族滅眾怒殺之數曰吏卒稍自悔詣館謝宏靖願革心事之三請不對眾曰公不赦
我矣軍中可一日無帥乎遂取朱克融主留后詔貶宏
靖太子賓客分司東都再貶吉州刺史明年出幽州改撫州刺史稍遷太子少師卒年六
十五贈太子太保宏靖少有令聞杜鴻漸杜佑皆器許
歷台閣顯級人以為有輔相才及居位簡默自處無所規拂幽蓊初效順不能因俗制變
故范陽復亂家聚書畫俸秘府先第在東都思順里時
號三相張家子文規次宗裴度秉政引文規為右補闕度出襄陽貶溫令度奏置幕府累
轉吏部員外郎右丞韋溫劾文規父昔被囚逗留不赴
難不宜任省署出為安州刺史終桂管觀察使子彥遠博學有文辭干符中至大理卿次
宗開成初為起居舍人文宗始詔左右史立螭頭下記
宰相奏對既退帝召見審正是非故開成時事為最詳以稱職兼集賢院直學士文規左
遷改國子博士史館修撰李德裕再當國引為考功員
外郎知制誥出澧明二州刺史卒孫茂樞【按世系表茂樞乃宗之次子未知孰是】
字休府及進士第天祐中累遷祠部郎中知制誥坐柳
璨事貶博昌尉

△源干曜

源干曜相州臨漳人祖師民隋刑部侍郎父直心高宗時太常伯流死嶺南干曜第
進士神龍中以殿中侍御史黜陟江東奏課最遷諫議
大夫景雲後公卿百官上巳九日廢射禮【按會要麟德元年三月三日展大射禮自後
遂不行至景雲二年干曜上此疏新書謂景雲後始
廢非也】干曜以為古之擇士先觀射禮所以別邪正觀德行中祭祀辟寇戎古先哲王
莫不遞襲比年以來射禮不讲所司恠費而舊典為虧
請依故事舉行開元初邠王府吏犯法元宗敕左右為王求才長史太常卿姜皎荐干曜
自梁州都督召見神氣爽澈占對有序帝悅之擢少府
少監兼邠王府長史累進尚書右丞四年拜黃門侍郎同紫微黃門平章事踰月與姚崇
俱罷會帝東幸以京兆尹留守京師治尚寬簡人安之
居三年政如始至仗內失白鷹詔京兆督捕獲于野絰榛死吏懼得罪干曜曰上仁明不

以畜玩寘罪苟获戾尹专之遂入自劾帝不问众伏其知体而善引咎八年复为黄门侍郎同中书门下三品进位侍中建言大臣子并求京职使俊乂之士率任外官非平施之道臣三子俱在京师请出二补外诏可乃以子河南参军弼为绛州司功太祝洁为郑尉诏曰干曜身率庶寮既请外其子又复下迁传不云乎范宣子让其下皆让其令文武官父子昆弟三人在京师者分任于外繇是公卿子弟皆出补帝尝自较其考与张说偕赐时议者言国执政所以同休戚不崇异无以责功帝乃诏中书门下共食实户三百堂封自此始东封还为尚书左丞相仍兼侍中久之罢侍中迁太子少师避祖名更授少傅封安阳郡公帝幸东都以老疾不任陪扈卒赠幽州大都督干曜历官皆以清慎恪敏得名为相十年与张嘉贞张说李元纁杜暹先后同秉政事未尝廷议可否晚节唯唯联署而已务为宽平惇大故鲜咎悔初因姜皎荐及皎为嘉贞所排至得罪讫不申救君子讥焉

源光裕

源光裕

族孙光裕亦有名居官号清愿抚诸弟友义为中书舍人与杨滔刘令植同删着开元新格历尚书左丞会选诸司长官为刺史光裕任郑州为世良吏卒官子洧以雍睦保家士友推之天宝中为给事中襄州刺史安禄山犯河洛为江陵大都督长史以御贼卒赠礼部尚书谥曰懿

△萧嵩

萧嵩特进宋国公瑀从曾孙也祖钧博学有才望永徽中历谏议大夫宏文馆学士左武侯别驾卢文操盗库物高宗命杀之钧曰文操诚不可赦但恐天下谓陛下重财轻法任喜怒杀人帝曰真谏议也诏原死太常乐工为宫人通问遗特诏杀之且附律钧言工所犯在未附律前不应死乃流工远裔终太子率更令父瓘渝州长史居母丧以毁卒嵩貌伟秀美须髯始娶会稽贺晦女僚壻陆象先宰相子时为洛阳尉已有名而嵩汨汨未仕善相人夏荣谓象先曰君后十年贵冠人臣然不若萧郎位重年高一门皆贵人未之许神龙元年始调洺州参军事桓彦范为刺史待以异礼河北黜陟使姜师度表为判官【旧书景云元年为醴泉尉时陆象先已为中书侍郎引为监察御史及象先知政事嵩又骤迁殿中侍御史】开元初擢中书舍人时崔琳王邱齐澣皆有名以嵩少术学不以辈行许也独姚崇称其远到历宋州刺史迁尚书左丞十四年以兵部尚书领朔方节度使既赴军有诏供帐饯定鼎门外玄宗赋诗劳行会吐蕃大将悉诺逻恭禄及烛龙莽布支陷瓜州执刺史田元

献回纥又杀凉州守将王君■（冕，大代兔）河陇大震帝择堪任边者徙嵩河西节度使判凉州事封兰陵县子嵩表裴宽郭虚己牛仙客置幕府以建康军使张守珪为瓜州刺史完树陁坞怀保边人于时悉诺逻恭禄威愴诸部吐蕃倚其健噬边嵩乃纵反闲示疑端赞普果诛之使悉末明攻瓜州守珪拒甚力虜引却会鄯州都督张志亮【旧书本纪及吐蕃传作张忠亮实录唐厯作志亮】破贼青海西嵩又遣副将杜宾客率强弩四千与吐蕃战祁连城下自晨鬪迄晡乃大溃斩一将虜哭震山谷露布至帝大悦授嵩同中书门下三品又官一子恩顾第一十七年进兼中书令自张说罢相令缺四年嵩得之然常遥领河西节度在公慎密人莫见其际子衡尚新昌公主嵩妻入谒帝呼为亲家仪物甚盛俄封徐国公初裴光庭与嵩数不协光庭卒帝委嵩择相嵩推韩休及休同位峭正不相假至校曲直帝前嵩惭乞骸骨帝慰之曰朕未厌卿何庸去乎嵩伏曰臣待罪宰相爵位既极幸陛下未厌得以乞身有如厌臣首领且不保又安得自遂因流涕帝为改容乃授尚书右丞相与休皆罢是日荆州进黄柑帝以紫帟包赐之擢子华给事中久之进太子太师而幽州节度使张守珪坐赂中人牛仙童得罪李林甫素忌嵩因言嵩尝以城南墅遗仙童贬青州刺史寻复拜太子太师固请老见许嵩退修葺园区优游自治而华为工部侍郎衡以尚主位三品就养年踰八十士艳其荣天宝八载卒赠开府仪同三司

萧华

萧复

萧华

华谨重方雅有家法嗣爵天宝末为兵部侍郎禄山乱陷贼逼守魏州郭子仪攻安庆绪于相州华闲道奉表欲举魏以应为贼所执会崔光远得魏州破械出之魏人德华庇免争来诣光远乞留有诏即授刺史史思明反子仪惧复失华乃表崔光远代之而召置军中相州兵溃华还朝犹以污贼降试秘书少监稍迁尚书右丞擢河中晋绛节度使上元初以中书侍郎同中书门下平章事李辅国用事求宰相华扼之辅国怨会肃宗大渐矫诏罢华为礼部尚书引元载以代载助辅国贬华为峡州司马卒二子恒悟恒子俛悟子自有传

萧复

复字履初衡子生戚里嫻从豪汰以服御舆马相夸复常衣垢弊以清操显力学非名士夙儒不与游华每叹曰此子当兴吾宗推主荫为宫门郎广德中岁大饥家百口不自振议鬻昭应墅宰相王缙欲得之使弟紘说曰以君

才宜在左右胡不以墅奉丞相取右职复曰鬻先人墅以济孀单吾何用美官使门内馁且寒乎缙憾之由是废数岁乃历歙池二州刺史【旧书云自常州刺史为潭州刺史与此异】治状应条迁湖南观察使改同州刺史岁歉州有京畿观察使储粟复辄发以贷人有司劾治诏削阶停刺史或吊之复曰苟利于人胡责之辞久乃拜兵部侍郎普王为襄汉元帅进复户部尚书统军长史旧制为行军长史德宗以复父讳更之未行扈狩奉天帝恶庠隘欲西如凤翔依张镒复曰凤翔乃泚旧兵今泚悖乱当有同恶者虽镒臣畏不免帝曰朕业行留一日以验尔言俄而镒为李楚琳所害以是拜吏部尚书同中书门下平章事复尝言艰难以来始用宦者监军权望太重是曹止可委宫掖事兵要政机叵使参领帝不听又言陛下初政清明自杨炎卢■〈木巳〉柄用滓秽盛德播越及兹今陛下深革睿思臣敢不尽力若使臣依阿偷免不敢当宰相【谨按通鉴辑览 御批德宗纵宦官袒卢■〈木巳〉几于好人所恶故其后虽能克复还都而播迁至再亦已灾及其身萧复抗直虽云不量凿而正柄然比之当时朝臣可谓铁中铮铮者矣】■〈木巳〉对帝或谄谀阿匿复厉言■〈木巳〉词不正帝色眙谓左右曰复慢我因诏复充山南江淮湖南岭南等道宣抚安慰使兴元初进门下侍郎初淮南陈少游左附李希烈而张镒判官韦皋杀邠陇叛卒不应楚琳复还执政建言陛下反正功臣已贵矣唯甄善汰恶为未明少游位将相首臣贼皋名浅官下独挺挺抗忠如以皋代少游则天下了然知逆顺之理帝许之复出中官马钦绪揖宰相刘从一附耳语既而从一密谗复曰有诏与公议向所奏不欲李勉卢翰闻知复曰朝廷大事正当谋及公卿如勉等非其人当罢去既曰宰相而谋议可独避之乎今与公行此或可第恐寢以为常政由是敝从一以闻帝不悦复辞疾上政事许之弟升尚郃国大长公主肃宗女也升早卒主以奸蛊事再得罪废诸子悉逐丑地帝衔曩愆故复坐是检校太子左庶子废居饶州贞元四年卒年五十七复望阙高华厉名节不通狎流俗及为相临事严方数拂帝意故居位亟解性孝友既贬晏然口未尝言所累复子湛湛子寘咸通中位宰相无显功史逸其传寘于遘有传

△裴耀卿

裴耀卿字焕之涇州刺史守真次子也数岁能属文擢童子举稍迁秘书省正字相王府典签与掾邱悦文学韦利器更直备顾问府中号学直王即帝位授国子王簿累迁长安令旧有配户和市法百姓厌苦耀卿一切责豪门坐贾预给以直绝僦欺之弊及去人思之为济州刺史

济当走集地广而户寡会天子东巡耀卿置三梁十驿科敛均省为东州知顿最封禅还次宋州宴从官帝欢甚谓张说曰前日出使巡天下观风俗察吏善恶不得实今朕有事岱宗而怀州刺史王邱伋牵之外一无它献魏州刺史崔沔供帐不施锦绣示我以俭济州刺史裴曜卿上书数百言至曰人或重扰即不足以告成朕置书座右以自戒此三人者不劳人以市恩真良吏矣俄徙宣州 【通鉴作定州】 前此大水河防坏诸州不敢擅兴役曜卿曰非至公也乃躬护作役未讫有诏徙官曜卿惧功不成弗即宣而抚巡飭厉愈急堤成发诏而去济人为立碑颂德

历冀州入拜户部侍郎开元二十年副信安王祗讨契丹又持帛二十万赐立功奚官曜卿曰帛涉寇境不可以不备乃令先与期而分道赐之一日毕突厥室韦果邀险来袭而曜卿已还迁京兆尹明年秋雨害稼京师饥帝将幸东都召问所以救人者曜卿曰陛下既东巡百司毕从则太仓及三辅积贮可遣重臣分道赈给计可支一二年自东都益广漕运以实关辅待稍充实则乘輿西还事蔑不济且国家帝业本在京师当百代不易但秦中地狭谷少水旱易匮往贞观永徽时禄禀数少岁漕粟二十万略足今用度寔广漕运数倍犹不能支故数东幸以就敖粟为国大计臣愿广陕运道使京师常有三年食虽水旱不足忧今天下输丁约四百万每丁支出百钱为陕洛运费又益半为营窰用分纳司农及河南陕州又令租米悉输东都从都至陕河路艰险既用陆运无由广致若广漕路变陆为水则所支有余动赢万计且河南租船候水始进吴工不习河漕处处停留易生隐盗请置仓河口以纳东租然后官自顾载分入河洛度三门东西各筑一仓自东至者东仓受之三门迫险则旁河凿山以开车道运数十里西仓受之度宜徐运抵太原仓趋河入渭更无留阻可减费巨万天子然其计拜黄门侍郎同中书门下平章事充转运使于是置河阴集津三门仓 【详郑氏食货略】 引天下租繇盟津泝河而西三年积七百万石省运费三十万缗或曰以此缗纳于上足以明功答曰是谓以国财求宠其可乎敕吏以为和市费迁侍中二十四年以尚书左丞相罢封赵城侯夷州刺史杨浚以赃抵死有诏杖六十流古州曜卿上言刺史县令为人父母风化所瞻今决杖赎死恩则已优而解体受笞事颇为辱恐非崇守长劝风俗之意谓凡刺史县令于本部决杖特乞停减从之是时特进盖嘉运破突骑施还诏为河西陇右节度使因令经略吐蕃嘉运以新立功日酣邀未赴屯曜卿言于帝曰嘉运精劲勇烈诚有余然臣见其夸言骄色窃忧之恐不足与立事今盛秋防边日月已薄当与军中士卒相见夫兵未及训不能知法士未怀

惠不可共心纵使幸而有功非师出以律之义且万人之命倚于将军今酣呶朝夕胖肆自安恐非爱人忧国者苟不易帅宜严诏申约以督其行帝乃促嘉运诣部卒无功还天宝初进尚书左仆射俄改右仆射而李林甫代之【旧书作改为尚书右仆射寻转左仆射与新书互异】

上日林甫至本省具朝服剑佩博士导郎官唱按礼毕就耀卿听事乃常服以赞者主事导唱林甫惊曰班爵与公同而礼数异何也耀卿曰比苦眩不堪重衣又郎博士纷泊非病士所宜林甫默然惭居一岁卒年六十三赠太子太傅谥曰文献子综吏部郎中综子佶

裴佶

裴佶

佶字宏正幼能文第进士补校书郎判入高等授蓝田尉德宗诏发畿县民城奉天严郢为京兆政刻急本曹尉韦重规妻乳且疾畏郢之暴不敢免佶请代役无愆程当时称其义帝幸梁佶奔见行在授补阙李怀光以河中叛佶建议请讨帝深器之诏用卢■〈木巳〉为饶州刺史与谏官执不可历迁谏议大夫黔中观察使韦士文为夷獠所逐诏佶代之部夷安服历同州刺史中书舍人迁尚书右丞时李巽以兵部尚书领盐铁将迁使局就本曹经构已半会佶至以为不可巽虽怙恩而强犹撤之时重其有守改吏部侍郎以疾为国子祭酒工部尚书卒赠吏部尚书谥曰贞佶清劲明锐所与友皆第一流郑余庆尤厚善既歿余庆为行服士林美之

△李适之

李适之恒山王承干孙也始名昌神龙初擢左卫郎将开元中累迁通州刺史以办治闻按察使韩朝宗言诸朝擢泰州都督徙陕州刺史河南尹为政不苛细吏民便之元宗患谷洛岁暴耗徭力诏适之以禁钱作三大防曰上阳积翠月陂自是水不能患刻石着功进御史大夫二十七年兼幽州长史知节度事适之以祖被废而父象见逐武后时葬故有阙至是丐陪瘞昭陵阙中诏可褒册典物焜照都邑行道为咨叹迁刑部尚书适之喜宾客饮酒斗余不乱夜宴娱昼决事案无留辞天宝元年代牛仙客为左相累封清和县公与李林甫争权不协林甫阴贼即好谓适之曰华山生金采之可以富国顾帝未之知适之性疏信其言他日从容为帝道之帝喜以问林甫对曰臣知之旧矣顾华山陛下本命王气之舍不可以穿治故不敢闻帝以林甫为爱己而薄适之不亲于是皇甫惟明韦坚裴宽韩朝宗皆适之厚善悉为林甫所构得罪适之惧不自安乃上宰政求散职以太子少保罢欣然自以为免祸俄坐韦坚累贬宜春太守会

御史罗希奭阴被诏杀坚等贬所州县震恐及口宜春

适之惧仰药自杀【旧书以李季卿为适之子新书作李适子别见文苑传按世系表适之一子名雷别无名季卿者新书为是】

钦定续通志卷二百三十二

●钦定续通志卷二百三十三 列传三十三

列传

唐【三十三】

○唐三十三

苏珣【晋】

尹思贞

毕构

李杰

解琬

裴灌

【宽 谥胄】

郑惟忠

王志愔

卢

从愿

李朝隐

王邱

严挺之【武绶】

苏珣

尹思贞

毕构

李杰

解琬

裴灌

郑惟忠

王志愔

卢从愿

李朝隐

王邱

严挺之

△苏珣

苏珣雍州蓝田人中明经第调鄂尉时李义琰为雍州长史鄂多讼日至长史府珣裁决明辨自是无诉者义琰异之顾听事曰此公坐也

恨吾齿晚不及见垂拱初为监察御史武后将杀韩鲁诸王付珣密牒按讯珣推之无状或言珣与韩鲁等有私后诘之挺议无所挠后不悦曰

卿大雅士此狱不足诿卿即诏监军河西五迁右司郎中御史王宏义附来俊臣为酷世畏疾莫敢触其锋会督伐材于虢笞督过程丁夫多死

珣按奏弘义坐免迁给事中进左肃政台御史大夫后营大像白司马坂糜用亿计珣上疏切谏见纳中宗将斩韦月将珣执据时令不可以大

戮忤三思意改右台俄出为岐州刺史复为右台大夫会节愍太子败诏株索支党时睿宗居藩为狱辞牵逮珣密启保辩亦会宰相开陈帝感

悟多所舍贷擢户部尚书封河内郡公以检校太子詹事致仕卒年八十一赠兖州都督谥曰文

苏晋

苏晋

子晋数岁知为文作八卦论吏部侍郎房颖叔秘书少监王绍宗叹曰后来之王粲也举进士及大礼科皆上第先天中为中书舍人元宗监国所下制命多晋及贾曾为之屡献说言天子嘉允出为泗州刺史以珣老请解职奉养珣卒厯户部侍郎袭爵迁吏部时宋璟兼尚书事晋与齐澣更典二都选既糊名校判而晋独事赏拔当时誉之及裴光庭知尚书有过官应批退者就籍以朱笔点头而已晋因榜选院曰门下点头者更拟光庭以为侮己出晋汝州刺史迁魏州终太子左庶子始晋与洛人张循之仲之兄弟善而二人以学显循之上书忤武后见杀仲之神龙中谋去武三思为宋之慈【通鉴作宋之逊】等所发死晋厚抚其子渐为营婚宦晋卒渐丧之若诸父云

△尹思贞

尹思贞京兆长安人弱冠以明经第调隆州参军事属邑豪蒲氏骜肆不法州檄思贞按之搃其奸赃万计卒论死部人称庆刻石以纪其事迁明堂令以善政闻擢殿中少监检校洺州刺史会契丹孙万荣乱朔方震惊思贞循抚境内独无扰武后玺书褒慰长安中迁秋官侍郎忤张昌宗意出为定州刺史召授司府少卿时卿侯知一亦厉威严吏为语曰不畏侯卿杖祇畏尹卿笔加银青光禄大夫其家坎地获古戟十二俄而门树戟时人异焉神龙初擢大理卿雍人韦月将告武三思大逆中宗命斩之思贞以方发生月固奏不可乃决杖流岭南三思讽所司加法杀之复固争御史大夫李承嘉附三思而以他事禁思贞不得谒思贞谓承嘉曰公为天子执法乃擅威福慢宪度谀附奸臣图不轨今将除忠良以自恣邪承嘉惭怒劾思贞出为青州刺史治州有绩蚕一岁四熟黜陟使路敬潜至部叹曰是非善政致祥乎表言之睿宗立召授将作大匠封天水郡公仆射窦怀贞护作金仙玉真观广调夫匠思贞数有损节怀贞让之答曰公辅臣也不能宣赞王化而土木是兴以媚上害下又听小人潜廷辱朝士今不可事公矣乃拂衣去阖门待罪帝知之特诏令视事怀贞诛【按金仙玉真二观作于景云二年怀贞伏诛乃开元元年事旧书云其年怀贞诛误】拜御史大夫累迁工部尚书请致仕许之开元四年卒年七十七赠黄门监谥曰简思贞前后为刺史十三郡其政皆以清最闻

△毕构

毕构字隆择河南偃师人六岁能为文及冠擢进士第补金水尉迁九陇主簿居亲丧毁棘甚已除犹屏处邱园武后召为左拾遗神龙初迁中书舍人敬暉等表诸武不宜为王构当读表抗声析句左右听者皆厯然可晓三思疾之出为润州刺史政有惠爱徙卫同陕三州迁益州府长史景龙末召为左御史大夫会平诸韦治其党衣冠多坐构详比重轻皆得其情时李杰为河南尹与构皆一时选世称毕李封魏县男复为益州长史按察剑南振弊柅私号为清严睿宗嘉构修洁独行有古人风其治术又为诸使最乃赐玺书袍带再迁吏部尚书并遥领益州长史徙广州都督玄宗立授河南尹进户部尚书久之移疾帝手疏医方赐之当时以户部为凶官遽改太子詹事冀其愈会卒赠黄门监谥曰景始构丧继母而二妹襁褓身鞠养至成人妹为构服三年弟栩以太府主簿留司东都闻疾驰归哀毁如大丧虽变服未尝笑天下称其友悌终荆州司马构子炕天宝末为广平太守拒安禄山城陷覆其家赠户部尚书炕生垆始四岁与弟增以细弱得不杀为赏口河北平宗人宏赎出之后举明经为临涣尉徐州节度使张建封高炕节闻垆笃行表署幕府摄符离令后调王屋尉以谨廉闻喜宾客家未尝以有无计及歿无费治丧云

△李杰

李杰本名务光相州滏阳人后魏并州刺史宝之裔孙少以孝友着擢明经第解褐齐州参军事累迁天官员外郎为吏详敏有治誉以采访使行山南时户口逋荡细弱下户为豪力所兼杰为设科条区处检防亡匿复业者十七八神龙中为河东巡察黜陟使课为诸道最先天中进陕州刺史水陆发运使置使自杰始改河南尹杰既精听断虽行坐食饮省治不少废繇是府无淹事人吏爱之寡妇有告其子不孝者杰物色非是谓妇曰子法当死无悔乎答曰子无状寔悔乃命市棺还敛之使人迹妇出与一道士语顷持棺至杰命捕道士按问乃与妇私不得逞杰杀道士内于棺河汴之交旧有梁公埭废不治南方漕弗通杰调汴郑丁男复作之不费而利入代宋璟为御史大夫尚衣奉御长孙昕皇后妹壻也素恶杰遇于道与所亲杨仙玉共殴辱之杰诉曰败发肤痛在身辱衣冠耻在国帝怒诏杖杀昕等于朝堂以谢百官降书慰杰以护作桥陵封武威县子初杰引侍御史王旭为护陵判官旭贪赃杰将绳之未及发反为所构出衢州刺史迁扬州大都督府长史复为御史劾免开元六年卒帝悼之特赠户部尚书

△解琬

解琬魏州元城人举幽素科调新政尉后自成都丞奏事称旨超迁监察御史以丧免武后知琬习边事夺服往抚羌夷琬固乞终丧后嘉许之诏服除赴屯迁侍御史安抚乌质勒及十姓部落以功擢御史中丞兼北廷都护西域安抚使琬与郭元振善宗楚客恶之左授沧州刺史为政引大体部人顺附景龙中迁御史大夫兼朔方行军大总管前后乘边积二十年大抵务农习战多为长利华虏安之景云二年复为朔方军大总管分遣随军要籍官河阳丞张冠宗肥乡令韦景骏普安令于处忠料三城兵省其戍十万人改右武卫大将军兼检校晋州刺史济南县男以老丐骸骨不待报辄去优诏以金紫光禄大夫听致仕准品给全俸玺书劳问会吐蕃骚边复召授左散骑常侍诏与虜定经界因谐辑十姓降户琬建言吐蕃不可以信约请调兵十万屯秦渭闲防遏其奸是冬吐蕃果入寇为秦渭兵击走之俄复请老不许迁太子宾客年八十余开元五年终同州刺史

△裴灌

裴灌绛州闻喜着姓父琰之永徽中为同州司户参军年甚少刺史李崇义轻之镌谕曰同三辅吏事繁子盍求便官毋留此琰之唯唯吏白积案数百崇义让使趣断琰之曰何至逼人乃命吏连纸进笔为省决一日毕既与夺当理而笔词劲妙崇义惊曰子何自晦成吾过耶由是名动一州号霹雳手后为永年令有惠政吏刻石颂美以仓部郎中病废灌侍疾十余年不肯仕琰之没始擢明经调陈留主簿迁监察御史时崔湜郑愔典吏部坐奸赃为李尚隐所劾诏灌按讯而安乐公主上官昭容阿党湜等灌执正其罪天子称之累进中书舍人睿宗造金仙玉真二观时旱甚役不止灌上言春夏毋聚大众起大役不可兴土功妨农事若役使乖度则有疾疫水旱之灾此天人常应也今自冬徂春雨不时降人心惓然莫知所出而土木方兴时叹之孽职为此发春秋庄公三十一年冬不雨是时岁三筑台僖公二十一年夏大旱是时作南门陛下以四方为念宜下明制令二京营作和市木石一切停止有如农桑失时户口流散虽寺观营立能救饥寒敝哉不报迁兵部侍郎以铨总劳特授一子官开元五年为吏部侍郎甄拔佳士为多拜御史大夫灌雅与张说善说方宰相数荐之灌长于敷奏天子亦自重焉擢吏部尚书家世俭素而晚节稍畜妓妾为奢侈事议者以为阙改太子宾客卒赠礼部尚书谥曰懿从祖弟宽

裴宽

裴谕

裴胄

裴宽

宽性通敏工骑射弹棊投壶略通书记景云中为润州参军事刺史韦洗有女择所以归会休日登楼见人于后圃有所瘞藏者访诸吏曰
参军裴宽居也召问状答曰宽义不以包苴污适有人以鹿为饷致而去不敢自欺故瘞之洗嗟异乃引为按察判官许妻以女归语妻曰常求
佳婿今得矣明日帟其族使观之宽衣碧瘠而长既入族人皆笑呼为碧鹤雀洗曰爱女宜为贤公侯妻何可以貌求人卒妻宽举拔萃为河南
丞迁长安尉宇文融括天下田奏为江东覆田判官改太常博士礼部建言忌日享庙应用乐宽自以情立议曰庙尊忌卑则作乐庙卑忌尊则
备而不奏中书令张说是之请如宽议迁刑部员外郎万骑将军马崇白日杀人而王毛仲恃贵幸将鬻其狱宽固执不从河西节度萧嵩表为
判官历兵部侍郎宰相裴耀卿领江淮运列仓河阴奏宽为户部侍郎自副迁吏部出为蒲州刺史州久旱宽入境辄雨徙河南尹不附权贵河
南犬治繇金吾大将军授太原尹帝赋诗褒饯天宝初由陈留太守拜范阳节度使时北平军使乌承恩虏酋也与中人通数冒贿宽以法绳治
檀州刺史何僧献生口数十宽悉归之故夷夏感附三载用安禄山守范阳召宽为户部尚书兼御史大夫裴敦复平海贼还广张功簿宽密白
其妄帝素重宽会河北部将入朝盛誉宽政且言华虏犹思之帝嗟赏睠倚加厚李林甫恐其遂相又恶宽善李适之乃漏宽语以激敦复先是
宽以所善请于敦复林甫趣敦复发之敦复未及闻扈幸温泉宫而其下裨将程藏曜曹鉴自以他事系台宽捕按之敦复谓宽求致其罪遽以
金五百两赂贵妃姊因得事闻于帝由是贬宽睢阳太守及韦坚狱起宽复坐亲贬安陆别驾林甫使罗希奭杀李适之也亦使过安陆将怖杀
宽宽叩头祈哀希奭乃去宽惧终见杀丐为浮屠不许稍迁东海太守徙冯翊入为礼部尚书卒年七十五赠太子太傅宽兄弟八人皆擢明经
任台省州刺史性友爱于东都治第八院相对甥侄亦有名称常击鼓会饭其为政务清简所莅人爱之世皆冀其得宰相天宝闲称旧德以宽
为首然惑于佛喜与桑门游习诵其书老弥笃云子谕

裴谕

谕字士明擢明经调河南参军事性通绰不好苛细累迁京兆仓曹参军虢王巨表署襄邓营田判官母丧居东都会史思明乱逃山谷闲
思明故宽将德宽旧恩且闻谕名遣甫骑迹获之喜甚呼为郎君伪授御史中丞贼残杀

宗室谓阴缓之全活者数百人又尝疏贼虚实于朝事
泄思明恨骂危死而免贼平除太子中允迁考功郎中数燕见奏事代宗幸陕谓徒步挟
考功南曹印赴行在帝曰疾风知劲草信矣将用为御
史中丞为元载沮抑故拜河东租庸盐铁使时关辅旱谓入计帝召至便殿问榷酤利岁
出内几何谓久不对帝复问曰臣有所思帝曰何邪谓
曰臣自河东来涉三百里农人愁叹谷菽未种诚谓陛下轸念元元先访疾苦而乃责臣
以利孟子曰仁义而已何以利为故未敢即对帝曰微
公言朕不闻此拜左司郎中数访政事载忌之出为虔州刺史历饶卢亳三州除右金吾
将军德宗新即位以刑名治天下百吏震服时大行将
葺陵事禁屠杀郭子仪家奴宰羊谓列奏帝谓不畏强御善之或曰尚父有社稷功岂不
为庇之谓笑曰非君所知尚父方贵盛帝新即位必谓
党附者众今发其细过以明尚父威权不足畏上尊天子下安大臣不亦可乎时朝堂别
置三司决庶狱辩争者辄击登闻鼓谓上疏曰谏鼓谤
木之设所以达幽枉延直言今诡猾之人轻动天听争纤微若然者安用吏治乎帝然之
于是悉归有司谓恶法吏舞文或挟宿怨为重轻因献
狱官箴以讽坐所善僧抵法贬阆州司马俄召为太子右庶子进兵部侍郎至河南尹东
都副留守凡五世尹河南谓视事未尝敢当正处以宽
厚和易为治不鞫人以赃卒年七十五赠礼部尚书

裴胄

宽弟子胄字允叔擢明经佐李抱玉凤翔幕府不得意谢归更从宣歙观察使陈少
游抱玉怒劾贬桐庐尉时李栖筠观察浙西幕府皆一
时高选判官许鸣谦名知人见崔造及胄器之白栖筠取胄为支使代宗恶宰相元载怙
权召栖筠为御史大夫欲以为相栖筠引胄殿中侍御
史尤为载所恶会栖筠卒胄护丧归洛阳人为危之胄屹然不沮愴少游复表为淮南观
察判官载诛始拜刑部员外郎迁宣州刺史杨炎当国
为载复讎穷摭所恶会胄部人积胄杂奉为赃炎遣员■〈宀禹〉蔓劾峭诋贬汀州司
马稍迁京兆少尹以父名不拜换国子司业迁江西观
察使初李兼尝罢南昌卒千余人收资禀为月进胄白罢之樊泽徙襄州宰相议所代德
宗雅记胄才遂拜荆南节度使是时方镇争剥下希恩
制重锦异绶名贡奉有中使者即悉公帑市欢胄待之有节献饷直不数金宴劳止三爵
是时武臣多厮役待宾介不以礼少失意则以罪中伤
之胄亦劾斥其管记梁易从世恨胄之流于俗卒年七十五赠尚书右仆射谥曰成

△郑惟忠

郑惟忠宋州宋城人第进士补井陘尉天授中以制举召见廷中武后问举者何所

事为忠对皆不合旨惟忠曰外扬君之美内正君之恶
后曰善擢左司御胄曹参军事迁水部员外郎后还长安复以待制召后曰非尝于东都
对忠臣者乎朕今不忘迁凤阁舍人中宗立擢黄门侍
郎时议禁岭南酋户不得畜兵惟忠曰善为政者因其俗且吴都赋所谓家鹤膝户犀渠
此民风也禁之得无扰乎遂止进大理卿节愍太子败
守卫诘误并拟配流诸韦党请悉诛之帝欲改推惟忠奏大狱始判复改讯恐反侧者不
自安且失信天下有诏百司参议卒论如前所全贷为
多俄授御史大夫持节赈给河北道且许黜陟守宰还奏称旨封荥阳县男迁太子宾客
卒赠太子少保

△王志愔

王志愔博州聊城人擢进士第中宗神龙中为左台侍御史以刚鸷为治人吏畏惮
呼为阜鵬迁大理正尝奏言法令者人之堤防不立则
无所制今大理多不奉法以纵罪为仁持文为苛臣执刑典恐且得谤遂上所著应正论
以见志因规帝失帝嘉之景云中以左御史中丞迁大
理少卿时诏用汉故事设刺史监郡于天下剧州置都督选素威重者授之遂拜志愔齐
州都督事中格复授齐州刺史河南道按察使徙汴州
封北海县男太极元年兼御史中丞内供奉实封百户出为魏州刺史改扬州长史所至
破碎奸猾令行禁信境内肃然开元十年帝幸东都 【
按本纪十年正月幸东都本传作九年误】 诏留守京师京兆人权梁山与左右屯营官
谋反夜犯长乐门入宫城将杀志愔志愔踰垣走而屯
营兵悔更斩梁山等自归志愔惭悸卒

△卢从愿

卢从愿字子龚六世祖昶仕后魏为度支尚书自范阳徙临漳故从愿为临漳人擢
明经为夏尉又举制科高第拜右拾遗迁监察御史为
山南黜陟巡抚使还奏称旨累进中书舍人睿宗立拜吏部侍郎吏选自中宗后纲纪耗
荡从愿精心澄叙伪牒诡功擿检无所遗铨总六年平
允称最帝异之特官其一子从愿请赠其父敬一为郑州刺史制可初高宗时吏部号称
职者裴行俭马载及是从愿与李朝隐为有名故号前
有裴马后有卢李开元四年玄宗悉召县令策于廷考下第者罢之从愿坐拟选失实下
迁豫州刺史政严简奏课为天下第一宝书劳问赐绢
百匹召为工部侍郎迁尚书左丞中书侍郎以工部尚书留守东都代韦抗为刑部尚书
数充校考使升退详确御史中丞宇文融方用事将以
括田户功为上下考从愿不许融恨之乃密白从愿盛殖产占良田数百顷帝自此薄之
目为多田翁后欲用为相屡矣卒以是止十八年复为

东都留守坐子起居郎论输粟入官有剩利为宪司所纠贬绛州刺史迁太子宾客二十年河北饥诏为宣抚处置使发仓廩赈饥民使还乞骸骨授吏部尚书致仕给全禄终身卒赠益州大都督谥曰文

△李朝隐

李朝隐字光国京兆三原人明法中第调临汾尉擢至大理丞武三思构五王而侍御史郑愔请诛之朝隐独以未经鞫实不宜轻用法忤旨贬岭南丑地宰相韦巨源李峤言于中宗曰朝隐素清正一日远逐恐骇天下帝更以为闻喜令迁侍御史吏部员外郎时政出权幸不关两省降墨敕授官斜封付中书即宣所司朝隐执罢千四百员怨诽讟腾朝隐胖然无避屈迁长安令宦官闾兴贵有所干请曳去之睿宗嘉叹后御承天门对百官及朝集使褒谕其能进太中大夫一阶赐中上考绢百匹以旌刚烈成安公主夺民园不酬直朝隐取主奴杖之由是权豪敛伏为执政所挤出通州都督徙绛州刺史开元初迁吏部侍郎铨叙明审与卢从愿并授一子官久之以策县令有下第降滑州刺史徙同州玄宗东幸召见慰劳赐以衣帛擢河南尹政严清奸人不容息太子舅赵常奴怙势横闾里朝隐曰此不绳不可为政执而撈辱之帝赐书慰勉入为大理卿【按通鉴开元六年宋璟请以李朝隐为大理卿而以陆象先为河南尹帝皆从之旧书作十年误】武疆令裴景仙丐赃五千匹亡命帝怒诏杀之朝隐曰景仙曾祖寂有佐命功载初时家为酷吏所破诛夷略尽而景仙独存且承嫡藉当死坐犹将宥之使私庙之祀无馁魂可也帝不许固请曰生杀之柄人主专之条例轻重有司当守且赃惟枉法抵死今丐赃即斩后有枉法抑又何加且近发德音杖者听减流者给程岂一景仙独过常法有诏决杖百流岭南朝隐更授岐州刺史母丧解召为扬州大都督府长史固辞见听时年已衰而笃于孝自致毁瘠士人以为难明年诏书敦遣始就职还为大理卿封金城伯代崔隐甫为御史大夫天下以其有素望每大夫阙冀朝隐得之及居职不争引大体惟先细务由是名少衰进太常卿出为岭南采访处置使兼判广州卒于官赠吏部尚书官给车轎北还谥曰贞

△王邱

王邱字仲山同皎从兄子也父同晬终太子左庶子邱十一擢童子科它童皆试诵经邱独属文繇是知名及冠举制科中第授奉礼郎气象清古志行修洁词赋尤高族人方庆及魏元忠更荐之自偃师主簿擢监察御史开元初迁考功员外郎考功异时多请托进者滥冒岁数百人邱务核实材登科纔满百议者谓自武后至是数十年采录精明无邱比其后席豫严

挺之亦有称然出邱下迁紫微舍人吏部侍郎典选复号平允其奖用如山阴尉孙逖桃林尉张镜微湖城尉张晋明进士王泠然皆一时茂秀久之为黄门侍郎会山东旱饥议以中朝臣为刺史制诏皋陶称在知人在安民今长吏或未称苍生谓何深思循良以革颓敝宜重刺史之选自朝廷始乃以邱与中书侍郎崔沔等并为山东刺史

【按通鉴开元十二年六月帝以山东旱命台阁名臣以补刺史旧书作十一年误】而邱守怀州尤清严为下畏慕入知吏部选改尚书左丞以父丧解服除为右散骑常侍仍知制诰裴光庭卒萧嵩与邱善将引与当国邱固辞盛推韩休行能及休秉政荐为御史大夫邱讷于言所白奏帝多不喜改太子宾客袭父封宿预男以疾徙礼部尚书致仕邱更履华剧而所守清约未尝通馈遗室宅童骑敝陋既老药饵不自给帝叹之以为有古人节下制给全禄以旌洁吏天宝二载卒赠荆州大都督谥曰文【旧书无谥按会要谥文者有宿预县公王邱是邱尝进爵为公史亦阙载】

△严挺之

严挺之名浚以字行华州华阴人少好学姿质轩秀举进士并擢制科调义兴尉号材吏姚崇为州刺史异之崇执政引为右拾遗睿宗好音律每听忘勅先天二年正月望夜胡人婆陁请然百千灯因弛门禁又追赐元年酺帝御延喜安福门纵观昼夜不息阅月未止挺之上疏谏以为酺者因人所利合釀为欢也不使靡敝今暴衣冠罗伎乐杂郑卫之音纵倡优之玩使有司跛倚下人罢剧州县坊曲课赋苛严呼嗟道路贸坏家产营百戏之资扰方春之业欲同其乐而反遗之患乃陈五不可诚意恳到帝纳焉侍御史任正名恃风宪至廷中责詈衣冠挺之让其不敬反为所劾贬万州员外参军事开元中为考功员外郎累进给事中典贡举时号平允会杜暹李元纁为相不相协暹善挺之而元纁善宋遥用为中书舍人遥校吏部判取舍与挺之异言于元纁元纁屡诘譙挺之挺之厉言曰公位相国而爱憎反任小人乎元纁曰小人为谁曰宋遥也繇是出为登州刺史改太原少尹初殿中监王毛仲持节使太原朔方籍兵马后累年仍牒太原取兵仗挺之不肯应且以毛仲宠幸久恐有变密启于帝俄改濮汴二州刺史所治皆严威吏至重足胁息会毛仲败帝以挺之言忠召为刑部侍郎迁太府卿宰相张九龄雅知之用为尚书左丞知吏部选李林甫与九龄同辅政以九龄方得君谄事之内实不善也户部侍郎萧灵林甫所引不知书尝与挺之言称烝尝伏腊乃为伏猎挺之白九龄省中而有伏猎侍郎乎乃出灵岐州刺史林甫恨之九龄欲引以辅

政使往谒林甫挺之负正陋其为人凡三年非公事不造也林甫益怨会挺之有所谗于尉州刺史王元琰林甫使人暴其语禁中下除洺州刺史徙絳州天宝初帝顾林甫曰严挺之安在此其材可用林甫退召其弟损之与道旧淳淳款曲且许美官因曰天子视絳州厚要当以事自解归得见帝且大用因给挺之使称疾愿就医京师林甫已得奏即言挺之老疾幸闲官得自养帝恨咤久之乃以为员外詹事诏归东都挺之郁郁成疾乃自为文志墓遗令薄葬敛以时服挺之重交游许与生死不易嫁故人孤女数十人当时重之然溺志于佛与浮屠惠义善义卒衰服送其丧已乃自葬于其塔左子武

严武

严绶

严武

武字季鹰幼豪爽母裴不为挺之所答独厚其妾英武始八岁怪问其母母语之故武奋然以铁锤就英寝碎其首左右惊白挺之曰郎戏杀英武辞曰安有大臣厚妾而薄妻者儿故杀之非戏也父奇之曰真严挺之子然数禁敕以荫补太原府参军事累迁殿中侍御史从玄宗入蜀擢谏议大夫至德初赴肃宗行在房管以其名臣子荐为给事中已收长安拜京兆少尹坐管事贬巴州刺史【旧书武拜京兆少尹不之官乃出为绵州刺史与新史异】久之迁东川节度使广德二年合剑南为一道【按方镇表广德二年合两川为一道是代宗时事非上皇诏也新旧书俱作上皇误】擢武成都尹剑南节度使还拜京兆尹为二圣山陵桥道使封郑国公迁黄门侍郎与元载厚相结求宰相不遂复节度剑南破吐蕃七万众于当狗城遂收盐川加检校吏部尚书武在蜀颇放肆用度无艺或一言之悦赏至百万蜀虽号富饶而峻掊亟敛闾里为空然虜亦不敢近境梓州刺史章彝始为武判官因小忿杖杀之管以故相为巡内刺史武慢倨不为礼最厚杜甫然欲杀甫数矣永泰初卒母哭且曰而今而后吾知免为官婢矣年四十赠尚书左仆射

严绶

挺之从孙绶【旧书云蜀人按绶既为挺之从孙亦当是华阴人疑旧史误】绶父丹尝为剑南盐铁青苗租庸使以武在蜀辞不拜绶擢进士第以侍御史副刘赞为宣歙团练使赞卒绶总留事悉库物以献召为刑部员外郎幕僚进奉由绶始河东节度使李说病军司马郑儁总其政说卒授儁节度使时德宗务姑息镇帅死不它命即用军司马代之以和厌众情至是帝颇忆绶所献所献故擢为河东司马明年儁卒

即检校工部尚书节度河东宪宗立杨惠琳反夏州刘辟反蜀绶建言天子始即位不可失威请必诛选锐兵遣大将李光颜助讨贼二贼平检校尚书左仆射封扶风郡公进司空在镇九年尚宽惠治称流闻士马孳息尝大阅旗帜周七十里回鹘梅录将军在会闻金鼓震伏入为尚书右仆射绶既名胄吏事有方略然锐进趋素议薄之始就廊下食在百官上帝使中人赐含桃绶见拜之为御史劾奏绶惭惧待罪诏释绶而贬中人出为荆南节度使封郑国公溱州蛮张伯靖杀吏据辰锦等州连九洞自固诏绶进讨绶勒兵出次遣将赍檄开晓羣蛮悉降吴元济反僉以绶明恕可大事乃徙山南东道节度使加淮西招抚使绶引师厌贼境多出金帛赏士厚赂中人招声援闭屯弥年不战宰相裴度谓绶非将才以太子少保召还检校司徒判光禄卿事进少傅卒年七十七赠太保绶才不踰中人然历三镇所奏辟及绶时位将相者九人河东李进贤者以贵得幸于绶署牙门将元和中进贤累为振武节度使辟绶子澈为判官澈年少治苛刻军中苦之回鹘入辟鹈泉进贤发兵讨之吏禀粮不实次鸣砂焚杀其将杨遵宪还攻进贤左右拒战不胜縋而去奔靖边军乃杀澈而屠进贤家诏以夏绥银节度张煦代之诛乱首数百人乃定

钦定续通志卷二百三十三

●钦定续通志卷二百三十四 列传三十四

列传

唐 【三十四】

○唐三十四

裴守真【子余 行立】 崔沔 阳峤 宋庆礼 杨珣

崔隐甫 李尚隐 潘好礼 倪若水

许景先 席豫 齐澣【抗】

裴守真

崔沔

阳峤

宋庆礼

杨珣

崔隐甫

李尚隐

潘好礼

倪若水

许景先

席豫

齐澣

△裴守真

裴守真字方忠【据世系表补】绛州稷山人后魏冀州刺史叔业六世孙父昝大业中为淮安司户参军郡人杨琳田瓚等乱劫吏多死以昝仁爱相诫无敢害护送还乡贞观时官鄯令守真早孤母丧哀毁骨立举进士六科连中【旧书作八科】累调干封尉养寡姊谨甚世推其礼法永淳初关中旱悉禀禄奉姊及诸甥与妻息恶食不赡也授太常博士守真善容典才称其官高宗将封嵩山诏诸儒议射牲事守真奏古者郊祀天地天子自射牲汉武帝封太山令侍中儒者射之帝不亲也按封禅祀礼前明十五刻宰人鸾刀割牲质明行事毛血已具天子至奠玉酌献而已今若前祀一日射牲则早于事及日则晚不逮事汉又天子不亲恐不可行是时破阵庆善二乐舞入帝常立以视须乐阕乃坐守真言二舞诚祖宗盛德然古无天子立观者化育诒庇孰非厥功不应鼓舞别申严奉诏可未及行会帝崩大行旧礼无在者守真与博士韦叔夏辅抱素等讨按故事称情为文时人服其得礼天授中为司府丞推核诏狱多裁恕全免数十姓不合武后旨出为汴州司马累迁成州刺史政不务威严吏民怀之徙益州送者千数出境尚不止长安中卒赠户部尚书子子余耀卿巨卿曾孙行立【据世系表行立乃守真五世孙】耀卿别传

裴子余

裴行立

裴子余

子余事继母以孝闻中明经补鄆尉时同舍李朝隐程行谿以文法称而子余以儒显或问优劣于长史陈崇业答曰兰菊异芬胡有废者景龙中为左台监察御史涇岐有隋世番户子孙数千家司农卿赵履温奏籍为奴婢充赐口子余曰官户以恩原为番户且今又子孙可抑为贱乎履温倚宗楚客执辩于廷子余执对不挠遂沮其议开元初累迁冀州刺史为政惠裕人称有恩入为岐王府长史卒谥曰孝时程行谿谥贞中书令张说叹曰二谥可无媿矣子余居官清家闻友爱兄弟六人皆有志行云

裴行立

行立重然诺学兵法母亡泣血几毁以军劳累授沁州刺史迁卫尉少卿口陈愿治民试一县自效除河东令宽猛得当繇蕲州刺史迁安

南经略使环王国叛人李乐山谋废其君来乞兵行立不受命部将杜英策讨斩之归其孥蛮人悦服英策及范廷芝者皆溪洞豪也隶于军它

经略使多假借辄暴恣干治行立阴把其罪贷之许自效故能得英策死力廷芝尝休沐久不还行立召之约曰军法踰日者斩异时复然且死

后廷芝踰期行立笞杀之以尸还范氏更为择良子弟以代于是威声风行徙桂管观察使黄家洞贼叛行立讨平之 【按通鉴元和十五年

二月以行立为安南都护道卒是冬韩愈上言裴行立阳旻二人邀功求赏争献谋计虚奏杀获欺罔朝廷用兵二年贼犹依旧是时行立已死

而贼犹未平则新书所称非实录也】 俄代桂仲武为安南都护锐于立功为时所訾召还道卒 【按行立改安南都护行至海门而卒新书

云召还道卒亦非也】 年四十七赠右散骑常侍

△崔沔

崔沔字善冲京兆长安人后周陇州刺史士约四世孙 【吴缜纠缪云案世系表并无陇州刺史士约而沔乃后周大将军说之四世孙

与传不同】 自博陵徙焉纯谨无二言事亲笃孝有才章擢进士举贤良方正高第不中者诵訾之武后敕有司覆试对益工遂为第一再补陆

浑主簿入调吏部郎岑羲叹曰君今却洗也荐为左补阙性舒迟进止雍如也当官正色未尝挠沮睿宗召授中书舍人以母病东都不忍去固

辞求侍更表陆浑尉郭邻太乐丞封希颜处士李喜以代己处诏改虞部郎中俄检校御史中丞请发太仓粟及减苑圃鸟兽所给以赈贫乏人

赖其利监察御史宋宣远与卢怀慎姻家恃以弄法姚崇子彝留司东都通宾客招贿赂沔将按劾崇怀慎方执政共荐沔有史才转著作郎去

其权盖惮之也久之为太子左庶子母亡受吊庐前宾客未尝至枢室曰平生非至亲不升堂入谒岂以存亡变礼邪中书令张说数称之服除

迁中书侍郎沔喜论得失或曰今中书宰相承制虽侍郎贰之取充位而已沔曰百官分职上下相维岂可俛默偷安为怀禄士邪凡诏敕曹事

多所异同说不悦出为魏州刺史雨潦败稼沔弛禁便人召还分掌吏部十铨以左散骑常侍为集贤修撰历秘书监太子宾客是时太常议加

宗庙笾豆又欲增丧服于是韦绦请每坐增笾豆至十二沔议以为不可 【详见韦绦传】 又欲加外祖父母舅舅舅母及堂姨堂舅服沔议曰

正家之道不可以贰故父以尊崇母以厌降是以内服齐斩外服皆总尊名所加不过一等今古不易之道也昔辛有适伊川见被发而祭知其

将戎礼先亡也往修新礼推广舅恩故宏道以来国命再移于外姓礼亡征兆可不戒哉诏中书门下参裁于是宗庙笾豆坐各六姨若舅小功

舅母縗麻堂姨袒免余仍旧制每朝廷有疑议皆咨逮取衷卒年六十七赠礼部尚书谥曰孝沔俭约自持禄禀随散宗族不治居宅尝作陋室
铭以见志子佑甫至宰相别传 【按裴守真崔沔二人旧书入孝友传今从新书】

△阳峤

阳峤其先北平人世徙洛阳北齐尚书右仆射休之四世孙举八科皆中调将陵尉累迁詹事司直长安中左右御史中丞桓彦范袁恕己争取为御史杨再思素与峤善知其意不乐弹抨之任为语彦范曰为官择人岂待情乐唯不乐者固与之以伸难进抑躁求也遂为右台侍御史久乃迁国子司业峤资谨饬好学喜诱劝后生修讲舍人以为善职睿宗立进尚书右丞时议建都督府择最吏故峤为涇州都督寻议罢厯魏州刺史荆州长史本道按察使率以清白闻魏州人斲耳阙下请峤为刺史故再治魏入为国子祭酒封北平县伯引尹知章范行恭赵元默为学官皆时名儒生徒游惰者督以鞭楚人怨之乘夜殴峤道中事闻诏捕殴者杖杀之峤抚孤侄与子均常语人曰吾备位方伯而心亦昔时一尉耳以老致仕卒谥曰敬

△宋庆礼

宋庆礼涪州永平人擢明经补卫尉武后诏侍御史桓彦范行河北鄴断居庸五回等路以备突厥召庆礼与议见其方略器之俄迁大理评事为岭南采访使时崖振五州首领更相掠民苦于兵使者至辄苦瘴疠莫敢往庆礼身到其境谕以大谊皆释仇相亲州土以安罢戍卒五千厯监察殿中侍御史以习识边事拜河东河北营田使善骑日能驰数百里性甘劳苦然好兴作浚塞掘穿植兵以邀虏径议者蚩其不切事稍迁贝州刺史复为河北支度营田使初营州都督府治柳城扼制奚契丹武后时赵文翊失两蕃情攻残其府更治东渔阳城玄宗时奚契丹款附帝欲复治故城宋璟固争不可独庆礼执处其利乃诏与太子詹事姜师度左骁卫将军邵宏等为筑城使三旬毕俄兼营州都督开屯田八十余所追拔渔阳淄青没户还旧田又集商胡立邸肆不数年仓廩充居人蕃辑卒赠工部尚书庆礼为政清严吏畏威不敢犯太常博士张星以奸巧自是谥曰专礼部员外郎张九龄申驳曰庆礼国劳臣在边垂三十年往城营州士纔数千无甲兵强卫指期而往不愆所虑遂罢海运收岁储边亭晏然其功可推不当丑谥庆礼兄子辞玉亦自诣阙诉改谥曰敬

△杨珣

杨珣字瑶光华州华阴人五世祖缙 【旧书作高祖】 为陈中书舍人以文学名终交爰九州岛都督武康郡公子林甫仕隋为柳城太守

以郡归高祖授检校总管足疾不能造朝拜绛州刺史封宜春郡公子琮为上津令隋乱去官与秦王同里居武德初为王府参军兼库直隐太子事平诏亲王宰相一人入宴而琮独预太宗赐怀昔赋以申恩意历沔绥二州刺史【旧书云祖琮绛州刺史】 珣始为麟游令时窦怀贞大营金仙玉真二观檄取畿内尝负逆人货者暴敛之以佐费珣拒不应怀贞怒曰县令而拒大夫命乎珣曰所论者民冤抑也何论位高下乎怀贞壮其对为止初韦后表民二十二为丁限及败有司追趣其课珣执不可曰韦氏当国擅权擢士大夫赦罪人皆不改奚独取已宽之人重敛其租非保下之道遂止不课由是名显当世累擢侍御史京兆尹崔日知贪沓不法珣与大夫李杰谋劾举之反为日知先构珣廷奏曰纠弹之司一为恐胁所屈开奸人谋则御史台可废玄宗直之令杰还视事而逐日知珣进历御史中丞户部侍郎帝常召宰相大臣议天下户版延英殿珣言利病尤详帝咨赏宇文融逮检脱户余口珣执不便融方贵公卿唯诺独珣抗议故出为华州刺史帝封太山集乐工山下居丧者亦在行珣谓起直经使和锺律非人情所堪帝乃罢之入为国子祭酒表大儒王迥质尹子路白履忠等三人教授国子有诏迥质谏议大夫皇太子侍读履忠老不任职拜朝散大夫罢归子路直宏文馆皆有名珣奏有司帖试明经不质大义乃取年头月尾孤经绝句请令自今已后尽帖平文且今之习左传者十无二三仪礼公羊谷梁殆将废绝请量加优奖以扶微学从之因诏以仪礼三传出身者免任散官遂着为令生徒为珣立颂太学门外又言古者卿大夫子弟及诸侯岁贡小学之异者入太学渐渍礼乐知朝廷君臣之序班以品类分以师长三德四教学成然后爵之唐兴二监举者千百数当选者十之二考功覆校以第谓经明行修故无多少之限今考功限天下明经进士岁百人二监之得无几然则学徒费官禀而博士滥天禄者也且以流外及诸色仕者岁二千过明经进士十倍胥吏浮虚之徒耗先王礼义非得与服勤道业者絜长短绝轻重也国家启庠序广化导将有以用而劝进之有司为限约以黜退之欲望俊又在朝难矣帝然其言再迁大理卿以疾辞改左散骑常侍卒年六十八赠户部尚书谥曰贞珣常叹士大夫不能用古礼因其家冠婚丧祭乃据旧典为之节文揖让威仪哭踊衰杀无有违者在官清白吏请立石纪德珣曰事益于人书名史氏足矣若碑颂者徒遗后人作矻石耳珣伯父志操颇刚简未遇时着闲居赋自托常曰得田十顷僮婢十人下有兄弟布粟之资上可供先公伏腊足矣位终司属卿安平县男珣从父兄晏精孝经学常手写数十篇可教者辄遗之

△崔隐甫

崔隐甫贝州武城人隋散骑侍郎儵曾孙解褐左玉钤卫兵曹参军迁殿中侍御史内供奉浮屠惠范倚太平公主胁人子女隐甫劾状反为所挤贬邛州司马元宗立擢汾州长史兼东道支度营田使迁洛阳令梨园弟子胡鹑善笛有宠尝负罪匿禁中帝以他事召隐甫从容指曰就卿丐此人对曰陛下轻臣而重乐工请解官再拜出帝遽谢与胡鹑隐甫杀之有诏贯死不及矣赐隐甫百缣孙佺败绩于奚擢隐甫并州司马护边会兄逸甫疾甚未及行诏责逗留下除河南令累拜华州刺史太原尹入为河南尹居三岁进拜御史大夫初台无狱有囚则系大理贞观时李干佑为大夫始置狱由是中丞侍御史皆得系人隐甫执故事废之其后患囚往来或漏泄复系之厨院云台中自监察御史而下旧皆得颺事无所承谘隐甫始一切令归禀乃得行有忤意辄劾正多贬绌者台吏侧目威名赫然帝尝诏校外官岁考异时必委曲参审竟春未定隐甫一日会朝集使询逮检实其暮皆讫议者服其敏帝尝谓曰卿为大夫天下以为称职张说当国隐甫素恶之乃与中丞宇文融李林甫暴其过不宜处位说赐罢然帝嫉朋党免其官使归侍母岁余复为大夫迁刑部尚书兼河南尹帝还京师即拜东都留守累封清河郡公卒赠益州大都督谥曰忠始帝欲相隐甫也谓曰牛仙客可与语卿尝见否对曰未也帝曰可见之隐甫终不诣他日又问对如初帝乃不用子弟问故答曰吾不以其人微易之也其材不逮中人可与之对耶隐甫所至洁介自守明吏治在职以强正称云

△李尚隐

李尚隐其先自赵郡徙万年年二十举明经再调下邳主簿州刺史姚班【旧书作姚珽按姚班尝历六州刺史且年世亦相当其作珽者字误耳】器其能神龙中左台中丞侯令德为关内黜陟使尚隐佐之以最擢左台监察御史于是崔湜郑愔典吏部选附势幸铨拟不平至逆用三年员阙【宋璟传作二年】材廉者辄不进俄而相踵知政事尚隐与御史李怀让【通鉴作御史靳恒】显劾其罪湜等皆斥去睦州刺史冯昭泰性鸷刻尝诬系桐庐令李师旦二百余家为妖蛊有诏御史覆验人畏其强皆称病不肯往尚隐曰善良蒙枉不为申明可乎因请行果推雪其冤湜愔复用出尚隐为伊阙令怀让魏令湜等伏诛玄宗知尚隐方严繇定州司马擢吏部员外郎怀让自河阳令拜兵部员外郎怀让彦人后历给事中尚隐以将作少监营桥陵封高邑县男未几进御史中丞御史王旭招权不法仇家告其罪尚隐穷治具得奸赃

遂抵罪进兵部侍郎俄出为蒲州刺史浮屠怀照者自言母梦日入怀生己镂石着验闻人冯待征等助实其言尚隐劾处妖妄诏流怀照播州再迁河南尹尚隐性刚亮论议皆披心示诚处事分明御下不苛密尤详练故实前后制令诵记各无遗妖贼刘定高夜犯通洛门尚隐坐不素觉左迁桂州都督帝遣使劳曰知卿公忠然国法须尔因赐杂彩百匹遣之迁广州都督五府经略使及还人或哀金以赠尚隐曰吾自性分不可易非畏人知也代王邱【旧书作王鉞】为御史大夫时司农卿陈思问引属吏多小人干隐钱谷尚隐按之赃累巨万思问流死岭南改尚隐太子詹事不阅旬进户部尚书前后更扬益二州长史东都留守爵高邑伯开元二十八年以太子宾客卒年七十五谥曰贞尚隐三入御史府辄绳恶吏不以残摯失名所发当也素议归重仕官未尝以过谪惟劾幸臣及坐小法左迁复见用以循吏终始云自开元二十二年置京畿采访处置等使用中丞卢奂为之尚隐以大夫不充使永泰以后大夫王翊崔涣崔寔卢■〈木巳〉乃为之

△潘好礼

潘好礼贝州宗城人第明经累迁上蔡令治在最擢监察御史坐小累下除芮城令拜侍御史徙岐王府司马居后母丧诏夺服固辞不出开元初为邠王府长史王为滑州刺史好礼兼府司马知州事王御下不能肃有诏好礼检督王家至过失皆上闻王每游观好礼必谏谕禁切农月王出猎家奴罗迥好礼遮道谏王初不许乃卧马下諄曰今农在田王何得非时暴禾稼以损下人要先践杀司马然后听所为王惭为还迁豫州刺史勤力于治清廉无所私然喜察细事下厌其苛子请举明经好礼曰经不明不可妄进乃自试之不能通怒笞之械而徇于门复以公累徙温州别驾卒好礼博学能论议节行修整一意无所倾附未尝自列阶勋居室服用麤苟至终身世谓近名

△倪若水

倪若水字子泉恒州藁城人擢进士第累迁右台监察御史黜陟剑南道绳举严允课第一开元初为中书舍人尚书右丞出为汴州刺史政清净增修孔子庙兴州县学庐劝生徒身为教诲风化兴行玄宗遣中人捕鷓鴣溪■〈式鸟〉南方若水上言农方田妇方蚕以此时捕奇禽怪羽为园籞之玩自江岭而南达京师水舟陆賫所饲鱼虫稻粱道路之言不以贱人贵鸟望陛下邪帝手诏褒荅悉放所玩谪使人过取罪而赐若水帛四十段时天下久平朝廷尊荣人皆重内任虽自冗官擢方面皆自谓下迁班景倩自扬州采访使入为大理少卿过州若水饒于

郊顾左右曰班公是行若登仙吾恨不得为驺仆未几入为户部侍郎复拜右丞卒

△许景先

许景先常州义兴人曾祖绪武德时以佐命功历左散骑常侍封真定公遂家洛阳景先由进士第释褐夏阳尉神龙初东都造服慈阁景先献赋李迥秀见其文畏叹曰是宜付太史擢左拾遗以论事切直外补滑州司士参军举手笔俊拔茂才异等连中进扬州兵曹参军还为左补阙宋璟苏颋择殿中侍御史久不补以授景先时议金甌抨按不避近强与齐澣王邱韩休张九龄更知制诰以雅厚称张说曰许舍人之文虽乏峻峰激流然词旨丰美得中和之气开元十年伊汝溢坏庐舍甚众景先见侍中源干曜曰灾眚所降王者宜修德应之因遣大臣存问失职罪已引咎以荅天谴公在元弼庸可默乎干曜悟遽白玄宗遣陆象先持节振贍十三年帝自择刺史景先由吏部侍郎为刺史治虢州大理卿源光裕郑州兵部侍郎寇泚宋州礼部侍郎郑温琦邠州大理少卿袁仁敬杭州鸿胪少卿崔志廉襄州卫尉少卿李升期邢州太仆少卿郑放定州国子司业蒋挺湖州左卫将军裴观沧州卫率崔诚遂州凡十一人治行诏宰相诸王御史以上祖道洛滨盛具奏太常乐帛舫水嬉命高力士赐诗帝亲书且给纸笔令自赋赉绢三千遣之后徙岐州入为吏部侍郎卒

△席豫

席豫字建侯襄州襄阳人后周昌州刺史固七世孙后徙河南长安中举学兼流略词擅文场科擢上第时年十六以父丧罢复举手笔俊拔科中之补襄邑尉奏事阙下会节愍太子难安乐公主请为皇太女豫曰昔梅福上书讯后族彼何人哉乃上疏请立皇太子语深切人为寒惧太平公主闻其名将表为谏官豫耻污诚谒遁去俄举贤良方正异等为阳翟尉开元初观察使荐豫贤迁监察御史出为乐寿令前令以亲丧解而豫母病诉诸朝改怀州司仓参军复举超拔羣类科会母丧去服除授大理丞迁考功员外郎进绌清明为中书舍人与韩休许景先徐安贞孙逖名相甲乙出郑州刺史韩休辅政举代己入拜吏部侍郎玄宗曰卿前日考功职详事允故有今授豫典选六年拔寒远士多至台阁当时推知人号席公云天宝六载进礼部尚书累封襄阳县子凡四以使者按行江南江东淮南河北南方俗死不葬暴骨中野豫教以埋敛明列科防俗为之改豫清直亡欲当官不为势权所撼性谨畏与子弟属吏书不作草字或曰此细事耳何留虑荅曰细不谨况大事邪及疾笃遗令三日敛敛已即葬勿久留以黷公私贖不足可卖居宅以终事卒年六十九赠江陵大都督谥曰文帝尝登朝元阁赋诗羣臣属和帝以豫诗

最工诏曰诗人之冠冕也弟晋亦以文名当时

△齐澣

齐澣字洗心定州义丰人少开敏年十四见特进李峤称有王佐才中宗在庐陵澣上言请抑诸武迎太子东宫不报及太子还武后召澣宴同明殿谕曰朕母子如初卿豫有力焉方不次待尔澣辞母老不忍远离赏而罢圣厯初及进士第以拔萃调蒲州司法参军有父子连坐论死者澣曰条落则本枯柰何俱死议贷其父太守不听固争卒原景云初姚崇取为监察御史凡劾奏常先风教号善职睿宗将祠太庙刑部尚书裴谈摄太尉先告澣奏孝享摄事稽首而拜恭明神也而谈慢媿不恭并劾谈神昏形滓挟邪以罔上神龙时事武三思陷敬晖没其家以获进妻外淫男女不得姓氏夫告神慢事主不忠家不治有是三罪不可不寘之法谈由是下除汾州刺史开元初姚崇复相用为给事中中书舍人论驳及诰诏皆援准古谊朝廷大政必咨之时号解事舍人数讽崇年老宜避位时宋璟在广州因劝崇举自代崇用其谋璟为相它日问曰吾不敢冀房杜比尔日诸公云何澣曰不如璟请故荅曰前时近郊户三百以为困今不百户是以知之马怀素等绪次四库书表澣为副改秘书少监出为汴州刺史地当舟车湊集事浩繁前刺史数不称职唯倪若水与澣以清毅闻吏民颂美玄宗封太山厯汴宋许车骑数万王公妃主四夷君长马橐它亦数万所顿弥数十里澣列长棚帘幕联亘上食凡千罍纳筦钥身进膳帝以为知礼喜甚为留三日赐帛二千匹澣以淮至徐城险急凿渠十八里入青水人便其漕中书令张说择丞辖以王邱为左澣为右李元紘杜暹当国表宋璟为吏部尚书澣及苏晋为侍郎世谓台选尝奏事帝指政事堂曰非卿尚谁居者是时开府王毛仲宠甚与龙武将军葛福顺相婚嫁毛仲奏请无从不从澣乘闲曰福顺典兵马与毛仲为婚家小人宠极则奸生不预图且有后患高力士小心谨畏加宦人可备禁中驱使腹心所委何必毛仲哉又言君不密失臣臣不密失身惟陛下密此言帝嘉纳且劳曰卿第出我徐计其宜会大理丞麻祭坐事出为兴州别驾澣往钱因道谏语察素奸佞遽言状帝怒召澣入殿中曰卿尚疑朕不密而反告察谓何且察轻躁无行常游太平门者詎不知邪澣免冠顿首谢贬高州良德丞察再贬皇化尉其党齐敷郭稟皆流放久之澣徙索卢丞郴州长史濠常二州刺史迁润州州北距瓜步沙尾纒汇六十里舟多败溺澣徙漕路繇京口埭治伊娄渠以达扬子岁无覆舟减运钱数十万又立伊娄埭官征其入招还流人五百户置明州以安辑之复徙汴州澣中失势益怅恨素操寢衰更倚力士助得

为两道采访使兴利以中天子意哀货财遗谢贵幸纳刘戒女为妾不荅其妻李林甫恶其行欲挤而废之会其幕府坐赃事连澣诏矜澣老放归田里天宝初召为太子少詹事留司东都严挺之亦为林甫所废与澣家居杖屨经过不缺日林甫畏之乃用澣为平阳太守离其谋更以黄老清静为治卒年七十二肃宗时录林甫所陷者皆褒洗故澣赠礼部尚书澣尝称陈希烈宋遥苗晋卿韦述之才后皆大显麻察者河东人由明经第五迁殿中侍御史魏元忠子升死节愍太子难而元忠系大理升妻郑父远尝纳钱五百万以女易官武后重元忠旧臣欲荣其姻对授远河内令子洺州参军元忠下狱遣人绝婚许之明日嫁其女察劾远败风教请锢终身远遂废当时谓察为公而终以儉险斥云澣孙抗

齐抗

齐抗

抗字遐举少值天宝乱奉母夫人隐会稽寿州刺史张镒辟署幕府抗吏事闲敏有文雅从镒镇江西及以宰相领凤翔奏署监察御史李楚琳乱奔奉天授侍御史迁户部员外郎萧复引为江淮宣慰判官德宗自梁洋远财用大屈盐铁使元琇荐抗材改仓部郎中斡盐利俄为水陆运副使护漕江淮给京师历谏议大夫坐小累为处州刺史历苏州徙潭州观察使召为给事中迁河南尹进太常卿以中书侍郎同中书门下平章事抗无远谋大略虽用心至精末乃滋彰苛刻以病乞身罢为太子宾客卒年六十五赠户部尚书谥曰成初吏部岁考书言以它官第上下中书门下遣官覆实以为常抗以尚书侍郎皆大臣选今更覆核非任人勿疑之道礼部侍郎试贡士其姻旧悉试考功谓之别头皆奏罢之又省州别驾田曹司田官判司双曹者减中书吏员此其稍近治者云

钦定续通志卷二百三十四

●钦定续通志卷二百三十五 列传三十五

列传

唐 【三十五】

○唐三十五

刘子元【颀 滋 餗 汇秩 迅 回】 吴兢 韦述 蒋乂【系
伸借】 柳芳【登 璟冕】 沈既济【传师

】

刘子元

吴兢

韦述

蒋义 【蒋系】

柳芳

沈既济

△刘子元

刘子元名知几以元宗讳嫌故以字行年十二父藏器为授古文尚书业不进楚督之及闻为诸兄讲春秋左氏辄辨析所疑叹曰书如是
儿何怠父奇其意许授左氏踰年遂通览羣史与兄知柔俱以善文词知名擢进士第调获嘉主簿武后证圣初诏九品以上陈得失子元上书
讥每岁一赦或一岁再赦小人之幸君子之不幸又言君不虚授臣不虚受妄受不为忠妄施不为惠今羣臣无功遭遇辄迁至都下有车载斗
量杷推椀脱之谚又谓刺史非三载以上不可徙宜课功殿明赏罚后嘉其直不能用也累迁凤阁舍人兼修国史中宗时擢太子率更令 【
旧书云景龙初再转太子中允会要亦云太子中允刘知几以监修者多甚为国史之弊求罢史】 介直自守累岁不迁会天子西还子元自乞
留东都或言子元身史臣而私著述驿召至京领史事迁秘书少监时宰相韦巨源纪处讷杨再思宗楚客萧至忠皆领监修子元病长官多意
尚不一而至忠数责论次无功乃奏记求罢去因为至忠言五不可曰古之国史皆出一家未闻藉功于众唯汉东观大集羣儒纂述无主条章
不建今史局取士有倍东京人自为荀袁家自为政骏每记一事载一言阁笔相视含毫不断头白可期汗青无日一不可汉郡国计书先上太
史副上丞相后汉公卿所撰先集公府乃上兰台故史官载事为广今史臣惟自询采二史不注起居百家弗通行状视听不该簿籍难见二不
可史局深籍禁门所以杜颜面防请谒也今作者如林佻示褒贬言未绝口而朝野咸知孙盛取嫉权门王劭见讎贵族常人之情不能无畏三
不可古者史氏各有指归故司马迁退处士进奸雄班固抑忠臣饰主阙今史官注记类稟监修或须直辞或当隐恶士羊九牧其令难行一国
三公适从焉在四不可属词比事劳逸宜均人思自勉则书可立成今监者不肯指授修者又不遵奉务相推避以延岁月五不可至忠得书惜
其才不许解史任楚客等恶其言抵切谓诸史官曰是子作书欲致吾何地始子元修武后实录有所改正而武三思等不听自以为见用于时
而志不遂乃着史通内外四十九篇讥评今古徐坚读之叹曰为史氏者宜署此坐右也雅与徐坚元行冲吴兢等善尝曰海内知我者数子耳
乃委国史于吴兢别撰刘氏家史及谱考上推汉为陆终苗裔非尧后彭城丛亭里诸刘
出楚孝王噐曾孙居巢侯殷不承元王交按揭据明审议

者高其博尝曰吾若得封必以居巢绍司徒旧邑后果封居巢县子乡人以其兄弟六人俱有名号其乡曰高阳里曰居巢累迁太子左庶子兼崇文馆学士景云二年皇太子将释奠国学有司具仪从臣着衣冠乘马子元议古大夫以上皆乘车以马为駢服魏晋已后朝士驾牛车鞍马之故行于军旅戎服所乘贵其便习耳今陵庙巡谒王公册命士庶亲迎则盛服冠履乘辂车他事无车故贵贱通乘马然亦止宜于褻服博带褻衣革履高冠自是车中之服非马上所施也比法驾所幸侍臣皆马上朝服不师古道有损威仪宜从废改太子从之因着为定令开元初迁左散骑长侍尝议孝经郑氏学非康成注举十二条左证其谬当以古文为正易无子夏传老子书无河上公注请存王弼学宰相宋璟等不然其论奏与诸儒质辩博士司马贞等请二家兼行惟子夏易传请罢诏可会子元为大乐令抵罪子元请于执政元宗怒贬安州别驾卒年六十一子元领国史且三十年官虽徙职常如旧礼部尚书郑惟忠尝问自古文士多史才少何耶对曰史有三长才学识世罕兼之夫有学无才犹愚贾操金不能殖货有才无学犹巧匠无榱桷斧斤弗能成室善恶必书使骄君贼臣知惧此为无可加者时以为笃论子元善持论辩据明锐视诸儒皆出其下朝有论著辄豫歿后帝诏河南就家写史通读之称善追赠工部尚书谥曰文六子元觐餗汇秩迅迴

刘觐

刘滋

刘餗

刘汇

刘秩

刘迅

刘迴

刘觐

觐字惠卿好学多艺术子元卒有诏访其后擢起居郎历右拾遗内供奉献续说苑十篇以广汉刘向所遗而刊落怪妄又尝以竹书纪年序诸侯列会皆举谥后人追修非当时正史师春一篇录卜筮事与左氏合知按春秋经传而为也因着外传云【艺文志刘觐六经外传三十七卷】子滋泐

刘滋

滋字公茂通经术喜持论以荫历涟水令杨绾荐材堪谏官授左补阙久之去养亲东都河南尹李廙奏补功曹母丧解服除以司勋员外

郎判南曹勤职奉法进至给事中兴元元年以吏部侍郎知南选时大盗后旱蝗相仍吏不能诣京师故命滋至洪州调补以称职闻贞元二年擢左散骑常侍同中书门下平章事为相无所设施廉抑畏慎而已明年罢又明年复为吏部侍郎迁尚书会御史中丞韦贞伯劾奏吏选不实诏与侍郎杜黄裳俱夺阶卒赠陕州大都督谥曰贞浹亦有学称生子敦儒家东都母病狂易非笞掠人不能安左右皆亡去敦儒日侍疾体常流血母乃能下食敦儒怡然不为痛隐留守韦夏卿表其行诏标阙于闾元和中权德舆复荐之乃授左龙武军兵曹参军分司东都母丧毁瘠几死时谓刘孝子后为起居郎达礼好古有祖风

刘餗

餗字鼎卿天宝初历集贤院学士兼知史官终右补阙父子三人更莅史官着史例三卷颇有法

刘汇

汇左散骑常侍终荆南节度使子赞以荫仕为郾丞杨炎荐赞名儒后【旧书赞名儒子按汇未尝以名儒称也新书云炎荐汇名儒子又以荐汇而非荐赞矣今改】擢浙西观察判官炎入相进歙州刺史政干强济野媪将为虎噬幼女呼号搏虎俱免观察使韩滉表赞治有异行加金紫徙常州滉辅政分所统为三道以赞为宣州刺史都团练观察使治宣十年赞本无学第以刚猛立威官吏重足一迹宣既富饶即厚敛广贡奉以结恩又不能训子皆骄傲不度素业衰矣卒赠吏部尚书谥曰敬

刘秩

秩字祚卿开元末历左监门卫录事参军事稍迁宪部员外郎坐小累下除陇西司马安禄山反哥舒翰守潼关杨国忠欲夺其兵秩上言翰兵天下成败所系不可忽房管见其书以比刘更生至德初迁给事中久之出为闾州刺史贬抚州长史卒所著政典止戈记至德新议等凡数十篇【旧书载秩历官给事中尚书右丞国史祭酒与新书异】

刘迅

迅字捷卿历京兆功曹参军事常寝疾房管忧曰捷卿有不讳天理欺矣陈郡殷寅名知人见迅叹曰今黄叔度也刘宴每闻其论曰皇王之道尽矣上元中避地安康卒迅读诗书春秋礼乐五说【旧书作六说按艺文志刘迅六说五卷旧书是】书成语人曰天下滔滔知我者希终不以示人

刘迴

迴以刚直称第进士历殿中侍御史佐江淮转运使时新更安史乱迴馈运财赋力

于职大厯初为吉州刺史治行尤异累迁给事中

△吴兢

吴兢汴州浚仪人少厉志贯知经史方直寡谐比惟与魏元忠朱敬则游二人当路荐兢才堪论譔诏直史馆修国史迁右拾遗内供奉神龙中改右补阙节愍太子难奸臣诬构相王与谋朝廷大恐兢上言文明后皇运不绝如带陛下龙兴恩被骨肉相王仁孝遭荼苦哀毁以陛下为命若信邪佞委之于法伤陛下之恩失天下之望芟刈股肱独任胸臆可为寒心自昔翦伐宗支委任异姓未有不亡者秦任赵高汉任王莽晋家自相鱼肉隋至猜忌子弟海内靡沸覆车可验且根朽者叶枯源涸者流竭皇家枝干夷芟略尽陛下即位四年一子弄兵被诛一子以罪谪去惟相王朝夕左右斗粟之刺苍蝇之诗不可不察累迁起居郎与刘子元徐坚等并职元宗初立收还权纲锐于决事羣臣畏伏兢虑帝果而不及精乃上疏曰自古人臣不谏则国危谏则身危臣愚食陛下禄不敢避身危之祸比见上封事者言有可采但赐束帛而已未尝蒙召见被拔擢其忤旨则朝堂决杖传送本州岛或死流贬由是臣下不敢进谏古者设诽谤木欲闻已过今封事谤木比也使所言是有益于国使所言非无累于朝陛下何遽加斥逐以杜塞直言道路流传相视怪愕夫汉高帝赦周昌桀纣之对晋武帝受刘毅桓灵之讥况陛下豁达大度不能容此狂直耶夫人主居尊极之位专生杀之权其为威严峻矣开情意纳谏诤下犹惧不敢尽柰何以为罪臣诚恐天下骨鲠士以谗言为戒挠直就曲斲方为刑偷合苟容不复能尽节忘身纳君于道矣寻以母丧去官服除自陈修史有绪家贫不能具纸笔愿得少禄以终余功有诏拜谏议大夫复修史以父丧解宰相张说用赵冬曦代之终丧为太子左庶子开元十三年帝东封太山道中数驰射为乐兢谏曰方登岱告成不当逐野兽使有垂堂之危朽株之殆帝纳之明年六月大风诏羣臣陈得失兢上疏曰自春以来亢阳不雨乃六月戊午大风拔树坏居人庐舍传曰敬德不用厥灾旱上下蔽隔庶位踰节阴侵于阳则旱灾应又曰政悖德隐厥风发屋坏木风阴类大臣之象恐陛下左右有奸臣擅权怀谋上之心臣闻百王之失皆由权移于下天降灾异欲人主感悟愿深察天变杜绝其萌且陛下承天后和帝之乱府库未充冗员尚繁户口流散法出多门赇谒大行趋竞弥广此弊未革实陛下庶政之阙也臣不胜惓惓愿斥屏羣小不为慢游出不御之女减不急之马明选举慎刑罚杜侥幸存至公虽有旱风之变不足累圣德矣始兢在长安景龙间任史事时武三思张易之等监领多饰虚词兢不得志私撰唐书唐春秋未

就至是巧官笔札冀得成书 【事在开元十四年】 诏兢就集贤院论次时张说罢宰相在家修史大臣奏国史不容在外 【按艺文志大明宫光顺门外东都明福门外皆创集贤书院学士通籍出入兢修国史就东都集贤院会要云在明福门外大街之西本太平公主宅也】 诏兢等赴馆撰录 【是时史馆在门下省南】 进封长垣县男久之坐书事不当贬荆州司马以史草自随萧嵩领国史奏遣使者就兢取书得六十余篇累迁洪州刺史坐累下除舒州 【按旧书载兢厯合洪饶诉四州刺史迁相州天宝初改官名为邺郡太守与新书互异】 天宝初入为恒王傅意犹愿还史职李林甫嫌其衰不用卒年八十兢叙事简核号良史晚节稍疏时人病其太简初与刘子元撰定武后实录叙张昌宗诱张说诬证魏元忠事颇言说已然可赖宋璟等激励故转祸为忠不然皇嗣且殆后说为相读之心不善知兢所为即从容相谓曰刘生书魏齐公事不少假借柰何兢曰子元已亡不可受诬地下兢实书之其草故在闻者叹其直说屡以情斡改辞曰徇公之情何名实录卒不改世谓今董狐云

△韦述

韦述机会孙家厨书二千卷述为儿时诵忆略徧父景骏景龙中为肥乡令述从到官元行冲景骏姑子也为时儒宗常载书数车自随述入其室观书不知寝食行冲异之试与语前世事详谛以指掌使属文受纸辄就行冲曰外家之宝也举进士时述方少仪质陋倅考功员外郎宋之问曰童子何业述曰性嗜著书所撰唐春秋三十篇恨未毕它唯命之问曰本求茂才乃得迂固遂上第开元初为栎阳尉秘书监马怀素奏述与诸儒就秘阁详录四部书为总目二百卷五年而成 【按艺文志羣书四录二百卷殷践猷王愜韦述余钦母隄刘彦直王湾王仲邱撰元行冲上之本传作续七志非也今据旧书改】 述好谱学见柳冲所撰氏族系录每私写怀之还舍则又缮录故于百氏源派为详乃更撰开元谱二十篇累除右补阙张说既领集贤院荐述为直学士迁起居舍人从封太山奏东封记有诏褒美先是诏修六典徐坚构意岁余未有所适及萧嵩引述撰定述始摹周六官领其属事归于职规制遂定初令狐德棻吴兢等撰武德以来国史皆不能成述因二家参以后事始定类例嵩欲蚤就复奏起居舍人贾登著作左郎李锐助述绸绩迨成文约事详萧颖士以为譙周陈寿之流改国子司业充集贤学士累迁工部侍郎封方城县侯述典掌图书余四十年任史官二十年澹于荣利为人纯厚长者士无贵贱皆以礼接之蓄书二万卷皆手校定黄墨精谨内

秘书不逮也古草隶帖秘书古器图谱无不备安禄山乱剽失皆尽述独抱国史藏南山身陷贼污伪官贼平流渝州为刺史薛舒所困不食死广德初甥萧直为李光弼判官诣阙奏事称旨因理述仓卒犇逼能存国史贼平尽送史官于休烈以功补过宜蒙恩宥有诏赠右散骑常侍韦氏之显者孝友词学则承庆嗣立邃音乐有万石达礼仪则叔夏史才博识有述所著书二百余篇行于时弟迨迪学业亦亚述与迨对为学士与迪并礼官搢绅高之时赵冬曦兄弟亦各有名张说尝曰韦赵兄弟今之杞梓也

△蒋乂 【蒋系】

蒋乂字德源常州义兴人徙家河南祖环开元中宏文馆学士父将明天宝末辟河中使府安禄山反以计佐其帅全并潞等州两京陷被拘乃佯狂以免虢王巨引致幕府历侍御史擢左司郎中国子司业集贤殿学士乂性锐敏七岁时见庾信哀江南赋再读辄诵外祖吴兢位史官乂幼从外家学得其书博览强记逮冠该综羣籍有史才司徒杨綰尤称之将明在集贤值兵兴图籍散外白宰相请引乂入院助力整比宰相张鎰亦奇之署集贤小职乂料次踰年各以部分得善书二万卷再迁王屋尉充太常礼院修撰贞元九年擢右拾遗史馆修撰德宗重其职先召见延英乃命之张孝忠子茂宗尚义章公主母亡遗言丐成礼帝念孝忠功即日召为左卫将军许主下降乂上疏以为墨缯之礼本缘金革未有夺丧尚主者繆典礼违人情不可为法帝令中使谕以茂宗母所请乂意殊坚帝曰卿所言古礼也今俗借吉而婚者不少对曰俚室穷人子旁无至亲乃有借吉以嫁不闻男冒凶而娶陛下建中诏书郡县主当婚皆使有司循典故毋用俗仪公主春秋少待年不为晚请如礼便帝曰更思之会太常博士韦彤裴堪亦上疏谏帝迁其言促行前诏然心嘉乂有守十八年迁起居舍人转司勋员外郎皆兼史任帝尝登凌烟阁视左壁頽剥题文漫缺行纔数字命录以问宰相无能知者遽诏乂至答曰此圣厯中侍臣图赞口诵以补不失一字帝叹曰虽虞世南默写列女传不是过会诏问神策军建置本末中书讨求不获时集贤学士甚众悉亡以对乃访乂乂条据甚详宰相高郢郑珣瑜叹曰集贤有人哉明日诏兼判集贤院事父子为学士儒者荣之顺宗既葬议祧庙有司以中宗中兴之君当百代不迁宰相问乂乂曰中宗即位春秋已壮而母后篡夺以移神器赖张柬之等国祚再复盖曰反正不得为中兴凡非我失之自我复之为中兴汉光武晋元是也自我失之因人复之晋孝惠孝安是也今中宗与惠安二帝同不可为不迁主有司疑曰五王有安社稷功若迁中宗则配飨永绝乂曰禘祫功臣乃合食太庙中宗庙虽毁

而禘祫并陈太庙此则五王配食与初一也由是迁庙遂定迁兵部郎中与许孟容韦贯之删正制敕三十篇为开元格后敕李锜诛诏宗正削一房属籍宰相召又问一房自大功可乎答曰大功锜之从父昆弟其祖神通有功配飨于庙虽裔孙之恶而忘其勋不可自替可乎曰替者锜昆弟其父国贞【新书作若幽按李锜父国贞本名若幽见旧书国贞传而求之新书宗室传世系表皆茫无可考亦疏悞之一端也】死社稷今以锜连坐不可执政然之故罪止锜及子息无旁坐者未几改秘书少监复兼史馆修撰与独孤郁韦处厚修德宗实录以劳迁右谏议大夫裴垍罢宰相而李吉甫恶垍以尝监修故授又太常少卿久之迁秘书监累封义兴县公卒年七十五赠礼部尚书谥曰懿又在朝廷久居史职二十年每有大政事议论宰相未能决心咨访之又鍊经义或旧章以参时事其对允切该详初以是被遇终亦忤贵近不至显官遇权臣秉政辄数岁不迁尝疏裴延龄罪恶及拒王叔文当世高之结发志学老而不厌虽甚寒暑卷不释于前故能通百家学尤明前世沿革家藏书至万五千卷论撰百余篇初名武宪宗时因进见请曰陛下偃武修文羣臣当顺承上意请改名又帝悦时讨王承宗兵方罢又恐天子锐于武亦以讽它日帝见侍御史唐武曰命名固多何必曰武又既改之矣更曰庆羣臣乃知帝且厌兵云五子系伸偕知名仙佶位刺史系善属文自幼得父典实大和初授昭应尉直史馆明年拜右拾遗史馆修撰与沈传师郑澣陈夷行李汉参撰宪宗实录转右补阙宋申锡被诬文宗怒甚系与左常侍崔玄亮涕泣苦诤申锡得不死厯膳部员外工礼兵三部郎中皆兼史职开成末转谏议大夫宰相李德裕恶李汉以系女壻出为桂管观察使人安其治复坐汉贬唐州刺史宣宗立召为给事中集贤殿学士判院事转吏部侍郎厯兴元凤翔节度使懿宗初拜兵部尚书以弟伸位丞相恳辞乃检校尚书右仆射节度山南东道封淮阳郡公徙东都留守卒子曙字耀之咸通末由进士第署鄂岳团练判官除虞工二部员外郎改起居郎黄巢之难曙阖门无噍类以是绝意仕进隐居沈痛中和二年表请为道士许之

蒋伸

蒋偕

蒋伸

伸字大直第进士大中二年以右补阙为史馆修撰转驾部郎中知制诰白敏中领邠宁节度表伸自副加右庶子入知户部侍郎九年为翰林学士进承旨十年改兵部侍郎判户部宣宗雅信爱伸每见必咨天下得失伸言比

爵赏稍易人且偷帝愕然曰偷则乱矣伸曰非遽乱但
人有覬心乱由是生帝嗟叹伸三起三留曰它日不复独对卿矣伸不谕未几以本官同
中书门下平章事踰四月解户部加中书侍郎懿宗即
位兼刑部尚书监修国史咸通三年【本纪宰相表俱作三年本传作二年误】出为
河中节度使同中书门下平章事徙宣武俄以太子少
保分司东都七年用为华州刺史再迁太子太傅表乞骸骨以本官致仕卒赠太尉
蒋偕

偕以父任历右拾遗史馆修撰转补阙主客郎中初柳芳作唐历大历以后阙而不
录宣宗召崔龟从韦澳李荀张彦远及偕等分年撰次
尽元和以续云累迁太常少卿大中八年与卢耽牛丛王汾卢吉撰次文宗实录蒋氏世
传朴学唯伸及系子兆能辞章取进士第然不为文士
所多三世踵修国史世称良笔咸云蒋氏日历天下多藏焉

△柳芳

柳芳字仲敷蒲州河东人开元末擢进士第由永宁尉直史馆萧宗诏芳与韦述缀
辑吴兢所次国史会述卒芳继成之起高祖讫干元凡
百三十卷叙天宝后事弃取不伦史官病之然芳笃志论著无须臾废属承寇乱史籍沦
缺上元中坐事徙黔中时高力士亦贬巫州因从力士
质开元天宝及禁中事具识本末时国史已送官不可追刊乃推衍义类仿编年法为唐
历四十篇颇有异闻然不立褒贬义例为诸儒讥讪后
历左金吾卫骑曹参军史馆修撰改右司郎中集贤殿学士卒子登冕

柳登

柳璟

柳冕

柳登

登字成伯淹贯羣书年六十余始仕宦元和初为大理少卿与许孟容等刊正敕格
以病改右散骑常侍致仕卒年九十余赠工部尚书

柳璟

子璟字德辉宝历初第进士宏词三迁监察御史时郊庙告祭吏部以杂品摄上公
璟据开元元和诏书太尉以宰相摄事司空司徒以仆
射尚书师傅摄余司不及差限请如旧制从之累迁吏部员外郎文宗开成初为翰林学
士初芳永泰中按宗正谍断自武德以昭穆系承撰永
泰新谱二十篇璟因召对帝叹新谱详悉诏璟摭永泰后事缀成之复为十篇户部供
笔札禀料迁中书舍人武宗立转礼部侍郎璟为人宽
信好接士称人之长游其门者它日皆显于世会昌二年再主贡部坐其子招贿贬倍州

司马终郴州刺史

柳冕

冕字敬叔博学富文辞且世史官父子并居集贤院历右补阙史馆修撰坐善刘晏贬巴州司户参军还为太常博士昭德王皇后崩冕与张荐议皇太子宜依晋魏故事卒哭除服左补阙穆质请依礼替而除冕议见用德宗既亲郊庙慎祠事动稽典礼冕以吏部郎中摄太常博士与荐及司封郎中徐岱仓部郎中陆质修饬仪矩帝疑郊庙每升辄去剑履及象剑尺寸祝文轻重之宜冕据礼以对本末详明天子嘉异久之以论议劲切执政不善出为婺州刺史十二年兼御史中丞福建观察使自以久疏斥又性躁狷不能无恨乃上表乞代且推明朝覲之意曰臣窃感江汉朝宗之誼鹿鸣君臣之燕颂声之作王道本始自兵兴以来不遑议礼方牧未朝燕乐久缺臣限一切之制例无朝集足不践轩墀之地十有二年于兹矣国家故事天下朝集三考一见皆以十月上计京师十一月礼见会尚书省应考绩事元日陈贡棊集于考堂唱其考第进贤以兴善简不肖以黜恶自安史乱常始有专地四方多故始有不朝臣忝牧圉之寄愤不庭之臣思一入覲率先天下使君臣之义亲而不疏朝覲之礼废而复举比闻诸将帅亡歿者众臣自悼何德以堪久长乡国人情之不忘也阙廷臣子所恋也朝覲国家大礼也三者臣之大愿表累上其辞哀切德宗许还会冕奏闽中本南朝畜牧地可息羊马置牧区于东越名万安监又置五区于泉州悉索部内马驴牛羊合万余游畜之不经时死耗畧尽复调充之民间怨苦坐政无状代还卒赠工部尚书

△沈既济

沈既济苏州吴人经学该明吏部侍郎杨炎雅善之既执政荐既济有良史才召拜左拾遗史馆修撰初吴兢撰国史为则天本纪次高宗下既济奏议以为则天皇后进以强有退非德让史臣追书当称为太后不宜曰上中宗虽降居藩邸而体元继代本吾君也宜称皇帝不宜曰卢陵王睿宗在景龙前天命未集假临大宝于谊无名宜曰相王未容曰帝且则天改周正朔立七庙天命革矣今以周厕唐列为帝纪孝于礼经是谓乱名中宗嗣位在太后前而叙年制纪反居其下方之跻僖公是谓不智昔汉高后称制独有王诸吕为负汉约无迁鼎革命事时孝惠已歿子非刘氏不纪吕后尚谁与哉议者犹谓不可况中宗以始年即位季年复祚虽尊名中夺而天命未改足以首事表年何所拘阂而列为二纪鲁昭公之出春秋岁书其居曰公在干侯君在虽失位不敢废也请省天后纪合中宗纪每岁首必书孝和在所以统之曰皇帝在房陵太

后行某事改某制纪称中宗而事迹太后名不失正礼不违常矣若后姓氏名讳才藝智畧崩葬日月宜入皇后传题其篇曰则天顺圣武皇后云议不行德宗初立锐于治建中二年诏中书门下两省分置待诏官三十择见官故官若同正试摄九品以上者为之视品给俸至廩饩干力什器馆宇悉有差以公钱置举本贍用度既济谏曰今日之治患在官烦不患员少患不问不患无人两省官自常侍谏议补阙拾遗四十员日有两人备顾问亦不少矣且其中尚有二十一员未补若谓见官不足与议则当更选其人若欲广聪明牧淹滞则当先补其阙何事官外置官夫置钱取息有司之权制非经治法今置员三十大抵月费不减百万以息准本须二千万得息百万配户二百又当复除其家且得入流所损尤甚今关辅大病皆言百司息钱毁室破产未有以革臣计天下财赋耗斲大者唯二事一兵资二官俸它费十不当二者之一所以黎人重困杼轴空虚今四方形势兵未可去资费虽广不获已为之又益以闲官冗食其弊柰何藉旧而置犹可若之何加焉事遂寝炎得罪既济坐贬处州司户参军后入朝位礼部员外郎卒撰建中实录时称其能子传师

沈传师

沈传师

传师字子言材行有余治春秋工书有楷法少为杜佑所器贞元末举进士时给事中许孟容礼部侍郎权德輿乐推穀士号权许德輿称之为于孟容孟容曰我故人子盍不过我传师往见谢曰闻之丈人脱中第则累公举矣故不敢进孟容曰如子可使我急贤诣子不可使子因旧见我遂擢第德輿门生七十人推为颜子复登制科授太子校书郎以鄂尉直史馆转右拾遗左补阙史馆修撰迁司门员外郎知制诰召入翰林为学士改中书舍人翰林缺承旨次当传师穆宗欲面命辞曰学士院长参天子密议次为宰相臣自知必不能愿治人一方为陛下长养之因称疾不出帝遣中使敦召李德裕素与善开晓淳切终不出遂以本官兼史职俄出为湖南观察使方传师与修宪宗实录未成监修杜元颖因建言张说令狐垣在外论次国书今彙史残课请付传师即官下成之诏可宝历二年入拜尚书右丞复出江西观察使徙宣州传师明吏治吏不敢问慎重刑法每断狱召幕府平处轻重尽合乃论决尝择邸吏尹伦迟鲁不及事官属屡白易之传师曰始吾出长安诫伦曰可阙事不可多事伦如是足矣故所莅以廉靖闻入为吏部侍郎卒年五十九赠尚书传师性夷粹无竞更二镇十年无书贿入权家初拜官宰相欲以姻私托幕府者传师固拒曰诚尔愿罢所授故其僚佐如李景让萧寘杜牧极当时选云治

家不威严闺门自化兄弟子姓属无亲疏衣服饮食如一
一问饷姻家故人帑无储钱鬻宅以葬子询字诚之亦能文辞会昌初第进士补渭南尉
累迁中书舍人出为浙东观察使除户部侍郎判度支
咸通四年为昭义节度使治尚简易人皆便安奴私侍儿询将戮之奴惧结牙将为乱夜
攻询灭其家赠兵部尚书左散骑常侍刘潼代为节度
驰至刳奴心祭其灵坐 【按通鉴咸通五年以京兆尹李蟪为昭义节度使与此异】

钦定续通志卷二百三十五

●钦定续通志卷二百三十六 列传三十六

列传

唐 【三十六】

○唐三十六

宇文融【审】 韦坚 杨慎矜

宇文融

韦坚

杨慎矜

王鉷

△宇文融

宇文融京兆万年人隋平昌公■〈弓弓文〉裔孙祖节明法令贞观中为尚书右丞谨干自将江夏王道宗以事请节节以闻太宗喜赉绢二百劳之曰朕比不置左右仆射正以公在省耳永徽初迁黄门侍郎同中书门下三品代于志宁为侍中坐善房遗爱贬桂州卒融明辩长于吏治开元初调富平主簿源干曜孟温继为京兆厚礼之时天下户版冗隐人多去本籍浮食闾里诡脱繇赋豪弱相并州县莫能制融由监察御史陈便宜请校天下籍收匿户羨田佐用度玄宗以融为覆田劝农使钩检帐符得伪勋亡丁甚众擢兵部员外郎兼侍御史融乃奏慕容琦韦洽裴宽班景倩庠狄履温贾晋等二十九人 【按通典亦作二十九人旧书及通鉴皆作十人】 为劝农判官假御史分按州县括正邱亩招徕户口而分业之又兼租地安辑户口使于是诸道收没户八十万田亦称是岁终羨钱数百万缗帝悦引拜御史中丞然吏下希望融旨不能无扰张空最务多其获而流客颇脱不止初议者以生事沮诘百端而帝意向之宰相源干曜等赞成其事又集羣臣大议户部侍郎杨珣以为籍外取税百姓困弊得不酬失珣坐左迁融乃自请驰传行天下事无巨细先上劝农使而后上台省台省须其意乃行下融所过见高年宣天子恩旨百姓至有感涕者使还言状帝乃下诏以客赋所在并建常平仓益贮九谷

权发敛官司劝作农社使贫富相恤凡农月州县常务
一切罢省使趋刈获流亡新归十道各分官属存抚使遂厥功复业已定州县季一申牒
不须挟名中书令张说素恶融融每建白说辄引大体
廷争融揣说不善欲先事中伤之张九龄谓说曰融新用事辩给多诈公不可以忽说曰
狗鼠何能为会帝封太山还融以选限薄冬请分吏部
为十铨有诏融与礼部尚书苏颋刑部尚书韦抗工部尚书卢从愿右散骑常侍徐坚蒲
州刺史崔琳魏州刺史崔沔荆州长史韦虚心郑州刺
史贾鲁怀州刺史王邱分总而不得参事一决于帝融奏选事说屡却之融怒乃与御史
大夫崔隐甫等劾罢说融畏说且复用訾诋不已帝疾
其党诏说致仕放隐甫于家出融为魏州刺史方河北大水即诏领宣抚使俄兼检校汴
州刺史河南北沟渠堤堰决九河使又建请垦九河故
地为稻田权陆运本钱收其子入官兴役纷然而卒无成功入为鸿胪卿兼户部侍郎明
年入黄门侍郎同中书门下平章事融曰使吾执政得
数月久天下定矣乃荐宋璟为右丞相裴耀卿为户部侍郎许景先为工部侍郎当时长
其知人而性卞急少所推下既居位日引宾客故人与
酣饮然而神用警敏应对如响虽天子不能屈信安王祎节度朔方融畏其权讽侍御史
李宙劾奏之祎密知因玉真公主高力士自归翌日宙
通奏帝怒罢融为汝州刺史 【按通鉴祎入朝融使御史李寅弹之泄于所亲祎闻之先
以白上与新书畧同新书李寅作李宙又不言祎入
朝盖阙戈也旧书云侍御史李宙驿召祎将下狱祎既申诉得理融坐阿党李宙贬与新
书通鉴皆异】 居宰相凡百日去而钱谷亦自此不治
帝思之让宰相曰公等暴融恶朕既罪之矣国用不足将柰何裴光庭等不能对即使有
司劾融交不逞作威福其息受赃馈狼藉乃贬融平乐
尉岁余司农发融在汴州给隐官息钱巨万给事中冯绍烈深文推证诏流于岩州道卒
初融广置使额以侈帝心百姓愁怨有司寢失职自融
始帝犹思其旧功赠台州刺史其后言利得幸者踵相蹶皆本于融云

宇文审

宇文审

子审融之贬也审与兄弟侍母京师及闻融再贬不告其家徒步号泣省父使者怜
之以车共载达于岩州后擢进士第累迁大理评事以
夏楚大小无制始创杖架以高庠度杖长短又铸铜为规齐其巨细杨国忠颋政杀岭南
流人以中使传口敕行刑畏议者嫉其酷乃以审为岭
南监决处置等使活者甚多后终和永二州刺史

△韦坚

韦坚字子全京兆万年人姊为惠宣太子妃妹为皇太子妃中表贵盛故仕最蚤繇
秘书丞历奉先长安令有干名见宇文融杨慎矜父子
以聚敛进乃运江淮租赋所在置吏督察以佐国稟岁终增巨万玄宗咨其才擢为陕郡
太守水陆运使汉有运渠起阙门西抵长安引山东租
赋汔隋常治之坚为使乃占咸阳壅渭为堰绝灞浚而东注永丰仓下复与渭合初浚水
街苑左有望春楼坚于下凿为潭以通漕二年而成帝
为升楼诏羣臣临观坚豫取洛汴宋山东小斛舟三百贮之潭篙工柁师皆大笠侈袖芒
屨为吴楚服每舟署某郡以所产珍货暴陈其上船尾
相衔进数十里不绝关中不识连檣挟棹观者骇异而陕尉崔成甫衣缺胯衫锦半臂绛
冒额立舳前倡得宝歌美妇数百皆巾■〈巾菁〉鲜
冶齐声应和鼓吹合作船次楼下坚跪进诸郡轻货上百牙盘食帝大悦擢坚右散骑常
侍官属赏有差蠲役人一年赋舟工赐钱二百万名潭
曰广运坚进兼江淮南租庸转运处置等使又兼御史中丞封韦城县男坚妻姜皎女李
林甫舅子也初甚昵比既见其宠恶之坚亦自以得天
子意锐于进又与左相李适之善故林甫授坚刑部尚书夺诸使以杨慎矜代之河西陇
右节度使皇甫惟明数于帝前短林甫称坚才林甫知
之惟明故为忠王友王时为皇太子矣正月望夜惟明与坚宴集林甫奏坚外戚与边将
私且谋立太子有诏讯鞫林甫使杨慎矜杨国忠王鉉
吉温等文致其狱帝惑之贬坚缙云太守惟明播川太守籍其家太子惧表与妃绝再贬
坚江夏别驾未几长流临封郡弟兰为将作少匠冰鄂
令芝兵部员外郎子谅河南府户曹皆谪去岁中遣监察御史罗希奭就杀之杀惟明于
黔中惟坚妻得原从坐十余人坚始凿潭多坏民家墓
起江淮至长安公私骚然及得罪林甫遣使江淮钩索坚罪捕治舟夫漕史所在狱皆满
郡县剥敛偿输责及邻伍多裸死牢户林甫死乃止

△杨慎矜

杨慎矜隋齐王暕曾孙祖正道从萧后入突厥及破颉利可汗乃得归为尚衣奉御
父隆礼【吴缙曰宰相世系表作崇礼盖避明皇帝
讳改名尔】 历州刺史善检督吏以严辩自名开元初为太府卿封弘农郡公时御府财
物羨积如邱山隆礼性详密出纳虽寻尺皆自按省凡
物经杨卿者号无不精丽岁常爱省数百万任职二十年年九十余以户部尚书致仕卒
慎矜沈毅任气健而才初为汝阳令有治称隆礼罢太
府玄宗访其子可代父任者宰相以慎余慎矜慎名皆得父清白帝喜擢慎矜监察御史
知太府出纳慎余太子舍人主长安仓慎名大理评事
为含嘉仓出纳使被眷尤渥慎矜迁侍御史知杂事议输物有污伤贵州县偿所直转经

賁入京师自是天下调发始烦天宝二年权判御史中丞京畿采访使太府出纳如故于时李林甫用事慎矜进非其意固让不敢拜乃授谏议大夫兼侍御史更以萧谅为中丞谅争轻重不平罢为陕郡太守林甫知慎矜为已屈卒授御史中丞兼诸道铸钱使韦坚之狱王鉷等方文致而慎矜依违不甚力鉷恨之虽林甫亦不悦鉷父与慎矜外兄弟也故与鉷狎及为侍御史繇慎矜所引后迁中丞同列慎矜与语犹名之鉷负林甫势滋不平会慎矜擢户部侍郎仍兼中丞林甫疾其得君且逼己乃与鉷谋陷之明年慎矜父冢草木皆流血惧以问所善胡人史敬忠敬忠使身桎梏裸而坐林中厌之又言天下且乱劝慎矜居临汝置田为后计会婢春草有罪将杀之敬忠曰勿杀卖之可市十牛岁耕田十顷慎矜从之婢入贵妃姊家因得见帝帝爱其辩慧留宫中寢侍左右帝尝问所从来婢奏为慎矜家所卖帝曰彼乏钱邪对曰固将死赖史敬忠以免【按通鉴云慎矜有侍婢明珠色美敬忠屡目之慎矜即以遗敬忠车载过贵妃姊柳氏楼下姊邀敬忠上楼求车中美人敬忠不敢拒明日姊入宫以明珠自随帝见而异之问所从来明珠具以实对事出明皇杂录与新书本传异又明皇杂录及唐历俱作史敬思】帝素闻敬忠挟术问质其然婢具言敬忠夜过慎矜坐庭中步星变夜分乃去又白厌胜事帝怒杨国忠知之国忠鉷方睦阴相语始慎矜夺鉷职田辱诟其母又尝私语讖书鉷衔之未有发也至闻国忠语乃喜且欲尝帝以取验异时奏事数称引慎矜帝勃然曰尔亲邪毋相往来鉷知帝恶甚乃与林甫作飞牒告慎矜本隋后蓄讖纬妖言与妄人交规复隋室帝震怒收慎矜尚书省诏刑部尚书萧炅大理卿李道邃殿中侍御史卢铉杨国忠噪声驰遣京兆士曹参军吉温系慎余慎名于洛阳狱考治捕太府少卿张瑄致会昌傅舍劾瑄与慎矜共解国讖榜掠不服铉遣御史崔器索讖书于慎矜小妻卧内得之以示慎矜慎矜曰它日无是今得之吾死命矣夫温又诱敬忠首服诘慎矜不能对有诏杖敬忠赐慎矜瑄死籍其家子女悉置岭南姻党坐窜徙者十余族近亲不得仕京师遣御史颜真卿驰洛阳决狱慎余慎名闻兄死皆哭既读诏辍哭慎名曰奉诏不敢惜死但寡姊垂白作数行书与别真卿许之索笔曰拙于谋己兄弟并命姊老孤莹何以堪此遂缢慎矜兄弟友爱事姊如母仪干皆秀伟爱宾客标致不凡著称于时宝应初慎矜王琚韦坚皆复官爵

△王鉷

王鉷中书舍人璿侧出子也初为鄆尉迁监察御史擢累户部郎中数按狱深文玄

宗以为才进兼和市和余长春宫户口色役使拜御史中丞京畿关内采访黜陟使林甫方兴大狱撼东宫诛不附己者以鉞险刻可动以利故倚之鉞所摧陷多抵不道又厚诛敛向天子意人虽被蠲贷鉞更奏取脚直转异贷百姓闲关输送乃倍所赋又取诸郡高户为租庸脚士大抵费业皆破督责连年人不聊生帝在位久妃御服玩脂泽之费日侈而横与别赐不绝于时重取于左右藏故鉞迎帝旨岁进钱巨亿万储禁中以为岁租外物供天子私帑帝以鉞有富国术宠遇益厚以户部侍郎仍御史中丞加检察内作闲厩使苑内营田五坊宫苑等使陇右羣牧度支营田使天宝八载方士李浑上言见太白老人告玉欣秘记事帝诏鉞按其地求得之因是羣臣奉上帝号明年鉞为御史大夫兼京兆尹加知总监裁接使于是领二十余使中外畏其权鉞于第左建大院文书丛委吏争入求署一字累数日不得天子使者赐遗相望声焰熏灼帝宠任鉞亚林甫而杨国忠不如也然鉞畏林甫谨事之安禄山怙宠见林甫白事稍息怠林甫欲示之威托以事召王大夫俄而鉞至趋进俯伏禄山不觉自失故林甫虽忌其盛亦以附己亲之子准为卫尉少卿以鬪鸡供奉禁中林甫子岫亦亲近准骄甚凌岫出其上过驸马都尉王繇以弹弹其中折玉簪为乐既置酒永穆公主亲视供具万年尉韦黄裳长安尉贾季邻等候准经过饌具倡乐必素辨无敢逆意鉞事嫡母孝而与弟焊友爱焊厯户部郎中召术士语不轨术士惊引去鉞畏事泄托它事捕杀之以绝口王府司马韦会安定公主子也窃语于家左右往白鉞鉞遣季邻收会长安狱夜缢死以尸还家会姻属权近而惕息不敢言鉞封太原县公兼殿中监为中丞也与杨国忠同列己而鉞用林甫荐为大夫故国忠不悦焊与故鸿胪少卿邢璠子縉善鉞因焊亦交縉十一载四月縉与焊谋引右龙武军万骑烧都门诛执政作难先二日事觉帝召鉞付告牒鉞意焊与縉连故缓其事但督两县尉捕贼贾季邻等至縉与其党持弓刃突出格鬪鉞与国忠继至縉党相语曰勿鬪大夫或白国忠曰贼语阴相谓不可战会高力士以飞龙小儿甲骑四百至斩縉尽禽其党国忠奏鉞与谋帝不信林甫亦为鉞言故帝原焊不问然欲鉞请焊罪使国忠讽之鉞不忍帝怒而陈希烈极言鉞大逆当诛有诏讯鉞狱具诏焊杖死鉞赐死三卫尉侍御史裴冕请国忠以其尸归敛葬之诸子悉诛家属徙远方有司籍第舍数日不能徧至以宝钿为井干引泉激溜号自雨亭其奢侈类如此鉞兄锡见诸弟贵盛不肯仕鉞强之为太子仆至是贬东区尉死于道时人伤焉初鉞附杨慎矜以贵己而佐林甫陷慎矜覆其家凡五年而鉞亦族矣

钦定续通志卷二百三十六

●钦定续通志卷二百三十七 列传三十七

列传

唐【三十七】

○唐三十七

郭虔瓘 郭知运【英杰英义】 王君■〈龔，大代兔〉 张守珪【
献诚 献恭献甫】 王忠嗣 牛仙客

哥舒翰【曜】 高仙芝 封常清

郭虔瓘

郭知运

王君■〈龔，大代兔〉

张守珪

王忠嗣

牛仙客

哥舒翰

高仙芝

封常清

△郭虔瓘

郭虔瓘齐州历城人开元初录军阀累迁右骁卫将军兼北庭都护金山道副大总管明年突厥默啜子同俄特勒围北庭虔瓘饬垒自守同俄单骑驰城下勇士狙道左突斩之贼亡酋长相率丐降请悉军中资赎同俄死闻已斩举军恸哭去虔瓘以功授冠军大将军安西副大都护封潞国公【虔瓘始封太原郡公进潞国】请募关中兵万人击余寇有诏令募士所过给公乘熟食将作大匠韦湊上言汉徙豪族以实关中今畿辅户口逋耗异时戎敌入盗丁壮悉行不宜更募骁勇以空京甸资荒服万人所过递馱熟饗亘六千里州县安所供亿秦陇以西多沙磧少居人若何而济纵有克获其补几何傥稽天诛无乃甚损不省既而虔瓘果不见敌还迁凉州刺史河西节度大使进右威卫大将军四年奏家奴八人有战功求为游击将军宰相劾其恃功乱纲纪不可听罢之陝王为安西都护诏虔瓘为副虔瓘与安抚招慰十姓可汗使阿史那献数持异交诉诸朝元宗遣左卫中郎将王惠赍诏书谕解【杜暹传虔瓘与阿史那献刘遐庆等不协诏暹往按应是一时事】虔瓘奉诏久之卒军中以张孝嵩为安西副都护孝嵩伟姿貌及进士第而慷慨好兵在安西劝田训士府库盈饶徙太原尹卒以黄门侍郎杜暹代【

新旧书杜暹传俱称暹代张孝嵩为安西都护而旧书虔瓘传乃作张嵩按通鉴开元十年北庭节度使张嵩击吐蕃大破之新旧书不载其事而张孝嵩为安西副护亦正在其时疑本是一人而或以为嵩或以为孝嵩或以为安西或以为北庭则传闻异辞耳】

△郭知运

郭知运字逢时瓜州晋昌人【旧书作常乐人】长七尺猿臂虎口以格鬪功累补秦州三度府果毅从郭虔瓘破突厥有功加右骑卫将军封介休县公吐蕃将盆达延方力徐寇渭源盗收马诏知运与薛纳王峻等相掎角败之进阶冠军大将军兼临洮军使封太原郡公赐赉万计徙陇右诸军节度大使鄯州都督突厥降户阿悉烂■〈足夹〉跌思泰率众叛执单于都护张知运诏以朔方兵追击至黑山呼延谷败之敌弃仗走取副都护还诏知运兼陇右经畧使营柳城开元五年大破吐蕃献俘京师明年复出将轻兵丙夜至九曲获精甲名马牦牛甚众既献获诏分赐文武五品以上清官及朝集使三品者进鸿胪卿摄御史中丞六州胡康待宾反率王峻讨平之拜左武卫大将军授一子官赐金帛九年卒于军年五十五赠凉州都督知运屯西方戎敌畏惮与王君■〈髡，大代兔〉功名略等时号王郭帝诏中书令张说纪其功于墓碑上元中配飨太公庙永泰初谥曰威子英杰英义

郭英杰

郭英义

郭英杰

英杰字孟武为左卫将军幽州副总管开元二十三年长史薛楚玉遣英杰与裨将吴克勤乌知义罗守忠帅万骑及奚众讨契丹屯榆关契丹酋长可突于拒战都山下奚众贰官军不利知义守忠引麾下遁去英杰克勤力战死其下尚六千人殊死战敌示以英杰首终不屈师遂燔

郭英义

英义字符武以武勇有名河陇间累迁诸卫员外将军哥舒翰见之曰是当代吾节制者禄山乱拜秦州都督陇右采访使贼将高嵩拥兵入汧陇英义伪劳之且具饗伏兵发尽掳其众至德二载加陇右节度使召还改羽林军大将军掌卫兵以丧去职史思明陷洛阳谋掠陈蔡诏英义统淮南节度兵贼寇陕虢又改陕西节度潼关防御使进御史大夫兼神策军节度使代宗即位以检校户部尚书兼大夫雍王率诸将讨贼洛阳留英义殿于陕东都平权知留守英义无检御才纵麾下与朔方回纥大掠都城

及郑汝环千里无居人召拜尚书右仆射封定襄郡王
日骄蹇为侈汰阴事宰相元载以久其权严武卒拜剑南节度使自以有内主故肆志无
所惮初玄宗在蜀时旧宫为道士祠冶金作帝像尽绘
乘輿侍卫每尹至先拜祠后视事英又爱其地胜选辄坏绘像自居之众始不平又教女
伎乘驴击球钿鞍宝勒及它服用日费数万未尝问民
间事为政苛暴道路以目怨崔旰 【旰后赐名奝故新书作崔奝】 不附己出兵袭旰
不克旰因人之怨率麾下五千直捣成都英又拒战众
皆反戈内攻乃奔简州次灵池普州刺史韩澄斩首送旱遂屠其家

△王君■〈奝，大代兔〉

王君■〈奝，大代兔〉字威明瓜州常乐人初事郭知运为别奏累功至右卫副
率知运卒代为河西陇右节度使右羽林军将军判凉
州都督事开元十四年 【旧书作十六年冬通鉴考异云据实录及吐蕃传入寇在十四
年冬旧传误也】 吐蕃酋悉诺逻寇大斗谷掠甘州
而还君■〈奝，大代兔〉勒兵蹶其后率秦州都督张景顺乘冰渡青海破其后军获
辎重羊马万计以功迁大将军封晋昌县伯拜其父寿
为少府监听致仕君■〈奝，大代兔〉凯旋玄宗宴君■〈奝，大代兔〉及妻夏于
广达楼赐金帛夏亦自以战功封武威郡夫人俄而吐
蕃陷瓜州执刺史田元献 【旧书作田仁献】 及寿进攻玉门军使人谓君■〈奝
，大代兔〉曰将军常自许忠勇今不一进战柰何君■
〈奝，大代兔〉登陴西向哭兵不敢出初凉州有回纥契苾思结浑四部世为酋长君
■〈奝，大代兔〉微时数往来为所轻及节度河西
回纥等颇鞅鞅耻为下君■〈奝，大代兔〉又数督过之皆怨望潜遣人至东都言状
君■〈奝，大代兔〉闻驿奏四部有叛谋帝使中人
即讯回纥不能自直于是瀚海大都督回纥承宗流灊州浑大得流吉州贺兰都督契苾
承明流藤州卢山都督思结归国流琼州而承宗党瀚
海州司马护输等益不平思复怨会吐蕃使间道走突厥君■〈奝，大代兔〉率骑到
肃州掩取之还至甘州护输伏兵发夺君■〈奝，大
代兔〉节杀左右亲吏剖其心曰是始谋者君■〈奝，大代兔〉引帐下力战兵尽乃
死护输欲以尸奔吐蕃追兵至乃弃尸去帝痛惜之赠
特进荆州大都督以丧还京师诏张说刻文墓碑帝自书以宠之始吐蕃寇瓜州分遣莽
布支攻常乐令贾师顺乘城守俄而瓜州陷悉诺逻并
兵攻之数日敌众有姻家在城中使夜见师顺曰州已失守贼悉众来孤城讵可久何早
降以全噍类乎师顺曰吾受天子命守此义不可下贼
数日又说师顺曰明府不降吾众且还宜有以赠我师顺请脱士卒衣襦悉诺逻知无有

乃夜彻营去毁瓜州城师顺开门收拾器械复完守备

吐蕃果使精骑还袭见有备乃去以功迁鄯州都督陇右节度使师顺岐州人终左领军将军

△张守珪

张守珪陕州河北人姿干瓌壮慷慨尚节义善骑射以平乐府别驾从郭虔瓘守北庭突厥侵轮台遣守珪往援中道逢贼苦战斩首千余

级禽颡斤一人开元初敌复攻北庭守珪间道奏事京师因上书言利害请引兵出蒲昌轮台夹击贼再迁幽州良杜府果毅时卢齐卿为刺史

器之引与共榻坐谓曰不十年子当节度是州为国重将愿以子孙托稍迁建康军使王君■（曩，大代兔）死河西震惧诏以守珪为瓜州

刺史墨离军使督余众完故城版筑方立敌奄至众失色守珪曰创痍之余讵可矢石相确须权以胜之遂置酒城上会诸将作乐敌疑有备不

敢攻引去守珪纵兵击败之于是修复廨宇招流冗使复业有诏以瓜州为都督府即以守珪为都督州地沙磧不可耘常蓄雪水溉田是时渠

塌为寇毁材木无所出守珪密祷于神一时水暴至大木数千章塞流下因取之修复堰坊耕者如旧州人神之刻石纪事迁鄯州刺史陇右节

度使徙幽州长史河北节度副大使俄加采访处置等使契丹奚连年梗边牙官可突于骁勇有谋畧前长史赵含章薛楚玉等不能拒守珪至

每战辄胜敌遂大败帝喜诏有司告九庙契丹酋屈刺及突于恐惧乃遣使诈降守珪得其情遣右卫骑曹王悔诣部计事屈刺无降意徙帐稍

西北密引突厥众将杀悔会契丹别帅李过折与突于争权不叶悔因间诱之夜斩屈刺及突于尽灭其党以众降守珪次紫蒙州大阅车实赏

将士传屈刺突于首于东都二十三年入见天子会藉田毕即酺燕为守珪饮至赋诗宠之加拜辅国大将军右羽林大将军赐金彩授二子官

诏立碑纪功久之复讨契丹余党于捺禄山鹵获不訾会裨将赵堪百真陀罗等强使平卢军使乌知义度湟水邀叛奚且昧其稼知义辞不往

真陀罗矫诏胁之知义与敌鬪不胜还守珪匿其败上克获状事颇泄帝遣谒者牛仙童按实守珪逼真陀罗自杀厚赂使者还奏如状后仙童

以赃败事逮守珪以功贬括州刺史疽发背死子献诚

张献诚

张献恭

张献甫

张献诚

献诚天宝末陷安禄山授伪署后事史思明将兵数万守汴州东都平史朝义走还

汴献诚不内籍所统兵以州归国诏即拜汴州刺史封
南阳郡公改宝应军左厢兵马使更封邓国公既来朝代宗礼赐尤渥擢山南西道节度
使【旧书作观察使按方镇表广德元年升山南西
道防御守提使为节度使寻降为观察使此叙献诚授官之始宜从新书】讨南山剧贼
高玉禽之俄兼剑南东川节度时崔旰杀郭英义献诚
率众战梓州大败大历三年以疾归京师举其从弟献恭自代以检校户部尚书知省事
病甚固乞辞位卒始献诚喜功名为政宽裕有机畧随
方制变而简廉不逮于父

张献恭

献恭数有军功以右羽林将军代为节度使大历末破吐蕃于岷州久之拜东都留
守累迁检校吏部尚书德宗欲徙卢■〈木巳〉为饶
州刺史给事中袁高上还诏书苦争献恭见帝曰高所奏宜听帝不答复前曰高乃陛下
良臣当优异之上遂不徙■〈木巳〉世服其不挠子
煦积阍亦至夏州节度使元和八年张武军逐节度使李进贤屠其家杀判官严澈宪宗
怒诏煦以本军进讨许以便宜赐缣三万为军资河东
王鐔遗兵五千为援煦入捕乱卒苏国珍等数百人诛之卒赠太子太保

张献甫

献甫亦献诚从弟以军功试光禄卿殿中监从河中节度使贾耽讨梁崇义有劳德
宗西幸又从浑瑊讨朱泚战多累迁至金吾将军检校
工部尚书李怀光叛吐蕃盗边献甫领禁兵戍咸阳累年兵农悦安贞元四年代韩游瓌
领邠宁节度使邠宁军素骄惮献甫严因游瓌去遂纵
掠邀范希朝为帅都将杨朝晟诛首乱者献甫乃得入于是断山浚塹选岩要地筑烽堡
请复盐州及洪门洛原镇屯兵诏可献甫遣兵马使魏
范逐吐蕃筑盐夏二城敌众畏不敢入寇十二年加检校尚书左仆射卒赠司空

△王忠嗣

王忠嗣华州郑人父海宾太子右卫率丰安军使开元二年吐蕃寇陇右诏陇右防
御使薛讷率杜宾客郭知运王峻安思顺御之以海宾
为先锋战武阶追北至壕口杀其众进战长城堡诸将媚其功按兵顾望海宾战死大军
乘之斩贼万七千级获马七万牛羊四十万玄宗怜其
忠赠左金吾大将军时忠嗣年九岁始名训授尚辇奉御入见帝伏地号泣帝抚之曰此
去病孤也须壮而将之更赐今名养禁中肃宗为忠王
帝使与游及长雄毅寡言有武畧上与论兵应对蠡起帝器之曰后日尔为良将试守代
州别驾豪猾闭门自敛不敢干法数以轻骑出塞忠王
言于帝曰忠嗣敢鬪恐亡之由是召还信安王祗在河东萧嵩出河西数引为麾下帝以

其年少有复讎志诏不得特将嵩入朝忠嗣曰从公三年无以归报天子乃请精锐数百袭虏会赞普大酋阅武郁标川嵩不欲遣忠嗣不从提刀畧阵斩数千人获羊马万计嵩上其功帝大悦累迁左威卫将军代北都督封清源县男与皇甫惟明不协构忠嗣罪贬东阳府左果毅河西节度使杜希望欲取吐蕃新城【新书作新罗城】有言忠嗣才者希望以闻诏追赴河西进拔其城授左威卫郎将专知兵马俄吐蕃大出欲报新城之役晨压官军阵众寡不敌举军皆恐忠嗣单马进左右驰突独杀数百人贼众器相蹂军■〈广外多内〉翼掩之贼大败拜左金吾卫将军领河东节度副使大同军使寻为节度使二十九年节度朔方兼灵州都督天宝元年北讨奚怒皆战桑干河三遇三克耀武漠北高会而还时突厥新有难忠嗣进军碛口经畧之乌苏米施可汗请降忠嗣以其方强特文降拜乃营木刺兰山谍虚实因上平戎十八策纵反间于拔悉密与葛逻禄回纥三部攻多罗斯城涉昆水斩米施可汗筑大同静边二城徙清塞横野军实之并受降振武为一城自是敌不敢盗塞徙河东节度使进封县公忠嗣少负勇敢及为将乃能持重安边不生事尝曰平世为将抚众而已吾不欲竭中国力以幸功名故训练士马随阙缮补有漆弓百五十斤每彀之示无所用军中士气盛日夜思战忠嗣纵诡间伺敌隙时时出奇兵袭之所向无不克故士亦乐为用军每出召属长付以兵使授士卒虽弓矢亦志姓名其上军还遗弦忘镞皆按名第罪以是部下人人自劝器甲充牣自朔方至云中袤数千里据要险筑城堡斥地甚远自张仁亶后四十余年惟忠嗣继其功俄为河西陇右节度使权朔方河东节度佩四将印劲兵重地控制万里近世未有也授一子五品官后数出战青海积石敌辄奔破又讨吐谷浑于墨离平其国乃固让朔方河东二节度许之帝方事石堡城诏问攻取计忠嗣奏言石堡险固吐蕃举国守之若顿兵坚城下费士数万然后可图恐得不偿所失请厉兵马待衅取之帝意不快而李林甫尤忌其功日钩摭过咎会董延光建言请下石堡诏忠嗣分兵应接忠嗣不得已为出军而士无赏格延光不悦河西兵马使李光弼入说曰大夫爱惜士卒有拒延光心虽名受诏实夺其谋然以数万众付之而不立重赏何以鼓士勇且大夫惜数万段赐以启谗口有如不捷归罪大夫大夫先受祸矣忠嗣曰今以数万众争一城得之不足制敌不得未害于国吾忍以数万人命易一官哉明日见责不失一金吾羽林将军归宿卫不者黔中上佐耳光弼谢曰大夫乃行古人事非光弼所及也延光过期不克果诉忠嗣沮兵又安禄山城雄武扼飞狐塞谋乱请忠嗣助役因欲留其兵忠嗣

先期至不见禄山而还数上言禄山且乱林甫益恶之
阴使人诬告忠嗣尝养宫中云吾欲奉太子帝怒召入付三司讯验罪当死哥舒翰方有
宠白上请以官爵赎忠嗣罪帝意解贬汉阳太守久之
徙汉东郡卒年四十五后翰引兵攻石堡拔之死亡畧尽如忠嗣言故当世号为名将初
在朔方至互市辄高偿马直诸蕃争来市故蕃马寔少
唐军精及镇河陇又请徙朔方河东九千骑以实军迄天宝末益滋息宝应元年追赠兵
部尚书

△牛仙客

牛仙客涇州鹑觚人初为县小史令傅文静器之会为陇右营田使引与计事积功
迁洮州司马河西节度使王君■〈龔，大代兔〉召
为判官君■〈龔，大代兔〉死仙客独得免萧嵩代节度复委以军政仙客清勤不懈
接士大夫以信及嵩还执政因荐之稍迁太仆少卿判
凉州别驾知节度留后事俄为节度使开元二十四年代信安王祗为朔方行军大总管
始在河西嗇事省用仓库积巨万器械犀锐崔希逸代
之即以闻帝令刑部员外郎张利贞【新书作张利】驰传覆视如状帝悦将用为尚
书宰相张九龄持不可乃封陇西郡公实封户二百李
林甫探知帝旨称其材会九龄罢故以工部尚书同中书门下三品知门下事遥领河东
节度副大使为相与时浮沈唯唯恭愿前后赐与緘度
不敢用百司谿决无所处可辄曰如令式帝既用仙客知时议不归乘间以问高力士高
力士曰仙客本胥吏非宰相器帝忿然曰朕且用康■
〈功上言下〉盖恚言也久之封豳国公加左相卒赠尚书右丞相谥曰贞简

△哥舒翰

哥舒翰其先盖突骑施酋长哥舒部之裔父道元为安西都护将军赤水军使故仍
世居安西翰少补效穀府果毅家富于财任侠重然诺
纵菹酒长安市年四十余遭父丧不归不为长安尉所礼慨然发愤游河西事节度使王
倕倕攻新城使翰经畧稍知名又事王忠嗣署卫将翰
能读左氏春秋汉书通大义疏财多施予故士归心为大斗军副使佐安思顺不相下忠
嗣更使讨吐蕃副将倨见翰怒立杀之麾下为股栗迁
左卫郎将吐蕃盗边与翰遇苦拔海吐蕃枝其军为三行从山差池下翰持半段枪迎击
所向辄披靡名盖军中擢授右武卫将军副陇右节度
为河源军使先是吐蕃候积石军麦熟岁来取莫能禁翰乃使王难得杨景晖设伏东南
谷吐蕃以五千骑入塞放马褫甲将就田翰自城中驰
至麤鬪敌骇走追北伏起悉杀之只马无还者翰尝逐寇马惊陷于河吐蕃三将欲刺翰
翰大呼皆拥矛不敢动救兵至追杀之翰有奴曰左军

年十六以膂力闻翰工用枪追及贼拟枪于肩叱之贼反顾翰刺其喉剔而左之高五尺许乃堕左军即下马斩其首以为常会忠嗣被罪帝召翰入朝部将请赉金帛以救忠嗣翰但赉幞装曰使吾计从奚取于是不行用此足矣翰至帝虚心待与语异之拜鸿胪卿为陇右节度副大使翰已谢即极言忠嗣之枉帝起入禁中翰叩头从帝且泣帝悟为末贷其罪忠嗣不及诛朝廷称其义踰年筑神威军青海上吐蕃攻破之更筑于龙驹岛有白龙见因号应龙城翰相其川原宜畜牧谪罪人二千戍之由是吐蕃不敢近青海天宝八载诏翰以朔方河东羣牧兵十万攻吐蕃石堡城数日未克翰怒捽其将高秀岩张守瑜将斩之秀岩请三日期如期而下遂以赤岭为西塞开屯田备军实加特进赐赉弥渥十一载加开府仪同三司翰素与安禄山安思顺不平帝每欲和解之会三人俱来朝帝使骠骑大将军高力士宴城东翰等皆集诏尚食生击鹿取血漰肠为热洛河以赐之翰母于阆王女也禄山谓翰曰我父胡母突厥公父突厥母胡族类本同安得不亲爱翰曰谚言狐向窟嗥不祥以忘本也兄既见爱敢不尽心禄山以翰讥其胡怒骂曰突厥敢尔翰欲应之力士目翰翰托醉去久之进封凉国公兼河西节度使攻破吐蕃洪济大莫门等城收黄河九曲以其地置洮阳郡筑神策宛秀二军进封西平郡王赐音乐田园又赐一子五品官裨将赏拜有差宰相杨国忠恶禄山白发其反状故厚结翰俄进太子少保翰嗜酒极声色因风痺体不仁既疾废遂还京师阖门不朝请十四载禄山反封常清以王师败帝乃召见翰拜太子先锋兵马元帅以田良邱为军司马萧昕为判官王思礼钳耳大福李承光高元荡苏法鼎管崇嗣为属将火拔归仁李武定浑萼契苾窳以本部隶麾下凡河陇朔方奴刺等十二部兵二十万守潼关师始东先驱牙旗触门堕注旄干折众恶之天子御勤政楼临送诏翰以军行过门毋下百官郊饯旌旗亘二百里翰惶恐数以疾自言帝不听然病痼不能事以军政委良邱使王思礼主骑李承光主步三人争长政令无所统一众携弛无鬪意明年进拜尚书左仆射同中书门下平章事禄山遣子庆绪攻关翰击走之始安思顺度禄山必反尝为帝言得不坐翰既恶禄山又怨思顺及是知重兵在己有所论请天子重违因伪为贼书遣思顺者使关遯禽以献翰因疏七罪请诛之有诏思顺及弟元贞皆赐死徙放其家国忠始惧或说翰曰禄山本以诛国忠故称兵今若留卒三万守关悉精锐度浚水诛君侧此汉挫七国计也思礼亦劝翰翰犹豫未发谋颇露【通鉴载王思礼密说哥舒翰使抗表请诛国忠翰不应思礼又请以三十骑劫取以来至潼关杀之翰曰如此乃翰反

非禄山也考异曰元宗实录云或劝翰留兵二万守关悉以精锐回诛杨国忠此汉挫七国之计也翰心许之未发有客泄其谋于国忠国忠大惧按翰若回兵诛国忠则正与禄山无异思礼劝翰抗表言国忠罪犹不敢况敢举兵乎事必不然且翰虽心许他人安得知之正由翰按兵不进故国忠及其党疑惧恐翰回兵诛之其实翰无此心也若果欲诛国忠则安肯恸哭出关乎今按新旧唐书皆用元宗实录故附载考异之言以正之】国忠大骇入见帝曰兵法安不忘危大兵在潼关而无后殿万有一不利京师危矣即募牧儿三千人日夜训练以剑南列将分统之又募万人屯灊上使腹心杜干运为帅翰疑图己表请干运兵隶节下因诡召干运计事者至军即斩首梟牙门并其军国忠愈恐谓其子曰吾无死所矣翰数奏言禄山虽窃据河朔不得人心请持重以敝之待其离隙可不血刃而禽贼将崔干佑守陕郡仆旗鼓羸师以诱战覘者曰贼无备可图也帝信之诏翰进讨翰报曰禄山习用兵今始为逆不能无备是阴计诱我贼远来利在速战王师坚守毋轻出关计之上也且四方兵未集宜观事势不必速当是时禄山虽盗河洛所过残杀人人怨之淹时月不能进尺寸地又郭子仪李光弼兵益进取常山十数郡禄山始悔反矣将还幽州以自固而国忠计迫谬说帝趣翰出潼关复陕洛时子仪光弼遥计曰翰病且耄贼素知之诸军乌合不足战今贼悉锐兵南破宛洛而以余众守幽州吾直捣之覆其巢窟质叛族以招逆徒禄山之首可致若师出潼关变生京师天下殆矣乃极言请翰固关无出军而帝入国忠之言使使者趣战项背相望也翰窘不知所出六月引而东恸哭出关次灵宝西原与干佑战由关门七十里道险隘其南薄山北阻河贼以数千人先伏险翰浮舟中流以观军谓干佑兵寡易之促士卒进道岨无行列贼乘高颓石下击杀士甚众翰与良邱登北阜以军三万列河鸣鼓思礼等以精卒居前余军十万次之干佑为阵十五五或却或进而陌刀五千列阵后王师视其阵无法指观嗤笑曰禽贼乃会食及战干佑旗少偃如欲遁者王师懈不为备伏忽起薄战皆奋死鬪翰以毡蒙马车画龙虎饰金银爪目将骇贼倚戈矢逐北贼负薪塞路顺风火其车爍焱炽突腾烟如夜士不复相辨自相鬪杀尸血狼籍久乃悟又弃甲奔山谷及蹈河死者十一二有粮艘百余军争济艘辄沈至缚矛盾乘以度喧叫振天地贼乘之奔溃畧尽始关门有三堑广二丈深一丈士马奔■〈足戚〉相压迨少选堑平后至者践之以入既败翰自变量百骑绝河还营羸兵裁八千至潼津收散卒复守关于佑进攻于是火拔归仁等给翰出关翰曰何邪曰公以二十万众一日覆没持是安归公

不见高仙芝等事乎翰曰吾宁效仙芝死汝舍我归仁不从执以降贼械送洛阳京师震动由是天子西幸禄山见翰责曰汝常易我今何如翰俯伏谢罪曰陛下拨乱主今天下未平李光弼在土门来瑱在河南鲁灵在南阳臣为陛下以尺书招之三面可平禄山悦即署司空同中书门下平章事执火拔归仁曰背主忘义吾不尔容斩之翰以书招诸将皆让翰不死节禄山知事不可就囚之东京平安庆绪以翰度河及败乃杀之【旧书云禄山闭翰于苑中潜杀之与新书通鉴不同】翰为人严少恩军行未尝恤士饥寒有啖民楛者痛笞辱之监军李大宣在军中不治事与将士樗蒲饮酒弹箜篌琵琶为乐而士米糒不饜帝令中人袁思艺劳师士皆诉衣服穿空帝即斥御服余者制袍十万以赐其军翰藏库中及败封鏐如故先是有客梁慎初遣翰书请坚壁勿战以屈贼翰善之奏为左武卫胄曹参军留幕府及翰与国忠贰慎初曰难将作矣乃遁去翰失守华阴冯翊上洛郡官吏皆溃帝遣剑南将刘光庭等将新募兵万余人往助翰未至而翰被缚云其后赠太尉谥曰武愍

歌舒曜

歌舒曜

子曜字子明八岁元宗召见华清宫擢尚辇奉御累迁光禄卿以翰陷贼哀愤号恸故吏裴冕杜鸿渐等见之叹息李光弼讨河北曜请行拜鸿胪卿为光弼副降安太清救宋州有功改殿中监袭封为东都镇守兵马使德宗立召为左龙武大将军李希烈陷汝州以周晁为伪刺史诏拜曜东都汝州行营节度使将凤翔邠宁泾原奉天好畤兵万人讨希烈帝召见问曰卿治兵孰与父贤对曰先臣臣安敢比但斩长蛇殪封豕然后待罪私室臣之愿也帝曰尔父在开元时朝廷无西忧今朕得卿亦不东虑及行帝祖通化门是日牙干折时以翰出师已如此而斩持旗者卒以败今曜复尔人忧之曜击贼收汝州禽晁以献斩其将二人希烈退保许州诏城襄城曜以疲人版筑不如按甲持重以挫之帝不许有诏督战曜进攻颍桥雷震军中七马毙曜惧还屯襄城希烈遣众万人纵火攻栅殪人于堑以薄垒曜苦战破之居数月希烈自率兵三万围曜筑甬道属城矢集如雨帝遣神策将刘德信以兵三千援之又诏河南都统李勉出兵相犄角勉以希烈在外许守兵少乘虚袭之希烈自解乃遣部将与德信趋许未至有诏切让使班师德信等惶惑还军无斥候至扈涧为贼设伏诡击死者殆半器械辘重皆亡德信走汝州勉恐东都危使将李坚华以兵四千往守贼梗道不得入汴兵沮襄城围益急帝乃召普王以荆襄江西鄂沔之师讨蔡州诏泾原节度使姚令言掇襄

城未行京师乱帝幸奉天襄城陷曜走洛阳会母丧夺为东都畿汝节度使迁河南尹曜拙于统御而锐杀戮士畏而不怀贞元元年部将叛夜焚河南门曜挺身免帝以汴州刺史薛珏代之召入为鸿胪卿终右骁卫上将军赠幽州大都督子七人俱以儒闻峒茂才高第有节概嶮岷岷皆明经擢第

△高仙芝

高仙芝高丽人父舍鸡初以将军隶河西军为四镇校将仙芝年二十余从至西安以父功补游击将军数年父子并班仙芝美姿质善骑射父犹以其儒缓忧之初事节度使田仁琬盖嘉运等不甚知名后事夫蒙灵詧乃善遇之开元末表为安西副都护四镇都知兵马使小勃律其王为吐蕃所诱妻以女故西北二十余国皆羁属吐蕃自仁琬以来三讨之皆无功天宝六载诏仙芝以步骑一万出讨是时步兵皆有私马自随仙芝乃自安西过拨换城入握瑟德经疏勒登葱岭涉播密川遂顿特勒满川行百日特勒满川即五识匿国也仙芝乃分军为三使疏勒赵崇玘自北谷道拨换贾崇瓘自赤佛道仙芝与监军边令诚自护密俱入约会连云堡堡有兵千余城南因山为栅兵九千守之城下据婆勒川会川涨不得渡仙芝杀牲祭川命士人赍三日糒集水涯士不甚信既涉旗不沾鞞不濡兵已成列仙芝喜告令诚曰向吾方涉贼击我我无类矣今既济而阵天以贼赐我也遂登山挑战日未中破之拔其城斩五千级生擒千人马千余匹衣资器甲数万计仙芝欲遂深入令诚惧不肯行仙芝留羸弱三千使守遂引师行三日过坦驹岭岭峻绝下四十里仙芝恐士惮险不敢进乃潜遣二十骑衣阿弩越胡服来迎先语部校曰阿弩越胡来迎我无虑矣既至士不肯下曰公驱我何去会二十人至曰阿弩越胡来迎已断娑夷桥矣仙芝即阳喜令士尽下娑夷河弱水也既行三日越胡来迎明日至阿弩越城遣将军席元庆以精骑一千先往谓小勃律王曰不窥若城吾假道趋大勃律耳城中大酋领皆吐蕃腹心仙芝密令元庆曰若酋领逃者可出诏书呼之赐以缯彩至皆缚以待我元庆如言仙芝至悉斩之王及妻逃山穴不可得仙芝招谕乃出降因平其国急遣元庆断娑夷桥其暮吐蕃至不克度桥长度一箭所及者功一岁乃成八月仙芝以小勃律王及妻自赤佛道还连云堡与令诚俱班师于是拂菻大食等共七十二国皆震慑降附仙芝遣判官王庭芬奏捷京师军至河西灵詧怒不迎劳既见骂曰高丽奴于阗使尔何从得之仙芝惧且谢曰中丞力也又曰焉耆镇守使安西副都护都知兵马使皆何从得之答曰亦中丞力也灵詧曰审若此捷书不待我而敢

即奏何邪奴当斩顾新立功故贷尔仙芝不知所为令诚密言状于朝且曰仙芝立功而以忧死后孰为朝廷用者帝乃擢仙芝鸿胪卿假御史中丞代灵警为四镇节度使而诏灵警还灵警惧仙芝朝夕见辄趋走灵警益惭副都护程千里衙将毕思琛行官王滔康怀顺陈奉忠等皆尝谮仙芝于灵警者既视事呼千里嫚骂曰公面虽男儿而心似妇女何邪谓琛曰尔夺吾城东千石种田忆之乎又召滔欲捽辱良久皆释曰吾不恨矣由是举军安之俄加左金吾卫大将军与一子五品官九载讨石国其王车鼻施约降仙芝为俘献阙下斩之由是西域不服其王子走大食乞兵攻仙芝于怛逻斯城以直其冤仙芝为人贪破石国获瑟瑟十余斛黄金五六橐驼良马宝玉甚众家资累巨万然亦不甚爱惜人有求辄与不问几何寻除武威太守代安思顺为河西节度使土人固留思顺更拜右羽林军大将军封密云郡公禄山反荣王为元帅仙芝副之领飞骑彊骑及朔方等兵出禁财募关辅士五万继封常清东讨帝御勤政楼引荣王受命宴仙芝以下帝又幸望春亭劳遣诏监门将军边令诚监军次陕郡而常清败还仙芝急乃开太原仓悉以所有赐士卒焚其余引兵趋潼关会贼至甲仗资粮委于道弥数百里既至关勒兵缮守具士气稍稍复振贼攻关不得入乃引还初令诚数私于仙芝仙芝不应因言其逗挠状以激帝且云常清以贼摇众而仙芝弃陕地数百里股盗禀赐帝大怒使令诚即军中斩之令诚已斩常清陈尸于蘧蔭仙芝自外至令诚以陌刀百人自从曰大夫亦有命仙芝遽下曰我退罪也死不敢辞然以我为盗资粮诬也谓令诚曰上天下地三军皆在君岂不知又顾麾下曰我募若辈本欲破贼取重赏而贼势方锐故迁延至此亦以固关也我有罪若辈可言不尔当呼枉军中咸呼曰枉其声殷地仙芝视常清尸曰公我所引拔又代吾为节度今与公同死岂命欤遂就死

△封常清

封常清蒲州猗氏人外祖教之读书多所该究然孤负年过三十未有名夫蒙灵警为四镇节度使以高仙芝为都知兵马使尝出军奏僉从三十余人衣襟鲜明常清慨然投牒请豫常清素瘠又跛仙芝陋其貌不纳明日复至仙芝谢曰僉已足何庸复来常清怒曰我慕公义愿事鞭鞫故无媒自前公何见拒深乎以貌取士恐失之子羽仙芝犹未纳乃曰候门下仙芝不得已窜名僉中会达奚诸部叛自黑山西趣碎叶有诏邀击灵警使仙芝以三千骑追蹶达奚行远人马疲禽馘畧尽常清于幕下潜作捷布具记井泉次舍克贼形势谋畧条最明审仙芝取读之皆意所欲出乃大骇即用之军还灵警迎劳仙芝已去奴袜带刀而判官刘眺独孤峻

争问向捷布谁作者公幕下安得此人答曰吾廉封常清也眺等惊进揖常清坐与语异之遂知名以功授迭州戍主仍为判官仙芝破小勃律代灵警为安西节度使常清以从战有劳擢庆王府录事参军事为节度判官仙芝征讨常知留务常清才而果胸无疑事仙芝委家事于郎将郑德詮其乳母子也威动军中常清尝自外还诸将前谒德詮见常清始贵易之走马突常清驹士去常清命左右引德詮至庭中门辄闭因离席曰吾起细微中丞公过听以主留事郎将安得无礼因叱曰须暂假郎将死以肃吾军因杖死以面仆地曳出之仙芝妻及乳母哭门外救请不能得遽以状白仙芝仙芝惊及见常清惮其公不敢让常清亦不谢会大将有罪又杀二人军中莫不股栗仙芝节度河西复请为判官久之擢安西副大都护安西四镇节度副大使知节度事未几改北庭都护持节伊西节度使常清性勤俭耐劳苦出军乘骡私厩裁二马赏罚分明天宝末入朝而安禄山反帝引见问何策以讨贼常清见帝忧因大言曰天下太平久人不知战然事有逆顺势有奇变臣请驰至东京悉府库募骁勇挑马槌渡河计日取逆贼首以献阙下天下壮之明日以常清为范阳节度副大使乘驿赴东京常清募兵得六万人然皆市井庸保乃部分旗帜断河阳桥以守贼移书平原令太守颜真卿以兵七千防河真卿驰使司兵参军事李平入奏常清取平表发视即倚帐作书遗真卿劝坚守日传购禄山檄数十函与之真卿得以分晓诸郡禄山渡河陷荥阳入罍子谷先驱至葵园【按通鉴云封常清所募兵皆白徒未便训练屯武牢以拒贼贼以铁骑蹂之官军大败常清收余众战于葵园又败新旧书不载武牢败事盖史脱也】常清使骁骑拒之杀拓羯数十人俄贼大军至常清不能御退入上东门战不利贼鼓而进劫官吏再战于都亭驿又不胜引兵守宣仁门复败乃自提象门出伐大木塞道以殿至谷水西奔陕语仙芝曰贼锐甚难与争锋潼关无兵一夫奔突则京师危不如急守潼关仙芝从之败书闻帝削常清官使白衣隶仙芝军效力仙芝使衣黑衣监左右部军及边令诚以诏书至示之常清曰吾所以不死者恐污国家节度戮贼手今死乃甘心始常清败径入关欲见上陈讨贼事至渭南有诏赴潼关常清忧惧为表以谢且言自东京陷三遣使表论成败不得对又言臣死后望陛下无轻此贼则社稷安至是临刑以表授令诚而死人多哀之

钦定续通志卷二百三十七

●钦定续通志卷二百三十八 列传三十八
列传

唐 【三十八】

○唐三十八

李光弼【荔非元礼 郝廷玉 李国臣 白孝德张伯仪 白元光 陈利贞
侯仲庄 柏良器乌承玘】 郭子仪【曜
晞 承嘏 暖 钊縱 钰 曙 幼明】

李光弼

郭子仪

△李光弼

李光弼营州柳城人父楷洛本契丹酋长武后时入朝累官左羽林大将军封蓟郡公吐蕃寇河源楷洛率精兵击走之师还卒于道赠营州都督谥曰忠烈光弼严毅沈果有大略起家左卫亲府左郎将累迁左清道率兼安北都护补河西王忠嗣府兵马使充赤水军使忠嗣遇之厚虽宿将莫能比尝曰它日得我兵者光弼也俄袭父封以破吐蕃吐谷浑功进云麾将军朔方节度使安思顺表为副知留后事爱其材欲以子妻之光弼引疾去陇右节度使哥舒翰异其操表还长安安禄山反郭子仪荐其能诏摄御史大夫持节河东节度副大使知节度事兼云中太守寻加魏郡太守河北采访使光弼以朔方兵五千出土门东救常山次真定常山团结子弟执贼将安思义降自颜杲卿死郡为战区露鬣蔽野光弼酌而哭之出为贼幽闭者厚恤其家时贼将史思明李立节蔡希德攻饶阳光弼得思义不杀问其计答曰今军行疲劳逢敌不可支不如按军入守料胜而出敌兵焱锐弗能持重苟不获利气沮心离于时乃可图矣光弼曰善据城待明日思明兵二万傅堞光弼兵不得出乃以劲弩五百射之贼退徙阵稍北光弼出其南夹滹沱而军思明恃近救解鞍休士是日饶阳贼五千至九门光弼谍知之提轻兵敛旗鼓伺贼方饭袭杀之且尽思明惧引去以奇兵断饷道马食荐藉相守四十余日会郭子仪收云中诏悉众出井陘与光弼合击贼九门西思明大败挺身走赵郡立节中流矢死【通鉴中郎将浑瑊射李立节杀之】希德走巨鹿收橐城等十县遂攻赵诏加光弼范阳大都督府长史范阳节度使思明繇赵郡入博陵杀官吏景城河闲信都清河平原博平六郡之民结营以拒贼至是皆附光弼光弼急攻赵一日拔之士多卤掠光弼坐譙门收所获悉归之民大悦进围博陵未下与子仪合击思明于嘉山大破之光弼以范阳本贼巢窟当先取之握贼根本会潼关失守乃拔军入井陘肃宗即位诏以兵赴灵武更授户部尚书同中书门下平章事节度如故光弼以景城河闲兵五千入太原前此节度使王承业政弛

谬侍御史崔众主兵太原每侮狎承业光弼素不平及是诏众以兵付光弼众见光弼长揖不即付兵光弼怒收系之会使者至拜众御史中丞光弼曰众有罪已前系今但斩侍御史若使者宣诏即斩中丞使者内诏不敢出乃斩众以徇威震三军至德二载思明希德率高秀岩牛廷玠将兵十万攻光弼时锐兵悉赴朔方而麾下卒不满万众议培城以守光弼曰城环四十里贼至治之徒疲吾人乃彻民屋为礮石车军二百人挽之石所及辄数十人死贼伤十二思明为飞楼筑土山临城光弼遣穴地颓之思明宴城下使倡优侮詈光弼遣人隧地禽取之思明大骇徙牙帐远去军中皆视地而行又潜沟营地将沈其军乃阳约降至期以甲士守陴遣裨校出若送款者思明大悦俄而贼数千没于堑城上鼓噪突骑出乘之俘斩万计思明畏败乃去留希德攻太原光弼出敢死士博贼斩首七万级希德委资粮遁走初贼至光弼设公幄城隅以止息经府门不顾围解阅三夕乃归私寝收清夷横野等军贼别将攻好畤破大横关光弼追败之加检校司徒寻迁司空封郑国公食实户八百千元元年入朝诏朝官四品以上郊谒进兼侍中与九节度围安庆绪于相州大战邺西败之光弼与诸将议思明勒兵魏州欲以怠我不如起军逼之彼惩嘉山之败不敢轻出得旷日持久则庆绪可禽观军容使鱼朝恩固谓不可既而思明来援光弼拒贼战尤力杀略大当会诸将惊溃各引归所在剽掠独光弼整众还太原帝贷诸将罪以光弼兼幽州大都督长史知诸道节度行营事又代子仪为朔方节度使未几为天下兵马副元帅光弼以河东骑五百驰东都夜入其军且谓贼方窥洛当扼虎牢帅师东出河上檄召兵马使张用济用济惮光弼严教诸将逗留其兵用济单骑入谒光弼斩之以辛京杲代【按通鉴云张用济屯河阳光弼檄召之用济曰朔方非叛军也乘夜而入何见疑之甚耶与诸将谋以精锐突入东京逐光弼请子仪命其士皆被甲上马衔枚以待仆固怀恩康元宝止之所载较新旧书本传为详】复追都将仆固怀恩怀恩惧先期至会滑汴节度使许叔冀战不利降贼思明乘胜西向光弼敦阵徐行趋东京谓留守韦陟曰贼新胜难与争锋欲诘之以计然洛无见粮危偪难守公计安出陟曰益陕兵公保潼关可以持久光弼曰两军相敌尺寸地必争今委五百里而守关贼得地势益张不如移军河阳北阻泽潞胜则出败则守表里相应贼不得西此援臂势也夫辨朝廷之礼我不如公论军旅胜负公不如我陟不能答判官韦损曰东都乃帝宅公当守之光弼曰守之则泛水崕岭龙门皆当置兵子能尽守乎遂檄河南纵官吏避贼闭无留人督军取战守备思明至偃师光弼悉军趋河

阳身以五百骑殿贼游骑至石桥诸将曰并城而北乎当石桥进乎光弼曰当石桥进夜甲士秉炬徐行部曲坚重贼不敢逼已入三城众二万军纔十日粮光弼按阅守备部分士卒无不严办思明入洛阳空无所得惮光弼倚其后未敢犯宫阙顿白马祠治堑沟筑月城以守贼攻光弼与战中潭西破逆党斩千级溺死者甚众生执五千人初光弼谓李抱玉曰将军能为我守南城二日乎抱玉曰过期何若曰弃之抱玉许诺即给贼曰吾粮尽明日当降贼喜敛兵待期抱玉已缮完即请战贼忿欺急攻之抱玉出奇兵夹击俘获过当贼帅周摎引却光弼自将治中潭树壁掘堑摎舍南城攻中潭光弼遣荔非元礼出劲卒于羊马城以拒贼摎大溃收兵复振与安太清合众三万攻北城光弼敛军入登陴望曰彼军虽锐然方阵而器不足虞也日中当破乃出战及期未决召诸将曰彼强而可破者乱也今以乱击乱宜无功因问贼阵何所最坚曰西北隅召郝廷玉曰为我以麾下破之请骑兵五百与之三百复问其次曰东南隅召论惟贞当之请铁骑三百与之二百光弼执大旗曰望我旗麾若缓可观便宜若三麾至地诸军毕入生死以之退者斩既而冯堞望廷玉军不能前趋左右取其首来廷玉曰马中矢非却也乃命易佗马有裨将援矛刺贼洞马腹中数人又有迎贼不战而却者光弼召援矛者赐绢五百匹不战者斩光弼麾旗三诸军争奋贼众奔败斩首万余级俘八千余人马二千军资器械以亿计禽周摎徐璜玉李秦授【按通鉴云周摎以数骑遁去又考异云李秦授上元元年四月乃见禽周摎上元二年三月为史朝义所杀据此则新旧本传称周摎李秦授见禽者皆误】惟太清挺身走思明未知犹攻南城光弼驱所俘示之思明大惧筑垒以拒官军始光弼将战内刀于鞞曰战危事吾位三公不可辱于贼万有一不捷当自刎以谢天子及是西向拜舞三军感动太清袭怀州守之上元元年加太尉中书令进围怀州思明来救光弼再逐北思明见兵河清声渡河绝饷路光弼壁野水渡既夕还军留牙将雍希颢守曰贼将高暉【通鉴作高廷暉】李日越万人敌也贼必使劫我尔留此贼至勿与战若降与偕来左右窃怪语无伦是日思明果召日越曰光弼野次尔以铁骑五百夜取之不然无归日越至垒使人问曰太尉在乎曰去矣兵几何曰千人将为谁曰雍希颢日越谓其下曰我受命云何今顾获希颢归不免死遂请降希颢与俱至光弼厚待之表授特进兼右金吾大将军高暉闻亦降或问公降二将何易也光弼曰思明再败恨不得野战闻我野次彼固易之命将来袭必许以死希颢无名不足以为功日越惧死不降何待高暉材出日越之右降者见遇贰者得不思奋乎

诸军决丹水灌怀州未下光弼令廷玉由地道入得其军号登陴大呼王师乘城禽太清
杨希仲送之京师献俘太庙进食实户一千五百思明
使谍宣言贼将士皆北人讴唵思归朝恩信之屡上贼可灭状诏谕光弼光弼固言贼方
锐未可轻动仆固怀恩冒光弼功阴佐朝恩陈扫除计
使者来督战光弼不得已令李抱玉守河阳出师次北邙光弼使傅山阵怀恩曰我用骑
今迫险非便地请阵诸原光弼曰有险可以胜可以败
阵于原败斯歼矣怀恩不从贼据高原以长戟七百壮士执刀随之委物伪遁怀恩军争
剽获伏兵发官军大溃怀州复陷光弼渡河保闻喜抱
玉以兵寡弃河阳光弼请罪帝以怀恩违令覆军优诏召光弼入朝恳让太尉更拜开府
仪同三司中书令河中尹晋绛等州节度使未几复拜
太尉兼侍中河南副元帅知河南淮南东西山南东荆南五道节度行营事 【实录旧纪
皆云光弼都统河南进南山南东江东五道唐厯会
要为河南淮南东西山南东荆南五道刘展乱纪又有江西浙东浙西凡八道新传盖从
唐厯】 镇泗州帝为赋诗以饯朝义乘邙山之捷进略
申光等十三州光弼舆疾就道监军使以兵少请保扬州光弼曰朝廷以安危寄我贼安
知吾众寡若出不意当自溃遂疾驱入徐州时朝义围
李岑于宋州使田神功击走之初神功平刘展逗留淮南尚衡殷仲卿相攻兗郛闲来瑱
擅襄阳及光弼至屯朝义走神功还河南瑱衡仲卿踵
入朝其为诸将惮服类此宝应元年进封临淮郡王光弼收许州斩贼嬴千级缚伪将二
十二人朝义分兵攻宋州光弼破走之浙东贼袁晁反
台州残剡州县光弼遣麾下破其众于衢州广德元年遂禽晁浙东平诏增实封户二千
与一子三品阶赐铁券名藏太庙图形凌烟阁相州北
邙之败朝恩羞其策缪故深忌光弼而程元振尤疾之二人用事日谋有以中伤者及来
瑱为元振谗死光弼愈恐吐蕃寇京师代宗诏入援光
弼畏祸迁延不敢行及帝幸陕犹倚以为重其母在河中数遣使存问以解嫌疑帝还长
安因拜东都留守察其去就光弼以就江淮粮运引兵
归徐州自是诸将田神功等不复禀商光弼愧恨成疾二年薨年五十七帝遣使吊恤其
母赠太保谥曰武穆诏百官送葬延平门外光弼居父
丧三年不入妻室事继母至孝好读班固汉书其用兵谋定而后战能以少覆众治师训
整天下服其威名军中指顾诸将不敢仰视初与郭子
仪齐名世称李郭而战功推为中兴第一其代子仪朔方也营垒士卒麾帜无所更而光
弼一号令之气色乃益精明云子汇有志操官至泾原
节度使罢军中杂徭出俸钱赎将士质卖子还其家卒赠工部尚书光弼弟光进字太应
初为房管裨将将北军战陈涛斜兵败犇行在肃宗宥

之代宗即位拜检校太子太保封凉国公吐蕃入寇至便桥郭子仪为副元帅光进及郭英义佐之自至德后与李辅国并掌禁兵委以心膂光弼被谮出为渭北邠宁节度使永泰初封武威郡王累迁太子太保卒母李有须数十长五寸许死葬长安南原将相奠祭凡四十四幄时以为荣光弼所部将李怀光仆固怀恩田神功李抱玉董秦哥舒曜韩游瓌浑瑊之辛京杲自有传若荔非元礼郝廷玉李国臣白孝德张伯仪白元光陈利贞侯中庄栢良器皆章章可称列者附次左方

荔非元礼

郝廷玉

李国臣

白孝德

张伯仪

白元光

陈利贞

侯仲庄

栢良器

乌承玘

荔非元礼

荔非元礼起裨将累兼御史中丞光弼守河阳周摎攻北城光弼方壁中潭摎闻并兵从光弼光弼使元礼守羊马城于城东北隅建小旗以望摎军摎恃众直逼城以车千乘载木鹅撞车麾兵填堑八道并进光弼谕元礼曰中丞视贼过兵不顾何也报曰公欲守邪战耶光弼曰战曰方战则贼为我实堑何为禁之光弼曰吾虑不及此公勉之元礼遂出战摎军小却元礼以敌坚未可以驰还军示弱怠其意光弼怒使召元礼欲按军法答曰方战不及往请破贼以见因休栅中良久顾麾下曰向公来召殆欲斩我鬪死有名无庸受戮乃下马持刀瞋目直前锐士堵而进左右奋击一当数人斩贼数百首摎遁去以功累迁骠骑大将军怀州刺史知镇西北庭行营节度使上元二年光弼进收洛阳军败元礼徙军翼城为麾下所害

郝廷玉

郝廷玉骁勇善格鬪为光弼爱将及保河阳禽徐璜玉功为多累封安边郡王授神策将军吐蕃犯京畿与马璘屯中渭桥它曰鱼朝恩闻其善布阵请观之廷玉申号令鸣鼓角部伍坐作进退若一朝恩叹服廷玉恻然曰此临淮王遗法也王善御军赏当功罚适过每校旗不如令

者辄斩由是人皆自效自临淮歿无复校旗事此安足赏哉累为秦州刺史卒赠工部尚书

李国臣

李国臣河西人本姓安力能抉关以折冲从收鱼海五城迁中郎将后为朔方将积劳擢云麾大将军赐姓李从光弼守河阳累封临川郡王大历八年为盐州刺史吐蕃败浑瑊于黄菩原将略汧陇国臣曰贼乘胜必扰京师我趋秦原彼当反顾乃引兵登安乐山鸣鼓而西日行三十里吐蕃闻之自百里城回军踰险瑊因击败之卒赠扬州大都督

白孝德

白孝德安西人事光弼为偏裨史思明攻河阳使骁将刘龙仙以骑五十挑战加右足马鬣上嫚骂光弼光弼登城顾诸将曰孰能取是贼仆固怀恩请行光弼曰是非大将所宜左右以孝德对召问须兵几何对曰愿选五十骑为后继大军鼓噪以张吾气足矣光弼抚其背遣之孝德拥二矛策马绝河半济怀恩贺曰事克矣观其揽辔安闲决可万全龙仙见其独来甚易之稍近将动孝德摇手止之曰侍中使致辞无它与语息马良久瞋目曰贼识我乎我白孝德也龙仙骂之乃跃马前搏城上因大噪五十骑继后进龙仙环堤走孝德追及斩其首而还后累功至北庭行营节度使徙邠宁仆固怀恩引吐蕃兵入寇孝德击败之永泰初吐蕃回纥围泾阳郭子仪说回纥约盟吐蕃退走子仪使浑瑊以兵五千出奉天命孝德应之大战赤沙峯斩获甚众累封昌化郡王历太子少傅建中元年卒赠太保

张伯仪

张伯仪魏州人以战功隶光弼军浙贼袁晁反使伯仪讨平之功第一擢睦州刺史后为江陵节度使朴厚不知书然推诚遇人军中畏肃民亦便之李希烈反诏与贾耽张献甫收安州战不利伯仪中流矢师却失所持节贼追及奋力以御之两刃相向不得下会救至免至汉水拏野人船以达沔州徐收散卒还久之除右龙武统军卒赠扬州大都督既请谥博士李吉甫议以伯仪虽败而其忠可录谥曰恭

白元光

白元光其先突厥人父道生历宁朔州刺史元光初隶本军补节度先锋安禄山反诏徙朔方兵东讨元光领所部结义营长驱从光弼出土门累迁太子詹事封南阳郡王为两都游奕使长安平率兵清宫进击余寇身被数创肃宗躬为傅药转卫尉卿兼朔方先锋史思明攻河阳光弼召主骑军其后历灵武留后定远城使贞元二年卒赠越州都督

陈利贞

陈利贞幽州范阳人初为平卢将安禄山乱从光弼军河南张巡被围睢阳也光弼遣郝廷玉及利贞救之轻骑出入廷玉称为胜己以子妻之及归荐于光弼自行闲累迁检校太子宾客封静戎郡王李希烈叛诏哥舒曜东讨利贞为前锋次郟城贼众大集利贞出奇兵五百横捣其右贼锋拙数月不敢前及希烈攻曜襄城利贞登陴捍守七十日未尝栉沐非议事不下城朱泚反利贞及张廷芝所统士皆幽蓟河陇人故与廷芝合谋应泚而利贞麾下亦从为乱夜半难作利贞拔剑当军门大譟曰欲过门者先杀我众畏其锋乃止廷芝出奔德宗嘉之擢汝州防御使贞元五年卒

侯仲庄

侯仲庄蔚州人为光弼先锋授忠武将军禽安太清有功累加冠军将军仆固怀恩以朔方反仲庄为都将训兵自守人畏其锋怀恩败郭子仪代之引为心腹封上谷郡王为神策京西将德宗幸奉天迁左卫将军为防城使修垒堞昼夜执戈逻巡从幸兴元殿军骆谷授防御招收使帝还都复镇奉天几二十年卒赠洪州都督

柏良器

柏良器字公亮魏州人父造以获嘉令死安禄山难乃学击剑欲报贼父友王奂为光弼从事见之曰尔额文似临淮王面黑子似颜平原殆能立功乃荐之光弼授兵平山越迁左武卫中郎将以部兵隶浙西豫平袁晁方清其后潘狩虎胡参分据小伤蒸里又击破之是时年二十四更战阵六十二李希烈围盩厔水灌之亲令军中明日拔城良器以救兵至择弩手善游者沿汴渠夜入及旦伏弩发贼乘城者皆死录功封平原郡王入为左神策军大将军知军事图形凌烟阁募材勇以代士卒市贩者中尉窦文场恶之坐友人阑入换右领军卫自是军政皆中官专之终左领军卫大将军赠陕州大都督子耆别传

乌承玼

乌承玼字德润张掖人开元中与族兄承恩皆为平卢先锋号辕门二龙契丹可突于杀其王邵固降突厥而奚亦乱其王鲁苏挈族属及邵固妻子自归是岁奚契丹入寇诏承玼击之破于捺禄山二十二年诏信安王祗率幽州长史赵含章进讨承玼请含章曰二敌固剧贼前日战而北非畏我乃诱我也公宜畜锐以折其谋含章不信战白城果大败承玼独按队出其右斩首万计可突于奔北奚渤海太武艺与弟门艺战国中门艺来诏与太仆卿金思兰发范阳新罗兵十万讨之无功武艺遣客刺门艺于

东都引兵至马都山屠城邑承玼室要路堑以大石亘
四百里贼不得入于是流民得还士少休脱铠而耕岁省度支运钱安庆绪使史思明守
范阳思明恃兵强为自固计庆绪密遣阿史那承庆安
守忠就督事且图之承玼劝思明曰唐家中兴与天下更始庆绪偷肆晷刻公殆与俱亡
有如束身本朝湔洗前污此反掌功耳思明善之斩承
庆等奉表听命始承恩为冀州刺史失守思明护送东都故肃宗使自云中趋幽州开说
思明与承玼谋投衅杀之不克死承玼奔李光弼表为
冠军将军封昌化郡王为石岭军使王思礼为节度使军政倚办焉久之移疾还京师卒
年九十六子重胤别传

△郭子仪

郭子仪华州郑人长七尺二寸以武举异等补左卫长史累迁单于副都护振远军
使天宝八载木刺山始筑横塞军及安北都护府诏即
军为使俄苦地偏不可耕徙筑永清号天德军又以使兼九原太守十四载安禄山反诏
子仪为卫尉卿灵武郡太守充朔方节度使率本军东
讨子仪收静边军斩贼将周万顷击高秀岩河曲败之遂收云中马邑开东陉加御史大
夫贼陷常山河北郡县皆没会李光弼攻贼常山拔之
子仪引军下井陘与光弼合破贼史思明众数万平橐城南攻赵郡禽贼四千纵之斩伪
守郭献璆还常山思明以众数万踵其后及行唐子仪
选骑五百更出挑之三日贼引去乘之又破于沙河遂趋常阳以守禄山益出精兵佐思
明子仪曰彼恃加兵必易我心不固矣与战未决戮一
部将以徇士殊死鬪遂破之斩首二千级俘五百人获马如之于是昼扬兵夜捣垒贼不
得息乃与光弼仆固怀恩浑释之陈回光等击贼嘉山
斩首四万级获人马万计思明跳奔博陵于是河北诸郡往往斩贼守迎王师方北图范
阳会哥舒翰败天子入蜀太子即位灵武诏班师子仪
与光弼率步骑五万赴行在时朝廷草昧众单寡军容阙然及是国威大振拜子仪兵部
尚书同中书门下平章事仍总节度肃宗大阅六军鼓
而南至彭原宰相房管自请讨贼次陈涛斜师败众略尽故帝唯倚朔方军为根本贼将
阿史那从礼以同罗仆骨骑五千诱河曲九府六胡州
部落数万迫行在子仪以回纥首领葛逻支击之执获数万牛羊不可胜计河曲平至德
二载攻贼崔干佑于潼关干佑败退保蒲津会永乐尉
赵复河东司户参军韩旻司士徐景及宗室子锋在城中谋为内应子仪攻蒲复等斩降
者披阖内军干佑走安邑安邑伪纳之兵半八县门发
干佑得脱身走贼安守忠壁永丰仓子仪遣子旰与战斩首万级旰死于阵进收仓于是
关陕始通 【按通鉴云安庆绪遣兵救潼关郭旰等

大败死者万余人李绍光王祚战死仆固怀恩抱马首浮渡渭水退保河东据此则潼关既得复失观盱等之死似通鉴为得之】 诏还凤翔进司空充关内河东副元帅率师趋长安次潏水上贼守忠等军清渠左大战王师不利委仗奔子仪牧溃卒保武功待罪于朝乃授尚书左仆射俄从元帅广平王率蕃汉兵十五万收长安李嗣业为前军元帅为中军子仪副之王思礼为后军阵香积寺之北距泂水临大川弥亘一舍贼李归仁领劲骑挑战官军器嗣业以长刀突出斩贼数十骑乃定回纥以奇兵繚贼背夹攻之斩首六万级生禽二万贼帅张通儒夜亡陕郡翼日王人京师老幼夹道呼曰不图今日复见官军王休士三日遂东安庆绪闻王师至遣严庄悉众十万屯陕助通儒旗帜钲鼓径百余里师至新店贼已阵出轻骑子仪遣二队逐之又至倍以往皆不及贼营辄反最后贼以二百骑掩军未战走子仪悉军追横贯其营贼张两翼包之官军郗嗣业率回纥从后击飞矢射贼贼惊曰回纥至矣遂大败僵尸相属于道严庄等走洛阳挟庆绪渡河保相州遂收东都于是河东河西河南州县悉平以功加司徒封代国公食邑千户入朝帝遣具军容迎灞上劳之曰国家再造卿力也子仪顿首陈谢有诏还东都经略北讨干元元年破贼河上执安守忠以献遂朝京师诏百官迎于长乐驿帝御望春楼待之进中书令帝即诏大举九节度师讨庆绪以子仪光弼皆元功难相临摄第用鱼朝恩为观军容宣慰使而不立帅子仪自杏园济河围卫州庆绪分其众为三军将战子仪选善射三千士伏壁内诫曰须吾却贼必乘垒若等噪而射既战伪遁贼薄营伏发注射如雨贼震骇王师整而奋斩首四万级获铠胄数十万执安庆和收卫州又战愁思冈破之连营进围相州引漳水灌城漫二时不能破城中粮尽人相食庆绪求救于史思明思明自魏来李光弼王思礼许叔冀鲁炅前军遇之战邺南杀伤相半炅中流矢子仪督后军未及战会大风拔木遂晦跬步不能相物色于是王师南溃贼亦走辘轳满野诸节度引还子仪以朔方军保河阳断航桥时王师众而无统进退相顾望责功不专是以及于败有诏留守东都俄改东畿山南东道河南诸道行营元帅鱼朝恩素疾其功因是媒谮之故帝诏子仪还更以赵王为天下兵马元帅李光弼副之代子仪领朔方兵士卒涕泣遮中使请留子仪给之曰我钱中使耳未行也因跃马而去 【谨按通鉴 御批李郭虽并为中兴名将输忠王室然朔方受代之际使子仪光弼易地而居恐光弼不能如子仪之略无芥蒂矣二人优劣当以此定之】 思明再陷河洛西戎逼扰京辅天子盱食乃授邠

孽寇首鼠乃置散地非所宜帝亦悟上元初诏为诸道兵马都统以管崇嗣副之率英武威远兵及河西河东镇兵繇邠窳朔方大同横野军以趋范阳诏下为朝恩沮解明年光弼败邙山失河阳又明年河中乱杀李国贞太原戕邓景山朝廷忧二军与贼合而少年新将望轻不可用遂以子仪为朔方河中北廷潞仪泽沁等州节度行营兼兴平定国副元帅进封汾阳郡王屯绛州时帝已不豫羣臣莫有见者子仪请曰老臣受命将死于外不见陛下目不瞑帝引至卧内谓曰河东事一以委卿子仪呜咽流涕至屯诛首恶王元振等数十人诸镇惕息代宗立程元振忌宿将难制离构百计因罢子仪副元帅加实户七百为肃宗山陵使子仪惧谗且盛尽哀肃宗所赐诏敕千余篇上之因自明帝优诏答之初帝与子仪平两京同天下忧患至是悔悟眷礼弥重时史朝义尚盗洛帝欲使副雍王率师东讨为朝恩元振交訾之乃止会梁崇义据襄州叛仆固怀恩屯汾州阴召回纥吐蕃深入犯奉天武功遽拜子仪关内副元帅镇咸阳初子仪自相州罢归京师部曲离散逮承诏麾下才数十骑驱民马补行队至咸阳贼已过渭水并南山而东天子幸陕子仪闻流涕董行营还京师遇射生将王献忠以彀骑叛劫诸王欲奔贼子仪让之取诸王送行在乃率骑南收兵得武关防兵及溃卒数千军寝完会六军将张知节迎子仪洛南大阅兵屯商州威震关中乃遣知节率乌崇福羽林将长孙全绪为前锋营韩公堆昼则击鼓张旗帜夜则丛万炬以疑贼初光禄卿殷仲卿募兵蓝田以劲骑先官军为游奕直渡浆民给敌曰郭令公来贼惧会故将军王甫结侠少夜鼓朱雀街呼曰王使至吐蕃夜溃于是遣大将李忠义屯苑中渭北节度使王仲升守朝堂子仪以中军继之射生将王抚自署京兆尹乱京城子仪斩以徇破贼书闻帝以子仪为京城留守自变生仓卒赖子仪复安故天下皆咎程元振羣臣数论奏元振惧乃说帝都洛阳帝可其计子仪奏曰雍州古称天府用武之国秦汉所以成帝业也先帝兴朔方诛庆绪陛下席西土戮朝义虽天道助顺亦地势则然比吐蕃冯陵而不能抗者盖由六军皆市井窳虚名逃实赋一日驱以就战有百奔无一前又宦竖掩迷庶政荒夺遂令陛下彷徨暴露越在陕服斯委任失人岂秦地非良哉洛阳自大盗以来焚埃略尽百曹榛荒寰服不满千户井邑如墟东薄郑汴南界徐北绵怀卫及相千里萧条亨舍不烟何以奉万乘牲饩供百官次舍哉且地狭阨裁数百里险不足防适为鬪场惟时迈亟还见宗庙谒园陵再造王家以幸天下帝得奏曰子仪固社稷臣也朕西决矣乘舆还子仪顿首请罪帝劳曰用卿晚故至此乃赐铁券图形凌烟阁仆固怀恩纵兵掠并汾

属县帝患之以子仪兼河东副元帅河中节度使镇河中怀恩子瑒屯榆次为帐下张惟岳所杀传首京师持其众归子仪怀恩惧委其母走灵州广德二年进太尉兼领北道邠宁泾原河西通和吐蕃及朔方招抚观察使辞太尉不拜怀恩诱吐蕃回纥党项数十万入寇朝廷大恐诏子仪屯奉天帝问计所出对曰无能为也怀恩本臣偏将虽慄果然素失士心今能为乱者誅思归之人劫与俱来且皆臣故部曲素以恩信结之彼忍以刃相向乎帝曰善贼寇邠州先驱至奉天诸将请击之子仪曰客深入利速战彼下素德我吾缓之当自携贰因下令敢言战者斩坚壁待之贼果遁子仪至自泾阳恩赉崇缛进拜尚书令恳辞不听诏趣诣省视事子仪固让且言太宗尝践此官故累圣旷不置员皇太子为雍王定关东乃得授讷可猥私老臣且用兵以来僭赏者多至身兼数官冒进亡耻今凶丑略平乃作法审官之时宜从老臣始帝不获已许之具所以让付史官因赐美人六人从者自副车服帷帘咸具永泰元年诏都统河南道节度行营复镇河中怀恩尽说吐蕃回纥党项羌浑奴刺等三十万掠泾邠躡凤翔入醴泉奉天京师大震于是帝命李忠臣屯渭桥李光进屯云阳马璘郝廷玉屯便桥骆奉先李曰越屯整屋李抱玉屯凤翔周志光屯同州杜冕屯坊州天子自将屯苑中急召子仪屯泾阳军纔万人比到贼围已合乃使李国臣高升魏楚玉陈回光朱元琮各当一面身自率铠骑二千出入阵中回纥怪问是谓谁报曰郭令公惊曰令公存乎怀恩言天可汗弃天下令公即世中国无主故我从以来公今存天可汗存乎报曰天子万寿回纥悟曰彼欺我乎子仪使谕贼曰昔回纥涉万里戡大憝助复二京我与若等休戚同之今乃弃旧好助叛臣一何愚彼背主弃亲于回纥何有回纥曰本谓公亡不然何以至此今诚存我得见乎子仪将出左右谏曰贼不可信子仪曰今众寡不敌难以力胜吾将示以至诚左右请以骑五百从又不听即传呼曰令公来贼皆持满待子仪以数骑出免胄释甲投鎗而进诸酋长大惊相顾曰是也皆下马罗拜子仪即召与饮遗锦彩结欢誓好如初因说之曰吐蕃不顾舅甥之亲吞噬我边鄙焚荡我畿甸所掠之财不可胜计马牛被数百里是谓天赐不可失且逐戎得利与我继好不两善乎会怀恩暴死羣贼无所统一遂许诺吐蕃疑之夜引去子仪遣将白元光合回纥众追蹙大军继之破吐蕃十万于灵台西原斩级五万俘万人尽得所掠士女牛羊马橐驼不胜计遂自泾阳来朝加实封二百户还河中大历元年华州节度使周智光谋叛帝闲道以蜡书赐子仪令悉军讨之同华将吏闻军起杀智光传首阙下二年吐蕃寇泾州诏移屯泾阳邀战于灵州败之

斩首二万级明年还河中吐蕃复寇灵武诏率师五万屯奉天白元光破贼于灵武议者以吐蕃数为盗马璘孤军在邠不能支乃以子仪兼邠
宁庆节度使屯邠州徙璘为泾原节度使回纥赤心请市马万匹有司以财乏止市千匹子仪曰回纥有大功宜答其意中原须马臣请内一岁
奉佐马直诏不听人许其忠九年入朝对延英帝与语吐蕃方强慷慨至流涕退上书曰朔方国北门西御犬戎北虞豸豸五城相去三千里开
元天宝中战士十万马三万匹仅支一隅自先帝受命灵武战士从陛下征讨无宁岁顷以怀恩乱痍伤雕耗亡三分之二比天宝中止十之一
今吐蕃兼吞河陇杂羌浑之众岁深入畿郊势踰十倍与之角胜岂易得邪属者贼来称四节度将别万人人兼数马臣所统士不当贼四之一
马不当贼百之二外畏内惧将何以安臣惟陛下制胜力非不足但简练不至进退未一时淹师老地广势分愿于诸道料精卒满五万者列屯
北边则制胜可必窃惟河南河北江淮大镇数万小者数千殫屈禀给未始搜择臣请追赴阙中勒步队示金鼓则攻必破守必全长久之策也
又自陈衰老乞骸骨不许德宗嗣位诏还朝摄冢宰充山陵使赐号尚父进位太尉中书令增实封通前二千户给粮千五百人刍马二百匹尽
罢所领使及帅建中二年疾病帝遣舒王到第传诏省问子仪不能兴叩头谢恩薨年八十五帝悼痛废朝五日诏羣臣往吊随丧所须皆取于
官赠太师陪葬建陵及葬帝御安福门哭过其丧百官陪位流涕赐谥忠武配飨代宗庙着令一品坟崇丈八尺诏特增丈以表元功子仪事上
诚御下恕赏罚必信遭幸臣程元振鱼朝恩短毁方时多虞握兵处外然诏至即日就道无纤介顾望故谗闲不行破吐蕃灵州而朝恩使人发
其父墓盗未得子仪自泾阳来朝中外惧有变及入见帝唁之即号泣曰臣久主兵不能禁约军士残人之墓固亦多矣此天谴非人患也朝恩
又尝约子仪修具元载使人告以军容将不利公其下衷甲愿从子仪不听但以家僮十数往朝恩曰何车骑之寡告以所闻朝恩泣曰非公长
者得无致疑乎田承嗣傲很不轨子仪尝遣使至魏承嗣西望拜指其膝谓使者曰兹膝不屈于人久矣今为公拜李灵耀据汴州公私财赋一
皆遏绝子仪封币道其境莫敢留令持兵卫送麾下宿将数十皆王侯贵重子仪颐指进退若部曲然幕府六十余人后皆为将相显官其取士
得才类如此与李光弼齐名而宽厚得人过之子仪岁入官俸无虑二十四万缗前后赐良田美器名园甲馆不胜纪代宗不名呼为大臣以身
为天下安危者二十年校中书令考二十四八子七壻皆贵显朝廷诸孙数十不能尽识至问安但颔之而已富贵寿考哀荣终始人臣之道无

阙焉子曜旰晷晷晤暖曙映而四子以才显

郭曜

郭晞

郭承嘏

郭暖

郭钊

郭縱

郭铈

郭曙

郭幼明

郭曜

曜性沈静资貌瑰杰累从节度府辟署破贼有功为开阳府果毅都尉至德初推子仪功授卫尉卿累进太子詹事太原郡公子仪专征伐曜留治家事少长无闲言诸弟或饰池馆盛车服曜独以朴简自处子仪罢兵迁太子少保昆弟六人共制拜官子仪薨以遗命簿上四朝所赐名马珍物德宗复赐之乃悉散诸弟居丧以礼疾甚或劝茹葱薤终不属口后卢■〈木巴〉秉政忌勋族子仪壻太仆卿赵纵少府少监李洞清光禄卿王宰皆以次得罪奸人幸其危多论夺田宅奴婢曜大恐独宰相张镒力保护德宗稍闻之诏有司曰尚父有大功于国许宥十世前日其家市田宅奴婢而无赖者以尚父歿妄论夺之自今有司毋得受建中三年卒赠太子太傅谥曰孝

郭晞

晞善骑射从征伐有功复两京战最力出奇兵破贼累进鸿胪卿河中军乱子仪召首恶诛之其支党犹反仄晞选亲兵昼夜警以备非常奸人不得发以功拜殿中监吐蕃回纥入寇加御史中丞领朔方军援邠州与马璘合军击贼破之贼复来阵泾水北子仪遣晞率徒兵五千骑五百袭之晞以兵寡不进须暮贼半济乃击斩首五千级加御史大夫子仪固让乃止居父丧值朱泚乱南走山谷贼舁致之欲污以官佯瘖不答贼露兵胁之不动数以城中事贻书李晟既而奔奉天天子还改太子宾客子钢从朔方杜希全幕府希全檄为丰州刺史晞怜其弱不任事丐罢德宗遣使者召钢钢疑得罪挺身走吐蕃不纳希全执送京师赐死晞坐免寻复太子宾客累封赵国公卒赠兵部尚书孙承嘏

郭承嘏

承嘏字复卿幼秀异通五经元和中及进士第累迁起居舍人居母丧以孝闻太和

六年为谏议大夫言政事得失文宗以郑注为太仆卿承嘏极论其非注颇惧进给事中俄出为华州刺史给事中卢载还诏书且言承嘏数封驳称职宜在禁闼帝曰朕谓久次欲优其稍入耳乃复留给事中时江淮旱用度不支诏宰相分领度支户部承嘏言宰相调阴阳安黎庶若使阅簿书校缙帛非所宜帝顺纳迁刑部侍郎帝常称其儒素无贵骄气不类勋家每进对恩接备厚方大任用会卒家无余货亲友为办丧祭赠吏部尚书

郭暖

暖以太常主簿尚升平公主拜驸马都尉试殿中监封清源县侯宠冠戚里大历末检校左散骑常侍建中时主坐事留禁中朱泚乱逼署暖官辞以居丧被疾既而与公主奔奉天德宗嘉之释主罪进暖金紫光禄大夫赐实封五千户寻迁太常卿贞元三年袭代国公卒年四十八赠尚书左仆射初暖女为广陵郡王妃王即位是为宪宗妃生穆宗穆宗立尊妃为皇太后赠暖太傅四子铸钊鋹铈铸袭封

郭钊

钊代宗朝以外孙为奉礼郎累官至左金吾大将军改检校工部尚书为邠宁节度使入为司农卿宪宗寝疾宦竖或妄议废立者穆宗问计于钊答曰殿下为太子当旦夕视膳何外虑乎时称得元舅体穆宗即位检校户部尚书兼司农卿俄为河阳三城节度使徙河中尹领晋绛慈隰节度使敬宗立召拜兵部尚书又帅剑南东川太和中南蛮寇蜀取成都外郭杜元颖不能御钊兼领西川节度未行蛮众已略梓州州兵寡不可用钊贻书谯蛮首■〈竹差〉颠以侵叛意■〈竹差〉颠曰元颖不自守数侵吾圉我以是报乃与钊修好约无相犯天子嘉之即拜西川节度使以疾请代为太常卿卒赠司徒子仲文仲泰仲词开成二年诏仲文袭太原郡公给事中卢弘宣奏钊妻沈公主女代宗皇帝外孙其子仲词尚饶阳公主仲文冒嫡不应袭使仲文承嫡则沈当黜且仲词亦不得尚主乃诏仲词检校殿中少监驸马都尉袭封而仲文以太皇太后故置不问仲恭厯詹事府丞亦尚金堂公主

郭鋹

鋹字利用尚德阳郡主顺宗立主进封汉阳公主擢鋹检校国子祭酒驸马都尉自景龙后外戚多为检校官不治事宰相荐其才不当以外戚废乃拜右金吾将军封太原郡公恭逊折节不以富贵加人性周畏不立赫赫名有谏于上退必毁橐家人子弟无知者别墅在都南尤胜垵穆宗尝幸之置酒极欢改太子詹事充闲厩宫苑使卒赠尚书左仆射

郭铎

铎性和易累为殿中监尚西河公主縱卒代为太子詹事宫苑闲厩使长庆三年暴卒初西河主降沈氏生一子铎无嗣以沈氏子嗣

郭曙

曙代宗朝累官司农卿德宗幸奉天曙方领家兵猎苑北闻蹕至伏谒道左遂从乘輿入骆谷霖雨涂潦卫兵或异语帝召谓曰朕不德而苦公等宜执朕送朱泚以谢天下诸将皆感泣曰愿死生从陛下时曙与功臣子李升韦清令狐建李彦辅被甲请见言曰南行路险且虞奸变臣等世蒙恩今相誓愿更挟帝马许之帝还曙清擢金吾大将军余并为禁军将军曙终祁国公

郭幼明

子仪母弟幼明性谨愿喜宾客以子仪故终少府监赠太子太傅子昕肃宗末为四镇留后关陇陷不得归朝廷但命官遥领其使建中二年昕始与伊西北廷节度使曹令忠遣使入朝德宗下诏褒奖令忠授北廷大都护四镇节度留后赐氏李更名元忠昕授安西大都护四镇节度使诸将吏超七资叙官云

钦定续通志卷二百三十八

●钦定续通志卷二百三十九 列传三十九

列传

唐 【三十九】

○唐三十九

李嗣业 马璘 李抱玉【抱真】 路嗣恭【应恕】

李嗣业

马璘

李抱玉

路嗣恭

△李嗣业

李嗣业京兆高陵人长七尺膂力绝众开元中从安西都护来曜讨十姓苏禄先登捕贼累功署昭武校尉后应募安西军中初用陌刀而嗣业尤善每战必为先锋所向摧北马灵警为节度出战必与俱高仙芝讨勃律署嗣业及中郎将田珍为左右陌刀将时吐蕃兵十万屯娑勒城据山濒水联木作郭以扼王师仙芝潜军夜济信图河令曰及午破贼不者皆死嗣业提步士升山颓石四面以击贼又树大旗先走险诸将

从之贼不虞军至因大溃投崖谷死者十八鼓而驱至勃律禽其主平之授右威卫将军
从平石国及突骑施以跳荡先锋加特进贼号为神通
大将初仙芝特以计袭取石国其子出犇因构诸蕃与大食连兵攻四镇仙芝率兵二万
深入为大食所败残卒数千事急嗣业谋曰将军深履
贼境后援既绝而大食乘胜诸蕃锐于鬪我与将军俱死尚谁报朝廷者不如守白石岭
以为后计仙芝曰吾方收合余烬明日复战嗣业曰事
去矣不可坐须菹醢即驰守白石岭路既隘步骑鱼贯而前会拔汗那还兵辘轳塞道不
可骋嗣业惧追及手挺麈击人马毙仆者数十百贼骇
走仙芝乃得还表嗣业功进右金吾大将军留为疏勒镇使城一隅阨屡筑辄坏嗣业视
之有白龙见因其处蒞祠以祭城遂不坏汉耿恭故井
久涸祷已泉复出初讨勃律也通道葱岭有大石塞隘以足蹶之抵穹壑人以为至诚所
感云天宝十二载加骠骑大将军入朝赐酒帝前醉起
舞帝宠之赐彩百金皿五十物钱十万曰为解醒具安禄山反肃宗追之诏至即引道与
诸将割臂盟曰所过郡县秋毫不可犯至凤翔上谒帝
喜曰今日卿至贤于数万众事之济否固在卿辈乃召与郭子仪仆固怀恩犄角常为先
锋以巨棓笞鬪贼辄崩溃进四镇伊西北庭行军兵马
使广平王收长安嗣业统前军阵于香积祠北贼首李归仁拥精骑薄战王师注矢逐之
走未及营贼大出掩追骑还蹂王师于是乱不能阵嗣
业谓子仪曰今日不蹈万死取一生则军无类矣即袒持长刀大呼出阵前杀数十人复
整步卒三千以陌刀长柯斧堵进所向无前归仁匿兵
营左觐军势王分回纥锐兵击其伏嗣业出贼背合攻之自日中至昃斩首六万级填涧
壑死几半贼东走遂平长安进收东都嗣业战多乃与
张镐鲁炆来瑱嗣吴王祗李奂略定诸州兼卫尉卿封虢国公实封户二百兼怀州刺史
北庭行营节度使与子仪等围相州诸将无功独嗣业
被坚数奋为诸军冠中流矢卧帐中方愈忽闻金鼓声知与贼战大呼创溃血流数升卒
谥曰忠勇赠武威郡王嗣业忠毅忧国不计居产有宛
马十匹前后赏赐皆上于官以助军云子佐国袭爵历丹王府长史卒推嗣业功赠宋州
刺史

△马璘

马璘岐州扶风人年二十读汉马援传至丈夫当死边野以马革裹尸而归慨然曰
使吾祖勋业坠地乎开元末挟策从安西节度府以奇
劳累迁金吾卫将军至德初王室多难统精甲二千自二庭赴凤翔肃宗奇之委以东讨
初战卫南以百骑破贼五千众从李光弼攻洛阳史朝
义众十万阵北邙山旗铠照日诸将犹豫未敢击璘率部士五百薄贼屯出入三反众披

靡乘之贼遂溃光弼曰吾用兵三十年未见以少击众
雄捷如马将军者 【吴缜纠缪云按李光弼及史思明传邙山之战思明主其军非朝义
也此其误一也又按帝纪上元二年二月戊寅光弼
与思明战败绩而光弼传亦云官军大溃则此安得有贼遂溃之说哉此其误二也新书
抵牾吴氏砭之良是今附着其说】 迁试太常卿明年
吐蕃寇边诏璘移军援河西怀恩之叛璘引还闲关转鬪至凤翔贼围已合节度使孙志
直婴城守璘令士持满外向突入县门不解甲出战背
城阵贼溃率轻骑追之斩数千级漂血丹渠帝引见慰劳擢兼御史大夫永泰初拜四镇
行营节度南道和蕃使俄检校工部尚书北庭行营邠
宁节度使元日有卒犯盗或曰宜赦璘曰赦之则人将伺其曰为盗遂戮之天大旱里巷
为土龙聚巫以祷璘曰旱由政不修即命撤之明日雨
是岁大穰未几徙泾原权知凤翔陇右节度副使四镇北庭如旧复以郑颖二州隶之大
历八年吐蕃内寇浑瑊战宜禄不利璘设伏潘原与瑊
合击破之俘级数万 【通鉴璘出精兵袭贼辎重于潘原杀贼数千人与本传小异】
进检尚书右仆射明年入朝求宰相以检校左仆射知
省事进扶风郡王 【通鉴十年九月吐蕃寇泾州璘破之于百里城事出实录而本传未
载】 十一年卒于军年五十六赠司徒赠司徒谥曰
武璘少学术而武干绝伦遭时屯棘以忠力奋在泾八年缮屯壁为战守具令肃不残人
乐为用贼不敢犯为中兴锐将初泾军乏财帝讽李抱
玉让郑颖璘因得衰积且前后赐赉无算家富不赀治第京师侈甚其寝堂无虑费钱二
十万缗德宗在东宫闻之不喜及即位乃禁第舍不得
踰制诏毁璘中寝及宦人刘忠翼第璘家惧悉籍亭馆入之官其后赐羣臣宴多在璘山
池而子无行财亦寻尽

△李抱玉

李抱玉本安兴贵曾孙世居河西善养马始名重璋闲骑射少从军为人沈毅有谋
尤忠谨李光弼引为裨校天宝末玄宗以其战河西有
功为改今名禄山乱守南阳斩贼使至德二载上言世占凉州耻与逆臣共宗有诏赐之
姓因徙籍京兆举族以李为氏进至右羽林大将军知
军事擢陈郑颖毫节度使史思明已破东都光弼壁河阳拒之使抱玉守南城贼急攻抱
玉纵奇兵出表里俘杀甚众贼乃舍去从光弼战大败
因不能西差功第一封栾城县公代宗立兼泽潞节度使统相卫仪邢十一州兵以功授
司空兼兵部尚书武威郡王恳辞王爵徙凉国公进司
徒广德中吐蕃入寇帝次陕羣盗徧南山五谷闲东距虢西抵岐椎剽不胜计诏太子宾
客薛景仙为南山五溪谷防御使引兵招捕久不克更

诏抱玉讨贼抱玉尽得贼株抵蹊隧分兵守诸谷使牙将李崇客率精骑四百自桃林虢川袭之贼帅高玉脱身走城固山南西道张献诚禽以献悉索支党斩之不阅旬五谷平即诏抱玉权凤翔陇右节度抱玉恳让司徒故以尚书左仆射同中书门下平章事河西陇右副元帅又让仆射故还为兵部尚书大历二年来朝久之加山南西道副元帅兼节度使屯盩厔抱玉兼三节度三副元帅位望隆赫乃上言陇坻达扶文绵地二千里虜孔道不一梁岷重则关辅轻愿择能臣帅西道当一面臣得专事关陇帝多其让许之抱玉在镇十余年禁暴安人为将臣之良卒年七十四赠太保谥曰昭武从父弟抱真

李抱真

李抱真

抱真字大玄沈虑而断抱玉属以军事授汾州别驾仆固怀恩反陷焉挺身归京师代宗以怀恩倚回纥所将朔方兵精忧之召抱真问状答曰郭子仪尝领朔方军人多德之怀恩欺其下曰子仪为朝恩所杀今起而用之是伐其谋兵可不战解也既而怀恩败如抱真策迁殿中少监陈郑泽潞节度留后既谢因言百姓劳逸在牧守愿得一州以自试更授泽州刺史兼泽潞节度副使徙怀州仍为怀泽潞观察留后凡八年抱真策山东有变泽潞兵所走集乘战伐后赋重人困军伍雕刑乃籍户三丁择一蠲其徭租给弓矢令闲月得曹偶习射岁终大校亲按籍第能否赏责比三年皆为精兵举所部得成卒二万遂雄山东天下称昭义步兵为诸军冠久之为泽潞节度行军司马会昭义节度李承昭病诏抱真权磁邢兵马留后德宗嗣位检校工部尚书领昭义节度使建中中田悦反围邢及临洺诏抱真与河东马燧合神策兵救之败悦于双冈斩其将杨朝光又破之临洺围遂解以功检校兵部尚书复与悦战洹水走之进围魏悦战城下大败进检校尚书右仆射会朱滔王武俊反救悦抱真退保魏帝仓卒狩奉天闻问诸将皆哭各引麾下还屯于时李希烈陷汴李纳反郛李怀光相次反河中抱真独以数州横绝溃叛中离沮其奸为羣盗所惮兴元初检校左仆射同中书门下平章事繇倪国公进义阳郡王朱滔悉幽蓟兵与回纥围贝州以应朱泚而希烈既窃名号则欲臣制诸叛众稍离天子下罪己诏并赦羣盗抱真乃遣客贾林以大义说武俊使合从击滔武俊许诺而内犹豫抱真将自造其壁谕军事于司马卢玄卿曰吾此行系时安危使遂不还部勒以听天子命惟子励兵东向雪吾之耻亦惟子即以数骑驰入见武俊曰泚希烈争窃帝号滔攻贝州此其志皆欲自肆于天下足下既不能与竞长雄舍九叶天子而臣反贼乎

且诏书罪己禹汤之心也方上暴露播越公能自安乎
因持武俊涕下交颐武俊亦感泣左右皆泣退卧帐中甘寝久之武俊感其不疑乃益恭
指心誓天曰此身已许公死矣食讫约为昆弟而别旦
日合战大破滔经城进检校司空实封六百户贞元初朝京师诏还所镇抱真喜士虽小
善皆卑礼厚币数千里邀致之好方士谓不死可致有
孙季长者为治丹且曰服此当僊去抱真惑之因疾请降官七让司空还为左仆射饵丹
二万丸不能食且死医以彘肪谷漆下之疾少闲季长
曰危得僊何自弃也益服三千九卒年六十二其子殿中侍御史緘匿丧与其属卢会昌
元仲经谋会诸将仲经诡抱真令曰吾疾不任事令緘
典军勉佐之副使李说及诸校俯首皆吮曰诺緘盛服出众拜之悉发府库劳军会昌即
为抱真表翌日令诸将署章请以节付緘天子已闻抱
真丧遣使者驰入军诏以事属大将王延贵緘伪若抱真疾者三日乃出见陈兵甚严使
者曰朝廷已知公薨诏以兵属延贵君速归发丧緘愕
然乃遽以印钥上监军始发丧使者趣延贵视事护緘赴东都诏赠抱真太保

△路嗣恭

路嗣恭字懿范京兆三原人始名剑客以世荫为邳尉席豫黜陟河朔表为萧关令
连徙神乌姑臧二县考绩为天下最玄宗以为可嗣汉
鲁恭因赐名转渭南令主杜化东阳二驿时关畿用兵使人系道嗣恭储具有素而民不
扰后为郭子仪朔方节度留后大将孙守亮拥重兵骄
蹇不受制嗣恭因称疾守亮至即杀之一军皆震大历三年【新书作永泰三年按永泰
二年十一月即改元大历不得有永泰三年也今从
旧书】 检校刑部尚书知省事出为江西观察使以善治财赋称有贾明观者素事鱼朝
恩朝恩诛当坐死宰相元载纳其赂遣效力江西将行
居民数万怀瓦石候击载谕市吏禁止乃得去魏少游畏载常回容之及嗣恭代少游即
日杖死大历八年岭南将哥舒晃杀节度使吕崇贲五
岭大扰诏嗣恭兼岭南节度使封冀国公嗣恭募勇敢士八千人以流人孟瑶敬冕为才
擢任之使瑶督大军当其冲冕率轻兵由闲道出不意
遂斩冕及支党万余筑尸为京观俚洞魁宿为恶者皆族夷之还为检校兵部尚书复知
省事嗣恭起州县吏以课治进至显官及冕事株戮舶
商没其财数百万私有之代宗恶焉故赏不酬功【建中实录云自兵兴以来诸军杀将
帅而要君者多矣皆因授其任以苟安之其王师征
讨不失有罪始斯役也既而有谤其收南海府库阅上不实者不得用久之此与新旧书
本传小异又邳侯家传云嗣恭附元载遗载琉璃盘代
宗恶之故不用】 德宗立阴赂宰相杨炎炎录前功更拜兵部尚书东都留守俄加怀郑

汝陕河阳三城节度东都畿观察使卒年七十一赠左

仆射子应恕

路应

路恕

路应

应字从众以荫为著作郎贞元初出为虔州刺史诏嗣父封凿赣石梗嶮以通舟道德宗时李泌为相号得君帝尝曰谁于卿有恩者朕能报之泌乃言曩为元载所疾谪江西路嗣恭与载厚臣尝畏之会与其子应并驱马啮其胫臣惶恐不自安应闕不言勉起见父臣常愧其长者思有以报帝曰善即日加应检校屯田郎中服金紫累迁宣歙池观察使封襄阳郡王李锜反发乡兵救湖常二州以故锜不能拔元和六年以疾授左散骑常侍卒谥曰靖

路恕

恕字体仁从嗣恭讨哥舒晃授检校工部员外郎得从便宜擢降将伊慎用之贼平恕功多嗣恭节度河阳也恕为怀州刺史年纔三十杨炎用扞魏博为时嗤诋累迁鄜坊宣歙观察使坐事贬吉州刺史以右散骑常侍致仕卒赠洪州都督

钦定续通志卷二百三十九

●钦定续通志卷二百四十 列传四十

列传

唐【四十】

○唐四十

房管

崔圆

苗晋卿

裴冕

裴遵庆【向枢】

吕諲

房管

崔圆

苗晋卿

裴冕

裴遵庆

吕諲

△房管

房管字次律河南河南人父融武后时以正谏大夫同凤阁鸾台平章事神龙元年贬死高州管少好学风度沈整以荫补弘文生与吕向偕隐陆浑山十年开元中作封禅书说宰相张说说奇之奏为校书郎举任县令科授卢

氏令拜监察御史坐讯狱非是贬睦州司户参军复为
县所至上德化兴长利以治最显天宝五载试给事中封漳南县男坐善李适之韦坚斥
为宜春太守历琅邪邳扶风三郡频迁宪部侍郎十五
载帝狩蜀管驰至普安上谒帝喜甚即拜文部尚书同中书门下平章事从至成都赐一
子官俄与韦见素崔涣奉册灵武见肃宗具言上皇所
以传付意因道当时利病箝索敌情辞吐华畅帝为改容管既有重名帝倾意待之机务
一一与管参决诸将相莫敢望于是第五琦以言财利
幸管谏曰往杨国忠聚敛产怨天下陛下即位人未见德今又宠琦是一国忠死一国忠
生无以示远方帝曰六军之命方急无财则散卿恶琦
可也何所取财管不得对北海太守贺兰进明自河南至诏摄御史大夫岭南节度使入
谢帝曰朕语管除正大夫何为摄邪进明衔之因曰晋
任王衍为宰相祖尚浮华不事天下事故至于败方唐中兴当用实才而管性疏阔大言
无当非宰相器且管讷肯为陛下用者帝曰何哉对曰
陛下顷为皇太子太子出曰抚军入曰监国而管为圣皇议遣诸王为都统节度乃谓陛
下为元子而付以朔方河东河北空虚之地永王丰王
乃统四节度此于圣皇似忠于陛下非忠也管意诸子一得天下身不失恩又多树私党
以副戎权推此而言岂肯竭诚于陛下乎帝入其语始
恶管以进明为御史大夫河南节度使会管请自将平贼帝犹倚以成功乃诏管持节招
讨西京防御蒲潼两关兵马节度等使得自择参佐乃
以兵部尚书王思礼御史中丞邓景山为副户部侍郎李揖为行军司马中丞宋若思起
居郎知制诰贾至右司郎中魏少游为判官给事中刘
秩为参谋管分三军趋京师杨希文将南军自宜寿入刘慙 【通鉴作刘贵哲】 将中
军自武功入李光进将北军自奉天入十月庚子次便
桥辛丑中军北军遇贼陈涛斜战不利管欲持重有所伺中人邢延恩促战故败癸卯率
南军复战遂大败希文慙皆降贼初管用春秋时战法
以车二千乘缭营骑步夹之既战贼乘风鼓噪牛悉髀栗贼投刍而火之人畜大乱官军
死伤者四万残众才数千不能军管还走行在帝大怒
赖李泌营救乃宥之 【谨按通鉴辑览 御批车战或宜于古而实不宜于今房管用
之取败燎原只轮不返自当绳以丧师之律泌何以
复为营救耶】 使衰夷散复图进取管雅自负以天下为己任然用兵本非所长其佐李
揖刘秩等皆儒人未尝更军旅管每诧曰彼曳落河虽
多能当我刘秩乎帝虽恨管丧师而眷任未衰崔圆自蜀来最后见帝管易之圆以金畀
李辅国不淹日被宠遂怨管管数称疾不入琴工董延
兰出入管所管昵之廷兰藉管势数招赇谢为有司劾治管诉于帝帝因震怒叱遣之管

惶恐就第罢为太子少师从帝还都封清河郡公管之
废朝臣多言管谋包文武可复用而管方日引刘秩严武与宴语移病自如帝以管虚言
浮诞内鞅鞅挟党背公非大臣体干元元年出为邠州
刺史逐秩武等因下诏陈其比周状喻敕中外 【谨按通鉴辑览 御批管之得罪皆
其自取徒以与杜甫交藉其臆芴世遂有以管为冤
者可谓阿其所好而失正道矣】 管治邠人便安之政声流闻召拜太子宾客迁礼部尚
书为晋汉二州刺史宝应二年召拜刑部尚书道卒赠
大尉管有远器好谈老子浮屠法喜宾客高谈有余而不切事时天下多故急于谋略攻
取帝以吏事绳下而管为相遽欲从容镇静以辅治之
又知人不明以取败挠故功名隳损云

△崔圆

崔圆字有裕贝州武城人后魏尚书左仆射亮八世孙少孤贫志向卓迈喜学兵家
开元中诏举遗逸以钤谋对策甲科历京兆府参军尹
萧灵荐之迁会昌丞杨国忠遥领剑南节度引圆为左司马知留后玄宗西出次扶风迁
御史中丞剑南节度副大使圆锐功名初闻难刺国忠
意乃治城浚隍列馆宇储什具帝次河池圆疏具陈蜀土腴谷羨储供易办帝省书泣下
曰世乱识忠臣即日拜中书侍郎同中书门下平章事
仍兼剑南节度使天子至朝廷百司殿宇帷幔皆具益嗟赏之肃宗立命与房管韦见素
赴行在所 【按通鉴至德元载七月己亥上皇临轩
命韦见素房管崔涣奉传国宝玉册诣灵武传位二载正月命崔圆奉诰赴彭原据此则
圆赴行在不与管见素同往且管传亦云崔圆自蜀来
最后见帝本传非也】 帝为制遗爱碑于蜀以宠之至德二载迁中书令封赵国公实封
户五百干元元年罢为太子少师留守东都于是上皇
所置宰相无在者玉师之败相州也军所过皆纵剽圆惧委东都奔襄阳诏削阶封寻诏
拜济王传李光弼表为怀州刺史改汾州以治行称徙
淮南节度使在镇六年请朝京师吏民乞留诏检校尚书右仆射还之久乃检校左仆射
入知省事大历中卒年六十四赠太子太师谥曰昭襄

△苗晋卿

苗晋卿字符辅潞州壶关人世以儒素称擢进士第调为修武尉累进吏部郎中中
书舍人知吏部选事久之进侍郎积宽纵吏下因缘作
奸方时承平选常万人李林甫为尚书专国政以铨事委晋卿及宋遥天宝二年 【按唐
会要天宝元年冬选六十四人判入等至来年正月
于勤政楼下帝亲自重试惟二十人比类稍优余并下第史以其事相首尾总叙入二年
】 判入等者凡六十四人分甲乙丙三科以张奭为第

一奭御史中丞倚之子倚新得幸于帝晋卿欲附之奭本无学故议者嚣然不平安禄山因闲言之帝为御花萼楼覆实中裁十一二奭持纸终日笔不下人谓之曳白帝大怒贬倚淮阳太守遥武当太守晋卿安康太守明年徙魏郡即充河北采访使居三年政化大行尝入计谒归壶关望县门辄步吏谏止晋卿以公门当下况父母邦乎郡太守迎犒使所属令行酒酒至必立饮白醪侍老有献降西阶拜而饮时美其恭改河东郡兼河东采访使徙扶风郡封高平县男迁工部尚书东都留守召为宪部兼左丞安禄山反奭廷芝弃陕郡不守杨国忠忌其有望即奏东道贼冲非大臣不可镇遏授陕郡太守陕虢防御使晋卿见帝以老辞忤旨致仕车驾入蜀搢绅多陷贼晋卿闲道走金州肃宗至扶风召赴行在拜左相平京师封韩国公食五百户改侍中既而乞骸骨罢为太子太傅未几复拜侍中玄宗崩肃宗疾甚诏晋卿摄冢宰固让曰大行遗诏皇帝三日听政且稽祖宗故事无冢宰之文帝不听后数日代宗立复诏摄冢宰固辞乃免时年老蹇甚乞闲日入政事堂帝优之听入阁不趋为御小延英召对宰相对小延英自晋卿始吐蕃犯京师晋卿以病卧家贼輿致胁之噤不肯语贼不敢害帝还拜太保罢政事永泰初薨年八十一赠太师京兆少尹护丧谥曰懿献元载未显时为晋卿所遇载方相故讽有司改谥文贞晋卿宽厚所至以惠化称魏人为营生祠立石颂美再秉政出入七年小心谨畏不甚斥是非得失故能安保宠名然练达事体百官簿最一省无遗议者比汉胡广肃宗欲以李辅国为常侍奏曰常侍近密非贤不可居岂宜任等辈罢之朝廷欲论陈希烈等死晋卿曰陛下得张通儒安守忠孙孝哲等何以加罪帝不从俄而史思明乱持是以诱众大历七年配享肃宗庙庭

△裴冕

裴冕字章甫河中河东人本冠族仕家以荫再调渭南尉王鉞为京畿采访使表署判官历殿中侍御史冕少学术然明锐果于事号称职鉞雅任之及鉞得罪有诏廷辨冕位甚下而抗言其诬鉞死李林甫方用事僚属惧皆引去独冕为敛葬由是寔知名河西节度使哥舒翰辟行军司马玄宗入蜀诏皇太子为天下兵马元帅拜冕御史中丞兼左庶子副之初冕在河西方召还而道遇太子平凉遂从至灵武与杜鸿渐崔漪同辞进曰主上南狩宗社神器要须有归今天意人事属在殿下宜正位号有如逡巡失亿兆心则大事去矣太子曰我平寇逆奉迎乘輿还京师退居储贰以待膳左右岂不乐哉公等何言之过对曰殿下居东宫二十年今多难启圣以安社稷而所从将士皆关辅人日夜思归大众

一骚不可复集不如因而抚之以就大功凡五请卒见听太子即位进冕中书侍郎同中书门下平章事建言贾官度僧道士收费济军兴肃宗至凤翔罢冕政事拜尚书右仆射两京平封冀国公实封五百户出为剑南西川节度使复为右仆射待制集贤院俄充山陆使于是中书舍人刘烜为李辅国所昵冕表为判官烜抵法坐降施州刺史徙澧州大历中郭子仪言于代宗曰冕首佐先帝驰驱灵武有社稷勋程元振忌其贤遂加诬构海内冤之陛下宜还冕于朝复俾辅相必能致治成化时元载秉政冕早所甄引载德之又贪其衰瘵遂拜左仆射同中书门下平章事入见拜不能兴载自扶之代为赞谢俄兼江南江淮副元帅东都留守不踰月卒有诏赠太尉冕以忠勤自将然不知宰相大体性豪侈枵马直数百金者常十数每广会宾客不能名其馔领使既众吏白俸簿月二千缗冕顾视喜见颜闲世訾其嗜利云始肃宗庙惟苗晋卿配享冕卒后二十余年有苏正元者奏言肃宗为元帅时师纔一旅冕于草创中甄大义以劝进招募骁勇几十余万既逾月房管来又一年而晋卿至今晋卿从祀而冕乃不与有诏冕配享肃宗庙

△裴遵庆

裴遵庆字少良绛州闻喜人幼强学该综图传外晦内明不干当世以仕家推荫为兴宁陵丞调大理丞边将萧克济督役苛暴役者有丑言有司以大逆论遵庆曰财不足聚人力不足加众焉能反由是全救数十族频擢吏部员外郎判南曹天宝时选者岁万计遵庆性强敏视簿牒详而不苛世称吏事第一肃宗时为吏部侍郎萧华辅政屡荐之拜黄门侍郎同中书门下平章事代宗初仆固怀恩反帝以遵庆忠厚大臣故奉诏宣慰怀恩听命将入朝既而为将范志诚沮止时帝在陕遵庆脱身赴行在帝还迁太子少傅罢为集贤院待制改吏部尚书以尚书右仆射复知选事朝廷优其老听就第注官时以为荣性惇正老而弥谨每荐贤有来谢者以为耻谏而见从即内益畏虽亲近但记其削橐疏数而莫知所言大历十年薨年九十余初为郎时着王政记述今古治体识者知其有公辅器云子向

裴向

裴枢

裴向

向字僊仁建中初李纾为同州刺史奏署判官李怀光叛河中使其将赵贵先筑垒于同州纾奔奉天而向领州务贵先胁吏督役不及期将斩以徇民皆骇散向独诣贵先垒开谕之贵先乃降同州不陷向力也累为栎阳渭南

令奏课皆第一擢户部员外郎德宗末方镇之副多自
选于朝以待有变次授之故向以选为太原少尹行军司马历陕虢观察使以吏部尚书
致仕向能以学行持门户内外亲属百余口禄俸必均
世称其孝睦卒年八十赠太子少保子寅官累御史大夫寅子枢

裴枢

枢字纪圣咸通中第进士杜审权镇河中奏署幕府再迁蓝田尉宰相王铎知之遂
直弘文馆从僖宗入蜀擢殿中侍御史中和初铎为都
统表署郑滑掌书记龙纪初进给事中改京兆尹与孔纬厚善纬以罪贬故枢改右庶子
出为歙州刺史迁右散骑常侍为汴州宣谕使枢素与
朱全忠相结纳故全忠听命修贡献不绝昭宗悦迁兵部侍郎俄以兵部侍郎同中书门
下平章事帝在凤翔罢为工部尚书已还宫拜检校尚
书左仆射同平章事出为清海节度使全忠言枢有经世才不宜弃外复拜门下侍郎平
章事监修国史累进右仆射诸道盐铁转运使哀帝嗣
位柳璨方用事全忠以牙将张廷范为太常卿枢以为廷范勋臣自宜任方镇何用为卿
恐非王意持不下全忠怒谓宾佐曰吾常器枢不浮薄
今乃尔璨闻即罢枢政事拜左仆射俄贬登州刺史又贬泷州司户参军至滑州全忠遣
人杀之白马驿投尸于河年六十五初全忠佐吏李振
曰此等自谓清流宜投诸浊流全忠笑而许之

△吕諲

吕諲河中河东人少力于学志行整饬开元末第进士调蓝陵尉采访使韦陟署为
支使哥舒翰节度河西表支度判官历太子通事舍人
性静慎勤总吏职诸僚或出游諲独颓然据案钩视簿最翰益亲之累兼殿中侍御史翰
败潼关諲西趋灵武肃宗才之拜御史中丞所陈事无
不顺纳从至凤翔迁武部侍郎干元二年九节度兵败帝忧之擢諲同中书门下平章事
知门下省翌日复以李岷李揆第五琦为宰相而苗晋
卿王玙罢会母丧解三月复召知门下省事兼判度支还执政累讨须昌县伯迁黄门侍
郎上元初加同中书门下三品当赐门戟或劝諲以凶
服受吉赐不宜諲释纓拜赐人讥其失礼諲引妻之父楚宾为卫尉少卿楚宾子震为郎
官中人马尚言者素昵于諲为人求官諲奏为蓝田尉
事觉帝怒命敬羽穷治杀尚言以其肉赐从官罢諲为太子宾客数月拜荆州长史澧朗
峡忠等五州节度使諲始建请荆州置南郡诏可于是
更号江陵府以諲为尹置永平军万人遏吴蜀之冲以湖南之岳潭郴道邵连黔中之涪
凡七州隶其道 【按旧书亦作七州新书方镇表上

元二年荆南节度增领涪衡潭岳郴邵永道连九州岛通鉴载吕諲奏请以江南之潭岳

郴邵永道连黔中之涪皆隶荆南则止有八州考旧书地理志贞观十七年废永州并入道州上元二年复析置永州或者是年增置在前析置在后故新旧书本传皆不及永至旧书有衡无岳新书有岳无衡则未知何者为是】初荆州长史张惟一以衡州蛮酋陈希昂为司马督家兵千人自防惟一亲将牟遂金与相忤希昂率兵至惟一所捕之惟一惧斩其首以谢悉以遂金兵属之乃退自是政一出希昂后入朝迁常州刺史过江陵入谒譚伏甲击杀之诛党偶数十人积尸府门内外震服妖人申泰芝用左道事李辅国擢谏议大夫置军邵道二州闲以泰芝总之纳羣蛮金赏以绯紫出褚中诏书赐衣示之羣蛮怵于赏而财不足更为剽掠吏不敢制潭州刺史庞承鼎疾其奸因泰芝过潭缚付吏劾赃巨万得左道讖记并奏之辅国矫追泰芝还京既召见反譚承鼎陷不辜诏譚按罪譚使判官严郢具狱暴泰芝之恶帝不省赐承鼎死流郢建州后泰芝终以赃徙死譚为治不急细务决大事刚果不挠始在河西悉知诸将能否及为尹奏取材者数十人总牙兵故威惠两行譚之相与李揆不平既斥乃用善治闻揆恐帝复用即妄奏置军湖南非便又阴遣人刺譚过失譚上疏讼其事帝怒逐揆出之显条其罪譚苦羸疾卒年五十一赠吏部尚书譚在朝不称任职及为荆州号令严明赋敛均一其治尚威信故军士用命闔境无盗贼民歌咏之自至德以来处方面数十人譚最有名荆人生构房祠及歿吏哀钱十万徙祠府西始譚知杜鸿渐元载才荐于朝后皆为宰相永泰中严郢以故吏请谥博士独孤及谥曰肃郢以故事宰相谥皆二名请益曰忠肃及执奏谓谥在义美恶不在多名宜如前谥遂不改

钦定续通志卷二百四十

●钦定续通志卷二百四十一 列传四十一

列传

唐【四十一】

○唐四十一

李麟

张镐

李岷

杨綰

崔佑甫【植倭】

柳浑

李泌【繁】

韦处厚

路

隋

李麟

张镐

李岷

杨綰

崔佑甫

柳浑

李泌

韦处厚

路隋

△李麟

李麟裔出懿祖于属最疏父浚历润虢潞三州刺史以诚信号良吏开元中终剑南节度按察使赠户部尚书谥曰诚麟好学善文辞以父荫补京兆府户曹参军举宗室异能转殿中侍御大累擢兵部侍郎与杨国忠同列国忠怙权疾之改权礼部贡举国忠迁麟复本官改国子祭酒出为河东太守有清政安禄山反朝廷以麟儒者非御悔才还为祭酒封渭源县男元宗入蜀麟走见帝再迁宪部尚书同中书门下平章事时宰相韦见素房管崔涣崔圆踵赴肃宗行在独麟以宗室子留总百司上皇还京进同中书门下三品封褒国公张皇后挟李辅国寢挠政苗晋卿崔圆等畏其权皆附离取安独麟守正不阿顺辅国忌恚干元初罢为太子少傅明年卒年六十六赠太子太傅谥曰德

△张镐

张镐字从周博州人仪状瓌伟有大志涉猎经史好王霸大略少事吴兢兢器之游京师未知名常饮酒鼓琴自娱人或邀之杖策往醉即返不及世务天宝末杨国忠执政求天下士为己重闻镐才荐之拜左拾遗历侍御史玄宗西狩镐徒步扈从俄遣诣肃宗所数论事擢谏议大夫寻拜中书侍郎同中书门下平章事时引内浮屠数百居禁中号内道场讽呶外闻镐谏曰帝王当修德以弭乱安人未闻区区佛法可致太平也帝然之寻诏兼河南节度使都统淮南诸军事贼围宋州张巡告急镐倍道进檄濠州刺史闾邱晓趋救晓逗留不肯进比镐至淮口而巡已陷镐怒杖杀晓帝还京师封南阳郡公诏以本军镇汴州捕平残寇史思明提范阳献顺歛镐揣其伪密奏曰思明势穷而服包藏不测可以计取难以义招不宜以威权假之又言滑州防御使许叔冀狡狴临难必变宜追还宿卫书入不省时宦官络绎出镐境未尝降情结纳自范阳滑州使还者皆盛言思明叔冀忠而毁镐无经略才帝以镐不切事机遂罢宰相授荆州大都督府长史思明叔冀后果叛如镐言召拜太子宾客左散骑常侍坐市嗣岐王珍第贬辰州司户参军代宗初起为抚州刺史迁洪州观察使更封平原郡公袁晁寇东境江界震骚镐遣兵屯上饶斩首二千级又袭舒城贼杨昭梟之沈千载者新安大豪连结椎剽州县不能禽镐遣

别将尽殄其众改江南西道观察使卒镐起布衣二朞

至宰相居身廉不殖货产善待士性简重论议有体在位虽浅而天下之人推为旧德云

△李峴

李峴吴王恪孙也折节下士长吏治天宝时累迁京兆尹玄宗岁幸温汤甸内巧供亿以媚帝峴独无所献帝异之杨国忠使客蹇昂何盈

擿安禄山阴事讽京兆捕其第得安岱李方来等与禄山反状缢杀之禄山怒上书自言帝惧变出峴为零陵太守峴为政得人心时京师米翔

贵百姓乃相与谣曰欲粟贱追李峴寻徙长沙永王为江陵大都督假峴为长史至德初肃宗召之拜扶风太守兼御史大夫明年擢京兆尹封

梁国公干元二年以中书侍郎同中书门下平章事于是吕諲李揆第五琦同辅政而峴位望最旧事多独决諲等不平李辅国用权制诏或不

出中书百司莫敢覆峴顿首帝前极言其恶帝悟稍加检制辅国由是让行军司马然深衔峴凤翔七马坊押官盗掠人天兴令谢夷甫杀之辅

国讽其妻使诉枉诏监察御史孙莹鞫之直夷甫其妻又诉诏御史中丞崔伯阳刑部侍郎李晔大理卿权献为三司讯之无异辞妻不承辅国

助之乃令侍御史毛若虚覆按若虚委罪夷甫言御史用法不端伯阳怒欲质让若虚驰入自归帝帝留若虚帘中顷伯阳等至劾若虚傅中人

失有罪帝怒叱之贬伯阳高要尉权献杜阳尉逐李晔岭南流莹播州峴谓责太重入言于帝曰若虚希旨乱法陛下信为重轻示无御史台帝

怒李揆不敢争乃出峴为蜀州刺史时右散骑常侍韩择本入对帝曰峴欲专权朕今出之尚恨法太宽择本曰峴言直不敢专权陛下宽之祇

益盛德耳代宗立改荆南节度知江淮选补使入为礼部尚书兼宗正卿乘輿在陕由商山走帝所还京拜门下侍郎同中书门下平章事故事

政事堂不接客自元载为相中人传诏者引升堂置榻待之峴至即敕吏撤榻又奏常参官举才任谏官宪官者无限员不踰月为要近潜短遂

失恩罢为太子詹事迁吏部尚书复知江淮选改检校兵部尚书兼衢州刺史卒年五十八初东京平陈希烈等数百人待罪议者将悉抵死帝

意亦欲惩天下故崔器等附致深文峴时为三司 【按吕諲传云以御史中丞崔器宪部侍郎韩择本大理卿严向为三司使又诏御史大夫

李峴及諲领使】 独曰法有首从情有重轻若一切论死非陛下与天下惟新意况河北残孽劫服官吏其人尚多今不开自新之路而尽诛之

是坚叛者心使为贼致死困兽犹鬪况数万人乎器与吕諲皆龊龊文吏操常议不及大体尚腾颊固争数日乃见听衣冠蒙更生贼亦不能归

怨天子峴力也峴兄峘峰峘从上皇峴诒载肃宗以动力相高同时为御史大夫俱判台

事又合制封公而峰为户部侍郎银青光禄大夫同居
长兴里第门列三戟

△杨绾

杨绾字公权华州华阴人祖温玉在武后时为显官世以儒闻绾少孤事母谨甚性
沈靖独处一室左右图史凝尘满席澹如也不好立名
有所论著未始示人第进士补太子正字举词藻宏丽科玄宗已试又加诗赋各一篇绾
为冠由是擢右拾遗制举加诗赋繇绾始天宝乱肃宗
即位绾脱身见行在拜起居舍人知制诰累迁中书舍人兼修国史故事舍人年久者为
阁老其公靡杂科独取五之四至绾悉均给之历礼部
侍郎建复古孝廉力田等科天下高其议俄迁吏部品裁清允人服其公是时元载秉政
公卿多附之绾未尝私谒载忌绾望高会宦者鱼朝恩
判国子监既诛因是建言太学当得天下名儒以清其秩即拜绾国子祭酒外示尊重而
实以散地处之载日贪冒天下士议益归绾帝亦知之
自擢为太常卿充礼仪使载得罪拜中书侍郎同中书门下平章事修国史制下士相贺
于朝绾固让帝不许时诸州悉带团练使绾奏刺史自
有持节诸军事以掌军旅司马古司武所以副军即今副使司兵参军即今团练判官官
号重复可罢天下团练守捉使诏可又减诸道观察判
官员之半复言旧制刺史被代若别追皆降鱼书乃得去开元时置诸道采访使得专停
刺史威柄外移渐不可久其刺史不称职若赃负本道
使具条以闻不得擅追及停而刺史亦不得辄去州诣使所如其故阙使司毋委摄听上
佐代领帝善其谋于是高选州上佐定上中下州差置
兵员诏郎官御史分道巡核又定府州官月廩使优狭相均始天下兵兴从权宜官品同
而禄例差及四方粗定元载王缙当国偷以为利因不
改故江淮大州至月千缗而山剑贫险虽上州刺史止数十缗及此始复旧制绾素痼疾
居旬日寢剧有诏就中书疗治每对延英殿许挟扶于
时厘补穿敝唯绾是恃未几卒帝惊悼谓羣臣曰天不使朕致太平何夺绾之速邪即日
诏赠司徒遣使者册授欲及其未敛也诏百官如第吊
遣使会吊赙绢千匹布三百匹太常初谥文贞比部郎中苏端愐人也持异议宰相常袞
阴助之帝怒贬端巴州员外司马赐谥曰文简绾俭约
未尝问生事禄禀分姻旧随多寡辄尽造之者清谈终晷不及荣利欲干以私闻其言必
内愧止经典微趣学家疑晦者一见即诣其极始辅政
御史中丞崔宽本豪侈城南别墅池观堂皇为当时第一即日遣人毁之京兆尹黎干出
入从驺馭百数省损才留十余骑中书令郭子仪在邠
州行营方大会除书至音乐散五之四它闻风靡然自化者不可胜纪世以比杨震山涛

谢安云

△崔佑甫

崔佑甫字贻孙太子宾客孝公沔之子也世以礼法为闻家第进士调寿安尉安禄山陷洛阳佑甫冒矢石入私庙负木主以逃自起居舍人累迁中书舍人性刚直遇事不回时侍郎阙佑甫摄省事数与宰相常袞争议不平袞怒使知吏部选每拟官袞辄驳异佑甫不为不会朱泚军中猫鼠同乳表其瑞袞率羣臣贺佑甫独曰可吊不可贺诏使问状对曰臣闻礼迎猫为其食田鼠今猫受畜于人不能食鼠而反乳之无乃失其性邪猫职不修其应若曰法吏有不触邪疆吏有不扞敌臣愚以为当命有司察贪吏诫边候勤徼巡则猫能致功鼠不为害代宗异其言袞益不喜帝崩袞与礼官议礼为君斩袞三年汉文权制犹三十六日高宗以来如汉故事玄宗肃宗之丧始服二十七日乃者遗诏虽曰天下吏民三日释服羣臣宜如皇帝服二十七日乃除佑甫曰遗诏无臣庶人之别是皇帝宜二十七日而羣臣三日也袞曰贺循称吏者官长所署非公卿百官也佑甫曰传曰委之三吏乃三分也史称循吏良吏岂胥吏欤袞曰礼非天降地出人情而已且公卿大臣膺受宠禄今与黔首同信宿而除于公安乎佑甫曰若遗诏何诏而可改孰不可改意象殊厉袞方入临遣从吏扶立殿墀上佑甫指之谓众曰臣哭君前有扶礼乎袞不胜怒乃劾佑甫率情变礼请贬潮州刺史德宗以为重改河南少尹始肃宗时天下务剧宰相更直掌事若休沐还第非大诏命则听直者代署以闻是时郭子仪朱泚俱以平章事当署敕尾而不行宰相事帝新即位袞如故事代署子仪泚人言佑甫不宜贬帝曰卿向何所言今云非邪二人对初不知帝怒以袞为罔上是日羣臣直经立月华门外即两换职以袞河南少尹【通鉴作潮州刺史盖再贬也详见袞传】而拜佑甫门下侍郎同中书门下平章事俄改中书侍郎自至德干元以来天下战讨启丐填委故官赏繆紊永泰后稍稍平定而元载用事非贿谢不与官划塞公路纲纪大坏载诛杨绾相未几卒袞当国惩其敝凡奏请一杜绝之然无所甄异贤愚同滞及佑甫则荐举惟其人不自疑畏推至公以行未踰年除吏凡八百员莫不谐允帝尝谓曰人言卿拟官多亲旧何邪对曰陛下下令臣进拟庶官夫进拟者必悉其才行如非夙知何由得其实帝以为然神策军使王驾鹤者典卫兵久权震中外帝将代之惧其变佑甫曰是无足虑即召驾鹤留语移时而代者已入军中矣淄青李正己畏帝威断表献钱三十万缗以观朝廷帝意其诈未能答佑甫曰正己诚诈陛下不如因遣使劳其军以所献就赐将士若正己奉承

诏书是陛下恩洽士心若不用彼自敛怨军且乱又示诸藩以朝廷不重贿帝曰善正己
惭服时议者韪其谏谓可复贞观开元之治是岁被
疾诏肩輿至中书卧而承旨若还第即遣使咨决卒年六十赠太傅谥曰文贞故事门下
侍郎未有赠三师者帝以其有大臣节特宠异之朱泚
乱佑甫妻王陷贼中泚尝与佑甫同列还以繒帛菽粟受而緘鏹之帝还京具封以献士
君子益重其家法云子植嗣

崔植

崔倭

崔植

植字公修佑甫弟庐江令婴甫子也佑甫病谓妻曰吾歿当以庐江次子主吾祀及
卒护丧者以闻帝恻然召植使即丧次终服补弘文生
博通经史于易尤邃与郑覃同时为补阙皆贤宰相后每朝廷有得失两人者更疏论执
誉望蔚然元和中为给事中时皇甫镈判度支建言减
百官奉廩植封还诏书镈又请天下所纳盐酒利增估者以新准旧一切追偿植奏言用
兵久百姓凋罄往虽估踰其实今不可复收于是议者
咸罪镈镈惧而止 【旧书云寻除御史中丞入阁弹事颇振纲纪按穆宗纪宰相表亦云
御史中丞崔植本传脱也】 穆宗即位 【新书作
长庆初按植拜相在未踰年改元之前不当称长庆初也今改正】 拜中书侍郎同中书
门下平章事穆宗问贞观开元中治道最盛何致而然
植曰太宗资上圣兴民闲知百姓疾苦厉精思治又以房玄龄杜如晦魏征王珪为之佐
君明臣忠致治升平固其宜也玄宗在天后时身践忧
患既即位得姚崇宋璟二人蚤夜孜孜纳君于道璟尝手写尚书无逸为图以献劝帝出
入观省以自戒其后朽暗乃代以山水图稍怠于勤左
右不复箴规奸臣日用事以至于败昔德宗尝问先臣佑甫开元天宝事先臣具道治乱
所以然臣在童丱记其说今愿陛下以无逸为元龟则
天下幸甚他日又问司马迁言汉文帝惜十家产而罢露台身衣弋绋履革舄集哀书囊
为殿帐信乎何太俭邪植曰良史非虚言汉承秦侈纵
之余海内凋窳文帝从代来知稼穡艰难是以躬履俭约为天下守财景帝遵而不改故
家给户足至武帝时钱朽贯谷红腐乃能出师征伐威
动四方然侈靡不节末年户口减半税及舟车人不聊生乃下哀痛诏封丞相为富人俟
然则帝王不可以不示俭于天下帝曰卿言善患行之
为难耳时朝廷悉收河朔三镇而刘总又以幽蓟七州献诸朝且惧部将构乱乃先籍豪
锐不检者送京师而朱克融在籍中植与杜元颖不知
兵谓藩镇且平不复料天下安危事而克融等羈旅寒蹶愿得官自效日诉于前皆抑不

与及遣张弘靖赴镇纵克融等北还不数月克融乱复
失河朔矣天下尤之植内惭罢为刑部尚书旋授岳鄂观察使未几迁岭南节度使还拜
户部尚书终华州刺史赠尚书左仆射

崔陵

陵字德长佑甫从子也性介洁以苏州刺史奏课第一迁湖南观察使湖南旧法虽
丰年贸易不出境邻部灾荒不恤也陵至削其禁自是
商贾流通货物益饶入为户部侍郎判度支时田弘正徙镇州以魏兵二千行既至留自
卫请度支给岁粮穆宗下其议陵固执不与弘正不得
已遣魏卒俄而镇兵乱弘正遇害陵之为也时天子失德陵党与盛有司不敢名其罪出
为凤翔节度使踰年徙河南尹以户部尚书致仕卒赠
太子少保谥曰肃

△柳浑

柳浑字夷旷一字惟深本名载梁仆射惔六世孙后籍襄州早孤方十余岁有巫告
曰儿相天且贱为浮屠道可缓死诸父欲从其言浑曰
去圣教为异术不若速死学愈笃与游者皆有名士天宝初擢进士第调单父尉累除
衢州司马弃官隐武甯山召拜监察御史台僚以仪矩相
绳而浑放旷不乐检局乃求外职宰相惜其才留为左补阙大历初江西魏少游表为判
官州僧有夜饮火其庐者归罪瘖奴军候受财不诘狱
具浑与其僚崔佑甫白奴冤少游趣讯僧僧首伏因厚谢二人路嗣恭代少游浑迁团练
副使俄为袁州刺史佑甫辅政荐为谏议大夫浙江东
西黜陟使入为尚书右丞李希烈据淮蔡关播用李元平守汝州浑曰是夫衔玉而贾石
之也往必见擒何贼之攘既而果为贼缚 【此节新
书原文在封宜城县伯后吴缜纠谬云案本纪建中四年正月李希烈陷汝州执刺史李
元平十月朱泚反今浑传先叙朱泚建中四年十月反
事又及贞元元年事然后述建中四年正月以前用李元平事此失其序矣今改正】 朱
泚乱浑匿终南山贼素闻其名以宰相召执其子榜笞
之搜索所在浑微服步至奉天改右散骑常侍贼平奏言臣名向为贼污且载于文从戈
非偃武所宜乃更今名贞元元年迁兵部侍郎封宜城
县伯三年以本官同中书门下平章事仍判门下省帝尝亲择吏宰畿邑而政有状召宰
相语皆贺帝得人浑独不贺曰此特京兆尹职耳陛下
当择臣辈以辅圣德臣当选京兆尹承大化尹当求令长亲细事代尹择令非陛下所宜
帝然之玉工为帝作带误毁一铉私市它玉足之及献
帝擿之工人伏罪诏京兆府论死浑曰于法误伤乘舆器服罪当杖请论如律由是工不
死左丞田季羔从子伯强请卖私第募兵助讨吐蕃浑

曰季羔先朝号名臣世孝谨表阙于门隋时旧第惟田一族耳讨贼自有国计岂容不肖子毁门构徼一时幸损风教哉请薄责以示惩沮帝嘉纳韩滉自浙西入朝帝虚己待之奏事或曰晏它相取充位滉或掇吏省中浑虽为滉所引恶其专质让曰省闼非刑人地而掇吏至死公家先相国以猜察不满岁辄罢今公奈何蹈前非专立威福岂尊主卑臣义邪滉悔悟稍褫其威白志贞除浙西观察使浑奏志贞兴小吏纵嘉其才不当超剧职臣以死守不敢奉诏会浑移疾出即日诏付外施行疾闲因乞骸骨不许门下吏白过官浑愀然曰既委有司而复挠之岂贤者用心邪士或千里辞家以干禄小邑主办岂虑不能是岁拟官无退异者浑瑊与吐蕃会平凉是日帝语大臣以和戎息师之便马燧贺曰今日已盟可百年无虏患浑跪曰五帝无诰誓三王无盟诅盖盟诅之兴皆在季末今盛明之朝反以季末事行于夷狄且夷狄易以兵制难以信结臣窃忧之李晟继言曰蕃戎多不情诚如浑言帝变色曰浑儒生未达边事而大臣亦当尔邪皆顿首谢夜半邠宁节度使韩游瓌飞奏吐蕃劫盟将校皆覆没帝大惊即以其表示浑明日慰之曰卿儒士乃知军戎万里情乎益礼异之宰相张延赏怙权嫉浑守正遣亲厚谓曰明公旧德第慎言于朝则位可久浑曰为吾谢张公浑头可断而舌不可禁卒为所挤 【吴缜纠谬云延赏与浑在贞元三年同时为相是年延赏以七月壬申薨浑以八月己丑始罢然则其罢非缘延赏所挤按通鉴称浑与延赏议事数异同由是交恶上好文雅酝藉而浑质直轻脱无威仪上不悦盖延赏平日或有萋菲之言而罢相则自出德宗意比较新旧史所书近得其实】 以右散骑常侍罢政事浑警辩好谈谑与人交豁如也性节俭不营产利罢后日置酒召故人出游酣肆乃还旷然无黜免意五年卒年七十五谥曰贞浑兄识字方明知名士也工文章与萧颖士元德秀刘迅相上下而识练理创端往往诣极当时作者服其简拔浑亦善属文但沈思不逮于识云

△李泌

李泌字长源魏八柱国弼六世孙徙居京兆七岁知为文开元十六年悉召能言佛道孔子者相荅难禁中有员俶者九岁升堂词辩注射坐人皆屈 【艺文志有员椒太玄幽赞十卷注云开元四年京兆府童子进书召试及第授散官文学直弘文馆按泌生于开元十年故至十六年为七岁志以为开元四年非也】 帝异之曰半千孙固当然因问童子岂有类若者乎俶跪奏曰舅子李泌帝即驰召之泌既至帝方与张说观奕因使说试其能说请赋方圆动静泌逡巡曰愿闻其略说因曰方若棋局圆若棋

子动若棋生静若棋死泌即荅曰方若行义圆若用智
动若骋材静若得意说因贺帝得奇童帝大悦曰是子精神要大于身赐束帛敕其家曰
善视养之张九龄尤所奖爱常引至卧内九龄与严挺
之萧诚善挺之恶诚佞劝九龄谢绝之九龄忽独念严太苦劲不若萧软美可喜方命左
右召萧泌在旁曰公起布衣以直道至宰相而喜软美
者乎九龄惊改容谢之因呼小友及长博学善治易常游嵩华终南闲慕神仙不死术天
宝中诣阙献复明堂九鼎议帝忆其早慧召讲老子有
法得待诏翰林仍供奉东宫皇太子遇之厚尝赋诗讥谗杨国忠安禄山等国忠疾之诏
斥置蕲春郡肃宗即位灵武物色求访会泌亦自至 【
旧书云至彭原谒见新书云于灵武谒见】 已谒见陈天下所以成败事帝悦之授以官
固辞愿以客从入议国事出陪舆辇众指曰着黄者圣
人着白者山人帝闻因赐金紫拜元帅广平王行军司马帝尝曰卿昔侍上皇中为朕师
今下判广平王军是朕父子三世资卿道义也始军中
谋帅皆属建宁王泌密白帝曰建宁王诚贤然广平冢嗣有君人量岂使为吴太伯乎帝
曰广平为太子何假元帅沁曰使元帅有功陛下不
以为储副得邪太子从曰抚军守曰监国今元帅乃抚军也帝从之初帝在东宫李林甫数
构潜势危甚及即位怨之欲掘冢焚骨泌以天子而念
宿嫌示天下不广使胁从之徒得释言于贼帝不悦曰往事卿忘之乎对曰臣念不在此
上皇有天下五十年一旦失意南方气候恶且春秋高
闻陛下录故怨将内惭不恚万有一感疾是陛下以天下之广不能安亲也帝感悟抱泌
颈以泣曰朕不及此尝从容问破贼期对曰贼掠金帛
子女悉送范阳有苟得心渠能定中国邪华人为之用者独周摯高尚等数人余皆胁制
偷合至天下大计非所知也不出二年无寇矣陛下无
欲速夫王者之师当务万全图久安使无后害今诏李光弼守太原出井陘郭子仪取冯
翊入河东则史思明张忠志不敢离范阳常山安守忠
田干真不敢离长安是以两军禁其四将也随禄山者独阿史那承庆耳使子仪毋取华
令贼得通关中则北守范阳西救长安奔命数千里其
精卒劲骑不逾年而敝我常以逸待劳来避其锋去翦其疲以所征之兵会扶风与太原
朔方军互击之徐命建宁王为范阳节度大使北并塞
与光弼相犄角以取范阳贼失巢窟当死河南诸将手帝然之会西方兵大集帝欲速得
长安曰今战必胜攻必取何暇千里先事范阳乎泌曰
必得两京则贼再强我再困且我所恃者碛西突骑西北诸戎耳若先取京师期必在春
关东早热马且病士皆思归不可以战贼得休士养徒
必复来南此危道也帝不听二京平帝奉迎上皇自请归东宫以遂子道泌曰上皇不来

矣人臣尚七十而传况欲劳上皇以天下事乎帝曰奈何泌乃为羣臣通奏具言天子思恋晨昏请促还以就孝养上皇得初奏荅曰当与我剑南一道自奉不复东矣帝甚忧及再奏至喜曰吾方得为天子父遂下诰戒行崔圆李辅国以泌亲信疾之泌畏祸愿隐衡山有诏给三品禄赐隐士服为治室庐泌尝取松樛枝以隐背名曰养和后得如龙形者因以献帝四方争效之代宗立召至舍蓬莱殿书阁初泌无妻不食肉帝乃赐光福里第强诏食肉为娶朔方故留后李暉甥昏日敕北军供帐元载恶不附已因江西观察使魏少游请僚佐载称泌才以试秘书少监充判官帝不得已出之谓曰元载不容卿俟朕决意诛之当即召卿 【谨按通鉴辑览 御批代宗欲罢载相泌即应直行黜陟论史者乃疑载柄权日久一时难于措置如是则载之权是谁所假之哉盖彼时纪纲陵替非一朝一夕之故矣】 载诛召还复为常袞所忌出为楚州刺史辞不行帝亦留之会澧州阙袞盛言南方凋瘵请辍泌治之且使周知人闲利弊 【谨按通鉴辑览 御批新进无所建竖克知灼见为难固非历试不可若李泌在肃宗朝参豫密勿委任已深代宗自广平就封之时即倾心倚信且赖其调停久矣奚待授以方州俾知人闲利弊耶常袞一言而以新闲旧不惟惑之甚直是昏之甚矣】 乃授澧朗峡团练使徙杭州刺史皆有风绩德宗在奉天召赴行在授左散骑常侍时李怀光叛岁又蝗旱议者欲赦怀光帝博问羣臣泌破一桐叶附使以进曰陛下与怀光君臣之分不可复合如此叶矣由是不赦始朱泚乱帝约吐蕃赴援赂以安西北庭既而浑瑊与贼战咸阳泚大败吐蕃以师追北不甚力因大掠武功而归京师平来请如约帝业许欲遂与之泌曰安西北庭控制西域五十七国及十姓突厥皆捍兵处以分吐蕃势使不得并兵东侵今与其地则关中危矣且吐蕃向持两端不战又掠我武功乃贼也奈何与之遂止贞元元年拜陕虢观察使泌始凿山开车道至三门以便饷漕以劳进检校礼部尚书淮西兵防秋屯鄜州已而四千人亡归或曰吴少诚密招之既入境泌邀险悉击杀之三年拜中书侍郎同中书门下平章事累封邳县侯初张延赏减天下吏员人情愁怨泌请复之帝未从因问今户口减承平时几何曰三之二帝曰人既雕耗员何可复泌曰不然户口虽耗而事多承平十倍且所谓省官者去其冗员非常员也至德以来置额外官敌正员三之一可悉罢中朝官常侍宾客十员其六员可罢左右赞善三十员其二十员可罢又诸王未出合者官属皆不除计所收料奉乃多于减员矣帝从之是时州刺史月奉至千缗方镇所取无艺而京官禄薄自方镇入八座至谓罢权薛邕由左丞

贬歙州刺史家人恨降之晚崔佑甫任吏部员外求为洪州别驾使府宾佐有所忤者荐为郎官其当迁台阁者皆以不赴取罪去泌以为外太重内太轻乃请随官闲剧普增其奉时以为宜而实参多沮乱其事不能悉如所请郃国公主太子萧妃母也坐蛊媚幽禁中帝怒责太子太子不知所对泌入见帝数称舒王贤泌揣帝有废立意因曰陛下有一子而疑之乃欲立弟之子臣不敢以古事争且十宅诸叔陛下奉之若何帝赫然曰卿何知舒王非朕子对曰陛下昔为臣言之陛下有嫡子以为疑弟之子敢自信于陛下乎帝曰卿违朕意不顾家族邪对曰臣衰老位宰相以谏而诛分也使太子废它曰陛下悔曰我惟一子杀之泌不吾谏吾亦杀尔子则臣绝祀矣虽有兄弟子非所歆也即噫鸣流涕因称昔太宗诏太子不道藩王窥伺者两废之陛下疑东宫而称舒王贤得无窥伺乎若太子得罪请亦废之而立皇孙千秋万岁后天下犹陛下子孙有也且郃国为其女妒忌而蛊惑东宫岂可以妻母累太子乎执争数十意益坚帝寤太子乃得安时方镇私献于帝岁凡五十万缗其后稍损至三十万帝以用度乏问泌泌请天下供钱岁百万给宫中劝不受私献凡诏旨须索即代两税则方镇可以行法天下纾矣帝从容言卢杞清介敢言但少学耳人皆指其奸而朕不觉也对曰使陛下觉之岂有建中之乱乎帝曰建中之乱卿亦知桑道茂语乎乃命当然对曰他人皆可以言命惟君相不可言盖君相所以造命也若言命则礼乐刑政皆无所用矣纣曰我生不有命自天此商之所以亡也俄加集贤殿大学士修国史泌引张说故事辞乃以学士知院事 【按此节新书原文甚讹舛且云至崔圆复为大学士亦引泌为让而止似崔圆之为大学士反在泌后矣今考唐会要载泌奏伏蒙以臣为集贤殿大学士窃寻故事中书令张说中朝元老硕德鸿儒恳辞大学士众称达礼及至德二年崔圆为相加集贤殿大学士其后因循遂成恒例伏望削去大字其崇文馆大学士亦准此新书彙括其语而颠倒讹错遂不可通时泌止加集贤殿大学士而论及崇文欲并去大字以为后法新书乃谓泌加两馆大学士之号亦非也又按崔圆为集贤殿大学士本传不载此亦足补正史之阙】 四年八月月蚀东壁泌曰东壁图书府大臣当有忧者吾以宰相兼学士当之矣昔燕国公张说由是以亡又可免乎明年果卒年六十八赠太子太傅泌出入中禁事四君数为权幸所疾常以智免好纵横大言时时讷议能悟移人主然常持黄老鬼神说故为人所讥切独柳玭称两京复泌谋居多其功乃大于鲁连范蠡云子繁

李繁

李繁

繁少才警无行阳城为泌所荐故德泌而亲厚于繁及疏裴延龄过恶既具藁以繁可信夜使繁书繁尽能诵忆乃录以示延龄明日延龄白帝即撻其条以自诉解城奏入帝怒遂不省泌与梁肃善故繁师事肃及卒烝其室士议讜丑由是摈弃积年后为太常博士权德輿为卿奏斥之改河南府士曹参军累迁隋州刺史罢归敬宗诞曰诏与兵部侍郎丁公着太常少卿陆亘入殿中抗老佛论改大理少卿弘文馆学士谏官御史交章弹治乃出为亳州刺史州有剧贼剽室庐略财货为患它刺史不能禽繁有机略悉知贼巢所在一旦出兵捕斩之议者责繁不先启观察府为擅兴诏御史舒元輿按之元輿与繁素隙尽翻其狱以为滥杀不辜有诏赐死人皆冤之繁下狱知且死恐先人功业泯灭从吏求废纸握笔着家传十篇传于世

△韦处厚

韦处厚字德载京兆万年人事继母以孝闻亲歿庐墓终丧中进士第又擢才识兼茂科授集贤校书郎举贤良方正异等宰相裴埶引直史馆改咸阳尉宪宗初擢左补阙礼部尚书李絳请闲言古帝王以纳谏为圣今不闻进规纳忠何以知天下事帝曰韦处厚路隋数上疏其言忠切顾卿未知尔由是中外推其靖密历考功员外郎坐与宰相韦贯之善出开州刺史以户部郎中入知制诰穆宗立为翰林侍讲学士处厚以帝冲年不向学即与路隋合易书诗春秋礼孝经论语掇其粹要题为六经法言二十篇上之冀助省览帝称善并赐金币再迁中书舍人张平叔以言利得幸于帝建言官自鬻盐笼天下之财宰相不能诘下羣臣议处厚发十难消其迂谬事遂寝敬宗初李逢吉得柄构李绅逐为端州司马其党刘栖楚等欲致绅必死建言当徙丑地处厚上言逢吉党与以绅之斥犹有余辜人情危骇绅先朝旧臣就令有过尚当袞瑕洗衅成无改之美况被谗乎建中时宰相朋党杨炎为元载复讎卢杞为刘晏偿怨兵连祸结天下骚然此陛下亲所闻见得不深念哉绅繇是免逢吉怒至宝历元年【新书作三年误】赦书不言左降官未量移者以沮绅内徙处厚复奏逢吉缘绅一人而使近岁流斥皆不蒙泽非所以广恩于天下帝悟追改其条进翰林承旨学士兵部侍郎方天子荒暗月视朝才三四处厚入见即自陈有罪愿前死以谢帝曰何哉对曰臣昔为谏官不能死争使先帝因畋与色而至不寿于法应诛然所以不死者陛下在春宫十有五矣今皇子方襁褓臣不敢避死亡之诛帝大感悟赐锦彩以慰其意【谨按通鉴辑览 御批处厚冀以危词耸听而不知其言之乖谬

大臣笃于忠爱苟事切君身当随时直陈无隐岂宜
计储位少长为进谏等差乎使其隐微果存此念则心迹叵测罪不容诛即诡饰以抒激
切而显斥先朝罔顾尊亲之讳亦岂能掩其不敬处厚
于二者皆无可自解尹起莘仅责其受赏不辞不从大体立论殊失轻重而敬宗乃感其
言非昏戾而何】王廷凑之乱帝叹宰相不才而使奸
臣跋扈处厚曰陛下有一裴度不能用乃叹恨无萧曹此冯唐所谓有颇牧不能用也后
禁中急变文宗绥内难犹豫未即下诏处厚入昌言曰
春秋大义灭亲内恶必书以明逆顺正名讨罪何所避讳哉遂奉诏班谕是夕号令及它
仪矩不暇责有司一出处厚无违旧章者进拜中书侍
郎同中书门下平章事封灵昌郡公堂史汤鉢数招权纳赂斥出之相府肃然初贞元时
宰相齐抗奏罢州别驾及当为别驾者引处之朝元和
后两河用兵裨将立功得补东宫王府官朱紫淆并授受不纲处厚乃置六雄十望十紧
等州悉补别驾由是流品澄别帝虽自力机政然骤信
轻改摇于浮论处厚尝独对曰陛下不以臣不肖使待罪宰相凡所奏可中辄变易自上
心出邪乃示臣不信得于横议邪即臣何名执政且裴
度元勋旧德辅四朝竇易直长厚忠实经事先帝陛下所宜亲重委信之臣乃陛下自擢
今言不见纳宜先罢即趋下顿首帝矍然曰何至是处
厚遽趋出帝复召问所欲言乃对近君子远小人始可为治淳复数百言又言裴度忠可
久任帝嘉纳之自是无复横议者时李同捷叛诏诸军
进讨魏博史宪诚怀向背裴度待以不疑宪诚遣吏白事处厚召语曰晋公以百口
保尔帅于天子我则不然正须所为以邦法从事耳宪
诚惧不敢贰卒有功李载义数破沧镇兵皆剝剔以献处厚戒之前后完活数百千人太
和二年方奏事暴疾仆香案前帝命中人掖之舆还第
一夕卒年五十六赠司空处厚姿状如甚懦者居家亦循易至廷争嶷然不可回夺刚于
御史百僚畏惕推择官材往往弃瑕录善时亦讥其太
广性嗜学家书讎正至万卷为拾遗时撰德宗实录后又与路隋共次宪宗实录诏分日
入直创具凡例未及成而终本名淳避宪宗讳改今名

△路隋

路隋字南式其先出阳平父泌通五经端亮寡言以孝悌闻建中末为长安尉德宗
出奉天弃妻子奔行在扈狩梁州排乱军以出再中流
矢裂裳濡血以策说浑瑊召置幕府东讨李怀光奏署副元帅判官从瑊会盟平凉为虜
所执死焉时隋婴孺以恩授八品官逮长知父陷虜中
日夜号泣坐必西向不食肉母告以貌类泌者终身不引镜贞元末吐蕃请和隋三上疏
宜许不报举明经授润州参军事李錡欲困辱之使知

市事隋怡然坐肆不为屈韦夏卿高其节辟置东都幕府元和中吐蕃款塞隋五上疏请
修好冀得泌还诏可遣祠部郎中徐复报聘而泌以丧
至帝愍恻赠绛州刺史官为治丧服除擢隋左补阙史馆修撰以鯁亮称穆宗立与韦处
厚并擢侍讲学士再迁中书舍人翰林学士每除制出
以金币来谢者隋却之曰公事而当私赋邪进承旨学士迁兵部侍郎文宗嗣位以中书
侍郎同中书门下平章事监修国史初韩愈撰顺宗实
录书禁中事为切直宦竖不喜訾其非实帝诏隋刊正隋请条示其谬误者付史官刊定
有诏摘贞元永贞闲数事为失实余不复改进门下侍
郎弘文馆大学士久之辞疾不听册拜太子太师明年李德裕贬袁州长史不署奏为郑
注所忌乃检校尚书右仆射同中书门下平章事镇海
节度使道病卒年六十赠太保谥曰贞

钦定续通志卷二百四十一

●钦定续通志卷二百四十二 列传四十二

列传

唐【四十二】

○唐四十二

高适

元结

李承

韦伦

薛珏【存庆】

崔汉衡

戴叔伦

王翊【正雅 翊

凝】徐申

郗士美

辛秘

高适

元结

李承

韦伦

薛珏

崔汉衡

戴叔伦

王翊

徐申

郗士美

辛秘

△高适

高适字达夫沧州渤海人少落魄不治生事客梁宋闲宋州刺史张九皋奇之举有
道科中第调封邱尉不得志去客河西河西节度使哥

舒翰表为左骁卫兵曹参军掌书记禄山乱召翰讨贼即拜适左拾遗转监察御史佐翰

守潼关翰败帝问羣臣策安出适请竭禁藏募死士抗
贼未为晚不省天子西幸适走闲道及帝于河池因言翰忠义有素而病夺其明乃至荒
踏监军诸将不恤军务以倡优菟籥相娱乐浑隴武士
饭粝米日不厌而责死战其败固宜又鲁炅何履光赵国珍屯南阳而一二中人监军更
用事是能取胜哉臣数为杨国忠言之不肯听故陛下
有今日行帝颌之俄迁侍御史擢谏议大夫负气敢言权近侧目帝以诸王分镇适盛言
不可俄而永王叛肃宗雅闻之召与计事因言王且败
不足忧帝奇之除扬州大都督府长史淮南节度使诏与江东韦陟淮西来瑱率师会安
陆方济师而王败李辅国恶其才数短毁之下除太子
少詹事未几蜀乱出为蜀彭二州刺史始上皇东还分剑南为两节度百姓敝于调度而
西山三城列戍适上疏曰剑南虽名东西川其实一道
自邛关黎雅界于南蛮由茂而西经羌中至平戎等城界于吐蕃濒边诸城皆仰给剑南
异时以全蜀之饶而山南佐之犹不能举今裂梓遂等
八州专为一节度岁月之计西川不得参也嘉陵比困夷獠日虽小定而痍瘡未平耕纺
亡业衣食贸易皆资成都是不可得役亦明矣可税赋
者独成都彭蜀汉四州而已以四州耗残当十州之役其敝可见而言利者枘凿万端穷
朝抵夕千案百牒皆取之民官吏惧谴责及邻保威以
罚扶而逋逃益滋又关中比饥士庶流入蜀者道路相系地入有讫而科敛无涯为蜀计
者不亦难哉又平戎以西数城皆穷山之巔蹊隧险绝
运粮束马之路坐甲无人之乡为戎狄言不足利戎狄为国家言不足广士宇奈何以弹
丸地而困全蜀太平之人哉若谓己戍之城不可废己
屯之兵不可收愿罢东川以一剑南并力从事不尔非陛下洗荡关东扫清逆乱之意也
万一蜀人又扰岂不貽朝廷忧帝不纳梓屯将段子璋
反适从崔光远讨斩之而光远兵不戢遂大掠天子怒罢光远以适代为西川节度使广
德元年吐蕃取隴右适率兵出南鄙欲牵制其力既无
功遂亡松维二州及云山城 【通鉴载广德元年吐蕃陷松维保三州及云山新筑二城
按地理志此三州皆广德元年没吐蕃而保州本名
奉州至干元元年董嘉俊以郡来归始更今名则此时未得称保州也保州属县四而云
山归顺皆天宝八载析定廉县置所云云山新筑二城
疑即此二县也新书乃止有二州一县自不若通鉴之详核惟奉州之称保州系用史家
追书之例耳】 召还为刑部侍郎左散骑常侍封渤海
县侯永泰元年卒赠礼部尚书谥曰忠适尚节义语王霸衮衮不厌遭时多难以功名自
许而言浮其实不为搢绅所推然政宽简所莅人便之
年五十始为诗即工每一篇己好事者辄传布其诒书贺兰进明使疾救梁宋以亲诸军

与许叔冀书令释憾同援梁宋未渡淮移檄将校绝永
王俾各自白君子以为义而知变

△元结

元结后魏常山王遵十五代孙曾祖仁基从太宗征辽东以功拜塞令袭常山公父延祖年过四十不仕亲娅强劝之再调春陵丞辄弃官去少师事元德秀天宝十二载举进士擢上第复举制科国子司业苏源明见肃宗问天下士荐结可用时史思明攻河阳帝将幸河东召结诣京师问所欲言乃上时议三篇帝悦擢右金吾兵曹参军摄监察御史为山南西道节度参谋募义士于唐邓汝蔡降剧贼五千瘞战死露骸于泌南名曰哀邱史思明乱帝将亲征结建言贼锐不可与争宜折以谋帝善之因命发宛叶军以挫贼锋结屯泌阳守险全十五城以讨贼功迁监察御史里行荆南节度使吕諲请益兵拒贼帝进结水部员外郎佐諲府又参山南东道来瑱府瑱诛结摄领府事会代宗立丐归侍亲授著作郎久之拜道州刺史初西原蛮掠居人数万去遗户裁四千诸使调发符牒二百函结以人困甚不忍加赋即上言臣州为贼焚破粮储屋宅男女牛马几尽今百姓十不一存耄孺骚离未有所安岭南诸州寇盗不尽得守捉候望四十余屯一有不靖湖南且乱请免百姓所负租税及租庸使和市杂物十三万缗帝许之明年租庸使索上供十万缗结又奏岁正租庸外所率宜以时增减诏可结为民营舍给田免徭役流亡归者万余进授容管经略使身谕蛮豪绥定八州会母丧人皆诣节度府请留加左金吾卫将军民乐其教至立石颂德罢还京师卒年五十赠礼部侍郎

△李承

李承赵州高邑人幼孤其兄晔养之既长以悌闻擢明经累迁大理评事为河南采访使判官尹子奇陷汴州拘承送洛阳觐得贼谋皆密启诸朝两京平例贬临川尉不三月除德清令寻擢监察御史累迁吏部郎中淮南西道黜陟使奏置常丰堰于楚州以御海潮溉屯田墾卤收获十倍它岁德宗将讨梁崇义李希烈揣知之乃表崇义过恶请先诛讨帝悦数对左右称其忠会承使回言希烈能立功然恐后不可制帝初谓不然及崇义平希烈果叛始思其言擢拜河中尹晋绛观察使承廉正有雅望以才显于时未几改山南东道节度使希烈犹据襄州帝虑不受命欲以禁兵卫送承承辞请以单骑入既至希烈舍承外馆迫胁日万端承晏然誓以死守希烈不能屈遂大掠去襄汉荡然承辑安之居一年阖境完复初希烈虽去留部校守觐往来踵舍承因得使所厚臧叔雅结希烈腹心

周曾王玠姚憺及曾等谋杀希烈承首谋也密诏褒美

寻检校工部尚书湖南观察使建中四年卒年六十二赠吏部尚书子藩自有传

△韦伦

韦伦系本京兆父光乘在开元天宝闲为朔方节度使伦以荫调蓝田尉干力勤济杨国忠署为铸钱内作使判官国忠多发州县民人令

鼓铸督非所习虽捶扶苛严愈无功伦请准直募匠代无聊之人繇是役用减鼓铸多矣玄宗晚节盛营宫室吏介以为欺伦阅实工员省费倍

从帝入蜀以监察御史为剑南节度行军司马置顿判官时中人卫卒多侵暴尤难治伦以清俭自将西人赖济中宦疾之以谗贬衡州司户参

军度支使第五琦荐伦才擢商州刺史荆襄道租庸使襄州裨将康楚元乱自称东楚义王刺史王政弃城遁贼南袭江陵绝汉沔饷道伦调兵

屯邓州厚抚降贼寇益息乃击禽楚元以献收租庸二百万缗召为卫尉卿俄兼盩厔二州刺史干元三年襄州再乱 【新书本文作干元中

襄州乱按肃宗纪干元年中襄州之乱有二一康楚元之乱在干元二年八月一张维瑾之乱在上元元年四月上元元年即干元三年也上文

既云禽楚元以献则此为维瑾之乱无疑而语未分明故稍为改定】 诏伦为山南东道节度使而李辅国方恣横伦不肯谒恨之中罢为秦州

刺史吐蕃党项岁入边伦兵寡数格虏败贬巴州长史徙务川尉代宗立连拜忠台饶三州刺史宦者吕太一反岭南诏拜伦韶州刺史韶连郴

都团练使为太一反闲贬信州司马斥弃十年客豫章德宗嗣位选使绝域者擢伦太常少卿充和吐蕃使伦至谕天子威德赞普顺悦乃入献

还进太常卿兼御史大夫再使如旨伦处朝数论政得失宰相卢杞恶之改太子少保从狩奉天及杞败关播罢为刑部尚书伦在朝堂流涕曰

宰相无状使天子至此不失为尚书后何劝闻者惧其公帝后欲复用杞为刺史伦苦谏帝纳之进太子少师郢国公致仕时李楚琳以仆射兼

卫尉卿李忠诚以尚书兼少府监伦言楚琳逆节忠诚戎丑不当宠以官又请为义仓以捍无年择贤者任帝左右谓吐蕃豺虎野心不可恃信

约宜谨备边帝善其言厚礼之居家以孝慈称卒年八十三赠扬州督谥曰肃

△薛珏

薛珏字温如河中宝鼎人以荫为懿德太子庙令累迁干陵台令岁中以清白闻课第一改昭应令人请立石纪德珏固让迁楚州刺史初

州有营田宰相遥领使而刺史得专达俸及它给百余万田官数百岁以优得迁别户三千备刺史厮役珏至悉条去之租入赢异时观察使恶

其洁诬以罪左授峡州刺史建中初德宗命使者分诸道察官吏升黜而李承赵赞卢翰

皆言珽状书参闻于是拜中散大夫赐金紫刘玄佐表兼汴宋行军司马李希烈弃汴州走即拜珽刺史迁河南尹人为司农卿是时诏举堪刺史县令者且百人延问人闲疾苦吏治得失取尤通达者什二宰相欲试以文词珽曰求良吏不可责文学乃止寻改京兆尹司农供三宫畜茹三十军不足请市京兆是时韦彤为万年令珽使彤禁鬻卖民苦之德宗怒夺珽彤俸帝疑下情不达因诏延英坐日许百司长官二员言阙失谓之巡对 【会要贞元七年十月诏自今己后每御延英殿令诸司长官二人奏本司事俄又令常参官日二人引见访以政事谓之巡对】珽刚严晓法治勤身以劝下然苛察无经术大体坐善窶参改太子宾客出为岭南观察使卒年七十四赠工部尚书子存庆

薛存庆

薛存庆

存庆字嗣德及进士第历御史尚书郎五迁给事中与韦弘景封驳诏书时称其直刘总以幽州归穆宗谓宰相曰必用薛存庆可以宣朕意对延英一刻遣之至镇州疽发于背卒赠吏部侍郎

△崔汉衡

崔汉衡博州博平人沈懿博厚善与人交始为费令滑州节度使令孤彰表掌书记大历六年以检校礼部员外郎为和蕃副使还迁右司郎中建中二年 【旧书作三年误】 吐蕃请盟擢殿中少监为和蕃使与其使区颊赞俱来约盟改鸿胪卿持节送区颊赞归遂定盟清水德宗幸奉天吐蕃以兵佐浑瑊败贼武功转秘书监俄拜上都留守兵部尚书东都淄青魏博赈给宣慰使又使幽州还命称旨贞元三年豫吐蕃盟平凉被执虜将杀之因夷言谓之曰我善结赞无杀我而汉衡诚信素着虜亦尊重故至河州得还明年出为晋慈隰观察使卒赠尚书左仆射

△戴叔伦

戴叔伦字幼公润州金坛人师事萧颖士为门人冠刘晏管盐铁表主运湖南至云安杨子琳反 【本传作杨惠琳误今据吴缜纠谬改】 驰客劫之曰归我金币可缓死叔伦曰身可杀财不可夺乃舍之嗣曹王皋领湖南江西表佐幕府皋讨李希烈留叔伦领府事试守抚州刺史民岁争溉灌为作均水法俗便利之耕饷岁广狱无系囚俄即真期年诏书褒美封谯县男加金紫服齐映刘滋执政叔伦劝以经画兵食金谷之司不轻易人天下州县有上中下紧望雄辅者有司铨拟皆便所私此非择人求治之术其尤切者县令录事参军事此二者宜出中书门

下无计资序限远近高卑一以殿最升降则人知劝映等重其言迁容管经略使绥徕夷落威名流闻其治清明仁恕多方略故所至称最德宗尝赋中和节诗遣使者宠赐代还卒于道年五十八

△王翊

王翊字宏肱并州晋阳人少治兵家天宝中授翊卫尉羽林军宿卫擢才兼文武科出为辰州刺史与讨襄州康楚元有功加兼秘书少监迁朗州刺史大历中擢容管经略使初安禄山乱诏岭南兵隶南阳鲁炅炅败绩众奔溃溪洞夷獠相挺为乱夷酋梁崇牵号平南都统与别帅覃问合又与西原贼张侯夏永更诱啸因陷城邑遂据容州前经略使陈仁琇元结长孙全绪等皆侨治藤梧翊至言于众曰我容州刺史安可客治它所必得容乃止即出私财募士有功者许署吏于是人自奋不数月斩贼帅欧阳珪因至广州请节度使李勉出兵并力勉不许曰容陷贼久獠方强今速攻祇自败耳翊曰大夫即不出师愿下书州县阳言以兵为助冀藉此声成万一功勉许诺翊乃移书义藤二州刺史约皆进讨引兵三千与贼鏖战日数遇勉檄止之辄匿不发战愈力卒破贼禽崇牵悉复容州故地捷书闻诏更置顺州以定余乱翊凡百余战禽首领七十覃问遁去复遣将李实等分讨西原平郁林等诸州累兼御史中丞招讨处置使会哥舒晃反翊命实悉师援广州问因合众乘闲来袭翊设伏击之生禽问岭表平代宗遣使慰劳右金紫光禄大夫赐第京师时吐蕃入寇郭子仪悉河中兵乘边召翊为河中少尹领节度后务悍将凌正数千法不逞约其徒夜斩关逐翊翊觉之阴乱漏刻以差其期众惊不敢发俄禽正诛之一军惕息厯汾州刺史为振武军使绥银等州留后入拜京兆尹会起泾原兵讨李希烈次浚水京兆主供给饷败肉腐众怒曰食是而讨贼乎遂叛翊挺身走奉天拜太子詹事德宗还都再迁大理卿出为福建观察使徙东都留守既至开田二十余屯修器械皆良金寿革练士卒号令精明俄而吴少诚叛独东畿为有备关东赖之贞元十八年卒赠尚书右仆射谥曰肃翊雅善卢杞杞之杀崔盭沮李怀光不得朝皆与其谋议者以为訾子正雅

王正雅

王翊

王凝

王正雅

正雅字光谦元和初擢进士累迁监察御史穆宗时京邑多盗贼正雅以万年令威震豪强尹柳公绰言其能就赐绯鱼累擢汝州刺史属

监军怙权乃谢病去入为大理少卿会争宋申锡狄坚甚申锡得不死太和中卒赠左散骑常侍

王翊

翊兄翊历山南东道节度使代宗目为纯臣世称谨廉卒赠户部尚书谥曰忠惠

王凝

翊曾孙凝字成庶少孤依其舅宰相郑肃举明经进士皆中历台省寢知名寻擢礼部侍郎不阿权近出为商州刺史驿道所出吏破产不能给而州有冶赋羨银常榷直以优吏奉凝不取则以市马故无横扰人皆慰悦徙湖南观察使僖宗立召为兵部侍郎领盐铁转运使坐举非其人以秘书监分司东都即拜河南尹迁宣歙池观察使时干符四年也王仙芝之党屠至德势益张凝遣牙将孟琢助池守贼益兵来攻实欲袭南陵凝遣樊侔以舟师扼青阳侔违令轻与贼战不胜凝斩以徇诸将闻皆股栗以死缀贼贼不能进时江南环境为盗区凝以强弩拒采石张疑帜遣别将马颖解和州之围明年贼大至都将王涓自永阳赴敌凝大宴谓涓曰贼席胜而骄可持重待之慎毋战涓意锐日趋四舍至南陵未食即阵死焉监军收余卒数千还走城沮挠无去意卒又恣横不能禁凝让曰兵不能捍敌又恣之犯民生业何以称朝廷待将军意监军词屈趣亲吏入民舍夺马凝乘门望见麾左右捕取杀之由是不敢留然益储畜缮完以备贼贼至不能加会大星直寝庭坠术家言宜告疾不视事以厌胜凝曰东南国用所出而宣为大府吾规脱祸可矣顾一方何赖哉誓与城共存亡勿复言既而贼去未几卒年五十八赠吏部尚书谥曰贞

△徐申

徐申字维降京兆人擢进士第累迁洪州长史嗣曹王皋讨李希烈檄申以长史行刺史事任职办皋表其能迁韶州刺史诏自兵兴四十年刺史以县为治署而令丞杂处民闲申按公田之废者募人假牛犁垦发以所收半畀之田久不治故肥美岁入凡三万斛诸工计所庸受粟有差乃徙治故州未几邑闾如初创驿候作大市器用皆具州民诣观察使请为生祠申固让观察使以状闻迁合州刺史始来韶户止七千比六年倍而半之会初置景州授刺史赐钱五十万如节度副使迁邕管经略使苗洞纳质供赋不敢桀骜踰年进岭南节度使前使死吏盗印署府职百余员畏事泄谋作乱申觉杀之诘误一不问远俗以攻劫相矜申禁切无复犯外蕃岁以珠璫瑁香文犀浮海至申于常贡外未尝剩索商贾饶盈刘辟反表请发卒五千循马援故道繇夔蛮抵蜀捣辟不备诏可加检校礼部

尚书封东海郡公诏未至卒年七十赠太子少保谥曰平

△郗士美

郗士美字和夫兖州金乡人父纯举进士拔萃制策皆高第张九龄李邕数称之自拾遗七迁至中书舍人处事不回为宰相元载所忌时鱼朝恩以牙将李琮署两街功德使琮恃势桀横众辱京兆尹崔昭于禁中纯曰此国耻也即诣载请速处其罪载不纳遂辞疾还东都号伊川田父十年不出德宗立崔佑甫辅政召为太子左庶子集贤殿学士不拜以老乞身改詹事听致仕帝召见褒叹良久赐金紫公卿以下咸祖都门世高其节士美年十二通五经史记汉书皆能成诵父友萧颖士颜真卿柳芳与相论绎尝曰吾曹异日当交二郗之闲矣未冠为阳翟丞佐李抱真潞州幕府以才历王虔休李元皆留不徙久乃进房州刺史黔中经略观察使溪州贼向子琪以众八千阻山剽劫士美讨平之加检校右散骑常侍封高平郡公迁京兆尹天子多所咨逮出为鄂岳观察使时安黄节度使伊慎入朝其子宥主后务偃蹇母死京师不发丧欲固其权士美知之使府属过其境宥出迎因以母讣告之即为办装宥惶遽上道改河南尹检校工部尚书充昭义节度使昭义自李抱真以来皆武臣私厨月费米六千石羊千首酒数十斛潞人困甚士美至悉去之出禀钱市物自给又卢从史时日具三百人膳以饷牙兵士美曰卒卫于牙固职也安得广费为私恩亦罢之讨王承宗也遣大将王献督万人为前锋献恣横逗挠士美即斩以徇下令曰敢后者斩亲鼓之大破贼下三营环柏乡时诸镇兵合十余万绕贼多玩寇犯法独士美兵锐整最先有功宪宗喜曰固知士美能办吾事承宗大震惧亡几会诏班师然威震两河以疾召拜工部尚书后检校刑部尚书为忠武节度使卒年六十四赠尚书左仆射谥曰景生平与人交然诺不欺以是名重于世

△辛秘

辛秘系出陇西贞元中擢明经第授华原主簿以判入等调长安尉其学于礼家尤洽高郢为太常卿奏为博士再迁兵部员外郎常兼博士再辟礼仪使府宪宗初拜湖州刺史李锜反遣大将先取支州苏常杭睦四刺史或战败或拘胁独秘以儒者贼易之未及至秘召牙将邱知二夜开城收壮士得数百逆贼大战斩其将近焚营堡锜平赐金紫金谓秘材任将帅会河东范希朝出讨王承宗召秘为希朝司马主留务累迁汝常州刺史河南尹进拜昭义军节度使是时承讨恒赵之后潞人凋耗秘至则约出入嗇用度比四年储钱七十万缗粮七十万斛器械坚

良隐然复为完镇召还道病卒年六十四赠尚书左仆射谥曰肃 【旧书作谥昭】 后更谥懿秘为大官居不易第服不改初其奉禄悉与里表亲属病自铭其墓作书一通緘之卒后发视则送终制也俭而不违于礼云

钦定续通志卷二百四十二

●钦定续通志卷二百四十三 列传四十三

列传

唐 【四十三】

○唐四十三

崔光远 来瑱 田神功 侯希逸 邓景山 【崔瓘】

魏少游 卫伯玉 崔寔 李

澄 韩全义 严砺 卢从史 高霞寓

崔光远

来瑱

田神功

侯希逸

邓景山

魏少游

卫伯玉

崔寔

李澄

韩全义

严砺

卢从史

高霞寓

△崔光远

崔光远系出博陵后徙灵昌祖敬嗣为房州刺史中宗在房州敬嗣竭诚推奉储给丰衍帝德之及反正有与敬嗣同姓名者 【旧书云有益州长史崔敬嗣同姓名】 每拟官帝辄超拜后召见悟非是访真敬嗣已死即授其子汪五品官汪生光远勇决任气开元末为唐安令与杨国忠善累迁京兆少尹为吐蕃吊祭使还会玄宗西狩诏留光远为京兆尹西京留守采访使乘舆已出都人乱火左藏大盈库争辇财珍至乘驴入宫殿者光远乃募官摄府县谁何宫阙斩十数人乃定因使其子东见禄山而禄山先署张休为京兆尹由是追休授光远故官俄而同罗背贼以厩马二千出奔贼将孙孝哲安神威招之不得神威忧死官吏惊走狱囚皆逸

光远以为贼且走命人守神威孝哲等第斩曳落河二人孝哲驰白禄山光远惧与长安令苏震出开远门使人奔呼曰尹巡门兵具器仗迎谒至皆斩之募得百余人遂趋灵武肃宗嘉之擢拜御史大夫复为京兆尹遭到渭北募侨民会贼党剽泾阳休祠房椎牛呼饮光远刺知之率兵夜趋其所使百骑彀满阻其前命骁士合噪贼醉不能师斩其徒二千得马千噉俘一酋长以献自是贼常避其锋扈帝还改礼部尚书邺国公封实户三百千元元年繇汴州刺史代萧华为魏州节度使初郭子仪与贼战汲郡光远裁率汴师千人援之不甚力及守魏使将军李处崧拒贼子仪不救战不胜奔还贼因傅城下诡呼曰处崧召我而不出何也光远信之斩处崧处崧善战众倚以为重及死人益危魏城经袁知泰能元浩等完筑牢甚光远不能守夜溃围出奔京师帝赦其罪拜太子少保会襄州将康楚元张嘉延反陷荆襄诸州因拜持节荆襄招讨充山南东道兵马都使又徙凤翔尹先是岐陇贼郭愔等掠州县光远至遣官谕降之既而沈饮不亲事愔等阴约党项及奴刺突厥败韦伦于秦陇杀监军使帝怒光远无状召还复使节度剑南会段子璋反东川李旻败走成都光远进讨平之然不能禁士卒剽掠士女至断腕取金者夷杀数千人帝诏监军按其罪以忧卒

△来瑱

来瑱邠州永寿人父曜奋起行闲开元末为鸿胪卿持节碣西副大使四镇节度使著名西边终右领军大将军瑱少尚名节慷慨有大志颇涉书传天宝初从父四镇任剧职累迁殿中侍御史为伊西北庭行军司马拾遗张镐荐以能断大事有御侮才擢颖川太守充招讨使会母丧免以孝闻安禄山反张垪荐起复拜汝南太守未行改颖川贼攻之城中积粟素多瑱完埤自如与贼战城下手射皆应弦仆贼使降将毕思琛来招思琛父故将也拜城下泣且吊瑱不应前后俘杀甚众贼惧目为来嚼铁以功就加防御使河南淮南游奕逐要招讨使贼围南阳急瑱与魏仲犀合兵救之不胜人情恟惧瑱抚绥训练贼不得侵改淮南西道节度使两京平加开府仪同三司封颖国公食三百户相州兵败转陕虢节度兼潼关防御团练镇守使干元三年襄州部将张维瑾等杀其使史翊徙瑱山南东道襄邓均房金商随郢复十州节度使【按方镇表至德二载废南阳节度使升襄阳防御使为山南东道节度使领襄邓随唐安均房金商九州岛无郢复二州此云襄邓均房金商随郢复止九州而新旧书传下文皆称十州疑有阙误今考通鉴宝应元年割商金均房别置观察使令瑱止领六州与本传改瑱为山南东道襄邓唐复随

郢六州节度文合则所云十州内应脱一唐字无疑然安州不见本传而郢复二州又与方镇表所载互异姑仍其旧以志阙疑】 既至维瑾降
上元二年春破史思明余党于鲁山俘贼渠及战汝州获马牛橐驼凡两战斩首万级明年诏瑱还镇安襄汉将士亦宜其政因讽众留己而身
赴诏命至邓复诏归镇肃宗闻其谋恶之吕諲王仲升等皆言瑱得士心不可以留乃改襄邓唐复随郢六州节度俄而王仲升与贼战申州为
贼擒瑱顾望不即救司马裴茂者始以荫为京兆司录参军瑱遇之厚及瑱私汉上欲夺其位表称瑱善谋而勇恐后难制宜早图之帝乃阴夺
其权外示宠荣令节度淮西申安蕲黄光沔兼河南陈豫许郑汴曹宋颍泗十五州加襄邓等七州防御使代瑱瑱惧表言淮西无粮须麦收
始可上道又讽众固留代宗立复授襄州节度奉义军渭北兵马等使密诏茂图之茂自均州浮汉而下督军五千陈谷水北瑱以兵逆之大呼
曰吾奉诏留镇此州尔何名而来且示以诏书茂军皆曰伪也争射之瑱走旗下副使薛南阳引奇兵三百出其背与瑱夹击杀获几尽茂脱身
走至申口擒之并妻子械送京师诏流费州赐死瑱因入朝谢罪帝待之无疑拜兵部尚书同中书门下平章事充山陵使时程元振用事疾瑱
乃告与巫祝言不顺会王仲升归证瑱与贼合致已久陷帝积怒下诏削除官爵贬播州尉员外置及鄂赐死 【通鉴作流播州赐死】 籍其
家瑱之死掩尸于坎校书郎殷亮为备棺衾以葬帝徐悟以他事罪元振流溱州而以梁崇义为节度使代瑱为瑱立祠四时致飨避瑱厅事不
处哀祈礼葬诏可广德元年追复官爵

△田神功

田神功冀州南宫人天宝末为县史陷贼会河朔兵兴贼署为平卢兵马使率众归朝从李忠臣收沧德攻相州拒杏园后守陈留战不胜
与许叔冀复降史思明思明使与南德信刘从谏略江淮遂袭德信斩之从谏脱身走并将其兵来归诏拜鸿胪卿战于郑州破贼四千生擒其
将四人牛马器械不可胜计 【按通鉴上元元年神功破史思明之兵于郑州新书不录今依旧唐书辑入】 俄袭敬缸郢州不克刘展反邓
景山引以助讨入扬州大掠居人商贾货兼发冢墓死者数千人既而擒展送京师 【按通鉴上元二年贾隐射展中目而仆遂斩之本刘
展乱纪新旧书暨实录俱云生擒今从之】 迁兖郛节度使 【新书迁淄青节度使更徙兖郛按新书方镇表上元二年置淄沂节度使侯希
逸引兵保青州授青密节度使遂废淄沂节度并所管五州号淄青平卢节度据此神功不当先领此职故不从】 时贼围宋州急李光弼奏神

功往救贼解去又破法子营复攻敬缸降之朝义闻乃奔下博进封信都郡王徙河南节度汴宋八州观察使大历二年来朝加检校右仆射又判左仆射知省事加太子太师还镇神功事母孝始尝骄倨自如见光弼待官属钧礼乃折节谦损既寝疾宋之将吏为禳祈报恩八年自力入朝卒代宗为撤乐赠司徒诏其弟曹州刺史神玉知汴宋留后贖绢千匹布五百端特许百官吊丧赐屏风茵褥于灵座至德后节度使不兼宰相者唯神功恩礼最笃神玉终汴宋节度留后

△侯希逸

侯希逸平卢人身长七尺丰下锐上少习武艺天宝末为本军裨将守保定城禄山反署亲将徐归道为平卢节度使遣中人韩朝扬招降希逸斩以徇与安东都护王玄志合兵袭杀归道遣使上闻诏拜玄志平卢节度使干元初玄志卒敕使往抚将士且就察军中所欲立者副将李怀玉姑即希逸母因共杀玄志子推立希逸为留后朝廷因授希逸节度使【节度使由军中废立自此始】以近贼数为所迫率励将士累破逆徒向泗客李怀仙等然孤军无援又为奚侵掠乃拔其军二万俘海入青州据之平卢遂陷肃宗因以希逸为平卢淄青节度使自是淄青常以平卢冠使在镇着甚声称理兵务农远近美之宝应初与诸军讨平史朝义加检校工部尚书赐实封图形凌烟阁大历末进封淮阳郡王后渐怠肆好田猎尤崇释教兴工创寺军州苦之永泰初怀玉因众怨适希逸与巫者夜宿城外闭关不纳遂奔滑州召还检校尚书右仆射知省事迁司空未及拜卒年六十二赠太保

△邓景山

邓景山曹州人本以文吏进累至监察御史至德初擢拜青齐节度使徙淮南为政简肃有鬻集城门邓班语景山曰鬻介物也失所次金不从革之象其有兵乎未几宋州刺史刘展反初展有异志淮西节度使王仲升表其状诏迁扬州长史兼江淮都统密诏景山执送京师展知之拥兵二万渡淮景山逆击不胜奔寿州因引平卢节度副使田神功讨展神功兵至扬州大掠居人发冢墓大食波斯贾胡死者数千人展叛凡三月平追景山入朝拜尚书左丞以崔圆代之王思礼在太原储膺羸衍请输半以实京师会卒管崇嗣代之政弛不治数月为下盗费略尽帝闻即以景山为太原尹封南阳郡公至则振核纪纲检覆侵隐众大惧而景山清约子弟饌不过草具待上宾惟豚鱼而已取食粟红腐者食之兼给麾下麾下怨讪左右白景山景山慢骂士皆羞忿有裨校抵死诸将请赎不许其弟请代不许请纳一马赎景山乃许减死众怒曰吾属

命纚一马直乎景山叱遣之少将王抱节因众怒作乱景山遇害时宝应元年也肃宗以其统驭失方不复究验遣使喻抚其军军中请辛云京

为节度诏可景山与刘晏善其后家寒窶晏屡经纪之嫁其孤女谥曰敬

崔瓘

崔瓘

崔瓘博陵人以士行修谨闻累官至澧州刺史不为烦苛人便安之流亡还归居二年增户数万诏特进五阶以宠异政大历中迁湖南观

察使时将吏习宽弛不奉法瓘稍以礼法绳裁之下多怨别将臧玠判官达奚覲忿争玠夜以兵杀覲瓘闻难惶惧走遇害帝悼惜之

△魏少游

魏少游邢州巨鹿人以干吏称天宝末累迁朔方水陆转运副使肃宗幸灵武杜鸿渐等奉迎而留少游缮治宫室少游大为殿宇幄帘皆

象宫阙诸王公主悉有次舍供饌穷水陆又有千余骑铠帑光鲜振旅以入帝见宫殿不悦曰我至此欲就大事安用是为稍命去之除左司郎

中两京平封巨鹿县侯迁陕州刺史王师溃于邳河洛震骇少游镇守自若擢京兆尹李辅国以其不附己改卫尉卿会率羣臣马助军少游与

汉中王瑀持异帝怒贬渠州长史复为京兆尹始请中书门下省五品尚书省四品诸司正员三品诸王驸马朞以上亲及壻若甥不得任京兆

官诏可大历二年为江西观察使进刑部尚书改封赵国公六年卒赠太子太师 【旧书脱太子二字】 少游四为京兆虽无赫赫名然善任

人缘饰规检有足称者

△卫伯玉

卫伯玉史失其何所人少习武技天宝中从安西府积劳至员外诸卫将军肃宗即位慨然愿立功乃归长安领神策兵马使出镇陕州行

营干元二年贼将李归仁以骑五千入寇伯玉与战强子坂破之获马六百匹迁羽林大将军徙四镇北庭行营节度使俄为神策军节度使思

明遣子朝义夜袭陕将动京师伯玉迎击破之于永宁加特进封河东郡公广德元年代宗幸陕以伯玉有干略可方面大事乃拜荆南节度使

进封城阳郡王大历初以母忧当代讽将吏留己复诏节度荆南议者丑之十一年归京师卒

△崔寔

崔寔本贝州安平人后徙卫州世儒家而独喜纵横事客游剑南以步卒事鲜于仲通又从李宓讨云南无功还成都行军司马崔论悦之

荐为牙将历事崔圆裴冕冕被谤朝廷遣使者问状寔部兵截耳白其冤使者以闻寔亦

召留京师为折冲郎将宝应初蜀乱山贼乘险道不通
严武白宓为利州刺史既至贼遁去由是知名及武为剑南节度使过州心欲与俱西而
利非所属赂张献诚以求宓献诚使移疾自解武遂奏
为汉州刺史会吐蕃引杂羌寇西山破柘静等州武遣宓将而西既薄贼城城皆累石不
得攻乃为地道再宿而拔拓地数百里虜众惊以为神
及还武装七宝鬘迎入成都以夸异之表为西山都知兵马使永泰元年武卒宓奏大将
王崇俊为节度而行军司马杜济别将郭英干郭嘉琳
皆推郭英干二奏俱至而朝廷已用英干矣英干始署事即诬杀崇俊遣使召宓宓大恐
托拒吐蕃不敢还英干出兵声言助宓实欲袭之宓家
在汉州英干迁之成都通其妾媵宓知之益负阻英干自将讨之值大雪马多冻死士心
离遂败归宓因率兵攻成都英干阵城西使相茂琳为
前军英干居左嘉琳后殿战辄败军多降宓使反攻英干不胜走简州为韩澄所杀【新
书作走灵池通鉴旧书俱作走简州从之】于是剑
南大扰杨子琳与栢贞节连和讨宓明年代宗诏杜鸿渐往平其乱宓遣使献缯锦数万
辞甚卑约鸿渐贪其利至镇委以政事日与僚属纵酒
高会表贞节为邛州刺史子琳为泸州刺史以和解之数荐宓于朝因诏授成都尹西山
防御使西川节度行军司马鸿渐既遇朝遂为节度使
大历三年入朝宓本名旰至是赐名【旧书鸿渐讨旰为行军司马仍赐名宓鸿渐归遂
授宓为节度按通鉴大历二年六月鸿渐入朝据此
改名当在行军司马时又旧传宓至十四年始入朝而鸿渐传云大历二年鸿渐仍率旰
同入覲通鉴考异曰实录无随鸿渐入朝事传误据通
鉴与新书同从之】时宓弟宽留守成都杨子琳乘闲以精骑数千袭据其城宽战力屈
宓妾任氏素骁果出家财募勇士千人设部队自将以
进子琳大惧会粮尽遂遁帝闻子琳取成都遣宓还宓见朝无纪纲而蜀地险远乃痛诛
斂使宽居京师厚赂权贵深结元载父子故宽骤擢御
史中丞宽兄审至给事中宓在蜀久兵寝强盛肆侈穷欲多污逼将吏妻妾朝廷隐忍不
能诘累加尚书左仆射十四年入朝进检校司空中
书门下平章事兼山陵使俄为御史大夫【按旧纪及宰相表乔琳免后皆无宓入相文
而旧书宓传云代乔琳为御史大夫平章事新书云
以平章事为御史大夫通鉴乔琳罢政事在大历十四年十一月宓即于是月为单于镇
北大都护无代琳为御史大夫事未知孰是】建白择
御史当出大夫不宜谋及宰相因奏李衡于结等任御史杨炎怒不附已寝而不行又恶
宓申救刘晏会南蛮合吐蕃入寇覆没州县德宗促宓
还炎乃说帝曰蜀天下奥壤自宓擅制朝廷失外府十四年此行若使无功是徒遣也若

其有功谊不可夺胜败皆非国家利帝问卿策云何炎
曰请留窻发朱泚所领范阳兵数千人杂禁兵往击之何忧不克因是得真亲兵蜀将破
胆然后更授他帅以收千里之权是谓因小祸受大福
也帝曰善遂留窻托言重臣绥靖北陲改兼京畿观察使灵州大都督单于镇北大都护
朔方节度鄜坊丹延州都团练观察等使每道各置留
后灵州杜希全振武张光晟【新旧书俱作王翊按翊传无为振武事而光晟传大历末
为振武节度与通鉴合从之】鄜州李建徽使得自
奏事及署戴休颜杜从政吕希倩伺窻过失窻至夏州与希倩招降党项甚众炎恶之即
奏希倩无绥边才而以神武将军时常春代之更拜窻
右仆射知省事与卢■〈木巳〉不叶尝谓所亲帝聪明从谏如转圜但为卢■〈木巳〉
所惑尔■〈木巳〉闻之思构窻于帝会朱泚乱与
王翊同赴难翊言其顾望又得泚反闲诬以与贼通书乃召至朝堂中人引窻于幕后使
二力士缢杀之年六十一籍其家中外冤之贞元十二
年故将夏绥银节度使韩潭请以己官雪窻罪乃听收葬窻季弟密密子绘俱以文辞称
绘四子蠡黯确颜皆擢进士第蠡字越卿开成中为户
部简侍郎历平卢天平军节度使终尚书左丞子堯字野夫干符中为吏部侍郎美文辞
谈辩华绘出为陕虢观察使王仙芝乱汉上河南羣盗
兴堯委政厮竖不恤人疾苦百姓诉旱指庭树示之曰柯叶尚尔何旱为即榜笞之上下
离心俄为军吏所执髡其髯鬢堯再拜祈免乃得去渴
甚求饮于民民饮以溺坐失守贬端州司马终左散骑常侍黯字直卿开成初为监察御
史奏郊庙祭事不虔条具以闻擢员外郎累迁谏议大
夫确字岳卿颜字希卿位皆郎中

△李澄

李澄辽东襄平人隋蒲山公宽之远胄以勇剽隶江淮都统李垣府为偏将又从永
平节度李勉军勉帅汴表澄滑州刺史李希烈陷汴勉
走澄以城降贼希烈以为尚书令节度永平军兴元元年澄遣卢融闲道奉表诣行在德
宗嘉之署帛诏内蜜丸授澄刑部尚书汴滑节度使澄
未即宣乃先勒训士马希烈疑以养子六百戍之贼急攻窻陵邀澄至右注澄密令焚营
为惊遁者养子辈果乘以剽掠澄尽斩之希烈不能诘
贼遣将翟崇晖率精兵寇陈州未还汴军寡澄度不能制己又中官薛盈珍持节至封澄
武威郡王赐实封乃燔贼旗节自归希烈既失澄而崇
晖复败繇是奔汝南澄引兵将取汴屯其北门不敢进及刘洽师屯东门贼将田怀珍纳
之比澄入洽已保子城矣澄乃舍浚仪两军将士日忿
争未能安会郑州贼将孙液送款于澄澄遣子清驰赴之先是河阳节度使李芄使偏将

雍希颢 【旧书作雍颢】 攻郑数残剽液拒之及纳

清希颢大怒急攻郑清助守杀河阳兵数千希颢焚阳武去澄遂如郑诏授清检校太子宾客易名克窳贞元初迁澄检校尚书左仆射义成军节度使二年卒年五十四赠司空澄始封陇西公后乃进王爵每上章必迭署二封士大夫笑其野澄之丧克窳闕不发欲自领事其行军司马马铉不许克窳杀之婴城将为乱刘洽以兵屯境上遣使谕止诏以贾耽代镇克窳乃护丧归悉索府中财夜出军士从剽之殆尽澄柩至京犹赐克窳庄一区钱千缗粟麦数千石云

△韩全义

韩全义史失其先世兴卒伍以巧佞事宦者窦文场擢累长武城使进拜夏绥银宥节度使诏以长武兵赴屯全义素懦贪无纪律诏未下军中徧知之谋曰夏州沙碛无树蓺生业不可往是夜噪而乱全义缒以逸杀其亲将王栖岩赵虔曜等军虞候高崇文诛乱首众乃定全义得赴屯吴少诚以蔡拒命诏合十七镇兵讨之时军无帅统惟以奄竖监之遂败于少澱德宗以文场素为全义地因用为淮西行营招讨使以陈许节度使上官浚副之诸镇兵皆属全义无它方路号令悉禀监军每议攻战宦竖十数纷争帐中互诋訾不能决贼知之数请战遇贼广利城方暑地沮洳士皆病疠全义未尝存之既战师皆溃退保五楼贼移屯逼之乃与监军贾英秀等保澱水不能固又八屯陈州宦人共掩其败帝不知少诚度无能为即谩书谢监军求洗前咎帝下其议宰相贾耽请纳其诚帝然之全义班师过阙下托疾不入谒司马崔放见帝谢无功帝曰全义诱少诚归国功大矣何必杀敌乃为功邪还屯夏州令中人即第宴赉然卒不得见帝去时恨帝失政使奸人得肆云宪宗在藩疾之既嗣位全义大惧愿入覲不复用以太子少保致仕卒其子献女乐八人帝不纳曰我方以俭治天下恶用是为哉

△严砺

严砺字符明梓州盐亭人少为浮屠法太守伟其材表为玄武尉从祖兄震镇山南署牙将德宗临幸主馈饷有功迁都虞候为人轻躁多奸谋以便佞自将累为兴州刺史震卒以砺权主留府事遗言荐之即拜本道节度使在位贪沓苟得士民不胜其苦诬奏马勋贬贺州司户刘辟反以储备有素加检校左仆射兼领东川擅没吏民田宅百余所税外加敛钱及刍粟数十万元和四年卒赠司空后御史元稹劾发其赃请加恶谥朝廷以其死故但追田宅奴婢还其主税外所敛悉蠲除云

△卢从史

卢从史其先在元魏时为盛族后徙籍不常父虔好学由进士第历御史秘书监从史少好骑射游泽潞闲节度使李长荣署为督将贞元后藩臣阙德宗必取本军所喜戴者授之从史在潞奸猾得志又善附迎中人会长荣卒即擢拜昭义节度副大使既得志寢恣不道元和中丁父丧去官从史即献计诛王承宗阴伺帝旨繇是夺服领泽潞因诏讨贼而勒兵逗留阴与承宗交得其密号授军中又高台粟直以售度支即上书求兼宰相且诬诸军与贼通兵未可进宪宗患之初神策中尉吐突承璀与对垒从史时过其营饮博承璀多出宝带奇玩夸之从史贪吝猥所玩悦必遗焉从史喜益狎不疑帝用裴垍谋敕承璀图之承璀伏壮士幕下伺其来与语士突起猝持出帐后缚内车中从者惊乱斩数十人谕以密诏而大将乌重胤素忠果部勒其众乃定会夜疾驱未明出境道路无知者有诏慰其军疏从史罪恶贬驩州司马赐死子继宗等并徙岭南

△高霞寓

高霞寓幽州范阳人其先五代不异居孝闻里间德宗诏表其门霞寓能读春秋及兵法颇以感槩自尚狡譎多变往见长武城使高崇文崇文异其才檄任军职从击刘辟战辄克下鹿头城降李文悦仇良辅等追战七盘城有功禽辟于羊灌擢拜彭州刺史俄代崇文为长武城使封感义郡王元和中以左威卫将军随吐突承璀讨王承宗诸将多覆军独霞寓有功诏藏所获铠仗于神策库以旌之承璀已执卢从史其军相惊乃遣霞寓谕之麾而大呼曰元恶缚矣公等宜自安即脱铠揖而前众遂定留为帅霞寓闲道去欲拜丰州刺史三城都团练防御使讨吴元济也析山南东道为两镇以霞寓宿将拜唐邓随节度使遏贼南冲霞寓虽悍而寡谋统制尤非所善始引兵趋萧陂战小胜进至文城栅贼伪北逐之为伏所掩遂大败才以身免诏贬归州刺史乃厚赂权宦召为右卫大将军拜振武节度使会吐蕃攻盐丰二州霞寓以兵五千屯拂云堆虏引去浚金河溉鹵地数千顷改左武卫大将军又节度邠宁位检校司徒宝历中以右金吾卫大将军召卒于道赠太保

钦定续通志卷二百四十三

●钦定续通志卷二百四十四 列传四十四

列传

唐 【四十四】

○唐四十四

元载

王缙【黎干】

杨炎【庾准】

严郢

窦参【吴

通元】

元载

王缙

杨炎

严郢

窦参

△元载

元载字公辅凤翔岐山人父升本景氏曹玉明妃元氏赐田在扶风升主其租入有劳请于妃冒为元氏【旧书载母携载适景升冒姓元氏似载非景升子又不详元氏来历今从新书】载少孤嗜学尤好道书天宝初诏举明庄老列文四子学者遂入高等补新平尉韦镒监选黔人苗晋卿留守东都皆署判官连授大理评事司直寢以名闻肃宗初江东李希言表为采访副使擢祠部员外郎洪州刺史入为度支郎中占奏敏给帝甚异之累迁户部侍郎充度支江淮转运等使帝不豫李辅国用事其妻即载宗女因相缔结会京兆尹缺辅国白用载载意属国柄固辞辅国会其意翌日拜同中书门下平章事领使如故代宗立辅国数称其才进拜中书侍郎许昌县子载以度支职务繁重虑吏事督责伤名损威乃悉委刘晏俄判天下元帅行军司马盗杀辅国载阴与其谋乃复以厚利结中人董秀刺取密旨凡帝有所属必先知之探微揣端无不谐契故帝任不疑华原令顾繇白发其私帝斥繇除名为民载与内侍鱼朝恩不叶乘闲奏诛之矜肆益甚时拟奏文武官功状多舛虑有司驳正请别敕授六品以下官吏兵二部即附甲团奏不须检勘又与王缙请以河中为中都选兵五万列屯镇御褒关辅河东十州税实之杪秋行幸春首还京可避羌戎之患遣所亲经图宫殿先筑私第帝闻恶之置其议初四镇北庭行营节度使寄治泾州议者皆谓散地不可守载请徙京西军戍原州移子仪大军驻泾以为根本分兵守石门木峡陇山之险北抵于河稍置鸣沙县丰安军为之羽翼北带灵武五城为之形势然后举陇右之地以至安西是谓断西戎脰朝廷高枕矣图上地形使吏闲入原州度水泉计徒庸车乘畚鍤之器悉具而田神功沮短其议乃曰兴师料敌老将所难陛下信一书生举国从之诬矣帝由是凝不决时载久得君外委主书卓英倩李待荣内劫妇言纵子关通货贿京师要司及方面皆进用贪猥城中开南北二第近郊起台观膏腴别墅疆畛相望名姝异伎举集其门恣为淫褻不避人伦帝知而戒之警然不悛有李少良者以吏进由诸帅府累迁殿中侍御【按通鉴作成都司录】罢游京师不

见调愤载不法疏论其恶帝留少良客省欲究其事其友韦颂漏言于陆珽载召珽问知之乃奏杀少良及珽颂皆杖死由是道路目语不敢复议帝积怒大历十二年三月遣金吾将军吴凑收载及王缙系政事堂分捕亲吏诸子下狱命刘晏李涵等讯状遣中使临诘阴事皆服先杖杀董秀赐载自尽于万年县 【据通鉴辑】 妻王氏江西节度忠嗣女素以凶戾闻子伯和扬州兵曹参军仲武祠部员外郎季能校书郎并赐死发其祖父冢刘棺弃尸并毁庙主破大窳安仁二第修百官署以东都第助治禁苑籍其家锤乳五百两分赐朝臣胡椒至八百斛它物称是女真一没入掖庭德宗为太子实用载议兴元元年诏复其官听改葬谥曰荒后改曰成载败卓英倩李待荣术者李季连悉论死其坐贬者杨炎王昂宋晦韩洄王定包佶徐演裴冀王纪韩会等凡数十人英倩弟英璘家金州恃载权豪制乡曲聚无赖少年以伺变载诛盗库兵据险以叛诏发禁卒及山南西道兵讨捕刺史孙道平擒杀之

△王缙

王缙字夏卿本太原祁人后客河中少好学与兄维俱以名闻举草泽文辞清丽科历侍御史武部员外郎禄山乱擢太原少尹佐李光弼以功加宪部侍郎历工兵二部侍郎史朝义平诏宣慰河北使还称旨拜黄门侍郎同中书门下平章事 【通鉴广德二年以右散骑常侍王缙为黄门侍郎同平章事旧传详载缙由左散骑常侍改兵部侍郎宣慰河北拜黄门侍郎】 进侍中代李元弼持节都统河南淮西山南东道诸节度行营事辞侍中加东都留守岁余拜河南副元帅请减军资钱四十万缙修东都殿宇朱希彩杀李怀仙诏拜卢龙节度使至即委军希彩而还会辛云京卒兼领河东节度太原将王无纵张奉璋恃功以缙儒者易之不如律令缙斩以徇诸将股栗再岁还以本官复知政事时元载用事曲意附之素佞佛不茹荤食肉晚年尤甚妻死以道政里第为佛祠每节度观察使入朝必邀至其所讽令施财佐营作初代宗喜祠祀未重浮屠法缙与元载盛陈福业报应言国家庆祚灵长皆福报所凭非关人事故帝信愈笃大历政刑日以堙陵实由于此性贪冒纵弟妹女尼广纳财贿猥屑相积若市贾然及败刘晏等鞫其罪同载论死晏谓李涵曰重刑再覆国家常典又法有首从二人同刑亦宜重取进止乃覆奏帝悯其毫不加刑贬括州刺史久之迁太子宾客分司东都卒年八十二

黎干

黎干

黎干戎州人善星纬术得待诏翰林累至谏议大夫自负其辩沾沾喜议论宝应初

礼官建言以景皇帝配天地比于商之契周之后稷于
礼为宜干非之上十诘十难傅经义诋郑元议闲代宗不韪其言迁京兆尹以治称京师
苦乏樵薪干议开漕渠运载久之渠不就改刑部侍郎
鱼朝恩败坐交通出为桂州刺史本管观察使大历八年复召为京兆尹时大旱干造土
龙自与巫覡对舞弥月不应又祷孔子庙帝闻命毁土
龙减膳节用既而霪雨十三年泾水壅隔请开郑白支渠复秦汉故道以溉民田废碾碓
八十余所干性贪暴既复用专徇财色附会嬖近挟左
道希主恩帝甚惑之德宗在东宫干与宦者刘忠翼谋危宗嗣及即位又诡道希进密诣
忠翼第事觉除名长流赐死蓝田驿

△杨炎

杨炎字公南凤翔天兴人曾祖大宝武德初为龙门令刘武周攻之死于守赠全节
侯祖哲以孝行旌父播登进士第退居求志玄宗召拜
谏议大夫弃官归养肃宗就加散骑常侍赐号元静先生 【旧书作元靖】 炎美须眉
风骨峻峙文藻雄蔚汧陇闲号为小杨山人始辟河西
吕崇贲掌书记李光弼奏为判官不应召拜起居舍人固辞遭父丧庐墓侧号泣不绝声
有紫芝白雀之祥诏表其庐三代以孝闻门树六阙近
古未有终丧起为司勋员外郎迁中书舍人知制诰元载与炎同郡炎又元出也擢炎吏
部侍郎史馆修撰引以自近亲重无比载败贬道州司
马德宗在东宫雅知其名及即位崔佑甫荐炎可器任即拜门下侍郎同中书门下平章
事旧制天下财赋皆贮于左藏太府四时上其数比部
覆其出入及第五琦为度支盐铁使时京兆多豪将求取无节不能自制乃悉进大盈内
库天子以给取为便遂不复出自是天下公赋为人君
私藏有司不得计盈缩宦官持簿籍蚕食其闲根柢连结牢不可动炎奏财赋国之大本
生民之命天下治乱重轻系焉先朝权制以中人领其
职丰俭盈虚虽大臣不得知则无以计天下利害政之蠹敝莫甚于此请出之以归有司
度宫中一岁经费几何量数奉入帝从之乃诏岁中裁
取以入大盈 【按旧书每岁量进三五十万通鉴岁于数中择精好者三五千匹质录亦
互异】 度支具数先闻又请为两税法尽革天宝至
德以后积弊 【详见食货略】 凡百役之费一钱之敛先度其数而赋于人量出制入
户无主客以见居为簿人无丁中以贫富为差不居处
而行商者在所州县税三十之一度所取与居者均使无饶利居人之税秋夏两入之俗
有不便者正之其租庸杂徭悉省而丁额不废其田亩
之税率以大历十四年垦田之数为准而均收之夏税尽六月秋税尽十一月岁终以户
赋增失进退长吏而尚书度支总焉帝善之诏谕中外

天下咸称其便自是人土断而地着赋不加敛而增人版籍不造而得其虚实吏不诚而奸无所取轻重之权始归朝廷矣炎以单议悟天子中外翕然望为贤相居数月崔佑甫疾不能视事乔琳免炎独当国遂多变佑甫之政减薄护元陵功人始不悦又请开丰州陵阳渠发畿县民役作闾里骚然渠卒不就素德元载思有以报之于是复议城原州段秀实时为泾原节度谓安边却敌宜以缓计方农事不可遽兴功炎怒追为司农卿以邠寇李怀光督作遣朱泚崔瑊统兵万人翼之诏下泾军恚曰吾属为国西屏十余年始居邠州甫营农桑有地着之安徙此榛莽中手披足践既立城垒则又投之塞外且安寘此乎又怀光持法严举军畏之裨将刘文喜因人之怒上疏复求秀实为帅不则朱泚诏以泚代怀光文喜又不奉诏闭城拒守质其子吐蕃以求援时方旱人情骚携羣臣请赦文喜帝不听命泚与怀光率军围其城别将刘海宾斩文喜献其首泾州平而原卒不能城又以诬杀刘晏朝野侧目李正己表请晏罪炎惧乃遣腹心分走诸道声言宣慰实自辩解言晏往尝附会奸邪谋立独孤妃为后帝自恶之非它过帝闻使中人复其言于正己还报信然于是帝意銜之未发也会卢■〈木巳〉入相炎进中书侍郎同秉政薄■〈木巳〉无学术且貌陋托疾不与会食■〈木巳〉阴恨之旧制舍人分押六曹以平奏报开元初废其职■〈木巳〉请复之炎固执不可■〈木巳〉益怒又密启主书过逐之炎谓当自治奈何相侵初炎赴召道经襄汉固劝梁崇义入朝不从后又使李舟驰说及其叛议者以为炎趣成之帝欲用淮西李希烈致讨炎曰希烈为李忠臣养子卒逐忠臣取其位此可以任乎居无尺寸功犹倔强不奉法设使平贼将何以制之帝不能平恚曰朕业许之不能食言遂用希烈又尝访羣臣可大任者■〈木巳〉荐张镒严郢炎举崔昭赵惠伯帝以炎谕议疏阔遂罢为尚书左仆射既谢对延英讫不至中书■〈木巳〉怒益欲中之【按炎罢相通鉴以李希烈军久不应■〈木巳〉密言希烈迁延以炎故也请暂免炎相以悦之建中实录又云会炎病请急累日上使中官就第宣谕旨翌日迁左仆射炎谒谢恩旨甚渥■〈木巳〉大惧与新旧书传颇异】先是严郢为京兆尹不附炎【详郢传】至是■〈木巳〉引为御史大夫炎子宏业赍赂狼籍郢按之并得它过赵惠伯前尹河南重价市炎第为官廨御史劾炎宰相抑吏私第贵取其直■〈木巳〉召大理正田晋评罪晋曰宰相于庶官比监临计羨利罪夺官■〈木巳〉怒谪晋衡州司马于是当监主自盗罪绞开元时萧嵩欲营曲江南立私庙以为天子临幸处乃止后炎复取以立庙飞语云地有

王气故炎取之帝闻震怒会狱具诏三司同覆贬炎崖州司马未至百里赐死年五十五
贬惠伯费州多田尉亦杀之初炎矫饬志节颇得名既
傅会元载时议薄之后得政柄果于用私睚眦必讎终以此及祸久之复其官谥肃愍左
丞孔戣驳之更曰平厉

庾准

庾准

庾准常州人父光先天宝中文部侍郎准以门荫入仕无学术以柔媚得幸于王缙
骤至中书舍人再迁尚书右丞缙得罪出为汝州刺史
复入为司农卿又善杨炎炎欲杀刘晏知准与晏有隙使为荆南节度晏既诬死引为尚
书左丞建中三年卒赠工部尚书

△严郢

严郢字叔敖华州华阴人父正海以吏更七郡终江南西道采访使郢及进士第补
协律郎守东都太庙祿山乱郢取神主秘于家至德初
定洛阳有司得以奉迎还庙擢大理司直吕諲镇江陵表为判官方士申泰芝 【旧书吕
諲传作申奉芝】 以术得幸肃宗妖幻诡众奸赃巨
万潭州刺史庞承鼎按治帝召还泰芝下承鼎江陵狱郢具言泰芝左道帝遣中人与諲
噪声有状帝不然之会郢入朝亟辨之帝怒卒杀承鼎
流郢建州 【按旧书吕諲传諲令郢鞫之諲上疏论其事肃宗怒流郢建州承鼎竟得雪
无郢入朝事承鼎得雪亦与此互异】 代宗初召郢
为监察御史联署帅府司马郭子仪表为关内河东副元帅府判官迁行军司马子仪镇
邠州檄郢主留务河中士卒不乐戍邠多逃还取渠首
尸之乃定岁余召至京师元载荐之帝时载得罪不见用御史大夫李栖筠亦荐郢帝曰
是元载所厚可乎答曰如郢材力陛下不自取而留为
奸人用邪即日拜河南尹水陆运使大厯末进拜京兆尹严明持法令疾恶抚穷敢诛杀
盗贼一衰减隶官匠丁数百十人号称职宰相杨炎请
屯田丰州发关辅民凿陵阳渠郢习朔边利病即奏朔方五城旧屯肥饶地自丧乱以来
十不垦一今若发二京关辅民于丰州浚渠营田计所
得不补所费而关辅之人不免流散是虚畿甸而无益军储也郢又请以凿渠粮俾旧屯
诸城夏贷冬输取渠工布帛给田者令据直转谷则关
辅免调发而屯田自辟炎不许渠卒不成御史台请天下断狱一切待报唯杀人偿死余
悉徙边郢言罪人徙边即流也流有三而一用之诚难
且杀人外犹有十恶今一例徙之法太轻不足禁恶若杂犯等悉与十恶同徙即又太重
况论徒者至广例不覆讞若悉待报正恐案牒填委章
程紊挠且边及近边若何为差请下有司更议炎恶异已阴讽御史张着劾郢匿发民浚

渠使怨归上系金吾长安中日数千人遮建福门讼郢
冤帝微知之削兼御史中丞人知郢得原皆迎拜会秋旱郢请蠲租税炎令度支御史按
覆以不实罢为大理卿炎之罢卢■〈木巳〉引郢为
御史大夫共谋炎罪即逮捕赵惠伯下狱楚掠惨棘锻成其罪天下以郢挟宰相报仇为
不直然■〈木巳〉内忌郢才因按蔡廷玉事出郢费
州刺史道逢枢宾问之或曰赵惠伯之宾郢内惭忽忽岁余卒【旧书卢■〈木巳〉传
云贬郢驩州刺史恐误】

△窦参

窦参字时中刑部尚书诞四世孙学律令为人矜严悻直果于断以荫累万年尉同
舍当夕直者闻亲疾惶遽参为代之会失囚京兆按直
簿劾其人参曰彼以不及谒而往参当坐乃贬江夏尉人皆义之迁奉先尉男子曹芬兄
弟隶北军醉殴其妹父救不止恚赴井死参当兄弟重
辟众请俟免丧参曰父繇子死若以丧延是杀父不坐皆榜杀之一县畏伏进大理司直
按江淮狱次扬州节度陈少游偃蹇不郊迎遣军吏致
问参厉辞譙让少游惭往谒参参不顾即去婺州刺史邓珽盗赃八千缗宰相右珽欲免
输其财诏百官集尚书省议多希意为助参独持法卒
输入之迁监察御史湖南判官马彝发部令赃千万令之子因权幸诬奏彝参往按直其
狱彝后佐曹王皋以干直闻者也入为御史中丞举劾
无回忌德宗数召见语天下事或决大议深器之多与宰相驳畏数为排却卒无以伤参
由是无所惮或率情制事矣时定百官班廩参尝为大
大理司直故多其入使在丞上恶詹事李升抑其班在诸府少尹下中外稍恶其专进兼户
部侍郎陈少游死子请袭封参大署省门曰少游位将
相以艰危易节上含垢不忍发其息容得传袭邪遂不敢求封而去神策将军孟华有战
功或诬以反龙武将军李建玉陷吐蕃自拔归部曲告
与虜通皆论死参悉理出之俄以中书侍郎同中书门下平章事领度支盐铁使每延英
对它相罢参必留以度支为言实专政也参无学术惟
树亲党以为耳目四方藩帅畏之淄青李纳厚参外示严畏阴赂左右毁短之参爱族子
申为给事中每除吏多访申申因得招赂漏禁密语故
申所至人目为喜鹊帝闻以戒参且曰是必为累不如斥之参以情诉曰臣无强子侄申
虽疏属保无它犯申竟不悛初陆贄与参不平申舅嗣
虢王则之与吴通元兄弟善共譖贄帝得奸逐申为道州司马不浹旬贬参郴州别驾【
旧书通元传参贬柳州司马申锦州司户】宣武刘
士宁饷参绢五千湖南观察使李巽以状闻帝大怒以为外交戎臣欲杀参贄以杀之大
重乃贬驩州司马子景伯配泉州女尼真如隶郴州没

入赀产奴婢帝又欲杀申则之及属人荣贄固争法有首从请贬荣远官申则之除名流岭南诏可时宦侍谤不已参竟赐死于邕州年六十而杖杀申免荣死诸寀并逐云

吴通玄

吴通玄

吴通玄海州人与弟通微皆博学父道瓘以道士诏授太子诸王经故通玄等太子待之甚善始通玄举神童补秘书正字又擢文辞清丽科调同州司户参军德宗立兄弟踵召为翰林学士顷之通微迁职方郎中通玄起居舍人并知制诰凡帝有譔述非通玄笔未尝嫌与陆贄吉中孚韦执谊并位贄文高有谋特为帝器遇且更险艰有功通玄等特以东宫恩旧进昵而不礼见贄骤擢颇媚恨贄自恃劲正屡短通玄于帝前又言承平时工艺书画之冗皆待诏翰林而无学士至德以来命集贤学士入禁中草书诏待进止于翰林院因以名官今四方无事制书职分宜归中书舍人请罢学士帝不许通玄怨日结谋夺其内职会贄权知兵部侍郎主贡举乃命为真贞元七年通玄拜谏议大夫自以久次当得中书舍人大怨望贄与寀参交恶参从子申从舅嗣虢王则之方为金吾将军故申介之使结通玄兄弟共危贄飞谤云贄试进士受贿谢帝恶诬构大怒罢参相逐则之昭州司马通玄泉州司马又通玄以宗室女为外妇帝以淫污近属自诘之不敢答赐死长城驿通微白衣待罪于门帝宥之内惧祸不敢行丧服

钦定续通志卷二百四十四

●钦定续通志卷二百四十五 列传四十五

列传

唐 【四十五】

○唐四十五

李栖筠【吉甫】

李勉

李墉【磻】

崔从【能】

李栖筠

李勉

李墉

崔从

△李栖筠

李栖筠字贞一世为赵人幼孤有远度庄重寡言体貌轩特喜书多所通晓为文章劲迅有体要不妄交游举进士擢高第调冠氏主簿太守李峴视若布衣交迁安西封常清节度判官表摄监察御史为行军司马肃宗驻灵武

发安西兵栖筠拣精卒七千赴难擢殿中侍御史李岷
与吕諲崔器为详理使岷表栖筠为判官多务平恕轻重以情故岷独得美誉出吕諲崔
器上迁吏部员外郎判南曹时大盗后选簿亡舛多伪
冒栖筠判析有条吏气夺号神明迁山南防御观察使会岷去相栖筠坐所善除太子中
允改河南令李光弼守河阳高其才引为行军司马兼
粮料使改绛州刺史累擢给事中进工部侍郎关中旧仰郑白二渠溉田而豪戚壅上游
取硃利且百所夺农用十七栖筠请皆撤毁岁得租二
百万元载忌之出为常州刺史岁仍旱编民死徙踵路栖筠为浚渠引江流灌田遂大稔
捕宿贼张度支党皆尽乃大起学校堂上画孝友传示
诸生为乡饮酒礼登歌降饮人人知劝以治行进银青光禄大夫封赞皇县子赐一子官
会光弼用平卢司马许杲讨平苏州寇方清杲恃功擅
留上元有窥江吴意朝廷以残创重起兵拜栖筠为浙西都团练观察使至则张设武备
遣辩士厚赍金币赏劳杲军以夺其谋杲惧悉众渡江
栖筠乃益增学庐表宿儒褚冲吴何员等为学官远迩趋慕又奏部豪姓多徙贯京兆河
南规脱徭科请量产出赋以杜奸谋诏可代宗厌元载
恣横欲引刚鲠大臣自助会御史大夫敬括卒即召栖筠与张延赏延赏先至遂代括俄
按李少良陆珽等上书劾载阴事依违称疾帝殊失望
出之拜栖筠御史大夫制麻自中以授外庭莫知也栖筠素方挺无所屈于是华原尉侯
莫陈怵 【安通鉴作美原尉未知孰是】 以优补长
安尉当参台栖筠物色其劳怵色动不能对乃自言为徐浩杜济辞邕所引三人者皆元
载党栖筠并劾之怵等皆坐贬自以任国风宪故事赐
百官宴曲江教坊倡颯杂侍谢不往台遂以为法素有相望帝因惮载辄止然有进用皆
密访焉多所补助时帝少刚断栖筠内忧愤卒年五十
八自为墓志敕赠吏部尚书谥文献栖筠喜奖善而乐人攻己短为天下士归重不敢斥
其名称赞皇公云子吉甫

李吉甫

李吉甫

吉甫字宏宪以荫补左司御率府仓曹参军贞元初为太常博士年尚少明练典故
昭德皇后崩恤礼废缺吉甫草具其仪德宗称善李泌
竊参器其才厚遇之累迁驾部员外郎及陆贄为相疑有党出为明州长史久之起为忠
州刺史时贄已谪忠州吉甫置怨与结欢人益重其量

【新书传云宰相欲害贄起吉甫为忠州刺史按旧传云吉甫遇赦迁忠州贄本传亦云
时吉甫量移忠州通鉴暨纲目并同从之】 六年不

徙官以疾免寻授柳州刺史迁饶州宪宗立拜考功郎中知制诰俄入翰林为学士迁中

书舍人刘辟拒命帝意讨之未决吉甫独请无置宜绝朝贡以折奸谋时李锜在浙西厚赂贵幸请用韩滉故事领盐铁又求宣歙吉甫奏言昔韦皋多蓄财故刘辟因以构乱锜不臣有萌若益以盐铁之饶采石之险是趣之反也帝悟乃以李巽为盐铁使高崇文围鹿头未下严砺请出并州兵与崇文趋果阆以攻渝合吉甫以为非是因言汉伐公孙述晋伐李势宋伐谯纵梁伐刘季连萧纪凡五攻蜀由江道者四宜起宣洪蕲鄂强弩兵直捣三峡则贼势必分首尾不救崇文惧舟师成功人有鬪志矣帝从之砺复请大臣为节度吉甫谏曰崇文功且成而又命帅不复尽力矣因请以西川授崇文而属砺东川使两相制由是崇文悉力刘辟平吐蕃遣使请寻盟吉甫议德宗初未得南诏故与吐蕃盟自异平寻归国吐蕃不敢犯塞诚许盟则南诏怨望边隙日生帝辞其使复请献滨塞亭障南北数千里求盟吉甫谋曰边境荒岨犬牙相吞边吏按图覆视且不能知今吐蕃绵山跨谷以数番纸而图千里起灵武着剑门要险之地所亡二三百所有得地之名而实丧之陛下将安用此帝乃诏谢赞普不纳张愔既得徐州帝又欲以濠泗二州还其军吉甫曰淮负泗饷道所会濠有涡口之险前日授建封几失形势今愔乃两廊壮士所立虽有善意未能制其众又使得淮涡阨东南走集忧未艾也乃止中书吏滑涣素厚中人刘光琦颇窃朝权四方赂遗交至吉甫劾其奸簿家货得数千万贬死雷州帝愈倚信元和二年拜中书侍郎同中书门下平章事吉甫在外十余年究知闾里疾苦常病方镇强恣至是上言使属郡刺史得自为或帝然之出郎吏十余人为刺史自王叔文时选任猥冒吉甫始簿其员人得叙进官无留才又度李锜必反劝帝召之使者三往以病解而多持金啖权贵至为锜游说者吉甫曰锜庸材而所畜乃亡命羣盗非有鬪志讨之必克帝意决复请起徐州兵为先锋诏汴州韩宏率兵为犄角则贼不战而溃从之锜众闻徐梁兵兴果斩锜降

【按通鉴元和二年李锜求入朝上许之锜实无行意复上表称疾帝以问宰相武元衡曰锜求朝得朝求止得止可否在锜何以令四海上以为然下诏征之锜诈穷遂谋反无吉甫劝帝召锜事又锜众执锜械送京师上御兴安门诘之锜无以对乃并其子师回腰斩之亦与新传斩锜降互异】

以功封赞皇县侯徙赵国公德宗以来姑息藩镇有终身不易地者吉甫为相岁余凡易三十六镇殿最分明三年上策试贤良方正直言极谏举人牛僧孺皇甫湜李宗闵皆指陈时政之失吉甫恶其直泣诉于上罢覆策学士裴垍王涯僧孺等久不调朋党自此始

【新唐书本传云裴一以尚书右仆射制度支结党倾执政会皇甫湜等对策指摘权强

用事者皆怒帝亦不悦均党因宣言殆执政使然右拾遗独孤郁李正辞等陈述本末帝乃解通鉴考异曰均等虽欲为谗若云执政自教举人诋时政之失岂近人情按僧孺与吉甫子德裕朋党分角起于对策诋毁之嫌如新书所云吉甫何嫌于僧孺殊非事实今依通鉴纂入】未几以检校兵部尚书兼中书侍郎平章事充淮南节度使

【新唐书本传吉甫本善窋羣羊士谔吕温荐羣为御史中丞羣即奏士谔侍御史温知杂事吉甫恨不先白持之久不决羣等衔之俄而吉甫病医者夜宿其第羣捕医者劾吉甫交通术士帝大骇讯之无状羣等皆贬而吉甫亦固乞免因荐裴垪自代乃出镇淮南考羣传武元衡举羣代己为中丞羣奏刑部郎中吕温羊士谔为御史吉甫以羊吕险躁持之数日不下羣等怒怨及吉甫出镇因失恩倾之乃捕术士陈登考劾构吉甫阴事密以上闻与本传异吉甫以士谔温为险躁非素所亲善可知窋羣劾吉甫交通术士若在出镇前不得云因失恩倾之又医者旧书作日者陈克明与羣传术士陈登亦不符三传互异似俱未足据又通鉴考异谓吉甫以诬构郑綱贬斥裴垪宪宗察见其情而疏簿之故出镇淮南亦属虚拟之辞今上纪吉甫出镇而不指其由以志阙疑】奏蠲逋租数百万筑富人固本二塘溉田且万顷又筑平津堰会江淮旱浙东西尤甚吉甫白以时救恤居三载每朝廷得失辄以闻六年裴垪病免复以前官召还秉政入对延英五刻始罢帝尊任之官而不名吉甫疾吏员广乃奏曰自秦至隋设官之多无如国家者天宝以后中原宿兵见在八十余万商贾僧道不服田亩者十有五六是常以三分劳筋苦骨之人奉七分坐待衣食之辈也今内外官以税钱给俸者不下万员天下或以一县之地而为州一乡之民而为县者甚众旧制一品月俸三千缗职田禄米不过千斛艰难以来增置使额厚给俸钱大历中权臣月俸至九千缗州无大小刺史皆千缗常袞为相始立限约李泌又量其闲剧随事加增然有名存职废或额去俸存请敕有司详定省吏员并州县减入仕之涂定俸给之数乃诏段平仲韦贯之许孟容李绛同详定省并内外官八百八员诸司流外千七百余人【本传省官八百员吏千四百员今依通鉴纲目】又奏收都畿佛祠田硲租入以宽贫民永昌公主薨有司请如德宗义阳故事起祠堂帝令减旧制之半吉甫曰德宗一切之恩不可为法昔汉章帝欲起邑屋于亲陵东平王苍以为不可故非礼之举人君所慎请裁置墓户以充守奉帝曰吾固疑其冗减之今果然然不欲取编民以官户奉坟而已吉甫再拜谢帝因言自今事有不

安者第言之无谓朕不能行也十六宅诸王既不出合诸女嫁不时选尚皆由中人厚为

财谢乃得遣吉甫奏自古尚主必慎择其人独近世不然帝乃下诏皆封县主令有司取门阀者配焉田季安疾甚吉甫请任薛平为义成节度使以重兵控邢洛因图上河北险要所在帝张于浴堂门壁每议河北事必指曰朕日按图信如卿料矣刘潼军屯普润数暴掠吉甫奏还泾原畿民赖之八年回鹘引兵自西城柳谷侵吐蕃塞下传言且入寇吉甫曰回鹘犯边当先绝和亲今不足虞也因请起夏州至天德复驿候十一区以通缓急发夏州精骑五百以护党项而已既而果边吏妄言六胡州在灵武部中开元时废之更置宥州以处降户寓治经略军宝应以来因循遂废吉甫请复之以备回鹘抚党项乃复置宥州治经略军取鄜城神策屯兵九千以实之又以江淮甲三十万给大原泽潞军增太原马千匹由是戎备完辑自蜀平帝锐意欲取淮西方吉甫在淮南闻吴少阳立上下携离自请徙寿州以天子命招怀之反闲以挠其党会朝廷方讨王承宗未暇也后田宏正以魏归吉甫知魏人谓田进诚才而唐州乃蔡喉襟请拔进诚为刺史以临贼境且慰魏心乌重胤守河阳吉甫以汝州扞蔽东都兵寡不足慑寇河阳宿兵本以制魏人今宏正归顺则河阳为内镇不宜屯重兵以示猜阻请徙屯汝州帝皆从之及元济擅立吉甫以内地无唇齿援因时可取不当用河朔故事与帝意合又请自往招元济苟逆志不悛得指授羣帅俘贼以献帝不许同请至流涕慰勉之会暴疾卒年五十七帝震悼赙外别赐缣五百恤其家自大敛至卒哭皆中人临吊吉甫图淮西地未及上帝敕其子献之及葬祭以少牢赠司空有司谥曰敬宪度支郎中张仲方驳之帝怒贬仲方更赐谥曰忠懿吉甫初为相颇洽时情及再辅政天下想望风采而稍修怨人心疑惮之尝讨论易象异义附于一行集注之下及缀录东汉魏周隋故事目为六代略凡三十卷分天下诸镇纪其山川险易故事各写其图于篇首号元和郡国图凡五十四卷又录当时户赋兵籍号国计簿凡十卷纂六典诸职为百司举要一卷皆奏上之子德修宝历中为膳部员外郎出为舒湖楚三州刺史卒次子德裕自有传 【按新书

转载裴一倾执政事与通鉴互异而后再云裴一左迁皆出其谋刺又与鉴合所称引一自代适相矛盾矣又通鉴称李绛忠鲠而吉甫媚顺如所云天下已太平陛下宜为乐及人臣不当强谏使君悦臣安等语则天下想望风采者何在又田季安卒鉴称吉甫请兴兵而李绛力争以为不必用兵宪宗竟用绛策则以重兵控邢洛云云似未可信考异于裴均事谓系德裕秉政掩先人之恶改定实录故旧传有此说然则史鉴互有异同恐本传不无溢美今综新旧二传存其可据者而略其不相合者以着阙疑之意

云尔】

△李勉

李勉字符卿郑惠王元懿曾孙父择言累为州刺史封安德郡公以吏治称张嘉贞为益州都督性简贵接部刺史倨甚择言守汉州独引同榻坐讲绎政事名重当时勉少喜学沈雅清整始调开封尉汴州水陆都会俗庞错号难治勉摧奸决隐为有名从肃宗于灵武擢监察御史时武臣崛起无法度大将管崇嗣背阙坐笑语哗纵勉劾不恭帝叹曰吾有勉乃知朝廷之尊迁司膳员外郎关东献俘百人将即死勉入见帝曰寇乱之污半天下欲澡心自归无繇如尽杀之是驱以助贼也帝驰骑完宥后归者日至累为河东王思礼朔方河东都统李国贞行军司马进梁州刺史勉假王晬南郑令晬为权幸所诬诏诛之勉曰方籍牧宰为人父母岂以谗杀良吏乎即拘晬为请得免晬后以推择为龙门令果有名羌浑奴刺寇州勉不能守召为大理少卿然天子素重其正擢太常少卿欲遂柄用而李辅国讽使下己勉不肯乃出为汾州刺史历河南尹徙江南观察使厉兵睦邻平贼屯部人父病以盂道埋木偶署勉名掘治验服勉曰是为其父则孝也纵不诛入为京兆尹兼御史大夫鱼朝恩领国子监威宠震赫前尹黎干谄事之须其入敕吏治数百人具以饷至是吏请勉不从寻拜岭南节度使番禺贼冯崇道桂州叛将朱济时等负险为乱残十余州勉遣将李观率容州刺史王翊讨斩之五岭平西南夷舶岁至纒四五讥视苛谨勉既廉洁又不暴征明年至者乃四千余柁居官久未尝拉饰器用车服后召归至石门尽搜家人所蓄犀珍投江中时人谓可继宋璟卢奂李朝隐部人叩阙请立碑颂德代宗许之进工部尚书封汧国公滑亳节度使令狐彰且死表勉为代从之勉居镇且八年以旧德方重不威而治诸帅暴桀者皆尊惮之田神玉死诏勉节度汴宋未行汴将李灵耀反魏将田悦以兵来叩汴而屯勉与李忠臣马燧合讨之淮西军据汴北河阳军壁其东大将杜如江尹伯良与悦战匡城不胜徙垒与灵耀合忠臣将军李重倩夜攻其营与河阳军合噪贼不阵溃脱走河北灵耀奔韦城为如江所擒勉缚以献斩阙下既而忠臣专汴故勉还滑台明年忠臣为麾下所逐复诏勉移治汴德宗立就加同中书门下平章事俄为汴宋滑亳河阳等道都统建中四年李希烈围襄城诏勉出兵救之帝又遣神策将刘德信以兵三千援接勉奏言贼以精兵攻襄城而许必虚令兵直捣许则襄围解不待报使其将唐汉臣与德信袭许未至数十里有诏诘让二将惧而还次扈润不设备为贼所乘杀伤什五輜械尽亡汉臣走汴德信走汝勉惧东都危复遣兵

四千往戍贼断其后不得归于是希烈自将攻勉勉气索婴守累月援莫至哀兵万人溃围出东保睢阳兴元元年勉固让都统以检校司徒平章事召既见帝素服待罪诏不许勉内愧取充位而已不敢有所与贞元初帝起卢■〈木巳〉为刺史袁高还诏不得下帝问勉曰众谓卢■

〈木巳〉奸邪朕顾不知谓何勉曰天下皆知而陛下独不知此所以为奸邪也时黷其对然自是益见疏居相二年辞位以太子太师罢卒年七十二赠太傅谥曰贞简勉少贫客梁宋与诸生共逆旅诸生疾且死出白金曰左右无知者幸君以此为我葬余自取之勉许诺既葬密置余金棺下后其家谒勉共启墓出金付之位将相所得奉赐悉遗亲党身没无赢藏其在朝廷鯁亮廉介为宗臣表礼贤下士有终始尝引李巡张参在幕府后二人卒至宴饮仍设虚位沃馈之遣戍兵常视其资粮春秋存问家室故能得人死力善鼓琴有所自制天下宝之乐家传响泉韵磬勉所爱者

△李墉

李墉字建侯江夏人北海太守邕之从孙大历中第进士又以书判高等补秘书省正字李怀光辟致幕府擢累监察御史怀光反墉与母妻陷焉因给怀光以兄病卧洛且革母欲往视怀光许可戒妻子无偕行墉私遣之怀光怒欲加罪谢曰墉籍在军不得随侍老母奈何不使妇往怀光止不问后与高郢密奏贼军虚实及所以攻取者德宗手诏褒答怀光觉严兵召二人问之墉词气不挠三军为感动怀光不杀囚之河中平马燧破械致礼表佐其府以言不用罢归洛中嗣曹王皋奏兼殿中侍御史辟致襄州幕府入为吏部员外郎徐州张建封卒兵乱囚监军迫建封子愔主军务帝以墉为宣慰使持节直入其军大会士喻以祸福出监军狱中使复其位众不敢动愔即上表谢罪称兵马留后墉曰非诏命安能辄称之削去乃受既还称旨迁郎中顺宗时进御史中丞宪宗立为京兆尹进尚书右丞元和初京师多盗贼复拜京兆尹以检校礼部尚书为凤翔陇右节度使未几移镇太原入为刑部尚书诸道盐铁转运使拜淮南节度使王师讨蔡方急李师道谋挠沮之墉以兵二万分压郢境贖饷不仰有司是时兵兴天子忧财乏使程异驰驿江淮讽诸道输货助军墉境内素富强即籍府库留一岁储余尽纳于朝诸道由是悉索以献先是吐突承璀为监军贵宠甚墉亦刚严素着差相敬惮未尝稍失承璀归数称荐之召拜门下侍郎同中书门下平章事墉不喜由宦幸进及出祖乐作泣下谓诸将曰吾老安外镇宰相岂吾任乎至京师不肯视事引疾固辞改户部尚书俄检校尚书左仆射兼太子宾客分

司东都以太子少傅致仕卒赠太子太保谥曰肃壙强直无私与杨凭穆质许孟容王仲舒友善皆以气自任而壙当官以峭法操下所至称治在淮南七年令行禁止其生杀擒擿一委军吏而参佐束手不得与人往往陷非法物议以此少之子棻 【旧书作柱】 仕历宗正卿京兆尹河东凤翔节度使以秘书监卒

李磻

李磻

棻子磻字景望大中末擢进士累迁户部郎中分司东都劾奏内围使郝景全不法事景全摘磻奏犯顺宗嫌名坐夺俸磻上疏辨之得不夺黄巢陷洛磻挟尚书八印走河阳时留守刘允章为贼胁遣人就磻索印拒不与允章悟亦不臣贼光启中避乱淮南嗣襄王伪诏至苦谏高骈勿受不纳王铎镇滑台杖策诣之铎表荐召入为中书舍人翰林学士干宝元年进礼部尚书同中书门下平章事时宰臣崔昭纬素疾磻讽刘崇鲁掠其麻哭之官磻怀奸不可相天子乃左授太子少傅磻自言为崇鲁诬汗书十一上不止议者讥其非大臣体昭宗素所器遇决意复用在位数月又罢为太子少师于是李茂贞王行瑜韩建拥兵阙下列磻罪杀之于都亭驿行瑜诛诏复官爵赠司徒谥曰文磻好学聚书至万卷世号李书楼所著文章及批注诸书传甚多子沆字东济有俊才亦遇害赠礼部员外郎

△崔从

崔从字子义国子司业融曾孙也少孤贫与兄能偕隐太原山中会岁饥拾橡实以饭讲学不废擢进士第辟山南严震府为推官以母丧免兄弟庐墓丧阙不应辟命久之韦皋引为西山运务使权知邛州事前刺史有以盗系狱辞已具从疑其冤纵不治俄得真盗皋卒刘辟反欲并东川从以书谕止辟辟怒攻之从乃募兵婴城守高崇文平辟从完州自如卢坦表为宣州副使入为殿中侍御史迁吏部员外郎异时吏给选者成牒以先后丐赍从一限出之后遂为法裴度为御史中丞奏以右司郎中知杂事度已相代为中丞弹治不屈权幸事系台阁而付仗内者必抗章论列请还有司荐引御史务取质重廉退者李邕以宠得京兆尹为庄宪太后山陵桥道使务以减末徭费为功至不治道輶车留渭桥久不得进从三劾之无少贷俄授陕虢观察使迁尚书右丞王承宗请割德棣而遣子入侍也宪宋选堪使者以命从议者谓承宗狠谲非单使可屈从次魏田宏正请以五百骑从辞之惟童骑十数疾趋镇集军士球场宣诏为陈逆顺大节祸福之效音辞畅厉士感动承宗自失貌愈

恭至泣下即按二州户口符印上之还为山南西道节度使帝欲遂相之监军使揣知为用事者求金从不肯答用是不得相长庆初繇尚书左丞领鄜坊节度属部多神策屯军数乱法骄横吏不能制从一绳以法下皆重足畏之党项互市羊马类先遗帅守从独不取而厚慰待之羌不敢盗境宝厯初为东都留守故事留司官入宫城门列晨衙见留守吏诞傲久废至是复行召拜户部尚书宰相李宗闵以从为裴度李德裕所善内不喜从求致仕除太子宾客分司东都告满百日去于是众哗语不平宗闵惧复授检校尚书左仆射淮南节度副大使知节度事扬州凡交易货产奴婢有贯率钱畜羊有口算又贸曲牟其赢以佐用度从皆蠲除之宫吏俸帛常加倍以给独节度使则否从皆与之同大和六年卒年七十二下有割股肉以祭者赠司空谥曰贞从为人严伟立朝棱棱有风望不喜交权利忠厚而让阶品当立门戟终不请位方镇内无声妓娱乐玩士大夫贤之

崔能

崔能

能字子才浑瑊以朔方军讨朱泚引佐幕府累迁黔中观察使以谗坐贬从为中丞奏以自代繇将作监授岭南节度使卒赠礼部尚书从子慎由安潜能子彦曾自有传

钦定续通志卷二百四十五

●钦定续通志卷二百四十六

列传

唐【四十六】

○唐四十六

王思礼 鲁炆 王难得【子颜用】 辛云京【京杲】 冯河清 李芑 李叔明【升】 曲环 王虔休 卢羣 李元素 卢士玫

王思礼

鲁炆

王难得

辛云京【辛京杲】

冯河清

李芑

李叔明

曲环

王虔休

卢羣

李元素

卢士玫

△王思礼

王思礼高丽人入居营州父为朔方军将思礼习战鬪从王忠嗣至河西与哥舒翰同为押衙及翰为陇右节度使思礼与中郎将周佖为翰押衙以功授右卫将军关西兵马使从讨九曲后期当斩临刑翰释之思礼徐曰死固分也何复贷为诸将壮之俄加金城郡太守安禄山反翰为元帅奏思礼兼太常卿充元帅府马军都将委以军事潼关失守思礼走行在肃宗责不坚守引至纛下将斩之宰相房管谏以为可收后效遂赦之寻副房管战便桥不利更为关内行营节度河西陇右伊西行营兵马使守武功贼安守忠来战思礼退保扶风长安平思礼先入清宫收东京战数有功迁兵部尚书封霍国公食实户五百寻兼潞沁等州节度干元元年总关中潞州行营兵三万骑八千与子仪围贼相州军溃惟思礼与李光弼两军独全寻破史思明别将万余众于直千岭光弼徙河阳代为河东节度副大使上元元年加司空自武德以来三公不居宰辅唯思礼而已二年薨赠太尉谥曰武烈思礼善守计短攻战然持法严整士不敢犯在太原器甲完精储粟至百万斛云 【思礼在太原储廩盈衍请输半以实京师事见邓景山传】

△鲁炅

鲁炅幽州蓟人长七尺余略通书史以荫补左羽林长上陇右节度使哥舒翰引为别将从破石堡城收河曲迁左武卫将军后复以破吐蕃跳荡功除右领军大将军安禄山反拜上洛太守将行于帝前画攻守势迁南阳太守兼守捉防御使封金乡公寻为山南节度使以岭南黔中山南东道子弟五万屯湓水南贼将武令珣毕思琛等击之众欲战炅不可贼右趋乘风纵火郁气奔营炅与中人辞道挺身走举众没贼收散兵保南阳潼关失守贼使哥舒翰招下不从使武令珣攻之令珣死田承嗣继往颍川来瑱襄阳魏仲犀合兵援炅炅城中食尽饿者相枕藉朝廷遣中使者曹日升宣慰加炅特进太仆卿不得入日升以十骑驰入城致命复以骑趋让阳领兵千由音声道运粮饷炅故炅得与贼相持踰三月炅被围凡一年昼夜战人相食卒无救至德二载五月乃率众突围走襄阳承嗣尾击炅殊死战二日斩获甚众贼引去俄拜御史大夫襄邓十州节度使会二京平贼走河北时襄汉数百里乡聚荡然举无樵烟初贼欲剽乱

江湖赖旻适扼其冲故南夏以完策勋封岐国公实封二百户干元元年又加淮西节度邓州刺史与九节度围安庆绪于相州旻领淮西襄阳两镇步卒万人骑三百明年与史思明战安阳王师不利旻中流矢辄奔诸节度溃去所过剽夺而旻军尤甚有诏来瑱节度淮西徙旻郑陈亳节度使至新郑闻郭子仪整军屯谷水李光弼还太原旻羞惧仰药死年五十七

△王难得

王难得沂州临沂人父思敬少隶军试太子宾客难得健武工骑射天宝初为河源军使吐蕃赞普子郎支都者恃驍敏乘名马宝钿鞍略阵挑战甚闲暇难得怒挟矛驰马直斩其首玄宗壮其果召见令殿前作刺贼状大悦赐锦袍金带累授金吾将军从哥舒翰击吐蕃至积石虜吐谷浑王子悉弄参及悉颊藏而还复收五桥拔树悖城进白水军使收九曲加特进肃宗在灵武军赏乏难得上家赀助军试卫尉卿俄领兴平军及凤翔兵马使收京师方战麾下士失马难得驰救矢着眉披肤鄣目乃拔箭断肤殊死前鬪血蔑不己帝嘉之从郭子仪攻相州累封琅邪郡公为英武军使宝应二年卒赠潞州大都督

王子颜

王用

王子颜

王子颜少从父征讨检校卫尉卿生庄宪太后元和元年宪宗朝南宫乃褒赠思敬为司徒难得太尉子颜太师唯子颜子用及封

王用

用字师柔拜太子詹事纔三月封太原郡公掌厩苑累迁检校左散骑常侍兼右金吾大将军谦畏无过卒赠工部尚书

△辛云京 【辛京杲】

辛云京兰州金城人客籍京兆世为将家云京有胆决常冠军积功迁特进太常卿史思明屯相州云京以锐兵四千袭滏阳追破其众至浪井授开府仪同三司加代州都督镇北兵马使太原军乱帝恶邓景山绳下无渐以云京性沈毅因授太原尹进封金城郡王 【按肃宗纪宝应元年建卯月癸丑河东军乱杀其节度邓景山都知兵马使辛云京自称节度使又邓景山传云景山遇害肃宗不复究验遣使谕抚其军中请云京为节度使诏可据此盖云京自立之后以军中之情请诸朝非帝特授也本传恐误】 云京治谨于法军中畏而信之回纥恃旧勋

每入朝所在暴钞至太原不敢惕息数年太原大治加检校尚书右仆射同中书门下平

章事大历三年检校左仆射卒年五十五代宗为发哀流涕赠太尉谥曰忠献从弟京杲信安王祎节度朔方京杲与弟旻以策千说祎后从李光弼出井陘先驱战嘉山尤力累迁鸿胪卿召为英武军使代宗立封庸国公迁左金吾卫大将军进晋昌郡王历湖南观察使【按京杲为湖南观察使贪虐使部将王国良戍武冈赖其富即劾以死国良恐据县反事见嗣曹王皋及西原蛮传又尝私怒部曲杀之有司劾当死赖李忠臣救得释事见李忠臣传而京杲本传俱不载】后为工部尚书致仕朱泚盗京师以老病不能从西向恸而卒赠太子少保旻亦从光弼定恒赵后署太原三贼使史思明屯相军及滏阳旻逆击走之东都陷退守河阳卒于屯云京曾孙说别传

△冯河清

冯河清京兆人始隶郭子仪军以战多拜左卫大将军后从泾原节度使马璘充兵马使数以偏师与吐蕃遇建中时节度使姚令言率兵讨关东以河清知留后幕府殿中侍御史姚况领州而行师过阙有急变德宗走奉天河清况闻问召诸将计事东向哭相励以忠发储铠完仗百余乘献行在初帝之出六军仓卒无良兵士气沮及河清输械至被坚勒兵军声大振即拜河清泾原节度使安定郡王况行军司马朱泚数遣谍人誅之河清辄斩以徇兴元元年浑瑊以吐蕃兵败贼韩旻等泾人妄传吐蕃有功将以叛卒孥与赀归之众大恐且言不杀冯公吾等无类矣田希鉴遂害河清况挺身还乡里京师平赠河清尚书左仆射拜况太子中舍人况性简退未尝言功属岁凶奉稍不自给以饥死河清再赠太子少傅

△李芑

李芑字茂初赵州人解褐上邽主簿严武为京兆尹荐补长安尉李勉观察江西表署判官永泰初宣饶剧贼方清陈庄西绝江劫商旅支党盘结芑请以秋浦置州扼使不得合勉奏以宣之秋浦青阳饶之至德置池州即诏芑行州事魏少游代勉表署都团练副使摄江州刺史勉节度永平复辟幕府会李灵耀反署芑兼亳州防御使护陈颍饒道德宗立授河阳三城镇遏使未几拜节度使以东畿汜水等五县隶属与马燧等破田悦洹水上以功检校兵部尚书实封百户进围悦悦将符璘以骑五百降兴元初检校尚书右仆射以疾将请老谓所亲曰岁方旱蝗上厌征伐天下城垒坚戈鋌利然务以力胜其可尽乎救敝者莫若德方镇之臣宜先退让死权錡禄吾敢哉言而不践非吾志也固求罢归东都卒年六十四赠太子太保

△李叔明

李叔明字晋闻州新政人本鲜于氏仲通之弟也擢明经为杨国忠剑南判官干元中除司勋员外郎副汉中王瑀使回纥回纥遇瑀慢叔明让之可汗为如礼复命迁司门郎中东都平拜洛阳令招徕遗民号能吏擢商州刺史上津转运使迁京兆尹民歌其德久之以疾辞除太子右庶子崔旰扰成都出为邛州刺史旰入朝即拜东川节度使遂州刺史徙治梓州大历末表乞宗姓列属籍代宗从之建中初吐蕃袭火井掠龙州陷扶文远三州叔明分五将邀击走之加检校户部尚书梁崇义阻命诏引兵下峡战荆门败其众襄州平迁检校尚书左仆射德宗幸兴元出家赀助军悉衣币献宫掖加太子太傅封蓊国公初东川承兵盗乡邑雕破叔明治之二十年抚接有方华裔遂安后朝京师以病足赐锦鞶令宦士肩舁以见拜尚书右仆射乞骸骨改太子太傅致仕贞元三年卒谥曰襄叔明素恶道佛之弊上言请本道定寺为三等观为二等上寺留僧二十一上观道士十四每等降杀以七皆择有行者余还为民德宗善之以为不止本道可行下尚书省杂议都官员外郎彭偃请僧道士年未五十者输绢四尼及女冠输绢二杂役与民同之过五十者免刑部员外郎裴伯请僧道士一切限年六十四以上尼女冠四十九以上许在道余悉还为编民官为计口授地收废寺观以为庐舍议虽上罢之

李升

李升

子升【通鉴作升】以少卿从德宗梁州叔明严敕以死报故升有功擢禁军将军贞元初迁太子詹事坐郾国公主贬罗州别驾叔明素豪侈在蜀殖财广第舍田产歿数年子孙骄纵贖产皆尽世言多藏者以叔明为鉴云

△曲环

曲环陕州安邑人客陇右少喜兵法资勇敢善骑射天宝中从哥舒翰讨吐蕃拔石堡取黄河九曲洪济等城授果毅别将安禄山反从鲁灵守邓州与贼武令珣战尤力加左清道率从李抱玉屯河阳又自将兵守泽州破贼锐将安晓拜羽林将军与诸将讨史朝义平河北累转金吾大将军大历中戍陇州数破吐蕃以功兼太常卿德宗初吐蕃寇剑南诏环以邠陇兵五千驰救收七盘城威武军维茂等州吐蕃破走威名大振加太子宾客赐名马豫讨泾州刘文喜迁开府仪同三司封晋昌郡王邠陇兵马使时李纳逼徐州环与刘元佐救之败其众功最建中三年擢邠陇行营节度使李希烈陷汴州环守盩厔战陈州斩贼三万五千级禽其将翟崇晖进检校工部尚书兼陈州刺史希烈平改陈许节度

赐封三百户二州比为寇冲民苦剽卤客他县环勤身节用宽赋敛简条教不三岁归者襁系训农治兵谷食丰衍转检校尚书左仆射贞元十五年卒年七十四赠司空

△王虔休

王虔休字君佐汝州梁人少涉学有材武以信义为乡党畏慕大历中刺史李深署为裨将泽潞李抱真闻其名厚以币招之授兵马使抱真讨河北战双冈临洛虔休功多擢步军都虞候封同昌郡王实封五十户抱真卒一军思乱虔休折其邪谋众服其言得不乱德宗嘉之以邕王为昭义节度大使擢虔休潞州左司马领留后本名延贵至是赐名号令抚循军中大治初抱真之丧军司马元谊据洺州叛虔休遣将李廷芝讨之谊出奔魏治潞二岁迁昭义节度使检校工部尚书始属城州县守宰多署他职不亲政故治苟简虔休悉增俸廩遣就部人以妥安卒年六十二赠尚书左仆射谥曰敬

△卢羣

卢羣字载初系出范阳少学于垂山淮南陈少游闻其名奏署幕府已而荐诸朝李希烈反以监察御史为江西行营粮料使嗣曹王皋节度江西奏为判官皋徙荆襄皆从其府以劲正闻入为侍御史累迁兵部郎中淮西吴少诚擅决司洧水溉田使者止之不奉诏命羣临诘少诚曰是于人有利羣曰臣道贵顺恭恪所以为顺也专命废顺虽利何有且怠于事上者固不能责其下矣少诚听命羣又为陈古今成败事少诚竦然以奉使称旨迁检校秘书监郑滑节度行军司马姚南仲入朝即以羣代节度卒年五十九赠工部尚书

△李元素

李元素字太仆邢国公密裔孙仕为御史东都留守杜亚恶大将令狐运会盗劫输绢于洛北运适与其下畋近郊亚疑而讯之掠服死者甚众诏监察御史杨窳覆验事皆不讎亚怒劾窳罔上窳抵罪宰相以狱大宜审奏请覆之诏元素与刑部员外郎崔从质大理司直卢士瞻驰按亚以狱成告元素徐察其冤悉纵所囚以还亚复劾元素比元素还帝已怒奏狱未毕帝曰出元素曰臣言有所未尽帝曰第去元素曰臣以御史按狱知冤不得尽辞是无容复见陛下帝意解即道运冤状帝感悟后岁余齐抗得真盗由是天下重之迁给事中会郑滑节度使卢羣卒拜元素检校工部尚书节度其军治有异绩元和初召为御史大夫中外企听风采既而一不建为人人失望李錡反拜浙西节度使数月还为国子祭酒进户部尚书判度支元素少孤奉长姊谨悌及没裴哽成疾因辞职屏居再娶

妻王氏方庆之孙性柔弱元素为郎官时甚礼重及贵溺情姬侍遂不见答且又无子而前妻之子已长无良及寝疾昏惑听谮出之王诉诸朝诏免元素官且令畀王赀五百万卒赠陕州大都督

△卢士玫

卢士玫者山东人以交儒进端厚无竞为吏部员外郎善于职再迁知京兆尹刘总入朝与士玫故内姻乃请析瀛郑两州用士玫为观察使诏可俄而幽州乱朱克融袭之朝廷欲重其任就加节度使士玫空家赀助军然部卒多家幽州阴导克融入故士玫阖府皆见囚幽州及雪克融始得还以太子宾客分司东都除虢州刺史复为宾客卒赠工部尚书

钦定续通志卷二百四十六

●钦定续通志卷二百四十七 列传四十七

列传

唐【四十七】

○唐四十七

令狐彰【建】 张孝忠【茂宗 茂知茂昭 陈楚】 康日知【志睦承训】 李洧 刘雍 田宏正【布羣牟】 王承元 牛元翼【傅良弼】 史孝章【宪忠】

令狐彰

张孝忠

康日知

李洧

刘雍

田宏正

王承元

牛元翼

史孝章

△令狐彰

令狐彰字伯阳京兆富平人志胆沈果知书传大义射命中从安禄山天宝中署左卫郎将禄山叛与张通儒入长安伪署左街使二京平走河朔史思明署博滑二州刺史屯滑台既而反正因监军杨万定以闻自禄山构逆未有举州向化者肃宗大悦拜滑毫魏博节度使河朔平加兼御史大夫封霍国公检校尚书右仆射始滑当寇冲城邑墟榛彰躬训吏下检军力农遣士防秋自赍粮所过无秋毫犯然猜阻伎忍忤者辄死与鱼朝思有隙及用事彰不敢入朝会母丧失明卒方疾甚敕子建通运归东都私

第悉上军府兵仗财用簿最表吏部尚书刘宴工部尚书李勉堪大事请以自代代宗得表咨悼下诏褒美闾赠太傅

令狐建

令狐建

建累官右龙武军使德宗幸奉天建方肄射遂以四百人殿擢行在中军鼓角使左神武军大将军其妻成德节度使李实臣女也建将弃之诬与门下客郭士伦通榜杀士伦而逐其妻宝臣请劾案无状建会赦免俄起为右领军大将军复坐专杀以勋贷坐妄自陈贬施州别驾卒赠右领军大将军又加赠扬州大都督宪宗时讨蔡用李吉甫言以彰前遣子受代授建弟通赞善大夫运徙寿州团练使以昭彰之忠且风蔡通惧贼不敢战贬昭州司户参军事终左卫大将军运为东都留守将为杜亚所陷流死归州

△张孝忠

张孝忠本奚种世为乙失活酋长父谧纳款授鸿胪卿孝忠以勇闻燕赵闲性宽裕事亲孝天宝末以善射供奉仗内安禄山奏为偏将破九姓突厥以功擢漳源府折冲安史再陷河洛常为贼前锋朝义败乃自归授左领军将军以兵属李宝臣累加左金吾卫将军宝臣待之厚奏为易州都督分精骑七千当幽州擢太子宾客封符阳郡王宝臣晚节稍忌刻召欲杀之孝忠不往会病死子惟岳擅立诏朱滔以幽州兵讨之滔忌孝忠善战虑师出为己思使判官蔡雄说以顺逆孝忠即遣将程华报滔连和遣录事参军事董稹入朝德宗嘉之擢检校工部尚书成德军节度使令与滔并力败惟岳于束鹿滔欲乘胜袭恒州孝忠乃引军西北壁义丰滔疑之孝忠将佐谏曰尚书推赤心于朱司徒可谓至矣今逆贼已溃元功不终后且悔之孝忠曰本求破贼贼已破矣而恒州多宿将追之则死鬪缓之则改图且滔言大而识浅可以虑始难与守成故吾坚壁于此以待贼之灭耳滔亦止屯束鹿月余王武俊果斩惟岳以献已而定州刺史杨政义以州降孝忠遂有易定时三分成德地诏定州置军名义武以孝忠为节度易定沧等州观察使后滔与武俊叛复遣蔡雄说之答曰吾业已效忠不复助恶矣乃浚沟垒修器械厉士乘城固守滔悉兵攻之帝诏李晟窦文场率师援孝忠滔解去孝忠因与晟结婚天子出奉天孝忠遣将赴难佐晟收京师兴元初诏同中书门下平章事贞元二年河北蝗民饿死如积孝忠与共下同粗淡日膳裁豆■〈豆昔〉而已人服其俭推为贤将明年检校司空诏其子茂宗尚义章公主卒年六十二追封上谷郡王赠太师谥曰贞武子茂昭茂宗茂和

张茂宗

张茂和

张茂昭

陈楚

张茂宗

茂宗擢累光禄少卿左卫将军元和中厯闲厯使宝厯初迁兗海节度使终左龙武统军

张茂和

茂和厯左武卫将军裴度讨蔡奏为都押衙茂和数以胆勇求自试谓度无功辞不行度请斩之以令军宪宗曰予以其家忠且孝为卿远斥后终诸卫将军

张茂昭

茂昭本名升云德宗时赐今名字丰明少沈毅颇通书传孝忠时累擢检校工部尚书孝忠卒帝拜邕王谅为义武军节度大使以茂昭为留后封延德郡王后二年为节度使久之入朝为帝从容言河朔事帝竦听曰恨见卿晚召宴麟德殿赐良马甲第器币优具诏其子克礼尚晋康郡主帝方倚之经置北方会崩故茂昭每入临辄哀不自胜顺宗立进同中书门下平章事复遣之镇宪宗元和二年请朝五奏乃听愿留不许加兼太子太保既还王承宗叛诏河东河中振武义武合军为恒州北道招讨茂昭治廩厯列亭候平易道路以待西平军承宗以骑二万踰木刀沟薄王师茂昭躬擐甲为前锋令其子克让从子克俭与诸军分左右翼绕贼大败之会有诏班师加检校太尉兼太子太傅乃请举宗还朝表数上帝乃许北镇遣客闲说皆不纳诏左庶子任迪简为行军司马乘驿往代茂昭奉两州符节管钥图籍归之先敕妻子道戒曰吾使而曹出易庶后世不为污俗所染未半道迎拜兼中书令充河中晋绛慈隰节度使至京师双日开延英对五刻罢又表迁坟墓于京兆许之明年疽发于首卒年五十册赠太师谥曰献武

陈楚

陈楚者茂昭甥也字材卿定州人有武干事茂昭厯牙将常统精卒从征伐茂昭入朝擢诸卫大将军封晋宁郡王元和末义武节度使浑镐丧师定州乱拜楚节度使驰传赴军及郊无迎者左右劝无入楚曰定军不来迎以试我今不入正堕计中乃冒雪行四十里夜入其州众心乃定徙河阳三城入为左羽林统军检校司空卒年六十一赠司空子君奕亦凤翔节度使

△康日知

康日知灵州人少事李惟岳擢累赵州刺史惟岳叛日知与别驾李濯及部将百人啐牲血共盟固州自归惟岳怒遣先锋兵马使王武俊攻之日知使客谢武俊陈顺逆形势劝自拔武俊悟引兵还斩惟岳以献德宗美其谋擢为深赵观察使赐实封户二百会武俊拒命遣将张锺葵攻赵州日知破之上俘京师兴元元年以深赵益成德徙日知奉诚军节度使又徙晋绛累加检校尚书左仆射封会稽郡王贞元初卒赠太子太师

康志睦

康承训

康志睦

子志睦字得众资赳伟工驰射隶右神策军迁累大将军讨张部以功兼御史大夫进平卢军节度使李同捷反略千乘志睦挫其锐遂下薄台尽夺其械加检校尚书左仆射徙泾原封会稽郡公卒年五十七赠司空

康承训

子承训字敬辞推门功累进左神武军将军宣宗擢为天德军防御使军中服其威政诏检校工部尚书封会稽县男擢义武节度会南诏破安南诏徙岭南西道城邕州合容管经略使隶之遂统诸军行营兵马南诏深入承训分兵六道出战不利士死十八唯天平卒二千还屯闾军震副使李行素帅众治濠栅甫毕南诏围之四日或请夜出兵袭蛮承训意索不听天平裨将阴募勇儿三百夜缒烧蛮屯斩首五百【按通鉴诸将请分道斫蛮承训不许有天平小校再三力争乃许之】南诏恐明日解而去承训谬言大破贼告于朝加检校尚书右仆射籍子弟媼昵冒赏而士不及怨言嚙流【谨按通鉴辑览御批承训先事无料敌之智临事无应变之才赖天平小校力争出奇致胜顾冒功掠美亲昵皆滥膺爵赏而庸庸转不晋一阶其何以使军士奋勇效命然彼时懿宗独何为者哉】岭南东道节度使韦宙白宰相承训惭移疾授右武卫大将军分司东都咸通中南诏复盗边武懿戍兵作乱推粮料判官庞勋为长还陷徐州乃拜承训检校尚书右仆射义成军节度使徐四行营都招讨使率魏博鄆延义武凤翔沙陀吐浑兵二十万讨之凡一年庞勋平【按彭门之乱为唐季大事宿兵年余仅乃授首王仙芝黄巢即继之以起唐书不传庞勋而附见于承训传内事伙文繁不分客主猝难寻究今别于叛臣内为勋专传采承训传及通鉴之文以成之】

】承训迁检校左仆射同中书门下平章事徙节度河东于是宰相路岩韦保衡劾承训

讨贼逗挠贪卤获不时上功贬蜀王傅分司东都再贬

恩州司马僖宗立授左千牛卫大将军卒年六十六子传业尝从父征伐终鄜坊节度使

△李洧

李洧者淄青节度使正己从父兄也始署徐州刺史建中初正己卒子纳叛攻宋州洧挈州自归加兼御史大夫封潮阳郡王实封户二百

充招谕使初洧遣巡官崔程入朝且白宰相徐州不足独抗贼得海沂为节度可与成功洧素与二州刺史有约且不肯为贼守程先咨张镒而

卢■〈木巳〉怒不先白故中格及纳攻徐刘玄佐与诸将击退之既贼方张乃加洧徐海沂密观察使时海密为贼守不受命洧未大以取之

迁检校户部尚书会疽发背少闲肩舆过市市人叫欢洧惊疽溃卒赠尚书左仆射以洧将高承宗代之其弟淡险人也耻居下阴约纳攻徐为

内应并说滕将翟济济执以闻擢济沂州刺史召淡入京师以洧赦不罪

△刘潼

刘潼卢龙节度使怵之次子济母弟也涉书史有材武好施爱士能得人死力始事朱滔常陈君臣大义裁抑其凶及怵得幽州不三月病

且死潼侍汤液未尝离以父命召济于莫州济嗣总军事故德潼之让以为瀛州刺史许代已久之济自用其子为副大使潼因请以所部为天

子戍陇悉发其兵千五百驰归京师无一卒敢违令者 【德宗纪贞元八年十一月幽州卢龙军节度使刘济及其弟瀛州刺史潼战于瀛州

潼败奔于京师吴缜曰与本传全异未知孰是】 德宗甚宠之拜秦州刺史屯普润军中不设音乐士卒病亲存问所欲死则哭之宪宗立方士

罗令则诣潼营妄言废立潼械送阙下杀之录功号其军曰保义蕃戎畏慑不敢入寇常忼然有复河湟志屡为朝廷言未见省累封彭城郡公

及病籍士马求代既还卒于道年四十九赠尚书右仆射谥曰景

△田宏正

田宏正字安道父廷玠尚儒学不乐军旅与承嗣为从昆弟仕为平舒丞迁乐寿清池束城河闲四县令以治称迁沧州刺史李宝臣朱滔

与承嗣不协合兵围沧州廷玠固守连年食尽无叛者朝廷嘉其节徙相州承嗣盗磁相廷玠无所回染及悦代立忌廷玠之正召为节度副使

珽玠至称疾不出悦过谢之杜门不纳愤而卒宏正幼通兵法善骑射承嗣爱之以为必兴吾宗名之曰兴季安时为衙内兵马使同节度副使

封沂国公后忌其正出为临清镇将欲因罪诛之宏正阳痹痼卧家不出乃免季安死子怀谏袭召还旧职怀谏委政于家奴蒋士则措置不平

众怒咸曰兵马使吾帅也牙兵即诣其家迎之宏正拒不纳众哗于门宏正出众拜之胁

还府宏正顿于地度不免即令于军曰尔属不以吾不肖使主军今与公等约能听命否皆曰唯公命因曰吾欲守天子法举六州版籍请吏于朝苟天子未命敢有请吾旗帜者死杀掠人者死皆曰诺遂到府杀士则及支党十余人于是图魏博相卫贝澶之地籍其入以献不敢署僚属而待王官宪宗美其诚诏检校工部尚书充魏博节度使又遣司封郎中知制诰裴度宣慰度明辩具陈朝廷厚意宏正不觉自失乃深相结纳奉上益谨复请度徧行其部宣示天子恩诏因令节度金谋布衣崔欢奉表陈谢且言欲变山东承袭旧风然后退归邱园避贤者路死不恨制诏褒答且赐今名天子讨蔡宏正遣子布以兵三千进战数有功李师道疑其袭已不敢显助蔡故元济失援王师得致诛焉王承宗叛诏宏正以全师压境破其众南宮承宗惧归穷于宏正宏正表诸朝遂献德棣二州以谢纳二子为质俄而李师道拒命诏宏正与宣武等五节度兵进讨宏正自杨刘渡河距郛四十里坚壁师道大将刘悟率精兵屯河东战阳谷再遇再北斩万余级贼势蹙悟乃反兵斩师道首诣宏正降取十有二州以献以功加宏正检校司徒同中书门下平章事是岁来朝对麟德殿眷劳殊等引见僚佐将校二百余人皆有班赐进兼侍中实封户三百擢其兄融为太子宾客东都留司宏正数上表固请留阙下帝不许遂还悉遣子姓仕朝廷帝皆擢任之穆宗立王承元以成德军请帅帝诏宏正兼中书令为节度使宏正以新与镇人战有父兄怨取魏兵二千自卫入其军时天子赐钱一百万缗不时至军有怨言宏正亲加抚喻乃安仍请留魏兵为纪纲以持众心度支崔俊齐其禀沮却之长庆元年七月归卫兵于魏是月军乱并家属将吏三百余人皆遇害年五十八帝闻震悼册赠太尉谥曰忠愍子布羣牟

田布

田羣

田牟

田布

布字敦礼幼机悟宏正戍临清布知季安且危密白父请以众归朝宏正奇之及得魏使布总亲兵王师诛蔡以军隶严绶屯唐州凡十八战破凌云柵下郾城以功授御史中丞蔡平入为左金吾卫将军谏官尝论事帝前同列将麾却之布止曰使天子容直臣毋轻进宏正徙成德以布为河阳节度使父子同日受命布所至必省冗将募战卒宽赋劝穡人皆安之长庆初徙泾原宏正遇害魏博节度使李愬病不能军公卿议以魏强而镇弱且魏人素德宏正以布之贤而世其官可以成功穆宗遽召布解纁拜

检校工部尚书魏博节度使乘传以行布号泣固辞不
听乃出伎乐与妻子宾客决曰吾不还矣未至魏三十里跣行披发号哭而入居堊室屏
节旄凡将士老者兄事之禄奉月百万一不入私门又
发家钱十余万缗颁士卒以牙将史宪诚出麾下可任乃委以精锐时中人屡趣战而度
支馈饷不继布辄以六州租赋给军引兵三万进屯南
宫破贼二垒于是朱克融据幽州与王廷凑唇齿河朔三镇旧连衡桀骜自私而宪诚蓄
异志阴欲乘衅又魏军骄惮格战会大雪师寒粮乏军
中谤沸宪诚得闲因以摇乱会有诏分布军合李光颜救深州兵怒不肯东众遂溃皆归
宪诚唯中军不动布以中军还魏明日会诸将议事众
哗曰公能行河朔旧事则生死从公不然不可以战布度众且乱叹曰功无成矣即为书
谢帝曰臣观众意终且负国臣无功不敢忘死哭授其
从事李石讫乃入至几筵引刀刺心曰上以谢君父下以示三军言讫而绝年三十八赠
尚书右仆射谥曰孝子鑑在宥鑑宣宗时历银州刺史
坐以私铠易边马论死宰相崔铉奏布死节可贷鑑以劝忠烈故贬为州司马在宥大中
年为安南都护颇立边功

田羣

羣会昌中历蔡州刺史坐赃且抵死兄肇闻之不食卒宰相李德裕奏汉河闲人尹
次颖川人史玉坐杀人当死次兄初玉母浑诣官请代
因缢于时皆赦其死于是武宗诏减死一等

田牟

牟宽厚明吏治为神策大将军开成初盐州刺史王宰失羌人和诏牟代之累迁鄜
坊节度使再徙天平三为武宁一为灵武军至检校尚
书左仆射卒诸子皆有方面功以忠义为当世所高

△王承元

王承元者承宗弟也有沈谋年十六劝承宗亟引兵共讨李师道承宗少之不用然
军中往往指目之承宗死未发丧大将谋取帅他姓参
谋崔燧与诸校计以祖母凉国夫人李氏命承元嗣承元泣拜不受诸将牢请承元曰帝
使中贵人监军盍先请监军至又如命乃谢曰诸君不
忘王氏以及孺子苟有令其从我乎众曰惟所令遂于衙门都将所视事约左右不得称
留后事一关参佐密表请帅于朝穆宗诏起居舍人栢
耆宣慰授承元检校工部尚书义成军节度使北镇以两河故事胁诱承元不纳诸将皆
悔耆至士哭于军承元令曰诸君不欲我去意固善虽
然格天子诏我获罪奈何前李师道有诏赦死欲举族西诸将止弗遣他曰乃共杀之今
君等幸置我无与师道比乃徧拜诸将诸将语塞承元

即出家费尽赐之斩不从命者十辈军乃定入朝昆弟拜刺史者四人位于朝者四十人
祖母入见帝命中宫礼赉异等徙承元鄜坊丹延节度
俄徙凤翔凤翔右袤泾原地平少岩险吐蕃数入盗承元据胜地为鄣置守兵千诏号临
汧城以劳封岐国公五年徙节平卢淄青始盐禁未尝
行两河承元请归有司由是兖郛诸镇皆奉法承元资仁裕所至爱利卒年三十三赠司
徒

△牛元翼

牛元翼赵州人材果而谋王承宗时倚其计为强雄与傅良弼二人冠诸将王廷凑
叛穆宗以元翼在成德名出廷凑远甚自深州刺史擢
为深冀节度使以携其军廷凑怒遣部将王位以锐兵攻元翼不胜乃合朱克融共围之
诏进元翼成德军节度使以宣武兵五百进援元翼固
守长庆二年诏赦廷凑罪徙元翼山南东道以深州赐廷凑使中人促元翼南廷凑恨之
已受诏兵不解招讨使裴度谄书谗让克融解而归廷
凑退舍诏并加检校工部尚书两悦之淹月元翼率十余骑冒围出朝京师廷凑入尽杀
元翼亲将臧平等百八十人元翼见延英赉问优缛命
中人杨再昌取其家廷凑辞以须秋遣元翼闻平等死愤恚卒悉还所赐于朝廷凑遂夷
其家

傅良弼

傅良弼

傅良弼字安道清河人以射冠军中初瀛之博野乐寿介范阳成德闲每兵交先薄
二城故常为剧屯德宗以王武俊破朱滔功皆隶成德
故以良弼守乐寿李寰守博野廷凑之叛两贼交诱之而坚壁为国固守有诏以乐寿为
左神策行营拜良弼为都知兵马使寰所领土隶右神
策号沂州营亦以寰为都知兵马使赐第京师俄以良弼为沂州刺史良弼率众出力战
乃得去寰引兵三千趋沂州廷凑邀之寰斩三百级追
者不敢前天子以良弼寰忠有状乃更赐奴婢服马召良弼为左神策军将军宝历初擢
夏绥银节度使异时蕃帐亡命来者必偿马乃与良弼
至皆执付其部酋种欢怀终横海节度使寰累擢保义军节度使后授夏绥宥节度使卒

△史孝章

史孝章字得仁资修谨退让如诸生魏博节度使李愬奇之檄试都督府参军父宪
诚得魏迁士曹参军孝章见父数奸命内非之尝雪涕
陈逆顺朝廷闻而喜之授孝章节度副使累迁检校左散骑常侍进检校工部尚书寻入
朝劳予蕃厚宪诚亦上书求覲帝知非宪诚意特录孝
章悟发故分相卫澶而授孝章节度使未至魏人乱父死于军帝念史氏祸而恤孝章故

夺丧拜右金吾卫将军徙节度鄜坊进检校户部尚书

久之自邠窳以病丐还卒于行年三十九赠尚书右仆射孝章本名唐后改今名

史宪忠

史宪忠

宪诚弟宪忠字符贞少为魏牙门将田宏正讨齐蔡常为先锋阅三十战中流矢酣鬪不解由是著名宪诚表为贝州刺史魏乱奔京师加累检校右散骑常侍陇州刺史增亭鄣徙客馆于外戎谍无所伺会昌中筑三原城吐蕃因之数犯边拜宪忠泾原节度使吐蕃遣使来请堕城且愿以尝役使者之人置塞上宪忠知其黠遣使谢之吐蕃情得而服会党项羌内寇又徙朔方有诏驰驿赴屯宪忠请徐行许之乃移书与羌人示要约羌人乃皆喜奉酒湏迎道宪忠廉俭少所欲故所至莫不怀德累封北海县子检校尚书左仆射兼金吾大将军以病自丐改左龙武统军卒年七十一赠司空

钦定续通志卷二百四十七

●钦定续通志卷二百四十八 列传四十八

列传

唐【四十八】

○唐四十八

刘晏【暹潼】 第五琦 班宏 王绍 李巽

刘晏

第五琦

班宏

王绍

李巽

△刘晏

刘晏字士安曹州南华人玄宗封泰山晏八岁【按旧书作七岁晏赐死时新书年六十五旧书年六十六考明皇封泰山在开元十三

年乙丑晏死在建中元年庚申若从新书作八岁则晏安当六十三从旧书七岁则六十二两书本传前后俱不相符今仍新书原文】 献颂行

在帝奇其幼命张说试之说曰国瑞也即授太子正字天宝中累调夏令未尝督赋而输无逋期举贤良方正补温令所至有惠利民皆刻石以

纪再迁侍御史禄山乱避地襄阳永王璘署晏右职固辞诏拜度支郎中兼侍御史领江淮租庸事晏至吴郡而璘反乃与采访使李希言谋拒

之希言假晏守余杭发兵坚壁会王败欲转略州县闻晏有备遂自晋陵西走以功拜彭

原太守徙陇华二州刺史迁河南尹时史朝义盗东都
乃治长水进户部侍郎兼御史中丞度支铸钱盐铁等使寻兼京兆府司农卿严庄下狱
晏遣吏防守其家已而释诬劾晏漏禁中语宰相萧华
亦忌之贬通州刺史代宗立复为京兆尹户部侍郎领度支盐铁转运铸钱租庸使晏以
户部让颜真卿改国子祭酒又以京兆让严武即拜吏
部尚书同中书门下平章事使如故坐与程元振善罢为太子宾客俄兼御史大夫领东
都河南江淮转运租庸盐铁常平使时大兵后京兆米
斗千钱禁膳不兼时甸农授穗以输晏乃自按行浮淮泗达于汴入于河右循底柱硖石
观三门遗迹至河阴巩洛见宇文愷梁公堰厮河为通
济渠视李杰新堤尽得其势然畏为人牵制乃移书宰相元载言利害载方内擅朝权既
得书即尽以漕事委晏故得尽其才凡岁至四十万斛
自是关中虽水旱物不翔贵 【按通鉴晏以江汴河渭水方不同各随便宜造运船教漕
卒缘水置仓转相受给自是每岁运谷至百余万斛
无升斗沈覆者】 再迁吏部尚书又兼益湖南荆南山南东道转运常平铸钱使与第五
琦分领天下金谷又知吏部三铨事常袞执政忌晏有
公望乃言晏旧德当师长百僚用为左仆射实欲夺其权帝以计务方治诏以仆射领使
如旧初晏分置诸道租庸使慎简台阁士专之时经费
不充停天下摄官独租庸得补署且数百人皆新进锐敏趣督倚办虽权贵千请欲假职
仕者晏厚以禀人奉之未尝使亲事是以人人劝职第
五琦始榷盐佐军兴晏代之法益密利无遗入初岁收缗钱六十万末乃什之计岁入千
二百万而榷居大半民不告勤京师盐暴贵诏取三万
斛以贍关中自扬州四旬至都人以为神至湖峽荒险处所出货皆贱弱不偿所转晏悉
储淮楚闲贸铜易薪岁铸缗钱十余万其措置纤悉如
此每朝谒马上以鞭算质明视事至夜分止虽休澣不废事无闲剧即日剖决无留所居
修行里粗朴庠陋饮食俭狭室无媵婢然任职久势轧
宰相要官华仗多出其门故议者颇言晏任数固恩德宗立言者屡请罢转运使晏亦固
辞不许又加关内河东三川转运盐铁及诸道青苗使
始杨炎为吏部侍郎晏为尚书不相下元载得罪诏晏鞫治而炎坐贬及炎执政衔宿怒
先是帝居东宫代宗宠独孤妃而爱其子韩王宦人刘
清潭与嬖幸请立妃为后且言王符异以摇东宫时妄言晏与谋至是炎见帝流涕曰赖
祖宗神灵先帝与陛下不为贼臣所闲不然刘晏黎干
摇动社稷凶谋果矣今干伏辜而晏在臣位宰相不能正其罪法当死崔佑甫崔宁力相
解释宁尤切至炎怒斥宁于外遂罢晏使坐新故所交
簿物抗谬贬忠州刺史炎必傅其罪知庾准与晏素憾乃擢为荆南节度使准即奏晏与

朱泚书语言怨望又搜卒擅取官物胁诏使谋作乱炎
证成之建中元年七月诏赐晏死年六十五后十九日赐死诏书乃下且暴其罪家属徙
岭表坐累者数十人天下以为冤兴元初帝寤悟乃许
归葬贞元五年遂擢晏子执经为太常博士宗经秘书郎执经还官求追命有诏赠郑州
刺史又加司徒晏歿二十年而韩洄元琇裴昶李衡包
佶卢征李若初继掌财利皆晏所辟用晏既被诬而旧吏推明其功着洄以为管萧之亚
云琇后以尚书右丞判度支国无横敛而军旅济为韩
滉所恶贬雷州司户参军 【详见韩滉传】 昶以兵部侍郎判度支封闻喜县公衡历
户部侍郎佶润州延陵人父融以诗名佶累官谏议大
夫坐善元载贬岭南晏奏起为汴东两税使晏罢以佶充诸道盐铁轻货钱物使终秘书
监丹阳郡公征累官户部侍郎历同华二州刺史若初
累官浙西观察诸道盐铁使时天下钱少货轻州县禁钱不出境商贾不通若初始奏纵
钱以起万货诏可卒赠礼部尚书

刘暹

刘潼

刘暹

晏兄暹为汾州刺史天资疾恶所至以方直为观察使所畏建中末召为御史大夫
宰相卢■（木巳）惮其严更荐前河南尹于颀代之
暹终潮州刺史

刘潼

暹孙潼字子固擢进士第杜惊判度支表为巡官累迁祠部郎中大中初讨党项羌
军食乏宰相欲以潼为使难其遣潼请行遂命为供军
使会复河湟调师屯守以潼判度支河湟供军案历京兆少尹山南有剧贼依山为剽宣
宗怒欲讨之宰相崔铉曰此陛下赤子迫于饥寒弄兵
山谷闲不足讨请遣使喻释之诏潼驰往潼挺身直叩其垒曰有诏赦尔罪盗皆列拜约
潼就馆而降会山南节度使封敖遣兵击贼潼罢归数
陈边事擢右谏议大夫出为朔方灵武节度使坐累贬郑州刺史改湖南观察使召为左
散骑常侍拜昭义节度使徙河东又徙西川时李福讨
南诏兵不利潼至抚以恩信蛮皆如约六姓蛮持两端为南诏闲候潼出兵袭击俘五千
人南诏大惧自是不敢犯边 【吴缜纠谬云按南诏
传潼为西川节度使之时即懿宗咸通七年八年之闲也当是时南诏方强南寇安南西
扰成都至咸通十年又自沐源八寇嘉州由此言之则
南诏何尝不敢犯边乎若云南诏少戢不敢轻寇边庶几近之】 以功加检校尚书右仆
射卒赠司空

△第五琦

第五琦字禹珪京兆长安人少以吏干事韦坚坚败不得调久之为须江丞太守贺
阡进明才之安禄山反进明徙北海奏琦为录事参军
事时贼已陷河闲信都进明未战玄宗怒遣使封刀趣之曰不亟进即斩首进明惧不知
所出琦劝厚以财募勇士出贼不意如其计复收所陷
郡肃宗驻彭原进明遣琦奏事既谒见即陈今之急在兵兵强弱在赋赋所出以江淮为
渊若假臣一职请悉东南宝货飞饷函洛帝悦拜监察
御史句当江淮租庸使迁司虞员外郎河南等五道支度使迁司金郎中兼侍御史诸道
盐铁铸钱使盐铁名使自琦始进度支郎中兼御史中
丞当军兴随事趣办不益赋而用以饶于是迁户部侍郎判度支河南等道支度转运租
庸盐铁铸钱司农太府出入山南东西江西淮南馆驿
等使开元二年进同中书门下平章事初琦请铸开元重宝钱以一代十既当国又铸重
规一代五十会物价腾踊饿殍相望议者以为非诏贬
忠州长史会有告琦纳金者遣御史驰按琦辞曰位宰相可自持金邪若付受有状请归
罪有司御史不晓以为具服狱上之遂长流夷州宝应
初起为朗州刺史有异政拜太子宾客吐蕃盗京师郭子仪表为粮料使兼御史大夫关
内元帅副使改京兆尹俄加判度支铸钱盐铁转运常
平等使累封扶风郡公复以户部侍郎兼京兆尹坐与鱼朝恩善贬括州刺史徙饶湖二
州复为太子宾客东都留守德宗素闻其才将复用召
之会卒年七十一 【按旧书年七十】 赠太子少保子峰妇郑皆以孝表门

△班宏

班宏卫州汲人父景倩国子祭酒 【按旧书父景倩秘书监】 以儒名家宏天宝
中擢进士第调右司御胄曹参军高适镇剑南表为观
察判官青城人以左道惑众谋作乱事觉诬引屯将规缓死众凶惧宏验治即杀之人心
大安大历中擢起居舍人四迁给事中累进吏部侍郎
贞元初仍旱蝗赋调益急以户部侍郎副度支使韩滉俄而竇参当国代滉使而参仕大
理司直时宏已为刑部侍郎德宗以宏熟天下计故进
宏尚书副参参久不归使于宏乃与参有隙帝后遇参薄参知之欲归使然不欲宏专遂
荐张滂为户部侍郎盐铁转运使而以宏判度支分滂
关内河东剑南山南西道盐铁转运隶宏以悦其意又还江淮两税置巡院官令宏滂共
差择滂请盐铁旧簿书于宏宏不与及署院官更持可
否官乏不补滂奏言臣职不修无逃死如国家大计何由是有诏分掌宏见宰相辞曰宏
主漕岁得江淮米五十万斛前年至七十万今职移于
人敢请罪滂在侧谗曰公所言非也朝廷不夺公职乃公丧官缙纵奸吏自取咎尔凡为

度支胥吏不一岁家辄巨亿僮马产第侈王公非盗县
官财何以然上既知之故令滂分掌今公无乃归怨上乎宏不答于是移病归第宰相白
其状诏许如刘晏韩滉故事以东都河南淮南江南山
南东道两税滂主之东渭桥以东巡院隶焉关内河东剑南山南西道宏主之宏清洁勤
力晨入官署夕而出吏不堪其劳而已益恭参得罪宏
为有力卒年七十三赠尚书右仆射谥曰敬后二年滂亦罢为卫尉卿

△王绍

王绍本名纯避宪宗讳改焉自太原徙京兆之万年父端第进士有名终工部员外
郎绍少为颜真卿所器字之曰德素奏为武康尉包佶
领租庸盐铁使署判官时李希烈阻兵江淮输物留梗乃徙饷道自颍入汴绍入关德宗
已西狩乃督轻货趣闲道走洋州绍先见行在帝劳之
曰吾军乏春服朕且衣裘奈何绍流涕曰佶道臣贡奉无虑五十万当即至后五日继至
由是纾难迁仓部员外郎是时兵旱无年诏户部收阙
官俸税茶及无名钱以修荒政绍由员外郎判务迁户部兵部郎中皆专领进户部侍郎
判度支顷之迁尚书主计凡八年顺宗立王叔文夺其
权拜兵部尚书出为东都留守元和初检校尚书右仆射为武宁军节度使复以濠泗二
州隶其军裨将安进达唐重靖谋乱绍以计取之出家
赏士举军安赖复拜兵部尚书判户部卒年七十二赠右仆射谥曰敬

△李巽

李巽字令叔赵州赞皇人以明经补华州参军事举拔萃授鄆尉累进左司郎中常
州刺史召拜给事中出为湖南观察使贞元五年徙江
西巽锐于为治持法察吏不敢少给顺宗立擢兵部侍郎杜佑表为盐铁转运副使俄代
佑使任自刘晏后职废不振赋入媮耗巽莅职一年较
所入如晏最多之年明年过之又明年增百八十万缗再迁吏部尚书程异坐王叔文废
巽时荐之异计较精于巽故巽能善职盖有助云元和
四年疾革郎官省候巽言不及病但与商较程课功利是夕卒年六十三 【按旧书年七
十一】 赠尚书右仆射巽为人忌刻校怨竇参为相
出巽常州及参贬郴州巽时观察湖南宣武节度使刘士宁致绢数千匹于参巽即劾参
交通藩镇遂杀参

钦定续通志卷二百四十八

●钦定续通志卷二百四十九

列传

唐 【四十九】

○唐四十九

李揆 王珣 常袞 赵憬 崔造 齐映 卢迈
关播 董晋【陆长源 刘全谅】 袁滋
赵宗儒 窦易直

李揆

王珣

常袞

赵憬

崔造

齐映

卢迈

关播

董晋

袁滋

赵宗儒

窦易直

△李揆

李揆字端卿祖元道为文学馆学士自有传【吴缜纠缪云按宰相世系表元道生正基正基生亶亶生成裕成裕生揆元道于揆为高祖与传不同未知孰是】父成裕秘书监揆性警敏善文章开元末擢进士第补陈留尉献书阙下试中书迁右拾遗再转起居郎知宗子表疏以考功郎中知制诰扈狩剑南拜中书舍人干元二年宗室请上张皇后号曰翊圣肃宗问揆揆引韦后谏止之后有子数岁欲立为太子而帝意未决时代宗已封成王帝从容语揆曰成王长有功将定太子卿意谓何揆曰陛下此言社稷福也因再拜贺帝曰朕计决矣俄兼礼部侍郎知贡举陈书廷中令诸儒尽所欲言由是人人称美未卒事拜中书侍郎同中书门下平章事修国史封姑臧县伯揆美风仪善奏对帝叹曰卿门地人物文学皆当世第一信朝廷羽仪乎时京师多盗至驂衢杀人尸沟中吏褫气李辅国方横请选羽林骑五百备徼捕揆以为不可辅国议格揆决事明当然锐于进且近名兄楷有时称滞冗官不得迁吕諲政事出揆远甚以故相镇荆南治声尤高揆惧复用遣吏至諲所构抉过失諲密诉诸朝帝怒贬揆袁州长史不三日以楷为司门员外郎揆累年乃徙歙州刺史初苗晋卿数荐元载揆轻载地寒谓晋卿曰龙章凤姿士不见用麀头鼠目子乃求官邪载闻衔之及秉政奏揆试秘书监江淮养疾载诛始拜睦州刺史入为国子祭酒礼部尚书德宗幸奉天【

按新旧两书皆云德宗幸山南卢■〈木巳〉以揆入蕃会盟考德宗建中二年十月幸奉天十二月贬■〈木巳〉为新州司马兴元元年二月始幸梁州地理志梁州为山南西道治所奉天乃雍州属县不隶山南唐人于朱泚逆难例云播迁山南盖从其后而统言之若■〈木巳〉之使揆则在奉天时纪事之文不得浑同也今改】揆素为卢■〈木巳〉所恶用为入蕃会盟使拜尚书左仆射揆辞老恐死道路不能达命帝恻然■〈木巳〉曰和戎者当练朝廷事非揆不可异时年少揆者不敢辞揆至蕃酋长曰闻唐有第一人李揆公是否揆畏留因给之曰彼李揆安肯来邪还卒凤州年七十四赠司空谥曰恭

△王珣

王珣方庆六世孙少为礼家学玄宗在位久推崇老子道好神仙事广修祠祭靡神不祈珣上言请筑坛东郊祀青帝天子入其言擢太常博士侍御史为祠祭使珣专以祠解中帝意有所禳祓大抵类巫覡汉以来葬丧皆有瘞钱后世里俗稍以纸寓钱为鬼事至是珣乃用之肃宗立累迁太常卿又以祠祷见宠干元三年拜蒲同绛等州节度使俄以中书侍郎同中书门下平章事时大兵后天下愿治珣望轻无它才不为士议谐可既骤得政中外悵骇乃奏置太一坛劝帝身见九宫祠帝由是专意它议不能夺帝尝不豫太卜建言崇在山川珣遣女巫乘传分祷天下名山大川巫皆盛服中人护领所至于托州县赂遗狼藉时有一巫美而蛊以恶少年数十自随尤儇狡不法驰入黄州刺史左震晨至馆请事门鏐不启震怒破鏐入取巫斩廷下悉诛所从少年籍其赃得十余万因遣还中人既以闻珣不能诘帝亦不加罪明年罢珣为刑部尚书又出为淮南节度使犹兼祠祭使徙浙东召入再迁太子少师卒赠开府仪同三司谥简怀曾孙抃别有传

△常袞

常袞京兆人天宝末及进士第性狷洁不忘交游由太子正字累为中书舍人文采赡蔚长于应用誉重一时鱼朝恩兼判国子监袞奏成均当用名儒不宜以宦臣领职时朝廷多事西北边虏连为寇盗袞累上章陈利害代宗甚顾遇之加集贤学士大历元年迁礼部侍郎仍为学士元载之得罪令袞与刘晏李涵等鞫之狱竟拜门下侍郎同中书门下平章事弘文崇文馆大学士与杨绾同执政绾长厚通可而袞苛细以清俭自贤帝内重绾而颀任之礼遇信爱袞弗及也绾卒袞始当国故事日出内厨食赐宰相家可十人具袞奏罢之又将让堂封它宰相不从乃止议者以为厚禄重赐所以优贤崇国政也不能当辞位不宜辞禄 【谨按通鉴辑览

御批时人讥袞云云盖出于佐饗者之口然袞
犹稍知节操较之持禄固位者流犹为彼善于此若但徇大烹养贤之文而不知制禄代
耕之义岂伊皋作相必当日食万钱耶司马光廉耻存
焉之论庶乎不失平允】政事堂北门异时宰相过舍人院咨逮政事至袞乃塞之以示
尊大愆元载败室卖官之路然一切以公议格之非文
词者皆摈不用故世谓之鬻伯以其鬻鬻无贤不肖之辨云袞为相散官纔朝议而无封
爵郭子仪言于帝遂加银青光禄大夫封河内郡公德
宗即位袞奏贬崔佑甫为河南少尹帝怒使与佑甫换秩再贬潮州刺史建中初杨炎辅
政起福建观察使始闽人未知学袞为设乡校使作文
章亲加教导与客主钧礼观游燕飧与焉由是俗一变岁贡士与内州等卒于官年五十五
赠尚书左仆射闽人祀袞于学

△赵憬

赵憬字退翁渭州陇西人志行峻洁不自衒宝应中方营泰建二陵用度广又吐蕃
盗边天下荐饥憬褐衣上疏请杀礼从俭试江夏尉佐
诸使府进太子舍人母丧免有芝生壤树建中初擢水部员外郎湖南观察使李承表憬
自副承卒遂代之居二载召还阖门不与人交李泌荐
之对殿中占奏明辨德宗悦拜给事中贞元中咸安公主降回纥诏关播为使而憬以御
史中丞副之异时使者多私赍繒絮市马规利独憬不
然使未还尚书左丞缺帝曰赵憬堪此遂以命之寔参当国欲抑为刺史帝不许参罢进
中书侍郎同中书门下平章事与陆贄同辅政贄于裁
决少所让又徙憬门下侍郎繇是不平自以不任职数称疾时杜黄裳遭奄人谗诋穆贄
韦武李宣卢云等为裴延龄构摈势危甚憬申解皆得
免初贄约共执退延龄既对贄极言其奸帝色变憬不为助遂罢贄乃始当国憬精治道
常以国本在选贤节用薄赋敛宽刑罚恳恳为天子言
之又陈前世损益当时之变献审官六议帝皆然之下诏褒答辅政五年卒年六十一赠
太子太傅谥曰贞宪

△崔造

崔造字元宰深州安平人与韩会卢东美张正则三人友善好言当世事皆自谓王
佐才故号四夔浙西观察使李栖筠辟为判官累迁左
司员外郎与刘晏善晏得罪贬信州长史徙建州刺史朱泚乱造辄驰檄比州发所部兵
二千以待命德宗嘉之京师平召还至蓝田自以舅源
休与贼同逆上疏请罪帝以为有礼下诏慰勉擢给事中贞元二年以给事中同中书门
下平章事帝谓造敢言为能立事故不次用之造久在
江左疾钱谷诸使罔上或干没自私乃建言天下两税请委本道观察使刺史选官部送

京师诸道水陆转运使度支巡院江淮转运使请悉停
以度支盐铁务还尚书省六曹皆宰相分领于是齐映判兵部李勉刑部刘滋吏礼二部
造户工二部又以户部侍郎元琇判诸道盐铁榷酒事
吉中孚度支诸道两税事而浙江东西岁入米七十五万石方岁饥更以两税准米百万
豪寿洪潭二十万责韩滉杜亚漕送东渭桥诸道有盐
铁处仍置巡院岁尽宰相计最殿以闻造厚元琇故首命之时滉方领转运有宠于帝朝
廷仰其须持不可帝重违之复以滉为江淮转运使余
如造请是秋江淮米大集帝美滉功以滉专领度支诸道盐铁转运等使造惧始托疾辞
位罢为太子右庶子贬琇雷州司户参军于是造所请
悉罢以忧愧卒年五十一

△齐映

齐映瀛州高阳人举进士博学宏词补河南府参军事滑亳节度使令孤彰署掌书
记彰疾甚引映托后事映因说彰纳节归诸子京师彰
从之即以女妻映彰卒军乱映间归东都三城使马燧辟为判官卢■（木巳）荐授刑
部员外郎又为凤翔张镒判官映练军事论奏数称旨
进行军司马德宗出奉天镒懦弱不知兵部将李楚琳欲为乱映与齐抗请先事诛之镒
不用楚琳杀镒军中多为映指道故得免奔奉天授御
史中丞从幸梁道险涩常为帝御会马骇突帝恐伤映诏舍辔固不去帝嘉叹擢给事中
进中书舍人贞元二年以舍人同中书门下平章事俄
改中书侍郎封河间县男与崔造刘滋并辅政滋端重寡言映谦不肩事否可一颡于造
会造疾映乃当国吐蕃数入寇关辅震骚咸言帝欲避
狄映入谏俯伏流涕天子为感悟映微时张延赏遇之善及相而延赏为左仆射数为映
画事又为所亲求官映不答延赏恚既复用即劾映非
宰相器明年贬夔州刺史徙衡州久之为桂管江西两观察使卒年四十八赠礼部尚书
谥曰忠

△卢迈

卢迈字子元河南河南人【按旧书作范阳人从其望也】性孝友举明经入第
补太子正字以拔萃调河南主簿集贤校理公卿交荐
之擢右补阙三迁吏部员外郎出为滁州刺史召还再迁谏议大夫数条当世病利进给
事中改尚书右丞将作监元亘摄祠以私忌不听誓御
史劾之帝疑其罚下尚书省议迈曰按大夫士将祭于公既视濯而父母死犹奉祭礼散
齐有大功丧致齐有期丧齐有疾病听还舍不奉祭无
忌日不受誓者虽令忌日与告且春秋不以家事辞王事今摄祭特命也互以常令拒特
命执非所宜遂抵罪以本官同中书门下平章事进中

书侍郎时陆贽赵憬专大政迈居中治身循法无它过久之暴眩省中輿还第诏大臣即问固乞骸骨罢为太子宾客卒年六十赠太子太傅

△关播

关播字务元卫州汲人及进士第邓景山节度青齐淮南再署幕府迁右补阙与神策军使王驾鹤姻家元载恶之出为河南兵曹参军事数试属县政异等陈少游镇浙东淮南表为判官摄滁州刺史李灵耀叛少游屯淮上所在盗贼猖奋播储货力给军杨绾常袞皆善播引为都官员外郎德宗初湖南峒贼王国良惊剽州县诏播宣辑及还再迁给事中故事诸司甲库以令史直曹刳脱为奸播悉易以士人时黷其法厯吏部侍郎帝求宰相卢■〈木巳〉以播韦柔可制因从容言播材任宰相乃拜中书侍郎同中书门下平章事政一决于■〈木巳〉尝论事帝前播意不可避坐欲有所言■〈木巳〉目禁辄止时李元平陶公达张恣刘承诚率轻薄子游播门下能侈言诞计以功名自喜播谓皆将相材数请帝用之李希烈叛帝以汝州据贼冲刺史疲软不胜任播盛称元平帝召见拜左补阙不数日检校吏部郎中兼汝州别驾知州事元平始至募工筑郭浚隍希烈阴使亡命应募凡内数百人元平不寤贼遣将李克诚以精骑薄城募者内应缚元平驰见希烈遗矢于地希烈嫚骂曰盲宰相使尔当我何待我浅耶伪署御史中丞播闻谄曰元平事济矣谓必覆贼建功也左右笑之无何伪署宰相公达等以元平屈贼皆废不用播从幸奉天卢■〈木巳〉白志贞已贬而播犹执政议者不平遂罢为刑部尚书贞元初检校尚书右仆射持节送咸安公主降回鹘还迁兵部尚书以太子少师致仕斥卖车骑阖门不娶外事卒年七十九赠太子太保

△董晋

董晋字混成河中虞乡人擢明经肃宗幸彭原上书行在拜秘书省校书郎待制翰林出从淮南崔圆府为判官还朝累迁祠部郎中大历中李涵持节送崇徽公主于回纥署晋判官回纥使问岁市马而唐归我贿不足何也涵惧未及对数目晋晋曰尔之马岁五至而边有司数皮偿货天子不忘尔劳敕吏无得问反用是望我邪使还迁秘书少监德宗立授太府卿不旬日为左散骑常侍兼御史中丞知台事出为华州刺史朱泚反遣兵攻之晋弃华走行在改国子祭酒帝还京师迁左金吾卫大将军改尚书左丞是时右丞元琇为韩滉排挤得罪滉势振朝廷晋见宰相诵元琇非罪士大夫壮其节贞元五年以门下侍郎同中书门下平章事方寔参得君裁可大事不关咨晋晋循谨无所驳异参欲以其侄申为吏部侍郎讽晋以闻帝怒曰无乃参迫卿为之邪晋谢具道所以然帝即问参过

失晋无敢隐由是参罢宰相晋惶恐上疏固辞位九年
罢为礼部尚书以兵部尚书为东都留守会宣武李万荣病且死诏晋检校尚书左仆射
同中书门下平章事为宣武节度副大使知节度事万
荣死邓惟恭总其军谋代之晋受命惟幕府驸从即日上道至郑逆者不至人劝止以
观便宜晋不听及郊惟恭始出迎谒既入即委以军政
无所更众服晋有体汴士素骄怙乱尝介勇士伏幕下早暮番休晋一罢之惟恭乃结大
将相里重晏等谋乱晋觉之杀其党械送惟恭京师帝
录其繁李乃劳贷死流汀州帝恐晋懦弱诏拜汝州刺史陆长源为司马以佐晋晋谦愿
俭简事多循仍故军粗安在军凡五年卒年七十六赠
太傅谥曰恭惠子溪字惟深亦擢明经三迁万年令讨王承宗也擢度支郎中为东道行
营粮料使坐盗军费流封州至长沙赐死子居中善诗
为张籍所称

陆长源

刘全谅

陆长源

陆长源者吴人字泳 【按旧书陆长源字泳之】 太子詹事余庆孙也贍于学始
辟昭义辞嵩幕府历建信二州刺史韩滉兼领江淮转
运使辟署兼御史中丞以为副入迁都官郎中复出汝州刺史遂徙宣武政皆出司马初
欲峻法绳骄兵为晋所持不克行而判官杨凝孟叔度
等又苛细晋卒长源总留后事大言曰将士久慢吾且以法治之众始惧军中请出帑帛
为晋制服不许固请止给其直叔度又偿直以盐高盐
直贱帑估人得盐二觔举军大怒或劝长源曰故事有大变则厚赐于军军乃安长源曰
异时河北贼以钱买戍卒取旌节吾不为众怒益甚纔
八日军乱杀长源及叔度等死之日有诏拜节度使远近嗟恨赠尚书左仆射长源好谐
易而清白自将去汝州送车二乘长源死监军俱文珍
密召宋州刺史刘全谅使总后务全谅至其夜军复乱杀大将及部曲五百人乃定帝即
诏全谅检校工部尚书宣武节度使

刘全谅

全谅始名逸准至是赐名 【按旧书刘全谅本名逸准】 本怀州武陟人也父客
奴以戍籍幽州事平卢军以材力显数战有功拜左骁
卫将军游弈使安禄山反诏以平卢节度副使吕知诲为使知诲降贼害安东副都护马
灵警客奴与诸将共杀知诲与安东将王元志相闻以
客奴为柳城郡太守摄御史大夫平卢节度使赐名正臣以元志为安东副大都护正臣
袭范阳为史思明所败奔還元志酖杀之全谅事刘元

佐为牙将以勇果善骑射为元佐厚礼累兼御史中丞及元佐子士璠代立疑宋州刺史翟良佐不附已扬言行部至则以全谅代之故汴将士多归心焉视事凡八月卒赠尚书右仆射军中立韩弘代节度云

△袁滋

袁滋【按旧书入良吏传】字德深蔡州朗山人陈侍中宪之后强学博记建中初黜陟使赵赞荐于朝起处士授试校书郎进詹事府司直部官以盗金下狱滋直其冤御史中丞韦贞伯闻之表为侍御史邢部大理核罪人失其平惮滋守法因权势以请滋终不署奏迁工部员外郎韦皋始招来西南夷南诏异牟寻内属德宗选郎吏可抚循者皆惮行至滋不辞帝嘉之擢祠部郎中兼御史中丞赐金紫持节往踰年还进谏议大夫迁尚书右丞知吏部选求外迁为华州刺史政清简慈惠民爱向之召为左金吾卫大将军耆老遮道罗拜莫不流涕宪宗监国进拜中书侍郎同中书门下平章事刘辟反诏滋为剑南两川山南西道安抚大使半道以检校吏部尚书平章事为剑南东西川节度使是时贼方炽又兄峯在蜀为辟所劫【按通鉴以滋为节度使征辟为给事中辟不受征阻兵自守滋畏其强不敢进帝怒贬之并无滋兄在蜀之说即旧书亦不载】滋畏不进贬吉州刺史未几徙义成节度使滑用武地东有淄青北魏博滋严备而推诚信务在怀来李师道田季安畏服之居七年百姓立祠祝祭以户部尚书召改检校兵部拜山南东道节度使徙荆南吴元济之反滋自表入朝欲议罢淮西事道闻萧俛钱徽坐沮议黜滋更言必胜乃得还俄而高霞■〈宀禹〉败帝思以恩信倾贼且滋尝云云乃授彰义节度使侨治唐州滋与元济通好贼围新兴滋卑辞讲解贼因是易滋不为备时帝责战急而滋至六月以无功贬抚州刺史未几迁湖南观察使累封淮阳郡公卒年七十赠太子太保子均右拾遗郊翰林学士【吴缜纠谬云按宰相世系表滋五子均太子典膳郎都字之美右拾遗郊字之干虢州刺史与傅不同又艺文志注云郊字之仪滋子也昭宗翰林学士亦与表不同未知孰是】

△赵宗儒

赵宗儒字秉文邓州穰人第进士授校书郎判入等补陆浑主簿数月拜右拾遗翰林学士再迁司勋员外郎贞元六年领考功事黜陟详当无所回惮进考功郎中累迁给事中十二年以本官同中书门下平章事赐金紫居二岁罢为太子右庶子屏居慎静奉朝请而已迁吏部侍郎元和初检校礼部尚书充东都留守三迁至检校吏部荆南节度使散冗食戍二千人历山南西道河中二镇拜御史大夫改吏部尚书罢为

太子少师太和初进太子太傅文宗召访政理对曰尧舜之化慈俭而已愿陛下守之帝纳其言六年授司空致仕卒年八十七册赠司徒谥曰昭

△窦易直

窦易直字宗元京兆始平人擢明经补校书郎十年不应辟以判入等为蓝田尉累迁吏部郎中元和六年进御史中丞繇陕虢观察使入为京兆尹万年尉韩晤坐赇易直令官属按之得赃三十万宪宗疑未尽诏穷治至三百万贬易直为金州刺史久之起宣歙浙西观察使时江淮旱漕物淹积不能前其部将王国清指漕货激众谋乱易直知之械国清送狱其党数千羣灌入狱篡取之欲大剽易直登楼令曰能诛乱者一级赏千万【此系新书原文按旧书作获一人赏十万似较近理】众喜反缚为乱者三百余人易直悉斩之入为户部侍郎判度支长庆四年同中书门下平章事转门下侍郎封晋阳郡公即让度支置其俸三月有诏停判文宗立检校尚书右仆射同平章事为山南东道节度使入为左仆射判太常卿事顷之检校司空为凤翔节度以疾还京师卒赠司空谥曰恭惠子紉仕至渭南尉集贤校理妻父王涯被祸宦官知易直子得不死贬循州司户参军

钦定续通志卷二百四十九

●钦定续通志卷二百五十 列传五十

列传

唐【五十】

○唐五十

张镒 姜公辅 武元衡【儒衡】 李绛【璋】 宋申锡

张镒

姜公辅

武元衡

李绛

宋申锡

△张镒

张镒字季权一字公度国子祭酒后胤五世孙也【吴缜纠谬云按后胤传末云孙齐邱历监察御史朔方节度使终东都留守子镒别有传则镒乃后胤之曾孙非五世孙也】父齐邱朔方节度使东都留守镒以荫授左卫兵曹参军郭子仪表为元帅府判官累迁殿中侍御史干元初华原令卢枏以公事譙责邑人齐令洗令洗宦人也衔之构枏罪镒按验当免官

有司承风以死论镒不直之乃白其母曰今理枳枳免
死而镒坐贬默则负官贬则为太夫人忧敢问所安母曰儿无累于道吾所安也遂执正
其罪枳得流镒贬抚州司户参军徙晋陵令江西观察
使张镐表为判官迁屯田右司二员外郎居母丧以孝闻大历初出为濠州刺史李灵耀
反于汴镒团阅乡兵严守御有诏褒美擢侍御史兼缘
淮镇守使以最迁寿州刺史历江西河中观察使不阅旬改汴滑节度使以病固辞诏留
私第建中二年拜中书侍郎同中书门下平章事郭子
仪婿太仆卿赵纵为奴告下御史劾治而奴留内侍省镒奏言奴告主风不可长今纵下
狱而奴留禁中尤情所不厌请念子仪功贷纵罪奴以
伸贵贱之分帝纳之贬纵循州司马杖奴死镒召子仪家僮数百暴示奴尸卢■〈木巳〉
忌镒刚直欲去之时朱泚以卢龙卒戍凤翔帝择人
以代■〈木巳〉即谬曰凤翔将校班秩素高非宰相信臣不可镇抚臣宜行帝不许
■〈木巳〉复曰陛下必以臣容貌藁陋不为三军所信
恐后生变臣不敢自谋惟陛下择之帝乃顾镒曰文武兼资望重内外无易卿者其为朕
抚卢龙士乃以中书侍郎为凤翔陇右节度使镒知为
■〈木巳〉阴中然辞穷因再拜受诏帝幸奉天镒罄家货将自献行在而营将李楚琳
者尝事朱泚得其心军司马齐映等谋曰楚琳必为乱
乃遣屯陇州楚琳稽故未行镒以帝在外心忧惑谓已亟去不为备楚琳夜率其党王汾
李卓牛僧伽等作乱镒缒城走不及远与二子为候骑
所执楚琳杀之属官王沼张元度柳遇李淑皆死诏赠镒太子太傅

△姜公辅

姜公辅爱州日南人 【按旧书姜公辅不知何所人】 第进士补校书郎以制策
异等授右拾遗为翰林学士朱泚之召还京师也公辅
谏曰陛下若不能坦怀待泚不如诛之不从俄而泾师乱帝自苑门出公辅叩马谏曰泚
尝帅泾原得士心向以滔叛夺之兵居常怫郁不自聊
请驰骑捕取以从无为羣凶得之帝仓卒不及听 【按新书本传此下有帝欲往凤翔倚
张镒公辅以镒文吏所领皆朱泚部曲军且有变遂
之奉天不数日而凤翔果乱杀镒通鉴则以为萧复之言旧书公辅及复两传俱不载而
新书复传又纪此事一事两属殊失精审复传又云以
是拜同中书门下平章事考复与公辅以十月丁巳同日并命作相盖公辅以策朱泚事
复以策张镒事各膺柄用不应事在前知皆以属之公
辅今删】 既至奉天帝知羣臣多劝泚奉迎乘輿者乃诏诸道兵距城一舍止公辅曰王
者不严羽卫无以重威灵今禁旅单寡而士马处外为
陛下危之帝曰善悉内诸军泚兵果至乃擢公辅谏议大夫同中书门下平章事帝徙梁

唐安公主道薨帝悼之甚诏厚其葬公辅谏曰即平贼主必归葬今行道宜从俭以济军兴帝怒遂下迁太子左庶子以母丧解复为右庶子久不迁陆贽为相公辅数求官贽密谓曰竊丞相尝言为公拟官屡矣上辄不悦公辅惧请为道士未报它日又言之帝问故公辅隐贽言以参语对帝怒黜公辅泉州别驾遣使赍诏让参顺宗立拜吉州刺史未就官卒宪宗时赠礼部尚书

△武元衡

武元衡字伯苍曾祖载德则天皇后之族弟祖平一有名元衡举进士累为华原令畿辅镇军督将皆骄横挠政元衡移病去德宗知其才召拜比部员外郎岁内三迁至右司郎中以详整任职擢为御史中丞常对延英帝目送之曰是真宰相器顺宗立王叔文使人诱以党拒不纳俄为山陵仪仗使监察御史刘禹锡求为判官元衡不与叔文滋不悦数日改太子右庶子会册皇太子元衡赞相太子识之及即位是为宪宗复拜中丞进户部侍郎元和二年拜门下侍郎同中书门下平章事兼判户部事帝素知元衡坚正有守故眷礼信任异它相浙西李錡求入覲既又称疾帝问宰相郑絪絪请听之元衡曰不可錡自请入朝诏既许之而复不至是可否在錡陛下新即位天下属耳目若奸臣得遂其私则威令去矣帝然之遽追錡而錡计穷果反是时蜀新定高崇文为节度不知吏治帝难其代诏元衡检校吏部尚书兼门下侍郎同平章事为剑南西川节度使繇萧县伯封临淮郡公帝御安福门慰遣之元衡至绥靖约束俭已宽民比三年上下完实蛮夷怀归八年召还秉政李吉甫李絳数争事帝前不叶元衡独持正无所违附吉甫卒淮蔡用兵帝悉以机政委之王承宗上疏请赦吴元济使人白事中书悖慢不恭元衡叱去承宗怨数上章诬诋未几入朝出靖安里第夜漏未尽贼乘暗呼曰灭烛射元衡中肩复击其左股徒御格鬪不胜皆骇走遂害元衡批颅骨持去帝震惊罢朝坐延英见宰相哀恻为再不食赠司徒谥曰忠愍诏金吾府县大索或传言曰无搜贼贼穷必乱又投书于道曰毋急我我先杀汝故吏卒不穷捕兵部侍郎许孟容言于帝曰国相横尸路隅而盗不获为朝廷辱帝乃下诏急捕积钱东西市以募告者于是左神策将军王士则左威卫将军王士平以贼闻捕得张晏等十八人言为承宗所遣皆斩之逾月东都防御使吕元膺执淄青留邸贼门察訾嘉珍自言始谋杀元衡者会晏先发故藉之以告师道而窃其赏帝密诛之 【谨按通鉴辑览 御批盗杀宰相事出非常搜捕岂容刻缓乃所司惑于贼人诡计竟尔观望迟疑使非许孟容剴切进言几欲置之不问及下诏大索又以士则妄

告李代桃僵虽元膺购募山棚罪人斯得尚欲掩饰前
非不加穷治岂足以肃法纪而申国宪由是观之宪宗之平淮蔡盖幸耳非真能恢宏太
宗之业者也】

从父弟儒衡

武儒衡

武儒衡

儒衡字廷硕以庄词正色见重于宰相郑余庆元衡歿帝待之益厚累迁户部郎中
知谏议大夫事俄兼知制诰皇甫铸以宰相领度支剥
下以媚天子儒衡疏其状铸自诉于帝帝曰乃欲报怨邪铸不敢对儒衡议论劲正有风
节且将大用宰相令狐楚忌之会以狄兼谟为拾遗楚
自草制引武后革命事盛推仁杰功以指切儒衡且沮止之儒衡泣见上曰臣祖平一当
天后时避仕终老不涉于累帝慰勉之自是薄楚迁中
书舍人时元稹倚宦官知制诰儒衡鄙厌之会食瓜蝇集其上儒衡挥以扇曰适从何处
遽集于此一坐皆失色疾恶太明终不至大任以兵部
侍郎卒年五十六赠工部尚书

△李绹

李绹字深之赵郡赞皇人擢进士宏辞补渭南尉拜监察御史元和二年授翰林学
士俄知制诰会李锜诛宪宗将鞫取其货绹与裴垍谏
曰锜僭侈诛求六州之人怨入骨髓今元恶传首若因取其财恐非遏乱略惠绥困穷者
愿锡本道代贫民租赋制可枢密使刘光琦议遣中人
持赦令赐诸道以哀馈饷绹请附度支盐铁帝尝称太宗玄宗之盛朕欲庶几二祖无愧
宗庙何行而至此绹对甚切至帝嘉纳之诏绹与崔羣
钱徽韦弘景白居易等搽次君臣成败五十种为连屏张便坐绹见浴堂殿帝曰比谏官
多朋党论奏不实皆陷谤讪欲黜其尤者若何绹曰此
非陛下意必儉人以此荧误上心自古纳谏昌拒谏亡夫人臣进言于上岂易哉人主虽
开纳奖励尚恐不至今乃欲谴诃之使直士杜口非社
稷利也吐突承璀讨王承宗议者皆言古无以宦人统师者绹当制书固争帝不能夺诏
宰相授敕承璀果无功还加开府仪同三司绹奏承璀
丧师当抵罪今宠以崇秩后有奔军之将蹈利干赏陛下何以处之又数论事自知言切
且斥去悉取内署所上疏稟焚之以俟命帝果怒绹谢
曰陛下怜臣愚处之腹心之地而惜身不言乃臣负陛下若上犯圣颜旁忤贵幸因而获
罪乃陛下负臣于是帝动容曰卿告朕以人所难言者
疾风知劲草卿当之矣遂繇司勋郎中进中书舍人翌日赐金紫亲择良笏与之乌重胤
缚卢从史而承璀牒署昭义留后绹曰泽潞据山东要

害磁邢洛跨两河间可制其合从今辞竖就禽方收威柄遽以偏将莅本军纲纪大紊矣
河南北诸镇谓陛下啖以官爵使逐其帅其肯默然哉
宜以孟元阳为泽潞而以重胤节度三城两河帝从之吴少诚病甚绛建言淮西地不与
贼接若朝廷命帅今乃其时有如阻命则决可讨矣然
镇蔡不可并取愿赦承宗趣立蔡功时江淮大旱帝下赦令有所蠲弛绛言江淮流亡所
贷未广而宫人猥积有怨鬲之思当大出之以省经费
岭南之俗鬻子为业可听非券剂取直者如掠卖法敕有司一切苛止帝皆顺纳后阅月
不赐对绛谓大臣持禄不敢谏小臣畏罪不敢言管仲
以为害霸最甚今臣等饱食不言无履危之患自为计得矣顾圣治如何有诏明日对三
殿帝尝畋苑中至蓬莱池谓左右曰李绛必谏不如且
止其见礼惮如此六年罢学士迁户部侍郎判本司帝每有询访随事补益所言无不听
欲遂相之而承璀宠方盛忌其进阴有毁短帝乃出承
璀淮南监军翌日拜绛中书侍郎同中书门下平章事封高邑男方江淮岁俭民荐饥有
御史使还奏不为灾帝以语绛答曰方隅皆陛下大臣
奏孰不实而御史苟悦陛下耳愿出其名显责之李吉甫尝盛赞天子威德帝欣然绛独
曰陛下自视今日何如汉文帝时帝曰朕安敢望文帝
对曰是时贾谊以为措火积薪下火未及然因以为安其忧如此今法令所不及者五十
余州西戎内讧近以泾陇为鄙去京师远不千里烽燧
相接更加比水旱无年仓廩空虚诚陛下焦心销志求济时之略渠便高枕而卧哉帝入
谓左右曰绛言骨鲠真宰相也魏博田季安死子怀谏
弱军中请袭节度吉甫议讨之绛曰不然怀谏乳臭不能事必假权于人权重则怨生将
生患众所归必在宽厚简易军中素所爱者彼得立不
倚朝廷亦不能安惟陛下蓄威以俟之俄而田兴果立以魏博听命帝大悦吉甫复请命
中人宣慰因刺其变徐议所宜绛独谓不如推诚抚纳
即假旄节毋俟使者持三军表来请帝重违吉甫故诏张忠顺持节往而授兴留后绛固
请曰如兴万有一不受命即姑息复如向时矣由是即
拜兴节度使绛复请斥禁钱百五十万缗赐其军有言太过者绛曰假令举十五万众期
岁而得六州计所转给三倍于费今兴天挺忠义首变
污俗破两河之胆可嗇小费不以激劝人心哉从之帝患朋党以问绛答曰自古人君最
恶者朋党小人揣知故常借口以激怒上心朋党者寻
之则无迹言之则可疑夫圣人同迹贤者求类是同道也非党也天下趋利之人常为朋
比同其私也守正之人常遭构毁违其私也小人多谮
言常胜正人少直道常不胜可不戒哉吐蕃犯泾州掠人畜绛因言滨塞虚籍多实兵少
今京西北神策镇军本防盛秋坐仰衣食不使战事至

之日乃先稟中尉夫兵不内御要须应变请分隶本道则号令齐一前战不还踵矣然士卒乐两军姑息宦者以为言议遂寝尝盛夏对延英帝汗浹衣绛欲趋出帝曰朕宫中所对惟宦官女子欲与卿讲天下事乃其乐也帝尝问玄宗开元时致治天宝则乱何一君而相反邪绛曰治生于忧危乱生于放肆玄宗尝历试官守知人之艰难初任姚崇宋璟励精听纳泊林甫国忠得君于是上不闻直言嗜欲日滋天下骚动故治乱系时主所行无常治亦无常乱教坊使称密诏阅良家子及别宅妇人内禁中京师嚣然绛将入言吉甫曰此谏官事绛曰公尝病谏官论事此难言者欲移之耶吉甫乃欲讽诏使止之绛以吉甫畏不敢谏遂独上疏帝曰朕以丹王等无侍者比命访闾里以货致之彼不喻朕意故至哗扰乃悉归所取以足疾求免罢为礼部尚书帝乃召承璀于淮南十年出为华州刺史承璀田多在部中主奴扰民绛捕系之会遣五坊使帝戒曰至华宜自戢绛大臣有奏即行法矣州有捕鹞户岁责贡限绛以为言并劝止畋猎诏泽潞太原天威府并罢之入为兵部尚书母丧免还授河中观察使河中故节制而皇甫镈恶绛故薄其恩镈得罪复以兵部召迁御史大夫穆宗数游畋绛率其属叩延英切谏不纳以疾辞退兵部尚书历东都留守徙东川节度使复为留守宝历初拜尚书左仆射绛以直道进退冠一时屡为谗邪所中下迁太子少师分司东都文宗立召为太常卿以检校司空为山南西道节度使累封赵郡公四年南蛮寇蜀道诏绛募兵千人往赴不半道蛮已去兵还监军使杨叔元者素疾绛遣人迎说军曰将收募直而还为民士皆怒乃噪而入劫库兵绛方宴不设备遂握节登陴或言缒城可以免绛不从牙将王景延力战歿绛遂遇害年六十七幕府赵存约辞齐皆死事闻谏官崔戎等列绛冤册赠司徒谥曰贞赠礼甚厚景延亦赠官禄一子大中初诏史官差第元和将相图形凌烟阁绛在焉独留中绛所论事万余言其甥夏侯孜以授蒋偕次为七篇子璋

李璋

李璋

璋字重礼大中初擢进士第辟卢钧太原幕府迁监察御史奏太庙祫享复用宰相摄事进起居郎旧制设次郊丘太仆盘车载乐召羣臣临观璋奏罢之咸通中累官尚书右丞湖南宣歙观察使

△宋申锡

宋申锡字庆臣史失其何所人少孤擢进士第累辟节度府后频迁起居舍人以礼部员外郎为翰林学士敬宗时拜侍讲学士文宗即位再转中书舍人复为翰林学士帝恶宦官权宠震主再致宫禁之变而王守澄典禁兵偃

蹇放肆欲剷除本根思可与决大事者察申锡忠厚因
召对俾与朝臣谋去守澄等且倚以执政申锡顿首谢未几拜尚书右丞踰月进同中书
门下平章事乃除王璠京兆尹密谕帝旨璠漏言而守
澄党郑注得其谋太和五年遣军候豆卢着诬告申锡与漳王谋反守澄持奏浴堂将遣
骑二百屠申锡家宦官马存亮争以为当召南司会议
守澄乃止捕申锡亲吏张全真家人买子缘信及十六宅典史胁成其罪帝乃罢申锡为
太子右庶子召三省官御史中丞大理卿京兆尹会中
书集贤院杂验反状翌日延英召宰相羣臣悉入初议抵申锡死于是左散骑常侍崔元
亮给事中李固言谏议大夫王质补阙卢钧舒元褒罗
泰蒋系裴休窦宗直韦温拾遗李羣韦端符丁居晦袁都等伏殿陛请以狱付外帝震怒
元亮固言执据愈切涕泣恳到帝稍解复召宰相入议
牛僧孺曰人臣不过宰相申锡复欲何求且申锡殆不至此注恐覆按诈觉乃劝守澄请
止行贬黜 【按通鉴载牛僧孺救申锡语为得理及
郑注劝守澄亦能窥见其情今据以增入】 繇是议贷申锡于岭表京兆尹崔管大理卿
王正雅苦请出着与申锡劾正情状帝悟乃贬申锡开
州司马从而流死者数十百人擢豆卢着兼殿中侍御史初申锡既归易素服俟命外舍
其妻责谓曰公何负天子乃反乎申锡曰吾起孤生位
宰相蒙国厚恩不能鉏奸乱反为所陷我岂反者乎申锡自为近臣凡四方贿谢一不受
既被罪有司验劾悉得所还问遗书朝野为咨闵七年
感愤卒有诏归葬开成元年追复右丞同中书门下平章事赠兵部尚书录其子慎徽为
城固尉会昌二年赐谥曰贞

钦定续通志卷二百五十

●钦定续通志卷二百五十一 列传五十一

列传

唐 【五十一】

○唐五十一

段秀实【刘海宾】颜真卿

段秀实

颜真卿

△段秀实

段秀实字成公本姑臧人曾祖师浚仕陇州刺史留为汧阳人秀实六岁母疾病不
勺饮至七日病间乃肯食时号孝童及长沈厚能断慨
然有济世意举明经其友易之乃弃去天宝四载从安西节度使马灵警讨护密有功授
安西府别将灵警罢又事高仙芝为判官迁陇州大推

府果毅后从封常清讨大勃律次贺萨劳城与虏战胜之常清逐北秀实曰贼出羸师饵我也请大索悉得其伏虏师燿改绥德府折冲都尉肃宗在灵武诏李嗣业以安西兵五千赴行在节度使梁宰欲逗留观变嗣业阴然之秀实切责嗣业嗣业因固请宰遂东师以秀实为副嗣业为节度使而秀实方居父丧表起为义王友充节度判官安庆绪奔邺嗣业与诸将围之以鞬重委河内署秀实兼怀州长史知州事兼留后时师老财乏秀实督馈系道募士市马以助军诸军战愁思冈嗣业中流矢卒众推荔非元礼代秀实闻之即遗白孝德书使发卒护丧送河内亲与将吏迎诸境倾私财葬之元礼高其义奏擢试光禄少卿俄而元礼为麾下所杀将佐多死惟秀实以恩信为士卒所服皆罗拜不敢害更推白孝德为节度使秀实凡佐三府益知名时吐蕃袭京师代宗幸陕劝孝德即日鼓行入援孝德徙邠宁署支度营田副使于是邠宁乏食乃请屯奉天仰给畿内时公廩竭县吏不知所出皆逃去军辄散剽孝德不能制秀实曰使我为军候岂至是邪司马王稷言之遂知奉天行营事号令严壹军中畏戢兵还孝德荐为泾州刺史封张掖郡王时郭子仪为副元帅居蒲子晞以检校尚书领行营节度使屯邠州士放纵不法邠恶少纳贿窜名伍中因肆志吏不得问秀实自州至府请为都虞候以已乱孝德即檄署付军俄而晞士十七人入市取酒刺酒翁坏酿器秀实列卒取之断首置槩上植市门外一营大噪尽甲孝德恐召秀实曰柰何秀实曰请辞于军乃解佩刀选老嫠一人持马至晞门下甲者出秀实笑且入曰杀一老卒何甲也吾戴头来矣甲者愕眙因晓之曰尚书固负若属邪副元帅固负若属邪柰何欲以乱败郭氏晞出秀实曰副元帅功塞天地当务始终今尚书恣卒为暴使乱天子边欲谁归罪罪且及副元帅今邠恶子弟以货窜名军籍中杀害人藉藉如是几日不大乱乱由尚书出人皆曰尚书以副元帅故不戢士然则郭氏功名其与存者有几晞再拜曰公幸教晞愿奉军以从即叱左右皆解甲令曰敢讙者死秀实曰吾未哺食请设具已食曰吾疾作愿宿门下遂卧军中晞大骇戒候卒击柝卫之旦与俱至孝德所谢不能邠由是安初秀实为营田官泾大将焦令谌取人田自占给与农约熟归其半是岁大旱农告无人令谌曰我知入不知旱也责之急农无以偿往诉秀实秀实署牒免之因使人逊谕令谌令谌怒召农责曰我畏段秀实耶以牒置背上大杖击二十舆致廷中秀实泣曰乃我困汝即自裂裳裹疮注药卖己马以代偿淮西将尹少荣颇刚鲠入骂令谌曰汝诚人乎泾州野如赭人饥死而尔必得谷击无罪者段公仁信大人惟一马卖而市谷入汝汝取之不耻凡为

人傲天灾犯大人击无罪者尚不愧奴隶邪分谏闻大愧流汗曰吾终不可以见段公一夕自恨死马璘代孝德每所咨逮璘处决不当固争之
不从不止始璘城泾州秀实为留后以劳加御史中丞大历三年遂徙泾州是军自四镇北庭赴难征伐数有功既骤徙相与出怨言别将王童
之谋作乱约曰闻警鼓而纵秀实知之召鼓人阳怒失节戒曰每筹尽当报因延数刻尽四鼓而曙明日复有告者曰夜焚藁积约救火则乱秀
实严警备夜中果火发令军中曰敢救者斩童之居外请入不许明日捕之并其党八人斩以徇曰后徙者族军遂迁泾州于时食匱郭无居人
朝廷患之诏璘领郑颖二州以佐军命秀实为留后军不乏资二州以治璘奏为行军司马兼都知兵马使璘有疾请秀实摄节度副使秀实按
甲备变璘卒都虞候史廷干裨将崔珍张景华欲谋乱秀实送廷干京师徙珍景华于外一军遂安即拜四镇北庭行军泾原郑颖节度使数年
吐蕃不敢犯塞又按格令官使二料取其一十三年来朝代宗问所以安边者画地以对件别条陈帝悦慰赉良渥赐第一区实封百户还镇德
宗立加检校礼部尚书建中初宰相杨炎追元载议欲城原州诏中使问状秀实言方春不可兴土功请须农隙炎谓沮已遂召为司农卿朱泚
反以秀实久失兵柄意其必怏怏遣骑召之不纳骑士踰垣入劫之秀实自度不免乃谓子弟曰吾当以死徇社稷耳乃往见之 【按新书召
为司农卿句下叙次欠明今从通鉴改辑】 泚喜曰公来吾事成矣秀实曰将士东征宴赐不丰有司过耳人主何与知公本以忠义闻天下今
变起仓卒当谕众以祸福扫清宫室迎乘輿公之职也泚默然秀实知不可乃阴结左骁卫将军刘海宾泾原都虞候何明礼孔目官岐灵岳同
谋杀泚三人者皆秀实素所厚 【按旧书及通鉴俱云秀实余结刘海宾何明礼岐灵岳等三人新书则叙刘海宾姚令言何明礼为三人考
灵岳于秀实追兵事觉甘心承罪而死应与秀实有同志而令言继从泚党新书叙次前后自相矛盾今从通鉴改辑】 会源休教泚伪迎天子
遣将韩旻领锐师三千疾驰奉天秀实以为宗社之危不容喘乃遣人谕灵岳窃取姚令言印不获乃倒用司农印追其兵旻至骆驿得符还秀
实谓海宾曰旻之来吾等无遗类我当直搏杀贼乃约事急为继而令明礼应于外翌日旻兵至泚令言大惊灵岳独承其罪而死不以及秀实
泚召秀实计事源休姚令言李忠臣李子平皆在坐秀实戎服与休并语至僭位勃然起执休腕夺其象笏奋而前唾泚面大骂曰狂贼万段我
岂从汝反邪遂击之泚举臂捍笏中颡流血蔑面匍匐走贼众未敢动而海宾等无至者秀实大呼曰我不同反胡不杀我遂遇害年六十五海

宾明礼皆继为贼害帝在奉天恨用秀实不极才垂涕悔悵初秀实自泾州被召戒其家曰若过岐朱泚必致赠遗慎毋纳至岐泚固致大绫三百家人拒不遂至都秀实怒曰我终不以污吾第以置司农治堂之梁间吏后以告泚泚取视其封帕完新秀实尝以禁兵寡弱不足备非常言于帝帝不用及泾卒乱召神策六军无一人至者兴元元年诏赠太尉谥曰忠烈赐封户五百庄第各一区长子三品诸子五品并正员官帝还都又诏致祭旌其门亲铭其碑太和中子伯伦始立朝累官福建观察使终太仆卿孙崐文楚珂知名崐自郑滑节度使入为右金吾卫大将军封西平郡公甘露之变崐当诛裴度奏忠臣后宜免死贬循州司马文楚咸通末为云州防御使为李克用所杀珂僖宗时居颍州黄巢围颍刺史欲以城降珂募少年拒战众裹粮请从贼遂溃拜州司马

刘海宾

刘海宾

刘海宾者彭城人以义侠闻为泾原兵马将与秀宾友善累战功兼御史中丞刘文喜据泾州叛海宾与其子光国给以奏请及入对因言奸慝可诛状既还光国手斩文喜献阙下拜左骁卫大将军封五原郡王海宾乐平郡王赠太子太保实封百户

△颜真卿

颜真卿字清臣秘书监师古五世从孙少孤母殷氏躬训导既长博学工辞章事亲孝开元中举进士又擢制科调醴泉尉再迁监察御史使河陇时五原有冤狱久不决天且旱真卿辨狱而雨郡人呼御史雨迁殿中侍御史宰相杨国忠恶之讽中丞蒋冽奏为东都采访判官再转武部员外郎国忠终欲去之乃出为平原太守安禄山谋逆真卿度必反托霖雨增俾浚隍料丁壮储廩廩日与宾客泛舟饮酒以纾禄山之疑禄山反河朔尽陷独平原城守具备使司兵参军李平驰奏玄宗始闻乱叹曰河北二十四郡无一忠臣邪及平至帝大喜谓左右曰朕不识真卿何如人所为乃若此时平原有静塞兵三千乃益募士得万人饶阳太守卢全诚济南太守李随清河长史王怀忠景城司马李暉邳郡太守王焘各以众归诏北海太守贺兰进明率精锐五千济河为助贼破东都遣段子光传李愷卢奕蒋清首徇河北真卿畏众惧给诸将曰吾素识愷等其首皆非是乃斩子光藏三首它日结刍续体敛而祭为位哭之是时从父兄杲卿为常山太守斩贼将李钦凑等清土门十七郡同日自归推真卿为盟主兵二十万绝燕赵诏即拜户部侍郎佐李光弼讨贼真卿以李暉自副而用李铣贾载沈震为判官俄加河北招讨采访使清

河太守使郡人李■〈山上罅下〉来乞师真卿为出兵六千知■〈山上罅下〉材因谓曰吾兵已出子将何以教我■〈山上罅下〉曰朝家使程千里统众十万自太行而东将出■〈山郭〉口限贼不得前公若先伐魏郡斩贼守袁知泰以劲兵披■〈山郭〉口出官师使讨邺幽陵平原清河合十万众徇洛阳分犀锐制其冲公坚壁勿与战不数十日贼必溃相图死真卿然之乃檄清河等郡遣大将李择交副将范冬馥和琳徐浩与清河博平士五千屯堂邑袁知泰遣将白嗣深乙舒蒙等兵二万拒战贼败斩首万级知泰走汲郡史思明围饶阳遣游弈兵绝平原救军真卿惧不敌以书招贺兰进明以河北诏讨使让之进明败于信都会平卢将刘正臣以渔阳归真卿欲坚其意遣贾载越海遗军资十余万以子颇为质颇甫十岁军中固留不从肃宗已即位灵武真卿数遣使以蜡丸裹书陈事拜工部尚书兼御史大夫复为河北招讨使时军费困竭李■〈山上罅下〉劝真卿收景城盐使诸郡相输用度遂不乏禄山乘虚遣思明尹子奇急攻河北诸郡复陷独平原博平清河固守然人心危不复振真卿谋于众曰贼锐甚不可抗若委命辱国非计也不如径赴行在至德元载十月弃郡度河间关至凤翔谒帝诏授宪部尚书迁御史大夫方朝廷草昧不暇给而真卿绳治如平日百官肃然两京复帝遣左司郎中李巽告宗庙祝署嗣皇帝真卿谓礼仪使崔器曰上皇在蜀可乎器遽奏改之帝以为达识又言春秋新宫灾鲁成公三日哭今太庙为贼毁请筑坛于野皇帝东向哭然后遣使不从宰相厌其言出为冯翊太守转蒲州刺史封丹阳县子为御史唐旻诬劾贬饶州刺史干元二年拜浙西节度使刘展将反真卿豫饬战备都统李峘以为生事因召为刑部侍郎展卒举兵度淮而峘奔江西李辅国迁上皇西宫真卿率百官问起居辅国恶之贬蓬州长史代宗立起利州刺史不拜再迁吏部侍郎除荆南节度使未行改尚书右丞帝自陕还真卿请先谒陵庙宰相元载以为迂真卿怒曰朝廷事岂堪公再破坏邪载衔之俄以检校刑部尚书为朔方行营宣慰使未行留知省事更封鲁郡公时载多引私党畏羣臣论奏乃给帝曰羣臣奏事多挟谗毁请每论事皆先白长官长官以白宰相宰相详可否以闻真卿上疏曰诸司长官者达官也皆得专达于天子郎官御史陛下腹心耳目之臣也今陛下欲自屏耳目使不聪明则天下何望焉今令宰相宣进止御史台作条目不得直进从此人不奏事天下之士钳口结舌陛下渐成孤立后悔无及矣后摄事太庙言祭器不饬载以为诽谤贬峡州别驾改吉州司马迁抚湖二州刺史载诛杨绾荐之擢刑部尚书进吏部杨炎当国以直不容换太

子少师然犹领使及卢■〈木巳〉益不喜改太子太师并使罢之数遣人问方镇所便将出之真卿往见■〈木巳〉辞曰先中丞传首平原面流血吾不敢以方拭亲舌舐之公忍不见容乎杞矍然下拜而衔恨切骨李希烈陷汝州■〈木巳〉乃建遣真卿谕之可不劳师而定诏可公卿皆失色至河南河南尹郑叔则以希烈反状明劝不行答曰君命可避乎既见希烈宣诏旨希烈养子千余拔刃争进诸将皆嫚骂真卿色不变希烈以身扞麾其众退乃就馆逼使上疏雪己真卿不从又遣李元平说之真卿叱曰尔受国委任不能致命顾吾无兵戮汝尚说我邪希烈大会其党召真卿使倡优斥侮朝廷真卿怒曰公人臣柰何如是拂衣去希烈大惭时朱滔王武俊田悦李纳使者皆在坐谓希烈曰闻太师名德久矣公欲建大号而太师至求宰相孰先太师者真卿叱曰若等闻颜常山否吾兄也吾守吾节死而后已岂受若等胁邪希烈乃拘真卿守以甲士掘方丈坎于庭传将坑之真卿见希烈曰死生分矣何多为张伯仪败希烈令赍旌节首级示真卿真卿恸哭投地会其党周曾康秀林等谋袭希烈奉真卿为帅事泄曾死乃拘送真卿蔡州真卿度必死乃作遗表墓志祭文指寢室西壁下曰此吾殡所也希烈僭称帝使问仪式对曰老夫曾掌国礼所记诸侯朝觐耳兴元后王师复振贼虑变遣将辛景臻安华至其所积薪于廷曰不能屈节当焚死真卿起赴火景臻等遽止之希烈弟希倩坐朱泚诛希烈因发怒使阉奴等害真卿曰有诏真卿再拜奴曰宜赐卿死曰老臣无状罪当死然使人何日长安来奴曰从大梁来骂曰乃逆贼耳何诏云遂缢杀之年七十六【按旧书七十七】嗣曹王皋闻之泣下因表其大节淮蔡平子顓硕护丧还帝废朝五日赠司徒谥文忠天下不以姓名称而独曰鲁公善正草书笔力遒婉世宝传之贞元六年赦书授顓五品正员官开成初又以曾孙弘式为同州参军

钦定续通志卷二百五十一

●钦定续通志卷二百五十二 列传五十二

列传

唐【五十二】

○唐五十二

李晟【愿 宪 愬听 王佖】

马燧【畅炫】

浑瑊【镐鏃】

李晟

马燧

浑瑊

△李晟

李晟字良器洮州临洮人世为裨将晟幼孤事母孝身長六尺才勇绝伦年十八从河西王忠嗣击吐蕃有骁酋乘城晟一矢毙之忠嗣抚其背曰万人敌也凤翔高升召补列将连破叛羌迁左羽林大将军击党项有功授特进大历初李抱玉署为右军都将吐蕃寇灵州抱玉授兵五千使击之晟曰以众则不足以谋则多遂将千人出大震关屠定秦堡吐蕃解去进开府兼右金吾大将军泾原四镇北庭兵马使马璘与吐蕃战盐仓败绩晟拔璘归封合川郡王璘忌晟归之朝为右神策都将德宗立吐蕃寇剑南诏晟将神策兵往救踰漏天拔飞越等三城【通鉴克维茂二州今从新旧唐书】追击大渡河虜引遁建中二年魏博田悦反攻临洛晟为神策先锋合河东马燧昭义李抱真兵攻斩杨朝光晟乘冰渡洛破悦又战洹水悦大败遂进攻魏朱滔王武俊应悦围赵州康日知抱真分兵二千戍邢燧怒欲引归晟曰邢赵比壤今贼攻赵李公分众守不为过公遽去奈王事何燧悟造抱真垒与交欢晟请合张孝忠兵图范阳以救赵帝益以神策三将晟自魏引而北武俊果解围晟与孝忠北略恒州围滔将郑景济于清苑决水以灌滔武俊悉兵赴救晟内攻景济外抗滔等相持五月不解遘疾甚引还定州贼不敢逼【通鉴晟军大败今据新旧书】疾间将复进会帝出奉天诏赴难孝忠以军介二盗间倚晟为重数止晟无西晟谓天子播越人臣当百舍一息义武欲止吾请留子约昏又解玉带遗其亲将使谕意始得行诏迎拜神策行营节度使进临渭北壁东谓桥刘德信自扈涧败归亦次渭南军器无制德信入谒晟晟责所以败斩之并德信兵势益振李怀光军咸阳不欲晟当一面请与合诏移屯陈涛斜每战晟必锦衣绣帽指导阵前怀光心恶之戒其持重晟曰昔在泾原士颇相畏服欲令识之夺其心耳怀光益怫晟使人说之进兵不纳怀光复奏神策兵给赐比方镇独厚众以为言欲晟自削其军则士怨易挠帝遣陆贽诏怀光与晟参议怀光曰禀赐不均何以令战晟曰公为元师专军政晟一军增损费调惟所命怀光不欲腴刻事出己乃止怀光屯咸阳凡八旬阴通朱泚晟惧为所并上言当先变制备请假裨将赵光铤唐良臣张彧为洋利剑三州刺史通蜀汉襟喉未报吐蕃请以兵佐诛泚帝议亲督战怀光疑夺其军图反益急晟与李建徽阳惠元联垒事迫适有使至晟乃令曰奉诏徙屯渭桥即结阵行未几怀光并建徽惠元兵惠元死之是日帝进狩梁州骆谷道隘从官乏食帝叹曰早用晟言三蜀可坐致也进晟尚书左仆射同中书门下平章事是时晟以孤军居强寇间恐二贼合以轧之则卑词厚币伪致诚于

怀光而阴为备使张彧假京兆少尹调畿内赋不淹旬
刍糒告具乃陈兵下令誓以收复士皆雪涕感奋于是骆元光守潼关尚可孤保七盘皆
受晟节度戴休颜韩游瓌率奉天邠盩师从晟怀光始
惧欲袭晟三令其众不应【怀光令众据通鉴增】乃奔河中偏将孟涉段威勇自拔
归晟诏加晟检校右仆射兼河中尹河中晋绛慈隰节
度使又兼京畿渭北鄜坊丹延节度招讨使帝欲益西幸晟请驻梁汉以系天下望又进
京畿渭北鄜坊商华兵马副元帅神策军及晟家皆陷
贼中左右或言及晟泣曰天子何在而敢恤家乎泚使晟吏王无忌壻款壁门曰公等家
无恙晟怒斩之时输缣不属盛夏士有衣裘者晟能同
劳苦终无携怨会诸将谋所向众言先拔外城后清宫晟曰坊市里閤隘贼若设伏鬪居
人器溃非计也贼精甲聚苑中直击心腹将走不暇则
宫阙保而肆廛安皆曰善遂移壁光泰门薄城贼将张庭芝李希倩【通鉴作希清】
求战晟勒吴玠等纵击华州师少贼急攻晟以精骑驰
救中军噪而从乘胜入光泰门贼再却尸蔽地余众窜白华终夜闻哭声明将复战或请
待西师晟曰贼胆已破当乘机扑灭不可少待容其为
备使王佖李演将骑史万顷将步抵苑北神麇村先夜隕苑墙二百步为道比至贼已栅
木拒战晟叱诸将曰安得纵贼当先斩公万顷惧拔栅
先入佖继进贼奔溃获段诚谏大军分道争前姚令言庭芝希倩犹殊死鬪晟令唐良臣
以步骑奔突贼十余遇辄北■〈足戚〉入白华贼伏
骑千余起晟率麾下百骑驰击左右呼曰相公来贼惊溃各就禽馘泚以残卒万人西遁
命田子奇追之余党悉降晟屯含元外廷舍右金吾次
令军中五日内辄通家问者斩遣京兆尹李齐运督长安万年令分慰百姓大将高明曜
取贼妓一司马佖取贼马二立斩以徇士民感悦诛贼
党八人于市表守节不屈者程镇之刘乃蒋沆赵晔薛岌等择文武摄台省以俟乘輿条
为贼胁污者请以不死露布上行在帝览之泣下羣臣
上寿且言晟荡涤凶慝市不易廛虽三代用师薨以加帝曰天生李晟以为社稷非为朕
也拜司徒兼中书令帝至自梁戎服谒见三桥再拜顿
首先贺殄歼大盗庙朝安复已即跪陈不能指日灭贼致銮輿再狩伏道左请死帝为掩
涕起之就位赐永崇里第泾阳延平门田园女乐一列
诏将相送入第帝自制纪功碑敕皇太子书立于东渭桥初晟屯渭桥荧惑守岁久乃退
宾佐贺具言进兵昌晟曰天子野次臣下惟知死敌安
知天道至是乃曰前士大夫劝晟出兵非敢拒也五纬羸缩无常万一复守岁则我军不
战自溃矣咸曰非所及也泾州数戕军帅晟请治不龚
命者因劝耕积粟羈制西蕃乃拜凤翔陇右泾原节度使行营副元帅徙王西平郡晟请

李楚琳俱行欲治杀张镒罪帝务安反侧不许晟至凤翔诛乱将王斌等十余人宦者尹元贞擅入河中谕慰怀光晟劾其矫使罪备言赦怀光有五不可河中抵京师纔三百里同州制其冲兵多则示疑少则无以控御一也赦怀光必以晋绛慈隰还之浑瑊康日知又劳迁徙二也兵力未穷忽宥反逆今回纥拒北吐蕃梗西希烈僭准蔡弃强示弱以招窥觐三也怀光既赦朔方将士应叙勋行赏府库方虚不酬所望愈激之叛四也诸道解还赏典不举怨言必起五也今河中米斗五百刍藁行罄其大将杀戮几尽围守旬时势必内溃臣请约十日粮以破贼帝方委燧瑊故不许泾州田希鉴先亦杀其帅未讨晟托巡边指泾执希鉴并其党悉伏诛具事以闻在镇倾家赀怀辑降附得大酋浪息曩奏封王号蕃使至息曩必在坐衣锦袍金带虜皆指目歆艳吐蕃大惧其相尚结赞多诈谋曰唐名将特李晟马燧浑瑊耳当以计去之即兴兵抵凤翔禁虜掠阳怒曰召我来何不出牛酒犒徐引退以是间晟晟先使王佖选兵三千伏汧阳令击其中军几获结赞又遣野诗良辅攻拔摧沙堡结赞屡求和未许更遣使卑词因燧乞盟燧上请晟适入朝力言戎狄不可信宰相韩滉意与合滉卒张延赏当国故与晟有隙虽诏讲解而阴不与数陈和亲便密言晟不可久持兵帝惑其言贞元三年册拜晟太尉中书令罢其兵及瑊将与吐蕃盟延赏曰李太尉谓和好必不成今盟日定矣晟闻泣曰吾生长西陲备谙虜情所以论奏耻朝廷为大戎侮耳【延赏及晟语从通鉴补辑】盟于平凉瑊果被劫仅得免罢燧河东一如结赞计云通王府长史丁琼为延赏挤抑见晟曰以公功乃夺兵柄恐位高难全盍早图晟执以闻四年诏为晟立五庙高祖芝以下皆追赠他日与燧见延英帝嘉其勋诏图象于凌烟旧臣之次命皇太子书诏文赐晟晟刻石于门九年卒年六十七帝震悼流涕手诏誓以存保世嗣申告柩前赠太师谥曰忠武元和中诏其家编属籍配飨德宗庙庭晟性疾恶莅下明每治军必曰某有劳某能某事虽厮养小善必录笃于故旧岚州刺史谭元澄尝有德于晟遭贬死晟贵理其枉厚抚其二子尝慕魏征直谏致太宗尧舜上司马李叔度曰此搢绅儒者事非勋德所宜晟曰君失词幸备位将相容身不言岂所谓有犯无隐邪叔度惭晟进对睿谔尽大臣节出未尝露于人理家以严子侄非晨昏不得见言不及公事正岁崔氏女归盛让曰姑在堂妇当治酒食且以待宾立遣还家达礼敦教类如此既卒城盐州复故池以新盐赐宰执帝思晟致盐于灵座眷遇始终无与比有十五子知名者愿宪愬听

李愿

李宪

李愬

李昕

王佖

李愿

愿少谦谨晟立勋时诸子尚无官宰相以闻德宗即授愿太子宾客上柱国旧制柱国门列戟遂父子并赐元和初为夏绥银宥节度政令简严部人有失马者愿悬金署牒以购三日榜下得马二系书云逸至不时告谨以良马一赎罪愿归失马而纵其良四境肃然移镇武甯讨青郛数有功因疾以弟愬代俄节度凤翔颇崇声色怠于政长庆中徙宣武先是张弘靖给军优厚愿赏赉不及前而操下甚威用妻弟竇綏【通鉴作竇瑗】领亲兵复骄鹜贪黷牙将李臣则夜突斩綏愿闻变不及巾与左右数人缒城夺野人乘驰以免城中推李■〈宀介〉为留后月余诛之贬愿隋州刺史寻拜河中晋绛等节度荒侈如旧厚赂权近赋入随尽蒲人怨且乱会卒赠司徒

李宪

宪与愬最称仁孝宪好儒动循礼则襄阳于頔辟为从事时吴少诚跋扈独畏頔人以为得宪之助迁卫州刺史有治行再徙绛州河中兵素仰食于绛岁租与余常数十万石故敖倚山民输一车十牛犹不胜宪相地建仓汾滨费当二百万请留垣县粟棗河南以钱还余绛粟既免负载且权其赢完新仓绛人甚赖之入为宗正少卿太和公主降回鹘为送使副还献回鹘道里记后由江西观察转岭南节度宪虽勋伐起家所厯政绩显著善治律令而性明恕尝活大狱无罪者数百人卒于官

李愬

愬字符直有筹略娴骑射荫补协律郎选卫尉少卿晟卒与宪庐墓次德宗诏归第一宿复徙跣往遂许终制服阍为坊晋二州刺史治异等宪宗讨吴元济唐邓节度高霞■〈宀禹〉败绩代以袁滋亦无功愬求自试宰相李逢吉谓愬可用授检校左散骑常侍隋唐邓节度使至军不为斥候部伍或以不肃言愬曰贼方安袁公之宽吾不欲使震而备我下令曰天子知愬能忍耻第委拊循战非吾事因斥罢倡乐士伤病者亲为营护贼降者听其便或有亲在劳之曰而亦王人无弃亲戚给粟帛遣还众愿为死山川险易贼情伪悉以告居半岁知士心振厉请济师诏益河中鄜坊骑二千于是攻下马鞍山拔道口栅战楂枒山取炉冶城入白狗汶港栅袭楚城朗山平青陵城禽骁将丁士良【通鉴作

王士良】 异其才不杀署捉生将士良谢曰吴秀琳以数千兵不可破者陈光洽为之谋也我能为公取之乃禽以献秀琳即举文城栅降遂以其众攻吴房日值往亡吏白法宜避愬曰彼不吾虞正可击也入外郭引还贼率精骑尾击愬众殊死战射杀其将孙忠宪 【通鉴作孙献忠】 或劝乘胜攻子城不听秀琳进策曰欲破贼非得李佑不可愬遣史用诚候佑护获伏骑以羸卒诱佑果轻出禽之诸将素苦佑请即戮愬不应待以客礼问与李忠义并召屏人语至夜分忠义本名宪亦降将军中多谏二人不可近遇之益厚会绵雨数月不绝咸谓不杀佑之罚且称谍言佑为内应愬持以泣曰天岂不欲平贼乎何见夺者众邪械佑送之朝密言杀佑则无以成功诏释还愬令佩刀出入帐下署六院兵马使众不敢复言始定谋袭蔡旧令舍谍者族愬刊其令谍反效以情时李光颜战屡胜元济悉锐卒抗洄曲愬知隙可乘遣告裴度师期元和十二年 【新书十一年误】 十月十日师夜起以佑及忠义帅突将三千为前锋自将三千为中军田进诚 【通鉴作李进诚】 以后军殿出文城栅令曰东趋六十里至张柴歼其戍敕士少休复旆而出吏请所向愬曰入蔡州取吴元济诸将失色监军泣曰果落佑奸计会大雨雪天晦凜风偃旗马栗缩士抱戈僵仆者道相望陂泽阻奥未尝历皆谓投不测然业从愬人人无敢为身谋愬道分兵断洄曲朗山路自张柴行七十里夜半达悬瓠城雪甚击城旁鹅鹜池以乱军声佑坎墉先登众继进杀门卒发关留击柝者鸡鸣雪止愬入元济外宅蔡吏惊曰城陷矣元济尚不信曰洄曲子弟归索褚衣耳及闻号令曰常侍传语惊曰何常侍得至此率左右登牙城进诚环攻愬计元济望救于董重质访慰其家使召以书重质单骑归诣愬降进诚火南门元济穷蹙请罪梯下槛送京师申光诸屯相继降愬不戮一人屯兵鞠场以俟度度至愬具橐鞬迎度欲避愬言蔡人久废上下分请示之礼遂受愬谒观者咸耸明日还军文城加检校尚书左仆射山南东道节度封凉国公赐一子五品官方禽元济诸将请曰始公败朗山不忧胜吴房不取冒大风雪不止孤军深入不怯而卒以成功何也愬曰朗山不利可弛其备若取吴房贼将并力守蔡存之以分其兵雪夜烽断莫知吾至深入人有致死心战自倍众皆服 【语从通鉴补辑】 帝欲经略陇右徙愬凤翔未发李师道反诏愬代愿帅武宁旬日践父兄两镇世以为荣愬击贼金乡十一遇辄胜淄青平进同中书门下平章事赐第兴宁里田弘正移镇州以愬领魏博镇军乱杀弘正愬闻素服令三军曰魏人得通圣化者田公力也田公抚魏七年天子嘉其仁爱使往治镇今镇人敢行不道是轻魏无人父

子兄弟食田公恩其何以报众皆哭又遗口德将牛元翼玉带宝剑谓之曰吾先人以此剑翦大盗吾又以平蔡寇今用授公努力诛贼元翼报曰愿尽死勒兵以俟愬疾甚不能出师诏田布代除太子少保还东都卒年四十九赠太尉谥曰武愬俭约持已昆弟席勋贵率饰室庐仆马独愬处父时故院无所增始晟克京城市民安堵及愬平蔡复踵其美晚与郑注善失于取士论者不以揜其贤云

李听

听字正思七岁荫协律郎父吏少之不甚敬听辄鞭之晟奇其才长辟于頔府吐突承璀讨王承宗擢听神策行营兵马使斩贼骁将宪宗诏图状以进卢从史持两端承璀用听计卒就缚迁蔚州刺史民多盗铸听开旧炉日铸钱五万无敢私犯徙安州观察使柳公绰讨蔡署听典军声警贼境召为羽林将军帝讨李师道出为楚州刺史郢人素易淮军听加训厉出贼不意趋涟水破沐旺阳绝龙沮堰遂取海州降朐山戍余城皆送款以功迁御史大夫夏绥银宥节度旋徙灵盐部有光禄渠久废听决渠溉千顷屯田以省转饷利赖甚饶穆宗立择名臣代裴度帅太原以在东宫时听方为羽林索其骏马不敢献乃曰李听不与朕马是必可任授检校尚书节度河东敬宗嗣位改义成军太和初讨李同捷时魏博将元志绍【新旧书作志绍此从通鉴】潜结沧镇反攻其帅史宪诚诏听出援击杀志绍【旧书志绍败奔镇州为王廷凑所杀】封凉国公荫一子五品官宪诚既请朝诏听兼领魏博迁延不即赴魏人杀宪诚立何进滔拒守听不得入屯馆陶进滔乘无备揜击师惊溃听昼夜驰免辘械尽丧御史中丞温造等劾奏帝不罪罢为太子少师听素赂权幸多为援助未几拜邠宁节度使邠署相传不利葺垣宇听曰将凿凶门而出何避治舍亟使整完卒无异改镇武宁军故奴为徐将不喜听至杀其所遣亲吏听惧固辞疾用为太子少保开成中为河中节度使帝叹曰付之兵不疑置之散地不怨惟听为然四年以疾求还复为太子太保卒年六十一赠司徒听莅官苛细聚敛以极欲或诫其盛饰服玩答曰勋家若示衰薄恐不显忠功之效吾欲夸而劝之也子琢历义昌平卢镇海三节度使无显绩可称道后为蔚朔等州节度使徙河阳三城坐逗挠下迁刺史卒

王佖

王佖晟之甥武敢善射晟出师佖必从攻朱泚于光泰门贼锋尚锐佖与李演血战连败贼诸军乘势大振擢授神策将在泾原击吐蕃有功晟视佖等诸子而给与有过晟兵罢佖亦入为左卫上将军元和中拜灵盐节度使先

是吐蕃欲作乌兰桥以过师贮材河壩朔方府每潜遣兵发木委诸河迄不成僖至虜知其贪而寡谋厚赂之而急就功筑月城以守由是岁御寇不暇人以咎僖在镇无检下术多猜忌杀人召还为右卫将军久之卒

△马燧

马燧字洵美其先自右扶风徙汝州郟城父季龙岚州刺史燧姿貌魁伟长六尺二寸少与诸兄学辍策叹曰丈夫当建功济世宦老一儒哉遂精兵法沈勇多智禄山反使贾循守范阳燧说循使诛向润客牛廷玠倾其本根循许不时决禄山遣韩朝阳缢杀循燧间道归平原平原不守复走魏泽潞节度李抱玉署为赵城尉时回纥归国恃功剽肆供饷小不称辄杀人抱玉宾介惮往燧自请典办具先赂其酋与约得其旗章为信犯令者得杀之燧又取死囚给役小违令辄戮虜大骇比出境帖然抱玉奇其才燧因曰属与回纥接颇得其情仆固怀恩内树李怀仙张忠志辞嵩田承嗣为党外交回纥将必窥太原宜早备既而怀恩果与太原将谋举其城辛云京觉之不克嵩自相卫馈怀恩粮抱玉令燧往说嵩与怀恩绝累迁郑州刺史劝督农务岁一税民甚便徙怀州值兵后大旱失耕燧勤教化止横调烦苛厚礼将士之亲收瘞暴毙是秋稻生于境人赖以济抱玉移凤翔表燧陇州刺史州西山有道吐蕃常所出入燧聚石种树以障设二门为谯橧八日毕功虜不能暴从抱玉入朝代宗雅闻燧才召见授商州刺史兼水陆转运使河阳逐其将常休明诏燧检校左散骑常侍为三城使汴将李灵耀反引魏博为援命燧与淮西李忠臣合讨忠臣战败将还燧曰以顺讨逆何忧不克慎毋弃功名忠臣乃收亡卒势复振败贼于西梁固燧又独破其饿狼军八千田悦率众二万救灵耀败永平淄青兵乘胜距汴一舍而屯忠臣合诸军战不利燧出奇兵奋击悦单骑遁【通鉴忠臣先遣李重倩夜扰其营与燧以大军乘之悦不战而溃稍异】灵耀亦走被禽汴州平燧知忠臣暴傲让其功不欲入汴出舍板桥忠臣果因会击杀宋州刺史李僧惠燧还河阳秋大雨河溢吏请具舟避燧曰使城中尽鱼而独完其家吾不忍已而无害迁河东节度使太原承鲍防之败兵力衰单燧募厮役数千教之数月悉成精骑造铠必短长三制称所衣以便进趋为战车蒙以狻猊象列戟于后行载兵甲止为营阵遇险遏奔冲器用完锐居一年得选兵三万威摄北方建中二年入朝检校兵部尚书封豳国公还镇田悦遣将围邢州自攻临洺邢将李洪【通鉴作李共】临洺将张仝固守诏燧以步骑二万与昭义李抱真神策兵马使李晟合军赴救燧出崞口未过险移书示好

于悦悦以为畏己大喜既次邯郸斩悦使以徇破其支
军悦遣杨朝光以兵万人据双冈筑东西栅燧军营二垒间东栅走归悦燧即其弃栅置
辎重悦其众计曰朝光栅坚燧攻未能即下杀伤必多
吾则已拔临洛飡士而战必胜术也分兵助朝光燧令大将李自良等守双冈戒曰令悦
得过者斩自推火车焚栅击斩朝光进军临洛悦悉军
战燧以锐卒当其冲凡百余返士皆决死悦大败去斩首万级俘千人获粮三十万斛邢
围亦解以功加右仆射先战燧约师胜则以家货赏至
是殫私财颁麾下德宗诏度支出钱五千万以偿进兼魏博招讨使李纳李惟岳合兵万
三千救悦悦哀散兵二万壁洹水燧请益师诏河阳李
芑以兵会次于漳悦遣王光进守长桥扼军路燧以铁锁维车数百载土塞下流而渡悦
知燧食乏坚壁不出燧赍十日粮临仓口与悦夹洹而
军造三桥逾洹日挑战抱真芑问曰粮少而深入何也燧曰粮少利速战今悦联淄青恒
为首尾欲不战以老我师若分击左右悦且来助是腹
背支敌也当攻其必救令诸军夜半食潜师趋魏曰闻贼至止为阵留百骑鸣鼓角持火
待军毕发匿其旁须悦众度即焚桥行十余里悦与李
纳等兵踰桥乘风纵火噪而前燧令无动除榛莽广百步为场募勇士五千阵而待比悦
至火止气衰燧纵兵直击悦大败走桥桥焚众赴水死
者不胜计斩首二万虜三千尸横三十里悦乘夜走魏州其将不纳追骑不至乃得入婴
城自守于是李再春以博州悦兄昂以洛州王光进以
长桥皆降悦使符璘李瑶卫淄青残兵还璘瑶亦降魏先导御河贯城燧塞其上游悦益
恐遣使求助于朱滔王武俊二人方怨望乃连和悦恃
燕赵援出兵背城阵燧复与诸军击破之进中书门下平章事北平郡王 【封王旧书在
兴元元年】 滔武俊联兵救魏帝遣李怀光以朔方
军助燧怀光未休士即与滔等战大败滔堰水绝官军粮道燧退保魏县滔等军亦至濒
河为垒会帝出奉天燧引还太原初抱真欲杀杨鉢燧
奏免之及邢围解获军粮燧自有之抱真怒洹之捷军趋魏有突骑犯燧营抱真勒兵不
救燧将攻魏抱真请独当一面繇是逗遛武俊略赵地
抱真分兵戍邢燧怒将引还李晟和之乃复与抱真善及田昂降燧请以洛州隶抱真抱
真亦请分李晟兵隶燧以示协一然议者咎燧以私忿
迁延卒不成大功燧遣王权以兵五千赴奉天又令子汇及诸将子壁中渭桥帝已幸梁
州乃还燧念晋阳王业所基宜固险引晋水注城为池
酏汾水环城树柳捍堤帝还都李怀光反加燧河东保宁奉诚军行营副元帅与浑瑊骆
元光共讨河中贼党要廷珍守晋毛朝扬守隰郑抗守
慈燧移檄招谕皆以州降因拜燧晋绛慈隰节度使武俊之围赵也康日知将弃赵燧请

诏武俊击朱滔授以深赵以日知为晋慈隰节度使及三州降燧固让日知且言因降而授恐后有功者踵以为常帝嘉许燧军次绛略诸县降其将冯万兴任象玉绛守将弃城遁进战宝鼎射杀贼将徐博文斩首万级获马五百时天下旱蝗朝士多请宥怀光燧以怀光反复不可信河中近甸舍之屈威灵无以示天下入朝面陈得三十日粮足平贼许之乃与瑊元光韩游瓌合兵贼将徐廷光守长春宫城燧挺身至城下廷光惮燧拜城上燧度其心屈徐曰我自朝廷来可西向受命廷光复拜燧曰朔方将士自禄山以来功高天下柰何为族灭计从吾言非止免祸立富贵未对燧曰尔以吾为欺今不远数步可射我披而示之心一军皆感泣即降燧以数骑入城众大呼曰吾等更为王人矣 【通鉴廷光将士闻燧言伏泣燧令第坚守弗出皆诺遂进逼河中骆元光招廷光廷光辱骂及燧还乃开门】 焦篱堡将亦降余戍望风遁燧济河兵八万列阵城下是日牛名俊斩怀光首以降诛其党阎晏孟宝张清吴罔等它胁附悉赦之不阅月河中平迁光禄大夫兼侍中赐一子五品官还太原帝赐宸宸台衡二铭燧勒石起义堂帝为题额贞元二年吐蕃尚结赞陷盐夏二州屯鸣沙及春畜死粮乏诏燧与元光游瓌会击尚结赞惧乞盟帝不许乃甘词重币请于燧明年燧偕蕃使论颊热朝盛言宜许盟诏浑瑊与盟平凉瑊被劫仅免吐蕃归所掠燧兄子弇曰河曲之屯春草未生公若渡河我无种矣赖公许和今以报帝闻侮怒夺其兵拜司徒兼侍中赐伎乐奉朝请而已五年与李晟并图象凌烟阁后病足不任谒九年十月自力朝廷英诏毋拜时晟初卒帝顾燧悲涕曰尚记与太尉晟俱来今独见公燧疾而仆帝亲掖诏左右扶去送至陞燧顿首泣谢固乞骸让侍中不许十一年八月卒年七十赠太傅谥曰庄武子汇畅

马畅

马炫

马畅

畅少以荫生至鸿胪少卿燧讨山东时畅留京师值岁旱朝廷括商旅缗钱多入南山为盗畅客窃议事且危畅遂遣奴谏燧班师燧以闻使兄炫拘畅请罪帝贷不问但诛其客敕炫杖畅三十亦罢括商令燧卒后畅赀甲天下晚为豪幸中官等侵牟以至穷困终少府监赠工部尚书诸子竟无室庐自托当世以畅为厚畜戒子继祖以门功为太子舍人五迁至殿中少监卒

马炫

燧兄炫字弱翁以儒学闻隐苏门山李光弼镇太原辟掌书记甚器之田神功署为节度判官授连润二州刺史政绩清白燧为司徒授刑部侍郎以兵部尚书致仕卒

△浑瑊

浑瑊本铁勒九姓之浑部世为皋兰都督父释之以才武积功朔方累迁开府仪同三司宣朔郡王广德中载没吐蕃 【按代宗本纪广德二年仆固怀恩杀朔方节度留后浑瑊释之新书瑊传释之与吐蕃战没旧书作与吐蕃战没于灵武皆与纪异考通鉴白玉焦晖既杀仆固瑒怀恩自汾州度河北走朔方将浑瑊之守灵州怀恩至将拒之其甥张韶曰彼或翻然改图以众归镇何可不纳释之疑未决怀恩行速先候者而至释之不得已纳之韶以其谋告怀恩乃以韶为闻杀释之而收其军然则释之实为怀恩所杀灵武正其地也谓与吐蕃战没盖当时怀恩以吐蕃叛或用间为谋假手吐蕃以杀之耳异辞而实一事今仍其旧而附识之】 瑊少善骑射年十一即随父防秋从破贺鲁部拔石堡城龙驹岛署折冲果毅节度使安思顺授以偏师入葛禄部破阿布思与诸军城永清及天安军迁中郎将禄山反随李光弼定河北杀贼骁将李立节肃宗即位率兵趋行在至天德遇蕃军入寇败之从郭子仪复两京破安庆绪新乡擢武锋军使从仆固怀恩平史朝义大小数十战功称最改太常卿怀恩图逆瑊归子仪父丧起复朔方行营兵马使怀恩诱吐蕃十万至奉天瑊率骁骑冲其阵挟一虏还夜袭杀数千人士气大振 【从通鉴补辑】 以功加御史中丞后虏复入寇瑊胜之漠谷迁太子宾客屯奉天周智光反子仪令瑊以步骑万人下同州智光平屯宜禄防秋大历八年吐蕃大犯边 【新书七年通鉴本纪俱在八年】 瑊会泾原马璘兵次黄菩原宿将史抗违令军大败子仪谓诸将曰朔方兵精天下今为虏败奈何瑊请再战乃驰朝那与盐州刺史李国臣邀虏秦原悉夺所掠而还领邠州刺史寻击却吐蕃于方渠怀安子仪入朝知邠宁庆兵马留后回纥侵太原破鲍防军拜瑊都知兵马使督石岭关以南诸军为犄角虏引去子仪为太尉所部析为三节度以瑊兼单于大都护绥银麟胜州节度副大使未几崔宁领朔方入为左金吾卫大将军建中四年李希烈诈为瑊交通书帝识其妄更赐良马锦币泾师乱瑊率宗人子弟从帝至奉天授行在都虞候京畿渭北节度使朱泚兵薄城晨至日中战不解有刍车至瑊曳以塞门焚而战贼始退灵武杜希全等援兵将至帝议道所从出瑊谓漠谷险狭必为贼邀不若自干陵北过卢■（木巳）言恐惊陵寝瑊曰泚日斩干陵松柏其惊多矣今城中危蹙

希全等若得营据要地则泚可破帝竟用■〈木巳〉策四军皆溃泚治攻具益急矢石四集如雨昼夜不息凡浹日人心惴甚或夜缒出掇疏供御帝与瑊对泣泚方据干陵下瞰衣黄衣蔽翟扇宦人趋拜左右纵嫚词指斥使骑环驰责大臣不识天命造云梁广数十丈可容五百人施大轮濡毡冒革周布水囊为障直指城东北旁构木庐运薪土其下将塞隍帝授瑊空名告身千余募突将死士赐瑊笔使量功以署不足则署衣因曰朕与公诀矣有急可令马承倩奏瑊俯伏呜咽受命时士卒冻馁甲兵弊乏瑊但以忠义感率羣臣忧不支号天以祷瑊中矢自拔被血而战先与防城使侯仲庄揣云梁所道掘深隧积马矢燃薪以待贼乘风推云梁进及隧而轮陷风返悉焚死者数千举城欢噪振地是日授瑊二子官赏将校有差泚复来攻会李怀光赴难乃解去进瑊行在都知兵马使怀光反帝狩山南瑊卫入谷口击却怀光追骑加检校左仆射同中书门下平章事奉天行营副元帅帝用汉拜韩信故事临轩授钺瑊将诸军趋京师贼将韩旻拒武功瑊会吐蕃兵大破之武亭川遂屯军奉天以抗西面李晟破贼之日瑊与韩游瓌戴休颜收咸阳进屯延秋门泚平兼侍中帝还宫授河中同陕虢行营副元帅由楼烦郡王徙封咸寧赐第大寧里女乐五人将相送归第如晟礼俄转朔方行营副元帅与马燧同讨怀光怀光平检校司空任一子五品官镇河中蕃相尚结赞畏瑊与晟燧欲以计胜诡请燧求盟燧力赞可许诏纳盟平凉川以瑊为会盟使为结赞所劫副使崔汉衡以下皆陷惟瑊免自奉天入朝素服待罪诏释之使镇奉天以御吐蕃寻还河中四年授邠寧庆副元帅十二年检校司徒兼中书令十五年卒年六十四赠太师谥忠武瑊通春秋汉书尝慕司马迁自叙着行纪一篇词不矜大性忠谨功高愈下岁时贡献必躬阅视拜赐常如在上前世方之金日磾故始终为帝信待猜问不能入有所奏论不尽可辄私喜曰上不疑我君子贤之本名日进稍显改焉子镐鏃

浑镐

浑鏃

浑镐

镐素谦谨喜接士大夫历唐邓二州刺史有政誉元和中延州沙陀部苦边吏贪扰朝议选才干者为刺史任镐延州会讨王承宗义武任迪简病不能军擢镐为节度使治兵颇有法然计略短而不务持重镇定相去九十里遽引兵压镇境贼见镐无斥候潜师入定肆焚掠镐军摇中人促战乃出薄贼大败而还诏以陈楚代时师饥冻遂劫镐家至裸辱楚驰入城始定令军中归所掠卫出之坐贬韶州刺史后代州刺史韩

重华奏镐隐供军钱币十余万再贬循州卒

浑鑑

鑑以荫补诸卫参军迁丰州刺史坐赃贬袁州司马【旧书袁州司户】还为袁王傅李训郑注之乱或言鑑匿贾餗百骑搜捕苦辨始免而家一空文宗怜之授殿中监宰相拟以刺史帝曰是岂可以牧民念其父功富之可也宰相言鑑尝治郡有声乃拜寿州刺史终诸卫大将军

钦定续通志卷二百五十二

●钦定续通志卷二百五十三 列传五十三

列传

唐【五十三】

○唐五十三

杨朝晟 戴休颜 阳惠元 李元谅 李观 韩游瓌

杜希全 邢君牙

杨朝晟

戴休颜

阳惠元

李元谅

李观

韩游瓌

杜希全

邢君牙

△杨朝晟

杨朝晟字叔明夏州朔方人起行间为甘泉府果毅从李怀光讨泾州刘文喜以功授骠骑大将军李纳寇徐州随唐朝臣往讨常冠军怀光赴难奉天属朝晟将千人下咸阳怀光反韩游瓌入邠寇贼党张昕守邠州索军资募士欲归怀光朝晟父怀宾为游瓌将夜斩昕及同谋者游瓌遣以闻授御史中丞朝晟泣见怀光曰父立功于国子当诛不可主兵怀光縶之诸军围河中怀宾从游瓌战长春宫甚力怀光平帝原朝晟因为游瓌都虞候游瓌御士素宽及张献甫来代军遂乱胁监军请范希朝为帅希朝时在京师朝晟阳许之给众曰予贺所请之当也众稍定潜结诸将诛首恶二百余人献甫始得入军帝以希朝为副使加朝晟御史大夫贞元九年城盐州朝晟屯木波堡献甫卒代为邠寇节度十三年请城方渠合道木波以遏吐蕃路且言部兵足办诏问前城五原用师七万今何易

邪对曰盐州集军兴役蕃戎先知今调本镇兵十日抵
塞下出不意而城虜料吾众不减七万未敢轻入不三旬可毕功聚粮屯卒寇至莱野翦
夷不能久留此万全计也若大发兵阅月乃至虜知必
来战则不暇城矣帝纳其策师次方渠水乏有青蛇乘高下视其迹水随而流筑防环为
涇渊汲饮仰足有诏置祠命泉曰应圣己城吐蕃众至
度不能害数日引去复城马岭而还拓地三百里十七年防秋于宁州卒

△戴休颜

戴休颜夏州人有胆略为郭子仪部将谕平党项以安河曲试太常卿封济阴郡公
进咸宜郡王兼朔方节度副使城邠州功最迁盐州刺
史奉天之难率部兵三千昼夜奔赴与浑瑊杜希全韩游瓌等捍御有功德宗进狩梁洋
留守奉天李怀光遣人招诱即斩其使婴城固守怀光
大骇自涇阳夜遁加检校工部尚书奉天行营节度使合浑瑊兵击泚偏师追至中渭桥
斩首三千京城平又与瑊趋岐阳邀泚余党进右仆射
扈驾还都赐女乐甲第寻拜左龙武统军卒赠扬州大都督弟休璇休宴俱以将略称
显官

△阳惠元

阳惠元平州人赳勇多权略从军平卢后与田神功李忠臣泛海至青齐诏以兵隶
神策为京西兵马使镇奉天德宗初立稍绳诸镇于是
李正己田悦各增兵屯河南大扰诏移兵万二千戍关东帝御望春楼誓师劳遣酒至神
策将士皆不饮帝问故惠元对曰臣发奉天臣之帅张
巨济约曰是役也不立功毋饮酒臣不敢违既行有司供馈于道惟惠元军瓶罍不发帝
嘉叹降玺书慰劳田悦反领兵会诸将合讨战御河夺
三桥功为最以兵属李怀光建中四年自河朔赴难解奉天围加检校工部尚书摄贝州
刺史【旧书在赴奉天前】诏与李晟李建徽及怀
光联营便桥俄晟移垒翰林学士陆贽谏帝曰晟既虑变东徙宜托言晟兵寡藉惠元建
徽为掎角以备贼为解密谕趣装进道则怀光计无所
施帝不从使李升往伺是夕怀光夺二军惠元建徽走奉天怀光遣将冉宗追及于好畤
惠元被发呼天血流出眦袒裼战死二子晟曷匿井中
皆及害【旧书惠元及二子并投井中冉宗害之稍异】赠惠元尚书左仆射晟殿中
监曷邠州刺史少子旻字公素好畤之难被八创堕别
井救免历邢州刺史卢从史被缚有骁卒五千溃奔旻旻闭城不纳谕以祸福众感悟还
军宪宗嘉之迁易州讨吴元济时以唐州刺史提兵薄
申州拔其外垣加御史中丞容州蛮反授本州岛经略招讨使既平进御史大夫卒赠左
散骑常侍

△李元谅

李元谅安息人本安氏少养于宦官骆奉先冒姓骆名元光美须髯武敢有谋备宿卫试太子詹事镇国李怀让奏署副使军中皆畏服朱泚乱遣何望之袭华州刺史董晋弃城走望之入据元谅自潼关引兵拔其城数日募众万余军乃振时尚可孤守蓝田元谅屯昭应王权壁中渭桥相为声援贼不敢踰渭南授镇国军节度使封武康郡王先是幽陇兵出关讨李希烈泚使刘忠孝召还华阴尉李夷简追捕及关元谅斩以徇所召兵不得入故华州独完俄诏与李晟收京师元谅奋击于浚西败贼进屯苑东晟使坏苑垣入贼连败遂大溃功成让晟退壁近郊加尚书右仆射赐甲第女乐一子六品官寻与马燧浑瑊讨李怀光其将徐廷光素易元谅嫚骂且为优胡侮其祖廷光降于燧元谅遇之军门叱左右斩之乃诣燧谢燧大怒将杀元谅韩游瓌曰杀一偏裨尚尔杀一节度法宜如何燧默然元谅请输劳军钱百万自赎瑊亦为请燧释之贞元三年瑊盟吐蕃命元谅以军驻潘原元谅曰潘原去平凉七十里虏情多诈有急何以赴请连屯瑊以违诏不许瑊壁距盟所二十里元谅密徙相次会日元谅望云物知不祥严部伍结阵俄而瑊被劫奔還元谅成列出李观亦以精兵伏险追骑乃退元谅先遣辎重而徐与瑊振旅归帝嘉叹赉良驹金币赐姓及名迁节度陇右治良原隍堞湮圯旁皆平林荐草虏入寇常休牧于此元谅与士卒培高浚深芟榛莽辟美田数十里岁收粟数十万斛又筑连弩台进据胜势列新城虏至辄北去泾陇由是义安卒年六十二赠司空谥曰庄威

△李观

李观其先自赵郡徙为洛阳人少沈厚寡言以策干朔方节度郭子仪遣佐坊州刺史吴柚为防遏使亲丧免居罄屋吐蕃入寇代宗幸陕观率乡里子弟千人守黑水虏不敢近岭南节度使杨慎徽奏充偏将及徐浩李勉代领军政悉倚任焉累迁大将召为右龙武将军泾师叛观适番上领卫兵扈驾至奉天增募五千人列通衢城中气振从幸梁州以劳着帝还诏总后军擢四镇北庭行军泾原节度使在镇四年励士储粮境以盗辑平凉之盟微观与李元谅浑瑊几不免是年入朝除少府监检校工部尚书卒赠太子少傅

△韩游瓌

韩游瓌灵州灵武人始为郭子仪裨将安禄山反使阿史那从礼出塞诱九蕃府六胡部落子仪遣游瓌率辛京杲击破之进邠宁节度留后德宗出狩兵未集游瓌合庆州刺史论惟明趋赴遇朱泚兵欲还奉天监军翟文秀曰

吾壁于此贼敢踰我可夹攻若向奉天是引贼逼天子也游瓌曰贼分军缀我余众犹能鼓而西奉天无强卒安能夹攻遂还泚蹶至与战不利泚兵夺门游瓌殊死鬪乃解泚毁佛寺治攻具游瓌以寺材皆干薪具火以待贼攻南雉游瓌趋北堞遣将火其栅贼气沮帝置卫卒统军以游瓌惟明贾隐林李怀光叛游瓌白发招诱书帝嘉其忠问计安出对曰怀光总诸镇怙以为乱陛下但以众与地授各守将罢怀光权而尊以元功彼奚能为帝曰罢怀光而泚益张奈何对曰今贡赋方至酬士以不次之赏其守自固邠精甲有万臣将之纠合四方义军贼不足灭帝美其言会怀光诱复至浑瑊得书稍警备游瓌不知怒骂瑊帝疑有变进幸梁州游瓌既失兵用客刘南金计招旧部兵八百驰入邠说张昕母从逆昕不听欲加害游瓌阴结其将高固等伏甲斩昕怀光子玫在邠游瓌卫出之曰杀之祇速敌至怀光遂奔蒲游瓌屯七盘稟李晟节度诏拜邠节度使与瑊及戴休颜分扼京西险要晟入长安游瓌破泚兵咸阳加检校尚书左仆射扈帝还宫论功与瑊等皆第一还屯邠帝怀光寇同州瑊败于干坑诏游瓌并力破贼众五千遂会瑊马燧平河中贞元二年吐蕃入泾陇邠节度使游瓌追至安化遣将夜袭其营虜惊逸继因燧乞盟诏问游瓌对曰西戎强则入寇弱则求盟今侵地益深而有请诈也帝不从会盟平凉命游瓌屯洛口盟之日游瓌令众曰有变急趋柏泉以分其势虜骑追瑊见兵出解去后又寇丰义复败之南原子钦绪为射生将与妖人谋反事泄奔邠州中人捕斩 【旧书通鉴邠州将吏械送京师稍异】 游瓌求归死不许执钦绪二子送京师亦原之旋入朝素服听命诏复位劳遇如故以请城丰义趣还军初众谓游瓌之朝且得罪赍送殊薄及还举军不安游瓌欲杀大将范希朝希朝奔凤翔召入宿卫游瓌城二版而溃卒大掠不能禁帝用张献甫代未至游瓌畏乱即赴都拜右龙武统军卒谥曰襄

△杜希全

杜希全京兆醴泉人隶郭子仪麾下积功至朔方节度使整肃军令士皆畏服奉天之狩首与鄜坊节度李建徽盐州刺史戴休颜夏州刺史时常春引兵赴难次漠谷贼乘高纵礮发弩邀击德宗遣援不得进希全退守邠州贼平迁检校尚书右仆射灵盐丰夏节度使封余姚郡王将即镇献体要八章规切时政帝嘉纳赐君臣箴一篇寻兼夏绥银都统建言盐州为塞保鄜自平凉背盟遂陷于虜为边深患请复城之诏希全合朔方邠节度银夏鄜坊振武及神策行营兵三万五千赴盐州又敕泾原剑南山南军入蕃畜制执筑凡六千人阅二旬毕虜由是不敢轻入

希全久镇河西颇越法帝数优容忌丰州刺史李景略名出己右力加排劾帝为斥以答其意素苦风眩增剧益暴忍诬杀判官李起将士累息卒赠司空

△邢君牙

邢君牙瀛州乐寿人从幽蓟平卢军历折冲郎将安禄山反从侯希逸涉海入青州田神功为兖郛节度令将兵防秋好时代宗避吐蕃幸陕以扈从功累封河间郡公李晟讨田悦署为都将战武安襄国洹水功最德宗在奉天晟率君牙倍道赴难屯渭桥军事咸商之晟镇凤翔数行边常以君牙守后晟入朝代为凤翔观察使俄领节度检校尚书右仆射吐蕃岁犯边君牙修耕战以备戎不能为患又城陇州平戎川号永信城卒赠司空初布衣张汾于君牙坐客上会君牙怒吏盗宴钱汾不谢去曰素闻邢君牙一时豪俊今乃与吏论钱云何君牙惭遽释吏款汾月余谢以缣五百其屈己好士类此

钦定续通志卷二百五十三

●钦定续通志卷二百五十四 列传五十四

列传

唐【五十四】

○唐五十四

陆贽

陆贽

△陆贽

陆贽字敬輿苏州嘉兴人十八第进士中博学宏辞调郑尉罢归寿州刺史张镒有重名贽往见语三日奇之请为忘年交饷钱百万曰请为母夫人一日费贽不纳止受新茶一串而已以书判拔萃补渭南尉【旧书作渭南主簿按权德輿所作陆宣公文集序亦云调渭南簿】德宗立遣黜陟使庾何等十一人行天下贽说使者请以五术省风俗八计听吏治三科登隼又四赋经财实六德保罢瘵五要简官事五术曰听谣诵审其哀乐纳市贾观其好恶讯簿书考其争讼览车服等其俭奢省作业察其趣舍八计曰视户口丰耗以稽抚字视垦田赢缩以稽本末视赋役薄厚以稽廉冒视案籍烦简以稽听断视囚系盈虚以稽决滞视奸盗有无以稽禁御视选举众寡以稽风化视学校兴废以稽教导三科曰茂异贤良干蛊四赋曰阅稼以奠税度产以衰征料丁壮以计庸占商贾以均利六德曰敬老慈幼救疾恤孤賑贫穷任失业五要曰废兵之冗食蠲法之挠人省官之不急去物之无用罢事之非要时皆黻其言迁监察御史

帝在东宫已闻其名召为翰林学士会马燧讨贼河北
久不决请济师李希烈寇襄城诏问策安出贄言今幽燕恒魏之势缓而祸轻汝洛蒙汴
之势急而祸重田悦覆败之余无复远略王武俊有勇
无谋朱滔多疑少决互相制劫急则合力退则背憎不能有越轶之患此谓缓也希烈果
于奔噬忍于伤残据蔡许富全之地而益以邓襄虜获
之实东寇则饜道阻北窥则都邑震此谓急也代朔邠灵之精骑上党盟津之练卒悉举
而委之山东将多而势分兵广而财屈则屯戍失于太
繁也李勉文吏也而当汴必争地哥舒曜之众乌合也扞襄城方锐之贼则守御失于不
足也今若使李怀光帅师救襄城之围还李芑河阳以
援东都汝洛既固梁宋亦安是乃取有余救不足计之得也又吾立国之权在审轻重王
畿者四方之本也京邑者王畿之本也是以前世转天
下租税徙郡县豪杰以实京师太宗列置府兵八百所而关中五百举天下不敌关中则
居重驭轻之意也方世承平久武备微故禄山乘外重
之势一举而覆两京然犹诸牧有马州县有粮肃宗得以中兴干元后外虞踵发悉师东
讨故吐蕃乘虚而先帝莫与为御是失驭轻之权也既
自陕还惩艾前事稍益禁卫故关中有朔方泾原陇右之兵以捍西戎河东有太原之兵
以制北虜今朔方太原之众已屯山东神策六军悉戍
关外关辅之间征发已甚宫苑之内备卫不全万一将帅之中又如朱滔李希烈或负固
边垒诱致豺狼或窃发郊畿惊犯城阙未审陛下复何
以备之陛下倘过听愚计所遣神策六军李晟等及节将子弟悉可追还明敕泾陇邠
但令严备封守仍令更不征发使知各保安居又罢京
师及畿县间架等杂税人心不摇邦本自固帝不纳后泾师急变贄言皆效从狩奉天机
务填委总远近调发奏请报下书诏曰数百贄初若不
经意逮成皆周尽事情中于机会旁吏承写不给同职者皆伏其能帝与贄语及乱故每
自克责贄曰致今日之患皆羣臣之罪也帝曰此亦天
命非由人事贄退而上书曰陛下志壹区宇四征不庭凶渠称诛逆将继乱兵连祸结行
及三年一人征行十室资奉居者疲馈转行者苦锋镝
去留骚然而闾里不宁矣聚兵日众供费日博常赋不给乃议蹙限而加敛焉加敛既殫
乃别配之别配不足于是榷算之科设率贷之法兴禁
防滋章吏不堪命农桑废于追呼膏血竭于笞捶兆庶嗷然而郡邑不宁矣边陲之戍以
保封疆禁卫之旅以备巡警邦之大防也陛下悉而东
征边备空屈又撙私牧责将家以出兵籍马夫私牧者元勋贵戚之门也将家者统率岳
牧之后也其复除征徭旧矣今夺其畜牧事其子孙丐
假以给资装破产以营卒乘元臣贵位孰不解体方且税侯王之庐算稗贩之缙贵不见

优近不见异羣情噐然而关畿不寔矣陛下又谓百度弛废则持义以掩恩任法以成治断失于太速察伤于太精断速则寡恕于人而疑似不容辨也察精则多猜于物而亿度未必然也寡恕而下惧祸故反侧之衅生多猜而下防嫌故苟且之患作由是叛乱继产忿讟并兴非常之虞亿兆同虑惟人主独不闻耳至使凶卒鼓行白昼犯阙重门无结草之御环卫无谁何之人陛下虽有股肱之臣耳目之佐见危不能竭诚临难不能效死所谓致今日之患是羣臣之罪岂徒言欤陛下方以兴衰委之天命亦过矣臣闻天所视听皆因于人紂之辞曰我生不有命在天此舍人事推天命必不可之理也人事治而天降乱未之有也人事乱而天降康亦未之有也自比兵兴物力耗竭人心惊疑如居风涛汹汹靡定族谋聚议谓必有变京师之人固非悉通算术皆晓古书则致寇之由岂运当然夫治或生乱乱或资治有以无难而亡多难而兴今生乱失序之事则既往不可复追矣其资治兴邦之业在刻励而谨修之舍己以从众违欲以遵道远儉佞亲忠直推至诚去逆诈斯道甚易知甚易行不耗神不劬力第约之于心耳何忧乎乱人何畏乎厄运何患乎不寔哉帝又问贄事切于今者贄劝帝羣臣参日使极言得失若以军务对者见不以时听纳无倦兼天下之智以为聪明帝曰朕本好推诚亦能纳谏往谓君臣一体推信不疑至儉人卖为威福今兹之祸推诚之敝也又谏者不密要须归曲于朕以自取名朕嗣位见言事多矣大抵雷同道听质问则穷故顷不诏次对岂倦于接纳哉贄因是极谏曰臣闻人之所助在信信之所本在诚一不诚心莫之保一不信言莫之行故圣人重焉传曰诚者物之终始不诚无物匹夫不诚无复有事况王者赖人之诚以自固而可不诚于人乎驭以智则诈示以疑则偷接不以礼则徇义轻抚不以情则效忠薄上行则下从之上施则下报之不尽于己而责尽于人必怠而不从矣不诚于前而望诚于后必给而不信矣故诚与信不可斯须去身愿陛下慎守而力行之恐非所以为悔也人之行己必有过差上智下愚俱所不免智者改过而之善愚者耻过而遂非太宗有躬行仁义之德泊致太平之功可谓盛矣然而人至于今以从谏改过为称首是知帝王之美莫大于斯陛下谓谏官论事引善自予归过于上者信非其美然于盛德未有亏焉陛下若纳练不违则传之适足增美陛下若违谏不纳又安能禁之勿传不宜以此梗进言之路也圣人为治务询众心彥言无验不必用质言当理不必违逊于志不必然逆于心不必否异于人不必是同于众不必非辞拙而效迂者不必愚言甘而利重者不必智考之以实惟善所在则可以尽天下之心矣陛下又以雷同道

说质问则穷臣谓陛下虽穷其辞而未穷其理能服其口而未服其心且下之情莫不愿达于上上之情莫不求知于下然而下常苦上之难达上常苦下之难知若是者何九弊不去也所谓九弊者上有六下有三好胜人耻闻过骋辩给衒聪明厉威严恣强愎上之弊也谄谀顾望畏懦下之弊也好胜而耻过必甘佞辞忌直言则谄谀者进而忠实之语不闻矣聘辩而衒明必折人以言虞人以诈则顾望者自便而切摩之益不尽矣厉威而恣愎必不能降情接协引咎在己则畏懦者至而情理之说不申矣人之难知尧舜所病胡可以一酬一诘而谓尽其能哉夫欲治天下而不务得人心则固不治矣务得人心而不勤接下则心固不得矣务接下而不辨君子小人则下固不可接矣务辨君子小人而恶直嗜谀则君子小人固不可辨矣趋和求媚人之甚利存焉犯颜冒祸人之甚害存焉居上者易其言而以美利利之犹惧忠告之不暨况疏隔而猜忌者乎转考功郎中依前充职尝从容奏曰此时诏书陛下宜痛自引过以感人心昔禹汤以罪己勃兴楚昭以善言复国陛下诚能不愆改过以言谢天下俾臣草辞无讳庶几羣盗革心帝然之故行在诏书如下虽武人悍卒无不挥涕激发及通京师李抱真来朝奏曰陛下在山南时山东士卒闻书诏之辞莫不感泣思奋臣节臣知贼不足平也【谨按通鉴辑览 御批兴元下诏四方人心大悦者盖以太宗之德在人者深而当时人心亦皆厌乱故其感动之速所谓饥易为食渴易为饮而赦胁从以销羽翼尤不失权变机宜耳无识者乃云德宗反正全由文诰动人不知反正而措施乖方藩镇横逆如故浸淫以至于唐亡所谓感人者安在孟子云仁言不如仁声信矣】帝欲明年遂改元而术家上言数鍾百六宜有所变革示天下复始帝乃议更益大号贄曰尊号之兴本非古制行于安泰之日已累谦冲袭乎丧节之时尤伤事体贄奏言若以术数须有变更与其增美词而失人心不若黜旧号以祗天戒帝从之但改年号而已会兴元赦令方具帝以稟付贄使商讨贄知帝执德不固欲激之使强其意即上言以为动人以言所感已浅言又不切人能肯怀今兹德音悔过之意不得不深引咎之辞不得不尽使天下闻之人人得其所欲何有不从然臣窃以知过非难改过为难言善非难行善为难惟陛下先断厥志以施其辞度可行者而宣之不可者措之无苟于言以重取悔帝纳之始帝播迁府藏委弃卫兵无褚衣至是天下贡奉稍至乃于行在夹庑署琼林大盈二库别藏贡物贄谏以为师旅方殷创痛呻吟之声未息遽以珍贡私别库恐羣下有所觖望请悉出以赐有功帝悟即撤其署李怀光有异志欲怒其军使叛即上言兵稟薄与神

策不等难以战李晟密言其变因请移屯帝遣贄见怀
光议事贄还奏怀光寇奔不追师老不用羣帅欲进辄沮止其谋此必反宜有以制之因
劝帝许晟移军初贄与怀光语及晟怀光妄诧曰吾无
所藉晟贄即美其强雄使不得翻覆至是请下诏书如其意者且无辞归短于朝又遣李
建徽阳惠元与晟并屯东渭桥托言晟兵寡不足支贼
俾为犄角怀光虽不欲遣且辞穷无以沮解帝犹豫晟徙营不阅旬怀光果夺两节度兵
建徽挺身免惠元死之行在震惊遂幸梁道有献瓜果
者帝嘉其意欲授以试官贄谓名器宜重慎止可赐以钱帛不当酬以官帝曰试官虚名
无损于事贄奏言诱人方惟名与利名近虚而于教
为重利近实而于德为轻员外试官虽止虚名然而突铍锋排祸难者以是酬之可谓重
矣今献瓜果者亦以酬之则彼必相谓曰吾之躯命乃
同瓜果视人如草木谁复为用哉 【谨按通鉴辑览 御批惟名与器不可以假人民
献瓜果不过循野人芹曝之分钱帛贄予已足相酬
遽欲授以试官其昧于轻重实甚陆贄谓虚名滥施将无以为立功者之劝非惟深中当
时情弊抑亦千秋为君者所当留意者也】 俄以劳迁
谏议大夫仍为学士时凤翔节度使李楚琳杀张镒得位虽数贡奉议者颇言其挟两端
有所狙徇帝亦不能容使至皆不得召欲以浑瑊代之
贄谏曰楚琳之罪诚旧但今勤王之师悉在畿内急宣亟告景刻是争商岭既回远而骆
谷又为贼所扼通王命者惟褒斜尔使楚琳逞憾敢为
猖狂南塞要冲东与贼合则我咽喉梗而心膂分矣岂不病哉今顾望两端是乃天诱其
衷通归涂济大业也帝释然尽召见其使优诏存慰之
【谨按通鉴辑览 御批楚琳戕节使附逆泚当戡定之初明正其罪为反侧子示警
所谓名正义顺而德宗乃欲因势胁代近于诡譎即陆
贄欲羁授官职亦失之养奸岂当时势有不得不然者乎】 帝欲以内外从官普号定难
元从功臣贄曰官官具寮恪居奔走劳则有之何功之
云难则尝之何定之云今与奋命者齿恐沮战士之心结勋臣之愤帝乃止京师已平帝
欲召浑瑊访奔亡内人给装使赴行在贄谏以为巨盗
始平疲瘵之疴疮痍之卒尚未循拊而首访妇人非所以副惟新之望帝不复下诏犹遣
使谕瑊资遣初刘从一姜公辅等材下不逮贄远徙以
单言暂谋建位台宰而贄孤立一意为左右权幸沮短又言事无所回讳阴失帝意久之
不得宰相还京但为中书舍人俄以丧解官客东都诸
方赠遗一不取惟韦皋以布衣交先以闻故所致辄称诏受之服除以权知兵部侍郎复
召为学士入谢伏地哽泣帝为兴改容慰抚眷遇弥渥
天下属以为相而窦参素不平忌之贄亦数言参罪失贞元七年罢学士以兵部侍郎知

贡举明年参黜乃以中书侍郎同中书门下平章事帝始任杨炎卢杞引树私党排忠良天下怨疾贞元后惩艾其失虽置宰相至除用庶官反复参诘乃得下及贄秉政始请台阁长官得自荐其属有不职坐举者帝初许之或言诸司所引皆亲党招赂遗无实才帝复诏宰相自择贄奏言台省长官皆久当朝选陛下择辅相多出其中今乃谓不能进一二属吏岂后位宰相则可择天下材乎帝竟不行旧制吏部选以岁集自干元已后兵兴率三年一调吏员稽壅至十年不被调者缺员或累岁不补案牒丛淆吏缘为奸贄乃请以内外员三分之每岁计阙集人检柅吏奸天下便之当是时贾耽卢迈赵憬同辅政凡有司关白三人者更相顾不肯判贄又请如故事每旬一人秉笔所咨辄判河南北江淮荆襄陈许等四十余州大水贄请遣使振抚帝曰闻所损殊少即议优恤恐生奸欺贄又上疏极陈乃许 【谨按通鉴辑览 御批水连四十余州溺死二万余计振抚惟恐不逮犹虞或遗且灶鼃泽鴈皆按验可得奸欺何自而生此而尚欲屯膏民困将谁恤乎况德宗昔日朔方从逆之将士尚议并给冬衣而此惟西罹患之灾黎独靳恤之升斗前后自相刺谬亦已甚矣】 又以西北边岁调河南江淮兵谓之防秋士不素练战数败将统制不一亡以应敌乃上陈其弊曰自禄山构乱肃宗始撤边备以靖中原借外威窳内难于吐蕃乘衅回纥矜功中国不振四十余年西输贿币北偿马资尚不足满其意于是调敛四方以屯疆陲犹不能制故小入则驱略黎庶深入则震惊邦畿时有议安边之策者皆务所难忽所易勉所短略所长行之而要精图之而功靡就夫势有难易事有先后力大而敌脆则先所难是谓夺人之心也力寡而敌坚则先所易是谓观衅而动也顷属多故财匱人劳而欲广发师徒深践寇境复其侵地攻其坚城前有胜负未必之虞后有馈运不继之患万一挠败适所以启戎心挫国威也以此安边可谓不量势而务所难矣天之授有分地之产有宜勉所短而敌长者殆用所长而乘短者疆且以水草为取射猎为生便于驰突不耻败亡此戎狄之所长中国之所短也而欲益兵搜乘争驱角力交锋原野之上决命寻常之间以此御寇可谓勉所短而校其长矣务所难勉所短劳费百倍终无成功虽果成之不挫则废诚以越天授违地产亏时势反物宜者也若乃择将吏修纪律耀德以佐威能迹以柔远禁侵暴以彰吾信抑攻取以昭吾仁彼求和则善待而勿与盟彼为寇则严备而不求报此当今之所易也贱力贵智好生恶杀轻利重人忍小全大安其居而后动俟其时而后行修封疆守要害蹊堑隧列屯营谨禁防明斥候务农足食非万全不谋非百克不鬪寇小至则

遏其入寇大至则邀其归据险以乘之多方以误之使其勇无所加众无所用掠则靡获攻则不能进有腹背支敌之虞退有首尾难救之患是谓乘其弊不战而屈人兵此中国之所长也我之所长戎狄之短也我之所易戎狄之难也以长制短则用力寡而见功多以易敌难则财不匮而事速成舍此不务而反为所乘斯谓倒持戈矛以鑄授寇者也今则皆务之矣尚且守封未固寇戎未惩者盖又有六失焉王者欲备封疆御戎狄则选镇守之兵以置之古之善选置者必量其性习辨其土宜察其技能知其好恶用其力不远其性齐其俗不易其宜引其善不责其所不能禁其非不处其所不欲而又类其部伍安其室家然后能使之乐其居定其志奋其气势结其恩情以惠则感而不骄以威则肃而不怨靡督课而自用弛禁防而不携故守则固战则强其术无它便于人情而已矣今者远调屯士分戍边陲邀其所不能强其所不欲广其数不考其用责其力不察其情斯可为羽卫之仪而无益备御之实也何者穷边之地千里萧条寒风裂肤惊沙惨月昼则荷戈以耕夜则倚烽而覘有剽害之虑无休暇之娱非生其域习其风幼而视焉长而安焉则不能盗居而狎其敌也关东百物阜殷士怵温饱比诸边隅不翅天地闻绝塞荒陬之苦则辛酸动容聆强蕃寇虏之名则慑骇夺气而乃使之去亲族舍园庐甘所辛酸抗所慑骇将冀为用不亦疏乎矧又有休代之期无统制之善资奉若骄子姑息如倩人进不邀之以成功退不处之以严宪屈指计归张颐待饷侥幸者犹患还期矧缓恒念戎丑充斥乘其乱离布路东溃平居殫资储以奉浮冗临难弃城镇以摇疆场其弊岂特无益哉固亦将有所挠也谪徙之人本以增户实边立功自赎既无良之人而思乱幸灾又甚于戍卒适有防卫之烦而无立功之益虽前代行之固非可遵者也帅臣身不临边而以偏师戍守大抵士之犀锐悉选以自奉委其疲羸乃配诸镇寇至而不支则劫执芟蹂恣所欲得比都府闻知虏已旋退治兵若此斯可谓措置乖方一失也赏以存劝罚以示惩以懋有庸以威不恪故赏罚之于馭众譬輓轨所以行车衔勒所以服马也令将之号令不能行之军国之典刑不能施之将上下遵养以苟岁时欲褒一有功虑无功者反侧欲责一有罪畏同恶者震惊罪以隐忍而不彰功以嫌疑而不赏故使忘身效节者获谗于等夷僨军缓救者不怀于愧畏况又公忠者直己而不求诸人反罹困厄败挠者行私而苟媚于众例取优崇此义士勇夫所以痛心解体也又如遇敌而守不固陈谋而功不成责将帅将帅曰资粮不足责有司有司曰须给无乏更相为解而朝廷含糊未尝究诘故抱直者吞声而靡诉诬善者罔上而不惭馭众

若此可谓课责亏度二失也课责亏度措置乖方将不得竭其才卒不得尽其力屯集虽众无施战陈虜常越境横行若涉无人之地递相推倚莫敢谁何虚张贼势上闻惟曰兵少不敌朝廷莫之省则又调发益师无裨于备御而有弊于供亿闾井日耗敛求日繁倾家析产榷盐税酒无虚所入半以事边制用若此可谓财匱于兵众矣三失也今四夷最强盛者莫如吐蕃举吐蕃众未当中国十数大郡而内虑外备与中国不殊其能寇边者无几且又器不犀利甲不精完材不趨敏动则中国惧其众不敢抗静则惮其强不敢侵何哉良以我之节制多而彼之统帅一也且节制多则人心不一人心不一则号令不行号令不行则进退难必进退难必则疾徐失宜疾徐失宜则机会不及机会不及则气势自衰斯乃勇废为阉众失为弱开元天宝时制西北二蕃则朔方河西陇右三节度而已尚虑权分或诏兼领之中兴已来未遑外讨则侨四镇隶安定以陇右附扶风所当二蕃则朔方泾原陇右河东四节度而已以关东戍卒属之虽任未得人而措置之法存焉自贼泚乱以诱泾原怀光反以污朔方则分朔方为三节度其镇军且四十皆特诏任之各有中人监军咸得相抗莫能禀属边书告急方使关白用兵是谓从容拯溺揖让救焚矣兵以气势为用者也气聚则盛散则消势合则威析则弱今之边戍势弱气消建军若此可谓力分于将多矣四失也治我之要最在均齐故军法无贵贱之差军实无多少之异所以同其志尽其力也穷边之地长镇之兵皆百战伤夷终年勤苦角所能则练习度所处则孤危考其服役则劳察其临敌则勇为衣禀止于当身又为家室所分居常冻馁而关东戍士岁月更代怯于应敌懈于服劳然衣禀优厚继以茶药资以蔬酱丰寡相县势则远甚又有以边军诡为奏请遥隶神策者禀赐之饶遂有三倍之益此士类所以忿恨经费所以褊匱夫事业未异给养顿殊人情所不甘也不为戎首则已可嘉而欲使协力同心以攘寇臣知其必不能焉养士若此可谓怨生于不均矣五失也凡任将帅必先考察行能然后指以所授之方语以所委之事令自揣可否以见要领须某甲兵籍某参佐用若干步骑计若干资粮何所列屯何时成功观其言校其实若曰不足取则当退之于初不宜诒悔于后也若曰可任则当要之于终不宜掣肘于内也故疑者不使使者不疑劳神于拔选端拱于委任然后核否臧信赏罚受赏者不为滥当罚者不敢辞付授之柄既专苟且之心自息矣顷边军去就裁断多出宸衷选置戎臣先求易制多其部使力分轻其任使心弱由是分阨责成之义废死绥任咎之志衰一则听命二则听命爽于军情亦听命乖于事宜亦听命天两强相按两军

相持事机所急罅不留息况千里之远九重之深陈述之难明听览之不专欲事无遗策虽圣亦有所不能焉守城者以兵寡不敢抗分镇者以无诏不敢救逗留之顷寇已奔逼牧马屯牛鞠椎剽矣嗇夫樵妇罄俘囚矣假令诏至发兵惟以虚声应援互相顾望败者减百为一获者衍百为千帅守以总制在朝不恤罪累陛下以大权由己不究事情用帅若此可谓机失于遥制矣六失也臣愚谓宜罢四方之防秋者以其数析而三之其一责本道节度募壮士愿屯边者徙焉其一则第以本道衣禀责关内河东募用蕃汉子弟愿傅军者给焉其一以所输资粮给应募者以安其业诏度支市耕牛召工人就诸屯缮完器具至者家给牛一耕耨水火之器毕具一岁给二口粮赐种籽劝之播时须一年则使自给有余粟者县官倍价以售既息调发之烦又无幸免之弊出则人自为战处则家自为耕与夫暂屯遽罢岂同日论哉然后建文武大臣一人为陇右元帅自泾陇凤翔薄长武城尽山南西道凡节度府之兵皆属焉又诏一人为朔方元帅由鄜坊邠宁捷灵夏凡节度府之兵属焉又诏一人为河东元帅举河东极振武节度之兵属焉各以临边要州为治所所部州若府遴柬良吏为刺史外奉军兴内课农桑慎守中国所长谨行当今所易则八利可致六失可去矣帝爱重其言不能用也【按权德輿序翰苑集云窦参纳刘士宁之赂为李巽所发得罪左迁横议者以公与参素不协归罢相之议于公旧书本传云参之死贄有力焉此即横议者之说也贄救解窦参前后凡三状皆委曲周至通鉴备览载其语据以办旧书之诬今一以新书为正】班弘判度支卒官贄荐李巽帝漫许之而自用裴延龄贄言延龄假伪躁妄不可用不听俄而延龄奸佞得君天下仇恶无敢言贄上书苦谏帝不恠竟以太子宾客罢贄性畏慎及策免朝谒之外不通宾客延龄揣帝意薄谗短百端帝遂怒欲诛贄赖阳城等交章论辨乃贬忠州别驾后稍思之会辞延为刺史谕旨慰劳韦皋数上表请贄代领剑南顺帝立与阳城郑余庆同召还诏未至卒年五十二赠兵部尚书谥曰宣始贄入翰林年尚少以材幸天子常以辈行呼而不名在奉天朝夕进见小心精敏未尝有过由是帝倚同类莫敢望虽外有宰相主大议而贄常居中参裁可否时号内相及兴元戡难功虽爪牙宣力亦贄有助焉狩山南也道险涩与从官相失夜召贄不得帝惊泣曰得陆贄者赏千金翌日上谒帝喜见颜闻自太子以下皆贺及辅政不敢自爱重事有可否必极言无隐或规其太过者对曰吾上不负天子下不负所学遑它恤乎精于吏事斟酌剖决不爽锱铢既放荒远闭门却扫人不识其面又避谤不著书地苦瘴疠祇为今古集验方五

十篇示乡人云

钦定续通志卷二百五十四

●钦定续通志卷二百五十五 列传五十五

列传

唐 【五十五】

○唐五十五

韦皋【林蕴】 张建封【愔】 严震 韩弘【公武充】

韦皋

张建封

严震

韩弘

△韦皋

韦皋字城武京兆万年人为建陵挽郎累辟诸府擢监察御史张镒镇凤翔署营田判官知陇州行营田事德宗幸奉天李楚琳杀镒叛归朱泚陇州刺史郝通奔楚琳始泚为凤翔帅有范阳军五百随镇既归留戍陇州督以部将牛云光至是云光欲劫皋以臣泚谋泄率众出奔道遇泚奴邀与俱行言泚授皋御史中丞若不受即以兵诛之皋纳奴伪受命因谓云光曰大使苟无他图请释甲以安众云光视皋书生无能为命士尽委铠仗而入明日犒宴皋伏甲两庑尽杀其众以云光及奴首徇泚又遣他奴拜皋凤翔节度皋亦斩之及从骑三人纵一人使归报帝闻诏陇州为奉义军授皋节度使以旌其功皋遣兄平及弇至奉天乃筑坛盟将士驰使连和吐蕃陇坻遂安帝还都入为左金吾卫大将军贞元年代张延赏领剑南西川先是云南蛮附吐蕃为之向导皋闻遣使招谕西南夷稍通二年蛮酋苴那时以王爵让其兄子乌星皋请并封以示褒进诏可三年云南王异牟寻款边求内属四年吐蕃寇西川皋击破于清溪关外时云南未敢显叛吐蕃亦发兵屯泸北皋为遗云南书转致吐蕃吐蕃疑塞其趋蜀路云南怒归志益坚【吐蕃入寇从通鉴补】遂约东蛮鬼主骠傍苴梦冲绝吐蕃盟五年东蛮攻吐蕃请济师皋遣精兵二千共败蕃众于台登杀大酋乞臧遮遮等虜坠死崖谷不可计遮遮尚结赞子蕃将之雄贵者也既亡余城栅无不降进皋检校吏部尚书梦冲复与吐蕃盟皋遣别将苏崧召之诘其叛斩于琵琶川立次鬼主蛮部震服九年朝议城盐州虑虜挠袭诏皋出师牵制乃命大将董勳张芬分出西山灵关破峨和通鹤等城蕃将论莽热来援败其军进收白岸盐州既城加检校右仆射扶风县伯于是西山羌女诃陵等八

国皆请入朝皋遣幕官崔佐时趣云南与其王盟去吐蕃所立号复南诏旧名 【从通鉴补】 诏皋统押近界诸蛮西山八国云南安抚使俄

同中书门下平章事十三年复巂州 【通鉴在五年今从新旧书】 后酋帅马定德与大将数十人皆来降昆明管些蛮又内附赞普怒北掠

灵朔陷麟州帝诏皋深入十七年八月皋令大将陈治崔尧臣等分九道出塞十月大破吐蕃追奔千里遂围维州赞普释灵朔兵使论莽热率

杂虏十万来救师据险设伏以待虏至噪而奋击生擒莽热献诸朝进检校司徒兼中书令南康郡王帝制纪功碑以赐顺宗立久疾王叔文干

政皋遣刘辟至京师谒叔文请尽领剑南必有以报不然惟君之怨叔文怒欲斩辟辟遁去皋知叔文多衅自以大臣得与国大议上表请皇太

子监国又上笺太子暴叔文等奸状且劝进会裴均严绶相继请太子遂受禅奸党悉窜殛是岁皋暴卒年六十一赠太师谥曰忠武皋治蜀二

十一年前后出师破吐蕃四十八万禽杀酋将千五百斩首五万余级获器械牛羊各数十万功为西南最善抚士凡昏嫁死丧皆厚资给僚掾

官稍显即署属郡刺史恐泄其侈横不使还朝刘辟踵之卒图不轨朝廷欲追绳其咎或诋皋所进兵器皆镂定秦字陆畅上言向在西蜀知定

秦系匠名由是议息畅字达夫雅承皋厚礼尝作蜀道易以美皋者皋始重赋敛以事月进结主恩府库既实列州互除租三岁一复 【旧事

皋重敛蜀土虚竭新书皋务私其民列州互除租彼此迥异今从通鉴】 及卒蜀人画像拜祀刻石遇皋名讳而辄去兄聿元和初为国子司业

刘辟与卢文若反皋子 【皋子旧书以为皋侄】 行式娶文若女弟聿不以闻辟平行式妻当没掖庭有司并按聿或以道远不应坐乃皆赦

之兄平 【旧书云从兄平新书云弟平未知孰是】 与皋斩朱泚使赴奉天上功擢万年尉平子正贯字公理少孤皋谓能大其门名曰臧孙

为单父尉不乐弃去改今名举贤良方正异等累迁司农卿坐事贬均州刺史宣宗立拜京兆尹擢岭南节度使海贾舶至大帅必索犀象明珠

酬以下直正贯一无所取人服其清风俗尚鬼正贯毁淫祠教民毋妄祈会海水溢争言撤祠千神怒正贯登城沃酒誓曰不当神意咎在守土

无逮下民俄而水去民乃信居三岁病亟遗令无厚葬无请谥卒年六十八赠工部尚书林蕴

林蕴

林蕴字复梦泉州莆田人父披字茂彦以刺史樊晃奏署临汀令举治行迁别驾蕴世通经西川节度使韦皋辟推官刘辟反蕴晓以逆顺

不听复遗书切谏辟怒械于狱且杀之将就刑大呼曰危邦不入乱邦不居得死为幸矣

辟惜其直阴戒刑人抽剑磨其颈以胁服之蕴叱曰死
即死我项岂顽奴砥石耶辟知不可服舍之斥为唐昌尉及辟败蕴名重京师李吉甫李
绛武元衡为相蕴遗书讽以六事皆当时极弊蕴为韦
皋所引重嫉其专制感愤关说然嗜酒多忤物宰相置不用也沧景程权辟掌书记既而
权上四州版籍请吏而军中习熟擅地畏内属挟权拒
命不得出蕴陈君臣大谊谕首将人人释然于是权得去蕴迁礼部员外郎刑部侍郎刘
伯刍荐之于朝出为邵州刺史尝杖杀客陶玄之投尸
江中籍其妻为倡复坐赃杖流儋州而卒 【按唐书以蕴世通经列之儒林考其杀客籍
妻坐赃遭贬于儒岂云无玷然能拒刘辟出程权刚
毅之气凛凛以故名重一时本传载其为韦皋所引重兹移附皋传后俾得从其类谨识
】

△张建封

张建封字本立邓州南阳人 【旧书兖州人】 客充父玠少任侠安禄山反使李
廷伟胁徇山东鲁郡太守韩择木迎馆之玠率诸豪将
入斩之择木惧不许参军张孚助其谋乃杀廷伟事闻择木孚皆蒙赏而玠去之江南不
言功建封善属文能辩论慷慨以功名自许宝应中苏
常盗起代宗诏中官马日新与李光弼共讨建封乃见日新请注说谕果一日降数千人
纵归田里由是知名令狐彰节度滑亳奏置府中建封
心非其不朝往见转运使刘晏晏使筦漕务岁余罢时马燧为三城镇遏使素相善表为
判官燧讨李灵耀军务悉咨决从镇河东建中初燧荐
之于朝杨炎将处以要职为卢杞所恶出为岳州刺史李希烈叛寿州刺史崔昭与通书
疏德宗召宰相选代昭者■〈木巳〉仓卒间白用建
封希烈僭号陈少游阴附之希烈遣杨丰赍伪赦二畀建封少游建封斩丰首送伪书于
行在少游闻而恚且惧建封因劾其附贼状帝不暇治
希烈又伪署杜少诚淮南节度约破寿州以趋江都建封守霍邱秋栅贼不能东帝还自
梁迁御史大夫濠寿庐观察使大缮障隍远近悦附希
烈选精锐来攻辄沮衄贼平任一子正员官始李洧以徐州降洧卒高承宗独孤华继任
困弱不能支寇李泌建言东南漕自淮达汴徐之埭桥
为咽喉今徐州刺史高明应甚少倘为李纳所并则梗饷路而失江淮矣请以建封代贞
元四年授建封徐州刺史益以泗濠二州为节度使久
之检校尚书右仆射十三年入朝即日召见延英诏会朝赴大夫班以示优异建封赋朝
天行以献赐名马珍具甚厚京城以宦者主宫市抑买
人物十不偿一至有重荷趋肆而徒返者谏臣交论不纳建封间为帝言颇顺听诏蠲逋
赋帝问何如对曰残逋决无可敛虽除之百姓尚无所

益河东节度使李说华州刺史卢微皆病不任职金吾将军李翰好刺细事规宠建封皆陈劾之帝皆嘉纳上巳曲江赐宴特诏与宰相同榻食还镇帝以诗饯当时高秩大勋如马燧浑瑊刘玄佐李抱真等所未得也复使左右赐以所持鞭曰卿忠节岁寒不渝用此为况建封又赋诗自励十六年以疾求代代未至而卒年六十六赠司徒建封莅徐十年军事大治善容人过亦未尝曲法贷奸其言忠义感激人皆畏悦士无贤不肖游其门者礼遇维均许孟容韩愈皆奏署幕府有文章传于世子愔

张愔

张愔

愔以荫补虢州参军建封卒府佐郑通诚惧军乱谋引浙西过兵为援举军怒杀通诚及大将数人表请愔为留后帝不许割濠泗隶淮南命杜佑讨徐泗州刺史张仵战埇桥兵败帝乃授愔留后俄进武宁节度元和初被疾请代召为工部尚书以王绍帅武宁濠泗仍还徐徐人乃安愔未踰境卒凡治徐七年其政称理赠尚书右仆射

△严震

严震字遐闻梓州盐亭人本农家子丰于财至德干元中数出赀助边授州长史严武镇西川擢署押衙委以军务武卒山南西道节度府表为凤州刺史母丧罢起为兴凤两州团练使为政清严兴利除害远迩咨美剑南黜陟使韦贞状震治行第一赐上下考封郾国公迁山南西道节度使朱泚反遣腹心穆廷光等赍书招诱震斩以闻李怀光既通贼帝欲移蹕山南震闻驰表奉迎令大将张用诚以兵五千扞卫用诚有反计会震牙将马勋继至帝告以故勋曰臣归取符召之即不受斩以复命计日往得震符还请壮士五人与俱用诚以勋未知其谋迎归传舍左右严侍勋阴令焚草馆外士寒争附火勋从容出符曰大夫召君用诚惧将走壮士自后禽之用诚子斫伤勋首左右格杀其子而仆用诚勋即其营士皆擐甲矣勋大言曰若父母妻子在梁州今弃而反何所利大夫取用诚于若等无与众不敢动缚用诚送震杖杀之拔其副以统师翌日发奉天既入骆谷怀光追骑至赖山南兵以免寻加检校户部尚书封冯翊郡王宰相以梁地瘠请幸成都震曰山南密迩畿辅李晟图收复方籍六师为声援如引而西诸将顾望奏功无期晟表至亦请驻蹕梁洋议遂定梁汉虽领郡十五赋入纔比东方数大县安史后山贼剽劫户口减半震劝课鳩敛有法民不烦扰而行在供亿无阙车驾将还进检校左仆射改梁州为兴元府用震为尹久之同中书门下平章事贞元十五年卒年七十六赠太保谥曰忠穆从孙譔与宰相杨收善咸通中擢江西节度使改

号镇南军收得罪韦保衡奏譴赇狼籍遣使按核诏
赐死

△韩弘

韩弘滑州匡城人少孤依其舅刘元佐由诸曹试大理评事元佐卒子士宁被逐弘
事刘全谅署都知兵马使全谅死汴军思元佐之惠共
请监军表弘为留后诏充宣武节度副大使知节度事始吴少诚与全谅谋袭陈许使数
辈犹在馆弘喜得旄节即斩少诚使选兵三千助讨少
诚败之汴自刘士宁以来军益骄及杀陆长源主帅势轻不可制弘察乱魁刘諤等三百
人数其罪悉斩牙门流血丹道弘对宾僚言笑自若由
是讫弘去无敢肆者李师古欲侵郑滑屯兵曹州或告翦棘夷道师且至弘曰兵来不除
道也师古计穷引去少诚以牛革遗师古师古资以盐
过界弘皆阻留曰于法不得私相馈师古等皆深惮之 【从通鉴补】 累授检校司空
同中书门下平章事弘以官与太原王锬等耻居其下
宪宗方藉以临淮西改司徒班锬上严绶为贼所败拜弘淮西诸军行营都统使扞两河
而令李光颜乌重胤击贼弘不离境遣子公武领兵属
光颜弘阴为逗挠每诸将告捷辄不怡元济平以功兼侍中封许国公李师道诛弘大惧
入朝固愿留京师册拜司徒中书令帝崩摄冢宰俄出
为河中节度使以病请还仍前守司徒中书令卒年五十八赠太尉谥曰隐初弘来朝献
马三千绢五十万它锦彩三万而汴库钱绢尚百余万
马七千粮储兵械不可数弘沈谋勇断庄重寡言罪人准法不自为轻重诏使至多倨待
及齐蔡平势屈请覲然两朝尊宠竟以名位终子公武

韩公武

韩充

韩公武

公武字从偃性恭逊为宣武行营兵马使讨蔡有功检校左散骑常侍鄜坊等州节
度弘入朝亦乞罢征为右金吾将军弘出河中弘弟充
徙宣武乃曰二父居重镇孺子敢当金吾职固辞改右骁卫大将军卒赠户部尚书谥曰
恭

韩充

充本名璀少亦依舅氏历河阳昭义牙将弘领宣武召主亲兵授御史大夫弘持法
峻人不自保充谦谨无少怠恒以得士不自安请入宿
卫弘许而未遣因猎单骑归洛阳擢右金吾卫大将军历少府监鄜坊等州节度穆宗立
幽镇魏复乱朝廷以王承元帅冀卒屯滑州恐相煽诱
命充与承元更代会汴军逐李愿立牙将李■（宀介）主留务充素为汴众悦服诏节

度宣武兼统义成军讨■〈宀介〉败之郭桥李质斩
 ■〈宀介〉遂入汴时李光颜亦奉诏讨■〈宀介〉欲先得汴任军俘掠汴监军姚文
 寿谋内其师充闻急驰至城下汴人望见欢跃无复疑
 貳帝始遣人问破贼期充对一月可破方二旬即克帝谓充料敌如神加检校司空散
 ■〈宀介〉所胁为兵者三万密籍首乱千余人令出境
 曰敢后者斩内外安堵卒年五十五赠司徒谥曰肃充虽将家不事奢侈历三镇俭约如
 儒者临机决策无遗悔世推善将自弘去汴监军选牙
 兵二千直阁下日给酒肴物力为之屈充未入李质总军事曰韩公至而顿去二千人食
 必失人心不去无以继何可留此弊遗吾帅悉罢之而
 后迎充质节士也■〈宀介〉邀帅节劝之不从■〈宀介〉首发疽委质以兵遂禽之
 终金吾将军

钦定续通志卷二百五十五

●钦定续通志卷二百五十六 列传五十六

列传

唐【五十六】

○唐五十六

鲍防 李自良 萧昕 薛播 樊泽【宗师】

王纬 吴凑【士矩】 郑权 陆

亘 卢坦【阎济美】 柳晟 崔戎

鲍防

李自良

萧昕

薛播

樊泽

王纬

吴凑

郑权

陆亘

卢坦

柳晟

崔戎

△鲍防

鲍防字子慎襄州襄阳人幼孤贫笃学善词章第进士历诸府僚属太原帅薛兼训
 被疾代宗授防少尹节度行军司马俄知留后兼太原

尹节度使帝美其政诏图形别殿转福建江西观察使入为左散骑常侍从德宗至奉天进礼部侍郎封东海郡公贞元元年策贤良方正得穆质柳公绰崔邠魏弘简等时岁旱策问阴阳裨疹质对引汉卜式请烹弘羊以指宰辅右司郎中独孤慤欲下质防曰使上闻所未闻不亦善乎卒置高第世美防知人初与知杂御史窦参涂遇导骑不引避参鞭其仆及参为相防尹京兆遽令以工部尚书致仕防曰吾与萧昕子齿坐宰相余怒而同昕老愤郁以卒年六十九赠太子少保谥曰宣防尤工于诗与中书舍人谢良弼友善号鲍谢云

△李自良

李自良兖州泗水人天宝乱以战功至右卫率偕袁傔讨贼袁晁试殿中监辞兼训移镇太原又为牙将及鲍防代镇值回纥入寇防遣将焦伯瑜迎击自良曰寇远来难与争锋宜坚壁不出筑二垒搯其归路防不听伯瑜果大败马燧代防表为军候自良勤恪有谋燧深委信从讨田悦破李怀光功在诸将右燧罢兵德宗欲以自良继其任自良因事燧久固辞不敢当咸多其让乃授右龙武大将军入谢帝终以河东近虏谓曰卿进退诚有礼然北门之守无易卿者勉为朕行拜检校工部尚书充河东节度使居镇九年简俭有法上下悦附卒于官赠尚书左仆射

△萧昕

萧昕字中明梁鄱阳王恢七世孙世居河南开元天宝间再中博学宏辞科调寿安尉累迁左补阙安禄山反为副元帥哥舒翰掌书记翰败间道入蜀奉诰册上肃宗历中书舍人礼部侍郎从代宗幸陕擢国子祭酒请崇太学以树教本诏羣臣及六军子弟肄业者昕补生员大历初持节吊回纥回纥恃功廷诘昕曰非我无以平中国乱柰何不时归我市马直众失色昕徐曰国家赏定寇功丝毫不遗况邻国乎尔与叛臣仆固怀恩连祸引吐蕃犯郊甸吐蕃败走始悔惧叩颡求和非天子念旧功当只马不得出塞是尔自绝岂我失信回纥惭厚加礼遣使约和昕归转工部尚书封晋陵侯朱泚之难昕年八十余徒步出城贼求之亟独窜山谷至奉天加太子少傅爵郡公兼礼部尚书知贡举以太子少师致仕卒年九十三赠扬州大都督谥曰懿昕始荐张镐来瑱镐不数年位将相瑱为将着威望在礼部擢杜黄裳高郢裴垍其后黄裳等并为名执政

△薛播

薛播河中宝鼎人曾祖文思中书舍人播早孤伯母林博通经史教授诸子及播兄弟后播兄弟七人皆第进士衣冠以为荣累授殿中侍

御史武功万年令播温敏而裕与人交有常李栖筠常袞崔佑甫并相器重佑甫秉政拜中书舍人出为汝州刺史坐事贬再迁至河南尹以礼部侍郎卒赠本曹尚书子公达擢进士第佐凤翔军其帅悬赏集射设的高数丈一军莫能中公达揖曰请为公欢三发皆中众大呼笑帅不喜自免去复佐河阳军终国子助教

△樊泽

樊泽字安时河中人幼孤依外家客河朔辞嵩帅相卫表为尧山令举贤良方正次潼关雨淖不能前有熊执易同宿逆旅哀其困自罢所举辍衣与马以赠泽擢上第杨炎善之荐为左补阙泽武勇娴韬略尝召对延英德宗嘉其论兵与己意合累迁山南东道司马寻拜节度使数与李希烈接战禽其骁将张嘉瑜杜文朝梁俊之等遂收唐隋二州贞元三年改镇荆南会山南东道嗣曹王皋卒军乱以泽威惠素着襄汉复徙山南东道加检校尚书右仆射十四年卒年五十七赠司空谥曰成子宗师

樊宗师

樊宗师

宗师字绍述始为国子主簿元和中历金部郎中绵绛二州刺史有治声进谏议大夫未拜卒宗师喜施予家财悉散姻旧妻子以不给告笑不答学力淹通韩愈尝称荐其论议平正有经据所著春秋传魁纪公樊子凡百余篇

△王纬

王纬字文卿并州太原人父之咸与弟之贲之涣皆有文纬举明经以书判入等为长安尉大历中路嗣恭观察江西纬与李泌同为判官嗣恭希元载意欲杀泌纬解救获免泌入相奏纬于己有恩德宗许为报进给事中未几拟授浙西观察使帝曰黄门要地独不留议事耶泌对曰浙西赋入尤剧纬清而忠能胜惠养之任制可初州县有韩滉时罢钱未入者十八万缗吏请哀为进奉纬奏蠲以纾民许之加御史大夫兼诸道盐铁转运使忤裴延龄意改检校工部尚书卒年七十一赠太子少保纬居官清白而伤于苛碎好用刻深吏督察其下以此见病

△吴凑

吴凑章敬皇后弟由布衣与兄淑同日开府赐官封皆等凑畏太盛乞解太子詹事改检校宾客兼家令进左金吾卫大将军滑帅令狐彰汴帅田神功继没其下乘丧摇乱代宗命凑持节抚慰至则委曲说谕度可行者为之奏请各得其情军中驩附帝深重其才元载当国久奸迹日彰帝欲加之法顾左右无可与计召凑密图及收载王缙杨炎王昂韩会包佶等皆当坐凑建言法有首从不应概用极刑缙等乃得减死德

宗初出为福建观察使美誉四闻宰相竦参以私憾数加短毁且言凑风痹不良趋走帝召验非实由是恶参擢凑陝虢观察使代参党李翼宣武刘元佐卒命凑驰代未至汴军立元佐子士宁帝欲遣兵纳凑参请授士宁节钺以沮凑还为右金吾大将军贞元十四年大旱谷贵人多流亡帝咎京兆尹失理以凑代韩皋凑勤于为政民庶爱向时京师苦宫市凑见便殿因言宫中所须责臣可办即不欲外吏与闻内禁事乞选中官高年谨信者为宫市令平价和售流议自息又陈掌闲彊骑飞龙内园禁军诸司供役太繁宜有蠲省帝辄顺听府吏以凑起戚藩不谙簿领每有疑狱候凑将出方呈冀幸容欺凑仓卒一视指摘尽中其弊掾属非大过不榜责召至庭诘服释去羣相训勸庶事毕举文敬太子义章公主之薨帝欲厚葬鳩工妨农凑极言不避或劝论谏不宜过繁恐上厌苦凑曰上忧劳四海岂因所爱而疲民以逞反复启悟幸一动听则民受赐不少进兼兵部尚书遘疾不纳医巫家人泣请答曰吾以庸才起田亩位三公显仕四十年年七十更欲何求古来外戚令终者有几吾得归侍先人地下足矣帝闻诏侍医敦进汤剂不获已饮之卒年七十一赠尚书左仆射谥曰成先是官街树稀有司补植榆凑谓榆不足荫玩易以槐及槐阴成而凑已亡人抚树怀其泽凑自负元以来特承恩顾小心奉职未尝有过为世外戚表云

吴士矩

吴士矩

凑子士矩有文学喜与豪俊游开成初为江西观察使飨宴侈纵初至库钱二十七万缗晚年纔九万军资不给中外申论文宗弗穷究仅贬蔡州别驾御史中丞狄兼謩言士矩负陛下法难私请遣御史即讯庶杜江淮它镇循习意乃流端州

△郑权

郑权汴州开封人擢进士第为泾原帅刘昌从事昌被疾入朝度军情必变以权宽厚俾主留务昌去兵果乱权挺身冒白刃明谕顺逆诛首随机数人一军畏服德宗嘉之授行军司马擢河南尹拜山南东道节度使寻徙德棣沧景军会讨李师道奏置归化县绥纳降附沧州刺史李宗爽数违节制权劾奏有诏追赴京师宗爽讽州兵留己帝更命乌重胤代权沧人惧共逐宗爽至都斩以徇授权节度邠宁或讼权诬宗爽左降原王傅改右金吾卫大将军穆宗立持节为回鹘告哀使权魁伟有閔辨与可汗争曲直词气激壮虜深敬异使还迁工部尚书日用奢侈俸入不足乃结权幸出镇岭南多哀珍货输赂左右助力者大为朝士所嗤卒于官

△陆亘

陆亘字景山吴郡人元和三年应制科中第补万年丞再迁太常博士有礼史孟真久练其事凡大礼仪未达者率就访真倚以倨横会草册皇太子仪真参议偃蹇亘笞逐之胥曹失色进户部郎中太常少卿历充蔡虢苏四州刺史浙东观察使复徙宣歙卒年七十一赠礼部尚书亘严重强毅所至称理初赴兖州对延英具陈节度分兵屯属州刺史不能制之弊因诏屯兵得隶刺史温州自经贼乱夺官吏半俸代民租后相沿更以为奸亘按举赃罪表请还官全禀吏畏而赖之

△卢坦

卢坦字保衡河南洛阳人为河南尉杜黄裳为尹尝召坦曰某家子昵恶人破产盍往察坦曰凡居官能积财者必剥下以致之使子孙善守是天富不道也不若恣其所为以归于人黄裳异其言遇加厚郑滑节度李复表为判官复病甚监军薛盈珍封府库纳甲士牙中举军大恐坦劝止乃安复卒诏姚南仲代坦知盈珍轻南仲南仲必不受留恐及祸护复丧归东都补寿安令县人机织未就而赋限已穷坦诣府请延十日不许坦令但织而输勿顾限违之不过罚令俸耳由是知名入为刑部郎中兼侍御史数月迁中丞时赦令已禁止诸道进奉钱山南节度使柳晟浙西观察使阎济美违诏输献坦劾奏二人白衣待罪帝谕坦曰彼所献皆家财朕已许原不可失信坦曰赦令所以布大信也陛下勿以小信失大信帝曰既受之柰何坦请出归有司从之李锜诛有司将毁其祖神通墓坦上疏谏止仆射裴均在班踰位坦引之退以姚南仲为例均曰南仲何人曰是守正不交权幸者均怒罢为左庶子寻拜宣歙观察使初刘辟壻苏强坐诛其兄弘自免官去有才行人莫敢用坦奏弘与弟距三千里宜不通谋请署判官帝曰使强在尚录其才况彼兄耶江淮遇旱谷贵或请抑其价坦曰直贱他州谷皆不至任之便既而商米至市估遂平迁户部侍郎判度支河毁西受降城宰相李吉甫议移驻天德坦谓城当磧口制狄要冲若避河流退徙不过数里今天德地僻倚山去河远烽候不接虏至不知无故而蹙地二百里非计也城使周怀义与坦议同吉甫不悦出坦为东川节度使坦与宰相李絳议多协絳藉为助坦出半岁而絳罢吴元济之叛【新书作吴少诚之诛按少诚以贞元十六年十月复官爵以元和四年死未尝诛也且李罢相在元和九年二月卢坦出镇东川又在其前半岁上距少诚之死已四年矣以叙次先后考之亦非是今据吴缜纠谬改正】诏东川以兵二千屯安州坦朔望使人存问其家士皆感慰无逃还者惟请收军吏闰月粮助行善为人所非元和

十二年卒年六十九赠礼部尚书

阎济美

阎济美

阎济美者擢进士第贞元末由婺州刺史迁福建观察使寻徙浙西为治简易人称长者常赋外未尝有所增其罢浙西也在道方见诏而贡献无所还故帝为言之复刺华州入为秘书监以工部尚书致仕卒谥曰温

△柳晟

柳晟河中解人父潭尚和政公主官太仆卿晟年十二居父丧以孝闻代宗于诸甥中特加恩宠养之宫中使与太子诸王受学于吴大瓘

【吴通元传作道瓘】并子通元既长授检校太常卿德宗立以晟幼同砚席尤亲信用事朱泚反从至奉天晟与贼帅多旧故请入京城说

谕以携其党帝壮而遣之泚右将军郭常左将军张光晟皆奉命约自拔归俄谋泄系晟狱中晟夜半坎垣毁械而亡断发为僧间道归行在帝

见而流涕车驾还擢原王府长史吴通元得罪晟欲上书其弟止曰天子方怒无自贻悔不听凡三上通元得减死【案通鉴贞元八年赐谏

议吴通元死特减大辟一等】晟累迁将作少监寻节度山南西道府兵讨刘辟还未入城复诏戍梓州众怒欲谋变晟疾驱入劳军毕问曰若

等何为成功曰诛骄不受命者晟曰既知刘辟干诛柰何复欲使后人诛若等士皆免胄拜愿赴戍所入为将作监充回鹘册立使至则诘之曰

属闻可汗无礼自大去信自强礼信不能守何足奉中国可汗及诸贵人骇愕跪伏成礼使还进左金吾卫大将军爵为公卒年六十九赠太子

少保晟才敏下士好施惟自兴元入朝贡献不如诏被劾宪宗念其贤竟弗暴其事

△崔戎

崔戎字可大玄暉从孙【宰相世系表云玄暉四世从孙】举明经授太子校书郎调蓝田主簿淮南帅李墉卫次公前后交辟裴度节

度太原署参谋时不承宗以镇州叛度请戎往谕承宗感泣听命入为殿中侍御史累迁谏议大夫云南蛮扰成都诏戎持节宣慰两川奏罢税

外姜芋钱三分其当赋者以一分准缙布优其估以宽民公私废置莫不称便还拜给事中出刺华州吏援旧事置钱万缗供私用戎不取临去

悉以享军召吏谓曰吾不欲矫激以夸后人也徙袁海沂密观察使民遮道拥留至解鞬断■〈革登〉值诏使尚在环向泣请戎至夜半单骑

亡去乃止莅兖州鉏奸吏十余辈羣情大悦岁余卒年五十五赠礼部尚书子雍字顺中为和州刺史庞勋兵劫乌江雍不能抗遣人持牛酒以

劳而密表其状民不知上诉宰相路岩素有隙傅其罪赐死

钦定续通志卷二百五十六

●钦定续通志卷二百五十七 列传五十七

列传

唐【五十七】

○唐五十七

徐浩 吕渭【温】 于頔 王智兴【晏平晏宰】 杜兼【
羔中立】 杜亚 范传正 孟简
刘伯刍【宽夫】 杨凭【凝敬之】 潘孟阳 崔元略【铉】

韦绶

徐浩

吕渭

于頔

王智兴

杜兼

杜亚

范传正

孟简

刘伯刍

杨凭

潘孟阳

崔元略

韦绶

△徐浩

徐浩字季海越州人擢明经张说称其才繇鲁山主簿为集贤校理迁右拾遗辟幽州张守珪幕府改监察御史历河阳令有治绩东都留守王倓表署其府民有妄作符命者浩校篆诘其诈累迁都官郎中为岭南选补使又领东都选肃宗立授中书舍人四方诏令多出浩手遣辞贍速又参太上皇诰册宠遇罕与为比兼尚书右丞建言故事有司断狱必刑部审覆自李林甫杨国忠当国就宰相府断事尚书以下未省即署乖慎恤意请如故便诏可详断复自此始进国子祭酒以李辅国谪贬庐州长史代宗复征拜中书舍人迁工部侍郎会稽县公出为岭南节度观察使兼御史大夫召拜吏部侍郎集贤殿学士【按通鉴吏部侍郎杨綰典选平允性介直不附元载岭南节度使徐浩贪冒倾南方珍货以赂载载以綰为国子祭酒引浩代之】坐妾弟以优冒选托侍郎薛邕注授京尉为

御史大夫李栖筠所弹贬明州别驾德宗即位征拜彭

王傅进郡公建中三年卒年八十赠太子少师谥曰定浩父峤之善书【旧书父峤官至洛州刺史】以法授浩浩尤工草隶世状其法曰怒

猊抉石渴骥奔泉浩初以文学称晚节颇嗜财惑于所嬖卒以此败云

△吕渭

吕渭字君载河中人父延之越州刺史浙东节度使渭举进士累授婺州永康令大理评事浙西观察使李涵辟为支使再迁殿中侍御史

大历末涵为元陵副使渭又为判官涵自御史大夫改太子少傅渭上言涵父名少康当避宰相崔佑甫善其言擢司门员外郎御史台劾渭昔

涵再任少卿不以嫌今谓少傅为慢官疑渭为涵游说乃贬渭歙州司马贞元中累迁礼部侍郎始中书省有柳树建中末枯死德宗自梁还复

荣茂人以为瑞柳渭试进士取为题帝闻不以为善【旧书云帝闻而嘉之】又与裴延龄为姻家擢其子操上第会入阁遗私谒之书于廷

出为潭州刺史贞元十六年卒年六十六赠陕州大都督子温恭俭让

吕温

吕温

温字和叔一字化光贞元末登进士第与韦执谊交厚因善王叔文再迁为左拾遗以侍御史副张荐使吐蕃会顺宗立荐卒于青海吐蕃

以中国有丧留温不遣时叔文乘权与游皆贵显温以绝域不得迁常自悲元和元年乃还而柳宗元等九人皆坐叔文贬温独以奉使免进户

部员外郎温文采赡逸为时所称性险躁好奇近利与窦羣羊士谔昵羣为御史中丞荐温知杂事士谔为御史宰相李吉甫持之久不报时吉

甫为中官所恶将出镇扬州温乘间倾之会吉甫病召医人陈登诊视夜宿安邑里第温令吏捕登鞫问且奏吉甫阴事宪宗骇异既诘辨皆妄

言乃贬温均州刺史朝议责太轻再贬道州久之徙衡州不得意发疾卒年四十所著凌烟阁功臣铭张始兴画赞移博士书颇为文士所赏有

文集十卷恭字恭叔尚气节喜纵横孙吴术为山南西道府掌书记进殿中侍御史终岭南府判官俭亦为侍御史让至太子右庶子皆美才吉

甫再入中书长庆后德裕党盛吕氏诸子无至达官者

△于頔

于頔字允元河南人后周太师谨七世孙荫补千牛【按权德輿所作頔家庙碑頔五代祖象贤以前皆仕北朝曾祖范显武令祖江未

仕父夔泗州司马入唐三代无达官亦无致身王事者新旧书俱云得荫未详何据】调华阴尉累劳迁侍御史为吐蕃计会使擢长安令驾部

郎中出为湖州刺史修复湖陂溉田三千顷岁获秔稻蒲鱼每以万计州地瘠薄葬者不掩■〈木匱〉頔为坎瘞枯骨千余人赖以安未几改

苏州罢淫祠浚沟浚端路衢为政有绩然暴横少恩杖前部尉以逞憾观察使王纬以闻德宗不省俄迁大理卿为陕虢观察使益峻罚苛愆官

吏惴恐参军事姚岷不胜虐自沈于河贞元十四年拜山南东道节度使是时吴少诚叛頔率兵自唐州战吴房朗山败之禽其将李璨又胜之

濯神沟于是请升襄州为大都督府广募战士储良械憫然有专汉南意帝晚务姑息頔奏建无不从公敛私输持下益急而慢于奉上诬劾邓

州刺史元洪朝廷重违其意为流端州命中人护送至枣阳頔遣兵劫洪还拘之又表责洪太重改吉州长史遣使原谕乃已尝怒判官薛正伦

奏贬陕州长史比诏下頔中悔奏复署旧职累迁检校尚书左仆射同中书门下平章事封燕国公【按旧书本纪頔于宪宗嗣位之十二月

甲辰加平章事元和二年八月辛巳封燕国公此与旧传俱序于宪宗立之前与纪互异】俄擅以兵取邓州帝不问宪宗立权纲自出頔稍惧

愿以第四子季友尚主帝以永昌公主降焉遂入朝拜司空同中书门下平章事请准杜佑月三奉朝诏可时宦者梁守谦幸于帝颇用事有梁

正言者与頔子敏善敏因正言厚赂守谦求頔出镇久不报敏怒其给贵所馈诱正言家奴支解之弃溷中家童上诉诏捕頔吏沈璧及它奴送

御史狱命中丞薛存诚刑部侍郎王播大理卿武少仪杂问之頔贬为恩王傅子敏窜雷州至商山赐死次子季友夺二官正言诛死久之拜户

部尚书【按旧书本纪頔于元和八年二月贬恩王傅九月壬申为太子宾客十年十月壬子为户部尚书旧书于頔贬官后但书其改授太

子宾客此又但书其拜户部尚书各纪一官遂致互异】又坐季友居丧荒宴削金紫光禄大夫明年乃致仕宰司将以太子少保官之帝改署

宾客郁郁不得意卒赠太保太常谥曰厉季友从穆宗猎苑中求改谥会李愬亦为请更赐谥曰恩

△王智兴

王智兴字匡谏怀州温人少骁锐为徐州牙兵事刺史李洧洧弃李纳挈州自归纳怒急攻洧智兴能驶步奉表不数日至京师告急德宗

出朔方军五千击纳解去自是为徐特将王师讨吴元济李师道谋挠王师数侵徐救蔡节度使李愿遣智兴率步骑拒贼屡破之累迁侍御史

元和十三年伐师道智兴攻拔金乡鱼台俘斩万计贼平进御史中丞明年召还为沂州刺史长庆初河朔用兵加检校左散骑常侍充武宁军

副使河北行营诸军都知兵马司帅兵三千渡河属朝廷用崔羣为武宁节度使羣畏智

兴难制密请追还京师【按旧书智兴傅亦云崔羣
虑其旋军难制密表请追赴阙授以他官惟新旧书羣传云羣以智兴得士心请因授智
兴节钺与此互异】未报会赦王廷凑诸节度班师智
兴还羣遣寮属迎之令士委甲而入智兴心不悦因勒兵斩关入杀异己者十余辈然后
谒羣谢曰此军情也羣乃治装去智兴以兵卫送还朝
至埇桥掠盐铁院及贡物劫商旅逐濠州刺史侯弘度朝廷甫罢兵不能讨即诏检校工
部尚书充本军节度使李■〈宀介〉攻宋州智兴悉
锐师破之漳口■〈宀介〉平君检校尚书左仆射李同捷以沧德叛智兴请讨之诏拜
检校司徒同中书门下平章事沧德行营招抚使拔棣
州诸将闻战愈力遂有功入朝燕麟德殿赐予备厚册拜太傅封雁门郡王进兼侍中改
忠武河中宣武三节度卒年七十九赠太尉子九人晏

平晏宰知名

王晏平

王晏宰

王晏平

晏平幼从父军以讨同捷功检校右散骑常侍朔方灵盐节度使父丧擅取马四百
兵械七千自卫御史劾之诏改永州司户参军

王晏宰

晏宰后去晏独名宰少拳果长隶神策军甘露之变以功兼御史大夫为光州刺史
有美政观察使段文昌荐之朝除盐州刺史持法严人
不甚便累擢邠宁庆节度使回鹘平徙忠武军王师讨刘稹诏宰以兵出魏博趋磁州复
诏宰兼统河阳行营进取天井关贼党离沮李德裕以
宰乘破竹势不遂取泽州以其子晏实守磁为顾望计帝有诏切责宰惧急攻陵川破贼
石会关进攻泽州其将郭谊杀稹降宰传稹首京师遂
节度太原宣宗初入朝厚结权幸求宰相周墀劾之乃还军吐蕃引党项回鹘寇河西诏
统代北诸军进击以疾不任事徙河阳罢为太子少保
分司东都进少傅卒晏实幼机警智兴自养之故名与诸父齿稹平擢淄州刺史终天雄
节度使

△杜兼

杜兼字处弘中书令正伦五世孙初正伦无子故以兄子志静为后父廩为郑州录
事参军事安禄山乱逃去贼索之急宋州刺史李岑以
兵迎之为追骑所害兼尚幼逃入终南山伯父存介为贼执临刑兼号呼愿为奴以赎遂
皆免建中初进士高第徐泗节度使张建封表至其府
积劳为濠州刺史性浮险尚奢侈德宗既厌兵大抵刺史重代易至历年不徙兼探帝意

谋自固即修武备募占劲兵三千帝以为才遂横恣僚
官韦赏陆楚论事忤兼诬劾以罪杀之众莫不冤又妄系令狐运而陷李藩欲杀之不克
元和初入为刑部郎中改苏州刺史比行上书言李锜
必反留为吏部郎中寻擢河南尹卒年七十

杜羔

杜中立

杜羔

从弟羔贞元初及进士第有至性父死河北母更兵乱不知所之及兼为泽潞判官
鞫狱有媪辨对不凡乃羔母因得奉养而不知父墓区
处昼夜哀恸他日舍佛祠观柱间有文字乃其父临死记墓所在羔奔往有耆老识其塋
因是乃得葬元和中为万年令时许季同为长安令京
兆尹元义方责租赋不时系二县吏将罪之羔等辩列尤苦尹不为纵羔乃谒宰相请移
散官宪宗遣中使问状具对府政苛细力不堪奉诏皆
免官夺尹三月俸议者以羔为直未几授户部郎中后历振武节度使以工部尚书致仕
卒赠尚书右仆射谥曰敬

杜中立

子中立字无为以门荫历太子通事舍人开成初尚真源长公主迁光禄少卿驸马
都尉中立数求自试转太仆卫尉二少卿历左右金吾
大将军捕系京师恶少立捶死迁司农卿绳吏急反为中伤左徙庆王傅久之复拜司农
卿入谢帝曰卿用法深信乎答曰穀下百司养名不肯
事如司农尤丛剧陛下无遽信流言假臣数月事可济帝许之初度支度六宫殫钱移司
农司农季一出付吏大吏尽举所给于人权子钱以给
之不以时中立取钱纳帑舍率五日一出吏不得为奸后遂以为法加检校右散骑常侍
出为义武节度使旧徭车三千乘岁挽盐海滨民苦之
中立置飞云将数百人具舟以载自是民不劳军食足矣大中十二年大水泛徐兖青郛
而沧地积卑中立自按行引御水入之毛河东注海州
无水灾卒年四十八赠工部尚书

△杜亚

杜亚字次公京兆人肃宗在灵武上书论当世事擢校书郎杜鸿渐节度河西奏署
幕府入朝历吏部员外郎鸿渐为山南剑南副元帅亚
与杨炎并为判官再迁谏议大夫元载得罪亚与刘晏等劾治载死迁给事中常袞恶之
出为江西观察使德宗立召还亚意必任台宰倍道进
与人语皆天下大政或以事祈谒辄相然可帝知不悦也既又建奏疏阔不称旨罢为陕
虢观察兼转运使徙河中刘晏抵罪贬睦州刺史兴元

初入迁刑部侍郎又拜淮西节度使至则治漕渠引湖陂筑防庸入之渠中以通大舟夹堤高印田因得溉灌疏启道衢彻壅通堙人皆悦赖然用度无艺府财耗竭贞元中罢归宰相竇参惮其宿望以检校吏部尚书留守东都病风痺且废犹欲固宠奏垦苑中为营田可减度支岁禀诏许之先是苑地可耕者皆留司中人及屯士占假亚计窘更举军帑钱与甸人至秋取菽粟偿息输军中贫不能偿者发困窘略尽流亡过半又赂中人求兼河南尹帝审其妄使礼部尚书董晋代之赐亚还病不能谒卒年七十四赠太子少傅谥曰肃

△范传正

范传正字西老邓州顺阳人父恂为户部员外郎与赵郡李华善有当世名传正举进士宏辞皆高第授集贤殿校书郎历歙湖苏三州刺史有殊政进拜宣歙观察使代还坐治第过制宪宗薄不用改光禄卿以风痺卒赠左散骑常侍

△孟简

孟简字几道德州平昌人同州刺史诜之曾孙 【隐逸传云诜汝州梁人纠缪云平昌孟氏之望】 擢进士第登宏辞科累官至仓部员外郎以不附王叔文宰相韦执谊为徙他曹 【旧书迁司封郎中】 元和四年拜谏议大夫知匭事王承宗叛诏以吐突承璀为招讨使简抗疏论之出为常州刺史开古孟渎长四十一里溉田四千余顷廉使举课绩八年加金紫光禄大夫征为给事中九年出为越州刺史兼御史中丞浙东观察使始李迺抑士族右编人及简为政反之农估兼受其弊时谓两失之十二年入为户部侍郎加御史中丞出为襄州刺史山南东道节度使十四年诏置临汉监牧马命简充使职简奏请均州郟乡县镇遏使赵洁充本县令台司奏有亏刑典罚一月俸改授太子宾客分司东都穆宗立以简在襄阳故杀腹心吏陆翰翰子弟诣阙诉冤发简奸赃御史劾验得遗吐突承璀贖七千余贯再贬吉州司马长庆元年大赦量移睦州刺史复徙常州三年仍入为太子宾客分司东都其年十二月卒简早岁工诗名闻江淮俊拔尚义交友歿能恤其孤晚路殊躁急佞佛过甚为儒者所诮

△刘伯刍

刘伯刍字素芝兵部侍郎乃之子志行修谨淮南杜佑辟为从事府罢征拜右补阙迁主客员外郎数过友家饮噉为韦执谊阴劾贬虔州掾曹后为考功员外郎裴垪善其应对机捷迁考功郎中集贤院学士转给事中李吉甫复相与垪宿嫌垪卒不加赠伯刍为申理乃赠太子少

傅或言其妻埶从母也吉甫欲按之求补虢州刺史稍迁刑部侍郎俄知吏部选事元和十年以左常侍致仕卒年六十一赠工部尚书伯刍风度高严善谈谑而动与时适论者少之子宽夫

刘宽夫

刘宽夫

宽夫宝历中为监察御史奏以王府官摄祭位轻非严恭意请以尚书省东宫三品若左右丞侍郎通摄俄转左补阙陈岵注维摩经因供奉僧进得濠州刺史宽夫与同列因对论之敬宗怒谓宰相曰岵不因僧得郡谏官安得此言须推排头首来宽夫奏曰昨论陈岵时不记发言前后独臣草状应伏诛推言所从恐累国体帝嘉其引过释之宽夫弟端夫为太常博士驳韦绶谥议知名宽夫子允章字蕴中咸通中为礼部侍郎请诸生及进士第并谒先师衣青衿介帻以还故制改国子祭酒又建言羣臣输光学钱治庠序宰相五万节度使四万刺史万诏可后为东都留守黄巢至分司李璘挈尚书印走河阳允章寄治河清巢僭号辄受伪官文书尽用伪年号遣取印璘所璘不与更悔愧移檄近镇起兵捍贼璘持印还之后废于家

△杨凭

杨凭字虚受一字嗣仁虢州弘农人少孤其母训导有方长善文辞与弟凝凌皆有名踵擢进士第时号三杨凭重交游尚气节然诺与穆质许孟容李墉相友善称杨穆许李愿事节度府召为监察御史累迁太常少卿湖南江西观察使性简傲接下脱略人多怨之在二镇尤侈汰元和四年拜京兆尹与御史中丞李夷简素有隙因劾凭江西奸赃及他不法诏刑部尚书李墉大理卿赵昌即台参讯时凭治第永窰里功役丛烦又广蓄妓妾于永乐里别舍谤议颇喧故夷简籍之痛摘发欲抵以死宪宗以凭治京兆绩但贬临贺尉德宗时假借方镇习为僭拟夷简首按凭时以为宜而缘私怨论者亦不与俄徙杭州长史以太子詹事卒凭所善客徐晦者字大章第进士贤良方正擢栎阳尉【旧书云皆自杨凭所荐】及得罪姻友无往候者独晦至蓝田慰饯故相权德舆与凭交最深谓晦曰今日送临贺诚厚无乃为累乎晦曰方布衣时临贺知我今忍遽弃乎有如公异时为奸邪谮斥又可尔乎德舆称之朝夷简遽表为监察御史晦白夷简曰生平不践公门公何取信而见奖拔夷简曰君不负杨临贺肯负国乎由是知名拜中书舍人太和四年拜兵部侍郎五年为太子宾客分司东都晦性强直当官守正嗜酒丧明以礼部尚书致仕开成三年卒赠兵部尚书

杨凝

杨敬之

杨凝

凝字懋功由协律郎三迁侍御史为司封员外郎坐厘正嫡媵封邑为权幸所忌徙吏部稍迁右司郎中宣武董晋表为判官亳州刺史缺晋以凝行州事增垦田决污堰筑堤防水患讫息时孟叔度纵横挠军治而凝亦荒湏晋卒乱作凝还京师阖门三年拜兵部郎中卒凌字恭履最善文终侍御史子敬之

杨敬之

敬之字茂孝元和初擢进士第平判入等迁右卫胄曹参军累迁屯田户部二郎中坐李宗闵党贬连州刺史文宗好儒以宰相郑覃兼国子祭酒俄以敬之代兼太常少卿是日二子戎戴登科时号杨家三喜转大理卿检校工部尚书兼祭酒卒敬之尝为华山赋示韩愈愈称之传布士林性爱士类得其文章孜孜玩讽人以为癖雅爱项斯为诗所至称之由是擢上第斯字子迁江东人敬之尝祖客灞上见闽人濮阳愿阅其文遍语公卿间会愿死敬之为敛葬

△潘孟阳

潘孟阳父炎大历末官右庶子为元载所恶久不迁载诛进礼部侍郎以病免妇翁刘晏任权时虽疏书报答未尝辄开晏得罪坐贬澧州司马舆疾上道不自言于邵高其介申救不见听孟阳少以荫进登博学宏辞科累迁殿中侍御史公卿多父友及外祖宾从故得荐用累至兵部郎中贞元末王绍以恩幸进数称其才权知户部侍郎杜佑判度支奏以自副宪宗立命巡江淮省财赋加盐铁转运副使并察诸使治否孟阳以豪倨所至务游赏倡乐夜饮且招金钱补吏大失人望使还能大理卿后郑敬宣慰江淮帝丁寔以孟阳为诚元和三年出为华州刺史迁剑南东川节度使宰相武元衡与孟阳旧复以户部侍郎召判度支又兼京北五城营田使太府卿王遂为西北供军使以营田非便持之不下孟阳忿恨形于言二人俱请对帝怒罢孟阳左散骑常侍四年复本官盛葺第舍帝微行至乐游原望见之以问左右孟阳惧辍不敢治而伎媵用度过侈汰人多指怨之病风痺改左散骑常侍十年八月卒赠兵部尚书谥曰康初孟阳为侍郎年未四十其母谓曰以尔之材而位丞郎使吾忧之

△崔元略

崔元略博州人 【旧书作博陵人】 第进士历佐使府元和八年拜殿中侍御史

十二年迁刑部郎中知台杂事擢御史中丞十三年李夷简为御史大夫诏元略留司东台改京兆少尹行府事数月迁为尹十四年改左散骑常侍初中丞缺议者属崔植而元略谬谓植入阁不如仪使御史弹治及宰相以二人进元略果得之植恨怅既当国以元略宣抚党项使辞疾不行植奏不少责无以示羣臣乃出为黔南观察使徙鄂岳长庆四年入为大理卿敬宗即位复为京兆尹兼御史大夫收贷钱万七千缗为侍御史萧澈弹劾诏三司杂治宦人崔潭峻左右之狱具止削兼秩俄授户部侍郎谏官诉元略方劾而迁有助力元略自解辨乃止宝历二年京兆尹刘栖楚又劾元略前造东渭桥纵吏增估物不偿值取工徒赃二万缗诏夺俸一月于是栖楚规相位疑元略妨己路故举疑似蔑染之太和三年进户部尚书四年判度支五年检校吏部尚书出为东都留守畿汝等防御使改义成节度使十二月卒废朝三日赠尚书左仆射子铉

崔铉

崔铉

铉字台硕擢进士第从李石荆南为宾佐入拜司勋员外郎翰林学士迁中书舍人学士承旨武宗好蹴鞠角抵铉切谏帝嘉纳之会昌三年拜中书侍郎同中书门下平章事泽潞平兼户部尚书与李德裕不协罢为陕虢观察使宣宗初以御史大夫召进尚书左仆射兼门下侍郎封博陵郡公所善郑鲁杨绍复段瓌薛蒙时语曰郑杨段薛炙手可热欲得命通鲁绍瓌蒙帝闻之题于宸铉欲引鲁为相帝不许用为河南尹帝语铉曰鲁去矣事由卿否铉惶惧谢罪后出为淮南节度使帝钱太液亭赐诗宠之宣州军乱逐观察使郑熏铉出兵讨击诏兼宣徽池观察使既平加检校司空罢兼使居九年条教一下无复改民咸顺赖咸通初徙山南东道荆南二镇封魏国公庞勋叛自桂管北还所过剽略铉闻大募兵江湘邀贼归路贼惧更踰岭自淮而北朝廷壮其忠卒于官子沆字内融干符五年以户部侍郎同中书门下平章事昕旦告麻大雾塞廷中百僚就班修庆大风雨雹时谓不祥俄改中书侍郎兼工部尚书卢携专政而黄巢势寢盛沆每建裁遏多为携沮抑贼陷京师匿张直方第遇害元略弟元受元式元儒皆举进士第元式宣宗初以刑部尚书判度支拜门下侍郎同中书门下平章事进兼户部尚书卒赠司空谥曰庄

△韦绶

韦绶字子章京兆万年人有至性然好不经丧父镌臂血写浮图书为长安尉遭朱泚乱羸服走奉天拜华阴令佐襄阳于岷府面刺岷纵

恣頔不能容荐诸朝三迁职方郎中穆宗为太子授入侍读迁谏议大夫尝密赍家所造食入宫饷太子宪宗尝召对绶奏曰太子学书至依字辄去人曰上以此可天下奏事臣子不合全书帝嘉太子贤赐绶锦彩绶数为俚言以悦太子他日太子为帝道之帝怒曰绶当以经义辅导太子而反语此朕何赖焉出为虔州刺史穆宗立以师友恩召为尚书右丞集贤院学士出入禁中怙宠甚请帝诞日百官先诣光顺门贺皇太后然后上皇帝寿诏可宰臣奏古无生日称贺者绶议格时大臣论启或未决绶居中助可否九日宴羣臣曲江绶请集贤学士得别会从之长庆元年三月进礼部尚书判集贤院事帝问所以振灾邀福者对曰宋景公以一善言退法星三舍汉文除秘祝敕有司祭而不祈此皆受自至之福书美前史如失德却灾媚神丐助神而有知且因以谴也时帝不德故托讽焉二年十月检校户部尚书为山南西道节度使请门戟十二以行又乞赐钱二百万官子元弼太常丞帝许之绶毫而贪泊临戎镇庶政隳紊卒赠尚书右仆射有司谥通丑故吏以为言改谬丑不报罢 【按旧书博士刘端夫请谥为通殿中侍御史孟管上言以为非当博士权安请谥为谬竟不施行】

钦定续通志卷二百五十七

●钦定续通志卷二百五十八 列传五十八

列传

唐 【五十八】

○唐五十八

归崇敬【登融】 奚陟 张荐【读】 赵涓 李纾

郑云逵 徐岱 王仲舒 冯伉

卢景亮【王源中】 薛苹【膺】 卫次公【洙】 薛戎放 胡证

崔弘礼 崔元亮 王质

殷侗【盈孙】 王彦威 庾敬休

归崇敬

奚陟

张荐

赵涓

李纾

郑云逵

徐岱

王仲舒

冯伉

卢景亮

薛苹

卫次公

薛戎

胡证

崔弘礼

崔玄亮

王质

殷侑

王彦威

庾敬休

△归崇敬

归崇敬字正礼苏州吴人治礼家学多识客典擢明经遭父丧孝闻乡里调国子直讲天宝中举博通坟典科对策第一迁四门博士有诏举才可宰百里者复策高等授左拾遗再迁起居郎赞善大夫史馆修撰兼集贤殿校理修国史仪注以贫求解厯同州长史润州别驾未几有事桥陵建陵召还参仪典改主客员外郎复兼修撰代宗幸陕召问得失崇敬极陈生人疲敝当以俭化天下则国富而兵可用所建礼典如百官朝朔望不宜服袴褶东都太庙不当置木主驳方士巨彭祖建言四季月郊祀天地议五人帝祭毋称臣春秋释奠祝版皇帝署行东面之礼事皆施行大历初授仓部郎中充吊祭册立新罗使海道风涛舟几坏众谋以单舸免曰共舟数十百人我何忍独济少选风息还授国子司业兼集贤学士八年遣祀衡山未至而哥舒晃乱广州监察御史惮之请望祀而还崇敬正色曰君命岂有畏邪遂往皇太子欲临国学行齿胄礼崇敬以学与官名皆不正乃建议请以国子监为辟雍省祭酒为太师氏司业为左师右师议格不行坐吏给禀钱不实贬饶州司马德宗立召还复拜国子司业稍迁翰林学士左散骑常侍充皇太子侍读又兼晋王元帅参谋封余姚郡公田悦李纳禀命持节宣慰称旨表归上冢宠赐缗帛儒生以为荣迁工部尚书仍前职年老以兵部尚书致仕卒年八十八 【按旧书作年八十】 赠尚书左仆射谥曰宣论撰数十篇子登

归登

归融

归登

登字冲之事继母笃孝大历中举孝廉高第贞元初策贤良为右拾遗裴延龄得幸德宗欲遂以相右补阙熊执易疏论之以示登登动容曰愿窜吾名雷霆之下君难独处同列有所谏止辄联署无所回讳转右补阙起居舍人凡十五年退然远权势终不以淹晚槩怀迁兵部员外郎顺宗为皇太子登父子侍读及即位以东宫恩超拜给事中迁工部侍郎复为皇太子诸王侍读献龙楼箴以讽徙左散骑常侍宪宗问政所先登知帝睿而果于断劝以纳谏后判国子祭酒事进工部尚书累封长洲县男卒年六十七赠太子少师谥曰宪子融

归融

融字章之元和中及进士第累迁左拾遗事文宗为翰林学士进至户部侍郎开成初拜御史中丞湖南观察使卢周仁以南方屡火取羨钱亿万进京师融劾奏周仁陈小利假异端公违诏书徇私希恩请重责违所进代贫民租入诏不从置钱河阴院以虞水旱寻迁京兆尹李固言为相恶之徙秘书监固言罢擢权知兵部侍郎岁间出为山南西道节度使徙东川还历兵部尚书累封晋陵郡公会昌后儒臣少朝廷礼典多本融议辞疾以太子少傅分司东都大中七年卒赠尚书左仆射

△奚陟

奚陟字殷卿其先自谯亳西徙故为京兆人少笃志通羣书大历末擢进士文辞清丽科授宏文馆校书郎德宗立谏议大夫崔河图持节使吐蕃表陟自副以亲老辞不拜杨炎联政召授左拾遗居亲丧毁瘠过礼朱泚反问道及车驾于兴元拜起居郎翰林学士不就职贼平改太子司议郎历金部吏部员外会左右丞缺转左司郎中贞元八年迁中书舍人于是江南淮西皆大水诏陟劳问循慰所至人人便安迁刑部侍郎京兆尹李充有美政裴延龄恶之诬劾充比陆贽数遗金帛又干没京兆钱六十八万缗请付比部钩校时郎中崔元翰怨贽揣延龄指逮系榜掠甚急陟持平具狱上且言京兆钱给县馆传余以度支符用度略尽充既免元翰不得意以恚死陟寻知吏部选事迁侍郎铨综平允卒年五十五赠礼部尚书子敬元位左补阙

△张荐

张荐字孝举深州陆泽人祖鸞字文成早慧书无不览为儿时梦紫文大鸟五色成文止其庭大父曰吾闻五色赤文凤也紫文鸞也若壮殆以文章瑞朝廷乎遂命以名调露初登进士第蹇味道见所对称天下无双授岐王府参军入以制举皆甲科再调长安尉迁鸿胪丞四参选判策为铨府最员半千称鸞文辞犹青铜钱万选万中时号鸞青钱学士证圣中天官

侍郎刘奇以鸞为御史性褊躁不持士行姚崇尤薄之
开元初御史李全交劾鸞多口语讪短时政贬岭南刑部尚书李日知讼斥太重得内徙
鸞属文下笔辄成浮艳少理致然大行一时武后时中
人马仙童陷默啜问文成在否答曰近自御史贬官曰国有此人不用无能为也 【吴缜
纠谬云证圣元年至开元元年相去一十九年而鸞
仍为御史此已可疑且鸞既于开元初以御史贬官矣何缘武后时马仙童有近自御史
贬官之语此一节前后乖舛全不可考今按武后时贬
官开元初贬岭南自是二事史叙默啜问答于后取与新罗日本之文相次耳若以先后
言之则鸞证圣元年为御史自御史贬官中间复跻朝
列至开元初又为李全交所劾坐贬岭南旧闻脱畧史失其厯官之详故新旧二书俱以
梗概之辞言之而吴氏联缀上下以为事实因有十九
年为御史之疑且谓开元初以御史贬官与马仙童所称牵合为一事皆未免以辞害意
今附正之】 新罗日本使至必出金宝购之终司门员
外郎荐敏锐有文辞初为颜真卿叹赏大历中李涵表荐才任史官母丧阙于邵以闻召
充史馆修撰兼阳翟尉真卿为李希烈所拘遣兄子峴
及家仆奏事五辈皆留内客省荐上疏请以所逮捕希烈幼弟及妻祖母郭妻妹封寘境
上赎真卿卢杞持之不报朱泚反诡姓名匿城中着史
遁先生传京师平擢左拾遗诏复用杞为刺史荐与陈京赵需等论杞奸恶不当用入对
挺确德宗纳之贞元元年帝亲郊时更兵乱礼物残替
荐为太常博士参缀礼仪略如旧章四年关播送咸安公主入回纥荐为判官还迁工部
员外郎十一年拜谏议大夫仍充史馆修撰裴延龄用
事荐将疏其恶延龄知之奏以荐领史职不宜兼谏议改秘书少监延龄排摈不已会遣
使蕃域屡充册命吊祭二十年至赤岭东歿于纥壁驿
顺宗即位讫至诏赠礼部尚书谥曰宪荐自拾遗至侍郎二十年皆兼史馆三使绝域皆
兼宪职以该洽多能敏于占对被选初贞元时京师旱
帝避正殿减膳荐白限日以应古制及定昭德皇后庙乐迁献懿二祖定太仪号大臣祔
庙鼓吹法莫不参裁诸儒谓博而详有文集三十卷及
所撰五服图宰辅略灵怪集江左寓居录并传于时子又新希复皆登进士第又新自有
传

张读

张读

孙读字圣用 【旧书云希复子】 幼颖解大中时第进士郑熏辟署宣州幕府累
迁礼部侍郎中和初为吏部选牒精允调者丐留二年
诏可榜其事曹门后兼宏文馆学士判院事卒

△赵涓

赵涓冀州人幼有文天宝时第进士补郾城尉稍厯台省河南副帅王缙奏充判官德宗初为衢州刺史永泰时禁中火近东宫代宗疑之涓以监察御史为巡使迹火所来乃出宦人直舍者帝在东宫颇德之及治衢不为观察使韩滉所容奏免官帝以名问宰相曰是岂永泰时御史乎对曰然即拜尚书左丞典吏部选从狩梁兴元元年卒赠户部尚书子博宣登进士第藻翰豪迈沈于酒傲忽少检陈许曲环辟署于府久不能堪为所诬奏流康州时人冤之

△李纾

李纾字仲舒天宝末为校书郎大历初李季卿荐为左补阙累迁中书舍人德宗居奉天选为同州刺史帝次梁纾委城趋行在擢兵部侍郎高邑伯反正兼知选事李怀光诛河东节度及诸军会河中诏往宣劳还奏合旨拜礼部侍郎建言享武成王庙不宜与文宣王等制从之纾性乐易喜接后进其自奉颇华裕不龊龊崖检官虽贵而游纵自如奉诏为兴元纪功述及他郊庙乐章论譔甚多进吏部侍郎年六十二卒贞元八年赠礼部尚书

△郑云逵

郑云逵荥阳人父昈为郾城尉州刺史移职民之暴警者遮道留昈诛杀六七人采访使奇之言状擢北海尉安禄山反县民孙俊殴市人以应昈率众击杀之改登州司马李光弼表为武宁府判官迁沂州刺史谕降贼李浩五千人终滁州刺史云逵为人诞譎敢言大历初举进士去客燕朔以画干朱泚泚表为掌书记妻以滔女泚将朝使云逵先入奏同府蔡廷玉潜于泚奏贬为平州参军【旧书作莫州】滔代泚将复为判官廷玉与朱休微潜滔于泚云逵漏其语以怒滔故滔论廷玉等得罪死滔助田悦云逵谏不从遂弃室归长安擢谏议大夫帝在梁云逵依李晟晟表以礼部侍郎为军司马时时咨逮戎略元和元年拜右金吾卫大将军改京兆尹五年卒弟方逵悖悍结徒剽劫父欲杀之不克云逵自劾不能教恐赤臣家诏锢死黔州

△徐岱

徐岱【旧书在儒学传】字处仁苏州嘉兴人世农家子于学无所不通辨论明锐座人常屈大历中刘晏表为校书郎观察使李栖筠署岱所居为复礼乡荐为偃师尉礼仪使蒋镇荐为太常博士专掌礼事从德宗幸奉天以膳部员外郎兼博士贞元初为太子诸王侍读迁给事中兼史馆修撰帝以诞日岁诏佛老者大论麟德殿并召岱及赵需许孟容韦渠牟讲

说始三家若矛楯然卒而同归于善帝大悦赉予有差
两宫恩遇无比性笃慎未尝泄禁中语亦不谈人短宗族遗孤皆为婚嫁惟吝嗇持家管
钥为世所讥云卒年五十上赙以帛绢皇太子遗绢百
匹赠礼部尚书

△王仲舒

王仲舒【旧书在文苑传】字弘中并州祁人少孤贫事母孝嗜学工文不就乡
举所友皆知名士与梁肃杨凭友善贞元十年贤良方
正高第拜左拾遗德宗欲相裴延龄与阳城交章言不可元和五年自职方郎中知制诰
仲舒文思温雅制诰出人皆传写杨凭得罪斥去无敢
过其家仲舒屡存问将直凭冤贬峡州刺史除母丧为婺州刺史先是州疫旱人徙死几
空居五年里闾增完加金紫徙苏州堤松江为路变屋
瓦绝火灾赋调与民期不扰自办穆宗立思其文宜为诰召为中书舍人既至视同列率
新进少年居不乐曰岂可复治笔研于其间哉吾久弃
外周知俗病利得治之不自愧宰相闻除江西观察使江西榷酒利多他州十之八民私
酿岁抵死不绝仲舒罢酤钱九十万吏坐失官息钱五
十万悉产不能偿仲舒焚簿书脱械不问水旱民赋不入出钱二千万代之有为佛老法
兴祠屋者皆驱出境长庆三年冬卒年六十二赠左散
骑常侍谥曰成仲舒尚义概所居急民废置自为科条始若烦密久皆称其便

△冯伉

冯伉【旧书在儒学传】本魏州元城人父玠家京兆大历初登五经秀才科建
中四年登博学三史科三迁膳部员外郎充睦王等侍
读李抱真卒伉持节临吊归之帛不受德宗以此擢为醴泉令县百姓多猾着谕蒙书十
四篇劝之务农进学而教以忠孝每乡给一卷居七年
韦渠牟荐为给事中皇太子诸王侍读对殿中赐金紫进兵部侍郎出为同州刺史以散
骑常侍召领国子祭酒者再元和四年卒年六十六赠
礼部尚书着三传异同三卷子药擢进士第又第制科仕尚书郎

△卢景亮

卢景亮字长晦幽州范阳人少孤学无不览第进士宏辞授秘书郎张延赏节度荆
南表为枝江尉掌书记入迁右补阙景亮志义崒然多
激发与穆质同在谏争地书数上鲠毅无所回帝怒贬为郎州司马质亦斥去废抑二十
年至宪宗时由和州别驾召还再迁中书舍人景亮善
属文根于忠仁有经国志尝谓人君足食足兵而又得士天下可为也乃起轩琐以来至
唐剝治道之要著书上下篇号三足记又作答问言挽
运大较及陈西戎利害元和初卒赠礼部侍郎宪宗时以直谏知名者又有王源中

王源中

王源中

王源中字正蒙擢进士宏辞累迁左补阙是时中官领禁兵数乱法捕台府吏属系军中源中上言台宪者纪纲地府县责成之所设吏有罪宜归有司无令北军乱南衙麾下重于仗内帝纳之累转户部郎中侍郎擢翰林学士进承旨学士以疾出为山南西道节度使入拜刑部郎中未几领天平节度使开成三年卒赠尚书右仆射

△辞莘

辞莘河中宝鼎人父顺为奉天尉与杨国忠有旧及用事将引之辄谢绝莘以吏最拜长安令历虢州刺史宪宗时奏最擢湖南观察使徙浙东以治行迁浙西加御史大夫累封河东郡公所居守法度务在安人居三镇声乐不闻于家所得禄即分散亲属故人而无余藏除左散骑常侍年七十致仕卒赠工部尚书谥曰宣

辞膺

辞膺

子膺太和初为右补阙内供奉其弟齐左佐兴元李绛幕府绛遇害齐死于难膺闻不及请驰赴之哀甚闻者垂泣后历工部员外郎

△卫次公

卫次公字从周河中河东人举进士第调渭南尉严震在兴元辟佐其府累迁殿中侍御史贞元中擢左补阙翰林学士德宗崩与郑絪皆召至金銮殿时皇太子久疾禁中或传更议所立众失色次公曰太子虽久疾豕嫡也内外系心久矣必不得已宜立广陵王絪随赞之议乃定顺宗立王叔文等用事次公与絪多所持正知礼部贡举斥华取实不为权力侵挠由中书舍人充史馆修撰改兵部侍郎絪以宰相罢坐与善下除太子宾客久乃为陕虢州观察使蠲横租钱岁三百万复入为兵部侍郎进尚书左丞时方讨蔡数建请罢兵帝将相之制稟具而蔡捷书至乃追止以检校工部尚书为淮南节度使久之召还道病卒年六十六赠太子少傅谥曰敬次公本善琴未显时京兆尹李齐运使子请授之次公拒绝因终身不复鼓

卫洙

卫洙

子洙举进士尚临真公主检校秘书少监驸马都尉文宗曰洙起名家以文进宜谏官宠之乃为左拾遗历义成节度使咸通中卒

△辞戎

薛戎字符夫河中宝鼎人客毗陵阳羨山年四十余不仕江西观察使李衡辟署幕府三返乃应故宰相齐映代衡奏留之府罢复归阳羨福建观察使柳冕辟佐其府先是马总佐郑滑府监军宦人诬劾之贬泉州别驾冕欲除总以附幸家即使戎摄刺史按置其罪戎不肯从还白其状冕怒囚之它馆环兵胁辱之累月戎终不为屈淮南节度使杜佑闻之书责冕会冕亦病死得解自放江湖间复为藩府交奏稍迁河南令吐突承璀讨镇州所过吏治道前驱惟戎境内按故无所治迺留府卒犯令缚置狱留守怒遣将略出之不与累迁浙东观察使所部州触酒禁者罪当死橘未贡先鬻者死戎弛其禁卒年七十五赠左散骑常侍

薛放

薛放

弟放端厚寡言第进士累擢兵部郎中穆宗为太子拜侍读及即位参赞机命进工部侍郎集贤学士改刑部侍郎终江西观察使谥曰简

△胡证

胡证字启中河东人举进士第浑瑊美其才又以乡府奏寘幕下繇殿中侍御史为韶州刺史以母老辞为太子舍人更从襄阳于嶷署掌书记入为户部郎中田弘正以魏博内属请自副诏兼御史中丞为副使入迁谏议大夫元和九年拜振武军节度使居四年召仕金吾大将军又充京西京北巡边使太和公主降回鹘以检校工部尚书为和亲使旧制行人有私覬礼县官不能具召富人子纳费于使而命之官证请俭受省费以绝其滥还拜工部侍郎改京兆尹左散骑常侍宝历初以户部尚书判度支固辞拜岭南节度使卒年七十一赠尚书右仆射 【按旧书赠左仆射】 广有舶贝奇宝证厚殖财号京师高訾素与贾餗善李训败卫军利其财声言餗匿其家争入剽劫执其子湫内左军至斩以徇

△崔弘礼

崔弘礼字从周系出博陵北齐左仆射怀远六世孙 【旧书作怀远七世孙按世系表博陵第二房昂字怀远北齐礼部尚书生液液生洽洽生洽洽生预预生育育生孚孚生弘礼自昂至宏礼凡七世旧书是也又按崔昂在北齐为右仆射坐事除名后终礼部尚书新书以为左仆射亦误】 磊磊有大志通兵略及进士第平判异等灵武林栾表为判官以亲老不应更署东都留守吕元膺参谋时天子讨蔡李师道谋袭洛胁沮朝廷以释蔡危弘礼为箝揣贼情部分设张东都卒无患迁留守判官擢忻汾二州刺史田弘正请朝表弘礼徙卫州兼魏博节度副使

伐李师道弘正多所咨逮又表为相州刺史长庆初张弘靖镇幽州诏弘礼往副未及行军乱改絳州刺史李■〈宀介〉反于汴诏徙河南尹迁河阳节度使治河内秦渠溉田千顷岁收八万斛徙华州刺史改天平节度使李同捷叛与李昕合师讨之击贼禹城破之时徐泗节度使王智兴檄兖海郓曹淄青当徐道者出车五千乘转覆馈军弘礼度道远乃自兖开盲山故渠自黄队抵青邱师人大济加检校尚书左仆射徙东都留守召还以病自乞改刑部尚书复为留守卒年六十五赠司空

△崔玄亮

崔玄亮字晦叔磁州昭义人贞元初擢进士第累署诸镇幕府父丧客高邮卧苫终制地下湿因得痺病不乐进取元和初召为监察御史累转驾部员外郎稍迁密歙二州刺史歙人马牛生驹犊官籍蹄噉吏得为奸玄亮焚其籍历湖曹二州太和四年繇太常少卿改谏议大夫拜右散骑常侍每迁官辄让形于色郑注构宋申锡捕逮仓卒内外震惊玄亮率谏官叩延英苦诤反复数百言文宗未谕玄亮置笏在陛曰孟轲有言众人皆曰杀之未可也卿大夫皆曰杀之未可也天下皆曰杀之然后察之乃真于法今杀一凡庶当稽典律况欲诛宰相乎臣为陛下惜天下法不为申锡言也俯伏流涕帝感悟繇此名重朝廷顷之移疾归东都召为虢州刺史卒年六十六赠礼部尚书

△王质

王质字华卿五世祖通为隋大儒质少孤客寿春力耕养母讲学不勒诸生从者甚众举进士中甲科繇秘书省正字累佐帅府五迁侍御史繇山南西道节度副使再转谏议大夫宋申锡之得罪质与谏官伏阁文宗开延英召见泣涕陈谏帝稍寤申锡得不死为宦竖所恶出虢州刺史李德裕素器之擢给事中河南尹徙宣歙观察使卒年六十八赠左散骑常侍谥曰定

△殷侑

殷侑陈州人幼志学不治货产长通经术贞元末及五经第长于礼擢太常博士元和八年回鹘请和亲朝廷以费剧欲纾期诏侑副宗正少卿李忠诚使回鹘【按旧书李忠诚奉使回鹘以侑为副新书诏侑下脱副字】可汗骄甚盛陈甲兵欲臣使者侑不为屈还迁虞部员外郎王承宗叛遣侑招谕承宗听命进谏议大夫侑论朝廷治乱得失前后凡八十四通以语切出为桂管观察使宝历元年徙江西所至以洁廉称入为卫尉卿文宗即位李同捷叛而王廷凑阴为唇齿兵久不解诏五品以上官议尚书省帝锐欲讨贼侑请舍廷凑而专事同捷帝不纳然

内嘉尚同捷平以侑尝为沧州行军司马遂拜义昌军节度使时瘠荒之余侑单身之官
安足羸淡与下共劳苦以仁惠为治岁中流户襁属而
还遂为营田丐耕牛三万诏度支赐帛四万匹佐其市初州兵三万仰禀度支侑始至一
岁自以赋入贍其半二岁则周用乃奏罢度支所赐户
口滋饶以劳加检校吏部尚书六年徙天平节度裁制经费岁以钱十五万缗粟五万石
归有司加检校尚书右仆射御史大夫温造劾侑违制
擅赋敛民为无名之献诏以庾承宣代还帝终嘉侑进刑部尚书复用为天平节度开成
元年再召为刑部尚书时李训郑注已诛帝问侑治安
术侑言朝廷宜任耆德毋轻用新进帝善之赐彩三百匹初盐铁度支使属官悉得以罪
人系在所狱或私置牢院而州县不闻知岁千百数不
时决侑奏许州县纠列所系申本道观察使并具狱上闻许之泾原节度使朱叔夜坐侵
牟赃家畜兵器罢为左武卫大将军侑薄其罪天子由
是疏之赐叔夜死出侑为山南东道节度使坐减兵不先论启左迁太子宾客分司东都
俄领忠武军节度卒年七十二赠司空孙盈孙

殷盈孙

殷盈孙

盈孙广明初为成都诸曹参军僖宗至蜀闻有礼学擢太常博士光启三年帝将还
京而七庙焚残告享无所盈孙创定其礼龙纪元年昭
宗郊祠两中尉及枢密皆以宰相服侍盈孙言先世典令无内官朝服侍祠必欲之当随
所摄资品虽无援据犹免僭逼诏可时丧乱后制度雕
紊追补容典皆盈孙折衷焉终大理卿赠吏部尚书

△王彦威

王彦威其先出太原少孤家无赀自力于学淹识古今典礼举明经甲科未得调求
为太常散吏卿知其经生补检讨官彦威采隋以来讫
唐凡礼沿革皆条次汇分号元和新礼上之有诏拜博士宪宗以正月崩有司议葬用十
二月下宿彦威言天子之葬七月愆期非礼有诏更用
五月淮南李夷简上言大行皇帝功高宜称祖穆宗下其议彦威言宜称宗制可累擢司
封郎中弘文馆学士谏议大夫李师道既平其十二州
赋法未均诏彦威为勘定两税使差量纤悉人不为烦还兼史馆修撰下迁河南少尹俄
改司农卿李宗闵执政雅善之进拜平卢节度使开成
初召为户部侍郎判度支彦威亦善吏事但经总财用出入米盐非所长也始神策军多
以禀缗于度支取直吏私增贾厚给之经用益耗开成
初有诏禁止时宦者仇士良鱼弘志方用事彦威乃奏复与直悦媚士良等又劾王播贡
羨羸以冀速进会边兵诉所赐不时缗皆敝恶贬卫尉

卿俄检校礼部尚书为忠武节度使毁山房三千余所盗无所容徙节宣武封北海县子卒赠尚书右仆射谥曰靖

△庾敬休

庾敬休【旧书在忠义传】字顺之邓州新野人祖光烈与弟光先不受禄山伪官遁去光烈终大理少卿光先吏部侍郎父何【旧书作河】当朱泚反又与季弟倬逃山谷何终兵部郎中敬休举进士又中宏辞辟宣州幕府入拜右补阙起居舍人建言天子视朝宰相羣臣以次对言可传后者承旨宰相示左右起居则载录季送史官如故事诏可既而执政以几密不可露罢之文宗将立鲁王为太子慎选师傅以户部侍郎【旧书作工部】兼鲁王傅初剑南西川山南西道岁征茶及除陌钱户部自遣巡院主之募贾人入钱京师太和元年崔元略奏责本道主当岁上度支四万缗久之逗留多不至敬休始请置院秭归收度支钱乃无逋没又奏两川米价腾踊百姓请罢本道阙官职田禄米以救贫民从之再为尚书左丞太和九年三月卒于家赠吏部尚书敬休姿容温雅襟抱夷旷不饮酒茹葷不迳声色着谕菩录七卷弟简休亦至工部侍郎

钦定续通志卷二百五十八

●钦定续通志卷二百五十九 列传五十九

列传

唐【五十九】

○唐五十九

姚南仲 独孤及【朗郁】 顾少连 韦夏卿 段平仲

吕元膺 许孟容【季同】 薛存诚【延老

】 李逊【方元 建讷】 温造璋

姚南仲

独孤及

顾少连

韦夏卿

段平仲

吕元膺

许孟容

薛存诚

李逊

温造

△姚南仲

姚南仲华州下邽人干元初擢制科授太子校书累迁右补阙大历十年【旧书作十三年】 贵妃独孤氏薨【吴缜纠谬云独孤氏当薨时止为贵妃不得书皇后书崩宜从本纪及后妃传所云贵妃独孤氏薨今从之】代宗悼痛诏近城为陵以朝夕临望南仲上疏言长安祖宗所宅不可兴凿建陵又陛下省望感伤有损圣德帝说其言进五品阶善宰相常袞袞贬官南仲出为海盐县令观察使韩滉奏为推官又奏授殿中侍御史内供奉充支使召还四迁为御史中丞改给事中陝虢观察使贞元十三年代李复为义成节度使【旧书作十五年今从通鉴】 监军薛盈珍曰姚大夫书生岂将才也判官卢坦私谓人曰姚大夫外柔中刚监军侵之必不受军府祸自此始矣【新书载此事在卢坦传今据辑入】 盈珍恃权挠政不克逞因毁南仲于朝德宗惑之十六年盈珍遣小使程务盈诬表以罪会南仲裨将曹文洽入奏知其语追至长乐驿及之与同舍夜杀务盈投其诬于厕为二书一抵南仲一诉南仲冤且自言杀务盈状乃自杀驿吏以闻帝骇异南仲请入朝待罪帝问曰盈珍扰卿耶对曰盈珍不扰臣但乱陛下法耳且天下如盈珍辈何可胜数虽使羊杜复生亦不能行恺悌之政成攻取之功也帝默然乃授尚书右仆射贞元十九年卒年七十五【旧书作七十四】 赠太子太保谥曰贞

△独孤及

独孤及字至之河南洛阳人天宝末由华阴尉辟江淮都统李峒府掌书记代宗以左拾遗召既至上疏陈政言听直谏则太平可阶师兴民困拥兵者暴宜思所以救之星陨如雨清明降霜三月苦热此下陵上替怨讟所致宜罪己求贤爱人节用以反妖灾为和气又请减江淮山南诸道兵以贍国用俄改太常博士或言景皇帝不宜为太祖及据礼条上谥吕諲卢奕郭知运等无浮美无隐恶得褒贬之正迁礼部员外郎历濠舒二州刺史岁饥旱邻郡庸亡什四以上舒人独安以治课加检校司封郎中赐金紫徙常州甘露降其廷卒年五十三谥曰宪及喜鉴拔后进如梁肃高参崔元翰陈京唐次齐抗皆师事之其为文彰明善恶长于论议晚嗜琴有眼疾不肯治欲听之专也子朗郁【旧书无及传见子郁传云父及天宝末与李华萧颖士齐名善为文所著仙掌铭大为时流所赏】

独孤朗

独孤郁

独孤朗

朗字用晦【案旧书朗乃郁弟与新书不同】 由处士辟署江西宣歙浙东三府

元和中擢右拾遗建言宜用观察使领本道盐铁罢场
监管榷吏除百姓患不听盗杀武元衡朗请贬京兆尹诛捕贼吏因请罢淮西兵忤宪宗
意贬兴元户曹参军入为监察御史转殿中兼史馆修
撰坐与李景俭饮景俭使酒慢宰相出为韶州刺史【旧书作漳州】寻入为左司员
外郎迁谏议大夫敬宗初宦官殴鄂令崔发鸡千下朗
请诛首恶以正国法王播赂权近复判盐铁朗连疏论执宝历元年十一月迁御史中丞
二年六月赐金紫故事选御史皆中丞自请是时崔晃
郑居中繇宰相力得监察御史朗拒不纳晃居中卒改他官侍御史李道枢醉谒朗朗劾
不虔下除司议郎十月高少逸入合失仪朗不弹奏宰
相衔阻崔晃事左授少逸赞善大夫朗亦罚俸会殿中王源植贬官朗直其枉书五上不
报即自劾执法不称愿罢去帝遣中人慰谕不许文宗
初改工部侍郎太和元年八月出为福建观察使赴官创发背卒于路赠右散骑常侍
独孤郁

郁字古风幼孤与朗育于伯父汜第进士学有父风权德舆器之妻以女授监察御
史元和初应制举才识兼茂明于体用策入第四等拜
左拾遗太子司议郎杜从郁拜左补阙郁兴同列论之曰从郁是宰臣佑之子父居宰执
从郁不宜居谏列乃改为左拾遗又论曰补阙之与拾
遗资品虽殊同是谏官若时政或有得失不可令子论父从郁竟改他官四年转右补阙
论中官吐突承璀不宜为河北招讨使乃改招抚宣慰
使五年兼史馆修撰充翰林学士迁起居郎德舆相郁以妇翁嫌辞内职宪宗曰德舆乃
有此佳婿因诏宰相高选世族故杜惊尚岐阳公主然
帝犹谓不如德舆之得郁也迁考功员外郎充史馆修撰判馆事预修德宗实录七年知
制诰八年转驾部郎中德舆去位还为学士九年以疾
辞禁近十一月改秘书少监屏居鄂卒年四十赠绛州刺史郁有雅名帝遇之厚议者亦
谓当宰相共以早世惜之子庠字贤府丧父始十岁有
至性闻呼父官及吊客来辄号恸几绝后举进士仕至尚书丞考旧书所载则谓官至侍
郎

△顾少连

顾少连字夷仲苏州吴人举进士礼部侍郎薛邕器之登拔萃科授登封主簿邑有
虎患少连命塞陷穿移文岳神虎不为害御史大夫千
顾荐为监察御史德宗幸奉天徒步诣谒授水部员外郎翰林学士再迁中书舍人以谨
密称请徙先兆于洛帝重远去诏遣其子往中人护藏
葬役厯吏部侍郎尝与裴延龄会田镐第酒酣挺笏前曰段秀实笏击贼臣今吾将击奸
臣得元友直劝解乃止改京兆尹政尚宽简以京畿租

赋薄厚不一用法均之迁吏部尚书封本县男徙兵部为东都留守奏募耕禁苑及汝州闲田阅武力利铠仗时号良吏卒年六十三赠尚书右仆射谥曰敬始少连携少子师闵奔行在诏同止翰林院车驾还授同州参军

△韦夏卿

韦夏卿字云客京兆万年人【旧书杜陵人】父迢检校都官郎中岭南节度行军司马夏卿苦学善文辞大历中与弟正卿同举贤良方正皆策高等授高陵主簿累迁刑部员外郎时久旱蝗诏以郎官宰畿甸授奉天令课第一转长安令改吏部员外郎郎中擢给事中出为常州刺史夏卿深于儒术所至招礼通经之士时处士窦羣寓于郡界夏卿以所著史论荐之于朝改苏州刺史贞元末徐州节度使张建封疾甚诏夏卿为徐泗行军司马且代之未至建封卒徐军立其子愔为留后召夏卿为吏部侍郎时从弟执谊在翰林尝受人金有所干请密以金纳夏卿怀中夏卿毁怀不受曰吾与尔赖先人遗德致位及此顾当是哉执谊大惭转京兆尹太子宾客检校工部尚书为东都留守辞疾改太子少保卒年六十四赠尚书左仆射谥曰献夏卿性通简好古多闻晚岁将归署其居曰大隐洞与齐映穆赞赞弟员友善与人同处喜怒不形抚孤侄恩踰己子为政务通理不甚作条教所辟士如路隋张贾李景俭等至宰相达官故世称知人正卿子瓘字茂宏及进士第仕累中书舍人与李德裕善德裕任宰相罕接士惟瓘往请无闲也李宗闵恶之德裕罢贬为明州长史会昌末累迁楚州刺史终桂管观察使

△段平仲

段平仲字秉庸武威人隋民部尚书达六世孙登进士第杜佑李复节度淮南连掌书记【旧书云复移镇华州滑州仍为从事】入为监察御史磊落尚气节嗜酒敢言是时德宗春秋高躬自听断天下事有所壅隔平仲常曰帝聪明神武臣下畏怯自循默尔使我得召见必大有开纳贞元十四年京师旱诏择御史郎官开仓振恤平仲与考功员外陈归被选同得对粗陈振恤事帝察其意有所畜以归在侧未言事讫平仲方独进帝乃并留归正色问之杂以他语平仲错愕不得言乃谬称名帝怒叱去之苍黄向幄后归下阶连呼乃得出坐废七年然名由此显元和初为谏议大夫宪宗使吐突承璀讨镇州亟疏争不可及还无功又请斩之转给事中自在要近朝廷有得失未尝不论奏人推其狷直转尚书右丞以疾改太子左庶子卒

△吕元膺

吕元膺字景夫郢州东平人质度瓌伟始游京师谒故宰相齐映映叹曰吾不及识

娄郝殆斯人类乎策贤良高第授同州安邑尉刺史侯
鐫辟为长春宫判官属蒲贼侵轶鐫失所元膺遂潜迹不务进取贞元初谕惟明节制渭
北延在宾席自是名达朝廷惟明卒王栖曜代之德宗
敕栖曜留元膺自佐入拜殿中侍御史厯右司员外郎出为蕲州刺史尝录囚囚或白明
日岁旦恨不得省父母因泣元膺恻然悉释械归之而
戒还期吏白不可答曰吾以信待人人岂我违如期而至自是羣盜感愧悉避境去元和
初征拜右司郎中兼侍御史知杂事迁谏议大夫给事
中规谏驳议大举其职及镇州王承宗叛宪宗将以吐突承璀为招讨处置使元膺与穆
质孟简许孟容等八人抗论不可宪宗为改使号出为
同州刺史既谢帝问政事得失元膺详对帝谓宰相曰元膺直气说言宜留左右柰何出
之李藩裴垍因贺曰此乃宗社无疆之休请留元膺给
事左右兼皇太子侍读进御史中丞元和五年十二月 【年月从通鉴补】 拜鄂岳观
察使尝夜登城守者不许左右曰中丞也对曰夜不可
辨乃还明日擢守者为大将入拜尚书左丞度支使潘孟阳太府卿王遂交相恶乃除孟
阳散骑常侍遂邓州刺史诏辞无所轻重元膺封还诏
书请明示枉直江西裴堪按虔州刺史李将顺受赇不覆讯而贬元膺曰观察使奏部刺
史不加覆虽当诛犹不可为天下法请遣御史按问宰
相不能夺代权德輿为东都留守兼御史大夫都畿防御使故事留守赐旗甲至元膺不
给或言用兵讨淮西东都近贼损其仪沮威望请比华
汝寿三州帝不听并三州罢之留守不赐旗甲自此始也都有李师道留邸兵与山棚
谋窃发事觉元膺禽破之始盗发都人震恐守兵弱不
足恃元膺坐城门指使部分意气自若人赖以安东畿西南通邓虢川谷旷深多糜鹿人
业射猎而不事农迁徙无常皆趨悍善鬪号曰山棚权
德輿居守将羈縻之未克至是元膺请募为山河子弟使卫宫城诏可改河中节度使
时方镇多姑息独元膺坚正自处监军使及中人往来者
无不严惮入拜吏部侍郎立朝有台宰望以疾改太子宾客居官始终无訾缺元和十五
年二月卒年七十二赠吏部尚书

△许孟容

许孟容字公范京兆长安人擢进士异等又第明经 【旧书云究王氏易】 调校
书郎辟武宁张建封府李纳以兵拒境建封遣将吏数
辈告谕不听于是孟容单车诣纳陈逆顺纳即罢兵表为濠州刺史德宗知其能召拜礼
部员外郎公主子求补崇文生孟容不可主诉之帝问
状以着令对帝嘉其守擢郎中累迁给事中京兆上言好時风雹害稼帝遣宦人覆视不
实夺尹以下俸孟容曰府县上事不实罪应罚然陛下

遣宦者覆视紊纲纪宜更择御史一人参验乃可不听浙东观察使裴肃倭判官齐总暴敛以厚献会肃卒帝擢总自大理评事兼监察御史为衢州刺史衢大州也孟容封还诏书曰衢州无他虞齐总无殊绩忽此超奖深骇羣情若总必有可录愿明书劳课然后超改以解众疑会补阙王武陵等亦执争于是诏中停帝召孟容谓曰使百执事皆如卿朕何忧耶自袁高争卢杞后凡十八年门下无议可否者至孟容数论驳贞元十九年夏大早上疏以为自古天人交感由百姓利病之急者切者邦家教令之大者远者户部钱非度支岁计本防缓急别用若取一百万缗代京兆一岁赋则京圻无流亡可振灾为福又应省察流移征防当还还之役作禁锢当释释之逋悬馈送当免免之沈滞郁抑当伸伸之以顺人奉天先是为裴延龄李齐运流斥者虽十年弗内移故孟容因旱及之帝始不悦改太常少卿元和初再迁尚书右丞拜京兆尹神策军自兴元后日骄恣府县不能制军吏李昱贷富人钱八百万三岁不肯归孟容遣吏捕诘与之期使偿曰不如期且死中尉诉于帝宪宗诏以昱付军治之再遣使皆不听奏曰不奉诏臣当诛然臣职司鞶毂当为陛下抑豪强钱未尽输昱不可得帝嘉其守正许之豪右大震累迁吏部侍郎盗杀武元衡孟容白宰相曰汉有一汲黯奸臣寝谋今狂贼敢尔尚谓国有人乎愿白天子起裴中丞辅政使主兵柄索贼党罪人得矣后数日果相度俄以尚书宣慰汴宋陈许河阳行营拜东都留守元和十三年四月卒年七十六赠太子少保谥曰宪孟容方劲有礼学每所折衷咸得其正好提掖士天下清议上之

许季同

许季同

弟季同始署西川韦皋府判官刘辟反弃妻子归拜监察御史历长安令再迁兵部郎中孟容为礼部侍郎徙季同京兆少尹时京兆尹元义方出为鄜坊观察使奏劾宰相李絳与季同举进士为同年才数月辄徙帝以问絳曰进士明经岁大抵百人吏部得官至千人私谓为同年本非亲与旧也今季同以兄嫌徙少尹岂臣所助耶且忠臣事君不以私害公设有才虽亲旧当白用避嫌不用乃臣下身谋非天子用人意帝然之季同终宣歙观察使

△薛存诚

薛存诚字资明河中宝鼎人【旧书河东人】擢进士第累辟使府入为监察御史知馆驿元和初讨刘辟邮传事丛诏以中人为馆驿使存诚以为害体甚奏罢之转殿中侍御史【旧书云裴垍作相用为起居郎】累迁

给事中琼林库广籍工徒存诚曰此奸人麝名以避征役不可许又神策军与咸阳尉袁儋不平诬奏之儋被罚二敕皆执不下宪宗悦遣使劳之拜御史中丞僧鉴虚者自贞元中关通赂遗倚宦人为城社坐于頔杜黄裳家事逮捕下狱存诚穷劾之得赃数十万当以大辟权近为保救帝诏释之存诚不听明日诏使诣台谕曰朕须此人面诘非赦也存诚奏曰狱已具陛下必欲召赦之请先杀臣乃可不然臣不敢奉诏鉴虚卒抵死江西监军高重昌妄劾信州刺史李位谋反追付仗内诘状存诚一日三表请付位御史台及按果无实再授给事中会御史中丞阙帝谓持宪无易存诚者乃复命之会暴卒帝悼惜赠刑部侍郎存诚性和易于人无所不容及当官毅然不可夺子廷老

薛廷老

薛廷老

廷老字商叟说正有父风及进士第宝历中为右拾遗敬宗荒恣廷老与舒元褒李汉入合论奏曰臣伏见近日除拜往往不由中书进拟或是宣出伏恐纲纪渐坏奸邪恣行敬宗厉声曰更谏何事元褒曰宫中兴作太甚帝色变曰兴作何所元褒不能对廷老曰臣等以谏为职有闻即应论奏莫知兴作何所但见运瓦木绝多即知有用乞陛下勿罪臣言帝曰所奏已知寻加史馆修撰郑注用事岭南节度使郑权附之悉盗公库宝货输注家为谢廷老表按权罪由是中人切齿又论李逢吉党张权舆程昔范不宜居谏争官逢吉怒会廷老告满十旬出为临晋令文宗立召为殿中侍御史李让夷数荐之拜翰林学士日酣饮不持检操帝不悦并让夷罢之开成三年迁给事中廷老在公卿闲侃侃不千虚誉推为正人卒赠刑部侍郎子保逊第进士位至给事中保逊子昭纬干奩中至礼部侍郎坐事贬礪州刺史卒

△李逊

李逊字友道后魏申公发之后于赵郡谓之申公房曾祖进德太子中允祖珍玉昌明令父震雅州别驾世寓于荆州之石首逊登进士第辟襄阳掌书记复从事湖南主其留务累拜池濠二州刺史初濠州兵谋杀其将杨腾腾走扬州因灭腾腾家遂行攘剽逊至谕以利害众释甲请罪观察使限外浮敛逊一不应入为虞部郎中元和初出为衢州刺史以政最擢浙东观察使贞元初福建军乱前观察使皇甫政奏益兵三千屯于境以折闽冲遂为长戍逊至即停其兵入为给事中故事天子以畸日听政对羣臣逊奏陛下求治而天下有所陈不宜限以日宪宗从之迁户部侍郎代严绶为山南东道节度使时方讨蔡析山南东道为两节度以唐邓隋三

州授高霞寓得专攻讨而逊督襄复郢均房五州赋馈之初襄阳兵隶霞■〈宀禹〉者多逃还后霞■〈宀禹〉战贼不胜言为逊所挠帝欲按状宰相请置不问下迁太子宾客中人诬之更贬恩王傅久乃厯京兆尹国子祭酒以检校礼部尚书为忠武节度使时吴元济始平民新罹兵战难遽完辑逊申严约束赏罚明信众皆感悦逊为政以均一贫富扶弱抑强为己任故所至称理长庆元年幽镇继乱逊请身先讨贼不许但命以兵万人会行营逊奉诏即日发兵先诸军至进检校吏部尚书寻改凤翔节度使过京师以疾求解改刑部尚书三年正月卒年六十三赠尚书右仆射谥曰贞【旧书谥恭肃】子方元

李方元

李建

李讷

李方元

方元字景业第进士裴谊奏署江西府判官有死囚十余方元刺审其冤贷之累为池州刺史钩检户籍差量徭赋皆有科品吏不得私常曰沈约年八十手写簿书盖为此云终处州刺史

李建

逊弟建字构直与兄俱客荆州乡人争鬪不诣府而诣建平决无颇母怜其孝每字之曰■〈彡委〉子劝我食我辄饱进药吾意其瘳贞元中补校书郎德宗思得文学者或以建闻帝问左右宰相郑珣瑜曰臣为吏部时当补校书者八人他皆籍贵势以请建独无有帝喜擢左拾遗翰林学士顺宗立李师古以兵侵曹州建作诏谕还之词不假借王叔文欲更之建不可左除太子詹事改殿中侍御史【旧书云元和六年坐事罢职降詹事府司直高郢为御史大夫奏为殿中侍御史】以兵部郎中知制诰宰相有窜定诏稿者亟请解职除京兆少尹【旧书云自以草诏思迟不愿司文翰改京兆尹】会逊被谗建申治之出为泮州刺史【旧书云与宰相韦贯之友善贯之罢相建亦出为泮州刺史】召拜刑部侍郎卒【旧书云征拜太常少卿寻以本官知礼部贡举取舍非其人又惑于请托坐罚俸明年除礼部侍郎以人情不洽改为刑部长庆二年二月卒】赠工部尚书初建为学时家苦贫兄造知其贤为营丐使成就之故逊建皆举进士后虽通显未尝置垣屋以清俭称建子讷

李讷

讷字敦止及进士第累迁中书舍人为浙东观察使性疏下遇士不以礼为下所逐

贬朗州刺史召为河南尹时久雨洛暴涨讷行水魏王堤惧漂汨疾驰去水遂大毁民庐议者薄其才初讷居与宰相杨收接收欲市讷冗舍以广第讷叱曰先人旧庐为权贵优笑地耶凡三为华州刺史历兵部尚书以太子太傅卒遗命葬不请卤簿避赠溢诏听 【旧书官至检校尚书右仆射】

△温造

温造字简舆大雅五世孙父佶字辅国安禄山乱往见平原太守颜真卿助为守计李光弼厚遇之终太常丞造姿表瑰杰性嗜书盛气少所降屈不喜为吏隐王屋山人号其居曰处士墅寿州刺史张建封闻其名书币招礼造欣然从之建封虽咨谋而不敢縻以职事及节度徐州造谢归下邳慨然有高世心建封恐失造因妻以兄子时李希烈反天下兵镇阴相撼逐主帅自立德宗患之以刘济方纳忠于朝密诏建封择纵横士往说济建封强署造节度参谋使幽州造与济语未讫济俯伏流涕愿效死节造还建封以闻诏驰驿入奏天子爱其才将用为谏官以语泄乃止复去隐东都乌重胤奏置幕府长庆初以京兆司录为太原幽镇宣谕使召见赐绯衣至范阳刘总囊鞬郊迎造为开示祸福总惧籍所部九州岛入朝还迁殿中侍御史田宏正遇害以起居舍人复宣慰镇州行营顷之李景俭以酒得过宰相造坐与饮出为朗州刺史开后乡渠百里溉田二千顷民获其利号右史渠召授侍御史知弹奏夏州节度使李佑拜大金吾违诏进马造正衙捋劾佑曰吾夜入蔡州擒吴元济未尝心动今日胆落于温御史迁左司郎中知御史杂事进中丞弹击无所回畏发南曹伪官九十人主吏皆论死迁尚书右丞封祁县子兴元军乱杀李绛众谓造可夷其乱乃授检校右散骑常侍山南西道节度使许以便宜从事帝虑劳费造曰诸道戍蛮兵方还愿得密诏受约束用此足矣许之命神策将董仲质河中将温德彝郃杨将刘士和从造而兴元将卫志忠张丕李少直自蜀还造喻以意皆曰不敢二乃用八百人自从五百人为前军既入前军呵护诸门造至欲大宴视听事曰此隘狭不足飨士更徙牙门坐定将卒罗拜徐曰吾欲闻新军去住意可悉前旧军无得进劳问毕就坐酒行从兵合卒有觉者欲引去造传言叱之乃不敢动即问军中杀绛状志忠丕夹阶立拔剑传呼曰杀围兵争奋皆斩首凡八百余人亲杀绛者醢之号令者殊死取百级祭绛三十级祭死事官王景延等余悉投之汉江监军杨叔元拥造靴祈哀造以兵卫出之诏流康州以功加检校礼部尚书赐万缣赏其兵入为兵部侍郎以病出东都留守俄节度河阳奏复怀州古秦渠枋口堰以溉济源河内温武

陟四县田五千顷召为御史大夫方倚以相会疾不能朝改礼部尚书卒年七十赠尚书右仆射兄邈弟逊邈长庆太和中累以拾遗补阙召不应邈尝为邑宰解印绶去造子璋

温璋

温璋

璋以父荫累官大理丞擢侍御史赐绯迁婺州刺史以政绩赐金紫徙庐宋二州刺史宣州逐郑熏也崔铉调淮南兵讨之以璋为宣州刺史事平就拜观察使擢武宁节度使银刀军骄横累将姑息而璋政严明惧之相率逐璋诏徙邠宁节度历京兆郡 【按旧书璋传银刀军颇骄横璋至诛其恶者五百余人自是军中畏法入为京兆尹无逐璋事而通鉴载璋被逐之故甚详且云朝廷知璋无辜以为邠宁节度使与新传合且考异云按诛银刀军者王式也旧传误今据通鉴考异从新书】 璋素强干鉏宿弊豪右慑服加检校吏部尚书同昌公主薨懿宗诛医无状者系亲属三百余人璋与刘瞻极谏贬振州司马叹曰生不逢时死乌足惜仰药死

钦定续通志卷二百五十九

●钦定续通志卷二百六十 列传六十

列传

唐 【六十】

○唐六十

穆宁【赞 质员】 崔邠【郾 郾郾】 柳公绰【仲郾 璞 珪 璧玼
公权 子华】 杨于陵 马总

穆宁

崔邠

柳公绰

杨于陵

马总

△穆宁

穆宁怀州河内人父元休开元闲献书 【旧书撰洪范外传十篇献之】 擢偃师丞宁以明经授盐山尉禄山反署刘道元景城守宁募兵斩之檄州县并力捍贼史思明略境郡守召宁摄东光令御之贼遣使诱宁宁斩以徇郡守恐怒贼即夺其兵罢所摄始宁与平原太守颜真卿揣禄山必叛及闻真卿拒贼即遗真卿书曰夫子为卫君乎真卿喜署宁河北采访支使宁以息属其母弟曰苟不乏嗣足矣即驰谒真卿既而贼攻平原宁劝固守真卿不从夜亡过河见肃宗行在帝问状真卿对不用穆宁言故

至此帝异之驰驿召窋将拜谏议大夫会真卿以直忤旨窋亦罢上元二年为殿中侍御史佐盐铁转运住埇桥李光弼屯徐州餉不至檄取资粮窋不与光弼召窋欲杀之窋即往见光弼光弼曰吾师众数万为天子讨贼食乏则人散君闭廩不救欲溃吾兵耶答曰命窋主粮者救也公可以檄取乎今公求粮而窋专馈窋求兵而公亦专与乎光弼执其手谢曰吾固知不可聊与君议耳时重其能守官累迁鄂岳沔都团练及租庸盐铁转运使当是时河漕不通自汉沔径商山以入京师淮西节度使李忠臣不奉法设戍逻征商贾纵兵剽行人道路几绝与窋夹淮为治惮窋威略劫为衰漕贾得通坐杖死沔州别驾薛彦伟再贬至昭州平集尉大历四年起授监察御史三迁检校秘书监兼和州刺史治有状后刺史疾之以天宝旧版校见户诬以逋亡多坐贬泉州司户参军子赞守阙三年告冤诏御史覆视实增户数倍召入拜太子右谕德窋性不能事权右故执政者处之散位窋默默不得志且曰时不我容我不时徇又可以进乎移疾满百日屡矣亲友强之辄复一朝德宗幸奉天奔诣行在擢秘书少监兴元初改右庶子帝还京师乃曰可以行吾志矣即罢归东都以秘书监致仕贞元十年十月卒年七十九窋居家严事寡姊恭甚尝譔家令训诸子人一通又戒曰君子事亲养志为大直道而已慎无为谄疾病不尝药时称知命四子赞质员赏赞为御史中丞质右补阙员侍御史赏监察御史皆以守道行谊显先是韩休家训子姓至严贞元闲言家法者尚韩穆二门云

穆赞

穆质

穆员

穆赞

赞字相明 【旧书云释褐济源主簿时父窋被诬赞上诉得雪由是知名】 累擢侍御史分司东都陝虢观察使卢岳妻分资不及妾子妾裴氏诉之中丞卢伋欲重裴罪赞不听伋与宰相窦参共诬赞受金 【旧书侍御史杜伦希参伋意诬赞受裴之金鞭共使以成其狱】 狱甚急弟赏上冤状诏三司覆无验出为郴州刺史参败召为刑部郎中对延英擢御史中丞裴延龄判度支属吏受赇具狱欲曲贷吏赞执不可延龄白赞深文贬饶州别驾 【旧书云丁母忧再转虔常二州刺史】 宪宗立进宣歙观察使永贞元年十一月卒于官年五十八赠工部尚书

穆质

质性强直举贤良方正条对详切自补阙至给事中时政得失未尝不尽言元和时盐铁转运诸院擅系囚笞掠严楚人多死质奏请与州县吏参决自是不冤后论吐突承璀不宜为将宪宗不悦改太子左庶子坐与杨凭善出为开州刺史卒

穆员

员字与直工为文章杜亚留守东都署佐其府蚤卒兄弟皆和粹世以珍味目之赞少俗然有格为酪质美而多入为酥员为醍醐赏为乳腐云

△崔邠

崔邠字处仁贝州武城人父倕至德初献赋行在肃宗异其文位吏部侍郎邠第进士复擢贤良方正授渭南尉迁补阙上疏论裴延龄奸以鲠亮知名由中书舍人再迁吏部侍郎性温裕沈密尤敦清俭宪宗器之裴垪亦荐邠材可宰相会病遂不拜后改太常卿知吏部尚书铨故事太常始视事大阅四部乐都人纵观邠自第去帽亲导母舆公卿见者皆避道都人荣之以母忧解元和十年三月卒于丧年六十 【旧书作六十二】 赠吏部尚书谥曰文简弟酆郾郇郈郅郇

崔酆

崔郾

崔郇

崔郈

郾字广略中进士第补集贤校书郎历监察御史刑部员外郎母丧服阕为吏部员外郎下不敢欺褻黜必当寒远无留才 【旧书再迁左司郎中元和十三年郑余庆为礼仪详定使选礼学者共事以郾为判官吏部郎中】十五年为谏议大夫穆宗荒于禽酒坐朝常晚郾与同列郑覃等延英切谏帝为畋游稍简长庆中转给事中敬宗嗣位拜侍讲学士进中书舍人谢曰陛下使臣侍讲半载不一问经义臣无功不足副厚恩帝曰朕机务稍闲即当请益高鉉在旁因言陛下乐善而无所咨询天下不知有向儒意帝深引咎咸赐锦币郾与高重类六经要言为十卷上之迁礼部侍郎 【旧书东都试举人凡两岁掌贡士平心阅试赏拔艺能所擢无非名士至大中咸通之代为辅相名卿者十数人】出为虢州观察使先是上供财乏则夺吏俸助输岁率八十万郾曰吏不能赡私安暇恤民即以府常费代之又诏赋粟输太仓者岁数万石民困于输则又犂而致之河郾乃傍流为大廩受粟寔而注诸艘民悦忘输之劳改鄂岳等州观察使自蔡人叛鄂岳常苦兵江湖盗贼显行郾修

治铠仗造蒙冲驶追穷蹶上下千里岁中悉捕平又观察浙西迁检校礼部尚书开成元年卒官年六十九赠吏部尚书谥曰德郾不藏货有辄周给亲旧为治其昏丧居家怡然子弟自化室庖漏无步庀至霖淖则客盖而履以就外位治虢以宽经月不答一人及莅鄂则严法峻诛一不贷或问其故曰陝土瘠而民劳吾抚之不暇犹恐其扰鄂土沃民剽杂以夷俗非用威不能治政所以贵知变者也闻者服焉五子瑶瑰瑾佩璆瑶任浙西鄂岳观察使瑾任湖南观察使瑰佩俱达官

崔鄴

鄴擢进士累迁至左金吾卫大将军暴卒以韩约代之不阅旬李训乱约死于难世谓鄴之亡崔氏积善报也赠礼部尚书

崔郾

郾登进士第补渭南尉累擢监察御史迁刑部郎中出副杜元颖西川节度府召入为工部侍郎集贤殿学士权知礼部真拜兵部侍郎本官判吏部东铨事文宗勤于政道每苦选曹讹弊延英谓宰臣曰吏部殊不选才安得摭实无滥可厘革否李石对曰令录可以商量他官且宜循旧帝曰循旧如配官耳贤不肖安能甄别因召三铨谓之曰卿等比选令录如何注拟郾对曰资叙相当问其为治之术视可否拟之帝曰依资合得而才劣者何授对曰与边远慢官帝曰如以不肖之才治边民则疾苦可知也凡朝廷求理远近皆须得人苟非其材人受其弊矣寻拜吏部侍郎开成二年出为宣州刺史兼御史中丞宣歙观察使四年入为太常卿七月以本官同中书门下平章事寻加中书侍郎银青光禄大夫会昌初李德裕用事与郾兄弟素善郾在相位累年历方镇太子师保卒崔氏四世缙麻同爨兄弟六人至三品邠郾郾凡为礼部五吏部再唐兴无有也居光德里构便斋宣宗闻而叹曰郾一门孝友可为士族法因题曰德星堂后京兆民即其里为德星社云

△柳公绰

柳公绰字宽京兆华原人始生三日伯父子华曰兴吾门者此儿也因小字起之幼孝友性质严重属文典正不读非圣书贞元元年十八应制举登贤良方正直言极谏科授校书郎四年再登其科授渭南尉岁饥每饭不过一器岁稔复初累迁开州刺史地接夷落寇常逼其城吏曰兵力不能制愿以右职署渠帅公绰曰吾同恶耶何可挠法立诛之寇亦引去迁侍御史吏部员外郎时武元衡节度剑南与裴度俱为判官尤相引重召为吏部郎中宪宗喜武功且数出游畋元和五年十一月公绰奏太医箴以讽帝高其才遣使谓曰卿爱朕深当置之座隅踰月

拜御史中丞公绰与裴垍善李吉甫复当国以怨垍故出公绰为湖南观察使地卑湿不可迎养求分司东都不听八年徙鄂岳观察使时讨吴元济诏发鄂岳卒五千隶安州刺史李昕公绰曰朝廷谓吾儒生不知兵耶即请自行许之引兵度江抵安州昕以军礼迎谒公绰谓曰公所以属鞬负弩非兵事耶若褫戎容则两郡守耳何所统壹哉以公世将晓兵吾且欲署职以兵法从事昕曰唯命即以都知兵马使中军先锋行营都虞候三牒授之选兵六千属焉戒诸校曰行营事一决都将昕被用畏威尽力当时服其知权军出公绰数省问其家疾病生死厚给之妇人冶容不谨者投之江军中感服曰中丞为我知家事敢不死战故鄂军每战必克十一年入为给事中李师道平公绰宣谕郢州还拜京兆尹方赴府有神策校乘马不避者实时榜死帝怒其专杀公绰曰此非独试臣乃轻陛下法帝曰既死不以闻可乎公绰曰臣不当奏在市死职金吾在坊死职左右巡使帝乃解 【谨按通鉴辑览 御批跃马冲导罪之细者即平民有犯予校已足蔽辜京兆虽以肃清辇毂为任亦岂可因冲已导而遽毙军将公绰此举非惟草菅人命几于弁髦王章及帝怒诘犹饰辩不已是但知唐突者之无礼而不知专擅者之更非礼也或犹以公绰为风厉真不知政衡者】 母丧服除为刑部侍郎领盐铁转运使转兵部兼御史大夫长庆元年复为京兆尹时幽镇用兵补置诸将使驿系道公绰奏曰比馆递匱乏驿置多阙敕使衣绯紫者所乘至三四十骑黄绿者不下十数吏不得视券随口辄供驿马尽乃掠夺民马怨嗟惊扰行李殆绝请着定限以息其弊有诏中书条检定数由是吏得纾罪宦官共恶疾之累迁礼部尚书以祖讳换左丞三年五月检校户部尚书山南东道节度使行部至邓县吏有纳贿舞文二人县令以公绰守法必杀赃吏狱具公绰判曰赃吏犯法法在文吏坏法法亡诛舞文者其厩马害圉人公绰杀之或言良马可爱曰安有良马而害人乎敬宗宝历元年加检校左仆射入为刑部尚书二年出为邠宁节度使先时神策诸镇列屯部中不听本道节制故虜得窥间公绰论所宜因诏屯营缓急悉受节度三年复为刑部尚书京兆狱有姑鞭妇至死者府断偿死公绰议曰尊毆卑非鬪且其子在以妻而戮其母非教也竟减死太和四年为河东节度使岁恶辍宴饮衣食与士卒均北虜遣梅禄将军李畅以马万匹来市所过皆厚劳饬兵防袭夺至太原公绰独遣牙将祖考恭单骑劳问辟牙门令译官引谒宴以常礼畅市马而还不敢侵犯陜北有沙陀部勇武喜鬪为九姓六州所畏公绰召其酋朱邪执宜治废栅十一募兵三千留屯塞上其妻母来太原者令夫人饮食问遗之沙陀感

恩故悉力保障六年以病乞代三月授兵部尚书征还京师四月卒年六十八赠太子太保谥曰元 【旧书作成】 公绰居丧毁慕三年不澡

沐事后母薛氏谨甚虽姻属不知非薛所生外兄薛宫早卒为育其女嫁之尝曰吾莅官未尝以私喜怒加于人子孙其昌乎与钱徽蒋乂杜元

颖薛存诚善取士如许康佐郑朗卢简辞崔玘夏侯孜李拭韦长皆知名显贵云子仲郢

柳仲郢

柳璞

柳珪

柳璧

柳玘

柳公权

柳子华

柳仲郢

仲郢字谕蒙母韩氏即皋女也善训子故仲郢幼嗜学尝和熊胆丸使夜咀嚼以助勤长工文着尚书二十四司箴为韩愈柳宗元咨赏元

和十三年进士擢第为校书郎牛僧孺辟武昌幕府以仲郢有父风矩叹为非积习名教不及此入为监察御史迁侍御史有禁卒诬里人斫父

墓柏射杀之法司以专杀论而中尉护免其死仲郢与右补阙蒋系御史萧杰前后执奏朝廷嘉其守会昌中三迁吏部郎中武宗诏减冗官仲

郢条简浹日损千二百五十员议者厌伏迁左谏议大夫帝延方士筑望仙台累谏諄切帝为惭谢御史崔元藻以覆按吴湘狱得罪仲郢上疏

申理宰相李德裕知其无私奏拜京兆尹置权量东西市禁私制以便贸易北司吏入粟违约仲郢杀而尸之自是无敢犯中书舍人纆干泉诉

甥刘诩殴其母诩为禁军校仲郢不待奏即捕取死杖下宦官以为言改右散骑常侍知吏部铨德裕颇抑进士科仲郢无所徇时进士无受恶

官者又当调者持阙簿令自阅即拟唱吏无能为奸宣宗初德裕罢政事坐所厚善出为郑州刺史周墀镇滑郑为属郡高其绩及入相荐授河

南尹召拜户部侍郎墀罢他宰相恶仲郢左迁秘书监数月复尹河南以宽惠为政或言不类京兆时答曰鞶鞶之下先弹压郡邑之治本惠养

乌可类乎擢剑南东川节度使杀贪吏边章简官下肃然居五年征为吏部侍郎改兵部领盐铁转运使大中十二年辞疾以刑部尚书罢使转

户部封河东县男山南西道节度使凤州刺史卢方乂以轻罪决部民数日而毙其妻列诉又旁引他吏械系满狱仲郢召其妻谓之曰刺史科

小罪诚人但本非死刑虽未出辜其实病死罚方乂百直系者皆释郡人深感之南郑令

权奕有罪仲郢杖之六日死贬雷州刺史起为虢州刺史以检校尚书左仆射东都留守会盗发父墓弃官归华原徙华州刺史不拜咸通五年起为天平军节度使卒于镇仲郢方严尚气义李德裕贬死家无禄不自振及领盐铁遂取其兄子从质为推官知苏州院事宰相令狐绲持不可乃移书开谕绲绲感悟寻与从质正员官仲郢每私居内斋束带正色厩无名马衣不熏香父子更九镇皆不奏祥瑞不度浮屠急于摘贪济弱每旱潦必贷匱蠲负里无逋家衣冠孤女不能自归者斥稟为婚嫁在朝非庆吊不至宰相第家藏书必三本上者贮库其副常所阅下者幼学焉仲郢退公布卷不舍昼夜九经三史皆一钞魏晋及南北史再钞又类所钞他书三十卷号柳氏自备旁录仙佛书甚众皆楷小精真无行字子璞珪璧玼

柳璞

璞字韬玉学不营仕着春秋三氏异同义又述天祚长历断自汉武帝纪元为编年以大政大祥异侵叛征伐随着之闰位者附见其左常谓杜征南春秋后序述纪甲历为得实自余史家皆差蒋系以为然终著作郎

柳珪

珪字交元【旧书字镇方】大中中与璧继擢进士皆秀整而文杜牧李商隐称之杜惊镇西川表置幕府久乃至会惊徙淮南归其积俸珪不纳以蓝田尉直宏文馆迁右拾遗萧仿郑裔绰谓珪不能事父封还其诏仲郢诉其子冒处谏职为不可谓不孝则诬请勒就养诏可初公绰治家埒韩滉及珪被废士人愧怅终卫尉少卿

柳璧

璧字宾玉马植镇陈许辟管书记又从植汴州李瓚镇桂管表为判官璧规止其不法瓚不听乃拂衣去未几军乱擢右补阙再转屯田员外郎僖宗幸蜀授翰林学士累迁右谏议大夫

柳玼

玼以明经授秘书正字由书判拔萃累转左补阙高湜再镇昭义皆表为副【旧书李蔚镇襄阳辟掌书记】擢刑部员外郎湜贬高要尉玼三疏申理湜后见藁叹曰吾自辨析亦不及此出为岭南节度副使廨中橘熟既食乃纳直于官黄巢陷交广逃还【旧书郡人邓承勋以小舟载玼脱祸】除起居郎贼陷长安为刃所伤出奔行在再迁中书舍人御史中丞文德元年以吏部侍郎修国史拜御史大夫直清有父风昭宗欲倚以相中官譖玼烦碎非廊庙器乃止坐事贬泸州刺史卒光化初帝自华还诏复官爵玼常述家训以戒子弟其略言门地高可畏

不可恃所以承世胄在修己为学以无能望他人用无善望他人爱犹农夫卤莽种而冀幸天泽祇自馁也又言名门右族莫不由祖考忠孝勤俭以成立之莫不由子孙顽率奢傲以覆坠之成立之难如升天覆坠之易如燎毛夫行道之人德行文学为根株正直刚毅为柯叶有根无叶或可俟时有叶无根膏雨所不能润也至于孝慈友悌忠信笃行乃食之酰酱可一日无哉

柳公权

公权字诚悬年十二工词赋元和初擢进士第李听镇夏州辟掌书记因入奏事穆宗谓之曰朕尝于佛庙见卿笔迹思之久矣即拜右拾遗侍书学士再迁司封员外郎帝问公权用笔法对曰心正则笔正笔正乃可法矣帝改容知其以笔谏也历穆敬文三朝侍书中禁公绰在太原尝寓书李宗闵言家弟本志儒学先朝以侍书见用颇类工祝愿徙散秩乃徙右司郎中弘文馆学士文宗复召侍书迁中书舍人充翰林书诏学士尝夜召对子亭烛穷而诏未尽宫人以蜡液濡纸继之从幸未央宫帝驻辇曰朕有一喜边戍赐衣久不时今中春而衣已给公权为数十言称贺帝曰卿可贺我以诗宫人迫之公权应声成文婉切而丽诏令再赋复无停思帝悦曰子建七步尔乃三焉常与六学士对便殿帝称汉文恭俭因举袂曰此三澣矣学士皆贺独公权无言帝问之对曰人主当进贤退不肖纳谏诤明赏罚服澣濯衣末节耳 【谨按通鉴辑览

御批公权以敢言着闻文宗亦嘉其风采然彼时宦寺弄权朝臣植党未闻有所纠弹则亦杜钦谷永之流耳区区不谏澣衣托词笔谏亦所云末节而已】 异日与周墀同对论事不阿墀为恺恐公权益不夺帝徐曰卿有诤臣风可屈居谏议大夫乃自舍人下迁仍为学士知制诰开成三年转工部侍郎召问得失因言郭旼领邠盗而议者颇有臧否帝曰旼尚父从子太皇太后季父官无玷邮自大金吾位方镇何所更议答曰旼诚勋旧然人谓献二女乃有是除信乎帝曰女自参太后非献也公权曰瓜李之嫌何以户晓因引王珪谏庐江王妃事帝即令南内使张日华送二女还旼家其忠益多类此迁学士承旨武宗立罢为右散骑常侍宰相崔琪引为集贤学士知院事李德裕不悦左授太子詹事改宾客累封河东郡开国公复为常侍进至太子少师咸通初以太子太保致仕六年卒年八十八赠太子太师公权博贯经术于诗书左氏春秋国语庄周书尤邃每解一义必数十百言通音律而不喜奏乐曰闻之令人骄怠其书法结体劲媚自目一家文宗尝召与联句帝曰人皆苦炎热我爱夏日长公权属曰熏风自南来殿阁生微凉他学士亦属继帝独讽公权者以为

词清意足不可多得乃令公权题于殿壁字方圆五寸
帝叹曰锺王无以尚也当时大臣家碑志非其笔人以子孙为不孝外夷入贡者皆别署
货贝曰此购柳书尝书上都西明寺金刚经有锺王欧
虞褚陆诸家法最为得意凡公卿以书贖遗盖巨万而主藏奴或盗用惟研笔图籍自鐫
秘之

柳子华

子华永泰初辟严武剑南府累迁池州刺史代宗将幸华清宫先命完葺欲以子华
为京兆少尹尹恶其刚方沮解之遂为昭应令 【旧
书云知府东十三县捕贼】 检校金部郎中修宫使设棘围于市徇邑中曰民有得华清
宫瓦石材用投围中三日不还者死不终日已山积矣
营办略足宰相元载有别墅以奴主务自称郎将怙势纵暴租赋未尝入官子华因奴入
谒收狱劾发宿罪杖杀之一邑震伏载不敢怨遣吏厚
谢子华预知其终自为墓铭子公器公度公度善摄生年八十有强力白云吾不以元
气佐喜怒气海常温耳位光禄少卿公器生遵遵生璨
别有传

△杨于陵

杨于陵字达夫汉太尉震之裔父太清 【旧书宋州单父尉】 倦宦客河朔死安
禄山之乱于陵始六岁间关至江左逮长好学有奇志
年十八擢进士释褐句容主簿韩滉刚严少许可独奇于陵以女妻之辟鄂岳江西使府
滉居宰相权震中外于陵避亲不肯调退庐建昌以文
书自娱滉卒贞元八年入为膳部员外郎以吏部判南曹时选者与宰相亲文书不如式
于陵驳其违宰相怒以南曹郎出使吊宣武军迁右司
郎中换吏部出为绛州刺史德宗雅闻名留拜中书舍人京兆尹李实恃恩暴横于陵与
许孟容不附为所譖短徙秘书少监帝崩宣遗诏于太
原幽州节府献遗无所纳拜华州刺史迁浙东观察使越人饥请出米三十万石振赡贫
民政声流闻入为京兆尹先是编氓多窜北军籍中倚
以横闾里于陵请限丁制减三丁者不得着籍奸人无所影赖京师豪右大震迁户部侍
郎元和初牛僧孺等以贤良方正对策于陵被诏程其
文居第一执政怒出为岭南节度使辟韦词李翱等在幕府咨访得失教民陶瓦易蒲屋
以绝火患监军许遂振悍戾肆贪惮于陵不敢挠以私
则为飞语闻京师有诏罢归遂振领留事笞吏别决其赃吏呼曰杨公尚拒他方赂遗肯
私官钱耶宰相裴垪亦为帝别白言之乃授吏部侍郎
而遂振终得罪初吏部程判别诏官参考齐抗当国罢之至是尚书郑余庆移疾乃循旧
制 【旧书以兵部员外郎韦顓屯田员外郎张仲素

太学博士陆亘等为之】于陵言他官但第判能否不知限员有司计员为留遣之格事不相谋莫如勿置因诏三考官止较科目选至常调悉还吏部又请修甲历南曹置别簿相检实吏不能为奸治奏选者纳直给符告居四年凡调三千员时称平允九年妖人杨叔高自广州来于于陵请为己辅于陵执奏杀之改兵部兼御史大夫判度支王师讨淮西于陵用所亲为供军使主唐邓而高霞■〈宀禹〉腾牒度支以饷道乏及战败诏责之指以为言帝怒贬于陵彬州刺史徙原王傅复以吏部侍郎知吏部选李师道平分其地为三镇以于陵兼御史大夫充淄青十二州宣慰使还奏合旨穆宗即位迁户部尚书长庆初拜太常卿充东都留守数上疏乞身不许宝历二年授太子少傅【旧书作太傅】封弘农郡公俄以尚书左仆射致仕诏给实俸让不受于陵器量方峻进止有常度节操鲜明始终不失其正太和四年十月卒年七十八册赠司空谥曰贞孝四子景复仕至同州刺史绍复中书舍人师复大理卿中子嗣复位宰相自有传

△马总

马总字会元扶风人少孤寡不妄交游贞元中姚南仲辟署滑州幕府监军薛盈珍诬南仲不法总坐贬泉州别驾盈珍入用事福建观察使柳冕希旨欲诛之会刺史穆赞保护乃免徙恩王傅元和中以虔州刺史迁安南都护廉清不挠用儒术教其俗政事嘉美獠夷安之建二铜柱汉故处劓着唐德以继伏波之迹徙桂管经略观察使入为刑部侍郎十二年兼御史大夫副裴度宣慰淮西吴元济禽为彰义节度留后蔡人习伪恶相掉讪犷戾有夷貊风总为设教令明赏罚磨治洗汰其俗一变始奏改彰义为淮西寻擢拜淮西节度使徙忠武改华州防御镇国军使李师道平析郛曹濮等为一道除总节度赐号天平军长庆初刘总上幽镇地诏刘总徙天平召总还将大用之会刘总卒穆宗以郛人附赖总复诏还镇二年检校尚书左仆射入为户部尚书三年卒赠右仆射谥曰懿

钦定续通志卷二百六十

●钦定续通志卷二百六十一 列传六十一

列传

唐【六十一】

○唐六十一

贾耽

郑余庆【澣 处晦从说】

郑珣瑜【覃 裔绰朗】

高郢【定】

杜佑【式方 惊 惛 牧 顛

- 2644 -

】 郑綯【颢】 权德舆【璩】 崔羣 李夷简 令狐楚【绹】
瀉】 段文昌【成式】 萧俛【仿廩】

贾耽

郑余庆

郑珣瑜

高郢

杜佑

郑綯

权德舆

崔羣

李夷简

令狐楚

段文昌

萧俛

△贾耽

贾耽字敦诗沧州南皮人天宝中举明经补临清尉上书论事徙太平河东节度使王思礼署为度支判官累进汾州刺史治凡七年政有异绩召授鸿胪卿兼左右威远营使俄为山南西道节度使梁崇义反东道耽进屯谷城取均州建中三年徙东道德宗在梁耽使司马樊泽奏事泽还耽大置酒会诸将俄有急诏至以泽代耽召为工部尚书耽纳诏于怀饮如故既罢召泽曰诏以公见代吾且治行敕将吏谒泽大将张献甫曰天子播越而行军以公命问行在乃规旄钺利公土地可谓事人不忠矣军中不平请为公杀之耽曰是何谓耶朝廷有命即为帅矣吾今趋觐得以君俱乃行军中遂安俄为东都留守贞元九年以尚书右仆射同中书门下平章事俄封魏国公常以方镇帅缺当自天子命之若谋之军中则下有背向人固不安帝然之不用也顺宗立进检校司空左仆射时王叔文等干政耽病之屡移疾乞骸骨不许卒年七十六赠太傅谥曰元靖耽着贞元十道录以贞观分天下隶十道在景云为按察开元为采访废置升降备焉

△郑余庆

郑余庆字居业郑州荥阳人三世皆显宦余庆少善属文擢进士第严震帅山南西道奏置幕府贞元初还朝擢库部郎中翰林学士以工部侍郎知吏部选贞元十四年拜中书侍郎同中书门下平章事每奏对多傅经义素善度支使于■〈丕页〉凡所陈必左右之■〈丕页〉

坐事贬又岁旱饥朝廷议振禁卫十军为中书史漏言迭二忤贬彬州司马顺宗以尚书左丞召会宪宗立即其官复拜同中书门下平章事时主书滑涣与宦人刘光琦相倚为奸每宰相议为光琦沮变者令涣往请必得四方货饷奔委之弟泳至官刺史杜佑郑絪执政颇姑息而佑常行辈待不名也至余庆议事涣傲然指画诸宰相前余庆叱去未几罢为太子宾客【按宰相表元和元年十一月余庆罢为河南尹与传不同考旧传拜河南尹在改国子祭酒后乃表误也】后涣以赃败帝寢闻叱去事善之改国子祭酒累迁吏部尚书改太子少傅兼判太常卿事出为山南西道节度使入拜太子少师请老不许迁尚书左仆射帝患典制不伦谓余庆淹该前载乃诏为详定使俾参裁订正凡损增仪矩号称详衷俄拜凤翔尹节度凤翔复为太子少师封荥阳郡公兼判国子祭酒事建言兵兴以来学校废诸生离散今天下承平臣愿率文吏月俸百取一以资完葺诏可穆宗立加检校司徒卒年七十五赠太保谥曰贞子澣

郑澣

郑处晦

郑从谠

郑澣

澣本名涵避文宗故名改焉第进士累迁右补阙敢言无所讳迁起居舍人考功员外郎余庆为仆射避除国子博士史馆修撰文宗立入翰林为侍讲学士帝使稗擷经史为要录试举诸条撻问之酬析无留答因赐金紫累进尚书左丞出为山南西道节度使始余庆在兴元创学庐澣嗣完之养生徒风化大行以户部尚书召未拜卒年六十四赠尚书右仆射谥曰宣四子处晦从谠尤知名

郑处晦

处晦字廷美文辞秀拔仕历刑部侍郎浙东观察宣武节度使

郑从谠

从谠字正求及进士第补校书郎累迁左补阙令狐绹魏扶皆澣门生数进誉之迁中书舍人咸通中为吏部侍郎铨次明允出为河东节度使徙宣武以善最闻改岭南东道节度林邑蛮内侵募土豪捍御交广晏然僖宗立召为刑部尚书久之擢同中书门下平章事进门下侍郎时河东叛将杀其节度使康传圭劫府库为乱朝廷以为忧帝欲大臣临制乃拜从谠检校司徒【宰相表作检校司空】以宰相秩复为河东节度兼行营招讨使诏自择参佐从谠即表长安令王调自副刘崇龟赵崇为节度观察判官刘崇鲁推官李渥掌书记崔泽支使皆一时选

时人谓之小朝廷言得才多也 【谨按通鉴辑览 御批名士虚声相尚未必尽于实用有裨聚集虽多亦何足异况幕府得人极盛亦不过如绿水芙蓉之比时人乃目之为小朝廷唐末人心幻妄不知明别尊卑于此可见】既视事乃推捕反贼诛其首恶以张彦球才可任释不问而付以兵果得其死力渠凶宿狡不敢发发又辄得士皆惕伏会黄巢犯京师帝驻梁汉诏从说发部兵属北面招讨副使诸葛爽入讨从说团士五千遣将论安从爽而李克用谓太原可乘以沙陀兵奄入其地壁汾东从说以饩醪犒军克用曰我且引而南欲与公面约从说登城开勉感慨使立功报天子厚恩克用辞穷再拜去然阴纵其下肆掠从说追安使与将王蟾高弁等踵击亦会振武契苾通至与沙陀战沙陀大败引还即遣安等屯北百并安擅还从说合诸将命持安出斩之鞠场中和二年朝廷赦沙陀使击贼自赎兵不敢道太原繇岚石并河而南独克用从数百骑过辞城下从说以名马器币归之明年贼平诏克用代领河东召拜司空复秉政进太傅兼侍中从帝至兴元以疾拜太子太保还第卒谥文中初盗流中原沙陀强悍而卒收其用者盖从说为太原重也时郑畋以宰相镇凤翔移檄讨贼两人以忠义相提衡贼尤惮之号二郑云

△郑珣瑜

郑珣瑜字符伯郑州荥泽人少孤值天宝乱退耕陆浑山以养母大历中以讽谏主文科高第授大理评事调阳翟丞以拔萃为万年尉崔佑甫为相擢左补阙出入中外累迁至吏部侍郎为河南尹清静惠下贱敛贵发以便民时韩全义将兵伐蔡河南主馈运珣瑜密储之阳翟以给官军百姓不知僦运劳时谓治河南比张延赏而重厚坚正过之复以吏部侍郎召进门下侍郎同中书门下平章事顺宗立即迁吏部尚书王叔文挠政韦执谊为宰相居外奉行叔文一日至中书见执谊直吏白方宰相会食百官不见者叔文恚叱吏吏走入白执谊起就合与叔文语珣瑜与杜佑高郢辍飧以待顷之吏白二公同饭矣珣瑜喟曰吾可复居此乎命左右取马归卧家不出七日罢为吏部尚书亦会有疾数月卒年六十八赠尚书左仆射谥文献子覃

郑覃

郑裔绰

郑朗

郑覃

覃以父荫补宏文校书郎擢累谏议大夫宪宗取五中官为和籾使覃奏罢之时吐

蕃方强穆宗不恤国事荒昵盘游覃与崔郾等廷对极
陈不可帝亦温语答之王承元徙郑滑节度使镇人固留不出承元请以重臣劳安其军
诏覃为宣谕使起居舍人王璠副之覃传诏开勸大义
军遂安承元乃得去宝厯初擢京兆尹文宗召为翰林侍讲学士进工部侍郎覃经术该
深淳笃守正帝尤重之李宗闵牛僧孺知政以覃与李
德裕厚忌其亲近为助力阳迁工部尚书罢侍讲欲推远之帝雅向学颇思覃复召为侍
讲学士德裕既相以为御史大夫俄德裕罢宗闵复用
覃繇户部尚书下除秘书监宗闵得罪迁刑部尚书进尚书右仆射判国子祭酒李训诛
帝召覃视诏禁中遂拜同中书门下平章事封荥阳郡
公劝帝责名实谨法度进门下侍郎宏文馆大学士覃既名儒故以宰相领祭酒请太学
五经经置博士再迁太子太师开成四年与杨嗣复议
论不叶遂罢为右仆射武宗初李德裕复用欲援覃共政固辞乃授司空致仕卒始覃以
经籍剞繆博士陋浅不能正建言愿与巨学鸿生共力
讎刊准汉旧事镂石太学示万世法诏可覃乃表周墀崔球张次宗孔温业等是正其文
刻于石子齋绰

郑裔绰

裔绰峭立有父风以门荫进为李德裕所知擢渭南尉直宏文馆累迁谏议大夫持
正不阿迁给事中杨汉公为荆南节度使坐贪沓贬秘
书监寻拜同州刺史裔绰与郑公與封还制书且曰同州太宗兴王地陛下为人子孙当
慎所付且汉公墨没败官奈何以重地私之翌日贬裔
州刺史时犹衣绿因诏赐绯鱼后繇秘书监迁浙东观察使终太子少保覃弟朗

郑朗

朗字有融始辟柳公绰山南幕府入迁右拾遗开成中擢起居郎文宗与宰相议政
适见朗执笔螭头下谓曰向所论事亦记之乎朕将观
之朗曰臣执笔所书者史也故事天子不观史帝悦谓宰相曰朗可谓善守职者然人君
之为善恶必记朕恐平日言之不协治体为将来羞庶
一见得以自改朗遂上之累迁谏议大夫为侍讲学士由华州刺史入拜御史中丞户部
侍郎为鄂岳浙西观察使武宣武二节度厯工部尚书
判度支御史大夫复为工部尚书同中书门下平章事中人李敬实排朗驺导驰去朗以
闻宣宗诘敬实自言供奉官不避道帝曰传我命则绝
道行可也而私出不避宰相邪即斥敬实久之以疾自陈罢为太子少师卒赠司空

△高郢

高郢字公楚其先自渤海徙卫州遂为卫州人九岁通春秋工属文着语默赋诸儒
称之父伯祥为好畷尉安禄山陷京师将杀之郢尚幼

解衣请代贼义并贷之宝应初及进士第以茂才异行高第累擢咸阳尉郭子仪取为朔方掌书记子仪怒判官张昙奏抵死郢引救甚力忤子仪意下徙猗氏丞李怀光引佐邠宁府怀光将还河中郢劝不如西迎乘舆怀光不听既又欲悉兵鼓而西时浑瑊提孤军抗贼羣将未集郢恐为怀光所乘与李墉固止之会怀光子瑋候郢郢因胁说曰君视天宝以来称兵者今尚谁在且国家固有天命若恃众而动自绝于天安知三军不有奔溃而助顺者乎瑋大惧流汗不能语郢因与其将吕鸣岳张延英谋间道归国事泄怀光先斩二将然后引郢诘郢抗词无所愧隐观者为泣下怀光惭赦之孔巢父遇害郢抚尸而哭怀光已诛李晟表其忠马燧奏管书记召拜主客员外郎迁中书舍人久之进礼部侍郎谢绝请谒颛行艺迁太常卿贞元末擢中书侍郎同中书门下平章事顺宗立病不能事王叔文党根据朝廷帝始诏皇太子监国而郢以刑部尚书罢明年为华州刺史政尚仁静复召为太常卿除御史大夫数月改兵部尚书固乞骸骨以尚书右仆射致仕卒年七十二赠太子太保谥曰贞子定

高定

高定

定辩慧七岁读尚书至汤誓跪问郢曰奈何以臣伐君郢曰应天顺人何云伐邪对曰用命赏于祖不用命戮于社是顺人乎郢异之长通王氏易为图合入出上圆下方合则重转则演七转而六十四卦六甲八节备焉仕至京兆府参军

△杜佑

杜佑字君卿京兆万年人父希望仕至鄜州都督终西河刺史佑以荫补济南参军事剡县丞尝过润州刺史韦元甫元甫以故人子待之不加礼它日元甫有疑狱不能决试讯佑佑为辨处契要无不尽元甫奇之署司法参军府徙浙西淮南皆表置幕府入为工部郎中充江淮青苗使再迁容管经略使杨炎辅政历金部郎中为水陆转运使改度支兼和籴使于是军兴馈漕佑得剴决以户部侍郎判度支建中初河朔兵孥战民困赋无所出佑以为救敝莫若省用省用则省官乃上议请省冗员卢杞当国恶之出为苏州刺史前刺史母丧解佑母在辞不行改饶州俄迁岭南节度使佑为开大衢疏析廛闾以息火灾朱厓黎氏三世保险不宾佑讨平之召拜尚书右丞【旧书作左丞】俄出为淮南节度使以母丧解诏不许徐州节度使张建封卒军乱立其子愔请于朝帝不许乃诏左检校尚书左仆射同中书门下平章事节度徐泗讨定之

佑具舳舻遣属将孟准度淮击徐不克引还固境不敢进乃诏授愔徐州节度使析濠泗二州隶淮南初佑决雷陂以广灌溉斥海濒弃地为田积米至五十万斛列营三十区士马整饬四邻畏之然宽假僚佐故南宮傅李亚郑元均至争权乱政帝为佑斥去之十九年拜检校司空同中书门下平章事德宗崩诏摄冢宰进检校司徒兼度支盐铁使于是王叔文为副佑既以宰相不亲事叔文遂专权欲摇东宮冀佑为助佑不应乃谋逐之未决而败宪宗在諒闇复摄冢宰明年拜司徒封岐国公党项阴导吐蕃为乱诸将邀功请讨之佑上疏言今戎丑方强边备未实诚宜慎择良将使之完辑禁绝诛求示以信诚来则惩御去则谨备彼当怀柔革其奸谋何必亟兴师役坐取劳费帝嘉纳之岁余乞致仕不听诏三五日一入中书平章政事佑每进见天子尊礼之官而不名后数年乞休骸骨帝不得已许之仍拜光祿大夫守太保致仕俾朝朔望遣中人锡予备厚元和七年卒年七十八册贈太傅謚曰安簡佑资嗜学虽贵犹夜分读书先是刘秩摭百家俚周六官法为政典三十五篇房管称才过刘向佑以为未尽因广其阙益新礼为二百篇号通典奏之子式方

杜式方

杜悰

杜慆

杜牧

杜顥

杜式方

式方字考元以荫授扬州参军事再迁太常寺主簿考定音律卿高郢称之佑既相出为昭应令迁太仆卿子悰尚公主式方以右戚移病不视事穆宗立授杜管观察使弟从郁痼疾躬为营方药羞膳及死期而泣世称其笃行卒贈礼部尚书从郁元和初为左补阙崔羣等以宰相子为嫌再徙秘书丞终驾部员外郎子牧

杜悰

悰字永裕以门荫三迁太子司议郎尚岐阳公主授殿中少监驸马都尉太和初由澧州刺史召为京兆尹迁凤翔忠武节度使入为工部尚书判度支会昌初为淮南节度使武宗诏扬州监军取娼家女十七人进禁中监军请悰同选又欲阅良家有姿相者悰曰吾不奉诏而辄与罪也监军怒表于帝帝以悰有大臣体乃诏罢所进伎有意倚悰为相矣踰年召拜检校尚书右仆射同中书门下平章事仍判度支刘稹平进左仆射兼门下侍郎未几以本官罢出为剑南东川节度使徙西川复镇淮南时方旱道

路流亡藉藉惊荒涵宴适不能事罢兼太子太傅分司
东都踰岁起为留守复节度剑南西川召为右仆射【按宰相表作左仆射】判度支
进兼门下侍郎同平章事帝大渐枢密使王归长马公
儒等以遗诏立夔王左军中尉王宗实等以为归长等矫诏乃迎郗王立之是为懿宗久
之遣枢密使杨庆诣中书独揖惊它宰相毕誠杜审权
蒋伸不敢进乃授惊中人请帝监国奏因谕惊劾大臣名不在者抵罪惊遽封授使者复
命谓庆曰上践祚未久君等秉权以爱憎杀大臣公属
祸无日矣庆色沮去帝怒亦释大臣遂安未几册拜司空封邠国公以检校司徒为凤翔
荆南节度使加兼太傅卒年八十赠太师弟悛

杜悛

悛咸通中为泗州刺史会庞勋反围城悛完守备以待贼处士辛谠自广陵来见悛
劝出家属独以身守悛不可谠曰公能如是仆当与公
同死贼将李圆易悛驰勇士百人欲入封府库悛为好言厚礼迎劳明日伏甲士三百宴
球场贼皆歼焉圆怒傅城战悛杀数百人圆退壁城西
勋闻益其兵而以书射城中促降会夜悛击鼓乘城大呼圆气夺奔还徐州未几贼焚淮
口昼夜战不息谠乃请救于戍将郭厚本将淮南兵千
五百人救泗州次洪泽节度使令狐绹遣牙将李湘屯淮口与郭厚本合为圆所败湘等
并没于是援绝贼乃以铁锁绝淮流梯冲乘城粮尽为
薄饘以给懿宗遣使加悛检校右散骑常侍勉以坚守会招讨使马举率兵至遂解去围
凡十月悛抚循士皆殊死奋而辛谠冒围出入纠辑援
师卒完一州时称为难贼平悛迁义成军节度使检校兵部尚书卒

杜牧

牧字牧之善属文第进士复举贤良方正沈傅师表为江西团练府巡官又为牛僧
孺淮南节度府掌书记擢监察御史移疾分司东都以
弟顓病弃官复为宣州团练判官拜殿中侍御史内供奉是时刘从谏守泽潞何进滔据
魏博颇骄蹇不循法度牧追咎长庆以来朝廷措置亡
术复失山东巨封剧镇所以系天下轻重不得承袭轻授皆国家大事嫌不当位而言实
有罪故作罪言言上策莫如自治中策莫如取魏下策
为浪战时论韪之累迁左补阙史馆修撰改膳部员外郎宰相李德裕素奇其才会昌中
黠戛斯破回鹘回鹘种落溃入漠南牧说德裕不如遂
取之以为两汉伐虏常以秋冬当匈奴劲弓折胶重马免乳与之相校故败多胜少今若
以仲夏发幽并突骑及酒泉兵出其意外一举无类矣
德裕善之会刘稹拒命招诸镇兵讨之牧复移书于德裕以河阳西北去大井关强百里
用万人为垒室其口深壁勿与战成德军世与昭义为

敌王元逵思一雪以自奋然不能长驱径捣上党其必取者在西面今若以忠武武宁两军益青州精甲五千宣润弩手二千道绛而入不数月必覆贼巢昭义之食尽仰山东常日节度使率留食邢州山西兵单少可乘虚袭取故兵闻拙速未睹巧之久也俄而泽潞平略如牧策历黄池睦三州刺史入为司勋员外郎常兼史职改吏部改为湖州刺史踰年以考功郎中知制诰迁中书舍人牧刚直有奇节不为龊龊小谨敢论列大事指陈病利尤切卒年五十

杜顓

顓【按宰相世系表作顓】字胜之幼病目母禁其为学举进士授秘书省正字李德裕奏为浙西府宾佐德裕贵盛宾吝无敢忤惟顓数谏之及谪袁州叹曰门下爱我皆如顓吾无今日太和末召为咸阳尉直史馆常语人曰李训郑注必败行未及都闻难作疏辞疾归顓亦善属文与牧相上下竟以丧明卒

△郑綱

郑綱字文明余庆从父行也幼有奇志善属文所交皆天下有名士擢进士宏辞高第张延赏帅剑南奏署掌书记入为起居郎翰林学士累迁中书舍人德宗自兴元还置六军统军视六尚书以处功臣除制用白麻付外又废宣武军益左右神策以监军为中尉窦文场恃功阴讽宰相进拟如统军比綱当作制契言不可帝悟乃不用麻顺宗病不能语王叔文与牛美人用事权震中外惮广陵王雄睿欲危之帝召綱草立太子诏綱不请辄书曰立嫡以长跪白之帝颔乃定宪宗即位拜中书侍郎同中书门下平章事迁门下侍郎始卢从史阴与王承宗连有诏归潞从史辞潞乏粮请留军山东李吉甫密谮綱漏言于从史帝怒赖李绛谏而释居位四年罢为太子宾客久乃检校礼部尚书出为岭南节度使后累迁河中节度入为御史大夫检校尚书左仆射兼太子少保文宗太和中年老乞骸骨以太子太傅致仕卒年七十八赠司空谥曰宣

郑顓

郑顓

孙顓举进士以起居郎尚万寿公主拜驸马都尉有器识宣宗时恩宠无比终检校礼部尚书河南尹

△权德輿

权德輿字载之父皋见卓行传德輿七岁居父丧哭踊如成人未冠以文章称韩洄黜陟河南辟置幕府复从江西观察使李兼府为判官杜佑裴胄交辟之德宗闻其材召为太常博士改左补阙贞元八年关东淮南浙西州县

大水坏庐舍漂杀人德輿建言宜择羣臣明识通方者
持节劳徠问人所疾苦蠲其租入与连帅守长讲求所宜帝乃遣奚陟等四人循行慰抚
裴延龄以巧幸进判度支德輿上疏斥言其奸疏奏不
省迁起居舍人岁中兼知制诰进中书舍人久之知礼部贡举真拜侍郎凡三岁甄品详
谛取明经初不限员十九年大旱德輿因是上陈阙政
请诏所在裁留经用以种贷民今兹租赋及宿逋远贷一切蠲除约太仓一岁计斥其余
者以糶于民帝颇采用之宪宗元和初历兵部侍郎坐
累徙太子宾客俄还前官时泽潞卢从史诈傲寢不制其父虔卒京师而成德王承宗父
死求袭德輿谏以为欲变山东先择昭义之帅从史拔
自军校偃蹇不法今可因其丧选守臣代之成德习俗既久当制以渐许成德之请则可
许昭义则不可帝不听及承宗叛从史乃诡计以挠王
师兵老无功德輿请赦承宗徙从史后皆略如所料会裴垍病德輿自太常卿拜礼部尚
书同中书门下平章事王锬繇河中入朝求兼宰相李
藩以为不可德輿亦奏争帝乃止董溪于皋蓐以运粮使盗军兴流岭南帝悔其轻诏中
使半道杀之德輿谏宜审正其罪明下诏书与众同弃
则人人惧法帝深然之尝问政之宽猛孰先对曰唐家承隋苛虐以仁厚为先列圣所循
皆尚德教帝曰诚如公言德輿善辩论开陈古今本末
以觉悟人主为辅相宽和不为察察明李吉甫再秉政帝又自用李絳参赞大机是时帝
切于治事巨细悉责宰相吉甫絳议论不能无持异至
帝前遽言亟辩德輿居中不敢有所轻重坐是罢为本官寻以检校吏部尚书留守东都
进扶风郡公未几复拜太常卿徙刑部尚书先是诏许
孟容蒋乂刊汇格敕既成上之留禁中德輿请出其书与侍郎刘伯刍参复研考定三十
篇奏上复检校吏部尚书出为山南西道节度使后二
年以病乞还卒于道年六十赠尚书左仆射谥曰文

权璩

权璩

子璩字大圭元和初擢进士历监察御史有美称宰相李宗闵荐为中书舍人时李
训挟宠以周易博士在翰林璩与舍人高元裕给事中
郑肃韩偓等连章劾训倾覆阴巧且乱国不宜出入禁中不听及宗闵贬璩屡表辩解贬
阆州刺史文宗怜其母病徙郑州训诛时人多璩明祸
福大体能世其家

△崔羣

崔羣字敦诗贝州武城人未冠举进士陆贽主贡举梁肃荐其有公辅才擢甲第举
贤良方正授秘书省校书郎累迁右补阙翰林学士中

书舍人数陈说言宪宗嘉纳因诏学士凡奏议待羣署乃得上羣固让惠昭太子薨是时遂王嫡而澧王长多内助帝将建东宫诏羣为澧王作让表羣奏大凡已当得则让不当得之乌用让今遂王嫡宜为太子帝从其议进户部侍郎元和十二年以中书侍郎同中书门下平章事李师道既诛师古等妻子没入掖廷帝疑以问羣羣请释之并还其奴婢赀产盐铁院官权长孺坐罪抵死其母耄丐子以养帝爽然欲赦之以问宰相羣对陛下幸怜其老宜即遣使谕旨若须出赦无及矣于是免死羣凡启奏平恕如此处州刺史苗积进羨钱七百万羣以受之失信天下请还赐其州以纾下户之赋是时皇甫镈言利幸于帝阴藉左右求宰相羣数言其佞邪不可用既入对及开元天宝事羣因推言其极曰安危在出令存亡系所任玄宗用姚崇宋璟张九龄则理用李林甫杨国忠则乱人皆以天宝十五年禄山自范阳起兵是理乱分时臣以为开元二十年罢九龄任林甫理乱自此已分矣词意激切左右为感动帝卒自相镈会羣臣上帝号镈欲兼用孝德为号羣独以为有睿圣则孝德并见帝闻不乐会度支禀赐边士不时物多弊恶李光颜忧甚至欲引佩刀自决中外皆恐镈奏边鄙无事乃羣鼓动欲以买直归怨天子于是罢为湖南观察使穆宗立以吏部侍郎召之劳曰我为太子卿力也羣曰此先帝意臣何力焉俄拜御史大夫未几检校兵部尚书充武宁节度使羣以其副王智兴得士心不若假以节度不报智兴讨幽镇还藉兵逐羣羣失守左迁秘书监分司东都改华州刺史历宣歙池观察使进兵部尚书出为荆南节度使召拜吏部尚书卒年六十一赠司空

△李夷简

李夷简字易之郑惠王元懿四世孙以宗室子始补郑丞德宗幸奉天朱泚外示迎天子遣使东出关至华候吏李翼不敢问夷简谓曰泚必反向发幽陇兵五千救襄城乃贼旧部是将追还耳上越在外召天下兵未至若凶狡还西助泚送死危祸也请验之翼驰及潼关果得召符白于关大将骆元光乃斩贼使收伪符献行在诏即拜元光华州刺史元光掠功故无知者夷简弃官去擢进士第中拔萃科调蓝田尉迁监察御史坐小累下迁虔州司户参军九岁复为殿中侍御史元和时至御史中丞京兆尹杨凭性鸷锐始为江南观察使冒没于财夷简为属刺史不为凭所礼至是发其贪凭贬临贺尉夷简赐金紫以户部侍郎判度支俄检校礼部尚书山南东道节度使初贞元时取江西兵五百戍襄阳制蔡石胁仰给度支后亡死略尽而岁取赀不置夷简曰迹空文苟军兴可乎奏罢之阅三岁徙帅剑南西川夬州刺史王禺积奸赃属蛮怒畔

去夷简逐禹占檄谕祸福蛮落复平始韦皋作奉圣乐于岷作神圣乐常奏之军中夷简谓礼乐非诸侯可擅制命罢去十三年召为御史大夫进门下侍郎同中书门下平章事李师道方叛裴度当国帝倚以平贼夷简自谓才不能有以过度乃求外迁以检校尚书左仆射平章事为淮南节度使长庆初请老不听以右仆射召辞不拜复以检校左仆射兼太子少师分司东都明年卒年六十七赠太子太保夷简致位显处以直自闲未尝苟辞气悦人历三镇家无货产病不迎医将终戒毋厚葬毋事浮屠毋碑神道世谓行己能有终始者

△令狐楚

令狐楚字愬士德棗之裔也生五岁能为辞章逮冠贡进士既及第桂管观察使王拱爱其才将辟楚惧不至乃先奏而后聘满岁谢归李说严绶郑儋继领太原高其行引在幕府儋暴死不及占后事军大讙将为乱夜十数骑挺刃邀楚使草遗奏诸将圜视楚色不变秉笔辄就以徧示士皆感泣一军乃安由是名益重以亲丧解既除召授右拾遗宪宗时累擢职方员外郎知制诰其为文于笺奏制令尤善每一篇成人皆传讽皇甫镈以言利幸与楚萧俛皆厚善故荐于帝帝亦自闻其名召为翰林学士进中书舍人方伐蔡久未下议者多欲罢兵帝独与裴度不肯赦元和十二年度以宰相领彰义节度使楚草制其辞有所不合度得其情时宰相李逢吉与楚善皆不助度故帝罢逢吉停楚学士但为中书舍人俄出为华州刺史镈既相擢楚河阳怀节度使代乌重胤度出太原镈荐楚为中书侍郎同中书门下平章事穆宗即位进门下侍郎镈得罪时谓楚缘镈以进且尝逐裴度天下所共疾会萧俛辅政乃不敢言方营景陵诏楚为使而亲吏韦正牧奉天令于翬等不偿佣钱十五万缙楚献以为羨余怨诉系路诏捕翬等下狱诛出楚为宣歙观察使俄贬衡州刺史再徙以太子宾客分司东都长庆二年擢陝虢观察使谏官论执不置楚至陝一日复罢还东都会逢吉复相力起楚以李绅在翰林沮之不克敬宗立逐出绅即拜楚为河南尹迁宣武节度使汴军以骄故而韩宏弟兄务以峻法绳治楚至解去酷烈以仁惠鑄谕人人悦喜入为户部尚书俄拜东都留守徙天平节度使久之徙节河东召为吏部尚书检校尚书右仆射俄兼太常寺卿进拜左仆射彭阳郡公始帝许相楚会甘露之变楚知王涯贾餗冤草诏不切指其罪仇士良恶之乃用李石而以楚为盐铁转运使请罢榷茶使从之开成元年上巳赐羣臣宴曲江楚以新诛大臣暴骸未收怨疹感结称疾不出乃请给衣衾槽椀以敛刑骨顺阳气是时政在宦竖数上疏辞位拜山南西道节度使卒年七十二赠司空

谥曰文子绪。绹显于时，绪以荫仕，历隋寿汝三州刺史。有佳政，汝人请刻石颂德。绪以绹当国，固让。宣宗嘉其意，乃止。

令狐绹

令狐滈

令狐绹

绹字子直，举进士，擢累左补阙、右司郎中，出为湖州刺史。大中初，宣宗谓宰相白敏中曰：「宪宗葬道，遇风雨，六宫百官皆避，独见颀而髯者，奉梓宫不去，果谁邪？」敏中言：「山陵使令狐楚帝曰：『有子乎？』对曰：『绪少，风痹，不胜用。』」绹今守湖州，因曰：「其为人宰相器也。」即召为考功郎中、知制诰，入翰林为学士。它夜，召与论人间疾苦，帝出金镜书曰：「太宗所著也。卿为我举其要。」绹摘语曰：「至治未尝任不肖，至乱未尝任贤。任贤享天下之福，任不肖罹天下之祸。」帝曰：「善。」进中书舍人，袭彭阳男，迁御史中丞，再迁兵部侍郎，还为翰林承旨。夜对禁中，烛尽，帝以乘舆金莲华炬送还院。吏望见，以为天子来，及绹至，皆惊。俄同中书门下平章事，辅政十年。懿宗嗣位，由尚书左仆射。【按旧书作右仆射】门下侍郎，再拜司空。未几，检校司徒、平章事，为河中节度使，徙宣武，又徙淮南，副大使安南，平以馈运劳，封凉国公。庞勋自桂州还道浙西，白沙入浊河，漂舟而上。绹闻，遣使慰无且，馈之裨将李湘曰：「徐兵擅还，果反矣。虽未有诏，一切制乱，我得专之。今其兵不二千，而广舟舰，张旗帜，示侈于人，其畏我甚高邮。厓峭水狭，若使荻艚火其前，劲兵乘其后，一举可覆。不然，使得绝淮泗，合徐之不逞，祸乱滋矣。」绹懦缓，不能用。因曰：「彼不为暴，听其度淮河，豫我哉。」勋还，果盗徐州，其众六七万，徐乏食，分兵攻滁和，楚寿陷之，粮尽，啖人以饱。诏绹为徐州南面招讨使，贼方攻泗州，杜慆坚守，绹命湘率兵五千救之，勋谩辞谢。绹喜，即请假，勋节而敕湘无庸战。贼乘间直袭湘垒，悉俘而食之。醢湘及监军郭厚本。时浙西杜审权使票将翟行约卒千兵，与湘会，未至而湘覆贼，伪建淮南旗帜，诱之，亦皆陷。绹既师败，乃以左卫大将军马举代之。以绹为太子太保，分司东都。僖宗初，拜凤翔节度使。顷之，就加同平章事，徙封赵。卒年七十八，赠太尉。子滈、涣、沔。

令狐滈

滈避嫌不举进士。绹辅政，而滈与郑顥为姻家，怙势骄偃，通宾客，招权以射取四方货财。绹去，宰相因丐滈与羣进士试。有司诏可是，岁及第。谏议大夫崔瑄劾奏，绹以十二月去位，而有司解牒，尽十月屈朝廷取士法。为滈家事，请委御史按实其罪，不听。滈乃以长安尉为集贤校理，稍迁右拾遗，史馆修撰。诏下左拾遗刘蛻起居郎张云交疏指其恶辞，及绹、滈俱求换它

官改詹事府司直緇方守淮南上奏自治帝为贬云为
兴元少尹蛻华阴令瀉亦湮扼不振而死涣泐皆举进士涣终中书舍人

△段文昌

段文昌字墨卿一字景初志元四世孙世客荆州疏爽任义节节度使裴胄礼之后
依剑南节度韦皋表为校书郎宰相李吉甫才之擢
登封尉集贤校理再迁左补阙宪宗数欲亲用为韦贯之所阻贯之罢引为翰林学士迁
中书舍人遂为承旨穆宗即位屡召入思政殿顾问率
至夕乃出俄拜中书侍郎同中书门下平章事未踰年自表还政授剑南西川节度使同
平章事文昌素谙蜀利病治宽静羣蛮震服长庆二年
黔中蛮叛观察使崔元略以闻文昌使一介开晓蛮即引还入迁兵部尚书文宗立拜御
史大夫进封邹平郡公俄检校尚书右仆射平章事节
度淮南太和四年检校左仆射徙帅荆南州或旱禴解必雨或久雨遇出游必霁民为语
曰旱不苦禱而雨雨不愁公出游南诏袭南安帝以文
昌得蛮夷心诏使下檄慰让即日解而去复节度西川九年卒赠太尉

段成式

段成式

子成式字柯古推荫为校书郎博学强记累擢尚书郎为吉州刺史终太常少卿 【
按旧书成式咸通中为江州刺史其刺吉州终太常
俱不载未详孰是】 着酉阳书数十篇子安节干宁中为国子司业

△萧俛

萧俛字思谦华之孙贞元中及进士第又以贤良方正对策异等拜右拾遗元和六
年召为翰林学士凡三年进知制诰会张仲方以李吉
甫数调发疲天下訾其谥宪宗怒逐仲方而俛坐与善夺学士下除太仆少卿皇甫镈荐
为御史中丞镈与令狐楚皆善俛两人同辅政数称其
善故帝待俛厚袭徐国公穆宗立逐镈议所以代者楚荐之授中书侍郎同中书门下平
章事进门下侍郎吐蕃寇泾州调兵护边帝因问兵法
有必胜乎俛曰兵凶器圣人不得已用之夫以仁讨不仁以义讨不义先招怀后掩袭救
人如免水火此必胜术也若乃以小不忍轻任千戈师
曲而敌怨非徒不胜又将自危是以圣王慎于兵帝重其言尝诏俛撰王承宗先铭俛奏
承宗比不臣迷而后复臣不忍称道其先帝善而止令
狐楚罢执政西川节度使王播贴权幸求宰相俛劾播纤佞不可污台宰帝不许自请罢
冀有感寤帝亦不省俄罢为尚书左仆射用播为盐铁
使后卒相俛自谓辅政浅固辞仆射换吏部尚书又避选事徙兵部移病求分司不许授
太子少保为同州刺史复以少保分司东都文宗即位

召授少师称疾力不拜乃还左仆射许致仕庄恪太子时议选旧德保辅东宫复以少师召辄上还制书坚辞即迁太子太傅优诏褒尚开成初弟俶为楚州刺史召见帝曰俶先帝贤宰相筋力未衰可一来尔善道朕意乃以诏书并绢三百因俶致之俶终不起以寿卒母韦贤明治家严俶虽宰相侍左右如褐衣时穆宗初两河底定俶与段文昌当国谓四方无虞劝帝偃革尚文乃密诏天下镇兵每岁百人中限八人逃死谓之销兵既而籍卒逋亡无生业曹聚山林间为盗贼会朱克融王廷凑乱燕赵一日悉收用之朝廷调兵不克乃召募市人乌合战辄北遂复失河朔矣

萧仿

萧廩

萧仿

仿字思道俶从弟太和中擢进士第累除给事中宣宗力治喜直言尝以李璣为岭南节度使使者已赐节而仿封还诏书帝方作乐不暇命使遣优工趋出追之未及璣所而还令狐綯用李琢经略安南琢以暴沓免俄起为寿州团练使仿劾奏琢无所回时推其直自集贤学士拜岭南节度使【按旧书仿于懿宗时罢知政事出为岭南节度使与此互异考宰相表咸通十四年十月仿知政事干符元年十一月进司空二年五月卒则仿之建节岭南当在未相时旧传无考】南方珍贿丛伙不以入门咸通初为左散骑常侍懿宗怠政事喜佛道仿谏以为天竺法割爱取灭非帝王所尚慕不若惩谬赏滥罚振殃祈福帝嘉叹其言后宫数迁拜义成军节度使滑州濒河累岁水坏西北防仿徙其流远去树堤自固人得以安以兵部尚书再判度支进中书侍郎同中书门下平章事再迁司空兰陵县侯时天下盗起宦人持兵柄仿以鲠直为权近所忌卒年八十

萧廩

子廩字富侯第进士迁尚书郎广明初以谏议大夫知制诰请厉止夜行以备贼谍出太仓粟贱估以济贫民俄迁京兆尹田令孜养子有罪亡亟捕吏系狱请救踵门廩不纳杖杀之内外畏誓令孜拒黄巢以廩为粮料使辞疾贬贺州司户参军事会襄王窃据挈族逃河朔镇冀节度使王镕厚礼之光化中以给事中召不至卒

钦定续通志卷二百六十一

●钦定续通志卷二百六十二 列传六十二

列传

唐【六十二】

○唐六十二

白志贞 裴延龄 崔损 韦渠牟 李齐运 李实
皇甫铸 王播【起 龟式】 杜元颖

白志贞

裴延龄

崔损

韦渠牟

李齐运

李实

皇甫铸

王播

杜元颖

△白志贞

白志贞者本名琇珪故太原吏也事节度使李光弼矜矜自力有智数光弼善之使与帐下议代宗素闻及光弼卒擢累司农卿在官十年德宗以为敏遂倚腹心进授神策军使赐今名善窥亿帝指故言无不从从狩奉天以为行在都知兵马使惧李怀光暴其恶乃与赵赞卢杞等抑怀光不使朝怀光反论斥其奸贬恩州司马赞播州司马稍徙阆州别驾贞元二年起为果州刺史宰相李勉固谏不许明年拜浙西观察使死于官

△裴延龄

裴延龄河东人干元末为汜水尉贼陷东都去客江夏华州刺史董晋表署判官策迁太常博士卢杞秉政引为膳部员外郎集贤院直学士崔造表知东都度支院召为祠部郎中不待命辄还集贤院宰相张延赏疾其轻率出为昭应令与尉交诉所赋京兆尹郑叔则佑尉而御史中丞窦参善延龄卒逐尹德宗用参辅政即擢延龄司农少卿会班宏卒假领度支延龄素不善财计乃广钩距取宿奸老吏与谋以固帝幸因建言左藏天下岁入不费耗登不可校请列别舍以检盈虚于是以天下宿负八百万缗析为负库抽贯三百万缗为剩库样物三十万缗为季库帛以素出以色入者为月库帝皆可之然天下负皆穷人偿入无期抽贯与给皆尽样物与帛固有籍延龄但多其簿最吏员以诡帝于财用无所加也俄以户部侍郎为真又请以京兆苗钱市草千万俾民输诸苑宰相陆贽等以为非是不从京右偏故有萑苇地数顷延龄妄言长安

咸阳间得陂茆数百顷愿以为内厩牧地水甘草荐与苑厩等帝以问宰相皆曰当无有帝遣使按覆果诈延龄大惭帝不责也又请后官阙不即补收其禀以实帑簿造神龙佛祠须材五十尺者延龄妄奏同州得大谷木数千章度皆八十尺帝曰吾闻开元时近山无巨木求之岚胜间今何地之近材之良邪延龄曰异材瑰产处处有之待圣主乃出今生近辅岂开元所当得也帝悦是时陆贄为宰相帝素所信重极论其譎妄不可任帝以为排媚愈益厚延龄太府卿韦少华劾其侵削兆民为天子取怨于下又引建中横敛多积致播迁者其言甚深切帝得奏不悦会盐铁使张滂京兆尹李充司农卿李钰皆指延龄专以儉伪罔上帝怒乃罢贄宰相左除滂等官时大旱人情愁惴延龄言贄等失权怨望显言岁饥民流度支粮刍乏以激怒众士他日帝畋苑中而神策军诉度支不赋厩刍者天子惑延龄言乃下诏斥逐贄等朝廷震恐延龄恃得君谓必辅政少所降下至嫚骂逐臣时人侧目属疾卧第载度支官物输之家死年六十九人语以相安唯帝悼不已册赠太子太傅上柱国元和中

△崔损

崔损字至无系本博陵大历间中进士博学宏辞补校书郎咸阳尉避亲改大理评事累劳至右谏议大夫于时宰相赵憬卒卢迈属疾裴延龄素善损荐之德宗贞元十二年以本官同中书门下平章事始中书虚位十口议者谓选有德及用损中外帐失踰年进门下侍郎以便柔逊愿中帝意怜遇弥渥卒赠太子太傅谥曰靖

△韦渠牟

韦渠牟京兆万年人工部侍郎述从子也少警悟工为诗李白异之授以古乐府去为道士不终更为浮屠已而复冠浙西韩滉表试校书郎进至四门博士迁秘书郎进诗七百言未浹旬擢右补阙内供奉始同列易之后数遣中人专召渠牟繇是皆属目岁中至谏议大夫渠牟为人佻躁志向浮浅特用儉巧中帝意为帝所倚信颇张威福以动天下士之浮竞甘进者争出其门赫然势焰可炙再擢太常卿卒年五十三赠刑部尚书谥曰忠

△李齐运

李齐运蒋王恽孙始补盩厔王府东阁祭酒擢累监察御史复辟江淮都统李峘府由工部郎中为长安令政颇修办擢京兆少尹出为河中尹晋绛慈隰观察使德宗出狩李怀光还兵奔难昼夜驰及河中齐运悉所赋劳军牛酒丰甘人人喜悦及怀光反还守河中齐运弃城走诏拜

京兆尹时李晟壁渭桥齐运发民筑城保督刍粟以饷晟贼平颇有功万年丞源邃不事齐运怒捽辱之死于廷邃家告冤御史大夫崔纵请穷治帝不许御史联章深劾齐运诉于帝言为朋党所挤天子使宰相谕谏官御史后毋得羣署章以劾然卒不直邃冤久之大蝗旱齐运不能政乃以韩洄代之改宗正卿闲厩宫苑使进至礼部尚书宰相内殿对已齐运常次进帝与参决大事既无学暗于大体第以甘言阿匿而已卒年七十二赠尚书左仆射

△李实

李实道王元庆四世孙以荫仕嗣曹王皋辟署江西府判官迁蕲州刺史皋节度山东南道复从之皋卒实知后务刻薄军费士怨怒欲杀之夜缢亡归京师累进司农卿擢拜京兆尹封嗣道王怙宠而悞不循法度贞元二十年早关辅饥实方务聚敛以结恩怙权作威公卿为谗短迁斥者甚众诏书蠲人逋租实格诏固敛畿民大困官吏皆被榜罚掊取二十万缗吏乞贷毫厘辄死顺宗在谅闇不踰月实杀数十人于府贬通州长史市人争怀瓦石邀劫之实惧夜遁去长安中相贺以赦令内移死虢州

△皇甫镈

皇甫镈泾州临泾人贞元初第进士又擢制科为监察御史居丧游处不度下除詹事府司直久之迁吏部员外郎典南曹钤制史奸稍知名进郎中迁累司农卿判度支改户部侍郎宪宗方伐蔡急于用度镈哀会严亟以办济师帝悦进兼御史大夫蔡平之明年遂同中书门下平章事犹领度支裴度极论镈奸邪苛刻不可任用不纳镈乃益以巧媚自固建损内外宫稟佐国用给事中崔植上诏书乃止帝斥内帑所余诏度支评直镈贵售之以给边兵故繒陈彩触手辄坏士怨怒聚焚之裴度以其事闻镈指所著鞞曰此内库所出牢韧可服彼言不可用诈也帝信之镈衔度乃与李逢吉令狐楚合挤之出度太原又以崔羣有天下重望劲正敢言后议帝号镈乃谮羣抑损徽称帝怒逐羣湖南镈罢度支进门下侍郎平章事尝与金吾将军李道古共荐方士柳泌浮屠大通为长年药帝惑之穆宗在东宫闻其奸妄始听政集羣臣于月华门贬镈崖州司户参军死镈弟镛字猷卿第进士镈为相时任河南少尹见权宠太盛每极言之镈不悦乃求分司为太子右庶子镈败朝廷贤之授国子祭酒开成初以太子少保卒镛能属文工诗为人寡言正色衣冠甚伟不屑世务所交皆知名士著书数十篇

△王播

王播字明扬其先太原人父恕为扬州仓曹参军遂家焉播贞元中与弟炎起皆有

名并擢进士而播举贤良方正异等补盩厔尉以善治
狱御史中丞李汶荐为监察御史历侍御史李实为京兆尹与播遇诸衢故事尹当避道
揖实不肯播移文诋之实大怒表播为三原令将折之
播受命趋府谢如礼邑中豪强犯法未尝辄贷岁终课最实重其才更荐之德宗将擢以
要近会母丧解还除驾部员外郎迁工部郎中知御史
杂事刺举不阿有能称历虢州刺史李巽领盐铁奏以副己擢御史中丞岁终改京兆尹
盗贼弭息宪宗以为能进刑部侍郎领诸道盐铁转运
使时讨淮西切于馈饷播引程异自副异尤通万货盈虚使驰传江淮哀财用以给军兴
兵得无乏帝嘉其功超拜礼部尚书稍以货贿结宦要
中外以为言播荐皇甫镈及镈用事更忌播而以异代使播罢守本官久之检校户部尚
书为剑南西川节度使穆宗立逐镈播求还长庆初召
为刑部尚书复领盐铁进中书侍郎同中书门下平章事时权幸竞进播赖其力至宰相
专务将迎居位无所裨益复失河北众望不厌乃以检
校尚书右仆射出为淮南节度使仍领使职是时南方旱歉人相食播掙敛不少哀民皆
怨之敬宗即位即拜检校司空以王涯代使播失职见
王守澄方得君厚以金谢守澄乘间荐之天子有意复用播于是谏议大夫独孤朗等见
延英言播倾邪关通帝左右状帝冲闇不内其言遂复
领使天下公议益不与文宗立就进检校司徒太和元年入朝拜左仆射复辅政累封太
原郡公居位四年卒年七十二赠太尉谥曰敬

王起

王龟

王式

王起

起字举之释褐校书郎补蓝田尉李吉甫辟为淮南掌书记以殿中侍御史入兼集
贤殿直学士元和末累迁中书舍人数上疏谏穆宗畋
游事岁中考第一拜礼部侍郎李■（宀介）叛与播俱上疏请诏王智兴讨之卒定其
乱赐金紫拜河南尹进吏部侍郎方播以仆射居相避
选曹改兵部为集贤殿学士拜陕虢观察使时亳州刺史李繁以擅诛贼抵罪起言繁父
有功而二千石不宜偿贼死不报入拜尚书左丞以户
部尚书判度支灵武邠盩多旷土奏为营田以省馈挽历河中节度使方蝗旱粟价腾踊
起下令家得储三十斛斥其余以市否者死神策士怙
势不从寘于法繇是瘡积咸出民赖以生召授兵部尚书以检校尚书右仆射为山南东
道节度使滨汉塘堰联属吏弗完治起至部先修复与
民约为水令遂无凶年李训为宰相起门生也欲引与共政即加银青光禄大夫复以兵

部尚书召判户部训败起素长厚人不以训诤之止罢
其判俄加皇太子侍读帝题诗太子笏以赐开成三年入翰林为侍讲学士改太子少师
起治生无检所得禄赐为僮婢盗有贫不能自存帝知
之诏月益仙韶院钱三十万议者谓与玩臣分给可耻也起赖其入不克让武宗立为章
陵鹵簿使东都留守召为吏部尚书判太常卿帝患选
士不得才特命起典贡举进尚书左仆射封魏郡公凡四举士皆知名者人伏其鉴擢山
南西道节度使同中书门下平章事宣宗初检校司空
以疾愿代不许卒年八十八赠太尉谥曰文懿炎终太常博士子铎镣自有传起子龟式
王龟

龟字大年性高简博知书传无贵胄气武宗雅知之以左拾遗召入谢自陈病不任
职诏许终父丧召为右补阙再擢屯田员外郎称疾去
崔珣观察宣歙表为副龟乐宛陵山水故从之入为祠部郎中史馆修撰咸通中知制诰
铎为相改太常少卿同州刺史牙将白约素暴横尝哞
言月禀薄以动士心为乱龟捕杀之人皆震栗徙浙东观察使初式临州有惠政人闻其
至欢迎之卒赠工部尚书子堯力学有文辞以铎当国
不贡进士终右司员外郎

王式

式以荫为太子正字擢贤良方正科累迁殿中侍御史少节俭巧于宦因郑注以交
王守澄中丞归融劾之出为江陵少尹大中中为晋州
刺史会河曲大歉民流徙它州不纳独式劳恤之活数千人时特峨胡亦饥将入寇汾浚
闻式严备不敢道境以善最称徙安南都护政有威惠
占城真腊慕义悉入献亦还所掠王民蛮国剧贼仇甫 【按通鉴作裘甫】 乱明越观
察使郑祗德不能讨宰相选式往代讨平之加检校右
散骑常侍咸通三年徐州银刀军乱以式检校工部尚书徙武宁节度使诏许滑兵自随
视事三日悉以计诛乱兵会诏降武宁为团练罢归终
左金吾大将军

△杜元颖

杜元颖如晦五世孙贞元末及进士第又擢宏词数从使府辟署稍以右补阙为翰
林学士敏文辞宪宗特所赏叹吴元济平论书诏勤迁
司勋员外郎知制诰穆宗以元颖多识朝章尤被宠拜中书舍人户部侍郎为学士承旨
以本官同中书门下平章事建安县男自帝即位不阅
岁至宰相搢绅骇异甫再替出为剑南西川节度使同平章事敬宗骄僻元颖每欲中帝
意以固幸乃巧索珍异献之百工造作无程敛取苛重
至削军食以助裒畜又给与不时戎人寒饥乃仰足蛮徼于是人人咨苦反为蛮内觚戎

备不修太和三年南诏乘虚袭戎嵩等州诸屯闻贼至
辄溃戍者为向导遂入成都已傅城元颖尚不知乃率左右婴牙城以守贼大掠焚郛郭
残之留数日去蜀之宝货工巧子女尽矣初元颖计迫
将挺身走会救至乃止由是贬邵州刺史议者不厌斥为循州司马死于贬所年六十四
将终表丐赠官乞归葬诏赠湖州刺史元颖与李德裕
善会昌初德裕当国因赦令复其官弟元绛终太子宾客元绛子审权自有传

钦定续通志卷二百六十二

●钦定续通志卷二百六十三 列传六十三

列传

唐 【六十三】

○唐六十三

韦执谊 王叔文 王伾 陆质 刘禹锡 柳宗
元 程异

韦执谊

王叔文

王伾

陆质

刘禹锡

柳宗元

程异

△韦执谊

韦执谊京兆旧族也幼有才及进士第对策异等授右拾遗年踰冠入翰林为学士
便敏侧媚得幸于德宗使豫诗歌属和被诏称旨与裴
延龄韦渠牟等宠任相埒出入备顾问帝诞日皇太子献画浮屠象帝使执谊赞之太子
赐以帛诏执谊到东宫谢太子乃曰君知王叔文乎美
才也执谊繇是与叔文善以母丧解终丧为吏部郎中数召至禁中顺宗立以疾不亲政
叔文用事乃擢执谊为尚书左丞 【按宰相表作右
丞】 同中书门下平章事叔文与王伾居中窃命欲执谊据以奉行执谊外迫公议欲示
天下非党与者乃时时异论相可否而密谢叔文曰不
敢负约欲共济国家事尔叔文数为所梗遂诟怒反成仇怨及宪宗受内禅贬执谊为崖
州司户参军死

△王叔文

王叔文越州山阴人以棋待诏颇读书班班言治道德宗诏直东宫太子引以侍读
因论政及宫市之弊太子曰寡人见上将极言之坐皆

趣赞叔文独嘿然既罢太子曰向君无言何哉叔文曰太子之事上非视膳问安无与也且陛下在位久有如小人离间谓殿下收厌羣情则安解乎太子谢曰非先生不闻此言繇是重之宫中事咸与参订叔文浅中浮表士之欲速进者率谐附之若韦执谊陆质吕温李景俭韩翥韩泰陈谏柳宗元刘禹锡为死友而凌准程异又因其党进出入诡秘外莫得其端强藩剧帅或阴相赂遗以自结顺宗立不能听政深居施幄坐以牛昭容宦人李忠言侍侧羣臣奏事从幄中可其奏王伾密语诸黄门陛下素厚叔文即繇苏州司功参军拜起居郎翰林学士大抵叔文因伾因忠言忠言因昭容更相依仗伾主传受叔文主裁可授之中书执谊作诏文施行质泰谏准翥宗元禹锡等倡誉之以为伊周管葛复出憫然谓天下无人叔文每言钱谷者国大本操其柄可因以市士乃白用杜佑领度支盐铁使己副之实专其政不淹时迁户部侍郎宦人俱文珍忌其权罢叔文学士诏出骇怅日引其党谋取神策兵制天下之命乃以宿将范希朝为西北诸镇行营兵马使泰为司马副之于是诸将移书中尉告且去宦人始悟夺其权大怒曰吾属必死其手乃谕诸镇慎毋以兵属人希朝泰到奉天诸将不至乃还母死匿丧踰日始发执谊知其将败益不用其语乃谋起复斩执谊与不附己者闻者恟惧广陵王为太子羣臣皆喜独叔文有忧色诵杜甫诸葛祠诗以自况歔歔泣下太子已监国贬渝州司户参军明年诛死

△王伾

王伾杭州人始以书待诏翰林入太子宫侍书顺宗立迁左散骑常侍待诏通天下赇谢为巨榷裁窃以受珍使不可出则寝其上叔文既居丧伾日请中人及杜佑起叔文为宰相且总北军不许又请以威远军使同中书门下平章事复不可乃一日三表皆不报忧悸行且卧至夕大呼曰吾疾作輿归第贬开州司马死其所支党皆逐惟陆质以前死免韩翥者滉族子有俊才以司封郎中贬饶州司马终永州刺史陈谏警敏尝览染署岁簿悉能言其尺寸所治一阅籍终身不忘自河中少尹贬台州司马终循州刺史凌准字宗一有史学自翰林学士贬连州司马死于贬韩泰字安平有筹划伾叔文所倚重能决大事以户部郎中神策行营节度司马贬虔州司马终湖州刺史

△陆质

陆质字伯冲七代祖澄仕梁为名儒世居吴明春秋师事赵匡匡师啖助质尽传二家学陈少游镇淮南表在幕府荐之朝授左拾遗累迁左司郎中历信台二州刺史质素善韦执谊方执谊附叔文窃威柄用其力召为给事中

宪宗为太子诏侍读质本名淳避太子名故改时执谊惧太子怒已专故以质侍东宫阴伺意解释左右之质伺间有所言太子辄怒曰陛下命先生为寡人讲学何可及它质惶惧出执谊未败时质病甚太子已即位为临问加礼卒

△刘禹锡

刘禹锡字梦得自言系出中山世为儒擢进士第登博学宏辞科工文章淮南杜佑表管书记入为监察御史素善韦执谊时王叔文得幸太子禹锡以名重一时与之交叔文每称有宰相器太子即位朝廷大议秘策多出叔文引禹锡及柳宗元与议禁中所言必从擢屯田员外郎判度支盐铁案颇冯籍其势多中伤端士宪宗立叔文等败禹锡贬连州刺史未至斥朗州司马久之召还宰相欲任南省郎而禹锡作元都观诗语讥忿当路者不喜出为播州刺史诏下御史中丞裴度为言播极远猿狖所宅禹锡母八十不能往当与其子死诀恐伤陛下孝治请稍内迁帝曰为人子者宜慎事不貽亲忧今禹锡所坐更合重于他人度无以对帝改容曰朕所言责人子事终不欲伤其亲乃易连州又徙夔州刺史由和州刺史入为主客郎中复作游元都诗以诋权近闻者益薄其行俄分司东都宰相裴度兼集贤殿大学士雅知禹锡荐为礼部郎中集贤直学士度罢出为苏州刺史以政最赐金紫服【谨按通鉴辑览 御批宗元党附叔文自取戮辱韩愈作志以为不自爱惜语涉周旋若禹锡既以失身获谴而还朝尚罔知惩艾肆言讥忿其罪当不止与柳同科乃集贤金紫滥赏屡叨守正如裴度汲汲荐刺又何为者韩志惜宗元不得有力推挽应即指是而发盖均为文人气类陋习所中非正道也】徙汝周二州迁太子宾客复分司禹锡恃才而废褊心不能无怨望年益晏偃蹇寡所合乃以文章自适素善诗晚节尤精与白居易酬复颇多居易以诗自名者尝推为诗豪又言其诗在处应有神物护持会昌时加检校礼部尚书卒年七十二赠户部尚书

△柳宗元

柳宗元字子厚其先盖河东人从曾祖奭为中书令得罪武后死高宗时父镇天宝未遇乱奉母隐王屋山常间行救养后徙于吴肃宗平贼镇上书言事擢左卫率府兵曹参军佐郭子仪朔方府三迁殿中侍御史以事触窦参贬夔州司马还终侍御史宗元少精敏绝伦为文章卓伟精致一时辈行推仰第进士博学宏辞科授校书郎调蓝田尉贞元十九年为监察御史里行善王叔文韦执谊二人者奇其才及得政引内禁近与计事擢礼部员外郎欲大进用俄而叔文败贬邵州刺史不半道贬永州司马既

窜斥地又荒瘠因自放山泽间其堙厄感郁一寓诸文
元和十年徙柳州刺史时刘禹锡得播州宗元曰播非人所居而禹锡亲在堂吾不忍其
穷无辞以白其大人如母子异方便为永诀即具奏欲
以柳州授禹锡而自往播会大臣亦为禹锡请因改连州柳人以男女质钱过期不赎子
本均则没为奴婢宗元设方计悉赎归之尤贫者令书
佣视直足相当还其质已没者出已钱助赎南方为进士者走数千里从宗元游经指授
者为文辞皆有法世号柳柳州十四年卒年四十七宗
元少时嗜进既坐废遂不振然其才实高名盖一时韩愈评其文曰雄深雅健似司马子
长崔蔡不足多也既没柳人怀之托言降于州之堂人
有慢者辄死庙于罗池愈因碑以实之云

△程异

程异字师举京兆长安人居乡以孝称第明经释褐泰陵尉登开元礼科再补郑尉
精吏治为叔文所引繇监察御史为盐铁杨子院留后
叔文败贬彬州司马李巽领盐铁荐异心辛可任请被擢用之乃授侍御史复为杨子留
后稍迁淮南等道两税使异起退废能厉已竭节悉矫
革征利旧弊入迁累卫尉卿盐铁转运副使方讨蔡异使江表以调征赋因行谕诸帅府
以羨赢贡故异所至不剥下不加敛经用以饶遂兼御
史大夫为盐铁使元和十三年以工部侍郎同中书门下平章事犹领盐铁异以钱谷奋
而至宰相自以非人望久不敢当印秉笔明年西北军
政不治议置巡边使宪宗问孰可者乃自请行会卒赠尚书左仆射谥曰恭身歿官第无
留贖世重其廉云

钦定续通志卷二百六十三

●钦定续通志卷二百六十四 列传六十四

列传

唐【六十四】

○唐六十四

杜黄裳 裴埴 李藩 韦贯之【澳 绶温 萧佑】

裴度【识谥】

杜黄裳

裴埴

李藩

韦贯之

裴度

△杜黄裳

杜黄裳字遵素京兆万年人【按旧书作京兆杜陵人】擢进士第又中宏辞郭子仪辟佐朔方府子仪入朝使主留事李怀光与监军阴谋矫诏诛大将等以动众心欲代子仪黄裳得诏判其非以质怀光怀光流汗服罪于是诸将很骄难制者黄裳皆以子仪令易置众不敢乱入为侍御史为裴延龄所恶十期不迁贞元末拜太子宾客迁太常卿时王叔文用事黄裳未尝过其门壻韦执谊辅政黄裳劝请太子监国中执谊曰公始得一官遽开口议禁中事黄裳怒曰吾受恩三朝岂以一官见卖即拂衣出皇太子总军国事擢黄裳门下侍郎同中书门下平章事于时夏绥银节度使韩全义儉佞无功因其来朝白罢之俄而刘辟叛议者以辟恃险讨之或生事惟黄裳固劝不赦因奏罢中人监军而专委高崇文凡兵进退黄裳自中指授无不切于机蜀平羣臣贺宪宗目黄裳曰时卿之功帝尝问前古王者所以治乱云云黄裳知帝锐于治恐不得其要因推言王者之道在修己任贤择人任而责成见功必赏有罪信罚孰敢不力帝嘉纳之由是平夏翦齐灭蔡复两河以机秉还宰相纪律设张赫然号中兴自黄裳启之元和二年以检校司空同中书门下平章事为河中晋绛节度使俄封邠国公明年卒年七十赠司徒谥曰宣献子载终太仆少卿

△裴垪

裴垪字宏中绛州闻喜人擢进士第以贤良方正对策第一补美原尉藩府交辟不就四迁考功员外郎吏部侍郎郑珣瑜委垪校辞判研核精密皆值才实宪宗元和初召入翰林为学士再迁中书舍人李吉甫始执政以情谓垪曰吾落魄远裔更十年始相天子比日人物吾懵不及知且宰相职当进贤任能君精鉴为我言之垪即崖略疏三十许人吉甫藉以荐于朝天下翕然称得人坐覆视皇甫湜牛僧孺等对策非是罢学士为户部侍郎吉甫罢乃拜垪中书侍郎同中书门下平章事加集贤殿大学士监修国史垪当国请绳不轨课吏治分明淑慝帝降意顺纳常呼垪官而不名岭南节度使杨于陵为监军许遂振所诬诏授冗官垪曰以一中人罪藩臣陛下之法安在更授吏部侍郎严绶守太原政一出监军李辅光垪劾其懦以李墉代之王承宗擅袭节度方帝屡削叛族意必取之又吐突承璀每欲挠垪权因探帝意自请往于时泽潞卢从史诡献征讨计垪固争以为从史苞逆节内连承宗外请兴师以图身利且武俊有功于国陛下前以地授李师道而今欲夺承宗地有之赏罚不一沮劝废矣帝依违不能决久之卒用承璀谋会兵讨承宗从史果反复兵久暴无功王师告病既而从史遣部将王翊元奏事垪从容以

语动之翊元因言从史恶稔可图状垵比遣往得其大将乌重胤等要领垵乃为帝陈从史暴戾不君视承璀若小儿往来神策军不甚戒可因其机致之后无兴师之劳帝初瞿然徐乃许之垵请秘其计帝曰惟李绛梁守谦知之俄而承璀缚从史献于朝因班师垵奏承璀首谋无功陛下虽拙法人心不厌请流斥以谢天下乃罢所领兵先是天下赋法有三曰上供曰送使曰留州建中初厘定常赋而物重钱轻其后轻更相反民输率一倍其初而所在以留州送使之入舍公估更实私直以自润故赋益苛齐民重困垵奏禁之一以公估准物观察使得用所治州租调至不足乃取支郡以贍故送使之财悉为上供自是起淮江而南民少息矣垵器局峻整持法度虽宿贵前望造詣不敢干以私谏官言得失大抵执政多忌之惟垵奖励使尽言垵为学士时引李绛崔羣与同列及相又擢韦贯之裴度知制诰李夷简御史中丞皆踵躐为辅相号名臣自他选任罔不精明人无异言士大夫不以垵年少柄用为嫌五年暴风痹帝怅惜遣使致问药膳进退辄疏闻居三月益痼乃罢为兵部尚书卒赠太子太傅

△李藩

李藩字叔翰其先赵州人父承仕为湖南观察使有名于时藩少沈靖有检局姿制闲美敏于学年四十余杜亚居守东都表致府中亚尝疑牙将令狐运为盗掠服之藩争不从辄去后果获真盗稍知名徐州张建封辟节度府未尝察苛细建封卒濠州刺史杜兼疾驱至阴有觊望藩泣谓曰仆射公奄忽如此公宜谨守土何弃而来宜速还否则以法劾君兼错忤去恨之因诬奏建封死藩撼其军有非望德宗怒密诏徐泗节度使杜佑杀之佑以阖门保藩帝未之信亟追藩既入帝望其状貌曰是岂作乱人邪释之拜秘书郎累擢吏部郎中坐小累左授著作郎再迁给事中制有不便就敕尾批却之吏惊请联他纸藩曰联纸是牒岂曰敕邪裴垵白宪宗谓藩有宰相器会郑絪罢因拜门下侍郎同中书门下平章事藩忠谨好丑必言帝以为无隐尝问前世所以家给或国匱乏者何致而然乃祈禳之数藩对俭则足用敦本则百姓富反是则匱又言义于人者和于神人乃神之主安而福至帝悦后复问神仙长年事藩知帝且有所惑极陈荒妄漫诞不可信后入柳泌等藩果为累云河东节度使王铎赂权近求兼宰相密诏中书门下曰铎可兼宰相藩遽取笔灭宰相字署其左曰不可还奏之宰相权德輿失色曰有不可应别为奏可以笔涂诏耶藩曰势迫矣出今日便不可止既而事得寝李吉甫复相谗之于帝乃罢藩为太子詹事后数月帝复思藩召对殿中事寢

释明年为华州刺史未行卒年五十八赠户部尚书谥曰贞简

△韦贯之

韦贯之名纯避宪宗讳以字行后周柱国夔八世孙父肇大历中为中书舍人累上疏言得失为元载所恶左迁京兆少尹久之改秘书少监载曰肇若过我当择善地处之终不肯诣载诛除吏部侍郎代宗欲相之会卒贯之及进士第为校书郎擢贤良方正异等补伊阙渭南尉河中郑元泽潞郗士美以厚币召皆不应居贫噉豆糜自给再迁长安丞或荐之京兆尹李实贯之不诣实官亦不迁永贞时始为监察御史迁礼部员外郎进吏部员外郎坐考贤良方正牛僧孺等策独署奏出为果州刺史半道贬巴州久之召为都官郎中知制造进中书舍人宰相裴垪尝三奏事宪宗不从贯之曰公亦以进退决请乎垪曰奉教事果见听垪因曰君异时当位于此改礼部侍郎所取士抑浮华先行实于时流竞为息尝从容奏曰礼部侍郎重于宰相帝问何故曰是为陛下柬宰相者得无重乎帝美其言【谨按通鉴辑览 御批礼部重于宰相逞臆说而不中事理彼盖以为取士所以储材也宪宗美其言未几遂以为相可谓以言取人而不知任贤之轻重矣】改尚书右丞俄同中书门下平章事迁中书侍郎讨吴元济也贯之请释镇州专力淮西时帝业已讨镇不从终之蔡平镇乃服初讨蔡以宣武韩弘为都统又诏河阳乌重胤忠武李光颜合兵以进贯之谏诸将战方力今若置都统又令二帅连营则各持重养威未可岁月下也亦不从后四年乃克蔡皆如贯之策云帝以段文昌张仲素为翰林学士贯之谓学士所以备顾问不宜专取辞艺奏罢之皇甫镈张宿皆以幸进宿使淄青裴度欲为请银绯贯之曰宿奸佞吾等纵不能斥柰何欲假以宠乎由是宿等恐阴构之又与度论兵帝前议颇驳故罢为吏部侍郎于是翰林学士左拾遗郭求上疏申理诏免求学士出贯之为湖南观察使左迁太子詹事分司东都穆宗立即拜河南尹以工部尚书召未行卒年六十二赠尚书右仆射谥

贞后更谥文

韦澳

韦绶

韦温

萧佑

韦澳

澳贯之子字子裴第进士复擢宏辞方静寡欲十年不肯调御史中丞高元裕与其兄温善欲荐用之讽澳谒已温归以告澳不答温曰元

裕端士若轻之邪澳曰然恐无呈身御史周墀节度郑滑表署幕府会墀入相私谓曰何以教我澳曰愿公无权墀愕眙澳曰爵赏刑罚人主之柄公无以喜怒行之俾庶官各举其职则公敛衽庙堂上天下治矣乌用权墀叹曰吾先居此得无愧乎擢考功员外郎史馆修撰岁中知制诰召为翰林学士累迁兵部侍郎进学士承旨与萧寘皆为宣宗礼遇每两人直必偕召问政得失一日召入屏左右问曰朕于敕使何如澳陈帝威制前世无比帝摇首曰未也策安出澳仓卒答曰若谋之外廷则太和事可用追鉴不若就择可任者与计事帝曰朕固行之矣自黄至绿自绿至绯犹可衣紫即合为一矣澳愧汗不能对乃罢改京兆尹帝舅郑光主墅吏豪肆积年不输官赋澳逮系之他日延英帝问其故澳具道奸状且言必寘以法帝曰可贷否答曰陛下自内署擢臣尹京邑安可使画一法独行于贫下乎帝入白太后曰是不可犯后为输租乃免由是豪

右敛迹 【谨按通鉴辑览 御批豪贵肆恶乡土最为蠹政害民况辇毂闻岂容恣横若富族抗租不问将于贫户取益其弊更不可究极

韦澳执械庄吏请置于法按律正无可追乃宣宗不但不治郑光庇党之罪且为奸吏宛转乞贷史称大中朝用法无私其然岂其然哉】 会户

部阙判使帝以问澳澳三不对帝曰任卿可乎曰臣老矣力疲气耗烦剧非所任者帝默不乐出谓其甥柳玘曰吾本不为宰相所知上便委以

使务脱谓吾他歧而得卒无以自白今时事寢恶皆吾辈贪爵位致然 【谨按通鉴辑览

御批韦澳数语固足为贪名位者下砭然为臣

者感激自效冀时事可以日理方为不负特达之知乃沾沾以他歧干进恐启他人之疑为说是特对甥自炫名高耳其所云造膝时事又谁见

之而谁传之】 未几授河阳节度使懿宗立徙平卢军入为吏部侍郎复出为邠宁节度使宰相杜审权素不悦坐吏部时史盗簿书为奸贬秘

书监分司东都就迁河南尹辞疾不拜勾归樊川逾年以吏部侍郎召不起卒赠户部尚书谥曰贞为学士时帝尝曰朕每遣方镇刺史欲各悉

州郡风俗者卿为朕撰一书澳乃取十道四方志手加紬次题为处分语后邓州刺史薛宏宗中谢帝敕戒州事人人惊服

韦绶

绶贯之兄举孝廉又贡进士礼部侍郎潘炎将以为举首绶以其友杨凝亲老故让之不对策辄去凝遂及第后擢明经辟东都幕府德宗

时以左补阙为翰林学士密政多所参建帝常幸其院韦妃从会绶方寝学士郑絪欲驰告之帝不许时大寒以妃蜀襦袍覆而去其待遇若此

每入直踰月不得休以母老屡勾解职每请帝辄不悦出入八年而性谨畏晚感心疾罢

还第终左散骑常侍弟纁有精识为士林器许兄弟皆
名重当时授子温

韦温

温字宏有方七岁日诵书数千言十一举两经及第以拔萃高等补咸阳尉入为监
察御史以台制苛严不可以省养不拜换著作郎既谢
辄解归侍亲疾调适汤剂弥二十年衣不弛带既居丧毁瘠不支服除李逢吉辟置宣武
府频迁右补阙宰相宋申锡被构罪不测温率同舍伏
合切争由是益知名太和五年太庙室漏罅诏宗正将作营治不时毕文宗怒责卿李锐
监王■〈王甚〉夺其稟因敕中人葺之温言比诏下
阅月有司弛情不力正可黜慢官愆不恪择可任者缮完之今慢吏夺稟而易以中人是
许百司公废职以宗庙之重为陛下所私臣窃惜之帝
乃罢宦人改侍御史李德裕入辅擢礼部员外郎或言雅为牛僧孺厚德裕曰是子坚正
可以私废乎郑注节度凤翔表为副温曰拒则远黜从
之祸不测吾焉能为注起邪注诛由考功员外郎拜谏议大夫未几为翰林学士先是授
在禁廷积忧畏病废故诫温不得任近职至是固辞不
拜俄兼太子侍读晨诣宫日中见太子谏曰殿下盛年宜鸡鸣蚤作问安天子如文王故
事太子不悦【按旧书温谏太子太子幼不能行其
言称疾上不悦改太常少卿未详孰是】温辞侍读太子得罪诏谕羣臣温曰陛下训之
不早非独太子罪时颇直其言迁尚书右丞盐铁推官
姚勔按大狱帝以为能擢职方员外郎温上言郎官清选不可赏能吏帝命中人谕送温
执议不移诏改勔检校礼部郎中帝问故于杨嗣复对
曰勔名臣后治行无疵若吏材干而不入清选他日孰肯当剧事者此衰晋风不可以法
帝素重温出为陕虢观察使有惠政武宗立擢吏部侍
郎李德裕欲引同辅政时李汉以家行不谨贬汾州司马温苦言汉可释非德裕意不悦
出宣歙观察使明年卒年五十八赠工部尚书谥曰孝
温性刚峻人望见无敢戏慢者与杨嗣复李珣善尝劝与李德裕平故憾二人不从及皆
谪温叹曰用吾言孰至是邪温少合所善惟萧佑

萧佑

萧佑字佑之夷儻君子也少贫窶隐居以孝养闻司农卿李实督官租佑居丧未及
输召至将责之会有赐与倩佑为奏实称善即荐于朝
终制以处士拜左拾遗累迁谏议大夫终桂州观察使赠右散骑常侍精画及书自锺王
萧张以来皆能识其真警然不以尘事自蒙故温号山
林友云

△裴度

裴度字中立河东闻喜人贞元初擢进士第以宏辞补校书郎举贤良方正异等调河阴尉迁监察御史论权嬖梗切出为河南功曹参军武元衡帅西川表掌节度府书记召为起居舍人元和六年以司封员外郎知制造田宏正献魏博六州于朝宪宗遣度宣谕宏正知度为帝高选故郊迎趋跽受命且请徧至属州布扬天子德泽魏人由是欢服还拜中书舍人久之进御史中丞宣徽五坊小使方秋阅鹰狗所过挠官司小邨令裴寰不为礼因构寰送诏狱宰相武元衡婉辞诤帝怒未置度见延英言寰无宰帝恚曰寰诚无罪杖小使小使无罪且杖寰度曰责若此固宜第寰为令惜陛下百姓安可罪帝色霁乃释寰王师讨蔡以度视行营诸军还奏攻取策与帝意合且问诸将才否度对李光颜义而勇当有成功不三日光颜破时曲兵帝叹度知人进兼刑部侍郎王承宗李师道谋缓蔡兵乃伏盗京师刺用事大臣已害宰相元衡又击度伤首冒毡得不死哄导骇伏独驹王义持贼大呼贼断义手度坠沟贼意已死因亡去议者欲罢度安二镇反侧帝怒曰度得全天也若罢之是贼计适行吾倚度足破三贼矣度病创一再旬分卫兵护第存候踵路疾愈诏毋须宣政衙门对延英拜中书侍郎同中书门下平章事时方连诸道兵环拏不解内外大恐人累息及度当国外内始安由是讨贼益急始德宗时尚苛伺中朝士相过金吾辄飞启宰相至阖门谢宾客度以时多故宜延天下髦英咨筹策乃建请还第与士大夫相见诏可于时讨蔡数不利羣臣争请罢兵度奏病在腹心不时去且为大患不然两河亦时视此为逆顺会唐邓节度使高霞寓战却他相揣帝厌兵欲赦贼帝不许十二年宰相逢吉涯建言饷亿烦匱宜休师唯度请身督战帝独目度留曰果为朕行乎度俯伏流涕曰臣誓不与贼偕存即拜门下侍郎平章事彰义军节度淮西宣慰招讨处置使度以韩弘领都统乃上还招讨以避弘然实行都统事于是表马总为宣慰副使韩愈行军司马李正封冯宿李宗闵各两使幕府入对延英曰主忧臣辱义在必死贼未授首臣无还期帝壮之为流涕及行御通化门临遣赐通天御带发神策骑三百为卫初逢吉忌度帝恶居中挠沮出之外度屯郾城劳诸军宣朝廷厚意是时诸道兵悉中官统监自处进退度奏罢之使将得颛制号令未几李愬夜入悬瓠城缚吴元济以报度遣马总先入蔡明日统洞曲降卒万人持节徐进抚定其人初元济禁偶语于道夜不然烛酒食相馈遗者以军法论度下令唯盗贼鬪死抵法余一蠲除往来不限昼夜民始知有生之乐度以蔡牙卒侍帐下或谓反侧未安不可去备度笑曰吾为彰义节度元恶已擒人皆吾人也众感泣既而申光平定以马总为留

后度入朝会帝以二剑付监军梁守谦使悉诛贼将度遇诸郾城复与入蔡量罪议诛守谦请如诏度固不然腾奏申解全宥者甚众策勋进金紫光禄大夫宏文馆大学士上柱国晋国公户三千复知政事程异皇甫铸以言财赋幸俄得宰相度三上书极论不可帝不纳自上印又不听初蔡平王承宗惧度遣辨士栢耆胁说乃献德棣二州纳质子又谕程权入覲始判沧景德棣为一镇朝廷命帅而承宗势乃离李师道怙强度密劝帝诛之乃诏宣武义成武宁横海四节度会田宏正致讨宏正请自黎阳济合诸节度兵宰相皆谓宜度曰魏博军度黎阳即叩贼境封畛比联易生顾望是自战其地宏正光颜素少断士心盘桓果不可用不如养威河北须霜降水落于阳刘度河直抵郛以营阳谷则人人殊死贼势穷矣帝曰善诏宏正如度言宏正奉诏师道果擒大贾张陟负五坊息钱帝命坊使杨朝汶收其家簿阅货钱虽已偿悉钩正根自变量十百人御史中丞萧俛及谏官列陈中人横恣度亦极言之时方讨郛帝曰姑议东军此细事我自处辨度曰兵事不理止山东中人横暴将乱都下帝不悦徐乃悟诛朝汶而原系者由是京师澄肃帝尝语臣事君当励善底公朕恶夫树党者度曰君子小人以类而聚未有无徒者君子之徒同德小人之徒同恶外甚类中实远在陛下观所行则辨帝曰言者大抵若此朕岂易辨之已而为异铸所构以检校尚书右仆射兼门下侍郎平章事为河东节度使穆宗即位进检校司空朱克融王廷湊乱河朔加度镇州行营招讨使时帝以李光颜乌重胤爪牙将倚以击贼兵十余万无尺寸功度既受命入贼境数斩将以闻俄兼押北山诸蕃使时元稹显结宦官魏宏简求执政惮度复当国因经置军事数居中持梗不使有功度恐乱作即上书痛暴稹过恶帝不得已罢宏简稹近职俄擢稹宰相以度守司空平章事东都留守谏官叩延英言不可罢度兵摇众心帝不召会中人使幽镇还言军中谓度在朝而两河诸侯忠者怀强者畏今居东人人失望帝悟诏度由太原朝京师及陛见辞切气怡卓然当天子意闻者皆竦毅将贵臣至赍咨出涕度之行移克融廷湊书开说大谊皆愿罢兵帝方忧深州围欲必出牛元翼更使度腾书布旨或曰贼知度失兵柄必背约顾望帝释然乃拜度守司徒领淮南节度使会昭义监军刘承偕慢刘悟举军哗怒执承偕悟拘以闻帝怒问度何施而可度顿首谢藩臣不与政辞不对帝强之度曰必欲收忠义心使帅臣死节独斩承偕则四方羣盗隐然破胆矣帝曰更言其次度曰投诸荒裔可乎帝曰可悟果出承偕昭义遂安是时徐州三智与逐崔羣诸军盘互河北进退未一议者交口请相度乃以本官兼中书侍郎平章事权佞侧目

谓李逢吉险贼善谋可以构度共讽帝自襄阳召逢吉还拜兵部尚书度居位再阅月果
为逢吉所闲罢为左仆射帝暴风眩中外不闻问者凡
三日度数请到内殿求立太子翼日乃见帝遂立景王为嗣逢吉既代相思有以牙辞之
引所厚李仲言张又新李续张权舆等内结宦官种交
党丑沮日闻乃出度山南西道节度使夺平章事敬宗嗣立之三月王廷凑屠元翼家帝
嗟惋累日因叹宰辅非才韦处厚上疏曰陛下当食嗟
息恨无萧曹今一裴度尚摈于外此冯唐所云虽有颇牧不能用也帝感悟于是复度兼
平章事帝注意度中人至度所必叮咛慰安且示召期
宝历二年度请入朝逢吉党大惧权舆作伪谣且言度名应图讖天子独能明其诬诏复
使辅政先是帝将幸东都大臣切谏不纳度从容奏国
家建别都本备巡幸自艰难以来宫阙署中百司之区荒圯弗治假岁月完新然后可行
仓卒无备有司且得罪帝悦曰羣臣谏朕不及此如卿
言诚有未便因止朱克融执赐衣使者杨文端又四假度支帛三十万匹且请遣工五千
助治东都帝怒患之欲遣重臣临慰度曰克融无恙而
悖是将亡无庸遣重使第以诏书言中人倨骄须还我自责谴陛下若未能然则诏宫室
营缮既有序毋遣工为重劳朝廷缘召发乃有赐与朕
无所爱独与范阳体不可尔帝曰善用度次策克融听命归文端未几军乱杀克融帝纵
弛日晏坐朝度谏帝嘉纳为数视朝未几判度支帝崩
定策诛刘克明等迎立江王是为文宗加门下尚书李全略死子同捷求袭沧景军度奏
讨平之即陈调兵食非宰相事请罢度支归有司奏可
进阶开府仪同三司赐实封户三百度恳让不得可乃受实封太和四年数引疾不任机
重愿上政事帝择尚医护治中人日劳问相蹶乃诏进
司徒平章事国重事须疾已三日五日一至中书度让免册礼于是牛僧孺李宗闵同辅
政媚度勋业久居上欲有所进乃共訾其迹损短之因
度辞位即白帝进兼侍中出为山南东道节度使曰罢元朴所置临汉监收千马纳之校
以善田四百顷还襄人顷之固请老不许八年徙东都
留守罢加中书令李训之祸宦官肆威以逞凡训注宗姬宾客悉收逮讯报苛惨度上疏
申理全活数十姓武德县王藏史盗钱亡命河阳节度
温造责令王赏偿负系狱三年度为帝言之赏得释时阉竖擅威天子拥虚器搢绅道丧
度不复存经济意乃治第东都集贤里又于午桥作别
墅号绿野堂野服萧散与白居易刘禹锡为文酒交不问人闲事帝知度神明不衰每大
臣自洛来必问度安否开成二年复以本官节度河东
度固辞帝命吏部郎中卢弘宣谕意曰为朕卧护北门可也趣上道度乃之镇易定节度
使张璠卒军中将立其子元益度遣使晓譬祸福元益

惧束身归朝三月以病旬还东都四年正月诏许还京以疾未克谢有诏先给俸料上巳宴羣臣曲江度不赴帝赐以诗复诏曰方春慎疾为难勉医药自持薨年七十六【按旧书作七十五与此互异】帝闻震悼赠太傅谥文忠赠礼优渥帝怪无遗奏敕家人索之得半橐以储贰为请无私言会昌元年加赠太师大中初诏配享宪宗庙庭度名震四夷使外国者其君长必问度年今几状貌孰似事四朝以全德始终及歿天下莫不思其风烈五子识谥知名【按宰相世系表度七子譔诩谥调议誠让无名识者惟议检校右仆射袭晋国公与此互异考旧传度子识譔让谥议五人亦无名调誠者识袭晋国公与新书同又考旧书宣宗纪十一年识徙节忠武亦书其爵为晋国公则表不载识名以为议袭封者误也】

裴识

裴谥

裴识

识字通理性敏悟凡经目未始忘推荫补京兆参军累擢大理少卿王师讨刘稹为供军使稹平改司农卿进湖南观察使入拜大理卿袭晋国公半封为泾原节度使时蕃酋尚恐热上三州七关列屯分守宣宗择名臣以识帅泾原毕誠帅邠宁李福帅夏州帝亲临遣识至治堡障整戎器开屯田初将士守边或积岁不得还识与立戍限满者代亲七十近戍由是人感悦加检校刑部尚书徙凤翔忠武天平邠宁灵武等军进检校尚书右仆射灵武地斥卤无井识誓神而凿之果得泉历六节度所莅皆有可述卒赠司空谥曰昭

裴谥

谥有文辞以荫累官考功员外郎宣宗访元和宰相子思度勋望故待谥有加为翰林学士累迁工部侍郎诏加承旨后为太子少师封河东郡公黄巢盗国迫以伪官不从遇害

钦定续通志卷二百六十四

●钦定续通志卷二百六十五 列传六十五

列传

唐【六十五】

○唐六十五

高崇文【承简】 伊慎

朱忠亮

刘昌裔

范希朝

王锸【稷】 孟元阳

王栖曜【茂元】

刘昌【士泾】 赵昌

李景略

任迪简

张万福

高固

【郝玘 史敬奉 野诗良辅】 李光进
乌重胤【石洪】 王沛【逢】 杨元卿【延宗】 曹华 高瑀
刘沔 石雄

高崇文

伊慎

朱忠亮

刘昌裔

范希朝

王锬

孟元阳

王栖曜

刘昌

赵昌

李景略

任迪简

张万福

高固

李光进

乌重胤

王沛

杨延宗

曹华

王逢

杨元卿

高瑀

刘沔

石雄

△高崇文

高崇文其先自渤海徙幽州七世不异居开元中再表其闾崇文性朴重寡言少籍平卢军贞元中从韩全义镇长武城治军有声累官金吾将军吐蕃三万寇宁州崇文率兵三千往救战佛堂原大破之封渤海郡王全义入朝留知行营节度后务迁长武城都知兵马使刘辟反宰相杜黄裳荐其才诏检校工部尚书左神策行营节度使俾统左右神策麟游奉天诸屯兵讨辟时显功宿将人人自谓当选及诏出皆大惊始

崇文选兵五千常若寇至至是卯漏受命辰巳出师器良械完无一不具过兴元士有折
逆旅匕箸者即斩以徇乃西自阆中出却剑门兵解梓
潼之围诏拜崇文东川节度使进薄鹿头城凡八战皆捷贼大震其将李文悦以兵三千
自归仇良辅举鹿头城二万众降遂趣成都辟走追禽
之槛送京师秋毫无犯斩其大将邢泚胁污者为条上全活之进检校司空西川节度副
大使南平郡王实封三百户崇文不通书厌案牍谘判
以为繁且蜀优富无所事请扞边自力乃诏同中书门下平章事邠宁庆节度使为京西
诸军都统居邠三年戎备整修卒年六十四赠司徒谥
曰威武会昌六年诏配享宪宗庙

高承简

高承简

子承简少事忠武军后更隶神策以崇文平蜀功除嘉王傅裴度征蔡奏署牙将蔡
平诏并上蔡郾城遂平西平四县【按旧书作上蔡
郾城遂平三县】为澶州拜承简刺史治郾城始开屯田列防庸濒澶绵地二百里无复
水败皆为腴田葺儒宫备俎豆岁时行礼野有菽实民
得以食将吏立石颂功迁邢州刺史观察府责赋尤急承简代下户数百输租迁宋州会
宣武将李■〈宀介〉反遣使责财于宋承简囚之前
后数辈辄系狱一日并山斩于牙门威震部中■〈宀介〉悉兵攻之宋有三城南城陷
承简保北两城数与贼确会徐州救至■〈宀介〉为
李质所执兵遂溃拜兖海沂密节度使迁义成军检校尚书左仆射【按旧书作右仆射】
入拜右金吾卫大将军复节度邠宁先是虜多以
盛秋犯边承简请屯邠州以制其侵属疾还朝道卒赠司空谥曰敬崇文孙骈自有传

△伊慎

伊慎字寡悔兖州人通春秋战国策天官五行书用善射为折冲都尉丧母将合葬
而不知父墓昼夜哭梦若有导者既发之旧志可按也
乃得葬江西节度路嗣恭讨哥舒晃以慎为先锋疾战斩晃授连州长史知团练副使三
迁江州别驾讨梁崇义也慎以江西牙兵属李希烈希
烈署汉南北兵马使不受独率所部破崇义于蛮水效俘三万襄汉平功多希烈爱其材
数馈遣欲縻止之卒以计免明年希烈果反嗣曹王皋
至鍾陵得而壮之拔为大将希烈恐为皋所任遗以七属甲诈为慎书行反闲帝遣使即
军中斩之皋表列其诬未报贼泝江徇地皋授慎兵劳
而遣与贼大战破之收黄梅次长平杀贼将斩级千余拔蔡山尤力遂下蕲州即拜刺史
封南兖郡王天子在梁州包佶转东南财粮次蕲口贼
遣骁将杜少诚以兵万人遏江道不得西慎选士七千列三屯相望偃旗以待少诚分围

之未合慎自中屯鼓之诸屯悉出奋击贼乱少诚走斩
别将许少华封其尸为京冢漕无留艰进围安州希烈之甥刘戒虚以兵八千来援慎逆
击于应山禽之示城下州开门降以功为安州刺史实
封百户攻隋州战厉乡斩首五千级喻降李惠登即荐惠登为刺史拜慎安黄州节度使
吴少诚反诏领步骑五千兼统荆南湖南江西兵当一
面遇贼于三州范营义阳战于申斩首数千加检校刑部尚书贞元末诏安黄为奉义军
即为奉义节度宪宗即位入朝拜尚书右仆射改金吾
卫大将军以钱三千万贻宦人求帅河中事暴贬右卫将军明年念旧劳复检校右仆射
兼右卫上将军卒赠太子太保谥曰壮缪干符中盗发
其墓赐绢二百修瘞云

△朱忠亮

朱忠亮字仁辅汴州浚仪人举明经不中往事昭义节度使薛嵩为裨将屯普润开
田峙粮以功擢太子宾客朱泚乱率麾下四十骑至奉
天封东阳郡王为定难功臣扈狩梁州为贼钞获系长安狱贼平李晟释之奏隶本军 【
按旧书李晟释之荐于浑瑊署定平镇都虞候此云
奏隶本军与旧书互异】 累迁定平军使宪宗立加御史大夫授泾原四镇节度使本名
士明至是赐今名泾俗旧多卖子忠亮以财赎免者前
后数百筑潘原城有劳改封丹阳卒赠尚书右仆射谥曰灵

△刘昌裔

刘昌裔字光后太原阳曲人少游三蜀杨惠琳乱昌裔说之惠琳顺命拜泸州刺史
署昌裔州佐惠琳死客河朔闲曲环方攻濮州表为判
官为环檄李纳割晓大谊环上其稟德宗异之环领陈许军又从府迁累进营田副使环
卒上官浚知后务吴少诚引兵薄城浚欲遁去昌裔止
曰受诏而守死其职也况士马完奋足支贼若坚壁不战七日贼气必衰我以全制之可
也况许诺贼攻堞坏不得修昌裔密造飞棚联栅即募
突将千人凿城以出击贼走之比还栅已立守陴遂安以功擢浚陈许节度使昌裔陈州
刺史韩全义败于澱水引军走陈求入保昌裔登陴揖
曰天子命君讨蔡何为来陈且贼不敢至我城下君其舍外无恐明日从十余骑持牛酒
抵全义营劳军全义不自意迎拜叹服改陈许行军司
马浚卒军中推昌裔有诏检校工部尚书代节度封彭城郡公元和八年大水坏庐舍溺
居人以检校尚书左仆射兼左龙武统军召还京师始
宪宗恶昌裔自立欲召之而重生变宰相李吉甫曰陛下乘人心愁苦可召也遂以韩皋
代之至长乐驿知帝意因称风眩卧第岁中卒赠潞州
大都督谥曰威

△范希朝

范希朝字致君河中虞乡人初从邠宁军为别将事节度使韩游瓌德宗在奉天以战守功累兼御史中丞治军整毅游瓌畏其才将伺隙杀之希朝惧奔凤翔帝闻召寘左神策军贞元四年以游瓌政无状使代之希朝曰始偪而来终代其任非所以防觊觎安反仄也固让左金吾卫将军张献甫军中惮献甫严以兵胁监军使请于帝必得希朝乃止诏拜宁州刺史邠宁节度副使俾佐献甫俄迁振武节度使部有党项室韦杂居暴掠放肆日入愿作谓之刮城门希朝度要害置屯保斥逻严密鄙民以安至小窃取亦杀无赦虜人惮伏贞元末请朝时诸镇不以事自述职者希朝而已帝悦拜右金吾卫大将军宪宗立检校尚书左仆射复为右金吾卫大将军俄检校司空出为朔方灵盐节度使迁河东率师讨王承宗败之木刀沟然老病不能有大功还朝改左龙武统军以太子太保致仕卒赠太子太师谥忠武改曰宣武

△王锬

王锬字昆吾【按宰相世系表锬字昭范】自言太原人始隶湖南团练府为裨将嗣曹王皋为团练使使锬诱降武冈叛将王国良以功擢邵州刺史皋节度江西李希烈南侵皋与锬兵三千使屯浔阳而皋全军临九江袭蕲州遂以众济表锬江州刺史兼御史中丞充都虞候皋为荆南节度使欲署府少尹而上佐鄙其人乃复檄都虞候从皋朝京师皋奏锬文用虽不足而它可试德宗擢为鸿臚少卿岁省冗费五十万缗擢容管经略使凡八年溪落安之迁岭南节度使广人与蛮杂处地征薄多牟利于市锬租其廛榷所入与常赋埒以为时进裒其余悉自入诸蕃舶至尽有其税于是财蓄不贖日十余艘载皆犀象珠琲与商贾杂出于境数年京师权家无不富锬之财召为刑部尚书淮南节度使杜佑数请代乃以锬检校兵部尚书为佑副厚事佑以悦之坐必就司马听事不数日遂代佑久之入拜尚书左仆射又检校司徒为河中节度使进兼太子太傅徙河东河东自范希朝讨镇无功兵方三万骑六百府库残耗锬能补充畜费未几兵至五万骑五千财用丰余除检校司空同中书门下平章事卒赠太尉谥曰魏

王稷

王稷

子稷历鸿臚少卿锬在藩稷常留京师视势高下轻重以纳贖焉长庆二年用稷为德州刺史悉金宝媵侍以行节度使李全略利其货因军乱杀稷纳其女为媵开成中沧州节度使刘约奏稷子叔泰生五岁值全略乱为郡人

匿养得不死送叔泰京师文宗悯焉诏授九品官使奉
罽

△孟元阳

孟元阳史失其何所人起陈许军中以严整称曲环领节度使时已为大将使董作
西华屯盛夏属而立乎涂役休乃就舍故田辄岁稔而
军食常足环卒吴少诚来寇元阳婴城守围甚急然终不能傅城韩全义败五楼列将多
私去独元阳与神策将苏元策宣州将王干以所部屯
激水破贼二千诏拜陈州刺史宪宗立迁河阳节度使五年检校尚书右仆射徙帅昭义
军入为右羽林统军封赵国公改右金吾大将军复拜
统军卒赠扬州大都督

△王栖曜

王栖曜濮州濮阳人安禄山反尚衡哀义兵讨贼署牙将徇兖郛诸县下之进牙前
总管贼将邢超然守曹州乘城指顾栖曜曰彼可取也
一矢殒之遂拔曹州累授试金吾卫将军袁晁乱浙东御史中丞袁傒讨之表为偏将与
贼战日十余遇生禽晁收州县十六授常州别驾浙西
都知兵马使时江介未定诏内常侍马日新以汴滑军五千镇之中人暴横贼萧廷兰悉
众怨逐日新劫其众栖曜方游弈近郊贼胁取之与围
苏州栖曜乘贼怠挺身登城率城中兵出战贼众大败迁试金吾大将军李灵耀反汴州
浙西观察使李满使提兵四千为河南犄角有功李希
烈陷汴州乘胜东略次宁陵将袭宋州浙西节度使韩滉使栖曜以强弩三千涉水夜入
宁陵希烈不之知晨朝矢集帐前惊曰江淮弩已入矣
遂不敢东贞元初拜左龙武大将军出为鄜坊节度使十九年卒赠尚书右仆射谥曰成
王茂元

王茂元

子茂元少好学德宗时上书自荐擢试校书郎改太子赞善大夫吕元膺留守东都
署防御判官淄青留邸卒谋乱元膺率兵围之士无敢
先者茂元取一人斩之众乃进贼遂出奔累迁岭南节度使蛮落安之家积财交煽权贵
郑注用事迁泾原节度使注败悉出家货饷两军得不
诛封濮阳郡侯召为将作监领陈许节度使又徙河阳卒赠司徒谥曰威

△刘昌

刘昌字公明汴州开封人善骑射天宝末从河南防御使张介然讨安禄山授易州
遂城府左果毅史朝义兵围宋州城中食尽且降昌说
刺史李岑曰李光弼在河阳江淮足兵势必来援今廩曲尚多若屑以食可支二十日则
救至岑听之昌乃被铠登城以忠义谕贼贼畏不敢攻

俄而光弼援军至贼夜溃光弼闻其谋召置军中将用之会光弼卒还为宋州牙门将李灵耀以汴州反刺史李僧惠欲应之昌请见陈逆顺计且泣僧惠悟即驰奏请自将讨贼故灵耀失助不得逞汴州平李忠臣疾僧惠攻杀之昌遁去刘玄佐领宣武节度使擢昌左厢兵马使李纳反以偏师收考城充行营诸军马步都虞候玄佐攻濮州以昌摄刺史以破李希烈功加检校工部尚书累实封一百户贞元三年入朝诏以宣武兵八千北出五原士卒有逗留沮事者斩三百人乃行举军慑伏寻授京西行营节度使岁余改四镇北庭行营兼泾原节度七年城平凉开地二百里扼弹箏峡又西筑保定扞青石岭凡七城二堡旬日就以功检校尚书右仆射累封南川郡王十四年归化堡军乱逐大将张国诚诏昌经略昌入堡诛数百人复使国诚统之昌在边凡十五年身率士垦田三年而军有羨食兵械锐新边障妥安及感疾诏赴京师未行卒年六十五赠司空

刘士泾

刘士泾

子士泾尚云安公主拜驸马都尉累迁少卿家积财内结权近善胡琴故得幸于贵人后迁太仆卿给事中韦宏景等封还制书以士泾交通近幸不当居九卿宪宗曰昌有功于边士泾又尚主官少卿已十余年制书宜下宏景等乃奉诏

△赵昌

赵昌字洪祚天水人始为昭义李承昭节度府属累迁虔州刺史安南酋獠杜英翰叛都护高正平以忧死拜昌安南都护夷落向化毋敢桀居十年足疾请还朝以兵部郎中裴泰代之入为国子祭酒未几州将逐泰德宗召昌问状时年踰七十占对精明帝奇之复拜安南都护诏书至人相贺叛兵即定宪宗初立检校户部尚书迁岭南节度使降辑陬荒以劳徙节荆南召入再迁工部尚书兼大理卿出为华州刺史迁太子少保卒年八十五赠扬州大都督谥曰成

△李景略

李景略幽州良乡人父承悦檀州刺史密云军使景略以荫补幽州府功曹参军大历末客河中阖门读书李怀光为朔方节度使署巡官迁大理司直怀光屯咸阳将袭东渭桥召幕府计议景略曰杀朱泚还军诸道杖策诣行在此转祸为福也不听既出军门恸哭曰岂意此军乃陷不义乎遂遁归灵武节度使杜希全表置于府累转侍御史丰州刺史丰州当回纥通道前刺史软柔每虏使至与抗礼景略以计柔之自此

回纥使至者皆拜于庭威名显闻希全忌之诬奏贬袁州司马希全死迁左羽林将军对德宗延英殿论奏衍衍有大臣风会河东节度使李说病以景略为太原少尹行军司马说自以威望不及景略略中尉窦文场谋毁去之岁余塞下传言回纥将南寇文场方侍帝傍即言丰州当得良将且举景略乃拜丰州刺史天德军西受降城都防御使穷塞苦寒地堦鹵边户劳悴景略至节用约已与士同甘蓼凿咸应永清二渠溉田数百顷储稟器械毕具威令肃然声雄北疆回纥畏之卒于屯年五十五天下惜用景略才有所未尽赠工部尚书

△任迪简

任迪简京兆万年人擢进士第天德李景略表佐其军尝宴客而行酒者误进酖景略用法严迪简不忍其死饮为酖徐以它辞请易之归略血不以闻军中悦其长者【谨按通鉴辑览御批为人隐过固长者之事若以酖行酒强饮以冀遁人之罪且饮酖亦未必至呕血迪简特藉此要结众心侨情饰伪诸军士遂堕其术中观他日之推奉代帅肺肝如揭矣】举军请为帅乃授丰州刺史天德军使由殿中侍御史授兼大夫散骑常侍入为太常少卿太子左庶子张茂昭以易定归擢迪简行军司马代之大将杨伯玉据牙不纳众杀之别将张佐元复叛迪简斩以徇乃入以检校工部尚书为节度使承茂昭奢纵后公私屈黷欲飨士无所给至与下同粝食身居戟户踰月军中感其公请安卧内迪简乃许三年上下完充以疾入除工部侍郎至京竟不能朝谢改太子宾客卒赠刑部尚书谥曰襄

△张万福

张万福魏州元城人三世明经止县令州佐万福以业儒不显乃学骑射从王斛斯以别校征辽东有功李峘斩刘展署为部将斩首万级累摄寿州刺史舒庐寿都团练使真拜刺史兼淮南节度副使而节度崔圆忌之失刺史改鸿胪卿使将千人镇寿州时许杲以平庐行军司马将卒三千驻濠州阴窥淮南圆使万福摄濠州刺史杲闻即移戍当涂贼陈庄陷舒州圆又令摄舒州刺史督淮南盗贼穷破株党大历三年召见代宗曰欲一识卿面且将以许杲累卿万福辞谢因前曰陛下以一许杲召臣如河北诸将叛欲属何人帝笑曰始为我了杲事且当大用乃拜和州刺史兼行营防御使督盗淮南万福至州杲惧徙屯上元过楚州大掠为其将康自劝所逐自劝循淮钞而东万福倍道追杀之免者十三尽还所剽于民帝下诏褒美赐具衣宫锦十双寻以利州刺史镇咸阳且留宿卫李正己反屯兵埧桥江淮漕舡积千余不敢踰涡口德宗乃

以万福为濠州刺史万福驰至涡口驻马于岸悉发漕舡相衔进贼兵倚岸熟视不敢动
改泗州刺史魏州饥父子相卖万福曰魏州吾乡瑞安
忍其困令兄子将米百车饷之赎魏人自卖者给资遣之为杜亚所忌召拜右金吾将军
及见帝惊曰亚乃言尔昏耄何邪诏图形凌烟阁数赐
与并敕度支籍口畜给其费阳城等诣延英论延龄事伏合不去帝震怒左右惧不测万
福大言曰国有直臣天下无虑矣吾年八十与见盛事
徧揖城等劳之天下益重其名以工部尚书致仕卒年九十

△高固

高固不知何许人或言四世祖侃永徽中为北庭安抚使禽车鼻可汗以功为安东
都护固生微贱为家所卖转为浑瑊童奴字黄岑性敏
慧有旅力善骑射能读左氏春秋瑊爱养之从瑊屯朔方德宗在奉天固仍从瑊贼突入
东壅门固引锐士长刀杀贼数十人曳车塞隘贼不能
入封渤海郡王李怀光反使邠宁留后张昕将兵万人先趣河中固在行乃伺闲入帐下
斩昕首以徇拜检校右散骑常侍前军兵马使贞元十
七年邠宁节度使杨朝晟卒诏将并邠宁朔方为一军议以李朝案为节度刘南金副之
以询邠军咸曰如诏数日复劫固为帅固曰然能听吾
言乃可众唯唯固徇曰毋杀人毋肆掠三军皆顺悦帝亦念固功乃拜邠宁节度使固本
宿将且宽厚人皆安之然久在散位数为侪类轻笑及
受命众多惧固一释不问宪宗时检校尚书右仆射入为右羽林统军卒赠陕州大都督
郝玘

史敬奉 【野诗良辅】

郝玘

郝玘不记其乡里贞元中为临泾镇将尝从数百骑出野还说节度使马璘曰临泾
扼洛口其川饶衍利畜牧其西走戎道旷数百里皆流
沙无水草愿城之为休养便地玘出或谓璘曰玘言信然虽然公所以蒙恩大幸以边防
未固也上心日夜念此故厚于公今若用玘言则边已
安尚何事为璘不听及段佑代节度玘又说佑筑临泾以折虜势佑请于朝卒诏城临泾
为行原州以玘为刺史戍之自是虜不敢过临泾迁检
校左散骑常侍泾原行营节度使封保定郡王赞普常等玘身铸金象令于国曰得生玘
者以金玘偿之朝廷畏失名将徙为庆州刺史卒佑本
郭子仪牙将征伐有功贞元末为泾原节度使虜畏惮之终右神策大将军

史敬奉 【野诗良辅】

史敬奉者灵州人事朔方军为牙将元和中吐蕃数犯塞十四年敬奉白节度使杜
叔良请兵三千赍一月粮深入虜地分贼势叔良以二

千兵予之行十余日不闻问皆谓已歿敬奉乃由闲道绕出虜后部落奔骇因大破之驱其余众于瓠芦河获马牛杂畜迨万数赐实封五十户敬奉与凤翔将野诗良辅及郝玘皆以名雄边良辅者后为陇州刺史朝廷遣使至吐蕃虜辄言唐家称和好岂妄邪不尔安得任良辅为陇州刺史

△李光进

李光进其先河曲诸部姓阿跌氏贞观中内属以其地为鸡田州世袭刺史隶朔方军光进与弟光颜少依舍利葛旃葛旃妻其女兄也初葛旃杀仆固瑒归河东辛云京遂与光进俱家太原以沈果称从马燧救临洺战洹水有功历前后军牙门将兼御史大夫代州刺史元和时检校工部尚书为振武节度使赐姓以光宠之【按旧书本传光进从郭子仪收两京有功肃宗纪至德二载封李光进为范阳郡公考光进卒于宪宗元和十年年六十五追溯至至德中仅五六岁岂能即有战功又考光进本河曲部落稽阿跌之族至元和六年始赐姓李氏是六年以前不得称李光进也旧书李光弼传云与弟光进在京师并开甲第则至德中封范阳郡公者乃光弼之弟传中以同名致误耳应以新书为正】别诏光颜拜洺州刺史弟兄荣冠当时光进徙灵武卒年六十五赠尚书左仆射有至性居母丧三年不归寝光颜先娶而母委以家事及光进娶母已亡弟妇籍货贮纳管钥于姒光进命反之曰妇逮事姑且尝命主家事不可改因相持泣乃如初光颜字光远从河东军为裨将节度使马燧谓曰若有奇相终必光大解所佩剑赠之讨李怀光杨惠琳战有功从高崇文平剑南数搴旗陷军出入若神益知名进兼御史大夫历代洺二州刺史元和九年讨蔡以陈州刺史充忠武军都知兵马使始踰月擢本军节度使诏以其军当一面光颜乃壁澉水明年大破贼时曲始裴度宣慰诸军还为宪宗言光颜勇而义必立功俄又与乌重胤破贼小澉河十一年拔凌云栅捷奏入帝大悦厚赉其使进检校尚书左仆射时韩宏都统诸军素蹇纵阴挟贼自重且恶光颜忠力思有以挠之乃饰名姝教歌舞费百巨万遣使以遗光颜光颜约旦日纳焉乃大合将校置酒引使者以待姝至秀曼都雅一军带视光颜徐曰我去室家久以为公忧诚无以报德然战士皆弃妻子蹈白刃奈何独以女色为乐为我谢公天子于光颜恩厚誓不与贼同生指心曰虽死不贰因呜咽泣下将卒数万皆感激流涕乃厚赂使者还之于是士气益励裴度筑赫连城于迎口率轻骑观之贼以奇兵自五沟至大呼薄战城为震坏度危甚光颜力战却之先是光颜策贼必至密遣田布伏精骑沟下扼其归贼

败弃骑去颠死沟中者千余由是贼悉锐士当光颜而李愬得乘虚入蔡矣董重质弃洄曲军降愬光颜跃马入贼营大呼众万余人投甲请命
贼平加检校司空入朝召对麟德殿赐与蕃渥命宴其第归刍米二十车帝讨李师道徙义成节度使不三旬再败贼濮阳拔斗门斩数千级吐蕃入寇徙邠宁军时虜毁盐州城使光颜复城之穆宗立召还赐开化里第加同中书门下平章事俄徙凤翔帝将伐镇州复还忠武又兼深冀行营节度使提军深入而馈运不至有诏以沧景德棣州益之光颜以宰相处置失宜辞兼领亦会赦王廷凑复所治李■〈宀介〉乱汴州诏总军出讨朝受命暮即戎翌日拔尉氏与汴人战琵琶沟未阵薄之贼走■〈宀介〉平进兼侍中敬宗初真拜司徒河东节度使宝历二年卒年六十六赠太尉谥曰忠

△乌重胤

乌重胤字保君河东将承玘子也少为潞牙将兼左司马节度使卢从史奉诏讨王承宗阴与贼通吐突承璀将图之以告重胤乃缚从史帐下士持兵合讐重胤叱曰天子有命从者赏违者斩士敛手还部无敢动宪宗嘉其功擢河阳节度使封张掖郡公帝讨淮蔡诏重胤以兵压贼境割汝州隶其军与李光颜相犄角大小百余战凡三年贼平再迁检校司空进邠国公徙横海军建言河朔能拒朝命者盖刺史失权镇将领军能作威福也使刺史得职大帅虽有禄山思明之奸能据一州为叛哉臣所管三州辄还刺史职各主其兵因请废景州法制修立时以为宜长庆末以检校司徒同中书门下平章事为山南西道节度使召至京师改节天平事未几卒年六十七赠太尉谥懿穆重胤待官属有礼当时有名士如温造石洪皆在幕府既歿士二十余人刲股以祭子汉宏嗣爵居母丧夺为左领军卫将军固辞帝嘉许之

石洪

石洪

石洪者字浚川其先姓乌石兰后独以为氏洪有至行举明经为黄州录事参军罢归东都十余年隐居不出公卿数荐皆不答重胤镇河阳乃具书币邀辟洪亦谓重胤知己故欣然戒行重胤喜其至礼之后诏书召为昭应尉集贤校理又有李珙者世儒家珙独尚材武有崖岸尝至泽潞见李抱真欲署牙将闻其使酒不用都将王虔休曰珙奇士不能用即杀之无为它人得也抱真不纳虔休代节度引为将重胤禽从史珙将救之既闻谋出朝廷乃止重胤爱其才讨淮西时表为行营都将终右武卫上将军

△王沛

王沛许州许昌人少勇决为节度使上官浼所器妻以女署牙门将浼卒它壻田僞
胁浼子袭领其军谋杀监军沛知其计密告之支党悉
禽德宗嘉美诏拜御史中丞李光颜讨吴元济奇沛风檠署行营兵马使使将劲兵别屯
数破贼有功蔡平加御史大夫复从光颜定淄青及光
颜镇邠诏分许兵往戍沛又为都将救盐州败顷屯筑高垣牢键闭寇至耕者保垣以守
居六年泾人德之徙节河阳何进滔乱魏博元卿请自
赍三月粮举军出讨文宗嘉美加检校司空献粟二十万石助天子经费进光禄大夫徙
宣武军太和七年以疾归东都授太子太保卒赠司徒

△杨延宗

子延宗开成中为磁州刺史与河阳兵谋逐帅自立事败诏以元卿尝毁家归忠全
其宗杖死延宗于京兆府赐还田产

△曹华

曹华宋州楚邱人始从宣武军缚乱将李乃送阙下节度使董晋署为牙将宪宗初
累拜检校右散骑常侍召至京师赐矛甲缯锦【旧
书云德宗特赐旗甲此以为宪宗初未知孰是】还屯拜宁州刺史未行属吴元济不受
命诏河阳怀汝节度使乌重胤讨之重胤请华自副战
青陵城贼大奔拔凌云栅贼平以功授棣州刺史封陈留郡王擢横海节度副使时朝廷
披郛为三镇其明年兖海军乱杀观察使王遂诏华往
代视事三日合军大飨幕甲士于庑酒中令曰天子以郛人参别而戍有转徙劳欲厚赏
之请郛人右州兵左既而出州兵乃阖门大言曰天子
有命诛杀世蕃以功擢宁州刺史徙陈州李■〈宀介〉之乱以忠武节度副使率师讨
■〈宀介〉■〈宀介〉平加检校右散骑常侍进拜
兖海沂密节度使军政大治以检校工部尚书徙忠武太和元年卒赠尚书右仆射

△王逢

子逢从父征伐累功署忠武部知兵马使太和中入为诸卫将军从刘沔石雄破回
鹘于天德有士二千人未尝战欲冒尝赐逢不与或为
请之答曰士会死取赏若无功而赏何哉武宗以逢用法严使宰相李德裕让之逢曰战
者前蹈白刃不以法人孰用命后亦至忠武节度使云

△杨元卿

杨元卿史失其何所人吴少诚跋扈蔡州元卿以褐衣见署剧县俄召入幕府又事
少阳每言君臣大义以动其心及元济擅袭节度元卿
以奏事至阙具条贼虚实请敕诸道执元济诛之元济觉乃杀其妻并四子宪宗拜元卿
岳王府司马寻授光禄少卿蔡平超拜左金吾卫将军
劝帝取淮西怪珍宝帝曰我讨贼为人除害贼平我求得矣焉用宝止勿复言出为汾

州刺史复入为金吾长庆初擢泾原渭节度使元卿垦
发屯田五千帅者甲起于幕环之凡斩千二百人海沂之人重足屏息华恶沂地徧请治
兗许之自李正己盗齐鲁俗益污罄华下令曰邹鲁礼
义乡不可忘本乃身见儒士春秋祀孔子祠立学官讲诵斥家货佐贍给人乃知教成就
诸生仕诸朝镇人害田弘正华亟请以本军进讨不从
进华检校工部尚书就充节度使李■〈宀介〉叛以兵取宋州华不得命以兵逆击破
之■〈宀介〉平检校尚书右仆射徙镇义成军卒年
六十九赠左仆射

△高瑀

高瑀冀州藁人少沈邃喜言兵释褐右金吾胄曹参军累迁陈蔡二州刺史入为太
仆卿忠武节度使王沛死乃加瑀检校左散骑常侍领
忠武节度使州比水旱无年瑀相地宜筑堤庸百八十里时其鍾泄民赖不饥再加检校
尚书右仆射六年徙节武宁军以刑部尚书召辞疾拜
太子少傅不阅月复诏节度忠武卒于镇赠司空

△刘沔

刘沔字子汪徐州彭城人父廷珍以羽林军扈德宗奉天以战功官左骑卫大将军
东阳郡王沔少孤客振武节度使范希朝署牙将军中
大会沔捉刀立堂下希朝奇之召谓曰后曰必处吾坐希朝卒入为神策将太和末累迁
大将军擢泾原节度使徙振武【按旧书载刘沔少
事李光颜为帐中亲将元和末光颜讨吴元济常用沔为前锋蔡将有董重质者守洄曲
其部下乘骡即战号骡子军最为劲悍官军常警备之
沔骁锐善战每与骡军接战必冒刃陷坚俘馘而还故忠武一军破蔡功第一淮蔡平随
光颜入朝宪宗留宿卫厯三将军厯盐州刺史天德军
防御使与此所载大异未详孰是】开成三年突厥劫营田沔发吐浑契苾沙陀部万人
击之贼一辔无返者悉颁所获马羊于战卒筑都护府
西北四垒进检校户部尚书武宗立迁检校尚书左仆射回鹘寇天德诏以兵据云伽关
虜引去会昌二年又掠太原振武天子使兵部郎中李
拭调兵食因视诸将能否拭独称沔乃拜河东节度兼招抚回鹘进屯雁门关虜寇云州
沔击之斩七裨将败其众以还太和公主功加检校司
空议者恨其薄又进金紫光禄大夫赐一子官刘稹阻命诏沔南讨屯榆社沔素与张仲
武不协时方追幽州兵故徙义成会王宰逗留宰相李
德裕表沔镇河阳以滑兵二千壁万吾居宰肘腋下激之俾出军稹平进检校司徒徙忠
武节度使以病改太子少保不任谒拜太子太保致仕
卒年六十五赠司徒

△石雄

石雄徐州人少为牙校敢毅善战气盖军中王智兴讨李同捷收棣州使雄先驱度河鼓行无前初徐军恶智兴苛酷谋逐之而立雄智兴惧变因立功奏除州刺史诏以为壁州刺史智兴由是杀雄素所善百余人诬雄阴结士摇乱请以军法论文宗素知其能不杀流白州徙为陈州长史党项扰河西召雄隶振武刘沔军破羌有劳帝难智兴久不擢会昌初回鹘入寇连年掠云朔牙五原塞下诏雄为天德防御副使兼朔州刺史佐刘沔屯云州沔召雄谋曰虜离散当扫除久矣国家以公主故不欲亟攻我若径趋其牙彼不及备必弃公主走我当迎主归有如不捷吾则死之雄曰诺即选沙陀李国昌及契苾拓拔杂虜三千骑夜发马邑旦登振武城望之见鬪车十余乘从者朱碧衣谍者曰公主帐也雄潜使喻之曰天子取公主兵合第无动雄穴城夜出纵牛马鼓噪直捣乌介帐可汗大骇单骑走追至杀胡山斩首万级获马牛羊不费迎公主还进丰州防御使武宁李彦佐讨刘稹逗留以雄为晋绛行营诸军副使助彦佐雄受命即勒兵越乌岭破贼五壁斩获千计贼大震就拜行营节度使代彦佐徙河中稹危蹙其大将郭谊密献款请斩稹首自归众疑其诈雄大言曰稹之叛谊为谋主今欲杀稹乃谊自谋又何疑雄以七千人径薄潞受谊降进检校兵部尚书徙河阳 【按通鉴郭谊杀稹函首遣使降于王宰宰以状闻乃诏石雄将七千人入潞州以应谊言与此互异考旧书武宗纪郭谊使人至王宰军请杀稹自赎王宰以闻乃诏石雄率军七千人入潞州谊斩稹以迎雄通鉴以杀稹在乞降之时而新书脱去诏雄一节俱于事实未合】 宣宗立徙镇凤翔雄素为李德裕识拔会德裕罢宰相因代归拜神武统军卒

钦定续通志卷二百六十五

●钦定续通志卷二百六十六 列传六十六

列传

唐 【六十六】

○唐六十六

窦羣 李逢吉 刘栖楚 张又新 元稹 牛僧孺

【蔚 徽 丛】 李宗闵 杨嗣复 【授

貶损】 杨虞卿 【汉公汝士】 张宿 熊望 栢耆

窦羣

李逢吉

刘栖楚

张又新

元稹

牛僧孺

李宗闵

杨嗣复

杨虞卿

张宿

熊望

栢耆

△窦羣

窦羣字丹列京兆金城人【按旧书作扶风平陵人】父叔尚代宗时位左拾遗羣兄弟皆擢进士第独羣以处士客顺陵母卒庐墓坎终丧从卢庇传啖助春秋学著书数十篇以韦夏卿荐德宗擢为左拾遗王叔文党盛雅不喜羣羣亦悻悻不肯附欲逐之韦执谊不可乃止宪宗立转膳部员外郎兼侍御史知杂事出为唐州刺史节度使于頔闻其名与语奇之表以自副武元衡李吉甫皆所厚善故召拜吏部郎中元衡辅政荐羣代为中丞羣引吕温羊士谔为御史吉甫以二人躁险持不可羣仗很反怨吉甫吉甫节度淮南羣谓失恩因挤之陈登者善术夜过吉甫家羣即捕登掠考上言吉甫阴事宪宗面覆登得其情大怒将诛羣吉甫为救解乃免出为湖南观察使改黔中会水坏城郭调溪洞羣蛮筑作因是羣蛮乱贬开州刺史稍迁容管经略使召还卒于行年五十五【按旧书卒年五十】赠左散骑常侍兄常牟弟庠巩皆为郎工词章为联珠集行于时

△李逢吉

李逢吉字虚舟系出陇西举明经又擢进士第范希朝表为振武掌书记荐之德宗拜左拾遗宪宗时迁给事中皇太子侍读改中书舍人知礼部贡举未已事拜门下侍郎同中书门下平章事诏礼部尚书王播署榜逢吉性忌刻险谲多端及得位务偿好恶裴度讨淮西逢吉虑成功密图沮止趣和议者请罢诸道兵宪宗知而恶之出为剑南东川节度使穆宗即位徙山南东道缘讲侍恩阴结近幸长庆二年召入为兵部尚书时度与元稹知政度尝条稹愆妄逢吉以为其隙易乘遂并中之遣人上变言和王傅于方结客欲为稹刺度帝命尚书左仆射韩皋给事中郑覃与逢吉参鞫方无状稹度坐是皆罢逢吉代为门下侍郎平章事进尚书右仆射帝暴疾中外阻遏逢吉因中人梁守谦刘弘规王守澄

议请立景王为皇太子帝不能言颌之而已明日下诏皇太子遂定郑注得幸于王守澄逢吉遣从子训赂注结守澄为奥援【按训传逢吉使训赂注守澄自在太和六七年闲而此传次之武昭狱前与训传矛盾旧书亦然】自是肆志无所惮其党有张又新李绩张权舆刘栖楚李虞程昔范姜洽及训八人而傅会者又八人皆任要剧故号八关十六子有所求请先赂关子后达于逢吉无不得所欲未几封凉国公敬宗新立度求入覲逢吉不自安张权舆为作讖言以恨度而韦处厚亟为帝言之计不行于是兴武昭狱以止度入武昭者度讨蔡时所遣说吴元济者也除石州刺史罢归不得用怨望与太学博士李涉金吾兵曹参军茅汇居长安中以气侠相许逢吉与李程同执政不叶程族人仍叔谓昭曰丞相欲用君顾逢吉持不可昭愈愤酒所语其友刘审欲刺逢吉审窃语权舆逢吉因汇召见昭厚相语纳忿隙得解及是昭汇皆下狱命御史中丞王播按之训讽汇使诬昭与李程同谋不然且死汇不可曰诬人以自勉不为也狱成昭榜死汇流崖州涉康州仍叔贬道州司马训流象州擢审长寿主簿而逢吉谋益露天子知度忠卒相之逢吉于是寢竦以检校司空平章事为山南东道节度使久乃徙宣武以太子太师为东都留守及训用事召拜尚书左仆射足病不能朝以司徒致仕卒年七十八赠太尉谥曰成无子以从弟子植嗣

△刘栖楚

刘栖楚其出寒鄙为镇州小史王承宗奇之荐于李逢吉繇邓州司仓参军擢右拾遗逢吉之罢裴度逐李绅皆嗾而为奸者敬宗立视朝常宴数游畋失德栖楚叩头极谏血被面李逢吉传诏毋叩头待诏旨栖楚捧首立帝动容扬袂使去栖楚曰不听臣言臣请死于此有诏慰谕乃出迁起居郎辞疾归洛后谏官对延英帝问向延争者在邪以谏议大夫召未几宣授刑部侍郎故事侍郎无宣授者逢吉喜助已故不次任之数月改京兆尹峻诛罚不避权豪先是诸恶少窜名北军凌藉衣冠有罪则逃军中无敢捕栖楚一切穷治不阅旬宿奸老蠹为敛迹一日军士乘醉有所凌突诸少年从旁噪曰痴男子不记头上尹邪然其性诡激敢为轻行乘险抵巇若无顾藉内实恃权怙宠以干进诣宰相厉色慢辞韦处厚恶之出为桂管观察使卒赠左散骑常侍

△张又新

张又新字孔昭工部侍郎荐之子元和中及进士高第历左右补阙性倾邪李逢吉用事恶李绅冀得其罪求中朝凶果敢言者厚之以危中绅又新与拾遗李续刘栖楚等为逢吉搏吠所憎故有八关十六子之目敬宗立绅贬

端州司马朝臣过宰相署阁者曰止宰相方与补阙语
姑伺之及又新出流汗揖百官曰端溪之事窃不敢让人皆辟易畏之寻转祠部员外郎
及逢吉罢领山南东道节度表又新为行军司马坐田
伾事贬汀州刺史李训有宠又新复见用迁刑部郎中为申州刺史训死复坐贬终左司
郎中又新善文辞再以谄附败丧其家声云

△元稹

元稹字微之河南人六代祖岩为隋兵部尚书稹幼孤母郑贤而文亲授书传九岁
工属文十五擢明经既以判入等补校书郎元和元年
举制科对策第一拜左拾遗性明锐遇事辄举始王叔文王伾蒙幸太子宫而挠国政稹
谓宜选正人辅导因条上十事一教太子正邦本二封
诸王固磐石三出宫人四嫁宗女五时召宰相讲庶政六次对羣臣广聪明七复正衙奏
事八许方幅纠弹九禁非时贡献十省出入畋游又陈
西北边事宪宗悦召问得失当路者恶之出为河南尉以母丧解服除拜监察御史按狱
东川因劾奏节度使严砺违诏过赋数百万没入涂山
甫等八十余家田产奴婢时砺已死七刺史皆夺俸砺党怒俄分司东都时浙西观察使
韩皋杖安吉令孙灏数日死武宁王绍护送监军孟升
丧乘驿内丧邮中吏不敢止内园擅系人踰年台不及知河南尹诬杀诸生尹太阶飞龙
使诱亡命奴为养子田季安盗取洛阳衣冠女汴州没
入死贾钱千万凡十余事悉论奏会河南尹房式坐罪稹举劾按故事追摄移书停务诏
薄式罪召稹还次敷水驿中人仇士良 【按旧书作
内官刘士元未知孰是】 夜至稹不让中人怒击稹败面宰相以稹年少轻树威失宪臣
体贬江陵士曹参军而李绛崔羣白居易皆论其枉久
乃徙通州司马改虢州长史元和末召拜膳部员外郎稹尤长于诗与居易名相埒天下
传讽号元和体往往播乐府穆宗在东宫妃嫔近习皆
诵之宫中呼元才子稹之谪江陵善监军崔潭峻长庆初潭峻方亲幸以稹歌词数十
百篇奏御帝大悦即擢祠部郎中知制诰变诏书体务纯
厚明切盛传一时然其进非公议为士类訾薄俄迁中书舍人翰林承旨学士数召入礼
遇益厚自谓得言天下事中人争与稹交魏弘简在枢
密尤相善裴度出屯镇州有所论奏共沮却之度三上疏劾弘简稹倾乱国政陛下欲平
贼当先清朝廷帝迫羣议乃罢弘简而出稹为工部侍
郎然眷倚不衰未几进同中书门下平章事稹思立奇节报天子以厌人心时王廷凑方
围牛元翼于深州稹所善于方言王昭于友明 【按
于友明旧书本传及稹至同州谢表皆作王友明】 皆豪士雅游燕赵闲能得贼要领可
使反闲而出元翼愿以家货办行得兵部虚告二十以

便宜募士稹然之李逢吉知其谋阴令李赏誅裴度曰于方为稹结客将刺公度隐不发神策军中尉以闻诏韩皋郑覃及逢吉杂治无刺度状而方计暴闻遂与度偕罢宰相出为同州刺史谏官争言度不当免而黜稹轻帝独怜稹但削长春宫使再替徙浙东观察使太和三年召为尚书左丞务振纲纪出郎官尤无状者七人然稹素无检望轻不为公议所右王播卒谋复辅政甚力讫不遂俄拜武昌节度使卒年五十三赠尚书右仆射

△牛僧孺

牛僧孺字思黯隋仆射奇章公弘之裔工属文第进士元和初以贤良方正对策与李宗闵皇甫湜俱第一条指失政其言鲠讦不避宰相宰相怒故杨于陵郑敬韦贯之李益等坐考非其宜皆调去僧孺调伊关尉改河南迁监察御史累进考功员外郎集贤殿直学士穆宗初以库部郎中知制诰徙御史中丞按治不法内外澄肃宿州刺史李直臣坐赇当死赂宦侍为助欲贷而用之僧孺持不可乃止赐金紫服以户部侍郎同中书门下平章事始韩弘入朝其子公武用财赂权贵杜塞言者俄而弘公武卒孙弱不能事帝遣使者至其家悉收费簿校计出入所以饷中朝臣者皆在至僧孺独注其左曰某月日送钱千万不纳帝善之谓左右曰吾不谬知人繇是遂以相寻迁中书侍郎敬宗立进封奇章郡公是时政出近幸僧孺数表去位帝乃于鄂州置武昌军授武昌节度使同平章事鄂城土恶亟圯岁增筑僧孺陶甃以城五年毕鄂人无复岁费文宗立李宗闵当国屡称僧孺贤不宜弃外复以兵部尚书平章事幽州乱杨志诚逐李载义帝召宰相问计僧孺曰第付以节使扞奚契丹彼且自力不足以逆顺治也帝因遣使慰抚之进门下侍郎弘文馆大学士是时吐蕃请和约弛兵而大酋悉怛谋举维州入之剑南于是李德裕上言韦皋经略西川至死恨不能致今以生羌二千人烧十三桥捣虏之虚可以得志帝使羣臣大议请如德裕策僧孺持不可遂诏返降者时皆谓僧孺挟素怨横议沮解之帝亦以为不直会中尉王守澄引纤人窃议朝政它日延英召见宰相曰公等有意于太平乎何道以致之僧孺曰臣待罪宰相不能康济然太平亦无象今四夷不内扰百姓安生业私室无强家上不壅蔽下不怨讟虽未及至盛亦足为治矣而更求太平非臣所及退谓它宰相曰上责成如是吾可久处此耶固请罢乃检校尚书左仆射平章事为淮南节度副大使天子既急于治故李训等投隙得售其妄开成初表解剧镇以检校司空为东都留守三年召为尚书左仆射以足疾不任谒检校司空平章事为山南东道节度使会昌元

年汉水溢坏城郭坐不谨防下迁太子少保进少师明年以太子太傅留守东都刘稹诛事连僧孺武宗怒黜为太子少保分司东都累贬循州

长史宣宗立徙衡汝二州还为太子少师卒赠太尉年六十九谥曰文简诸子蔚丛最显

牛蔚

牛徽

牛丛

牛蔚

蔚字大章少擢明经又第进士繇监察御史为右补阙大中初屡条切政宣宗喜曰牛氏果有子差慰人意出为金州刺史累迁吏部郎中

失权幸意贬国子博士分司东都复以吏部召兼史馆修撰咸通中进至户部侍郎袭奇章侯坐累免未一岁复官久之检校兵部尚书山南西

道节度使在镇三年徐州盗起神策两中尉讽诸藩悉财助军蔚索府帛三万以献中人嫌其吝用吴行鲁代还及黄巢入京师遁山南故吏民

喜蔚至争迎侯因请老以尚书右仆射致仕卒子循徽

牛徽

徽举进士累擢吏部员外郎干符中选曹猥滥吏多奸岁调四千员徽治以刚明柅杜干请法度复振蔚避地于梁道病徽与子扶篮舆历

阁路盗击其首血流面持舆不息盗迫之徽拜曰人皆有父今亲老而疾幸无骇惊盗感之乃止抵梁徽趋蜀谒行在丐归侍亲疾会拜谏议大

夫固辞见宰相杜让能曰上迁幸当从亲有疾当侍而徽兄在朝廷身乞还营医药时兄循已位给事中许之父丧客梁汉终丧以中书舍人召

辞疾改给事中留陈仓张浚代太原引为判官敕在所敦遣徽太息曰王室方复膺藏殫耗当协和诸侯以为藩屏而又济以兵诸侯离心必有

后忧不肯起浚果败复召为给事中杨复恭叛山南李茂贞请假招讨节伐之未报而与王行瑜辄出兵昭宗怒持奏不下茂贞亟请帝召羣臣

议无敢言徽曰王室多难茂贞诚有功今复恭阻兵而讨之罪在不俟命尔臣闻两镇兵多杀伤不早有所制则梁汉之人尽矣请假以节明约

束则军有所畏帝曰然乃以招讨使授茂贞果有功然益偃蹇帝使宰相杜让能将兵诛讨徽谏曰岐国西门茂贞凭其众而暴若令万分一不

利屈威重奈何愿徐制之不听师出帝复召徽曰今伐茂贞彼众乌合取必万全卿计何日有捷对曰臣职谏争所言者军国大体如索贼平之

期愿陛下考蓍龟责将帅非臣职也既而师果败遂杀大臣王室益弱俄繇中书舍人为刑部侍郎袭奇章男崔胤忌徽之正换左散骑常侍徙

太子宾客以刑部尚书致仕归樊川卒赠吏部尚书

牛丛

丛字表龄第进士繇藩帅幕府任补阙数言事会宰相请广谏员宣宗曰谏臣惟能举职为可奚用众耶今张符赵璘牛丛使朕闻所未闻三人足矣以司勋员外郎为睦州刺史帝劳曰卿非得怨宰相乎对曰陛下比诏不由刺史县令不任近臣宰相以是擢臣非嫌也咸通中拜剑南西川节度使时蛮犯边抵大渡进略黎雅叩叩岷关谩书求入朝且曰假道丛囚其使四十人释二人还之蛮惧即引去僖宗幸蜀授太常卿以病求为巴州刺史不许还京为吏部尚书嗣襄王乱丛客死太原

△李宗闵

李宗闵字损之郑王元懿四世孙擢进士调华州参军事举贤良方正与牛僧孺诋切时政触宰相李吉甫恶之补洛阳尉久流落不偶去从藩府辟署入授监察御史礼部员外郎裴度伐蔡引为彰义观察判官蔡平迁驾部郎中知制诰穆宗即位进中书舍人长庆初钱徽典贡举宗闵托所亲于徽而李德裕李绅元稹在翰林有宠于帝共白徽纳干丐取士不以实宗闵坐贬剑州刺史由是嫌忌显结树党相磨轧凡四十年播绅之祸不能解俄复为中书舍人典贡举所取多知名士世谓之玉笋宝历初累进兵部侍郎父丧解太和二年以吏部侍郎同中书门下平章事时德裕自浙西召欲以相而宗闵中助多先得进即引僧孺同秉政相唱和去异己者德裕所善皆逐之迁中书侍郎久之德裕为相与宗闵共当国德裕入谢论及朋党帝曰众以杨虞卿张元夫萧澣为党魁德裕因请皆出为刺史帝然之宗闵曰德裕居外久其知党人不如臣之详虞卿日见宾客于第世号行中书故臣未尝与美官德裕曰给事中非美官云何宗闵大沮俄以同平章事为山南西道节度使李训郑注始用事疾德裕共訾短之乃罢德裕复召宗闵知政事进封襄武县侯恣肆附托会虞卿以京兆尹得罪极言营解帝怒谓曰尔尝诋郑覃为妖气今自为妖耶即出为明州刺史贬处州长史训注复劾宗闵贬潮州司户参军事时训注欲以权市天下凡不附己者皆指以二人党逐去之人人骇栗帝乃诏宗闵德裕姻家门生故吏自今一切不问尝叹曰去河北贼易去此朋党难开成初幽州史元忠河阳李载义累表论洗乃徙为衢州司马杨嗣复辅政与宗闵善欲复用而畏郑覃乃托宦人讽帝帝因紫宸对果曰朕念宗闵久斥应授一官覃与陈夷行往复辩论固执不可帝终以嗣复言擢宗闵杭州刺史迁太子宾客分司东都既而覃夷行去位嗣复谋引宗闵辅政未及而文宗崩会昌中刘稹以泽潞叛德裕建言宗闵素厚从谏今上党近东都乃拜宗闵湖州刺史稹败得交通状贬漳州长史

流封州宣宗即位徙柳州司马卒子琨瓚皆擢进士令
狐绹作相而瓚以知制诰历翰林学士绹罢瓚亦出为桂管观察使不善御军为士卒所
逐贬死宗闵弟宗冉其子汤累官京兆尹黄巢陷长安
杀之

△杨嗣复

杨嗣复字继之仆射于陵子也八岁知属文后擢进士博学宏辞与裴度柳公绰皆
为武元衡所知表署剑南幕府进右拾遗直史馆尤善
礼家学改太常博士再迁礼部员外郎累迁中书舍人时于陵为户部侍郎嗣复与牛僧
孺李宗闵雅相善二人辅政引之然不欲越父当国故
权知礼部侍郎文宗嗣位进户部侍郎于陵老求侍不许丧除擢尚书左丞太和中宗闵
罢嗣复出为剑南东川节度使宗闵复相徙西川开成
初以户部侍郎召领诸道盐铁转运使俄与李珣并拜同中书门下平章事弘农县伯仍
领盐铁后紫宸奏事嗣复为帝言陆洿屏居民闲而上
书论兵可劝以官珣趣和之郑覃不平曰陛下当察朋党嗣复曰覃疑臣党臣应免即再
拜祈罢帝方委以政故慰安之它日延英访对史官不
及知嗣复建言请延英对宰相语关道德刑政者委中书门下直日纪录月付史官它宰
相议不同止久之帝又问延英政事孰当记之珣监修
国史对曰臣之职也陈夷行曰宰相所录恐掩蔽圣德自盗美名覃曰陛下开成初政甚
善三年后日不逮前嗣复曰开成初覃夷行当国三年
后臣与李珣同进臣不能悉心奉职使政事日不逮前臣之罪也即叩头请辞趋出帝使
使者召还曰覃言失何及此邪嗣复阖门不肯起帝乃
免覃夷行相而嗣复专天下事进门下侍郎建言使府官属多宜省帝曰无反滞才乎对
曰才名自异汰去糝滓者菁华乃出帝曰昔萧复秉政
难言者必言卿其志之未几帝崩中尉仇士良废遗诏立武宗帝之立非宰相意故内薄
执政臣不如礼自用李德裕而罢嗣复为吏部尚书出
为湖南观察使会诛薛季棱刘宏逸中人多言尝附嗣复珣不利于陛下帝刚急即诏中
使分道诛嗣复等德裕与崔郾崔珙等诣延英论救 【
按旧书纪时相之论救嗣复但称崔郾崔珙而不及德裕盖以嗣复乃宗闵党疑德裕未
肯甲救也然考纲目书此事并载杜惊奔马见德裕语
则论救嗣复实德裕为之倡旧书反不着其名误也】 帝曰朕纘嗣之际珣等各有附会
若珣季棱属陈王犹是先帝意如嗣复宏逸属安王乃
内为杨妃谋使安王立肯容我耶言毕戚然乃曰为卿赦之因追使者还贬嗣复潮州刺
史宣宗立起为江州刺史以吏部尚书召道岳州卒年
六十六赠尚书左仆射谥曰孝穆嗣复五子其显者授损 【按旧书嗣复子损授技拭搨

【以损次授前与世系表合此云授损似失其次】

杨授

杨巽

杨损

杨授

授字得符于昆弟最贤由进士第累迁户部侍郎以母病求为秘书监后以刑部尚书从昭宗幸华徙太子少保卒赠尚书左仆射

杨巽

子巽 【按宰相世系表作然旧书亦作巽表误】 字公隐累擢左拾遗昭宗初立数游宴上疏极谏历户部员外郎崔胤招朱全忠入京师巽挈族客湖南终谏议大夫

杨损

损字子默繇荫补蓝田尉至殿中侍御史家新昌里与路岩第接岩方为相欲易其厩以广第损族仕者十余人议曰家世盛衰系权者喜怒不可拒损曰今尺寸土皆先人旧贖非吾等所有安可奉权臣邪穷达命也卒不与岩不悦使损按狱黔中踰年还三迁绛州刺史岩罢去召为给事迁京兆尹与宰相卢携雅不叶复除给事中陕虢军乱逐观察使崔瑊命损覆之至则尽诛有罪者拜平庐节度使徙天平未赴复留卒官下

△杨虞卿

杨虞卿字师皋虢州弘农人父窳有高操擢明经调临涣主簿弃官还夏与阳城为莫逆交陕虢观察使李齐运表置幕府齐运入为京兆尹表奉先主簿拜监察御史坐累免顺宗初召为殿中侍御史终国子祭酒虞卿第进士博学宏辞为校书郎累擢监察御史穆宗初立逸游荒恣虞卿上疏极谏俄诏行劳西北边还迁侍御史改礼部员外郎史馆修撰进吏部会曹史李宾等鬻伪告身调官六十五员赃千六百万以上虞卿发其奸宾等系御史府而虞卿亲史尝受二百万亡命私奴受三十万虞卿缚奴送狱三司严休复高鉞韦景休杂推宾等皆诛死虞卿坐不检下免官李宗闵牛僧孺辅政引为右司郎中弘文馆学士再迁给事中虞卿佞柔善谐丽权幸倚为奸利宗闵待之尤厚就党中为最能唱和者以口语轩轾事机故时号党魁德裕之相出为常州刺史宗闵复入以工部侍郎召迁京兆尹太和九年京师讹言郑注为帝治丹剔小儿肝心用之民相惊帝不悦注亦内不安而雅与虞卿有怨即约李训奏言语出虞卿家帝大怒下虞卿诏狱于是诸子弟自囚阙下称冤虞卿得

释贬虔州司户参军死弟汉公 【按汉公旧书作虞卿之弟考宰相世系表与旧书同新书误以汉公为虞卿之子今改正】 予知退知权擅

堪皆擢进士第

杨汉公

杨汝士

杨汉公

汉公字用父始辟兴元李绛幕府绛死不与其祸累迁户部郎中史馆修撰转司封郎中坐虞卿下除舒州刺史徙湖亳苏三州擢桂管浙东观察使由户部侍郎拜荆南节度使召为工部尚书或劾汉公治荆南有贪赃降秘书监稍迁国子祭酒宣宗擢为同州刺史于是给事中郑裔绰郑公舆共奏汉公冒猥无廉概不可处近辅三还制书帝不从会寒食宴近臣帝言汉公事裔绰独对同州太宗兴王地汉公既以墨败陛下容可举剧部私贪人帝恚见颜闲翌曰斥裔绰为商州刺史汉公自同州更宣武天平两节度使卒子筹范仕亦显

杨汝士

汝士字慕巢中进士第又擢宏辞牛李待之善引为中书舍人开成初由兵部侍郎为东川节度使时嗣复镇西川乃族昆弟对拥旄节世荣其门终刑部尚书子知温知至悉以进士第入官知温终荆南节度使知至为宰相刘瞻所善以比部郎中知制诰瞻得罪亦贬琼州司马累擢户部侍郎

△张宿

张宿者本寒人自名诸生宪宗为广陵王时因张茂宗荐得出入邸中诞譎敢言及监抚自布衣授左拾遗交通权幸四方赂遗满门数召对不能慎密坐漏禁中语贬郴丞十余年累迁比部员外郎宰相李逢吉数言其狡譎不可信白为濠州刺史宿上疏自言留不遣帝欲以为谏议大夫逢吉曰谏议职要重当待贤者宿细人不可使污是官陛下必用之请先去臣乃可帝不悦后逢吉罢诏权知谏议大夫宿怨执政不与已乃日肆谗惑与皇甫镈相附离多中伤正人君子元和末持节至淄青李师道愿割地遣子入侍既而悔复遣宿往暴卒于道赠秘书监

△熊望

熊望者字原师擢进士第性险躁以辩说游公卿闲刘栖楚为京兆尹树权势望日出入门下为刺取事机阴佐计划敬宗喜为歌诗议置东头学士以备燕狎栖楚荐望未及用帝崩文宗立韦处厚秉政诏望因缘险薄营密职图褻幸讙沸众议贬漳州司户参军

△栢耆

栢耆者有纵横学父良器为时威名将是时王承宗以常山叛朝廷厌兵耆杖策诣淮西行营谒裴度且言愿得天子一节驰入镇可掉舌下之度为言乃以左拾遗往既至以大谊动承宗至泣下乃请献二州以二子入质真擢耆左拾遗由是声震一时迁起居舍人王承元徙义成军遣谏议大夫郑覃往慰成德军赉缗钱百万赉未至举军哗议穆宗遣耆谕天子意众乃信悦转兵部郎中谏议大夫太和初李同捷反诏两河诸镇出兵久无功乃授耆德州行营诸军计会使与判官沈亚之谕旨会横海节度使李佑平德州同捷穷请降佑使大将万洪代守沧州同捷未出也耆以三百骑驰入沧以事诛洪与同捷朝京师既行谍言王廷凑欲以奇兵劫同捷耆遂斩其首以献诸将嫉耆功比奏攒诋文宗不获已贬耆循州司户参军亚之南康尉初佑闻耆杀洪大惊疾遂剧帝曰佑若死是耆杀之至是积前怒诏长流爱州赐死 【谨按通鉴辑览

御批栢耆虽不免急功然以诸道攻三年不能得之贼一旦诛之其功固可抵过也乃以李佑之死遽令自尽何以厉用命之士哉】

钦定续通志卷二百六十六

●钦定续通志卷二百六十七 列传六十七

列传

唐 【六十七】

○唐六十七

韩愈【孟郊 张籍 皇甫湜卢仝 贾岛 刘义】白居易【行简敏中】

韩愈

白居易

△韩愈

韩愈字退之邓州南阳人 【按旧书作昌黎人考洪兴祖年谱辨证并方崧卿增考年谱云韩氏世居颍川与昌黎之韩支派各别宋元

丰元年封愈为昌黎伯盖取其郡望而愈每自称为昌黎人亦本其郡望也是旧书称其望新书着其地皆不悞又校北魏韩麒麟最着于魏史

称其为昌黎棘城人本望始此今直隶永平府之昌黎县乃金世宗大定二十九年始立是在韩愈四百年后矣】 七世祖茂有功于后魏封安

定王父仲卿为武昌令有美政既去县人刻石颂德终秘书郎愈生三岁而孤随伯兄会贬官岭表会卒嫂郑鞠之愈自知读书日记数千百言

比长尽能通六经百家学擢进士第会董晋为宣武节度使表署观察推官晋卒愈从丧出不四日汴军乱乃去依武宁节度使张建封建封辟

府推官操行坚正鯁言无所忌调四门博士迁监察御史上疏极论宫市德宗怒贬阳山令有爱在民民生子多以其姓字之改江陵法曹参军元和初权知国子博士分司东都三岁为真改都官员外郎即拜河南令迁职方员外郎华阴令柳涧有臯前刺史劾奏之未报而刺史罢涧讽百姓遮索军顿役直后刺史恶之按其狱贬涧房州司马愈过华以为刺史阴相党上疏治之既御史复问得涧赃再贬封溪尉愈坐是复为博士既才高数黜官又下迁乃作进学解以自谕执政览之奇其才改比部郎中史馆修撰转考功知制诰进中书舍人初宪宗将平蔡命御史中丞裴度使诸军按视及还具言贼可灭与宰相议不合愈亦奏言蔡可灭在陛下断与不断耳执政不喜会有人诋愈在江陵时为裴均所厚均子鶚素无状鶚还省父愈为序餞鶚仍呼其字谤语嚣暴由是改太子右庶子及度以宰相节度彰义军宣慰淮西奏愈行军司马愈请乘遽先入汴说韩弘使叶力元济平迁刑部侍郎宪宗遣使者往凤翔迎佛骨入禁中三日乃送佛祠王公士人奔走膜呗愈恶之乃上表极论帝大怒持示宰相将抵以死裴度崔羣曰愈言讪悞罪之诚宜然非内怀至忠安能及此愿少宽假以来谏诤帝曰愈言我奉佛太过犹可容至谓东汉奉佛以后天子咸天促言何乖刺邪愈人臣狂妄敢尔固不可赦于是中外骇惧虽戚里诸贵亦为愈言乃贬潮州刺史既至潮以表哀谢帝颇感悔欲复用之持示宰相皇甫湜素忌愈直即奏言愈终狂疏可且内移乃改袁州刺史初愈至潮州问民疾苦皆曰恶溪有鳄鱼食民畜产且尽民以是穷愈自为文祭之一夕徙去自是潮无鳄鱼患袁人以男女为隶过期不赎则没入之愈至悉计庸得赎所没归之父母七百余人因与约禁其为隶召拜国子祭酒转兵部侍郎镇州乱杀田弘正而立王廷凑诏愈宣抚既行众皆危之元稹言韩愈可惜穆宗亦悔诏愈度事从宜无必入愈至廷凑严兵迓之甲士陈廷至坐廷凑曰所以纷纷者乃此士卒也愈大声曰天子以公为有将帅材故赐以节岂意同贼反邪语未终士前奋曰先太师为国击朱滔血衣犹在此军何负乃以为贼乎愈曰以为尔不记先太师也若犹记之固善天宝以来安禄山史思明李希烈等有子若孙在乎亦有居官者乎众曰无愈曰田公以魏博六州归朝廷官中书令父子受旗节刘悟李佑皆大镇此尔军所共闻也众曰弘正刻故此军不安愈曰然尔曹亦害田公又残其家矣复何道众讙曰善廷凑虑众变疾麾使去因曰今欲廷凑何所为愈曰神策六军将如牛元翼者不乏但朝廷顾大体不可弃之公久围之何也廷凑曰即出之愈曰若尔则无事矣会元翼亦溃围出廷凑不追愈归奏其语帝大悦

转吏部侍郎时宰相李逢吉恶李绅欲逐之遂以愈为京兆尹兼御史大夫特诏不台参而除绅中丞绅果劾奏愈愈以诏自解其后文刺纷然宰相以台府不协遂罢愈为兵部侍郎而出绅江西观察使绅见帝得留愈亦复为吏部侍郎长庆四年卒年五十七赠礼部尚书谥曰文愈性明锐不诡随与人交始终不少变成就后进士往往知名经愈指授皆称韩门弟子愈官显稍谢遣凡内外亲若交友无后者为嫁遣孤女而恤其家嫂郑丧为服期以报每言文章自汉司马相如太史公刘向杨雄后作者不世出故愈深探本元卓然树立成一家言其原道原性师说等数十篇皆奥衍闳深与孟轲杨雄相表里而佐佑六经云从愈游者若孟郊张籍亦皆自名于时

孟郊

张籍

皇甫湜

卢仝

贾岛

刘叉

孟郊

孟郊者字东野湖州武康人少隐嵩山性介少欣合愈一见为忘形交年五十得进士第调溧阳尉县有投金濑平陵城林薄蒙翳下有积水郊闲往坐水旁裴回赋诗而曹务多废令白府以假尉代之分其半奉郑余庆为东都留守署水陆转运判官余庆镇兴元奏为参谋卒年六十四张籍谥曰贞曜先生郊为诗有理致最为愈所称

张籍

张籍者字文昌和州乌江人第进士为太常寺太祝久次迁秘书郎愈荐为国子博士水部员外郎主客郎中当时有名士皆与游而愈贤重之籍为诗长于乐府多警句仕终国子司业

皇甫湜

皇甫湜字持正睦州新安人擢进士第为陆浑尉仕至工部郎中辨急使酒数忤同省求分司东都留守裴度辟为判官度修福先寺将立碑求文于白居易湜怒曰近舍湜而远取居易请从此辞度谢之湜即请斗酒饮酣援笔立就度赠以车马缯彩甚厚湜大怒曰自吾为顾况集序未尝许人今碑字三千字三缣何遇我薄耶度笑曰不羁之才也从而酬之

卢仝

卢仝居东都愈为河南令爱其诗厚礼之仝自号玉川子尝为月蚀诗以讥切元和

逆党愈称其工时又有贾岛刘义皆韩门弟子

贾岛

贾岛字浪仙范阳人初为浮屠名无本愈教其为文遂去浮屠举进士文宗时坐飞谤贬长江主簿会昌初以普州司仓参军迁司户未受命卒年五十六

刘义

刘义者亦一节士少放肆为侠行继乃折节读书能为歌诗闻愈接天下士步归之后不知所终

△白居易

白居易字乐天其先盖太原人北齐五兵尚书建有功于时赐田韩城子孙家焉又徙下邳父季庚为彭城令李正己之叛说刺史李洧自归累擢襄州别驾居易敏悟绝人工文章未冠谒顾况况吴人恃才少所推可见其文自失曰吾谓斯文遂绝今复得子矣贞元中擢进士拔萃皆中补校书郎元和元年对制策一等调整度尉明年为集贤校理月中召入翰林为学士迁左拾遗四年天子以旱甚下诏有所蠲贷振除灾沴居易见诏节未详即建言乞尽免江淮两赋以救流瘠且多出宫人宪宗颇采纳李师道上私钱六百万为魏征孙赎故第居易言征任宰相太宗用殿材成其正寝后嗣不能守陛下宜以贤者子孙赎而赐之师道人臣不宜掠美帝从之河东王锬将加平章事居易以为宰相天下具瞻非有重望显功不可任按锬诛求百计不恤雕瘵所得财号为羨余以献今若假以名器非所以训四方也帝乃止是时孙璿以禁卫劳擢凤翔节度使张奉国定徐州平李锜有功迁金吾将军居易为帝言宜罢璿进奉国以竦天下忠臣心度支有囚系闾乡狱更三赦不得原又奏言父死縶其子夫久系妻嫁债无偿期禁无休日请一切免之奏凡十余上益知名会王承宗叛帝诏吐突承璀率师出讨居易谏唐家制度每征伐专委将帅责成功比年始以中人为都监韩全义讨淮西贾良国监之高崇文讨蜀刘贞亮监之且与天下兵未有以中人专统领者神策既不置行营节度即承璀为制将又充诸军招讨处置使是实都统恐四方闻之必轻朝廷后世且传中人为制将自陛下始陛下忍受此名哉且刘济等洎诸将必耻受承璀节制心有不乐无以立功此乃资承宗之奸挫诸将之锐帝不听既而兵老不决居易上陈利害请罢承璀会承宗请罪兵遂罢后对殿中论执强颺帝未谕辄进曰陛下误矣帝变色罢欲斥之绛曰陛下启言者路故羣臣敢论得失若黜之是箝其口使自为谋非所以发扬盛德也帝悟待之如初岁满当迁帝以资浅且家素贫听自择官居易请

如姜公辅以学士兼京兆户曹参军以便养诏可明年
以母丧解还拜左赞善大夫是时盗杀武元衡京都震扰居易首上疏请亟捕贼刷朝廷
耻以必得为期宰相嫌其出位不悦出为州刺史中书
舍人王涯上言不宜治郡追贬江州司马久之徙忠州刺史入为司门员外郎以主客郎
中知制诰穆宗好畋游献续虞人箴以讽俄转中书舍
人田布拜魏博节度使命持节宣谕布遗五百缗诏使受之辞曰布父讎国耻未雪人当
以物助之乃取其财谊不忍方谕问旁午若悉有所赠
则贼未殄布赀竭矣诏听辞饷是时河朔复乱合诸道兵出讨迁延无功贼取弓高绝粮
道深州围益急居易上言兵多则难用将众则不一宜
诏魏博泽潞定沧四节度令各守境以省度支赀饷每道各出锐兵三千使李光颜将光
颜故有凤翔徐滑河阳陈许军无虑四万可径薄贼开
弓高粮路合下博解深州之围与牛元翼合还裴度招讨使使悉太原兵西压境见利乘
隙夹攻之闲令召谕以动其心未及诛夷必自生变不
听乃勾外迁为杭州刺史始筑堤捍钱塘湖锺泄其水溉田千顷复浚李泌六井民赖以
汲久之以太子左庶子分司东都复拜苏州刺史病免
文宗立以秘书监召迁刑部侍郎封晋阳县男太和初二李党事兴杨虞卿与居易姻家
而善李宗闵居易恶缘党人斥乃移病还东都除太子
宾客分司踰年即拜河南尹复以宾客分司开成初起为同州刺史不拜以太子少傅进
冯翊县侯会昌初以刑部尚书致仕六年卒年七十五
赠尚书右仆射宣宗以诗吊之遗命薄葬毋请谥居易与弟行简从祖弟敏中友爱东都
所居履道里疏沼种树构石楼香山凿八节滩自号醉
吟先生又称香山居士尝与胡杲吉旼郑据刘真卢真张浑狄兼谟卢贞燕集人慕之绘
为九老图居易于文章精切然最工诗初颇以规讽得
失及其多更下偶俗好至数千篇当时士人争传鸡林行贾售其国相率篇易一金初与
元稹酬咏故号元白稹卒又与刘禹锡齐名号刘白始
生七月能展书姆指之无两字虽试百数不差敏中为相请谥有司曰文东都江州人为
立祠焉

白行简

白敏中

白行简

行简字知退擢进士辟卢坦剑南东川府罢与居易自忠州入朝授左拾遗累迁主
客员外郎代韦词判度支按进郎中长庆时振武营田
使贺峻志营田数过实诏行简覆按之发其妄志惧自刺不殊行简敏而有辞后学所慕
尚宝历二年卒

白敏中

敏中字用晦少孤承学诸兄长庆初第进士辟义成节度使李听府听一见许其远到迁右拾遗改殿中侍御史为符澈邠宁副使澈卒以能政闻御史中丞高元裕荐为侍郎史再转左司员外郎武宗雅闻居易名欲召用之是时居易足病废宰相李德裕言其衰茶不任事即荐敏中文词类其兄而有器识即日知制诰召入翰林为学士进承旨宣宗立以兵部侍郎同中书门下平章事迁中书侍郎兼刑部尚书德裕贬敏中抵之甚力议者訾恶厯尚书右仆射门下侍郎封太原郡公自员外凡五年十三迁崔铉辅政欲专任患敏中居右会党项数寇边铉言宜得大臣镇抚敏中以司空平章事兼邠宁节度招抚制置使帝御安福楼以饯颁玺书谕慰赐通天带卫以神策兵开府辟士礼如裴度讨淮西时次宁州诸将已破羌贼敏中即说谕其众皆愿弃兵为业乃自南山道河按屯堡回绕千里又规萧关通灵威路使为耕战具踰年检校司徒徙剑南西川增驛军完创关壁治蜀五年有劳加兼太子太师徙荆南懿宗立召拜司徒门下侍郎迁平章事数月足病不任谒固求避位不许中使者劳问俾对别殿毋拜右补阙王谱奏言敏中病四月愿听其请无使有持宠旷责之讯书闻帝怒斥谱阳翟令未几加敏中中书令自裴度以勋德居而敏中以恩泽进咸通二年南蛮扰边召敏中入议许挟扶升殿固求免乃出为凤翔节度使三奏愿归守庐墓除东都留守不敢拜许以太傅致仕诏书未至卒册赠太尉

钦定续通志卷二百六十七

●钦定续通志卷二百六十八 列传六十八

列传

唐 【六十八】

○唐六十八

钱徽

崔咸

韦表微

高鉞【湜

铢错

湘】

冯宿

【定审】

李虞仲

李翱

卢简

辞【简能

宏止简求】

高元裕

封敖

郑熏

敬晦

韦博

李景让【景温】

钱徽

崔咸

韦表微

高鉞

冯宿

李虞仲

李翱

卢简辞

高元裕

封敖

郑熏

敬晦

韦博

李景让

△钱徽

钱徽字蔚章父起附见卢纶传徽中进士第居谷城谷城令王郢善接侨士游客以财贷馈坐是得臯观察使樊泽视其簿独徽无有乃表署掌书记又辟宣歙崔衍府王师讨李希烈檄遣采石兵会战戍还颇骄蹇会衍病亟徽请召池州刺史李逊署副使逊至而衍死一军赖以安入拜左补阙以祠部员外郎为翰林学士三迁中书舍人加承旨宪宗尝独召徽从容言它学士皆高选宜预闻机密广参决帝称其长者是时内积财图复河湟然禁无名贡献而至者不甚却徽恳陈罢之帝密戒后有献毋入右银台门以避学士以论淮西事忤旨罢职从太子右庶子出虢州刺史入拜礼部侍郎宰相段文昌学士李绅以所善士诱徽求致第籍徽不能如二人请因是共挤其非有诏王起白居易覆试而黜者过半遂贬江州刺史或劝徽出文昌绅私书自直徽曰苟无愧于心安事辨证邪敕子弟焚书【谨按通鉴辑览 御批党牛怨李已足紊乱朝常至通关节于贡举是以先进引后进其为门户纷争瓜连枝蔓尤不可究诘矣若时人称美钱徽不奏人私书此更瞽说既有私书则掌举者已属纳人关节且未必止段李二人而已徽即下愚肯自言耶史书之不足信如此】初州有盗劫贡船捕吏取滨江恶少年二百人系讯徽按其枉悉纵去数日舒州得真盗州有牛田钱百万刺史以给宴饮赠饷者徽曰此农耕之备可妄用哉命代贫民租入转湖州时宣歙旱左丞孔戣请徙徽领宣歙宰相以其不文辞进不用戣曰相君宜知天下事徽江虢之治不及况其它邪还迁工部侍郎出为华州刺史文宗立召拜尚书左丞会宣墨麻羣臣在廷方大寒稍稍引还徽素恭谨不去位久而仆因上疏告老不许太和初复为华州俄以吏部尚书致仕卒年七十五赠尚书右仆射徽任庶子时韩公武以赂结公卿遗徽钱二十万不纳或言非当路可无让徽曰取之在义不在官时称有公望子可复

方义可复副郑注出镇凤翔注败及祸方义终太子宾客子翊字瑞文善文辞宰相王抟荐知制造进中书舍人抟得罪翊贬抚州司马

△崔咸

崔咸字重易博州博平人元和初擢进士第又中宏辞郑余庆李夷简皆表在幕府与均礼入朝为侍御史处正特立风采动一时累迁陝虢观察使日与宾客僚属痛饮未尝醒夜分辄决事裁剖精明无一毫差吏称为神入拜右散骑常侍秘书监太和八年卒诸文中歌诗最善

△韦表微

韦表微字子明隋郟城公元礼七世孙擢进士第数辟诸使府久之入授监察御史里行俄为翰林学士是时李绅忤宰相贬端州庞严蒋防皆谪去学士缺人人争荐丞相所善者表微独荐韦处厚人服其公进知制造后与处厚议增选学士复荐路隋处厚以诸父事表微因曰隋位崇入且翁右奈何答曰选德进贤初不计私也久之迁中书舍人敬宗尝语左右欲相二韦会崩文宗立独相处厚进表微户部侍郎刁志滔叛诏李听率师讨之次河上天子忧无成功表微曰以听军势不十五日必破贼及捷书上止浹日志滔残兵六千奔昭义宰相请推处首恶者诛之归胁从者于魏表微上言逆予降又杀之非好生也请以听代史宪诚于魏志滔之徒可使招纳不听以病瘕罢学士卒年六十赠礼部尚书着有春秋三传总例九经师授谱

△高鉞

高鉞字翹之史失其何所人与弟铢锴俱擢进士第累迁右补阙史馆修撰元和末以中人为和余使鉞累疏论执转起居郎数陈政得失穆宗嘉之面赐绯鱼召入翰林为学士张韶变兴仓卒鉞从敬宗夜驻左军翌日进知制造拜中书舍人入见帝因劝躬听览以示忧勤帝纳其言赐锦彩俄罢学士累进吏部侍郎人善其振职出为同州刺史卒赠兵部尚书

高湜

高铢

高锴

高湘

高湜

子湜字澄之第进士累官右谏议大夫咸通末为礼部侍郎时士多繇权要干请湜不能裁既而抵帽于地曰吾决以至公取之得譴固吾分乃取公乘亿许棠聂夷中等皆有名当时以兵部侍郎判度支出为昭义节度使为下所逐贬连州司马 【按旧传祇载湜为礼部侍郎余

俱不载考本纪及他传湜为兵部郎中中书舍人权知礼部贡举及为荆南节度判官并无为昭义节度语至咸通以后昭义军之乱一于干符五年时为节度者李钧也一于中和元年高浚牙将刘广据潞州浚天井关戍将孟方立攻杀广自称留后则为昭义节度为下所逐者高浚非高湜也新书盖移浚事为湜事然浚贬端州刺史非连州司马卒无定据谨附注于此】以太子宾客分司东都卒

高铢

铢字权仲既擢第署太原张宏靖幕府入迁监察御史太和时累擢给事中文宗得李训骤拜侍讲学士铢率谏官伏合言训素行儉邪不可任必乱天下明年训当国出铢为浙东观察使厯义成节度使大中初迁礼部尚书判户部徙太常卿【按旧书铢于开成三年就加检校左散骑常侍寻入为刑部侍郎四年七月出为河南尹会昌末为吏部侍郎与此互异】卒

高锴

锴字弱金连中进士宏辞科辟河东府参谋厯吏部员外郎迁中书舍人开成元年权知贡举【按旧书锴权知贡举在太和九年十月次年为开成元年乃以锴为礼部侍郎新书俱属之开成元年误】锴以籍上帝语侍臣曰比年文章卑弱今所上差胜于前即以锴为礼部侍郎阅三岁颇得才实始岁取四十人才益少诏减十人犹不能满迁吏部侍郎出为鄂岳观察使卒赠礼部尚书

高湘

子湘字浚之擢进士第厯长安令右谏议大夫从兄湜与路岩亲善而湘厚刘瞻岩既逐瞻贬湘高州司马僖宗初召为太子右庶子【按旧书肃宗纪以为韦保衡所逐考僖宗纪即位之九月保衡贬贺州而湘即于是月召为谏议大夫其为保衡所逐而非路岩明矣又按旧传湘干符三年九月以中书舍人权知礼部侍郎盖初以谏议召而旋为中书舍人此谓召为右庶子未知何据】终江西观察使

△冯宿

冯宿字拱之婺州东阳人父子华庐亲墓有灵芝白兔号孝冯家宿贞元中与弟定从弟审宽并擢进士第徐州张建封表掌书记建封卒子愔为军中肋主留事李师古将乘丧复故地愔大惧于是王武俊拥兵观衅宿以书说之武俊悦即以表闻遂授愔留后宿不乐佐愔更从浙东贾全观察府愔憾其去奏贬泉州司户参军召为太常博士累迁都官员外郎裴度节度彰义军表为判官淮西平除比部郎中长庆时进知

制浩牛元翼徙节山南东道为王廷凑所围以宿总留事还进中书舍人出华州刺史避讳不拜徙左散骑常侍兼集贤殿学士拜河南尹历工部刑部二侍郎修裕后敕三十篇行于时累封长乐县公擢东川节度使完城郭增兵械十余万诏分余甲赐黔巫道涪水数坏民庐舍宿修利防庸一方便赖疾革将断重刑家人请宥之宿曰命修短天也挠法以求佑吾不敢卒年七十赠吏部尚书谥曰懿子图字昌之连中进士宏辞科大中时终户部侍郎判度支宽为起居郎

冯定

冯审

冯定

定字介夫伟仪观与宿齐名人方汉二冯于頔素善之頔在襄阳定徒步上谒吏不肯白乃亟去頔闻斥吏归钱五十万及诸境定返其遗以书让頔不下士頔大惭第进士异等辟浙西薛苹府以郾尉为集贤校理始定居丧号毁甚故数移疾大学士疑其简怠夺职三迁祠部员外郎出为郢州刺史坐游宴不节免官起为国子司业再迁太常少卿文宗尝诏开元霓裳羽衣舞参以云韶肄于廷定部诸公立县闲端凝若植帝异之问学士李珣珣以定对帝喜曰岂非能古章句者耶亲诵定送客西江诗召升殿赐禁中瑞锦诏悉所著以上迁谏议大夫请左右史从宰相至延英记所言执政不悦改太子詹事郑覃兼太子太师上曰欲会尚书省定据礼当集詹事府诏可论者多其正换卫尉卿以散骑常侍致仕卒赠工部尚书谥曰节

冯审

审字退思开成中为谏议大夫拜桂管观察使历国子祭酒监有孔子碑武后所立睿宗署额审请琢周着唐终秘书监子緘字宗之干符初历京兆河南尹

△李虞仲

李虞仲字见之父端见文苑传虞仲第进士宏辞累迁太常博士建言谥者所以表德惩恶春秋褒贬法也古者将葬请谥今近或二三年远乃数十年然后请谥人歿已久风绩湮歇采诸传闻不可考信臣请凡得谥者前葬一月请考攻敕太常定议其不请与请而过时者听御史劾举居京师不得过半期居外一期若善恶者而不请许考功察行谥之节行卓异虽无官及官卑者在所以闻诏可宝历初以兵部郎中知制诰进中书舍人出为华州刺史历吏部侍郎简俭寡欲时望归重卒年六十五赠吏部尚书

△李翱

李翱字习之后魏尚书左仆射冲十世孙中进士第始调校书郎元和初为国子博士史馆修撰常谓史官纪事不得实乃建言大抵人之行非大善大恶暴于世者皆访于人人不周知故取行状溢牒然其为状者皆故吏门生苟言虚美溺于文而忘其理臣请指事载功则贤不肖易见如言魏征但记其谏争语足以为直言段秀实但记倒用司农印追逆兵笏击朱泚足以为忠烈不者愿敕考功太常史馆勿受如此可以传信后世矣诏可又条兴复太平大略曰陛下既以武功定海内若遂革弊事复高祖太宗旧制用忠正而不疑屏邪佞而不迕改税法不督钱而纳布帛绝进献宽百姓租赋厚边兵以制蕃戎侵盗数引见待制官问以时事通壅蔽之路此六者政之根本太平所以兴陛下既已能行其难若何而不为其易者乎臣窃惜陛下当可兴之时而谦让未为也再迁考功员外郎初谏议大夫李景俭表翱自代景俭斥翱下除朗州刺史俄召为礼部郎中【按旧书穆宗纪翱于穆宗即位之六月贬朗州十一月复书曰以宗正卿李翱为华州刺史翱未尝为宗正卿由宗正出刺华州者■〈曾羽〉也见李宗闵传翱与■〈曾羽〉文近致讹】翱性峭鯁论议无所屈仕不得显官怫郁无所发见宰相李逢吉面斥其过失逢吉诡不校翱恚惧即移病满百日有司白免官逢吉更表为庐州刺史时州旱遂疫逋捐系路亡籍口四万权豪贱市田屋牟厚利而寡户仍输赋翱下教使以田占租无得隐收豪室税万二千缗贫弱以安入为谏议大夫知制造改中书舍人栢耆使沧州翱盛言其才耆得罪由是左迁少府少监后厯迁桂管湖南观察使山南东道节度使卒【按李翱之为刑部户部侍郎在为湖南观察之后山南东节度之前新书不载盖略之也而旧书敬宗纪宝厯二年书曰右散骑常侍李翱卒尤属谬误翱未官散骑且厯太和开成至会昌中始卒安得书卒于十余年前乎盖亦李■〈曾羽〉之误】翱始从昌黎韩愈为文章辞致浑厚见推当时故有司亦谥曰文

△卢简辞

卢简辞字子策父纶别传与兄简能弟宏止简求皆有文并第进士厯佐帅府入迁侍御史习知法令及台阁旧事宝厯中黎干子焯诣台请复叶县故田有司莫能知简辞独诘曰按干坐党鱼朝恩诛贲田皆没大厯后数十年比有赦令无原洗之言焯安得冒论不为治福建盐铁院官鲁昂坐赃简辞穷按乃得金床瑟瑟枕大如斗敬宗曰禁中无此昂为吏可知矣李程镇太原表为节度判官入授考功员外郎累擢湖南

浙西观察使以检校工部尚书为忠武节度使徙山南东道坐事贬衢州刺史卒

卢简能

卢宏止

卢简求

卢简能

简能字子拙太和时累官驾部员外郎郑注表为凤翔判官注为张仲清所杀简能亦被害子知猷字子暮中进士第登宏辞补秘书省正

字萧邺镇荆南剑南再辟掌书记入迁右补阙出为饶州刺史以政最闻累进中书舍人朱玫乱避难不出僖宗还京召拜工部侍郎史馆修撰

历太常卿户部尚书至太子太师昭宗为刘季述所幽感愤卒赠太尉子文度亦贵显

卢宏止

宏止【按宰相世系表止作正旧书同今仍新书原文】字子强佐刘悟府累擢监察御史沈传师表为江西团练副使入拜侍御史华

州刺史宇文鼎户部员外郎卢允中坐赃诏宏止按讯文宗将杀鼎宏止执据臯由允中鼎乃连坐不应死帝释之累迁给事中会昌中出为邢

洺磁三州及河北两镇宣慰使还拜工部侍郎以户部领度支初两池盐法弊得费不相偿宏止使判官司空舆检钩厘正条上新法即表舆两

池使自是课入岁倍用度赖之踰年出为武宁节度使徐自王智兴后吏卒骄沓银刀军尤不法宏止戮其尤无状者终宏止治不敢哗优诏褒

劳宏止羸病丐身边东都不许徙宣武卒于镇赠尚书右仆射子虔灌有美才终秘书监

卢简求

简求字子臧始从江西王仲舒幕府两为裴度元稹所辟又佐牛僧孺镇襄阳入迁户部员外郎会昌中讨刘稹以忠武节度使李彦佐为

召讨使咨选简求副之俾知后务历苏寿二州刺史大中九年党项扰边拜泾原渭武节度使徙义武凤翔河东三镇简求为政长权变居边善

绥御人皆安之太原统退浑契苾沙陀三部难驯制它帅或与诅盟质子弟然寇掠不为止简求归所质开示至诚虏惮其恩信不敢乱久之辞

疾以太子少师致仕还东都卒年七十六赠尚书左仆射子嗣业汝弼皆中进士第汝弼以祠部员外郎知制诰从昭宗迁洛后依李克用克用

表为节度副使

△高元裕

高元裕字景圭其先渤海人第进士累辟节度府以右补阙召道商州会方士赵归真擅乘驿马元裕诋曰天子置驿尔敢疾驱耶命左右

夺之还具以闻敬宗视朝不时稍稍决事禁中宦竖恣放大臣不得进见元裕谏曰今西

头势乃重南衙枢密之权过宰相帝颇悟而不能有所
检制人皆危之俄换侍御史内供奉士始相贺李宗闵高其节擢谏议大夫进中书舍人
郑注入翰林元裕当书命乃言以医术侍注愧憾及宗
闵得臯元裕坐出钱贬阆州刺史注死复授谏议大夫翰林侍讲学士庄恪太子立择可
辅导者乃兼宾客进御史中丞累擢尚书左丞领吏部
选出为宣歙观察使入授吏部尚书拜山南东道节度使封渤海郡公奏蠲逋赋甚众在
镇五年复以吏部尚书召卒于道年七十六赠尚书右
仆射兄少逸长庆末为侍御史坐失举劾贬赞善大夫累迁谏议大夫稍进给事中出为
陕虢观察使中人责峡石驿吏供饼恶鞭之少逸封饼
以闻宣宗怒召使者责曰山谷闲是饼岂易具邪谪隶恭陵中人皆敛手以兵部尚书致
仕卒元裕始名允中太和中改今名子璩字莹之第进
士累官至谏议大夫懿宗时拜剑南东川节度使召拜中书侍郎同中书门下平章事卒
赠司空太常博士曹邺建言璩交游丑杂进取多蹊径
请溢为刺从之

△封敖

封敖字硕夫其先冀州修人元和中中进士第江西裴堪辟置其府转右拾遗为宰
相李德裕所器会昌初以左司员外郎召为翰林学士
三迁工部侍郎敖属辞赡敏不为奇涩语切而理胜未几拜御史中丞与宰相卢商虑因
误纵死臯复为工部侍郎大中中厯平卢兴元节度使
初郑涯开新路水壤其栈敖更治斜谷道行者告便蓬果贼依鸡山寇三川敖遣副使王
贄捕平之加检校吏部尚书还为太常卿徙国子祭酒
复拜太常进尚书右仆射 【按旧书敖入为户部尚书卒无进尚书右仆射之文其封渤
海男则大中初为吏部侍郎时与表悉合与此互异

】然少行检士但高其才故不至宰相卒子彦卿望卿从子特卿皆第进士

△郑熏

郑熏字子溥亡乡里世系擢进士第厯考功郎中翰林学士出为宣歙观察使颇以
清力自将牙将素骄共谋逐出之熏奔扬州贬棣王府
长史分司东都懿宗立召为太常少卿累擢吏部侍郎时数大赦阶正议光禄大夫者得
荫一子门施戟于是宦人用阶请荫子熏却之不肯叙
宰相杜惊才其人拟判度支辞又拟刑部兼御史中丞固辞乃免久之进左丞性友爱纠
族百口稟不充求外迁拟华州刺史辄留中为幸侍所
沮后以太子少师致仕蒔松于廷号七松处士云

△敬晦

敬晦字曰彰河中河东人进士及第辟山南东道节度府与马曙联舍于是帅不政

法制陵頹曙引大吏廷责之吏负兼军职不引咎走诉
诸府牙将且十辈方杂语以申吏枉晦让诸将曰吏冒军名公等不能诘反引与为伍奈何众愧谢累擢谏议大夫武宗时赵归真以诈营罔天子御史平吴湘狱得臯宰相晦上疏极道非是不少回纵大中中厯御史中丞刑部侍郎诸道盐铁转运使浙西观察使徙充海节度使以太子宾客分司卒赠兵部尚书谥曰肃

△韦博

韦博字大业京兆万年人取进士第寢迁殿中侍御史开成中回鹘入寇以符澈为河东节度使拜博为判官久之进主客郎中时诏毁佛祠悉浮屠隶主客博言令太暴宜近中宰相李德裕恶之会羌浑叛以何清朝为灵武节度使诏博副之擢右谏议大夫召对赐金紫因行西北边商虏强弱还奏有旨进左大夫为京兆尹与御史中丞器竞不平皆得臯下除博卫尉卿出为平卢节度使检校礼部尚书徙昭义卒年六十二赠兵部尚书

△李景让

李景让字后己赠太尉愷孙也 【按旧书愷赠司徒非太尉又考吴缜纠缪以李彭传言之景让乃彭之孙愷之曾孙旧书李愷传愷子彭彭子宏宏子景让则景让实愷曾孙此云愷孙未知何据】 性方毅有守宝厯初迁右拾遗淮南节度使王播以钱十万市朝廷欢求领盐铁景让诣延英亟论不可遂知名沈传师观察江西表以自副厯中书舍人礼部侍郎商华虢三州刺史母郑治家严景让自右散骑常侍出为浙西观察使母问行日景让率然对有日郑曰如是吾方有事未及行盖怒其不尝告也且曰己贵何庸母行景让重请臯乃赦故虽老犹加捶敕已起欣欣如初尝怒牙将杖杀之军且谋变母欲息众讙召景让廷责曰尔镇抚方面而轻用刑一夫不盗岂特上负天子亦使百岁母衔羞泉下何面目见先大夫乎将鞭其背吏大将再拜请不许皆泣谢乃罢一军遂定入为尚书左丞拜天平节度使徙山南东道封酒泉县男大中中进御史大夫寻拜西川节度使以病丐致仕或谏公廉洁亡素储不为诸子谋利景让笑曰儿曹讎饿死乎辄还东都以太子少保分司卒年七十二赠太子太保谥曰孝元和后大臣有德望者以居里显景让宅东都乐和里世称清德者号乐和李公云

李景温

李景温

弟景温厯华州刺史以美政闻累迁尚书右丞卢携当国弟隐繇博士迁水部员外

郎材下资浅人疾其冒无敢绳撻景温不许赴省时故事久废景温既举职时论黷之

钦定续通志卷二百六十八

●钦定续通志卷二百六十九 列传六十九

列传

唐 【六十九】

○唐六十九

李渤 裴潏 李中敏 李甘 刘蕡

李渤

裴潏

李中敏

李甘

刘蕡

△李渤

李渤字浚之魏横野将军申国公发之裔父钧殿中侍御史以不能养母废于世渤耻之不肯仕刻志于学与仲兄涉偕隐庐山久之更徙少室元和初户部侍郎李巽谏议大夫韦况交章荐之诏以右拾遗召渤上书谢昔屠羊说有言立三旌禄万锺知贵于屠羊然不可使吾君妄施彼贱贾也犹能忘己爱君臣虽欲盗荣以济所欲得无愧屠羊乎不拜洛阳今韩愈遗书招之渤心善其言始出家东都每朝廷有阙政辄附章列上元和九年讨淮西上平贼三术一曰感二曰守三曰战感不成不失为守守不成不失为战又上御戎新录乃以著作郎召渤遂起岁余迁右补阙以直忤旨下迁丹王府咨议参军分司东都十三年上书言五事一礼乐二食货三刑政四议都五辨讎渤虽处外然志存朝廷表疏凡四十五献擢为库部员外郎会皇甫镈辅政务剥下佐用度而渤奉诏吊郗士美丧在道上言渭南长源乡户四百今纔四十闾乡户三千而今千它州县大抵类此推其敝始于均摊逃户十室五逃则未逃者五家摊税若抵石于井非极泉不止此聚敛之臣割下媚上愿下诏一赐禁止计不三年人必归于农夫农国之本本立太平可议矣又言道路弗不治驿马多死宪宗得奏咨骇即诏出飞龙马数百给畿驿渤既以峭直触要臣意乃谢病归穆宗立召拜考功员外郎岁终当校考渤自宰相而下升黜之上奏曰宰相俛文昌植陛下即位用为辅弼安危治乱一以付之俛等不陈先王道德以沃君心又不举旧典以立教化且政之兴废在赏罚俛等未闻奖一人使在官有所劝黜一人使尸禄有所惧邪正

莫辨赏罚无章陛下比幸骊山宰相学士皆股肱心腹宜皆知之不先事以谏陷君于过
俛与学士杜元颖等请考中下御史大夫李绛左散骑
常侍张惟素右散骑常侍李益谏幸骊山郑覃等谏畋游得事君之礼请考上下崔元略
当考上下前考于羣上下而羣以赃败请降中中大理
卿许季同任羣者应考中下然顷陷刘辟弃家以归忠节着考中中少府监裴通职修举
考应中上以封母舍嫡而追所生请考中下奏入不报
会渤请急冯宿领考功以考课止校岁中善恶而渤举旧事为褒贬且郎中校京官四品
以下黜陟之由三品上为清望官岁进名听内考非有
司所得专请如故事渤议遂废会魏博节度使田弘正表渤为副元颖劾奏渤狂躁卖直
售名外交方镇不宜在朝出为虔州刺史渤奏还信州
务税钱二百万免赋米二万石废冗役千六百人观察使上状不阅岁迁江州刺史度支
使张平叔敛天下逋租渤上言度支所收贞元二年流
户赋钱四百四十万臣州治田二千顷今旱死者千九百顷若徇度支所敛臣惧天下谓
陛下当大旱责民三十年逋赋臣刺史上不能奉诏下
不忍民穷无所逃死请放归田里有诏蠲责渤又治湖水筑堤七百步使人不病涉入为
职方郎中进谏议大夫时敬宗晏朝一日羣臣立紫宸
门外老病者几顿仆渤见宰相曰昨论晏朝事今益晚是谏官不能移人主意渤请出合
待罪会唤仗乃止退上疏言今日入合陛下不时见羣
臣羣臣皆布路跛倚天跛倚形诸外则忧思结诸内忧倦既积灾衅必生又言左右常侍
职规讽循默不事若设官不责实不如罢之俄充理匭
使建言事大者以闻次白宰相下以移有司有司不当许再纳匭妄诉者加所坐一等以
绝冒越诏可时政移近幸纪律荡然渤劲正不顾患通
章封无阙日天子虽幼昏亦感寤擢给事中赐金紫服五坊卒夜鬪伤县人鄂令崔发怒
敕吏捕摔其一中人也释之帝大怒收发送御史狱会
大赦改元发以囚坐鸡竿下俄中人数十持梃乱击发败面折齿几死既而囚皆释而发
不得原渤上疏曰县令曳辱中人人人殴御因其罪一
也然令罪在赦前而中人在赦后不寘于法臣恐四夷闻之慢倍之心生矣渤又诵言前
神策军在幔城夺京兆进食牙盘不时治致宦人益横
帝以问左右皆曰无之帝谓渤有党出为桂管观察使它日宰相李逢吉等见帝言发母
故宰相韦贯之姊年八十忧发成疾帝始免发犹夺其
官至文宗乃用发为怀州长史桂有漓水世言秦命史禄伐粤凿为漕马援讨征侧复治
以通馈后为江水溃毁渠遂废浅每转饷役数十户济
一艘渤酺浚旧道舟楫利焉踰年以病归洛太和中召拜太子宾客卒年五十九赠礼部
尚书渤孤操自将不苟合于世人咸谓之沽激屡以言

斥而悻直不少衰守节者尚之

△裴潏

裴潏本河东闻喜人笃学善隶书以荫仕元和初累迁左补阙于是两河用兵宪宗任宦人为馆驿使检稽出纳有曹进玉者尤恃恩倨甚使者过至加摔辱宰相李吉甫奏罢之会伐蔡复以中人领使潏谏曰馆驿之务每驿皆有专知若复以宫闈臣领之则内人而及外事职分乱矣太平至理澄本正名宜塞侵官之原出位之渐帝虽不用而嘉其忠擢起居舍人帝喜方士而柳泌为帝治丹剂求长年帝御剂中躁病渴潏谏曰陛下以孝安宗庙以仁牧黎庶攘划袄凶宾礼贤俊神功圣德前古所不及陛下躬行之天地宗庙必相陛下以亿万之永今乃方士韦山甫柳泌等以丹术自神更相称引诡为陛下延年臣谓有道之士匿名灭景无求于世必不肯干谒贵近自鬻其伎今之至者自言飞炼为神以誅权贵大言怪论取惊流俗伪穷情得不耻遁逃如此情状岂可保信夫三牲五谷稟自五行发为五味天地生之所以奉人圣人节调以致康强若乃药剂所以御疾岂常进之饵哉况又金石酷烈而烧治积年包灾产毒未易可制礼君之药臣先尝之父之药子先尝之臣愿以所治剂俾其人服之竟一岁以考真伪则自然明验矣帝怒贬江陵令穆宗立泌等诛召潏再迁刑部郎中前率府仓曹参军曲元衡杖民柏公成母死有司以死在辜外推元衡父荫赎金公成受赇不诉以赦免潏议曰杖捶者官得施所部非所部虽有罪必请有司明不可擅也元衡非在官公成母非所部不可以荫免公成取贿仇家利母之死逆天性当伏诛有诏元衡流公成论死久之繇给事中为汝州刺史越法杖人辄死以太子左庶子分司东都迁左散骑常侍集贤殿学士改刑部侍郎为华州刺史召拜兵部侍郎出河南尹复还旧官卒赠户部尚书谥曰敬潏以道自任悉心事上疾党附不为权近所持尝哀古今辞章续梁昭明太子文选自号太和通选上之当时文士非与游者皆不取世恨其隘宪宗竟以药弃天下世益谓潏知言穆宗虽诛泌而后稍稍复惑方士有布衣张皋者上疏曰神虑澹则血气和嗜欲胜则疾疹作古之圣贤务自颐养不以外物挠耳目声色败情性则和平自臻非药物效也高宗时处士孙思邈达于养生其言曰人无故不用饵药药有偏助令人藏气不平夫寒暑为贼节宣乖度有资于医尚当重慎故礼称医不三世不服其药庶士犹尔况天子乎先帝晚节喜方士累致危疾陛下素所详知不可更踵前车自贻后悔帝善其言诏访皋不获

△李中敏

李中敏字藏之系出陇西元和中擢进士第性刚峭与杜牧李甘善其文辞气节大抵相上下沈传师观察江西辟为判官入拜侍御史郑注诬构宰相宋申锡天下以目太和六年大旱诏询所以致雨者中敏时以司门员外郎上言昔东海误杀一孝妇大旱三年宋申锡位宰相为奸人所忌陷不测之辜狱不参验衔恨而没天下士皆指目郑注天之降灾殆有由然桑弘羊兴筦榷之利卜式请烹以致雨况申锡之枉天下知之何惜斩一注以快忠臣之魂帝不省中敏以病告满归颍阳【旧书作洛阳】注诛以司勋员外郎召累迁谏议大夫为理匭使建言上书者将纳于匭有司先审其副有不可辄却之臣谓匭朝出禁中日暮将入为下开必达之路广聪明直枉结也若有司先裁可否恐事不重密非穷塞得自申意请今后但为引进可否断自中旨以明置匭之本诏可迁给事中仇士良以开府阶荫其中子敏判曰开府阶诚宜荫子谒者监何由有儿士良惭恚繇是复弃官去开成末为婺杭二州刺史【按通鉴李德裕亦以中敏为杨嗣复之党恶之出为婺州刺史是由给事中出为刺史中闲未尝有弃官之事又通鉴纪此在武宗即位之后则中敏之历婺杭二州亦不尽在开成末也】卒于官中敏所善李款字言源长庆初第进士为侍御史注自邠窳入朝款伏阙劾奏注内通敕使外结朝臣往来两地卜射赋谢帝不省后寢用事款被斥去注死繇仓部员外郎累迁江西观察使终澶王傅【谨按通鉴辑览御批中官荫子至明季而弊极其实已滥觞于此中敏一判不烦言而切中窳瑯豎衔恨有志者方当力为主持德裕徒以门户之见辄加贬谪不顾是非不循法度惟报复私嫌是务可鄙甚矣】

△李甘

李甘字和鼎长庆末第进士举贤良方正异等累擢侍御史郑注侍讲禁中求宰相朝廷哗言将用之甘显倡曰宰相代天治物者当先德望后文艺注何人欲得宰相白麻出我必坏之既而麻出乃以赵儋为鄜坊节度使甘坐轻肆贬封州司马而李训内亦恶注繇是注卒不相甘终于贬始河南人杨牢有至行甘方未显以书荐于尹曰执事之部孝童杨牢父茂卿从田氏府赵军反杀田氏茂卿死牢自洛阳走常山二千里号伏叛垒秃发羸骸有可怜状讎意感解以尸还之单纒冬月往来太行闲冻肤皴瘵衒哀雨血行路稠人为牢泣牢为儿践操如此未闻执事门唁而书显之岂树风扶教意耶甘为人遇事慷慨皆此类牢后亦擢进士第

△刘蕡

刘蕡字去华幽州昌平人客梁汴闲明春秋能言古兴亡事沈健于谋浩然有捋世

意擢进士第自元和之末宦官益横建置天子在其掌握威权出人主之右蕢常痛疾太和二年举贤良方正能直言极谏帝引诸儒百余人于廷亲策之蕢对曰臣诚不佞有正国致君之术无位而不得行有犯颜敢谏之心无路而不得达常欲与庶人议于道商贾谤于市得通上听一悟主心虽被袄言之罪无所悔况逢陛下询求过关咨访嘉谋制诏中外举直言极谏臣辱斯举专承大问敢不悉意以言至于上所忌时所禁权幸所讳恶有司所与夺臣愚不识伏惟陛下少加优容不使圣时有谗言受戮者天下之幸也臣闻不宜忧而忧者国必衰宜忧而不忧者国必危臣以为陛下宜先忧者宫闱将变社稷将危天下将倾四海将乱此四者国家已然之兆故臣谓圣虑宜先及之夫帝业艰难而成之固不可容易而守之太祖肇其基高祖勤其续太宗定其业元宗继其明至于陛下二百余载其闲圣明相因扰乱继作未有不用贤士近正人而能绍兴徽烈者也或一日不念则颠覆大器宗庙之耻万古为恨臣谨按春秋继故必书即位所以正其始也终必书所终之地所以正其终也故为君者所发必正言所履必正道所居必正位所近必正人春秋阉弑吴子余祭书其名疏远贤士昵近刑人有不君之道伏惟陛下思祖宗开国之勤念春秋继故之诚明法度之端杜篡弑之渐远刀锯之贱亲骨鲠之直辅相得以颞其任庶寮得以守其官奈何以褻近五六人总天下大政外专陛下之命内窃陛下之权威摄朝廷势倾海内羣臣莫敢指其状天子不得制其心祸稔萧墙奸生帷幄臣恐曹节侯览复生于今日此宫闱将变也臣谨按春秋定公元年春王不言正月者春秋以为先君不得正其终则后君不得正其始故曰定无正也今忠贤无腹心之寄阉寺专废立之权陷先帝不得正其终致陛下不得正其始况太子未立郊祀未修将相之职不归名器之宜不定此社稷将危也臣谨按春秋王札子杀召伯毛伯春秋之义两下相杀不书此书者重其颞王命也夫天之所授者在命君之所存者在令操其命而失之者是不君也侵其命而专之者是不臣也君不君臣不臣此天下所以将倾也臣谨按春秋晋赵鞅以晋阳之兵叛入于晋书其归者能逐君侧之恶以安其君故春秋善之今威柄陵夷藩臣跋扈或有不达人臣之节首乱者以安君为名不究春秋之微称兵者以逐恶为义则典刑不繇天子征伐必自诸侯此海内之将乱也故樊哙排闥而雪涕袁盎当车而抗辞京房发愤以殒身窦武不顾而毕命此皆陛下明知之矣臣谨按春秋晋狐射姑杀阳处父书襄公杀之者以其君漏言也夫上漏其情则下不敢尽意上泄其事则下不敢尽言故传有造膝诡辞之文易有失身害成之戒今公

卿大臣非不欲为陛下言之虑陛下不能用也忽而不用必泄其言臣下既言而不行必婴其祸适足钳直臣之口而重奸臣之威是以欲尽其言则有失身之惧欲尽其意则有害成之忧裴回郁塞以须陛下感悟然后尽启沃陛下何不以听朝之余时御便殿召当世贤相老臣访持变扶危之谋求定倾捄乱之术塞阴邪之路屏褻狎之臣制侵陵迫胁之心复门户扫除之役戒其所宜戒忧其所宜忧既不得治其前当治于后既不得正其始当正其终昔秦之亡也失于强暴汉之亡也失于微弱强暴则奸臣畏死而害上微弱则强臣窃权而震主伏见敬宗不虞亡秦之祸不翦其萌伏惟陛下深軫亡汉之忧以杜其渐则宗祖之洪业可绍三五之遐轨可追矣臣谨按春秋书梁亡不书取者梁自亡也以其思虑昏而耳目塞上出恶政人为寇盗皆不知其所以然以自取其灭亡也臣闻国君之所以尊者重其社稷也社稷之所以重者存其百姓也苟百姓不存则虽社稷不得固其重社稷不重则人君不得保其尊故治天下者不可不知百姓之情夫百姓者陛下之赤子陛下宜令慈仁者视育之如保傅焉如乳哺焉如师之教导焉故人之于上也恭之如神明爱之如父母今或不然陛下亲近贵幸分曹建署补除卒吏召致宾客因其货贿假以声势大者统藩方小者为守牧居上无清惠之政而有饕餮之害居下无忠诚之节而有奸欺之罪故人之于上也畏之如豺狼恶之如仇敌今海内困穷处处流散饥者不得食寒者不得衣鰥寡孤独不得存老幼疾病不得养加以国权兵柄颺于左右贪臣聚敛以固宠奸吏因缘而弄法冤痛之声上达于九天下入于九泉鬼神为之怨怒阴阳为之愆错君门万里不得告诉士人无所归化百姓无所归命官乱人贫盗贼并起土崩之势忧在旦夕即不幸因之以病疴继之以凶荒陈胜吴广不独起于秦赤眉黄巾不独生于汉所以为陛下发愤扼腕痛心泣血也如此则百姓有涂炭之苦陛下何繇而知之乎陛下有子惠之心百姓安得而信之乎臣闻汉帝即位之初更制七十余事其心甚诚其称甚美然纪纲日紊国祚日衰奸宄日强黎元日困繇不能择贤明而任之失其操柄自陛下即位忧勤兆庶屡降德音四海之内莫不抗首而长息自喜复生于死亡之中也伏惟陛下慎终如始以塞四方之望诚能揭国柄以归于相持兵柄以归于将去贪臣聚敛之政除奸吏因缘之害惟忠贤是近惟正直是用内宠便僻无所听焉选清慎之官择仁惠之长敏之以利煦之以和教之以孝慈导之以德义去耳目之塞通上下之情俾万国欢康兆庶苏息即心无不达而行无不孚矣臣谨按春秋齐桓公盟诸侯不日而葵邱之盟特以日者美其能宣明天子之禁率奉

正官之法故春秋备而书之然则官者五帝三王之所建也法者高祖太宗之所制也法宜画一官宜正名今又分外官中官之员立南司北司之局或犯禁于南则亡命于北或正刑于外则破律于中法出多门人无所措繇兵农势异而中外法殊也臣闻古者因井田以制军赋闲农事以修武备提封约卒乘之数命将在公卿之列故兵农一致而文武同方以保乂邦家式遏乱略太宗置府兵台省军卫文武参掌闲岁则櫜弓力穡有事则释耒荷戈所以修复古制不废旧物今则不然夏官不知兵籍止于奉朝请六军不主武事止于养阶勋军容合中官之政戎律附内臣之职首一戴武弁疾文吏如仇讎足一蹈军门视农夫如草芥谋不足以翦除奸凶而诈足以抑扬威福勇不足以镇卫社稷而暴足以侵害里闾羈縻藩臣干陵宰辅隳烈王度汨乱朝经张正夫之威上以制君父假天子之命下以御英豪有藏奸观衅之心无仗节死难之谊岂先王经文纬武之旨邪臣愿陛下贯文武之道均兵农之功正贵贱之名一中外之法还军卫之职修省署之官近崇贞观之风远复成周之制自邦畿以刑下国始天子而达诸侯可以制猾奸之强无踰检之患矣昔晁错为汉削诸侯非不知祸之将至忠臣之心壮夫之节苟利社稷死无悔焉臣非不知言发而祸应计行而身缪盖痛社稷之危哀生人之困岂忍姑息时计窃陛下命之宠哉是时考官左散骑常侍冯宿太常少卿贾餗库部郎中庞严见蕡封嗟伏以为过古晁董而畏中官不敢取诏下物论噤然称屈谏官御史欲论奏执政抑之于时被选者二十有三人所言皆冗齷常务类得优调河南府参军事李合曰刘蕡下第我辈登科能无厚颜乃上疏以为蕡所对策汉魏以来无与为比有司以言涉讦忤不敢以闻自诏书下万口籍籍叹其诚鯁至于垂泣且陛下以直言召天下士蕡以直言副陛下所问虽讦必容虽过当奖书于史策于古光明使万一蕡不幸死天下必曰陛下阴杀讦直结讎海内忠义之士皆惮诛夷人心一摇无以自解况臣所对不及蕡远甚乞回臣所授以旌蕡直臣逃苟且之惭朝有公正之路陛下免天下之疑顾不美哉不报令狐楚牛僧孺节度山南东西道皆表蕡幕府授秘书郎待以师礼而宦人深嫉蕡诬以罪贬柳州司户参军卒 【旧书及通鉴皆云终使府御史恐未核】 及昭宗诛韩全海等左拾遗罗衮上言蕡罹谴逐身死异土六十余年正人义夫切齿饮泣比陛下幽东内幸西州王室几丧使蕡策早用则杜渐防萌逆节可消寔殷忧多难远及圣世耶帝感动赠蕡右谏议大夫访子孙授以官云合字子玄后历贺州刺史

钦定续通志卷二百六十九

●钦定续通志卷二百七十 列传七十

列传

唐【七十】

○唐七十

李训 郑注 王涯 贾餗 舒元舆 王璠【郭
行余 韩约 罗立言李孝本 顾师邕 李贞素
】

李训

郑注

王涯

贾餗

舒元舆

王璠

△李训

李训字子垂始名仲言字子训故宰相揆族孙质状魁梧敏于辩论多大言自标置擢进士第补太学助教辟河南节度府从父逢吉为宰相以仲言阴险善谋事厚昵之坐武昭狱流象州文宗嗣位更赦还以母丧居东都郑注佐昭义府仲言往见注相得甚欢时逢吉方留守怏怏不乐思复用知与注善付金币百万使西至京师厚结注注喜介之谒王守澄守澄善遇之即以注药术仲言易义并荐于帝仲言持诡辩激印可听善钩揣人主意始宋申锡谋诛守澄不克死宦尹益横帝愈愤耻欲夷绝其类注阴知帝指屡建密计引仲言叶力仲言尚纒纒帝使衣戎服号王山人与注出入禁中服除起为四门助教赐绯袍银鱼时太和八年也其十月迁周易博士兼翰林侍讲学士于是给事中郑肃韩偓谏议大夫李翊郭承嘏中书舍人高元裕权璩等共劾仲言儉人天下共知不宜在左右帝不听仲言数进讲至阍寺必感愤申重以激帝心帝见其言纵横谓果可任遂不疑而待遇莫与比因改名训明年秋七月进翰林学士兵部郎中知制造居中倚重实行宰相事宦人陈弘志时监襄阳军训启帝召还至青泥驿遣使者杖杀之复以计白罢守澄观军容使赐鸩死【按旧书文宗纪李训之为兵部郎中知制造在太和九年七月甲子作相在九月己巳决杀陈弘志在九月癸亥盖前训作相七日酖杀王守澄在十月辛巳又训作相后十二日也纲目与纪膺合新传序于作相之前旧传序于作相之后俱误】又逐西川监军杨承和淮南韦元素河东王

践言于岭外已行皆赐死而崔潭峻前物故诏剖棺鞭尸元和逆党几尽训本挟奇进及大权在己锐意去恶故与帝言天下事无不如所欲与注相朋比务报恩复讎素忌李德裕宗闵之宠乃因杨虞卿狱指为党人尝所恶者悉陷党中迁贬无阙日班列几空中外震畏帝为下诏开谕羣情稍安不踰月以礼部侍郎同中书门下平章事赐金紫服仍诏三日一至翰林以终易义训起流人一岁至宰相谓遭时其志可行欲先诛宦竖乃复河湟攘夷狄归河朔诸镇意果而谋浅天子以为然俄赐第胜业里赏赉旁午每进见它宰相备位天子倾意宦官卫兵皆慑惮迎拜天下险怪士徼取富贵皆凭以为资训时时进贤才伟望以悦士心人皆惑之尝建言天下浮屠避徭赋耗国衣食请行业不如令者还为民既执政自白罢因以市恩始注先显训藉以进及势相埒赖宠争功不两立然方事未集乃出注使镇凤翔外为助援内实猜克待逞且杀之擢所厚善分总兵柄于是王璠为太原节度使郭行余为邠宁节度使罗立言权京兆尹韩约金吾将军李孝本权御史中丞阴许璠行余多募士及金吾台府卒劫以为用十一月壬戌帝御紫宸殿约奏甘露降金吾左仗树羣臣贺训元與奏言甘露近在禁中陛下宜亲往以承天祉许之即攀如含元殿诏宰相羣臣往视还训奏言非甘露帝曰岂约妄邪顾中尉仇士良鱼志弘等验之训因欲闭止诸宦人使无逸者时璠行余皆辞赴镇兵列丹凤门外彀而待训传呼曰两镇军入受诏旨闻者趋入邠宁军不至璠惧不能前独行余拜殿下宦人至仗所约流汗不能举首士良等怪之曰将军何为尔会风动庑幕见执兵者士良等惊走出阊者将阖扉为宦侍叱争不及闭训急连呼金吾兵曰卫乘輿者人赐钱百千于是有随训入者宦人曰急矣上当还内即扶攀决罍罍下殿趋训攀攀曰陛下不可去士良曰李训反帝曰训不反士良手搏训而蹙训压之将引刀鞞中救至士良免立言孝本领众四百东西来上殿与金吾士纵击宦官死者数十人训持攀愈急至宣政门宦人郗志荣搤训仆之攀入东上合即闭内官呼万岁者数四须臾士良遣神策副使刘泰伦陈君奕等率卫士五百挺兵出所值辄杀涯等惶遽易服步出杀诸司史六七百人复分兵屯诸宫门捕训党千余人斩四方馆流血成渠宦竖知训事连天子相与怨喷帝惧伪不语故宦人得肆志杀戮俄而舒元與王涯皆为兵所执涯实不知谋士良榜笞急乃自署反状诏出卫骑千余驰咸阳奉天捕亡者大索都城分掩涯训等第遂大掠两省印簿书辄持去秘馆图籍荡然无余明日召羣臣朝至建福门从者不得入光范门内闭乃繇金吾右仗至宣政衙兵皆露持是时无宰相御史中丞久之合

门使马元贇启宣政扉传诏张仲方可京兆尹而吏皆前死羣臣不能班帝初未知涯等被系犹迟其不朝既而士良白涯与训谋逆将立郑注遽召仆射令狐楚郑覃兵部尚书王源中吏部侍郎李虞仲等至帝对悲愤因付涯讯牒曰果涯书邪楚曰然涯诚有谋罪应死是日京师兵剽劫未止民乘乱往往复私怨相戕击人死甚众帝遣杨镇靳遂良等屯兵大衢鼓而傲之兵乃止帝逼于宦官于是下诏暴训涯等罪孝本奔郑注至咸阳追骑及之餽匿民闲羸服乘驴自归璠聚河东兵环第自卫志弘给出之俄行余立言皆得自涯十余族并奴婢悉系左右军训既败被绿衣诡言黜官走终南山依浮屠宗密宗密欲匿之其徒不可乃奔凤翔为整屋将所执械而东训恐为宦人酷辱祈监者曰得我者有赏不如持首去乃斩之传其首余党悉禽后一日两神策兵将涯等赴郊庙过两市皆腰斩梟首以徇约最后捕得责以反状不服斩之杀训弟仲褒元皋帝颇思训数为李石郑覃称其才而宦竖益炽帝末以制居常忽忽不怿自是感疾云

△郑注

郑注绛州翼城人世微贱以方伎游江湖闲元和末至襄阳依节度使李愬为愬煮黄金饵之寢亲遇署衙推从至徐州稍参处军政挟邪市权举军患之监军王守澄白愬愬曰然彼奇士也将军试与语守澄始拒不纳既坐机辩横生钩得其意守澄大惊引至后堂语终夕恨相见晚谢愬曰诚如公言即署巡官守澄入总枢密与俱至京师厚加贍恤日夜为守澄计议因阴通赂遗初士纤巧者附离后要官贵人亦趋往既陷宋申锡搢绅侧目御史李款言注奸状请付有司治罪始王涯用注力再辅政又惮守澄遏其奏更擢通王府司马右神策判官士议讙骇刘从谏恶其人欲因斥去之即表副昭义节度至府不旬月文宗暴眩守澄复荐注即日召入对浴堂门赐赉至渥是夜彗出东方长三尺芒耀怒急俄进太仆卿兼御史大夫寻擢工部尚书翰林侍讲学士时李训已在禁中日日议论帝前相倡和谋鉏翦中官自谓功在晷刻帝惑之乘是进退士大夫挠馱朝法贤不肖淆乱俄检校尚书右仆射凤翔陇右节度使诏月入奏事请寮属于训训与舒元舆谋终杀注虑其豪俊为助更择台阁长厚者入辞帝赐通天犀带出都门旗干折注恶之先是守澄死以十一月葬浚水注奏言守澄国劳旧愿身护丧因羣宦者临送欲以镇兵悉禽诛之训畏注专其功乃先五日举事注率五百骑至扶风令韩辽知其谋奔武功注闻训败乃还监军张仲清与前少尹陆畅给注计事斩其首兵皆溃去寮属皆死梟注首光宅坊三日瘞之羣臣皆贺乃夷其家籍赀得绢

百万匹它物称是

△王涯

王涯字广津其先本太原人博学工属文擢进士又举宏辞再调蓝田尉久之以左拾遗为翰林学士进起居舍人元和初会其甥皇甫湜以贤良方正对策异等忤宰相涯坐不避嫌罢学士再贬虢州司马徙为袁州刺史宪宗思之以兵部员外郎召知制诰再为翰林学士累迁工部侍郎封清源县男俄拜中书侍郎同中书门下平章事坐循默不称职罢再迁吏部侍郎穆宗立出为剑南东川节度使时吐蕃寇边西北骚然又略雅州涯调兵拒之长庆三年入为御史大夫迁户部尚书盐铁转运使宝历时复出领山南西道节度使文宗嗣位召拜太常卿四年以吏部尚书代王播复总盐铁政益刻急岁中进尚书右仆射代郡公自李师道平三道十二州皆有铜铁官岁取冶赋百万观察使擅有之不入公上涯始建白收隶天子盐铁诏可久之以本官同中书门下平章事合度支盐铁为一使兼领之俄检校司空兼门下侍郎罢度支真拜司空始变茶法益其税以济用度下益困而郑注亦议榷茶天子命涯为使心知不可不敢争李训败乃及祸籍田宅入于官子孟坚为工部郎中集贤殿学士仲翔太常博士季琰校书郎皆死昭宗天复初大赦明涯训之冤追复爵位官其后裔

△贾餗

贾餗字子美河南人举进士高第又策贤良方正异等授渭南尉集贤校理累擢考功员外郎知制诰餗美文辞开敏有断然褊急气陵辈行李渤为谏议大夫恶其人为宰相言之而李逢吉窦易直爱餗才得不斥穆宗崩告哀江浙道拜常州刺史入为太常少卿复知制诰历礼部侍郎凡三典贡举再迁京兆尹兼御史大夫姑臧县男太和九年出为浙西观察使未行拜中书侍郎同中书门下平章事俄为集贤殿大学士监修国史刘蕡以贤良方正对策指中人为祸乱根本而餗与冯宿庞严为考官畏避不敢闻竟罹其祸

△舒元舆

舒元舆婺州东阳人【按宰相世系表作世家庐江旧书作江州人与此互异】地寒不与士齿始学即警悟去客江夏节度使郗士美异其秀特数延誉元和中举进士擢高第调鄆尉有能名裴度表掌兴元书记文檄豪健一时推许拜监察御史劾按深害无所纵再迁刑部员外郎元舆自负才有过人者锐进取太和五年献文阙下不得报上书自陈文宗得书高其自激印出示宰相李宗闵以浮躁诞肆不可用改着

作郎分司东都时李训居丧尤与元舆善及训用事再迁左司郎中权知御史中丞会帝录囚元舆奏辨明审不三月即真兼刑部侍郎专附郑注注所恶举绳逐之月中以本官同中书门下平章事诡谋谬算日与训比败天下事二人之为也

△王璠

王璠字鲁玉万年人元和初举进士宏辞皆中累迁监察御史仪寓峻整著称于时以起居舍人副郑覃宣慰镇州长庆末擢职方郎中知制诰时李逢吉秉政特厚璠骤拜御史中丞璠挟所恃颇横恣道直左仆射李絳交骑不避絳上疏论之逢吉惮絳正遏其事不奏但罢璠为工部侍郎而絳亦用太子少师分司东都议者不直之明年出为河南尹时内厩小儿颇扰民璠杀其尤暴者远近畏伏入为尚书右丞再迁京兆尹郑注奸状始露宰相宋申锡御史中丞宇文鼎密与璠议除之璠反以告王守澄而注由是倾心于璠进左丞判太常卿事出为浙西观察使李训得幸璠以逢吉故吏荐之复召为左丞拜户部尚书判度支封祁县男李宗闵得罪璠亦其党见注求解乃免训将诛宦人乃授河东节度使已而败

郭行余

韩约

罗立言

李孝本

顾师邕

李贞素

郭行余

郭行余者元和时进士累擢京兆少尹历仕至楚汝二州刺史大理卿擢邠宁节度使李训在东都与行余善故用之及祸

韩约

韩约朗州武陵人本名重华志勇决略涉书有吏干历两池榷盐使虔州刺史交趾叛领安南都护再迁太府卿太和九年代崔鄯为左金吾卫大将军居四日事败

罗立言

罗立言者宣州人贞元末擢进士魏博田弘正表佐其府改阳武令以治剧迁河阴改度支河阴留后坐平余非实没万九千缗盐铁使惜其干止奏削兼侍御史繇庐州刺史召为司农少卿以财事郑注亦与李训厚善训以京兆多吏卒擢为少尹知府事以就其谋训败及祸

李孝本

李孝本宗室子元和时第进士累迁刑部郎中依训得进于是御史中丞舒元舆引知杂事元舆入相擢权知中丞事亦因训及祸

顾师邕

顾师邕字睦之少连子性恬约喜书寡游合第进士累迁监察御史李训荐为水部员外郎翰林学士训遣宦官田全操刘行深周元稹薛士干似先义逸刘英諷按边既行命师邕为诏赐六道杀之会训败不果师邕流崔州至蓝田赐死

李贞素

李贞素嗣道王实子累迁宗正少卿由将作监改左金吾卫将军韩约之诈贞素知之流儋州至商山赐死

钦定续通志卷二百七十

●钦定续通志卷二百七十一 列传七十一

列传

唐 【七十一】

○唐七十一

李德裕

陈夷行

李绅

李回

李让夷

魏謩

曹确

刘瞻

李蔚

李德裕

陈夷行

李绅

李回

李让夷

魏謩

曹确

刘瞻

李蔚

△李德裕

李德裕字文饶元和宰相吉甫子也少力学既冠卓犖有大节不喜与诸生试有司以荫补校书郎河东张宏请辟掌书记府罢召拜监察御史穆宗即位擢翰林学士帝为太子时已闻吉甫名由是顾德裕厚凡号令大典册皆更其手帝怠荒于政戚里多所请丐挟宦人谏禁中语关托大臣德裕建言请白事宰相者听至中书无辄诣第帝然之再进中书舍人未几授御史中丞始吉甫相宪宗牛僧孺李宗闵对直言策痛

诋当路条失政吉甫诉于帝且泣有司皆得罪遂与为怨吉甫又为帝谋讨两河叛将李逢吉沮解其言功未既而吉甫卒裴度实继之逢吉以议不合罢去故追衔吉甫而怨度摈德裕不得进至是闲帝暗庸詎度与元稹相怨夺其宰相而已代之欲引僧孺益树党乃出德裕为浙西观察使俄而僧孺入相由是牛李之憾结矣初润州承王国清乱竄易直领府库赉军费用殫而下益骄德裕自检约以留州财贍兵虽俭而均故士无怨南方信襍巫虽父母痲疾子弃不敢养德裕择长老可语者谕以孝慈大伦使相晓敕违者寘法数年恶俗大变又按属州非经祠者毁千余所撤私邑山房千四百舍寇无所度敬宗立侈用无度诏浙西上脂盃妆具德裕奏所须脂盃妆具度用银二万三千两金百三十两物非土产虽力营索尚恐不逮愿诏宰相议不报又诏索盘绦縹绦千匹复奏止之自元和后禁毋私度僧徐州王智兴给言天子之诞月筑坛度人资福诏可即显募江淮闲民因牟财自入德裕劾奏智兴为坛泗州募愿度者人输钱二千不复勘诘普加髡落自淮而右户三丁男必一男剔发规影徭赋度江者日数百苏常齐民十固八九若不加禁遏则前至诞月江淮失丁男六十万不为细变有诏徐州禁止时帝昏荒数游幸狎比羣小听朝简忽德裕上丹宸六箴其一曰宵衣讽视朝希晚也二曰正服讽服御非法也三曰罢献讽敛求怪珍也四曰纳海讽侮弃忠言也五曰辨邪讽任羣小也六曰防微讽伪游轻出也帝虽不能用其言犹敕韦处厚諄諄作诏厚谢其意然为逢吉排笮讫不内徙时亳州浮屠诡言水可愈疾号曰圣水互相欺誅往汲者日数十百人德裕严勒津逻捕绝之且请下观察使填塞以绝妄源从之帝方惑佛老祷福祈年浮屠方士并出入禁中狂人杜景先上言其友周息元寿数百岁帝遣宦者至浙西迎之诏在所驰驿敦遣德裕上疏极谏息元果诞谲不情终帝世无他验文宗即位乃逐之太和三年召拜兵部侍郎裴度荐材堪宰相而李宗闵以中人助先秉政且得君出德裕郑滑观察使引僧孺协力罢度政事二怨相济凡德裕所善悉逐之于是二人权震天下党人牢不可破矣踰年徙剑南西川蜀自南诏入寇败杜元颖而郭钊代之病不能事民失职无聊生德裕至则完残奋怯皆有条次成都既南失姚协西亡维松由清溪下沫水而左尽为蛮有始韦皋招来南诏复巂州倾资结蛮示以战阵文法德裕以皋启戎资盗策非是非痛矫革不能刷一方耻乃建筹边楼按南道山川险要与蛮相入者图之左西道与吐蕃接者图之右其部落众寡馈餽远迩曲折咸具召习边事者与之指画商订又料择伏瘴旧獠与州兵任战者废遣狩耄什三四士无敢怨又请甲人

于安定弓人河中弩人浙西繇是蜀之器械皆犀锐率户二百取一人使习战贷勿事缓
则农急则战谓之雄边子弟筑仗义城以制大度清溪
关之阻作御侮城以控荣经犄角势作柔远城以扼西山吐蕃复叩岷关徙巂州治台登
以夺蛮险旧制岁杪运内粟瞻黎巂州起嘉眉道阳山
江而达大度乃分饷诸戍常以盛夏至苦瘴毒犇夫多死德裕命以十月为漕始先夏而
至馈者乃安于是二边寢惧南诏请还所俘掠四千人
吐蕃维州将悉怛谋以城降维距成都四百里因山为固东北繇索丛岭而下二百里地
无险走长川不三千里直吐蕃之牙异时戍之以制虜
入者也德裕既得之即发兵以守且陈出师之利僧孺居中沮其功命返悉怛谋于虜以
信所盟德裕终身以为恨 【按德裕追论维州事疏
云维州据高山绝顶三面临江在戎虜平川之冲是汉地入兵之路初海陵并没惟此独
存吐蕃潜以妇人嫁于此州门子二十年后两男长成
窃开垒门引兵夜入遂为所陷号曰无忧城从此得并力于西边更无虞于南路韦皋欲
经币河湟须此城为始急攻数年卒不可克旧唐书采
以入传新书删之亦不载于吐蕃传维州唐地陷蕃本末形势俱不瞭如且无以征德裕
之善计宋待外夷素无自强之策惟以守信偷安即司
马光亦以德裕为非胡三省谓元佑弃米脂四塞予西夏盖当时国论大指如此也今从
附辑】 会监军使王践言入朝盛言悉怛谋死拒远人
向化意帝亦悔之即以兵部尚书召俄拜中书门下平章事封赞皇县伯常建言朝廷惟
邪正二途正必去邪邪必害正然其辞皆若可听愿审
所取舍不然二者并进虽圣贤经营无由成功俄而宗闵罢德裕代为中书侍郎集贤殿
大学士帝暴感风害语言郑注始因王守澄以药进帝
少闲又荐李训使待诏帝欲授谏官德裕曰训小人顷咎恶暴天下不宜引致左右帝曰
人谁无过当容其改且逢吉尝言之对曰圣贤则有改
过若训天资奸邪尚何能改逢吉位宰相而顾爱凶回以累陛下亦罪人也帝语王涯别
与官德裕摇手止涯帝适见不恚训注皆怨即复召宗
闵辅政拜德裕兴元节度使入见帝自陈愿留阙下复拜兵部尚书宗闵奏命已行不可
止更徙镇海军以代王璠先是太和中漳王养母杜仲
阳归浙西有诏在所存问时德裕被召乃檄留后使如诏书璠人为尚书左丞而漳王以
罪废死因与户部侍郎李汉共譖德裕尝赂仲阳导王
不轨帝惑其言召王涯李固言路隋质之隋言德裕大臣不宜有此谗焰少衰遂贬德裕
为太子宾客分司东都复贬袁州长史隋亦免相未几
宗闵以罪斥而注训等败帝追悟德裕以诬构逐乃徙滁州刺史又以太子宾客分司东
都旋起为浙西观察使德裕三在浙西出入十年迁淮

南节度使代牛僧孺僧孺闻之以军事付其副张鹭即驰去淮南府钱八十万缗德裕奏言止四十万为鹭用其半僧孺诉于帝谏官姚合魏謩等共劾奏德裕挟私怨沮伤僧孺帝置章不下诏德裕覆实德裕上言诸镇更代例杀半数以备水旱助军费因索王播段文昌崔从相授簿存具在惟从死官下僧孺代之其所杀数最多即自劾始至镇失于用例不敢妄遂待罪有诏释之武宗立召为门下侍郎同中书门下平章事既入谢即进戒帝辨邪正专委任而后朝廷治夫正人既呼小人为邪小人亦谓正人为邪何以辨之请借物为喻松柏之为木孤生劲特无所因倚萝葛则不然弱不能立必附他木故正人一心事君无待于助邪人必更为党以相蔽欺君人者以是辨之则无惑矣 【谨按通鉴辑览

御批正人指邪人为邪邪人亦指正人为邪二语似矣然邪正固不容不别而朋党实非朝廷所宜有如李德裕较之牛僧孺为略正矣然其朋党恶习何尝不为当时之害】 齐桓公问管仲所以害霸者仲对知人不能举举不能任任而杂以小人害霸也夫辅相有欺罔不忠当亟免忠而材者属任之政无他门天下安有不治帝尝疑杨嗣复李珣顾望不忠遣使杀之德裕率三宰相见延英泣谏因追还使者嗣复等乃免时帝数出畋游暮夜乃还德裕上言愿节田游寻册拜司空 【按新唐书本纪会昌二年正月李德裕为司空三年六月为司徒旧唐书本纪则元年四月进司空二年五月兼守司徒年月不同考旧传位司空在迎公主还下守司徒在赠悉怛谋下二事俱在会昌三年旧书纪传叙次前后皆误】 回鹘自开成时为黠戛斯所破会昌后乌介可汗挟公主牙塞下种族大饥以弱口重器易粟于边退浑党项利虏掠因天德军使田牟上言愿以部落兵击之议者请可其言德裕曰回鹘于国尝有功以穷来归不如与之食以待其变沙陀退浑不可恃也天德兵素弱以一城与劲虏确无不败请诏牟无听诸戎计帝于是贷粟二万斛会盟没斯杀赤心以降赤心兵溃去于是回鹘势穷数丐羊马欲藉兵复故地又愿假天德城以舍公主帝不许乃进逼振武保大栅杷头峯以略朔川转战云州刺史张献节婴城不出回鹘乃大掠党项退浑皆保险莫敢拒帝益知向不许田牟用二部兵之效乃复问以计德裕曰乌介所恃公主尔得健将出奇夺还之王师急击彼必走今锐将无易石雄者请以蕃浑劲卒与汉兵衔枚夜击之势必得帝即以方略授刘沔令雄邀击可汗败之迎公主还回鹘遂败进位司徒黠戛斯遣使来且言攻取安西北廷帝欲从黠戛斯求其地德裕曰不可安西距京师七千里北廷五千里纵得之无用也持实费市虚事灭一回鹘而又生之帝乃止泽潞刘从谏

死其从子稹擅留事以邀节度德裕曰泽潞内地非河朔比舍而不讨无以示四方帝曰可胜乎对曰河朔稹所恃以唇齿也如令魏镇不与则破矣夫三镇世嗣列圣许之请使近臣明告以泽潞命帅不得视三镇今欲诛稹其各以兵会帝然之乃以李回持节谕王元逵何宏敬皆听命始议用兵中外交章固争德裕独请讨帝曰为我语于朝有沮军者先诛之羣论遂息元逵兵已出而宏敬逗留持两端德裕建遣王宰以陈许精甲假道于魏以伐磁宏敬闻遽勒兵请自涉漳取磁潞会横水戍兵叛入太原逐其帅李石奉裨将杨弁主留事方是时稹未下朝廷益忧议者颇言兵皆可罢帝遣中人马元实如太原侦变 【按马元实旧书作元贯】 弁厚赂中人帐饮三日还谬曰弁兵多属明光甲者十五里德裕诘曰李石以太原无兵故调横水卒千五百使戍榆社弁因以乱渠能列卒如此多耶则曰晋人勇皆兵也募而得之德裕曰募士当以财李石以人欠一缣故兵乱弁何得耶太原一铠一戟举送行营安致十五里明光乎使者语塞德裕即奏弁贱伍不可赦如力不足盍舍稹遽趣王逢起榆社军诏元逵趋士门会太原河东监军吕义忠闻即日召榆社卒入斩弁献首京师德裕每疾贞元太和闲有所讨伐诸道兵出境即仰给度支多迁延以困国力或与贼约令懈守备得一县一屯以报故师无大功因请敕诸将令直取州勿攻县故元逵等下邢洛磁而稹气索矣未几郭谊持稹首降帝问何以处谊德裕曰稹竖子安知反职谊为之今三州已降稹穷蹙又叛其族以邀富贵不诛后无以惩恶帝曰朕意亦尔因诏石雄入潞尽取谊等及尝为稹用者悉诛之策功拜太尉进封赵国公寻改卫国公帝尝从容谓宰相曰有人称孔子其徒三千亦为党信乎德裕曰昔刘向云孔子与颜回子贡更相称誉不为朋党禹稷与皋陶转相汲引不为比周无邪心也今所谓党者诬善蔽忠附下罔上车马驰驱以趋权势昼夜合谋美官要选悉引其党为之否则抑压以退仲尼之徒有是乎陛下以是察之则奸伪见矣又尝谓省事不如省官省官不如省吏能简冗官诚治本也乃请罢郡县吏凡二千余员去者皆怨时天下粗平数上疏乞骸骨不许当国凡六年方用兵时决策制胜它相无与故威名独重于时宣宗即位德裕奉册太极殿帝退谓左右曰向行事近我者非太尉耶每顾我毛发为森竖翌日罢为检校司徒同中书门下平章事荆南节度使俄徙东都留守白敏中令狐绹崔铉皆素雠大中元年使党人李咸斥德裕阴事故以太子少保分司东都再贬潮州司马 【谨按通鉴辑览 御批大中务反会昌之政论史者徒以时相前后倾轧宋室绍述纷更有类乎此殊不知宣宗未嗣位时久为

武宗所不礼而李德裕擅权日久又挟震主之势观太尉顾我毛发洒淅数语与霍光驂乘何异则德裕之致祸本其身自取岂待同列巧为排摈而宣宗猜忌寡恩之失有不止于矫枉过正者矣】 明年又导吴汝纳讼李绅杀吴湘事而大理卿卢言刑部侍郎马植御史中丞魏扶言绅杀无罪德裕徇成其冤至为黜御史罔上不道乃贬崖州司户参军事 【按旧唐书传大中元年秋再贬潮州司马明年冬又贬潮州司户二年冬又贬崖州司户纪又以崖州之贬系之三年九月制词称潮州司马季德裕可崖州司户旧传所云明年冬又贬潮州司户者衍文也至年月互异之处未详孰是】 明年卒年六十三德裕性孤峭明辩有风采善为文章虽至大位犹不去书其谋议援古为质袞袞可喜常以经纶天下自命武宗知而能任之言从计行是时王室几中兴先是韩全义败于蔡杜叔良败于深皆监军宦人制其权将不得专进退诏书一日三四下宰相不豫又诸道锐兵皆监军取以自随每督战乘高建旗自表小不胜辄卷旗去大兵随以北由是王师所向多负至讨回鹘泽潞德裕建请诏书付宰司乃下监军不得干军要率兵百人取一以为卫自是号令明壹将乃有功元和后数用兵报机急帝一切令德裕作诏德裕数辞帝曰学士不能尽吾意所居安邑里第有院号起草亭曰精思每计大事则处其中虽左右侍御不得豫不喜饮酒后房无声色娱生平所论著多行于世云子焯仕汴宋幕府贬象州立山尉懿宗时以赦令徙郴州余子皆从死贬所焯子延古司勋员外郎德裕之斥中书舍人崔嘏字干锡谊士也坐书制不深切贬端州刺史嘏举进士复以制策历邢州刺史刘稹叛使其党裴问戍于州嘏说使听命改考功郎中至是作诏不肯巧傅以罪吴汝纳之狱朝廷无为辨者惟淮南府佐魏铤就逮吏使诬引德裕虽痛掠终不从竟贬死岭外又丁柔立者德裕当国时或荐可任谏诤官不果用大中初为左拾遗德裕被放柔立内伤之为上书直其冤坐阿附贬南阳尉 【谨按通鉴辑览 御批李绅案奏湘罪不无迎合执政之心及御史覆奏其冤德裕自当平情问雪乃竟以私意擅杀且罪及推勘之人徇门户而专威福再贬实罪所当得柔立素为所斥乃以为之讼白得名然岂能欺有卓识者哉】 懿宗时诏追复德裕太子少保卫国公赠尚书左仆射距其歿十年

△陈夷行

陈夷行字周道其先江左诸陈也世客颍川由进士第累擢起居郎史馆修撰以劳迁司封员外郎凡再岁以吏部郎中为翰林学士庄恪太子在东宫夷行兼侍读数迁至工部侍郎开成二年进同中书门下平章事而杨嗣复

李珣相次辅政夷行介特议论往往相侵短夷行不能堪辄引疾求去文宗遣使者慰起之会以王彦威为忠武节度使史孝章领邠宁议皆出嗣复及夷行对延英帝问除二镇当否对曰苟自圣择无不当者嗣复曰若用人尽出上意而当固善如小不称下安得嘿然夷行曰愿陛下无倒持太阿以鑄授人嗣复曰古者任则不疑齐桓公器管仲于讎虜岂有倒持虑耶帝以其面相触颇不悦仙韶乐工尉迟璋授王府率右拾遗窦洵直当衙论奏郑覃嗣复嫌以细故谓洵直近名夷行曰谏官当衙正须论宰相得失彼贱工安足言者然亦不可置不用帝即徙璋光州长史【按纠谬驳此传及韦温传谓璋初授王府率因洵直争下除光州长史矣韦温何为犹封还诏书无乃误记盖洵直所争者授王府率温所封还者除光州刺史诏书虽相承而各为一事次第谏争本无误也】进门下侍郎帝尝怪天宝政事不善问姚元崇宋璟于时在否李珣曰姚亡而宋罢因推言元宗自谓未尝杀一不辜而任李林甫种夷数十族夷行曰陛下亦宜戒以权属人嗣复曰夷行失言太守易暴乱为仁义用房元龄十有六年任魏征十有五年人主用忠良久益治用邪佞一日多矣时用郭蘧为坊州刺史右拾遗宋祁论不可蘧果坐赃败帝欲赏祁夷行曰谏官论事是其职若一事善辄进官恐后不免有私夷行盖专诋嗣复又素善覃阴助以排斥朋党天子恶其太过恩礼遂衰罢为吏部尚书寻拜华州刺史武宗即位召为御史大夫俄还进门下侍郎平章事进位尚书左仆射以足疾乞身罢为太子太保以检校司空河中节度使卒

△李绅

李绅字公垂中书令敬玄曾孙世宦南方客润州绅六岁而孤哀等成人母卢躬授之学苏州刺史韦夏卿数称之葬母有鸟衔芝坠轎车元和初擢进士第补国子助教不乐辄去客金陵李锜爱其才辟掌书记绅以锜所为不法不受其书币锜怒将杀绅遁而获免锜诛穆宗召为右拾遗翰林学士与李德裕元稹同时号三俊累擢中书舍人牛僧孺辅政以绅为御史中丞顾其气刚卞而韩愈劲直乃以愈为京兆尹兼御史大夫免台参以激绅绅愈果不相下更持故事诋讦繇是皆罢之以绅为江西观察使入谢自陈所以然帝悟改户部侍郎逢吉终欲陷之绅族子虞隐居华阳自言不愿仕时来省绅雅与柏耆程昔范善及耆为拾遗虞以书求荐绅谓之虞失望悉暴绅所言于逢吉逢吉滋怒乃用张又新李续等计擢虞昔范与刘栖楚皆为拾遗以伺绅隙内结王守澄自助会敬宗立逢吉使守澄从容奏言先帝始议立太子杜元颖李绅劝

立深王独宰相逢吉请立陛下而李续李虞助之逢吉乘闲言绅尝不利于陛下请逐之帝初即位不能辨乃贬绅为端州司马人无敢言者惟韦处厚屡言绅枉后天子于禁中得先帝手敕书一笥发之见裴度元颖绅三疏请立帝为嗣始大感悟悉焚逢吉党所上谤书宝历赦令不言左降官与量移处厚执争诏为追定得徙江州长史迁滁寿二州刺史霍山多虎擷茶耆病之绅至虎不为暴以太子宾客分司东都太和中李德裕当国擢绅浙东观察使李宗闵方得君复以太子宾客分司开成初郑覃以绅为河南尹河南多恶少皆望风遁去迁宣武节度使大旱蝗不入境武宗即位徙淮南召拜中书侍郎同中书门下平章事进尚书右仆射门下侍郎封赵郡公居位四年以足缓不任朝谒检校右仆射平章事复节度淮南卒赠太尉谥文肃始澧人吴汝纳者韶州刺史武陵兄子也武陵坐赃贬死汝纳家被逐久不调时李吉甫任宰相汝纳怨之后遂附宗闵党中会昌时为永宁尉弟湘为江都尉部人讼湘受赃娶民颜悦女绅使观察判官魏铤鞫湘罪明白论报杀之时议者谓吴氏世与宰相有嫌疑绅内顾望织成其罪谏官屡论列诏遣御史崔元藻覆按元藻言湘盗用程粮钱有状娶部人女不实按悦尝为青州衙推而妻王故衣冠女不应坐德裕恶元藻持两端奏贬崖州司户参军宣宗立德裕去位绅已卒崔铉等久不得志导汝纳使为湘讼言湘为人诬蔑以娶妻资媵结赃且言颜悦故士族罪皆不当死绅枉杀之又言湘死绅令即瘞不得归葬凡戮有罪犹待秋分湘无辜盛夏被杀崔元藻衔德裕斥已即翻其辞因言御史覆狱还皆对天子别白是非德裕使不得对具狱不付有司但用绅奏寘湘死是时德裕已失权而宗闵故党令狐绯崔铉白敏中皆当路因是逞憾准神龙诏书酷吏歿者官爵皆夺子孙不得进宦诏削绅三官子孙不得仕始绅以文艺节操见用屡为怨仇所报郗卒能自伸其才以名位终然所至务威烈或陷暴刻故虽歿而坐湘冤云

△李回

李回字昭度新兴王德良六世孙 【按宗室世系表郇王房次子长平王叔良生郇国公孝协孝协生婺州刺史思忠思忠生宣州士曹参军建威建威生泗水令峻嶠峻嶠生奉先令如仙如仙生回回为长平王叔良六世孙新兴王德良乃郇王第四子非回祖也传误】 本名躔字昭回避武宗讳改焉长庆中擢进士第又策贤良方正异等辟义成淮南幕府稍迁监察御史累进起居郎李德裕雅知之强干无不办繇职方员外郎判户部案四迁中书舍人会昌中以刑部侍郎兼御史中丞时方伐刘稹武宗虑河朔列镇阴相缔以挠兵事德裕荐回持节往谕何

弘敬王元逵取邢洺磁报天子二将听命又张仲武以幽州兵攻回鹘而与刘沔不协回至谕以大义仲武释然即合太原军攻潞复以回为使督战至蒲东王宰石雄囊鞬谒道左回不顾呼直史责破贼限牒宰等震恐期六旬取潞否则死之未及期三日贼平以户部侍郎判户部事俄进中书侍郎同中书门下平章事武宗崩为山陵使迁门下侍郎兼户部尚书出为剑南西川节度使以与德裕善决吴湘狱时回为中丞坐不纠摘贬湖南观察使俄以太子宾客分司东都给事中还制谓责回薄遂贬贺州刺史徙抚州长史卒大中九年诏复湖南观察使赠刑部尚书

△李让夷

李让夷字达心系本陇西擢进士第辟镇国李绛府判官又从西川杜元颖幕府与宋申锡善申锡为翰林学士荐让夷右拾遗俄召拜学士累进谏议大夫开成初进中书舍人武宗初三迁至尚书右丞拜中书侍郎同中书门下平章事潞州平检校尚书右仆射宣宗立进司空门下侍郎为大行山陵使未复土拜淮南节度使以疾愿还卒于道赠司徒让夷廉介不妄交位虽显剧以俭约自将为世咨美

△魏謩

魏謩字申之文贞公征五世孙擢进士第同州刺史杨汝士辟为长春宫巡官文宗读贞观政要思征贤诏访其后汝士荐为右拾遗邕管经略使董昌龄诬杀参军衡方厚贬溱州司户俄徙峡州刺史謩谏曰王者赦有罪唯故无赦比昌龄专杀不辜特被矜贷中外以为屈法今又授刺史复使治人紊宪章乖至治不见其可诏改洪州别驾御史中丞李孝本宗室子坐李训事诛死其二女没入宫謩上言宗姓不育宠幸为累伤治道之本速尘秽之嫌谚曰止寒莫若重裘止谤莫若自修惟陛下崇千载之盛德去一旦之玩好帝即出孝本女诏褒謩以为右补阙教坊有工善新声诏授扬州司马议者颇言司马品高不可以授贱工帝意右之宰相谕谏官勿复言謩独固谏荆南监军吕令琛纵僭卒辱江陵令观察使韦长避不发移内枢密使言状謩劾长任察廉知监军侵屈官司不以上闻私白近臣乱法度不报俄为起居舍人帝问卿家书诏颇有存者乎謩对惟故笏在诏令上送郑覃曰在人不在笏帝曰覃不识朕意此笏乃今甘棠因敕謩曰事有不当毋嫌论奏謩对臣顷为谏臣故得有所陈今则记言动不敢侵官帝曰两省属皆可议朝廷事而毋辞也中尉仇士良捕妖民贺兰进兴及党与治军中反状帝自临问诏斩囚以徇御史中丞高元裕言狱当与众共之刑部大理法官也决大狱不与知律令谓何请归有司未报謩上言事系军即推军中如齐民宜付府

县今狱不在有司法有轻重何从而知帝停决诏神策军以官兵留仗内余付御史台台
惮士良不敢异卒皆诛死擢谏议大夫兼起居舍人宏
文馆直学士固让乃拜始暮之进李珣杨嗣复实推引之武宗立暮坐二人党出为汾州
刺史俄贬信州长史宣宗嗣位移郢商二州刺史召授
给事中迁御史中丞发驸马都尉杜中立奸赃权威缩气俄兼户部侍郎事奏中丞纪纲
所寄不宜杂领钱谷乞专治户部诏可顷之进同中书
门下平章事建言今天下羸治惟东宫未立不早以正人傅导之非所以存副贰之重且
泣下帝为感动会詹毗国献象暮以为非土性不可畜
请还其献河东节度使李业杀降虜边部震扰业内恃凭借人无敢言暮奏徙滑州迁中
书侍郎大理卿马曙有犀铠数十惧而瘞之奴王庆以
怨告曙藏甲有异谋按之无他状投曙岭外庆免议者谓奴诉主法不听暮引律固争卒
论庆死累迁门下侍郎兼户部尚书大中十年 【按
宣宗纪宰相表俱云暮以大中十一年二月辛巳罢相此作十年脱一字至吴缜所纠本
传以为十五年谓差四年者不知据何本】 以平章事
领剑南西川节度使上疾求代召拜吏部尚书因久疾检校尚书右仆射太子少保卒年
六十六赠司徒暮为宰相议事天子前说切无所回畏
宣宗尝曰暮名臣孙有祖风朕心惮之然卒以刚正为令狐绯所忌谗罢之

△曹确

曹确字刚中河南河南人擢进士第历践中外累拜兵部侍郎咸通中以本官同中
书门下平章事俄进中书侍郎确邃儒术器识方重动
循法度帝宠优人李可及擢为威卫将军确曰太宗着令文武官六百四十三 【按百官
志太宗省内外官定制为七百三十员此云文武官
六百四十三其数不同吴缜纠之未知孰是】 谓房玄龄曰朕设此待天下贤士工商杂
流假使技出等夷正当厚给以财不可假以官帝不听
确居位六年进尚书右仆射以同平章事出为镇海节度使徙河中卒

△刘瞻

刘瞻字几之其先出彭城后徙桂阳举进士博学宏词皆中徐商辟署盐铁府累迁
太常博士刘瑒执政荐为翰林学士拜中书舍人进承
旨出为河东节度使咸通十一年以中书侍郎同中书门下平章事同昌公主薨懿宗捕
太医韩绍宗等送诏狱逮系宗族数百人瞻喻谏官皆
依违无敢言即自上疏固争帝大怒即日赐罢以检校刑部尚书同平章事为荆南节度
使路岩韦保衡从为恶言闻帝俄斥廉州刺史岩等殊
未慊按图视驩州道万里即贬驩州司户参军事天下谓瞻鲠正特为谗挤举以为冤僖
宗立徙康虢二州刺史以刑部尚书召复以中书侍郎

平章事居位三月卒贍为人廉俸余以济亲旧无第舍四方献馈不及门

△李蔚

李蔚字茂休系本陇西举进士书判拔萃皆中拜监察御史累擢尚书右丞懿宗惑浮屠常饭万僧禁中蔚上疏切谏不听俄拜京兆尹太常卿出为宣武节度使徙淮南代还民诣阙请留诏许一岁僖宗干符初以吏部尚书同中书门下平章事罢为东都留守河东乱杀其帅崔季康用邠盩李侃代之士不附以蔚尝在太原府有惠政为人所怀拜河东节度使同平章事至镇三日卒

钦定续通志卷二百七十一

●钦定续通志卷二百七十二 列传七十二

列传

唐【七十二】

○唐七十二

李程【廓】 李石【福】 李固言 李珣 崔珙【管远】
】 郑肃【卢商】 卢钧 韦琮
 马植 周墀 崔龟从 裴休 崔慎由【安潜彦曾】 萧邺
 刘瑑【夏侯孜】 杜审权【让能】
 毕誠 杨收【发】 徐商【彦若】 刘邺【豆卢瑑】 赵隐
路岩【韦保衡】

李程

李石

李固言

李珣

崔珙

郑肃

卢钧

韦琮

马植

周墀

崔龟从

裴休

崔慎由

萧邺

刘瑑【夏侯孜】

杜审权

毕誠

杨收

徐商

刘邺

赵隐

路岩

△李程

李程字表臣襄邑恭王神符五世孙也擢进士宏辞赋曰五色造语警拔士流推之调蓝田尉县有滞狱十年程单言辄判京兆状最迁监

察御史召为翰林学士顺宗即位为王叔文所排罢学士再迁司勋员外郎爵渭源县男德宗季秋出畋有寒色顾左右曰九月犹衫二月而袍

不为顺时朕欲改月谓何左右称善程独曰玄宗着月令十月始裘不可改帝矍然止学士入署常视曰影为候程性嬾曰过八砖乃至时号八

砖学士元和三年出为随州刺史以能政赐金紫服李夷简镇西川辟成都少尹以兵部郎中入知制诰韩弘为淮西都统命程宣慰历御史中

丞鄂岳观察使还为吏部侍郎敬宗初以本官同中书门下平章事帝欲于宫中营新殿程谏曰陛下方谅阴未宜兴作愿回作费奉园陵帝嘉

纳又请置侍讲学士加中书侍郎进彭原郡公宝历二年检校吏部尚书同平章事为河东节度使徙河中召拜尚书左仆射俄检校司空 【

按宰相表检校兵部旧传同此误】 领宣武山南东道节度再为仆射程为人辩给多智然简脱无仆检虽在华密而无重望武宗立为东都留

守卒年七十七赠太保谥曰缪

李廓

李廓

子廓第进士累迁刑部侍郎大中中拜武宁节度使不能治军补阙郑鲁奏言新麦未登徐必乱既而果逐廓乃擢鲁起居舍人

△李石

李石字中玉襄邑恭王神符五世孙元和中擢进士第辟李听幕府从历四镇有材略为吏精明太和中为行军司马听以兵北渡河令石

入奏占对华敏文宗异之擢工部郎中判盐铁案令狐楚节度河东引为副使入迁给事中累进户部侍郎判度支帝恶李宗闵等以党相排背

公害政凡旧臣皆疑不用取后出孤立者故李训等至宰相训诛死乃擢石以本官同中书门下平章事仍领度支石器雄远当轴秉权亡所挠

方是时宦寺气盛陵暴朝廷每对延英而仇士良等往往斥训以折大臣石徐谓曰乱京
师者训注也然其进孰为之先士良等恐缩不得对气
益夺缙绅赖以强他日紫宸殿宰相进及陛帝喟而叹石进曰陛下之叹臣固未谕敢
问所从帝曰朕叹治之难也石曰今四海夷一唯登拔
才良使小大各任职爱人节用国有余力下不加赋太平之术也于时大臣新族死岁苦
寒外情不安帝曰人心未舒何也石曰刑杀太甚则致
阴沴比郑注多募凤翔兵至今诛索不已臣恐缘以生变请下诏慰安之又劝节用度去
冗食宰相吏卒因内变多死诏江西湖南索募直助召
士力石言宰相若徇正忘私宗庙神灵犹当佑之虽有盗无害也有如挟奸自欺植权党
害正直虽加之防鬼得以诛无所事召募请直以金吾
为卫中人自边还走马入金光门道路妄言兵且至京师讙走尘起百官或鞞而骑台省
吏稍稍遁去郑覃将出石曰事未可知宜坐须其定宰
相走则乱矣若变出不虞逃将安适人之所瞻不可忽也益治簿书沛然如平时里闲羣
无赖望南阙阴持兵俟变金吾大将军陈君赏率众立
望仙门内使趣阖门君赏不从日入乃止是日非石镇静君赏有谋几乱俄进中书侍郎
因言致治之道在得人德宗多猜贰仕进之涂塞奏请
辄报罢东省闭闼累月南台惟一御史故两河诸侯竞引豪英士之喜利者多趋之为
谋主藩镇日横天子为旰食元和闲进用日广陛下嗣
位惟贤是咨士皆在朝廷彼疆宇甲兵如故而低摧顺屈者士不知助也帝曰天下之势
犹持衡此首重则彼尾轻矣其为我博选士朕且用之
石奏咸阳令韩辽治兴成渠渠当咸阳右十八里左直永丰仓秦汉故漕渠成起咸阳抵
潼关三百里无车挽劳李固言曰恐役非其时奈何帝
曰以阴阳拘畏乎苟利于人朕奚虑石用韩益判度支案以赃败石曰臣本以益知财利
不保其贪帝曰宰相任人知则用过则弃谓之至公它
宰相所用强蔽其过此其私也三年正月将朝骑至亲仁里狙盗发射石伤马逸盗邀斫
之坊门绝马尾乃得脱天子骇愕遣使者慰抚赐良药
始命六军卫士二十人从宰相是日京师震恐百官造朝纔十一石因卧家固辞位有诏
以中书侍郎平章事为荆南节度使始训注乱权归阖
竖天子畏偪几不立石起为相以身徇国欲强王室收威柄而仇士良疾之将加害帝知
其然而不能理遂罢去石让中书侍郎换检校兵部尚
书会昌三年检校司空徙河东会伐潞诏以太原兵助王逢军榆社石起横水戍千五百
人令别将杨弁领之常日军兴人赐二缣治装会财匱
给以半士怨又促其行弁乘隙激众以乱还兵逐石出之诏以太子少傅分司东都俄检
校吏部尚书即拜留守卒年六十二赠尚书右仆射

李福

李福

弟福字能之太和中第进士杨嗣复领剑南辟幕府崔郾辅政兼集贤殿大学士引为校理调蓝田尉石当国荐福可任治人繇监察御史至户部郎中累历州刺史进谏议大夫大中时党项羌震扰议者以将贪产怨议择儒臣治边乃授福夏绥银节度使以善政闻徙镇郑滑再迁兵部侍郎判度支出为宣武节度使入迁户部尚书会蛮侵蜀诏福持节宣抚即拜剑南西川节度使同中书门下平章事与蛮战败绩贬蕲王傅分司东都僖宗初以检校尚书左仆射就拜留守改山南东道节度使王仙芝寇山南福团乡兵邀险须之贼不敢入转略岳鄂以逼江陵节度使杨知温求援于福乃自将州兵率沙陀壮骑五百赴之贼已残江陵郾闻福至乃走以劳检校司空同中书门下平章事还朝以太子太傅卒

△李固言

李固言字仲枢其先赵人擢进士甲科江西裴堪剑南王播皆表署幕府累官户部郎中温造为御史中丞表知杂事进给事中再迁尚书右丞李德裕辅政出固言华州刺史俄而李宗闵复用召为吏部侍郎州大豪何延庆横猾哗众遮道使不得去固言怒杖杀之尸诸道既领选按籍自拟先收寒素进御史大夫太和九年宗闵得罪李训郑注用事训欲自取宰相乃先以固言为门下侍郎同中书门下平章事旋坐党人出为山南西道节度使训自代其处训败文宗颇思之复召为平章事仍判户部俄以门下侍郎平章事为西川节度使让还门下侍郎乃检校尚书左仆射始置骠军千匹又募锐士三千武备雄完武宗立召授右仆射会崔珙陈夷行以仆射为宰相改检校司空兼太子少师领河中节度使蒲津岁河水坏梁吏撤竿用舟邀丐行人固言除之以疾复为少师迁东都留守宣宗初还右仆射后以太子太傅分司东都卒年七十八赠太尉

△李珣

李珣字待价其先出赵郡客居淮阴幼孤事母以孝闻举进士高第河阳乌重胤表置幕府以拔萃补渭南尉擢右拾遗穆宗即位召李光颜于邠李愬于徐州期九月九日大宴羣臣珣与宇文鼎温畬韦瓘冯约同进曰道路皆言陛下追光颜等将与百官高会且元朔未改陵土新复谒密弛禁本为齐人锺鼓合飨不施禁内夫王者之举为天下法不可不慎且光颜愬忠劳之臣方盛秋屯边如令访谋猷付疆事召之可

也岂以酒食之欢为厚耶盐铁使王璠增茶税十之五以佐用度珣上疏谓榷率本济军兴而税茶自贞元以来有之方天下无事忽厚敛以伤国体一不可茗为人饮与盐粟同资若重税之售必高其敝先及贫下二不可山泽之产无定数程斤论税以售多为利若价腾踊则市者稀其税几何三不可帝不纳方是时禁中造百尺楼土木费巨万故播亟敛阴中帝欲珣以数谏出为下邳令武昌牛僧孺辟署掌书记还为殿中侍御史除礼部员外郎僧孺还相以司勋员外郎知制诰为翰林学士加户部侍郎始郑注以医进文宗一日语珣曰卿亦知有郑注乎宜与之言珣曰臣知之奸回人也帝愕然李宗闵以罪去珣为申辨贬江州刺史徙河南尹李固言入相珣复为户部侍郎判本司事三年杨嗣复辅政荐珣以本官同平章事珣与固言嗣复善自固言得位相继援引居大政以倾郑覃陈夷行李德裕三人凡有奏议必以朋党为谋屡为覃所廷折

【按新传叙次于当时情事未晰今从旧唐书辑】珣数辞位不许进封赞皇县男始庄恪太子薨帝意属陈王既而帝崩中人引宰相议所当立珣曰帝既命陈王矣已而武宗即位人皆为危之珣曰臣下知奉所言安与禁中事迁门下侍郎为文宗山陵使会秋大雨梓宫至安上门陷于泞罢为太常卿终以议所立贬江西观察使再贬昭州刺史宣宗立内徙郴舒二州以太子宾客分司东都迁河南节度使罢横赋宿逋百余万以吏部尚书召去镇而府库十倍于初俄检校尚书右仆射淮南节度使珣顾已大臣谊不以内外自异表请立皇太子维天下心江淮旱发仓禀赈流民以军羨储杀半价与人卒年六十九赠司空谥曰贞穆始淮南三节度皆卒于镇人劝易署寝珣曰上命我守扬州是实正寝若何去之及疾亟官属见卧内惟以州有税酒直而神策军常为豪商占利方论奏未见报为恨淮南之人德之珣已歿叩阙下愿立碑刻其遗爱云

△崔珙

崔珙其先博陵人父颀官同州刺史生八子皆有才世以拟汉荀氏八龙珙为人有威重精吏治以拔萃异等累擢至泗州刺史由太府卿为岭南节度使入对延英文宗访治抚后先珙对有理时徐州以王智兴后军骄数犯法节度使高瑀未能制天子思材望威烈者革其弊见珙意慷慨又治泗得士心即诏珙代瑀居二岁徐人戢畏入为右金吾大将军迁京兆尹会大旱奏析浚入禁中者取十九溉民田开成末累进刑部尚书诸道盐铁转运使俄同中书门下平章事仍领盐铁即拜中书侍郎会昌二年进位尚书左仆射明年以兄管丧被疾求解以所守官罢

与崔铉故有怨及铉宰相代为使即奏珙妄费宋滑院盐铁钱九十万缗又劾与刘从谏厚数护其奸贬泮州刺史再斥恩州司马宣宗立徙商州刺史以太子宾客分司东都起为凤翔节度使铉复执政珙惧以疾自乞是时西戎归故地边奏系驿议所以绥接珙坐不自力避事下除太子少师分司东都就拜留守复节度凤翔卒于官子涓御史大夫

崔管

崔远

崔管

管字从律珙兄举进士贤良方正皆高第累辟诸使府入朝稍历吏部员外郎李德裕任御史中丞引知杂事进给事中太和初持节宣慰卢龙使有指及兴元杀李绛复往慰抚军皆按堵还迁工部侍郎京兆尹宋申锡为谗所危管与大理卿王正雅固请出狱付外与众治之天下重其贤以尚书右丞出为荆南节度使进左丞俄判兵部西铨吏部东铨徙东都留守以吏部尚书召辞疾不拜会昌中终山南西道节度使赠尚书左仆射弟瓌琦尤显瓌位刑部尚书琦河中节度使琦子澹擢进士第终吏部侍郎崔远

子远干宝中以兵部侍郎同中书门下平章事迁中书侍郎从迁洛罢为尚书右仆射柳璨忌衣冠有望者贬为白州长史被杀于白马驿诸崔自咸通后有名历台阁藩镇者数十人天下推士族之冠始其曾祖母长孙春秋高无齿祖母唐事姑孝每旦乳姑一日病召长幼言吾无以报妇愿后子孙皆若尔孝世谓崔氏昌大有所本云

△郑肃

郑肃字义敬荥阳人以儒世家肃学有根柢第进士书判拔萃补兴平尉累擢太常少卿博士有疑议往咨必据经条答文宗高择鲁王府属肃以谏议大夫兼长史王为皇太子迁给事中进尚书右丞出为陕虢观察使开成二年召拜吏部侍郎帝以肃尝辅导东宫诏兼宾客为太子授经既而太子母爱弛为谗所乘废斥有端肃言天下大本不可轻动意致深切帝为动容然内宠方熯太子终以忧死出为检校礼部尚书河中节度使武宗知太子无罪特困于谗而朝廷谓肃临义不可夺挺挺有大臣节召为太常卿迁山南东道节度使五年以检校尚书右仆射同中书门下平章事宣宗即位迁中书侍郎罢为荆南节度使卒赠司空谥曰文简子洎仕至州刺史洎子仁规中书舍人仁表起居郎始肃罢政事帝以卢商代之

卢商

卢商

商字为臣范阳人蚤孤寡能以学自奋举进士拔萃皆中由校书郎佐宣歙西川幕府入朝累十余迁至大理卿为苏州刺史吏以盐法求赢费民愈困商令计口售盐无常额人便之岁费返增进浙西观察使召为刑部侍郎京兆尹方伐潞刍粮踰太行饷军环六七镇招商以户部侍郎判度支又诏杜惊兼盐铁度支并二使财以贍兵乃不乏出为东川节度使以兵部侍郎还判度支擢中书侍郎同中书门下平章事范阳郡公大中元年春旱招商与御史中丞封敖理囚系于尚书省误纵死罪罢为武昌军节度使以疾辞拜户部尚书卒

△卢钧

卢钧字子和系出范阳徙京兆蓝田举进士中第以拔萃补秘书正字从李绛为山南府推官调长安尉又从裴度为太原观察支使迁监察御史争宋申锡狱知名进吏部郎中出为常州刺史迁给事中有大诏令必反复省审驳奏无私拜华州刺史关辅驿马疲耗钧为市健马率三岁一易自是无乏事擢岭南节度使海道商舶始至异时帅府争贱售其珍钧一不取蕃獠与华人错居相婚嫁多占田营第舍吏或挠之则乱钧下令蕃华不得通婚禁名田产贞元后流放衣冠子姓穷弱不能自还者以奉禀资助又除采金税以户部侍郎召判户部会昌中汉水害襄阳拜钧山南东道节度使筑堤六千步以障王师伐刘稹武宗以钧宽厚能得众诏兼节度昭义军会稹死敕乘驿往进检校户部尚书专领昭义稹将白惟信保潞城未下石雄召之使往十余辈皆死钧次高平惟信献款且曰不即降者畏石尚书尔雄欲尽夷潞兵钧不听坐治堂上左右皆雄亲卒击鼓传漏钧自居甚安雄引去乃召惟信至送阙下余众悉原俄而兴士五千戍代北钧坐城门劳遣戍卒骄不欲去酒酣反攻城迫大将李文矩为帅钧仓卒奔潞城文矩投地僵卧稍谕叛者众乃悔服即相与谢钧迎还府斩首恶乃定诏趣戍者行密使尽戮之钧请徐乘其变而使者不发须报时戍人已去潞一舍钧选牙卒壮骑夜趋迟明至太平驿尽斩之即拜检校尚书左仆射宣宗即位改吏部尚书会刘约自天平徙宣武未至暴死家僮五百无所仰衣食思乱乃授钧宣武节度使人情妥然召入复为吏部尚书迁检校司空太子少师封范阳郡公节度河东大中九年召为左仆射钧宿齿数外迁而后来多至宰相始被召自以当辅政既失志数移病不事事令狐绹恶之罢仆射以检校司空守太子太师元日大飨含元殿钧年八十升降如仪音吐鸿畅举朝咨叹以钧耆硕顾不任职咎绹为媚贤绹闻言于帝即以钧同中书门

下平章事为山南西道节度使俄检校司徒为东都留守懿宗初复节度宣武辞不拜以太保致仕卒年八十七赠太傅谥曰元钧所居官必有绩大抵根仁恕至诚而施于事位将相没而无赢财

△韦琮

韦琮字礼玉进士及第稍进殿中侍御史坐讯狱不得实改太常博士累擢户部侍郎翰林学士承旨以中书侍郎同中书门下平章事迁门下侍郎兼礼部尚书无功罢为太子宾客分司卒

△马植

马植字存之凤州刺史勋子也第进士又擢制策科补校书郎繇寿州团练副使三迁饶州刺史开成初为安南都护精吏事以文雅饒政洞夷便安州部废池珠复生以政最检校左散骑常侍徙黔中观察使会昌中召拜光禄卿迁大理植自以誉望在当时诸公右久补外还朝不得要官为宰相李德裕所抑白敏中当国凡德裕所不善悉不次用之故植以刑部侍郎领诸道盐铁转运使迁户部俄同中书门下平章事进中书侍郎初左军中尉马元贄最宠赐通天犀带植素与元贄通昭穆元贄以赐带遗之它日对便殿帝识其带以诘植植震恐具言状罢为天平军节度使既行诏捕亲吏下御史狱尽得交私状贬常州刺史以太子宾客分司东都起忠武宣武节度使卒

△周墀

周墀字德升汝南人少孤事母孝及进士第辟湖南团练府巡官入为监察御史集贤殿学士长史学属辞高古文宗雅重之迁起居舍人改考功员外郎兼舍人事俄知制诰入翰林为学士武宗即位以疾改工部侍郎出为华州刺史徙江西观察使劾举部刺史翦捕剧贼出兵戍彭蠡湖禁止剽劫进拜义成节度使封汝南县男一军大治以兵部侍郎召判度支进同中书门下平章事迁中书侍郎建言故宰相德裕复位元和实录窜寄它事以广父功遂削新书河东节度使王宰重赂权幸求同平章事领宣武墀言天下大镇如井汴者纔几宰之求何可厌宣宗纳之驸马都尉韦让求为京兆持不与由是妄进者少衰会吐蕃微弱以三州七关自归帝召宰相议河湟事墀对不合旨罢为剑南东川节度使驸马都尉郑顥言于帝曰世谓墀以直言相亦以直言免帝悟加拜检校尚书右仆射卒年五十九赠司徒

△崔龟从

崔龟从字玄告清河人元和十二年擢进士第又登贤良方正及书判拔萃二科拜右拾遗太和二年改太常博士最明礼家沿革问不虚

酬定敬宗庙室祝辞皇帝不可云孝弟九宫皆列星不容为大祠大臣薨宜于讣曰辍朝不宜于数日外三品已上官非经任将相密近不宜辍朝诏皆可其议累转考功郎中史馆修撰九年转司勋郎中知制诰十二月正拜中书舍人开成初出为华州刺史三年三月入为户部侍郎判本司事四年权判吏部尚书铨事大中四年【旧书宣宗纪大中二年】以中书侍郎同中书门下平章事五年七月撰成续唐历三十卷上之【旧书宣宗纪云续柳芳唐历二十二卷数不同】十一月检校尚书左仆射充宣武军节度使六年罢相累历方镇卒

△裴休

裴休字公美孟州济源人父肃贞元时为浙东观察使剧贼栗辘诱山越为乱陷州县肃引州兵破禽之休擢进士第举贤良方正异等历诸府辟署入为监察御史更内外任大中时以兵部侍郎领诸道盐铁转运使六年进同中书门下平章事奏言宰相论政上前知印者次为时政记详已辞略它议请宰相人自为记合付史官诏可进中书侍郎太和后岁漕江淮米四十万斛至渭河仓者纔十三舟楫僨败吏乘为冒没刘晏之法尽废休分遣官询按其弊乃命在所令长兼重漕褒能者谪怠者旧岁率雇缙二十八万休悉归诸吏敕巡院不得辄侵牟着新法十条又立税茶十二法人以为便居三年粟至渭仓者百二十万斛无留壅时方镇设邸阁居茶取直因视商人他货横赋之道路苛扰休建言许收邸直毋擅赋商人又收山泽宝冶悉归盐铁秉政凡五岁罢为宣武军节度使封河东县子久之由太子少保分司东都复起历昭义河东风翔荆南四节度卒年七十四赠太尉休能文章书楷有法嗜浮屠法演绎其说数万言

△崔慎由

崔慎由字敬止司空从之子聪警强记资端厚有父风繇进士第擢贤良方正异等郑滑高铎辟府判官入为右拾遗进翰林学士授湖南观察使召还由刑部侍郎领浙西入迁户部侍郎判户部俄进工部尚书同中书门下平章事与萧邺有隙邺辅政引刘瑑而出慎由为东川节度使初宣宗饵长年药病渴且中躁而国嗣未立帝对宰相欲肆赦患无其端慎由曰太子天下本若立之赦为有名帝恶之不荅邺等乘是譖去之时大中十二年也咸通初徙华州刺史改河中节度使以吏部尚书请老授太子太保分司东都卒赠司空谥曰贞子胤别传慎由弟

崔安潜

崔彦曾

崔安潜

安潜字进之进士擢第咸通中历江西观察忠武节度使干符初王仙芝寇河南安潜募人增陴缮械号令精明贼畏之不犯陈许境使大将张自勉将兵七千援宋州时宋威屯曹州官军数却贼围宋益急自勉收南月城斩贼二千级仙芝夜解去宰相郑畋请以陈许兵三千隶宋威而威忌自勉乞尽得安潜军使自勉隶麾下畋谓威有疑忿必杀自勉奏言今以兵悉畀威是自勉以功受辱安潜抗贼有功乃取锐兵付威后有缓急何以战是劳不蒙赏诏止以四千付威余还自勉俄代高骈领西川节度吏倚骈为奸利者安潜皆诛之宰相卢携素厚骈乃诬以罪罢为太子宾客分司东都僖宗避贼剑南召为太子少师王铎任都统表以自副铎解兵安潜复为少师东都留守青州王敬武卒诏拜平卢节度使检校太师兼侍中会敬武子师范专地不得入而还后迁太子太傅卒赠太子太师谥贞孝

崔彦曾

彦曾岭南节度使能之子咸通初由太仆卿为徐州观察使晓律令为政刚猛徐军素骄彦曾长于抚民而短于治军亲吏尹戡徐行俭贪不恤士士多怨桂林戍卒叛胁粮料判官庞勋为将剽虏北还自浙西趋淮南彦曾命牙将田厚简慰劳而用都虞候元密伏甲任山馆击贼勋遣吏给言士思归不敢遏请至府解甲自归彦曾斩其吏勋陷宿州彦曾料丁男乘城或劝率众奔兖州彦曾曰我方帅也奉命守此惟有死尔斩议者一人号于众俄而勋傅城城中大雾如堕彦曾悉诛贼家属勋众四面超墉入囚彦曾大彭馆有曹君长者说勋曰贵者不并处今朝廷未以留后命公盖观察使存尔勋乃杀彦曾于寝自监军使逮官属皆死赠刑部尚书干符中录其子佑之为荥阳尉徐吏有路审中者彦曾知其能颇任之既遇害赂守卒敛藏其尸张玄稔攻徐州审中率死士应官军开南白门官兵入因得破勋后位岚州刺史郑畋谓审中节贯神明请擢为右羽林将军诏可有许铎者罢武城令客于徐勋胁以官不从彦曾官属被囚铎潜馈资粮及死为之瘞匿免其子弟贼平乃皆归其丧诏拜石首令僚官焦璐温廷皓李柅崔蕴柳秦卢崇嗣韦廷范赠官有差录其子官之

△萧邺

萧邺字启之梁长沙宣王懿九世孙及进士第累进监察御史翰林学士出为衡州刺史大中中召还翰林拜中书舍人迁户部侍郎判本司以工部尚书同中书门下平章事懿宗初罢为荆南节度使仍平章事进检校尚书左仆射徙剑南西川南诏内寇不能制下迁检校右仆射山南西道观察使历户部吏部二尚书拜右仆射还以平章事节度河东在官无足称道

卒

△刘瑒 【夏侯孜】

刘瑒字子全高宗朝宰相仁轨五世孙第进士镇国陈夷行表为判官入迁左拾遗谏罢武宗方士言多恳愎大中初擢翰林学士会伐党项诏为行营宣慰使迁刑部侍郎乃哀汇敕令可用者由武德讫大中凡二千八百六十五事类而析之参订重轻号大中刑律统类以闻法家推其详由河南尹进宣武军节度使徙河东未几以户部侍郎召判度支寻同中书门下平章事仍领度支尝与崔慎由议帝前慎由请甄别流品瑒质曰王夷甫相晋崇尚浮虚以述流品卒致沦夷今日不循名责实使百吏各称职而先流品未知所以致治也慎由不能对由是罢相俄而瑒大病加工部尚书拜卧内犹手疏陈政事居位半岁卒年六十三赠尚书左仆射瑒以名节自将凡议论处事不私与瑒同知政者夏侯孜孜字好学亳州谯人擢进士第累迁婺绛等州刺史由兵部侍郎诸道盐铁转运使为同中书门下平章事仍领盐铁懿宗立进门下侍郎谯郡侯俄以同平章事出为西川节度使召拜尚书左仆射还执政进司空为贞陵山陵使坐隧坏出为河中节度使咸通时蛮犯蜀深入士乏粮追责孜治蜀无素备以太子少保分司东都卒

△杜审权

杜审权字殷衡太宗朝宰相如晦六代孙第进士辟浙西幕府举拔萃中为右拾遗宣宗时入翰林为学士累迁兵部侍郎学士承旨懿宗立进同中书门下平章事再迁门下侍郎出为镇海军节度使同平章事庞勋乱徐州审权与令狐绹崔铉连师掎角馈粟相衔王师赖济勋破进检校司空入为尚书左仆射襄阳郡公继领河中忠武节度使卒赠太子太师谥曰德审权清重寡言性长厚居翰林最久终不漏禁近语与杜悰俱位将相悰先进故世谓审权为小杜公

杜让能

杜让能

子让能字羣懿擢进士第从宣武王铎府为推官以长安尉为集贤校理丧母以孝闻又辟刘邺牛蔚二府稍进兵部员外郎萧遘领度支引判度支案僖宗狩蜀奔谒行在三迁中书舍人召为翰林学士方关东兵兴调发绥徠书诏丛浩让能思精敏凡号令行下处事值机无遗算帝倚重之从还京师再迁兵部尚书封建平县子李克用兵至帝夜出凤翔苍黄无知者让能方直徒步从十余里得遗马褫绅为鞞乘之朱玫兵逼乘舆帝走宝鸡独让能从帝次褒中擢兵部侍郎同中书门下平章事于时嗣襄王

熅即伪位藩镇附者十八贡赋不输行在无以备赏劳
卫兵往往乏食君臣搏手无策让能建遣大使入河中谕王重荣重荣果奉诏京师平进
中书侍郎徙封襄阳郡公官吏多污伪署有司皆欲论
死让能以胁从不足深治固争之多所全贷昭宗立进尚书左仆射晋国公赐铁券累进
太尉李茂贞守凤翔自大顺后兵寢强恃功不奉法朝
廷弗能制会杨复恭走山南茂贞欲兼有梁汉请以师问罪未报而兵出帝忿其专然不
得已从之山南平诏茂贞领兴元武定而以徐彦若为
凤翔节度使分果阆州隶武定军茂贞不赴镇上章语悖慢又贻书责诋让能帝怒诏让
能计议且趣调发时宰相崔昭纬阴结茂贞及王行瑜
让能所言悉漏之茂贞乃以健儿数百杂市人候昭纬与郑延昌归第拥肩舆噪曰凤翔
无罪幸公不加讨以震惊都辇昭纬曰上委杜太尉吾
等何知市人不识孰为太尉即投瓦石妄击昭纬等走而免遂丧其印京师争避乱逃山
谷闲让能谏帝曰茂贞固宜诛然大盗适去凤翔国西
门又陛下新即位愿少宽假以贞元故事姑息之不可使怨望帝曰今诏令不出城门朕
顾奄奄度日坐观此耶卿为我图之朕自以兵属诸王
让能曰陛下欲削涤僭慢刚主威隆王室此中外大臣所宜共成之不宜专任臣帝曰卿
元辅休戚与我均何所避泣曰臣位宰相所以未乞骸
骨者思有以报陛下敢计身乎且陛下之心宪祖心也但时有未便它日臣蒙晁错之诛
顾不足弭七国患然敢不奉诏景德二年以嗣覃王为
招讨使神策将李鐔副之率师三万送彦若赴镇昭纬内畏有功密语茂贞曰上不喜兵
一出太尉茂贞乃悉兵迎战整屋覃王败乘胜至三桥
让能曰臣固豫言之请归死以纾难帝涕下不能已曰与卿决矣再贬雷州司户参军茂
贞尚驻兵请必杀之乃赐死年五十三弟彦林官御史
中丞弘徽户部侍郎皆被害帝痛之后赠太师子光义次子晓不复仕晓入梁贵显于世
△毕誠

毕誠字存之荆州司马栩之曾孙太和中举进士书判拔萃连中辟忠武杜悰幕府
悰领度支表为巡官又从辟淮南入拜侍御史李德裕
始与悰同辅政不协故出悰剑南东川节度使故吏惟誠饒讯德裕忌之出为慈州刺史
累官驾部员外郎仓部郎中故事要家势人以仓驾二
曹为辱誠沛然如处美官以职方郎中兼侍御史知杂事召入为翰林学士党项扰河西
宣宗尝召访边事誠援质古今条破羌状甚悉帝悦即
拜刑部侍郎出为邠宁节度河西供军安抚使誠到军遣吏谕羌人皆顺向时戍兵常苦
调饟乏誠募士置屯田岁收谷三十万斛诏书嘉美俄
徙昭义又迁河东复修杷头七十烽寇不敢入懿宗立迁宣武节度使召为户部尚书判

度支未几以礼部尚书同中书门下平章事再期固称疾改兵部尚书罢旋兼平章事节度河中卒年六十二

△杨收

杨收字藏之世居冯翊七岁而孤处丧若成人母长孙亲授经十三通大义善属文吴人号神童博学强记涪阳耕得古钟高尺余收扣之曰此姑洗角也既刮拭有刻在两栞果然尝言琴通黄钟姑洗无射三均侧出诸调犹萝葛附灌木然时有安浚者世称善琴且知音收问五弦外其二云何浚曰世谓周文武二王所加者收曰能为文王操乎浚即以黄钟为宫而奏之以少商应大弦收曰止如子之言少商武弦也且文世安得武声乎浚大惊因问乐意收曰乐亡久矣上古祀天地宗庙皆不用商周人歌大吕舞云门以祀天神歌太簇舞咸池以祀地祇大吕黄钟之合阳声之首而云门黄帝乐也咸池尧乐也不敢用黄钟而以太簇次之然则祭天者圜钟为宫黄钟为角太簇为征姑洗为羽祭地者函钟为宫太簇为角姑洗为征南吕为羽讫不用商及二少盖商声刚而二少声下所以取其正裁其繁也汉祭天则用商而宗庙不用谓鬼神畏商之刚西京诸儒惑圜钟函钟之说故自受命郊祀宗庙乐唯用黄钟一均章帝时太常丞鲍业始旋十二宫夫旋宫以七声为均均言韵也古无韵字犹言一韵声也始以某律为宫某律为商某律为角某律为征某律为羽某律少宫某律少征亦曰变曰比一均成则五声为之节族此旋宫也乃取律次之以示浚浚时七十余以为未始闻而收未冠也不肯先兄假仕假褫褐乃擢进士杜惊表署淮南推官惊领度支又节度剑南东西川辄随府迁宰相马植表渭南尉集贤校理议补监察御史收又以假方外迁谊不可先固辞复为惊节度府判官蜀有可县【按地理志嵩州县西泸本可天宝元年更名惊节度时无可县史盖举其旧名】直嵩州西南地宽平多水泉可灌秔稻或为惊计兴屯田惊将从之收曰田可致兵不可得且地当蛮冲今辍西南屯士往耕则姚嵩兵少贼得乘闲若调兵捍贼则民疲士怨假令大穰蛮得长驱是资贼粮岂国计乃止始周墀节度东川表其弟严掌书记墀卒惊辟为观察府判官兄弟并在幕府假自浙西判官擢监察御史收亦自西川迁兄弟同台收以详礼学改太常博士严亦自扬州召为监察御史旋以母丧免服除从淮南崔铉府为支使还拜侍御史夏侯孜以宰相领度支引判度支案迁长安令懿宗时累擢中书舍人翰林学士承旨以中书侍郎同中书门下平章事始南蛮自大中以来火邕州掠交趾调华人往屯涉氛瘴死者十七收议豫章募士三万置镇南军以拒蛮又峙食泛舟饷南海天子嘉其功进尚书

右仆射封晋阳县男既益贵稍自满侈吏客倚为奸收
之相中尉杨元价实左右之乃招四方赋饷数千诿收不能从元价以负己阴加毁短罢
为宣歙节度使不敢当两使禀料但受刺史俸留公藏
钱七百万韦保衡又劾收前用严譔为江西节度使受谢百万及它隐盗贬端州司马俄
流驩州诏内养追赐死收自作书谢丐弟严死奉先臣
后即仰鸩死帝见书惻然乃宥严后诏追雪复官爵子巨鳞巨干竈初为翰林学士从入
洛终散骑常侍鳞至户部尚书

杨发

杨发

收兄发字至之登进士又中拔萃累官左司郎中宣宗追加顺宪二宗尊号有司议
改造庙主署新谥诏百官议发与都官郎中卢抔以为
改作主求古无文执不可知礼者黷之改太常少卿为苏州刺史徙福建观察使以能政
闻拜岭南节度使承前宽弛操刚严军遂怨起为乱囚
传舍贬婺州刺史假字仁之仕终常州刺史严字凛之举进士时王起选士三十人而杨
知至竈穢源重郑朴及严五人皆世胄起以闻诏独收
严累迁至工部侍郎翰林学士收知政请外拜浙东观察使收贬严亦斥为邵州刺史徙
吉王傅干符中以兵部侍郎判度支卒子涉注涉具五
代传

△徐商

徐商字义声越州刺史有功孙客新郑再世因为新郑人擢进士第大中时累官尚
书左丞宣宗诏为巡边使拜河中节度使突厥残种保
特峨山以千帐度河自归诏商绥定商表处山东宽乡置备征军凡千人爨纸为铠劲矢
不能洞徙山南东道襄多山棚贼商取材卒为捕盗将
别为屯营寇所发迹捕必得遂为精兵江西都将反商发捕盗营士往平之咸通初以刑
部尚书为诸道盐铁转运使封东莞县子四年进同中
书门下平章事出为荆南节度使累进太子太保卒

徐彦若

徐彦若

子彦若事僖宗为中书舍人昭宗立再用为御史中丞张浚师败太原以彦若为户
部侍郎同中书门下平章事俄代李茂贞为凤翔节度
使不得入还为御史大夫干竈初复当国进太保齐国公崔胤专政以彦若位已右不悦
以平章事为清海军节度使卒于镇

△刘邺

刘邺字汉藩润州句容人父三复善文章母病废三复丐粟以养李德裕为浙西观

察使表为掌书记会昌时位宰相擢三复刑部侍郎弘文馆学士邺六七岁能属辞德裕使与子共师学德裕既斥邺去客江湖闲陕虢高元裕表署推官高少逸又辟镇国幕府咸通初擢左拾遗召为翰林学士赐进士第历中书舍人迁承旨德裕诬死令狐绯久当国更数赦不为还官爵绯去位邺乃申直其冤世高其义进户部侍郎诸道盐铁转运使以礼部尚书同中书门下平章事判度支僖宗嗣位再迁尚书左仆射初韦保衡路岩与邺同秉政为迹亲俄而萧仿崔彦昭得相罢邺为淮南节度使同平章事黄巢方炽诏高骈代之徙节度凤翔固辞还左仆射帝西狩追乘舆不及与崔沆豆卢瑑匿将军张直方家贼捕急三人不肯臣俱见杀

豆卢瑑

豆卢瑑

豆卢瑑者字希贞河南人仕历翰林学士户部侍郎与崔沆皆拜同中书门下平章事是日宣告于廷大风雷雨拔树未几及祸

△赵隐

赵隐字大隐京兆奉天人祖植当德宗出狩变仓卒羽卫单寡朱泚攻城急植率家人奴客以死拒守献家财劳军帝嘉之贼平累擢郑州刺史郑滑节度使李融奏以自副融疾病委以军政大将宋朝晏火其营夜为乱植列卒不动须之迟明而溃捕斩皆尽累擢岭南节度使父存约辟署兴元李绛府值军乱方与绛燕闲吏报贼至绛麾存约使去对曰荷公厚谊不当独免即部勒左右捍之同被害隐以父死难与兄鹭庐墓几十年阖门诵书不应辟召亲友敦勉令仕会昌中擢进士第历州刺史河南尹以兵部侍郎领盐铁转运使咸通末进同中书门下平章事迁中书侍郎封天水县伯性仁悌不敢以贵权自处僖宗初罢为镇海军节度使王郢之乱坐抚御失宜下除太常卿广明初为吏部尚书居母丧卒子光逢光裔光胤皆第进士历台省华剧光逢五代史有传

△路岩

路岩字鲁瞻魏州冠氏人及进士第懿宗咸通初自屯田员外郎入翰林为学士以兵部侍郎同中书门下平章事年三十六居位八岁进至尚书左仆射通赂遗奢肆不法与韦保衡同当国二人势动天下既权侔则争与保衡还相恶罢为剑南西川节度使承蛮盗边后岩力拊循置定边军于邛州【按方镇表咸通九年置定边军治邛州十一年废岩镇西川在十二年且定边军乃李师望置窦滂败已废不因岩也史误】扼大度治故辟取坛丁子弟教击刺使补屯籍由是西山八国来朝以劳迁兼中书

令封魏国公始为相时委事亲吏边咸会至德令陈蟠
叟奏书愿请闲言财利帝召见则曰臣愿破边咸家可佐军兴帝问咸何人对曰宰相岩
亲吏也帝怒斥蟠叟自是人无敢言咸乃与郭筹者相
倚为奸岩不甚制尝阅武都场咸筹议事以书相示则焚之军中恟恟遂闻京师岩坐是
徙荆南节度使道贬新州刺史至江陵免官流儋州籍
其家岩美须髯至江陵两昔皆白捕诛咸筹等岩至新州诏赐死岩尝密请三品以上得
罪诛剔取喉以验俄而自及

韦保衡

韦保衡

韦保衡字蕴用京兆人咸通中以右拾遗尚同昌公主迁起居郎驸马都尉主郭淑
妃所生懿宗爱之恩礼最异悉宫中珍玩资予之俄历
翰林学士承旨以兵部侍郎同中书门下平章事自尚主至是裁再期又进门下侍郎尚
书右仆射性浮浅既恃恩据权以嫌爱自肆王铎举保
衡进士萧遘与同升以尝薄己皆见斥逐杨收倾路岩人益畏之主薨而宠遇不衰僖宗
立进司徒俄为怨家白发阴罪贬贺州刺史再贬澄迈
令遂赐死弟保义自兵部侍郎贬宾州司户参军而刘瞻等坐主薨见贬者皆复起

钦定续通志卷二百七十二

●钦定续通志卷二百七十三 列传七十三

列传

唐【七十三】

○唐七十三

裴坦【贄】	崔彦昭	郑畋	王铎【鐸】	王徽	
卢携	萧遘	韦昭度	张浚	刘	
崇望【崇龟崇鲁】	郑延昌	王溥	卢光启	陆扆	王抟
郑紫	朱朴【孙偓】	韩偓			

裴坦

崔彦昭

郑畋

王铎

王徽

卢携

萧遘

韦昭度

张浚

刘崇望

郑延昌

王溥

卢光启

陆扆

王搏

郑繁

朱朴

韩偓

△裴坦

裴坦字知进隋营州都督世节裔孙及进士第沈传师表置宣州观察府召拜左拾遗史馆修撰历楚州刺史令狐綯当国荐为职方郎中知制诰再进礼部侍郎拜江西观察使华州刺史召为中书侍郎同中书门下平章事不数月卒坦性简俭子取杨收女赍具多饰金玉坦命撤去曰乱我家法从子贄

裴贄

裴贄

贄字敬臣及进士第累擢右补阙御史中丞刑部尚书昭宗引拜中书侍郎兼本官同中书门下平章事寻兼户部尚书帝幸凤翔为大明宫留守罢俄进尚书左仆射以司空致仕朱全忠将篡贬青州司户参军杀之

△崔彦昭

崔彦昭字思文其先清河人淹贯儒术擢进士第数应帅镇辟奏于吏治精明所至课最累进户部侍郎繇河阳节度使徙河东沙陀诸部多犯法彦昭抚循有威惠三年境内大治僖宗立授兵部侍郎诸道盐铁转运使俄同中书门下平章事仍判度支初杨收路严韦保衡皆坐朋比贿赂得罪死萧仿秉政矫革之而彦昭协力故百职修举迁门下侍郎帝因下诏暴收等过恶申励丁寔以成其美彦昭虽宰相退朝侍母膳顺色柔声左右无违士人多其孝伶人李可及为懿宗所宠横甚彦昭奏逐死岭南累拜兼尚书右仆射以疾去位授太子太傅卒

△郑畋

郑畋字台文系出荥阳父亚举进士贤良方正书判拔萃皆中李德裕辟署幕府擢监察御史李回荐为刑部郎中知杂事拜给事中德裕罢出为桂管观察使坐吴湘狱不能直贬死畋举进士时年甚少有司上第籍武宗疑索所试自省乃可奏为宣武推官以书判拔萃擢渭南尉

宣宗时白敏中令狐绹继当国皆怨德裕其宾客并废斥故畋外更帅镇幕府几十年绹去位始为虞部员外郎右丞郑熏诬畋罪出之久乃入为刑部员外郎刘瞻相荐授户部郎中入翰林为学士俄知制诰会讨庞勋书诏纷委畋思不淹晷皆切机要勋平以户部侍郎进学士承旨瞻以谏连懿宗罢畋草制多褒言韦保衡等以为附下罔上贬梧州刺史僖宗立内徙郴絳二州以右散骑常侍召还故事两省转对延英独常侍不与畋言宜备顾问诏着于令以兵部侍郎进同中书门下平章事禁百官仆吏不得擅至宰相府交广邕南兵旧取岭北五道餉船多败没畋请以岭南盐铁委广州节度使韦荷岁煮海取盐直四十万缗市虔吉米以贍安南罢荆洪等漕役后以王师甫为岭南供军副使师甫请兼总兵岁加献钱二十万缗畋曰荷且有功而师甫以利谋夺其兵不可再迁门下侍郎封荥阳郡侯以星变求去位不许干符六年黄巢势寢盛据安南腾书求天平节度使帝令羣臣议咸请假节以纾难畋欲因授岭南节度使而卢携方倚高骈立功乃曰骈才略无双淮南天下劲兵又诸道之师方至蔓尔贼奈何舍之畋曰不然巢之乱本于饥其众以利合故能兴江淮根蔓天下如以恩释罪使及岁丰其下思归众一离巢即机上肉耳天子内亦属骈乃然携议会骈奏南蛮方强请如西戎以公主下嫁携又议从之畋以为损国威灵不可即抗论至相诟携怒拂衣去裾蔑于砚因抵之帝以大臣争口语无以示百官乃俱罢以畋为太子宾客分司东都俄召拜吏部尚书明年为凤翔陇西节度使募锐兵五百号疾雷将境中盗发辄得会巢陷东都遣兵戍京师以家财劳行妻自纡戎衣给战士帝出梁洋畋上谒斜谷泣曰将相误国臣请死帝劳遣之且曰公谨扼贼冲无令西畋还搜士卒缮器械浚城隍使于梁者道相属俄而贼使至诸将皆欲附贼畋开谕不可即悉出金帛请得脱身去复不听而使以伪赦令示军中乃去明日诏使至畋召监军袁敬柔以逆顺晓诸将乃听命畋遣子凝绩从帝有诏进同中书门下平章事贼将又至畋斩于军迁检校尚书右仆射西面行营都统军中承制除拜乃以前灵武节度使唐弘夫为行军司马中和元年贼将王璠率众三万来攻畋使弘夫设伏以待战龙尾坡杀贼二万威动京师时诸镇兵在襄内尚数万无所归畋招来慰结乃与泾原程宗楚秦州仇公遇鄜延李孝恭夏州拓拔思恭约盟传檄天下时王命不出剑门四方谓王室微不能复兴及畋檄至远近咸耸各治兵思立功奔问行在巢大惧不敢西谋当此时微畋天子几殆弘夫取咸阳以桴济兵渭水贼伏甲伪走弘夫与宗楚乘胜入都门为贼所覆畋数敕无轻进二人不听果败以鄜夏兵屯东

渭桥再进司空兼门下侍郎京城四面行营都统行军司马李昌言者屯兴平遣麾下求为南面都统辄引兵趋府畋不意见袭登城好语曰吾方入朝公能戢兵爱人为国灭贼乎能则守此矣遂委军去昌言自为留后卫畋出境半道即辞疾诏授太子少傅分司东都便医于兴元明年复拜畋司空门下侍郎平章事军务一以咨决兴州戍将孙邛坐赃抵死畋言邛护褒斜有功请免死陈秋儿保嵯峨山拒贼请以检校散骑常侍隶奉天军制皆可旧制使府校书郎以上满三岁迁监察御史里行至大夫常侍满三十月迁自军兴有岁内数迁者畋请行营节度由里行至大夫许满二十月迁校书郎以上满二岁乃奏非军兴者如故事从之时田令孜恃权干请畋不应陈敬瑄欲以官品居宰相上畋曰外宰相安得论品卒不肯下令孜敬瑄内衔之贼平帝将还而李昌言自以袭畋而夺之镇今畋当国内不喜故三人相结遣客上畋过咎帝得其情不许畋乃引疾入见帝曰乘舆东还由大散关幸凤翔供帐顿峙一委昌言乃可安臣若以宰相从彼且猜阻非所以靖反侧也请以散官养疾帝以其诚乃受检校司徒太子太保罢政事以凝绩为壁州刺史留养徙陇州【按原文作龙州考关内道之龙州武德六年置贞观二年并入绥德河北道之东龙州武德元年置天宝元年改尧山当时已无此名今依旧唐书作陇州】卒年六十三赠太尉后帝思畋忠力又赠太傅凝绩数岁亦卒始李茂贞以博野裨将戍奉天畋召隶麾下厚礼之茂贞感其饰擢及畋还葬郑表为请谥曰文昭天复初与李思恭配享僖宗庙庭又赠宗楚弘夫官郑穀者熏子也方畋秉政擢为给事中至侍郎其捐怨类如此

△王铎

王铎字昭范宰相播弟炎子【按铎乃炎子播传明云弟炎原文作昆弟子混今改】会昌初擢进士第累迁右补阙集贤殿直学士白敏中辟署西川幕府咸通初历中书舍人礼部侍郎所取多才实士拜御史中丞以户部侍郎判度支十二年由礼部尚书进同中书门下平章事加门下侍郎尚书左仆射超拜司徒韦保衡始由铎得进士谨事之及窃政权将大斥不附者病铎持其事不得肆乃以检校左仆射出为宣武节度使僖宗初以左仆射召复拜门下侍郎平章事干符六年贼破江陵宋威无功朝廷议置统帅铎因请自率诸将督羣盗帝即以铎为侍中荆南节度使诸道行营都统封晋国公李系者西平王晟诸孙敏辩善言兵然中无有铎信之举为将使守湖南俄而贼舍广州鼓而北系未战辄溃铎退营襄阳于是以高骈代之贬太子宾客分司东都未几召拜太子少师从天子入蜀拜司徒门下侍郎平章事加侍中复以太子太

保平章事是时诛讨大计悉属骎骎内幸多难数偃蹇而外逗挠铎感慨王室每入对必噫鸣流涕固请行时中和二年也乃以检校司徒中书令为义成节度使诸道行营都都统【按原文作都统资治通鉴以王铎为都都统西门思恭为都都监考异云此时诸将为都统者甚多铎为都都统是也纪亦作都都统今增】判延资户部租庸等使于是表崔安潜自副郑昌图裴贇裴枢王抟等在幕将以周岌王重荣诸葛爽康实安师儒时溥六节度为将佐中尉西门思恭为监军率卫兵泊梁蜀师三万壁整屋移檄天下先是诸将虽环贼莫肯先及铎檄至号令殷然士气皆起争欲破贼故巢战数蹙宦人田令孜策贼必破欲使功出于己乃构铎于帝罢为检校司徒以义成节度还屯后数月复京师策勋居关东诸镇第一四年徙义昌节度使【通鉴朱全忠之降也铎为都统承制除官全忠初镇大梁事铎礼甚恭铎依以为援而全忠兵浸强益骄倨铎知不足恃表请还朝乃徙铎为义昌节度使】铎世贵出入裘马鲜明妾侍且众过魏乐彦禎子从训伏兵高鸡泊劫之铎及家属吏佐三百余人皆遇害朝廷不能治天下痛之【谨按通鉴辑览御批铎初自请出师聊藉以免伴食之诮非果有制胜长略也是以坐镇数载老师糜饷无尺寸功乃腆颜表请还朝不特庸碌无能亦且出入自由矣况当戎马倥偬时拥姬侍而侈服御致为奸人窥伺举室罹灾抑亦自贻之戚耳史赞乃称其有社稷才扶持王室几致中兴不知铎有何功业而如此称许可谓信史乎】

王镣

王镣

吊镣累官汝州刺史干符中王仙芝来攻镣拒之自督勇士与别将董汉勋守南北门城陷汉勋力战死镣贬韶州司马终太子宾客

△王徽

王徽字昭文京兆人第进士授校书郎沈询判度支徐商领盐铁皆辟署使府从令狐绹署宣武淮南掌书记召授右拾遗书二十余上言无回忌徐商罢政守江陵表为殿中侍御史署节度府判官御史中丞高湜荐知杂事进力功员外郎故事考簿以朱注上下为殿最岁久易漫吏辄窜易为奸徽始用墨擢翰林学士广明元年卢携罢以徽为户部侍郎同中书门下平章事是日黄巢入关夜僖宗西狩徽与崔抗豆卢瑑仆射于琮诘朝乃知追帝不及为贼执还迫以官阳瘖不答以刃环胁卒不动守者懈乃奔河中裂缣书章遣人间走蜀诏拜兵部尚书京城四面宣慰催阵使授检校尚书左仆射同中书门下平章事领昭义节度使固辞更为诸道

租庸供军使因说行营都监杨复光请赦沙陀罪令赴
难其夏沙陀会诸军遂平京师迁右仆射大乱之后宫观焚残园陵皆发掘鞠为邱莽乘
輿未有东意诏徽充大明宫留守京畿安抚制置修奉
使徽外调兵食内抚绥流亡踰年稍稍完聚兴复殿寝表请帝东还又进检校司空御史
大夫仍权京兆尹宦要家争遣人治第侵冒齐民徽一
平以法由是为帝左右所憎以其党薛■（木巳）为少尹轻其权杞方居丧徽奏止不
使到府众忿共譖罢徽令赴行在俄授太子少师徽遂
移疾河中满百日免帝还京师复申前授称疾不任奉谒宰相疾其怨望贬集州刺史会
帝出次宝鸡念徽无罪拜吏部尚书封琅琊郡侯未行
而嗣襄王煜作乱帝进次汉中煜逼召徽以阉废自言及煜僭号迫羣臣作誓牒徽托手
弱卒不肯署煜平帝至凤翔召徽为御史大夫固辞足
痹复拜太子少师昭宗立见便殿进对详洽帝顾宰相曰徽神气尚强可用乃复授吏部
尚书是时铨选失序吏肆为奸补调重复不可检徽为
手籍一验证之遂无奸滞进右仆射大顺元年卒赠司空谥曰贞

△卢携

卢携字子升其先本范阳世居郑擢进士第辟浙东府入朝为右拾遗累进户部侍
郎翰林学士承旨干符五年进同中书门下平章事俄
拜中书侍郎刑部尚书弘文馆大学士携姿陋而语不正与郑畋俱李翱甥同相然所处
议多驳初王仙芝起携表宋威齐克让曾袞皆为招讨
使及威杀尚君长贼益炽乃以王铎镇荆南为诸道都统携不悦是时黄巢已破广州势
张甚表求天平节度使诏宰相百官议携素厚高骈属
令立功又欲激巢使战而败铎乃坚言不可假贼节钺止授率府率又徇骈与南诏和亲
与畋争相罣由是罢为太子宾客分司东都俄为兵部
尚书会骈将张璘破贼帝复召携以门下侍郎同平章事及铎失守以骈代即按关东诸
将为铎畋所任者悉易置内倚田令孜外寄戎政于骈
与夺惟所爱恶后病风足蹇神塞事多决于亲吏杨温李修贿赂显行及巢破淮南璘战
死忠武兵乱皆咎携始下诏以巢为天平节度使贼已
破潼关明日以太子宾客罢分司东都是夜仰药死子晏天佑初为河南尉柳璨杀之

△萧遘

萧遘字得圣宰相寘子咸通中擢进士第辟节度府入朝拜右拾遗与韦保衡联第
保衡材下诸儒靳薄之不甚齿独称重遘保衡憾焉保
衡已为相摭遘罪由起居舍人斥播州司马未几保衡死召为礼部员外郎干符中累擢
户部侍郎翰林学士承旨僖宗入蜀以兵部判度支次
绵州拜同中书门下平章事从还京师累拜司空封楚国公遘负大节以王佐自任既当

国风采峭整时藩镇多兴盗贼横放莫能制支详在徐州引散骑常侍李损子凝吉为佐牙将时溥逐详取节度溥为饗干所毒不死或谗凝吉为详报仇溥怒杀之损时在朝溥言损连谋请并诛田令孜受溥金劾损付御史狱中丞卢渥傅成其罪御史王华表损不知状令孜请移神策狱华不奉诏遽即叩延英争曰凝吉以冤就屠已不可言损与子音问不接且数期安得同谋溥恃功坏法请案近臣卑侮王室行无将之萌帝悟止免官当此时令孜权宠可炙公卿附顺唯遽未尝稍下后令孜以兵讨王重荣重荣引沙陀败王师而西帝惊幸凤翔诸节度共劾令孜生事离间大臣遽与裴澈计召朱玫于邠玫以兵五千奉迎与沙陀等连和令孜迫帝幸陈仓夜出百官不及从玫怒令孜并怨帝谓遽曰上奔播六年中原之人肝髓流野得复宗庙遗老残民闻舆马音流涕相欢上曾不念以诸侯勤王功为敕使之宠今奸臣为国产怨我奉命而来返以为胁君羣臣报国极矣战力殫矣尚能垂头塌翅求生于黄门哉丧君有君公其图之遽曰上无负天下为令孜制每言必涕下陈仓之行又劫于兵公诚有忧王室意宜还藩奉表请天子复国玫曰诸王才可任天下者不乏遽曰人非伊霍欲为祸首未或利也玫退曰我择一王为帝违者斩乃立嗣襄王熈召遽作册苦辞玫更委郑昌图滋恨遽及还长安使昌图相熈罢遽为太子太保移疾不出弟遽为永乐令往从之帝还宫宰相孔纬与遽有隙乃劾遽尝为伪臣即赐死其所

△韦昭度

韦昭度字正纪京兆人擢进士第累迁中书舍人僖宗西狩以兵部侍郎翰林学士承旨从未几进同中书门下平章事还京授司空再狩山南还次凤翔李昌符乱兴仓卒昭度质家族于禁军誓共讨贼士感动乃平昌符迁太保兼侍中昭宗即位守中书令封岐国公王建攻陈敬瑄于成都以昭度为西川节度使敬瑄不内诏东川顾彦朗与建合兵讨拜昭度兼行营招抚使淹半年始拔汉州建给昭度曰公暴师远事蛮夷方山东兵连祸结腹心疾也宜亟还定之敬瑄小丑责建等可办昭度信之请还未半道建以重兵守剑门急攻成都囚敬瑄自称留后罢昭度为东都留守杜让能既被害以司徒门下侍郎复为平章事进太傅王行瑜求为尚书令昭度言太宗由是即位后人臣无复拜者郭子仪有大功尝授之固辞免况行瑜乎乃更号尚父行瑜怨会用李磻辅政而崔昭纬密语行瑜曰前公已为尚书令昭度特不可今又引磻叶力此奸人立党惑上听恐复如杜太尉时行瑜乃与李茂贞数上书讥诋朝政昭度惧称疾罢为太傅致仕行瑜茂贞韩建联兵至阙下言昭度伐蜀失

谋请贬之未及报行瑜收昭度于都亭驿杀之天子不得已下诏暴其罪行瑜诛乃追复官爵许其家收葬赠太尉

△张浚

张浚字禹川本河间人性通脱无检泛知书史喜高论不得志乃屏居金凤山学纵横术以千时枢密使杨复恭遇之以处士荐为太常博士进度支员外郎黄巢之乱称疾挟其母走商山僖宗西出卫士食不给汉阴令李康献糗饵数百馱帝异之曰尔乃及是乎对曰臣安知为此张浚教臣也乃急召浚至行在再进谏议大夫王铎奏署都统判官时王敬武在平卢军最强累召不应浚往说之敬武已臣贼不迎使者浚责之曰公为天子守藩今使者赍诏至不北面俯伏未识君臣大分何以长吏民哉敬武愕怩愧谢浚宣诏已召将佐至鞠场倡言忠义之士当审利害黄巢贩盐虜耳舍天子而臣之何利耶今诸侯勤王者踵相接公等据一州以观成败后贼平将安往诚能此时共诛大盗迎天子功名富贵可反手取吾怜公等舍安而蹈危也诸将杂然曰谏议语是敬武即引军从浚西擢浚为会军使贼平以户部侍郎判度支后再狩山南拜同中书门下平章事仍判度支浚始由复恭进复恭中失权更依田令孜故复恭衔之及为中尉数被离闲昭宗即位复恭恃援立功专任事帝稍不平当时多言浚有方略乃复见委信尝问致治之要对曰在强兵兵强天下服矣天子由是甘心于武功是时朱全忠威震关东而安居受杀李克恭以潞州归全忠全忠乃与幽州李匡威云州赫连铎上言先帝幸梁由李克用与朱玫连和请举兵诛之诏文武四品以上议皆言王室未宁虽得太原犹非所有浚曰先帝时身播屯乱盖克用全忠不相下请因其弱讨之断两雄势帝曰平巢克用功第一今乘危伐之天下其谓我何久不决孔纬曰浚言万世之利幸听勿疑既浚纬相倡和帝乃决出师诏浚为河东行营兵马招讨制置使京兆尹孙揆为昭义节度使副之韩建为供军使以全忠匡威铎并为招讨使枢密使骆全諲为行营都监以汴甲三千为帐下发五十二军邠豳鄜夏杂虜合五万帝置酒安喜楼临饯浚泣下曰陛下偏于贼臣愿以死除之先是汴华邠岐兵绝河会平阳汴将朱崇节已戍潞浚虑汴人遂据有之乃令揆分兵趋潞会太原将李存孝方攻潞揆至长子为存孝所禽汴人亦弃城去浚次阴地关诸军壁平阳存孝击之皆大北浚敛众遁存孝进掠晋绛慈隰浚间道出王屋奔河清麾下略尽全諲饮药死建遁去克用上书请罪辞悖慢朝廷震动即日罢浚为武昌军节度使三贬绣州司户参军全忠为申请诏听便浚乃至蓝田依韩建及韦昭度死复用纬为相故浚亦拜兵部尚书领天下租

庸使将复用克用上言若朝以浚为相暮请以兵见乃
止于室中罢使拜尚书右仆射上书乞骸骨迁左仆射致仕居洛长水墅刘季述乱浚徒
步入洛泣喻张全义并致书诸藩请谋王室之难王师
范起兵青州欲取浚为谋主不克全忠胁帝东迁浚闻曰乘輿卜洛则大事去矣盖知其
将篡也全忠畏浚构他镇兵使全义遣牙将如盗者夜
围墅杀之屠其家实天复三年十二月【按纠谬云天复二年昭宗尚在岐下为全忠所
围未出亦未有卜洛之事王师范亦未起兵本纪书
三年为得其实本传云二年者误然此乃脱笔非文误也今从纪画一】始浚素厚永
懿史叶彦彦知其谋以告浚子格浚度不免父子相持泣
曰刘则俱死不如去以存吾嗣彦率士三十人送格泝汉入蜀后事王建少子播闲道走
淮南依杨行密时行密得承制除拜播请每除吏必置
制诰于紫极宫玄宗像前乃出之示不忘朝廷且欲雪家冤而不克终广陵

△刘崇望

刘崇望字希徒渝国公政会七世孙及进士第宣歙王凝辟转运巡官崔安潜镇许
及剑南崇望兄弟四人同幕府世以为才安潜入为吏
部尚书崇望又以员外郎主南曹选事清辨僖宗幸山南王重荣怨宦竖不肯率职崇望
以谏议大夫持节往谕陈君臣大义动之重荣顺服请
诛朱玫自效使还擢翰林学士昭宗即位进中书侍郎同中书门下平章事张浚伐太原
崇望固执不可浚果败代为门下侍郎判度支玉山都
将杨守信反夜陈兵阙下帝列兵延喜门命崇望守度支库黎旦含光门未开禁卒左右
值立将大掠俄闻传呼宰相来门辟崇望驻马劳曰上
自将在中营公等禁军也不前杀贼取功而苟欲剽掠成恶名乎士皆唯唯至长乐门贼
望兵至乃遁去是日京师不乱系其力进尚书左仆射
朱全忠谋取徐泗表请以大臣代时溥乃授崇望武宁军节度使溥拒命崇望还为太常
卿会王珂王珙争河中诏以崔胤为节度使珂李克用
壻也太原邸吏薛志勤曰崔公镇河中不若光德刘公于我公最善光德崇望所居坊也
后李茂贞王行瑜入害大臣坐是贬昭州司马行瑜诛
克用直其冤召为吏部尚书徙兵部王建欲并东川诏崇望为剑南东川节度使同中书
门下平章事未至建已使王宗涤知留后崇望乃还为
兵部尚书卒赠司空

刘崇龟

刘崇鲁

刘崇龟

兄崇龟字子长擢进士终清海军节度使广有大贾约倡女夜集而它盗杀女遗刀

去贾入践血而觉乘扁亡吏迹贾捕劾得约女状而不
杀也崇龟方大飨军集宰人暮以遗刀阴易一杂置之诘朝羣宰即庖取刀一人不去曰
是非我刀问得其主名往视则亡矣崇龟取它囚杀之
声言贾陈诸市亡宰归捕诘具伏其精明类此姻旧或干以财但写荔枝图与之然不能
防检其家既没有鬻珠翠羽者由是名损

刘崇鲁

弟崇鲁字郊文亦第进士擢左补阙翰林学士僖宗避难山南为嗣襄王熅史馆修
撰得不诛景福中以水部郎中知制诰雅与崔昭纬善
帝以李磻辅政而昭纬外倚邠岐以久其权谋沮磻墨麻出崇鲁辄掠麻大哭帝问焉崇
鲁曰今虽乏人岂宜收儉人为宰相磻以杨复恭西门
重遂得近职奈何用之磻由是不得相因自陈为山南杨守亮诋毁不容与复恭交私又
言崇望为宰相使亲吏日夕谒左军与复恭亲厚崇鲁
向殿哭厌诅天祚且其父坐贿饮药死崇鲁身为朱玫史官作劝进表在太原府使西川
见田令孜没阶趋废制度自崇鲁始其相詈如市人 【
谨按通鉴辑览 御批崇鲁甘为昭纬爪牙党私攻讦谬傅直名较磻之儉邪附势更
为奸巧而彼此狺狺交关挠紊朝常唐室纪纲扫地其
欲不亡得乎】 崇龟始闻哭麻恚不食曰吾兄弟未始以声利败名今不幸乃生是儿后
王行瑜崔昭纬相继诛崇鲁贬崖州司户参军终水部
员外郎

△郑延昌

郑延昌字光远其先荥阳人 【按史传必系里居新唐书于里居无闻而族望可考
者例曰其先某处人如郑延昌传里族俱略于王溥
卢光启传则明着为失而不详然本书宰相世系表具有考证传未可独佚也延昌表出
北祖郑氏与余庆珣瑜同望今据增】 咸通末擢进士
第迁监察御史郑畋镇凤翔表在其府黄巢乱京师畋倚延昌调兵食且谕慰诸军畋再
秉政擢司勋员外郎翰林学士累进兵部侍郎兼京兆
尹判度支拜户部尚书以中书侍郎同中书门下平章事兼刑部尚书无它功以病罢拜
尚书左仆射卒

△王溥

王溥字德润其先晋阳人 【按宰相世系表溥乃太原王氏其曾祖翱与翊翊为兄
弟翊新唐书皆有传为并州晋阳人翊附传族系甚
明原传云失其何所人误今据表改正】 第进士累擢礼部员外郎史馆修撰崔胤镇武
安表署观察府判官胤不赴镇溥留充集贤殿直学士
御史中丞赵光逢奏为刑部郎中知杂事昭宗蒙难东内溥与胤说卫军执刘李述等杀

之帝反正骤拜翰林学士户部侍郎以中书侍郎同中书门下平章事判户部不能有所裨益罢为太子宾客分司东都未几召拜太常卿工部尚书会朱温侵逼贬淄州司户参军赐自尽与裴枢等投尸于河

△卢光启

卢光启字子忠其先范阳人【按范阳卢质质子昼昼子光启三世详见世系表不得云不详何所人旧误今据改】第进士累擢兵部侍郎昭宗幸凤翔宰相皆不从以光启权总中书事兼判三司进左谏议大夫参知机务复拜兵部侍郎同中书门下平章事俄罢为太子少保改吏部侍郎初光启执政韦贻范苏检相继为宰相贻范字垂宪以龙州刺史贬通州检为洋州刺史二人奔行在贻范迁给事中用李茂贞荐阅旬为工部侍郎同中书门下平章事判度支倚权臣恣鹜不恭会母丧免踰月夺服不数月卒检初拜中书舍人贻范荐于茂贞即拜工部侍郎同中书门下平章事茂贞与朱全忠通好乃求尚主取检女为景王妃以固恩帝还京师检长流环州光启赐死

△陆扆

陆扆字祥文宰相贄族孙客于陕遂为陕人光启二年从僖宗幸山南擢进士第累官翰林学士中书舍人扆属辞敏速昭宗优遇之累为尚书左丞封嘉兴县男徙户部侍郎同中书门下平章事进中书侍郎判户部嗣覃王以兵伐凤翔扆谏曰国步方安不宜加兵近辅必为它盗所乘无益也帝责扆沮挠贬峡州刺史师果败久之授工部尚书从天子自华州还以兵部尚书复当国封吴郡公天复初帝密语韩偓曰陆扆裴贄孰忠于我偓曰扆等皆宰相安有它肠帝曰外言扆不喜我复位元日易服奔启夏门信不偓曰孰为陛下言此曰崔胤令狐涣偓曰陛下反正扆素不知谋忽闻兵起欲出奔耳陛下责其不死难则可以不为不喜乃谗言也帝悟累兼户部尚书帝至自凤翔大赦天下诸道皆赐诏独不及李茂贞扆曰国西凤翔为最近其罪固不可赦然尚修职贡朝廷未之绝无宜于诏书异也始崔胤罢相扆代之胤内怨望及是议以为阴有党附贬沂王傅分司东都胤死复授吏部尚书从迁洛柳璨始附朱全忠谋去朝廷衣冠有望者贬扆濮州司户参军杀之白马驿年五十九扆初名允迪后改云

△王搏

王搏字昭逸肃宗朝宰相玁之曾孙权进士第辟佐王铎滑州节度府累迁苏州刺史以户部侍郎判户部干盗初进同中书门下平章事

董昌诛出为威胜节度使未行加检校尚书右仆射浙东西宣抚使会钱镠兼领二浙故留拜门下侍郎同中书门下平章事判度支正拜右仆射迁司空封鲁国公初中官权盛帝欲剪抑之自石门还政一决宰相羣宦不平构藩镇内胁天子抁曰人君务平心大体偏听产乱古所戒也今奄人盗威福未可卒除当徐以计去之事急且有变崔胤与抁并位素忌抁即劾抁为中官外应会胤罢疑搏挤斥乃厚结朱全忠荐已复辅政即潜搏与枢密使宋道弼景务修交私将危社稷全忠因显疏其尤光化三年罢为工部侍郎贬溪州刺史又贬崖州司户参军事赐死蓝田驿

△郑紫

郑紫字蕴武 【宰相世系表及旧唐本传俱不载里系】 及进士第历监察御史累擢左司郎中困窳甚丐补庐州刺史黄巢掠淮南紫移檄请无犯州境巢笑为敛兵州独完僖宗嘉之赐绯鱼王徽为御史大夫以兵部郎中表知杂事迁给事中杜宏徽任中书舍人紫以其兄让能辅政不处禁要上还制书不报辄移病去召为右散骑常侍往往条摘失政众讟传之宰相怒改国子祭酒议者不直复还常侍大顺后王政徽紫每以诗谣托讽中人有诵之天子前者昭宗意其有所蕴因有司上班簿遂署其侧曰可礼部侍郎同中书门下平章事紫本善诗其语多俳谐故使落调世共号郑五歇后体至是省史走其家上谒紫笑曰诸君误矣人皆不识字宰相亦不及我俄闻制诏下叹曰歇后郑五作宰相事可知矣固让不听立朝侃然无复故态自以不为人所瞻望纔三月以疾乞骸拜太子少保致仕卒

△朱朴

朱朴襄州襄阳人以三史举繇荆门令进京兆府司录参军改著作郎干宝初太府少卿李元实欲取中外九品以上官两月俸助军兴朴上疏执不可而止擢国子博士上书议迁都襄邓不报朴为人木强无它能方是时天子失政思用特吉士任之以中兴而朴所善方士许岩士得幸言朴有经济才帝召与语擢左谏议大夫同中书门下平章事俄判户部进中书侍郎帝益治兵所处可一委朴朴移檄四方令近者出甲士资馈饷远者以羨余上后数月岩士为韩建所杀朴罢为秘书监三贬郴州司户参军卒与朴皆相者孙偓

孙偓

孙偓

孙偓字龙光其先武邑人 【据宰相世系表增】 偓第进士历显官以户部侍郎

同中书门下平章事迁门下为凤翔四面行营都统俄
兼礼部尚书行营节度诸军都统招讨处置等使与朴皆贬衡州司马卒

△韩偓

韩偓字致光京兆万年人擢进士第佐河中幕府召拜左拾遗以疾解后累迁左谏议大夫崔胤判度支表以自副王溥荐为翰林学士迁中书舍人偓尝与胤定策诛刘季述昭宗反正为功臣帝疾宦人骄横欲尽去之偓曰陛下诛季述时余皆赦不问今又诛之谁不惧死含垢可也宦人食度支者八千人公私牵属不减二万虽诛大七巨魁未见有益适固其逆心耳帝尝欲以当国偓辞因荐御史大夫赵崇初李继昭等以功皆进同中书门下平章事时谓三使相后更附韩全海周敬容皆忌胤胤闻召凤翔李茂贞入朝使留族子继筠宿卫偓以为不可胤不纳偓又语令狐涣涣曰吾属不惜宰相邪无卫军则为阉竖所图矣偓曰不然无兵则家与国安有兵则家与国不可保李彦弼见帝倨甚至饮殿中帝不平偓请逐之赦其党许自新又请厚与金帛官爵毋使豫政事帝不用彦弼潜偓及涣漏禁省语帝怒曰卿有官属日夕议事奈何不欲我见学士胤召朱全忠讨全海汴兵将至偓曰初以卫兵检中人今敕使卫兵为一臣窃寒心愿诏茂贞还其卫军不然两镇兵鬪阙下朝廷危矣又劝表暴内臣罪因诛全海等若茂贞不如诏即许全忠入朝未及用全海等已劫帝西幸偓夜追及鄂见帝恸哭至凤翔迁兵部侍郎进承旨宰相韦贻范母丧诏还位偓当草制上言贻范处丧未数月遽使视事伤孝子心今中书事一相可办陛下诚惜贻范才候变纒而召可也学士使马从皓逼偓求草偓曰腕可断麻不可草明日百官至而麻不出宦侍合噪茂贞入见帝曰命宰相而学士不草麻非反邪艷然出姚洎闻曰使我当直亦继以死既而帝畏茂贞卒诏贻范还相洎代草麻自是宦党怒偓甚 【谨按通鉴辑览 御批命相失当即上疏论列亦臣职所宜然若但断断以草制不草制争之则茂贞所云书生礼数与反何异二语词虽俚俗诚已深悉其矫清博直盖唐世停草裂麻病疾相沿甚为蠹政之尤此虽起于下多伪臣实亦因于上无明主然尔时朝政固无一足加责备者矣】 全海诛宦人多坐死帝欲尽去余党偓曰尽诛则伤仁愿去尤者帝曰善崔胤请以辉王为元帅帝问偓它日累吾儿否偓曰陛下在东内时天阴雩王闻鸟声曰上与后幽困鸟雀声亦悲陛下闻之惻然有是帝曰然是儿天生忠孝与人异意遂决偓议附胤类如此偓处可机密率与帝意合欲相者三四让不敢当初偓侍宴全忠胤临陛宣事坐者皆去席偓不动曰侍宴无辄立全忠怒偓薄已胤亦与偓贰会逐王溥

陆扈帝以王赞赵崇为相胤执赞崇非宰相器帝不得已而罢赞崇皆偃所荐全忠见帝斥偃罪帝数顾胤胤不为解乃贬濮州司马帝执其手流涕曰我左右无人矣再贬荣懿尉徙邓州司马天佑二年复召为学士还故官偃不敢入朝挈其族南依王审知而卒兄仪字羽光亦以翰林学士为御史中丞偃贬之明年帝宴文思球场全忠入百官坐庑下全忠怒贬仪棣州司马

钦定续通志卷二百七十三

●钦定续通志卷二百七十四 列传七十四

列传

唐

○唐七十四

周宝 王处存 邓处讷 陈儒 刘巨容【冯行袭】赵德諲

【匡凝】 杨晟 顾彦朗【彦晖】 王重

荣 诸葛爽 李罕之

周宝

王处存

邓处讷

陈儒

刘巨容

赵德諲

杨晟

顾彦朗 【顾彦晖】

王重荣

诸葛爽

李罕之

△周宝

周宝字上珪平州卢龙人曾祖待选为鲁城令安禄山反率县人拒战死之祖光济为平卢牙将每战得攻鲁城者必手屠之历左赞善大夫从李洧以徐州归天子父怀义检校工部尚书天德西城防御使宝荫千牛备身为怀义军部将会昌时选方镇才校入宿卫与高骈皆隶右神策军历良原镇使以善击球俱补军将骈以兄事宝宝强毅未尝诘于人官不进自请以球见武宗称其能擢金吾将军以球丧一目进检校工部尚书泾原节度使务耕聚粮黄巢据宣歙徙宝镇海军节度兼南面招讨使僖宗入蜀加检校司空时羣盗盘结柳超据常熟王敖据昆山

王腾据华亭宋可复据无锡宝练卒自守发杭州兵戍县镇分八都石镜都董昌主之清平都陈晟主之于潜都吴文举主之盐官都徐及主之新登都杜棱主之唐山都饶京主之富春都文禹主之龙泉都凌文举主之中和二年进同中书门下平章事兼天下租庸副使封汝南郡王宝以京师陷将赴难益募兵号后楼都以子玅统之孱不能驭军部伍横肆宝亦稍惑声色不恤事以壻杨茂实为苏州刺史重敛人不聊田令孜以赵载代之茂实不受命宝表留不听乃残郭署污垣牖去诏以王蕴代载载留润州初镇海将张郁以击球事宝光启初贼剽昆山宝遣郁领兵三百戍海上郁醉而叛王蕴谓州兵还休不设备郁遂大掠蕴婴城守宝遣将拓拔从讨定之郁保常熟因攻常州刺史刘革迎降众稍集宝遣将丁从实攻之郁走海陵从实遂据常州董昌徙义胜军节度使宝承制擢杭州都将钱鏐领州事是时右散骑常侍沈诰使至江南负田令孜势震暴州县嗣襄王下令搜令孜党宝收诰及赵载杀之高骈领盐铁辟宝子佶为支使宝亦表骈从子在幕府骈为都统寢不礼宝宝衔之帝在蜀淮南绝贡赋谩言道浙西为宝剽阻帝知其诬不直骈自是显隙骈出屯东塘约西定京师宝喜将赴之或曰高氏欲图公地宝未信骈遣人请会金山谋执宝宝答曰平时且不闻境上会况上蒙尘宗庙焚辱盍高会时耶我非李康不能为人作功勋欺朝廷也骈遣人切让宝亦诟绝之会部将刘浩刁颀与度支催勘使太子左庶子薛朗叛宝方寝外兵格鬪火照城中宝惊出谕曰为吾用则吾兵否则寇也六州皆我镇何往不适乃至青阳门出奔士大掠官属崔绾陆锬田倍皆死浩奉朗领府事宝至奔牛埭骈馈以齏粉讽其且亡也宝抵于地曰公有吕用之难方作无谓我即奔常州依丁从实召后楼都无至者钱鏐遣杜棱成及攻薛朗棱子建徽攻从实声言迎宝遂围常州从实奔海陵鏐具囊鞬迎宝舍樟亭未几杀之不淹月而骈为毕师铎所囚宝死年七十四赠太保鏐以杜棱守常州文德元年拔润州刘浩亡不知所在执朗剖其心祭宝

△王处存

王处存京兆万年人世籍神策军家胜业里为天下高赀父宗以军吏累除检校司空金吾大将军遥领兴元节度使处存自右军镇使历检校刑部尚书定州制置使累迁义武节度使黄巢陷京师处存号哭不俟诏分麾下兵二千间道至山南卫乘輿外约王重荣连盟进屯渭桥而泾州行军司马唐宏夫亦屯渭北诏处存检校尚书右仆射督战俄拜东南面行营招讨使中和二年授京城东面都统素善李克用又故婚

好遣使十辈晓譬迎劝卒共平京师王铎差兴复功以勤王举义处存为第一收城破贼克用为第一迁检校司空复出兵三千属大将张公庆会诸军捕巢泰山灭之进检校司徒同中书门下平章事田令孜讨王重荣徙处存节度河中上书言重荣有大功不可改易不纳趣上道军次晋州刺史冀君武闭门不内而重荣拒诏处存临事有大将风幽镇兵悍马强其地势也而易定介其间侵轶岁至及李匡威得志谋并取之处存善驩邻内抚民有恩协穆太原以自助岁时讲兵与诸镇抗无能侵轧者累加侍中检校太尉卒年六十五赠太子太师谥曰忠肃三军迹河朔旧事推子郃由副使为留后昭宗从之累拜节度使加检校司空同中书门下平章事又进太保光化三年朱全忠使张存敬攻幽州以瓦桥泞潦道祁沟关郃畀叔父处直兵扰其尾令骑将甄琼章次义丰而存敬游弈骑已至且战且引十余里执琼章而氏叔琮下深泽执大将马少安围祁州屠之斩刺史杨约休兵十日处直壁沙河存敬军河北挑战处直不出涉河乃战处直大败存敬遂围定州郃斩亲吏梁汶移书存敬请盟俄而外郛陷郃以其族奔太原克用表为检校太尉卒处直事具五代史 【按郑志列传于其人其事牵连两朝而两史并见者皆删其一盖通史之例应尔新唐书末与五代史互见者甚伙今逐一裁勘其事多隶唐而沿及五代者则存唐传而补辑欧史以终之其事助于唐而系于五代者则存五代传其所未备仍采唐传以为缘起所贵人不复见而事特详谨识起例于此】

△邓处讷

邓处讷字冲韞邵州龙潭人少从江西人闵頊防秋安南中和元年还道潭州逐观察使李裕召诸州戍校徇曰天下未定与君等安州邑以待天子命若何众称善乃推頊为留后请诸朝僖宗方在蜀遣使抚慰当是时抚州刺史锺传据洪州议者欲二盗相噬即复置镇南军擢頊节度使頊悟不受命更为检校尚书右仆射欽化军节度使以处讷为邵州刺史朗州武陵人雷满者本渔师有勇力时武陵诸蛮数叛荆南节度使高骈擢满为裨将镇蛮军从骈淮南逃归与里人区景思猎大泽中啸亡命少年千人署伍长自号朗团军推满为帅景思为司马袭杀刺史崔翥诏授朗州兵马留后岁略江陵焚庐落劫居人俄进武贞军节度使先是陬溪人周岳与满狎因猎宰肉不平而鬪欲杀满不克见满已据州悉众趋衡州逐刺史徐顛诏授衡州刺史 【按五代史雷满传周岳与满及区景思同起兵推满与此异考处讷结满以杀岳似为岳欲杀满报复不应同起此得其实】 頊既强大且治人有恩哀顛穷率兵纳之岳羸军诱

战项堕伏中大败淮西将黄皓杀项岳闻乱以轻兵入
潭州自称钦化军节度使处讷砺甲训兵积八年结满为援攻岳斩之自称留后昭宗诏
拜武安军节度使不三日会刘建锋马殷兵至攻澧陵
处讷遣邵州豪杰蒋勋邓继崇率兵三千断龙回关殷说勋下之其下畏建锋虐夜弃甲
走建锋王关曰此天意也尽用邵旗铠趋潭州守者以
为勋军纳之处讷方宴执而杀之项字公谨满字乘仁岳字峻昭满不修饬每宴使客抵
宝器潭中曰此水府也蛟龙所凭吾能没焉乃裸入水
俄取器以出累迁检校太尉同中书门下平章事天复元年卒子彦威自立 【按五代史
不纪彦威即袭破江陵亦以为满时事未知孰是】
闻荆南节度使成汭兵出袭江陵入之焚楼船残墟落数千里无人迹弟彦恭结忠义节
度赵匡凝以逐彦威据江陵匡凝弟匡明系之还走朗
州后为马殷所攻彦恭奔淮南卒

△陈儒

陈儒江陵人世为牙右职广明元年以郑绍业为荆南节度使时朗州刺史段彦蕃
方据荆南绍业惮之踰半岁乃至召还以彦蕃代彦蕃
与监军朱敬玫不平谋杀之敬玫觉先率兵入其府彦蕃方寝縋城奔亲军垒不得入见
害帝遣中人似先元锡王鲁琪慰抚密戒曰若敬玫可
诛诛之敬玫盛兵出迎元锡等不敢发而还复诏郑绍业为节度使逗遛不进敬玫署儒
领府事明年迁检校工部尚书为节度使进检校右仆
射敬玫有悍卒三千号忠勇军暴甚儒不能制会绍业将申屠琮援京师归儒告以忠勇
挠治琮请除之大将程君从闻之率众奔澧州琮追斩
百余人军乃溃已而琮复颍军雷满三以兵薄城儒厚啖以利乃去淮南将张瓌韩师德
据复岳二州自署刺史儒请瓌摄行军司马师德摄节
度副使共击满师德兵上峡大略去瓌引兵入逐儒儒将奔行在既又劫还囚之瓌滑州
人暴勇而残荆故将夷戮几尽时以杨玄晦代敬玫监
军召敬玫还成部惧帝治前罪称疾自解敬玫数杀大将富商故积贿每曝衣统燻不可
计瓌见心动遣卒贼之刺其腹死秦宗言来寇马步使
赵匡欲奉儒出瓌觉之杀匡而绝儒食死瓌固垒二岁樵苏皆尽米斗钱四十千疫死者
争啖其尸军中甲鼓无遗宗言不能下乃解去二年宗
权遣赵德諲攻之瓌求救于归州刺史郭禹禹率峡州刺史潘章解其围明年德諲又至
城遂陷瓌死人无识者并尸于并复州长史陈璠断瓌
首置囊中走京师献之授安州刺史

△刘巨容

刘巨容徐州人为州大将庞勋之反自拔归授埇桥镇遏使射死浙西叛将王郢拜

明州刺史徙楚州团练使黄巢乱江淮授斩黄招讨副
使徙襄州行军司马检校右散骑常侍巢据荆南俄迁山南东道节度使以扞巢屯团林
巨容守荆门关与贼战巨容伪北巢追之伏兴贼大败
执贼将十三人巢浮江东奔巨容追之率十俘八以功迁检校礼部尚书诸将欲乘胜追
斩巢巨容曰朝家多负人有危难不爱惜官赏事平即
忘之不如留贼为富贵地故巢复炽 【谨按通鉴辑览 御批巨容膺阍外之寄贼方
败甯有会可乘正当悉锐穷追以靖伏莽乃怨诽国
家负人欲留贼以图富贵曹全晟既统舟师渡江开除书而遽返致贼气复煽江东二人
之罪固不可胜诛然所以致此者岂非僖宗不能振饬
纪纲国政日坏而尚专务游嬉其获罪祖宗较之二人为尤甚也】 及陷两京巨容合诸
道兵讨之授南面行营招讨使累兼天下兵马先锋开
道供军粮料使检校司空封彭城县侯巨容明吏治僖宗在蜀公卿多因巨容护赴行在
山南西道节度使鹿晏弘为禁军所逐引麾下东出襄
邓秦宗权遣赵德諲合晏弘兵攻襄州巨容不能守奔成都始扬州人申屠生能化黄金
高骈客之为吕用之所潜亡奔襄汉骈遣吏捕得生见
巨容自言其术巨容留不遣田令孜之弟道襄州巨容出金夸之及在蜀匿生使术不得
传令孜恨之龙纪元年杀巨容夷其宗生并死

冯行袭

冯行袭

巨容部将冯行袭者均州武当人以谋勇称为州校中和初乡豪孙喜聚众数千人
谋攻城行袭伏士江隩单舟迎喜曰州人思得将军久
矣顾将军兵多必剽掠若留众江北以轻骑进我为乡导贼可下喜信之既度江吏出迎
伏兴行袭击喜斩之众皆溃行袭乘胜逐刺史吕焯据
均州巨容因表为刺史帝在蜀均之右有长山当襄汉贡道剧贼据险劫献物行袭平之
武定节度使杨守忠表为行军司马使领兵搤谷口以
通秦蜀凤翔李茂贞养子继臻据金州行袭攻拔之昭宗即授金州防御使时山南西道
节度使杨守亮将袭京师道金商行袭逆战破之以金
州为戎昭军擢行袭节度使朱全忠围凤翔韩全诲遣中人二十辈督江淮兵过其州行
袭方附全忠尽杀之收诏书送全忠天佑二年王建遣
将王思綰攻行袭败其兵州大将金行全出降行袭奔均州建以行全为子更名宗朗授
观察使以渠巴开三州隶之宗朗不能守焚郭邑去全
忠以行袭不足御建遣别将屯金州行袭议徙戎昭军于均州以金房为隶全忠以金人
不乐行袭以冯恭领州罢防御使而废戎昭军行袭事
梁官至司空封授乐郡王卒赠太傅谥曰忠敬 【从五代史补辑】

△赵德諲

赵德諲蔡州人从秦宗权为右将以讨黄巢功授申州刺史光启初与秦浩鹿晏弘合兵攻襄州节度使刘巨容奔成都宗权假德諲山南东道节度留后进攻荆南留裨将王建肇守之明年归州刺史郭禹来讨建肇纳之奔黔州德諲失荆南又度宗权必败举地附朱全忠全忠方为蔡州四面行营都统即表以自副加忠义军节度使宗权平加中书令封淮安郡王卒子匡凝嗣

赵匡凝

赵匡凝

匡凝字光仪由唐州刺史自为山南东道节度留后昭宗即授节度使以威惠闻累迁检校太尉兼中书令全忠之败清口匡凝与奉国节度使崔洪河东李克用淮南杨行密约合兵攻全忠会方城镇遏使度轸奔全忠发其谋全忠移书切责使氏叔琮攻唐州刺史赵匡璠降进围隋州执刺史赵匡璘斩首五千级拔邓州执刺史国湘匡凝惧乞盟全忠使亲将陈俊王绅入叔琮军崔洪留之绅亡归会河东客伊超使淮南还过蔡洪亦留之因是并俊送全忠以部将苛约为解遣兄贤入质全忠还之质洪子于汴全忠使贤调蔡州卒二十出戍将行大将崔景思不悦杀贤洪惧遂奔行密天佑元年封匡凝楚王时诸道不上供唯匡凝岁贡赋天子全忠方图天下遣人谕止之匡凝流涕曰吾为国屏翰渠敢有他志副使王筠劝绝全忠全忠怒攻之弟匡明大破汴军于邓州因遣匡凝与王建连和及荆南成纳败匡凝取江陵表匡明为荆南节度留后诏拜检校司徒荆南节度行军司马全忠以其兵分可图也乃使杨师厚攻匡凝自将中军继之屯临汉匡凝遣客谢囚不遣败荆南救兵全忠循江而南师厚繇阴谷伐木为梁匡凝以兵二万濒江战大败乃燔州单舸夜奔扬州行密见之曰君在镇轻车重马输于贼今败乃归我邪匡凝曰仆世为唐臣岁时职贡非输贼也今以不从贼力屈归公惟公生死之耳行密厚遇之【案匡凝对行密数语具见忠荇今从五代史辑补】筠自杀全忠遂趋江陵匡明亦谋奔淮南子承规谏曰昔诸葛兄弟分仕三国若适扬州是自取疑也乃趋成都王建待以宾礼授武信军节度使分其众为崇义勇义顺义广义四都全忠遂有荆南匡凝后为徐煜所杀匡明卒于蜀【案新唐书赵匡凝传下有杨守亮一传守亮乃宦者杨复恭假子依附建节与诸藩镇不同且复恭假子守信守忠守贞皆为节度使不应独为守亮立传其传中事亦与复恭传大概相同今略取其异者入复恭传本传从删】

△杨晟

杨晟不详宗系隶凤翔军节度使李昌符畏其勇欲杀之妾周撻使亡去隶神策军为都校僖宗在陈仓邠盩朱玫合昌符追行在乃擢晟感义军节度使检校司空守大散关玫兵攻关晟数却战潘氏遂大败内外无固志帝更徙兴元晟西袭文州逐刺史据成龙茂等州王建攻成都田令孜以晟故将与连和假威戎军节度使守彭州晟击建无功且畏图己乃约山南西道节度使杨守亮兄弟合谋拒建掠新繁焚汉州又攻东川顾彦晖为建兵所逐建使王宗裕率骑五万围晟晟假子实以骑八千降于建建以骑兵袭杨守厚等皆亡去晟开门决战大败遂约降建馈十羊晟曰以我为机上肉乎不出建筑甬道属陴以入斩晟首晟有仁心下怀其恩食尽无叛者初昌符死晟得其妾周母事之周请为妻晟固辞旦夕问省乃视事爱将安师建既就执建顾曰尔报杨司徒足矣能从我乎谢曰司徒誓同生死不忍复载日月再三不答乃戮之

△顾彦朗 【顾彦晖】

顾彦朗彦晖者丰州人并为天德军小校黄巢乱长安率军同复京师彦朗迁累右卫大将军光启中擢拜东川节度使检校太保同中书门下平章事至剑门陈敬瑄使吏夺其节彦朗不得入保利州敬瑄诬劾彦朗擅兴兵掠西境诏和之乃得到军署彦晖汉州刺史初山南西道节度使杨守亮忌壁州刺史王建欲逐之建闻合溪洞豪酋取阆利二州彦朗与建雅旧阴助贖建攻成都彦朗挟故憾与并力会彦朗卒彦晖自知留后明年为节度使中人送节为绵州刺史杨守厚所留守厚发兵攻梓州彦晖告急于建建使李简救之戒曰贼破并取彦晖无须再往也简破守厚军彦晖辞疾不克取建素有吞噬心以彦朗婚娅久未忍及彦晖父愈疏境上关赋相稽诟建怒景福元年遂攻彦晖彦晖求救于杨守亮遣杨子彦戍梓执建大将王宗弼彦晖责曰王公何以见讨君为大将不谏云何宗弼谢罪即解缚更养为子改名琛明年建将华洪破绵州守厚走得彦晖节时诏进彦晖检校司空东川节度使干盩二年昭宗在石门督彦晖建赴行在建率兵二十万次绵州即劾彦晖劫辎运回袭之彦晖不敢出但遣人塞舟路建遂击取巴阆蓬渠通果龙利八州帝遣中人为两川宣谕协和使建奉诏还而兵不解彦晖谋窘因大略汉眉资简等州李茂贞亦欲争其地使子兴元节度使继密引军救彦晖以窥东川四年华洪率众五万攻彦晖取渝昌普三州壁梓州南败彦晖兵围遂固梓有镜堂世称其丽彦晖尝会诸将堂上养子瑶尤亲信彦晖以所佩剑号疥癆宾佩之使侍左右尝语诸将曰与公等生死同

之违者先齿疥癆宾众曰诺及围急瑶请聚亲信饮得同死彦晖顾王琛曰尔非我旧可自求生指颓垣令逸彦晖手杀妻子乃自刎宗族诸将皆死

△王重荣

王重荣太原祁人父纵太和末为河中骑将从石雄破回鹘终盐州刺史重荣以父任为列校与兄重盈皆以毅武冠军擢河中牙将主伺察两军士干夜禁捕而鞭之士诉于中尉杨元寔元寔怒执重荣让之具言其状元寔叹曰非尔明辨孰由知之更擢府右署稍迁行军司马黄巢陷长安分兵略蒲节度使李都不能支乃臣贼然内惮重荣表以自副地迤贼调取横数使者至百辈坐传舍益发兵吏不堪命重荣胁说都曰我所诡谋纾难以外援未至今贼哀责日急又收吾兵以困我亡无日矣请绝桥婴城自守不然变生都曰吾兵寡谋不足绝之祸且至愿以节假公遂奔行在重荣乃悉驱出贼使斩之因大掠居人以悦其下天子使前京兆尹窦漪问道慰其军重荣率官属奉迎漪至大飨士倡言曰天子以大臣守士谁得逐之为我疏首恶者众无敢对重荣佩刀历阶曰首谋者我也尚谁索目漪吏趣具骑漪即奔还重荣遂主留后贼使健将朱温以舟师下马翊黄邨率众自华阴合攻重荣重荣感励士众大战败之 【谨按通鉴辑览 御批重荣拥河中重镇战守皆有可凭何至望尘降贼真所谓乱臣贼子也迨困于调发始驱杀贼使击败贼兵顾借口于屈节纾患所谓欲盖弥彰其将谁欺乎】 即拜检校工部尚书为节度使会忠武监军杨复光率陈蔡兵万人屯武功重荣与连和俘贼将李详于华州贼使尚让来攻而朱温将劲兵居前败重荣兵于西关门于是出兵夏阳掠河漕重荣迁兵三万攻温温惧举同州降复光欲斩之重荣曰今招贼一切释罪且温武锐可用杀之不祥表为同华节度使巢丧二州怒甚自将精兵数万壁梁田重荣军华阴复光军渭北犄角攻之贼大败执其将赵璋巢中流矢走重荣兵亦死耗相当惧巢复振忧之与复光计复光建遣使与李克用连和克用使陈景斯总兵自岚石赴河中亲率师从之遂平巢复京师以功检校太尉同中书门下平章事封琅琊郡王累加检校太傅中人田令孜怒重荣据盐池之饶建请二池领属盐铁重荣不许奏言故事岁输盐三千乘于有司斥所余以贍军天子遣使谕旨不听令孜徙重荣兖海节度使以王处存代之诏克用将兵援河中重荣上书劾令孜离间方镇令孜遣邠寇朱玫进讨壁沙苑重荣遗克用书给言奉密诏须公到使我图公此令孜朱全忠朱玫之惑上也因示伪诏克用方与全忠有隙信之请讨全忠及玫帝数诏

和解克用合河中兵战沙苑大败奔邠州神策军溃还京师遂大掠克用乘胜西天子走凤翔俄嗣襄王熿僭位重荣不受命与克用谋定王室杨复恭代令孜领神策故与克用善遣谏议大夫刘崇望赉诏谕天子意两人听命即献缣十万愿讨孜自赎重荣遂斩熿长安复平然性悍酷尝辱部将常行儒行儒怨之光启三年引兵夜攻府重荣亡出外诘旦杀之推立重盈重盈前已为汾州刺史黄巢度淮擢陝虢观察使重荣据河中三迁检校尚书右仆射即拜节度使同中书门下平事事及代重荣留长子珙领陝虢节度事入杀行儒军复安昭宗立进太傅兼中书令封琅邪郡王父子兄弟相继帅守而从子蕴亦为忠武节度使干宝二年重盈死军中以其兄重简子珂继重荣故推为留后珙与弟绛州刺史瑶争河中上言珂本家苍头请选大臣镇河中又与朱全忠书言之珂急乃请婚于克用克用荐之天子许嗣镇然犹以崔胤为河中节度使珙复构珂于王行瑜李茂贞行瑜等约韩建共荐珙诏已授珂重荣有大功不可废行瑜怒使其弟行约攻珂克用遣李嗣昭援之败珙于猗氏三镇衔帝之却其请也连兵犯京师谋废帝诛执政而立吉王固请授珙河中克用闻之怒以师讨三镇瑶珙引兵去克用拔绛州斩瑶而屯渭北败行约于朝邑行约走京师与弟行实谋挟帝幸邠茂贞养子继鹏欲以帝幸凤翔两军合噪京师大乱帝出幸石门诏克用珂以兵趋新平又诏泾州张鐸会克用军以扼岐阳茂贞斩继鹏传首以谢诏削行瑜官爵以克用为邠宝四面行营都招讨使珂为粮料使帝既还加珂检校司空为节度使克用以女妻之珂亲迎太原以李嗣昭助守河中因攻珙珙战数北珙任威虐杀给事中王柷等十余人人有罪辄刳断以逞柷故常州刺史避难江湖帝闻刚夔以给事中召道出陝珙谓且柄任厚礼之柷鄙其武暴不降意既晏盛列珍器音乐珙请于柷曰仆今日得在子弟列大赐也三请柷不答珙勃然曰天子召公公不可留此遂罢遣吏就道杀之族其家投诸河以溺死闻帝不能诘光化二年为部将李璠所杀赠太师诏陝州冤死者有司吊祭存问其家始全忠击杨行密不能克讽荆襄青徐诸道请已为都统以讨行密帝依违未报而珂与太原镇定诸道亦请加行密都统以讨全忠繇是两罢之全忠怨珂不忘帝为刘季述所废珂愤见言色屡陈讨贼谋既反正首献方物帝甚倚之而全忠以克用方强不敢加兵及王镕屈服拔定州而克用兵折乃谓其将张存敬曰珂恃太原侮慢我尔持一绳缚之存敬以兵数万渡河由含山袭绛州刺史陶建钊晋州刺史张汉瑜皆降以何邕戍之进攻珂全忠率师继进珂乞师太原为邕所连不能进珂急使妻遗克用书曰贼攻

我朝夕见俘乞食大梁矣克用答曰道且断往救必俱亡不如归朝廷珂穷遣使告李茂贞曰帝初反正诏藩镇无相侵而朱公不顾约以攻敝邑敝邑亡则邠岐非君所保天子神器敛手付人矣宜与华州韩公出精锐固潼关以张兵势仆不武公其惠我西偏地以为扞守蒲请公自有之关西安危国祚长短系公此举也茂贞不答珂益■〈跬戚〉会桥毁潜具舟将遁夜谕守兵无肯为用者牙将刘训叩寝门珂疑有变叱之训请断臂自明珂出问计答曰若夜出人将争舟一夫鸱张祸系其手旦日以清谕军中宜有乐从者可则济否则召诸将行成以缓敌徐图所向上策也珂然之明日登城语存敬曰吾于朱公有父子驩君姑退舍须公至吾自听命乃执太原诸将并奉节印内存敬军树大幡城上遣兄璘与诸将樊洪等见存敬存敬解围而戍以兵全忠自洛至全忠王出也始背贼事重荣约为甥舅指日月曰我得志凡氏王者皆事之至是遇重荣墓伪哭而祭次虞乡珂欲面缚牵羊以见全忠报曰舅之恩无日可忘若以亡国礼见黄泉其谓我何珂出迎握手泣下骈辔以入居旬日以存敬守河中举珂室徙于汴后令入覲遣人贼之于华州自重荣傅珂凡二十年

△诸葛爽

诸葛爽青州博昌人为县伍伯令笞苦之乃亡命庞勋反入盗中为小校勋势■〈跬戚〉率百余人与泗州守将汤羣自归累迁汝州防御使李琢讨沙陀于云州表为北面招讨副使徙夏绥银节度使检校尚书右仆射黄巢犯京师诏率代北行营兵入卫次同州降贼伪署河阳节度使间道奉表自明诏拜节度使累授京师东南面招讨诸行营副都统左先锋使兼中书门下平章事朱温为贼守同州爽率轻兵入之温偃旗设伏以待爽解甲就舍伏发悉弃铠马奔还至修武为魏博韩简击败之不敢入简留将赵文■〈王弁〉戍河阳自攻郛时中和二年也河阳人诱爽自金商驰复入之厚礼文■〈王弁〉及戍人还之魏于是爽攻新乡简自郛来战获嘉西简阴窥关中其下不悦裨将乐彦祯间众之隙引其军先还故简兵八万自溃相藉溺清水至不流明年诏爽为东南面招讨使伐秦宗权爽虽兴庸厮善吏治累擢检校司空光启二年卒其将刘经与泽州刺史张言共立爽子仲方为留后为蔡贼孙儒所攻奔于汴儒取孟州

△李罕之

李罕之陈州项城人少奉捷初为浮屠行勾市穷曰无所得抵钵褫祇杖云聚众攻剽五台下先是蒲绛民壁摩云山避乱羣贼攻不克罕之以百人径拔之众号李摩云随黄巢渡江降于高骈骈表知光州事为秦宗权所迫奔

项城收余众依诸葛爽署怀州刺史爽伐宗权即表以
 自副屯睢阳无功又表为河南尹东都留守使捍蔡李克用脱上源还罕之迎谒厚相结
 罕之因府为屯会孙儒来攻走保龟池东都陷儒焚宫
 阙剽居民去爽遣将收东都罕之逐出之爽不能制俄而爽死其将刘经张言共立爽子
 仲方欲去罕之而罕之故与郭璆有隙擅杀璆军中不
 悦经闻众怒袭其壁罕之退保干壕经追击反为所败乘胜入屯洛阳苑中经战不胜还
 河阳罕之屯巩将度泛经遣张言拒河上反与罕之合
 攻经不克屯怀州孙儒逐仲方取河阳自称节度使俄而宗权败弃河阳走罕之言进收
 其众勾援河东克用遣安金俊率兵助之得河阳克用
 表罕之为节度使同中书门下平章事有诏与属籍又表言为河南尹东都留守 【按五
 代史罕之与言皆附于梁与此互异】 罕之与言甚
 笃然性猜暴是时大乱后野无遗秆部卒日剽人以食言善积聚劝民力耕储廩稍集罕
 之仰以给求之无涯言不能厌罕之拘河南官吏笞督
 之又东方贡输行在者多为罕之邀劫文德元年罕之悉兵攻晋州言夜袭河阳俘罕之
 家罕之穷奔河东克用复表为泽州刺史领河阳节度
 使罕之数出抄怀孟晋绛无休岁人匿保山谷出为樵汲者罕之俘斩略尽数百里无舍
 烟克用讨王行瑜表罕之副都统检校侍中行瑜诛封
 陇西郡王检校太尉兼侍中罕之恃功多尝私克用爱将盖寓求一镇寓为请克用不许
 曰鹰鹯饱则去矣我惧其翻覆也光化初昭义节度使
 薛志勤卒罕之夜袭潞入之自称留后报克用曰志勤死惧它盗至不俟命辄屯于潞克
 用遣李嗣昭先击泽州拘罕之家属送太原罕之攻沁
 州执刺史守将送款于汴全忠表罕之昭义节度使命丁会援之与嗣昭战含口嗣昭不
 利葛从周取泽州嗣昭又攻罕之罕之暴得病不能事
 全忠更以罕之节度河阳三城卒于行年五十八

钦定续通志卷二百七十四

●钦定续通志卷二百七十五 列传七十五

列传

唐 【七十五】

○唐七十五

王敬武【师范】 孟方立 时溥 朱宣 孙儒 高仁

厚 赵犨【昶翊】 成纳 杜洪

锺传 刘汉宏 张雄【徐约】

王敬武

孟方立

时溥

朱宣

孙儒

高仁厚

赵犛

成汭

杜洪

锺传

刘汉宏

张雄

△王敬武

王敬武青州人隶平卢军为偏校事节度使安师儒中和中盗发齐棣间遣敬武击定还逐师儒自为留后时王铎方督诸道行营军复京
师承制授敬武平卢节度使趣其兵西京师平进检校太尉同中书门下平章事龙纪元年卒

王师范

王师范

子师范年十六自称留后昭宗以太子少师崔安潜领节度师范拒命棣州刺史张蟾迎安潜师范遣部将卢宏攻之宏与蟾连和师范以金啖之曰君若顾先人不绝其祀君之惠也不然愿死坟墓宏少之不为备师范伏兵迎于路部将刘鄩斩宏遂攻棣州蟾求救于朱全忠全忠驰使谕解师范拔其城斩蟾安潜不敢入师范喜儒学谨孝于法无所私舅醉杀人其家诉之师范厚赂谢诉者不置师范曰法非我敢乱乃抵舅罪母恚之师范立堂下日三四至不得见三年拜省户外不敢懈以青州父母所籍每县令至具威仪入谒令固辞师范遣吏挟座拜廷中乃出或谏不可答曰吾恭先世且示子孙不忘本也 【谨按通鉴辑览 御批节使不敢横行理固宜尔然当时逆藩跋扈朝命视同弁髦何有于桑梓一令况师范并无尽心効忠之可纪乃欲以曲谨沽名饰诈其谁欺】 全忠已并郓州遣兵攻师范师范下之会全忠围凤翔昭宗诏方镇赴难以师范附全忠命杨行密部将朱瑾攻青州且欲代为平卢节度师范闻之哭曰吾为国守藩君危不持可乎乃与行密连盟遣将张居厚李彦威以甲槩二百舆给为献者及华州先内十舆阖人觉众擐甲噪杀全忠守将娄敬思是时崔允方在华闭门拒战执居厚刘鄩袭兖州入之师范亦潜兵入河南徐沂郓等十余州同日并发全忠使从子友宁率军东讨师

范击斩其首全忠怒悉军二十万倍道至又败退屯临淄留杨师厚攻之师厚败师范兵于临朐执诸将又获其弟师克遂傅其城师范众尚十余万诸将请决战而师范以弟故乃请降 【谨按通鉴辑览 御批唐室陆危诸藩皆坐视不救惟师范慷慨誓师差强人意惜诸将才皆庸儒事迄无成乃青州之围不能始终全节辄开门降贼前后判若两人实负初心矣】 全忠归其弟假师范知节度留后事师范献钱二十万缗以谢军汴将刘重霸执棣州刺史邵播得其书八百纸皆教师范战守全忠憚而杀之岁余徙师范于汴表为河阳节度使全忠既受唐禅友室妻诉讎人于朝乃族师范于洛阳先是有司坎第左告之故师范乃与家人宴少长列坐语使者曰死固不免予惧昭穆失序不可见先人地下酒行以次受戮者二百人

△孟方立

孟方立邢州人始为泽州天井戍将迁游弈使中和元年昭义节度使高浚击黄巢战石桥不胜保华州为裨将成邻所杀还据潞州方立率兵攻邻斩之自称留后擅裂邢洺磁为镇治邢为府号昭义军潞人请监军使吴全勛知兵马留后时王铎领诸道行营都统以潞未定墨制假方立检校左散骑常侍兼御史大夫知邢州事方立不受囚全勛以书请铎愿得儒臣守潞铎使参谋中书舍人郑昌图知昭义留事欲遂为帅僖宗用旧相王徽领节度时天子在西河关云扰方立擅地而李克用窥潞州徽度朝廷未能制乃固让昌图昌图治不三月辄去方立更表李殷锐为刺史徙治龙冈会克用为河东节度使昭义监军祁审诲乞师求复昭义军克用遣贺公雅李筠安金俊三部将击潞州为方立所破又使李克修攻取之杀殷锐遂并潞州表克修为节度留后初昭义有潞邢洺磁四州至是方立自以山东三州为昭义而朝廷亦命克修以潞州旧军界之昭义有两节自此始方立倚朱全忠为助故克用击邢洺磁无虚岁光启二年克修击邢州取故镇进攻武安方立将吕臻马爽战焦冈为克修所跋斩首万级执臻等拔武安临洺邯鄲沙河克用以安金俊为邢州刺史招抚之方立勾兵于王镕镕以兵三万赴之克修还后二年方立督部将奚忠信兵三万攻辽州以金啖赫连铎与连和会契丹攻铎师失期忠信三分其兵鼓而行克用伏兵于险忠信前军没既战大败执忠信脱者十二龙纪元年克用使李罕之李存孝击邢攻磁洺方立战琉璃陂大败禽其二将被斧钺徇邢垒呼曰孟公速降有能斩其首者假三州节度使方立力屈又属州残堕人心恐性刚少恩夜行俾兵皆偃告劳自顾不复振乃引酖自杀从弟迁素得士心众推为节度留

后请援于全忠全忠方攻时溥不即至命王虔裕以精甲数百赴之假道罗宏信不许乃趋间入邢州大顺元年存孝复攻邢迁挈邢洺磁三州降执王虔裕三百人献之遂迁太原表安金俊为邢洺磁团练使以迁为汾州刺史【按原文作邠州考邠非晋属且天井关在汾州今从五代史作汾】梁氏叔琮攻晋出天井关迁开门降导以攻太原军还以迁归全忠恶其反复杀之【从五代史补辑按新唐书此下有杨行密传行密应列五代吴载记此从删】

△时溥

时溥徐州彭城人为州牙将黄巢乱京师节度使支详遣溥与陈璠率兵五千西讨次河阴军乱剽居人溥招戢其众引还屯境上疑不敢归详以牛酒犒士约悉贯其罪军乃入共推溥为留后溥厚具赍装遣璠护详还京师夜驻七里亭璠擅杀详屠其家溥怒署璠宿州刺史俄杀之别遣将引锐兵三千入关僖宗因以武宁节度命之巢败东走围陈州秦宗权方据淮西相联结溥地介于贼悉师讨之军锋甚盛连战辄克授东面兵马都统遂合许兖郓兵逐尚让于太康斩首数万级让降溥遣将李师悦等追尾巢至莱芜大破之林言斩巢首持归溥以献天子故破贼溥功第一加检校司徒同中书门下平章事进检校太尉兼中书令巨鹿郡王宗权阻兵拜溥蔡州行营兵马都统贼平与朱全忠争功嫌恚日构孙儒方与杨行密争扬州诏全忠为淮南节度使溥自以先起显名位都统顾不得而全忠得之颇怅恨全忠使司马李璠郭言等东兵道宿州遗溥书假道溥不可以兵袭之言战甚力解而还全忠怨自是连岁略徐泗全忠自将及其郊未得志引去溥穷乞师于李克用克用为攻碭山朱友裕救之各亡其大将友裕进攻宿州不能拔时大顺元年也明年丁会筑堤阨汴水灌宿郛三月拔之使刘瓚守而溥将刘知俊引兵二千降全忠军益不振民失田作又大水荐饥死丧十七八乃请和于全忠全忠曰移镇则可昭宗以宰相刘崇望代之授溥太子太师溥虑去徐且见杀惶惑不受命谕军中固留诏可泗州刺史张谏闻溥已代即上书纳质请隶全忠溥既复留谏大惧全忠为表徙郑州刺史谏畏两怨集已乃奔杨行密行密以谏为楚州刺史并其民徙之以兵屯泗朱友裕率军攻溥溥将徐汶出降溥求救于朱瑾全忠自以兵屯曹将去留精骑数千授霍存曰事急可倍道趋之瑾兵二万与溥合攻友裕存引兵疾战瑾溥还壁明日复战霍存败死之进逼友裕友裕坚营不出瑾食尽还兖州全忠使庞师古代友裕溥分兵固守石佛山师古攻拔之王重师牛存节等梯其堞以入溥徙金玉与妻子登燕子楼自焚死实景福

二年全忠遂有其地私置守焉

△朱宣

朱宣宋州下邑人父以豪猾鬻盐抵法死宣亡命去青州为王敬武牙军黄巢之乱敬武遣将曹存实率兵西入关宣为军候道郓州是时节度使薛崇拒王仙芝战死其将崔君裕摄州事存实袭杀之据其地遂称留后以宣功多署濮州刺史留总帐下兵中和初魏博韩简东窥曹郓存实迎战死宣收残卒婴城简围之六月不能拔引去僖宗嘉其守拜宣天平节度使

【按朱宣得天平节钺事吴缜纠谬以纪传互勘事

多岐舛其显然者天平军节度自干符四年至中和四年据纪则历薛崇张昺崔君裕曹金鼐崔用曹存实朱宣凡七帅据传则薛崇崔君裕曹

存实朱宣四帅而已至韩简寇郓纪云曹全鼐死传云曹存实迎战而死宣之得节纪云逐存实自称留后传云宣婴城简不能拔拜节度使考

旧书薛史欧史于此传中曹存实事皆作曹全鼐惟通鉴以为宣代曹存实考异据实录云曹存实继其叔父全鼐未周岁而遇害然则始杀崔

君裕者全鼐后为韩简所杀者存实叔侄相继其中复无崔用且薛崇诸人惟张昺旧书有传终于天平与新纪同余新旧书俱无本传旧纪亦

无崔君裕以下诸事无从考证姑仍其旧要之缜所纠新书之失此其最着明者也】累

加同中书门下平章事宣有众三万弟瑾勇冠三军阴

有争天下心瑾得兖州兄弟雄张山东时秦宗权悉兵攻朱全忠使秦贤列三十六壁自将督战全忠大恐求救于宣宣与瑾身往击宗权宗权

败走全忠厚德宣兄事之情好笃密而内忌其雄且所据皆劲兵地欲造怨乃图之即声言宣纳汴亡卒移书诋让宣以新有恩于全忠答檄恚

望之由是显结隙使朱珍先攻瑾取曹州宣救曹不克奔还范珍围濮州宣使弟罕救濮全忠自将击罕斩之拔濮州朱裕奔归郓珍薄郓挑战

宣不出裕为书给降导珍入县门发死士数千纵礮石击未入者杀裨将百余人复取曹以郭词为刺史大将郭铖斩词奔全忠景福初复伐宣

令从子友裕先驱自继之次卫南宣以轻兵夜掩友裕军走之据其营全忠未知运粮以入乃觉走瓠河宣留濮州全忠令友裕驰壮骑谍郓虚

实身将而北会宣引还纵兵战全忠南走几不脱乃谋持久取宣岁一再暴其鄙夺之食俘其工织■〈广外勤内〉有存者宣令贺瓌守濮州

为友裕所攻委城走庞师古既拔徐州全忠即遣攻齐州宣瑾皆戍以兵久不下干盩元年全忠身往薄清河结垒宣瑾三分其兵出击之全忠

迎战东阿南风急汴军居下甚惧俄而风返全忠得纵火焚其旁燹熏涨天宣瑾大北是夏全忠壁曹州南宣薄战禽其将三人全忠还明年使

朱友恭击兖州瑾坚壁守宣釐瑾友恭夺其粮全忠自军单父会宣求救于李克用友恭退壁曹南数月全忠自伐宣败克用将李承嗣等乃还宣追之大钞曹州其秋全忠复攻郟壁梁山宣克用挑战全忠设伏破之斩首数千级引而南克用蹶全忠后至柏和大寒全忠军多死三年克用使其将李瑋以兵屯莘援宣为罗宏信所破全忠大喜度宣可困遣庞师古代宣宣逆战败于马颊河师古迫西门兵不出全忠之攻宣凡十兴师四败绩宣才将皆尽益内沮度不能与全忠确则固守增堞深沟为不可逼明年葛从周密造舟于堑师人踰而升宣出奔为民所缚追至执以献全忠斩之而纳其妻瑾事具五代史

△孙儒

孙儒河南河南人以趨卞横里中隶忠武军为裨校与刘建锋善黄巢乱以兵属秦宗权为都将光启初宗权遣儒攻东都留守李罕之出奔儒焚宫阙屠居人河阳节度使诸葛爽与战洛水爽败儒亦东围郑州朱全忠屯中牟救之不敢前儒众夜登城刺史李璠走进拔河桥遂取河阳留后诸葛仲方出奔全忠壁河阴儒掠汴鄙全忠却屯胙城东南列伪旗鼓疑之儒乃还会全忠与宗权战宗权败走儒闻杀孟人■〈?不〉尸于河焚井邑乃去杨行密得扬州宗权使弟宗卫争淮南以儒为副建锋为前锋儒常曰丈夫不能苦战万里赏则繇已奈何居人下生不能富贵死得庙食乎未几汴兵攻蔡宗权召之儒称疾不往宗衡督之即大会帐下酒酣斩宗衡并其众与建锋许德勋等盟有骑七千因略定傍州不淹旬兵数万号土团白条军文德元年破扬州自为淮南节度使与时溥连和全忠尝以书招儒故又纳款于汴且送宗衡秦彦毕师铎首全忠藉以闻昭宗授儒检校司空全忠署为招讨副使龙纪初悉兵攻宣州行密取淮南儒还行密走始得润常苏三州兵益强使建锋守润常儒谋定江南乃北争天下畏全忠搗虚乃遣人卑辞厚贿全忠荐于朝诏授淮南节度使大顺元年行密取润州以安仁义守之常州以李友守之儒怒三分其军度江建锋复拔常润仁义走全忠遣将庞从等军十万奄至高邮儒悉师御之故仁义间取润州刘威田頔等败建锋于武进取常州杭州钱鏐将沈粲自苏州奔儒行密诸将在润常者皆为建锋所逐仁义頔弃润州走明年儒引兵自京口转战行密诸将屯险者闻儒至皆走頔威等合兵三万邀儒黄池儒遣马殷击走之儒营广德乘胜至东溪淮人大恐行密遣台蒙屯西溪自引军逆战儒军围之数重黑云将李简以骑驰之【按五代吴世家行密既破儒收其余兵数千以皂衣蒙甲号黑云都不应此时已有黑云将】行密乃免儒遂围宣

州会溪潦暴涌广德黄池诸壁皆没儒分兵取和滁二州其秋儒焚扬州引而西传檄远近号五十万所过烧庐舍杀老弱以给军行密惧将遁去戴规曰儒军数败今扫地而至决死于我若吾遣降者间至扬州抚慰衣食使儒军闻其家尚完人人志归不战可禽也行密乃遣亲将入扬州取儒营粮数十万斛以稟饥民儒屯广德陶雅以骑军破儒前锋屯严公台十二月顓威与儒战皆大败儒连屯稍西行密使陶雅屯润州扼其归路景福元年儒复围宣州屯陵阳行密战不利谋出奔刘威方系狱且死行密穷更召问计对曰儒焚仓隕垒以来粮尽将为我禽可劲兵背城坐制其困李神福亦请据险邀儒粮行密乃分兵攻广德壁以绝饗道军大疫儒病疴遣建锋殷钊诸县行密知城下兵寡乃晨出率仁义顓背城战破五十壁会暴澍且冥儒车大败儒病甚股弁不能兴顓执儒献行密诸将皆降儒就刑于市见刘威曰中君之谋儒尝引鉴搔首曰此头不久当入京师至是传首阙下建锋殷哭之相语曰公常有志庙食吾等有土当庙以报德及殷据湖南表儒赠司徒乐安郡王立庙以祀

△高仁厚

高仁厚亡其里系初事剑南西川节度使陈敬瑄为营使黄巢陷京师天子出居成都敬瑄遣黄头军部将李鋌巩咸以兵万五千戍兴平数败巢军贼号蜀兵为鸦儿每战辄戒毋与鸦儿鬪敬瑄喜其兵可用益选卒二千使仁厚将而东先是京师有不肖子皆着垒带冒持挺剽闾里号闲子京兆尹始视事辄杀尤者以怖其余窦潘治京兆至杀数十百人稍稍惮戢巢入京师人多避难宝鸡闲子掠之吏不能制仁厚素知状下约入邑闾纵击军入闲子聚观嗤侮于是杀数千人坊门反闭欲亡不得皆死闾里乃安会邛州贼阡能众数万略诸县列壁数十涪州刺史韩秀升等乱峡中韩求反蜀州诸将不能定敬瑄召仁厚还使督兵四讨屯永安获阡能谍者自言父母妻子囚于贼约不得军虚实且死仁厚哀之曰为我报贼明日我且战能释甲署背曰归顺皆得复农矣纵谍去命诸将毁栅鼓而前贼渠罗浑擎设伏诈降仁厚遣将不持兵入谕其众皆真降浑擎诈穷而逸吏执之降众署背得免则告诸壁大军至贼帅句胡僧大惊斩之莫能禁众执以降韩求赴水死贼帅罗天子弃寨奔阡能仁厚引兵逼之众呼噪争出执阡能挈罗天子首迎降【按阡能乃贼首已见上文传不终言其就禽事殊为漏略今采通鉴增】余栅皆下仁厚还天子御楼劳军授仁厚检校尚书左仆射眉州刺史敬瑄与仁厚谋曰秀升未禽贡输梗夺百官乏奉民不盐食公能破贼当以东川待公仁厚许之诏拜行军司马仁厚闻贼储械子女皆在屯乃以锐兵濒江伐木顓

水碍舟道负岸而阵使游军逼贼久不战则夜以千卒
持短刀强弩直薄营火而噪之秀升率舟兵救火仁厚遣人没水凿舟皆沈众惧多溃秀
升斩溃兵欲胁止之众怒执秀升以降槛车送行在斩
于市东川节度使杨师立初隶神策军累迁检校司空同中书门下平章事闻敬瑄以仁
厚代已有望言敬瑄讽帝召师立以本官兼尚书右仆
射师立益怒移檄言敬瑄十罪杀监军田绘屯涪城遣兵攻绵州不克又檄剑州刺史姚
卓文共攻成都假卓文指挥应接使卓文不应诏削师
立官爵敬瑄即表仁厚为东川节度留后杨茂言为行军副使杨棠为诸军都虞候率兵
二万讨之师立遣大将张士安郑君雄守鹿头关仁厚
次汉州前军战德阳师立婴城阅四旬夜出兵扰北栅仁厚设两翼而伏披栅门列炬贼
不敢进伏发击走之杨茂言谓仁厚且败引兵走久乃
还明日会诸将仁厚曰副使当以死报天子斩而徇师立十战皆北仁厚约城中斩首恶
者赏君雄諄于军曰天子所讨反者耳吾等何与乃与
士安哗而进以仁厚书示师立曰请以死谢众自沈于池死君雄悉诛其家仁厚入府纵
击囚赈贫绝诏拜剑南东川节度使光启二年遂据梓
州绝敬瑄君雄时为遂州刺史亦陷汉州攻成都敬瑄使部将李顺之逆战君雄死又发
维茂州羌军击仁厚斩之于盩中皆追赠司徒

△赵犛

赵犛陈州宛邱人世为忠武军牙将犛资警健儿时好为营阵行列号令指顾羣儿
无敢乱父叔文见之曰是当大吾门稍长喜书学击剑
善射会昌中从伐潞州收天井关又从征蛮忠武军功多迁大校黄巢入长安所在盗兴
陈人诣节度府请犛为刺史表授之既视事会官属计
曰巢若不死长安必东出关陈其冲也乃培城疏塹实仓库峙藁薪为守计民有货者悉
内之缮甲兵募悍勇悉补子弟领兵巢败果东奔败将
孟楷以万人寇项犛击禽之僖宗嘉其功累迁检校司空巢闻楷死惊且怒悉军据浚水
与秦宗权合兵数十万缭长壕五周百道攻之州人大
恐犛令曰士贵建功立名节今虽众寡不敌男子当死地求生徒惧无益也且死国不愈
生为贼乎吾家食陈禄誓破贼以保陈异议者斩众听
命引锐士出战屡破贼巢益怒将必屠之乃起八仙营于州左僭象宫阙引百官曹署储
粮为持久计宗权输铠仗军须贼益张犛小大数百战
胜负相当故人心固乃间道乞师于朱全忠未几汴军至壁西北陈人思奋犛引兵急击
贼破之围凡三百日而解中和五年擢彰义军节度使
巢虽败宗权始炽略地数千里屠二十余州唯陈赖犛独完以功检校司徒加泰宁浙西
两节度皆在陈并领之龙纪初进同中书门下平章事

忠武军节度使乃治陈州流亡踵还与弟昶至友爱后将老悉以军事付之乃卒赠太尉
驩悉忠力以孤城抗贼巢卒败亡然附全忠亦赖其力
复振故委输调发助全忠常先它镇云

赵昶

赵翊

赵昶

昶字大东神采轩异内沈厚破孟楷功多巢之围昶夜撤师疲而寝如有神相之者
黎曙决战士争奋死鬪禽贼酋数人斩级千余驩领泰
宁以昶为州刺史检校尚书右仆射当时方镇言忠壮吏治皆推驩昶驩之老乃授留后
迁忠武节度使亦留陈进检校司徒劭劝农桑于人有
恩惠加同中书门下平章事于宁二年卒年五十三赠太尉

赵翊

驩子翊【按五代史作驩弟】字右节雄毅喜书善骑射巢之难激励麾下约皆
死以先冢迹贼畏见残即夜缢死士取枢以八库有巨
弩机牙坏不能张翊以意调治激矢至五百步人马皆洞贼畏不敢逼以劳检校尚书右
仆射遥领处州刺史昶师忠武翊迁行军司马昶之丧
知忠武留后全忠表为节度使陈士恶善圯翊迭璧表墉遂无患三加检校太保光化三
年同中书门下平章事进兼侍中封天水郡公按邓艾
故迹决翟王渠溉稻以利农一家三节度相继二十余年陈人宜之天复初韩建帅忠武
以翊知同州节度留后昭宗还长安诏八朝赐号迎銮
功臣以检校太傅为右金吾卫上将军从东迁岁余以疾免卒年五十五赠侍中陈人为
罢市【按新唐书此下有田頔朱延寿刘建锋马殷
马宾等传頔延寿皆杨行密部将事系行密与唐无涉应附五代吴载记殷应列五代楚
戴记而以建锋及宾附见此俱从删】

△成纳

成纳青州人少无行使酒杀人亡为浮屠后入蔡贼中为贼帅假子更姓名为郭禹
当戍江陵亡为盗保火门山后诣荆南节度使陈儒降
署裨校久之张瓌囚儒以禹凶慄欲杀之禹结千人奔入峡袭归州入之自称刺史招亡
训士得胜兵三千秦宗权故将许存奔禹禹以青州剽
卒三百畀之使讨荆南部将弁权于清江禽权取其众禹又破其将王建肇建肇奔黔州
昭宗拜禹荆南节度留后始改名纳复故姓宗权余党
常厚攻夔州纳率存夜斩营袭厚破之遂入夔州【按新唐书本文载韩楚言妻断夫首
事楚言以诮辱成纳败不能死妻李惧支解之辱自
杀其夫楚言非忠于唐李亦安得为烈且其事不可为训今删】使司马刘昌美守夔率

存沂江略云安按兵渝州尽下濒江州县时王建肇据黔州帝以建肇为武泰军节度使洎遣将赵武率存攻之建肇走洎乃以武为留后存为万州刺史存不得志洎遣客伺之方蹴球洎曰存必叛自试其力矣遣将袭之存夜率左右超堞走与王建肇皆降于王建洎颇知吏治尝录囚尽其情垫江贼阴杀令其主簿疑小吏导之讯不承临刑曰我且讼地下踰月吏暴死洎闻益详于狱始治州民版无几未再期自占者万余时镇国节度使韩建亦以治显号北韩南郭洎累进检校太尉中书令上谷郡王云安榷盐本隶盐铁洎擅取之故能畜兵五万初任贺隐隐贤者也故洎所举少过晚得妻父任之譖害诸子洎皆手杀之至绝嗣澧朗本隶荆南为雷满所据别为节度洎数请之宰相徐彦若不许及彦若罢道江陵洎出怨言彦若曰公专一面自视桓文一贼不能取而怨朝廷乎洎大惭晚喜饵术士药濒死而苏天复三年帝诏淮南节度使杨行密围鄂州朱全忠使韩勅救之讽洎与马殷雷彦威犄角洎自将而行下知洎不足亢行密无敢谏惟亲吏杨师厚劝之洎为巨舰堂皇悉备至公安卜不吉欲还师厚曰公举全军中道还何以见百姓洎乃行彦威潜师略江陵洎诸将念私无鬪志淮南将李神福壁沙桥望洎军曰战舰虽盛首尾断绝可取也击洎君山败之火其船众大溃洎投江死天佑中全忠表洎死国事请与杜洪皆立庙云

△杜洪

杜洪鄂州人为里伴儿干符末黄巢乱江南永兴民皆亡为盗刺史崔绍募民强雄者为土团军贼不敢侵于是人人知兵杭州刺史路审中为董昌所拒走客黄州中和末闻绍卒募士三千入鄂州以守洪为州将有功亦逐岳州刺史居之光启二年安陆贼周通率兵攻审中审中亡去洪乘虚入鄂自为节度留后僖宗即拜本军节度使是时永兴民吴讨据黄州骆殷据永兴二人皆隶土团者也军剽甚洪虽得节制而附朱全忠绝东南贡路干盍初自将击讨乞师淮南杨行密遣朱延寿助之洪引还延寿拔黄州俘讨献京师骆殷弃永兴走行密取其地洪得骆殷倚为心腹间取永兴守之全忠方围凤翔昭宗遣使者东出道武昌洪皆杀之行密使李神福刘存率舟师万人讨洪骆殷弃永兴走县民方诏守以待命神福已得诏大喜以永兴壮县馈餼所仰既得鄂半矣遂进围鄂州洪婴城请救于汴全忠率兵五万营霍邱行密御之汴兵不利引还使别将吴章以三千兵解围神福迎破之时全忠方与河东军薄战不能救洪乃求助于马殷殷不答洪计穷复走全忠全忠遣曹延祚合吴章兵万三千救洪淮南将刘存浚坎傅城殷为洪谋曰淮兵深入仰永兴以济若奇兵

取之可不战而溃洪以精兵合汴人间道掩永兴三十里而舍存以方诏苗璘当之汴亡卒走淮壁言军虚实曰郢军懦可取开道军不可当也璘曰杀强则弱者挠矣乃自击开道军败之禽汴士三百人徇城下洪军气沮存使辩士临说洪恃汴方强无降意或劝存急击援兵则城自下存曰击之贼入则城固矣若纵其遁城可取也俄而汴军走是日城陷执洪及曹延祚皆斩扬州市

△锤传

锤传洪州高安人业负贩或劝为盗必大显时王仙芝猖狂江南大乱众推传为长乃鸩夷獠依山为壁至万人自称高安镇抚使仙芝遣柳彦璋略抚州不能守传入据之言诸朝诏即拜刺史中和二年逐江西观察使高茂卿遂有洪州抚民危全讽闻传之去窃州以叛使弟存昌据信州僖宗擢传江西团练使俄拜镇南节度使检校太保中书令爵颍川郡王又徙南平传率兵围抚州天火其城内讙惊诸将请急攻之传曰乘人之险不可乃祝曰全讽罪无害民者火即止全讽闻谢罪听命以女女传子匡时传以匡时为袁州刺史击马殷又以彭玕为吉州刺史玕健将也传倚以为重广明后州县不乡贡惟传岁荐士行乡饮酒礼率官属临观资以装赆故士不远千里走传府传少射猎醉遇虎与鬪虎搏其肩而传亦持虎不置会人斩虎然后免既贵悔之戒诸子曰士处世尚智谋勿效吾暴虎也乃画搏虎状以示子孙凡出军攻战必祷佛祠积饵饼为犀象高数寻晚节重敛商人至弃其货去天佑三年卒匡时自立为节度观察留后次子匡范为江州刺史怨兄立挈州附淮南因言兄结汴人图扬州杨渥使秦裴攻匡时围洪州匡时城守凡三月城陷执匡时归扬州渥切责匡时顿首请死渥哀赦之彭玕既失援厚结马殷且观虚实使者还曰殷将校辑睦未可图也遂归款玕通左氏春秋尝募求西京石经厚赐以金扬州人至相语曰十金易一笔百金偿一篇况得士乎故士人多往依之始危全讽闻匡时立喜曰听锤郎为节度三年我自取之及渥兵盛不敢救潜谋攻渥会淮南亡将王茂章过州请曰闻公欲大举愿见诸将军才否全讽搜众十万邀茂章观之对曰扬州有士三等公众正当其下盍更益之全讽不能答复为杨氏所并

△刘汉宏

刘汉宏本兖州小史从大将击王仙芝劫辘重叛去干符末焚略江陵无完家于是都统王铎遣将崔锴降之表为宿州刺史汉宏恨赏薄有望言会浙东观察使柳瑫得罪乃以汉宏代之僖宗在蜀贡输踵驿而西帝悦宠其军为义胜军即授节度使汉宏既有七州志侈大辄曰天

下方乱卯金刀非吾尚谁哉鸦噪诸廷命斫树或曰巨木不可伐怒曰吾能斩白蛇何畏一木中和二年遣弟汉宥率诸将攻杭州壁西陵为董昌所败复遣兵七万濒江而屯昌使钱镠宵济袭破之明年汉宏屯黄岭发洞獠同攻昌镠出富阳击诸营多溃去汉宏大沮悉军十万列舰西陵谋袭昌祷于江有一矢坠前恶之俄与镠遇镠俘馘五千汉宏羸服走或执之给而免明日复战镠斩其弟汉容将辛约时锺季文守明州卢约处州蒋瓌婺州杜雄台州朱褒温州褒兵最强故汉宏使褒治大舰习战以史惠施坚实韩公汶将其军帝闻杭越拏战遣中人焦居璠持节诏通好皆不奉诏光启二年镠率诸将攻越自趋导山破公汶于曹娥埭与褒战烧其舰进屯丰山坚实诣镠降汉宏率麾下六百人走台州镠斩其母妻于屯杜雄飡其军皆醉执汉宏以见董昌汉宏曰自古岂有不亡国邪昌使斩于市叱刑者曰吾节度使非庸人可杀我尝梦持金杀我者必钱镠也昌命镠斩之

△张雄

张雄泗州连水人与里人冯宏铎皆为武宁军偏将宏铎为吏辱雄为辩数并见疑于节度使时溥二人惧祸乃合兵三百度江壁白下取苏州据之稍稍啸会战舰千余兵五万乃自号天成军镇海节度使周宝之败奔常州闻高骈将徐约兵锐甚诱之使击雄与之苏州雄匿众海中使别将赵晖据上元资以舟械宝兵散多降晖众数万雄即以上元为西州负其才欲治台城为府旌旗衣服僭王者杨行密围扬州毕师铎厚赍宝币啖雄连和雄率军浮海屯东塘是时扬州围久皮囊革带食无余军中杀人代粮纔千钱闻雄至间道走军以银二斤易斗米逮糠粃以差为直雄军富过所欲即不战去晖数剽江道雄击杀之坑其众自屯上元大顺初以上元为升州诏授雄刺史未几卒雄善驭众人思之为立庙宏铎代为刺史宏铎善骑射侃侃若儒者行密已得淮南宏铎纳好然倚兵舰完利谋取润州遣客尚公乃进说行密行密不从客曰公不见听未知胜几楼船时行密大将田頔在宣州阴图宏铎募工治舰工曰上元为舟市木远方坚致可胜数十岁頔曰我为舟一用之耳不计其久取木于境可也宏铎介宣扬间不自安州数有怪天复二年大风发屋巨木飞舞州人骇曰州且易主大将冯晖等劝宏铎悉军南向声言讨锺传实袭頔行密知之遣客说止不听頔逆击于曷山宏铎大败收残士欲入海行密惧复振遣人迎犒东塘好谓曰兵有胜负今众尚强乃自弃于海奈何吾府虽隘尚可以居若欲扬州我且让公宏铎举军尽哭行密拏飞舳不持兵入其军执宏铎手慰勉遂以归表为淮南节度副使

见尚公乃曰颇忆为冯公求润州否何多尚邪谢曰臣为君恨其未遂行密笑曰吾得君尚何忧

徐约

徐约

徐约者曹州人已得苏州诏授刺史钱镠遣弟鉞攻之约驱民墨纛其彰曰愿战南都从事或曰都者国称杭终有国乎约后寢寤与其下哭而别入海死镠使沈粲守苏州约众降润州阮结不能定镠以成及讨之尽歼其众

【按新唐书此下有王潮王审邽刘知谦卢光稠传

潮应列五代闽载记审邽应附见知谦应列南汉载记光稠应附见此俱从删】

钦定续通志卷二百七十五

●钦定续通志卷二百七十六 列传七十六

列传

唐 【七十六】

○唐七十六 藩镇魏博

（臣）等谨按藩镇关唐室盛衰新书特为别传深合史法郑志于列史别传标目相沿者如忠义循吏之类俱从汇编其一代特见他史所无者如后汉书党锢则仍编入列传中存其名次藩镇一传独采李唐今依新书原编以符郑例又郑志不录旧史论赞而独存党锢传论著为范氏之说盖党锢缘起事实具见论中不容删没也宋祁作藩镇传论推原唐失河北之由仿司马迁始皇纪赞引贾谊过秦论之法有取于杜牧罪言而全采其守论于一时得失叛服之故形势了然足为史家杰作故依党锢传论例标宋氏曰全录卷端

宋氏曰安史乱天下至肃宗大难略平君臣皆幸安故瓜分河北地付授叛将护养孽萌以成祸根乱人乘之遂擅署吏以赋税自私不朝献于廷效战国肱髀相依以土地传子孙胁百姓加锯其颈利怵逆污遂使其人自视由羌狄然一寇死一贼生讫唐亡百余年卒不为王土当其盛时蔡附齐连内裂河南地为合从以抗天子杜牧至以山东王不得不王霸不得不霸贼得之故天下不安 【按此三语乃牧罪言之文厥今以下则守论全文也】 又曰厥今天下何如哉干戈朽鉄钺钝含忍混贷照育逆孽殆为故常而执事大人曾不历算周思以为宿谋方且嵬岸抑扬自以为广大繁昌莫已若也呜呼其不知乎其俟蹇顿颠倾而后为之支计乎且天下几里列郡几所自河以北蟠城数百角奔为寇伺吾人顛頼天时不利则将与其朋伍骸乱吾民于掌股之上今者及吾之壮不图禽取乃偷处恬逸以为后世子孙背肋疽根此复何也议者

曰倔强之徒吾以良将劲兵为衔策高位美爵充饱其肠安而不挠外而不抱犹豢虎狼而不拂其心则忿气不萌此大历贞元所以守邦也何必疾战焚煎吾民然后为快也愚曰大历贞元之间有城数十千百卒夫则朝廷贷以法故于是阔视大言自树一家破制削法角为尊奢天子不问有司不呵王侯通爵越录受之【按录新唐书作禄今依本集改】 覲聘不来几杖挾之逆息虜胤皇子嫔之地益广兵益强僭拟益甚侈心益昌土田名器分划大尽而贼夫贪心未及畔岸淫名越号走兵四略以饱其志赵魏齐燕同日而起梁蔡吴蜀蹶而和之其余混馔轩器欲相效者往往而是运遭孝武前英后杰夕思朝议故能大者诛鉏小者惠来大抵生人油然多欲欲而不得则怒怒则争乱随之是以教笞于家刑罚于国征伐于天下裁其欲而塞其争也大历贞元之间反此提区区之有而塞无涯之争是以首尾指支几不能相运掉也凡今者不知非此而反用以为经将见为盗者非止于河北而已呜呼大历贞元守邦之术永戒之哉魏博传五世至田宏正入朝十年复乱更四姓传十世有州七成德更二姓传五世至王承元入朝明年王廷湊反传六世有州四卢龙更三姓传五世至刘总入朝六月朱克融反传十二世有州九淄青传五世而灭有州十二沧景传三世至程元入朝十六年而李全略有之至其子同捷而灭有州四宣武传四世而灭有州四彰义传三世而灭有州三泽潞传三世而灭有州五虽然迹其由来事有因藉地之轻重视人谋臧否欤今取擅兴若世嗣者为藩镇传若田宏正张孝忠等暴忠纳诚以屏王室自如别传云

田承【嗣悦 绪季安】 史宪诚 何进滔【乐彦祯】 罗宏信

田承嗣

史宪诚

何进滔

罗宏信

△田承嗣

田承嗣【按原文字承嗣顾炎武曰名字相同始于晋宋之间至唐尤盛藩镇传田绪字绪刘济字济此起家军伍未有字如李载义之比史家例以为字非也且其文可省今从删后仿此】 平州卢龙人世事卢龙军隶安禄山麾下累功至武卫将军禄山反与张忠志为贼前驱陷河洛尝大雪禄山按行诸屯至其营若无人已而擐甲列卒阅所籍不缺一禄山异其能使守颍川郭子仪平东都承嗣以郡降俄而复叛安庆绪奔邳承嗣自颍川来与蔡希德武令珣合兵六万庆绪复振抗王师岁余史思明乱

承嗣又为贼导及朝义败与共保莫州仆固瑒追北承嗣急乃诈朝义使自求救幽州因执贼妻息降于瑒厚以金帛间瑒将士而诈疾不出瑒欲驰入取之承嗣列千刀为备瑒不得志承嗣重赂之以免乃与张忠志李怀仙薛嵩皆诣仆固怀恩谢愿各行间时朝廷厌随机数大赦怀恩功高觐留贼自重因建白承嗣等分帅河北赐铁券誓不死拜承嗣莫州刺史三迁贝博沧瀛等州节度使检校太尉承嗣沈猜阴贼不习礼义既得志即计口重敛厉兵缮甲使老弱耕壮者在军不数年有众十万又择翘秀强力者万人号牙兵自署官吏图版税入皆私之又求兼宰相代宗多所含宥因就加同中书门下平章事封鴈门郡王宠其军曰天雄以魏州为大都督府即授长史诏子华尚永乐公主冀结其心愈不逊大历八年相卫薛嵩死弟■〈山上罅下〉求假节牙将裴志清逐■〈山上罅下〉■〈山上罅下〉以众归承嗣帝自用李承昭为相州刺史未至承嗣誅相人反阳言救实袭取之帝遣谕罢兵不奉诏遣将卢子期取洺州杨光朝取卫州胁刺史薛雄乱不从屠其家悉四州兵财以归擅置守宰逼使者行磁相遣刘浑从之阴使从子悦讽诸将诣使者撻面请承嗣为帅诏贬承嗣永州刺史许一子从悦及诸子皆逐恶地命河东节度使薛兼训成德李宝臣幽州朱滔昭义李承昭淄青李正己淮西李忠臣永平李勉汴宋田神玉等兵六万犄角进若承嗣不承命讨以军法其下霍荣国以磁降李正己拔德州李忠臣攻卫筑偃月壁河上承嗣列将携阻杀数十人乃定帝又遣御史大夫李涵督诸节度并力承嗣遣裴志清等攻冀州志清以兵附成德承嗣悉众围之为宝臣所逐火辎重归于贝计益穷奏表请委身阙下又使悦与卢子期将万人攻磁州屯东山宣慰使韩朝彩等固守兼训以万骑屯西山成德幽州各遣兵救承昭以神策射生继进入河东迭诸军进讨数有功颇顾赏天子使中人劳賚供帐高会诸军少懈而正己宝臣二军会枣强更相见正己军辄引去忠臣乃弃月迭济河屯阳武承昭使成德幽州兵循东山袭子期军自闭壁以骄贼子期分步骑万人环承昭壁以兵四千乘高望麾而进河东将刘文英辛忠臣等决战而成德幽州兵绕出子期后于是围解更阵高原诸将与承昭夹攻大战临水贼败斩九千级执子期及将士二千三百乘胜进距磁十里承昭举燧朝彩出锐兵鼓噪薄魏营斩首五百悦惊率余兵夜走尽弃旗幕铠仗五千乘成德将王武俊以子期归宝臣宝臣方攻洺州因以示城下降之复徇降瀛州献子期京师斩之天子遣中人劳宝臣不为礼宝臣乃贰反攻朱滔与承嗣和承嗣与之沧州正己又请许承嗣入朝十一年遣谏议大夫杜亚持节受降许闔门

还京师赦魏博所管与更始承嗣逗遛不至其秋复略滑州败李勉兵会李灵耀以汴叛诏忠臣勉河阳马燧合讨灵耀求救于承嗣使悦将兵三万赴之败勉将杜如江正己将伊伯良死者殆半乘胜屯汴北郭与灵耀合燧忠臣逆击破之悦遁灵耀东走欲归承嗣为如江所擒并魏将常准献京师明年承嗣上书请罪诏复官爵子弟皆仍故官再赐铁券承嗣盗有贝博魏卫相磁洛七州而未尝北面天子凡再兴师会国威中夺穷而复纵故承嗣得肆奸无忌十四年死年七十五

赠太保
田悦
田绪
田季安
田悦

悦蚤孤母更嫁平卢戍卒随转侧淄青间承嗣访获之年十三委以号令裁处皆意合及长剽悍善鬪冠军中贼忍狙诈外饬行义轻财重施以钓誉人皆附之承嗣爱其才将死顾诸子弱乃命悦知节度事而诸子佐之诏悦自中军兵马使府左司马擢留后俄检校工部尚书为节度使悦外示恭顺阴济其奸帝晚年尤宽弛悦所奏请无不从德宗立不假借方镇稍惕息会黜陟使洪经纶至河北闻悦养士七万辄下符罢其四万归田亩悦即奉命因大集将士以好言激之曰而等籍军中久仰缱廩养父母妻子今罢去何恃而生众大哭悦乃出家赀给之令还部自此魏人德悦及刘晏死藩帅益惧会汴州城隘李勉增广之传言帝且东封【按原文作东封泰山通鉴无泰山二字胡三省注云盖用左传东封西封语非封泰山之谓城汴与封禅无涉盖讹言谓将东讨藩镇故城汴以通之曹汴接坏故正己惧李勉非跋扈者原文叙次事理未晰今从通鉴改正】而李正己惧率兵万人屯曹州遣人说悦同叛悦因与梁崇义等阻兵连和以王侑扈■〈山上鄂下〉许士则为腹心邢曹俊孟希佑李长春符璘康恂为爪牙建中二年镇州李惟岳淄青李纳求袭节度不许悦为请不答遂合谋叛令狐峘等表汰浮图悦乃诈其军曰有诏阅军之老疾疲弱者由是举军咨怨悦与纳会濮阳纳分兵佐悦会幽州朱滔等奉诏讨惟岳悦乃遣孟希佑以兵五千助惟岳别遣康恂以兵八千攻邢州刺史李洪守不下【按旧唐书并载李洪张仵守邢新书不及洪今据补】杨朝光以兵五千壁卢矐绝昭义饷道悦自将兵数万继进又使朝光攻临洛将张仵固守食且尽乃饰爱女示众曰库廩竭矣愿以此女代赏士感泣请死战大破悦军诏河东马燧

河阳李芑与昭义军救亓三节度次狗明二山间未进亓急以纸为风鸢高百余丈过悦营上悦使善射者射之不能及燧营噪迎之得书言三日不解临洺士且为悦食燧乃自壶关鼓而东破卢曠战双冈禽贼大将卢子昌而杀朝光悦遁保洹水于是曹俊为贝州刺史乃承嗣旧将果而谋悦召问计对曰兵法十则攻今公以逆千顺势不敌也宜留兵万人屯■〈山郭〉口以遏西师则举河北二十四州惟公所命今攻临洺粮竭卒老不见其可悦所服虜■〈山上骂下〉孟希佑等皆訾短之悦不听其言燧等距悦军三十里筑垒相望悦与纳合兵三万阵洹水燧引神策将李晟夹攻悦悦大败引壮骑数十夜奔魏李长春拒关以须官军而三帅顿不进明日悦得入杀长春持佩刀立军门流涕曰悦藉伯父余业与君等同休戚今败亡及此不敢图全然悦久稽天诛者特以淄青恒冀子弟不得承袭既弗能报乃至用兵使士民涂炭悦正缘老母不能自颈愿公等斩我首取富贵无庸俱死乃自投于地众抱持之曰今士马尚可一战脱不济死生以之悦收泪曰诸公不以悦丧败誓同存亡纵身先地下敢忘厚意乃断发为誓将士亦断发约为兄弟率富民家财及府库所有大行赐与李再春及其子瑶以博州悦从兄昂以洺州皆降燧悦族其家悦自视兵耗惧不知所出复召曹俊谋为整军完垒以振士气羣心复坚后十余日燧等始进薄城未几王武俊杀惟岳而深州降朱滔滔分兵守之天子授武俊恒州刺史以康日知为深赵二州观察使武俊恨赏薄滔怨不得深州悦知二将可间乃间道使王侑许士则说滔曰司徒奉诏讨贼不十日拔束鹿下深州惟岳势蹙故王大夫能得逆首诏得惟岳地者隶之今乃以深州与康日知是朝廷不信于公也且上将扫除河朔不使父子相袭又功臣刘晏等皆旋踵破灭杀梁崇义诛其口三百余血丹汉江今日破魏明日取燕赵如牵辕下马耳魏博全则燕赵安鄙州尚书必以死报德且合从连衡救灾恤患不朽之业也尚书愿上贝州以广汤休使侑等奉簿最孔目司徒朝至魏则夕入贝惟熟计之滔素欲得贝即大喜使侑先还告师期先是诏武俊出恒冀粟三十万赐滔使还幽州以突骑五百助燧军武俊惧悦破将起师北伐不肯归粟马滔因使王郢说武俊曰天子以君善战天下无前故分粟马以弱君军今若举魏博则王师北向漳滏势危诚能连营南旆解田悦于倒县大夫之利也岂特粟不出窖马不离厩又有排危之义声大夫亲断逆首血蔑衣袖日知不出赵城何功于国而坐兼二州河北士以不得深州为大夫耻司徒不欲以深州与康日知愿以与大夫 【按原文无此二句下文得深句无根今从通鉴补】 武俊既得深亦喜即日

使使报滔于是滔率兵二万屯盩厔晋武俊以兵万五千会之悦恃救至使康愔督兵与王师战御河上大败还走悦怒闭不纳滔籍死塹中者甚众其夏滔武俊军至悦具牛酒迎犒燧等营魏河西武俊滔悦壁河东相持自秋迄冬燧遣晟以兵三千自邢赵与张孝忠合攻涿莫二州以绝幽蓟路悦重德滔欲推为盟主而臣之滔不敢当乃更议如七国故事悦国号魏僭称王以府为大名府署子为府留后以扈■〈山上罅下〉为留守许士则司武曾穆司文裴抗司礼封演司刑并为侍郎刘士素内史舍人张瑜孙光佐给事中邢曹俊孟希佑左右仆射田晁高编征西节度使蔡济薛有伦虎牙将军高崇节知军前兵马夏侯赫兵马使晁以兵数千助李纳守郛明年夏滔屯河间留大将马实以兵万人戍魏会朱泚乱燧还太原武俊等皆罢悦饒之厚遗武俊实官属皆有赠兴元元年滔自将兵欲南度河助泚使王郢见悦计事曰顷大王在重围孤与赵刻日赴难以全魏贝今秦帝已据关中孤以步骑十万与回纥趋东都相应王能从孤济河合势以取大梁孤得西收巩陕与秦兵会天下可定也则王与赵王永无南虑为唇齿之国幸速计之悦闻已赦罪复官爵心不欲行重遽绝滔阳遣薛有伦报如约滔大喜复使舍人李管申固所言悦犹豫许士则谏曰冀王杀怀仙屠希彩誅兄使如京师而夺之权有恩者诛同谋者覆彼心腹渠可量哉全大王亲不加泚勇不加怀仙希彩也而念恩不已拘挛匹夫义出且禽大王不如伪许出迎遣州县具牛酒至则以事自解不可顾恩取祸也悦然之先是武俊阴约悦背滔及闻滔要悦西使田秀驰说悦曰方泚未盗京师时滔为列国且自高如得东都与泚连兵多势张反制于豎子乎今朝廷复官赦罪乃王臣岂舍天子而北面滔泚耶愿大王闭垒不出武俊须昭义军出为王讨之悦具道其谋而遣会穆报滔滔喜自河间南踰贝州次清河使报悦不至进屯永济使王郢等督之悦曰始约从王今举军持悦曰魏比困侵掠供餼屈竭以悦日拊循犹恐携间一日去城邑朝出夕变且何归不然不敢背约今遣孟希佑悉兵五千助王因使其属裴抗卢南史报命滔怒骂曰逆虏前日求救许我贝州我不取尊我为天子我与同为王教我远来而不出是贼不击尚何诛乃囚抗等使马实取数县已而释抗还之悦兵不敢出遂围贝州滔取武城通德棣供兵馈尽囚诸县官吏唯清阳不下滔围之实拔清平俘掠去于是李抱真武俊约出兵救魏会诏拜悦检校尚书右仆射封济阳郡王给事中孔巢父持节宣劳悦阻兵凡四年狂悖少谋亟战数北死者什八士苦之巢父至莫不欣然悦与巢父张饮门阶皆彻卫至夜分从弟绪与族人谋与左右踰垣入悦方醉寝酣

挺刃升堂二弟谏止绪斩之因手刺悦并杀其母妻悦死年三十四比明以悦命召许士则蔡济计事至则杀之刘忠信者悦常使防督绪直寝门绪呼曰忠信刺仆射与扈■〈山上罅下〉反众执之语曰无之支已殊绝

田绪

绪承嗣第六子悦待诸弟无间使绪主牙军凶险多过常笞勸之悦俭嗇有节绪常苦不足颇怨望故作难悦既死惧众不附以其徒数百将出奔邢曹俊率众追还绪乃下令军中曰我先王子能立我者赏众乃共推绪为留后归罪扈■〈山上罅下〉斩以徇复杀悦亲信薛有伦等数十人因巢父遣使听命天子滔闻悦死以兵五千合实军进攻魏州实瀕王莽河壁使人入魏招绪降绪新篡实围且急乃遣使以好言见滔滔许盟曾穆劝绪绝滔而绪部分亦定乃乘城战武俊抱真各修好如悦时诏即拜绪节度使实围魏凡三月滔败走贞元元年以嘉诚公主降绪拜驸马都尉绪猜忌杀兄弟姊妹凡数人兄朝仕李纳为齐州刺史或言纳将入之魏以代绪绪厚赂纳且召朝朝以死请不行乃送之京师过滑绪将篡取之贾耽以兵援免累迁检校尚书左仆射常山郡王又徙王鴈门实封五百户加同中书门下平章事暴疾死年三十三赠司空少子季安嗣

田季安

季安字夔母微贱公主命为己子数岁为左卫胄曹参军节度副使绪死时年十五军中推为留后因授节度使除丧加检校尚书右仆射进位检校司空俄同中书门下平章事季安畏主严颇循礼法及主薨始自恣官属进谏皆不纳会诏中尉吐突承璀以神策兵讨王承宗季安谋曰王师不跨河二十五年今越魏伐赵赵虜魏亦虜矣奈何或请以五千骑决除君忧季安曰善沮军者斩绛人谭忠者祖瑶天宝末为内黄令死燕寇忠豪健喜兵为幽州刘济将【按谭忠事幽镇而乃心唐室杜牧为作燕将录新书采入此传及刘济传今补录里系以示褒】适使魏闻之入见季安曰往年王师取蜀取吴算不失一是宰相谋也今伐赵不使耆臣宿将而付中臣不起天下甲而出秦甲君知谁为之谋此上自为谋以夸服臣下若师未叩赵而先碎于魏是上之谋不及下岂能不耻既耻且怒必任智画仗猛将再举涉河鉴前之败必不越魏诛赵校罪轻重必不先赵后魏是上不上下不下当魏而来也季安曰计安出忠曰王师入魏君厚犒之悉甲伐赵而阴遗赵书曰魏若伐赵为卖友魏若与赵为反君卖友反君魏不忍受执事能弛陴鄣遗一城魏得持之献捷天子此使魏北得以奉赵西得以为臣赵不拒君则魏安矣季安

然之遣大将率兵会王师伐承宗粮饷自办取堂阳以报加太子太保有邱绛者父时宾佐与同府侯臧争权季安怒斥为下县尉俄召还先坎道左既至生瘞之忍酷无忌惮大抵如此死年三十二赠太尉妻元谊女召诸将立其子怀谏最幼不能事决于私奴蒋士则数易置诸将军中怒取田兴为留后兴以怀谏归第而杀士则等十余人季安既葬乃送怀谏京师授右监门卫将军绪弟缙字云长贞元十年入朝授左骁卫将军封扶风郡公元和中拜夏绥银节度使始开元时置宥州扼寇路久而废缙复城之王师伐蔡缙上橐驼牛马助军吐蕃寇丰州缙设伏邀其归俘斩过当入为左卫大将军李昕代之昕劾缙盗没军粮四万斛强取羌人羊马故吐蕃得乘隙贬卫王傅俄而吐蕃又攻盐州贬房州司马长庆初终左领军卫将军弟华太常少卿尚永乐新都二公主田氏自承嗣至怀谏四世凡四十九年

△史宪诚

史宪诚其先奚也内徙灵武为建康人三世署魏博将宪诚始以趨敢从父军田宏正讨李师道将先锋兵四千济河拔城栅师踵进乘胜傅郟堞师道传首以功兼御史中丞长庆二年田布之自杀也军乱宪诚为中军兵马使颇言河朔旧事以摇众众乃逼还府擅总军务穆宗以朱克融王廷凑方盗幽镇未有以制即以节度使授之宪诚外託王命而阴结幽镇以自固时李■〈宀介〉方乱私与交通数助请旄节城马头具舟黎阳示将济师者会天子遣司门郎中韦文恪宣慰宪诚见使者礼倨言慢俄闻斩■〈宀介〉更恭谨谓文恪曰我本奚如狗也唯知识主虽日加槌不忍离其譎狻类此进检校司空与李全略婚太和中其子同捷反潜以粮资之文宗申约使者相望因进同中书门下平章事宪诚使大将侦事京师作谩言自大宰相韦处厚折其诈遣去宪诚惧出兵从王师讨之复遣大将丕志沼率师二万攻德州时王廷凑援同捷阴诱志沼以利志沼反屯永济兵锐甚宪诚告急诏义武李昕进讨于是志沼与廷凑合兵劫贝州为昕所败奔廷凑沧景平宪诚不自安请纳地进检校司徒兼侍中徙河中封千乘郡公以李昕代初宪诚将以族行惧魏军之留问策于弟宪忠宪忠教分相卫请置帅因以弱魏复请诏昕引军声图志沼而假道清河帝从之宪诚因欲倚昕公去魏及昕次清河魏人惊宪忠曰彼假道取贼吾军无负朝廷何惧为乃稍安然魏素聚兵清河昕至悉出其甲将入魏魏军闻之惧明日进甲而出昕按军馆陶不进众谓宪诚卖己曰给我以沽恩耶夜攻杀之并监军史良佐推何进滔为帅以请诏赠宪诚太尉实太和三年宪诚起凡七年死

△何进滔

何进滔灵武人世为本军校少客魏事田宏正从讨王承宗李师道以功兼侍御史
宪诚死军中传諄曰得何公事之军安矣进滔令曰公
等既迫我当听吾令众唯唯乃斩杀前使及监军者素服临哭将吏皆入吊诏拜留后俄
授节度使居魏十余年民安之累进检校司徒同中书
门下平章事开成五年死赠太傅谥曰定子重顺袭武宗诏河阳李执方沧州刘纳谕朝
京师或割地自效不听命时帝新即位重起兵乃授福
王绾节度大使以重顺副赐名宏敬帝讨刘稹加东面招讨使宏敬倚稹相唇齿无深入
意诏称其事母孝在军久宜亟战亦自如及王宰踰干
河攻泽州命宏敬犄角塞山东道不奉诏王元逵克邢州攻上党宏敬不得已乃出师未
几宰统陈许兵假道收磁州宏敬惧乃进战拔平恩诏
检校尚书左仆射泽潞平加同中书门下平章事懿宗初兼中书令封楚国公咸通七年
死赠太师子全皞袭明年拜节度使平庞勋以功迁检
校司空同中书门下平章事母丧请纳节行丧诏不许全皞年少好杀小罪鲜纵贯人人
危惧后军中相传腴减粮帛众遂叛推韩君雄总军事
而杀全皞实咸通十一年诏赠太保自进滔至全皞凡三世四十二年懿宗更以普王为
大使擢君雄留后君雄魏州人俄进副大使三迁检校
司空僖宗即位进同中书门下平章事赐名允中死年六十一赠太尉子简袭留后俄授
节度使累进检校太尉同中书门下平章事封魏郡王
帝在蜀天下乱简恃强完欲拓地攻河阳及郢语在诸葛爽朱宣传 【按原文多与爽宣
两传复今从史家互见例】 简败于新乡乐彦禎以
一军先还简奔归疽发背死彦禎代之再世凡十二年

乐彦禎

乐彦禎

彦禎者亦魏人简时历博州刺史下河阳有功迁澶州魏人立之诏检校工部尚书
领留后进节度使累加检校尚书左仆射同中书门下
平章事彦禎喜儒术引公乘亿李山甫皆在幕府嗣襄王熿之乱彦禎使山甫往见镇州
王镒欲合幽邢沧诸镇同盟拒贼镒厚谢卒不克彦禎
见王室微颇骄大城魏周八十里一月毕人怨其残子从训凶悖劫王铎取其家魏人不
直又聚亡命五百人号子将出入卧内军中藉藉恶之
从训惧奔近县彦禎即以为六州指挥使相州刺史鞏兵械泉布迹接于道军中益贰彦
禎常梦解佩带履而行既寤曰神告我下将有背乎已
而军乱囚彦禎迫为桑门寻杀之推大将赵文■〈王弁〉总留后从训求救于朱全忠
全忠为起师次内黄从训自相以军三万传城文■〈

王弁)不敢出众惧杀之更推罗宏信出战从训败袁余众壁洹水宏信遣将程公佐击斩之实文德元年彦祜起凡七年

△罗宏信

罗宏信字德孚魏州贵乡人善骑射貌雄伟为裨将主马牧魏有巫告宏信曰白头老人使谢君君当有是地宏信曰神欲危我耶文■〈王弁)死众曰孰愿主吾军者宏信辄曰神命我矣众环视以为宜遂立之诏知留后再迁节度使加检校司空同中书门下平章事豫章郡公朱全忠讨黄巢餉粟三万斛马二百秦宗权乱复诏宏信以粟二万斛助军检校工部尚书雷邨来责粟宏信素胁于牙军擅杀邨全忠以檄谯让宏信不敢报大顺初全忠攻太原来假粮马又议屯邢洛假道相卫宏信不纳全忠使丁会庞师古葛从周霍存等引万骑渡河宏信壁内黄凡五战皆败乃厚币求和全忠方图河北欲结纳宏信乃还兵全忠攻兖郛朱宣求援于克用遣李存信救之屯莘其下侵魏刍牧宏信不平克用欲合镇定兵营河曲搯魏滑路宏信驰告全忠请禁游舸绝往来久之魏人不至全忠疑其给自将至滑宏信来告曰魏人未动者正欲缓图之全忠遂屯曹太原将李瑋救宣复壁莘宏信厌其暴而瑋沟垒自固全忠遣使谓曰晋人志并河朔师还为公忧之宏信乃攻破瑋克用怒以兵掠魏博全忠以葛从周助宏信大破之禽其子落落宏信杀之克用侵魏不已大战白龙潭宏信败追薄魏门而还宏信乃乞师全忠全忠遣将壁洹水救魏克用游兵剽相魏民死十九宏信告亟全忠复遣葛从周将兵追蹶拔洛州执刺史邢行恭复攻邢马师素自拔走遂围磁州袁奉韬自杀不五日取三州自是克用兵不出始全忠亟讨兖郛惧宏信贰故岁时赂遗良厚宏信每有馈答全忠引其使北面拜受兄事之宏信以为厚己故推心焉累进检校太师守侍中徙临清郡王光化元年死年六十三赠太师追封北平王谥曰庄肃子绍威事具五代史 【按新唐书有绍威传考绍威入梁事甚繁伙应从其所终之代此从删】

钦定续通志卷二百七十六

●钦定续通志卷二百七十七

列传

唐 【七十七】

○唐七十七 藩镇镇冀

李宝臣【惟岳 惟诚 惟简】 王武俊【士真 承宗】 王廷凑【元逵 绍鼎 绍懿 景崇】

李宝臣

王武俊

王廷凑

△李宝臣

李宝臣字为辅本范阳内属奚也善骑射范阳将张锁高畜为假子冒其姓名忠志为卢龙府果毅常覘虏阴山追骑及射六人尽殪从安禄山入朝留为射生子弟出入禁中禄山反遁归更为禄山假子使将骁骑十八人【按旧书作八千人兵数多寡悬殊考通鉴禄山遣何千年高邈将奚骑二十人劫杨光翽盖实十八人与千年邈为二十人也且劫质出人不觉无庸多兵新书为当】劫太原尹杨光翽挟以出追兵万余不敢逼又督精甲军土门以扼井陘事安庆绪为恒州刺史九节度师围相州忠志惧归命肃宗即授故官封密云郡公史思明渡河忠志复叛勒兵三万固守贼将辛万宝屯恒州相犄角思明死忠志不肯事朝义使裨将王武俊杀万宝挈恒赵深定易五州以献雍王东讨开土门纳王师助攻莫州朝义平擢礼部尚书封赵国公名其军曰成德即拜节度使赐铁券姓名遂有恒定易赵深冀六州地【按旧书有后又得沧州语考沧乃田承嗣地下文宝臣与滔讨承嗣首攻沧州不应先属宝臣新书得之】马五千步卒五万财用丰衍益招来亡命雄冠山东与薛嵩田承嗣李正己梁崇义姻相为表里始宝臣与正己素为承嗣所易其弟宝正承嗣壻也往依魏与承嗣子维击球马骇触维死承嗣怒囚之以告宝臣宝臣谢教不谨进杖欲使示责承嗣遂鞭杀之由是交恶乃与正己共劾承嗣可讨状代宗欲其自相图即诏宝臣与朱滔及太原兵攻其北正己与滑亳河阳江淮兵攻其南师会枣强椎牛飨军宝臣厚赐士而正己颇觳军怨望正己惧变即引去滔宝臣攻沧州未下击宗城残之承嗣弟廷琳方守贝州遣高嵩岩将兵三千戍宗城宝臣使张孝忠攻破之斩嵩岩逸所执将四十余人会王武俊执贼大将卢子期遂降洺瀛当是时河南诸将败田悦于陈留正己取德州欲颇穷讨承嗣惧乃甘言给正己正己止屯诸军莫敢进于是天子遣中人马希倩劳宝臣宝臣归以百缣使者恚抵诸道宝臣顾左右愧甚诸将已休独武俊佩刀立庑下语之故武俊计曰赵兵有功尚尔使贼平天子幅纸召置京师一匹夫耳养魏以为资上策也宝臣曰赵魏有衅何从而可对曰势同患均转寇讎为父子歃唾闲耳朱滔屯沧州请禽送魏可取信宝臣然之先是承嗣知宝臣少长范阳心常欲得之乃勒石若讖者瘞之境教望气者云有王气宝臣掘得之文曰二帝同功势万全将田作伴入幽燕谓宝臣与正己为二帝而阴使客说曰公与滔共攻沧州即有功利归天子诚能赦承嗣

罪请奉沧州入诸赵愿取范阳以报公以骑前驱承嗣
以步卒从此万全势也宝臣喜得沧州又语与讖会遂阴交承嗣图幽州承嗣陈兵出次
以自验宝臣谬谓滔使曰吾闻朱公貌若神愿绘而观
滔即图示之宝臣置图射堂大会诸将熟视曰信神人也密选精卒二千夜驰三百里欲
劫滔戒曰取貌如射堂者时二军不相虞忽闻变滔大
骇战瓦桥败衣佗服得脱禽类滔者以归承嗣承嗣知衅成还军入堡使人谢宝臣曰河
内方有警未暇从公石讖吾戏为耳宝臣惭而还俄进
封陇西郡王又拜同中书门下平章事德宗立拜司空宝臣晚节尤猜忌自顾子惟岳暗
弱恐下不服即杀骨鲠将辛忠义卢倬许崇俊张南容
张彭老等二十余人众乃携宝臣既贮异志引妖人作讖兆为丹书灵芝朱草斋别室筑
坛置银盘金匱玉罍猥曰内产甘露神酒刻玉印告其
下曰天瑞自至众莫敢辨者妖人复言当有玉印自天下海内不战而定宝臣大悦厚贖
金帛既而畏事露且诛诈曰公饮甘露液可与天神接
密奠于液宝臣饮已即瘖三日死年六十四惟岳悉诛杀妖人时建中二年也遗表请
以惟岳领军贻书执政谏家事归节于朝诏赠太傅

李惟岳 【李惟诚 李惟简】

李惟岳 【李惟诚 李惟简】

惟岳少为行军司马恒州刺史宝臣死军中推为留后求袭父位帝不许以张孝忠
代之田悦为请不听遂与悦李正己谋拒命府小史胡
震私人王他奴等专画反计府属邵真泣曰先公位将相恩甚厚而大夫违命縲絰中愚
固惑焉魏近且与国不可遽绝请厚礼遣其使徐图之
齐远而交疏不如械使者送京师且请致讨帝嘉大夫忠所请宜许惟岳寤使真作奏震
与将吏不可惟岳又从之其舅谷从政以智略为宝臣
所忌恒移病至是出谏曰今天下无事主上神武必至加兵虽大夫恩及三军万一不捷
孰为用命先朝相公与幽帅不协国家必命为帅可不
惧乎往者田承嗣佐禄山思明乱天下千征百战顷年为官军所败仰天垂泣赖先相公
保援获宥若雷霆不收岂有生理今田悦凶狂何如承
嗣况相公诛灭军中将校其子弟存者宁无愤心因利乘便必相倾陷为大夫久长计莫
若令惟诚知留后大夫自速入朝国家念先相公功见
大夫顺命何求不得今与羣逆为危计非保家之道也不纳 【按旧书载从政谏惟岳语
较邵真尤为明白肫挚不特为国家折奸谋即为惟
岳计更无出此新书删之未是今据补】 于是张孝忠以易州归天子诏朱滔与孝忠合
兵讨尽赦吏士购惟岳首惟岳与滔战束鹿大奔遂围
深州明年正月率兵万余使王武俊争束鹿田悦遣孟佑来助武俊以精兵先陷阵师却

滔缙帛为狻猊使壮士百人蒙以噪趋惟岳军马骇军
乱因大败于是深州日急悦亦婴城矣惟岳惧召真议遣使诣马燧令其弟惟简见帝斩
大将谢罪以兵属郑洗身朝京师孟佑知其谋走告悦
悦使扈岌来让曰敝邑本为君索节岂为叛逆耶虽见破可拒守为后图今君信邵真谗
闲欲归罪悦以自湔荡何负而然不则遣佑还军无遣
王师禽若能诛真以徇情事公如初惟岳懦不能决毕华见曰大夫与魏盟未久魏虽被
围彼多蓄积未可下齐兵劲地广裾带山河所谓东秦
险固之国与相维持足以抗天下夫背义不祥轻虑生祸且孟佑骁将王武俊善战前日
逐滔滔仅免今合两将破滔必矣惟岳见深围未解畏
佑还乃斩真以谢悦明日复战又大败而康日知举赵州听命惟岳益困乃付牙将卫常
宁兵五千俾王武俊骑八百攻日知武俊素为惟岳忌
师行谓常宁曰大夫信谗吾朝不图晏是行胜与否吾不复入恒矣将以身托定州张公
常宁与副李献诚曰诏斩大夫首以其官界之观大夫
势终必败若倒戈还府事实易图有如不捷张公可归也武俊然之惟岳使要籍官谢遵
至武俊壁议事武俊与谋使内应至期启城门武俊入
杀人廷中无亢者乃传令曰大夫叛命今取之拒者族士不敢动武俊使牵惟岳出缙之
戟门下并杀郑洗他奴等数十人传首京师尽赦其将
士给部中租役三年真始事宝臣掌文记武俊表其忠赠户部尚书共息吕擢冀州长史
常宁后在武俊时用事谋乱诛惟岳异母兄惟诚尚儒
术谦裕宝臣爱之使决军事以惟岳正嫡固让其妹妻李纳故宝臣请惟诚复故姓而仕
诸郛为纳营田副使四为州刺史初惟岳诛武俊械惟
简及其母郑送京师 【按新书惟岳叛时惟简奉母奔京师考上文惟岳叛后兵败而惧
欲因马燧送惟简不应叛时惟简已自归且下云兄
死人手尔入朝更为明晓新书自相矛盾今据旧书改】 帝拘于客省及出奉天惟简将
赴难谋于郑郑曰尔父立功河朔位宰相身未尝至京
师兄死人手尔入朝未识天子不能效忠吾不子汝督其行曰而能死王事吾不朽矣乃
斩关出道更七战得及行在拜太子谕德有功围城中
帝徙山南以三十骑从夜失道驰至盩厔西闻中人语问天子所在密语曰帝在此帝流
涕执其手曰尔有母乃能从朕耶对曰臣誓以死比明
北方尘起帝惧惟简登高曰浑瑊以骑来城至遂决趋兴元惟简前导及帝还封武安郡
王号元从功臣图形凌烟阁赐铁券宪宗时为左金吾
卫大将军长史万国俊夺兴平民田吏不敢治至是诉于惟简即日废国俊以地与民出
为凤翔节度使市耕牛佃具给农岁增垦数十万亩卒
年五十五赠尚书右仆射子元本轻薄无行长庆末与薛浑私侍襄阳公主事败主幽禁

中元本以功臣子贷死流岭南弟铎好学多识有儒者风

△王武俊

王武俊字符英本出契丹怒皆部父路俱开元中与饶乐府都督李诗等五千帐降入居蓟武俊甫十五善骑射与张孝忠齐名隶李宝臣
帐下为裨将宝应初王师入井陘武俊谓宝臣曰以寡敌众曲遇直战则离守则溃锐师远鬪庸可御乎宝臣遂以恒定等五州自归共平余贼
武俊谋也奏兼御史中丞封维川郡王子士真亦沈悍有断宝臣倚爱以女妻之宝臣以疑杀许崇俊等士真密结左右故武俊免于难惟岳拒
命或言武俊有他志武俊知之出入导从纔一二未尝接宾客惟岳虽内疑然见其屈损又惜善鬪未忍杀康日知以赵州降惟岳谋伐之皆曰
武俊故心膺先君命佐大夫士真又女弟壻今事急宜去猜嫌任之乃遣与卫常璠将兵往因谋执惟岳而日知亦遣人邀说以祸福武俊乃还
兵使人谓惟岳曰大夫与齐魏同恶今魏已败齐为赵州所限幽州兵近在定三军且救死诏召大夫宜亟归惟岳惶遽出遂缢即遣其属孟华
奏天子华辩对称旨德宗擢为兵部郎中授武俊检校秘书监兼御史大夫恒冀观察使是时惟岳将杨政义以定降杨荣国以深降朱滔受而
戍之帝以定赐张孝忠而日知为深赵观察使武俊怨不得节度使而失赵定滔亦怨失深二人相结武俊即缚使者送滔与之叛诏华谕解不
听时马燧李抱真李芑李晟讨田悦悦方困武俊滔救之屯连篋山帝诏李怀光督神策兵助讨贼军就舍气锐甚纵兵入滔壁杀千余人悦军
既屡北不能阵怀光缓辔观之武俊乘其怠使赵万敌等以二千骑横突而滔军踵驰王师乱相蹈藉死河为不流怀光还走壁武俊夜决河注
王莽渠断燧饷路燧计穷而与滔素姻乃遣使谩谢滔曰老夫不自量与诸君遇王大夫善战天下无前吾固宜败幸公图之使老夫得还河东
诸将亦罢兵吾为言天子以河北地付公滔亦阴忌武俊胜且不制即谓武俊曰王师既败马公卑约如此不宜迫人于险答曰燧等皆国名臣
连兵十万一战而北贻羞国家何面目见天子彼行不五十里必反拒我滔固许之燧至魏县坚壁自固师复振滔惭谢嫌隙始构武俊使张锺
葵攻赵州日知斩其首以闻于是武俊与田悦等擅相王武俊国号赵以恒为真定府命士真留守兼元帅以毕华郑儒为左右内史王士良司
刑王佑司文士清司武并为尚书士则司文侍郎宋端给事中王洽内史舍人张士清执宪大夫卫常璠内史监皇甫祝尚书左仆射建中四年
抱真使客贾林诈降武俊既见曰吾来传诏非降也武俊色动林曰天子知大夫登坛建

国抚膺顾左右曰我本忠义天子不省故至是今诸军
数表大夫至诚帝见表动色曰朕前误无及矣朋友失意尚可谢朕四海主毫芒过失反
不得自新耶大夫亲断逆首而宰相闇于事宜国家与
大夫乌有细故哉朱滔以利相动公何取焉诚能与昭义同心旷然改图上不失君臣之
义下以为子孙计武俊曰仆虏人尚知抚百姓天子固
不务杀人以安天下山东连兵战骨暴野虽胜谁与居今不憚归国业与诸军盟虏性朴
强不欲曲在我天子若能以恩荡刷之我首倡归命不
从者奉辞伐之河北不五十日可定会帝出奉天抱真将还泽潞悦说武俊滔踵袭之林
曰夫退军前辎重后锐师人心固壹不可图也使战胜
得地利归于魏不幸丧师赵受其灾沧赵乃故地胡不取之武俊遂引而北林复激之曰
燕魏心险王室强则须公援弱则己欲并吞滔自为盟
主以来轻蔑同列且河北惟有赵魏燕耳滔乃称冀公图公冀州矣使滔制山东大夫能
臣滔乎武俊投袂曰二百年天子犹不能事安能臣竖
子耶乃定计通好抱真而约马燧盟兴元元年赦天下武俊大集其军黜伪号诏国子祭
酒董晋与中人宣慰拜检校工部尚书恒冀深赵节度
使又加检校司空同中书门下平章事兼幽州卢龙节度使琅邪郡王是时滔悉幽蓟兵
与回纥围贝州将绝白马津南趋洛李怀光据河中李
希烈陷汴南略江淮李纳方叛唯李晟军渭上羽书所制者天下纔十二三人心惴恐及
田绪杀悦林复说武俊曰滔素欲得魏博悦死魏人气
■〈火戣〉公不救魏且下滔益甲数万张孝忠将北面事滔三道连衡济以回纥长驱
而南昭义军必保山西则河朔举入滔矣今魏尚完孝
忠未附公与昭义合兵破之声振关中京邑可坐复天子反正不朽之业谁与公参武俊
大喜与抱真相闻自将屯南宮抱真屯径城南军相距
十里武俊潜会抱真于军陈说忼慨抱真亦倾意结纳约为兄弟遂俱东壁贝州距城三
十里滔欲迎战武俊戒士饱食曰军未合毋妄动遣赵
琳赵万敌兵五万蔽林以待滔使票将马实卢南史阵而西李少成引回纥翼之日中兵
按武俊与子士清引精骑望少成军抱真次之滔驰骑
二百出武俊东南乘高鼓噪武俊使步兵决战而自以骑当回纥勒兵避其锐回纥马怒
突而过武俊急击琳等兵亦出回纥惊中断遂先奔初
滔兵蹙武俊军不能伤回纥既郤即欲引还器不能止军大奔滔走还壁武俊中流矢谓
抱真曰士少衰盍以骑济师巢可覆也抱真使来希皓
率劲骑薄滔营卢元真乘其后滔惧引去希皓迫之武俊邀于隘滔大败免者八千人会
夜各按屯武俊营滔东北抱真营西北滔知不支夜半
焚车粮遁归火如昼师大噪其声殷地抱真以山东蝗食少归于潞武俊亦还会有诏复

滔官爵武俊上还幽州卢龙节度又诏以恒州为大都督府即授武俊长史赐德棣二州以士真为观察使清河郡王天子至自梁遇武俊益厚子弟虽襁褓悉官之俄进检校太尉兼中书令得建庙京师武俊善射尝猎一日射雉兔九十五贞元十七年死年六十七羣臣奉慰如浑瑊故事赠太师有司谥威烈帝更为忠烈子士真士清士平士则士真袭

王士真 【王承宗】

王士真 【王承宗】

士真其长子也少佐父立功更患难既得节度息兵善守虽擅置吏私赋入而岁贡数十万缗比燕魏为恭元和初即拜同中书门下平章事四年死赠司徒谥曰景襄军中推其子承宗为留后始河北三镇以嫡长自置副大使故承宗以御史大夫为之及总留事宪宗久不报承宗数上疏自言帝闻刘济田季安俱病议更建使翰林学士李绛曰镇州狃世继惟拒命则讨之燕魏淄青势同必合方江淮水潦财力刑困宜即诏承宗嗣季安等虽病徐图所宜帝然之欲析镇分建节度令承宗岁输赋如李师道绛曰德棣久隶成德一旦割之承宗得以为辞假令奉诏诸道以割地同怨万一旅拒倍难处置不如令使者自以其意谕之无令知出陛下 【按新书叙次绛语事理未晰今依通鉴辑】 帝乃诏京兆尹裴武慰抚承宗奉诏恭甚请上德棣二州遂以检校工部尚书嗣领节度而以德州刺史薛昌朝为保信军节度使统德棣昌朝嵩子也与承宗故姻帝因欲离之诏未至承宗驰骑劫囚之诏更用棣州刺史田涣为二州团练守捉使令归昌朝承宗拒命帝怒削官爵遣中人吐突承璀将左右神策率河中河阳浙西宣歙兵讨之赵万敌者故武俊健将士真时入朝上言讨之必捷令与承璀偕诏武俊忠节茂着其以实封赐子士则毋毁坟墓承璀至军无威略师不振神策大将郾定进战没气益折及吴少诚死李绛奏蔡无四邻援攻讨势易不如赦承宗专事淮西帝不听昭义节度使卢从史恃承宗外自固内实与之太常卿权德舆谏曰神策军市井屠贩不更战陈恐惮劳远溃为盗贼恒冀骑壮兵多攻之必引时月西戎乘间则禁卫不可顿虚京师心腹宜深念方夏盛暑水潦疾疫且降诚虑有溃挠之变山东诸侯皆以息自副谁肯为陛下尽力者卢从史倚寇为援詎承璀邀宠利宜召行营善将令倍驿驰度至半道授以泽潞而徙从史他镇破其奸然后赦承宗众情必服帝未许五年河东军拔其一屯张茂昭破之木刀沟帝患从史诈卒以计缚送京师刘济又拔安平承宗惧上书谢罪且言往年纳地迫三军不得专而为

卢从史卖以求利愿请吏入赋得自新时师久饷不属帝忧之而淄青卢龙数表请赦乃诏浣雪尽以故地畀之罢诸道兵昌朝归京师授右武卫将军承宗自谓计得警然无顾惮七年军库火器铠殆尽杀守吏百余人不自安及吴元济反承宗与李师道上书请宥教其将尹少卿为蔡游说见宰相语不逊武元衡怒叱遣之承宗怨甚与师道谋遣恶少年数十曹伏河阴乘昏射吏吏奔溃因火漕院人趋火鬪死者十余辈县大发民捕盗亡去不获凡败钱三十万缗粟数万斛未几张晏等贼宰相元衡京师大索天子为旰食承宗尝疏元衡过咎留中至是帝出示羣臣议声罪伐之诏绝承宗朝贡窜其弟承系承迪承荣于远方以博野乐寿故范阳地归刘总而所遣盗处处窃发断建陵门戟燔献陵寝宫伏甲欲反洛阳不克承宗数出兵掠邻鄙田宏正上言承宗宜诛帝使率师压境承宗揣诏旨兵不即进即肆剽沧景易定间人苦之十一年诏削爵以实封赐士平使奉武俊后令河东义武卢龙横海魏博昭义六节度兵数十万进讨环地数千里以分其势然营屯离置主约不得一士观望独昭义郗士美薄贼境贼不敢犯始承宗不能叶诸父皆奔京师士则为神策大将军闻其叛请占族京兆裴度请用为邢州刺史使隶昭义以倾赵人有王怡者武俊从子为承宗守南宫士则招之归命谋泄遇害子元伯奔还擢监察御史诏赠怡尚书左仆射明年元济平承宗大恐使牙将石汛奉二子至魏博因田宏正求入侍且请归德棣二州宏正遣知感知信诣阙下请命前此帝使尚书右丞崔从赐诏许自新承宗素服待罪及是诏复官爵以华州刺史郑权为横海节度使统德棣沧景等州复承宗实封户三百以所部饥赐帛万匹李师道平奉法益谨表所领州录事参军判司县主簿令皆勾上官十五年死赠侍中军中推其弟承元为留后承元不敢世于镇诏用为义成军节度使事见本传

△王廷凑

王廷凑本回纥阿布思族隶安东都护府曾祖五哥之为王武俊养子故冒姓王世为裨将廷凑事王承宗为兵马使田宏正至镇州诏以度支缗钱百万劳军不时致廷凑暴其稽以观众心众果怨由是害宏正自称留后胁监军表请节又取冀州杀刺史王进岌穆宗怒以宏正子布为魏博节度使率军进讨仍敕横海昭义河东义武军并力大将王位等谋执廷凑不克死者三千余人会朱克融囚张宏靖以幽州乱乃合从拒王师诏议攻讨先后剑南东川节度使王涯以为范阳乱非宿谋可先事镇州又有魏博之怨济以晋阳沧德犄角而进瀛莫易定实贼咽喉宜屯重兵诏义武节度使陈楚闭境督诸军三道攻而沧德乌重允最宿将当一而裴

度以河东节度使兼幽镇招抚使屯承天军重允知时
不可按兵未肯前帝意锐甚更以深冀行营节度使杜叔良代之叔良素结中人入见帝
大言曰贼不足破会度逐廷湊兵于会星又入元氏叔
良率诸道兵救深州战博野大奔失所持节以身免贬归州刺史叔良者将家子本以附
会至灵武节度使坐不职罢复帅沧景延湊知其怯故
先犯之师由是败当是时诸道兵仰度支者十五万府帑不给置南北供军院既薄贼鄙
粮道梗樵苏不继兵番休取刍蒸廷湊乘间夺转运车
六百乘食愈困至所须衣帛未半道诸军强取之其悬师深入者不得衣食又监军悉取
精骠士自随疲琐者各行阵战辄溃二贼众不过万余
王师统制不一讫无功深州围益急明年魏牙将史宪诚叛田布众溃于南宫帝不得已
乃赦廷湊检校右散骑常侍成德军节度使会牛元翼
出奔廷湊遂取深州诏兵部侍郎韩愈慰其军廷湊既原则稍挺与克融宪诚深相结沧
州李全略死子同捷求袭文宗不许更授兖海节度使
同捷逆命厚结廷湊帝虞其变故授检校司空及幽魏徐兖兵讨同捷廷湊挠魏北鄙以
牵制之而馈沧景饘粮囚邻道使者不遣帝怒诏绝其
输贡于是易定柳公济战新乐斩首三千级昭义刘从谏战临城败之引漳注深冀诏削
廷湊官爵诸道以兵进讨斩廷湊者赐钱二万缗优予
官以州镇降者有差公济再战行唐皆克廷湊射蜡书求救于幽州行营李载义获之又
纳魏叛将兀志诏会同捷平廷湊稍畏表上景州而弓
高乐陵长河三县固守复上书谢帝方厌兵赦之悉复官爵还所上州久之进兼太子太
傅太原郡公太和八年死赠太尉军中以元逵请命帝
听袭节度

王元逵 【王绍鼎 王绍懿 王景崇】

王元逵 【王绍鼎 王绍懿 王景崇】

元逵其次子也识礼法岁时贡献如职帝悦诏尚絳王悟女寿安公主刘稹叛武宗
诏元逵为北面招讨使即日师引道拔宣务壁破援军
尧山攻邢州降之累迁检校司徒同中书门下平章事稹平加兼太子太师封太原郡公
食实封户二百进至兼太傅大中八年死年四十三赠
太师谥曰忠子绍鼎袭字嗣先累擢检校尚书左仆射淫暴厚敛升楼弹射路人以为乐
众忿欲逐之会病死赠司空子幼宣宗以元逵次子绍
懿为留后俄为节度使累封太原县伯加检校司空咸通七年死赠司徒初绍懿病笃召
绍鼎子景崇曰先君以政属我须尔长授之今疾甚尔
虽少勉总军务礼藩邻奉朝廷则家业不堕矣监军上状懿宗悦擢景崇为留后寻进节
度使景崇字孟安以公主嫡孙尤被宠庞勋反景崇遣

兵会王师平贼进检校尚书右仆射主薨谥曰章惠居丧如礼母张卒号慕羸憊当时称之以政委宾佐检戒亲属不得与尝欲引母昆弟为牙将其佐张位曰军中用人以劳能若私其人厚畀田宅禄食可也何必官景崇谢进同中书门下平章事检校太尉兼中书令封赵国公干符五年进王常山黄巢伪诏至景崇斩以徇因发兵驰檄诸道合定州王处存连师西入关问行在贡输相踵每语及宗庙园陵辄流涕蔚州刺史苏佑为沙陀所攻乞师于幽州屯美女谷兵不利佑将出奔会诏徙濮州刺史拥兵之官道于镇景崇馆之灵寿肆其下剽夺景崇杀之累迁至检校太傅中和三年死年三十七赠太傅谥曰忠穆子镕事具五代史 【按新书有镕传镕周旋晋汴两镇事甚繁伙且终于梁代应入五代传此从删】 始廷湊微时邺有道士为卜得干之坤曰君将有土及得镇迎事甚谨复问寿几何子孙几何答曰公三十年后当有二王已而廷湊立十三年死盖廋文也景崇镕皆王廷湊尝使至河阳醉寝于路有过丈曰非常人也从者以告廷湊驰问其故曰吾见君鼻息左若龙右若虎子孙当王百年家有大树覆及堂公兴矣及害宏正而树适庇寝自廷湊及镕凡百年

钦定续通志卷二百七十七

●钦定续通志卷二百七十八 列传七十八

列传

唐 【七十八】

○唐七十八 藩镇卢龙

李怀仙 朱滔 刘怱【济总】 朱克融 李载义【杨志

诚】张仲武直方 张允伸【张公素】李茂勋

李全忠 刘仁恭

李怀仙

朱滔

刘怱

朱克融

李载义

张仲武

张允伸

李茂勋

李全忠

刘仁恭

△李怀仙

李怀仙柳城人世事契丹降将 【按新唐书无降将二字营州为唐羁縻州以处降者去降将二字则怀仙入唐始末不明今据旧书增

】守营州禄山反以为裨将史思明盗河南留次子朝清守幽州以阿史那玉高如震辅之朝义弑立移檄诛朝清二将乱朝义以怀仙为幽州节度使督兵驰入如震不及计乃出迎怀仙外示宽居三日大会斩如震州部悉平朝义败将趋范阳中人骆奉先间遣鑄说怀仙遂降使其将李抱忠以兵三千戍范阳朝义至抱忠不内乃缢斩其首囚奉先以献仆固怀恩即表怀仙为卢龙军节度使迁检校兵部尚书王武威郡属怀恩反边羌拏战不解朝廷方勤西师故怀仙与田承嗣薛高张忠志等得招散亡治城邑甲兵自署文武将吏私贡赋天子不能制大历三年麾下朱希彩朱泚泚弟滔谋杀怀仙斩阍者以入希彩不至遼明泚惧欲亡滔曰谋不成有死逃将焉往俄希彩至共斩怀仙族其家希彩自称留后张忠志以兵讨其乱不克代宗因赦罪诏宰相王缙为节度使以希彩副之希彩闻缙至搜卒伍大陈戎备以逆缙建旌棨徐驱希彩迎谒恭甚缙度不可制劳军阅旬乃还希彩即领节度五年封高密郡王懿恣不轨人不堪七年其下李瑗杀之共推朱泚为留后泚自有传

△朱滔

朱滔性变诈希彩以同宗倚之使主帐下亲兵泚领节度遣滔将兵三千西乘塞安史后山东虽外臣顺实傲肆不廷至泚首效款帝嘉之召见殿中问曰卿材孰与泚多滔曰统御士众方略明辨臣不及泚臣年二十八获谒天子泚长臣五年未识朝廷泚不及臣帝愈喜特诏勒兵贯王城出屯涇州置酒开远门饯之戍还乃谋夺泚兵诡说曰天下诸侯未有朝者先至可夺天子意子孙安矣泚信之因入朝稍不相平泚遂乞留西讨吐蕃以滔权知留后兼御史大夫滔杀有功者李瑗等二十余人李惟岳拒命滔与成德张孝忠再破之束鹿取深州进检校司徒遂领节度赐德棣二州德宗以康日知为深赵二州团练使诏滔还镇滔失深州不平又请恒定七州赋供军复不许愈怨时马燧围田悦悦穷间滔与王武俊同叛滔姑子刘怱为涿州刺史以书谏曰司徒身节制太尉位宰相恩遇极矣今昌平有太尉乡司徒里不朽业也忠顺则无不济比忘上乐战不顾成败如安史者今复何有司徒图之无貽悔滔不从激其众曰士喋血鬪既下坚城朝廷乃见夺奏赏不报君等疾趋破马燧军以取贖粮可乎军中不应三号之乃曰幽人死于南者骸撑不揜痛藏心髓奈何复欲暴骨中野乎司徒兄弟受国宠士各蒙官赏愿安之不恤其它滔罢潜杀不共乱者数十人日知发其谋于燧帝以悦未下即封滔通义郡王实

户三百滔愈悖分兵与武俊屯赵州胁日知矫诏发其粮即引兵救悦次束鹿军大噪曰天子令司徒北还而南救魏寔有诏邪滔惧走匿传舍裨将蔡雄好谏士曰始天子约取成德所得州县赐有功者拔深州者燕也本镇常苦无丝纆冀得深州以佐调率今顾不得又天子以帛赐有功士为马燧掠去今引而南非自为也军中悔谢复曰虽然南行违诏莫如还滔回次深州诛二百人【按新书原文诛首变者二百人军士不从滔乱不得被以恶名今删】众惧乃率兵南壁寔

晋与武俊合帝命马燧李怀光击之滔属郑云逵田景仙皆奔燧已而滔破怀光军悦德滔援欲尊而臣之滔让武俊曰篋山之胜王大夫力也于是滔武俊官属共议古有列国连衡共抗秦今公等在此李大夫在郛请如七国并建号用天子正朔且师在外无名岂长为叛臣宜择日定约顺人心不如盟者共伐之滔以禄山思明皆起燕恶其名以冀尧所都因号冀武俊号赵悦号魏纳号齐建中三年冬十月庚申为坛魏西祀天各僭为王皆三让就位滔为盟主称孤武俊悦及纳称寡人【按新唐书有云气土高之应此乃乱贼造作附会以相矜煽无足称道今删】

居室皆曰殿妻曰妃子为国公下皆称臣谓殿下上书曰笈所下曰令置左右内史视丞相内史令监视侍中中书令东西侍郎视门下中书东曹给事西曹舍人视给事中中书舍人司议大夫视谏议大夫六官省视尚书东西曹仆射视左右仆射御史台曰执宪置大夫至监察御史驱使要藉官曰承令左右将军曰虎牙豹略军使曰鹰扬龙骧滔改幽州为范阳府以子为留后称元帅刘怦为留守柳良器李子千左右内史滔兄琼瑰陆庆东西曹仆射杨霁马实寇瞻杨荣国司文司武司礼司刑侍郎李士真樊播执宪大夫中丞聘处士张遂王道为司谏燧遣李晟将兵至易定率张茂昭攻涿莫以绝滔援明年围青苑滔将郑景济固守滔使马实将兵万人与武俊拒燧自以兵万余救清苑绝晟粮道至定州晟不知夜引兵还滔疑有伏不敢逼遽保瀛州而孝忠晟合兵千人城莱水滔骁将乌萨戒袭杀城卒数百晟不出景济望滔军立帜为应滔进军薄晟营晟战不利城中兵亦出晟大败奔易州茂昭走满城滔已破晟回屯河间不进武俊使宋端趣让滔怒曰孤亟战且病就医药而王已复云云孤南救魏弃兄背君如脱屣王必相疑亦听所为端还武俊谓实曰寡人望王速来指踪决胜负复何恶王异日并天下寡人得六七城为节度足矣实还具道所以然武俊亦遣谢滔滔悦亦报谢然武俊内衔之与田悦潜谋绝滔及泚反燧等皆班师武俊实亦还悦武俊遣使至河间贺泚即位武俊诡请实共攻康日知于赵州谋覆其军不克实归武俊厚赠遗泚

遣人密召滔使趋洛阳滔发书西向再拜移檄诸道曰
今发突骑四十万走洛阳与皇帝会上阳宫使王郢说悦连和俱西滔素强调敛武俊等
不能堪又令各以兵五千从攻洛欲僭称帝乘輿法从
及赦令皆具初回纥以女妻奚王大历末奚乱杀王女逃归道平卢滔以锦绣张道待其
至请为婚女悦许焉遣修堦礼于回纥回纥喜报以名
马重宝及僭相王与武俊悦纳纳四金钥于回纥曰四国愿听命可汗谨上金钥启闭出
纳唯命至是乞师焉回纥以二千骑从而武俊亦先乞
师断怀光饷路未至而王师还回纥过幽州滔使啖其酋达干曰若能同度河而南玉帛
子女不费计可得也达干许诺约曰五十里舍以须悦
军滔兵五万车千乘骑二万士私属万余虏兵三千马橐它倍之过武俊境武俊盛劳之
然悦已用武俊谋不肯出储峙于野以待滔至贝州悦
刺史邢曹俊上谒即归闭城守滔疑之次永济武俊阴遣客反间滔曰悦有憾须公南以
兵断公归路宜少备滔怒入永济执悦吏掠讯不得杀
之使回纥大掠南及澶卫系执老幼无遗者悦大恐阖城自保滔遣将杨布略定馆陶屯
平恩置官吏滔整军北还使马实屯冠氏闻悦死遂攻
魏州围贝州于是武俊李抱真合击滔滔急召实至贝州步马乏顿明日辄约战实请休
士三日蔡雄达干等畏武俊坚壁难图请战杨布曰大
王将取东都逢小敌即怯何以长驱天下术士尹少伯亦言必胜既战为二军所乘大败
大将朱良佑李进皆被执滔奔入德州杀少伯雄布俄
而京师平滔已败不能军走还幽州上书待罪诏武俊抱真开示大信若诚心审固者当
与更始初滔以刘怵忠力使留守及败疑图已彷徨不
敢入怵闻其至搜兵缮铠夹道陈二十里迎谒望滔哭滔遂入府气沮索日邑邑被病政
事悉委怵贞元元年死年四十二赠司徒

△刘怵

刘怵幽州昌平人少为范阳裨将以亲老疾辄去职李怀仙檄召不应朱滔时积功
至雄武军使垦田节用以辨治称稍迁涿州刺史滔讨
田承嗣表知府事和裕得众心李宝臣以兵劫滔于瓦桥滔走宝臣乘胜欲袭幽州怵设
方略勒兵完守宝臣不敢谋擢御史中丞滔败归终不
贰益治兵人嘉怵忠于所奉及滔死军中尽推怵乃总军事俄诏为节度副大使彭城郡
公居镇纔二月死年五十九赠兵部尚书谥曰恭

刘济

刘总

刘济

子济游学京师第进士历莫州刺史怵病诏济假州事及怵死嗣节度累迁检校尚

书右仆射同中书门下平章事奚数侵迁击走之穷追
千余里至青都山斩首二万级及掠檀蓟北鄙济率军会室韦破之王承宗叛济合诸将
曰天子知我怨赵必命我伐之赵且大备我奈何裨将
谭忠欲激济伐承宗疾言曰天子不使我伐赵赵亦不备燕济怒系之使视赵果不设备
数日诏书许济无出师济释忠谢而问之忠曰昭义卢
从史外亲燕内实忌之外绝赵内实与之此为赵画曰燕倚赵自固虽甚怒必不残赵故
不足虞也赵既不备燕从史则告天子曰燕赵宿怨也
今赵见伐而不备燕是燕反与赵此以知天子不使君伐赵赵亦不备燕济曰计安出曰
今天子诛承宗而燕无一卒济易水者正使潞水卖恩
于赵贩忠于上是君贮忠谊心而染私赵之名卒不见德于赵恶声徒嘈嘈于天下济然
之以兵七万先诸军斩首数千级又拔饶阳屯瀛州进
攻安平久不拔济命次子总以兵八千先登日中拔其城会赦承宗进中书令济之出留
长子缙假副使总为行营都知兵马使济病甚总与左
右张玘成国宝及帐内亲近谋使人诈从京师来曰朝廷以公前屯瀛州逗遛诏副大使
代节度明日复使人曰诏节至太原矣又使人走呼曰
过代矣举军惊济愤怒不知所为诛主兵大将数十人及素与缙善者亟追缙以玘兄皋
代留事济自朝至中昃不食渴索醅浆总使吏唐宏实
寘毒济饮而死年五十四缙至涿州总矫济命杀之乃发丧赠太师谥曰庄武

刘总

总性阴贼尤险谲已毒父即领军政朝廷不知其奸诏嗣节度封楚国公累进检校
司空承宗再拒命总遣兵取武强按军两端以私馈贐
宪宗知之外示崇宠进同中书门下平章事及吴元济李师道平承宗忧死田宏正入镇
州总大恐谋自安又数见父兄为崇乃衣食浮屠数百
人昼夜祈禳憩祠场则慚安或居卧内辄惊不能寐晚年益惨悻谭忠复说总曰天地之
数合必离离必合河北与天下离六十年数穷必合往
朱泚希烈自立赵冀齐魏称王郡国弄兵可谓危矣然卒无事元和以来刘辟李錡田季
安卢从史齐蔡之强或首于都市或身为逐客皆君目
见今兵駉駉北来赵人已献德棣十二城助魏破齐唯燕无一日劳后世得无事乎为君
忧之总泣且谢因上疏纳土请为浮屠割所治为三以
幽琢营为一府请张宏靖治之瀛莫为一府卢士玫治之平蓟妫檀为一府薛平治之 【
按吴缜纠谬云穆宗纪刘总以卢龙八州归于有司
赦幽涿檀顺瀛莫营平八州崔植传刘总以幽蓟七州献诸朝温造传总籍所部九州岛
入朝而总传上疏欲割所治幽涿营为一府瀛莫为一府
平蓟妫檀为一府然则总所归之地在崔植传则七州在本纪则八州在温造及总传则

九州岛以州名参考之则十州舛驳至此考旧唐书地理志范阳节度统九军幽檀妫蓟恒定易莫沧平卢节度统二军营平此定制也后范阳节度兼领平卢而恒定易入于成德军瀛州来隶平卢军又朱希彩析幽州之范阳归义固安置涿州然则总传九州岛正合至纪所列与传异者有顺州考新书方镇表广德元年范阳节度罢领顺州纪误崔植传亦误】 尽籍宿将荐诸朝会穆宗冲逸宰相崔植杜元颖无远谋欲重宏靖故全付总地唯分瀛莫置观察使拜总检校司徒兼侍中天平节度使又赐浮屠服号大觉榜其第为佛祠遣使者以节印偕来时总已自髡祝让节印以浮屠行始总请代献马万五千匹羣臣或疑其诈帝独纳之使给事中薛存庆宣慰及所部复一岁缗钱百万劳军高年惇独不能自存者官吏就问赐粟帛总遂与忠俱行军中世怀其惠拥留不得进总杀首谋者十人以节付张皋 【按通鉴考异引实录幽州留后张玘奏总剃发为僧不知所在皋乃玘兄然则不以节付皋也然总以夜去皋或不知今仍之】 夜间道去迟明军中乃知及定州死 【按藩镇传诸人皆书死独总书卒盖以其纳土之故然总身弑父厥罪维均今改书死】 诏赠太尉子础及弟约至长安者十一人皆擢州刺史忠护总丧至亦卒

△朱克融

朱克融滔孙以偏校事刘总总将入朝虑后有变籍其军材勇黠暴者悉荐之朝冀厚与爵位使北方歆艳无甘乱心克融在遣时执政非其人既见总纳地谓天下旷然无复事克融等留京师久之不得调数诣宰相求自试皆不听饥寒无所贷勺内怨忿会张宏靖赴镇因悉遣还俄幽州乱囚宏靖克融父洄号智谄疾废卧家众往请为帅洄辞因推克融领军务诏以刘悟为节度使驰往俄而瀛冀皆附克融悟不得入克融纵兵掠易州败两县寇蔚州易州刺史柳公济战白石岭斩三千级转寇定州节度使陈楚破其兵二万会镇州杀田宏正议者谓二贼均逆而克融不敢害宏靖宜诛赵赦燕朝廷度幽蓟未可复取乃拜克融检校左散骑常侍幽州卢龙节度使长庆元年也明年陷弓高攻下博与王廷凑共围深州裴度以檄谯谕克融乃还进检校工部尚书表献马万匹羊十万请直赏军敬宗初迁检校司空赐边屯时服克融以帛疏恶囚诏使杨文端又言闻东幸雒愿率匠五千助营宫室且请帛三十万备军费帝用裴度谋屈之语在度传 【按此事在裴度传甚详从史家互见例】 进爵吴兴郡王是年军乱杀克融及其子延龄诏随司徒次子延嗣领留后为大将李载义杀而代之并族其家

△李载义

李载义自称恒山愍王之后刘济引补帐下从征伐积功为牙中兵马使朱克融死子延嗣叛命载义因众不忍杀之暴其罪于朝敬宗即授检校户部尚书卢龙军节度使封武威郡王初张宏靖之囚幕府多见害妻子留不遣及是载义悉护送京师俄而李同捷据沧景邀袭封载义请讨贼自效文宗嘉之进检校尚书右仆射斩级数有功贼平诏同中书门下平章事赐白玉带示殊礼太和四年为兵马使杨志诚所逐奔易州即上言愿将妻子身入见帝令使者抵太原慰迎赐袍笏装器又以其尝有功且意恭顺乃册拜太保仍平章事俄为山南西道节度使徙河东始回鹘使者岁入朝所过暴慢吏不敢呵禁益警悍至鞭候人剽突市区大酋李畅晓华语尤凶黠横须索扶痕邮人载义召畅语曰可汗以舅甥故使将军朝贡谊不容将军暴也天子厚饗礼客有不谨吏皆论死若将军所部不戢斂攘自如我必杀犯者将军其少戒因悉罢防兵以两卒护阖畅惮之讫无犯者进兼侍中吏下请立碑纪功诏李程为之辞未有字帝诏曰周书凡厥正人既富方谷卿宜当之以方谷为字开成三年卒年五十赠太尉初载义母葬范阳为杨志诚掘发后志诚被逐道太原载义奏请别其心偿毋怨不许又欲杀之官属苦救乃免然尽戕其妻息士卒帝屈法弗劾也

杨志诚

杨志诚

杨志诚事载义为牙将载义宴天子使者鞠场志诚与其党噪而起载义走因自为都知兵马使文宗更以嘉王领节度用志诚为留后俄检校工部尚书擢节度副大使踰年进检校吏部诏下邸吏白宰相曰军中不识朝仪惟知尚书改仆射为进秩今一府盛服待天子命如复为尚书则举军惭使者势不得出既志诚果怨望军有嫚言囚中人魏宝义及它使焦奉鸾尹士恭遣部将王文颖入谢让还所命复赐之文颖不肯受辄去帝忍不责乃进检校尚书右仆射八年为下所逐推部将史元忠总留后志诚在镇密制天子袞冕被服拟乘舆元忠表于朝诏御史按治斥岭南至商州诛之而以通王领节度授元忠留后明年检校工部尚书为副大使会昌初为偏将陈行泰所杀行泰邀节制未报次将张绛杀行泰起求帅军武宗自用张仲武代之

△张仲武

张仲武范阳人通左氏春秋会昌初为雄武军使行泰杀元忠请节李德裕言河朔请帅报太速故军得安若少须下且有变帝许之未报

果为绛所杀复诱其军以请亦置未报时回鹘为黠戛斯所破乌介可汗托天德塞上仲武遣属吴仲舒入朝请以本军击回鹘德裕因问北方事仲舒曰行泰绛皆游客人心不附仲武旧将张光朝子年五十余通书习戎事性忠义愿归款朝廷旧矣德裕曰即以为帅军无复乱乎答曰仲武得士心命之必有逐绛者德裕人白帝曰行泰等邀节不可许仲武求自效用之有名军且无辞乃擢兵马留后而诏抚王领节度诏下绛果为军中所逐即拜仲武副大使检校工部尚书兰陵郡公会回鹘特勒那颉啜拥赤心部七千帐逼渔阳仲武使其弟仲至别将游奉寰等率锐兵三万破之进检校兵部尚书始回鹘常有酋长监奚契丹督岁贡因诃中国仲武使裨将石公绪等厚结二部执谍者八百余人杀之回鹘欲入五原掠保塞杂虏乃先以宣门将军四十七人诡结欢仲武赂其下知所谋因逗遛不遣使失师期回鹘人马多病死由是不敢犯五原塞乌介失势往依康居尽徙余种寄黑车子部回鹘遂衰名王贵种相继降捕几千人仲武请立石纪圣功诏德裕为铭揭碑卢龙大中初又破奚北部入山奚擢累检校司徒同中书门下平章事卒谥曰庄 【按王承元顺朝命易它镇故不从其父兄别为专传张仲武有功于唐且无跋扈事视当时诸人为特出但父子相袭犹踵河北故智故仍入藩镇传亦以叙次承授便于贯串也】

张直方

张直方

子直方以右金吾将军袭留后俄进副大使多不法畏变起乃托出畋奔京师军中以张允伸总后务直方至宣宗遣使者郊劳授金吾大将军以其族大给检校工部尚书俸久之进检校尚书右仆射坐以小罪笞杀金吾史改右羽林统军好驰猎往往设置罟于道当宿卫不时入下迁骁卫将军奴婢细过辄杀积其罪贬思州司户参军母惊曰尚有尊于我子邪久复授羽林统军纵部下为盗复贬康州司马后居东都弋猎愈甚洛阳飞鸟皆识之见必羣噪干符中累进左骁卫大将军郑畋辅政颇言仲武会昌时功第一今直方百口不自存每内燕以衣敝恶辞不赴陛下录功念旧宜少优假诏还检校右仆射进左金吾卫大将军黄巢犯京师直方迎灞上既而纳亡命谋劫巢报天子公卿多依之贼觉屠其族

△张允伸

张允伸字逢昌范阳人世为军校直方出奔以都知兵马使为众推留后报可未几检校散骑常侍为节度使累进检校司徒兼太傅同中

书门下平章事封燕国公庞勋反上书欲遣弟允皋领兵讨贼不许上米五十万斛盐二万斛诏嘉美进兼侍中咸通十二年以疾甚上节印诏许以子简会为副大使卒年八十八赠太尉谥曰忠烈允伸性勤俭下所安赖未尝有边鄙虑子十四人简会入朝昆弟多至大将军刺史郡左者而军中推张公素为留后

张公素

张公素

公素范阳人以列军事允伸擢累平州刺史允伸卒以兵来会丧军士素附其威望简会知不可制即出奔诏公素为节度使进同中书门下平章事为李茂勋所袭奔京师贬复州司户参军

△李茂勋

李茂勋本回鹘阿布思之裔张仲武时来降沈勇善射仲武器之任以将兵常乘边积功赐姓名陈贡言者燕健将为纳降军使军中素信服茂勋袭杀之因举兵给称贡言反公素迎击不利走茂勋入府众始悟因推主州务诏即拜节度使俄以病自上诏进尚书右仆射致仕表子可举代遂领留后进节度使擢累检校太尉中和末太原李克用始太与定州王处存结可举恶其窥山东为己患乃约吐浑都督赫连铎镇州王镕联和扬言易定本燕赵属得其地且参有之即遣军司马韩元绍击沙陀药儿岭斩首七千级杀其将朱邪尽忠等又战雄武军杀获万人铎又破沙陀于蔚州诏以铎为云州刺史进可举检校侍中乃遣票将李全忠率众六万围易州镕以兵攻无极处存求援太原克用自将赴之镇人惧退保新城克用急攻之镕引去追破之九门易久未下卢龙将刘仁恭穴地入得其城士卒有骄色处存以轻兵三千蒙羊皮夜布之野精骑伏它道全忠军望为羣羊争趋之伏骑发大败之复取易州全忠遁尽失刍粮仗铠惧得罪乃哀余众反攻幽州可举度不支引其族登楼自燔死

△李全忠

李全忠范阳人仕为隶州司马芦生其室一尺三节以问别驾张建设曰芦茅类公茅土兆也传节者其三世乎罢归事可举为牙将可举死众推为留后光启元年拜节度使未几卒子匡威嗣领留后进为使性豪爽恃燕蓟劲兵处有雄天下意与赫连铎兵攻太原争云代李克用使金安俊攻铎匡威救之战蔚州射杀金俊兵表请讨沙陀而朱全忠亦土言愿协力故张浚因请用兵浚败克用攻云州以骑将薛阿檀为前锋设伏河上铎追阿檀抵河伏起大败遂围云州塹而守分兵出井陘屯常山大掠深赵

匡威以步骑万余援王镕克用还因急攻铎会食尽铎
奔州奔匡威克用取云州铎本吐谷浑部酋开成中其父率种人三千帐自归守云州十
五年至是失景福初克用伐镕镕来求救匡威遣将赴
之克用去明年兵复出井陘匡威自将援镕将行置酒大会其弟兵马留后检校司徒匡
筹妻张艳匡威酒酣留张氏报之匡威军次博野匡筹
乃据城自为留后即授检校太保节度使匡威麾下多去屏营无所归留深州遣属李抱
贞上书愿入朝时京师数寇难人人危惧传言金头王
且来皆亡窜山谷抱贞还而镕已迎馆于镇匡威引抱贞登城西大悲浮屠顾望流涕美
其山川乃共图镕阳为镕方略缮甲治城堑阴施予倾
士心镇军忠于王氏皆恶之匡威亲忌日镕过慰士衷甲劫镕入牙城镇人拒之镕得脱
镇人斩匡威以徇匡筹诉诸朝檄暴镕罪攻乐寿武强
以报始匡筹之夺也燕人不义之刘仁恭出奔太原克用倚其谋下武劬二州败匡筹于
居庸关李存审与战匡筹又败挈其族奔京师次景城
沧州节度使卢彦威杀之掠车马僮奴妻方乳不能进仁恭获之纳于克用始匡威见逐
叹曰兄失弟得无所悔然其材恐不足以守果亡而幽
州地归克用以仁恭为帅

△刘仁恭

刘仁恭深州人父晟为李可举新兴镇将故仁恭事军中从李全忠攻易州以能穴
地道号窟头稍迁裨校尝自言梦大幡出指端年四十
九当秉旄节李匡威恶之补景城令会瀛州乱杀守吏仁恭募士千人定其乱匡威复使
将兵戍蔚州踰期未代士皆怨会匡筹逐其兄仁恭拥
戍兵趋幽州匡筹逆战败之遂以其族奔太原李克用待之甚厚拜寿阳镇将数以策干
克用请步骑一万东取幽州己为导克用攻匡筹匡筹
遁去仁恭与符存审入城封府库以待克用悦留仁恭守之以亲信分典其兵干宝二年
表仁恭检校司空卢龙军节度使明年克用攻魏州召
卢龙兵仁恭以契丹解又明年克用复兴其兵救朱瑄使者数十往卒不出克用以书让
之仁恭乃慢骂执其使尽囚太原士之在燕者复诱克
用麾下归之克用怒自将往击不胜师丧过半仁恭献馘于朱全忠全忠表同中书门下
平章事既与克用绝则益募兵光化初使其子守文袭
沧州节度使卢彦威弃城走遂有沧景德三州地用守文为节度留后请命于朝昭宗未
即从会中人至仁恭嫚谓曰旄节吾自有要假长安本
色耳何见拒邪卒以守文为横海军节度使 【按守文得节事新唐书不载从五代史补
】 由是益张悉幽沧步骑十万声言三十万南徇魏
镇屠贝州罗绍威求救于朱全忠全忠使李思安葛从周赴之屯内黄仁恭负强下令曰

思安懦当先破之乃取魏守文与单可及精甲五万循
清水上思安设伏逆战伪不胜守文蹶北至内黄思安整兵还击伏发斩可及独守文挺
逸众无还者从周以刑洺兵与魏将贺德伦等夜击仁
恭破八屯仁恭走自魏抵长河数百里尸蔽道镇人邀败之东境仁恭遂衰三年葛从周
攻沧州仁恭壁干盩从周潜军战老鸦堤仁恭败退壁
瓦桥卑辞归穷于克用求救克用为侵邢洺俄而全忠取瀛莫克用使周德威出飞狐天
佑三年全忠自将攻沧州壁长芦仁恭悉发男子十五
以上为兵涅其面曰定霸都士人则涅于臂曰一心事主得众二十万屯瓦桥全忠环沧
而沟之援绝人相食仁恭求战不许复从克用乞师使
百辈往乃许仁恭以兵三万合攻潞州降全忠将丁会沧围乃解时中原多故仁恭倚燕
强且远无所惮意自满从方士学长年筑馆大安山掠
子女充之以堊土为钱敛真钱穴山藏之杀匠灭口禁南方茶自撚山为茶号山曰大恩
以邀利子守光烝嬖妾事觉仁恭谪之李思安来攻屯
石子河仁恭居大安山城中无备守光引兵出战思安去因回攻大安虜仁恭囚别室遂
有卢龙守光事具五代史

钦定续通志卷二百七十八

●钦定续通志卷二百七十九 列传七十九

列传

唐 【七十九】

○唐七十九 藩镇淄青横海

李正己【纳 师古师道】 程日华【怀直 怀信权】 李全略【同

捷】

李正己

程日华 【程怀直 程怀信 程权】

李全略 【李同捷】

△李正己

李正己高丽人为营州副将从侯希逸入青州希逸母即其姑故荐为折冲都尉宝
应中从讨史朝义时回纥恃功横正己欲以气折之与
大酋角逐士皆墙立观约后者批之既逐而先正己批其颊矢液流离众军粲然酋大惭
自是沮希逸以为兵马使以其得众心阴忌之因事解
其职寻逐希逸诏代为节度使本名怀玉至是赐今名遂有淄青齐海登莱沂密德棣十
州与田承嗣薛嵩李宝臣梁崇义相倚嵩死李灵耀反
诸道共披其地正己复取曹濮徐兖郓凡十有五州号最强大政令严酷威震邻境历检
校司空加同中书门下平章事以司徒兼太子太保封

饶阳郡王附属籍因徙治郛以子纳及腹心将守诸州建中初闻城汴州乃约田悦梁崇义李惟岳偕叛自屯济阴益师徐州扼江淮天子于是改运道檄天下兵为守备河南骚然会发疽死年四十九兴元初纳顺命诏赠太尉

李纳

李师古

李师道

李纳

纳少时将兵防秋代宗召见擢殿中丞赐金紫入朝擢兼侍御史正己署为濮徐兖沂海留后进御史大夫正己死秘不发以兵会田悦于濮阳马燧方击悦纳使大将卫俊救之为燧所破略尽收洹水德宗诏诸军合讨其从父洧以徐州归大将李士真以德州李长卿以棣州送款纳恚洧背己集兵攻洧帝命刘元佐督军进援大破之纳还濮阳进围之纳登陴泣且悔遣判官房说与子弟质京师因元佐谢罪时中人宋凤朝以纳穷欲立功建不可赦帝乃械说等纳还郛与悦李希烈朱滔王武俊连和自称齐王置百官兴元初复归命授检校工部尚书复平卢帅节赐铁券又同中书门下平章事封陇西郡王希烈围陈州纳会诸军破之城下加检校司空实封五百户进检校司徒死年三十四赠太傅子师古师道

李师古

师古以荫署青州刺史纳死军中请嗣帅诏起为右金吾卫大将军本军节度使初棣州有蛤■〈虫朵〉盐地岁产盐数十万斛李长卿以州入朱滔独蛤■〈虫朵〉为纳据后德棣入王武俊纳乃筑垒德州南跨河以守蛤■〈虫朵〉谓之三汊通魏博以交田绪盗掠德州武俊患之师古始袭武俊易其弱率兵取蛤■〈虫朵〉三汊师古使赵镐拒战德宗遣使者谕武俊罢兵师古亦隳三汊听命尝怒其僚独孤造使奏事京师遣大将王济缢杀之贞元末进同中书门下平章事德宗崩师古幸国丧欲攻掠州县勒兵出次闻顺宗立乃罢累加检校司徒兼侍中元和初死赠太傅

李师道

师道师古异母弟也师古尝曰是不更民间疾苦要令知衣食所从乃署知密州师古病召高沐李公度等问谁嗣二人未对师古曰岂以人情属师道邪虑覆吾宗及死沐公度与家奴卒立之请于朝制久不下师道谋裒兵守境沐争止更上书奉两税守盐法请重朝廷宪宗方诛刘辟未遑东讨命建王审领节度大使以师道知留后加检校工部尚书为副大使自正

已以来虽外奉王命而啸引亡叛严法持下所付遣必
质妻子有谋顺者夷其家故能胁汗士众传三世云帝讨蔡诏兴诸道兵不及郢师道选
卒二千抵寿春阳言助王师实欲援蔡亡命少年为师
道计曰河阴者江淮委输河南帝都请烧河阴敖库募洛壮士劫宫阙即朝廷救腹心疾
此解蔡一奇也乃遣客烧河阴漕院钱三十万缗米数
万斛仓百余区又有说师道曰上虽志讨蔡谋皆出宰相而武元衡得君愿为袁盎事后
宰相必惧请罢兵蔡围解矣乃使人杀元衡伤裴度初
师道置邸东都多买田伊阙陆浑间以舍山棚遣将訾嘉珍门察部分之嵩山浮屠圆静
为之谋元和十年大飨士邸中既衷甲矣其徒百官留
守吕元膺以兵掩邸贼突出转略畿部入山中数月夺山棚所市山棚怒道官军袭击尽
杀之圆静者年八十余尝为史思明将骁悍绝伦既执
力士椎其胫不能折骂曰竖子折人脚且不能乃曰健儿因自置其足折之且死叹曰败
吾事不得见洛城流血留守防御将都亭驿吏皆阴受
师道署职故无知者又穷治嘉珍察乃害武元衡者 【按盗杀武元衡事新书于元衡传
两载张晏门察訾嘉珍之狱王承宗传及此传分系
而无定辞通鉴又载田宏正入郢阅师道簿书有赏杀武元衡人王士元等考张晏之诛
张宏靖即疑其不实王士元等之鞠虽款服而物色异
同即云恒郢同谋而真贼究无左验史家分纪固属疑以传疑亦以见唐失政刑如此大
事不加穷治■〈萧页〉殒了狱则其它之不足扶奸
谋而申国宪者多矣】 盐铁使王播又得嘉珍所藏弓材五千并断建陵戟四十七始师
道欲知元济虚实使刘晏平间道走淮西晏平归以为
元济必败师道本倚蔡闻之怒以它事杀晏平及闻李光颜拔凌云棚始大惧遣使归顺
帝重分兵支两寇命给事中柳公绰慰抚之加检校司
空蔡平又遣比部员外郎张宿讽令割地质子师道乃纳三州遣子宏方入侍宿既还师
道中悔召诸将议皆曰蔡数州战三四年乃克公今十
二州 【按通鉴考异云李正己初据十五州李纳拒命徐州归朝廷德棣二州入于朱滔
有十二州而已】 何所虞大将崔承庆独进曰公初
不示诸将腹心而委以兵此皆嗜利者朝廷以一浆十饼诱之去矣师道恚遣承度诣京
师戒侯吏待其还斩之承度待命客省不敢还帝以其
负约用左散骑常侍李逊喻旨既至师道严兵以见逊责以背约师道懦暗不自决私奴
婢媪争言先司徒土地奈何一旦割之今不献三州不
过战耳即不胜割地未晚师道乃以军不协为解帝怒削其官诏诸军进讨武宁节度使
李愿使将王智兴破其众斩二千级获马牛四千略驰
至平阴横海节度使郑权战福城斩五百级武宁将李佑战鱼台败之宣武节度使韩宏

拔考城淮南节度使李夷简命李昕趋海州下沐阳胸
山进戍东海魏博节度使田宏正身将兵自阳刘济河拒郢四十里而营再接战破三万
众禽三千人陈许节度使李光颜攻濮阳收斗门杜庄
二屯宏正又战东阿残其众五万师道每闻败辄悸成疾及李佑取金乡左右莫敢白师
道遣将刘悟屯阳谷当魏博军疑其逗遛悟惧不免引
兵反攻城师道晨起闻之白其嫂裴曰悟兵反将求为民守坟墓即与宏方匿溷间就禽
之师道请见悟不许复请送京师悟使谓曰司空今为
囚何面目见天子犹俯仰祈哀宏正曰不若速死乃并斩之传首京师初师古见刘悟曰
后必贵然败吾家者此人也田宏正之度河也禽其将
夏侯澄等四十七人诏悉赦之给缁絮还隶魏博义成军父母在欲还者优遣贼皆感慰
相告由是悟得行其谋师道首传宏正营召澄验之澄
舐目中尘号绝良久悟素与师道妻魏乱妄言郑公征之裔不死没入掖廷它宗属悉远
徙悟独表师古子明安为朗州司户参军亲将王承庆
承宗弟也师道以兄女妻之潜约左右欲因肆兵执师道会悟入出奔徐州归朝

△程日华 【程怀直 程怀信 程权】

程日华定州安喜人始名华德宗以其有功益曰日华父元皓为安禄山定州刺史
故日华籍本军为张孝忠牙将沧故成德部州也德宗
以畀义武前刺史李固烈牢守孝忠令日华往喻之固烈请还恒州悉帑以行军中怒杀
固烈屠其家日华惊匿床下将士出之逼领州孝忠亦
以日华宽厚遂假以刺史朱滔叛兵屯河间沧定道阻滔招日华不纳攻之日华乘城自
固参军事李宇谋曰城久围府兵不为援今州十县濒
海有鱼盐利自给此军本号横海将军能绝易定归天子自为一州可亢盗喉襟能用仆
计请至京师为天子言之日华乃遣宇西帝果大喜拜
御史中丞沧州刺史复置横海军即以为使时建中三年也拜检校工部尚书诏沧岁馈
义武钱十二万缗粮数万斛以宇为判官武俊欲得沧
遣人说日华归已日华给曰敝邑为贼攻力屈则下之愿假骑二百抗贼贼退请以地授
公武俊喜归之马日华留马谢其使武俊大怒与滔方
睦惧有怨乃止久之武俊归命日华乃还马以珍币厚谢复结好武俊亦释然贞元二年
卒赠兵部尚书子怀直擅知留事帝以日华故拜权知
沧州刺史宇入朝愿析东光景城二县置景州且请刺史河朔刺史不廷授几三十年帝
嘉其志以徐申为景州刺史升横海军为节度擢怀直
为留后明年为使九年来朝进检校尚书右仆射怀直荒田猎出辄数日不返帐下程怀
信其从昆也闭门不纳乃入朝帝不罪更以虔王为节
度使擢怀信留后以怀直兼右龙武军统军明年怀信为节度矣十六年怀宜卒赠扬州

大都督后五年怀信死子权袭领军务诏授留后元和元年拜节度使累进检校兵部尚书封邢国公六年入朝加检校尚书右仆射权始名执恭尝梦沧诸门悉署权字乃改名以应之及淮西平惕不安丐入朝固辞军政诏华州刺史郑权代之后以检校司空为邠宁节度使卒赠司徒宗族奉朝请宿卫者三十余人

△李全略 【李同捷】

李全略本王氏名日简事王武俊为偏裨承宗时入朝授代州刺史田宏正遇害穆宗以全略故镇州将召问全略多陈利害冀合帝意宜请尽死报遂授德州刺史时杜叔良败博野故以全略为横海军节度沧德棣州观察使赐今姓名未几使子同捷入朝既还即奏为沧州长史押中军兵马帝不得已可其请全略阴规传久选材武结士心棣州刺史王稷善抚众而家富于财全略内忌计杀之族其家未几死同捷领留后事求节敬宗持久诏不下俄而文宗立同捷以帝新嗣位必大开贷示四方乃遣弟同志同巽入朝使属崔长奉表请命诏拜兖海节度使以乌重允代同捷计穷矫言军中留己于是王智兴请全军出讨魏博史宪诚令大将传手诏入于军同捷不受诏削官爵命重允率郛齐兵进讨宪诚智兴及汴滑李昕平卢康志睦易定张璠幽州李载义以兵博境同捷自以与成德有旧乃倾玉帛子女市河北三镇驩载义执使者献诸朝王廷湊本窥横海欲乘隙取之引军来援智兴攻棣州引水灌城凡七月其将张叔连降始刺史栾蒙以同捷叛密上变事泄为所害赠工部尚书智兴进围沧州是时帝且讨王廷湊兵须伙繁置供军粮料使以济两河诸将多张俘首冒赏自重允卒后李寰傅良弼不终事更以左金吾卫大将军李佑代智兴将李君谋以轻兵绝河夜残无棣降饶安壁兵五千明年佑拔无棣平原诏行营坚壁务农非被袭勿决战而佑兵已薄德州帝遣谏议大夫柏耆宣慰佑拔德州同捷益急乞降佑疑其诈耆引兵直入城取同捷及家属驰西佑入沧州耆至将陵斩同捷传首京师诏贷四州一年租赋赦同捷母并妻息徙河南流崔长商州同巽等以异母贷死

钦定续通志卷二百七十九

●钦定续通志卷二百八十

列传

唐 【八十】

○唐八十 藩镇宣武彰义泽潞

刘元佐【士奩】 吴少诚【少阳元济】 刘悟从【谏稹】

刘元佐 【刘士宁】

吴少诚

刘悟 【刘从谏 刘稹】

△刘元佐 【刘士宁】

刘元佐滑州匡城人少为县捕盗犯法亡命从永平军为牙将大历中李灵曜据汴州反元佐袭取其宋州诏以州隶永平节度使李勉即表署刺史建中初进兼御史中丞充宋亳颖节度使李纳攻李洧于徐州诏元佐援洧大破纳兵斩首万余级东南饷漕乃通进围濮州徇濮阳皆下遂通濮阳津迁检校兵部尚书兼曹濮观察淄青兖郛招讨使汴滑都统副使李希烈之反元佐与李勉陈少游哥舒曜联兵屯淮汝数困贼帝在奉天垂意关东乃诏检校尚书左仆射同中书门下平章事希烈攻陈州元佐救之希烈走遂进取汴州诏加汴宋节度使陈州诸军行营都统元佐本名洽至是赐名入朝复兼泾原四镇北庭兵马副元帅检校司徒元佐贵母尚在常月织紵一端示不忘本数教敕元佐尽臣节见县令走廷中白事戒曰长吏恐惧卑甚吾思而父吏于县亦当尔而据案当之可安乎故元佐待下益加礼汴有相国寺或传佛躯汗流元佐自往大施金帛将吏商贾走输恐后籍所入得巨万因以贍军其权譎类若此李纳遣使至汴元佐盛饰女子进之厚馈遗皆得其阴谋故纳最恇之所宠吏张士南及假子乐士朝货皆巨万而士朝私元佐嬖妾惧事觉酖元佐死年五十八赠太傅谥曰庄武军中匿丧俟代帝亦为隐踰三日乃发丧使至帝问所欲立曰陕虢观察使吴凑可乎监军孟介行军卢瑗以为便乃拜凑为节度使至泛水元佐枢将遣士请具礼瑗不许众怒而噪起元佐子士宁于丧尊为留后帝召宰相议窦参曰汴人挟李纳以邀命若不许势且合遂以士宁为左金吾卫将军嗣节度始元佐养子士干与士朝皆来京师士干知元佐死无状遣奴持刀给为吊入杀士朝于次帝恶其专亦赐士干死士宁未授诏时私遣人结王武俊刘济田绪等诸镇不直之皆执其使士宁忍暴手杀人杯案间又强烝父诸妾逼乱吏民妻女每畋猎数日乃还其下厌苦大将李万荣与元佐同里宽厚得士心士宁引众二万畋城南未还万荣晨入府分兵闭诸门使告士宁曰诏书召大夫宜速去不然且传首士宁奔京师诏就第禁出入拜万荣兵马留后遣兵西防秋兵素骄当戍者怨大校韩惟清张彦琳等请往不许使其子乃将未行彦琳等反攻万荣不胜而溃惟清奔郑州彦琳走东都万荣悉诛其妻子众不安乃呼于市曰大军至城且破万荣捕按之或言为士宁所教万荣以闻斥士宁置郴州俄进万荣节度

使会病甚以兵属邓惟恭惟恭者与万荣同里闰而署子乃为司马万荣死是夜惟恭执乃送京师杖死京兆府以董晋代之

△吴少诚

吴少诚幽州潞人以荫官诸王府户曹参军事为荆南节度使庾准牙门将从入朝道襄阳度梁崇义必叛密画计将献天子李希烈以闻诏嘉美擢封通义郡王崇义反希烈以为前锋事平赐实封户五十希烈叛少诚为尽力及死推陈仙奇主后务既又杀之众乃共推少诚德宗因授申蔡光等州节度观察留后自希烈以来申蔡人劫于苛法习暴掠地少马乘骡以战号骡子军尤悍锐甲皆画雷公星文以厌胜其属郑常杨冀欲劫逐少诚以听命不克被害贞元五年进拜节度使曲环卒少诚间陈许无帅以兵攻临颖围许州德宗怒削官爵合十六道兵进讨于颍以襄阳兵战吴房朗山禽其三将王宗以寿州兵破贼于秋栅时师众无统帅而宦人监军颡进退互为异见既战小澱河诸道师未交而溃乃诏韩全义为淮蔡招讨处置使上官浚副之诸将皆受节度与贼吴少阳等战广利城师复败退营五楼为贼所乘遂大溃全义及监军贾英秀等夜遯保澱水汴宋徐泗淄青兵走陈州少诚薄澱水而营全义惧退保陈而潞滑河阳河中兵逃归惟陈许将孟元阳神策将苏光荣壁澱水全义乃斩潞将夏侯仲宣滑将时昂河阳将权文度河中将郭湘欲以振师不能也少诚引还全义之败少诚得帐中诸公书数百番持以给众曰朝廷公卿托全义破蔡日掠将士妻女为婢媵以激怒其众绝向顺意少诚弱王师移书于英秀求昭雪帝召大臣议宰相贾耽曰五楼军退而少诚卷甲不追有自新路剑南韦皋上言请择重臣为统帅因荐浑瑊贾耽陛下若重烦元老臣请以锐士万人顺流以翦元慙不然因其请罪特加原洗罢两河诸军亦其次也使少诚祸盈恶周变生帐下必其贼党又当以官爵与之则一少诚死一少诚生亦何足赖帝遂赦少诚尽还其官爵顺宗即位进同中书门下平章事检校司空徙封濮阳郡王元和四年死赠司徒而吴少阳代之

吴少阳 【吴元济】

吴少阳 【吴元济】

少阳者沧州清池人与少诚同在魏博军相友善少诚养以为弟署右职少阳度少诚猜忍请为外捍少诚乃表为申州刺史少诚病亟家奴单于熊儿矫召少阳至摄副使总军事于是杀少诚子元庆自称留后宪宗以王承宗方叛诏遂王为节度使以少阳领留后进拜节度使益畜马劫掠招亡命以实其军不肯朝然屡献牧马以自解帝亦因善之九年死子元济匿

不发丧以病闻伪表请元济主兵遣医往视即阳言少
愈不得见有董重质者少诚壻勇悍久将善为兵元济倚之先是其属苏兆杨元卿侯惟
清尝劝少阳入朝元济缢兆归其尸而囚惟清元卿奏
事在长安具言其事帝以二人者皆死赠惟清兵部尚书兆尚书右仆射少阳死四十日
帝不为辍朝易将增戍以须变会传言重质族杀元济
吉甫因请为少阳辍朝遣使赙赠元济不得命乃悉兵四出焚舞阳及叶掠襄城阳翟剽
系千余里吊使至弗克入诏乌重允兼汝州刺史引军
压其境盩州刺史曹华为之副戍襄城李光颜为忠武节度使总兵临屯析山南东道诏
节度使严绶为申光蔡等州招抚使下诏夺元济官爵
趣诸道进讨田宏正韩宏各遣子率兵隶绶光颜军绶屯蔡西鄙小胜不设备为贼袭败
于慈邱退保唐州寿州刺史令狐通战数北贼乃拔霍
邱屠马塘通婴城不敢出诏左金吾卫大将军李文通代通会裴度辅政贼始惧而元济
不能指授诸将赵昌凌朝江董重质李佑李宪王览赵
晔王仁清等以便宜人自为战抗王师李师道馈盐出入盩陵雍邱间韩宏知而不禁文
通与贼将王览董重质战史蒺冈馘览光颜大破贼于
时曲复与重允合击贼小浍河败之天子责绶失律更以韩宏兼都统擢高霞寓唐邓隋
节度使十一年诸军大合光颜壁掌河文通败贼于固
始拔■〈金敖〉山霞寓战朗山斩首千余级次铁城贼伪奔霞寓穷追伏发死伤略尽
退保新兴贼围之监军李议诚驰救围解还守唐州元
济以霞寓不足虞并兵备陈其秋文通以兵衔枚夜出九女原屠保壁三十所分兵西北
并安阳山破降万余执两将光颜败郾城兵二万俘大
将复与重允合攻凌云栅拔之帝怒诸军无大功诏内常侍梁守谦宣慰因督战付诏书
五百以待有功斥金帛募死士进拜光颜检校尚书左
仆射重允右仆射度御史中丞韩宏子公武御史大夫贬霞寓以袁滋代之滋懦不能军
十二年更以李愬为唐邓隋节度使元济食尽士卒食
菱芡鱼鳖皆竭至斲草根以给民四溃侨置郾城吴房于行营以绥新附愬攻其西破屯
栅十余执丁士良吴秀琳贼帅张伯良以兵三万与光
颜战郾城大败奔还蔡曹华取青陵城断郾归路贼将邓怀金送款愬又袭破朗山执戍
将梁希果平汶港等三壁元济知众数溃而外失秀琳
等因奉表请束身北阙下帝许以不死元济取行营马三百董重质不与故不果降愬略
兴桥得守将李佑不杀引至帐下计议始谋袭蔡自少
诚盗蔡四十年王师未尝傅城下又尝败韩全义于颍以是无所惮内恃陂浸重阻故合
天下兵攻之三年纔克一二县帝命裴度为彰义节度
兼申光蔡四面行营招抚使梁守谦与诸将计先度未至立功诸将亟战不胜度至大劳

将士皆感激请战光颜每战冠军故元济悉众亢时曲佑为愬谋曰蔡之守者市人疲卒耳劲兵皆在外若直捣县瓠贼成禽矣愬然之十月壬申以精骑夜袭蔡坎垣入之戍者不知贼恃重质兵在洄曲不虞师至及愬攻内城元济始惊被甲乘城以待重质会重质降愬而李进诚取贼库兵即攻之明日【按此元和十二年十月十六日也新书原文上不纪年月但书明日未晰又纪书十二年十月癸酉李愬传书十一年十月己卯吴缜纠之今考平淮西碑及通鉴考异补识年月于前】烧其门民相率抱薪增火门坏执元济举族传之长安帝御兴安门受俘羣臣称贺以元济献库社徇于市斩之年二十五夜失其首妻沉没入掖庭二弟三男子流江陵皆杀之斩其属刘协庶赵晔王仁清等十余人度还以马总为留后俄拜节度使析浚州隶陈许始度之出太子右庶子韩愈为行军司马帝美度功即命愈为平淮西碑愈以元济之平繇度能固天子意得不赦故诸将不敢首鼠卒禽之多归功度而愬特以入蔡功居第一愬妻唐安公主女也出入禁中诉愈文不实帝重轶武臣心诏斲其文更命翰林学士段文昌为之【按罗隐江东集有记石烈上一篇载李愬给事人石孝忠推碑见帝诉愈文不实与此不同】李佑以功迁神武将军后擢夏绥银宥节度使终沧德景节度使检校尚书左仆射帝迹董重质教元济乱欲诛之而李愬先许不死故贬春州司户参军凌朝江播州司户参军是岁申蔡州始输贡户部以其久不至请元日陈于廷

△刘悟【刘从谏 刘稹】

刘悟正臣孙也【按正臣事已见全谅传吴缜纠其丛复今删】叔父全谅节度宣武署牙将以罪奔潞州王虔休复署为将被病还东都全谅积缗钱数百万在焉悟破滕鏞用之犯法系河南狱留守韦夏卿贷兔李师古厚币迎之从击球撞师古马仆将斩之悟盛气不慑师古奇其才令将后军妻以从媚历牙门右职师道被讨使将兵屯曹田宏正兵屯阳谷悟营潭赵城中飞语悟当为帅师道内疑数召悟计事悟曰今与魏如角力者势已交先退者负悟还魏踵薄城下矣左右谏曰兵成败未可知杀大将孰肯为用师道然之或言悟且乱师道遣使责战密语其副张暹使斩悟暹以情告悟乃斩使者召诸将曰魏博兵强出则败不出则死且天子所诛司空而已吾属为驱迫就死地孰若还兵取郛立大功转危亡为富贵乎众皆唯唯因遣报宏正使进兵潭赵悟夜半薄西门黎明启而入杀师道并大将魏铤等数十人即拜悟义成节度使封彭城郡王实封户五百元和十五年来朝进检校兵部尚书穆宗立徙昭义军先克融

乱移守卢龙至邢州会王廷凑之变不得入还屯进兼
幽镇招讨使治邢州围临城观望久不拔与监军刘承偕不协承偕与都将张问谋缚悟
送京师以问代悟知之以兵围监军杀小使其属贾直
言质责悟曰李司空死有知使公所为至此军中将复有如公者矣悟遽谢曰吾不欲闻
李司空字即搆兵退匿承偕囚之 【按吴缜纠谬云
都将张问贾直言传作慈州刺史张汶未知孰是又贾传称悟因直言谏能以臣节光明
于朝誉直言遂并誉悟失其实矣悟骄悍性成安知感
悔当以此传所书为正】 帝重违其心贬承偕悟自是颇专肆上书多不恭负罪亡命者
多归之强列其冤累进检校司徒同中书门下平章事
宝历初巫者妄言师道以兵屯琉璃陂悟惶恐自往求哀将易衣呕血数斗死赠太尉表
其子从谏嗣从谏少狡狴师道使悟出屯署从谏门下
别奏从谏与师道诸奴日戏博交通具知阴事疏于悟故悟得立功悟死从谏知留后赂
当权者朝议谓上党内镇与河朔异不可许左仆射李
绛言悟匿死众不必同乱从谏威惠未着若诏北镇大将领节度驰入军谋自屈矣时李
逢吉王守澄纳其赂数为请敬宗乃以晋王为节度大
使诏从谏主留事起将作监主簿检校左散骑常侍未几拜节度使太和初李听败馆陶
走浅口从谏救之得免进检校尚书左仆射拜司空封
沛国公昭义自悟时治邢州而人思上党从谏还治潞方年壮思立功六年请入朝文宗
待遇加等明年还藩进同中书门下平章事公卿多托
以私又见事柄不一遂心轻朝廷及甘露事宰相皆夷族从谏不平三上书请王涯等罪
讥切中人时宦竖得志天子弱郑覃李石新执政藉其
论执以立权纲中人惮而怨之仇士良倡言从谏志窥伺从谏亦妄言清君侧因与朝廷
猜贰武宗立兼太子太师从谏畜马高九尺献之帝不
纳疑士良所沮怒杀马益不平又闻士良宠方渥愈忧惑欲自入朝恐不脱祸因被病死
年四十一赠太傅从子稹父从素仕右骁卫将军从谏
以为嗣病甚与妻裴谋令主军事置大将王协郭谊刘武德刘守义等佐稹秘不发丧协
谋请医于朝中人与医至从谏死已再旬稹曰公困革
不任受诏中人曰卧而视可也辞以母夫人侍不可屏中人欲直入武德等户之中人恐
其变趋出后使者继任为知从谏已死者未至数舍众
惧武德与将董可武出兵万人迎劳至牙门不得前诸将乃诣监军崔士康邀说请如河
朔故事士康懦不敢拒乃至丧次扶出稹为裹绝巾曰
毋更欲杀敕使诸将哄然笑遂出见三军帝怒前使者不入谪隶恭陵稹所遣使三辈皆
仗死京兆府诏从素书敕稹护丧还东都稹不奉诏诏
羣臣议李德裕请讨之诏夺从谏稹官敕诸军进讨于是河阳王茂元以兵屯万善河东

刘沔守昂车关壁榆社魏博何宏敬柵肥乡侵平恩成
德王元逵次临洺略任尧山向城河中陈夷行营冀城侵冀氏茂元别遣将营天井关为
贼将薛茂卿所破张巨进攻万善不能下茂元欲走会
日暮贼自溃去诏忠武王宰以本军入怀泽行营茂卿负战胜冀厚赏或言其兵犯王略
深朝廷且怒节益不可至稹然之茂卿失望乃与宰通
伪北委天井关奔泽州使谍告宰取泽吾应于内宰疑不进稹闻其贰召诛之宰进破刘
公直拔陵川刘沔又取石会关李石代沔领河东稹因
石兄洺州刺史恬移书乞降石以闻右拾遗崔碣请纳之帝怒斥碣邓城令诏敢言罢兵
者戮贼境上令石答书许稹面缚稹不出俄而杨弁逐
石与稹连和稹诸将建议我求承袭彼叛卒若与之是与反者械其使送京师使康良佺
屯鼓腰岭败太原兵生禽卒七百帝犹不赦始从谏将
死命稹无笞辱羣奴故李士贵等与王协尤用事士有功不赏下无鬪志府中财货山积
而协请税商人使刘溪等分出检实溪并取齐民贖十
二百姓始怨从谏妻弟裴问守邢州募兵五百号夜飞将多豪姓子其家以输贖不时为
溪所囚问以为言溪大怒问因杀溪与刺史崔嘏自归
成德军王钊守洺州给士■〈此上巾下〉布一端稹檄代岁禀钊谓众曰库物尚多欲
发以为赏可乎士皆喜悉所有给之送款魏博军磁州
将高玉尧山将魏元谈等以次降成德元逵以久为贼守杀之稹闻三州降大惧郭谊与
王协议图稹使董可武诱稹至北第置酒饮酣即斩首
悉取从谏子在襁褓者二十余并从子积匡周等杀之诛张谷张沿陈杨庭李仲京王渥
王羽韩茂章茂实贾庠郭台甄戈十一族夷之函稹首
送王宰献京师告庙社御兴安门受之刘公直亦降于宰石雄以兵守境军大掠谊移书
责之雄衔怒稹之死谊斥从谏妻伏夹室私收其贖建
大厩日望旌节宰相德裕建言稹庸下乱繇谊始及穷蹙乃图稹邀荣不诛无以惩宜及
兵在境悉取逆党送京师论如法先是有狂人呼于潞
市曰石雄七千人至矣从谏捕诛之乃请诏雄率兵如数以入雄至潞缚谊及王协刘公
直安全庆李道德李佐尧刘武德董可武等送京师并
诛死杖崔士康杀之诏从谏且死乃署稹军事宜剖棺暴尸三日谊兖州人 【按新书原
文载从谏目尚开及郭谊兄岌葬地事文类说家无
关劝惩今删】 张谷张沿陈扬庭皆有文谷纳邯鄲人李严女为侍人号新声当从谏潜
图窥胁新声谏谷曰从谏非有战野攻城功直以其父
挈齐十二州还天子未能夺其嗣耳自有泽潞未闻以一缕一蹄为天子寿章武朝数镇
颠覆皆雄才杰器尚不能固天子恩况从谏擢自儿女
手中苟不以法得亦宜以不法终君当脱族西去大丈夫勿顾一饭恩以骨肉腥健儿食

谷畏言泄縊之李仲京训兄王渥播子王羽涯族孙韩茂章茂实约子贾庠餗子郭台行余子甘露难作皆羸服奔从谏从谏衣食之甄戈者颇任侠自称荆卿从谏与定州戍将有嫌命戈斩其首他日又使取仇人乃十余辈劫之从谏不悦号伪荆卿从谏妻裴以弟立功诏贷其死刑部侍郎刘三复执不可于是赐死【按新书原文载裴氏劝从谏入朝为子孙计上文裴与从谏谋令稹主军劝夫忠顺陷子不载且此时独不知为子孙计耶自相矛盾今删】有李佐之者兼孙也累调河南尉客潞从谏留署观察府支使因娶其从祖妹从谏病佐之力讽使还东都从谏虽不能从然感服其言病且革王協等恐佐之妻母有所关说即鞬母归东都会佐之奴告佐之漏军中虚实稹杀之武乡令唐汉宾俭裔孙以稹拒命固请归朝不听举族见害李师晦者本宗室子悟辟致幕府见从谏稍恣横假言求长生术不与事从谏使归东都师晦惧潜请居涉从谏不之疑稹败有为帝言者擢伊阙令而赠薛茂卿博州刺史大中初又赠汉宾本县令先时河北诸将死皆先遣使吊祭次册赠次近臣宣慰度军便宜乃与节军中不许出乃用兵不半岁不能定故得为备稹初不意帝怒即见讨及茂元录诏示稹举族号恟欲自归而愚懦不决云自悟至稹三世凡二十六年季丕者善长短术与从谏厚善署大将及稹阻命军中疾其才丕惧乞为游弈遂自归议者疑为贼遣德裕奏言讨贼半年始有降者当赏以劝擢忻州刺史杨弁乱遣人诱丕丕斩之以兵扼走集迁汾晋二州刺史大中初拜振武节度使检校刑部尚书党项叛徙鄜坊卒

钦定续通志卷二百八十

●钦定续通志卷二百八十一 列传八十一

列传

五代【一】

○五代一

敬翔	朱珍	庞师古	葛从周	霍存	张存敬
符道昭	刘捍	寇彦卿	康怀		

英

敬翔

朱珍

庞师古

葛从周

霍存

张存敬
符道昭
刘捍
寇彦卿
康怀英
△敬翔

敬翔字子振同州冯翊人干符中举进士不中依同里人汴州观察支使王发发无所荐引翔为人作笺刺传军中太祖爱之谓发曰闻君有故人可与俱来翔见太祖补以军职非其所好乃以为馆驿巡官太祖与蔡人战汴郊翔为太祖谋多中太祖欣然以为得翔晚动静辄问之昭宗自岐迁长安召翔与李振升延喜楼劳之拜翔太府卿昭宗迁洛阳宴崇勋殿酒半起使人召太祖入内殿将有所托太祖惧辞以疾昭宗曰卿不欲来可使敬翔来太祖遽麾翔出翔亦佯醉去太祖已破赵匡凝取荆襄遂攻淮南翔切谏以为新胜之兵宜持重养威太祖不听出兵光州遭大雨几不得进进攻寿州不克多所亡失太祖始大悔归而忿躁杀唐大臣几尽然益以翔为可信任梁之篡弑翔之谋为多太祖即位改唐枢密院为崇政院以翔为使迁兵部尚书金銮殿大学士封平阳郡侯 【据薛史增】 翔从太祖用兵三十余年尽心勤劳昼夜不寐自言惟马上乃得休息太祖刚暴难近有不可翔未尝显言微开其端太祖意悟多为之改易太祖破徐州得时溥宠姬刘氏爱幸之刘氏故尚让妻也乃以妻翔翔贵刘氏犹侍太祖卧内车服骄侈别置典谒交结藩镇权贵往往附之宠信言事不下于翔翔以太祖故虽患之而不能止太祖崩友珪立以翔先帝谋臣惧图己不欲翔居内职乃以李振代为崇政使拜翔中书侍郎同中书门下平章事翔多称疾未尝省事末帝即位赵岩等用事颇离间旧臣翔愈郁郁不得志其后梁尽失河北与晋相拒杨刘翔曰故时河朔半在以先帝之武御貔虎之臣犹不得志于晋今晋曰益强梁日益削陛下处深宫中所与计事者皆近习亲戚而望成事乎臣闻晋攻杨刘李亚子负薪渡水为士卒先陛下委蛇守文以儒雅自喜而遣贺坏为将岂足当彼余锋乎臣虽惫受国恩深若其乏材愿自效岩等以翔为怨言遂不用王彦章败于中都末帝惧召段凝于河上凝顾望不来末帝遽呼翔曰朕居常忽卿言今急矣勿以为忤卿其教我当安归翔曰臣从先帝三十余年虽为相实朱氏老奴事陛下如郎君敢有所隐陛下初用段凝臣已争之今凝不来敌势已迫欲为陛下谋小人间之必不见听请先死不忍见宗庙之亡君臣相向恸哭翔与李振

俱为太祖所信任庄宗入汴诏赦梁羣臣振喜谓翔曰有诏洗涤将朝新君邀翔俱翔夜止高头车坊将旦左右报曰崇政李公入朝矣翔数曰李振谬为丈夫矣复何面目入梁建国门乎乃自经死

△朱珍

朱珍徐州丰人少与庞师古等俱从梁太祖为盗太祖镇宣武珍为太祖创军制选将练兵甚有法梁败黄巢破秦宗权东并兖郓未尝不在战中勇出诸将太祖与晋王东逐黄巢还过汴馆之上源驿太祖使珍夜以兵攻之晋王亡去珍悉杀其麾下兵义成军乱遣珍以兵趋滑州道大雪趣兵疾驰一夕至城下拔之秦宗权遣卢瑋张晁等攻梁时梁兵少数为宗权所困乃拜珍淄州刺史募兵于淄青得万余人以归太祖大喜曰贼方息兵养勇度吾兵少不出而未知珍来宜出其不意击之败晁等宗权由此败亡梁军威大振以得珍兵故也珍从太祖攻朱宣取曹州又取濮州刺史朱裕奔郓太祖留珍攻之裕诈为降书阴约开门为内应珍信之军入瓮城垂门发郓人从城上礮石投之兵皆死珍仅以身免太祖不之责魏博军乱囚乐彦贞太祖遣珍救魏珍破黎阳临河李固三镇杀魏豹子军二千于临黄威振河朔梁攻徐州珍先下丰县又败时溥于吴康与李唐宾等屯萧县唐宾者陕州陕人也初为尚让偏将降梁每战与珍俱珍小却唐宾佐之乃大胜珍尝私迎家军中太祖遣唐宾伺之珍与唐宾不协唐宾夜走还宣武珍单骑追之交诉太祖前太祖为和解之珍屯萧闻太祖将至戒军中治馆廐唐宾步将严郊治廐失期军吏督之郊诉于唐宾唐宾以让珍珍怒拔剑起唐宾拂衣就珍珍即斩之遣使者告唐宾反太祖大惊敬翔为太祖画佯收唐宾妻子下狱因如萧珍迎谒遂执之诸将霍存等十余人叩头救珍太祖大怒举胡床掷之曰方珍杀唐宾时独不救之耶存等退珍遂缢死

△庞师古

庞师古曹州南华人初名从梁太祖镇宣武初得马五百匹为骑兵以师古将之从破黄巢秦宗权皆有功太祖攻时溥未下留兵属师古守之师古取宿迁进屯吕梁败其兵二万孙儒逐杨行密取扬州太祖遣师古渡淮攻儒为儒所败是时朱珍李唐宾已死师古与霍存分将其兵梁攻徐州太祖夺彬王友裕兵以属师古师古攻破徐斩溥表为徐州留后 【按文苑英华有授庞从武宁平南节度使制非留后也薛史亦作使而欧史通鉴皆作留后当从文苑英华及薛史为是】 攻郓州临济水师古彻木为桥夜先济朱宣走中都见杀太祖已下兖郓乃遣师古与葛从周攻杨行密于淮南师古出清口从周出安丰师古自微时事太祖谨甚未尝

离左右为将必受方略以行军中非太祖命不妄动师

古营清口地势卑或请就高为栅师古以非太祖命不听淮人决水浸之请者告曰上流水至矣师古以为摇动士卒立斩之已而水至兵不能战遂见杀

△葛从周

葛从周字通美濮州鄄城人少从黄巢巢败降梁从太祖攻蔡州太祖坠马从周扶太祖复骑与敌步鬪伤面身被数创偏将张延寿从旁击敌乃得脱太祖用从周延寿为大将从周与秦宗权战于焦夷获其将王涓从朱珍收兵淄青功为多李罕之召晋兵攻张全义于河阳太祖遣从周丁会等救之败晋兵于沅河潞州冯霸杀晋守将李克恭以降梁太祖遣从周入潞州晋兵攻之从周走河阳太祖攻魏从周与丁会先下黎阳临河会太祖于内黄败魏兵于永定桥从丁会攻宿州以水浸其城破之太祖攻朱瑾于兖州未下留从周围之瑾闭壁不出从周诈去夜潜还擒杀千余人晋攻魏太祖遣侯言救之言筑垒洹水太祖怒言不出战遣从周代言从周益闭垒不出而凿三閤门以待晋兵攻之从周以精兵自閤门出击败之晋王怒自将击从周从周虽大败而擒晋王子落落从攻郢州擒朱宣于中都又攻兖州建朱瑾太祖表为兖州留后以兖郢兵攻淮南出安丰会庞师古于清口行至濠州闻师古死遽还将渡溲河淮兵追之亦大败是时晋兵出山东攻相卫太祖遣从周略地山东五日而下洺邢磁三州太祖表兼邢州留后刘仁恭攻魏屠贝州从周会太祖救魏入于魏州燕兵攻馆陶门从周以五百骑出使闭门而后战破其八栅燕兵走追至临清拥之御河溺死者甚众太祖以为宣义行军司马太祖遣从周攻刘守文于沧州仁恭以燕兵援守文监军蒋晖语诸将曰燕兵来不可迎战宜纵其入城聚食仓廩使两困而后取之诸将颇以为然从周怒曰兵在上将岂监军所得言且胜败之机晖岂足以知之乃勒兵逆战于老鸦堤大败燕军时守文亦求救于晋晋为攻邢洺以牵之从周遽还败晋兵于青山口遂从太祖攻镇州下临城王镕乞盟太祖表为泰宁军节度使从氏叔琮攻晋太原不克梁兵西攻凤翔青州王师范遣其将刘鄩袭兖州太祖还遣从周攻鄩卒招降之太祖即位拜左金吾卫上将军以疾致仕居偃师末帝即位拜昭义军节度使封陈留郡王食俸于家卒赠太尉

△霍存

霍存洺州曲周人少从黄巢巢败降梁骁勇善骑射秦宗权攻汴存连破张晷秦贤从朱珍掠淄青庞师古攻时溥皆有功朱珍李唐宾死

乃以庞师古代珍存代唐宾以攻溥败之殒山又与葛从周丁会下宿州从攻潞州与晋人遇战马牢川存入则前出则殿晋人郗遂东攻魏取淇门梁得曹州以存为刺史兼诸军都指挥使梁攻郢州朱瑾求救存伏兵萧县击之败瑾等于石佛山存中流矢卒太祖已即位阅骑兵于繁台顾诸将曰使霍存在岂劳吾亲阅耶诸君盍复思之乎他日语又如此

△张存敬

张存敬谯郡人少事梁太祖为将李罕之攻张全义太祖遣存敬与丁会等救之罕之解围去以存敬为诸军都虞侯太祖攻徐兖以为行营都指挥使从葛从周攻沧州败刘仁恭于老鸦堤还攻王镕于镇州入其城取马牛万计迁宋州刺史复从诸将攻幽州取其瀛漠祁景四州梁攻定州与王处直战怀德驿大败之已下镇定乃遣攻王珂于河中下晋绛二州珂降太祖表存敬护国军留后复徙宋州刺史未至卒于河中赠太傅子仁愿有孝行存敬卒事其兄仁颖如事父礼尤晓法令事梁唐晋常为大理卿

△符道昭

符道昭蔡州人为秦宗权骑将宗权败依凤翔李茂贞茂贞养以为子名继远梁攻茂贞道昭战屡败乃归梁太祖表为秦州节度使以乱不果行太祖为元帅初开府而李周彝以鄜州降以为左司马难其右及得道昭乃授之罗绍威将诛其牙兵恶魏兵强求梁为助太祖乃悉发魏兵攻燕而遣马嗣勋助诛牙兵牙兵已诛魏兵在外闻之皆乱魏将左行迁据历亭史仁遇据高唐以叛道昭等从太祖悉破之道昭勇于犯敌而少成算每战先发多败周彝等继之乃胜开平元年与唐怀英等攻潞州筑夹城为蚰蜒塹以围之逾年不能下晋兵攻破夹城道昭战死

△刘捍

刘捍开封人事太祖为客将从朱珍募兵淄青太祖北攻镇州与王镕和遣捍见镕镕方严兵捍驰一骑入城谕意镕听命梁兵攻定州降王处直捍复以一骑入慰太祖围凤翔遣捍入见李茂贞计事唐昭宗召见问梁军中事称旨拜登州刺史梁兵攻淮南捍作浮桥以渡师拜宋州刺史太祖即位累迁左龙虎统军出为佑国军留后同州刘知俊反以赂诱捍将吏执捍去械送李茂贞见杀赠太傅

△寇彦卿

寇彦卿字俊臣开封人世事宣武军为牙将太祖以为通引官累迁右长直都指挥使领洺州刺史罗绍威将诛牙军太祖遣彦卿之魏计事彦卿阴为计划乃悉诛牙军彦卿善伺太祖意动作皆如旨太祖尝曰敬翔刘捍寇彦

卿皆天为我生之赐以所乘爱马一丈乌太祖围凤州以彦卿为都排阵使彦卿乘乌驰突阵前太祖目之曰真神将也【按通鉴开平二年帝从吴越王钱鏐之请以亳州团练使寇彦卿为东南面行营都指挥使击淮南袭霍邱又九国志朱景传亦载梁祖命寇彦卿率劲骑袭霍邱彦卿负神将名而传无军事可纪薛史亦失载谨补注于此】太祖迁唐都洛阳遣彦卿奉表迫驱上道【案五代史原文载迁都事甚详已见唐崔胤传此从其略盖通史不必复纪也】太祖即位拜彦卿感化军节度使岁余召为左金吾卫大将军充金吾衙仗使彦卿晨朝至天津桥民梁现不避道前驱摔投桥上石栏以死彦卿见太祖自首诏彦卿以钱偿现家御史司宪崔沂请论如法太祖不得已责授彦卿左卫中郎将复拜襄州防御使迁河阳节度使末帝即位徙镇威胜卒年五十七

△康怀英

康怀英【案通鉴作怀贞盖本名后避末帝讳改】兖州人事朱瑾为牙将梁兵攻瑾瑾出略食丰沛问留怀英守城怀英即以城降后从氏叔琮攻赵匡凝下邓州梁攻李茂贞于岐以为先锋至武功击杀岐兵万余人李周彝以鄜坊兵救岐怀英击走之因取其翟州岐兵屯奉天怀英栅其东北夜半岐兵攻之怀英不欲惊他军独以三千人出战迟明岐兵解去身被十余创杨行密攻宿州太祖遣怀英击走之表宿州刺史迁保义军节度使丁会以潞州叛降晋太祖命怀英为招讨使将行戒之甚切怀英惶恐期必得潞州以报筑夹城围之晋遣周德威屯乱柳数攻夹城怀英不敢出战太祖乃以李思安代降怀英为都虞侯思安亦无功太祖大怒罢思安以同州刘知俊为招讨使知俊未至军太祖自至泽州为怀英等军援且督之已而晋王李克用卒庄宗召周德威还太原太祖闻晋有丧德威去亦归洛阳诸将皆少弛庄宗与德威等疾驰六日伏兵三垂冈直趋夹城破之怀英大败以百骑遁归诣阙请死太祖曰去岁兴兵太阴亏食占者以为不利吾独违之而致败非尔过也释以为右卫上将军刘知俊叛奔岐以怀英为保义军节度使西路副招讨使知俊以岐兵围灵武太祖遣怀英攻邠宁以牵之取宁庆衍三州还至升平知俊掩击之遂大败徙镇感化讨朱友谦之叛与晋人战又大败徙镇永平卒

钦定续通志卷二百八十一

●钦定续通志卷二百八十二 列传八十二

列传

五代【二】

○五代二

刘鄩 牛存节 张归霸 王重师 徐怀玉 杨师厚
王景仁 贺瓌 王檀 马嗣勋
 王虔裕 谢彦章

刘鄩

牛存节

张归霸

王重师

徐怀玉

杨师厚

王景仁

贺瓌

王檀

马嗣勋

王虔裕

谢彦章

△刘鄩

刘鄩密州安邱人少事青州王敬武敬武卒子师范立棣州刺史张蟾叛师范遣指挥使卢洪讨蟾洪亦叛师范伪为好辞召洪至迎于郊外命鄩斩之坐上因使鄩攻蟾破之师范表鄩登州刺史以为行军司马梁太祖西攻凤翔师范乘虚分袭梁诸州县它遣者谋多泄不成独鄩素好兵书有机略时梁已悉有兖郛以葛从周镇兖州从周将兵在外鄩乃使人鬻油城中悉得虚实出入之所乃以步兵五百从城下水窦入袭破之徙从周家属外第亲拜其母抚之甚有恩礼太祖东还遣朱友盭攻师范从周攻鄩鄩以版輿置从周母城上母呼从周曰刘将军待我甚厚无异于汝人臣各为其主汝可察之从周为之缓攻鄩乃悉简妇人及老疾者出之独与少壮者坚守待援久之不至人心颇离副使王彦温踰城奔守陴者多逸鄩乃遣人阳语彦温曰非吾素遣者皆勿以行又下令城中曰吾遣从副使者得出否者族城中皆感奔者乃止梁兵闻之果疑彦温非实降斩之城下由是守益坚师范兵已屈从周以祸福谕鄩鄩报曰俟吾主降即以城还梁师范败降以谕鄩 【案鄩必俟师范谕乃始降梁盖效李世绩之守黎阳事见北梦琐言欧史失载今增】 乃亦归梁太祖以为元从都押衙时太祖已领四镇四镇将吏皆功臣旧人鄩一旦以降将居其上诸将见鄩皆用军礼鄩居自如太祖益奇之及即位累迁左

龙武统军刘知俊叛陷长安太祖遣鄠与牛存节讨之
知俊走凤翔太祖乃以长安为永平军拜鄠节度使末帝立为开封尹杨师厚卒分相魏
为两镇末帝恐魏兵乱遣鄠以兵屯魏县 【按册府
元龟通鉴薛史皆作屯南乐】 魏兵果劫贺德伦降晋庄宗入魏鄠以为晋兵悉在魏太
原可袭乃结草人执旗帜负以驴往来城上而潜军出
黄泽关袭太原至乐平遇雨不克进而旋急趋临清争魏积粟而周德威已先至鄠乃屯
莘县筑甬通及河以馈军久之末帝以书责鄠战鄠报
未可击复遣问必胜之策鄠曰臣无奇术请人给米十斛米尽则敌破矣末帝大怒谓鄠
曰将军蓄米将疗饥乎将破敌乎乃遣使者监督其军
鄠召诸将谋曰主上深居禁中与诸白面儿谋必败人事今敌盛未可轻动君以为如何
诸将皆欲战鄠乃悉召诸将坐之军门人饮以河水一
杯诸将或饮或辞鄠曰一杯之难犹若此滔滔河流可尽乎诸将皆失色时庄宗在魏数
以劲兵压鄠营鄠不肯出而末帝数促鄠战庄宗乃声
言归太原命符存审守魏而潜兵贝州鄠以晋王西归魏无备可击乃以兵万人攻魏城
东庄宗自贝州返击之鄠惊兵稍郤追至故元城庄宗
与符存审为南方阵夹之鄠为员阵以应之兵再合鄠大败南保滑州末帝以为义成军
节度使明年河朔皆入于晋降鄠亳州团练使 【按
通鉴鄠自滑州入朝朝议以河朔失守落鄠平章事是鄠曾加使相欧薛两史皆失载】
兖州张万进反遣鄠攻杀之拜泰宁军节度使朱友谦
叛陷同州末帝以鄠为河东道招讨使行次陕州鄠以书招友谦不报留月余待之尹皓
段凝等素恶鄠乃潜鄠与友谦亲家逗留养贼已而兵
数败诏罢归洛阳酖杀之 【按庄宗实录云忧患发病卒薛史作张宗奭奉密旨逼令饮
酖盖当时已密之故实录未得其实】 年六十四赠
中书令 【谨按通鉴辑览 御批以私姻移谕迁延贻误军计正当明正显戮耳密令
行酖何为哉昔子舆氏引庾公之斯之事虽为取友
者旁引曲证之端已非正道后世不知谋国者辄沿袭之以为公私交尽何啻失之千里
】 子遂凝遂雍事唐皆为刺史明宗王淑妃故鄠妾明
宗晚年淑妃用事鄠二子皆被恩宠潞王从珂反于凤翔遂雍为西京副留守留守王思
同帅诸镇兵讨凤翔战败东归遂雍不纳封府库以待
潞王潞王见遂雍握手流涕及入立拜遂雍淄州刺史以鄠兄琪之子遂清代遂雍为西
京副留守遂清以孝称历易棣等五州刺史皆有善政
迁凤州防御使宣徽北院使判三司晋开运中终安州防御使

△牛存节

牛存节字赞正青州博昌人初名礼事诸葛爽于河阳爽卒乃归梁太祖赐之名字

以为小校张晷攻汴存节破其二寨梁攻濮州战南刘
桥范县存节功多李罕之围张全义全义来乞兵太祖以存节故事河阳知其间道使为
前锋击走罕之太祖攻魏存节下魏黎阳临河与太祖
会内黄迁滑州牢城遏后指挥使梁兵攻郢存节使都将王言藏船濠中期日午渡兵踰
濠急攻之会营中火起郢人登城望火言伏不敢动失
期存节独破郢西瓮城门夺其濠桥梁兵得俱进遂破朱宣从葛从周攻淮南淝河之败
存节所部独全并收散卒八千以归 【按旧唐书昭
宗纪庞师古葛从周等攻淮南至淝河死伤略尽唯牛存节一军获免则存节自有所将
之兵未被残破薛史云存节作后殿收合所部并败兵
八千余人亦不独仅收从周散卒已也欧史不及存节所部今补】 拜亳宿二州刺史朱
瑾走吴召吴兵攻徐宿存节谋曰淮兵必不先攻宿夜
以兵急趣徐州傅城瑾方至惊曰来何速也不能攻而去迁潞州都指挥使太祖攻凤翔
使召存节潞人送者皆号泣累拜邢州团练使元帅府
左都押衙太祖即位拜右千牛卫上将军从康怀英攻潞州为行营排阵使夹城破存节
自西都将兵应接溃卒行至天井关闻晋兵攻泽州 【
按五代史原文作存节等以余兵归通鉴考异谓存节若自夹城归则先过泽州后至天
天井关岂得已过而返救之梁列传及薛史皆作存节自
西都应接夹寨溃卒通鉴取之欧史未明地理以致误今据改】 存节顾诸将曰泽州要
害不可失也诸将皆不欲救存节举策而先士卒随之
比至州人已焚外城将降晋闻存节至乃稍定遂入城助守晋人穴地道来攻存节亦穴
地以应之战于隧中敌不得入乃解去累迁匡国军节
度使友珪立朱友谦叛附于晋西连凤翔存节东西受敌同州水咸无井刘知俊之叛也
以渴不能守而走故友谦与岐兵合围欲持久以渴之
存节祷而凿井八十水皆甘可食友谦卒不能下末帝立加同中书门下平章事徙镇天
平蒋殷反攻破之以功加太尉梁晋相距河上存节方
病瘖忠愤弥激治军督士未尝言病病革召归京师将卒语其子知业曰忠孝吾子也不
及其它赠太师

△张归霸

张归霸字正臣 【从薛史增】 清河人少与弟归厚归弁俱从黄巢巢败归霸兄
弟乃降梁秦宗权攻汴归霸战数有功张晷军赤冈以
骑兵挑战矢中归霸拔之以射贼一发而毙夺其马而归太祖壮之使以弓手五百人伏
湟中太祖以骑数百为游兵过晷栅晷追太祖归霸发
伏杀晷兵千人太祖攻蔡州蔡将萧颢急击太祖营归霸辄与徐怀玉合击败之太祖得
拔营去太祖攻兖郓使归霸守曹州大败朱瑾于金乡

又破濮州晋人攻魏归霸从葛从周救魏战洹水归霸禽克用子落落以与魏人又破刘仁恭于内黄功出诸将右累拜河阳节度使开平二年卒子汉杰事末帝为显官以张德妃同产故用事梁亡族诛归厚字德坤善用弓槊能以少击众以与张晷独战而胜为骑长郴王友裕攻郢屯濮州太祖后至与友裕相失卒遇郢兵千人太祖望而少之与归厚以听子军直冲之战已合郢兵大至归厚以数十骑卫太祖马中矢僵乃持槊步鬪太祖先还军中遣张筠驰骑取之以为必死矣归厚体被十余箭得筠马乃归太祖见之泣曰尔在丧军何足计乎使舁归宣武迁右神武统军历洺晋绛三州刺史与晋人屡战未尝屈于化元年拜镇国军节度使以疾卒子汉卿归弁亦善战开平初以为滑州长剑指挥使子汉融梁亡皆族诛

△王重师

王重师许州长社人秦宗权陷许州重师脱身归梁从太祖平蔡攻兖郛为拔山都指挥使苦战齐鲁间威震邻敌迁颍州刺史太祖攻濮州已破濮人积草焚之梁兵不得入重师方病创卧帐中遽起悉取军中毡毯沃水蒙火上率精卒以短兵突入众随之遂取濮州重师身被八九创军士负之而还太祖闻之惊曰奈何使我得濮州而失重师乎逾月乃愈王师范降表重师青州留后累迁佑国军节度使同中书门下平章事居数年甚有威惠重师与刘捍故有隙捍尝构之太祖会重师辄遣裨将张君练攻邠凤而败太祖怒其擅发兵挫国威将召而罪之【按通鉴重师镇长安数年贡赋不时乃召令入朝是重师获罪非尽由谗构也薛史亦不载】遣刘捍代重师重师不知太祖怒已捍至重师礼甚倨捍因驰白太祖言重师有二志遂贬死

△徐怀玉

徐怀玉亳州焦夷人本名琮与梁太祖俱起微贱勇于战阵从太祖镇宣武为永城镇将秦宗权攻梁壁金堤灵昌酸枣怀玉以轻骑连击破之又败之于板桥赤冈拔其八栅从太祖东攻兖郛破徐宿战必捷赏赉以分士卒为梁名将太祖赐名怀玉从太祖败魏兵黎阳破朱瑾于金乡又从庞师古攻杨行密清口之败怀玉军独完收散卒万余人归迁沂州刺史王师范叛梁怀玉屡以州兵击破之迁齐州防御使天复四年以州兵西迎昭宗都洛阳迁华州观察留后屯雍州迁右羽林统军又屯泽州晋人为隧以攻怀玉击之隧中晋人乃郟太祖时历曹晋二州刺史晋军数至怀玉坚守败晋于洪洞拜保大军节度使朱友谦叛附于晋袭鄆州执怀玉杀之

△杨师厚

杨师厚颍州斤沟人少事河阳李罕之从罕之降晋后以罪奔梁太祖以为宣武军押衙曹州刺史梁攻王师范师厚战临朐禽其偏将八十余人取棣州以功拜齐州刺史太祖攻赵匡凝于襄阳师厚为先锋以浮桥渡汉击败之匡凝弃城走进取荆南又走匡凝弟匡明拜山南东道节度使同中书门下平章事刘知俊叛攻陷长安刘鄩牛存节等攻之久不下师厚以奇兵入其西门遂克之【按通鉴时师厚为西路行营招讨使帅刘鄩等讨知俊鄩等破潼关师厚以奇兵后至遂克之是师厚实与鄩等同役凤翔而鄩等亦非无功足录也与史互异】晋周德威攻晋州以应知俊师厚败之于蒙坑迁保义军节度使徙镇宣义晋军攻燕燕王刘守光求援于梁太祖为之击赵以牵晋屯于龙花遣师厚攻枣强屠之进围蓼县晋史建瑋以轻兵夜击梁军梁军大扰弃輜重走太祖迁东都留师厚屯魏州明年太祖遇弑友珪自立师厚乘间杀魏牙将潘宴臧延范等逐节度使罗周翰友珪因以师厚为天雄军节度使师厚自太祖时尝为招讨使悉领梁劲兵既得魏稍矜倨难制故时魏恃牙兵以强罗绍威时牙兵尽死魏始为梁所制师厚乃复置银枪劲节军友珪阴欲图之召师厚入计事其吏劝勿行师厚曰吾二十年不负朱家今若不行则见疑而生事然吾知上为人虽往无如我何乃以劲兵二万朝京师留兵城外以十余人从入见友珪益恐惧赐与巨万而还已而末帝谋讨友珪遣马慎交阴见师厚布腹心师厚犹豫未决或曰均王仗大义诛贼其事易成若一朝破贼公将何以自处师厚大悟乃遣其将王舜贤至洛阳见袁象先计事使朱汉宾以兵屯滑州为应末帝卒与象先杀友珪末帝即位师厚邺王诏书不名事无巨细皆谘之然心益忌畏已而师厚痲发卒末帝为之受贺于宫中由是始分相魏为两镇魏军乱以魏博降晋梁失河北自此始

△王景仁

王景仁庐州合肥人初名茂章少从杨行密起淮南骁勇刚悍临敌以身先梁太祖遣兄子友瑑【按友瑑乃朗王存之子欧史作子瑑】攻王师范于青州师范乞兵于行密遣景仁以步骑七千救之师范背城为两栅友瑑夜击其一栅中告急趣景仁出战景仁按兵不动友瑑已破一栅连战不已迟明景仁度友瑑兵已困乃出战大败之遂斩友瑑时太祖方攻郓州闻友瑑死以兵二十万倍道至景仁闭垒示怯伺梁兵怠毁栅出疾战战酣退坐召诸将饮酒已而复战太祖登高望见之得青州降人问饮酒者为谁曰王茂章也太祖叹曰使吾得此人为将天

下不足平也梁兵又败景仁军还梁兵急追之景仁遣裨将李虔裕设伏以待追兵至虔裕以死遏之景仁缓行全军以归事行密为润州团练使行密死子渥自宣州入立景仁代守宣州渥求宣州故物不与渥怒以兵攻之【按新唐书杨行密传渥求茂章亲兵不得乃以兵五千袭之薛史作渥忌其勇悍欲除之皆与欧史互异】景仁奔于钱镠镠表领宣州节度使梁太祖素识景仁遣人召之遂间道归梁仍以为宁国军节度使同中书门下平章事开平四年为北面招讨使伐赵行至魏州司天监言太阴亏不利行师太祖驰使者止之景仁已过邢洛不奉诏及晋人战大败于柏乡罢就第后数月悉复其官爵末帝立为淮南招讨使使攻庐寿军过独山山有杨行密祠再拜号泣而去战于霍山梁兵败走景仁殿而力战不甚败归京师病疽卒赠太尉

△贺瓌

贺瓌字光远濮州人事郢州朱宣为都指挥使梁太祖攻朱瑾于兖州宣遣瓌与何怀宝柳存等救兖瓌趋待宾馆欲绝梁饷道太祖侦知之选精兵夜疾驰百里旦至巨野东遇瓌兵击之瓌等大败瓌及怀宝等至兖城下以招瑾瑾不纳因斩怀宝等十余人而独留瓌瓌感太祖不杀誓以身自效从平青州以为曹州刺史太祖即位徙相州末帝时迁左龙虎统军宣义军节度使贞明元年魏兵乱贺德伦降晋晋王入魏刘鄩败走河朔皆入于晋晋军取杨刘乃以瓌为招讨使与谢彦章等屯行台瓌与彦章有隙伏甲杀之庄宗以轻兵袭濮州瓌自行台蹶之战于胡柳陂斩其将周德威瓌军已胜阵无石山日暮晋军仰攻之瓌下击晋军遂夺山【按此即王建及传所谓土山也原文不着夺山事于战时形势未尽且与建及传不符今增】瓌大败晋遂取濮州城德胜夹河为栅瓌以舟兵攻南栅不能得还军行台以疾卒年六十二赠侍中

△王檀

王檀字众美京兆人少事梁太祖为小校尚让攻梁战尉氏门檀勇出诸将太祖奇之迁踏白副指挥使从来珍募兵有功梁与蔡兵战板桥李重裔马蹠为蔡兵所擒檀驰取之并获其将一人从太祖破魏内黄迁冲山都虞侯复从朱珍攻徐州获其将一人梁兵攻王师范檀别破其密州拜密州刺史太祖即位迁保义军节度使潞州东北面招讨使王景仁败于柏乡晋兵围邢州太祖欲自将救之檀表止请自拒敌卒全邢州以功加同中书门下平章事进封琅琊郡王友珪立徙镇宣化贞明元年又徙匡国时庄宗取魏博檀以谓晋兵悉在河北乃以奇兵西出阴地袭太原不克而还徙镇天卒檀尝招亡盗居帐下帐下兵乱入杀檀年五十八赠太

师谥忠毅

△马嗣勋

马嗣勋濠州锺离人少为州客将梁太祖攻濠州刺史张遂遣嗣勋持牌印降梁杨行密攻遂遂又使嗣勋来乞兵兵未至濠州已没嗣勋乃留事梁太祖以为宣武军元从押衙太祖西攻凤翔行至华州道嗣勋入说韩建建实时出降天佑二年罗绍威乞兵诛牙军遣嗣勋以千人赴之尽诛牙兵语在绍威传嗣勋亦中重创卒太祖即位赠太保

△王虔裕

王虔裕琅琊临沂人少从诸葛爽起青棣间爽败虔裕随爽奔于梁时太祖新就镇黄巢秦宗权等兵方盛太祖数为所窘而梁未有佗将乃以虔裕将骑兵常为先锋击巢拔其数栅巢走梁兵蹶之战于万胜戍巢败而东虔裕功为多乃表为义州刺史黄巢已去秦宗权攻许郑与梁为敌境大小百余战虔裕常有功既又遣虔裕拒秦贤于尉氏战败失一裨将太祖怒拘之军中邢州孟迁降梁为晋人所围太祖遣虔裕以精兵百人疾驰夜破围入迟明立梁旗帜于城上晋人以为救兵至乃退己而复来迁执虔裕降于晋见杀

△谢彦章

谢彦章许州人幼事葛从周从周养以为子授之兵法置千钱大盘中为行阵偏伍之状示以出入进退之节彦章尽得之及壮事梁太祖为骑将时贺瓌善用步卒而彦章与孟审澄侯温裕皆善将骑兵审澄温裕所将不过三千彦章多而益办末帝时累迁匡国军节度使贞明四年晋攻河北贺瓌为北面招讨使彦章为排阵使屯于行台彦章好礼儒士虽居军中尝儒服或临敌御众肃然有将帅之威左右驰骤疾若风雨晋人望其行阵齐整相谓曰谢彦章必在此也其名重敌中如此瓌心忌之一日与瓌行视郊外瓌指一地语彦章曰此地冈阜隆起其中坦然营栅之地也巳而晋兵栅之瓌疑彦章阴以告晋益恶之瓌欲速战彦章请持重以老敌马步都虞侯朱珪夙与彦章有隙乃诬反瓌旦享士使珪伏甲杀之审澄温裕皆见害 【按审澄时为濮州刺史温裕则别将也】

钦定续通志卷二百八十二

●钦定续通志卷二百八十三

列传

五代 【三】

○五代三

郭崇韬

安重海

周德威

符存审 【彦超彦饶】

郭崇韬

安重诲

周德威

符存审 【符彦超 符彦饶】

△郭崇韬

郭崇韬字安时 【从薛史增】 代州雁门人为河东教练使庄宗为晋王孟知祥荐崇韬为中门使甚见亲信庄宗即位拜兵部尚书枢密使梁王彦章击破德胜唐东保杨刘彦章图之庄宗登垒望见彦章为重堑以绝唐军意轻之曰是欲持久以敝我也即引短兵出战为伏兵败归问崇韬计安出时唐已得郢州矣崇韬曰彦章围我于此志在取郢州也臣愿得兵数千据河下流筑垒必争之地以应郢州为名彦章必来争既分其兵可图也然板筑难卒就陛下日以精兵挑战使彦章不得东十日垒成矣庄宗乃遣崇韬与毛彰将数千人夜渡河筑垒于博州东昼夜督役六日垒成彦章急攻之不克还趋杨刘庄宗迎击遂败之康延孝自梁奔唐先见崇韬崇韬延之卧内尽得梁虚实是时庄宗军朝城段凝军临河唐自失德胜梁兵日掠澶相黎阳卫州而李继韬以泽潞叛入于梁契丹数犯幽涿又闻延孝言梁方召诸镇兵欲大举唐诸将皆忧惑以谓郢州隔河难守不若弃与梁而西取卫州黎阳以河为界与梁约罢兵庄宗不悦召问崇韬崇韬曰陛下兴兵仗义将士疲战争生民苦转饷者十余年矣况今大号已建河北皆引首望成功今得一郢州不能守而弃之虽欲指河为界谁为陛下守者且唐未失德胜时四方商贾征输必集积薪刍粮饷如山自失南城保杨刘道路转徙耗大半而魏博五州秋稼不稔竭民而敛不支数月此岂按兵持久时乎臣自康延孝来尽得梁虚实此真天亡之时也愿陛下分兵守魏固杨刘而自郢长驱捣其巢穴不出半月天下定矣庄宗大喜即日下令军中归家属于魏夜渡杨刘从郢州入袭汴八日而灭梁推功赐崇韬铁券拜侍中成德军节度使依前枢密使庄宗与诸将以兵取天下而崇韬未尝战阵徒以谋议居佐命第一位兼将相遂以天下为己任遇事无所回避而宦官伶人不便初崇韬与宦者马绍宏俱为中门使而绍宏位在上及庄宗即位二人当为枢密使崇韬不欲绍宏在己上乃以为宣徽使绍宏失职怨望崇韬因置内勾使以绍宏领之寻罢绍宏尤侧目崇韬颇惧语其人曰吾佐天子取天下今大功已就而羣小交兴吾欲避归镇阳庶免祸对曰俚语曰骑虎者势不得下今公权位已隆而下多怨嫉一失其势能自安乎今中宫未立而刘氏有宠宜请立刘氏为皇后而多建天下利害便民者然

后退而乞身天子以公有大功而无过必不听公去是
外有避权之名而内有中宫之助又为天下所悦虽有谗间其可动乎崇韬以为然乃上
书请立刘氏为皇后崇韬素廉自从入洛始受四方赂
遗或以为言崇韬曰吾位将相禄赐巨万岂少此今藩镇诸侯多梁旧将皆主上斩祛射
钩之人也一切拒之岂无反侧且藏于私室何异公帑
明年天子有事南郊乃悉献所藏以佐赏庄宗已郊遂立刘氏为皇后崇韬累表自陈请
依唐旧制还枢密使于内臣而并辞镇阳优诏不允因
建天下利害二十五事施行之李嗣源为成德军节度使徙崇韬忠武崇韬辞言甚恳至
遂罢其命同光三年夏霖雨不止大水害民田民多流
死庄宗患宫中暑湿思得高楼避暑遣宫苑使王允平营之宦官曰郭崇韬眉头不伸常
为租庸惜财用陛下虽欲有作其可得乎庄宗乃使人
问崇韬曰昔吾与梁对垒河上虽祁寒盛暑被甲跨马不以为劳今居深宫荫广厦不胜
其热何也崇韬对曰陛下昔以天下为心今以一身为
意艰难逸豫为虑不同其势自然也愿陛下无忘河上则可使繁暑坐变清凉庄宗默然
终遣允平起楼崇韬果切谏宦官曰崇韬第无异皇居
安知陛下之热由是谗间愈入河南县令罗贯为人强直正身奉法颇为崇韬所知宦官
伶人求请书积几案一不报皆以示崇韬崇韬数以为
言宦官伶人由此切齿张全义为尹贯不为之屈而多按诛恃全义为不法者全义尝使
人告刘皇后从容为白贯事而左右日夜共攻其短庄
宗未有以发皇太后崩葬坤陵庄宗幸陵作所而道路泥涂桥坏庄宗止輿问谁主者宦
官曰属河南因亟召贯至对曰臣初不奉诏请诘主者
庄宗曰尔所部复问何人下狱拷掠体无完肤明日诏杀之崇韬谏以桥道不修法不当
死庄宗怒起入宫崇韬随之论不已庄宗自阖殿门崇
韬不得入贯卒见杀明年征蜀议择大将明宗为总管当行而崇韬以谗见危思立大功
为自安计乃曰契丹为患北边非总管不可御魏王继
岌国之储副而大功未立且亲王为元帅唐故事也庄宗曰继岌小子岂任大事公为我
副之乃以继岌为西南面行营都统崇韬为招讨使军
政皆决崇韬唐军入蜀所过迎降王衍弟宗弼阴送款于崇韬求为西川兵马留后崇韬
以节度使许之军至成都宗弼奉崇韬甚厚又与蜀人
列状见魏王请崇韬留镇蜀继岌颇疑崇韬无以自明因以事斩宗弼及其弟宗渥宗勋
崇韬素嫉宦官尝谓继岌曰王有破蜀功师旋必为太
子俟主上千秋万岁后当尽去宦官至于扇马亦不可骑继岌监军李从袭等见崇韬专
军事心已不平及闻此言皆切齿思图之庄宗闻破蜀
遣宦官向延嗣劳军崇韬不郊迎延嗣大怒与从袭等共构之延嗣还上蜀簿庄宗怪所

得薄延嗣因言蜀宝货皆入崇韬且诬其有异志将危
魏王庄宗怒遣宦官马彦珪至蜀视崇韬去就彦珪告刘皇后刘皇后教彦珪矫诏魏王
杀之崇韬有子五人廷诲廷信从死于蜀余皆见杀明
宗即位诏许归葬以其太原故宅赐其一孙崇韬自以为子仪后其伐蜀也过子仪墓下
马号恸而去闻者颇以为笑然崇韬尽忠国家有大略
其已破蜀因遣使者以唐威德风谕南诏诸蛮欲因以杀来之可谓有志矣

△安重诲

安重诲应州人父福迁为晋将以骁勇知名晋兵杀朱宣福迁与梁战死重诲少事
明宗明宗镇安国以为中门使及兵变于魏大计皆重
诲与霍彦威决之明宗即位以为枢密使累加侍中兼中书令重诲自为中门使已见亲
信而以佐命功处机密之任事大小皆参决其势倾动
天下虽其尽忠劳力时有补益而恃功矜宠威福自出旁无贤人君子之助其独见之虑
祸衅所生至于臣主俱伤几灭其族斯其可哀者也重
诲尝出过御史台门殿直马延悞冲前导重诲怒即台门斩延而后奏请降敕处分明宗
不得已从之宰相任圜判三司以职事与重诲争不能
得圜怒辞疾退居重诲诬以罪矫诏杀圜而后白事具圜传又恐天下议已因取三司积
欠二百余万请放之以悦人其威福自出多此类也是
时四方奏事皆先白重诲然后闻河南县献嘉禾一茎五穗重诲视之曰伪也笞其人遣
之夏州李仁福进白鹰重诲郤之明日白曰陛下诏天
下毋献鹰鹞而仁福违诏献鹰臣已郤之矣重诲出明宗阴遣人取以入佗日按鹰西郊
戒左右无使重诲知宿州进白兔重诲曰兔阴且狡虽
白可为遂郤而不白明宗为人虽宽厚然其性果于杀人马牧军使田令方所牧马瘠而
多毙坐劾当死重诲谏曰使天下闻以马故杀一军使
是谓贵畜而贱人令方因得减死明宗遣回鹘侯三驰传至其国醴泉县素无驿其令刘
知章不时给马侯三遽以闻明宗大怒械知章至京师
将杀之重诲从容为言得不死其尽忠补益亦此类也重诲既以天下为己任遂欲内固
社稷而外制诸侯之强然其轻信韩玫之谮而绝钱鏐
之臣徒陷彦温于死而不能去潞王之患李严一出而知祥贰仁矩未至而董璋叛此所
谓独见之虑祸衅所生也钱鏐据有两浙号兼吴越而
王自梁及庄宗常异其礼羁縻之明宗即位鏐遣使朝寓书重诲慢重诲怒未有以发乃
遣其嬖吏韩玫副供奉官乌昭遇使鏐玫恃势辱昭遇
因醉使酒以马捶击之鏐欲奏其事昭遇以为辱国固止之玫还反谮于重诲曰昭遇见
鏐舞蹈称臣以朝廷事私告鏐昭遇坐死下制削夺鏐
官爵于是钱氏遂绝于唐 【案吴越备史吴越王命文穆王奏雪其事书不得通乃以绢

书上之天子始得闻焉是吴越未尝绝唐与史互异

】潞王从珂镇河中重诲以其非李氏子后必为患欲阴图之从珂阅马黄龙庄其牙内指挥使杨彦温闭城叛从珂遣人谓彦温曰我遇汝厚

何苦而反报曰彦温非叛也得枢密院宣请公趣归朝廷耳从珂走虞乡驰上变明宗疑其事不明遣人诱致彦温欲究所以重诲固请用兵明

宗乃遣侍卫指挥使药彦稠西京留守索自通率兵讨之诚曰为我生致彦温吾将自讯其事彦稠等攻破河中希重诲旨斩彦温以灭口重诲

率羣臣贺明宗大怒曰朕家事不了卿等不合致贺从珂罢镇居清化里第重诲数讽宰相冯道等言从珂失守宜行法重诲又自论列明宗曰

吾为小校时衣食不能自足此儿为我担石灰拾马粪以相养活今贵为天子独不能庇之邪使其杜门私第亦何与公事重诲由是不复敢言

孟知祥镇西川董璋镇东川二人皆有异志重诲每事裁抑务欲制其奸心【五代史补载知祥将据蜀遣使以金赂重诲重诲喜之案重诲

虽威福自专虑多召衅而欧薛两史皆不着其黷货且云重诲死后家费不及数千缗况此时正欲裁制知祥岂有反喜其通赂之理陶岳之言

恐不足据】凡两川守将更代多用己所亲信必有精兵从之渐令分戍诸州以虞缓急二人觉以为图己益不自安既而遣李严为西川监军

知祥即日斩严又分阆州为保宁军以李仁矩为节度使以制璋且削其地璋以兵攻杀仁矩二人遂皆反初明宗幸汴重诲欲因以伐吴明宗

难之后得吴谍者言徐知诰欲举吴称藩愿得安公一言为信重诲大喜因谍者遗知诰玉带而不以其事闻逾年知诰之问不至捧圣都军使

李行德十将张俭告变言枢密承旨李虔徽语其客边彦温云重诲募士缮甲欲自伐吴又与谍者交私明宗初颇疑之大臣左右皆为解因廷

诘彦温具伏其诈于是君臣相顾泣下彦温行德俭皆坐族诛重诲因求解职明宗慰之重诲论请不已明宗怒乃趣中书议代冯道曰诸君苟

惜安公使得罢去是纾其祸也赵凤以为大臣不可轻动遂以范延光为枢密使重诲居职如故董璋等反遣石敬瑭讨之川路险粮运甚艰每

一石致一斗自关以西民苦输送往往亡聚山林为盗贼明宗欲自行重诲止之请行关西闻之皆恐动重诲日驰数百里督趣粮运昼夜不绝

毙踏道路者不胜数重诲过凤翔节度使朱宏昭延之寝室使其妻子奉事左右甚谨重诲酒酣为宏昭言昨被谗几不自全赖明圣得保家族

因感叹泣下重诲去宏昭上言重诲怨望至营恐生事宣徽使孟汉琼自行营使还亦言西人震骇状因述重诲过恶重诲行至三泉召还过凤

翔宏昭拒不纳重诲惧驰趋京师未至拜河中节度使宦者安希伦坐为重诲阴伺宫中

动息事发弃市重海益惧因上章告老以太子太师致仕而以李从璋代遣药彦稠率兵如河中虞变重海二子崇绪崇赞宿卫京师闻制下即日奔其父重海见之惊曰二渠安得来已而曰此非渠意为人所使耳吾以一死报国余复何言乃械送京师明宗又遣翟光业至河中视重海去就戒曰有异志则与从璋图之光业至从璋率兵围重海第入拜于庭重海降答拜从璋以槌击其首重海妻抱之而呼曰令公死未晚何遽如此夫妻皆死检责其家货不及数千缗明宗下诏以其绝钱镠致孟知祥董璋反及议伐吴以为罪并杀其二子余子孙皆免重海得罪知必死叹曰我固当死但恨不与国家除去潞王也

△周德威

周德威字镇远朔州马邑人为人勇多智能望尘知敌数事晋王为骑将累迁内衙指挥使其小字阳五当梁晋之际周阳五之勇闻天下梁军围晋太原令曰生得周阳五者为刺史有骁将陈章者号陈野义常以白马朱甲自异出入阵中求周阳五欲必生致之晋王戒德威曰陈野义欲得汝以求刺史宜善备之德威笑曰陈章好大言耳安知刺史非臣作因戒其部兵见白马朱甲者佯走避之德威微服杂伍中兵始交德威部下退走章旧稍急追德威从其后挥铁锤中章堕马遂生擒之梁攻燕晋遣德威为燕攻梁取潞州梁舍燕攻潞围以夹城潞州守将李嗣昭城守而德威与梁军相持于外踰年嗣昭与德威素有隙晋王病且革语庄宗曰梁军围潞而德威与嗣昭有隙吾甚忧之王丧在殡庄宗新立杀其叔父克宁国中未定重兵悉属德威于外晋人皆恐庄宗使人以丧及难告且召其军德威即日还军太原留兵城外徒步入伏哭几绝晋人乃安遂从庄宗复击梁军破夹城与嗣昭欢如初以功拜振武节度使同中书门下平章事天佑七年秋梁遣王景仁将魏滑汴宋等兵七万人击赵赵王王镒乞师于晋晋遣德威先屯赵州冬梁军至柏乡赵人告急庄宗自将出赞皇会德威于石桥进距柏乡五里营于野河北德威告庄宗曰梁军甚锐未可与争宜少退以待之庄宗曰吾提孤军出千里利速战不乘势急击之使敌知吾众寡则吾无所施矣德威曰不然赵人能城守而不能野战吾之取胜利在骑兵平川广野骑兵所长也今军河上迫贼营门非吾用长地所恃者一水隔耳使梁得舟楫渡河吾无类矣不如退军郾邑诱敌出营扰而劳之可以策胜也已而获梁游兵问景仁何为曰治舟数百将以为浮梁庄宗笑曰果如公所料乃退军郾邑德威晨遣三百骑叩梁营挑战自以劲兵三千继之景仁怒悉军以出与德威转鬪数十里至郾南两军皆阵梁军横亘六七里汴宋之

军居西魏滑之军居东庄宗欲战德威持马谏曰梁军远来必不暇赍粮糗纵其能赍亦不暇食不及日午人马俱饥因其将退而击之胜至未申时梁军东偏尘起德威鼓噪而进麾其西偏曰魏滑军走矣又麾其东偏曰梁军走矣梁阵动不可重整乃皆走遂大败自鄆追至柏乡横尸数十里景仁以十余骑仅而免自梁与晋争凡数十战其大败未尝如此刘守光僭号于燕晋遣德威出飞狐击之入祁沟关耶涿州遂围守光于幽州尽下燕诸州县踰年破幽州以功拜卢龙军节度使 【案辽史周德威镇幽州时卢文进引辽师攻之城几陷以救得免此事新旧史皆失载】 庄宗与刘鄆相持于魏鄆夜潜出黄泽关以袭太原德威自幽州以千骑入土门蹶之鄆至乐平遇雨不得进而还德威与鄆俱东争趋临清临清有积粟且晋军饷道也德威先驰据之以故庄宗卒能困鄆军而败之庄宗勇而好战尤锐于见敌德威老将常务持重以挫人锋故其用兵常伺敌隙以取胜十五年德威将燕兵与镇定等军从庄宗于河上自麻家渡进军临濮以趋汴州军宿胡柳陂梁军至庄宗问战于德威德威对曰此去汴州信宿而近梁军父母妻子皆在其中梁人家国系此一举吾以深入之兵当其必死之战可以计胜难与力争也且吾军先至以逸待劳王宜按军无动臣请以骑军扰之使其营栅不得成樵爨不暇给因其劳乏而乘之可以胜庄宗曰吾终日俟敌今见敌不击复何为顾李存审曰公以輜重先吾为公殿遂出德威谓其子曰吾不知死所矣前遇梁军而阵王军居中镇定军居左德威军居右輜重次右之西兵接庄宗率银枪军驰入梁阵梁军小败犯晋輜重輜重见梁朱旗皆惊走入德威军德威军乱梁军乘之德威父子皆战死庄宗与诸将相持而哭曰吾不听老将言使其父子至此及即位赠德威太师明宗时加赠太尉配享庄宗庙庭晋高祖追封德威燕王子光辅官至刺史

△符存审 【符彦超 符彦饶】

符存审字德详陈州宛邱人初名存少贱犯法当死临刑指旁坏垣顾主者曰愿就死于彼冀得垣土覆尸主者哀而许之为徙垣下而主将方饮酒顾其爱妓思得善歌者佐酒妓言有符存尝为妾歌甚善主将驰召存审存审以徙垣下故未加刑因就召使歌而悦之得不死后从李罕之归晋晋王以为义儿军使赐姓李氏名存审从晋王击李匡侔为前锋破居庸关又从击王行瑜破龙泉寨从李嗣昭攻汾州执李瑋 【薛史作李康】 又攻潞州降丁会从周德威破梁夹城晋赵攻燕梁救燕击赵深州围蔚县存审与史建瑭军下博击走梁军魏博叛梁降晋存审为先锋屯临清庄宗入魏存审殿军魏县与刘鄆相距莘西从庄宗败鄆于故元城以

功累迁为安国军节度使徙横海加同中书门下平章
事契丹围幽州时晋与梁相持河上欲发兵兵少欲勿救惧失之庄宗疑以问诸将存审
独以为当救以骑兵五千击走契丹 【案契丹国志
存审令步兵阵于后先以羸兵曳柴燃草而进烟尘涨天鼓噪合战乃趋后阵乘之辽太祖大败】 从战胡柳陂晋军晨败亡周德威存审与其
子彦图力战暮复败梁军于土山迁内外蕃汉马步军总管梁朱友谦以河中同州降晋
梁遣刘鄩攻同州友谦求救乃遣存审与李嗣昭救之
河中兵弱粮少而新降人心颇持两端晋军屯朝邑诸将皆欲速战存审曰使梁军知吾
利速战则将夹渭而营断我饷道以持久困我则我进
退不可败之道也乃按军不动居旬日望气者言有黑气状如鬪鸡存审曰可以一战矣
乃进军击鄩大败之鄩夜遁去追击于渭河又大败之
张文礼弑赵王王镕晋遣阎宝李嗣昭等攻之至辄战死最后遣存审破之存审为将有
机略大小百余战未尝败衄与周德威齐名德威死晋
之旧将独存审在契丹入塞乃以存审为卢龙军节度使时存审已病辞不肯行庄宗使人
慰遣之庄宗灭梁入洛存审自以身为大将不得与
破梁之功怏怏病益甚因请朝京师时郭崇韬权位已重然名望素在存审下不乐其来
加己上沮之存审妻郭氏泣诉于崇韬曰吾夫于国有
功而与公乡里之旧柰何忍令死弃穷野崇韬愈怒存审章累上辄不许存审伏枕叹曰
老夫事二主四十年今日天下一家四夷远俗至于亡
国之将射钩斩袪之人皆得亲见天子奉觞为寿独予弃死于此岂非命哉崇韬度存审
病已亟乃请许其来朝徙镇宣武卒于幽州临终戒其
子曰吾少提一剑去乡里四十年间取将相然履锋冒刃出死入生而得至此也出其身
所中矢鏃百余示之曰尔其勉哉子彦超彦饶彦卿彦
超初为汾州刺史明宗入洛时为北京巡检永王存霸奔太原彦超见留守张宪谋之宪
儒者事庄宗最久不忍背恩欲纳之彦超不从存霸遂
见杀明宗德之以为建雄军留后迁北京留守历镇昭义泰宁安远彦超主藏奴王希全
盗其货稍责之奴惧夜叩门言有急彦超出见杀赠太
尉彦饶为汴州马步军都指挥使天成元年发汴兵戍瓦桥关控鹤指挥使张谏反迫彦
饶为帅彦饶阳许之明日衙见伏甲诛谏诏褒其忠略
清泰三年拜忠正军节度使侍卫马步军都指挥使晋高祖起太原彦饶以侍卫兵从废
帝至河阳废帝败晋高祖徙彦饶义成军节度使范延
光反白奉进以侍卫兵三千屯滑州兵士犯法奉进捕得五人其三人义成兵也因并斩
之彦饶怒明日奉进过彦饶谢语不合拂衣而起彦饶
不复留其麾下大噪追奉进杀之彦饶不之止也屯驻军将马万等擒彦饶送京师以彦

饶应延光反闻诏削官爵杀之彦饶以一旦之忿不能
驭其军杀奉进巳非本意以反见诛非其罪也彦卿宋史有传
钦定续通志卷二百八十三

●钦定续通志卷二百八十四 列传八十四

列传

五代 【四】

○五代四

史建瑋	【匡翰】	王建及	元行钦	安金全	袁建丰	西
方邺	符习	【乌震】	孔谦	张延朗		
李严	李仁矩	毛璋	朱宏昭	刘延朗	康思立	
康义诚	药彦稠					

史建瑋

王建及

元行钦

安金全

袁建丰

西方邺

符习

孔谦

张延朗

李严

李仁矩

毛璋

朱宏昭

刘延朗

康思立

康义诚

药彦稠

△史建瑋

史建瑋字国宝 【从薛史增】 雁门人父敬思为九府都督从晋王入关破黄巢
击秦宗权常将骑兵为先锋上源驿之变为梁兵所杀
建瑋少为裨校自晋降丁会与梁相距潞州建瑋巳为先锋梁兵数为建瑋所杀相戒避
史先锋柏乡之战周德威击梁左军建瑋击其右大败
之以功加检校左仆射晋赵攻燕梁救燕击赵深州围枣强蓳县晋精兵皆在北独符存

审与建瑋以三千骑屯赵州梁兵已破枣强存审扼下博桥建瑋分其麾下五百骑为五队一之衡水一之南宫一之信都一之阜城而自将其一约各取梁刍牧者十人会下博至暮擒梁兵数十皆杀之各留一人纵使逸告之曰晋王军且大至明日建瑋率百骑为梁旗帜杂其刍牧者暮叩梁营杀门卒纵火大呼斩击数十百人梁兵得归者皆言晋军且至梁太祖夜拔营去时方病由是增剧而晋军得并力以收燕者二人之力也后从庄宗入魏博败刘鄩累功历贝相二州刺史晋军讨张文礼建瑋以先锋兵下赵州进薄镇州攻城门中流矢卒

史匡翰

史匡翰

子匡翰尚晋高祖女是为鲁国长公主为将沈毅有谋而接下以礼与部曲语未尝不名为唐天雄军步军彰圣马军两都指挥使事晋历义成军节度使所至兵民称之史氏世将而匡翰好读书尤喜春秋三传义成军从事关彻尤嗜酒尝醉骂匡翰曰近闻张彦泽裔张式未闻史匡翰斩关彻天下谈者未有偶尔匡翰不怒引满自罚而慰勉之人皆服其量卒年四十四

△王建及

王建及【薛史册府元龟俱作李建及或尝赐姓如元行钦故牵连同传未可知也】许州人少从李罕之奔晋为匡卫指挥使梁晋战柏乡相距鄙邑野河上镇定兵扼河桥梁兵急击之庄宗望见镇定兵将败顾建及曰桥为梁夺则吾军危矣柰何建及选二百人驰击梁兵败解去从战莘县故元城皆先登陷阵累功拜辽州刺史将银枪效节军晋攻杨刘建及躬负葭苇堙堑先登拔之从战胡柳晋兵已败与梁争土山梁兵先至登山庄宗至山下曰今日得山者胜驰骑犯之建及以银枪军继进梁兵下走阵山西晋兵遂得土山建及呼其众曰今日所失辎重皆在山西盍取之即驰犯梁阵梁兵大败晋遂军德胜为南北城于河上梁贺瓌攻其南城以竹竿维战舰于河晋兵不得渡南城危甚建及以大瓮积薪自上流纵火焚梁战舰而以三舟载甲士随之斧其竹竿梁兵皆走晋军乃得渡救南城瓌解去建及为将喜以家赀散士卒宦官韦令图监其军言建及得士心惧有异志不可令典牙兵出为代州刺史怏怏而卒

△元行钦

元行钦幽州人为刘守光裨将守光篡其父仁恭使行钦以兵囚仁恭于大安山又使行钦害诸兄弟其后晋攻幽州守光使行钦募兵云朔间时明宗略地山北与行钦相拒广边军行钦屡败乃降宗养以为子常从立功庄宗闻行钦骁勇取之以为散员都部署赐姓名曰李绍

荣庄宗与梁战潘张军败而溃得三四骑驰去梁兵数百追及攢稍围之行钦望其旗而识之驰一骑奋剑断其二矛斩首一级梁兵解去庄宗还营持行钦泣曰富贵与卿共之由是宠绝诸将拜忻州刺史迁武宁军节度使庄宗宴羣臣于内殿酒酣道平生战事为乐怪行钦不在所司奏曰奉敕宴使相绍荣散官不得与庄宗罢会不乐明日即拜行钦同中书门下平章事赵在礼反于魏以行钦为邺都行营招抚使讨之行钦攻邺南门以诏书招在礼在礼送羊酒犒军登城再拜以诏书示诸军皇甫晖从旁夺诏书坏之军士大噪行钦具以闻庄宗大怒乃益召诸镇兵属行钦行钦分为五道毁轮扉为筏渡长庆河攻冠氏门不克时邢洺诸州相继叛行钦攻邺无功庄宗欲亲征羣臣谏止乃遣明宗讨之明宗至魏军城西行钦军城南而明宗军变入魏与在礼合行钦退屯卫州以明宗反闻明宗自魏引兵南行钦率兵趋还京师从庄宗幸汴行至滎泽行钦杀明宗子从璟语在宗室传明宗入汴庄宗至万胜镇不得进与行钦登道旁冢置酒相顾泣下有野人献雉问冢名曰愁台也庄宗益不悦因罢酒去西至石桥置酒野次庄宗谓行钦曰卿等从我久富贵急难无不同今危蹙而默默无言坐视成败我至滎泽欲单骑渡河自求总管卿等各陈利害今日俾我至此卿等何如行钦泣而对曰臣本小人蒙抚养位将相危难不能报国死无以塞责因与诸将百余人皆解髻断发置地誓死报君臣相持恸哭庄宗还洛阳数日复幸泛水郭从谦反庄宗崩行钦出奔至平陆为野人执送虢州刺史石潭 【薛史作县令裴进】折其两足槛车送京师明宗见之骂曰我儿何负于尔行钦瞋目直视曰先皇帝何负于尔乃斩于洛阳市市人皆为流涕

△安金全

安金全代北人骁果工骑射号能擒生踏伏事晋为骑将数从庄宗有功官至刺史以疾居太原梁晋相距河上晋兵皆从太原无备梁将王檀乘虚来袭监军张承业大恐率诸司工匠城守外攻甚急金全强起谓承业曰太原晋之根本一旦不守则大事去矣老夫诚惫尚能为公破贼乃被甲跨马率子弟及故将吏百余人夜出北门击檀于羊马城中檀军惊溃而晋救兵稍至然庄宗不以金全为能终不录其功金全与明宗有旧明宗即位拜振武军节度使同中书门下平章事在镇二年召还以疾卒

△袁建丰

袁建丰不知其世家晋王讨黄巢至华阴阑得之时方九岁爱其俊爽收养之长习骑射从击王行瑜李匡威又从庄宗破夹城战柏乡以功累迁左厢马军指挥使明宗为内衙指挥使建丰为副使从庄宗入魏取卫磁洺三州

击梁将王千斩首千余级从战胡柳指挥使孟谦据相州叛建丰还讨平之历洛相隰三州刺史病风废明宗即位以旧恩召还京师加检校太尉遥领镇南军节度使俸食其俸以疾卒赠太尉

△西方邺

西方邺定州满城人年二十渡河游梁不见用归庄宗于河上数有功同光中为曹州刺史以州兵屯汴州明宗自魏反兵南渡河而庄宗东幸汴节度使孔循怀二志使北门迎明宗西门迎庄宗所以供帐委积如一曰先至者入之邺责循曰主上破梁得公有不杀之恩柰何欲纳总管而负国循不答石敬瑭妻明宗女也方在汴邺欲杀之循知其谋取之藏其家邺无如之何乃将麾下西迎庄宗于泛水呜咽泣下 【按通鉴邺守汴石敬瑭使裨将突入封邱门据其城邺遂请降似不及复迎庄宗附载以志疑】 庄宗亦为嘘唏乃使为先锋庄宗遇弑明宗入洛邺请死于马前明宗嘉叹久之明年荆南高季兴叛拜邺夔州刺史以兵出三峡取三州乃以夔州为益江军拜邺节度使又取归州邺武人所为多不中法判官谭善达数谏邺怒遣人告善达受人金下狱死邺病见善达为崇卒于镇

△符习

符习赵州昭庆人少事赵王王镕为军校自晋救赵破梁赵常遣习将兵从晋张文礼弑镕上书求习归赵庄宗遣之习号泣曰臣世受赵王恩王尝以一剑与臣使自效今闻王死欲以剑自裁念卒无益请击赵破贼报王冤庄宗壮之乃遣阎宝史建瑋等助习讨文礼以习为镇州兵马留后习攻文礼不克庄宗用佗将破之拜习成德军节度使习辞愿授河内一镇得自攻取之乃拜习天平军节度使东南面招讨使习亦未尝攻取后徙镇安国又徙平卢赵在礼作乱遣习以镇兵讨贼未至魏而明宗兵变遣人招之见明宗于胙县平卢监军杨希望闻习为明宗所召乃以兵围习家将杀之指挥使王公俨给希望曰习家不足虑宜分兵守城以虞外变希望信之公俨因擒斩希望习家由是获免而公俨宣言青人不便习因自求为节度使明宗乃以房知温代习镇平卢拜公俨登州刺史公俨不承命知温擒而杀之习复镇天平徙宣武习素为安重诲所不悦乃以太子太师致仕归以其子令谦为赵州刺史奉养之习以无罪怏怏失职居岁余中风卒赠太师子令谦蒙令谦在赵州有善政及卒州人号泣送葬者数千人当时号为良刺史蒙为成德军节度副使后事晋官至礼部侍郎

乌震

乌震

乌震信都人本赵军卒稍以功迁裨校隶习军从讨张文礼家在赵文礼执震母妻及子十余人以招震震不顾文礼乃皆断其手鼻而不诛纵至习军军中皆不忍正视震一恸而止愤激自励攻破镇州以功拜刺史历深赵冀三州震通左氏春秋为刺史以廉平有声明宗闻其名擢拜河北道副招讨使领宁国军节度使代房知温戍卢台始至而戍兵龙暉等作乱见杀赠太师

△孔谦

孔谦魏州人为魏州孔目官魏博入于晋庄宗以为度支使倾巧善事人庄宗及左右皆悦之自少为吏勤敏工书算颇知金谷聚敛之事晋与梁相距河上十余年谦调发供馈未尝乏以成庄宗之业然民亦不胜其苦庄宗初建大号谦自谓当为租庸使而郭崇韬用张宪为使以谦为副谦已怏怏既而建北都谦谓崇韬宜得重人镇之非张宪不可崇韬以为然因以宪留守北都而以宰相豆卢革判租庸谦益失望乃阴求革过失革尝以手书假租庸钱十万谦以示崇韬而微泄其事革闻之惧遂求解职而以王正言为租庸使谦益愤愤求解职庄宗怒其避事欲寘之法赖伶官景进救之乃止已而正言病风不任事景进数为谦言乃罢正言以谦为租庸使赐号丰财赡国功臣谦无佗能直以聚敛为事庄宗初即位推恩天下除百姓田租放诸场务课利欠负者谦悉违诏督理故事观察使所治属州事皆不得专达上所赋调亦下观察使行之而谦直以租庸帖调发诸州不关观察观察使交章谓制敕不下支郡刺史不专奏事唐制也今唐运中兴愿还旧制诏从其请而谦不奉诏卒行直帖又请减百官俸钱省罢节度观察判官推官等员数以至障塞天下山谷径路禁止行人以收商旅征算遣大程官放猪羊柴炭占庇人户更制括田竿尺尽率州使公廩钱由是天下皆怨苦之明宗立下诏暴谦罪斩于洛阳市籍其家遂罢租庸使额分盐铁度支户部为三司

△张延朗

张延朗汴州开封人事梁以租庸使为郢州粮料使明宗克郢得延朗复以为粮料使及即位累迁忠武军节度使长兴元年始置三司使以延朗为之延朗号为有心计以三司为己任而天下钱谷亦无所建明历泰宁雄武军节度使废帝以为吏部尚书兼中书门下平章事判三司晋高祖有异志三司财货在太原者延朗悉调取之高祖深以为恨晋兵起废帝欲亲征而心畏高祖疑不决延朗与刘延朗等劝帝必行延朗籍诸道民为丁及括其马丁马未至晋兵入京师高祖得延朗杀之

△李严

李严幽州人初名让坤事刘守光为刺史后事庄宗为客省使严明敏多艺颇知书而辩同光三年使于蜀为王衍陈唐兴复功德之盛蜀人听之皆竦动时蜀君臣皆庸暗而恃险自安穷极奢僭严还具言可取状初庄宗遣严以名马入蜀市珍奇以充后宫而蜀法严禁以奇货出剑门其非奇物而出者名曰入草物严无所得而还庄宗闻之大怒曰王衍其能免为入草人乎于是决议伐蜀冬魏王继岌西伐以严为三川招抚使【后通鉴严为招抚使欧史讹招讨时军中都招讨则郭崇韬副招讨则李令德又东南面都招讨则高季兴严以招抚为名故先行】与康延孝以兵五千先行所过州县皆迎降至汉州王衍告曰得李严来即降严驰入益州衍以妻母为托即以蜀降严还明宗以为泗州防御使客省使如故其后孟知祥倔强于蜀安重诲用事思有以制知祥者严乃求为西川兵马都监将行其母曰汝前启破蜀之谋今行其以死报蜀人矣初严与知祥同事庄宗严尝有过庄宗怒甚命斩之知祥为解乃笞而释之知祥虽与严有旧恩而恶其来蜀人亦皆恶之严至知祥置酒从容问曰朝廷以公来邪公意自欲来邪严曰君命也知祥发怒曰天下藩镇皆无监军安德尔独来此此乃孺子荧惑朝廷尔即擒斩之明宗不能诘知祥由此遂反

△李仁矩

李仁矩不知其世家少事明宗为客将及即位以为客省使明宗祀天南郊东西川当进助礼钱使仁矩趣之仁矩恃恩骄恣见藩臣不以礼东川节度使董璋置酒召仁矩辞不往于传舍与倡妓饮璋怒率衙兵露刃之传舍牵出将斩之仁矩涕泣拜伏谢罪乃止明日璋置酒召仁矩见其妻子以厚谢之仁矩还言璋必反仁矩素为安重诲亲信思以制璋乃分东川之阆州为保宁军以仁矩为节度使遣姚洪将兵戍之璋已怒仁矩至镇伺璋动静必以闻璋益疑惧遂决反攻阆州仁矩召将校问策皆曰璋有二心久矣常以利啖吾兵兵未可用贼锋方锐宜坚壁以挫之能守旬日大军必至贼当自退仁矩曰蜀懦安能当我精锐之师即驱之出战兵未交而溃遂被擒并其家属皆见杀

△毛璋

毛璋沧州人为横海军节度使戴思远军校晋下魏博思远出奔璋以沧州降晋以为贝州刺史与晋梁相拒河上璋累战有功庄宗灭梁拜华州节度使在镇多不法议者疑其有异志乃徙昭义璋初欲拒命其判官边蔚切谏乃听命璋在华州得魏王继岌伐蜀余赀既富而骄淫

尝服赭袍饮酒使所得蜀奴为王衍宫中之戏明宗闻而恶之召为金吾上将军东川董璋上言璋遣子延赞持书往西川疑有奸乃追还延赞并璋下御史狱延赞款称实璋假子有叔父在蜀欲往省之无私书璋无罪名有司议璋前任藩镇阴畜异图及处班行不慎行止乃停官勒还私第初延赞之蜀与其客赵延祚俱及下狱延祚欲言璋阴事璋许以重赂既出责于璋不与延祚乃诣台自言并璋复下狱中丞吕梦奇议璋前已蒙昭雪而延祚以责赂故复加织罗乃稍宥璋有告者言梦奇受赂乃移军巡狱狱吏锻炼之璋具伏许赂延祚未与尝以马借梦奇而无受赂璋坐长流儒州已而赐自尽

△朱宏昭

朱宏昭太原人少事明宗为客将明宗即位为文思使与安重诲有隙故常使于外董璋为东川节度使以宏昭为副西川孟知祥杀其监军李严宏昭大惧求还京师璋不许遂相猜忌宏昭益开怀待之璋颇重其为人后璋有军事遣宏昭入朝乃免累迁凤翔节度使以谗杀安重诲【事具重诲传】范延光尤恶其为人罢为左武卫上将军宣徽南院使久之为山南东道节度使时明宗已病而秦王从荣祸起有端诸大臣皆欲引去避祸枢密使范延光赵延寿日夕求去延寿使其妻兴平公主入言于中延光亦因孟汉琼王淑妃进说故皆得罢以宏昭及冯赞代之冯赞者亦太原人父璋事明宗为阍者赞儿时以通黠为明宗所爱以为进奏官及即位历河东忠武节度使三司使明宗病甚大臣稀进见而孟汉琼王淑妃用事宏昭及赞并掌机务大事皆决此四人及杀秦王立愍帝益自以为功又所用多非其人给事中陈义险谄好阴谋尝事梁张汉杰又事郭崇韬辄败死宏昭乃引以为枢密院直学士用其谋是时宏昭赞遣汉琼至魏召愍帝入立而留汉琼权知后事明年汉琼请入朝宏昭赞乃议徙成德范延光代汉琼北京留守石敬瑭代延光凤翔潞王从珂代敬瑭三人皆唐大臣以汉琼故轻易其地又不降制书第遣使者监上道从珂由此遂反兵已东愍帝大惧遣人召宏昭计事宏昭曰上召我急将罪我也使者促之甚急宏昭呼曰穷至此耶乃投井死安从进闻之亦杀赞于家妻子皆见杀赞有子三岁其故吏张守素匿之以免汉高祖即位赠宏昭尚书令赞中书令

△刘延朗

刘延朗宋州虞城人废帝起凤翔与共事者五人节度判官韩昭胤掌书记李专美牙将宋审虔客将房皐而延朗为孔目官初愍帝即位徙废帝为北京留守促上道帝召昭胤等议昭胤等皆劝帝反皐又喜鬼神巫祝之说有

瞽者张蒙自言事太白山神神魏崔浩也言吉凶无不中曷引蒙见帝闻其语声惊曰此非人臣也使问于神神传语曰三珠并一珠驴马没人驱岁月甲庚午中兴戊己土曷问其义蒙曰神言如此我能传之不能解也帝即以蒙为馆驿巡官帝将反而兵少又乏食甚惧使曷问蒙蒙传神语曰王当有天下可无忧于是决反使专美作檄书数朱宏昭冯贇之罪驰告诸镇皆不应独陇州防御使相里金遣其判官薛文遇计事帝得文遇大喜而延朗调率城中民财以给军王思同率诸镇兵围凤翔废帝惧遣曷问神神曰王兵少东兵来迎王已而东兵果叛降于帝帝入京师受册明宗枢前即位册曰维应顺元年岁次甲午四月庚午朔帝回顾曷曰神言岂不验哉由是益亲信而专以巫祝用事帝既立以昭胤为左谏议大夫端明殿学士专美为比部郎中枢密院直学士审虔为皇城使曷为宣徽北院使延朗为庄宅使久之以昭胤曷为枢密使延朗为副使审虔为侍卫步军都指挥使而薛文遇亦为职方郎中枢密院直学士由是审虔将兵专美文遇主谋议而昭胤曷及延朗掌机密初帝与晋高祖俱事明宗而心不相悦帝既入立高祖不得已来朝颇自疑延朗等多言敬瑭可留京师昭胤专美曰敬瑭与赵延寿皆尚公主不可独留乃遣之会契丹数寇北边以高祖为大同振武威塞彰国等军都总管屯忻州屯兵忽变拥高祖呼万岁高祖惧斩三十余人而后止帝益疑之与延朗等日夕谋议常至夜分而罢高祖弟重胤为皇城副使公主母曹太后居中因得伺帝动静言语以报高祖益自危帝母魏氏追封宣宪皇太后墓在太原有司议立寝宫高祖言陵与民墓相杂不可立宫帝疑高祖欲毁民墓为国取怨由此发怒罢高祖总管徙镇郢州延朗等多言不可而止后月余文遇独直帝夜召之语罢敬瑭事文遇曰国家事断在陛下敬瑭徙亦反不徙亦反迟速尔不如先事图之帝大喜曰术者言朕今年当得一贤佐定天下卿其是邪乃令文遇手书除目夜半下学士院草制明日宣制两班皆失色居五六日敬瑭以反闻延朗等请帝亲征帝心忧惧常恶言敬瑭事每戒人曰尔无说石郎令我心胆堕地延朗等屡迫之乃行至怀州夜召李崧问计文遇不知而继至帝见之色变崧蹶其足文遇乃出帝曰我见文遇肉颤遽欲抽刀刺之崧曰文遇小人致悞大事刺之益丑乃巳时契丹已立敬瑭为天子以兵而南帝惶惑不知所之遣审虔将干骑至白司马坡踏战地审虔曰何地不堪战虽有其地何人肯立于此不如还也帝遂还自焚高祖入京师延朗等六人皆除名为民自延朗与曷并掌机密延朗专任事诸将当得州者惟视纳赂多少为先后由是人人皆怨曷心患之而不能争每延朗议

事则垂头阳睡晋兵入延朗以一骑走南山过其家指而叹曰吾积钱三十万于此不知何人取之遂为追兵所杀高祖闻暲常不与事哀之后复以为将岁余卒专美事晋为大理卿开运中卒当晋之将起废帝以昭胤为中书侍郎同中书门下平章事出为河阳节度使与审虔文遇皆不知所终

△康思立

康思立本山阴诸部人【按薛史作晋阳人】少为骑将从庄宗破梁夹城战柏乡累功迁突骑指挥使明宗即位历昭武保义军节度使皆有善政潞王起凤翔愍帝遣王思同等讨之思立有捧圣羽林屯兵千五百人乃以羽林千人属思立至凤翔军叛降从珂思立欲尽诛羽林家属未及而兵已至乃以捧圣兵城守从珂兵傅其城呼曰西兵七万策新天子尔五百人何能拒徒陷陕人于死耳捧圣兵闻之皆解甲思立遂开门迎从珂废帝即位以思立初无降意颇不悦之数徙镇寻以老罢石敬瑭反帝幸怀州以思立为北面行营马军都指挥使将从驾骑兵救张敬达未至而敬达死思立以疾卒于道皆高祖入立赠太子少傅

△康义诚

康义诚字信臣代北三部落人以骑射事庄宗为突骑指挥使从明宗讨赵在礼至魏而军变义诚劝明宗南向明宗即位迁捧圣指挥使领汾州刺史从破朱守殷迁侍卫亲军马步军都指挥使领河阳三城节度使出为山南东道节度使复为亲军都指挥使领河阳加同中书门下平章事秦王从荣事起义诚素心结之独持两端语在宗室传三司使孙岳尝为冯贇言从荣必败之状义诚闻而不悦从荣死义诚始引兵入河南府召兵检阅从荣家贇岳至义诚乘乱使人射杀之又以从荣故与朱宏实有隙潞王反凤翔王思同率诸镇兵围之【按通鉴载护国安彦威山南西道张虔钊武定孙汉韶彰义张从宾静难康福凡五镇节度】兴元张虔钊兵叛降思同走诸镇兵皆溃愍帝大怒谓朱宏昭等曰朕新即位天下事皆出诸公然于事兄未有失节今事至此何方转祸当率左右往迎吾兄逊以位苟不吾信死其所也宏昭等惶恐不能对义诚前曰西师惊溃主将怯耳今京师兵尚多臣请尽将以西扼关而守招集亡散为后图愍帝以为然幸左藏库亲给将士人绢二十匹钱五千军士负物扬言曰到凤翔更请一分朱宏实见士无鬪志而义诚尽将以西疑其有二心谓义诚曰今西师小衄无一骑东者人心可知不如以见兵守京师以自固彼虽幸胜特得虔钊一军耳诸镇兵在后其敢径来邪义诚怒曰如此言宏实反矣宏实曰公谓谁欲反邪其声厉闻

于帝召两人讯之两人争于前帝不能决遂斩宏实 【谨按通鉴辑览 御批从厚柔懦无能羣小满朝无足与图国是当从珂举兵犯阙义诚辈早蓄异心逝将他适所可稍恃以支持者惟朱宏实耳虽其固守徐图之计未必果能济事而其心皦然不滓从厚所宜知也乃不辨黑白枉杀忠良譬之木将槁而复披其枝叶能无立见倾覆乎】 以义诚为招讨使悉将禁军以西行至新安降于从珂清泰元年四月斩于兴教门外夷其族

△药彦稠

药彦稠沙陀三部落人初为骑将明宗即位累迁侍卫步军都虞候领寿州节度使安重诲矫诏遣河中指挥使杨彦温逐其节度使潞王从珂以彦稠为招讨使 【按册府元龟作副招讨使考安重诲传索自通与彦稠并命必其副也欧史得之】 明宗欲生得彦温戒彦稠毋杀彦稠希重诲旨杀彦温以灭口明宗大怒然不之罪也长兴中为静难军节度使党项阿埋屈悉保等族抄掠方渠邀杀回鹘使者明宗遣彦稠与灵武康福会兵击之尽诛其族获其大首领连香等又逐盐州诸戎取所掠男女千余人潞王从珂反彦稠为招讨副使王思同兵溃彦稠与王思同俱东走为潞王兵所得囚之华州狱已而杀之晋高祖立赠侍中

钦定续通志卷二百八十四

●钦定续通志卷二百八十五 列传八十五

列传

五代 【五】

○五代五

豆卢革 卢程 任圜 赵凤 李袭吉 张宪
萧希甫 刘赞 何瓚

豆卢革

卢程

任圜

赵凤

李袭吉

张宪

萧希甫

刘赞

何瓚

△豆卢革

豆卢革父瓚唐舒州刺史豆卢世名族唐末革避乱中山为王处直掌书记庄宗议建国以革名家子召为行台左丞相即位拜同中书门下平章事革素不学问除拜官吏多失序常为尚书郎萧希甫驳正颇患之乃荐韦说为相说唐末殿中侍御史后事梁为礼部侍郎革以说能知故事引以佐己而说亦无学术徒以流品自高时庄宗内畏刘皇后外惑宦官伶人郭崇韬虽尽忠于国而亦无学术革说俯仰无所为唯诺崇韬而已唐梁之际仕宦遭乱奔亡而吏部铨文书不完因缘为奸利私鬻告敕乱易昭穆崇韬请论以法议者以为宜革以渐而崇韬疾恶太甚果于必行说革心知其未可不能有所建言是岁冬选人吴延皓改亡叔告身事发及选吏尹玫皆坐死尚书左丞判吏部铨崔沂等皆贬说革诣合门待罪由是一以新法从事往往以伪滥驳放而毙踣羁旅号哭道路者不可胜数及崇韬死说乃教门人上书言其事议者益以罪之是岁大水四方地连震流殍数万军士妻子皆采稻以食庄宗日以责三司使孔谦谦不知所为枢密小吏段徊引前朝故事国有水旱则天子以朱书御札问宰相庄宗乃命学士草诏手书以问革说革说不能对第曰陛下威德着于四海今西兵破蜀所得珍宝足以给军水旱天之常道不足忧也革说各以其子为拾遗父子同省人以为非遽改佗官而革以说子为宏文馆学士说以革子为集贤院学士庄宗崩革为山陵使已祔庙故事当出镇乃还私第数日未得命故人宾客趣使入朝枢密使安重诲诘之谏官希旨上疏诬革纵田客杀人说坐与邻人争井逐俱罢革贬辰州刺史说淑州刺史所在驰驿发遣宰相郑珣任圜三上章请毋行后命不报革复坐请俸私自入说卖官与选人责授革费州司户参军说夷州司户参军皆员外置同正员

【按通鉴革因奏事时礼貌不恭又是时百官俸皆折估革父子独受实钱及强夺民田取宿藏物因罢相出为刺史与史所载获罪之由事迹微异】

已而窜革陵州说合州皆长流百姓初说尝以罪窜南海遇赦还寓江陵与高季兴相知及相常相问遗唐兵伐蜀季兴请以兵入三峡诏使自取夔忠万归峡等州为属郡蜀破季兴无功而唐用佗将取五州明宗初即位季兴数请五州以谓先帝所许朝廷不得已与之及革说再贬因以其事归罪二人诏赐自尽

△卢程

卢程不知其世家何人也 【按薛史程唐朝右族祖懿父蕴皆历仕通显考新唐书世系表范阳二房卢氏下明注懿蕴而无官懿第三子庄生鼎起居舍人与苏楷驳昭宗谥而蕴下无程新唐书五代史皆欧阳修所撰未必不相印证若此或薛史所载未得其实今仍原文】 唐

昭宗时举进士为盐铁出使巡官唐亡变服为道士游燕赵诸侯间豆卢革荐为河东节度推官庄宗尝召程草文书辞不能其后战胡柳掌书记王诚歿于阵庄宗还太原置酒谓监军张承业曰吾以卮酒辟一书记于坐因举卮属巡官冯道程位在道上以尝辞不能故不用而迁程支使程大恨曰用人不以门阀而先田舍儿邪庄宗即位议择宰相卢汝弼苏循已死次节度判官卢质当拜质不乐任事乃言革程皆唐名族可相庄宗以程为中书侍郎同平章事程奉皇太后册自魏至太原所至驱役丁夫笞辱官吏有假驴夫于程者程帖兴唐府给之府吏启无例程怒笞吏背少尹任团【按原文作任圜薛史同考圜传是时方为真定尹非兴唐少尹也通鉴作任团圜之弟今从之】庄宗姊壻也诣程诉其不可程方据几决事视团骂曰尔何虫豸恃妇家力耶宰相取给州县何为不可团不对而去驰至博州诉庄宗庄宗大怒趣令自尽赖卢质力解乃罢为右庶子庄宗入洛程于路坠马中风卒赠礼部尚书

△任圜

任圜京兆三原人李嗣昭节度昭义辟圜观察支使梁兵围潞州踰年嗣昭危甚问圜去就计圜劝坚守已而庄宗破梁夹城潞围解闻圜计甚嘉之其后嗣昭与庄宗有隙圜数奉使往来辩释谗构嗣昭卒免于祸胡柳之战圜颇有功庄宗劳之曰儒士亦破体邪仁者之勇何其壮也张文礼弑王镕庄宗遣嗣昭讨之嗣昭战歿圜代将其军文礼子处球等闭城坚守不可下圜数以祸福谕镇人镇人信之处球登城呼圜乞指生路圜告之曰以子先人固难容贷然罚不及嗣子可从轻其如拒守经年伤吾大将一朝困竭方布款诚以此计之子亦难免然坐而待毙曷若伏而俟命处球流涕曰公言是也乃遣人送状乞降既而符存审攻破镇州处球虽见杀而镇之吏民以尝乞降得保家族者甚众其后以镇州为北京拜圜工部尚书兼真定尹北京副留守知留守事为政有惠爱明年郭崇韬兼领成德军节度使改圜行军司马仍知真定府事圜与崇韬素善又为其司马崇韬因以镇州事托之而圜多所违异初圜推官张彭为人倾险贪黷圜信任之及崇韬领镇彭为圜谋隐其公廩钱庄宗遣宦者选故赵王时宫人有许氏者光有色彭赂守者匿之事觉召彭将罪之彭惧悉以前所隐公钱簿书献崇韬崇韬深德彭不杀由是与圜有隙同光三年圜罢司马守工部尚书魏王继岌伐蜀崇韬惧圜攻已于后乃辟圜参魏王军事崇韬见杀以圜代将其军康延孝反继岌遣圜击败延孝于汉州魏王行至渭南自杀圜悉将其军以东明宗嘉其功拜圜同中书门下平章事兼判三司时明宗新诛孔谦圜选辟才俊

抑绝侥幸公私给足是秋韦说豆卢革罢相圜与安重诲郑珏孔循议择当为相者圜意属李琪而珏循欲引太常卿崔协重诲以为然佗日明宗问谁可相者重诲即以协对圜争曰天下皆知崔协不识字号为没字碑以臣一人取笑足矣相位有几岂容更益笑端明宗在藩时识易州刺史韦肃欲相之次及冯道议未决重诲等退休于中兴殿廊下孔循不揖拂衣而去行且骂曰天下事一则任圜二则任圜圜乃何人圜犹以李琪为言重诲终以循言为信居月余协与冯道皆拜相圜与重诲交恶自协始故事使臣出四方皆自户部给券重诲奏请自内出圜争之不能得遂与重诲辨于帝前圜声色俱厉明宗罢朝嫔御迎前问曰与重诲论事者谁明宗曰宰相也宫人奏曰妾在长安见宰相奏事未尝如此盖轻大家耳明宗由是不悦而使臣给券卒自内出圜益愤沮重诲尝求圜妓不与由是二人益相恶圜遽求罢乃罢为太子少保寻致仕退居磁州朱守殷反重诲诬圜与守殷连谋遣人矫制杀圜明宗知而不问为下诏坐圜与守殷通书而言涉怨望愍帝即位赠太傅

△赵凤

赵凤幽州人少以儒学知名燕王刘守光时悉黥燕人为兵凤惧髡为僧依燕王弟守奇自匿从守奇奔梁为郢州节度判官晋取郢庄宗得凤喜以为扈銮学士即位拜中书舍人翰林学士刘皇后拜张全义为父明日遣宦者命学士作笺上全义以父事之凤上书极言不可全义养子郝继孙犯法死宦官伶人利其财固请籍没凤言继孙为全义养子不宜有别籍之财于法亦不至籍没时皇后及羣小用事言皆不纳明宗立武君不通文字四方章奏尝使安重诲读之重诲亦不知书奏读多不称旨于是置端明殿学士以冯道及凤为之凤好直言而性刚强素与任圜善圜为相颇荐进之圜为重诲所诬杀凤号哭呼重诲曰任圜天下义士岂肯谋反而公杀之何以示天下重诲惭不能对术士周元豹善相人庄宗信重之以为北京巡官尝相明宗当贵不可言明宗即位思元豹以为神将召至京师凤谏曰好恶上所慎也今陛下神其术而召之则倾国之人皆将奔走吉凶之说转相惑乱为患不细明宗遂不复召朱守殷反明宗幸汴州守殷诛又诏幸邺从驾诸军方自河南徙家至汴不欲北行而定州王都以为将图己疑不自安宰相率百官请罢幸不听凤手疏责安重诲言甚切直重诲以白遂罢天成四年夏拜门下侍郎同中书门下平章事秘书少监于峤者自庄宗时与凤俱为翰林学士久不迁自以材名在凤上因与萧希甫非斥时政尤诋訾凤凤衔之左迁峤秘书少监峤因被酒往见凤凤辞峤诟直吏又溺于从者直庐而去凤以闻诏夺峤

官流振武天下冤之安重诲为边彦温等告变明宗廷
诘具伏其诈即斩之后数日凤奏事中兴殿启曰臣闻奸人有诬重诲者明宗曰此闲事
朕已处置卿可无问凤曰臣所闻者系国家利害陛下
不可以为闲因指殿屋曰此殿所以尊严宏壮者栋梁柱石之所扶持也若折一椽去一
柱则倾危矣大臣国之栋梁柱石也且重诲起微贱历
艰危致陛下为中兴主安可使奸人动摇明宗改容曰卿言是也遂族彦温等三家其后
重诲得罪羣臣无敢言者独凤数言重诲尽忠明宗以
凤为朋党罢为安国军节度使凤在镇所得俸禄悉以分将校宾客废帝入立召为太子
太保病足居于家清泰二年卒

△李袭吉

李袭吉洛阳人干符中举进士为晋王掌书记博学多知唐故事迁节度副使官至
谏议大夫晋与梁交兵累年晋王数困欲通和使袭吉
为书谕梁辞甚辩丽梁太祖使人读之至于毒手尊拳交相于暮夜金戈铁马蹂践于明
时叹曰李公有士如此使吾得之傅虎以翼也袭吉为
人恬淡以文辞自娱天佑三年卒以卢汝弼代为副使汝弼工书画亦多知唐故事而文
辞不及袭吉庄宗嗣晋王承制封拜官爵皆出汝弼十
八年卒庄宗即位赠袭吉礼部尚书汝弼兵部尚书

△张宪

张宪字允中晋阳人庄宗以为天雄军节度使掌书记即位拜工部侍郎租庸使累
迁刑部侍郎判吏部铨东都副留守宪精于吏事甚有
能政庄宗幸东都定州王都来朝命宪治鞠场与都击鞠庄宗即位坛在鞠场宪以为不
可毁乃别治宫西为鞠场未成庄宗怒命两虞候亟毁
坛为场宪退而叹曰此不祥之兆也明宗北伐契丹取魏铠仗给军有细铠五百宪给之
而不以闻庄宗至魏大怒责宪驰自取之左右谏止又
问宪库钱几何宪上库簿有钱三万缗庄宗益怒谓其嬖伶史彦琼曰我饮博须钱十余
万而宪以故纸给我我未渡河时库钱常百万缗今复
何在彦琼为宪解乃已郭崇韬伐蜀荐宪可相而宦官伶人不欲枢密承旨段徊曰宰相
在天子前事有非是尚可改作一方之任苟非其人则
为患不细宪材诚可用不如任以一方乃以为太原尹北京留守赵在礼作乱宪家在魏
在礼善待之以书招宪宪斩其使不发书而上之庄宗
遇弑明宗入京师太原犹未知而永王存霸来奔左右告宪曰魏兵南向主上存亡未可
知存霸来无诏书而所乘马秋断得非战败者乎宜拘
之以俟命宪曰吾本书生无尺寸功而人主遇我甚厚岂宜怀二心以幸变第可与之俱
死尔宪从事张昭远教宪奉表明宗劝进宪涕泣拒之

已而存霸见符彦超愿为僧以求生彦超麾下兵大噪杀存霸宪出奔忻州亦见杀

△萧希甫

萧希甫宋州人少举进士青州节度使袁象先辟为巡官希甫不乐弃其母妻变姓名亡之镇州赵王王镕以为参军尤不乐又亡之易州削发为僧庄宗将建国置百官求隐逸士以李绍宏荐为魏州推官庄宗即位欲以知制诰有诏定内宴仪问希甫枢密使得坐否希甫以为不可忤宦官张居翰宰相豆卢革等希旨共排斥之以为驾部郎中庄宗灭梁遣希甫宣慰青齐始知母死妻亦改嫁乃发哀服丧于魏州明宗即位召为谏议大夫复置匭函以希甫为使希甫建言自兵乱相乘王纲大坏侵欺凌夺有力者胜凡掠人妻女占人田宅奸赃之吏刑狱之冤何可胜纪匭函一出投诉必多功臣贵戚有不得绳之以法者乃自天成元年四月二十八日昧爽已前大辟已上皆赦除之然后出匭函以示众初明宗欲以希甫为谏议大夫豆卢革韦说颇沮难之其后革说为安重诲所恶希甫希旨诬奏革说卒皆贬死拜左散骑常侍希甫褊而躁进尝遣人夜叩宫门上变言河堰牙官李筠告本军谋反诘旦追问无状斩筠军士诣安重诲求希甫啖之坐动摇军众贬岚州司户参军卒

△刘赞

刘赞魏州人也父玘为县令赞始就学衣以布每食则玘自肉食而别以蔬食食赞曰肉食君之禄也尔欲之则勤学问以干禄此非尔食也由是赞益力学举进士为罗绍威判官去为租庸使赵岩巡官又为孔谦盐铁判官明宗时累迁御史中丞刑部侍郎守官以法权豪不可干以私时秦王从荣握兵而骄多过失言事者请置师傅大臣畏王请王得自择王请赞乃拜赞秘书监傅王赞泣曰祸将至矣王府元帅属官十余人多浮薄倾险日献谀谄独赞从容讽以正道王恶之戒左右赞来不得通赞亦月一至府而已退则杜门不交人事已而王果败死唐大臣议王属官当坐者冯道曰元帅判官任赞在职不逾月詹事王居敏及刘赞皆以正直见恶河南府判官司徒诩病告久皆宜不与其谋惟咨议参军高辇与王最厚法当死【按五代史补高辇劝秦王诛武将唐知训等王曰至尊在上一旦如此得无危乎辇曰子弄父兵罪当笞尔不然悔将无及矣此辇与谋坐死之证史失载】余可原减朱宏昭曰使秦王得入光政门当待赞等如何且法有首从今秦王夫妇女皆死而赞等止其一身幸矣道等难之冯赞固争以为不可于是论高辇死而任赞等十七人皆长流赞流岚州清泰二年诏归田里行至石会关病卒

△何瓚

何瓚闽人唐末举进士及第庄宗镇太原辟为判官张承业卒代知留守事为人明敏通吏事庄宗建大号于邺都拜谏议大夫瓚虑庄宗事不成求留守北京瓚与明宗有旧明宗即位召还见内殿劳问久之已而以瓚为西川节度副使时孟知祥已有二志方以副使赵季良为心腹闻瓚代之亟奏留季良遂改瓚行军司马知祥反罢置私第饮恨而卒

钦定续通志卷二百八十五

●钦定续通志卷二百八十六 列传八十六

列传

五代 【六】

○五代六 义儿

（臣）等谨按义儿盛于梁唐之际自梁太祖唐太祖庄宗明宗皆有之梁以友文召祸着之家人传中友恭在唐书逆臣友谦事梁不终列于杂传庄宗之世以为乱贼嬖幸恩泽之资初无足述明宗则行钦戕其亲子从珂移其神器更无复异姓骨肉之谊矣欧阳修独以唐太祖养子立义儿传其说具见序中第它史所无无可附丽而事专唐代不宜杂置今以入唐臣传后仍存其序云

欧阳氏曰呜呼世道衰人伦坏而亲疏之理反其常干戈起于骨肉异类合为父子开平显德五十年间天下五代而实八姓其三出于勾养盖其大者取天下其次立功名位将相岂非因时之隙以利合而相资者耶唐自号沙陀起代北其所与俱皆一时雄杰■〈虎武〉武之士往往养以为儿号义儿军至其有天下多用以成功业及其亡也亦由焉太祖养子多矣其可纪者九人其一是为明宗其次曰嗣昭嗣本嗣恩

存信存孝存进存璋存贤作义儿传 【李存审后复以符氏大显故别自为传】

李嗣昭 李嗣本 李嗣恩 李存信 李存孝 李存进

李存璋 李存贤

李嗣昭

李嗣本

李嗣恩

李存信

李存孝

李存进

李存璋

李存贤

△李嗣昭

李嗣昭字益先 【从薛史增】 本姓韩氏汾州太谷县民家子也太祖出猎见林中有异气召问其家适生儿遗以金帛而取之命弟克柔养为子初名进通后改名嗣昭短小而胆勇过人嗜酒太祖微戒之遂终身不饮太祖爱其谨厚常从用兵为内衙指挥使王珙与其兄珂争立遣嗣昭助珂败珙于猗氏梁救珙又败之于胡壁堡光化元年泽州李罕之袭潞州以降梁梁遣丁会应之嗣昭与会战含山大败之遂取泽州明年克潞州三年出山东取梁洺州梁太祖自将攻之设伏于青山口嗣昭弃城走遇伏大败天复元年梁取晋绛慈隰大举围太原嗣昭日以精骑出击会大雨梁军解去晋汾州刺史李瑋叛降梁嗣昭复取汾州又取慈隰梁兵西围凤翔嗣昭乘间攻梁晋绛梁朱友宁氏叔琮迎击之嗣昭败走晋遣李存信率兵迎嗣昭存信又败梁军遂围太原而慈隰汾州复入于梁太祖大恐谋走云州李存信等劝太祖奔契丹嗣昭力争以为不可赖刘太妃亦言之乃止嗣昭昼夜出奇兵击梁军乃解去嗣昭复取汾慈隰当是时镇定皆已绝晋附梁晋外失大国之援内亡诸州仍岁之间孤城被围者再嗣昭力战之功为多天佑三年与周德威攻梁潞州降丁会以嗣昭为昭义军节度使梁攻潞筑夹城围之梁太祖尝遣人招降嗣昭嗣昭斩使拒守踰年庄宗始攻破夹城嗣昭完辑兵民抚养甚有恩惠胡柳之败庄宗惧欲还兵临濮嗣昭曰梁军已胜旦暮思归吾若收军使彼休息整而复出何以当之宜因其劳乏以精骑挠之时梁军已登无石山庄宗遣嗣昭转击山北而自以银枪军争山大败梁军于是晋城德胜矣周德威死嗣昭权知幽州居数月以李绍宏代之嗣昭将去幽州人皆哭遮留之夜遯去十九年庄宗击契丹于望都被围数十重嗣昭以三百骑决围翼庄宗出阎宝攻镇州而败以嗣昭代之镇兵出掠九门嗣昭以奇兵击镇军且尽余三人匿破垣中嗣昭驰马射之反为贼射中脑嗣昭顾箠中矢尽拔矢于脑射杀一人还营而卒嗣昭七子继侗长而懦其弟继韬因之以自立庄宗方与梁相持河上因即以为昭义军留后继韬委政于魏琢申蒙琢等常教继韬反未决庄宗在魏以事召监军张居翰节度判官任圜琢等以谓庄宗召问继韬事且见诛因趣之继韬乃遣其弟继远入梁梁末帝即拜继韬同中书门下平章事居数月庄宗灭梁继韬将走契丹会赦至乃随其母杨氏朝于京师杨氏善畜财平生居积行贩至货百万当嗣昭被围夹城时弥年军用乏绝杨氏之积有助焉至是乃赍银数十万两至京师厚赂宦官伶人及刘皇后皆为言庄宗释继韬数召从猎宠幸无间李存渥数诋责之继韬不自安求归镇不许乃阴使人教继远起变于军中冀遣已安辑

之事泄斩于天津桥并诛其二子即遣人斩继远以继俦知潞州事已而召还京师继俦悉取继韬伎妾珍翫不时即路其弟继达怒曰吾兄父子诛死而大兄不仁利其货财淫其妻妾吾所不忍也乃服纆麻自变量百骑坐戟门使人入杀继俦节度副使李继珂募市人千余攻继达继达走城外自刭死继能继袭皆以事见杀惟继忠仅免家于晋阳杨氏所积余货犹巨万晋高祖自太原起兵召契丹为援契丹求赂高祖贷于继忠以取足高祖入立以为沂棣单三州刺史开运中卒

△李嗣本

嗣本本姓张氏雁门人少事太祖赐姓名养为子从击居庸关以功迁义儿军使从破王行瑜迁威远军使从攻罗宏信以先锋兵破汤阴从庄宗破潞州夹城累迁振武节度使号威信可汗天佑十三年从击刘鄩下洺磁诸州六月还军振武契丹入代北攻破蔚州嗣本战歿

△李嗣恩

嗣恩本姓骆吐谷浑部人少事太祖能骑射为铁林军将稍以战功迁突阵指挥使赐姓名以为子从败康怀英迁左厢马军都指挥使从李嗣昭援朱友谦于河中与梁兵力战稍中其口不日迁辽州刺史从庄宗入魏迁天雄军马步都指挥使刘鄩攻太原兵趣乐平嗣恩从后追之自他道先入太原以守鄩兵去嗣恩亦以兵会庄宗于魏从战于莘累迁振武节度使天佑十五年卒赠太尉

△李存信

存信本姓张父君政回鹘李思忠之部人也存信少善骑射通六蕃书语从太祖入关破黄巢累功为马步军都指挥使赐姓名以为子存信与存孝俱为养子材勇不及存孝而不为之下由是交恶存孝所为存信每沮激之存孝卒得罪死而存信数从征伐以功领郴州刺史遣将兵救朱宣屯于莘县为罗宏信所击败亡太祖子落落从讨刘仁恭大败于安塞太祖大怒顾存信曰昨日吾醉公独不能为我战邪古人三败公已二矣将杀之存信叩头谢罪而免由是大惧常称疾天复二年卒

△李存孝

存孝代州飞狐人本姓安名敬思太祖略地代北得之赐姓名以为子常从为骑将李罕之之来归也遣存孝与薛阿檀安休休等以兵七十助罕之还击张言于河阳梁亦遣丁会牛有节等助言战于温县梁军先扼太行存孝大败安休休被执是时晋已得泽潞岁与孟方立争邢洺磁卒取三州存孝功为多明年潞州军乱梁遣李说攻罕之于泽州存孝以骑兵五千救之梁军呼罕之曰公常倚太原为命今上党已归朝

大兵围太原沙陀将无穴自处公复谁恃而不降乎存孝以精骑五百绕梁栅呼曰我沙陀之求穴者待尔肉食军可令肥者出鬪梁骁将邓季筠引军出战存孝舞稍擒之讒败走追击至马牢关还攻潞州而孙揆方以朝命来为节度使以梁卒三千为卫褒衣大盖拥节先驱存孝以三百骑伏长子西崖谷间伺揆军过横击断之擒揆归于是梁守将葛从周朱崇节弃潞去复取潞州因攻晋绛张浚韩建皆走存孝猿臂善射身被重铠橐弓坐稍舞铁挝出入阵中以两骑自从战酣易骑上下如飞其取潞功为多而太祖别以康君立为潞州留后存孝为汾州刺史存孝负其功不食者数日及走张浚迁邠州刺史大顺二年徙邢州留后 【按旧唐书以存孝据邢州为大顺元年事】 时晋军连岁攻赵常山存孝常为先锋下赵临城元氏赵王求救于李匡威匡威兵至晋军辄引去存孝素与存信有隙存信譖之曰存孝有二心常避赵不击存孝不自安乃附梁通赵自归朝廷因请会兵伐晋朝命赵王王镕援之明年赵与幽州有隙惧而与晋和反以兵三万助晋击存孝存孝婴城自守太祖自将兵傅其城掘堑以围之存孝出兵冲击堑不得成裨将袁奉韬使人说存孝曰公所畏者晋王尔王俟堑成且留兵去诸将非公敌也存孝以为然堑成存孝遂窘城中食尽登城呼曰儿蒙王恩位至将相岂欲舍父子而附仇讎乃存信构陷之耳愿生见王一言而死太祖遣刘夫人入城慰谕引与俱来存孝泥首请罪曰儿于晋有功而无过所以至此由存信为之耳太祖叱曰尔为书檄罪我百端亦存信为之邪缚至太原车裂以徇然太祖惜其材怅然恨诸将之不能容也为之不视事者十余日康君立素善存信方二人之交恶也君立每左右存信以倾之存孝已死太祖每语及存孝流涕不已君立以为不然太祖怒酖杀君立 【按薛史与此同唐末见闻录云行剑斫损君立把送马步司收禁翌日放出寻已身毙通鉴考异以为薛史乃文饰其事】 君立初为云州牙将唐僖宗时太祖逐段文楚盖君立首事后累功表昭义节度使

△李存进

存进振武人本姓孙名重进 【薛史作重禄】 太祖攻破朔州得之赐姓名养为子从破黄巢以为义儿军使从庄宗战柏乡迁行营马步军都虞候历慈沁二州刺史魏博初定以为天雄军都部署治乱军以法犯辄梟磔于市魏人屏息畏之从战河上以功迁振武军节度使时晋军德胜为南北寨每以舟兵来往颇以为劳而河北无竹石存进乃以苇笮维大舰为浮梁庄宗大喜解衣以赐之镇州之役史建瑭阎宝李嗣昭相次战歿乃以存进为招讨使军东垣晨出刍牧张处球以兵千余逼存进栅存进

出战杀处球兵殆尽而存进亦歿于阵赠太尉子汉韶
明宗时复本姓为洋州节度使潞王从珂以凤翔反汉韶与张虔钊会唐军讨之唐军皆
降于从珂独汉韶与虔钊军不降俱奔蜀事蜀历永平
兴元武信节度使卒于蜀

△李存璋

存璋字德璜云中人 【从册府元龟增】 初与康君立薛志勤等从太祖破黄巢
累迁义儿军使太祖病革存璋与张承业等受顾命立
庄宗为晋王以存璋为河东马步军使晋自先王时尝优假军士军士多犯法踰禁庄宗
新立尤患之存璋一切绳以法境内清肃从攻夹城战
柏乡以功迁汾州刺史庄宗与刘鄩战于魏博梁遣王檀乘虚袭太原存璋以汾州兵入
城拒守以功累迁大同军节度使天佑十九年卒赠太
尉

△李存贤

存贤字子良 【从薛史增】 许州人也本姓王名贤少为黄巢军卒善角抵太祖
于陈州得之赐姓名养为子后为义儿军副兵马使迁
沁州刺史沁当敌冲徙其南百余里据险立栅为治所存贤至曰徙城避敌岂勇者所为
乃复城故州梁兵屡攻之卒不能近 【按册府元龟
载汴人将袭沁伏兵城下存贤觉其奸变令守陴者鼓噪如攻战之势敌遂退足补史阙
】 迁武州刺史又迁慈州天佑十八年梁攻朱友谦庄
宗遣存贤援之友谦新叛梁归晋河中食少人心多贰谍者因谓存贤曰河中人欲杀子
以归梁宜亟去存贤曰死王事吾志也复何恨哉卒击
走梁兵庄宗即位拜右武卫上将军庄宗亦好角抵常与王都较而屡胜颇以自矜因顾
存贤曰尔能胜我与尔一镇存贤博而胜之同光二年
春幽州符存审病甚庄宗置酒宫中叹曰吾创业故人零落殆尽存者惟存审耳今又病
笃北方之事谁可代之因顾存贤曰无以易卿角抵之
胜吾不食言 【按薛史此为存贤得蔚州时事与此互异】 即日以为卢龙军节度使
是岁卒于幽州赠太傅

钦定续通志卷二百八十六

●钦定续通志卷二百八十七 列传八十七

列传

五代 【七】

○五代七

桑维翰

景延广

吴峦

桑维翰

景延广

吴峦

△桑维翰

桑维翰字国侨河南人貌丑怪身短面长常临鉴曰七尺之身不如一尺之面慨然有志于公辅初举进士主司恶其姓与丧同音有劝其从佗求仕者维翰铸铁砚示人曰砚弊则改而佗仕卒以进士及第晋高祖辟为掌书记常以自从高祖有异谋维翰与刘知远赞成之因求援于契丹邪律德光已许诺而赵德钧亦以重赂啖德光求助已高祖惧事不果乃遣维翰为陈利害甚辩德光意乃决卒以灭唐兴晋维翰力也高祖即位以为翰林学士礼部侍郎知枢密院事迁中书侍郎同中书门下平章事兼枢密使天福四年出为相州节度使徙泰宁镇州安重荣既得吐浑欲用以攻契丹高祖意未决维翰上疏言契丹未可与争者七高祖召使者至卧内谓曰北面事方挠吾胸中得卿此疏计已决可无忧也七年徙镇晋昌出帝即位召拜侍中景延广用事与契丹绝盟维翰言不入乃阴使人说帝曰制契丹而安天下非用维翰不可乃出延广于河南拜维翰中书令复为枢密使封魏国公事无巨细一以委之数月间百度寢理时翰林学士端明殿学士枢密院学士皆久废维翰复奏置【按五代会要开运元年六日敕翰林学士与中书舍人旧分为两制各置六员偶自近年暂停内署况司诏命必在深严将使从宜邳仍旧贯宜复置翰林学士院以本纪考之正维翰除枢密使之月也】悉用亲旧为之维翰权势既盛四方赂遗岁积巨万内客省使李彦韬端明殿学士冯玉用事共谗之由是日益见疏帝饮酒得疾维翰阴白太后请为皇弟重睿置师傅帝疾愈知之怒罢为开封尹维翰遂称足疾稀复朝见契丹屯中渡破栾城杜重威等大军隔绝维翰曰事急矣乃见冯玉等计事不合又求见帝帝方调鹰苑中不暇见维翰退而叹曰晋不血食矣自契丹与晋盟始成于维翰而终败于景延广故自兵兴契丹未尝不以此两人为言德光将至京师遣张彦泽遗太后书问此两人在否可使先来帝以维翰尝议毋绝盟而已违之也不欲使见德光因讽彦泽图之而彦泽亦利其货维翰状貌既异素威严自持老将大臣见者无不屈服彦泽以骁悍自矜每往候虽冬月未尝不流汗彦泽入京师左右劝维翰避祸维翰不为动彦泽以兵入府问维翰何在维翰厉声曰吾晋大臣自当死国安得无礼彦泽股栗不敢仰视退谓人曰吾不知桑维翰何如人今日见之犹使人恐惧如此乃以帝命召维翰送侍卫司狱是夜彦泽使人缢杀之以自缢告德光德光至京师以尸赐其家而货财悉为彦泽所掠

△景延广

景延广字航川陕州人父建善射尝教延广曰射不入铁不如不发由是延广以挽强称事梁邵王友海友海谋反被幽延广亡去后从王彦章战中都彦章败延广仅以身免明宗时朱守殷平录从反者晋高祖主之延广以汴州军校当诛高祖惜其才阴纵之后以为客将即位以为侍卫步军都指挥使累迁义成保义军节度使复召为侍卫马步军都虞候徙镇河阳三城迁马步军都指挥使高祖崩出帝立延广有功焉初立晋大臣议告契丹致表称臣延广独不肯但致书称孙而已大臣皆知其不可而不能夺契丹果怒数来责延广谓契丹使者乔莹曰先皇帝北朝所立今天子中国自册可为孙不可为臣且晋有横磨大剑十万口翁要战则来佗日不禁孙子取笑天下莹知其言必起两国之争惧后无以取信也因请载于纸藏衣领中以归具告契丹契丹益怒 【谨按通鉴辑览御批晋既藉北朝以兴岂能相抗辽与晋有德无怨背之实为不祥且尔时并无良将精兵之可恃而延广大言不惭徒贻其君以负义之辱小人庸罔诬国顾如是哉】 天福九年春契丹入雁门侵代州延广从出帝北征为御营使相拒澶魏间先锋石公霸与契丹遇于戚城高行周符彦卿兵少不能救驰骑促延广益兵延广按兵不动三将被围数重帝自御军救之乃得出延广方握亲兵节制诸将恃功恣横凡号令皆由己出帝亦不能制也自延广一言契丹与晋交恶诸将皆力战而延广独闭壁不敢出契丹尝呼晋人曰景延广唤我来何不速战凡书檄未尝不以为言契丹去出帝还京师出延广为河南尹留守西京郁郁不得志见晋日削度必不能支契丹乃为长夜之饮大治第宅置妓乐惟意所为契丹至中渡延广屯河阳闻杜重威降乃还德光至相州遣骑兵数千杂晋军渡河趋洛以取延广戒曰延广南奔吴西走蜀必追取之而延广顾家未能引决兵奄至乃驰见德光于封邱德光责之曰南北失欢皆因尔召乔莹出书质其前言延广具服以十事责延广每服一事授一牙筹至八筹延广以面伏地不能仰视遂叱而锁之送之北行至陈桥止民家夜分扼吭死汉高祖时赠侍中

△吴峦

吴峦字宝川郢州卢县人少举明经不中为大同沙彦珣节度判官晋高祖起太原契丹入援过云州执彦珣去城中推峦为主闭门拒守契丹围之七月不能下高祖义之以书告契丹使解兵去召峦为武宁军节度副使厯复州防御使出帝即位与契丹绝盟河北诸州皆警以贝州水陆冲缓急可转饷乃积刍粟数十万以王令温为永清军节度使守之令温牙将邵

珂素骄很难制夺职闲居阴通于契丹言贝州可取状
会令温以事朝京师心疑珂质其子崇范自随晋大臣以峦前守云中故令驰驿代守贝
州峦善抚士卒天大寒裂其帷幄以衣士卒士卒皆爱
之珂求见愿自效峦推心信之开运元年正月契丹兵至峦命珂守南门围三日四面急
攻峦从城上投薪草焚其梯冲殆尽已而珂引契丹入
峦守东门方战左右报珂反顾城中已乱即投井死令温家属为契丹所虏出帝悯之以
令温为武胜军节度使后累历方镇周显德中卒令温
瀛州河间人也

钦定续通志卷二百八十七

●钦定续通志卷二百八十八 列传八十八

列传

五代 【八】

○五代八

苏逢吉 史宏肇 杨邠 王章 刘铕 李业

聂文进 后赞 郭允明

苏逢吉

史宏肇

杨邠

王章

刘铕

李业

聂文进

后赞

郭允明

△苏逢吉

苏逢吉京兆长安人汉高祖镇河东父悦为从事逢吉常代父作奏记高祖召见逢
吉以为节度判官 【按五代史补高祖在河东幕府
阙书记朝廷除前进士邱庭敏为之庭敏以高祖有异志恐为所累辞疾不赴遂改苏逢
吉庭敏不见于史附注以表其志节】 高祖性素严宾
佐稀得见逢吉独终日侍立两使文簿以时进高祖多以为可然为人贪诈无行喜杀戮
高祖尝以生日遣逢吉疏理狱囚以祈福谓之静狱逢
吉入狱阅囚无轻重曲直悉杀之报曰狱静矣高祖建号拜中书侍郎同中书门下平章
事时朝廷大事皆出逢吉逢吉素不学间出其意见故
汉世尤无法度高祖既定京师逢吉与苏禹珪同在中书除吏多违旧制逢吉尤纳货赂

然高祖方倚信二人故莫敢有告者凤翔李永吉朝京
师逢吉使人许以一州求其先王玉带永吉以无为解逢吉乃使人市一玉带直数千缗
责永吉偿之前客省使王筠使楚还逢吉意其获重赂
亦许以一州筠以橐装之半献之而皆不得州又以取田宅故族李崧时天下多盗逢吉
自草诏下州县凡盗所居本家及邻保皆族诛或谓逢
吉曰为盗族诛已非法况邻保乎逢吉不得已但去族诛而已于是郢州捕贼使者张令
柔尽杀平阴县十七村民数百人卫州刺史叶仁鲁闻
部有盗自帅兵捕之村民十数先逐盗入山中盗散走仁鲁从后至见民捕盗者以为贼
悉擒杀之逢吉颇以仁鲁为能由是天下因盗杀人滋
滥逢吉已贵益豪侈郟中书堂食日命家厨进珍羞继母死不服丧妻武氏卒讽百官及
州镇皆输绫绢为丧服武兵未期除其诸子为官有庶
兄自外来未白逢吉而见其诸子逢吉怒托以佗事告于高祖杖杀之尝从高祖征邺数
使酒辱周太祖太祖恨之隐帝立逢吉素善李涛讽涛
请罢太祖与杨邠枢密李太后怒涛离间大臣以杨邠代涛相事悉决焉逢吉禹珪备位
而已干佑二年加拜司空以周太祖镇邺不落枢密使
事与史宏肇有隙争谋出镇以避之既而中辍人问其故逢吉曰苟舍此而去史公一处
分吾齏粉矣是时隐帝少小人在侧宏肇等威制人主
帝与左右李业郭允明等皆患之逢吉每见业等以言激之业等卒杀宏肇 【薛史李业
等谋杀宏肇诸人逢吉初不预其谋闻变惊骇与此
互异】 即以逢吉权知枢密院方命草麻闻周太祖起兵乃止逢吉夜宿金祥殿东阁未
瞑已见李崧在侧周兵至北郊官军败逢吉与隐帝走
赵村自杀于民舍周太祖定京师梟其首适当李崧被刑之所

△史宏肇

史宏肇字化元郑州荥泽人驕勇走及奔马梁末选为禁兵汉高祖典禁兵宏肇为
军校后从高祖于太原使将武节左右指挥高祖建号
代州王暉拒命宏肇攻破之以功拜忠武军节度使侍卫步军都指挥使契丹北归留耿
崇美攻王守恩于潞州高祖南向京师遣宏肇前行击
走崇美守恩以城归汉河阳武行德泽州霍令奇等 【案通鉴薛史俱作翟令奇】 皆
迎宏肇自归高祖安行入京师宏肇严毅寡言麾下稍
忤意立挝杀之以故士畏法所至秋毫无犯迁侍卫亲军马步军都指挥使领归德军节
度使同中书门下平章事高祖疾大渐与杨邠苏逢吉
等同受顾命隐帝初河中凤翔永兴相继反关西用兵京师民流言相惊恐宏肇出兵警
察务行杀戮罪无大小皆死时太白昼见民仰观者辄
腰斩于市凡民抵罪吏以白宏肇宏肇但以三指示之吏即腰斩之又为断舌决口斫筋

折足之刑李崧坐奴告变族诛宏肇取其幼女为婢于是前资故将失职之家姑息僮奴而厮养辈往往胁制其主燕人何福进【薛史作何福殷此作进避宋讳也】有玉枕直钱十四万遣僮卖之淮南僮隐其钱福进笞僮乃诬告福进得赵延寿玉枕以遗吴人宏肇捕治福进弃市帐下分取其妻子而籍其家财其领归德时副使等月率私钱千缗为献颍州曲扬官曲温与军将陈拯争官务讼之三司三司直温拯诉之宏肇宏肇以为颍已属州而温不先白追温杀之连坐者数十人周太祖平李守贞推功羣臣宏肇拜中书令隐帝渐近小人嬉游无度太后亲族颇干托宏肇与杨邠稍裁抑之太后有故人子求补军职宏肇辄斩之帝赐教坊使等玉带锦袍往谢宏肇宏肇怒曰健儿为国征行未有偏赐尔曹何功敢当此悉取所赐还官周太祖出镇魏州宏肇议带枢密以行苏逢吉杨邠不可宏肇恨之明日会饮宴贞固第宏肇厉声举爵属太祖曰昨廷论何为异同今日与公饮此逢吉与邠亦举大爵曰此国家事何必介意遂俱饮醕宏肇曰安朝廷定祸乱直须长枪大剑毛锥子安足用三司使王章曰无毛锥子军赋何从集毛锥子盖言笔也宏肇默然他日会饮章第酒酣为手势令宏肇不能客省使阎晋卿坐次宏肇屡教之苏逢吉戏曰座有姓阎人何忧罚爵宏肇妻阎氏酒家娼以为讥已大怒欲殴之逢吉先出索剑欲追之杨邠泣曰苏公汉宰相公若杀之致天子何地乃驰马去由是将相如水火隐帝遣王峻置酒公子亭和解之【谨按通鉴辑览御批宰相令仆会饮沈湎已乖政体而使气讷武臣矜枪剑微长文士诩毛锥薄技甚至丑语诟詈锋刃几加仪检荡然矣隐帝不能诘治复令释和于杯酒之间纪纲陵替若此安得不亡】是时李业郭允明后赞聂文进等用事不喜执政而隐帝春秋渐长为大臣所制数有忿言业等乘间譖之密谋禁中干佑三年冬十月十三日宏肇与杨邠王章等入朝甲士自内出擒宏肇邠章斩之并族其家周太祖即位追封郑王

△杨邠

杨邠魏州冠氏人少为州掌籍吏事汉高祖为右都押衙即位拜枢密使邠出于小吏不喜文士与苏逢吉等内相排忌逢吉讽李涛上疏罢邠与周太祖枢密使邠泣诉李太后前太后怒罢涛相加邠中书侍郎兼吏部尚书同平章事时逢吉禹珪颇以贿除吏邠为相深革逢吉所为然不知大体以谓为国家者帑廩实甲兵完而已礼乐文物皆虚器也以故务为苛细凡前资官不得居外而天下行旅皆给过所然后得行旬日间人情大扰邠度不可行而止尝与王章论事帝前帝曰事行之后勿使有言也邠

遽曰陛下但禁声有臣在闻者战栗太后弟业求为宣
徽使邠以为不可帝欲立所爱耿夫人为后邠又以为不可夫人死将以后礼葬之邠又
以为不可由是隐帝大怒左右乘间构之与史宏肇等

同日见杀邠为人颇俭静四方之赂虽不邠然往往以献于帝周太祖即位追封宏农王
△王章

王章魏州南乐人为州孔目官汉高祖典禁兵补章都孔目官从之太原高祖即位
拜三司使隐帝立加太尉同中书门下平章事时汉方
新造承契丹后京师空乏而关西三叛作周太祖用兵西方章供馈军旅未尝乏绝然征
利剥下民甚苦之往时民租率石输二升为雀鼠耗章
增至二斗为省耗缗钱出入皆以八十为陌章减其出者陌三州县民诉田者必令州县
覆之以括其隐田天下由此重困百官俸廩皆取供军
之余不堪者命有司高估其价估定又增谓之抬估意犹不满复增之民犯盐矾酒曲者
无多少皆抵死吏缘为奸民不堪命已而与史宏肇等
同日见杀

△刘铢

刘铢陕州人少为梁邵王牙将与汉高祖有旧从镇太原以为左都押衙惨酷好杀
戮高祖以为勇断类已特信用之即位拜永兴军节度
使徙镇平卢加检校太师同平章事又加侍中时江淮不通吴越钱镠使者常泛海至中
国而滨海诸州皆置博易务与民贸易民负失期者务
吏擅自摄治置刑狱不关州县民颇为苦铢悉禁之然用法亦自为刻深民有过者问其
年几何对曰若干即随其数杖之谓之随年杖每杖必
以两杖俱下谓之合欢杖又请增民租亩出钱三十以为公用民不堪之隐帝患铢刚暴
召之惧不至沂州郭淮攻南唐还兵驻青州隐帝乃遣
符彦卿往代铢铢顾禁兵在乃受代权知开封府周太祖兵犯京师铢悉诛太祖与王峻
等家属太祖入京师责铢曰与公共事先帝独无故人
情乎吾家屠灭虽有君命加之酷毒一何忍也铢曰为汉诛叛臣尔岂知其他太祖方欲
归人心乃贷其家属止杀铢与李业等梟首于市

△李业

李业高祖皇后之幼弟也高祖时为武德使隐帝即位业以皇太后故益用事时天
下旱蝗河决京师大风拔木坏城门宫中数见怪物投
瓦石撼门扉而帝方与业及聂文进后赞郭允明等狎昵太后数以灾异戒帝不听会宣
徽使阙业欲得之大臣杨邠史宏肇等皆以为不可业
由此怨望谋杀邠等邠等已死又遣供奉官孟业以诏书杀郭威于魏州威举兵反遣兵
拒威业请出府库以赉军苏禹珪不可业拜禹珪于帝

前曰相公且为官家勿惜府库乃诏赐京师兵及魏兵从威南者钱人十千督其子弟作书以告北兵之来者汉兵败业取内库金宝怀之以奔其兄保义军节度使洪信洪信拒不纳业走至绛州为人所杀

△聂文进

聂文进并州人少为军卒善书算给事汉高祖帐中以为押司官即位历拜枢密院承旨周太祖为枢密使颇亲信之文进稍横恣迁右领军大将军周太祖镇邺文进等用事居中及谋杀杨邠等文进夜作诏书制置中外典阅兵籍以指挥杀戮为己任周太祖初闻邠等遇害以为文进不与及发诏书皆其手迹乃大诟周兵至京师隐帝败于北郊太后使谓文进善卫帝对曰臣在此百郭威何害与其徒饮酒歌呼自若隐帝遇弑文进亦见杀

△后赞

后赞兖州瑕丘人其母娼也赞幼善讴事汉高祖为牙将即位拜飞龙使隐帝尤爱幸之杨邠等执政赞久不得迁乃共谋杀邠等邠等死隐帝悔之赞与允明等番休侍帝不欲左右言己短隐帝兵败北郊赞奔兖州慕容彦超执送京师梟首于市

△郭允明

郭允明河东人【据薛史增】少为汉高祖厮养高祖以为翰林茶酒使隐帝狎爱之允明益横使荆南高保融车服导从如节度使阴使人步测城池高下若为攻取计者荆人皆恐保融厚赂以遣之迁飞龙使与李业谋杀杨邠等是日无云而昏雾雨如泣日中载邠等十余尸暴之市允明手杀邠等诸子于朝堂西庑王章壻张贻肃血流逆注隐帝败于北郊还至封邱门不得入走赵村允明从后追之弑帝于民舍乃自杀

钦定续通志卷二百八十八

●钦定续通志卷二百八十九

列传

五代【九】

○五代九

王朴 郑仁诲 扈载

王朴

郑仁诲

扈载

△王朴

王朴字文伯东平人少举进士为校书郎依汉枢密使杨邠邠与王章史宏肇等有隙朴知其必乱乃去邠东归后三家之客多及难而朴独免周世宗镇澶州朴为节度掌书记世宗尹开封拜朴右拾遗为推官即位迁比部郎中献平边策曰唐失道而失吴蜀晋失道而失幽并观所以失之之由知所以平之之术当失之时君暗政乱兵骄民困近者奸于内远者叛于外小不制而至于僭大不制而至于滥天下离心人不用命吴蜀乘其乱而窃其号幽并乘其间而据其地平之之术在乎反唐晋之失而已必先进贤退不肖以清其时用能去不能以审其材恩信号令以结其心赏功罚罪以尽其力恭俭节用以丰其财徭役以时以阜其民俟其仓廩实器用备人可用而举之彼方之民知我政化大行上下同心力强财足人安将和有必取之势败知彼情状者愿为之间谍知彼山川者愿为之先导彼民与此民之心同是与天意同与天意同则无不成之功攻取之道从易者始当今惟吴易图东至海南至江可挠之地二千里从少备处先挠之备东则挠西备西则挠东彼必奔走以救其弊奔走之间可以知彼之虚实众之强弱攻虚击弱则所向无前矣勿大举但以轻兵挠之彼人怯弱知我师入其地必大发以来应数大发则民困而国竭一不大发则我获其利彼竭我利则江北诸州乃国家之所有也既得江北则用彼之民扬我之兵江之南亦不难平之也如此则用力少而收功多得吴则桂广皆为内臣岷蜀可飞书而召之如不至则四面并进席卷而蜀平矣吴蜀平幽可望风而至唯并必死之寇不可以恩信诱必须以强兵攻力已竭气已丧不足以为边患可为后图方今兵力精练器用具备羣下知法诸将用命一稔之后可以平边臣书生也不足以讲大事至于不达大体不合机变惟陛下宽之迁左谏议大夫知开封府事岁中迁左散骑常侍充端明殿学士世宗雅知朴及见其议论伟然益以为奇引与计议天下事无不合遂决意用之显德三年征淮以朴为东京副留守还拜户部侍郎枢密副使迁枢密使 【按周本纪显德三年九月端明殿学士左散骑常侍王朴为尚书户部侍郎枢密副使四年八月王朴为枢密使传并为一年事误矣迁枢密使当书于留守京师之下】 四年再征淮以朴留守京师世宗之时外事征伐而内修法度朴为人明敏多材智非独当世之务至于阴阳律历之法莫不通焉显德二年诏朴校定大衍历乃削去近世符天流俗不经之学设通经统三法以岁轨离交朔望周变率策之数步日月五星为钦天历六年又诏朴考正雅乐朴以谓十二律管互吹难得其真乃依京房为律准以九尺之弦十三依管长短寸分设柱用七声为均乐成而和朴

性刚果又见信于世宗凡其所为当时无敢难者然人亦莫能加也其所作乐至宋用之不可变其言诸国兴灭次第云淮南可最先取并必死之寇最后亡其后宋兴平定四方惟并独后服皆如朴言六年春行视汴口作斗门疾作昇归而卒年五十四世宗临其丧以玉钺叩地大恸者数四赠侍中

△郑仁海

郑仁海字日新太原晋阳人初事唐将陈绍光绍光骁勇好使酒尝因醉怒仁海拔剑欲杀之仁海植立不动无惧色绍光掷剑于地抚之曰汝有器量必富贵非吾所及也后弃绍光还乡里事母以孝闻汉高祖为河东节度使周太祖居帐下时时往过仁海与语甚欢每事有疑即从仁海质问所对不阿太祖益奇之汉兴周太祖为枢密使乃召仁海用之累官至内客省使太祖破李守贞于河中军中机画多所参决太祖入立以为大内都点检恩州团练使枢密副使累迁宣徽北院使出为镇宁军节度使显德元年拜枢密使【按通鉴是年正月为枢密使同平章事五月兼侍中传皆失书】世宗攻河东仁海留守东都明年冬以疾卒仁海自微时常为太祖谋画及居大位未尝有所闻而太祖世宗皆亲重之然亦能谦谨好礼不自矜伐为士大夫所称赠中书令追封韩国公谥忠贞

△扈载

扈载字仲熙北燕人少好学善属文广顺初举进士高第拜校书郎直史馆再迁监察御史其为文章以辞多自喜常次历代有国废兴治乱之迹为运源赋又因游相国寺见庭竹可爱作碧鲜赋题其壁世宗遣小黄门就壁录之览而称善因拜水部员外郎知制语迁翰林学士赐绯而载已病不能朝谢居百余日乃力疾入直学士院世宗怜之赐告还第遣太医院视疾初载以文知名一时枢密使王朴尤重其才荐于宰相李谷久而不用朴以问谷曰扈载不为舍人何也谷曰非不知其才然载命薄恐不能胜朴曰公为宰相以进贤退不肖为职何言命邪已而召拜知制诰及为学士居岁中病卒年三十六议者以谷能知人而朴能荐士世宗尤礼文士载与张昭夔伊陶谷徐台符等俱被进用谷居数人中文辞最劣尤无行昭伊数与论议其文粲然而谷徒能先意所在以进谏取合人主事无大小必称美颂赞大抵类俳优而载以不幸早卒议论虽不及昭伊而不为谷之谏也

钦定续通志卷二百八十九

●钦定续通志卷二百九十 列传九十

列传

五代【十】

○五代十

王镒 罗绍威 王处直 刘守光 李茂贞

王镒

罗绍威

王处直

刘守光

李茂贞

△王镒

王镒其先世为唐成德军节度使自父景崇以上在唐藩镇传中和二年景崇死镒年十岁军中推为留后时晋新有太原李匡威据幽州王处存据中山赫连铎据大同孟方立据邢台豪杰并起交争镒介其间士马强畜积富藉其世家以取重四方诸镇废立承继有请于唐者皆因镒以闻自晋兵出山东已破孟迁取邢洺磁三州景福元年乃大举击赵下临城镒求救于李匡威匡威来救晋军引去明年晋会王处存攻镒拔坚固镇攻新市镒禽晋将薛万金匡威以兵三万救镒【按欧史叙次败晋军事未晰今据新唐书辑】镒遣追风都团练使段亮等以兵属匡威袭战于磁河晋军大败明年春晋攻天长军镒救之败于叱日岭晋军遂出井陘镒又求救于匡威匡威以五千骑败克用于元氏匡威为弟匡侑所逐镒德其救已迎馆于海子园以父事之匡威客李正抱【新唐书作李抱贞】者少游燕赵间爱之及是与匡威皆失国无聊乃谋劫镒代之诈为忌日镒往吊伏起持镒两袖镒曰吾国赖公存今日是所甘心匡威素少镒以为无能为因与镒并辔诣府受代行过亲事营军士闭门大噪屠者墨君和望见镒从缺垣中跃出挟镒于马负之走匡威正抱皆死匡侑虽憾其兄而阳以大义责镒甚急镒既失燕援而晋军急攻平山劫镒以盟遂与晋和其后梁太祖下晋邢洺磁三州乃为书招镒使绝晋归梁镒依违不决晋将李嗣昭复取洺州太祖击走之得镒与嗣昭书多道梁事太祖怒因移兵常山自将傅城下焚南关镒惧谓其属曰事急矣奈何判官周式与太祖有旧因请入梁军太祖望见骂曰尔公朋附太原今无赦矣吾知李嗣昭在城中可使先出因以所得书示式式曰梁欲取一镇州而止乎而欲成霸业于天下也且霸者责人以义而不私今天子在上诸侯守封睦邻所以息争且休民也昔曹公破袁绍得魏将吏与绍书悉焚之此英雄之事耳今梁知兵举无名而假嗣昭以为辞王氏五世六公抚有此土岂无死士而待嗣昭乎太祖大喜曰吾言戏

耳延式上座议与镠和镠以子昭祚为质太祖以女妻之太祖即位封镠赵王镠祖母丧诸镇皆吊梁使见晋使在馆还言赵王有二志开平四年遣魏博将夏諲等以兵三千袭深冀二州以王景仁为北面行营招讨使镠乞兵于晋晋人击败景仁于柏乡梁遂失镇定晋师出镠常以兵从镠德晋甚明年会庄宗于承天军许以女妻镠子昭海当是时诸镇俱敝于战争赵独安乐镠尤骄于富贵又好左道炼丹求长生与道士王若讷留游西山登王母祠每出逾月忘归任其政于宦者宦者石希蒙与镠同卧起天佑十八年冬镠自西山宿鹊营庄将还府希蒙止之宦者李宏规力谏不从宏规怒遣亲事军将苏汉衡率兵擐甲露刃于帐前斩希蒙首掷于镠前镠惧遽归使其子昭祚与大将张文礼族宏规汉衡收其偏将下狱穷究反状亲军皆惧文礼诱之为乱夜半军士千余人踰垣而入镠方与道士焚香受箓斩镠首袖之而出因纵火焚其宫王氏之族遂减镠少子昭海年十岁有德镠者藏之穴中乱定湖南人李震匿之南岳为浮图易名崇隐昭海既长镠故将符习为宣武军节度使震以归习表于朝拜考功郎中司农少卿周显德中犹为少府监云张文礼者镠以为子号王德明镠死文礼自为留后庄宗初纳之后知其通于梁也遣赵故将符习与阎宝击之文礼病疽卒子处瑾拒守击败习等以李嗣昭代之嗣昭中流矢卒以李存进代之存进辄复战歿乃以符存审为招讨使遂破之执文礼妻及子处瑾处球处琪等归于晋赵人请而醢之磔文礼尸于市

△罗绍威

罗绍威字端己父宏信唐魏博节度使在唐藩镇传绍威袭父爵新立幽州刘仁恭以兵六十万攻魏屠其城绍威求救于梁太祖自将与仁恭战于内黄大败燕军明年太祖遣葛从周会魏兵攻沧州取其德州仁恭以兵至逆战于老鸦堤大破之绍威德梁助己故奉事愈谨魏博自田承嗣始有牙军岁久益骄前帅史宪诚何全皞韩君雄乐彦贞等皆由牙军所立怒辄杀之绍威通习吏事为政有威严然其家世由牙将所立天佑二年牙校李公佺作乱不克奔沧州绍威乃遣使告梁乞兵欲尽诛牙军太祖因遣李思安等攻沧州召兵于魏绍威因悉发魏兵以从独牙军在绍威子廷规娶梁女会女卒太祖阴遣客将马嗣勋选良兵实輿中以长直军千人杂輿夫入魏诈为助葬太祖以兵继其后绍威夜以奴兵数百会嗣勋兵击牙军并其家属尽杀之太祖自内黄驰至魏魏兵从攻沧州者行至厯亭闻之皆反分入澶博诸州魏境大乱太祖为悉平之牙军死魏兵悉叛绍威势益孤太祖乃欲夺其地绍威始大悔是岁太祖复攻

沧州宿兵长芦梁兵数十万皆取足绍威以此重困昭宗迁洛诏诸镇缮理京师绍威营太庙成加拜守侍中进封邺王太祖围沧州未下刘守光会晋军破梁潞州太祖归过魏绍威惧终袭己乃入见曰今四方称兵为梁患者以唐在故也唐家天命已去不如早自取之太祖大喜乃急归太祖即位将都洛阳绍威取魏良材为五凤楼朝元前殿浮河而上立之京师太祖以为功过萧何赐以宝带名马又请伐木安阳淇门为船自河入洛岁漕谷百万石以供京师太祖益以为忠遣将程厚卢疑督其役舟未成而绍威病乃表言魏故大镇多外兵愿得梁一有功重臣临之请以骸骨就第太祖亟命其子周翰监府事且谓使者曰为语而主如不讳当世世贵尔子孙绍威仕梁累拜太师兼中书令卒年三十四赠尚书令谥曰贞壮子三人廷规官司农卿周翰袭父位

【按梁太祖实录以司门郎中罗廷规充魏博节度副使知府事仍改名周翰以廷规周翰为一人通鉴考异疑为实录之误考薛史亦作绍威子三人长廷规官司农卿早卒次周翰袭父爵云云与欧史同】 为杨师厚所逐徙为宣义军节度使卒弟周敬代之徙镇忠武唐庄宗时为金吾大将军明宗以为匡国军节度使罢为上将军卒廷规娶梁太祖二女曰安阳公主曰金华公主周翰娶末帝女曰寿春公主周敬亦娶末帝女曰晋安公主

△王处直

王处直字允明兄处存为唐义武军节度使傅子郃在藩镇传郃为节度使时处直为后院中军都知兵马使光化三年梁兵来攻郃遣处直拒之败于沙河兵返入城逐郃郃出奔晋推处直为留后梁兵围之处直乃请事梁而绝晋出绢十万匹犒军与梁盟梁太祖表处直义武军节度使累封太原王太祖即位封处直北平王其后梁兵攻王镕镕求救于晋处直亦遣人至晋愿绝梁以兵五千从晋破梁军于柏乡自是晋南北攻战十余年间处直尝以兵从处直好巫客有李应之者以左道愈处直疾以为行军司马军政咸取决焉初应之于陘邑阑得小儿刘云郎养为子处直未有子乃以云郎与处直子之更名曰都甚爱之应之由此益横籍管内丁壮别立新军自将之治第博陵坊四面开门皆用左道将吏知其必为患而莫能谏也会幽州李匡侏如京师假道中山处直伏甲城外以备不虞匡侏已去甲士入城围应之第杀之因诣处直请杀都处直不与明日第功行赏因阴疏甲士姓氏藏于别籍其后因事悉诛之而处直终为都所杀都为狡佞多谋处直以为节度副使张文礼弑王镕庄宗发兵讨之处直谋曰镇定之蔽也文礼虽有罪然镇亡定不独存乃遣人

请庄宗毋发兵庄宗取所获文礼与梁蜡书示处直曰
文礼负我师不可止处直益自危处直有孽子郁从郃奔晋晋王以女妻之为新州防御
使处直乃阴与郁交通使北招契丹入塞以牵晋且许
召为嗣都闻之不悦郁自奔晋常恐处直不容因此大喜以厚赂诱阿保机举国入侵定
人皆不欲契丹之举小吏和昭训劝都举事都因执处
直囚之西宅自为留后凡王氏子孙及处直将校杀戮殆尽明年正月朔旦都拜处直于
西宅处直奋起搯其胸呼曰逆贼吾何负尔欲嚙其鼻
都掣袖而走处直遂见杀庄宗已败契丹于沙河追奔过定州与都相得欢甚以子继岌
娶都女以都为义武军节度使同光二年庄宗幸邺都
来朝赐与巨万所请无不从及明宗立颇恶都为人而安重诲每以法绳之都始有异志
时唐兵击契丹数往来定州都供馈多阙益不自安和
昭训为都谋曰天子新立四方未附其势易离可为自安计已而朱守殷反于汴州都遂
亦反遣人以蜡书招青徐岐潞梓五镇约举兵皆不应
明宗遣王晏球讨之都复与王郁招契丹为援契丹遣托纽将万骑救都都遣指挥使郑
季璘龙泉镇将杜宏寿以二千人迎契丹为晏球所败
季璘宏寿被执不屈遂见杀晏球屯军望都与都及契丹战大败之曲阳 【薛史作嘉山
】 都及托纽得数骑遁去闭城不复出初庄宗军中
阍得一男子使冒姓李名继陶养以为子明宗即位安重诲出以乞段徊徊亦恶而逐之
都使人求得之至是给其众曰此庄宗太子也被以天
子服使巡城上以示晏球军军士识者曰继陶也共诟之都居城中兵少惟以契丹二千
人守城呼托纽为王屈身事之诸将有欲出降者都伺
察严密杀戮无虚日以故坚守经年天成四年二月城破都与家属皆自焚死王氏遂绝
于中山而处存有子邺邺子廷胤与庄宗连外媼明宗
时厯贝忻密潼隰州刺史范延光反晋高祖以廷胤为杨光远行营中军使破延光有功
拜彰德军节度使初处直为都所囚幼子威北走契丹
契丹谓晋高祖曰吾欲使威袭其先人爵土如何高祖遽徙廷胤镇义武曰此亦王氏后
也后徙镇海卒 【案王郁自处直见杀之后史不言
其所归及王都之讨复云与郁招契丹为援似郁已从晋归中山也通鉴云契丹因败责
王郁縶之以归自是不听其谋似郁先归定而后归辽
也然当都幽縶处直之时王氏子孙尽被杀戮设此时而郁在定则固都素所不悦者岂
能复为破巢之完卵郁终身未尝归定自无可疑及考
辽史本传郁自得父命即奉表举室降辽辽太祖以为养子闻都自为留后太祖遣其从
皇太子讨之至定州都坚壁不出乃掠居民而还则是
契丹方声罪讨都安得以万骑来援与欧史通鉴所载全相刺谬然修于托纽之救叙述

甚详自必有据今仍从之而附载他说以示阙疑也】

△刘守光

刘守光父仁恭唐卢龙军节度使守光囚而袭之语在唐藩镇传守光既囚父其兄守文率兵讨之至卢台为守光所败进战玉田又败乃乞兵契丹明年守文将契丹吐浑兵四万人战于鸡苏守光兵败守文阳为不忍出阵呼其众曰毋杀吾弟守光将元行钦识守文跃马擒之又囚之别室既而杀之【谨案通鉴辑览 御批兄讨幽父之弟即诛之亦不为过乃对众泣谓勿杀此与宋襄不禽二毛同一迂庸卒以自取败亡所谓可笑可鄙者耳】守文将吏孙鹤吕兗等立守文子延祚以拒守光围之百余日城中米斛值钱三万人食堽土马相食其鬃尾兗等率城中饥民食以曲号宰杀务日杀以饷军久之延祚力穷遂降守光素庸愚由此益骄为铁笼铁刷之刑燕人争逃祸于佗境守光身衣赭黄谓其将吏曰我衣此南面可帝天下乎孙鹤切谏梁攻赵赵王王镕求救于守光孙鹤力劝其出兵守光不肯晋救赵大败梁兵于柏乡进掠邢洺至于黎阳守光闻晋空国深入梁乃治兵戒严遣人以语动镇定曰燕有精兵三十万愿率二镇以从晋然谁当主此盟者晋人患之乃班师守光益以为诸镇畏其强乃讽诸镇共尊己于是晋王率天德宋瑶振武周德威昭义李嗣昭义武王处直成德王镕等以墨制册尊守光为尚书令尚父守光又遣人告梁请授已河北兵马都统以讨镇定河东梁遣阁门使王瞳拜守光河北采访使有司白守光尚父受册用唐册太尉礼仪守光问曰此仪注何不郊天改元有司曰此天子礼也尚父虽尊乃人臣耳守光怒曰我为尚父谁当帝者乎乃械梁晋使者下狱置斧钁于庭令曰敢谏者死孙鹤进谏守光怒令军士割而啖之鹤呼曰不出百日大兵当至命窒其口而醢之守光遂以梁干化元年八月自号大燕皇帝改元应天以王瞳齐涉为左右相晋遣太原少尹李承勋贺册尚父至燕而守光已僭号有司迫承勋称臣承勋不屈以列国交聘礼入见守光怒杀之明年晋遣周德威将三万人会镇定之兵攻燕自祁沟关入其澶涿武顺诸州皆迎降守光被围经年累战常败乃奉书服罪德威曰大燕皇帝尚未郊天何至此耶子受命讨僭乱不知其佗守光益窘乃献绢千匹银千两锦百段遣使谓德威曰守光去岁妄自尊崇本不能为朱温下耳岂意大国暴师经年幸少宽之德威不许守光登城呼曰俟晋王至则降晋王乃自临军守光登城见晋王晋王问将如何守光曰今日俎上肉惟王所为守光有嬖者李小喜劝其毋降守光因请俟佗日是夕小喜叛降于晋军明旦城破执仁恭及其家族三百口守光与

其妻李氏祝氏子继珣继方继祚等南走沧州迷失道至燕乐界中数日不得食遣其妻祝氏乞食于田家田家怪而诘之祝氏以实告乃被擒送幽州晋王方大飨军客将引见叩头请死命械之并其父仁恭以从还过赵赵王王镕会晋王置酒酒酣请曰愿见仁恭父子晋王命破械出之引置下坐饮食自若皆无惭色晋王至太原曳仁恭父子以组献于太庙守光将死泣曰臣死无恨然教臣不降者李小喜也晋王使召小喜小喜瞋目曰囚父弑兄烝其骨肉亦小喜教尔耶晋王怒命先斩小喜 【谨案通鉴辑览

御批守光逆伦伤化罪不容诛然小喜则曾受其恩者既给故主以私降甚至瞋目叱詈良心湮灭尽矣存勋先正其诛颇为快举】守光呼曰王将复唐室以成霸业何不赦臣使自效其二妇从旁骂曰事已至此生复何为愿先死乃俱死晋王命李存霸执仁恭至雁门刺其心血以祭先王墓然后斩之

△李茂贞

李茂贞深州博野人本姓宋名文通为本郡军卒戍凤翔从郑畋击黄巢有功自队长迁军校 【案册府元龟载茂贞以宿卫军留凤翔大破尚让于龙尾坡录功为神策军指挥使检校太保即此事也】光启元年朱玫反僖宗出居兴元玫遣王行瑜攻大散关茂贞与保銓都将李鋌等败行瑜于大唐峯以功自扈跸都头拜武定军节度使赐姓名扈跸东归至凤翔凤翔节度使李昌符与天威都头杨守立争道以兵相攻僖宗使茂贞击杀昌符以功拜凤翔陇右节度使大顺元年封陇西郡王二年枢密使杨复恭得罪奔于养子兴元节度使杨守亮茂贞言复恭父子罪皆当诛因自请为山南招讨使昭宗难之茂贞擅攻破兴元杀复恭父子表其子继密权知兴元军府事昭宗乃徙茂贞山南西道而以卒相徐彦若镇凤翔茂贞不奉诏上表辞不逊昭宗不能忍以问宰相杜让能能让能以茂贞地大兵强又近京师唐力未可以致讨易以自危昭宗怒曰吾不能孱孱坐受凌弱乃责让能治兵以覃王嗣周为京西招讨使率扈驾军五十四都战于整屋唐军败溃茂贞遂犯京师屯三桥昭宗御安福门杀两枢密以谢使罢兵茂贞与让能素有隙因曰谋举兵者让能也陈兵临皋驿请杀让能昭宗泣下沾襟贬让能赐死茂贞乃罢明年河中节度使王重盈卒诸子争立晋王李克用请立珂茂贞与韩建王行瑜请立珙昭宗不许茂贞等怒率三镇兵犯京师谋废立而晋王亦举兵至茂贞惧乃杀宰相韦昭度李礪留其养子继鹏以兵二千宿卫而去继鹏与行瑜弟行实等闻晋兵且至争劫昭宗出奔京师大乱昭宗出居石门茂贞以兵至鄠县斩继鹏自赎晋兵已破行瑜还军渭北请击茂贞昭宗

欲庇之以为缓急以其杀子自贖为解诏罢晋军克用
叹曰唐不诛茂贞忧未已也昭宗自石门还益募安圣捧宸等军万余人以诸王将之茂
贞谓唐将讨己亦治兵犯京师昭宗遣覃王拒之军至
三桥溃昭宗出居华州遣宰相孙偓以兵讨茂贞韩建为茂贞请乃已久之加尚书令封
岐王昭宗既反正宰相崔胤谋以梁兵诛宦者中尉韩
全海等倚茂贞为外援茂贞遣子继筠以兵数千宿卫天复元年胤召梁太祖以军至同
州全海等惧与继筠劫昭宗幸凤翔梁军围之逾年茂
贞战辄败闭壁不敢出城中薪食俱尽自冬涉春民冻饥死者日千数其存者相与邀遮
茂贞求生路茂贞穷迫谋以天子与梁以为解三年正
月与梁约和斩韩全海等二十余人传首梁军梁围解天子虽得出然梁遂劫东迁而唐
亡茂贞非惟亡唐亦自困矣及梁太祖即位诸侯强者
皆相次称帝独茂贞不能但称岐王开府置官属视朝出入拟天子以妻为皇后而已茂
贞宽仁爱物岐民颇安之初有地二十州其被梁围也
兴元入于蜀开平已后邠宁鄜坊入于梁秦凤阶成又入于蜀当梁末年所有七州而已
【徐无党曰二十州者岐陇泾原渭武秦成阶凤邠
宁庆衍鄜坊丹延梁洋也】庄宗破梁茂贞称岐王上笺以季父行自处及闻入洛乃上
表称臣遣子从曦来朝【案薛史作继曦考茂贞诸
子若继鹏继筠皆从继薛史是也】庄宗以其耆老甚尊礼之改封秦王诏书不名同光
二年卒年六十九谥忠敬从曦袭为凤翔节度使魏王
继岌征蜀为供军转运接应使蜀平继岌遣从曦部送王衍至凤翔监军使柴重厚拒不
纳从曦遂东至华州闻庄宗之难乃西归明宗立遣人
诛重厚从曦上书言重厚守凤翔军民无所扰愿贷其过虽不许士人以此多之厯镇宣
武天平从曦有田千顷竹千亩在凤翔惧侵民利未尝
省理凤翔人爱之废帝起凤翔部人叩马乞从曦废帝入立乃复以为凤翔节度使卒于
镇

钦定续通志卷二百九十

●钦定续通志卷二百九十一 列传九十一

列传

五代【十一】

○五代十一

韩建

韩逊

杨崇本

高万兴

温韬

卢光稠

【谭全播】

朱瑾

韩建

韩逊

杨崇本

高万兴

温韬

卢光稠 【谭全播】

朱瑾

△韩建

韩建字佐时许州长社人少为蔡州军校隶忠武军将鹿晏宏从杨复光复光死晏宏与建等无所属乃以麾下西迎僖宗所过攻劫据山南而不能守晏宏东走许州建乃奔蜀拜金吾卫将军僖宗还长安拜华州刺史华州数经大兵户口流散建少习农事督民耕植出入问疾苦建不知书使人题所服器具各为名目以视之久乃渐通文字时诸镇皆武夫独建抚辑兵民荆南成汭时冒姓郭亦善辑荆楚当时号为北韩南郭大顺元年以兵属张浚伐晋浚败建自含山遯归河中之争立也建与李茂贞助王珙语在茂贞传晋兵问罪三镇傅华州建登城呼曰敝邑未尝失礼于大国何为见攻晋人曰君以兵犯天子杀大臣是以讨也已而与晋和干宝三年茂贞复犯京师昭宗将奔太原次渭北建遣子允 【通鉴作从允】 请幸华州昭宗又欲如鄜州建追及于富平泣曰藩臣倔强非止茂贞若舍近畿而巡极塞乖輿渡河不可复矣昭宗亦泣遂幸华州时天子孤弱独有殿后军及定州三都将李筠等兵千余人卫以诸王将之建已得昭宗遂欲制之因请罢诸王将兵散去殿后诸军累表不报昭宗登齐云楼西北顾望京师作菩萨蛮词三章酒酣与从臣悲歌泣下建心不悦因遣人告诸王谋杀建劫天子佗幸昭宗召建将辨之建称疾不出乃遣诸王自诣建辨之建不见请送诸王十六宅昭宗难之建乃率精兵数千围行宫请诛李筠昭宗大惧遽诏斩筠悉散殿后及三都卫兵幽诸王于十六宅昭宗益悔幸华遣延王戒丕使晋以谋兴复戒丕还建与中尉刘季述诬诸王谋反以兵围十六宅诸王皆登屋叫呼遂见杀昭宗无如何为建立德政碑以慰安之建已杀诸王乃营南庄起楼阁欲邀昭宗游幸因废之而立德王裕其父叔丰谓建曰汝陈许闲一田夫遭乱蒙恩至此欲以两州百里地行大事覆族之祸吾不忍见不如先死会李茂贞梁太祖皆欲发兵迎天子建稍惧乃止光化元年昭宗还长安封建颖川郡王辞乃封许国公赐铁券梁太祖以兵向长安遣张存敬攻下同州建乃降太祖责建背已建曰判官李巨川之谋也太祖即杀巨川以建从昭宗东迁建从至洛阳昭宗举酒属太祖与建曰迁都后国步小康社稷安危系卿两人次何皇后举觞建蹶

太祖足太祖乃阳醉去建出谓太祖曰天子与宫人眼语幕下有兵仗声恐公不免也太祖以故尤德之表建平卢军节度使太祖即位拜司徒同中书门下平章事太祖性刚暴臣下莫敢谏诤惟建时有言颇优容之未几罢相出镇许州太祖崩许州军乱见杀【按五代史此下有李仁福传仁福为夏国之先应入宋载记此从删】

△韩逊

韩逊不知其世家初为灵武军校唐末据有灵盐唐即以为节度使梁开平三年封颍川王时邠寇鄜延凤翔诸镇皆与梁争战独逊臣属于梁李茂贞尝遣刘知俊攻逊不能克逊亦善抚其部部人爱之为立生祠贞明中逊卒军中立其子洙为留后梁即以为节度使至唐庄宗时又以洙兼河西节度天成四年洙卒以洙子澄为朔方军留后其将李宾作乱澄乃上书请师于朝明宗以康福代之韩氏自逊有灵武史不见其事传世皆无所称澄后不知所终

△杨崇本

杨崇本幼为李茂贞养子冒姓李名继徽茂贞表为静难军节度使梁太祖攻岐未下移兵攻邠州崇本降太祖使复姓赐名崇本迁其家于河中以为质崇本妻有色太祖往来河中尝幸之妻颇愧耻闲遣人诮责崇本崇本涕泣愤怒其后梁兵解岐围崇本妻得归乃复背梁归茂贞茂贞西连蜀兵与崇本攻雍华进屯美原梁将康怀英等会同州刘知俊击败之自此不复东干化四年为其子彦鲁所弑崇本养子李保衡杀彦鲁以降梁

△高万兴

高万兴河西人【五代史作河南人今从辞史】唐末河西属李茂贞茂贞将胡敬璋为延州刺史万兴与弟万金俱事敬璋为骑将敬璋死其将刘万子代为刺史梁开平二年万子会葬敬璋其将许从实杀之自为延州刺史时万兴兄弟将兵戍境上闻万子死以部下数千人降梁【辞史作万兴万金因会葬纵兵攻万子归款于汴而欧史以为许从实作乱考万兴兄弟时方戍境上自以欧史为实】梁太祖屯河中遣刘知俊以兵应万兴攻丹州执刺史崔公实进攻延州执许从实鄜州李彦容坊州李彦昱皆弃城走太祖乃以万兴为延州刺史忠义军节度使以牛存节镇鄜延已而刘知俊叛乃徙存节同州以万金代存节万兴累迁检校太师兼中书令封渤海郡王贞明四年万金卒乃以万兴为鄜延节度使进封北平王梁亡庄宗入洛万兴尝一来朝同光三年卒于镇子允韬代立徙镇安国义成清泰中卒万金子允权开运中为

虜施令罢居于家时周密为彰信军节度使契丹灭晋延州军乱逐密密守东城而西城之兵以允权为留后闻汉高祖起太原遂归汉即拜节度使广顺三年卒

△温韬

温韬京兆华原人少为盗后事李茂贞为华原镇将冒姓李名彦韬茂贞以华原县为耀州以韬为刺史梁太祖围岐韬以耀州降已而复叛归茂贞茂贞又以美原县为鼎州建义胜军以韬为节度使末帝时韬复叛茂贞降梁梁改耀州为崇鼎为裕义胜军为静胜以韬为节度使复其姓温更其名曰昭图韬在镇七年悉发掘唐诸陵取其所藏金宝而昭陵最固韬从埏道下见宫室制度闳丽不异人闲中为正寝东西厢列石床床上石函中为铁匣悉藏前世图书锤王笔迹纸墨如新韬悉取之惟干陵风雨不可发后徙镇忠武庄宗灭梁韬自许来朝因伶人景进缙赂刘皇后庄宗待韬甚厚赐姓名曰李留冲郭崇韬曰此劫陵贼耳罪不赦庄宗曰已宥之矣遽遣还镇明宗入洛与段凝俱收下狱已而赦归田里明年流德州赐死

△卢光稠 【谭全播】

卢光稠谭全播皆南康人光稠状貌雄伟无他才能而全播勇敢有识略然全播常奇光稠为人唐末相与聚兵为盗众推全播为主全播曰诸君徒为贼乎而欲成功乎若欲成功当得良帅卢公堂堂真君等主也众阳诺之全播怒拔剑斩木以誓众惧乃立光稠为帅是时王潮陷岭南全播攻取其虔韶二州又遣光稠弟光睦攻潮州光睦好勇而轻进全播度其必败乃伏兵归路光睦果败走潮人追之发伏邀击大败之遂取潮州时刘岩起南海以兵数万攻虔州光稠大惧全播曰刘岩易与尔乃选精兵万人伏山谷中以老弱五千出战于城南战酣伪北岩急追之伏兵发岩遂大败光稠第战功全播悉推诸将光稠心益贤之光稠以虔韶二州请命于梁太祖为置百胜军以光稠为防御使兼五岭开通使又建镇南军以为留后 【按通鉴开平三年八月卢光稠以州附于淮南又遣使附于梁附淮南事传失载】 开平五年光稠病以符印属全播不受光稠卒全播立其子延昌事之延昌好游猎其将黎求闭门拒之延昌见杀求因谋杀全播全播惧称疾不出求乃自立寻暴病死其将李彦图自立全播益惧遂杜门称笃彦图疑之使覘其动静全播应覘为状以自免彦图死州人相率叩门请全播乃起遣使请命于梁拜防御使全播治虔州七年有善政杨隆演遣刘信攻破虔州以全播归广陵卒 【按五代史此下有雷满锤传赵匡凝朱宣等传皆已入唐书

此不复载】

△朱瑾

朱瑾唐天平军节度使宣从弟也宣事在唐藩镇传瑾从宜居郢州补军校少倜傥有大志兖州节度使齐克让爱其为人以女妻之瑾亲迎选壮士为舆夫伏兵器舆中夜至兖州兵发虜克让自称留后僖宗即拜瑾泰宁军节度使梁太祖既与瑾兄弟恶岁攻兖郢瑾兄弟往来相救凡十余年大小数十战与太祖屡相胜败太祖得宣将贺环何怀宝及瑾兄琼乃将至兖城下告瑾曰汝兄败矣琼等已降不如早自归瑾伪曰诺乃遣牙将持书币诣军门降太祖大喜至延寿门与瑾交语瑾曰愿得琼来送符印太祖信之遣客将刘捍送琼往瑾伏壮士桥下单骑迎琼挥手语捍曰请琼独来琼前壮士擒之遂闭门责以先降斩之掷其首城外太祖度不可下乃留兵围之而去瑾婴城自守而乞兵于晋晋遣李承嗣史俨等以骑兵五千救之太祖已破宣乃急趋兖城中食尽瑾与承嗣等掠食丰沛闲梁兵奄至瑾将康怀英等以城降瑾等将麾下走沂州刺史尹处宾不纳又走海州梁兵急追之乃奔淮南杨行密闻瑾来大喜表瑾领武宁军节度使以为行军副使瑾大破梁兵于清口行密累表瑾东南诸道行营副都统领平卢军节度使同中书门下平章事行密死渥及隆演相继立皆年少徐温与子知训专政畏瑾欲除之瑾乃谋杀知训尝以月旦遣爱妾候知训家知训强通之妾归诉瑾益不平屡劝隆演诛徐氏以去国患隆演不能既而知训以泗州建静淮军出瑾为节度使将行召之夜饮明日过瑾谢延升堂出其妻陶氏知训方拜瑾以笏击踏之伏兵自户突出杀之切瑾以二恶马系庭中知训入而释马使相蹶鸣故外人莫闻其变瑾携其首驰示隆演曰今日为吴除患矣隆演曰此事非吾敢知遽起入内 【谨按通鉴辑览 御批知训无礼于君凡有心者皆当为鹰鹯之逐朱瑾虽以私嫌擅杀然实为吴除害隆演既据有吴国自当为之主持庶几跋扈者知所警惕乃懦怯无识诱为不敢与闻致徐温覬觐日深浸成篡窃之祸虽其及身以柔善自全而吴业之衰自彼酿之实行密之罪臣败子耳】 瑾忿然以首击柱提剑而出府门已阖因踰垣折足瑾顾路穷大呼曰吾为万人去害而一身死之遂自刎润州徐知诰闻乱以兵趋广陵族瑾家瑾妻陶氏临刑而泣其妾曰何为泣今行见公矣陶氏收泪欣然就戮瑾尝病疽医者视之色惧瑾曰但理之吾非以病死者于是果然 【按五代史此下有王师范李罕之孟方立王珂赵犇冯行袭等传俱已入唐书又氏叔琼李彦威即朱友恭俱入唐奸臣传此俱从删又李振改入逆臣传】

钦定续通志卷二百九十一

●钦定续通志卷二百九十二 列传九十二

列传

五代 【十二】

○五代十二

裴迪 韦震 孙德昭 王敬堯 刘知俊 丁会

贺德伦 阎宝

裴迪

韦震

孙德昭

王敬堯

刘知俊

丁会

贺德伦

阎宝

△裴迪

裴迪字升之河东闻喜人善治财赋唐司空裴璩判度支辟为出使巡官都统王铎镇滑州奏迪汴宋郓等州供军院使铎为租庸使辟租庸招纳使梁太祖镇宣武辟节度判官太祖用兵四方留迪调兵赋一切货财狱讼皆任迪太祖西攻岐王师范谋袭汴遣健卒苗公立阴伺虚实迪召公立问东事公立色动屏人密诘之具得其事不暇启遣朱友窳以兵巡兗郓以故师范虽窃发而事卒不成太祖自岐还将吏皆赐迎銜叶赞功臣将吏入见太祖目迪曰叶赞之功惟裴公有之他人不足常也迪入唐累迁太常卿太祖即位召拜右仆射居一岁告老以司空致仕卒于家

△韦震

韦震字东卿雍州万年人初名肇强敏有口辩事梁太祖为都统判官申丛执秦宗权犹豫不知所为太祖遣震覘之震料其必败丛后果为郭璠所杀璠以宗权归太祖太祖欲大其事请献俘于唐唐以黄巢献馘而已宗权不足俘左拾遗徐彦枢亦疏请所在斩决太祖遣震往复论奏卒俘宗权太祖德之表为节度副使昭宗幸石门太祖遣震由虢略闲道奉表行在昭宗赐其名震太祖已破兗郓遂攻吴而败惧诸镇图已乃讽诸镇荐已为元帅且求兼领郓州昭宗初不许震强辩敢大言语数不逊昭宗卒许之太祖遂兼四镇表震郓州留后昭宗迁洛震入为

河南尹六军诸卫副使以病瘖守太子太保致仕太祖受禅改太子太傅末帝即位加太师卒 【按五代史此下有孔循传今改入逆臣】

△孙德昭

孙德昭盐州五原人父惟最 【辞史作惟最】 黄巢陷长安率乡里子弟得义兵千人攻巢咸阳兴平州将壮之益以州兵二千与破贼功拜右金吾卫大将军累迁鄜州节度使留京师宿卫鄜州将吏诣阙请之镇京师民数万与神策军复遮留不得行改荆南节度使在京制置分判神策军号扈驾都德昭以父任为神策军指挥使光化三年刘季述废昭宗宰相崔胤谋反正阴求义士共事德昭乃与孙承海董从实 【按新唐书及通鉴俱作周承海董彦弼辞史与欧史同】 应允天复元年正月朔未旦季述将朝德昭伏甲士道旁邀其舆斩之承海等分索余党立尽昭宗闻外諠哗大恐德昭驰至叩门曰季述诛矣皇帝当反正何皇后呼曰可进逆首德昭掷其首入已而承海等悉收余党首以献昭宗信之德昭破锁出昭宗御丹凤楼反正以功拜静海军节度使赐姓李号扶倾济难忠烈功臣与承海等皆拜节度使同中书门下平章事图形凌烟阁俱留京师号三使相恩宠无比时崔胤方召梁兵诛宦官而宦官亦倚李茂贞为捍蔽梁岐交争冬十月宦者韩全海劫昭宗幸凤翔承海从实皆从而德昭独与梁太祖颇德其附已至华州德昭以军礼迎谒太祖至京师表同州留后将行京师民覆请留遂留为两街制置使梁兵围凤翔德昭以其兵八千属太祖太祖益德之使先之洛阳昭宗东迁拜左威卫上将军以疾免太祖即位以为左卫大将军末帝立拜左金吾卫将军卒承海从实至凤翔与宦者俱见杀

△王敬尧

王敬尧颍州汝阴人为州牙将唐末王仙芝等攻劫汝颖闲刺史不能拒敬尧遂代之即拜刺史善用铁枪重三十斤颍州与淮西为邻境数为秦宗权所攻力战拒之颖旁诸州民皆依敬尧避贼颍州户至二万梁太祖攻淮南道过颖敬尧供馈甚厚太祖大喜表为沿淮指挥使梁兵攻吴庞师古死清口败兵归过颖大雪饥冻敬尧乃沿淮积薪为燎作糜粥舖之多赖以全活太祖表敬尧武宁军留后遂拜节度使天佑三年为左卫上将军太祖即位以疾致仕卒 【按五代史此下有蒋殷传今改入逆臣】

△刘知俊

刘知俊字希贤徐州沛人少事时溥溥与梁相攻知俊与麾下二千人降梁太祖以为左开道指挥使名重军中历海怀郑三州刺史从破青州以功表匡国军节度使邠州杨崇本以兵六万攻雍州太祖方与诸将攻沧州知俊

不俟命与康怀英等击败之斩获无算延州高万兴降
梁太祖遣知俊会万兴攻下丹延鄜坊四州加检校太尉兼侍中封大彭郡王知俊功益
高太祖性多猜忌屡杀诸将王重师无罪见杀知俊不
自安太祖已下鄜坊遣知俊复攻邠州知俊以军食不给未行太祖幸河中使宣徽使王
殷召知俊其弟知浣为亲军指挥使闲遣人告知俊不
宜来知俊遂叛臣于李茂贞 【按通鉴知俊既附岐复遣使请晋人出兵攻晋绛遗晋王
书曰不过旬日可取两京复唐社稷是知俊不独臣
岐且通晋也欧史失载】 以兵攻雍华执刘捍送凤翔太祖使人谓曰朕待卿至矣何相
负耶知俊报曰王重师不负陛下而族灭臣非背德但
畏死尔太祖复使语以前诛重师为刘捍所误今捍已死无所释憾知俊不报以兵断潼
关太祖遣刘鄩牛存节攻之遂奔于茂贞茂贞地狭无
以处之使西攻灵武韩逊告急太祖遣康怀英寇彦卿等攻邠盩以牵之知俊大败怀英
于升平 【薛史作长城岭】 杀梁将许从实茂贞以
为涇州节度使使攻兴元取兴凤围西县已而茂贞左右忌知俊功闲之茂贞夺其军乃
奔于蜀王建以为武信军节度使使反攻茂贞取秦凤
阶成四州建待知俊甚厚然阴忌其才蜀人亦共嫉之知俊色黑而其生岁在丑建诸子
皆以宗承为名乃于里巷构谣言曰黑牛出圈椽绳断
建益恶之遂见杀

△丁会

丁会字道隐寿州寿春人少为盗与梁太祖俱从黄巢太祖镇宣武以为都押衙张
全义攻破李罕之罕之召晋兵围河阳全义告急梁方
攻魏遣会及葛从周等将万人救之行至河阴谋曰罕之料吾不敢渡九鼎以吾兵少而
来远且不虞吾之速至也当出其不意掩击之乃渡九
鼎直趋河阳战于沅水罕之大败河阳围解大顺元年梁军击魏会及葛从周破黎阳临
河遂败罗宏信于内黄梁攻时溥于徐州遣会别攻宿
州刺史张筠闭城距守会堰汴水浸其东城城坏筠降朱瑾以兵万余击单父会败之于
金乡李罕之叛晋以潞州降梁会自河阳攻下泽州乃
以会为昭义军留后会畏梁太祖雄猜常称疾者累年复起为昭义军节度使昭宗遇弑
会与三军缟素发哀梁攻燕沧州刘守光乞师于晋晋
人为攻潞州会乃降晋晋王以会归太原赐以甲第位在诸将上庄宗立以为都招讨使
天佑七年卒赠太师

△贺德伦

贺德伦河西人少为滑州牙将梁太祖兼领宣义德伦常从征伐以功累迁平卢军
节度使贞明元年魏州杨师厚卒末帝以魏兵素骄难

制乃分相澶卫三州建昭德军以张筠为节度使魏博贝三州仍为天雄军以德伦为节度使遣刘鄩以兵六万渡河声言攻镇定王彦章以骑兵五百入魏州屯金波亭以虞变分魏牙兵之半入昭德德伦促牙兵上道亲戚相诀别哭声盈涂效节军将张彦谋于其众相与夜攻金波亭彦章走出迟明魏兵攻牙城执德伦致之楼上纵兵大掠末帝遣供奉官扈异驰至魏谕彦许以刺史彦曰但以六州还魏而诏刘鄩反兵皇帝可以高枕异还言彦狂蹶不足畏宜促鄩击之末帝使人谕彦以制置已定不可复易使者三返彦怒召罗绍威故吏司空颀曰为我作奏若复依违则渡河虏之耳末帝优诏答之言王镕死镇人请降遣鄩以兵定镇州非有他若魏不便之即召鄩还戒彦勿为朝廷生事彦乃以杨师厚镇魏州尝带招讨使逼德伦论列之末帝不许彦乃迫德伦降晋遣牙将曹延隐奉书庄宗庄宗入魏德伦以彦逼己遣人阴诉于庄宗庄宗斩彦于临清而后入徙德伦大同军节度使行至太原监军张承业留之王檀攻太原德伦麾下多奔檀承业惧德伦为变杀之

△阎宝

阎宝字琼美郢州人少为朱瑾牙将瑾走淮南宝降梁为诸军都虞候从诸将征伐未尝独立战功贞明初拜保义军节度使贺德伦以魏博降晋晋军攻下洺磁相卫移兵围邢州末帝遣捉生都指挥使张温救宝温至内黄遇晋军乃降晋遣温至城下招宝宝遂降晋拜检校太尉同中书门下平章事领天平军节度使东南面招讨使位在诸将上梁晋战胡柳晋军败庄宗欲引兵退保临濮宝曰梁兵势蹙今骤胜而骄怠此不可失之时也庄宗谢曰微公几败吾事乃整军复战遂败梁兵十八年晋讨张文礼于镇州以宝为招讨使明年三月宝战败退保赵州惭愤发疽卒赠太师晋天福中追封太原王 【按五代史此下有康延孝传今改入贰臣】

钦定续通志卷二百九十二

●钦定续通志卷二百九十三 列传九十三

列传

五代 【十三】

○五代十三

张全义 朱友谦 朱汉宾 刘玘 周知裕 陆思铎

霍彦威 房知温 王晏球 安重

霸 王建立 康福

张全义

朱友谦

朱汉宾

刘玘

周知裕

陆思铎

霍彦威

房知温

王晏球

安重霸

王建立

康福

△张全义

张全义字国维濮州临濮人田家子也亡入黄巢贼中巢陷长安以为吏部尚书水运使巢败去事诸葛爽于河阳爽死事其子仲方仲方为孙儒所逐全义与李罕之分据河阳洛阳以附于梁【按通鉴李罕之召全义于泽州与之收合余众罕之据河阳全义据东都共求援于河东李克用以其将安金俊将骑助之表罕之为河阳节度使全义为河南尹盖取唐书之文是二人方受晋厚恩不应其时便附梁也】二人相得甚欢罕之常乏食仰给全义全义不能给因有隙罕之出兵攻晋绛全义袭取河阳罕之奔晋召晋兵围全义甚急梁遣牛存节等以兵万人救之晋军败解去梁以丁会守河阳全义还为河阳尹德梁出已由是尽心焉是时河南遭巢儒兵火后户不满百全义披荆棘劝耕殖筑南北二城以居之数年人物完盛及梁太祖劫唐昭宗东迁缮理宫阙府廨仓库皆全义之力全义初名言昭宗赐名全义唐亡事梁又请改名太祖赐名宗奭梁与晋战河北兵数败亡全义辄搜卒伍铠马月献之以补其缺太祖兵败蓆县道病还洛幸全义会节园避暑留旬日全义妻女皆迫淫之其子继祚愤耻不自胜欲刺刃太祖全义止之曰吾为李罕之所围啖木屑为食惟一马欲杀以饷军死在朝夕而梁出之得至今日此恩不可忘也太祖性猜忌尝有构全义于太祖者召之意且不测全义妻储氏遽入见厉声曰宗奭种田叟尔守河南三十年开荒鬬土拮据财赋助陛下创业今衰朽无能为而陛下疑之何也太祖笑曰我无恶心姬勿多言全义事梁累拜中书令兼领忠武陕虢郑滑河阳节度使判六军诸卫事天下兵马副元帅封魏王初全义为罕之所败其弟全武及家属为晋兵所得晋王给以田宅待之甚厚全义常阴遣人通问梁亡庄宗入汴全义自洛来朝泥首待罪庄宗劳之曰卿家弟侄幸复相见全义俯伏感涕命

皇子继岌皇弟存纪等皆兄事之全义因去梁所赐名
请复故名犹不自安乃赂刘皇后以自托初贞明中末帝幸洛阳将郊不果其仪仗法物
犹在全义因请幸洛阳曰南郊仪物已具庄宗大悦加
拜太师尚书令明年幸洛阳将郊而礼物不具因改用来年然不以前语责全义数幸其
第命皇后拜全义为父改封齐王初庄宗灭梁欲掘梁
太祖墓斲棺戮尸全义以谓梁虽讎敌今已屠灭其家足以报怨剖棺之戮非王者以大
度示天下也庄宗以为然铲去墓阙而已全义监军尝
得李德裕平泉醒酒石德裕孙延古因托全义复求之监军忿然曰自黄巢乱后洛阳园
宅无复能守岂独平泉一石哉全义尝从巢以为讎己
因奏答杀监军者其听讼以先诉者为直民苦之元行钦讨赵在礼无功大臣皆言明宗
可将庄宗方疑之不欲遣全义力以为言乃从之明宗
至魏果反全义以忧卒年七十五谥忠肃子继祚官至上将军晋高祖时与张从宾反于
河阳当族诛宰相桑维翰以其父珙尝事全义有恩乞
全活之不许止诛继祚及其妻子而已

△朱友谦

朱友谦字德光许州人初名简以卒隶澠池镇有罪去为盗久之为陕州军校节度
使王珙与弟珂争河中战败其牙将李璠与友谦谋共
杀珙附于梁梁太祖表璠代珙璠立友谦复逐之乃表友谦代璠梁太祖西攻岐往来过
陕中友谦奉事尤谨请更名齿诸子太祖怜而许之太
祖即位徙镇河中累迁中书令封冀王友珪弑立加友谦侍中虽受命而心常不平已而
友珪召入覲友谦不行乃附于晋友珪遣招讨使韩勅
将康怀英等兵五万击之晋王出泽潞救之大败怀英于解县夜追败之白径岭梁兵乃
解去末帝即位友谦复臣于梁而不绝晋也贞明六年
友谦遣其子令德袭同州逐节度使程全晖因求兼镇末帝初不许已而许之制命未至
友谦复叛始绝梁而附晋晋封友谦西平王加守太尉
以其子令德镇同州庄宗灭梁入洛友谦来朝赐姓名曰李继麟赐予巨万明年加守太
师尚书令赐铁券徙令德遂州以其弟令锡为忠武军
节度使诸子及将校为刺史者十余人恩宠无比时宦官伶人用事多求赂于友谦不能
给宦官伶人皆怒唐兵伐蜀友谦阅其精兵命令德将
以从军及郭崇韬见杀伶人景进言兵初出时友谦以为讨己阅兵自备又言崇韬所以
反以友谦为内应今且谋与存义为郭氏报冤庄宗疑
其事而未发友谦闻之大恐将入朝自明将吏皆劝阻不听单车入朝景进使人诈为变
书告友谦反乃徙友谦义成军节度使遣朱守殷夜以
兵围其馆驱友谦出徽安门外杀之复其姓名诏魏王继岌杀令德于遂州王思同杀令

锡于许州夏鲁奇族其家属于河中鲁奇至友谦妻张氏率其宗族二百余口见鲁奇曰朱氏宗族当死愿无滥及平人乃别其婢仆以其族百口就刑又取铁券示鲁奇曰此皇帝所赐也不知为何言语鲁奇亦为之惭友谦死其将史武等七人皆坐友谦族诛天下冤之 【按五代史此下有袁象先传今改入贰臣】

△朱汉宾

朱汉宾字绩臣亳州谯人父元礼为梁军校战歿于清口太祖怜汉宾以为养子郢州朱瑾募军中骁勇者黥双雁于其颊号雁子都太祖闻之乃更选勇士数百人号落雁都以汉宾为指挥使人皆称朱落雁又为天威军使历磁滑宋亳曹五州刺史安远军节度使庄宗灭梁罢汉宾为右龙武统军待之颇薄后因出游幸其第汉宾妻有色而慧因侍左右进酒食奏歌舞庄宗欢甚漏再下乃去汉宾自此有宠明宗入立恶之以为右卫上将军安重诲用事汉宾依附之相为婚媾由是复得为昭义军节度使 【按辞史汉宾镇潞后复移镇青州欧史失载】 重诲死汉宾罢为上将军遂以太子少保致仕汉宾未尝有战功而临政能守法好施惠人颇爱之清泰二年卒晋高祖时赠太子少傅谥贞惠 【按五代史此下有段凝传今改入贰臣】

△刘玘

刘玘汴州雍邱人世为宣武军牙将梁太祖镇宣武玘以军卒历迁牙将为襄州都指挥使 【按辞史多滑徐二州都指挥使】 山南节度使王班为乱军所杀推玘为留后玘伪许之明日飨士伏甲幕中酒半擒为乱者杀之会梁遣陈晖兵亦至襄州平以功拜复州刺史徙亳安二州末帝时为晋州观察留后凡八年日与晋人交战庄宗灭梁玘来朝庄宗劳之玘顿首谢罪遣还镇遂以为节度使徙镇安远天成元年复徙武胜卒于道赠侍中

△周知裕

周知裕字好问幽州人为刘仁恭骑将仁恭被幽知裕去事守文守文又见杀乃与张万进立守文子延祚而事之守光又杀延祚以其子继威代之万进杀继威与知裕俱奔梁梁太祖得知裕喜甚为置归化军以知裕为指挥使所得晋兵皆以隶知裕梁晋相距河上其摧坚陷阵归化一军为最然在梁位不过刺史庄宗入汴知裕欲自杀人止之乃降唐庄宗宠待之以为房州刺史 【按辞史知裕曾为伐蜀前锋骑将】 明宗时历绛淄二州刺史迁宿州团练使安州留后所居皆有善政安州近淮俗恶病者父母有疾置之佗室以竹竿系饮食委之至死不近

知裕深患之加以教化由是稍革罢为右神武统军应顺中卒赠太傅

△陆思铎

陆思铎澶州临黄人少为宣武军卒以善射名累迁拱辰左厢都指挥使领恩州刺史梁晋相拒河上思铎镂姓名于箭箬以射晋军中庄宗马鞍庄宗拔矢见思铎姓名奇之其后灭梁思铎谒见庄宗出其矢示之思铎伏地请死庄宗慰之拜龙武右厢都指挥使晋高祖时为陈蔡二州刺史卒思铎在陈州有善政临终戒其子曰陈人爱我我死则葬焉遂葬陈州 【按五代史此下有赵在礼传今改入叛臣】

△霍彦威

霍彦威字子重洺州曲周人少遭兵乱梁将霍存掠得之养为子尝从存战中矢眇一目后事梁太祖稍迁左龙骧军使右监门卫上将军预诛友珪拜洺州刺史迁邠宁节度使刘知俊攻邠州彦威固守踰年每俘获必纵还之知俊不复攻徙镇义成天平兼北面行营招讨使与晋军相持河上屡败降为陕州留后庄宗灭梁彦威来朝庄宗置酒故梁崇元殿酒酣指彦威及段凝袁象先等举酒属明宗曰此皆前日勅敌今侍吾饮乃卿功也彦威等惶恐伏地请死庄宗劳之曰吾与总管戏尔卿无畏赐姓名李绍真明年徙镇武宁赵在礼反彦威别讨赵太于邢州破之仍以兵属明宗明宗军变从马直军吏张破败率众杀将校纵火焚营噪呼明宗叱之曰尔辈皆天子亲军今贼城破在旦夕正立功名取富贵之时何返效贼耶军士对曰城中戍卒思归天子不垂原宥且闻破魏后欲尽坑魏博诸军某等初无叛心直畏死耳今宜与城中合势击退诸镇兵请天子帝河南令公帝河北明宗涕泣谕之乱兵呼曰令公不欲帝河北则他人有之我辈狼虎岂识尊卑彦威与安重诲劝明宗许之乃拥兵入城与在礼合置酒大会部兵在外者闻明宗反皆溃去彦威独不入以所将五千人营城西北隅不动居二日明宗复出得彦威兵乃之魏县谋还镇州彦威重诲劝明宗以兵南向庄宗崩彦威从明宗入洛阳首率羣臣劝进内外机事皆参决焉徙镇平卢淳于晏者登州人也少举明经及第遭乱依彦威自彦威为偏裨时已从之彦威尝战败脱身走麾下兵无从者独晏徒步以一剑从之彦威高其义所历方镇常辟以自从家事无大小皆决于晏彦威以故少过失天成三年冬卒于镇明宗方猎近郊青州驰骑奏至涕泣还宫辍朝仍终其月不举乐赠太师谥忠武

△房知温

房知温字伯玉兖州瑕丘人少以勇力为赤甲都官健后隶魏州马鬪军稍迁亲随

指挥使庄宗取魏博得知温赐姓名曰李绍英以为澶州刺史历曹贝二州戍瓦桥关明宗自魏反兵南向知温首驰赴之天成元年拜泰宁军节度使明年为北面招讨使率魏效节九指挥戍卢台魏军自杨师厚时几为梁患其后张彦逼贺德伦降晋皇甫晖劫赵在礼作乱素为不法其戍卢台也军发之日不给兵甲惟以长竿系旗帜以表队伍军士颇自疑惑明年遣乌震代知温戍知温意不乐卢台戍军夹水东西为两寨震初至与知温会东寨方博效节军乱噪于门外知温即乘马出乱军击杀震执辔留知温知温给曰骑兵皆在西寨今独步军恐无能为乃跃马登舟渡河入西寨以骑军尽杀乱者明宗下诏凡九指挥三千余家数万口悉驱至漳水上杀之魏骄兵于是而尽明宗知变自知温起释不问徙镇武宁加兼侍中历镇天平平卢初明宗为北面招讨使知温为副废帝时以裨将事知温甚谨后因杯酒失意及废帝起凤翔愍帝出奔知温乘闲有窥觐意谓其司马李冲曰吾有钱数屋养马数千因时建义功必有成冲曰今天子孱弱上下离心潞王兵威甚盛事未可知冲请怀表西觐之至京师废帝已入立冲即奉表称贺还劝知温入朝废帝慰劳甚厚封东平王知温在镇厚敛积货巨万治第青州南城出入以声妓游嬉不恤政事天福元年卒赠太尉子彦儒献其父遗货拜沂州刺史将吏分其余者皆为富家云

△王晏球

王晏球字莹之洛阳人少为盗所掠汴州富人杜氏得之养为子冒其姓梁太祖镇宣武以选为厅子都指挥使即位为右千牛卫将军友珪立龙骧戍卒反自怀州趣京师遣晏球击败之河阳迁龙骧第一指挥使末帝即位迁龙骧四军都指挥使捉生军将李霸将千人戍杨刘夜作乱自水门入纵火大噪以长竿缚布沃油仰烧建国门晏球闻乱不俟命率龙骧五百骑击贼迟明尽杀之以功拜澶州刺史梁晋军河上以晏球为行营马步军都指挥使庄宗入汴晏球以兵追之行至封邱闻末帝已崩即解甲降唐赐姓名曰李绍虔拜齐州防御使戍瓦桥关明宗兵变自邺而南遣人招晏球从至洛阳拜归德军节度使王都反以晏球为招讨使与宣徽南院使张延朗等讨之契丹托纽万骑来救晏球闻托纽等兵且来留延朗屯新乐自逆于望都而契丹从他道入定州与都出不意击延朗军延朗大败收余兵会晏球趋曲阳都乘胜追之晏球先至水次方坐胡床指麾下都众奄至晏球与左右千余人连矢射之都众稍却而后军亦至晏球立高冈【册府元龟作嘉山】号令诸将皆橐弓矢用短兵回顾者斩符彦卿以左军攻其左高行珪以右军攻其右中军骑士抱

马项驰入都军都遂大败与托纽入城不敢复出契丹
又遣特哩衮【旧作惕隐按辽职官志惕隐乃典族属官即宗正职或当时称其官而非人名】以七千骑益都晏球遇之唐河追击至满城
斩首二千级其余众奔溃投村落村落之人以锄耰白梃所在击杀之无遗特哩衮与数十骑走幽州西为赵德钧擒送京师晏球攻定州久不
克明宗数遣人促之晏球以为未可急攻偏将朱弘昭张虔钊等宣言曰晏球怯耳乃驱兵进果败由是不敢复言晏球休养士卒食其三州之
赋悉以俸禄所入具牛酒日与诸将高会久之都城中食尽数与托纽谋决围走不果都将马让能以城降都自焚死晏球为将有机略善抚士
卒围定几一年军中未尝戮一人以功拜天平军节度使又徙平卢累官至兼中书令卒赠太尉

△安重霸

安重霸云州人初与明宗俱事晋王得罪奔梁又奔蜀王建以为亲将王衍立宦者王承休用事重霸深自托梁末蜀取李茂贞秦成阶三
州重霸劝承休求镇秦州衍以为节度使重霸为其副重霸与承休多取秦州花木献衍请衍东游唐魏王兵伐蜀承休大恐以问重霸重霸曰
剑门天下险虽精兵不可过然公受国恩闻难不可不赴愿与公俱西承休以为然整军将发帐饮城外酒罢承休上道重霸立马前辞曰秦陇
不可失愿留为公守承休业已上道无如之何唐军已破蜀重霸遂以三州降唐明宗以为阆州团练使罢为左卫大将军久之以为匡国军节
度使废帝时为京兆尹西京留守徙镇大同以病罢归卒于潞州

△王建立

王建立辽州榆杜人唐明宗为代州刺史以为虞候将庄宗尝遣女奴之代州祭奠侵扰代人建立捕而笞之庄宗怒欲杀之明宗护之以
免明宗自魏反曹皇后王淑妃皆在常山建立杀其监军并守兵明宗家属得无患由是益德之即位累拜成德军节度使检校太尉同中书门
下平章事建立与安重诲素不协王都有二志数以书通建立约为兄弟重诲知之以为言明宗不欲伤建立亟召还京师以为右仆射同中书
门下平章事判二司居岁余自言不识文字愿解三司明宗不许久之称疾乃出为平卢军节度使又徙上党怏怏不得志求解职以太子少保
致仕数请朝见不许乃自诣京师阍至后楼见明宗涕泣言己无罪为重诲所摈明宗曰汝为节度使不作好事岂独重诲谗汝耶赐以茶药遣
之废帝立复起为天平军节度使晋高祖时徙镇平卢天福五年来朝高祖劳之令毋拜赐肩輿入朝给二宦者掖而升殿又徙昭义累封韩王

建立好杀人晚节惑浮图法戒杀生所至人稍安之卒赠尚书令子守恩性贪鄙以荫补稍迁诸卫将军建立已卒家于潞守恩自京师得告归契丹灭晋昭义节度使张从恩与守恩媼家乃以守恩权巡检使守潞而从恩入见契丹守恩遂劫其家货以州降汉汉高祖即位即拜节度使徙镇静难西京留守加同中书门下平章事时周太祖以枢密使将白文珂等军西平三叛还过洛阳守恩以使相自处肩輿出迎太祖怒即以头子命文珂代守恩为留守守恩奉朝请于京师隐帝杀史宏肇等召羣臣慰谕守恩前对曰陛下始睡觉矣闻者皆缩颈显德中为左金吾卫上将军卒

△康福

康福蔚州人世为军校初事晋王为偏将庄宗令牧马于相州为小马坊使逾年马大蕃滋明宗自魏反兵过相州福以小坊马二千匹归命军势由是益盛明宗入立拜飞龙使领磁州刺史襄州兵马都监枢密使安重诲恶之福惧求外任灵武韩洙死弟澄立而偏将李从宾作乱澄表请朝廷命帅重诲以灵武深入羌境为帅者多遇害乃拜福凉州刺史河西军节度使福入见涕泣明宗意动欲为福更他镇而重诲不可乃令将军牛知柔以兵卫福行至方渠羌果出邀福福以兵击走之至青冈峡遇雪福登山望见山谷中烟火有吐蕃数千帐不觉福至福分兵三道袭之吐蕃大骇弃车帐走杀之殆尽获玉璞绫锦羊马甚众由是威声大振福居灵武三岁常丰稔有马千驷蕃夷畏服言事者疑福有异志重诲亦言福必负朝廷明宗遣人讽之福言受国恩深有死无二因乞还朝不许章再上即随至明宗不之罪徙镇彰义历静难雄武充西面都部署晋高祖时徙镇河中代还卒于京师赠太师谥武安

钦定续通志卷二百九十三

●钦定续通志卷二百九十四 列传九十四

列传

五代 【十四】

○五代十四

郭延鲁	华温琪	苾从简	张筠	杨彦询	李周
刘处让	李承约	张希崇	相里金		
张廷蕴	马全节	皇甫遇	安彦威	李琼	刘景岩
郭延鲁					
华温琪					
苾从简					

张筠

杨彦询

李周

刘处让

李承约

张希崇

相里金

张廷蕴

马全节

皇甫遇

安彦威

李琼

刘景岩

△郭延鲁

郭延鲁沁州绵上人父饶以骁勇事晋数立军功为沁州刺史九年为政惠爱州人思之延鲁以善槊为将累迁神武都知兵马使朱守殷反从攻汴州以先登功为汴州马步军都指挥使累迁复州刺史延鲁思继父志以廉平自励民甚赖之秩满州人乞留不许皆遮道攀号天福中拜单州刺史卒于官时刺史皆以军功拜武夫恃功纵下为害不细延鲁父子特以善着焉

△华温琪

华温琪字德润宋州下邑人世本农家温琪身长七尺少从黄巢为盗巢陷长安以为供奉官都知巢败温琪走滑州自顾貌伟惧不容乃投白马河流数十里不死人援而出之又自经于桑林辄枝折乃之胙县有田父见之曰子状貌堂堂非常人也匿于家居岁余濮州刺史朱裕募兵乃往依之后事梁为开道指挥使累功为绛棣二州刺史棣苦河患温琪徙新州避之民赖其功又历齐晋二州庄宗攻晋州踰月不能破末帝嘉其善守升晋州为定昌军以温琪为节度使坐掠部民妻罢为金吾卫大将军左龙武统军寻迁耀州观察留后庄宗灭梁见温琪曰此为梁守平阳者嘉之以耀州为顺义军即拜节度使徙镇雄武明宗时来朝愿留阙下以为左骁卫上将军踰年明宗谓枢密使安重诲曰温琪旧人宜与一重镇重诲意不欲对以无员阙他日又语重诲曰可代者惟枢密使耳明宗曰可重诲不能答温琪惧称疾不出者累月已而以为镇国军节度使废帝时以太子太保致仕天福元年卒赠太子太傅

△苾从简

苾从简陈州人世本屠羊从简去事晋为军校善用槊攻城多为梯头庄宗爱其勇累迁步军都指挥使庄宗与梁对阵梁军有执大旗出入阵闲者庄宗望见之叹曰彼猛士谁能为我取之从简请往庄宗惜之不许从简潜率数骑驰入梁军夺其旗而还尝中流矢镞入髀骨命工取之工欲凿其骨人皆以为不可从简遽使凿之工迟疑不忍下从简叱其亟凿左右视者皆若不胜而从简言笑自若然其为人刚暴难制庄宗每优容之累迁蔡州防御使明宗时累徙麟汝汾金四州废帝反凤翔从简与诸镇兵围之兵溃被执废帝责其不降对曰事主不敢二心废帝释之拜颍州团练使晋高祖起兵太原废帝将亲征召为招讨副使从至河阳拜河阳三城节度使废帝还洛阳从简即降晋历镇忠武武宁入为左金吾卫上将军卒赠太师从简好食人肉所至潜捕民闲小儿以食许州富人有玉带欲之而不可得遣二卒夜入其家杀而取之卒夜踰垣隐木闲见其夫妇相待如宾叹曰吾公欲夺其宝而害斯人吾必不免因跃出告之使速以带献遂踰垣去不知所之

△张筠

张筠海州人事时溥为宿州刺史梁太祖取宿州得筠以为四镇客将长直军使累拜宣徽使末帝分建昭德军以筠为节度使由是魏博军叛附于晋晋王攻相州筠弃城走后以为永平军节度使梁亡事唐为京兆尹伐蜀为剑南两川安抚使蜀平拜河南尹徙镇兴元尝有疾不见将吏副使符彦琳入问筠又辞彦琳疑筠已死即请出牌印筠怒命左右收彦琳下狱以反闻明宗知而释之阳徙筠为西京留守戒守者不内筠至长安不得入乃朝京师以为左骁卫上将军筠弟籛当筠尹京兆以为牙内指挥使三白渠营田制置使筠西伐蜀留籛守京兆魏王继岌班师至兴平籛断咸阳浮桥以拒继岌继岌乃自杀初筠代康怀英镇永平怀英死筠掠其家货又于唐故宫掘得金玉偏将侯莫陈威尝与温韬发唐诸陵分得宝货筠以事杀而取之继岌死籛悉取其行橐庄宗遣宦者向延嗣杀王衍延嗣因尽得其珍宝明宗即位捕诛宦者延嗣亡命籛又尽取其货由是兄弟富皆巨万然筠为人好施予所至不为聚敛而籛嗜酒贪鄙历沂密二州刺史晋出帝时以将军市马于回鹘坐马不中式有司理其直籛郁郁而卒筠居洛阳拥货以酒色声妓自娱天福二年徙居长安是岁张从宾作乱入洛阳筠遂以免卒赠太子少师

△杨彦询

杨彦询字成章河中宝鼎人少事王师范掌藏书颇见亲信师范降梁见杀彦询乃

之魏事杨师厚为客将魏傅入于晋因留事庄宗为引
进副使奉使吴蜀常称旨历德州刺史羽林将军晋高祖镇太原废帝疑其有贰志择诸
将谨厚者佐之乃以彦询为太原节度副使高祖以疑
见徙欲拒命以问彦询彦询曰太原之力能与唐敌否公其审之高祖反意已决彦询亦
不复敢言左右以为异议欲杀之高祖止之契丹立高
祖于太原以兵送至河上彦询为宣徽使 【按辞史高祖即位授齐州防御使检校太保
欧史不载】 数往来帐中德光亦爱其为人明年拜
威德军节度使复入为宣徽使又拜安国军节度使天福七年徙镇镇国岁大饥为政有
惠爱以病风罢为右金吾卫上将军卒赠太子太师

△李周

李周字通理邢州内邱人唐昭义军节度使抱真之后年十六为内邱捕贼将以勇
闻时梁晋兵争山东羣盗充斥行者必以兵卫周乡人
卢岳徙家太原周送之至西山有盗从林中射岳中马周大呼曰吾在此孰敢尔邪盗闻
其声曰李周也因去周送岳至太原岳知星且工相人
占晋必有天下而周且将相劝其留事晋周以母老辞归而梁方攻下邢洛晋王栅兵青
山口路梗不知所归乃思岳言至青山归晋晋王以为
万胜黄头军使后从征伐常有功从战柏乡先登迁匡霸指挥使守杨刘梁兵来攻坚守
久之闻母丧奔归庄宗遣他将代周守几为梁兵所破
遽追周还守之其后梁人已破德胜因复东击杨刘以巨舰绝河断晋饷援周遣人驰趣
庄宗来救请日行百里以赴急庄宗笑曰周为我守何
忧日行六十里且行且猎比至周已绝粮三日庄宗以巨楫积薪沃油顺流纵火焚梁舰
梁兵解去庄宗见周劳曰微公诸将为梁擒矣历相蔡
二州刺史明宗时拜武信军节度使徙镇静难历武安远永兴宣武四镇所至多善政
晋高祖时复镇静难罢还出帝幸澶渊以周留守东京
还拜开封尹卒赠太师

△刘处让

刘处让字德谦沧州人少为张万进亲吏从入梁为其泰宁军牙将万进叛梁附晋
梁遣刘鄩讨之遣处让求救于晋晋方与梁相拒未能
出兵处让于军门截耳而诉曰万进所以见围附晋故也柰何不顾其急苟不出兵请死
晋王义之为发兵未渡河而万进为梁所败处让因留
事晋庄宗即位为客省使常使四方多称旨天成中累迁左骁卫大将军废帝时魏州军
乱遣范延光招讨以处让为河北都转运使晋高祖立
历宣徽南院使范延光反命杨光远为招讨使以处让参其军事已而副招讨使张从宾
叛于河阳处让分兵击破之还与光远攻邺逾年不能

下处让入城譬以祸福延光乃降唐制枢密使常以宦者为之自梁用敬翔李振唐庄宗始用武臣权重将相高祖时以宰相桑维翰李崧兼枢密使处让与诸宦者心不平之光远之讨延光也以重兵在握举动多骄恣所求请高祖颇裁抑之处让为光远言此非上意皆维翰崧等嫉公光远大怒兵还见高祖诉以维翰等沮己高祖不得已罢维翰等以处让为枢密使处让在职所陈述多不称旨后丁母忧去高祖遂不复拜枢密使居丧期年起复为彰德军节度使右金吾卫上将军卒赠太师

△李承约

李承约字德俭蓟州人少事刘仁恭为山后八军巡检使仁恭被囚承约以其兵奔晋晋王以为匡霸指挥使从破夹寨战临清以功累迁洛汾二州刺史颍州团练使天成中邠州节度使毛璋有异志拜承约涇州节度副使往伺璋动静承约谕以祸福后朝廷遣人代璋璋实时受代明宗大喜即拜承约黔南节度使承约以恩信抚诸夷落劝民农桑兴学校居数年当代黔南人诣京师乞留为许留一年召为左卫上将军改左龙武统军拜昭义军节度使复为左龙武统军天福二年迁左骁卫上将军卒赠太子太师

△张希崇

张希崇字德峰幽州蓟人少通左氏春秋刘守光不喜儒士希崇因事军中为偏将军行军司马明宗时卢文进自平州亡归契丹因以希崇代为节度使遣亲将以三百骑监之居岁余监兵稍怠希崇因率其麾下生口二万南归明宗嘉之拜汝州防御使迁灵武节度使灵州地接蕃戎兵饷道常苦抄掠希崇乃开屯田教士耕种军以足食而省转馈招辑夷落自回鹘瓜沙皆遣使入贡明宗下诏褒美居四岁上书求还内地徙镇邠宁晋高祖入立复拜灵武节度使希崇事母至孝朝夕立侍食必彻馔乃敢退为将不喜声色好读书颇知星天福三年月掩毕口大星希崇叹曰毕口大星边将也我其当之乎明年正月卒赠太师

△相里金

相里金字奉金【按朱彝尊集载相里金墓碑跋云金字国宝与史不同碑乃当时撰述似为可据】并州人事晋为五院军队长从战柏乡胡柳皆有功迁黄甲指挥使同光中拜忻州刺史时诸州皆用武人多以部曲主场务渔蠹公私以利自入金独禁部曲不与事厚其给养使掌家事而已迁陇州防御使废帝起凤翔驰檄四邻未有应者独金首遣判官薛文遇来废帝德之即位拜保义军节度使晋高祖入立徙镇

建雄罢为上将军天福五年卒赠太师 【按碑作赠太子太师】

△张廷蕴

张廷蕴字德枢 【从辞史增】 开封襄邑人少为宣武军卒去事晋为军校尝从力战先登庄宗壮之以为帐前黄甲二十指挥步军都虞候魏博三城巡检使庄宗在魏刘皇后从多纵其下扰人无敢言者廷蕴辄收斩之李继韬叛庄宗遣明宗为招讨使元行钦为都部署廷蕴为马步军都指挥使将兵为前锋廷蕴至潞曰已暮即率兵百余踰濠登城遂破潞州明旦明宗与行钦始至明宗心颇嫌之廷蕴以功累迁申怀沂三州刺史金颖陇绛四州防御团练使左监门卫上将军开运中卒廷蕴武人所识不过数字而平生重文士尝从明宗破郢州获判官赵凤以其儒人亟荐于明宗后凤为相数荐廷蕴于安重诲重诲屡言之明宗以破潞之隙衔之故终不秉旄节廷蕴素廉历七州卒之日家无余资

△马全节

马全节字大雅大名元城人唐同光中为捉生指挥使天成中历博单郢沂四州刺史金州防御使废帝时蜀人攻金州州兵纔数百全节散家财与士卒坚守城卒以全废帝召以为沧州留后晋高祖入立即拜横海军节度使徙镇安远代李金全金全叛附于李升使全节与安审晖讨之金全南奔全节与昇守将李承裕战安州大败之承裕走审晖追至云梦执之将献于京师承裕谓全节曰吾城中所掠百万计将军皆取之矣吾见天子必诉此而后就刑全节惧因杀承裕高祖置不问徙全节昭义安国义武诸镇自出帝与契丹交恶全节未尝不在兵闲开运元年为行营都虞候契丹与晋军相拒澶魏闲全节别攻白团城破之克秦州降其守将晋廷谦四月契丹败于戚城引兵分道而北全节败之于定丰执其将安晖七月徙广晋尹留守邺都十月杜重威为招讨使以全节为副大败契丹于卫村二年徙镇顺国未至而卒赠中书令全节为人谦谨事母至孝其临政决事必问法如何初徙广晋过元城衣白襦谒其县令州里以为荣

△皇甫遇

皇甫遇常山真定人事唐明宗为正胜军节度使所至苛暴诛斂晋高祖时历义武昭义建雄河阳四镇罢为神武统军契丹入员州出帝以高行周为北面行营都部署遇为马军右厢排阵使会青州杨光远反乃遣遇及李守贞分兵守郢州兵至马家渡而契丹方欲渡河助光远遇等击败之以功拜义成军节度使马军都指挥使开运二年契丹侵西山遣先锋赵延

寿围镇州杜重威不敢出战延寿分兵大掠攻破栾城柏乡等九县南至邢州出帝遣北面行营都监张从恩会马全节安审琦及遇等御之从恩等至相州阵安阳河南遣遇与慕容彦超率数千骑前视敌渡漳河逢契丹兵数万转战十余里至榆林契丹围之遇马中箭而踣得仆杜知敏马乘之以战知敏为契丹所擒遇谓彦超曰知敏义士也岂可失之即与彦超跃马入取之而还战自午至未解而复合契丹益出生兵势甚盛遇戒彦超曰今日之势战与走尔战尚或生走则死也当死战报国张从恩与诸将怪遇无报皆谓遇已陷矣已而有驰骑报遇被围审琦将赴之从恩疑报者诈不欲往审琦曰吾属失皇甫遇复何面目见天子即引骑渡河诸将皆从而北距十余里契丹望见救兵来即解而北去遇与审琦等收军而南时契丹兵已深入人马俱乏其还也诸将不能追从恩因率遇等退保黎阳三年冬以重威为都招讨使遇为马军右厢都指挥使屯于中渡重威已阴送款契丹伏兵幕中悉召诸将列坐告以降皆愕不能对重威出降表遇等俛首以次自书其名即麾兵解甲出降契丹遣遇与张彦泽先入京师遇行至平棘绝吭而死

△安彦威

安彦威字国俊代州崞县人少隶唐明宗麾下明宗镇天平宣武成德常以为牙将以谨厚见信及即位累迁捧圣指挥使领宁国军节度使晋高祖入立拜彦威北京留守徙镇归德河决滑州命彦威塞之彦威出私钱募民治堤迁西京留守岁大饥加意赈抚饥民有犯法者宽贷之以是不忍流去丁母忧哀毁过制出帝与契丹隳盟拜彦威北面行营副都统悉以家财佐军用以疾卒于京师彦威与安太妃同宗出帝事以为舅彦威未尝言及卒太妃临哭人始知之当时益称其慎重

△李琼

李琼字隐光【从辞史增】沧州饶安人少为骑将与晋高祖俱隶唐明宗麾下同光二年契丹入边明宗出涿州与战不胜诸将各引去晋高祖独战不已契丹渐围之琼引高祖衣与俱遯至刘李河追兵且及琼浮水先至南岸高祖至河中流马踣琼以长矛援出之又以所乘马与高祖而步护之乃得免明宗兵南向琼从高祖以三百骑先趋汴州高祖为保义军节度使以为牙队指挥使高祖建国以为护圣都虞候久之拜相申二州刺史出帝时为棣州刺史杨光远反以书招琼琼不纳迁洺州团练使又为护圣右厢都指挥使契丹入京师以琼为威州刺史行至郑州遇盗见杀

△刘景岩

刘景岩延州人家素封以货游豪俊闲事高万金为部曲后为丹州刺史 【通鉴作坊州】 晋高祖起太原唐废帝调民户每出一卒为义兵延州节度使杨汉章发民赴京师将行景岩遣人激怒之义兵乱杀汉章迎景岩为留后晋高祖即位即拜节度使景岩从事熊曷多智阴察景岩跋扈难制欲以利愚之因言边地不可久安邠涇多善出利百倍宜多市田射利自厚景岩信之岁余获甚多景岩使曷朝京师曷乃言景岩不宜在边乃移景岩邠州曷入拜补阙而景岩又徙镇保义居未几又徙武胜景岩乃悟曷为卖己诬奏曷隐已玉带曷坐贬开运三年景岩以太子太师致仕契丹入京师以周密镇延州州人逐密立高允权允权妻刘氏景岩孙女也景岩良田甲第僮仆甚盛党项司家族畜牧近郊尤富强景岩私与往来允权颇患之允权妻岁时归省景岩谓曰高郎一县令而有此州其可保乎允权意恶之又利其田宅乃诬其反而杀之

钦定续通志卷二百九十四

●钦定续通志卷二百九十五 列传九十五

列传

五代 【十五】

○五代十五

卢文进	李金全	杨思权【尹晖】	刘审交	王周
高行周	白再荣	安叔千	翟光邺	
冯晖	唐景思	王进	常思	孙方谏
王环	折从阮	娄继英	慕容彦超	刘词

卢文进

李金全

杨思权

刘审交

王周

高行周

白再荣

安叔千

翟光邺

冯晖

唐景思

王进

常思

孙方谏

刘词

王环

折从阮

娄继英

慕容彦超

△卢文进

卢文进字大用范阳人为刘守光骑将降唐拜寿州刺史庄宗以属其弟存矩存矩为新州团练使统山后八军庄宗与刘鄴相距于莘召存矩兵存矩募山后劲兵数千人课民出马民以十牛易一马皆怨而兵又不乐南行行至祁沟关聚谋乱文进有女幼而美存矩求为侧室以其大将不敢拒心常嫌之因与乱军杀存矩【按辞史军士聚乱文进抚膺恸哭曰奴辈累我遂为乱军所拥乃攻新州据此似文进初不欲为乱者通鉴亦采其说】反攻新州不克攻武州又不克遂奔于契丹契丹使守平州明宗即位文进率众数万归唐以为义成军节度使居岁余徙镇威胜加同平章事入为上将军又镇昭义安远晋高祖立与契丹约为父子文进惧不自安天福元年冬杀其行军司马冯知兆副使杜重贵送款于李昇昇遣兵迎之文进居镇有善政兵民爱之将行从数骑驰至营中别其将士告以避契丹之意将士皆再拜为诀乃南奔昇以为天威统军宣润节度使后以左卫上将军【按金陵志文进自满州召还兼中书令封范阳郡王奉朝请】卒于金陵

△李金全

李金全其先出于吐浑金全少为唐明宗厮养从战有功由刺史拜彰武军节度使在镇贪暴罢归献马数十匹居数日又以献明宗谓曰卿患马多耶卿在泾治状如何无乃以马为事乎金全惭不能对徙镇横海久之罢为右卫上将军晋高祖时安州屯防指挥使王晖杀节度使周怀高祖遣金全将骑兵千人以诏书招晖许以刺史又以信箭谕安州不戮一人且戒金全曰无失吾信己而晖南走为襄州安从进所遮杀金全后至得晖党数百人皆送京师金全利晖所掠资因杀其将武克和等十余人高祖不能讨即以金全为安远军节度使金全左都押衙胡汉荣用事【辞史作汉筠避周讳也】所为不法高祖不欲因汉荣以累功臣为选贾仁沼代之且召汉荣汉荣教金全留己金全客庞令图谏曰仁沼昔事王晏球晏球攻中山王都遣善射者登城射晏球中兜牟仁沼从后引弓

射善射者一发而毙晏球求其人赏之仁沼不言此天下忠臣也都败晏球遣仁沼献捷京师赐与甚厚悉分故人亲戚贫者此天下廉士也宜纳仁沼而遣汉荣汉荣闻之夜使人杀令图而酖仁沼仁沼舌坏而死天福五年高祖以马全节代金全仁沼二子欲诣京师诉父冤汉荣大惧给金全曰前日天子召汉荣公不遣仁沼之死其二子将诉于朝今以全节代公是召公对狱也金全信之遂叛送款于李昇昇以为天威统军汉隐帝时李守贞反河中乞兵于昇金全为昇润州节度使与查文徽等出沭阳昇诸将皆锐于攻取金全独以为远不相及不可行乃止其后亦不复用不知所终

△杨思权

杨思权邠州新平人事梁为控鹤军使唐庄宗灭梁以为夹马都指挥使明宗时秦王从荣镇河东以冯贇为副思权为北京步军都指挥使以佐佑之从荣素骄所为多不法是时愍帝为宋王尹河南谦恭好礼明宗阴遣人从容语宋王之善以讽勉之从荣不悦告思权曰天下共贤河南而非我我将废矣柰何思权曰公有甲士而思权在河患劝从荣招募死士增利器械以为备冯贇患之以闻乃召思权还以从荣故不之责后为右羽林都指挥使将兵戍兴元潞王从珂反张虔钊会诸镇兵围凤翔思权攻城西严卫指挥使尹晖攻城东破其两关城从珂登城呼外兵告以己非反者语甚悲外兵闻者皆哀之而虔钊督战甚急军士反兵逐虔钊思权因呼其众曰潞王真吾主也即拥军入城降晖闻思权已降亦麾其军使解甲由是诸镇兵皆溃思权入见曰臣以赤心奉殿下事成愿不以防御团练使处臣乃出一纸于怀中请志姓名以为验从珂即书曰可邠节度使及入立即拜思权静难军节度使后为右龙武统军左卫上将军天福八年卒赠太傅

尹晖

尹晖

尹晖者魏州大名人【按薛史晖少以勇健事杨师厚为军士唐庄宗擢为小校从征河上累擢诸军指挥使领数郡刺史皆晖为严卫指挥使以前事欧史失载】从废帝入洛阳而晋高祖来朝相遇于道晖时为严卫指挥使恃先降功不为屈马上横鞭揖之高祖怒白废帝不可与名藩乃以为应州节度使高祖入立罢为右卫大将军范延光反以书招晖晖出奔淮南为人杀于道【按五代史此下有王宏贇传今改入逆臣】

△刘审交

刘审交字求益幽州文安人为唐兴令补范阳牙校刘守光僭号以为兵部尚书守光败归唐庄宗以为从事屡为转运供军使拜辽州刺史改慈州以母老去官母丧哀毁过礼不调累年晋高祖分户部度支盐铁为三使岁余三司益烦弊乃复合为一拜审交三司使议者请检天下民田宜得益租审交曰租有定额而天下比年无闲田民之苦乐不可等也遂止不检民赖以不扰迁右卫上将军陈州防御使出视民田见耕器薄陋乃取河北耕器为范更铸之后徙襄州青州皆有善政罢还契丹入京师留萧翰而去翰复以审交为三司使王淑妃与羣臣谋迎汉高祖或以为燕兵在京师者犹数千可城守审交进曰余燕人也今为燕守城当为燕谋然事势不可为也乃遣人西迎高祖高祖至罢审交不用隐帝时为汝州防御使有能名干佑三年卒州人聚哭柩前上疏乞留葬近郊使民得岁时祠祭诏许之赠太尉

△王周

王周魏州人事唐庄宗明宗为裨校以战功拜刺史晋天福中从杨光远讨魏州又从杜重威讨镇州皆有功历贝州涇州节度使涇州张彦泽苛虐民多流亡周乃更为宽恕问民疾苦去其苛弊二十余事民皆复归历迁武胜保义义武成德四镇皆有善政定州侨坏覆民租车周曰桥梁不修刺史过也乃偿民粟为治其桥杜重威降契丹契丹兵过镇州临城呼周使出降周泣曰受晋厚恩不能死战而以城降何面目南行见人主与士大夫乎求刀欲自杀家人止之迫以出降契丹以为武胜军节度使汉高祖入立徙镇武宁卒赠中书令

△高行周

高行周字尚质妫州人【辞史作幽州】世为怀戎戍将父思继兄弟以武勇雄于北边为幽州李匡威戍将匡威为其弟匡侔所篡晋王将讨其乱患思继兄弟遣人至孔岭关招之燕俗重气义思继等闻晋为匡威报讎欣然从之为晋兵前锋匡侔闻思继兄弟皆叛乃弃城走克用以刘仁恭守幽州思继兄弟为诸军都指挥使分掌燕兵克用临诀属仁恭善防之留晋兵千人为仁恭卫兵多犯法思继等数诛杀之克用以责仁恭仁恭以高氏为诉由是晋尽诛思继兄弟仁恭以其兄之子行珪为牙将而思继子行周年十余岁亦收之帐下稍长补以军职仁恭被囚守光立以行珪为武州刺史其后守光背晋晋攻之守光将元行钦牧马山后闻守光且见围即率所牧马赴援而麾下兵叛推行钦为留后行钦素惮行珪乃遣人之怀戎縶其子而招行珪曰守光可取而代也当从我行不然且杀公子行珪谢曰与君俱刘公将而忍叛之吾当

为刘氏也尚何顾吾子耶行钦即以兵围行珪 【按通鉴考异云唐庄宗实录薛史纪及元行钦传皆云行钦闻行珪降晋帅兵攻之惟周太祖实录及本传云行钦称留后行珪城守不从行周卒时去燕亡及行钦之死已久行周名位尊显门生故吏虚美其兄弟故与诸说特异也】
月余城中食尽行珪告州人曰吾非不为父老守也今刘公救兵不至柰何可杀吾降晋父老皆泣愿死守时行周适从行珪在武州即夜缒出城驰见庄宗庄宗遣明宗救之比至行钦已解去行珪乃降晋庄宗时历朔忻岚三州刺史大同军节度使明宗入立徙镇威胜安远行珪性贪鄙所为多不法副使范延策数规谏行珪衔之戍兵有谋叛者行珪先觉之潜徙库兵于他所戍兵叛趋库劫兵无所得乃溃去行珪追而杀之因诬奏延策同反并其子皆见杀天下冤之行珪卒于镇赠太尉当行珪之降晋也行周隶明宗帐下为裨将梁晋军河上庄宗遣明宗东袭郢州行周将前军夜遇雨军中皆不欲进行周曰此天赞我也郢人恃雨不备宜出其不意击之即夜驰涉济入其城郢人方觉遂取之庄宗灭梁以功领端州刺史迁绛州明宗时从平朱守殷克王都迁颍州团练使镇武军节度使历镇彰武昭义晋高祖时为西京留守徙镇天雄以襄州行营都部署讨安从进平之徙镇归德出帝时代景延广为侍卫亲军都指挥使李彦韬冯玉等用事乃求归镇许王从益召行周以拒汉高祖行周叹曰衰世难辅况儿戏乎乃不从汉高祖入立加守中书令徙镇天平封临清王周太祖时封齐王卒赠尚书令追封秦王

△白再荣

白再荣不知其世家 【旧史云本蕃部人】 少为军卒唐晋闲为护圣指挥使从契丹北行至镇州契丹留满达勒守镇州而去晋人从者多留焉居未几李筠 【通鉴作李荣此作筠亦旧史避周讳】 何福进等谋逐满达勒使人召再荣共攻之满达勒走诸将推再荣为留后时李崧和凝等皆在镇再荣以兵环其居迫而求物又欲害崧李谷谓曰公等亲被契丹之苦忧死不暇然逐满达勒者乃众人所为非独公力也今纔得生路而遽杀宰相他日天子问宰相何在何以对之再荣默然乃止而悉拘尝事满达勒者取其财镇人谓之白满达勒汉高祖即位拜再荣为留后迁义成军节度使罢还周太祖以兵入京师军士攻再荣第悉取其财已而前启曰士卒尝事公隶麾下一旦无礼如此亦复何面见公乃斩之携其首去家人以帛赎而葬之

△安叔千

安叔千字胤宗沙陀三部落人少事唐庄宗为奉安指挥使明宗时与讨王都拜秦

州刺史以从击契丹功迁昭武军节度使历静难横海
安国建雄四镇晋出帝时为左金吾卫上将军契丹入京师晋百官迎见德光于赤冈叔
千出班作契丹言德光劳曰汝在邢州已通诚款吾今
至此当与汝一吃饭处叔千再拜乃以为镇国军节度使汉高祖入立罢归自以尝私附
契丹颇怀媿惧以太子太师致仕周太祖兵入京师军
士大掠叔千家货已尽而军士意其犹有所藏捶掠不已伤重归于洛阳卒

△翟光邺

翟光邺字化基濮州鄄城人父景珂当梁晋相距河上景珂率聚邑人守永定驿晋
人攻之踰年不能下景珂卒战死光邺时年十岁为晋
兵所掠明宗忧之事唐官至耀州团练使【辞史明宗深加爱遇安重诲之罢光邺与中
官孟小僧有力焉欧史失载】晋高祖时历棣沂二
州刺史西京副留守出帝已破杨光远以光邺为青州防御使契丹灭晋遣光邺知曹州
许王从益入汴以为枢密使汉高祖入京师累迁至左
金吾大将军充街使周太祖入立为枢密副使出知永兴军卒于官光邺事继母以孝闻
虽贵常假官舍以居雍睦亲族与均有无其政务以宽
静休息为意既卒州人上书乞留葬立祠不许

△冯晖

冯晖魏州人为效节军卒以功迁队长唐庄宗入魏晖以队长亡入梁军王彦章以
其骁勇隶之麾下梁亡庄宗赦不问从明宗讨杨立魏
王继岌平蜀累迁夔兴二州刺史东川董琪反晖从晋高祖讨璋军至剑门不得入晖从
他道出其左击蜀守兵殆尽会晋高祖班师拜澶州刺
史天福中范延光反魏州遣晖袭滑州不克遂入于魏为延光守已而出降拜义成军节
度使徙镇灵武灵武自唐明宗以后市马余粟招降给
军岁用度支钱六千万关西转输供给民不堪役青冈土桥之闲氏羌剽掠行旅必以兵
晖始至则推以恩信部族怀惠止息侵夺然后广屯田
以省转饷治库仓亭馆千余区多由俸钱民不加赋管内大治党项拓拔彦超最大族他
族视为去就晖至彦超来谒遂留之为起第城中赐予
丰厚彦超既留诸部族争以羊马为市易暮年有马五千匹晋见晖马多而得夷心反以
为患徙镇静难保义召为侍卫步军都指挥使晖于是
始觉晋有患己意乃深结冯玉等因得复镇灵武时王令温镇灵武失夷落心大为边患
晖请自募兵卫得千余人行至梅戍蕃夷稍稍来谒晖
顾首领一人指其佩剑曰此板桥王氏剑邪吾闻王氏剑天下利器也俯而取诸腰闲若
将翫之因击杀首领并其从骑十余人时去灵武尚五
六百里诸族皆以兵阨道路晖以言譬喻之独所杀首领一族求战即与战而败之诸族

遂不敢动晖至镇抚绥边部凡十余年恩信大着官至

中书令封陈留王广顺三年卒追封卫王 【按五代史此下有皇甫晖传今改入叛臣】

△唐景思

唐景思秦州人少以屠狗为生去为军卒为蜀指挥使守固镇唐魏王继岌兵至以城降拜兴州刺史入晋为贝州行军司马契丹入贝州

景思为赵延寿所得以为壕砦使及灭晋以为亳州防御使汉高祖时为邓州行军司马后为沿淮巡检汉法酷而史宏肇用事喜以告讦杀人

景思奴尝有求不得即告变诬景思与李景交通而私畜兵甲宏肇遣吏将三十骑往收之奴谓吏曰景思勇者也得则杀之不然将失之吏至

景思迎前以两手抱吏呼冤请诣狱自理吏引奴与景思验景思请吏索其家但有钱十千为受外赂有甲一属为私畜兵吏索之惟一衣笥军

籍粮簿而已吏悯而宽之景思请械送京师以自明景思有仆王知权在京师闻景思被告乃见宏肇请先下狱明景思不反景思既械就道颍

亳之人随至京师共明之宏肇乃鞫其奴具伏即奏斩奴而释景思后从世宗战高平为效顺指挥使复戍淮上周师伐淮南以功领饶州刺史

迁亳州行刺史兵攻濠州以伤重卒赠武清军节度使

△王进

王进幽州良乡人勇悍走及奔马少聚徒为盗乡里患之符彦超遣人以赂招置麾下彦超镇安远军中有变遣进驰奏京师明宗怪其来

速嘉其足力以隶侍卫指挥汉高祖为侍卫亲军指挥使以进为军校高祖镇河东因以之从每有急必遣进往返京师不过五六日累迁奉国

军都指挥使从周太祖起魏历官至彰德军节度使显德初卒赠太师

△常思

常思字克恭太原人初为卒历唐晋为六军都虞候汉高祖镇河东以为牢城指挥使即位领武胜军节度使徙镇昭义思起军卒未尝有

战功徒以幸会汉兴遂秉旄节在潞五年以聚敛为事初思微时周太祖方少孤无依衣食思家以思为叔太祖已即位待之如家人礼广顺三

年徙镇归德居三年来朝又徙平卢思因启曰臣居宋宋民负臣丝息十万两愿以券上进世宗颌之 【按欧史原文作太祖颌之误今据薛

史改正】 即焚其券诏宋州悉蠲除之居青州踰年得疾归洛阳卒赠中书令

△孙方谏

孙方谏郑州清苑人初定州西北有狼山堡定人常保以避契丹有尼深意居其中以佛法诱民民多归之尼姓孙氏方谏自以为尼族尼

死继行其法堡人推以为主晋出帝时军府恶方谏聚徒山中恐为边患表为游奕使 【

按通鉴载契丹来侵方谏率众邀击民人依之者甚众朝廷资其御寇署为东北招收指挥使又按宋史孙行友传方谏归朝署为东北面招收指挥使每契丹军来必率其徒袭击之易定帅闻于朝因以方谏为边界游奕使行友副之契丹颇畏焉与此所载互异】方谏因有所求不得乃北通契丹及灭晋以为义武军节度使已而徙之云中方谏不受命率其徒复入狼山汉高祖起契丹焚定州虏其民北去方谏自狼山入据之以归汉高祖嘉之即拜义武军节度使周太祖时徙镇国以其弟行友【按宋史孙行友传云行友兄子方谏此以行友为方谏弟与宋史异】为定州留后世宗攻太原方谏朝于行在从还京至洛阳卒赠太师【按五代史此下有王峻王殷传改入逆臣】

△刘词

刘词字好谦大名元城人少事杨师厚魏博入于晋从庄宗战夹河以功累迁长剑指挥使坐事左迁汝州十余年废帝时诏诸州镇选骁勇者充禁军词得选为禁军校从破张从宾杨光远又从马全节破安州杜重威破镇州皆有功累拜沁州刺史晋军讨安从进为襄州行营都虞候以功迁沁州团练使徙房州岁余为政不苛挠人颇便之词暇常被甲枕戈而卧谓人曰我以此取富贵岂可一日忘之且人情易习若惰其筋力有事何以报国汉高祖时复为奉国右厢都指挥使汉讨李守贞词以侍卫步军都指挥使领盩江军节度使为行营都虞候以功拜镇国军节度使周太祖入立加同中书门下平章事历镇安国河阳三城世宗战高平樊爱能等军败南走遇词止之词辄趣兵以进世宗嘉之以为随驾都部署班师以为河东行营副都部署徙镇永兴明年卒赠侍中谥忠惠

△王环

王环镇州真定人初为孟知祥御者知祥僭号于蜀使典卫兵晋开运之乱秦凤阶成入于蜀孟昶以环为凤州节度使周显德二年遣王景向训攻秦凤数为环所败大臣皆请罢兵世宗决意攻之周兵粮道颇艰昶遣兵五千出堂仓抵黄花谷以争粮道景训度其来命排阵使张建雄以兵二千当谷口别遣裨将以劲兵千人伏堂仓以待其归蜀兵前遇建雄战不胜退走堂仓伏发尽殪之由是诸城堡之兵悉溃初昶遣其秦州节度使高处侑以兵援环未至闻堂仓兵败亦溃归处侑判官赵玘拒处侑而以城出降于是成阶二州亦相继降独环坚守百余日然后克之世宗召见环叹曰吾数以书招环不答至力屈就擒虽不能死亦忠其所事也用之可劝事君者拜右骁卫将军时周师已征淮即以环佐侯章为攻取贼城水砦副部署初周师南征李景陈兵于淮舟楫甚盛周师患无水战

之具乃置造船务于京城西为战舰数百艘得景降卒
教水战明年世宗再征淮使环将水战卒数千自蔡河入淮环居军中未尝有战功蜀卒
与环俱擒者世宗不杀悉以从军后多南奔于景世宗
待环益不疑已而景将许文缜边镐等皆被擒世宗悉以为将军与环等列第京师岁时
赐予甚厚明年幸淮南又以环从遇疾卒于泗州

△折从阮

折从阮字可久云中人初名从远避汉高祖名改焉父嗣伦为麟州刺史从阮为人
温恭长者居父丧以孝闻唐庄宗镇太原以为牙将后
为府州刺史晋出帝与契丹败盟从阮以兵攻契丹取其城堡十余迁本州岛团练使兼
领朔州刺史安北都护振武军节度使契丹西南面行营
马步军都虞候汉高祖入立于府州建永安军以从阮为节度使明年以其族朝京师徙
镇武胜即拜从阮子德宸为府州团练使周太祖入立
从阮历徙宣义保义静难三镇 【按通鉴周广顺二年以从阮为保义节度使讨野鸡族
欧史失载】 显德二年罢还京师行至洛阳卒赠中
书令 【按五代史此下有朱守殷董璋范延光等传今改入叛臣】

△娄继英

娄继英不知何许人历梁唐为绛冀二州刺史北面水陆转运使耀州团练使晋高
祖时为左监门卫上将军继英子妇温延沼女也延沼
自其父韬伏诛兄弟废居于许心尝怨望及范延光反继英有弟为魏州子城都虞候延
光遣人以蜡丸书招继英继英乃遣延沼入魏延光见
之大喜与之信箭使阴图许延沼与其弟延浚延袞募徒期攻许节度使苾从简为备严
延沼未及发蜡书事泄继英惶恐不自安乃出奔许高
祖下诏招慰之使复位继英惧不敢出温氏兄弟谋杀继英以自归延沼以其女故不忍
张从宾反洛阳延沼兄弟乃与继英俱投之继英知温
氏之初欲杀己也反谮延沼兄弟于从宾皆杀之从宾败继英为杜重威所杀 【按五代
史此下有安重荣安从进杨光远李守贞王景崇赵
思绾等传今俱改入叛臣杜重威张彦泽改入逆臣】

△慕容彦超

慕容彦超吐谷浑部人汉高祖同产弟尝冒姓阎氏彦超黑而髯号阎昆仑少事唐
明宗为军校累迁刺史唐晋之闲历磁单濮棣四州坐
濮州造曲受赇法当死汉高祖自太原上章论救减死流房州汉高祖起太原彦超自流
所逃归拜镇宁军节度使杜重威反于魏高祖以天平
军节度使高行周为都部署以讨之彦超为副与行周谋议多不协行周用兵持重至城
下久不进彦超欲速战而行周不许行周有女嫁重威

子彦超扬言行周以女故惜贼城不攻行周大怒高祖闻二人不相得惧有他变遂亲征彦超数以事陵行周行周见宰相涕泣以屎塞口以自诉高祖知屈在彦超遣人慰劳行周召彦超责之又遣诣行周谢过行周意稍解时汉兵久顿重威守益坚诸将皆知未可图而彦超独言可速攻高祖因自督士卒急攻死伤万余人由是不敢复言后重威出降高祖以行周为天雄军节度使行周辞不肯受高祖为徙彦超镇泰宁行周乃受隐帝谋杀周太祖及王峻等惧事不果召诸将入卫京师使者至充彦超方食释七箸就道周兵犯京师开封尹侯益谓隐帝曰北兵之来其家属皆在京师宜闭门以挫其锐遣其妻子登陴以招北兵可使解甲彦超谓益曰益老矣此懦夫之计也隐帝乃遣彦超副益将兵于北郊周兵至益夜叛降于周彦超力战于七里隐帝出劳军太后使人告彦超善卫帝彦超大言报曰北兵何能为当喝使归营又谓隐帝曰官家宫中无事明日可出观臣战明日隐帝复出劳军彦超战败奔兖州隐帝遇弑周太祖入立彦超不自安数有所献太祖报以玉带赐诏安慰呼为弟而不名又遣翰林学士鱼崇谅慰谕彦超益疑惧已而刘旻自立于太原攻晋绛太祖遣王峻用兵西方彦超乘闲亦谋反遣押衙郑麟至京师求入朝太祖知其诈许之复称管内多盗而止又为高行周所与书以进其辞皆指斥若欲共反者太祖验其印文伪以示行周彦超又遣人南结李昇昇出兵攻洮阳为周兵所败而刘旻攻晋绛不克解去太祖乃遣侍卫步军指挥使曹英客省使向训讨之彦超闭城自守彦超之反也判官崔周度谏彦超大怒未有以害之已而见围因大括城中民货以犒军前陕州司马阎宏鲁惧鞭扑悉家货以献彦超以为未尽又欲并罪周度乃令周度监括宏鲁家宏鲁遣家僮与周度鬻掘无所得彦超又遣郑麟持刃迫之宏鲁惶恐拜其妻妾皆言无所隐周度入白彦超彦超不信下宏鲁及周度于狱宏鲁乳母于泥中得金缠臂献以赎宏鲁彦超大怒遣军校笞宏鲁夫妇肉烂而死遂斩周度于市彦超诈而好聚敛在镇尝置库质钱有奸民为伪银以质者主吏久之乃觉彦超阴教主吏夜穴库垣尽徙金帛它所而以盗告彦超即榜于市使民自占所质以偿之民皆争以所质物自言乃得质伪银者寘深室使教十余人日夜为之皆铁为质包以银号铁胎银其被围也勉城守者曰吾有银数千铤当悉赐汝军士私相谓曰此铁胎尔皆不为之用明年五月太祖亲征城破彦超夫妇投井死遂灭其族诏赠阎宏鲁左骁卫大将军崔周度秘书监

【按五代史此下有冯道李琪郑珣等传今俱改入贰臣】
钦定续通志卷二百九十五

●钦定续通志卷二百九十六 列传九十六

列传

五代 【十六】

○五代十六

李愚	卢导	司空颀	马允孙	刘岳	马缟
卢损	崔居俭	崔棹	李恠		
赵莹	冯玉	卢质	吕琦	薛融	何泽
王权	史圭	龙敏	李崧		
贾纬	段希尧	张允	王松	裴皞	王仁裕
羽	王延				裴

李愚

卢导

司空颀

马允孙

刘岳

马缟

卢损

崔居俭

崔棹

李恠

赵莹

冯玉

卢质

吕琦

薛融

何泽

王权

史圭

龙敏

李崧

贾纬

段希尧

张允

王松

裴皞

王仁裕

裴羽

王延

△李愚

李愚字子晦渤海无棣人谨重寡言好学为古文沧州节度使卢彦威以为安陵主簿丁母忧去后游关中刘季述幽昭宗愚以书说韩建使图兴复其言甚壮建不能用乃去之洛阳举进士宏词为河南府参军白马之祸复去之山东与李延光相善延光以经术事梁末帝为侍讲数称荐愚愚由此得召久之拜左拾遗崇政院直学士衡王友谅末帝兄也梁大臣李振等皆拜之独愚长揖末帝以责愚曰衡王朕拜之卿独揖可乎对曰陛下以家人礼见之拜宜也臣于王无所私岂宜妄有所屈 【谨按通鉴辑览 御批有道则见无道则隐士君子出处之正也李愚既自负学行岂宜臣事朱梁既为爵禄所羁受而弗却徒以长揖藩王显其抗直昧大节而矜细行所谓欲盖弥彰耳】 坐言事忤旨罢为邓州观察判官唐庄宗灭梁愚朝京师唐诸公卿素闻愚学古重之拜主客郎中翰林学士魏王继岌伐蜀辟愚都统判官蜀道险议者谓宜缓师待变而进郭崇韬以决于愚愚曰王衍荒怠人厌其政宜乘其无备击之利在速不可缓也崇韬以为然遂以灭蜀初军行至宝鸡招讨判官陈义称疾请留愚请斩以徇由是军中无敢言留者明宗即位累迁兵部侍郎承旨明宗祀天南郊愚为宰相冯道赵凤草加恩制道鄙其词罢为太常卿任圜罢相乃拜愚中书侍郎同平章事愚为相不治第宅借延宾馆以居有疾明宗遣宦官视之见其败毡敝席匹壁萧然明宗嗟叹命以供帐物赐之潞王反兵犯京师愍帝夜出奔明日愚至端门欲入中书候太后进止冯道曰潞王已处处张榜招安今即至矣何暇俟太后旨耶乃相与出迎废帝入立罢道出镇同州以刘昫为相昫性褊急而愚素刚介动辄违戾昫与冯道媼家愚素恶道为人遇事辄以诮昫两人遂相诟詬乃俱罢愚守左仆射是时兵革方兴天下多事而愚为相欲依古以创理乃请颁唐六典示百司使各举其职州县贡士作乡饮酒礼时以其迂阔不用废帝常谓愚等无所事目之曰此粥饭僧耳清泰二年卒

△卢导

卢导字熙化范阳人唐末举进士为监察御史唐亡事梁累迁左司郎中侍御史知杂事以病免唐明宗时召拜右谏议大夫迁中书舍人潞王兵入京师愍帝出奔宰相冯道李愚集百官于天宫寺将出迎潞王百官久而不集

惟导与舍人张昭先至冯道请导草笺劝进导曰潞王入朝郊迎可也劝进之事岂可轻议道曰劝进其可已乎导曰今天子蒙尘于外遽以大位劝人若潞王守节不回以忠义见责其将何辞以对且上与潞王皆太后子不如率百官诣宫门取太后进止语未终有报曰潞王至矣京城巡检使安从进催百官班迎百官纷然而去潞王止于正阳门外道又促导草笺导对如初李愚曰吾辈罪人卢舍人言是也乃已导复事晋为吏部侍郎天福六年卒

△司空颀

司空颀贝州清阳人唐僖宗时举进士不中去为罗绍威掌书记绍威卒入梁为太府少卿杨师厚镇天雄颀解官往依之师厚卒贺德伦代之张彦之乱命判官王正言草奏诋斥梁君臣正言素不能文又为兵刃所迫汗浹背不能下笔彦怒推正言下榻顾书吏问谁可吏即言颀驰骑召之颀为乱兵劫其衣以敝服蔽形而至见彦长揖神气自若挥笔成文而言甚浅鄙彦以其易晓甚喜即给衣服仆马以为德伦判官德伦以魏博降晋晋王兼领天雄仍以颀为判官【按资治通鉴劝晋王除张彦泽乃颀之谋】梁晋相距河上常以颀权军府事颀为郭崇韬所恶崇韬数言其受赂都虞候张裕多过失颀屡以法绳之颀有侄在梁遣家奴召之裕擒其家奴以为通书于梁庄宗族杀之【按五代史此下有刘昫卢文纪传今改入贰臣】

△马允孙

马允孙字庆先棣州商河人【按资治通鉴作滴河注隋置滴河县属渤海郡唐属棣州薛史亦作滴河】举进士为唐潞王从珂河中观察支使从珂罢居京师允孙从而不去从珂为京兆尹徙镇凤翔以为观察判官及将举兵反与将吏韩昭允等谋议已定召允孙告之曰受命移镇路出京师何向为便允孙曰君命召不俟驾今大王为国宗属而先帝新弃天下临丧赴镇臣子之道也左右皆笑其愚然从珂心独重之既入立以为户部郎中翰林学士久之拜中书侍郎同中书门下平章事允孙不通世务事多壅塞当时号为三不开谓其不开口论议不开印行事不开门延士大夫也晋兵起太原废帝至河阳允孙自洛来朝行在时已危迫人皆冀其有所建说允孙献绫三百匹而已晋高祖入立罢归里允孙少学韩愈为文多斥浮屠氏之说及罢归乃反学佛撰法喜集佛国记行于世后以太子宾客分司居洛阳周广顺中卒【按五代史此下有姚凯传今改入贰臣】

△刘岳

刘岳字昭辅洛阳人唐民部尚书政会八代孙崇龟崇望其诸父也岳名家子好学敏于文辞举进士事梁为左拾遗侍御史末帝时为翰林学士累官兵部侍郎梁亡贬均州司马复用为太子詹事唐明宗时为吏部侍郎故事吏部文武官告身皆输朱胶纸轴钱然后给品高者则赐之其官卑而贫者不能输钱往往但得敕牒而无告身岳以为制辞或任其材能或褒其功行或申以训诫受官者不给告身皆不知受命之所以然请一切赐之由是百官皆赐告身宰相冯道本田家子貌质野旦入朝兵部侍郎任赞与岳在后道行数反顾赞问岳道反顾何为岳曰遗下兔园册尔兔园册者乡校俚儒教田夫牧子之所诵也道闻之大怒徙岳秘书监李愚为相迁岳太常卿初郑余庆尝采唐士庶吉凶书疏之式杂以常时家人礼为书仪两卷明宗见其有起复冥昏之制叹曰儒者所以崇孝悌而敦风俗且无金革之事起复可乎昏吉礼也用于死者可乎乃诏岳选文学通古今之士共删定之岳与太常博士段颙田敏等增损其书公卿家颇遵用之然其讹谬不经之类甚多岳卒于官赠吏部尚书

△马缟

马缟不知其家世再举明经宏词为梁太常少卿以知礼称唐庄宗时累迁中书舍人刑部侍郎权判太常卿明宗入立继唐太祖庄宗而不立亲庙缟言汉诸侯王入继统者必别立亲庙光武皇帝立四亲庙于南阳请如汉故事立庙申孝享明宗下其议礼部尚书萧顷等请如缟议宰相郑珣等引汉桓灵为比谓宜定谥四代祖考为皇置园陵事下太常博士王丕议汉桓帝尊祖孝穆孝崇皆为皇帝缟以为孝穆孝崇有皇而无帝惟吴孙皓尊其父和为文皇帝不可为法右仆射李琪等议与缟同明宗下诏欲兼用皇帝乃命宰相集百官于中书各陈所见李琪等称尊祖称为皇帝曾祖为皇宰相郑珣合羣议奏曰礼本人情随时损益开元时尊皇陶为德明皇帝凉武昭王为兴圣皇帝皆立庙京师请用唐家故事四代祖考皆加帝如诏旨仍立庙京师诏可加帝而立庙应州刘岳修书仪所增损皆决于缟尝坐覆狱不当贬绥州司马复为太子宾客迁户部兵部侍郎卢文纪作相以其迂儒鄙之改国子祭酒卒赠兵部尚书

△卢损

卢损范阳人少学为文性刚介梁开平初举进士与任赞刘昌素薛钧高总同年所在相诟及昌素赞居要地损愈自引异不相亲狎左丞李琪素薄昌素为人常善待损琪有女弟眇年长婚对不售乃以妻损损慕琪声称纳之及琪为相损累迁右司员外郎唐天成初由史馆修撰

转谏议大夫屡上书言事词理鄙陋清泰时卢文纪为相密与损参决时政末帝即位以为御史中丞拜命之日以宪司不能振举纲领致风俗

颓坏乃大为条奏而有平明放钥日出守端之语大为士流嗤鄙未几坐误详赦书失出罪人罢晋天福中复用为右散骑常侍 【按通鉴载

天福三年以闽主昶为闽国王以左散骑常侍卢损为册礼使又册府元龟载损使于闽昶不郊迎不接见但遣其子继恭陈主礼而已】 转秘

书监颇怏怏不得志即拜章辞位乃授户部尚书致仕居颍州广顺三年卒 【按欧史卢损有目无传或当时撰述阙漏抑流传脱简今采薛史补】

△崔居俭

崔居俭清河人美文辞少举进士梁贞明中为中书舍人翰林学士御史中丞唐庄宗时为刑部侍郎太常卿崔氏自后魏隋唐与卢郑皆

为甲族吉凶之事各着家礼至其后世子孙专以门望自高为世所嫉明宗崩居俭以故事为礼仪使以祖讳蠡辞不受宰相冯道即徙秘书监

居俭怏怏失职后历兵吏部侍郎尚书左丞户部尚书晋天福四年卒赠右仆射居俭拙于为生居显官衣服常乏死之日贫不能葬闻者哀之

△崔棨

崔棨字子文深州安平人父涿唐末为刑部郎中棨少好学工文辞梁贞明三年举进士甲科开封尹王瓚辟掌奏记性至孝父病不肯服

药棨屡进不纳宾客问疾者棨辄迎拜门外涕泣告之涿终不服药而卒棨居丧哀毁除服唐明宗以为监察御史不拜踰年再命乃拜累迁都

官郎中翰林学士晋高祖时以户部侍郎为学士承旨权知天福二年贡举初棨为学士尝草制为宰相桑维翰所改棨以唐故事学士草制有

所改者当罢职乃引经据争之维翰颇不乐而棨少专文学不能莅事维翰乃命棨知贡举果不能举职时有进士孔英者素有丑行棨既受命

往见维翰维翰素尊严而语简谓棨曰孔英来矣棨不谕其意乃考英及第物议大非之即罢学士拜尚书左丞迁太常卿八年高祖诏太常复

文武二舞详定正冬朝会礼及乐章棨与御史中丞窦贞固刑部侍郎吕琦礼部侍郎张允等草定之以风痹改太子宾客分司西京卒

△李恠

李恠京兆人少好学工文辞唐末举进士为秘书省校书郎集贤校理事梁为中书舍人翰林学士梁亡责授怀州司马遇赦量移稍迁卫

尉少卿天成中复为中书舍人翰林学士累迁尚书右丞承旨时右散骑常侍张文宝知贡举所放进士中书有覆落者乃请下学士院作诗赋

为贡举格学士窦梦征张砺等所作不工乃命恠为之恠笑曰予少举进士登科盖偶然耳后生可畏假令予复就礼部试未必不落第安能与英俊为准格闻者多其知体复迁刑部尚书分司洛阳卒 【按五代史此下有和凝傅今改入贰臣】

△赵莹

赵莹字符晖华州华阴人初为梁将康延孝从事晋高祖为保义节度使以莹掌书记徙镇常以莹从高祖将起兵太原以问诸将吏将吏多赞成之莹独劝毋反高祖虽不用其言心甚爱之及即位拜翰林学士承旨户部侍郎同中书门下平章事累拜中书令出为晋昌军节度使开封尹是时出帝童昏冯玉李彦韬等用事与桑维翰争权共譖去之以莹柔而易制故复引为相契丹灭晋莹从出帝北徙事托允为太子太保周太祖与契丹通好遣尚书左丞田敏使契丹遇莹于幽州莹见敏悲不自胜莹子易则易从莹之北与易从俱而易则留事汉后莹病将卒告契丹愿以尸还中国契丹许之及卒遣易从护丧南归赠太傅

△冯玉

冯玉字璟臣定州人少举进士不中冯赧为河东节度使辟为推官入拜监察御史累迁礼部郎中为盐铁判官晋出帝纳玉姊为后玉以后戚知制诰拜中书舍人玉不知书制诰常倩同官殷鹏代为之顷之玉出为颍州团练使拜端明殿学士户部侍郎迁枢密使中书侍郎同中书门下平章事时冯皇后用事军国大务一决于玉玉尝疾在告自刺史以上宰相不敢除授玉除中书舍人卢价为工部侍郎桑维翰以价资望浅不可由是与桑维翰有隙维翰遂罢玉为相积贿巨万契丹灭晋张彦泽先以兵入京师兵士争入玉家掠其货一夕而尽明日见彦泽犹谄笑自言愿得持晋玉玺献契丹以冀恩奖彦泽不纳出帝之北玉从人契丹为太子太保周广顺三年其子杰自契丹逃归玉惧以忧卒

△卢质

卢质字子微河南人父望唐司勋郎中质幼聪慧善属文事唐为秘书郎丁母忧解职后游太原晋王以为河东节度掌书记质与张承业等定义立庄宗为嗣庄宗将即位以质为大礼使拜行台礼部尚书欲以为相质性疏逸不欲任责固辞乃拜太原尹北京留守迁户部尚书翰林学士从平梁权判租庸迁兵部尚书后为学士承旨天成元年拜匡国军节度使三年拜兵部尚书判太常卿事历镇河阳横海初梁已篡唐封哀帝为济阴王既而酖杀之瘞于曹州同光三年庄宗将议改葬而曹太后崩乃止因故塋稍广其封以时荐飧而已质乃建议立庙追谥

曰昭宣光烈孝皇帝庙号景宗天成四年八月戊申明宗御文明殿遣质奉册立庙于曹州寻以议者言立庙称宗而不入太庙非是乃复奏去庙号废帝反凤翔愍帝发兵讨之竭帑藏赏军而兵至凤翔皆叛降废帝悉将而东许以重赏及入立有司献籍数甚少废帝暴怒自诸镇至刺史皆进钱帛助国用犹不足三司使王玫请率民财以佐用乃使质与玫等共议配率而贫富不均怨讼并起囚系满狱六七日闲所得不满十万废帝患之乃命质等借民屋课五月由是民大咨怨晋高祖入立质以疾分司西京拜太子太保卒赠太子太师谥文忠

△吕琦

吕琦字辉山幽州安次人父兖为横海军节度判官节度使刘文守与弟守光相攻守文败死吏民立其子延祚以兖为谋主已而延祚又为守光所败兖见杀守光族其家琦年十五见执将就刑兖客赵玉给监者曰此吾弟也监者信之纵琦去琦足弱不能走玉负之行逾数百里变姓名乞食以免琦乃游学汾晋闲唐庄宗镇太原以为代州军事推官后为横海赵德钧节度推官入为殿中侍御史明宗时为驾部员外郎兼侍御史知杂事河阳主藏吏盗所监物下军巡狱狱吏尹训纳赂反其狱其冤家诉于朝下御史台按验得训赃状奏摄训赴台训为安重诲所庇不与琦请不已训惧自杀狱乃辨蒙活者甚众岁余迁礼部郎中史馆修撰长兴中废帝罢居清化坊与琦同巷琦数往过之后废帝入立待琦甚厚拜知制诰给事中枢密院直学士端明殿学士是时晋高祖镇河东有二志废帝患之琦与李崧俱备顾问多所裨画琦言太原必引契丹为助不如先事制之契丹自明宗时托纽见杀策喇卜等俘在京师数遣使者来求辄不报而东丹王又亡入中国契丹由此数欲求和琦因言方今之势不如与契丹通和如汉故事岁给金帛妻以女使强蕃大镇外无所引援可弭乱心崧以语三司使张延朗延朗欣然曰苟能纾国患岁费县官十数万缗责吾取足可也因共建其事废帝大喜他日以琦等语问枢密直学士薛文遇文遇大以为非因诵戎昱社稷依明主安危托妇人之诗以诮琦等废帝大怒急召问琦等琦等察帝色怒急曰臣等为国计非与契丹求利于中国也帝愈怒曰卿等佐朕欲致太平而若是邪崧等惶恐拜谢拜无数琦足力乏先止帝曰吕琦强项肯以人主视我邪琦曰陛下以臣等言非罪之可也屡拜何益帝意稍解曰勿拜赐酒一卮而遣之其议遂寢因迁琦御史中丞居数月复为端明殿学士其后晋高祖起太原果引契丹为助遂以亡唐琦事晋为秘书监累迁兵部侍郎天福八年卒赵玉仕至职方员外郎琦事之如父玉疾亲尝药扶持及卒为

主丧玉子文度幼孤琦教以学如己子后举进士及第

△薛融

薛融汾州平遥人少以儒学知名唐明宗时为右补阙直宏文馆晋高祖镇太原融为观察判官高祖欲拒命延宾佐问可否坐中或赞成之或恐惧不敢言融独从容对曰融本儒生尔军旅之事未尝学也进退存亡之理岂易言哉高祖不之责及入立累拜左谏议大夫迁中书舍人融曰文辞非臣所长也遂辞不拜时诏修洛阳大内融上书切谏即诏罢其役迁御史中丞改尚书右丞分司西京卒

△何泽

何泽广州人少好学长于歌诗举进士为洛阳令唐庄宗好畋猎数践民田泽乃潜伏草闲伺庄宗过当马谏曰陛下未能一天下以休兵暴敛疲民以给军食今田将熟柰何恣畋游以害多稼使民何以出租赋吏何以督民耕陛下不听臣言愿赐死马前使后世知陛下之过庄宗大笑为之止猎拜仓部郎中明宗时数上书言事明宗幸汴州又欲幸邺而人情不便大臣屡言不听泽伏合切谏明宗嘉之拜吏部郎中史馆修撰泽外虽直言而内实邪佞尝于内殿起居班退独留以笏叩颡北望呼曰明主明主闻者哂之五代之际民苦于兵往往割股庐墓以规免赋役户部岁给蠲符课州县出纸号为蠲纸泽言其弊明宗下诏悉废之泽与宰相赵凤有旧数求为给谏凤薄其为人以为太常少卿敕未出而泽先知之即称新官上章自诉章下中书凤等言泽未拜命而称新官轻侮朝廷请坐法乃以太仆少卿致仕居河阳年已七十尚希仕进即遣婢诣阼上章请立秦王为皇太子晋高祖时召为太常少卿卒

△王权

王权字秀山太原人唐左仆射起之曾孙举进士为右补阙唐亡事梁为职方员外郎知制诰翰林学士累迁御史中丞唐庄宗灭梁贬权随州司马起为右庶子累迁户部尚书晋高祖时为兵部尚书高祖以父事契丹权当奉使辞不行坐是停任踰年以太子少傅致仕卒赠左仆射

△史圭

史圭常山石邑人为晋宁乐寿县令有善政县人立碑颂之郭崇韬镇成德辟为从事明宗时为尚书郎安重诲为枢密使荐圭直学士故事直学士职虽清而承领文书参掌庶务与判官无异重诲素不知书倚圭以备顾问始白许圭升殿侍立枢密直学士升殿自圭始改尚书右丞判吏部铨事重诲败死出圭为贝州刺史罢归常山晋高祖立召拜刑部侍郎盐铁副

使迁吏部侍郎分知铨事有能名以疾罢卒

△龙敏

龙敏字欲讷幽州永清人少仕州摄参军刘守光乱敏避之沧州遂客于梁久不调敏素善冯道道为唐庄宗从事潜往依之张承业辟为监军巡官使掌奏记庄宗即位召拜司门员外郎敏父盛式年七十余而祖父年九十余皆在邺敏乃求为兴唐尹事祖父以孝闻丁母忧去职除服累拜兵部侍郎冯赟留守北京辟敏副留守赟入为枢密使敏拜吏部侍郎是时晋高祖起太原乞兵契丹唐废帝在怀州赵德钧父子有异志张敬达屯晋安势甚危急废帝问计从臣敏曰晋所恃者契丹也东丹王失国之君今在京师若以兵送东丹自幽州入西楼契丹且有内顾之忧何暇助晋晋失契丹大事去矣又谓李懿曰敏燕人也能知德钧德钧为将督健儿守城婴堞而已使当大敌奋不顾身非其能也今闻驾前马犹有五千愿得壮者千匹健兵千人与勇将郎万金自平遥沿山趋官砦且战且行得半达则事济矣懿为言之废帝不能用为晋太常卿使吴越时奉使者见吴越王皆下拜敏独揖之还迁工部侍郎干佑元年痍发于首卒赠右仆射

△李崧

李崧深州饶阳人幼能文章为镇州参军唐魏王继岌为兴圣宫使领镇州节度使以推官李尧掌书记崧谓掌书吕柔曰魏王皇子天下之望书奏之职非尧所当柔私使崧代为之以示卢质冯道皆称善乃以为兴圣宫巡官拜协律郎继岌与郭崇韬伐蜀以崧掌书记继岌杀崇韬人情不安崧乃召书吏三四人登楼去梯夜以黄纸作诏书倒用都统印明旦告谕诸军人心乃定师还继岌死于道崧至京师任圜判三司用为盐铁判官以内忧去职服除范延光居镇州辟崧掌书记延光为枢密使崧拜拾遗直枢密院累迁户部侍郎端明殿学士长兴中明宗春秋高秦王从荣多不法晋高祖为六军副使惧祸求藩明宗选将镇太原以备契丹高祖欲之枢密使范延光赵延寿等议以康义诚应选崧独曰太原国之北门宜得重臣非石敬瑭不可也由是从崧议高祖深德之阴遣人谢崧曰为浮屠者必合其尖盖欲使崧终始成己事也其后高祖以兵入京师崧窜匿召为户部侍郎拜中书侍郎同中书门下平章事兼枢密使高祖崩出帝即位以崧兼判三司与冯玉对掌枢密是时晋兵败契丹于阳城赵延寿在幽州诈言思归以诱晋兵崧等信之初汉高祖掌亲军与杜重威同制加平章事耻之怒不肯谢晋高祖遣和凝谕之乃谢其后汉高祖出居太原重威代为侍卫使崧亦数称重威之材于是汉高祖以崧

为排己深恨之崧又信延寿之诈以为然卒以重威将大兵后败于中渡晋遂以亡契丹耶律德光素闻崧名及入京师谓人曰吾破南朝得崧一人而已乃拜太子太师 【按辽史太宗纪大同元年以晋李崧为枢密使辞史同】 契丹北还命崧以族俱行留之镇州其后满达勒弃镇州崧与冯道等得还高祖素不悦崧又怨者诸言崧为契丹所厚故崧遇汉权臣常惕惕为谦谨莫敢忤初汉高祖入京师以崧第赐苏逢吉崧家遭乱多埋金宝逢吉悉有之并其西京田宅崧弟屿嶷与逢吉子弟同舍酒酣出怨言崧又以宅券献逢吉逢吉尤不喜屿仆葛延遇为屿商贾多干没其赀屿笞责之延遇夜宿逢吉部曲李澄家以情告时高祖将葬睿陵河中李守贞反澄乃教延遇告变言崧与其甥王凝谋因山陵放火焚京师又以蜡丸书通守贞逢吉遣人召崧至第从容告之崧知不免乃以幼女托逢吉逢吉送崧侍卫狱崧出乘马从者无一人恚曰自古岂有不死之人然亦岂有不亡之国乎乃自诬伏族诛崧素与翰林学士徐台符相善后周太祖立台符告宰相冯道请诛延遇道以数经赦难之枢密使王峻多台符有义乃奏诛延遇 【按五代史此下有李璘传今改入贰臣】

△贾纬

贾纬镇州获鹿人少举进士不中州辟参军唐天成中范延光镇成德辟赵州军事判官迁石邑令纬长于史学唐自武宗已后无实录史官职废纬采次传闻为唐年补录六十五卷论次虽多阙误而丧乱之际事迹粗存亦有补于史氏晋天福中为太常博士非其好也数求为史职改屯田员外郎起居郎史馆修撰与修唐书丁内艰服除知制诰累迁中书舍人谏议大夫给事中复为修撰汉隐帝时诏与王仲竦俨等同修晋高祖出帝汉高祖实录初桑维翰为相常恶纬待之甚薄纬为维翰传言维翰死有银八千铤翰林学士徐台符以为不可纬乃更为数千铤广顺元年实录成纬求迁官不得由是怨望时宰相王峻监修国史纬书日历多言当时大臣过失峻见之怒曰贾给事子弟仕宦亦要门阀柰何愿诋当朝之士使其子孙何以仕进言之高祖贬平卢军行军司马明年卒

△段希尧

段希尧河内人历仕州县唐天成中为卫州录事参军 【按欧史不言希尧在唐时官似希尧始终事晋不及二代不应入杂传矣今据辞史补】 晋高祖为河东节度使以为判官高祖屯军忻州军中有拥高祖呼万岁者高祖惶惑不知所为希尧劝高祖斩其乱首乃止高祖将举兵与宾佐谋希尧以为不可及即位后恩泽比诸将吏最薄久之稍迁谏议大夫使于

吴越是时江淮不通奉使者皆泛海希尧过海遭大风
左右恐惧希尧曰吾平生不欺汝等恃吾可无恐已而风止历莱怀棣三州刺史出帝时
为吏部侍郎判东西铨事累迁礼部尚书卒赠太子少
保

△张允

张允镇州人少为张文礼参军唐庄宗讨文礼允脱身降系之狱文礼败乃出之为
魏州功曹赵在礼辟节度推官历沧兖二镇掌书记入
为监察御史累迁水部员外郎知制诰废帝皇子重美为河南尹掌六军以允刚介乃拜
给事中为六军判官罢为左散骑常侍晋高祖即位屡
赦天下允为驳赦论以献时晋高祖方好臣下有言览之大悦允事汉为吏部侍郎隐帝
诛戮大臣京师皆恐允常退朝不敢还家止于相国寺
周太祖以兵入京师允匿于佛殿承尘坠而卒

△王松

王松父徽为唐僖宗宰相松举进士后唐时历刑部郎中晋高祖镇太原辟松节度
判官及即位拜右谏议大夫累拜工部尚书出帝北迁
萧翰立许王从益于京师以松为左丞相汉高祖入洛先遣人驰诏东京百官尝授伪命
者皆焚之使勿自疑由是御史台悉敛百官伪敕焚之
松以手指其胸引郭子仪自谓以语人曰此乃二十四考中书令也闻者笑之后松子仁
宝为李守贞河中支使守贞反松以子故上书自陈高
祖怜之但使解职而已寻以疾卒

△裴皞

裴皞字司东河东人出于名家少好学性素刚急直而无隐唐光化中举进士拜校
书郎拾遗补阙事梁为翰林学士中书舍人事后唐为
礼部侍郎皞喜议论每陈朝廷阙失多斥权臣改太子宾客以老拜兵部尚书致仕晋高
祖时起为工部尚书复以老告拜右仆射致仕卒赠太
子太保皞以文学在朝廷久宰相马允孙桑维翰皆皞礼部所放进士后允孙知举发榜
引新进士诣皞谒世传以为荣维翰已作相尝过皞皞
不迎不送人或问之皞曰我见桑公于中书庶寮也桑公见我于私第门生也何送迎之
有人亦以为当

△王仁裕

王仁裕字德辇天水人少不知书以狗马弹射为乐年二十五始就学以文辞知名
秦帅辟为判官秦州入于蜀仁裕因事蜀为中书舍人
翰林学士蜀平仁裕事唐复为秦州节度判官王思同镇兴元辟为从事思同留守西京
以为判官废帝举兵凤翔思同战败废帝得仁裕闻其

名不杀寘之军中凡驰檄诸镇诏书告命皆仁裕为之久之以都官郎中充翰林学士晋高祖入立罢为郎中厯司封左司郎中谏议大夫汉高祖时复为翰林学士承旨累迁户部尚书罢为兵部尚书太子少保显德三年卒赠太子少师仁裕晓音律晋高祖初定雅乐宴羣臣于永福殿奏黄钟仁裕闻之曰音不纯肃而无和声当有争者起禁中已而两军校鬪升龙门外声闻于内人以为神与和凝皆以文章知名

△裴羽

裴羽字用化父赞相唐僖宗羽以父任为河南寿安尉事梁为御史台主簿改监察御史唐明宗时为吏部郎中与右散骑常侍陆崇使于闽为海风所飘至钱塘是时唐方绝钱镠朝贡羽等被留经岁而崇卒后镠遣羽还羽求载崇尸俱归镠初不许羽以语感动镠乃恻然许之因附羽表自归明宗得镠表大喜由是吴越得通于中国羽护崇丧至京师及其橐装还其家士人皆多羽之义周太祖时为左散骑常侍卒赠户部尚书

△王延

王延字世美郑州长丰人少好学尝以赋谒梁相李琪琪荐为即墨令冯道作相与延故人召拜左补阙迁水部员外郎知制诰拜中书舍人权知贡举吏部尚书卢文纪与故相崔协有隙时协子颀方举进士文纪谓延曰吾尝誉子于朝贡举选士当求实效无以虚名取人昔有越人善泅生子方晬其母浮之水上人怪而问之则曰其父善泅子必能之若是可乎延退而笑曰卢公之言为崔协也恨其父遂及其子耶明年选颀甲科人皆称其公累迁刑部尚书以太子少保致仕卒 【按五代史此下有马重续赵延义传今改入艺术】

钦定续通志卷二百九十六

●钦定续通志卷二百九十七 列传九十七

列传

宋 【一】

○宋一

石守信【保兴 保吉元孙】 王审琦【承衍克臣】 高怀德

韩重赞【崇训崇业】 张令铎

罗彦瓌 王彦升 韩令坤伦 慕容延钊【德丰德琛】

符彦卿

石守信

王审琦

高怀德
韩重赟
张令铎
罗彦瓌
王彦升
韩令坤 【韩伦】
慕容延钊
符彦卿
△石守信

石守信开封浚仪人始事周祖得隶帐下广顺初累迁亲卫都虞候从世宗征晋阳遇敌高平力战又从征淮南关南俱着战功累迁殿前都虞候转都指挥使领洪州防御使 【按东都事略作江州】 恭帝立加领义成军节度太祖即位迁侍卫马步军副都指挥使改领归德军节度李筠之变与高怀德率前军破筠众于长平又败之于泽州泽潞平加同平章事李重进超兵扬州以守信为行营都部署兼知扬州行府事帝亲征至大仪顿守信驰奏城破在朝夕大驾亲临一鼓可平帝亟赴之果克其城建隆二年移镇郢州兼侍卫亲军马步军都指挥使初 【按宋史本传作干德初因晚朝与石守信等饮酒考李焘通鉴长编系建隆二年七月戊辰曰事史盖叙出镇之由故用初字干德二字衍文今删】 帝因晚朝与守信等饮酒酒酣曰我非尔曹不及此然吾为天子殊不若为节度使之乐吾终夕未尝安枕而卧守信等顿首曰今天命已定谁复敢有异心陛下何为出此言帝曰人孰不欲富贵一旦有以黄袍加汝身虽欲不为其可得乎守信等谢曰臣愚不及此惟陛下哀矜之帝曰人生驹过隙尔不如多积金帛田宅以遗子孙歌儿舞女以终天年君臣之闲无所猜嫌不亦善乎守信等谢曰陛下念及此所谓生死而肉骨也明日皆称病乞解兵权帝从之 【按杯酒释兵权宋人推为一时大计后世亦豔称之不知宋祖英勇久为诸臣所折服故一经示意遂皆俯听其事在魁柄之独操而不在秘计之特出且宋祖素言自有天命何复介介于诸镇兵权毋乃先歉己心遂不能笃信天命邪伏读通鉴辑览 御批宋君臣有知应亦心悦诚服矣】 皆以散官就第 【按宋初州郡事悉归知州通判节度使虽莅镇亦无所掌且诸人或遥领故曰散官也】 赏赉甚厚已而太祖欲使符彦卿管军赵普屡谏以为彦卿名位已盛不可复委以兵权太祖不从宣已出普复怀之太祖迎谓之曰岂非符彦卿事耶对曰非也因奏他事既罢乃出彦卿宣进之太祖曰果然宣何

以复在卿所普曰臣托以处分之语有侏■〈亻 离〉

者复留之惟陛下深思利害勿复悔太祖曰卿苦疑彦卿何也朕待彦卿厚彦卿岂负朕耶普对曰陛下何以能负周世宗太祖默然事遂中止

开宝六年加兼侍中太平兴国初加兼中书令二年拜中书令行河南尹充西京留守三年加检校太师四年从征范阳坐失律责授崇信军节

度兼中书令俄进封卫国公七年徙镇陈州复守中书令九年卒年五十七赠尚书令追封成武郡王谥武烈子保兴保吉 【按宋史石守信

传前有范质王专魏仁溥三传俱改入贰臣】

石保兴

石保吉

石元孙

石保兴

保兴字光裔本名保正太祖取兴宗之义改之建隆初年十四以荫补供奉官明年迁尚食副使太祖尝召功臣子弟询以时事保兴年最

少应对明白太祖奇之拜如京使太宗征河东为御砮四面都巡检太平兴国八年出为高阳关监军守信卒起复领本州岛团练使雍熙初契丹

侵边为澶州前军驻泊李继迁入钞徙银夏绥府都巡检使尝巡按鞞子砮并黑水河趣谷中夏人以数千骑渡河邀战保兴所部不满二千人

乃分短兵伏于河浒俟其半渡急击之斩首百余级追北数十里优诏褒美端拱中为西京都巡检使淳化五年真拜蕲州团练使为永兴军钤

辖改夏绥麟府州钤辖至道二年徙延州都巡检使兼署州事改本路副都部署与范廷召等五路讨贼 【按宋史太宗本纪及夏国传俱作

范廷召副李继隆分五路进讨西夏时廷召出延州保兴为本路副都部署故与廷召同日出师本传作重召误今据改】 有节奇罗尼 【旧

作岌伽罗臑今改正】 数族率众来拒保兴选敢死士数百人衔枚夜击歼之自是乌叶优叶诸族归降还至乌白池贼又为方阵来拒保兴麾

众出入阵中会乘马中流矢挺身持满易骑奋呼且行且鬪凡三日四十二战贼遂引去咸平二年知威虜军会夏人入钞保兴发官帑钱数万

缗分给战士主者固执不可保兴曰城危如此安暇中覆事定覆而不允愿以家财偿之夏人退驿置以闻真宗贷而不问三年就拜棣州防御

使徙知邢州改澶州五年以疾求归京师卒年五十八子元孙

石保吉

保吉字佑之初以荫补天平军衙内都指挥使尚太祖女延庆公主拜左卫将军驸马都尉累迁朔州观察使威塞军节度雍熙中历知河

阳大名府连改横海安国二镇节度真宗即位加检校太尉保平军节度车驾北巡命为河北诸路行营都部署屯定州景德初改武宁军节度同平章事幸澶渊命与李继隆分为都排阵使军于北门外契丹骑数万骤至城下保吉不介马而驰当其锋契丹兵引去俄请盟锡宴射于行宫后苑帝谓继隆等曰北敌畏威服义息战安民卿等力也保吉进曰臣受命御患上稟成算至于布列行阵指授方略皆出于继隆继隆曰宣力用心躬率将士臣不及保吉帝嘉其协和赐以袭衣带马改镇镇安大中祥符二年卒年五十七赠中书令谥庄武 【按东都事略作壮武】

】初守信镇陈年五十七卒及保吉继是镇卒年相同谈者异之子貽孙任崇仪使孝孙西京左藏库使

石元孙

元孙字善长始名庆孙避章献太后祖讳易之以守信荫为东头供奉官合门祗候累迁如京副使仁宗即位改文思副使为澶州巡检徙知莫州有治迹又徙保州领廉州刺史兼广信安肃军缘边都巡检时开屯田凿塘水有讼元孙擅污民田者遣官按视讼者以诬服诏褒谕之再迁西上合门使并代州兵马钤辖历侍卫亲军步军殿前都虞候鄜延副都总管缘边安抚使迁邕州观察使康定初夏人寇延州元孙与战于三川口军败见执传者以为已死赠忠正军节度使兼太傅录其子孙七人及元昊纳款纵元孙归谏官御史奏元孙军败不死辱国请斩塞下贾昌朝独言曰在春秋时晋获楚将谷臣楚获晋将知罃亦还其国不诛因入对探袖出魏志于禁传以奏曰前代将臣败覆而还多不加罪帝乃贷元孙安置全州以升祔赦内徙襄州侍御史刘湜言元孙失军辱命朝廷贷而不诛若例从量移无以劝用命之士元孙遂不徙后徙许州还京师卒

△王审琦

王审琦字仲宝其先辽西人后徙家洛阳汉干佑初隶周祖帐下性纯谨甚亲任之李守贞平署厅直左番副将从世宗征刘崇力战有功累迁铁骑都虞候俄领勤州刺史亲征淮南舒州坚壁未下诏以郭令图领刺史命审琦及司超以精骑攻其城一夕拔之令图既入城审琦等遂救黄州数日令图为舒人所逐审琦选轻骑衔枚夜发信宿至城下大败舒人令图得复还治所又破南唐军于紫金山世宗围濠州审琦先拔其水砦夺月城濠州遂降及攻楚州为南面巡检城将陷审琦意淮人必遁设伏以待城中兵果凿南门而溃伏兵击之斩获甚多淮南平又从平瓦桥关积官至殿前都虞候领睦州防御使太祖即位擢为殿前都指挥使领泰宁

军节度从征李筠为御营前洞屋都部署泽潞平改领

武成军节度 【按东都事略作义成军】 李重进起兵副石守信为前军部署讨之建隆二年出为忠正军节度 【按曾巩隆平集作忠武

军】 在镇八年为政宽简所部邑令以罪停其录事吏幕僚白令不先咨府请按之审琦曰五代以来诸镇强横令宰不得专县事今部内宰能

斥去黠吏诚可嘉尔何按之有闻者叹服开宝二年从征太原为御营四面都巡检三年改镇许州六年与高怀德并加同平章事七年卒年五

十赠中书令追封琅琊郡王子承衍承衍承德承佑承俊承偃承僎承仅承休承德西上合门使会州刺史承佑至如京使承俊承僎至内殿崇

班承偃至合门祇候承仅至左神武将军致仕承休至内殿承制

王承衍

王克臣

王承衍

承衍字希甫幼端谨审琦镇兖海寿春皆署以牙职开宝初补内殿供奉官都知三年尚太祖女昭庆公主授右卫将军 【按公主传作

左卫将军】 驸马都尉仍充都知踰年领恩州刺史加本州岛防御使太平兴国七年授彰国军节度雍熙中出知天雄军府兼都部署时契丹扰

镇阳候骑至冀州去魏二百余里邻境戒严城中大恐属上元节承衍下令市中及佛寺然灯设乐与宾佐宴游达旦人赖以安明年召还复为

贝冀都部署端拱初换永清军节度再知天雄军吏民千余诣监军请为本道节帅诏褒之咸平六年以疾求罢节钺三抗表不许帝自临问至

卧内慰勉久之卒年五十二赠中书令给卤簿葬谥恭肃子世安世隆世雄世融世安至崇仪副使通事舍人世隆以公主子为如京副使累迁

领平州刺史景德初卒特赠泰州防御使召见其三子赐名克基克绪克忠皆面授供奉官世雄至内殿崇班世融为内殿承制 【按东都事

略作内围苑使】 世融子克臣 【按宋史此下有承衍附传无事迹足录今从删】

王克臣

克臣字子难祖承衍尚秦国贤穆公主 【按东都事略作贤肃公主】 克臣第景佑进士仁宗阅其文顾侍臣曰贤穆有孙登科可喜也

仕累通判寿州鼓角卒夜入州廨击郡将既就擒而监兵使所部被甲操刃立庭中官吏骇观克臣徐言曰此不过为盗耳立遣甲者去戒凶卒

勿妄引他人众讙服是日天颺节率掾属朝谒如常仪人赖以安犹坐贬监潭州税熙宁中郑侠以上书窜岭表克臣尝荐侠且馈之白金又坐

夺官复为户部副使以集贤殿修撰知郟州京东多盗克臣请以便宜处决遂下诸郡使

械送尤桀者斩以狗盗为少衰河决曹村克臣亟筑堤城下或曰河决澶渊去郛为远且州徙于高八十年不知有水患安事此克臣不听役愈急堤成水大至不没者才尺余复起甬道属之东平王陵埽人得趋以避水事盗皆绘像祀之进天章阁待制徙知瀛州有告外闲入境密旨趣具狱株连甚众克臣阴缓之已而得为闲者于他道徙知太原王中正西讨罔功而诬克臣姑息士卒使无固志黜为单州明年拜工部侍郎至是神宗幸尚书省至部舍止辇奖其治力以为虽少者不及顾其子驸马都尉师约使入覲元佑四年以龙图阁直学士太中大夫卒年七十六子师约字君授少习进士业尚徐国公主授左卫将军国朝故事主婿未尝居职帝始令师约同管当三班院试其才明年主就馆乃罢宣仁后临朝师约屡上书言事元符初议者以为职不当上言褫其秩徽宗即位乃复保平军留后又为枢密都承旨未几复罢崇宁元年卒年五十九子殊主所生至阆州观察使

△高怀德

高怀德字藏用真定常山人周天平节度齐王行周之子忠厚倜傥有武勇行周厯延潞二镇及留守洛都节制宋亳皆署以牙职晋开运初契丹侵边行周为北面前军都部署怀德始冠愿从北征行周壮之行至戚城遇契丹军被围数重援兵不至怀德左右驰射众皆披靡抉父出以功领罗州刺史及行周移镇郢州改集州刺史仍领牙校又迁信州刺史从行周再镇宋州晋末契丹南侵以行周为邢赵路都部署御之留怀德守睢阳会杜重威降契丹京东诸州盗起怀德坚壁清野敌不能入行周率兵归镇敌遂解去汉初行周移镇魏博及再领天平以怀德为忠州刺史领职如故周祖征慕容彦超还过汶上宠赐行周甚厚并赐怀德衣带鞍马行周卒召怀德为东西班都指挥使领吉州刺史改铁骑都指挥使太原刘崇入寇世宗讨之以怀德为先锋都虞候高平克捷迁铁骑右厢都指挥使领果州团练使从征淮南知庐州行府事充招安使寻迁龙捷左厢都指挥使领岳州防御使南唐将刘仁贍据寿春舒元据紫金山置连珠砦为援以抗周师怀德率数十骑觐其营垒夜涉淮迟明贼来战怀德以少击众擒其裨将以还尽侦知其形势强弱世宗一日因按辔淮壖以观贼势见一将追击贼众夺槩以还令左右问之乃怀德也召至慰劳许以节钺及北征命与韩通率兵先抵沧州初得关南又命副陈思让为雄州兵马都部署克瓦桥关降姚内斌以归恭帝立擢为侍卫马军都指挥使领江甯军节度【按五代史职方考及会要俱无江甯军而韩重贗刘廷让等传亦作领江甯军节度与此同考

唐书地理志升州江甯郡干元二年置江甯军据此则唐时本有是名其地至五代久为吴南唐所据此系殿前管军领职实未尝出镇其地或当沿袭旧名以此为大镇之美号诸传类此者甚多今并仍原文附识于此】 又为北面行营马军都指挥使太祖即位拜殿前副都点检移镇滑州充关南副都部署尚宣祖女燕国长公主加驸马都尉李筠起兵上党帝将亲征先令怀德率所部与石守信进攻破筠众于泽州南事平迁忠武军节度 【按宋史公主传燕国长公主再适忠武军节度使高怀德是怀德尚主时已移镇忠武军矣考长编建隆六年八月燕国长公主出降殿前副都点检忠武军节度使驸马都尉高怀德与公主传合本传作尚主以后事当从公主传】 检校太尉从平扬州改归德军节度开宝六年加同平章事太宗即位加兼侍中又加检校太师太平兴国四年从平太原改镇曹州封冀国公七年改武胜军节度是年七月卒年五十七赠中书令追封渤海郡王谥武穆子处恭至右监门卫大将军

△韩重赞

韩重赞磁州武安人少以武勇隶周祖麾下广顺初补左班殿直副都知从世宗战高平又从征淮南累迁控鹤军都指挥使领虔州刺史太祖即位擢龙捷左厢都校领永州防御使从征泽潞还代张光翰为侍卫马步军都指挥使领江甯军节度讨李重进为行营马步军都虞候建隆二年改殿前都指挥使徙领义成时有谮重赞私取亲兵为腹心者太祖怒欲诛之赵普谏曰亲兵陛下必不自将须择人付之若重赞以谗诛即人人惧罪谁复为陛下将亲兵者太祖纳其言重赞得不诛后闻普尝救己即诣普谢普拒不见五年出为彰德军节度开宝二年太祖征太原过其郡谓曰契丹知我是行必率众来援彼意镇定无备必由此路入卿为我领兵倍道兼行出其不意破之必矣乃命为北面都部署重赞令军士衔枚夜发果遇契丹兵于定州遂乘之大破其众七年卒赠侍中子崇训崇业重赞与张光翰赵彦徽分领诸军节度嘉其翊戴功也光翰后唐山南节度使虔钊兄子彦徽真定安喜人与太祖同事世宗太祖兄事之卒俱赠侍中

韩崇训

韩崇业

韩崇训

崇训字知礼以荫补供奉官迁西京作坊副使出为澶州河南北都巡检使从太宗征河东还以贝冀等州都巡检使权知麟州李继迁寇夏州崇训领兵赴援大败之徙监夏州军历知越泉登莫四州徙知威虜军改如京使咸

平初出知石州属继迁犯境崇训追袭之至贺兰山而
还二年再知麟州又败继迁于城下崇训由河西徙闽越再移北边凡二十五年以劳擢
西上合门使邠宁环庆清远军都巡检使徙镇定高阳
关行营钤辖屯镇州兼河北都转运使事契丹兵至方顺河将侵威虜军崇训陈兵唐河
扼其要路契丹遣别骑寇赤堠驿崇训分兵擒戮之敌
遂遁去移并代钤辖权知并州从部署张进领兵由土门会大将王超袭破契丹于定州
又迁镇定高阳马步军都钤辖屯定州景德初契丹复
来侵至唐河崇训陈兵河南翌日又与王超追袭至镇州既而都部署桑赞逗留不进崇
训帅兵独往时车驾幸澶州召崇训乃还大中祥符二
年授右龙武军大将军 【按东都事略作左龙武军】 领韶州防御使以本官分司西
京卒年五十六崇训为人长厚谦畏未尝忤物子允恭
礼宾副使有谋略人以为能世其家云

韩崇业

崇业字继源以荫补供奉官选尚秦王廷美女云阳公主授左监门卫将军驸马都
尉廷美得罪去驸马之号廷美卒起为静难军行军司
马雍熙三年公主卒咸平四年改左屯卫大将军领高州团练使追封公主为虢国长公
主五年卒年四十一子允升为内殿承制合门祇候

△张令铎

张令铎棣州厌次人少以勇力隶军伍后唐清泰中补宁卫小校晋初改隶奉国军
汉干佑中从周祖平河中迁奉国军指挥使广顺初累
迁本军左厢都指挥使领虔州团练使从世宗征淮南移领虎捷左厢加常州防御使再
征寿春与龙捷右厢柴贵分为京城左右厢巡检世宗
将北征命与韩通高怀德领兵先赴沧州又副韩令坤为霸州部署率兵戍守恭帝立授
侍卫亲军步军都指挥使领武信军节度使太祖即位
征李筠以令铎为东京旧城内都巡检建隆二年出为镇宁军节度帝为皇弟兴元尹光
美娶其第三女开宝三年卒于京师年六十赠侍中令
铎性仁恕尝语人曰我从军三十年大小四十余战多摧坚陷敌未尝妄杀一人及卒人
多惜之子守正至内园使守恩累迁崇仪使领绵州刺
史加西上合门使知泰州

△罗彦瓌

罗彦瓌并州太原人父全德晋泌州刺史彦瓌得补内殿直出帝在澶州欲命使宣
慰大名府时河北契丹骑充斥遂募军中骁勇士十人
从行彦瓌备选衔枚夜发往返如期繇是补兴顺指挥使开运末契丹主至汴遣彦瓌送
厩马十匹至幽蓟彦瓌至元氏闻汉祖建号太原以马

归汉汉祖嘉之及入汴擢为护圣指挥使周初迁散员都虞候坐枢密使王浚党出为邓州教练使世宗嗣位从向训收秦凤有功迁散指挥都虞候显德末太祖自陈桥入归公署见宰相范质等未及言彦瓌挺剑而前曰我辈无主今日须得天子质等由是降阶听命擢为控鹤左厢都指挥改内外马军都军头领眉州防御使从平泽潞还命代赵彦徽为侍卫步军都指挥使领武信军节度建隆二年出为彰德军节度干德二年改安国军节度与昭义军节度李继勋大破契丹四年春又与合门使田钦祚杀太原军千余人于静阳擒其将鹿英等获马三百匹明年移镇华州开宝三年卒年四十七

△王彦升

王彦升字光烈性残忍多力善击剑号王剑儿本蜀人后唐平蜀徙家洛阳因宦官骠骑大将军孟汉琼言于明宗补东班承旨晋天福中转入内殿直开运初契丹围大名出帝幸澶渊募勇敢士赍诏纳城中彦升与罗彦瓌应之一夕突围而入迁护圣指挥使周广顺中从向拱破太原兵虢亭南斩其帅王璋于阵世宗征淮南从刘崇进宋偃破金牛水砦又从李重进扞吴兵于盛唐又从张永德攻瀛州下束城以功累转散员都指挥使太祖北征至陈桥为众推戴彦升以所部先入京遇韩通于路逐至第杀之初太祖誓军入京不得有秋毫犯及闻通死意甚不乐以建国之始不及罪彦升拜恩州团练使领铁骑左厢都指挥使后为京城巡检中夜诣王溥第溥惊悸而出既坐乃曰此夕巡警甚困聊就公一醉耳彦升意在求贿溥佯不悟置酒数行而罢翌日溥密奏其事乃出为唐州刺史干德初迁申州团练使开宝二年改防州防御使是冬又移原州西人有犯汉法者彦升不加刑召僚属饮宴引所犯以手摔断其耳大嚼卮酒下之其人流血被体股栗不敢动前后啖者数百人西人畏之不敢犯塞七年以病代还次于州卒年五十八太祖以其专杀韩通终身不授节钺

△韩令坤 【韩伦】

韩令坤磁州武安人父伦少以勇敢隶成德军兵籍累迁徐州下邳镇将兼守御指挥使世宗以令坤贵擢陈州行军司马及令坤领陈州徙伦许州罢职复居宛邱多以不法干郡政私酷求市利掊敛民财公私患之 【按五代史周家人传世宗本生父柴守礼尝杀人于市有司以闻世宗不问是时王溥汪晏王彦超韩令坤等同时将相皆有父在洛阳与守礼朝夕往来作意所为洛阳人多畏避之号十阿父】 项城民武郁诣阙诉其事命殿中侍御史率汀按之伦诈报汀云被诏赴阙汀奏之追劾具状法当弃市令坤泣请于世宗遂免死流海岛显德六年为

左骁卫中郎将迁左监门卫将军太祖即位拜亳州团练使改本州岛防御使卒令坤少隶周祖帐下广顺初领和州刺史世宗即位授殿前都虞候俄赏高平之功为龙捷左厢都虞候领容州团练使征太原为行营前军马军都校未几为侍卫马军都指挥使领定武军节度【按东都事略作武定军】世宗命宰相李谷将兵征淮南俾令坤等十二将以从谷退保正阳为吴人所乘令坤与宣祖李重进合兵进击大败吴人世宗亲征闻扬州无备遣令坤及宣祖白延遇赵晁等袭之令坤先令延遇以精骑数百迟明驰入城中不之觉令坤继至民皆按堵南唐东都副留守冯延鲁为僧匿寺中【按通鉴及十国春秋冯延鲁传延鲁以工部侍郎出为东都副留守兵败削发为僧为周兵所获史误为马延鲁今据改】获之送行在遂以令坤知州由是泰州惧以城降时钱俶受诏攻常润围毘陵为南唐所败南唐乘胜遣将陆孟俊逼泰州周师不能守孟俊遂进军蜀冈逼扬州令坤弃其城寻闻太祖与张永德领兵趋六合来援复入城守大败南唐兵擒孟俊向拱为缘江招讨使以令坤副之下寿州归朝加检校太尉领镇安军节度使世宗复幸淮右次楚州遣令坤率兵先入扬州权知军府事扬州城为吴人所毁诏发丁壮别筑新城命令坤为修城都部署六年命令坤以汴亳民导汴水入于蔡世宗将北征率兵先赴大名又副王晏为益津关一路都部署俄为霸州都部署恭帝立诏防北边太祖即位移领天平军加侍卫马步军都指挥使同平章事太祖亲征李筠诏令坤率兵屯河阳泽潞平加兼侍中又从讨李重进改成德军节度充北面缘边兵马都部署将赴镇上于别殿置酒钱之因勸其为治【按李焘长编载建隆二年闰三月甲子罢慕容延钊为山南西道节度使韩令坤为成德节度使自是殿前都点检遂不复除按丙戌韩令坤慕容延钊辞宴于广政殿自是节度使已上出使赴镇宴如仪】干德六年卒年四十六太祖素服发哀于讲武殿录其子庆朝为闲厩使庆雄为闲厩副使令坤有才略识治道与太祖同事周室情好亲密镇常山凡七年北边以盗闻其卒甚悼惜之追封南阳郡王【按本传不载追封今据东都事略增】

△慕容延钊

慕容延钊字化龙【据东都事略补】太原人父章襄州马步军都校领开州刺史延钊少勇敢汉祖之兴也周祖为其佐命以延钊隶帐下周广顺初补西头供奉官世宗即位为殿前散指挥使都校高平之战督左先锋累迁殿前都虞候领睦州防御使从征淮南归朝复为殿前都虞候出为镇淮军都部署显德五年世宗在迎銮江口闻吴人舟数百艘泊东■〈

汭布) 洲命延钊与宋延偓水陆并进大破之淮南平
迁殿前副都指挥使领淮南节度恭帝立徙镇镇宁充殿前副都点检太祖即位延钊方
握重兵屯真定帝遣使谕旨许以便宜从事延钊与韩
令坤率所部兵按治边境以镇静闻太祖嘉之加殿前都点检同中书门下三品避其父
名故也李筠之变命与王全斌由东路会兵进讨俄为
行营都部署知潞州行府事及平加兼侍中诏还澶州建隆二年表解军职徙为山南东
道节度四年命师南征以延钊为湖南道行营前军都
部署时延钊被病诏令肩舆即戎事擒贼将汪端磔于市遂平荆湘加检校太尉是冬卒
年五十一初延钊与太祖友善显德末太祖任殿前都
点检延钊为副常兄事延钊及即位每遣使劳问犹以兄呼之闻其卒恸哭久之赠中书
令追封河南郡王录其子弟授官者四人子德业德丰
德钧德业至卫州刺史德钧至尚食副使延钊弟延忠历官磁州刺史延卿至虎捷军都
指挥使延卿子德琛

慕容德丰

慕容德琛

慕容德丰

德丰字日新幼聪悟延钊爱之尝曰兴吾门者必此子八岁补山南东道衙内指挥
使延钊卒授如京使开宝中从征太原领御砮南面巡
检又为扬州都监征南唐为洞子都监城既下命为升州都监泽国富饶使者多哀聚金
帛德丰独以廉洁闻俄领蔚州刺史太平兴国二年知
庆州兼邠宁都巡检居任以简静为治边镇安之雍熙四年出为定远军钤辖命领后阵
中队别将万骑以御边患淳化中知邢州三年改知延
州以所部不治徙知庆州又改灵州兼部署谷价涌贵德丰出私廩赈饥民全活者众贼
入境率兵击走之咸平二年迁客省使知镇州召对便
坐抚慰甚至是冬契丹南侵德丰缮兵固守饷馈不绝三年改沧州在西边时母留京师
妻孥寓长安贫甚真宗悯之特诏给团练使奉踰年进
颍州团练使知贝瀛二州五年卒年五十家无余财谈者善之子惟素至殿内承制

慕容德琛

德琛以延钊荫补供奉官累迁内殿崇班知夔州李顺之乱贼酋张余领众十万余
舟千艘来寇与顺战龙山又与白继赟击贼斩获甚众
悉焚其舟贼剽开州围云安德琛往援又败之历转崇仪副使荆湖北路钤辖蛮扰澧鼎
境上德琛战于北汉夺耕牛铠甲斩馘以归徙峡路钤
辖未至复知夔州天禧初改右监门卫大将军卒

△符彦卿

符彦卿字冠侯陈州宛邱人父存审后唐宣武军节度兼中书令彦卿年十三能骑射事庄宗于太原以谨愿称及长以为亲从指挥使入汴迁散员指挥使郭从谦之乱庄宗左右皆引去惟彦卿力战射杀十数人俄矢集乘輿遂恸哭而去天成三年讨王都于定州大破契丹于嘉山明年克其城授耀州团练使改庆州刺史晋天福初授同州节度改左羽林统军俄兼领右羽林改镇鄜延出帝即位召还出镇河阳三城契丹南侵诏彦卿率所部拒战澶渊契丹骑兵数万围高行周于铁邱诸将莫敢当其锋彦卿独自变量百骑击之契丹遁去行周得免移镇许州封祁国公开运二年与杜重威李守贞经略北鄙契丹军围之于阳城军中乏水人马多渴死时晋师居下风将战弓弩莫施彦卿谓张彦泽皇甫遇曰与其束手就擒曷若死战然未必死彦泽等然之遂潜兵尾其后顺风击之契丹大败改武宁军节度同平章事为左右所闲会再出师河朔彦卿不预易其行伍配以羸师数千戍荊州口及杜重威以大军降于溥水急诏彦卿与高行周领禁兵屯澶渊会彦泽引契丹兵入汴彦卿与行周遂归契丹时徐宋寇盗蠭起契丹主遣彦卿归镇汉祖入汴彦卿自徐州来朝改镇兖州加兼侍中干佑中加兼中书令封魏国公拜守太保移镇青州周祖即位封淮阳王移镇郢州魏府王殷得罪即以彦卿为大名尹天雄军节度进封魏王世宗初并人扰潞州潞兵败命彦卿领兵从磁州固镇路压其背及帝亲征命为行营一行都部署兼知太原行府事领步骑二万进讨初彦卿之行也世宗以并人虽败朝廷馈运不继未议攻击且令观兵城下徐图进取及周师入境汾晋吏民望风款接皆以久罹虐政愿输军须以资兵力世宗从之而连下数州彦卿等皆以刍粮未备欲旋军世宗不之省乃调山东近郡挽军食济之及世宗至城下命与郭从义向训白重赞史彦超率万骑屯忻口以拒北援又下盂县契丹驻忻北游骑及近郊史彦超以二千骑当其锋左右驰击彦超死之败契丹众二千余契丹适走先锋为其所掩重伤数百人诸将论议矛盾师故不振世宗乃班师彦卿遣归本镇还京拜彦卿太傅改封魏王恭帝立加封太尉太祖即位加封太师建隆四年春来朝赐裘衣玉带宴射于金凤园太祖七发皆中的彦卿贡名马称贺开宝二年移凤翔节度被病肩輿赴镇至西京上言疾亟请就医洛阳从之假满百日犹请其奉为御史所劾下留司御史台太祖以姻旧特免推鞫止罢其节制八年卒年七十八丧事官给彦卿将家子勇略有谋善用兵存审之第四子军中谓之符第四前后赏赐巨万悉分给帐下故士卒乐为效死契丹自阳城之败尤畏彦卿或马病不饮齧必唾而咒曰此中岂有符

王邪晋少主既陷契丹德光之母问左右曰彦卿安在或对曰闻已遣归徐州矣德光母曰留此人中原何失策之甚其威名如此镇大名十余年政委牙校刘思遇思遇贪黠怙势敛货财公府之利多入其家彦卿不之觉时藩镇率遣亲吏受民租槩量增溢公取其余羨而魏郡尤甚太祖闻之遣常参官主其事由是斛量始平诏以羨余粟赐彦卿以愧其心性不饮酒颇谦恭下士对宾客终日谈笑不及世务不伐战功居洛阳七八年每春月乘小驷从家僮一二游僧寺名园优游自适周世宗二后 【按五代史周家人传宣懿皇后崩于世宗时宋初迁西宫号周太后淳化四年卒者后妹也世宗二后皆彦卿女宋史本传止载宣懿今改补】 太宗懿德皇后皆彦卿女也自恭帝及太祖两朝赐诏书不名子昭信昭愿昭寿昭信周显德初卒赠检校太保闻州防御使昭愿积官为天雄军邢州二钤辖拜本州岛防御使卒昭寿累迁凤州团练使益州钤辖为神卫卒赵延顺等所杀昭寿子承谅娶齐王女嘉兴县主 【按宋史此下有昭愿昭寿附传昭愿传无事迹足录昭寿事见后雷有终传今并从删】

钦定续通志卷二百九十七

●钦定续通志卷二百九十八 列传九十八

列传

宋 【二】

○宋二

王景 王晏 郭从义 武行德 杨承信 折德宸

【御勋 御卿 克行】 王承美 李继周

 孙全照 侯延广 扈彦珂

王景

王晏

郭从义

武行德

杨承信

折德宸

王承美

李继周

孙全照

侯延广

扈彦珂

△王景

王景莱州掖人家世力田少倜傥善骑射结里中恶少为盗梁大将王檀镇滑台以景隶麾下后唐庄宗入汴景来降累迁奉圣【按东都事略作奉国】都虞候清泰末从张敬达围晋阳会契丹来援景以所部归晋祖天福初授相州刺史范延光据邺叛属郡多为所胁从景独分兵拒守晋祖幸邺留为京城巡检使开运二年契丹南侵出帝幸澶渊景与高行周等大破契丹众于戚城累拜横海军节度契丹至汴以其党代景景归次常山闻契丹主殂即闲道归镇汉干佑初加同平章事会契丹饥幽州民多度关求食至沧州境者五千余人景善怀抚诏给田处之周祖微时与景善及即位加兼侍中景起身行伍素无智略然临政不尚刻削民有讼必面诘之不至大过即谕释去不为胥吏所摇部民便之广顺初入朝民遮道留之不获有截景马镫者俄以景为护国军节度迁镇凤翔显德初封褒国公加开府阶世宗加兼中书令先是秦凤陷蜀州旁蕃汉户诣阙请收复景与向拱率兵出大散关进讨遂命景为西面行营都部署【按通鉴作西面行营都招讨使】大破蜀军于邽斩首数万级【按通鉴王景败蜀兵获将卒三百与宋史本传不同】秦州降徙景镇泰州兼西面缘边都部署恭帝立进封凉国公太祖即位加守太保封太原郡王建隆二年来朝复以为凤翔节度西面缘边都部署四年卒年七十五赠太傅追封岐王谥元靖景性谦退每朝廷使至虽卑位必降阶送迎周旋尽礼或曰王位尊崇无自谦抑景曰人臣重君命固当如是惟恐不谨耳初封郡王朝廷以吏部尚书张昭将命景尤加礼重以万余缗遗昭左右言其过厚景曰我在行伍闲即闻张尚书名今使于我是朝廷厚我也子廷义廷睿廷训廷义起家供奉官周世宗擢为虎捷都虞候迁龙捷右第二军都校领珍州刺史太祖即位改内外马步军副都军头开宝二年加领横州团练使从征太原廷义性勇敢亲鼓士乘城独免胄矢中其脑而颠经宿卒年四十七太祖甚惜之优诏赠建雄军节度延训至骁卫大将军致仕

△王晏

王晏徐州滕人家世力田晏少壮勇无赖尝率羣寇行攻劫梁末徐方大乱属邑皆为他盗所剽惟晏乡里恃晏获全后唐同光中应募隶禁军累迁奉国小校晋开运末与本军都校赵晖忠卫都校侯章等戍陕州会契丹至汴遣其将刘愿据陕恣行暴虐晏与晖等谋曰今契丹南侵天下汹汹太原刘公威德远被若杀愿送款河东取富贵如反掌耳晖等然之晏乃率敢死士夜踰城入府署斩愿首县府门外遣其子汉伦

奉表晋阳时汉祖虽建号威声未振得晏等来归甚喜即以晖为保平军节度章为镇国军节度晏为绛州防御使既而晖等表晏始谋功为第一迁建雄军节度汉祖入汴加同平章事周祖即位加兼侍中广顺元年刘崇侵晋州晏闭关不出设伏城上并人以为怯竞攀堞而登晏麾伏兵击之颠死者甚众遣汉伦追北数十里擢汉伦滨州刺史周祖以晏家彭城授武宁军节度俾荣其乡里三年封滕国公加开府阶世宗加兼中书令初晏至镇悉召故时同为盗者遗以金帛从容置酒语之曰吾乡素多盗吾与诸君昔尝为之后来者固当出诸君下为我告谕令不复为若不能改吾必尽灭其族由是境内安静吏民诣阙举留请为晏立衣锦碑世宗初复请立德政碑世宗命比部郎中知制诰张正撰文赐之诏改其乡里为使相乡勋德里私门立戟未几改河南尹西京留守显德三年移凤翔节度六年从世宗北征为益津关一路马军都部署韩令坤副焉遂平三关太祖即位封赵国公从征李筠师还改安远军节度干德元年进封韩国公上章请老拜太子太师致仕每朝会令缀中书门下班俄归洛阳别墅四年冬卒年七十七赠中书令

△郭从义

郭从义字德基【据东都事略补】其先沙陀部人父绍古事后唐武皇忠谨特见信任赐姓李氏绍古卒从义纔卅角庄宗畜于宫中与诸子齿明宗与绍古同事武皇情好款狎即位以从义补内职累迁内园使晋天福初始复姓郭氏坐事出为宿州团练副使丁内艰北归遂家太原汉祖在镇表为马步军都虞候屡率师破契丹于代北及建大号从义首赞其谋擢郑州防御使充东南道行营都虞候领首军自太原路渡河汉祖入汴以为河北都巡检使赵思绾之叛为行营都部署师至永兴围其城即以从义为永兴军节度思绾粮尽城中人相食从义系书矢上射城中说思绾令降仍表于朝廷许以华州节制隐帝遣使谕思绾思绾开门纳款从义具军容入城憩候馆中思绾入谒即令武士执之并其党悉斩于市加同平章事周广顺初加兼侍中移镇许州世宗将征刘崇从义适来朝因请扈从改天平军节度令从符彦卿破契丹于忻口以功加兼中书令从征淮南移镇徐州宋初加守中书令太祖征扬州从义迎谒于路愿扈从不允干德二年又为河中尹护国军节度【按东都事略作干德元年事】六年以疾归京师开宝二年改左金吾卫上将军逾年上章请老拜太子太师致仕四年卒年六十三赠中书令从义善击球尝侍太祖于便殿命击之从义易衣跨驴驰骤殿庭周旋击拂曲尽其妙既罢上赐坐谓之曰卿技固精矣然非将相所为从义大

恂子守忠守信守信颇知书与士大夫游子世隆世隆子昭佑承佑昭佑为合门祗候 【按宋史此下有从义曾孙承佑附传无事迹足录今从删又承佑传后有李洪信洪义二传已改入贰臣】

△武行德

武行德并州榆次人身长九尺余材貌奇伟家甚贫常采樵鬻之自给晋祖镇并门暇日从禽郊外值行德负薪见其魁岸又所负薪异常令力士更举之俱不能举奇之因留帐下晋天福初授奉国都头迁指挥使累迁盩厔军都虞候开运中契丹至汴行德被获乃伪请于契丹以自效契丹信之方具舟数十艘载铠甲令行德率将校军卒送归其国泝汴至河阴行德谓诸将曰我辈与其离乡并投边塞为异域之鬼曷若与君驱逐凶党共守河阳姑俟契丹兵退视天命所属归之众素服行德威名皆曰所向惟命行德即杀契丹监使分授器甲由泛水倍道抵河阳契丹节度使崔廷勋 【按隆平集东都事略俱作延勋】 出兵来拒行德麾众逆击廷勋大败弃城走行德遂据河阳尽以府库分给将士因推行德知州事时契丹兵尚充斥行德士卒缮甲兵据上游士气益奋人望归之闻汉祖起太原即自称河阳都部署遣其弟行友闲道奉表劝进汉祖即授行德河阳三城节度汉祖出晋绛至洛行德以所部兵翼至京师还河阳干佑中加同平章事移真定尹成德军节度广顺初加兼侍中俄改忠武军节度迁河南尹西京留守时禁盐入城犯者法至死告者给厚赏洛阳民家姬将入城鬻蔬俄有僧从姬买蔬就宫翻视密窺盐管中少答其直不买而去姬持入城抱关者搜得盐擒以诣府行德见盛盐幞非村姬所有疑而诘之姬言适有僧自城外买蔬取视久之而去即捕僧讯治之具状与关吏同诬姬以希赏行德释姬斩僧与抱关吏数辈人畏之若神明部下凜然显德初加开府阶封谯国公世宗即位兼中书令封邢国公先是唐末杨氏据淮甸自甬桥东南决汴汇为污泽二年将议南征遣行德率所部丁壮于古堤疏道之东达于泗上及亲征以行德为濠州行营都部署破淮军二千余人于郡境俄遣率师屯定远以逼其城为吴人所败左授右卫上将军五年下淮南复授行德保大军节度兼中书令恭帝立进封宋国公宋太祖即位加中书令进封韩国公再授忠武军节度改封魏国公干德二年冬移镇安州加开府仪同三司开宝二年入为太子太傅太平兴国三年以本官致仕四年卒年七十二赠太师

△杨承信

杨承信字守真其先沙陀部人光远第三子幼以父任自义武军节院使领兰州刺

史历宣武平卢二军牙校开运初光远以青州叛出帝遣李守贞等讨之光远死承信诣阙请死诏释之及契丹灭晋以承信为平卢军节度继父职仕汉历安鄜二州节度累加检校太师周广顺初加同平章事以郊祀恩加开府阶封杞国公世宗即位进韩国公显德初征淮南为濠州攻城副都部署改寿州北砦都部署兼知行府事寿州平累战功擢忠正军节度同平章事恭帝立进封鲁国公太祖即位加兼侍中来朝会征李筠命为泽州西面都部署筠平移镇河中干德元年进封赵国公二年卒年四十四赠中书令承信身长八尺美仪表善持论且多艺能虽叛臣之子然累历藩镇刻励为政而不苛故能始终富贵其卒也蒲民表乞祠之则其遗爱之在人者可知矣景德四年录其孙松为奉职 【按宋史此下有侯章传无事迹足录今从删】

△折德宸

折德宸世居云中为大族父从阮自晋汉以来独据府州控扼西北中国赖之仕周至静难军节度使其镇府州时署德宸为马步军都校显德初 【按通鉴汉干佑三年罢永安军至周显德元年五月复置永安军于府州以德宸为节度宋史作广顺闲设今改正】 周世宗建府州为永安军以德宸为节度使时从阮镇邠窳父子俱领节镇时人荣之显德中德宸率师攻下河市镇斩并军五百余级入朝以其弟德愿权总州事时世宗南征还次通许桥德宸迎谒且请迁内地世宗以其素得蕃情不许厚加赐赉而遣之德宸未至德愿又破并军五百余于沙谷砦斩其将郝章张钊太祖即位德宸又破河东砂谷砦斩首五百级建隆二年来朝待遇有加遣归镇干德元年败太原军于城下擒其将杨璘二年卒年四十八赠侍中子御勋御卿

折御勋

折御卿

折克行

折御勋

御勋字世隆德宸镇府州日表为右职德宸卒以御勋领汾州团练使权知府州事开宝二年太祖征太原御勋诣行在谒见以为永安军留后四年以郊祀来朝礼毕归镇九年郊祀西洛复来朝道病后期改泰宁军节度使留京师太平兴国二年卒年四十赠侍中

折御卿

御卿幼补节院使御勋知州事署为兵马都尉御勋徙镇召为闲厩副使知府州太宗征河东命与尹宪领屯兵同攻岚州又破岢岚军擒

其军使折令图以献遂下岚州又杀其宪州刺史霍翊又擒其将马延忠等七人迁崇仪使【按隆平集作御卿授闲厩副使改崇仪使知府州据此则御卿知府州乃在迁崇仪使后也与史互异】淳化三年凡四迁而为府州观察使五年拜永安军节度使既而契丹众万余来侵御卿大败之于子河汉自是契丹畏不敢深入太宗因遣使问御卿曰西北要害皆屯劲兵戎人何自而至御卿对曰敌缘山峡小径入谋剽略臣谍知之遣人邀其归路因纵兵大击败走之人马坠崖谷死者相枕其大将韩德威仅以身免皆圣灵所及非臣之功也帝嘉之岁余御卿被病契丹谍知之且为李继迁所诱率众来侵以报子河汉之役御卿力疾出战契丹闻其至不敢进会疾甚其母密遣人召归御卿曰世受国恩边寇未灭御卿罪也今临敌弃士卒自便不可死于军中乃其分也为白太夫人无念我忠孝岂两全言讫泣下翊日卒年三十八帝闻悼惜久之赠侍中以其子惟正为洛苑使知州事惟正归朝以其弟惟昌继之咸平二年河西黄女族长蒙异保及惟昌所部啜讹引赵保吉之众入寇麟州万户谷进至松花砦惟昌与从叔同巡检使海超弟供奉官惟信率兵赴战会保吉兵众官军不敌惟昌臂中流矢坠马摄弓起得裨将马突围出海超惟信没焉九月保吉党万私保移埋复来寇惟昌与宋思恭刘文质合战于埋并峯败走之又破言泥族拔黄砦俘斩甚众以功领富州刺史改文思使景德元年与王万海等破贼砦获刍粮抵麟州秋入朔州界破狼水砦时契丹方围岢岚军闻败遁去明年拜兴州刺史大中祥符二年表求赴阙真宗命近臣与射于苑中宴赐甚厚上言先臣御卿蒙赐旗三十竿以壮军容请别给赐许之七年命河东民运粮赴麟州当出兵为援惟昌力疾领步骑屯窰远砦冒风沙而行时疾已亟犹与宾佐宴饮谈笑自若焉明日卒年三十七以其弟惟忠继之惟忠字苾臣初以兄惟信战没补西头供奉官擢合门祗候及惟昌卒以惟忠为六宅使知府州兼麟府路都巡检使领普州刺史累进简州团练使云麾将军卒惟忠知兵事天圣中契丹与夏国会兵境上声言嫁娶惟忠覘得其实率麾下往备之戒士卒毋轻动一夕风霾有骑走营中皆以为寇至惟忠坚卧不动徐命擒之得数诞马盖敌所纵也既卒录其弟侄子孙七人以其子继宣嗣州事久之特赠惟忠耀州观察使宝元中继宣坐苛虐掊刻种落嗟怨绌为左监门卫将军楚州都监擢其弟右侍禁继闵为西京作坊使嗣州事继闵字广孝庆历中元昊兵攻麟州不克进围州城城险且坚东南有水门厓壁峭绝阻河贼缘厓腹微径鱼贯而前城中矢石乱下贼转攻城北士卒复力战贼死伤甚众遂引去围丰州丰州

遂陷继闵以城守劳特迁宫苑使普州刺史未几护送麟州戍卒冬服贼伏兵邀击之尽掠所赍继闵脱身由闲道归会赦止夺宫苑使后复官
领果州团练使自元昊反继闵招辑归业者三千余户皇佑二年卒以其弟继祖嗣州事继祖字应之由右侍禁累迁成州团练使临政二十余年奏乞书籍仁宗赐以九经韩绛发河东兵城委继祖为先锋深入敌帐降部落户八百加解州防御使卒继祖有子当袭州事请以授兄之子克柔诏从之而进其三子官录二孙为借职弟继世少从军为延州东路巡检威明山之内附继世先知之遣其子克懃报种諤諤用是取绥州继世以骑步万军于怀窳砦入晋祠谷往银州分明山之众万五千户居于大理河夏人来攻再战皆捷諤抵罪逮系狱以兵付之而行遂同明山守绥州录功领忠州刺史说韩绛城委以抚横山因画取河南之策绛以为然以左骥驥使果州团练使卒诸司使无贖礼诏以继世蕃官捍边有绩特给之从子克行

折克行

克行字遵道继闵子也初仕军府无所知名夏人寇环庆种諤拒之诏河东出师为援克行以兵三千护饷道战于葭芦川先登斩级四百降户千马畜万计诸老将矍然曰真折太尉子也擢知府州克行每出必胜夏人畏之益左厢兵专以当折氏太原孙览议城葭芦诸将论多不合召克行问策即条具所见顿兵吐浑河约勒部伍为深入穷讨状敌疑不敢动遂城葭芦既讫役会诏河东进筑八砦通道鄜延延帅遣秦希甫来议筑先后克行请两路并力乘士气之锐先筑远以出其不意希甫持不可并上二议卒用克行策城成谍言寇至军中皆戒严克行止之曰彼自扰耳已而果然克行在边三十年善拊士卒战功最多羌人呼为折家父官至秦州观察使卒赠武安军节度使子可大为荣州团练使知府州从子可适未冠有勇驰射不习而能鄜延郭达见之叹曰真将种也荐试廷中补殿侍隶延州从种諤出塞遇敌马以少年易之可适索与鬪斩其首取马而还益知名米脂之役与夏人战三角岭得级多又败之于蒲桃谷夏人十万入寇可适先得其守烽卒姓名诈为首领行视呼出尽斩之烽不传因卷甲疾趋大破之于尾丁碛回次怪杨沟正午驻营分骑据西山曰彼若蹶吾后腹背受敌必败果举军来可适所部纔八千转战至高岭乃从闲道趣洪德设伏邀其归路敌至伏发冲之其国母踰山而遁众相蹈藉赴崖涧死者如积论前后功至皇城使成州团练使知岷兰州镇戎军渭帅章榘合熙秦庆三道兵筑好水川命总管王文振统之而可适将军为副熙州兵千人失道尽死文振归罪于可适

案即下之吏宰相章惇欲按军法哲宗不许犹削十三官而罢案请留以责效乃以权第十二将威明阿密密勒都克颇皆夏人桀黠用事者诏可适密图之会二酋以畜牧为召会兵境上可适谍知之遣兵夜往袭并俘其族属三千人遂取天都山以其地为西安州命可适知州事锺傅议取灵武可适入覲帝以传策访焉对曰得之易守之难当先侵弱其地待吾藩篱既固然后可图帝曰卿言是也进武安军节度观察留后步军都虞候大城萧关与传议齟齬会覆师数百于踏口传劾之贬郑州观察使俄知渭州拜淮康军节度使转运使请于平夏通峡镇戍西安四砦分筑场圃置刍粟五百万可适以费大难之又欲借车牛以运及致十万斛于熙河皆戾其意乃中以疑谤召为佑神观使明年复以为渭州命其子彦质直秘阁参军事数月而卒年六十一彦质绍兴中签书枢密院别有传【按宋史此下有冯继业传继业有杀兄之恶并无事迹足录今从删】

△王承美

王承美丰州人本河西藏策族都首领其父事契丹为左千牛卫将军开宝二年率众来归承美授丰州牙内指挥使父卒改天德军蕃汉都指挥使知州事移丰州刺史遣军校诣阙言愿诱退浑突厥内附帝嘉其意太平兴国七年与契丹战斩获以万计擒其天德军节度使韦太以献明年契丹来侵又击败其众万余追北至青冢百余里斩获益众以功授本州岛团练使淳化二年冬来朝令归所部控子河汉自是诸蕃岁修贡礼颇效忠顺景德初迁本州岛防御使寻请于州城置孔子庙诏可之大中祥符五年卒赠恩州观察使六年录其子文宝孙怀筠以官

△李继周

李继周延州金明人祖计都父孝顺皆为金明镇使继周嗣掌本族太平兴国三年东山蕃落集众寇清化砦继周率众败之补殿前承旨雍熙中又与侯延广败默藏玛雅尔等族于浑州西山淳化五年讨李继迁命开治塞门鸦儿两路又招降族帐首二十余人率所部入夏州败蕃将数千于石堡砦以功转供奉官继周以阿都关塞门卢关等砦最居边要遂规修筑砦城有摩罗木嘉密默伊藏等族居近卢关未尝内顺继周夜率所部往袭焚之斩获甚众大军讨西夏命为延州路踏白先锋会继迁邀战于路继周战却之咸平三年复为先锋入贼境焚积聚杀获人畜器甲凡六十余万授供奉官使领金明县兵马都监新砦解家河卢关路都巡检蕃骑入钞继周逐之出境景德元年夏人围麟州继周受诏率兵会李继福掩击之加领诚州刺史大中祥符二年卒年六十七诏边臣择其子

可袭职者以名闻边臣言其子殿直士彬逊悞从子士用朴忠练边事且为部落所伏乃诏士彬管勾部族事士用为巡检都监以左右之士彬后至供备库副使金明县都监新砦解家河卢关路巡检康定元年元昊攻保安军而潜兵袭金明士彬父子俱被禽士彬兄士绍至内殿崇班士用至供奉官合门祗候李继福者亦与继周同时归顺授永平砦茈村军主以战功历归德将军领顺州刺史至内殿崇班新归明诸族都巡检【按宋史此下有孙行友传行友以左道惑众己见五代史其兄方谏传中入宋后无事迹足录今从删】

△孙全照

孙全照字继明行友子以荫补殿直从田重进击贼有功就加西京作坊使兼知威虜军连为广韶鄜延二路都巡检使淳化五年率兵与李继隆克绥州因与张崇贵等同戍守之俄护屯兵于夏州兼知州事景德元年上幸澶渊命为驾前西面邢洺马步军钤辖兼天雄军驻泊兼管勾东南贝冀等州钤辖全照言若敌骑南逼魏城但得骑兵千百必能设奇取胜帝赏其忠果乃传诏都部署周莹若全照欲击贼即分兵给之既而边骑果逼府城全照拒退之真宗遣使劳慰时契丹请和朝廷遣曹利用就其行帐议事全照疑非诚恳劝判府王钦若留不遣故德清军不能守吏民多为贼所害及契丹出境北面将帅还师并至府城全照令以次双行入门魏能不从其约率兵马盆入全照坐城楼引弓射之钦若入朝就命全照知军府事以城守劳加检校工部尚书徙镇州全照形短精悍知兵以严毅整众然性刚使气专任刑罚中书初进拟严州刺史帝曰全照深刻常虑人以严察议己今授此州似涉讥诮乃改焉三年为邠宁环庆都部署赵德明纳款朝议减西鄙戍兵令屯近地全照以边防不可无备未即奉诏帝曰全照是好勇多言者德明使已至关复何虑焉因徙全照知永兴军府仍拜四方馆使西师移屯者至府命全照兼驻泊钤辖全照许州有别墅求典是州可之大中祥符四年车驾西幸留为新城都巡检未几卒年六十【按宋史此下有侯益传改入贰臣其子仁矩仁宝附传今并删】

△侯延广

侯延广太子太师益之孙初在襁褓中遭王景崇之难乳母刘氏以己子代延广死刘氏行丐抱持延广至京师还益延广父仁矩历通祁雄三州刺史悉以补牙职仁矩在雄州日方饮宴虜数十骑白昼入州城居民惊扰延广自变量骑驰出牙门射杀其酋长一人斩首数级悉禽其余党延广持首级以献仁矩喜拊其背曰兴吾门者必汝也监军李汉超以其事闻诏书

褒美赐锦袍银带仁矩卒补西头供奉官从党进讨太原太平兴国初出护延州军兼缘边巡检善抚士卒下乐为用戎人畏服会西北戎寇边求可使徼巡者近臣言延广将家子习边事无出其右延广时被疾强起之迁崇仪副使充同鄜坊延丹缘边都巡检使戎人闻延广之至不敢复为寇乱叛卒刘渥啸聚亡命数百人寇耀州富平县谋入京兆其势甚盛关右骚然延广率兵自闲道追之会渥于富平西十五里渥众已千余人延广挺身与渥鬪大树下断渥右臂渥脱走乘势大破其众渥创甚止谷中后数日为追兵所获渥素号骁勇无敌至是为延广所杀羣盗丧气余党稍稍自归关右以定擢拜崇仪使淳化二年李继迁始扰夏台即命延广领奖州刺史知灵州赵保忠阴结继迁朝廷命骑将李继隆率兵问罪以延广护其军既而夏台平保忠就缚手诏褒美师还留为延州钤辖会节帅田重进老耄以延广同知州事兼缘边都巡检使先是延广知灵州部下严整戎人悦服李继迁素避其锋监军康赞元害其功诬奏延广得虏情恐后倔强难制遽诏还以慕容德丰代之部内甚不治至道闲继迁寇灵州朝廷谋帅同知枢密院事钱若水称延广可使就拜宁州团练使知灵州兼兵马都部署戎人塞道邮传饷餽皆不通延广独自变量十骑之镇戎人素服其威名皆相率引避二年春被病上遣御医驰驿视之医至疾已亟延广谓中使李知信曰延广自度必不起家世受国恩今日得死所矣但恨未立尺寸功以报上耳言讫而卒年五十帝以其子为六品正员官子绍隆东染院使绍隆子宗亮右侍禁合门祗候 【按宋史此下有张从恩传从恩在汉时以右卫上将军奉朝请入宋后未柄用无事迹足录今从删】

△扈彦珂

扈彦珂代州雁门人幼事王建立晋天福中建立节制潞州卒遗表荐彦珂得补河东节度左都押衙会汉祖建号擢为宣徽南院使未几授镇国军节度使干佑初河中李守贞永兴赵思綰凤翔王景崇并据城叛周祖为枢密使总兵出征道出华州时议多以先讨景崇思綰为便周祖意未决彦珂曰三叛连衡推守贞为主宜先击河中河中平则永兴凤翔失势矣今舍近图远若景崇思綰逆战于前守贞兵其后腹背受敌为之奈何周祖从其言及平河中以功迁护国军节度广顺初就加同平章事移镇滑州岁余代归世宗嗣位授左卫上将军显德三年以太子太师致仕归西京太祖即位遣使就赐器币数月卒年七十五 【按宋史此下有薛怀让赵赞二传怀让在周时以左武卫上将军致仕入宋后未柄用无事迹足录今从删赞系延寿子改附贰臣传延寿传后】

钦定续通志卷二百九十八

●钦定续通志卷二百九十九 列传九十九

列传

宋 【三】

○宋三

李继勋 药元福 赵晁【延溥】 郭崇 杨廷璋

宋偓 向拱 王彦超 王全斌

康延泽 王继涛 高彦晖

李继勋

药元福

赵晁 【赵延溥】

郭崇

杨廷璋

宋偓

向拱

王彦超

王全斌

康延泽

王继涛

高彦晖

△李继勋

李继勋大名元城人周祖领镇选隶帐下广顺初补禁军列校累迁至侍卫步军都指挥使领昭武军节度岁余改领曹州世宗亲征淮南令继勋领兵屯寿州城南进洞屋云梯攻其城继勋怠于守御为其所败召归阙出为河阳三城节度议者以为失责帅之义及再幸寿春还左授继勋右武卫大将军显德四年复从世宗南征以功迁左领军卫上将军改右羽林统军六年世宗幸沧州以继勋为战棹左厢都部署俄权知邢州恭帝立授安国军节度加检校太傅太祖即位加检校太尉平泽潞继勋朝于行在即以为昭义军节度是秋率师入河东燔平遥县俘获甚众建隆二年又败并军获其辽州刺史传延彦及弟延勋来献干德二年诏与康延沼尹训率步骑万余攻辽州太原将郝贵超领兵来援战于城下继勋大败之州将杜延韬等籍部下兵三千送款于继勋遣慕容延忠入奏诏褒之未几并人诱契丹步骑六万人来取辽州复遣继勋罗彦瓌郭进曹彬等领六万众赴之大破契丹及太原军于城下 【按十国春秋载契

丹西南面招讨使托里以六万骑来援北汉败宋兵于石州无继勋等败契丹及太原兵事而续通鉴所载与此并同当以史为正】五年加同平章事开宝初将征河东以继勋为行营前军都部署败并人于同涡河【按宋史本传作涡河太祖本纪作铜温河北汉世家作洞涡河长编作洞过河史文互异考方輿纪要洞涡河在榆次县东十五里魏收志云洞涡水一出木瓜岭一出沽岭一出大廉山一出九里原过晋祠下四水合流故曰同涡后俗名洞涡今据改】二年太祖亲征河东命继勋为行营前军都部署三年移镇大名太平兴国初加兼侍中俄以疾求归洛阳许之拜太子太师致仕朝会许缀中书门下班寻卒年六十二赠中书令继勋与太祖有旧故特承宠遇弟继偓亦有武勇子守恩至如京使守元至北作坊使守徽为崇仪副使

△药元福

药元福并州晋阳人善骑射初事邢帅王檀为厅头军使以勇敢闻事后唐历天平军内外马军都指挥使晋天福中为深州刺史开运初契丹陷甘陵围魏郡师次于河出帝驻军澶渊契丹阵于城北东西连亘掩城两隅登陴望之不见其际元福以左千牛卫将军领兵居阵东偏契丹尽锐来战元福与慕容邺各领二百骑为一队出鬪元福奋铁挝击契丹毙者数人左右驰突无不披靡契丹兵溃出帝登城见元福三马皆中流矢择名马赐之面授郑州刺史为权臣所沮止刺原州俄改秦州明年契丹复内侵命与李守贞符彦卿皇甫遇张彦泽等御之于阳城晋师方列阵设拒马为行砦契丹以奇兵出阵后断粮道乏水凿井辄坏契丹顺风扬尘诸将皆曰彼势甚锐俟风反与战元福曰军中饥渴已甚若俟风反出战吾属为虏矣彼谓我不能逆风以战宜出不意以击之此兵家之奇也乃率麾下骑开拒马出战契丹大败追北二十余里杀获甚众元福为威州刺史会灵武节度王令温以汉法治蕃部西人苦之共谋为乱三族酋长拓跋彦超石存也厮褒率众攻灵州令温遣人闲道入奏乃以河阳节度冯晖镇朔方召关右兵进讨以元福将行营骑兵元福与晖出威州土桥西遇彦超兵七千余邀晖行李元福转战五十里杀千级禽三十余人又遣部校援出令温护送洛下朔方距威州七百里无水草号早海师须赍粮以行至耀德食尽比明行四十里彦超等众数万布为三阵扼要路据水泉以待晖军军中大惧晖遣人赂以金帛求和解彦超许之使者往复数四至日中列阵如故元福曰彼知我军饥渴邀我于险既许和解而日中未决此岂可信哉欲困我耳迂延至暮则吾党成禽矣晖惊曰奈何元福曰彼虽众而精兵绝少依西山为阵

者是也余不足患请以麾下骑先击西山兵敌少却举黄旗为号合势进击败之必矣敌众果溃举黄旗以招晖晖军继进彦超大败汉干佑中从赵晖讨王景崇于凤翔时兵寡弱不满万人蜀兵数万来援都监李彦从以数千人击蜀军众寡不敌汉军少却元福领数百骑自后驱之下令还顾者斩众皆殊死战大败蜀兵追至大散关【按大散关之捷元福之功居多通鉴载蜀兵援景崇于大散关祇云李彦从袭击破之不及元福】凤翔平以功迁淄州刺史周广顺初刘崇引契丹扰晋州命枢密使王峻率兵拒之以元福为西北面都排阵使军过蒙坑崇夜烧营遁峻令元福与仇超陈思让追至霍邑既行又遣止之元福谓思让等曰刘崇召契丹扰边志在疲弊中国今兵未交而遁宜追奔深入以挫其势请将畏懦遂止周祖知其事明年因调兵戍晋州谓左右曰去年刘崇之遁若从药元福之言则无边忠矣俄与曹英向训讨慕容彦超于兖州元福为行营马步军都虞候诏元福自晋州率所部入朝即遣东行敕曹英向训不令以军礼见当时有为宿将筑连城以围兖彦超昼夜出兵元福屡击败之遂闭壁不敢出十余日元福营栅皆就又穴地及筑土山百道攻其城会周祖亲征元福以所部先入羊马城诸军鼓噪角进拔之以功授建雄军节度世宗高平之战刘崇败走太原遂纵兵围其城以元福为同州节度充太原四面濠砦都部署时攻具悉备城中危急以粮运不继诏令班师元福上言曰进军甚易退军甚难世宗曰一以委卿遂部分卒伍为方阵而南元福以麾下为后殿崇果出兵来追元福击走之师还加检校太尉移镇陕州又历定庐曹三镇太祖即位加检校太师卒年七十七赠侍中元福虽老筋骨不衰人或言其气貌益壮当复领兵必大喜曲致礼待或加以赠遗时称骁将

△赵晁【赵延溥】

赵晁真定人初事杜重威为列校重威诛属周祖镇邺中晁因委质麾下周祖开国擢为作坊副使慕容彦超据兖州叛以晁为行营步军都监兖州平转作坊使晁自以逮事霸府复有军功而迁拜不满所望居常怏怏从征刘崇世宗意在速战令晁倍道兼行晁私语通事舍人陈好谦曰贼势方盛未易敌也宜持重以挫其锐好谦以所言入白世宗怒曰汝安得此言必他人所教言其人则舍尔不言当死好谦惧遂以实对世宗即命并晁械于州狱军回始赦之李重进败吴人于正阳以降卒三千付晁晁一夕尽杀之世宗不之罪恭帝立加检校太傅太祖即位加检校太尉未几以疾归京师卒年五十二太祖甚悼之赠太子太师再赠侍中晁身长七尺仪貌雄伟好聚敛处方镇以贿闻以周初与宣祖

分掌禁军有宗盟之分故太祖常优礼之再加赠典焉子延溥周显德中以父任补左班殿直太祖即位为铁骑指挥使开宝初太祖亲征晋阳太宗守京邑延溥以所部为帐下牙军转殿前散员指挥使太平兴国三年从平太原略地燕蓟六军扈从有后期至者帝怒欲寘于法延溥遂进曰陛下巡行边陲以防御外侮今契丹未殄而诛谴将士若举后图谁为陛下戮力乎帝嘉纳之师还迁内外马步军都军头领本州岛防御使熙雍四年再知贝州以疾求代代未至卒年五十赠天德军节度子承彬至内殿崇班承彬子咸一为虞部员外郎咸熙天圣八年进士及第

△郭崇

郭崇应州金城人初名崇威避周祖讳止称崇父祖俱代北酋长崇弱冠以勇力应募为卒后唐清泰中为应州骑军都校晋祖割云应地入于契丹崇耻事之奋身南归历郢河中潞三镇骑军都校开运中戍太原会汉祖起义以崇为前锋入汴改护圣左第六军都校领郢州刺史改领富州从周祖平河中迁果州防御使【按东都事略作团练使】周祖镇邺以崇领行营骑军兼天雄都巡检使干佑三年从周祖平国难与李筠拒慕容彦超于留子陂走之以崇补侍卫马军都指挥使遣冯道等迎湘阴公赧于徐州将立之会契丹南侵周祖北征次于澶州为六军推戴枢密使王峻在京师闻变遣崇率七百骑东距赧遇于睢阳崇阵于牙门外赧惧登门楼呼崇曰汝等何遽至此崇曰澶州军变遣崇等来卫乘輿非有他也赧召崇升楼崇未敢登即遣道下与语崇乃登具言军情有属天命已定赧执崇手泣俛首久之俄而赧所领卫兵都校张令超以众归崇赧亲将贾王等数怒目视道将害之赧曰汝辈勿草草此非关令公事崇即送赧就馆舍广顺初领定武军节度未几复升陈州为节镇以颍州隶焉命崇为节度加同平章事出镇澶州周祖不豫促还镇所世宗立并人侵潞州命崇与符彦卿出固镇以御之世宗亲征又副彦卿为行营都部署师还加兼侍中移真定尹成德军节度四年世宗征淮南契丹掠边崇率师攻下束鹿县俘获甚众五年表求致政不允恭帝立加检校太师太祖即位加兼中书令崇追感周室恩遇时复泣下监军陈思诲密奏其状因言常山近边崇有异心宜谨备之太祖曰我素知崇笃于恩义盖有所激发尔遣人覘之还言崇方对宾属坐池潭小亭饮博城中晏然太祖笑曰果如朕言未几来朝时命李重进为平卢军节度因重进起兵改命崇为节制干德三年卒年五十八赠太师子守璘至洛苑副使妻即明德皇后之姊也子允恭以父任授殿直至崇仪副使知常州卒次女为仁宗皇后天圣三年诏赠崇尚书令兼中书令守璘太尉盛国

军节度允恭太傅安德军节度六年又诏追封崇英国公加赠守璘永清军节度兼中书令允恭忠武军节度兼侍中允恭子中庸左侍禁合门祗候副使中和娶颍川郡王德彝女为西染院副使

△杨廷璋

杨廷璋字温玉真定人家世素微贱有姊寡居京师周祖微时欲聘之廷璋谓姊曰此人姿貌异常不可拒姊从之周祖从汉祖镇太原廷璋屡省其姊周祖爱其纯谨姊卒留廷璋给事左右及出讨三叛入平国难廷璋数献奇计即位追册廷璋姊为淑妃擢廷璋为右飞龙使廷璋固辞不拜愿推恩其父洪裕即令召洪裕赴阙以老疾辞就拜金紫光禄大夫真定少尹世宗自澶渊还京言廷璋有干才迁客省使俄为河阳巡检知州事泾帅史懿称疾不朝周祖命廷璋往代之将行谓之曰懿不就命即图之廷璋至屏左右以诏书示懿谕以祸福懿即日载路俄闻周主崩廷璋呕血不食者数日世宗立拜左骁卫大将军征刘崇以为建雄军节度在镇数年颇有惠爱前后率兵入太原境拔仁义高壁等砦俘获甚多并人弃沁州二百里退保新城廷璋遂置保安兴同白壁等十余砦会隰州刺史孙议卒廷璋遣监军李谦溥领州事谦溥至并人来攻其城议者以为宜速救廷璋曰隰州城壁坚完并人奄至未能为攻城具当出奇以破之乃募敢死士百余人由闲道遣人约谦溥为内应既至即衔枚夜击城中鼓噪以出并人大溃奏至诏褒之世宗自河东还加检校保恭帝立加检校太傅太祖即位加检校太尉吏民诣阙请立碑颂功德太祖命卢多逊撰文赐之李筠起兵潜遣使赍蜡书求援邻境廷璋获之械送京师因上攻取之策即下诏委以经略及车驾亲征诏廷璋率所部入阴地关分其势及平归镇是秋来朝改镇邠州干德四年移鄜州开宝二年召为右千牛卫上将军四年卒年六十廷璋美髯长上短下好修容仪虽见小吏未尝懈惰善待士幕府多知名人在晋州曰太祖命荆罕儒为钤辖罕儒以廷璋周朝近亲疑有异志每入府中从者皆持刀剑欲图廷璋廷璋推诚待之殊不设备罕儒亦不敢发终亦无患议者以廷璋在泾州保全史懿阴德之报也廷璋子七人皆不为求官惟表其孤甥安崇勋得西头供奉官崇勋后唐枢密使重诲子廷璋子垣埧皆进士及第垣至屯田员外郎盐铁副使判官埧为都官郎中

△宋偓

宋偓河南洛阳人祖瑶唐天德军节度兼中书令父廷浩尚后唐庄宗女义宁公主生偓廷浩历石原房三州刺史晋初为泛水关使张从宾之叛力战死之偓年十一以父死事补殿直迁供奉官晋祖尝事庄宗每偓母入见诏

令勿拜汉祖在晋阳遣其子承训至洛奉书偃母结昏
即永宁公主也累授北京皇城使汉干佑初拜右金吾卫大将军驸马都尉隐帝即位授
昭武军节度 【按东都事略作昭化军】 移镇滑州
周祖举兵向关时偃在镇开门迎谒周祖深德之偃率所部兵从周祖至留子陂隐帝卫
兵悉走投周祖周祖谓偃曰至尊危矣公近亲可亟去
拥卫无令惊动偃策马及御营军已乱矣广顺初授左监门卫上将军世宗征淮南令偃
与左龙武统军赵赞右神武统军张彦超前景州刺史
刘建于寿州四面巡检师还以偃为右神武统军充行营右厢都排阵使又为庐州城下
副部署吴人大发舟师次东沛洲断苏杭之路世宗遣
偃领战舰数百艘袭之又遣大将慕容延钊率步骑而进水陆合势大破之世宗尝次于
野有虎逼乘輿偃引弓射之一发而毙及江北诸州悉
平画江为界世宗驻迎銮命偃率舟师三千泝江而上巡警诸郡师还复授滑州节制又
移镇邓州恭帝立加开府仪同三司太祖即位加检校
太师遣领舟师巡抚江徼舒州团练使司超副之李重进谋以扬州起兵偃察其状飞章
以闻太祖令偃屯海陵以观重进去就遂从征扬州为
行营排阵使及平以功改保信军节度来朝徙镇华州会凿池都城南命偃率舟师数千
以习水战车驾数临观焉五年改忠武军节度开宝初
太祖纳偃长女为后偃本名延渥以父名下字从水上言改为偃三年徙邠州太平兴国
初加同平章事二年移定国军节度四年从平太原又
从征幽州师还归镇五年诏知沧州六年封邢国公俄迁同州九年又为右卫上将军雍
熙中曹彬等北伐班师会偃知霸州归阙端拱二年卒
年六十四赠侍中谥庄惠中使护葬偃庄宗之外孙汉祖之婿女即孝章皇后近代贵盛
鲜有其比子元靖至供备库使元度至供备库副使元
载元亨并至左侍禁合门祇候初孝章寝疾语晋国长公主曰我瞑目无他忧惟虑族属
不敦睦貽笑于人景德中偃幼子元翰果诣京府求析
家财真宗闻之诏释勿问仍谕其族属务遵先后遗戒焉元度子惟简为殿直惟易为奉
职

△向拱

向拱字星民怀州河内人始名训避周恭帝讳改焉少倜傥负气汉祖在晋阳招致
天下士拱至太原以策干汉祖不纳客于周祖门下及
周祖领节镇署拱知客押牙周祖即位授宫苑使广顺中出监昭义屯军并人领马步十
五都来侵拱与巡检陈思让迎战于鹿亭南获其帅王
璠曹海金又败其军于壶关师还会征慕容彦超命为都监即日遣行贼平为陕州巡检
未几改客省使知陕州会延州高允权卒其子绍基欲

求继袭即自领使务朝廷益禁兵戍守命拱权知州事尝请禁州民卖军装兵器于西人从之所属部落有侵盗汉户者拱招其酋帅犒之令誓不敢侵犯召拜左神武大将军宣徽南院使刘崇入寇遣马军樊爱能步军何徽赴泽州令拱监护之世宗亲征拱以精骑居阵中高平之捷以功兼义成军即度河东行营前军都监师还出镇陈州先是晋末秦州节度何建以秦成阶三州入蜀蜀人又取凤州至是宰相王溥荐拱讨之乃召拱与凤翔王景并率兵出大散关连下城砦蜀人闻凤州急将绝周师粮道拱命排阵使张建雄领兵二千直抵黄花谷又遣别将领劲卒千人出敌后截其归路敌果为建雄所败奔堂仓又为劲卒所遇合势掩击擒其监军王峦孙韬等由是剑门之下州邑营砦望风宵遁秦凤阶成平显德二年世宗亲征淮南以拱权东京留守兼判开封府事时扬州初平南唐令境上出师谋收复韩令坤有弃城之意即驿召拱赴行在拜淮南节度依前宣徽使兼缘江招讨使以令坤为副追叙秦凤功加检校太尉时周师围寿春经年未下江淮草寇充斥吴援兵栅于紫金山与城中烽火相应而舒蕲和泰复为吴人所据拱上言徙扬州之师并力攻寿春俟其城下然后改图进取世宗从之拱乃封库付扬州主者复遣本府牙将分部按巡城中秋毫不犯军民感悦及师行吴人有负糗粮以送者至寿春与李重进合势攻其城败淮南军于黄蓍砦以为武宁军节度命领其属驻镇淮军及克寿州以功加同平章事领武宁军节度淮南平改山南东道节度俄充西南面水陆发运招讨使恭帝立加检校太师河南尹西京留守太祖即位加兼侍中太祖征李筠拱迎谒至泛水言筠逆节久着兵力日盛宜急济大河踰太行乘其未集攻之缓则势张难为力矣帝从其言卷甲倍道趋之筠果率其兵南向闻车驾至惶骇走泽州城守遂见擒干德初封谯国公拱尹河南十余年专治园林第舍好声妓纵酒为乐府政废弛羣盗昼劫移镇安州命左武卫上将军焦继勋代之谓继勋曰洛久不治无复效拱为也太平兴国初进封秦国公来朝授左卫上将军八年代王彦超判左金吾卫仗事雍熙三年卒年七十五赠中书令咸平初真宗闻拱之后有寒馁流离者录其孙恠为国子助教拱子德明至洛苑使显大中祥符八年进士出身德明子悦为虞部郎中

△王彦超

王彦超字德升【据东都事略补】大名临清人性温和恭谨能礼下士少事后唐魏王继岌从继岌讨蜀还至渭南会明宗即位继岌遇害彦超乃依凤翔重云山僧舍晖道人为徒晖善观人谓彦超曰子富贵人也安能久居此给资帛遣之时晋祖帅陕乃召至帐下委以心腹

及移镇太原将引兵南下遣从事桑维翰求援契丹以彦超从行天福初累殿前散指挥都虞候领蒙州刺史汉初领岳州防御使出为复州防御使周祖平内难后北征契丹以彦超为行营马步左厢都排阵使从周祖入汴时自彭门迎湘阴公入纒位会军变周祖革命即命彦超权知徐州节度未行湘阴公旧校巩廷美据州起兵【按宋史作巩廷美据州叛廷美之于周祖未可称叛今改】真拜彦超武宁军节度讨之彦超督战舰破其水砦乘胜拔之又与枢密使王峻拒刘崇于晋州崇遁去授建雄军节度俄改河阳三城节度移镇河中显德初加同平章事刘崇南寇命彦超领兵取晋州路东向邀击从战高平彦超自阴地关与符彦卿会兵围汾州诸将请急攻彦超曰城已危矣旦暮将降我士卒精锐倏驱以先登必死伤者众少待之翌日州将董希颜果降遂趋石州彦超亲鼓士乘城数日下之擒其守将安彦进改忠武军节度加兼侍中诏率所部浚胡芦河城李晏口工未毕契丹万余骑来侵彦超击败之宰相李谷征淮南以彦超为前军行营副部署败淮南军于寿州城下吴兵水陆来援谷退保正阳吴人蹶其后会李重进兵至合势急击大破吴人改京兆尹永兴军节度移镇凤翔恭帝立加检校太师西面缘边副都部署太祖即位加兼中书令代还太祖与彦超有旧因幸作坊召从臣宴射酒酣谓彦超曰卿昔在复州朕往依卿何不纳我彦超降阶顿首曰勺水岂能止神龙耶当日陛下不留滞于小郡者盖天使然尔帝大笑彦超翌日奉表待罪帝遣中使慰谕令赴朝谒未几复以为永兴军节度又以其父光禄卿致仕重霸为太子少傅致仕干德二年复镇凤翔开宝二年为右金吾卫上将军判卫仗事太平兴国六年封邠国公七年彦超语人曰人臣七十致仕古之制也我年六十九当自知止明年表求致仕加太子太师给金吾上将军禄彦超既得请尽斥去仆妾之冗食者居处服用咸遵俭约雍熙三年卒年七十三赠尚书令开宝初彦超自凤翔来朝与武行德郭从义白重赞杨廷璋俱侍曲宴太祖从容谓曰卿等皆国家旧臣久临剧镇王事鞅掌非朕所以优贤之意彦超知旨即前奏曰臣无勋劳久冒荣宠今已衰朽愿乞骸骨归邱园臣之愿也行德等竟自陈夙昔战功及履历艰苦帝曰此异代事何足论翌日皆罢行德等节镇时议以此许彦超初彦超将致政每戒诸子曰吾屡为统帅杀人多矣身死得免为幸必无阴德以及后汝曹勉为善事以自庇及卒诸子果无达者宣化门内有大第园林甚盛不十余年其家已鬻之矣孙克从咸平元年进士及第亦止于州县【按宋史此下有张永德传改入贰臣】

△王全斌

王全斌并州太原人其父事唐庄宗为岢岚军使私畜勇士百余人庄宗疑有异志召之惧不敢行全斌时年十二谓其父曰此盖疑大人有他图愿以全斌为质必得释父从其计果获全因以隶帐下及庄宗入洛累历内职同光末国有内难兵入宫城近臣宿将皆弃甲遁去惟全斌与符彦卿等十数人居中拒战明宗即位补禁军列校晋初从侯益破张从宾于泛水迁护圣指挥使周广顺初改护圣为龙捷以全斌为右厢都指挥使及讨慕容彦超于兖州为行营马步都校显德中从向训平秦凤遂领恩州团练使俄迁领泗州防御使从世宗平淮南复瓦桥关改相州留后太祖即位李筠起兵于潞州全斌与慕容延钊由东路会大军进讨拜安国军节度建隆四年与洺州防御使郭进等率兵入太原境进克乐平干德二年又为忠武军节度诏命全斌为西川行营前军都部署率禁军步骑及诸州兵由凤州路进讨蜀拔干渠渡万仞燕子二砦遂下兴州进拔石碣鱼关白水二十余砦先锋史延德进兵三泉败蜀军数万擒招讨使韩保正副使李进既而崔彦进康延泽等逐蜀军过三泉遂至嘉陵杀虏甚众蜀人断阁道军不能进全斌议取罗川路以入延泽潜谓彦进曰罗川路险军难并进不如分兵治阁道进与大军会于深渡彦进白全斌全斌即命彦进延泽督治阁道数日成遂进击金山砦破小漫天砦全斌由罗川趋深渡与彦进会蜀人依江列阵以待彦进遣张万友等夺其桥会暮夜蜀人退保大漫天砦诘朝彦进延泽万友分三道击之蜀人悉其精锐来逆战又大破之乘胜拔其砦蜀将王审超监军赵崇渥遁去复与三泉监军刘延祚大将王昭远赵彦韬引兵来战三战三败追至利州北昭远渡桔栢江焚梁退守剑门遂克利州【按续资治通鉴长编据实录载大漫天之战全斌擒其寨主王审超监军赵崇渥三泉监军刘延祚全斌传则云审超崇渥遁去复与延祚等来战与实录不合而长编又据实录书明年正月诛大漫天寨主王审超等则又似同时被擒也传恐有误云】自利州趋剑门次益光全斌会诸将议曰剑门天险古称一夫荷戈万夫莫前诸君宜各陈进取之策侍卫军头向韬曰降卒牟进言益光江东越大山数重有狭径名来苏蜀人于江西置砦对岸有渡自此出剑关南二十里至清强店与大路合可于此进兵即剑门不足恃也全斌等即欲卷甲赴之康延泽曰来苏细径不须主帅亲往且蜀人屡败并兵退守剑门莫若主帅协力进攻命一偏将趋来苏若达清强击剑关与大军夹攻破之必矣全斌纳其策命史延德分兵趋来苏造浮梁于江上蜀人见梁成弃砦而遁昭远闻延德兵趋来苏至清强即引兵退阵于汉源坡留其偏将守剑门全斌等击破

之昭远崇韬皆遁走遣轻骑追获传送阙下遂克剑州杀蜀军万余人四年师次魏城孟昶遣使奉表来降全斌等入成都旬余刘延让等始自峡路至昶馈遗延让等及犒师并同全斌之至及诏书颁赏诸军亦无差降由是两路兵相嫉蜀人亦构主帅遂不协全斌等先受诏每制置必须诸将会议至是虽小事不能即决俄诏发蜀兵赴阙人给钱十千未行者加两月廩食全斌等不即奉命由是蜀军愤怨人人思乱两路随军使臣常数十百人全斌彦进及王仁贍等各保庇之不令部送蜀兵但分遣诸州牙校蜀军至绵州果叛劫属邑众至十余万自号兴国军有蜀交州刺史全师雄者尝为将有威惠士卒畏服适以其族赴阙下绵州遇乱师雄恐为所胁乃匿其家于江曲民舍后数日为乱兵所获推为主帅全斌遣都监米光绪往招抚之光绪尽灭师雄之族纳其爱女及橐装师雄闻之遂无归志率众急攻绵州为横海指挥使刘福龙捷指挥使田绍斌所败遂攻彭州逐刺史王继涛杀都监李德荣据其城成都十县皆起兵应师雄师雄自号兴蜀大王开幕府置僚属署节帅二十余人令分据灌口导江郫新繁青城等县彦进与张万友高彦晖田钦祚同讨之为师雄所败彦晖战死钦祚仅免贼众益盛全斌又遣张廷翰张煦往击之不利退入成都师雄分兵绵汉闲断阁道缘江置砦声言欲攻成都自是邛蜀眉雅东川果遂渝合资简昌普嘉戎荣陵十七州并随师雄为乱邮传不通者月余全斌等甚惧时城中蜀兵尚余二万全斌虑其应贼尽杀之未几刘延让曹彬破师雄之众于新繁师雄退保郫县全斌仁贍又攻破之师雄走保灌口砦会虎捷指挥使吕翰为主将所不礼与师雄党刘泽合众至五万果州指挥使宋德威遂州牙校王可瓌相继为乱仁贍等讨吕翰于嘉州翰败走入雅州师雄病死于金堂推谢行本为主罗七君为佐国令公与贼将宋德威唐陶鼈据铜山旋为康延泽所破仁贍又败吕翰于雅州翰走黎州为下所杀后丁德裕等分兵招集贼众始息全斌之入蜀也适属冬暮京城大雪太祖设毡帷于讲武殿衣紫貂裘帽以视事忽谓左右曰我被服若此体尚觉寒念西征将冲犯霜雪何以堪处即解裘帽遣中黄门驰赐全斌仍谕诸将以不徧及也全斌拜赐感泣初成都平命参知政事吕余庆知府事全斌但典军旅全斌语所亲曰我闻古之将帅多不能保全功名今西蜀平欲称疾东归庶免悔吝或曰今寇盗尚多非有诏旨不可轻去全斌犹豫未决会有诉全斌及彦进破蜀日夺民家子女玉帛不法等事与诸将同时召还太祖以全斌等初立功虽犯法不欲辱以狱吏但令中书问状皆引伏全斌责授崇义军节度观察留后彦进责授昭化军节度观察留后特建

随州为崇义军金州为昭化军以处之仁贍责授右卫大将军开宝末车驾幸洛阳郊祀召全斌侍祠以为武宁军节度谓之曰朕以江左未平虑征南诸将不遵纪律故抑卿数年为朕立法今已克金陵还卿节钺仍以银器万两帛万匹钱千万赐之全斌至镇数月卒年六十九赠中书令天禧二年录其孙永昌为三班奉职全斌轻财重士不求声誉宽厚容众军旅乐为之用黜居山郡十余年怡然自得识者称之子审钧广州兵马钤辖审锐供奉官合门祇候曾孙凯字胜之祖审钧尝为永兴军驻泊都监以击贼死遂家京兆饶于财凯散施结客日驰猎南山下以践蹂民田捕至府时寇准守长安见其状貌奇之为言全斌取蜀有劳而审钧以忠义死当录其孤遂以为三班奉职自右侍禁雄州兵马监押擢合门祇候定邢赵都巡检使 【按东都事略作镇定邢赵都巡检使】 元昊反徙麟州都监尝出双烽桥染枝谷遇夏人破之又破帕尔沁科尔罗部再战于伺候烽前后斩获以数千计夏人围麟州乘城拒鬪昼夜三十一日始解去特迁西头供奉官代迁边寇犹钞掠以为内殿崇班麟州路缘边都巡检使与同巡检张岳护粮道于沁密埽克寇猝大至与岳相失乃分兵出其后夹击之复与岳合斩首百余级又入兔毛川贼众三万凯以兵六千陷围流矢中面鬪不解又斩首百余级贼自蹂践死者以千数迁南作坊副使后为并代州钤辖管句麟府军马事夏人二万寇青塞堡凯出鞋邪谷转战四十里至杜牯川大败之复得所掠马牛以还经略使明镐言凯在河外九年有功遂领资州刺史久之召还未及见会甘陵盗起即命领兵赴城下贼平拜泽州刺史知邠州未几历环庆并代定州路副都总管捧日天武四厢绵州防御使累迁侍卫亲军步军副都指挥使泾州观察使又徙秦凤路辞日帝谕以嘉勒斯赉摩征交易阻绝颇有入寇之萌宜安静以处之凯至与主帅以恩信抚接遂复常贡召拜武胜军节度观察留后侍卫亲军马军副都指挥使卒年六十六赠彰武军节度使谥庄恪凯治军有纪律善抚循士卒平居与均饮食至临阵援枹鼓毅然不少假故士卒畏信战无不力前后与敌遇未尝挫衄兔毛川之战内侍宋永诚哭于军中凯劾罢之尤笃好于故旧子緘緘子洗字晋卿能诗善画尚蜀国长公主官至留后

△康延泽

康延泽父福晋护国军节度兼侍中天福中延泽以荫补供奉官周广顺二年迁内染院副使太祖即位从慕容延钊李处耘平湖湘时荆南高保融卒其子继冲嗣领军事命延泽赍书币先往抚之且察其情伪及还尽得其机事因前导大军入境遂下荆峡以劳授正使干德中征

蜀为凤州路马军都监破白水合子二砦进击西县三泉获韩保正由来苏路会大军克剑门及孟昶降延泽以百骑先入成都安抚军民尽封府库而还就命为成都府都监会全师雄复乱徙为晋州刺史时有降兵二万七千诸将惧为内应欲尽杀之延泽请简老幼疾病七千人释之余以兵卫还浮江而下贼若来劫夺即杀之未晚诸将不能用俄出兵败贼党刘泽三万人复有王可瓌率数郡贼兵来战延泽击走之追北至合州又破可瓌余党谢行本等擒罗七君事平优诏奖就命为东川七州招安巡检使全斌等得罪延泽亦坐贬唐州教练使开宝中起为供奉官迁左藏库副使坐与诸侄争家财失官居西洛卒兄延沼幼隶后唐明宗帐下仕晋历官随泽二州刺史仕周累迁蔡齐郑楚四州防御使晋潞二州兵马钤辖太祖即位讨李重进为前军马军都指挥使建隆四年改怀州防御使干德六年命李继勋等征河东为先锋都监太祖亲征太原以延沼宿将熟练边事诏领兵屯潞州会以疾归郡开宝二年卒年五十八

△王继涛

王继涛河朔人少给事汉祖左右干佑初补供奉官历诸司副使仕周为右武卫大将军淮南平为天长军使显德五年迁和州刺史太祖即位为左骁骑大将军再迁左神武大将军干德二年大军伐蜀为凤州路壕砦使兴元降王全斌命继涛权府事孟昶降全斌又遣继涛与供奉官王守讷部送昶归阙守讷白全斌言继涛问昶求宫妓金帛全斌遂留继涛止令守讷送昶俄诏以继涛为彭州刺史绵州军乱劫全师雄为帅率众攻彭城继涛与都监李德荣拒之德荣战死继涛身被八枪单骑走至成都素与通事舍人田钦祚有隙会钦祚入朝诬奏继涛以他事太祖驿召继涛将面质之道病卒诏曰故彭州刺史王继涛先登击贼身被重创优典未加赍志而歿故阶州刺史高彦晖帅师讨贼奋不顾命垂老之年殒身锋镝永言痛悼不忘于怀宜各赐其家粟帛

△高彦晖

高彦晖蓟州渔阳人仕契丹为瀛州守将世宗北征以城来降迁耀阶二州刺史太祖命师伐蜀为归州路先锋都指挥使全师雄之乱崔彦进遣彦晖与田钦祚共讨之至导江与贼遇贼据隘路设伏竹箐中官军至遇伏发遂不利彦晖谓钦祚曰贼势张大曰将暮请收兵诘朝与战钦祚欲遁虑贼曳其后乃给之曰公食厚禄遇贼畏缩何也彦晖复麾兵进钦祚潜遁去彦晖独与部下十余骑力战皆死之时年七十余彦晖老将练习边事上闻其歿甚痛惜故并命优恤之

钦定续通志卷二百九十九

●钦定续通志卷三百 列传一百

列传

宋【四】

○宋四

赵普 李崇矩【继昌】 王仁贍 楚昭辅 李处耘【继隆继和】

赵普

李崇矩

王仁贍

楚昭辅

李处耘

△赵普

赵普字则平幽州蓟人父迥徙常山又徙河南洛阳普沈厚寡言镇阳豪族魏氏以女妻之周显德初永兴军节度刘词辟为从事世宗用兵淮甸太祖拔滁州宰相范质奏普为军事判官宣祖卧疾滁州普朝夕奉药饵宣祖由是待以宗分太祖尝与语奇之时获盗百余当弃市普疑有无辜者启太祖鞠之获全者众淮南平调补渭州军事判官太祖领同州节度辟为推官移镇宋州表掌书记太祖北征至陈桥被酒卧帐中众军推戴普与太宗排闥入告及受禅以佐命功授右谏议大夫充枢密直学士车驾征李筠命普与吕余庆留京师普愿扈从太祖笑曰若胜胄介乎从之普因进策曰陛下初登宝位光耀神武挫英雄之气服天下之心在此举矣且其机贵速不尚巧迟若倍道兼行掩其未备所谓自天而下可一战而擒也太祖然之及筠诛迁兵部侍郎枢密副使维扬李重进治城缮兵太祖问普攻取之策普曰重进昧武侯之远图守薛公之下计不过缮修孤垒以长淮为恃耳况其内乏资储外无救援以臣愚见急攻亦取援守亦取不如速取之矧陛下以顺讨逆哉不踰月遂诛重进建隆二年拜枢密使检校太保仍加功臣之号【按太祖讨李筠李重进用赵普谋功成迅速宋史本传未载考东都事略及太宗御制碑文并长编增】干德二年范质等三相同日罢以普为门下侍郎平章事集贤殿大学士【按宋史本传此下有普拜相太宗署敕事语详宴仪传此从删】帝视如左右手事无大小悉咨决焉普兼监修国史命薛居正吕余庆参知政事以副之不宣制班在宰相后不知印不预奏事不押班但奉行制书而已先是宰相兼敕皆用内制普相止用敕非旧典也太祖数微行过功臣家普每退朝不敢便衣冠一日大雪向夜普意帝不出久之闻叩门声普亟出帝立风雪中普惶惧迎拜帝曰已约晋王矣已而太

宗至设重裯地坐堂中炽炭烧肉普妻行酒帝以嫂呼之因与普计下太原普曰太原当西北二面太原既下则我独当之不如姑俟削平诸国则弹丸黑子之地将安逃乎帝笑曰吾意正如此特试卿尔遂定下江南之策帝曰王全斌平蜀多杀人吾今思之犹耿耿不可用也普于是荐曹彬为将潘美副之【按太祖与普议下江南普荐曹彬为将本传不载据邵氏闻见录增】五年加右仆射昭文馆大学士俄丁内艰诏起复视事遂劝帝遣使分诣诸道征丁壮籍名送京师以备守卫诸州置通判使主钱谷由是兵甲精锐府库充实【按东都事略载太祖召普问息兵马国家长久之计普对唐季以来战鬪不息由节镇太重君弱臣强惟稍夺其权制其钱谷收其精兵则天下自安故石守信等罢典禁兵后又有是劝史称由是兵甲精锐府库充实可见藩镇横恣时京师徒守空名而已】开宝二年冬普尝病车驾幸中书三年春又幸其第抚问之六年帝又幸其第时钱王俶遣使致书于普及海物十瓶置于庑下仓卒不及屏帝顾问何物普以实对帝曰海物必佳即命启之皆瓜子金也普惶恐顿首谢曰臣未发书实不知帝叹曰受之无妨彼谓国家事皆由汝书生尔普为政颇专廷臣多忌之时官禁私贩秦陇大木普尝遣亲吏诣市屋材联巨筏至京师治第吏因之窃货大木冒称普鬻都下权三司使赵玘以闻太祖大怒促令追班将下制逐普赖王溥奏解之故事宰相枢密使每候对长春殿同止庐中帝闻普子承宗娶枢密使李崇矩女即令分异之普又以隙地私易尚食蔬圃以广其居又营邸店规利卢多逊为翰林学士因召对屡攻其短会雷有邻击登闻鼓讼堂后官胡赞李可度受赇鬻法及刘伟伪作摄牒得官王洞尝纳赂可度赵孚授西川官称疾不上皆普庇之太祖怒下御史府按问悉抵罪以有邻为秘书省正字普恩益替始诏参知政事与普更知印押班奏事以分其权未几出为河阳三城节度检校太傅同平章事【按宋宰辅编年录引石林燕语云故事宰相去位例除本官稍优则进官一等或易东宫三少惟赵韩王以开国旧臣且相十年故以使相罢盖异恩也】太平兴国初入朝改太子少保迁太子太保颇为卢多逊所毁奉朝请数年郁郁不得志会柴禹锡赵镒等告秦王廷美骄恣将有阴谋窃发帝召问普言愿备枢轴以察奸变退又上书自陈预闻太祖昭宪皇太后顾托之事辞甚切至太宗感悟召见慰谕俄拜司徒兼侍中封梁国公先是秦王廷美班在宰相上至是以普勋旧再登元辅表乞居其下从之及涪陵事败多逊南迁皆普之力也八年出为武胜军节度检校太尉兼侍中帝作诗以饯之普奉而泣曰陛下赐臣诗当刻石与臣朽骨同葬泉下帝

为之动容翌日谓宰相曰普有功国家朕昔与游今齿发衰矣不容烦以枢务择善地处之因诗什以导意普感激泣下朕亦为之堕泪宋琪对曰昨日普至中书执御诗涕泣谓臣曰此生余年无阶上答庶希来世得效犬马力臣昨闻普言今复闻宣谕君臣始终之分可谓两全雍熙三年大军出讨幽蓟久未班师普疏谏剴切帝赐手诏优答之四年移山南东道节度自梁国公改封许国公会诏下亲耕藉田普表求入覲辞甚恳切帝恻然从其请既至慰抚数四普呜咽流涕陈王元僖上言乞再用普太宗欲相吕蒙正以其新进藉普旧德为之表率册拜太保兼侍中时枢密副使赵昌言与胡旦陈象舆董俨梁颙厚善会旦令翟马周上封事排毁时政普深嫉之奏流马周黜昌言等郑州团练使侯莫陈利用骄肆僭侈大为不法普廉得之尽以条奏利用坐流商州普固请诛之其嫉恶强直皆此类李继迁之扰边普建议以赵保忠复领夏台故地因令图之保忠反与继迁同谋为边患时论归咎于普颇为同列所窥不得专决旧制宰相以未时归第是岁大热特许普夏中至午时归私第明年免朝谒止日赴中书视事有大政则召对被疾请告车驾屡幸其第省之赐予加等普遂称疾笃三上表求致仕上勉从之以普为西京留守河南尹依前守太保兼中书令普三表恳让赐手诏曰开国旧勋惟卿一人不同他等无至固让俟首涂有日当就第与卿为别普捧诏涕泣因力疾请对赐坐移晷颇言及国家事上嘉纳之普将发车驾幸其第淳化三年以老衰久病令留守通判刘昌言奉表求致政中使驰传抚问凡三上表乞骸骨拜太师封魏国公给宰相奉料令养疾俟损日赴阙仍遣其弟宗正少卿安易赍诏书赐之又特遣使赐羊酒七月卒年七十一卒之先一岁普生日上遣其子承宗赍器币鞍马就赐之承宗复命未几卒次岁普已罢中书令故事无生辰之赐特遣普侄婿左正言直昭文馆张秉赐之礼物普闻之因追悼承宗秉未至而普疾笃【按宋史本传此下有赵普遣吏诣上清致祷事语涉不经今从删】遂卒上闻之震悼谓近臣曰普事先帝与朕故旧能断大事向与朕尝有不足众所知也朕君临以来每优礼之普亦倾竭自效尽忠国家真社稷臣也朕甚惜之因出涕左右感动废朝五日为出次发哀赠尚书令追封真定王赐谥忠献上撰神道碑铭亲八分书以赐之遣右谏议大夫范杲摄鸿臚卿护丧事赙绢布各五百匹米面各五百石葬日有司设卤簿鼓吹如式二女皆笄普妻和氏言愿为尼太宗再三谕之不能夺赐长女名志愿号智果大师次女名志英号智圆大师初太祖侧微普从之游既有天下普屡以微时所不足者言之太祖豁达谓普曰若尘埃中可识天子宰

相则人皆物色之矣自是不复言普少习吏事寡学术及为相太祖常劝以读书晚年手不释卷每归私第阖户启篋取书读之竟日及次日临政处决如流既薨家人发篋视之则论语二十篇也普性深沈有崖谷虽多忌克而能以天下事为己任宋初在相位者多齷齪循默普刚毅果断未有其比尝奏荐某人为某官太祖不用普明日复奏其人亦不用明日普又以其人奏太祖怒碎裂奏牍掷地普颜色不变跪而拾之以归他日补缀旧纸复奏如初太祖乃悟卒用其人又有羣臣当迁官太祖素恶其人不与普坚以为请太祖怒曰朕固不为迁官卿若之何普曰刑以惩恶赏以酬功古今通道也且刑赏天下之刑赏非陛下之刑赏岂得以喜怒专之太祖怒甚起普亦随之太祖入宫普立于宫门久之不去竟得俞允太宗入弭德超之逸疑曹彬不轨属普再相为彬辨雪保证事状明白太宗叹曰朕听断不明几误国事即日窜逐德超遇彬如旧祖吉守郡为奸利事觉下狱案劾爰书未具郊礼将近太宗疾其贪墨遣中使谕旨执政曰郊赦可特勿贷祖吉普奏曰败官抵罪宜正刑辟然国家卜郊肆类对越天地告于神明奈何以吉而隳陛下赦令哉太宗善其言乃止真宗咸平初追封韩王二年诏以普配飨太祖庙庭普子承宗羽林大将军知潭郢二州皆有声承煦成州团练使弟固安易安易卒赠工部尚书固至都官郎中 【按宋史此下有安易附传其建议蜀地用钱事见食货略他所敷陈皆不足录今从删又吴延祚传改入贰臣】

△李崇矩

李崇矩字守则潞州上党人幼孤贫有至行乡里推服汉祖起晋阳次上党史宏肇时为先锋都校闻崇矩名召署亲吏宏肇总禁兵兼京城巡检多残杀军民左右引去惟崇矩事之益谨及宏肇被诛独得免周祖即位求宏肇亲旧于崇矩崇矩上其母弟福素主其家尽籍财产以付福周祖嘉之以隶世宗帐下显德初补供奉官从征高平转供备库副使太祖讨李筠命率禁军数千人屯河阳以所部攻大会砦拔之改潞潞南面行营前军都监与石守信高怀德罗彦瓌同破筠众于碾子谷及平泽潞先入城收图籍视府库因上言曰上党臣乡里也臣父尚藁葬愿护榱归京师许之会判三司张美出镇拜右监门卫大将军充三司使从征李重进还为宣徽北院使仍判三司干德二年代赵普拜枢密使五年加检校太傅时剑南初平禁军校吕翰聚众构乱军多亡命在其党中言者请诛其妻子太祖疑之以语崇矩崇矩曰叛亡之徒固当孥戮然案籍合诛者万余人太祖曰朕恐有被其驱率非本心者 【按史纬恐有被驱率非其

本心云云亦作崇矩语】乃令尽释之翰众闻之亦

稍稍自归未几翰败灭开宝初从征太原会班师会崇矩为后殿次常山被病帝命乘凉车还京师崇矩叩头言凉车乃至尊所御是速臣死尔

固辞得免时赵普为相崇矩以女妻普子承宗相厚善帝闻之不悦有郑伸者客崇矩门下性险诘无行崇矩待之渐薄伸因上书告崇矩阴事

崇矩不能自明太祖释不问出为镇国军节度赐伸同进士出身以为酸枣主簿六年崇矩入为左卫大将军太平兴国二年河防多决诏崇矩

乘传自陕至沧棣按行河堤出为邕贵浔宾横钦六州都巡检使未几移琼崖儋万四州都巡检使时黎贼扰动崇矩悉抵其洞穴抚慰以己财

遗其酋长众皆怀附代还拜右千牛卫上将军端拱元年卒年六十五赠太尉谥元靖崇矩性纯厚寡言尤重然诺史宏肇卒见其子孙必厚礼

之振其乏绝在岭海四五年恬不以炎荒婴虑旧涉海者多舫舟以俟便风或旬余或弥月崇矩往来皆一日而渡未尝留滞士卒僮仆随者皆

无恙子继昌

李继昌

李继昌

继昌字世长太祖尝畀弱弓轻矢教以射法荫补西头供奉官太祖欲选尚公主崇矩谦让不敢当继昌亦自言不愿崇矩亟为继昌聘妇

太祖闻之颇不悦开宝五年迁如京副使淳化中齐饥多盗命为登莱沂密七州都巡检使至道二年蜀贼平余党颇啸聚拜西京作坊使峡路

二十五州军捉贼招安都巡检使旋改兵马钤辖贼酋喻雷烧者久为民患以金带遗继昌继昌伪纳之贼懈不设备因掩杀之进西京左藏库

使咸平三年王均乱蜀与雷有终上官正石普同受诏进讨有终等失利徙继昌屯雁桥门进逼鱼桥门均脱走继昌入城严戒部下无扰民者

获妇女童幼置空寺中俟事平遣还其家继昌急领兵追贼至资州闻均梟首乃还以功领奖州刺史俄知青州入掌军头引见司景德二年将

幸澶州遣先赴河上给诸军铠甲契丹请和欲近臣充使乃令继昌与其使姚东之偕往俄与韩杞同至行在及契丹聘至又命至境首接伴契

丹是冬将朝陵寝以汝州近洛卫兵所驻命知州事兼兵马钤辖驾还召归出知延州兼鄜延路钤辖大中祥符元年以目疾求归京师入对劳

问再三少愈令枢密院传旨将真拜刺史复任延安继昌以疾表求休致改右骁卫大将军领郡如故其子遵勳尚万寿长公主主入对帝问继

昌强健能饮食拜连州刺史出知涇州表求两朝御书及谒拜诸陵皆许之天禧二年卒年七十二遣中使护榅以归录其子赞善大夫文晟为

殿中丞殿直文旦为侍禁继昌性谨厚士大夫乐与之游为治尚宽所至民怀之任峡路
时与上官正联职正残忍好杀尝有县胥护刍粮地远
后期正令斩之继昌徐为解贷焉郑伸者早死其母贫饿尝诣继昌乞丐家人竞前诟逐
继昌召见与白金百两时人称之

△王仁瞻

王仁瞻字子丰 【据东都事略补】 唐州方城人少倜傥不事生产委质刺史刘
词词迁永兴节度署为牙校将词卒遗表荐仁瞻材可
用太祖素知其名请于世宗以隶帐下太祖即位授武德使出知秦州改左飞龙使高继
冲请命以仁瞻为荆南巡检使继冲入朝命知军府干
德二年召赴阙擢为枢密副使兴师讨蜀命仁瞻为凤州路行营前军都监蜀平坐没入
生口财货杀降兵致蜀土扰乱责授右卫大将军五年
仁瞻廉得近臣戚里遣人市竹木秦陇闲联巨筏至京师所过关渡矫称制免算既至厚
结有司悉官市之倍收其直仁瞻密奏之帝怒以三司
副使范旻户部判官杜载开封府判官吕端属吏旻载具伏罔上为市竹木入官端为秦
府亲吏乔珽请托执事者贬旻为房州司户载均州司
户端商州司户判四方馆事程德元武德使刘知信翰林使杜彦圭日骑天武四厢都指
挥使赵延溥武德副使窦神兴左卫上将军张永德左
领军卫上将军祁廷训驸马都尉王承衍石保吉魏咸信并坐贩竹木入官责降罚奉是
岁车驾北巡命仁瞻为大内部署七年以政事与僚属
相矛盾争辩帝前仁瞻辞屈责授右卫大将军翌日改唐州防御使月给奉钱二十万仁
瞻之获罪也兵部郎中判句院宋琪及三司判官并降
秩先是仁瞻掌计司殆十年恣下吏为奸怙恩宠无敢发者前者发范旻等事中外益畏
其口会属吏陈恕等数人率以皦察不畏强御自任因
议本司事有不协者朝参日恕独出班持状奏其事帝诘之仁瞻屈伏帝怒甚故及于谴
而恕等悉奖擢琪与恕等联事始合谋同奏至帝前而
宋琪犹附会仁瞻故亦左降仁瞻既失权势因怏怏成疾数日卒年六十六后帝因言及
三司财赋谓宰相赵普等曰王仁瞻领邦计积年恣吏
为奸诸场院官皆隐没官钱以千万计朕悉令罢之命使分掌仁瞻再三言恐亏旧数朕
拒之未踰年旧获千缗者为一二万缗万缗者为六七
万缗其利数倍用度既足傥遇水旱即可免民租税仁瞻心知其非颇亦惭悸朕优容之
子昭雍为崇仪副使

△楚昭辅

楚昭辅字拱辰宋州宋城人 【隆平集作睢阳人】 少事华帅刘词词卒事太祖
隶麾下以才干称甚信任之陈桥师还昭宪太后在城

中太祖忧之遣昭辅问起居昭辅具言士众推戴之状太后乃安太祖即位为军器库使亲讨泽潞及征淮扬并以昭辅为京城巡检建隆四年权知扬州使江表还命钩校左藏库金帛数日而毕条对称旨开宝四年帝以其能心计拜左骁卫大将军权判三司太平兴国初拜枢密使三年加检校太傅从征太原加检校太尉俄以足疾请告帝亲临问以所居湫隘命有司广之昭辅虑侵民地固让不愿治帝嘉其意赐白金万两令别市第昭辅被疾家居近一岁始以石熙载代之昭辅不求解职上亦不忍罢会郊祀毕罢为骁骑卫上将军逾年卒年六十九赠侍中命中使护其丧归葬乡里无子录其兄子吉为供奉官敏为殿直昭辅性勤介人不敢干以私然颇吝嗇前后赐予万计悉聚而畜之尝引宾客故旧至藏中纵观且曰吾无汗马劳徒以际会风云吾为国家守尔后当献于上及罢机务悉以市善田宅时论鄙之初词卒昭辅来京师问卜于瞽者刘悟悟为筮卦曰汝遇贵人见奇表丰下者即汝主也宜谨事之汝当贵矣及见太祖状貌如悟言遂委质焉咸平三年录弟之子谅为借职大中祥符八年又录从孙鼎为右班殿直吉至内殿崇班吉子随敏子咸并进士及第随为太常博士咸屯田员外郎

△李处耘

李处耘字正元【据隆平集补】潞州上党人父肇仕后唐历军校至检校司徒从讨王都定州契丹来援力战死晋末处耘尚幼随兄处畴至京师遇张彦泽纵士卒剽略处耘年犹未冠独当里门射杀数十人众无敢当者里中赖之汉初折从阮帅府州召置门下委以军务从阮后历邓滑陕邠四节度处耘皆从之显德中从阮遗表称处耘可用会李继勋镇河阳诏署以右职继勋初不为礼因会将吏宴射处耘连四发中的继勋大奇之令升堂拜母稍委郡务俾掌河津处耘白继勋曰此津往来者惧有奸焉不可不察也居数月果得契丹谍者索之有与西川江南蜡书即遣处耘部送阙下太祖时领殿前亲军继勋罢镇世宗以处耘隶太祖帐下补都押衙会太祖出征驻军陈桥处耘见军中谋欲推戴遽白太宗与王彦升谋召马仁瑀李汉超等定议始入白太祖处耘临机决事谋无不中太祖嘉之授客省使兼枢密承旨右卫将军从平泽潞迁羽林大将军宣徽北院使讨李重进为行营兵马都监贼平以处耘知扬州大兵之后境内凋弊处耘勤于绥抚奏减城中居民屋税民皆悦服建隆三年诏归京师老幼遮道涕泣累日不得去拜宣徽南院使兼枢密副使朗州军乱诏慕容延钊率师讨之以处耘为都监入辞帝亲授方略令会兵汉上先是朝廷遣内酒坊副使卢怀忠使荆南觇势强弱使还具言可

取状遂命处耘图之处耘至襄州先遣合门使丁德裕假道荆南请具薪水给军令军中入江陵城有不由路及擅入民舍者斩师次荆门高继中遣其叔保寅及军校梁延嗣奉牛酒犒师且来覘也处耘待之有加谕令翌日先还延嗣大喜令报继冲以无虞荆门距江陵百余里是夕召保寅等饮宴延嗣之帐处耘密遣轻骑数千倍道前进继冲但俟保寅延嗣之还遽闻大军奄至即惶怖出迎遇处耘于江陵北十五里处耘揖继冲令待延嗣遂率亲兵先入登北门比继冲还则兵已分据城中荆人束手听命即调发江陵卒万余人并其师晨夜趋朗州又先遣别将分麾下及江陵兵趋岳州大破贼于三江口又遇贼帅张从富于澧江击败之逐北至敖山砦贼弃砦走俘获甚众处耘择所俘体肥者数十人令左右分啖之黥其少健者令先入朗州会暮宿砦中迟明延嗣大军继至黥者先入城言被擒者悉为大军所啖朗人大惧纵火焚城而溃会朗帅周保权年尚幼为其将汪端劫匿于江南岸僧寺中处耘遣麾下将田守奇帅师渡江获之遂入潭州尽得荆湖之地初师至襄州衢肆鬻饼者率减少倍取军人之直处耘捕得其尤者二人送延嗣延嗣怒不受往复三四处耘遂命斩于市以徇延嗣所部小校司义舍于荆州客将王氏家使酒凶恣王氏愬于处耘处耘召义阿责义又譖处耘于延嗣至白湖处耘望见军人入民舍良久舍中人大呼求救遣捕之即延嗣围人也乃鞭其背延嗣怒斩之由是大不协更相论奏朝议以延嗣宿将贯其过谪处耘为淄州刺史处耘惧不敢自明在州数年干德四年卒年四十七赠宣德军节度检校太傅赐地葬于洛阳徧桥村处耘有度量善谈当世之务居常以功名为己任荆湖之役处耘以近臣护军自以受太祖之遇思有以报故临事专制不顾羣议遂至于贬后太祖颇追念之及开宝中为太宗纳其次女为妃即明德皇后也子继隆继和自有传继恂官至洛苑使顺州刺史继恂子昭逊为供备库使处畴官至作坊使子继凝

李继隆

李继和

李继隆

继隆字霸图幼养于伯父处畴及长以父荫补供奉官处耘贬淄州继隆亦除籍会长春节与其母入贡复旧官时权臣与处耘有宿憾者忌继隆有才继隆因落魄不治产以游猎为娱干德中平蜀选为果阆监军年方弱冠母忧其未更事将辅以处耘左右继隆曰是行儿自有立岂须此辈愿不以为虑母慰而遣之代还夜涉栈道雨滑与马偕坠绝涧深十余丈絀于

大树骑卒驰数十里外取火引绳以出之会征江南领
雄武卒三百戍邵州止给刀盾蛮贼数千阵长沙南截其道继隆率众力战贼遁去手足
俱中毒矢得良药而愈部卒死伤者三之一太祖闻其
勇敢器重之又与石曦率兵袭袁州破桃田砦追贼二十里入潭富砦焚其梯冲刳积复
从李符督荆湖漕运给征南诸军吴人以王师不便水
战多出舟师继饷道继隆屡与鬪粮悉善达日驰四五百里常令往来觐候一日中途遇
虎射杀之尝获吴将部送赴阙至项县而病斩其首以
献太祖益嘉之与吴人战流矢中额以所冠胄坚厚得不伤太祖察其才且追念其父欲
拔用之谓曰升州平可持捷书来当厚赏汝时内侍使
军中者十数辈皆伺城陷献捷会有机事当入奏皆不愿行而继隆独请赴阙太宗见其
来时城尚未下甚讶之继隆度金陵破在旦夕因言在
途遇大风晦暝城破之兆也翌日捷奏至太祖召谓曰如汝所料矣吴将卢绛聚众万余
攻掠州县命继隆招来之江南平录功迁庄宅副使从
幸西洛改御营前后巡检使从征太原为四面提举都监与李汉琼领梯冲地道攻城西
面机石过其旁从卒仆死继隆督战无怠讨幽州与郭
守文领先锋破契丹数千众及围范阳又与守文为先锋大败其众于湖翟河南后为镇
州都监契丹侵边与崔翰诸将御之初太宗授以阵图
及临阵有不便众以帝命不可违继隆曰事有应变安可预定设获违诏之罪请独当也
即从宜而行败之于徐河四年护三交屯兵与潘美出
征代北破灵邱县尽略其人以归改定州驻泊都监李继迁叛命继隆与田仁朗王侁率
兵击之出银州北破悉利诸族追奔数十里斩获尤多
又出开光谷西杏子坪破布策布藏族斩其副首领玛尔默节五十七人降音藏族首领
托卜巴军等三千余众复破默邵朗锡斡诸族及浊轮
川东兔头川西生擒七十八人斩首五十九级俘获数千计引师至监城乌页允页四族
来降惟嘉且罗尼十四族怙其众不下乃与尹宪袭击
之夷其帐千余俘斩七千余级俄改领环州团练使又护高阳关屯兵从曹彬征幽州率
兵助先锋薛继昭破其众数千于固安南下固安新城
进克涿州矢中左股血流至踵获契丹贵臣一人彬欲上其功继隆止之俄而傅潜米信
军败独继隆振旅而还即命继隆知定州寻诏分屯诸
军继隆令书吏尽录其诏旬余有败卒集城下不知所向继隆按诏给券俾各持诣所部
太宗益嘉其有谋三年迁侍卫马军都虞候领武州防
御使契丹大入边出为沧州都部署刘廷让与敌战君子馆先约继隆以精卒后殿缓急
为援既而敌围廷让数重继隆引麾下兵退保乐寿延
让力不敌全军陷没裁以单骑遁免帝怒追继隆赴阙令中书问状既而得释逾年加领

本州岛观察使端拱初制授侍卫马军都指挥使领保顺节度出为定州都部署初朝议有寇至令坚壁清野勿与战一日契丹骤至攻蒲城至唐河护军袁继忠慷慨请出师中黄门林延寿等五人以诏书止之继隆曰阃外之事将帅得专乃与继忠出兵战数合击走之二年送刍粟入威虜军契丹将率骑八万邀战继隆所领步骑裁一万先命千人设伏城北十里而与尹继伦列阵以待敌【按续通鉴契丹将耶律休恪率精骑数万邀战时都巡检使尹继伦适领兵徼巡遇之夜潜兵蹶其后契丹军去大军四五里继隆方阵于前以待继伦从后击败之据此则继伦乃先出师从后逆击非与继隆并列阵以待也与传互异】众方食继伦出其不意击走之继隆追奔过徐河俘获甚众尝有诏废威虜军继隆言梁门为北面保障不可废遂城守如故讫为要地淳化初帝遣使至定州密谕继隆若契丹复入寇朕当亲讨继隆奏以疆事当责将帅臣虽弩弱誓死为期是岁契丹不入边议遂止四年召还太宗面奖之改领静难军节度复遣还屯所时夏州赵保忠与继迁连谋朝廷患之又绥州牙校高文岷举城效顺河外蕃汉大扰以继隆为河西行营都部署尚食使尹继隆为都监以讨之既而继迁遁去擒保忠以献初裨将侯延广监军秦翰议请诛保忠及出兵追之继隆曰保忠机上肉尔当请于天子今继迁遁去千里穷磧艰于转饷宜养威持重未易轻举延广等服其言会密诏废夏州隳其城继隆命秦翰与弟继和及高继勋同入奏以为朔方古镇贼所窥觐之地存之可依以破贼并请于银夏两州南界山中增置保戍以扼其冲且为内属藩部之障蔽而断贼粮运皆不报至道二年白守宗守荣马绍忠等送粮灵州为继迁所邀败于洛浦河帝闻之怒亟命继隆为灵环十州都部署是秋五路讨继迁以继隆出环州取东关镇由赤柾苦井路赴之继隆以所出道回远乏水请由橐駝路径趋贼之巢穴且遣继和入奏太宗召诘之知其必败因遣周莹赍手诏切责督其进军赤柾莹至继隆以便宜发兵不俟报与丁罕行十余日果不见敌而还诸将失期士卒困乏继隆素刚因惭愤肆杀戮乃奏转运使陈绛梁鼎军储不继并坐削秩三年继迁以蕃部从顺者众遣其军主史虬遇率兵屯橐駝口西北双雉以遏绝之执仓族蕃官虬遇来告继隆遣刘承蕴田敏会虬遇讨之斩首数千级获牛马橐駝万计先是受诏送军粮赴灵州必由旱海路自冬至春而刍粟始集继隆请由古原州蔚茹河路便众议不一继隆固执论其事太宗许焉遂率师以进壁古原州令如京使胡守澄城之是为镇戎军真宗即位改领镇安军节度检校太傅踰月召还加同中书门下平章事解兵柄归本镇咸平二年丁内

艰起复会秋潦暴集蔡水坏岸继隆乘危督士卒补塞
自辰迄午冲波稍息四年加检校太师王师失利于望都继隆累表求诣阙面陈边事因
乞自效俄召还延见询访因言丑类侵扰盖亦常事愿
委将帅讨伐不烦亲征真宗慰谕之改山南东道节度判许州景德初契丹大入寇踰魏
郡至河上真宗幸澶渊继隆表求扈从命为驾前东西
排阵使先赴澶州陈师于北城外毁车为营敌数万骑急攻继隆与石保吉率众御之追
奔数里及帝至幸北门观兵召问慰劳见其所部整肃
叹赏久之二年还京加开府仪同三司食邑实封诏始下会疾作帝亲临问继和时为并
代钤辖驿召省视卒年五十六赠中书令谥忠武以其
子昭庆为洛苑使从子昭 【阙】 昭逊并为内殿崇班录其门下二十余人干兴初诏
与李沆王旦同配享真宗庙庭继隆出贵胄感慨自树
深沉有城府真宗以元舅之亲不欲烦以军旅优游近藩恩礼甚笃然多智用能谦谨保
身明德寝疾欲面见之帝促其往继隆但诣万安宫门
拜笺终不入又尝命诸王诣第候谒继隆不设汤茗第假王府从行茶炉烹饮焉昭庆改
名昭亮见外戚传

李继和

继和字周叔少以荫补供奉官三迁洛苑使淳化后继隆多在边任继和常从行友
爱尤至每令入奏机事继隆罢兵柄手录唐李绩遗戒
授继和曰吾门不坠者在尔矣初继隆之请城镇戎军也朝廷不果于行继和面奏曰平
凉旧地山川险阻旁扼夷落为中华襟带城之为便太
宗乃许焉后复不守咸平中继和又以为言乃命版筑以继和知其军兼原渭仪都巡检
使城毕加领平州刺史建议募贫民及弓箭手垦田积
粟又屡请益兵朝议未许帝曰苟缓急部署不为济师则或至失援矣命继和兼泾原仪
渭钤辖时继迁未弭命张齐贤梁颢经略因访继和边
事继和言镇戎军为泾原仪渭北面扞蔽又为环庆原渭仪秦熟户所依正当回鹘西凉
六谷吐蕃密布戡裕玛藏朗嘉诸族之路自置军已来
克张边备诚能常用步骑五千守之泾原渭州苟有缓急会于此军并力战守则贼必不
敢过故置此城以扼要路议者以调发刍粮扰民为言
此军所费止出四州地里非遥输送甚易又刘琮方兴屯田屯田若成积中有备则四州
税物亦不须得灵州孤垒戍守最苦望比他州尤加存
恤苟选择英杰使守灵武高官厚赏不吝先与可保必胜之功朝廷比禁青盐甚为允愜
蕃戎所赖止在青盐禁之则彼自困矣五年继和领兵
杀威密 【旧作卫理今改正】 族于天麻川自是羸山外诸族皆恐惧内附愿于要害
处置族帐砦栅以为戍守继和因请移泾原部署于镇

戎以壮军势又请开道环延为应援真宗以其精心戎事甚嘉之戎人伺警巡弛备一夕塞长壕越古长城抵城下继和与都监史重贵出兵御之贼据险再突城隍列阵接战重贵中重创败走之大获甲骑有诏嘉奖别出良药缣帛牢酒以赐继和习武艺好谈方略颇知书所至干治然性刚忍御下少恩部兵终日擐甲常如寇至及较阅之际仗罚过当人多怨焉真宗屡加勛励且为覆护之尝上言保捷军新到屯所多亡命者请优赐缗钱苟有亡逸即按军法旧制凡赐军中虽缘奏请者亦以特旨给之帝以继和峻酷欲军士感其惠特令以所奏着诏书中而加赐之且以计情定罪自有常制不许其请以边防之地虑人不为用遣张志言代还既即路军中皆恐其复来六年又出为并代钤辖将行请对欲领兵去按度边垒帝曰河东岩险兵甲甚众贼若入寇但邀其归路自可致胜不必率兵而往也景德初契丹侵边徙北平砦车驾驻澶渊继和受诏与魏能张凝领兵赴赵州蹙敌后契丹请和边民犹未宁又命副将张凝为缘边巡检安抚使事平复还并代时朝廷每诏书约束边事或有当行极断之语官吏不详深意即处大辟继和言其事乃诏自今有云重断极断处斩决配之类悉须裁奏先是继隆卒继和耻以遗奏得官久之迁西上合门使未几擢殿前都虞候领端州防御使大中祥符元年卒年四十六赠镇国军节度遣诸王率宗室素服赴吊二子早卒帝以其族盛大诸侄皆幼令三班选使臣为主家事弟继恂至洛苑使顺州刺史赠左神武大将军子昭逊为供备库使

钦定续通志卷三百

●钦定续通志卷三百一 列传一百一

列传

宋 【五】

○宋五

曹彬【璨 玮 琮】 潘美【李超】

曹彬

潘美

△曹彬

曹彬字国华真定灵寿人父芸成德军兵马使彬始生周岁父母以百玩之具罗于席观其所耶彬左手持干戈右手持俎豆斯须取一印他无所视人皆异之及长气质淳厚汉干佑中为成德军牙将节帅武行德见其端懿指谓左右曰此远大器非常流也周太祖贵妃张氏彬从母也周祖受禅召彬归京师隶世宗帐下从镇澶渊补供奉官擢河中都监蒲帅王仁镐

以彬帝戚尤加礼遇彬执礼益恭公府燕集端简终日未尝旁视仁镐谓从事曰老夫自谓夙夜匪懈及见监军矜严始觉己之散率也显德五年使吴越致命讫即还私覲之礼一无所受吴越人以轻舟追遗之至于数四彬犹不受既而曰吾终拒之是近名也遂受而籍之以归悉上送官世宗强还之彬始拜赐悉以分遗亲旧而不留一钱出为晋州兵马都监一日与主帅暨宾从环坐于野会邻道守将走价驰书来诣使者素不识彬潜问人曰孰为曹监军有指彬以示之使人以为给己笑曰岂有国戚近臣而衣弋绋袍坐素胡迹者乎审视之方信迂引进使初太祖典禁旅彬中立不倚非公事未尝造门羣居燕会亦所罕预由是器重焉建隆二年自平阳归召谓曰我畴昔常欲亲汝汝何故疏我彬顿首谢曰臣为周室近亲复忝内职靖恭守位犹恐获过安敢妄有父结迁客省使与王全斌郭运领骑兵攻河东平乐县降其将王超侯霸荣等既而贼将改进率兵来援三战皆贼之遂建平乐为平晋军干德初改左神武将军时初克辽州河东召契丹兵六万骑来攻平晋彬与李继勋等大败之于城下俄兼枢密承旨二年冬伐蜀诏以刘光毅为归州行营前军副部署彬为都监峡中郡县悉下诸将咸欲屠城彬独申令戢下所至悦服帝闻降诏褒之俄而全师雄等构乱拥众十万彬复与光毅破之于新繁卒平蜀乱橐中惟图书衣衾而已及还以彬清介廉谨授宣徽南院使义成军节度使彬入见辞曰征西将士俱得罪臣独受赏恐无以示劝帝曰卿有茂功又不矜伐设有微累仁贍等岂惜言哉惩劝国之常典可无让六年遣李继勋党建率师征太原命为前军都监战洞过河斩获甚众开宝二年议亲征太原复命为前军都监率兵先往次团柏谷降贼将陈廷山又战城南薄于濠桥夺马千余及太祖至则已分砦四面而自主其北七年将伐江南九月奉诏与李汉琼田钦祚先赴荆南发战舰潘美帅步兵继进又诏以彬为升州西南路行营马步军战棹都部署分兵由荆南顺流而东破峡口砦进克池州连克当涂芜湖二县驻军采石矶十一月作浮梁跨大江以济师大破其军于白鹭洲又破之于新林港进次秦淮江南水陆十余万陈于城下大败之浮梁成吴人出兵来御自三月至八月连破之进克润州金陵受围至是凡三时吴人樵采路绝频经败衄李煜危急遣其臣徐铉奉表诣阙乞缓师帝不之省先是大军列三砦美居守北偏图其形势来上太祖指北砦谓使者曰吴人必夜出兵来寇尔亟去令曹彬速成深沟以自固无堕其计中既成吴兵果夜来袭美率所部依新沟拒之吴人大败奏至帝笑曰果如此长围中彬每缓师冀煜归服又使人谕之曰事势如此所惜者一城生聚

若能归命策之上也城垂克彬忽称疾不视事诸将来问疾彬曰余疾非药石所能愈惟须诸公诚心自誓克城之日不妄杀一人则自愈矣诸将许诺共焚香为誓明日稍愈又明日城陷煜诣军门请罪待以宾礼请煜入宫治装彬数骑待宫门外煜之君臣卒赖保全自出师至凯旋士众畏服无轻肆者及入见刺称奉敕江南干事回其谦恭不伐如此初彬之总师也太祖谓曰俟克李煜当以卿为使相副帅潘美预以为贺彬曰不然夫是行也仗天威遵庙谟乃能成事吾何功哉况使相极品乎美曰何谓也彬曰太原未平尔及还献俘帝谓曰本授卿使相然刘继元未下姑少待之美窃视彬微笑帝觉遽诘所以美以实对帝亦大笑【按王曾笔录太祖遣彬下江南以平定日授以相印泊凯旋绝无前命因曲宴彬乃从容陈叙及之史称彬谦恭不伐未必邀荣使相且官位非臣下所宜自请当以史为正】乃赐彬钱二十万彬退曰人生何必使相好官亦不过多得钱尔未几拜枢密使检校太尉忠武军节度使【按宋宰辅编年录云枢密领节度自彬始赏江南之功也】太宗即位君同平章事【按宋宰辅编年录云彬初以节度使为枢使不罢旄钺至是加同平章事仍充枢密使即罢旄钺】议征太原召彬问曰周世宗及太祖皆亲征何以不能克彬曰世宗时史彦超败于石岭关人情惊扰故班师太祖顿兵甘草地会岁暑雨军士多疾因是中止太宗曰今吾欲北征何如彬曰国家兵甲精锐翦太原之孙垒如摧枯拉朽尔太宗意遂决太平兴国三年进检校太师从征太原加兼侍中八年为弭德超所诬罢为天平军节度使【按宋史本传作太平军考宋史地理志天平军本郢州无太平军今改】旬余帝悟其潜进封鲁国公待之愈厚雍熙三年诏彬与潘美等北伐分路进讨三月败契丹于固安破涿州大破其援师于城南四月又与米信破之于新城及战于岐沟关诸军败绩退屯易州临易水而营帝闻亟令分屯边城追诸将归阙先是贺令图等言于帝曰契丹主少母后专政宠幸用事请乘其衅以取幽蓟遂遣彬与崔彦进米信自雄州田重进趋飞狐潘美出鴈门约期齐举将发帝谓之曰潘美之师但先趋云应卿等以十万众声言取幽州且持重缓行不得贪利彼闻大兵至必悉众救范阳不暇援山后矣既而美先下寰朔云应等州重进又取飞狐灵邱蔚州多得山后要害地彬亦连下州县每奏至帝已讶彬进军之速及彬次涿州旬日食尽因退师雄州以援饷帝闻之曰岂有敌人在前反退军以援刍粟失策之甚也亟遣使止彬勿前急引师缘白沟河与米信军会按兵养锐以张西师之势俟美等尽略山后地会重进之师而束合势以取幽州时彬部下诸将闻

美及重进累建功而已握重兵不能有所攻取议蜂起彬不得已复裹粮往攻涿州契丹大众当前时方炎暑军士乏困粮且尽彬退军无复行伍遂为所蹶而败诏彬等至阙鞫于尚书省令翰林学士贾黄中等杂治之彬等具伏违诏失律罪责授右骁卫上将军彦进右武卫上将军信右屯卫上将军余以次黜四年起彬为侍中武宁军节度使淳化五年徙平卢军节度使真宗即位复检校太师同平章事数月召拜枢密使【按长编云真宗即位复平章事召入为枢密使兼侍中罢旄钺谓之曰宥司要领允重必素有名望端亮谨厚处之乃可镇静而责成彬以耆旧冠枢衡之首】咸平二年被疾帝趋驾临问手为和药仍赐白金万两问以后事对曰臣无事可言臣二子材器可取臣若内举皆堪为将帝问其优劣对曰璨不如玮六月薨年六十九帝临哭之恸对辅臣语及彬必流涕赠中书令追封济阳郡王谥武惠且赠其妻高氏韩国夫人官其亲族门客亲校十余人八月诏彬与赵普配飨太祖庙庭彬性仁敬和厚在朝廷未尝忤旨亦未尝言人过失伐二国秋毫无所取位兼将相不以等威自异遇士夫于涂必引车避之不名下吏每白事必冠而后见居官俸入给宗族无余积平蜀回太祖从容问官吏善否对曰军政之外非臣所闻也固问之惟荐随军转运使沈伦廉谨可任为帅知徐州日有吏犯罪既具案逾年而后杖之人莫知其故彬曰吾闻此人新娶妇若杖之其舅姑必以妇为不利而朝夕笞詈之使不能自存吾故缓其事然法亦未尝屈焉北征之失律也赵昌言表请行军法及昌言自延安还被劾不得入见彬在右府为请于上乃许朝谒子璨瑒玮玳玘珣琮瑒娶秦王女兴平郡主至昭宣使玳左藏库副使玘尚书虞部员外郎珣东上合门使琮西上合门副使玘之女即慈圣光献皇后也芸累赠魏王彬韩王玘吴王谥曰安僖玘之子侑傅侑见外戚传傅后兄也荣州刺史谥恭怀

曹璨

曹玮

曹琮

曹璨

璨字韬光性沈毅善射以荫补供奉官常从彬征讨得与计议彬以为类己特钟爱焉迁宫苑副使累擢为镇州行营钤辖徙绥银夏麟府等州钤辖契丹入寇屡战有功诸将多欲穷追璨虑有伏力止之至道初迁四方馆使知灵州徙河西钤辖改引进使范廷召将兵出塞命璨为之副丁外艰起复为鄜延路副都部署拜赵州刺史领武州团练使充麟府浊轮副部署

出蕃兵邀继迁俘馘甚众入为枢密都承旨改领亳州
团练使契丹入寇命为镇定高阳关三路行营都钤辖领康州防御使再知定州明年由
天德军节度入为东京旧城都巡检使改镇彰德转殿
前都指挥使又改保静武宁忠武等军节度使 【按隆平集载璨历官殿前都指挥使宋
史失载今据增】 在禁卫十余年未尝忤旨天禧三
年以足疾授河阳节度使同平章事卒年七十赠中书令谥武懿璨起贵胄以孝谨称能
自奋厉以世其家习知韬略虽轻财不逮其父而敬人
和厚亦有父风子仪官至耀州观察使

曹玮

玮字宝臣父彬历武宁天平军节度使皆以玮为牙内都虞候补西头供奉官合门
祗候沈勇有谋通春秋三传于左氏尤深李继迁叛诸
将数出无功太宗问彬谁可将者彬曰臣少子玮可任即召见以本官同知渭州时年十
九真宗即位改内殿崇班知渭州驭军严明有部分赏
罚立决犯令者无所贷善用闲周知虏动静举措如老将彬卒请持丧不允徙知镇戎军
李继迁虐用其国人玮知其下多怨即移书诸部谕以
朝廷恩信抚养无所闲以动诸羌由是康诺尔等族请内附继迁略西蕃还玮邀击于石
门川俘获甚众以镇戎军据平地便于骑战非中国之
利请自陇山以东循古长城堑以为限又以弓箭手皆土人习障塞蹊隧晓羌语耐寒苦
官未尝与兵械资粮而每战辄使先拒贼恐无以责死
力遂给以境内闲田春秋耕斂州为出兵护作而蠲其租继迁死其子德明请命于朝玮
言继迁擅河南地二十年兵不解甲使中国有西顾之忧今国危子弱不即捕灭后更强盛不可制愿假臣精兵出其不意禽德明送阙下复河
西为郡县此其时也帝方以恩致德明不报既而西延
嘉密阿日威数大族请拔帐自归诸将犹豫不敢应玮曰德明野心不急折其翮后必扬
去即日将骑兵薄天都山援降者内徙德明不敢拒迁
西上合门使为环庆路兵马都钤辖兼知汾州 【按东都事畧作汾州】 帝以玮习知
河北事乃以为真定路都钤辖领高州刺史玮常上泾
原环庆两道图至是帝以示左右曰华夷山川城郭险固出入战守之要举在是矣因敕
别绘二图以一留枢密院一付本道俾诸将按图计事
及复为泾原路都钤辖兼知渭州与秦翰破章默特族于武延州 【按东都事畧作武延
咸泊川】 分兵灭巴藏于平凉于是陇山诸族皆来
献地玮筑堡山外为笼竿城募土兵守之曰异时秦渭有警此必争之地也踰年上表还
州事愿专督军旅帝不欲遽更守臣以密诏敦谕之改
引进使英州团练使复知秦州兼泾原仪渭镇戎缘边安抚使时嘉勒斯赉强盛立遵佐

之立遵乃上书求号赞布玮言赞布可汗号也立遵一言得之何以处嘉勒斯賚邪且复有求渐不可制乃以立遵为保顺军节度使恩如斯托特都西羌将举事必先定约束号为立文法嘉勒斯賚使其舅桑杨丹与斯敦立文法于离王族谋内寇玮阴结斯敦解宝带予之斯敦感激求自效闲谓玮曰吾父何所使欲吾首犹可断以献玮曰我知桑扬丹时至汝帐下汝能为我取桑扬丹首乎斯敦愕然应之后十余日果断其首来因献南市地南市者秦渭之阨也玮城之表斯敦为顺州刺史初张佶知秦州置四门砦侵夺羌地时羌人多叛去畏得罪不敢出玮招出之令入马赎罪还故地至者数千人每送马六十匹给米一端筑弓门治方迹穰静戎三阳定西伏羌永宁小洛门威远十砦浚濠三百八十里皆役属羌厢兵工费不出民伏羌首领斯结博哩默隆私立文法玮潜兵灭其帐其年嘉勒斯賚率众数万人入寇玮迎战三都谷追奔三十里斩首千余级获马牛杂畜器使三万余迁客省使康州防御使玛尔布擦勒立栅野吴谷玮选募神武军二百人斩栅获生口孳畜甚众宗噶尔大首领甘遵治兵于润努尔川玮遣闲杀遵及破岳矩戡所立文法于楚玛尔城既而河州洮兰安江摩敦邈川当布诸城皆纳质为熟户时玮作堑抵灿罗咙灿罗咙西方要害地也先是玮遣小吏杨知进护赐物通甘州可汗王还过宗噶尔界立遵邀知进语曰秦州大人直以兵入灿罗咙来幸为我言愿罢兵岁入贡约蕃汉为一家因使种人达宝十琳从知进来献马自是嘉勒斯賚势蹙退保碛中不出秦人请刻石纪功有诏褒之天禧三年德明寇柔远砦都巡检杨承吉与战不利以玮为华州观察使鄜延路副都总管环庆秦等州缘边巡检安抚使威齐古密达木等族闻玮至归附者甚众拜宣徽北院使镇国军节度观察留后签书枢密院事宰相丁谓逐寇准恶玮不附己指为准党除南院使环庆路都总管安抚使干兴初谪左卫大将军容州观察使知莱州玮以宿将为谓所忌即日上道从弱卒十余人不以弓鞬矢箠自随谓败复华州观察使知青州徙天雄军以彰化军节度观察留后知永兴军拜昭武军节度使知天雄军以疾守河阳数月为真定府定州都总管改彰武军节度使卒赠侍中谥武穆玮用士得其死力平居甚闲暇及师出多奇计出入神速不可测一日张乐饮僚吏中坐失玮所在明日徐出视事而贼首已掷庭下矣尝称疾加砭艾卧阁内不出会贼至玮奋起裹创被甲跨马贼望见皆遁去将兵几四十年未尝少失利嘉勒斯賚闻玮名即望玮所在东向合手加颡契丹使过天雄部勒其下曰曹公在此毋纵骑驰驱也真宗慎兵事凡边事必手诏诘难至十数反而玮守初议卒无以夺

后虽他将论边事者往往密付玮处之渭州有告戍卒叛入夏国者玮方对客奕棋遽曰吾使之行也夏人闻之即斩叛者投其首境上羌杀边民入羊马赎罪玮下令曰羌自相犯从其俗犯边民者论如律自是无敢犯环庆属羌田多为边人所市致单弱不能自存因没彼中玮尽令还其故田后有犯者迁其家内地所募弓箭手使驰射较强弱胜者与田二顷再更秋获课市一马马必胜甲然后官籍之则加五千亩至三百人以上团为一指挥要害处为筑堡使自墾其地为方田环之立马社一马死众出钱市马降者既多因制属羌百帐以上其首领为本族军主次为指挥使又其次为副指挥使不及百帐为本族指挥使其蕃落将校止于本军叙进以其习知羌情兴地利不可徙他军也开边濠率令深广丈五尺山险不可墾者因其峭绝治之使足以限敌后皆以为法天雄卒有犯盗者众谓狱具必杀之玮乃处以常法人或以为疑玮笑曰临边对敌斩不用命者所以令众吾非好杀也治内郡安事此乎初守边时山东知名士贾同造玮客外舍玮欲按边即同舍邀与俱同问从兵安在曰已具既出就骑见甲士三千环列初不闻人马声同归语人曰玮殆名将也玮为将不如其父宽然自为一家嘉佑八年诏配飨仁宗庙庭【按宋宰辅编年录云本朝曹武惠配飨太祖武穆配享仁宗韩忠献配飨英宗宗文定配飨徽宗父子配飨自昔所无也】

曹琮

琮字宝章兄翊娶秦王女兴平郡主琮幼时从主入禁中太宗置膝上拊其背曰曹氏有功我家此亦佳儿也及彬领镇海军节度使补衙内都指挥使仁宗册琮兄女为后礼皆琮主办除卫州团练使琮因奏曰陛下方以至公属天下臣既备后族不宜冒恩泽乱朝廷法族人敢因缘请托愿致于理时论称之出知邠州兼知秦州度羨财为仓廩大积谷古渭冀城生羌屡入钞边琮怀以恩信击平酺酒犒之多请内属宝元初会元昊反拜同州观察使复知秦州上攻守御三策久之兼同管句泾原路兵马定国军节度观察留后刘平石元孙败关辅震恐琮请籍民为义军以张兵势于是料简乡弓手数万人贼寇山外还天都劫仪秦属户琮发骑士设伏以待之贼遂引去琮欲诱吐蕃犄角图贼得西川旧贾使谕意而沙州镇王子遣使奉书曰我本唐甥天子实吾舅也自党项破甘凉遂与汉隔今愿率首领为朝廷击贼帝善琮策改陕西副都总管经略安抚招讨副使拜步军副都指挥使与夏竦屯鄜州还为马军副都指挥使以疾卒帝临奠后并出临丧就第成服赠安化军节度使兼侍中谥忠恪琮小心谨畏善赞谒御军整严死时家无余貲子佺皇城使嘉州防御使佺

子诗尚鲁国大长公主

△潘美

潘美字仲询大名人父璘以军校戍常山美少倜傥隶府中典谒尝语其里人王密曰汉代将终凶臣肆虐四海有改卜之兆大丈夫不以此时立功名取富贵碌碌与万物共尽可羞也会周世宗为开封府尹美以中涓事世宗及即位补供奉官高平之战美以功迁西上合门副使出监陕州军改引进使世宗将用师陇蜀命护永兴屯兵经度西事先是太祖遇美素厚及即位命美先往见执政谕旨中外陕帅袁彦凶悍信任羣小嗜杀黷货且缮甲兵太祖虑其为变遣美监其军以图之美单骑往谕以天命既归宜修臣职彦遂入朝帝喜曰潘美不杀袁彦能令来覲成我志矣李重进起兵太祖亲征命石守信为招讨使美为行营都监以副之扬州平留为巡检以任镇抚以功授秦州团练使时湖南叛将汪端既平人心未宁乃授美潭州防御使岭南刘鋹数寇桂阳江华美击走之溪洞蛮獠自唐以来不时侵略颇为民患美穷其巢穴多所杀获余加慰抚夷落遂定干德二年又从兵马都监丁德裕等率兵克郴州开宝三年征岭南以美为行营诸军都部署朗州团练使尹崇珂副之进克富川鋹遣将率众万余来援遇战大破之遂克贺州又下昭桂连三州西江诸州以次降美以功移南面都部署进次韶州韶广之北门也贼众十余万聚焉美挥兵进乘之韶州遂拔斩获数万计鋹穷蹙遣其臣王珪诣军门求通好又遣其左仆射萧灌中书舍人卓惟休奉表乞降美因谕以帝意以为彼能战则与之战不能战则劝之守不能守则谕之降不能降则死不能死则亡非此五者他不得受美即令殿直冉彦袞部送灌等赴阙鋹复遣其弟保兴率众拒战美即率厉士卒倍道趋栅头距广州百二十里鋹兵十五万依山谷坚壁以待美因筑垒休士与诸将计曰彼编竹木为栅若攻之以火彼必溃乱因以锐师夹击之万全策也遂分遣丁夫数千人人持二炬闲道造其栅及夜万炬俱发会天大风火势甚炽鋹众惊扰来犯美挥兵急击之鋹众大败斩数万计长驱至广州鋹尽焚其府库遂克之擒鋹送京师露布以闻即日命美与尹崇珂同知广州兼市舶使拜山南东道节度五年兼岭南道转运使土豪周思琼聚众负海为乱美讨平之岭表遂安八年议征江南遣美与刘遇等率兵先赴江陵既命美为升州道行营都监与曹彬偕往进次秦淮时舟楫未具美下令曰美受诏提骁果数万人期于必胜岂限此一衣带水而不径度乎遂麾以涉大军随之吴师大败及采石矾浮梁成吴人以战舰二十余万鸣鼓泝流来趋利美麾兵奋击夺其战舰擒其将郑宾等

七人又破其城南水砦分舟师守之奏至太祖遣使令亟徙置战棹以防他变美闻诏即徙军是夜吴人果来攻砦不能克进薄金陵江南水陆十万陈于城下美率兵袭击大败之李煜危甚遣徐铉来乞缓师帝不之省仍诏诸将促令归附煜迁延未能决夜遣兵数千持炬鼓噪来拒美率精锐以短兵接战因与大将曹彬率士晨夜攻城百道俱进金陵平以功拜宣徽北院使命副党进攻太原战于汾上破之且多擒获太平兴国初改南院使三年加开府仪同三司四年命将征太原美为北路都招讨判太原行府事部分诸将进讨并州遂平继征范阳以美知幽州行府事及班师命兼三交都部署留屯以捍北边三交西北三百里地名固军其地险阻为北边咽喉美潜师袭之遂据有其地因积粟屯兵以守之自是北边以宁美尝巡抚至代州既秣马蓐食俄而契丹兵万骑来攻近塞美誓众衔枚奋击大破之封代国公八年改忠武军节度进封韩国公雍熙三年诏美及曹彬崔彦进等北伐美独拔寰朔云应等州诏内徙其民会契丹兵奄至战于陈家谷口不利骁将杨业死之美坐削秩三等责授检校太保明年复检校太师知真定府未几改都部署判并州加同平章事数月卒年六十七赠中书令谥武惠咸平二年配飨太宗庙庭子惟德至宫苑使惟固西上合门使惟正西京作坊使惟清崇仪使惟熙娶秦王女平州刺史女即章怀皇后 【按宋史本传云惟熙女即章怀皇后也惟熙二字重出系误今删】 美后追封郑王以章怀故也惟吉美从子累资为天雄军驻泊都监虽连戚里能以礼法自饬扬历中外人咸称其勤敏云

李超

李超

李超者冀州信都人为禁卒常从潘美军中主刑刀美好乘怒杀人超每潜缓之美怒解辄得释以是全者甚众人谓其有阴德子浚字德渊中进士累擢秘书知康州景德初以虞部员外郎兼侍御史知杂事从幸澶渊师还命与陈尧咨安抚河北踰年判吏部铨浚居宪府未再岁帝宠待之擢枢密直学士宰相王旦言浚虽有剴别才然骤历清切时望未允真宗曰朕业已许之矣寻知开封能检察隐微京师称之出知秦州暴疾卒浚与李宗谔同岁同月后一日生其卒也亦后一日众以为异

钦定续通志卷三百一

●钦定续通志卷三百二 列传一百二

列传

宋 【六】

○宋六

张美 郭守文 尹崇珂 刘廷让 袁继忠 崔彦进 皇甫继
明 张琼 曹翰 杨信【嗣赞】 党进
李汉琼 刘遇 李怀忠 米信 田重进 刘廷翰 崔翰

张美

郭守文

尹崇珂

刘廷让

袁继忠

崔彦进

皇甫继明

张琼

曹翰

杨信 【杨嗣 杨赞】

党进

李汉琼

刘遇

李怀忠

米信

田重进

刘廷翰

崔翰

△张美

张美字符珪贝州清河人少善书计初为左藏小吏以强干闻三司荐奏特补内库
专知出为澶州粮料使周世宗镇澶渊每有求取美必
曲为供给及即位召为枢密承旨时宰相景范判三司被疾命美权判三司征淮南留为
大内部署一日方假寐忽觉心动遽惊起行视宫城中
少顷内酝署火起既有备即扑灭之俄真授三司使世宗再幸淮上皆为大内都点检北
征又为大内都部署师还为左监门卫上将军充宣徽
北院使判三司美强力有心计周知利病以干敏称世宗连岁征讨粮馈不乏深委赖焉
然以澶渊有所求假颇薄之美亦自愧恭帝立加检校
太傅太祖即位加检校太尉初李筠镇上党募亡命渐倔强难制美度筠必生变阴积粟
于怀孟闲后筠果起兵太祖亲讨之大军十万出太行
经费无阙拜定国军节度县官市木关中同州岁出缗钱数十万以假民畏吏十取其一

谓之率分钱岁至数百万美独不取干德五年移镇沧
州太平兴国初入朝改左骁卫上将军八年请老以本官致仕雍熙二年卒年六十八淳
化初谥恭惠子守瑛至供备库使孙士宗王内殿承制
士禹为崇班士安为合门祗候士宣为礼殿副使

△郭守文

郭守文字国华 【据东都事畧补】 并州太原人父暉仕汉为护圣军使从周祖
征河中战死守文年十四居丧哀毁周祖怜之召隶帐
下广顺初补左班殿直太祖即位迁西头供奉官蜀平迁知简州时剑外多寇守文悉招
来集附从潘美征岭南会擒刘鋹驰传告捷迁翰林副
使从曹彬等平金陵护送李煜归阙下时煜以拒命颇自歉不欲生见太祖守文察知之
因谓煜曰国家止务恢复疆土以致太平岂复有后至
之责耶煜心遂安俄从党进破并寇于团相谷太平兴国初奉州内附蕃部骚动命守文
乘传抚谕西夏悦伏三年迁西上合门使是夏汴水决
于盩厔发宋亳丁壮塞之命守文董其役是冬又与王侁石全振护塞灵河县决河及征
太原与梁迥分护行营马步军会刘继元降其弟继文
据代州依契丹之援以拒命遣守文讨平之俄受诏护定州屯兵大破契丹于蒲城迁东
上合门使领澶州刺史召还拜内客省使雍熙二年诏
守文率兵屯三交俄加领武州团练使属夏人扰攘命守文帅师讨之破夏州盐城镇济
啰尼等十四族又破密威族诸部相率来降凡银麟夏
三州归附者百二十五族万六千余户西鄙遂宁五年大举北伐为幽州道行营前军步
军水陆都监卒与契丹遇为流矢所中气色不挠督战
益急会大军不利坐违诏逗遛退军左迁右屯卫大将军事具曹彬传明年复旧职三月
拜宣徽北院使又与田钦祚并为北面排阵使屯镇州
端拱初改南院使镇州路都部署又为北面行营都部署兼镇定高阳关两路排阵使是
冬契丹南侵大破之唐河端拱三年十月卒年五十五
赠侍中谥忠武追封樵王守文沉厚有谋略颇知书每朝退习书百行出官温雅未尝忤
人意先是将臣戍边者多致寇以邀战功河朔诸州殆
无宁岁既败岐沟关乃命守文以内职总兵镇常山以经略之守文既丧月余中使自北
边来言守文死军士皆流涕帝问何以得此对曰守文
得禄赐悉犒劳士卒死之日家无余财帝嗟叹久之赐其家钱五百万为真宗纳其女为
夫人即章穆皇后也子崇德至太子中舍崇信至西京
左藏库使赠福州观察使崇俨至崇仪使赠润州观察使诸司使无废朝赠官之例崇信
崇俨咸以后兄故特示优礼崇德子承寿至虞部员外
郎天禧五年录承寿子若水为太常寺奉礼郎崇仁为解州团练使

△尹崇珂

尹崇珂秦州天水人后徙居大名父廷勋历磁同滁三州刺史崇珂初事周世宗于藩邸及即位补东西班都知从战高平及从征淮南皆有劳绩累迁殿前都指挥使太祖即位出为淄州刺史有善政民诣阙请刻石颂德太祖命殿中侍御史李穆撰文赐之讨湖南为行营前军马军都指挥使荆湘平授朗州团练使又与潘美丁德裕克郴州干德中征岭表为行营马步军副部署克广州擒刘鋹即日诏与潘美同知广州迁保信军节度未几南汉开府乐范容州都指挥使邓存忠韶州贼帅膳思琼春恩道都指挥使麦汉琼等据五州之地以叛崇珂讨之太祖遣中使李神佑督战数月尽平其党还治所六年卒年四十二赠侍中子昭吉弟崇珪初太宗在周朝娶崇珂妹追谥淑德皇后

△刘廷让

刘廷让【按宋史本传作字光又考东都事畧廷让本名光又太宗即位赐今名今据改】其先涿州范阳人曾祖仁恭祖守文其弟守光因父仁恭守文举兵讨之为守光所杀廷让与其父延进避难南奔少有膂力周祖以隶帐下广顺中从世宗征淮南领雷州刺史再迁涪州团练使太祖即位转江州防御使从征李筠为行营先锋使建隆二年改侍卫马军都指挥使领江甯军节度干德二年诏领兵赴潞州以备并寇兴师伐蜀为四川行营前军兵马副都部署率禁兵诸州兵由归州进讨张廷翰随之入其境连破松木三会巫山等砦获蜀将南光海袁德宏等夺战舰二百余艘因度南岸初夔州有鑿江为浮梁上设敌棚三重夹江列炮具廷让等将行太祖以地图示之指鑿江曰我军至此泝流而上慎勿以舟师争胜当先以步骑陆行出其不意击之俟其势却即以战棹夹攻取之必矣及师至距鑿江三十里舍舟步进顿兵白帝庙西先夺其桥复牵舟而上监军武守谦率所部来拒战廷翰引兵逆击败之于猪头铺乘胜克其城守将高彦俦自焚悉如太祖计遂进克万施开忠四州峡中郡县悉下遂州州将陈愈率吏民来降尽出府库金帛以给将士初出师太祖命所得郡县当倾帑藏为朕赏战士国家所收唯土疆尔故人皆效命所至成功蜀平时王全斌等皆坐贪黷左降惟廷让秋毫无犯全师雄等复乱又与曹彬攻破之改领镇安军节度从征太原开宝六年出为镇安军节度太平兴国二年入为右骁卫上将军雍熙三年曹彬败于岐沟关诸将失律多坐黜免既而契丹扰边议遣将无愜上意者时廷让与宋偓张永德并罢节镇在环列帝欲令击契丹自效乃遣分守边郡以廷让知雄州又徙瀛州兵马都部署是冬契丹数万骑

来侵廷让与战君子馆时天大寒兵士弓弩皆不能彀契丹围让数重廷让先分精兵属李继隆为后殿缓急为援至是继隆退保乐寿廷让一军皆没仅以数骑获免先锋将贺令图杨重进皆陷于契丹自是河朔戍兵皆无鬪志又科乡民为兵以守城未习战鬪契丹遂长驱而入陷深祁德数州杀官吏俘士民所在辇金帛而去博魏之北民尤苦焉太宗闻之下哀痛之诏廷让诣阙待罪太宗知为李继隆所误不之责四年复命代张永德知雄州兼兵马部署以疾求归京师不俟报乃离屯所帝怒下御史按问狱具诏削夺在身官爵配隶商州又黜其子如京使永德为濠州团练副使永恭为崇仪副使永和为唐州刺史廷让既黜怏怏不食行至华州卒年五十九帝录其旧勋赠太师子永德至内殿崇班永恭至西京作坊副使永和为内殿承制永锡至崇班永保永昌永规并至合门祇候永崇为崇班永窳及孙允忠并为合门祇候

△袁继忠

袁继忠其先振武人后徙并州父进仕周为阶州防御使继忠以父任补右班殿直太祖平泽潞讨并汾悉预攻战干德中征蜀隶大将刘廷让麾下既克蜀知云安军历嘉蜀二州监军开宝中伐广南及平迁供奉官护隰州白壁关屯兵时河东拒命继忠累入其境破三砦遂与都巡检郭进略地忻代州改天平军巡检太宗即位命击梅山洞贼破之又巡遏边部于唐龙镇征太原预破鹰扬军先登陷阵契丹入代境率兵击走之以功迁通事舍人护高阳关屯兵与崔彦进破契丹长城口时有劝继忠自论其功者继忠不荅会赵保忠来朝献其地绥州刺史李克宪偃蹇不奉诏遣继忠谕旨竟率克宪入朝迁西上合门副使诏与田仁朗率兵定河西诸州大破西人于葭芦川【按方輿记要延安府东北有葭芦川夏国传载种諤谋取横山遣燕达等筑抚窳故城及开光岭葭芦川等砦宋史本传作葭芦州误今据改】迁引进副使护定州屯兵雍熙二年迁西上合门使三年大将田重进征契丹命为定州路行营马步军都监领师取飞狐下灵邱平蔚州擒其帅大鹏翼以献事见重进传师还继忠为后殿行列甚整至定州重进欲斩降卒后期至者继忠谕以杀降不祥皆救免之迁判四方馆事领播州刺史护屯兵如故大将李继隆以易州静塞骑兵尤骁果取隶麾下畜其妻子城中继忠言于继隆曰此精卒止可守城万一敌至城中谁与捍者继隆不从既而契丹兵至城陷卒妻子皆为所俘继隆疑此卒怨己欲分隶诸军继忠曰不可但奏升其军额优以廩给使之尽节可也从之众皆感悦继忠因自请以隶麾下会契丹骑大至驻唐河北诸将欲坚壁待之继忠身先士卒辞气慷慨众壮

之率静塞军摧锋先入契丹兵大溃淳化初迁引进使
护镇定高阳关两路屯兵三年被病召赴阙卒年五十五继忠长厚忠谨士大夫多与游
前后赐赉巨万计悉以犒赏士卒身死之日家无余财
搢绅称之子用成雍熙初登进士第至太常博士

△崔彦进

崔彦进大名人有胆略善骑射汉干佑中隶周祖帐下广顺初补卫士世宗镇澶渊
令领禁兵以从征淮南及平瓦桥关迁东西班指挥使
领昭州刺史太祖即位征李筠为先锋部署从平李重进改虎捷右厢建隆二年迁侍卫
步军都指挥使领武信军节度大举伐蜀为凤州路行
营前军副都部署蜀平坐纵部下略玉帛子女及诸不法事左迁昭化军节度观察留后
改授彰信军节度太平兴国二年移镇河阳四年遣将
征太原分命攻城以彦进与郢州防御使尹勋攻其东彦进督战甚急晋阳平从征幽州
又与内供奉官江守钧率兵攻城之西北及班师诏彦
师与西上合门副使薛继兴等领兵屯关南是秋契丹侵遂城与刘廷翰崔翰等击破之
五年车驾北巡为关南都部署败契丹于唐兴口雍熙
三年命将北伐分兵三路诏彦进为幽州道行营马步军水陆副都部署与曹彬米信出
雄州大军失利彦进坐违彬节制贬右武卫上将军事
具彬传四年授保静军节度端拱元年被病召归阙卒年六十七赠侍中彦进频立战功
然好聚财货所至无善政没后诸子争家财有司摄治
太宗召见为决之谓左右曰此细务朕不宜亲临但以彦进尝任节制不欲令其子辱于
父耳子怀遵至内殿崇班怀清至崇仪副使怀遵子上
贤娶镇王女崇安县主怀清子从湜娶岐王女永寿县主为西京左藏库副使后坐事除
名【按宋史此下有张廷翰传其征蜀事已载刘廷
让传中别无事迹足录今从删】

△皇甫继明

皇甫继明冀州蓀人父济汾川令继明身長七尺善骑射以膂力闻郡中刺史张廷
翰以隶左右荐于太祖补殿前指挥使历左右番押班
都知太平兴国七年坐奏王廷美事出为汝州马步军都指挥使雍熙三年召入为马步
军副都军头田重进北征继明为前锋加马步军头端
拱二年转龙神卫四厢都指挥使领罗州防御使副高琼为并代部署淳化二年又副范
廷召为平虏桥砦兵马都部署改高阳关部署至道元
年改领洋州观察使充环庆路马步军都部署继明御下严肃士卒颇畏惧之二年受诏
护送輜重赴灵州继明已先约灵州部署田绍斌率军
迎援适被病裨将白守荣请率兵先往继明宿将虑守荣等轻佻与敌接战曰我疾少闲

送夔铄被甲上马强行至清远军卒年六十三诏赠彰

武军节度子怀信为供奉官

△张琼

张琼大名馆陶人少有勇力善射隶太祖帐下周显德中太祖从世宗南征击十八里汉砦为战舰所围一人甲盾鼓噪而前众莫敢当太祖命琼射之一发而踣淮人遂却及攻寿春太祖乘皮船入城濠城上弓弩遽发矢大如椽琼亟以身蔽太祖矢中琼股死而复苏鏃者髀骨坚不可拔琼索杯酒满饮破骨出之血流数升神色自若太祖壮之及即位擢典禁军累迁内外马步军都军头领爱州刺史太宗自殿前都虞候尹开封太祖曰殿前卫士如狼虎者不啻万人非琼不能统制即命琼代为都虞候迁嘉州防御使琼性暴无机多所凌轹时史珪石汉卿方用事琼轻侮之目为巫媪二人衔之发琼擅乘官马纳李筠隶仆畜部曲百余人恣作威福禁军皆惧又诬毁太宗为殿前都虞候时事召讯琼琼不伏太祖怒令击之汉卿即奋铁挝乱下气垂绝曳出遂下御史案鞫之琼知不免解所系带以遗母狱具赐死太祖旋闻家无余财止有仆三人甚悔之因责汉卿曰汝言琼有仆百人今何在汉卿曰琼所养者一敌百耳太祖优恤其家以其子尚幼乃擢其兄进为龙捷副指挥使

△曹翰

曹翰大名人少为郡小吏好使气陵人不为乡里所誉汉初周祖镇邺与语奇之以隶世宗帐下世宗镇澶渊署为牙校入尹开府留翰在镇会周祖寝疾翰不俟召归见世宗密谓曰主上不豫王为冢嗣不待医药而决事于外廷失天下望世宗悟即入侍以府事属翰总决及世宗即位补供奉官从征高平参豫谋画寻迁枢密承旨世宗征淮南留铠甲千数在正阳既而得降卒八百部送归京师时翰适从京师来诣过正阳十数里许遇之虑劫兵器为叛矫杀之及见世宗具言其事世宗不悦翰曰贼以困归我非心服也所得器甲尽在正阳苟为所劫是复生一淮南矣因不之罪从征瓦桥关会班师留知雄州世宗大渐谕范质等以王着为相翰为宣徽使质以嗜酒翰饰诈而专并寝之改德州刺史太祖即位从征泽潞还改济州刺史干德二年征蜀移刺均州【按隆平集载干德中伐蜀以翰帅荆襄又诏兼运是翰非仅刺均州也】涧谷深险翰令凿石通道师旋以济诏兼西南诸州转运使自石门径趋归州饷运不乏由夔万入会王全斌军成都以平时全师雄拥众十余万据郫县叛未几军校吕翰杀武怀节据嘉州以叛均率兵会曹彬等讨平之师还迁蔡州团练使开宝中河决澶州令翰董其役复决阳武再护

役皆有成绩将征江南命翰率兵先赴荆南改行营先锋使进克池州金陵平江州军校胡德 【按宋史太祖本纪开宝九年夏曹翰拔江州屠之擒牙校宋德明胡则】 牙将宋德明据城拒命翰率兵攻之凡五月而陷屠城无噍类杀兵八百所略金帛以亿万计伪言欲致庐山东林寺铁罗汉像五百头于京师因调巨舰百般载所得以归迁桂州观察使判颍州太平兴国四年从征太原为攻城南面都部署与崔彦进李汉琼刘遇三节度分部攻城翰攻东北刘遇坚欲易之数日不决上虑诸将不协遣谕翰曰卿智勇无双西北面非卿不能当也翰乃奉诏筑土山瞰城中数日而就继元甚恐军中乏水城西十余里谷中有娘子庙翰往祷之穿渠得水人马以给又从征幽州率所部攻城东南隅卒掘土得蟹以献翰谓诸将曰蟹水物而陆居失所也且多足彼援将至不可进拔之象况蟹者解也其班师乎已而果验五年从幸大名拜威塞军节度仍判颍州复命为幽州行营都部署诏督役开南河自雄达莫以通漕运议筑大堤捍之翰遣徒数万伐巨木于敌境遣骑五授五色旗为斥候前遇邱陵水泽寇贼烟火则各举其旗以为应又起烽燧于境上敌疑不敢近塞得巨木数万以济用乞事归镇翰在郡岁久征敛苛酷政因以弛上以其有功每优容之会汝阴令孙崇望诣阙诉翰所为多不法诏遣御史滕中正乘传鞫之狱具当弃市上贷其罪削官爵流锢登州雍熙二年起为右千牛卫大将军分司西京召入为左千牛卫上将军赐钱五百万白金五千两淳化三年卒年六十九赠太尉上命迁其四子守谦守能守节守贵官其六子守让守贄守澄守恩守英守吉皆补殿直翰阴狡多智数好夸诞贪冒货赂饮酒至数斗不乱每奏事帝前虽数十条皆默识不少差尝作退将诗曰曾因国难披金甲耻为家贫卖宝刀翰直禁日因语及之帝悯其意故有银钱之赐咸平元年赐谥武毅

△杨信 【杨嗣 杨赞】

杨信瀛州人初名义显德中隶太祖麾下为裨校太祖即位权内外马步军副都军头累迁殿前都虞候领汉州防御使干德四年信病瘖帝幸其第赐钱二百万改静江军节度开宝二年散指挥都知杜廷进等将为不轨谋泄夜启玄武门召信追捕迟明十九人皆获帝亲讯而诛之迁殿前都指挥使改领建武军节度太祖尝令御龙直习水战于后池有鼓噪声信居玄武门外闻之遽入服阜绋袍以见帝谓曰吾教水战尔非有他也出帝目送之谓左右曰真忠臣也九年授义成军节度太平兴国二年改镇宁军并领殿前都指挥使三年以痼疾在告俄卒赠侍中信虽瘖疾而质实自将善部分士卒指顾申儆动有纪律故见信任而终始无疑焉未

死前一日瘖疾忽愈帝闻而骇之遽幸其第信自言遭遇两朝恩宠隆厚叙谢感慨涕泗横集帝加慰勉锡赉有差信弟嗣赞建隆初以信荐为殿直累迁高阳关战棹都监淳化二年知保州门无私谒改如京使再知保州有战功咸平初真拜保州刺史召还授本州岛团练使时杨延昭方为刺史嗣言尝与延昭同官骤居其上不可愿守旧官帝嘉其让乃迁延昭官嗣与延昭久居北边俱以善战闻时谓之二杨嗣治郡兼领巡徼在郡日少城堞圯坏有未葺者诏供备库副使赵彬代之改深州团练都巡检使兼保州钤辖五年边人寇保州嗣与杨延昭御之部伍不整为所袭士马多亡失代还特宥其罪明年与防秋之策条陈北面利害以其练选边事出为镇定高阳关三路后阵钤辖移定州副都部署景德初改镇州路副都部署嗣老年总军政虑有废阙旋命代之复出为天雄军副都部署以左龙武大将军致仕卒年八十一录其子承宪为侍禁赞稍知书无异能以兄故得掌禁旅累资朝着至牧守焉

△党进

党进朔州马邑人幼给事魏帅杜重威重威败进以膂力隶军伍周广顺初补散指挥使铁骑都虞候太祖即位转本军都校累迁领睦州防御使改领阆州干德初改龙捷左厢都虞候领利州观察使权步军杜审琼卒命进代领其务领彰信军节度开宝元年将征太原以进将河东行营前军太祖师临晋阳置砦四面命进主其东偏师未成列太原骁将杨业领突骑数百来犯进夺身从数骑逐业业急入隍中会援兵至缘绳入城获免帝激赏之改侍卫马军都指挥使领镇安军节度又命将河东行营兵征太原败太原军于城北太祖崩召还太平兴国二年出为忠武军节度在镇岁余一日自外归有大蛇卧榻上寝衣中进怒烹食之遇疾卒年五十一赠侍中进出戎行形貌魁岸居常恂恂每擐甲胄毛发皆竖进名进自称曰暉人问之则曰吾欲从吾便耳先是禁中军校自都虞候已上悉书所掌兵数于槌上如笏记焉太祖一日问进所掌几何进不识字但举槌以对曰尽在是矣帝以其朴直益厚之尝受诏巡京师见有畜养禽兽者必取纵之骂曰买肉不将供父母反以饲禽兽乎太宗尝令亲吏臂鹰雏于市进欲放之吏曰此晋王鹰也进乃戒之曰汝谨养视小民传以为笑其变诈又如此杜重威子孙有贫困者进分月俸给之士大夫或有愧焉子崇义闲厩使崇贵合门祗候

△李汉琼

李汉琼河南洛阳人曾祖裕祁州刺史汉琼体质魁岸有膂力晋末补西班卫士迁内殿直周显德中从征淮南迁龙旗直副都知改左射

指挥使太祖即位再迁铁骑第二军都校领饶州刺史累迁领洮州观察使征江南命领行营骑军兼战棹左厢都指挥使自蕲春攻岐口砦沿流拔池州破铜陵取当涂作浮梁于牛渚以济大军分围金陵率所部度秦淮取巨舰实苇其中纵火攻其水砦拔之江南平领振武军节度太平兴国二年出镇彰德太宗亲征太原改攻城都部署汉琼与牛思进主攻城南偏汉琼先登矢集其脑并中指伤甚犹力疾战帝召至幄款赐良药以慰劳之先是攻城者以牛革冒木上士卒蒙之而进谓之洞子帝欲幸其中以劳士卒汉琼极谏以为矢石之下非万乘之尊所宜轻往帝乃止太原平改镇州兵马钤辖契丹数万骑寇中山汉琼与战于蒲城大败之逐至遂城俘斩万计加检校太尉车驾幸大名汉琼上谒陈边事称旨命为沧州都部署以病还京卒年五十五赠中书令汉琼性木强使酒难近然善战有功无子弟汉赉汉彬太平兴国初汉赉补供奉官尝监高阳关平戎军乘传衢婺二州补剧贼程白眉数十人悉歼焉累任崇仪使知涇州大中祥符七年卒汉彬至礼宾副使

△刘遇

刘遇沧州清池人少魁梧有膂力周祖镇大名隶帐下广顺初补控鹤都头改副指挥使太祖即位迁御马直指挥使累迁控鹤右厢都指挥使领琼州团练使从征太原迁虎捷右厢改领蔚州防御使开宝六年转侍卫步军都虞候领洮州观察使征江南领步军战棹都指挥使时吴兵三万屯皖口遇会诸路兵破之擒其将朱令赉王晖等获戎器数万金陵平加领大同军节度太平兴国二年出为彰信军节度四年征太原与史珪攻城北面平之进攻范阳师还坐所部失律责授宿州观察使五年从幸大名复保静军节度幽州行营都部署护筑保州威虜静戎平塞长城五城徙镇滑州遇性淳谨尤善射太宗待之甚厚雍熙二年卒年六十六赠侍中

△李怀忠

李怀忠涿州范阳人初名怀义太祖掌禁兵时隶帐下为散都头累授东西班都指挥使改领富州刺史开宝中从太祖征晋阳累月未下会盛暑欲班师怀忠谓贼婴孤城内无储恃外无援兵其势危困若急攻之破在旦夕臣愿奋锐为士卒先会大热战不利怀忠中流矢力疾战益奋还授散指挥使迁富州团练使改日骑左右厢都指挥使帝幸西京爱其地形势得天下中正有留都之意怀忠乘闲进曰东京有汴渠之漕岁致江淮米数百万斛警卫数十万人仰给于此帑藏重兵皆在焉根本安固已久一旦遽欲迁徙臣实未见其利帝嘉纳之 【按长编载

太祖欲迁都西京怀忠言迁都未见其利帝不听晋王又以为言帝亦不答徐谓左右曰姑从晋王言不出百年天下民力殫矣本传作帝嘉纳

怀忠语互异】太宗即位领大同军节度三年改步军都指挥使卒赠侍中录其子绍宗等三人为供奉官大中祥符三年又录其子德钧为借职

△米信

米信旧名海进【按东都事畧作旧字海进】本奚族少勇悍以善射闻周祖即位隶护圣军从世宗征高平迁龙捷散都头太祖总禁兵以信隶麾下得给使左右遂委心焉改名信署牙校及即位补殿前指挥使迁直长平扬州日信执弓矢侍帝侧有游骑将追乘舆射之一发而毙迁内殿直指挥使开宝元年改殿前指挥使领郴州刺史太宗即位累迁领洮州观察使征太原命为行营马步军指挥使与田重进分督行营诸军并人潜师来犯信击败之杀其将裴正并州平遂移兵攻范阳师还以功擢保顺军节度使命与郭守赞等同护定州屯兵六年迁定州驻泊部署八年改领彰化军节度使雍熙三年征幽蓟命为幽州西北道行营马步军都部署败契丹于新城契丹率众复来战大军稍却信独以麾下龙卫卒三百御敌敌围之数重矢下如雨信射中数人麾下士多死会暮信持大刀率从骑大呼杀数十人敌遂小却信以百余骑突围得免坐失律议当死诏特原之责授右屯卫大将军明年复授彰武军节度端拱初诏置方田以信为邢州兵马都部署监之改镇横海军信不知书所为多暴横帝命何承矩为之副以决州事及承矩领护屯田信多专恣不法帝知之召为右武卫上将军判左右金吾街仗事未踰月吏卒以无罪被捶撻者甚众强市人物妻死买地营葬妄发居民冢墓家奴陈赞老病捶之致死为其家人所告下御史鞠之信具伏狱未上而卒年六十七赠横海军节度子继丰内殿崇班合门祇候

△田重进

田重进幽州人形质奇伟有武力周显德中应募为卒隶太祖麾下从征契丹至陈桥还迁御马军使积功至灋州刺史太平兴国四年从征太原还录功擢为天德军节度使改侍卫步军指挥使领静难军节度使九年河决滑州韩房村重进总护其役以刘吉为之副河遂塞雍熙中命节北征重进率兵傅飞狐城下用袁继忠计伏兵飞狐南口擒契丹骁将大鹏翼及其监军马赞【按宋史太宗本纪作康州刺史马頔】副将何万通并渤海军三千余人斩首数千级俘获以万计逐北四十里连下飞狐灵州【按宋史太宗本纪灵州作灵邱】等城进攻

蔚州其牙校李存璋等杀酋帅萧栋摩执耿绍忠率吏民来附会曹彬之师不利乃命重进董师驻定州迁定州驻泊兵马都部署三年率师入契丹境攻下岐沟关杀守城兵千余及获牛马辎重以还四年改彰信军节度淳化三年改真定尹成德军节度未几移京兆尹永兴军节度五年改知延州复还镇至道三年卒年六十九赠侍中重进不事学太宗居藩邸时爱其忠勇尝遗以酒炙不受使者曰此晋王赐也何为不受重进曰为我谢晋王我知有天子尔卒不受上知其忠朴故终始委遇焉子守信六宅使守吉合门祇候

△刘廷翰

刘廷翰开封浚仪人父绍隐后唐末隶兵籍晋天福中以队长戍魏博范延光反绍隐力战死周世宗镇澶渊廷翰以膂力隶帐下即位补殿前指挥使累从征伐再迁至散指挥第一直都知太祖即位豫平上党维扬迁铁骑都指挥使领廉州刺史太平兴国四年从征太原领镇州驻泊都钤辖太宗北伐既班师帝以边备在于得人乃命廷翰李汉琼率兵屯真定崔彦进屯关南崔翰屯定州契丹果纵兵南侵廷翰先阵于徐河彦进率师出黑芦堤北衔枚蹶契丹后崔翰汉琼兵继至合击之大败其众于蒲城廷翰以功领大同军节度殿前都虞候八年改领彰信军节度雍熙四年改镇滑邢端拱中镇州驻泊马步军都部署郭守文卒帝特命廷翰代之淳化三年改大名尹天雄军节度以病求解官还阙帝亲临问赐赉有加未几卒年七十赠侍中廷翰自卫士至上将颇以武勇自任宽厚容众虽不事威严而长于御下为殿前都指挥使入朝常行众中每历宫殿门少识之者尝与郊祀恩当追封三世廷翰少孤其大父以上皆不逮事忘其家讳上为撰名亲书赐之子赞元宫苑使登州刺史赞明皇城使勤州团练使

△崔翰

崔翰字仲文京兆万年人少有大志风姿伟秀太祖见而奇之以隶麾下从世宗征淮南平寿春取关南以功补军使太祖即位迁御马直副指挥使从征泽潞开宝初迁河东降民以实陕西地晋人勇悍多习武艺命翰差择之及阅试河北镇兵取其骁果者以分配天武两军九年领端州刺史太宗即位进本州岛团练使太平兴国二年讲武于西郊时殿前都指挥使杨信病瘖命翰代之翰分布士伍南北绵亘二十里建五色旗号令将卒望其所举以为进退六师周旋如一帝御台临观大悦以藩邸时金带赐之谓左右曰晋朝之将必无如崔翰者从征太原命总侍卫马步诸军率先攻城流矢中其颊神色不变督战益急帝即军帐抚问之太原平时

帝将有事幽蓟诸将以为晋阳之役师罢饷匱刘继元降赏赉且未给遽有平燕之议不敢言翰独奏曰所当乘者势也不可失者时也取之易帝谓然定义北伐既而班师命诸将整暇以还至金台驿大军南向而溃帝令翰率卫兵千余止之翰请单骑往至则谕以师律众徐以定不戮一人既复命帝喜因命知定州得以便宜从事缘边诸军并受节制军市租储得以专用契丹兵数万寇蒲城翰会李汉琼兵于徐河河阳节度崔彦进兵自高阳关继至因合击之契丹投西山坑谷中死者不可胜计俘馘数万所获他物又十倍焉以功擢武泰军节度使初刘继元降帝令翰往抚慰俘略无得出城时秦王廷美以数十骑将冒禁出翰呵止之至是构于上明年出为感德军节度使至镇时盗贼充斥翰诱其渠魁戒以祸福羣盗感悟散归农田境内肃然雍熙二年移知滑州三年北伐不利帝追念徐河之功召翰为威虏军行营兵马都部署改镇定国军移镇镇安军淳化三年召还以疾留京师稍闲入见帝曰臣既以身许国不愿死于家得以马革裹尸足矣帝壮之复令赴镇月余卒年六十三赠侍中翰骁勇有谋所至多立功轻财好施死之日家无余貲子继颺虞部员外郎孙承业内殿承制合门祗候承佑内殿崇班

钦定续通志卷三百二

●钦定续通志卷三百三 列传一百三

列传

宋 【七】

○宋七

李琼	郭琼	陈承昭	李万超	白重赞	王仁鎬
陈思让【若拙】	焦继勋	袁彦	李谷		
咎居润	王易简	赵上交	刘温叟【晔几】	刘涛	边光
范	刘载	程羽			

李琼

郭琼

陈承昭

李万超

白重赞

王仁鎬

陈思让

焦继勋

袁彦
李谷
咎居润
王易简
赵上交
刘温叟
刘涛
边光范
刘载
程羽
△李琼

李琼字子玉幽州人祖传正涿州刺史父英涿州从事琼幼好学涉猎史传挟策诣太原会唐庄宗募勇士即应募与周祖等十人约为兄弟一日会饮琼熟视周祖知非常人因奉酒祝曰凡我十人龙蛇混合异日富贵无相忘皆刺臂出血为誓周祖与琼情好尤密尝见其危坐读书因问所读何书琼曰阃外春秋所谓以正守国以奇用兵较存亡治乱记贤愚成败皆在此也周祖曰兄当教我自是周祖出入常袖以自随遇暇辄读每问难琼谓琼为师及讨河中乃解琼兵籍令参西征军事贼平表于朝授朝散大夫大理司直迁太子洗马周祖镇邺表为大名少尹广顺初拜将作监充内作坊使连知亳陕二州改济州刺史世宗初迁洺州团练使改安州防御使治郡宽简民请立碑颂德诏中书舍人窦仪撰文赐之太祖即位召为太子宾客建隆三年请老改右骁卫上将军致仕卒年七十三赠太子少师

△郭琼

郭琼平州卢龙人祖海本州岛两冶使父令奇卢台军使琼少以勇力闻事契丹为藩汉都指挥使后唐天成中挈其族来归明宗以为团练使改刺商州迁原州清泰初移阶州城垒未葺蜀人屡寇琼因徙城保险民乃无患受诏攻文州拔二十余砦晋天福中羌浑骚动朔方节度张希崇表琼为部署将兵共讨平之开运初为北面骑军排阵使阳城之役战功居多改沂州刺史充荆口砦主兼东面行营都虞候擒莫州刺史赵思以献乃改刺怀州俄为北面先锋都监契丹灭晋盗贼蠡起山东为甚契丹主命琼复刺沂州以御盗琼即日单骑赴郡盗闻琼威名相率遁去汉干佑中淮人攻密州以为行营都部署未至淮人解去会平卢节度刘铎恃佐命之旧称疾不朝大臣惧其难制先遣琼与卫州刺史郭

超以所部兵屯青州铄不自安置酒召琼伏壮士幕下欲害琼琼知其谋屏去从者从容就席略无惧色铄不敢发琼因为陈祸福铄感其言遂治装俄诏至即日上道琼改颖州团练使又加防御使时朗州结荆淮广南合兵攻湖南诏琼以州兵合王令温大军攻光州寻以内难不果罢归朝遣诣河北计度兵甲刍粮周祖召权知宗正卿事世宗征刘崇为北面行营都监历绛蔡齐三州防御使在齐州民饥琼以己俸振之人怀其惠相率诣阙颂其德政诏许立碑宋建隆三年告老加右领军卫上将军致仕归洛阳干德二年卒年七十二琼虽起卒伍而所至有惠政礼士乐善盖武臣之贤者也

△陈承昭

陈承昭江表人始事李景为保义军节度周世宗征淮南景以承昭为濠泗楚海水陆都应援使世宗既拔泗州引兵东下太祖遇承昭于淮上击败之亲擒承昭世宗释之授右监门卫上将军改右领军卫上将军分司西京太祖即位以承昭习知水利督治惠民五丈二河近甸丁壮修畿内河堤命承昭董其役又令督诸军子弟凿池于朱明门外以习水战从征太原承昭请壅汾水灌城城中危甚会班师功不克就干德五年迁右龙武军统军开宝二年卒年七十四赠太子太师大中祥符元年录其孙宗义为三班借职

△李万超

李万超并州太原人幼孤贫负贩以养母晋祖起并门万超应募隶军籍战累捷稍迁军校从李守贞讨杨光远于青州奋勇先登飞石中其脑气不属者久之开运中从杜重威拒契丹于阳城流矢贯手万超拔矢复战神色自若以功迁肃锐指挥使契丹入中原时万超以本部屯潞州主帅张从恩将弃城归契丹会前骁卫将军【通鉴作左骁卫大将军】王守恩服丧私第从恩即委以后事【按通鉴载赵行迁知留后守恩权巡检使与傅所载委以后事句互异】遁去及契丹使至乃专领郡务守恩遂无所预万超奋然谓其部下曰我辈垂饵虎口苟延旦夕之命今欲杀使保城非止逃生亦足建勋业汝曹能乎众皆喜曰唯命遂率所部入府署杀其使推守恩为帅列状以闻汉祖从其请仍命史弘肇统兵先渡河至潞见万超语之曰得复此州公之力也吾欲杀守恩以公为帅可乎万超对曰杀契丹使以推守恩盖为社稷计尔今若贼害于人自取其利非宿心也弘肇大奇之表为先锋马步军都指挥使路经泽州刺史翟令奇坚壁拒命万超驰至城下谕之令奇乃开门迎纳弘肇即留万超权州事汉祖遂以为刺史及征李守贞以万超为行营壕砦使河中平

拜怀州刺史周祖开国从征慕容彦超又为都壕砦使以功授洺州团练使预收秦凤改怀州从平淮南连移青登二州所至有善政太祖即位入为右武卫大将军迁左骁卫大将军开宝八年卒年七十二

△白重赞

白重赞宪州楼烦人其先沙陁部族重赞少从军有武勇汉初为护圣都指挥使干佑中平河中以功领端州刺史周广顺中授义成军节度在镇日河屡决重赞亲部丁壮塞大福六合二堤世宗征刘崇以重赞为河东道行营马军都指挥使重赞与李重进居阵西偏樊爱能何徽居阵东偏既合战爱能徽皆遁走惟重赞与重进率所部力战世宗自督亲军合势薄之并人大败既诛爱能等授重赞保大军节度使及征太原河阳刘词为随驾都部署重赞副之忻州监军杀刺史赵皋及契丹大将军杨耨姑以城降而契丹兵犹盛命重赞及符彦卿击走之改河阳三城节度检校太尉征淮南命重赞率亲兵三千军颍上改淮南道行营马步军都虞候俄迁彰义军节度太祖即位加检校太师改镇泾州有马步军教练使李玉本燕人凶狡与重赞有隙遂与部下阎承恕谋害重赞密遣人市马纓伪造制书云重赞构逆令夷其族乃自持伪制并马纓以告都校陈延正曰使者致而去矣延正具白重赞重赞封其书以闻太祖大骇验视皆诞谬遂命六宅使陈思诲驰赴泾州禽玉及承恕鞫问伏罪俄改泰宁军节度干德四年又为定国军节度开宝二年改左千牛卫上将军奉朝请三年卒年六十二

△王仁镐

王仁镐邢州龙冈人后唐明宗镇邢台署为牙校即位授为作坊副使累迁改右领军卫将军晋天福中青州杨光远将图不轨以仁镐为节度副使伺其动静历二年或潜仁镐于朝改护国军行军司马仁镐至河中秋月光远反书闻汉干佑中历昭义天雄二军节度副使周祖镇邺表仁镐为副留守及起兵仁镐预其谋广顺中为王峻所忌出为唐州刺史充宣徽北院使兼枢密副使显德初复出为永兴军节度使世宗嗣位移河中会殿中丞上官瓚使河中还言河中民多匿田租遂遣瓚按视均定百姓苦之多逃亡他郡仁镐抗论其事乃止五年拜安国军节度制曰眷惟襄国实卿故乡分子龙节之权成尔锦衣之美时人美之郡有羣盗仁镐遣使遗以束帛谕之悉遁去不复为盗恭帝立移山南东道节度太祖即位加检校太师建隆二年以疾召还次唐州卒于传舍年六十九仁镐性端谨俭约崇信释氏每晨诵佛经至日盥出视事从事

刘谦责仁镐曰公贵为藩侯不能勤恤百姓孜孜事佛何也仁镐敛容逊谢无愠色当时称其长者

△陈思让

陈思让字后己幽州卢龙人父审确仕后唐至晋历檀顺涿均沁唐祁城八州刺史预征蜀权利州节度终金州防御使思让初隶庄宗帐下即位补右班殿直晋天福中迁作坊使以先锋右厢都监征安从进大破之以功授坊州刺史八年冬契丹谋入寇以思让监澶州军赐鞍勒马器帛讨杨光远于青州也又为行营右厢兵马都监兵罢改磁州刺史符彦卿北征契丹思让表求预行寻改卫州连丁内外艰时武臣罕有执丧礼者思让不俟诏去郡奔丧闻者嘉之起复随州刺史汉初移刺淄州会淮南与朗州马希萼合兵淮南攻湖南马希广来乞师旋属内难又周祖北征乃分兵令思让往郢州赴援兵未渡而希广败思让留于郢周祖即位召思让及所部兵还刘崇自立于太原【按宋史称刘崇僭号太原考五代史于周广顺元年书刘崇自立于太原盖崇为后汉高祖母弟周祖篡汉崇义不为周屈十国诸论亦予其不屈于周今依五代史改】周祖思得方略之士以备边遣思让率兵诣磁州控扼泽潞未几升磁州为团练即以思让充使刘崇遣大将李瓌【通鉴作李存瓌】自团柏军于鹞子店思让与都监向训张仁谦等率军至鹿亭西与瓌军遇获崇偏将王璠曹海金俄遣王峻援晋州以思让与康延昭分为左右厢排阵使率军自乌岭路至绛州与大军合崇烧营遁去思让又与元福袭之命权知绛州明年迁绛州防御使显德元年改亳州充昭义军兵马钤辖屡败并人及契丹援兵迁安国军节度观察留后充北面行营马步军排阵使五年败并军于西山是秋邢州官吏耆艾邢铖等四十人诣阙求借留思让诏褒之改义成军节度观察留后六年世宗将北征命先赴冀州以俟命及得瓦桥关为雄州命思让为都部署率兵戍守世宗不豫还京留思让为关南兵马都部署恭帝立授广海军节度太祖即位加检校太傅干德二年又为保信军节度时皇子兴元尹德昭纳思让女为夫人开宝二年改护国军节度河中尹七年卒年七十二赠侍中思让累历方镇无败政酷信释氏人目为陈佛子身没之后家无余财弟思海至六宅使子钦祚累迁至香药库使长州刺史钦祚子若拙

陈若拙

陈若拙

若拙字敏之【按宋史本传后云若拙寡学术素无文目为瞎牒此处称其幼嗜学应对详雅云云前后互异今删】太平兴国五年进

士甲科解褐将作监丞通判鄂州改太子右赞善大夫知单州以能政就改太常丞迁监察御史充盐铁判官益州系囚甚众太宗召若拙面谕委以疏决迁殿中侍御史通判益州淳化三年就命为西川转运副使未几改正使召归会李至守洛都表若拙佐治改度支员外郎通判西京留司久之柴禹锡镇涇州复奏为通判迁司封员外郎部送刍粮至塞外优诏奖之入为盐铁判官转工部郎中与三司使陈恕不协求徙他局改主判开拆司车驾北巡命李沆留守东京以若拙为判官河决郢州朝议徙城以避水患命若拙与阎承翰往规度寻命权京东转运使因发卒塞王陵口又于齐州浚导水势设巨堤于采金山奏免六州所科稍木五百万民甚便之河平真授转运使召还拜刑部郎中知潭州时三司使缺若拙自谓得之及是大失望因请对言父母年老不愿远适求纳制命帝怒追若拙所授告敕黜知处州徙温州代还复授刑部郎中再为盐铁判官改兵部郎中河东转运使会经度制置使陈尧叟言其干职擢拜右谏议大夫徙知永兴军府时邻郡岁饥前政拒其市余若拙至则许贸易民赖以济又移知凤翔府入拜给事中知澶州蝗旱之余勤于政治郡民列状乞留天禧二年卒年六十四若拙多诞妄寡学术当时以第二人及第者为榜眼若拙素无文故目为瞎榜云子映

△焦继勋

焦继勋字成绩许州长社人少读书有大志尝谓人曰大丈夫当求功异域取万户侯岂能孜孜事笔砚哉遂弃其业游三晋闲为轻侠晋祖镇太原继勋以儒服谒见晋祖与语悦之留帐下天福初授皇城兼宫苑使迁武德使安重荣反镇州安从进自襄阳举兵为应【按五代史晋天福六年十月山南东道节度使安从进反十一月西京留守高行周为南面军前都部署以讨之十二月成德军节度使安重荣反天平军节度使杜重威为镇州行营招讨使战败之七年正月安重荣伏诛又按五代史安从荣传安从进反襄阳重荣闻之乃亦举兵又安从进传天福六年安从荣执杀契丹使者反迹见高祖为之幸邺从进闻高祖北遂杀知麟以反与宋史安重荣反镇州安从进自襄阳举兵为应互异】晋祖命继勋督诸将进讨至唐州南遇从进军万余设伏击败之禽其牙将安洪义鲍洪等得山南东道印从进单骑奔还从进弟从贵率兵千余人援均州刺史蔡行遇继勋杀其众生禽从贵断腕放入城中从进自此不能复镇继勋就拜齐州防御使少帝即位从进平籍继勋威名镇之徙襄阳防御使入为右千牛卫大将军拜宣徽北院使迁南院使西人寇边朝议发师致讨继勋抗疏请行拜秦州观察使兼诸蕃水陆转

运使既至推恩信设方略招诱诸郡酋长相率奉玉帛牛酒乞盟边境以安俄徙知陕州就迁保义军兵马留后汉初凤翔军校阳彦昭据城叛命继勋率师讨之以功授保大军节度召入会汉祖幸大名留为京城右厢巡检使俄改右羽林统军隐帝末命继勋领兵北征及周祖举兵向阙继勋奉隐帝逆战于留子陂【五代史作刘子陂】战不利遂归周祖广顺初改右龙武统军世宗征淮南为左厢排阵使又改右羽林统军将军左屯卫上将军拜彰武军节度太祖即位召为右金吾卫上将军改右武卫上将军权知延州判右街使杜审琼卒命继勋代之时向拱为西京留守多饮燕不省府事羣盗白日入都市劫财拱被酒不出捕太祖选继勋代之月余京城肃然太祖幸洛还以为彰德军节度仍知留府事太平兴国三年卒年七十八赠太尉继勋猎涉史传颇达治道所至有善政然性吝嗇多省公府用度时论少之子守节【按宋史此下有守节附传及刘重进传无事迹足录今并删】

△袁彦

袁彦河中河东人少以趯勇应募汉干佑中周祖领军讨李守贞以彦置麾下及镇邺以为部直小将周显德初授内外步军都军头领泉州刺史改岳州防御使从征寿州为城北造竹龙都部署竹龙者以竹数十万竿围而相属上设版屋载甲士数百人以攻其城又命于涡口修桥桥成世宗幸焉因立为镇淮军前太祖下滁阳禽皇甫晖姚凤彦皆有劳绩诏褒之又令率师屯下蔡以逼寿春及克寿州【按刘仁贍镇寿州始末见五代史死节传周世宗实录载仁贍降书盖其副使孙克等所为也克诈为仁贍书以城降仁贍即于是日卒周世宗本纪书三月丁未克寿州注云仁贍实不降故书周自克之尔宋史承周实录之文误今依世宗本纪改刘仁贍降为克寿州】从世宗攻濠泗又禽南唐将许文绩边镐等以献真授步军都指挥使领彰信军节度恭帝立移保义军节度太祖即位加检校太尉改镇曹州移鄆州罢镇归阙卒年六十六景德四年特诏录其孙昭庆为借职【按宋史此下有祁廷训张铎李万全三传及田景咸王晖合传俱无事迹可录今删】

△李谷

李谷字惟珍颍州汝阴人身长八尺少勇力善射以任侠为事颇为乡人所困发愤从学所览如宿习年二十七举进士连辟华秦二州从事晋天福中擢监察御史少帝即位拜职方郎中转运吏部郎中罢职天福九年少帝亲征契丹诏许扈从充枢密直学士加给事中为冯玉李彦韬所排会帝再幸河北改三司副使权判留司三司事开运二年出为磁州刺史北面水

陆转运使契丹入汴少帝蒙尘旧臣无敢候谒者谷独拜迎于路泣曰臣无状负陛下因倾囊以献会契丹主发使至谷禽斩之密送款于汉祖潜遣河朔酋豪梁晖入据安阳契丹主患之即议北旋会有告契丹以城中虚弱者契丹还攻安阳陷其城谷自郡候契丹遂见获曰尔何背我归太原谷曰无之契丹主因引手车中似取所获文字而谷知其诈因请曰如实有此事乞显示之契丹国制人未伏者不即寘死自后凡诘谷者六次谷词不屈契丹主病且曰我南行时尔谓我必不得北还尔何术知之今我疾甚能救则致尔富贵谷曰实无术为人所陷耳谷气色不挠俄而德光道殒永康继立署谷给事中时契丹将满达守真定而李崧和凝与家属皆在城中会李筠何福进率兵逐满达推护圣指挥使白再蒙【通鉴作思州团练白再荣】权知留后再蒙利崧等家财令甲士围其居以求赂既得之复欲杀崧等灭口谷遽见再蒙谓之曰今国亡主辱公辈握劲兵不能死节虽逐一契丹将城中战死者数千人非独公之力也一朝杀宰相即日中原有主贵公专杀何辞以对再蒙惧崧等获免汉初入拜左散骑常侍旧制罢外郡归本官至是进秩奖之也俄权判开封府时京畿多盗中牟尤甚谷诱邑人发其巢穴有刘德舆者梁时屡摄畿佐居中牟素有干才谷即署摄本邑主簿请侍卫兵数千佐德舆悉禽贼党自是行者无患俄迁工部侍郎周祖西征为西南面行营水陆转运使关右平改陈州刺史周祖兵入汴命权判三司广顺初加户部侍郎拜中书侍郎平章事仍判三司初汉干佑中周祖讨河中谷掌转运时周祖已有人望兼汉政紊乱潜行异志楼以讽谷谷但对以人臣当尽节奉上而已故开国之初倚以为相是岁淮阳吏民数千诣阙请立生祠许之谷恳让得止先是禁牛革法甚峻犯者抵死谷乃校每岁用革之数凡田十顷岁出一革余听民私用又奏罢屯田务以民隶州县课役尽除宿弊显德初加右仆射集贤殿大学士从世宗征太原命谷先调兵食又代符彦卿判太原行府事师还进位司空门下侍郎监修国史谷以史氏所述本于起居注丧乱以来遂废其职请令端明枢密直学士编纪言动为内廷日历以付史官是岁河决齐郛发十数州丁壮塞之命谷领护刻期就功二年议伐南唐以谷为淮南道行营前军都部署兼知庐寿等州行府事忠武军节度王彦副之韩令坤以下十二将率从谷领兵自正阳渡淮先锋都将白延遇败吴军数千于来远又破千余人于山口镇进攻上窑又败千余众获其小校数十人长围寿春南唐遣大将刘彦贞来援谷召将佐谋曰今援军已过来远距寿阳二百里舟棹将及正阳我师无水战之备万一断桥梁隔绝王师则腹背受敌

矣不如退守浮梁以待戎轭之至初世宗至围镇巴闻此谋亟走内侍乘骑止之谷已退保正阳仍焚刍粮回军之际递相掠虏淮北役夫数百悉陷于寿春世宗闻之怒亟命李重进率师伐之以谷判寿州行府是秋诏归阙得风痺疾累表请致仕优诏不允每军国大事令中使就第问之四年吴人壁紫金山筑甬道以援寿春时议师老无功请罢兵为便世宗令范质王溥就谷谋之谷手疏请征世宗大悦用其策及淮南平出谷疏令翰林学士承旨陶谷为赞以赐之是夏世宗还谷扶疾见便殿诏令不拜令坐御坐侧以抱疾既久请辞相位世宗怡然勉之以平寿州叙功加爵邑是秋抗表乞骸骨罢相守司空加邑封令每月肩輿一诣便殿访以政事恭帝立加开府仪同三司进封赵国公求归洛邑从其请太祖即位遣使就赐器币建隆元年卒年五十八赠侍中谷为人厚重刚毅深沈有城府议政事明畅聳听好汲引寒士多至显位与韩熙载善熙载将南渡密告谷曰若江东相我我当长驱以定中原谷笑曰若中原相我下江南探囊中物耳谷后果如其言李昉尝为谷记室谷曰子他日官禄当如我昉后至宰相司空周显德中扈载以文章驰名枢密使王朴荐令知制诰除书未下朴诣中书言之谷曰斯人命薄虑不克享耳载知制诰迁翰林学士未几卒世谓朴能荐士谷能知人谷归洛中昭义李筠以谷周朝名相遗钱五十万他物称是谷受之既而筠起兵谷忧恚而终子言至补阙拱至太子中允

△咎居润

咎居润字广川【据东都事略增】博州高唐人善书计后唐长兴中隶枢密院为小吏以谨愿称晋初补牙职会景延广留守西洛署为右职延广卒陕帅白文珂表荐居润于周祖时世宗尹京诏以补府中要职即位擢为军器库使从征高平以功迁客省使知青秦二州历知凤翔河中府【按宋史作历知凤阳河中府考宋时无凤阳府名据东都事略改】显德三年代王朴知开封府四年幸寿州命为副守幸淮上以为宣徽北院使兼副留守六年征关南为东京副留守吴廷祚为枢密使真判开封府改左领军卫上将军恭帝立加检校太傅太祖即位加检校太尉及征泽潞命赴澶州巡警师还权知镇州加左领军卫上将军建隆二年又权知澶州拜义武军节度【东都事略作义成军】在镇数年得风痺干德四年卒年五十九赠太师居润性明敏有节槩笃于行义晋室将亡景延广委其族自洛赴难至则为契丹所执僚吏部曲悉遁独居润保护其家居润与太祖同事世宗情好款浹尝荐沈伦于太祖以为纯谨可用后用至宰相世称其知人子惟质至内园使弟居

济至水部员外郎大中祥符三年录其孙建中为三班借职 【按宋史此下有窦贞固李涛两传查窦贞固入宋未久不仕而卒李涛已改入贰臣其附后之李澣李仲容二人无迹可录今并删】

△王易简

王易简字国宝京兆万年人性介特寡合曾祖肱唐剑州刺史祖远连州刺史父贯唐州刺史易简少好学工诗会僖宗幸蜀长安兵乱避地山谷梁干化中举进士擢第复隐华山邠帅韩恭辟观察支使府罢华帅李保衡复辟从事踰年尹皓代保衡易简仍在幕府会朱友谦以河中叛归庄宗攻华州甚急城中危惧咸请筑月城以自固皓恃勇不听易简固请乃许板筑始毕外城果坏军民赖之会夜不能攻友谦遂遁去皓卒易简归田里久之召为著作郎数月弃去复召为右拾遗上书忤旨出为邓州节度推官后唐同光中遣魏王继岌伐蜀以宰相郭宗韬为招讨使辟易简为巡官改魏王都督府记室参军明宗即位周帅罗周恭辟为掌书记府罢退居华阴作小隐诗二十首并序以见志好事者多传诵秦王从荣闻而重之谓宰相冯道李愚曰易简有才岂宜久居外地即召为祠部员外郎改水部郎中知制诰府中书舍人晋初判弘文馆史馆事晋祖为治务求速效易简上渐治论以谏之诏书褒荅以论付史馆及废翰林学士易简兼知内制又拜御史中丞历右丞吏部侍郎左丞判吏部铨尝上言选人诣都亲求解样往来跋涉乞委南曹详定下诸州每取解时准条式遵行从之周朝讳简易止名易广顺初迁礼部尚书是冬合三铨为一令易简权判俄改刑部尚书显德四年以太子少保致仕归乡里太祖即位召加少傅所居华阴构一鸣堂二品楼优游自适建隆四年无疾卒年七十九子景让进士及第至尚书郎

△赵上交

赵上交涿州范阳人本名远字上交避汉祖讳遂以字称祖光邺鄂州录事参军父简章涿州司马上交身长七尺负才任气为乡里所推后唐同光中尝诣中山王都有和少微者亦在都门下毁訾上交都遂不为礼因南游洛阳中官骠骑大将军马绍宏领北面转运制置大使表为判官迁殿中丞秦王从荣开府兼判军卫以上交为虞部员外郎充六军诸卫推官累迁司封郎中充判官从荣豪迈不遵礼法好昵羣小上交从容引恭世子戾太子之事讽谏从荣怒出之历泾秦二镇州节度判官从荣及祸僚属皆坐斥上交由是知名晋初召为左司郎中度支判官历右谏议大夫会废翰林学士以上交为中书舍人知内外制迁刑部侍郎上言乞自今但能雪活冤狱不限中外官并加旌赏诏从之俄

迁户部侍郎拜御史中丞弹举无所阿避契丹入汴立明宗幼子许王从益为帝【按五代史后唐明宗家人王淑妃传称许王从益晋天福四年九月封为郟国公以奉唐祀出帝即位契丹犯京师耶律德光拜从益为彰信军节度使从益辞不之官与母俱迁洛阳德光北归留萧翰守汴州汉高祖起太原翰欲北去乃使人召从益委以中国遂以从益权知南朝军国事又按汉高祖本纪天福十二年五月萧翰遁归于契丹以郟国公李从益知南朝军国事据此则立从益者乃契丹北归以后晋守萧翰所为非入汴时事也又许王是唐时初封此时已降称郟公所正者止称权知南朝军国事未尝为帝两史互异】以礼部尚书王崧为左丞相上交为右丞相契丹去上交请去伪号称梁王汉祖将至从益遣上交驰表献款授检校礼部尚书太仆迁秘书监周祖监国命太师冯道迎湘阴公于徐州以上交副之广顺初拜礼部侍郎会将试贡士上交申明条制颇为精密始复糊名考校擢扈载甲科及取梁周翰董淳之流时称得士转户部侍郎明年再知举谤议纷然时枢密使王峻用事尝荐童子上交拒之峻怒奏上交选士失实贬商州司马朝议以为太重会峻贬乃止但坐所取士李观侯璨赋落韵改太子詹事显德初迁宾客二年拜吏部侍郎多请告不朝时出游别墅世宗因问陶谷曰上交岂衰老乎谷对曰上交昔掌贡举放鬻市家子李观及第受所献名园多植花卉优游自适世宗怒免其官太祖即位起为尚书右丞建隆二年卒年六十七上交莅官以干闻当时称有公辅器尤好吟咏子曦字可畏七岁丧母过哀十二能属文与兄峻同举进士未成名而兄夭遂以荫补牛千备身厯秘书郎殿中丞著作郎卒年二十六

△刘温叟

刘温叟字永龄河南洛阳人性重厚方正动遵礼法唐武德功臣政会之后父岳后唐太常卿温叟七岁能属文善楷隶岳时退居洛中语家人曰吾儿风骨秀异所未知者寿耳今世难未息得与老夫皆为温洛之叟足矣故名之温叟以荫补国子四门助教河南府文学清泰中为左拾遗内供奉以母老乞归就养改监察御史分司未几召为右补阙仕晋累拜刑部郎中改都官郎中充翰林学士初岳仕后唐尝居内署至是温叟复居斯任时人荣之温叟既受命归为母寿候立堂下须臾闻乐声两青衣举箱出庭奉紫袍兼衣母命卷帘见温叟曰此即尔父在禁中日内库所赐者温叟拜受泣下岁满加知制诰契丹入汴温叟惧随北迁与承旨张允共上表求解职契丹主怒欲出允等为县令赵延寿曰若学士才不称职求解者守本官可也不可加贬出遂得罢职出院汉祖南下温叟自洛

从至郑州称疾不行及入汴温叟久之方至授驾部郎中周初拜左谏议大夫改中书舍人加史馆修撰判馆事显德初迁礼部侍郎知贡举得进士七十六人有譖于帝者帝怒黜十二人左迁太子詹事温叟实无私后数年其被黜者相继登第温叟与张昭同修汉隐帝及周祖实录恭帝即位迁工部侍郎兼判国子监祭酒周祖即位改刑部建隆元年拜御史中丞丁内艰退居西洛旋复本官三年兼判吏部铨一日晚归由阙前太祖方与中黄门等数人偶登明德门西阙前驺者潜知之以白温叟温叟令传呼如常过阙前翌日请对具言人主非时登楼则近制咸望恩宥鞏下诸军亦希赏给臣所以呵导而过者欲示众以陛下非时不登楼也太祖善之【按温叟传呼过阙翼日请对之言因宋祖善之史家遂以为善谈伏读通鉴辑览诚春秋之定论以是知温叟大有愧于蘧伯玉矣】任台丞十二年屡求代太祖难其人不允开宝四年被疾太祖知其贫就赐器币数月卒年六十三温叟事继母以纯孝闻虽盛暑非冠带不敢见五代以来言执礼者惟温叟焉立朝有德望精赏鉴门生中尤器杨徽之赵邻几后皆为名士范杲幼时尝以文贽温叟大加称奖以女妻之太宗在晋邸闻其清介遣吏遗钱五百千温叟受之贮厅西舍中令府吏封署而去明年重午又送角黍纨扇所遣吏即遗钱者视西舍封识宛然还以白太宗太宗曰我钱尚不用况他人乎昔日纳之是不欲拒我也今周岁不启封其苦节愈见命吏鞏钱归邸是秋太宗侍宴后苑因论当世名节士具道温叟前事太祖再三赏叹雍熙初子照罢徐州观察推官待选以贫诣登闻求注官及引对太宗问谁氏子照以温叟对太宗愀然召宰相语其事且言当今大臣罕有其比因问照当得何官宰相言免选以为厚恩帝曰其父有清操录其子登朝庶足示劝擢照太子右赞善大夫炳烨并进士及第

刘晔

刘几

刘晔

晔字耀卿进士及第积官秘书省著作郎知龙门县羣盗杀人晔捕得之将械送府恐道亡失皆斩之众服其果通判益州召还时王曙治蜀或言其政苛暴真宗问曙治状与凌策孰愈晔曰策在蜀岁丰事简故得以宽假民比岁小歉盗贼窃发非诛杀不能禁然曙所行亦未尝出陛下法外帝善之天禧元年始置谏官帝谓宰相曰谏官御史当识朝廷大体于是以晔为右正言会京东南有泉出民争传可以已疾诏即其地建祥源观晔言其诡妄不经且亢旱不可兴土木以营不急岁荐饥河决滑州大兴力

役饥孳相望晬请策免宰相以应天变 【按宋史真

宗本纪河决滑州在天禧三年六月建祥源观在天禧二年闰四月宋史本传叙此二事先后失次今据改】 又请罢提点刑狱禁民弃父母事

佛老者皆不报表请补外帝以晬屡言事乃以判三司户部勾院出安抚京西还直集贤院同修起居注迁右司谏以尚书工部员外郎兼侍御

史知杂事权判吏部流内铨累迁刑部郎中龙图阁直学士知河南府徙河中府卒初王曙坐寇准贬官在朝无敢往见者晬叹曰友朋之义独

不行于今欵往钱之经宿而还尝善河中处士李洩洩死为陈其高行诏以著作郎赠之唐末五代乱衣冠旧族多离去乡里或爵命中绝而世

系无所考惟刘氏自十二代祖北齐中书侍郎环儁以下仕者相继而世牒具存焉子几刘几

几字伯寿以晬任为将作监主簿生而豪儁长折节读书第进士从范仲淹辟通判邠州邠地鹵民病远汲几浚渠引水注城中役兴客曰

自郭汾阳城此州苟外水可酺何待今日无为虚计劳人也几不荅未几水果至凿五池于通逵民大便利知盩州俗喜巫军校仗妖法结其徒

乱有日几使他兵伏垒门以伺夜半尽擒之加本路兵马钤辖知邠州侂智高犯岭南几上书愿自效以为广东西捉杀道闻蒋偕张忠战没疾

驰至长沙见狄青曰贼若退守巢穴瘴毒方兴当班师以俟再举若恃胜求战此成擒耳贼果悉众来大战于归仁铺前锋孙节死几以右军搏

鬪胜负未决言于青出劲骑五千张左右翼捣其中坚贼骇溃进皇城使知泾州陛见辞以母老丐复文阶归养仁宗谕之曰泾内地也将母莫

便焉命特赐冠帔领循州刺史迁西上合门使再归郎中班曾公亮荐之复以嘉州团练使为太原泾原路总管夏人寇用亮堡 【东都事畧

作同家堡】 转运使陈述古摄渭帅几移文索援兵不听率诸将偕请又不听乃趣以手书述古怒移几为凤翔且劾生事朝廷以总管非转运

使所得徙置遣御史出按述古黜几亦改鄜州召判三班院边吏告夏人趋大顺英宗问几几曰大顺天险非夏人可得近正恐与赵明为雠尔

帝曰明之子奔马入城几为所掩卿料敌一何神也以为秦凤总管神宗即位转四方馆使知保州治状为河北第一踰年即请老还为秘书监

致仕元丰三年祀明堂大臣言几知音诏诣太常定雅乐几曰古乐备四清声沿五季乱离废请增之乐成予一子官闲与人语边事谓张耒曰

比见诏书禁边吏夜饮此曹一旦有急将使输其肝脑此平日禁乐为今役者不亦难乎夫椎牛酺酒丰犒而休养之非欲以醉饱为德所以增

士气也耒敬识其语再加通议大夫卒年八十一几笃于风义推父遗恩官从兄已得任

子必先兄弟子之孤者其议乐律最善以为律主于人
声不以尺度求合古今异时声亦随变犹以古冠服加于今人安可得而称儒者泥古致
详于形名度数闲而不知清浊轻重之用故求于器虽
合而考于声则不谐尝游佛寺闻钟声曰声澌而悲主者且不利是夕主僧死在保州闻
角声曰宫微而商离至秋守臣忧之及期几遇疾然所
学颇杂郑卫云

△刘涛

刘涛字德润徐州彭城人后唐天成中举进士释褐为凤翔掌书记拜右拾遗时太
常丞史在德上章词理鄙俗仍犯庙讳涛上言请正其
罪虽不允时论是之累迁起居舍人晋天福初改司勋员外郎史馆修撰历度支职方二
郎中掌左藏库汉初宰相苏禹珪荐为中书舍人周广
顺中坐令子监察御史项代草诰命左迁少府少监分司西京项亦贬复州司户显德四
年再知贡举枢密使王朴言涛取士不精命翰林学士
李昉覆试黜者七人责授太子右赞善大夫恭帝立迁右詹事涛性刚毅不挠素与宰相
范质不协常郁郁不得志遂退居洛阳之清化里杜门
以书史自娱太祖素知涛履行开宝二年召赴阙以老病求退授秘书监致仕年七十二
卒清泰初中书舍人卢导受诏主文将锁宿涛力荐薛
居正以为文章器业必至台辅导取之后果为相世称其知人项子岁晟子讷谭并进士
及第至屯田员外郎讷为殿中侍御史

△边光范

边光范字子仪并州阳曲人父仁嗣忠武军节度副使光范后唐天成二年起家榆
次令召为殿中丞长兴四年改太常丞晋天福初授检
校户部员外郎北京留守判官兼侍御史二年拜太府少卿上书言选能吏以苏民瘼奏
入留中不出积官光禄少卿广晋府判官少帝即位拜
右谏议大夫权知开封府事迁给事中会蝗灾遣使亳州括借军粮称为平允开运元年
权知郑州拜左散骑常侍二年入为枢密直学士少帝
以光范藩邸旧僚待遇尤厚因游宴见光范位翰林学士下即日拜尚书礼部侍郎知制
诰充翰林学士仍直枢密院汉初改检校刑部尚书卫
尉卿上言慎选良牧立定年限以责辑绥之效疏入不报周广顺初出知陈州迁秘书监
召拜御史中丞复为礼部侍郎时礼部侍郎于贡部或
掌或否光范拜官将及秋试乃言于执政曰他曹公事不敢辞若处文衡校阅名贤品藻
优劣非下走所能也及期辞疾不出乃以翰林学士承
旨徐台符掌之时论多其自知世宗即位改刑部侍郎权知开封府俄迁户部显德五年
遣使普均租税光范诣宋州时韩通掌禁兵领宋师修

汴堤访郡民皆言光范均平之状乃具以闻世宗嘉之太祖即位征泽潞命为前军转运计度郑洛汝孟怀刍粮拜太常卿时张昭为吏部尚书朝议以其耆老令光范签判选事建隆四年襄州节度慕容延钊征湖南以光范权知州事路当冲会饷馈无阙是冬郊祀召还会延钊卒复知襄州大军数万由陕路讨蜀出汉上光范复当供亿人不知劳尝举本镇判官李穰为殿中侍御史穰后坐事除籍光范左迁太子宾客仍知襄州五年兼桥道使朝廷遣官督治道常六七辈一使所调发民皆数百人吏缘为奸多私取民课所发不充数而道益不修光范计其工以州卒代民官给器用役不淹久人以无扰诏书褒美开宝四年复判吏部铨曹御史中丞刘温叟卒以光范判御史台事数月真拜中丞六年以疾解铨曹任卒年七十三光范性至孝谦退和易雅有吏干母病疽尝吮之景德中录其孙易从同学究出身

△刘载

刘载字德舆涿州范阳人唐卢龙节度济之六世宗父昭下蔡令载后唐清泰中举进士晋初解褐校书郎历左拾遗集贤殿直学士汉初为殿中侍御史历仓部员外郎尝着五论曰为君为相为将去谗纳谏颇为文士所称周世宗初擢知制诰显德三年拜右谏议大夫迁给事中太祖即位浚五丈河自陈桥达曹州之西境命护其役建隆四年贝州节度使张光翰来朝遣载权知州事光翰归镇载还知贡举干德六年令知镇州开宝四年坐与何继筠不协改山南东道行军司马十年不召尝受诏权点检州事太平兴国初复入为给事中三年出知襄州六年代还告老改工部侍郎致仕乃赐一子出身八年卒年七十一载尤好学博通史传善属文尝受诏撰明宪皇后谥册文又作吊战国赋万余言行于世雅信释典敦尚名节子宗言至比部郎中宗望景德二年进士及第大中祥符四年其孙介以载文集来献以为试将作主簿

△程羽

程羽字冲远深州陆泽人少好学能属文晋天福中擢进士及第授阳谷县主簿历虞乡醴泉新都令皆有政绩太祖开宝中选为两使判官入对询以时事敷奏称旨擢著作郎知兴州踰年改知兴元府 【阙】 八年诏归阙以本官领开封府判官羽性淳厚莅事恪谨时太宗尹京颇以长者待之及即位拜给事中知开封府未几出知成都府为政宽简蜀人便之入朝拜礼部侍郎太平兴国五年典试贡士御试得人居多帝欲优以清职故事端明殿设学士二员居翰林学士上专备顾问冯道赵凤始居是职累朝因之及是即殿名以羽为文明殿学士位

在枢密副使下 【按太宗本纪太平兴国五年正月改端明殿学士为文明殿学士太平兴国五年三月应在拜礼部侍郎下今改】 六年以老疾求解职拜兵部侍郎未几致仕雍熙元年卒年七十二赠礼部尚书子帝振以荫至尚书虞部员外郎大中祥符元年卒其子适赐同学究出身从孙琳别传

钦定续通志卷三百三

●钦定续通志卷三百四 列传一百四

列传

宋 【八】

○宋八

张昭 窦仪【伉俪】 吕余庆 刘熙古【蒙正蒙叟】 石熙

载【中立】 李穆【肃】

张昭

窦仪

吕余庆

刘熙古

石熙载

李穆 【李肃】

△张昭

张昭字潜夫本名昭远避汉祖讳止称昭自言汉常山王耳之后世居濮州范县 【东都事畧作河闲人】 祖楚平寿张令楚平生直即昭父也初楚平赴调长安值巢寇乱不知所终直幼避地河朔既冠以父失所在时盗贼蠡起道路榛梗乃自秦抵蜀徒行丐食求父所在积十年不能得乃发哀行服躬耕海滨青州王师范开学馆延置儒士再以书币招直置宾职师范降梁直脱离北归以周易春秋教授时号逍遥先生昭始十岁能诵古乐府咏史诗百余篇未冠徧读九经尽通其义处侪类中缓步阔视以为马郑不己若也后至赞皇遇程生者专史学以为专究经旨不通今古率多拘滞若极谈王霸经纬治乱非史不可因出班范汉书十余义商榷乃授昭荀纪国志等后又尽得十三史五七年闲能驰骋上下数千百年事又注十代兴亡论躬耕负米以养亲后唐庄宗入魏河朔游士多自效军门昭因至魏携文数十轴谒兴唐尹张宪家富文籍每与昭燕语讲论经史要事恨相见之晚即署府推官同光初奏授真秩加监察御史里行宪为北京留守昭亦从至晋阳庄宗及难闻邺中兵士推戴明宗宪部将符彦超合戍将应之昭谓宪曰得无奏表劝进为自安之

计乎宪曰我本书生见知主上位至保厘乃布衣之极
苟腴颜求生何面目见主于地下昭曰此古人之志也公能行之死且不朽矣相泣而去
宪遂死之时论重昭能成宪之节时有害昭者昭曰主
辱臣亡死而无悔众执之以送彦超彦超曰推官正人无得害之又逼昭为榜安抚军民事
以昭为北京留守推官加殿中侍御史内供奉官
天成三年改安义军节度书记时以武皇庄宗实录未修诏镇国节度卢质西州节度副
使何琼秘书监韩彦辉续录事迹瓚上言昭有史材尝
私撰同光实录十二卷又闻其欲撰三祖志并藏昭宗朝阳武皇制诰诏九十余篇请以
昭所撰送史馆拜昭为左补阙史馆修撰委之撰录昭
以懿祖献祖太祖并不践帝位仍补为纪年录二十卷又撰庄宗实录三十卷上之迁都
官员外郎时皇子竞尚奢侈昭请诸皇子各置师傅讲
论道德使博识安危之理深知成败之由四年上武王以来功臣列传三十卷 【按五代
会要广顺元年闰正月平章事监修国史李愚与修
撰判馆事张昭远等进新修后唐功臣列传三十卷】 以本官知制诰明宗好畋猎昭上
疏谏嘉纳之长兴二年丁内艰昭性至孝居丧哀毁服
除改职方员外郎知制诰充史馆修撰上言乞复本朝故事置观察使察民疾苦御史弹
事谏官月给谏纸并从之又奏请劝农耕及置常平仓
等十数事明宗方务听纳昭复上疏言委任审于材器听受审于忠邪出令审于烦简兴
师审于德方赏罚审于喜怒毁誉审于爱憎议论审于
贤愚嬖宠审于奸佞推是八审以决万几庶可以臻至治明宗称善清泰中改驾部郎中
知制诰撰皇后册文迁中书舍人二年召判史馆兼点
阅三馆书籍较正添补预修明宗实录以献 【按五代会要清泰三年二月门下侍郎平
章事监修国史姚顛上明宗实录三十卷同修撰官
中书舍人张昭远等各颁赉有差】 三年迁礼部侍郎改御史中丞晋天福二年改户部
侍郎宰相桑维翰荐为翰林学士内署故事以先后入
为次不系官序特诏昭立位次承旨崔胤晋祖常幸内署与昭语及并魏旧事甚重之直
以昭故授著作佐郎致仕至是卒归西洛赙赐加等五
年服阕召为户部侍郎以唐史未成诏与吕琦崔胤等续成之别置史馆命昭兼判院事
昭又撰唐朝君臣正论上之改兵部侍郎八年迁吏部
判东铨兼史馆修撰判馆事开运二年唐书成加金紫阶进爵邑三年拜尚书右丞判流
内铨权知贡举汉初复为吏部侍郎时追尊六庙定谥
号乐章武曲命昭权判太常卿事月余即真干佑二年加检校礼部尚书隐帝昵比羣小
昭上言请听政之暇数召儒臣讲论经义周广顺初拜
户部尚书子秉阳为阳翟主簿抵罪昭自以失敬奉表引咎左迁太子宾客岁余复旧官

尝奏请兴制举设贤良方正能直言极谏经学优深可为师法详闲吏治达于教化三科职官士流黄衣草泽并许应诏诸州依贡举体式量试策论三道共以三千字以上为准考其文理俱优解送尚书吏部其登朝之官亦听自举从之显德元年迁兵部尚书世宗以昭旧德甚重焉尝诏撰制旨兵法十卷又撰周祖实录三十卷及梁郢王均帝后唐闵帝废帝汉隐帝五朝实录梁二主年祀寢远事皆遗失遂不克修余三帝实录皆藏史馆【按五代会要周显德三年十二月敕太祖实录并梁均帝唐清泰二主实录差兵部尚书张昭修其同修撰官委张昭定名奏请至四年正月兵部尚书张昭奏奉敕编修太祖实录及梁唐二末主实录今请国子祭酒尹拙太子詹事刘温叟同编修伏缘汉隐帝君临太祖之前其历试之绩并在汉隐帝朝内请先修隐帝实录又梁末主之上有郢王友珪篡杀居位未有纪录请依宋书刘邵例书为元克友珪其末主请依古义书曰后梁实录又唐末主之前有应顺帝在位四月出奔亦未编纪请书为前废帝清泰主为后废帝其书并为实录从之五年六月兵部尚书张昭等修太祖实录三十卷上之】世宗好拔英俊有自布衣及下位上书言事者多不次进用昭疏谏曰昔唐初刘洎马周起于徒步太宗擢用为相其后柳璨朱朴方居下僚昭宗亦加大用然太宗用之而国兴昭宗用之而国亡士之难知如此臣愿陛下存旧法而用人当以此四士为鉴戒世宗善之诏令详定经典释文九经文字制科条式及问六玺所出并议三礼图祭玉文鼎釜等昭援引经据时称其该博恭帝立封舒国公太祖即位拜吏部尚书干德元年郊祀昭为卤簿使奏复宫阙庙门郊坛夜警晨严之制礼毕进封郑国公与翰林承旨陶谷同掌选谷尝诬奏事引昭为证昭免冠抗论太祖不说遂三拜章告老以本官致仕改封陈国公开宝五年卒年七十九昭博通学术书无不览兼善天文风角太一卜相兵法释老之说藏书不下万卷尤好纂述自唐晋至宋专笔削典章之任岭南平擒刘鋹将献俘莫能知其礼时昭已致政太祖遣近臣就其家问之昭方卧病口占以授使者子秉图进士及第秉谦至尚书郎

△窦仪

窦仪字可象蓟州渔阳人父禹钧与兄禹锡皆以词学名禹钧唐天佑末起家幽州掾历沂邓安同郑华宋澶州支使判官周初为户部郎中显德中迁太常少卿右谏议大夫致仕仪十五能属文晋天福中举进士侍卫军帅景延广领夔州节度表为记室延广后历滑陕孟郢四镇仪并为从事开运中杨光远以青州判时契丹南侵博州刺史周儒以城降光远与儒遣

人引契丹轻骑于马家渡渡河时延广掌卫兵颜衍知州事即遣仪入奏仪谓执政曰昨与衍论事势有所预虑所以乘驿昼夜不息而来国家若不以良将重兵控博州渡必恐儒引契丹踰东岸与光远兵合则河南危矣俄而儒果导契丹渡河增置垒栅少帝军河上即遣李守贞等率兵万人水陆并进守汶阳据要害契丹果大至击走之汉初召为右补阙礼部员外郎周广顺初改仓部员外郎知制诰翰林学士厯驾部郎中给事中并充职刘温叟知贡举所取生有覆落者加仪礼部侍郎权知贡举俄以父病上表解官世宗亲加慰抚手封金丹俸赐其父父卒归葬洛阳终丧召拜端明殿学士从征淮南判行在三司世宗以其饷馈不继将杀之宰相范质解救得免淮南平判河南府兼知西京留守事恭帝立迁兵部侍郎充职俄使南唐既至将宣诏会雨雪李景请于庑下拜受仪曰仪获将国命不失旧礼傥以沾服失容请俟诸他日景即拜命于庭太祖建隆元年迁工部尚书罢学士兼判大理寺奉诏复位刑统为三十卷会翰林学士王着以酒失贬官太祖谓宰相曰深严之地当得宿儒处之范质等对曰竇仪清介重厚然已自翰林迁端明矣太祖曰非斯人不可处禁中卿当谕以朕意勉令就职即日再入翰林为学士干德二年范质等三相并罢越三日始命赵普平章事制书既下太祖问翰林学士曰质等已罢普敕何官当署承旨陶谷时任尚书乃建议相位不可以久虚今尚书乃南省六官之长可以署敕仪曰谷所陈非承平之制皇弟开封尹同平章事即宰相之任太祖曰仪言是也【按赵普拜相以太宗署敕是时陶谷引唐甘露之变故事对为竇仪所非太祖由是轻谷重仪仪遂大用】即命太宗署敕赐之仪加礼部尚书时御史台议欲以左右仆射合为表首太常礼院以东官三师为表首仪援典故以仆射合为表首者六而谓三师无所据朝议是之四年知贡举是冬卒年五十三赠右仆射仪学问优博风度峻整弟俨侃称儔皆相继登科冯道与禹钧有旧尝赠诗有灵椿一株老丹桂五枝芳之句搢绅多讽诵之当时号为竇氏五龙初周祖平兗州议将尽诛胁从者仪白冯道范质同请于周祖皆得全活显德中太祖克滁州世宗遣仪籍其府库太祖复令亲吏取藏中绢给麾下仪曰太尉初下城虽倾藏以给军士谁敢言者既着籍乃公帑物也非诏不可取后太祖屡对大臣称仪有执守欲相之赵普忌仪刚直乃引薛居正参知政事及仪卒太祖闵然谓左右曰天何夺我竇仪之速耶盖惜其未大用也侃汉干佑初及第至起居郎儔周广顺初及第至左补阙子諲諲诰俱登进士第諲至都官员外郎諲至秘书丞

窦俨

窦偁

窦俨

俨字望之幼能属文既冠举晋天福六年进士辟滑州从事府罢授著作佐郎集贤校理出为天平军掌书记以母忧去职服除拜左拾遗开运中诸镇恣用酷刑俨疏请禁止从之仕汉为史馆修撰周广顺初选右补阙与贾纬王仲同修晋高祖少帝汉祖三朝实录改主客员外郎知制诰时仪自阁下入翰林兄弟同日拜命分居两制时人荣之俄加金部郎中拜中书舍人显德元年加集贤殿学士判院事父忧去职服阙复旧官时世宗方切于治道俨上疏曰历代致理六纲为首一曰明礼二曰崇乐三曰熙政四曰正刑五曰劝农六曰经武陈礼乐刑政劝农经武之言世宗多见听纳南征还诏俨考正雅乐俄权知贡举拜翰林学士判太常寺俨校钟磬筦钥之数辨清浊上下之节复举律吕旋相为宫之法迄今遵用会诏中外臣僚有所闻见并许上章论议俨疏奏数事不报太祖即位就转礼部侍郎代仪知贡举当是时祀事乐章宗庙谥号多俨撰定议者服其该博车驾征泽潞以疾不从卒年四十二俨性夷旷好贤乐善优游策府凡十余年于仪尤为才俊对景览古皆形讽咏更迭倡和至三百篇多以道义相敦厉并着集显德中奉使荆南荆南自唐季以来高氏据有其地虽名藩臣车服多僭侈踰制以至司宾贱隶候馆小胥皆盛服影纓与王人抗礼俨讽以天子在上诸侯当各守法度悉令去之然后宣达君命尤善推步逆知吉凶卢多逊杨徽之同任谏官尝谓之曰丁卯岁五星当聚奎自此天下太平二拾遗见之俨不与也又曰俨家昆弟五人皆登进士第可谓盛矣然无及相辅者惟偁稍近之亦不久居其位卒如其言俨子早卒以侄说为嗣

窦偁

偁字日章汉干佑二年举进士第周广顺初补单州军事判官迁秘书郎出为绛州防御判官太祖即位历武宁军掌书记西京留守判官天雄归德军节度判官开宝六年拜右补阙知宋州太宗领开封府尹选偁判官时贾琰为推官【按东都事畧载偁琰在太宗幕府其官名与宋史同宋名臣言行录载窦偁为晋府记室贾琰为判官与史互异】偁不乐其为人太宗尝宴诸王偁琰与会琰言矫诞偁叱之曰巧言令色心独不愧乎坐上愕然因罢会太宗白太祖出偁为彰义军节度判官太平兴国五年车驾幸大名府召至行在所拜比部郎中时议北征偁请休兵牧马以徐图之上从其言归以偁为枢密直学士六年迁左谏议大夫充职七年

参知政事上曰汝何能臻此偁曰陛下不忘旧臣太宗
曰非也卿能以公正责贾琰朕旌直臣尔是冬卒 【按宋史本传作是秋卒按太宗本纪
太平兴国七年冬十月己卯左谏议大夫窦偁卒今
据改正】 年五十八赠工部尚书初偁在泾州与丁颢同官颢子谓方幼偁见之曰此儿
必远到以女妻之后为宰相三公太祖尝谓宰相曰近
朝卿士窦仪质重严整有家法闺门敦睦人无谰语诸弟不能及偁亦中人材尔偁有操
尚可嘉也

△吕余庆

吕余庆幽州安次人本名胤犯太祖偏讳因以字行父琦晋兵部侍郎余庆以荫补
千牛备身历开封府参军迁户曹掾少帝弟重睿领忠
武军节度以余庆为推官仕汉历周迁濮州录事参军太祖领同州节度闻余庆有才奏
为从事世宗问曰得非尝为濮州纠曹者乎即以为定
国军事掌书记世宗尝镇澶渊濮为属郡故知其为人也太祖历滑许宋三镇余庆并为
宾佐及即位召拜给事中充端明殿学士清泰中琦亦
居是职官秩皆同时人荣之未几知开封府太祖征潞及扬并领上都副留守建隆三年
迁户部侍郎荆湖平出知潭州改襄州迁兵部侍郎知
江陵府召还以本官参知政事蜀平命知成都府时多盗贼军士恃功骄恣大将王全斌
等不能戢下一日药市始集街吏驰报有军校被酒持
刃夺贾人物余庆立捕斩之以徇军中畏伏民用安堵就加吏部侍郎归朝兼剑南荆南
等道都提举三司水陆发运等使开宝六年与宰相更
知政事印旋以疾上表求解机务拜尚书左丞九年卒年五十赠镇南节度余庆重厚简
易自太祖领藩镇余庆为元僚及受禅赵普李处耘皆
先进用余庆恬不为意未几处耘黜守淄州余庆自江陵还太祖委曲问处耘事余庆以
理辨释帝以为实遂命参知政事会赵普忤旨左右争
倾普余庆独辨明之太祖意稍解时称其长者至道中以弟端为宰相特诏赠侍中

△刘熙古

刘熙古字义淳宋州宁陵人年十五通易诗书十九通春秋子史后唐长兴中以三
传举时翰林学士和凝掌贡举熙古献春秋极论二篇
演论三篇凝甚加赏召与进士试擢第清泰中金州防御使孙铎表熙古为从事晋天福
初铎移汝州又辟以随熙古善骑射一日有鸮集戟门
槐树高八尺熙古引弓一发贯鸮于树铎喜令勿拔矢以旌其能后二岁铎卒调补下邑
令俄为三司户部出使巡官领永兴渭桥华州诸仓制
置发运仕汉为卢氏令周广顺中改亳州防御推官历澶州支使秦凤平以为秦州观察
判官太祖领宋州为节度判官即位召为左谏议大夫

知青州干德初迁刑部侍郎知凤翔府未几移秦州州境所接多寇患熙古至谕以朝廷恩信取蕃部酋豪子弟为质边鄙以宁转兵部侍郎徙知成都府六年就拜端明殿学士开宝五年诏以本官参知政事岁余以足疾求解拜户部尚书致仕九年卒年七十四赠右仆射熙古兼通阴

阳象纬之术性淳谨虽显贵不改寒素历官十八登朝三十余年未尝有过子蒙正蒙叟

刘蒙正

刘蒙叟

刘蒙正

蒙正字颐正善骑射干德中以荫补殿直迁供奉官王师征江南卢绛以舟师来援润州蒙正分精甲百人与绛战矢中左胁战愈力及下

润州获知州刘澄监军崔亮部送阙下太平兴国四年转内藏库副使进崇义使又出知沧冀磁等三州戎人犯境蒙正调丁男乘城固守有劳

以擅乘驿马责授亳州团练副使咸平四年卒年七十二

刘蒙叟

蒙叟字道民干德中进士甲科历岳宿二州推官以所知论荐授太子中允知干兴拜监察御史徙知济州历知卢濠滁汝四州迁都官咸

平中以本官直史馆车驾北巡令知中宫名表献宋都赋述国家受命建号之地宜建都立宗庙时虽未遑后卒从之改职方郎中景德中以足

疾拜太常少卿致仕卒年七十三蒙叟好学善属辞子宗儒太子中书宗弼宗海并进士及第

△石熙载

石熙载字凝绩河南洛阳人周显德中进士登第疏俊有量居家严谨有礼法太祖即位太宗以殿前都虞候领泰宁军节制辟为掌书记

及尹京邑表为开封府推官授左拾遗迁左补阙以谗出为忠武崇义二军掌书记太宗即位复以左补阙召同知贡举时梅山洞蛮屡为寇以

熙载知潭州召还擢为兵部员外郎太平兴国四年领枢密直学士未几签书枢密院事

【按领枢密二句宋史载在擢为兵部员外郎下考

宋史太宗本纪太平兴国四年正月置签书枢密院事以石熙载为之宰辅表同今据改】 亲征河东以给事中充枢密副使从行还迁刑部侍

郎六年 【按宋史本传作五年考太宗本纪宰辅表俱作六年今据改】 拜户部尚书枢密使 【按宋宰辅编年录云用文正官充枢密使

自熙载始】 以病足在告寝疾久之未愈八年上表求解职诏加慰抚授尚书右仆射九年卒年五十七赠侍中谥元懿帝为悲叹累日且谓其

事君之心纯正无他适当委用而奄忽至此深为可惜国朝大臣谢事而卒车驾临视者

惟熙载焉咸平二年与薛居正配飨太宗庙庭熙载性
忠实遇事尽言是非好恶无所顾避人有善即推荐之时论称其长者从弟熙古幼弟熙
正皆登进士第熙载抚之如一子中立

石中立

石中立

中立字表臣年十三而孤性疏旷好谐谑初为西头供奉官后五年改光禄寺丞家
材悉推与诸父无所受擢直集贤院与李宗谔杨亿刘
筠陈越相厚善校讎秘书凡更中立者人皆传之累擢知制诰翰林学士加承旨兼龙图
阁学士景佑四年拜参知政事明年灾异数见谏官韩
琦言中立在位喜诙笑非大臣体与王随陈尧佐韩亿皆罢以户部侍郎为资政殿学士
进大学士迁吏部侍郎提举祥源观以太子少傅致仕
迁少保卒年七十八【据东都事畧增】 赠太子太傅谥文定中立练习台阁故事不
汲汲近名嘉宾客至必与饮酒醉乃得去初家产岁入
百万钱末年费几尽帝闻其病赐白金三百两既死其家至不能办丧子居简从简【按
宋史本传止载子居简一人据隆平集增】 居简至
太子中允集贤校理

△李穆【李肃】

李穆字孟雍开封府阳武人父咸秩陕西大都督府司马穆幼能属文有至行行路
得遗物必访主归之从酸枣王昭素受易及庄老书尽
究其义昭素谓曰子所能得精理往往出吾意表且语人曰李生异日必为廊庙器以所
著易论三十三篇授之周显德初以进士为郢汝二州
从事迁右拾遗太祖即位以殿中侍御史选为洋州通判既至剖决滞讼无留狱焉移陕
州通判有司调郡租输河南穆以本镇军食阙不即应
命坐免又坐举官削前资时弟肃为博州从事穆将母就肃居虽贫甚兄弟相与讲学意
泊如也开宝五年以太子中允召明年拜左拾遗知制
诰五代以还词令尚华靡穆独用雅正悉矫其弊穆与卢多逊为同门生太祖尝谓多逊
李穆性仁善辞学之外无所豫对曰穆操行端直临事
不以死生易节仁而有勇者也帝曰诚能如是吾当用之时将有事江南已部分诸将而
未有发兵之端乃先召李煜入朝以穆为使穆至谕旨
煜辞以疾且言事大朝以望全济今若此有死而已穆曰朝与否国王自处之然朝廷甲
兵精锐物力雄富恐不易当其锋宜熟思之无自贻后
悔使还具言状帝以为所谕要切江南亦谓其言诚实太平兴国初转左补阙三年加史
馆修撰判馆事四年从征太原还拜中书舍人预修太
祖实录七年以与卢多逊款狎又为秦王廷美草朝辞笏记为言者所劾责授司封员外

郎八年与宋白等同知贡举及侍帝御崇政殿亲试进士帝悯其颜貌癯瘁即日复拜中书舍人史馆修撰判馆事召为翰林学士知开封府剖判精敏猾奸无所贷假由是豪右屏迹权贵无敢干以私帝益知其才擢拜左谏议大夫参知政事月余丁母忧未几起复本官穆三上表乞终制诏强起之穆益哀毁尽礼九年晨起将朝风眩暴卒年五十七穆自责授员外郎复中书舍人入翰林参知政事以至于卒不及周岁帝闻其死哭谓近臣曰穆国之良臣朕方倚用遽兹沦没非斯人之不幸乃朕之不幸也赠工部尚书穆性至孝母尝卧疾每动止转侧皆亲自扶掖乃称母意后穆坐秦王事属吏其子惟简给祖母以穆奉诏鞫狱台中及责授为省郎还家不以白母母终弗之知及居丧思慕以至灭性穆善篆隶文工画常晦其事质厚忠恪谨言慎行纯至无矫饰善谈名理接引后进多所荐达尤宽厚家人未尝见其喜愠所著文章随即毁之惟简以父任将作监丞大中祥符七年特拜太子中允致仕后加太常丞多才艺性冲澹不乐仕进去官家居三十余年人多称之弟肃字季雍七岁读书知大义举进士登甲科历濮博二州从事迁保静军节度推官诏方下一夕卒

钦定续通志卷三百四

●钦定续通志卷三百五 列传一百五

列传

宋【九】

○宋九

薛居正【惟吉】 沈伦【继宗】 卢多逊 宋琪【宋雄】

薛居正

沈伦

卢多逊

宋琪

△薛居正

薛居正字子平开封浚仪人父仁谦周太祖宾客居正少好学有大志清泰初举进士不第为遣愁文以自解寓意倜傥识者以为有公辅之量踰年登第晋天福中华帅刘遂凝辟为从事遂凝兄遂清领邦计奏署盐铁判官【东都事畧作盐巡官】开运初改度支推官宰相李崧领盐铁又奏署推官加大理寺直迁右拾遗桑维翰为开封府尹奏署判官汉干佑初史弘肇领侍卫亲军威权震主残忍自恣无敢忤其意者其部下吏告民犯盐禁法当死狱将决居正疑其不实召诘之乃吏与民有私憾因诬

之逮吏鞫之具伏抵法弘肇无以屈周广顺初迁比部
员外郎领三司推官旋知制造从征兖州加都官郎中累迁左谏议大夫擢宏文馆学士
判馆事使沧州定民租以材干闻于朝擢刑部侍郎判
吏部铨太祖即位迁户部侍郎太祖亲征李筠及李重进并留司三司俄出知许州建隆
三年入为枢密直学士权知贡举初平湖湘以居正知
朗州会亡卒数千人聚山泽为盗监军使疑城中僧千余人皆其党欲尽捕诛之居正以
计缓其事因率众翦灭羣寇擒贼帅汪端诘之僧皆不
预赖以全活干德初加兵部侍郎车驾将亲征太原大发民馈运时河南府饥逃亡者四
万家命居正驰传招集浹旬闲民尽复业以本官参知
政事【按太祖干德二年初置参知政事为宰相副贰薛居正吕余庆始任斯职】五
年加吏部侍郎开宝五年兼淮南湖南岭南等道都提
举三司水陆发运使又兼门下侍郎监修国史又监修五代史六年拜门下侍郎平章事
太平兴国初加左仆射昭文馆大学士从平晋阳还进
位司空卒年七十赠太尉中书令谥文惠居正性任宽简不好苛察士君子以此多之自
参政至为相凡十八年恩遇始终不替先是太祖尝谓
居正曰自古为君者鲜克正己为臣者多无远略虽居显位不能垂名后代而身陷不义
子孙罹殃盖君臣之道有所未尽吾观唐太宗受人谏
疏直诋其非而不耻以朕所见不若自不为之使人无异词又观古今人臣多不令终能
保全而享厚福者由忠正也开宝中居正与沈伦并为
相卢多逊参知政事九年多逊亦为平章事及居正卒沈伦责授多逊南流论者以居正
守道蒙福果符太祖之言平居好读书为文落笔不能
自休子惟吉集为三十卷上之赐名文惠集成平二年诏配飨太祖庙庭

薛惟吉

薛惟吉

惟吉字世康居正假子也居正妻妬悍无子故养惟吉爱之甚笃少有勇力与京师
少年追逐角抵蹴鞠纵酒不仅尝与伶人游居正不能
知荫补右千牛卫备身历太子通奉舍人改西头供奉太宗即位三相子皆越次拔擢沈
伦卢多逊子并为尚书郎惟吉以不习文故为右千牛
卫大将军及居正卒太宗亲临居正妻拜旋丧所帝问不肖子安在颇改行否惟吉伏丧
侧窃闻帝语惧赧不敢起自是尽革故态谢绝所与游
者居丧有礼既而多接贤士大夫颇涉猎书史时论翕然称之帝知其改行令知澶州改
扬州上表自陈迁左千牛卫大将军俄诏知河南府又
知凤翔府淳化五年与秦州温仲舒对易其任未几迁左领军卫大将军至道二年移知
延州未行卒年四十二

△沈伦

沈伦字顺仪开封太康人旧名义伦以与太宗名下字同止名伦少习三礼于嵩洛闲以讲学自给汉干佑中白文珂镇陕伦往依之周显德初太祖领同州节度宣徽使咎居润与伦厚善荐于太祖留幕府太祖继领滑许宋三镇皆署从事掌留后财货以廉闻及即位自宋州观察推官召为户部郎中奉使吴越归奏便宜十数事皆从之道出扬泗属岁饥民多死郡长吏白于伦曰郡中军储尚百余万斛倘贷于民至秋复收新粟如此则公私俱利非公言不可还具以白朝论沮之曰今以军储振饥民若荐饥无征孰任其咎太祖以问伦曰国家以廩粟济民自当召和气致丰稔岂复有水旱耶此当决于宸衷太祖即命发廩贷民建隆三年迁给事中明年为陕西转运使王师伐蜀用为随军水陆转运使先是王全斌崔彦进之入成都也竞取民家玉帛子女伦独居佛寺饭蔬食有以珍异奇巧物为献者伦皆拒之东归篋中所有纔图书数卷而已太祖知之遂贬全斌等以伦为户部侍郎枢密副使亲征太原领大内都部署判留司三司事先是伦第瘠陋处之晏如时权要多冒禁市巨木秦陇闲以营私宅及事败露皆自启于帝前伦亦尝为母市木营佛舍因奏其事太祖笑谓曰尔非踰矩者知其未葺居第因遣中使按图督工为治之伦私告使者愿得制度狭小使者以闻帝亦不违其志开宝二年丁母忧起复视事六年拜中书侍郎平章事集贤殿大学士兼提举荆南剑南水陆发运事零祀西洛以伦留守东京兼大内都部署俄召赴行在令预大礼太平兴国初加右仆射兼门下侍郎监修国史亲征太原复以伦为留守判开封府事师还加左仆射五年史官李昉扈蒙撰太祖实录五十卷伦为监修以献六年加开府仪同三司是岁疾作自是多请告卢多逊事将发伦已上表求致仕明年多逊败以伦与之同列不能觉察诏加切责降授工部尚书其子都官员外郎继宗本由父荫不宜更在朝行可落班簿时伦病不能兴上表谢未几伦再奏章乞骸骨复授左仆射致仕帝以伦国初旧臣遽复继宗官以慰其心雍熙四年卒年七十九赠侍中初有司议谥伦曰恭惠继宗上言曰臣父始从冠岁即事儒业叨遇明时陟于相位尝历集贤修史之职伏请改谥曰文判太常礼仪院赵昂判考功张洎驳曰沈伦逮事两朝早升台弼有祇畏谨守之美有矜恤周济之心其备位台衡出于际会徒能谨飭以自保全以恭配惠厥美居多至于集贤国史皆宰相兼领之任非必由文雅而登其沈伦谥伏望如故从之

沈继宗

沈继宗

继宗字世卿伦为枢密副使以荫补西头供奉官伦作相授水部员外郎累转屯田郎中出知单州代归命使京东计度财赋濮州土贡银课民织造不折省税郢州节度配属县纳药物皆为民病继宗归历言于帝以除其弊至道末领淮南转运使致仕后扈从东封复授职方郎中历迁至判三司三勾院大中祥符五年卒年五十五子惟温惟清惟恭并为将作监主簿惟温后至秘书丞惟清娶密王女宜都县主至内殿承制

△卢多逊

卢多逊怀州河内人曾祖得一祖贞启皆为邑宰父亿字子元少笃学以孝悌闻举明经调补新乡主簿秩满复试进士为校书郎集贤校理晋天福中迁著作佐郎出为郢州观察支使节帅杜重威骄蹇黠货幕府贿赂公行唯亿清介自持会景延广镇天平表亿掌书记留守西洛又表为判官时国用窘乏取民财以助军河南府计出二十万缗延广欲并缘以图羨利增为三十七万缗亿谏曰公位兼将相既富且贵今国帑空竭不得已而取费于民公何忍利之乎延广惭而止汉初以魏王承训为开封尹授亿水部员外郎充推官时侍卫诸军骄恣朝廷姑息之军士成美以驴负盐入都门阍者不敢执反擒平民孟柔送侍卫司柔自诬伏论当弃市亿察其冤言于汉祖而释之周初为侍御史汉末兵乱法书亡失至是大理奏重写律令格式统类编敕乃诏亿与刑部员外曹匪躬大理正段寿同加议定以晋汉及周初事关刑法敕条者分为二卷附编敕自为大周续编敕诏行之太祖即位迁少尹亿性恬退闻其子多逊知制诰即上章求解干德二年以少府监致仕多逊周显德初举进士解褐秘书郎集贤校理迁左拾遗集贤殿修撰太祖建隆三年以本官知制诰历祠部员外郎权知贡举加兵部郎中史馆修撰开宝二年车驾征太原知太原行府事移幸常山大权知镇州师还直学士院四年命为翰林学士使江南还因言江南衰弱可图之状受诏同修五代史迁中书舍人参知政事【按宋史宰辅表开宝六年九月己巳卢多逊自翰林学士兵部员外郎迁中书舍人参知政事本传不载其为兵部员外郎】丁外艰数日起复视事会史馆修撰扈蒙请复修时政记诏多逊专其事金陵平加吏部侍郎太平兴国初拜中书侍郎平章事从平太原还加兵部尚书多逊博涉经史聪明强力文辞敏给好任数有谋略发多奇中太祖好读书每取书史馆多逊预戒吏令白己知所取书必通夕阅览及太祖问书中事多逊应答无滞先是多逊知制诰与赵普不协及在翰林日

每召对多攻普之短未几普出镇河阳太宗践阼普入
为少保普子承宗娶燕国长公主女承宗适知潭州受诏归阙成婚礼未踰月多逊白遣
归任普由是愤怒初普出镇河阳上言自愬云外人谓
臣轻议皇弟开封尹皇弟忠孝全德岂有闲然矧昭宪皇太后大渐之际臣实预闻顾命
知臣者君愿赐昭鉴太祖手封其书藏于宫中至是普
复密奏臣开国旧臣为权幸所沮因言昭宪顾命及先朝自愬之事帝于宫中访得普前
所上表因感悟即留承宗京师未几复用普为相多逊
益不自安普屡讽多逊令引退多逊贪固权位不能决会有以多逊尝遣堂吏赵白交通
秦王廷美事闻太宗怒诏数其罪责授守兵部尚书明
日以多逊属吏命翰林学士承旨李昉学士扈蒙卫尉卿崔仁冀膳部郎中知杂事滕中
正杂治之狱具召文帝常参官集议朝堂太子太师王
溥等七十四人议请依有司所断削夺在身官爵准法诛斩诏令卢多逊在身官爵及三
代封赠妻子官封并用削夺追毁一家亲属并配流崖
州所在驰驿发遣纵经大赦不在量移之限替周已上亲属并配隶边远州郡剖曲奴婢
纵之余依百官所议 【按宋名臣言行录载竇仪为
翰林学士时赵普专政帝患之欲闻其过一日召仪语及普所为多不法且誉仪早负才
望之意仪监言普开国元勋公忠亮直社稷之重帝不
悦仪归言于诸弟曰我必不能作宰相然亦不诣朱崖多逊有崖州之行是其言之验也
】 多逊至海外因部送者还上表称谢雍熙二年卒于
流所年五十二诏徙其家于容州未几复移置荆南端拱初录其子雍为公安主簿还其
怀州籍没先莹雍卒诸弟皆特赦除州县官初亿性俭
素自奉甚薄及多逊贵显赐赉优厚服用渐侈愀然不乐谓亲友曰家世儒素一旦富贵
暴至吾未知税驾之所后多逊果败人服其识咸平五
年又录雍弟宽为襄州司士参军宽弟察中景德进士察奉多逊丧归葬襄阳

△宋琪

宋琪字俶宝幽州蓟人少好学晋祖割燕地以奉契丹契丹岁开贡部琪举进士中
第署寿安王侍读时天福六年也幽帅赵延寿辟琪为
从事会契丹内侵随延寿至京师延寿子赞领河中节度汉初改授晋昌军皆署琪为记
室周广顺中赞罢镇补观城令世宗征淮南赞自右龙
武统军为排阵使复辟琪从征及金陵归款以赞镇庐州表为观察判官部有冤狱琪辨
之免死者三人特加朝散大夫太祖即位连移寿阳延
安二镇皆表琪为从事干德四年召拜左补阙开封府推官太宗为府尹初甚加礼遇琪
与宰相赵普枢密使李崇矩善出入门下遂恶之乃白
太祖出琪知龙州移阆州开宝九年为护国军节度判官太宗即位召赴阙时程羽贾琰

皆自府邸攀附致显要抑琪久不得调太平兴国三年授太子洗马迁太常丞出知大通监五年召归将加擢用为卢多逊所阻改都官郎中【东都事畧作都官员外郎】出知广州将行复以藩邸旧僚留判三司勾院七年与三司使王仁贍廷办事忤旨责授兵部员外郎俄通判开封府事京府置通判自琪始【按东都事畧云京府通判惟琪而已自是不复置也与宋史本传异】八年擢拜右谏议大夫同判三司改左谏议大夫参知政事是秋帝将以工部尚书李昉参预国政以其先入乃迁琪为刑部尚书十月赵普出镇南阳琪遂与昉同拜平章【按宋史太宗本纪太平兴国八年十一月壬子朔以参知政事宋琪李昉同平章事】自员外郎岁中四迁至尚书为相帝谓曰世之治乱在赏当其功罚当其罪即无不治谓为饰喜怒之具即无不乱卿等慎之九年九月帝幸景龙门外观水碓因谓侍臣曰此水出于山源清泠甘美凡近河水皆甘岂非余润之所及乎琪等对曰实因地脉潜通而然亦犹人之善恶以染习而成也雍熙元年十二月【按宋史本传云其年冬郊祀礼毕考太平兴国九年十一月改元雍熙琪加昭文馆大学士是十二月事不应蒙上作其年今改】加门下侍郎昭文馆大学士会诏广宫城宣徽使柴禹锡有别第在表识内上言愿易官邸帝览奏不悦禹锡阴结琪欲因白请卢多逊旧第帝益鄙之【按宋宰辅编年录载太宗谓宰相李昉等曰朕欲展宫城禹锡有别第在表识中上言愿易闾闾中官邸朕极不乐自此朕薄其为人乃潜与宋琪相结为琪请流人卢多逊旧第朕命即赐之多逊犯罪籍没为宰相复请居之不避恶名岂大臣之体乎】先是简州军事推官王澣引对帝嘉其隽爽面授朝官翼日琪奏澣经学出身一任幕职例除七寺丞帝曰吾已许之矣可与东宫官琪执不从拟大理丞告牒进入帝批曰可右赞善大夫琪勉从命帝滋不悦初帝令琪娶马仁瑀寡妻高继冲之女厚加赐与以助采广南转运王延范高氏之亲也知广州徐休复密奏其不轨且言其依附大臣帝因琪与禹锡入对问延范何如人琪未知其端盛言延范强明忠干禹锡旁奏与琪同帝意琪交通不欲暴其状因以其素好诙谐无大臣体罢守本官【按宋史宰辅表雍熙二年十二月丙辰宋琪自同中书门下平章事以本官免】禹锡授左骁卫大将军端拱初帝亲耕藉田以旧相进位吏部尚书二年将讨幽蓟诏羣臣各言边事琪本燕人究知蕃部兵马山川形势俄又陈十策颇采用之淳化二年诏百官转对琪首应诏建明堂辟雍之议五年李继迁入寇灵武命侍卫马军都指挥使李继隆为河西兵马都部署以讨之西川贼帅李顺攻劫州县以昭宣使王继

恩为剑南西川招安使琪又上书言边事帝密写其奏
令继隆择利而行至道元年大宴于含光殿帝问琪年对曰七十有九帝因慰抚久之二
年拜右仆射又以其衰老诏许五日一朝是年卒赠司
空谥惠安子贻序为右赞善大夫贻麻为大理评事贻广童子出身琪素有文学颇谐捷
在使府前后三十年周知人情尤通吏术在相位日百
执事有所求请多面折之以是取怨于人贻序尝预修册府元龟笔札遒劲坐事左迁复
州副使为殿中丞卒

宋雄

宋雄

宋雄者亦幽州人初与琪齐名燕蓟闲谓二宋雄仕契丹为应州从事雍熙三年王
师北伐雄与其节度副使艾正以城降授正本州岛观察
使以雄为鸿胪少卿同知州事改光禄少卿历知均唐二州未几护河阴屯兵以知河渠
利害因命领护汴口均节水势以达转漕京师赖之改
太子詹事复为光禄少卿迁将作监所在职务修举公私倚任焉雄涉猎文史善谈论有
气节士流推许之景德元年卒年七十六子可久为太
常寺奉礼郎

钦定续通志卷三百五

●钦定续通志卷三百六 列传一百六

列传

宋 【十】

○宋十

李昉【宗讷 宗谔昭述 昭邁】 吕蒙正 张齐贤【宗海】 贾黄中

李昉

吕蒙正

张齐贤

贾黄中

△李昉

李昉字明远深州饶阳人父超晋工部郎中集贤殿直学士 【东都事畧作集贤院
学士】 无子以昉为后荫补斋郎选授太子校书汉
干佑举进士为秘书郎宰相冯道引之与吕端同直宏文馆改左拾遗集贤殿修撰周显
德二年宰相李谷征淮南昉为记室世宗览军中章奏
爱其辞理明自己知为昉所作及见相国寺文英院集乃昉与扈蒙崔颂刘衮窦俨赵逢
及昉弟载所题益善昉时而称赏之曰吾久知有此人
矣师还擢为主客员外郎知制诰集贤殿直学士四年加史馆修撰判馆事是年世宗南

征从至高邮会陶谷出使内署书诏填委乃命为屯田
郎中翰林学士太祖即位加中书舍人建隆三年罢为给事中四年平湖湘受诏祀南岳
就命知衡州踰年代归陶谷诬奏昉为所亲求京畿令
帝怒召吏部尚书张昭面质其事昭老儒气直免冠帝前抗声云谷罔帝帝疑之不释出
昉为彰武军行军司马居延州为生业以老三岁当内
徙昉不愿宰相荐其可大用开宝二年召还复拜中书舍人未几直学士院 【按宋名臣
言行录载昉在周朝知开封府人望已归太祖而昉
独不附王师入京昉又独不朝贬道州司马三岁徙延州别驾在延州为生业以老三岁
当徙不愿内徙后二年宰相奏其可大用召判兵部昉
五辞既至帝劳之昉曰臣前日知事周而已今以事周之心事陛下帝大喜曰宰相不谬
荐人与宋史本传异】 三年知贡举五年复知贡举预
宴大明殿帝见昉坐卢多逊下因问宰相对曰多逊学士昉直殿尔即令真拜学士令居
多逊上昉之知贡举也其乡人武济川预选既而奏对
失次昉坐左迁太常少卿俄判国子监明年复拜中书舍人翰林学士判吏部铨时赵普
为多逊所构数以其短闻于帝帝询于昉对曰臣职司
书诏普之所为非臣所知普寻出镇多逊遂参知政事太宗即位加昉户部侍郎受诏与
扈蒙李穆郭贄宋白同修太祖实录从攻太原车驾次
常山常山即昉之故里因赐羊酒俾召公侯相与宴饮尽欢里中父老及尝与游从者咸
预焉七日而罢人以为荣师还拜工部尚书兼承旨太
平兴国中改文明殿学士时赵普宋琪居相位久求其能继之者宿旧无踰于昉遂命参
加政事普出镇昉与琪俱拜平章事加监修国史复时
政记先进御而后付有司自昉议始也雍熙元年郊祀命昉与琪并为左右仆射昉固辞
仍加中书侍郎王师讨幽蓟不利遣使分诣河南东籍
民为兵凡八丁取一昉等相率奏免帝嘉纳之端拱初布衣翟马周击登闻鼓讼昉居宰
相位当北方有事之时不为边备徒知赋诗宴乐属藉
田礼方毕乃诏学士贾黄中草制罢昉为右仆射且加切责黄中言仆射百僚师长实宰
相之任今自工部尚书而迁是职非黜责也若曰文昌
务简以均劳逸为辞斯为得体帝然之会边警益急诏文武羣臣各进策备御昉又引汉
唐故事深以屈己修好弭兵息民为言时论称之淳化
二年复以本官兼中书侍郎平章事监修国史三年夏旱蝗既雨时昉与张齐贤贾黄中
李沆同居宰辅以燮理非材上表待罪帝不之罪四年
昉以私门连遭忧戚求解机务诏不允遣齐贤等谕旨复起视事后数月罢为右仆射先
是帝召张洎草制授昉左仆射罢相洎言昉居燮理之
任而阴阳乖戾不能决意引退俾居百僚师长之任何以示劝帝览奏乃令罢守本官晋

侍中明年昉年七十以特进司空致仕朝会宴乐令缀
宰相班岁时赐予益厚焉至道元年正月望帝观灯干元楼召昉赐坐于侧酌御罇酒饮
之自取果饵以赐帝观京师繁盛指前朝坊巷省署以
谕近臣令拓为通衢长廊因论晋汉君臣昏闇猜贰枉陷善良时人不聊生虽经营缮其
暇及乎昉谓晋汉之事臣所备经何可与圣朝同日而
语若今日四海清晏民物阜康皆陛下恭勤所致帝曰勤政忧民帝王常事朕不以繁华
为乐盖以民安为乐尔因顾侍臣曰李昉事朕两入中
书未尝有伤人害物之事宜其今日所享如此可谓善人君子矣二年陪祀南郊礼毕入
贺因拜舞仆地台史掖之以出卧疾数日薨年七十二
赠司徒谥文正昉和厚多恕不念旧恶在位小心循谨无赫赫称为文章慕白居易尤浅
近易晓好接宾客江南平士大夫归朝者多从之游雅
厚张洎而薄张昝及昉罢相洎草制深攻诋之而昝朔望必诣昉或谓昝曰李公待君素
不厚何数诣之昝曰我为廷尉日李公方秉政未尝一
有请求此吾所以重之也昉所居有园亭别墅之胜多召故人亲友宴乐其中既致政欲
寻洛中九老故事时吏部尚书宋琪年七十九左谏议
大夫杨徽之年七十五郢州刺史魏丕年七十六太常少卿致仕李运年八十水部郎中
朱昂年七十一庐州节度副使武允成年七十九太子
中允致仕张好问年八十五吴僧赞宁年七十八议将集会蜀寇而罢昉素与卢多逊善
待之不疑多逊屡谮昉于帝或以告昉不之信及人相
太宗言及多逊事昉颇为解释帝曰多逊居常毁卿一钱不直昉始信之帝由此益重昉
昉居中书日有求进用者虽知其材可取必正色拒绝
己用擢用或不足用必和颜温语待之子弟问其故曰用贤人主之事若受其请是市私
恩也故峻绝之使恩归于上若不用者既失所望又无
善辞取怨之道也初起未有子昉母谢方娠指腹谓叔母张曰生男当与叔母为子故昉
出继于超昉再相因表其事求赠所生父母官诏赠其
祖温太子太傅祖母权氏莒国太夫人超太子太师谢氏郑国太夫人昉素病心悸数岁
一发发必弥年而后愈盖典诰命三十余年劳役思虑
所致及居相位益加忧畏 【按长编载昉卒后太宗谓近臣曰昉本以文章进用及居相
位自知才微任重无所弥纶但忧愧而已】 子四人
宗讷宗海宗谔宗谅宗海右赞善大夫宗谅主宾客员外郎

李宗讷

李宗谔

李昭述

李昭遘

李宗讷

宗讷字大辨以荫补太庙斋郎迁第四室长代谒吏部铨拟授秘书省正字帝命擢国子监丞盖帝居藩邸时每有篇咏令昉属和前后数百章皆宗讷缮写帝爱其楷丽问知为宗讷所书故有是命雍熙初昉在位相帝欲命宗讷为尚书郎昉恳辞以为非承平故事止改秘书丞历太常博士宗讷颇习典礼淳化中吕端掌礼院引宗讷同判累迁比部郎中咸平六年卒年五十五子昭回召试赐进士第昭逊太子中舍

李宗谔

宗谔字昌武七岁能属文耻以父任得官独由乡举第进士授校书郎明年献文自荐迁秘书郎集贤校理同修起居注先是后苑陪宴校理官不与京官乘马不得入禁门至是皆因宗谔之请复之遂为故事真宗即位拜起居舍入预重修太祖实录从幸大名迁知制诰判集贤院景德二年召为翰林学士是秋将郊命判太常大乐鼓吹二署先是乐工率以年劳迁补至有抱其器而不知声者宗谔素晓音律遂加审定奏斥谬滥者五十人因修完器具更署职名条上利病二十事事具乐畧又着乐纂以献命付史馆自是月再肄习焉属契丹遣使来贺承天节诏宗谔为馆伴使自郊劳至饮饯皆刊定其仪大中祥符初从封泰山改工部郎中三年知审官院属祀汾阴后土命为经度制置副使同权河中府事礼成优拜右谏议大夫尝侍宴玉宸殿帝谓曰闻卿至孝宗族颇多长幼雍睦朕嗣守二圣基业亦如卿之保守门户也又曰翰林清华之地前贤扬历多有故事卿父子为之必周知也宗谔尝着翰林杂记以纪国朝制度明日上之宗谔究心典礼凡创制损益靡不与闻五年以疾卒年四十九帝甚悼之谓宰相曰国朝将相家能以声名自立不坠门阀唯昉与曹彬家尔宗谔方期大用不幸短命深可惜也初昉居三馆两制之职宗谔不数年皆践其地风流儒雅藏书万卷内行淳至事继母符氏以孝闻二兄早世奉嫂字孤恩礼兼尽与弟宗谅友爱尤至覃恩所及必先羣从及歿而已子有未仕者勤接士类无贤不肖恂恂尽礼奖拔后进唯恐不及以是士人皆归仰之宗谔工隶书尝预修续通典大中祥符封禅汾阴记诸路图经又作家传谈录并行于世子昭遯昭述昭适

李昭述

昭述字仲祖以父荫为秘书省校书郎召试学士院赐进士出身为刑部详覆官累迁秘书丞羣牧制置使曹利用荐为判官郢州牧地侵于民者凡数千顷昭述悉复之以太常博士知开封县特迁尚书屯田员外郎开封推官坐尝被曹利用荐出知常州迁为三司度支判官改河

北转运使江陵屯兵晔言仓粟陈腐欲以动众昭述取以为奉且以饭其僚属众遂定徙湖南潭州戍卒愤监军酷暴欲构乱或指昭述谓曰如李公长者何可负其谋遂寝昭述闻之以戒监军监军自是不复为暴比去众遮道罗拜指妻子曰向非公无噍类矣河决澶渊久未塞会契丹遣刘六符来乃命昭述城澶州以治堤为名调兵农八万逾旬而就初六符过之真以为堤也及还而城具甚骇愕初置义勇军人情汹汹昭述乘疾置日行数舍开谕父老众始安宣抚使表其能除龙图阁直学士之澶州又为枢密直学士陝西都转运使河北始置四路以为真定府路安抚使知成德军大水民多流亡籍僧舍积粟为粥糜活饥民数万计改龙图阁学士知秦州谏官御史言昭述庸懦不可负重镇留真定府居四年入领三班院以翰林侍读学士知郑州未几知通进银台司判太常寺复领三班累迁尚书右丞卒赠礼部尚书谥恪李氏居京城北崇庆里凡七世不异爨至昭述稍自丰殖为族人所望然家法亦不隳

李昭遘

昭遘字逢吉宗愕从子也以荫为将作监主簿幼时杨亿尝过其家出拜亿命为赋既成亿曰桂林之下无杂木非虚言也其后荐之召试授馆阁校勘改集贤院校理坐失误落秩未几复为盐铁判官初议罢天下职田及公使钱昭遘以为不可三司使姚仲孙恶其异已请诘所以兴利之实昭遘争不屈遂罢判官为白波发连使因入奏事仁宗谓曰前所论罢职田等事卿言是也迁直史馆知陝州谏官欧阳修言陝府关中之要地昭遘无治剧材不宜遣改判三司理欠司徒度支判官使契丹还道除陝西转运使坐家人盗辽人银酒杯降知泽州阳城冶铸铁钱民冒山险输矿炭苦其役为奏罢铸钱又言河东铁钱真伪淆杂不可不革后复直史馆知陝州城中旧无井唐武德中刺史长孙操始疏广济渠水入城众赖其利昭遘至立庙祠之累迁尚书工部郎中擢天章阁待制知沧州用谏官吴及言复改知陝州徙郑州卒昭遘性和易不忤物能守家法

△吕蒙正

吕蒙正字圣功河南人祖梦奇户部侍郎父龟图起居郎蒙正太平兴国二年擢进士第一授将作监丞通判升州陞辞有旨民事有不便者许骑置以闻赐钱二十万代还会征太原召见行在授著作郎直使馆加左拾遗五年亲拜左补阙知制诰初龟图多内宠与妻刘氏不睦并蒙正出之颇沦蹶窘乏刘誓不复嫁及蒙正登仕迎二亲同堂异室奉养备至龟图旋卒诏起复迁都官郎中入为翰林学士 【按宋史宰辅

表太平兴国八年载十一月壬申吕蒙正自翰林学士都官员外郎参知政事宰辅编年录亦载蒙正自翰林学士都官员外郎除惟吕文穆公神道碑所载与宋史本传同】擢左谏议大夫参知政事帝谓之曰凡士未达见当世之务戾于理者则怏怏于心及列于位得以献可替否当尽其所蕴虽言未必尽中亦当金议而更之俾协于道朕固不以崇高自恃使人不敢言也蒙正初入朝堂有朝士指之曰此子亦参政耶蒙正阳不为闻而过之同列不能平诘其姓名蒙正遽止之曰若一知其姓名则终身不能忘不若无知之为愈也时皆服其量李昉罢相蒙正拜中书侍郎兼户部尚书平章事监修国史蒙正质厚宽简有重望以正道自持遇事敢言每论时政有未允者必固称不可帝嘉其无隐赵普开国元老蒙正后进历官一纪遂同相位普甚推许之俄丁内艰起复先是卢多逊为相其子雍起家即授水部员外郎后遂以为常至是蒙正奏曰臣忝甲科及第释褐止授九品京官况天下才能老于岩穴不沾寸禄者多矣今臣男始离襁褓膺此宠命恐罹阴谴乞以臣释褐时官补之自是宰相子止授九品京官遂为定例朝士有藏古镜者自言能照二百里欲献之蒙正以求知蒙正笑曰吾面不过楮子大安用照二百里哉闻者叹服淳化中右正言宋抗上疏忤旨抗蒙正妻族坐是罢为吏部尚书复相李昉四年昉罢蒙正复以本官入相因对论及征伐帝曰朕比来征讨盖为民除暴苟好功黷武则天下之人燔亡尽矣蒙正对曰隋唐数十年中四征辽羯人不堪命炀帝全军陷没太宗自运土木攻城如此卒无所济且治国之要在内修政事则远人来归自致安静帝韪之尝灯夕设宴蒙正侍帝语之曰五代之际生灵凋丧周太祖自邺南归士庶皆罹剽掠下则火灾上则彗孛观者恐惧当时谓无复太平之日矣朕躬览庶政万事粗理每念上天之赐致此繁盛乃知理乱在人蒙正避席曰乘舆所在士庶走集故繁盛如此臣尝见都城外不数里饥寒而死者甚众不必尽然愿陛下视近以及远苍生之幸也帝变色不言蒙正侃然复位同列多称其直谅帝尝欲遣人使朔方谕中书选才而责以事者蒙正退以名上帝不许他日三问三以其人对帝曰卿何执耶蒙正曰臣非执盖其人可使余人不及臣不欲用媚道妄随人主意以害国事同列悚息不敢动帝退谓左右曰蒙正气量我不如既而卒用蒙正所荐果称职至道初以右仆射出判河南府兼西京留守蒙正至洛多引亲旧欢宴政尚宽静委任僚属事多总裁而已真宗即位进左仆射会营奉熙陵蒙正追感先朝不次之遇奉家财三百余万以助用【按吕文穆公神道碑作出私钱三百万助复土之费】葬日伏哭尽哀人以为得

大臣体咸平四年以本官同平章事昭文馆大学士国朝以来三入相者惟赵普与蒙正焉郊祀礼成加司空兼门下侍郎六年授太子太师封莱国公改封徐 【按宋史本传封蔡国公改封随又封许考东都事畧作封莱国公改封徐又封许真宗本纪咸平六年以吕蒙正为太子太师莱国公又吕文穆公神道碑载改太子太师仍封莱国公以告成泰山进封徐祠后土又进封许国本传误今据改】 又封许景德二年表请归洛陛辞曰肩輿至东园门命二子掖以升殿因言远入请和弭兵省财古今上策惟愿陛下以百姓为念帝嘉纳之因迁从简太子洗马知简奉礼郎蒙正至洛有园亭花木日与亲旧宴会子孙环列迭奉寿觞怡然自得大中祥符而后帝朝永熙陵封泰山祠后土过洛两幸其第锡賚有加帝谓蒙正曰卿诸子孰可用对曰诸子皆不足用有侄夷简任颍州推官宰相才也夷简由是见知于帝富言者蒙正客也一日白曰儿子十许岁欲令入书院事廷评太祝蒙正许之及见惊曰此儿他日名位与吾相似而勋业远过于吾令与诸子同学供给甚厚言之子即弼也后弼两入相亦以司徒致仕其知人类如此许国之命甫下而卒 【按宋史真宗本纪大中祥符四年三月甲申幸吕蒙正第夏四月丁卯许国公吕蒙正薨】 年六十八赠中书令谥曰文穆蒙正初为相时张绅知蔡州坐赃免或言于帝曰绅家富不至此特蒙正贫时勾索不如意今报之尔帝命即复绅官蒙正不辨后考课院得绅实状复黜为絳州团练副使及蒙正再入相太宗谓曰张绅果有赃蒙正不辨亦不谢在西京日帝数遣中贵人将命至蒙正待之如在相位时不少贬时人重焉子从简再为国子博士惟简太子中舍承简司门员外郎行简比部员外劳务简亦国子博士居简殿中丞知简太子右赞善大夫 【按富文忠公弼所撰吕文穆公蒙正神道碑载男十八从简驾部员外郎知简大理寺丞惟简库部郎中承简虞部郎中行简比部郎中次未名次易简奉礼郎务简光禄少卿居简龙图阁直学士尚书兵部侍郎师简司丰少卿与宋史本传所载官职人数俱不同】 蒙正弟蒙休咸平进士至殿中丞龟图弟龟祥殿中丞知寿州子蒙亨举进士高等既廷试以蒙正居中书故报罢后厯下蔡武平主簿至道初考课州县官蒙亨引对文学政事俱优命为光禄寺丞大理寺丞卒次子蒙巽虞部员外郎蒙周淳化进士及第蒙亨子即夷简也次子宗简亦进士及第庆厯中居简提点京东刑狱时夏竦有憾于石介介死竦言于帝曰介未尝死北走邻国矣乃遣中使发棺验之居简谓曰万一介果死则朝廷为无故发人之墓奈何使曰于君何如居简曰介死当时必有内外亲族及门生会葬问之可也

中使乃令结状保证以闻介事乃白居易简长者其行事多类此徐州妖人孔直温挟左道
诱军士为变或诣转运使告不受词居简令易其牒尽
捕究党与贷诖误者请于朝斩直温等濮州复判都民惊溃居简驰往获首恶诛之以兵
部侍郎判西京御使台卒年七十三

△张齐贤

张齐贤曹州冤句人徙家洛阳孤贫力学有远志慕唐李大亮之为人故字师亮太
祖幸西都齐贤以布衣献策马前召至行宫齐贤以手
画地条陈十事曰下并汾曰富民曰封建曰敦孝曰举贤曰太学曰藉田曰选良吏曰慎
刑曰惩奸内四说称旨齐贤坚执以为皆善帝怒令武
士拽出之【按东都事畧作太祖赐束帛而遣之邵氏间见录所载与事畧同王曾笔录
所载与宋史本传同名臣言行录两引之】及还语
太宗曰我幸西都得一张齐贤我不欲爵之以官异时可使辅汝为相也太宗擢进士欲
置齐贤高第有司偶失抡选帝不悦一榜尽与京官于
是齐贤以大理评事通判衡州时州鞫劫盗论皆死齐贤至活其失入者五人自荆渚至
桂州水递铺夫数千户困于邮役衣食多不给论奏减
其半四年代还会亲征晋阳齐贤上谒选秘书丞忻州新下命知州事明年召还改著作
佐郎直史馆改左拾遗车驾北征议者皆言宜速取幽
蓟齐贤以幽燕未下不足为虑今河东初平人心未固圣人举事动在万全百战百胜不
若不战而胜若重之慎之则契丹不足吞燕蓟不足取
自古疆场之难非尽由敌国亦多边吏扰而致之若缘边诸砦抚御得人但使峻垒深沟
畜力养锐务农积谷以实边用赋敛苛重者改而正之
因而利之以德怀远以惠利民远人之归可立而待六年为江南西路转运副使改右补
阙加正使齐贤至官询知饶信虔州土产铜铁铅锡之
所推求前代铸法取饶州永平监所铸以为定式诣阙面陈其事敷奏详确议者不能夺
先是诸州罪人多辄送阙下路死者十常五六齐贤道
逢南剑建昌虔州所送索牒视之率非首犯悉伸其冤抑因力言于朝后凡送囚至京请
委强明吏屡问不实则罪及原问官属自是江南送罪
人者为减大半先是江南诸州小民居官地者有地房钱吉州缘江地虽沦没犹纳勾栏
地钱编木而浮居者名水场钱皆前代弊政齐贤悉论
免之初李氏据有江南民户税钱三千已上者户出丁一人黥面自备器甲输官库出即
给之日支粮二升名为义军既内附皆放归农至是言
者以为此辈久在行伍不乐耕农乞遣使选充军伍并其家属送阙下齐贤上言江南义
军例皆良民横遭黥配无所逃避克复之后便放归农
久被皇风并皆乐业搜索惊扰不若且仍旧贯齐贤居使职勤究民弊务行宽大江左人

思之不忘召还拜枢密直学士擢右谏议大夫签书枢
密院事雍熙初迁左谏议大夫三年大举北伐代州杨业战没帝访近臣以策齐贤请行
即授给事中知代州与部署潘美同领缘边兵马是时
辽兵自湖谷薄城下神卫都校马正以所部列南门外众寡不敌副部署卢汉赟畏懦保
壁自固齐贤选厢军二千出正之右誓众慷慨一以当
百辽兵遂却先是约潘美以并师来会战无何闲使为辽人所得齐贤以师期既漏且虞
美众为辽所乘既而美使至云师出并州至北井得密
诏东师败绩于君子馆并之全军不许出战已还州矣于是辽兵塞川齐贤曰贼知美之
来而不知美之退乃闭其使密室中夜发兵二百持一
帜负一束刍距州城西南三十里列帜然刍辽兵遥见火光中有旗帜意谓并师至矣骇
而北走齐贤先伏步兵二千于土磴砦掩击大败之擒
其北大王之子一人帐前实里一人斩获甚众捷奏且归功汉赟端拱元年拜工部侍郎
辽人又自大石路南侵齐贤预备厢兵千人为二部分
屯繁峙崞县下令曰代西有寇则崞县之师应之代东有寇则繁峙之师应之比接战则
郡兵集矣至是果为繁峙兵所败二年制屯田领河东
制置方田都部署入拜刑部侍郎枢密副使淳化二年参知政事数月拜吏部侍郎同中
书门下平章事齐贤母孙氏年八十余封晋国太夫人
每入谒禁中帝叹其福寿有令子多手诏存问加赐与搢绅荣之初王延德与朱贻业同
掌京庾欲求补外贻业与参政李沆有媼娅托之以请
于沆沆为请于齐贤齐贤以闻太宗以延德尝事晋邸怒其不自陈而干祈执政召见诘
责延德贻业皆讳不以实对齐贤不欲累沆独任其责
四年罢为尚书左丞命知定州以母老不愿往未几丁内艰水浆不入口者七日自是日
啖粥一器终丧不食酒肉蔬果寻复转礼部尚书知河
南府时狱有大辟将决齐贤至立辨而释之三日徙知永兴军时合门祗候赵赞以言事
得幸提点关中刍粮所为多豪横齐贤论列其罪卒抵
于法俄徙襄州移荆南又徙安州踰年加刑部尚书真宗即位召拜兵部尚书同中书门
下平章事 【按宋史宰辅表咸平元年十月戊子张
齐贤自守户部尚书知安州加兵部尚书同中书门下平章事实录载真宗即位迁户部
尚书拜兵部尚书平章事宋史本传不载迁户部尚书
】 尝从容为帝言皇王之道而推本其所以然郊祀加门下侍郎与李沆同事不相得坐
冬至朝会被酒失仪免相四年李继迁陷清远军命为
泾原等州军安抚经畧使以右司谏梁颢为之副齐贤言灵武一郡援隔势孤继迁觊觎
若以蕃部大族首领素与继迁有隙者啖以官爵诱以
货利结之以恩信而激之以利害则蕃部族帐靡不倾心不难招集互为声援又请调江

淮荆湘丁壮八万以益防御朝议以为动摇兼泽国人
民远戍西鄙亦非便计遂寝齐贤又言灵州斗绝一隅自继迁为患以来危困弥甚为今
之计若能增益精兵以合两边屯驻对替之兵从以原
渭镇戎之师率山西熟户从东界而入严约师期两路交进灵州之围自解然后取灵州
军民而置砦于萧关武延川险要处以侨寓之如此则
蕃汉土人之心有所依赖裁候平寇却归旧贯然后纵蕃汉之兵乘时以为进退则成功
不难矣时不能用未几灵武果陷闰十二月拜右仆射
判汾州不行改判永兴军兼马步军部署时薛居正子惟吉妻柴氏无子早寡尽畜其产
及书籍纶告欲改适齐贤惟吉子安上其事帝不
欲寘于理命司门员外郎张正伦就讯柴氏所对与安上状异下其事于御史乃齐贤子
太子中舍宗海教柴氏为词齐贤坐责太常卿分司西
京宗海贬海州别驾 【按实录载故相薛居正子惟吉妻柴氏无子家甚富惟吉有子安
柴氏素与之不协既寡又尽畜其祖父金帛计直三
万缗并书籍纶告以谋改适齐贤定娶之自京兆遣牙吏约车来迎行有日矣安上诣东
府诉其事府以闻帝不欲寘于理命司门员外郎张正
伦就讯柴氏置对与安上状谬异帝不得已下其事于御史台乃齐贤子太子中舍宗海
教柴氏为词遂验问柴氏之臧获发其瘞藏得金具二
万计齐贤坐责云云较宋史本传特详】 景德初起为兵部尚书知青州帝幸澶渊命兼
青淄潍州安抚使二年改吏部尚书疏言臣在先朝常
忧灵夏两镇为继迁并吞数年之闲终为吞噬今其子德明其志又似不小臣虑德明乘
大驾东幸之际去攻六谷则瓜沙甘肃于阗诸处渐为
控制矣望委大臣经制其事从东封还复拜右仆射三年出判河阳从祀汾阴还进左仆
射五年代还请老以司空致仕归洛得裴度午桥庄有
池榭松竹之盛日与亲旧觞咏其闲意甚旷适七年薨年七十二赠司徒谥文定齐贤四
践两府九居八座以三公就第康宁福寿时罕其比居
相日数起大狱又与寇准相倾人或以此少之齐贤诸子皆能有立宗信内殿崇班宗礼
大理寺丞宗谅殿中丞宗简合门祗候宗讷太子中舍
宗礼最贤虽累资登朝而畏羁束故多居田里 【按实录齐贤传子宗信宗海宗礼宗亮
宗简宗约】

张宗海

张宗海

宗海字习之齐贤第二子也少喜学兵法阴阳象纬之书无不通究以父任为秘书
省正字迁至太子中舍贬海州别驾尝通判河阳徙知
富顺监会夷人斗郎春叛羣獠皆骚动宗海将郡兵攻破之擢开封府判官三司度支勾

院宗海在开封日御史王■〈?公〉劾其嗜酒废事
及为河北转运使乃发■〈?公〉居丧假官舟贾贩朝论恶之会以调发扰民徙知徐
州累迁太常少卿后为永兴军兵马钤辖又徙鄜延路
兼知鄜州元昊寇延安刘平石元孙败没钤辖黄德和遁还延州不纳又走鄜州宗海曰
军奔将无所归激之则为乱矣乃纳之拘德和以闻是
时鄜城不完且无备传言寇兵至人心不安宗海乃严斥候籍入而禁出使老幼并力守
御之敌亦自引去领兴州防御使复徙永兴钤辖兼知
邠州以秘书监致仕初齐贤守代州宗海尝预计画其保任亲族不问疏近以年为先后
然性贪虽谢事犹事货殖以至于卒子二人子皋字叔
谟少有才名而不自负人乐与之游最善尹洙洙曰吾交天下士多矣不以通否易意者
子皋也举进士试秘书郎知新郑县累官至尚书司封
员外郎子宪字彦章以荫将作监主簿以献文赐同进士出身累迁尚书刑部郎中知光
化军戍卒逐其帅韩纲余党作乱子宪招降之征税重
人多逋负子宪奏除之厯知洪州庐州迁秘书监累职徙扬州卒

△贾黄中

贾黄中字媧民沧州南皮人唐相玘四世孙也父玘字仲宝晋天福三年进士解褐
太祖即位为刑部郎中终水部员外郎知浚仪县年七
十卒玘严毅善教子士大夫子弟来谒必谆谆诲诱之初通判镇州葬乡党羣从之未葬
者十五丧孤贫不自给者咸教育而婚嫁之黄中幼聪
悟方五岁玘每旦令正立展书卷比之谓之等身书课其诵读六岁举童子科七岁能属
文触类赋咏父常令蔬食曰俟业成乃得食肉十五举
进士授校书郎集贤校理迁著作佐郎直史馆建隆三年迁左拾遗厯左补阙开宝八年
通判定州判太常礼院黄中多识典故每详定礼文损
益得中岭南平以黄中为采访使廉直平恕远人便之还奏利害数十事皆称旨会克江
表选知宣州岁饥民多为盗黄中出已俸造糜粥赖全
活者以千数仍设法弭盗悉解去太宗即位迁礼部员外郎太平兴国二年知升州时金
陵初附黄中为政简易部内甚治一日案行府署中见
一室扃钥甚固命发视之得金宝数十匱计直数百万乃李氏宫合中遗物也即表上之
帝览表谓侍臣曰非黄中廉恪则亡国之宝将污法而
害人矣赐钱三十万五年召归阙有荐黄中文学高第召试中书拜驾部员外郎知制诰
八年与宋白吕蒙正等同知贡举迁司封郎中充翰林
学士雍熙二年又知贡举俄掌吏部选端拱初加中书舍人二年兼史馆修撰凡再典贡
部多简拔寒俊除拟官吏品藻精当淳化四年与李沆
并拜给事中参知政事太宗召见其母王氏命坐谓曰教子如是真孟母矣作诗赐之颁

赐甚厚黄中素重吕端为人属端出镇襄阳黄中力荐于帝因留为枢密直学士遂参知政事当世文行之士多黄中所荐引而未尝言人莫知之也然畏慎过甚中书政事频留不决四年与沆并罢守本官明年知襄州上言母老乞留京改知澶州辞曰夫小心翼翼君臣皆当然若太过则失大臣之体黄中顿首谢帝因谓侍臣曰朕尝念其母有贤德七十余年未觉老每与之语甚明敏黄中终日忧畏必先其母老矣因目参知政事苏易简曰易简之母亦如之自古贤母不可多得易简前谢曰陛下以孝治天下奖及人亲臣实何人膺兹荣遇至道初黄中遭疾诏令归阙会建储宫择大臣有德望者为宾友黄中在选中以久疾改命李至李沆兼宾客黄中亦特拜礼部侍郎代至兼秘书监黄中素嗜文籍既居内阁甚以为慰二年卒年五十六其母尚无恙卒如帝言赠礼部尚书帝谓其母曰勿以诸孙为念朕当不忘也黄中端谨能守家法廉白无私多知台阁故事谈论亶亶听者忘倦焉在翰林日太宗召见访以时政得失黄中但言臣职典书诏思不出位军国政事非臣所知帝益重之以为谨厚及知政事卒无所建明时论不之许子守谦雍熙二年进士守正献文召试赐进士第后为虞部员外郎守约国子博士守文殿中丞守讷赞善大夫

钦定续通志卷三百六

●钦定续通志卷三百七 列传一百七

列传

宋【十一】

○宋十一

钱若水 苏易简 郭贄 李至 辛仲甫 王沔

温仲舒 王化基【举正 举元诏】

钱若水

苏易简

郭贄

李至

辛仲甫

王沔

温仲舒

王化基

△钱若水

钱若水字澹成一字长卿河南新安人父文敏汉青州帅刘铎辟为录事参军历长

水鄴都尉扶风令相州录事参军先是府帅多以笔牍私取官库钱韩重赆领节制颇仍其弊文敏不从重赆假他事廷责之文敏不为屈太祖嘉其有守授右赞善大夫知泸州至郡有政迹蛮人诣阙借留诏改殿中丞许再任三迁司封员外郎又知洺州建昌军卒年七十二若水幼聪悟十岁能属文华山陈抟见之曰子神清可以学道不然当富贵但忌太速尔雍熙中举进士释褐同州观察推官有富民失女奴其父母讼于州鞠于有司狱吏尝有贷于富民不获乃劾富民父子数人共杀女奴弃之水中遂失其尸而诬以罪皆应死若水疑之密使人访求女奴得之乃引以示女奴之父母皆泣曰是也富民父子赖以得免郡太守欲荐之若水固辞且曰朝廷以此为若水功当置狱吏者于何地太守叹服【按富民女奴事宋史本传不载据东都事畧增】淳化初寇准掌选荐若水洎王扶程肃陈充钱熙五人文学高第召试翰林若水最优擢秘书丞直史馆【按东都事畧载若水擢秘书丞直史馆由太宗闻其雪富民失女奴事遂召用宋名臣言行录亦云太宗闻之骤加褒擢二年中为枢密副使宋史本传以若水之擢因召试翰林最优与事畧言行录互异】岁余迁右正言知制诰会置理检院于干元门外命若水领之俄同知贡举加屯田员外郎改职方员外郎翰林学士与张洎并命尝草赐赵保忠诏有云不斩继迁开狡兔之三穴潜疑光嗣持首鼠之两端太宗大以为当至道初以右谏议大夫同知枢密院事真宗即位加工部侍郎上章言母老求解机务诏不许请益坚遂以本官充集贤院学士判院事俄诏修太宗实录若水引柴成务宗度吴淑杨亿同修成八十卷初太宗有畜犬甚驯常在乘舆左右及崩鸣号不食因送永熙陵寝李至尝咏其事欲若水书之以戒浮俗若水不从吕端虽为监修以不莅局不得署名至执其事以为专美若水称诏旨及唐朝故事以折之时议不能夺既又重修太祖实录【按宋史真宗本纪咸平元年九月己巳诏吕端钱若水重修太祖实录二年六月丁巳宰臣进重修太祖实录又按长编载先是太宗命张洎重修太祖实录其书未成会洎死己巳诏宰相吕端集贤院学士钱若水同领其事宋史本传误作太宗今据改】参以王禹偁李宗谔梁颙赵安仁未周岁毕俄判吏部流内铨从幸大名若水陈御敌安边之策大意用兵以伐谋为主御将以用法为先远引近征谓不数年间可致边烽罢警俄知开封府时北边未宁内出手札询若水备御翦灭之策若水以为未得幽州未可翦灭也遂陈备边之要有五一日择郡守二日募乡兵三日积刍粟四日革将帅五曰明赏罚又言边部用兵唯视太白与月为进退者诚以太白者将军也星辰者

廷尉也合则有战不合则无战合于东则主胜合于西
则客胜陛下苟思兵者凶器战者危事而不倒持太阿授人以柄则守在四夷而常获静
胜此备御之上策也帝善其议未几出知天雄军兼兵
马部署时言事者请城绥州屯兵积谷以备党项边城互言利害前后遣使数辈按视不
能决时已大发丁夫将兴其役诏若水自大名驰往视
之若水上言绥州顷为内地民赋登集尚须旁郡转饷自赐地赵保忠以来人户凋残若
复城之即须增戍刍粮之给全仰河东其地隔越黄河
铁碣二山无定河在其城下缓急用兵输送艰阻且其地险若未葺未完边寇奔冲难于
固守况城邑焚毁片瓦不存过山林材木匮乏城之甚
劳未见其利复诣阙面陈其事帝嘉纳之遂罢役初若水率众过河分布军伍咸有节制
深为戍将推服帝谓左右曰若水儒臣中知兵者也是
秋又遣巡抚陕西缘边诸郡令便宜制置边事还拜邓州观察使并代经畧使兼知并州
事六年因疾归京师数月始赴朝谒与僚友会食假寝
而卒年四十四赠户部尚书谥宣靖 【按若水谥宣靖宋史本传失载据东都事畧长编
增】 子延年甫七岁录为太常奉礼郎若水美风神
有器识能断大事事继母以孝闻雅善谈论尤轻财好施所至推诚待物委任僚佐总其
纲领无不称治汲引后进推贤重士襟度豁如也故其
死士君子尤惜之兄若愚比部员外郎从弟若冲大中祥符中调河阳令真宗念若水母
老遣使存问赐缗帛羊酒且赐若冲帛三十端补孟州
别驾延年后以献文赐进士出身历太常博士集贤校理

△苏易简

苏易简字太简梓州铜山人父协举蜀进士归朝仕至光禄寺丞易简少聪悟好学
风度凝粹才思敏赡太平兴国五年年踰弱冠举进士
太宗方留心儒术贡士皆临轩覆试易简所试三千余言立就帝览之称赏擢冠甲科解
褐将作监丞通判升州迁左赞善大夫八年以右拾遗
知制诰雍熙初与贾黄中同知贡举有诏凡属就举者籍名别试易简妻弟崔范匿父丧
充贡奏名在上第又王千里者水部员外郎孚之子协
为孚门生千里预荐坐范及千里罪罢易简知制诰以本官奉朝请未几复知制诰充翰
林学士连知贡举陈尧叟孙何并甲廷试淳化二年同
知京朝官考课迁中书舍人充承旨先是曲宴将相翰林学士皆预坐梁迥启太祖罢之
又皇帝御丹凤楼翰林承旨侍从升楼西南隅礼亦废
至是易简请之皆复旧制易简续唐李肇翰林志二卷以献帝赐诗以嘉之帝尝以轻绡
飞白大书玉堂之署四字令易简榜于厅额 【按长
编载淳化二年冬翰林学士承旨苏易简续翰林志二卷以献帝嘉之赐诗一章纸尾批

云诗意美卿居清华之地也易简愿以所赐诗刻石昭示无穷上复为真草行三体书其诗命待诏吴文赏刻之因徧赐近臣又飞白书玉堂之署四大字令中书召易简付之榜于厅额帝曰此永为翰林中美事易简曰自有翰林未有如今日之荣也】 易简会韩偓毕士安李至等往观帝闻遣中使赐宴甚盛至等各赋诗纪其事宰相李昉等亦作诗颂美之 【按长编载易简以所赋诗悉以奏御帝谓宰相曰苏易简以卿等诗什来上斯足以见儒墨之充学士之贵也可别录一本进入以其本赐易简】 他日易简直禁中以水试欹器帝因晚朝问曰闻卿所玩得非欹器耶易简曰然江南徐邈所作也命取试之乃奏曰臣闻日中则昃月满则亏器盈则覆物盛则衰愿陛下持盈守成慎终如始以固丕基则天下幸甚会郊祀充礼仪使先是扈蒙建议以宣祖升配易简引唐故事请以宣祖太祖同配从之 【按长编载礼仪使苏易简上言太祖皇帝光启丕图恭临大宝以圣授圣传于无穷谨按唐永徽中以高祖太宗同配上帝望将来亲祀郊丘奉宣祖太祖同配诏从之淳化四年春正月辛卯合祭天地于圜丘以宣祖太祖升配】 俄掌吏部选迁给事中参知政事时赵昌言亦参知政事与易简不协至忿争帝前帝皆优容之未几昌言出使剑南中路命改知凤翔明年易简亦以礼部侍郎出知邓州移陈州 【按宰辅编年录载至道元年正月赵昌言罢参知政事四月苏易简罢参知政事时李顺构乱太宗命昌言为川峡五十二州招安行营都部署握兵入蜀易简为张洎所攻非因忿争致罢执政也】 至道二年卒年三十九赠礼部尚书易简外虽坦率中有城府由知制造入为学士年未及三十属在文初不达体要及掌诰命颇自刻励在翰林八年眷遇夔绝伦等李沆后入在易简下先参知政事故以易简为承旨锡赉均焉太宗遵旧制且欲稔其名望而后正台辅易简以亲老急于进用因亟言时政阙失遂参大政易简之执政也太宗召其母薛氏入禁中赐冠帔命坐问曰何以教子成此令器对曰幼则束以礼让长则教以诗书帝顾左右曰真孟母也易简性嗜酒帝尝以诗戒之令对其母读自是每入直不敢饮及卒帝曰易简果以酒死可惜也易简雅善笔札所著文集皆藏于秘阁三子宿寿耆大中祥符闻皆禄之以官云耆子舜钦自有传

△郭贇

郭贇字仲仪开封襄邑人干德中举进士中首荐太宗尹京因事藩邸太平兴国中擢为著作佐郎右赞善大夫俄兼皇子侍讲太宗在东宫出戒子篇命贇注解且令委曲讲说以喻诸王迁右补阙与宋白并拜中书舍人五年

置京朝官差遣院凡将命出入受代归阙官吏悉考校
劳绩铨量才品命贄泊滕中正雷德骧领之七年以本官参知政事曹彬为弭德超所诬
贄极言救解深为宰相赵普所重尝因论事奏曰臣受
不次之遇誓以愚直上报太宗曰愚直何益于事贄曰虽然犹胜奸邪一日以入对宿醒
未解左迁秘书少监知荆南府府俗尚淫祀属久旱盛
陈祷雨之具贄始至命悉撤去投之江不数日大雨就加左谏议大夫入为盐铁使时诸
路积逋欠犯人虽死犹系其子孙贄条陈其事多所蠲
贷藉田超拜工部侍郎淳化中知澶州坐河决免所居官久之起为给事中复工部侍郎
真宗即位拜刑部侍郎出知天雄军入判太常寺吏部
流内铨加集贤院学士判院事知河南府归朝献诗自陈进秩吏部俄兼秘书监初真宗
未出合贄已授经帝尝至其家后杨可法继其任帝以
为辅导不及贄尝称贄纯厚长者至是在秘府屡赐对询访旧事且愍其老特拜工部尚
书翰林侍读学士迁礼部尚书大中祥符三年卒年七
十六帝以旧学之故亲临哭之赠左仆射谥文懿录其子昭度为大理寺丞昭升昭用并
大理评事昭允左贄善大夫贄属文敏速而不雕刻性
温和颇能延誉时隼宋白赵昌言皆其所荐也贄初充赋有声邑人同在籍中者忌之潜
加构毁自是连上不中选泊贄再知贡举邑人子以明
经充荐诏下日悔泣而去贄闻之命其所亲召还谕之就举遂预荐中第然吝嗇切于治
生晚节不事事人颇以是少之

△李至

李至字言几真定人幼沈静好学能属文及长辞华典赡举进士释褐将作监丞累
迁右补阙知制诰太平兴国八年转比部郎中为翰林
学士拜右谏议大夫参知政事雍熙初加给事中时议亲征范阳至上疏陈三策谓京师
天下之本恭守宗庙不离京国为策之上未几以目疾
累表求解机政授礼部侍郎进秩吏部会建秘阁命兼秘书监选三馆书置阁中俾至总
之至每与李昉王化基等观书阁下帝必遣使赐宴且
命三馆学士皆与焉至是升秘阁次于三馆从至请也帝临幸秘阁出草书千字文为赐
至勒石帝曰千文乃梁武得破碑锤繇书命周兴嗣次
韵而成理无足取若有资于教化莫若孝经乃书以赐至荐潘慎修舒雅杜镐吴淑等入
充直馆校理请购亡书闲以新书奏御必便坐延见恩
礼甚厚淳化五年兼判国子监至言二传二礼孝经论语尔雅七经疏未备今直讲崔颐
正孙奭崔偓佺皆励精强学博通经义望令重加雠校
以备刊刻从之后又引吴淑舒雅杜镐检正讹谬至与李沆总领而裁处之至道初真宗
初正储位以至与李沆兼宾客诏太子事以师道傅礼

真宗每见必先拜至等上表不敢当礼诏答曰朕旁稽古训肇建承华用选端良资于辅导藉卿宿望委以护调盖将勛以谦冲故乃异其礼数
勿饰当仁之让副予知子之心至等相率谢太宗谓曰太子贤明仁孝国本固矣卿等可尽心规诲若动皆由礼则宜赞助事有未当必须力言
至于礼乐诗书义有可裨益者皆卿等素习不假朕之言谕真宗即位拜工部尚书参知政事一日帝访以灵武事至言河湟夷夏杂居先王置之度外望陛下以元元为念不以巨憝介意料彼胁从亦厌兵久矣苟啖以厚利縻以重爵亦安肯迷而不复讫于沦胥哉今灵州不可不弃非
独臣愚以为当然若移朔方军额于环州一时之权非臣之所敢知也后灵武卒不能守咸平元年再以目疾求解政柄授武信军节度使入辞
节制不允居二年徙知河南府四年以病求归本镇许之诏甫下卒年五十五赠侍中诏给其子惟良惟允惟熙等奉终制至刚严简重人士罕
登其门性吝嗇幼育于飞龙使李知审家及贵即逐其养子以利其资知审因至亦至右金吾卫大将军

△辛仲甫

辛仲甫字之翰汾州孝义人少好学及长能吏事伟姿仪器局沈厚周广顺中郭崇署掌书记崇所亲吏为廂虞候部民有被劫杀者诉阴
识贼魁即捕盗吏也官不敢诘仲甫请自捕逮鞫之吏故稽其狱仲甫曰民被寇害而使自诬服蠹政甚矣焉用僚佐为请易吏以雪冤愤崇悟
移鞫之乃得实状崇移镇真定改深赵镇观察判官太祖即位以崇为监军陈思海密奏崇有奸状帝怒且疑遣中使驰往验之未至崇忧懣失
据谓宾佐曰苟主人不察为之奈何皆愕相视仲甫曰皇帝膺运公首效节军民处置率循常度何以加辞第远使使者率僚属尽郊迎礼听彼
伺察久当自辨矣崇如其言使者至视崇无他意还奏帝大喜归罪思海仲甫又随崇为平卢军节度判官崇卒改郓齐观察判官累雪冤枉干
德五年入拜右补阙出知光州州有横河与城直会霖潦水溢溃庐舍仲甫集船数百艘军资民储皆赖以济移知彭州州卒诱营兵及诸屯戍
谋以长春节宴集日为乱属春初仲甫出城巡视见壕中草深意可藏伏命烧薙之凶党疑谋泄有自首者擒百余人尽斩之先是州少种树暑
无所休仲甫课民栽柳荫行路郡人谓之补阙柳太祖问羣臣文武兼资者为谁赵普以仲甫对徙益州兵马都监代还选为三司户部判官太
平兴国初迁起居舍人奉使契丹辽主问党进何如人如进之比有几仲甫曰国家名将辈出如进鹰犬材耳何足道哉辽主欲留之仲甫曰信
以成命义不可留有死而已辽主竟不能屈使还以刑部郎中知成都府既命奏免岁输

铜钱罢榷酤政尚宽简蜀人安之加右谏议大夫时彭州盗贼连结为害诏捕未获仲甫诱百余人令自缚诣吏余因散去入知开封府拜御史中丞雍熙三年拜给事中参知政事端拱中进户部侍郎时吕蒙正以长厚居相位王沔任事仲甫从容其间而已淳化二年以足疾罢为工部【东都事畧作户部】尚书出知陈州代归会蜀有寇以仲甫素着恩信将令輿疾招抚因疾未行以太子少保致仕真宗即位加太子少傅咸平三年卒年七十四赠太子太保子若冲若虚若蒙若济若渝皆能其官孙有孚有邻俱中进士

△王沔

王沔字楚望齐州人太平兴国初举进士解褐大理评事太宗亲征太原见于行在授著作郎【东都事畧作著作佐郎】直史馆迁右拾遗出为京西转运副使明年加右补阙知怀州擢膳部郎中枢密直学士迁右谏议大夫同签书枢密院事雍熙元年加左谏议大夫枢密副使端拱初改户部侍郎参知政事淳化初宰相赵普出守西洛吕蒙正以宽简自任政事多决于沔沔与张齐贤同掌枢务颇不叶齐贤出知代州沔遂为副使参预政事陈恕好苛察亦尝与沔忤淳化二年齐贤洎恕参知政事沔不自安虑僚属有以中书旧事告齐贤等会左司谏王禹偁上言自今宰相及枢密使不得于本厅见客许于都堂延接沔嘉即奏行之直史馆谢泌以为如此是疑大臣以私也疏驳之太宗追还前诏沔暨恕因是罢守本官翌日蒙正亦罢沔见上涕泣不愿离左右未几须鬓皆白三年帝欲黜陟官吏命沔与谢泌王仲华同知京朝官考课沔上言应京朝官殿犯乞令刑部条报以赃及公私罪分三等以闻立法苛察欲因是以求再用受命甫旬日方视事以暴疾卒年四十三赠工部尚书沔聪察敏辨有适时之用言事能委曲敷绎旧例丞相待漏于庐燃巨烛天始晓时入朝往往尚有留案遣决未尽沔止燃数寸事都毕犹徘徊笑谈方晓【待漏事宋史本传不载据欧阳修归田录增入】性苛刻少诚信掌机务日凡谒见者必啖以甘言皆喜过望既而进退非允人胥怨之沔弟淮太平兴国五年进士任殿中丞尝掌香药榷易院坐赃论当弃市以沔故诏杖一百降定远主簿沔以是频为寇准所诋云

△温仲舒

温仲舒字秉阳河南人太平兴国二年举进士为大理评事通判吉州再迁秘书丞知汾州坐事除名未几复起为右赞善大夫通判睦州端拱初拜右正言直史馆三年拜工部郎中枢密直学士秋彗星见召对别殿仲舒以为国家平太原以来燕代之交城守年深杀伤剽掠彼此

迭见大河以北农桑废业户口减耗凋弊之余极力奉边丁壮备徭老弱供赋遗庐坏堵不亡即死邪人媚上犹云乐输加以兵卒践更行者辛苦居者怨旷愿推恩宥以绥民庶太宗嘉纳之遂赦河北淳化二年拜右【按宋史宰辅表右作左】谏议大夫枢密副使改同知枢密院事四年罢知秦州先是俗杂羌戎有拉玛嘉勒多藏沙布等部唐末以来居于渭河之南大洛小洛门砦多产良木为其所据岁调卒采伐给京师必以货假道于羌户然不免攘夺甚至杀掠仲舒至部兵厯按诸砦谕其酋以威信诸部献地内属既而悉徙其部落于渭北立堡砦以限之民感其惠会有言仲舒生事者乃命知凤翔薛惟吉与仲舒对易其任连知兴元江陵二府加给事中会内侍蓝继宗使秦州还言得地甚利乃召仲舒拜户部侍郎寻参知政事二砦后为内地岁获巨木之利咸平初拜礼部尚书罢政出知河阳踰年知开封府五年以京府务剧求罢遂以本官兼御史中丞寻迁刑部尚书知天雄军徙河南景德中并州缺守帝以北门重镇须大臣镇抚非张齐贤温仲舒不可令宰相谕旨皆不愿往未几复知审官院大中祥符中进秩户部尚书三年判昭文馆大学士命下卒年六十七赠左仆射谥恭肃仲舒敏于应务少与吕蒙正契厚又同登第仲舒黜废累年蒙正居中书极力援引及被任用反攻蒙正士论薄之自为正言至贰枢密皆与寇准同进时人谓之温寇子嗣宗嗣良嗣先嗣立仲舒既卒帝悯其孤弱并禄以官

△王化基

王化基字永图镇定人太平兴国二年举进士为大理评事通判常州迁太子右赞善大夫知岚州时赵普为相建议以骤用人无益于治改淮南节度判官入为著作郎迁右拾遗抗疏自荐太宗览奏曰化基自结人主慷慨之士也召试知制诰以右谏议大夫权御史中丞一日侍便殿问以边事对曰治天下犹植木焉所患根本未固固则枝干不足忧朝廷治则边鄙何患乎不安又尝令荐士即一疏数十人王嗣宗辞映耿望皆其所荐也化基尝慕范滂为人献澄清畧言时事有五复尚书省二慎公举三惩贪吏四省冗官五择远官书奏太宗嘉纳之初柴禹锡任枢密有奴受人金而禹锡实不知也参知政事陈恕欲因以中禹锡太宗怒引囚讯其事化基为辨其诬太宗感悟以化基为长者淳化中拜中丞俄知京朝官考课迁工部侍郎至道三年超拜参知政事【按宋史宰辅表至道三年正月丙子王化基自礼部侍郎参知政事宰辅编年录同本传不言其为礼部侍郎】咸平四年以工部尚书罢知扬州移知河南府进礼部尚书大中祥符三年卒年六十七赠右仆射谥惠

献化基宽厚有容喜愠不形僚佐有相凌慢者辄优容之 【按隆平集载化基知杭州书记张贺颇傲忽之太宗知而面询化基第荐其才语

不及他】 在中书不以荫补诸子官然善教训故其子举正举直举善举元皆有所立

王举正

王举元

王诏

王举正

举正字伯中幼嗜学厚重寡言化基以为类己器爱异诸子以荫补秘书省校书郎进士及第知伊阙任邱县召为馆阁校书集贤校理真

宗实录院检讨国史编修官三迁尚书度支员外郎直集贤院修三朝宝训同修起居注擢知制诰其妻父陈尧佐为相改龙图阁待制尧佐罢

以兵部郎中复知制诰为翰林学士拜右谏议大夫参知政事前一日吏有驰报者举正方燕居斋舍徐谓吏曰安得漏禁中语既入谢仁宗曰

卿恬于进取未尝干朝廷以私故不次用卿时陕西用兵吕夷简以宰相判枢密院举正曰判名重不可不避也乃改兼枢密使迁给事中御史

台举李徽之为御史举正友壻也格不行徽之讼曰举正妻悍不能制如谋国何欧阳修等亦论举正懦默不任事举正亦自求去遂以资政殿

学士尚书礼部侍郎知许州光化军叛卒转寇傍境州兵有谋起为应者举正潜捕首恶斩之徙知应天府累迁左丞皇佑初拜御史中丞乃奏

张尧佐庸人缘妃家一日领四使 【东都事畧载张尧佐授宣徽节度羣牧景灵四使】使贤士大夫无所劝不报举正因留班廷诤乃夺宣

徽景灵二使又曰先朝用人虽守边累年者官止遥郡刺史今所用未尽得人而克期待迁使后有功者何所劝且转运使察官吏能否生民休

戚赖焉命甫下而数更不终岁而再易恩泽所以未宣民疾所以未瘳者职此故也御史唐介坐言事贬春州举正力言之介得徙英州居半岁

尧佐复为宣徽使家居凡七上疏及狄青为枢密使又言青出兵伍不可为执政力争不能夺因请解言职帝称其得风宪体除观文殿学士礼

部尚书知河南府入兼翰林侍读学士每进读及前代治乱之际必再三讽谕以太子少傅致仕卒赠太子太保谥安简文章雅厚如其为人

王举元

举元字懿臣以上文章赐进士出身知潮州江水败堤盗乘间窃发举元夜召里豪计事盗既获乃治堤为河阴发运判官或言大河决将

犯京师举元适入对具论地形证其妄已而果然历郡牧户部判官京东转运使沙门岛多流人守吏顾货橐阴杀之举元请立监以较赏罚自

是全活者众徙淮南河东夏人来争屈野地举元从数骑渡河设幕与之议示以赤心夏人咸服治平中又徙成都邛井盐岁入二百五十万为达勒卓克所侵积不售下令止之盐登于旧召提举在京修造进盐铁副使拜天章阁待制知沧州改河北都转运使知永兴军庆人夏人屯境上有窥伺意举元使二裨将以千骑扼其要害长安遣从事来会兵泾原戒勿轻举大将窦舜卿锐意请行不听举元曰不过三日敌去矣至期果去神宗以细札谿攻守策举元请省官减戍益备去兵勿营亭障舆论不合遂引疾求解徙陈州未行而卒官至给事中年六十二子诏

王诏

诏字景献用荫补官通判广信军事知博州魏俗尚椎剽奸盗相囊橐诏请开反告杀并赎罪法以携其党元佑初朝廷起回河之议未决而开河之役遽兴诏言河朔秋潦水淫为菑民人流徙赖发廩赈赡思稍苏其生未可以力役伤也从之擢开封推官富民贷后绝僧牒为缙钱十三万踰期复责倍输身死货籍又锢其妻子诏请免之出为滑州州属县有退滩百余顷岁调民刈草给河堤民病其役诏募人佃之而收其余为度支郎中使契丹时方讨西夏迓者耶律诚欲尝我言曰河西无礼大国能容乎诏曰夏人侮边既正其罪矣何预两朝和好事入贺故事跪而饮盖有误拜者乃强诏诏曰南北百年所守者礼其可纷更耶卒跪饮之崇宁中由大理少卿为卿徙司农御史论诏在滁日请苏轼书醉翁亭碑罢主崇福宫旋知汝州铸钱卒骂大校诏斩以徇而上章待罪除直秘阁言者复抉滁州事【按宋史本传载御史论诏在滁日请苏轼书醉翁亭碑又云言者复抉滁州然传中载诏所历官前后并无滁州之任】罢去起知深谿二州徙同州过阙留为左司郎中迁卫尉太府卿刑部侍郎详定敕令旧借绯紫者不佩鱼诏言章服所以辨上下今与胥吏不异遂皆佩鱼历工兵户三部侍郎转开封尹时子璠使京西摄尹洛父子两京相望人以为荣进刑部尚书拜延康殿学士提举上清宝篆宫复为工部尚书徽宗闵其老命毋拜诏皇恐于是但朝朔望以银青光禄大夫致仕卒年七十九

钦定续通志卷三百七

●钦定续通志卷三百八 列传一百八

列传

宋【十二】

○宋十二

张宏

赵昌言

陈恕【魏羽 刘式】

刘昌言

张洎

李惟清

张宏

赵昌言

陈恕

刘昌言

张洎

李惟清

△张宏

张宏字巨卿青州益都人太平兴国二年举进士为将作监丞通判宣州改太子中允直史馆迁著作郎预修太平御览历左拾遗出为峡路转运副使就加左补阙知遂州以勤于闻入为度支员外郎雍熙中吕蒙正李至张齐贤王沔荐其文行改主客郎中史馆修撰数日以本官充枢密直学士太宗召对便殿谓曰成都重地卿为朕镇之因厚赐以遣至郑州促召归阙拜右谏议大夫枢密副使时河朔用兵宏无所建白御史中丞赵昌言多言边事乃以昌言副枢密宏为中丞两更其职端拱初改工部侍郎再为枢密副使淳化二年以吏部侍郎罢俄判吏部铨权知开封府至道初出知潞州二年就转右丞真宗即位加工部尚书咸平初还朝知审官院二年真宗以上封者众虑其稽留命宏与王旦知登闻鼓院再掌吏部选四年卒年六十三赠右仆射录其子可久大理评事可道太祝可度奉礼郎宏循谨守位不求赫赫之誉历践通显未尝败事可久至虞部员外郎可道国子博士可度太子中舍

△赵昌言

赵昌言字仲谟汾州孝义人父叟从事使府太宗尹开封选为雍邱太康二县令后终安申观察判官昌言少有大志赵逢高锡寇准皆称许之太平兴国三年举进士文思甚敏有声于场屋为贡部首荐廷试日太宗见其辞气俊辩又覩其父名谓左右曰是尝为东畿宰朕之生辰必献诗百韵为寿善训其子亦可嘉也擢寘甲科为将作监丞通判鄂州拜右拾遗直史馆选为荆湖转运副使迁右补阙改知青州入拜职方员外郎知制诰预修文苑英华雍熙初加屯田郎中明年同知贡举俄出知天雄军时曹彬崔彦进米信失律于岐沟昌言遣观察支使郑蒙上疏请诛彬等优诏褒答召拜御史中丞太宗宴金明池特召预焉宪官从宴自昌言始也河东用兵枢密副使张宏循默守位昌言多条上边事太宗即以昌言为左谏议大夫代宏为枢密副使【东都事畧作代张宏为右谏议大夫枢密副使】迁工部侍郎时盐铁副使陈象舆与昌

言善知制诰胡旦度支副使董伊皆昌言同年右正言梁颢尝在大名幕下四人者日夕会昌言之第京师为之语曰陈三更董半夜有佣书翟颖性险诞与旦狎旦为作大言之辞使颖上之为颖改姓名马周以为唐马周复出也其言多毁时政自荐为大臣及历举数十人皆公辅器期昌言为内应许王尹开封【按长编陈王元僖进封许王是端拱元年二月事开封尹许王捕颖击狱是本年三月事本传仍称陈王尹开封误今改】廉知以闻诏捕颖系狱鞫之得实昌言坐贬崇信军节度行军司马颖杖脊黥面流海岛禁锢终身初太宗厚遇昌言欲相之赵普以勋旧复入恶昌言刚戾乃相吕蒙正裁数月会有颖狱普以昌言树党再劝太宗诛之太宗特宽焉淳化二年起昌言知蔡州逾年召拜右谏议大夫或议弛茶盐禁以省转漕命昌言为江淮两浙制置茶盐使昌言极言非便太宗不纳趋昌言往昌言固执如初即以户部副使雷有终代之卒以无利而罢昌言复知天雄军大河贯府境豪民峙刍菱图利诱奸人潜穴堤防岁仍决溢昌言知之命径取豪家所积以给用自是无敢为奸利者属澶州河决流入御河涨溢浸府城昌言籍府兵负土增堤数不及千乃索禁旅佐役皆偃蹇不进昌言怒曰府城将垫人民且溺汝辈食厚禄欲坐观耶敢不从命斩众股栗赴役不浹旬城完太宗手诏褒谕之召拜给事中参知政事俾乘疾置以入即赴中书时京城连雨昌言请出厩马分牧外郡或以盛秋备敌马不可阙昌言曰塞下积水敌必不至太宗从之未几王小波李顺构乱于蜀议遣大臣抚慰昌言独请发兵无使滋蔓廷论未决会嘉眉连陷始命王继恩等分路进讨昌言摄祭太庙宿斋中因召对滋福殿复赞兵计遂遣使督继恩战继恩御众寡术余寇未殄握兵留成都士无鬪志郡县复有陷者太宗意颇厌兵召昌言谓曰西川本自一国太祖平之讫今三十年矣昌言知帝意即前指画攻取之策太宗喜命昌言为川峡五十二州招安行营马步军都部署昌言恳辞敦谕不许赐精铠良马白金别赐手札数幅皆讨贼方畧自继恩以下并受节度既行有奏昌言无嗣鼻折山根颇有反相不宜遣握兵入蜀后旬日召宰相于北苑门曰昨令昌言入蜀朕思之有所未便且蜀贼小丑昌言大臣未易前进且令驻凤翔止遣内侍卫绍钦斋手书指挥军事亦可济也诏书追及昌言已至凤州留候馆百余日贼平改户部侍郎罢政事知凤翔府徙澶涇延三州真宗即位迁兵部侍郎知陕州移知永兴军咸平三年与吕蒙正寇准同召以本官兼御史中丞知审官院有言门资官不宜任亲民昌言手疏以才不才在人岂以寒隼世家为限遂罢其议加工部尚书仍兼中丞先时多遣台吏巡察羣臣

踰越法式者昌言建议请准故事令左右巡使分领之会知审刑院赵安仁判大理寺韩国华断狱失中解职昌言因上言详断官宜加慎择有议刑不当严示惩罚授以远官若有罪被问不即引伏者许令追摄又天下大辟断讞皆录款以闻奏付刑部详覆用刑乖理者皆行按劾惟开封府未尝奏案或断狱有失止罪原勘官吏知府等官皆不及责则何以辩明枉滥表则方夏望自今如外州例施行从之会孟州民常德方讼临津尉任懿以贿登第事下御史乃知举王钦若受之昌言以闻钦若自诉诏邢昺覆案坐昌言故入夺官贬安远军行军司马移武胜军景德初拜刑部侍郎求兼三馆职命判尚书都省真宗幸澶渊以盟津居要增屯兵命知河阳历知天雄军府境内有小盗昌言榜谕能告执者给赏牙吏即迁职枢密使王继英以为小盗不当擅为赏格乃访昌言易其榜有劳者俟朝旨徙知镇州迁户部侍郎 【东都事畧作吏部侍郎】大中祥符二年卒年六十五赠吏部尚书谥景肃录其子庆嗣为国子监丞赋禄终丧侄孙允明同学究出身昌言喜推奖后进掌漕湖外时李沆通判潭州昌言谓有台辅量表闻于朝王旦宰岳州平江昌言一见识其远大以女妻之后皆为贤相王禹偁自卑秩擢词职亦昌言所荐也昌言强力尚气槩当官无所顾避所至以威断立名虽屡经摈斥未尝少自抑损然刚愎纵率对僚吏倨慢时论以此少之庆嗣至太子洗马

△陈恕

陈恕字仲言洪州南昌人少为县吏折节读书江南平礼部侍郎王明知洪州恕以儒服见明与语大奇之因资送令预计偕太平兴国二年进士解褐大理评事通判洪州恕以乡里辞改澧州澧自唐季为节镇兼领吏多缘簿书干没为奸恕尽摛发其弊以吏干闻召入为右赞善大夫同判三司勾院迁左拾遗充度支判官与判使王仁贍廷争本司事仁贍屈伏坐贬秩擢恕为度支员外郎仍旧职再迁工部郎中知大名府时契丹来侵受诏增浚城隍其器用取于民者不时集恕立擒府中大豪一人会将吏将斩之大豪叩头流血请翌日集事违期甘死恕令械之以徇民皆恐栗无敢后期者数日工就会契丹引去召入为户部郎中户部副使迁右谏议大夫知澶州驿召为河北东路营田制置使太宗谕以农战之旨恕对曰古者兵出于民无寇则耕寇至则战今之戎士皆以募致衣食仰给县官若使冬持兵御寇春执耒服田万一生变悔无及矣太宗曰卿第行朕思之恕行数日果有诏止令修完城堡通导沟渎而已营田之议遂寝俄知代州入判吏部选事拜盐铁使恕有心计厘去宿弊太宗深器之亲题殿柱曰真盐铁陈恕迁给事中参知政事太宗言及户部使樊

知古所部不治恕与知古联事情好款洽密与语之欲
知古修举其职知古愬于太宗太宗怒恕泄禁中语罢守本官旋出知江陵府大发羣吏
奸赃坐徒流停废者甚众郡内惕息淳化四年分三司
为十道置左右计使召恕为工部侍郎充总计使判左右计事左右计使分判十道事凡
议论计度并令恕等参预恕以官司分隶政令互出难
以经久极言其非便岁余果罢复以恕为盐铁使时太宗留意金谷召三司吏李溥等二
十七人对于崇政殿询以计司利害溥等共上七十一
事诏以四十四事付有司行之其十九事下恕等议可否太宗谓宰相曰溥等条奏事颇
有所长朕尝语恕等若文章稽古此辈固不可望若钱
谷利病颇自幼至长寝处其中必周知根本但假以颜色引令剖陈必有所益后数日太
宗又曰国家岁入财数倍于唐唐中叶以降藩镇擅命
征赋多不入公家下陵上替经制隳坏若前代为得即已致太平岂复烦朕心虑也因召
恕等责以职事旷废且谓恕等专守绳墨终不能为国
家度长絜大剖烦析滞只如京城仓库主吏当改职者簿领中壹处节目未备即至十年
五年不决以致贫无资给转徙沟壑岂不伤和气哉恕
等顿首谢五年赐三司钱百万募吏有能言本司不便者令恕等量事大小以钱赏之钱
尽更给至道二年欲并三司命官总判其勾院磨勘理
欠凭由支收行帐提点等司令恕条列其事以闻悉从恕奏恕将立茶法召茶商数十人
俾各条利害恕第为三等语副使宋大初曰吾观下等
固灭裂无取上等取利太深不可行惟中等公私皆济吾裁损之可以经久于是始为三
法【按宋史食货志及名臣言行录俱作三说法】
行之货财流通峡路诸州承孟氏旧政赋税轻重不均阆州税钱千八百为一绢果州六
百为一绢民前后击登闻鼓陈诉历二十年诏下本道
官吏因循不理转运副使张晔年少气锐会受诏按覆即便宜行之恕奏晔擅改法计果
州一岁亏上供绢万余晔坐削一任免恕每便殿奏事
太宗或未深察必形谗让恕敛板蹶缩退至殿壁以立若无所容俟意稍解复进恚执前
奏终不改易如是或至三四太宗以其忠多从之迁礼
部侍郎真宗即位加户部命条具中外钱谷以闻恕久不进屡趣之恕曰陛下富于春秋
若知府库充实恐生侈心臣是以不敢进真宗嘉之咸
平二年拜吏部侍郎知通进银台封驳司审官院上言封驳之任实给事中之职隶于左
曹虽别建官局不可失其故号请以门下封驳事隶银
台司从之五年知贡举恕自以洪州人避嫌凡江南贡士悉彼黜退又援贡举非其人之
条故所取甚少而所取以王曾为首及廷试糊名考校
曾复得甲科时议称之恕每自叹曰吾得曾名世才也不愧知人矣恕事母孝母亡哀慕

过甚遂至羸瘠起复视事迁尚书左丞权知开封府恕
己病犹勉强亲职数月增剧表求馆殿之职获奉以济其贫真宗曰卿求一人可代者听
卿去是时寇准罢枢密使恕即荐以自代遂以准为三
司使恕为集贤学士判院事准即检寻恕前后改革兴立之事类以为册及以所出榜别
用新板躬至恕第请判押恕亦不让一一押之自是计
使无不循其旧贯至李谿为三司使始改茶法恕之规模渐革矣帝重恕诏太医诊疗百
日有司请停奉不许未几卒年五十九恕将卒口占遗
奏及约束后事送终之具无不周悉赠吏部尚书录其子执中为太常寺太祝执古为奉
礼郎恕颇涉史传多识典故精于吏理深刻少恩人不
敢干以私前后掌利柄十余年强力干事胥吏畏服有称职之誉善谈论听者忘倦素不
喜释氏尝请废译经院真宗曰三教之兴其来已久前
代毁之者多矣但存而不论可也恕尝怒子淳私用钱及寝疾上言淳不率教导多与非
类游常习武艺愿出为外州军校真宗曰戎校管镇兵
非丞郎家子弟所莅也以为滁州司马恕卒召复旧官后竟以贿败执中至同中书门下
平章事别有传执古至虞部员外郎执方执礼并太子
中舍

魏羽 【刘式】

魏羽 【刘式】

魏羽字垂天歙州婺源人少能属文上书李煜署弘文馆校书郎时建当涂县为雄
远军以羽为判官王师渡江出其境羽以城降太祖擢
为太子中舍仍旧职金陵平入朝命知兴州太平兴国初知棣州改京兆府六年受诏诣
瀛州覆军市租得隐漏数万计因上言本州岛录事参军
郭震十年未代河间令崔能前任即墨未岁迁秩有司调选失平疏远何由闻达请罪
典司以肃欺弊帝赐诏褒谕复命迁太常博士知宋州
又徙阆州就改膳部员外郎入判大理寺历度支户部二判官召拜本曹郎中因上疏言
三司职官颇众愿省其半可以责成仍条列利病凡二
十事诏下有司详议皆以为便改盐铁判官时北边多警朝议耕战之术以羽为河北东
路营田副使改两浙转运使迁兵部郎中淳化初选为
秘书少监迁左谏议大夫俄拜度支使改盐铁使四年并三部为一司以羽判三司先是
三司簿领堆积吏缘为奸虽当更立新制未为适中羽
请依唐制天下郡县为十道两京为左右计各署判官领之制三司使二员以羽为左计
使董俨为右计使中分诸道以隶焉未久以非便罢守
本官出知滑州加给事中徙潭州真宗即位迁工部侍郎连徙杭扬二州召权知开封府
车驾北巡判留司三司再为户部度支使咸平四年以

疾解职拜礼部侍郎月余卒年五十八羽涉猎史传好言事淳化中许王暴薨或有以官府旧事上闻者太宗怒追捕僚吏将穷究之羽乘间上言曰汉戾太子窃弄父兵当时言者以其罪当笞耳今许王之过未甚于是太宗嘉纳之繇是被劾者皆获轻典尝建议有唐以来凡制诏皆经门下省审有非便者许其封驳请遵故事择名臣专领其职迄今不废羽强力有吏干尤小心谨事太宗尝谓左右曰羽有心计亦明吏道但无执守与物推移耳历剧职十年始踰四十须鬓尽白亦可怜也羽出入计司凡十八年习知金谷之事然颇伤烦急不达大体长子玠卒次子校书郎瓘后为殿中丞琰为太子中舍孙平仲天禧三年同进士出身羽同时有刘式者亦久居计司勑端拱中三年磨勘之法首以式主之式字叔度袁州人李煜时举三传中第归太祖历迁大理寺丞赞善大夫监通州丰利监及主三司都磨勘司尝建议置主籍支收司以谨财赋出纳时以为当迁秘书丞至道中并三勾院为一命式领之再转工部员外郎迁刑部式深究簿领之弊江淮间旧有横赋逋积至多式奏免之人以为便然多所条奏检校过峻为下吏所讼免官卒真宗追录前效赐其子立本学究出身次子立之后为国子博士立德立礼并进士及第立礼为殿中丞

△刘昌言

刘昌言字禹谟泉州南安人少笃学文词靡丽本道节度陈洪进辟功曹参军掌筭奏太平兴国二年洪进归朝改镇徐州又辟推官五年举进士入格太宗初惜科第止授归德军掌书记八年复举得第迁保信武信二镇判官宰相赵普镇南阳重昌言有吏干钱俶帅邓表荐之移泰宁军节度判官入为左司谏广西安抚使淳化初赵普留守西京表为通判委以府政普疾属昌言后事普卒昌言感普知己经理其家事太宗以为忠于所举拜起居郎连对三日皆至日旰昌言捷给谈诡能揣人主意无不称旨迁工部郎中踰月守本官充枢密直学士与钱若水同知审官院二十八日迁右谏议大夫同知枢密院事昌言骤用不为时望所伏或短其闾语难晓太宗曰惟朕能晓之又短委母妻乡里十余年不迎侍别娶旁妻诏令迎归京师本州岛给钱办装县次续食时又有光禄丞何亮家果州秘书丞陈靖家泉州不迎其亲下诏戒谕文武官父母在剑南峡路漳泉福建岭南皆令迎侍敢有违者御史台纠举以闻昌言自以登擢非次惧人倾夺会诛凶人赵赞昌言与赞素善前在河南尝保任之心不自安因太宗言及近侍有与赞交者昌言蹶然出位顿首称死罪太宗慰勉之然自此恶其为人以给事中罢出知襄州至道二年

徙知荆南府真宗即位就拜工部侍郎咸平二年卒年五十八赠工部尚书子有方比部员外郎有政虞部员外郎

△张洎

张洎滁州全椒人少有俊才博通坟典江南李景开宝举登进士第解褐上元尉擢监察御史洎自以论事称旨遂肆弹击无所忌大臣游简言等嫉之会景徙豫章留洎为煜记室景卒煜嗣擢知制诰迁中书舍人清辉殿学士参预机密恩宠第一洎旧字师黯煜令字偕仁好建议每上言未即行必称疾煜手札慰谕之始复视事王师围金陵洎引符命劝煜勿降苟一旦不虞即臣当先死既而城陷洎携妻子及橐装自便门入止宫中给光政使【按五代史南唐世家开宝五年煜下令贬损制度改枢密院为光政院故称枢密使为光政使也】陈乔同升阁欲与俱死乔自经气绝洎反下见煜曰臣与乔同掌枢务国亡当俱死又念主在谁能为主白其事不死将有以报也归朝太祖召责之曰汝教煜不降使至今日因出帛书示之乃攻城日洎所草诏召上江救兵蜡丸书也洎顿首请罪曰实臣所为也犬吠非主此其一尔他尚多有今得死臣之分也辞色不变太祖奇之贷其死拜太子中允寻判刑部【按马令南唐书云南唐之士归于皇朝洎最显焉】太宗即位以其文雅选直舍人院改户部员外郎太平兴国四年出知相州明年徙贝州又知相州部内不治转运使田锡劾之代还帝以其儒生不责以吏事诏不问令以本官知译经院迁兵部员外郎礼户二部郎中端拱初契丹侵边诏羣臣言事洎以练兵聚谷分屯塞下来则备御去则勿追为要畧会钱俶薨太常定谥忠懿洎时判考功为覆状有居亢无悔之语虞部郎中张佖奏驳之事下中书以诘洎对状未几选为太仆少卿同知京朝官考课拜右谏议大夫判大理寺又充史馆修撰判集贤院事帝以儒行篇赐近臣及新第举人洎上表谢帝览而嘉之擢拜中书舍人充翰林学士帝顾谓近臣曰学士之职清要贵重非他官可比朕常恨不得为之故事赴上日设燕教坊以杂戏进久罢其事至是令尽设之仍诏枢密直学士吕端刘昌言及知制诰柴成务等预会时以为荣俄判吏部铨尝引对选入帝顾之谓近臣曰张洎富有文艺至今尚苦学江东士人之冠也洎与钱若水同在翰林甚被宠顾时刘昌言骤擢枢要人望甚轻董俨方掌财赋欲以计倾之会杨徽之钱熙尝言洎及若水旦夕当大用熙以语昌言昌言曰洎必参政柄若水后进年少岂遽及此时翰林小吏谄事在侧昌言虑洎闻之即对小吏尽述熙言令告洎洎方修饬边幅以固恩宠疑徽之遣熙以构飞语中已遂白于帝帝怒召昌言责之以徽之为镇安军行军司

马熙罢职通判朗州皇子益王元杰改封吴王授扬州
润州大都督府长史领淮南镇江两军节制洎当草制因上议曰唐以扬益潞幽荆五郡
为大都督府置长史司马为上佐其大都督府非亲王
不授或亲王遥领别命大臣领郡除长史副大使知节度事今益王以扬润二郡改封居
大都督之任又已正领节度事却加长史乃是自为上
佐矣乞付中书门下商议施行宰相以制命已行难于追改洎又上表论列吕蒙正言越
王领福州长史今吴王独为大都督居越王之上非便
帝令俟异日除授并改正之至道二年郊祀覃庆遂改焉 【按宋史本传云至明年帝郊
祀覃庆考益王元杰改封吴王长编载于淳化五年
二月而太宗本纪至道二年二月吴王元杰为扬州大都督兼领寿州非明年也今据本
纪改】 洎奉诏与李至范果张佖同修国史又判史馆
洎博涉经史多知典故每帝有著述或赐近臣诗什洎必上表援引经传以将顺其意帝
因赐诗褒美有翰长老儒臣之句与苏易简同在翰林
素不协及易简参知政事洎多攻其失既而易简罢即以洎为给事中参知政事与寇准
同列先是准知吏部选事洎掌考功为吏部官属准年
少新进气锐思欲老儒附己以自大洎夙夜坐曹视事每冠带候准出入于省门揖而退
不交一谈准益重焉因延与语洎捷给善持论多为准
规画准心服乃兄事之极口称洎于帝帝欲进用又知其在江左日多谗毁良善李煜杀
潘佑与有谋焉疑之翰林待诏尹熙古吴郢皆江东人
洎尝善待之帝一夕召熙古辈侍书禁中因问以佑得罪故熙古言煜忿佑谏说太直非
洎预谋 【按宋史南唐世家潘佑传称佑因谏昱不
纳忿而自经并非因煜忿而杀佑亦不言洎有预谋也】 自是遂加擢用盖准推挽之也
既同秉政奉准愈谨政事一决于准无所参预专修时
政记甘言善柔而已后因奏事异同准复忌之至道二年四方馆使曹璨自河西驰骑入
奏边事言继迁率万余众寇灵州帝诏宰相吕端知枢
密院事赵镒等各以所见即日具奏来上吕端相率诣长春殿言曰臣等若各述所见则
非询谋佥同之议望许共为一状陈其利害洎越次奏
曰端等备位辅弼缄默不言深失吁谟之体端曰洎欲有言不过揣摩陛下意耳必无骨
鲠之论帝默然翌日洎上疏引贾捐之弃珠崖事愿弃
灵武以省关西馈运帝尝有此意既而悔之洎果迎合览奏不悦以疏付洎曰卿所陈朕
不晓一句洎惶恐而退帝召同知枢密院事向敏中等
曰张洎上言果为吕端所料朕已还其疏矣洎既议事不称旨恐惧欲自固权位帝已嫉
准专恣恩宠衰替洎虑一旦同罢免因奏事大言准退
后多诽谤准色变不敢辨由是罢政未几洎病在告满百日力疾请对方拜踏于帝前明

日上章求解职优诏不允后月余改刑部侍郎罢知政
事奉诏呜咽疾遂亟十余日卒年六十四赠刑部尚书以其二子皆为京官泊美风仪有
文采尤险诋好攻人短李煜既归朝贫甚时丐索之煜
以白金瓌面器与泊泊尚未满意煜子仲寓 【按五代史南唐世家云封长子仲遇清源
公宋史南唐世家云仲寓伪封清源郡公考五代史
有仲遇无仲寓宋史有仲寓无仲遇而清源封号两史皆同东都事畧又作仲瑀】 死亦
不吊与张泌议事不协遂为讎隙始以从父礼事泌既
而不拜善事内官在翰林日引唐故事奏内供奉官蓝敏政为学士使内侍裴愈副之帝
曰此唐室弊政朕安可踵此覆辙泊惭而退性鄙吝难
亲戚无所沾及江表故旧亦罕登其门素与徐铉厚善后相连遂绝交子安期至国子博
士方回后为虞部员外郎方回子怀玉王钦若壻赐进
士及第大理寺丞秘书校理

△李惟清

李惟清字直臣下邑人父仲行为章邱簿因徙家焉惟清开宝中以三史解褐涪陵
尉蜀民尚淫祀病不疗治听于巫覡惟清擒大巫笞之
民以为及祸他日又加捶焉民知不神然后教以医药稍变风俗时遣宦官督输造船木
纵恣不法惟清奏杀之由是知名秩满迁大理寺丞太
平兴国三年为荆湖北路转运判官五年改左赞善大夫充转运副使升正使就改监察
御史兼总南路掌入奏事太宗问曰荆湖累年丰稔又
无徭役民间苏否对曰臣见官卖盐斤为钱六十四民以三数斗稻价方可买一斤乃诏
斤减十钱徙京西转运使入为度支判官改主客员外
郎雍熙三年大举取幽州惟清以为兵食未丰不可轻动朝廷业已兴师奏入不报判度
支许仲宣建议通盐法以卖盐岁课赋于乡邨与户税
均纳惟清奉诏往荆湖诸路详定奏言以盐配民非便遂罢使还出为京东转运使会募
丁壮为义军惟清曰若是天下不耕矣三上疏谏繇是
独选河北而余路悉罢擢屯田郎中度支副使端拱初迁右谏议大夫改度支使会遣使
河朔治方田大发兵惟清以盛春妨农恳求罢废太宗
曰兵夫已发矣止令完治边城而已淳化三年迁给事中充盐铁使淮南榷货务卖岳茶
斤为钱百五十惟清擅减斤五十钱不以闻左授卫尉
少卿出知广州至道初就拜右谏议大夫太宗闻其廉平诏奖之二年徙广南东四路都
转运使寻召拜给事中同知枢密院事惟清倜傥自任
有钩距临事峻刻所至称强干然以俗吏进无人望纔数月真宗即位加刑部侍郎复除
御史中丞既去枢要怫郁尤甚肆情弹击咸平元年卒
年五十六赠户部尚书子永锡荫至光禄寺丞后至右赞善大夫次子永德至殿中丞

钦定续通志卷三百八

●钦定续通志卷三百九 列传一百九

列传

宋 【十三】

○宋十三

柴禹锡 张逊 周莹 王继英 王显

柴禹锡

张逊

周莹

王继英

王显

△柴禹锡

柴禹锡字符圭大名人少时有客见之曰子质不凡若辅以经术必致将相禹锡由是留心问学时太宗居晋邸以善应对获给事焉太平兴国初授供奉官三年改翰林副使迁如京使仍掌翰林司每夜直帝以藩府旧僚多召访外事迁宣徽北院使告秦王廷美阴谋擢枢密副使转南院使雍熙中议广宫城禹锡请以别业易官邸帝因是薄之又于帝前称转运使王延范忠勤且为宰相宋琪请卢多逊故第帝恶其朋比下诏切责以左骁卫大将军出知沧州语详宋琪传禹锡在任勤于政治部民列状以闻改涪州观察使徙澶镇二州驻泊部署俄知潞州州民乞留三载诏奖之徙知永兴军府再召为宣徽北院使知枢密院事至道初制除镇宁军节度知泾州入谢日帝谓曰由宣徽罢者不过防御使尔今委卿旌节兼之重镇可谓优异矣禹锡流涕哽咽而已咸平中移知贝州是岁契丹兵奄至城下禹锡内严备御寇寻引去明年徙陕州景德初子宗庆选尚召禹锡归阙令公主就第谒见行舅姑礼固辞不许顷之还镇卒年六十二赠太尉 【隆平集作赠太子太傅】 子宗亮太子中允宗庆永清军节度

△张逊

张逊博州高唐人数岁丧父养于叔父职方员外郎干后随母归魏仁浦家驸马都尉咸信其异父弟也太宗在晋邸召隶帐下太平兴国初补左班殿直从征太原还迁文思副使累迁度支使端拱初迁盐铁使二年授宣徽北院使签书枢密院事未几兼枢密副使知院事与同列寇准不协每奏事颇相矛盾一日逊等晚归私第准与温仲舒并轡有狂民迎马首拜呼万岁街使王宾旧与逊同事晋邸逊又尝举宾雅相厚

善因奏民迎准拜呼万岁准辩实与仲舒同行逊令宾独奏斥臣辞意俱厉因互发其私太宗恶之下诏切责逊左降右领军卫将军准亦罢职西蜀李顺为乱诏发兵水陆进讨以荆渚居其要害命逊为右骁卫大将军知江陵府逊至会峡路诸漕卒数千人聚江陵有告其谋变以应蜀寇府中议欲尽诛之逊止捕首恶杨承进等斩于市余党亲加慰抚飞奏以闻太宗嘉之诏以其卒分配州郡逊卒年五十六时至道元年也赠桂州观察使逊小心谨慎徒以攀附至贵显其吁谋献替无闻焉子敏中初补供奉官逊在宣徽表言尝业文愿改秩累至比部郎中次子虚中娶宗室申国公女至供奉官合门祇候敏中子先进士及第 【按宋史此下有杨守一赵镕二传守一与镕俱给事晋邸以诬构秦王廷美遂至通显无事迹足录今并删】

△周莹

周莹瀛州景城人右领军卫上将军景之子也景家富财好结交历事唐汉周习水利尝浚汴口导郑州郭西水入中牟渠修滑州河堤累迁至是官太宗潜邸时莹得给事中左右即位补殿直领武骑卒巡警泉福州卒纔数百捕剧贼千余迁供奉官又使绥银州按边事还奏称旨擢鞍辔库副使雍熙二年为杭睦五州都巡检使兼杭州都监会妖僧绍伦为变莹擒获之逮捕就戮者三百余人人以为酷滥代还与郝守浚护塞宋州决河俄改三路排阵钤辖历知天雄军真定二府就迁引进使至道二年李继隆讨西夏诏莹诣军前授以机事还拜客省使签书枢密院诸房公事真宗嗣位拜宣徽北院使先是宣徽着位在枢密副使上莹表请居下从之咸平三年迁南院使知枢密院事会蜀平部送胁从者数十百人至阙下西川转运使马亮因入奏请赦其罪遣还莹以为当尽诛之令莹亮廷议帝是亮议悉原其罪五年高阳关都部署阙藩侯无足领之者宰相请辍宣徽使以居其任时王继英任北院帝以莹练达军事乃拜永清军节度兼领高阳关都部署为三路排阵使契丹来侵诏步兵赴边军为援莹至则寇兵已去即日还屯所帝闻曰莹何不持重少留示以不测轻于举措非将帅体也景德初代王显为天雄军都部署兼知军府事尝召洺州骑士千五百人赴大名道与寇值力战有死伤者莹犹谓其玩寇将悉诛之诏赐金帛谕莹勿治其罪车驾北巡为驾前东西贝冀路都部署明年改知陕州俄徙永兴军府又移邠州兼环庆路都部署时夏州内属诏省戍兵还营以减馈饷之费仍手诏谕莹莹遽奏乞留以张边威帝谓莹庸懦不智以曹玮代之徙知澶州大中祥符初改天平军节度明年为镇定都部署兼知定州转运使奏其旷弛

徙知澶州境内屡有冠盗宰相以莹任居将帅不能以威望镇靖请徙他郡帝曰处之闲僻适使其自偷尔遂下诏督责令其擒捕时发卒修河防而军中所给糗粮多腐败不可食又役使不均莹不加恤以故亡命者众七年入朝复遣还镇又以澶渊当契丹之冲籍其廩给之厚复命知澶州九年被疾求还京师卒年六十六赠侍中初谥忠穆后改元惠录其二子供奉官普显为内殿崇班二孙永昌永吉为殿直莹居枢近无他谋畧及莅军旅历藩镇功业无大过人

△王继英

王继英开封祥符人少从赵普给笔札普罢河阳为少保从者皆去继英趋事逾谨普再入相继英隶名中书五房院时真宗在藩邸选为导吏兼内知客事太宗召见谓曰汝昔事赵普朕所备知今奉亲贤尤宜尽节及建储授左清道率府副率兼左春坊谒者谒者本宦职副率品秩颇崇非趋走左右者所宜为俾兼领之执政之误也真宗即位擢为引进使领恩州刺史累迁枢密都承旨改客省使契丹来侵继英密请车驾北巡帝从之即命继英驰传诣镇定高阳关阅视行宫储顿宣谕将士俄充澶州钤辖会大将傅潜逗挠得罪令继英即军中召还属吏寻掌三班拜宣徽北院使与周莹同知枢密院事莹出镇继英遂冠枢密小心慎靖以勤敏称帝倚赖之景德初授枢密使 【按宋史宰辅表载景德元年八月己未王继英自宣徽南院使检校太保知枢密院事进枢密使本传南院作北院不载检校太保】 从幸澶州契丹请和諏访经畧继英预焉明年郊祀加特进检校太傅三年卒年六十一赠太尉侍中谥恭懿子遵式遵海遵度遵范皆至显官

△王显

王显字德明开封人初为殿前司小吏太宗居藩尝给事左右性谨介不好狎未尝践市肆太宗即位补殿直稍迁供奉官累迁东上合门使八年拜宣徽南院使兼枢密副使是夏制授枢密使 【按宋史宰辅表载太平兴国八年六月己亥王显自枢密副使加检校太保进枢密使本传不载加检校太保】 帝谓之曰卿世家本儒少遭乱失学今典朕机务无暇博览羣书能熟军戒三篇亦可免面墙矣副使赵昌言寇准锋气皆锐慢显显或失误护短终不肯改帝每面戒之淳化二年诏加切责黜授随州刺史充崇信军节度观察等使遣之任俄知永兴军徙延州时夏台益部寇扰显上言李继迁翻然向化许其内附然而狼子野心未可深信宜谨屯戍固城垒积刍粮遴选才勇付以边任蜀寇未平宜申饬将帅速期荡平至于河北关防所当加谨诚以国家方事西南密谋兴举若分中朝

之势力则长外寇之奸谋矣时制沿边粮斛不许过河
西河西青盐不得过界贩鬻犯者不以多少处斩显请犯多者依法自余别为科断以差
其罪章上未报移知秦州初温仲舒知州日开拓山林
讽藩部献其地后朝廷虽尝给还而采伐如故转运使卢知翰请量给藩部茶彩以酬所
献诏遣张从式与显同往规度显言乃者朝命以赵保
吉修贡边城务使安静若今动众开斥疆境非便议遂罢咸平初入朝改横海军节度出
知镇州二年曹彬卒复拜枢密使 【按宋史宰辅表
载咸平二年七月己丑王显自横海军节度使兼御史大夫依前检校太傅除枢密使本
传不载兼御史大夫检校太傅】 郊祀加检校太师真
宗幸大名内枢惟显与副使宋湜从言者多谓显专司兵要谋畧非长会湜卒乃以参知
政事向敏中权同知枢密院事三年改授山南东道节
度同中书门下平章事定州路行营都部署河北都转运使兼知定州吏民诣驻泊都部
署孔守正言显治状愿借留守正以闻明年加镇定高
阳关三路都部署许便宜从事契丹来侵前军过威虏军比时方积雨契丹以皮为弦湿
缓不堪用显因大破之梟获甚众明年求致仕不许改
河阳三城节度将之镇时议亲征契丹显言盛寒在序敌未犯塞继迁未灭西鄙不宁议
者乃于此时请复幽蓟非计之得也必欲复燕蓟旧地
则必修文德养勇锐因时之利而后可景德初徙知天雄军府又言祖宗以来多命近臣
统领军旅今后宣徽使宜于文武羣臣中择晓达边事
者为之武臣以罪黜者宜加容贷不以一眚遂废至若临敌命将则贵专任出师应敌则
约束将校使相应援全是数者则军威倍壮人心增勇
矣契丹来侵帝议亲征显复陈三策谓大将军方在镇定契丹必不南侵车驾止驻澶渊
诏镇定出兵会河南军合击之可也若契丹虚张声势
以抗我师潜遣锐兵南攻驾前诸军则令镇定之师直冲戎帐攻其营砦沿河游兵不战
而自屈矣否则遣骑兵千余步兵三千于濮州渡河横
掠继以大军追北掩击亦可出其不意也已而契丹请盟赵德明遣使修贡称藩朝廷加
赏锡且许通青盐以济边民从显之请也四年以疾还
京师卒年七十六赠中书令谥忠肃录其二子显自三班不数年正枢任奖擢之速时无
儼之者显吏军司时张永德以滑州节制为殿前都点
检及显自枢密镇孟津兼相帅永德由太子太师为相帅同日宣制永德兼大夫反在显
下时人讶之显居中执政矫情以厚胥吏龌龊自固而
已在藩镇颇纵部曲扰下论者非之子希逸字仲庄以荫补供奉官好学尤熟唐史聚书
万余卷换秩授朝奉大夫太子中允咸平初改殿中丞
直史馆预修册府元龟加祠部员外郎卒希范至如京副使

钦定续通志卷三百九

●钦定续通志卷三百十 列传一百十

列传

宋 【十四】

○宋十四

扈蒙 王着 王祐【旭质】 杨昭俭 鱼崇谅

张澹 高锡

扈蒙

王着

王祐

杨昭俭

鱼崇谅

张澹

高锡

△扈蒙

扈蒙字口用幽州安次人少能文晋天福中举进士入汉为鄆县主簿赵思绾叛遣郭从义讨之郡县吏供给皆戎服趋事蒙冠服褻博举止舒缓从义颇讶之转运使李谷谓曰蒙文学名流不习吏事遂不之问周广顺中从归德军节度赵晖掌书记召为右拾遗直史馆知制诰蒙从弟载时为翰林学士兄弟并掌内外制时号二扈太祖即位由中书舍人迁翰林学士坐请托于同年仇华【按长编载蒙以仆夫扈继远为从子属之同年生淮南转运使仇华使厘务继远盗官盐事发蒙坐夺金紫黜为左赞善大夫本传所称请托即此事也】黜为太子左赞善大夫稍迁左补阙掌大名市征复知制诰充史馆修撰开宝中受诏与李穆等同修五代史连知贡举蒙上书言自今凡有裁制之官优恤之言发自宸衷可书简策者并委宰臣及参知政事每月轮知抄录以备史官撰集从之即以参知政事卢多逊典其事九年受朝于元殿降王在列声明大备蒙上圣功颂以述太祖受禅平一天下之功其词夸丽有诏褒之为卢多逊所悉出知江陵府太宗即位召拜中书舍人旋复翰林学士与李昉同修太祖实录太平兴国四年从征太原还转户部侍郎加承旨雍熙三年被疾以工部尚书致仕未几卒年七十二赠右仆射自张昭谏仪卒典章仪注多蒙所刊定初太祖受周禅追尊四庙亲郊以宣祖配天及太宗即位礼官以为舜郊尝商郊冥周郊后稷王业所因也若汉高之太公光武之南顿君虽有帝父之尊而无预配天之祭故自太平兴国三年六年

再郊并以太祖配于礼为允太宗将东封蒙定议曰严父莫大于配天请以宣祖配天自雍熙元年罢封禅为郊祀遂行其礼识者非之蒙性沈厚不言人是非有笑疾虽帝前不自禁载字仲熙有传见五代史 【按宋史本传前有陶谷传改入贰臣】

△王着

王着字成象单州单父人性豁达无城府幼能属文汉干佑中举进士周祖镇大名世宗侍行闻著名召置门下因得谒见周广顺中世宗镇澶州辟观察支使随世宗入朝迁殿中丞即位拜度支员外郎显德三年充翰林学士恭帝立加金部郎中知制诰太祖即位加中书舍人建隆二年知贡举时亳州献紫芝郢州获白兔陇州贡黄鹦鹉着献颂因以规谏太祖甚嘉其意下诏褒之四年宿直禁中被酒夜扣滋德殿门求见帝怒黜为比部员外郎干德中改兵部员外郎二年复知制诰加史馆修撰判馆事三年就转户部郎中六年复为翰林学士加兵部郎中再知贡举开宝二年暴卒年四十二着少有俊才事周世宗以幕府旧僚眷待尤厚常召见命皇子出拜每呼学士而不名以嗜酒而不得相善与人交好延誉后进当世士大夫称之 【按宋史本传末云有传见五代史考薛居正欧阳修五代史俱无王着传今删】

△王祐

王祐字景叔大名莘人少笃志词学性倜傥有俊气晋天福中以书见桑维翰称其藻丽由是名闻京师邺帅杜重威辟为观察支使汉初重威移镇睢阳反侧不自安祐尝劝之使无反汉不听佑坐是贬沁州 【按东都事畧作辽州】 司户参军因作书贻乡友以见志仕周历魏县南乐二令太祖即位拜监察御史出知魏县移知光州迁殿中侍御史干德三年知制诰六年加集贤院修撰转户部员外郎太祖征太原已济河诸州馈集上党城中车乘塞路帝闻之将以稽留罪转运使赵普曰六师方至而转运使以获罪闻敌必谓储峙不充有以窥我矣非威远之道也俾能治剧者往莅其州足矣即命祐知潞州及至馈饷无乏路亦无雍班师召还会符彦卿镇大名颇不治太祖以祐代之俾察彦卿动静谓曰此卿故乡所谓昼锦者也祐以百口明彦卿无罪且曰五代之君多因猜忌杀无辜故享国不永愿陛下以为戒彦卿由是获免故世谓祐有阴德继以用兵岳表徙知襄州湖湘平移知潭州召还摄判吏部铨时左司员外郎侯陟自扬州还复判铨祐判门下省陟所注拟祐多驳正卢多逊与陟善陟因诉之多逊素恶祐不比己遂黜祐为镇国军行军司马太平兴国初移知河中府入为左司员外郎拜中书舍人充史馆

修撰未几知开封府以病请告太宗谓祐文章清节兼着特拜兵部侍郎卒年六十四追封晋国公累赠太师尚书令兼中书令 【据欧阳修所撰王文正公旦全德元老之碑增】 初祐掌诰会卢多逊为学士阴倾赵普多逊累讽祐比己祐不从一日以宇文融排张说事劝释之多逊滋不悦及普再入多逊果败与宇文融事颇类识者服其先见祐子三人懿旦旭旦自有传初祐知贡举多拔擢寒俊毕士安柴成务皆其所取也后与其子旦同入两制居中书懿字文德励志为学举进士尝知袁州有政绩卒年四十九

王旭

王质

王旭

旭字仲明严于治内恕以接物尤笃友义以荫补太祝尝知缙氏县时官邻邑者多贪猥民有永盗三镞缙氏一鎌之谣又知雍邱县真宗尹京时素闻其能及践阼三迁至殿中丞自旦居宰府旭以嫌不任职王矩尝荐旭材堪治剧真宗召旦谓曰前代弟兄同居要地者多矣朝廷任才岂以卿故屈之邪命授京府推官旦固辞改判南曹寻判国子监出知颍州荒政修举大中祥符间旦既薨扬历中外早有政绩由兵部郎中出知应天府卒年六十八懿子睦旭子质皆能其官

王质

质字子野少谨厚淳约力学问师事杨亿亿叹以为英妙伯父旦见其所为文嗟赏之以荫补太常寺奉礼郎后献文召试赐进士及第被荐为馆阁校勘改集贤校理累迁尚书祠部员外郎丁父忧与诸弟饭脱粟茹蔬终丧通判苏州州守黄宗旦少质尝因争事宗旦曰少年乃与丈人抗邪质曰事有当争职也卒不为屈宗旦得盗铸钱者百余人下狱治退告质曰吾以术钩致得之喜见于色质曰以术钩人寘之死而又喜仁者之政固如是乎宗旦惭沮为薄其罪还判尚书刑部吏部南曹知蔡州州人岁时祀吴元济庙质曰安有逆丑而庙食于民者毁之为更立狄仁杰李愬像而祀之蔡人至今号双庙以本曹郎中召为开封府推官时兄雍为三司判官质不欲兄弟并居省府恳辞得知寿州徙庐州盗杀其徒并贖而遁捕得之质论盗死大理以法不当死质曰盗杀其徒自首者原之所以携贰其党且许之自新此法意也今杀人取贖而捕获贷之岂法意乎疏上不报降监舒州灵仙观采古今炼形摄生之术撰宝元总录百卷逾年韩琦知审刑院请盗杀其徒非自首者勿原著为令于是郑戩叶清臣皆言质非罪且称其材起知泰州迁度支郎中徙荆湖北路转运使

尝摄江陵府事或诉民约婚后期民言贫无费故违约
质问其费几何出私钱子之吏捕盗人衣者盗叩头曰平生不为过迫饥寒而至此质命
取衣衣之遣去加史馆修撰同判吏部流内铨擢天章
阁待制出知陕州卒质家世富贵兄弟习为骄侈而质克己好善自奉简素如寒士不喜
畜财至不能自给初旦为中书舍人家贫与昆弟贷人
息钱违期以所乘马偿之质阅书得故券召子弟示之曰此吾家素风尔曹当毋忘也范
仲淹贬饶州治朋党方急质独载酒往饯或以诮质质
曰范公贤者得为之党幸矣世以此益贤之

△杨昭俭

杨昭俭字仲宝京兆长安人昭俭少敏俊后唐长兴中登进士第解褐成德军节度
推官拜左拾遗直史馆与中书舍人张昭远等同修明
宗实录书成迁殿中侍御史晋天福初改礼部员外郎晋祖命宰相冯道为契丹册礼使
以昭俭为介授职方员外郎旋加虞部郎中以本官知
制诰不逾月三拜命时人荣之拜中书舍人又为翰林学士时骄将张彦泽镇泾原暴杀
从事张式朝廷不加罪昭俭与刑部郎中李涛谏议大
夫郑受益抗疏论列请寘之法疏奏不报会有诏令朝臣转对或有封事亦许以不时条
奏昭俭复上疏愿回睿断诛彦泽以谢军吏由是权臣
忌之会请告洛阳不赴晋祖丧为有司所纠停官未几起为河南少尹改秘书少监寻复
中书舍人时河决数郡大发丁夫以本部帅董其役既
而塞之晋少主喜诏立碑记其事昭俭表谏曰陛下刻石纪功不若降哀痛之诏摛翰颂
美不若颁罪己之文言甚切至少主嗟赏之卒罢其事
周世宗爱其才复召入翰林为学士改御史中丞多振举台献故事未几以鞫狱之失出
为武胜军节度行军司马太祖开宝二年入为太子詹
事六年以工部尚书致仕太宗即位就加礼部尚书太平兴国二年卒年七十六昭俭事
晋有直声然利口喜讥訾执政大臣惧其构谤多曲徇
其意

△鱼崇谅

鱼崇谅字仲益其先楚州山阳人后徙于陕崇谅初名崇远后避汉祖讳改之幼能
属文弱冠相州刺史辟为从事又为秦王从荣记室从
荣诛坐除籍流庆州后唐清泰三年起为陕州司马仕晋历殿中侍御史凤翔李俨表为
观察支使奉方物入贡宰相荐为屯田员外郎知制诰
开运末契丹入汴契丹相张砺荐为翰林学士契丹主北归留崇谅京师汉祖复令知制
诰俄拜翰林学士就加中书舍人隐帝时以母老求就
养除保义军节度副使领台州刺史会举师讨三叛节度使白文珂在军前崇谅知后事

凡供军储备调发皆促期而办近镇赖之崇谅亲属尽在凤翔城中踰年城破李谷为转运使庇护崇谅家数十口皆无恙崇谅请告自岐迎居于陕未几王仁裕罢内职朝议请召崇谅为学士周祖践阼书诏繁委皆崇谅为之广顺初加工部侍郎充职会兖州慕容彦超加封邑彦超已怀反侧遣崇谅充使赐官告仍慰抚之时多进策人命崇谅就枢密院引试考定升降崇谅以母老思乡里求解官归养诏给长告俄拜礼部侍郎复为学士诏令侍母归阙崇谅再乞终养优诏不允世宗征高平崇谅尚未至陶谷乘间言曰鱼崇谅逗遛不来有顾望意世宗颇疑之崇谅又表陈母病诏许归陕州就养讫太祖朝不起太宗即位诏授金紫光禄大夫尚书兵部侍郎致仕岁余卒

△张澹

张澹字成文其先南阳人徙家河南澹幼好学有才藻晋开运初登仕士第宰相桑维翰器之妻以女解褐校书郎直昭文馆历左拾遗礼部员外郎并充史馆修撰出为洛阳令秩满授吏部员外郎复充史馆修撰周恭帝初拜右司员外郎知制诰太祖建隆二年加祠部郎中会秘书郎张去华上书自荐有文艺愿与澹及祠部员外郎知制诰卢多逊殿中侍御史师颂并试覆定优劣太祖令并武于讲武殿澹所对不应策问责授左司员外郎通判泰州兼海陵盐监副使蜀平通判梓州复拜祠部郎中开宝初就转仓部郎中四年以本官知制诰会内署学士太祖令澹权直学士院【按长编据实录载开宝六年夏四月壬寅命知制诰张澹权祇应翰林院事】七年间点检三司事卒年五十六太祖闻其无子甚愍之命中使护葬于洛阳澹历官厘务所至皆治初与词臣抗艺黜居郎署颇怏怏晚年附会卢多逊方再获进用淳化中太宗论及文士曰澹典书命而试以策非其所长此盖陶谷高锡党张去华以沮澹尔若使谷辈出其不意而遽试之岂有不失律者耶

△高锡

高锡字天福河中虞乡人家世业儒幼颖悟能属文汉干佑中举进士王晏镇徐州辟掌书记留守西洛又辟河南府推官坐按狱失实夺官迁至涇州会赦得归周显德初宰相请选将拒刘崇世宗锐意亲征破崇高平诛败将樊爱能等由是政无大小悉亲决之不复责成有司锡徒步诣招谏匭上书请择贤任官分治众职疏奏不报世宗尝令翰林学士及两省官分撰俳优词付教坊肄习以奉游宴锡复上疏谏后为蔡州防御推官太祖即位弃官归京师诣匭上疏请禁兵器不报建隆五年又以书干宰相范质质奏用为著作佐郎迁监察御史拜左拾遗知制

诰加屯田员外郎太宗尹京石熙载在幕中锡弟铢应进士举千熙载望首荐铢辞艺浅薄熙载不许锡深衔之数于帝前言熙载裨赞无状帝以语太宗且曰当为汝泽人代之太宗曰熙载勤于乃职闻高锡尝求荐其弟熙载拒之虑为锡所构帝大悟虽怒之未有以发会使青州私受节帅郭崇谂遗又尝致书澧州刺史为僧求紫衣为人所告贬莱州司马遇赦改均州别驾移陈州太平兴国八年卒

钦定续通志卷三百十

●钦定续通志卷三百十一 列传一十一

列传

宋 【十五】

○宋十五

颜衍	剧可久	赵逢	苏晓	高防	冯瓚
边翊	王明	许仲宣	杨克让		
段思恭	侯陟	李符	魏丕	董枢	

颜衍

剧可久

赵逢

苏晓

高防

冯瓚

边翊

王明

许仲宣

杨克让

段思恭

侯陟

李符

魏丕

董枢

△颜衍

颜衍字祖德兖州曲阜人自言兖国公四十五世孙少苦学治左氏春秋梁龙德中擢第解褐授北海主簿以治行闻再调临济令临济多淫祠有针姑庙者里人奉之尤笃衍至即焚其庙后唐天成中为邹平令晋祖入洛累迁河阳三城节度副使检校左庶子知州事居半岁得家

问父在青州有风痹疾衍不奏弃官去侍疾不复有仕宦意岁余父疾不能起衍亲自掬矢未尝少倦晋祖闻之召为工部郎中枢密直学士连使促召至阙辞曰臣无他才术未知何人误有闻达望放臣还遂其私养晋祖曰朕自知卿非他人荐也俄废枢密院以本官奉朝请踰年上表请还侍养授青州行营司马丁父忧哀毁甚久召为驾部郎中盐铁判官以母老恳辞有诏止守本官未几复出为天平军节度副使开运末授左谏议大夫权判河南府召拜御史中丞丧乱之后朝纲不振衍执宪颇有风采言御史有风宪之体自今藩镇幕僚勿得任台官虽亲王宰相出镇亦不可奏充宾佐非奉制勘事勿得出京自余不令厘杂务诏惟辟召人幕如故余从其请复抗表求侍养改户部侍郎衍又坚乞罢免诏书褒许即与其母东归汉干佑末丁忧服除诏郢州高行周津遣赴阙衍辞以足疾不至周祖起为尚书右丞充端明殿学士征兖州驻城下遣衍往曲阜祠文宣王庙城平以衍权知州事归朝权知开封时王峻持权衍与陈观俱为峻所引用会峻败观左迁衍罢职守兵部侍郎显德初上表求解官授工部尚书致仕还乡里台阁搢绅祖饯都门外冠盖相望时人荣之太祖建隆三年卒于家年七十四衍守章句无文藻然谅直孝悌为时所推

△剧可久

剧可久字尚贤涿州范阳人沈毅方正明律令与冯道赵凤为友后唐同光初凤荐于朝补徐州司法以干职闻召为大理评事踰年迁大理正坐误治狱责授登州司户遇赦召为著作郎仕晋历官大理卿周广顺初改太仆卿复为大理卿会郑州民李思美妻诣御史台诉夫私鬻盐罪不至死判官杨瑛寘以大辟有司摄治瑛瑛具伏可久断瑛失入减三等徒二年半宰相王峻欲杀瑛召可久谓之曰死者不能复生瑛枉杀人其可恕耶可久执议益坚瑛得免死由是忤峻改太仆卿分司西京显德三年所举官犯赃可久坐停任明年复起为右庶子时奉制旨删定律令与侍御史知杂事张湜等于都省集议删定五年书成目曰刑统宰相请颁天下与律疏令式并行可久复拜大理卿太祖建隆三年告老改光禄卿致仕【按长编据会要载建隆三年八月朔敕大理卿范阳剧可久为光禄卿致仕可久年逾七十无请老意帝特命之】卒年七十七可久在廷尉四十年用法平允以仁恕称

△赵逢

赵逢字常夫妫州怀戎人性刚直有吏干父崇事刘守光为牙校后唐天佑中庄宗遣周德威平幽州因诛崇逢尚幼德威录为部曲令与

诸子同就学及德威战没逢乃游学河朔间久之西游客凤翔李从曦门下从曦卒侯益领节制逢又依之汉干佑中益入为开封尹表逢为巡官逢求举进士是岁登甲科解褐授秘书郎直史馆仕周累官皆兼史职太祖即位拜中书舍人征泽潞逢从行次河内闻李筠拥兵为变又虑太行艰险乃妄言坠马伤足留于怀州驾还京有密旨除拜逢当草制又称疾不入太祖谓宰相曰此人得非规避行役者耶对曰诚如圣言遂贬房州司户会恩量移汝州司马干德初名授都官郎中知制诰充史馆修撰判馆事二年改判昭文馆未几充枢密直学士加左谏议大夫蜀平出知阆州时部内盗贼攻州城逢防御有功代还迁给事中充职六年权知贡举太祖征太原以逢为随军转运使铸印赐之会发诸道丁壮数十万筑堤壅汾水灌晋阳城逢白太祖乞效用即命督其版筑时方盛暑逢于烈日中亲课力役因遘疾舆归京师开宝八年卒逢扬历清近所至有声然伤惨酷又言多诋讦搢绅目之为铁槩大中祥符三年特诏录其子枢为三班借职

△苏晓

苏晓字表东京兆武功人后唐长兴初辟邓州从事汉祖镇太原表为观察支使周广顺初为大理正以谏狱有功迁少卿显德中厯屯田郎中太祖即位诏与窦仪等同详定刑统及编敕建隆四年权大理少卿事迁度支郎中干德三年出为淮南转运使建议榷薪黄舒庐寿五州茶置十四场规其利岁入百余万缗开宝三年迁司勋郎中改西川转运使仍掌京城市征先是朝廷遣供备库使李守信市木秦陇闻守信盗官钱巨万既受代部所发守信至中牟自到太祖命晓案之逮捕甚众右拾遗通判秦州马适妻李即守信信息女守信尝用木为筏以遗适晓得守信所送书以进太祖将舍之晓固请寘于法仍籍其家余所连及者多致破产尽得所隐没官钱擢拜晓右谏议大夫判大理寺迁左谏议大夫七年监在京商税九年卒年七十三晓深文少恩当时号为酷吏及卒无子有一女甚钟爱亦先晓卒人以为深刻所致

△高防

高防字修己并州寿阳人性沈厚守礼法累世将家父从庆戍天井关与梁军战死防年十六护柩以归事母孝初张从恩为北京副留守奏摄太原府仓曹掾从恩移澶州转运使表为判官有亲校段洪进盗官木造器市取其直从恩将杀之洪进惧给曰判官使为之从恩诘防既引伏洪进得免从恩遗防钱十千马一匹遣之防拜受而去终不自明既而悔之命骑追防还居岁余帅韩令坤驰骑召防吴军复至广陵防与

令坤败之诏书嘉奖改左散骑常侍复厯知蔡宋二州再从世宗南征判行泗州城降命防知州事复知蔡州迁户部侍郎世宗谋取蜀以防为西南面水陆转运制置使屡发刍粮赴凤州为征讨之备太祖即位征李筠防又为潞州东北路计度转运使泽潞平拜尚书左丞建隆二年出知秦州州与夏人杂处罔知教养防齐之以刑旧俗稍革州西北夕阳镇连山谷多大木夏人利之防议建采造务辟地数百里筑堡要地自渭而北夏人有之自渭而南秦州有之募卒三百岁获木万章夏部桑布沁等率诸族千余人涉渭夺木筏杀役兵防出与战俘四十七人以献太祖虑扰边郡诏谕酋帅赐所获之俘锦袍银带以遣之遂罢采木之役命吴廷祚为节度以代防归朝为枢密直学士尚书左丞干德元年权知凤翔府未几卒【按长编载干德元年夏五月辛酉命枢密直学士尚书左丞高防权知凤翔府又于本年载冬十二月庚子尚书左丞高防卒于凤翔宋史本传不载其为尚书左丞又书出知凤翔于干德元年前今据长编改】年五十九太祖甚悼惜赐其子太府寺丞延绪诏曰尔父有干蛊之才怀匪躬之节朕所毗倚遽兹沦亡闻之薑伤不能自己矧素尚清白谅无余资殓殮所须特宜优恤今遣供奉官陈彦珣部署归葬西洛凡所费用并从官给

△冯瓚

冯瓚字礼臣齐州厯城人性便佞任数务巧进父知兆后唐司农卿瓚以荫补秘书省校书郎迁太子右赞善大夫汉初改监察御史仕周至祠部郎中充集贤院直学士太祖即位转兵部郎中瓚有吏材太祖甚宠之擢拜左谏议大夫出知舒州境内有菰蒲鱼鳖之饶居民采以自给防御使司超尽征之瓚奏夺民利请蠲除从之徙知庐州以本官充枢密直学士时剑外初平卒有亡命者散匿为盗命瓚知梓州无何蜀军校上官进率亡命二千余人掠民数万夜攻州城瓚曰贼乘夜奄至此乌合之众以槌挺相击必无固志正可持重以镇之旦自溃矣城中止有云骑兵三百令分守城门瓚坐城楼密令促更筹未夜分击五鼓贼悉遁去因纵兵追之擒上官进斩于市诱其余党千余人并释其罪境内获安初太祖欲任用瓚常与赵普言瓚有奇才普忌之乃遣诣蜀平寇潜令所亲信从其行密察其过即亡入京师击登闻鼓讼瓚受赇为奸事急召归阙亲问之词理屡屈乃属吏既而普遣人至潼关阅其囊装得金带珍玩之物皆封题将以赂刘焜焜方在太宗幕府瓚具伏普言法当死太祖欲贷之普固执不可乃削籍流登州沙门岛瓚在海上凡十年不得召开宝末遇赦放还太宗即位授左赞善大夫太平兴国元年与礼部

员外郎贾黄中左补阙程能分掌左藏三库先是货泉与金帛通至是以帑藏充溢乃命分之判大理寺改度支判官迁秘书少监充职太宗亲征太原以瓚为随驾三司判官凯旋改大理卿兼判秘书省以足疾求解除给事中致仕复旧勋五年卒年六十七子克忠至内殿崇班合门祗候

△边翊

边翊字待价华州郑人晋天福六年举进士解褐秘书省校书郎直弘文馆汉干佑初为右拾遗加朝散大夫周广顺元年迁右补阙显德中累授职方员外郎知通州翊课鬻盐于狼山岁增万余石太祖即位诣卫州视秋稼及掌京仓建隆二年兄玘自河南令入为吏部员外郎复以翊为洛阳令兄弟迭尹赤邑时人荣之干德初召为仓部郎中蜀平知三泉县开宝初迁职方郎中监京兆曲务又掌永安军榷货奏徙务扬州有富民诉广陵尉谢图杀其父本部收尉囚之官吏推劾累三百日狱未具州以状闻诏翊案鞫尽得其实乃富民以私憾诬告尉即反坐之就命权知州事仍兼榷货务罢郡又兼掌酒税盐矾务丁母忧起复知州事会征江表兼领淮南转运使金陵平知江北诸州转运事太宗即位迁吏部郎中充广南转运使初至桂州守张颂卒颂潍州人藁葬城外旧制不许以族行仆人乃分匿其家财翊召官吏悉追取之部送其柩归潍州又属郡守与护军有忿隙者但奏令易地不致之于罪太平兴国五年拜右谏议大夫领吏部选事七年移知开封府明年卒年六十三翊强干有吏材帝方欲倚用闻其卒甚嗟惜之翊一子早卒以其从子俊为尉氏主簿兄玘至金部郎中弟玠右赞善大夫从子仿至殿中丞倚为比部员外郎

△王明

王明字如晦大名成安人晋天福中举进士不第骁骑将药元福为原州刺史辟为从事冯晖节制灵武表为观察巡官周广顺初元福领陈州防御使奏署判官刘崇起兵晋州命元福将兵援之事多咨于明先是州县吏部送丁壮饷粮一夕夫尽遁去元福怒尽驱官吏出军门将就戮明驰往止之入白元福曰今军储无阙丁夫数万人文吏懦不能制斩之何益宽以待之凯旋公无专杀之名不亦善乎元福感悟尽免其死既而崇众宵遁即命元福为建雄军节度留镇因奏署明为书记显德初元福移镇陕恃功骄恣明直道见疏求归省元福数召明明谢绝之诣阙上书求任州县历清平郾城二县令太祖即位荆南高继冲入覲授彭门节钺以明为武宁军节度掌书记干德初召公卿近臣各举清白

有吏干者一人给事中马士元以明塞诏为左拾遗蜀平选知荣州代归迁右补阙会用兵岭南选为荆湖转运使开宝三年大举南征明为随军转运使山路险绝舟车不通但以丁壮数万人转递供亿不阙每下一郡一城必先保其簿书守其仓库既而贺州未下明与主帅计曰当急取之恐援兵至则我师胜负未可知诸将颇犹豫明乃擐甲胄率所部护送輜重卒百人拥丁夫数千畚鍤皆作堙其堑直抵城门城中惧开门纳款遂据有之因抵广州贼众十余万拒战是夕大风发屋折木众乃惊惧明与都部署潘美等谋命丁夫数千人持二炬闲道先捣贼垒大军蓐食阵以待之俄万炬皆发焚其栅贼惊果来犯大军因迎击之贼大败刘鋹以城降广州平为本道转运使太祖嘉其功擢授秘书少监领韶州刺史充转运使俄以潘美尹崇珂为岭南转运使明为副使明徧历部内视民疾苦旧无名科敛悉条奏除之岭表遂安七年代归帝召见劳问赐衣带鞍马是岁将用师南唐以明为黄州刺史帝密授成算明既视事即完葺城垒训练士卒众莫解其意俄王师自荆渚乘战舰而下即以明为池州至岳州江路巡检战棹都部署击鄂州军于江南斩首三百级又破万余人于武昌杀江南军七百人拔樊山砦破江州军又破江南军于江中获船十余艘又击败湖口军万余众夺战舰五百艘时南唐将朱令赟自上江领众十五万运大舰沿流而下将焚采石浮梁抵金陵为援明率所部舟师屯独树口遣其子驰奏请添造战舰三百艘以袭令赟帝曰非应急策也令赟朝夕至金陵之围解矣乃密遣人谕明令树长木于洲浦间若帆樯之状令赟望见之果疑大军袭其后逗挠不敢进明移檄诸军相为犄角因督兵棹袭之至小孤山与诸军合势大破之擒令赟金陵平诏明安抚诸郡因命知洪州太宗即位兼领江南诸路转运使召为右谏议大夫充三司副使太平兴国七年与侯陟同判三司事八年诏分三司各命使领之改左谏议大夫为盐铁使迁给事中雍熙四年改光州刺史出知并州端拱元年代还表求正秩改礼部侍郎契丹来侵诏以明知真定府故遂遁去淳化初归阙知京朝官差遣事二年卒年七十三子挺扶并进士及第挺至殿中侍御史扶尝直集贤院至工部员外郎景德中录幼子揆为光禄寺主簿大中祥符八年又录其孙师颜为三班借职揆至殿中丞

△许仲宣

许仲宣字希粲青州人汉干佑中登进士第时年十八周显德初解褐授济阴主簿考功员外郎张乂荐为淄州团练判官太祖即位赴调引对便殿仲宣气貌雄伟太祖悦之擢授太子中允受诏知北海军仲宣度其山川形势

地里广袤可为州郡因画图上之遂升为潍州初议建
牧马监令仲宣行视诸州颇得善地从征并门掌给纳四十余州资粮悉能集事帝益知
其强干开宝四年知荆南转运事及征江南又兼南面
随军转运事兵数十万供馈无阙南唐平以漕挽功拜刑部郎中九年诏知永兴军府事
太宗嗣位迁兵部郎中驿召赴阙授西川转运使属西
南夷寇钞边境仲宣亲至大度河谕以逆顺示以威福夷人率服会言事者云江表用兵
时仲宣干没官钱召还令御史台尽索财计簿钩校凡
数年而毕无有欺隐改广南转运使会征交州其地炎瘴士卒死者十二三大将孙全兴
等失律仲宣因奏罢其兵不得报即以兵分屯诸州开
库赏赐草檄书以谕交州交州即送款内附遣使修贡仲宣复上章待罪希嘉之太平兴
国六年迁吏部郎中八年与膳部郎中知杂滕中正兵
部郎中刘保勋刑部郎中辛仲甫皆以久次郎署擢升谏垣仲宣为右谏议大夫召还以
本官权度支雍熙四年出知广州未上移知江陵府改
河南府端拱中迁给事中淳化元年卒年六十一仲宣性宽恕倜傥不检有心计初为济
阴主簿时令与簿分掌县印令畿嬖妾与其室争宠令
弗能禁嬖欲陷其主窃取其印藏之封识如故以授仲宣翼日署事发匣则无其印因逮
捕县吏数辈及令簿家人下狱鞫问果得之于令舍灶
突中令闻之仓皇失措仲宣处之晏然人服其量尝从征江南都部署曹彬令取陶器数
万给士卒为灯具仲宣已预料置奉之如其数其才干
类此子待用至国子博士待问再举及第至殿中丞待旦至比部员外郎待用子巨源亦
登进士第

△杨克让

杨克让字庆孙同州冯翊人晋末举进士不第州将刘继勋辟为户曹掾汉干佑中
本府节度张彦成表授掌书记周广顺初彦成移镇安
阳穰下克让以旧职从行彦成入为执金吾病笃奏称其材可用克让以彦成死未葬不
忍就禄退居别墅俟张氏子外除时论称之历镇宁军
掌书记显德二年调授凤翔府司录参军加兼监察御史以祖母老辞官归养未几改延
州观察推官与通判宋琪并为节度使赵赞所礼累加
朝散大夫兼殿中侍御史连以家难去职太祖素知其名会赞入觐复称其才即起为左
补阙掌薪口榷货务干德六年知果州上言愿毕襄事
特赐缗钱许葬毕赴任开宝三年就命为西川转运副使蜀民怀其善政玺书褒美代归
疏民利病十事称旨太祖召升殿赐坐劳问将大用为
侯陟所阻事见陟传征南唐命克让知升州行府升州平就知州事兼水陆计度转运使
事加兵部员外郎太平兴国初就加刑部郎中知大名

府会钱俶陈洪进来归疆土以克让为两浙西南路转运使泉州民啸聚为盗克让在福州即率其屯兵至泉州与王文宝共讨平之 【按宋史本传云与王明王文宝共讨平之考长编太平兴国三年未载陈洪进纳土帝即命其子文显知泉州议择能臣关掌州事殿中丞南顿乔惟岳方居父丧诏起惟岳为通判惟岳始至会仙游蒲田百丈草寇乘虚啸聚十余万来攻城城中兵才三千势甚危急监军何承矩王文宝欲尽屠其城燔府库而遁惟岳抗议以为朝廷任以绥远之寄今惠泽未遍盗贼连结反欲屠城焚库岂诏意哉承矩等因复坚守时两浙西南路转运使杨克让在福州遂率屯兵往救之围既解监军军器库副使王继升率精兵二百骑夜出追击悉擒其魁首械送阙下草寇悉平云云并未有王明共讨平之事即王明传亦不载讨平泉寇今将王明二字删】 四年徙知广州俄兼转运市舶使明年卒年六十九克让少好学手写经籍盈篋历官廉干所至有声每视事自旦至暮或通夕断决如流时称能吏子希闵生而失明令诸弟读经史历耳辄不忘属文善箴尺赵普守西洛府中笺疏皆希闵所为将奏署本府掾固辞不受卒年三十九自教三子日华日严日休皆登进士第希闵弟希甫淳化三年进士从子日宣亦登进士第

△段思恭

段思恭泽州晋城人父希尧仕晋累陟清显思恭以门荫历官华商等州观察支使刘继勋节制同州辟掌书记继勋入朝会契丹入汴军士譁噪请立思恭为州帅思恭谕以祸福乃止汉祖建国授左补阙隐帝时蝗徧祈山川思恭上言狱讼平允则灾害不生望令诸州速决重刑无致淹滥必召和气从之历度支驾部周显德中定滨州田赋世宗嘉之拜左司员外郎太祖建隆二年除开封令迁金部郎中干德初平蜀通判眉州时亡命集众攻逼州城刺史赵廷进惧不能敌将奔嘉州思恭止之因率屯兵与贼战彭山人无鬪志思恭募军士先登者厚赏于是诸军贾勇大败贼思恭矫诏以上供钱帛给之后度支请按其罪太祖怜其果干不许令知州事俄召为考功郎中知泗州会冯继业自灵州举宗来朝帝以思恭代知州事仍语之曰冯继业言灵州非卫霍名将镇抚之不可汝其往哉思恭曰臣奉诏而往必能治之帝壮之思恭下车矫继业之失绥抚戎人访求民病悉奏免之俄而回鹘入贡路出灵州交易于市思恭遣吏市礪砂吏争直与之竞思恭释吏不问械其使数日始贯之使还愬其主复遣使賫牒诣灵州问故思恭理屈不报自是数年回鹘不复入贡久之迁右谏议大夫知扬州朝廷方经畧江表命思恭兼沿

江巡检每出巡委州事于通判以牌印自随驿书自京师来者令赍至其所事多稽滞因与通判李岩相告讦诏以属吏思恭辞不直责授太常少卿改知宿州太宗即位迁将作监知秦州坐擅借官库银造器又假贡奉名贱市獾毛虎皮为马饰为通判王廷范所发降授少府少监知邢州太平兴国六年迁少府监雍熙元年再为右谏议大夫二年知寿州端拱初迁给事中寻知陕州淳化三年卒年七十三思恭以门资历显官不知书无学术然践更吏事所至亦着勤绩子惟一三司度支判官从子惟几第进士仕至兵部员外郎

△侯陟

侯陟淄州长山人汉末举明经周广顺初试校书郎太平兴国初帝次镇州以功迁左谏议大夫权御史中丞事【按长编云权中丞始此】三司使王仁贍左降以陟与王明同判三司八年卒赠工部尚书陟有吏干性狡狴好进善事权贵巧中伤人陟素忌杨克让侦知太祖欲大用之因奏事帝问识杨克让否陟曰臣与克让甚善知其人诚佳士也近闻其自言上许以大用多市白金作饮器以自奉臣颇怪之帝怒亟令克让出典郡其险诋如此

△李符

李符字德昌大名内黄人汉干佑中郭从义奏为京兆府户曹掾杨恪荐为大理正太祖干德中知归州转运司制置归朝以京西诸州钱帛不登选知京西南面转运事奏便宜百余条凡四十八事命着为令因奏对称旨迁起居郎荆湖转运许仲宣随军讨南唐诏符赴荆湖调发刍粮符领船数千艘顺流而下符又建议凿横江河以通漕运发和州三县丁壮给其役太祖欲幸西京有事于南郊符上书陈八难曰京邑凋敝一也宫阙不备二也郊庙未修三也百司不具四也畿内民困五也军食不充六也壁垒未设七也千乘万骑盛暑扈行八也不从改比部员外郎判刑部太平兴国初迁驾部转祠部郎中知广州兼转运使五年召为右谏议大夫判吏部铨兼大理寺寻代范旻为三司副使坐与官属竞课最罢职守本官七年开封尹秦王廷美出守西京以符知开封府廷美事发太宗令归第省过赵普令符上言廷美在西洛非便恐有他变宜迁远郡以绝人望遂有房陵之贬普恐泄言坐符用刑不当贬盩国军行军司马卢多逊之贬崖州也符白普曰珠崖远在海中水土颇善春州稍近瘴气甚毒至者必死愿徙多逊处之普不答先是太宗尹京符因宋琪荐弭德超事藩邸符贬德超为枢密副使屡称其冤会德超以事贬帝恶其朋党徙符岭表普移符知春州至郡岁余卒年五十九符无文学者吏干好希

人主意以求进用终以此败至道二年郊祀追复右谏

议大夫祥符五年录其子璜试将作监主簿

△魏丕

魏丕字齐物相州人颇涉学问周世宗镇澶渊辟司法参军有盗五人狱具丕疑其冤缓之不数日果获真盗世宗嘉其明慎厯顿邱冠氏元城三县令世宗即位改右班殿直出监明灵砦军征淮甸丕获江南谍者四人部送行在诏奖之迁供奉官供备库副使太祖即位改作坊副使一日语丕曰作坊久积弊尔为我修整之丕在职尽力以久次转正使开宝九年领代州刺史凡典工作十余年太祖平诸路皆先期令修刼器械无不精办雍熙四年代郝正为户部使端拱初迁度支使出为黄州刺史还朝召对便坐赐御书急就章朱邸集丕退作歌以献因自述愿授台省之职太宗面谕曰知卿本儒生然清望官奉给不若刺史之优也淳化初改汝州刺史厯知凤州改襄州境内久旱丕以诚祷之一夕雨沾足召还表求致仕授左武卫大将军仍领汝州刺史俄判金吾街仗初六街巡警皆用禁卒至是诏左右街各募卒千人优以廩给使传呼备盗丕以新募卒引对遂分四营营设五都一如禁兵之制改领郢州刺史俄改领复州迁左骁卫大将军咸平二年卒年八十一丕好歌诗颇与士大夫游接有时称南唐主李煜妻卒遣丕充吊祭使且使观其意趣煜邀丕登升元阁赋诗丕有朝宗海浪拱星辰之句以风动之太宗尝赐诗令丕与柴禹锡和焉

△董枢

董枢真定元氏人后唐太清中以献书授校书郎累厯宾佐晋天福中为左拾遗知枢密院表奏周广顺初为左补阙世宗即位诏常参官各奏封事枢上平吴策淮南平迁浚仪令恭帝即位迁殿中侍御史太祖干德初迁主客员外郎上书请伐蜀蜀平通判剑州会全师雄叛攻剑刺史张仁谦足疾不能战欲弃城走枢战败之因招余众降仁谦饮枢令醉密杀降数百诬奏枢与贼通会中使自成都还备言其事太祖并召之廷辩曲直仁谦屈下御史台鞫之黜宋州教练使以枢尝贡西伐讨迁比部郎中三年出兼桂阳监使上书请伐广南诏益桂阳戍卒三千令枢统之开宝二年又上方畧会刘鋹命内侍曾居实侵桂阳枢击退之三年大举伐鋹令枢率兵趋连口克之改兵部郎中权知连州兼行营招抚使四年移知襄州又为河北转运使改判西京留司御史台以前桂阳监任隐没羨银坐死

钦定续通志卷三百十一

●钦定续通志卷三百十二 列传一百十二

列传

宋 【十六】

○宋十六

马令琮

杜汉徽

张廷翰

蔡审廷

周广

石曦

张藏英

解晖

王晋卿

郭廷谓

【延浚】

赵延进

辅超

马令琮

杜汉徽

张廷翰

蔡审廷

周广

石曦

张藏英

解晖

王晋卿

郭廷谓

赵延进

辅超

△马令琮

马令琮本名令威避周祖名改之大名人父全节五代史有传全节历节度皆署令琮为牙校累授彰德牙内都指挥使检校尚书左仆射领勤州刺史令琮少善骑射尝从其父平安州及与镇州安重荣战皆有功由是知名晋开运二年全节卒令琮起复拜隰州刺史仕汉为西京巡检使仕周累领建州刺史太祖即位出刺怀州会将亲征李筠召三司张美饷兵食美言河内密迳上党令琮日夜储蓄以俟王师太祖善之命授团练使执政言令琮方供亿大军不可移他郡故升怀州为团练以令琮充使又充先锋都指挥使泽潞平为昭义兵马钤辖踰年被疾诏许归郡干德元年卒年三十九太祖甚怜之录其子延恩为殿直

△杜汉徽

杜汉徽京兆长安人父阿孙为太原威胜军使汉徽有膂力善骑射年十七仕后唐累迁护圣军使晋天福六年与慕容邨等讨安州李金全生禽指挥使孙厚以功迁兴顺指挥使八年从征镇州安重荣改护圣指挥使赠阿孙为左赞善大夫开运二年以所部戍深州破契丹于乐

寿杀获甚众汉初从高行周讨杜重威于邺屡为流矢所中身被重创犹力战观者壮之又率所部戍镇州破契丹于灵寿周世宗征刘崇汉徽有战功补龙捷左第五军都虞候移所部屯安平县破契丹于县南迁本军左第四军都虞候太祖即位补本军都校领茂州刺史改领潮州从平李筠又从平李重进录功居多建隆三年出为天长军使移雄武军使知屯田事是冬被病即以符印授通判宋鸾请告归京家人劝其求医药汉徽笑曰我在戎行四十年大小百余战不死幸矣安用药为未几卒

△张廷翰

张廷翰冀州信都人父慎图仕周为兵部郎中廷翰少慷慨有智略善骑射晋天福中冀州刺史张建武召补牙校其后刺史李冲署为本州牢城军校契丹入中原署其党何行通为刺史契丹主道殂州人共杀行通推廷翰知州事汉初就拜刺史廷翰尽捕杀行通者戮于市为政宽厚简易民甚爱之周广顺初召赴阙周祖见其貌魁伟谓枢密使王峻曰冀州近边虽更择人亦无踰廷翰者即日迁还在郡八年契丹将高牟翰【辽史作高模翰】数扰边皆为廷翰击走显德中历棣海沂三州团练使屡率兵败淮人移莱州太祖即位又历冀亳三州干德二年卒年四十七【按宋史此下有吴虔裕传无事迹足录今删】

△蔡审廷

蔡审廷磁州武安人少能骑射晋初应募补护圣散都头周显德初擢为殿前散员转铁骑副兵马使从世宗战高平有功迁军使太祖从世宗征淮南审廷隶麾下预战紫金山改副指挥使太祖即位授殿前散都头指挥使从征李筠攻泽州先登为飞石伤足建隆中领富州刺史兼内外马步军副都军头干德初授冀州刺史征太原时为北面步军都指挥使屯兵易州审廷训练士卒甚整太祖过镇阳见于行在所赐名马宝剑命为镇州兵马都钤辖开宝八年卒年六十九

△周广

周广字大均其先应州神武川人父密事晋历鄜延晋三镇节度使周广顺初至太子太师致仕广幼从其父为牙校汉初授供奉官未几擢左千牛卫将军周祖讨慕容彦超以广为行营都监后世宗征淮南既得江北数州即命广劳来安集民甚德之因领常州刺史兼内外马步军都军头淮南平改眉州刺史太祖即位授隰州刺史干德三年迁潘州团练使令训练雄武诸营开宝二年从征太原为攻城楼橹战棹都部署师还加内外马步军副都军头六年改右屯卫大将军领郡如故太平兴国二年卒【按宋史此下有张勋传无事迹足录今删】

△石曦

石曦并州太原人晋祖弟韩王敬晖之子【按五代史晋家人传韩王敬晖字德昭宋讳敬故止称韩王晖今增】天福中以曦为右神武将军历汉至周为右武卫左神武二将军恭帝立初为左卫将军会高丽王昭加恩命曦副左骁卫大将军戴交使建隆三年再使高丽迁左骁卫大将军护秦州屯兵西人犯边曦率所领击破之斩其渠帅太祖征晋曦领兵二千人自泽潞除道至太原壅汾水灌其城又益兵千人部攻辽州俄知雄州代为潭州钤辖开宝八年领兵败南唐军二千余于袁州平梅山板仓诸洞蛮寇太平兴国中历右神武右羽林大将军连知孟襄二州迁领诚州刺史雍熙四年改知霸州兼部署会陈廷山谋以平戍军叛入北边曦察知之与侯延济定计禽廷山以献录其功加领本州团练使同知镇州淳化二年移原州迁右龙武军大将军被病请告四年卒年七十四

△张藏英

张藏英涿州范阳人自言唐相嘉贞之后唐末举族为贼孙居道所害藏英年十七仅以身免后逢居道于豳州市引佩刀刺之不死为吏所执节帅赵德钧壮之释而不问以补牙职藏英后闻居道避地关南乃求为关南都巡检使至则微服携铁槌匿居道舍侧伺其出击之遂禽归设父母位陈酒肴縛居道于前号泣鞭之齧其肉经三日剖其心以祭诣官首服官为上请而释之燕蓟闲目为报讎张孝子契丹用为卢台

【按宋地理志通鉴俱作芦台军五代史周祖本纪作卢台与宋史本传同】军使兼擢盐制置使周广顺三年率内外亲属并所部兵千余人及煮盐户长幼七千余口牛马万计舟数百艘航海归周至沧州刺史李暉以闻周祖颇疑之令馆于封禅寺数月世宗即位授德州刺史未几召归对便殿询以备边之策藏英请于深州李宴口置砦及诱境上亡命者以隶军愿为主将得便宜讨击世宗悉从之以为缘边招收都指挥使藏英遂筑城李宴口累月募得劲兵数千人会遣凤翔节度王彦超巡边为契丹所围藏英率新募兵驰击之转战十余里契丹解去改濮州刺史仍领边任契丹将高牟翰以精骑数千扰边藏英逆击于胡卢河北【按高牟翰即辽之高模翰胡卢河宋史王彦超传亦载此事作胡芦河考高模翰援汉却周辽史在穆宗应历元年二月之闲穆宗应历元年即周祖广顺元年故宋史张廷翰传所载高牟翰扰边事亦在周广顺初此处乃在世宗即位后与辽史并张廷翰传俱不合】自旦至晡杀伤甚众值暮收兵契丹遁去后因领兵巡乐寿契丹幽州骁将姚内斌侦知藏英兵少以精骑二千阵于县之北藏英率麾下击之自辰至申士皆殊死战内

斌遂解去世宗降玺书褒美征瓦桥关为先锋都指挥使败契丹骑数百于关北下固安县改关南排阵使太祖即位迁瀛州团练使并护关南军建隆三年卒于治所年六十九孙鉴自有传【按宋史此下有陆万友传无事足录今删】

△解晖

解晖洺州临洺人父珪应募为州兵后唐天成中西征至剑门没于阵晖少有勇力以父死戎事得隶兵籍戍鴈门与契丹接战斩首七级获酋长一人以功迁奉国军队长晋天福中安重荣反镇州因举兵向关至宋城晋师逆战大破之晖募军中壮士百余人夜捣贼垒杀获甚众晖频中流矢而督战自若颜色不挠迁本军列校仕周累迁虎捷第一军都虞候太祖即位从征泽州力战目中流矢师还策勋为内外马步军副都军头建隆四年充湖广道行营前军战棹都指挥使潭州平玺书奖谕伪统军黄从志据岳州晖率舟师讨平之生禽从志改控鹤右第二军都指挥使领高州刺史干德六年诏领所部军屯上党从李继勋略太原开宝九年破太原军于境上改均州刺史太平兴国二年【按宋史地理志作三年】诏于潞州北乱柳石围中筑城名威胜军以晖为军使从征并州与尚食使后彦赞率所部先下隆州禽招讨使李询等以献于行在所复令与彦赞督战士隶城西行营分攻太原刘继元降太宗以太原宫女三人赐晖俄迁本州岛团练使知霸州雍熙初充云应襄朔忻代等州都巡检使三年代归本郡淳化二年被病上章告老改右千牛卫上将军致仕诏未至而卒年八十晖鸷猛木强每受诏征伐常身先之人所惮者晖视之若甚易由是频立战功金创徧体时称骁将子守颺至内殿崇班阁门祗候【按宋史此下有李韬传无事实足录今删】

△王晋卿

王晋卿河朔人少勇敢为乡里所推周世宗在澶渊晋卿以武艺求见得隶帐下及即位补东头供奉官从战高平征淮甸每遣宣传密旨甚亲信之泊北征为先锋都监督战有功诏权控鹤都虞候克关南授军器库使显德四年为龙捷右第一军都指挥使领彭州刺史恭帝立出为滨州刺史太祖干德中为兴州刺史移汉州时蜀初平寇盗充斥晋卿严武备设方略禽捕翦灭靡有遗漏自是虽剧贼无敢窥其境然以贿闻太祖惜其才而不问秩满归阙求养疾改左监门卫将军奉朝请未几诏戍北边疆场清肃开宝四年复授莫州刺史在郡谨斥侯善抚循士卒皆乐为用边民安堵六年卒年六十七

△郭廷谓

郭廷谓字信臣徐州彭城人父全义仕南唐为濠州观察使廷谓幼好学工书善骑射补殿前承旨改濠州中军使李景每令侦中朝机事入奏全义卒擢庄宅使濠州监军周世宗攻淮右南人屡败城中甚恐廷谓与州将黄仁谦为固御之计周师遣谍以铁券及其垒廷谓拒之城

中负贩之辈率不逞廷谓虑其亡逸籍置大寺遣兵守之给日食俾制防城具随其所习以故周师卒不得觐城中虚实周师为浮梁涡口命张从恩焦继勋守之廷谓语仁谦曰此濠寿之患也彼以骑士胜故利于陆我以舟师锐故便于水今夏久雨淮流泛滥愿假舟兵二千断其桥直抵寿春仁谦初沮其议不得已从之即轻棹衔枚抵其桥麾兵断笮悉焚之周师大衄焚其资粮而还授武殿使周师退保定远又募壮士为负贩状入定远侦军多寡及守将之名还曰武行德周务勅也廷谓曰是可图也又籍乡兵万余泊卒五千日夕训练依山衔枚设伏破之周师大溃行德单骑脱走时有以玉帛子女饷廷谓者悉拒之唯取良马二百匹以献以功为滁州刺史上淮巡检应推兵马都监及紫金山之战南唐诸将多归降者独廷谓以全军还守濠州追不能及时濠守欲弃城走廷谓止之俄加本州岛团练使缮戈甲治沟垒常若敌至是秋周师复至表于景请援且言周兵四临乞卑辞请和以固邻好夜出敢死士千余袭周营焚头车洞屋周师蹂躪死者甚众既而援兵不至周师急击廷谓集诸军垒门之外南望大恸而降于周至山阳见世宗特加宴赐拜亳州防御使以其弟本州岛马步都校廷赞为和州刺史命攻天长军降其将马赞又为楼橹战棹左右厢都监俄归淮南太祖即位从征上党再知亳州干德二年代还改絳州防御使两川平冯瓚知梓州为仆夫所讼召廷谓为静江军节度观察留后以代之州承旧政有庄宅户车脚户皆隶州将鹰鹞户日献雉兔田猎户岁入皮革又有乡将都将镇将辈互扰闾里廷谓悉除之开宝五年卒年五十四廷谓性恭谨事母以孝闻未尝不束带立侍子延浚廷谓兄廷谕仕南唐为太子洗马致仕归朝至秘书监廷谕子延泽

郭延浚

郭延浚

延浚字利川太祖录为供奉官屡使西北宣谕机事太平兴国初领八作司雍熙三年改崇仪使淳化四年李顺乱改西京作坊使充成都十州都巡检使时成都将陷延浚单骑入城与郭载议募亡卒退保剑门贼数千来蹶其后击破之王继恩至以延浚为先锋壕砦使即领兵倍

道先进贼出探骑数十悉禽之尽得贼机事延浚易旗变号贼不之觉斩关掩入继恩又请延浚知汉州州经兵燹廨舍桥梁城砦悉毁延浚募军民葺之又率州帑以应军须录功改洛苑使真宗初会河朔用兵延浚驰往边城按视砦垒咸平二年卒子有伦为供奉官合门祇候 【按宋史此下有延泽传无事迹足录今删】

△赵延进

赵延进澶州顿邱人父暉周太子太师延进颇亲学尝与军中少年入民家竞取财贿延进独持书数十编以归同辈哂之汉末暉领凤翔节度未赴镇王景崇据城反命暉为都招讨使击之延进年十八屡当军锋景崇平延进奉捷奏以入授凤翔牙内指挥使领贵州刺史暉徙宋州亦从为牙职改领荣州刺史睢阳有盗数百各立酋帅为民患延进以父命领牙兵悉禽戮之诏书褒美丁外艰表求持服既终丧周世宗征淮南延进献万缣以助军仍请对世宗召见之时延进有从兄为虎捷都虞候帐前横冲指挥使世宗指延进语之曰尔弟拳勇有谋将授以禁军大校延进自陈好读书不愿也翼曰授右千牛卫将军濠州兵马钤辖从征瓦桥关为随驾金吾街仗使太祖即位迁右羽林军将军濠州都监会伐蜀以襄州当川路津要命为钤辖同知州务蜀平专领郡事汉江水岁坏堤害民田常兴工修护延进累石为岸遂绝其患入为两浙漳泉国信使开宝二年授右龙武将军知灵州以母老愿留得权判右金吾街仗使厯知河中府梓相青三州太平兴国中大军平并州讨幽蓟皆为攻城八作壕砦使尝诏督造炮具八百期以半月延进八日成太宗亲试之大悦又令主城北请洞子及班师命与孟元喆药可琼留屯定州契丹来侵命延进与崔翰李继隆将兵八万御之赐阵图分为八阵俾以从事师次满城【按宋史本传作蒲城考宋地志蒲城属陕南永兴军路之华州迴与辽境绝不相连惟满城旧属易州其地后归契丹延进等留屯定州正与易州相近蒲城应是满城之讹今改】辽骑至延进乘高望之东西亘野不见其际翰等方按国布阵阵去各百步士众疑惧略无鬪志延进谓翰等曰主上委吾等以边事盖期于克敌耳今敌众若此而我师星布其势悬绝彼若持我将何以济不如合而击之可以决胜违令而获利不犹愈于辱国乎翰等曰万一不捷则若之何延进曰倘有丧败则延进独当其责于是改为二阵前后相副士众皆喜三战大破之获人马牛羊铠甲数十万以功迁右监门卫大将军知镇州及代吏民数千守阙借留诏许留一年俄改右领军卫大将军累迁右骁骑大将军改知邓州淳化初飞蝗不入境诏褒之还判右金吾街仗事至

道二年拜右金吾卫大将军咸平二年卒年七十二赠右武卫上将军延进姿状秀整涉猎经史好作诗什士流以此多之延进妻即淑德皇后之妹故在显德兴国中颇任以腹心子昂太平兴国二年登进士第至户部郎中直昭文馆

△辅超

辅超忻州秀容人家世业农超少勇悍有力晋开运中应募隶澶州军籍汉干佑中赵思绾据永兴叛周祖护诸将讨之督兵攻城超率骁勇十七人升云梯斫北门楼坏而入士卒继进城遂陷以功补小校显德中从太祖征淮南常执锐前驱定滁泗破淮阴下扬州以功转日骑副兵马使太祖即位从平上党再迁内直都知太宗即位以超为马军都军头会亲征太原冒矢石攀堞先登身被十三创帝嘉其勇赐锦袍银带帛五十段诘朝再乘城中流矢者八复加厚赐大举袭范阳分兵三路超隶偏将米信为田重进先锋取飞狐蔚州迁马步军副都军头俄出补曹州马步军都指挥使领峰州刺史改深州召归转都军头淳化三年出为德州刺史坐诬奏使者殴杀驿吏责授右监门卫将军领诚州刺史五年复加都军头领澄州刺史真宗即位加领奖州团练使真拜莱州团练使以年老愿留京师从之景德二年卒年七十七

钦定续通志卷三百十二

●钦定续通志卷三百十三 列传一百十三

列传

宋 【十七】

○宋十七

杨业【延昭 文广 王贵】荆罕儒【嗣】 曹光实【克明】 张晖

司超

杨业

荆罕儒

曹光实

张晖

司超

△杨业

杨业并州太原人父信为汉麟州刺史业幼倜傥任侠善骑射畋猎尝曰我他日为将用兵亦犹用鹰犬逐雉兔尔事刘崇以骁勇闻累迁至建雄军节度使屡立战功所向克捷人号为无敌太宗征太原素开其名尝购求之既而孤垒甚危业劝其主继元降以保生聚 【按九国

志载刘继业为继元扞太原城东南颇杀伤王师及继元降继业犹据城苦战帝素知其勇欲生致之令中使谕继元俾招继业继元遣所亲信往继业乃北面再拜大恸释甲来见帝喜慰抚之甚厚后姓杨氏止名业李焘据之以载长编又注云据国史杨业传乃云孤垒甚危业劝其主出降以保生聚与九国志大不同按五代史垂涕劝继元出降者但马峰一人寔非杨业也若业劝降则当与继元同出见何用别遣中使召乎长编所载如此考东都事略宋通鉴诸书载业事俱与九国志同】继元既降帝遣中使召见业大喜以为右领军卫大将军师还授郑州刺史防御使【按宋史本传作刺史据东都事略长编两书改】帝以业老于边事复迁代州兼三校驻泊兵马都部署会契丹入鴈门业领麾下数千骑自西京而出由小陁至鴈门北口南向背击之契丹大败以功迁云州观察使仍判郑州代州自是契丹望见业旌旗即引去边将多忌之有潜上谤书斥言其短者帝不问封其奏以付业雍熙三年大兵北征以忠武军节度使潘美为云应路行营都部署命业副之以西上合门使蔚州刺史王侁军器库使顺州团练使刘文裕护其军连拔云应寰朔四州师次桑干河会曹彬败于岐沟诏美护四州之民内徙既而契丹复陷寰州业谓美等曰今辽兵益盛不可与战朝廷止令取数州之民但领兵出大石路先遣人密告云朔州守将俟大军离代州日令云州之众先出我师次应州契丹必来拒即令朔州民出城直入石碣谷遣强弩千人列于谷口以骑士援于中路则三州之众保万全矣侁沮其议曰领数万精兵而畏懦如此但趋鴈门北川中鼓行而往文裕亦赞成之业曰不可此必败之势也侁曰君侯素号无敌今见逗挠不战得非有他志乎业曰业非避死特虑杀伤士卒而功不立今君责业以不死当为诸公先即自石朱路趋朔州将行泣谓美曰此行必不利业太原降将天子不杀而授以兵柄非纵敌不击盖欲立尺寸功以报国恩尔诸君既责业以避敌业当先死于敌因指陈家谷口曰诸君于此张步兵强弩为左右翼以援业转战至此无遗类矣美即与侁领兵阵于谷口自寅至巳侁使人登托逻台望之以为契丹败走欲争其功即领兵离谷口美不能制行二十里闻业败即麾兵却走业力战自午至暮果至谷口望见无人拊膺大恸再率帐下士力战身被数十创士卒殆尽业犹手刃数百人马重伤不能进遂为契丹所擒其子延玉亦没焉业太息曰帝遇我厚期捍边克敌以报反为奸臣所迫致王师败衄尚何面目求活耶乃不食三日死帝闻之痛惜甚下诏旌之曰故云州观察使杨业诚坚金石气激风云挺陇上之雄才本山西之茂族自委戎乘式资战功方提貔

虎之师以効边陲之用而羣帅败约援兵不前独以孤军陷于沙漠劲果森厉有死不回
求之古人何以加此可赠太尉大同军节度赐其家布
帛千匹粟千石大将军潘美削三官王侁除名降隶金州刘文裕除名隶登州业忠烈武
勇有智谋练习攻战与士卒同甘苦代北苦寒人多服
毡罽业但挟纆露坐治军事傍不设火为政简易御下有恩士卒乐为之用阵之将陷也
麾下犹百余人业谓曰汝等各有父母妻子与我俱死
无益可走还报天子众皆感泣不去淄州刺史王贵杀数十人矢尽遂死余亦死无一生
还者闻者皆流涕业既没朝廷录其子供奉官延朗为
崇仪副使次子延玉殿直延浦延训并为供奉官延环延贵延彬并为殿直

杨延昭

杨文广

王贵

杨延昭

延昭本名延朗后改焉为儿时多戏为军阵业尝曰此儿类我每征行必以从太平
兴国中补供奉官业攻应朔延昭为其军先锋战朔州
城下流矢贯臂鬪益急业之死太宗悯之擢延昭以崇仪副使出知景州累迁保州缘边
都巡检使就加如京城咸平二年契丹扰边延昭时在
遂城城小无备契丹攻之甚急众心危惧延昭悉集城中丁壮登陴护守会大寒汲水灌
城外旦悉为冰坚滑不可近契丹遂溃去获其铠仗甚
众以功拜莫州刺史时真宗驻大名傅潜握重兵顿中山延昭与杨嗣石普屡请益兵以
战潜不许及潜抵罪召延昭赴行在屡访边要帝甚悦
指示诸王曰延昭父业为前朝名将延昭治兵护塞有父风深可嘉也厚赐遣还是冬契
丹南侵延昭伏锐兵于羊山西自北掩击且战且退及
伏发契丹众大败获其将函首以献进本州岛围练使与保州杨嗣并命帝谓宰相曰嗣
及延昭并出疏外以忠勇自效朝中忌嫉者众朕力为保
庇以及于此五年契丹侵保州延昭与嗣提兵援之未成列为契丹所袭军士多丧失命
李继宣王汀代还将治其罪帝曰嗣辈素以勇闻将收
其后效即宥之六年契丹复侵望都继宣坐逗遛削秩复用延昭为都巡检使时讲防秋
之策诏嗣及延昭条上利害又徙窳边军部署景德元
年诏益延昭兵满万人如契丹骑入寇则屯静安军之东令莫州部署石普屯马村西以
护屯田断黑卢口万年桥敌骑奔冲之路仍会诸路兵
犄角追袭令魏能张凝田敏奇兵牵制之时王超为都部署听不隶属延昭上言契丹顿
澶渊去北境千里人马俱乏虽众易败凡有剽掠率在
马上愿饬诸军扼其要路众可歼焉即幽易数州可袭而取奏入不报仍率兵抵辽境破

古城俘馘甚众及请和真宗选边州守臣御笔录以示
宰相命延昭知保州兼缘边都巡检使二年追叙守御功进本州岛防御使俄徙高阳关
副都部署 【按东都事略云官至英州防御使】 在屯
所九年延昭不达吏事军中牒诉尝遣小校周正治之颇为正所罔因缘为奸帝知之斥
正还营而戒延昭焉 【按东都事略云诉牒皆决于
小校真宗知而不责也第戒饬小校而已语与宋史异】 大中祥符七年卒年五十七延
昭智勇善战沉默寡言平居未尝问及家事所得奉赐
悉犒军奉已简易号令严明与士卒同甘苦遇敌必身先行阵克捷推功于下故人乐为
用在边防二十余年契丹惮之目为杨六郎及卒帝嗟
悼之遣中使护榱以归河朔之人多望柩而泣录其三子官其常从门客亦试艺甄叙之
子文广

杨文广

文广字仲容以讨贼张海有功授殿直范仲淹宣抚陕西与语奇之置麾下从狄青
南征知德顺军为广西钤辖知宜邕二州累迁左藏库
使带御器械治平中议宿卫将英宗曰文广名将后且有功乃擢龙神卫四厢都指挥使
迁秦凤副都总管韩琦使筑笋策城文广声言城喷珠
率众急趣笋策比暮至其所部分已定迟明敌骑大至知不可犯而去文广遣将袭之斩
获甚众或问其故文广曰先人有夺人之气此必争之
地彼若知而据之则未可图也知涇州镇戎军为定州路副都总管迁步军都虞候辽人
争代州地界文广献阵图并取幽燕策未报而卒赠同
州观察使

王贵

王贵者并州太原人周广顺初补卫士太祖即位累迁至散员都指挥使马步军都
军头领胜州刺史太平兴国二年出为淄州刺史受诏
从潘美北征攻沁州颇立战功又从杨业为辽兵所围亲射杀数十人矢尽张空拳又击
杀数人遂遇害年七十三擢其子文晟供奉官文昱殿
直

△荆罕儒

荆罕儒冀州信都人少为盗晋天福中诣范阳事赵延寿得掌亲兵开运末延寿从
契丹主入汴署罕儒密州刺史汉初故山南东道行军
司马周广顺初为率府率奉朝请贫不能振显德中世宗战高平戮不用命者因求骁勇
士通事舍人李延杰以罕儒闻即召赴行在命为招收
都指挥使会征太原命罕儒率步卒三千先入敌境罕儒趋太原城焚其东门擢为控鹤
弩手大剑直都指挥使从平淮南领光州刺史改泰州

为下蔡守御都指挥使累擢至团练使太祖建隆初升郑州防御使改晋州兵马钤辖罕儒恃勇轻敌尝率骑深入晋境人多闭壁不出虏获甚众复领千骑抵汾州城下焚其草市案兵以退一夕次京土原刘钧遣大将郝贵超领万余众袭罕儒黎明及之罕儒遣都监毡毯副使閻彦进分兵以御贵超罕儒方锦袍里甲据迹享士闻彦进小却即上马径犯贼锋并人攒戈春之罕儒犹手杀十数人遂遇害刘钧素畏罕儒之勇常欲生致之及闻其死求杀罕儒者戮之太祖痛惜不已擢其子守勋为西京武德副使因索京土原之不效命者黜慈州团练使王继勋为率府率閻彦进为殿直斩其部下龙捷指挥使石进德等二十九人罕儒轻财好施礼接儒士负勇善战不顾胜负常欲削平太原志未果而及于败人皆惜之罕儒兄延福延福孙嗣

荆嗣

荆嗣

嗣干德初应募为控鹤卒从李继勋讨河东继勋择悍勇百人闲道截洛阳砦嗣请行手斩五十级进薄汾河河东将杨业扼桥路嗣与众转战杀业所部兵千计射中业从骑业退保城进焚南门夺羊马城矢集于面敌夜薄砦继勋选勇敢五百人接战而嗣为冠及旦多所斩馘从太祖征太原率先陷阵召见补御龙直太平兴国初三迁至天武军校太宗再征太原嗣登城手刃数人足贯双箭中手炮折二齿太宗赐以锦袍银带从崔翰征幽州补龙猛副指挥使五年契丹侵雄州据龙湾堤嗣隶袁继忠遇敌屡击之皆获胜八年李继迁寇边又从袁继忠田钦祚戍三义口为前锋斩贼千余追之获牛羊铠甲弓矢数千计进至万并口狐路谷余贼复来请战初以雄武千人为后殿为贼所掩继忠命嗣援之凡数战始与雄武合队因列阵格鬪复夺人马七百余钦祚夜还依山为营贼亦砦其下募劲卒五十往袭之嗣为其帅抵贼所刺杀百余人焚其砦而还雍熙三年从田重进谭廷美率师入辽境疾战飞狐口辽师不利重进引全师合击辽骑引去进至飞狐城北辽将大鹏翼率众复至重进阵压东偏数战不胜命嗣出西偏麾兵薄山崖以短兵接战辽兵败投崖而下手斩百余级散卒千余在野嗣呵止之悉断弦折箏来降追至河槽复击退余众屯土岭裨将黄明与战不胜将退嗣谓之曰汝且屯兵于此为我声援我当战此岭遂力战追奔五十余里抵仓头而还又领招收卒千人克仓头小治二砦黄明与战克直谷砦命嗣屯焉数日辽人复致师重进与战奔突往来大军颇扰重进召嗣合战悉走之夺炮具铠胄贼乘夜复围直谷石门二砦重进遣嗣以精兵五百济之嗣曰敌二万余今

援师甚寡难以解围重进颇忧之嗣曰谭师屯小治绾兵二千愿闲道以往邀其策应中夜匹马诣廷美廷美曰敌势若此何可解也嗣曰请移全军就平川植旗立队别择三二百人张白旗于道侧彼见旗帜绵亘远甚谓大军继至嗣自以所部五百疾驱往鬪必克其砦廷美许焉一日凡五七战辽兵遂引去咸如嗣所料蔚州之降也重进先命嗣率勇士数十人缒入见守将得其实状翌日将受降而敌反拒大军所出之路遂与鬪杀伤甚众屡缒入城取守将之归服者重进之垒粮运颇乏嗣遣降卒鞏州廩济之辽援兵大至副都指挥使江谦妄言惑众嗣即斩之悉收兵敛辎重还重进砦与辽人转战时军校五人其四悉鬪死至大岭嗣与战败走之师还太宗引见便殿重进言其有劳补本军都虞候又从李继隆御敌于北平砦将赴蒲城道遇敌疾战俘获甚众又战于鸾女祠继隆遣步卒二千伏定州古城为敌所攻命嗣援之至唐河桥嗣扼桥路出战解敌围数重与伏兵合分为三队背水为阵敌将于越率骑百余队临烽台求战嗣整兵与战数合得与继隆会又阵于东偏大败之继隆以闻诏嘉奖之迁本军都指挥使领澄州刺史至道二年加御前忠佐马步军头屯定州辽人入侵隶范廷召提偏师捍辽兵于嘉山廷召徙高阳命嗣以兵二千为殿过平敌城辽众十余万来嗣屡出战及桑赞秦翰来援夜二鼓敌再至嗣曰彼不利夜战我当破其砦以趣大军即与赞翰合势戒所部望敌炬火多处并力冲之诘旦至瀛州咸平三年加领本州岛团练使出为郎山路都巡检使破敌砦于蒲阴俘获甚众四年命嗣领万人断西山路会敌遽至大兵不及进而止五年真拜蔡州团练使赵州部署踰年徙沧州是冬辽人入侵命率所部自齐州抵淄青警备景德初又命与刘汉凝田思明率兵至冀州防边俄赴澶州行在所会辽人请和复遣还任历郓州凤翔永兴部署车驾幸亳州留为旧城内同都巡检使大中祥符七年改虢州防御使邠州环庆副部署卒嗣起行闲以劳居方面经百五十余载歿兄子信贵并为左侍禁贵至内殿崇班

△曹光实

曹光实字显忠【据东都事略增】雅州百丈人父畴为蜀静南军使控扼邛崃以捍蛮夷光实少武勇有胆气轻财好施不事细行意豁如也畴卒光实嗣职迁永平军节度管内捕盗游弈使太祖干德中命王全斌等平蜀俄而盗贼羣起夷人张忠乐者尝羣行攻劫且憾光实杀其徒党率众数千中夜奄至环其居鼓噪并进光实负其母挥戈突围出贼众辟易不敢近贼杀其族三百余口又发其父墓坏其棺槨光实诣全斌具以事白誓雪冤愤时蜀中诸郡未下乃图雅州地形要害兼陈用兵攻取之策

请官军先下之全斌乃署光实为义军都指挥使残寇
犹据沈黎光实以所部尽平之遂以光实知黎雅二州兼都巡检使安集劳来蛮族怀之
六年全斌遣人贡京师遂言境内安义乞罢义军归农
太祖喜曰此蜀中杰俊也诏升殿劳问久之以为黎州刺史开宝三年改唐州刺史及平
交广羣盗未息以光实为岭南诸州都巡检使既至捕
逐羣盗海隅以盗太平兴国二年就迁本州岛团练使车驾征河东以光实知威胜军事
令调军食光实入告愿提一旅奋锐先登帝曰资粮事重
亦足宣力也河东平命为汾辽石沁等州都巡检使改汝州团练使大军北征与潘美分
道出鴈门光实为前锋遇敌击败之李继捧之入朝也
以光实为银夏绥麟府丰宥州都巡检使继捧弟继迁逃入蕃落为边患光实乘闲掩袭
至地斤泽俘斩甚众破其族帐获继迁母妻及牛羊万
计继迁仅免使人给光实期某曰降于葭芦川光实信之且欲专其功不与人谋及期继
迁先设伏兵光实遂遇害卒年五十五以其子大理评
事克护为右赞善大夫克恭为殿直淳化二年又录克己为奉职后至殿内承制克广至
合门祇候从子克明

曹克明

曹克明

克明字尧卿既生会敌攻百丈县父光远遇害姆抱克明匿苇蒲中得免既长喜兵
法善骑射从父光实奇之补为衙内都虞候光实击敌
于葭芦川战歿克明时护輜重在后闻光实死惧军乱秘不发丧令人传光实令还军银
州而潜与仆张贵入敌中获光实尸还葬京师繇是显
名初蜀人留京师者禁不得还乡里克明以母老闲道归李顺反闻克明将家子且有名
欲胁以官克明携母遁山谷夜止神祠中梦有人叱之
起既觉而去贼果至及贼陷雅州克明募众数万人以迎王师遂复名山火并夹门 【东
都事略作夹江】 等九县分兵嘉眉邛三州立七砦
以邀贼复收雅州蜀平擢西头供奉官黎州兵马监押以余寇未息权邛州驻泊巡检峡
路溃卒邓绍等复起攻雅州克明又平之入朝改内殿
崇班为温台等七州都巡检使景德中蛮寇邕州改供备库副使知邕州召左右江蛮洞
三十六酋长谕以恩信是岁悉来赴承天节克明慰拊
出衣服遗之感泣而去独如洪峒恃险不至克明谕两江防遏使黄众盈引兵攻之斩其
首领陆木前梟于市宜州澄海军校陈进反时郁江暴
涨州城摧圯克明伐木为连舫维之水土状如郭郭又多张旗帜浮巨楫陈兵其上为守
御备募溪峒兵三千而黄众盈亦济兵千五百将趣象
州会巡抚使曹利用约克明会兵行次贵州遇贼大败之贼平利用专其功代还真宗问

南方事对称旨赐一子官迁供备库使江淮两浙都大
提举捉贼使克明使人捕贼辄出私钱资之以故人人尽力视贼中趋勇者释缚使还捕
其党前后获千余人知江甯府张咏以其事闻赐钱四
十万领平州刺史知辰州抚水蛮叛徙宜融桂昭柳象邕钦廉白十州都巡检使兼安抚
使既至蛮酋献药一器曰药箭中人以是解之可不死
克明曰何以验之曰请试以鸡犬克明曰当试以人乃取药箭刺酋股而饮以药即死羣
蛮惭惧而去是年冬安抚都监王文庆马玉出天河砦
东克明与中人杨守珍出环州樟岭西磴道危绝林木深阻蛮多伏弩以待玉所向力战
屡败蛮军是时朝廷意在招附数诏谕克明而克明亦
惮深入屡移文止玉玉至如门团为蛮所扼不得进克明迁延顾望月余乃至抚水州与
知州蒙承贵等约盟而还未几知桂州兼管勾溪峒公
事始置溪峒司又奏闽广南两路士军为忠敢军州人覆茅为屋岁多火克明教以陶瓦
又激江水入城以防火灾代还知滁州徙鼎州会交趾
李公蕴寇邕州以文思使复知邕州既至遣人入交趾谕以利害公蕴拜表谢罪迁西上
合门使历知登舒邵三州复徙鼎州卒

△张暉

张暉幽州大城人后唐清泰初隶控鹤军累迁奉国弩手都头晋开军末与武行德
夺契丹甲船于河阴行德领河阳以暉为弩手指挥使
复令引兵趋怀州契丹将遁去因领州军汉祖入汴暉迎于荥阳授怀州刺史干佑初郢
州刺史慕容业治多不法以暉为缘汉都巡检使领唐
州屯军至郢州即代业还京改郢州刺史周广顺初刘崇起兵晋阳召暉为步军左厢排
阵使师还改沂州刺史从世宗征淮甸充壕砦都指挥
使俄为西南面桥道使太祖即位从征泽潞为行营壕砦使先登陷阵事平迁华州团练
使在郡颇有治状建隆二年太原未下诏入覲问计暉
对曰泽潞疮痍未复军旅一兴恐人力重困不若戢兵息民俟富庶而后为谋朝廷方议
伐蜀迁凤州团练使兼缘边巡检壕砦桥道使暉尽得
山川险易因密疏陈之太祖大悦干德二年大军西下乃以暉充西川行营先锋都指挥
使督兵开大散关路躬抚士卒且役且战人忘其劳至
青泥岭卒天禧五年暉妻年百五岁家贫诣阙自陈诏赐束帛录其孙永德为三班借职

△司超

司超大名元城人初事邢帅安叔干汉祖在太原超隶帐下为小校汉祖将渡河遣
超先领劲骑由晋绛趋河阳及入汴以超为郢州必敌
指挥使时京东诸州寇盗充斥以超为宋宿亳三州游弈巡检使改宿州西固镇守御都
指挥使移屯颍州下蔡镇屡与淮人战有功周世宗命

宰相李谷讨淮南以超为步军先锋副都指挥使又为庐寿光黄等州巡检使大败淮人三千余众于盛唐县获棹船四十余艘禽其监军高弼果毅指挥使许万以献时黄州未下即命超遥领黄州刺史兼楼櫓战棹右厢都校师还改光州刺史败吴军千余于麻城北显德四年与王审琦攻舒州败吴军三千先禽刺史施仁望献于行在即以超为舒州团练使太祖即位命副宋偓领舟师巡抚江徼诏升舒州为防御以超充使从太祖讨李重进以为前军步军都指挥使及平遣归治所建隆三年迁蔡州防御使干德六年改絳州防御使徙晋州兵马钤辖是秋又副赵赞为邠州行营都部署进攻河东及太祖亲征为行营前军步军都指挥使改郑州防御使开宝七年朝廷将讨江左以超久在淮右习知江山险易徙蕲州防御使行至淮西卒年七十一天禧元年录其孙文睿为三班奉职

钦定续通志卷三百十三

●钦定续通志卷三百十四

列传

宋 【十八】

○宋十八

何继筠【承矩】 李汉超【守恩】 郭进 李谦溥【允则允正】 姚内斌 董遵诲 贺惟忠 马仁瑀

何继筠

李汉超

郭进

李谦溥

姚内斌

董遵诲

贺惟忠

马仁瑀

△何继筠

何继筠字化龙河南人父福进历事后唐至周累官忠武成德天平三节度继筠幼时与羣儿戏必分行伍为战阵之象晋初补殿直周祖讨三叛表继筠从行贼平改供奉官广顺初福进镇真定署衙内都校尝领偏师出土门与并人战以功领钦州刺史契丹将高模翰率二千骑扰深冀以苇筏度胡卢河继筠与虎捷都指挥使刘诚诲率兵拒之至武强获老稚千余人模翰遁去俄随福进入朝为内殿直都知福进卒起复为濮州刺史领兵戍静安军契丹内侵继筠逆击败之改棣州刺史世宗征瓦桥关命

继筠以所部兵出百井道破并人数千众太祖建隆二年升棣州为团练以继筠充使三年命为关南兵马都监干德四年加本州岛防御使开宝元年命昭义节度李继勋等征太原以继筠为先锋部署至涡河与并人遇击走之夺汾河桥败其众于城下获马五百匹擒其将张环石赧【按东都事略长编俱作石斌】以献二年春太祖亲征晋阳契丹来援继筠时屯兵阳曲县驿召至行在所授以方略命将精骑数千赴石岭关拒契丹谓之曰翌日亭午俟卿来奏捷也至期帝御北台以俟见一骑自北来亟遣逆问之乃继筠子承睿来献捷生擒刺史二人【按长编作擒其武州刺史王彦符】俘获甚众初并人恃契丹为声援及捷奏太祖命以所获首级铠甲示城下并人丧气继筠以功拜建武军节度判棣州三年来朝诏赐鞍马戎仗令戍边四年来朝疽发背车驾幸其第赐赆甚厚未几卒年五十一帝谓侍臣曰继筠捍边有功朕不早授方镇者虑其数奇耳今纔领节制果至沦没可惜也赠侍中令以生平所佩剑及介冑同葬继筠深沉有智略前后备边二十与士卒同甘苦得其死力善揣边情边人畏伏多画像祠之子承矩【按宋史此上有李进卿传及进卿子延渥附传并杨美传俱无事迹足录今从删】

何承矩

何承矩

承矩字正则幼为棣州衙内指挥使从继筠讨刘崇擒其将胡澄以献开宝四年授闲厩副使太平兴国三年漳泉陈洪进纳土诏承矩乘传监泉州兵会仙游莆田百丈寇贼啸聚承矩与乔惟岳王文宝讨平之以功就迁闲厩使疏为政之害民者数十事上之悉被容纳会改使名即为崇义使五年知河南府时调丁男百十辈转送上供纲承矩以为横役奏罢其事徙知潭州凡六年圉圉屡空诏嘉奖之入为六宅使端拱元年领潘州【按东都事略隆平集俱作淄州】刺史命护河阳屯兵米信知沧州以其不习吏事命承矩知节度副使实专郡治时契丹挠边承矩请于顺安砦西开易河蒲口导水东注于海东西三百余里南北五七十里资其陂泽筑堤贮水为屯田可以遏敌骑之奔轶俟期岁间关南诸泊悉壅阨即播为稻田为御边之要策太宗嘉纳之属霖雨为灾典者多议其非便承矩引援汉魏至唐屯田故事以折众论务在必行乃以承矩为制置河北缘边屯田使俾董其役事具食货略由是自顺安以东濒海广袤数百里悉为稻田而有莞蒲蜃蛤之饶民赖其利淳化四年擢为西上合门使知沧州踰年徙雄州承矩推诚御众同其甘苦边民有告机事者屏左右与之款接无所猜忌故契丹动息皆能前知至

道元年契丹精骑数千夜袭城下伐鼓纵火以逼楼堞承矩整兵出拒迟明列阵酣战久之斩馘甚众擒其酋所谓铁林相公者契丹遁去是年府州尝败契丹众承矩条杀获以谕州民或揭于市契丹愧忿故有是役太宗意其轻率致寇复命与沧州安守忠两换其任魏廷式使河北得雄州功状朝廷遣使核实将士始获推赏真宗嗣位复遣知雄州咸平二年契丹南侵屡遣内侍以密诏问御遏之计密封以献尝诏听边民越拒马河交市承矩上言自淘河至泥姑海口屈曲九百余里此天险也太宗置砦十六铺百二十五廷臣十一人戍卒三千余部舟百艘往来巡警以屏奸诈则缓急之备大为要害今听公私贸市则人马交度深非便宜且砦铺皆为虚设矣疏奏即停前诏屡被手札褒饬三年召还拜引进使州民诣阙贡马乞借留承矩诏书嘉奖复遣之承矩言昨者契丹入侵高阳一路东负海西抵顺安士庶安居即屯田之利也顺安至西山地虽数军路纔百里纵有邱陵冈阜亦多川渎泉源因而广之制为塘埭自可息边患矣又请于边郡置营召募不须品度人才止求少壮有武艺者万人俟契丹有警令智勇将统而用之又请复设缘边榷场以惠契丹纵有渝信犯盟亦不之废大臣文武中别有良谋者请委之边任使施方略责以成功又建议选锐兵于干宁军挽刀鱼船自界河直趋平州境以牵西面之势五年诏兼领制置屯田使始建榷场或者谓承矩意在继好然契丹无厌未足诚信徒使公行窥伺会契丹有杀斥候卒者复罢之时契丹数窥边城大浚渠颇挠其役诏承矩握兵深入其境以分其势承矩以无骑兵第遣数千卒出混泥城袭之而还景德元年入朝进领英州团练使出知澶州承矩自守边以来尝欲朝廷怀柔远人为息兵之计及是与契丹修好真宗益善其有谋明年复知雄州是岁契丹遣使奉币承矩上言朝廷待之以礼宜得中庶可久也真宗嘉纳仍听事有未尽者便宜裁处三年真拜雄州团练使时边兵稍息农政未修又置缘边安抚使命承矩为之且诏边民诱其复业承矩曰契丹闻之必谓诱其部属也乃易诏文为水旱流民之意王钦若时知枢密援汉虫达周仲居改诏请罪承矩帝曰承矩任边有功当优假之第诏自今朝旨未便者奏禀进止承矩颇有识鉴典长沙日李沆王旦为佐承矩厚待之以为有公辅器善推步自知冥数乃以老疾求僻郡诏自择其代承矩以李允则为请乃授承矩齐州团练使遣之任至郡裁七日卒年六十一特赠相州观察使【按东都事略作防御使】以其子龟龄为侍禁昌龄九龄为殿直遐龄为斋郎缘边泊涿易州民闻承矩卒皆相率诣雄州发哀昌龄娶齐王女太和县主至内殿崇班昌龄子象中为合门祗候

△李汉超

李汉超字显忠 【据东都事略增】 云州云中人始事邺帅范延光不为所知又事郢帅高行周亦不见亲信会周世宗镇澶渊汉超遂委质焉即位补殿前指挥使三迁殿前都虞候太祖即位改散指挥都指挥使领绵州刺史累迁控鹤左厢都校领恩州团练使从平李重进寻迁齐州防御使兼关南兵马都监汉超仕关南人有讼汉超强取其女为妾又贷而不偿者太祖召而问之曰汝女可适何人曰农家也又问汉超未至关南契丹如何曰岁苦侵暴曰今复尔耶曰否太祖曰汉超朕之贵臣也为其妾不犹愈于农妇乎使汉超不守关南尚能保汝家之所 有乎责而遣之密谕汉超曰亟还其女并所贷朕姑贵汝勿复为也不足于用何不以告朕耶汉超感泣誓以死报在郡十七年政平讼理吏民爱之诣阙求立碑颂德太祖诏率更令徐铉撰文赐之霸州监军马仁瑀尝兄事汉超多自肆擅发麾下卒入辽境剽夺人口羊马由是二将交恶太祖虑其生变遣中使赐汉超仁瑀金帛令和解之太平兴国初迁应州观察使判齐州仍为关南巡检二年八月卒于屯所太宗甚悼惜赠太尉忠武军节度汉超善抚士卒与之同甘苦死之日军中皆流涕子守恩

李守恩

李守恩

守恩少骁果善战有父风太祖亲征太原汉超为北面行营都监守恩从父军中会契丹遣兵援河东至定州西嘉山将入土门守恩领牙兵数千骑战败之太祖谓左右曰此稚子能若是他日将帅才也汉超卒擢为骁猛军校累官至陇州刺史知灵州与转运使陈纬部刍粮过瀚海为贼所邀守恩及子广文助教象之陇州衙内指挥使望之弟寄班守忠皆没真宗闻之震悼特赐守恩洪州观察使次子佑之顺之用之润之庆之成之藏之

△郭进

郭进深州博野人少贫贱为巨鹿富家佣保有膂力倜傥任气结豪侠饮酒蒲博其家少年患之欲杀进富人妇竺氏阴知其谋以告进遂走晋阳隶汉祖帐下晋开运末契丹扰边汉祖建号太原契丹主道殒汉祖入汴进请以奇兵间道先趋洺州因定河北诸郡累迁干坊二州刺史少帝即位改磁州仕周由淄州刺史移登州讨平羣盗部内清肃民吏千余人诣阙请立屏盗碑许之显德初改卫州河朔盗匿汲郡山谷间为民患进以计翦灭之郡民又请立碑记其事改洺州团练使有善政郡民复诣阙请立碑颂德特诏左拾遗郑起撰文赐之进尝于城四面植

柳壕中种荷芰蒲葭后益繁茂郡民见之有垂涕者曰此郭公所种也太祖即位亲征泽潞迁本州岛防御使充西山巡检尝与曹彬王全斌入太原境获数千人开宝二年太祖亲征河东以进为行营前军马军都指挥使九年命将征河东以进为河东道忻代等州行营马步军都监招徕山后诸州民三万七千余口太平兴国初领云州观察使判邢州仍兼西山巡检四年车驾将征太原先命进分兵控石岭关为都部署以防北边契丹果入侵进击败之攻破西龙门砦俘馘来献自是并人夺气时田钦祚护石岭军恣为不法进虽力不能禁亦屡形于言进武人性刚烈战功高钦祚以他事侵之心不能甘自经死年五十八钦祚以暴卒闻太宗悼惜久之赠安国军节度后颇闻其事因罢钦祚内职出为房州团练使进有材干轻财好施御下严毅在西山时太祖遣戍卒必谕之曰汝辈谨奉法我犹贷汝郭进杀汝矣尝有军校自西山诣阙诬进阴通太原将有异志太祖遣使送与进令杀之进释不问使御并寇曰汝有功即荐汝于朝败则勿来也其人果用命立功而还进即奏授以官太祖从之初开宝中太祖令有司造宅赐进悉用簞瓦有司言旧制非亲王公主之第不可用帝怒曰进控扼西山十余年使我无北顾之忧我视进岂灭儿女耶亟往督役无妄言太平兴国初又赐宅一区【按宋史此下有牛思进传无事迹足录今从删】

△李谦溥

李谦溥字德明并州孟人少通左氏春秋历仕晋汉为供奉官周广顺初迁供备库副使世宗征刘崇辽州刺史张乙坚壁不下遣谦溥单骑说之乙以城降以功改闲厩使师还留为晋州兵马都监以偏师屡挫太原会隰州刺史孙义卒时世宗亲征淮南谦溥谓节帅杨廷璋曰大窳咽喉要地不能阙守且车驾出征若俟报则孤城陷矣廷璋即署谦溥权隰州事至郡亟命浚城隍严兵备未旬日而并人果以数千骑来寇方盛暑谦溥单衣挥扇从二小吏登城徐步按视战具并人退舍后旬余大发冲车攻城谦溥募敢死士得百余人短兵坚甲衔枚夜缒出城会廷璋兵至合势夹攻掩其不及并人大扰悉众遁去追北数十里时显德四年也明年五月攻克孝义县以功领衢州刺史监军如故世宗北征召赴行在恭帝即位为澶州巡检使诏城莫州数旬而就改丹州刺史太祖建隆四年移慈州兼晋隰缘边都巡检行石州事以兴同砦为治所太祖命四路进兵略地太原郑州刺史孙延进絳州刺史沈继深通事舍人王睿等师出阴地以谦溥为先锋会霍邑谦溥为画攻取之策众不能用军还出白璧关次谷口又谓诸将曰王师深入敌境今既退兵彼必乘我当备之诸

将亦不答谦溥独令所部擐甲俄追骑果至延进等仓皇走谷中独谦溥麾兵拒之并人遂却复移隰州刺史开宝元年命李继勋等征太原以谦溥为汾州路都监太祖征晋阳为东砦都监前军副部署党进遣谦溥伐木西山以给军用未至闻鼓声乃并人逼西砦大将赵赞御之并众未退让溥麾所部赴之太祖遽至观战怪其赴援者非精甲问之乃谦溥也帝甚喜谦溥在州十年敌人不敢犯境有招收将刘进者勇力绝人谦溥抚之厚籍其死力往来境上屡以少击众并人患之为蜡丸书以间进佯遗书道中晋帅赵赞得之以闻太祖令械进送阙下谦溥诘其事进伏请死谦溥曰我以举家四十口保汝矣即上言进为并人所恶此乃反间也奏至帝悟遽令释之赐以禁军都校戎帐服具进感激愿击敌自效开宝三年召谦溥为济州团练使会边将失律复为晋隰缘边巡检使边民皆喜争相迎劳于道左六年领兵入太原连拔七砦八年以疾求归京师疾笃累上章辞禄不许明年卒年六十二谦溥与宣祖同里闰弟谦升与太祖为布衣交其母阎尝厚待太祖及即位数迎入宫中使左右掖之不令拜命坐饮食话及旧故赐赉优厚雍熙中太宗为许王纳谦升女为夫人以谦升为如京副使谦溥子允则允正从子允恭为内殿崇班合门祇候

李允则

李允正

李允则

允则字垂范少以才略闻历知潭沧雄镇潞州尝奏除潭州诸弊政又湖湘山田民不耕垦允则下令给诸军刍皆输粟藁由是山田遂无遗地初至沧州葺营垒多开井泉言者以为扰未几被兵近郊老幼皆入城保而水不乏真宗嘉之雄州居民惟结茅允则教以陶又合外旧瓮城与大城为一始创关城焉增广阎承翰所修屯田列堤道以通安肃广信顺安军所以设险者盖备契丹机密事动息皆知之当时边臣无及者景德以后国信往还议制及所费用皆其所裁定智识开敏处事审当其方略施設虽游观亭传莫不有所寓也官至宣州防御使卒 【据东都事略增】

李允正

允正字修己以荫补供奉官太平兴国中掌左藏库屡得升殿奏事太宗颇记忆其旧故雍熙中与张平同掌三班俄为合门祇候四年为合门通事舍人时女弟适许王以居第质于宋偃太宗诘之曰尔父守边二十余年止有此第何以质之允正具以奏即遣内侍辇钱赎还缙绅

多赋诗美之淳化中命讨戎泸州叛蛮迁西上合门副使又提点左右藏屡乘传北面经度边要五年为卫州修河部署会建清远军积石砦命诣瀚海部分其役还拜西上合门使并州驻泊钤辖俄代张永德知州事徙代州咸平初使西蜀询访民事还进秩东上合门使历知镇莫二州又为并代马步军钤辖契丹扰边车驾驻大名允正与高琼率太原军出土门路来会召见便殿所部有广锐骑士数百皆素练习命允正引入赐缗钱遣屯邢州与石保吉逐辽人辽人遁去俄以兵会大名复还并代五年合泾原仪渭邠盩环庆路为一界命黄汉忠为都部署驿召允正为钤辖兼安抚都监即日上道又命与钱若水同诣洪德怀安沿边诸砦经度边事加领诚州刺史罢两路之职复任并代钤辖每钱若水按巡边垒即诏权莅州事进四方馆使代马知节为鄜延部署兼知延州改客省使知定州兼镇定都钤辖大中祥符三年累表求还至京师将祀汾阴以疾难于扈从命为河阳部署以便养会张从贵卒赵德明颇踰轶亟诏徙允正为鄜延部署内使密诏存谕礼成领河州团练使允正颇知书性严毅疏财喜自修饬素病痾痿以是罕在要近累典边任多杀戮是秋移知永兴军卒年五十一

△姚内斌

姚内斌平州卢龙人少仕契丹为关西巡检瓦桥关使周显德六年世宗北征太祖将兵至瓦桥关内斌率众降世宗以为汝州刺史内斌本名犯宣祖讳下一字遂改今名太祖即位从平李筠改虢州刺史西夏数犯西鄙为庆州刺史兼青白两池榷盐制置使在郡十数年夏人畏伏不敢犯塞号内斌为姚大虫言其武猛也初内斌降其妻子皆在契丹干德四年子承赞密自幽州来归五年幽州民田光嗣等又以内斌儿女六人间道来归太祖并召见赐以衣服缗钱鞍马令中使护送还内斌开宝四年召赴阙帝待之甚厚遣归治所七年暴得疾卒年六十四子承赞为供奉官阁门祇候死于阵承鉴至殿中丞

△董遵海

董遵海涿州范阳人父宗本尝事契丹帅赵延寿及延寿被执举族南奔汉祖得之擢拜随州刺史署遵海随州牙校周显德初世宗北征大将高怀德遵海之舅也表遵海从行师次高平与晋人遇将接战晋兵未成列怀德命遵海先出奇兵击之晋人溃大军继进遂败之二年讨秦凤大将韩通又表遵海自随与贼战于唐仓先登陷阵擒蜀招讨使王鸾以献克秦凤二州师还录其前后功补东西班押班又迁骁武指挥使四年从征淮南下合肥又从韩通平雄霸二州太祖微时尝客游至汉东依宗本遵海

凭借父势太祖每避之遵海尝谓太祖曰每见城上紫云如盖又梦登高台遇黑蛇约长百尺余俄化龙飞腾东北去雷电随之是何祥也太祖皆不对他日论兵战事遵海理多屈拂衣而起太祖乃辞宗本去自是紫云渐散及即位一日便殿召见遵海伏地请死帝令左右扶起因谕之曰卿尚记往见紫云及化龙之梦乎遵海再拜呼万岁俄有部卒击登闻鼓诉其不法十余事太祖释不问遵海益惶愧待罪太祖召谕之曰朕方赦过赏功岂念旧恶耶汝可勿复忧吾将录用汝遵海再拜感泣时遵海母在幽州经患难睽隔太祖令人賂边民窃迎其母送与遵海遵海遣外弟刘综贡马以谢太祖解所服真珠盘龙衣命赍赐之综曰遵海人臣岂可当此太祖曰吾方委以方面不此嫌也从慕容延钊讨李筠迁马军都军头因留镇泽潞三年召归迁散员都虞候干德六年以西夏近边授通远军使遵海拊谕诸族酋长谕以朝廷成德割羊酹酒宴犒甚至众皆悦服后数月复来扰边遵海率兵深入其境击走之俘斩甚众获牛马数万夷落以定太祖嘉其功就拜罗州刺史如故太宗即位兼领灵州路巡检遵海豁达无崖岸多方略能挽强命中武艺皆绝人在通远军凡十四年安抚一面夏人悦服尝有剽略灵武进奉使鞍马兵器者遵海部署帐下欲讨之夏人惧尽归所略拜伏请罪遵海即慰抚令去自是各谨封略秋毫不敢犯历太祖太宗朝委遇始终不替许以便宜制军事太平兴国六年卒年五十六录其子嗣宗嗣荣为殿直

△贺惟忠

贺惟忠沂州定襄人少勇敢善骑射周祖将兵讨三叛惟忠谒于道左自陈有武艺周祖悦之即留置所部洎开国得隶世宗帐下奏补供奉官不辞去世宗怒之及嗣位终不迁擢初授仪鸾副使令知易州捍边有功寻迁正使开宝二年太祖驻常山以惟忠为本州岛刺史兼易定祁等州都巡检使尝中流矢金疮发而卒太祖闻之嗟悼即以其子昭度为供奉官惟忠性刚果知书洞晓兵法有方略在易州缮完亭障抚士卒得其死力每乘塞用兵所向必克威名震北边故十余年间契丹不敢南牧昭度至西京作坊使淳化中知通远军有罪当弃市减死流商州

△马仁瑀

马仁瑀大名夏津人少与羣儿戏为行阵之状自称将军日与之约鞭其后期者羣儿皆畏伏及长善射挽弓三百斤汉干佑中周祖镇邺仁瑀年十六愿隶帐下周祖素闻其勇既见甚喜留置左右广顺初补内殿直世宗亲征刘崇至高平周师不利诸将多引退仁瑀谓众曰主辱

臣死安用我辈乃控弦跃马挺身出阵射贼毙者数十人士气益振大军乘之崇遂败绩擢为弓箭控鹤直指挥使还京又迁散指挥使从征淮南至楚州攻水砦砦中建飞楼高百尺余世宗观之相去殆二百步楼上望卒厉声嫚骂世宗怒甚命左右射之远莫能及仁瑀引满应弦而颠及淮南平身被数十创迁内殿直都虞候又从平三关太祖即位以佐命功授散员都指挥使累迁领扶州团练使从平泽潞以功领常州防御使建隆二年改领岳州俄又改领汉州初诏仁瑀等领荆湖诸郡不数岁复其地至是将征蜀又诏领川峡诸郡遂平之先是辞居正知贡举仁瑀私嘱所与者榜出无其人闻喜宴日仁瑀酒酣携所嘱者诣居正功责之为御史中丞刘温叟所劾帝优容之又与后族王继勋忿争各勒所部兵欲相图太祖密知之出仁瑀为密州防御使太祖征晋阳命仁瑀率师巡边至上谷渔阳契丹素闻仁瑀名不敢出因纵兵大掠俘生口牛羊数万计驾还仁瑀归治所明年羣盗起兖州贼首周弼毛裘甚勇悍材貌奇伟监军讨捕数不利诏仁瑀掩击仁瑀率帐下十余卒入泰山擒弼尽获其党鲁郊遂寔开宝四年迁瀛州防御使兄子尝因醉误杀平民系狱当死民家自言非有宿憾但过误尔愿以过失杀伤论仁瑀曰我为长吏而兄子杀人此怙势尔非过杀也岂敢以私亲而乱国法哉遂论如律给民家布帛为棺殓具太平兴国初移知辽州四年车驾从征太原有功又从成州刺史慕容超飞龙使白重贵八作使李继升分兵攻城及征范阳败契丹于卢龙北契丹兵奔溃师还迁朔州观察使判瀛州事七年卒年五十赠河西兵节度使 【按东都事略作赠河西观察使】

钦定续通志卷三百十四

●钦定续通志卷三百十五 列传一百十五

列传

宋 【十九】

○宋十九

王赞 卢怀忠 张延通 史珪 田钦祚 侯赞

翟守素 刘福 安守忠 孔守正

谭延美 元达 常思德 尹继伦 薛超【丁罕】 李

斌 田仁朗

王赞

卢怀忠

张延通

史珪

田钦祚
侯赞
翟守素
刘福
安守忠
孔守正
谭延美
元达
常思德
尹继伦
薛超
李斌
田仁朗
△王赞

王赞澶州观城人少为小吏累迁本州岛马步军都虞候周世宗镇澶渊每旬决囚赞引律令辨析中理问之知其尝事学问即署右职及即位补东头供奉官累迁右骁卫将军三司副使时张美为使世宗问京城卫兵岁廩几何美不能对赞代奏甚悉美因是衔之及征关南言于世宗以赞为客省使领河北诸州计度使五代以来姑息藩镇有司不敢绳以法赞所至发摘奸伏无所畏忌振举纲领号为称职由是边臣切齿师还复为三司副使太祖建隆初始平李重进太祖素知赞材干可委以完葺即令知扬州既行舟覆于閤桥下溺死亲属随没者三人帝甚叹悼谓左右曰溺吾枢密使矣盖将大用也 【按宋史此下有张保续赵玘二传无事迹足录今并从删】

△卢怀忠

卢怀忠瀛州河闲人少有膂力善骑射汉干佑初寓居河中值李守贞之叛周祖围其城怀忠夜踰城出见陈攻取便宜河中平奏补供奉官从征慕容彦超于兖州显德初监沂州军以所部破海州功居多世宗议北征先遣怀忠按视出师道路三关平迁如京副使太祖即位迁内酒坊副使会朗州军乱太祖将出师致讨遣怀忠使荆南因谓曰江陵人情去就山川向背我欲尽知之怀忠使还奏曰继冲甲兵虽整而控弦不过三万年谷虽登而民苦暴敛南迩长沙东距金陵西迫巴蜀北奉朝廷观其形势盖日不暇给取之易耳太祖召宰相范质等谓曰江陵四分五裂之国今出师湖南假道荆渚因而下之万全策也太祖即以怀忠为前军步军都

监荆湖平以功迁内酒坊使干德二年改判四方馆事
知江陵府四年王师伐蜀江陵当峡江会冲以供亿之劳迁客省使又明年使江南【按
长编载开宝元年八月命客省使卢怀忠等二十二
人领兵屯潞州将有事于北汉也不言其使江南】还中途遇疾至京师未几卒年四十
九大中祥符四年录其子熙为校书郎【按宋史此
下有王继勋丁德裕二传无事迹足录今并从删】

△张延通

张延通潞州潞城人父彦成周右金吾卫上将军延通性颖悟有才干荫补供奉官
太祖即位历通事舍人迁东上合门副使开宝中为西
川兵马都监太祖以蜀寇未平命同内客省使丁德裕引进副使王班内臣张屿领兵屯
蜀部德裕颇专恣延通面质其短德裕衔之又与张屿
不协延通亦为和解德裕疑延通与屿为党益不悦会太祖征太原有使自行在至备言
太祖当盛暑躬冒矢石劳顿万状延通曰主上勤劳若
此而吾辈日享安乐盖言不自安也德裕不答会张屿先归阙太祖赐予甚厚延通德裕
继至则召延通顾问而待德裕稍薄德裕颇疑惧遂奏
延通尝对众言涉指斥且多不法事指屿为党太祖怒即收延通张屿及王班下御史台
鞫之延通等引伏太祖始欲舍之及引问延通抗对不
逊遂斩之屿班并内臣王仁吉并杖脊屿配流沙门岛班许州仁吉西窑务时开宝二年
也【按宋史此下有梁迥传无事迹足录今从删】

△史珪

史珪河南洛阳人父暉晋严卫指挥使珪少以武勇隶军籍周显德中为小校太祖
领禁卫以珪给事左右及即位用为御马直队长四迁
马步军副都军头兼控鹤弓弩大剑都指挥使开宝六年加都军头领毅州刺史太祖初
临御欲周知外事令珪博访珪廉得数事白于帝验之
皆实由是信之后乃渐肆威福民有市官物不当价者珪告其欺罔当寘法列肆无不侧
目帝闻之曰将禁其二价宜示以明文自今应市易官
物有妄增价直欺罔官钱者按鞫得实并以枉法论其犯在诏前者不问自是珪不复敢
言时德州刺史郭贵知邢州国子监丞梁梦升知德州
贵族人亲吏之在德州者颇为奸利梦升以法绳之贵素与珪善遣人以其事告珪图去
梦升珪悉记于纸将伺便言于帝一日帝因言迩来中
外所任皆得其人珪遽曰今之文臣亦未必皆善乃探怀中所记以进曰祇如知德州梁
梦升欺蔑刺史郭贵几至于死帝曰此必刺史所为不
法梦升真清强吏也因以所记纸付中书曰即以梦升为赞善大夫既又曰与左赞善珪
以谮不行居常怏怏寻坐漏泄禁中语出为光州刺史

会岁饥淮蔡民流入州境珪不待奏即开仓减价以糶所全活甚众太平兴国初以为扬楚等九州岛都巡检使四年征太原命珪与彰信军节度刘遇攻城北面从征幽州坐所部逗挠失律责授定武行军司马数月召为右卫将军领平州刺史督浚惠民河自尉氏达京九十里数旬而毕民咸便之受诏捕获江淮盗曲谋首迁隰州刺史知保州静戎军上缘边便宜十五事皆从之雍熙中从曹彬征幽州为押阵部署以所部下涿州师还卒年六十一珪多智数好以甘言小惠取誉于人故所至不忍其去云

△田钦祚

田钦祚颍州汝阴人在汉为殿直改供奉官周世宗征淮南为前军都监从征关南还会塞澶渊决河命钦祚领禁兵护役因令督治澶州城淮人寇高密刺史王万威求济师命钦祚领兵援之既至围解太祖即位迁合门通事舍人干德二年讨蜀为北路先锋都监令乘传往来宣达机事孟昶降奉捷书驰奏迁西上合门副使蜀土寇乱又遣钦祚率师讨平之四年并人寇乐平从罗彦瓌拒之钦祚独以所部三千人破寇擒副将一人俘获甚众以功迁西上合门使开宝二年又与何继筠破敌于石岭关领贺州刺史判四方馆使三年契丹扰中山以钦祚为定州路兵马都部署与战遂城自旦及晡杀伤甚众钦祚马中流矢踣骑士王超授钦祚以马军复振敌解去朝廷将议讨江表遣钦祚觐之还奏合旨江南所得宝货直三千万悉赐钦祚会兴师首命钦祚与曹彬李汉琼率骑军先赴江陵就命为升州西南路行营马军兼左厢战棹都监败吴军万余于溧水斩其主帅李雄等五人擒裨将二人进围金陵为南面攻城部署既平以功加领汾州防御使太平兴国初迁引进使为晋州都钤辖太原骁将杨业率众寇洪洞县钦祚击败之斩获盈千太宗赐钦祚白金五千两令市宅四年从征太原护前锋骑兵屯石岭关以扞契丹钦祚性刚戾数陵其主帅郭进进战功高屡为钦祚所陵心不能甘遂自经死语详郭进传初贼兵奄至进出战钦祚但闭壁自守既去又不追所受月奉刍粟多贩鬻规利为部下所诉责授睦州团练使太宗北巡以为幽州西路行营壕砦都监六年改房州团练使累迁银夏绥宥都巡检吏俄召还会征幽州命为排阵使钦祚已被病受诏不胜喜甫一夕卒钦祚性阴狡不喜儒士好狎侮同列人多恶之子承海仕至供奉官合门祗候承说至崇仪副使

△侯赞

侯赞并州太原人父义汉辽州刺史赞以荫补殿前承旨周显德中迁供奉官江南复命领三门集津发运使太祖即位为诸卫将军先是

朝廷岁仰关中谷麦以给用赞掌其事历三十年国用无阙累迁至右武卫将军开宝中
历知建安军扬徐二州皆有善政太宗即位移知福州
改右卫将军太平兴国二年钱俶初纳土诏赞驰往两浙诸州阅视军储刍茭累迁右卫
大将军七年知灵州按视蕃落宴犒以时得边士心部
内大治迁左卫在朔方凡十余年帝念久次求可代者而难其人淳化三年卒于官年七
十四赠本卫上将军 【按宋史此下有王文宝传文
宝平泉州盗事已附见杨克护传中他无事迹足录今从删】

△翟守素

翟守素济州任城人父溥晋左司御率府率守素以父任为殿直历汉周迁供奉官
领承天军使 【按隆平集作仕周至刺史】 太祖干
德中为引进副使从王全斌伐蜀以往来驰告军事为职蜀平擢判四方馆以两川余寇
未殄虑致骚动再令守素入蜀经略诸郡分兵以防遏
之开宝中会麟府内属戎人争地不决因致扰乱诏守素驰往抚喻守素辨其曲直戎人
悦服从征太原命海州刺史孙方进围汾州守素监其
军转引进使寻命为剑南十州都巡检吏太宗即位迁客省使领宪州刺史太平兴国三
年河决滎阳诏守素发郑之丁夫千五百人与卒千人
领护塞之是秋梅山洞蛮恃险叛命遣守素率诸州屯兵往击之值霖雨弥旬弓弩解弛
不堪用明日将接战守素一夕令削木为弩及旦贼奄
至交射之贼遂败乘胜逐北尽平其巢穴先是数郡大吏富人多与贼帅包汉阳交通既
而得其书讯数百封守素并焚之反侧以定俄而钱俶
纳土诏守素为两浙诸州兵马都监安抚诸郡旋命知杭州岁满为西京巡检使秦王廷
美以事勒归私第以守素权知河南府兼留守司事属
洛阳岁旱艰食多盗帝忧之守素至渐以寤息未几迁商州团练使雍熙二年改知延州
自刘廷让败于君子馆河朔诸州城垒多圯四年诏守
素与田仁朗王继恩郭延浚分路按行发诸州镇兵增筑护其役赐白金三千两留充天
雄军兵马钤辖知大名府改知潞州会建方田命为代
北方田都部署并州兵马钤辖从屯夏州改知凤翔府淳化中夏帅赵保忠上言其弟继
迁诱戎人为寇且求援师诏守素率兵复屯夏州未几
又徙石州以老病上疏求归本郡从之三年卒年七十一守素逮事四朝绵历内职五十
余年性敬慎宽仁容众所至有治绩凡断大辟狱虽众
状明白仍徧询僚案佥同而后决属吏有过不面折但援往事之相类者以微警之新进
后生多至节帅而守素久次不迁殊无陨获意时论以
此多之 【按宋史此下有王侁刘审琼二传无事迹足录今并从删】

△刘福

刘福 【按隆平集作留福】 徐州下邳人少倜傥魁岸有膂力周显德中世宗征淮南福徒步谒见于寿春世宗奇之因留麾下每出战则令福率卫士为先锋与破紫金山砦淮南平录功授怀德指挥使太祖即位迁横海指挥使率所部隶步帅刘光毅由峡路征蜀比至成都孟昶已降大将王全斌部送降卒归京师至绵州降卒盗库兵劫蜀旧将全师雄叛福与龙捷指挥使田绍斌夹击之贼众大溃斩首及溺江死者以万计以功授虎捷都虞候继隶曹彬麾下平江南还授指挥使领蔚州刺史从太宗克并汾迁马步都军头武州团练使端拱初出为洺州防御使二年改雄州兼本州岛兵马部署雄州地控边塞常屯重兵福至部按行城垒调镇兵以给缮完出私钱以资宴犒寇虽大至而恃以无恐淳化初迁凉州观察使判雄州事二年卒年六十四赠太傅 【按隆平集作卒赠节度使】福虽不学而御下有方略为政简易人甚德之领雄州五年郡境盗谧福既贵诸子常劝起大第福怒曰我受禄厚足以侷舍庇汝曹既无尺寸功报朝廷岂可营度居室为自安计乎卒不许既死帝闻其言赐其子白金五千两使市第宅

△安守忠

安守忠字信臣并州晋阳人父审琦周平卢军节度封陈王晋天福八年审琦出领山南东道以守忠为牙内指挥使领绣州刺史周显德四年改鞍辔库使会淮南初下命守忠驰往宣谕时藩臣骄蹇遇朝使多简傲守忠抗以正礼不辱命未几改卫州刺史太祖即位入为左卫将军建隆四年湖南初平命为永州刺史干德中护河阴屯兵蜀平太祖知远俗苦苛虐南郑为走集之地故特命守忠知兴元府以抚绥之四年改汉州刺史时寇难甫平使车旁午公帑不足守忠出私钱以给用每遣使太祖必戒之曰安守忠在蜀能律己以正汝行见之当效其为人也开宝初改濮州刺史会河决澶州命守忠副颍州团练使曹翰护役河决遂塞五年知辽州民有阴召并寇谋内应者事泄守忠悉斩以徇九年命将征太原守忠受诏与孙宴宣由辽州入既而与路罗砦监押马继恩遇乃相与会兵入贼境燔砦四十余获牛羊数千议将深入会帝崩乃班师太平兴国初移知灵州在官凡七年雍熙二年改知易州徙夏州每西戎犯边战无不捷录功就拜濮州团练使端拱中知沧州改瀛州兼高阳关驻泊部署迁瀛州防御使初守忠尝梦一濮字方丈余及领是郡几二十年于是始悟淳化二年徙知雄州方与僚佐宴饮有军校谋变擐甲及闾阖者仓卒入白守忠言笑自若徐顾坐客曰此辈酒狂尔擒之可也人服其量明年加耀州观察使兼判雄州未几召还奏边事称旨

五年又知沧州至道初移雄州三年复知沧州拜感德军节度观察留后徙宋州兼制置营田使威德兼着吏民不忍其去咸平三年入覲遣还未行暴卒年六十九赠太尉录其子继昌为供备库副使壻王世及为光禄寺丞守忠谨恣淡薄为治简静太祖居藩日素相厚善及受禅后每优任之守忠处之益谦从征太原多与谋略人罕知之者所至藩郡乐施予丰宴犒且喜与士大夫游从故时论多与之

△孔守正

孔守正开封浚仪人周世宗征淮南以材勇选为东班承旨太祖即位补内殿直兼领骁雄吐浑指挥从刘廷翰平蜀还迁骁雄副指挥使开宝中征太原守正隶何继筠麾下会契丹遣兵来援晋阳守正大败契丹兵于石岭关获其将王破得时王师之陷敌者数百人守正以骑军驰之尽夺以还太平兴国中累迁日骑东西班指挥使从太宗亲征晋阳守正分主城西洞屋领步卒大呼先登继与内侍蔡守恩等率骑兵力战晋军遂溃从征范阳至金台驿诏与刘仁蕴先趋岐沟关时城未下守正夜超垣度鹿角临机桥以大军将至说关使刘禹【按长编作东易州刺史刘禹盖契丹名岐沟关曰东易州也】使降禹解悬桥守正遂入城抚谕其军民以城守属綦延朗而已赴行在时契丹兵在涿州东守正与傅潜率御前东西班分两阵驰击之逐北二十余里降其羽林兵数百人继与高怀德刘廷翰合兵追之至桑干河契丹自是不敢近塞以劳再迁日骑都指挥使领濡州刺史端拱初迁龙卫都指挥使领长州团练使出镇真定旋为颍州防御使太宗以其练习戎旅特置龙卫神卫四厢都指挥使以授之改领振州防御使明年拜殿前都虞候领容州观察使一日侍宴北苑守正大醉与王荣论边功于帝前忿争失仪侍臣请以属吏帝弗许翼日俱诣殿廷请罪帝曰朕亦大醉漫不复省遂置不问俄命为定州行营副部署受诏诣保州军开道遇敌于曹河与战数合梟首三十余获马五十匹帝闻而壮之淳化初擢高阳关副都部署军中小将有詈其校长者守正械送阙下未尝专决焉明年护浚惠民河塞澶州决河就命知州军改慎州观察使还领代州部署连移并代夏绥麟府三镇与李继迁战大横岗援范廷召出塞破贼于白池至行庄焚掠甚众改代夏二州部署真宗即位复徙代州咸平初授昌化军节度观察留后守正上言四任鴈门边亭久安愿徙东北自效会夏人入寇改定州行营副都部署四年移彰德军留后以风疾妨政改安化军留后景德初复以不任职代时议防秋北鄙守正犹屡表请行帝闵之不许未几卒年六十六赠泰宁军节度使

△谭延美

谭延美大名朝城人躯干壮伟少为盗于乡里周世宗镇澶渊募置帐下即位补殿前散都头从征淮南迁控鹤军副指挥使又从克三关时太祖领禁兵留督牙队太祖即位补控鹤指挥使稍迁都虞候马步副都军头征湖南与解晖分领行营战擢都指挥使时汪端寇攻朗州甚急招讨慕容延钊遣延美率兵赴之大败贼众擒端以还擢铁骑副指挥使领睦州刺史四迁至内殿直都知太平兴国初为蕲州刺史连徙庐寿濠光州军巡检使剧贼之为害者悉就捕六年徙知威虏军雍熙三年举兵北伐命延美为幽州西面行营都监与田重进出飞狐北俄遇敌延美曰彼恃众易我宜出其不意先攻之即麾骑军直进敌兵将溃大军继至遂败之斩首五百获其将大鹏翼以献擢本州岛防御使逾年改亳州出为镇州钤辖端拱元年徙知懿远军一旦契丹兵抵城下延美开门示之不敢入围城数日开门如故民出取刍粮者无异平曰契丹卒疑之遂引去二年进邕州观察使判亳州兼知代州是时任边郡者皆令兼领内地一州处其家属徙知潞陕泾州咸平四年以左领军卫上将军致仕六年卒年八十三赠建武军节度子继伦至崇仪副使雍虞部员外郎

△元达

元达初名守旻洺州鸡泽人身长八尺余负膂力善射家业农不任作苦委耒耜慨叹而去之任侠纵酒尝醉见道旁槐树拔剑斩之树立断达私喜曰吾闻李将军射石虎饮羽今树为我断岂神助欤尝从少年数十百人欲起为盗里中父老交戒之乃止时郡以户籍调役达当送徒阙下行数舍乃悉纵之曰吾观汝曹亦大丈夫也岂乐为是哉可善自为计吾亦从此逝矣已而追捕至达援弓引满待之追者不敢近由是亡命山林闲太宗居晋邸时达求见得隶帐下尝侍太宗习射园亭命之射达射四发不中的已而连中太宗喜为更其名曰达及即位补御龙直队长雍熙初累迁妨州刺史继领本州岛团练使时州郡部送亡命者至阙左右讽杀之达奏请赦之使自新且成好生之德从之端拱二年擢侍卫步军都虞候领幽州刺史历北面行营都部署由常山镇入为京城巡检【按隆平集累擢至封州观察使】淳化四年卒年四十二赠昭化军节度达虽奋自草野历职戎署至交士夫能折节尽礼人以是称之

△常思德

常思德开封人周显德初以材勇应募隶天武军累迁神卫都虞候太宗雍熙初从曹彬征幽州因署牙校寻镇威虏军端拱初以弓箭直都虞候领溪州刺史淳化中李顺叛蜀命往夔峡招捕师次达州新宁县调近州土兵掩

杀贼徒三千余人于梁山时雷有终领大军抵合州境上贼众二万来拒思德与尹元裴庄等合击之合州遂平贼帅田奉正苏荣据果州思德因其遁而追捕之斩首八百果州既定余贼保渠州及走广安梁山乃分兵为三抵广安梁山者思德领之趣渠州者元庄领之合力进讨尽歼其党自是川峡赖以安静无复寇患以功真授汝州刺史初曹彬北征不利至涿州左右皆溃散独思德以所部护至易州语人曰既备武行则与主帅同死生可也若视利害以为去就将何面目以见君父乎太宗尝闻其言至是陛辞深加慰劳且谕之曰为臣以忠实为本汝少仕时既以骁勇自効且能尽心于主将事朕之日虽久而忠实如一今虽老亦当尽心乃职庶无负乎朕之委寄也未几移庆州路副都部署屯邠州咸平初与李继隆同部刍粮赴灵州以疾改陈留都监换左神武大将军二年卒年六十五

△尹继伦

尹继伦开封浚仪人父勋郢州防御使尝内举继伦以为可用太祖以补殿直权领虎捷指挥预平岭表下金陵太宗即位改供奉官从征太原还迁洛苑使充北面缘边都巡检使端拱中威虜军粮馈不继契丹潜议入侵帝遣李继隆发镇定兵万余护送輜重数千乘契丹将裕悦谍知之率精锐数万骑将邀于路继伦适领兵巡徼路与敌直裕悦径趋大军过继伦军不顾而去继伦谓其麾下曰敌蔑视我尔彼南出而捷还则乘胜驱我而北不捷亦且泄怒于我将无遗类矣为今日计不如卷甲衔枚以蹶之彼锐气前趣不虞我之至力战而胜足以自树纵死犹不失为忠义岂可泯然而死为异域鬼乎众皆愤激从命继伦令军中秣马俟夜人将短兵潜蹶其后至唐州徐河闲天未明越去大军四五里会食讫将战继隆方阵于前以待继伦从后急击杀其将皮室一人皮室者契丹相也皮室既擒众遂惊溃裕悦方食失箸为短兵中其臂创甚乘善马先遁契丹自是不敢窥边其平居相戒则曰当避黑面大王以继伦面黑故也以功领长州刺史仍兼巡检使淳化初著作佐郎孙崇谏自契丹逃归太宗询以边事极言徐河之战契丹为之夺气故每闻继伦名则仓皇不知所措于是迁继伦尚食使领长州团练使以励边将淳化五年李继隆奉诏讨夏州以继伦为河西兵马都监未几以深州团练使领本州岛驻泊兵马部署至道二年分遣将帅为五道讨李继迁时大将李继隆由灵环路往逗挠不进帝怒急召继伦至京师授灵庆兵马副都部署欲以夹辅继隆也时继伦已被病强起受诏帝素闻其嗜酒以尊酒赐而遣之即日乘驿赴行营至庆州卒年五十遣中使护其丧而归葬焉

△薛超

薛超辽州平城人少有勇力干德初应募为虎捷卒从崔彦进平蜀录功补虞候迁十将太平兴国初四迁至天武指挥使从征太原领游骑千人备御镇定境上以张军势及车驾还契丹频侵镇定超从大将军刘廷翰率兵至徐河敌将领骑十余出挑战超跃马直前连射数人遂败之以功加步军都军头迁神卫军都校领叙州刺史雍熙三年从潘美北征至鴈门西陉路与契丹遇又战败之追至寰州其将赵彦辛以城降超连被创流血濡甲缕部分军士自若乘胜抵应州其节度副使艾正以城降还加马步军都军头淳化初屯镇州迁天武指挥使领澄州团练使至道元年卒年五十七

丁罕

丁罕

丁罕颍州人始应募补卫士累迁指挥使从刘廷翰战徐河以夺桥功迁本军都虞候累迁天武指挥使领奖州团练使淳化三年出为泽州团练使知霸州会河溢坏城垒罕以私钱募筑民咸德之五年以容州观察使领灵环路行营都部署与李继迁战斩首俘获以数万计至道中率兵从大将李继隆出青冈峡贼闻先遁追十日程不见而返三年真拜密州观察使知威虏军徙贝州咸平二年卒子守德能世其家 【按宋史此下有赵瑫附传又有郭密傅思让二传俱无事迹足录今从删】

△李斌

李斌青州人初太宗在晋邸闻其状貌魁伟召置左右即位补御龙直副指挥使太平兴国中以天武指挥使领郑州刺史七年坐尝受秦王廷美馈遗贬曹州都校雍熙三年迁营州刺史四年领溪州团练使连为贝冀二州驻泊都监淳化中继领莱州洺州团练使勤于政理人服其清慎转运使陈纬以状闻于朝至道初拜桂州观察使仍判洺州徙沧州及代吏民不忍其去邻境亦上其善状诏书褒美之咸平三年卒年六十一

△田仁朗

田仁朗大名元城人父武仕晋昭义军节度使仁朗以父任始为西头供奉官太祖即位从讨李重进攻城有功还与右神武统军陈承昭浚五丈河以通漕运干德中讨蜀命仁朗为凤州路壕砦都监伐木除道大军以济录功迁染院副使从征太原还与陈承昭壅汾水灌城城将陷会班师俄迁内染院使数日改左藏库使为中官所谗大祖怒立召诘之至殿门命去冠带仁朗神色不挠从容曰臣尝从破蜀秋毫无犯陛

下固知之今主藏禁中岂复为奸利以自污赞善大夫怒释止停其职开宝六年起为樞
易使七年以西北边内侵选知庆州仁朗至率麾下往
击之短兵将接前锋稍却仁朗斩指挥使二人军中震恐争乞效命遂大破之敌相率请
和仁朗烹牛置酒与之约誓边境乃寤玺书褒美太平
兴国初秦州羌为寇命仁朗屯兵清水会李飞雄事败召为西上合门使四年征太原命
仁朗与合门祗候刘绪按行太原城四面壕砦阅视攻
城梯冲器械太原平留仁朗为兵马铃辖闲厩使武再兴军器库副使贾湜并为巡检俄
命仁朗与再兴役民筑榆次新城从幸大名改沧州铃
辖俄迁东上合门使知秦州九年判四方馆事李继迁为乱命仁朗率兵巡宁夏岁余召
还未几继迁攻麟州诱杀曹光实遂围三族砦命仁朗
与合门使王侁副使董愿宫苑使李继隆驰传发边兵数千击之仁朗次绥州奏请益兵
留月余俟报会三族砦将折遇也杀监军使者与继迁
合太宗怒亟遣军器库使刘文裕自三交乘疾置代仁朗继迁乘急攻抚宁砦仁朗不知
为文裕所代喜谓诸将曰今继迁啸聚羌戎数万尽锐
以攻孤垒抚宁小而固兵少而精未可以旬浹破当留信宿俟其困以大兵临之分强弩
三百邀其归路必成擒矣仁朗部署已定欲示闲暇日
纵博及赴阙下御史按问请益兵及陷三族状仁朗对曰所召银绥夏兵其州皆留防
城不遣所部千余人皆曹光实旧卒器甲不完故请益
兵况转输刍粟未备三族砦与绥相去道远非元诏所救昨臣已定擒继迁策会诏代臣
其谋不果因言继迁得部落情愿降优诏怀来之或以
厚利陷诸酋长密图之不尔恐他日难制大为边患御史以其状闻帝大怒切责宪府官
吏曰仁朗不恤军政得为过乎大理遂当仁朗乏军兴
及征人违期二十日以上坐死帝特贷之责授商州团练副使驰驿发遣是役也仁朗计
已决为王侁等所构逗挠不进军故及于贬后数月帝
知其无罪召拜右神武军大将军部修河北东路诸州城池数月而就留知雄州加领澄
州刺史时河北用兵大藩多用节将朝议以通判权位
不伦寻选诸司使有吏干者佐大藩以仁朗知定州节度副使事端拱二年召赴阙未闻
命而卒年六十时端拱二年也仁朗性沉厚有谋略颇
涉书传所至有善政云 【按宋史此下有刘谦传无事迹足录今从删】

钦定续通志卷三百十五

●钦定续通志卷三百十六 列传一百十六

列传

宋 【二十】

○宋二十

刘保勋 刘蟠 宋瑯 樊知古【郭载】 臧丙 张观
陈从信 张平【从吉】 王继升【昭
远】 尹宪 王宾 安忠

刘保勋

刘蟠

宋瑯

樊知古

臧丙

张观

陈从信

张平【张从吉】

王继升

尹宪

王宾

安忠

△刘保勋

刘保勋字修业河南人父处让仕后唐入晋拜枢密使出为彰德军节度保勋少好骑射后唐清泰中裁十许岁摄潞州左司马随父署彰德军衙内都校父卒补供奉官习刑名之学颇工诗因献诗宰相桑维翰奇之奏擢太常丞汉为秘书丞周广顺初有荐其详练法律兼大理正迁工部员外郎历掌郢宋楚三州盐曲商税太祖即位拜户部员外郎为云安监盐制置使岁满出羨余百万转运使欲以功状闻保勋曰贪官物为己功可乎乃止太平兴国四年征晋阳改户部郎中为随军转运使兼勾当北面转运事又与侯陟用勾当军前诸事会陕西北路转运使雷德骧调沁州军粮后期诏劾德骧以保勋代之太原平命知并州累拜右谏议大夫知开封府雍熙三年命曹彬等征幽州保勋以本官知幽州行府事子利涉以开封府兵曹督刍粟随军常从其父会王师不利济拒马河更相蹂躏多死保勋马陷淖中利涉自后掀出之力不胜人马相挤压遂俱死时年六十二帝命恤其后保勋三子二子先保勋死季子随没以其孙巨川为嗣授秘书正字端拱初特诏赠工部侍郎保勋性纯谨未尝忤物精于吏事不惮繁剧尝语人曰吾受君命未尝辞避接同僚未尝失意居家积费未尝至千钱及死闻者皆痛惜之至道三年又录其次孙世长为正字咸平初保勋妻卒诏赐钱十万巨川累为比部郎中【按宋史此下有滕中正传无事迹足录今从删】

△刘蟠

刘蟠字士龙滨州渤海人汉干佑二年举进士解褐益都主簿太祖即位历安远军及河阳节度推官干德五年召拜监察御史典染院事开宝七年与殿中丞刘德言同知淮南诸州转运事太平兴国初就迁仓部员外郎改转运使岁漕江东米四百万斛以给京师颇为称职改驾部员外郎八年丁内艰时以诸州纲运留滞起复知京城陆路发运司事会河决韩村大发丁夫塞之命蟠调给其饷未几河塞累迁左谏议大夫淳化二年卒年七十三蟠性清介寡合能攻苦食淡专事苛刻好设奇诈以售知人主典染作日太祖多临视之蟠侦车驾至辄衣短后衣芒屨持梃督役头蓬不治遽出迎谒太祖以为勤事赐钱二十万尝受诏巡茶淮南部民私贩者众蟠乘羸马伪称商人抵民家求市茶私贩家不疑出与之即擒寘于法子锴初以父荫为大理评事咸平二年擢进士第直史馆累迁至户部郎中盐铁副使【按宋史此下有孔承恭传无事迹足录今从删】

△宋瑄

宋瑄字宝臣华州渭南人干德中进士及第拔萃登科解褐青城主簿好写书秩满载数千卷以归吴廷祚镇永兴辟掌书奏廷祚卒复调下邳主簿擢著作佐郎知绵州太宗即位改右赞善大夫为峡路转运副使旋知秦州有善政就拜监察御史充陕西转运使以韦亶代知秦州瑄去州未百日亶坐事系狱上以瑄前有治绩再命知秦州安集诸戎部内清肃雍熙初转比部员外郎在在凡六年召归授度支判官俄迁屯田郎中知益州属岁饥多盗瑄始至以方略擒捕招辑盗遂息下诏嘉奖端拱初就拜右谏议大夫时两川转运使副皆坐事免以瑄为西川转运使加左谏议大夫改知峡州淳化中三吴岁饥疾病民多死择长吏养治之命瑄知苏州瑄体丰硕素病足至州地卑湿疾益甚人或劝其谢疾北归瑄曰天子以民病俾我绥抚何可以疾辞既而太白犯南斗曰斗为吴分民方饥天象如此长吏得无咎乎四年卒年六十一录其子明远为蒲城主簿瑄性清简历官三十年未尝问家事唯聚书以贻子孙且曰使不忘本也明远淳化三年进士后为都官员外郎次子柔远亦举进士及第垂远合门祗候【按宋史此下有袁廓传无事迹足录今从删】

△樊知古

樊知古字仲师其先京兆长安人曾祖偁濮州司户参军祖知谕事吴为金坛令父潜事李景任汉阳石埭二县令因家池州知古尝举进士不第遂谋北归乃渔钓采石江上数月乘小舟载丝绳维南岸疾棹抵北岸以度江之

广狭开宝三年诣阙上书言江南可取状以求进用太祖令送学士院试赐本科及第解褐舒州军事推官尝启于帝言老母亲属数十口在江南恐为李煜所害愿迎至治所即诏煜令遣之煜方闻命即厚给赍装护送至境上七年召拜太子右赞善大夫会王师征江表知古为乡导下池州八年以知古领州事先是州民保险为寇知古击之连拔二砦擒其魁以献余皆溃散方议南征命高品石全振往湖南造黄黑龙船以大舰载巨竹絙自荆南而下议者以谓江涛险壮恐不能就乃于石碑口试造之移至采石三日桥成不差尺寸从知古之请也金陵平擢拜侍御史令乘传按行江南诸州询访民事复命知江东南路转运事数日改授江南转运使先是江南诸州官市茶十分之八复征其余分然后给符听其所往商人苦之知古请蠲其税仍差增所市之直以便于民又奏罢江南旧用铁钱先是李煜用兵权宜调敛知古悉奏为常额豫章洪氏尝掌升州榷酤逋铁钱数百万至是知古挟微时常辱于洪氏责偿铜钱以快意太宗即位授库部员外郎召为京西北路转运使太平兴国六年出领荆湖转运使雍熙初迁比部郎中会河朔用兵分诸郡为两路以给漕挽迁知古为东路转运使端拱初迁右谏议大夫河北东西路转运使两路各置转运副使都转运使之名自知古始【按长编载太平兴国四年十一月己亥以河北转运使高继申为河北南路都转运使下注云按樊知古传云都转运使之名自知古始事在端拱元年十月据实录则高继申于太平兴国四年十二月己为之必有一误姑存以俟细考会要云太平兴国初分河北南路雍熙中又分为东西路后并焉分为南路或自此始当俟检详据此在李焘作长编时已自存疑也】二年诏加河北西路招置营田使奏请修城木五百余万牛革三百万帝谓所请过当诏有司量以官物给之会度支使李惟清上言河北军储无备请发河南十七军州转粟以赴太宗曰农事方殷岂可更与此役惟清固以为请遣左正言冯拯乘传与知古计之知古即言河北军储可以均济足俟农隙令民转饷拯复命太宗曰不细筹之则民果受弊矣未几入朝奏事称旨拜给事中为户部使知古有才力累任转运使甚得时誉及在户部以职事不治诏书切责名益减素与陈恕亲善恕时参知政事太宗言及计司事有乖违者恕具以告后因奏事知古遂自解帝问从何得知曰陈恕告臣帝怒恕泄禁中语且嫉知古轻佻故两罢之出知古知梓州未至改西川转运使知古自以尝任三司使一旦掌漕运剑外郁郁不得志尝称足疾未尝按行郡县蜀中富饶罗纨锦绣等物甲天下言事者兢商榷功利又土狭民稠耕种不足给繇是兼并者益余贱贩

贵以规利淳化中青城县民王小波聚众为乱谓其众曰吾疾贫富不均今为汝辈均之附者益众遂攻陷青城县掠彭山杀其令齐元振巡检使张玘与鬪于江源县射小波中其额旋病创死玘亦被杀众遂推小波妻弟李顺为帅所至陷州郡时已诏知梓州右谏议大夫张雍代知古为转运使雍未至知古与知府郭载及属官走东川诏复令掌两川漕运知古自劾擅离所部制置无状帝特宥之以本官出知均州视事旬日忧悸卒年五十二赐其子汉公同学究出身知古明俊有吏干辞辨捷给及在西川不能弭盗而逃虽获宥终以惭死云

郭载

郭载

郭载字咸熙开封浚仪人父暉右监门卫将军义州刺史载荫为右班殿直累迁供奉官合门祗候雍熙初提举西川兵马捕盗事端拱二年擢引进副使知天雄军入同勾当三班出知秦州兼沿边都巡检使先是巡边者多领兵骑以威戎人所至颇烦苦之载悉减去戎人感悦迁西上合门使改知成都府载在天雄军屡奏市余朝臣段献可冯侃等所市麤恶军人皆曰此物安可充食太宗颇疑使覆验之及报与载奏同献可等皆坐削官仍令填偿及载受代献可等所市皆支毕复有羨数三司判勾冯拯以闻太宗召度支使魏羽诘之羽曰献可等所市不至麤恶亦无欠数臣与侃亲旧是以未敢白太宗曰此公事而何用畏避因召宰相谓曰此乃郭载力奏朕累与卿等议皆云有实今支毕颇有羨余军士复无词诉郭载朕向以诚纯待之何为矫诬及此然已委西川候还日别当诘责于是献可等悉复官载行至梓州时李顺已构乱有日者潜告之曰益州必陷公少留数日可免于祸载怒曰吾受诏领方面阽危之际岂敢迁延邪即日入成都顺兵攻城益急难守乃与樊知古奔剑门随招安使王继恩统兵讨顺平之复入成都亦以忧患成病卒年四十载前在蜀颇能为民除害故蜀民悦之再至成都即值兵乱随继恩及平贼亦有所全济故其死也成都人多叹惜之

△臧丙

臧丙字梦寿旧名愚字仲回大名人弱冠好学太平兴国初举进士解褐大理评事通判大盈监官课民煮井为盐丙职兼总其事先是官给钱市薪吏多侵牟致岁课不充坐械系者常数十百人丙至召井户面付以钱既而市薪山积岁有羨盐致有羨数太宗平晋阳以丙为右赞善大夫知辽州时知石州冯汝士丙同年生也与监军不协一夕割刃于腹而死事可疑丙上疏言汝士死非自杀乞按治帝览奏惊骇即遣使

鞠之召丙问状丙曰汝士居牧守之任不闻有私罪而言自杀若使冤死不明不加宿直者以罪今后书生不能治边郡矣帝嘉其直改著作郎累迁右拾遗直史馆加工部员外郎朝廷方以九等亚列为重改司农少卿淳化二年拜右谏议大夫出知江陵府岁余疾卒年五十三以其子待用为四门助教历贺州刺史次子列进士及第至太常丞 【按宋史此下有徐休复传无事迹足录今从删】

△张观

张观字仲宾常州毗陵人在江南登进士第归朝为彭原主簿太平兴国初移兴元府掾复举进士不第调鸡泽主簿再求试特授忠武掌书记就改观察判官上疏请复刺史及不遣武德卒诣外州侦事颇称旨召拜监察御史充桂阳监使献所业文赐进士及第会三司言剑外赋税轻诏观乘传按行诸州因令稍增之观上疏言增赋以扰远民非便太宗深以为然因留不遣复上言臣备位风宪每遇百官起居曰分立于庭司察不如仪者举之因见陛下多与近臣论政德音往复颇亦烦劳至于有司职官簿书丛脞咸以上闻殊非国体况帝王之道言则左史书之动则右史书之列于绅素垂为轨范不可不慎也今远人未服边鄙不宁阴阳未序仓廩犹虚淳朴未还奢风尚炽县道未治逋逃尚多刑法未措禁令犹密坠典未复封祀犹阙凡此数者皆朝廷之急务也诚愿陛下于听断之暇延宰执近臣与之扬榷帝嘉之以为度支判官寻迁左司改盐铁判官尝因奏事言陛下服御器用愿从纯俭帝曰朕庶事简约至于所服多用絁绢皆经澣濯尔卿言甚善观顿首谢又谏罢治佛寺不报出为诸路茶盐制置副使请众更茶盐之制不称旨改知黄州迁扬州皆有善政会三司改旧贯均州县之籍以分其职召为三司河东道判官有诏计司官属不得越局言他事观自以任谏官不奉诏帝怒谓宰相曰朕俾警三司僚属各率其职非令谏官不言时务观乃妄有援引以讽刺朕姑为容忍不欲深责乃令出知道州移广南西路转运使坐奏交州黎桓为乱兵所杀丁璇复位 【按宋史本传作丁浚考宋史外国传交址郡王丁璉薨其弟璇嗣立大将黎桓迁璇于别宫代总其众据此当作璇今改】 事不实被劾狱未具卒于桂州年五十三观广览汉史雅好论事辞理切直有古人之风焉

△陈从信

陈从信字思齐亳州永城人心计精敏太宗在晋邸令典财用王宫事无大小悉委焉累官右知客押衙开宝三年三司言仓储月给止及明年二月请分屯诸军尽率民船以资江淮漕运太祖大怒责之曰国无九年之蓄曰不

足尔不素计而使仓储垂尽乃请屯兵括民船以运是
可卒致乎今设汝安用苟有所阙当罪汝以谢众三司使楚昭辅惧诣太宗求宽释使得
尽力太宗既许召从信问之对曰从信尝游楚泗知粮
运之患良以舟人之食日厯郡县勘给是以凝滞若自发舟计日往复并支可以责其程
限又楚泗运米于舟至京复辇入仓宜宿备运卒令即
时出纳如此每运可减数十日楚泗至京千里旧八十日一运一岁三运若去淹留之虚
日则每岁可增一运今三司欲籍民舟若不许则无以
责办许之则京师冬月薪炭殆绝不若募舟之坚者漕粮其损败者任载薪炭则公私俱
济且今市米腾贵官价斗钱七十贾者失利不至储粟
之家亦匿而不糶是以米益贵若听民自便即四方奔凑米多而价自贱矣太宗明日具
奏太祖可之其事果集太宗即位迁东上合门使充枢
密都承旨坐事责授闲厩使合门祇候太平兴国三年改左卫将军复为枢密都承旨七
年坐秦王廷美事以本官罢 【按宋史廷美传云左
卫将军枢密承旨陈从龙为左卫将军坐交通廷美及受其燕犒也所载事与从信传同
而名作从龙应有误】 明年分使三部以从信为度支
使加右卫大将军九年卒年七十三赠太尉侯莫陈利用者所为多不法始因从信推荐
人以是少之

△张平 【张从吉】

张平青州临朐人弱冠寓单州依刺史罗金山金山移滁州署平马步都虞候太宗
尹京兆给事藩邸及秦王廷美领贵州 【按宋史廷
美本传建隆元年授嘉州防御使二年迁兴元尹厯领山南西道永兴军节度使并无领
贵州之文其为贵州防御使乃廷美子德恭也】 复署
为亲吏有诉平匿府中钱物秦王白太宗鞠之无状秦王益不喜遂遣去太宗怜其非罪
以属徐帅高继冲继冲署为镇将平叹曰吾命虽蹇后
未必不为福也太宗即位召补右班殿直监市木秦陇平悉更新制建都务计水陆之费
以春秋二时联巨筏自渭达河厯砥柱以集于京期岁
中良材山积太宗嘉其功迁供奉官监阳平都木务兼造船场旧官造舟既成以河流湍
悍备其漂失凡一舟调三户守之岁役户数千平遂穿
池引水系舟其中不复调民有寇阳拔华者往来关辅闲为患讨之不克平遣人说之遂
来归改崇仪副使仍领其务凡在阳平九年计省官钱
八十万缗雍熙中召还同知三班事迁如京使代王明为盐铁使陕西转运使李安发其
旧为阳平奸利以忧恚成疾卒年六十三赠右千牛卫
上将军平好史传微时遇异书尽日耽玩或解衣易之及贵聚书数千卷平在彭门日郡
吏有侮平者数辈后悉被罪配京窑务平子从式适董

其役见之以语平平召至第为设酒饌劳之给以缗钱且戒从式善视之未几遇赦得原时人称其宽厚从式事太宗藩邸累官文思使次子从吉以荫补殿直转供奉官知宜州屡破溪蛮转运使尧叟上其状累迁内殿崇班合门祇候代还为如京副使咸平中知环州尝与宋沆率兵袭西夏小岨部署张凝表其专责授内殿崇班俄知澧州复旧秩景德四年宜州军校陈进叛命副曹利用为广南东西路安抚使将兵讨之次象州大乌砦与贼战进为先锋郭志言所刺遂入城以平贼功改庄宅副使未还卒年四十九

△王继升

王继升冀州阜城人性纯质谨愿事太宗于藩邸以纯谨被信任及即位补供奉官累迁军器库副使陈洪进来献漳泉之地以继升为泉州兵马都监会游洋洞民万余叛攻泉州继升潜率精骑二百夜击破之擒其魁械送阙下余党悉平召还迁军器库使领顺州刺史知诸道水路发运事雍熙四年以诸道水陆发运并为一司命继升与刑部员外郎董俨同掌其事号为称职俄迁右神武军将军端拱初改领本州岛团练使三月卒年六十四赠洋州观察使子昭远

王昭远

王昭远

昭远形质魁伟色黑继升名之铁山有膂力善骑射少时入山捕鹰鹞值涧水暴涨十余丈昭远升大树经宿得免尝涉河冰陷二公傍共援出之昭远神色自若喜与里中恶少游处一日众祀里神昭远适至有以博投授之谓曰汝他日倘有节钺试掷以卜之昭远一掷六齿皆赤南游京师事太宗于晋邸特被亲遇常呼其小字及即位补殿前指挥使稍迁都知从征太原先登为流矢所中血渍甲缕战益急会刘继元降命守城门籍兵仗又从征范阳多所擒获超散员指挥使涪王之迁房陵也禁卫诸校杨均王荣等以依附被谴独昭远无所预太宗以为忠再迁东四班都虞候太宗尝草书纨扇作古诗赐诸将意多比讽其赐昭远尤加赏遇二年领沙州观察使【按宋史地理志无沙州惟外国传有沙州为汉炖煌故地唐时置沙州后没吐蕃至宋时世为曹氏所据不应复为殿帅领职盖宋初殿师所领使额每沿袭旧名未尝亲镇其地故多不见于宋史地理志】再为并代副都部署至道中李继迁扰西鄙绝灵武粮道命昭远为灵州路都部署护二十五州刍粟竟达灵武继迁不敢犯真宗即位徙定州行营都部署寻拜保静军节度使充天雄军都部署知府事咸平二年移知河阳数月卒年五十六赠太尉谥惠和

昭远颇知书性吝嗇所至无善政母弟昭懿亦事晋邸至捧日弟昭逊西京作坊使初祖母郭氏尝对昭远母指昭远曰此儿有贵相他日必至公侯指昭懿曰此儿奉钱过二万不能胜矣果皆如其言昭远子怀普九岁事太宗左右至西京左藏库使平州刺史怀一供备库副使怀正内殿承制怀英内殿崇班

△尹宪

尹宪并州晋阳人开宝中事太宗于藩邸太宗即位擢为殿直充延州保安军使改供奉官太平兴国四年护府州屯兵与鄜州三族会攻岚州破敌千余众擒伪知岚州事马延忠拔缘河诸砦以功转西京作坊副使入朔州界破寇武军杀其军使获人马器甲甚众改护夏州兵转供备库使杀戮三汉丑奴庄及诱其渠帅屡降诏书褒美雍熙初诏就知夏州攻破李继迁之众于地斤泽继迁遁走俘获四百余帐奏请于所部抽移诸帐别置骑兵号曰平砦以备用诏从之破岌嘉勒罗尼等十四族【按宋史夏国传载宪知夏州与都巡检曹光实破李继迁于地斤泽作太平兴国八年事太宗本纪作雍熙元年与此同至宪破岌嘉勒罗尼十四族太宗本纪及党项传并作雍熙二年本传载于雍熙初宪知夏州之前与太宗本纪党项传俱不合今移置于此】俄杀芦关及南山伊埒数族诸族遂扰代还为洪州巡检未几命护莫州屯兵诏知瀛州兼兵马钤辖知沧州移邢州皆兼钤辖淳化初与王文宝并命为四方馆使连护镇定州屯兵改知贝州移高阳关兵马钤辖知定州与兵部署王荣不协荣素粗暴因忿殴宪仆地宪怏怏致疾数日卒年六十三

△王宾

王宾许州许田人小心谨愿年十余事宣祖左右及长善骑射太宗领兗海节制署府中右职太平兴国初补东头供奉官亳州监军迁仪鸾副使从征太原又从征范阳与彰信节度刘遇攻城东面五年车驾北巡副王仁贍为大内都部署七年改洛苑使会汴漕壅滞军食不给诏别置水陆发连两司以宾有心计会领演州刺史与儒州刺史许昌裔同掌其事凡四年储积增羨号为称职改神武将军黎阳当舟车交会禁兵常屯万余以度支使张逊荐命护黎阳军兼领黄御两河发运事俄领本州岛团练使以宾请黎阳建通利军命就知军事宾规起公署邮馆供帐之器咸具加本军大将军俄兼河北水陆路转运使贝州兵屯无壁垒分寓邸肆宾选隙地筑舍千二百余以处之诏优褒美召为右羽林军大将军判左金吾兼六军诸卫仪仗司事淳化四年出知扬州兼淮南发运使徙为通许镇都监至道元年卒年七十三宾事宣祖太祖太宗殆

六十年最为勤旧故恩宠尤异前后赐赉数千万俱奉释氏在黎阳日按见古寺基即以奉钱修之掘地丈余得数石佛及石碣有宾姓名宾异其事以闻诏名寺为淳化

△安忠

安忠河南洛阳人形质魁岸不知书纔通姓名而已事太宗藩邸殆二十年太宗即位授东头供奉官弓箭库作坊等使掌屯兵于雍州会曹彬败于拒马河忠分砦兵布列缘边以备游骑与大将李继隆田重进崔翰追契丹于祁州北端拱元年移护高阳关屯兵契丹侵镇定又与崔翰等拒之傅潜阵于瀛州忠当城之西面徙知寿州移贝州有剧贼十二人久为民患忠悉捕获淳化四年判左金吾街仗王宾出知扬州以忠代为左龙武军大将军忠泣请诸卫将军列在朝外不得近左右愿复旧职帝笑曰环列之官古官也大将军三品汝终不知朝廷表着之位因从其请俄复东上合门使充淮南诸州兵马钤辖至道三年以病求归至泗州卒年六十四天禧元年录其孙惟庆为殿直

钦定续通志卷三百十六

●钦定续通志卷三百十七 列传一百十七

列传

宋 【二十一】

○宋二十一

张鉴	姚坦	索湘	宋太初	卢之翰	郑文宝
王子舆	刘综	卞袞	许骧		
裴庄	韩国华	慎知礼	【从吉】		
张鉴					
姚坦					
索湘					
宋太初					
卢之翰					
郑文宝					
王子舆					
刘综					
卞袞					
许骧					
裴庄					
韩国华					

慎知礼 【慎从吉】

△张鉴

张鉴字德明瀛州团练使藏英之孙父裔以荫补供奉官鉴本将家幼嗜学太平兴国三年擢进士第释褐大理评事累迁监察御史奉诏决狱江左颇雪冤滞厯殿中侍御史会命曹彬等进讨幽州问羣臣以方略鉴上疏极言不可论者以鉴燕人沮议非忠太宗置不问与赵延进同掌左藏 【按宋史赵延进本传不载掌左藏事】 延进恃恩踰规鉴廷奏之有旨罢延进以鉴判三司度支凭由催欠司时三部各置凭由催欠鉴请并为一从之淳化初 【按宋史本传下文云淳化中盗起西蜀考宋史地理志及通鉴置临江军在淳化三年分天下为十道在淳化四年盗起西蜀在淳化五年不应于盗起西蜀事始书淳化年号此处增淳化初方见分明下淳化中从删】 王明李惟清荐其能用为江南转运使本部有大姓为民患鉴以名闻太宗尽令部送魁首及妻子赴阙以三班职名羈縻之江左震肃又建议割瑞州清江吉州新淦袁州新喻三县置临江军时以为便召还特被慰奖梓州符愿骄僭不法命鉴代之迁刑部员外郎再迁改都勾院擢拜枢密直学士知通进银台封驳司掌三班请考校供奉官以下殿最即诏鉴兼磨勘职又言改三司为左右计分天下为十道非便未几果复旧五年盗起西蜀王继恩讨平之其下恃功暴横益州张咏密奏请命近臣分屯师旅遣鉴与西京作坊使冯守规偕往面授方略鉴以益部新复军旅不和闻使命骤至易其戎伍恐或猜惧变生请假臣安抚之名帝称善鉴至蜀与咏即遣部戍卒出境继恩麾下使臣亦多遣东还督继恩等分路讨捕残寇而自招辑反侧事平拜左谏议大夫户部使会五路进兵讨西夏命鉴往环州与李继隆议护送刍粮入灵州及还疏请以灵州赐继迁稍息飞挽之役 【按长编载鉴此疏在至道三年正月再往陕西督饷之后非灵州还时所上也据疏内有因兹首春俾务东作云云当在三年正月再往陕西时】 寻诏鉴专督军粮以军兴法从事馈运颇集真宗即位迁给事中使如故咸平初改工部侍郎出知广州移知朗州溪洞羣蛮数寇扰鉴召酋豪谕以威信皆俯伏听命召还以疾徙知相州景德初卒年五十八子士廉为殿中丞士宗太子洗马士程屯田员外郎

△姚坦

姚坦字明白曹州济阴人开宝中以尚书擢第补将陵尉厯知浚州太平兴国三年召还为著作佐郎通判唐州八年诸王出合诏给谏以上于朝班中举年五十以上通经有文行者以备宫僚乃以户部员外郎王适监察御史

赵齐为卫王府咨议左赞善大夫戴元为本府翊善水部员外郎赵令图为广平郡王府咨议国子博士阎象为本府翊善又以起居舍人杨可法国子博士杨幼英左赞善大夫林新及坦为皇子翊善国子博士邢昺为诸王府侍讲太宗召王适等谓曰诸子生长深宫未知世务必资良士赞导使日闻忠孝之道汝等皆朕所慎简各宜勉之坦厯殿中丞仓部员外郎迁本曹郎中转考功仍为益王府翊善坦性木强固滞王尝于邸中为假山费数百万既成召宾僚观之坦独俛首王强使视之曰但见血山耳安得假山王惊问故坦曰在田舍时见州县催科捕人父子兄弟送县鞭笞流血被体此假山皆民租税所为非血山而何时帝亦为假山闻毁之王少佚豫坦即丑诋帝尝戒之曰元杰知书好学亦足为贤王矣少不中节亦须婉辞规讽况无大故而诋讦之岂裨赞之道邪顷之左右乃教王诈称疾不朝太宗日使视疾逾月不瘳甚忧之召王乳母问状乳母曰王本无疾徒以姚坦检束居常不得自便王不乐故成疾帝怒曰吾选端士辅王为善王不能用其谏而又诈疾欲使朕去正人以自便何可得也且王年少必尔辈为之谋耳因命粹至后苑杖之召坦慰谕曰卿居王宫能以正为羣小所疾大为不易卿但如是勿虑谗间朕必不听王薨改卫尉少卿判吏部南曹他日因事得对上以其旧人召升殿与语坦言及故府意短诸王而称己之敢言坦退上谓侍臣曰坦在宫邸不能以正理诲谕事有微失即从而扬之此卖直取名耳景德初求补郡俾知邓州转运使表其治状诏嘉奖之大中祥符初复知光州二年卒年七十五

△索湘

索湘字巨川沧州盐山人开宝六年进士释褐郢州司寇参军 【按宋史本传作释褐郢州司理参军考宋史太祖本纪开宝六年秋七月壬子朔诏诸州府置司寇参军以进士明经者为之又长编载开宝六年七月壬子朔诏改马步院为司寇院以新及第进士九经五经及选人资叙相当者为司寇参军又文献通考载开宝六年初置诸州司寇参军以新进士及选人为之后乃改为司理湘举进士在开宝六年不应云司理今据本纪及长编通考改】 齐州有大狱连逮者千五百人有司不能决湘受诏推鞠事随以白太平兴国四年转运使和峴荐其能迁太仆寺丞充度支巡官寻拜监察御史九年诏下东封与刘蟠同知泰山路转运事又为河北转运副使湘经度供馈以能干闻事集加屯田员外郎明年契丹入侵王师岨于君子馆敌兵乘胜据中渡桥塞土门将趋镇州诸将计议未定湘为田重进画谋结大阵东行声言会高阳关兵

敌拥众邀于平虏城夜率兵而南径入镇阳据唐河乘其无备破砦栅敌悉遁走雍熙中召为盐铁判官改驾部员外郎端拱二年河北治方田命副樊知古为招置营田使会议罢复为河北转运使转虞部郎中选为将作少监有讼其擅易库缣以自用者责授缮部员外郎知相州时有羣盗聚西山下谋断澶州河桥入攻磁相州援旗伐鼓白昼钞劫邻郡发兵千人捕逐无敢近湘择州军得精锐三百人侦其入境即掩击尽擒之转运使王嗣宗出状闻诏复旧官为河东转运使王超等率师趋乌白池抵无定河水源涸绝军士渴乏湘亟犂大锹千枚至令凿井众赖以济真宗即位入为右谏议大夫复充河北转运使属郡民有干酿岁输课甚微不逞吏民因缘为奸盗湘奏废之德州旧赋民马以给驿又役民为步递湘代以官马兵卒民皆便之会内殿崇班阎自新建议请于静戎威虜两军置场鬻茶收其利以资军用湘言非便遂止又言事者请许榷场商旅以茶药等物贩易于北界北界商旅许于雄霸州市易资其懋迁庶息边患诏湘详议以闻乃上言北边自兴置榷场商旅辐凑制置深得其宜今若许其交相贩易则沿边商人深入戎界窃为非便又北界商人若至雄霸其中或杂奸伪何由辨明况边民易动难安蕃戎之情宜为羁制望且仍旧会有诏规度复修定州新乐蒲阴两县湘以其地迫窄非屯兵之所遂奏罢之湘少文而长于吏事历边郡所至必广储蓄为备豫计出入军旅间颇着能名先是边州置榷场与蕃夷互市自京辇物货充之其中茶茗最为烦扰道远多损败湘请许商贾缘江载茶诣边郡入中既免道途之耗复有征算之益又威虜静戎军岁烧缘边草地以绝南牧或又请于此砦山麓中兴置银冶湘以为召寇亦奏罢之咸平二年入为户部使受诏详定三司编敕坐与王夫交相请托擅易版籍责授将作少监三年出知许州徙荆南复为右谏议大夫知广州四年卒诏遣其子希颜护丧传置归乡里

△宋太初

宋太初字永初泽州晋城人太平兴国三年举进士解褐大理评事通判戎州以善政闻有诏褒美迁将作监丞赞善大夫通判晋州转太常丞雍熙三年通判成都府会诏求直言着守成箴以献淳化初迁监察御史时北面用兵选为雄州通判入判度支勾院为京西转运副使移河东迁正使改殿中御史至道初迁兵部员外郎充盐铁副使时陈恕为使太初有所规画必咨恕未尝自用会西鄙有警转馈艰急充陕西转运使白守荣等护刍粮抵灵州坐卢之翰违旨责怀州团练副使明年为祠部郎中知梓州俄复旧秩真宗嗣位召还复命经度陕西馈运事咸

平初拜右谏议大夫知江陵府蛮寇扰动太初以便宜制遏诏奖之再知梓州益州雷有终以母老求还诏太初就代时分川峡为四路【按宋史真宗本纪咸平四年三月分川峡转运使为益利梓夔四路本传作分川峡误今改】各置转运使帝以事有缓急难于均济命太初为四路转转运使俾同规画与钤辖杨怀忠不协蜀土始安帝虑其临事矛盾召还会御史中丞赵昌言等坐事被劾命权御史中丞先是按劾有罪必豫请朝旨太初以为失风宪体狱成然后闻俄出知杭州以浙右卑湿宿疾不便求近地得庐州疾久颇昏忘不能治大郡连徙汝光二州景德四年卒年六十二录其弟继让试校书郎太初性周慎所至有干职誉尝着简谭自为之序子传庆后为太子中舍

△卢之翰

卢之翰字维周祁州人少笃学家贫客游单州防御使刘乙馆于门下乙徙钱塘之翰随寓其郡太平兴国四年举进士不得解诣登闻鼓陈诏听附京兆府解试明年登第解褐大理评事知临安县三迁殿中丞通判洛州会契丹入侵之翰募城中丁壮决漳御河以固城壁敌不能攻召还迁太常博士为河东转运副使徙京西转运副使改工部员外郎建议导溟河合于淮达许州以便漕运加户部员外郎又改陕西转运使迁吏部员外郎至道初李顺乱蜀命兼西川安抚转运使会调发刍粮输灵州诏分三道护送命洛苑使白守荣马绍忠领其事之翰违旨擅并为一为李继迁邀击于浦洛河大失輜重诏国子博士王用和乘傅逮捕与转运使宋太初及副使秘书丞窦玘皆系狱鞫问坐除名之翰贬许州司马明年起为工部员外郎同勾当陕西转运使真宗即位复吏部员外郎充转运使以久次召拜礼部郎中复遣之任咸平元年以疾命国子博士张志言代还未几复出为京西转运使先是朝廷议城故原州以张守备之翰沮罢之其后西鄙不宁修葺为镇戎军之翰坐横议非使黜知归州三年授广南西路转运使会广州索湘卒就改太常少卿知州事之翰无廉称又与转运使凌策不协阴发其事五年徙知永州未行卒年五十七

△郑文宝

郑文宝字仲贤盩化人【据东都事略增】右千牛卫大将军彦华之子彦华初事李煜文宝以荫授奉礼郎掌煜子清源公仲寓书籍迁校书郎归朝煜以环卫奉朝请文宝欲一见虑卫者难之乃被蓑荷笠以渔者见陈圣主宽宥之意宜谨节奉上勿为他虑煜忠之后补广文馆生深为李昉所知太平兴国八年登进士第除修武主簿迁大理评事知梓州录事参

军事代归献所著文召试翰林改著作佐郎通判颍州
丁外艰起知州事召拜殿中丞使川陕均税次渝涪闻夔州广武卒谋乱乃乘舸泛江一夕数百里以计平之授陕西转运副使许便宜从事会
岁歉诱豪民出粟三万斛活饥民八万六千口既而李顺乱西蜀秦陇贼赵包聚众数千将趋剑阁以附顺文宝移书蜀郡分兵讨袭获其渠魁
余党歼焉文宝前后自环庆部粮越旱海入灵武者十二次晓达蕃情习其语经由部落每宿酋长帐中人或呼为父迁太常博士召至阙下奏
对捷辨帝深眷遇俄加工部员外郎时龙猛卒戍环庆七年不得代思归谋乱文宝矫诏以库金给将士且自劾请代偿诏蠲其所费先是诸羌
部落树艺殊少但用池盐与边民交易谷麦会馈挽趋灵州为继迁所钞文宝建议以为银夏之北千里不毛但以贩青白盐为命请禁之许商
人贩安邑解县两池盐于陕西以济民食官获其利而戎益困继迁可不战而屈乃诏自陕以西有敢私市者皆抵死募告者差定其罪行之数
月犯者益众戎人乏食相率寇边内属万余帐亦叛商人贩两池盐少利多取他径出唐邓襄汝间邀善价吏不能禁关陇民无盐以食境上骚
扰帝知其事遣知制诰钱若水驰传视之悉除其禁召诸族抚谕之乃定朝廷议城古威州遣内侍冯从顺访于文宝文宝言威州在清远军西
北八十里乐山之西唐大中时灵武朱叔明收长乐州邠宁张君绪收六关即其地也故垒未圯水甘土沃有良木薪秸之利约葫芦临洮二河
压明沙萧关两戍东控五原北固峡口足以襟带西凉咽喉灵武城之便然环州至伯鱼伯鱼抵青冈青冈抵清远皆两舍而清远当羣山之口
拒塞门之要请先建伯鱼青冈清远三城为顿师归重之地古人有言金城汤池非粟不能守俟二年秦民息肩臣请建营田积粟实边之策
修五原故城专三池盐利以金帛啖党项酋豪子弟使为朝廷用不惟安朔方制竖子至于经营安西绥复河湟此其渐也诏从其议文宝至贺
兰山下见唐室营田旧制建议兴复可得秔稻万余斛减岁运之费清远据积石岭在旱海中去灵环皆三四百里素无水泉文宝发民负水数
百里外留屯数千人又募民以榆槐杂树及猫狗鸦乌至者厚给其直地𦵏鹵树皆立枯西民甚苦其役而城之不能守卒为山水所坏又令宁
庆州为水碓亦为山水漂去继迁酋长威喇威斯鄂者文宝以金帛诱之与手书要约留其长子为质令阴图继迁即遣去谓之曰事成朝廷授
汝以刺史文宝又预漆木为函以备驰献继迁之首又发民曳古碑石诣清远军将图纪功威喇卜等尽以事告继迁继迁上表请罪帝怒文宝
犹含容之既而文宝复请禁盐边民冒法抵罪者甚众太常博士席义叟决狱陕西廉知

其事以语中丞李昌龄以闻文宝又奏减解州盐价未
满岁亏课二十万贯复为三司所发乃命盐铁副使宋太初为都转运使代文宝还下御
史台鞫问具伏下诏切责贬蓝山令未几移枝江令真
宗即位徙京山咸平中召还授殿中丞掌京南榷货时庆州发兵护刍粮诣灵州文宝素
知山川险易上言必为继迁所败未几果如其奏转运
使陈纬没于贼继迁进陷清远军命相府召文宝询策略文宝因献河西陇右图叙其地
利本末且言灵州可弃时方遣大将王超援灵武即复
文宝工部员外郎为随军转运使至环州或言灵州已陷文宝乃易服引单骑冒大雪间
道抵清远故城尽得其实遂奏班师就除本路转运使
上疏请再葺清远军都部署王汉忠言其好生事遂徙河东转运使上言管内广锐兵万
余难得资粮请徙置近南诸州又欲令强壮户市马备
征役宰相李沆等以为广锐州兵皆本州岛守城置营必虑安土重迁徙之即致纷扰又
强壮散处乡落无所拘辖勒其市马亦恐非便帝复令文
宝条对文宝固执前议且言土人久留恐或生事帝曰前令团并军伍改置营壁欲其互
移本贯行之已久而文宝确陈其利因命钱若水详度
以闻若水所对与沆等同遂罢之先是麟府屯重兵皆河东输馈虽地里甚迩而限河津
之阻土人利于河东民罕至则刍粟增价帝尝访使边
者言河裁阔数十步乃诏文宝于府州定羌军经度置浮桥人以为便会继迁围麟州令
乘传晨夜赴之围解迁刑部员外郎顷之寇准荐其熟
西事可备驱策因复任陕西转运使尝出手札密戒令边事与僚属计议勿得过有须索
重扰于下后有言其张皇者诏徙京西以朱台符代之
景德元年契丹侵边又徙河东文宝安辑所部募乡兵张边备又领蕃汉兵赴河北手诏
褒谕未几复莅京西契丹请和文宝陈经久之策帝嘉
之三年召还未至遇疾表求藩郡散秩诏听不除其籍续奉养疾以其子郢州推官于陵
为大理寺丞知襄城县以便其养大中祥符初改兵部
员外郎车驾祠汾阴还文宝至郑州请见帝以其久疾除忠武军行军司马文宝不就以
前官归襄城别墅六年卒年六十一文宝能为诗善篆
书工鼓琴好谈方略以功名为己任久在西边参预兵计心有余而识不足又不护细行
所延荐属吏至多而未尝择也

△王子舆

王子舆字希孟密州莒人少业文辞太平兴国八年举进士解褐北海主簿历大理
评事知临海县改光禄寺丞使西蜀决狱还知兴国军
淳化中雷有终为江浙荆湖茶盐制置使奏子舆为判官转太子中允改著作郎江淮两
浙制置茶盐就转太常博士真宗即位迁殿中侍御史

因入对与三司论列利害以子輿为长转度支员外郎子輿以每事上计司移报稽滞求兼省职乃命为盐铁判官仍领制置增岁课五十余万贯咸平三年就命兼充淮南转运使子輿精于吏事久掌茶盐漕运周知利害裁量经制公私便之所至郡县以公事申请者文牒纷委顷刻待报子輿皆即决遣曾无凝滞明年表求代诏许自择子輿以卞袞刘师道名闻即命袞与师道为转运使召子輿拜右谏议大夫户部使五年方奏事便殿俄疾作仆地命中使掖之以出至第卒子道宗方幼命三司判官朱台符检校其家子輿止一子而三女皆幼道宗寻卒家寓楚州子輿妻刘还父母家子輿旅衬在京师景德中官借船移柩还葬其里鬻京师居第以钱寄楚州官库备三女资送从其从弟之请也

△刘综

刘综字居正河中虞乡人少依外兄通远军使董遵海遵海尝遣贡马太祖嘉其敏辨将授三班之职综自陈素习词业愿应科举及还帝解真珠盘龙衣以赐遵海综辞曰遵海人臣安敢当此赐帝曰吾委遵海以方面不以此为疑也雍熙二年举进士第解褐邛州军事推官就改永康军判官迁大理评事通判眉州转太仆寺丞代还对便殿因言蜀地富庶安谧已久益州长吏望慎择其人帝嘉之改太子中允未几李顺果为乱复召见寻为三门发运司水陆转运使通判大名府连丁家艰起知建安军先是天长军及扬州六合县民输赋非便综奏请降天长军为县隶扬州以六合县隶建安军自是民力均济【按宋史地理载天长军废为县隶扬州以扬州之六合县隶建安军并在至道二年本传作至道二年以前事与志互异】至道二年迁太常丞咸平初命代王钦若判三司都理欠凭由司出为河北转运副使上言州县幕职官以昏耄放罢者其间有实廉谨之士或幼累无托或居止无定全藉禄廩以济朝夕一旦停罢则饥寒无依以伤和气望自今并除致仕官又言法官断狱皆引律令之文以定轻重之罪及其奏御复云虑未得中别取进止殊非一成不变之道且复烦于圣断望自今降旨约束不得复然时河北承兵宝之后民户凋弊吏部所铨幕职州县官皆四方之人不习风俗且有怀土之思以是政事多因循不举综请自今并以河朔人充之冀其安土以勤职事夏人扰边环庆大屯士马诏徙综为陕西转运副使时梁鼎议禁解盐官自货鬻乃命综与杜承睿制置青白盐事综条上利害力言非便卒罢其事时灵州孤危献言者或请弃之综言灵州民淳土沃为四陲巨屏所宜固守以为扞蔽然后于浦洛河建军城屯兵积粮为之应援此暂劳永佚之势况镇戎军与灵州相接今若弃之则原渭等州益须设备较

其劳费恐十倍滋多也俄充转运使又献议于镇戎军置屯田务又录唐安国镇制置城壕镇戎古记石本以进诏从其请又言天下州郡长吏审官皆据资例而授未为得人自今西川荆湖江浙福建广南知州或地居津要或户口繁庶之处望亲加选任其执政旧臣及给舍以上知州处亦择官通判又京朝官当任远官者率以父母未葬为辞意求规免自今父母委未葬者许请告营办审官投状并明言父母已葬乃许依例考课违者并罢其官从之六年再为河北转运使时两河用兵边事烦急转漕之任尤所倚办综继领其职号为详练景德三年召拜户部员外郎枢密直学士勾当三班院综言御史员数至少每奉朝请劾制狱多以他官承之甚紊彝制望诏两制以上各举才堪御史者充三院共置十员若出使按狱所经州郡官吏能否生民利病刑狱枉滥悉得察举四年西幸道出河阳境上时节度王显疾还京以综权知孟州事未几召还复出知并州大中祥符四年馆伴契丹使因作大雪歌以献即命同知贡举以李宗谔代为馆伴使俄权知开封府综以贵要交结富民为之请求或托为亲属奏授试秩缘此谒见官司颇紊公政请加抑止又文武官居远任而家属寓京师其子孙弟侄无赖者望严行约束并其交游辈劾罪从之七年以老疾求典河中真宗以太室宫庙长吏奉祠综艰于拜起虑不克恭事命知庐州明年罢学士授右谏议大夫八年卒年六十一综强敏有吏材所至抑挫豪右振举文法时称干治然尚气好胜不为物论所许子建中正中并赞善大夫弟綽淳化三年进士官刑部郎中

△卞袞

卞袞字垂象益州成都人父震举蜀进士渝州刺史南光海辟为判官蜀平仍旧职会贼杜承褒率众围城援兵不至震躬率士卒且战且拒为流矢所中创甚不能临军而州兵重伤卷甲宵遁刺史陈文袞又不能遏贼遂入据郡城以伪官厚贿诱震震皆斩其使贼有东章者本州岛兵校也因遣人述朝廷威德谕以祸福章惧且信因伏兵击其党类承褒之众素不为备实时大溃震与文袞分部余卒夹攻之贼众遂平文袞坐陷失州城削籍为民震以前功得赎以虢州录事参军卒太平兴国八年袞登进士第累迁大理评事知将乐县改光禄寺丞通判泗州再通判宣州淳化中上命采庶僚中廉干者给御书印纸俸书课最仍赐实奉以旌异之袞预焉改太常丞咸平初迁监察御史为淮南转运副使同荆湖发运使以干职闻就加殿中侍御史入判三司开拆司再为淮南转运使兼发运使六年并三司使之职分置副贰以袞为刑部员外郎充盐铁副使景德初卒年四十五录其弟宸为临颖主簿子咸为将作监主簿袞明敏有吏

干累掌财赋清心治局号为称职然性惨毒掊克严峻
专事捶楚至有大虫之号真宗尝谓近臣曰衮公忠尽瘁无所畏避人罕能及然顷在外
任颇伤残酷所至州县纤微之过无所容贷大凡督察
部下糺逃愆违非有大故所宜矜恕官吏自当畏威怀恩不敢贰过公家之事亦无不济
乃知为吏之方适中为善也

△许骧

许骧字允升世家蓟州祖信父唐世以财雄边郡唐知契丹将扰边白其父当迁去
信以资产富殖不乐他从唐潜赍百金而南未几晋祖
以燕蓟赂契丹唐归路遂绝尝拥商货于汴洛间见进士缀行而去窃叹曰生子当令如
此因不复行商卜居睢阳娶李氏女生骧风骨秀异唐
曰成吾志矣郡人戚同文以经术聚徒唐携骧诣之且曰唐顷者不辞父母死有余恨今
拜先生即吾父矣且自念不学思教子以兴宗绪此子
虽幼愿先生成之骧十三能属文善词赋唐不识字而罄家产为骧交当时秀彦太平兴
国初诣贡部与吕蒙正齐名太宗尹京颇知之及廷试
擢甲科解褐将作监丞通判益州累迁右补阙历江南转运副使洪吉上供运船水损物
主吏惧罪故覆舟鞠狱者按以欺盗当流死者数百人
骧驰往讯问得其情实以闻多获轻典优诏褒之又上言劫盗配流遇赦得原还本乡讎
告捕者多所杀害自今请以隶军诏可迁正使端拱初
拜主客郎中徙知福州累表求还不俟报入朝召对便殿延问良久以久处外任为辞擢
授右谏议大夫就命知益州召归上言蜀民浮窳易摇
宜择忠厚者抚之为预备既而李顺叛众颇服其先见命知审官院迁御史中丞以疾固
让不许占谢日命坐劳问出良药赐之真宗即位改兵
部侍郎屡求小郡养疾因入朝失仪为御史所纠特诏不问命出知单州咸平二年卒年
五十七赠工部尚书赐其子宗寿出身骧虽无他才略
而人以儒厚长者称之宗寿后为殿中丞

△裴庄

裴庄字端己阆州阆中人在蜀以明经登第归朝历虹县尉高陵主簿本府召权司
理掾转运使雷德骧以威望自任尝巡按至境官属皆
出迎候庄独视事本局徐谒道周德骧称其守徙权忻州录事参军先是忻州恃积军储
条制甚峻掌出纳者尝十余人庄代之独任其事擢授
绛州防御推官提点并岚二州缙帛刍粮改辽州判官仍莅旧局雍熙三年命将巡边以
庄掌随军粮料内客省使杨守一称荐之授大理寺丞
时迁云朔降户于汝洛遣庄安辑之俄通判忻州未上道会魏咸信出镇澶州以通判澶
州改命未踰年咸信表其能迁太子中允端拱初潘美

镇真定又辟为通判时契丹掠赵深边将无功庄上书以为周世宗诛樊爱能何徽二将遂取淮南克巴蜀愿陛下申明纪律无使诸将玩寇又言缘边砦栅戍兵既寡敌易袭取咸请废罢以益州兵会诏建方田庄复上言大役兵师虑生事于边鄙帝善之淳化三年召诏以边事称旨令授清资官翊日拜监察御史荆湖南路转运使未行改三司盐铁判官五年李顺乱蜀命与雷有终并兼陕路随军转运同兵马事或言庄本蜀人不宜任此帝益信之许以便宜事平转殿中侍御史历工部司封二员外郎至道二年遣将五路出师讨李继迁庄阴料师出无功因请加恩继迁俟其倔强拒命则按甲塞外俘擒未晚既而诸将果败绩咸平二年巡抚江南使还言池州兴国军得良吏余无足称且言朝廷所命知州通判率以资考而授至有因循偷安无政术而得亲民之任其素蕴才器有政绩者偶缘公坐则黜司冗务真伪莫辨侥幸滋甚请自今慎选其人勿以资格补授有政绩者加以恩礼是年秋契丹侵边命为河北转运使时傅潜统大军驻定州北庄屡奏其无谋略虑或失机会王显掌枢密显与潜俱起攀附颇庇之庄奏至多不报徙知越州俄傅潜得罪庄因上言显潜皆非材致误边事请行严诛以肃羣议未几徙知宣州会诏求直言庄条列四事一去暴征二省烦刑三择吏职四敦稼政疏奏诏令开陈其所宜行先后庄对甚悉改司封郎中景德初安抚两浙奏能吏二十人慢官者五人多所升黜又知潞邢二州天禧二年改光禄卿告归卒年八十一录其孙庆孙试将作监主簿庄有吏干颇无清操慷慨敢言然寡学术尝建议请置广德院西垣学士闻者嗤之子奂咸平二年进士屯田郎中穆左班殿直合门祗候【按宋史此下有牛冕张适栾崇吉袁逢吉四传俱无事迹足录并从删】

△韩国华

韩国华字光弼相州安阳人太平兴国二年举进士解褐大理评事通判泸州就迁右赞善大夫代还除彰德军节度判官迁著作佐郎监察御史雍熙中假太常少卿使高丽时太宗将北征以高丽接辽境屡为其所侵命赉诏谕之且令发兵西会既至其俗颇犷惊恃险迁延未即奉诏国华移檄谕以朝廷威德宜亟守臣节否则天兵东下无以逃责于是俯伏听命使还历迁左司谏充盐铁判官淳化二年契丹请和朝议疑其非实遣国华使河朔察之既至尽得其诈以闻每岁后苑赏花三馆学士皆得预三年国华与潘太初因对自言任两省清官兼计司职不得侍曲宴愿兼馆职即日命并直昭文馆后二日陪预苑宴三司属官兼直馆自国华等始知河阳潞州转运使言其善绥辑诏奖之景德中假

秘书监使契丹又为江南巡抚入权开封府判官真宗朝陵魏咸信自曹州召入扈从命国华权州事俄改太常少卿出知泉州太中祥符初迁

右谏议大夫四年代还至建州卒于传舍年五十五赠太师中书令兼尚书令追封魏国公【按宋神宗御制韩琦两朝顾命定策元勋之碑

载曾祖太师中书令兼尚书令追封齐燕魏三国公宋史国华传不载赠封今据补】 赐其子琬出身国华伟仪观性纯直有时誉子琚璩琦并

进士及第琦相英宗神宗自有传【按宋史此下有何蒙传无事迹足录今从删】

△慎知礼【慎从吉】

慎知礼衢州信安人父温其有词学仕钱俶终元帅府判官知礼幼好学年十八献书于俶署校书郎未几命为掌书记太祖即位介俶子

惟济入覲归署营田副使太平兴国三年从俶归朝授鸿胪卿历知陈州兴元府知礼母年八十余居宛邱恳求归养退处十年缙绅称其孝至

道三年以工部侍郎致仕知礼自幼至白首岁读五经周而后止每开卷必正衣冠危坐未尝少懈焉咸平初卒年七十七子从吉钱俶之婿也

为元帅府长史归朝历将作少监会择朝士有望者补少列改太子右庶子真宗升储换卫尉少卿真宗即位复为右庶子迁詹事从吉自归朝

居散秩几三十年颇以文酒自娱士大夫多与之游景德初上言求领事务判刑部颇留意法律大中祥符初改授卫尉卿纠察在京刑狱拜右

谏议大夫判吏部铨临事敏速勤心公家所至务皦察多请对陈事帝嘉其无隐八年改给事中权知开封府有咸平县民张斌妻卢氏与侄质

交讼从吉子钧锐纳卢氏贿从吉坐削秩天禧三年起为卫尉卿明年判登闻鼓院坐与寇准善以光禄卿致仕卒年七十从吉善为饌具分遗

权要晚年进趋弥笃以至于败物论鄙之子鏞金部度支员外郎秘阁校理楷太常博士钦定续通志卷三百十七

●钦定续通志卷三百十八 列传一百十八

列传

宋【二十二】

○宋二十二

马全义【知节】 雷德骧【有终 孝先简夫】 王超【德用】

马全义

雷德骧

王超

△马全义

马全义幽州蓟人自幼学击剑善骑射十五隶魏帅范延光帐下延光叛晋祖征之

以城降悉籍所部来上全义在籍中因补禁军不得志
遂遁去汉干佑中李守真镇河中召置帐下及守真叛周祖讨之全义每率敢死士夜出
攻周祖垒多所杀伤守真贪而无谋性多忌克全义屡
为画策皆不能用城陷遂变姓名亡命周广顺初世宗镇澶渊全义往事之从世宗入朝
周祖召见补殿前指挥使谓左右曰此人忠于所事昔
在河中屡挫吾军汝等宜效之世宗即位迁右番行省从战高平以功迁散员指挥使从
征淮南以功迁殿前指挥使右番都虞候恭帝立授铁
骑左第二军都校领播州刺史太祖即位历内殿直都知控鹤左厢都校领果州团练使
从征李筠筠退保泽州城小而固攻之未下太祖患之
召全义问计对曰筠守孤城若并力急攻立可殄灭倘缓之适足长其奸尔太祖曰此吾
心也即麾兵急击之全义率敢死士数十人乘城攀堞
而上为飞矢贯臂流血被体全义拔镞临敌士气益奋遂克其城迁虎捷左镶都校领睦
州防御使又从征李重进领控鹤虎捷两军为后殿贼
平班师录功居多改龙捷左镶都校领江州防御使俄被疾太祖遣太医诊视仍谕密旨
曰俟疾间当授以河阳节制全义疾已亟但叩头谢数
日卒年三十八特赠检校太保大同军节度使子知节

马知节

马知节

知节字子元幼孤太宗时以荫补供奉官赐今名 【按隆平集载全义卒太祖念其
功其子方七岁召见特授供奉官赐名知节据此则
知节授官在太祖时也】 年十八监彭州兵以严莅众众惮之如老将又监潭州兵时何
承矩为守镇以文雅饰吏治知节慕之因折节读书雍
熙间护兵博州契丹入边刘廷让败于君子馆先是知节完城缮甲储积刍粟吏民以为
生事既而契丹果至以有备引去众始服徙知定远军
时议调河南十三州之民 【按宋史樊知古传作调发河南十七州军此作十三军互异
】 输饷河北转运使樊知古适至议事知节曰此军
丁少粟多簸其红腐当得十之六七知古从之果获粟五十万斛分给诸屯遂省河南之
役时部民入保避寇卒有盗妇女首饰者护军止笞遣
之知节曰民避外患而来反罹内寇此而可恕何以肃下即命斩之知深庆二州迁西京
作坊使旋知梓州李顺之叛诏与王继恩同讨贼 【
按李顺乱成都王继恩为西蜀招安使讨之王继恩自有传此作刘继恩误今改】 继恩
恃势自任恶知节不附己遣守彭州付以羸兵三百彭
之旧卒悉召还成都知节累请益兵不从贼众十万攻城知节力战自晨抵晡士多死慨
然叹曰死贼手非壮夫也即横槊溃围出迟明援兵至

复鼓噪入贼遂溃去帝闻而壮之曰贼众我寡知节不易当也授益州钤辖加益汉九州
岛都巡检使会韩景佑帐下刘旰胁牙兵为乱运破州县
众踰二千知节领兵三百追至蜀州与战旰走印州知节曰贼破印州必乘胜渡江薄我
既息而后战官军虽倍制之亦劳不如乘其弊急击之
破之必矣追至方井镇与旰遇杀之无噍类咸平初领登州刺史知秦州州尝质羌酋支
属二十余人踰二纪矣知节曰羌亦人尔岂不怀归悉
遣之羌人感之讫终更不犯塞时州有银坑岁久矿竭课额弗除主吏破产偿之不足知
节请蠲之章三上乃允迁西上合门使知益州兼本路
转运使自干德后岁漕蜀物动踰万计时籍富民以部舟运坐沉覆破产者众知节请以
省校代乡户运舟而程其漕事自是蜀人赖以免患徙
知延州兼鄜延驻泊部署边寇将至方上元节遽命张灯启关累夕宴乐寇不测即引去
会镇州程德元政事旷弛徙知节代之诏发澶魏等六
州粮输定武时兵交境上知节曰粮之来是资盗也止令于舟车所至收之寇无所得而
遁车驾在澶渊时王超拥兵数十万屯真定逗留不进
知节移书诘让之超始出兵犹以中渡无桥为辞知节预命度材一夕而具景德中徙知
宋州未几迁东上合门使枢密都承旨擢拜签书枢密
院事时契丹已盟中国无事大臣方言符瑞知节每不然之尝言天下虽安不可忘战去
兵以为弁自陈年齿未衰五七年间尚可驱策如边方
有警愿预其行但得副都部署名及良马数匹轻甲一联足矣帝以为然因命制铜铁锁
子甲以赐焉进宣徽北院使加兼枢密副使时王钦若
为枢密使知节薄其为人遇事敢言未尝少屈每廷议得其不直辄面诋之钦若宠顾方
隆知节愈不为下天禧初召拜宣徽南院使知枢密院
事以疾乞罢除彰德军留后知贝州兼部署将行真宗闵其癯瘁止命归镇时上党大名
之民已争来迎谒未几卒年六十五赠侍中谥正惠知
节将家子以武力智谋自许又能好书宾友儒者所与善厚必一时豪杰论事蹇蹇未尝
有所顾忌故闻其风者亦知其为正直云

△雷德骧

雷德骧字善行同州合阳人周广顺三年举进士解褐磁州军事判官召为右拾遗
充三司判官太祖即位拜殿中侍御史改屯田员外郎
判大理寺其官属与堂吏附会宰相赵普擅增刑名因上言欲求见太祖以白其事未引
对直诣讲武殿奏辞气俱厉太祖诘之德骧对曰臣值
陛下日旰未食方震威严尔帝怒令左右曳出诏置极典俄怒解黜为商州司户参军刺
史知德骧旧为省郎以客礼之及奚屿知州希宰相旨
至则倨受庭参德骧不能堪出怨言屿衔之适有言德骧至郡为文讪上者屿召德骧与

语潜遣吏给家人取得之即械系德骧具状以闻太祖
贷其罪削籍徙灵武数年其子有邻系登闻鼓诉中书不法事赵普由是出镇河阳召德
骧为秘书丞俄分判御史台三院事又兼判吏部南普
开宝七年同知贡举太平兴国四年车驾征太原为太原西路转运使六年同知京朝官
考课迁兵部郎中七年以公累降本曹员外郎出知怀
州未几复旧官又命为两浙转运使其子殿中丞有终亦为淮南转运使父子同日受诏
搢绅荣之俄迁右谏议大夫雍熙二年征归朝同知京
朝官考课初帝谓宰相曰朕前日阅班籍择官为河北转运使所患不能周知羣臣履行
自今令德骧录京朝官履历功过之状引对既得渐识
羣臣择才委任且使有官政者乐于召对负瑕累者耻于顾问可以为惩劝矣端拱初迁
户部侍郎会赵普再入相宣制之日德骧方正班不觉
坠笏遽上疏乞归田里太宗召见安谕之赐白金三十两罢知考课止以本官奉朝请会
议事尚书省乘酒叱起居员外郎郑构为盗御史奏劾
下御史台案问具状帝止令罚月俸而释之讫赵普出守西洛帝终保全之淳化二年为
其婿如京副使卫濯讼有邻子孝先内乱帝素怜德骧
恶暴扬其丑不以孝先属吏止除名配均州德骧坐失教责授感德军行军司马并其子
少府少监有终责授衡州团练副使德骧因惭愤成疾
二年卒年七十五有终为三司盐铁副使表乞追复旧官从之德骧无文采颇以强直自
任性褊躁多忤物不为士大夫所与有邻开宝中举进
士不第其父既窜灵武意宰相赵普挤抑之时堂后吏胡赞李可度经职岁久或称其请
托受赇而秘书丞王洞与德骧同年登第有邻每造谒
洞洞多以家事委之一日洞令有邻市白金半铤因曰此令吾子知要与胡将军盖谓赞
也时又有招应摄官三任详由全者许投牒有司即得
召试录用有邻素与前摄上蔡主簿刘伟交游知伟虽尝三摄而一任失其解由伟造伪
印令其兄前住士先书写之因是得试遇铨遂具章告
其事并下御史府按鞫有邻出入赞家证其事多实狱具伟坐弃市洞等并决杖除名赞
可度仍籍其家有邻授秘书省正字自是累上疏密告
人阴事俄被病白昼见伟入室以杖捶其背号呼闻于外数日而死

雷有终

雷孝先

雷简夫

雷有终

有终字道成以荫补汉州司户参军时侯陟典选木强难犯选人听署于廷无敢哗
者有终独抗言愿为大郡治狱掾陟叱之曰年未三十

安可任此官有终不为沮署莱芜尉知监左拾遗刘祺视有终年少颇易之有终发其奸
赃祺坐罪杖流海岛以有终代知监事先是三司补吏
为治官率以货进多恣横至是受署者惮有终率多避免太宗即位闻其名遣内侍伍守
忠同掌监事且察其治迹守忠至裁周月即还奏有终
强济之状亟诏为大理寺丞会德骧任陕西转运奏为解州通判特许德骧不巡察是州
有终入奏盐池利害改赞善大夫令还权知军事省通
判太平兴国六年迁殿中丞知密州徙淮南转运副使时德骧主簿两浙往往省于境土
时人荣之雍熙中王师北征命为蔚州飞狐路随军转
运使入为盐铁判官历户部度支副使出知升州淳化初就迁少府少监知广州二年以
女弟婿卫濯讼坐亲累责授衡州团练副使夺章服俄
丁外艰行及许田召归入对起为都官员外郎历度支盐铁副使复金紫时以江南岭外
茶盐价不一细民冒禁私贩多陷重辟诏有终领江淮
两浙荆湖福建广南路茶盐制置使就出盐产茶之地以便宜裁制使还改工部郎中知
大名府不踰月复为少府少监徙知江陵李顺之乱王
师西征命与裴庄为峡路随军转运使同知兵马事调发兵食规画戎事皆有节制师行
至峡中遇盗格鬪且行且战进至广安军垒濒江三面
树栅会夜阴晦贼众奄至鼓噪举火士伍恐惧有终安坐栲发自若贼围既合引奇兵出
其后击之贼众惊扰赴水死者无算就拜右谏议大夫
知益州次简州寓佛舍度贼必至命左右重闭召土人严更警备初夕间道而出贼围守
数重及坏寺人惟击柝者在焉俄兼同招安使贼平移
知许州改知并州真宗嗣位加工部侍郎代还知审刑院授户部使咸平二年将巡师大
名【按宋史真宗本纪载咸平二年十二月帝亲御
契丹甲寅驾发京师甲子次大名本传作三年误今改】遣有终乘驿先诣澶州督纳粮
草车驾还次德清军会益州奏神卫戍卒以正旦窃发
害兵马候辖符昭寿拥都虞候王均为乱逐知州牛冕即日拜有终泸州观察使知益州
兼川峡两路招安捉贼事御厨使李惠洛苑使石普供
备库副使李守伦并为招安抚检使给步骑八千命往招讨又以洺州团练使上官正为
东川都钤辖西作坊使李继昌为峡路都钤辖崇仪副
使高继勋王阮并为益州驻泊都监供奉官合门祗候孙正辞为诸州都巡检使正月三
日均率众陷汉州进攻绵州旬日不能下趣剑门先是
知剑州秘书丞李士衡度寇必至城不能守悉徙官帑保剑门焚其仓廩及署榜招军卒
之流逸者得数十人已而贼果至士衡与剑门都监左
藏库副使裴臻逆击之时风雪连日均众无所掠惟食败糟臻与战斩首数千级贼众疲
剧宵遁还保益州士衡即驰骑入奏帝嘉之拜士衡度

支员外郎臻崇仪使领峰州刺史仍旧职知蜀州供奉官合门祗候杨怀忠闻变即调乡丁会十一路巡检兵刻期进讨十七日怀忠率众入益州焚城北门至三井桥时均尚留剑门与贼将鲁麻胡阵于江渚庙前自晨至晡战数合怀忠兵势不敌退还所部怀忠部下多李顺旧党颇贪剽劫故败绩焉怀忠移文嘉眉七州调军士丁男来会二月再攻益州时均方遣逆党赵延顺攻邛蜀怀忠逆与之战贼稍怀忠与转运使陈纬麾兵由子城南门直入军资库与纬署其库钥均众皆银枪绣衣为数队分列子城中贼兵出通远门与怀忠战数合会暮怀忠复退军笮桥背水列阵砦楮木桥南以扞邛蜀之路贼故不复能南略自清水坝温江金马三道来攻楮木砦出官军后焚江原神祠断邛蜀援路怀忠三路分兵以抗之斩首五百余级驱其余众入阜江获甲弩甚众乘胜逐贼至益州南十五里砦于鸡鸣原以俟王师均亦闭成都东门以自固是月有终等至令石普先与绵汉都巡检张思钧收复汉州进壁升僊桥贼出攻砦有终击走之一日均开城伪为遁状有终与上官正石普率兵径入官军分剽民财部伍不肃贼闭关发伏布床榻于路口官军不得出因为所杀有终等缘堞而坠李惠死之退保汉州益州城中民皆奔迸四出复为贼党分骑追杀或囚系之支解族诛以恐众又胁士民僧道之少壮者为兵先刺手背次髡首次黥面给军装令乘城与旧贼党相间有终署榜招之至则署其衣袂释之日数百人三月进攻弥牟砦斩首千余级复为贼所拒四月贼由升僊桥分路来寇并军于东偏有终率兵逆击败之杀千余人夺其伞盖金枪等物均单骑还城有终遣其子奉礼郎孝若驰奏帝召孝若问败贼之由笑谓左右曰均鼠窃尔虽婴城自守计日可擒矣孝若因言尝习武艺愿改秩以效即补供奉官俄以刑部员外郎马亮为转运使国子博士张志言副之供备库副使张晌为绵汉都巡检使杨怀忠又分所部砦于合水尾浣花等处树机石设箠篱以拒之贼自升僊之败彻桥塞门官军进至清远江为梁而渡有终与石普屯于城北门之西依壕为土山分设鹿角又得旧章场造梯冲洞车攻具普专主之高继勋张晌孙正辞攻城东上官正李继昌王阮攻城西杨怀忠与巡检殿直合门祗候马贵攻城南贼将赵延顺尽驱凶党以拒既而延顺中流矢死又遣其党丁重万立城门上官军射之殪每攻城辄会雨城滑不能上官军及丁夫为洞屋以进贼又凿地道出掩之溺濠中死者千余军势小衄时方暑湿军士多疾有终市药他州疗之是月诏洛苑使秦翰为两川捉贼招安使有终与翰叶议于城北鱼桥又筑土山八月克城北羊马城遂设雁翅敌棚覆洞屋以进逼罗城九月城北洞屋

成贼对设敌楼以抗官军有终遣卒焚之贼复筑月城以自固有终募敢死士间道以入
贼为药矢中者立死卒皆蒙毡秉燧悉焚其望櫓机石
先遣东西南砦鼓噪攻城有终与石普分主洞屋以进普穴城为暗门门成贼攒戟于前
无敢进者有二卒请行许以厚赏乃麾戈直冲之贼锋
稍却遂入城有终登城楼下瞰贼之余众犹砦天长观前于文翁坊密设炮架高继勋白
于马亮请给秸秆油■〈米凡〉众执长戟巨斧秉炬
以进悉焚之杨怀忠焚其砦天长观前追至大安门复败焉是夕二鼓均与其党二万余
南出万里桥门突围而遁有终疑有伏遣人纵火城中
诘朝与秦翰登门楼牙吏有受伪署官职者捕得立楼下榜积薪厝火其上索男子魁壮
者令辨之曰某尝受某职即命左右摔投火中自晨至
晡焚死者数百人时谓冤酷均既走度合水尾由广都略陵荣趣富顺监所过断桥塞路
焚仓库而去初有终遣怀忠领虎翼军追之后二日石
普继往以全军为后援十月均至富顺其将校以筏度江趋戎泸蛮境朝廷每岁孟冬朔
诏富顺监具酒肴犒内属蛮酋是日裁设具而均党适
至皆食焉闻怀忠追骑将至均心易之谓其党曰速降怀忠令其众负担以行怀忠距富
顺六十里于杨家市少憩贼众在后者邀战怀忠遣骑
士历高原覘贼且语其左右曰纵贼渡江后悔无及闻石侯将至当以奇兵取之乃临江
列阵击之余党散走有拏舟将渡江而遁者怀忠合强
弩射之溺死甚众怀忠张旗鸣鼙入城均方在监署中其众多醉均穷蹙缢死虎翼军校
鲁斌断其首诣怀忠获僭伪法物旌旗甲马甚众擒其
党六千余人逆徒歼焉怀忠旋军出北门普众方至夺均首驰归成都梟于北市均本隶
开封散从直后补军校初神御军之戍成都者以均及
董福分二指挥以领之福御众有法部下皆优足均纵其下饮博军装亦以给费是岁车
驾幸河朔符昭寿与牛冕大阅于东郊蜀人趋视之二
军衣服鲜弊不等均众因是惭愤益州知州与钤辖二廨并禁旅为牙队岁除冕以酒肴
犒部士而昭寿既骄恣复肆侵虐冕亦宽弛无政故诘
朝合起为乱神卫卒既杀昭寿是日成都官吏方相与贺正闻变皆奔窜牛冕与转运张
适縋城而出惟都巡检使刘绍荣冒刃格鬪既而众寡
不敌叛卒尚未有主或欲奉绍荣为帅者绍荣摄弓骂曰我燕人也比弃乡土来归本朝
岂能与汝同逆汝亟杀我我肯负朝廷哉众未敢动监
军王泽与均适至乃谓均曰汝所部为乱盍自往招安均既往叛卒即拥之为王绍荣自
经死均僭号大蜀改元化顺署置官称设贡举以张锴
为谋主锴本名美太原旧卒后为神卫小校狡狴尝历战阵粗习阴阳以荧惑同恶故劝
均为乱均实戇懦无谋尝言官军若至我当先路出迎

自陈被胁之状锠闻之择军中子弟署寄班以防守均令不与人接见官军围城每射箭招诱及令均子弟至城下均皆不之知得箭书锠悉焚之自起至败所守止一城而已均初署亲军为天降虎翼后果为虎翼军所杀贼既平遣承受供奉官杨崇勋乘传告捷赐崇勋锦袍银带器币有终加保信军节度观察留后以秦翰为内园使恩州刺史石普为益州团练使高继勋王阮并为崇仪使孙正辞为内殿崇班李继昌为奖州刺史张昉为供备库使杨怀忠为供备库副使马贵为供奉官是役也怀忠之功居最为石普所忌朝廷微闻之遣寄班安守忠按视战所尽得其功状以故怀忠复迁崇仪使领恩州刺史四年有终代还命为泾原仪渭镇戎路都部署辞不拜改知永兴军府 【按长编载有终以平贼功进保信军留后代还知永兴军宋史本传祇云怀忠迁崇仪使倾恩州刺史有终代还改知永兴不载以功进留后事】 徙秦州景德初徙为并代副都部署契丹入侵帝幸澶渊诏有终率所部由土门抵镇州与大兵会既而王超桑赞逗挠无功惟有终赴援威声甚振河北列城赖其雄张俄而契丹修好命还屯所就判并州召拜宣徽北院使检校太保二年暴疾卒年五十九赠侍中录其子孝若为内殿崇班合门祇候孝杰为内殿崇班孝绪为供奉官孝恭为侍禁亲族门客给事辈迁补者八人有终倜傥自任不拘小节有干局沈敏善断不畏强御轻财好施历典藩阃能抚士卒丰于宴犒官用不足则倾私帑及榷钱以给之家无余财奉身甚薄常所御者铜鞍勒马而已第在崇仁里者德骧所创有终在蜀尝贷备用库钱数百万奏纳其第偿之优诏蠲免为宣徽使特给廉镇公用钱岁二千贯身没之日宿负犹不啻千万官为偿之王继英在枢密颇忌有终进用屡言其在蜀及守边厚费以收士卒心真宗不之信卒保护焉

雷孝先

孝先字子思有邻子举进士试秘书省校书郎知天长县以卫濯讼其内乱除籍配均州后复知宛邱县李继隆判陈州荐其能加试大理评事契丹入侵真宗幸大名孝先以部刍粮河北首至行在擢太常寺奉礼郎王均反益州随季父有终进讨孝先率先锋与贼战升僊桥斩首数百得均金枪黄伞以献改将作监丞李继迁陷灵州朝廷调兵军费多出于民关内大扰孝先请益募商人入粟塞下偿以茶盐召对称旨命驰驿陕西与转运使郑文宝议立规画事多施行累迁尚书屯田员外郎尝请置三司拘收司以检天下财利出入之数诏如其请知兴元府坐保任失实降通判华州徙知郢州宰相寇准举换内园使知贝州会慈州民张熙载诈称黄河都总管籍并河州郡刍粮数至贝州孝先觉其奸

捕系狱孝先欲因此为奇功以动朝廷迫司理参军纪瑛教熙载伪为契丹谋者部送京
师枢密院按得孝先所教状谪泽州都监后迁领军卫
大将军昭州刺史分司西京卒子简夫

雷简夫

简夫字太简隐居不仕康定中枢密使杜衍荐之召见以秘书省校书郎签书秦州
观察判官时三白渠久废京兆府遂荐简夫治渠事先
时治渠岁役六县民四十日用梢木数百万而水不足简夫用三十日梢木比旧三之一
而水有余知坊州徙阆州用张方平荐知雅州既而辰
州蛮酋彭士羲内寇三司副使李参侍御史朱处约安抚不能定继命简夫往至则督诸
将进兵筑明溪上下二砦据其险要拓取故省地石马
崖五百余里士羲内附擢三司盐铁判官以疾知虢同二州累迁尚书职方员外郎卒录
其子爵臣为郊社斋郎

△王超

王超赵州人弱冠长七尺余太宗尹京召置麾下及即位以隶御龙直淳化二年累
迁至河西军节度使殿前都虞候真宗嗣位以翊戴功
加检校太傅领太平军节度咸平二年大阅禁兵二十万于东郊超执五方旗以节进退
帝御戎幄观之面赐褒奖从幸大名与都虞候张进并
为先锋都大点检傅潜逗挠得罪以超为侍卫马步军都虞候镇州行营都部署又帅镇
定高阳关三路与契丹战于遂城西俘馘二万计斩其
裨王骑将十五人李继迁陷清远军超将西面行营之师御之徙帅永兴军宰相言超材
堪将帅遂以超帅定州路行营王继忠副之寻加镇定
高阳关三路都部署密遣中使赐以御弓矢许便宜从事加开府仪同三司检校太尉咸
平六年辽师大入超召镇州桑赞高阳关周莹率兵会
定州莹以非诏旨不至辽兵围望都超赞率兵赴之阵于县南六里继忠在阵东偏契丹
出其背遮绝粮道人马乏困继忠驰前与契丹战超赞
遂旋师继忠孤军没焉帝即遣刘承珪李允则驰往察退衄之状且言镇州副部署李福
拱圣军都指挥使王升当战先旋福坐削籍流封州升
决杖配隶琼州景德初帝亲巡澶渊召超赴行在复缓师期契丹遂深入会南北通好故
薄其责止罢超三路帅为崇信军节度使徙知河阳又
移镇建雄知青州卒赠侍中再赠尚书令追封鲁国公谥武康超为将善部分御下有恩
与高琼同典禁旅尝休假他适过营垒军校不时将迎
琼即命捶罚超以为非公行不当加罪人称其忽然临军寡谋拙于战鬪子德用

王德用

王德用

德用字符辅幼从父补衙内都指挥使至道二年分五路出兵讨李继迁超帅兵六万出绥夏德用年十七为先锋将万人战铁门关斩首十三级俘掠畜产以数万计进师乌白池诸将多失道不至敌甚锐超按兵不进德用请乘之以精兵五千转战三日敌势却德用曰归师迫险必乱乃领兵距夏州五十里绝其归路下令曰乱行者斩一军肃然超亦为之按辔继迁蹶其后左右望见队伍甚严整莫敢近超抚其背曰王氏有子矣累迁内殿崇班以御前忠佐为马军都军头出为邢洺磁相巡检盗张洪霸相聚界上吏不能捕德用以毡车载勇士诈为妇人饰过邯鄲贼果来邀勇士奋出悉禽之徙督捕陕西东路盗贼相戒曰此禽张洪霸者皆相率逃去为环庆路指挥使寻以奏事忤旨责授郢州马步军都指挥使天圣初以博州团练使知广信军城坏久不治德用率禁军增筑之有诏褒谕召还又为并代州马步军副都总管迁殿前都虞候步军副指挥使历桂州福州观察使章献太后临朝有求内降补军吏者德用曰补吏军政也不可与太后固欲举之卒不奉诏乃止太后崩有司请卫士坐甲德用曰非故事也不奉诏仁宗阅太后合中得德用前奏军吏事奇之以为可大用拜检校太保签书枢密院事德用谢曰臣武人幸得以驰驱自効赖陛下威灵待罪行间足矣且臣不学不足以当大事帝遣使者趣入院遂为副使久之以奉国军节度观察留后同知院事迁知院历安德军加检校太尉定国军节度使宣徽南院事赵元昊反德用请自将讨之不许德用状貌雄毅面黑颈以下白皙人皆异之言者论德用貌类艺祖 【按东都事略作翰林学士苏绅语】 御史中丞孔道辅继言之谓德用得士心不宜久典机密遂罢为武宁军节度使徐州大都督府长史有言德用市马于府州者上其券乃市于商人者言者犹不已降右千牛卫上将军知随州州置判官家人皆惶恐德用举止言色如平时惟不接宾客而已徙知曹州或谓德用曰孔中丞害公今死矣德用曰中丞言官岂害我者朝廷亡一忠臣可惜也起为保静军节度观察留后知青州改澶州陕西用兵久无功契丹遣刘六符来求复关南地以兵压境德用见帝流涕言臣前被罪陛下赦而不诛今不足辱命帝慰劳曰河北方警藉卿镇抚之又赐手诏慰勉拜保静军节度使岁大熟六符见德用拜曰此公仁政所及也徙真定府定州路都总管还奏事复以宣徽南院使判成德军未行徙定州路都总管日训练士卒久之士殊可用契丹使谍者来覘或请捕杀之德用曰第舍之彼得实以告是服人之兵以不战也明日大阅援桴鼓之士皆踊跃进退坐作终日不戮一人乃下令具糗粮听吾鼓声视吾旗帜所向覘者归告契丹

谓汉兵将大入既而复议和遂徙陈州又徙河南不行入奉朝请出判相州拜同中书门下平章事判澶州徙郑州封祁国公还为会灵观使德用素善射虽老不衰侍射瑞圣园辞曰臣老矣不能胜弓矢帝再三谕之持二矢未发帝顾之使必中乃收弓矢谢一发中的再发又中帝笑曰德用欲中即中尔孰谓老且衰乎赐裘衣金带加检校太师复判郑州徙澶州改集庆军节度使封冀国公皇佑三年上疏乞骸骨以太子太师致仕大朝会缀中书门下班德用将家子习知军中情伪善以恩抚下故多得士心虽屡临边境未尝亲矢石督攻战而名闻四夷闾阎妇女小儿皆呼德用曰黑王相公帝尝遣使问边事德用曰咸平景德中赐诸将阵图人皆死守战法缓急不相救以至于屡败诚愿不以阵图赐诸将使得应变出奇自立异効帝以为然德用虽致仕干元节上寿预班廷中契丹使语译者曰黑王相公乃复起耶帝闻之起为河阳三城节度使同中书门下平章事判郑州至和元年遂以为枢密使命入谒拜明年富弼相契丹使耶律防至德用与防射玉津园防曰天子以公典枢密而用富公为相将相皆得人矣帝闻之赐弓一矢五十后封鲁国公求去位至六七乃以为忠武军节度使景灵宫使又以为同羣牧制置使有诏五日一会朝听子孙一人扶掖卒年七十九赠大尉中书令谥武恭加赐其家黄金德用诸子中咸融最钟爱晚年颇纵之多不法后更折节自饬官至左藏库使眉州防御使

钦定续通志卷三百十八

●钦定续通志卷三百十九 列传一百十九

列传

宋 【二十三】

○宋二十三

傅潜	【张昭允】	王汉忠	王能	张凝	魏能	陈兴
许均	李重贵	呼延赞	刘用			
耿全斌	周仁美	田绍斌	杨琼	钱守俊	徐兴	王杲
	白守素	张思钧				

傅潜

王汉忠

王能

张凝

魏能

陈兴

许均
李重贵
呼延赞
刘用
耿全斌
周仁美
田绍斌
杨琼
钱守俊
徐兴
王杲
白守素
张思钧
△傅潜

傅潜冀州衡水人少事州将张廷翰太宗在藩邸召置左右即位隶殿前左班厯东西班指挥使征太原一日再中流矢又从征范阳先至涿州与契丹战生擒五百余人翌日上过其所见积尸及所遗器仗嘉叹之师旋擢为内殿直都虞候帝对枢密言潜从行有劳赏薄三迁至日骑天武左右厢都指挥使领云州防御使雍熙二年命大将曹彬北征以潜为幽州道行营前军马步军都指挥使师败于拒马河责授右领军卫大将军自检校司徒降为右仆射仍削功臣爵邑明年起为内外马步都军头领潘州防御使自端拱初至至道中数被迁转出为延州路都部署改镇州真宗即位领忠武军节度召还咸平二年复出为镇定高阳关三路行营都部署契丹大入缘边城堡悉飞书告急潜麾下步骑凡八万余咸自置铁挝铁锤争欲奋击潜畏懦无方略闭门自守将校请战者则丑言骂之无何契丹破狼山砦悉锐攻威虏略宁边军及祁赵游骑出邢洺镇定路不通者踰月朝廷屡间道遣使督其出师会诸路兵合击范廷召桑赞秦翰亦屡促之皆不听廷召等怒因诟潜曰公恇怯乃不如一姬尔潜不能答都钤辖张昭允又屡劝潜潜笑曰敌势如此吾与之角适挫吾锐气耳然不得已分骑八千步二千付廷召等于高阳关逆击之仍许出兵为援洎廷召等与契丹血战而潜不至康保裔遂战死及车驾将亲征又命石保吉上官正自大名领前军赴镇定与潜会潜卒逗遛不发致敌骑犯德棣渡河湊淄齐劫人民焚庐舍帝驻大名而边捷未至且诸将屡请益兵潜不之与有战胜者潜又抑而不闻帝繇是

大怒乃遣高琼单骑即军中代之令潜诣行在至则下御史府命钱若水同劾按一夕狱具百官议法当斩从驾羣臣多上封请诛之帝贷其死
诏削夺潜在身官爵并其家属长流房州潜子内殿崇班从范亦削籍随父流所仍籍没其赀产五年会赦徙汝州景德初起为本州岛团练副使
改左千牛卫上将军分司西京大中祥符四年车驾西巡至洛因命从驾还京迁左监门大将军还其宅久之判左金吾街仗天禧元年卒 【
按宋史此上有王继忠传考继忠官定州路副都部署战陷契丹赐名耶律显忠又改名忠信历封王爵其后继忠附表力请召还中朝真宗以
誓书约各无所求赐诏谕意史称南北息兵继忠与有力焉与甘心委质二姓者有别且辽史已为立传其与契丹战事亦附见王超传中此从
删】

张昭允

张昭允

张昭允字仲孚卫州人以父秉荫试大理评事潘美妻以女奏换右班殿直以久次迁通事舍人端拱初契丹内侵命为雄州监军敌骑乘
秋掠境上昭允与知州田仁朗选锐卒袭其帐败走之进西上合门副使提总左右藏金
银钱帛昭允以诸州绢常度外长数尺请裂取付工官
备他用岁获羨余既而士卒受冬服度之不及程出怨言昭允坐免官俄起为崇仪副使
累迁西上合门使河西马步军钤辖屯石州会讨李继
迁王超出夏绥州路领后阵超深入数百里踰白池道阻粮绝昭允以所部援之戎人大
败真宗即位以昭允章怀皇后姊婿颇被亲信咸平二
年命为镇定高阳关行营马步都钤辖时傅潜为都部署畏懦城守昭允屡劝其出兵潜
按兵不动潜既得罪昭允亦削夺官爵长流道州景德
二年起为楚州团练副使改右神武将军大中祥符元年卒昭允喜笔札习射晓音律子
正中居中 【按宋史此下有戴兴传无事迹足录今
从删】

△王汉忠

王汉忠字希杰徐州彭城人少豪荡有膂力形质魁岸善骑射节帅高继冲欲召至
帐下汉忠不往因殴里中少年遂西至京师太宗在藩
邸召见奇其材力置左右即位补殿前指挥使迁内殿直都知从征太原先登流矢中眸
战益急帝壮之端拱初累迁侍卫马军都虞候领洮州
观察使高阳关副都部署契丹南侵汉忠合诸军击败之淳化中徙定州迁殿前都虞候
真宗即位自中山召归复出为高阳关都部署进领威
塞军节度咸平三年契丹掠中山汉忠率诸将阵于野契丹遁追斩甚众获其贵将加殿

前副都指挥改领保静军节度五年罢西面经略使命
汉忠为邠豳环庆两路都部署李允正宋沆为钤辖领戍兵二万五千人委汉忠分道控制数月召还坐违诏无功责左屯卫上将军出知襄州
常奉外增岁给钱二百万未上道暴得疾卒赠太尉汉忠有识略军政严肃性刚果不务小节轻财乐施好读书颇能诗喜儒士待宾佐有礼名称甚茂以是自矜尚羣帅多不悦子从吉后因诣阙上书坐除名配随州

△王能

王能广济定陶人初事州将袁彦太宗在晋邸召置左右即位补内殿直累迁至前右班都虞候兼御前忠佐马步军都军头咸平初自捧
日右厢都指挥使出为济州团练使知静戎军建议决鲍河断长城口北注雄州塘水为戎马限方舟通漕以实塞下又开方田尽戎顺安之境
契丹来侵能击走之初真宗询军校勤勇者委以方面因语宰相曰闻王能魏能颇宣力公家陈兴张禹班亦有声于时才固难全拔十得五亦
有助也景德初擢本州岛防御使与魏能张凝并命出为邢洺路都部署俄改镇定高阳关三路行营都部署大中祥符二年诏合镇定两路部署
为一命能领之明年召入为侍卫步军副都指挥使领曹州观察使祀汾阴留为京城巡检兼留司殿前司事礼成加领振武军节度复为镇定
副都部署兼知定州八年表求入覲许之先是节帅陛见必饮于长春殿掌兵者则不预至是特令用藩臣例有司言能既赴坐则殿前马军帅
皆当侍立繇是特令诸帅预坐自是掌兵者率以为例天禧二年制授彰信军节度罢军职赴镇以地近其乡里宠之也明年卒年七十八赠太尉录其子守信等官

△张凝

张凝沧州无棣人少有武勇倜傥自任乡人赵氏子以材称凝耻居其下因挟弓与角胜负约筑土百步射之凝发一矢洞过矢激十许步
抵大树而止观者叹服节帅张美壮之召置帐下太宗在藩邸闻其名以隶亲卫即位补殿前指挥使稍迁散祗候班都虞候淳化初以其有材
干与王斌王宪并授洛苑使凝领绣州刺史出为天雄军驻泊都监移贝州改高阳关行营钤辖六宅使真宗践祚加庄宅使迁北作坊使咸平
初契丹南侵凝率所部兵设伏于瀛州西出其不意腹背奋击挺身陷敌凝子昭远年十六从行即单骑疾呼突入阵中所向披靡掖凝以出明
年契丹兵大至车驾幸大名凝与范廷召于莫州东分据要害断其归路契丹宵遁凝纵兵击之尽夺所掠生口资畜邠豳环庆灵州路副部署
兼安抚使时斥堠数扰转运使刘综惧飞挽不给问计于凝凝曰今当深入因敌资粮不

足虑也乃自白豹镇率兵入敌境生擒贼将烧荡三日
余帐刍粮八万斩首五千余获牛马器甲二万降九百余人庆州蕃族和尔嘉木等桀黠
难制凝袭破之又熟户与生羌错居颇为诱胁凝引兵
至八州原分水岭柔远镇降和卓等百七十余族合四千户边境获安就加益州团练使
景德初迁本州岛防御使代杨嗣为定州路行营副都署
徙保州驻泊又兼北面安抚使时王超为总帅以大兵顿中山朝议择凝与魏能田敏杨
延昭分握精骑俟契丹至深入以牵其势超尝请四人
悉隶所部帝以本设奇兵挠敌之心腹若复取裁大将则无以责效乃令凝等不受超节
度时魏能逗挠退保城堡众皆愤悻责让能凝独默然
或问之凝曰能羸材险愎既不为诸君所容吾复切言之使其心不自安非计也帝闻而
嘉其有识车驾观兵澶渊凝率众抵易州既而契丹受
盟北归所过犹侵剽不已遂以凝为缘边安抚使提兵蹶其后契丹乃不敢掠夺改高阳
关部署明年议劳就加殿前都虞候卒凝忠勇好功名
累任西北善训士卒缮完器仗前后赏赐多以犒师家无余资京师无居第真宗悼惜之
赠彰德军节度使遣中使护丧还京官给葬事厚恤其
家子昭远

△魏能

魏能郢人少应募隶云骑军后选补日骑左射又隶殿前班七迁散员左班都知旧
制诸军辞见才器勇敢或迥异出羣者许将校交举以
任使毋枉其志能时未有举者太宗曰能材勇过人朕可自保由是进用之端拱二年加
御前忠佐马军副都军头历殿前左班都虞候领溪州
刺史加秩转马步军都军头咸平三年真拜黄州刺史明年为镇定高阳关三路前阵钤
辖五年知郑州团练使复任威虏军契丹入侵能当城
西与诸将合战无惮色大败其众斩首二万级契丹统军铁林公来薄阵能发矢殪之并
其将十五人夺甲马兵械益众契丹复入能率州军逆
战南关门遣其子政与都监刘知训间道抵敌行势战数十合破走之获器甲十八万契
丹尝谋内侵能侦知即发兵逆击生擒酋帅殄灭殆尽
六年改威虏军部署知军事能建言戍卒逸边境者请没其妻与子为奴婢帝虑严迫听
缓期自新违以法坐会浚静戎顺安军营田河道以扼
敌冲 【按长编载咸平六年七月甲寅召辅臣于便殿帝曰今北河已屯大兵而边将屡
奏敌未有隙且聚军虚费则民力何以充给朕切思
之不若因有所置制以为控扼之利静戎顺安军先开营田河道可以扼黑口三台小李
路又得通漕极边当今乘此开浚使及军城敌或挠我
役即合兵击杀此第言浚顺安军营田河道不及静戎今据增】 徙莫州路部署时石普

屯兵顺安之西境诏能与杨延昭田敏犄角为备景德
初破契丹于长城口追北遏阳山复以所部御寇于顺安召拜防御使复出为盩边军路
部署诏推能果略再任以威虜使副精兵伺敌动止边
人百余掠居民树蕃僧为帅能与田敏杨勋合兵设伏击之擒其帅贼来逼城能出兵拒
之少衄即却阵入城张凝以兵击却之会诏能与凝领
偏师分道入幽易牵制契丹之势能畏懦不前且不戢所部多俘夺人马俄徙屯定州及
遣凝蹶迹北行能羸险自度无功心愧出怨辞以讷闻
朝议谓能刚猾少检不可专任乃命綦政敏为钤辖俾同职焉明年师还大名时王能曹
璨各领兵归阙钤辖孙全照遣能璨之师由北门分道
先人能师继之能怒全照后已疾驱竟入全照射之能夺全照弓以去翌日诣判府王钦
若诬全照射伤押队合门杨凝词颇纷竞全照密疏能
摧兵退缩师缓失期及师旋不整状帝怒其逗遛会全照奏乃质实于张凝白守素等即
责授右羽林将军出为巩县都监明年以自陈特改官
右骁卫大将军虢州都监累迁加领康州团练使大中祥符八年卒录其子正为合门祗
候靖为三班奉职

△陈兴

陈兴澶州卫南人开宝中应募为卒得隶御龙右直端拱中累迁御前忠佐步军副
都军头王超为并代部署奏兴随军遣戍汾州明年李
继隆行营河西兴隶麾下克绥夏银州继隆命权知夏州寻还屯所受诏提辖河东缘边
城池器甲刍粮至道初继隆荐其材干召补御龙弩直
都虞候咸平初为马军都军头领蒙州刺史三年真授宪州刺史知霸州会城绥州诏与
钱若水往视利害事具若水传又徙泾原仪渭镇戎军
部署上言镇戎军去渭州瓦亭砦七十余里中有二堡请留兵三百戍之俄与曹玮秦翰
领兵抵镇戎军西北乌延咸泊川掩击蕃寇章密族帐
获甚众继迁所部哈努勒族往岁钞劫灵州援粮恃险与众尤桀黠难制复与秦翰等合
兵进讨穷其巢穴尽焚掘其窖藏复诏褒之仍加赐赉
景德三年迁本州岛团练使知徐州兴起行伍有武略所至颇着声绩真宗言军校之材
必以兴为能大中祥符初召为龙神卫四厢都指挥使领
登州防御使出为邠盩环庆路副都部署兼知邠州坐擅释劫盗罢军职改徐州防御使
知怀州六年卒

△许均

许均开封人建隆中应募为龙捷卒征辽州以功补武骑十将开宝中迁武骑副兵
马使从曹彬征金陵军众陷水砦流矢贯手改本军使
从征河东攻隆州城先登陷之中八创迁副指挥使前后屡被赏赉出屯杭州妖僧绍伦

结党为乱均从巡检使周莹悉擒杀之端拱初补指挥使从李继隆秦翰赴夏州擒赵保忠令均率兵卫守改龙卫第四指挥使俄屯夏州贼来犯境一日十二战走之又从石普击贼于原州牛栏砦普表上其功迁第三军指挥使咸平初以御前忠佐马军都军头戍秦州王均之乱遣乘传入蜀隶雷有终麾下守鱼桥门又从秦翰追杀贼党于广都降其众七千余驿召授东西班都虞候领顺州刺史五年稍迁散员都虞候尝召见访以北面边事翌日真拜磁州刺史深州兵马钤辖六年改泾州驻泊部署数月知镇戎军尝出巡警至陇山木峡口真宗以其无故离城虑有狂寇奔突诏书戒敕俄以其不明吏治用曹玮代之徙为邠州驻泊部署改永兴军部署车驾将幸澶渊诏均与知府向敏中及凤翔梁鼎同提总陕西诸州巡检捕盗事时有王长寿者本亡命卒聚徒百余是春抵陈留剽劫县民捕之不获朝廷遣使益兵逐之澶濮间会契丹南侵夹河民庶惊扰长寿结党愈众人皆患之均至胙城长寿拥众五千余入县钞掠均部下徒兵杨袒与鬪均以方略诱之生擒长寿斩获其党皆尽帝以方御敌未欲因捕贼奖均但赏均部下卒被伤者赐帛迁级焉明年追叙前劳擢为本州岛团练使寻出知代州四年均被疾以米锐代还未至而均卒录其子怀忠为奉礼郎怀信为侍禁幼子怀德自有传 【按宋史此下有张进传无事迹足录今从删】

△李重贵

李重贵孟州河阳人姿状雄伟善骑射少事寿帅王审琦颇见亲信以甥妻之补合流镇将镇有羣盗以其尚少谋夜入劫钞重贵知之即筑栅课民习射盗闻之溃去太宗在藩邸知其勇干召隶帐下即位补殿前指挥使迁捧日右厢都指挥使领蛮川防御使至道二年出为卫州团练使未行会命将五路讨李继迁以重贵为麟府州浊轮砦路都部署得对便殿因言贼居沙碛中逐水草牧畜无定居便战鬪利则进不利则走今五路齐入彼闻兵势太甚不来接战且谋远遁欲追则人马乏食将守则地无坚垒贼既未平臣辈何颜以见陛下太宗善之出御剑以赐又累遣使抚劳既而诸将果无大功及还命为代并副都部署真宗即位加本州岛防御使徙高阳关行营副都部署咸平二年契丹南侵议屯兵杨曠张凝领先锋遇敌重贵率策应兵酣战全军而还范廷召自定州至遇契丹兵交战康保裔大阵为敌所覆重贵与凝赴援腹背受敌自申至寅力战却敌时诸将颇失部分独重贵与凝全军还屯凝议上将士功状重贵喟然曰大将陷没而吾曹计功何面目也帝闻而嘉之明年以劳进阶及食邑徙知贝州召至劳问复遣入郡是冬徙沧州驻泊副都部署兼知州事

以疾求还京就药医既愈连为邢州天雄二部署又知冀州景德初车驾幸澶渊召还为大内都部署明年出知郑州以疾甚授左武卫大将军领潘州防御使改左羽林军大将军致仕大中祥符三年卒

△呼延赞

呼延赞并州太原人少为骁骑卒太祖以其材勇补东班长入承旨迁骁雄军使从王全斌讨西川身当前锋中数创以功补副指挥使太平兴国初太宗亲选军校以赞为铁骑军指挥使从征太原先登乘城及堞而坠者数四面赐金帛奖之七年从崔翰戍定州翰言其勇擢为马军副都军头稍迁内员寮直都虞候雍熙四年加马步军副都军头尝献阵图兵要及树营砦之策求领边任召见令之作武艺赞具装执鞭驰骑挥铁鞭枣槊旋绕廷中数四又引其四子必兴必改必求必显以入选舞剑盘槊赐白金数百两及四子衣带端拱二年领富州刺史俄与辅超并加都军头淳化三年出为保州刺史冀州副都部署至屯所以无统御材改辽州刺史又以不能治民复为都军头加康州团练使咸平二年从幸大名为行宫内外都巡检真宗尝补军校皆叙己功或至讙哗赞独进曰臣月奉百千所用不及半忝幸多矣自念无以报国不敢更求迁擢将恐福过灾生再拜而退众嘉其知分三年元德皇太后园陵命掌护仪卫及还而卒赞有胆勇鸷悍轻率常言愿死于敌徧文其体为赤心杀贼字至于妻孥仆使皆然诸子耳后别刺字曰出门忘家为国临阵忘死为主及作破阵力降魔杵铁折上巾两旁有刃皆重十数斤绛帕首乘骝服饰诡异性复鄙诞不近理盛冬以水沃孩幼冀其长能寒而劲健其子尝疾赞割股为羹疗之赞卒后擢必显为军副都军头

△刘用

刘用相州人善骑射事太宗于藩邸即位补军职累迁捧日都指挥使李顺乱蜀为西路行营钤辖贼平迁忻州刺史至道初为河西乌白池都钤辖着战功改高阳关副都部署真宗即位加本州岛团练使并州副都部署咸平中复为高阳关副都部署时烽堠数警用建议益边兵矣其南牧即率骁锐出东路以牵制其势因图上地形帝召宰相阅视可其奏且令转运使于保州威虏静戎顺安军预备资粮六年命将三路出师扞敌诏用与刘汉凝田思明领兵五千由东路会石普孙全照犄角攻之未几换镇州副部署景德初为邢州部署车驾北征用以城守之劳进爵邑历知齐陈潞三州大中祥符二年卒

△耿全斌

耿全斌冀州信都人父颢怀顺军校全斌少丰伟颢携谒陈抟谓有藩侯相颢戍西蜀全斌往省乘舟泝江夜大风失缆漂七十里至曙风未止舟忽泊岸人颇异之后游京师属太宗在藩邸全斌候拜于中衢自荐材干得召试武艺以善左射隶帐下即位补东班承旨稍迁骁猛副兵马使从征太原还遇契丹于蒲阴追击至徐河因据水口要害迁补日骑副兵马使云骑军使屯瀛州与契丹战所乘马两中流矢死凡三易乘战不却契丹为引去端拱初击蕃部于宥州败之累转马步军都军头全斌在军中有能名真宗尝召问边事全斌口陈利害甚称旨因谓辅臣曰元澄郑诚耿全斌人多称之观其词气若有志操止在宿卫无以见其才宜以边郡试之遂拜雄州刺史知深州徙石隰部署以备河西继迁死全斌率兵入伏落关诱蕃部来归者数千人俄知安肃军尝绘山川险易为图以献契丹来侵自山北抵河浒全斌遣子从政焚桥砦分率精兵击走之改冀州刺史高阳关钤辖擢从政为侍禁寄班祇候大中祥符初封禅泰山以为濮州钤辖其年还京师卒

△周仁美

周仁美深州人开宝中应募隶贝州骁捷军关南李汉超选备给使屡捕获契丹谋者从汉超战于西嘉山身中重创补队长汉超上其功隶殿前班迁御前忠佐马军副都军头戍环州时努卜雅尔鼐累岁为寇仁美与陈德元宋思恭破之发戎族困窘以饷师又与思恭讨茂车春济达至道初舒玛尔努卜雅尔鼐族复叛德元令仁美提兵抚辑之仁美谓石昌镇主和文显曰此贼不除边患未弥因厚设殽酒召酋长二十八人缚送州狱自是诸族畏惧二年又与马绍忠白守荣田绍斌部刍粮趣清远军仁美为先锋至岐子平遇贼击走之明日又战于浦洛河自巳至戍战数十合进璧干河绍忠守荣皆败走绍斌退止浦洛独仁美所部不满三千身中八创护刍粮官吏直抵清远绍斌继至深叹其勇干表上有功时运粮民道路被伤者相继仁美领徒援护悉抵环州又遇虜于橐驼路击走之先是诸蕃每贡马京师为继迁邀击仁美领骑士为援贼不敢犯补澶州龙卫军都虞候部署李继隆奏留麾下选军中伉健者千人令仁美领之屡入敌境战有功俄还澶州召见会令诸军射仁美自陈筋力未衰愿对殿廷发二矢帝许之既而前奏曰臣老于戎门多戍外郡罕曾入覲京阙前后征行体被三十余创今日得对万乘千载之幸傥或备员宿卫立殿庭下一日足矣帝顾傅潜而笑潜亦称其武干力留补马步军副都军头潜屯北面常以自随契丹攻蒲阴仁美领万骑解其围又从王超屯镇定仪渭累迁龙卫军都指挥使领顺州刺史复屯镇定时州有

亡命卒聚盗剽村闾为患王超委仁美招捕仁美选勇敢卒诈亡命趣贼得其要领即自往谕以祸福留贼中一日超忽失仁美求之甚急诘旦仁美至具道其事乃出库钱付仁美为赏不数日贼悉降凡得二百余人以隶军籍大中祥符八年擢为龙神卫四厢都指挥使领奖州防御使迁捧日天武四厢都指挥使改领端州防御使权京新城内都巡检先是巡兵捕亡卒盗贼不获皆有罚而获者无赏仁美因差立赏格以闻诏从其请天禧三年卒

△田绍斌

田绍斌汾州人仕河东刘钧为佐圣军使戍辽州周显德四年领五十骑来归钧屠其父母家属世宗召补骁武副指挥使太祖即位随崔彦进征李筠攻大会砦破之以功迁龙捷指挥使又败筠于泽州茶碾村筠退保泽州绍斌凿濠围守流矢中左目前军部署韩令坤以其事闻及太祖召见于潞州绍斌杀晋军夺其铠甲益众又从讨李重进下荆湖平岭南皆有功讨蜀隶大将刘延让麾下会全师雄寇神泉绍斌率所部败其党数千时汉剑道梗因赖以盗凡在蜀三岁剽盗殄除累迁龙捷都虞候尝盗官马贸直尽偿博进事发狱具有司引见讲武殿继斌称死罪太祖知其骁勇释之且密赐白金会征江南择诸军借事得五百人为步鬪军令绍斌领之及率云骑二千抵升州城下克获甚多太祖亲讨河东绍斌从何继筠扼契丹兵于北百井获胜而还太平兴国初擢龙卫军指挥使领江州刺史二年梅山洞蛮叛与翟守素分击之至邵州闻蛮酋符汉阳死去其居十里大破其众擒蛮二万令军中取利剑二百斩之余五千遣归谕诸洞自是蛮党帖服曹彬之攻幽州也命为先锋指挥使遇契丹兵鬪夺牛羊器甲师还召见便殿加领溪州团练使复遣屯北面端拱元年拜冀州防御使寻改解州淳化中为河中同丹坊鄜延横岭蕃界都巡检使会郑文宝议城席鸡城砦为清远军绍斌与文宝同领其役城毕以文宝之请命为知军事至道元年拜会州观察使仍判解州俄充灵州马步军部署领兵入蕃讨贼斩首二千级获羊马橐驼二万计马以给诸军之阙者捷闻手诏嘉谕之数部金粟帛诣灵武清远远人砮服不扰未几皇甫继明白守荣等督转饷于灵州绍斌率兵援接抵咸并贼众来薄阵绍斌且行且鬪至耀德凡杀千人寇复尾后绍斌为方阵使被伤者居中自将骑三百步弩三百大败之于浦洛河初守荣与绍斌为期会继明病卒故后一日未发为贼所围守荣等欲击之绍斌曰蕃戎轻佻勿弃輜重与战当按辔结阵徐行守荣等不从绍斌因率所部去輜重四五里继迁初见绍斌旌旗不敢击守荣等自欲邀功

与战贼先设伏以羸骑挑战已而伏发守荣等战败绍斌率所部徐还一无遗失至清远

【按隆平集载守荣等弃辎重与贼战败绍斌为击

走贼护粮以行与宋史本传互异】与张延州会食见濠中人裸而呼曰我白守荣也绳引而上遣内侍马从顺驿闻太宗益嘉之优诏褒美时

命李继隆范廷召讨继迁就命绍斌为本州岛都部署兼内外都巡检使继隆以浦洛之败上闻言绍斌握兵不顾自言灵武非我不能守欲图方

面有异志太宗怒曰绍斌昔尝背太原来投今又鼠首两端真贼臣也即遣使捕系绍斌鞫问贬右监门卫率府副率虢州安置真宗即位召还

授右监门卫大将军领叙州刺史寻改莱州防御使诏还其所籍居第赐良马十匹为环庆灵州清远军部署庆州伊济族数为寇掠道路患之

尝有骁捷卒二十余往邠州为其掠夺即驰告绍斌绍斌召其酋帅三人断臂馘剗放还寇遂帖服迁邢州观察使傅潜屯中山绍斌三驰书于

潜且言边众大至但列兵唐河南背城与战慎无穷追潜性巽懦闻之益不敢出敌众益炽焚劫城砦车驾驻大名召潜属吏词逮绍斌免官黜

为左卫率府副率送往上都禁其出入五年授右千牛卫将军致仕景德初起为左龙武军将军永城兵马都监三年迁左监门卫大将军帝以

绍斌久失职不宜在冲要乃徙考城都监大中祥符初领长州刺史从东封朝覲坛就班军士建充庭旗旗倒压绍斌仆地遽起无伤时绍斌已

老其壮健若此后迁左领军卫大将军领康州团练使巩县都监三年卒年七十七绍斌长兵间习战法其后累以格鬪立功然性暴戾故屡被

黜子守信为内殿崇班合门祇候【按宋史此下有王荣传无事迹足录今从删】

△杨琼

杨琼汾州西河人幼事冯继业以材勇称太宗召置帐下及即位隶御龙直三迁神勇指挥使从征太原以劳补御龙直指挥使淳化中李

顺乱蜀琼往夔峡擒贼招安与尹元裴庄分路进讨克资普二州云安军遣使即军中真拜单州刺史至道初召还共职明年徙知霸州兼钤辖

未几改防御使灵庆路副都部署河外都巡检使贼数寇边琼捍御有功导黄河溉民田数千顷败贼于合河镇北贼骑五百掠城下击破之追

北三十里并赐嘉谕咸平四年以鄜州观察使充灵环十州军副都部署兼安抚副使遣使谕旨贼若寇清远及青冈白马砦即合兵与战是秋

果长围清远顿积石河清远屡走间使诣琼请济师琼将悉出兵为援钤辖内园使冯守规都监崇仪使张继能曰敌近重兵在前继无以进不

可悉往乃止命副部署海州团练使藩璘都监西京左藏库刘文质率兵六千赴之且曰伺我之继至琼逗遛不进顿庆州遣钤辖李让率兵往

援至则城已陷贼泊青冈城下琼与守规继能方缓行出师及闻清远之败益恇怯不前
顺州刺史王瓌普谓琼曰青冈地远水泉非屯师计愿
弃之琼合谋焚刍粮兵仗驱老幼以出琼却师退保洪德砦贼侵未尝交一锋事闻召琼
辈悉系御史狱治罪当死兵部尚书张齐贤等议请如
律诏特贷命削官长流崖州继能守规辈同坐籍其家业明年移道州景德初起为右领
军卫将军分司西京累迁左领军卫大将军领贺州团
练使知袁州有州卒自言得神术能飞行空中州人颇惑琼捕至折其足奏戮之五年卒
年六十七录其子舜臣为奉职长子舜宾内殿崇班合
门祗候

△钱守俊

钱守俊濮州雷泽人少勇鸷尝为盗陂泽中称转陂鹞周显德中应募为铁骑卒从
征淮南战紫金山下寿春获战舰千余艘继从克关南
太祖即位补禁卫隶散员直干德中转殿前班都知寻征太原方战矢中左足拔而复进
格鬪不已还改东西班指挥使迁马步军副都军头太
平兴国四年命与张绍勅李神佑刘承珪率师屯定州以备北边移屯赵州又从征范阳
师还道遇敌战于徐河斩夺颇众雍熙三年命将北征
田重进出飞狐道守俊以偏师为援边骑云集守俊按甲从容进战大败之连护屯兵于
赵定代还掌军头引见司淳化三年出为单州团练使
又明年改迁齐州时河西蕃部内扰命以副都部署镇其地徙屯石州有言守俊病且老
握重兵不堪其职召为左领军卫大将军领潘州防御
使大中祥符三年卒年八十一守俊累从军征讨前后中三十六创景德中录其子允庆
为奉职弟守信官崇仪副使守荣内园使

△徐兴

徐兴青州人以拳勇得隶兵籍周显德中从征淮右太祖即位隶御龙直会平泽潞
上其功补控鹤军使征晋阳部卒壅汾水灌并州城益
多其劳迁本军副指挥使太平兴国初从潘美趣团柏谷奋与贼鬪生擒伪兵马都监李
美身被重创无所回挠加指挥使从征太原讨幽蓟屡
中流矢以着绩闻累迁秩出为洺州部署端拱中修镇定城逾月讫工改莫州防御使知
静戎军历祁博二州咸平中为泾原环庆十州部署诏
督转灵武刍粮道积石遇寇与战时泾原仪卫驻泊部署王荣援兵不应遂败走坐削籍
流郢州会赦入为右卫将军迁左监门卫大将军景德
二年卒年六十八

△王杲

王杲齐州人周显德中应募为卒从世宗收三关隶先锋太祖即位从征泽潞平扬

州皆有战功乃拔迁散指挥使累转马军副都军头屯并州雍熙中为龙卫右第二军都虞候会遣赵保忠还夏州命杲引兵护送及还保忠以方物赈杲拒不纳太宗知之诏赐白金百两迁右第一军屯镇州契丹入侵隶大将郭守文扞城杲守北关契丹兵退命督饷藁趣威虜军还抵徐河时尹继伦与契丹战兵小衄杲遇于河上即按兵拒之获胜守文上闻得召见问状补部军头领勤州刺史命监河北有能声寻命阅教定州诸军骑射入掌军头目引见司李顺乱蜀与尹元并为西川招安使大败贼众以功真拜唐州刺史时贼虽平道路尚梗余党或保山林以肆奸杲复与石普等追捕于彭州于是始平至道初乃迁复迁灵州副部署累徙石隰副部署以转饷河西失期降右千牛卫大将军咸平五年出为亳州永城县都监被召将入见以疾亟弗果卒年六十四 【按宋史此下有李重诲传无事迹足录今从删】

△白守素

白守素开封人父廷训太祖即位为龙捷都指挥使守素以荫补东班承旨太平兴国五年迁补右班殿直以善射授供奉官带御器械三迁至供备库使咸平中厯镇州行营钤辖改定州复徙镇州王继忠陷没师还渡河契丹兵乘之守素据桥有矢数百每发必中敌不敢近遂引去真宗与辅臣议三路御敌命魏能为威虜军部署帝曰能杠强愎尤难共事闻守素久练边计张锐性颇和善参知戎务庶克相济乃命守素与锐并为钤辖戍顺安以贰之景德元年契丹侵长城口守素与能大破之加领康州刺史又提骑卒戍静戎军兼莅营田之役俄为镇定钤辖是冬契丹复内侵守素败其前锋获车重又入敌境俘擒甚众及请和省边戍之职与曹璨留任镇定追叙前劳加合州团练使大中祥符三年命副李迪使契丹守素久居边名闻北庭颇畏伏之帝虑其不欲行密遣内侍询于守素守素顿首感咽即以崔可道代焉再迁南作坊使五年卒帝甚惜之录其一子官

△张思钧

张思钧邢州沙河人善击剑挽强应募为卒晋开运间迁广锐军使仕周为南北两关巡检太祖即位补龙卫指挥使李继勋下辽州战带甲祠追奔至长城擒其将穆克善鲍淑俄屯潞州合战三十余以劳迁都虞候开宝二年从郭进田钦祚戍三交战石岭关 【按宋祖亲征晋阳何继筠拒契丹于石岭关考宋史太祖本纪及继筠传并作开宝二年本传作三年误今据改】 合门祗候齐延琛苗昶陷敌中思钧鼓劲骑突入夺还何继筠入晋境思钧隶麾下拔南桥径度大将出必为先锋太平兴国初屯定

州领兵援磁窑战败其众身中五十创奋不顾逐贼薄
军城夺马及铠甲而还敌复来攻又大败之命赐服带领河州刺史雍熙三年契丹入侵
刘廷让战于君子馆命思钧翼从败绩陷敌中端拱初
自契丹逃归授澄州刺史知齐州思钧以武进素不知民政仅踰月即徙濮鄆滨棣州巡
检至道中改鄆延巡检使会葺右堡砦击寇走之未几
寇逼保安军与曹璨往援进蹶五十余里至木场寇乃遁去真宗即位徙益州钤辖兼绵
汉九州岛都巡检使王钧陷汉州思钧攻克之斩伪刺史
苗进又与石普败贼于弥牟砦巴西尉傅翱有善马思钧求之不与召翱至责以转饷后
期斩之帝闻其事传召付御史台鞠治罪当斩特贷死
削籍流封州复起为左司御率府率考城监军车驾幸澶渊召诣行在命李继隆石保吉
同议兵事赐服御有加景德二年为西京水北都巡检
使俄分司西京召对行在帝悯其老授唐州防御副使徙郑州大中祥符二年再迁左千
牛卫将军四年卒年八十九子承恩为三班奉职思钧
起行伍征讨稍有功质状小而精悍太宗尝称其楼罗自是人目为小楼罗云 【按宋史
此下有李琪王延范二传琪无显著迹延范以左道
谋为不轨伏诛俱无足录并从删】

钦定续通志卷三百十九

●钦定续通志卷三百二十 列传一百二十
列传

宋 【二十四】

○宋二十四

吕端 毕士安【仲衍仲游】 寇准

吕端

毕士安

寇准

△吕端

吕端字易直幽州安次人父琦晋兵部侍郎端少敏悟好学以荫补千牛备身仕周
为直史馆 【按宋史本传作以荫补千牛备身历国
子主簿太仆寺丞秘书郎直宏文馆换著作佐郎直史馆东都事畧作以荫补千牛备身
仕周为直史馆今依东都事畧纂】 太祖即位迁太常
丞知浚仪县同判定州开宝中西上合门使郝崇信使契丹以端假太常少卿为副八年
知洪州未上改司门员外郎知成都府为政清简远人
便之秦王廷美为开封尹召拜考功员外郎充开封府判官太宗征河东廷美将有居留
之命端白廷美曰主上栉风沐雨以申吊伐王地处亲

贤当表率扈从今王留务非所宜也廷美由是恳请从行寻坐王府亲吏请托执事者违诏市竹木贬商州司户参军移汝州复为太常丞判寺事出知蔡州以善政吏民列奏借留改祠部员外郎知开封县迁考功员外郎兼侍御史知杂事使高丽暴风折檣舟人怖恐端读书若在斋合时迁户部郎中判太常寺兼礼院选为大理寺少卿俄拜右谏议大夫许王元僖尹开封府又为判官王薨有发其阴事者坐裨赞无状遣御史武元颖内侍王继恩就鞫于府端方决事徐起候之二使曰有诏推君端神色自若顾从者曰取帽来二使曰何遽至此端曰天子有制问即罪人矣安可在堂上对制使即下堂随问而答左迁卫尉少卿会置考课院羣官有负谴寘散秩者引对皆泣涕以饥寒为请至端即奏曰臣前佐秦邸以不检府吏谪掾商州陛下复擢官籍辱用今许王暴薨臣辅佐无状陛下又不重谴俾亚少列臣罪大而幸深矣今有司进退善否苟得颍州副使臣之愿也太宗曰朕自知卿无何复旧官为枢密直学士逾月拜参知政事时赵普在中书尝曰吾观吕公奏事得嘉赏未尝喜遇抑挫未尝惧亦不形于言真台辅之器也岁余左谏议大夫寇准亦拜参知政事端请居准下太宗即以端为左谏议大夫立准上每独召便殿语必移晷擢户部侍郎同平章事时吕蒙正为相太宗欲相端或曰端为人胡涂太宗曰小事胡涂大事不胡涂决意相之后数日罢吕蒙正而相端焉初端兄余庆建隆中以藩府旧僚参预大政端复居相位时论荣之端历官仅四十年至是骤被奖擢太宗犹恨任用之晚端为相持重识大体以清简为务虑与寇准同列先居相位恐准不平乃请参知政事与宰相分日押班知印同升政事堂太宗从之时同列奏对或多异议惟端罕所建明一日内出手札戒谕自今中书事必经吕端详酌乃得奏闻端愈谦让不自当初李继迁扰西鄙保安军奏获其母至是太宗欲诛之以寇准居枢密副使独召与谋准退过相幕端疑谋大事邀谓准曰帝戒君勿言于端乎准曰否端曰边鄙常事端不必与知若军国大计端备位宰相不可不知也准遂告其故端曰何以处之准曰欲斩于保安军北门外以戒凶逆端曰必若此非计之得也愿少缓之端遂覆奏入曰昔项羽得太公欲烹之高祖曰愿分我一杯羹夫举大事不顾其亲况继迁悖逆之人乎陛下今日杀之明日继迁可擒乎若其不然徒结怨讎愈坚其叛心尔太宗曰然则何如端曰以臣之愚见置于延州使善养视之以招来继迁虽不能即降终可以系其心而母死生之命在我矣太宗抚髀称善曰微卿几误我事即用其策其母后病死延州继迁寻亦死继迁子竟纳款请命端之力也进门下侍郎兼兵部尚书太宗不豫真

宗为皇太子端日与太子问起居及疾大渐内侍王继恩忌太子英明阴与参知政事李昌龄殿前都指挥使李继勋知制诰胡旦谋立故楚王元佐【按涑水记闻载太宗大渐李皇后与王继恩等忌太子英明谋立废楚王元佐】太宗崩李皇后命继恩召端端知有变锁继恩于合内使人守之而入皇后曰宫车已晏驾立嗣以长顺也今将如何端曰先帝立太子正为今日今始弃天下岂可遽违命有异议邪乃奉太子至福庭中真宗既立垂帘引见羣臣端平立殿下不拜请卷帘升殿审视然后降阶率羣臣拜呼万岁以继勋为使相赴陈州贬昌龄忠武军司马继恩左监门卫将军均州安置旦除名流浚州籍其家赀真宗每见辅臣入对惟于端肃然拱揖不以名呼又以端躯体洪大宫庭阶阼稍峻特令梓人为纳陛尝召对便殿访军国大事经久之制端陈当世急务皆有条理真宗嘉纳加右仆射监修国史明年被疾诏免常参就中书视事上疏求解不许以太子太保罢在告三百日有司言当罢奉诏赐如故车驾临问端不能与抚慰甚至卒年六十六赠司空谥正惠追封妻李氏涇国夫人以其子藩为太子中舍荀大理评事蔚千牛备身藹殿中省进马端姿仪瑰秀有器量宽厚多恕意豁如也虽屡经摈退未尝以得失介怀善与人交轻财好施未尝问家事李惟清自知枢密改御史中丞意端抑已及端免朝谒乃弹契常参官疾告逾年受奉者又构人讼堂吏过失欲以中端端曰吾直道而行无所愧畏风波之言不足虑也端祖兗守文之乱举族被害父琦方幼以同郡赵玉得免事载五代史琦传玉子文度有孙绍宗十余岁端视如己子表荐赐出身故相冯道乡里世旧道子正之病废端分俸给之端两使绝域其国叹重之后有使往者每问端为宰相否其名显如此景德二年真宗闻端后嗣不振又录蔚为奉礼郎藩后病足不任朝谒请告累年有司奏罢其奉真宗特令复旧官分司西京给奉家居养病端不蓄资产藩兄弟贫匮又迫婚嫁因质其居第真宗时出府内钱五百万赎还之又别赐金帛俾偿宿负遣使检校家事藩荀皆至国子博士蔚至太子中舍

△毕士安

毕士安字仁叟【隆平集作字舜举】代州云中人父义林观城令因家焉士安少好学事继母祝氏以孝闻祝氏曰学必求良师友乃与如宋又如郑得杨璞韩丕刘锡为友因为郑人干德四年举进士邠帅杨廷璋辟幕府掌书奏开宝四年为济州团练推官专掌筦榷岁课增羨改兗州观察推官太平兴国初为大理寺丞领三门发运事吴越钱俶纳土选知台州言钱氏上图籍有司皆张侈赋数今湖海新民始得天

子命吏宜有安辑愿一用旧籍诏从之明年迁左赞善大夫徙饶州复出知干州以母老愿降任就养改监汝州稻田务雍熙二年诸王出合慎择僚属以虞部郎中王龟从兼陈王府记室参军水部员外郎王素兼韩王府记室参军秘书丞张茂直兼益王府记室参军士安迁左拾遗兼冀王府记室参军太宗召谓曰诸子生长宫廷未娴外事年渐成人必资良士赞导使日闻忠孝之道卿等勉之士安本名士元以元犯王讳遂改焉迁考功员外郎端拱中诏王府僚属各献所著文太宗阅视累日问近臣曰其才已见矣其行孰优或以士安对帝曰正协朕意俄以本官知制诰王请对愿留府邸不许淳化二年召入翰林为学士大臣以张洎荐太宗曰洎视毕士安词艺践历固不减但履行远在下尔士安以父名义林抗章引避朝议谓二名不偏讳不听三年与苏易简同知贡举加主客郎中以疾请外改右谏议大夫知颍州真宗以寿王尹开封府召为判官又为皇太子以兼右庶子迁给事中登位命权知开封府事拜工部侍郎枢密直学士时近臣有怙势强取民间定婚女其家诉于府士安因对奏还之宫府常从为廷职者每授任于外必令士安戒勸咸平初辞府职拜礼部侍郎复为翰林学士诏选官校勘三国志晋唐书或有言两晋事多鄙恶不可流行者真宗以语宰相士安曰恶以戒世善以劝后善恶之事春秋备载真宗然之遂命刊刻士安以目疾求解改兵部侍郎出知潞州特加月给之数入为翰林侍读学士景德初兼秘书监契丹谋入境士安首疏五事应诏陈选将饷兵理财之策真宗嘉纳李沆卒进士安吏部侍郎参知政事【按长编载李沆死中书无宰相帝意欲擢任三司使寇准乃先置宿德以镇之迁翰林侍读学士兵部侍郎毕士安为吏部侍郎参知政事】入谢真宗曰未也行且相卿士安顿首真宗曰朕倚卿以辅相岂特今日然时方多事求与卿同进者其谁可对曰宰相者必有其器乃可居其位臣弩朽实不足以胜任寇准兼资忠义善断大事此宰相才也真宗曰闻其好刚使气又对曰准方正慷慨有大节忘身徇国秉道嫉邪此其素所蓄积朝臣罕出其右者第不为流俗所喜今天下之民虽蒙休德涵养安佚而西北跳梁为边境患若准者正所宜用也真宗曰然当藉卿宿德镇之未阅月以本官与准同拜平章事士安兼监修国史居准上准为相守正嫉恶小人日思所以倾之有布衣申宗古告准交通安王元杰准惶恐莫知所自明士安力辩其诬下宗古吏具得奸罔斩之准乃安景德元年契丹统军达兰引兵分掠威虏顺安北平侵保州攻定武数为诸军所却益东驻阳城淀遂攻高阳不得逞转窥贝冀天雄兵号二十万真宗坐便殿问策安出土安与寇

准条所以御备状又合议请真宗幸澶渊士安言澶渊之行当在仲冬准谓当亟往不可缓卒用士安议初咸平六年云州观察使王继忠战陷契丹至是为契丹奏请议和大臣莫敢如何独士安以为可信力赞真宗当羁縻不绝渐许其成真宗谓敌悍如此恐不可保士安曰臣尝得契丹降人言虽深入屡挫不甚得志其阴欲引去而耻无名耳且彼窳不畏人乘虚覆其巢穴此请殆不妄继忠之奏臣请任之真宗喜手诏继忠许其请和时已诏巡幸而议者犹哄哄二三大臣有进金陵及成都图者士安亟同准请对力陈其不可惟坚定前计真宗严兵将行太白昼见流星出上台北贯斗魁或言兵未宜北或言大臣应之士安适卧疾移书准曰屡请昇疾从行手诏不许今大计已定惟君勉之士安得以身当星变而就国事心所愿也已而少间追至澶渊见于行在时已聚兵数十万契丹大震犹乘众掠德清至澶北鄙为伏弩发射达兰死众溃遁去

【按真宗本纪及长编契丹统军达兰为李继隆等设矢中弩死在真宗未至澶州时此传及寇准传并作至澶州之后所载互异】 会曹利用自契丹使还具得要领又与其使者姚东之俱来讲和之议遂定岁遗契丹银绢三十万朝论皆以为过士安曰不如此契丹所顾不重和事恐不能久及罢兵从还乃按边要选良守将易置之雄州以李允则定州马知节镇州孙全照保州杨延昭他所择用各得其任令塞上得境外牛马类者悉还之通互市除铁禁招流亡广储蓄未几夏州赵德明亦款塞内附二方既定中外畧安量时制法次第施行复置贤良方正直言极谏等科以广取士二年章七八上以求病免优诏不允遣使敦谕不得已复起视事十月晨朝至崇政殿庐疾暴作真宗步出临视已不能言诏内侍窦神宝以肩舆送归第卒年六十八赠太傅中书令谥文简以皇城使卫绍钦治葬有司给卤簿录其子世长为太子中舍庆长为大理寺丞孙从古为将作监主簿士安端方沈雅有清识酝籍美风采善谈吐所至以严正称年耆目眊读书不辍手自雠校或亲缮写又精意词翰尝谓人曰仆仕宦无赫赫之誉但力自规检庶几寡过尔凡交游无党援惟王佑吕端见引重王旦寇准杨亿相友善王禹偁陈彭年皆门人也禹偁济州人幼时以事至士安官舍士安识其非常童留之教以学毕业日显后遂登科进用更在士安前及士安知制诰其命乃禹偁词也士安没后真宗谓寇准等曰毕士安善人也事朕南府东宫以至辅相饬躬慎行有古人之风遽此沦没深可悼惜及王旦为相面奏陛下前称毕士安清慎如古人在位闻之感叹仕至辅相而四方无田园居第没未终丧家用已屈真不负陛下所知然使其家假贷为生宜有以周之者窃

谓当出上恩非臣敢为私惠真宗感叹赐白金五千两子世长至卫尉卿庆长至太府卿
孙从善从古从厚从诲从简从道从范从益从周皆历
官曾孙仲达仲偃仕至郡守仲衍仲游仲愈

毕仲衍

毕仲游

毕仲衍

仲衍字夷仲以荫为主簿举进士中第调沈邱令欧阳修吕公着荐之入司农为主簿升丞吴充引为中书检正奉使契丹宴射连破的众惊异之且伟其姿容密使人取其衣为度制服以赐时预其元会尽能记其朝仪节奏图画归献后钱勰出使契丹主犹问毕少卿何官今安在王珪与充不相能以仲衍为充所用数求罪过欲伤之卒无可乘但留滞不迁经四年乃以秘阁校理同知太常礼院为官制局检讨官制文字千万计区别分类损益删补皆曲尽其当凡从中问其事必须仲衍然后报他人不知也高丽使入贡诏馆之上元夕与使者宴东阙下作诗诵圣德神宗次韵赐焉当时以为宠官制行帝自擢起居郎王珪留除命谓为太峻争于前帝连称曰是当得尔未几暴得疾一夕卒年四十三岁

毕仲游

仲游字公叔与仲衍同登第调寿邱柘城主簿罗山令环庆转运司干办公事从高遵裕西征运期迫遽陕西八十县馈挽之夫三十万一旦悉集转运使范纯粹李察度受其赋而给之食必旷日乃可会僚属议皆不知所为以诿仲游仲游集诸县吏令先效金帛缗钱之最戒勿启肩鐻共簿其名数以为质预饬其斛量数千洞撤仓庾墙壁使赢粮者至其所人自■〈奭斗〉概输其半而以半自给不终朝霍然而散翊日大军遂行纯粹察叹且谢曰非君几败吾事元佑初为军器卫尉丞召试学士院同策问者九人【按东都事畧作召试天下文学之士十三人】乃黄庭坚张耒晁补之辈苏轼异其文擢为第一加集贤校理开封府推官出提点河东路刑狱韩缜以故相在太原按视如列郡缜奴告有卒剽其衣于公堂之侧缜怒将寘卒于理仲游曰取衣服尠薄而敢掠之于帅牙非人情也取以付狱治卒得免太原铜器名天下独不市一物惧人以为矫也且行买二茶匕而去缜曰如公叔可谓真清矣召拜职方司勋二员外郎改秘阁校理知耀州是岁大旱仲游先民之未饥揭喻境内曰郡振施与平余若千万石实虚张其数富室知有备亦相劝发廩凡民就食者十七万九千口无一人去其乡徽宗时历知郑郛二州京南淮南转运副使入为吏部郎中言孔子庙自颜回以降皆爵命于朝冠冕居正而子

鯉孙伋乃野服幅巾以祭为不称诏皆追侯之仲游早
受知于司马光吕公着不及用范纯仁尤知之当国时又适居母丧故未尝得尺寸进然
亦堕党籍坎壈散秩而终年七十五仲游为文切于事
理而有根柢不为浮夸诡诞戏弄不庄之语苏轼在馆阁颇以言语文章规切时政仲游
忧其及祸贻书戒之司马光为政反王安石所为仲游
予之书光轼得书耸然竟如其虑仲愈历国子监丞诸王府侍讲知凤翔府坐兄仲游陷
党籍例废黜徽宗曰毕仲游被遇先帝可除罪籍以仲
愈为都官郎中擢秘书少监卒

△寇准

寇准字平仲华州下邳人父相 【按寇忠公准旌忠之碑载父相赠晋国公太师尚
书令】 晋开运中应辟为魏王府记室参军准少英
迈通春秋三传太平兴国五年年十九举进士太宗取人多临轩顾问年少者往往罢去
或教准增年答曰准方进取可欺君邪后中第授大理
评事知归州巴东县后三岁补大名府成安宰每期会赋役未尝辄出符移惟具乡里姓
名揭县门百姓莫敢后期累迁殿中丞通判郢州召试
学士院授右正言直史馆为三司度支推官转盐铁蠲司判官会诏百官言边事而准极
陈利害帝益器重之擢尚书虞部郎中枢密院直学士
判吏部东铨尝奏事殿中语不合帝怒起准辄引帝衣令帝复坐事决乃退帝曰朕得寇
准犹文皇之得魏征也淳化二年大旱太宗延近臣问
时政得失准独言洪范天人之际应若影响大旱之证盖刑有所不平太宗怒起入禁中
顷之召问所以不平状准请召二府入乃言曰顷者盖
祖吉王准皆侮法受赇吉赃少乃伏诛准以参政沔之弟盗主守财至千万止杖仍复其
官非不平而何帝以问沔沔顿首谢于是切责沔而知
准为可用矣即拜准左谏议大夫枢密副使改同知枢密院事准与知院张逊不协 【按
宋宰辅编年录云知院同知院之名自此始逊与仲
舒准仍并带副使自后或以正官或检校官为之秩与副使同未即真则称检校】 他日
行道逢狂人迎马呼万岁逊嗾判左金吾王宾上其事
语在逊传因是出知青州帝顾准厚常念之语左右曰寇准在青州乐乎对曰准得善藩
当不苦也数日辄复问左右揣帝意且复召用准因对
曰陛下思准不少忘闻准日纵酒未知亦念陛下乎帝默然明年召拜参知政事至道元
年加给事中时帝在位久冯拯等上疏乞立储贰帝怒
斥之岭南中外无敢言者准初自青州召还入见帝足创甚自褰衣以示准且曰卿来何
缓耶准对曰臣非召不得至京师帝曰朕诸子孰可以
付神器者准曰陛下为天下择君谋及妇人中官不可也谋及近臣不可也惟陛下择所

以副天下望者帝俛首久之屏左右谓曰襄王可乎准曰知子莫若父圣虑既以为可愿即决定帝遂以襄王为开封尹改封寿王于是立为皇太子庙见还京师之人拥道喜跃曰少年天子也帝闻之不恠召准谓曰人心遽属太子欲置我何地准再拜贺曰此社稷之福也二年祠南郊中外官皆进秩准素所喜者多得台省清要官所恶与不及知者退序进之彭惟节位素居冯拯下拯转虞部员外郎惟节转屯田员外郎章奏列衔惟节犹处其下准怒堂帖戒拯毋乱朝制拯奏准擅权又条上岭南官吏除拜不平数事广东转运使康戡亦言吕端张洎李昌龄等皆准所引端德之洎能屈奉准而昌龄畏慙不敢与准抗故得以任胷臆乱经制太宗怒准适祀太庙摄事召责端等端曰准性刚自任臣等不欲数争虑伤国体因再拜请罪及准入对帝语及冯拯事自辩帝曰若廷辩失执政体准犹力争不已又持中书簿论曲直于帝前帝益不悦因叹曰鼠雀尚知人意况人乎遂罢准知邓州真宗即位迁尚书工部侍郎咸平初徙河阳改同州三年朝京师行次阌乡又徙凤翔府帝幸大名诏赴行在所迁刑部权知开封府六年迁兵部为三司使帝久欲相准患其刚直难独任景德元年以毕士安参知政事踰月并命同中书门下平章事准以集贤殿大学士位士安下时契丹内侵纵游骑掠深祁间小不利辄引去准曰是狃我也请练师命将简骁锐据要害以备之是冬契丹果大入急书一夕凡五至准不发饮笑自如明日同列以闻帝大骇以问准准曰陛下欲了此不过五日尔因请帝幸澶州同列惧欲退准止之令候驾起帝难之欲还内准曰陛下入则臣不得见大事去矣请毋还而行帝乃议亲征召羣臣问方畧既而契丹围瀛州直犯贝魏中外震骇参知政事王钦若江南人也请幸金陵陈尧叟蜀人也请幸成都帝问准准心知二人谋乃阳若不知曰谁为陛下画此策者罪可诛也今陛下神武将臣协和若大驾亲征敌自当遁去不然出奇以挠其谋坚守以老其师劳逸之势我得胜算矣奈何弃庙社欲幸楚蜀远地使所在人心皆溃致敌乘势深入乎遂请帝幸澶州及至澶州南城契丹兵益盛众请驻蹕以觐军势准固请曰陛下不过河则人心益危敌气未慑非所以取威决胜也且王超领劲兵屯中山以扼其亢李继隆石保吉分大阵以扼其左右肘四方征镇赴援者日至何疑而不进众皆惧准固争不决出遇高琼于屏闲谓曰太尉受国恩今日有以报乎对曰琼武人愿効死准复入对琼随立庭下准厉声曰陛下不以臣言为然盍试问琼等琼即仰奏曰寇准言是准曰机不可失宜趣驾琼即麾卫士进辇是日帝遂渡河御北城门楼远近望见御盖踊跃欢呼声闻数十里契丹相视惊

愕不能成列帝尽以军事委准准承制专决号令明肃
敌数千骑乘胜蒲城下诏士卒迎击斩获大半乃引去帝还行宫留准居城上徐使人视
准何为准方与杨亿饮博歌呼帝喜曰准如此吾复何
忧相持十余日其统军达兰出督战为伏弩中额死乃密奉书请盟准不从而使者来请
益坚帝将许之准欲邀使称臣且献幽州地帝厌兵欲
羈縻不绝而已有潜准幸兵以自取重者准不得已许之 【谨按通鉴辑览 御批澶
州告急都邑震惊庸懦者束手仓皇奸狡者议迁楚
蜀安危之机悬于呼吸寇准处以静镇而羣心安力赞亲征而敌气馁不劳亡矢遗镞而
转旋于俄顷之间可谓功在社稷矣论者或惜其不决
战于士卒欢呼之际以定厥功而杜后患乃迂儒侈口快谈而未达于时势不知欲和之
意早定于真宗准亦不宜违君命而邀己功且契丹倾
国而来志不在小虽达兰战没少挫其锋而情锐薄城亦未易轻敌若必邀其献地称臣
激极生变成败尚未可知则适可而止亦不得谓之坐
失事会也】 帝遣曹利用如军中议岁币曰百万以下皆可许也准召利用至幄语曰虽
有敕汝所许过三十万吾斩汝矣利用果以三十万约
而还河北罢兵准之力也准在相位用人不以次同列颇不悦他日又除官同列因吏持
例簿以进准曰宰相所以进贤退不肖也若用例一吏
职尔二年加中书侍郎兼工部尚书准颇自矜澶渊之功虽帝亦以此待准甚厚王钦若
深嫉之一日会朝准先退帝目送之钦若因进曰陛下
敬寇准为其有社稷功邪帝曰然钦若曰澶渊之役陛下不以为耻而谓准有社稷功何
也帝愕然曰何故钦若曰城下之盟春秋耻之澶渊之
举是城下之盟也以万乘之贵其何耻如之帝为之不悦钦若曰陛下闻博乎博者输钱
欲尽乃罄所有出之谓之孤注陛下寇准之孤注也斯
亦危矣由是帝顾准寢衰明年罢为刑部尚书知陕州 【长编作峡州】 遂用王旦为
相帝谓旦曰寇准多许人官以为己恩俟行当深戒之
从封泰山迁户部尚书知天雄军祀汾阴命提举贝德博召滨棣巡检捉贼公事迁兵部
尚书入判尚书都省帝幸亳州权东京留守为枢密院
使同平章事林特为三司使以河北岁输绢阙督之甚急而准素恶特颇助转运使李士
衡而沮特具言在魏时尝进河北绢五万而三司不纳
以至阙供请劾主吏以下然京师岁费绢百万准所助纔五万帝不悦谓王旦曰准刚忿
如昔旦曰准好人怀惠又欲人畏威皆大臣所避而准
乃为己任此其短也未几罢为武胜军节度使同平章事判河南府徙永兴军天禧元年
改山南东道节度使时巡检朱能挟内侍都知周怀政
诈为天书帝以问王旦旦曰始不信天书者准也今天书降颁命准上之准从上其书 【

谨按通鉴辑览 御批准于钦若判若冰炭何独
于干佑天书之事效其所为盖一以图己之进用一以喜未能素相比附虽堕其术而不
顾可见门户之为害甚于陷阱一溺其中即欲自拔亦
不可得矣】 中外皆以为非遂拜中书侍郎兼吏部尚书同平章事景灵宫使 【按长
编载准自永兴来朝将发其门生有欢准者曰公若至
河阳称疾坚求补外此为上策倘入见即发干佑天书诈妄之事尚可全平生正直之名
斯为次也最下则再入中书为宰相尔准不恚揖而起
君子谓准之及于祸盖自取之也时又有陕州处士魏野善王旦寇准赠诗必劝以早退
旦准皆不能用识者高之】 三年祀南郊进尚书右仆
射集贤殿大学士时真宗得风疾刘太后预政于内准请闲曰皇太子人所属望愿陛下
思宗庙之重传以神器择方正大臣为羽翼丁谓钱惟
演佞人也不可以辅少主帝然之准密令翰林学士杨亿草表请太子监国且欲援亿辅
政已而谋泄 【谨按通鉴辑览 御批寇准密赞
大计自当慎之又慎东宫监国事出非常止宜诏自朝廷岂可由羣臣陈请准因周怀政
之告而始有此议又预令人草表已属害成况复被酒
漏言尤为粗疏无术其遭谗去位不得谓非自取也】 罢为太子太傅封莱国公 【按
长编载准被酒漏所谋谓等益惧力谮准请罢政事帝
不记与准初有成言诺其请会日暮召知制诰晏殊入禁中示以除目殊曰臣掌外制此
非臣职也乃召惟演惟演至极论准端恣请深责帝曰
当与何官惟演请用王钦若例授准太子太保帝曰与太傅又曰更与加优礼惟演请封
国公出袖中具员册以进帝于小国中指莱国字】 时
怀政反侧不自安且忧得罪乃谋杀大臣请罢皇后预政奉帝为太上皇而传位太子复
相准客省使杨崇勋等以告丁谓谓微服夜乘犊车诣
曹利用计事明日以闻怀政伏诛复降准为太常卿知相州徙安州贬道州司马帝初不
知也他日问左右曰吾目中久不见寇准何也左右莫
敢对帝崩时亦言惟准与李迪可托其见重如此干兴元年再贬雷州司户参军初丁谓
出准门至参政事甚谨尝会食中书羹污准须谓徐起
拂之准笑曰参政国之大臣乃为官长拂须邪谓甚愧之由是倾构日深及准贬未几谓
亦南窜道雷州准遣人以一蒸羊逆境上谓欲见准准
拒绝之天圣元年徙衡州司马初太宗尝得通天犀命工为二带一以赐准及是准遣人
取自洛中既至数日沐浴具朝服束带北面再拜呼左
右趣设卧具就榻而卒初张咏在成都闻准入相谓其僚属曰寇公奇材惜学术不足尔
及准出陕咏适成都罢还准严供帐大为具待咏将去
准送之郊问曰何以教准咏徐曰霍光传不可不读也准莫谕其意归取其传读之至不

学无术笑曰张公谓我矣在雷州踰年既卒衡州之命
乃至遂归葬西京道出京南公安县人皆设祭哭于路折竹植地挂纸钱逾月视之枯竹
皆生笋众因为立庙岁时享之无子以从子随为嗣准
歿后仁宗对辅臣哀准以忠死复太子太傅赠中书令莱国公后又赐谥曰忠愍皇佑四
年诏翰林学士孙抃撰神道碑帝为篆其首曰旌忠

钦定续通志卷三百二十

●钦定续通志卷三百二十一 列传一百二十一

列传

宋 【二十五】

○宋二十五

李沆【维】 王旦 向敏中

李沆【利瓦伊】

王旦

向敏中

△李沆【利瓦伊】

李沆字太初洺州肥乡人少好学器度宏远父炳尝语人曰此儿异日必至公辅太平兴国五年举进士甲科为将作监丞通判潭州迁右赞善大夫转著作郎相府召试约束边将诏书既奏御太宗甚悦命直史馆雍熙三年右拾遗王化基上书自荐太宗谓宰相曰李沆宋湜皆嘉士也即命中书并化基召试并除右补阙知制诰沆位最下特升于上各赐钱百万又以沆素贫多负人钱别赐三十万偿之四年与翰林学士宋白同知贡举谤议虽众而不归咎于沆迁职方员外郎召入翰林为学士淳化二年判吏部铨尝侍曲宴太宗目送之曰李沆风度端凝真贵人也三年拜给事中参知政事四年以本官罢奉朝请未几丁内艰起复遂出知升州未行改知河南府真宗升储迁礼部侍郎兼太子宾客诏东宫待以师傅礼真宗即位迁户部侍郎参知政事咸平初以本官平章事监修国史改中书侍郎会契丹侵边真宗北幸命沆留守京师肃然真宗还沆迎于郊命坐置酒慰劳久之累加门下侍郎尚书右仆射真宗问治道所宜先沆曰不用浮薄新进喜事之人此最为先问其人曰如梅询曾致尧等是矣后致尧副温仲舒安抚夹西疏言仲舒不足与共事轻锐之党无不称快沆不喜也因用他人副仲舒罢致尧帝尝语及唐人树党难制遂使王室微弱盖奸邪难辨尔沆对曰佞言似忠奸言似信至如卢杞蒙蔽德宗李勉以为真奸邪是也真宗曰奸邪之迹虽曰难辨久之自败一夕遣使持手诏欲以刘氏为贵妃沆对使者引烛焚诏附奏曰但道臣沆

以为不可其议遂寝驸马都尉石保吉求为使相复问
沆沆曰赏典之行须有所自保吉因缘戚里无攻战之劳台席之拜恐腾物议他日再三
问之执议如初遂止帝以沆无密奏谓之曰人皆有密
启卿独无何也对曰臣待罪宰相公事则公言之何用密启夫人臣有密启者非谗即佞
臣常恶之岂可效尤时李继迁久叛兵众日盛有图取
益方之意朝廷困于飞挽中外咸以为灵州乃必争之地苟失之则缘边诸郡皆不可保
帝颇惑之因访于沆沆曰继迁不死灵州非朝廷有也
莫若遣使密召州将使部分军民空垒而归如此则关右之民息肩矣方众议各异未即
从沆言未几而灵州陷帝由是益重之沆为相王旦参
政事以西北用兵或至旰食旦叹曰我辈安能坐致太平得优游无事耶沆曰少有忧勤
足为警戒他日四方宁谧朝廷未必无事后契丹讲和
旦问何如沆曰善则善矣然边患既息恐人主渐生侈心耳旦未以为然沆又日取四方
水旱盗贼奏之旦以为细事不足烦圣听沆曰人主少
年当使知四方艰难不然血气方刚不留意声色犬马则土木甲兵祷祠之事作矣吾老
不及见此此参政他日之忧也沆没后真宗以契丹既
和西夏纳款遂封岱祠汾大营宫观搜讲坠典靡有暇日旦亲见王钦若丁谓等所为欲
谏则业已同之欲去则上遇之厚乃以沆先识之远叹
曰李文靖真圣人也当时遂谓之圣相寇准与丁谓善屡以谓才荐于沆不用准问之沆
曰顾其为人可使之在人上乎准曰如谓者相公终能
抑之使在人下乎沆笑曰他日后悔当思吾言也准后为谓所倾始伏沆言沆为相接宾
客常寡言马亮与沆同年生又与其弟维善语维曰外
议以大兄为无口匏维乘间达亮语沆曰吾非不知也然今之朝士得升殿言事上封论
奏了无壅蔽多下有司皆见之矣若邦国大事北有契
丹西有夏人日旰条议所以备御之策非不详究荐绅如李宗谔赵安仁皆时之英秀与
之谈犹不能启发吾意自余通籍之子坐起拜揖尚周
章失次即席必自论功最以希宠奖此有何策而与之接语哉苟屈意妄言即世所谓笼
罩罩之事仆病未能也沆又尝言居重位实无补惟
中外所陈利事【宋史本传作中外所陈利害按东都事畧及长编俱作四方言利事者
未尝一施行今据改】一切报罢之此少以报国尔
朝廷防制纤悉备具或徇所陈请施行一事即所伤多矣陆象先曰庸人扰之是已儉人
苟一时之进岂念厉民耶沆为相常读论语或问之沆
曰沆为宰相如论语中节用而爱人使民以时尚未能行圣人之言终身诵之可也景德
元年沆待漏将朝矢作而归诏太医诊视抚问之使相
望于道明日驾往临问赐白金五千两方还宫而沆卒年五十八帝闻之惊叹趣驾再往

临哭之恸谓左右曰沆为大臣忠良纯厚始终如一岂
意不享遐寿言终又泣下赠太尉中书令谥文靖录其弟国子博士贇为虞部员外郎光
禄寺丞源为太子中舍屯田员外郎直集贤院维为户
部员外郎子宗简为大理评事甥苏昂妻兄之子朱涛并同进士出身干兴元年仁宗即
位诏配享真宗庙庭沆性直谅内行修谨言无枝叶识
大体居位慎密不求声誉动遵条制人莫能干以私公退终日危坐未尝跛倚治第封邱
门内厅事前仅容旋马或言其太隘沆笑曰居第当传
子孙此为宰相厅事诚隘为太祝奉礼厅事已宽矣至于垣颓壁损不以屑虑堂前药阑
坏妻戒守舍者勿葺以试沆沆朝夕见之经月终不言
妻以语沆沆曰岂可以此动吾一念哉家人劝治居第未尝答弟维因语次及之沆曰身
食厚禄时有横赐计囊装亦可以治第但念市新宅须
一年缮完人生朝暮不可保又岂能久居巢林一枝聊自足耳安事丰屋哉沆与诸弟友
爱尤器重维暇日相对宴饮清言未尝及朝政亦未尝
问家事沆没后或荐梅询可用真宗曰李沆尝言其非君子其为信倚如此维第进士历
官尚书左丞兼侍读学士预修真宗实录迁工部尚书
博学少以文章知名至老不废书景德以后巡幸四方典章名物多维所参定尝预定七
经正义修续通典册府元龟景佑元年赠尚书左仆射

【按宋史此下有沆弟维传今接附沆传后】

△王旦

王旦字子明大名莘人曾祖言黎阳令祖彻左拾遗父祐尚书兵部侍郎以文章显
于汉周之际事太祖太宗为名臣 【按欧阳修撰王
文正公全德元老碑载曾祖追封许国公祖追封鲁国公考追封晋国公皆累赠太师尚
书令兼中书令】 尝手植三槐于庭曰吾之后世必有
为三公者此其所以志也旦幼沉默好学有文祐器之曰此儿当至公相太平兴国五年
进士及第为大理评事知平江县就改将作监丞赵昌
言为转运使以威望自任属吏屏畏入旦境称其善政以女妻之代还命监潭州银场何
承矩典郡荐入为著作佐郎预编文苑英华诗类迁殿
中丞通判郑州表请天下建常平仓以塞兼并之路徙濠州淳化初王禹偁荐其才任转
运使驿召至京旦不乐吏职献文召试命直史馆二年
拜右正言知制诰初祐以宿名久掌书命旦不十年继其任时论美之钱若水有人伦鉴
见旦曰真宰相器也与之同列每曰王君凌霄耸壑栋
梁之材贵不可涯非吾所及李沆以同年生亦推重为远大之器明年与苏易简同知贡
举加虞部员外郎同判吏部流内铨知考课院赵昌言
参机务旦避嫌引唐独孤郁权德輿故事辞职太宗嘉其识体改礼部郎中集贤殿修撰

昌言出知凤翔即曰以旦知制诰仍兼修撰判院事又令冠西阁至道元年知理检院二年进兵部郎中真宗即位拜中书舍人数月为翰林学士兼知审官院通进银台封驳司帝素贤旦尝奏事退目送之曰为朕致太平者必斯人也钱若水罢枢务得对苑中访近臣之可用者若水言旦有德望堪任大事帝曰此固朕心所属也咸平三年又知贡举锁宿旬日拜给事中同知枢密院事踰年以工部侍郎参知政事契丹侵边从幸澶州雍王元份留守东京遇暴疾命旦驰还权留守事旦曰愿宣寇准臣有所陈准至旦奏曰十日之间未有捷报时当如何帝默然良久曰立皇太子旦既至京直入禁中下令甚严使人不得传播及驾还旦子弟及家人皆迎于郊忽闻后有驺诃声惊视之乃旦也景德二年【按宋史本传戴咸平三年同知枢密院事谕年参知政事下又云二年加尚书左丞考宋史真宗本纪及东都事畧旦加左丞在景德二年拜相在三年二年上脱景德二字今据增】加尚书左丞三年拜工部尚书同中书门下平章事集贤殿大学士监修两朝国史王钦若以天书封禅等事倾动帝意帝心惮旦曰王旦得无不可乎钦若曰臣得以圣意喻之宜无不可乘间为旦言旦黽勉而从帝尤犹豫莫与筹之者会幸秘阁骤问杜镐曰古所谓河出图洛出书果何事也镐老儒不测其旨漫应之曰此圣人以神道设教尔帝繇此意决复召旦欢饮赐以尊酒曰此酒极佳归与妻孥共之既归发之皆珠也由是凡天书封禅之事旦不复异议【谨按通鉴辑览御批王旦于天书封禅之事称贺力请甚至身充大礼使于谄谀逢迎之术无所不至则其过不止于不能谏阻而已也至后遗令披缙为敛以表不谏之失尤为欲盖弥彰或者以为美珠固结则殊不然即如所云诡为尊酒颁赐其事甚秘谁复为之漏泄实系史家傅会之词】大中祥符初为天书仪仗使从封泰山为大礼使进中书侍郎兼刑部尚书受诏撰封祀坛颂加兵部尚书四年祀汾阴又为大礼使迁右仆射昭文馆大学士仍撰祀坛颂将复进秩恳辞得免止加功臣俄兼门下侍郎玉清昭应宫使【按石林燕语云大中祥符五年玉清昭应宫成王魏公为首相始命充使宫观置使自此始然每为现任宰相兼职天圣元年吕申公为相时朝廷崇奉之意稍缓因是罢使名】五年为玉清奉圣像大礼使景灵宫建又为朝修使七年刻天书兼刻玉使选御厩三马赐之玉清昭应宫成拜司空国史成迁司徒旦为天书使每有大礼辄奉天书以行恒邑邑不乐凡柄用十八年为相仅一纪会契丹修和西夏誓守故地二边兵罢不用真宗以无事治天下旦谓祖宗之法具在务行故事慎所变改帝益信之言无不听凡大臣

有所请必曰王旦以为何如天下大蝗使人于野得死
蝗帝以示大臣明日执政遂袖死蝗进曰蝗实死矣请示于朝率百官贺旦独不可后数
日方奏事飞蝗蔽天帝顾旦日使百官方贺而蝗如此
岂不为天下笑耶宫禁火灾旦驰入帝方以两朝所积为可惜旦对曰陛下富有天下财
帛不足忧所虑者政令赏罚之不当臣备位宰府天灾
如此臣当罢免继上表待罪帝乃降诏罪已许中外封事言得失后有言荣王宫火所延
非天灾请置狱劾当坐死者百余人旦独请曰始火时
陛下已降诏罪已臣等皆上章待罪今反归咎于人何以示信且火虽有迹安知非天谴
耶当坐者皆免日者上书言宫禁事坐诛籍其家得朝
士所与往还占问吉凶之说帝怒欲付御史问状旦曰此人之常情且语不及朝廷不足
罪帝犹怒旦因自取尝所占问之书进曰臣少贱时不
免为此必以为罪愿并臣付狱臣为宰相执国法岂可自为之幸于不发而以罪人帝意
解旦至中书悉焚所得书既而复悔驰取之而已焚之
矣繇是皆免契丹奏请岁给外别假钱币旦曰东封甚近车驾将出彼以此探朝廷之意
耳帝曰何以答之且曰止当以微物轻之乃以岁给三
十万物内各借三万仍谕次年额内除之契丹得之大惭次年复下有司契丹所借金
币六万事属微末今仍以常数与之后不为比西夏赵德
明言民饥求粮百万斛大臣皆曰德明新纳誓而敢违请以诏责之帝以问旦旦请敕有
司具粟百万于京师而诏德明来取之德明得诏惭且
拜曰朝廷有人寇准数短旦旦专称准帝谓旦曰卿虽称其美彼专谈卿恶旦曰理固当
然臣在相位久政事阙失必多准对陛下无所隐益见
其忠直此臣所以重准也帝以是愈贤旦中书有事送密院违诏格准在密院以闻旦被
责堂吏皆罚不踰月密院有事送中书亦违诏格堂吏
欣然呈旦旦令送还密院准大惭寇准罢枢密使托人私求为使相旦惊曰将相之任岂
可求耶吾不受私请准深憾之已而除准武胜军节度
使同中书门下平章事准入谢曰非陛下知臣安能至此帝具道旦所荐者准愧叹以为
不可及帝欲相王钦若旦曰钦若遭逢陛下恩礼已隆
且乞留之枢密两府亦均臣见祖宗朝未尝有南人当国者虽古称立贤无方然须贤士
乃可臣为宰相不敢阻抑人此亦公议也真宗遂止旦
没后钦若始大用语人曰为王公迟我十年作宰相钦若与陈尧叟马知节同在枢密府
因奏事忿争帝召旦至钦若犹哓不已帝大怒命付狱
旦从容请来日取旨明日召旦前问之旦曰钦若等当黜未知坐以何罪帝曰坐忿争无
礼旦曰陛下奄然天下使大臣坐忿争无礼之罪或闻
外国恐无以威远愿至中书召钦若等宣示陛下含容之意且戒约之俟少闲罢之未晚

也帝曰非卿言朕固难忍后月余钦若等皆罢旦尝与杨亿评品人物亿曰丁谓久远当何如旦曰才则才矣语道则未他日在上位使有德者助之庶可终吉若独当权必为身累尔后谓果如言旦为兖州景灵宫朝修使内臣周怀政偕行或业间请见旦必俟从者尽至冠带出见于堂白事而退后怀政以事败方知旦远虑内臣刘承规以忠谨得幸病且死求为节度使帝语旦曰承规待此以瞑目旦执不可曰他日将有求为枢密使者柰何遂止自是内臣官不过留后旦为相宾客满堂无敢以私请察可与言及素知名者数月后召与语询访四方利病或使疏其言献之观才之所长密籍其名其人复来不见也每有差除先密疏三四人姓名以请所用者帝以笔点之同列不知争有所用惟旦所用奏入无不可丁谓以是数毁旦帝益厚之故参政李穆子行简以将作监丞家居有贤行迁太子中允使者不知其宅真宗命就中书问旦人始知行简为旦所荐旦凡所荐皆人未尝知旦没后史官修真宗实录得内出奏章始知朝士多旦所荐云谏议大夫张师德两诣旦门不得见意为人所毁以告向敏中为从容明之及议知制诰旦曰可惜张师德敏中问之旦曰累于帝前言师德名家子有士行不意两及吾门状元及第荣进素定但当静以待之若复奔竞使无阶而入者当如何也敏中启以师德之意固称适有阙望公弗遗旦曰第缓之使师德知聊以戒贪进激薄俗也石普知许州不法朝议欲就劾旦曰普武人不明典宪恐恃薄效妄有生事必须重行乞召归置狱乃下御史按之一日而狱具议者以为不屈国法而保全武臣真国体也薛奎为江淮发运使辞旦且无他语但云东南民力竭矣奎退而叹曰真宰相之言也张士逊为江西转运使辞旦求教旦曰朝廷權利至矣士逊迭更是职思旦之言未尝求利张咏知成都召还以任中正代之言者以为不可帝问旦对曰非中正不能守咏之规他人往妄有变更矣旦任事久人有谤之者辄引咎不辨至人有过失虽人主盛怒可辨者辨之必得而后已天禧初进位太保【按三公并除双员自旦始】为兖州太极观奉上宝册使复加太尉兼侍中五日一赴起居入中书遇军国重事不以时参决旦愈畏避上疏恳辞一日独对滋福殿帝曰朕方以大事托卿而卿疾如此因命皇太子出拜旦惶恐走避太子随而拜之旦言太子盛德必任陛下事因荐可为大臣者十余人其后不至宰相惟李及凌策二人亦为名臣先是太子谕德见旦称太子学书有法旦曰谕德之职止于是耶张士逊又称太子书旦曰太子不在应举选学士不在学书旦复以疾恳辞帝悯其形瘁许之诏以太尉领玉清昭应宫使给宰相半俸初旦以宰相兼使今罢相使

犹领之其专置使自旦始寻又命肩輿入禁扶见于延和殿帝曰卿今疾亟万一有不讳使朕以天下事付之谁乎旦曰知臣莫若君惟明主择之再三问不对时张咏马亮皆为尚书帝历问二人亦不对因曰试以卿意言之旦强起举笏曰以臣之愚莫如寇准帝曰准性刚褊卿更思其次旦曰他人臣所不知也遂辞退后旦没岁余竟用准为相旦与杨亿素厚延至卧内请撰遗表表上帝遂幸其第赐白金五千两旦作奏辞之藁末自益四句云益惧多藏况无所用见欲散施以息咎殃即昇至内闕诏不许还至门旦已卒年六十一赠太师尚书令魏国公谥文正录其子弟侄外孙门客常从授官者十数人诸子服除又各进一官干兴初诏配享真宗庙庭及建碑仁宗篆其首曰全德元老之碑旦事寡嫂有礼与弟旭友爱甚笃婚姻不求门阀被服质素家人未尝见其怒饮食不精洁但不食而已不置田宅曰子孙当各念自立何必田宅徒使争财为不义尔真宗以其所居陋欲治之旦辞以先人旧庐乃止三子雍国子博士冲左赞善大夫素别有传

△向敏中

向敏中字常之开封人父瑀仕汉为符离令性严毅惟敏中一子躬自教督不假颜色尝谓其母曰大吾门者此儿也敏中及冠继丁内外忧能刻厉自立有大志太平兴国五年进士解褐将作监丞通判吉州就改右赞善大夫转运使张齐贤荐其才代还为著作郎召见便殿占对明畅太宗善之命为户部推官出为淮南转运副使时领外计者皆以权宠自尊所至畏惮敏中不尚威察待僚属有礼勤于劝勸职务修举或荐其有武干者召入将授诸司副使敏中恳辞仍献所著文加直史馆遣还任以耕藉恩超左司谏入为户部判官知制诰未几权判大理寺时没入祖吉赃钱分赐法使敏中引锺离意委珠事独不受妖尼道安构狱事连开封判官张去华敏中妻父也以故得请不预决讞既而法官皆贬犹以亲累落职出知广州入辞面叙其事太宗为之感动翌日迁职方员外郎遣之是州兼掌市舶前守多涉讥议敏中至荆南预市药物以往在任无所须以清廉闻就擢广南东路转运使召为刑部郎中太宗飞白书敏中泊张咏二名付中书曰此二人名臣也朕将用之并命为枢密直学士时通进银台司主出纳书奏领于枢密院颇壅遏或至漏失敏中具奏其事恐远方有失事机请别置局命官专莅校其簿籍诏命敏中与咏领其局太宗欲大任敏中当涂者忌之会有言敏中在法寺时皇甫侃监无为军榷务以贿败发书历诣朝贵求为末减敏中亦受之事下御史按实俄捕得侃私僮诘之云尝有书及门敏中不启封书令瘞临江传舍驰驿掘

得封题如故太宗大惊异召见慰谕赏激遂决于登用拜右谏议大夫同知枢密院事自郎中至是百余日超擢如此时西北用兵枢机之任专主谋议敏中明辨有才畧遇事敏速凡二边道路斥堠走集之所莫不周知至道初迁给事中真宗即位敏中适在疾告力起见于东序即遣视事进户部侍郎会曹彬为枢密使改为枢密副使咸平初拜兵部侍郎参知政事从幸大名属宋湜病代兼知枢密院事时大兵之后议遣重臣慰抚边郡命为河北河东安抚大使以陈尧叟冯拯为副发禁兵万人翼从所至访民疾苦四年以本官同平章事充集贤殿大学士故相辞居正居第有诏无得贸易敏中违诏质之既而闻其欲取王承衍女弟密约已定而未纳采询于王氏得其实罢为户部侍郎出知永兴军景德初复兵部侍郎夏州李继迁卒其子德明纳款就命敏中为鄜延路缘边安抚使俄还京兆是冬帝幸澶渊赐敏中密诏尽付西鄙许便宜行事敏中得诏不泄视政如常日会大雉有告禁卒欲倚雉为乱者敏中密使麾兵被甲伏庑下幕中明日尽召宾僚兵官置酒纵阅无一人预知者命雉入先驰骋中门外后召至阶敏中振袂一呼伏出尽擒之果各怀短刃即席斩焉既屏其尸以灰沙扫庭仍张乐宴饮坐客皆股栗边藩遂安时旧相出镇不以军事为意帝闻之称敏中曰大臣出临四方惟敏中尽心民事尔于是有复用之意二年又以德明誓约未定徙敏中为鄜延路都部署兼知延州委以经畧改知河南府兼西京留守大中祥符初议封泰山以敏中旧德有人望召入权东京留守礼成拜尚书右丞时吏部选人多稽滞者命敏中与温仲舒领其事俄兼秘书监又领工部尚书充资政殿大学士祀汾阴复为留守敏中以厚重镇静人情帖然拜刑部尚书五年复拜同平章事充集贤殿大学士加中书侍郎七年除景灵宫使【按宋宰辅编年录云时初置使以敏中为之】宫成进兵部尚书天禧初加吏部尚书进右仆射兼门下侍郎监修国史是日翰林学士李宗谔当对帝曰朕自即位未尝除仆射今命敏中此殊命也【按真宗即位之年夏三月癸卯宰相吕端加右仆射自后张齐贤李沆王旦陈尧叟皆除右仆射天禧元年二月王钦若又先敏中六月拜除不得谓未尝除仆射命敏中为殊命也又考李宗谔卒于祥符五年距敏中除仆射已六载矣安有李宗谔当对事东都事畧宋名臣言行录所载俱同姑仍其旧】敏中应甚喜贺客必多卿往观之勿言朕意也宗谔既至敏中谢客门阑寂然明日具以所见对帝曰向敏中大耐官职徙玉清昭应宫使以年老累请致政优诏不许三年郊祀毕进左仆射昭文馆大学士奉表恳让又表求解皆不许明年卒年七十二赠太尉中书令

谥文简五子诸壻并迁官亲校又官数人敏中姿表瓌
硕有仪矩性端厚岂弟多智晓民政善处繁剧慎于采拔居大任三十年时以重德目之
为人主所优礼故虽衰疾终不得谢及追命制入帝特
批曰敏中淳谨温良宜益此意其恩顾如此子传正国子博士传式龙图阁直学士传亮
驾部员外郎传师殿中丞传范娶南阳郡王惟吉女安
福县主为密州观察使谥惠节傅亮子经定国军留后谥康懿经女即钦圣宪肃皇后也
以后族赠敏中燕王传亮周王经吴王敏中余孙铎绛
并官太子中书

钦定续通志卷三百二十一

●钦定续通志卷三百二十二 列传一百二十二

列传

宋 【二十六】

○宋二十六

王钦若 丁谓 夏竦

王钦若

丁谓

夏竦

△王钦若

王钦若字定国临江军新喻人父仲华祖郁钦若早孤郁爱之太宗伐太原时钦若
纔十八作平晋赋论献行在郁为濠州判官将死告家
人曰吾历官逾五十年慎于用刑活人多矣后必有兴者其在吾孙乎淳化三年钦若擢
进士甲科为亳州防御推官迁秘书省秘书郎监庐州
税改太常丞判三司理欠凭由司时毋宾古为度支判官尝言曰天下逋负自五代迄今
理督未已民病几不能胜仆将启蠲之钦若一夕命吏
句校成数翌日上之真宗大惊曰先帝顾不知邪钦若徐曰先帝固知之殆留与陛下收
人心尔即日放逋负一千余万释系囚三千余人帝益
器重钦若召试学士院拜右正言知制诰召为翰林学士蜀寇王均始平为西川安抚使
所至问系囚自死罪以下第降之凡列便宜多所施行
还授左谏议大夫参知政事以郊祀恩加给事中河阴民常德方讼临津县尉任懿赂钦
若得中第事下御史台劾治初钦若咸平中尝知贡举
懿举诸科寓僧仁雅舍仁雅识僧惠秦者与钦若厚懿与惠秦约以银赂钦若书其数于
纸令惠秦持去会钦若已入院属钦若客纳所书令奴
祁睿书懿名于臂并以所约银告钦若懿再入试第五场睿复持汤饮至贡院钦若密令

奴索取银懿未即与而登科去仁雅驰书河阴始归之
德方得其书以告御史中丞赵昌言昌言以闻既捕祁睿等亦请逮钦若属吏祁睿本亳
小吏虽从钦若久而名犹隶亳州钦若乃言向未有祁
睿惠秦亦不及门帝方顾钦若厚命邢昺阎承翰等于太常寺别鞠之懿更云妻兄张驾
识知举官洪湛尝俱造湛门始但以银属二僧不知达
主司为谁昺等遂诬湛受懿银湛适使陕西还而狱已具时驾且死睿又悉遁去钦若因
得固执祁睿休役后始佣于家它奴使多新募不识惠
秦故皆无证验湛坐削籍流儋州而钦若遂免方湛代王旦入知贡举懿已试第三场及
官收湛赃家无有也乃以湛假梁颢白金器输官湛遂
死贬所人知其冤而钦若恃势人莫敢言者景德初契丹入侵帝将幸澶渊钦若自请北
行【按续通鉴载帝问寇准曰天雄军重镇孰可为
守准以王钦若荐钦若至未及有言准遽曰主上亲征非臣子辞难之曰参政为国柄臣
当体此意钦若惊惧不敢辞本传乃云自请北行盖曲
笔也】以工部侍郎参知政事判天雄军提举河北转运使真宗亲宴以遣之素与寇准
不协及还累表愿解政事罢为刑部侍郎资政殿学士
寻判尚书都省修册府元龟或褒赞所及钦若自名表首以谢或缪误有所谴问戒书吏
但云杨亿以下其所为多此类也岁中改兵部加大学
士知通进银台司兼门下封驳事初钦若罢为置资政殿学士以宠之准定其班在翰林
学士下钦若诉于帝复加大字班承旨上【按宋宰
辅编年录云置资政殿学士大学士自钦若始】以尚书左丞知枢密院事修国史大中
祥符初为封禅经度制置使兼判兖州为天书仪卫副
使先是真宗尝梦神人言赐天书于泰山即密谕钦若钦若因言六月甲午木工董祚于
醴泉亭北见黄素曳草上有字不能识皇城吏王居正
见其上有御名以告钦若既得之具威仪奉导至社首跪授中使驰奉以进真宗至含芳
园奉迎出所上天书再降祥瑞图示百僚钦若又言至
岳下两梦神人愿增建庙庭及至威雄将军庙其神像如梦中所见因请构亭庙中封禅
礼成迁礼部尚书命作社首颂迁户部尚书从事汾阴
复为天书仪卫副使迁吏部尚书明年为枢密使检校太傅同中书门下平章事圣祖降
加检校太尉七年为同天书刻玉使马知节同在枢密
素恶钦若议论不相下会泸州都巡检王怀信等上平蛮功钦若久不决知节因面诋其
短争于帝前及趣论赏钦若遂擅除怀信等官坐是罢
枢密使奉朝请改刻玉副使知通进银台司俄复拜枢密使同平章事上玉皇尊号迁尚
书右仆射判礼仪院为会灵观使有龟蛇见拱圣营因
其地建祥源观命钦若总领之寻拜左仆射兼中书侍郎同平章事明年为景灵使阅道

藏得赵氏神仙事迹四十人绘于廊庑又明年商州捕
得道士谯文易 【隆平集东都事畧并作谯之易】 畜禁书能以术使六丁六甲神自
言尝出入钦若家得钦若所遗诗帝以问钦若谢不省
遂以太子太保出判杭州仁宗为皇太子自以东宫师保请归朝复为资政殿大学士诏
日赴资善堂侍讲皇太子会辅臣兼领三少钦若又以
品高求换秩拜司空寻除山南道节度使同平章事判河南府 【按宋宰编年载钦若晏
见帝问曰卿何故不之中书对曰臣不为宰相安敢
之中书帝顾都知送钦若诣中书视事令设馔以待之谓曰帝命中书设馔尔钦若既出
使都知入以无白麻不敢奉诏因归私第有诏学士院
降麻谓乃除钦若使相为西京留守帝但问宣制亦不之悟也】 与宰相丁谓不协以疾
请就医京师不报令其子从益移文河南府輿疾而归
谓言钦若擅去官守命御史中丞薛映就第按问钦若惶恐伏罪降司农卿分司南京夺
从益一官仁宗即位改秘书监起为太常卿知濠州以
刑部尚书知江甯府仁宗尝为飞白书适钦若有奏至因大书王钦若字是时冯拯病太
后有再相钦若意即取字緘置汤药合遣中人赍以赐
旦口宣召之至国门而人未有知者既朝复拜司空门下侍郎同平章事玉清昭应宫使
昭文馆大学士监修国史帝初临政钦若谓平时百官
叙进皆有常法为迁叙图以献真宗实录成进司徒以郊祀恩封冀国公兼译经使始赴
传法院感疾亟归帝临问赐白金五千两卒赠太师中
书令谥文穆录亲属及所亲信二十余人国朝以来宰相恤恩未有钦若比者钦若尝言
少时过圃田夜起视天中赤文成紫微字后使蜀至褒
城道中遇异人告以他日位至宰相既去视其刺字则唐相裴度也及贵遂好神仙之事
常用道家科仪建坛场以礼神朱书紫微二字陈于坛
上表修裴度祠于圃田官其裔孙自撰文以纪其事真宗封泰山祀汾阴而天下争言符
瑞皆钦若与丁谓倡之钦若状貌短小项有附疣时人
目为瘿相然习数过人每朝廷有所兴造委曲迁就以中帝意又性倾巧敢为矫诞马知
节尝斥其奸状帝亦不之罪其后仁宗尝谓辅臣曰钦
若久在政府观其所为真奸邪也王曾对曰钦若与丁谓林特陈彭年刘承珪时谓之五
鬼奸邪险伪诚如圣谕钦若子从益终赞善大夫追赐
进士及第后无子以叔之子为后 【按宋史此下有林特附传无事迹足录今从删】

△丁谓

丁谓字谓之后更字公言苏州长沙人少与孙何友善同袖文谒王禹偁禹偁大惊
重之以为自唐韩愈柳宗元后三百年始有此作世谓
之孙丁淳化三年登进士甲科为大理评事通判饶州踰年直史馆峡路蛮扰边命往体

量还奏称旨领峡路转运使累迁尚书工部员外郎会
分川峡为四路改夔州路转运使初王均叛朝廷调施黔高溪州蛮子弟以捍贼既而反
为寇谓至召其种酋开谕之且言有诏赦不杀酋感泣
愿世奉贡乃作誓刻石柱立境上蛮地饶粟而常乏盐谓听以粟易盐蛮人大悦其后溪
蛮别种有入寇者谓即遣高溪酋帅其徒讨击出兵援
之复上言黔南蛮族多善马请致馆犒给缗帛岁收市之其后徙置夔州城砦皆谓所经
画也居五年不得代乃诏举自代者于是入权三司盐
铁副使未几擢知制诰判吏部流内铨景德元年契丹侵河北帝幸澶渊以谓知郢州兼
齐濮等州安抚使提举转运兵马巡检事契丹深入民
惊扰争趣杨刘渡舟人邀利不时济谓取死罪囚给为舟人斩河上舟人惧民得悉渡遂
立部分使并河执旗帜击刁斗呼声闻百余里契丹遂
引去明年召为右谏议大夫权三司使寻加枢密直学士大中祥符初议封禅未决帝问
以经费谓对大计有余议乃决因诏谓为计度泰山路
粮草使初议即宫城干地营玉清昭应宫左右有谏者帝召问谓对曰陛下有天下之富
建一宫奉上帝且所以祈皇嗣也羣臣有沮陛下者愿
以此谕之王旦密疏谏帝如谓所对告之旦不复敢言乃以谓为修玉清昭应宫使复为
天书扶侍使迁给事中真拜三司使祀汾阴为行在三
司使建会灵观谓复总领之迁尚书礼部侍郎进户部参知政事建安军铸玉皇像为迎
奉使朝谒太清宫为奉祀经度制置使判亳州谓献白
鹿并灵芝九万五千本还判礼仪院又为修景灵宫使摹写天书刻玉笈玉清昭应宫副
使历工刑兵三部尚书再为天书仪卫副使拜平江军
节度使知升州天禧初徙保信军节度使三年以吏部尚书复参知政事 【按长编云故
事节度使除拜当降度翰林学士盛度以为参知政
事当属外制遂命知制诰宋绶草词谓甚恨焉】 是岁祀南郊辅臣俱进官故事尝为宰
相而除枢密使始得迁仆射乃以谓检校太尉兼本官
为枢密使时寇准为相尤恶谓谓媒檠其过遂罢准相既而拜谓同中书门下平章事昭
文馆大学士监修国史玉清昭应宫使 【按长编召
钱惟演入对曰冯拯故参知政事今除拜枢密使当矣但中书不当止用李迪一人盖迁
曹利用或丁谓迁中书帝曰谁可惟演曰丁谓文臣迁
中书为便又言玉清昭应宫未有使谓首议建宫即令领此又言曹利用忠赤有功国家
亦宜与平章事帝曰诺以枢密使吏部尚书丁谓平章
事枢密使并检校太尉曹利用加同平章事皆用惟演所言】 周怀政事败议再贬准帝
意欲谪准江淮间谓退除道州司马同列不敢言独王
曾以帝语质之谓顾曰居停主人勿复言盖指曾以第舍假准也其后诏皇太子听政皇

后裁制于内以二府兼东宫官遂加谓门下侍郎兼太子少傅而李迪先兼少傅乃加中书侍郎兼尚书左丞故事左右丞非两省侍郎所兼而谓意特以抑迪也谓所善林特自宾客改詹事谓欲引为枢密副使兼宾客迪执不可因大诟之既入对斥谓奸邪不法事愿与俱付御史杂治语在迪传帝因格前制不下乃罢谓为户部尚书迪为户部侍郎寻以谓知河南府迪知郓州明日入谢帝诘所争状谓对曰非臣敢争乃迪忿詈臣尔愿复留遂赐坐左右欲设墩谓顾曰有旨复平章事乃更以杭进即入中书视事如故仍进尚书左仆射门下侍郎平章事 【按长编载谓始传诏召刘筠草复相制筠不奉诏乃更召晏殊龙川别志涑水记闻皆以为草制者钱惟演也御史台记及宋绶撰刘筠墓志则隐其名曰卒命他学士为之东都事畧同此事宋史本传不载然于当曰大有关系不第为知制诰诸人分守正与党恶也因考诸书而备录之】 兼太子少师天章阁成拜司空干兴元年封晋国公仁宗即位进司徒兼侍郎 【隆平集作侍中】 为山陵使寇准李迪再贬谓取制草改曰当丑徒于纪之际属先皇违豫之初罹此震惊遂至沈剧 【按寇准贬雷州司户知制诰宋绶当直草责辞谓嫌其不切即用己意改定制词中有曰始其告变之辰适当违豫之际阽危将发震骇斯多四语即谓所改稍换其词】 凡与准善者尽逐之是时二府定议太后与帝五日一御便殿听政既得旨而谓潜结内侍雷允恭令密请太后降手书军国事进入印画学士草制辞允恭先持示谓阅讫乃进盖谓欲独任允恭传达中旨而不欲同列与闻机政也允恭倚谓势益横无所惮允恭方为山陵都监与判司天监刑中和擅易皇堂地夏守恩领工徒数万穿地土石相半众议日喧惧不能成功中作而罢奏请待命谓庇允恭依违不决内侍毛昌达自陵下还以其事奏诏问谓谓始请遣使按视既而咸谓复用旧地方诏冯拯曹利用等就谓第议遣王曾覆视遂诛允恭后数日太后与帝坐承明殿召拯利用等谕曰丁谓为宰辅乃与宦官交通因出谓尝托允恭不法等事因曰谓前附允恭奏事皆言己与卿等议定故皆可其奏且营奉先帝陵寝而擅有迁易几误大事拯等奏曰自先帝登遐政事皆谓与允恭同议称得旨禁中臣等莫辨虚实赖圣神察其奸此宗社之福也乃降谓太子少保分司西京故事黜宰相皆降制时欲亟行止令拯等即殿庐召舍人草词仍榜朝堂布谕天下追其子珙珩玘一官落珙馆职先是女道士刘德妙者尝以巫师出入谓家谓败逮系德妙内侍鞫之德妙通款谓尝教言若所为不过巫事不若托言老君言祸福足以动人于是即谓家设神像夜醮于园中允恭数至请祷及帝崩

引入禁中又因穿地得龟蛇令德妙持入内给言出其家出洞中仍复教云帝即问若所事何知为老君第云相公非凡人当知之谓又作颂题曰混元皇帝赐德妙语涉妖诞遂贬崖州司户参军诸子并勒停祀又坐与德妙奸除名配隶复州籍其家得四方赂遗不可胜纪其弟诵说谏悉降黜坐谓罢者自参知政事任中正而下十数人在崖州踰三年徙雷州又五年徙道州明道中授秘书监致仕居光卒年七十二 【据东都事畧增】 谓机敏有智谋儉狡过人在三司案牒繁委吏久难解者一言判之众皆释然真宗朝营造宫观奏祥异之事多谓与王钦若发之初议营昭应宫料功须二十五年谓令以夜继昼每绘一壁给二烛七年乃成真宗崩议草遗制军国事兼取皇太后处分谓乃增以权字及太后称制又议月进钱充宫掖之用由是太后深恶之因雷允恭遂并录谓前后欺罔事窜之在贬所专事浮屠因果之说家寓洛阳尝为书自克责叙国厚恩戒家人毋辄怨望遣人致于洛守刘煜祈付其家戒使者何煜会众僚时达之煜得书不敢私即以闻帝见感恻遂徙雷州亦出于揣摩也

△夏竦

夏竦字子乔江州德安人父承皓太平兴国初上平晋策补右侍 【东都事畧作右侍禁】 隶大名府契丹入侵承皓繇间道发兵夜与契丹遇力战死之赠崇仪使录竦为润州丹阳县主簿竦资性明敏好学自经史百家无不通晓为文章典雅藻丽举贤良方正擢光禄寺丞通判台州召直集贤院为国史编修官累迁右正言帝幸亳州为东京留守推官仁宗初封庆国公主旦数言竦材命教书资善堂未几同修起居注为玉清昭应宫判官兼领景灵宫会真观事迁尚书礼部员外郎知制诰史成迁户部景灵宫成迁礼部郎中竦娶杨氏杨亦工笔札有钩距及竦显多内宠寢与杨不谐杨疏竦阴事讼之开封府府以事闻下御史台置劾左迁职方员外郎知黄州后二年徙邓州又徙襄州属岁饥大发公廩不足竦又劝率州大姓使出粟得二万斛用全活者四十余万人仁宗即位迁户部郎中徙寿安洪三州洪俗尚鬼多巫覡竦索部中得千余家敕还农业毁其淫祠以闻诏江浙以南悉禁绝之竦材术过人急于进取喜交结任数术倾侧反复世以为奸邪当太后临朝尝上疏乞与修真宗实录不报既而丁母忧潜至京师依中人张怀德为内助宰相王钦若雅善竦因左右之遂起复知制诰为景灵判官判集贤院以左司郎中为翰林学士句当三班院兼侍读学士龙图阁学士又兼译经润文官迁右谏议大夫枢密副使修国史迁给事中初武臣赏罚无法吏

得高下为奸竦为集前比着为定例事皆按比而行改参知政事祥源观使增设贤良等六科复百官转对置理检使皆竦所发与宰相吕夷简不相能复为枢密副使迁刑部侍郎史成进兵部寻进尚书左丞章献太后崩为礼部尚书知襄州改颖州京东又荐饥徙青州兼安抚使踰年罢安抚迁刑部尚书徙应天府宝元初以户部尚书入为三司使赵元昊反拜奉宁军节度使知永兴军听便宜行事徙镇忠武知泾州还判永兴军兼陕西经畧安抚招讨进宣徽南院使与陈执中论兵事不合诏徙屯鄜州 【东都畧作邓州】 初竦在泾州朝廷遣庞籍就计事竦因条上十事时边臣多议征讨朝廷乡之而竦言出师非便既而诏以泾原鄜延两路兵进讨会元昊稍求纳款范仲淹请留鄜延兵繇是泾原兵亦不行竦上十事一教习强弩以为奇兵二羁縻属羌以为藩篱三诏嘉勒斯賚父子并力破贼四度地形险易远近砦栅多少军士勇怯而增减屯兵五诏诸路互相应援六募土人为兵州各一二千人以代东兵七增置弓手壮丁猎户以备城守八并边小砦毋积刍粮贼攻急则弃小砦入保大砦以完兵力九关中民坐累若过误者许人入粟赎罪铜一斤为粟五斗以贍边计十捐并边冗兵冗官及减骑军以舒馈运当时颇采用之其募土人为兵令下杨偕力非其说与偕交章论奏竦议终屈竦雅意在朝廷以任以西事颇依违顾避又数请解兵柄改判河中府徙蔡州庆厯中召为枢密使谏官御史交章论竦在陕西畏懦不肯尽力每论边事但列众人之言至遣敕使临督始陈十策尝出巡边置侍婢中军帐下几致军变元昊尝募得竦首者与钱三千为贼轻侮如此今复用之边将体解矣且竦挟诈任数奸邪倾险夷简畏其为人不肯引为同列既退乃荐之以释宿憾陛下孜孜政事首用怀诈不忠之臣何以求治会竦已至国门言者论不已请不令入见谏官余靖又言竦累表引疾及闻召用即兼驿而驰若不早决竦必坚求面对叙恩感泣复有左右为之地则圣听惑矣章累上即日诏竦归镇竦亦自请还节徙知亳州改授吏部尚书 【按长编云竦又自请纳节还文资仍不带职乃陟吏部尚书】 岁中加资政殿学士竦之及国门也帝封弹疏示之既至亳书上书万言自辩复拜宣徽南院使河阳三城节度使判并州明年拜同中书门下平章事判大名府又明年召入为宰相 【按宋宰辅编年录载故事大臣自使相除枢相必纳节还旧官淮竦独依前官夏竦枢相制曰是用断自朕志召登机衡遏流议于风波定成契于金石仍中军之旄钺兼上宰之印章】 制下谏官御史复言大臣和则政事修竦前在关中与执中论议不合不可使共事遂改枢密使封英国公 【按宋宰

辅编年录载是岁南郊中外将相惟竦满万户中书请封英国公 旧制将相食邑万户即封国公】 亲事官夜入禁中欲为乱领皇城司者皆坐逐独杨怀敏降官领入内都知如故言者以为竦结怀敏而曲庇之会京师同日无云而震者五帝方坐便殿趣召翰林学士张方平至谓曰夏竦奸邪以致天变如此宜出之罢知河南府未几赴本镇加兼侍中飡明堂徙镇武甯进郑国公锡賚与辅臣等将相居外遇大礼有赐自竦始寻以病归卒赠太史中书令赐谥文正刘敞言世谓竦奸邪而谥正不可改谥文庄竦以文学起家有名一时朝廷大典策多以属之为郡有治绩喜作条教于闾里立保伍之法盗贼不敢发然人苦烦扰治军尤严敢诛杀尝有龙骑卒戍边剽州郡莫能止或密以告竦时竦在关中俟其至召诘之诛斩殆尽军中大震其威畧类多此然性贪数商贩部中在并州使其仆贸易为所侵盗至杖杀之积家财累巨万自奉尤侈畜声伎甚众所在阴间僚属使相猜阻以钩致其事遇家人亦然子安期字清卿以父任为将作监主簿召试赐进士出身累迁太常博士出为京西转运使盗起部中剽劫州县而光化军戍卒相继叛势且相合安期督将吏尽捕得斩之徙河东转运使累迁尚书工部郎中徙江淮发运使入为三司户部副使会元昊纳款西边罢兵命往陕西与诸路经畧安抚司议损边费颇奏省吏员及汰边兵之不任役者五万人擢天章阁待制遂为陕西都转运使徙河北进兵部郎中时竦为枢密使为请还所迁官丐淮浙一郡复以为工部郎中江淮发运使徙知永兴军进龙图阁直学士吏部郎中知渭州简弓箭手得骁勇万人为步兵骑又半之教以战阵法繇是土兵胜他路又籍塞下闲田募人耕种岁得谷数万斛以备振发名曰贷仓迁右谏议大夫进枢密直学士知延州未至丁父忧服除辞所进职复为龙图阁直学士兼侍读提举集禧观以学士复知延州州东北阻山无城郭虏骑尝乘之安期至即大筑城时方暑士卒有怨言安期益令广袤计数百步令其下曰敢言者斩躬自督役不踰月而就元昊请画疆界朝廷欲遣使以问安期安期对曰此不足烦王人衙校可办也议遂决暴得疾卒安期虽乘世资颇以才自厉朝廷数使之然无学术而求入侍经筵为世所讥其奉养声伎不减其父云

钦定续通志卷三百二十二

●钦定续通志卷三百二十三 列传一百二十三

列传

宋 【二十七】

○宋二十七

陈尧佐【尧叟尧咨】 宋庠【祁】 陈执中 刘沆 冯拯【
行己伸己】 贾昌朝【昌衡】 梁适
鲁宗道 薛奎 王曙【益柔】 蔡齐【延庆】

陈尧佐

宋庠

陈执中

刘沆

冯拯

贾昌朝

梁适

鲁宗道

薛奎

王曙

蔡齐

△陈尧佐

陈尧佐字希元其先河朔人高祖翔为蜀新井令因家焉遂为阆州阆中人父省华字善则事孟昶为西水尉蜀平授陇城主簿累迁栝阳令县之郑白渠为邻邑强族所据省华尽去壅遏水利均及民皆赖之端拱三年太宗亲试进士伯子尧叟登甲科占谢辞气明辨太宗顾左右曰此谁子王沔以省华对即召省华为太子中允河决郢州命省华领州事知苏州时遇水灾省华复流民数千户殍者悉瘞之诏书褒美省华智辨有吏干景德初判吏部铨权知开封府转光禄卿旧制卿监坐朵殿太宗以省华权莅京府别设其位升于两省五品之南未几因疾求解任拜左谏议大夫再表乞骸骨不许三年卒年六十八特赠太子少师尧佐进士及第【按隆平集端拱元年登进士第】 历魏县中牟尉知朝邑县会中人方保吉诬以事降本县主簿徙下邳累迁秘书郎【按东都事略及欧阳修撰尧佐神道碑俱作累迁太常丞】 知开封府录事参军理狱有能绩迁府推官坐言事忤旨降通判潮州修孔子庙作韩吏部祠以风示潮人有民张氏子为鳄鱼所食尧佐命吏操网往捕鳄弭受网作文示诸市而烹之其患遂息召还献诗数百篇大臣亦荐其文学得直史馆知寿州岁大饥出奉米为糜粥食饿者吏人悉献米全活数万人徙庐州以父疾请归提点开封府界事后为两浙转运副使钱塘江篝石为堤为两潮所啮再岁辄坏尧佐请下薪实土乃坚久丁谓言其不可徙尧佐京西转运使后卒如尧佐议堤乃成徙河东路以地寒民贫仰石炭以生

奏除其税又减泽州大广冶铁课数十万徙河北母老
祈就养召纠察在京刑狱为御试编排官坐置等误降官监鄂州茶场天禧中河决起知
滑州造木龙以杀水怒又筑长堤护之人呼为陈公堤
营永定陵复徙京西转运使入为三司户部副使徙度支同修真宗实录不试中书特擢
知制诰兼史馆修撰知通进银台司进枢密直学士 【
按神道碑作迁龙图阁直学士】 知河南府徙并州每汾水暴涨州民辄忧扰尧佐为筑
堤植柳数万本作柳溪民赖其利召同修三朝史代弟
尧咨同知开封府累迁右谏议大夫为翰林学士遂拜枢密副使 【按宋宰辅表载陈尧
佐自翰林学士兼龙图阁直学士右谏议大夫权知
开封府迁枢密副使神道碑亦载兼龙图阁直学士拜枢密副使】 祥符知县陈诘为治
严急吏欲罪诘乃空县逃去太后怒诘连吕夷简亲执
政以嫌不敢辨事下枢密院尧佐独曰罪诘则奸吏得计后谁敢复绳吏者诘由是得免
以给事中参知政事迁尚书吏部侍郎太后崩执政多
罢以户部侍郎知永兴军初太后遣宦者起浮图京兆城中前守姜遵尽毁古碑碣充砖
甃用尧佐奏曰唐贤人墓石今十亡七八矣子孙深刻
大书欲存之千载乃一旦与瓦砾等诚可惜也其未毁者愿敕州县完护之厯徙郑州景
佑四年拜同中书门下平章事集贤殿大学士以灾异
数见自责求罢章凡四上谏官韩琦论政事错缪以宰相非其人遂与王随同罢为淮康
军节度使同中书门下平章事判郑州以太子太师致
仕卒赠司空兼侍中谥文惠尧佐少好学及贵犹读书不辍善古隶八分工诗性俭约器
服坏随辄补之曰无使不全见弃也号知余子自志其
墓曰寿八十二不为夭官一品不为贱使相纳禄不为辱三者粗可归息于父母栖神之
域矣陈抟尝谓其父曰君三子皆当将相惟中子贵且
寿后如抟言

陈尧叟

陈尧咨

陈尧叟

尧叟字唐夫解褐光禄寺丞直史馆与省华同日赐绯迁秘书丞再迁工部员外郎
广南西路转运使会加恩黎桓为交州国信使初将命
者必获赠遗数千缗桓责赋敛于民往往断其手足尧叟遂奏召桓子授以朝命而却其
私觐又桓界先有亡命来奔者多匿不遣因是海贼频
年入寇尧叟悉捕归之桓感恩并捕海贼为谢先是岁调雷化高藤容白诸州兵使犍军
粮泛海给琼州其兵不习水利率多沈溺咸苦之海北
岸有递角场正与琼对伺风便一日可达与雷化高太平四州地水路接近尧叟因规度

移四州民租米输于场令琼州遣蜚兵具舟自取人以
为便咸平初诏诸路课民种桑枣尧叟言臣所部诸州土风本异地利之博者惟麻苧麻
苧所种与桑柘不殊既成宿根旋擢新干周岁之间三
收其苧复一固其本国家军须所急布帛为先因劝谕部民广植麻苧请以所种麻苧顷
亩折桑枣之数诸县令佐依例书厯为课民以所织布
赴官卖者免其算税如此则布帛上供泉货下流公私交济诏从之代还加刑部员外郎
迁兵部拜主客郎中枢密直学士知三班兼银台通进
封驳司制置羣牧使河决澶州王陵口诏往护塞之遂与冯拯同为河北河东安抚副使
时中外上封奏者甚众命与冯拯详定利害及与三司
议减冗事俄与拯并拜右谏议大夫同知枢密院事有言三司官吏积习依违文牒有经
五七年不决者吏民抑塞水旱灾沴多由此致诏尧叟
与拯举常参官干敏者同三司使议减烦冗参决滞务凡省去烦冗文帐二十一万五千
余道又减河北官七十五员 【按冯拯传作减废冗
官十五员考长编载省去三司积滞文帐及诸州无例施行文字二十一万五千余道减
河北句当京朝官使臣幕职共七十五员拯传系脱误
无疑此事已载尧叟传中拯传不复见附识于此】 五年进给事中景德元年迁工部侍
郎签书枢密院事奉秩恩例悉同副使寻兼刑部兵部
二侍郎与王钦若并知枢密院事仍兼羣牧制置使始置使即以尧叟为之及掌枢密即
罢其任至是以国马戎事之本宜得大臣总领故又委
尧叟焉预修国史大中祥符初东封加尚书左丞进工部尚书祀汾阴礼成进户部尚书
五年与钦若并以本官检校太傅同平章事充枢密使
加检校太尉未几与钦若罢守本官仍领羣牧明年复与钦若以本官检校太尉同平章
事充枢密使以足疾求避位优拜右仆射知河阳赐诗
为饯天禧初还京师卒年五十七赠侍中谥曰文忠录其孙知言知章为将作监主簿长
子师古赐进士出身后为都官员外郎希古至太子中
舍坐事除籍尧叟伟姿貌强力奏对明辨多任知数久典机密军马之籍悉能周记母冯
氏性严尧叟事亲孝谨怡声侍侧不敢以贵自处家本
富禄赐且厚冯氏不许诸子事华侈景德中尧叟掌枢机弟尧佐直史馆尧咨知制诰与
省华同在北省诸孙任官者十数人宗亲登科者又数
人荣盛无比宾客至尧叟兄弟侍立省华侧客不自安多引去既卒帝褒封其母上党郡
太夫人进封滕国年八十余无恙后尧叟数年卒

陈尧咨

尧咨字嘉谟举进士第一授将作监丞通判济州召为秘书省著作郎直史馆判三
司度支句院始合三部句院兼总之擢右正言知制诰

崇政殿试进士尧咨为考官三司使刘师道属弟几道以试卷为识验坐贬单州团练副使复著作郎知光州寻复右正言知制诰知荆南改起居舍人同判吏部流内铨旧格选人用举者数迁官而寒士无以进尧咨进其可擢者帝特迁之改右谏议大夫集贤院学士以龙图阁直学士尚书工部郎中知永兴军长安地斥卤无甘泉尧咨疏龙首渠注城中民利之然豪侈不循法度敞武库建视草堂开三门筑甬道出入列禁兵自卫用刑惨急数有杖死者尝以气凌转运使乐黄目黄目不能堪求解去遂徙尧咨知河南府既而有发尧咨守长安不法事帝不欲穷治止削职徙邓州寻复知制诰尧咨性刚戾数被挫忽忽不乐尧叟进见帝帝问之对曰尧咨岂知上恩所以保佑者自谓遭谗至此乞明示所犯使知陛下保全之意帝赐诏条其事切责乃皇恐称谢久之复职仁宗即位擢知开封府除翰林学士龙图阁学士以先朝初榜甲科特诏班旧学士蔡齐之上【按本传不载尧咨举进士之年考宋史真宗本纪咸平元年三月壬申赐进士孙仅等宴琼林度尧咨举进士当在是年所为称先朝初榜甲科也】换宿州观察使知天雄军尧咨内不平固辞不得已拜命自契丹修好城壁器械久不治尧咨葺完之然须索烦扰多暴怒列军士持大梃侍前吏民语不中意立至困仆以安国军节度观察留后知郢州建请浚新河自鱼山至下把以导积水拜武信军节度使知河阳徙澶州又徙天雄军卒赠太尉谥曰康肃尧咨于兄弟中最为少文然以气节自任工隶书善射知荆南时母冯氏问曰古人居一郡一邑必有异政汝典郡有何治效尧咨曰荆南当冲要郊劳宴饷迨无虚日然稍精于射众无不服冯氏曰汝父训汝以忠孝俾辅国家今不务仁政善化而专卒伍一夫之技岂汝先人之意耶杖而击之【按冯氏生尧叟兄弟三人皆贵显史称性严不许诸子事华侈可谓处贵不骄处富能俭无媿贤母矣东都事略载其询尧咨典郡治效杖击尧咨尤知大体宋史尧咨本传不载今据增】子述古太子宾客致仕博古笃学能文为馆阁校勘【按宋史尧佐传中不载其有子尧叟传载子师古希古尧咨传载子述古博古考隆平集尧叟不载其有子尧佐有子十人述古博古皆尧佐子尧咨子七人本传皆不载欧阳修所撰陈文惠公神道碑子男十人长述古有德古无博古德古官馆阁校勘而宋史尧咨传载子博古亦馆阁校勘纪载互异并识之以资考证】早卒【按宋史此下有尧叟从子渐附传无事迹足录今从删】

△宋庠

宋庠字公序安州安陆人后徙开封之雍邱父玘【按宋祁撰其父行状及王珪范

镇撰庠祁碑并作圮宋史本传作■〈木巳〉盖误

今据改】 尝为九江掾庠天圣初举进士开封试礼部皆第一擢大理评事同判襄州召试迁太子中允直史馆历三司户部判官同修起居注

再迁右正言郭皇后废庠与御史伏合争论坐罚金久之知制诰时亲策贤良茂才等科而命与武举人杂视庠言非所以待天下士宜如本朝

故事命有司设次具饮膳斥武举人令别试诏从之兼史馆修撰知审刑院密州豪王澥私酿酒邻人往捕之澥给奴曰盗也尽使杀其父子四

人州论奴以法澥独不死宰相陈尧佐右澥庠力争卒抵澥死改权判吏部流内銓迁尚书刑部员外郎仁宗欲以为右谏议大夫同知枢密院

事中书言故事无自知制诰除执政者乃诏为翰林学士庠初名郊李淑恐其先己以奇中之言曰宋受命之号郊交也合姓名言之为不祥 【

按东都事略载李淑在翰林因对言于仁宗曰宋郊姓符国号名应祀天不祥也较宋史本传语为明晰】 帝弗为意他日谕改名庠宝元中以

右谏议大夫参知政事庠为相儒雅练习故事自执政遇事辄分别是非与宰相吕夷简论数不用凡庠与善者夷简皆指为朋党如郑戡叶清

臣等悉出之乃以庠知扬州未几以资政殿学士徙郢州进给事中庆历五年除参知政事范仲淹去位帝问宰相章得象谁可代仲淹者得象

荐宋祁帝雅意在庠复召为参知政事七年春旱用汉灾异策免三公故事罢宰相贾昌朝辅臣皆削一官以庠为右谏议大夫帝尝召二府对

资政殿 【按忠规德范碑及长编俱作天章阁】 出手诏策以时事庠曰两汉对策本延岩穴草莱之士臣等备位政府而比诸生非所以尊

朝廷请至中书合议条奏时陈执中为相不学少文故夏竦为帝画此谋意欲困执中也论者以庠为知体明年除尚书工部侍郎充枢密使皇

佑中拜兵部侍郎同中书门下平章事集贤殿大学士享明堂礼成复加工部尚书三年祁子与越国夫人曹氏客张彦方游而彦方伪造敕牒

为人补官论死谏官包拯奏庠不戢子弟又言庠在政府无所建明庠亦请去乃以刑部尚书观文殿大学士知河南府历徙许州河阳嘉佑三

年再迁兵部尚书以检校太尉同平章事充枢密使封莒国公与副使程戡不协戡罢而御史言庠昏惰乃以河阳三城节度同平章事判郑州

徙相州以疾召还英宗即位移镇武宁军改封郑国公庠在相州即上章请老至是请犹未已乃出判亳州庠前后所至以镇静为治及再登用

遂沈浮自安晚爱信幼子多与小人游不谨御史吕诲请敕庠不得以二子随帝曰庠老矣柰何不使其子从之至亳请老益坚以司空致仕卒

赠太尉兼侍中谥元献帝为篆其墓碑曰忠规德范之碑庠自应举时与祁俱以文学名

擅天下俭约不好声色读书至老不倦天资忠厚尝曰
逆诈恃明残人矜才吾终身不为也弟祁

宋祁

宋祁

祁字子京与兄庠同时举进士礼部举祁第一庠第三章献太后不欲以弟先兄乃
擢庠第一而寘祁第十人呼曰二宋以大小别之释褐
复州军事推官孙奭荐之改大理寺丞国子监直讲召试授直史馆再迁太常博士同知
礼仪院有司言太常旧乐数增损其声不和诏祁同按
试李照定新乐胡瑗铸钟磬祁皆典之事见乐志迁尚书工部员外郎同修起居注权三
司度支判官方陕西用兵调费日蹙祁上言今左藏无
积年之镪太仓无三岁之粟良由取之既殫用之无度也朝廷大有三冗小有三费以困
天下之财何为三冗天下有定官无限员一冗也天下
厢军不任战而耗衣食二冗也僧道日益多而无定数三冗也自今僧道以受戒具者姑
如旧其它悉罢还为民可得耕夫织妇五十余万人天
下厢军止图供役本不知兵月支廩粮岁费库帛已在籍者勿论其它悉驱之南亩又得
力耕者数十万国家郡县素有定官譬以十人为额常
以十二加之即迁代罪谪随取之而有今州县不广于前而官五倍于旧请诏三班审官
院内诸司流内铨明立限员以为定法其门荫流外贡
举等科实置选限稍务择人俟有阙官计员补吏何为三费一道场斋醮无有虚日百司
供亿不可费计陛下事天地宗庙社稷百神牺牲玉帛
使有司端委奉之岁时荐之足以竦明德介多福矣何必希屑屑之报哉一京师寺观或
多设徒卒添置官府衣粮率三倍他处而又自募民财
营建祠庙虽曰不费官帑然国与民一也舍国取民其伤一焉一使相节度不隶藩要夫
节相之建或当边镇或临师屯今大臣罢黜率叨恩除
坐靡邦用请自今地非边要州无师屯者不得建节度已带节度不得留近藩及京师如
是去三冗节三费陛下复能躬服至俭风示四方衣服
起居无踰旧规后宫锦绣珠玉不得妄费天下响应民业日丰饮马西河蠢尔戎首在吾
掌中矣徙判盐铁句院同修礼书次当知制诰而庠方
参知政事乃以为天章阁待制庠罢祁亦出知寿州徙陈州还知制诰权同判流内铨以
龙图阁直学士知杭州留为翰林学士提举诸司库务
数厘正弊事增置句当公事官其属言利害者皆使先禀度可否而后议于三司遂着为
令徙知审官院侍读学士庠复知政事罢祁翰林学士
改龙图直学士史馆修撰修唐书累迁右谏议大夫充羣牧使庠为枢密使祁复为翰林
学士景佑中诏求直言祁奏人主不断是名为乱又谓

与贤人谋而与不肖者断重选大臣而轻任之大事不图而小事急是谓三患其意主于强君威别邪正急先务皆切中时病会进温成皇后为贵妃故事命妃皆发册妃辞则罢册礼然告在有司必竣旨而后进又凡制词既授合门宣读学士院授而书之送中书结三省衔官告院用印乃进内祔适当制不竣旨写诰亦不送中书径取官告院印用之亟封以进后方爱幸跸行册礼得告大怒掷于地祔坐是出知许州甫数月复召为侍读学士史馆修撰祀明堂迁给事中兼龙图阁学士坐其子从张彦方游出知亳州兼集贤殿修撰岁余徙知成德军迁尚书礼部侍郎充本路安抚使兼马步军都总管河北骑军虽多而马常少请弛河东陕西马禁又请复唐馱幕之制居三月徙定州又上言天下根本在河北河北根本在镇定以其扼敌冲为国家门户也谋契丹者不得不先河北谋河北舍镇定无足议者请合镇定为一路以将相大臣领之使权一而责有归夫耻怯尚勇好论事甘得而忘死河北之人殆天性然若少励之不忧不战臣窃谓欲兵之强莫如多谷与财欲士训练莫如善择将帅欲人乐鬪莫如赏重罚严欲敌顾望不敢前莫如使镇重而定疆请先入谷镇定镇定既充可入谷余州列将在陕西河东有功状者得迁镇定则镇定重天下久平马益少臣请多用步兵马少则骑精步多则鬪健我能用步所长虽契丹多马亦无所用之矣 【按东都事略称祁守边议兵虽古名将亦无以过范镇撰神道碑较简今据参辑】 又少御戎论七篇加端明殿学士特迁吏部侍郎知益州寻除三司使右司谏吴及尝言祁在定州不治纵家人贷公使钱数千缗在蜀奢侈过度既而御史中丞包拯亦言祁益部多游燕且其兄方执政不可任三司乃加龙图阁学士知郑州唐书成迁左丞进工部尚书以羸疾请便医药入判尚书都省 【按神道碑载唐书成进尚书左丞以疾自郑州还入判尚书都省序迁工部尚书传书进工部尚书于判尚书都省之前与碑互异】 踰月拜翰林学士承旨诏遇入直许一子主汤药复为羣牧使寻卒遗奏请择宗室贤材进爵亲王为七鬯之主若六宫有就馆之庆圣嗣蕃衍则宗子降封郡王以避正嫡此定人心防祸患之大计也又自为志铭及治戒以授其子三日敛三月葬慎无为流俗阴阳拘忌也勿请谥勿受赠典若等兄弟十四人惟二孺儿未仕以此倭莒公莒公在若等不孤矣后赠刑部尚书祁兄弟皆以文学显而祁尤能文善议论然清约庄重不及庠论者以祁不至公辅亦以此云修唐书十余年自守亳州出入内外尝以橐自随祁所至治事明峻好作条教其子遵治戒不请谥久之学士承旨张方平言祁法应得谥谥曰景文

△陈执中

陈执中字昭誉以父恕任为秘书省正字累迁卫尉寺丞知梧州上复古要道三篇真宗异而召之帝属疾春秋高大臣莫敢言建储者执中进演要三篇以早定天下根本为说翌日帝以他疏示辅臣皆赞曰善帝指袖中曰又有善于此者出之乃演要也因召对便殿劳问久之擢右正言逾月遂立皇太子明年坐考御史进士卷差谬贬卫尉寺丞监岳州酒务稍复殿中丞通判抚州复右正言曹利用壻卢士伦除福建运使惮远不行利用为请乃改京东执中尝劾奏之利用挟私忿出执中知汉阳军及利用得罪乃召为羣牧判官权三司盐铁判官累迁三司户部副使明道中安抚京东进天章阁待制使还知应天府徙江甯府扬州再迁工部郎中改龙图阁直学士知永兴军拜右谏议大夫同知枢密院事元昊寇延州手诏咨访辅臣攻守方略执中既上对退疏言元昊窃发西垂连犯亭障延安几至于不保自金明李士彬族破而并边篱落皆大坏塞门金明相距二百里宜列修三城城屯兵千人益募弓箭手寇大至则退保小至则出鬪选合门祗候以上为塞主都监以诸司使为卢关一路都巡检以兵二千属之使为三砦之援熟羌居汉地久者委边臣拊存之反复者破逐之至于新拊黠羌如泾原喀努勒密藏达尔楚数族久居内地常有叛心不肆翦除恐终为患今军须之出民已愁叹复欲徧修城池恐民力不堪请且修并边城池其次如延州之鄜同环庆之邠窳不过五七处量为营葺仍须增土兵以备守御省骑卒以减转饷然后徐议荡平帝嘉纳之既而议刺土兵久不决罢知青州又以资政殿学士知河南府改尚书工部侍郎历陕西同经略安抚招讨使与夏竦同知永兴军议边事多异同诏令互出巡边乃屯泾州令诸部曰寇藉吾水草钞边图利不除且复至命悉焚之又表解兵柄以为兵尚神密千里禀命非所以制胜宜属四路各保疆圉朝议善之就知陕州复徙青州于是请城傅海诸州朝廷重兴役有诏不许执中不奉诏卒城之明年沂卒王伦叛趣淮南执中遣巡检傅永吉追至采石矶捕杀之召拜参知政事谏官孙甫蔡襄极论不可帝遣使驰赐敕告踰年拜同中书门下平章事集贤殿大学士兼枢密使西夏纳款与宰相贾昌朝请解枢密七年春旱昌朝罢执中降给事中已而加昭文馆大学士监修国史踰月复官皇佑初以足疾辞位自陈不愿为使相大学士翰林学士孙抃当制遂以尚书左丞知陈州宰相文彦博宋庠以为礼薄帖麻改兵部尚书迁吏部观文殿大学士久之拜集庆军节度使复拜同平章事判大名府河决商胡走大名程琳欲为堤不果成而去执中乘年丰调丁夫增筑二十里以障横

溃以吏部尚书复拜同平章事昭文馆大学士每朝退
闭中书东便门以防漏泄三司句当公事及监场务官权势所引者皆奏罢之内外肃然
会张贵妃薨治丧皇仪殿追册为后王洙石全彬务以
非礼导帝意执中随辄奉行久之嬖妾笞小婢出外舍死御史赵抃列八事奏劾欧阳修
亦言之至和二年春旱谏官范镇请速退执中以快中
外之望御史中丞孙抃又与其属郭申锡毋湜范师道赵抃请合班论奏罢执中为镇海
军节度使同平章事判亳州 【按执中之罢宋史仁
宗本纪及宰辅表俱作至和二年六月且本纪于是年三月书旱本传作三年误今改】
踰年辞节改尚书左仆射 【隆平集东都事略俱作
右仆射】 观文殿大学士封英国公徙河南府又徙曹州皆不赴过都以疾赐告就第拜
司徒岐国公致仕卒赠太师兼侍中执中在中书八年
人莫敢干以私四方问遗不及门惟殿前都指挥使郭承佑数至其家为御史所言遂诏
中书枢密自今非聚厅不见宾客及议谥礼官韩维曰
执中以公卿子遭世承平因缘一言遂至贵显天子以后宫之丧问所以葬祭之礼执中
位上相不能总率羣司考正仪典知治丧皇仪非嫔御
之礼追册位号于宫闈有嫌建朝用乐踰祖宗旧制皆白而行之此不忠之大者又闺门
之内礼分不明夫人正室疏薄自绌庶妾贱人悍逸不
制其治家无足言者宰相不能秉道率礼正身齐家方杜门深居谢绝宾客曰我无私也
我不党也岂不陋哉谥法宠禄光大曰荣不勤成名曰
灵执中出入将相以一品就第宠禄光大矣得位行政贤士大夫无述焉不勤成名矣请
谥曰荣灵后改谥恭襄诏谥曰恭帝篆其墓碑曰褒忠
之碑子世儒官至国子博士妻李与羣婢杀世儒所生母世儒与谋皆弃市

△刘沆

刘沆字冲之吉州永新人倜傥任气天圣八年擢进士第二为大理评事通判舒州
有大狱历岁不决沆数日决之章献太后建资圣浮图
内侍张怀信挟诏命督役严峻州将至移疾不敢出沆奏罢怀信迁太常丞直集贤院出
知衡州大姓尹氏欺邻翁老子幼欲窃取其田乃伪作
卖券及邻翁死遂夺而有之其子诉于州县二十年不得直沆至复诉之尹氏遂伏罪迁
太常博士历三司度支部判官同修起居注擢右正
言知制诰判吏部流内铨奉使契丹馆伴杜防强以酒沆因醉詈之坐是出知潭州又降
知和州改右谏议大夫知江州时湖南蛮獠数为寇杀
官吏以沆为龙图阁直学士知潭州兼安抚使许便宜从事沆大发兵至桂阳招降二千
余人使散居所部而蛮酋降者皆奏命以官又募土兵
分捕余党斩馘甚众 【按隆平集载沆至潭州募土兵使保地分贼稍困乃令提点刑狱

杨旼等八路入讨斩首万余级遂顿兵开一路榜曰
贼由此路出降敢杀者与擅杀同于是降者三四万人【与宋史本传所载互异】已而余
党复叛杀裨将胡元沆坐降知鄂州历知永兴军顷之
以龙图阁学士权知开封府迁尚书工部侍郎踰年拜参知政事初沆在府有张彦方者
客越国夫人曹氏家受富民金为伪告敕既败系狱沆
抵彦方死辞不及曹氏曹氏张贵妃母也沆既用谏官御史疑以此进争论之帝不听贵
妃薨追册皇后沆为监护使数月拜同中书门下平章
事集贤殿大学士改园陵使御史中丞孙抃御史范师道毋湜言宰相不当为赠后典葬
不报既葬赐后合中金器数百两力辞而请其子瑾试
学士院遂帖职【谨按通鉴辑览 御批刘沆以会葬得授平章论者讥之乃载其力
辞赐金事然辞赏而为其子求官所望不更奢乎是
亦垄断贱丈夫而已且仁宗独未闻赐钱而不与郎官之事乎】时中书可否多用例人
或援例以讼而法有不行沆进言三弊一近臣保荐一
近臣陈旬亲属一叙劳干进请诏中书枢密凡三事无用例余听如旧事既施行众颇不
悦寻如旧文彦博富弼复入为相彦博为昭文馆大学
士弼监修国史沆迁兵部侍郎位在弼以下论者以为非故事由学士杨察之误乃帖麻
改沆监修国史弼为集贤殿大学士沆既疾言事官因
言自庆历后台谏官用事朝廷命令之出事无当否悉论之必胜而后已专务抉人阴私
莫辨之事以中伤士大夫执政畏其言进擢尤速沆遂
举行御史迁次之格满二岁者与知州御史范师道赵抃岁满求补郡沆引格出之中丞
张昇等言沆挟私出御史时枢密使狄青亦因御史言
罢知陈州沆又言御史去陛下将相削陛下爪牙事不可测昇等益论办不已罢沆为观
文殿大学士工部尚书知应天府迁刑部尚书徙陈州
沆长于吏事善刺探权近过失阴持之以轩轻取事论者以此少之卒赠左仆射兼侍中
知制诰张瓌草词诋沆其家不敢请谥帝为篆碑曰思
贤之碑子瑾尝为天章阁待制坐法免后以功复职

△冯拯

冯拯字道济父俊事汉湘阴公刘贇贇死俊与从行千余人系侍卫狱周太祖赦之
授检校太子宾客戍安远军驭马镇辞不行因徙居河
阳拯以书生谒赵普普奇其状曰子富贵寿考宜不下我【按续通鉴补拯父为赵普句
当家事一日普独坐拯方十余岁弹雀帘下普熟视
之召与语曰此子异日当至吾位据此则非以书生谒普也】太平兴国二年举进士补
大理评事通判峡州历迁度支判官淳化中有上封请
立皇太子者拯与尹黄裳王世则洪湛伏合请立许王元僖太宗怒悉贬岭外拯知端州

既至上言请遣使括诸路隐丁更制书籍及议盐法通商凡十余事以左正言为虞部员外郎真宗即位进比部员外郎迁驾部咸平初坐试开府进士赋涉讥讪下拯御史台未几释之明年兼侍御史知杂事时西北用兵王超傅潜将兵出走瀛间观望玩寇拯极论之不报超等果逗挠覆军擢祠部郎中枢密直学士权判吏部流内铨以审官及铨法未备请凡荫补京官试读一经书家状通习为中格始得仕寻以右谏议大夫同知枢密院事帝欲修绥州城堡谋诸辅臣拯与宰相向敏中等皆曰便宰相吕蒙正参知政事王旦王钦若欲弃之帝遣洪湛驰驿往视还上七利二害卒修完之迁尚书工部侍郎签书枢密院事赐手札访边事拯谓备边之要不扼险以制敌之冲未易胜也今防秋宜于唐河增屯兵至六万控定武之北为大阵邢州置都总管为中阵天雄军置钤辖为后阵罢莫州狼山两路兵从之景德中为参知政事再迁兵部侍郎时契丹始盟拯言边方骚动武臣幸之以为利帝曰朝廷以信为守然戒备不可废也此外当静治以安吾民尔尔其奉承之大中祥符初严贡举糊名法拯与王旦论选举帝前拯请兼考策论不专以诗赋为进退帝曰可以观才识者文论也拯论事多合帝意如此封泰山为仪仗使进尚书左丞以疾在告数请罢帝以手诏谕旨又命宰相王旦就第劝拯起视事从祀汾阴为仪仗使迁工部尚书复以疾求罢拜刑部尚书知河南府听以府事委官属七年除御史中丞又以疾辞除户部尚书知陈州再知河南府迁兵部尚书入判尚书都省以吏部尚书检校太傅同中书门下平章事充枢密使其冬拜右仆射兼中书侍郎太子少傅同平章事集贤殿大学士进左仆射干兴元年封魏国公 【按东都事略作祁国公】 迁司空兼侍中辅臣会食资善堂召议事丁谓独不预谓知得罪颇哀请钱惟演遽曰当致力无大忧也拯熟视惟演蹶蹶及对承明殿太后怒甚语欲诛谓拯进曰谓固有罪然帝新即位亟诛大臣骇天下耳目谓岂有逆谋哉第失奏山陵事耳太后怒少解谓既贬拯代谓为司徒玉清昭应宫使昭文馆大学士监修国史五上表愿罢相拜五胜军节度使检校太尉兼侍中判河南府即卧内赐告及旌纛遣内司宾抚问还奏其家俭陋被服甚质太后赐以衾裯锦绮屏然拯平居自奉侈靡顾禁中不知也既卒赠太师中书令谥文懿拯气貌严重宦者传诏至中书不延坐工部尚书林特尝诣第累日不得通白以咨事使诣中书既至又遣堂吏谓之曰公事何不自达朝廷卒不见特大愧而去钱惟演营入相拯力言太后姻家不可任遂出惟演河阳子行己伸己

冯行己

冯伸己

冯行己

行己字肃之以父任为右侍禁泾原路驻泊都监知宪州因治状增秩历石保霸冀莫五州所至有能称夏人既纳款疆候播言契丹治兵幽燕大为战具议者欲解西备北行己言辽夏为与国元昊入贡容怀诡计幽燕治兵或为虚声边鄙之虞恐不在河朔也皇佑中知定州韩琦荐为路钤辖徙知代州管干河东缘边安抚事夏人掠麟州蕃部且盗耕楚叶河西田遇官军连逻者辄聚射诏行己讨之行己言此奸民无忌惮非君长过不宜以细故启大衅但加戒戢足矣五台山寺调厢兵义勇缮葺为除和余谷三万行己谓不可损岁久之储以事不急之务进西上合门使四迁客省使更高阳关秦凤定州大名府路马步总管以卫州防御使致仕预洛阳耆英之集元佑中终金州观察使卒年八十四

冯伸己

伸己字齐贤以荫补右侍禁累迁西头供奉官授合门祗候桂州兵马都监转运使俞献可辟知廉州久之安化蛮扰边献可又荐知宜州天圣中改桂宜融柳象沿边兵马都监遂专溪峒事以礼宾使复知宜州代还道改供备库使知邕州又改东染院使领荣州刺史梓夔路兵马钤辖迁洛苑使知桂州兼广西钤辖道江陵会安化蛮犯边官军不利诏伸己讨之伸己疾驰至宜州缮器甲募丁壮转粮饷由三路以进伸己临军单骑出阵语酋豪曰朝廷抚汝甚厚汝乃自取灭亡耶今我奉天子命来汝听吾言则生不则无噍类矣众仰泣罗拜曰不图今日再见冯公也明日蛮渠弃兵械率众降军门以劳迁西上合门使知宜州乐善蛮寇武阳伸己遣谕祸福悉还所掠又莫世堪负险强黠钞劫边户为疆场患伸己设伏擒捕皆寘于法迁果州团练使在宜二年徙桂州改右武卫大将军守本官分司西京卒始安化蛮叛区希范应募击贼贼平希范诣阙而言其功朝廷下宜州伸己谓希范无功妄要赏遂编管全州其后希范遁归谋为乱欲杀伸己岭外骚然议者皆罪伸己焉

△贾昌朝

贾昌朝字子明真定获鹿人晋史官纬之从曾孙也天禧初真宗尝祈谷南郊昌朝献颂召试赐同进士出身主晋陵簿赐对便殿除国子监说书孙奭判监独称昌朝讲说有师法他日书路随韦处厚传示昌朝曰君当以经术进如二公为颍川郡王院伴读再迁殿中丞历知宜兴东明县奭侍读禁中以老辞荐昌朝自代诏试中书寻复国子监说书上言礼母之讳不

出于宫今章献太后易月制除犹讳父名非尊宗庙也
诏从之景佑中始置崇政殿说书以授昌朝诵说明白帝多所质问加直集贤院太平兴国寺灾是夕大雨震雷朝廷议修复昌朝上言近年寺
观屡灾此殆天示警告可勿缮治以示畏天爱人之意西域僧献佛骨铜像昌朝请加赐
遣还毋以所献示中外悉行其言天章阁置侍讲亦首
命昌朝累迁尚书礼部郎中史馆修撰刘平为元昊所执边吏诬平降贼议收其家昌朝
曰汉族杀李陵陵不得归而汉悔之先帝厚抚王继忠
家终得继忠用平事未可知使收其族虽平在亦不得还矣乃得不收擢知制诰权判吏
部流内铨兼侍讲初铨法县令钱满万二千乃举令昌
朝曰法如此则小县终不得善令请概举令而与之奉如大县进龙图阁直学士权知开
封府迁右谏议大夫权御史中丞兼判国子监议者欲
以金缯啖契丹使攻元昊昌朝曰契丹许我有功则责报无穷矣力止之乃上言自西羌
之叛士不练习将不得人以屡易之将馭不练之士故
战则必败此削方镇太过之弊也亲旧恩幸出即为将素不知兵一旦副以千万人之命
是驱之死地矣此用亲旧恩幸之弊也今杨崇勋李昭
亮尚任边鄙望速选士代之方镇守臣无数更易刺史以上宜慎所授以待有功又上备
边六事一曰馭将帅二曰复土兵三曰训营卒四曰制
远人五曰绥蕃部六曰谨觐候书奏多施行之昌朝复请度经费罢不急诏与三司合议
岁所省缗钱百万又言朝臣七十筋力衰者宜依典故
致仕有功状可留者勿拘因疏耄昏不任事者八人令致仕庆历三年拜参知政事疏言
用兵以来天下民力颇困请诏诸路转运使毋得承例
折变科率须科折者悉听奏裁虽奉旨及三司文移于民不便者亦以上闻以工部侍郎
充枢密使寻拜同中书门下平章事集贤殿大学士仍
兼枢密使居两月拜昭文馆大学士监修国史元昊归石元孙议赐死以昌朝言得免诏
有司议升祔奉慈庙三后有司论不一昌朝曰章献母
仪天下章懿誕育圣躬宜如祥符升祔元德皇后故事章惠于陛下有慈保之恩当别享
奉慈庙如故乃奉二后神主升祔真宗庙元昊既歿附
因请宰相罢兼枢密使六年日食帝谓昌朝等曰谪见于天愿归罪朕躬卿宜究民疾苦
思所以利安之昌朝对曰陛下此言足以弭天变臣敢
不夙夜孜孜以奉陛下帝又曰人主惧天而修德犹人臣畏法而自新也昌朝因顿首谢
明年春旱帝避正寝减膳昌朝引汉灾异册免三公故
事上表乞罢参知政事吴育数与昌朝争上议前论者多不直昌朝高若讷为御史中丞
言大臣廷争不肃故雨不时若遂罢育除昌朝武胜军
节度使检校太傅同中书门下平章事判大名府兼北京留守司河北安抚使寻以讨贝

州贼有功移山南东道节度使 【按东都事略云王
则平加检校太师封安国公王安石撰昌朝神道碑云移镇山南东道检校太师赐号安
国公】 杨偕言贼发昌朝部中不当赏弗从先是契丹
聚亡卒勇伉者号投来南军边法卒亡自归者死昌朝除其法归者辄迁补于是来者稍
众因廉知契丹事契丹遂拒亡卒黜南军不用边人以
地外质契丹故稍侵边界昌朝为立法质地而主不时赎人得赎而有之岁余地悉复三
司使叶清臣移用河北库钱昌朝格诏不与清臣论列
不已遂出清臣河阳徙昌朝判郑州过阙入觐留为祥源观使拜尚书右仆射观文殿大
学士判尚书都省岁中求外复除山南东道节度使右
仆射检校太师兼侍中判郑州固辞仆射侍中改同中书门下平章事赐中谢自昌朝始
也母丧服除判许州召对迺英合命讲干卦帝甚嘉之
又言汉唐都雍置三辅内翼京师朝廷都汴而近京诸郡皆属他道制度不称王畿请析
京东之曹州京西之陈许滑郑皆隶开封府以四十二
县为京畿帝纳之复判大名府兼河北安抚使嘉佑元年进封许国公又兼侍中未几以
同中书门下平章事为枢密使三年宰相文彦博请罢
谏官御史恐昌朝代彦博乃相与言昌朝建大第别剏客位以待宦官宦官有矫制者枢
密院释不治遂以镇安军节度使右仆射检校太师侍
中兼充景灵宫使出判许州又以保平军节度陕州大都督府长史移大名府兼安抚使
英宗即位徙凤翔节度使加左仆射凤翔尹进封魏国
公治平元年以侍中守许州力辞弗许明年以疾留京师乃以左仆射观文殿大学士判
尚书都省卒年六十八赠司空兼侍中 【按宋史不
载昌朝赠官据神道碑补】 谥曰文元御书墓碑曰大儒元老之碑昌朝在侍从多得名
誉及执政乃不为正人所与而数有攻其结宦官宫人
者 【按宋宰辅编年录载温成皇后乳母贾氏宫中谓之贾婆婆昌朝以姑事之谏官劾
昌朝交通女谒指贾氏也】 然言者谓昌朝释宦官
矫制后验问无事实云子章馆阁校勘蚤世青朝请大夫 【神道碑载昌朝六子长章次
圭次田次齐次炎炎未仕五子皆有官按炎后亦贵

显】 弟昌衡

贾昌衡

贾昌衡

昌衡字子平举进士为梓州路转运判官贾人请富顺井盐吏视贿多寡为先后昌
衡一随月日给之泸州边夷蛮故时守以武吏昌衡请
由东铨调选蛮驱马来市官第其良弩为二等上者送秦州下者辄轻估值而抑买昌衡
请严禁之厯徙两浙路转运使熙宁更法度核吏治昌

衡数以利害闻神宗奖其论奏忠益以正议大夫致仕卒 【按宋史此下有昌朝子炎及伯祖父琰二传炎论钱法事详食货略余俱无迹足录今并从删】

△梁适

梁适字仲贤东平人翰林学士颢之子少孤尝辑父遗文及所自着以进真宗曰梁颢有子矣授秘书省正字天圣初为开封工曹 【按王珪撰适墓志作知开封府功曹参军】 知昆山县徙梧州奏罢南汉时民间折税更举进士知淮阳军又奏减京东预买紬百三十万论景佑赦书不当录朱梁后帝嘉之召为审刑详议官梓州妖人白彦欢依鬼神以诅杀人狱具以无伤献适驳曰杀人以诅是甚于刃也卒论死有鸟似鹤集端门稍下及庭中或以为瑞适曰野鸟入宫何瑞之云他日宰相拟适提点刑狱帝曰姑留之俟谏官有阙可用也遂拜右正言上言夏守贇为将无功不宜复典宥密会妇党任中师执政以嫌改直史馆修起居注奉使陕西与范仲淹条边机十余事进知制诰权发遣开封府岁余出知兖州莱芜冶铁为民病当役者率破产以偿适募人为之自是民不忧冶户而铁岁溢再迁枢密直学士知延州留为翰林学士御史交劾之以侍读学士知澶州徙秦州入知审刑院擢枢密副使依智高移嫚书求邕桂节度帝将受降适曰若尔岭外非朝廷有矣乃遣狄青讨之贼平帝曰向非适言南方安危未可知也迁参知政事契丹欲易国书称南北朝适曰宋之为宋受之于天不可改也契丹亦其国名自古岂有无名之国哉遂止进同中书门下平章事集贤殿大学士大瑁王守忠求为节度使适持不可张贵妃治丧皇仪殿又以为不可将以适为园陵使适言国朝以来无此制由是寢与陈执中不合适晓畅法令临事有胆力而多挟智数不为清议所许御史马遵吴中复极论其贪黷怙权乃罢知郑州复加观文殿大学士知秦州古渭初建砦间为属羌所钞益兵拒守羌复惊疑适其牛酒召谕其种人且罢所益兵羌不敢为患徙永兴军夏人盗耕楚叶河西田累年朝廷欲正封以适为定国军节度使知并州至则悉复侵地六百里还知河阳领忠武昭德二镇检校太师复为观文殿大学士以太子太保致仕进太傅熙宁三年 【按墓志云熙宁元年天子亲祀南郊诏公入侍祠以疾不能至明年十二月十八日薨据此适之卒是熙宁二年非三年也】 卒年七十赠司空兼侍中谥曰庄肃孙子美绍圣中提举湖南常平时新复役法子美先诸路成役书历迁京西转运副使陈次升又言子美缘章惇姻家连使湖外承迎意旨一时逐臣在封部者多被其虐不宜使在近畿徙成都路迁河北都转

运使倾漕计以奉上至捐绢钱三百万市北珠以进崇宁间诸路朝臣进羨余自子美始
北珠出女真子美市于契丹契丹嗜其利虐女真捕海
东青以求珠两国之祸盖基于此子美用是致位光显宣和四年以疾罢为开府仪同三
司提举嵩山崇福宫卒赠少保子美为郡纵侈残虐然
有干才所至辨治云

△鲁宗道

鲁宗道字贯之【宋名臣言行录作字贯夫】亳州谯人少孤鞠于外家诸舅皆
武人宗道自奋励读书举进士为濠州定远尉调海盐
令县东南旧有港导海水至邑下岁久湮塞宗道发乡丁疏治之人号鲁公浦改歙州军
事判官再迁秘书丞天禧元年始诏两省置谏官六员
考所言为殿最首擢宗道与刘煜为右正言谏章由合门始得进不赐对宗道请面论事
而上奏通进司遂为故事尝言守宰去民近未见有区
别能否汉宣帝除刺史守相必亲见而考察之今守佐虽未暇亲见宜令中书询考以言
察其应对试之以事观其施为才不肖皆得进退之吏
部之择县令放此庶得良守宰宣助圣化矣真宗纳之宗道风闻多所论列帝意颇厌其
数后因对自讼曰陛下用臣岂欲徒事纳谏之虚名邪
请罢去帝抚谕良久他日书殿壁曰鲁直盖思念之也寻除户部员外郎兼右谏德时天
书降于佑山中宗道上疏曰天道福善祸淫不言示化
人君政得其理则作福以报之失其道则出异以戒之又何有书哉臣恐奸臣肆谋诞妄
以惑圣听也【按东都事略于右谏德下载宗道疏
谏天书事虽不见听论自不磨宋史本传失载今据增】踰年迁左谏德直龙图阁仁宗
即位迁龙图阁直学士判吏部流内铨宗道在选调久
患铨格烦密及知吏所以为奸状多厘正之悉揭科条庀下人便之拜右谏议大夫参知
政事章献太后临朝问宗道曰唐武后何如主对曰唐
之罪人也几危社稷后默然时有请立刘氏七庙者太后问辅臣众不敢对宗道不可曰
若立刘氏七庙如嗣君何帝太后将同幸慈孝寺欲以
大安辇先帝行宗道曰夫死从子妇入之道也太后遽命辇后乘舆时执政多任子于馆
阁读书宗道曰馆阁育天下英才岂繄袴子弟得以恩
泽处邪枢密使曹利用恃权骄横宗道屡于帝前折之自是贵戚用事者皆惮之目为鱼
头参政因其姓且言骨鲠如鱼头也再迁尚书礼部侍
郎祥源观使在政府七年务抑侥幸不以名器私人疾剧帝临问卒皇太后临奠之赠兵
部尚书宗道为人刚正疾恶少容遇事敢言初太常议
谥曰刚简复改为肃简议者以为肃不若刚为得其实云

△薛奎

薛奎字宿艺绛州正平人父化光善算术奎始生知其必至公辅奎举进士为州第一乃推与里人王严而处严下进士及第为隰州军事推官州民常聚博僧舍一日盗杀寺奴取财去博者适至血偶浣衣逻卒捕送州考讯诬伏奎独疑之白州缓其狱后果得杀人者徙仪州推官时灵州用兵州郡皆发丁夫运粮奎部送至盐州会久雨粟麦渍腐奎白转运使卢之翰请纵民还州而偿所失之翰怒欲劾奏之奎徐曰用兵久人疲转饷今幸兵食有余安用此陈腐以困民哉之翰意解凡民所失悉奏除之知莆田县请蠲南闽时税咸鱼蒲草钱知永州州有钱监岁调兵三百人采铁而岁入不偿费奎奏听民自采所输辄倍之迁太常博士向敏中荐为殿中侍御史出为陕西转运使【按欧阳修撰奎墓志作出为陕西转运副使】赵德明言延州蕃落侵其地黑林平下诏按验奎阅郡籍德明尝假道黑林平移文录示之德明遂伏未几坐失举免数月起通判陕州改尚书户部员外郎淮南转运副使迁江淮制置发运使疏漕河废三堰以便饷运擢三司户部副使坐与三司使李士衡争论事改户部郎中直昭文馆知延州仁宗即位擢龙图阁待制权知开封府为政严敏击断无所贷使契丹还迁右谏议大夫权御史中丞上疏论择人求治崇节俭屏声色凡十数事章献太后称制契丹使萧从顺请见太后且言南使至契丹者皆见太后而契丹使来乃不得见奎时馆伴折之曰皇太后垂帘听政虽本朝羣臣亦未尝见也从顺乃已或谗奎漏禁中语改授集贤院学士知并州改秦州州宿重兵经费常不足奎务为俭约教民水耕谨商算岁中积粟三百万征算余三十万核民隐田数百顷【按宋史本传征算余三千万核民隐田数千顷以秦一州岁中之余及民隐田均不应若是之多墓志云秦之余积者三百万征算之衍者三十万核民旧隐田数百顷语不失实今据改】得刍粟十余万加枢密直学士知益州成都民妇讼其子不孝诘之乃曰贫无以为养奎出俸钱与之戒曰若复失养吾不贷汝矣其母子遂如初召为龙图阁学士权三司使遂参知政事帝谕曰先帝尝以卿为可任今用卿先帝意也俄迁给事中帝尝谓辅臣曰臣事君鲜有克终者奎曰保终之道匪独臣下然也历数唐开元天宝时事以对帝然之迁尚书礼部侍郎太后谒太庙欲被服天子袞冕奎曰必御此若何为拜力陈不可终不见听及太后崩时帝对左右泣曰太后疾不能言犹数引其衣若有所属何也奎曰其在袞冕也服之岂可见先帝于地下帝悟卒以后服敛因上言请逐内侍罗崇勋等时二府大臣多罢去奎得喘疾数辞位罢为户部侍郎资政殿学士判尚书都省寻卒赠兵部尚书谥简肃奎性刚不

苟合遇事敢言真宗时数宴大臣至有沾醉者奎谏曰陛下即位之初励精万几而简宴幸今天下诚无事宴乐无度大臣数被酒无威仪非所以重朝廷也真宗善其言及参政事谋议无所避能知人范仲淹庞籍明镐自为吏部选人皆以公辅许之无子以从子为嗣

△王曙

王曙字晦叔隋东皋子绩之后世居河汾后为河南人举进士为定国军节度推官咸平中举贤良方正入等迁秘书省著作佐郎知定海县还为羣牧判官迁太常丞判三司凭由理欠司坐举进士失实降监庐州茶税累迁右谏议大夫为河北转运使坐部吏受赇降知寿州徙河南转运使句当三班院权知开封府以枢密直学士知益州绳盗以峻法多致之死有卒夜告其军将乱立辨其伪斩之蜀人比之张咏号前张后王入为给事中仁宗为皇太子与李迪同选兼宾客九坐贡举失实黜官复为给事中兼羣牧使其妻寇准女也准罢相且贬曙亦降知汝州准再贬曙亦贬郢州团练副使起为光禄卿知襄州又徙汝州天圣四年复给事中知潞州州有杀人者狱已具曙独疑之既而提点刑狱杜衍至事果辨徙河南府永兴军召为御史中丞兼理检使理检置使自此始玉清昭应宫灾守卫者皆系狱曙恐朝廷议修复上言玉清建宫不合经义灾变之来若有警者愿除其地罢诸祷祠以应天变仁宗与太后感悟遂减守卫者罪已而诏以不复缮修谕天下七年以尚书工部侍郎参知政事以疾请罢改户部侍郎资政殿学士知陕州徙河阳再知河南府迁吏部召为枢密使拜同中书门下平章事逾月卒赠太保中书令谥文康曙方严简重有大臣体居官深自抑损子益恭益柔益恭字达夫以荫为卫尉寺丞性恬淡历官尚书司门员外郎致仕子登朝累迁司农少卿

王益柔

王益柔

益柔字胜之为人伉直尚气喜论天下事用荫至殿中丞元昊叛上备边选将之策杜衍丁度宣抚河东益柔寓书言河外兵饟无法非易帅臣转运使不可因条其可任者衍度使还以学术政事荐知介邱县庆历更用执政异意者指为朋党仁宗下诏戒敕益柔上书论辨言尤切直尹洙与刘沪争城水洛事自泾原贬庆州益柔讼之曰水洛一障耳不足以拒贼沪裨将洙为将军以天子命呼之不至戮之不为过顾不敢专执之以听命是洙不伸将军之职而上尊朝廷未见其有罪也不听范仲淹未识面以馆阁荐之除集贤校理 【按东都事略作以杜衍荐

除集贤校理前知介邱县由衍等以学术政事荐集贤校理之除是由仲淹以馆阁荐也
事略盖悞并二事为一尔】 坐预苏舜钦秦邸会醉作
傲歌黜监复州酒税久之为开封府推官改盐铁判官凡中旨所需不应法式有司迎合
以求进者悉力论之出为两浙京东西转运使上言今
考课法区别长吏能否必明有显状显状必取其更置兴作大利夫小政小善积而不已
然后能成其犬取其大而遗其细将竞利图功恐事之
不举者日多而虚名无实之风日起愿参以唐四善兼取行实列为三等不行熙宁元年
入判度支审院诏百官转对益柔言人君之难莫大于
辨邪正邪正之辨莫大于置相相之忠邪百官之贤否也若唐高宗之李义府明皇之李
林甫德宗之卢■〈木巳〉宪宗之皇甫镈帝王之鉴
也高宗德宗之昏蒙固无足论明皇宪宗之聪明乃蔽于二人以二人之庸犹足以致祸
况诵六经挟才智以文致其奸说者哉意盖指王安石
也判吏部流内铨旧制选人当改京官满十人乃引见由是士多困滞且遇举者有故辄
不用益柔请才二人即引见众论翕然称之直舍人院
知制诰兼直学士院栋戩遇明堂恩中书熟状加光禄大夫而旧阶已特进益柔以闻帝
谓中书曰非翰林几何不为羌夷所笑宰相怒其不申
堂用他事罢其兼直迁龙图阁直学士秘书监知蔡扬亳州江甯应天府卒年七十二益
柔少力学通羣书为文日数千言尹洙见之曰瞻而不
流制而不窘语淳而厉气壮而长未可量也时方以诗赋取士益柔去不为范仲淹荐试
馆职以其不善词赋乞试以策论特听之司马光尝语
人曰自吾为资治通鉴人多欲求一观读未终一纸已欠伸思睡能阅之终篇者惟王胜
之耳其好学类此

△蔡齐

蔡齐字子思其先洛阳人也曾祖绾为莱州胶水令因家焉齐少孤依外家刘氏举
进士第一仪状俊伟举止端重真宗见之顾宰相寇准
曰得人矣诏金吾给七驄传呼以宠之状元给驄自齐始也除将作监丞通判兗州徙维
州以秘书省著作郎直集贤院仁宗即位历迁尚书礼
部员外郎兼侍御史知杂事钱惟演守河阳请曲赐镇兵钱章献太后将许之齐言帝新
即位惟演外戚请偏赏以示私恩不可许遂劾奏惟演
以起居舍人知制诰既而召入翰林为学士 【按宋史本传作入为翰林学士凡自外郡
入京则曰入为某官今齐已为知制诰非自外入京
朝者考范仲淹撰齐墓志既而召入翰林为学士语较本传明晰今据改】 加侍读学士
太后大出金帛修景德寺命齐为文记之内侍罗崇勋
主其事阴为齐曰趣为记当得参知政事矣齐久之不上崇勋谗之罢龙图阁学士知河

南府参知政事鲁宗道因争留之不能得以亲老改密州徙应天府入为右谏议大夫御史中丞太后崩遗诰以杨太妃为皇太后同裁制军国事合门趣百官贺齐使台吏毋追班乃入白执政曰上春秋富习知天下情伪今始亲政事岂宜使女后相踵称制乎遂罢预政复为龙图阁学士权三司使有飞语传荆王元俨为天下兵马都元帅者捕得系狱连逮甚众帝怒使齐按问之齐曰此小人无知不足治且无以安荆王帝悟遽释之拜枢密副使交趾虐其部人款宜州自归者八百余人议者谓不可内齐曰蛮人去暴而归有德却之不祥请给荆湖闲田使自营若纵去当不复还旧部必聚而为盗贼矣不从后数年蛮果为乱蜀大姓王齐雄坐杀人除名齐雄太后姻家未更赦复官齐言果如此法挠矣明日入奏事曰齐雄恃势杀人不死又亟授以官是以恩废法也帝曰降一等与官可乎齐曰以恩废法如朝廷何帝勉从之乃抵齐雄罪钱惟演附丁谓枢密题名辄削去寇准姓氏云逆准不书齐入奏曰寇准忠义闻天下社稷之臣也岂可为奸党所诬帝遽令磨去郭皇后废将立富人陈氏女为后齐极论之拜礼部侍郎参知政事王曾与齐善曾与夷简不能相曾罢相齐亦以户部侍郎归班寻出知颍州卒年五十二赠兵部尚书谥曰文忠 【隆平集作谥忠肃考齐墓志铭亦作文忠】 颍人见其故吏朱棗会丧犹号泣思之齐方重有风采性谦退不妄言有善未尝自伐丁谓秉政欲齐附己齐终不往少与徐人刘颜善颜罪废齐上其书数十万言得复官颜卒又以女妻其子庠所荐庞籍杨偕刘随段少连后率为名臣始齐无子以从子延庆为嗣既歿有遗腹子曰延嗣

蔡延庆

蔡延庆

延庆字仲远举进士第通判明州历福建路转运判官提点京东陕西刑狱神宗即位以集贤校理历开封府推官有卫士告黄衣老卒筒火入直延庆察卒色辞疑焉询之果为所诬即反坐告者事闻帝重之加直史馆知河中府明年同修起居注直舍人院判流内铨拜天章阁待制秦凤等路都转运使以应办熙河军须功进龙图阁直学士王韶进师河州羌断其归路延庆曰兵事非吾所宜预然主帅在难不急援之恐败国事遂檄兵赴救羌解去韶得全师还韶入朝廷庆摄熙帅会元夕张灯羌乘隙伏兵北关下遣其种二十九人伪请来属将举火内应延庆覘知悉斩以徇伏者宵遁徙知成都府兼兵马都钤辖本道旧不置都钤辖至是特命之初茂州羈縻州蛮族九自推一人为将统其众将常在

州听要束州居羣蛮中无城堑惟树鹿角为固蛮屡夜入剽人畜徼货来赎民患苦诣郡守李琪请筑城琪上于朝诏延庆度其利便延庆下其事琪已去后守范百常以为利遂筑之蛮酋诉谓侵其土地乞罢筑不许蛮遂叛延庆坐区理失宜徙知渭州仍降为天章阁待制夏人禹臧苑麻疑边境有谋使人入塞卖马吏执以告延庆曰彼疑故来覘执之是成其疑约马直授之使去疆吏入敌境攘羊马得而戮诸境上且告之曰两境不相侵则相保以安故戮以戒若有之亦当尔也夏人悦服尝得安南行军法【东都事略作九军法】读之谓诸将曰汉蕃兵马未整幸今无事可仿其制以备调发乃部分正兵弓箭手人马团为九将合百队分左右前后四部队有驻战拓战之别步骑器械每将皆同以蕃兵人马为别队各随所近分隶焉诸将之数不及正兵之半乃所以制之处老弱于城砦较其远近而为区别使蕃汉无相杂以防其变具为书上之时鄜延吕惠卿亦分画兵延庆条其不便神宗善其议召知开封府拜翰林学士以言者罢知滁州历瀛洪州复龙图阁待制帅高阳阅岁复直学士移帅定武元佑中入为工部吏部侍郎卒年六十二延庆有学问平居简嘿遇事能别白是非所至有惠政既为伯父齐后齐晚得子乃归其宗籍家所有付之无一毫自予莱人义焉

钦定续通志卷三百二十三

●钦定续通志卷三百二十四 列传一百二十四

列传

宋【二十八】

○宋二十八

杨砺 宋湜 王嗣宗 李昌龄【纘】 赵安仁【君锡】

陈彭年 任中正【中师】 周起 程

琳 范雍【子奇坦】 赵禎 任布 高若讷 孙沔

杨砺

宋湜

王嗣宗

李昌龄

赵安仁

陈彭年

任中正

周起

程琳

范雍
赵祯
任布
高若讷
孙沔
△杨砺

杨砺字汝砺京兆郿人父仁俪仕蜀为丹棱令蜀平补渭南主簿迁永和令砺建隆中举进士甲科父丧服除以禄不足养母闲居无仕进意亲旧劝之乃赴官解褐凤州团练推官岁余又以母疾弃官开宝九年诣阙献书诏试学士院授陇州防御推官入迁光禄寺丞丁内艰起就职久之转秘书丞改屯田员外郎知鄂州以善政闻真宗在襄邸砺为记室参军真宗尹开封砺为推官尝问砺何年及第砺唯唯不对后知其唱名第一自悔失问谓砺不以科名自伐甚重之储宫建兼右谕德及即位拜给事中判吏部铨未几召入翰林为学士咸平初知贡举俄拜工部侍郎枢密副使二年卒年六十九帝轸悼之谓宰相曰砺介直清苦方当任用遽此沦谢即冒雨临其丧砺僦舍委巷中乘舆不能进步至其第嗟悯久之赠兵部尚书子峤至祠部郎中峰至太常博士峭至太子中舍少子岵至道初与张庶凝刊校真宗储邸书籍即位赐进士出身直史馆至祠部郎中

△宋湜

宋湜字持正京兆长安人父温故仕晋为左补阙从父温舒亦进士至职方员外郎兄弟皆有时名湜幼警悟早孤与兄泌励志笃学事母以孝闻温舒典耀州湜侍行代作笺奏词敏而丽温舒拊背曰此见真国器恨吾兄不及见也太平兴国五年【隆平集作太平兴国二年】举进士释褐将作监丞通判梓州迁右赞善大夫宋准荐其文拜著作郎直史馆雍熙三年以右补阙知制诰与王化基李沆并命加户部员外郎与苏易简同知贡举俄判刑部淳化二年妖尼道安讼大理断狱不当湜坐累降均州团练副使时母老湜留其室奉养移汝州与王禹偁并召入为礼部员外郎直昭文馆五年以职方员外郎再知制诰判集贤院知银台通进封驳司至道元年为翰林学士兼修国史判昭文史馆事加兵部郎中真宗即位拜中书舍人咸平元年改给事中充枢密副使帝幸大名命湜与王显分押后阵驻蹕数日常召见便殿方奏事以疾掖出帝临视许以先归赐衾褥曰此朕尝御者虽故暗亦足御道途之寒又遣内侍护送供帐至澶州卒于道年五十一赠吏部侍郎以子纶为大

祝纯为奉礼郎帝再幸河朔追悼之加赠刑部尚书谥曰忠定湜风貌秀整器识冲远好学美文词喜引重后进当世士流翕然宗仰之

△王嗣宗

王嗣宗字希阮汾州人父梦证成州军事判官嗣宗少力学自奋游京师以文谒王佑颇见优待开宝八年登进士甲科补秦州司寇参军太宗征河东嗣宗陈边事召赴行在迁大理寺丞通判睦州改右赞善大夫徙河州帝遣武德卒潜察远方事嗣宗械送京师因奏曰陛下不委任天下贤俊猥信此辈以为耳目臣窃取帝怒遣使械嗣宗下吏削职会赦复官寻以秘书丞通判澶州并河东西植树万株以固堤防入为三司开拆推官以左正言充河北转运副使时边境用兵崔翰为大将嗣宗每以苦言激其展效太宗将议亲征嗣宗上疏言契丹必不至之状甚见嘉纳改左司谏历京西转运使又移河北贝州骁捷卒五十余人谋窃发嗣宗率吏悉擒之迁虞部郎中至道初移河东转运使知耀州又知同州加比部郎中淮南转运使江浙荆湖发运使扬楚闲有窄家神庙民有疾不饵药但竭致祀以邀福嗣宗彻其庙自是民风稍变初漕运经泗州浮桥舟多覆坏嗣宗徙置城隅遂获安济咸平三年以漕运称职就拜太常少卿踰年以右谏议大夫充三司户部使改盐铁使尝与度支使梁鼎户部使梁颙同对言曰国家经费甚繁赋入渐少加以冗食者众尤为耗蠹所宜裁节事有可省者愿条列以闻从之明年将郊祀嗣宗因条上应奉诸物以及工作凡减杂物十万六千省工九万九千会罢三部使改左谏议大夫知通进银台司兼门下封驳事出知并州兼并代部署州境有卧龙王庙每穷冬阖境致祭值风雪寒甚老幼踣于道嗣宗亟毁之转运使郑文宝上其政绩有诏褒美先是西边市马以给北边战士有瘠弱者即送阙下暑月道远多死嗣宗建议以汾州地凉接楼烦诸监美水草请就牧放从之诏拜御史中丞加兼工部侍郎权判吏部铨嗣宗刚果率易无所畏惮每进见极谈时事深诋参知政事冯拯之短遂结宰相王旦弟旭使达意于旦以为助旦疾之因力庇拯嗣宗大怒会愆雨请对因于帝前毁旦帝召旦等诘之嗣宗理屈复以他辞侵旦旦不与抗乃已将祀汾阴以永兴重地思得大臣才兼文武者镇之因谓宰相曰嗣宗尝自言知武事可授廉车以当此任宜召问之嗣宗愿奉诏即拜耀州观察使知永兴军府真宗作诗赐之时种放得告归山嗣宗逆于传舍礼之甚厚放既醉稍倨嗣宗怒以语讥放放曰君以手搏得状元耳何足道也初嗣宗试讲武殿搏赵昌言帽擢首科故放及之嗣宗愧恨因疏言所部兼并之家侵渔众民凌暴孤寡凡十余族而放为之首愿徙放嵩山

疏词极于诟辱至目放为魑魅帝方厚待放令徙居嵩
阳避之四年邠盗陈兴擅释劫盗徙知邠州兼邠宁环庆路都部署城东有灵应公庙旁
有山穴羣狐处焉妖巫挟之为人祸福民甚信前此长
吏皆先谒庙然后视事嗣宗熏其穴得数十狐尽杀之淫祀遂息徙知镇州发边肃奸赃
肃坐贬嗣宗尝言徙种放掘邠狐按边肃为去三害居
二岁召还授枢密副使检校太保时寇准为枢密使嗣宗与之不协累表解职授检校太
傅求罢除大同军节度知许州嗣宗尝游是州别墅在
焉时人以为荣移知河南府天禧初改感德军节度徙知陕州再表请老且求入覲遣使
召还改静难军节度既至阙下病足不能朝谒乃求再
知许州不复议休退寇准为相素恶之特命以左屯卫上将军检校太尉致仕 【按宋史
宰辅表载王嗣宗以天平军节度使致仕】 五年卒
年七十八赠侍中谥曰景庄录其子二人官嗣宗事三朝最为宿旧所至以严明御下尤
傲很务以丑言凌挫羣类为中丞日常忿宋白郭贇邢
昺七十不请老屡请真宗敕其休致又遣亲属讽激之及嗣宗晚岁疾甚犹享厚禄徘徊
不去尝谓人曰仆惟此一事未能免物议众皆嗤之子
尧臣内殿承制唐臣太子中舍

△李昌龄

李昌龄字天锡宋州楚邱人父运太常卿昌龄太平兴国三年举进士授大理评事
通判合州累擢右拾遗直史馆丁内艰起为淮南转运
使转户部员外郎知广州广有海舶之饶昌龄不能以廉自守淳化二年代还其父尝典
许州有第在城中昌龄包苴财物悉留贮焉其至京城
但药物药器而已会有言其贪者太宗以为诬擢礼部郎中逾月为枢密直学士是秋初
置审刑院于禁中凡狱具上奏先申审刑院印付大理
刑部断覆以闻又下审刑中覆裁决以付中书当者行之否则宰相闻以论决命昌龄知
院事又权判吏部流内铨进右谏议大夫充户部使改
度支使拜御史中丞下诏御史台合行故事并条奏以闻狱无大小自中丞以下皆亲临
鞫问不得专责所司李继隆受命河朔征讨不赴台辞
昌龄纠之遣吏追还罚奉又劾陕西转运使郑文宝生事边境筑城沙碛轻变禁法文宝
坐贬湖外至道二年以本官参知政事昌龄居位颇巽
懦无所建明真宗即位加户部侍郎坐交结王继恩贬忠武军节度行军司马咸平二年
起为殿中少监会诏羣臣言边事昌龄求面陈事机不
报王均之乱命知梓州改河阳又改光州就改光禄卿疾不能治事转运使以闻命守本
官分司西京寻请致仕帝曰昌龄素无清誉乃授秘书
监遂其请大中祥符元年卒年七十二录子虞卿试将作监主簿昌龄兄昌图弟昌言从

子紘

李紘

李紘

紘字仲纲父克明仕至提点广东刑狱紘进士及第试秘书省校书郎知歙县地产黄金民输以代赋后金竭责其赋如故紘奏罢之厯知于潜剡县治有惠爱御史知杂吕夷简荐之改著作佐郎知灵池县刘筠蔡齐举为御史台推直官拜监察御史时召成都府乐工许朝天等补教坊紘言陛下即位尚未能显岩穴之士而首召伶人非所以广德美于天下朝天等遂罢归迁殿中侍御史合门使王遵度领皇城遣卒刺事告贾人有为契丹间谍者捕系皇城司按劾命紘复讯紘悉得其冤抵卒罪降遵度曹州兵马都监判三司开拆司辅郡旱流星坠西南有声僧襁于文德殿紘奏曰文德殿布政会朝之正位每灾异辄聚缙黄赞呗其间何以示中外改盐铁判官厯梓州陕西河北路转运使迁侍御史建言西北久通好士习安佚不知战阵之法宜择良将练精卒去冗惰实仓廩丰财用为守御备举种世衡等数人及奏罢贡余物遗近臣积官进龙图阁直学士知秦州卒紘方介有吏材笃于交游与刘颜为友颜死移任子恩官其子子师中至天章阁待制

△赵安仁

赵安仁字乐道河南洛阳人父孚字大信周显德初举进士调补开封尉太祖干德中为浦江令父丧服阙摄永宁令会亲征太原部送本邑粮馈民怀其惠列状以闻即真授其任擢宗正丞俄坐事连逮抵罪语见赵普传太宗即位起为国子监丞知袁州还知开封府司录参军事受诏与殿中侍御史柴成务等行视黄河分南北岸按行复遥堤以纾湍决孚言治遥堤不如分水势于是建议于澶滑二州立分水之制时决河未平重惜民力事遂寝朝廷议行封禅孚上封禅颂召拜秘书丞受诏鞫开封狱得其非辜者即日授推官迁监察御史出知舒州改殿中侍御史雍熙中诏询文武御戎之策孚奏曰者北边未宾全燕犹梗再兴军旅将复土疆臣窃计屯戍边陲故非获已暴露原野岂是愿为欲望朝廷通达国信谕以祸福示以恩威议定边疆永息征战帝嘉之雍熙中廷策贡士而安仁预为考会赐金紫因顾安仁问孚年几安仁曰臣父年六十二帝曰孚名士也亟召对亦赐金紫明年卒安仁生而颖悟幼时执笔能大字十三通经传大旨早以文艺称雍熙二年登进士第补梓州榷盐院判官以亲老弗果往会国子监刻五经正义板本安仁善楷隶遂奏留书之授大理评事光禄寺丞召试翰林以著作佐郎直集贤院迁

太常丞真宗即位拜右正言预重修太祖实录帝出师大名安仁疏言急务者三大要者五急务三者一激励戎臣举劝惩之典二振救边民行优恤之惠三车驾还京重神武之威大要五者一选将略二持兵势三求军谋四修军政五爱民力咸平三年同知贡举未几知制诰继判尚书刑部兼制置羣牧使同知三班审官院景德初翰林学士梁颙卒即以安仁为工部员外郎充翰林学士初孚极陈和好之利至是安仁从幸澶州会北边请盟首命安仁撰答书又独记太祖时聘问书式契丹使至首命接伴凡覲见仪制多所裁定北使姚东之至又命安仁接伴东之颇矜兵强战胜安仁曰老氏云佳兵者不祥之器圣人不得已而用之胜而不美胜而美之者是乐杀人也乐杀人者不得志于天下东之自是不敢复言王继忠将兵陷契丹不能死节而反事之东之屡称其材安仁曰继忠早事藩邸闻其稍谨不知其它其敏于酬对切中事机类如此时论翕然称其得体帝益器之自是有意柄用二年又与晁迥等同知贡举三年以右谏议大夫参知政事俄修国史拜工部侍郎进秩刑部五年以兵部侍郎仍兼修史八年知贡举三典春闱择士平允是故独无讥诮帝再赐诗嘉之国史成进尚书右丞天禧二年改御史中丞卒年六十一赠吏部尚书谥文定以其子温瑜为大理寺丞至国子博士良规为奉礼郎承裕为正字安仁质直纯恇无所矫节宽恕谦退与物无竞虽家人仆使未尝见其喜愠善训诸子各授一经嗜读书所得禄赐多以购书尤知典故凡近世典章人物之盛悉能记之良规赐进士及第后仕至尚书工部侍郎知濠州卒子君锡 【按宋史此下有安仁子良规附传无事迹足录今从删】

赵君锡

赵君锡

君锡字无愧性至孝母亡事父良规不违左右夜则寝于旁凡如内则所载者无不亲之及登进士第以亲故不愿仕良规每出必扶掖上下至杂立仆御中尝从遏文彦博彦博异其容止问而知之语诸子令视以为法良规没调知武强县累迁宗正丞时增诸宗院讲书教授官而逐院自备缗钱为月馈贫者或不能以时致君锡言国家养天下士于太学尚不较其费今教育宗室不宜令自行束修诏悉从官给历开封府推官元佑初迁司勋右司郎中太常少卿擢给事中论蔡确章惇有罪不宜复职大河不可轻议东回请亟罢修河司以省邦费宽民力进刑部侍郎枢密都承旨拜御史中丞上疏劝帝亲讲学广谘问为躬政之渐君锡素有志行后随人低昂无大建明初苏轼出知杭州君锡极论其贤

及贾易劾轼题诗怨谤即继言轼负恩怀逆无礼先帝愿亟正其罪宣仁后览之不悦曰君锡全无执守以吏部侍郎天章阁待制知郑陈澶三州河南府徙应天绍圣中贬少府少监分司南京卒年七十二绍兴六年赠徽猷阁直学士

△陈彭年

陈彭年字永年抚州南城人父省躬为鹿邑令彭年幼好学母惟一子爱之禁其夜读书彭年篝灯密室不令母知年十三着皇纲论万余言为江左名辈所赏尝师事徐铉为文太平兴国中举进士在场屋间颇有隽名然佻薄好嘲咏频为宋白所黜雍熙二年调江陵府司理参军换江陵主簿历澧怀二州推官在怀深为知州乔惟岳倚任御史中丞王化基荐其才改卫尉寺丞迁秘书郎为大理寺详断官坐事出监湖州盐税寻又停官彭年素贫窶居丧免职赖仆人佣贩以济真宗即位复为秘书郎乔惟岳刺史海州及知苏寿二州并表彭年通判州事咸平三年屡上疏言事召试学士院迁秘书丞知闾州未行改金州上疏言五事一曰置谏官二曰择法吏三曰简格令四曰省冗员五曰行公举会召举贤良方正翰林学士朱昂以彭年闻召之辞以贫乏请终秩景德初代还直秘阁杜镐刁衍荐其该博命直史馆兼崇文院检讨又代潘慎修起居注献大宝箴顷之预修册府元龟迁右正言充龙图阁待制先是诏谏官御史举职言事惟彭年与侍御史贾翱数有章奏建白弹射帝令中书置籍记之加刑部员外郎与晁迥同知贡举请令有司详定考试条式帝因命彭年与戚纶参定多革旧制专务防闲其所取者不复拣择文行止较一日之艺虽杜绝请托然真甲等者或非宿学之士大中祥符元年议建封禅彭年预详定仪注上言辨正包茅之用礼成进秩工部郎中加集贤殿修撰历迁龙图阁直学士进右谏议大夫兼秘书监诏就赐食厅编次太宗御集赐勋上柱国尝因奏对帝言儒术污隆实关国家隆替太祖太宗丕变弊俗崇尚斯文朕获绍先业谨遵圣训礼乐交举儒术化成实二后垂裕之所致也又言君之难由乎听受臣之不易在乎忠直君以宽大接下臣以诚明奉上君臣之心皆归于正直道而行至公相遇孰谓难哉彭年曰陛下圣言精诣足使天下知训伏愿躬演睿思着之篇翰帝为制崇儒术为君难为臣不易二论彭年请示辅臣刻石国子监六年召入翰林为学士兼龙图阁学士同修国史彭年尝谒王旦旦辞不见翌日见向敏中敏中以彭年所上文字示旦旦瞑目不览曰是不过兴建符瑞图进取耳帝奉祀亳州太清宫丁谓为经度制置使以彭年副之又与谓同知礼仪院礼成加给事中又为天书同刻玉副使国史成迁工部

侍郎九年拜刑部侍郎参知政事判礼仪院充会灵观使天禧大礼为天书仪卫副使又为参详仪制奉宝册使进兵部侍郎以疾表求罢奉不许卒年五十七赠右仆射谥曰文僖录子佺期大理寺丞孙彦先太常寺奉礼郎彭年性敏给博闻强记贵至通显奉养无异贫约所得奉赐惟市书籍大中祥符间附王钦若丁谓朝廷典礼无不参预其仪制沿革刑名之学皆所详练虽前世所未有必推引依据以成就之时政大小日有谘访应答该辩一无凝滞皆与帝意合故眷遇特厚云

△任中正

任中正字庆之曹州济阴人父载官右拾遗中正进士及第为池州推官历大理评事通判邵州改濮州以翰林学士钱若水荐迁秘书省著作佐郎判大名府召为秘书丞江南转运副使中正躯干颀长帝择大笏命内臣取绯衣之长者赐之至部岁大稔民出租赋平余皆盈羨发运使王子舆欲悉调饷京师中正曰东南岁输五百余万而江南所出过半今岁有余或岁少歉则数不登惠及吾民矣乃止擢监察御史两浙转运使民饥中正不俟诏发官廩振之擢枢密直学士代张咏知益州在郡五载遵咏条教蜀人便之知审刑院出知并州迁给事中权知开封府大中祥符九年拜尚书工部侍郎枢密副使马知节知枢密院改同知院事明年曹利用为枢密使复为副使再进兵部侍郎参知政事仁宗为东宫时以右丞兼宾客迁工部尚书及即位拜兵部尚书中正素与丁谓善谓且贬左右莫敢言者中正独营救谓降太子宾客知郢州中正中师皆坐贬顷之以母老徙曹州迁礼部尚书卒赠尚书左仆射谥康懿

任中师

任中师

中师字祖圣进士及第试秘书省校书郎知平陆县以张知白荐遂为右正言中正贬中师亦降太常博士监宿州酒税未几通判应天府曹利用辟为羣牧判官徙知滑州入为开封府判官累迁尚书度支郎中直史馆知澶州以太常少卿直昭文馆知广州视事之明日吏白故事当谒诸祠庙而廨有淫祠中师遽命撤去之兼市舶使市舶置使自此始代还为右谏议大夫判尚书刑部加集贤院学士再知澶州未行进龙图阁直学士知并州许便宜从事历改枢密直学士知益州先是转运使韩洙急于笼利自薪刍蔬果之属皆有算而中师尽奏蠲之康定中任布守河阳数上书论事帝欲用之吕夷简荐中师才不在任布下遂并召为枢密副使 【按任布本传及宋史宰辅表俱作召为枢密副使后

罢知河阳此云任布守河阳数上书论事遂并召为枢密副使以守河阳在召为枢密前
误】 明年建北京令中师领修建进给事中宣抚河东
不行求补郡以尚书礼部侍郎资政殿学士知永兴军求内徙得知陈州踰年上书言臣
老矣家本曹人愿得守曹遂又改知曹州改户部侍郎
明年请老拜太子少傅致仕进太子少师卒赠太子太傅谥安惠中师性乐易平居自奉
甚俭约晚号大块翁

△周起

周起字万卿淄州邹平人生而丰下父意异之曰此儿必起吾门因名起幼敏慧如
成人意知卫州坐事削官起年十二诣京师讼父冤父
乃得复故官起举进士授将作监丞通判齐州擢著作佐郎直史馆累迁户部度支判官
以右正言知制诰权判吏部流内铨寻为东京留守判
官真宗东封还近臣多颂功德起独以居安为戒进金部员外郎判集贤院初置纠察刑
狱司因命起起乃请诸已决而事有所枉及官吏非理
榜掠者并听受诉从之擢枢密直学士权知开封府厯徙永兴天雄军所至有风烈迂右
谏议大夫知并州拜给事中同知枢密院事进礼部侍
郎为枢密副使起素善寇准准且贬起亦罢为户部郎中 【安宋史宰辅表天禧四年九
月乙未周起自礼部侍郎枢密副使以户部侍郎知
青州王安石撰起神道碑亦作户部侍郎】 知青州又降太常少卿厯知应天府丁谓既
贬复为礼部侍郎以疾请知颍州徙陈州汝州卒赠礼
部尚书谥安惠起性周密凡奏事及答禁中语随辄焚草故其言外人无知者子延荷以
孝友闻官殿中丞延隼颇雅厚官太常少卿

△程琳

程琳字天球永宁军博野人举服勤辞学科补泰宁军节度推官改秘书省著作佐
郎天禧中召试直集贤院仁宗即位改太常博士权三
司户部判官契丹使至琳为馆伴使契丹使言先皇帝尝通使承天太后独无使何也琳
曰南北兄弟也先皇帝视承天犹从母故无嫌今皇太
后乃嫂也礼不通问使者语屈时修真宗实录而大中祥符以来起居注阙琳追述上之
遂修起居注擢知制诰判吏部流内铨权三司使范雍
使契丹命琳发遣三司使太仓贍军粟陈腐不可食岁且饥琳尽发以贷民凡六十万斛
饥民赖以全活而军得善粟契丹遣萧蕴杜防来蕴出
坐位图示琳曰中国使者坐殿上高位今我位乃下请升之琳曰此真宗所定不可易也
防曰大国之卿可当小国之君琳曰南北虽两朝安有
大小卿尝坐我殿上我顾小国也防无以对宰相将许芝琳曰许其小必启其大乃止以
右谏议大夫权御史中丞时岁饥上疏请罢诸土木营

造蠲被灾郡县租赋改枢密直学士知益州迁给事中权知开封府王蒙正子齐雄捶老卒死货妻子使以病告琳察其色辞异令有司验得状蒙正连姻章献太后家太后谓琳曰齐雄非杀人者乃其奴尝捶之琳曰奴无自专理且使令与已犯同太后嘿然卒论如法外戚吴氏离其夫而挈其女归夫诉于府琳命还女吴氏言已纳宫中琳请于帝曰臣恐天下人有窃议陛下夺人妻女者帝亟命出之笞而归其妻迁工部侍郎龙图阁学士复为御史中丞不拜寻以翰林侍读学士兼龙图阁学士复为开封府改三司使出纳尤谨禁中有所取辄奏罢之内侍言琳专琳曰三司财赋皆朝廷有也臣为陛下惜于臣何有帝然之时议者患民税多目吏得为奸欲并其名合为一琳曰合而为一易于句校可也后有兴利之臣复用旧名增之是重困民也议者莫能夺 【按欧阳修撰琳神道碑载此事较为明晰今据参辑】 再迁吏部侍郎景佑四年遂参知政事迁尚书左丞时元昊反犹遣使来朝众请按诛之琳曰遣使常事也杀之不祥后使者益骄横大臣患之琳曰始不杀无罪也今既骄横可暴其恶诛之国法也又何患耶议者欲重贿嘉勒斯赉使讨贼因以其地与之琳曰使嘉勒斯赉得地是复生一元昊矣不若用间使二羌势不相合中国利也故枢密副使张逊曾孙偕才七岁宗室女生也贫不自给乳媪擅出券鬻其第琳欲得使开封府吏密谕媪偕幼得御宝许鬻乃售乳媪以宗室女故入宫见章惠太后既得御宝琳乃市取之又令吏市材水买妇女已而吏以赃败御史按劾得状降光禄卿知颍州顷之为户部侍郎寻复吏部知天雄军又以左丞为资政殿学士及建天雄军为北京内侍皇甫继明方用事主营宫室欲侈大以要赏琳以为方事边陲又事土木以困民不可既而继明数有论奏帝遣御史鱼周询按视遂罢继明命琳独主之迁工部尚书加大学士河北安抚使改武昌军节度使知永兴军陕西安抚使以宣徽北院使判延州仍为陕西安抚使元昊死谅祚立方幼三大将分治其国议者谓可因此时以节度使啖三将使各有所部分以弱其势琳曰幸人之丧非所以柔远人不如因而抚之议者惜其失机尝获戎首不杀戒遣之夏人亦相告勿捕汉民久之夏人以五百户驱牛羊叩边请降且言契丹兵至衙头国中乱愿自归琳曰彼诈也契丹至帐下当举国取之岂容有来降者间闻夏人方捕叛者此其是耶不然诱我耶拒不受已而贼果以骑三万临境上以捕降者为辞琳谍知之闭壁倒旗戒诸将勿动贼疑有备遂引去拜同中书门下平章事判大名府琳持重不扰前后守魏十年度要害缮壁垒增守御备值杂木数万曰异时楼櫓之具可不出于民矣人德之厯镇武胜

镇安上书曰臣虽老尚能为国守边未报得疾卒赠中书令谥文简琳敏厉深严长于政事辨议一出不肯下人然性嗇于财而厚自奉养章献

太后时尝上太后临朝图人以此薄之 【按宋史此下有姜遵传无事迹足录今从删】

△范雍

范雍字伯纯其先太原人后家河南中进士第为浴阳县主簿累迁尚书工部郎中为龙图阁待制 【按范镇撰雍神道碑作天章阁待

制】 陕西都转运使还提举诸司库务句当三班院环原州属羌扰边以雍为安抚使建言属羌因罪罚羊者旧输钱而比年责使出羊羌人颇

以为患请输钱如旧罪轻者以汉法赎金从之迁右谏议大夫权三司使雍在京东时平滑州水患以劳加龙图阁直学士天圣六年拜枢密副

使丁母忧起复迁给事中玉清昭应宫灾惟一二小殿存章献太后有再葺之意雍抗言曰不若悉燔之也先朝以此竭天下之力遽为灰烬非

出人意如又将葺之则民不堪命非所以畏天戒也时王曾亦谏阻乃止迁尚书礼部侍郎太后崩罢为户部侍郎知陕州改永兴军是岁饥疫

关中为甚雍为振恤以疾请近郡遂厯知河阳进吏部侍郎徙应天府又改河南府加资政殿学士陈安边六事 【按范仲淹撰雍墓志铭河

阳暇日念国家御戎之备率多弛废西羌狡很必有窥边之心恩不克威岂久安之势乃感激上言而得入覲陈安边六策据此则雍之陈安边

策在知河阳时非改知河南府后事也与宋史本传互异】 又请于天雄军聚甲兵以备河北于永兴军河中府益募土兵以备陕西即泾原环

庆有警河中得以援之既而元昊反拜振武军节度使知延州元昊先遣人通款于雍雍信之不设备一日引兵数万破金明砦乘胜至城下会

大将石元孙领兵出境守城者纔数百人雍召刘平于庆州帅师来援合元孙兵与贼战三川口大败皆为贼所执雍闭门坚守会夜大雪贼解

去城得不陷左迁户部侍郎知安州寻复吏部侍郎知河中府改知永兴军迁尚书左丞加资政殿大学士初完永兴城或言其非便诏止其役

雍匿诏而趣成之明年贼犯定州邠岐之闲皆恐惟永兴人心帖然复徙河南府迁礼部尚书卒赠太子太师谥忠献雍为治尚恕好谋而少成

颇知人喜荐士位多至公卿者狄青为小校时坐法当斩雍贷之后果以功名显云子宗杰厯陕西转运使先雍卒宗杰子子奇

范子奇

范坦

范子奇

子奇字中济以祖雍荫签书并州判官厯迁湖南转运副使建言梅山蛮恃险为边

患宜拓取之后章惇开五溪议由此起入判将作监使
于辽导者改路回远子奇谓曰此去云中有直道旬日可至何为出此导者又欲沮子奇
下马馆门外子奇曰异时于中门下马今何以辄易导
者计屈历河东陕西河北京东四路转运使工部左司二郎中加直龙图阁使河北诸郡
犹榷盐奏罢之元佑初为司农卿历知河阳召权户部
侍郎删酒户苛禁及奴婢告主给赏法未几出知庆州广储蓄缮城栅严守备羈黠羌推
诚待下人乐为用入为吏部侍郎以待制致仕卒年六
十三子坦

范坦

坦字伯履以父任为开封府推官金部员外郎大理少卿改左司员外郎押伴夏国
使应对合旨赐进士第权起居舍人使辽复命具语录
以献徽宗览而善之付鸿胪令后奉使者视为式迁殿中监知开封府再命使辽时兴边
议非时遣使以观衅坦以不宜始祸辞其行帝怒责舒
州团练副使稍复集贤殿修撰知江宁府洪扬二州召为户部侍郎论当十及夹锡钱之
弊以便亲请外知河阳入辞帝曰夹锡钱之害甚于当
十宜速正之为一道率坦至即奏罢之政和初复为户部遂改当十钱为当三罢淮盐入
东北鬻诸州公田以实常平又疏言户部岁入有限用
则无穷今节度使八十员留后至刺史数千员自非军功得之宜减其半奉及他工技未
作一切裁损时以为当时张商英为相坦多与之合及
商英去位言者论坦助为匱竭之说以摇众听又言坦建议鬻田改常平法废元符令及
罢夹锡钱之罪贬黄州团练副使安置韶州以赦复徽
猷阁待制卒年六十二

△赵祜

赵祜字表微其先单父人后徙宣城为人诚实宽厚少好学擢进士第历平定军判
官累迁殿中侍御史益州路转运使数言部中事以平
允称迁工部郎中召为侍御史知杂事改三司盐铁副使擢右谏议大夫集贤院学士知
益州坐市锦不如数降知同州徙凤翔京兆府三迁工
部侍郎复纠察在京刑狱司枢密直学士知并州代还迁刑部侍郎天圣八年迁枢密副
使迁吏部侍郎时权出宫掖祜厚给刘美人家婢以故
致位政府命未出人驰告祜祜问曰东头西头盖意在中书也闻者皆以为笑章献太后
崩罢为尚书左丞知河中府迁礼部尚书以太子少傅
致仕卒赠太子太保谥僖质

△任布

任布字应之河南人后唐宰相圜四世孙也力学家贫尝从人借书以读进士及第

补安肃军判官辄刺问契丹中事上疏请饬边备仍奏
河北利害后契丹至澶州真宗识其名特改大理寺丞知安阳县通判嘉州历判大名府
领湖南路提点刑狱入权三司盐铁判官判度支句院
京城东南有泉涌出为筑祥源观男女徒跣奔走瞻拜布论之曰明朝不宜以神怪徇愚
俗遂忤宰相意又与徐奭麻温共试开封府进士而奭
潜发封卷视之降监邓州税徙知宿州时越州守阙寇准曰越州有职分田岁入且厚今
争者颇重非廉士莫可予乃徙越州及准贬布亦徙建
州累迁尚书职方员外郎丁谓既逐稍用为白波发运使岁余判三司开拆司出为梓州
路转运使富顺监盐井岁久鹵薄而课存主者至破产
或鬻子孙不能偿布奏除之迁祠部郎中擢江淮制置发运使前使者多聚山海珍异之
物以饷权要布一切罢去召为三司度支副使奉使契
丹还累拜右谏议大夫知真定府或欲省河北兵布言契丹西夏方窥伺中国备未可弛
也又筑甬道属滹沱河跨绝泥潦徙知滑州改天雄军
迁给事中集贤院学士知许州进龙图阁直学士历知河南府未至召为枢密副使布纯
约自守及秉政无所建明子逊尝上书诋大臣及布皆
为不才御史鱼周询因疏奏布不才其子能知之乃以尚书工部侍郎罢知河阳议者以
周询引逊语逐其父为不知体复改蔡州授太子少保
致仕进少傅皇佑间赐一子进士出身迁少师卒赠太子太傅谥恭惠子达性亦恬达历
官为司封郎中

△高若讷

高若讷字敏之并州榆次人徙家卫州进士及第补彰德军节度推官改秘书省著
作佐郎再迁太常博士知商河县县有职分田而牛与
种皆假于民若讷独废不耕人以为清入为监察御史里行历迁知谏院时范仲淹坐言
事夺职知睦州余靖尹洙论救仲淹相继贬斥欧阳修
乃移书责若讷为谏官不能辨犹以面目见士大夫出入朝廷是不复知人间有差耻事
若讷忿以其书奏贬修夷陵令遂为时论所薄未几加
直史馆以刑部员外郎兼侍御史知杂事王蒙正知蔡州若讷言蒙正起裨贩因缘戚里
得官向徙郴州物论犹不平不可予以大州诏寝其命
大庆殿设祈福道场若讷奏大庆殿非行礼不御非法服不坐国之路寝也岂可聚老释
为渎慢阁文应为入内都知若讷言其肆横不法请出
之乃出文应为相州兵马铃辖又奏三公坐而论道今二府对纚数刻何以尽万几宜赐
坐从容如唐延英故事擢天章阁待制累迁右谏议大
夫权御史中丞时宰相贾昌朝与参知政事吴育数争事帝前明年春旱帝询所以然若
讷曰阴阳不和责在宰相遂引洪范以为大臣不肃则

雨不时若于是昌朝及育皆罢若讷遂代育为枢密副使王则据贝州讨之踰月未下或议招降若讷言河朔重兵所积今释不讨且启乱阶议乃定以工部侍郎参知政事拜枢密使凡内降恩若讷多覆奏不行入内都知王守忠欲得节度使固执以为不可皇佑五年罢为观文殿学士兼翰林侍读学士尚书左丞同羣牧制置使判尚书都省止命舍人草词卒赠右仆射谥文庄若讷强学善记尤喜申韩管子之书皇佑中诏累黍定尺以制锺律争论连年不决若讷以汉货泉度一寸依隋书定尺十五种上之并损益祠祭服器悉见施用

△孙沔

孙沔字符规越州会稽人中进士补赵州司理参军跌宕自放不守士节然材猛过人后以秘书丞为监察御史里行景佑元年礼院奏用冬至日册后沔奏丧未祥禫而行嘉礼非制也同安县尉李安世上书指切朝政被劾沔言若加罪安世恐杜天下言者请勿治黜知衡山县就道后上书言时事再贬永州监酒移通判潭州知处州迁监察御史又知楚州所在皆着能迹召为左正言论事益有直名迁尚书工部员外郎提举两浙刑狱遂以起居舍人历陕西转运使时宰相吕夷简求罢帝优诏弗许沔上书言夷简当国黜忠言废直道及以使相出镇许昌召还秉政于兹三年不更一事以姑息为安以避谤为智默默而去无一言启沃帝心别白贤不肖虽尽南山之竹不足书其罪也书闻帝不之罪议者喜其蹇切未几以天章阁待制为都转运使又迁礼部郎中历环庆路都总管安抚经略使知庆州元昊死诸将欲乘其隙大举灭之沔言乘危伐丧非中国体历知陕州河东都转运又移知庆州聚战亡遗骸葬祭之军中感泣凡三知庆州边人服其能历迁龙图阁直学士又迁枢密直学士知成都府未至以母丧罢服除为陕西都转运使求知明州会京东多盗乃知徐州沔明购赏严诛罚盗遂止徙秦州时侂智高反沔入见帝以秦州事勉之对曰秦州不足烦圣虑陛下当以岭南为忧臣闻智高掠邕广贼势方张官军朝夕当有败奏明日岭南以败闻帝谕执政曰诚如沔所料宰相庞籍奏遣沔行遂以为湖南江西路安抚使以便宜从事加广南东西路安抚使沔请益发骑兵【按宋史仁宗本纪皇佑四年八月命孙沔为湖南江西路安抚使沔请益发骑兵行至鼎州始有加广南安抚之命与本传载广南安抚在益发骑兵之前互异】且增选偏裨二十八人求武库精甲五千以备贼参知政事梁适诋其张皇沔曰前日惟亡备故至此今指期灭贼非可以徼幸胜乃欲示镇静耶夫实备不至而貌为镇静危亡之道也居二日促行才与兵七百沔忧贼渡岭而北乃檄

湖南北曰大兵且至其缮治营垒多具宴犒贼疑不敢
 北寇寻加广南东西路安抚使会遣狄青为宣抚使沔副青宣抚贼平沔留治后事迁给
 事中及还知杭州至南京召为枢密副使张贵妃薨追
 册为皇后命沔读册故事正后翰林学士读册沔既陈不可用宰相护葬且陛下若以臣
 沔读册则可以枢密副使读册则不可遂求罢职以资
 政殿学士知杭州迁大学士徙知青州又迁观文殿学士知并州而谏官吴及御史沈起
 奏沔淫纵无检守杭及并所为不法乃徙寿州按验得
 实责盗国军节度副使后复光禄卿分司南京会恩除知濠州以尚书礼部侍郎致仕英
 宗即位迁户部帝与执政议守边者难其人参知政事
 欧阳修奏沔向守环庆养练士卒招抚蕃夷恩信最着今虽七十精力不衰中间曾以罪
 废然宜弃瑕使过遂起为资政殿学士知河中府又为
 观文殿学士知庆州历徙延州道卒赠兵部尚书谥曰威敏 【按宋史本传不载沔赠谥
 据东都事略补】 沔居官有材力性强直少所惮然
 喜宴游女色故中间坐废初陕西用兵朝廷多假边帅倚以集事近臣出帅或骄恣越法
 及沔废后真定路安抚使吕溱相继得罪自此守帅之
 权微矣

钦定续通志卷三百二十四

●钦定续通志卷三百二十五 列传一百二十五

列传

宋 【二十九】

○宋二十九

高琼【续勋继宣】 范廷召 葛霸【怀敏】 曹利用【孙继
 邺】 张耆【希一利一】 杨崇勋 夏守
 赞【随】 狄青【张玉孙节】 郭逵

高琼

范廷召

葛霸

曹利用

张耆

杨崇勋

夏守赞

狄青

郭逵

△高琼

高琼字宝臣 【据王珪撰琼神道碑增】 燕人祖霸父干 【按神道碑曾祖冕赠中书令祖霸赠尚书令密国公父干赠尚书令冀国公】 李景杀霸干徙居亳州之蒙城因土著焉琼少勇鸷无赖为盗事败将磔于市值暑雨创溃伺守者稍怠即掣钉而遁事王审琦太宗尹京邑知其才勇召置帐下太宗尝侍宴禁中甚醉及退太祖送至苑门时琼与戴兴王超李斌桑赞从琼左手执勒右手执镫太宗乃能乘马太祖顾琼等壮之因赐以控鹤官衣带及器帛且勗令尽心焉太宗即位擢御龙直指挥使从征太原命押弓弩两班合围攻城及讨幽蓟属车驾倍道还留琼军中鼓吹殿后六班扈从不及惟琼首率所部见行在太宗大悦慰劳之太平兴国四年迁天武都指挥使镇西州刺史明年改领本州团练使车驾巡师大名命琼与日骑右厢都指挥使朱守节分为京城内巡检坐事出为许州马步军都指挥使 【按神道碑会卢多逊遣吏私通秦王邸坐失徼巡降许州马步军都指挥使】 会有龙骑亡命卒数十人因知州臧丙出郊谋劫其导从以叛琼闻即白丙趣还城因自率从卒数十人遂悉擒送于州丙上其事会将北伐召入授马步军都军头领蓟州刺史楼船战棹都指挥使部船千艘赴雄州又城易州失还为天武右厢都指挥使领本州岛团练使端拱初出为单州防御使改贝州部署二年迁朔易帅臣制授琼侍卫步军都指挥使领归义军节度出为并代马步军都部署戍兵有以廩食陈腐哗言者琼知之一日出巡诸营士卒方聚食因取其饭自啖之谓众曰今边鄙无警尔等坐饱甘丰宜知幸也众言遂息改镇州都部署至道中就改保大军节度典军如故真宗即位加彰信军节度复为并代都部署咸平中契丹侵边其母车帐至狼山大夏帝亲巡河朔遣杨允恭驰往召琼率所部出土门与石保吉会镇定既而傅潜以逗留得罪即召琼代之兵罢复还本任转运使言其政绩诏褒之三年代还之手创不任持笏诏执挺入谒授殿前都指挥使先是范廷召桑赞所将边兵临敌退衄言者请罪之帝以问琼琼对曰兵违将令于法当诛然陛下去岁已释其罪今复行之又方屯诸路非时代易臣恐众心疑惧乃止景德初车驾北巡时前军已与敌接战帝欲亲临营垒或劝南还琼曰敌师已老陛下宜亲往以督其成帝悦即日进幸澶渊明年以罢兵料简兵卒诸班直十年者出补军校年老者退为本班剩员琼进曰此非激劝之道宿卫岂不劳乎自是八年者皆得叙补焉马军都校葛霸权步军司会以疾在告令琼兼领二司琼从容上言曰臣衰老傥又有犬马之疾则须一将总此二职臣事先朝时侍卫都虞候以上常至十员职位相亚易于迁改且使军伍熟其名望边藩

缓急亦可选用帝深然之未几以久疾求解兵柄授检校太尉忠武军节度三年卒年七十二赠侍中嘉佑八年琼曾孙女进册为皇后累赠琼太师尚书令兼中书令秦国公治平四年为皇太后赠至卫王谥曰烈武神宗篆其碑曰决策定难显忠基庆之碑【按琼累赠官爵及谥号碑额宋史本传不载据神道碑补】琼不识字晓达军政然颇自任罕与诸将参议善训诸子继勋继宣继忠继密继和继隆继元继勋继宣最知名【按神道碑载琼子十四人俱有官身宋史本传止载七人】

高继勋

高继宣

高继勋

继勋字绍先初补右班殿直仪状颀伟太宗见而异之召问其家世以琼子对擢寄班祗候累迁内殿崇班咸平初王均据益州命为益州兵马都监提举西川诸州军巡检公事招安使雷有终以兵五百授继勋守东郭二门会贼攻弥牟砦继勋引兵转鬪至嘉州败之有终益以劲兵复进攻二门克之乃建帜城上诸将知城拔有终乃引军薄天长门贼复来拒战会日暮有终欲少休继勋曰贼窘矣急击之无失也率十数骑鏖战身被数创血濡甲马死更马以进会入内都知秦翰来援贼退保子城不敢出继勋潜知贼欲夜遁开围使得溃去均卒败灭以功迁崇义使贼余党保山藪中时出剽劫乃徙绵汉剑门路都巡检使继勋募恶少年侦贼动静穷蹶岩穴掩其不备悉擒杀之又徙峡路兵马钤辖还朝迁洛苑使并代州钤辖徙屯岢岚军契丹聚兵五万屯草城川继勋登高望之谓军使贾宗曰敌虽众而阵不整将不才也我兵虽少可以奇取胜先设伏山下与之战至寒光岭伏发契丹大败斩获甚众迁弓箭库使领荣州刺史徙麟府州钤辖时屯兵河外馈运不属继勋扼兔毛川援送军食师乃济徙知环州又徙瀛州奉使契丹还知定州徙鄜延路钤辖坐市马亏价失官已而复知瀛州仁宗即位真授陇州团练使厯知雄州其冬契丹猎燕蓟候卒报有兵入钞边州皆警继勋曰契丹岁赖汉金缯何敢捐盟好邪居自若已乃知渤海人叛契丹行剽两界也累擢泾原路副都总管兼知渭州入宿卫出为天雄军都总管愿复护边既而留不遣后为真定府定州路都总管改威武军节度观察留后遂拜保顺军节度使马军副都指挥使恭谢礼成徙镇昭信以老病乞骸骨召见便殿许一子扶掖听辞管军改镇建雄知滑州河水暴溢啗堤岸继勋虽老躬自督役露坐河上暮夜犹不辍水乃杀怒滑人德之卒年七十八赠太尉继勋性谦谨有机略善抚御士卒临战辄胜在蜀有威名号神

将子遵甫官至北作坊副使嘉佑八年遵甫女正位皇后神宗即位册皇太后累赠继勋太师尚书令兼中书令追封康王谥穆武熙宁九年诏宰相王珪为神道碑御篆碑首曰克勤敏功锺庆之碑遵甫亦赠太师尚书令兼中书令追封楚王【按东都事略载继勋赠楚王遵甫赠鲁

王王珪撰继勋神道碑载继勋赠康王遵甫赠武功都王与宋史本传互异】

高继宣

继宣字舜举幼善骑射颇工笔札知读书以恩补西头供奉官迁合门祗候邠州兵马都监曹玮守邠数与言兵荐其可用干兴初以内殿崇班为益州都监蜀人富侈元夕大张镫知府薛奎戒以备盗继宣藉恶少年饮犒之使夜中潜志盗背明日皆获历益州路兵马钤辖还为西上合门使泾原路钤辖兼安抚使知渭州迁四方馆使昭州刺史知雄州初元昊反声言侵关陇继宣请备麟府未几羌兵果入寇河外陷丰州擢捧日天武四厢都指挥使恩州团练使知并州俄元昊寇麟府继宣帅兵营陵井进屯府谷闲遣勇士夜乱贼营又募黥配厢军得二千余人号清边军命偏将王凯主之军次三松岭贼卒数万众围之清边军奋起大败之筑窰远砦相视地脉凿石出泉已而城五砦迁眉州防御使卒

△范廷召

范廷召冀州枣强人父铎为里中恶少年所害廷召年十八手刃父讎剖取其心以祭父墓弱冠身長七尺余有膂力尝为盗以勇壮闻周广顺初应募为北面招收指挥使世宗即位入补卫士从征高平力战迁殿前指挥使又从征淮南战紫金山流矢中左股太祖即位从平李筠李重进转本班都知又从征太原再转散都头都虞候领费州刺史太平兴国中以日骑军都指挥使从平太原征范阳秦王廷美尝遣亲吏阎怀忠赵琼犒禁军列校廷召预焉坐出为唐州马步军都指挥使雍熙三年议北征召入为马步军都军头领平州刺史幽州道前军先锋都指挥使与贼遇固安南破其众三千斩首千余级克固安新城二县乘胜下涿州复与契丹战中流矢血渍甲缕神色自若督战益急师还迁日骑右厢都指挥使领本州岛团练使又迁左厢移领高州端拱二年累授殿前都虞候领凉州观察使镇州副都部署大破契丹三万众于徐河斩首数千级淳化二年为平虏桥砦都部署历并代环庆两路副都署至道中遣将分五路讨李继迁命廷召副李继隆为环庆灵都部署廷召出延州诸将失期独廷召与王超大小数十战屡克捷帝嘉之俄又为并代两路都部署三年迁侍卫马军都指挥使领河西军节度为定州行营都部署咸平二年契丹入塞车驾北巡廷召与战于瀛州西大败之逐北至莫州东三十里

又斩获甚众契丹遁去师还录功加检校太傅益赋邑
又改殿前都指挥使四年卒年七十五赠侍中廷召在军四十余年由显德以来凡亲征
未尝不从善骑射尝出猎有羣鸟飞过廷召发矢并贯
其三观者骇异子守均至散员都虞候演州刺史守信内殿承制合门祗候守宣内殿崇
班守庆更名珪后为西京作坊副使淮南江浙荆湖制
置发运副使

△葛霸

葛霸真定人姿表雄毅善击刺骑射始事太宗于藩邸太宗即位补殿前指挥使累
迁散员都虞候雍熙中幽州之师失律大补军校以霸
为骁骑军都指挥使领澶州刺史戍定州尝遇契丹于唐河与战败走之斩获甚众俄召
为御前忠佐马步军都军头端拱初出为博州团练使
历潞代二州部署淳化元年擢殿前都虞候领澶州观察使为高阳关副都部署进都部
署凡七战召还制授保顺军节度典军如故出为镇州
都部署徙镇天雄咸平中帝劳师于大名霸与石保吉同来覲时康保裔没于河闲即日
以霸为贝冀高阳关前军行营都部署就迁副都指挥
使未几改邠益泾原环庆三路都部署四年迁侍卫马军都指挥使领感德军节度景德
初河决澶州横垄埽命为修河都部署未行属契丹侵
边帝议亲征副李继隆为驾前东面排阵使驻澶州明年召还是以功特加封邑上言朝廷
居明德心丧尚遏音乐请停迎授之制奏可是年以霸
久典兵年且老罢军职乃授昭德军节度出为并代都部署时廷臣有隶麾下者颇扰军
民霸昏耄为所罔真宗知之故有是召四年徙知耀州
霸虽懦然能谨直自持卒年七十五赠太尉子怀信至如京副使怀煦内殿承制怀正博
州团练使知沧莫二州怀敏

葛怀敏

葛怀敏

怀敏以荫授西头供奉官加合门祗候历知隰莫保三州累迁康州刺史知雄州就
迁西上合门使上平燕策会岁旱塘水涸怀敏虑契丹
使至测知其广深乃拥界河水注之塘复如故召对边事复还雄州改莱州团练使浊流
砮兵叛杀官吏溃去怀敏发兵掩袭尽诛其党徙沧州
怀敏为王德用妹壻德用贬亦降知滁州陕西用兵起为泾原路马步军副总管兼泾原
秦凤两路经略安抚副使既入对以曹玮尝所被介胄
赐之令制置鄜延环庆两路存废砮栅迁鄜延路副都总管进殿前都虞候知延州范仲
淹言其猾懦不知兵复徙泾原路兼招讨经略安抚副
使庆历二年元昊寇镇戎军怀敏出瓦亭砮督诸砮兵御敌与诸将会兵养马城闻元昊

徙军新壕外怀敏议质明袭之乃分诸将为四路趣定州砦缘边都巡检使刘湛向进行次赵福堡遇贼战不胜保向家峡怀敏使泾原路都监赵珣知镇戎军曹英并镇戎军西路巡检李良臣孟渊援之俄报敌已拔栅踰边壕怀敏入保定川砦敌毁板桥断其归路别为二十四道以过军环围之又绝定川水泉上流以饥渴其众环庆路都监刘贺率蕃兵鬪于河西不胜余众溃去怀敏为中军屯塞门东偏曹英等又败于塞之东北隅英面被流矢仆壕中怀敏所部兵见之奔骇怀敏为众蹂躪几死輿致瓮城久之乃苏复选士据门桥挥手刃以拒入城者赵珣等以骑军四合御敌敌众稍却然太军无鬪志珣驰入劝怀敏还军中是夕敌遂聚火围城四隅怀敏夜召诸将谋质明结阵走镇戎军因谕其亲军左右及在后者皆毋得动平明从吾往安西堡以英珣为先锋贺思纯为左右翼知和为殿听中军鼓乃得行至卯鼓未作怀敏先上马而大军按堵未动怀敏周麾者再将径去有执鞚者劝不可怀敏不得已乃还使参谋郭京等取刍城中未至怀敏复上马叱执辔者使馭馭者又不听拔剑将击之士卒遂散怀敏驱马东南驰二百里至长城壕路已断敌周围之遂与诸将皆遇害余军九千四百余人马六百余匹为敌所断其子宗晟与赵正郭京承受王昭明等还保定川初怀敏令军中步兵毋得动及前阵已去后军多不知者故皆得存时韩质郝从政胡息以兵六千保莲花堡刘湛向进兵一千保向家峡皆不赴援于是敌长驱抵渭州幅员六七百里焚荡庐舍屠掠民畜而去奏至帝嗟悼久之赠怀敏镇戎军节度使兼太尉同时战没者皆赠官有差复降向进等官落郝从政赵瑜职怀敏通时事善候人情故多以才荐之及用为将而轻率昧于应变遂至覆军帝念之赐谥忠隐子宗晟宗寿宗礼宗师皆迁官

△曹利用

曹利用字用之赵州宁晋人父谏擢明经第官崇仪使利用慷慨有志操谏卒补殿前承旨改右班殿直迁鄜延路走马承受公事景德元年契丹侵河北帝幸澶州射杀契丹大将达兰契丹欲收兵去使王继忠议和择可使契丹者时利用适奏事行在枢密院请以利用应选帝曰此重事也毋轻用人明日枢密使王继英又荐利用遂授合门祗候假崇仪副使奉书诣契丹军 【按宋史真宗本纪载契丹遣李兴附王继忠密表请和及曹利用使契丹在景德元年十月时契丹虽请和犹攻瀛冀诸州十一月帝始亲征契丹国志亦云真宗亲驾澶渊是时利用之书已通据此则继忠议和及利用使契丹非真宗幸澶渊后事也辽史圣宗本纪载继忠

议和亦在师未次澶渊之先利用来请和则在师次澶渊后所载互异】帝语利用曰契丹南来不求地则邀赂尔关南地归中国已久不可许汉以玉帛赐单于有故事利用对曰彼若妄有所求臣不敢生还帝壮其言利用驰至军中契丹主母见利用果议关南地利用拒之遣其臣韩杞来报命利用再使契丹契丹主母曰晋德我畀我关南地周世宗取之今宜还我利用曰晋人以地畀契丹周人取之我朝不知也若岁求金帛以佐军尚不知帝意可否割地之请利用不敢以闻其政事舍人高正始遽前曰我引众以来图复故地若止得金帛归则愧吾国人矣利用曰子盍为契丹熟计使契丹用子言恐连兵结衅不息非国利也契丹度不可屈和议遂定利用奉约书以归擢东上合门使忠州刺史契丹遣使来聘遂命利用迎劳之知宜州刘永规驭下残酷军校陈进乘众怨杀永规叛陷柳城县围象州掠广州岭南骚动帝谓辅臣曰朕固忧远方守将非其人以起边衅今果然曹利用晓方略尽心于事其以为广南安抚使岭南平迁引进使厯客省使嘉州防御使大中祥符七年拜枢密副使加宣徽北院使天禧元年同知枢密院事二年进知枢密院事遂拜枢密使同年同中书门下平章事利用在位既久颇恃功初辅臣丁谓李迪争论帝前迪斥谓奸邪因言利用与之为朋党利用曰以片文遇主臣不如迪捐躯以入不测之敌迪不逮臣迪坐是免而利用以检校太师兼太子少保为会灵观使进尚书右仆射封韩国公干兴初加左仆射兼侍中武宁军节度使景灵宫使进鲁国公诏如曹彬给公使钱岁万缗契丹使者肃从顺桀称疾留馆下不时发朝廷遣使问劳相望于道利用请一切罢之从顺乃引去天圣三年加司空五年改封郟国公【按东都事略载利用进尚书右仆射封韩国公干兴元年进封鲁国公天圣五年改封郟国公宋史本传俱失载今据补】章献太后临朝中人与贵戚稍能轩轻为祸福而利用以勋旧自居不恤也凡内降恩力持不予左右多怨太后亦严惮利用称曰侍中而不名利用奏事帘前颇不祇肃或以指爪系带鞞左右指以示太后曰利用在先帝前何敢尔邪太后颔之利用奏抑内降恩难屡却亦有不得已从之者人以是谗之或给太后曰蒙恩得内降辄不从今利用家媪阴诺臣请其必可得矣下之而验太后始疑其私颇衔怒内侍罗崇勋得罪太后使利用召崇勋戒敕之利用去崇勋冠帻诟斥良久崇勋恨之会其从子洎为赵州兵马监押州民赵德崇诣阙告洎不法事奏上崇勋请往按治遂穷探其狱洎坐被酒衣黄衣令人呼万岁杖死初洎事起即罢利用枢密使加兼侍中判邓州及洎诛谪左千牛卫将军知随州又坐私贷景灵宫公钱贬

崇信军节度副使房州安置命内侍杨怀敏护送诸子
各夺二官没所赐第籍其赀黜亲属十余人宦者多恶利用行至襄阳驿怀敏以语逼之
利用遂投缯而绝以暴卒闻后其家请居邓州帝恻然
许之命其子内殿崇班渊监本州岛税明道二年追复节度兼侍中复赠太傅还诸子官
赐谥襄悼命学士赵槩作神道碑帝为篆其额曰旌功之
碑诏归所没旧产利用性悍梗少通力裁侥幸而其亲旧或有因缘以进者故及于祸然
在朝廷忠荃有守始终不少屈死非其罪天下冤之

孙继邺

孙继邺

孙继邺字符嗣其先金陵人祖谦事李昇为长剑都指挥使南伐闽援兵不至战死
父承睿时为小校愤将兵者不如期致其父没乃刺杀
之亡去转徙淮楚闲久之入京师以策上太宗授左班殿直终左藏库使继邺初以三班
奉职监涪阳酒税会宜州陈进反曹利用辟以自随为
前驱破贼于象州大乌岭以功迁左侍禁改西头供奉官晁迥荐为合门祗候上御戎策
十数事又用曹玮荐为鄜延路兵马都监徙知环州累
迁崇仪副使会修筑洪德砦与总兵者论事不协绌为冀州兵马都监起知保安军徙涇
州使契丹枢密使曹利用欲用之继邺恶其权盛阴知
利用将有祸数以疾辞遂除左龙武军统军致仕利用贬复为崇仪副使累迁西上合门
使出为环庆路副都总管道改涇原路兼知渭州建言
萧关故道前控大川善水草敌骑所从出也诚得属羌与奉赐且羁其酋领使为藩篱则
可无西顾之忧矣为步军都虞候徙真定路卒

△张耆

张耆字符弼开封人年十一给事真宗藩邸及即位授西头供奉官尝与石知颀侍
射苑中连发中的擢供备库副使带御器械咸平中契
丹侵边以功迁南作坊使昭州刺史天雄军兵马钤辖边兵未解徙镇州行营黔辖又徙
定州契丹围望都耆与诸将从闲道往援比至城已陷
耆与敌战身被数创斩其梟将迟明复战会王继忠为契丹所执耆还请大举讨之辅臣
以为不可迁昭州团练使并代州钤辖明年契丹兵复
入帝欲亲征耆奏边事十余条多论兵贵持重及所以取胜者召还入对帝曰卿尝北伐
契丹入塞与卿所请兴师之日同悔不用卿策今领守
澶州而未得人如何耆请行帝喜命为驾前西面钤辖令至澶州候契丹远近耆驰骑往
改东面排阵钤辖事平会曹州赵谏告耆受金为人求
荐礼部贬供备库使潞州都监久之事稍辨复官管句皇城司帝以耆历河东稔边事召
耆问地里险易状耆因言云应蔚朔四郡闲遣人以文

移至并代闲非觐边虚实即欲熟道路宜密谕代州使白云应蔚至者由大石谷入自朔至者由士登入余闲道皆塞之以示险迁英州防御使
侍卫亲军马军都虞候从帝东封迁绛州防御使 【东都事略作齐州防御使】 殿前都虞候时建玉清宫耆疏言谓殫国财用以兴土木之役非所以承天意历迁威塞军节度使进宣徽南院使兼枢密副使罢判河阳天禧二年徙镇武宁拜同中书门下平章事判陈州累历镇安军淮南节度使判寿州召为枢密使兼羣牧制置使封岐国公 【按耆封岐国公宋史本传失载据东都事略补】 会灵观使先名旻至是表改名耆加尚书左仆射兼侍中历河阳三城泰宁山南东道昭德四镇节度使 【按东都事略载耆为泰宁山南东道昭德三镇节度并在拜枢密使后其为河阳三城节度则在拜枢密使之前与宋史本传互异】 进兼侍中封邓国公章献太后崩以左仆射改镇护国出判许州移襄邓孟许陈寿六州进封徐国公耆为人重密有智数章献太后微时尝寓其家耆事之甚谨及太后预政宠遇最厚安佚富盛踰四十年所历藩镇人颇以为扰以太子太师致仕卒赠太师兼侍中谥荣僖子二一□□□一利一名最着

张希一

张利一

张希一

希一字简翁以父耆任历官河北缘边安抚副使请徙边兵内地以宽余费每州岁为市平以余边谷使人不能高下其价戍卒之孥给粮先军士一日使其家为伍保坐以逃亡之累皆着为法徙成都利州路钤辖真定府路总管累使契丹契丹尝以雄州不当禁渔界河及役白沟两属民为言希一曰界河之禁起于大国统和中今文移尚存白沟本输中国田租我太宗特除之自是大国侵牟立税故名两属恶有中国不役之理契丹语塞以均州防御使卒弟利一

张利一

利一字和叔以荫补供奉官历河北缘边安抚都监兼合门通事舍人知广信军谍告契丹侵边利一置酒高会于譙门敌率众遁去徙知保州雄州契丹刺两属民为兵民不堪其辱利一绥来之有大姓举族南徙慕而来者众发廩振恤移诘涿州自是不敢复刺终雄州团练使

△杨崇勋

杨崇勋字宝臣蓟州人祖守斌事太祖为龙捷指挥使父全美事太宗为殿前指挥使崇勋以父任为东西班承旨事真宗于东宫帝尝曰闻若嗜学吾授若书崇勋自是少通兵法及前代兴废之事真宗即位迁左侍禁累迁枢

密都承旨改客省使领羣牧使帝久不豫寇准罢相入内副都知周怀政谋奉帝为太上皇传位太子复相准尝以谋访崇勋崇勋告其事遂诛怀政擢崇勋邓州观察使不拜乃以内客省使领桂州观察使复兼羣牧使初羣牧置使皆以文臣领之崇勋曰马者战备虽无事可去邪仁宗即位以彰德军节度观察留后知陈州历授殿前都指挥使领振武军节度使拜宣徽南院使兼枢密副使又历镇南定武军山南东道三镇节度使【按宋史宰辅表及东都事略载崇勋为镇南军节度使在拜宣徽使之前与宋史本传互异】章献与仁宗言先帝最称崇勋质信可任大事乃进枢密使明道二年加同平章事以河阳三城节度使判陈州景佑初怀政之弟怀信讼崇勋诬告其兄遂罢同平章事历知寿亳陈三州契丹将渝盟朝廷择将备边崇勋请行复拜同平章事判定州既而老不任事徙成德军又徙郑州坐其子宗诲纳赇枉法以左卫上将军致仕改太子太保卒赠太尉谥恭密寻改谥恭毅崇勋性贪鄙久任军职当真宗时每对辄肆言中外事喜中伤人人以是畏之【按宋史此下有夏守恩传已附见守赞传中今从删】

△夏守赞

夏守赞字子美并州榆次人父遇为武骑军校与契丹战没兄守恩给事真宗襄王邸王问其兄弟守恩言守赞四岁而孤日侍王邸不得时抚养心辄念之王为动容即日召入宫而怜其幼听就外舍后二年复召入王乳母齐国夫人使傅婢拊视之稍长习通文字王为太子守赞典工作事及即位授右侍禁李继迁叛命使绥夏伺边衅迁西头供奉官寄班祇候康保裔与贼战歿部曲畏诛声言保裔降贼密诏守赞往察之廉问得状还奏诏恤保裔家帝幸澶渊及祀汾阴为驾前巡检从幸亳州命修行宫转崇仪使提举仓草场帝甚亲信遣中使问守赞曰欲管军乎为横行使乎守赞曰臣得日近冕旒足矣寻迁西上合门使提举诸司库务以右千牛卫大将军昭州刺史为枢密都承旨兼领三班院凡十余年累迁步军马军殿前副都指挥使建武镇东保大军节度使进殿前都指挥使徙镇定国守恩坐赃废守赞亦以镇海军节度使罢管军之本镇踰年徙定州路都总管召知枢密院事既入见帝问西事守赞言平时小障屯兵马不及千余贼兵盛至固守不暇安能出鬪宜并兵以据冲要伺便邀击功或可成帝然之刘平石元孙败人有以降贼诬告者守赞颇辨其枉引康保裔事为质因自请将兵击贼换宣徽南院使陕西马步军都总管兼经略安抚缘边招讨使然守赞性庸怯寡方略不为士卒所服寻诏驻军河中居数月徙屯鄜州其子随为陕西缘边招讨

副使时晏殊宋绶知枢密院又召守赞同知院事守赞请罢以宣徽南院使天平军节度使
使历判相州复为真定府定州等路都总管未至徙高阳关都总管就判瀛州卒赠太尉谥忠僖子随

夏随

夏随

随字君正颇好儒术多从士大夫游以父荫为茶酒班殿侍迁右班殿直仁宗即位除内殿承制合门祗候累迁泰州防御使元昊反为鄜延路副都总管随本名元亨与元昊有嫌因奏改焉寻徙环庆路未几复还鄜延元昊为书及锦袍银带投境上以遗金明砮都监李士彬且约与同叛候人得之诸将皆疑士彬独随曰此行闲尔士彬与羌世仇若有私约通赠遗岂使众知邪乃召士彬与饮厚抚之士彬感泣后数日果击贼斩首获羊马自效及守赞知枢密院事耀州观察使知亳州刘平石元孙败以随知河中府守赞经略安抚陕西留领会灵观事守赞还复为陕西副都总管兼缘边招讨副使帝曰朝廷方以边事委卿卿毋以父在机密为嫌时随已病次陕州卒赠昭信军节度使谥庄恪随在边陲无多战功然慎重少过

△狄青

狄青字汉臣汾州西河人善骑射初隶骑御马直选为散直宝元初赵元昊反诏择卫士从边以青为三班差使殿侍延州指使时偏将屡为贼败士卒多畏怯青勇于临敌常为先锋凡四年前后大小二十五战中流矢者八破金汤城略宥州罗密翠香摩诺尔朶罗沁七家口等族燔积聚数万收其帐二千三百生口五千七百又城桥子谷筑招安丰林新砮大郎等堡皆扼贼要害尝战安远被创甚闻寇至即挺起驰赴众争前为用临敌被发带铜面具出入贼中皆披靡莫敢当 【谨按通鉴辑览 御批青猛锐善战所向披靡乃其勇略使然非被发面具足以制胜史家艳称其事洵为鹜奇失实】 尹洙为经略判官青以指使见与谈兵善之荐于经略使韩琦范仲淹曰此良将材也二人一见奇之待遇甚厚仲淹以左氏春秋授之曰将不知古今匹夫勇尔青折节读书悉通秦汉以来将帅兵法由是益知名以功累迁西上合门副使擢秦州刺史泾原路副都总管经略招讨副使帝以青数有战功欲召见问方略会贼寇渭州命图形以进元昊称臣徙真定路副都总管历迁马步军副都指挥使保大安远二军节度观察留后青奋行伍十余年而贵是时面涅犹存 【按文献通考载宋沿五代兵制诸军悉黥面为字以识军号胡寅谓籍民为兵无罪而黥之乃至不仁者所为是也青自行伍显贵面涅犹存

即其后不欲除去盖以示不忘本云】 帝常敕青傅药
除字青指其面曰陛下以功擢臣不问门地臣所以有今日由此涅尔臣愿留以劝军中
不敢奉诏以彰化军节度使知延州擢枢密副使皇佑
中广源州蛮侬智高反陷邕州又破沿江九州岛围广州岭外骚动杨畋等安抚经制蛮
事 【按宋史本传作杨略考宋史仁宗本纪及长编并
作皇佑四年六月命屯田员外郎直史馆杨畋安抚广南经制蛮事以师及无功降知鄂
州据此传作杨略误今改】 师久无功又命孙沔余靖
为安抚使讨贼帝犹以岭南为忧青上表请行翌日入对自言臣起行伍非战伐无以报
国愿得蕃落骑数百益以禁兵羁贼首致阙下帝壮其
言遂除宣徽南院使宣抚荆湖南北路经制广南盗贼事置酒垂拱殿以遣之时智高还
据邕州青合孙沔余靖兵次宾州先是蒋偕张忠皆轻
敌败死军声大沮青戒诸将毋妄与贼鬪听吾所为广西钤辖陈曙乘青未至辄以步卒
八千击贼溃于昆仑关殿直袁用等皆遁青曰令之不
齐兵所以败晨会诸将堂上揖曙起并召用等三十人按以败亡状驱出军门斩之沔靖
相顾■〈目𠄎〉眙诸将股栗已而顿甲更令调十日
粮众莫测贼觐者还以为军未即进明日乃整军骑一昼夜绝昆仑关出归仁铺先布阵
成列贼既失险遂悉众出战前锋孙节博贼死山下贼
气锐甚沔等惧失色青执白旗麾骑兵纵左右翼出贼不意大败之追奔五十里斩首数
千级其党黄师宓侬建中智中及伪官属死者五十七
人生擒贼五百余人智高夜纵火烧城遁去迟明青按兵入城获金帛巨万杂畜数千招
复老壮七千二百尝为贼所俘胁者慰遣之梟黄师宓
等邕州城下敛尸筑京观于城北隅时贼尸有衣金龙衣者众谓智高已死欲以上闻青
曰安知非诈也盗失智高不敢诬朝廷以贪功也复为
枢密副使迁护国军节度使河中尹还至京师帝嘉其功拜枢密使优进诸子官秩始交
址愿出兵助讨智高余靖言其可信具万人粮于邕钦
二州待之诏以缗钱三万赐交址为兵费许贼平厚赏之青至檄余靖无通使假兵即上
奏曰李德政声言将步兵五万骑一千赴援非其实情
且假兵于外以除内寇非我利也以一智高而横蹂二广力不能讨乃假兵蛮夷蛮夷贪
得忘义因而起乱何以御之请罢交址助兵从之贼平
人服其有远略青在枢密四年每出土卒辄指目以相矜夸又言者谓青家数有光怪请
出青于外以保全之不报嘉佑初京师大水青避水徙
家相国寺行止殿上人情颇疑乃罢青为同中书门下平章事出判陈州明年疽发髭卒
赠中书令谥武襄青为人慎密寡言其计事必审中机
会而后发行师先正部伍明赏罚与士同饥寒劳苦虽敌猝犯之无一士敢后先者故其

出常有功尤喜推功与将佐始与孙沔破贼谋一出于
青贼既平经制余事悉以诿沔退若不用意者沔始叹其勇既又服其为人自以为不如
也尹洙以贬死青悉力赙其家事子谿咏并为合门使
咏数有战功熙宁元年神宗考次近世将帅以青起行伍而名动中外深沈有智略能以
畏慎保全终始慨然思之命取青画像入禁中御制祭
文遣使赉中牢祠其家

张玉

孙节

张玉

张玉字宝臣保定人以六班散直隶狄青麾下筑青涧招安砦遇夏兵三万有驰铁
骑挑战者玉单持铁筒出鬪取其首及马军中因号曰
张铁筒以状闻仁宗曰真勇将也以为本路同巡检从征侂智高抵归仁驿贼列三锐陈
以逆官军军小却玉率右厢突骑横贯贼垒贼大溃帝
召见使作锐陈于殿廷下观破贼之势擢为广西钤辖徙大名进龙神四厢都指挥使为
副都总管谅祚攻大顺城玉以兵三千夜击之惊溃而
去累迁昭州防御使徙泾原熙宁中庆州卒叛玉袭逐于石门卒穷蹙请降玉斩二百人
坐夺职降为陵州团练使居数月复之王韶开熙河玉
迁宣州观察使为副都总管河北置三十七将以玉为第一将入为马步军都虞候卒赠
建雄留后

孙节

孙节开封人少隶军籍以才勇补右侍禁与狄青同在延州数攻破敌砦有功累迁
西京左藏库副使及青讨侂智高辟隶麾下至归仁铺节
为前锋直前搏战贼锐甚节鏖山下俄中枪而没特赠忠武军节度留后封其妻为仁寿
郡君官其子二人从子三人给诸司副使奉终其丧

△郭逵

郭逵字仲通父斌自邢徙洛康定中兄遵死于敌录逵为三班奉职隶陕西范仲淹
麾下仲淹勉以问学延安清刚社募兵误杀熟羌将论
死逵请而免之活壮士十三人时方议取灵武逵言地远而食不继城大而兵不多未见
其利未几泾原任福以全军败没人服其先见陈执中
安抚京东奏为驻泊将执中与宾佐论当今名将共推葛怀敏逵曰怀敏他日必败朝廷
事执中始怒居数日问曰君何以知葛怀敏非名将而
败事邪曰喜功徼幸徒勇无谋可禽也执中叹曰君真知兵怀敏既覆师矣为真定兵马
监押保州卒叛田况遣逵往招之逵与乱者侍其臻尝
同事范仲淹驰至城下示以旧所佩紫囊臻识之即与其党韦贵史克顺邀逵登城既见

申谕祸福众或疑不即下曰若降恐不免逵请以身为质于是开城降以功加合门祗候环庆兵马都监历泾原都监拔古渭城转通事舍人徙河北缘边安抚都监副吴奎使契丹会其主受尊号入观礼使还黜为汾州都监庞籍镇河东俾权忻州契丹来求天池庙地籍不能决以诱逵逵访得太平兴国中故牒证为王土檄报之契丹愧伏湖北溪蛮彭仕羲叛命逵为本路钤辖兼知澧州得蛮亲信为乡导尽平诸隘遂破其所居桃花洲仕羲弃城走余众悉降迁礼宾使徙知邵州武冈蛮反逵又讨平之累迁容州观察使泾原路副都部署治平二年以检校太保同签书枢密院旋出领陕西宣抚使判渭州逵虽立军功而骤跻政地神宗即位迁静难军留后召还改宣徽南院使判郢州至郢七日徙镇鄜延种諤受威明山降取绥州夏人遂诱杀知保安军杨定朝议以边衅方起欲弃绥州逵曰夏人既杀王官而又弃绥不守示弱已甚且明山举族来归当何以处之既而夏人欲以塞门安远二砦来易朝廷许之逵曰此正商于六百里之策也非先交二砦不可与遣其属赵嵩辞昌朝与夏使议唯言砦基嵩曰二砦之北旧有三十六堡且以长城岭为界西至王祥符所移书固在也虜使惊不能对乃寝其请初诏焚弃绥州逵匿而不下至是帝问大臣皆莫知逵始自劾向者违诏旨之罪帝手诏褒荅加检校太尉雄武军留后韩绛宣抚陕西主种諤计图取横山与逵议出兵逵曰諤狂生尔朝廷徒以家世用之必误大事绛怒以为阻挠奏召逵还明年庆州乱出判永兴徙秦州王韶开熙河逵按其不法朝廷遣蔡确鞫之谓逵诬罔落宣徽使知潞州寻徙太原复宣徽使交址李干德陷邕管召为安南行营经略招讨使兼荆湖广南宣抚使请鄜延河东旧吏士自随将行宴于便殿赐中军旗章剑甲以示宠次长沙先遣将复邕廉至广西讨拔广源州降守将刘应纪又拔决里隘乘胜取桃榔门州大战富良江斩其伪王子洪真干德穷蹙奉表归命时兵夫三十万人冒暑涉瘴地死者过半至是与贼隔一水不得进乃班师坐贬左卫将军西京安置屏处十年哲宗即位复左屯卫大将军致仕起知潞州进广州观察使知河中府请老改左武卫上将军卒赠雄武军节度使逵慷慨喜兵学神宗尝访八阵遗法对曰兵无常形是特奇正相生之一法尔因为帝论其详在延安使以教兵久不就逵择诸校习金鼓屯营者六十四人使人教一队顷刻而成尤善用偏裨每至所部令人自言所能暇日阅按之故临阵皆尽其技李复珪治庆州之败既斩李信刘甫又欲罪鄜延都巡检使白玉玉见逵托以后事且泣言不得终养母逵哀之不遣申救甚力得免已而玉大捷于新砦神宗谓逵曰白玉能以功补过卿之

力也每战先招怀后战鬪爱惜士卒不妄加诛戮其杀
贼妇女老弱者皆不赏虽坐征南无功久废犹隐然为一时宿将云

钦定续通志卷三百二十五

●钦定续通志卷三百二十六 列传一百二十六

列传

宋 【三十】

○宋三十

吴育 宋绶【敏求昌言】 李若谷【淑 寿朋复圭】 王博文【畴
】 王巖 李谿 程戡 夏侯峤
盛度 丁度 张观 郑戡 明镐

吴育

宋绶

李若谷

王博文

王巖

李谿

程戡

夏侯峤

盛度

丁度

张观

郑戡

明镐

△吴育

吴育字春卿建州建安人也父待问累官礼部侍郎致仕育少奇颖博学举进士试
礼部第一中甲科除大理评事迁寺丞历知临安诸暨
襄城三县自秦悼王葬汝州其后子孙从葬及岁时上冢皆以宦官典护颇扰州县育在
襄城请凡官所须皆具成数毋容使者妄索民甚便之
宗子所过纵鹰犬暴民田及入襄城境辄相戒约毋敢纵者举贤良方正擢著作郎 【案
欧阳修撰育墓志作著作佐郎】 直集贤院通判苏
州还知太常礼院奏定礼文名太常新礼庆历祀仪改右正言历三司盐铁户部二判官
【案文献通考盐铁户部度支谓之三司墓志载育
为户部度支二判官未尝为盐铁与宋史本传异】 寻以本官知谏院元昊僭号议出兵
讨之育言元昊虽称藩臣其尺赋斗租不入县官服叛

不常请置之示不足责且已僭輿服势必不能自削宜援国初江南故事稍易其名可以顺拊而收之不报复上言宜先以文诰告谕如尚不宾第严约束明烽堠坚壁清野以挫其锋勿贪功轻进时方锐意征讨不听既而覆军无功卒封元昊为夏国主如育所议育又言元昊见朝廷比年与西域诸戎不通朝贡乃得以利啖邻境固其巢穴无肘腋之患跳梁猖獗肆而不顾请募士谕嘉勒斯賚及他蕃部离散其党与使并力以攻而均其恩赐此伐谋之要也因录上真宗时通西域诸蕃事迹除知制诰进翰林学士迁礼部郎中契丹为元昊构兵元昊求纳款契丹遣使请勿纳元昊朝廷未知所答育因言契丹通好已久不可纳一叛羌以失其欢今彼相鬪鬪久不解可观形势乘机立功万一过计纳之臣恐契丹窥兵赵魏朝廷不得元昊毫发之助而太行东西且有烟尘之警宜使人谕元昊曰契丹汝世姻当顺契丹如故然后许汝归款告契丹曰已诏元昊如能投谢辕门即听内附若犹坚拒当为讨之如此皆不能归罪我矣于是召两制同上对卒不易育议寻知开封府庆历五年拜右谏议大夫枢密副使未几除参知政事山东盗起帝遣中使按视还奏盗不足虑兖州杜衍郓州富弼山东人尊爱之此可忧也帝欲徙二人于淮南育曰盗贼无足虑小人乘时以倾大臣祸几不可御矣事遂寝向绶知永静军为不法疑通判江中立发其阴事因构狱以危法中之中立自经死绶宰相子大臣有营助欲傅轻法育曰不杀绶无以示天下卒减死一等流南方御史唐询请罢制科帝刊其名以付中书育奏疏驳议帝是育言因谕辅臣曰彼上言者乞从内批行下今乃知欺罔也育请出姓名按劾以明国法育在政府遇事敢言与宰相贾昌朝数争议上前左右皆失色育论辨不已乃请曰臣所辨者职也顾力不胜愿罢臣职乃复以为枢密副使明年大旱御史中丞高若讷论奏遂罢昌朝育归给事中未几出知许州徙蔡州州故多盗育严伍保之法以检制盗贼时京师有告妖人千数聚确山者诏遣中使往招捕者十人至则以巡检兵往索之育曰此特乡民用浮图法相聚以利钱财尔一弓手召之可致今以兵往是趣之乱也顷之召十人至械送阙下皆无罪释之而告者伏辜寻以资政殿学士知河南府徙陕州又上书论诏狱为不便迁礼部侍郎知永兴军召兼翰林侍读学士以疾辞且请便郡帝语大臣曰吴育刚正可用第嫉恶太过耳因命知汝州会疾不已又请居散地以集贤院学士判西京留司御史台外台旧不领民事时张尧佐知河阳民讼久不决多诣育诉育为辨曲直判书状尾 【案文献通考云两京留司御史台谓之留台亦谓之外台又梦溪笔谈载两京留台皆有公宇旧为

前执政休老养疾之地故例不视事皇佑闲吴正肃育为西京留台独举其职即指此也
】 尧佐畏惧奉行复为资政殿学士兼翰林侍读学士
疾少闲复知陕州进资政殿大学士召还判尚书都省一日侍读禁中帝因语及臣下毁
誉多出爱憎卿所当慎也育曰知而形之言不若察而
行之事圣主之行如日月之明进一人使人皆知其善出一人使人皆晓其恶则阴邪不
能构害公正可以自立百王之要道也帝数欲大用为
谏官刘元瑜诬奏育在河南尝贷民出息钱久之除宣徽南院使鄜延路经略安抚使判
延州夏人既称臣而并边种落数侵耕为患庞籍守并
州欲筑堡备之育谓要契未明而亟城则羌人必争争而受患者必麟府也移交河东又
遗籍手书及疏于朝不报既而夏人果犯河外陷骁将
郭恩而太原将佐皆得罪去疾复作辞不任边事求解宣徽使复以为资政殿大学士尚
书左丞知河中府徙河南病卒年五十五赠吏部尚书
谥正肃育性明果所至作条教简疏易行而不可犯遇事不妄发发即人不能挠辨论明
白使人听之不疑初尹开封范仲淹在政府因事与仲
淹忤既而仲淹安抚河东有奏请多为任事者所沮育取可行者固行之其在二府待问
以列卿奉朝请育不自安请罢去不听及出帅永兴时
待问尚亡恙肩舆迎待时人荣之弟充为宰相自有传

△宋绶

宋绶字公垂赵州平棘人父皋尚书度支员外郎直集贤院绶幼聪警为外祖杨徽
之所器爱徽之无子家藏书悉与绶绶母亦知书每躬
自训教徽之卒遗奏补太常寺太祝年十五召试中书真宗爱其文迁大理评事听于秘
阁读书大中祥符元年复试学士院为集贤校理与父
皋同职后赐同进士出身迁大理寺丞除左正言同判太常礼院久之判三司凭由司建
言比岁下赦令释逋负后期未报者六十八州请于诸
路选官考核期半月以闻于是脱械系者三千二百人蠲积负数百万擢知制诰判吏部
流内铨兼史馆修撰同修真宗实录天圣三年为翰林
学士兼侍读学士句当三班院始诏读唐史固求解三班以颛进讲同修国史迁中书舍
人昭应宫灾罢二学士踰年复翰林学士史成迁尚书
工部侍郎时章献太后犹称制五日一御承明殿垂帘决事仁宗未尝独对羣臣绶请令
中书枢密院宣约唐先天制度非军国大事及大除拜
皆前殿取旨臣僚亦止前殿对书上忤太后意改龙图阁学士出知应天府太后崩帝思
绶言召还将大用宰相张士逊沮止之复加翰林侍读
学士诏定章献明肃章懿太后祔庙礼绶援春秋考仲子之宫唐仪坤庙故事 【案宋史
本传作坤仪庙考新唐书后妃传及文献通考载睿

宗景云元年别立庙曰仪坤以享昭成皇后至开元中肃明皇后亦依前仪坤庙安置今据改】 请别立章懿太后庙建名奉慈以安神主从之始置端明殿学士以命绶 【案宋史太宗本纪太平兴国五年改端明殿学士为文明殿学士以程羽为之程羽实为文明殿学士非端明殿学士也职官志载仁宗明道二年改承明殿为端明殿复置端明殿学士以翰林侍读学士宋绶为之宋称端明殿学士则自此始故史称始置】 绶固辞因上言帝王御天下在总揽威柄一纪以来令出帘帷自陛下躬亲万务内外延首思见圣政而赏罚号令未能有过于前日岂非三事大臣不能推心悉力以辅陛下之治邪顷太后朝多吝除拜而邪幸或径取升擢议者谓恩出太后今恩赏虽行又谓自大臣出非大臣朋党罔上何以得此朋党之为朝廷患古今同之或窥测帝旨密令陈奏或附会己意以进退人大官市恩以招权小人趋利以售进此风寔长有蠹邦政整齐纲纪正在今日帝大感悟及张士逊罢遂拜绶参知政事初有诏罢修庙寺观而章惠太后营王中正旧宅为道观谏官御史言之帝曰此太后奩中物也谏官御史欲邀名邪绶进曰彼岂知太后所为哉第见兴土木违近诏尔郭皇后废帝命绶作诏云 【案隆平集载尚美人出宫帝召绶面草诏当求德闋云云长编亦载尚杨二美人之出宫也帝令参知政事宋绶面作诏书与传云郭皇后废帝命绶作诏互异】 当求德闋以称坤仪既而左右引富人陈氏女入宫绶曰陛下乃欲以贱者正位中宫不亦与前日诏语戾乎王曾入对又论奏之帝曰宋绶亦如此言时大臣继有论者卒罢之帝春秋富天下久无事绶虑宴乐有渐乃言人心逸于久安患害生于所忽故立防于无事销变于未萌事至而应不亦殆欤臣愿飭励羣司不以承平自怠又上驭下之道有三临事尚乎守当机贵乎断兆谋先乎密能守则奸不能移能断则邪不能惑能密则事不能挠愿陛下念之至若深居燕闲声味以调六气节宣以顺四时保养圣躬宗社之休也再迁吏部侍郎时宰相吕夷简王曾论议数不同绶多是夷简而参知政事蔡齐闲有所异政事由此依违不决于是四人者皆罢绶以尚书左丞资政殿学士留侍讲筵权判尚书都省岁余加资政殿大学士以礼部尚书知河南府元昊反刘平石元孙败没帝以手诏赐大臣居外者询攻守之策绶画十事以献复召知枢密院事迁兵部尚书参知政事时绶母尚在绶既得疾不视事犹起居自力区处后事寻卒赠司徒兼侍中谥宣献 【案范镇撰宋敏求墓志载父绶兵部尚书参知政事赠太师中书令尚书令燕国公谥曰宣献】 绶性孝谨清介言动有常家藏书万卷亲自校雠博通经史百家笔札精妙

朝廷大议论多绶所裁定及卒帝多取其书字藏禁中子敏求

宋敏求

宋昌言

宋敏求

敏求字次道赐进士及第为馆阁校勘出为金书集庆军判官王尧臣修唐书以敏求习唐事奏为编修官持祖母丧诏令居家修书卒丧同知太常礼院累擢知制诰修仁宗实录兼判太常寺英宗在殡有言宗室服疏者可嫁娶敏求以大行未发引不可踰年又有言者敏求言宗室义服服降而练可嫁娶矣坐前后议异贬秩知绛州王珪范镇乞留之使成实录神宗曰典礼国之所重而误谬如是安得无责然敏求议初不误曾公亮恶礼院刘瑾附敏求为说故因是去之是岁即诏还王安石用事恶吕公着尝论奏青苗之害诬其言韩琦欲困人心如赵鞅兴晋阳之甲以逐君侧之恶出知颍州敏求当草制安石谕旨使明着罪状敏求但言敷陈失实安石怒白于帝命陈升之改其语敏求因请解职未听会李定自秀州判官除御史敏求又封还词头遂以本官右谏议大夫奉朝请策试贤良方正孔文仲对话切直擢寘优等安石愈怒罢文仲人为敏求惧帝独全护之除史馆修撰集贤院学士邓润甫为帝言比羣臣多尚告讐非国家之美宜登用敦厚之士以变薄俗乃加敏求龙图阁直学士命修两朝正史元丰二年卒年六十一特赠礼部侍郎敏求家藏书三万卷皆略诵习熟于朝廷典故士大夫疑议必就正焉所著书甚富学者多咨之尝建言河北陕西河东举子性朴茂而词藻不工故登第者少请令转运使择荐有行艺材武者特官之使人材参用而有可进之路又州郡有学舍而无学官故士轻去乡里以求师请置学官后颇施行之族弟昌言

宋昌言

昌言字仲谟以荫为泽州司理参军州有杀人狱昌言疑其冤迹捕得真犯者稍迁河阴发运判官河阴有凶盗杀人而鬻之如是十余年又县吏与市井少年共为胥橐昌言悉穷治之擢都水监丞熙宁初河决枣强而北昌言建议欲于二股河口西岸新滩立土约障水使之东流候稍深即断北流纵出葫芦下流以除恩冀深瀛水患诏从之提举河渠王亚以为不可成不如修生堤朝廷遣翰林学士司马光往视如昌言策不两月决口塞光奏昌言独有功迁开封府推官同判都水监汴水涨昌言请塞訾家口已而汴流绝监丞侯叔献唱为昌言罪昌言惧求知陕州历濮冀二州河决曹村召判都水监往护河堤灵平埽成转少府监卒

△李若谷

李若谷字子渊徐州丰人举进士补长社县尉州葺兵营课民输木檄尉受之而吏以不中程多退斥欲苛苦输者因以取赇若谷度材别其长短大小为程置庭中使民自输改大理寺丞知宜兴县官市湖洑茶岁约户税为多少率取足贫下若谷始置籍备句检茶恶者旧没官若谷使归之民许转贸以偿其数知连州真宗将朝谒太清宫选通判亳州累迁度支员外郎出为京东转运使会河决白马调取刍楗同列卢士伦协三司意趣刻扰州县而若谷宽之士伦构于朝徙知陕州盗聚青灰山久不散遣牙吏持榜招谕之盗杀其党与自归改梓州天圣初判三司户部句院使契丹陞辞不俟垂帘请对乃遽诣长春殿奏事罢知荆南士族元甲恃荫屡犯法若谷杖之曰吾代若父兄训之尔王蒙正为驻泊都监挟太后姻横肆若谷绳以法监司右蒙正奏徙若谷潭州洞庭多盗数邀商人船杀人辄投尸水中前此捕获多以尸无验每贷死隶他州久复逃归为患若谷擒致之磔于市自是寇稍息徙知滑州河啮韩村堤夜驰往督兵为大埽至旦堤完以右谏议大夫知延州州有东西两城夹河秋夏水溢岸辄圯役费不可胜纪若谷乃制石版为岸押以巨木后虽暴雨不复坏官仓依山而贮谷少若谷使作露囤囤可贮二万斛他郡多取法焉迁给事中知寿州安丰芍陂有南北两渠可溉田万余顷因旱岁豪右多侵耕其闲夏雨溢坏田辄盗决之陂失灌溉之利若谷撻冒占田者逐之每决辄调濒陂诸豪使塞堤盗决乃止加集贤院学士知江宁府徙知河南府改枢密直学士知并州并多降人喜盗窃籍累犯者以三人为保有犯并坐之悛者削去籍名进尚书工部侍郎龙图阁直学士知开封府【案宋史宰辅表及宋宰辅编年录俱作权知开封府】拜参知政事建言风俗媿恶在上之人作新之君子小人各有其类今一目以朋党恐正人无以自立矣帝然之为下诏谕中外以耳疾辞位罢为资政殿大学士吏部侍郎提举会灵观事【案宋宰辅编年录云宫观置提举目若谷始】以太子少傅致仕卒年八十赠太子太傅谥康靖若谷性资端重在政府论议常近宽厚治民多智虑恺悌爱人其去也多见思云子淑

李淑

李寿朋

李复圭

李淑

淑字献臣年十二真宗幸亳献文行在所真宗奇之命赋诗【案隆平集云命赋朝

谒太清宫诗称旨】 赐童子出身试秘书省校书郎

寇准荐之授校书郎馆阁校勘干兴初稍迁大理评事修真宗实录为检讨官书成改光禄寺丞集贤校理为国史院编修官召试赐进士及第改秘书郎进太常丞直集贤院同判太常寺擢史馆修撰再迁尚书礼部员外郎上时政十议改知制诰句当三班院为翰林学士进吏部员外郎会若谷参知政事改侍读学士加端明殿学士若谷罢进本曹郎中以右谏议大夫知许州岁饥取民所食五种上之帝恻然为蠲其赋权知开封府复为翰林学士中书舍人言者论其在开封府多褻近吏人改给事中知郑州徙河阳转尚书礼部侍郎复为翰林学士罢端明殿学士判流内铨复加端明殿学士淑初在郑州作周陵诗国子博士陈求古以私隙讼其讥讪朝廷除龙图阁学士出知应天府累表论辨不报乃请侍养明年复端明侍读二学士判太常寺父丧起复再为翰林学士谏官包拯吴奎等言淑性奸邪又尝请侍养父而不及其母罢翰林学士以端明龙图阁学士奉朝请丁母忧除服为端明侍读二学士迁户部侍郎复为翰林学士御史中丞张升等又论奏之不拜除兼龙图阁学士由是抑郁不得志出知河中府卒赠尚书右丞淑警慧过人博习诸书详练朝廷典故凡有沿革帝多谘访制作诰命为时所称初宋祁作张贵妃制故事妃当册命祁疑进告身非是以淑明典故问之淑心知其误谓祁曰君第进何疑邪祁遂得罪去其倾侧险陂类此子寿朋复圭

李寿朋

寿朋字延老庆历初与弟复圭同试学士院赐进士出身判吏部南曹使行诸陵奏言昭献皇后诞育二圣为国文母独以合葬安陵不及时祭请更其礼从之厯知凤翔府沧地震坏城郭帑庾寿朋督吏案缮葺未数月复其旧括荒田三万顷纵民耕之择其壮者使习兵河方北涌随塞之故道陞寿朋度必东溃谕居人徙避后三县四镇果垫焉司马光出使荐其能加直史馆入直舍人院同修起居注进户部盐铁副使暴得疾卒

李复圭

复圭字审言通判澶州北使道澶民主驿率困惫豪杜氏十八家诡言唐相如晦后每隸吏脱免复圭控籍役之徙知相州自太宗时聚夏人降者五指号听子马子弟相承百年无他役复圭斥不如格者选能骑射士补之为度支判官厯知涇州始二税之入三司移折己重转运使又覆折复圭为奏免民以为德厯湖北两浙淮南河东陕西成都六转运使浙民以给卫前役多破产复圭悉罢遣归农令出钱助长召人承

募民便之濒海人赖蛤沙地以生豪家量受税于官而占为己有复圭奏蠲其税分以予民熙宁初进直龙图阁知庆州夏人筑垒于其境不犯汉地复圭贪边功遣大将李信帅兵三千授以阵图使自荔原堡夜出袭击败还复圭斩信自解又遣别将破其金汤白豹西和市斩首数千级

【案宋史夏国传李信刘甫种咏等败还郭贵复出兵邛州进袭金汤而夏人已去惟杀所掠老幼一二百人以功告捷边怨由是大起此云破其金汤白豹西和市斩首数千级所载失实】 秉常举国入寇御史谢景温劾复圭擅兴边衅致士卒死伤者甚多而边民流离失所谪保静军节度副使岁余知光化军张商英言夏人谋犯塞之日久矣与破金汤适相值非复圭生事乃召判吏部流内铨知曹蔡沧州还为盐铁副使以集贤殿修撰知荆南卒复圭临事敏决称健吏与人交不以利害避然轻率躁急无威重喜以语侵人独为王安石所知故既废即起

△王博文

王博文字仲明曹州济阴人祖谏给事太宗藩邸为西京作坊副使博文年十六善属文举进士开封府以回文诗百篇为公卷人谓之王回文淳化三年太宗亲试进士以年少罢归后谏卒官庐州州守刘蒙叟为言召试舍人院为安丰主簿历迁殿中丞陈尧咨荐之试中书赐进士第擢知濠州历真州改监察御史以疾请出知海州徙密州负海有盐场岁饥民多盗鬻吏捕之辄抵死博文请弛盐禁候岁丰乃复从之除殿中侍御史天禧中朱能王先伪为干佑天书事觉能既败死先与其弟就禽诏博文按劾博文唯治首恶胁从者皆以减论还为开封府判官历陕西转运使属羌荫卜喀以族落数千帐寇原州柳泉镇环州鹑鸽泉砦梧州刺史杜澄内殿崇班赵世隆战没博文劾奏内侍都知周文质押班王怀信为泾原环庆两路钤辖提重兵驻大拔砦玩寇逗留耗用边费请用曹玮田敏代之既而文质怀信坐法遂以玮知永兴军使节制边事会玮病不行又用敏为泾原路总管寇遂平累迁龙图阁待制判吏部流内铨权发遣三司使事与监察御史崔暨内侍罗崇勋同鞫真定府曹汭狱及还权知开封府进龙图阁直学士知秦州为走马承受贾德昌所毁徙凤翔府又徙永兴军明年德昌以赃败改枢密直学士复知秦州初沿边军民之逃者必为熟户畜牧又或以遣远羌易羊马故常没者数百人其禽生羌则以锦袍银带茶绢赏之闲有自归而中道为蕃部所得亦不能辨坐法皆斩博文乃遣习知边事者密持信纸往招至则悉贷其罪由是岁减殊死者甚众朝廷下其法于他路又言河西回鹘多缘互市家秦陇闲请悉遣出境戒守臣使讥察之再迁右谏议大夫以龙图阁学士复

知开封府出知大名府迁给事中召权三司使遂同知
枢密院事踰月而卒赠尚书吏部侍郎博文以吏事进多任剧繁为政务平恕常语诸子
曰吾平生决罪至流刑未尝不阴择善水土处汝曹志
之然治曹汭狱议者多谓博文希太后旨纵崇勋傅致其罪云子疇

王疇

王疇

疇字景彝以父荫补将作监主簿中进士第累迁太常博士翰林学士宋祁提举诸
司库务荐疇句当公事时有宦官同提举者疇言于中
书曰翰林先进疇恐不得事然以朝士大夫为阉人指使疇实耻之辞不就用贾昌朝荐
编修唐书仁宗猎近郊疇引十事以谏皇佑中手诏禁
贵戚近习私谒者疇献圣政惟公颂召试直秘阁为开封府推官宦者李允良诉其叔父
死疑为仇家所毒请发棺验视众欲许之疇独不可曰
苟无实是无故而暴尸且安知非允良有奸既而穷治果与其叔父家有怨累擢知制诰
以右谏议大夫权御史中丞迁给事中英宗既即位感
疾皇太后垂帘听政后帝疾平犹未御正殿疇屡疏请以时御朝听政及朝谒祠庙会大
臣亦以为言自是帝遂听政时诏近臣议仁宗配祭故
事冬夏至祀昊天上帝皇地祇以太祖配正月上辛祈谷孟夏雩祀孟冬祀神州地祇以
太宗配正月上辛祀感生帝以宣祖配季秋大飨明堂
祀昊天上帝以真宗配而学士王珪等与礼官上议以谓季秋大飨宜以仁宗配为严父
之道知制诰钱公辅独谓仁宗不当配祭疇以谓珪等
议遗真宗不得配公辅议遗宣祖真宗仁宗俱不得配于礼意未安乃建议请依王珪等
议奉仁宗配飨明堂以符大易配考之说孝经严父之
礼奉迁真宗配孟夏雩祀以仿唐贞观显庆故事太宗依旧配正月上辛祈谷孟冬祀神
州地祇余依本朝故事如此则列圣并侑对越昊穹厚
泽流光圣裕万祀必如公辅之议则陷四圣为失礼导陛下为不孝违经戾古不可从朝
廷以疇论事有补帝与执政大臣皆器异之迁翰林学
士尚书礼部侍郎拜枢密副使于是公辅言疇望轻资浅在台素餐不可大用又颇荐引
近臣可为辅弼者公辅坐贬疇在位五十五日卒赠兵
部尚书谥忠简疇名臣子性介特励风操喜言朝廷事好治容服坐立巍然言必文未尝
慢戏吏治审密文辞严丽其执政未久终于位及所享
寿类其父云

△王巖

王巖字总之赵州临城人举进士授婺州观察推官代还真宗见而异之特迁秘书
省著作佐郎知祁县通判湖州累迁尚书度支员外郎

兼侍御史知杂事上言方调兵塞决河而近郡灾歉民力雕敝请罢土木之不急者会曹利用得罪黜以同里为利用所逮黜知湖州徙苏州还为三司盐铁副使时马季良方用事建言京师贾人常以贱价售茶盐交引请官置务收市之季良挟章献媼家众莫敢违黜独曰与民竞利岂国体邪遂罢之擢天章阁待制历左司郎中枢密直学士知益州戍卒有夜焚营杀马肋军校为乱者黜潜兵环营下令曰不乱者敛手出门无所问于是众皆出命军校指乱者得十余人戮之及旦人莫知也为政有大体不为苛察蜀人爱之拜右谏议大夫同知枢密院事景佑五年参知政事【案宋史仁宗本纪景佑五年十一月改元宝元黜除参知政事系春三月故史仍称景佑五年】明年迁尚书工部侍郎知枢密院事天圣中黜尝使河北过真定见曹玮玮谓曰君异日当柄用愿留意边防吾闻赵德明尝使人以马榷易汉物不如意欲杀之少子元昊方十余岁谏曰我戎人本从事鞍马而以资邻国易不急之物已非策又从而斩之失众心矣德明从之吾尝使人覘元昊状貌非常他日必为边患黜时未以为然比再入枢密元昊反帝数问边事黜不能对及西征失利议刺乡兵又久未决帝怒黜与陈执中张观同日罢黜出知河南府始叹玮之明识未几卒赠户部尚书谥忠穆【案隆平集作谥文穆】黜少时馆礼部尚书王化基之问枢密副使宋湜见而以女妻之宋氏亲族或侮易之化基曰后三十年黜富贵矣果如所言

△李谿

李谿字仲询唐赵国公岨之后岨贬死袁州因家新喻遂为新喻人谿幼有至性父文捷出其母谿日夜号泣饮食不入口父怜之而还其母遂以孝闻举进士真宗顾左右曰是能安其亲者擢第三人除大理评事通判舒州召试中书为太子中允直集贤院累擢知制诰寇准数改谿所拟制辞谿不乐以父留乡里请外遂出知荆南寻命为翰林学士仁宗即位超迁本曹郎中权知开封府数月权三司使拜右谏议大夫尝奏事两宫曰天下赋调有定今西北寝兵且二十年边馈如故戍兵虽未可减未作浮费非本务者宜一切裁损即诏谿与御史中丞刘筠等同议冗费以景德较天禧计所减得十二之上时陕西缘边数言军食不给度支都内钱不足支月奉章献太后忧之命吕夷简鲁宗道张士逊与谿等经度其事谿曰旧法商人入粟边郡算茶与犀象缗钱为虚实三估出钱十四文坐得三司钱百文请变法以实钱入粟实钱售茶三者不得相为轻重既行商人失厚利怨谤蠹起谿累请郡改枢密直学士知洪州行数月而吏以茶法妄称增课坐不察夺职久之进给事中知杭州

复枢密直学士知永兴军衣冠子弟恃荫无赖者谕悉杖之境内肃然还句当三班院坐
举吏降左谏议大夫权三司使事进尚书礼部侍郎拜
枢密副使父丧起复迁户部侍郎知枢密院事 【案宋史本传作知谏院事考宋史真宗
本纪宰辅表及宰辅编年录东都事略隆平集各纪
载俱作知枢密院事今据改】 是时榷茶法寢坏乃诏谕蔡齐等更议之谕以前坐变法
得罪固辞不许于是复用谕所变法语具食货略卒赠
右仆射谥宪成谕性明辨周知世务其处烦猝常若闲暇吏不敢欺在枢府专务革滥赏
抑侥幸人以为称职无子以族子为后

△程戡

程戡字胜之许州阳翟人少力学举进士甲科补泾州观察推官再迁秘书丞通判
许州曹利用贬戡以利用墦降通判蕲州徙虔州州人
有杀母暮夜置尸他人之门以诬仇者狱已具戡独辩之正其罪以尚书屯田员外郎知
归州召为侍御史三司度支判官累擢天章阁待制陝
西都转运使未几知渭州陝西有保毅军人苦其役戡奏曰保毅在乡兵外不黥而有籍
所以佐边备也已隶保捷而保毅籍如故州县以供力
役率困惫至破析财产售田者犹数户出一夫民不胜苦因诏私役保毅者以计佣律坐
之进枢密直学士知成都府坐常保任贝州张得一得
一伏诛夺职出知凤翔府寻徙河中御史中丞张观辨之复为枢密直学士知永兴军徙
瀛州四迁给事中契丹使过称疾求着帽见戡使谓曰
有疾可毋相见见当如礼使者语屈冠而见人言岁在甲午蜀且有变孟知祥之割据李
顺之起而为盗皆此时也仁宗自择戡再知益州迁端
明殿学士召见慰遣至彭州民妄言有兵变捕斩之守益州者以嫌多不治城堞戡独完
城浚池自固不以为嫌召拜参知政事奏禁蜀人妖言
诬民者避宰相文彦博亲改尚书户部 【案东都事略作礼部】 侍郎枢密副使数与
宋庠争议谏官御史皆论之戡亦自请罢除吏部 【
宋史宰辅表作礼部】 侍郎观文殿学士兼翰林侍读学士同羣牧制置使寻拜宣徽南
院 【隆平集作北院】 使鄜延路经略安抚使判
延州英宗即位以安武军节度使留再任初覃恩蕃官例不序迁至是用戡奏始皆得迁
又请首领有战功材武皆得召见选补为蕃官延州夹
河为两城雉堞颇卑小敌登九州岛台则下瞰城中戡调兵夫大增筑之横山酋豪怨谅
祚欲率其属叛取灵夏来求兵为援戡言豺虎非自相搏
则未易取也痲疽非其自溃则未易攻也谅祚久悖慢宜乘此许之所谓以蛮夷攻蛮夷
中国之利也会英宗不豫大臣重生事不报言者请选
大臣帅永兴屯重兵以制五路敕戡具利害以闻戡以为四路距永兴皆十数驿设有警

使听节制则不及事矣且关中财赋不赡宿军多何以
给之戡告老章累上终弗听遣使以手诏问劳乃再上章曰臣老疾遽矣高奴屯劲兵为
要地岂养病所邪召还道卒赠太尉谥康穆戡以在边
安重习事治不近名然不为言者所与或传戡交通宦官阉士良云

△夏侯峤

夏侯峤字峻极其先幽州人高祖秀为济州巨野镇游奕使因家焉峤弱冠以词赋
称太平兴国初举进士甲科解褐大理评事累迁监察
御史通判兴元府进秩殿中丞雍熙二年代还对便殿太宗语有司曰此人朕自知其材
行勿须奏拟即日改左补阙直史馆会王师护边乘传
督河闲饘道就命知莫州踰月徙洪州改起居郎真宗在襄邸太宗择朝士谨厚者为官
属即召入为翊善加直昭文馆真宗尹京府命兼推官
加司封员外郎东宫建复兼中舍迁工部郎中及嗣位拜给事中知审刑院数月擢枢密
院副使咸平元年以户部侍郎罢 【案宋史宰辅表
及东都事略俱作以户部侍郎罢本传作郎中误今据改】 二年始建讲读之职命峤为
翰林侍读学士及杨徽之卒又命兼秘书监是秋江浙
饥命为江南巡抚使所过疏理刑讼存问耆老务从宽简人以为便使还采病民二十余
事上之亟诏厘革又判吏部选事峤淳厚谨慎居官无
过失真宗爱重多所询访每以善人目之在近侍恩遇甚渥景德元年卒年七十二诏赠
兵部尚书录其子大理寺丞晟为太子中舍孙恭为奉
礼郎侄孙蔚赐同学究出身

△盛度

盛度字公量世居应天府后徙杭州余杭县父豫从钱俶入朝终尚书度支郎中度
举进士第补济阴尉累迁尚书屯田员外郎契丹侵边
从幸大名数上疏论边事奉使陕西因览疆域参质汉唐故地绘为西域图以献改开封
府判官坐决狱失实降监洪州税起知建昌军三司盐
铁判官改起居舍人知制诰尝奏事便殿真宗问其所上西域图度因言酒泉张掖武威
炖煌金城五郡之东南自秦筑长城西起临洮东至辽
碣延袤万里有郡有军有守捉襟带相属烽火相望其为形势备御之道至矣唐始置节
度后以宰相兼领用非其人故有河山之险而不能固
有甲兵之利而不能御今复绘山川道路壁垒区聚为河西陇右图愿备上览真宗称其
博学后迁右谏议大夫权知开封府以疾不拜入翰林
为学士加史馆修撰历兵部郎中会寇准罢相度以交通周怀政出知光州丁谓用事复
谪和州团练副使谓贬起为祠部郎中复兵部郎中迁
太常少卿知筠州更虔滁 【案东都事略作徐】 苏三州还知审刑院以右谏议大夫

知扬州加集贤院学士初度谪洪州建请复贤良方正科又请建四科以取士曰博通坟典达于教化科才识兼茂明于体用科军谋宏远堪任将帅科明晓法律能按章覆问科既而用夏竦议置六科其议亦自度始复为翰林学士史馆修撰迁给事中寻进承旨以礼部侍郎兼端明殿学士召问边计退而条十事上之又兼侍读学士景佑二年拜参知政事时王曾吕夷简为相度与宋绶蔡齐并参知政事曾与齐善而夷简与绶善惟度不得志于二人及二人俱辞相仁宗问度曰王曾吕夷简力求退何也度对曰二人腹心之事臣不得而知陛下询二人以孰可代者则其情可察矣仁宗果以问曾曾荐齐又问夷简夷简荐绶于是四人俱罢而度独留迁知枢密院事拜武宁军节度使坐令开封府吏冯士元强取其邻所赁官舍为郑戩所发以尚书右丞罢复知扬州加资政殿学士知应天府以太子少傅致仕卒赠太子太保谥文肃度好学家居列图书未尝释手敏于为文而泛滥不精性极猜险虽平居僚友不敢易语言所至下贫无赖多所纵舍稍有贲者一切绳之以法子申甫终尚书兵部郎中集贤校理尝为福建转运使颇以修洁称从兄京有吏能以尚书工部侍郎致仕卒

△丁度

丁度字公雅其先恩州清河人祖顓后唐清泰初陷契丹逃归徙居祥符父逢吉以医术事真宗藩邸然好聚书【案东都事略载度祖顓尽其家贲以置书至八千卷旦曰吾聚书多矣必有好学者为吾子孙与宋史本传异】与儒者游度强力学问大中祥符中登服勤词学科为大理评事通判通州改太子中允直集贤院坐解送国子监进士失实监齐州税还知太常礼院判吏部南曹上书论六事一增讲读官二增谏员三补荫用大功以上亲四选河北河东役兵补禁军五籍令佐垦田为殿最六凡缘公事坐私罪杖者听保任迁官章献太后善之旧制监司及藩镇辞谒皆赐对仁宗初即位止令附中书枢密奏之度言附奏非所以防壅蔽也又尝献王凤论于章献太后以戒外戚历三司磨勘司【案东都事略作历知湖州】京西转运使司天言永昌陵有白气请增筑以厌之有诏按视度奏神道贵静不可轻缮治乃止入知制诰迁翰林学士纠察在京刑狱判太常礼院兼羣牧使刘平石元孙败帝遣使问所以御边度奏曰今士气伤沮若复追穷巢穴馈粮千里轻用人命以快一朝之意非计之得也太祖时疆场之任不用节将但审擢材器丰其廩赐信其赏罚方陞辑寇几二十年为今之策莫若谨亭障远斥堠控扼要害为制御之全计因条上十策名曰备边要览时西疆未宁二府三司虽旬休不

废务度言苻坚以百万师寇晋谢安命驾出游以安人心请给假如故无使敌人窥朝廷浅深从之累迁中书舍人为承旨度又言祥符天圣闲牧马至十余万其后言者以天下无事不可虚费遂废八监然犹秦渭环阶麟府文州火山保德岢岚军岁市马二万二百匹补京畿塞下之阙自西鄙用兵四年所牧三万而已今河北河东京东西淮南皆籍丁壮为兵请令民畜一战马者得免二丁仍不升户等则缓急有备而国马蕃矣久之迁端明殿学士知审刑院时江西转运使移属州凡市米盐钞每百缗贴纳钱三之一通判吉州李虞卿受财免贴纳事觉大理将以枉法论度曰枉法谓于典宪有所阿曲虞卿所违者转运使移文尔遂贷虞卿死帝尝问用人以资与才孰先度对曰承平时用资边事未平宜用才时度在翰林已七年而朝廷方用兵故对以此谏官孙甫论度所言盖自求柄用帝谕辅臣曰度在侍从十五年数论天下事顾未尝及私甫安从得是语未几擢工部侍郎枢密副使言契丹尝渝盟预备不可忽因上庆历兵录及贍边录明年参知政事会春旱降秩中书舍人踰月复官后二年卫士为变事连宦官杨怀敏枢密使夏竦请御史与宦官同于禁中鞠之不可滋蔓令反侧者不自安度曰宿卫有变事关社稷此而可忍孰不可忍请付外台穷治党与争于帝前仁宗从竦言度遂求解政事罢为紫宸殿学士兼侍读学士御史何郯言紫宸非称官所宜改观文殿学士知通进银台司判尚书都省再迁尚书左丞卒赠吏部尚书谥文简度性淳质不为威仪左右无姬侍喜论时事在经筵岁久帝每以学士呼之而不名尝问蓍龟占应之事乃对卜筮虽圣人所为要之一技而已不若以古之治乱为监又尝示以欹器曰朕欲临天下以中正之道度对曰臣等亦愿无倾满以事陛下因奏太宗尝作此器真宗亦尝着论于是帝制后述以赐之子讽集贤校理

△张观

张观字思正绛州绛县人少谨愿好学有乡曲名中服勤词学科擢第一授将作监丞通判解州会盐池吏以赃败坐失举劾降监河中府税复通判果州改秘书省秘书郎仁宗即位累迁翰林学士知审官院左司郎中以给事中擢御史中丞举文彦博为御史时以为得人【宋史本传不载举文彦博事据东都事略增】会星流地震雷发正月诏求直言观上四事一曰知人二曰严禁三曰尚质四曰节用河北大雨水又条七事曰导积水以广播种缓催欠以省禁錮宽刑罚以振淹狱收逃田以募归复罢工役以先急务止配率以阜民财通商旅以济艰食复知审官院遂拜同知枢密院事康定中西兵失利因议点乡兵久之不决遂与王黼陈执

中俱罢以资政殿学士尚书礼部侍郎知相州徙澶州
河坏孙陈埽及浮梁州人大恐或请趋北原以避水患观曰太守独去如州民何乃躬率
卒徒增筑之堤完水亦退徙郟州旧法京东通安邑盐
而濒海之地禁私煮观上言利之所在百姓趋之虽日杀于市恐不能止请弛禁以便民
岁免黥配者不可胜计历知应天府孟州河南府以吏
部侍郎兼御史中丞父居业高年多病请便郡以观文殿学士知许州月余拜右丞 【案
东都事略作尚书左丞】 丁父忧哀毁过人既练而
卒赠吏部尚书谥文孝观性至孝初为秘书郎其父方为州从事因上书愿以官授父真
宗嘉之以居业为京官及观贵居业繇恩至太府卿居
业尝过洛嘉其山川风物曰吾得老于此足矣观于是买田宅营林榭以适其意早起奉
药膳然后出视事未尝一日废也趣尚恬旷持廉少欲
平生书必为楷字无一行草类其为人仁宗飞白书清字赐观以赏其节然于吏事非所
长知开封府民犯夜禁观诘之曰有人见否众传以为
笑云

△郑戩

郑戩字天休苏州吴县人早孤力学客京师事杨亿以属辞知名后复还吴亿卒宾
客弟子散去戩乃倍道会葬举进士擢甲科授太常寺
奉礼郎签书宣国军 【案东都事略作宣德军】 节度判官事召试学士院为光禄寺
丞集贤校理通判越州还改太子中允同知太常礼院
直史馆同修起居注以右正言知制诰判国子监选明经生讲解经义徙知审官院迁起
居舍人龙图阁直学士权知开封府吏冯士元为奸利
有告士元受赇藏禁书者戩穷治之辞连宰相吕夷简知枢密院盛度参知政事程琳遂
逮捕夷简子公绰公弼参劾其状既而士元流海岛度
琳坐尝交关士元罢去其余絀罚者自御史中丞孔道辅天章阁待制庞籍又十余人戩
敏强善听决喜出不意独假贷细民豪宗大姓绳治益
急政有能迹徙权三司使复转运使考课格分别殿最又句较三司出入得羨钱四百万
缗以右谏议大夫同知枢密院改枢密副使是时陕西
用兵戩请巡边以图破羌之策戩与参知政事宋庠为宰相吕夷简所忌与庠皆罢以资
政殿学士知杭州钱塘湖溉民田数十顷钱氏纳国后
葑土堙塞且多所占冒湖水益狭戩发属县丁夫数万辟之民赖其利事闻诏本郡岁治
如戩法迁给事中徙郟州又徙永兴军建言凡军行所
须愿下有司相缓急折为三等非急罢去先是衙吏输木京师浮渭泛河多漂没既至则
斥不中程往往破家不能偿戩奏岁减二十余万又奏
罢括余以劝民积粟长安故都多豪恶戩治之尚严甚者至黥窜人皆惕息未几为陕西

四路都总管兼经略安抚招讨使驻泾州听便宜从事
迁尚书礼部侍郎时知庆州滕宗谅知渭州张亢过用公使钱戡置于法行边至镇戎军
趣莲花堡天寒与将佐置酒元昊拥兵近塞会暮尘起
有报敌骑至者戡曰此必三川将按边回非敌骑也已而果然及疆事少宁诏还知永兴
军初静边砦主刘沪谋筑水洛结公二城以通秦渭援
兵招生羌大王族为边卫戡使沪与著作佐郎董士廉督其役会罢戡四路安抚使韩琦
知渭州尹洙皆以为地在生羌闲恐城未就而寇至召
沪士廉罢役归不听乃使裨将狄青将兵以往械送德顺军狄力于朝卒城之进户
部侍郎资政殿大学士知并州契丹与元昊方交兵边
奏互上独戡不以闻诏遣使问其故戡曰敌自相攻中国不足忧也鄜府闲有弃地曰草
城川戡募工人为弓箭手计口给田初兵兴用不足河
东行铁钱山多炭铁鼓铸利厚重辟不能止戡乃请三当一令既下兵民相扇动数千人
邀走马承受诉承受中贵人不能遏又羣噪州门守门
者拒不得入戡闻悉召至庭下推首谋数千人 【案数千人应作数十人】 黥隶他州
事乃定迁吏部侍郎改宣徽北院使拜奉国军节度使
卒赠太尉谥文肃戡遇事果敢必行然凭气近侠用刑峻深士民多怨之

△明镐

明镐字化基密州安邱人大中祥符五年中进士第补蕲州防御推官 【案东都事
略作广济军判官】 改大理寺丞薛奎领秦州辟为
节度判官奎徙益州辟知录事参军程琳代奎为签书节度判官就通判州事迁太常博
士还朝仁宗问镐所能奎称其沈鸷有谋能断大事除
开封推官献六冗书进尚书礼部员外郎累迁兵部员外郎直史馆益州路转运使会岁
饥民无积聚盗贼闲发镐为平物价募民为兵人赖以
安知陵州楚应几赃败或告以先期奏之镐曰获罪则已安可欺朝廷邪卒坐失察降知
同州会元昊寇延州起为陕西转运使敌破金明砦既
去议修复其城帅臣拥兵不即进而镐止以百余骑自督将士一月而成又常阅同州厢
军得材武者三百余人教以强弩奏为清边军最骁悍
其后陕西河东颇仿置之迁户部郎中直昭文馆知陕州徙江淮制置发运使未行会贼
破丰州擢天章阁待制河东都转运使修建宁中候百
胜砦镇川清塞堡凡五城以劳迁左司郎中明年擢龙图阁直学士知并州镐大巡边以
备贼时边任多纨袴子弟镐乃取尤不职者杖之疲软
者皆自解去遂奏择习事者守堡砦寻以枢密直学士左谏议大夫知成德军入知开封
府庆历七年王则叛命镐为体量安抚使城未下又命
参知政事文彦博为宣抚使以镐副之贝州平迁端明殿学士给事中权三司使诸将悉

超迁都虞候士卒八千四百人第其功为五等每等迁一资彦博数推镐功拜参知政事已而疽发背帝谓辅臣曰镐忠亮有劳及其未乱思一见之临问恻然曰方赖卿谋国事何遽被疾镐气急犹能顿首谢翌日卒年六十赠礼部尚书【宋史本传不载镐年寿及赠官据东都事略隆平集补】 谥文烈镐端挺寡言所至安静有体而遇事不苟为世所推重王则者本涿州人岁饥流至恩州自卖为人牧羊后隶宣毅军为小校恩冀俗妖幻相与习五龙滴泪等经及图讖诸书言释迦佛衰谢弥勒佛当持世初则去涿母与之诀别刺福字于其背以为记妖人因妄传字隐起争信事之而州吏张峦卜吉主其谋党连德齐诸州约以庆历八年正月断澶州浮梁乱河北会其党潘方净以书谒北京留守贾昌朝事觉被执故不待期亟以七年冬至叛时知州张得一与官谒天庆观则率其徒劫库兵得一走保骁捷营贼焚门执得一囚之兵马都监内殿承制田斌以从卒巷鬪不胜而出城扉阖提点刑狱田京任黄裳持印弃其家縋城出保南关贼从通判董元亨取军资库钥元亨拒之杀元亨又出狱囚囚有憾司理参军王奖者遂杀奖既而节度判官李浩清河令齐开主簿王湊皆被害则僭号东平郡王以张峦为宰相卜吉为枢密使建国曰安阳榜所居门曰中京居室厩库皆立名号改年曰得圣以十二月为正月百姓年十二以上七十以下皆涅其面曰宜军破赵得胜旗帜号令率以佛为称城以一楼为一州书州名阙补其徒为州每面置一总管然縋城下者日众于是令守者伍伍为保一人縋余悉斩有州民汪文庆郭斌赵宗本汪顺者自城上系书射镐帐约为内应夜垂絙以引官军既内数百人焚楼櫓贼觉率众拒战初官军既登欲专其功断絙以绝后来者及与贼战兵寡不敌与文庆等复縋而下是夜城几克则期正月十四日出要劫契丹使谍者以告镐遣殿侍安素伏兵西门贼果以数百人夜出伏发皆就获城峻不可攻乃为距闉将成为贼所焚遂即南城为地道日攻其北牵制之及文彦博至穴通城中选壮士中夜由地道入众登城贼纵火牛官军以枪中牛鼻牛还攻之贼大溃开东门遁合门祇候张綯缘壕与战死之总管王信捕得则其余众保村舍皆焚死檻送则京师支解以徇则叛凡六十六日

钦定续通志卷三百二十六

●钦定续通志卷三百二十七 列传一百二十七

列传

宋【三十一】

○宋三十一

王尧臣 孙抃 田况 田锡 王禹偁 张咏

王尧臣

孙抃

田况

田锡

王禹偁

张咏

△王尧臣

王尧臣字伯庸应天府虞城人举进士第一授将作监丞通判湖州召试改秘书省著作郎 【案欧阳修撰尧臣墓志铭作著作佐郎】

直集贤院会从父冲坐事出知光州父丧服除为三司度支判官再迁右司谏郭皇后薨议者归罪内侍都知阎文应尧臣请穷治左右侍医者

不报时上元节有司张灯尧臣俟乘輿出即上言后已复位号今方在殡不当游幸帝为罢张灯擢知制诰同知通进银台司提举诸司库务知

审刑院入翰林为学士知审官院陕西用兵为体量安抚使将行请曰故事使者所至称诏存问官吏将校而不及于民自元昊反三年于今关

中之民凋敝为甚请以诏劳来仍谕以贼平蠲租赋二年仁宗从之使还上言陕西兵二十万分屯四路然可使战者止十万贼众入寇常数倍

官军故三至而三胜泾原近贼巢穴最当要害宜先备之今防秋甚迹请益团土兵以二万屯渭州为镇戎山外之援万人屯泾州为原渭声势

二万屯环庆万人屯秦州以制其冲突且贼之犯边不患不能入患不能出也若以精兵扼险强弩注射旁设奇伏且追且击不败何待贼屡乘

战胜重掠而归诸将不能追击者由兵寡而势分也又论延州镇戎军渭州山外三败之由皆为贼先据胜地诱致我师将帅不能据险击归而

多倍道趋利兵方疲顿乃与生羌合战遂致掩覆愿敕边吏常远斥候遇贼至度远近立营砦然后量敌奋击毋得轻出诏以其言戒边吏时韩

琦坐好水川兵败徙秦州范仲淹亦以擅复元昊书降耀州尧臣言二人者皆忠义智勇不当置之散地又荐种世衡狄青有将帅才明年贼果

自镇戎军原州入寇败葛怀敏乘胜掠平凉潘原关中震恐自邠泾以东皆闭垒自守仲淹自将庆州兵捍贼贼始引去仁宗思其言乃复以琦

仲淹为招讨使置府泾州益屯兵三万人而使尧臣再安抚泾原初曹玮开山外地置笼竿等四砦募弓箭手给田使耕战自守其后将帅失抚

御稍侵夺之众怨怒遂劫德胜砦将姚贵闭城畔尧臣适过境上作书射城中谕以祸福众遂出降乃为申明约束如旧而去既还上言韩琦范

仲淹庞籍既为陕西四路都总管缘边经畧安抚招讨等使四路当禀节制而尚带经畧使【案东都事畧作经畧副使】名者九人请逐路都总管副都总管并罢经畧只充缘边安抚使既而滕宗谅亦以为请遂罢之又言鄜延环庆路皆险固易守惟泾原自汉唐来为冲要之地自镇戎军至渭州沿泾河大川直抵泾邠畧无险阻难以捍防如郭子仪浑瑊常宿重兵守之自元昊叛命数年由此三入寇朝廷置帅府于泾州为控扼关陕之会频经败覆边地空虚士气不振愿精择将佐其新集之兵未经训练宜易以旧人因论沿边城砦控扼要害贼径通属及备御轻重之策为五事上之又请废泾原五州营田益置弓箭手及彻潼关楼橹皆报可以户部郎中【案墓志铭作学士】权三司使辟张温之杜杞十余人为副使判官【案墓志铭云明年四月以学士权三司使自朝廷理元昊罪军兴而用益广前为三司者皆厚赋暴敛甚者借内藏率富人出钱下至果菜皆加税而用益不足公始受命则曰今国与民皆敝矣在陛下任臣者如何由是天子一听公所为公乃推见财利出入盈缩曰此本也彼末也计其缓急先后而去其蠹敝之有根穴者斥其妄计小利之害大体者然后一为条目使就法度罢副使判官不可用者十五人更荐用才且贤者朞年民不加赋而用足明年以其余偿内藏所借者数百万又明年其余而积于有司者数千万而所在流庸稍复其业此段事迹朱子采入名臣言行录宋史本传不载附识】时入内都知张永和建议收民馱舍钱十之三以助军费尧臣入对曰此衰世之事召怨而携民唐德宗所以致朱泚之乱也度支副使林澠畏永和附会其说尧臣奏黜澠议乃定夔州路转运使请增盐井岁课十余万缗尧臣以为上恩未尝及远人而反牟取厚利适足以敛怨罢之迁翰林承旨兼端明殿学士为羣牧使母丧服除转右谏议大夫加给事中拜枢密副使会侂智高反请析广西宜容邕州为三路遇蛮入寇三路会支郡郡兵掩击令经畧安抚使守贵州以统制焉益募澄海忠敢土军分屯运全永道三州米以饷之罢遣北兵远戍时狄青经制岭南诏青审议以为便居枢密三年务裁抑徼幸于是有缕匿名书传布京城者仁宗不以为疑也嘉佑元年拜户部侍郎参知政事久之帝欲以为枢密使而当制学士胡宿固抑之乃进吏部侍郎卒赠尚书左仆射谥文安尧臣以文学进典内外制十余年其为文词温丽执政时尝与宰相文彦博富弼刘沆劝帝早立英宗为嗣为诏草挟以进未果立元丰三年子水部员外郎同老进遗稿论父功帝以访文彦博具奏本末遂加赠太师中书令改谥文忠以同老为秘阁校理

△孙抃

孙抃字梦得眉山人六世祖长孺喜藏书号书楼孙氏子孙以田为业至抃始读书属文中进士以大理评事通判絳州召试学士院除太常丞直集贤院为开封推官判三司开折司同修起居注以右正言知制诰迁起居舍人翰林学士兼侍读学士史馆修撰累迁尚书吏部郎中抃虽久处显要罕所建明皇佑中以右谏议大夫权御史中丞制下谏官韩绛论奏抃非纠绳才不可任风宪抃即上疏曰臣观方今士人趋进者多廉退者少以善求事为精神以能讦人为风采捷给若嗇夫者谓之有议论刻深若酷吏者谓之有政事谏官所谓才者无乃谓是乎若然臣诚不能也仁宗察其言趣视事且命知审官院抃辞以任言责不当兼事局乃止在台数言事不为矫激尤喜称荐人才帝欲除入内都知王守忠领武宁军节度使抃奏罢之温成皇后葬以刘沆为监护使抃奏沆为宰相不当为后妃护葬丧事时又议为后建陵立庙抃率官属言非礼因相与请对固争不能得伏地不起帝为改容遣之御史请罢宰相梁适未听抃奏曰适在相位上不能持平权衡下不能笃训子弟言事官数论奏未闻报罢适无以慰物论宰相陈执中婢为嬖妾张氏擄杀置狱取证左执中弗遣有诏勿推抃论列疏十上适执中卒皆罢改翰林学士承旨复兼侍读学士帝读史记龟策传问古人动作必繇此乎对曰古有大疑既决于己又询于众犹谓不有天命乎于是命龟以断吉凶所谓谋及乃心谋及卿士谋及庶人谋及卜筮盖圣人贵诚不专人谋默与神契然后为得也帝善其对迁礼部侍郎抃久居侍从泊如也人以为长者既而枢密副使程戡罢帝欲用旧人即以命抃岁中参知政事抃性笃厚寡言质畧无威仪居两府年益耄于事无所可否又善忘语言举止好事者至传以为口实御史韩缜弹奏之罢为观文殿学士同羣牧制置使复兼侍读学士英宗即位进户部侍郎告老以太子少傅就第卒

【案苏颂撰抃行状云治平元年二月以太子太傅致仕于是公年六十九以其年十一月十七日薨子四人长珣国子博士次佑甫大理评事次喆次林并太常博士】 赠太子太保谥文懿

△田况

田况字符均其先冀州信都人晋乱祖行周没于契丹父延昭景德中脱身南归性沈鹜教子甚严累官至太子率府率况少好读书举进士甲科补江陵府推官迁秘书省著作佐郎举贤良方正授太常丞通判江宁府赵元昊反夏竦经畧陕西辟为判官擢直集贤院时竦与韩琦尹洙等画上攻守二策朝廷将用攻策范仲淹议未可出师况疏言不可攻有七乞召两

府大臣定议但令严设边备若有侵掠即出兵邀击或
贼界谨自守备不必先用轻举如此则全威制胜有功而无患也于是罢出师议况又言
治边十四事迁右正言专供谏职权修起居注遂知制
诰尝面奏事论及政体帝颇以好名为非意在遵守故常况退而着论上之其畧曰名者
由实而生非徒好而自至也尧舜三代之君非好名者
而鸿烈休德倬若日月不能纤晦者有实美而然也设或谦弱自守不为恢闳睿明之事
则名从而晦矣虽欲好之岂可得耶陛下倘奋干刚明
听断则有英睿之名行威令慑奸凶则有神武之名斥奢汰革风俗则有崇俭之名澄冗
滥轻会敛则有广爱之名悦亮直恶巧媚则有纳谏之
名务咨询达壅蔽则有勤政之名责功实抑偷幸则有求治之名今皆非之不为则天下
何所望以平乎抑又圣贤之道曰名教忠谊之训曰名
节羣臣诸儒所以尊辅朝廷纪纲人伦之大本也陛下从而非之则教化微节义废无耻
之徒争进而劝沮之方不行矣岂圣人率下之意耶时
边奏契丹修天德城及多葺堡砦况意其畜谋入侵乃上疏曰朝廷两府大臣皆宗庙社
稷天下生民所望而系安危者每旦垂拱之对不过目
前政事数条非陛下待辅臣意亦非辅臣所以忧朝廷之意也今北敌桀慢河朔将佐之
良愚中兵之善窳道路之夷险城垒之坚敝军政之是
否财粮之多少在两府辅臣实未有知之者万一变发所忽制由中出少有差跌则事不
测矣如前岁萧英刘六符始来和议未决中外惶扰不
知为计和议既定又复恬然是岂得为安哉愿因燕闲召执政大臣于便殿访逮时政专
以虑患为急则旦夕忧思不敢少解同心协力必有所
为今不以此为务而日以委琐之事更相辨对议者羞之臣叨备近列实系朝廷休戚惟
陛下不以人废言寻为陕西宣抚副使除龙图阁直学
士知成德军徙秦州进枢密直学士知渭州徙益州自李顺王均之乱蜀守得便宜决事
虽小罪并其家内徙流离怨愤况察其非甚者释之听
断之明蜀人以比张咏迁给事中召为御史中丞未至复为枢密直学士权三司使既又
以为龙图阁学士翰林学士况约景德会计录以今财
赋所入多于景德而其出又多于旧者为皇佑会计录上之冀帝节用除礼部侍郎三司
使至和元年擢枢密副使以疾乞免除尚书右丞观文
殿学士兼翰林侍读学士提举景灵宫以太子少傅致仕卒年五十九赠太子太保谥曰
宣简况喜持论多朝廷先务而切于时事者如策元昊
势屈纳款必令尽还延州侵地毋过许岁币并入中青盐请戮陕西陷没主将随行亲兵
其论甚伟然不尽行也 【案宋史本传后半原有阙
文自龙图阁直学士后事迹及迁除赠谥俱失载王惟俭宋史记据东都事畧纂辑较为

完善今从之】始契丹寇澶州畧得数百人以属其父

延昭延昭哀之悉纵去因自脱归中国延昭生八男子多知名况长子也保州之役况坑杀降卒数百人朝廷壮其决后大用之然卒无子以兄

子为后【案隆平集作以弟之子至安为后与本传互异】

△田锡

田锡字表圣嘉州洪雅人幼聪悟好读书属文杨徽之宋白皆厚遇之为之延誉繇是声称翕然太平兴国三年进士高等释褐将作监丞

通判宣州迁著作郎京西北路转运判官改左拾遗直史馆锡好言时务既居谏官即上疏献军国要机者一朝廷大体者四其畧曰顷岁王师

平太原未赏军功迄今二载幽燕窃据固当用兵虽稟宸谋必资武力愿陛下因郊裡耕藉之礼议平晋之功则驾馭戎臣莫兹为重此要机也

今交州未下战士无功春秋所谓老师费财者也臣闻圣人不务广疆土惟务广德业声教远被自当来宾愿陛下务修德以来远无钝兵以挫

锐又何必以蕞尔蛮夷上劳震怒乎此大体之一也今谏官不闻廷争给事中不闻封驳左右史不闻升降轩记言动岂圣朝美事乎又御史不

敢弹奏中书舍人未尝访以政事集贤院虽有书籍而无职官秘书省虽有职官而无图籍臣愿陛下择才任人使各司其局苟职业修举则威

仪自严此大体之二也尔者尚书省湫隘郎曹无本局尚书无厅事九寺三监寓天街之两廊贡院就武成王庙是岂太平之制度邪臣愿陛下

别修省寺用列职官此大体之三也案狱官令枷杻有短长钳锁有轻重尺寸斤两并载刑书未闻以铁为枷者也昔唐太宗观明堂图见人之

五藏皆丽于背遂减笞刑况隆平之时将措刑不用于法所无去之可矣此大体之四也疏奏优诏褒答僚友谓锡曰今日之事鲜矣宜少晦以

远谗忌锡曰事君之诚惟恐不竭矧天植其性岂为一赏夺邪时赵普为相令有司受羣臣章奏必先白锡贻书于普【宋史本传必先白下

有两锡字案必先白者白宰相非白锡也锡字一蓋衍文】以为失至公之体普引咎谢之【案宋名臣言行录载赵普当国锡谒之曰公以

元勋当国宜事损检令羣臣书奏先经中书既非尊王之体谏官章疏令合门填状尤弱台宪之风皆不便普引咎正容厚谢皆罢之云云语更

全备明晰】六年为河北转运副使驿书言边事其畧曰愿申饬将帅慎固封守勿尚小功许通互市俘获蕃口抚而还之如此不出五载河朔

之民得务农业亭障之地可积军储然后待其乱而取之则克乘其衰而兵之则降既心服而忘归则力省而功倍自国家图燕以来连兵未解

财用不得不耗人心不得不忧愿陛下精思虑决取舍无使旷日持久穷兵极武焉书奏

上帝嘉之七年徙知相州改右补阙复上章论事明年
移睦州睦州人旧阻礼教锡建孔子庙表请以经籍给诸生诏赐九经自是人知向学会
文明殿灾又拜章极言时政转起居舍人还判登闻鼓
院上书请封禅以本官知制诰寻加兵部员外郎端拱二年京畿大旱锡上章有调燮倒
置语忤宰相罢为户部郎中出知陈州坐稽留杀人狱
责授海州团练副使后徙单州召为工部员外郎复论时政阙失俄诏直集贤院至道中
复旧官真宗嗣位迁吏部出使秦陇还连上章言陕西
数十州苦于灵夏之役生民重困帝为戚然命同知审官院兼通进银台封驳司与魏廷
式联职以议论不协求罢出知泰州会彗星见拜疏请
责躬以答天戒再召见便殿及行降中使抚谕仍加优赐咸平三年诏近臣举贤良方正
翰林学士承旨宋白以锡应诏还朝屡召对言事锡尝
奏曰臣愿陛下以皇王之道治天下旧有御览但记分门事类臣请钞畧四部别为御览
三百六十卷万几之暇日览一卷经岁而毕又采经史
要切之言为御屏风十卷置宸座之侧则治乱兴亡之鉴常在目矣真宗善其言诏史馆
以羣书借之每成书数卷即先进内锡乃先上御览三
十卷御屏风五卷各为序以见意五年再掌银台览天下奏章有言民饥盗起及诏敕不
便者悉条奏其事帝对宰相称锡得争臣之体即以
本官兼侍御史知杂事擢右谏议大夫史馆修撰连上八疏皆直言时政得失六年冬病
卒年六十四遗表劝上以慈俭守位以清净化人居安
思危在治思乱帝览之惻然谓宰相李沆曰田锡直臣也朝廷少有阙失方在思虑锡之
章奏已至矣若此谏官亦不可得嗟惜久之特赠工部
侍郎 【案范仲淹撰锡墓志云后以二子登朝累赠兵部尚书】 录其二子 【案墓志
二子名庆述庆余】 并为大理评事锡耿介寡合
未尝趋权贵之门居公庭危坐终日无懈容慕魏征李绛之为人以尽规献替为已任尝
曰吾立朝以来章疏五十有二皆谏臣任职之常言苟
获从幸也岂可藏副示后谤时卖直邪悉命焚之然性凝执治郡无称

△王禹偁

王禹偁字符之济州巨野人世为农家九岁能文毕士安见而器之太平兴国八年
擢进士授成武 【东都事畧作武城】 主簿徙知长
洲县就改大理评事端拱初太宗闻其名召试擢右拾遗直史馆赐绯故事赐绯者给涂
金银带上特命以文犀带宠之即日献端拱箴以寓规
讽时北庭未宁访羣臣以边事禹偁献御戎十策以为外则合兵势而重将权罢小臣诩
谄边事行间谍离其党遣赵保忠折御卿率所部以犄
角下诏感励边人使知取燕蓟旧疆非贪其土地内则省官以宽经费抑文士以激武夫

信用大臣以资其谋不贵虚名以戒无益禁游惰以厚
民力帝深嘉之又与夏侯嘉正罗处约杜镐表请同校三史书多所厘正二年亲试贡士
召禹偁赋诗立就帝悦曰此不踰月遍天下矣即拜左
司谏知制诰是冬京城旱禹偁疏云一谷不收谓之饥五谷不收谓之饥饥大夫以下皆
损其禄饥则尽无禄廩食而已今旱云未沾宿麦未茁
既无积蓄民饥可忧望下诏直云君臣之间政教有阙自乘輿服御下至百官奉料非宿
卫军士边庭将帅悉第减之上答天谴下厌人心俟雨
足复故臣朝行中家最贫奉最薄亦愿首减奉以赎耗蠹之咎外则停岁市之物内则罢
工巧之伎近城掘土侵冢墓者瘞之外州配隶之众非
赃盗者释之然后以古者猛虎渡河飞蝗越境之事戒敕州县官吏其余军民刑政之弊
非臣所知者望委宰臣裁议颁行但感人必必召和气
未几判大理寺庐州妖尼道安诬讼徐铉道安当反坐有诏勿治禹偁抗疏雪铉请论道
安罪坐贬商州团练副使岁余移解州四年召拜左正
言上以其性刚直不容物命宰相戒之直宏文馆求补郡以便奉养得知单州至郡十五
日召为礼部员外郎再知制诰屡献讨李继迁便宜以
为继迁不必劳力而诛自可用计而取宜明数继迁罪恶晓谕蕃汉重立赏赐高与官资
则继迁身首不梟即擒矣其后潘罗支射死继迁夏人
款附卒如禹偁言至道元年召入翰林为学士知审官院兼通进银台封驳司诏命有不
便者多所论奏孝章皇后崩迁梓宫于故燕国长公主
第羣臣不成服禹偁与客言后尝母仪天下当遵用旧礼坐谤讪罢为工部郎中知滁州
初禹偁尝草李继迁制送马五十匹为润笔禹偁却之
及知滁闽人郑褒徒步来谒禹偁爱其儒雅为买一马或言买马亏价者太宗曰彼能却
继迁五十马顾肯亏一马价哉移知扬州真宗即位迁
秩刑部会诏求直言禹偁上疏言五事一曰谨边防通盟好使辇运之民有所休息二曰
减冗兵并冗吏使山泽之饶稍流于下三曰艰难选举
使入官不滥四曰沙汰僧尼使疲民无耗五曰亲大臣远小人使忠良蹇谤之士知进而
不疑奸憸倾巧之徒知退而有惧疏奏召还复知制诰
咸平初预修太祖实录直书其事时宰相张齐贤李沆不协意禹偁议论轻重其间出知
黄州作三黜赋以见志三年濮州盗夜入城畧知州王
守信监军王昭度禹偁闻而奏疏畧曰自五季乱离各据城垒豆分瓜剖七十余年太祖
太宗削平僭伪天下一家当时议者乃令江淮诸郡毁
城隍收兵甲彻武备者二十余年书生领州大郡给二十人小郡减五人以充常从号曰
长吏实同旅人名为郡城荡若平地虽则尊京师而抑
郡县为强干弱枝之术亦匪得其中道也臣比在滁州值发兵挽漕关城无人守御止以

白直代主开闭城池颓圯铠仗不完及徙维扬称为重镇乃与滁州无异尝出铠甲三十副与巡警使臣穀弩张弓十损四五盖不敢擅有修治上下因循遂至于此今黄州城雉器甲复不及滁扬万一水旱为灾盗贼窃发虽思御备何以枝梧盖太祖削诸侯跋扈之势太宗杜僭伪觊望之心不得不尔其如设法救世久则弊生救弊之道在乎从宜今江淮诸州大患有三城池堕圯一也兵仗不完二也军不服习三也濮贼之兴慢防可见望陛下特许江淮诸郡酌民户众寡城池大小并置守捉军士多不过五百人阅习弓箭然后渐葺城壁缮完甲冑则郡国有御侮之备长吏免剽畧之虞矣帝嘉纳之四年州境二虎鬪其一死食之殆半羣鸡夜鸣经月不止冬雷暴作禹偁手疏引洪范传陈戒且自劾帝遣内侍乘驿劳问醮禳之询日官云守土者当其咎帝惜禹偁才是日命徙蕲州禹偁上表谢有宣室鬼神之间不望生还茂陵封禅之书止期身后之语帝异之果至郡未踰月而卒年四十八帝甚悼之厚贖其家赐一子出身禹偁词学敏贍遇事敢言喜臧否人物以直躬行道为已任尝云吾若生元和时从事于李絳崔羣间斯无媿矣其为文著书多涉规讽以是颇为流俗所不容故屡见摈斥所与游必儒雅后进有词艺者极意称扬之如孙何丁谓辈多游其门子嘉佑嘉言俱知名嘉佑为馆职寇准曰吾尹京外议云何对曰人言丈人且入相准曰于吾子意何如嘉佑曰以愚观之不若不为相之善也相则誉望损矣自古贤相所以能建功业泽生民者其君臣相得如鱼之有水故言听计从而臣主俱荣今丈人负天下重望相则中外有太平之责焉丈人于明主能若鱼之有水乎准大喜执其手曰元之虽文章冠天下至于深识远虑或不逮吾子也嘉佑官不显嘉言以进士第为江都簿真宗尝观禹偁奏章嗟美切直因访其后宰相以嘉言闻即召对擢大理评事仁宗时为殿中侍御史曾孙汾举进士甲科仕至工部侍郎入元佑党籍

△张咏

张咏字复之濮州鄆城人【案韩琦撰咏神道碑载世本邳人后徙居于澶之临黄及公葬其先于鄆城故为邳之鄆城人】少负气不拘小节虽贫贱客游未尝下人太平兴国五年郡举进士议以咏首荐有夙儒张覃者未第咏与寇准致书郡将荐覃为首众许其能让是岁咏登进士乙科以大理评事知鄂州崇阳县崇阳民以茶为业咏曰茶利厚官将榷之不若拔茶植桑民以为苦其后榷茶他县失业而崇阳之桑已成为绢岁万匹民以殷富【案宋名臣言行录增纂】再迁著作佐郎以苏易简荐入为太子中允迁秘书丞通判麟相二州乞掌濮州市

征以便养俄召还知浚仪县 【案神道碑载监濮州税俄迁知开封府】 会李沆宋湜寇准连荐其才以为荆湖北路转运使奏罢归峡二州水递夫就转太常博士太宗闻其强干召还超拜虞部郎中与向敏中并擢为枢密直学士同知银台通进封驳司兼掌三班院张永德为并代部署有小校犯法笞之至死诏案其罪咏封还诏书且言陛下方委永德边任若以一部校故推辱主帅臣恐下有轻上之心太宗不从未几果有营兵胁诉军校者咏引前事为言太宗改容劳之出知益州广武卒刘吁作乱蜀州招安使上官正总兵攻讨缓师不进咏以言激正勉其亲行 【案长编李顺构乱在淳化五年正月王继恩破李顺收成都是在年五月上官正并未至蜀上官正所讨者广武卒刘吁吁之乱在至道三年八月是时王继恩已为谋废立事发责授右监门卫将军均州安置矣两人无同时用兵讨乱事本传以刘吁之乱悞为李顺构乱而于咏激正亲行又牵连王继恩在内两事混而为一兹据东都事畧改】 仍盛为供帐饩之酒酣举爵属军校曰汝曹蒙国厚恩此行当直抵寇垒平荡丑类若老师旷日即此地还为尔死所矣正由是决行深入大致克捷时寇掠之际民多胁从咏移文谕以朝廷恩信使各归田里且曰前日李顺胁民为贼今日吾化贼为民不亦可乎民间讹言有白头翁午后食人儿女一郡嚣然至暮路无行人既而得造讹者戮之民遂帖息初蜀士知向学而不乐仕宦咏察郡人张及李畋张达者皆有学行为乡里所称遂敦勉就举而三人者悉登科士由是知劝民有谏诉者咏灼见情伪立为判决人皆厌服好事者编集其辞镂板传布 【案宋名臣言行录引湘山野录云公每断事有情轻法重情重法轻者必为判语读以示之蜀人镂板谓之戒民集大抵以敦风俗笃孝义为本也】 咏尝曰询君子得君子询小人得小人各就其党询之则无不审矣其为政恩威并用蜀民畏而爱之丁外艰起复改兵部郎中真宗即位加左谏议大夫咸平初入拜给事中户部使改御史中丞二年同知贡举是夏以工部侍郎出知杭州属岁歉民多私鬻盐以自给捕获犯者数百人咏悉宽其罚而遣之官属请曰不痛绳之恐无以禁咏曰钱塘十万家饥者八九苟不以盐自活一旦蜂聚为盗则为患深矣俟秋成当仍旧法有民家子与姊壻讼家财壻言妻父临终此子裁三岁故见命掌贖产且有遗书令异日以十之三与子余七与壻咏览之索晒酹地曰汝妻父智人也以子幼故托汝苟以七与子则子死汝手矣亟命以七给其子余三给壻人皆服其明断移知永兴军府五年马知节自益徙延州朝议择可代者真宗以咏前在蜀治行优异复命知益州仍加刑部侍郎枢密直学士

就迁吏部侍郎转运使黄观上其治状有诏褒美会遣谢寿巡抚西蜀帝因令传谕咏曰
 得卿在蜀朕无西顾之忧寻归朝复掌三班领登闻检院
 咏中岁疡生脑颇妨巾带求知颍州真宗以其公直有时望再任益部皆以政绩闻不当
 莅小郡令中书召问将委以青杜或真定令其自择咏
 辞不就遂命知升州大中祥符初加左丞三年州民以咏秩满借留就转工部尚书令再
 任是秋以江左旱歉命充升宣等十州安抚使进礼部
 帝闻咏脑疡甚悯之令薛映驰驿代还以疾未见咏恨不得面陈所蕴乃抗论言近年虚
 国帑藏竭生民膏血以奉无用之土木皆贼臣丁谓王
 钦若启上侈心之为也不诛死无以谢天下章三上出知陈州初咏与青州傅霖少同学
 霖隐不仕咏既显求霖者三十年不可得至是来谒阍
 吏曰傅霖请见咏责之曰傅先生天下贤士吾尚不得为友汝何人敢名之霖笑曰别予
 一世尚尔邪是岂知世间有傅霖者乎咏问昔何隐今
 何出霖曰子将去矣来报子尔咏曰咏亦自知之霖曰知复何言翼日别去后一月而咏
 卒年七十赠左仆射谥忠定咏刚方自任为治尚严猛
 尝有小吏忤咏咏械其颈吏恚曰非斩某此枷终不脱咏怒其悖即斩之 【案宋名臣言
 行录引语录云公性刚毅因责决一吏彼枝辞不伏
 公曰这的莫要吃剑彼云决不得吃剑则得公牵出斩之以徇军吏愕以相顾自是服公
 之威信令出必行与此语虽有异事颇相同】 少学击
 剑慷慨好大言乐为奇节有士人游宦远郡为仆夫所持且欲得其女为妻士人者不能
 制咏遇于传舍知其事即阳假此仆为馭单骑出近郊
 至林麓中斩之而还尝谓其友人曰张咏幸生明时读典填以自律不尔则为何人邪又
 其言曰事君者廉不言贫勤不言苦忠不言己效公不
 言己能斯可以事君矣真宗尝称其材任将帅以疾不尽其用自号乖崖以为乖则违众
 崖不利物云弟诜为虞部员外郎 【案宋祁撰咏行
 状云子从质以父任累迁至卫尉丞居公之丧一月以毁而夭】

钦定续通志卷三百二十七

●钦定续通志卷三百二十八 列传一百二十八

列传

宋 【三十二】

○宋三十二

掌禹锡	苏绅	王洙【钦臣】	胥偃	聂冠卿	冯元
赵师民	张锡	张揆	尹洙	孙甫	
	谢绛	叶清臣	杨察		
掌禹锡					

苏绅

王洙

胥偃

聂冠卿

冯元

赵师民

张锡

张揆

尹洙

孙甫

谢绛

叶清臣

杨察

△掌禹锡

掌禹锡字唐卿许州郾城人中进士第为道州司理参军试身言书判第大理寺丞累迁尚书屯田员外郎通判并州擢知庐州未行丁度荐为侍御史上疏请严备西羌时议举兵禹锡引周宣薄伐为得汉武远讨为失且建画增步卒省骑兵旧法荐举边吏贪赃皆同坐禹锡奏谓使贫使愚用兵之法也若举边吏必兼责士节则莫敢荐矣材武者孰从而进哉后遂更其法出提点河东刑狱杜衍荐召试为集贤校理改直集贤院兼崇文院检讨历三司度支判官同管勾国子监数考试开封国学进士命题皆奇奥士子惮之目为难题掌公迁光禄卿改直秘阁英宗即位自秘书监迁太子宾客御史劾禹锡老疾不任事帝怜其博学多记令召至中书示以弹文禹锡惶怖自请遂以尚书工部侍郎致仕卒禹锡矜慎畏法居家勤俭尝预修皇佑方域图志地理新书奏对帝前王洙推其稽考有劳赐三品服好储书所记极博然迂漫不能达其要云

△苏绅

苏绅字仪甫泉州晋江人天禧中进士及第历宜复安三州推官改大理寺丞再迁太常博士举贤良方正科擢尚书祠部员外郎通判洪州徙扬州归上十议进直史馆为开封府推官三司盐铁判官时众星西流并代地地震方春而雷诏求直言绅上疏极言时事安化蛮蒙光月率众寇宜州败官军杀钤辖张怀志等六人绅上言曰国家比以西北二边为意鲜复留意南方故有今日之患臣顷从事宜州粗知本末安化

地幅员数百里持兵之众不过三四千人然而敢肆侵扰非特恃其险绝亦由往者守将失计至使乘隙蹂边屠杀将吏其损国威无甚于此彼六臣者虽不善为馭自致丧败然衔冤负耻当有以刷除臣观蛮情所恃者地形险扼据高临下大军难以并进然其壤土硤确资蓄虚乏刀耕火种以为糗粮其势可以缓图不可以速取可以计覆不可以力争广东西教阅忠敢澄海湖南北雄武等军皆惯涉险阻又所习兵器与蛮人畧同请速发旨宜州策应而以他兵代之仍命转运使备数年军食今秋冬之交岚气已息进军据其出路转粟补卒为旷日持久之计伺得便利即图深入可以倾荡巢穴杜绝蹊径使进无钞畧之获退无攻守之备然后谕以国恩许以送款而徙之内郡收其土地募民耕种异时足以拓外夷为屏蔽也仍诏旁近诸蛮谕以朝廷讨叛之意毋得相为声援如获首级即优赏以金帛不越一年逆寇必就殄灭况广西巉峒荆湖川峡蛮落甚多大抵好为骚动因此一役必皆震聳朝廷施用其策遣冯伸已守桂州经制之蛮遂平又陈便宜八事一曰重爵赏二曰慎选择三曰明荐举四曰异服章五曰适才宜六曰择将帅七曰辨忠邪八曰修预备书奏帝嘉纳之进史馆修撰擢知制诰入翰林为学士再迁尚书礼部郎中王素欧阳修为谏官数言事绅忌之会京师阙雨绅请对言洪范五事言之不从是谓不义厥咎僭厥罚常眚盖言国之号令不专于上威福之柄或移臣下虚哗愤乱故其咎僭又曰庶位踰节之谓僭刑赏妄加羣阴不附则阳气胜故其罚常眚今朝廷号令有不一者庶位有踰节而陵上者刑赏有妄加于下者下人有谋而僭上者绅意以指谏官谏官亦言绅举御史马端非其人改龙图阁学士知扬州复为翰林学士史馆修撰权判尚书省绅锐于进取善中伤人阴中王德用其疏至有宅枕干冈貌类艺祖之语帝恶之匿其疏不下遂出绅以吏部郎中改侍读学士集贤殿修撰知河阳徙河中未行感疾卒绅博学多知喜言事尝请罢连日视朝复唐制朔望唤仗入阁间开便殿延对辅臣宽制举科格以收才杰选命谏员勿侵御史职事赵元昊反请诏边帅为人讨之计且曰以十年防守之费为一岁攻取之资不尔则防守之备不止于十年矣又曰今边兵止备陕西恐贼出不意窥河东即麟府不可不虑宜稍移兵御之麟延与原州镇戎军皆当贼冲而兵屯众寡不均或寇原州镇戎军则鄜延能应援陕西屯卒太多永兴为关陇根本而戍者不及三十宜留西戍之兵壮关中形势缓急便于调发郡县备盗不谨请增尉员益弓手籍其论利害甚多绅与梁适同在两禁人以为险诋故语曰草头木脚陷人倒卓子讼别有传

△王洙

王洙字原叔应天宋城人少聪悟博学记问过人初举进士与郭祜同保人有告祜冒祖母禫主司欲脱洙连坐之法召谓曰不保可易也洙曰保之不愿易遂与祜俱罢天圣二年登进士第再举中甲科补舒城县尉坐覆县民鍾元杀妻不实免官后调富川县主簿晏殊留守南京厚遇之荐为府学教授召为国子监说书改直讲校史记汉书擢史馆检讨为天章阁侍讲累迁太常博士同管勾国子监预修崇文总目成迁尚书工部员外郎修国朝会要加直龙图阁权同判太常寺坐赴进奏院赛神与女妓杂坐为御史劾奏黜知濠州徙襄州会贝卒叛州郡皆恟恟襄佐史请罢教阅士不听又请毋给真兵洙曰此正使人不安也命给库兵教阅如常日人无敢哗者徙徐州时京东饥朝廷议塞商胡赋捷薪输半而罢塞洙命更其余为谷粟诱愿输者以舖流民因募其壮者为兵得千余人盗贼衰息有司上其最为京东第一徙亳州复为天章阁侍讲史馆检讨帝将祀明堂宋祁言明堂制度久不讲洙有礼学愿得同具其仪诏还洙太常再迁兵部员外郎命撰大飨明堂记除史馆修撰迁知制诰诏诸儒定雅乐久未决洙与胡瑗更造锺磬而无形制容受之别皇佑五年有事于南郊劝帝用新乐既而议者多非之卒不复用夏竦卒赐谥文献洙当草制封还其目曰臣下不当与僖祖同谥因言前有司谥王溥为文献章得象为文宪字虽异而音同皆当改于是太常更谥竦文庄而溥得象皆易谥尝言天下田税不均请用郭谠孙琳干步开方法颁州县以均其税贵妃张氏薨治丧皇仪殿追册温成皇后洙钩摭非礼阴与内侍石全彬附会时事陈执中刘沆在中书喜其助已擢洙为翰林学士既而温成即园立庙且欲用乐诏礼院议礼官论未一洙令礼直官填印纸上议请用乐朝廷从其说礼官吴充鞠直卿移文开封府治礼直官擅发印纸罪知府蔡襄释不问而谏官范镇疏礼院议园陵前后不一请诘所以御史继论之不已宰相意充等风言者皆罢斥既而洙以兄子尧臣参知政事改侍读学士兼侍讲学士罢一学士换二学士且兼讲读前此未尝有也是岁京东河北秋大稔洙言近年边余增虚价数倍虽复稍延日月而终偿以实钱及山泽之物以致三司财用之蹙请借内藏库禁钱乘时和余京东河北之粟以供边食可以坐纾便余之急又言近时选谏官御史凡执政之臣尝所荐者皆不与选且士之伤身励行稍为大臣所知反置而不用甚可惜也洙泛览传记至图纬方技阴阳五行算数音律诂训篆隶之学无所不通卒年六十一累官至尚书吏部郎中

【宋史本传不载其年寿并所止之官据欧阳修撰洙墓志增】 赐

谥曰文御史吴中复言洙官不应得谥乃止子钦臣

【按隆平集载洙子力臣钦臣涉臣曾臣墓志载子男五人长叟臣早卒次力臣太常寺大税次钦臣秘书省正字次陟臣将作监主簿次曾臣某官】

王钦臣

王钦臣

钦臣字仲至清亮有志操以文贄欧阳修修器重之用荫八官文彦博荐试学士院赐进士及第历陕西转运副使元佑初为工部员外郎奉使高丽还进太仆少卿迁秘书少监开封尹钱勰入对哲宗言比阅书诏殊不满人意谁可为学士者勰以钦臣对哲宗曰章惇不喜乃以勰为学士钦臣领开封改集贤殿修撰知和州徙饶州斥提举太平观徽宗立复待制知成德军卒年六十七钦臣性嗜古藏书数万卷手自雠正世称善本

△胥偃

胥偃字安道潭州长沙人少力学河东柳开见其所为文曰异日必得名天下大中祥符五年举进士甲科授大理评事通判胡舒二州直集贤院稍迁太常丞知开封县与御史高升试府进士既封弥卷首辄发视择有名者居上降秘书省著作佐郎监光化军酒起通判邓州复太常丞修起居注累迁尚书刑部员外郎知制诰迁工部郎中入翰林为学士权知开封府忻州地震偃以为地震阴之盛今朝廷政令不专上出而后宫外戚恩泽日蕃此阳不胜阴之效又宜选将练师以防边塞有卫卒赂库吏求拣冬衣坐系者三十余人时八月霜雪暴至偃推洪范急恒寒若之咎请从末减奏可西塞用兵士卒妻子留京师者犯法当死帝不忍用刑或欲以毒置饮食中令得善死偃极言其不可帝亦悔而止宦人程智诚与三班使臣冯大显八人抵罪帝使赦智诚三人而文显五人坐如法偃曰恤近遗远非政也况同罪异罚乎诏并释之未几卒偃未仕时家有良田数十顷既贵悉以予族人初天下职田无日月之限而赴官者多以前后为断偃请水陆田各限以月因着为令尝与谢绛受诏试中书吏而大臣有以简属偃者偃不敢发视亟焚之欧阳修始见偃偃爱其文召置门下妻以女子元衡有学行能自立为尚书都官员外郎并其子茂谿咸早卒偃妻直史馆方约之妹与元衡妇韩茂谿妇谢皆寡居丹阳闺门有法江淮人至今称之 【案宋史此下有柳植传植虽廉介然无事迹足录今从删】

△聂冠卿

聂冠卿字长孺歙州新安人举进士授连州军事推官杨亿爱其文章大臣交荐之召试学士院校勘馆阁书籍迁大理寺丞为集贤校理通判蕲州坐尝校十代兴亡论谬误落职再迁太常博士复集贤校理言天下旬奏狱虽笞杖并覆而徒流不系狱者乃不以闻非所以矜慎刑罚之意请自今罢覆笞杖罪自徒以上虽不系狱亦奏覆从之判登闻鼓院累迁尚书工部郎中翰林院侍讲学士冯元修大乐命冠卿检阅事迹又预撰景佑广乐记特迁刑部郎中直集贤院以兵部郎中知制诰判太常礼院纠察刑狱奉使契丹契丹主谓曰君家先世奉道子孙固有昌者尝观所著蕲春集词极清丽因自击球纵饮命冠卿赋诗礼遇甚厚还同知通进银台司审刑院入翰林为学士母忧起复判昭文馆兼侍读学士冠卿每进读左氏春秋必引尊王黜霸之义以讽一日坠笏上前帝悯冠卿丧毁羸瘠未几以葬亲告归至扬州卒诏以其弟太常博士世卿通判宣州初世卿监延丰仓掘地得古砖有隶书字半漫灭其可辨者云公先世饵霞栖云高尚不仕累石于江滨又云昭王大丞相聂又云水龙夜号夕鸡骇飞其年九月十二日卒年五十有五冠卿始见而恶之至是校所卒岁月及其享年无少异者冠卿嗜学好古手未尝释卷尤工诗

△冯元

冯元字道宗高祖禧唐末官广州以术数仕刘氏传三世【案东都事畧云三世仕岭南为日官】至父邴广南平入朝为保章正元幼从崔颐正孙奭为五经大义与乐安孙质吴陆参雋夏侯圭善羣居讲学或达旦不寝号四友进士中第授江阴尉时诏流内铨取明经者须学官元自荐通五经谢泌领铨诘之曰古人治一经或至皓首子尚少能尽通邪对曰达者一以贯之更问疑义辨析无滞补国子监讲书迁大理评事擢崇文院检讨兼国子监直讲王旦闻其名尝令说论语老子羣子弟侍听因荐之真宗试进士殿中召元讲易泰卦元进说曰地天为泰者以天地之气交也君道至尊臣道至卑惟上下相与则可以辅相天地财成万化帝悦未几迁太子中允直龙图阁诏预内朝直龙图阁预内朝自此始【案东都事畧隆平集俱云直阁官名盖始此不言预内朝宋祁撰元行状亦云直阁盖由公始】皇子为寿春郡王王旦又荐元宜讲经资善堂帝以元少更用崔遵度会遵度卒擢左正言兼太子右谕德仁宗即位迁户部员外郎为直学士兼侍讲与孙奭以经术并进讲论自是仁宗益向学同判国子监故事国子监多宿儒典领后颇用公卿子弟任均管库及奭元并命士议悦服同知贡举进龙图阁学士预修

三朝正史为翰林学士史馆修撰四迁给事中明道元年尝监护宸妃葬事及帝亲政追册宸妃为庄懿皇后改葬永定陵既发圹而流泉沮洳言者以监护不职罢翰林学士知河阳【东都事畧作罢知扬州】王曾为言元东朝旧臣不宜以细故弃外即召为翰林侍讲学士迁礼部侍郎知审官院复判礼院国子监上金华五箴赐书褒答修景佑广乐记书成迁户部侍郎足疾气愕属李淑宋祁为铭志卒年六十三【宋史本传不载元之年寿据宋祁撰元行状增】赠本部尚书谥章靖元性简厚不治声名非庆吊未尝过谒二府执亲丧自括发至祥练皆案礼变服多识古今台阁品式之事尤精易初七岁方读易母夜梦异人以绀莲华与元吞之且曰善读此后必贵显【案行状载是夕梦公吞绀莲夫人旦而抚公曰儿善读此后必贵显据此且字是旦字之误】元且老率三日一诵易无子以兄之子諲为后【案宋祁撰元行状载子四人孝谏知瀛州录事参军献诚知唐城县事某蚤卒彦诒太康主簿与宋史本传异】

△赵师民

赵师民字周翰青州临淄人九岁能属文举进士第复还乡里不仕孙奭辟兖州说书【东都事畧作荐为兖州教授】领诸城主簿师民学问精博奭自以为不及夏竦尤重之称为盛德君子论其文行愿回两子恩授以京秩除齐州推官青州教授更天平军节度推官年五十来京师近臣张观宋郊王尧臣庞籍韩琦明镐力荐为国子监直讲兼润冀二王宫教授改著作佐郎迁宗正丞会赵元昊反罢进讲师民上书陈十五事曰咨辅相命将帅简侍从择守宰治军旅修边防求谏诤延讲诵革贡举久官政谨财用不遗年容诽谤除忌讳慎出令因献劝讲箴明年复命讲读经史师民见朝廷厌兵屈意以招元昊内不能平乃上言请任方面以图报効尝讲诗如彼泉流曰水之初出喻王政之发顺行则通通故清洁逆乱则壅壅故浊败贤人用则王政通而世清平邪人进则王泽壅而世浊败帝曰水何以喻政对曰水者顺行而润下利万物故以喻政此于比兴义最大讲论语问修文德曰文者经天纬地之总称君人之道抚之以仁制之以义接之以礼讲之以信皆是帝曰然其所先者无若信也曰信者天下之大本仁义礼乐皆必由之此实至道之要复问钻燧改火曰古之圣王举动必顺天时近世渐务苟简以为非治具而遂废之至其万事皆不如古又问子夏子张所言交道孰胜曰圣哲之道含覆广大与天地参善者有以进德恶者俾之改行子张之言为优他日读汉记问长安城众莫能知师民陈自古都雍年世旧址所在若画诸掌在经筵十余年甚见器异累请补郡除龙图阁直学士知耀州

帝自写诗宠行目以儒林旧德将行上疏曰近覩太阳食于正朔此虽阴阳之事亦虑是天意欲以感动圣心臣非瞽史不知天道但率愚意言之凡天之示象由人君有失不然则下蔽其上古人君之失不过暴虐怠慢奢侈纵放不师古始舍是何失道之有今圣心慈仁恭勤俭约自检动循典礼如此自非下蒙上邪挠正使主恩不下究而谁之咎欤望陛下朝夕咨于丞弼心膺之臣泊左右近侍耳目之官其忠而纯者与之慎简内外百执事及州县牧宰使主恩究于下不为羣邪所蔽塞则亿兆之幸也三迁刑部郎中复领宗正卒师民淳静刚敏举止凝重 【东都事畧云师民经行淳懿然举止疏野与此互异】 幼丧父哀感不畜婢妾年四十四始婚志尚清远专以读书为事性极慈恕勤于吏治政有惠爱尝奏蠲陕西旱租又欲论榷酤诸弊会仁宗不豫而止尝患近世官失其守作正官名议子彦若试中书舍人

△张锡

张锡字贶之其先京兆人曾祖山甫尝从唐僖宗入蜀蜀平徙家汉阳锡进士甲科为试秘书省校书郎知南昌县迁著作郎知新州初建学于州自是人始知学再迁太常博士诏选能吏治畿县乃以锡知东明始至令其下曰吾所治者三强恃力富恃费刑恃赎者吾所先也岁中以治迹闻枢密直学士李及荐为监察御史丁谓贬崖州议还内地锡疏谓奸邪弄国本与天下共弃之今复还是违天下意由是徙雷州玉清昭应宫灾连系甚众锡言天灾反以罪人恐重天怒愿修德以应之会论者众狱遂解迁殿中侍御史改尚书兵部员外郎还判度支勾院为京东转运使淄青齐濮郓诸州人冒耕河壩地数起争讼锡命籍其地收租绢岁二十余万讼者亦息累迁右谏议大夫知审官院进翰林侍读学士判太常寺国子监卒年六十八 【宋史本传不载锡之年寿据欧阳修撰锡墓志增】 赠尚书工部侍郎锡淳重清约虽贵奉养如少贱时读书老而弥笃初举广文馆进士考官任随以为第一及随死无子锡屡赙其家子子骏子云皆为大理评事子谅大理寺丞 【宋史本传不载锡有子据欧阳修撰锡墓志增】

△张揆

张揆字贯之其先范阳人后徙齐州擢进士第为北海县尉改大理寺丞以疾解官十年不出户读易因通扬雄太元经陈执中安抚京东荐揆经明行淳召为国子监直讲徙诸王府侍讲以尚书度支员外郎直史馆权三司户部判官上所著太元集解数万言诏对迺英阁令揆著得断首且言断首准易之夬盖以阳刚决阴柔君子进小人退之象仁宗悦擢天章阁待

制兼侍读累迁右谏议大夫进龙图阁直学士给事中
判太常寺一日进读汉马后传至服大练抑止外家因言今妃族太盛不可不裁损使保
其家帝嘉纳之诏改王溥谥有议欲为文忠者揆曰溥
周之宰相国亡不能死安得为忠乃谥为文康加翰林侍读学士知审刑院出知齐州卒
赠尚书礼部侍郎揆性刚狷少容阔于世务然好读书
老而不倦与弟揆相友爱揆为龙图阁直学士 【案宋史此下有杨安国传安国仕仁宗
朝侍经筵最久无迹可录今从删】

△尹洙

尹洙字师鲁河南人少与兄源俱以儒学知名举进士历河南府户曹参军安国军
节度推官 【案东都事畧及欧阳修撰洙墓志韩琦
撰洙墓表俱作邵武军判官】 知光泽县举书判拔萃改山南东道节度掌书记知伊阳
县有能名用大臣荐 【案东都事畧云王晦叔荐其
材】 召试为馆阁校勘迁太子中允会范仲淹贬敕榜朝堂戒百官为朋党洙上奏曰仲
淹忠亮有素臣与之义兼师友则是仲淹之党也今仲
淹以朋党被罪臣不可苟免宰相怒落校勘复为掌书记监唐州酒税 【案洙墓志墓表
俱作监郢州酒税徙唐州】 西北久安洙作叙燕息
戍二篇以为武备不可弛其叙燕篇畧曰战国世燕最弱虽胜败异术大概论其强弱燕
不能加赵赵魏一则燕固不敌唐三盗连衡百余年虜
未尝越燕侵赵魏是燕独能支虜也自燕入于契丹势曰炽大显德世虽复三关尚未尽
燕南地国初始与并合势益张然止命偏师备御王师
伐蜀伐吴泰然不以两河为顾是赵魏足以制之明矣并寇既平悉天下锐专力契丹不
能攘尺寸地顷尝以百万众驻赵魏讫敌退莫敢抗世
多咎其不战然我众负城有内顾心战不必胜不胜则事亟矣故不战未尝咎也原其弊
在兵不分设兵为三壁于争地掎角以疑其势设覆以
待其进边垒素固驱民以守之俾其兵顿坚城之下乘间夹击无不胜矣制敌在谋不在
众以赵魏燕南益以山西民足以守兵足以战分而帅
之将得专制就使偏师挫衄他众尚奋讐能系国安危哉息戍篇畧曰今西北泾原岷
秦凤鄜延四帅戍卒十余万平世屯戍且犹若是后虽
有他警不可一曰辍去是十万众有增而无损期也国家厚利募人八粟倾四方之货然
无水漕之运所挽致亦不过被边数郡尔岁不常登廩
有常给顷年亦尝稍匮矣倘其乘我荐饥我必济师馈饷当出于关中则未战而西陲已
困可不虑哉按唐府兵上府千二百人中府千人下府
八百人为今之计莫若籍丁民为兵拟唐置府颇损其数又今边鄙虽有乡兵之制然止
极塞数郡民籍寡少不足备敌料京兆西北数郡上户

可十余万中家半之当得兵六七万民幸于庇宗乐然隶籍农隙讲事登材武者为什长队正盛秋旬阅常若寇至以关内河东劲兵傅之尽罢
京师禁旅慎简守帅分其统专其任分统则兵不重专任则将益励坚其守卫习其形势积粟多教士锐兵志所谓无恃其不来恃吾有以待之
其庙胜之策乎又为迷亨审断原刑敦学矫察考绩广课凡杂议共九篇上之赵元昊反大将葛怀敏辟为经畧判官洙虽用怀敏辟尤为经畧
使韩琦所深知顷之刘平石元孙战败朝廷以夏竦为经畧安抚使范仲淹韩琦副之复以洙为判官洙数上疏论兵请便殿召对二府大臣议
边事及讲求开宝以前用兵故实特出睿断以重边计又请减并栅垒召募土兵省骑军增步卒又上鬻爵令时诏问攻守之计竦具二策令琦
与洙诣阙奏之帝取攻策以洙为集贤校理洙遂趋延州谋出兵而仲淹持不可还至庆州会任福败于好水川因发庆州部将刘政锐卒数千
趋镇戎军赴救未至贼引去夏竦奏洙擅发兵降通判濠州当时言者谓福之败由参军耿传督战太急后得传书乃戒福使持重毋轻进洙以
传文吏无军责而死于行阵又为时所诬遂作悯忠办诬二篇未几韩琦知秦州辟洙通判州事加直集贤院上疏曰国家西有不臣之虜北有
强大之邻非特闾巷贼盗之势也自西夏叛命四年边塞苦数扰内地疲运输兵久于外而休息无期卒有乘弊而起兵法所谓虽有智者不能
善其后当此之时陛下宜夙夜忧惧所以虑事变而塞祸源然未闻以宗庙为忧危亡为惧此贱臣所以感愤于邑而不已也何者今命令数更
恩宠过滥赐与不节此三者因循不革弊坏日甚夫命令者人主所以取信于下也异时民间朝廷降一命令皆竦视之今则不然相与窃语以
为不久当更既而信然命令遂以日轻于下命令轻则朝廷不尊矣又闻羣臣有献忠谋者陛下始甚听之后复一人沮之则意移矣忠言者以
信之不能终颇自诘其谋以为无益此命令数更之弊也爵赏陛下所持之柄也近时外戚内臣以及士人或因缘以求恩泽从中而下谓之内
降臣闻唐氏政衰或母后专制或妃主擅朝树恩私党名为斜封今陛下威柄自出外戚内臣贤而才者当与大臣公议而进之何必袭斜封之
弊哉且使大臣从之则坏纲纪不从则沮德音坏纲纪忠臣所不忍为沮德音则威柄轻于上且尽公不阿朝廷所以责大臣今乃自以私昵挠
之而欲责大臣之不私难矣此恩宠过滥之弊也赐予国家所以劝功也比年以来嫔御及伶官大医之属赐予过厚民间传言内帑金帛陛下
用之不甚爱惜疏远之人诚不能知内府丰匮之数但见取于民者曰烦即知畜于公帑者不厚臣亦知国家自西方宿兵用度寢广帑藏之积

未必悉为赐予所费然下民不可家至而户晓往岁闻边将王珪以力战赐金则无不悦服或见优人所得甚厚则往往愤叹人情不可不察此赐予不节之弊也臣所论三事皆人人所共知近臣从谏而不言以至今日方今非独四夷之为患朝政日弊而陛下不寤人心日危而陛下不知故臣愿先正于内以正于外然后忠谋渐进纲纪渐举国用渐足士心渐奋边境之患庶乎息矣仁宗嘉纳之改太常丞知泾州以右司谏知渭州兼领泾原路经畧公事会郑戡为陕西四路都总管遣刘沪董士廉城水洛以通秦渭援兵洙以为前此屡困于贼者王由城砦多而兵势分也今又益城不可奏罢之时戡已解四路而奏沪等督役如故洙不平遣人再召沪不至命张忠往代之又不受于是谕狄青械沪士廉下吏戡论奏不已卒徙洙庆州而城水洛又徙晋州迁起居舍人直龙图阁知潞州会士廉诣阙上书讼洙诏遣御史刘湜就鞫不得他罪【案宋名臣言行录引南丰杂识云仲淹等既罢朝政洙亦为人希时宰意攻以居渭州时事遂置狱遣刘湜案之谓洙曰龙图以银为偏提给银有记而收偏提无籍龙图当得罪死矣洙曰此不足以致洙罪也以银为偏提用某工校主之附某籍可取视之湜阅籍果然知不能害叹息而已】而洙以部将孙用由军校补边自京师贷息钱到官亡以偿洙惜其才可用恐罢去假公使钱为偿之又以为尝自贷坐贬崇信军节度副使天下莫不以为湜文致之也徙监均州酒税感疾卒年四十七嘉佑中宰相韩琦为洙言乃追复故官及官其子构洙内刚外和博学有识度尤深于春秋自唐末历五代文格卑弱至宋初柳开始为古文洙与穆修复振起之其为文简而有法自元昊不庭洙未尝不在兵间故于西事尤练习其为兵制之说述战守胜败尽当时利害又欲训士兵代戍卒以减边费为御戎长久之策皆未及施为而元昊臣洙亦去得罪矣

△孙甫

孙甫字之翰许州阳翟人少好学日诵数千言慕孙何为古文章初举进士得同学究出身为蔡州汝阳县主簿再举进士及第为华州推官转运使李紘荐其才迁大理寺丞知绛州翼城县杜衍辟为永兴司录凡吏职纤末皆倚甫办甫曰待我以此可以去矣衍闻之不复以小事属甫衍与燕语甫必引经以对言天下贤俊历评其才性所长衍曰吾辟属官得益友诸生亦多从甫学问徙知永昌县监益州交子务再迁太常博士蜀用铁钱民苦转贸重故设法书纸代钱以便市易转运使以为造交子多犯法欲废不用甫曰交子可以伪造钱亦可以私铸私铸有犯钱可废乎但严治之不当以小仁废大利后卒不能废衍为枢密副使荐于朝授秘阁

校理是岁诏三馆臣僚言事甫进十二事按祖宗故实
校当世之治有所不逮者论述以为讽谏名三圣政范改右正言知谏院时河北降赤雪
河东地震五六年不止甫推洪范五行传及前代变验
上疏曰赤雪者赤眚也人君纾缓之应晋太康中河阴降赤雪时武帝怠于政事荒宴后
宫每见臣下多道常事不及经国远图故招赤眚之恠
终致晋乱地震者阴之盛也阴之象臣也后宫也四夷也三者不可过盛过盛则阴为变
而动矣唐高宗本封于晋及即位晋州经岁地震宰相
张行成言恐女谒用事大臣阴谋宜制于未萌其后武昭仪专恣几移唐祚天地灾变固
不虚应陛下救纾缓之失莫若自主威福时出英断以
慑奸邪以肃天下救阴盛之变莫若外谨戎备内制后宫此应天之实也时契丹西夏稍
强后宫张修媛宠幸大臣专政甫以此谏焉又言修媛
宠恣市恩祸渐已萌夫后者正嫡也其余皆婢妾尔贵贱有等用物不宜过僭帝曰用物
在有司所恨不知尔甫曰世谓谏臣耳目官所以达不
知若所谓前世女祸者载在书史陛下可自知也夏国乞盟甫上一利四害曰宿兵以来
国用空耗今若与之约和则边兵可减科敛可省其为
利一也始契丹声言尝遣使谕西人使臣中国今和议既成必恃其功去岁有割地之请
朝廷已增岁赂矣若更有求将安拒之其为害一也承
平四十年武事不饬及边鄙有警而用不习之将不练之兵故久无成功然比来边臣中
材谋勇健者往往复出方在讲训不懈以张中国之威
一旦因议和弛备复如曩日缓急必不可用其为害二也自元昊拒命终不敢深入关中
者以嘉勒斯賚等族不附虑为后患也今中国与之和
获岁遗之厚彼必专力以制二蓄强大之势自兹为始其为害三也且朝廷恃久安之势
法令纪纲弛而不葺及西戎累败王师始议更张以救
前弊今见戎人请和苟贪无事他时之患不可救矣其为害四也凡利害之机愿陛下熟
图之又言张子奭使夏州回元昊复称臣然乞岁卖青
盐十万石兼欲就京师互市诸物仍求增岁给之数臣以为西盐数万石其直不下钱十
余万缗况朝廷已许岁赐二十五万若又许其卖盐则
与遗契丹物数相当使契丹闻之则贪得之心生矣兼闻张子奭言元昊自拒命以来收
结人心钞掠所得旋给其众兵力虽胜用度随窘当此
之时尤宜以计困之安得汲汲与和曲徇其请乎时陕西经畧招讨副使韩琦判官尹洙
还朝甫建议请诏琦等条四路将官能否为上中下三
等黜其最下者保州兵变前有告者大臣不时发之甫因言枢密副使当得罪死乃杜衍
也边将刘沪城水洛于渭州总管尹洙以沪违节度将
斩之大臣稍主洙议甫以谓水洛通秦渭于国家为利沪不可罪由是罢洙而释沪衍屡

荐甫洙与甫数善者而甫不少假借其鲠亮不私如此
甫尝言参知政事陈执中不学亡术不可用帝难之由是求补外不许其后奏丁度因对
求进用帝曰度未尝请也度乞与甫辩且指甫为宰相
杜衍门人乃以右司谏出知邓州徙安州历江南东路两浙转运使范仲淹知杭州多以
便宜从事甫曰范公大臣也吾屈于此则不得伸于彼
矣一切绳之以法然退未尝不称其贤再迁刑部郎中天章阁待制河北都转运使留为
侍读卒特赠右谏议大夫甫性劲果善持论着唐史记
每言唐君臣行事以推见当时治乱若身履其间而听者晓然如目见之时人言终日读
史不如一日听孙论也

△谢绛

谢绛字希深其先阳夏人祖懿文为杭州盐官县令葬富阳遂为富阳人父涛以文
行称进士起家为梓州榷盐院判官李顺反成都涛尝
画守御计贼平以功迁观察推官权知华阳县乱亡之后田庐荒废诏有能占田而倍入
租者与之于是腴田悉为豪右所占流民至无所归涛
收诏书悉以田还主改秘书省著作佐郎知兴国军还以治行召对长春殿命试学士院
会契丹内侵真宗议亲征时曹濮多盗而契丹声言趋
齐郛以涛知曹州属县赋税多输睢阳助兵食是岁潦百姓苦于转送涛悉留不遣奏曰
江淮漕运日过睢阳可取以饷军愿留漕赋繇广济河
以馈京师转运使论以为不可诏从涛奏尝使蜀还举所部官三十余人宰相疑以为多
涛曰有罪愿连坐之奉使举官连坐自涛始久之用冯
拯荐复召试以尚书兵部员外郎直史馆遂兼侍御史知杂事真宗山陵灵驾所经道路
有司请悉坏城门庐舍以过车舆象物涛言先帝车驾
封祀仪物大备犹不闻有所毁撤且遗诏从俭薄今有司治明器侈大以劳州县非先帝
意愿下少府裁损之进直昭文馆累官至太子宾客绛
以父任试秘书省校书郎举进士甲科授太常寺奉礼郎知汝阴县杨亿荐绛文章召试
擢秘阁校理同判太常礼院仁宗即位迁太常博士建
议请以真宗配感生帝翰林学士承旨利瓦伊以为不可寻出通判常州天圣中天下水
旱蝗起河决滑州绛疏请下诏引咎损大官之膳避路寝
之朝许士大夫斥讳上闻讥切时病罢不急之役省无名之敛勿崇私恩更进直道宣德
流化以休息天下仁宗嘉纳之会修国史以绛为编修
官史成迁祠部员外郎直集贤院时涛官两京且老矣因请便养通判河南府又论唐室
丽正史官之局并在大明华清宫内太宗皇帝肇修三
馆更立秘阁于升龙门左亲为飞白书额作赞刻石阁下景德中国书寢广真宗皇帝又
益以内帑四库二圣数尝临幸亲加劳问递宿广内者

有不时之召人人力道术究艺文知天子尊礼甚勤而名臣高位繇此其选也往者遭遭延燔未遑中葺或引两省故事别建外馆直舍卑喧民櫺丛接太官卫尉供儗滋削陛下未尝迁翠华降玉趾寥寥册府不闻舆马之音旷有日矣议者以为慕道不笃于古待士少损于前士无延访之勤而因循相尚不自激策文雅渐敝窃为圣朝惜之愿辟内馆以恢景德之制诏可绛虽在外犹数论事奏言近岁不逞之徒托言数术以先生处士自名秃巾短褐内结权幸外走州邑甚者矫诬诏书傲忽官吏请严禁止尝以墨敕赐封号者追还之还权开封府判官徙三司度支判官再迁兵部员外郎上言迩来用物滋侈赐予过制禁中须索去年计为缗钱四十五万自今春至四月已及二十余万比裁节费用而有司移文但求咸平景德簿书簿书不存则无所措置臣以为不若推近及远递考岁用而裁节之不必咸平景德为准也又言号令数变则亏国体利害偏听则惑聪明请者务欲各行而守者患于不一请罢内降凡诏令皆由中书枢密然后施行因进圣治箴五篇以父忧去服除擢知制诰判吏部流内铨太常礼院吏部拟官旧视职田有无不问多寡以是不均绛为核其实以多寡为差其有名而无实者皆不用人以为便初改判礼院为知礼仪事自绛建请使契丹还请知邓州距州百二十里有美阳堰引湍水溉公田水来远而少利不及民滨堰筑新土为防俗谓之墩者大小又十数岁数坏辄调民增筑奸人蓄薪茭以时其急往往盗决堰百姓苦之绛按召信臣六门堰故迹距城三里壅水注钳庐陂溉田至三万顷请复修之可罢州人岁役以水与民未就而卒年四十六绛以文学知名一时为人修洁酝藉所至大兴学舍尝请诸郡立学在河南修国子学教诸生自远而至者数百人好施宗族喜宾客以故卒之日家无余货子景初景温景平景回景温中进士第历知河阳景平好学终秘书丞 【按宋史此下有绛子景温附传无事迹足录今从删】

△叶清臣

叶清臣字道卿苏州长洲人幼敏异好学善属文天圣二年举进士知举刘均奇所对策擢第二宋进士以策擢高第自清臣始授太常寺奉礼郎签书苏州观察判官事 【东都事畧作签书平江军节度判官】 还为光禄寺丞集贤校理通判太平州知秀州人判三司户部勾院改盐铁判官上言九事请遣使循行天下询民疾苦察吏能否兴太学选置博士许公卿大臣子弟补学生重县令诸科举人取名大义责以策问省流外官无得入仕听武臣终三年丧罢度僧废读经一业训兵练将慎出令简条约出知宣州累迁太常丞同修起居注判三司盐铁勾院

进直史馆是冬京师地震上疏曰十二月二日丙夜京师地震移刻而止定襄同日震至五日不止坏庐寺杀人畜凡十之六大河之东弥千五百里而及都下诚大异也属者荧惑犯南斗治厯者相顾而骇陛下忧勤庶政方夏泰盍而一岁之中灾变仍见必有下失民望上戾天意者故垂戒以启迪清衷而陛下徒使内侍走四方治佛事修道科非所谓消复之实也顷范仲淹余靖以言事被黜天下之人齧舌不敢议朝政者行将二年愿陛下深自咎责延忠直敢言之士庶几明威降鉴而善应来集也书奏数日仲淹等皆得近徙会诏求直言复上疏言大臣专政仁宗嘉纳之寻请外为两浙转运副使滨太湖有民田豪右据上游水不得泄而民不敢诉尝建请疏盘龙汇沪渎港入于海民赖其利以右正言知制诰知审官院判国子监时陕西用兵上言当今将不素蓄兵不素练财无久积小有边警外无骁将内无重兵举西北二陲观之若溲落大瓠外示雄壮其中空洞了无一物脱不幸戎马猖突腹内诸城非可以计术守也自元昊僭窃因循至于延州之寇中间一岁矣而屯戍无术资粮不充穷年畜兵了不足用连监牧马未几已虚使蚩蚩之氓无所倚而安者此臣所以孜孜忧大瓠之穿也今羌戎稍却变诈亡穷岂宜乘实时之小安忘前日之大辱若又泰然自处则后视今犹今之视前也元昊围延州既解去铃辖内侍卢守勲与通判计用章更讼于朝时内侍用事者多为守勲游说朝廷议薄守勲罪而流用章岭南清臣上疏曰臣闻众议延州之围卢守勲首对范雍号泣遣李康伯见天昊为偷生之计计用章以为事急不若退保鄜州李康伯遂有死难不可出城见贼之语自元昊退守勲惧金明之失二将之没朝廷归罪边将又思仓卒之言一旦为人所发则祸在不测遂反复前议移过于人先为奏陈冀望取信正如黄德和诬奏刘平欲免退定之罪寻闻计用章亦疏斥守勲事状诏文彦博置劾未分曲直而遽罪用章康伯特赦守勲此必有结中人以惑圣听者设用章有退保之言止坐畏懦而守勲谋见贼之行乃是归款二者之责孰重孰轻望诏彦博鞫正其狱其后狱具守勲纔降湖北兵马都监时西师未解急于经费中书进拟三司使清臣初不在选中帝曰叶清臣才可用擢为起居舍人龙图阁学士权三司使公事始奏编前后诏敕使吏不能欺簿帐之丛冗者一切删去内东门御厨皆内侍领之凡所呼索有司不敢问乃为合同以检其出入清臣与宋庠郑戩雅相善为吕夷简所恶出知江甯府踰年入翰林为学士知通进银台司勾当三班院丁父忧言者以清臣为知兵请起守边及服除宰相陈执中素不悦之 【按涑水记闻云执中之为相也叶清臣为翰林学士草其制

诰少所褒美又云执中自谏官在迁乘舟东下清臣自两浙罢官归道中相遇而争泊舟之地遂相忿詈由是有隙】 即除翰林侍读学士知邠州 【按涑水记闻作自扬州移知汾州】 道由京师因请对改澶州进尚书户部郎中知青州徙知永兴军浚三白渠溉田踰六千顷仁宗御天章阁召公卿出手诏问当世急务清臣闻之为条对极论时政阙失其言多剴切权贵且曰陛下欲息奔竞此系中书若宰相裁抑奔竞之流则风俗醇厚人知止足宰相用儉佞之士则贪荣冒进激成浑波向有职在管库日趋走时相之门入则取街谈巷言以资耳目出则窃庙谟朝论以惊流辈一旦皆擢职司以酬所任比日人士竞踵此风出入权要之家时有三尸五鬼之号乃列馆职或置省曹且台谏官为天子耳目今则不然尽为宰相肘腋宰相所恶则摭以微瑕公行击搏宰相所善则从而唱和为之先容中书政令不平赏罚不当则箝口结舌未尝敢言人主纤微过差或宫闈小事即极言过当用讦为直供职未逾岁时迁擢已加常等宋禧为御史劝陛下宫中畜犬设棘以为守卫削弱朝体取笑四夷不加诃遣擢为谏官王达两为湖南江西转运使所至苛虐诛剥百姓徒配无辜特以宰相故旧不次授擢遂有河北之行如此是长奔竞也其它所列利害甚众会河决商湖北道艰食复以为翰林学士权三司使旧制有三司使权使公事而清臣所除止言权使自是分三等焉以户部副使向传式不职奏请出之皇佑元年帝御便殿访近臣以备边之策清臣上对畧曰诏问北使诣阙以伐西戎为名即有邀求何以答之臣闻誓书所载彼此无求况元昊叛边累年致讨契丹坐观金鼓之出岂有毫发之助今彼国出师辄求我助奸盟违约不亦甚乎若使辩捷之人判其曲直要之一战以破其谋我直彼曲岂不惮服苟不知咎或肆侵陵方河朔灾伤之余野无庐舍我坚壁自守纵令深入其能久居既无所因之粮则亟当遁去然后选择骁勇遏绝归师设伏出奇邀击首尾若不就擒亦且大败矣诏问辅翊之能方面之才与夫帅领偏裨当今孰可以任此者臣以为不患无人患有人而不能用尔今辅翊之臣抱忠义之深者莫如富弼为社稷之固者莫如范仲淹谙古今故事者莫如夏竦议论之敏者莫如郑戩方面之才严重有纪律者莫如韩琦临大事能断者莫如田况刚果无顾避者莫如刘涣宏达有方畧者莫如孙沔至于帅领偏裨贵能坐运筹策不必亲当矢石王德用素有威名范仲淹深练军政庞籍久经边任皆其选也狄青范全颇能驭众蒋偕沈毅有术畧张亢倜傥有胆勇刘貽孙材武刚断王德基纯慤劲勇此可补偏裨者也诏谓朔方灾伤军储缺乏此则三司失计置转运使不举职也且如

施昌言承久弊之政方欲竭思虑办职事一与贾昌朝违戾遂被移徙军储何由不乏自去年秋八月计度市余而昌朝执异议仲春尚未与夺财赋何缘得丰先朝置内帑本备非常今为主者之吝自分彼我缓急不以为备则臣不知其所为也至于粒食之重转徙为难豪民诳误使得入粟以免杖笞必能速办夫能俭嗇以省费渐致于从容德音及此天下之福也比日多以卑官躐请厚奉幸门日开赐子无艺若令有司率循旧规庶几物力亦获宽弛诏问战马乏绝何策可使足用今欲不费而马立办莫若赋马于河北河东陕西京东西五路上户一马中户二户一马养马者复其一丁如此则坐致战马二十万匹不为难矣时清臣以河北乏兵食自汴漕米繇河阴输北道者七十余万又请发大名库钱以佐边余而安抚使贾昌朝格诏不从清臣固争且疏其跋扈不臣宰相方欲两中之乃徙昌朝郑州罢清臣为侍读学士知河阳卒赠左谏议大夫清臣天资英迈遇事敢行奏对无所屈郭承佑妻舒王元偁女封郡主给奉及承佑为殿前副都指挥使妻以不加封请增月给清臣执奏不可仁宗曰承佑不可妻又诸王女当行之清臣曰是终为徼幸遂卷其奏置怀中不行数上书论天下事陈九议十要五利皆当世可行者子均为集贤校理

△杨察

杨察字隐甫其先晋人从唐僖宗入蜀家于成都至其祖钧始从孟昶归朝钧生居简仕真宗时至尚书都官员外郎尝官庐州遂为合淝人居简生察景佑元年举进士甲科除将作监丞通判宿州迁秘书省著作郎直集贤院出知颍寿二州入为开封府推官判三司盐铁度支勾院修起居注历江南东路转运使属吏以察年少易之及行部数摘奸隐众始畏伏察在部专以举官为急务人或议之察曰此按察职也苟掎拾羨余则俗吏之能何必我哉召为右正言知制诰权判礼部贡院时上封者请罢有司糊名考士及变文格使为放轶以袭唐体察谓防禁一溃则奔竞复起且文无今昔惟以体要为宗若肆其澶漫亦非唐氏科选之法议遂寝晏殊执政以妻父嫌换龙图阁待制寻复知制诰拜翰林学士权知开封府擢右谏议大夫权御史中丞论事无所避会诏举御史建言台属供奉殿中巡纠不法必得通古今治乱良臣今举格太密坐细故皆置不取恐英伟之士或有所遗御史何郟以论事不得实中书问状察又言御史故事许风闻今以疑似之间遽被诘问臣恐台谏官畏罪缄默非所以广言路也又数以言事忤宰相陈执中未几坐前在府失出笞罪虽去官犹罢知信州徙扬州复为翰林侍读学士又兼龙图阁

学士知永兴军加端明殿学士知益州再迁礼部侍郎复权知开封府复兼翰林学士权三司使内侍杨永德毁察于帝三司有狱辞连卫士皇城石不即遣而有诏移开封府鞫之察由是乞罢三司仍迁户部侍郎兼三学士提举集禧观进承旨踰年复以本官充三司使卒赠礼部尚书谥宣懿察幼孤七岁始能言母颇知书尝自教之为文敏贍典内外制皆有体要遇事明决勤于吏职虽多益喜不厌无子以兄子庶为嗣 【按隆平集作以兄之子登为嗣】 弟寘举进士第一通判润州以母忧不赴毁瘠而卒时人伤之

钦定续通志卷三百二十八

●钦定续通志卷三百二十九 列传一百二十九

列传

宋 【三十三】

○宋三十三

韩丕 师颀 张茂直 梁颢【固】 杨徽之【杨澈】 吕文仲 王着 潘慎修 杜镐 查道

韩丕

师颀

张茂直

梁颢

杨徽之

吕文仲

王着

潘慎修

杜镐

查道

△韩丕

韩丕字太简华州郑人幼孤贫有志操读书于骊山嵩阳通周易礼记年长始学文太平兴国三年举进士声名藉甚公卿多荐之者尝着孟母碑返鲁颂人多讽诵之解褐大理评事通判衡州石熙载荐其文行代还以文学试中书擢著作佐郎直史馆改左拾遗八年迁职方员外郎知制诰雍熙初加虞部郎中二年与贾黄中徐铉同知贡举丕属思艰涩及典书命伤于稽缓宰相宋琪性褊急常加督责或申以谐谑丕不能平又舍人王佑以前辈负气每陵轹面折之丕乃表求外郡出知虢州就改职方郎中端拱初拜右谏议大夫知河阳濠州丕起寒素以冲澹

自处不奔竞于名宦太宗甚嘉重之淳化二年召入为翰林学士终以迟钝不敏于用俄罢职充集贤殿修撰知均州就迁给事中工部侍郎徙金州召还充史馆修撰又出知滁州就加礼部侍郎大中祥符二年卒丕历典州郡虽不优于吏事能以清介自持时称其长者云

△师颀

师颀 【按师颀宋史目录作师颀本传通家作师颀下篇张茂直传亦作师颀以字霄远推之颀字义为协考宋人寄赠梦英大师诗碑内有师颀一诗前署衔云翰林学士朝奉大夫尚书刑部侍郎知制诰史馆修撰与此传所载同则师颀为师颀之误无疑兹依目录改下张茂直传并改】 字霄远大名内黄人父均后唐长兴二年进士终永兴节度判官因家关右颀少笃学与兄頌齐名太祖建隆二年举进士竦仪典贡举擢之上第释褐耀州军事推官开宝中复为解州推官太平兴国初召还迁大理寺丞累迁监察御史通判永兴军府坐秦王廷美假公帑缙钱左授干州团练副使寻复旧官六年改殿中侍御史通判邠州徙知简州转起居舍人以公累去官复为殿中侍御史知资眉二州颀所至以简静为治蜀人便之代还迁侍御史知安州移朗州超拜工部郎中知陕州时西鄙用兵鐏道所出军士多亡命为盗颀严捕之盗解去改刑部郎中召还真宗以其素负才望而久次于外累召对询其文章颀谦逊自晦帝益嘉之命以本官知制诰兼史馆修撰咸平二年与温仲舒张咏同知贡举明年为翰林学士五年复与陈恕同典贡部又知审官院通进银台封驳司卒年六十七颀旷达有操尚子仲回端拱元年进士及第至太常博士仲宰国子博士仲说殿中丞

△张茂直

张茂直字林宗兖州瑕邱人方弱冠慕容彦超据州城驱之守陴及周师破敌拥城守者列坐将斩之会得释后励志于学开宝二年登进士第解褐海州推官进司农寺丞通判泰州为转运使韦务升诬奏徙监梓州富国监代还自陈得雪复通判静安军军不领县城闾之外即深州之下博茂直奏割下博隶焉进秩著作佐郎扈蒙荐其才改秘书丞参知政事李至称其端实命入益王元杰府为记室参军王好学喜为诗遇茂直甚厚虽受时果之赐亦分饷焉王尝遣使征诗茂直援笔而就甚称赏之端拱元年召对改度支员外郎三迁本曹郎中真宗居藩时茂直与朱昂并在诸王府每预宴集屡因酬唱识其名即位选用旧臣得茂直及昂与梁周翰师颀辈相继知制诰茂直既入西阁会元贾森日遣持礼币为赐复至旧府时人荣之茂直淳至寡言晚年多疾才思梗涩不称职改秘书少

监出知颍州咸平四年卒年七十五子成列端拱二年

进士及第成务比部员外郎

△梁颢

梁颢字太素郢州须城人父文度早世颢养于叔父王禹偁始与乡贡颢依以为学尝质疑义禹偁拒之不答颢发愤读书不期月复有所质禹偁大加器赏初举进士不中第留阙下雍熙二年复举进士廷试方日中献赋太宗诏升殿询其门第赐甲科解褐大名府观察推官四年与梁湛并召为右拾遗直史馆颢在大名佐赵昌言昌言入掌枢密【安东都事畧及长编俱作昌言为枢密副使】会翟马周事坐贬虢州司户参军起知鱼台县就加大理评事召还迁殿中丞顷之复直史馆历开封府推官累迁右司谏真宗初诏羣臣言事颢时使陕西途中作听政箴以献还为度支判官咸平元年与杨励李若拙朱台符同知贡举时诏钱若水重修太祖实录表颢参其事又同修起居注扈蹕大名诏访羣臣边事颢上疏畧曰臣闻自古用兵之道在乎明赏罚而已昨者命将出师乘秋备塞而傅潜奉明诏握重兵逗挠无谋守陴翫敌老精兵于不用边城昼警河朔之民流移失所魏博以北蹂践一空遂至銜辂亲征此所谓以贼遗君父者也以军法论之固合斩潜以徇军中降诏以示天下然后择边臣之可用者委用之不以名位高卑但择武勇谋畧素为众所推服者取十人焉人付骑士五十器甲完备轻赍粮糗逐水草以为利往复扞御不令入郡邑不许聚一处遇有敌兵随时掩袭仍令烽候相望交相救应缘边州郡守城兵帅即坚壁以待之遇游骑近城掩杀边城内量出兵甲援救如此则乘城者不坚闭垒门免坐观于胜负捍边者不苟依郡郭可行备于寇攘虽非良筹且殊胶柱时论颇称之三年与李宗谔赵安仁并命知制诰是年冬王均平命为峡路安抚使归掌三班韩国华判大理以断刑失中乃选颢以代之四年张齐贤使关右安抚以颢为之副颢有吏才每进对词辩明敏真宗嘉赏之凡羣臣上封者悉付颢与薛暎详阅可否以河北饥盗命与暎分为东西路巡检使还拜右谏议大夫充户部使会罢三部使以颢为翰林学士同知审官院三班景德元年权知开封颢美风姿强力少疾闺门雍睦与人交久而无改士大夫多之暴病卒年九十二帝甚軫侧赐赠加等【按颢后以子适相赠太师中书令追封周国公见王珪撰适墓志】子固述适适相仁宗别有传

梁固

梁固

固字仲坚幼有志节尝着汉春秋颢器赏之初以颢遗荫赐进士出身服阕诣登闻院让前命愿赴乡举许之大中祥符元年举服勤词学科擢第一解褐将作监丞通判密州就迁著作佐郎归朝改著作郎直史馆历户部判官判户部勾院为人慨慷尚气义明于吏道马元方领三司临事羸率固摭其旷阙状屡请对条奏尝诏鞫狱时称平审天禧大礼成奏颂甚工未几卒年三十三

△杨徽之

杨徽之字仲猷建州浦城人祖郃仕闽为义军校家世尚武父澄独折节为儒终蒲城令徽之幼刻苦为学邑人江文蔚善赋江为能诗徽之与之游从遂与齐名尝肄业浔阳庐山时李氏据有江表乃潜服至汴洛以文投窦仪王朴深赏遇之周显德中举进士刘温叟知贡部中甲科同时登第者十六人世宗命覆试惟徽之与李覃何曦赵邻几中选解褐校书郎集贤校理宰相范质深器重之累著作佐郎右拾遗窦俨纂礼乐书徽之预焉太祖干德初与郑玘并出为天兴令【按隆平集载建隆初监方城商税因故人出使访问谣俗徽之为言海内宁一宜崇儒术以厚风俗太祖疑其讪黜为天兴令】府帅王彦超素知其名待以宾礼蜀平移峨眉令复为著作佐郎知全州就迁左拾遗右补阙太平兴国初代还太宗素闻其诗名因索所著徽之以数百篇奏御且献诗为谢太宗览之称赏会诏李昉等采辑前代文字类为文苑英华以徽之精于风雅分命编诗献雍熙词上赓其韵以赐端拱初拜左谏议大夫出知许州入判史馆事加修撰因次对上言畧曰陛下嗣统鸿图阐扬文治之道亦已至矣然擅文章者多超迁明经业者罕殊用向非振举曷劝专勤师法不传祖述安在且京师四方之会太学首善之地今五经博士并阙其员非所以崇教化奖人材繇内及外之道也望博求通经之士增置员数分教胄子随其所业授以本官廩稍且优旌别斯在无使唐汉专称得人太宗嘉纳之顾谓宰相曰徽之濡雅操履无玷置于馆阁宜矣未几改判集贤院出为山南东道行军司马未行改镇安军行军司马事在张洎传真宗尹京妙选僚佐驿召为左谏议大夫与毕士安并充开封府判官召对便殿谕以辅导意东宫建属兼左庶子【按涑水记闻作兼太子谕德侍读】迁给事中即位拜工部侍郎枢密直学士俄兼秘书监咸平初加礼部侍郎二年以衰疾求解近职改兵部仍兼秘书监入谢命坐劳之曰图书之府清净无事俾卿得以养性也是秋特置翰林侍读学士命与夏侯峤吕文仲并为之赐宴秘阁且褒以诗未几以足疾请告车驾北巡力疾辞于苑中帝顾谓曰卿勉进医药比见当不久也及驻蹕大

名特降手诏存谕明年春正月车驾还又遣使临问卒
年八十赠兵部尚书【按涑水记闻作赠仆射又按东都事畧载仁宗时特赠太子太师
谥文庄】录其外孙宋绶太常寺太祝侄孙偃集并
同学究出身徽之纯厚清介守规矩尚名教尤疾非道以干进者尝言温仲舒寇准用博
击取贵位使后辈务习趋竞礼俗寢薄世谓其知言寡
谐于俗唯李昉王佑深所推服与石熙载李穆贾黄中为文义友自为郎官御史朝廷即
待以旧德善谈论多识典故唐室以来士族人物悉能
详记好吟咏每对客论诗终日忘倦无子一女适宋氏后徽之妻王卒及葬复以缙帛赐
其家

杨澈

杨澈

杨澈字晏如徽之宗人也世家建阳父思进晋天福中北渡海因家于青州之北海
累佐使幕澈幼聪警七岁读春秋左氏传即晓大义周
宰相李谷召令默诵一无遗误谷甚异之年十六思进为镇赵从事会昭庆令缺使府命
澈假其任时河决邻郡府督役甚急澈部徒数于径大
泽中多芦苇令采刈为筏顺流而下既至执事者讶以后期俄而苇筏继至骇而问之澈
以状对乃更嗟赏太祖建隆初举进士时窦仪典贡部
谓澈文词敏速可当书檄之任调补河内主簿再迁青州司户参军知州张全操多不法
澈鞫狱平允无所阿畏太祖知其名召试禁中改著作
佐郎出知渠州江南平改通判虔州令就大将曹彬分兵以行既入境伪帅郭再兴拥兵
自固澈单骑直趋其垒谕以朝廷威信再兴即奉符以
代澈悉料城中军士之勇壮者凡五百人为一纲部送京师土豪黎罗二姓聚众依山谋
乱澈率兵平之擒二豪械送阙下迁右赞善大夫知淄
州事亲以孝闻求便侍养徙通判青州三迁祠部员外郎复知淄州又知舒州累转祠部
郎中咸平初遴选王府僚佐以澈为雍王府记室参军
加度支郎中景德初车驾幸澶渊王为东京留守撤迁兵部郎中充留守判官军巡囚逸
王惊而感疾及薨又得闺门残忍之状坐辅导不善免
官未几起为祠部郎中卒年七十四子峦淳化进士职方员外郎

△吕文仲

吕文仲字子臧歙州新安人父裕南唐歙州录事参军文仲在江左举进士调补临
川尉再迁大理评事掌宗室书奏入朝授太常寺太祝
稍迁少府监丞预修太平御览广记文苑英华改著作佐郎以本官充翰林侍读直宿御
书院与侍书王着更宿侍书学葛湍亦直禁中太宗暇
日问文仲以书史着以笔法湍以字学雍熙初文仲迁著作佐郎副王着使高丽复命改

左正言巡抚福建未几加左谏议大夫淳化中与陈尧叟并兼关西巡抚使时内臣方保吉专干权酷威制郡县民疲吏扰变易旧法讼其掎克者甚众文仲等具奏其实太宗怒甚亟召保吉将劾之反为保吉所讼下御史验问文仲所坐皆细事而素巽懦且耻与保吉辩对因自诬伏遂罢职既而太宗知其由复令直秘阁踰月再为侍读迁起居舍人兵部员外郎咸平二年拜工部郎中充翰林侍读学士又知审刑院六年授御史中丞景德中鞫曹州奸民赵谏狱谏多与士大夫交游内出姓名七十余人令悉穷治文仲请对言逮捕者众或在外郡苟悉索之虑动人听帝曰卿执宪当嫉恶如讎岂公行党庇邪文仲顿首曰中司之职非徒绳纠愆违亦当顾国家大体今纵七十人悉得奸状以陛下之慈仁必不尽戮不过废弃而已但籍其名吏察其为人置于冗散或举选对扬之日摈斥之未为晚也帝从其言三年迁工部侍郎复为翰林侍读学士文仲久居禁近颇周密勤慎改刑部侍郎充集贤院学士未几卒录其子永为奉礼郎文仲富词学器韵淹雅其使高丽也善于应对清静无所求远俗悦之后有使高丽者必询其出处然性颇齷齪不为时论所许

△王着

王着字知微自言唐相石泉公方庆之后世家京兆渭南祖贲广明中从僖宗入蜀遂为成都人贲仕王建为雅州刺史父景瓌万州别驾着伪蜀明经及第历平泉百丈永康主簿蜀平赴阙授隆平主簿凡十一年不代着善书太宗以字书讹舛欲令学士删定少通习者太平兴国三年转运使侯陟以著名闻改卫寺丞史馆祗候委以详定篇韵六年召见赐绯加著作佐郎翰林侍书与侍读更直于御书院【按长编载王着加著作佐郎翰林侍书事在太平兴国七年六月】太宗听政之暇尝令中使王仁睿持御札示着着曰未尽善也太宗临学益勤又以示着着答如前仁睿诘其故着曰帝王始攻书或骤称善则不复留心矣久之复以示着着曰功已至矣非臣所能及其后真宗尝对宰相语其事且嘉着之善于规益雍熙二年迁左拾遗使高丽端拱初加殿中侍御史三年卒录其子嗣复为奉礼郎【按宋史此下有吕佑之传无事迹足录今从删】

△潘慎修

潘慎修字成德泉州莆田县人父承佑仕闽后归江南仕李景至刑部尚书致仕慎修少以父任为秘书省正字累迁至水部郎中兼起居舍人开宝末王师征江南李煜遣随其弟从镒入贡买宴钱求缓兵留馆怀信驿旦夕捷

书至邸吏督从镒入贺慎修以为国且亡当待罪何贺也自是每羣臣称贺从镒即奉表请罪太祖嘉其得体遣中使慰谕供帐牢饩悉加优给煜归朝以慎修为太子右赞善大夫煜表求慎修掌记室许之煜卒改太常博士厯膳部仓部考功三员外通判寿州知开封县又知湖梓二州淳化中秘书监李至荐之命以本官知直秘阁俄与直昭文馆韩援使淮南巡抚累迁仓部考功二部郎中咸平中又副刑昺为两浙巡抚使俄同修起居注景德初上言衰老求外任真宗以儒雅宜留秘府止听解记注之职数月擢为右谏议大夫翰林侍读学士从幸澶州遘寒疾诏令肩輿先归明年卒年六十九疾亟精爽不乱托陈彭年草遗奏不为诸子干泽但以主恩未报为恨帝悯之录其子汝士为大理评事汝砺为奉礼郎慎修风度酝籍博涉文史先是江南旧臣言李煜闇懦事多过实真宗以问慎修对曰煜非懵理若此何享国十余年他日对宰相语及之且言慎修温雅不忘本得臣子之操深嘉奖之当时士大夫与之游者咸推其素尚然颇恃前辈待后进倨慢人以此少之汝士至工部员外郎直集贤院

△杜镐

杜镐字文周常州无锡人父昌业南唐虞部员外郎镐幼好学博通经史兄为法官尝有子毁父画像为旁亲所讼疑其法不能决镐曰僧道毁天尊佛像可比也兄甚奇之举明经解褐集贤校理入直澄心堂江南平授千乘县主簿太宗即位江左旧儒多荐其能改国子监丞崇文院检讨会将祀南郊彗星见宰相赵普召镐问之镐曰当祭而日食犹废况谪见如此乎普言于帝即罢其礼迁著作佐郎改太子左赞善大夫厯殿中丞国子博士加秘阁校理太宗观书秘阁询镐经义进对称旨即日改虞部员外郎再迁驾部员外郎判太常礼院与朱昂刘承珪编次馆阁书籍改直秘阁会修太祖实录命镐检讨故事以备访问景德初置龙图阁待制首以镐为之加都官郎中预修册府元龟改司封郎中四年拜右谏议大夫龙图阁直学士赐袭衣金带班在枢密直学士下时特置此职儒者荣之大中祥符中同详定东封仪注迁给事中三年又置本阁学士迁镐工部侍郎充其职进秩礼部侍郎六年卒年七十六录其子渥为大理寺丞及三孙官镐博闻强记凡所检阅必戒书吏云某事某书在某卷几行覆之一无差误每得异书多召问之镐必手疏本末以闻顾遇甚厚士大夫有所著撰多访以古事虽晚辈卑品请益应荅无倦年踰五十犹日治经史数十卷或寓直馆中四鼓则起诵春秋所居僻陋仅庇风雨处之二十载不迁徙燕居暇日多挈醪饌以待宾友性和

易清素有懿行士类推之

△查道

查道字湛然歙州休宁人祖文徽仕南唐至工部尚书父元方亦仕李煜为建州观察判官王师平金陵卢绛据歙州遣使传檄至郡元方斩其使及绛禽太祖闻元方所为优奖之拜殿中侍御史知泉州卒道幼沈嶷不羣罕言笑喜亲笔砚文徽特爱之未冠以词业称侍母渡江奉养以孝闻母尝病思鳧羹方冬苦寒市之不获道泣祷于河凿冰取之得鳧尺许以馈又刲臂血写佛经母疾寻愈后数年母卒绝意名宦游五台将落发为僧一夕震雷破柱道坐其下了无怖色寺僧异之咸劝以仕端拱初举进士高第解褐馆陶尉曹彬镇徐州辟为从事深被礼遇改兴元观察推官寇准荐其才授著作佐郎淳化中蜀寇叛命道通判遂州召对出御书厯俾录其课给以实奉至道三年有使两川者得道公正清洁之状以闻优诏嘉奖迁秘书丞俄徙知泉州时寇党何彦惠集其徒二百余止西充之大木槽诏书招谕之未下咸请发兵殄之道曰彼愚人惧罪欲延命尔遂微服单马数仆不持尺刃间关林壑百里许直趋贼所谕以诏抚意或识之曰郡守也尝闻其仁是盗害我者即相率投顺罗拜号呼请罪悉给券归农驿奏玺书褒谕咸平四年代归上言曰朝廷命转运使副使不惟审度金谷盖以察廉郡县庶臻治平以召和气今观所至或匪尽公盖无惩劝之科致有因循之弊望自今每使回日先令具任内曾荐举才识者若干奏劄贪猥者若干朝廷议其否臧以为赏罚从之俄出知宁州会举贤良方正之士李宗谔以道名闻策入第四等拜左正言直史馆未几出为西京转运副使六年始令三司使分部置副召入拜工部员外郎充度支副使道儒雅迂缓治剧非所长卞袞为盐铁副使与道同候对将升殿遽出奏牍请道同署及帝询道不能对遂以本官罢出知襄州无愠色大中祥符元年归直史馆迁刑部员外郎预修册府元龟三年进秩兵部为龙图阁待制加刑部郎中判吏部选事进右司郎中真宗退朝之暇召冯元讲易便坐惟道与李虚己李行简预焉天禧元年以耳聩难于对问表求外任得知虢州将行帝御龙图阁饮饯秋蝗灾民歉道不候报出官廩米以赈又设粥糜救饥者给州麦四千斛为种于民民赖以济所全活万余人二年卒年六十四道性淳厚有犯不较所至务宽恕胥吏有过未尝笞罚民讼逋负者或出己钱代偿以是颇不治尝出按部路侧有佳枣从者摘以献道即计直挂钱于树而去儿时尝戏画地为大第曰此当分贍孤遗及居京师家甚贫多聚亲族之惇独者禄赐所得散施随尽不以屑意与人交情分切至废弃孤

露者待之愈厚多所周给初赴举贫不能上亲族哀钱三万遗之道出滑台过父友吕翁家翁丧贫窶无以葬其母兄将鬻女以襄事道倾褚中钱为助且为其女择壻别加资遣又故人卒贫甚质女婢于人道为赎嫁士族搢绅服其履行子循之 【按宋史此下有道从兄陶附传陶居官持法深刻无善绩足录今从删】

钦定续通志卷三百二十九

●钦定续通志卷三百三十 列传一百三十一
列传

宋 【三十四】

○宋三十四

鞠咏	刘随	曹修古	郭劝【源明】	段少连	彭
乘 嵇颖	梅挚	司马池【旦			
里朴】	李及	燕肃【度】	蒋堂	刘夔	马亮

陈希亮

鞠咏

刘随

曹修古

郭劝 【郭源明】

段少连

彭乘

嵇颖

梅挚

司马池

李及

燕肃

蒋堂

刘夔

马亮

陈希亮

△鞠咏

鞠咏字咏之开封人十岁而孤好学自立举进士试秘书省校书郎知钱塘县改著作郎知山阴县仁宗即位以太常博士召为监察御史钱惟演自亳州来朝 【按宋史钱惟演传云改保大军节度使知河阳踰年请入朝此作自亳州来朝两传互异】 图入相咏言惟演儉险太

后遣内侍持奏示之惟演顾望不行咏语谏官刘随曰若相惟演当取白麻廷毁之惟演闻乃亟去大安殿柱生芝草召羣臣就观咏言陛下新即位河决未塞霖雨害稼宜思所以应灾变愿陛下以援进忠良退斥邪佞为国宝以训劝兵农丰积仓廩为天瑞草木之怪何足尚哉时王钦若复相咏数睥睨其短钦若心忌之会崇俊入朝失仪咏言崇俊少在边今老不足罪钦若奏咏废朝廷仪出通判信州又坐鞫陈绛狱失实徙邵州钦若卒御史中丞王臻奏还咏殿中侍御史为三司盐铁判官曹利用贬死利用尝所荐擢者多领兵守边朝廷欲罢去之咏请一切毋治天圣六年夏大星昼陨有声如雷咏条五事上之因言太子少保致仕晁迥虽老而有器识宜蒙访对其必有补又言三司使胡则丁谓党也性贪巧不可任利权河北京师旱饥奏请出太仓米十万石振饥民江淮制置使锺离瑾因奏计多致东南物赂权贵咏请御史台劾状帝面谕瑾亟还所部以尚书礼部员外郎兼侍御史知杂事权同判吏部流内铨为三司盐铁副使八年特置天章阁待制以咏及范讽为之定国军节度使张士逊入覲冀得再用咏奏曰曹利用擅威福士逊与之共事相亲厚援荐以至相位陛下以东宫僚属用之臣愿割旧恩伸公义趣使之藩士逊乃赴镇明年咏卒自号深宁子 【按宋史此上有孔道辅传及道辅子宗翰附传今已改入孔氏后传附识】

△刘随

刘随字仲豫开封考城人以进士及第为永康军判官军无城堞每伐巨木为栅坏辄以他木易之颇用民力随因令环植杨柳数十万株连属为限界民得不扰属县令受赇鬻狱转运使李士衡托令于随不从士衡愤怒乃奏随苛刻罢归后改大理寺丞为详断官李溥以赃败事连权贵有司希旨不穷治随请再劾之卒抵溥罪晁迥荐通判益州吕夷简安抚川陕又言其材以太常博士改右正言坐尝为开封府发解巡捕官而不察举人私以策辞相授降监济州税稍徙通判晋州还朝迁右司谏为三司户部判官随在谏职数言事尝言今之所切在于纳谏其余守常安靖而已时下诏蜀中选优人补教坊随以为贱工不足辱诏书又劾奏江淮发运使锺离瑾载奇花怪石数十艘纳禁中及赂权贵累疏论丁谓奸邪不宜还之内地胡则谓之党既以罪出陈州不当复进职王钦若既死诏塑像茅山列于仙官随言钦若赃污无忌惮考其行岂神仙耶宜察其妄又言利瓦伊以词臣求换武职非所以励廉节前后所论甚众帝既益习天下事而太后犹未归政随请军国常务专禀帝旨又谏太后不宜数幸外家太后不悦会随请外出知济州改起居郎久之迁尚书刑部员外

郎入兼侍御史知杂事上言比年庶官侥幸请托或对见之际涕泗祈恩或绩效甚微銜鬻要赏亦有藩翰之臣请求靡厌按察之司燕安顾望以容奸为大体以举职为近名以巧诈为贤以恬退为拙以至贪残者渎于货财老疾者不知止足请申儆之朝廷为下诏戒中外未几权同判吏部流内铨以长定格从事吏不得为奸改三司盐铁副使使契丹以病足痹辞不能拜及还为有司劾奏夺一官出知信州徙宜州再迁工部郎中应天府召为户部副使改天章阁待制卒随与孔道辅曹修古同为言官皆以清直闻随临事明锐敢行在蜀时人号为水晶灯笼云

△曹修古

曹修古字述之建州建安人进士起家累迁秘书丞同判饶州宋绶荐其材召还以太常博士为监察御史上四事曰行法令审故事惜材力辨忠邪辞甚切至又奏唐贞观中尝下诏令致仕官班本品见任上欲其知耻而勇退也比有年逾八十尚在班行心力既衰官事何补请敕文武官年及七十上书自言特与迁官致仕仍从贞观旧制因着为令修古尝偕三院御史晨朝将至朝堂黄门一人行马不避呵者止之反为所詈修古奏前史称御史台尊则天子尊今黄门侮慢若此请付所司劾治帝立命笞之晏殊以笏击人折齿修古奏殊忿躁亡大臣体司天监主簿苗舜臣等尝言土宿留参太白昼见诏日官同考定舜臣等坐妄言灾变被罚修古奏言日官所定希旨悦上未足为信今罚舜臣等其事甚小然恐人人自此畏避天变不告所损至大禁中以翡翠羽为服玩诏市于南越修古以谓重伤物命且真宗时尝禁采玃毛故事未远命罢之时颇崇建塔庙议营金阁费不可胜计修古极陈其不可出知歙州徙南剑州复为开封府判官历殿中侍御史擢尚书刑部员外郎知杂司事权同判吏部流内铨会太后兄子刘从德死录其姻戚至于厮役几八十人修古与杨偕郭劝段少连交章论列太后怒命皆削一官以修古为工部员外郎同判杭州未行改知兴化军会赦复官卒修古立朝慷慨有风节当太后临朝权幸用事人人顾望畏忌而修古遇事辄言无所回挠家贫不能归葬宾佐贖钱五十万季女泣白其母曰柰何以是累吾先人也卒拒不纳帝思其忠特赠右谏议大夫【按修古后因曹覲被害赠尚书工部侍郎见覲传】修古无子以兄子覲为后覲知封州侂智高乱死之见忠义传弟修睦性廉介自立与修古同时举进士有声乡里致仕年五十一曹氏自修古以直谅闻其女子亦能不累于利至覲又能死其官而修睦亦恬于仕进不待老而归世以是贤之

△郭劝【郭源明】

郭劝字仲褒郢州须城人举进士授盩化军判官累迁太常博士通判密州特迁尚书屯田员外郎梓州路转运判官以母老固辞复为博士通判莱州州民霍亮为仇人诬罪死吏受赇傅致之劝为辨理得免擢殿中侍御史时宋绶出知应天府杜衍在荆南劝言绶有辞学衍清直不宜处外又言武胜军节度使钱惟演迁延不赴陈州观望相位弟惟济任观察使定州总管自请就迁留后胡则以罪罢三司使乃迁工部侍郎集贤院学士请趣惟演上道罢惟济兵权追则除命又论刘从德遗奏恩滥贬太常博士监维州税改祠部员外郎知莱州复为侍御史判三司盐铁勾院郭皇后废议选立陈氏劝谏郭氏非有大故不当废陈氏非世阀不可以偪宸极疏入后已废而陈氏议遂寝迁兵部员外郎兼起居舍人同知谏院马季良自贬所求致仕朝廷从之劝言致仕所以待贤者岂负罪贬黜之人可得请追还敕诰又言发运使刘承德献轮扇浴器请付外毁之以戒邪佞赵元昊袭父位劝为官告使所遗百万悉拒不受还兼侍御史知杂事权判流内铨迁工部郎中度支副使拜天章阁待制知延州元昊将山遇率族来归且言元昊将反劝奏却之是冬元昊果反遣伪官来劝视其表函犹称臣因奏元昊虽僭名号然尚称臣可渐以礼屈之遂落职知齐州改淄州数月移磁州元昊益侵边关陕扰攘言者犹指劝不当绝山遇事又降兵部员外郎知凤翔府寻复待制召权户部副使以龙图阁直学士知滑州再迁兵部郎中徙沧州又徙成德军盗起甘陵徙知郢州既而知成德军韩琦言劝所遣将张忠刘遵平贼功皆第一特诏奖谕未几召为翰林侍读学士复判流内铨改左谏议大夫权御史中丞迁给事中辞不受而请赠其祖莱阳令盩遂以为尚书祠部员外郎卫士有阴置刃衣篋中从勾当皇城司杨景宗入禁门为阍者所得景宗不以闻劝请先治景宗罪遂贬景宗复为侍读学士同知通进银台司劝性廉俭居无长物及再为侍读曰吾年七十可以归矣章上不得谢后二年卒子源明治平中为太常博士会御史知杂事吕海等奏弹中书议追崇濮安懿王典礼非是被黜以源明补监察御史里行源明乞免除命请追海等遂听免后以职方员外郎知单州卒

△段少连

段少连字希逸开封人倜傥有识度举服勤词学为试秘书省校书郎知崇阳县崇阳剧邑自张咏为令有治状其后惟少连能继其风迹累迁太常博士论刘从德遗奏恩滥降秘书丞监涟水军酒税复为博士通判天雄军仁宗亲政召为殿中侍御史与孔道辅等伏阁言郭皇后不当废少连坐赎未几除开封府判官改尚书刑部员外郎直集贤院为三司度支判官

出为两浙转运副使 【按东都事畧作转运使】 所至吏胥不能为奸有过能自改者犹保任之秀州狱死无罪人时少连在杭吏畏恐谋伪为死者服罪歟未及缀属少连已入城讯狱吏具服请罪是时郑向守杭无治才讼者不服往往自州出径趋少连少连处决莫不尽其理徙使淮南兼发运司事加兵部员外郎又徙陕州驸马都尉柴宗庆知陕州纵其下挠民少连劾奏之入兼侍御史知杂事为三司度支副使擢工部郎中天章阁待制知广州时元昊反范仲淹荐少连才堪将帅迁龙图阁直学士知泾州改渭州命未至而卒子仲坚 【按宋史本传不载少连有子据隆平集补】 少联通敏有才遇事无大小决遣如流不为权势所屈既卒仁宗叹息之

△彭乘

彭乘字利建益州华阳人少以好学称州里进士及第以亲老乞侍养居数日授汉阳军判官遂得请以归久之有荐其文行者召试除馆阁校勘固辞还家后复除凤州团练推官天禧初用寇准荐为馆阁校勘预校正南北史隋书改秘书省著作佐郎迁本省丞集贤校理恳求养亲得知普州蜀人得守乡郡自乘始普人鲜知学乘为兴学召其子弟为生员教育之乘父卒既葬有甘露降于墓柏人以为孝感累改夔州路转运使会土贼田忠霸诱下溪州蛮将内寇乘适按郡至境大集官吏勒兵下山以备贼贼遁去因遣人问之其党斩忠霸夷其家召修起居注擢知制诰累迁工部郎中入翰林为学士领吏部流内铨三班院为羣牧使卒御史知杂何郯论请赠官不许诏一子给奉终丧初修起居注缺中书舍人而乘在选中帝指乘曰此老儒也雅有恬退名无以易之及召见谕曰卿先朝旧臣久补外而未尝自言对曰臣生孤远自量其分安敢过有所望帝颇喜之乘质重寡言性纯孝不喜事生业聚书万余卷皆手自刊校蜀中所传书多出于乘云

△嵇颖

嵇颖字公实应天宋城人父适尝为石首主簿民有父子坐重系府檄适按之抵其父于法而子获免父死假人言曰主簿仁人也行且生贤子后必大明年颖生天圣中进士及第授蔡州团练判官王曾知青州徙天雄军皆辟为从事后用曾荐迁太子中允为集贤校理同修起居注擢知制诰累迁尚书兵部员外郎召入翰林为学士未及谢卒诏以诰敕衣带鞍马赐其家颖举进士时王曾张知白相继为南京留守见颖谨厚笃学谓其子弟曰若曹师表也张尧封尝从颖学所为文多留颖家其后尧封女入禁中为修媛甚被宠幸令其弟化基诣颖求编次其父

稟为序以献之颖不答亦不以献

△梅挚

梅挚字公仪成都新繁人进士起家大理评事知蓝田上元县徙知昭州通判苏州

【按东都事畧作举进士稍迁太常博士知苏州】

二浙饥官贷种食已而督偿颇急挚言借贷本以行惠乃重困民诏缓输期庆厯中擢殿中侍御史时数有灾异引洪范上变戒谓宜躬责修德

以回上帝之眷佑徙开封府推官迁判官僧常莹以简札达宫人鞏官郑玉醉殴巡卒挚请悉杖配之改度支判官进侍御史 【按东都事畧

作为御史权知谏院】 论石元孙不死行陈系縲还国之辱也不斩无以厉边臣再奏不报李用和除宣徽使加同中书门下平章事挚言国初

杜审琼亦帝舅也官止大将军李继隆累有战功晚年始拜使相祖宗慎名器如此今不宜急授无功以户部员外郎兼侍御史知杂事权判大

理寺言权陕西转运使张尧佐非才繇宫掖以进恐上累圣德又奏减资政殿学士员召侍御官同议政复百官转对帝谓大臣曰梅挚言事有

体以为户部副使会宴契丹使紫宸殿三司副使当坐殿东庑下同列有谓典宴例坐殿上而大宴当止殿门外尔因不即坐趋出降知海州徙

苏州入为度支副使初河北岁饥三司益漕江淮米饷河北后江淮饥有司尚责其数挚奏减之擢天章阁待制陕西都转运使还判吏部流内

铨进龙图阁学士 【按东都事畧及欧阳修有美堂记俱作龙图阁直学士】 知滑州

州岁备河调丁壮伐滩苇挚奏用州兵代之河大涨将

决夜率官属督工徒完堤水不为患诏奖其劳勾当三班院同知贡举请知杭州帝赐诗宠行累迁右谏议大夫徙江甯府又徙河中卒挚性淳

静不为矫厉之行政迹如其为人平居未尝问生业云

△司马池

司马池字和中自言晋安平献王孚后征东大将军阳葬安邑澜洄曲后魏析安邑置夏县遂为县人池少丧父家赀数十万悉推诸父而

自力读书时议者以蒲版窦津大阳路官运盐回远闻乃开■〈山含〉口道自闻喜逾山而抵垣曲咸以为便池谓人曰昔人何为舍径而求

迂殆必有未便者众不以为然未几山水暴至盐车人牛尽没入河众乃服举进士当试殿庭而报母亡友匿其书池心动夜不能寐曰吾母素

多疾家岂无有异乎因语其友友止以母疾告遂号恸而归后中第 【按隆平集载池登第在景德二年】 授永甯主簿厯建德郟县尉蜀人

妄言戍兵叛蛮将入寇争逃山谷间池摄县事会上元张灯纵民游观凡三夕民心遂安调郑州防御判官知光山县禁中营造诏诸州调竹木

州符期三日毕输池以土不产大竹转市薪黄非三日可致乃更与民自为期约过不输者罪之既而输竹先诸县盛度荐于朝改秘书省著作佐郎监安丰酒税徙知小溪县枢密使曹利用奏为羣牧判官辞不就朝廷固授之利用尝委括大臣所负进马价池曰令之不行由上犯之公所负尚多不先输何以趣他人利用惊曰吏给我已输矣亟命送官数日而诸负者皆入利用贬其党畏罪从而毁短者甚众池独称利用枉朝廷卒不问会诏百官转对池言唐制门下省诏书之出有不便者得以封还今门下虽有封驳之名而诏书一切自中书以下非所以防过举也内侍皇甫继明领估马司自言估马有羨利乞迁官事下羣牧司阅无羨利继明方用事自制置使以下皆欲附会为奏池独不可除开封府推官敕至阁门为继明党所沮罢知耀州擢利州路转运使知凤翔府召知谏院上表恳辞仁宗谓宰相曰人皆嗜进而池独嗜退亦难能也加直史馆复知凤翔有疑狱上献大理辄复下掾属惶遽引咎池曰长吏者政事所繇非诸君过乃独承其罪有诏勿劾岐阳镇巡检夜饮富民家所部卒执之俾为约不敢复督士卒而后释其缚池捕首恶诛之巡检亦坐废累迁尚书兵部员外郎兼侍御史知杂事尝言陕西用兵无宿将刘平好自用而少智谋必误大事后平果败更户部度支盐铁副使岁满中书进名帝曰是固辞谏官者擢天章阁待制知河中府徙同州又徙杭州池性质易不饰厨传剽剧非所长转运使江钧张从革劾池决事不当十余条及稽留德音降知虢州初转运使既奏池会吏有盗官银器械州狱自陈为钧掌私厨出所卖过半又越州通判载私物盗税乃从革之姻遣人私请或谓池可举劾以报池曰吾不为也人称其长者徙知晋州卒 【按苏轼撰司马光神道碑载池终兵部郎中赠太师温国公】 子旦光光自有传从子里

司马旦

司马里

司马朴

司马旦

旦字伯康清直敏强虽小事必审度以父任为秘书省校书郎历郑县主簿郑有妇蔭讼夺人田者家多金钱市党买吏合为奸谩十年不决旦取案一阅情伪立见黜吏十数辈冤者以直又并元庆豪欺乡里莫敢谁何旦擒致于法时旦年尚少上下易之自是惊服吏捕蝗因缘搔民旦言蝗民之仇宜听自捕输之官后着为令知祁县岁大旱人乏食羣盗剽斂富家巨室至以兵自备旦召富者开以祸福于是争出粟减直

以棗犹不失其羸饥者获济盗患亦弭举监在京杂物库知宜兴县其民囂讼旦每狱必穷根株痛绳之校系县门民稍以诋冒为耻时王安石守常州开运河调夫诸县旦言役大而亟民有不胜则其患非徒不可就而已令诸县岁递一役虽缓必成安石一听秋大霖雨民苦之多自经死役竟罢厯知梁山军安州治郡有大体所施設取于适理便事再监凤翔太平宫以熙寧八年致仕厯官十七迁至大中大夫元佑二年卒年八十二旦澹薄无欲奉养苟完人不见其贵与弟光尤友爱终始人无间言凡光平时所与论天下事旦有助焉及光被门下侍郎召固辞不拜旦引大义语之光幡然就位英宗即位例以亲属入贺得官时旦在梁山诸孙未仕者皆不遣入惟遣其从兄子稟旦与人交以信义喜周其急尝有以罪免官贫不能存者月分俸济之其人无以报愿以女为妾旦惊谢亟出妻奩中物使嫁之旦与文彦博程公珣席汝言为同年会赋诗绘像世以为盛事比唐九老子良试将作监主簿富永承议郎陕州通判宏陈留令宏子朴

司马里

里字昭远进士释褐授威胜军判官改大理寺丞庞籍为鄜延经畧使奏通判鄜州州将武人不法里平居与之驩甚临事正色力争不少假借性廉静质直所至有惠政每罢官至京师未尝有所谒视审官榜久阙人所不取者乃受之而去后知干州为太常少卿而卒

司马朴

朴字文季少育于外祖范纯仁绍圣党事起父宏上书论辨得罪纯仁责永州疾失明客至必令朴导以见时方七岁进揖应对如成人客皆惊叹以纯仁遗恩得官宏死徒跣负柩还调晋寧军士曹参军通判不法转运使王似讽朴伺其过朴不可曰下吏而陷长官不唯乱常人且不食吾余矣死不敢奉教似贤而荐之靖康初入为虞部右司员外郎金人次汴郊命朴使之问朴家世具以告喜曰贤者之后也待之加礼谕以亟求讲解朴复命任事者疑不决都城陷钦宗思朴之言以为兵部侍郎二帝将北迁又贻书请存立赵氏金人憚之挟以北去且悉取其孥开封仪曹赵鼎为匿其长子倬于蜀故得免建炎登极赦至燕朴私令赍诣徽宗为人所告金主怜其忠释之徽宗崩朴与奉使朱弁在燕共议制服弁欲先请朴曰为臣子闻君父丧当致其哀尚何请设请而不许奈何遂服斩衰朝夕哭金人亦义而不问又遣朱松年间行以金人情实归报宋因王伦出使持黄金赐朴伦还言金命朴为行台左丞朴辞而止益重之后卒于真定讣闻诏称其忠节显著赠兵部尚书谥曰忠洁

△李及

李及字幼几其先范阳人后徙郑州举进士再调升州观察推官寇准荐其才擢大理寺丞知兴化军以殿中丞通判曹州州民赵谏者素无赖持郡短长纵为奸利及受命谏在京师乃谒及及不之见慢骂而去投匿名书诬及因之毁朝政会上封者发谏事命转运使与及察其状及条上谏前后所为不道诏御史劾得其实斩于都市及由是知名擢知陇州初置提点刑狱以及使陕西特迁一官累迁太常少卿知秦州议者以及谨厚非守边才及至秦州州将吏亦颇易之会有禁卒白昼攫妇人金钗于市吏执以来及方坐观书召之使前略加诘问其人服罪及亟命斩之观书如故于是将士皆惊服改左司郎中枢密直学士以右谏议大夫召还再迁尚书工部侍郎历知杭州郢州应天河南府召拜御史中丞卒年七十特赠礼部尚书谥恭及资质清介治尚简严喜慰荐下吏乐道人善在杭州数年未尝市吴中物比去唯市白乐天集在河南杜衍为提点刑狱间与衍会具甚疏薄他日中贵人用事者至亦无加品衍叹其清德无子以弟之子为后

△燕肃

燕肃字穆之青州益都人父峻慷慨任侠杨光远反时率其属迎符彦卿遂家曹州肃少孤贫游学举进士补凤翔府观察推官寇准知府事荐改秘书省著作佐郎知临邛县县民尝苦吏追扰肃削木为牒民讼有连逮者书其姓名使自召之皆如期至徙知考城通判河南府召为监察御史准方知河南奏留之迁殿中侍御史提点广南西路刑狱迁侍御史徙广南东路还为丁谓所恶出知越州徙明州俗轻悍喜鬪肃下令独罪先殴者于是鬪者为息入直昭文馆为定王府记室参军判尚书刑部建言京师大辟一覆奏而州郡之狱有疑及情可悯者上请多为法司所驳乃得不应奏之罪愿如京师例许覆奏遂诏疑狱及情可悯者上请语在刑法畧其后大辟上请者多得贷议自肃始擢龙图阁待制权知审刑院知梓州累迁左谏议大夫历知亳青二州兼京东安抚使入判太常寺兼大理寺复知审刑肃言旧太常钟磬皆设色每三岁亲祠则重饰之岁既久所涂积厚声益不协乃诏与李照宋祁同按王朴律即划漆考击合以律准试于后苑声皆协又诏与章得象冯元详刻漏进龙图阁直学士知颍州徙邓州官至礼部侍郎致仕卒肃喜为诗性精巧画入妙品图山水罨布浓淡意象微远尤善为古木折竹尝造指南记里鼓二车及欹器以献又上莲花漏法诏司天台考于钟鼓楼下云不与崇天厯合然肃所至皆刻石以记其法州郡用之以候昏晓世推其精

密云子度孙瑛

燕度

燕度

度字唐卿登进士第知陈留县京东蝗年饥盗发度劝邑豪出粟六万以济民又行保伍法以察盗善状日闻通判永兴军三司使王尧臣举为户部判官以伐闾浅始命权发遣遂为故事出知滑州与黎阳对境河埽下临魏都霖潦暴至薪刍不属度曰魏实为河朔根本不可坐视成败悉以所储芟榷御之埽赖以不溃复为户部判官权河北转运副使六塔河决坐贬秩知蔡州徙福州闽故多盗度请假事权制摄一道遂加兵马钤辖入为户部副使以右谏议大夫知潭州卒年七十度有心计凡六佐大农庆厯中三司请榷河北盐度言川陕不榷酒河北不禁盐此祖宗顺民俗不易之制也榷之非是会张方平亦论之议遂寝 【按宋史此下有燕肃之孙瑛附载瑛在岭峽七年括南海犀珠香药奉宰相内侍人目之为香燕靖康初知河阳金兵攻城为乱兵所害无善迹足录今从删】

△蒋堂

蒋堂字希鲁常州宜兴人擢进士第为楚州团练推官满岁吏部引对真宗览所试判善之特授大理寺丞知临川县县富人李甲多为不法前令莫能制堂戒谕不悛白州以兵索其家得僭乘輿物置于死厯通判眉许吉楚州以太常博士知泗州召为监察御史禁中火有司请究所起多引宫人属吏堂言火起无迹安知非天意陛下宜修德应变有司乃欲归咎宫人以属吏而赐之死是重天谴也诏原之论奏郭皇后不当废坐赎再迁侍御史判三司度支勾院出为江南东路转运使徙淮南兼江南发运事时废发运使上封者屡以为非便堂言唐裴耀卿刘晏第五琦李巽裴休皆尝为江淮河南转运使不闻别置使名国朝卞衮王嗣宗刘师道亦止为转运兼领发运司事而岁输京师常足时虽用其议后卒复在江淮岁荐部吏二百人或谓曰一有谬举且得罪何以多为堂曰十得二三亦足报国坐失按蕲州王蒙正故入部吏死罪降知越州州之鉴湖马臻所为溉田八千顷食利者万家前守建言听民自占多为豪右所侵堂奏复之徙苏州入判刑部徙户部勾院厯户部度支盐铁副使安抚梓夔路擢天章阁待制江淮制置发运使先是发运使上计造大舟数十载江湖物入遗京师权贵堂曰吾岂为此岁入自可附驿奏也前后五年未尝一至京师就除河东路都转运使未行知洪州改应天府累迁左司郎中知杭州以枢密直学士知益州庆厯初诏天下建学汉文翁石室在孔子庙中堂因广其舍为学宫选属宫以教诸生士人翕然称之杨日

严在蜀有能名堂素不乐之于是节游宴减厨传专尚
宽纵颇变日严之政又建铜壶阁其制宏敞而材不预具功既半乃伐乔木于蜀先主惠
陵江渎祠又徙后土及刘禅祠蜀人浸不悦狱讼滋多
徙河中府又徙杭州苏州以尚书礼部侍郎致仕卒特赠吏部侍郎堂为人清修纯饬遇
事毅然不屈贫而乐施好学工文辞延誉晚进至老不
倦尤嗜作诗云

△刘夔

刘夔字道元建州崇安人进士中第补广德军判官累迁尚书屯田员外郎权侍御
史李照改制大乐钟磬夔以为乐之大本与政化通不
当轻易其器愿择博学之士以补卿丞凡四方妄献说以要进者请一切罢之帝善其言
厯知广州所至有廉名权三司度支副使桂阳监蛮唐
和寇边以右谏议大夫龙图阁直学士知潭州兼湖南安抚使初至遣人谕蛮酋使降不
从乃击败和于银江源进破其巢穴蛮远遁前将以帛
购蛮首至是有持首取购者按问乃辄杀平民诛之而罢购州境获安还权判吏部流内
铨知审刑院河北大水民流入京东为盗诏增京东守
备帝问谁可守郓者宰相以夔对进给事中枢密直学士以往至郓发廩振饥民赖全活
者甚众盗贼衰息赐书褒谕大臣议欲修复河故道夔
极言其不可遂罢迁工部侍郎知福州建州寻告老以户部侍郎致仕英宗即位迁吏部
卒年八十三夔尝过江东见二囚系累年矣问之曰前
此杀吉州掾徐咸疑二人所为夔为言于朝释之后果得真盗得养生术至老手足耳目
强明如少壮时不治财产所收私田有余谷则以周乡
里贫者卒前数日自作遗表以禄赐所余分亲族无子

△马亮

马亮字叔明庐州合肥人举进士为大理评事知芜湖县再迁殿中丞通判常州吏
民有因缘亡失官钱籍其赀犹不足以偿妻子连逮者
至数百人亮纵去缓与之期不踰月尽输所负罗处约使江东以亮治行闻擢知濮州会
诸路转运司置纠察刑狱官 【安东都事畧作提点
刑狱官】 福建路命亮覆讯冤狱全活者数十人迁太常博士知福州苏易简荐亮才任
繁剧召还同提点三司都勾院磨勘凭由司出知饶州
州豪白氏鹜横为闾里患亮发其奸诛之州有铸钱监匠多而铜锡不给亮请分其工之
半别置监于池州岁增铸缗钱十万迁殿中侍御史真
宗即位上书言陛下初政军赏宜速而所在不时给请遣使分督之又赦书蠲除州县逋
负而有司趣责愈急宜如赦推恩以宽民故事以亲王
尹开封地尊势重嫌隙易生愿鉴其繇以示保全亲爱之道契丹仍岁南侵河朔萧然请

修好以息边民帝善其言以亮为可用王均反以为西
川转运副使贼平主将邀功诛杀不已亮全活千余人城中米斗千钱亮出廩米裁其价
人赖以济召问蜀事会械送贼诬误者八十九人至阙
下执政欲尽诛之亮曰愚民胁从此特百之一二余窜伏山林者众今不贷之反侧之人
闻风疑惧一唱再起是灭一均生一均也帝悟悉宥之
加直史馆复遣还部时诸州盐井岁久泉涸而官督所负课系捕者州数百人亮尽释系
者而奏废其井又除属部旧逋官物二百余万还知潭
州属县有亡命卒剽攻为乡闾患人共谋杀之事觉法当死者四人亮咸贷之曰为民去
害而反坐以死罪非法意也徙升州行次江州属岁旱
民饥湖湘漕米数十舟适至亮移文守将发以振贫民因奏濒江诸郡皆大歉而吏不之
救愿罢官余令民转粟以相赈以右谏议大夫知广州
时宜州陈进初平而澄海兵从进反者家属二百余人法当配隶亮悉置不问盐户逋课
质其妻子于富室悉取以还其家海舶久不至使招来
之明年至者倍其初历知虔洪二州江陵府再迁尚书工部侍郎复知升州徙杭州加集
贤院学士先是江涛大溢调兵筑堤而工未就诏问所
以捍江之策亮赍诏祷伍员祠下明日潮为之却出横沙数里堤遂成入为御史中丞改
兵部侍郎知庐州徙江陵又徙江甯府仁宗初拜尚书
右丞复知庐州召判尚书都省知审刑院迁工部尚书知亳州又迁江甯府以太子少保
致仕 【按东都事畧作太子少傅】 卒赠尚书右仆
射亮有智畧敏于政事然其所至无廉称吕夷简少时从其父蒙亨为县福州亮见而奇
之妻以女陈执中梁适为京官田况宋庠及其弟祁为
童子时亮皆厚遇之世以亮为知人亮卒时夷简在相位有司谥曰忠肃人不以为是也
子仲甫为天章阁待制

△陈希亮

陈希亮字公弼其先京兆人唐广明中违难迁眉州青神之东山希亮幼孤好学年
十六将从师其兄难之使治钱息三十余万希亮悉召
取钱者焚其券而去业成乃召兄子庸谕使学遂俱中天圣八年进士第里人表闾曰三
儁初为大理评事知长沙县有僧海印国师与诸贵人
交通恃势据民地希亮捕治寘诸法郴州竹场有伪为券给输户送官者事觉输户当死
希亮察其非辜出之已而果得其造伪者再迁殿中丞
徙知鄆县老吏曹腆侮法以希亮年少易之希亮视事首得其罪毁淫祠数百区勒巫为
农者七十余家迁太常博士初蜀人官蜀不得通判州
事希亮以母老愿折资为县侍亲于是知临津县后为开封府司录司事福胜塔火官欲
更造度用钱三万希亮言陕西用兵愿以此馈军诏罢

之青州民赵禹上书言赵元昊必反宰相以禹狂言徙建州元昊果反禹讼所部不受亡至京自理宰相怒下开封狱希亮言禹可赏不可罪争不己帝释禹赏为徐州推官且欲以希亮为御史会外戚沈元吉以奸盗杀人希亮一问得实自惊仆死沈氏诉之诏御史劾希亮及诸掾吏希亮曰杀此贼者独我耳遂引罪坐废盗起京西富弼荐希亮可用起知房州州素无兵备民凛凛欲亡去希亮以牢城卒杂山河户得数百人日夜部勒声振山南民恃以安殿侍雷甲以兵百余人逐盗竹山甲不能戢所至为暴或疑为盗希亮勒兵阻水拒之甲下马拜请死曰初不知公官军也吏士欲斩甲以徇希亮独治为暴者十余人使甲以捕盗自赎时剧贼党军子方张转运使使供奉官崔德赞捕之德赞既失党军子遂围竹山民杀向氏父子三人梟首南阳市曰此党军子也希亮察其冤下德赞狱未服党军子获于商州诏赐向氏帛复其家流德赞通州或言华阴人张元走夏州为元昊谋臣诏徙其族百余口于房讥察出入饥寒且死希亮曰元事虚实不可知使诚有之徒坚其为贼耳此又皆其疏属无罪乃密以闻诏释之代还执政欲以为大理少卿希亮曰法吏守文非所愿愿得一郡以自效乃以为宿州州跨汴为桥水与桥争常坏舟希亮始作飞桥无柱以便往来诏赐缣以褒之仍下其法自畿邑至于泗州皆为飞桥皇佑元年移滑州未行诏提举河北便余都转运使魏瓘劾希亮擅增损物价已而瓘除龙图阁学士知开封府希亮乞廷辨既对仁宗直希亮夺瓘职知越州且欲用希亮希亮言臣与转运使不和不和得为无罪力请还滑会河溢鱼池埽且决希亮悉召河上使者发禁兵捍之庐于所当决吏民泣谏希亮坚卧不动水亦去是岁盗起宛句执濮州通判井渊以希亮为曹州不逾月悉擒其党淮南饥安抚转运使皆言寿春守王正民不任职正民坐免诏希亮乘传代之转运使调里胥米而蠲其役凡十三万石谓之折役米米翔贵民益饥希亮至除之且表其事旁郡皆得除又言正民无罪职事办治诏复以正民为鄂州久之徙希亮知庐州虎翼军士屯寿春者以谋反诛迁其余不反者数百人于庐皆不自安一日有窃入府舍将为不利者希亮笑曰此必醉耳贷而流之尽以其余给左右使令且以守仓库人为之惧希亮加亲信皆感德誓为希亮死改提点刑狱江东迁度支郎中徙河北嘉佑二年入为开封府判官改判三司户部勾院朝廷以三司事冗簿书留滞乃命希亮又兼开拆司荣州鬻鹽凡十八井岁久澹竭有司责课如初民破产籍没者三百余家希亮为言还其所籍岁蠲三十余万斤会接伴契丹使还自请补外乃以为京西转运使石塘河役兵叛其首周元自称周大王震动

汝路间希亮即轻骑出按斩元以狗流军校一人余悉遣赴役如初迁京东转运使维州
 参军王康赴官道博平大滑有号截道虎者殴康及其
 女几死吏不敢问希亮移捕甚急卒流海岛又劾吏故纵坐免者数人徐州守暴苛以细
 过籍民产数十家获小盗使必自诬抵死希亮言其状
 卒以废去数上章请老不允移知凤翔仓粟支十二年主者以腐败为忧岁饥希亮发十
 二万石贷民有司惧为擅发希亮身任之是岁大熟以
 新易旧官民皆便于阆使者入朝过秦州经略使以客礼享之侍者骄甚坏傅舍什器纵
 其徒入市掠饮食希亮闻之曰吾尝主契丹使初不敢
 暴横况此小国乎乃使持符告译者曰入吾境有秋毫不如法吾且斩若取军令状以还
 使者至罗拜庭下希亮命坐两廊饮食之护出其境无
 一人哗者英宗即位迁太常少卿狱有盗法当死僚官持不可久之盗杀守吏遁去希亮
 以前议献于朝僚官惧欲以事中希亮始州郡以酒相
 饷例皆私有之而法不可希亮以遗游士之贫者既而曰此亦私也以家财偿之遂借此
 自劾求去坐是分司西京未几致仕卒年六十四赠工
 部侍郎希亮为人清劲寡欲不假人以色自王公贵人皆严惮之见义勇为不计祸福所
 至奸民猾吏易心改行不改者必诛然出于仁恕故严
 而不残少与蜀人宋辅游辅卒于京母老子端平幼希亮养其母终身以女妻端平使同
 诸子学卒登进士第四子悦度支郎中恪滑州推官恂
 大理寺丞慥少时使酒好剑稍壮折节读书然终不遇及苏轼谪黄过岐亭识之人始知
 为慥云

钦定续通志卷三百三十

●钦定续通志卷三百三十一 列传一百三十一

列传

宋 【三十五】

○宋三十五

狄棐【遵度】 郎简 孙祖德 张若谷 石扬休 李垂

张洞 李仕衡【丕】 绪胡则 薛颜

许元 锺离瑾 孙冲 崔峰 田瑜 施昌言

杨偕 王沿【鼎】 杜杞【植枢】

杨旼 周湛 徐的 姚仲孙 陈太素【马寻杜曾】 李虚己

张傅 俞献卿 陈从易 杨大

雅

狄棐

郎简

孙祖德
张若谷
石扬休
李垂
张洞
李仕衡 【李丕绪】
胡则
薛颜
许元
锺离瑾
孙冲
崔峰
田瑜
施昌言
杨偕
王沿
杜杞 【杜植 杜枢】
杨旼
周湛
徐的
姚仲孙
陈太素 【马寻 杜曾】
李虚己
张傅
俞献卿
陈从易
杨大雅
△狄棐

狄棐字辅之潭州长沙人 【按隆平集作湘潭人考宋史地理志长沙湘潭俱属潭州下文棐谓所亲曰吾湘潭一寒士作湘潭人为是

】咸平二年举进士甲科授大理评事知分宜县历开封府司录知壁州寇准复入相乃荐通判益州擢开封府判官历京西益州路转运江淮制置发运使累迁太常少卿知广州加直昭文馆代还不以南海物自随人称其廉拜右谏议大夫龙图阁直学士权判吏部流内铨出知滑州

进给事中徙天雄军会给郊赏帛不善士卒哗噪趣府门棐不能治事闻命侍御史刘夔按视未及境众不自安棐驰白夔请给以行河事夔至诛首恶数人棐坐罢懦降知随州徙同州句当三班院进枢密直学士历知陕郑二州河中河南府复判流内铨出知扬州未行卒棐在河中时有中贵人过郡言将援棐于上前棐答以他语退曰吾官侍从可自污耶居官恺悌不为表暴死之日家无余货子

狄遵度

狄遵度

遵度字符规少颖悟笃志于学少举进士一斥于有司耻不复为以父任为襄县主簿居数月弃去好为古文其著述人多称之【按隆平集载棐子尚有遵道遵礼遵路遵度盖其次子也】

△郎简

郎简字叔廉杭州临安人幼孤贫进士及第补试秘书省校书郎知盩厔县徙福清令县有石塘陂岁久湮塞募民浚筑溉废田百余顷调随州推官及引对真宗曰简历官无过而无一人荐是必恬于进者特改秘书省著作佐郎知分宜县徙知夔州县吏死子幼赘壻伪为券冒有其货及子长屡诉不得直乃讼于朝下简劾治简示以旧牒又取伪券示之弗类始伏罪徙藤州兴学养士一变其俗藤自是始有举进士者累迁尚书度支员外郎广南东路转运使擢秘书少监知广州捕贼冯佐臣历右谏议大夫给事中知扬州徙明州以尚书工部侍郎致仕祀明堂迁刑部卒年八十有九特赠吏部侍郎简性和易平居宴语惟以宣上德救民患为意然在广州无廉称盖为子絜所累絜终尚书都官员外郎

△孙祖德

孙祖德字延仲潍州北海人进士及第初调濠州推官改大理寺丞知榆次县上书言刑法重轻以尚书屯田员外郎通判西京留守司方冬苦寒诏罢内外工作而钱惟演督修天津桥格诏不下祖德曰诏书可稽留耶卒罢役入为殿中侍御史迁侍御史章献太后疾剧祖德请还政及太后崩诸尝言还政者多进用遂擢尚书兵部员外郎兼起居舍人知谏院言郭皇后不当废获罪以赎论久之迁天章阁待制时三司判官许申因宦官阎文应献计以药化铁成铜可铸钱裨国用祖德言伪铜法所禁而官自为是教民欺也固争之出知兖徐蔡州永兴军徙凤翔府请置乡兵改龙图阁直学士知梓州累迁右谏议大夫知河中府历陈许蔡潞郓亳州应天府以疾得颍州除吏部侍郎致仕卒祖德少清约及致仕娶富人妻以规有其财已而妻悍反资以财出之子珪江东转运使

△张若谷

张若谷字德繇南剑沙县人进士及第为巴州军事推官会蜀寇掠邻郡若谷摄州事率众为守御备贼引去调全州军事推官入见真宗识其名顾曰是尝在巴州御贼者耶特改大理寺丞知蒙阳县三司言广监岁铸缙钱四十万其主监宜择人乃以命若谷岁余所铸赢三十余万缙擢知处州历江湖淮南益州路转运江淮制置发运使入为三司度支盐铁副使累迁右谏议大夫知并州先是麟府岁以缙锦市蕃部马前守辄罢之若谷以为互市所以利戎落而通边情且中国得战马亟罢之则猜阻不安奏复市如故而马入岁增进枢密直学士历知澶州成德军扬州江甯府入知审官院纠察在京刑狱知通进银台司应天府改龙图阁学士徙杭州会岁饥斥余廩为糜粥赈救之累官至尚书左丞致仕若谷素为宰相张士逊引拔然所至亦自有循良迹不激讦取名云

△石扬休

石扬休字昌言其先江都人后为眉州人少孤力学进士高第为同州观察推官迁著作佐郎知中牟县当往来之冲赋役烦重富人隶太常为乐工侥幸免役者六十余家扬休请悉罢之改秘书丞为秘阁校理开封府推官【按东都事略云以太常博士为开封府推官】累迁尚书祠部员外郎历三司度支盐铁判官坐前在开封尝失盗出知宿州顷之召入为度支判官修起居注初记注官与讲读诸儒皆得侍坐迩英阁扬休奏史官记言动当立以侍从之判盐铁句院以刑部员外郎知制诰同判太常寺初内出香祠温成庙帝误书名称臣扬休言此奉宗庙礼有司承误不以闻帝嘉之兼句当三班院为宗正寺修玉牒官迁工部郎中未及谢卒扬休喜闲放平居吟咏自适与家人言未尝及朝廷事及卒发褚中所得上封事十余章其大略请增谏官以广言路置五经博士使学者专其业出御史按察诸道以防壅蔽复齿胄之礼以强宗室择守令重农桑禁奢侈皆有补于时者然扬休为人慎默世未尝以能言待之也至于诰命非其所长好殖财以从官还乡里畴昔贫窶之人不挥一金反遍受里中富人金以去【按宋史此下有祖士衡传无事迹可录今从删】

△李垂

李垂字舜工聊城人咸平中登进士第上兵制将制书自湖州录事参军召为崇文校勘累迁著作郎馆阁校理上导河形胜书欲复九河故道时论重之又累修起居注丁谓执政垂未尝往谒或问其故垂曰谓为宰相不以公道副天下望而恃权怙势观其所为必游朱崖吾不欲在其党中谓闻而恶之罢知亳州迁颖晋绛李康伯曰诸公欲舜工为知制诰但宰相以

舜工未尝相识盍一往见之垂曰我若昔谒丁崖州则干兴初已为翰林学士矣今已老大见大臣不公常欲面折之焉能趋炎附热看人眉睫以冀推挽乎执政知之出知均州卒年六十九五子仲昌最知名

△张洞

张洞字仲通开封祥符人自幼卓犖不羣诵书日数千言为文甚敏遇事慷慨自许时赵元昊叛洞以布衣求上方略召试舍人院擢试将作监主簿寻举进士中第调涟水军判官再调颍州推官民刘甲者强弟柳使鞭其妇既而投杖夫妇相持而泣甲怒逼柳使再鞭之妇以无罪死吏当夫极法知州欧阳修欲从之洞曰律以教令者为首夫为从且非其意不当死众不听献于朝果如洞言修甚重之晏殊知永兴军奏管句机宜文字改大理丞知巩县枢密副使高若讷参知政事吴育荐其文学宜为馆职【按宋史宰辅表吴育为参知政事在庆历五年高若讷为枢密副使在七年而其时正当吴育由参政改枢副罢免是若讷与育历官前后相替不应叙育在若讷后或荐洞为馆职若讷在先非两人同为一时之事也】召试学士院充秘阁校理判祠部时天下户口日蕃民去为僧者众洞奏祠部帐至三十余万僧若不裁损后不胜其弊朝廷用其言始三分减一知太常礼院宰相陈执中将葬洞与同列议谥荣灵其孙诉之诏孙抃等复议改曰恭洞驳奏执中位宰相无功德而罪戾多生不能正法以黜之死犹当正名以诛之竟从抃等议初皇后郭氏忤旨得罪废没后仁宗悔之诏追复其号二十余年矣至是有司请祔于庙知制诰刘敞以谓春秋书禘于太庙用致夫人致者不宜致也且古者不二嫡当许其号不许其礼洞奏后尝母天下无大过恶中外所知陛下既察其偶失恭顺洗之于既没犹曰不许其礼于义非是尚当别立庙不行转太常博士判登闻鼓院仁宗方向儒术洞在馆阁久数有建明仁宗以为知经赐飞白善经字宠之出知棣州转尚书祠部员外郎河北地当六塔之冲者岁决溢病民田水退强者遂冒占弱者耕居无所洞奏一切官为标给蠲其租以绥新集河北东路民富蚕桑契丹谓之绫绢州朝廷以为内地不虑洞奏今沧景契丹可入之道兵守多缺契丹时以贩盐为名舟往来境上此不可不察愿度形势置帅增屯戍以控扼之时天下久安荐绅崇尚虚名以宽厚沉默为德于事无所补洞以谓非朝廷福又谓谏官持谏以震人主不数年至显仕此何为者当重其任而缓其迁使端良之士不亟易而浮躁者绝意致书欧阳修极论之召权开封府推官英宗即位转度支员外郎英宗哀疚或经旬不御正殿洞上言陛下春

秋鼎盛初嗣大统岂宜久屈刚健自比冲幼之主当躬
万几揽羣材以称先帝付畀之意厌元元之望大臣亦以为言遂听政诏讯祁国公宗说
狱宗说恃近属贵骄不道狱具英宗以为辱国不欲暴
其恶洞曰宗说罪在不宥陛下以其坑不辜数人置诸法可矣英宗喜曰卿知大体洞因
言唐宗室多贤宰相名士盖其知学问使然国家本支
蕃衍无亲疏一切厚廩之不使知辛苦婢妾声伎无多寡之限至灭礼义极嗜欲贷之则
乱公共之法刑之则伤骨肉之爱宜因秩品立制度更
选老成教授之宗室缘是怨洞痛诋訾之言帝亦起藩邸赖察之不罪也转司封员外郎
权三司度支判官对便殿称旨英宗遂欲进用大臣忌
之出为江西转运使江西荐饥征民积岁赋洞为奏免之又民输油绢不中度者旧责以
满匹洞命计尺寸输钱民便之移淮南转运使转工部
郎中淮南地不宜麦民艰于所输洞复命输钱官为糞麦不踰时而足自以年不能永教
诸子部分家事未几卒年四十九

△李仕衡 【李丕绪】

李仕衡字天均秦州成纪人后家京兆府进士及第调鄂县主簿田重进守京兆命
仕衡鞫死囚五人活者四人重进即其家谓曰子有阴
施此门当高大之徙知彭山县就加大理评事迁光禄寺丞父益以不法诛仕衡亦坐除
名后会赦寇准荐其材尽复其官领渭桥鞏运通判邠
州再迁秘书丞徙知剑州王均反仕衡度州兵不足守即弃城焚刍粟鞏金帛东守剑门
既而城陷汉川攻剑州州空无所资即趋剑门仕衡预
招贼众得千余人待之不疑贼将至与钤辖裴臻迎击之斩首数千级乃乘驿入奏擢尚
书度支员外郎已而使者言仕衡尝弃城降监虔州税
召还判三司盐铁句院度支使梁鼎言商人入粟于边率高其直而售以解盐商利益博
国用日耗请调丁夫转粟而鞏盐诸州官自鬻之岁可
得缗钱三十万仕衡曰安边无大于息民今不得已而调敛之又增以转粟挽盐之役欲
其不困何可得哉不听遂行鼎议而关中大扰乃罢鼎
度支使以仕衡为荆湖北路转运使徙陕西初岁出内帑缗钱三十万助陕西军费仕衡
言岁计可自办遂罢给真宗谒陵寝因幸洛仕衡献粟
五十万斛又以三十万斛馈京西朝廷以为材召为度支副使上言关右既弛盐禁而永
兴同华耀四州犹供卖盐年额钱请减十分之四诏悉
除之累迁司封郎中为河北转运使又奏罢内帑所助缗钱百万建言河北岁给诸军帛
七十万而民艰于得钱悉预假于里豪出倍偿之息以
是工机之利愈薄方春民不足请户给钱至夏输帛则民获利而官用足矣诏优其直仍
推其法于天下封泰山献钱帛刍粮各十万迁右谏议

大夫祀汾阴又助钱帛三十万乃命同林特提举西京陕西转运事权知永兴军进给事中踰月以枢密院直学士知益州顷之河北阙军储议者谓仕衡前过助封祀费真宗闻之以为河北转转使驾入亳州又贡丝绵缣帛各二十万后集粟塞下至巨万斛或言粟腐不可食朝廷遣使取视之而粟不腐也棣州污下苦水患仕衡奏徙州西北七十里既而大水没故城丈余南郊复进钱帛八十万先是每有大礼仕衡必以所部供军物为贡言者以为不实仕衡乃条析以进六十万皆上供者二十万即其羨余帝不之罪谓王旦曰仕衡应猝有材人欲以此中之然朝廷所须随大小即办亦其所长也明年旱蝗发积粟赈民又移五万斛济京西迁尚书工部侍郎权知天雄军盗起淄青阁迁刑部侍郎知青州前守捕羣盗妻子寘棘围中仕衡至悉纵使去未几其徒有梟贼首至者入为三司使帝作宽财利论以赐之乃更陕西入粟法使民得受钱与茶旧市羊及木责吏送京师而羊多道死木至湍险处往往漂失吏至破产不能偿仕衡乃许吏私附羊免其算使得补死者听民自采木输官用入粟法偿其直迁吏部侍郎仁宗即位拜尚书左丞以足疾改同州观察使知陈州州大水筑大堤以障水患徙颍州复知陈州曹利用仕衡壻也利用被罪降仕衡左龙武军大将军分司西京岁余改左卫大将军卒其后诏追复同州观察使仕衡前后管计事二十年虽才智过人然素贪家货至累巨万子丕绪荫补将作监主簿及仕衡归老丕绪时为尚书虞部员外郎请解官就养朝廷以为郎故事不许请削一官乃听未几还之后累迁司农卿致仕卒丕绪居官廉静不为矫激家多图书集历代石刻为数百卷藏之 【按宋史此下有李溥传溥由三司小吏擢官其后久专利权屡以奸赃贬黜无事迹可录今从删】

△胡则

胡则字子正婺州永康人果敢有材气以进士起家补许田县尉再调宪州录事参军时灵夏用兵转运使索湘命则部送刍粮为一月计则曰为百日备尚恐不支奈何为一月邪湘惧无以给遣则遂入奏太宗问边策对称旨顾左右曰州县岂乏人命记姓名中书后李继隆讨贼久不解湘语则曰微子几败我事一日继隆移文转运司曰兵且深入粮有继乎则告湘曰彼师老将归欲以粮乏为辞耳姑以有余报之已而果为则所料湘为河北转运使奏改秘书省著作佐郎签书贝州观察判官事累迁尚书户部员外郎真宗幸亳还擢三司度支副使初丁谓举进士客许田则厚遇之谓贵显则骤进用至是谓罢政事出则为京西转运使迁礼部郎中徙广西路转运使按宜州重辟十九人为辨活者九

人复为发运使累迁太常少卿干窳初坐丁谓党降知信州徙福州以右谏议大夫知杭州入权吏部流内铨坐失举复为太常少卿知池州未行复谏议大夫知永兴军徙河北都转运使以给事中权三司使通京东西陕西盐法人便之初则在河北殿中侍御史王汾尝就则假官舟贩盐又以其子为名祈买酒场至是张宗海撻发之按验得实出则知陈州踰月授工部侍郎集贤院学士刘随言则奸邪贪滥闻天下比命知池州不肯行今以罪去骤加美职何以风劝在位后徙杭州再迁兵部侍郎致仕卒

△辞颜

辞颜字彦回河中万泉人举三礼中第为嘉州司户参军代还引对称旨改将作监丞监华州酒税以秘书省著作佐郎使夔峡疏决刑狱还改太子左赞善大夫知云安军徙渝阆二州丁谓自举代荐颜为峡路转运使累迁尚书虞部员外郎始孟氏据蜀徙夔州于东山据峡山以拒王师而民居不便也颜为复其故城宜州陈进反命句当广南东西路转运使事贼平迁金部员外郎改河东转运使徙陕西河中浮桥岁为水所败颜即北岸疏上流为支渠以杀水怒因取渠水溉其旁田民颇利之坊州募人炼矾岁久课益重至有破产被系不能偿者颜奏罢坊矾则晋矾当大售后如其策徙河北历知河阳杭徐州【按东都畧作历知河阳扬杭徐三州】累迁光禄少卿以少府监知江甯府遯者昼劫人反执平人以告颜视其色动曰若真盗也械之果引伏转右谏议大夫知河南府仁宗即位迁给事中丁谓分司西京以颜雅与善徙知应天府又徙耀州部有豪姓李甲结客数十人号没命社少不如意则推一人以死鬪之积数为乡人患颜至大索其党会赦当免特杖甲流海上余悉籍于军以光禄卿分司西京卒尝属杜衍为墓志衍却之仁宗谓衍曰辞颜有丑行卿不欲志其墓诚清识也孙向自有传

△许元

许元字子春宣州宣城人【按东都事畧作泰州海陵人】以父荫为太庙斋郎改大理寺丞累迁国子博士监在京榷货务三门发运判官元为吏强敏尤能商财利庆厯中江淮岁漕不给京师乏军储参知政事范仲淹荐元可独倚办擢江淮制置发运判官至则悉发濒江州县藏粟所在留三月食远近以次相补引千余艘转漕而西未几京师足食朝廷以为任职就迁副使遂以尚书主客员外郎为使进金部特赐进士出身迁侍御史尝欲与施昌言分行二浙江南调发军食仁宗闻之语辅臣曰东南岁比不登民方匱乏尝诏损岁漕百万石而元与昌言乃更欲分道而出是必诛求疲民以自为功非朕志也下诏戒饬擢天章阁待制再迁郎

中以疾请还 厯知扬越秦州卒元在江淮十三年以聚敛刻剥为能急于进取多聚珍奇赂遗权贵尤为王尧臣所知发运使治所在真州衣冠之求官舟者日数十辈元视势家贵族立榷巨舰与之

△ 锺离瑾

锺离瑾字公瑜庐州合肥人举进士为简州推官以殿中丞通判益州建言州郡既上雨后虽凶旱多隐之以成前奏请令监司劾其不实者擢开封府推官出提点两浙刑狱衢润州饥聚饿者食之颇废农作请发米二万斛赈给家毋过一斛后徙淮南轸运副使厯京西河东河北转运使改江淮制置发运使殿直王乙者请自扬州召伯埭东至瓜州浚河百二十里以废二埭诏瑾规度以工大不可就止置闸召伯埭旁人以为利屡迁尚书刑部郎中为三司户部副使除龙图阁待制权知开封府未踰月得疾卒

△ 孙冲

孙冲字升伯赵州平棘人举明经厯古田青阳尉盐山丽水主簿后举进士登甲科授将作监丞厯通判晋绛保州坐与保州守争事降监吉州酒累迁太常博士河决棣州知天雄军寇准请徙州治河命冲往按视还言徙州动民亦未免治堤不若塞河为便遂以冲知棣州自秋至春凡四决冲皆塞之就除殿中侍御史准为枢密使卒徙州信阳而冲坐守护河堤过严民输送往来堤上者辄撈之为使者论奏徙知襄州冲复上疏论徙州非便着河书以献会京西蝗真宗遣中使督捕至襄怒冲不出迎乃奏蝗唯襄为甚而州将日置酒无恤民意帝怒命即州置狱冲得属县言岁稔状驰驿上之时使者犹未还帝悟为迫使使者笞之以侍御史为京西转运塞滑州决河权知滑州参知政事鲁宗道总河事用太常博士李渭策欲盛夏兴役冲言徒费薪楗困人力虽塞必决遂罢知河阳累迁刑部郎中厯湖北河东转运使会南郊赏赐军士而汾州广勇军所得帛不逮他军一军大噪捍守佐堂下劫之约与善帛乃免城中戒备遣兵围广勇营冲适至命解围弛备置酒张乐推首恶十六人斩之遂定初守佐以乱军所约者上闻诏给善帛使者至冲曰以乱而得所欲是愈诱之乱也卒留不与入判登闻鼓院以目疾改兵部郎中直史馆厯官至给事中卒冲为吏所至以强干称能任钩距多得事情然无家法晚节尤寡廉声孙永自有传

△ 崔峰

崔峰字之才京兆长安人进士及第累官尚书职方员外郎知遂州建议瞿塘峡置关如剑门以察奸人事既施行徙提点刑狱嘉陵江岁

调民丁治堤塌峰更用州兵代其役文州蕃卒数剽攻边户守臣虑生事多以牛酒和遣峰请守臣岁时得行边益募勇壮伺其发一切捕击之后无复内寇就除转运使历三司户部判官河东转运使会更钱法潞州民大扰推其首悉诛之人心遂定后为户部副使以右谏议大夫为河东都转运使迁给事中还纠察在京刑狱谏官御史言宰相陈执中纵嬖妾杀婢命按治峰以为执中自以婢不恪笞之死非妾杀之颇左右执中即授龙图阁待制知庆州羌井坑族乱潜兵讨平历知同州凤翔府改工部侍郎集贤院学士知河中府峰所至贪奸比老益甚在凤翔转运使辞向按之急不得已至河中请老以刑部侍郎致仕卒

△田瑜

田瑜字资忠河南寿安人举进士历袁郢合三州军事推官累迁尚书司封员外郎提点广南西路刑狱庆历中区希范诱溪洞环州蛮叛帝以瑜习知南方事就除荆湖北路转运使瑜檄属郡募民击贼又督转粟以守要害兵所至不乏食贼势大挫徙两浙转运按察使杭州龙山堤岁决水冒民居辄赋刍塞之瑜与民约每刍十束使输石一尺率五岁得石百万为石堤堤固而岁不调民加直史馆益州路转运使改江淮制置发运使擢天章阁待制知广州累迁谏议大夫权三司户部副使依智高犯邕瑜条上用兵御贼十事智高平召对便殿具言南方山川险要及备守之策乃以为广南东路体量安抚使还纠察刑狱同判吏部流内铨除龙图阁直学士知青州城有杀人投尸井中者吏以其无主名不以闻瑜廉得之大出金帛购贼后数日邻州民执贼以告属岁凶多盗瑜立赏罚设方略捕格之境中肃然徙知澶州卒瑜谨厚少文而于吏事颇尽心然御下急无廉称

△施昌言

施昌言字正臣通州静海人举进士高第授将作监丞通判滁州后以太常博士迁尚书屯田员外郎知太平州上政论三十篇入为殿中侍御史开封府判官安抚淮南还以礼部员外郎兼侍御史知杂事迁三司度支副使除天章阁待制河北都转运使言事者以为滨棣等六州河可涉宜有城守如边以待契丹诏昌言与宦官杨怀敏往视怀敏以为当城昌言曰六州地千里又河数移徙城之甚难而无利契丹未渝盟先自困非便也或请于麟府立十二砦以拓境又诏昌言与明镐张元度可否昌言独以为麟府在河外于国家无毫发入今不当又事无利之砦以重困财力就除知庆州在州所为不法语彻朝廷昌言疑通判陈湜言之追发湜罪湜坐废昌言亦降知华州历知沧州河阳移河北都转

运使议塞商胡埽决河令复故道与北京留守贾昌朝累论徙江淮发运使加龙图阁学士知应天府又知延州召还会塞六塔河以为都大修河制置使加枢密直学士知澶州以便役事河决夺一官知滑州又知杭州加龙图阁学士复知滑州以老求罢乃以知越州至京师卒

△杨偕

杨偕字次公坊州中部人唐左仆射于陵六世孙父守庆仕广南刘氏归朝为坊州司马因家焉偕少从种放学于终南山举进士释褐坊州军事推官知沂源县再调汉州军事判官有化瓦石为黄金者就偕试之偕曰吾从吏禄安事化金哉在官数上书论时政又论陕西边事复召试不赴即迁秘书省著作佐郎为审刑院详议官再迁太常博士宋绶荐为监察御史改殿中侍御史与曹修古连疏言刘从德遗奏恩太滥贬太常博士监舒州税以尚书祠部员外郎知光州改侍御史为三司度支判官时皇后废偕与孔道辅范仲淹力争道辅仲淹既出偕止罚金乃言愿得与道辅等皆贬不报当民陈氏女选入宫将以为后偕复上疏谏马季良以罪斥置滁州自言得致仕偕谓致仕用优贤者不当以宠罪人又数论升降之弊仁宗嘉纳之判吏部流内铨徙三司度支副使擢天章阁待制河北转运使按知定州夏守恩赃守恩流岭南进龙图阁直学士知河中府夏竦为陕西经略使请增置土兵易戍兵归卫京师偕言关中财用乏复增土兵徒耗国用且贼势方盛虽大增土兵亦未能减戍兵东归第竦惧败事欲以兵少为解尔竦复奏偕不忠沮边计偕争愈力时陕西议立五保偕以为扰民疏请罢之徙陕州又徙河东都转运使诏大选三路之民募为兵偕复言方今兵不为少苟多而不练则其势易以败又困国而难供时论者惟务多兵而偕论常如此进枢密直学士知并州元昊入寇密诏偕选强壮万人策应麟府偕奏出师临阵无纪律则士不用命今发农卒赴边虑在路逃逸及临阵退缩不禀号令请以军法从事诏如所请并人大惊畏都转运使文彦博奏罢之有中官预军事素横前帅优遇之偕至一绳以法命率所部兵从副总管赴河外戒曰遇贼将战一禀副总管节度中人不服捧檄诉偕叱曰汝知违主帅命即斩首乎监军怖汗不觉堕笏翌日告疾未几遂卒于是军政肃然元昊大掠河北诏修葺远砦偕言葺远砦在河外介麟丰二州之间无水泉可守请建新麟州于岚州有白塔地可建砦屯兵谓迁有五利不迁有三害省国用惜民力利一也内御岢岚石府州沿河一带贼所出路利二也我据其要则河兵虽合贼不敢逾河而东利三也商旅往来以通货财利四也方河东时得所屯兵马五七千人以张军势利五也今麟州转输束刍斗

粟费直千钱若因循不迁则河东之民困于调发无已
时害一也以孤垒饵敌害二也道路艰阻援兵难继害三也且州之四面属羌止存孤垒
今契丹又与西贼共谋待兵合来攻河东若朝廷不思
御捍之计而修葺远砦是求虚名而忽大患也况灵夏二州皆汉唐郡一旦弃之一麟州
何足惜哉书奏帝谓辅臣曰麟州古郡也咸平中尝经
寇兵攻围非不可守今遽欲弃之是将退而以河为界也宜谕偕速修复葺远以援麟州
明年改左司郎中本路经略安抚招讨使偕列六事于
朝一罢中人预军事二徙麟州三以便宜从事四出冗师五募武士六专捕援且曰能用
臣言则受命不然则已朝廷不从偕累奏乃罢知邢州
徙沧州求面论兵事召还令间日入对偕在并州日尝论八阵图及进神楯劈阵刀其法
外环以车内比以楯至是帝命以步卒五百如其法布
阵于庭善之乃下其法于诸路其后王吉果用偕刀楯法败元昊于兔毛州久之迁翰林
侍读学士知审官院复以为左司郎中元昊乞和而不
称臣偕以谓连年出师国力日蹙宜权许之徐图诛灭之计谏官王素欧阳修蔡襄累章
劾奏偕职为从官不思为国讨贼而助元昊不臣之请
罪当诛陛下未忍加戮请出之不宜留处京师帝以其章示偕偕不自安乃求知越州道
改杭州又上太平可致十象图还判太常司农寺改右
谏议大夫请老以尚书工部侍郎致仕卒遗奏兵论一篇帝怜之特赠兵部侍郎偕性刚
而忠樸敢为大言数上书论天下事议者以为迂阔难
用与人少合尤喜古今兵法子忱慥皆有隼才早卒

△王沿

王沿字圣源大名馆陶人少治春秋中进士第试秘书省校书郎历知宗城县张知
白荐其才擢著作佐郎入为审刑院详议官再迁太常
博士上言宋兴七十年契丹数侵深赵贝魏之间先朝患征调之不己也故屈己与之盟
然岂久安之策哉夫善御敌者必思所以务农实边之
计河北为天下根本其民俭嗇勤苦地方数千里古号丰实今其地十三为契丹所有余
出征赋者七分而已魏史起凿十二渠引漳水溉斥鹵
之田河内饶足唐至德后渠废相魏磁洺之地并漳水者累遭决溢今皆斥鹵不可耕故
沿边郡县数蠲租税而又牧监刍地占民田数百千顷
是河北之地虽十有其七得赋之实者四分而已以四分之力给十万防秋之师生民不
得不困也且牧监养马数万徒耗刍豢未尝获其用请
择壮者配军衰者徙之河南孳息者养之民间罢诸垆牧以其地为屯田发役卒刑徒田
之岁可获谷数十万斛夫漳水一石其泥数斗古人以
为利今人以为害系乎用与不用耳愿募民复十二渠渠复则水分水分则无奔决之患

以之灌溉可使数郡瘠鹵之田变为膏腴如是则民富十倍而仓廩有余矣诏河北转运使规度通判洺州王轸言漳河岸高水下未易疏导又其流浊不可溉田沿方迁监察御史即上书驳轸说帝虽嘉之而不即行语在河渠略天圣五年安抚关陕减诸县秋税十二三还为开封府推官又体量河朔饥民所至不俟诏发官廩济之就除转运副使上言本朝制兵刑未几于古自契丹通好三十年二边常屯重兵坐耗国用而未知所以处之请教河北强壮以代就粮禁卒之阙罢招厢军以其冗者隶作屯田行之数年禁卒当渐销减而强壮悉为精兵矣古者刑平国用中典而比者以敕处罪多重于律以绢估罪者敕以缙直代之律坐髡■〈金 犬〉而役者敕黥窜以为卒比诸州上言谪卒太多衣食不足愿勿复谪者七十余州以律言之皆不至是诚愿削深文而用正律以钱定罪者悉从绢估黥窜为卒者止从髡■〈金 犬〉被诏鞫曹洺狱于真定府迁殿中侍御史改尚书工部员外郎知邢州寻为河北转运使奏罢二牧监以地赋民导相卫邢赵水下天平景佑诸渠溉田数万顷因诣阙奏事授直昭文馆为三司户部副使徙盐铁迁兵部员外郎天章阁待制陕西都转运使时朝廷将减戍卒就食内地诏与知州总管钤辖等议沿即奏减卒数万知枢密院李谿以为不可复下沿边都监议沿上疏曰兵机当在廊庙之上岂可取责小人哉谿恶其言奏罢之降知滑州徙成德军建学校行乡饮酒礼迁刑部郎中河东都转运使加龙图阁直学士知并州时元昊数寇河东建议徙丰州不报已而州果陷进枢密直学士右司郎中为泾原路经略安抚招讨使兼知滑州增屯兵城中隘甚乃筑西关城五里改泾州观察使元昊入寇副都总管葛怀敏率兵出捍沿教怀敏率兵据瓦亭待之怀敏进兵镇戎沿以书戒勿入第背城为砦以羸师诱贼贼至发兵击之可有功怀敏不听进至定川果为所败贼乘胜犯渭州沿率州人乘城多张旗帜为疑兵贼遂引去坐怀敏败复为龙图阁直学士刑部郎中知虢川寻降天章阁待制为权御史中丞贾昌朝所奏落待制未几徙知成德军复待制又徙河中府卒沿好建明当世事而其论多齟齬初制河北水利导诸渠溉民田论者以为无益已而邢州民有争渠水至杀人者然后人知沿所建为利尝论以春秋法断事然真定之狱人以为沿傅致之子鼎

王鼎

王鼎

鼎字鼎臣以进士第累迁太常博士王尧臣领三司举句当公事数上书论时政得失时天子患吏治多弛监司不举职而范仲淹等方执

政择诸路使者令按举不法以鼎提点江东刑狱与转运使杨紘判官王绰竞擿发吏罪至微隐无所贷于是所部官吏怨之目为三虎仁宗闻之不说仲淹等罢鼎与紘绰皆为人所言时鼎提点两浙刑狱降知深州王则反深卒庞旦谋以元日杀军校劫库兵应之前一日有告者鼎夜出檄遣军校摄事外邑而阴为之备翌日会僚吏置酒如常叛党愕不敢动鼎刺得实徐捕首谋十八人送狱狱具候转运使审决未至军中恟恟谋劫囚鼎因谓僚吏曰吾不以累诸君独命取囚桀骜者数人斩于市众皆失色一郡帖然转运使至囚未决者半讯之皆伏诛明年河北大饥人相食鼎经营赈救颇尽力徙建州其俗生子多不举鼎为条教禁止时盗贩盐茶者众一切杖遣之监司数以为言鼎弗为变徙提点河北刑狱治奸赃益急所劾举不避贵势召为开封府判官改盐铁判官累迁司封员外郎淮南两浙荆湖制置发运副使内侍杨永德奏请沿汴置铺挽漕舟岁可省卒六万鼎议以为不可发八难永德不能复鼎因疏言陛下幸察用臣不宜过听小人妄有所改以误国计于是永德言不用居二年遂以为使前使者多渔市南物因奏计京师持遗权贵鼎一无所市独悉意精吏事事无大小必出于己凡调发纲吏度漕路远近定先后为成法于是劳逸均吏不能为重轻官舟禁私载舟兵无以自给则尽盗官米为奸有能居贩自贍者市人持以法不肯偿所逋鼎为移州县督偿之舟人有以自给不为奸而所运米未尝不足也入为三司盐铁副使数与包拯争议不少屈拯素强然无如之何迁刑部郎中天章阁待制河北都转运使徙河东卒鼎性廉不欺尝任其子族人欲增年以图速仕鼎不可父死分诸子以财鼎悉推与其弟尝知临邛县转运使选摄新繁新繁多职田斗粟不以自入奉使契丹得千缣散之族人一日尽所至不扰唯市饮食日用物增直以偿事继母孝教育孤侄甚至自奉俭约当官明敏强直不可挠所荐士多知名有终身不识者初鼎与弟豫皆有才气好上书言事仁宗称之以为豫孟浪鼎所言多可用豫为人不事羈检以大理寺丞知伊阙县有异政弃官浮游江湖间殖货自给以卒

△杜杞【杜植 杜枢】

杜■〈木巳〉字伟长以父镐荫补将作监主簿知建阳县强敏有才闽俗老而生子辄不举■〈木巳〉使五保相察犯者得重罪累迁尚书虞部员外郎知横州时安化蛮寇边■〈木巳〉言岭南诸郡无城郭甲兵之备牧守非才横为邕钦廉三郡咽喉地势险阻可屯兵为援邕管内制广源外控交址愿择文臣识权变练达岭外事者以为牧守使经制边事改通判真州徙知解州权发遣度支判官盗起京西掠商邓

均房焚光化军授京西转运按察使居数月贼平会广西区希范诱白崖山蛮蒙赶反岭外骚然擢■〈木巳〉刑部员外郎直集贤院广南西路转运按察安抚使【按涑水记闻作湖南转运副使】以书谕蛮听其自新蛮无至者遂勒兵攻破白崖黄泥九居山砦及五峒焚毁积聚斩首百余级复环州希范走荔枝峒■〈木巳〉遣使诱之赶来降■〈木巳〉乃击牛马为曼陀罗酒大会环州伏兵发诛七千余人后三日又得希范醢之以遗诸蛮因老病而释者纔百余人御史梅挚劾■〈木巳〉杀降失信诏戒谕之徙两浙转运使明年改河北拜天章阁待制环庆路经略安抚使知庆州■〈木巳〉上言杀降者臣也得罪不敢辞将吏劳未录臣未敢受命因为行赏蕃酋率众千余内附夏人以兵索酋而劫边户掠马牛有诏责■〈木巳〉■〈木巳〉言彼违誓举兵酋不可与因移檄夏人不偿所掠则酋不可得既而兵罢去■〈木巳〉性强记博览书传通阴阳数术之学自言吾年四十六死矣一日据厕见希范与赶在前诉冤叱曰尔狂僭叛命法当诛尚敢诉邪未几卒兄植以文雅知名累任监司终少府监弟枢亦强敏为比部员外郎绌监衡州税卒

△杨旼

杨旼字乐道保静军节度使重勋之曾孙进士及第授秘书省校书郎并州录事参军再迁大理寺丞知岳州庆历三年湖南獠人唐和等劫掠州县擢殿中丞提点本路刑狱专治盗贼事乃募才勇入峒讨击大兵溃旼踏岩下藉浅草得不死卒平六峒以功迁太常博士未几坐部将胡元战死降知太平州岁余贼益肆帝遣御史按视还言旼尝战山下人乐为用今欲殄贼非旼不可乃授东染院使荆湖南路兵马钤辖贼闻旼至皆恐畏踰岭南遁又诏往韶连等州招安之乃约贼使出峒授田为民而转运使欲授以官与贖纳质使还旼曰贼剽攻湖广七年所杀不可胜计今使饱贖粮据峒穴其势不久必复乱明年春贼果复出阳山旼即领众出岭外涉夏秋凡十五战贼溃旼感瘴疾归蛮平愿还旧官改尚书屯田员外郎直史馆知随州召还为三司户部判官会侂智高陷邕州召对便殿即日除起居舍人知谏院广南东西路体量安抚使经制贼盗旼至韶州会张忠战死智高自广州回军沙头将济旼令苏缄弃英州蒋偕焚粮储及召开贖岑宗闵王从政退保韶州贼势愈炽旼不能抗遂杀蒋偕王正伦败陈曙复据邕州旼坐是落知谏院知鄂州再降为屯田员外郎知光化军明年又降为太常博士岁终徙邠州复起居舍人为河东转运使入为三司户部副使迁吏部员外郎久之擢天章阁待制兼侍读判吏部流内铨上言愿择宗室之贤者使侍膳禁中为宗

庙计嘉佑三年冬河北地震明年日食正旦复上疏曰汉成帝时日食地震哀平之世嫡嗣屡绝此天所以示戒也陛下宜早立皇嗣以答天意
改知制诰李珣自防御使迁观察刘永年自团练使迁防御畋当草制封还词头言珣等无尺寸功特以外戚故除之恐非祖宗意不报进龙图
阁直学士复知谏院嘉佑六年京师大水畋援据洪范五行传言简宗庙则水不润下又曰听之不聪厥罚常水万几之听必有失于审者七庙之享必有失于顺者惟陛下积思而矫正之乃下其章礼官并两制考议咸言南郊三圣并侑温成皇后立庙皆违经礼于是诏自今南郊以太祖皇帝配改温成庙为祠殿卒赠右谏议大夫畋出于将家折节喜学问为士大夫所称在山下讨蛮家问至即焚之与士卒同甘苦破诸峒及用之岭南以无功斥名称遂衰性清介谨畏每奏事必发封数四而后上之自奉甚约为郡待客虽监司菜果数器而已及卒家无余赀

△周湛

周湛字文渊邓州穰人【按隆平集其先汝阴人后为邵州人】进士甲科为开州推官中身言书判改秘书省著作佐郎通判戎州俗不知医病者以祈禳巫祝为事湛取古方书刻石教之禁为巫者自是人始用医药累迁尚书都官员外郎知虔州提点广南东路刑狱初江湖民略良人鬻岭外为奴婢湛至设方略搜捕又听其自陈得男女二千六百人给饮食还其家徙京西路邓州美阳堰岁役工数十万漑州县职田而利不及民湛奏罢之为盐铁判官三司帐籍浩烦吏胥离析为弊欺湛为立勘同法岁减天下计帐七千为江南西路转运使州县簿领案牘淆混无纪次且多亡失民诉讼无所质至久不能决湛为立号以月日比次之诏下其法诸路又以徭赋不均百姓巧于避匿因条其诡名挟佃之类十二事且许民自言凡括隐户三十万还为户部判官又为夔州路转运使云安盐井岁赋民薪茅至破产责不已湛为蠲盐课而省输薪茅判盐铁句院以太常少卿直昭文馆为江淮制置发运使湛治烦剧能得其要所至喜条上利害前后至数十百事大江历舒州长风沙其地最险谓之石牌湾湛役三千万工凿河十里以避之人以为利除度支副使旧制发运司保任军将至三司不得考覆而皆迁之至是以名上者三十五人湛尽覆其滥者拜右谏议大夫知襄州襄人不善陶瓦率为竹屋岁久侵据官道檐庑相逼火数为害湛度其所侵悉毁彻之自是无火患然豪姓不便提点刑狱李穆奏湛扰人徙知相州右司谏吴及疏言百姓侵官主司禁之其职然也望诏执政大臣辨正湛是非明垂奖黜未几卒湛为人脱易少威仪然善射弩虽隔屋亦中的云

△徐的

徐的字公准建州建安人擢进士第补钦州军事推官钦土烦郁人多死瘴疠的见转运使郑天监请曰徙州濒水可无患请以上闻从之天监因奏留的使办役的短衣持梃与役夫同劳苦筑城郭立楼櫓以备战守画地居军民为府舍仓库沟渠廛肆之类民皆便之迁大理寺丞累迁尚书屯田员外郎知临江军擢广南西路提点刑狱安化州蛮攻杀将吏所部卒畏诛谋欲叛的驰骑至宜州晓以立功自赎众敛手听命奏复澄海忠敢军后皆获其用改知舒州徙荆湖北路转运使辰州蛮彭士义为寇的开示恩信蛮党悔过自归摄江陵府事城中多恶少年欲为盗辄夜纵火火一夜十数发的籍恶少年姓名使相保任曰尔辈递相察不然皆尔罪也火遂息太子洗马欧阳景猗横不法为里人害的发其奸窜之岭外以兵部员外郎为淮南江浙荆湖制置发运副使奏通泰州海陵如皋县漕河诏未下的以便宜调兵夫浚治之出滞盐三百万计得钱八百万缗遂为制置发运使迁工部郎中复治泰州西溪河发积盐加直昭文馆区希范蒙赶寇衡湘命的招抚之既至会蛮酋相继出降三司以郊祠近宜召还计事既还蛮复叛除度支副使荆湖南路安抚使至桂阳降者复众其钦景石硤华阴水头诸司不降者的皆讨平之斩其酋熊可清等千余级卒于桂阳

△姚仲孙

姚仲孙字茂宗本曹南着姓曾祖仁嗣陈州商水令因家焉仲孙早孤事母孝擢进士第补许州司理参军民妇马氏夫被杀指里胥尝有求而其夫不应以为里胥杀之官捕系辞服仲孙疑其枉知州王嗣宗怒曰若敢以身任之耶仲孙曰幸毋遽决冀得徐辨后两月果得杀人者调邢州推官徙资州转运使檄仲孙诣富顺监按疑狱全活数十人资州更二守皆昏老事多决于仲孙改大理寺丞知建昌县初建昌运茶抵南康或露积于道间为霖潦所败主吏至破产不能偿仲孙为募吏民输山木即高阜为仓邑人利之徙通判彭州尝以天下久无事不可以弛兵备因上前世御戎料敌之策名防边龟鉴通判睦州徙滁州岁旱饥有诏发官粟赈民主吏不时给仲孙既至州立劾主吏夜索丁籍尽给之累迁尚书屯田员外郎王巖守益州辟通判州事召为右司谏入内都知阎文应求为都知仲孙数其罪曰方帝斋宿太庙而文应叱医官声闻行在郭皇后暴薨中外莫不疑文应真毒者出文应为泰州兵马钤辖又称疾留复论奏乃亟去以起居舍人知谏院管句国子监以尚书户部员外郎兼侍御史知杂事时谏议大夫十二员仲孙曰谏议大夫盖朝廷之选不宜以岁

月序进请艰其选以处材望之臣余悉次补卿监乃诏
当选者奏听旨先是诸路复提点刑狱还朝多擢为省府官仲孙请第其课为三等升黜
之即诏仲孙司考课之法历三司户部度支盐铁副使
进天章阁待制河北都转运使大修城垒兵备仁宗赐诏褒之权知澶州河坏明公埽绝
浮桥仲孙亲总役堤上埽一夕复完权知大名府夜领
禁兵塞金堤决河是岁澶魏虽大水民不及患进礼部郎中龙图阁学士权三司使事属
西北备边募兵益屯及赏赐聘问之费不可胜计仲孙
悉心经度虽病未尝辄废事坐小吏诈为文符出知蔡州卒

△陈太素 【马寻 杜曾】

陈太素字仲华河南缙氏人中进士第尝为大理评断官入审刑为详议官权大理
少卿又判大理事任刑法二十余年朝廷有大狱疑必
召与议太素为推原人情以傅法意众皆释然所论建亦或有不中每临案牍至忘寝
食大寒暑不变子弟或止之答曰囹圄之苦岂不甚于
我也历知江阴军兖州明州有治迹累官至尚书兵部郎中卒太素家行修治尤善论刑
名常以为有司议法当据文直断不可求曲当法求曲
当法所以乱也同时有马寻者须城人举毛诗学究累判大理寺以明习法律称又有杜
曾者濮州人为吏号知法

△李虚己

李虚己字公受五世祖盈自光州从王潮徙闽遂家建安父寅有清节仕江南李氏
至诸司使江南国除授殿前承旨辞不拜时伪官皆入
留京师而寅母独在江南乃遣其长子归养举进士起家为衢州司理参军母老弃官以
归虚己亦中进士第历沈邱县尉知城固县改大理评
事累迁殿中丞提举淮南茶场知遂州太宗尝手书累二十余纸曰公勤洁己奉法除奸
惠爱临民者乃可书为劳绩月给奉以实钱命有司择
羣臣以治最闻者赐之仍谕曰除奸之要在乎奉法不可因以生事时虚己被赐因献诗
自陈父子遭遇荣及祖母帝悦为批其纸尾曰虚己学
古入官荣亲事生奉书为郡欲布新规朕得良二千石矣遂赐五品服又赐其祖母钱五
十万意实子钱五十缗帝后因宰相对始知误也以南
郊恩封羣臣母妻虚己又请罢其妻封以授祖母诏悉封之世以为荣会遣使察川峡吏
能否而州多不治唯虚己与薛颜邵煜查道数人以能
任职称再迁尚书屯田员外郎以便亲请通判洪州是时寅已谢归寅母尚无恙虚己双
輦迎侍寅至豫章乐其山水遂临州之东湖筑第宇以
居虚己为侍御史出提点荆湖南路刑狱徙淮南转运副使累迁兵部郎中知洪州迁尚
书工部侍郎徙池州求分司南京卒初寅之请老年未

六十虚己分司而归年六十九其季虚舟仕至余干县令坐法免官不复言仕寅事亲孝治家有法虚己虚舟又以孝友清慎世其家虚舟之子宽为尚书金部郎中定为司农少卿

△张傅

张傅字岩卿谯人进士及第稍迁秘书省著作佐郎知奉符县时方修会真宫天书观及增治岳祠以办事称宰相向敏中册东岳帝号还荐之知楚州会岁饥贻书发运使求贷粮不报因叹曰民转死沟壑矣报可待邪乃发上供仓粟赈贷所活以万计因拜章待罪诏奖之提点江西刑狱徙江东就除转运使入权三司盐铁判官会河决济北民多被害命安抚京东累迁工部郎中出为两浙转运使改荆湖北路复为盐铁判官再迁兵部为陕西转运使徙江淮发运使未至召还属西京奏兵食乏因言冯翊华阴积粟多可运二十万石济之遂留为侍御史知杂事判吏部流内铨进三司度支副使以疾请外迁太常少卿知应天府为右谏议大夫徙青州迁给事中知郓州复知应天府遂以工部侍郎致仕卒傅强力治事七为监司所至审核簿书句摛奸隐州县惮之傅曰吾所以事事致察者正所以爱州县也吏不敢慢则州县不复犯法矣人亦以为然

△俞献卿

俞献卿字谏臣歙人少与兄献可以文学知名皆中进士第献可有吏称历吏部郎中龙图阁待制献卿起家补安丰县尉有僧贵盗积财甚厚其徒杀之诣县给言师出游献卿曰吾与盗善不告而去岂有异乎其徒色动因执之得其瘞尸一县大惊再调昭州军事推官会宜州陈进乱象州守不任事转运使檄献卿往佐之及至守谋弃城献卿曰临难苟免可乎贼至当力击不胜有死而已奈何弃去初昭州积缗钱巨万献卿尽用平糶至积谷数万及是大兵至赖以馈军改大理寺丞为本寺详断官历除殿中侍御史为三司盐铁判官上言今天下谷帛之直比祥符初增数倍矣人皆谓稻苗未立而和糶桑叶未吐而和买自荆湖江淮间民愁无聊转运使务刻剥以增其数岁益一岁又非时调率营造一切费用皆出于民是以物价积高而民力积困也陛下宜与公卿大臣朝夕图议而拯正之帝纳其言为罢诸宫观兵卫又除无名之费以巨万计淮浙盐利不登命献卿往经度之更立新法岁增盐课缗钱甚众除陕西转运使时边吏多因事邀功泾原路钤辖擅于武英州凿边壕置堡砦献卿度必招寇患亟檄罢之未几贼果至杀将士塞所凿壕而去徙京西因入对甚言赵振堪将帅范仲淹明镐可大用及条上边策甚备

除福建转运使还判三司盐铁句院累迁户部度支盐铁副使以右谏议大夫集贤院学士知杭州暴风江潮溢决堤献卿大发卒凿西山作堤数十里民以为便后知应天府以刑部侍郎致仕卒

△陈从易

陈从易字简夫泉州晋江人进士及第为岚州团练推官再调彭州军事推官【按东都事略作判官】王钧盗据成都连绵汉诸郡彭人谋杀兵马都监以应之时从易摄州事斩其首谋者召余党晓以祸福贯之【按东都事略云均移书至州从易即命焚之以安众宋史本传不载附识】众皆呼悦乃率厉将吏修严守械戒其家僮积薪舍后曰吾力不足以守当死于此贼闻其有备不敢入境贼平安抚使王钦若以状闻召为秘书省著作佐郎大理寺详断官迁太常博士出知邵武军预修册府元龟改监察御史真宗宴近臣崇和殿从易赋诗称旨迁侍御史改刑部员外郎直史馆知虞州会岁大饥有持杖盗取民谷者请一切减死论凡生者千余人天禧中坐荐送别头进士失实降工部员外郎以父老求乡郡宰相寇准恶其疏已除吉州从易因对自言改福州未行遭父丧服除纠察在京刑狱出为湖南转运使徙知荆南擢太常少卿直昭文馆知广州在广三年以清德闻入为左司郎中知制诰初景德后文士以雕靡相尚一时学者向之而从易独守不变与杨大雅相厚善皆好古笃行时朝廷矫文章之弊故并进二人以风天下兼史馆修撰迁左谏议大夫命使契丹以年老辞不行又辞职请补郡进龙图阁直学士知杭州卒从易好学强记为人激直少容喜别白是非多面折人或尤其过从易终不变王钦若最善之及废居南京时丁谓方用事人畏谓无敢见钦若者从易将使湖南欲过之遇汴水旱涸遂告谓曰从易愿使湖外者非独为贫也亦以王公在宋故就省之尔今汴涸义不可从他道进幸公许少留谓即大喜曰王公之门独君为知我者遂听归馆须汴通乃行时寇准贬道州谓又谓从易曰庐陵之事可以释憾矣从易对曰当以故相事之尔谓有愧色其行志多类此

△杨大雅

杨大雅字子正唐靖恭诸杨虞卿之后虞卿孙承休天佑初为吴越国册礼副使杨行密据江淮道阻不克归遂家钱塘大雅承休四世孙也钱俶归朝挈其族寓宋州大雅素好学日诵数万言虽饮食不释卷进士及第历新息鄢陵县主簿改光禄寺丞知新昌县徙知浔州再迁秘书丞咸平中交址献犀因奏赋召试迁太常博士又上书自荐献所为文复召试直集贤院出知筠袁二州历知越州提点淮南路刑狱坐考试

国子监生失荐送降监陈州酒徒知常州判三司都磨勘司户部句院迁集贤殿修撰知应天府还纠察在京刑狱以兵部郎中知制诰大雅初名侃至是避真宗藩邸讳诏改之居二岁拜右谏议大夫集贤院学士知亳州卒大雅朴学自信无所附阿直集贤院二十五年不迁 【按东都事略作二十七年】 有出其后者往往致荣显天禧中使淮南过金陵遇风覆舟得榜卒拯之冠服尽丧时丁谓镇金陵遣人遗衣一袭大雅辞不受谓以为歉宰相王钦若亦不悦之晚与陈从易并命知制诰

钦定续通志卷三百三十一

●钦定续通志卷三百三十二 列传一百三十二

列传

宋 【三十六】

○宋三十六

边肃	梅询	马元方	薛田	寇瑊	杨日
严	李行简	章频	陈琰	李宥	
	郑向	郭稹	赵贺	高覲	袁抗【陟】
起	张旨	齐廓	郑骧		徐
王臻	鱼周询	贾黯	李京	吕景初【马遵】	吴及
	范师道	李绚【何中立】	沈邈		

边肃

梅询

马元方

薛田

寇瑊

杨日严

李行简

章频

陈琰

李宥

郑向

郭稹

赵贺

高覲

袁抗 【袁陟】

徐起

张旨

齐廓

郑骧

王臻

鱼周询

贾黯

李京

吕景初 【马遵】

吴及

范师道

李绚 【何中立】

沈邈

△边肃

边肃字安国应天府楚邱人进士及第除大理评事知于潜县累迁太常博士三司使魏羽荐为户部判官祀南郊超荐尚书度支员外郎帝以三司钩取无法至道初置行帐司以会财用之数命肃主之帐成迁工部郎中出知曹州徙邢州会契丹大入先是地屡震城堞摧圯无守备帝在澶州密诏肃若州不可守听便宜南保他城肃匿诏不发督丁壮乘城而辟诸门悉所部兵阵以待之骑傅城下肃与战小胜契丹莫测也居三日引去时镇魏深赵磁洺六州闭壁不出老幼趋城者肃悉开门纳之擢枢密直学士徙宣州车驾朝陵徙河南府还句当三班院出知天雄军徙镇定府累迁给事中以主嗣宗代肃嗣宗与肃有旧隙讽通判东方庆讼肃前在州私以公钱贸易规利遣吏强市民羊买女口自入嗣宗上其事帝以肃近臣不欲属吏遣刘综任中正以章示之肃引伏以守城功止夺三官贬岳州团练副使久之徙武昌安远军节度副使起知光州以泰宁军节度副使徙泗州又徙泰州卒子调终尚书兵部员外郎福建路转运使

△梅询

梅询字昌言宣州宣城人少好学有辞辨进士及第为利丰监判官后以秘书省著作佐郎御史台推勘官预考进士于崇政殿真宗过殿庐奇其占对详敏召试中书除集贤院李继迁攻灵州急吴淑上书请遣使谕秦陇以西诸戎使攻继迁询亦请以朔方授潘罗支使自攻取帝问谁可使罗支者询请行 【按东都事略云真宗问谁可使罗支者询请行真宗惜之不欲使蹈兵间询曰若活灵州而罢西兵何惜一梅询

真宗壮其言因遣使罗支】未至而灵州陷还为三司户部判官询自以为遇主知屡上书论西北事时契丹数侵河北询请遣大臣临边督战募游手击贼又论曹玮马知节才可用傅潜杨琼败当诛田绍斌王荣等可责其效以赎过凡数十事其言甚壮帝欲命知制诰李沆力言其险薄望轻不可用后断田讼失实降通判杭州知苏州就徙两浙转运副使判三司开拆司坐议天书出知濠州为湖北转运使以擅假驿马与人降通判襄州知鄂州徙苏州为陕西转运使坐荐举朱能贬怀州团练副使又以善寇准徙池州起知广德军历楚寿陕州复直集贤院累擢翰林侍读学士累给事中知审官院仁宗御迓英阁读正说养民篇览历代户口登耗之数顾谓侍臣曰今天下民籍几何询对曰先帝所作盖述前代帝王恭俭有节则户口充羨赋敛无艺则版图衰减炳然在目作鉴后王自五代之季生齿雕耗太祖受命太宗真宗休养百姓天下户口之数盖倍于前矣因诏三司及编修院检阅以闻病足出知许州卒故事侍读学士无出外者天禧中张知白罢参知政事领此职始出知大名府非历二府而出者自询始询性卞急好进然数为朝廷言兵在濠州梦人告曰吕丞相至矣既而吕夷简通判州事故待之甚厚其后援询于废斥中以至贵显夷简力也

△马元方

马元方字景山濮州鄄城人父应图尝知顿邱县太宗攻幽州应图部刍粮没军中元方去发为浮屠间行求父尸不得诉于朝帝悯之为官其兄元吉元方淳化三年进士及第为韦城县主簿改大理评事知万年县诸将讨李继迁关辅转饷踰瀚海多死亡独元方所部全十九以劳迁本寺丞为御史台推勘官迁殿中丞户部使陈恕奏为判官元方言方春民贫请预贷库钱至夏秋令以绢输官行之公私果便因下其法诸路知徐州改太常博士梓州路转运使后知郢州量括收地数千顷为京东转运副使迁转运使按部至濮州被酒殴知州蒋信降知宿州徙滑州为京西转运使知应天府累迁太常少卿擢右谏议大夫权三司使公事众论不以为允真宗谓宰臣曰元方在三司何多谤也王旦曰元方尽心营职然其性卞急且不纳僚属议而丑言诋之所以贾怨帝曰僚属顾不有贤俊邪岁余以烦苛罢进给事中权知开封府以枢密直学士知并州留再任诏中书谕以委属之意官至兵部侍郎卒

△薛田

薛田字希稷河中河东人少师事种放与魏野友善进士起家丹州推官李允正知延州辟为从事向敏中荐其才改著作佐郎知中江县

累迁侍御史益州路转运使民间以铁钱重私为券以便交易谓之交子而富家专之数致争讼田请置交子务以榷其出入未报及寇瑊守益州卒奏用其议蜀人便之 【按李攸宋朝事实云始益州豪民十余万户连保作交子亦有诈伪者知府事谏议大夫寇瑊奏乞下益州更不得似日前置交子铺诏转运使张若谷知益州辞田伺定夺闻奏请废私交子官中置造乃置交子务其后三司使田况奏请不许秦州借支疏内尚称自天圣元年薛田肇划兴置益州交子云云则是寇瑊所请乃是禁私交子而交子务之置实用田议也与宋史称田请置交子务未报及寇瑊守益州卒奏用其议互异】 累擢枢密直学士知益州代还知审刑院羌人内寇特迁右谏议大夫知延州久之以疾徙同州又徙永兴军辞不行卒田性颇和厚初以干敏数为大臣所称后屡更任使所治无赫赫名

△寇瑊

寇瑊字次公汝州临汝人擢进士授蓬州军事推官李顺余党谢才盛等复起为盗瑊设方略擒送京师徙开封推官会施州蛮叛转运使移瑊权领施州先是戍兵仰他州馈粮瑊至请募人入米偿以盐军食遂足复招谕高州刺史田彦伊子承宝入朝得给印纸为高州官族未几溪南蛮复内寇瑊率众擒其酋领戮之就除大理寺丞知开州迁殿中丞通判河南府坐解送诸料失实降监晋州税以太常博士通判并州改监察御史迁殿中侍御史为开封府判官尝奏事帝询施州备御之术因谕之曰东川控蛮夷尔功已试其为朕镇抚之命为梓州路转运使晏州多刚县酋斗望劫泸州 【按宋史地理志晏州本羁縻州熙宁八年始置涪州监隶泸州凡羁縻州止载州名而不及县故多刚县不入于志】 烧涪井监杀官吏瑊趋富顺监命部兵多张旗帜踰山西北趋戎州尽取公私舟载粮甲具音乐合两路兵至江安诱溪监顺史个松南广移悦等州刺史及八姓乌蛮首领使断贼径帝遣内殿崇班王怀信议攻讨招辑之宜瑊奏蛮人尝于二年春烧涪井监杀吏民既赦贷其罪复来寇边若不讨除则戎泸资荣富顺监诸蛮竞起为边害矣诏发陕西兵益以白芨子弟合六千三百人缘涪井溪转鬪凡十一阵破之蛮众相率来附纳牛羊铜鼓器械甚众而斗望犹旅拒不从瑊命怀信分兵拔其栅与都巡检使符承顺进战思晏江口斗望等始惊遽势稍却明日复分三道来拒王师怀信等格战瑊乘其后大破之斗望众万余器不能军溺死者众遂降因籍其勇悍者千人分五都以隶禁军为蛮远指挥使守涪井监更建砦栅浚三濠以环之就加侍御史召为三司盐铁判官逾月出为河北转运使天禧中河决澶渊瑊视役河上堤垫数里众皆奔

溃而城独留自若须臾水为却去众异之迁工部郎中上言契丹约和以来河北减戍卒之半而复刺土兵其实益三分之一塞下军储不给请行入中凿头便余三说之法入为三司度支副使未几以右谏议大夫集贤院学士知益州仁宗即位迁给事中城与丁谓厚善帝谓辅臣曰城有吏干毋深谴也徙邓州坐失举降少府监知金州复右谏议大夫会河决徙知滑州总领修河既而以岁饥罢役城言病民者特犍刍耳幸调率已集若积之经年则朽腐为弃物后复兴工敛之是重困也乃再诏塞河河平擢枢密直学士明年复给事中知秦州又坐失举夺一官召权三司使复其官如故时有议茶法者帝访以利害城曰议者未知其要尔河北入中兵食皆仰给于商旅若官尽其利则商旅不行而边民困于馈运茶法岂可以数更帝然之权知开封府天圣末再使契丹未行而卒城少孤鞠于祖母王氏及登朝以妻封邑回授之朝臣得回封祖母自城始

△杨日严

杨日严字垂训河南人进士及第试秘书省校书郎知安邱县通判亳陈二州知襄州徙庐郢二州入为开封府判官使契丹还为两浙转运副使未行会青徐饥改京东转运使因请江淮陕西转粟五十万赈贫民又开清河八十里抵暖水河并堤起仓廩便漕运以右谏议大夫集贤院学士知河中府加枢密直学士知益州时用兵伐元昊三司急财用有诏析户版为十等第赋役民以岁租占佃官田庐者高其估募输钱就市为己业人苦其扰又陕西奏收市益梓利诸路溪洞马而不知其实无马也日严皆奏罢之迁句当三班院知通进银台司闻后为守者其政不便蜀人因进对从容言远方宜抚安之无容变法以生事迁给事中以龙图阁学士知澶州召权知开封府吏械囚不谨囚自杀坐是罢府事判太常司农寺同知审官院卒日严初为益州转运使无他治能及知益州颇为蜀人所信爱兄日华历官至太常少卿三司副使

△李行简

李行简字易从同州冯翊人家贫刻志于学读六经每至夜分寒暑不易又聚木叶学书笔法遒劲与里中富人杨士元同学既而同中进士第士元资遗行简谢不取起家陇州司理参军徙彭州军事推官陵州富民陈子美父死继母诈为文书逐出之累诉不得直转运使檄行简劾正其狱改秘书省著作郎再迁太常博士知坊州御史中丞王嗣宗荐为监察御史王旦数称其才真宗雅亦知之再迁侍御史陕西旱蝗命往安抚发仓粟救乏绝又蠲耀州积年逋租还擢龙图阁待制历尚书刑部郎中帝数幸

龙图阁命讲周易间访大臣能否行简所对无怨昵各道其所长人以为长者久之拜右谏议大夫集贤院学士干兴初改给事中以足疾请外得知河中府徙虢州卒

△章频

章频字简之建州浦城人与弟頔皆以进士试礼部预选会诏兄弟毋并举频即推其弟弃去后乃擢第试秘书省校书郎知南昌县改大理寺丞知九陇县迁殿中丞眉州大姓孙延世伪为券夺族人田久不能辨转运使使按治之频视券墨浮朱上曰是必先盗印然后书既引伏狱未上而其家人复诉于转运使更命知华阳县黄梦松覆按无所异梦松用此入为监察御史频坐不时具狱降监庆州酒徙知长洲县天禧初增置谏官御史十二人频以选召对称旨擢监察御史陈亳间民讹言兵起老幼皆奔命安抚京西还为三司度支判官青州麻士瑶杀从子温裕并其财遣往按治士瑶伏诛又诏鞫邛州牙校讼盐井事皇城使刘美倚后家受赇使人市其狱频请捕系真宗以后故不问忤旨出知宣州改殿中侍御史迁侍御史频雅善丁谓谓贬左迁尚书比部员外郎监饶州酒起知信州进刑部员外郎知福州王氏时赋民官田岁输租税而已至是或谓鬻之可得缗钱二十余万频疏以为不可徙知潭州改广西转运使擢宜州守贪暴不法既罢去反讼频子许尝被刑而冒奏为秘书省校书郎频坐请知饶州复入为度支判官累迁刑部郎中使契丹至紫蒙馆卒契丹遣内侍就馆奠祭命接伴副使吴克荷护其丧以锦车驾橐驼载至中京敛以银饰棺又具鼓吹羽葆吏士持甲兵卫送至白沟诏遣其子访乘传扈柩以归访官三班奉职即许也

△陈琰

陈琰字伯玉澶州临河人进士及第历深阳栾城县主簿迁大理寺丞再迁太常博士转运使卢士伦曹利用壻也怙势听狱不以直讼者不已付琰评决琰直之御史知杂韩亿闻其事奏为监察御史丁父丧哀毁坟木连理服除迁殿中侍御史天圣五年祀南郊中外以为丁谓复还琰疏言丁谓贿赂包苴盈于私室威权请谒行彼公朝引巫师妖术厌魅宫闈易神寝龙冈冀消王气今禋柴展礼涣汗推恩必虑谓潜输琛货私结要权假息遐荒冀移善地李德裕止因朋党不获生还卢多逊曲事王藩卒无牵复请不原赦帝然之为三司度支判官迁侍御史历京西河东河北转运副使三司户部度支盐铁副使汴仓纳粮纲槩量不实操舟者坐亡失所载或杖背徒重役琰如奏选官监视谓之定计斗面积迁至尚书工部郎中卒

△李宥

李宥字仲严唐之后裔自吴徙青遂为青人祖成五代末以诗酒游公卿间善摹写山水至得意处疑非笔墨所成父觉见儒林传宥幼孤不好弄长读书属文不杂交游举进士调火山军判官入馆校勘书籍迁集贤校琰遂直院知蕲州岁凶人散委婴孩而去者相属于道宥令吏收取计口给谷俾营妇均养之每旬阅视所活甚众或杀人以米十石给佣者使就狱曰我重贿吏尔必不死宥得其情论如法提点荆湖刑狱又纠察在京刑狱同判太常寺旧宗庙五飨辅臣摄事中废且久止差从官宥因对力言遂复故事以谏议大夫知江甯府民有告人杀其子者曰吾子去家时巾若巾今巾是矣民自诬服宥疑召问卒伸其枉府舍火宥畏兵乱阖门不救降秘书监致仕起分司南京改太子宾客判留司御史台卒宥性清介然与物无忤好奖拔士人外族甚贫宥有别业以券畀之既死家无余财【按宋史此下有张秉张择行二传俱无事迹足录今并从删】

△郑向

郑向字公明开封陈留人举进士中甲科为大理评事通判蔡州累迁度支员外郎盐铁判官出为两浙转运副使疏润州蒜山漕河抵于江人以为便复为盐铁判官迁兵部郎中提点诸司库务以龙图阁直学士知杭州卒五代乱亡史册多漏失向着开皇纪摭拾遗事颇有补焉

△郭稹

郭稹字仲微开封祥符人世寓郑州举进士中甲科为河南县主簿除国子监直讲议者以其资浅罢还河南时孙奭冯元判监事因奏稹学问通博他选莫能及乃得留居二岁陈尧咨知大名辟签书府判官事改大理寺丞奭等复荐为直讲奭出知兖州又荐稹与贾昌朝赴中书试讲说而稹固辞召试学士院为集贤校理冯元知河阳辟为通判徙通判河南府入为三司度支户部判官累迁尚书刑部员外郎同修起居注康定元年使契丹告用兵西鄙契丹厚礼之与同出观猎延稹射稹一发中走兔众皆愕视契丹主遗以所乘马及他物甚厚既还转兵部知制诰判吏部流内铨擢龙图阁直学士权知开封府卒稹性和易文思敏瞻尤刻意于赋

△赵贺

赵贺字余庆开封封邱人事继母至孝举毛诗及第补临朐县主簿贺有干才知州寇准具知贺淳化中调丁壮塞澶州决河众多逸去独贺全所部而归改大理评事盐池吏欺缙钱选贺往解州钩校出入贺悉得其奸以殿中丞历知汉州蜀吏喜玩法而贺精明吏不敢欺事更被

贺多所究诘人目为赵家关谓如关梁不可越也召权三司户部判官真补度支判官累迁尚书工部郎中提举诸司库务为江淮制置发运使发运司占隶三司军将分部漕船旧皆由主吏自遣受赇不平或数得诣富饶郡因以商贩贫者至不能堪其役贺乃籍诸州物产厚薄分剧易为三等视其功过自裁定由是吏巧不得施岁漕米溢常数一百七十万苏州太湖塘岸坏及并海支渠多湮废水侵民田诏贺与两浙转运使徐奭兼领其事伐石筑堤浚积潦自吴江东赴海流民归占者二万六千户岁出苗租三十万迁刑部郎中历三司户部度支盐铁副使以右谏议大夫知永兴军徙邓州岁余判宗正寺出知越州坐失举降知濠州改庐州迁给事中复判宗正寺知郑蔡寿三州卒在临朐时用转运使李中庸荐改官及中庸没无子贺为主葬事图绘其象以岁时祀于家子宗道终集贤校理

△高覲

高覲字会之宿州蕲人以进士起家为嘉兴县主簿后以孙奭荐改秘书省著作佐郎累迁尚书屯田员外郎通判泗州诏定淮南场茶法覲陈说利害不报擢提点利州路刑狱召为三司户部判官安抚河北还为京西转运使徙益州彭州广碛丽水二峡地出金宦者挟富人请置场募人夫采取之覲曰聚众山谷间与蛮獠杂处非远方所宜且得不偿失奏罢之王蒙正恃章献太后亲多占田嘉州诏勿收赋覲又极论其不可坐失察嘉州守张约受赇贬通判杭州累迁右谏议大夫河东都转运使加集贤院学士判尚书刑部进给事中知单州卒子秉常为梓州路转运使

△袁抗 【袁陟】

袁抗字立之洪州南昌人举进士得同学究出身调阳朔县主簿荐补桂州司法参军抚水蛮寇融州转运使俞献可檄抗权融州推官督兵粮与谋军事蛮治舟且至抗即杨梅石门两隘建水栅二据其冲贼不得入后因置戍不废事平特迁衡州推官改大理寺丞累迁国子博士知南安军擢提点广南东路刑狱浙东叛卒鄂邻抄闽越转南海与广州兵逆战海中值大风有告邻溺死者抗独曰是日风势趣占城邻未必死后果得邻于占城还为度支三司判官以尚书金部员外郎为梓州路转运使徙益州路时三司岁市上供绫锦鹿胎万三千匹抗言蜀民困惫愿少纾其力以备泰中他日之用是年郊祀蠲其数之半黎州岁售蛮马诏择不任战者却之抗奏朝廷与蛮人互市非所以取利也金山前后五部落仰此为衣食一旦失利侵侮不知费直几马臣念蜀久安不敢奉诏寻如旧制除江淮发运使召为三司盐铁副使时抗老为御史所

劾罢知宣州累迁光禄少卿分司南京改少府监卒抗喜藏书至万卷子陟少刻厉好学善为诗终殿中丞

△徐起

徐起字豫之濮州鄄城人举进士试秘书省校书郎知隰川县积官尚书都官员外郎知楚州枢密直学士张宗象荐之擢提点广南西路刑狱入判三司开拆司历开封三司度支判官馆伴契丹使还奏所过州县使官既去官吏将校皆出郊旅贺燕饮久之城邑为之空乃下约束禁止之出为荆湖北路转运使部有戍卒杀人系狱其徒钦劫之起闻亟往按诛之分其徒隶他州徙江西知徐州就为转运使募富室得米十七万斛赈饥民又移粟以贍河北京西凡三百万与安抚使刘夔不相能徙京西又徙江东起请开长淮旧浦以备漕运知兖州有都巡检虐所部兵百余人持兵至庭下州人大恐起以祸福开谕之众感泣听命因按致其首奏罢都巡检复为度支判官累迁秘书监知湖州卒

△张旨

张旨字仲微怀州河内人为保定军司法参军上书转运使锺离瑾愿补一县尉捕剧贼以自効瑾壮其请为奏徙安平尉前后捕盗三百余人尝与贼鬪流矢中臂犹手杀数十人擢试秘书省校书郎知遂城县迁著作佐郎明道中淮南饥自诣宰相陈捋荒之策命知安丰县大募富民输粟以给饿者既而浚淖河三十里疏泄支流注芍陂为斗门溉田数万顷外筑堤以备水患再迁太常博士知尉氏县徙通判忻州元昊反特迁尚书屯田员外郎通判府州州依山无外城旨将筑之州将曰吾州据险敌必不来旨不听城垂就寇大至乃联巨木补其罅守以强弩中外不相闻者累日人心震恐库有杂彩数千段旨矫诏赐筑城卒卒皆东望呼万岁贼疑以救至也州无井民取河水以饮贼断其路旨夜开门率兵击贼贼小郤以官军壁两傍使民出汲复以渠泥覆积草贼望见以为水有余督居民乘城力战贼死伤者众随解去以功迁都官员外郎徙知莱州叶清臣举材堪将帅召对改知邢州擢提点河东路刑狱范仲淹欧阳修言其鸷武有谋略除合门使固辞进工部郎中知凤翔府累迁光禄卿知潞晋二州以老疾权判西京御史台寻卒

△齐廓

齐廓字公辟越州会稽人举进士第自梧州推官累迁太常博士知审刑详议官提点荆湖南路刑狱潭州鞫系囚七人为强盗当论死廓讯得其状非强付州使劾正乃悉免死平阳县自马氏时税民丁钱岁输银三万八千两民生子至壮不敢束发廓奏蠲除之历三司度支开封

府判官出为江淮西南转运使时初兼按察同时奉使者竞为苛刻邀声名独廓奉法如平时积官光禄卿直秘阁以疾分司南京改秘书监卒
廓宽柔恭谨人犯之不校弟唐为吉州司理参军博览强记尝举贤良方正对策入等越州蒋堂奏廓及唐父母垂老穷居乡里二子委而之官
唐复久不归省于是罢唐令归侍养廓方使湖南虽置不问然士论薄之

△郑骧

郑骧字士龙河南人登进士第更庆汝郑秦州推官改秘书省著作郎知垣曲县康继英辟金书卫州判官事刘从德代继英又表骧有善
状进一官累迁三司度支判官建言蜀人引江水溉田率有禁岁旱利不均宜弛其禁又言京西旱旧禁粟无出国门可且勿禁庆历中与鱼周
询刺陕西民兵十余万除陕西转运按察使兼三门发运使加直史馆河北转运使入为度支副使河决德州入王纪口议欲徙州诏骧往视之
还言州不当徙已而州果无患又为河北转运使王则反讨平之除天章阁待制知凤翔府先是皇甫泌夏安期皆为转运使泌先谪去安期后
至不及赏骧固辞不受愿推功与二人复为河北都转运使累迁尚书工部郎中以疾知华州卒

△王臻

王臻字及之颍州汝阴人始就学能文辞曾致尧知寿州有诗名臻以文数十篇往见致尧览之叹曰颍汝固多奇士举进士第为大理评
事历知舒城会昌县通判徐定二州以殿中丞知兖州特迁监察御史中使就营景灵宫太极观臻佐助工费有劳迁殿中侍御史擢淮南转运
副使时发运司建议浚淮南漕渠废诸堰臻言扬州召伯堰实谢安为之人思其功以比召伯不可废也浚渠亦无所益召为三司度支判官而
发运司卒浚渠以通漕臻坐前异议降监察御史知睦州道复官徙福州闽人欲报仇或先食野葛而后趋仇家求鬪即死其处以诬仇人臻辨
察格鬪状被诬者往往释去俗为少变又民间数以火讹相惊悉捕首恶罪之民乃定仁宗即位累擢龙图阁待制权知开封府迁尚书工部郎
中奸人伪为皇城司刺事卒吓良民以取赇臻购得其主名黥窜三十余人下肃然以右谏议大夫权御史中丞建言三司开封府诸曹参军
及赤县丞尉率用贵游子弟骄惰不习事请易以孤寒登第更仕宦书考无过者为之又言在京百司吏人入官皆如长定格归司三年皆允其
奏未几卒臻刚严善决事所至有风迹云

△鱼周询

鱼周询字裕之开封雍邱人早孤好学举进士中第为大理评事历知南华分宜静

海三县迁太常博士通判汉州城中夜有火部众掾之
植剑于前曰攘一物者斩火止民无所失以尚书屯田员外郎知真州历知蔡州陕西用
兵科敛烦数命安抚京西路又使陕西刺民兵进起居
舍人知谏院固辞乃以尚书户部员外郎兼侍御史知杂事为三司盐铁副使时渭州城
水洛尹洙郑戩争未决诏周询与都转运使程戡相利
害周询是戡议遂城之累迁右谏议大夫权御史中丞庆历八年手诏近臣访天下之务
周询上言略曰陛下患西陲御备天下绎骚趋募兵士
急调军食虽常赋有增而经用不足臣以为生灵重困于兹为剧速宜经度以纾匱乏愿
委安抚使与本路守边掌计臣僚同议裁减冗兵节抑
浮费去武臣之庸懦出守宰之贪残通盐商之利改钱币之法宣布德泽劝勉农桑则公
有羨财私有余力矣陛下患承平寢久仕进多门政滥
员多糜费廩禄臣以为国家于制举进士明经之外复有任子流外之补负瑕衅服輿台
者亦寘班列愿特诏进士先取策论诸科兼通经义中
第解褐无令过多其文武班奏荐并流外出官者权停五七年自然名器不滥奔竞衰息
矣陛下患牧守之职罕闻奏最臣闻汉宣帝勉励二千
石其有治效者增秩赐金或爵至关内侯公卿缺则以次用之故良吏为盛愿诏两府大
臣选委两制台谏官参举如两任通判可充知州军京
朝官依次除补若治状尤异即升省府提转其常例入知州者一切停罢则进擢得人牧
守重矣陛下患将帅之任艰于称职臣闻晏子荐司马
穰苴曰文能附众武能威敌是知将帅之材非文武兼备则不可为愿择名臣选举深博
有谋知兵练武之士不限资级试以边任如祖宗朝任
郭进李汉超辈阃外之事俾得专之无以谤讪轻有迁徙使其足以取重则安有不称职
之忧乎陛下患西北多故边情罔测献奇譎空言者多
陈悠久实效者少臣伏见国家偃革止戈踰四十载而守边多任庸人不严武备因循姑
息为敌所窥愿陛下特议减三路兵马之弩冗者以纾
经费以息科敛然后选将帅择偏裨使戢肃骄兵饬利戎器识山川形胜用兵奇正虽二
边异时侵轶恃吾有以待之庶几无患矣时执政及近
臣所对多疏阔仁宗颇嘉周询详敏知恩州张得一诛坐失举出知成德军未行卒帝嗟
悼之特赠尚书工部侍郎周询性和易闻见该洽明吏
事在安州时园吏见大蛇垂阑楯即视之乃周询醉而假寐世传其异

△贾黯

贾黯字直孺邓州穰人【按东都事略作南阳人】擢进士第一起家将作监丞
通判襄州还为秘书省著作佐郎直集贤院迁左正言
黯自以年少遭遇备位谏官果于言事首论韩琦富弼范冲淹可大用杜枢覆张彦方狱

将驳正忤执政意执政以他罪绌枢黯言枢无罪且旨
从中出不因臣下弹奏恐自此贵幸近习言一得入则将阴肆谗毁害及善良不可不察
时言者或论事亡状辄戒励穷诘黯奏谏官御史迹既
疏远未尝预闻时政不免采于传闻一有失言而诘难沮辱随之非所以开广言路请如
唐太宗用王珪魏征故事每执政奏事听谏官一人随
入执政又患言事官旅进论议上前不肯止乃诏凡欲合班上殿者皆禀中书俟旨黯论
以为今得进见言事者独谏官御史若然言路将壅陛
下不得闻外事矣请如故便皆弗许依智高反余靖知桂州杨畋安抚广南东西路皆许
便宜行事黯言二人临事指踪不一则下将无所适从
又靖专节制西路若贼东向则非靖所统无以使众不若并付靖经制两路从之皇佑四
年同修起居注徙判盐铁句院迁左司谏建言天下复
置义仓下其说诸路而论者不一黯亦反复辨析卒不果行宰相刘沆请中外荐举陈乞
一切以诏令从事每用例论者以为非便黯奏罢之狄
青除枢密副使黯言国初武臣宿将扶建大业平定列国有忠勋者不可胜数然未有以
卒伍登帷幄不报会灵观灾又言当罢营缮赦守卫者
罪以示儆惧修省之意擢知制诰初仁宗视事退御迓英阁召侍臣讲读修起居注官独
先出黯言君臣访对动关政体史臣不得预闻请并召
侍经筵许之初迓英延义二阁讲读官自有记注至是乃罢焉直龙图阁钱延年擢天章
阁待制黯当命辞即诋延年不才不宜污侍从封词目
还中书命遂寢判吏部流内铨益州推官乘泽父留乡里死三年矣泽为弗知者而调京
师既觉而去黯奏劾废终身徙襄州父疾且亟请徙郡
及解官就养不报乃弃官去而御史吴中复等劾黯辄委州印挠朝廷法黜知郢州未及
任父卒服除句当三班院为翰林学士唐介等坐言陈
升之不当柄用皆外补黯奏介等敢言请宽之以疾请郡改侍读学士知邓州未行疾愈
复以为翰林学士知审官院累迁尚书左司郎中权知
开封府两军狱囚岁瘐死者众而吏不任其责黯言吏或怠于视囚饥渴疾病因以致死
请岁计死者多少而赏罚之御史中丞王畴与其属陈
经吕诲传尧俞谏官司马光龚鼎臣王陶皆言黯刚愎自任赦书下府罪应释者反重刑
之罢为同提举在京诸司库务英宗即位迁中书舍人
受诏撰仁宗实录权知审刑院为羣牧使时封拜皇子并除检校太傅黯言太师太傅太
保是为三师天子之所师法子为父师于义不可请自
今皇子及宗室属卑者皆毋兼师傅官随其迁序改授三公下两制议请如黯奏而中书
亦谓自唐以来亲王无兼师傅者国朝以三师三公皆
虚名故因而授之宜正其失诏可迁给事中权御史中丞未几以吕诲知杂事诲尝弹奏

黯逡巡引避黯言尝荐诲为御史知其方正谨厚一时
公言非有嫌怨愿终与其事诲乃就职时帝初即位王广渊周孟阳以藩邸之旧数召对
黯言俊义满朝未有一被召者独亲近一二旧人示天
下以不广请如太宗故事召侍从馆阁之臣以备顾问帝尝从容谓黯曰朕欲用人少可
任者黯对天下未尝乏人顾所用如何尔退而上五事
一知人之明二养育以渐三材不求备四以类荐举五择取自代后与两制合议请以濮
王为皇伯执政弗从数诣中书争论既病求出以翰林
侍读学士知陈州未行卒年四十四口占遗奏数百言犹以濮王议为请赠尚书礼部侍
郎黯修洁自喜在朝数言事或从或否人称其介直 【
按东都事略云黯初登第还南阳时范仲淹知邓州黯诸仲淹求教仲淹曰君不忧不显
惟不欺二字可终身行之黯拜其言后黯每以语人曰
吾得于范公不欺二字平生用之不尽也此介直之称所由来矣】

△李京

李京字伯升赵州人进士中第历平定军判官冀州推官改大理寺丞知魏县奉法
严正吏不便欲以奇中京遂相率遁去监司果议以苛
刻斥京知府任布曰如此适堕吏计中京赖以免徙永昌县通判赵州以王拱辰荐迁监
察御史时太史言日当食不食羣臣皆贺京上疏曰陛
下精意感格日当食而阴云蔽亏虽荧惑退舍桑谷并枯无以异也然臣窃有疑者自宝
元初定襄地震坏城郭覆庐舍十年不已岂非西北二
边有窥中国之意乎今孟夏雷未发声岂非号令不信乎愿陛下饬边备慎出命以厌祸
于未形又尚美人弃外馆多年比闻复召入臣虑假媚
道以为蛊惑宜亟绝之苗继宗嫔御子弟乃缘恩私为府界提点宜割帷薄之爱重名器
之分庶几不累圣政仁宗嘉纳授右正言数上书论事
宰相贾昌朝不悦京尝属侍御史吴鼎臣荐推直官李实鼎臣希昌朝意告中丞高若讷
若讷为鼎臣上京简谪京太常博士监鄂州税既至引
令狐峒钱徽事言臣为御史谏官首尾五年凡六上章四亲对自陈疾故恳求外补臣之
出处粗有本末会推直官李实岁将满因简鼎臣宜留
实补御史鼎臣亦谓议协公望不意逾两月乃诬臣与实为朋党臣与实僚友鼎臣乡曲
之旧惟陛下察之未几卒官诏录其子湛为郊社斋郎
【按宋史此下有吴鼎臣附传无事迹足录今从删】

△吕景初 【马遵】

吕景初字冲之开封酸枣人以父荫试秘书省校书郎举进士历汝州推官改著作
佐郎知夏阳县金书河南府判官通判并州高若讷荐
为殿中侍御史张贵妃薨有司请依荆王故事辍视朝五日或欲更增日听上裁乃增至

七日景初言妃一品当辍朝三日礼官希旨使恩礼过
荆王不可以示天下妃既追册为皇后又诏立忌景初力争乃罢时兵冗用度乏景初疏
奏当祖宗时四方割据中国纔百余州民力未完耕植
未广然用度充足者兵少故也而所征皆克自数十年来用数倍之民所向必败以此知
兵在精不在众望诏中书枢密院议罢诏补而汰冗滥
又言坐而论道者三公也愿陛下于辅臣侍从台谏之列择其忠信通治道者屡诏而数
访之幸甚又与言事御史马遵吴中复奏弹梁适与刘
宗孟连姻而宗孟与冀州富人共商贩下开封府劾治所言不实皆坐谪景初通判江甯
府徙知衡州复召还台嘉佑初大雨水景初曰此阴盛
阳微之诫也疏请择宗子之贤者问安侍膳宫中以消奸萌或尹京典郡为夹辅之势时
狄青为枢密使得士卒心议者忧其为变景初奏称天
象谪见妖人讹言权臣有虚声为兵众所附中外为之恟恟此机会之际间不容发盖以
未立皇子社稷有此大忧惟陛下蚤为之计则人心不
摇国本固矣数请中书白执政请出青文彦博以青忠谨有素外言皆小人为之不足置
意景初曰青虽忠如众心何盖为小人无识则或以致
变大臣宜为朝廷虑毋牵闾里恩也知制诰刘敞亦论之甚力卒出青知陈州李仲昌以
河事败内遣中人置狱景初意贾昌朝为之即言事无
根源不出政府恐阴邪用此中伤善良乃更遣御史同讯迁右司谏安抚河北还奏比部
员外郎郑平占籍真定有田七百余顷因请均其徭役
着限田令以户部员外郎累迁吏部员外郎擢天章阁待制知谏院病未入谢而卒马遵
字仲涂饶州乐平人积官礼部员外郎兼侍御史知杂
事改吏部直龙图阁卒性乐易言事不为激讦多见推行杜衍范仲淹皆称道之

△吴及

吴及字几道通州静海人年十七以进士起家为侯官尉闽俗多自毒死以诬仇家
官司莫能辨及悉为谳正前后活五十三人提点刑狱
移其法于一路辟大理寺检法官徙审刑院详议累迁太常博士是时仁宗春秋既高无
子及因推言阉寺以及继嗣事至和元年上疏曰臣幸
得待罪法吏辄原刑法之本以效愚忠窃惟前世肉刑之设断支体刻饥肤使终身不息
陛下当隆盛之时未享继嗣之庆或者宦官太多而
陛下未悟也臣闻汉永平之际中常侍四员小黄门十人尔唐太宗定制无得踰百员且
以近事较之祖宗时宦官凡几何人今凡几何人伏望
浚发德音进献宦官一切权罢擅官童幼寘以重法若然则天心必应圣嗣必广安宗庙
之策无先于此书奏帝异其言欲用为谏官而及以父
忧去嘉佑三年始擢秘阁校理踰月改右正言复上言储副者天下之根本陛下以宗庙

之重根本未立四方无所系心宜发自圣断择宗室子
以备储副听入侍禁中他日有嫡嗣则异其恩礼复令归邸于理无嫌于义为顺弭觊觎
之心属天下之望宗庙长久之策也既而又言开宝诏
书内侍臣年三十无养父者听养一子为嗣并以名上宣徽院违者抵死比年此禁益弛
天绝人理阴累圣嗣愿诏大臣明示旧制上顺天意以
绥福佑明年遂权罢内臣进养子又上书论政事谓仓廩空虚内外匱乏其弊在于官多
兵冗请汰冗兵省冗官然后除民之疾苦因条上十余
事多施用之建请择馆职分校馆阁书并求遗书于天下语在艺文略明年日食三朝及
言日食者阴侵阳之戒陛下渊默临朝阴邪未尽屏左
右亲幸骄纵亡节将帅非其人为敌所轻因言孙沔在并州苛暴不法燕饮无度庞籍前
在并州轻动寡谋辄兴堡砦屈野之衄为国深耻沔繇
此坐废又言春秋有告余陛下恩施动植使人如伤然州郡官司各专其民擅造闭余之
令夫二千石以上所宜同国休戚坐视流离岂圣朝子
育兆民之意遂诏灾伤闭余论如违制律久之迁右司谏在职数年以劲正称遇事无小
大辄言尝请毋纳羣臣上尊号出后宫私身及非执事
人毋以御宝白札子赐近幸家人冠帔及比邱尼紫衣并责执政大臣用李吉甫故事选
拔贤俊仿杜预遗法旌擢守令复置将作监官属专领
营造论入内都知任守忠陵辘辘马都尉李玮及干求内降会谏官陈升之建请裁节班
行补授下两制台谏官集议主铁冶者旧得补班行至
是议罢之既定藁及与御史沈起辄增注兴国军磁湖铁冶如旧制主磁湖冶者大姓陈
叔良也翰林学士胡宿等即劾及与起职在台谏而为
程氏经营占锢恩例请诏问状皆引伏及出为工部员外郎知庐州进户部直昭文馆知
桂州卒录其弟齐为大庙斋郎及当官有守初为检法
官三司请重铸铁钱法至死下有司议及争不可主者恚曰立天下法当由一检法邪及
曰义理为先安有高下卒不为诘

△范师道

范师道字贯之苏州长洲人进士及第为抚州判官知广德县通判许州累迁都官
员外郎吴育举为御史奏请罢内降推恩择宰相久其
任选宗室贤者养宫中备储贰初皇佑中贾昌朝上议置五辅郡设京畿转运使提点刑
狱号为拱辅京师而论者谓宦官谋广亲事亲从兵欲
取京畿财赋贍之因以收事柄师道力奏非便逐复旧制又以四年贡举士苦淹久请易
为三年宰相刘沆护葬温成皇后礼官议称陵师道以
为非典制数疏争沆恶之引着令台官满二年当补外出知常州台谏官共言师道不当
去不报徙广南东路转运使旧补摄官皆委吏胥无先

后远近之差师道为置籍次第之召为盐铁判官道改两浙转运使迁起居舍人同知谏院管勾国子监后宫周氏董氏生公主诸阁女御多迁擢师道上疏曰窃闻诸合女御以周董育公主御宝白札并为本人不自中书出诰掖庭覬觐迁拜者甚多周董之迁可矣女御何名而迁乎才人品秩既高古有定员唐制止七人而已祖宗朝宫闈给侍不过二三百居五品之列者无几若使诸合皆迁则不复更有员数矣妇人女子与小人之性同宠幸太过则渎慢之心生恩泽不节则无厌之怨起且用度太烦一才人之奉月直中户百家之赋岁时赐予不在焉况诰命之出不自有司恐斜封墨勅复见于今日矣时大星陨东南有声如雷又上疏曰汉晋天文志天狗所下为破军杀将伏尸流血甘氏图天狗移大贼起今朝廷非无为之时也而备边防盗未见其至必有包藏险心投隙而动者宜拣拔将帅训练卒伍诏天下预为备御仁宗晚年尤恭俭四方无事师道言虽过每优容之迁兵部员外郎兼侍御史知杂事判都水监与监官御史数奏枢密副使陈升之不当用升之罢师道亦出知福州顷之以工部郎中入为三司盐铁副使迁户部直龙图阁知明州卒师道励风操前后在言责有闻即言或独争或列奏如陈执中家人杀婢卒坐免夺王拱辰宣徽使李淑翰林学士及王德用程戡领枢密官宦官石全彬阎士良升进皆尝奏数其罪焉

△李绚 【何中立】

李绚字公素邛州依政人少放荡亡检兄绚教之书严其课业而出绚遨游自若比暮绚归绚徐取书视之一过辄诵数千言绚奇之稍长能属文尤工歌诗擢进士第再授大理评事通判邠州元昊犯延州并边皆恐邠城陴不完绚方摄守即发民治城僚吏皆谓当上言迟报绚不听帝闻之喜因诏他州悉治守备还为太子中允直集贤院历开封府推官三司度支判官为京西转运使是时范雍知河南王举正知许州任中师知陈州任布知河阳并二府旧臣绚皆以不才奏之未几召修起居注纠察在京刑狱时宰相杜衍各拔知名士寘台省恶衍者指绚为其党绚尝举陆经经坐赃贬而任布又言绚在京西苛察出知润州改太常丞徙洪州时五溪蛮寇湖南择转运使帝曰有馆职善饮酒者为谁今安在辅臣未喻帝曰是往岁城邠州者其人才可用辅臣以绚对遂除湖南转运使绚乘驿至邵州戒诸部按兵毋得动使人谕蛮以祸福蛮罢兵受约束复修起居注权判三司盐铁句院复纠察在京刑狱以右正言知制诰奉使契丹知审官院迁龙图阁直学士起居舍人权知开封府治有能名绚夜醉晨奏事酒未解帝曰开封府事剧岂可沉湎于酒邪改提举在京诸司

库务权判吏部流内铨初慈孝寺亡章献太后神御物
 盗已得绚考掠不得其情辄释去时知制诰何中立权发遣开封府事穷治之盗伏罪中
 立迁兵部员外郎纠察在京刑狱绚黜知苏州未行卒
 绚疏明乐易少周游四方颇练世务数上书言便宜仁宗春秋高未有继嗣绚因祀高禘
 还献赋大旨言宜远嬖宠近贤良则神降之福子孙繁
 衍帝嘉纳之性嗜酒终以疾死中立字公南许州长社人颇以文词自喜然嗜酒无行知
 杭州暴中风卒

△沈邈

沈邈字子山信州弋阳人进士及第起家补大理评事知侯官县通判广州累迁都
 官员外郎历知真州福州庆历初为侍御史时吕夷简
 罢相辅臣皆主官邈言爵禄所以劝臣下非功而授则为滥今边鄙屡警未闻庙堂之谋
 有以折外侮无名进秩臣下何劝焉又论夏竦除枢密
 使而竦阴交内侍刘从愿使从愿内济狡谲竦外专机务奸党得计人主之权去矣其言
 甚切权盐铁判官转兵部员外郎时选诸路转运加按
 察使邈与张昞之王素首被选邈加直史馆使京东岁余入为侍御史知杂事未几擢天
 章阁待制知澶州徙河北都转运使又徙陕西岁中加
 刑部郎中知延州卒邈疏爽有治才然性少检

钦定续通志卷三百三十二

●钦定续通志卷三百三十三 列传一百三十三

列传

宋 【三十七】

○宋三十七

张昞之	魏瓘【琰】	滕宗谅【刘越】	李防
赵湘	唐肃	张述	黄震
胡顺之	陈贯【安石】	范祥【育】	田京
梁鼎	范正辞【讽】	刘师	周渭
道	王济	方偕	曹颖叔
赵及	刘湜	王彬	刘元瑜
			杨告

张昞之

魏瓘

滕宗谅 【刘越】

李防

赵湘

唐肃
张述
黄震
胡顺之
陈贯
范祥
田京
周渭
梁鼎
范正辞
刘师道
王济
方偕
曹颖叔
刘元瑜
杨告
赵及
刘湜
王彬
△张昱之

张昱之字景山父秘自有传昱之进士及第补乐清尉润州观察推官校勘馆阁书籍迁集贤校理通判常州知温州蔡齐荐其才可用擢提点淮南路刑狱杨崇勋知亳州恃恩为不法诬蒙城知县王申罪械送狱昱之廉得冤状乃出申配奸吏若干人徙广南东路转运使夷人有犯其酋长得自治而多惨酷请一以国法从事权度支判官为京西转运使加直史馆徙河北被边诸州发卒斩西山木卒逃入契丹者岁数百人敌既利其所开地又得亡卒故不争昱之戒斩伐毋得深入北地卒亦不敢逃还为盐铁副使擢天章阁待制河北都转运按察使保州广信安肃军自五代以来别领兵万人号缘边都巡检司以知州军为使置副二人分所领卒为三部使援邻道太祖尝用之有功诏每出巡别给粮钱以优其后州将不复出内侍为副数出巡部卒偏得廩赐军中以为不均通判保州石待举言于昱之请合三部兵更出入季一出即别给钱粮余悉罢仍请以武臣代内侍时杨怀敏方任边事尤不悦巡检司云翼卒恶石待举遂杀之以作乱昱之自魏驰至城下召诸将部分攻城使

人请怀敏曰不即来当以军法从事既至以兵自卫显之叱去卫者城开田况潜杀降兵数百人显之预知其谋除户部副使既而坐前事夺职知虢州王则反贝州有言显之在河北捕得妖人李教不杀使得逸去今乃为则主谋事平无其人会冀州人段得致诣阙自言尝为叔父屯田郎中显赦免缘坐且言显以书属显之乃下御史按劾虽不得书犹夺三官监鄂州税知汉阳军稍迁刑部郎中复待制知湖州徙扬州以光禄卿致仕卒显之喜吏事所至有声

△魏瓘

魏瓘字用之父羽奏补秘书省校书郎监广积仓知开封府仓曹参军持法精审明吏事上元阙前张灯与宦者护作宦者视瓘年少辄诛索侵扰瓘密以闻诏杖宦者遣之瓘门人魏纲上疏诋天书流海岛瓘亦坐是停官复监邓州税鄂州茶以大理寺丞知衡山县通判寿州历知循随安州提点广南西路刑狱邕州獠户缘逋负没妇女为佣者一千余人悉奏还其家就除转运使刘鋹时计口以税虽舟居皆不免至是而雷化钦廉高州犹未除瓘为除之减柳州无名役四百人召权度支判官寻以罪降知洪州徙梓州路转运使还知蔡州潭州为京西转运使江淮制置发运使自主客郎中迁太常少卿知广州筑州城环五里疏东江门凿东西澳为水闸以时启闭焉拜右谏议大夫再任临江军判官史沆性险诋尝为瓘所劾免会广州封送贡余椰子煎等饷京师辄邀留之飞奏指以为珍货诏遣内侍发验无有沆坐不实废瓘亦降知鄂州未踰年复为陕西转运使徙河北以给事中知开封府政事严明吏民惮之内东门索命妇车得赂遗掖庭物付府验治狱未上内降释罪谏官吴奎言法当执奏而瓘不即奏行请以废法论降知越州依智高寇广东西独广州城坚守不能下于是论筑城功迁工部侍郎集贤院学士复知广州兼广东经略安抚使给禁卒五千听以便宜从事属狄青已破贼召还纠察在京刑狱议者请开六塔河塞商胡北流宰相主其说命瓘按视还奏以为不可塞下溪州蛮彭士羲叛将发兵讨除进龙图阁直学士知荆南瓘以为五溪之险师行鸟道诸将贪功生事于国家何所利因条上三策以招徕为上守御为下攻取为失不报后卒如瓘议徙澶州滑州又徙邓州请老以吏部侍郎致仕卒瓘所至整办与人置对未尝屈

弟琰

魏琰

琰字子浩以父恩授秘书省正字为吏强敏名齐于瓘尝通判陈州适岁饥百姓相

率强取人粟坐死者甚众琰曰此迫于穷饿岂得已者
坐其首黥之厯知寿润滁安州寿州盗杀寺童子有司执僧笞服琰悯其非罪命械纵去
一府争以为不可后数日得真盗富人犯法当死而死
狱中琰曰是尝欺匿异籍孤弱者财所以自毙覬不可穷治尔岂吏受赇而为之谋乎后
有告者如琰所料累官司农卿知福州徙广州以疾告
得知江甯府晚昏眊纵私人乱法日笞扑无罪吏卒监司劾奏召判刑部仍致仕进卫尉
卿卒

△滕宗谅 【刘越】

滕宗谅字子京河南人与范仲淹同年举进士其后仲淹称其才乃以泰州军事推
官召试学士院改大理寺丞知当涂邵武二县迁殿中
丞代还会禁中火诏劾火所从起宗谅与秘书丞刘越皆上疏谏宗谅曰伏见掖庭遗烬
延炽宫闕虽沿人事实系天时诏狱未释鞫讯尚严恐
违上天垂戒之意累两宫好生之德且妇人柔弱万一怀冤足累和气疏奏仁宗为罢诏
狱时章献太后犹临朝宗谅言国家以火德王天下火
失其性由政失其本因请太后还政而越亦上疏太后崩擢尝言还政者越已卒赠右司
谏而除宗谅左正言后迁左司谏坐言宫禁事不寔降
尚书礼部员外郎知信州与范讽雅相善及讽贬宗谅降监池州酒久之通判江甯府徙
知湖州元昊反除刑部员外郎直集贤院知泾州葛怀
敏军败于定州诸部震恐宗谅顾城中兵少乃集农民数千戎服乘城又募勇敢谍知寇
远近及其形势檄报旁郡使为备会范仲淹自环庆引
蕃汉兵来援时天阴晦十余日人情忧沮宗谅乃大设牛酒迎犒士卒又籍定州战没者
于佛寺祭酹之厚抚其孥于是边民稍安仲淹荐以自
代擢天章阁待制徙庆州上言朝廷既授范仲淹韩琦四路马步军都总管经略安抚招
讨使而诸路亦带招讨称号非所宜诏罢之御史梁坚
劾奏宗谅前在泾州费公钱十六万贯及遣中使检视乃始至部日以故事犒賚诸部属
羌又间以馈遗游士故人宗谅恐连逮者众因焚其籍
以灭姓名仲淹时参知政事力救之止降一官知虢州御史中丞王拱辰论奏不已复徙
岳州稍迁苏州卒宗谅尚气倜傥自任好施与及卒无
余财所莅州喜建学而湖州最盛学者倾江淮间有谏疏二十余篇 【刘越字子长大名
人少孤贫有学行亦宗谅同年进士尝知襄城固始
二县有能名既赠官又官其一子赐其家钱十万】

△李防

李防字智周大名内黄人举进士为莫州军事推官随曹彬入契丹授忠武军节度
推官括磁相二州逃户田增租赋十余万因请均定田

税又请县有破逃五十户者令佐降下考百户殿三选二百户停所居官能招携者旌赏之改秘书省著作佐郎通判潞州迁秘书丞体量二浙民饥建言逃户田宜即召人耕种使人不敢轻去畝亩而官赋常在又请京师置折中仓听人入粟以江浙荆湖物偿之擢开封府推官请与判官间三五日即府司军巡院察冤狱出为川陕路转运副使先是沿江水递岁役民丁甚众颇废农作防悉以城卒代之会分川陕为四路徙防梓州路转运使累迁尚书工部员外郎为三司户部判官景德初江南旱诏与张知白分东西路安抚上言秦羲尝增江淮两浙荆湖榷酤钱民颇烦扰江南以岁饥权罢而淮南荆湖未被德音诏悉罢之仍诏羲等毋得复增榷酤之利遂为江南转运使淮南旧不禁盐制置司请禁盐而官自鬻之使兵夫辇载江上且多漂失之患防请令商人入钱帛京师或输刍粮西北边而给以盐则公私皆利后采用之徙知应天府凿府西障口为斗门泄汴水淤旁田数百亩民甚利之又徙兴元府入为三司盐铁判官失举免官后起通判河南府徙知宿延亳三州为利州路转运使累迁兵部郎中纠察刑狱擢右谏议大夫知永兴军进给事中复知延州更耀潞二州卒防好建明利害所至必有论奏朝廷颇施行之其精力过人防在江南晏殊以童子谒见防命赋诗使还荐之后至宰相

△赵湘

赵湘字巨源华州人进士甲科历彰武永兴昭武三军节度推官迁秘书省著作佐郎知新繁县以吏最命知商州徙陇州兴元府再迁太常博士上补政忠言十篇召判宗正寺上书言元德李太后母育圣躬请祔太宗庙室后用其说擢殿中侍御史权判三司句院上言今季冬诞圣之月愿诏有司自仲冬留大辟弗决俟孟春临轩阅视真宗曰虑系囚益淹久吏或因缘为奸尔湘又上书请封禅未几命管句南宫北宅事东封泰山为东京留守推官礼成迁侍御史升州火命湘往致祠兼问民疾苦还言转运使刘照弛职不按部知洪州马景病不任事皆罢黜之纠察刑狱改尚书刑部员外郎兼侍御史知杂事湘又言旧制文武常参官日趋朝并赴待漏院俟禁门辟今多后时乃入望敕正衙门主者察晚至以惩其慢时帝亲制五箴以自儆湘因言宗室风化所本宜有以训厉愿特制铭以赐南北邸帝悦为制宗室座右铭赐宁王元偓以下并及湘祀汾阴为考制度副使请如周官置土训录所过州县山川与俗好恶日上奏御兼判宗正寺历三司户部度支副使祀太清宫管句留司三司事为盐铁副使再迁工部郎中直昭文馆出知河南府徙河中府为京西转运使又徙凤翔府延州迁太常少卿知襄州又知应天府进右

谏议大夫复知河南为集贤院学士以疾徙虢州卒

△唐肃

唐肃字叔元杭州钱塘人当钱俶时始七岁能诵五经名闻其国中举进士调郿县主簿徙泰州司理参军有商人寓逆旅而同宿者杀人亡去商人夜闻人声往视之血沾商人衣为捕吏所执州趣狱具肃探知其冤持之后数日得杀人者后守雷有终就辟为观察推官迁秘书省著作佐郎历知闻喜福昌县通判陕州召拜监察御史遂提点梓州路刑狱迁殿中侍御史入为三司户部判官出知舒州迁侍御史为福建路转运使判三司开折司再迁工部郎中知洪州寻为江南东路转运使擢三司度支副使奉使契丹还迁刑部为龙图阁待制登闻检院知审刑院卒子询以父任为将作监主簿累迁右谏议大夫进给事中卒赠礼部侍郎询子垺附王安石为监察御史里行自有传【按宋史此下有唐肃子询传无事迹足录今从删】

△张述

张述字绍明遂州小溪人举进士调咸阳县主簿改大理寺丞迁太常博士皇佑中仁宗未有嗣述上书言宜慎择宗亲才而贤者异其礼秩试以职务俾内外知圣心有所属则天下大幸至和元年复上疏曰臣历观前世或令出宫闱或谋起阉寺或奸臣首议利幼主以专政假后官以盗权安危之机发于顷刻朝议恬然曾不为计此臣拳拳为陛下言也述前后七上疏最后语尤激仁宗终不以为罪述慷慨喜论事历通判延州知泗州皆有政迹后以尚书职方员外郎为江浙荆湖福建广南路提点坑冶铁钱事行至万州道病卒

△黄震

黄震字伯起建州浦城人进士及第累迁著作佐郎通判遂州尝给两川军士缗钱诏至西川而东川独不及军士谋为变震白主者曰朝廷岂忘东川邪殆诏书稽留尔即开州帑给钱如西川众乃定明日诏至累迁尚书都官员外郎提点湖北路刑狱还判三司磨勘司擢江淮发运使先是李溥自三司小吏为发运使十余年奸赃狼籍震将行上书自陈辞颇愤激既至发溥奸赃数十事溥坐废而震亦为溥讼夺一官罢畏谓权不敢自直及谓贬乃复官知饶州徙广东转运使广南岁进异花数千本至都下枯死者十八九道路苦其烦扰震奏罢之既卒诏进其官一等

△胡顺之

胡顺之字孝先原州临泾人登进士第试秘书省校书郎知休宁县民有汪姓者豪

横县不能制岁租赋常不入适以讼逮捕不肯出顺之
曰令不行何以为政命积薪环而焚之豪大骇少长趋出叩头伏辜推其长械送州致之法【按涑水记闻载胡顺之为浮梁县令民臧有金者素豪横不肯出租养犬数头里正近其门辄噬之绕垣密植橘柚人不可入每岁里正常代之输租之至官乃令里正聚藁自抵其居以藁塞门而焚之臧氏人皆逃逸顺之悉令掩捕驱至县男子年十六以上尽痛杖之自是臧氏租常为一县先此事与宋史本传所载休宁县民汪姓事相类史不言其尝知浮梁】为青州从事高丽入贡中贵人挟以为重使州官旅拜于郊顺之曰青大镇也在唐押新罗渤海柰何卑屈如此独不拜大姓麻士瑶阴结贵侍匿兵械服用拟尚方亲党仆使甚多州县被陵蔑莫敢发其奸会士瑶杀兄子温裕其母诉于州众相视曰孰敢往捕者顺之持檄径去尽得其党有诏鞫问士瑶论死其子弟坐流放者百余人改著作佐郎知常熟县【按涑水记闻作洪州金判后家于洪州】迁秘书丞分司南京仁宗即位迁太常博士天圣明道间再上宰相书乞太后还政宰相匿不以闻太后崩其书出宰相家仁宗嘉其忠特迁尚书屯田员外郎【按涑水记闻以覃恩迁屯田员外】其后数论朝廷事仲淹爱其才然挟术尚权喜纵横捭阖以目失明废州里皆惮焉

△陈贯

陈贯字仲通其先相州安阳人后葬其父河阳因家焉少倜傥数上疏言边事举进士真宗识贯名擢寘高第为临安县主簿以秘书省著作佐郎为刑部详覆官改秘书丞为审刑院详议官历知卫州泾州督察盗贼禁戢不肖子弟簿书筦库赋租出入皆自检核尝谓僚属曰视县官物如己物容有奸乎擢利州路转运使岁饥出职田粟赈饥者又帅富民令计口占粟悉发其余徙陕西累迁尚书度支员外郎入为三司盐铁判官领河北转运使请疏徐鲍曹易四水兴屯田徙河东历三司户部盐铁副使以刑部郎中直昭文馆知相州还朝卒贯喜言兵咸平中大将杨琼王荣丧师而归贯上书曰前日不斩傅潜张昭允使琼辈畏死不畏法请自今合战而奔者主校皆斩大将战死裨校无伤而还与奔军同军岨城围别部力足救而不至者以逗留论真宗嘉纳之又尝上形势选将练是论三篇大略言地有六害今北边既失古北之险然自威虜城东距海三百里沮泽硗确非敌所能轻入由威虜西极狼山不百里地广平利驰突此必争之地凡争地之利先居则佚后起则劳宜有以待之昔李汉超守瀛州契丹不敢视关南尺寸地今将帅大抵用恩泽进虽谨重可信卒与

敌遇方略何从而出国家收天下材勇以备禁旅恬于
休息久不识战可以卫京师不可以戍边境请募土人隶本军籍丁民为府兵使北捍契
丹西捍夏人敌之情伪地势之险易彼皆素知可不战
而屈人之兵矣后以疾卒着兵略世颇称之子安石

陈安石

陈安石

安石字子坚以荫锁厅及第嘉佑中为夔峡转运判官民蓄蛊毒杀人捕诛其魁并
得良药图由是遇毒者得不死提点陕西刑狱摄帅鄜
延能用谍者敌动静辄先闻尝敕边民戒严既而数万骑奄至无所获而去玺书嘉之
使京西河东淮南京东知苏州邠州河中府加集贤殿
修撰为河东都转运使议行盐法谓其僚曰兴事当有渐急则扰乃出盐付民而俾之券
使随所得贸易鬻毕而归券私贩为减进天章阁待制
官军西征时遣县令佐督饷安石谓文吏畏怯武人邀功乃但取敢行者申约束以防众
溃王中正帅东师而西报安石持四十日粮而师驻白
草平弥月安石深念曰吾顿兵益久而秦甲未至倘不足于食将以乏军兴罪我即擅发
民再饷乃以闻李舜举劾其专诏置狱于潞安石自麟
州会逮俄而他路馈粮多不继神宗察其无罪赦之尚书省初建召为户部侍郎尝与右
曹李定同奏事帝目留之曰卿岂非在淮南日不肯保
李定持服者乎对曰诏问臣臣不敢不以实奏帝曰以实事君朕所与也进吏部侍郎选
人将改京官须次久临当引对率困于刑寺审问或沮
以微文则一跌不复安石请罢再问以绝曩弊遂为后法出知永兴军邓襄陈郑州河阳
至龙图阁直学士绍圣元年卒年八十一

△范祥

范祥字晋公邠州三水人进士及第自干州推官稍迁殿中丞通判镇戎军元昊围
城急祥帅将士拒退之请筑刘璠堡定川砦从之历知
庆汝华三州提举陕西银铜坑冶铸钱祥晓达财利建议变盐法后人不致易稍加损益
人辄不便提点本路刑狱制置解盐累迁度支员外郎
权转运副使古渭州距秦州三百里道经哑儿峡边帅数请城之朝廷以馈饷之艰不许
祥权领州事骤请修筑未报辄自兴役蕃部惊扰青唐
族羌攻破广吴岭堡围哑儿峡砦官军战死者千余人坐削一官知唐州后复官提举陕
西缘边青白盐改制置解盐使卒嘉佑中包拯言祥通
陕西盐法行之十年岁减榷货务使缗钱数百万其劳可录官其子孙景郊社斋郎熙宁
中平洮岷迭宕河州数千里置郡县以古渭为通远军
权陕西转运副使张洸奏朝廷复洮陇故地自将帅至裨佐悉有功赏皇佑中转运使祥

即古渭为砦此举足以消沮边隙身黜谋废臣窃悲之
冀推原旧功少赐褒恤诏赠秘书录一子未官者子育

范育

范育

育字巽之举进士为泾阳令以养亲谒归有荐之者召见授崇文校书监察御史里
行西夏入环庆诏育行边还言宝元康定间王师与夏
人三大战而三北今再举亦然岂中国之大不足以支夏人数郡乎由不察彼已妄举而
骤用之尔昨荔原之役夏人声言我自修垒不与汉争
三犯之然后掩杀虽追奔亦不至境由是观之其情大可见矣又使河东与韩绛筑啰鄂
等二砦始调外郡稍远边城前后三十万夫辽州最为
穷僻然犹土户配夫四百三十四僦直计三千缗下者十六人其直十万辇运所经二十
二驿宣抚司不先告期转运使临时督办致民皆破产
上下莫敢言独辽守李宏能约民力所胜而馈不失期顾以诉其实翻令鞫罪愿贷被劾
官吏其刍粮在道者随所至受之使已困之民咸蒙德
泽神宗皆从之坐劾李定亲丧匿服罢御史知韩城县诏往鄜延议画地界育言保疆不
如持约持约不如敦信前日疆场尝严矣一旦约败鬪
者跌于前耕者侵于后是封沟不足恃也使人左去而兵革右兴金缙朝委而烽烟夕举
是持约不足恃也今我见利而加兵当讲好之后复自
立界不亦愧乎安南行营郭逵赵高以兵十万伐交趾行及长沙病死相属逵高又不辑
睦育疏其不便不从久之知河中府以直龙图阁镇秦
州元佑初召为太常少卿改光禄卿枢密都承旨出知熙州时又议弃质孤胜如两堡育
争之曰熙河以兰州为要塞此两堡者兰州之蔽也弃
之则兰州危兰州危则熙河有腰膂之忧矣又请城李诺平汝遮川曰此赵充国屯田古
榆塞之地也不报入为给事中户部侍郎卒高宗绍兴
中采其抗论弃地及进筑之策赠宝文阁学士

△田京

田京字简之世居沧州其后徙亳州鹿邑举进士调蜀州司法参军自秦州观察推
官改秘书省著作佐郎为大理寺详断官赵元昊反侍
读学士李仲容荐京知兵法召试中书擢通判镇戎军入对陈方略寻为经略安抚判官
会遣翰林学士晁宗慆即军中问攻守孰便众欲大举
入讨京曰夏人之不道久矣未易破也今欲驱不习之师深入敌境与之角胜负此兵家
所忌师出必败或曰不如讲和京曰敌兵未尝挫安肯
降我哉未几元昊使黄延德叩延州乞降以奇兵出原渭败大将任福夏竦素不悦京坐
是改通判庐州徙知邵武军提点河北路刑狱事乃上

言请择要官守沧卫凿西山石白废道以限戎马义勇聚教复给粮置卒守烽燧用奇正法训兵徙战马内地以息边费凡十余事仁宗颇嘉纳之入为开封府判官坐械囚送狱道死出知蔡州徙相邢二州复提点河北刑狱事主则据恩州反京縋城趣南关入骁健营抚士卒保州振武兵焚民居欲应贼京捕斩之乃定贼遣其党崔象伪出降京以其持妖言惑众又斩以徇由是营兵二十六指挥在外者皆慑服不敢叛州之南关民众多如城中得不陷贼京有功焉京督士攻城甚力贼系京妻子乘城迫使呼曰毋亟攻城中将屠我辈矣京叱诸军益进攻注矢仰射杀其家四人贼知京无所顾乃牵妻子去恩州平以不能预察贼降监郢州税先是驻泊都监田斌亦以贼发不能捕待罪兵间及城破从诸将入以功迁宫苑副使而京独被谪御史言失察贼过轻忘家为国义独重不宜左迁乃徙通判兖州又徙知江阴军知密州历提点淮南刑狱事京西转运使累迁兵部员外郎直史馆知沧州转运使擢天章阁待制陕西都转运使改兵部郎中复知沧州拜右谏议大夫卒京为人尚气节少时与常山董士廉汾阴郭京相友善俱以倜傥闻

△周渭

周渭字得臣昭州恭城人【按涑水记闻作连州人】幼孤养于诸父力学工为诗刘鋹据五岭政繁赋重民不聊生渭率乡人六百踰岭将避地零陵遂奔道州为盗所袭脱身北上建隆初上书言时务召试赐同进士出身解褐白马主簿县大吏犯法渭即斩之上奇其才擢右赞善大夫时魏帅符彦卿专恣渭知永济县相见略不降屈县有盗伤人而逸渭捕获并暴虐匿者按诛之不以送府干德中通判兴州州领置口砦多戍兵监军敖狠纵其下为暴渭驰往谕以祸福斩其军校众皆慑服命兼本砦钤辖开宝元年凤州七房冶主吏盗隐官银择渭往代羨课数倍又迁知棣州殿直傅延翰为监军谋作乱走契丹为部下所告渭擒之以闻渭在郡以简肃称及还吏民遮道泣留太平兴国二年为广南诸州转运副使初渭之入中原妻子留恭城开宝三年平广南诏昭州访求及是渭始还故里乡人以为荣渭奏去刘鋹时税算之繁者复位田赋兴学校迁殿中丞属有事交址主将逗挠无功有二败卒擐甲先至邕州中夺民钱渭捕斩之后至者悉令解甲以入移书交址谕朝廷威信将刻日再举黎桓惧即遣使入贡就加监察御史徙知扬州进殿中侍御史改两浙东西路转运使入为盐铁判官迁侍御史历判户部度支二勾院出知亳州俄授宋州加职方员外郎为益州转运使坐从子违诏市马黜为彰信军节度副使咸平二年真宗闻其清节召还将复用诏

下而卒年七十七以其子建中为乘氏主簿渭妻莫荃贤妇人也渭北走时不暇与荃诀二子孩幼荃尚少父母欲嫁之荃泣誓曰渭非久困者今违难远遁必能自奋于是亲蚕绩碓舂以给朝夕二子皆毕婚姻凡二十六年复见渭【按涑水记闻载渭为广南转运时久已改娶使人访其故妻先与之别二十七年矣妻固不嫁育二子皆长渭欲复迎之妻曰君既有室我不可复往且我有孙妇居此久不可去渭为具奏诏特爵为县君并其二子渭皆为奏官宋史本传作二十六年复见渭不载渭改娶事附议】朱昂着莫节妇传记其事

△梁鼎

梁鼎字凝正益州华阳人祖钺仕蜀为剑门关使父文献乘氏令鼎太平兴国八年进士甲科解褐大理评事知秭归县再迁著作佐郎端拱初献圣德徽号颂迁殿中丞通判歙州以能声闻徙知吉州民有萧甲者豪猾为民患鼎暴其凶状杖脊黥面徙远郡太宗尤赏其强干代还赐绯鱼旧例当给银宝瓶带太宗特以犀带赐之记其名于御屏淳化中上言诏有司申明考绩之法庶几官得其人民受其赐俄为开封府判官迁太常博士三司右计判官又为总计判官换度支判官至道初建议兴三白渠及陈许邓颍蔡宿亳数州用水利垦田事具食货志迁都官员外郎江南转运副使就改起居舍人徙陕西二年五将分道击李继迁李继隆擅出赤柅路无功还奏军储失期鼎坐削三任复为殿中丞领职如故以母老求郡历知徐密二州真宗践位复旧官咸平四年迁兵部员外郎知制诰赐金紫时三司督逋负严急有久被留系者命鼎与薛映按籍详定多所蠲免踰月拜右谏议大夫度支使时西鄙未宁鼎建议陕西禁解池盐所在官鬻诏从之以鼎为制置使议者多言其非便鼎既行即移文禁止盐商所在约束乖当延州刘廷伟庆州郑惟吉皆不从规画又鼎奏运咸阳仓粟以实边粟已陈腐鼎即与民俟秋收易新粟上封章密陈其烦扰者甚众鼎始谋多沮坐首议改作非是诏罢度支使守本官景德初知三班院通进银台司兼门下封驳事出知凤翔府表求判西京留司御史台三年卒年五十二鼎伟姿貌磊落尚气有介节居官峻厉名称甚茂好学工篆籀八分尝着隐书三卷史论二十篇学古诗五十篇子申甫吉甫

△范正辞

范正辞字直道齐州人父劳谦获嘉令正辞登第调补安阳主簿开宝中判入等迁国子监丞知戎州改著作佐郎代还治逋欠于淄州转运使称其能转左赞善大夫就知淄州太宗征河东诸州部粮多不及期正辞所部长山

县吏张秀督民输受钱二千即杖杀之郡中畏服太平
兴国中改殿中丞通判棣深二州迁国子博士御史中丞刘保勋奏充台直会有言饶州
多滞讼选正辞知州事至则宿系皆决遣之胥吏坐淹
狱停职者六十三人会诏令料州兵送京师有王兴者怀土惮行以刃故伤其足正辞斩
之兴妻诣登闻上诉太宗召见正辞廷辨其事正辞曰
东南诸郡饶实繁盛人心易动兴敢扇摇苟失控驭则臣无待罪之地矣上壮其敢断特
迁膳部员外郎充江南转运副使饶州民甘绍为羣盗
所掠州捕系十四人狱具当死正辞按部察其非实命徙他所讯鞫既而民有告羣盗所
在者正辞潜召监军王愿掩捕之得所弃赃按其奸状
伏法而前十四人皆得释端拱二年代归监折中仓迁仓部员外郎同知幕府州县官考
课改判刑部厯户部盐铁二判官迁考功员外郎通判
定扬杭三州真宗即位迁膳部郎中召判三司句院俄复为盐铁判官咸平二年出为河
东转运使三年以本官兼侍御史知杂事时李昌龄自
忠武行军起知梓州董俨知寿州王德裔杨缵皆任转运使后失官宰畿邑正辞上言昌
龄辈贪墨着闻愿陛下罢其民政诏追还俨敕余悉代
之又举吴奋等五人堪任大郡复请令奋等各举知县县令从之坐鞫任懿狱贬滁州团
练副使会赦复为仓部考功员外郎通判郢州知淮阳
军复膳部郎中以年老求监兖州商税大中祥符三年卒年七十五子识讽并进士及第
范讽

范讽

讽字补之以荫补将作监主簿献东封赋迁太常寺奉礼郎又献所为文召试入等
出知平阴县会河决王陵埽水去而土肥失阡陌田讼
不能决讽分别疆畔着为券民持去不复争讽辨数邀昂喜为名声然亦操持在已吏不
敢欺举进士第迁大理评事通判淄州岁旱蝗他谷皆
不立民以蝗不食菽犹可艺而患无种讽行县至邹平发官廩贷民县令争不可讽曰有
责令无预也即出货三万斛比秋民皆先期而输徙知
梁山军以母老不行得通判郢州时知州李迪贬衡州副使宰相丁谓戒使者持诏书促
上道讽辄留迪数日为治装祖行诏塞决河州募民人
刍槁而城邑与丰户等讽改符使富人输三之二因请下诸州以郢为率朝廷从其言徙
知广济军民避水堤居凡给徭于官者讽悉纵使护其
家奏除其租赋累迁太常博士以疾监舒州灵仙观尚御药张怀德至观斋祠讽颇要结
之怀德荐于章献太后遂召还问所欲言对曰今权臣
骄悍将不可制盖指曹利用也利用贬拜右司谏三司度支判官百官转对敕近臣阅视
其可行者类次以闻讽奏上亲览决可否玉清昭应宫

灾下有司治火所起讽曰此天之戒告乃复置狱以穷治之非所以应天也狱由是得解
改尚书礼部员外郎兼侍御史知杂事钱惟演自许州
来朝图相位讽奏惟演尝为枢密使以皇太后姻属罢之示天下以不私固不可复用遂
以惟演守河南擢天章阁待制知审刑院出知青州再
迁户部郎中时山东饥宰相王曾青人家积粟多讽发取数千斛济饥民因请遣使安抚
京东入为右谏议大夫权御史中丞又请益漕江淮米
百万自河阳河阴东下以赈贷之钱惟演倡议献懿二太后宜祔真宗庙室讽弹奏之及
言其在太后时权宠甚盛且与后族连姻请绌去遂贬
惟演随州陈尧佐罢参知政事有王文吉者告尧佐谋反仁宗遣中官讯问复以属讽夜
中被旨究诘旦得其诬状奏之讽尝侍对帝语及郭后
亡子讽言亡子大义当废阴合帝旨以龙图阁直学士权三司使时狄棐为直学士已久
讽盛气凌棐宰相李迪右之遂特诏班棐上论者非之
寻转阁学士以疾免三司使改翰林侍读学士管句祥源观徙会灵观复改阁学士给事
中知兖州既至郡而庞籍为广南东路转运使未行上
言讽以三司使曲为左藏监库吴守则奏课迁官尚美人同父弟娶守则女讽以银鞍勒
遗守则相结纳既出兖州假翰林白金器数千两自随
而增产于齐州市官田亏平估置狱于南京劾之讽坐方听旨擅驰驿还兖州当赎籍所
奏有不实当免官宰相吕夷简嫉讽诡激特贬讽武昌
军节度行军司马 【按涑水记闻云范讽性倜傥好直节不拘细行自在场屋与鞠咏滕
宗谅游已有轩轻之名及为中丞力挤张士逊援吕
夷简意夷简引已至二府夷简忌其刚伉久之不敢荐引讽愤激求出知兖州将行奏曰
陛下朝中无臣一旦纪纲大坏然始召臣将无益夷简
愈恶之故寻被谴谪】 由是宰相李迪等坐亲善讽皆斥岁中徙保信军听居舒州持母
丧又许归齐州日饮酒自纵为时所讥服除改将作少
监知淮阳军迁光禄卿知陕州道改潞州入见帝言元昊不可击独以兵守要害捍侵掠
久当自服复给事中卒讽数短参知政事王随于帝前
又尝与张士逊议事不合及为庞籍讼人谓大臣阴讽籍焉讽颇旷达然捭阖图进不守
名检所与游者辄慕其所为时号东州逸党山东人颜
太初作逸党诗刺之而姜潜者又尝贻书以疏其过云子宽之

△刘师道

刘师道字损之一字宗圣开封东明人父泽右补阙师道雍熙二年举进士初命和
州防御推官历保窰镇海二镇从事凡十年擢著作佐
郎纔一月会考课又迁殿中丞出知彭州就加监察御史转运使刘锡马襄上其治迹召
归会浦洛之败奉诏劾白守荣辈狱成太宗奖其勤赐

绯鱼川陕豪民多旁户时有言李顺之乱皆旁户鸠集请释旁户为三耆长迭主之畴岁
劳则授以官师道奏非便卒罢之改祠部员外郎出为
京东转运使真宗嗣位进秩度支咸平初徙知润州改淮南转运副使兼淮南江浙荆湖
发运使以漕事入奏特迁司封俄为正使改工部郎中
代查道为三司度支副使擢枢密直学士掌三班俄擢三司使从幸澶渊判随驾三司充
都转运使坐论奏诬罔责为忠武军行军司马以郊祀
恩起为工部郎中知复州换秀州大中祥符二年以兵部郎中知潭州迁太常少卿师道
敏于吏事所至有声吏民畏爱长沙当湖岭都会剖烦
析滞案无留事岁满复加枢密直学士换左司郎中留一任卒年五十四师道性慷慨尚
气谈世务与人交敦笃工为诗

△王济

王济字巨川其先真定人祖卿避地深州饶阳遂为县人父恕唐时童子及第开宝
中知秀州会盗起城陷为盗所杀将并害济济号恟谓
贼曰吾父已死吾安用生为但恨力不能杀汝以报父讎尔贼义之舍去济携父骨匿山
谷间既而官军大集济脱身谒其帅朱乙陈讨贼之计
乙嘉之遗以束帛奏假驿置遣归先是济母终于岳阳权窆佛舍至是乃并护二丧还饶
阳州将以闻太祖召见以其尚少且俾就学雍熙中上
书自陈死事之孤得试学士院补龙溪主簿时调福建输鹤翎为箭羽有司督责急民甚
苦之济谕民取鹅翎代输仍驿奏其事因诏旁郡悉如
济所陈县有陂塘数百顷为乡豪斡其利会岁旱济悉导之分溉民田汀州以银冶构讼
十年不决逮系数百人转运使使济鞠之纔七日情得
止坐数人再调胙城尉徙临河主簿迁光禄寺丞权大理丞改刑部详覆官 【按宋事实
类苑云王济为刑部详覆官屡上封事是时各道置
提举茶盐酒税官朝廷因令访察民间事与吏之能否甚重其选会京西道阙太宗问左
右刑部有好言者为谁左右以济对帝即以授之宋史
本传不载附识】 通判镇州牧守多勋旧武臣倨贵陵下济未尝挠屈戍卒颇恣暴不法
夜或焚民舍为盗一夕报有火济部壮士数十潜往侦
伺果得数辈并所盗物即斩之驰奏其事都校孙进使酒无赖殴折人齿济不俟奏杖脊
送阙下繇是军城畏肃就迁太子中舍诏书奖劳召判
登闻鼓院拜监察御史上疏陈统天下之术节民物之道大者有十择左右别贤愚正名
器去冗食加奉禄谨政教选良将分兵戍修民事开仕
进其言切于时词多不载咸平初济以刑网尚繁建议请删定制敕乃命张齐贤领其事
济预焉刑统旧条持杖行劫不以赃有无悉抵死齐贤
议货不得财者济与齐贤廷争数四目齐贤为腐儒然卒从齐贤议人以济为刻改盐铁

判官车驾巡师大名调丁夫十五万修黄汴河济以为
劳民诏济驰往经度还奏省十六七齐贤时为相以河决为忧因对并召济见齐贤请令
济署状保河不决济曰河决亦阴阳灾沴宰相苟能和
阴阳弭灾沴为国家致太平河之不决臣亦可保上动容独留济问边事济曰谋谟当国
之人未有如昔之比此诚急贤之秋着备边策十五条
以献三年权判大理寺事坐故入停官逾年复为监察御史通判河南府景德初徙知河
中府契丹南侵上幸澶渊诏缘河断桥梁毁船舫稽缓
者论以军法济密奏寝其事召拜工部员外郎兼侍御史知杂事判司农事受诏与刘综
改定茶法颇易旧制拜本曹郎中出知杭州上面加慰
谕仍戒以朝廷阙失许密上言迁刑部郎中郡城西有钱塘湖溉田千余顷岁久湮塞济
命工浚治增置斗门以备溃溢之患仍以白居易旧记
刻石湖侧民颇利之大中祥符三年徙知洪州兼江南西路安抚使属岁荒民饥躬督官
吏为糜粥日亲尝而给之录饥民为州兵全活甚众是
岁卒年五十九岁遗奏大旨以进贤退谏佞罢土木不急之费为言济颇涉经史好读左
氏春秋性刚直无所畏避少时深州刺史念金锁一见
器之且托后于济金锁没济抚其孤援真禄仕素与内臣裴愈有隙愈坐事命宪府鞠之
济适知杂事力为办理遂获轻典子孝杰

△方偕

方偕字齐古兴化莆田人年二十进士及第为温州军事推官岁饥民欲隶军就廩
食州不敢擅募偕乃诣提点刑狱吕夷简曰民迫流亡
不早募之将聚而为盗矣夷简从之籍为军者七千人后迁汀州判官权知建安县县产
茶每岁先社日调民数千鼓噪山旁以达阳气偕以为
害农奏罢之迁秘书省著作佐郎历知福清资阳县累迁尚书屯田员外郎为御史台推
直官澧州逃卒佣民家自给一日诬告民事摩驼神岁
杀十二人以祭令卒疏所杀主名安验皆亡状事遂辨迁侍御史元昊寇塞门鄜延副总
管赵振逗挠不出掇诏偕往按之偕奏兵寡不敌饵贼
无益振由是得不死为开封府判官江南安抚三司岁出乳香绵绮下州郡配民偕奏罢
之更盐铁判官迁兵部员外郎兼御史知杂事判大理
寺改度支副使擢天章阁待制江淮制置发运使知杭州迁刑部郎中偕以吏事进治杭
州有能声喜饮酒以太常少卿分司西京迁光禄卿卒

△曹颖叔

曹颖叔字秀之亳州谯人进士及第历威胜军判官渭州军事推官御史中丞蔡齐
荐为台主簿改大理寺丞韩亿知亳州辟佾书节度判
官事通判仪州韩琦文彦博荐其才徙夔州路转运判官夔峡尚淫祠颖叔悉禁绝之提

点陕西路刑狱夏人纳款为开封府判官除直史馆知凤翔府徙益州路转运使权度支副使擢天章阁待制知福州累迁右司郎中为陕西都转运使自庆历铸大铁钱行陕西民盗铸不已三司上榷铁之议颖叔曰铁钱轻而货重不可久行况官自榷铁乎请罢铸诸郡铁钱以三铁钱当铜钱之一从之两川和买绢给陕西兵而蜀人苦于烦敛颖叔为岁出本路缙钱五十万以易军衣之余者两川之民始无扰焉进龙图阁直学士知永兴军卒于官

△刘元瑜

刘元瑜字君玉河南人进士及第补舞阳县主簿改秘书省著作佐郎知雍邱县通判隰并二州知郢州以太常博士为监察御史上言课考之法员外郎郎中少卿须清望官五人保任始得迁故浮薄辈日趋权门非所以养廉耻也诏罢之提举河北便余会永宁云翼军士谋为变百姓窃知多逃避元瑜驰至斩为首者其余皆释去不问历京西河东转运使迁右司谏劾奏集贤校理陆经在河南日杖死争田寡妇且贷民镪投托权要遂复馆职请重寘于法又疏李用和曹琮李昭亮不可典军梁适不当除翰林学士范仲淹以非罪贬既复天章阁待制宜在左右尹洙余靖欧阳修皆以朋党斥逐此小人恶直丑正者也既而与靖等相失因论靖知制诰不宜兼领谏职且奉使契丹对契丹主效六国语辱国命请加罪修靖深恶之繇是论者以元瑜为奸邪后除三司盐铁副使以天章阁待制知潭州獠人数为寇元瑜使州人杨谓入梅山说酋长四百余人出听命因厚犒之籍以为民徙桂州固辞降邓州知随州改信州徙襄州人伏其明历河中府以左谏议大夫知青州卒元瑜性贪至窃贩禁物亲与小人争权时论鄙之

△杨告

杨告字道之其先汉州绵竹人父允恭西京左藏库使有功既死赐告同学究出身调庐江尉时张景答吏死而吏捕急逃归告惧告不见纳告曰君勿忧也吾死生以之景卒免改丰城主簿邑有贼杀人人知主名而畏不敢言告闻亲往擒贼捕得致于法境内肃然再调南剑州判官知南安六合钱塘宁国县改大理寺丞通判江宁盗杀商人凿舟沉尸江中有被诬告者告疑其无状后数日果得真盗徙知池州累迁尚书司封员外郎开封府推官开拆司为赵元昊旌节官告使元昊专席自尊大告徙坐即宾位莫之屈也除京西转运副使属部岁饥所至发公廩又募富室出粟赈之获济者甚众以疾权管勾西京留台顷之判三司凭由理欠司为淮南转运使徙制置发运使除三司户部副使更度支安

抚河东改盐铁副使历祠部度支司封郎中以少府监复为制置发运使拜右谏议大夫知郑州徙江甯府寿州告晓法令颇知财利而不务苛刻时号能吏然喜事权贵以要进一子力学有文赐同进士出身未几卒告悲伤之寻卒
△赵及

赵及字希之其先幽州良乡人父的为偃师令因家焉及举进士为慈州军事推官徙广信军判官改秘书省著作佐郎知魏县徙九陇以母老监叶县税历黄河御河催纲通判青州大名府累迁尚书屯田员外郎被举为殿中侍御史权宗正丞诏劾夏守恩狱内侍岑守中用贿挠法及劾正其罪迁侍御史夏守贇经略西鄙还及言其无功不可复枢府又疏罢郭承佑团练使未几请知怀州徙徐州还为三司户部判官还兵部员外郎京东转运按察使兼侍御史知杂事数论时政权判吏部流内铨初铨吏匿员阙与选人为市及奏阙至即榜之吏部榜阙自及始迁户部副使以疾改刑部郎中直昭文馆知卫州召为盐铁副使又以疾请知汝州岁除复召为副使不赴徙知河中府特拜天章阁待制右司郎中祀明堂迁右谏议大夫还判大理寺流内铨出知徐州疾甚求解近职还州事乃以本官管勾南京留司御史台卒及和厚谦退内行尤笃所治有声民吏爱之

△刘湜

刘湜字子正徐州彭城人举进士为澶州观察推官再调湖南节度推官改秘书省著作佐郎知益都县徙阴平再迁太常博士通判剑州审阆州狱活死囚七人王尧臣安抚陕西荐之擢知耀州拜监察御史王德用自随州诏还近臣言其有反相湜保右之历开封府推官三司盐铁判官迁殿中侍御史上言转运使掎摭郡县苛束官吏人不得骋其材宜稍宽假不为改者绳治之诏诣渭州劾尹洙私用公使钱颇傅致重法还为尚书礼部员外郎兼侍御史知杂事同判吏部流内铨除盐铁副使议者谓湜探宰相意深致洙罪故得优擢焉明年宴紫宸殿副使当坐殿东庑湜不即坐趣出合门奏之坐谪知沂州徙兖州又坐沂州误出囚死罪降知海州起为河东转运使迁户部员外郎复为盐铁副使兼领河渠事汴水绝凿河阴新渠通漕运如故会江南饥擢天章阁待制知江甯府奏运苏州米五十万斛以资饥民除户部郎中知广州依智高初平湜练士兵葺械器作铁锁断江路有盗据山山民资之食即徙民绝饷盗困蹙乞降居二年母老求内徙遂徙徐州湜喜曰昔布衣随计今以侍从官三品复典乡郡过始望矣又以左司郎中知郢州迁龙图阁直学士知庆州改知密州以病卒

△王彬

王彬光州固始人祖彦英父仁偁奔新罗父子相继执国政彬年十八以宾贡入太学淳化三年进士及第历雍邱尉皇城司阴遣人下畿县多厉民令佐至与为宾主彬至捕鞫之致之法自是诏亲事官毋得出都城易右班殿直辞不受后以秘书省著作佐郎通判筠州历知抚州抚州民李甲饶英恃财武断乡曲县莫能制彬按治之索其家得所藏兵械又得服器有龙凤饰甲坐大逆弃市并按英尝强取人孥配岭南州里肃然擢提点荆湖南路刑狱徙知潭州入判三司户部句院出为京西转运使徙河北部吏马崇正倚章献太后姻家豪横不法彬发其奸赃下吏忤太后意徙京东又徙河东陕西复为三司盐铁判官判都理欠凭由司累迁太常少卿卒

钦定续通志卷三百三十三

●钦定续通志卷三百三十四 列传一百三十四

列传

宋 【三十八】

○宋三十八

杨亿【伟纭】

晁迥【宗悫】

刘筠

薛映

谢泌

孙何【仅】

朱台符

戚纶

张

去华【师德】

乐黄目

柴成务

杨亿

晁迥

刘筠

薛映

谢泌

孙何

朱台符

戚纶

张去华

乐黄目

柴成务

△杨亿

杨亿字大年建州浦城人祖文逸南唐玉山令亿将生文逸梦一道士自称怀玉山人来谒未几亿生有毛被体长尺余经月乃落能言母

以小经口授随即成诵七岁能属文对客谈论有老成风雍熙初年十一太宗闻其名诏

送阙下试诗赋五篇太宗深加赏异命内侍都知王仁浚送至中书翌日下制即授秘书省正字特赐袍笏淳化中诣阙献文改太常寺奉礼郎仍令读书秘阁献二京赋命试翰林赐进士第迁光禄寺丞属后苑赏花曲宴太宗召命赋诗于坐侧又上金明池颂太宗讶有司不时召宰相言旧制未贴职者不预即以亿直集贤院至道初太宗亲制九弦琴五弦阮文士奏颂者众独称亿为优二年迁著作佐郎帝知其贫屡有沾赉尝命为越王生辰使时公卿表疏多假文于亿真宗即位初超拜左正言诏钱若水修太宗实录奏亿参预凡八十卷而亿独草五十六卷书成乞外补就养知处州真宗称其才长于史学留不遣固请乃许之任召还拜左司谏知制造咸平中西鄙未宁诏近臣议灵州弃守之事亿上疏曰朔方地在要荒之外声教不及元朔中大将军卫青奋兵掠地列置郡县今灵州盖朔方之故墟僻介西鄙数百里间无有水草烽火亭障不相望当其道路不壅饷馈无虞犹足以张大国之威声为中原之扞蔽自边境屡惊凶党猖炽爵赏之而不恭讨罚之而无获资粮靡履所失至多将士丁夫相枕而死以致募商人输帛入谷偿价数倍孤壤筑城边民绎骚国帑匱乏不能制边人之命及济灵武之急数年之间凶党逾盛灵武危堞岿然仅存河外五城继闻陷没但坚壁清野坐食糗粮闭垒枕戈苟度朝夕未尝出一兵驰一骑敢与之角此灵武之存无益明矣臣以为存有大害弃有大利昔西汉贾捐之建议弃朱崖当时公卿亦有异论元帝力排众说奋乎独见下诏废之人颂其德臣以为类于灵武也必以失地为言即燕蓟八州河湟五郡所失多矣何必此为臣窃惟太祖命姚内斌领庆州董遵海领环州统兵裁五六千悉付以阨外之事士卒效命疆场晏然朝廷无吁食之忧疆场无羽书之警臣乞选将临边赐给廩赋资以策略许便宜而行倘寇扰内属挠之以劲兵示之以大信怀荒振远谕以赏格彼则奔溃众叛安能与大邦为敌哉若欲谋成庙堂功在漏刻臣以为彼众方黠积财犹丰未可以岁月破也景德初以家贫乞典郡江左诏令知通进银台司兼门下封驳事时以吏部铨主事前宜黄簿王太冲为大理评事【按宋史职官志吏部分四迁尚书侍郎俱有左右选其尚书所掌之左右选吏额主事各一人此称吏部铨主事盖吏也】亿以承吏之贱不宜任清秩即封诏还未几太冲补外俄判史馆会修册府元龟亿与王钦若同总其事其序次体制皆亿所定羣寮分撰篇序诏经亿审定方用之三年召为翰林学士又同修国史凡变例多出亿手大中祥符初加兵部员外郎户部郎中五年以疾在告遣中使致太医视之亿拜章谢以久疾求解近职优诏不许亿刚介寡合

当时文士咸赖其题品或被贬议者退多怨谤王钦若骤贵亿素薄其人钦若衔之屡抉其失陈彭年方以文史售进忌亿名出其右相与毁訾上素重亿皆不惑其说 【按东都事略云章献后之立也真宗欲得亿草制使丁谓谕旨亿难之谓曰大年勉为此不忧不富贵亿曰如此富贵亦非所愿也乃命陈彭年草制亿既频忤旨而王钦若陈彭年深相谗毁亿尝入直夜召见禁中命坐赐茶从容顾问久之出文藁数篋以示亿曰卿识朕书迹乎皆朕自起草未尝令臣下代作也亿惶恐不知所对顿首再拜而出乃知谗言得行矣此二事宋史本传不载但称钦若彭年毁訾而真宗不惑其说与事略异】 亿有别墅在阳翟亿母往视之因得疾请归省不代报而行上亲緘药剂加金帛以赐亿素体羸至是以病闻请解官授太常少卿分司西京许就所居养疗册府元龟成进秩秘书监起知汝州会加上玉皇圣号以为参详仪制副使知礼仪院判秘阁太常寺天禧二年拜工部侍郎明年权同知贡举坐考较差谬降授秘书监丁内艰属行郊礼以亿典司礼乐未卒哭起复工部侍郎令视事四年复为翰林学士受诏注释御集又兼史馆修撰判馆事权景灵宫副使卒年五十七 【按东都事略云亿尝代寇准草奏请皇太子亲政斥丁谓等奸邪事准既逐亿亦忧畏而卒年四十七景佑元年枢密使王晦叔上其事仁宗嘉叹诏赠礼部尚书谥曰文有司举故事非尝任二府及事东宫四品无赠官仁宗曰亿为国竭忠有君子之大节可拘以常典乎宋史本传不载附识】 录其子紘为太常寺奉礼郎亿天性颖悟自幼及终不离翰墨文格雄健才思敏捷略不凝滞对客谈笑挥翰不辍精密有规裁善细字起草一副数千言不加点窜而博览强记尤长典章制度时多取正喜诲诱后进以成名者甚众重交游性耿介尚名节多周给亲友故廩禄亦随而尽无子以从子紘为后弟伟

杨伟

杨紘

杨伟

伟字子奇幼学于亿天禧元年献颂召试学士院赐进士及第以试秘书省校书郎知衢州龙游县再补蕲州录事参军国子监荐为直讲驸马都尉李遵勗守澶州辟金书镇安军节度判官事迁大理寺丞知河间县再迁太常博士为集贤校理通判单州会巡检部卒李素合州卒二百余人谋杀巡检使入鼓角门州将不敢出伟挺身往问曰若属何为而反俱曰将有诉于州非反也伟曰持兵来非反而何若属皆有父母妻子以一朝忿而欲鱼肉之乎悉令投兵坐籍首恶得十余人斩之徙知祥符县提点开

封府界诸县镇公事权开封府判官又判三司开拆司
累迁尚书兵部员外郎同修起居注伟清慎无治剧才常秉小笏以朝知制诰缺中书以
伟名进仁宗曰此非秉小笏者邪遂命知制诰权谏院
尝曰谏臣宜陈列大事细故何足论然当时讥其亡补迁刑部郎中为翰林学士祀明堂
迁右司郎中判太常寺为羣牧使兼侍读学士进中书
舍人卒赠尚书礼部侍郎

杨紘

紘字望之以荫历官知鄞县鄞滨海恶少贩鱼盐者羣居洲岛或掠商人财物入海
吏不能禁紘至设方略使识者质恶少船及归始给还
且戒谕之由是不敢为盗以亿文献赐进士出身通判越州知筠州提点江东刑狱除转
运按察使江东饥紘开义仓振之吏持不可紘曰义仓
为民也稍稽人将殍矣紘御下急常曰不法之人不可贷去之止不利一家尔岂可使郡
邑千万家俱受害邪闻者望风解去或过期不敢之官
与王鼎王绰号江东三虎坐降知衡州徙越州为荆南转运使徙福建不赴知湖州复为
江东转运使官至太常少卿卒紘性严虽家居儿女不
敢妄言笑聚书数万卷手抄事实名窥豹篇

△晁迥

晁迥字明远世为澶州清丰人自其父佺始徙家彭门迥举进士为大理评事历知
岳州录事参军改将作监丞稍迁殿中丞坐失入囚死
罪夺二官复将作丞监徐婺二州税迁太常丞真宗即位用宰相吕端参知政事李沆荐
擢右正言直史馆献咸平新书五十篇又献理枢一篇
召试除右司谏知制诰【按东都事略云吕蒙正举应贤良方正科以迥方为谏官乃报
罢召试翰林迁右司谏擢知制诰与宋史本传异】
判尚书刑部帝北征雍王元份留守京师加右谏议大夫为判官进翰林学士未几知审
官院为明德章穆二园陵礼仪使同修国史知大中祥
符元年贡举封泰山祀汾阴司太常详定仪注累迁尚书工部侍郎使契丹还奏北庭记
加史馆修撰知通进银台司献玉清昭应宫颂史成擢
刑部侍郎进承旨时朝廷方修礼文之事诏令多出迥手迁兵部侍郎请分司西京特拜
工部尚书集贤院学士判西京留司御史台赐一子官
河南以就养仁宗即位迁礼部尚书居台六年累请老以太子少保致仕天圣中迥年八
十一召宴太清楼免舞蹈迥坐御史中丞之南与宰相
同赐御飞白大字进太子少傅后复召对延和殿帝访以洪范雨暘之应对曰比年变灾
荐臻此天所以警陛下愿陛下修饬王事以当天心庶
几转乱而为祥也既而献斧宸慎刑箴大顺审刑无尽灯颂凡五篇及感疾卒年八十四

赠太子太保谥文元迥善吐纳养生之术通释老书性
乐易宽简服通履正虽贵势无所屈历官临事未尝挟情害物真宗数称其好学长者杨
亿尝谓迥所作书命无过褒得代言之体喜质正经史
疑义标括字类有以术命语迥迥曰自然之分天命也乐天不忧知命也推理安常委命
也何必逆计未然乎子宗恂

晁宗恂

晁宗恂

宗恂字世良 【东都事略作世长】 以父荫为秘书省校书郎屡献歌颂召试赐
进士及第又除馆阁校勘三迁大理寺丞集贤校理迥
领西台宗恂求便养通判许州仁宗即位迁殿中丞同修起居注天圣中百官转对宗恂
请减上供息闲田择狱官令监司举县令累迁尚书祠
部员外郎知制造入翰林为学士兼龙图阁学士权发遣开封府事辨雪疑狱有能名元
昊反关中久宿师以宗恂安抚陕西与夏竦议攻守策
未还道拜右谏议大夫参知政事会朝廷以金饰胡床及金抹器赐嘉勒斯贺宗恂曰仲
叔于奚辞邑请繁缨孔子曰不如多与之邑繁缨诸侯
之马饰犹不可与陪臣况以乘輿之器赐外臣乎必欲优其礼不若加赐金帛后从帝郊
祠感疾数求罢除资政殿学士给事中数日卒赠工部
尚书谥文庄宗恂性敦厚事父母孝笃于故旧凡任子恩皆先其族人在翰林一夕草将
相五制褒扬训戒人得所宜尝密诏访边策陈七事颇
施用之

△刘筠

刘筠字子仪大名人举进士为馆陶县尉 【隆平集作馆陶县令】 还会诏知制
诰杨亿试选人校太清楼书擢筠第一以大理评事为
秘阁校理真宗北巡命知大名府观察判官事帝垂意篇籍筠预修图经及册府元龟推
为精敏车驾西巡又命筠纂土训是时四方献符瑞天
子方兴礼文之事筠数上赋颂及册府元龟成进左正言直史馆修起居注迁左司谏知
制造加史馆修撰出知邓州徙陈州还纠察在京刑狱
知贡举迁尚书兵部员外郎复请邓州未行进翰林学士初筠尝草丁谓与李迪罢相制
既而谓复留守别草制筠不奉诏乃更召晏殊帝久疾
谓浸擅权筠曰奸人用事安可一日居此请补外以右谏议大夫知庐州仁宗即位迁给
事中复召为翰林学士踰月拜御史中丞先是三院御
史言事皆先白中丞筠榜台中御史自言事毋白丞杂知天圣二年贡举数以疾告进尚
书礼部侍郎枢密直学士知颍州召还复知贡举进翰
林学士承旨兼龙图阁直学士同修国史判尚书都省筠素爱庐江遂筑室城中构阁藏

前后所赐书再知庐州卒筠景德以来居文翰之选初
为杨亿所识拔后遂与齐名时号杨刘凡三入禁林又三典贡部以策论升降天下士自
筠始性不苟合遇事明达而其治尚简严一子蚤卒田
庐没官包拯少时颇为筠所知及拯显奏其族子为后又请还所没田尘云

△ 薛映

薛映字景阳唐中书令元超八世孙后家于蜀进士及第授大理评事历通判绵宋
升州累迁太常丞王化基荐为监察御史知开封县太
宗召对为江南转运使改左正言直昭文馆为江淮两浙茶盐制置副使改京东转运使
积迁尚书礼部郎中擢知制诰权判吏部流内铨兼制
置羣牧使司以右谏议大夫知杭州映临决蠹锐庭无留事转运使姚铉移属州当直司
毋得辄断徒以上罪映即奏徙流笞杖自有科条苟情
状明白何必系狱以累和气请诏天下凡徙流罪于长史前对辨无所异听遣决之朝廷
施用其言遂发铉纳部内女口及鬻铜器抑取其直又
广市绫罗不输税皆得实在杭五年入知通进银台司兼门下封驳事封泰山为东京留
守判官迁给事中勾当三班院出知河南府祀汾阴还
驻蹕西京以映有治状赐御史嘉奖迁尚书工部侍郎集贤院学士判尚书都省进枢密
直学士知升州建言州以牛赋民出租牛死租不得蠲
帝览章矍然因令诸州条奏悉蠲之顷之纠察在京刑狱再判都省历尚书左丞知扬州
徙并州又徙永兴军拜工部尚书兼御史中丞仁宗即
位迁礼部再为集贤院学士判院事知曹州分司南京卒赠右仆射谥文恭映好学有文
该览强纪善笔札章奏尺牍为治严明吏不能欺每五
鼓冠带黎明据案决事虽寒暑无一日异也子耀卿秘阁校理孙绅直龙图阁

△ 谢泌

谢泌字宗源歙州歙人自言晋太傅安二十七世孙少好学有志操太平兴国五年
进士解褐大理评事知清川县迁著作佐郎端拱初为
殿中丞献所著文召试中书以直史馆赐绯时言事者众诏合门非涉侥望乃许受之繇
是言路稍壅泌抗疏陈其不可且言边鄙有事民政未
又狂夫之言圣人择焉苟诘而拒之四聪之明将有所蔽复言国家图书多失次序唐景
龙中尝分经史子集为四库望遵复故事遂令直馆分
典四部以泌知集库改左正言使岭南采访淳化二年久旱复上言时政得失时王禹偁
上言请自今庶官候谒宰相并须朝罢于政事堂枢密
使预坐接见将以杜私请诏从之泌上言曰伏覩明诏不许宰相枢密使见宾客是疑大
臣以私也陛下以聪明寄于辅臣自非接下何以悉知
外事若令都堂候见则庶官请见咨事略无解衣之暇今陛下囊括宇宙总览英豪朝廷

无巧言之士方面无姑息之臣柰何疑执政为衰世之事乎太宗览奏即追还前诏仍以泌所上表送史馆会修正殿颇施采绘泌复上疏亟命代以丹雘且嘉其忠荅拜左司谏一日得对便殿太宗称其正直敢言泌奏曰陛下从谏如流故臣得以竭诚时羣臣升殿言事者既可其奏得专达于有司泌请自今凡政事送中书机事送枢密金谷送三司覆奏而行从之俄判三司盐铁勾院奉诏解送国学举人黜落既多羣聚喧诟怀璧以伺泌出泌知之潜由他涂入史馆数宿不敢出请对自陈太宗问何官驺导严肃都人畏避有以台杂对者即授泌虞部员外郎兼侍御史知杂事上元观灯泌特预召自是为例转金部员外郎充盐铁副使顷之改度支副使因郊祀条上军士赏给之数太宗曰朕惜金帛止备赏赐尔泌因曰今陛下薄于躬御赏赐特优实厯代之所难也俄与王沔同磨勘京朝官知三班通进银台司出知湖州再迁主客郎中知虢州真宗初边人屡寇泌上疏曰雍熙末赵普录唐姚崇太平十事以献未几普复用时称致治之策无出于此寻普病又辽骑扰边因循未行今北边谧盗继迁请命则可行于今日矣省不急之务削烦苛之政抑奔竞来直言斯皆致太平之术也臣伏覩近诏以不逞之徒所陈述皆闾阎事臣闻古先哲王询于刍蕘察于迩言者盖虑视听之蔽故采此以达物情亦罕行其事也臣又闻辅时佐主建万世之基立不拔之策者必倚老成之人未闻市井之胥走■〈汙〉之吏可当其任也惟陛下察往古用贤致治之道则贤者亦必尽忠竭力以辅成太平之治矣咸平二年徙知同州代还与陈恕同知贡举复知通进银台司加刑部出为两浙转运使累迁太常少卿右谏议大夫判吏部铨大中祥符五年卒年六十三泌性端直然好方外之学录其子衍为太常寺奉礼郎衍将作监主簿衍为太子中舍

△孙何

孙何字汉公蔡州汝阳人父庸字鼎臣建隆初为河南簿太平兴国六年鸿胪少卿改左赞善大夫厯殿中丞知龙州卒何十岁识音韵十五能属文笃学嗜古为文必本经义在贡籍中甚有声与丁谓齐名友善时辈号为孙丁淳化三年举进士开封府礼部俱首荐及第又得甲科解褐将作监丞通判陈州召入直史馆累迁右司谏真宗初何献五议其一请择儒臣有方略者统兵其二请世禄之家肄业太学寒隳之士州郡推荐而禁投贖自媒者其三请复制举其四请行乡饮酒礼其五请以能授官勿以恩庆例迁帝览而善之【按东都事略云唐制郊祀行庆止进勋阶五代肆赦例迁官秩朱兴因之未暇革也何与起居郎耿望言其非制真宗

嘉纳遂定三年磨勘进秩之法郊礼止加散官勋爵】

咸平二年举入阁故事何次当待制疏请三部使额迁之六卿慎择户部尚书一人专掌盐铁使事俾金部郎中员外郎判之又择本行侍郎二

人分掌度支户部使事各以本曹郎中员外郎分判之是冬从幸大名诏访边事何疏曰陛下亲幸澶魏天声一振敌骑四逃虽镇定道路已通

而德棣烽尘未息此殆将帅或未得人边奏或有雍阕邻境不相救援糗粮须俟转输之所致也将帅者何或恃勇无谋或忌功玩寇但全城堡

不恤人民边奏者何护塞之臣固禄守位城池焚劫不以实闻老幼杀伤托言他盗不救援者何缘边州县城垒参错如辅车唇齿之相依若头

自手足之相卫托称兵少不出或待奏可乃行俟辇输者何敌骑往还森驰鸟逝赢粮景从万两方行迨乎我来寇已遁去此四者当今急务择

将帅则莫若文武之内参用谋臣防壅阕则莫若凡奏边防陛见庭问合救援则莫若督以军令听其便宜运糗粮则莫若轻赍疾驰角彼趯捷

今所虑荐食者惟东北无备之城缮完周防不可不慎且大河津济处处有之亦望量屯禁兵扼其要害则请和之使不日可待真宗览而嘉之

及傅潜逗挠无功何又请斩潜以徇俄权户部判官出为京东转运副使又献疏请择州县守宰省三司冗员遴选法官赠秩益奉未几徙两浙

转运使【按东都事略作京吏两浙转运使隆平集作京西两浙转运使】加起居舍人景德初代还判太常礼院俄与晁迥陈尧咨并命知

制诰掌三班院何先以被疾勉强亲职一日奏事帝前坠奏牒于地俯取之复坠笏有司劾以失仪诏释之何惭上章求改少卿监分司西京养

疾帝不许第赐告是冬卒年四十四帝在澶渊闻之悯惜录其子言为大理评事何好学乐名教勤接士类后进之有词艺者必为称扬然性褊

急不能容物在浙右专务峻刻州郡病焉【按东都事略云何褊急颇事苛察日有捶楚州县吏患之乃求纸本古碑字磨灭者揭之馆中何

至则读其碑辨识文字遂往往至暮不复省录文案又官属罹谴罚者甚众故从者依凭其威妄为寒暑所至骚然视宋史本传较详附识】

弟仅

孙仅

孙仅

仅字邻几少勤学与何俱有名于时咸平元年进士甲科兄弟连冠贡籍时人荣之解褐舒州团练推官会诏举贤良方正之士赵安仁以

仅名闻策入第四等擢光禄寺丞直集贤院俄知浚仪县历迁右正言知制诰同知审官院永兴孙全照求代真宗思择循良任之仅尝倅京府

谕民政乃命知永兴军府仅纯厚长者为政颇宽尝诏戒焉大中祥符元年加比部员外郎代还知审刑院累进给事中天禧元年卒年四十九录其子大理评事和为卫尉寺丞仅性端悫中立无竞笃于儒学士大夫推其履尚仅弟侑亦登进士第至殿中丞

△朱台符

朱台符字拱正眉州眉山人少聪颖十岁能属辞太宗廷试贡士多擢敏速者台符与同辈课试以尺晷成一赋淳化三年进士登甲科解褐将作监丞通判青州召入直史馆再迁秘书丞知浚仪县咸平元年与杨砺李若拙梁颢同知贡举俄以京府旧僚擢太常博士出为京西转运副使上言顷者晋氏失御中原乱离太祖深鉴往古酌取中道与民休息遣使往来二十年间大省戍边之卒不兴出塞之兵深得制御之道也陛下自天受命宜于此时修好契丹彼必欢悦慕义因与之尽捐前恶复寻旧盟利以货财许以关市如太祖故事则两国既和无北顾之忧可以专力西鄙继迁自当革心而束手矣又自请往使时论黷之咸平二年春旱诏求直言台符上疏请重农积谷任将选兵慎择守令考课黜陟轻徭节用均赋慎刑责任大臣与图治道奏入优诏褒答入为盐铁判官改判户部勾院拜工部员外郎换度支判官景德初郑文宝为陕西转运使或言其张皇生事命台符代之台符俊爽好谋然颇以刻碎为举职与杨覃联事覃颇欲因仍旧贯台符则更革烦扰议事违戾交相掎奏命御史视其状徙台符知郢州【按宋史杨覃传作随州】覃知徐州三年召还会执政有不喜者复出知洪州卒于舟次年四十二赐其子公佐同学究出身公佐卒又以次子寿隆试将作监主簿弟昌符大中祥符中举进士为屯田员外郎

△戚纶

戚纶字仲言应天楚邱人父同文自有传纶少与兄维以文行知名笃于古学喜谈名教太平兴国八年举进士解褐沂水主簿按版籍得逋户脱口漏租者甚众徙知太和县就加大理评事江外民险悍多构讼为谕民诗五十篇因时俗耳目之事以申规诲每岁时必与狱囚约遣归祀其先皆如期而还迁光禄丞坐鞫狱陈州失实免官久之复授大理评事知永嘉县境有陂塘之利浚治以备水旱复为光禄寺丞真宗即位转著作佐郎通判泰州将行秘书监杨徽之荐其文学纯谨宜在馆阁命为秘阁校理受诏考校司天台职官定州县职田条制诏馆阁官以旧文献帝嘉纶所著特改太常丞俄判鼓司登闻院出内府缙帛市边粮诏纶乘传往均市之景德元年判三司开拆改盐铁判官上疏言边事

甚被嘉奖拜右正言初置龙图阁待制与杜镐并命纶久次州县留意吏事每便殿请对语必移晷或夜中召见多所敷启俄上奏十事一曰王畿关辅二曰五等封建三曰复制科四曰崇国学五曰辟旷土六曰修贡举七曰任大臣八曰置平糶九曰益厢军减禁兵十曰修六典令式词颇深切二年命知贡举纶上言取士之法多所规制并纳用焉预修册府元龟会置官总在京诸司之务凡百三十司命纶与刘承珪同领其事判鸿胪寺先是羣臣诏葬公私所费无定式纶言其事定为制度以三公尚书九列之任谓宜采通礼六典令式比类沿革着为大典时论称之进秩右司谏兵部员外郎时诏禁羣臣匿名上封及非次升殿奏事纶谓忠谏之入当开奖言路若疏远之士尤艰请对帝颇嘉之大中祥符元年掌吏部选事方是时祥文荐降歌颂日兴纶恐流俗托朝廷嘉瑞事诈为神灵木石之异诱惑愚众如少君栾大者上疏极谏【按宋史本传载纶疏辞不若事略方是时数语能明上疏之意今据纂入】是冬封泰山命纶同计度发运事礼成迁户部郎中直昭文馆待制如故被诏同编东封祥瑞封禅记会峻得制之入又兼集贤殿修撰建议修释奠仪颁于天下立常平仓隶司农寺以平民糶皆从之尝宴饯种放于龙图阁诏近臣为序帝览纶所作称其有史才三年擢枢密直学士复领发运之职出知杭州就加左司郎中属江潮为患乃立埽岸以易柱石之制虽免水患而众颇非其变法胡则时领发运肆纵不检厚给李浦素恶之通判吴耀卿则之党也因共摺摭纶过徙知扬州维扬亦浦则巡内持之益急求改僻郡徙徐州八年罢学士授左谏议大夫代还复知青州岁饥发公廩以振全安甚众徙郢州王遵诲为劝农副使诬奏纶谤讪坐左迁岳州团练副使易和州天禧四年改保静军节度副使以疾求归故里改太常少卿分司南京五年卒年六十八纶笃于古学善谈名理喜言民事颇近迂阔事兄维友爱甚厚与交游故旧以信义著称士子谒见者必询其所业访其志尚随才诱诲之大中祥符中继修礼文之事纶悉参其议乐于荐士每一奏十数人皆当时知名士晚节为权幸所排遂不复振善训子弟虽至清显不改其纯俭既没家无余费家人于几阁闲得遗戒一篇大率皆诱劝为学天圣中子舜宾献其文诏赠左谏议大夫舜宾官太子中书

△张去华

张去华字信臣开封襄邑人幼励学敏于属辞以荫补太庙斋郎周世宗平淮南时年十八慨然叹曰兵战未息民事不修非馭国持久之术因着南征赋治民论献于行在召试授御史台主簿属三院议事不得预坐谓所亲曰

簿领之职非壮夫所为即弃官归郑州太祖建隆初始携文游京师大为李昉所称明年举进士甲科即拜秘书郎直史馆以岁满不迁上章自诉因言制诰张澹卢多逊殿中侍御史苏颂文学肤浅愿得校其优劣太祖命陶谷等考之澹以所对不应问降秩即擢去华为右补阙朝议薄其躁进以是不迁秩者十六年尝得对便殿询及家世遂诉父仕汉忤权贵因罹重贬宰相薛居正亦为言之太祖曰汉室不道奸臣擅权此朕所亲见也荆湖平命通判道州去华上言桂管为五岭冲要今刘鋹保境固守赖之为扞蔽若大军先克其城以趣番禺如践无人之境且言桂州可取状代还知磁干二州选为益州通判迁起居舍人知凤翔府从太祖征太原监随驾左藏库就命为京东转运使历左司员外郎礼部郎中太平兴国七年为江南转运使雍熙中王师讨幽州去华督宋州馈运命掌河北转运事三年加陕州未行会许王尹京命为开封府判官踰岁就拜左谏议大夫又令枢密使王显谕以辅成之意未几有庐州尼道安讼弟妇不实弟妇即徐铉妻之甥去华故不为治坐贬安州司马岁余召授将作少监知兴元府改晋州迁秘书少监知许州真宗嗣位复拜左谏议大夫迁给事中知杭州两浙自钱氏赋民丁钱有死而不免者去华建议请除之有司以经费所仰固执不许咸平二年徙苏州顷之以疾求分司西京景德元年改工部侍郎致仕三年卒年六十九尝献元元论大旨以养民务穡为急真宗深所嘉赏命以缣素写其论为八十轴列置龙图阁之四壁然不饬边幅颇为清议所贬以是不登显用子师古师颜国子博士师锡殿中丞

张师德

张师德

师德字尚贤去华十子最器师德举进士第一除将作监丞通判耀州迁秘书省著作郎集贤校理判三司都理欠凭由司建言有逋负官物而被系本非侵盗若惇独贫病无以自偿愿特蠲之真宗用其言尝奏事殿中帝访以时事条对甚备帝喜其后每遣使辄曰张师德可用契丹高丽使来多以师德主之天禧初安抚淮南改判司农寺擢右正言知制诰累拜左谏议大夫师德孝谨有家法不交权贵时相颇不悦之在西掖九年不迁卒于官子景宪为大中大夫

△乐黄目

乐黄目字公礼抚州宜黄人世仕江左李氏父史字子正太平兴国五年以现任官举进士既佐武成军复赐及第官至职方员外郎判留司御史台好著述咸平五年尽取其所著书藏秘府黄目淳化三年举进士补伊阙尉迁

大理寺丞知寿安县咸平中徙知壁州上章言边事召
对拜殿中丞直史馆知浚仪县俄上言请自今审官院差知州铨曹注县令候各及三二
十人一次引见于御前试时务策一道察言观行取其
才识明于吏治达于教化者充选则官得其人事无不治帝颇嘉其好古厯度支盐铁判
官迁太常博士京西转运使大中祥符中使契丹还改
工部员外郎广南西路转运使就拜起居郎改陕西转运使陈尧咨知永兴多纵恣不法
诏黄目察之得实以闻尧咨坐罢黄目入判三司三勾
院天禧初马元方奏黄目职事不举遂分三勾院以三人掌之黄目罢任奉朝请踰月拜
兵部员外郎知制诰黄目属辞淹缓朝议不称职迁右
谏议大夫权知开封府仁宗升诸拜给事中兼左庶子入内副都知张继能尝以公事请
托黄目事败降左谏议大夫知荆南府复为给事中徙
潭州长沙月给减于荆诸州特诏增之代还知审官院以疾改知通进银台司兼门下封
驳事求外任得知亳州卒年五十六录其子理国为卫
尉寺丞定国为大理评事

△柴成务

柴成务字宝臣曹州济阴人干德中京府拔解太宗素知其名首荐之遂中进士甲
科解褐陝州军事推官改曹单观察推官迁大理寺丞
太平兴国中累迁光禄少卿奉使高丽远俗尚拘忌以月日未利拜恩稽留朝使成务贻
书往反开谕大体国人信服淳化二年为京东转运使
会宋州河决成务上言河水所经地肥淀愿免其租税劝民种艺从之召拜司封郎中知
制诰与魏庠同知京朝官考课又与庠同知给事中事
凡制敕有所不便者许封驳以闻蜀寇平使峡路安抚改左谏议大夫知河中府时银夏
未宁蒲津当馈挽之冲事皆办集得脱户八百家以附
籍真宗即位迁给事中知梓州未几代还又遣知青州旋受诏与钱若水等同修太宗实
录书成知扬州入判尚书刑部本司小吏倨慢成务怒
而笞之吏击登闻鼓诉冤有诏问状成务叹曰忝为长官杖一胥而被劾何面目据堂决
事邪乃求解职景德初卒年七十一成务有词学博闻
稽古士人重其文雅然为郡乏廉称时论惜之成务年六十六始有子授奉礼郎名贻范
后为国子博士

钦定续通志卷三百三十四

●钦定续通志卷三百三十五 列传一百三十五

列传

宋 【三十九】

○宋三十九

乔维岳	张雍	魏廷式	卢琰	宋抟	凌策
杨覃	陈世卿	李若拙【绎】			
陈知微	上官正	卢斌	周审玉	裴济	李继宣
张旦	张煦	张佶	王延德		张
常延信	张质	杨允恭	秦羲	谢德权	阎日新
怀德					靳

乔维岳

张雍

魏廷式

卢琰

宋抟

凌策

杨覃

陈世卿

李若拙

陈知微

上官正

卢斌

周审玉

裴济

李继宣

张旦

张煦

张佶

王延德

常延信

张质

杨允恭

秦羲

谢德权

阎日新

靳怀德

△乔维岳

乔维岳字伯周陈州南顿人周显德初登第授太湖主簿迁平舆令开宝中擢为太

子中舍知高邮军通判扬州徙常州金陵平又移升州
改殿中丞太平兴国初徙襄州陈洪进表纳疆土以其子文显为泉州留后朝廷议择能
臣关掌郡事即起维岳为通判会盗起仙游莆田县百
丈镇众十余万攻城城中兵裁三千势甚危急监军何承矩王文宝欲尽屠其民燔府库
而遁维岳挺然抗议以为朝廷寄以绥远今惠泽未布
盗贼连结反欲屠城岂诏意哉承矩等因复坚守既而转运使杨克让率福州兵破贼围
遂解诏褒之归朝为淮南转运副使迁右补阙主为使
淮河西流三十里曰山阳湾水势湍悍运舟多罹覆溺维岳规度开故沙河自末口至淮
阴磨盘口凡四十里又建安北至淮濫总五堰运舟所
至十经上下其重载者皆卸粮而过舟时坏失粮纲卒缘此为奸潜有侵盗维岳始命荆
二斗门于西河第三堰二门相距踰五十步覆以厦屋
设县门积水俟潮平乃泄之建横桥岸上筑土垒石以牢其址自是弊尽革而运舟往来
无滞矣尝按部至泗州虑狱法掾误断囚至死维岳诘
之法掾俯伏且泣曰有母年八十余今获罪则母不能活矣维岳悯之因谓曰他日朝制
按问第云转运使令处兹罪卒如其言获免维岳坐贖
金百一十斤罢使职权知楚州迁户部员外郎代还为度支判官转本曹郎中出为两浙
转运使厯知怀州沧州会考课京朝官召还属真宗以
寿王尹京精择府僚留为开封府推官或言维岳在淮南决狱不平允左右有知其事者
辩之太宗特加赏异储关建兼左谕德转太常少卿京
府事繁维岳评处详敏真宗践祚即命维岳与毕士安权知开封府拜给事中知审官院
维岳陈乞外迁小州上嘉其静退特授海州刺史咸平
初知苏州素病风上以吴中多食鱼蟹乃徙寿州卒年七十六赠兵部侍郎官给其葬大
中祥符中录其孙世昌献之并赐同学究出身维岳明
习吏事有治剧才 【按宋史此下有王陟附传无事迹足录今从删】

△张雍

张雍德州安德县人治毛氏诗开宝六年中第释褐东关尉太平兴国初有荐其材
者召归改将作监丞知南雄州迁太子右赞善大夫知
开封府司录参军事俄为秘书丞充推官京城民王元吉者母刘早寡有奸状为姻族所
知忧悸成疾又惧元吉告之遂遣侍婢诉元吉寘堇食
中以毒已病将死事下右军巡按之未得实移左军巡推吏受刘贿掠治元吉自诬伏俄
而刘死府虑囚元吉始以实对又移付司录尽捕原推
吏稍见诬构之迹列状引见诏免死决徙元吉大呼曰府中官吏悉受我赂反使我受刑
乎府不敢决元吉厯陈所受赂主名又令妻张击登闻
鼓诉之帝召张临轩顾问尽得其枉状立遣中使捕原推官吏付御史鞠治雍坐虑问元

吉称冤戒吏止令鞫其毒母状致吏讯掠惨暴免所居
官雍熙初雍复为秘书丞御史台推直官改盐铁推官迁右补阙充判官端拱初转工部
郎中判度支句院又为盐铁判官兼判句院以本官兼
侍御史知杂事出为淮南转运使淳化初迁为太府少卿加右谏议大夫徙两浙转运使
俄复知梓州蜀州青城民王小波李顺作乱众至万人
雍训练士卒得城中兵三千余人又募强勇千余守城犇绵州金帛以实帑藏遣推官盛
梁请兵于朝未几益绵邛彭汉州永康军悉陷于贼顺
入成都僭号大蜀王势甚盛遣其党杨广将十万众寇剑门相里贵帅众十万围梓潼雍
与监军卢斌登堞望之贼所出兵皆老弱疲惫无铠甲
斌笑请开北门击之雍曰不可贼或许见老弱设伏伺我又城中吏民心未定脱为伏兵
所突则堕其奸计言未毕果有卒依敌楼呼啸与外应
和雍亟斩以徇贼大设梯冲火车昼夜鼓噪攻城益急城中大恐雍命发机石碎之火箭
杂下贼稍退复治攻具城西北隅雍给曰军士趣治装
吾将开东门击贼阳遣步骑五百临东门贼升牛头山瞰城内信然伏精兵万余山之东
隅以待我雍即召敢死士百辈缒而下尽焚其攻具自
午达申殆尽贼以为神凶党数乘城进战皆不利一日北风昼晦贼乘风纵火急攻北门
雍与卢斌等领兵据门立矢石间固守不动贼为之少
却长围八十余日会王继恩遣石知颺来援贼始溃去入奏帝手诏褒美擢雍给事中至
道二年改工部侍郎召归复知永兴军转礼部侍郎改
刑部充度支使咸平四年迁盐铁使帝以三司事重宜有裁制用王嗣宗代之拜户部侍
郎复知审刑院出知秦州徙凤翔府景德初权知开封
事改兵部侍郎同知审官院车驾朝陵判留司尚书省出知邓州大中祥符元年即请老
以尚书右丞致仕诰命未至而卒年七十雍性鄙吝莅
事勤恪善为米盐苛察以肃下恃其清干受遇于时益矫厉以取名誉所至藩镇宴犒率
皆裁节聚公钱为羨余以输官帑集会宾佐粝食而已
在三司置簿籍有按前急马前急急中急之目颇为时论所诮子太冲官殿中丞 【按宋
史此下有董俨传俨不学无操行用倾狡图位无事
迹足录今从删】

△魏廷式

魏廷式字君宪大名宗城人少明法学太平兴国五年中第释褐朗州法曹掾知桃
源县迁将作监丞端拱初改著作佐郎通判颍州淳化
二年始命李昌龄判审刑院以廷式明练刑章奏为详议官屡进对迁太子左赞善大夫
时初较廷臣殿最命廷式与枢密都承旨赵镕李着同
句当三班多所规制超拜主客员外郎判三司都句院换河南东道判官改户部员外郎

知利州李顺为盗就命充陕西至益州路转运使后入
奏事太宗谓曰有事当白中书廷式曰臣三千七百里外乘驿而至以机事上闻愿取断
宸衷非为宰相来也即不时召对问方略称旨令还任
贼平知益州未至召入判大理寺至道初乘传河朔决狱复出知宋潭二州湖南地土衍
沃民喜讼产有根柢巧伪难辩者廷式立裁之吏民咸
服转吏部员外郎知桂州历工部郎中真宗即位改刑部会王继恩有罪下吏命廷式同
按之踰宿而狱具俄知审官院通进银台封驳司拜右
谏议大夫知审刑院出知泾州咸平二年卒年四十九子舜卿禹卿同学究出身廷式所
至以严明称刚果敢言为人主厚遇然性倾险喜中伤
人士君子惮其口而鄙其行

△卢琰

卢琰字锡圭淄州淄川人父浚右谏议大夫琰太平兴国八年进士解褐历城主簿
历大理评事知安吉县三迁太常丞通判并州至道中
就加太常博士咸平二年选为开封府判官会狱空有诏奖之迁工部员外郎为河北转
运副使时北鄙未宁调发军储粮道不绝以职务修举
召入迁秩刑部复遣之任会城祁州命专董其役契丹入边车驾幸澶州琰定州随军至
大名即单骑赴行在召对劳问久之其子士宗时为隰
州推官特迁大理寺丞契丹请和琰求归阙许之以使劳优拜吏部员外郎判三司三句
院命权户部副使时议东封又权京东转运使往营顿
置加户部郎中复判三句院大中祥符二年以本官兼侍御史知杂事数月授三司度支
副使祀汾阴岁命判留守司三司加吏部郎中俄拜右
谏议大夫知永兴军府再为河北转运使琰勤吏职所至以干集闻卒年五十九时琰母
八十余无恙上悯之以士宗为太常博士特命知怀州
又以次子秘书丞士伦为太常博士给禄终养士伦至工部郎中度支副使士宗自有传

△宋抟

宋抟字鹏举莱州掖人开宝八年得第调补遂宁尉历潍州司理参军改白虎令膳
部员外郎鞠砺荐其能迁右赞善大夫知利丰监徙知
滕州改殿中丞通判洪州召还命提点河北西路刑狱未行改监左藏库迁国子博士通
判西京留守司得对便坐徙江南转运使就迁度支员
外郎真宗嗣位迁司封员外郎河东转运使上言大通监冶铁盈积可备诸州军数十年
鼓铸愿权罢采以纾民又请科诸州丁壮为兵以增戎
备在任凡十一年河东接西北境时边事未息屯师甚广抟经制漕运以干治称连徙他
州郡辄乞留有诏褒饬两至夏州界部发居民数诣阙
奏事称旨屡以秩满请代朝议以抟善职就加祠部郎中景德四年入判三司句院踰月

为户部副使大中祥符初进秩刑部郎中俄使契丹会疾契丹主以车迎之二年卒年六十六子可法舜元

△凌策

凌策字子奇宣州涇人幼孤独厉志好学雍熙二年举进士起家广安军判官改西川节度推官以强干闻淳化三年就命为光禄寺丞签书两使判官代还拜左赞善大夫通判定州李顺之乱川陕选官多惮行【按宋史地理志川峡分四路陕西别为一路此处陕字应是峡字之讹】策自陈三莅蜀境谙其民俗即命知蜀州又以巴西当益之饷道徙绵州加太常博士还朝命为广南西路转运使进屯田员外郎入为户部判官迁都官先是岭南输香药以邮置卒万人分铺二百负担抵京师且以烦役为患诏策规制之策请陆运至南安泛舟而北止役卒八百大省转送之费卢之翰任广州无廉称以策有干名拜职方员外郎直史馆命代之广英路自吉河趣板步二百里当盛夏时瘴起行旅死者十八九策请由英州大源洞伐山开道直抵曲江人以为便代还知青州东封以供亿之勤超拜都官郎中入判三司三司院出知扬州属江淮岁俭颇有盗贼以策领淮南东路安抚使驾旋使停进秩司封王旦言策莅事和平可寄方面望即以江南转运使授之仍诏谕差选之意饶州产金尝禁商市鬻或有论告逮系满狱策请纵民贩市官责其算人甚便之召拜右谏议大夫集贤殿学士知益州初策登第梦人以六印加剑上遗之其后往剑外凡六任时以为异策勤吏职处事精审所至有治迹自蜀代还上颇有意擢用会已病命知通进银台司兼门下封驳事纠察在京刑狱真宗尝对王旦言策有才有治蜀敏而有断旦曰策性淳质和临事强济上深然之是秋拜给事中权御史中丞时榷茶之法弊甚诏与翰林学士李迪知杂御史吕夷简同议经制稍宽其旧明年疾甚不能朝谒累遣中使挟医存问赐名药复表求典益寻拜工部侍郎从其请天禧二年三月卒年六十二录其子将作监主簿瓘琬并为奉礼郎

△杨覃

杨覃字申锡汉太尉震之后覃少献书于钱王俶俶私署著作佐郎从俶归朝为禹城尉太平兴国八年举进士擢第授徐州观察推官改著作佐郎知戎州再迁太常博士使陕西蠲逋负覃本名蟬至是太宗为改焉淳化中转运屯田员外郎同判寿州巡抚使潘慎修上其政绩就命知州事时田重进为永兴节度选覃与林特同判军府事重进不法覃事多抗执重进颇不悦形于辞色覃表求徙任不许就转都官员外郎时讨李继迁调发刍粮覃特皆以急促办为务覃令钳手特令即械颈人用怨嗟改职方员

外郎咸平初迁屯田郎中三门发运使吕蒙正在河南荐其才诏入判三司磨勘凭由理欠司四年春旱覃上言古之用刑皆避三统之月汉旧章断狱报重尽三冬之月又唐太宗凡断重刑日勅减膳彻乐今春物方盛时雨尚愆望诏有司死罪未得论决俟雨降乃复常典仍望自今凡决重刑日依唐故事以彰至仁之德尝献时务策五篇一曰御戎二曰用兵三曰为政四曰选贤五曰刑罚文多不载明年权同知贡举出为陕西转运使会边臣言继迁死愿乘此时深入攻讨覃建议伐丧非礼且其子尚在当为之备请诏边臣谨守疆候毋得轻举时西鄙屯兵调役甚繁副使朱台符务有为而覃务循旧且言边事不宜更张初寇准知青州台符为通判至是准作相覃意台符凭恃僚旧密以上闻坐不协徙知随州移唐州景德二年召归属河北兵革之后命覃诣澶滨棣德搏州巡抚振给之出知潭州王师讨宜贼军须多出长沙诏书褒劳加刑部郎中大中祥符二年为淮南江浙荆湖制置发运使改太常少卿直昭文馆知广州覃勤于吏事所至以干济称南海有蕃舶之利前后牧守或致谤议惟覃以廉着远人便之加右谏议大夫四年卒年五十四遣其长子奉礼郎文友乘传赴丧诏本州岛护柩还其家官给所费录其次子敏为扬州司事参军覃从弟蛻及从子侃传后名大雅自有传

△陈世卿

陈世卿字光远南剑人雍熙二年登进士第解褐衡州推官再调东川节度推官会李顺寇两川知州张雍以州兵马为数部使官分领世卿素善射当城一面亲射中数百人贼寢盛同幕皆谋图全计世卿正色曰食君禄当委身报国奈何欲避难为他图邪亟出白雍曰此徒皆懦儒存之适足惑众不若遣出求援雍从之贼既引去雍表其材就改掌书记归朝为秘书郎迁太常丞知新安县或荐其堪任宪台即召归会张鉴出知广州表为通判将行加太常博士景德初徙知建州真宗知其材干授福建转运使规画南剑州安仁等银场岁增课羨俄代姚铉为两浙路转运使历祠部员外郎判三司三句院大中祥符四年改度支员外郎出为荆湖北路转运使属澧州慈利县下溪等四州蛮人侵县境地四百余里朝命世卿与合门祗候史方知澧州刘仁霸同领兵讨之遂还所侵地标正经界取其要领又令纳所掠汉口千余复置澧州武口等砦以控制之自是平定还朝屡述溪洞利害真宗器其材复自言愿效用于烦剧乃授世卿秘书少监郡有计口买盐之制人多不使至即奏除之卒年六十四录其子南安主簿俨为太祝

△李若拙

李若拙字藏用京兆万年人父光赞贝冀观察判官若拙初以荫补太庙斋郎复举拔萃授大名府户曹参军俄又举进士擢上第授密州防御推官登贤良方正直言极谏科太祖嘉其敏贍改著作佐郎故事制策中选者除拾遗补阙若拙以恩例不及上书自陈执政恶之出监商州坑冶迁太子左赞善大夫太平兴国二年知干州会李飞雄诈乘驿称诏使事败伏法太宗以若拙与飞雄父若愚连名疑其昆弟即捕系州狱坐削籍流海岛岁余起授卫尉寺丞知陇州四年复旧官以政闻超授监察御史通判泰州御史中丞滕中正荐之召归台顷之改右补阙时诸王出合若拙献颂称旨召见赐绯鱼同句当河东转运兼云应等八州事尝诣阙言边事太宗嘉之又同掌水陆发运司雍熙三年假秘书监使交州先是黎桓制度踰僭若拙既入境即遣左右戒以臣礼繇是桓听命拜诏尽恭燕飧日以奇货异物列于前若拙一不留眄取先陷蛮使邓君辨以归使还帝谓其不辱命迁起居舍人充盐铁判官淳化二年出为两浙转运使契丹寇边改职方员外郎徙河北路五年直昭文馆迁主客郎中江南转运使若拙质状魁伟尚气有干才然临事太缓宰相以为言罢使知涇州至道二年黎桓复侵南鄙又诏若拙充使至则桓复稟命使还真宗嗣位召见慰问进秩金部郎中召试学士院改兵部郎中充史馆修撰俄知制造咸平初同知贡举被疾改右谏议大夫车驾北巡判留司御史台明年使河朔按边事知升贝二州卒年五十八子绎

李绎

李绎

绎字纵之幼谨愿自修初以父使交趾有劳补太庙斋郎改太常寺太祝举进士中第除将作监丞累迁尚书屯田员外郎知华州蒲城民李蕴诉人盗其从子亡去绎密刺蕴蕴有阴罪侄觉之惧事暴杀之以灭口遂收蕴致法擢提点河北刑狱权知贝州岁旱绎为酒务市民薪草溢常数饿者皆以樵采自给得不死官入亦数倍边民岁输防城火牛草十余万委积久辄腐败绎奏罢之三迁本曹郎中为利州路转运使河北经费不支仁宗问谁可任者参知政事薛奎荐绎遂徙河北进刑部郎中直史馆知延州改兵部为江淮制置发运使内出绢五十万匹责贸于东南绎曰百姓饥不宜重扰辄奏罢之甫半年漕课视常岁增五之一迁太常少卿再知延州绎所至颇称治自以久宦在外意不自得尝两知凤翔府至是又徙凤翔寻为右谏议大夫卒

△陈知微

陈知微字希颜高邮人咸平五年进士甲科解褐将作监丞通判歙州擢为著作佐郎直史馆俄充三司户部判官奉使契丹迁太常博士判三司都磨勘司再为户部判官出为京东转运副使奏还东平监所侵民田六百八十家又决古广济河通运路罢夹黄河岁减夫役数万计迁右司谏徙荆湖南路转运使召还拜比部员外郎知制诰淮南饥遣知微巡抚所至按视储粮察诸官吏能否使还判吏部铨兼刑部知微词藻虽无奇采而平雅适用思亦敏速又判司农寺纠察在京刑狱天禧二年加玉清昭应官判官卒年五十录其子舜卿为太常寺奉礼郎知微仪状甚伟沈厚有材干不务皦察有集三十卷子尧卿大中祥符五年进士及第

△上官正

上官正字常清开封人少举三传后为鄜州掇官雍熙中召授殿前承旨屡遣鞫狱迁供奉官合门祗候天雄监军淳化中转作坊副使【按隆平集作作坊使】剑门都监李顺之乱分其党趋剑门时疲兵数百人正奋励士气以御之会成都监军宿翰领兵投剑门与正兵合因迎击大破贼数千众斩馘殆尽太宗嘉之超正为六宅使剑州刺史充剑门部署翰自供奉官擢崇义使领昭州刺史数月正被疾复遣还任所授以方略令招抚残孽慰勉遣之初川贼甚盛朝议深以栈路为忧正以孤军力战挫贼锋自是阁道无壅王师得以长驱而入贼众三百余败归成都自此沮气矣后贼既诛余寇匿山谷恃险结集剽劫为患正谕以朝廷恩信皆相率出降未几加峰州团练使与雷有终并为西川招安使正木强好凌人自谓平贼有劳受人主知无所顾忌数面攻两川官吏之短众积怨怒多上章诉其不法者太宗谓近臣曰正婞直而失于谦和恐其不能自全乃赐手札戒谕曰当以和辑远民为念正上表谢真宗即位改庄宅使是秋广武叛卒刘吁啸聚数千辈逐都巡检使韩景佑略汉蜀邛州怀安永康军正与钤辖马知节领兵趋新汉抵方并击败之斩吁平其党迁南作坊使咸平初擢拜东一合门使句当军头引见司俄权户部使出知沧州徙高阳关副都署真拜洺州团练使车驾北巡以为行营先锋钤辖寻知青州会王均叛属命为峡路都钤辖移知梓州又历沧瀛镇贝四州高阳关部署求知磁州会邢州地震民居不安徙正典之移潞州景德中以河北新经兵革以正知贝州迁洺州防御使复知沧州移同州再表引年授左龙武军大将军平州防御使分司西京寻以本官致仕四年卒年七十五子璨

△卢斌

卢斌开封人以笔札事晋邸太宗即位补殿直雍熙中领兵屯霸州会大举北伐令

以五千骑随曹彬抵岐沟 【按宋史本传作祁沟隆
平集作岐沟考宋史地理志隆平集不悞今据改】 时契丹据河王师乏水斌请以千弩
斫砮契丹遁去遂移军夹河既克涿州令斌以万人戍
守会食尽大兵将还斌因恳言涿州深在北境外无援兵内无资粮丁籍残失守之无利
今若还师必须结阵而去以一阵之役比于固守其利
百矣复虑辽人乘便剽袭宜为之备彬以为然遂以兵拥城中老幼并狼山南还易州彬
之旋也无复行伍果为契丹所乘诸将皆以失律被谴
斌亦下枢密院问状太宗闻其尝建议弃涿州遂释不问以为霸州破虏军缘边巡检端
拱中又为永兴军华州巡检时大贼侯和尚刘渥劫兴
平栌阳斌率兵掩袭且追且鬪至耀州擒斩并尽以劳改供奉官召还面加奖慰授合门
祗候为梓遂十二州都巡检使许便宜从事淳化二年
贼任诱等寇昌合州斌侦知贼在龙水镇值大雨斌驰马四十里骑从数十人遂斩诱等
百余级贼众悉平富顺监蛮掠荣州斌晨夜倍道以赴
得州兵千人署随军粮料以张其势蛮乃遁追至地头镇东南八十里树栅招其酋谕以
朝旨歃血刻石为盟而遣之俄而荣戎资州富顺监贼
钞乡邑斌擒三百人部送阙下余悉临敌斩戮贼王尽复起荣资斌击灭之尽缚以献迁
内殿崇班是冬季顺为乱斌即率兵六百抵成都鬪战
连月杀数万人明年成都不守斌还梓州集十州兵赴援知州张雍委以监护之任会江
水泛滥毁子城斌劝谕州民翌日畚鍤大集自城西大
濠中掘堑深丈决西河水注之以环城二月贼渠相里贵众二十一万傅城下城中兵裁
三千斌曰军法倍兵不战然狂丑乌合非训练之师即
感厉士伍负土塞南北门为固守之计又突出与贼战击刺三十余合贼稍却俄复大设
机石连弩冲车云梯四面鼓噪乘城矢石乱下斌与州
将随机设备长围八十日会王继恩令石知颺率兵来援斌出东门迎劳王师贼不战而
溃斌乘胜追斩及纳降二万余五月贼数万围阆州斌
领千兵赴之斩首五千围遂解又至蓬州老雅山贼众三千为阵拒斌斌击败之至城下
贼复大集斩三千级蓬州平斌传诏安抚蓬阆渠达四
州擢授西京作坊使领诚州刺史斌在川陕六年以孤军御寇累立战功表求入奏太宗
遣使谕之曰俟妖孽尽殄当召汝既而贼党集梓绵汉
三州境上斌往平之未几代还太宗亲加劳问拜东上合门使检校左仆射加食邑三百
户上言葭萌路出师讨贼可直入利州若寇焚栈道剑
门之险不足固也请置砮栅从之寻命为银夏兵马钤辖遣与李继隆等五路出师讨李
继迁斌求对恳言不若坚保灵州于内地多积刍粮以
师援送苟其至也会兵首尾击之庶几无枉费而不失固圉之策矣时业已出师不从其

议改授灵环路钤辖领兵二万为前锋令于乌白池与诸军会斌谓李继隆曰灵州抵乌白池月余方至若自环州橐駝路裁十日程即不俟诏而往与诸将失期不见贼而还俄徙屯涇州以疾召归句当军头引见司咸平初卒年五十子文质殿中丞

△周审玉

周审玉开封人父勋以亲校事唐明宗累立战功太平兴国中至隰州团练使周显德初审玉荫补殿直从世宗平瓦桥关甚见亲信太祖受禅为供奉官未几加合门祗候累迁崇义洛苑副使西京作坊使雍熙中契丹犯塞潘美屯师定州审玉为监军尝与敌战而先锋刘绪陷贼审玉跃马趣击拔绪而还以勇敢闻淳化中知贝州有骁捷卒戍州者三十七人同谋杀审玉劫库兵而叛推虞候赵咸雍为首审玉觉之与转运使王嗣宗率兵悉擒其党以功领顺州刺史至道初徙并州钤辖咸平初知凤翔府有桑门乘传而西以市木为名威动府县审玉曰此有所倚而为也因按诘之尽得其奸状械送阙下以目疾代还奉朝请拜章请老得左千牛卫大将军致仕卒年七十四审玉少长兵间习知攻守之法子允迪为虞部员外郎

△裴济

裴济字仲溥绛州闻喜人唐相耀卿八世孙后徙家河中济少事晋邸同辈有恃悍者济屡纠其过失被谮出补太康镇将未几谮济者坐法太宗即位补殿直为天威军兵马监押及平太原征幽蓟济迎谒陪扈令监军易州契丹攻城不能下以劳迁西头供奉官太平兴国末江表盗起命为巡检迁崇仪副使召还迁崇仪使监戍兵于威虏军涂次镇州夜有贼骑扣城门大呼曰官军至矣州将然之促守吏开关济遽止之曰此必妄也及旦果有敌兵遽去太宗嘉之迁西上合门使定州都监就加行营钤辖寻知定州契丹三万骑来攻济迎击于徐河斩数千级获牛马铠仗甚众淳化初与周莹同判四方馆未几为镇州行营钤辖又与李继隆击贼于唐河济短兵陷阵贼大败走优诏褒美改四方馆使复知定州徙天雄军钤辖迁客省使复知定州至道二年改内客省使知镇州立春日出土牛以祭酌奠始毕有卒挟牛去济察其举止知欲为变亟命擒之果有窃发者数十人已劫鄜间矣悉搜捕腰斩之军民肃然济在镇定凡十五年威绩甚着召还知天雄军咸平初李继迁叛以济领顺州团练使知灵州兼都部署至州二年谋緝八镇兴屯田之利民甚赖之其年清远军陷夏人大集断饗道孤军绝援济刺指血染奏求救甚急兵不至城陷死之帝闻嗟悼特赠镇江军节度三子并优进秩济在诸使中甚有声望

及没夏人皆惜之子德谷虞部郎中德基至如京使德

丰殿中丞

△李继宣

李继宣开封浚仪人干德中补右班殿直裁十七岁命往陕州捕虎杀二十余生致二虎一豹以献太平兴国初掌南作坊使改供奉官出为邠宁庆三州巡检都监继宣本名继隆与明德皇后兄同姓名至是太宗改焉召还承受定州路奏事奉诏修长城口平塞威虜静戎军保州又领兵入敌境获老幼千余牛畜数百又率兵扞契丹于干盩泥姑海口契丹寇静戎军从崔彦进过拒马河接战大败之又为贝州监军雍熙三年曹彬北征继宣从先锋李继隆至方城力战三日大军继至遂克固州进壁涿州东又与敌鬪乘胜攻北门克之又将五千骑援米信因率劲骑追至新城北大败之继宣亦中流矢大军还雄州取刍粮遇契丹新城疾战至暮继宣中十创明日复战继隆为敌所邀继宣以所部拔之且战且行夺涿河数日乃至涿州及弃州保岐沟关又战拒马上追奔至孤山契丹乃引去留屯满城俄还贝州以功超授崇仪使代王继恩为易州驻泊都监又领骑兵五千戍北平押大阵东偏受田重进节度屯长城口敌至大沟继宣进满城敌至定州夺唐河桥重进召继宣赴援转鬪入定州敌兵北去重进命将五千骑蹶其后抵拒马河及敌据杨疇继宣径掩击之遂焚庐舍而遁雍熙四年为高阳关行营都监端拱初契丹骑至瀛镇继宣率步骑万人入敌境抵胜务焚聚落获生口契丹乃引还时易州候骑不至继宣于易州平塞军长城口威虜静戎顺安军至高阳为望橧七所举烽以候警急二年为镇定高阳关三路排阵都监押大阵西偏与李继隆部刍粮抵威虜还度徐河为敌追袭继宣驻军与鬪杀获甚众又败契丹于保州西射城追薄西山淳化三年徙知保州又转庄宅使筑关城浚外濠葺营舍千五百区造船一百艘人鸡距泉以运粮徙定州行营都监戍深州改高阳关行营都监课军中劲弩为入阵之备五年领高州刺史会契丹泛海劫千乘县继宣请于海口置砦以御之至道三年迁北作坊使俄加南作坊使出为镇州行营钤辖契丹寇定州命主无地分马敌至怀德桥继宣领兵三千掩袭之至则契丹已坏桥继宣横木而度追奔五十余里契丹焚镇州中渡常山二桥继宣领兵趣之契丹保丰隆山砦继宣伐木治常山桥契丹闻之大惧拔砦遁走继宣锐于追袭傅潜为部署继宣诣潜请行颇为所抑及召潜属吏诏继宣与高琼同主军事逐敌越拒马河复为镇州钤辖受诏按视缘边城砦权知威虜军敌骑至城下屡出兵设伏斩获甚众俄还镇州咸平四年拜西上合门

使领康州刺史为前阵钤辖与秦翰杨延昭杨嗣分屯
静戎威虜敌至会师于威虜延昭嗣轻骑先赴羊山继宣与翰分左右队各整所部翰全
军亦往继宣留壁赤虜止以二骑继进至则延昭嗣适
为敌所乘继宣即召赤虜之师与翰师合势大战敌走上羊山继宣逐之环山麓至其阴
继宣马连中矢毙凡三易骑进至牟山谷大克捷特加
检校官及食邑明年徙定州钤辖扞契丹于唐河会缘边都巡检使杨延昭杨嗣御敌师
败诏继宣与内殿崇班王汀代之望都之败敌骑剽郡
县继宣立徐河契丹数十队薄威虜威虜魏能与战走之久而继宣始至又寇静戎汀请
分兵自将袭契丹继宣拒之虽日出游骑侦敌势屡徙
砦而未尝出战为能汀所发召还令枢密院问状降为如京副使景德初加如京使镇州
钤辖契丹乘秋来攻时桑赞病足郑诚赴定州继宣独
主镇州全师厯屯邢赵及与契丹和命为高阳关钤辖复为西上合门使领康州刺史三
年兼知瀛州继宣罕识字帝以河间郡事繁命高继勋
代之止为钤辖大中祥符初徙镇定两路钤辖进秩东上合门使召还改郢州部署加四
方馆使以疾授西京水南都巡检使卒年六十四子守
忠

△张旦

张旦赵州人勇敢善射以经学中第至国子博士淳化中知陵州时李顺构乱连下
城邑贼党数万攻陵州旦修完战具置鹿角砦驱市人
进战大败之杀五千余人获器械万计特迁水部员外郎赐绯鱼由是知名数月西川招
安使上官正言雅州密迩蛮蜚镇抚须得其人张旦前
守陵州剑外伏其威名望改授诸司使令知州事帝以省郎之重不欲换他职乃授刑部
员外郎赐金紫乘传之任真宗即位迁兵部员外郎改
尚食使知德清军景德中契丹入寇陷军壁旦与其子利涉率众奋击并战没帝闻之惊
悼特赠左卫大将军深州团练使利涉崇仪副使录其
四子官时有上封事者言朝廷宜优加恩典以劝忠臣诏以恤旦事告谕天下

△张煦

张煦字辅昉开封人开宝末补府中牙职雍熙二年为殿前承旨迁殿直歙州监军
凶人黄行达弟坐法抵死行达诬州将故入其罪诏煦
鞫之即日决遣还擢供奉官合门祗候又改内殿崇班镇定邢赵山西土门路都巡检使
契丹骑兵剽境上煦以所部斩首数十走之代还拜兵
备库副使权知环州改岢岚军使又知保安军咸平中王均乱蜀以煦为绵汉剑门路都
巡检使又与雷有终进攻成都煦主东砦焚其郛及楼
堞均突围而遁贼平以功就迁正使益州都监提总本路诸军事夏人寇边改泾原仪渭

都钤辖又为邠宁环庆路钤辖兼巡检安抚都监累蹶寇入贼中掩杀甚众有诏嘉奖会遣王超张凝秦翰援灵武命煦为西路行营都监至镇戎闻灵武已陷复还本任与张凝入西夏境夏人七百余邀战煦击杀甚众清远故城有酋长请以甲骑三万来降煦与凝曰此诈也亟严兵以待之果然凝按部归环州道为敌所邀煦闻之领所部锐兵自庆州赴之一夕与凝会射杀其大将与凝同还景德元年加领贺州刺史复为泾原仪渭镇戎军钤辖再知环州四年宜州戍卒陈进反命副曹利用为广东西路安抚使卢均僭号南平王围象州煦以兵会利用斩之初与利用同署纸人持百枚备给立功将士及破贼利用在前军无所给煦在后而所给过半真宗谓其太过贼平改如京使知怀州权河阳钤辖迁文思使知曹州会江淮灾歉以煦为江南西路安抚都监俄还济阴加北作坊使又徙沧州就转宫苑使领康州刺史大中祥符九年加领昭州团练使知鄜州未几复知沧州天禧三年拜西上合门使徙并代钤辖以老疾求近郡得知磁州卒年七十三煦明术数善相宅时称其妙

△张佖

张佖字仲雅本燕人后徙华州渭南初名志言后改焉父昉殿中少监佖少有志节始用荫补殿前承旨以习儒业献文求试换国子监丞迁著作佐郎监三白渠知泾阳县端拱初为太子右赞善大夫曹州民有被诬杀人者诏往按之发摛奸伏冤人得雪寻通判忻州迁殿中丞兼御河督运至道中通判陕州再部送刍粮赴灵武就改国子博士咸平初擢为陕西转运副使赐绯鱼至延安遇夏人入寇亲督兵击败之三年徙西川转运副使时诏讨王均以馈饷之劳迁虞部员外郎贼平以佖为利州路转运使有荐其武干者召还授如京使泾原钤辖兼知镇戎军徙麟府路钤辖夏人来寇佖率兵与战亲射杀酋帅俘获甚众景德中徙益州钤辖加宣州刺史迁文思使佖御军抚民甚有威惠蜀人久犹怀之大中祥符四年车驾祀汾阴以为西京旧城巡检钤辖会秦州李浚暴卒帝语近臣曰天水边要宜速得人马知节称佖可任帝然之遂改骐骥使就命知秦州至州置四门砦开拓疆境边部颇怨又临渭置采木场戎人不之争移帐而去佖不甚存抚亦不奏加赉赐边人追悔引众劫掠佖深入掩击败走之议者又欲加恩宗哥立遵等族以扼平夏佖请拒绝之徙邠宁路钤辖天禧初召为契丹国信副使再任邠宁兼知邠州迁宫苑使擢拜西上合门使复为泾原钤辖卒年六十九佖涉猎书史好吟咏勇敢善射有方略其总戎护塞以威名自任子宗象

△王延德

王延德开封东明人父温晋末契丹内侵温率乡豪捍蔽境内里人德之宣祖掌畿甸兵与温厚善延德方总角宣祖爱其谨重召置左右太宗尹京署为亲校太平兴国初授御厨正使加尚食使领蓟州刺史兼掌武德司改皇城使掌御辇院左藏库延德所领凡五印因对恳让遂罢左藏御厨八年兼充亲王诸宫使延德素谨慎以旧恩每延访外事端拱初领本州岛团练使淳化中当进秩延德与王继恩杜彦钧使额已极特置昭宣使以延德等为之至道二年加领平州防御使真宗嗣位改领怀州咸平初出知华州占谢日面请罢昭宣使从之帝幸大名为东京旧城都巡检使明年以风痹请告遣还本郡是冬卒年六十四赠邕州观察使延德所至好撰集近事先是诏史官修太祖太宗实录多以国初事访延德又上太宗南宫事迹子应昌庄宅使端州团练使

△常延信

常延信井州平晋人祖思仕周历昭义归德平卢三镇节度延信皆补牙职领和州刺史思卒入为六宅使领郡如故太祖即位改领平州坐与妻族相讼左授右监门卫副率出为潼关监军延信以关路岩险奏易道路及填禁防役工四十余万又监通许镇兵改梓遂十二州都巡检使亡命卒多聚山林为寇延信领徒捕杀三百余人历全邵六州都巡检使就充羊状六砦都钤辖【按宋史地理志全州清湘县注云有香烟禄塘长鸟羊状硖石磨石获源七砦又按方輿纪要羊状作羊泚】迁右卫副率会诚州蛮归款命延信驰入溪洞索其要领又逐蛮直趣古镇过西延大木诸洞蛮人慑伏淳化中历襄邓宋曹等州都巡检使改左监门卫将军屡部徒修护河防改左领军左屯卫二将军充西京水南都巡检使有盗掠彭婆镇及甲马营延信驰以往悉擒之咸平中历太康巩县二监军景德二年卒年六十四【按宋史此下有程德元王延德魏震三传宋史列传第六十八有两王延德卷首之王延德封人此为大名人考宋会要雍熙中供奉官于延德使高昌此王延德亦以供奉官使高昌或即于延德之讹也与德元震俱无事迹足录今并从删】

△张质

张质字守朴博州高唐人少孤养于兄赞赞为枢密院典谒质因得隶兵房颇为赵普曹彬所知太宗征河东还驻镇阳彬方典枢务一夕议调发屯兵时军载簿领阻留在道质潜计兵数部分军马及得兵籍较之悉无差谬淳化中累迁本房副都承旨咸平初授左监门卫将军枢密副都承旨景德三年为左屯卫大将军历右神武军右卫二大将军大中祥符七年转都承旨在枢要仅五十年练习事程精敏端恇未尝有

过旧本院吏罕有迁至都承旨者帝素知质廉谨故以授之尝召问五代以降泊国初军籍更易之制且命条具利害质纂兵要以进帝览而称

善天禧元年卒年七十四录其子大理评事纯为卫尉寺丞孙思道为三班奉职

△杨允恭

杨允恭汉州绵竹人家豪富少倜傥任侠干德中王师平蜀羣盗窃发允恭裁弱冠率乡里子弟砦于清泉乡为贼所获将杀之允恭曰苟

活我当助尔贼素闻其豪富乃释之阴结贼帅子伺贼将害其子以告因遁去内客省使丁德裕讨贼至州允恭以策干之署绵汉招收巡检贼

平补殿前承旨太平兴国中以殿直掌广州市舶自南汉之后海贼子孙相袭大者及数百人州县苦之允恭因部运入奏其事太宗即命为广

东都巡检使又以海盐盗入岭北民犯者众请建大庾县为军官辇盐市之诏建为南安军自是冒禁者少贼有叶氏者众五百余往来海上允

恭集水军造轻舫掩袭其首斩之余党走匿山谷允恭伐木开道歼焉贼寇每遇风涛则遽止洲岛间允恭领众涉海捕之殆尽贼皆望风奔溃

又抵漳泉贼所止处尽夺先所劫男女六十余口还其家转供奉官召归改内殿崇班时缘江多贼命督江南水运因捕寇党行及临江军择骁

卒拏轻舟伺下江贼所止夜发军城遇贼百余拒敌悉梟其首又趣通州境上蹶海贼贼系众舟张幕发劲弩短炮允恭兵刃所向多为幕所蒙

炮中允恭左肩流血及袖容色弥壮徐遣善泅者以绳连铁钩散掷之坏其幕士卒争进贼赴水死者大半擒数百人自是江路无剽掠之患以

功转洛苑副使江淮两浙都大发运擘画茶盐捕贼事先是三路转运使各领其职或廩庾多积而军士舟楫不给虽以官钱雇丁男挽舟土人

惮其役以是岁上供米不过三百万允恭尽籍三路舟卒与所运物数令诸州择牙吏悉集允恭乃办数授之江浙所运止于淮泗由淮泗输京

师行之一岁上供者六百万淳化五年转西京作坊使初产茶之地民输赋者悉计其直官售之精粗不校咸输榷务商人弗肯售久即焚之允

恭曰竭民利而取之积腐而弃之非善计也至道初刘式建议请废缘江诸榷务【按宋史本传作刘氏建议废缘江榷务考宋史食货志淳

化五年监察御史薛映秘书丞刘式请罢缘江诸榷务至道初式犹固执前议据此氏为式之讹今改】许商人过江听私货鬻允恭以为诸州

新陈相揉两河诸州风土各有所宜非杂以数品即商人少利请依旧河北置务均色号以年次给之事下三司盐铁使陈恕等以允恭议为是

诏从之即命允恭为发运使始改擘画为制置巢庐江二县旧隶庐州道远多寇民输劳费允恭请以二县建军诏许之以无为为额【按宋

史地理志及元丰九域志以庐州巢县无为镇建为军以巢庐江二县属之在太平兴国三年】淮南十八州军其九禁盐地则上下其直民利商盐之贱故贩者益众至有持兵器往来为盗者允恭以为行法宜一即奏请悉禁而官遣吏主之事下三司三司言其不可允恭再三为请太宗始从之是岁收利巨万允恭与王子與秦羲同主茶盐之任多作条制遂变新法真宗即位改西京左藏库使又言川陕铁钱之弊曰臣在先朝尝陈其事愿变法以革其弊先帝方议行之会贼顺叛扰而止今陛下继成先烈可遂建其法使民不失所且饶信之铜积数千万若遣运于荆达于蜀蜀素多铜俾夔益遂各置监鼓铸岁用均给不十年悉用铜钱矣议虽未用然自是吏卒奉给始改用十铁钱易铜钱之一俄知通利军兼黄御河发运使会议减西鄙屯兵以息转饷召允恭与崇仪副使窦神宝阁门祇候李允则驰往经度图上郡县山川之形胜允恭因建议曰自环州入积石抵灵武七日程刍粟之运其策有三然以人以驴其费颇烦而所载数渺莫若用诸葛亮木牛之制以小车发卒分铺运之每一车四人挽之旁设兵卫加戈刃于上寇至则聚车于中合士卒之力御寇于外寻为议者所沮而止复遣之任又议江淮盐铁使陈恕力争诏从允恭之议加领康州刺史咸平初以北边卖马未有定直命允恭主平其估乃置估马司铸印以为常制王均之乱帝虑南方有聚寇命允恭为荆湖江浙都巡检使二年以疾闻遣其子大理评事可乘传侍疾卒于升州年五十六赐其次子告同学究出身允恭有瞻干能以方略捕贼王小波之乱李顺之兄自荣据绵竹土人多被胁从允恭兄允升弟允元率乡里子弟并力破之又为王师乡导执自荣诣剑门以献王继恩表其事诏赐允升学究出身授本县令允元什邡令明年召赴阙授允升右赞善大夫允元大理评事可咸平元年进士喜属文有吏干累召试历都官员外郎改虞部员外郎

△秦羲

秦羲字致尧江甯人世仕江左父承裕建州监军使知州事李煜归朝承裕遣义诣阙上符印太祖召见悦其趋对详谨补殿直令督广济漕船太平兴国中有南唐军校马光珪等亡命荆楚结徒为盗羲受诏缚光珪以献太宗壮之改西头供奉官淳化中又督洛南采铜雷有众称其有心计遣监兴国军茶务会杨允恭改茶盐法荐羲掌真州榷务寻提点淮南西路茶盐得羨余十余万遂与允恭同为江淮制置擢授合门祇候兼制置矾税咸平初淮南榷盐二岁增钱八十三万余贯改内殿崇班又兼制置荆湖路江南羣盗久为民患羲讨捕皆尽四年领发运使

事【按长编及文献通考载太宗至道三年即罢发运使真宗咸平四年加都大发运事兼以淮南转运使领之而不立使名据此则咸平中未尝置发运使羲特兼领其事耳】改供备库副使献议增榷酤岁十八万缗所增既多尤为刻下会岁旱诏罢之景德初迁供备库使知江陵府坐举官不如状削秩大中祥符初起授供备库副使明年广州言澄海兵尝捕宜盗颇希恩桀骜军中不能制部送阙下帝以远方大镇宜得材干之臣镇抚之宰相历言数人皆不称旨帝曰秦羲可当此任复授供备库使充广州钤辖历东染院使知苏州改崇仪使提举在京诸司库务因对求典藩郡迁内院使知泉州天禧四年代还道病卒年六十四羲知书好为诗喜宾客颇有士风历财货之任凡十余年精勤练习号为称职

△谢德权

谢德权字士衡福州人父文节初仕王氏后入南唐以骁勇闻守鄂州拒王师战没德权以父死事李煜署庄宅副使归朝诣登闻检院自荐补殿前承旨迁殿直陕西巡检改右侍禁咸阳浮桥坏转运使宋大初命德权规画乃筑土实岸聚石为仓用河中铁牛之制缆以竹索繇是无患咸平二年宜州溪蛮叛命陈尧叟往经度之德权预其行以单骑入蛮境谕以朝旨众咸听命尧叟以闻加合门祗候广韶英雄连贺六州都巡检使代归提点京城仓草场廡积多患下湿德权累甃为台以籍之遂无败腐京城衢巷狭隘命德权广之既受诏则先撤贵要邸舍会有讼执政与许州民阴构西夏为叛者诏温仲舒谢泌鞫问令德权监之既而按验无状翌日对便殿具奏其妄泌独曰追摄大臣狱状乃具德权曰泌欲陷大臣邪若使大臣无罪受辱则人君何以使臣臣下何以事君仲舒曰德权所奏甚善帝乃可之六年命城新乐县迁供奉官又命浚北平砦濠葺蒲阴城一日遽乘传诣阙求对且言边民多挈族入城居止前岁契丹入塞傅潜闭垒自固康保裔被擒王师未有胜捷臣以为今岁契丹必侵内地令边兵聚屯一处尤非便利愿速分戍镇定高阳三路天雄城垒阔远请急诏蹙之乃葺澶州城北治德清军城塹以为豫备臣实虑蒲阴工木未讫敌必暴至帝慰遣之既而契丹果围蒲阴及闻有诏修河北行宫德权又驿奏请车驾毋渡河帝至澶州德权单马间道赴行在未几迁内殿崇班提辖三司衙司德权为设条制均其差使有大将隶内侍主藏内侍为奏留规免烦重之役德权携奏白上极言侥幸帝称其有守又命提总京城四排岸领护汴河兼督犂运前是岁役浚河夫三十万但挑沙拥岸址河流泛滥中流复淤德权须以沙尽至土为

垠弃沙堤外又为大锥以试筑堤之虚实植树数十万以固岸建议废京师铸钱监徙西窑务于河阴大省劳费改崇仪副使兼领东西八作司先是每营造患工少至终岁不成德权按其役皆克曰而就大中祥符元年议东封命与刘承珪戚纶同计度发运迁供备库使预修玉清昭应宫时累徙民舍以广宫地刘承珪议掘地及丈加筑以壮基址德权患其劳役过甚日与忿争不能夺遂求罢复领京城仓草场三年诏改西染院使出知泗州至任踰月卒年五十八以其子平为定远主簿德权清苦干事好兴功利多所经画见官吏徇私者必面斥之所至整肃然喜采察纤微以闻于上朝论恶之

△阎日新

阎日新宿州临涣人少为本州岛牙职补三司使役吏淳化中选隶寿王府主邸中记簿真宗即位擢为供奉官提点雄霸静戎军榷场咸平元年迁内殿崇班永兴军驻泊都监徙剑门关兼知剑门县就加供备库副使庆州都监景德初命管句邠宁环州驻泊兵马时部署张凝屡入边界焚族帐日新皆提兵应援俄知泾州未几移庆州上言伊锡三门等族恃险隘桀黠难制请开古川道东至乐业镇西出府城从之就转供备库使知环州兼邠宁环庆路钤辖缘边都巡检使安抚都监俄换泾原仪渭路二年迁如京使领万州刺史帝朝陵东封皆命为行宫使大中祥符初改文思使日新起胥史好云为以进取尝上言羣臣子弟以荫得官往往未童亂以受奉望自今年二十以上乃给廩又京城百官早朝而学士丞郎舍人以上导从呵止太盛难以趋避望令裁减又屡请对多所建白且自陈筋力尚壮愿正授刺郡守边城以効用俄真拜坊州刺史知渭州兼泾原路驻泊钤辖将祀汾阴故改知同州事俨信顿即日新所部车驾至迎谒献方物劳问久之遂从祀睢帝赐以袭衣金带还过新市镇又设彩楼乐伎以迎驾明年徙知徐州代还以有足疾改领军卫大将军昭州团练使知单州疾益甚许还京师天禧初卒年六十八

△靳怀德

靳怀德博州高唐人祖昌范殿中丞父隐禹城令怀德太平兴国中明法解褐广安军判官秩满授鸿胪寺丞历著作佐郎太子左赞善大夫通判相州改殿中丞通判广州迁国子博士通判沧州历虞部累迁比部员外郎又通判莫州知德州咸平中契丹入侵怀德固守城壁又转运使刘通言其善政诏褒之徙知密州会留后孔守正之镇代还盐铁使陈恕判官王济荐其武干换如京使历知邛州怀德本名湘素游寇准之门准父名湘景德中准方为相怀德乃改名焉俄知沧州大中祥符初召还复遣之任

吏民诣转运使李士衡借留怀德士衡以闻未几迁文
思使三年秋以江左旱歉命为洪虔十州安抚都监未至任改知曹州明年春迁为益州
钤辖加领长州刺史怀德历官以强干称然酗酒多失
将行别诏戒勸真宗又面谕之就迁北作坊使在剑外军民甚畏爱之复以善职入拜西
上合门使改领昭州刺史知澶州是州居水陆之要怀
德悉心抚治颇着政绩使车往复多称誉焉又知陕州踰年归阙而卒时天禧元年年七
十三

钦定续通志卷三百三十五

●钦定续通志卷三百三十六

列传

宋 【四十】

○宋四十

李迪【东之 肃之 承之 及之孝基】 王曾 张知白

杜衍

李迪

王曾

张知白

杜衍

△李迪

李迪字复古【隆平集作复吉】其先赵郡人后徙幽州曾祖在钦避五代乱又
徙家濮迪深厚有器局尝携其所为文见柳开开奇之
曰公辅材也举进士第一授将作监丞历通判徐兖二州改秘书省著作郎直史馆为二
司盐铁判官东封泰山复通判兖州坐解开封府进士
失当谪监海州税明年以右司谏起知郢州再迁吏部员外郎为三司盐铁副使擢知制
诰真宗幸亳为留守判官遂知亳州亡卒羣剽城邑发
兵捕之久不得迪至悉罢所发兵阴察知贼区处部勒骁锐士斩以徇代归进右谏议大
夫集贤院学士知永兴军徙陕西都转运使入为翰林
学士诏对出三司使马元方所上岁出入财用数以示迪时频岁蝗旱问何以济迪请发
内藏库以佐国用则赋敛宽民不劳矣帝曰当出金帛
数百万借三司迪曰天子于财无内外愿下诏赐三司以示恩德何必曰借帝悦又言陛
下东封时敕所过毋伐木除道即驿舍或州治为行宫
令加涂墍而已及幸汾亳土木之役过往时几百倍今蝗旱之灾殆天意所以儆陛下也
帝深然之他日又召对龙图阁命迪草诏徐谓迪曰曹
玮在秦州屡请益兵未及遣遽辞州事第怯耳谁可代玮者迪对曰玮知嘉勒斯賚欲入

寇且窥关中故请益兵为备非怯也且玮有谋略诸将皆非其比陛下重发兵岂非将上玉皇圣号邪今关右兵多可分兵赴玮帝因问关右兵几何对曰臣向在陕西以小册书兵粮数备调发今犹置佩囊中帝令自探取目黄门取纸笔具疏某处当留兵若干余悉赴塞下帝顾曰真所谓颇牧在禁中矣未久嘉勒斯賚果犯边秦州方出兵复召迪问曰玮此举胜乎对曰必胜居数日奏至玮与敌战三都谷果大胜帝曰卿何以知玮必胜迪曰嘉勒斯賚举兵远来声言某日下秦州会食以激玮玮勒兵不动以逸待劳臣用此知其胜帝益重之天禧元年拜给事中参知政事仁宗为皇太子除太子太傅迪辞以太宗时未尝立保傅止兼太子宾客诏皇太子礼宾客如师傅加礼部侍郎寇准罢帝欲相迪迪固辞一日对滋福殿有顷皇太子出拜曰陛下用宾客为宰相敢以谢帝顾谓迪曰尚可辞邪拜吏部侍郎兼太子少傅同中书门下平章事景灵宫使集贤殿大学士初真宗不豫寇准议皇太子总军国事迪赞其策丁谓以为不便曰即日上体平朝廷何以处此迪曰太子监国非古制邪力争不已于是皇太子于资善堂听常事他皆听旨周怀政之诛帝怒甚欲责及太子羣臣莫敢言迪从容奏曰陛下有儿子乃欲为此计帝大悟由是独诛怀政等 【按宋史真宗本纪及寇准传准以密请太子监国为丁谓所潜罢相在天禧四年六月丙申迪继准为相在七月丙寅内侍周怀政以谋传位太子伏诛在七月癸酉本传载诛怀政事于天禧元年迪拜参知政事后准未罢相前时事倒置今改纂于此】 丁谓擅权用事至除吏不以闻迪愤然语同列曰迪起布衣至宰相有以报国死犹不恨安能附权幸为自安计邪自此不协时议二府皆进秩兼东宫官迪迁中书侍郎兼尚书左丞故事宰相无为左丞者谓欲进所善林特为詹事迪不可又欲以为枢密副使兼宾客迪又不可既而帝御长春殿内出制书置榻前谓辅臣曰此卿等兼东宫官制书也迪进曰东宫官属不当增置臣不敢受此命宰相丁谓罔上弄权私林特钱惟演而嫉寇准特子杀人事寝不治准无罪罢斥惟演姻家使预政曹利用冯拯相为朋党臣愿与谓俱罢付御史台劾正帝怒留制不下左迁迪户部侍郎谓再对传口诏入中书复视事出迪知郢州仁宗即位太后预政初真宗将立章献后迪屡上疏谏以章献起于寒微不可母天下章献深衔之至是以迪与准为朋党贬衡州团练副使谓使人迫之或讽谓曰迪若贬死公如士论何谓曰异日诸生记事不过曰天下惜之而已谓败起为秘书监知舒州历江甯府兖州青州复兵部侍郎知河南府来朝京师时太后垂帘语迪曰卿向不欲吾预国事殆过矣今日吾保养天子至此

卿以为何如迪对曰臣受先帝厚恩今日见天子明圣
臣不知皇太后盛德乃至于此太后亦喜以尚书左丞知河阳明道元年迁工部尚书太后崩召为资政殿学士判尚书都省未几复拜同中书
门下平章事集贤殿大学士景佑中范讽得罪迪坐姻党罢为刑部尚书知亳州改相州既而为资政殿大学士翰林侍读学士留京师迪素恶
吕夷简因奏夷简私交荆王元俨尝为补门下僧惠清为守阙鉴义夷简请辨诏讯之乃迪在中书所行事夷简以斋祠不预降太常卿知岳州
复刑部尚书知徐州迪奏所部邻兖州欲行县因祠岳为上祈年祷皇子仁宗语辅臣曰大臣当为百姓访疾告祈祷非迪所宜其母令往久之
改户部尚书知兖州复拜资政殿大学士元昊攻延州武事久弛守将或为他名以避兵迪愿守边诏不许然甚壮其意除彰信军节度使知天
雄军徙青州踰年之本镇请老以太子太傅致仕归濮州后其子东之为侍御史知杂事奉迪来京师帝数遣使问劳欲召见以疾辞卒年七十
七赠司空侍中谥文定帝篆其墓碑曰遗直之碑又改所葬邓侯乡曰遗直乡子东之附传徽之补之仕至列大夫从子肃之承之及之 【按
东都事略载迪三子长柬之次徽之补之其肃之承之及之三人皆迪从子也有肃之等附传可据宋史本传并作迪子盖误今改又事略所载
柬之宋史隆平集俱作东之】

李东之

李肃之

李承之

李及之

李孝基

李东之

东之字公明赐进士出身为馆阁校勘宣化军使境上有废河故道官收行者税谓之干渡钱奏除之进直集贤院累擢侍御史知杂事东
之自少受知于寇准至是论准保护之功仁宗惻然即赐其碑曰旌忠拜天章阁待制河北都转运使加龙图阁直学士建言补荫之门太广遂
诏裁定自二府而下通三岁减入仕者一千人知荆南河阳澶州改集贤院学士判西京留司御史台英宗即位富弼荐其学行以旧职兼侍读
帝颇欲肃正宫省东之谏曰陛下长君也立自宗藩众方观望愿曲为容覆未几请老自工部尚书拜太子太保致仕遣使谕之曰以先帝梓宫
在殡朕不得为诗令讲读官皆赋诗劝劳甚渥又敕王珪叙其事东之出都门即幅巾白衣以见客再迁少师熙宁六年卒年七十八谥懿靖 【

按宋史本传不载东之谥据东都事略补】子孝基有李受者字益之长沙之浏阳人也仕于治平中至右谏议大夫天章阁待制兼侍读屡以老乞骸骨不听神宗立进给事中龙图阁直学士复言臣在先帝时年已七十不敢窃禄以自安今又加数年筋力惫矣惟陛下哀之于是拜刑部侍郎致仕赐宴赋诗及序如东之礼相去数月故时称二李卒年八十赠工部尚书

李肃之

肃之字公仪迪弟子也以迪荫监大名府军资库大河溢府檄修冠氏堤工就弗扰民悦之请为宰邑多盗肃之令比户置鼓有盗辄击鼓远近皆应盗遂息通判澶州契丹使将过郡而楼堞坏圯肃之谓郡守曰吾州为景德破敌之地当示雄疆遂鳩工构城屋凡千区已而中贵人衔命来视规制一新闻之朝擢知德州提点开封府界内县镇夔路湖南刑狱依蛮暴岭外肃之亲扞诸境会蒋偕失利亟率兵往蹶于临贺贼引去狄青孙沔交荐之徙湖北转运使辰阳彭士羲叛讨平之神宗即位谅祚寇大顺城肃之入奏帝访以西夏事奏对称旨以为右谏议大夫知庆州徙瀛州大雨地震官舍民庐推陷肃之出入泥潦中结草困以储庾粟之暴露者为芟舍以居民启廩振给严儆盗窃一以军法从事迁天章阁待制知开封府出知定州累迁枢密都承旨加龙图阁直学士知郢州卒年八十二肃之内行修飭母丧庐墓三年不入城郭季弟承之生而孤鞠育海道至于成人遂相继为侍从帝称其一门忠字云

李承之

承之字奉世性严重从兄东之将仕以官辞不受中进士第调明州司法参军郡守任情馥法人莫敢忤承之独力争之守怒曰曹掾敢如是耶承之曰事始至公自为之则已既下有司则当循三尺之法守惮其言尝建免役议王安石见而称之熙宁初以为条例司检详文字得召见神宗语执政曰承之言制置司事甚详非他人所及也改京官他日谓之曰朕即位以来不轻与人改秩今以命汝异恩也检正中书刑房察访淮浙常平农田水利差役事还奏役书二十篇加集贤检理又察访陕西时郡县昧于奉法敛羨余过制承之悉裁正其数迁集贤殿修撰擢宝文阁待制为同羣牧使纠察在京刑狱兼枢密都承旨出知延州入权三司使蔡确治相州狱多引朝士皆望风自折服承之言其险诋帝意悟趣使诘竟迁龙图阁直学士恳辞乞授兄肃之曰臣少鞠于兄且兄为待制十年矣帝曰卿兄弟孝友足厉风俗肃之亦当迁也即并命焉商人犯禁货北珠乃为公主售三司久不敢决承之曰朝廷法令畏王姬乎亟索之帝闻之曰有司当如此矣进枢密直学士坐补吏不当降待制

知汝州未几为陕西都转运使召拜给事中吏户二部侍郎复以枢密直学士知青州历应天府河阳陈郢扬州而卒

李及之

及之字公达亦迪弟之子由荫登第通判安肃军康定中夏人犯边契丹复发兵并塞疆候戒严及之言契丹以与夏人甥舅之故特此慰其心且姑张虚势以疑我必不失誓好愿毋过虞已而果然徙通判河南府亡卒张海倚山啸聚及之单骑与语谕使归命当奏贷其死海感动弛备奏方上而众兵集悉获之知信州入判刑部尝撰次唐史有益治体者为君臣龟鉴王尧臣上其书并表其学行韩琦亦以馆职荐之召试除直秘阁历开封府判官知泾晋陕三州及之吏事精明所居官皆称职以大中大夫致仕再转正议大夫卒年八十五子孝寿开封府户曹参军积官龙图阁学士孝称以荫登朝官工部尚书

李孝基

孝基字伯始进士高第唱名至墀下仁宗顾侍臣此李迪孙邪能世其家可尚旨晏殊富弼荐其材任馆阁欲一见之孝基曰名器可私谒邪竟不往知汝阴雍邱县通判阆州舒州知随州所治虽剧然事来亟断不为证左回枉甫日中庭已空矣或问其术曰无他省事耳阆中江水啮城几没郡吏多引避孝基率其下决水归旁谷城赖以全舒吏受赂鬻狱以杀人罪加平民孝基劾治三日得其情乃抵吏罪以亲须养求监崇福宫判四京国子监凡就闲十年累官光禄卿与父东之同谢事纔年五十士大夫美之以比二疏孝基为人冲澹善养后十一年无疾卒 【按宋史此下有及之子孝寿孝称二传俱阿附权奸孝寿尤残忍苛虐无善迹足录并删除】

△王曾

王曾字孝先青州益都人少孤 【按宋祁撰曾墓志云八岁终二丧】 鞠于仲父宗元从学于里人张震善为文辞咸平中由乡贡试礼部廷对皆第一杨亿见其赋叹曰王佐器也以将作监丞通判济州代还当召试学士院宰相寇准奇之特试政事堂授秘书省著作郎直史馆三司户部判官景德初始通和契丹岁遣使致书称南朝以契丹为北朝曾曰从其国号足矣业已遣使弗果易迁右正言知制诰兼史馆修撰时瑞应沓至曾入对奏曰此诚国家承平所致然愿推而弗居异日或有灾沴庶免舆议及帝既受符命大建玉清昭应宫曾陈五害以谏旧用郎中官判大理寺帝欲重之特命曾且谓曾曰狱重典也今以屈卿曾顿首谢因请自辟僚属着为令迁翰林学士帝尝晚坐承明殿召对久之

既退使内侍谕曰向思卿甚故不及朝服见卿卿勿以为慢其见尊礼如此知审刑院旧
违制无故失率坐徒二年曾请须亲被旨乃坐既而有
犯者曾乃以失论帝曰如卿言是无复有违制者曾曰天下至广岂人人尽晓制书如陛
下言亦无复有失者帝悟卒从曾议再迁尚书主客郎
中知审官院通进银台司句管三班院遂以右谏议大夫 【按宋史宰辅表作左谏议大
夫】 参知政事时宫观皆以辅臣为使王钦若方挟
符端傅会帝意又阴欲排异己者曾当使会灵因以推钦若帝始疑曾自异及钦若相会
曾市贺皇后家旧第其家未徙去曾令人舁土置门外
贺氏诉禁中明日帝以语钦若乃罢曾为尚书礼部侍郎判都省出知应天府天禧中民
间讹言有妖起若飞帽夜搏人自京师以南人皆恐曾
令夜开里门敢倡言者即捕之卒无妖徙天雄军复参知政事迁吏部侍郎兼太子宾客
真宗不豫皇后居中预政太子虽听事资善堂然事皆
决于后钱惟演后戚也曾密语惟演曰太子幼非宫中不能立加恩太子则太子安太子
安所以安刘氏也惟演以为然因以白后 【按东都
事略及宋名臣言行录载真宗不豫时有议请刘后称制者曾语惟演曰太子天下属望
今欲称制以疑百姓独不见武后之事乎与宋史本传
异】 帝崩曾奉命入殿庐草遗诏以明肃皇后辅立皇太子权听断军国大事丁谓入去
权字曾曰皇帝冲年太后临朝斯已国家否运称权犹
足示后且增减制书有法表则之地先欲乱之邪遂不敢去仁宗即位迁礼部尚书羣臣
议太后临朝仪曾请如东汉故事太后坐帝右垂帘奏
事丁谓独欲帝朔望见羣臣大事则太后召对辅臣决之非大事令入内押排雷允恭传
奏禁中画可以下曾曰两宫异处而柄归宦官祸端兆
矣谓不听既而允恭坐诛谓亦得罪自是两宫垂帘辅臣奏事如曾议谓初败任中正言
谓被先帝顾托虽有罪请如律议功曾曰谓以不忠得
罪宗庙尚何议邪时真宗初崩内外汹汹曾正色独立朝廷倚以为重拜中书侍郎兼本
官同中书门下平章事集贤殿大学士会灵观使王钦
若卒曾以门下侍郎兼户部尚书为昭文馆大学士监修国史玉清昭应宫使曾以帝初
即位宜近师儒即召孙奭冯元劝讲崇政殿天圣四年
夏大雨传言汴口决水且大至都人恐欲东奔帝问曾曾曰河决奏未至第民间妖言尔
不足虑也已而果然陕西转运使置醋务以榷其利且
请推其法天下曾请罢之曾方严持重每进谏言利害事审而中理多所荐拔尤恶侥幸
帝问曾曰比臣僚请对多求进者曾对曰惟陛下抑奔
竞而崇恬静庶几有难进易退之人矣曹利用恶曾班已上尝怏怏不悦语在利用传及
利用坐事太后大怒曾为之解太后曰卿尝言利用强

横今何解也曾曰利用素恃恩臣故常以理折之今加以大恶则非臣所知也太后意少释卒从轻议始太后受册将御大安殿曾执以为不可及长筵节上寿止供张便殿太后左右姻家稍通进谒曾多所裁抑太后滋不悦会玉清昭应宫灾乃出知青州【按宋史宰辅表作出知兖州】以彰信军节度使复知天雄军契丹使者往还敛车徒而后过无敢哗者人乐其政为画像而生祠之改天平军节度使同中书门下平章事判河南府景佑元年为枢密使明年拜右仆射兼门下侍郎平章事集贤殿大学士封沂国公曾进退士人莫有知者范仲淹尝问曾曰明扬士类宰相之任也公之盛德独少此耳曾曰夫执政者恩欲归己怨使谁归仲淹服其言初吕夷简参知政事事曾谨甚曾力荐为相及夷简位曾上任事久多所专决曾不能堪议论间有异同遂求罢仁宗疑以问曾曰卿亦有所不足邪时外传知秦州王继明纳赂夷简曾因及之帝以问夷简曾与夷简交论帝前曾言亦有过者遂与夷简俱罢以左仆射资政殿大学士判郓州宝元元年冬大星晨坠其寝左右惊告曾曰后一月当知之如期而卒年六十一赠侍中谥文正曾资质端厚在朝廷进止皆有常处平居寡言笑人莫敢干以私平生自奉甚俭皇佑中仁宗为篆其碑曰旌贤之碑后又改其乡曰旌贤乡大臣赐碑篆自曾始仁宗既祔庙诏择将相配享以曾为第一曾无子养子曰縉【按墓志载曾有子四人縉缘演縉縉俱光禄寺丞演将作监丞缘天以子幼取母弟皞字子融之子绎以嗣又富弼撰曾行状亦云有子四人与墓志同惟云以子幼取从兄子大理寺丞秘阁校理绎为子与宋史本传互异】又以弟子融之子绎为后尚书兵部郎中秘阁校理致仕卒【按宋史此下有曾弟子融附传子融本名皞字子融元昊反请以字为名无事迹足录其著述应详艺文略今从删】

△张知白

张知白字用晦沧州清池人幼笃学中进士第累迁河阳节度判官咸平中疏言要务真宗异之召试舍人院擢右正言出知剑州召置中书加直史馆判三司开拆司江南旱与李昉分路安抚及还权管句京东转运使事周伯星见司天以瑞奏羣臣称贺知白以为人君当修德应天星之见伏无所系因陈治道之要帝谓宰臣曰知白可谓乃心朝廷矣陕西饥命按巡之寻知邓州会关内流佣至境知白既发仓廩又募民出粟以济擢龙图阁待制知审官院再迁尚书工部郎中知白以朝廷制官重内轻外引唐李峤议迁台合典藩郡乃自请补外不许遂命纠察在京刑狱固请知青州还京师求领国子监帝曰知白岂倦于处剧邪宰相言知白践中

外未尝为身谋乃迁右谏议大夫权御史中丞拜给事中参知政事迁尚书工部侍郎时王钦若为相知白论议多不合因称疾辞位罢为刑部侍郎翰林侍读学士知大名府及钦若分司南京宰相丁谓素恶钦若徙知白南京留守意其报怨既至待钦若加厚谓怒徙亳州迁兵部仁宗即位进尚书右丞为枢密副使以工部尚书同中书门下平章事会灵观使集贤殿大学士时进士唱第赐中庸篇中书上其本乃命知白进读至修身治家之道必反复陈之知白在相位慎名器无毫发私常以盛满为戒虽显贵其清约如寒士天圣六年卒赠太傅中书令礼官谢绛议谥文节御史王嘉言知白守道徇公当官不挠可谓正矣谥文正王曾曰文节美谥矣遂不改知白九岁其父终邢州殡于佛寺及契丹侵河北寺宇多颓废殡不可辨知白既登第徒行访之得佛寺殿基恍然识其处既发其衣衾皆可验众叹其诚孝无子以兄子子思为后仕至尚书工部侍郎致仕

△杜衍

杜衍字世昌越州山阴人父遂良仕至尚书度支员外郎衍幼孤苦志厉操尤笃于学擢进士甲科补扬州观察推官改秘书省著作佐郎知平遥县通判晋州诏举良吏擢知干州陈尧咨安抚陕西以衍贤徙权知凤翔及罢归二州民邀留境上以太常博士提点河东路刑狱迁尚书礼部员外郎按行潞州折冤狱知州王曙为作辨狱记高继升知石州人告继升连蕃族谋变逮捕系治久不决衍辨其诬抵告者罪寔化军守将鞫人死罪不以实衍覆正之守将不伏诉之诏为置狱果不当死有司奏衍辨狱法当赏迁刑部章献太后遣使安抚淮南使还未及他语问杜衍安否使者以治状对太后叹曰吾知之久矣徙河东转运副使陕西转运使召为三司户部副使擢天章阁待制知江陵府未行会河北乏军费选为都转运使迁工部郎中不增赋于民而用足还为枢密直学士求补外以右谏议大夫知天雄军始衍为治谨密不以威刑督吏然吏民亦惮其清整仁宗特召为御史中丞奏言中书枢密古之三事大臣所谓坐而论道者也止只日对殿前何以尽天下事宜迭召见赐坐便殿以极献替可否又议常平法曰岁有丰凶谷有贵贱官以法平之则农有余利今豪商大贾乘时贱收水旱则稽伏不出冀其翔踊以图厚利而困吾民请量州郡远近户口众寡严赏罚课责官吏出纳无壅增损有宜公余未充则禁争余以规利者余毕而储之则察其以供军为名而假借者州郡阙母钱出官帑助之否则劝课之官家至日见亦奚益于事哉兼判吏部流内铨选补科格繁冗主判不能悉阅吏多受赇出缩为

奸衍既视事即敕吏函铨法力阅视具得本末曲折明日令诸吏无得升堂各坐曹听行文书铨事悉自予夺由是吏不能为奸利改知审官院其裁制如判铨时迁尚书工部侍郎知永兴军【按欧阳修撰衍墓志作枢密直学士知永兴军与宋史本传异】徙并州宝元二年迁刑部侍郎复知永兴军时方用兵民苦调发吏因缘为奸衍区处计划量道里远近宽其期会使民得次第输官比他州费省钱过半召还权知开封府康定元年拜同知枢密院事改枢密副使陕西兵久不解诏夏竦议攻守计竦列攻守二策以上宰相欲用出师衍曰侥幸成功非万全计争议久之不能得求罢不许【按宋史本传止载云夏竦上攻守二策不着西夏用兵之事今据墓志增辑】赐手诏敦勉为河东宣抚使庆历三年拜吏部侍郎枢密使每内降恩率寝格不行积诏旨至十数辄纳帝前谏官欧阳修入对帝曰外人知杜衍封还内降邪凡有求于朕每以衍不可告之而止者多于所封还也契丹与元昊争银瓮战黄河外参知政事范仲淹宣抚河东欲以兵自从衍曰二国方交鬪势必不来我兵不可妄出后契丹果不至契丹驸马刘三赼避罪来归辅臣议厚馆之以诘契丹阴事谏官欧阳修亦请留三赼帝以问衍衍曰中国主忠信若自违誓约纳叛亡则不直在我不如还之乃还三赼拜同平章事集贤殿大学士兼枢密使衍好荐引贤士而沮止侥幸小人多不悦其壻苏舜钦少年能文章论议少侵权贵监进奏院徇前例祠神以妓乐娱宾集贤校理王益柔为衍所知或言益柔尝戏作傲歌御史皆劾奏之欲因以危衍谏官孙甫言丁度因对求大用请属吏度知甫所奏误力求置对衍以甫方奉使契丹寝甫奏度深衔之及衍罢度草制指衍为朋比时范仲淹富弼与用事者不合仲淹弼既出宣抚言者益攻之帝欲罢二人政事衍执为不可然衍议论实非朋比也以尚书左丞出知兖州庆历七年衍甫七十上表请还印绶乃以太子少师致仕衍为宰相贾昌朝不喜议者谓故相一上章得请以三少致仕皆非故事盖昌朝抑之也皇佑元年特迁太子太保召陪祀明堂仍诏应天府敦遣就道都亭驿设帐具几杖待之称疾固辞进太子太傅赐其子同进士出身又进太子太师封祁国公衍清介不殖私产既退寓南都凡十年第室卑陋才数十楹居之裕如也善为诗工书行草皆有法卒年八十戒其子努力忠孝敛以一枕一席小圻库冢以葬自作遗疏其略曰无以久安而忽边防无以既富而轻财用宜早建储副以安人心语不及私赠司徒兼侍中谥正献子欣【按墓志载衍子四人洗欣讷诒洗讷诒早卒宋史本传但言戒其子忠孝而不着欣名今据补】

钦定续通志卷三百三十六

●钦定续通志卷三百三十七 列传一百三十七

列传

宋【四十一】

○宋四十一

晏殊 庞籍【恭孙】 王随 章得象 吕夷简【公绰 公
弼公孺】 张士逊 曾公亮【孝宽 孝广
孝蕴】 陈升之 吴充 王珪【罕琪】

晏殊

庞籍

王随

章得象

吕夷简

张士逊

曾公亮

陈升之

吴充

王珪

△晏殊

晏殊字同叔抚州临川人七岁能属文景德初张知白安抚江南以神童荐帝诏殊与进士千余人并试廷中殊援笔立成帝嘉赏赐同进士出身宰相寇准曰殊江外人帝顾曰张九龄非江外人邪后二日复试诗赋论殊奏臣尝私习此赋请试他题帝爱其不欺擢秘书省正字秘阁读书命直史馆召试中书迁太常寺奉礼郎为集贤校理再迁太常寺丞擢左正言直史馆为升王府记室参军仁宗为皇太子迁尚书户部员外郎为太子舍人寻知制诰判集贤院为翰林学士迁左庶子帝每访殊以事率用方寸小纸细书已答奏辄并藁封上帝重其慎密仁宗即位章献明肃太后奉遗诏权听政宰相丁谓枢密使曹利用各欲独见奏事无敢决其议者殊建言羣臣奏事太后者垂帘听之皆毋得见议遂定迁右谏议大夫兼侍读学士太后谓东宫旧臣恩不称加给事中预修真宗实录进礼部侍郎拜枢密副使疏论张耆不可为枢密使忤太后旨坐从幸玉清昭应宫从者持笏后至殊怒以笏撞之折齿御史弹奏罢知宣州【按东都事略作殊以笏击张耆折其齿非从者也考长编所载与宋史本传同谏官曹修古劾其忿躁无大臣体故罢之】改应天府延范仲淹以

教生徒自五代以来天下兴学自殊始召拜御史中丞
改资政殿学士兼翰林侍读学士兵部侍郎兼秘书监为三司使复为枢密副使未拜改
参知政事加尚书左丞太后谒太庙有请服袞冕者太
后以问殊以周官后服对太后崩以礼部尚书罢知亳州徙陈州迁刑部尚书以本官兼
御史中丞复为三司使陕西方用兵殊请罢内臣监兵
不以阵图授诸将使得应敌为攻守及募弓箭手教之以备战鬪又请出宫中物助边费
凡他司之领财利者皆罢还度支悉为施行康定初知
枢密院事遂为枢密使进同中书门下平章事庆历中拜集贤殿学士同平章事兼枢密
使殊平居好贤当世知名之士如范仲淹孔道辅皆出
其门及为相益务进贤材仲淹与韩琦富弼皆进用至于台阁多一时之贤帝亦奋然有
意欲因羣材以更治而小人权幸皆不便殊出欧阳修
为河北都转运使谏官奏留不许孙甫蔡襄上言宸妃生圣躬为天下主殊尝被诏志宸
妃墓没而不言又奏论殊役官兵治僦舍以规利坐是
降工部尚书知颍州然殊以章献太后方临朝故志不敢斥言而所役兵乃辅臣例宜借
者时以谓非殊罪徙陈州又徙许州稍复礼部刑部尚
书迁户部以观文殿大学士知永兴军徙河南府迁兵部封临淄公疾请归京师访医药
既平复求出守特留侍经筵诏五日一与起居仪从如
宰相踰年病剧帝将往视殊驰奏曰臣老疾行愈矣不足为陛下忧也已而卒年六十三
帝虽临奠以未视疾为恨赠司空兼侍中谥元献篆其
碑首曰旧学之碑殊性刚简奉养清俭累典州吏民颇畏其愎急善知人富弼杨察皆其
壻也殊为宰相兼枢密使而弼为副使辞所兼诏不许
其信遇如此文章瞻丽应用不穷尤工诗闲雅有情思晚岁笃学不倦子知止为朝请大
夫 【按神道碑载殊子八人居厚承裕宣礼崇让明
远祇德几道传正无知止之名】

△庞籍

庞籍字醇之单州成武人 【按宋史地理志单州有武县无武成应作成武亦非武
城之讹】 及进士第为黄州司理参军调开封府兵
曹参军迁大理寺丞累擢殿中侍御史章献太后崩遗诏章惠太后议军国事籍请下合
门取垂帘仪制尽燔之又奏陛下躬亲万几用人宜辨
邪正防朋党擢进近列愿采公论毋令出于执政孔道辅谓人曰言事官多观望宰相意
独庞醇之天子御史也为开封府判官尚美人遣内侍
称教旨免工人市租籍言祖宗以来未有美人称教旨下府者仁宗为杖内侍诏有司自
今宫中传命毋得辄受数劾范讽罪讽善李迪皆寝不
报反坐籍言宫禁事不得实以祠部员外郎罢为广南东路转运使又言范讽事有不尽

如奏讽坐贬籍亦降太常博士知临江军寻复官徙福建转运使景佑三年为侍御史改刑部员外郎知杂事判大理寺进天章阁待制元昊反为陕西体量安抚使坐令开府府吏冯士元市女口降知汝州徙同州就除陕西都转运使文彦博鞫黄德和狱未上诏籍同案籍言曰德和退怯当诛刘平力战而没宜加恤其子孙又建言频岁灾异天久不雨凡乘輿所费宫中所用宜加裁抑修德弭灾今宿兵西鄙将士力战弗获功赏而内官医官乐官无功劳享丰赐天下指目谓之三官愿少裁损专励战功进龙图阁直学士知延州俄兼鄜延都总管经略安抚缘边招讨使明年改延州观察使力辞换左谏议大夫自元昊陷金明承平塞门安远栲栳砦破五龙川边民焚掠殆尽籍至稍葺治之戍兵十万无壁垒皆散处城中畏籍莫取犯法金明西北有浑州川土沃衍川尾曰桥子谷寇出入之隘道使部将狄青将万余人筑招安砦于谷旁募民耕种收粟以贍军悉复所亡地筑十一城及开乱名平戎道通永和乌仁关更东西阵法为方阵颇损益兵械元昊遣李文贵赍雅尔旺荣书来送款籍曰此诈也乃屯兵青涧城后数月果大寇定川籍召文贵开谕之遣去既而元昊又以旺荣书来会帝厌兵因招怀之遣籍报书使呼旺荣为太尉籍曰太尉三公非陪臣所得称使旺荣当之则元昊不得臣矣今其书自称寔凌或默寔凌皆其官名也于义无嫌朝廷从之会敌新破泾原城砦方议修复使者往返踰年元昊又遣贺从勛来改名曰曩霄称男不称臣籍不敢闻从勛曰子事父犹臣事君也若得至京师天子不许更归议之籍送使者阙下因陈便宜言羌久不通和中国人愁怨今辞理寔顺必有改事中国之心请遣使者申谕之朝廷卒用其策元昊既臣召籍为枢密副使籍言自陕西用兵公私俱困请并省官属退近塞之兵就食内地从之于是颇省边费八年改参知政事明年以工部侍郎为枢密使迁户部皇佑三年拜同中书门下平章事昭文馆大学士监修国史籍初入相且独员而遽为昭文馆大学士出殊拜也侂智高反师数不利遣狄青为宣抚使谏官韩绛谓武人不宜专任帝以问籍籍曰青起行伍若以文臣副之则号令不专不如不遣诏岭南诸军皆受青节度既而捷书至帝喜曰青破贼卿之力也遂欲以青为枢密使同平章事籍力争之不听齐州学究皇甫渊以捕贼功上书求用道士赵清贖与籍娣家亲给为渊白籍乃与堂吏共受渊赂小吏诉之下开封府捕清贖刺配远州道死韩绛言籍阴讽府杖杀清贖以灭口覆之无状言不已乃罢知郢州居数月加观文殿大学士拜昭德军节度使知永兴军改并州仁宗不豫籍密疏请择宗室之贤者为皇子其言甚切坐擅听麟州筑堡

白草平而州将武戡等为夏人所败复为观文殿大学士户部侍郎知青州迁尚书左丞不拜徙定州召还京师上章告老寻以太子太保致仕封颍国公卒年七十六赠司空加侍中谥庄敏籍晓律令长于吏事持法深峭军中有犯或断斩刳踝或累笞至死以故士卒畏服治民颇有惠爱及为相声望减于治郡时子元英朝散大夫孙恭孙

庞恭孙

庞恭孙

恭孙字德孺以荫补通判施州崇宁中部蛮向文疆叛诏转运使王夔领州事致讨恭孙说降文疆而斩之夔上其功进三秩知涪州遂以开边为己任诱珍州骆文贵承州骆世华纳土费不贲转运判官朱师古劾恭孙生事詘师古而以恭孙代于是溱播溪思费等州相继降每开一城辄褒迁五年闲至徽猷阁待制威州守乞通保霸二州进恭孙直学士知成都府委以招纳未几其酋董舜咨董彦博来纳土诏更名保州为祺州霸州为亨州使恭孙进筑之言者论其贪纵谪保静军节度副使踰月起知陈州复待制帅泸州又以筑思州进学士前后在西南二十年所得州县多张名簿实瘠鹵不毛地缮治转饷为蜀人病未几皆废宣和中卒

△王随

王随字子正河南人【按东都事略及通鉴作河阳人隆平集作河南与宋史本传同】登进士甲科为将作监丞通判同州迁秘书省著作郎直史馆出为京西转运副使陞辞言父母家洛中乃在所部真宗因赐诗宠行以羊酒束帛令过家为寿迁淮南转运使岁饥随敕属部出库钱贷民市种粮岁中约输绢以偿流民多复业徙河东三迁刑部员外郎兼侍御史知杂事擢知制造以不善制辞出知应天府随治南京太宽改知扬州再加右谏议大夫权知开封府仁宗为太子拜右庶子仍领府事周怀政诛随自陈尝假怀政白金夺知制造改给事中知杭州干兴初复降秘书少监徙通州以州少学者徙孔子庙起学舍命州人子弟就学母丧起复光禄卿知润州徙江甯府岁大饥转运使移府发常平仓米计口日给一升随置不听曰民所以饥者由兼并闭籴以邀高价也乃大出官粟平其价复给事中为龙图阁直学士知秦州秦卒有负罪逃入蕃部者蕃人辄奴畜之小不如意复执出求赏前此坐法多死随下教能自归者免死听复隶军籍由是多来归者又请增蕃落卒给废陷马地募民耕种坐事徙河南府入为御史中丞迁尚书礼部侍郎翰林侍读学士明道中为江淮安抚使还拜户部侍郎参知政事景佑中加吏部侍郎知枢密院事遂拜门下侍郎同中书门下平章事昭文馆大学士监修国史自

薛居正后故事初相无越迁门下侍郎者学士丁度之失也为相一年无所建明与陈尧佐韩亿石中立同执政数争事会灾异屡发谏官韩琦言之随以彰信军节度使同中书门下平章事判河阳卒年六十七赠中书令谥章惠后改文惠随外若方严而治失于宽晚更卜急慕裴休之为人然风迹弗逮也

△章得象

章得象字希言世居泉州高祖仔钩事闽为建州刺史遂家浦城得象母方娠梦登山遇神人授以玉象及生父免复梦庭积象笏因名得象好学庄重进士及第为大理评事知玉山县迁本寺丞真宗将东封泰山以殿中丞签书兖州观察判官事知台州历南雄州徙洪州杨亿以为有公辅器荐之或问之亿曰闽士轻狭而章公深厚有容此其贵也未几召试为直史馆安抚京东权三司度支判官累迁尚书刑部郎中使契丹遂以兵部郎中知制诰踰年为翰林学士迁右谏议大夫进承旨兼侍讲学士景佑三年擢同知枢密院事宝元元年以户部侍郎同中书门下平章事集贤殿大学士帝谓得象曰向者太后临朝羣臣邪正朕皆默识之卿清忠无所附且未尝有所千请今日用卿职此也陕西用兵加中书侍郎兼工部尚书兼枢密使辞所加官明年拜工部尚书为昭文馆大学士监修国史庆历五年拜镇安军节度使同平章事判陈州【按宋史宰辅表及东都事略载得象以使相判陈州由陈州徙判河南本传不载判陈州下徙判河南府句无自矣今据宰辅表补】封郟国公徙判河南府以疾引年守司空致仕卒年七十一故事致仕官乘舆不临奠帝特往焉赠太尉兼侍中谥文宪皇佑中知制诰王洙言得象谥同周公改谥文简得象在翰林十二年章献太后临朝宦官方焯太后每遣内侍至翰林院得象必正色待之或不交一言在中书几八年宗党亲戚抑而不进仁宗锐意天下事进用韩琦范仲淹富弼使同得象经画当世急务得象无所建明御史孙抗数言之得象居位自若既而章十上请罢帝不得已许之

△吕夷简

吕夷简字坦夫先世莱州人祖龟祥知寿州子孙遂为寿州人夷简进士及第补绛州军事推官稍迁大理寺丞通判通州徙濠州再迁太常博士河北水选知滨州代还奏农器有算非所以劝力本也遂诏天下农器皆勿算擢提点两浙刑狱迁尚书祠部员外郎时京师大建宫殿伐材木于南方有司责期会工徒至有死者诬以亡命收系妻子夷简请缓其役从之又言盛冬挽运艰苦须河流渐通以卒番送真宗曰观卿

奏有为国爱民之心矣擢刑部员外郎兼侍御史知杂事蜀贼李顺叛执送阙下左右称贺既而属御史台按之非是贺者趣具顺狱夷简曰是可欺朝廷邪卒以实奏【按梦溪笔谈云蜀中剧贼李顺陷剑南两川关右震动朝廷以为忧后王师破贼梟李顺收复两川书功行赏了无闲言至景佑中有人告李顺尚在广州巡检使臣陈文珪捕得之乃真李顺也年已七十余推验明白囚赴阙覆按皆实朝廷以平蜀将士功赏已行不欲暴其事但斩顺赏文珪二官仍合门祇候文珪泉州人康定中老归泉州家有李顺款案本末甚详顺本味江王小博之妻弟始王小博反于蜀中不能抚其徒众乃共推顺为主顺初起悉召乡里富人大姓令具其家所有财粟据其生齿足用之外一切调发大赈贫乏录用才能存抚良善号令严明所至一无所犯时两蜀大饥旬日之间归之者数万人所向州县开门延纳传檄所至无复完垒及败人尚坏之故顺得脱去三十余年乃始就戮按小博宋史作小波】忤大臣意岁蝗旱夷简请责躬修政严饬辅相思所以共顺天意及奏弹李溥专利罔上寇准判永兴黥有罪者徙湖南道由京师上准变事夷简曰准治下急是欲中伤准尔宜勿问益徙之远方从之赵安仁为御史中丞夷简以亲嫌改起居舍人擢知制诰两川饥为安抚使进龙图阁直学士再迁刑部郎中权知开封府治严有声帝识姓名于屏风将大用之仁宗即位进右谏议大夫雷允恭擅徙永定陵地夷简与鲁宗道验治允恭诛以给事中参知政事因请以祥符天书内之方中【按东都事略作纳之陵中】官司仪卫悉行罢废真宗祔庙太后欲具平生服玩如宫中以银罩覆神主夷简言此未足以报先帝今天下之政在两宫惟太后远奸邪奖忠直辅成圣德所以报先帝者宜莫若此也故事郊祠毕辅臣迁官夷简与同列皆辞之【按宋敏求春明退朝录云自建隆至天禧朝廷大礼二府必迁官仁宗天圣二年南郊自夷简恳请乃止考长编载真宗咸平初年孙何建议已尝厘革盖不自夷简始也】迁尚书礼部侍郎修国史天圣七年进户部拜同中书门下平章事集贤殿大学士景灵宫使玉清昭应宫灾太后泣谓大臣曰先帝尊道奉天而为此今何以称遗旨哉夷简恐将复营构也乃推洪范灾异以谏太后默然因奏罢二府兼宫观使进吏部拜昭文馆大学士监修国史史成辞进官天圣末加中书侍郎章懿太后为顺容薨宫中未治丧夷简朝奏事因曰闻有宫嫔亡者太后矍然曰宰相亦预宫中事邪引帝偕起有顷独出曰卿何闲我母子也夷简曰太后他日不欲全刘氏乎太后意稍解有司希太后旨言岁月葬未利夷简请发哀成服备仪仗葬之大内火百官晨朝而宫门不

辟辅臣请对帝御拱辰门百官拜楼下夷简独不拜帝使人问其故曰宫庭月变羣臣愿一望清光帝举帘见之乃拜进尚书右仆射兼门下侍郎辞仆射乃兼吏部尚书初荆王子养禁中既长夷简请出之太后欲留使从帝诵读夷简曰上富春秋所亲非儒学之臣恐无益圣德即日命还邸中太后崩帝始亲政事夷简手疏陈八事曰正朝纲塞邪径禁货赂辨佞壬绝女谒疏近习罢力役节冗费其劝帝语甚切帝始与夷简谋以张耆夏竦皆太后所任用者也悉罢之退告郭皇后后曰夷简独不附太后邪但多机巧善应变耳由是夷简亦罢为武胜军节度使检校太傅同中书门下平章事判陈州及宣制夷简方押班闻唱名大骇不知其故而夷简素厚内侍副都知阎文应因使为中詞久之乃知事由皇后也岁中而夷简复相初刘涣上疏请太后还政太后怒使投岭外属太后疾革夷简请留之至是涣以前疏自言帝擢涣右正言顾谓夷简向者枢密院亟欲投涣赖卿以免夷简谢因曰涣由疏外故敢言大臣或及此则太后必疑凤旨自陛下使子母不相安矣帝以夷简为忠郭后以怒尚美人批其颊误伤帝颈帝以爪痕示执政大臣夷简以前罢相故遂主废后议 【伏读通鉴辑览 御批夷简本非正但废后一事不得归罪于彼以为修报复也试问后而批及帝为有罪为无罪耶使无其事夷简用计倾之则不容诛矣其详见于废后传】 仁宗疑之夷简曰光武汉之明主也郭后止以怨怼坐废况伤陛下颈乎夷简将废后先敕有司无得受台谏章奏于是御史中丞孔道辅右司谏范仲淹率台谏诣合门请对有旨令台谏诣中书夷简乃贬出道辅等后遂废宗室子益众为置太宗正纠率增教授员加右仆射封申国公王曾与夷简数争事不平曾斥夷简纳赂市恩夷简乞置对帝问曾曾语屈于是二人皆罢夷简以镇安军节度使同平章事判许州徙天雄军未几以右仆射复入相逾年进位司空辞不拜徙许国公时方饬兵备以判枢密院事而谏官田况言总判名太重改兼枢密使契丹聚兵幽蓟声言将入侵议者请城洛阳夷简谓契丹畏壮侮怯遽城洛阳亡以示威景德之役非乘輿济河则契丹未易服也宜建都大名示将亲征以伐其谋或曰此虚声尔不若修洛阳夷简曰此子囊城郢计也使契丹得渡河虽高城深池何可恃耶乃建北京未几感风眩诏拜司空平章事国重事疾稍闲命数日一至中书裁决可否夷简方辞复降手诏曰古谓髡可疗疾今翦以赐卿三年春帝御延和殿召见敕乘马至殿门命内侍取兀子輿以前夷简引避久之诏给扶母拜乃授司徒监修国史军国大事与中书枢密同议固请老以太尉致仕朝朔望既卒帝见羣臣涕下曰安得忧国忘身如

夷简者赠太师中书令谥文靖自仁宗初立太后临朝十余年天下晏然夷简之力为多其后元昊反四方久不用兵师出数败契丹乘之遣使求关南地颇赖夷简计划选一时名臣报使契丹经略西夏二边以盎然建募万胜军杂市井小人浮脆不任战鬪用宗室补环卫宫骤增奉赐又加遗契丹岁缯金二十万当时不深计之其后费大而不可止郭后废孔道辅等伏合进谏而夷简谓伏合非太平事且逐道辅其后范仲淹屡言事献百官图论迁除之敝夷简指为狂肆斥于外时谕以此少之夷简当国柄最久虽数为言者所诋帝眷倚不衰然所斥士旋复收用亦不终废其于天下事屈伸舒卷动有操术后配食仁宗庙为世名相始王旦奇夷简谓王曾曰君其善交之卒与曾并相后曾家请御篆墓碑帝因惨然思夷简书怀忠之碑四字以赐之子公绰公弼公着公孺公着自有传

吕公绰

吕公弼

吕公孺

吕公绰

公绰字仲佑 【按王珪撰公绰墓志及东都事略但作字仲裕】 荫补将作监丞知陈留县天圣中为馆阁对读召试直集贤院辞改校理迁太子中允夷简罢相复为直集贤院同管勾国子监出知郑州尝问民疾苦父老曰官籍民产第赋役重轻至不敢多畜牛田畴久芜秽公绰为奏之自是牛不入籍还判吏部南曹迁太常博士同判太常寺纠察在京刑狱虎翼卒刘庆告变下吏案验乃庆始谋众不从庆反诬众以邀赏因言京师卫兵百万不痛惩之则众心摇遂斩庆以徇迁尚书工部员外郎为史馆修撰时夷简虽谢事犹领国史公绰辞修撰夷简卒还兵部员外郎复为修撰服除复同判太常寺兼提举修祭器公绰以郊庙祭器未完制度多违礼请悉更造采月令诸书以四时新物及所当荐者配合为图又集郊祀总仪上之又言天地宗庙日月五方百神之祀咸有尊罍五齐三酒分实其中加明水明酒以达阴阳之气今有司徒设尊罍而酌用一尊非礼神之意宜按周礼实齐酒取火于日取水于月因天地之洁气又言祖宗配郊当正位今侧乡之非所以示尊严也初谥诸后皆系祖宗谥而真宗五后独曰庄公绰曰妇人从夫之谥真宗谥章圣而后曰庄非礼也愿更为章厯知制诰龙图阁直学士知永兴军徙秦州安远砦古渭州诸羌来献地公绰顾其属曰天下之大岂利区落尺寸地以为广邪却之弓箭手马多阙公绰谕诸砦户为三等凡十丁为社至秋成募出金帛市马马少则先后给之祀明堂迁刑部郎中召为龙图阁学士权知

开封府岁余进翰林侍读学士知审刑院兼判太常寺
初公绰在开封府宰相庞籍外属道士赵清贶受赂杖脊道死御史以公绰受籍旨左迁
龙图阁学士知徐州方杖清贶时实非公绰所临顷之
公绰亦自辨复侍读学士徙河阳留侍经筵时久不雨帝顾问何以致雨曰狱久不决即
有冤者故多旱帝亲虑囚已而大雨迁右司郎中未拜
卒赠左谏议大夫公绰通敏有才父知政时多涉干请喜名好进者趋之尝漏泄除拜以
市恩时人比之窦申

吕公弼

公弼字宝臣以父任为将作监主簿赐进士出身积迁直史馆河北转运使自宝元
庆历以来宿师备边既西北撤警而将屯如故民疲馈
饷公弼始通御河漕粟实塞下冶铁以助经费移近边屯兵就食京东增城卒给板筑蠲
冗赋及民逋数百万夷简之亡也仁宗思之问知公弼
名识于殿柱至是益材其为擢都转运使加龙图阁直学士知瀛州入权开封府尝奏事
退帝目送之谓宰相曰公弼甚似其父改同羣牧使以
枢密直学士知渭延二州徙成都府其治尚宽人疑少威断营卒犯法当杖扞不受曰盗
以剑死公弼曰杖者国法剑汝自请杖而后斩之军府
肃然英宗罢三司蔡襄召公弼代之初公弼在羣牧时帝居藩得赐马颇劣欲易不可至
是帝谓曰卿曩岁不与朕马是时固已知卿矣蔡襄王
计诉讼不时决故多留事卿继其后将何处以之公弼顿首谢对曰襄勤于事未尝有旷
失恐言之者妄耳帝以为长者拜枢密副使时言事者
数与大臣异议去公弼谏曰谏官御史为陛下耳目执政为股肱股肱耳目必相为用然
后身安而元首尊宜考言观事视其所以而进退之彗
出营室帝忧之同列请飭边备公弼曰彗非小变陛下宜修德以应天戒臣恐患不在边
也神宗立司马光劾内侍高居简帝未决公弼曰光与
居简不两立居简内臣耳而光中执法愿陛下择其重者帝曰然则当柰何公弼曰迁居
简一官而解其近职光当无争从之进枢密使议欲并
环庆鄜延为一路公弼曰自白草西抵定远中闲相去千里若合为一路猝有缓急将何
以应又欲下边臣使议之公弼曰庙堂之上不处决而
诱边吏可乎乃止王安石知政事嗾公弼不附己白用其弟公着为御史中丞以偏之公
弼不自安立上章避位不许陈升之建议卫兵年四十
以上稍不中程者减其牢廩徙之淮西公弼以为非人情帝曰是当退为剩员者今故为
优暇何所害对曰臣不敢生事邀名正恐误国耳既使
去本土又削其廩饩二十万众皆反侧为之柰何韩绛议复肉刑公弼力陈不可帝皆为
之止安石立新法公弼数言宜务安静又将疏论之从

孙嘉问窃其橐示安石安石先白之帝不乐遂罢为观文殿学士知太原府韩绛宣抚秦晋将取罗鄂特城令河东发兵二万趣神堂新路公弼曰虜必设伏以待我永和关虽回远可安行无患乃由永和既而新路援兵果遇伏诏褒之麟州无井唯沙泉在城外欲拓城包之而土善陷夏人每围城人皆忧渴死公弼用其僚邓子乔计仿古拔轴法去其沙实以末炭堽土于其上板筑立遂包泉于中自是城坚不陷而州得以守俄以疾请知郑州王韶取熙河朝廷谋秦凤师帝曰公弼在河东方出师仓卒时有缓御之能宜使往乃拜宣徽南院使判秦州帝疑其不肯行公弼闻命即治装帝喜召之入对慰劳而遣之既赴镇羌董毡辄治书称敕公弼却之曰藩臣安得妄称敕董毡惧自是不复敢纒旬月复以疾求解为西太一宫使卒年六十七赠太尉谥曰惠穆

吕公孺

公孺字稚卿以父任为奉礼郎赐进士出身判吏部南曹知泽潞庐常四州提点福建河北路刑狱入为开封府推官民鬻薪为盗所夺逐之遭伤尹包拯命笞盗公孺曰盗而伤主法不止笞执不从拯善其守及使三司而公孺为判官事皆咨决之判都水监未几改陕西转运使神宗得绥州遣使议守弃之便久未决命公孺往与郭逵议合遂存绥州常平法行公孺请以青苗免役归提刑司徒知渭州再徙郢州坐失入死刑责知蔡州元丰初帝召公孺慰之曰长安谋帅无以易卿命知永兴军徙河阳洛口兵千人以久役思归奋斧锺排关不得入西去河桥诸将请出兵掩击公孺曰此皆亡命急之变且生即乘马东去遣牙兵数人迎谕之曰汝辈诚劳苦然岂得擅还一度桥则罪不赦矣太守在此愿自首者止道左皆伫立以俟公孺索倡首者黥一人余复送役所语其校曰若复偃蹇者斩而后报众帖息乃自劾专命诏释之知审官东院出知秦州李宪以诏出兵欲尽驻原渭公孺不可与宪相论奏坐徙相州更陈杭郑瀛四州元佑初加龙图阁直学士复以为秦州固辞改秘书监迁刑部侍郎知开封府为政明恕幕人迁黜坐设毁其角法当徙公孺请罪数十人皆以杖免原庙亡珠系治典吏久公孺曰主者番代不一曷尝以珠数相授受岁时讳曰宫嫔狎至柰何颀指吏卒乎请之得释擢户部尚书以病提举醴泉观卒年七十赠右光禄大夫公孺廉俭与人寡合尝护曹佾丧得厚饷辞不受谈者清其节焉

△张士逊

张士逊字顺之祖裕尝主阴城盐院因家阴城【按东都事略云光化军人也唐汉阳王柬之之后】淳化中举进士为郟乡主簿迁射

洪令转运使檄移治鄴民遮马首不得去听还射洪改襄阳令又知邵武县宽厚得民前治射洪以旱祷雨白崖山士逊立廷中须雨足乃去邵武旱祷欧阳太守庙去城过一舍士逊彻盖雨沾足始归历御史台推直官翰林学士杨亿荐为监察御史贡举初用糊名法士逊为诸科巡捕官以进士有婣党请避去真宗记名于御屏自是有亲嫌者皆移试着为令中书拟人充江南转运使帝独用士逊再迁侍御史徙广东又徙河北河侵棣州诏徙州阳信议者患粮多不可迁士逊视濒河数州方艰食即计余以贷贫者期来岁输阳信公私利之仁宗出合帝选僚佐谓宰臣曰翊善记室府属也王皆受拜今王尚少宜以士逊为友令王答拜于是以户部郎中直昭文馆为寿春郡王友改升王府咨议参军仁宗为皇太子迁右谏议大夫兼右庶子改左庶子又为宾客迁枢密直学士既而二府大臣皆领东宫官遂换太子詹事擢枢密副使迁给事中兼詹事累迁尚书左丞遂拜礼部尚书同中书门下平章事集贤殿大学士曹汭狱事起宦者罗崇勋江德明方用事因潜利用帝疑问执政士逊曰此独不肖子为之利用大臣宜不知状太后怒将罢士逊帝以其东宫旧臣加刑部尚书知江甯府后领定国军节度使知许州明道初复入相进中书侍郎兼兵部尚书明年进门下侍郎昭文馆大学士监修国史羣臣上章懿皇后谥册退而入慰士逊与同列过杨崇勋园饮日中不至御史中丞范讽劾之以尚书左仆射判河南府改山南东道节度使同中书门下平章事判许州徙河南府宝元初复以门下侍郎兵部尚书入相对郢国公康定初士逊言禁兵久戍边其家在京师有不能自存者帝命内侍条指挥使以下为差等出内藏缗钱十万赐之士逊又请遣使安抚陕西帝命遣知制诰韩琦以行于是诏枢密院自今边事并与士逊等参议及简犂官为禁军犂官携妻子遮宰相枢密院喧诉士逊方朝马惊坠地时朝廷多事士逊亡所建明谏官韩琦论曰政事府岂养病之地邪士逊不自安累上章请老乃拜太傅封邓国公致仕御书飞白千岁字赐之士逊因建千岁堂尝请买城南官园帝以赐士逊宰相得谢盖自士逊始就第凡十年卒年八十六赠太师中书令谥文懿御篆其墓碑曰旧德之碑士逊生七日丧母其姑育养之既长事姑孝谨姑亡为行服徒跣扶柩以葬追封南阳县太君初陈尧佐罢参知政事人有挟怨告尧佐谋反复有诬谏官阴附宗室者士逊曰儉人构陷善良以摇朝廷奸伪一开俱不能自保矣帝悟抵告者以罪诬谏官事亦不下然曹利用在枢府藉宠肆威士逊居其闲无所可否时人以和鼓目之士逊尝纳女口宫中为御史杨偕所劾子友直字益之积官工部郎中知越州

士逊尝记仁宗东宫旧事而史官未之见友直纂为资善录上之幼子友正字义祖学书积三十年不辍遂以书名神宗评其草书为本朝第一

△曾公亮

曾公亮字明仲泉州晋江人举进士甲科知会稽县民田镜湖旁每患湖溢公亮立斗门泄水入曹娥江民受其利累迁集贤校理天章阁侍讲修起居注天章阁待制知制诰兼史馆修撰为翰林学士判三班院三班吏从猥非赇谢不行贵游子弟多倚势请谒公亮掇前后章程视以从事吏不能举手以端明殿学士知郑州有能声盗悉窜他境复入为翰林学士知开封府未几擢给事中参知政事加礼部侍郎除枢密使嘉佑六年拜吏部侍郎同中书门下平章事集贤殿大学士公亮明练文法更践久习知朝廷台阁典宪首相韩琦每咨访焉仁宗末年琦请建储与公亮等共定大议契丹纵人渔界河又数通盐舟吏不敢禁皆谓与之校且生事公亮言萌芽不禁后将柰何雄州赵滋勇而有谋可任也使谕以指意边害讫息英宗即位加中书侍郎兼礼部尚书寻知户部尚书神宗即位加门下侍郎兼吏部尚书拜尚书右仆射封英国公改兗国公熙宁初进封鲁国公二年拜左仆射加昭文馆大学士监修国史以老避位三年拜司空兼侍中河阳三城节度使集禧观使明年起判永兴军先是庆卒叛既伏诛而余党越佚自陕以西皆警备阅义勇益边兵移内地租赋人情骚然公亮一镇以静次第奏罢之专务裁抑冗费长安豪喜造飞语声言营卒怨减削谋以上元夜结外兵为乱邦人大恐或劝毋出游公亮不为动张灯纵观与宾佐竟夕乃归居一岁还京师旋以太保致仕元丰元年卒年八十赠太师中书令谥曰宣靖配享英宗庙庭及葬御篆其碑首曰两朝顾命定策亚勋之碑公亮方厚庄重沈深周密平居谨绳墨蹈规矩受遗辅政有始有卒帝尝以方张安世然性吝嗇殖货至巨万初荐王安石及同辅政知帝向之阴为子孙计凡更张庶事一切听顺而外若不与之者尝遣子孝宽参其谋至帝前略无所异于是帝益信任安石安石德其助已故引擢孝宽至枢密以报之苏轼尝责公亮不能救正公亮曰帝与介甫如一人此乃天也世讥其持禄固宠云子孝宽从子孝广孝蕴

曾孝宽

曾孝广

曾孝蕴

曾孝宽

孝宽字令绰 【按东都事略作公绰】 以荫知桐城县选知咸平县民诣府诉雨

伤麦府以妄杖之孝宽躬行田辨其实得蠲赋除秘阁
修撰提点开封府界镇县保甲法行民相惊言且籍为兵知府韩维上言乞候农隙行之
孝宽榜十七县揭赏告捕扇惑者民兵不敢诉入知审
官东院判刑部熙宁五年迁枢密都承旨承旨用文臣自孝宽始擢拜枢密直学士签书
枢密院以端明殿学士知河阳徙郓郓有孟子庙而无
封爵孝宽请于朝得封邹国公配享孔子连徙镇以吏部尚书召道卒年六十六赠右光
禄大夫

曾孝广

孝广字仲锡元丰末为北外都水丞元佑中大臣议复河故道召孝广问之言不可
出通判保州久之复为都水丞除京西转运判官入为
水部员外郎河决内黄诏孝广行视遂疏苏村凿巨野导河北流纾澶滑深瀛之害迁都
水使者洛水频岁溢涌浸啮北岸孝广按河堤得废渡
口遗迹曰此昔人所以杀水势也即日浚决之累石为防自是无水患累擢户部尚书坐
钱帛不给费罢为天章阁待制知杭州又以前聘契丹
失奉使体夺职寻复之移知潭州加显谟阁直学士知郓州孝广与胡安国邹浩善皆大
观中忤时相御史论之复夺职知饶州踰年徙广州历
成德军太原府得故职以卒年六十赠正议大夫莅官以严称

曾孝蕴

孝蕴字处善绍圣中营干发运司榷余事建言扬之瓜州润之京口常之犇牛易堰
为闸以便漕运商贾既成公私便之时京邑有盗徽宗
怒期三日不获坐尹罪孝蕴奏求盗急则遁益远小缓当自出从其言得盗崇宁建殿中
省擢为监居数月言者论其与张商英善以集贤殿修
撰出知襄州徙江浙荆淮发运泗州议开直河以避涨溢沙石之害孝蕴以淮汴不相接
不可成既而工役大集竟成之策勋第赏辞不受未几
河果塞召为户部侍郎徙工部以显谟阁待制知杭州其后坐累连削黜至安远军节度
副使宣和二年复天章阁待制知歙州方猎起青溪孝
蕴约敕郡内无得奔扰分兵守阨塞有避贼来归者获罪使出境人稍恃以安会移青州
既行而歙陷道改杭州时贼已破杭孝蕴单车至城下
城既克复军士多杀人孝蕴下令从者得自首无辄杀皆束手不敢惊论功进显谟阁直
学士又加龙图阁学士卒年六十五赠通议大夫

△陈升之

陈升之字旻叔建州建阳人举进士历知封州汉阳军入为监察御史右司谏改起
居舍人知谏院时俗好藏去交亲尺牒有讼则转相告
言有司据以推诘升之谓此告讦之习也请禁止之又言三馆为搢绅华途近者用人益

轻遂为贵游进取之阶请严其选诏自今臣僚乞子孙
恩者毋得除馆阁著作佐郎张尧佐缘后宫亲为三司使寻为宣徽使内侍王守忠领两
镇留后求升正班唐介击宰相斥岭南升之皆极谏迁
侍御史知杂事凡任言责五年所上数十百事然持论不坚以故不尽施用擢天章阁待
制河北都转运使知瀛州真定府加龙图阁直学士复
知谏院上言天下州县治否朝廷不能周知悉付之转运使今选用不精又无考课非闇
滞罢懦则凌肆刻薄所以疾苦愁叹壅于上闻必欲垂
意元元宜从此始乃诏翰林学士承旨孙抃权御史中丞张昇与升之同领磨勘转运使
及提点刑狱功务升之初为谏官时尝请抑绝内降诏
许有司执奏勿下至是由言之诏委三省劾正其罪仍揭于朝堂文彦博乞罢相升之虑
枢密使贾昌朝复用疏论其邪昌朝卒罢去升之迁枢
密直学士知开封府岁余拜枢密副使于是谏官御史唐介范师道吕诲赵抃王陶交章
论升之阴结宦者故得大用仁宗以示升之升之丐去
帝谓辅臣曰朕选用执政岂容内臣预议邪乃两罢之以升之为资政殿学士知定州徙
太原府治平二年复拜枢密副使神宗立以母老请郡
为观文殿学士知越州熙宁元年徙许州道改大名府过阙留知枢密院故事枢密使与
知院事不并置时文彦博吕公着既为使帝以升之三
辅政欲稍异其礼故特命之明年同制置三司条例司与王安石共事数月拜中书门下
平章事集贤殿大学士升之既相遂请免条例司以为
宰相无所不统所领职事岂可称司安石曰古之六卿即今之执政有司马司徒司空各
各一名一职何害于理升之曰若制置百司条例则可但今
制置三司一官则不可由是忤安石称疾归卧逾十旬帝数敦谕乃出会母丧去位终制
召为枢密使足疾不能立朝冬祀又不能相礼拜镇江
东节度使同平章事判扬州封秀国公卒年六十九赠太保中书令谥曰成肃升之深狡
多数善傅会以取富贵王安石用事患正论盈庭引升
之自助升之心知其不可而竭力为之用安石德之故使先已为相甫得志即求罢条例
司又时为小异阳若不与之同者世以是讥之谓之筌
相升之初名旭避神宗嫌名改焉

△吴充

吴充字冲卿建州浦城人未冠举进士与兄育京方皆高第调谷熟主簿入为国子
监直讲吴王宫教授他官多与宗室狎充齿最少独以
严见惮相率设席受经充作六箴以献曰视曰听曰好曰学曰进德曰崇俭仁宗命缮写
赐皇族英宗在藩邸书之坐右除集贤校理判吏部南
曹选人胡宗尧者翰林学士宿之子坐小累不得改京官判铨欧阳修为之请仇家潜修

以为党宿诏出修同州充言修以忠直擢侍从不宜用
谗逐若以为私则臣愿与修同贬于是修复留而充改知太常礼院张贵妃薨治丧越文
判寺王洙命吏以印纸行式书不令同僚知充移开封
治吏罪忤执政意出知高邮军还为羣牧判官开封府推官历知陕州移京西淮南河东
转运使英宗立数问充所在会入覲语及为吴王宫教
授时事嘉劳之寻权盐铁副使熙宁元年知制诰神宗谕以任用意曰先帝知卿久矣遂
同知谏院言士大夫亲没或藁殡数十年伤败风化宜
限期使葬诏着为令河北水灾地震为安抚使使还王安石参知政事充子安持其壻也
引嫌解谏职知审刑院权三司使为翰林学士三年拜
枢密副使王韶取洮州蕃酋木征遁去充请招还故地縻以爵秩使自领所部永为外臣
无庸列置郡县殫财屈力时方以开拓付韶充言不用
八年进检校太傅枢密使充虽与安石连婣而心不善其所为数为帝言政事不便帝察
其中立无与欲相之安石去遂代为同中书门下平章
事监修国史充欲有所变革乞召还司马光吕公着韩维苏颂乃荐孙觉李常程颢等数
十人光亦以充可告语与之书充不能用王珪与充并
相忌充阴掣其肘而充素恶蔡确确治相州狱捕安持及亲戚官属考治欲钩致充语帝
独明其亡他及确预政充与议变法于前数为所诎安
南师出无功知谏院张璪又谓充与郭逵书止其进兵充数遭同列困毁疾益侵元丰三
年罢为观文殿大学士西太一宫使踰月卒年六十赠
司空兼侍中谥曰正宪充内行修饬事兄甚谨为相务安静性沈密对家人语未尝及国
家事所言于上人莫知者将终戒妻子勿以私事干朝
廷帝益悲之世谓充心正而力不足讥其知不可而弗能勇退也子安诗安持安诗在元
佑为谏官起居郎安持为都水使者迁工部侍郎终天
章阁待制

△王珪

王珪字禹玉成都华阳人后徙舒 【按李清臣撰珪神道碑云曾祖封公于荣国由
荣国以下葬河南始徙籍于舒】 曾祖永事太宗为
右补阙吴越纳土受命往均赋至则悉除无名之算民皆感泣使还或言其多弛赋租帝
诘之对曰使新附之邦蒙天子仁恩臣虽得罪死不恨
帝大悦珪弱岁奇警出语惊人举进士甲科通判扬州吏民皆少珪有大校嫚不谨擿置
之法王伦犯淮南珪议出郊掩击之贼遁去召直集贤
院为盐铁判官修起居注北使过魏旧皆盛服入至是欲便服妄云衣冠在后乘珪命取
授之使者愧谢进知制诰知审官院为翰林学士知开
封府遭母忧除丧复为学士兼侍读学士先是三圣并侑南郊而温成庙享献同太室珪

言三后并配所以致孝也而渎乎飨帝后宫有庙所以广恩也而僭乎飨亲于是专以太祖侑于郊而改温成庙为祠殿嘉佑立皇子中书召珪作诏珪曰此大事也非面受旨不可明日请对曰海内望此举久矣果出自圣意乎仁宗曰朕意决矣珪再拜贺始退而草诏英宗立当撰先帝谥珪言古者贱不谥贵幼不谥长故天子称天以谥之制谥于郊若云受之于天者近制唯词臣撰议庶僚不得参闻颇违称天之义请令两制共议从之濮王追崇典礼珪与侍从礼官合议宜称皇伯三夫人改封大国执政不以为然其后三夫人之称卒如初议始珪之请对而作诏也有密潜之者英宗在位之四年忽召至藻珠殿传诏令兼端明殿学士锡之盘龙金盘谕之曰秘殿之职非直器卿于翰墨闻二府员缺即出命矣曩有逸口朕今释然珪谢曰非陛下至明臣死无日矣神宗即位迁翰林学士承旨珪典内外制十八年最为久次尝因展事斋宫赋诗有所感帝见而怜之熙宁三年拜参知政事九年进同中书门下平章事集贤殿大学士元丰官制行由礼部侍郎超授银青光禄大夫五年正三省官名拜尚书左仆射兼门下侍郎以蔡确为右仆射先是神宗谓执政曰官制将行欲新旧人两用之又曰御史大夫非司马光不可珪确相顾失色珪忧甚不知所出确曰陛下久欲收灵武公能任责则相位可保也珪喜谢确帝尝欲召司马光珪荐俞充帅庆使上平西夏策珪意以为既用兵深入必不召光虽召将不至已而光果不召永乐之败死者十余万人实珪启之八年帝有疾珪白皇太后请立延安郡王为太子太子立是为哲宗进珪金紫光禄大夫封岐国公 【按神道碑载仁宗英宗加徽号珪为仁宗册宝使礼成封郇国公神宗即位改岐国公】 卒于位年六十七赠太师谥曰文恭珪以文学进流辈咸共推许其文闳侈瓌丽自成一家朝廷大典策多出其手词林称之然自执政至宰相凡十六年无所建明率道谀将顺当时目为三旨相公以其上殿进呈云取圣旨上可否讫云领圣旨退谕禀事者云已得圣旨也绍圣中邢恕谤起黄履叶祖洽刘拯交论珪元丰末命事以为当时两府大臣尝议奏请建储珪辄语李清臣云他自家事外庭不当管恕又诱教高遵裕子士京上奏言珪欲言雍王遣士京故兄士充传道言语于禁中珪由是得罪追贬万安军司户参军削子籍徽宗即位还其官封蔡京秉政复夺赠谥政和中又复之珪季父罕从兄琪 【按神道碑云子仲修登进士第为秘书省著作佐郎仲端承事郎籍田令仲蕤承奉郎仲■〈山完〉仲煜承事郎东都事略云徽宗即位其子仲修诉其父冤乃尽复故官赠谥】

王罕

王琪

王罕

罕字师言以荫知宜兴县县多湖田岁诉水轻重失其平罕躬至田处列高下为图明年诉牒至按图示之某户可免某户不可免众皆服范仲淹在润奏下其式于诸道西方用兵仍年科箭羽于东南价踊贵富室至豫贮以待鬻罕白郡守倍其直市之而令民输钱旁州闻之皆愿如常州法累迁户部判官出为广东转运使依智高入寇罕行部在潮广州守仲简自围中遣书邀罕罕报曰吾非不欲归当求所以相济者遂还惠州州之恶少年正相率为盗里落惊扰惠人遮道求救护者数千计罕择父老可语者问以策曰吾属皆有田客欲给以兵使相保聚宰曰有田客者如是得矣无者柰何乃呼耆长发里民补壮丁每长二百人又令邑尉增弓手二千已时下令约申而集募有方略者许以官秩金帛使为甲首久之无至者有妇人诉为仆夺钗珥捕得之并执夺攘者十八辈皆梟首决口置道左传曰此耆长发为壮丁不肯行者也观者始有怖色至期得六百人尉所部亦至于是染库帛为旗割牛革为盾形柔之汤中每盾削竹签十六穿于革以木为鼻使持之自蔽断苦竹数千铍其末使操为兵悉出公私戎器檄告属城仿而行之数日众大振向之恶少年皆隶行伍无敢动乃简卒三千方舟建旗伐鼓作乐顺流而下将至广悉众登岸斩木为鹿角积高数仞营于南门智高见已严备不敢犯罕徐开门而入智高遂解去时南道邮驿断绝罕上事不得通而提点刑狱鲍轲遁处南雄数具奏及贼平轲受赏罕谪监信州酒安抚使孙沔言罕实有功复以为西路转运使或传智高不死走火峒依宗旦据险聚众邕守萧注谋击之罕呼宗旦子曰新谓之曰汝父内为交趾所仇外为边将希赏之饵非计也汝归报择利而为之于是父子俱降徙知潭州擢户部度支副使复为潭州为政务适人情不加威罚有狂妇数诉事却之则勃骂前守每叱逐之罕独引至前委曲徐问乃本为人妻无子夫死妾有子逐妇而据家资屡诉不得直因愤恚发狂罕为治妾而反其资妇良愈郡人传为神明监司上治状敕书褒谕徙知明州以光禄卿卒年八十兄之子珪少孤罕教谕有恩后珪贵每予书必以盛满为戒云

王琪

琪字君玉儿童时已能为歌诗起进士调江都主簿上时务十二事请建义仓置营田减度僧罢鬻爵禁锦绣珠贝行乡饮籍田复制科兴学校仁宗嘉之除馆阁校勘集贤校理帝宴太清楼命馆阁臣作山水石歌琪独蒙褒赏

诏通判舒州岁饥奏发廩救民未报先振以公租守以下皆不听琪挺身任之知复州知制诰会奉使契丹因感疾还上介诬其诈责信州团练副使久之以龙图阁侍制知润州转运使欲浚常润漕河琪陈其不便诏寝役而后议者卒请废古城埭破古函管而浚之河反狭舟不得方行公私交病徙知江甯先是府多火灾或托以鬼神人不敢救琪作赏捕之法未几得奸人诛之火患遂息累迁礼部侍郎致仕卒年七十二琪性孤介不与时合数临东南名镇政尚简静葬于真州诏真扬二州发卒护其窆盖异数也

钦定续通志卷三百三十七

●钦定续通志卷三百三十八 列传一百三十八

列传

宋 【四十二】

○宋四十二

韩琦【忠彦】 富弼【绍庭】 文彦博

韩琦

富弼

文彦博

△韩琦

韩琦字稚圭相州安阳人父国华自有传琦风骨秀异弱冠举进士名在第二方唱名太史奏日下五色云见左右皆贺授将作监丞通判淄州入直集贤院监左藏库时方贵高科多径去为显职琦独滞筦库众以为非宜琦处之自若禁中需金帛皆内臣直批旨取之无印可验琦请复旧制置传宣合同司以相防察又每纲运至必俟内臣监莅始得受往往数日不至暴露庑下衙校以为病琦奏罢之厯开封府推官三司度支判官拜右司谏时宰相王随陈尧佐参知政事韩亿石中立在中书罕所建明琦连疏其过四人同日罢又请停内降抑侥幸凡事有不便未尝不言每以明得失正纪纲亲忠直远邪佞为急前后七十余疏王曾为相谓之曰今言者不激则多畏顾何补上德如君言可谓切而不迂曾闻望方崇罕所奖与琦闻其语益自信擢知制诰益利岁饥为体量安抚使异时郡县督赋调繁急市上供绮绣诸物不予直琦为缓调蠲益之逐贪残不职吏汰冗役数百活饥民百九十万赵元昊反琦适自蜀归论西师形势甚悉既命为陕西安抚使刘平与贼战败为所执时宰入他诬收系平子弟琦辨直其冤进枢密直学士副夏竦为经略安抚招讨使诏遣使督出兵琦亦欲先发以制贼而合府固争元昊遂寇镇戎琦

与竦画攻守二策驰入奏仁宗欲用攻策执政者难之琦言元昊虽倾国入寇众不过四五万人吾逐路重兵自为守势分力弱遇敌辄不支若并出一道鼓行而前乘贼骄惰破之必矣乃诏鄜延泾原同出征既还营元昊来求盟琦曰无约而请和者谋也命诸将戒严贼果犯山外琦悉兵付大将任福令自怀远城趋德胜砦出贼后如未可战即据险置伏要其归及行戒之至再又移檄申约苟违节度虽有功亦斩福竟为贼诱没于好水川竦使人收散兵得琦檄于福衣带闲言罪不在琦琦亦上章自劾独夺一官知秦州会陕西分四路置帅以琦兼秦凤经略招讨安抚使庆历二年与三帅皆换观察使范仲淹庞籍王沿不肯拜琦独受不辞未几还旧职为陕西四路经略安抚招讨使屯泾州琦与范仲淹在兵闲久名重一时人心归之朝廷倚以为重故天下称为韩范初京师所遣戍兵不习劳苦贼轻之目为东兵琦奏增土兵以代戍建德顺军以蔽萧关鸣沙之道方谋取横山规河南而元昊称臣召为枢密副使元昊介契丹为援邀索无厌宰相晏殊等厌兵将一切从之琦陈其不便条所宜先行者七事一曰清政本二曰念边计三曰擢材贤四曰备河北五曰固河东六曰收民心七曰营洛邑继又陈掾弊八事欲选将帅明按察丰财利遏侥幸进能吏退不才谨入官去冗食帝悉嘉纳遂宣抚陕西讨平羣盗张海郭邈山尽修鄜延城障须敌悉归所侵地乃许和及还陈西北四策谓今当以和好为权宜战守为实务请缮甲厉兵营修都城密定讨伐之计二府合班奏事琦必尽言虽事属中书亦指陈其实同列或不悦帝独识之曰韩琦性直琦与范仲淹富弼皆以海内人望同时登用中外跂想其勋业仲淹等亦以天下为己任羣子不便之毁言日闻仲淹弼继罢琦为辨析不报尹洙与刘沪争城水洛事琦右洙朝论不谓然乃请外以资政殿学士知扬州徙郢州成德军定州兼安抚使进大学士又加观文殿学士初定州兵狃平贝州功需赏赉出怨语至欲噪城下琦闻之以为不治且乱用军制勒习洙其尤无良者士死攻城则赏赙其家籍其孤嫠既廩之维恩并行又仿古三阵法日月训习之由是中山兵精劲寇河朔京师发龙猛卒戍保州在道为人害至定琦悉留不遣易素教者使之北又赈活饥民数百万拜武康军节度使河东经略安抚使知并州契丹冒占天地庙地琦示以曩日彼所求修庙檄无以对遂归我斥地既又侵耕阳武砦地琦凿堑立石以限之始潘美镇河东患寇钞令民悉内徙而空塞下不耕于是忻代窳化大山之北多废坏琦以为此皆良田今弃不耕适足以资敌遂请距北界十里为禁地其南则募弓箭手居之垦田至九千六百顷久之求知相州嘉佑元年拜

枢密使三年拜同中书门下平章事集贤殿大学士六年迁昭文馆大学士监修国史封仪国公帝既连失三王自至和中得病不能御殿中外惴恐臣下争以立嗣固根本为言包拯范镇尤激切积五六岁依违未之行言者亦稍息至是琦乘闲奏请立皇嗣一日怀孔光传以进曰成帝无嗣立弟之子彼中材之主犹能如是况陛下乎愿以太祖之心为心则无不可者又与曾公亮张昇欧阳修极言之会司马光吕海皆有请琦进读二疏未及有所启帝遽曰朕有意久矣谁可者琦惶恐对曰此非臣辈所可议当出自圣择帝曰宫中尝养二子大者可琦请其名帝以宗实告宗实英宗旧名也琦等遂力赞之议乃定英宗居濮王丧议起知宗正琦乞内中批出帝意不欲宫人知曰只中书行足矣命下英宗固辞帝复问琦琦对曰陛下既知其贤而选之今不敢遽当盖器识远大所以为贤也愿固起之英宗既终丧犹坚卧不起琦言宗正之命初出外人皆知必为皇子不若遂正其名乃下诏立为皇子明年英宗嗣位琦加门下侍郎进封卫国公英宗暴得疾太后垂帘听政帝疾甚举措或改常度遇宦官尤少恩左右共为谗闲两宫遂成隙琦与欧阳修奏事帘前太后呜咽流涕具道所以琦曰此疾固尔病已必不然子疾母可不容之乎修亦委曲进言太后意稍和后数日琦独见帝帝曰太后待我无恩琦对曰自古圣帝明王不为少矣然独称舜为大孝岂其余尽不孝耶父母慈爱而子孝此常事不足道惟父母不慈而子不失孝乃为可称但恐陛下事之未至耳父母岂有不慈者帝大感悟及疾愈琦请乘輿具素服出祷两人情乃安太后还政拜琦右仆射封魏国公夏人寇大顺城琦议停岁赐绝和市遣使问罪枢密使文彦博难之或举宝元康定事琦曰谅祚非有元昊智计而边备过当时远甚亟诘之必服既而谅祚上表谢帝顾琦曰一如所料帝寝疾琦入问起居因曰陛下久不视朝愿早建储以安社稷帝颌之即召大学士草制立颍王神宗即位拜司空兼侍中琦执政三世或病其专御史中丞王陶劾琦不赴文德殿押班为跋扈琦请去帝为黜陶琦坚辞位除镇安武胜军节度使司徒兼侍中判相州入对帝泣曰侍中必欲去今日已降制矣擢其子忠彦秘阁校理琦辞两镇乃但领淮南会种谔擅取绥州西边俶扰改判永兴军经略陕西琦初言绥州不当取已而夏人诱杀杨定琦复言贼既如此绥今不可弃枢密院以初议诘之琦具论其故卒存绥州 【伏读通鉴辑览 御批种谔受降袭取绥州诚不免轻举杨定初时奉使西夏下拜称臣尤有当诛之罪然绥城既复尺寸皆国家壤地岂宜轻议弃捐而贼人戕杀王官又岂可以其祸由自取不加征讨韩琦所言自是正理且时势

既异更不必前后相符枢密必执初议以相诘亦不达事体之甚矣】熙宁元年复请相州以归河北地震河决徙判大名府充安抚使得便宜从事王安石用事出常平使者散青苗钱琦亟言之帝怀其疏以示宰相曰琦真忠臣虽在外不忘王室朕始谓可以利民今乃害民如此且坊郭安得青苗而亦强与之乎安石勃然进曰苟从其欲虽坊郭何害明日称疾不出当是时新法几罢安石复出持前议益坚琦又恳奏安石下之条例司令其属疏驳刊石颁天下琦请辨愈切不克从于是请解四路安抚使止领一路安石欲沮琦即从之六年还判相州契丹来求代北地帝手诏访琦琦奏言臣观近年以来朝廷举事似不以大敌为恤彼见形生疑必谓我有图复燕南意故引先发制人之说造为衅端今宜遣使报聘具言向来兴作乃修备之常岂有他意疆土素定悉如旧境不可持此造端以隳累世之好若其果自败盟则可一振威武恢复故疆疏上会安石再入相悉以所争地与契丹东西七百里论者惜之八年换节永兴军再任未拜而卒年六十八前一夕大星陨于治所枥马皆惊帝自为碑文篆其首曰两朝顾命定策元勋赠尚书令谥曰忠献配享英宗庙庭常令其子若孙一人官于相以护邱墓故事三省长官惟尚书令为尤重赠者必兼他官至琦乃单赠后又诏虽当追策不复更加师保盖贵之也琦蚤有盛名识量英伟临事喜愠不见于色论者以重厚比周勃政事比姚崇其为学士临边年甫三十天下已称为韩公嘉佑治平闲再决大策以安社稷当是时朝廷多故琦处危疑之际知无不为或谏之琦曰臣尽力事君死生以之至于成败天也岂可预忧其不济遂辍不为哉闻者愧服在魏都久辽使每过移牒必书名曰以韩公在此故也忠彦使辽辽主问知其貌类父即命工图之其见重敌国也如此琦天资朴忠折节下士无贱贵礼之如一尤以奖拔人材为急倘公论所与虽意所不悦亦收用之故得人为多选饬羣司皆使奉法循理其所建请第顾义所在无适莫心在相位时王安石有盛名或以为可用琦独不然及守相陞辞神宗曰卿去谁可属国者王安石何如琦曰安石为翰林学士则有余处辅弼之地则不可上不答其镇大名也魏人为立生祠相人爱之如父母有鬪讼传相劝止曰勿挠吾侍中也与富弼齐名号称贤相人谓之富韩云徽宗追论琦定策勋赠魏郡王子五人忠彦端彦纯彦粹彦嘉彦端彦右赞善大夫纯彦官至徽猷阁直学士粹彦为吏部侍郎终龙图阁学士嘉彦尚神宗女齐国公主拜驸马都尉终瀛海军承宣使

韩忠彦

韩忠彦

忠彦字师朴少以父任为将作监簿复举进士琦罢政忠彦以秘书丞召试馆职除校理同知太常礼院为开封府判官三司盐铁判官出通判永宁军召还为户部判官琦卒服除为直龙图阁擢天章阁待制知瀛州朝廷以夏人囚废其主秉常用兵西方既下米脂等城砦数十夏人求救于辽辽人移书继至会遣使贺辽主生辰忠彦以给事中奉使辽遣赵资睦迓之语及西事忠彦曰此小役也何问为辽主使其臣王言敷燕于馆言敷问夏国胡罪而中国兵不解无失两朝欢则善矣忠彦曰问罪西夏于二国之好何预乎使还时官制行章惇为门下侍郎奏给事东省属官封驳宜先禀而后上忠彦奏朝廷之事执政之所行也事当封驳则与执政固已异矣尚何禀议之有诏从其请左仆射王珪为南郊大礼使事之当下者自从其所画旨忠彦以官制驳之曰今事于南郊者大礼使既不从中画旨处分出一时者又不从中书奏审官制之行曾未期月而庙堂自渝之后将若之何乃诏事无巨细必经三省而后行拜礼部尚书以枢密直学士知定州元佑中召为户部尚书擢尚书左丞弟嘉彦尚主改同知枢密院事迁知院事哲宗亲政更用大臣言者观望争言垂帘时事忠彦言昔仁宗始政当时亦多讥斥章献时事仁宗恶其持情近薄下诏戒饬陛下能法仁祖用心则善矣以观文殿学士知真定府移定州忠彦在西府以用兵西方非是愿以所取地弃还之以息民力至是言者以为言降资政殿学士改知大名府徽宗即位以吏部尚书召拜门下侍郎忠彦陈四事一曰广仁恩二曰开言路三曰去疑似四曰戒用兵踰月拜尚书右仆射兼中书侍郎帝用忠彦言数下诏蠲天下逋负尽还流人而甄叙之忠直敢言若知名之士稍见收用进左仆射兼门下侍郎封仪国公而曾布为右相多不协言事者助布排忠彦以观文殿大学士知大名府又以钦圣欲复废后为忠彦罪再降大中大夫怀州居住又论忠彦在相位不应弃湟州谪崇信军节度副使济州居住逮复湟鄯又谪磁州团练副使复大中大夫遂以宣奉大夫致仕卒年七十二子治徽宗时为太仆少卿出知相州以疾丐祠命其子肖胄代之别有传

△富弼

富弼字彦国河南人少笃学有大度范仲淹见而奇之曰王佐才也举茂材异等授将作监丞签书河阳判官仲淹坐争废后事贬弼上言是一举而二失也纵未能复后宜还仲淹不听复判绛州迁直集贤院赵天昊反弼疏陈八事乞斩其使者召为开封府推官知谏院康定元年日食正旦弼请罢宴彻乐就馆赐北使酒食执政不可弼曰万一契丹行之为朝廷羞后

闻契丹果罢宴帝深悔之时禁臣僚越职言事弼因论

日食极言应天变莫若通下情遂除其禁元昊寇鄜州破金明铃辖卢守懃不救内侍黄德和引兵走大将刘平战死德和诬其降贼弼请按竟

其狱德和坐要斩夏守斌为陕西都部署又以入内都知王守忠为铃辖弼言用守斌既为天下笑今益以守忠殆与唐中官监军无异守懃德

和覆车之辙可复蹈乎诏罢守忠又言边事系国安危不当专委枢密请令宰相并领枢密院时西夏首领二人来降但补借奉职弼言当厚赏

以劝来者事下中书宰相初不知也弼叹曰此岂小事而宰相不知邪更极论之于是从弼言除盐铁判官史馆修撰奉使契丹庆历二年为制

诰纠察在京刑狱堂吏有伪为僧牒者开封不敢治弼白执政请以吏付狱吕夷简不悦会契丹屯兵境上遣其臣肃英刘六符来求关南地朝

廷择报聘者皆以其情叵测莫敢行夷简因是荐弼欧阳修引颜真卿使李希烈事请留之不报弼入对曰主忧臣辱臣不敢爱其死帝为动色

先以为接伴英等入境中使迎劳之英托疾不拜弼曰昔使北病卧车中闻命辄起今中使至不拜何也英矍然起拜弼开怀与语英感悦不复

隐其情遂密以其主所欲得者告曰可从从之不然以一事塞之足矣弼具以闻帝唯许增岁币仍以宗室女嫁其子进弼枢密直学士辞不拜

遂为使报聘既至六符来馆客弼见契丹主问故契丹主曰南朝违约塞雁门增塘水治城隍籍民兵将以何为羣臣请举兵而南吾以为不若

遣使求地求而不获举兵未晚也弼曰北朝忘章圣皇后之大德乎澶渊之役苟从诸将言北兵无得脱者且北朝与中国通好则人主专其利

而臣下无获若用兵则利归臣下而人主任其祸故劝用兵者皆为身谋耳契丹主惊曰何谓也弼曰中国提封万里精兵百万法令修明上下

一心北朝欲用兵能保必胜乎就使其胜所亡士马羣臣当之欤抑人主当之欤若通好不绝岁币尽归人主羣臣何利焉契丹主大悟首肯者

久之弼又曰塞雁门者以备元昊也塘水治于何承矩事在通好前城隍皆修旧民兵亦补阙非违约也契丹主曰微卿言吾不知其详然所欲

得者祖宗故地耳弼曰晋以卢龙赂契丹周世宗复取关南皆异代事若各求地岂北朝之利哉既退六符曰吾主耻受金帛坚欲十县何如弼

曰本朝皇帝言朕为祖宗守国岂敢妄以土地与人北朝所欲不过租赋耳朕不忍多杀两朝赤子故屈己增币以代之若必欲得地是志在败

盟假此为词耳澶渊之盟天地鬼神实临之今北朝首发兵端过不在我天地鬼神其可欺乎明日契丹主召弼同猎引弼马自近又言得地则

欢好可久弼反复陈必不可状且言北朝既以得地为荣南朝必以失地为辱兄弟之国

岂可使一荣一辱哉猎罢六符曰吾主闻公荣辱之言
意甚感悟今惟有结婚可议耳弼曰婚媾易生嫌隙本朝长公主出降赍送不过十万缗
岂若岁币无穷之利哉契丹主谕弼使归曰俟卿再至
当择一受之弼归复命复持二议及受口传之词于政府以往行次乐寿谓副使张茂实
曰吾为使者而不见国书脱书词与口传异吾事败矣
启视果不同即驰还都易书而行及至契丹不复求婚专欲增币曰南朝遗我之辞当曰
献否则曰纳弼争之契丹主曰南朝既惧我矣于二字
何有若我拥兵而南得无悔乎弼曰本朝兼爱南北故不惮更成何名为惧或不得已至
于用兵则当以曲直为胜负非使臣之所知也契丹主
曰卿勿固执古亦有之弼曰自古唯唐高祖借兵于突厥当时赠遗或称献纳其后颉利
为太宗所擒岂复有此礼哉弼声色俱厉契丹知不可
夺乃曰吾当自遣人议之复使刘六符来弼归奏曰献纳二字臣以死拒之彼气折矣可
勿许也朝廷竟以纳字与之岁增币二十万除枢密直
学士迁翰林学士皆恳辞曰增岁币非臣本志特以方讨元昊未暇与角故不敢以死争
其敢受乎三年拜枢密副使辞愈力改授资政殿学士
兼侍读学士复拜枢密副使弼言契丹既结好议者便谓无事万一败盟臣死且有罪愿
陛下思其轻侮之耻坐薪尝胆不忘修政以诰纳上前
而罢踰月复申前命使宰相谕之曰此朝廷特用非以使辽故也弼乃受帝锐以太平责
成宰辅数下诏督弼与范仲淹等又开天章阁给笔札
使书其所欲为者且命仲淹主西事弼主北事弼上当世之务十余条及安边十三策大
略以进贤退不肖止侥幸去宿弊为本欲渐易监司之
不才者使澄汰所部吏于是小人始不悦矣元昊遣使以书来称男不称臣弼言契丹臣
元昊而我不臣则契丹为无敌于天下不可许乃却其
使卒臣之四年契丹受礼云中且发兵会元昊伐呆儿族于河东为近帝疑二边同谋弼
曰兵出无名契丹不为也元昊本与契丹约相左右今
契丹独获重币元昊有怨言故城威塞以备之呆儿屡寇威塞契丹疑元昊使之故为是
役安能合而寇我哉或请调发为备弼曰如此正堕其
计臣请任之帝乃止契丹卒不动夏竦不得志中弼以飞语弼惧求宣抚河北还以资政
殿学士出知郓州岁余谗不验加给事中移青州兼京
东路安抚使河朔大水流民就食弼劝所部民出粟益以官廩得公私庐舍十余区散
处其人以便薪水官吏自前资待缺寄居者皆赋以禄
使即民所聚选老弱病瘠者廩之仍书其劳约他日为奏请受赏率五日辄遣人持酒肉
饭糗慰藉山林陂泽之利可资以生者听流民擅取死
者为大冢葬之目曰丛冢明年麦大熟民各以远近受粮归凡活五十余万人募为兵者

万计帝闻之遣使褒劳拜礼部侍郎弼曰此守臣职也
辞不受前此救灾者皆聚民城郭中为粥食之蒸为疾疫及相蹈藉或待哺数日不得粥
而仆名为救之而实杀之自弼立法简便周尽天下传
以为式王则叛齐州禁兵欲应之或诣弼告齐非弼所部恐事泄变生适中贵人张从训
衔命至青弼度其可用密付以事使驰至齐发吏卒取
之无得脱者即自劾擅之罪帝益嘉之复以为礼部侍郎又辞不受迁大学士徙知郑
蔡河阳加观文殿学士改宣徽南院使判并州至和二
年加户部侍郎拜同中书门下平章事集贤殿大学士与文彦博并命宣制之日士大夫
相庆于朝帝微觐知之以语学士欧阳修曰古之命相
或得之梦卜岂若今日人情如此哉帝弗豫大臣不得见中外忧栗弼彦博入问疾因托
襁褓事止宿连夕每事皆关白乃行宫内肃然语在彦
博传嘉佑三年加礼部侍郎进昭文馆大学士监修国史弼为相守典故行故事而附以
公议无容心于其闲六年以母忧去职故事执政遭丧
皆起复帝虚位五起之弼谓此金革变礼不可施于平世不拜命英宗即位召为枢密使
检校太师行礼部尚书治平二年以足疾求解拜镇海
军节度使同平章事判河阳 【按宋史宰辅表及宰辅编年录苏轼撰弼神道碑俱作判
河阳本传作扬州今据改】 封祁国公神宗即位改
镇武宁进封郑国公弼屡乞罢使相乃以为尚书左仆射观文殿大学士集禧观使复判
河阳熙宁元年徙判汝州 【按本传云进封郑熙宁
元年徙判汝州未若东都事略所载详备与宋史宰辅表合神道碑叙次与事略同今据
增】 诏入覲许肩舆至殿门神宗御内东门小殿令其
子掖以进且命毋拜坐语从容访以治道弼知帝果于有为对曰人主好恶不可令人窥
测可测则奸人得以傅会当如天之监人善恶皆所自
取然后诛赏随之则功罪无不得其实矣又问边事对曰陛下临御未久当布德行惠愿
二十年口不言兵帝默然至日昃乃退欲以集禧观使
留之力辞赴郡明年召拜司空兼侍中赐甲第悉辞之以左仆射门下侍郎同平章事昭
文馆大学士监修国史时有为帝言灾异皆天数非关
人事得失所致者弼闻而叹曰人君所畏惟天若不畏天何事不可为者此必奸人欲进
邪说以摇上心使辅拂谏争之臣无所施其力是治乱
之机不可以不速救即上书数千言力论之又言君子小人之进退系王道之消长愿深
加辨察勿以同异为喜怒喜怒为用舍陛下好使人伺
察外事故奸险得志又多出亲批若事事皆中亦非为君之道脱十中七八积日累月所
失亦多今中外之务渐有更张大抵小人惟喜生事愿
深烛其然无使有悔是时久旱羣臣请上尊号及用乐帝不许而以同天节契丹使当上

寿故未断其请弼言此盛德事正当以此示之乞并罢
上寿帝从之即日雨弼又上疏愿益畏天戒远奸佞近忠良帝手诏褒答之王安石用事
雅不与弼合弼度不能争多称疾求退章数十上神宗
将许之问曰卿即去谁可代卿者弼荐文彦博神宗默然良久曰王安石何如弼亦默然
拜武宁节度使同中书门下平章事判河南改亳州青
苗法出弼以谓如是则财聚于上人散于下持不行提举官劾弼格诏旨侍御史邓绾又
乞付有司鞫治乃以仆射判汝州安石曰弼虽责犹不
失富贵昔鯨以方命殛共工以象恭流弼兼此二罪止夺使相何由沮奸帝不答弼言新
法臣所不晓不可以治郡愿归洛养疾许之遂请老加
拜司空复武宁军节度使及平章事 【按东都事略及神道碑拜司空下有复武宁军节
度使同平章事盖弼以左仆射判汝州时已夺使相
故王安石有弼兼共鯨之罪止夺使相何以沮奸云云至此乃复故职宋史本传不载今
据增】 进封韩国公致仕弼虽家居朝廷有大利害知
无不言郭逵讨安南乞诏逵择利进退以全王师契丹争河东地界言其不可许星文有
变乞开广言路又请速改新法以解倒悬之急帝虽不
尽用而眷礼不衰尝因安石有所建明却之曰富弼手疏称老臣无所告诉但仰屋窃叹
者即当至矣其敌之如此元丰三年王尧臣之子同老
上言故父参知政事时当仁宗服药尝与弼及文彦博议立储嗣会翊日有瘳其事遂寢
帝以问彦博对与同老合帝始知至和时事嘉弼不自
言以为司徒六年卒年八十手封遗奏使其子绍庭上之其略云陛下即位之初邪臣纳
说听受失宜寢成祸患辅臣多士忠词谏论无复上达
臣老病将死不忍上负圣明辄倾肝胆去年永乐之役兵民死亡者数十万今久戍未解
百姓困穷天地至仁愿归其侵地休兵息民使关陕之
闲稍遂生理兼陕西再团保甲又葺教场州县奉行势侔星火人情惶骇难以复用不若
寢罢以绥怀之臣之所陈急于济事若夫要道则在圣
人所存与所用之人君子小人之辨耳帝览奏震悼内出祭文致奠赠太尉谥曰文忠弼
性至孝恭俭好修与人言必尽敬虽微官及布衣谒见
皆与之亢礼气色穆然不见喜愠其好善嫉恶出于天资常言君子与小人并处其势必
不胜君子不胜则奉身而退乐道无闷小人不慎则交
结构扇千岐万辙必胜而后已迨其得志遂肆毒于善良求天下不乱不可得也其终身
皆由于此云元佑初配享神宗庙庭哲宗篆其碑首曰
显忠尚德命学士苏轼撰文刻之绍圣中章惇执政谓弼得罪先帝罢配享至靖康初诏
复旧典焉

富绍庭

富绍庭

绍庭字德先性靖重能守家法弼卒两女与壻及甥皆同居绍庭待之与父时不殊一家之事毫发不敢变族里称焉历宗正丞通判絳州建中靖国初除提举河北西路常平辞曰熙宁变法之初先臣以不行青苗被罪臣不敢为此官徽宗嘉之擢祠部员外郎出知宿州卒年六十八子直柔别有传

△文彦博

文彦博字宽夫汾州介休人其先本敬氏以避晋高祖及宋翼祖讳改焉少与张昇高若纳从颍昌史照学照母异之曰贵人也及进士第知翼城县通判絳州为监察御史转殿中侍御史西方用兵偏校有临阵先退望敌不进者大将守着令皆申覆彦博言此可施之平居无事时今拥兵数十万而将权不专兵法不峻将何以济仁宗嘉纳之黄德和之诬刘平降虏也以金带賂平奴使附已说以证平家二百口皆械系诏彦博置狱河中鞫治得实德和谋翻狱至遣他御史来彦博拒不纳曰案具矣或弗成彦博执其咎德和并奴卒就诛以直史馆为河东转运副使麟州饷道回远【宋史本传作郑州考东都事略麟府二州并在河外彦博父洎以麟州饷道回远乃按唐张说尝出合河关掩击党项于银城北因欲复河外故道彦博遂继成之据此则廊字为麟字之误今改】银城河外有唐时故道废弗治彦博父洎为转运使日将复之未及而卒彦博嗣成父志益储粟元昊来寇围城十日知有备解去迁天章阁待制都转运使连进龙图阁枢密直学士知秦州改益州召拜枢密副使参知政事贝州王则反明镐讨之久不克彦博请行命为宣抚使旬日贼溃槛则送京师拜同中书门下平章事集贤殿大学士荐张瓌韩维王安石等恬退守道乞褻劝以厉风俗与枢密使庞籍议省兵凡汰为民及给半廩者合八万论者纷然谓必聚为盗帝亦疑焉彦博曰今公私困竭正坐兵冗脱有难臣请死之其策讫行归兵亦无事进昭文馆大学士御史唐介劾其在蜀日以奇锦结宫掖因之登用介既贬彦博亦罢为观文殿大学士知许州改忠武军节度使知永兴军至和二年复以吏部尚书同中书门下平章事昭文馆大学士与富弼同拜士大夫皆以得人为庆语见弼传三年正月帝方受朝疾暴作扶入禁中彦博呼内侍史志聪问状对曰禁密不敢漏言彦博叱之曰尔曹出入禁闥不令宰相知天子起居欲何为邪自今疾势增损必以告不尔当行军法又与同列刘沆富弼谋启醮大庆殿【伏读通鉴辑览 御批文彦博等此为直以三尺童视仁宗矣仁宗暴感风眩非不起之症彦博何不学樊哙排闥请见诸

事请旨而行乃公然赦死罪岂非专擅至启醮殿庭益属不经而史方谓京师业业赖彦博等以安诚阿其所好不识大体之言且京师之业业未必非彦博等之张大其事有以启之而仁宗愈后亦置之不问可谓柔懦不饬君纲者矣】因留宿殿庐志聪曰无故事彦博曰此岂论故事时邪知开封府王素夜叩宫门上变不使入明旦言有禁卒告都虞候欲为乱沆欲捕治彦博召都指挥使许怀德问都虞候何如人怀德称其愿可保彦博曰然则卒有怨诬之耳当亟诛之以靖众乃请沆判状尾斩于军门先是弼用朝士李仲昌策自澶州商湖河穿六漯渠入横垄故道北京留守贾昌朝素恶弼阴约内侍武继隆令司天官二人俟执政聚时于殿庭抗言不当穿河于北方致上体不安彦博知其意有所在然未有以制之后数日二人又上言请皇后同听政亦继隆所教也史志聪以其状白执政彦博视而怀之不以示同列徐召二人诘之曰天文变异汝职所当言也何得辄预国家大事汝罪当族二人惧色变彦博曰观汝直狂愚耳未忍治汝罪自今无得复然二人退乃出状示同列同列皆愤怒曰何不斩之彦博曰斩之则事彰灼于中宫不安众皆曰然既而议遣司天官定六漯方位复使二人往继隆白请留之彦博曰彼本不敢妄言有教之者耳继隆默不敢对二人至六漯恐治前罪更言六漯在东北非正北也帝疾愈彦博等始归第当是时京师业业赖彦博弼持重众心以安沆密白帝曰陛下违豫时彦博擅斩告反者彦博闻之以沆判呈帝意乃解御史吴中复乞召还唐介彦博因言介顷为御史言臣事多中臣病其闲虽有风闻之误然当时责之太深请如中复奏时以彦博为厚德久之以河阳三城节度使同平章事判河南府封潞国公改镇保平判大名府又改镇成德迁尚书左仆射判太原府俄复镇保平判河南丁母忧英宗即位起复成德军节度使三上表乞终丧许之初仁宗之不豫也彦博与富弼等乞立储嗣仁宗许焉而后宫将有就馆者故其事缓已而彦博去位其后弼亦以忧去彦博既服阙复以故官判河南有诏入觐英宗曰朕之立卿之力也彦博竦然对曰陛下入继大统乃先帝圣意皇太后协赞之力臣何力之有兼陛下登储纂极之时臣方在外皆韩琦等承圣志受顾命臣无与焉帝曰备闻始议卿于朕有恩彦博逊避不敢当帝曰暂烦西行即召还矣寻除侍中徙镇淮南判永兴军入为枢密使剑南西川节度使夏人犯大顺城庆帅李复圭以陈图方略授钤辖李信等趣使出战及败乃妄奏信罪彦博暴其非宰相王安石曲诛信等【按东都事略同信战败被诛者都巡检刘甫监押种泳】秦人冤之庆州兵乱彦博言于帝曰朝廷行事务合人心宜兼采众

论以静重为先陛下厉精求治而人心未安盖更张之过也祖宗法未必皆不可行但有偏而不举之弊尔安石知为己发奋然排之曰求去民害何为不可若万事隳隳乃西晋之风何益于治彦博在枢府九年又以极论市易司监卖果实损国体敛民怨为安石所恶力引去拜司空河东节度使判河阳徙大名府初选人有李公义者请以铁龙爪治河宦者黄怀信沿其制为浚川杷天下指笑以为儿戏安石独信之遣都水丞范子渊行其法子渊奏用杷之功水悉归故道退出兵田数万顷诏大名核实彦博言河非杷可浚虽甚愚之人皆知无益臣不敢雷同罔上疏至帝不悦复遣知制诰熊本等行视如彦博言子渊乃请覲言本等见安石罢意彦博复相故傅会其说御史蔡确亦论本奉使无状本等皆得罪独彦博勿问寻加司徒元丰三年拜太尉复判河南于是王同老言至和中议储嗣事彦博适入朝神宗问之彦博以前对英宗者复于帝曰先帝天命所在神器有归实仁祖知子之明慈圣拥佑之力臣等何功帝曰虽云天命实系人谋卿深厚不伐善阴德如丙吉真定策社稷臣也彦博曰如周勃霍光是为定策自至和以来中外之臣献言甚众臣等虽尝有请弗果行其后韩琦等讫就大事盖琦功也帝曰发端为难是时仁祖意已定嘉佑之末止申前诏耳正如丙吉霍光不相掩也遂加彦博两镇节度使辞不拜将行赐宴琼林苑两遣中谒者遗诗祖道当世荣之久之请老以太师致仕居洛阳元佑初司马光荐彦博宿德元老宜起以自辅乃命平章军国重事六日一朝一月两赴经筵恩礼甚渥然彦博无岁不求退居五年复致仕绍圣初章惇秉政言者论彦博朋附司马光诋毁先烈降太子少保卒年九十二崇宁中预元佑党籍后特命出籍追复太师谥曰忠烈彦博逮事四朝任将相五十年名动中外元佑闲契丹使耶律永昌刘霄来聘苏轼馆客与使入觐望见彦博于殿门外却立改容曰此潞公也使问其年曰何壮也轼曰使者见其容未闻其语其综理庶务虽精练少年有不如其贯穿古今虽专门名家有不逮使者拱手曰天下异人也其为所敬如此彦博虽穷贵极富而平居接物谦下尊德乐善如恐不及其在洛也洛人邵雍程颢兄弟皆以道自重宾接之如布衣交与富弼司马光等十三人用白居易九老会故事置酒赋诗相乐序齿不序官为堂绘像其中谓之洛阳耆英会好事者莫不慕之神宗导洛通汴而主者遏绝洛水不使入城中洛人颇患苦之彦博因中使刘惟简至洛语其故惟简以闻诏令通行如初遂为洛城无穷之利彦博八子皆厯要官第六子及甫初以大理评事直史馆与邢恕相善元佑初为吏部员外郎以直龙图阁知同州彦博平章军国及甫由右

司员外郎引嫌改卫尉光禄少卿彦博再致仕及甫知河阳召为太仆卿权工部侍郎罢为集贤殿修撰提举明道宫绍圣中蔡渭邢恕持及甫私书造梁焘刘摯之谤逮诣诏狱及甫有憾于元佑从而实之亦坐夺职未几复之卒

钦定续通志卷三百三十八

●钦定续通志卷三百三十九 列传一百三十九

列传

宋 【四十三】

○宋四十三

范仲淹【纯佑 纯礼纯粹】 范纯仁【正平】

范仲淹

范纯仁

△范仲淹

范仲淹字希文唐宰相履冰之后其先邠州人也后徙家江南遂为苏州吴县人父墉从钱俶归京师后为武宁军掌书记 【宋史本传不载仲淹父从钱俶归朝今据东都事略增】 仲淹二岁而孤母更适长山朱氏从其姓名说少有志操既长知其家世乃感泣辞母去之应天府依戚同文学昼夜不息冬月惫甚以水沃而食不给至以糜粥继之人不能堪仲淹不苦也举进士第为广德军司理参军迎其母归养改集庆军节度推官始还姓更其名 【按东都事略载仲淹终母丧乃归宗易今名】 历监楚州粮料院母丧去官晏殊知应天府闻仲淹名召寘府学上书请择郡守举县令斥游惰去冗僭慎选举抚将帅几万余言服除以殊荐为秘阁校理每感激论天下事一时士大夫矫厉尚风节自仲淹倡之天圣七年章献太后将以冬至受朝天子率百官上寿仲淹极言之且曰奉亲于内自有家人礼顾与百官同列北面而朝不可为后世法且上疏请太后还政不报寻通判河中府徙陈州时方建太一宫及洪福院市材木陝西仲淹言昭应寿宁天戒不远今又侈土木破民产非所以顺人心合天意也宜罢修寺观减常岁市木之数以蠲除积负又言恩幸多以内降除官非太平之政事虽不行仁宗以为忠太后崩召为右司谏言事者多暴太后时事仲淹曰太后受遗先帝调护陛下者十余年宜掩其小故以全后德帝为诏中外毋辄论太后时事初太后遗诏以太妃杨氏为皇太后参决军国事仲淹曰太后母号也自古无因保育而代立者今一太后崩又立一太后天下且疑陛下不可一日无母后之助矣岁大蝗旱江淮京东滋甚仲淹请遣使循行未报乃请闲曰宫掖中半日不食

当何如帝恻然乃命仲淹安抚江淮所至开仓振乏禁
民淫祀奏蠲庐舒折役茶江东丁口盐钱且条上裒敝十事会郭皇后废率谏官御史伏
合争之不能得明白将留百官揖宰相廷争方至待漏
院有诏出知睦州岁余徙苏州州大水民田不得耕仲淹疏五河导太湖注之海兴作未
就寻徙明州转运使奏留仲淹以毕其役许之拜尚书
礼部员外郎天章阁待制召还判国子监迁吏部员外郎权知开封府时吕夷简执政进
用者多出其门仲淹上百官图指其次第序迁公私况
进退近臣凡超格者不宜全委之宰相夷简不悦他日论建都之事仲淹曰洛阳险固而
汴为四战之地太平宜居汴即有事必居洛阳当渐广
储蓄缮宫室帝问夷简夷简曰此仲淹迂阔之论也仲淹仍为四谕以献大抵讥切时政
且曰汉成帝信张禹不疑舅家故有新莽之祸臣恐今
日亦有张禹坏陛下家法夷简怒诉曰仲淹离闲陛下君臣所引用皆朋党仲淹对益切
由是罢知饶州殿中侍御史韩渎希宰相旨请书仲淹
朋党揭之朝堂于是秘书丞余靖上言曰仲淹以一言忤宰相遽加贬窜况前所言者在
陛下母子夫妇之闲乎陛下既优容之矣臣请追改前
命太子中允尹洙自讼与仲淹师友且尝荐己愿从降黜馆阁校勘欧阳修以高若讷在
谏官坐视而不言移书责之由是三人者偕坐贬明年
夷简亦罢自是朋党之论兴矣仲淹既去士大夫为论荐者不已仁宗谓宰相张士逊曰
向贬仲淹为其密请建立皇太弟故也今朋党称荐如
此柰何再下诏戒敕仲淹在饶州岁余徙润州又徙越州元昊反召为天章阁待制知永
兴军改陕西都转运使会夏竦为陕西经略安抚招讨
使进仲淹龙图阁直学士以副之延州诸砦多失守仲淹自请行迁户部郎中兼知延州
先是诏分边兵总管领万人钤辖领五千人都监领三
千人寇至御之则官卑者先出仲淹曰将不择人以官为先后取败之道也于是大阅州
兵得万八千分为六各将三千人分部教之量贼众寡
使更出御贼时塞门承平诸砦既废用种世衡策城青涧以据贼冲大兴营田且听民得
互市以通有无又以民远输劳苦请建鄜城为军以河
中同华中下户税租就输之春夏徙兵就时可省余十之三他所减不与诏以为康定军
明年正月诏诸路入讨仲淹曰正月塞外大寒我师暴
露不如俟春深入贼马瘦人饥势易制也鄜延密迤灵夏西羌必由之地第按兵不动以
观其衅许臣稍以恩信招来之若臣策不效当举兵先
取绥宥据要害屯兵营田为持久计则茶山横山之民必挈族来归矣帝用皆其议仲淹
又请修承平永平等砦稍招还流亡定堡障通斥候城
十二砦于是羌汉之民相踵归业久之元昊归陷将高延德因与仲淹约和仲淹为书戒

喻之会任福败于好水川元昊答书语不逊仲淹对来
使焚之不以闻降本曹员外郎知耀州徙庆州会分陕西为四路乃迁左司郎中为环庆
路径略安抚缘边招讨使初元昊反阴诱属羌为助而
环庆酋长六百余人约为乡道事寻露仲淹以其反复不常至部即奏行边以诏书犒赏
诸羌阅其人马为立条约诸羌皆受命受邠州观察使
辞不拜庆之西北马铺砦当后桥川口在贼腹中仲淹欲城之度贼必争密遣子纯佑与
蕃将赵明先据其地引兵随之诸将不知所向行至柔
远始号令之版筑皆具旬日而城成即大顺城是也贼觉以骑三万来战佯北仲淹戒勿
追已而果有伏大顺既城而白豹金汤皆不敢犯环庆
自此寇益少明珠灭臧劲兵数万仲淹闻泾原欲袭讨之上言曰二族道险不可攻前日
高继嵩已丧师平时且怀反侧今讨之必与贼表里南
入原州西扰镇戎东侵环州边患未艾也若北取细腰葫芦众泉为堡障以断贼路则二
族安而环州镇戎径道通彻可无忧矣其后遂筑细腰
葫芦诸砦葛怀敏败于定州贼大掠至潘原关中震恐民多窜山谷闲仲淹率众六千由
邠涇援之始定川事闻帝按图谓左右曰若仲淹出援
吾无忧矣奏至帝大喜曰吾固知仲淹可用也进枢密直学士右谏议大夫仲淹以军出
无功辞不敢受命诏不听时已命文彦博经略泾原帝
以泾原伤夷欲对徙仲淹遣王怀德喻之仲淹谢曰泾原地重恐臣不足当此路愿与韩
琦同经略泾原并驻涇州琦兼秦凤臣兼环庆泾原有
警臣与韩琦合秦凤环庆之兵犄角而进若秦凤环庆有警亦可率泾原之师为援臣当
与琦练兵选将渐复横山以断贼臂不数年闲可期平
定请诏庞籍兼领环庆以成首尾之势秦州委文彦博庆州用滕宗谅总之孙沔亦可辨
集渭州一武臣足矣帝采用其言复置陕西四路安抚
经略招讨使以仲淹韩琦庞籍分领之仲淹与琦开府涇州而徙彦博帅秦宗谅帅庆张
亢帅渭仲淹为将号令明白爱抚士卒诸羌来者推心
委之不疑故贼亦不敢辄犯其境元昊请和召拜枢密副使王举正懦默不任事谏官欧
阳修等言仲淹有相材请罢举正用仲淹遂改参知政
事仲淹曰执政可由谏官而得乎固辞不拜愿与韩琦出行边命为陕西宣抚使未行复
除参知政事会王伦寇淮南州县官有不能守者朝廷
欲按诛之仲淹曰平时讳言武备寇至而专责守臣死事可乎守令皆不得诛 【按皆不
得诛应作皆得不诛】 帝方锐意太平数问当世事
仲淹语人曰上用我至矣事有先后久安之弊非朝夕可革也帝再赐手诏又为之开天
章阁召二府条对仲淹惶恐退而上十事一曰明黜陟
二曰抑侥幸三曰精贡举四曰择长官五曰均公田六曰厚农桑七曰修武备八曰推恩

信九曰重命令十曰减徭役帝方信向仲淹悉采用之
宜者令者皆以诏书画一颁下独府兵法众以为不可而止仲淹在政府欲仿周官以六
卿事分委辅相而自领兵刑之任亦不果行初仲淹以
忤吕夷简放逐者数年士大夫持二人曲直交指为朋党及陝西用兵天子以仲淹士望
所属拔用之及夷简罢召还倚以为治中外想望其功
业而仲淹以天下为己任裁削幸滥考核官吏日夜谋虑兴致太平然更张无渐规模阔
大论者以为不可行及按察使多出所举劾人心不悦
自任子之恩薄磨勘之法密侥幸者不便于是谤毁稍行而朋党之论浸闻上矣会边陲
有警因与枢密副使富弼请行边于是以仲淹为河东
陝西宣抚使赐黄金百两悉分遣边将麟州新被寇掠言者多请弃之仲淹为修故砦招
还流亡三千余户蠲其税罢榷酤予民又奏免府州商
税河外遂安比去攻者益急仲淹亦自请罢政事乃以为资政殿学士陝西四路安抚使
知邠州其中书所施为亦稍稍沮罢以疾请邓州进
给事中徙荆南邓人遮使者请留仲淹亦愿留邓许之寻徙杭州再迁户部侍郎徙青州
会病甚请颖州未至而卒年六十四赠兵部尚书谥文
正帝亲书其碑曰褒贤之碑仲淹内刚外和性至孝以母在时方贫其后虽贵非宾客不
重肉妻子衣食仅能自充而好施予置义庄里中以贍
族人泛爱乐善士多出其门为政尚忠厚所至有恩邠庆二州之民与属羌皆画像立生
祠事之及其卒也羌酋数百人哭之如父斋三日而去
四子纯佑纯仁纯礼纯粹

范纯佑

范纯礼

范纯粹

范纯佑

纯佑字天成尚节行方十岁能读诸书为文章籍籍有称父仲淹守苏州首建郡学
聘胡瑗为师瑗立学规良密生徒数百多不率教仲淹
患之纯佑尚未冠辄白入学齿诸生之未尽行其规诸生随之遂不敢犯自是苏学为诸
郡倡宝元中西夏叛仲淹连官关陝皆将兵纯佑与将
卒错处钩深摛隐得其才否由是仲淹任人无失而屡有功事父母孝未尝违左右不应
科第及仲淹以谗罢不得已荫守将作院主簿又为司
竹监以非所好即解去从仲淹之邓得疾卧许昌凡十九年卒年四十九子正臣守太常
寺太祝

范纯礼

纯礼字彝叟以荫为秘书省正字签书河南府判官知陵台令兼永安县为三司盐

铁判官以比部员外郎出知遂州泸南有边事调度苛棘纯礼一以静待之辨其可具者不取于民除户部郎中京西转运副使元佑初入为吏部郎中迁左司又迁太常少卿江淮荆浙发运使以光禄卿召迁刑部侍郎进给事中纯礼凡所封驳正名分纪纲皆国体之大者张来除起居舍人病未能朝而令先供职纯礼批敕曰臣僚未有以疾谒告不赴朝参先视事者来能供职岂不能见君坏礼乱法所不当为闻者皆悚动徙刑部侍郎转吏部改天章阁待制枢密都承旨知亳州提举明道宫元符三年以龙图阁直学士知开封府前尹以刻深为治纯礼曰宽猛相济圣人之训今处深文之后若益以猛是以火济火也由是一切以宽处之拜礼部尚书擢尚书右丞侍御使陈次升乞除罢言官并自内批不由三省进拟右相曾布力争不能得乞降黜次升纯礼徐进曰次升何罪不过防柄臣各引所亲且去不附己者尔帝曰然乃寝布议曾布奏议者多忧财用不足此非所急勿以为虑纯礼曰古者无三年之蓄曰国非其国今大农告匮帑庾枵空而曰不足虑非面谩邪因从容谏曰迩者朝廷命令莫不是元丰而非元佑以臣观之神宗立法之意固善吏推行之或有失当以致病民宣仁听断一时小有润色盖大臣识见异同非必尽怀邪为私也今议论之臣有不得志故挟此借口以元丰为是则欲贤元丰之人以元佑为非则欲斥元佑之士其心岂恤国事直欲快私忿以售其奸不可不深察也又曰自古天下治乱系于用人祖宗于此最得其要太祖用吕余庆太宗用王禹偁真宗用张知白皆从下列真诸要途人君欲得英杰之心固当不次飭拔必待荐而后用则守正特立之士将终身晦迹矣左司谏江公望论继述事当执中道不可拘一偏帝出示其疏纯礼赞之曰愿陛下以晓中外使知圣意所向亦足以革小人徇利之情乞褒迁公望以劝来者纯礼沈毅刚正曾布惮之激驸马都尉王诜曰上欲除君承旨范右丞不可诜怒会诜馆辽使纯礼主宴诜诬其辄斥御名罢为端明殿学士知颖昌府提举崇福宫崇宁中启党禁贬试少府监分司南京又贬静江军节度副使徐州安置徙单州五年复左朝议大夫提举鸿庆宫卒年六十七绍兴中赠资政殿学士谥曰恭献子正己

范纯粹

纯粹字德儒以荫迁至赞善大夫检正中书刑房与同列有争出知滕县迁提举成都诸路茶场元丰中为陕西转运判官时五路出师伐西夏神宗责诸将无功谋欲再举纯粹奏关陕公私大困若复加骚动根本可忧帝纳之进为副使吴居厚为京东转运使数献羨赋帝将以徐

州大钱二十万缗助陕西纯粹曰自徐至边劳费甚矣恳辞勿受入为右司郎中哲宗即位居厚败命纯粹以直龙图阁往代之尽革其苛政时苏轼自登州召还纯粹与轼同建募役之议轼谓纯粹讲此事尤为精详复代兄纯仁知庆州时与夏议分疆界纯粹请弃所取夏地曰争地未弃则边隙无时可除如河东之葭芦吴堡鄜延之米脂羲合浮图环庆之安疆深在夏境于汉界地利形势略无所益而兰会之地耗蠹尤深不可不弃所言皆略施行纯粹又言诸路策应旧制也自徐禧罢策应若夏兵大举一路攻围力有不胜而邻路拱手坐观其不拔者幸尔今宜修明战守救援之法朝廷是之及夏侵泾原纯粹遣将曲珍救之曰本道首建应援牵制之策臣子之义忘躯徇国无谓邻路被寇非我职也珍即日疾驰三百里破之曲律捣横山夏众遁去元佑中除宝文阁待制再任召为户部侍郎又出知延州绍圣初哲宗亲政用事者欲开边衅御史郭知章遂论纯粹元佑弃地事降直龙图阁明年复以宝文阁待制知熙州章惇蔡卞经略西夏疑纯粹不与共事改知邓州历河南府滑州旋以元佑党人夺职谪均州居住徽宗即位起知信州复故职知太原加龙图阁直学士再临延州改知永兴军寻以言者落职知金州提举鸿庆宫又责常州别驾鄂州安置锢子弟不得擅入都会赦复领祠久之以右文殿修撰提举太清宫党禁解复徽猷阁待制致仕卒年七十余纯粹沈毅有干略才应时须论事剴切绍兴中追复原官赠中奉大夫

△范纯仁

范纯仁字尧夫八岁能讲所授书以父任为太常寺太祝中皇佑元年进士第调知武进县以远亲不赴易长葛又不往曰岂可重于禄食而轻去父母耶仲淹没始出仕以著作佐郎知襄城县兄纯佑有心疾药膳居服躬亲时节贾昌朝守北都请参幕府宋庠荐试馆职皆为兄疾辞不就襄城民不蚕织劝使植桑有罪而情轻者视所植多寡除其罪民赖之签书许州观察判官知襄邑县县有牧地卫士牧马以践民稼纯仁捕一人杖之牧地初不隶县主者怒白其事于上劾治甚急纯仁言养兵出于税亩若使暴民田而不得问税安所出诏释之且听牧地隶县凡牧地隶县自纯仁始时旱久不雨纯仁籍境内贾舟谕之曰民将无食尔所贩五谷贮之佛寺候食阙时吾为余之众贾从命所蓄十数万斛至春诸县皆饥独境内民不知也治平中擢江东转运判官召为殿中侍御史迁侍御史时方议濮王典礼宰相韩琦参知政事欧阳修等议欲尊崇翰林学士王珪等议宜如先朝追赠期亲尊属故事纯仁言陛下受命仁宗而为之子与前代定策入继之主异宜如王珪等议继与御史

吕诲等更论奏不听于是还所授告敕家居待罪既而内出皇太后手书尊王为皇夫人为后纯仁复言陛下以长君临御柰何使命出房闱异日或为权臣矫托之地非人主自安计寻诏罢追尊起纯仁就职纯仁请出不已遂通判安州改知蕲州历京西提点刑狱京西陕西转运副使召还拜兵部员外郎兼起居舍人同知谏院奏言王安石变祖宗法度掎克财利民心不宁书曰怨岂在明不见是图愿陛下图不见之怨神宗曰何为不见之怨对曰杜牧所谓天下之人不敢言而敢怒是也帝嘉纳之曰卿为朕条古今治乱可为监戒者乃作尚书解以进加直集贤院同修起居注帝切于求治多延见疏逖小臣咨访阙失纯仁言小人之言听之若可采行之必有累盖知小忘大贪近昧远愿加深察富弼在相位称疾家居纯仁言弼受三朝眷倚当自任天下之重而恤已深于恤物忧疾过于忧邦致主处身二者胥失弼与先臣素厚臣在谏省不敢私谒以致忠告愿示以此章使之自省又论吕诲不当罢御史中丞李师中不可守边及辞向任发运使行均输法于六路纯仁言臣尝亲奉德音欲修先王补助之政今乃效桑羊均输之法而使小人为之掎克生灵敛怨基祸安石以富国强兵之术启迪上心欲求近功忘其旧学刘琦钱顛等一言便蒙降黜在廷之臣方大半趋附陛下又从而驱之其将何所不至道远者理当驯致事大者不可速成人材不可急求积弊不可顿革倘欲事功急就必为儉佞所乘宜速还言者而退安石答中外之望不听遂求罢谏职改判国子监所上章疏语多激切帝悉不付外纯仁尽录申中书安石大怒乞加重贬帝曰彼无罪姑与一善地命知河中府徙成都路转运使以新法不便戒州县未得遽行安石怒纯仁沮格因讒者遣使欲摭摭私事不能得使者以他事鞭伤传言者属官喜谓纯仁曰此一事足以塞其谤请闻于朝纯仁既不奏使者之过亦不折言者之非后坐失察僚佐燕游左迁知和州徙邢州未至加直龙图阁知庆州过阙入对神宗曰卿父在庆着威名卿必精兵法熟边事纯仁对曰陛下使臣缮治城垒爱养百姓不敢辞若开拓侵攘愿别谋帅臣遂行秦中方饥擅发常平粟赈贷僚属请奏而须报纯仁曰报至无及矣吾当独任其责或谤其所全活不实诏遣使按视会秋大稔民讙曰公实活我忍累公邪画夜争输还之使者至已无所负环州种古执熟羌为盗流南方过庆呼冤纯仁以属吏非盗也古避罪■〈言蔺〉讼诏御史治于盩州纯仁就逮民万数遮马涕泗不得行至有自投于河者狱成古以诬告谪亦加纯仁以他过黜知信阳军移齐州齐俗凶悍人轻为盗劫或谓此严治之犹不能戢公一以宽恐不胜其治矣纯仁曰宽出于性若强以

猛则不能持久猛而不久以治凶民取玩之道也有西司理院系囚常满皆屠贩盗窃督
偿释之复紊官司待其疾毙于狱纯仁曰法不至死以
情杀之岂理邪尽使自新释去期岁盗减比年大半丐罢提举西京留司御史台时耆贤
多在洛纯仁及司马光皆好客而家贫相约为真率会
脱粟一饭酒数行洛中以为胜事复知河中诸路阅保甲妨农论救甚力哲宗即位复直
龙图阁知庆州召为右谏议大夫以亲嫌辞改天章阁
待制兼侍讲除给事中时宣仁后垂帘司马光为政将尽改熙宁元丰法度纯仁谓光去
其太甚者可也差役一事尤当熟讲而缓行不然滋为
民病又云熙宁按问自首之法既已行之有司立文太深四方死者视旧数倍殆非先王
宁失不经之法纯仁素与光同志及临事规正类如此
元佑初进吏部尚书数日同知枢密院事初纯仁与议西夏请罢兵弃地使归所掠汉人
执政持之未决至是乃申前议又请归一汉人予十缣
事皆施行边俘鬼章以献纯仁请诛之塞上以谢边人不听议者欲致其子收河南故地
故赦不杀后又欲官之纯仁复固争然鬼章子卒不至
三年拜尚书右仆射兼中书侍郎纯仁在位务以博大开上意忠笃革士风学士苏轼以
发策问为言者所攻韩维无名罢门下侍郎补外纯仁
奏轼无罪维尽心国家不可因谮黜官及王觐言事忤旨纯仁虑朋党将炽与文彦博吕
公着辨于帘前未解纯仁曰朝臣本无党但善恶邪正
各以类分彦博公着皆累朝旧人岂容雷同罔上因极言前世朋党之祸并录欧阳修朋
党论以进知汉阳军吴处厚传致蔡确安州车盖亭诗
以为谤宣仁后上之谏官却寘于典宪执政右其说唯纯仁与左丞王存以为不可争之
未定闻太师文彦博欲贬于岭峤纯仁谓左相吕大防
曰此路自干兴以来荆棘近七十年吾辈开之恐自不免大防遂不敢言及确新州命下
纯仁于宣仁后帘前言圣朝宜务宽厚不可以言语文
字之闲暖昧不明之过诛窜大臣今举动宜与将来为法此事甚不可开端也且以重刑
除恶如以猛药治病其过也不能无损焉又与王存谏
于哲宗确卒贬新州大防奏确党人甚盛不可不问纯仁面谏朋党难辨恐误及善人又
上疏极言分辨党人或恐有伤仁化司谏吴安诗正言
刘安世交章击纯仁党确纯仁亦力求罢明年以观文殿学士知颍昌府踰年加大学士
知太原府夏人犯境朝廷欲罪将吏纯仁自引咎求贬
秩有诏贬官一等徙河南府再徙颍昌召还复拜右仆射因入谢宣仁后帘中谕曰或谓
卿必先引用王觐彭汝砺卿宜与吕大防一心对曰此
二人实有士望臣终不敢保位蔽贤望陛下加察宣仁后寝疾召纯仁曰卿父仲淹可谓
忠臣在明肃皇后垂帘时唯劝明肃尽母道明肃上宾

唯劝仁宗尽子道卿当似之纯仁泣曰敢不尽忠宣仁后崩哲宗亲政纯仁乞避位哲宗语吕大防曰纯仁有时望不宜去可为朕留之且趋入见问先朝行青苗法如何对曰先帝爱民之意本深但王安石立法过甚激以赏罚故官吏急切以致害民退而上疏其要以为青苗非所当行之终不免扰民也是时用二三大臣皆从中出侍从台谏官亦多不由进拟纯仁言陛下初亲政四方拭目以观天下治乱实本于此舜举皋陶汤举伊尹不仁者远纵未能如古人亦须极天下之选又羣小力排宣仁后垂帘时事纯仁奏曰太后保佑圣躬功烈诚心幽明共监议者不恤国事一何薄哉遂以仁宗禁言明肃垂帘事诏书上之曰望陛下稽仿而行以戒薄俗苏辙论殿试策问引汉昭变武帝法度事哲宗震怒曰安得以汉武比先帝纯仁从容言辙非谤右丞邓润甫越次曰先帝法度为司马光苏辙坏尽纯仁曰不然法本无弊弊则当改哲宗曰人谓秦皇汉武纯仁曰辙所论事与时也非人也哲宗为之少霁辙平日与纯仁多异至是乃服纯仁凡荐引人材必以天下公议其人不知自纯仁所出或曰为宰相岂可不牢笼天下士使知出于门下纯仁曰但朝廷进用不失正人何必知出于我邪哲宗既召章惇为相纯仁坚请去遂以观文殿大学士加右正议大夫知颍昌府入辞哲宗曰卿不肯为朕留虽在外于时政有见宜悉以闻毋事形迹徙河南府又徙陈州初哲宗尝言贬谪之人殆似永废纯仁前贺曰陛下念及此尧舜用心也既而吕大防等窜岭表会明堂肆赦章惇先期言此数十人当终身勿徙纯仁疏称大防等年老疾病不习水土炎荒非久处之地又忧虞不测何以自存臣曾与大防等共事多被排斥陛下之所亲见臣之激切止是仰报圣德愿将大防等引赦原放疏奏忤惇意诋为同罪落职知随州明年又贬武安军节度副使永州安置时疾失明闻命怡然就道闻诸子怨章惇必怒止之江行走贬所舟覆扶纯仁出衣尽湿顾诸子曰此岂章惇为之哉既至永韩维责均州其子诉维执政日与司马光不合得免行纯仁之子欲以纯仁与光议役法不同为请纯仁曰吾用君实荐以至宰相昔同朝论事不合则可汝辈以为今日之言则不可也其子乃止居三年徽宗即位钦圣显肃后同听政即日授纯仁光禄卿分司南京邓州居住遣中使至永赐茶药谕曰皇帝在藩邸太皇太后在宫中知公先朝言事忠直今虚相位以待不知目疾如何用何人医之纯仁顿首谢道除右正议大夫提举崇福宫不数月以观文殿大学士中太一宫使诏之又遣中使赐茶药促入覲仍宣渴见之意纯仁乞归许养疾不得已许之每见辅臣问安否乃曰范纯仁得一识面足矣疾革以宣仁后诬谤未明为

恨呼诸子口占遗表令门生李之仪次第之其略云盖尝先天下而忧期不负圣人之学此先臣所以教子而微臣资以事君又云惟宣仁之诬谤未明致保佑之忧勤不显又云未解疆场之严几空帑藏之积有城必守得地难耕凡八事建中靖国改元之旦受家人贺明日熟寐而卒年七十五赠开府仪同三司谥曰忠宣御书碑额曰世济忠直之碑纯仁性夷易宽简不以声色加人谊之所在则挺然不少屈自为布衣至宰相廉俭如一所得俸赐皆以广义庄前后任子恩多先疏族没之日幼子五孙犹未官尝曰吾平生所学得之忠恕二字立朝事君接待僚友亲睦宗族未尝须臾离此也子正平正思

范正平

范正平

正平字子夷学行甚高父纯仁卒诏特增遗泽官其子孙正平推与幼弟绍圣中为开封尉有向氏于其坟造慈云寺户部尚书蔡京以向氏后戚欲自结奏拓四邻田庐民有诉者正平按视以为所拓皆民业不可夺京坐罚金用是蓄恨正平及当国乃言正平矫撰父遗表又谓李之仪所述纯仁行状妄载中使蔡克明传二圣虚位之意遂以正平逮之仪克明同诣御史府捶楚甚苦皆欲诬服独克明曰旧制凡传圣语受本于御前请宝印出注籍于内东门使从其家得永州傅宣圣语本有御宝又验内东籍籍皆同其遗表八事诸子以朝廷大事防后患不敢上之缴申颖昌府印寄军资库自颖昌取至亦实狱遂解正平羁管象州之仪羁管太平州正平家属死者十数人会赦得归颖昌唐君益为守表其所居为忠直坊取所赐世济忠直碑额也正平告之曰此朝廷所赐施于金石揭于墓隧假宠于范氏子孙则可若于通途广陌中为往来之观以声色动庸俗不可也君益曰此有司之事君家何预焉正平曰先祖先君功名人所共知也十室之邑必有忠信异时不独吾谄笑君亦受其责矣竟撤去之正平以寿终绍兴中赠朝奉大夫

钦定续通志卷三百三十九

●钦定续通志卷三百四十 列传一百四十
列传

宋【四十四】

○宋四十四

韩亿【综宗彦】

韩绛【宗师】

韩维

韩缜【宗武】

包拯

吴奎

赵抃【叭】

唐介【淑问

义问恕】

韩亿

韩绛 【韩宗师】

韩维

韩缜

包拯

吴奎

赵抃

唐介

△韩亿

韩亿字宗魏其先真定灵寿人徙开封之雍坵举进士为大理评事知永城县有治声他邑讼不决者郡守皇甫选辄属亿治之通判陈州会河决治堤费万计亿不赋民而营筑之真宗尝欲召试而与王旦有亲嫌特召见改一官知洋州州豪李甲兄死迫嫂使嫁因诬其子为他姓以专其赀嫂诉于官积十余年不已亿视旧牒未尝引乳医为证召甲出乳医示之冤遂辨累迁尚书屯田员外郎知相州河北旱转运使不以实闻亿独言岁饥愿贷民租有诬其子纲请求受金者亿请自置狱按之事虽辨犹降通判大名府寻为殿中侍御史迁侍御史安抚淮浙除开封府判官出为河北转运使仁宗初进直史馆知青州以司封员外郎兼侍御史知杂事判大理寺丞吴植知临江军使人纳金于宰相王钦若因牙吏至京师审之语颇泄钦若知不可掩执吏以闻诏付台治而植自言未尝纳金反诬吏误以问所亲语达钦若亿穷治之盖植以病惧废金未达而事已露也植乃除名并按钦若诏释不问三司更茶法岁课不登亿承诏劾之由丞相而下皆坐失当之罚其不挠如此自辞奎后亿独掌台务者踰年除龙图阁待制奉使契丹时副使者章献外姻也妄传皇太后旨于契丹谕以南北欢好传示子孙之意亿初不知也契丹主问亿曰皇太后即有旨大使何独不言亿对曰本朝每遣使皇太后必以此戒之非欲达于北朝也契丹大喜曰此两朝生灵之福也人谓副使既失辞而亿更以为恩意甚推美之知亳州召知审刑院再迁兵部郎中同判吏部流内铨以右谏议大夫枢密直学士知益州故事益州岁出官粟六万石振巢贫民是岁大旱益倍数出粟先期予民民坐是不饥又疏九升江口下溉民田数千顷惟茂州地接羌夷蕃部岁至永康官场鬻马亿虑其规两州奏徙场黎州境上拜御史中丞请如唐制置御史里行景佑二年以尚书工部侍郎同知枢密院事时承平久武备不戒乃请二府各列上才任将帅者数十人推诚用之又言武臣宜知兵而书禁不传请纂其要

授之于是帝亲集神武秘略以赐边臣嘉勒斯賚与赵元昊相攻来献捷朝廷议加嘉勒斯賚节制亿曰彼皆蕃臣也今不能谕令解仇乃因而加赏非所以绥御四方也议遂寝元昊岁遣人至京出入民间无他禁亿请下诏为除馆舍礼之官主贸易外虽若烦扰实羁防之知开封府范仲淹献百官图指宰相吕夷简差除不平而阴荐亿可用仲淹既贬帝以谕亿亿曰仲淹举臣以公臣之愚陛下所知举臣以私则臣委质以来未尝交托于人遂除户部参知政事会忻州地大震谏官韩琦言宰相王随陈尧佐非辅弼才又言亿子综为羣牧判官不当自请以兄纲代之遂与宰相皆罢知应天府寻加资政殿学士知成德军改澶州复知亳州官至尚书左丞以太子少傅致仕卒赠太子太保谥忠献亿性方重治家严饬虽燕居未尝有惰容见亲旧之孤贫者常给其婚葬每见诸路有奏擡拾官吏小过者辄颜色不怿曰天下太平圣主之心虽昆虫草木皆欲使之得所仕者大则望为公卿次亦望为侍从职司一千石【按东都事略作二千石】其下亦望京朝幕职奈何辄之于盛世八子纲综绛绶缙绅绵纲尚书水部员外郎庆厯中知光化军性苛急不能抚循士卒军校邵兴帅众劫库兵为乱纲坐弃城除名编管英州

韩综【韩宗彦】

韩综【韩宗彦】

综字仲文荫补将作监主簿迁大理评事举进士第通判邓州天雄军会河溢金堤民依坵冢者数百家综令曰能济一人予千钱民争操舟楫以救已而坵冢多溃吕夷简自北京入相荐为集贤校理厯迁三司户部判官同修起居注使契丹契丹主问其家世综言亿在先朝尝持礼来契丹主喜曰与中国通好久父子俱使我宜酌我酒综率同使者五人起为寿契丹主亦离席酬之欢甚既还陈执中以为生事出知滑州徙许州殿前指挥使坐得许怀德争产书不以闻夺集贤校理知袁州未几复为江东转运使还再修起居注累迁刑部员外郎知制诰卒综尝为契丹馆伴使使者欲为书称北朝而去契丹号综曰自古未有建国而无号者使惭遂不复言其后朝廷择馆伴契丹使者帝曰孰有如韩综者乎子宗道为户部侍郎宝文阁待制纲子宗彦字钦圣荫纲将作监主簿举进士甲科累迁太常博士以大臣荐召试为集贤校理厯提点京西京东刑狱应天府失入平民死罪狱成未决通判孙世寔辨正之猛吏当坐法而尹刘沆纵弗治宗彦往案举沆复沮止之宗彦疏沆于朝抵吏罪仁宗春秋高未有嗣宗彦上书引汉章帝故事请修胎养之令以尚书兵部员外郎判三司盐铁勾院卒

△韩绛 【韩宗师】

韩绛字子华举进士甲科通判陈州直集贤院为开封府推官有男子冷青妄称其母顷在掖庭得幸有娠而出生已府以为狂奏流汝州绛言留之在外将惑众追责穷治盖其母尝执役宫禁嫁民冷绪生一女乃生青遂论弃市历户部判官江南饥为体量安抚使行便民事数十条宣州守廖询贪暴不法下吏寘诸理民大悦使还同修起居注擢右正言入内都知王守中兼判内行省绛言判名太重且国朝以来未有兼判两省者诏自今勿复除道士赵清贶出入宰相庞籍家以赂败开封杖流之道死绛言籍讽府杀之籍与尹俱谪去未几复进绛力争不得遂解言职明年知制造乞守河阳召判流内铨河决商湖用李仲昌议开六塔河而患滋甚命绛宣抚河北时宰主仲昌人莫敢异绛劾其蠹国害民仲昌遂窜岭表迁龙图阁学士知瀛州欧阳修率同列言绛宜在朝廷瀛非所处也留知谏院纠察在京刑狱为翰林学士御史中丞帝祷茅山求嗣绛草祝辞因劝帝汰出宫人及限内臣养子以重绝人之世皆从之掖庭刘氏通请谒为奸绛以告帝帝曰非卿言朕无由知不数日出刘氏及他不谨者真定守吕溱犯法从官通章请贯之绛曰法行当自贵者始更相请援则公道废矣并劾诸请者溱遂绌富弼用张茂实掌禁兵绛言人谓茂实为先帝子岂宜用典宿卫不报阖门待罪自言不敢复称御史中丞诏召之及出不秉笏穿朝堂谏官唐介论之罢知蔡州数月以翰林侍读学士知庆州熟羌据堡为乱即日讨平之加端明殿学士知成都府张咏镇蜀日东粟米秋粟盐官给券以惠贫弱历岁久权归豪右中人奉使至蜀使酒吏主贸易因附益以取悦绛悉奏罢之召知开封府为三司使请以川陕职田谷输常平仓而随其事任道里差次给直帝叹曰众方姑息卿不能徇时邪即行之神宗立韩琦荐绛有公辅器拜枢密副使始请建审官西院掌武臣升朝者以息吏奸神宗尝问天下遗利绛请尽地力因言差役之弊愿更定其法役议自此始矣代陈升之同制置三司条例王安石每奏事必曰臣见安石所陈非一皆至当可用陛下宜省察安石恃以为助熙宁三年参知政事夏人犯塞绛请行边安石亦请往绛曰朝廷方赖安石臣宜行乃以为陕西宣抚使既又兼河东几事不可待报者听便宜施行授以空色告敕得自除吏即军中拜同中书门下平章事昭文馆大学士开幕府于延安绛素不习兵事注措乖方选蕃兵为七军用知青涧城种谔策欲取横山令诸将听命于谔厚赏犒蕃兵众皆怨望又夺骑兵马以与之有抱马首以泣者既城罗鄂特又冒雪筑抚宁堡调发骚然已而二城陷趣诸道兵出援庆卒遂作乱议者罪绛

罢知邓州明年以观文殿学士徙许州进大学士徙大名府七年复代王安石相既颛处中书事多稽留不决且数与吕惠卿争论乃密请帝再用安石安石至颇与绛异有刘佐者坐法免安石欲拔用佐绛不可议帝前未决即再拜求去帝惊曰此小事何必尔对曰小事尚不伸况大事乎帝为逐佐未几绛亦出知许州元丰元年拜建雄军节度使知定州入为西太一宫使六年知河南府夏大雨伊洛间民被溺者十五六绛发廩赈恤环城筑堤数月水复至民赖以免哲宗立更镇江军节度使开府仪同三司封康国公为北京留守河决小吴都水议傍魏城凿渠东趋金堤役甚棘绛言功必不成徒耗费国力而使魏人流徙非计也三奏乞罢之元佑二年请老以司空检校太尉致仕明年卒年七十七赠太傅谥曰献肃绛临事果敢不为后虑好延接士大夫数荐司马光可用终以党王安石复得政是以清议少之子宗师字传道以父任历州县职既登第王安石荐为度支判官提举河北常平累官至集贤殿修撰知河中府卒初宗师在神宗朝数赐对常弗忍去亲侧屡辞官不拜世以孝与之

△韩维

韩维字持国以进士奏名礼部方亿辅政不肯试大廷受荫入官父没后闭门不仕宰相荐其好古嗜学安于静退召试学士院辞不就富弼辟河东幕府史馆修撰欧阳修荐为检讨知太常礼院礼官议袷享东向位维请虚室以待太祖温成后立庙用乐维以为不如礼请一切裁去议陈执中谥曰荣灵不行乞罢礼院以秘阁校理通判泾州神宗封淮阳郡王颍王维皆以记室参军王每事咨访尝与论天下事语及功名维曰圣人功名因事始见不可有功名心王拱手称善时禁中遣使泛至诸臣家为王择配维上疏曰王孝友聪明动履法度方向经学以观成德今卜族授室宜选勋望之家谨择淑媛考古纳采问名之义以礼成之不宜苟取华色而已左右史阙以维同修起居注侍迓英阁讲英宗初免丧简默不言维上疏曰迓英阁者陛下燕闲之所也侍于侧者皆献纳论思之臣陈于前者非经则史可以博谘访之义穷仁义之道究成败之原今体制终毕【按东都事略作礼制】臣下倾耳以听玉音陛下之言此其时也臣请执笔以俟进知制诰知通进银台司御史吕海等以濮议得罪请追还前诏令百官详议以尽人情请复海等职任以全政体既而责命不由门下维又言罢黜御史事关政体而不使有司与闻纪纲之失无甚于此乞解银台司不从遂阖门待罪有诏举台官二人维言吕海范纯仁有已试之效愿复其职翰林学士范镇作批答不合

旨出补郡维言镇所失只在文字当涵容之前黜钱公辅中外以为太重进退二近臣而众莫知其所谓自此谁敢尽忠者颍王为皇太子以维兼右庶子神宗即位除龙图阁直学士御史中丞王陶弹宰相韩琦不押当朝班为跋扈罢为翰林学士维言中丞之言是宰相安得无罪若非是安得止罢台职令为学士是迁也参知政事吴奎论陶事出知青州维言进退大臣不当如是诏迁奎官维又言执政罢免则为降黜今复迁官则为褒进二者理难并行此与王陶罢中丞而加学士何以异章上奎还就职维援前言求去知汝州数月召兼侍讲判太常寺初僖祖主已迁及英宗祔庙中书以为僖祖与稷契等不应毁庙维言太祖戡定大乱子孙遵业为宋太祖无可议者僖祖虽为高祖然仰迹功业非有所因若以所事稷契事之惧有所未安宜如故便王安石方主初议持不行熙宁二年迁翰林学士知开封府明年为御史中丞以兄细在枢府力辞安石亦恶其言保甲事欲使为开封始分置八厢决轻刑毅下清肃时吴充为三司使帝曰维充以文学进及任烦剧而皆称职可谓得人矣兼侍读学士充羣牧使孔文仲对策入等以切直罢归维言陛下毋谓文仲为一贱士黜之何损臣恐贤俊解体忠良结舌阿谀苟合者将窥隙而进为祸不细安石益恶之枢密使文彦博求去帝曰密院事剧当除韩维佐卿明日维奏事殿中以言不用请郡帝曰卿东宫旧人当留以辅政对曰使臣言得行贤于富贵若缘攀附旧恩以进非臣之愿也遂出知襄州改许州七年召为学士承旨入对帝曰天久不雨朕日夜焦劳奈何维曰陛下忧闵旱灾损膳避殿此乃举行故事恐不足以应天变当痛自责己广求直言退又上疏曰近畿内诸县督索青苗钱甚急往往鞭撻取足至伐桑为薪以易钱货旱灾之际重罹此苦若夫动甲兵危士民匱财用于荒远之地朝廷处之不疑行之甚锐至于蠲除租税宽裕逋负以救愁苦之民则迟而不肯发望陛下奋自英断行之过于养人犹愈过于杀人也帝感悟即命维草诏求直言其略曰意者听纳不得于理与狱讼非其情与赋敛失其节与忠信谗论郁于上闻而阿谀壅蔽以成其私者众与诏出人情大悦有旨体量市易免行利病权罢方出保甲是日乃雨王安石罢会细入相加端明殿学士知河阳复知许州帝幸旧邸进资政殿学士曾巩当制称纯明亮直帝令改命词维知帝意请提举嵩山崇福宫帝崩赴临阙庭宣仁后手诏劳问维对曰人情贫则思富苦则思乐困则思息郁则思通诚能常以利民为本则民富常以忧民为心则民乐赋役非人力所堪者去之则劳困息法禁非人情所便者蠲之则郁塞通推此而广之竭诚而行之则子孙观陛下之德不待教而

成矣未几起知陈州未行召兼侍读加资政殿大学士常言先帝以夏国主秉常废故兴问罪之师今既复位有蕃臣礼宜还其故地因陈兵不可不息者三地不可不弃者五又言仁宗选建储嗣一时忠勋皆被宠禄范镇首开此议赏独不及愿褒显其功镇于是复起用元佑更役法命维详定时四方书疏多言其便维谓司马光曰小人议论希意迎合不可不察成都转运判官蔡蒙附会定差维恶而劾之执政欲废王安石新经义维以当与先儒之说并行论者服其平拜门下侍郎维处东省踰年有忌之者密为谗愬诏分司南京尚书右司王存抗声帘前曰韩维得罪莫知其端臣窃为朝廷惜乃还大学士知邓州兄绛为之请改汝州久之以太子少傅致仕转少师绍圣中坐元佑党降左朝议大夫再谪崇信军节度副使均州安置诸子乞纳官爵听父里居哲宗览奏惻然许之元符元年以幸睿成官复右朝议大夫是岁卒年八十二徽宗初悉追复旧官

△韩缜

韩缜字玉汝登进士第签书南京判官仁宗以水灾求直言缜上疏曰今国本未立无以系天下心此阴盛阳微之应词极剴切刘沆荐其才命编修三班敕前此武臣不执亲丧缜建言三年之服古今通制晋襄衰墨从戎事出一时遂着令自崇班以上听持服为殿中侍御史参知政事孙抃持禄充位权陕西转运副使辞向赴阙枢密院辄画旨除为真刘永年以外戚除防御使内侍史志聪私役皇城亲从缜皆极论之帝为罢抃寝向与永年之命而正志聪罪迁侍御史度支判官出为两浙淮南转运使移河北夏谅祚死子秉常嗣遣使求封册朝廷方责夏人不修职贡欲择人诘其使缜适陞辞神宗命之往缜至驿问罪使者引服迨夜奏上帝喜改使陕西入知审官西院直舍人院以兄绛执政改集贤殿修撰盐铁副使以天章阁待制知秦州赏宴客夜归指使傅勅被酒误随入州宅与侍妾遇缜怒令军校以铁裹杖捶杀之勅妻持血衣挝登闻鼓以诉坐落职分司南京秦人语曰宁逢乳虎莫逢玉汝其暴酷如此久之还待制知瀛州熙宁七年辽使萧禧来议代北地界召缜报聘令持图牒致辽主不克见而还知开封府明年禧再至诏乘驿诣河东与禧分画以分水岭为界复命为枢密都承旨还龙图阁直学士元丰五年官制行易大中大夫同知枢密进知院事哲宗立拜尚书右仆射兼中书侍郎首相蔡确与章惇谋诬东朝及确为山陵使缜暴其奸状由是东朝及外廷悉知之确使还欲以其属高遵惠张璘韩宗文为美官宣仁后以访缜缜曰遵惠为太后从父璘者中书郎璪之弟宗文臣侄也今擢

用非次则是君臣各私其亲何以示天下乃止元佑元年御史中丞刘摯谏官孙觉苏辙王觐论夔才鄙望轻在先朝为奉使割地六百里以遗契丹边人怨之切骨不可使居相位章数十上罢为观文殿大学士知颍昌府移永兴河南拜安武军节度使知太原府易节泰宁军请老为西太一宫使以太子太保致仕绍圣四年卒年七十九赠司空谥曰庄敏夔外事庄重所至以严称虽出入将相而寂无功烈厚自奉养世以比晋何曾云子宗武

韩宗武

韩宗武

宗武第进士韩忠彦镇瀛州辟为河间令值河溢增堤护城吏率兵五百伐材近郊虽墓木亦不免父老遮道泣宗武入府白罢之徽宗即位为秘书丞因日食上疏言近世事有微渐而不可不察者五大臣不畏公论小臣趋和附下一也人主怠于政事威柄下移怨讟归上二也左右无辅拂之士守边无御侮之臣三也开境土以速边患耗赋财以敝民力四也岁谷不登仓庾空竭民人流亡盗贼数起五也诚愿躬览权纲收还威柄敷言奏功考察名实不以侍御之好钟鼓之娱为乐仁祖惻怛至诚以收天下之心神宗厉精不息以举天下之事皆所宜法不报哲宗将附庙中旨索省中书画甚急宗武言先帝祔庙陛下哀慕方深而丹青之玩取索不已播之于外惧损圣德陛下践祚如日初升当讲劄典训开广圣学好玩易志正古人所戒也疏入皇太后见之怒曰是皆内侍数辈所为尔欲尽加罚帝委曲申救乃已明日太后对宰相奖叹令俟谏官员阙即用之寻除都官员外郎改开封府推官丐外为淮南转运判官前使者贷上供钱禁庭遣使来索宗武奏其状词极鲠切坐贬秩罢归久之蔡京欲以知颍州帝语秘书事京不敢复言遂致仕官累大中大夫年八十二卒

△包拯

包拯字希仁庐州合肥人也始举进士除大理评事出知建昌县以父母皆老辞不就监和州税父母又不欲行拯即解官归养后数年亲继亡拯庐墓终丧犹徘徊不忍去久之赴调知天长县有盗割人牛舌者主来诉拯曰第归杀而鬻之寻复有来告私杀牛者拯曰何为割牛舌而又告之盗惊服徙知端州迁殿中丞端土产砚前守缘贡率取数十倍以遗权贵拯命制者才足贡数岁满不持一砚归寻拜监察御史里行改监察御史时张尧佐除节度宣抚两使右司谏张择行唐介与拯共论之语甚切建言国家岁赂契丹非御戎之策宜练兵选将务实边备又请重门下封驳之制及废辒辂吏选守宰行考试补荫弟子之法当时诸道转运加按

察使其奏劾官吏多摭细故务苛察相高尚吏不自安
拯于是请罢按察使出使契丹契丹令典客谓拯曰雄州新开便门乃欲诱我叛人以利
疆事耶拯曰涿州亦尝开门矣刺疆事何必开便门哉
其人遂无以对历三司户部判官出为京东转运使徙陕西又徙河北入为三司户部副
使秦陇斜谷务造船材木率课取于民又七州出赋河
桥竹索恒数十万拯皆奏罢之契丹聚兵近塞边郡稍警命拯往河北调发军食拯曰漳
河沃壤人不得耕邢洺赵三州民田万五千顷率用牧
马请悉以赋民从之解州盐法率病民拯往经度之请一切通商贩除天章阁待制知谏
院数论斥权贵大臣请罢一切内除曲恩又列上唐魏
郑公三疏愿置之坐右以为龟鉴又上言天子当明听纳辨朋党惜人才不主先入之说
凡七事请去刻薄抑侥幸正刑名戒兴作禁妖妄朝廷
多施行之除龙图阁直学士河北都转运使尝建议无事时徙兵内地不报至是请罢河
北屯兵分之河南兖郛齐濮曹济诸郡设有警无后期
之忧借曰戍兵不可遽减请训练义勇少给糒粮每岁之费不当屯兵一月之用一州之
赋则所给者多矣不报徙知瀛州诸州以公钱贸易积
岁所负十余万悉奏除之以丧子乞便郡知扬州徙庐州迁刑部郎中坐失保任左授兵
部员外郎知池州复官徙江甯府权知开封府迁右司
郎中拯立朝刚毅贵戚宦官为之敛手闻者皆惮之人以包拯笑比黄河清童稚妇女亦
知其名呼曰包待制京师为之语曰关节不到有阎罗
包老旧制凡讼诉不得径造庭下拯开正门使得至前陈曲直吏不敢欺中官势族筑园
榭惠民河以故河塞不通适京师大水拯乃悉毁或
持地券自言有伪增步数者皆审验劾奏之迁谏议大夫权御史中丞奏曰东宫虚位日
久天下以为忧陛下持久不决何也仁宗曰卿欲谁立
拯曰臣不材备位乞豫建太子者为宗庙万世计陛下问臣欲谁立是疑臣也臣年七十
且无子非邀福者帝喜曰徐当议之请裁抑内侍减节
冗费条责诸路监司御史府得自举属官减一岁休假日事皆施行张方平为三司使坐
买豪民产拯劾奏罢之而宋祁代方平拯又论之祁罢
而拯以枢密直学士权三司使欧阳修言拯所谓牵牛蹊田而夺之牛罚已重矣又贪其
富不亦甚乎拯因家居避命久之乃出其在三司凡诸
筦库供上物旧皆科率外郡积以困民拯特为置场和市民得无扰吏负钱帛多縲系间
辄逃去并械其妻子者类皆释之迁给事中为三司使
数日拜枢密副使顷之迁礼部侍郎辞不受寻以疾卒年六十四赠礼部尚书谥孝肃拯
性峭直恶吏苛刻务敦厚虽甚嫉恶而未尝不推以忠
恕也与人不苟合不伪辞色悦人平居无私书故人亲党皆绝之虽贵衣服器用饮食如

布衣时尝曰后世子孙仕宦有犯赃者不得放归本家
死不得葬大莹中不从吾志非吾子若孙也初有子名縉娶崔氏通判潭州卒崔守死不
更嫁拯尝出其媵在父母家生子崔密抚其母使谨视
之縉死后取媵子归名曰緄

△吴奎

吴奎字长文潍州北海人性强记于书无所不读举五经至大理丞监京东排岸庆
厯宿卫之变奎上疏曰涉春以来连阴不解洪范所谓
皇之不极时则有下伐上者今卫士之变起于肘腋流传四方惊骇羣听闻皇城司官六
人其五已受责独杨怀敏尚留人谓陛下私近幸而屈
公法且获贼之际传令勿杀而左右辄屠之此必其党欲以灭口不然何以不奉诏遂乞
召对面论仁宗深器之再迁殿中丞策贤良方正入等
擢太常博士通判陈州入为右司谏改起居舍人同知谏院每进言惟劝帝禁束左右奸
幸内东门阑得赂遗物下吏研治而开封用内降释之
奎劾尹魏瓘出瓘越州彭思永论事诏诘所从受奎言御史法许风闻若穷核主名则后
谁敢来告以事是自涂其耳目也上为罢不问郭承佑
张尧佐为宣徽使奎连疏其不当承佑罢使出尧佐河中皇佑中颇多灾异奎极言其征
曰帝王之美莫大于进贤退不肖今天下皆谓之贤陛
下知之而不能进天下皆谓之不肖陛下知之而不能退内宠骄恣近习回挠阴盛如此
盗不致大异乎唐介论文彦博指奎为党出知密州加
直集贤院徙两浙转运使入判登闻检院同修起居注知制诰奉使契丹会其主加称号
要入贺奎以使事有职不为往归遇契丹使于涂契丹
以金冠为重纱冠次之故使事者相见其衣服轻重必相当至是使者服纱冠而要奎盛
服奎杀其仪以见坐是出知寿州至和三年大水诏中
外言得失奎言陛下在位二十四年储嗣未立此事不宜优游愿蚤裁定定之不速致宗
祀无本郁结羣望推之咎罚无大于此帝感其言拜翰
林学士权开封府圭达于从政应事敏捷吏不敢欺富人孙氏辜榷财利负其息者至评
取物产及妇女奎发孙宿恶徙其兄弟于淮闽豪猾畏
敛居三月治声赫然除端明殿学士知成都府以亲辞改郢州复还翰林拜枢密副使神
宗初立奎父丧终制以故职还朝踰月参知政事时已
召王安石辞不至帝顾辅臣曰安石厯先帝朝召不赴颇以为不恭今又不至果病耶有
所要耶曾公亮曰安石文学器业不敢为欺奎曰臣尝
与安石同领郡牧见其护短自用所为迂阔万一用之必紊乱纲纪乃命知江甯奎尝进
言陛下在推诚应天天意无他合人心而已若以至诚
格物物莫不以至诚应则和气之感自然而致今民力困极国用窘乏必俟顺成乃可及

他事帝王所职惟在于判正邪使君子常居要近小人
不得以害之则自治矣帝因言尧时四凶犹在朝奎曰四凶虽在不能惑尧之聪明圣人
以天下为度未有显过固宜包容但不可使居要近地
尔帝然之御史中丞王陶以论文德不押班事诋韩琦奎状其过诏除陶翰林学士奎执
不可陶又疏奎阿附陶既出奎亦以资政殿大学士知
青州司马光谏曰奎名望清重今为陶绌奎恐大臣皆不自安各求引去陛下新即位于
四方观听非宜帝乃召奎归中书及琦罢相竟出知青
州明年卒年五十八赠兵部尚书谥曰文肃奎喜奖廉善有所知辄言之言之不从不止
也少时甚贫既通贵买田为义庄以赈族党朋友没之
日家无余资诸子至无屋以居当时称之

△赵抃

赵抃字阅道衢州西安人进士及第为武安军节度推官知崇安海陵江原三县通
判泗州濠守给士卒廩赐不如法声欲变守惧日未入
辄闭门不出转运使檄抃摄治之抃至从容如平时州以无事翰林学士曾公亮未之识
荐为殿中侍御史弹劾不避权幸声称凛然京师目为
铁面御史其言务欲朝廷别白君子小人以为小人虽小过当力遏而绝之君子不幸诬
误当保全爱惜以成就其德温成皇后之丧刘沆以参
知政事监护及为相领事如初抃论其当罢以全国体又言宰相陈执中不学无术且多
过失宣徽使王拱辰平生所为及奉使不法枢密使王
德用翰林学士李淑不称职皆罢去吴充鞠真卿刁约以治礼院吏马遵吕景初吴中复
以论梁适相继被逐抃言其故悉召还吕溱蔡襄吴奎
韩絳既出守欧阳修贾黯复求郡抃言近日正人端士纷纷引去侍从之贤如修辈无几
今皆欲去者以正色立朝不能谄事权要伤之者众耳
修黯由是得留一时名臣赖以安焉请知睦州移梓州路转运使改益州蜀地远民弱吏
肆为不法州郡公相馈饷抃以身帅之蜀风为变穷城
小邑民或生而不识使者抃无部无不至父老喜相慰奸吏竦服召为右司谏内侍邓保
信引退兵董吉烧炼禁中抃引文成五利郑注为比力
论之陈升之副枢密抃与唐介吕诲范师道言升之奸邪交结宦官进不以道章二十余
上升之去位抃与言者亦罢出知虔州虔素难治抃御
之严而不苟召戒诸县令使人自为治令皆喜争尽力狱以屡空岭外仕者死多无以为
归抃造舟百艘移告诸郡曰仕宦之家有不能归者皆
于我乎出于是至者相继悉授以舟并给其道里费召为侍御史知杂事改度支副使进
天章阁待制河北都转运使时贾昌朝以故相守魏抃
将按视府库昌朝使来告曰前此监司未有按视吾藏者恐事无比若何抃曰舍是则他

郡不服竟往焉昌朝不悦初有诏募义勇过期不能办
官吏当坐者八百余人抃被旨督之奏言河朔频岁丰故应募者少请宽其罪以俟农隙
从之坐者获免而募亦随足昌朝始愧服加龙图阁直
学士知成都以宽为治抃向使蜀日有聚为妖祀者治以峻法及是复有此狱皆谓不免
抃察其亡他曰是特酒食过耳刑首恶而释余人蜀民
大悦会荣諲除转运使英宗谕諲曰赵抃为成都中和之政也神宗立召知谏院故事近
臣还自成都者将大用必更省府不为谏官大臣以为
疑帝曰吾赖其言耳苟欲用之无伤也及谢帝曰闻卿匹马入蜀以一琴一鹤自随为政
简易亦称是乎未几擢参知政事抃感顾知遇朝政有
未协者必密启闻帝手诏褒答王安石用事抃屡斥其不便韩琦上疏极论青苗法帝语
执政令罢之时安石家居求去抃曰新法昔安石所建
不若俟其出既出安石持之愈坚抃大悔恨即上言制置条例司建使者四十辈骚动天
下安石强辩自用诋天下公论以为流俗违众罔民顺
非文过近者台谏侍从多以言不听而去司马光除枢密不肯拜且事有轻重体有大小
财利于事为轻而民心得失为重青苗使者于体为小
而禁近耳目之臣用舍为大今去重而取轻失大而得小惧非宗庙社稷之福奏入恳乞
去位拜资政殿学士知杭州改青州时京东旱蝗青独
多麦蝗来及境遇风退飞尽坠水死成都以戍卒为忧遂以大学士复知成都召见劳之
曰前此未有自政府往者能为朕行乎对曰陛下有言
即法也奚例之问因乞以便宜从事既至蜀治益尚宽有卒长立堂下呼谕之曰吾与汝
年相若吾以一身入蜀为天子抚一方汝亦宜清谨畏
戢以率众比戍还得余赀持归为室家计可也人喜转相告莫敢为恶蜀郡晏然剑州民
私作僧度牒或以为谋逆告抃不畀狱吏以意决之悉
从轻比谤者谓其纵逆党朝廷取具狱阅之皆与法合茂州夷剽境上惧讨乞降乃缚奴
将杀之取血以受盟抃使易用牲皆讙呼听命乞归知
越州吴越人饥疫死者过半抃尽掇荒之术疗病埋死而生者以全下令修城使得食其
力复徙杭以太子少保致仕而官其子岷提举两浙常
平以便养岷奉抃遍游诸名山吴人以为荣元丰七年卒年七十七赠太子少师谥曰清
献抃长厚清温人不见其喜温平生不治赀业不蓄声
伎嫁兄弟之女十数他孤女二十余人施德悖贫盖不可胜数日所为事入夜必衣冠焚
香以告于天不可告则不敢为也其为政善因俗施設
猛宽不同在虔与成都尤为世所称道神宗每诏二郡守必以抃为言要之以惠利为本
晚学道有得将终与岷诀词气不乱安坐而没宰相韩
琦尝称抃真世人标表盖以为不可及云

赵屺

赵屺

屺字景仁由荫登第通判江州改温州代还得见时拊已谢事神宗命为太仆丞擢
监察御史以父老请外提举两浙常平元佑中复为御
史上疏言治平以前大臣不敢援置亲党于要涂子弟多处筦库甚者不使应科举与寒
士争进自王安石柄国持内举不避亲之说始以子雱
列侍从由是循习为常资望浅者或居事权繁重之地无出身者或预文字清切之职今
宜杜绝其源又言台谏之臣或稍迁其位而阴夺言职
或略行其言而退与善地或两全并立苟从讲解或置而不问外示包容使忠鯁之士蒙
羞难退皆朝廷所宜深察也傅尧俞王岩叟梁焘孙升
以事去屺言诸人才能学术为世推称忠言嘉谏见于已试宜悉召还朝所言皆切时务
避执政亲嫌改都官员外郎出提点京东刑狱元符中
厯鸿胪太仆少卿曾布知枢密院将白为都承旨蔡卞摭其救傅尧俞事遂不用未几卒
初拊庐母墓三年县榜其里曰孝弟处士孙侔为作孝
子传及屺执父丧而甘露降墓木屺卒子云又以毁死人称其世孝

△唐介

唐介字子方江陵人父拱卒漳州州人知其贫合钱以贖介年尚幼谢不取擢第为
武陵尉调平江令民李氏贖而吝吏有求不厌诬为杀
人祭鬼岳守捕其家无少长楚掠不肯承更属介讯之无他验守怒白于朝遣御史方偕
徙狱别鞠之其究与介同守以下得罪偕受赏介未尝
自言知莫州任邱县当辽使往来道驿吏以诛索破家为苦介坐驿门令曰非法所应给
一切勿与稍毁吾什器者必执之皆帖伏以去沿边塘
水岁溢害民田中人杨怀敏主之欲割邑四十一村地漭涨潦介筑堤阡之民以为利通
判德州转运使崔峰取库绢配民而重其估介留牒不
下且移安抚司责数之峰怒数驰檄按诘介不为动既而果不能行入为监察御史里行
转殿中侍御史启圣院造龙凤车内出珠玉为之饰介
言此太宗神御所在不可喧渎后宫奇靡之器不宜过制诏亟毁去张尧佐骤除宣徽节
度景灵羣牧四使介与包拯吴奎等力争之又请中丞
王举正留百官班庭论夺其二使无何复除宣徽使知河阳介谓同列曰是欲与宣徽而
假河阳为名耳不可但己也而同列依违介独抗言之
仁宗谓曰除拟本出中书介遂劾宰相文彦博守蜀日造间金奇锦缘阁侍通官掖以得
执政今显用尧佐益自固结请罢之而相富弼又言谏
官吴奎表里观望语甚切直帝怒却其奏不视且言将远窜介徐读毕曰臣忠愤所激鼎
鑊不避何辞于谪帝急召执政示之曰介论事是其职

至谓彦博由妃嫔致宰相此何言也时彦博在前介责之曰彦博宜自省即有之不可隐彦博拜谢不已帝怒益甚梁适叱介使下殿修起居注蔡襄趋进救之贬春州别驾王举正言以为太重帝旋悟明日取其疏入改置英州而罢彦博相吴奎亦出由是直声动天下士大夫称真御史必曰唐子方而不敢名数月起监郴州税通判潭州知复州召为殿中侍御史遣使赐告趣诣阙下入对帝劳之曰卿迁谪以来未尝以私书至京师可谓不易所守矣介顿首谢言事益无所顾他日请曰臣既任言责言之不行将固争争之重以累陛下愿得解职换工部员外郎直集贤院为开封府判官出知扬州徙江东转运使御史吴中复言介不宜久居外时文彦博再当国请如中复奏语在彦博传然但徙河东久之入为度支副使进天章阁待制复知谏院帝自至和后临朝渊默介言君臣如天地以交泰为理愿时延羣下发德音可否万几以幸天下又论宫禁干丐恩泽出命不由中书宜有以抑绝赐予嫔御之费多先朝时十数倍日加无穷宜有所损监司荐举多得文法小吏请令精择端良敦朴之士毋使与检簿者同进诸路走马承受凌扰郡县可罢勿遣以权归监司兗国公主夜开禁门宜劾宿卫主吏以严官省帝悉开纳之御史中丞韩絳劾宰相富弼弼家居求罢絳亦待罪介与王陶论絳以危法中伤大臣絳罢介嫌于右宰相请外以知荆南敕过门下知银台司何郯封还之留擢开封府旋以论罢陈升之亦出知洪州加龙图阁直学士河北都转运使枢密直学士知瀛州治平元年召为御史中丞英宗谓曰卿在先朝有直声故用卿非繇左右言也介曰臣无状陛下过听愿献愚忠自古欲治之主要在顺人情祖宗遗德余烈在人未远愿览已成之业以为监则天下蒙福矣明年以龙图阁学士知太原府夏人数扰代州边多筑堡境上介遣兵悉撤之移谕以利害遂不敢动神宗立以三司使召熙宁元年拜参知政事先时宰相省阅所进文书于待漏舍同列不得闻介谓曾公亮曰身在政府而文书弗与知帝或有所问何辞以对乃与同视后遂为常帝欲用王安石公亮因荐之介言其难大任帝曰文学不可任耶吏事不可任耶经术不可任耶对曰安石好学而泥古故议论迂阔若使为政必多所变更退谓公亮曰安石果用天下必困扰诸公当自知之中书尝进除目数日不决帝曰当问王安石介曰陛下以安石可大用即用之岂可使中书政事决于翰林学士臣近每闻宣谕某事问安石可即行之不可不行如此则执政何所用恐非信任大臣之体也必以臣为不才愿先罢免安石既执政奏言中书处分札子皆称圣旨不中理者十八九宜止令中书出牒帝愕然介曰昔寇准用札子迁冯

拯官不当拯诉之太宗谓前代中书用堂牒乃权臣假此为威福太祖时以堂帖重于敕命遂削去之今复用札子何异堂牒张洎因言废札子则中书行事别无公式太宗曰大事则降敕其当用札子亦须奏裁此所以称圣旨也如安石言则是政不自天子出使辅臣皆忠贤犹为擅命苟非其人岂不害国帝以为然乃止介自是数与安石争论安石强辩而帝正其说介不胜愤疽发于背卒年六十介为人简伉以敢言见惮神宗谓其先朝遗直故大用之然居政府遭时有为而扼于安石少所建明声名减于谏官御史时比疾亟帝临问流涕复幸其第吊哭以画像不类命取禁中旧藏本赐其家赠礼部尚书谥曰质肃子淑问义问孙恕

唐淑问

唐义问

唐恕

唐淑问

淑问字士宪第进士至殿中丞神宗以其家世擢监察御史里行谕以谨家法务大体淑问见帝初即位锐于治因言中旨数下一出特断当谨出纳别枉直使命令必行今诏书求直言而久无所施用必欲屈羣策以起治道愿行其言初诏侍臣讲读淑问言王者之学不必分章句饬文辞稽古圣人治天下之道历代致兴亡之由延登正人博访世务以求合先王则天下幸甚河北饥流人就食京师官振廩给食来者不止淑问曰出粟不继是诱之失业而就死地也条三策上之滕甫为中丞淑问力数其短帝以为邀名乃诏避其父三司使出通判复州久之知真州提点湖北刑狱言新法不便乞解使事黜知信阳军以病免数年起知宣州徙湖州入为吏部员外郎又引疾求外帝以为避事降监抚州酒税哲宗立司马光荐其行已有耻难进召为左司谏以病致仕数月卒

唐义问

义问字士宣善文辞锁厅试礼部用举者召试秘阁父介引嫌罢之熙宁中辟京西转运司管勾文字神宗览本道章奏知义问所为以其名访辅臣因黄好谦领使事谕之曰唐义问刚方强敏行且用矣可面诏之寻以为司农管当公事方行手实法所在骚然义问言今造簿甫二岁民不堪命不宜复改为从曾孝宽使河东还奏事记利害纲目于笏帝取而熟视之屡举以问应析如流帝喜曰欲见卿非今日也擢湖南转运判官一路敷免役钱又分户五等储其羨为别赋号家刀钱义问奏除之移使京西文彦博守西郡义问求罢去彦博告以再入相时尝荐其父晚同为执政相得甚驩故义问乃止时陕西大举兵多亡卒所至成聚义问请令诣官

自陈给券续食人以为便会有不悦之者免归元佑中起知齐州提点京东刑狱河北转运副使方旱而雨用彦博荐加集贤修撰帅荆南请废渠阳诸砦蛮杨晟秀叛即拜河北转运使讨降之复砦为州进直龙图阁以集贤殿修撰知广州章惇秉政治弃渠阳罪贬舒州团练副使后七年复故官知颍昌府卒

唐恕

恕崇宁初为华阳令以不能奉行茶法忤使者谢病免归其弟意方为南陵令亦以病自免兄弟杜门躬耕恕寻以宣教郎致仕靖康元年御史中丞许翰言其高行诏起为监察御史意亦以宰相吴敏荐召对而贫不能行竟饿死江陵山中

钦定续通志卷三百四十

●钦定续通志卷三百四十一 列传一百四十一

列传

宋【四十五】

○宋四十五

邵亢【必】 冯京 钱惟演【易 彦远明逸 景谔 勰即】

邵亢

冯京

钱惟演

△邵亢

邵亢字兴宗丹阳人幼聪发过人方十岁日诵书五千言赋诗豪纵范仲淹举亢茂才异等时布衣被召者十四人试崇政殿独亢策入等除建康军节度推官或言所对策字少不应式宰相张士逊与之姻家故得预选遂报罢而士逊子实娶它邵与亢同姓亢亦不自言赵元昊叛亢言用兵在于择将今天下久不知战而所在多儒臣未必能应变武人得长一军又已老讷能身先矢石哉间起故家恩幸子弟彼安识攻守之计况将与卒素不相附又无坚甲利兵之御此不待两军相当而胜败之机固已形矣因献兵说十篇召试秘阁授颍川团练推官民税旧输陈蔡转运使又欲覆折缙钱且多取之亢言民之移输劳费已甚方仍岁水旱又从而加取不可遂止入为国子监直讲馆阁校勘同知太常礼院张贵妃薨立园陵禁京城乐一月亢累疏罢之进集贤校理仁宗继嗣未立亢言国之外患在边圉然御之之术不过羁縻勿绝而已内患则不然系社稷之安危不可不蚤定也提点开封县镇公事徙为府推官改度支判官契丹遣使贺干元节未至仁宗崩议者谓宜却或欲俟其及

国门而谕使之还亢请令奉书至枢前使见嗣君从之选为颍王府翊善加直史馆召对羣玉殿英宗访以世事称之曰学士真国器也擢同修起居注建言陛下初正欲治国者先齐家颍王且授室愿采用古婚礼公主下降不宜厌舅姑之尊帝深纳之遂以知制诰知谏院东宫建为右庶子神宗立迁龙图阁直学士时待制以上为帅守每他徙必迁职秩亢请未两岁者勿推恩王陶劾韩琦吴奎与之辨亢诋奎所言颠倒失大臣体盖欲并撼琦琦与奎竟同日去进枢密直学士知开封府亢遇事敏密吏操辞牒至前皆反复阅之人或以为劳亢曰决是非于须臾正当尔初虽烦后乃省也籍里闻恶年少与吏之废停者一有所犯皆迁处之畿下鬪讼为之衰止拜枢密副使夏人诱杀知保安军杨定朝廷谋西讨亢曰天下财力殫屈未宜用兵唯当降意抚纳俟不顺命则师出有名矣因条上其事诏报之曰中国民力大事也兵兴之后不无掇率人心一摇安危所系今动自我始先违信誓契丹闻之将不期而自合兹朕所深忧者当悉如卿计未几夏谅祚死国人执杀定者来请和或欲乘此更取塞门地亢以为幸人之丧非义也乃止亢在枢密踰年无大补益帝颇厌之尝与谏官孙觉言欲以陈升之代亢而使守长安觉遽劾亢荐升之帝怒其希指黜觉亢亦引疾辞以资政殿学士知越州历郑郛亳三州卒年六十一赠吏部尚书即其乡赐以居宅谥曰安简从父必

邵必

邵必

必字不疑举进士为上元主簿国子监立石经必善篆隶召充直讲选为唐书编修官必以史出众手非古人撰述之体辞不就进集贤校理同知太常礼院天子且亲祠执事者习礼坛下必言周官大宗伯凡王之禘祠肆仪为位郑康成释云若今肆司徒府古礼如此今即祠所习之为不敬乃徙于尚书省张贵妃受册礼官议命妇入贺仪未决或曰妃为修媛时命妇已不敢亢礼况今日乎必曰宫省事秘不可知既下有司议惟有外一品南省上事百官班见之仪然礼无不答众议乃定出知常州召为开封府推官坐在常州日杖人至死责监邵武税然杖者实不死久之知高邮军提点淮南刑狱为京西转运使必居官震厉风采始至郡惟一赴宴集行部但一受酒食之馈以为数会聚则人情狎多受馈则不能行事非使者体也入修起居注知制诰雄州种木道上契丹遣人夜伐去又数渔界河中事闻命必往使必以理折契丹屈之还知谏院编仁宗御集成迁宝文馆直学士权三司使加龙图阁学士知成都卒于道年六十四遣中使护其丧归

△冯京

冯京字当世鄂州江夏人少隽迈不羣举进士自乡举礼部以至廷试皆第一时犹未娶张尧佐方负宫掖势欲妻以女拥至其家束之以金带曰此上意也顷之宫中持酒馔来直出奩具目示之京笑不视力辞出授将作监丞通判荆南军府事还直集贤院判吏部南曹同修起居注吴充以论温成皇后追册事出知高邮京疏充言是不当黜刘沆请并斥京仁宗曰京亦何罪但解其记注旋复之试知制诰避妇父富弼当国嫌拜龙图阁待制知扬州改江甯府以翰林侍读学士召还纠察在京刑狱为翰林学士知开封府数月不诣丞相府韩琦语弼以京为傲弼使往见琦京曰公为宰相从官不妄造请乃所以为公重非傲也出安抚陕西请城古渭通西羌嘉勒斯賚卑摩展官以断夏人右臂除端明殿学士知太原府神宗立复为翰林学士改御史中丞王安石为政京论其更张失当累数千百言安石指为邪说请黜之帝以为可用擢枢密副使河东麟府丰三州城垒兵械不治官吏皆受谴京以先帅本道上章自劾曰使诸路帅臣知其虽一时脱去后能饶窃名位者犹必行法将不敢复偷惰旷职优诏不听进参知政事数与安石论辨又荐刘攽苏轼掌外制安石令保甲养马京谓必不可行会选人郑侠上书言时政荐京可相吕惠卿因是譖京与侠通罢知亳州未几以资政殿学士知渭州茂州夷叛徙知成都府蕃部阿丹方寇鸡粽关闻京兵至请降议者遂欲荡其巢窟京请于朝为禁侵掠给稼器饷粮食使之归夷人喜争出犬豕割血受盟愿世世为汉藩惠卿告安石罪发其私书有曰勿令齐年知齐年谓京也与安石同年生帝以安石为欺复召京知枢密院京以疾未至帝中夕呼左右语曰适梦冯京入朝甚慰人意乃赐京诏有渴想仪刑不忘梦寐之语及入见首以所梦告焉顷之以观文殿学士知河阳哲宗即位拜保宁军节度使知大名府又改镇彰德于是范祖禹言京再执政初与王安石不合后为吕惠卿所倾其中立不倚之操为先帝称挹且昭陵学士独京一人存若付以枢密必允公论时京已老乃以为中太一官使兼侍讲改宣徽南院使拜太子少师致仕绍圣元年卒年七十四赠司徒谥曰文简

△钱惟演

钱惟演字希圣吴越王俶之子从俶归朝为右屯卫将军历右神武军将军博学能文辞召试学士院以笏起草立就真宗称善改太仆少卿献咸平圣政录命直秘阁除尚书司封郎中知制诰再迁给事中知审官院大中祥符八年为翰林学士坐私谒事罢寻迁尚书工部侍郎再

为学士又坐贡举失实降给事中复工部侍郎擢枢密副使兼太子宾客迁工部尚书仁宗即位进兵部王曾为相以惟演尝位曾上因拜枢密使故事枢密使必加检校官惟演止以尚书充使有司之失也初惟演见丁谓权盛附之与为婚谓逐寇准惟演与有力焉谓祸既萌惟演虑并得罪遂挤谓以自解宰相冯拯恶其为人因言惟演以妹妻刘美乃太后姻家不可与机政罢为保大军节度使知河阳踰年请入朝加同中书门下平章事判许州未即行冀复用侍御史鞠咏奏劾之惟演乃亟去天圣七年改武胜军节度使明年来朝上言先茔在洛阳愿守宫钥即以判河南府再改泰宁军节度使惟演雅意柄用抑郁不得志及帝耕藉田求侍祠因留为景灵宫使太后崩诏还河南惟演不自安请以庄献明肃太后庄懿太后并配真宗庙室以希帝意惟演既与刘美亲又为其子暖娶郭后妹至是又欲与庄懿太后族为婚御史中丞范讽劾惟演擅议宗庙且与后家通婚姻落平章事为崇信军节度使归本镇未几卒特赠侍中太常张瓌按谥法敏而好学曰文贪而败官曰墨请谥文墨其家诉于朝诏章得象等复议以惟演晚节率职自新取谥法追悔前过曰思改谥曰思庆历间二太后始升祔真宗庙室子暖复诉前议乃谥曰文僖惟演出于勋贵文辞清丽名与杨亿刘筠相上下于书无所不读家储文籍俸秘府尤喜奖励后进初真宗谥号称文惟演曰真宗幸澶渊御契丹盟而服之宜兼谥武下有司议加谥武定惟演尝语人曰吾平生不足者惟不得于黄纸上押字尔盖未尝历中书故也子暖晦暄从弟易晦字明叔以大理评事娶献穆大长公主女累迁东上合门使贵州团练使王守忠领两使留后移合门定朝立燕坐位晦因言天子大朝会不可令宦者齿士大夫坐殿上守忠更欲以礼服进酒晦又以为不可句当三班院羣牧都监授忠州防御使历霸州防御使为羣牧副使卒暄字载阳以父荫累官驾部郎中知抚州移台州台城恶地下秋潦暴集辄圯溺人多即山为居暄为增治城堞垒石为台作大堤扞之进少府监权盐铁副使暄钩考诸路逋租两浙转运使负课当坐暄上言浙部仍岁饥故租赋不登籍今使者获罪必亟敛于民民不堪矣神宗即诏释之官制行为光禄卿出知郢州拜宝文阁待制卒子景臻尚秦鲁国大长公主景臻子忱在外戚传

钱易

钱彦远

钱明逸

钱景谔

钱勰

钱即

钱易

易字希白始父侔嗣吴越王为大将胡进思所废而立其弟俶俶归朝羣从悉补官
易与兄昆不见录遂刻志读书昆字裕之举进士为治
宽简便民能诗善草隶书累官右谏议大夫以秘书监于家易年十七举进士试崇政殿
三篇日未中而就言者恶其轻俊特罢之然自此以才
藻知名再举进士就开封府试第二自谓当第一为有司所屈乃上书言试朽索之馭六
马赋意涉讥讽真宗恶其无行降第三明年第二人中
第补濠州团练推官召试中书改光禄寺丞通判蕲州疏言古之肉刑者劓椽黥刖皆非
死尚以为虐近代以来断人手足钩背烙筋身见白骨
而犹视息四体分落乃方绝命以此示人非平世事也使严刑可诫于众则秦之天下无
叛民矣臣以为非法之刑非所以助治惟陛下除之帝
嘉纳其言景德中举贤良方正科策入等除秘书丞通判信州改太常博士直集贤院迁
尚书祠部员外郎坐发国子监诸科非其人降监颍州
税数月召还判三司磨勘司上言官物在籍而三司移文厘正或其数细微辄历年不得
报徒扰州县自今宫钱百谷斗帛二尺以下非欺给者
除之真宗雅眷词臣典掌诰命皆躬自简拔擢知制诰判登闻鼓院纠察在京刑狱累迁
左司郎中为翰林学士卒易才学赡敏过人数千百言
援笔立就又善寻尺大书行草子彦远明逸相继皆以贤良方正应诏宋兴以来父子兄
弟制策登科者钱氏一家而已

钱彦远

彦远字子高以父荫补太庙斋郎累迁大理寺丞举进士第以殿中丞为御史台推
直官通判明州迁太常博士举贤良方正能直言极谏
科擢尚书祠部员外郎知润州上疏曰陛下即位以来内无声色之娱外无畋渔之乐而
前岁地震雄霸沧登旁及荆湖幅员数千里虽往昔定
襄之异未甚于此今复大旱人心嗷嗷天其或者以陛下备寇之术未至牧民之吏未良
天下之民未安故出谴告以示之今契丹据山后诸镇
元昊盗灵武银夏被边长吏不复铨择高冠大裾耻言军旅湖广蛮獠劫掠生民调拨督
敛军须百出三年于今未闻分寸之效惟陛下念此三
方之急讲长久之计以上答天戒时旱蝗民乏食彦远发常平仓赈救之部使者诘其专
且摧价彦远不为屈召为右司谏请勿数赦择牧守增
俸入以养廉吏息土木以省工费迁起居舍人直集贤院知谏院会诸路奏大水彦远言
阴气过盛在五行传下有谋上之象请严宫省宿卫未

几有挟刃犯諺门者又上疏曰农为国家急务劝课不可不兴本朝转运使提点刑狱知州通判皆带劝农之职而徒有虚文无劝导之实宜置劝农司以知州为长官通判为佐举清强幕职州县官为判官先以垦田顷亩及户口数屋塘山泽沟洫桑柘着之于籍然后设法劝课除害兴利岁终农隙转运司考校之第其赏罚杨怀敏妄言契丹主宗真死乃除入内副都知内侍黎用信以罪窜海岛赦归遽得环卫官致仕许怀德慎镛年高未谢事杨景宗郭承佑闾冗小人宜废不用历举劾之多见听纳彦远性豪迈其任言职数有建明卒于官

钱明逸

明逸字子飞繇殿中丞策制科转太常博士擢右正言首劾范仲淹富弼更张纲纪纷扰国经凡所推荐多挟朋党乞早罢免疏奏二人皆罢其夕杜衍亦免相明逸盖希章得象陈执中意也石元孙与夏人战没以死事褒赠既而生归朝廷释不问明逸请正其僨军之罪乃窜之远方而夺其恩进同修起居注知制诰擢知谏院为翰林学士自登科至是纔五年加史馆修撰知开封府坐尹京无威望罢为龙图阁学士知蔡州历知秦州先是于闾入贡道邈川嘉勒斯賚留不遣会其妻亡前帅张方平请因而恤之且诱其般次入贡诏贖绢千匹明逸言朝廷抚嘉勒斯賚至厚今壅遏荒服之贡岂可复加赐以辱国体从之而于闾使与般次亦皆至斯賚有子质于秦别子木征居河州殿侍程从简私与之盟令过洮河许以官且归其质子事不验木征怒留贡使明逸械从简往诘因斩之木征惶惧悉遣所留者治平初复为翰林学士神宗立御史论其倾险儉薄顷附贾昌朝夏竦以陷正人文辞浅缪岂应冒居翰林院罢学士久之知永兴军熙寧四年卒年五十七赠礼部尚书谥曰修懿从子藻字醇老幼孤刻厉为学第进士又中贤良方正科为秘阁校理慈圣后临朝藻三上书乞还政同修起居注知制诰加枢密直学士知开封府平居乐易无崖岸而居官独立守绳墨为政简静有条理不肯徇私取显数求退改翰林侍读学士知审官东院卒年六十一赠大中大夫

钱景谌

景谌景臻之从兄也繇殿直巡辖两京马递中进士第初赴开封解试时王安石得其文以为知道者既荐送之又推誉于公卿闲自是执弟子礼安石提点府界景谌为属主簿又以文荐之执丧居许闻安石得政喜因事来京师谒之方盛夏安石褫服脱帽未及它语卒然问曰青苗助役如何景谌曰利少害多异日必为民患又问孰为可用之人曰居丧不交人事而人尤难事也遂辞出后调官复来安石已作相又往

诣之安石令先与弟安国相见安国亦与之善谓景谔曰相君欲以馆阁相处而任以事景谔曰百事皆可为所不知者新书役法耳及见安石安石欲令治峡路役书且委以戎泸蛮事景谔曰峡路民情仆固不能知而戎泸用兵系朝廷举动一路生灵休戚愿择知兵爱人者安石大怒遂与安石绝熙宁末从张景宪辟知瀛州终身为外官仅至朝请郎而卒

钱勰

勰字穆父彦远之子也生五岁日诵千言十三岁制举之业成熙宁三年试应既中秘阁选廷对入等矣会王安石恶孔文仲策迁怒罢其科遂不得第以荫知尉氏县授流内铨主簿判铨陈襄尝登进班簿神宗称之襄言主簿钱勰所为明日召对将任以清要官安石以不附已命权盐铁判官历提点京西河北京东刑狱元丰定官制勰方居丧帝于左司郎中格自书其姓名须终制日授之奉使吊高丽外意颇谓欲结之以北伐勰入请使指帝曰高丽好文又重士大夫家世所以选卿无他也乃求吕端故事以行凡馈饩非故所有者皆弗纳归次紫燕岛王遣二吏追饷金银器四千两竟却之还拜中书舍人元佑初迁给事中以龙图阁待制知开封府老吏畏其敏欲困以事导人诉牒至七百勰随即剖决宗室贵戚为之敛手虽丞相府谒吏干请亦械治之积为众所憾出知越州徙瀛州召拜工部户部侍郎进尚书加龙图阁直学士复知开封临事益精苏轼乘其据案时遗之诗勰操笔立就以报轼曰电扫庭讼响答诗简近所未见也哲宗莅政翰林缺学士章惇三荐林希帝以命勰仍兼侍读以尝行惇谪词惧而求去帝曰岂非鞅鞅非少主之臣矻矻无大臣之节者乎朕固知之无庸避也尝侍经幄帝留与之语曰台臣论徐邈事其辞及郑雍小人离间骨肉如此若雍有请当付卿以美诏慰安之既而雍章至勰答诏云弗容羣枉规欲动摇朕察其厚诬力加明辨夫何异趣乃尔乞身帝见之谓能道所欲言者惇因是极意排诋讽全台攻之言不已罢知池州卒于官年六十四元符末追复龙图阁学士后入元佑党籍云

钱即

即字中道吴越王诸孙第进士为睦州推官崇宁中为陕西转运判官王师复银州转饷居最徽宗召对问曰灵武可取乎对曰夏人去来飘忽不能持久是其所短然其民皆兵居不縻饮食动不勤转饷愿敕边臣先为不可胜以待衅庶可得志帝曰大砮泉可取否对曰是所谓瀚海也臣闻其地皆舄鹵无水泉或以饮马口鼻皆裂正得之无所用帝然之除直龙图阁知庆州至镇筑安边城归德堡包地万顷纵耕其中岁

得粟数十万徙知延安府在延五年童贯宣抚陕西得便宜行事时长安百物踊贵钱币益轻贯欲力平之计司承望风旨取市价率减什四违者重寘于法民至罢市徐处仁争之得罪又行均余法贱入民粟而高金帛估以赏下至募兵射士之授田者咸被抑配关内骚然几于生变即亦屡抗章极陈其害贬永州团练副使然余害亦寝数月还待制知兴仁府徙太原以童贯宣抚本道辞不许居二年以疾提举洞霄宫复直学士睦寇作起知宣州即自力上道至则悉意应军须贯上其功进龙图阁学士贯遂引为河北河东参谋以老固辞乃转正奉大夫致仕卒赠金紫光禄大夫谥曰忠定

钦定续通志卷三百四十一

●钦定续通志卷三百四十二 列传一百四十二

列传

宋 【四十六】

○宋四十六

张方平 王拱辰 张升 赵槩 胡宿 【宗炎 宗愈宗回

】

张方平

王拱辰

张升

赵槩

胡宿

△张方平

张方平字安道南京人少颖悟绝伦凡书皆一阅不再读宋绶蔡齐以为天下奇才举茂材异等为校书郎知昆山县又中贤良方正选迁著作佐郎通判睦州赵元昊且叛为嫚书来规得谴绝以激使其众方平请顺适其意使未有以发得岁月之顷以其间选将厉士坚城除器为不可胜以待之虽终于必叛而兵出无名不折则破我以全制其后必胜之道也时谓其论出姑息决计用兵方平上平戎十策以为入寇当自延渭巢穴之守必虚宜屯兵河东卷甲而趋之所谓攻其所必救形格势禁之道也宰相吕夷简善其策而不果行召试馆职命直集殿院俄知谏院夏人寇边方平首乞合枢密之职于中书以通谋议帝然之遂以宰相兼枢密使夏竦节制陕西并护诸将四路以禀复失事机且诏使出师逗遛不行及丰州陷刘平等覆师主帅皆坐谴竦独不预方平劾罢之而请四路帅臣各自任战守西帅久未解元昊亦因敝方平言愿因郊

赦引咎示信开其自新之路元昊竟降既以使契丹还知制诰权知开封府进翰林学士元昊既臣而与契丹有隙来请绝其使议者不可方平曰得新附之小羌失久和之强敌非计也宜赐元昊诏使之审处但嫌隙朝除则封册暮下如此于西北为两得时趣其谋拜御史中丞改三司使初王拱辰议榷河北盐方平见曰河北再榷盐何也帝曰始立法耳方平曰昔周世宗以盐课均之税中今两税盐铁是也岂非再榷乎帝惊悟方平请直降手诏罢之加端明殿学士时太常寺禁中卫卒夜变帝曰诏二府奖张贵妃扈蹕功夏竦求所以尊异之礼方平谓陈执中曰汉冯婕妤身当猛兽不闻有所尊异且皇后在而尊贵妃古无是事执中瞿然而罢帝以丰财省费诏羣臣方平既条对又独上数千言大略以为祥符以来务为姑息渐失祖宗之旧取士任子磨勘迁补之法坏命将养兵皆非旧律国用既窘则政出多门大商豪民乘隙射利而茶盐香矾之法乱此治忽盛衰之本不可以不急帝览对甚悦且大用会判官杨仪得罪坐与交出知滁州顷之知江甯府入判流内銓以侍读学士知滑州徙益州未至或扇言侂智高在南诏将入寇摄守亟调兵筑城朝廷发陕西步骑兵仗络绎往戍蜀诏趣方平行方平曰此必妄也道遇戍卒皆遣归他役尽罢得中部川译人始造此语者梟首境上而流其余党蜀人遂安复以三司使召方西鄙用兵两蜀多所调发方平为奏免横赋四十万减铸铁钱十余万缗又建言漕运以汴为主汴带引淮江利尽南海天圣己前岁调民浚之故水行地中其后浅妄者争以裁减役费为功汴日以塞是利尺寸而丧邱山也乃画上十四策帝称善悉如其说行之迁尚书左丞知南京未几以工部尚书帅秦州谍告夏人将压境方平料简士马声言出塞已而寇不至言者论其轻举曾公亮曰兵不出塞何名轻举寇之不得至者有备故也倘罪之后之边臣将不敢为先事之备矣方平不自安请知南京英宗立迁礼部尚书请知郢州还为学士承旨帝不豫召至福甯殿帝冯几书云明日降诏立皇太子方平抗声曰必颖王也嫡长而贤请书其名帝力疾书之乃退草制神宗即位召见请约山陵费又请差减锡赉以干兴为准拜参知政事曾公亮议用王安石方平以为不可数日遭父忧服阕以观文殿学士留守西京入覲留判尚书都省力请知陈州安石行新法方平陛辞极论其害帝怵然韩绛主西师庆卒乱京西转运使合一路各会兵于州民大骇方平持檄不下而奏之命罢诸郡兵召为宣徽北院使留京师王安石深沮之以为青州未行帝问祖宗御戎之要对曰太祖不勤远畧如灵夏河西皆因其酋豪许之世袭环州董遵诲西山郭进关南李汉超皆优其禄赐宽其

文法诸将财力丰而威令行间谍精审吏士用命故能以十五万人而获百万之用及太宗谋取燕蓟又内徙李彝兴冯晖于是朝廷始旰食矣
真宗澶渊之克与契丹盟至今人不识兵革近岁疆场之臣乃欲试天下于一掷事成微利不成诒患不可听也帝曰元昊初臣何以待之对曰
臣时为学士誓诏封册皆出臣手帝曰卿可谓旧德矣除中太乙宫使王安石弛铜禁奸民日销钱为器钱日耗方平极论其害帝颇采其言而
方平求去进使南院判应天府高丽使过府长吏当送迎方平言臣班视二府不可为陪臣屈诏但遣少尹王师征安南方平言举西北壮士健
马弃之炎荒其患有不可胜言者后皆如其言新法鬻河渡坊场司业并及祠庙宋闕伯微子庙皆为贾区方平言宋王业所基闕伯封于商邱
以主大火微子为始封之君是二祠者亦不得免乎于是天下祠庙皆得不鬻数请老以太子少师致仕官制行废宣徽使独命领之如故哲宗
立加太子太保元佑六年薨年八十五赠司空遗令毋请谥尚书右丞苏辙为请乃谥曰文定方平慷慨有气节既告老论事益切至于用兵起
狱尤反复言之且曰臣且死见先帝地下有以借口矣守蜀日得眉山苏洵与其二子轼辙尝荐轼为谏官轼下制狱又抗章为请故轼终身敬
事之王安石方用事嶷然不少屈以是望高一时守宋都日富弼过见之曰人固难知也方平曰谓王安石乎亦岂难知者方平顷知皇佑贡举
或称其文学辟以考校既入院凡院中之事皆欲纷更方平恶其人檄使出自是未尝与语也盖弼素亦善安石云

△王拱辰

王拱辰字君贶开封咸平人年十九举进士第一通判怀州入直集贤院历盐铁判官修起居注知制诰庆历元年为翰林学士契丹使刘
六符来求关南十县斥太宗伐燕为无名举朝莫知所答拱辰曰王师征河东契丹既通使而寇石岭关以援贼太宗怒遂回军伐之岂谓无名
乃作报书曰既交石岭之锋遂起衡门之役契丹得报遂继好如初权知开封府拜御史中丞夏竦除枢密使拱辰言竦经畧西帅无功今置诸
二府何以厉世因对极论之帝未省遽起拱辰前引裾乃纳其说竦遂罢又言滕宗谅在庆州所为不度宜施重责乃徙宗谅岳州僧绍宗以铸
佛像惑众都人竞投金冶中宫掖亦出货佐之拱辰言财费于不急诏亟禁之苏舜钦会宾客于进奏院王益柔醉作傲歌拱辰风其僚鱼周询
刘元瑜举劾之两人既窜废同席者俱逐时杜衍范仲淹为政拱辰之党不便舜钦益柔皆仲淹所荐而舜钦衍壻也故因是倾之由此为公议
所薄复以翰林学士权三司使坐举富民郑旭出知郑州徙澶瀛并三州还为学士承旨

兼侍读帝于迩英阁置太元经着草顾曰朕每阅此卿亦知其说乎拱辰具以对且曰愿陛下垂意六经旁求史策至和三年复拜三司使聘契丹还御史赵抃论其辄当非正之礼湖南转运判官李章市死商真珠事败拱辰悉入珠掖庭抃并劾之除宣徽北院使抃言宣徽之职本以待勋劳者拱辰安得污此选乃以端明殿学士知永兴军历泰定二州河南大名府积官至吏部尚书神宗登极迁太子少保熙宁元年复以北院使召还王安石参知政事恶其异己出为应天府八年入朝为中太一宫使元丰初转南院使赐金方团带再判大名改武安军节度使三路籍民为保甲日聚而教之禁令苛急往往去为盗郡县不敢以闻拱辰抗言其害曰是以法驱之使陷于罪罟也纵未能尽罢愿才损下户以纾之主者指拱辰为沮法拱辰上章不已于是第五等户得免哲宗立徙节彰德加检校太师是年薨年七十四赠开府仪同三司谥懿恪

△张升

张升 【按宋史宰辅表及东都事畧俱作■〈田上弁下〉别见宋史他传亦有作昇者】字杲卿韩城人举进士为楚邱主簿累官度支员外郎夏竦经畧陕西荐其才换六宅使泾原秦凤安抚都监以母老得知绛州改京西转运使知邓州又以母辞乃许归养历户部判官开封府推官至知杂御史张尧佐缘恩骤用知开封府内侍杨怀敏夜直禁中而卫士为变皆极论之以天章阁待制知庆州改龙图阁直学士知秦州初青唐蕃部藁毡世居古渭积与夏人有隙惧而献其地摄帅范祥亟城之诸族畏其偪举兵叛升至请弃勿城诏户部副使傅求审视之以为不可弃与升议殊先是副总管刘涣讨叛羗逗挠不时进升命他将郭恩代之羗乃溃去涣讼恩多杀老稚以撼升朝廷命张方平守秦徙升青州将罪升方平辞升乃复留至和二年召兼侍读拜御史中丞刘沆在相位以御史范师道赵抃尝攻其恶阴欲出之升上章力争之沆竟罢去帝见升指切时事无所避谓曰卿孤立乃能如是对曰臣仰托圣主致位侍从是为不孤今陛下之臣持禄养望者多而赤心谋国者少窃以为如陛下乃孤立尔帝为之感动嘉佑三年擢枢密副使迁参知政事枢密使见帝春秋高前后屡进言储嗣事卒与韩琦同决策英帝立请老帝曰太尉勤劳王家讵可遽去司马光言升为人忠谨清直若使且居其位于事亦未有旷废升请不已始赐告令养疾遂以彰信军节度使同中书门下平章事判许州改镇河阳三城拜太子太师致仕熙宁十年薨年八十六赠司徒兼侍中谥曰康节

△赵槩

赵槩字叔平南京虞成人少笃学自力器识宏远中进士第通判海州为集贤校理开封府推官出知洪州州薄章江有泛滥之虞槩作石堤以障其冲水不为患僚吏郑陶饶爽挟持郡事为不法前守莫能制收陶爽抵罪阖府股栗加直集贤院知青州坐失举澠池令张诰免起监密州酒知滁州召修起居注请郡除天章阁待制纠察在京刑狱知制诰郊祀当任子进阶爵乞回其恩封母郡太君苏舜钦等以羣饮逐槩言预会者皆馆阁名士举而弃之缺士大夫望不报求知苏州入为翰林学士聘契丹还兼侍读学士谏官郭申锡论事忤旨帝欲加罪槩曰陛下始面谕申锡毋面从今黜之何以示天下乃止以龙图阁学士知郢州应天府代韩绛为御史中丞绛论张茂实不宜典宿卫罢槩至首言之茂实竟去擢枢密使参知政事数以老求去熙宁初拜观文殿学士知徐州自左丞转吏部尚书以太子少师致仕退居十五年尝集古今谏争事为谏林百二十卷上之元丰六年薨年八十八赠太子太师谥曰康靖槩秉心和平与人无怨怒虽在事如不言然阴以利物者为不少议者以比刘宽娄师德坐张诰贬六年念之终不衰诰死恤其家备至欧阳修遇槩素薄及修有狱槩独抗章明其罪修得解始服其长者为郢州时吏按前守冯浩侵公使钱三十万当以职田租偿槩知其贫为代以己俸其平生所为类此

△胡宿

胡宿字武平常州晋陵人【按欧阳修撰宿墓志载其先豫章人也后徙常州之晋陵】登第【按墓志载举进士中天圣二年乙科】为扬子尉县大水民被溺令不能救宿率公私船活数千人以荐为馆阁校勘进集贤校理通判宣州知湖州前守滕宗谅大兴学校其后湖学为东南最宿之力为多筑石塘百里捍水惠民号曰胡公塘久之为两浙转运使召修起居注知制诰入内都知杨怀敏坐卫士之变为和州都监【按东都事略作出为和州都监宋史本传作升今据改】未几召入复故职宿封还词头且言怀敏得不穷治诛死已幸岂宜复在左右命遂寝庆历六年京东两河地震登莱尤甚宿兼通阴阳五行灾异之学乃上疏曰明年丁亥岁之刑德皆在北宫是调龙战之会其位在干若西北二边不动恐有内盗起于河朔又登莱视京师为东北少阳之位今二州置金坑多聚民凿山谷阳气耗泄故阴乘而动宜即禁止以窒地道时以为迂阔明年王则果以贝州叛皇佑五年正月会灵宫灾是岁冬至郊以二帝并配明年大旱宿言五行火礼也去岁火而今又旱其应在礼此殆郊丘并配之失即建言并配非古宜用迭配如初时议者谓士大夫言七十当致仕其不知止者请令有司按籍举行之宿以为非

优老之义当少缓其期武吏察其任事与否勿断以年文吏使得自陈而全其节及言皇佑新乐与旧乐难并用礼部间岁一贡士不便当用三年之制皆如其言唐介贬岭南帝遣中使护以往宿言事有不可测介如不幸道死陛下受杀直臣之名帝追还使者迁翰林学士知审官制院李仲昌开六塔河民被害诏狱薄其罪宿请斩以谢河北仲昌由是南甯充国公主下降将行册礼宿谏曰陛下昔封两长主未尝册命今施之爱女殆非汉明帝所谓我子岂得与先帝子等之义泾州卒以折支不时给出恶言且欲相扇为乱既寘于法乃命劾三司吏三司使包拯护弗遣宿曰泾卒固悖慢然当给之物越八十五日而不与计吏安得为无罪拯不知自省公拒制命纪纲益废矣拯惧立遣吏韩琦守并州请复其节镇宿言参商为仇雠之星国家受命于商邱而参为晋地今欲崇晋非国之利也宜如故便议遂止拜枢密副使曾公亮任雄州赵滋颢治界河事宿言于英宗曰忧患之来多藏于隐微而生于所忽自滋守边北人捕鱼伐苇一切禁绝由此常与鬪争南北通好六十载内外无患近年边遽来上不过侵诬尺寸此城砦之吏移文足以办诘何至于兴甲兵哉今搢绅中有耻燕蓟外属者天时人事未至而妄想难成之福愿守两朝法度以惠养元元宿以老数乞谢事治平三年罢为观文殿学士知杭州明年以太子少师致仕未拜而薨年七十三赠太子太傅谥曰文恭宿为人清谨忠实内刚外和羣居不哗笑与人言必思而后对故临事重慎不辄发发亦不可回止居母丧三年不至私室其当重任尤顾惜大体在审官刑院择详议官有在选中者尝监征榷以水灾负课同列谓小累不足白宿竟白之而荐其才足用仁宗听纳笃行自励至于贵达常如布衣时子宗炎【按墓志载宿子五人宗尧都官员外郎宗质国子博士宗炎宿之第四子也】从子宗愈宗回

胡宗炎

胡宗愈

胡宗回

胡宗炎

宗炎字彦圣由将作监主簿锁厅登第为国子大宗正丞开封府推官考功吏部郎中哲宗崩辽使来吊祭宗炎以鸿臚少卿迓境上使者不易服宗炎以礼折之须其听命乃相见既还升为卿初父宿使辽辽人重之其后宗炎堦邓忠臣迓客客问中外尝有充使者否忠臣以宿告且言前使鸿臚其子也客叹胡氏世不乏人俄以直龙图阁知颍昌府历密州而卒宗炎善为诗藻思清婉欧阳修守亳与客游郡圃或诵其诗

修赏味不已以为有鲍谢风致其重之如此

胡宗愈

宗愈字完夫举进士甲科为光禄丞宿得请杭州英宗问子弟谁可继者以宗愈对召试学士院神宗立以为集贤校理久之兼史馆检讨遂同知谏院殿内卒盗皇城器物宗愈言入内都知不能觉察愿正其罪殿帅直庐在长庆门内久而自置隶圉宗愈曰严禁旅所以杜奸宄也柰何令私人得为之请易募老卒王安石用李定为御史宗愈言定以幕职不因荐得之是殆一出执政意即大臣不法谁复言之苏颂李大临不草制坐绌宗愈又争之安石怒出通判真州历提点河东刑狱开封府推官吏部右司郎中元佑初起居郎中中书舍人给事中御史中丞时更定役法书成衙校募不足者听差人等户宗愈言法贵均一若持两端则于文有害是乃差法非募法也请删之哲宗尝问朋党之弊具君子无党论以进拜尚书右丞于是谏议大夫王觐论其不当而刘安世韩川孙觉等合攻之朝廷依违踰年出觐润州而言者愈力乃罢为资政殿学士知陈州徙成都府蜀人安其政召为礼部尚书迁吏部卒年六十六赠左银青光禄大夫谥修简后入元佑党籍云 【宗愈字修简后入元佑党籍见东都事略愈传宋史本传不载今据增】

胡宗回

宗回字醇夫用荫登第为编修敕令官司农寺干当公事京西转运判官提点刑狱京东陕西转运使吏部郎中绍圣初以直龙图阁知桂州进宝文阁待制坐系平民死降集贤殿修撰知随州改秦州庆州复为待制先是熙河将王瞻下邈川有功帅孙路不乐瞻夺其兵与王愍朝廷知之以宗回代路加直学士时青唐瞎征内附而心牟钦毡勒兵立别酋陇拶还其地势复张瞎征大惧自髡为僧以祈免王瞻怨孙路因言青唐不烦兵可下至则驻宗哥城不进宗回怒日夜檄趋之且戒瞻曰青唐兵甚弱陇拶稚子何能为而怯懦逗遛吾将以军法从事又遣王愍复至邈川声言代瞻瞻惧乃率步骑掩青唐据之陇拶降诏以青唐为鄯州邈川为湟州未几属羌即阿章叛拒官军宗回遣将王吉魏钊讨之皆败死又遣钜籍种朴往朴言贼锋方锐且盛寒宜少缓师宗回不听督之急朴不得已行亦败死于是转运判官秦希甫言湟鄯难守以为弃之便事下宗回宗回持不可希甫罢去会徽宗弃鄯州于是任伯雨再疏其罪夺职知蕲州还为待制历庆渭陈延澶州兄宗愈入党籍宗回亦罢郡居亡何录其坚守湟鄯之议起知秦州进枢密直学士徙永兴郑州成德军复坐事去大观中卒赠银青光禄大夫胡氏自宿始大及宗愈

仍世执政其后子孙至侍从九卿者十数遂为晋陵名族

钦定续通志卷三百四十二

●钦定续通志卷三百四十三 列传一百四十三

列传

宋【四十七】

○宋四十七

欧阳修【发棐】

刘敞【放奉世】

曾巩【肇】

欧阳修

刘敞

曾巩

△欧阳修

欧阳修字永叔庐陵人四岁而孤母郑守节自誓亲诲之学家贫至以荻画地学书幼敏悟过人读书辄成诵及冠嶷然有声宋兴且百年而文章体裁犹仍五季余习矍刻骈偶澶涩弗振士因陋守旧论卑气弱苏舜元舜钦柳开穆修辈咸有意作而张之而力不足修游随得唐韩愈遗藁于废书篋中读而心慕焉苦志探颐至忘寝食必欲并辔绝驰而追与之并举进士试南宫第一擢甲科调西京推官始从尹洙游为古文与梅尧臣游为歌诗相倡和遂以文章名冠天下入朝为馆阁校勘范仲淹以言事贬在廷多论救司谏高若讷独以为当黜修贻书责之若讷上其书坐贬夷陵令稍徙干德令武成节度判官复校勘进集贤校理庆历三年知谏院时仁宗更用大臣杜衍富弼韩琦范仲淹皆在位增谏官员用天下名士修首在选中每进见帝延问执政咨所宜行初范仲淹之贬饶州也修与尹洙余靖皆以直仲淹见逐目之曰党人自是朋党之论起修乃为朋党论以进论事切直帝独奖其敢言面赐五品服同修起居注遂知制造故事必试而后命帝知修诏特除之奉使河东自西方用兵议者欲废麟州以省馈饷修言麟州天险不可废不若分其兵驻并河内诸堡缓急得以应援而平时可省转输又言忻代岢岚多禁地废田愿令民得耕之不然将为敌有朝廷下其议久乃行岁得粟数百万斛凡河东赋敛过重民所不堪者奏罢下数事使还会保州兵乱以为龙图直学士河北都转运使平大将李昭亮通判冯博文私纳妇女修捕博文系狱昭亮惧立出所纳妇兵之始乱也招以不死既而皆杀之胁从二千人分隶诸郡富弼为宣抚使恐后生变将使同日诛之与修遇于内黄夜半屏人告之故修曰祸莫大于杀已降况胁从乎既非朝命脱一郡不从为变不细弼悟而止方是时杜衍等相继以党议罢去修慨然上疏曰杜衍

韩琦范仲淹富弼天下皆知其有可用之贤而不闻其有可罢之罪今此四人一旦罢去而使羣邪相贺于内四夷相贺于外臣为朝廷惜之于是邪党益忌修因其孤甥张氏狱傅致以罪左迁知制诰知滁州居二年徙扬州颍州复学士留守南京以母忧去服除召判流内铨小人畏修复用有诈为修奏乞澄汰内侍为奸利者羣皆怨怒谮之出知同州帝纳吴充言而止迁翰林学士俾修唐书奉使契丹其主命贵臣四人押宴曰此非常制以卿名重故尔知嘉佑二年贡举时士子尚为险怪奇涩之文号太学体修痛排抑之加龙图阁学士知开封府承包拯威严之后简易循理不求赫赫名京师亦治旬月改羣牧使唐书成拜礼部侍郎兼翰林侍读学士修在翰林八年知无不言河决商湖北京留守贾昌朝欲开横堦故道回河使东流有李仲昌者欲导入六塔河议者莫知所从修以为河水重浊理无不淤下流既淤上流必决以近事验之决河非不能力塞故道非不能力复但势不能久耳横堦功大难成虽成将复决六塔狭小而以全河注之滨棣德博必被其害不若因水所趋增堤峻防疏其下流纵使入海此数十年之利也宰相陈执中主昌朝文彦博主仲昌竟为河北患台谏论执中过恶而执中犹迁延固位修上疏曰陛下拒忠言庇愚相为圣德之累未几执中罢狄青为枢密使有威名帝不豫讹言籍籍修请出之于外以保其终尝因水灾上疏曰陛下临御三纪而储宫未建昔汉文帝初即位即立太子而享国长久唐明宗恶人言储嗣事不肯早定致秦王之乱陛下何疑而久不定乎其后建立英宗盖原于此五年拜枢密副使六年参知政事修在兵府与曾公亮考天下兵数及三路屯戍多少地理远近更为图籍其在政府与韩琦同心辅政凡兵民官吏财利之要中书所当知者集为总目时东宫犹未定与韩琦等协定大议语在琦传英宗以疾未亲政皇太后垂帘左右交构几成嫌隙韩琦奏事太后泣语之故琦以帝疾为解太后意不释修进曰太后事仁宗数十年仁德着于天下昔温成之宠太后处之裕如今母子之间反不能容邪太后意稍和修复曰仁宗在位久德泽在人天下奉戴嗣君无一人敢异同者非仁宗遗意天下谁肯听从太后默久之而罢帝将追崇濮王命有司议皆谓当称皇伯改封大国修引丧服记以为为人后者为其父母服降三年为期而不没父母之名以见服可降而名不可没也若本生之亲改称皇伯厯考前世皆无典据进封大国则又礼无加爵之道故中书之议不与众同太后出手书许帝称亲尊王为皇王夫人为后帝不敢当于是御史吕海等诋修主此议争论不已皆被逐惟蒋之奇之说合修意修荐为御史众目为奸邪之奇患之则思所以

自解修妇弟薛宗孺有憾于修造帷薄不根之谤摧辱
之之奇因中丞彭思永言即上章劾修神宗初即位欲深护修使诘思永之奇辞穷皆坐
黜修亦方求退罢为观文殿学士刑部尚书知亳州明
年迁兵部尚书知青州改宣徽南院使判太原府辞不拜徙蔡州修以风节自持既数被
污蔑年六十即连乞谢事帝优诏弗许及守青州又以
请止散青苗钱为安石所诋故求归愈切熙宁四年以太子少师致仕五年卒赠太子太
师谥曰文忠修始在滁州号醉翁晚更号六一居士天
资刚劲见义勇为放逐流离至于再三志气自若也方贬夷陵时取旧案反复观之见其
枉直乖错不可胜数于是仰天叹曰以荒远小邑且如
此天下固可知自尔遇事不敢忽学者求见所与言未尝及文章惟谈吏事谓文章止于
润身政事可以及物凡历数郡不见治迹不求声誉宽
简而不扰故所至民便之或问为政宽简而事不弛废何也曰以纵为宽以略为简则政
事弛废而民受其弊吾所谓宽者不为苛意简者不为
繁碎耳修幼失父母尝谓曰汝父为吏常夜烛治官书屡废而叹吾问之则曰死狱也我
求其生不得尔吾曰生可求乎曰求其生而不得则死
者与我皆无恨夫常求其生犹失之死而世常求其死也其平居教他子弟常用此语吾
耳熟焉修闻而服之终身为文天才自然丰约中度天
下翕然师尊之奖引后进如恐不及赏识之下率为闻人曾巩王安石苏洵洵子轼辙未
为人知修即游其声誉谓必显于世笃于朋友生则振
掖之死则调护其家好古嗜学凡金石遗文一切掇拾谓之集古录奉诏修唐书自撰五
代史记子发弈棊辨

欧阳发

欧阳棊

欧阳发

发字伯和少好学师事安定胡瑗得古乐钟律之说不治科举文词独探古始立论
议自书契来君臣世系制度文物旁及天文地理靡不
悉究以父恩补将作监主簿赐进士出身累迁殿中丞卒年四十六苏轼哭之以谓发得
文忠公之学汉伯阶晋茂先之流也

欧阳棊

棊字叔弼用荫为秘书省正字登进士乙科调陈州判官为审官主簿累迁职方员
外郎知襄州曾布妇兄魏泰居襄规占公私田园指州
门东偏官邸废址为天荒请之吏具成牒至棊持不与泰譖于布徙知路州旋又罢去元
符末历吏部右司二郎中以直秘阁知蔡州蔡地薄赋
重转运使又为覆折之民不堪命会有诏禁止而佐吏惮使者不敢以诏旨从事棊曰州

郡之于民诏令苟有未便犹将建请今诏止之若有憚而不行何以为长吏命即日行之未几坐党籍废卒

△刘敞

刘敞字原父临江新喻人举庆历进士廷试第一以内见王尧臣嫌为第二通判蔡州直集贤院判尚书考功夏竦薨赐谥文正敞疏三上改谥文庄方议定大乐使中贵人参其问敞谏曰王事莫重于乐今儒学满朝辩论有余而使若赵谈者参之臣惧为袁盎笑也权度支判官徙三司使秦州与羌人争古渭地仁宗问敞弃守孰便敞曰若新城可以蔽秦州长无羌人之虞倾国守焉可也或地形险利贼乘之以扰我边鄙倾国争焉可也今何所轻重而殫财困民损士卒之命以规小利使曲在国非计也议者多不同秦州自是多事矣温成后追册有佞人献议求立忌敞曰岂可以私昵之故变古越礼乎乃止吴充以典礼得罪冯京救之亦罢近职敞因对极论之帝曰充能官京亦亡它中书恶其太直不相容耳敞曰宽仁好谏而中书乃排逐言者臣恐感动阴阳有日食地震风霾之异已而果然因劝帝收揽威权帝深纳之同修起居注擢知制诰奉使契丹素习知山川道径契丹导之行自古北口至柳河回居殆千里欲夸示险远敞质译人曰自松亭趋柳河甚径且易不数日可抵中原何为故道此译相顾骇愧曰通好以来置驿如是不敢变也顺州山中有异兽如马而食虎豹契丹不能识敞曰此所谓驳也为说其音声形状且诵山海经管子书晓之使还求知扬州狄青起行伍为枢密使每出入小民辄聚观至壅马足不得行青不自安敞为言陛下爱青不如出之以全其终使出谕中书青乃去位扬之雷塘汉雷岐也旧为民田其后官取潞水主皆失业敞据塘旧券悉用还民天长县鞠王甲杀人既具狱敞察其冤亲按问之盖杀人者富人陈氏也相传以为神明徙郢州决狱讼明赏罚境内肃然道中遗一囊钱人莫敢取又有暮遗物市中者旦往访之故在先是久旱多蝗敞至而雨蝗出境召纠察在京刑狱营卒桑达等醉鬪皇城使捕送开封弃市敞移府问何以不经审讯奏请准近格诏以其章下府着为令嘉佑裕享羣臣上尊号敞疏言陛下不受徽号且二十年今岁来颇有灾异正当寅畏天命深自抑损岂可以虚名为累帝遂不受敞以识论与众忤求知永兴军拜翰林侍读学士敞侍英宗讲读每指事据经因以讽谏时两宫方有小人间言敞进读史记至尧授舜以天下拱而言曰舜至侧微也尧禅之以位天地享之百姓戴之非有他道惟孝友之德光于上下耳帝竦体改容知以义理讽也皇太后闻之亦大喜疾少间求外以为汝州旋改集贤院学士判南京御史台熙宁元年卒年

五十敞学问渊博尝夜视镇星谓人曰此于法当得土
不然则生女后数月两公主生又曰岁星往来虚危间色甚明盛当有兴于齐者岁余英
宗以齐州防御使入承大统尝得先秦彝鼎数十铭识
奇奥皆案而读之因以考知三代制度朝廷每有礼乐之事必就其家以取决焉为文尤
赡敏掌外制时将下直会追封王主九人立马却坐顷
之九制成欧阳修每于书有疑折简来问对其使挥笔答之不停手修服其博长于春秋
弟攸子奉世

刘攸

刘奉世

刘攸

攸字贡父与敞同登科仕州县二十年始为国子监直讲欧阳修赵槩荐试馆职御
史中丞王陶排之攸官己员外郎纔侍馆阁校勘熙宁
中判尚书考功同知太常礼院诏封太祖诸孙行尊者为主奉太祖后攸言礼诸侯不得
祖天子当自奉其国之祖宜崇德昭德芳之后世世勿
降爵宗庙祭祀使之在位则所以褒扬艺祖者着矣诏封如攸议方更学校贡举法攸曰
本朝选士之制行之百年累代将相名卿皆由此出而
以为未尝得人不亦诬哉愿因旧贯毋轻议改法王安石在经筵乞讲者坐攸曰侍臣讲
论于前避席立语乃古今常礼君使之坐所以示人主
尊德乐道也若不命而请则异矣礼官皆同其议至今仍之又尝贻安石书论新法不便
安石怒摈前过斥通判泰州以集贤校理判登闻检院
户部判官知曹州曹为盗区重法不能止攸治尚宽平盗亦衰息为开封府判官复出为
京东转运使徙知兖亳二州吴居厚代为转运使能奉
行法令致财赋乃追坐攸废弛黜监衡州盐仓哲宗初起知襄州入为秘书少监以疾求
去加直龙图阁知蔡州至蔡数月召拜中书舍人以疾
不起年六十七攸尤邃史学司马光修资治通鉴专职汉史为人疏儻不修威仪喜谐谑
数用以招怨悔云

刘奉世

奉世字仲冯中进士第熙宁三年初置枢密院诸房检详文字以太子中允居吏房
神宗称其奉职不苟加集贤校理检正中书户房公事
改刑房进直史馆国史院编修久之为吏部员外郎元佑初历度支左司郎中起居郎天
章阁待制枢密都承旨户部吏部侍郎权户部尚书七
年拜枢密直学士金书院事哲宗亲政用二内侍为押班中书舍人吕希纯封还之帝谓
近例奉世曰虽有近例柰人不可户晓帝为反命既而
章惇当国奉世乞免去绍圣元年以端明殿学士知成德军改定州知成都府过都入覲

欲述朋党倾邪之状帝将听其来曾布曰元佑变先朝法无一当者奉世有力焉遂不许明年署光禄少卿分司南京居郴州再贬隰州团练副使徽宗立尽还其官职知定州大名府郓州崇宁初再夺职谪居兗沂以赦得归 【按东都事略作夺职谪知徐州提举崇福宫】 政和三年复端明殿学士卒年七十三奉世优于吏治尚安静文词雅贍最精汉书学常云家世唯知事君内省不愧作士大夫公论而已得丧常理也譬如寒暑加人虽善摄生者不能无病正须安以处之

△曾巩

曾巩字子固建昌南丰人生而警敏年十二试作六论援笔而成甫冠名闻四方中嘉佑二年进士第调太平州司法参军召编校史馆书籍迁馆阁校勘集贤校理为实录检讨官出通判越州州旧取酒场钱给募牙前钱不足赋诸乡户期七年止期尽募者志于多入犹责赋如初巩立罢之岁饥度常平不足贍而田野之民不能皆至城邑谕告属县讽富人自实粟视常平价稍增以予民民得从便受粟不出田里而食有余又贷之种粮使随秋赋以偿知齐州曲堤周氏拥货雄里中子高横纵州县吏莫敢诘巩取寘于法章邱民聚党村落间巩配三十一人又属民为保伍使讥察其出入有盗则鸣鼓相援每发辄得盗有葛友者名在捕中一日自首巩饮食冠裳之盗闻多出自首自是外户不闭河北发民浚河调及他路齐当给夫二万县初按籍三丁出夫一巩括其隐漏至于九而取一省费数倍又弛无名渡钱为桥以济往来凡省六驿人皆以为利徙襄州洪州会江西岁大疫巩命县镇亭传悉储药待求军民不能自养者来食息官舍资其饮食衣衾之具师征安南所过州为万人备巩先期区处师去市里不知加直龙图阁知福州剑将乐盗廖思 【按曾肇撰巩行状作廖恩】 既赦罪出降余众溃复合巩以计罗致之继自归者二百辈福州无职田岁鬻园蔬收其直自入常三四十万巩罢之后至者亦不复取也徙明亳沧三州巩负才名久外徙过阙神宗召见遂留判三班院上疏议经费以节用为理财之要加史馆修撰会官制行拜中书舍人寻掌延安郡王笺奏故事命翰林学士至是特属之数月卒年六十五巩性孝友为文章本原六经少与王安石游及安石得志遂与之异神宗尝问安石何如人对曰安石文学行义不减扬雄以吝故不及帝曰安石轻富贵何吝也对曰勇于有为吝于改过耳吕公着尝告神宗以巩为人行义不如政事政事不如文章以是不大用云弟布自有传幼弟肇

曾肇

曾肇

肇字子开举进士调黄岩簿用荐为郑州教授擢崇文校书馆阁校勘兼国子监直讲同知太常礼院太常礼文残缺肇在职多所厘正亲祠皇地于北郊盖自肇发之迁国史编修官进吏部郎中迁右司为神宗实录检讨元佑初擢起居舍人未几为中书舍人论叶康直知泰州不当执政诤不先白御史因攻之肇求去范纯仁力为之言乃得释门下侍郎韩维奏范百禄事出守邓肇言维为朝廷辨邪正是非不可以疑似遂不草制谏议大夫王觐以论胡宗愈出守润肇言陛下寄腹心于大臣寄耳目于台谏今觐论执政即去之是爱腹心而涂耳目也帝悟太皇受册诏遵章献故事御文德殿肇言天圣初两制定议受册崇政仁宗特改焉此盖一时之制今帝述仁宗故事以极崇奉孝敬之诚臣窃谓太皇当于此时特下诏扬帝孝敬之诚而固执谦德屈从天圣两制之议止于崇政则帝孝愈显太皇之德愈尊矣坤成节上寿议令百官班崇政肇又言天圣三年近臣班殿廷百官止请内东门拜表今太皇盛德不肯自同章献宜如三年之制并从之四年春早有司犹请春宴肇同彭汝砺上疏曰天菑方作正君臣侧身畏惧之时乃相与饮食燕乐死无以消复天变翌日有旨罢宴以宝文阁待制知颍州徙邓齐陈州应天府入为吏部侍郎肇任礼院时启亲祠北郊之议是岁当郊肇坚抗前说既而合祭天地乃自劾改刑部请不已出知徐州徙江甯府帝亲政更用旧臣数称肇议礼趣入对肇言宜于此时选志信端良之士真诸近班以参谋议备顾问贵近恶其语出知瀛州时方治实录讥讪罪降为滁州稍复集贤殿修撰历泰州海州徽宗即位复召为中书舍人日食四月朔当条诏求言肇具述帝旨诏下投匭者如织章惇恶之欲因事去肇帝不听元佑臣僚被遣者咸以赦思甄叙肇请并录死者作训词哀厚惻怛读者为之感怆迁翰林学士兼侍读谏官陈瓘给事中龚原以言得罪肇极力论解建中靖国元年太史奏日又当食四月肇请对言比岁日食正阳咎异章着陛下宜反复循省以塞天变言发涕下帝悚然顺纳兄布在相位引故事避禁职拜龙图阁学士提举中太一宫未几出知陈州历太原应天府扬定二州崇宁初落职谪知和州徙岳州继贬濮州团练副使安置汀州四年归润而卒年六十一自熙宁以来四十年大臣更用事邪正相轧党论屡起肇身更其间数不合兄布与韩忠彦并相日久倾危之肇既居外移书告之曰兄方得君当引用善人以杜惇卞复起之萌惇卞纵未至一蔡京足以兼二人可不深虑布不能从未几京得政布与肇俱不免肇天资仁厚而容貌端严自少力学博览经传更十一州类多善政绍兴

初谥曰文昭子统至左谏议大夫

钦定续通志卷三百四十三

●钦定续通志卷三百四十四 列传一百四十四

列传

宋【四十八】

○宋四十八

蔡襄	吕溱	王素【靖震】	余靖	彭思永
张存	郑獬	陈襄	张公辅	
孙洙	丰稷	吕诲	刘述	刘琦
	何郯	吴中复【择仁】	陈荐	钱顛
	王猎	孙思恭	周孟阳	齐恢
				杨绘
				刘庠

朱京

蔡襄

吕溱

王素

余靖

彭思永

张存

郑獬

陈襄

钱公辅

孙洙

丰稷

吕诲

刘述

刘琦

钱顛

郑侠

何郯

吴中复

陈荐

王猎

孙思恭

周孟阳

齐恢

杨绘

刘庠

朱京

△蔡襄

蔡襄字君谟兴化仙游人举进士为西京留守推官馆阁校勘范仲淹以言事去国余靖论救尹洙请与同贬欧阳修移书责司谏高若纳由是三人者皆坐谴襄作四贤一不肖诗庆历三年仁宗更用辅相擢靖修及王素为谏官襄又以诗贺三人列荐之帝亦命襄知谏院襄喜言路开而虑正人难久立乃上疏曰朝廷增用谏臣修靖素一日并用三人忠诚刚正必能尽言臣恐邪人不利必造为御之之说其说有三一曰好名一曰好进三曰彰君过愿陛下察之毋使有好谏之名而无其实时有旱蝗日食地震之变襄以为灾害之来皆由人事原其所以致之由君臣上下皆阙失也不颞听断不揽威权使号令不信于人恩泽不及于下此陛下之失也持天下之柄司生民之命无嘉谋异画以矫时弊不尽忠竭节以副任使此大臣之失也朝有弊政而不能正民有疾苦而不能去陛下宽仁少断而不能规大臣循默避事而不能斥此臣等之罪也陛下既有引过之言达于天地神祇矣愿思其实以应之疏出闻者皆悚然进直史馆兼修起居注开宝浮图灾下有旧瘞佛舍利诏取以入宫人多灼臂落发者方议复营之襄谏曰陛下当修人事奈何专信佛法天之降灾以示儆戒顾大兴工役是将以人力排天意也吕夷简平章国事宰相以下就其第议政事襄奏请罢之元昊纳款始自称兀卒既又译为吾祖襄以为慢侮甚矣夏竦罢枢密使韩琦范仲淹在位襄言陛下罢竦而用琦仲淹士大夫贺于朝庶民歌于路虽然臣切忧之天下之势譬犹病者陛下既得良医矣信任不疑非徒愈病而又寿民医虽良术不得尽用则病且自深矣保州卒作乱推懦兵十余辈为首恶杀之以求招抚襄曰天下兵百万苟无诛杀决行之令必开骄慢暴乱之源今州兵戕官吏闭城门不能讨从而招之岂不为四方笑乞将兵人城尽诛之诏从其议以母老求知福州改福建路转运使开古五塘溉民田奏减五代时丁口税之半复修起居注唐介击宰相触盛怒襄曰介诚狂愚然出于进忠必望全贷既贬春州又上疏以为此必死之谪得改英州温成后追册请勿立忌而罢监护园陵官进知制诰三御史论梁适解职襄不草制后每除授非当职辄封还之迁龙图阁直学士知开封府襄精吏事谈笑剖决破奸发隐吏不能欺以枢密直学士再知福州郡士周希孟陈烈陈襄

郑穆以行义着襄备礼招延诲诸生以经学俗重凶仪
亲亡或秘不举至破产饭僧下令禁止之徙知泉州距州二十里万安渡绝海而济往来
畏其险襄立石为梁其长三百六十丈至今赖焉又植
松七百里以庇道路召为翰林学士三司使较天下盈虚出入量力以制用划剔蠹弊簿
书纪纲纤悉皆可法英宗不豫皇太后听政为辅臣言
先帝既立皇子宦妾更加荧惑而近臣知名者亦然几败大事近已焚其章矣已而外人
遂云襄有论议帝闻而疑之会襄数谒告因命择人代
襄襄乞为杭州拜端明殿学士以往治平三年丁母忧明年卒年五十六赠吏部侍郎襄
工于书为当时第一仁宗尤爱之制元舅陇西王碑文
命书之及令书温成后父碑则曰此待诏职耳不奉诏干道中赐谥曰忠惠

△吕溱

吕溱字济叔扬州人进士第一通判亳州直集贤院同修起居注由知蕲楚舒三州
【按东都事略作出知苏州历楚舒二州】 复修起
居注侂智高寇岭南诏奏邸毋得辄报溱言一方有警使诸道闻之共得为备今欲人不知此何意也进知制诰又出知杭州入为翰林学士疏
论宰相陈执中奸邪仁宗还其疏溱曰以口舌论人是阴中大臣也愿出以示执中使得
自辨未几执中去溱亦以侍读学士知徐州徙成德军
时方开六塔河宰相主其议溱请罢之以答天戒溱与都转运使李参不相能还判流内
铨参劾其借官曲作酒以私货往河东贸易及违式受
馈赆事下大理议溱乃未尝受帝知其过轻但贬秩知加州御史以为未抵罪分司南京
【按东都事略作西京】 起知池州江甯府复集贤
院学士加龙图阁直学士知开封府时为京尹者比不称职溱精识过人辨讼立断豪恶
敛迹改枢密直学士提举醴泉观卒年五十五赠礼部
侍郎溱开敏善议论一时名辈皆推许然自贵重在杭州接宾客不过数语时目为七字
舍人云

△王素

王素字仲仪太尉旦季子也赐进士出身至屯田员外郎御史中丞孔道辅荐为侍
御史道辅贬出知鄂州仁宗思其贤擢知谏院素方壮
年遇事感发尝言今中外无名之费倍蓰于前请省其非急者适皇子生将进百僚以官
惠诸军以赏素曰宜留爵秩以赏战功储金缯以佐边
费议遂已京师旱素请帝祷于郊帝曰太史言月二日当雨今将以旦日出祷素曰知其
且雨而祷之应天不以诚明日诣醴泉观素曰醴泉之
近犹外朝耳岂惮暑不远出耶帝悚然更诏诣西太一宫驾还而雨王德用进二女子素
论之帝立命遣出擢天章阁待制淮南郡转运按察使

新置按察类多以苛为明素独不撻细故即有贪刻必绳治穷竟以故下吏爱而畏之改知渭州坐市木河东有扰民状降华州又夺职徙汝俄
悉还其故迁龙图阁直学士初原州蒋偕建议筑大虫巉堡役未具敌伺闲要击不得成偕惧来归死素曰若罪偕乃是堕敌计责偕使毕力自
效总管狄青曰偕往益败不可遣素曰偕败总管行总管败素即行矣青不敢复言偕卒城而还以枢密直学士知开封府出知定州成都府凡
为政务合人情蜀人纪其目号曰王公异断复知开封素以三公子少知名出入侍从将帅久颇鞅鞅厌倦剧烦御史纠其过出知许州治平初
夏人寇静边砦召拜端明殿学士复知渭州于是三镇泾原蕃夷故老皆欢贺比至敌解去拓渭西南城浚隍三周积粟支十年属羌奉土地来
献悉增募弓箭手行陈出入之法身自督训其居旧穿土为室寇至老幼多焚死为筑八堡使居之听散耕田里有警则聚尝宴堂上边民传寇
至惊入城诸将曰使敌人亦从而入将必为内应合拒勿内素曰若拒之东去关中必摇吾在此敌必不敢犯我此当有奸言乃下令敢称寇至
者斩有顺候骑从西来人传果妄诸将皆服其明换澶州观察使知成德军改青州观察使熙宁初还以学士知太原府汾河大溢素曰若坏平
晋遂灌州城矣亟命具舟楫筑堤以捍之一夕水骤至人赖以安入知通进银台司转工部尚书仍故职致仕以学士就第卒年六十七谥曰懿
敏子巩有隼才长于诗从苏轼游轼守滁州巩往访之与客游泗水登鼉山吹笛饮酒乘月而归轼待之于黄楼上谓巩曰李太白死世无此乐
三百年矣轼得罪巩亦窜宾州数岁得还豪气不少挫后历宗正丞以跌荡傲世每除官辄为言者所议故终不显

王靖

王震

王靖

靖字詹叔蚤孤自力于学好讲切天下利害以祖荫历通判阆州知滁州主管北京御史台契丹数遣横使来靖疏言彼利中国赐遗挟虚
声以济其欲宜有以折之又请复明经科加试贡士以策观其所学稍变声律之习擢利州路转运判官提点陕西刑狱乡户役于州县者优则
愿久留劳则欲亟去吏得权其迟速靖以一岁月遣代遂为令徙河东长子县贼杀人捕治十数辈不得实皆释去靖阅其牒曰此真盗也教吏
曲折讯囚果服罪为开封府推官曹濮盗害官吏久不获靖受诏督捕成擒者因言盗之不戢由大姓囊橐请并坐之着为令徙广南转运使熙
宁初广人讹言交趾且至老幼人保事闻中外以为忧神宗曰王靖在彼可无念即拜太

常少卿直昭文馆知广州居二年入为度支副使卒子古字敏仲第进士熙宁中为司农主簿使行淮浙赈旱菑究张若济狱劾转运使王廷老张靚失职皆罢之连提举四路常平王安礼欲用为太常丞神宗谓古好异论止以为博士加上仁宗英宗谥因升祔四后初议不发册古言发册之礼虽为祔庙节文而升祔之重乃由册而后显今既行升祔则礼不可废诏用竹册又定诸神祠封额爵号之序出为湖南转运判官提点淮东刑狱历工部吏部右司员外郎太府少卿奉使契丹异时北使所过凡供张悉贷于民古请出公钱为之民得不扰绍圣初迁户部侍郎详定役法与尚书蔡京多不合京言臣欲用元丰人额雇直而古乃用司马光法诏徙古兵部寻以集贤殿修撰为江淮发运使进宝文阁待制知广州言者论其常指平岁为凶年亡散邦财夺职知袁州徽宗立复拜户部侍郎迁尚书与御史中丞赵挺之偕领放欠挺之言古蠲除太多欲尽倾天下之财不可用遂改刑部攻不已以宝文阁直学士知成都堕崇宁党籍责衡州别驾安置温州复朝散郎寻卒

王震

震字子发以父任试铨优等赐及第上诸路学制神宗称其才以习学中书刑房公事遂为检正预修条例加馆阁校勘检正孔目吏房元丰官制行震与吴雍从辅臣执笔入记上语面授尚书右司员外郎使自书除目举朝荣之兼修市易敕帝谕之曰朝廷造法皆本先王之制推行非人故不能善后且以钱贷民有不能偿辄籍其家岂善政也宜计其负几何悉捐之震顿首奉诏进起居舍人使行西边还为中书舍人元佑初迁给事中御史王岩叟劾之以龙图阁待制知蔡州历五郡绍圣初复为给事中权吏部尚书拜龙图阁直学士知开封府震与章惇皆吕惠卿所荐而素不相能府奏狱空哲宗疑不实震谓惇抑己于是颍昌盖渐有讼许赂惇子弟震捕渐掠治颇得踪迹惇惧以狱付大理而徙震为枢密都承旨遂坐折狱滋蔓倾摇大臣夺职知岳州卒

△余靖

余靖字安道韶州曲江人举进士起家为赣县尉试书判拔萃改将作监丞知新建县迁秘书丞数上书论事建言班固汉书舛谬命与王洙并校司马迁范曄二史书奏擢集贤校理范仲淹贬饶州靖言仲淹以刺讥大臣重加谴谪倘其言未合圣虑在陛下听与不听耳安可以为罪乎陛下自亲政以来屡逐言事者恐钳天下口疏入落职监筠州酒税尹洙欧阳修亦以仲淹故相继贬逐靖由是益知名徙监泰州税知英州迁太常博士复为校理同知礼院庆历中仁宗锐意欲更天下弊事增谏官员以靖为

右正言时四方盗贼窃发州郡不能制靖言朝廷威制天下在赏罚今官吏弛事羣盜蜂起大臣齷齪守常不立法禁可为国家忧也请严捕贼赏罚及定为贼劫质亡失器甲除名追官之法司天言太白犯岁星又犯执法靖上疏请责躬修德以谢天变使契丹辞曰以所奏事书笏各举一字为目凡数十事帝命悉条奏进修起居注开宝寺灵感塔灾复上疏言闻尝诏取旧瘞舍利入禁中阅视道路传言舍利在内廷有光恠窃恐巧佞之人推为灵异惑乱视听再图营造今自西陲用兵国帑虚竭民亡储蓄陛下若勤劳罪己忧人之忧则四民安居海内蒙福如不恤民病广事浮费奉佛求福非天下所望舍利神灵一塔不能自卫为火所毁况藉其福以庇民哉尝论夏竦奸邪不可为枢密使王举正不才不宜在政府狄青武人使之独守渭州恐败边事张尧佐以修媛故除提点府界公事非政事之美且郭后之祸起于杨尚不可不监太常博士王翼西京治狱还赐五品服靖曰治狱而锡服外人不知必以为翼深文重法能希陛下意以取此宠所损非细事也尝有工部郎中吕觉以治狱赐对祈易章绶陛下谕之曰朕不欲因鞫囚与人恩泽觉退以告臣臣尝书之起居注陛下前日论觉是则今日赐翼非矣是非与夺之闲贵乎一体其说多见纳用会西鄙厌兵元昊请和议增岁赐靖言景德中契丹举国兴师直抵澶渊先帝北征渡河止捐金缯三十万与之今元昊战虽累胜皆出将帅轻敌易动之故数年选将练兵始知守战之备而锐意解仇所予至二十六万夫以景德之患近在封域之内而岁赐如彼今日之警远在边鄙之外而岁赐如此若元昊使还益有所许契丹闻之盗不生心无厌之求自此始矣傥移西而备北为祸更深但思和与不和若有后患则不必曲意俯徇以贻国羞擢知制诰元昊既归款朝廷欲加封册而契丹以兵临西境遣使言为中国讨贼请止毋和朝议难之会靖数言契丹挟诈不可轻许即遣靖往报而留夏国封策不发靖至契丹卒屈其议而还朝廷遂发夏册臣元昊西师既解严北边亦无事靖尝为契丹国语诗御史王平等劾靖失使者体出知吉州求侍养去改将作少监分司南京居曲江己而授左神武军大将军雅州刺史寿州兵马钤辖辞不就再迁卫尉卿知虔州丁父忧去依智高反邕州乘胜掠九郡以兵围广州就丧次起靖为秘书监知潭州改桂州诏以广南西路委靖经制智高西走邕州靖策其必结援交趾而胁诸峒以自固乃约李德政会兵击贼于邕州又募侬黄诸姓酋长皆縻以职使不与智高合既而朝廷遣狄青孙沔将兵共讨贼青却交趾援兵不用贼平就迁靖给事中又迁尚书工部侍郎初青兵未至前戒部将勿战靖迫钤辖陈曙出鬪

败走青至按军法斩曙及指使袁用等于坐靖瞿然起拜及诸将班师独留靖广西遣人入特磨道擒智高母子弟三人生致之阙下加集贤院学士徙知潭州又徙青州交趾蛮申绍泰寇邕州杀五巡检以靖安抚广西至则召交趾用事臣费嘉佑诘问之嘉佑至给以近边种落相侵报误犯官军愿悉推治还所掠及械罪人以自赎靖信之遣去嘉佑遂归不复出知广州官至工部尚书代归卒特赠刑部尚书谥曰襄

△彭思永

彭思永字季长庐陵人第进士知南海分宁县通判睦州台州大水败城人多溺往摄治焉尽葬死者民贫不能葺居为伐木以助之数月公私之舍皆具城筑高于前而坚亦如之知潮州常州入为侍御史论内降授官赏之弊谓斜封非盛世所当有仁宗深然之皇佑祖明堂前一日有传百姓【按姓字疑官字之误】皆进秩者思永言不宜滥恩以益侥幸时张尧佐已贵而犹觊执政王守忠已受宠而求旌节思永率同列言之或曰俟命出未晚也思永曰先事而言第得罪尔命一出不可止矣遂独抗疏言外戚秉政宦侍用权非社稷之福帝怒中丞郭劝谏官吴奎为之请乃以泛恩转司封员外郎而解台职为湖北转运使下溪蛮彭仕羲作乱先移书激骂辰州守守将讨之思永按部适至仕羲惧遣使迎谢寝其谋加直史馆为益州路转运使成都府吏盗公钱付狱已三岁思永摄府事甫一日即具狱民以楮券为市藏衣带中盗置刃于瓜捷取之鲜败者思永得一人诘之悉黥其党隶兵闲中使岁祠峨眉率留成都陪珍玩价直数百万钱悉出于民思永腴其三之一使怒去寻为户部副使擢天章阁待制河北都转运使知瀛州徙知江甯府治平中召为御史中丞濮王有称亲之议思永更上疏极论以为当尊为濮国大王祭告之辞则曰侄嗣皇帝书名昭告于皇伯父在王则极尊崇之道而于仁庙亦无所嫌英宗感其切至垂欲施行而中书持之甚力神宗即位御史蒋之奇纠欧阳修阴事思永以为首建濮议违典礼以犯众怒不宜更在政府诏问语所从来思永不肯对而极陈大臣专恣朋党乃出知黄州改太平州熙宁三年以户部侍郎致仕卒年七十一思永仁厚廉恕为儿时旦起就学得金钗于门外默坐其处须臾亡钗者来物色审之良是即付之始就举持数钏为资同举者过之出而玩或坠其一于袖闲众相为求索思永曰数止此耳客去举手揖钏坠于地众皆服其量居母丧窆甚乡人馈之无所受子卫亦孝谨以父老弃官家居十余年族里称之

△张存

张存字诚之冀州人举进士为安肃军判官天禧中诏选司以身言书判选士才得

二人存预其选改著作佐郎知大名府朝城县寇准为守异待之御史中丞王曙屡荐为殿中侍御史迁侍御史仁宗初亲政罢百官转对存请复之又言前者曹修古辈同忤旨废黜布衣林献可因上封事窜恶地恐自今忠直之言蔽而不达因历引周昌朱云辛庆忌辛毗事以开帝意历京东陕西河北转运使户部度支副使西边动兵以天章阁待制为陕西都转运使黄德和之诬刘平也存奏言不与敌接战自旦至暮杀伤相当因德和引却以致溃败方贼势甚张非平捕战其势必不沮延州孤垒非平解围其城必不守身既陷没不幸又为谗佞所困边臣自此无复死节矣朝廷采其说始遣文彦博按治由是平得直而德和诛元昊求款附议者犹执政讨之说存建言兵役不息生民疲弊敌既有悛心虽名号未正颇羈縻之迁龙图阁直学士知延州以母老惮行徙泽州还为待制踰年知成德军复学士契丹与元昊结昏阴谋相首尾聚兵塞上而求关南存言河北城久不治宜留意乃以为都运使尽城诸州入知开封府复使河北王则反坐失察降知汀州因壻李■〈易父〉之弟李教醉为妖言事夺职知池州又徙郴久之乃复职以吏部侍郎致仕凡十五年积迁礼部尚书存性孝友家居矜庄枣强河决势逼冀城或劝使他徙曰吾家众所望也苟轻举动使一州吏民何以自安卒年八十八谥恭安

△郑獬

郑獬字毅夫安州安陆人进士第一通判陈州入直集贤院度支判官修起居注知制诰英宗即位治永昭山陵悉用干兴制度獬言今国用空乏先帝节俭爱民盖出天性而山陵制度乃欲效干兴最盛之时独不伤俭德乎愿饬有司损其名数又言天子初即位郡国驰表称贺例官其人此出五代余习今庶官猥众充溢铨曹不须复行此恩以开侥幸皆不报又言陛下初临御所与共政者七八大臣而已焉能尽天下之聪明愿申诏中外许令尽言臣下进见访以得失必能有益治道帝嘉纳之时诏诸郡敦遣遗逸之士至则试之秘阁命以官颇有谬举者旋即废罢獬言愿复此科使豪俊无遗滞之叹出知荆南治平中大水求言獬上疏言今诏发天下忠义之士必有极其所蕴以荐诸朝宜选官置属掌所上章与两府近臣从容讲贯羣臣得而众事举此应天之实也还判三班院神宗初拜翰林学士朝廷议纳横山獬曰兵祸必起于此已而种谔取绥州獬言臣窃见手诏深戒边臣无得生事今乃特尊用变诈之士务为掩袭岂帝王大略哉谔擅兴当诛又请因谅祚告哀遣使立其嗣子识者韪之权发遣开封府民喻兴与妻谋杀一妇人獬不肯用按问新法为王安石

所恶以侍读学士知杭州御史中丞吕诲乞还之不听
未几徙青州方散青苗钱引疾祈闲提举鸿庆宫卒年五十一

△陈襄

陈襄字述古福州侯官人少孤能自立与陈烈周希孟郑穆谓之四先生举进士调浦城主簿摄令事每听讼必使数吏环立于前私谒者不得发老奸束手民有失物者捕偷儿至数辈相撑拄襄曰某庙钟能辨盗犯者扞之辄有声乃阴涂以墨而以帷蔽之群盗往扞独一人手无所污乃为盗者知河阳县始教民种稻富弼为郡守一见即礼遇之襄留意教化进县子弟于学弼为相荐为秘阁校理判祠部知常州运渠横遏震泽积水不得北入江为常苏二州病襄度渠之丈尺与民田步亩定其数授以浚法遂削望亭古堰水不复积入为开封府推官盐铁判官神宗立奉使契丹以设席小异于常不即坐契丹移檄疆吏坐出知明州明年同修起居注知谏院改侍御史知杂事论青苗法不便曰臣观制置司所议莫非引经以为言而其实则称贷以取利非圣世所宜行望贬斥王安石吕惠卿以谢天下又乞罢韩絳政府以杜大臣争利而进者且言韩维不当为中丞刘述范纯仁等无罪宜复官皆不听召试知制诰以言不行辞愿补外帝惜其去留修起居注踰年为知制诰寻直学士院安石益忌之撻其书诏小失出知陈州徙杭州以枢密直学士知通进银台司兼侍读判尚书都省卒年六十四赠给事中襄莅官所至必务兴学校平居存心以讲求民闲利病为急在经筵时神宗顾之甚厚尝访人材之可用者襄以司马光韩维吕公着苏颂范纯仁苏轼至于郑侠三十三人对帝不能尽用

△钱公辅

钱公辅字君倚常州武进人第进士甲科通判越州为集贤校理同判吏部南曹历开封府推官户部判官知明州衙前法以三等差次劳勤应格者听指酒场以自补富者足欲而贫者日困充募益鲜额有不足至役乡民破产不供费公辅取酒场官鬻之分轻重以给役者不复调民同修起居注进知制诰英宗即位陈治平十议大要言采民政分吏课择守宰置二府官属又作帝问一篇上之王畴为翰林学士未久擢副枢密公辅谓畴素望浅不草制帝以初政用大臣而公辅格诏谪为滁州团练使踰年起知广德军神宗立拜天章阁待制知邓州复知制诰入见帝劳苦之使录十议以进命知谏院王安石雅与之善既得志排异己者出滕甫郢州公辅数于帝前言甫不当去薛向更盐法安石主其议而公辅谓向当黜遂拂安石意罢谏职旋出知江甯府明年帝欲召还安石言其助小人

为异议不宜在左右但徙扬州以病改提举崇福观卒
年五十二

△孙洙

孙洙字巨源广陵人未冠擢进士再迁集贤校理知太常礼院治平中求贤以洙应
诏疏时弊要务十七事【按据李清撰墓志作论时政七事要务十五事】后多施行兼史馆检讨同知谏院王安石主新法多逐谏官御史
洙力求补外得知海州免役法行常平使者欲加敛缙
钱以取赢为功洙力争之方春旱发运使调民浚漕渠以通盐舸洙持之不可三上奏乞
止其役旱蝗为害致祷于胸山彻奠大雨蝗赴海死寻
干当三班院革其为欺奸甚者八事定为令同修起居注进知制诰先是百官迁叙出一
定之词建言羣臣进秩事理各异而同用一词苟从简
便非所以畅王言重命令也诏自今皆随等撰定元丰初兼直学士院擢翰林学士纔踰
月得病卒年四十九洙博闻强识明练典故出语皆成
章文词典丽有西汉之风

△丰稷

丰稷字相之明州鄞人登第为谷城令以廉明称知封邱县擢监察御史治参知政
事章惇请托事无所移挠出惇陈州徙著作佐郎吏部
员外郎提点利州成都路刑狱入为殿中侍御史上疏哲宗愿以洪范为元龟祖训为宝
鉴一动一言思所以为则于四海为法于千载刘奉世
册立夏国嗣子干顺而干顺来贺坤成节奉世遽出境稷劾之迁右司谏扬荆二王密令
蜀道织锦茵稷于正衙论曰二圣以俭先天下而宗王
僭侈官吏奉承皆宜纠之改国子司业起居舍人历太常少卿国子祭酒除刑部侍郎兼
侍讲元佑八年春多雪稷言嘉祥未臻沴气交作愿陛
下昭圣德祇天戒总正万事以消灾祲帝亲政召内侍居外者乐士宣等数人稷言陛下
初亲万几未闻登进忠良而首召近幸恐上累大德以
集贤院学士知颍州江甯府拜吏部侍郎又出知河南府加龙图阁待制章惇欲困以道
路连岁亟徙六州徽宗立以左谏议大夫召道徐御史
中丞入对论蔡京奸状又乞辨宣仁诬谤之祸且言史臣以王安石日录乱神宗实录今
修哲宗实录愿申饬之时宦官渐盛稷怀唐书仇士良
传读于帝前曾布将相稷约其僚共论之俄转工部尚书兼侍读布遂相稷谢表有佞臣
之语帝问为谁对曰曾布也陛下斥之外郡则天下事
定矣改礼部哲宗升祔讲功臣配享稷以为司马光吕公着或谓二人常得罪不可用稷
曰止论其有功于时尔禁内织锦缘宫帘为地衣稷言
仁宗衾褥用黄絁服御用缣纒宜守家法诏罢之稷尽言守正帝待之厚而积忤贵近不

得留竟以枢密直学士守越蔡京得政修故怨贬海州
团练副使道州别驾安置台州除名徙建州稍复朝散郎卒年七十五建炎中追复学士
谥曰清敏稷三任言贵每草疏必密室子弟亦不得见
退多焚藁未尝以时政语人所荐士如张庭坚马涓陈瓘陈师锡邹浩蔡肇皆知名当世
云

△吕诲

吕诲字献可开封人祖端相太宗真宗诲性纯厚家居力学不妄与人交进士登第
由屯田员外郎为殿中侍御史时廷臣多上章讦人罪
诲言台谏官许风闻言事盖欲广采纳以补阙政苟非职分是为侵官今乃诋斥平生暴
扬暧昧刻薄之态寢以成风请下诏惩革枢密副程戡
结贵幸致位政地诲疏其过以宣徽使判延州复上言戡以非才罢不宜更委边任宣徽
使地高位重非戡所当得兗国公主簿其夫夜开禁门
入诉诲请并劾阁吏且治主第宦者罪悉逐之御药供奉官四人遥领团练使御前忠佐
当汰复留诲劾枢密使宋庠徇私紊法诏罢庠而用陈
升之为副使诲又论之升之既去诲亦出知江州上疏请蚤建皇嗣曰窃闻中外臣僚以
圣嗣未立屡有密疏请择宗人唯陛下思忠言奋独断
以遏未然之乱又闻太史奏彗躔心宿请备西北按天文志心为天王正位前星为太子
直则失势明则见祥今既直且暗而妖彗乘之恐咎证
不独在西北也自夏及秋雨淫地震阴盛之沴固有冥符近者宗室之中讹言事露流传
四方人心骇惑窥觐之志可不防其渐哉愿为社稷宗
庙计审择亲贤稽合天意仁宗以诲章付中书韩琦由此定义召为侍御史改同知谏院
英宗不豫诲请皇太后日命大臣一员与淮阳王视进
乐饵都知任守忠用事久帝之立非守忠意数闲谍东朝播为恶言内外汹惧海上两宫
书开陈大义词旨深切帝疾小愈屡言乞亲万几太后
归政诲言于帝曰后辅佐先帝历年阅天下事多矣事之大者宜关白咨访然后行示弗
敢专遂论守忠平生罪恶并其党史昭锡窜之南方内
臣王昭明等为陕西四路钤辖专主蕃部诲言自唐以来举兵不利未有不自监军者今
走马承受官品至卑一路已不胜其害况钤辖乎卒罢
之治平二年迁兵部员外郎兼侍御史知杂事上言台谏者人主之耳目旧三院御史常
有二十员而后益衰减盖执政者不欲主上闻中外之
阙失今台阙中丞御史五员惟三人在职封章十上报闻者八九谏官二人一他迁一出
使言路壅塞未有如今日之甚者帝览奏即命邵必知
谏院于是濮议起侍从请称王为皇伯中书不以为然诲引义固争七上章乞解台职遂
劾宰相韩琦不忠愿黜居外藩以慰士谕又与御史范

纯仁吕大防共劾欧阳修首开邪议以枉道说人主以近利负先帝陷陛下于过举皆不报已而诏濮王称亲海上还诰敕居家待罪乃下迁海
工部员外郎知蕲州神宗立徙晋州 【按司马光撰海墓志徙晋州在英宗时与宋史本传互异】 加集贤殿修撰知河中府召为盐铁副使
擢天章阁待制复知谏院拜御史中丞初中旨下京东买金数万两又令广东市真珠传云将备宫中十合用度海言陛下春秋富盛然聪明睿
知以天下为心必不留神于此愿亟罢之王安石执政时多谓得人海言其不通时事大用之则非所宜上疏劾安石曰大奸似忠大佞似信安
石外示朴诚中藏巧诈陛下悦其才辨而委任之安石初无远略惟务改作立异罔上欺下文言饰非误天下苍生必斯人也如久居庙堂必无
安静之理帝方注倚安石还其章海求去乃出知邓州海之将有言也司马光劝止之海曰安石虽有时名然好执偏见轻信奸回喜人佞已听
其言则美施于用则疏置诸宰辅天下必受其祸且上新嗣位所与朝夕图议者二三执政而已苟非其人将败国事此乃心腹之疾救之惟恐
不逮顾可缓耶海既斥安石益横光由是服海之先见自以为不及也明年改知河南命未下而寝疾矣旋提举崇福宫以疾表求致仕曰臣本
无宿疾医者用术乖方妄投汤剂率任情意差之指下祸及四肢一身之微固无足恤奈九族之托何盖以身疾谕朝政也海三居言责皆以弹
奏大臣而去一时推其鲠直居病困犹旦夕愤叹以天下事为忧既革司马光往省之至则目已瞑闻光哭蹙然而起张目强视曰天下事尚可
为君实勉之遂卒年五十八海内闻者痛惜之诏赠通议大夫以其子由庚为太常寺太祝

△刘述

刘述字孝叔湖州人举进士为御史台主簿知温耀真三州提点江西刑狱累官都官员外郎知审官院胡宿言其沈静有守特迁兵部员
外郎改荆湖南北京西路转运使再以覃恩迁刑部郎中神宗立召为侍御史知杂事帝知其久次授吏部郎中尝言去奢当自后宫始章辟光
宜诛高居简宜黜张方平不当参大政王拱辰不当除宣徽使皆不报王安石参知政事帝下诏专令中丞举御史不限官高卑赵抃争之弗得
述言旧制举御史官众议佥举则各务尽心不容有偏蔽私爱之患今专委中丞则爱憎在一己万一非其人将受权臣属托自立党援不附己
者得以中伤媒孽诬陷其弊不一愿收还前旨弗听述兼判刑部安石争谋杀刑名述不以为是及敕下述封还中书奏执不已安石白帝诏开
封推官王克臣劾述罪于是述率御史刘琦钱顛共上疏曰安石专肆胸臆轻易宪度无

忌憚之心陛下置安石政府必欲致時如唐虞而反操
管商權詐之術開局設官用八人者分行天下驚駭物聽動搖人心去年因許遵文過飾
非妄議自首按問之法安石任一偏之見改立新議以
害天下大公章辟光獻岐邨遷外之說疏閑骨肉罪不容誅呂誨等連章論安石獨進瞽
言熒惑聖聽先朝所立制度乃欲事事更張廢而不用
言行乖戾一至于此剛狠自任則又甚焉願早罷逐以慰安天下元元之心曾公亮位居
丞弼不能竭忠許國反有畏避之意趙抃則括囊拱手
但務依違大臣事君豈當如是疏上安石奏先貶琦顛監處衢州鹽務司馬光疏言琦顛
所坐不過疏直乞還其本資以靖羣聽不報開封獄具
述三問不承安石欲置之獄光又與范純仁爭之乃議貶為通判帝不許以知江州踰歲
提舉崇禧觀卒年七十二紹興初贈秘閣修撰

△劉琦

劉琦字公玉宣城人以都官員外郎通判歙州召為侍御史建言自城綏州數致羌
寇宜棄之浙西開漕渠役甚小使者張大其事以功遷
官言者論其非詔琦就劾官吏人人惴恐琦但按首謀二人而已既貶通判鄧州卒年六
十一

△錢顛

錢顛字安道常州無錫人初為寧海軍節度推官守孫沔用威嚴為治屬吏奔走聽
命顛當官而行無所容撓遇不可必爭之由是獨見器
重知贛烏程二縣皆以治行聞治平末以金部員外郎為殿中侍御史里行許遵議謀殺
案問刑名未定而入判大理顛以為一人偏詞不可以
汨天下之法遵所見迂執不可以當刑法之任不從二年而貶將出台于眾中責同列孫
昌齡曰平日士大夫未嘗知君名徒以昔官金陵媚事
王安石宛轉荐君得為御史亦當少思報國奈何專欲附會以求美官顛今當遠竄君自
謂得策耶即拂衣上馬去后自衢徙秀州家貧母老至
丐貸親舊以給朝晡而怡然無適官之色蘇軾遺以詩有烏府先生鐵作肝之句世因目
為鐵肝御史卒年五十三

△鄭俠

鄭俠字介夫福州福清人治平中隨父官江寧閉戶苦學王安石知其名稱獎之進
士高第調光州司法參軍安石居政府凡所施行民閑
不以為便光有疑獄俠獻議傳奏安石悉如其請俠感為知己秩滿入都時初行試法之
令安石問以所聞對曰青苗免役保甲市易數事與邊
鄙用兵在俠心不能無區區也安石不答俠退不復見但數以書言法之為民害者久之
監安上門安石雖不悅猶使其子雱來語以試法方置

修经局又欲辟为检讨更令其客黎东美谕意侠曰读书无几不足以辱检讨所以来求执经相君门下耳相君发言持论无非以官爵为先所以待士者亦浅矣果欲援侠而成就之取其所献利民便物之事行其一二使进而无愧不亦善乎是时免役法出民商咸以为苦虽负水舍发担粥提茶之属非纳钱者不得贩鬻税务索市利钱其末重于本侠因东美列其事未几诏小夫裨贩者免征商之重者十损其七他皆无所行是时自熙宁六年七月至七年三月不雨人无生意东北流民羸瘠愁苦身无完衣并城民买麻■〈米凡〉麦麸合米为糜或茹木实草根至身被锁械而负瓦楬木卖以偿官累累不绝侠知安石不可谏悉绘所见为图奏疏诣合门不纳乃假称密急发马递上之银台司其略云去年大蝗秋冬亢旱麦苗焦枯不种不入羣情惧死方春斩伐竭泽而渔草木鱼鳖亦莫生遂灾患之来莫之或御愿陛下开仓廩振贫乏取有司掊克不道之政一切罢去冀下召和气上应天心延万姓垂死之命疏奏神宗反复观图寝不能寐翌日命开封体放免行钱三司察市易司农发常平仓三卫具熙河所用兵诸路上民物流散之故青苗免役权息追呼方田保甲并罢凡十有八事民闲讙呼相贺又下责躬诏求言越三日大雨辅臣入贺帝示以侠所进图状且责之安石上章求去羣奸切齿遂以侠付御史治其擅发马递罪吕惠卿邓管言于帝曰陛下成此美政天下方被其赐一旦用狂夫之言罢废殆尽岂不惜哉相与环泣于帝前于是新法一切如故安石去惠卿执政侠又上疏论之仍取唐魏征姚崇宋璟李林甫卢杞传为两轴题曰正直君子邪曲小人事业图并言禁中有被甲登殿等事惠卿奏为谤讪编管汀州御史台吏杨忠信取名臣谏疏授侠曰以此为正人助惠卿暴其事且嗾御史张琥并劾冯京为党与侠行至太康还对狱成惠卿议致之死帝曰侠所言非为身也忠诚亦可嘉岂宜深罪但徙英州哲宗立始得归苏轼孙觉表言之以为泉州教授元符七年再窜于英【按西塘集侠自英州放还为泉州教授复改泉州录事参军章惇用事乃再窜于英】徽宗立赦之仍还故官又为蔡京所夺自是不复出布衣粝食屏处田野然一言一话未尝忘君宣和元年卒年七十九绍熙初诏赠朝奉郎官其孙嘉正为山阴尉

△何郟

何郟字圣从本陵州人徙成都第进士由太常博士为监察御史转殿中侍御史言事无所避王拱辰罢三司使守亳己而留经筵郟乞正其营求之罪石介死枢密使夏竦谗其诈朝廷下京东体实郟与张升极陈竦奸状事得寝杨怀敏以卫卒之乱犹为副都知郟又与升及鱼周

询论之仁宗召谕云怀敏实先觉变宜有所宽假郟争辨尤力卒出之夏竦倡言张贵妃之功谏官王贇遂言贼根本起于皇后合请究其事冀
摇动中宫而阴为妃地帝以语郟郟曰此奸人之谋乃止不究竦负罪不去郟等奏出知河南时诏羣臣陈左右朋邪中外险诈久而无所行郟
请阅实其是否因言不可以一臣诈而疑众臣一士诈而疑众士君臣交疑欲天下无否塞之患不可得矣都知任守忠以修祭器劳迁景福殿
使给两使留后奉郟曰旧制内臣遥领止于廉察今虽不授留后而先给其禄既得其禄必得其官若又从之则何求不可既又诏许如正班守
忠移合门欲缀本品坐宴郟又言祖宗之制未有内臣坐殿上者忠闻之不敢赴知杂御史阙帝以郟不阿权势越次用之以母老求西归加直
龙图阁知汉州疏言张尧佐缘后宫亲叨窃非据外庭窃议将处以二府臣谓莫若富贵尧佐而不假之以权如李用和可也其后卒罢尧佐宣
徽之命进集贤殿修撰知梓州擢天章阁待制还判银台司时封驳之职废郟乞准故事凡诏敕并由门下从之唐介出荆南敕过门下郟封还
之介复留谏院迁龙图阁直学士为河东都转运使故相梁适帅太原病不能事内臣苏安静钤辖兵马怙宠不法皆劾奏之历知永兴河南治
平末再知梓州居三年老而病犹乞进用神宗薄之诏提举成都玉局观从臣外祠自此始遂以尚书右丞致仕卒年六十九始郟为御史有直
声为仁宗所知晚节颇依违在梓州因地震言阴盛臣强以讥切韩琦又乞召还王陶以迎合上意由是声名损于御史时云 【按郟因地震
讥切韩琦及乞召还王陶系治平中再知梓州时事宋史本传叙于郟知汉州以前兹移置传末稍为增辑】

△吴中复

吴中复字仲庶兴国永兴人父仲举仕李煜为池阳令中复进士及第知峨眉县廉于居官通判潭州御史中丞孙抃荐为监察御史迁殿
中侍御史弹宰相梁适仁宗问中复唐天宝后治乱之分中复历引姚宋九龄林甫国忠用舍以对适罢中复亦通判虔州未至复还台富弼主
李仲昌开六塔河内臣刘恢密告所断冈与国姓上名同贾昌朝阴助之欲以摇弼诏中复往治较其名乃赵征村亦无冈势狱以故得止又弹
宰相刘沆沆罢改右司谏同知谏院迁御史知杂事户部副使擢天章阁待制知泽州 【按东都事略作知潭州】 瀛州移河东都转运使进
龙图阁直学士知江甯府邮兵苦巡辖官苛刻絜而鞭之狱具法不至死中复以便宜戮首恶流其余入奏为令历成德军成都府永兴军河北
行青苗法使者至将先下州县中复檄之曰敛散自有期今先事扰之何也拒不听且以

报安抚司韩琦方疏谏青苗录其语以上熙宁并省郡
邑以永康为县中复言永康控威茂不可废其后竟复之关内大旱请加振恤执政恶之
遣使往视谓为不实削一阶提举玉隆观起知荆南坐
过用公使酒免卒年六十八从孙择仁

吴择仁

吴择仁

择仁字智夫以父任为开封雍邱主簿元佑中金水河堤坏十六县皆选属庀役得
诣朝堂白事宰相范纯仁犹异之建中靖国初畿内饥
多盗以择仁知大鹿县盗相戒不入境中贵人谭稹奴犯法按致于理稹造譖徽宗召户
部郎中宋乔年往鞠择仁着衣冠坐庀下乔年虑囚摘
隐剔抉帑庾出入不能得毫毛罪乃归传舍择仁往谒乔年迎笑曰所以来为察君罪顾
乃得一奇士吾今荐君矣居数日召诣阙方有青唐擢
熙河路转运判官即以直秘阁为副使从招讨使王厚领兵深入克兰廓城栅十三加龙
图进集贤殿修撰为京畿都转运使郑州城恶受命更
筑之坚致如削铁遂拜户部侍郎兼知闰封府卖珠人居民货久不返度事急匿宦官杨
戩第择仁迹取之窜于远戩中以事出为显谟阁直学
士知熙州府永兴军走马承受蓝从熙言其擅改茶法夺职免再以徽猷阁待制领江淮
发运还直学士知渭州以病提举崇福宫卒年六十六

△陈荐

陈荐字彦升邢州沙河人举进士为华阳尉从韩琦定州河东幕府琦辅政荐为秘
阁校理判登闻检院知太常礼院英宗诸王出合选为
记室参军直集贤院颍王为皇太子加右谕德神宗即位拜天章阁待制进知制诰转知
谏院薛向首谋取横山功不成荐请以汉王恢之罪罪
之除龙图阁直学士河北都转运使河决枣强水官议于恩冀深瀛之闲筑堤三百六十
里期一月就功役丁夫八万荐曰河未能为数州害民
力方困愿以岁月为之还判流内铨太常寺议学校贡举法请会三年贡士数均之诸路
计口察孝廉如汉制权主管御史台言李定匿所生母
丧不宜为御史罢台事又以议典礼不合出知蔡州召为宝文阁学士兼侍读进资政殿
学士屡求退以为本州岛命两省燕饯资善堂擢其子厚
御史台主簿未几提举崇福宫卒年六十九赠光禄大夫

△王猎

王猎字得之长垣人累应进士不第庆历用兵诏求遗逸范仲淹荐之得出身为永
兴蓝田主簿府使之掌学诸生有犯法者猎自责数以
为教之不至徙林虑令县依山俗以搜田为生不知学猎立孔子庙择秀民诲之汉杜乔

墓在境中往奠谒建祠其旁吏民爱信共目为清长官
入为吴王潭王宫教授睦亲广亲宅讲书诸王侍讲凡在京藩十二年英宗入为皇太子
即拜说书及即位拜天章阁待制兼侍讲方议濮王称
以问猎猎不可曰臣荷皇恩厚不敢以非礼名号加于王所以报也帝自是不复议以疾
请谢事不许神宗立进龙图阁直学士求知襄州未行
改滑州自工部郎中为本曹侍郎后八年卒年八十

△孙思恭

孙思恭字彦先登州人擢第后即遭父丧不肯复从官二十年闲纔三书吏考为宛
邱令转运使以水灾时调春夫争弗得乃弃官去吴奎
荐其学行补国子直讲加秘阁校理事神宗藩邸为说书又为侍讲直集贤院以居中都
久力请补外王奏留之及即位擢天章阁待制思恭性
不忤物犯而不校笃于事上有所见必密疏以闻帝亦闲访以政欧阳修初不知思恭修
出政府思恭尽力救解出知江甯府邓州以疾移单州
管干南京留司御史台卒年六十一思恭精关氏易尤妙于大衍尝修天文院浑仪着尧
年至熙甯长历近世历数之学未有能及之者

△周孟阳

周孟阳字春卿其先成都人徙海陵第进士为潭王宫教授诸王府记室英宗居环
列以其质厚礼重之从容陈古事以讽英宗及为皇子
坚卧不出孟阳劝之曰天子知太尉贤乃发德音何为坚拒如此设固辞不拜使人别
有所奉遂得燕安无患乎帝意乃决及即位命为皇子
位说书以尝侍藩邸固辞加直秘阁同知太常礼院最后召至隆儒殿且大用孟阳称他
人使代乃迁集贤殿修撰同判太常寺兼侍读神宗初
拜天章阁待制卒年六十九

△齐恢

齐恢字熙业蒲阴人唐宰相映之裔也第进士历通判陈州提点成都府路刑狱三
年徙河东凡公帑格外馈饷之物一无所受单车而东
入为户部判官神宗出阁精简宫僚韩琦荐其贤以直昭文馆为颖王府翊善进太子左
谕德帝即位拜天章阁待制知通进银台司出知相州
召知审官西院纠察在京刑狱卒年六十六恢居乡里恂恂称君子临政府明白简约不
苛扰所至人爱之帝念旧僚自谏议大夫特赠工部侍
郎

△杨绘

杨绘字元素绵竹人进士上第通判荆南以集贤校理为开封推官遇事迎刃而解
仁宗爱其才欲超真侍从执政见其年少不用以母老

请出知眉州徙兴元府在郡狱无系囚神宗立召修起居注知制诰知谏院诏遣内侍王中正李舜举等使陕西绘言陛下新即位天下拭目以观初政馆阁台省之士不之遣独遣中人乎向传范安抚京东西路绘请易之以杜外戚干进之渐曾公亮请以其子判登闻鼓院用所厚曾巩为史官绘争曰公亮持国名器视如己物帝为寝其命绘亦解谏职改兼侍读绘固辞滕甫言于帝帝曰绘不畏强御朕一见许其忠荃今日之除盖难与宰相并立于轻重之闲姑令少避尔绘以谏官不得其言则去经筵非姑息之地卒不拜未阅月复知谏院擢翰林学士为御史中丞时安石用事贤士多谢去绘言老成之人不可不惜当今旧臣多引疾求去陛下可不思其故乎又言方今以经术取士独不用春秋宜令学者以三传解经免役法行绘陈十害安石使曾布疏其说诏绘分析固执而议遂罢为侍读学士知亳州历应天府杭州再为翰林学士议者欲加孔子帝号绘以为非礼又言不宜用辽历改置闰悉从之绘常荐属吏王永年御史蔡承禧言其私通馈赂坐贬荆南节度副使分司南京改提举太平观起知兴国军元佑初复天章阁待制再知杭州卒年六十二绘为吏敏强主爱利而受性疏旷讫以是见废斥然表里洞达一出于诚为范祖禹所咨重

△刘庠

刘庠字希道彭城人八岁能诗蔡齐妻以子用齐遗奏补将作监主簿复中进士第为高密广平院教授英宗求直言庠上书论时事除监察御史里行日食甫数日苑中张具待幸庠言非所以祈天戒诏罢之会圣宫修仁宗神御殿甚宏丽庠言天子之孝在继先志隆大业不在宗庙之靡宜损其制以昭先帝俭德奉宸库被盗治守藏吏庠言皇城几察厉禁实近侍主之当并按仁宗外家李珣犯销金法庠奏言法行当自贵近始帝不豫储嗣未正庠疏言颍王长且贤宜亟立使日侍禁中阅四方章奏帝皆行之神宗立迁殿中侍御史为右司谏言中国御戎之策守信为上昔元昊之叛五来五得志海内为之困弊今莫若示大信舍近功为国家长利奉使契丹以英宗祥祭曰丐免晏契丹义而听之除集贤修撰河东转运使庠计一路之产铁利为饶请复旧冶鼓铸通隰州盐矾博易以济用又请募民入粟塞下豫为足食进天章阁待制河北都转运使契丹侵霸州土场或言河北不可不备庠上五策料其必不动已而果然大河东流议者欲徙而北内侍程昉希功请益兵济役庠请迟以岁月徐观其势而顺导之朝廷是其议移知真定府又为河东都转运使召知开封府王安石欲见之竟下往奏论新法神宗谕之曰奈何不

与大臣协心济治乎庠曰臣知事陛下不敢附安石会与蔡确争廷参礼遂以为龙图阁直学士知太原府请复宪州募民子弟剽锐工技击者籍为勇敢仿汉谪戍法贯流以下罪徙实河外契丹建牙云中遣骑涉内地边吏执之契丹檄取纷然又遣使议强事众疑其造兵端欲大为备庠奏言云朔岁俭军无见粮契丹张形示强造端首祸宜先谕以理然后饬兵观衅帝嘉使者辞顺讫以黄嵬山分水岭立新疆母丧服终知成都府乞禁西山六州与汉人婚姻勿蹈吐蕃取维州之害徙泰州坐失举降知虢州移江宁府滁州徙永兴军时西征无功关内骚动庠过关力言虚内事外恐摇根本帝感纳其忠元佑初加枢密直学士知渭州卒年六十四卒后苏颂论庠治平建储之功诏褒录其子

△朱京

朱京字世昌南丰人父轼有隐德京登进士甲科教授亳州应天府入为太学录神宗数召见论事擢监察御史时中丞及同僚多罢去京抗疏曰御史假之则重略之则轻今耳目之官屡进屡却则言者不若静默为贤直者不若柔从为智偷安取容虽得此百数亦何益于国耶帝劳之曰昨览奏疏所补多矣见者目为真御史未几论大臣除拟有爱憎之私中书言其失实谪监兴国军盐税厯太常博士湖北京西江东转运判官提点淮西刑狱司封员外郎元符初迁国子司业京在元佑时尝为幸太学颂或摘其语有及先朝者京亦固辞不拜徽宗初立复命之踰月而卒

钦定续通志卷三百四十四

●钦定续通志卷三百四十五 列传一百四十五

列传

宋 【四十九】

○宋四十九

蔚昭敏 高化 周美 孟元 刘谦 赵振 范恪

马怀德 向宝 石普 张孜

李允则 张亢【奎】 刘涣【沪】 赵滋

蔚昭敏

高化

周美

孟元

刘谦

赵振

范恪

马怀德

向宝

石普

张孜

李允则

张亢

刘涣

赵滋

△蔚昭敏

蔚昭敏字仲明开封祥符人父兴从太宗平太原真宗为襄王昭敏自东班殿侍选隶襄王府帝即位授西头供奉官累迁崇仪使冀贝行营兵马都监契丹以五千骑突至燕州城南昭敏帅部兵与战败之得其器甲咸平四年领顺州刺史定州行营钤辖兼押大阵又为镇定高阳关三路先锋契丹入寇帝北巡至大名契丹退趋莫州昭敏与范廷召追至莫州东三十里斩首万余级擒生口甚众拜唐州团练使累迁至殿前都指挥使保静军节度使卒赠侍中

△高化

高化字仲熙真定人少沈勇有力学击剑善射契丹犯河北应募转饷飞狐口杨业留戏下使捕贼酋大鹏翼获之会契丹又犯真定乃辞业还家从州将入京师遂隶禁军选为襄王牵■〈革龙〉官王尹京命巡内外八厢积获奸盗甚众一日王趋急召出府门马惊堕化掖之而起王曰微尔吾几殆益亲信之真宗即位擢御龙弩直双员都头累迁御龙骨朵直都虞候干兴初授天武右第二军都指挥使荣州刺史迁天武右厢都指挥使蜀州团练使天圣六年夏大雨命护汴堤夜驰至城西堤欲坏督守兵负士不能过时夏守恩方典军积材木城隅化尽取以塞堤乃得无患仁宗嘉之进神龙卫四厢都指挥使袭州防御使为鄜延路马步军副都总管徙泾原路权知渭州迁捧日天武四厢都指挥使发兵袭明珠族不利降滑州总管改兴州防御使真定路副都总管徙高阳关路修护章惠太后园陵累拜殿前副都指挥使历建武军节度使以老辞管军诏入朝化又固请改武安军节度使知沧州未行改相州部有大狱已具皆当论死化疑之遣移讯果出无罪者三人以右屯卫上将军致仕卒年八十赠太尉谥曰恭庄化谨质少过馭军有法虽起身行伍然颇知民事焉

△周美

周美字之纯灵州回乐人少隶朔方军以材武称归京师天子召见隶禁军常令宿卫天圣初德明部落寇平凉方渠美以军候戍边与州将追战破之于九井原乌仑河累迁天武都虞候天昊反陕西用兵经略使夏竦荐其材擢供备库使延州兵马都监夏人既破金明诸砦美请于经略使范仲淹曰夏人新得志其势必复来金明当边冲今不亟完将遂失之仲淹因属美复城如故数日贼果来其众数万薄金明阵于延安城北三十里美领众二千力战抵暮援兵不至乃徙军山北多设疑兵夏人望见以为救至即引去既而复出艾蒿砦遂至郭北平夜鬪不解美率众使人持一炬从闲道上山益张旗帜四面大噪贼惧走获牛羊橐駝铠甲数千计遂募兵筑万安城而还敌复寇金明美引兵由虞家堡并北山而下敌即引却迁文思使徙知保定军经略使庞籍表留之改东路都巡检使败敌于金汤城焚其族部二十一元昊大入据承平砦诸将会兵议攻讨洛苑副使种世衡请赍三日粮直捣敌穴美曰彼知吾来必设伏待我不如闲道掩其不意世衡不听美独以西兵出芙蓉谷【按长编作以兵西出芙蓉谷】大破敌世衡等果无功未几敌复略土埕砦美迎击于野家店追北至拓跋谷以功迁右骍使军还筑栅于葱梅官道谷以据敌路令士卒益种营田岁收谷六千斛复率众繇厅子部西济大理河屠扎斡多叶二百帐焚其积聚以归庞籍仲淹交荐之除鄜延路兵马都监迁贺州刺史又破敌于无定河乘胜至绥州杀其酋豪因城龙口平砦敌以精骑数千来袭美从百余骑驰击破之加本路钤辖遂为副总管迁龙神卫四厢都指挥使通州刺史进捧日天武西厢都指挥使陵州团练使庆历中又城清水安定黑水佛堂北横山干谷土明柳谷雕巢卢儿原安砦十一堡安定之役谍报敌数万将大至经略使遣管句机宜楚建中分诸将兵趣城黑水以待诸将惮敌且至不肯与兵美曰兵尝以寡击众何自怯也卒以兵二千与建中而敌亦引去每边书至诸将各择便利独美未尝辞难然所向辄克诸将以此服之愿侍卫亲军马军殿前都虞候眉州防御使步军副都指挥使遂州观察使鄜延副都总管召还授耀州观察使又进马军副都指挥使卒赠忠武军节度使谥忠毅自陕西用兵诸将多不利美前后十余战平族帐二百焚二十一招种落内附者十一族复城堡甚多在军中所得禄赐多分其戏下有余悉飧劳之及死家无余资子蚤卒以孙永清为子官至引进副使【按宋史此下有阎守泰传无事迹足录今从删】

△孟元

孟元字善长洺州人少隶禁军以挽强选补殿侍累迁散都头班指挥使擢如京使并代州兵马都监改钤辖徙高阳关路又徙真定路王则据贝州反元赴城下攻战被数十创又中机石坠濠中既出战愈力更募死士由永济渠穴地以进贼平改右骠驎使徙大名府路钤辖河朔饥权知沧州民鬻盐为生岁荒盐多不售民无以自给元度军食有余悉用易盐繇是民不转徙御史中丞郭劝言其贝州功而赏未当乃擢普州刺史迁宫苑使专管句麟府军马事护筑永宁堡敌不敢动为龙神卫四厢都指挥使忠州团练使高阳关马步总管迁天武捧日四厢都指挥使又迁步军都虞候眉州防御使并代路副都总管判京兆贾昌朝奏为大名府路副都总管徙定州路迁马军都虞候徙鄜延路卒赠遂州观察使

△刘谦

刘谦字汉宗开封人少补卫士数迁至捧日右厢都指挥使领嘉州团练使兼京城巡检元昊反改博州团练使环庆路马步军总管兼知邠州谦不读书然鬪讼曲直皆区处当理前守者多强市民物以饰厨传谦独无所挠夏竦奏为泾原路总管徙知泾州未行会贼寇镇戎军谦引兵深入贼境破其聚落而还以功擢龙神卫四厢都指挥使象州防御使暴疾卒赠永清军节度使观察留后

△赵振

赵振字仲威雄州归信人景德中从石普于顺安军获契丹阵图授三班借职为隰州兵马监押高平蛮叛徙湖北都巡检使兼制置南路以南方暑湿弓弩不利别创小矢激三百步中辄洞穿蛮遂骇散迁庆州沿边都巡检使时金汤李钦白豹神木玛尔纲罗卜藏三族尤悍振募降羌啖以利令相攻破十余堡钦等诣振自归振为置酒先酹取细仗围财数分植百步外共射钦等百发不中振十矢皆贯钦等皆惊誓不敢复犯明年泾原属羌和斯布格等叛围平远砦都监赵士龙战没振出别道力战抵砦夺取水泉率敢死士破围贼走追斩数千级徙泾原都监厯知顺安保安广信军霸州知环州累迁象州防御使元昊将反为金银冠佩隐饰甲骑遗属羌振潜以金帛诱取之以破其势告邻部俾以环为法不听于是东茭金明万刘诸族胜兵数万悉为贼所有及刘平等皆败于三川口延州几殆惟环庆无患自本路马步军副都总管擢龙神卫四厢都指挥使鄜延路副都总管知延州寻改捧日天武四厢振谓将吏曰今贼以我夷伤必乘胜以进势宜固守尚虑诸城不能皆如吾谋苟延州弗支则陕西未可测此天下安危之机也未几贼寇塞门砦振有兵几八千被围五

月才遣百余人赴之砮遂陷坐拥兵不救贬白州团练使知絳州未行会延德继元家复诉于朝敕御史方偕就劾振法当斩再贬太子左清道率府率潭州安置踰年复右武卫将军惠州团练使并代路兵马钤辖就迁副总管祁州团练使元昊既破丰州将袭近砮振出麟州深柏堰击破之兼领岚宪六州军事河外饥振设法通砮外商得米数十万斛军民以济进博州防御使改解州致仕复起为左神武军大将军卒子珣瑜皆工骑射珣年十六仁宗召试便殿授三班借职景佑中自殿直进合门祇候除濠州兵马都监作聚米图经五卷又上五阵图兵事十余篇以荐为缘边巡检使擢通事舍人招讨都监珣辞都监授兵万人居泾原兼治龙竿城马展达鲁百余帐处近塞为暴珣白府引兵二万袭贼俘获数千计静边将刘沪殿后为贼所掩珣登阪望见从骑数百复入拔沪之众以出辖戡居龕谷无所属珣与书招之辖戡听命改本路都监适元昊大入府檄留珣会葛怀敏于瓦亭怀敏已屯五谷口西至马栏城闻夏人徙军新濠外议欲质明掩袭珣谓怀敏曰敌远来众倍锋锐莫若依马栏城布栅以扼其路守镇戎城以便饷道俟其衰击之此必胜之道也怀敏不听兵遂逼镇戎城越界壕抵定川未及阵夏人引铁骑来犯珣居阵西北瑜亦在军中战甚力东壁兵辄溃中军大扰珣拥刀斧手前鬪夏众稍却军得复阵怀敏诘朝退走就食镇戎俄夏骑四合珣被擒瑜以身免珣后卒贼中弟璞亦知名 【按宋史此下有张忠传无事迹足录今从删】

△范恪

范恪字许国开封人少隶军籍于许州选入捧日军又选为殿前指挥使历行门龙旗直散原押班康定元年元昊数寇边擢内殿崇班庆州北路都巡检使与攻白豹城破之既还夏人袭其后恪设伏崖险敌半度邀击之多斩获以功迁内殿承制尝会诸道兵攻十二盘结多丹密藏砮中流矢督战愈力视炮石中有火爨者恪取号于众曰贼矢石尽用灶下爨矣于是士卒争奋果先得城迁供备库副使恪有弓胜一石七斗其箭镞如铍名曰铍弓又于羽闲识其官称姓氏凡所发必中至一箭贯二人他日取焦蒿砮归恪独殿后为数千骑所袭恪视矢箠止有二铍即为引满之势贼遽却尝与总管杜惟序钤辖高继隆将兵分讨罕齐锡默托辉等三砮恪先破托辉而继隆围锡默不能下恪驰往取之既又援惟序下罕齐砮改左骐骥副使夏人犯大顺城诸将皆闭城自守恪率兵二千余战克之改宫苑副使环庆路兵马都监迁礼宾使荣州刺史环庆路钤辖洛苑使权秦凤路兵马总管自龙神卫四厢都指挥使累迁至侍卫亲军

马步军副都指挥使历坊州刺史解州防御宣州观察
使保信军节度观察留后以疾出为永兴军路副都总管卒赠昭化军节度使

△马怀德

马怀德字得之开封祥符人父玉东头供奉官言怀德可试引弓击剑角抵补三班奉职为延州南安砦主东路巡检范仲淹知延州奏为
兵马监押以所部兵入贼境破济罗叶策二砦迁左班殿直又率蕃汉烧荡贼海沟茶山龙栢安化十七砦三百余帐迁右侍禁授合门祗候为
东路都巡检使夷哈尚给布等十八砦贼以四万骑犯边趋仆射谷怀德以兵数千据谷旁高原待之斩首二百级得畜产器械以千数迁内殿
崇班又以兵修龙安城寇不敢犯遂以鄜延路都监又城绥平破贼青化押班吹丹三砦杀获甚众元昊为夏国主命国子博士高良夫与怀德
会西人画界庞籍具论其前后功迁供备库副使兼合门通事舍人时用兵久民多亡散怀德招辑有方经略使梁适奏请推其法诸路历知保
安军环州环庆益利路钤辖累迁至四方馆使舒州团练使徙鄜延路副都总管坐违法赂宦官阎士良为安抚吕景初奏降四方馆使英州刺
史大名府路总管侍卫亲军步军都虞候象州防御使鄜延路副都总管迁马军都虞候徙环庆路环州蕃官苏恩以其属叛往降之又迁殿前
都虞候步军副指挥使随州观察使英宗即位迁静难军节度观察留后召还卒赠安远军节度使 【按宋史此下有安俊传无事迹足录今
从删】

△向宝

向宝镇戎军人为御前忠佐换礼宾使泾原秦凤钤辖历真定鄜延副都总管运龙神卫四厢都指挥使嘉州团练使卒宝善骑射年十四与
敌战斩首二级及壮以勇闻有虎踞五原卑邪州东西百里断人迹宝一矢殪之道过潼关巨盗郭邈山多载关中金帛子女宝射走之尽得其
所掠神宗称其勇以比薛仁贵及死厚恤其家

△石普

石普其先幽州人自言唐河中节度雄之后徙居太原祖全事周为铁骑军使父通事太宗于晋邸普十岁给事邸中以谨信见亲补寄班
祗候再迁东头供奉官贼邢橐駝贾秃指数百人寇掠永兴诸县命普督兵往捕悉获之迁内殿崇班带御器械李顺叛普为西川行营先锋与
韩守英马知节诛斩之迁西京作坊使 【按东都事略作迁西京左藏库使】 钦州刺史顺余党复寇邛蜀伪称邛南王又为西川都提举捉
贼使时蜀民疑不自安多欲为盗普因驰入对面陈蜀乱由赋敛苛急农民失业宜稍蠲

减之使自为生则不讨而自平矣帝许之普即日还蜀
揭榜谕之莫不悦服贼平累迁洛苑使富州团练使延州缘边都巡检使羌酋乜羽内寇
普追杀之从真宗幸大名会王均叛以为川峡路招安
巡检使佐雷有终率诸将进讨至天回镇贼出拒战普领前阵力击破之贼退保益州王
师围城数月不下普缮军炮又为地道攻城城破均夜
半突围由南门遁普引兵追击千富顺监均自杀余党皆平迁冀州团练使契丹犯边为
保州兵马钤辖北面行营押策先锋与契丹战廉良城
【按东都事略作炎凉城】又战长城口获俘甚众徙定州路副都总管灵州失守益兵
备关中徙永兴军副都总管普上请曰臣尝将兵辄
破一钱与别将各持半用相合为信帝为制传信牌又献御戎图请设堑以陷敌马并上
所置战械甚众徙为莫州总管初契丹南侵既而谍者
言复欲大入寇帝自画军事以手诏示辅臣令普统军一万于莫州卢文寿王守俊监之
敌骑北去则西趋顺军袭击断西山之路如河冰已合
敌由东路则刘用刘汉凝田思明以兵五千会普及孙全照为犄角徙普屯顺安之西与
威虜魏能保州杨延昭北平田敏为犄角内侍冯仁俊
掌御剑于莫州与普不叶帝召仁俊还又令普率所部屯干盩军复迁普冀州团练使徙
本州岛总管车驾幸澶渊时王继忠已陷契丹契丹欲请
和因继忠遣人持信箭为书遗普且通密表事平迁容州观察使为鄜延路副都总管赵德
明纳款诏降制命普言不宜授以押蕃落使使之总制
属羌则强横不可制矣乃止兼管内蕃落使未几徙并代路改桂州观察使镇州路总管
迁保平军节度观察留后赴本镇帝祀汾阴还扈从至
西京拜河西军节度使知河阳徙许州筑大流堰引河通漕京师上军议条目二卷用将
机宜要诀二图时方崇尚符瑞而普请罢天下醮设岁
可省缗钱七十余万繇是忤帝意大中祥符九年上言商贾自秦州来言嘉勒斯賚欲阴
报曹玮请以臣所献阵图付玮可使玮必胜帝以普言
踰分命知杂御史吕夷简劾之狱具集百官参验九月下旬日不食坐普私藏天文下百
官杂议罪当死诏除名贬贺州遣使繫送流所甫至贺
州授太子左清道率府副率房州安置稍复为左千牛卫将军其妻表求普领小郡迁左
领军卫大将军仁宗即位徙安州迁左屯卫大将军徙
蔡州坐失保任降本卫将军历迁左千牛左领军卫大将军起知信阳军徙光州以私用
孔子庙钱贬太子左监门率府副率滁州安置以左卫
将军分司西京给官第居蔡州迁大将军卒普倜傥有胆略凡预讨伐闻敌所在即驰赴
之众推其勇

△张孜

张孜开封人母入宫乳悼献太子孜方在襁褓真宗以付内侍张景宗景宗遂养以
为子荫补三通奉职给事春坊司转殿直皇太子即位
迁供奉官合门祇候为陈州兵马都监五迁至供备库使领恩州团练使真定路兵马钤
辖历知莫贝瀛三州转运使张昱之奏冀贝骁捷军士
上关银鞬钱事下孜议孜言不可罢昱之犹执不已遂奏罢保州云翼别给钱粮军怨果
叛契丹欲背盟富弼往使命孜为副以劳迁西上合门
使知瀛州拜单州团练使龙神卫四厢都指挥使并代副总管河东更铁钱法人情疑贰
兵相率扣府欲诉闭门不纳是日几乱孜策马从数卒
往谕之皆散还营迁济州防御使侍卫马军都虞候又迁殿前都虞候加桂州管内观察
使迁侍卫步军副都指挥使虎翼兵教不中程指挥使
问状屈强不肯对乘夜十余人大噪孜擒首恶斩之然后闻迁昭信军节度观察留后马
军副都指挥使孜长于宫禁中言者请罢孜兵柄乃出
为懿远军节度使知潞州徙陈州复召为马军副都指挥使御史中丞韩絳又言孜不当
典兵寻以罪罢知曹州卒赠太尉谥勤惠 【按宋史
此下有许怀德传无事迹足录今从删】

△李允则

李允则字垂范济州团练使谦溥子也少以材略闻荫补衙内指挥使改左班殿直
太平兴国七年始置榷场于静戎军允则典其事还使
河东路决系囚原治逋欠又使荆湖察官吏与转运使检视钱帛器甲刑狱遂擢合门祇
候浚治京师诸河泐水门郑州水碓西川贼刘旰平上
官正议修城命允则往视还言西川以无城难守宜如正议又言兵分则缓急不为用请
并屯要害以便馈饷高溪州蛮田彦尹入寇允则以蛮
徼不足加兵悉招辑之累迁供备库副使知潭州初马氏暴敛州人出绢谓之地税潘美
定湖南计屋输绢谓之屋税营田户给牛岁输米四斛
牛死犹输谓之枯骨税民输茶税以九斤为一大斤后益至三十五斤允则请除三税茶
以十三斤半为定制民皆便之湖湘多山田可以艺粟
而民惰不耕乃下令月所给马刍皆输本色繇是山田悉垦湖南饥发官廩先振而后奏
明年荐饥复发廩贱粟因募饥民堪役者隶军籍得万
人陈尧叟安抚湖南民列允则治状请留尧叟以闻召还迁洛苑副使知沧州允则巡视
州境浚浮阳湖葺营垒官舍闲穿井未几契丹来攻老
幼皆入保而水不乏契丹解去转西上合门副使镇定高阳三路行营兵马都监押大阵
东面凡下诸路宣敕必先属允则省而后行契丹通好
徙知瀛州上言朝廷已许契丹和议但择边将谨誓约迁西上合门副使何承矩择代请
允则知雄州迁东上合门使奖州刺史河北既罢兵允

则治城垒不辍契丹主曰南朝尚修城备得无违誓约乎其相张俭曰李雄州为安抚使其人长者不足疑既而有诏诘之允则奏曰初通好不即完治恐他日颓圯因此废守边患不可测也帝以为然城北旧有瓮城允则合大城为一自此瓮城之人悉内城中始州民多以草覆屋允则取材木西山大为仓廩营舍始教民陶瓦甃标里闲置廊市邸舍水碓城上悉累甃下环以沟堑蒔麻植榆柳广闾承翰所修屯田架石桥构亭榭列堤道以通安肃广信顺安军岁修禊事为竞渡上元旧不燃灯允则结采山聚优乐使夜纵游尝得谍释缚厚遇之谍因出所刺缘边金谷兵马之数允则曰若所得谬矣呼主吏按籍书实数与之谍请加緘印纵还未几谍遽至还所与数緘印如故反出彼中兵金财力地里委曲以为报一日民有诉为契丹民殴伤而遁者允则不治与伤者钱二千众以为怯逾月幽州以其事来诘答以无有盖他谍欲以殴人为质验比得报以为妄乃杀谍云翼卒亡入契丹允则移文督还契丹报以不知所在允则曰在某所契丹骇不敢隐即归卒乃斩以徇历四方馆引进使高州团练使天禧二年以客省使知镇州徙潞州仁宗即位领康州防御使天圣六年卒允则不事威仪闲或步出遇民有可语者延坐与语以是洞知人情讼至无大小面讯立断善抚士卒皆得其用盗发辄获人亦莫知所由在河北二十余年事功最多

△张亢

张亢字公寿自言后唐河南尹全义七世孙家于临濮少豪迈有奇节进士及第为广安军判官【按宋史本传作广平军东都事略作广安军考宋史地理志潼川路有广安军又名盩而无广平据改】应天府推官治白沙石梁二渠民无水患改大理寺丞金书西京判官事通判镇戎军上言赵德明死其子元昊喜诛杀势必难制宜亟防边因论京北攻守之计既而契丹聚兵幽涿闲河北增备遂起为如京使知安肃军元昊反为泾原路兵马钤辖知渭州累迁右骐骥使忠州刺史徙鄜延路知鄜州上疏曰旧制诸路总管钤辖都监各不过三两员今每路多至十四五员少亦不减十员不相统制请每路军马事止以三两员领之又泾原一路兵势既分不足以当大敌又比来主将与军伍移易不定人马强弱配属未均请下韩琦范仲淹分按逐路以马步军八千已上至万人择才位兼高者为总领其下分为三将一为前锋一为策前锋一为后阵每将以使忠臣佐三两人分屯要害之地敌小入则一将出大入则大将出又量敌数多少使邻路出兵应接此所谓常山蛇势也今万人已上为一大将一路又有主师延州领三大将鄜州一大将保安军及西路巡检德靖

砮共为一大将则鄜延路兵五万人矣原渭州镇戎军
各一大将渭州山外及瓦亭各一大将则泾原路五万人矣弓箭手熟户不在焉昨延州
之败盖由诸将自守不相应援请令边臣预定其法敌
寇某所则某将为先锋某将出某所为奇兵某将出某所为声援某城砮相近出敢战死
士某所设覆都同巡检则反扼要害又令邻路取某路
出应仍潜用旗帜为号臣在山外策应未尝用本指挥旗号自以五行支干别为引旗盖
兵出入百步之外不能相知若不预为之号必误军事
国家承平日久失于训练今每指挥艺精者不过百余人余皆瘦弱不可用且官军所恃
者步军与强弩尔臣知渭州日见广勇军彊弩者三百
五十人引一石二斗者仅百余人余仅及七八斗正欲阅习时易为力尔臣以路镫弩试
皆不能张阅习十余日裁得百余人又教以小坐法亦
十余日又教以带甲小坐法五十余日始能服熟若安前弊以应新敌其有必胜之理乎
又诸路骑兵不能驰险计其刍粟一马之费可养步军
五人马高不及格宜悉还坊监止留十之三余以步兵代之诸路弓箭手生长边陲父祖
效命累世捍贼乃无进擢之路何以激劝边民窃闻大
帅议五路进师用兵以来屡出无功若一旦深入臣切以为未可也山界诸州城砮距边
止二三百里夏兵器甲虽精利其鬪战不及山界部族
而财粮又尽出山界若十月后令诸将分番出界使夏人不得耕牧然后出步兵负十日
粮人日给米一升马日给粟四升草五分贼界有草地
以半资放牧亦可减挽运之半王师既行使嘉勒斯賚及九姓回纥分制其后必荡覆巢
穴又言陕西民调发之苦数倍常岁宜一切权罢令安
抚司与逐州长吏减省他役颛应边须及选殿侍军将各三十人以駝骡各二百留其半
河中以运鄜延安军军须其半留干州或永兴军以
运环庆原渭镇戎军军须分一转运使专董其事又鄜州四路半当冲要尝以闲慢路递
铺兵卒之半贴冲要二路驿百人每三人挽小车载二
百五十斤至三百斤若团并犖运边计亦未至失备而民力可以宽后多施用进西上合
门使改都钤辖屯延州又奏边机军政措置失宜者十
事言王师每出不利此皆将不知兵之弊未深究致败之由而为之措置徒益兵马未见
胜术一也发兵千里远鬪锐气已衰如贼已退乃是空
劳师徒异时更寇别路必又如此是谓不战而自弊二也总管虽令互相策应环州至延
州十四五驿径赴亦不下十驿泾原至秦凤千里若发
兵互援而山路险恶人马之力已竭三也朝廷罄力供亿而边臣但言兵少兵无节制一
弊无奇正二弊无应援三弊主将不一四弊兵分势弱
五弊有此五弊如驱市人而战虽有百万亦无益于事四也累年败衄而居边要者未知

何谋使更数年未罢兵国用民力何以克堪五也今言
边事者甚众前条方行后令即变胥史有钞录之劳官吏无商略之暇边防军政一无定
制六也夏竦陈执中皆朝廷大臣今但主文书守诏令
每有宣命则翻录行下如诸处申禀则令候朝旨如是则何必以大臣主事七也陕西日
以增员所占兵士千余人请给岁约万缗诸州并募克
敌致胜保捷广锐宣毅等兵久未曾团结训练但费军廩无益边备八也今军有手艺人
每一指挥抽占三之一如延州诸将不出即有兵二万
除五千守城之外其余止一万五千若有警急三日内不能团集九也陕西教集乡兵共
十余万人井市无赖岂无奸盗杂于其中苟无措置他
日为患不细十也既而复请面陈利害不报会元昊益炽以兵围河外自后河川袭府州
蕃汉民被杀掠已众攻城不能下引兵屯琉璃堡纵游
骑钞麟府闲二州闭壁不出时丰州已为夏人所破麟州势孤徙宥为并代都钤辖管句
麟府军马事单骑叩城既入即纵民出采薪刍汲涧谷
然夏人犹时出钞掠宥以州东焦山有石炭穴为筑东胜堡下城旁有蔬畦为筑金城堡
州北沙阮有水泉为筑安定堡置兵守之禁兵皆败北
无鬪志乃募役兵敢战者夜伏隘道邀击夏人游骑比明有持首级来献者宥以锦袍赐
之禁兵始渐奋咸愿一战宥知可用始谋击琉璃堡使
谍伏敌砦旁草中侦知无备夜引兵袭击大破之夏人弃堡去乃筑宣威砦于步駝捍寇
路时麟州馈路犹未通敕宥自护赏物送麟州敌既不
得钞遂以兵数万趋栢子砦来邀宥所将才三千人宥激怒之士皆感厉会天大风顺风
击之斩首六百级相蹂践赴崖谷死者不可胜计夺
马千余匹乃修建宣威砦夏人数出争遂战于兔毛川宥自抗以大阵而使骁将孙岳伏短
兵强弩数千于山后宥以万胜军皆京师新募敌目曰
东军素易之而怯虎翼军勇悍阴易其旗敌果趣东军值虎翼卒搏战良久伏发敌大溃
不踰月筑清塞百胜中候建宁镇川五堡麟府之路始
通宥复奏今所通特一径尔请更增并边诸栅以相维持则可以广田牧壮河外之势会
契丹欲渝盟领果州团练使知瀛州迁四方馆使泾原
路经略安抚招讨使知渭州迁引进使徙并代副都总管为御史梁坚所劾夺引进使为
本路钤辖及夏人与契丹战河外复引进使副都总管
知代州兼河东沿边安抚事范仲淹宣抚河东复奏宥前所增广堡砦宜使就总其事诏
既下明镐以为不可屡牒止之宥曰受诏置堡砦岂可
得经略牒而止耶坐违节度死所甘心堡砦必为也每得牒置案上督役愈急及堡成乃
发封自劾朝廷置不问蕃汉归者数千户岁减戍兵万
人河外遂为并汾屏蔽复知瀛州因言州小而人众缓急无所容若广东南关则民居皆

在城中夏竦前在陕西悉亢不附己特沮其役然卒城
之加领眉州防御使复为泾原路总管知渭州会给郊赏转运使奏亢擅减三司所估会
竦为枢密使夺防御使降知磁州御史宋禧继言亢尝
以库银市易复夺引进使为右领卫大将军知寿州改将作监知和州坐失举徙筠州久
之复为引进使果州团练使又复眉州防御使真定府
路副都总管迁客省使以足疾知卫州徙怀州降曹州钤辖改河阳总管以疾辞为秘书
监未几复客省使眉州防御使徐州总管卒亢好施轻
财驭军严明所至有风迹民图像祠之仁宗念其功特赠遂州观察使 【按宋史本传不
载亢赠据隆平集东都事略补】

张奎

张奎

奎字仲野先亢中进士历并秀州推官监衢州酒徐生者殴人至死系婺州狱再问
辄言冤奎视囚籍印窾伪深探之乃狱吏窜易卒释徐
生抵吏罪改大理寺丞知合淝县徙南充县以殿中丞通判泸州罢归会秦州盐课亏缗
钱数十万事连十一州诏奎往按还奏三司发钞稽缓
非诸州罪未几知江州徙楚州迁太常博士召为殿中侍御史知滑州徙邢州授度支判
官出为京东转运使以待御史为河东转运使进刑部
员外郎知御史杂事安抚京东募民充军凡十二万奏州县吏能否数十人还为户部副
使及分陕西为四路擢天章阁待制环庆路经略安抚
招讨使知庆州历陕西都转运使知永兴军河东都转运使加龙图阁直学士知澶青徐
扬等州再迁吏部郎中迁右谏议大夫知江宁府还判
吏部流内铨徙审官院知河南府初全义守洛四十年洛人德之有生祠及见奎伟仪观
曰真齐王孙也因复兴齐王祠岁余以能政闻迁给事
中归朝京东盗起加枢密直学士知郢州数月捕诸盗悉平奎治身有法度所至有治迹
子焘龙图阁直学士 【按宋史此下有刘文质传无
事迹足录今从删】

△刘涣

刘涣字仲章保州人祖审琦简穆皇后从侄从讨李重进战死父文质以近亲而忠
谨太宗欲信任之历知麟庆泾代等州立战功前后赐
子异于诸将涣以父任为将作监主簿监并州仓天圣中章献太后临朝久涣谓天子年
加长上书请还政后怒将黥隶白州吕夷简薛奎力谏
得免仁宗亲政擢为右正言郭后废涣与孔道辅范仲淹等伏阙争之黜通判磁州寻知
辽州夏人叛朝廷议遣使通河西嘉勒氏涣请行闲道
走青唐谕以恩信嘉勒氏大集族长誓死扞边得其誓书与西州地图以献加直昭文馆

迁陕西转运使由工部郎中知沧州改吉州刺史知保
州州自戍卒叛后兵益骄涣至虎翼军谋举城叛民大恐涣单骑徐叩营械首恶者归斩
之一军帖服徙登州益治刀鱼船备海寇寇不敢犯历
知邢恩冀涇澶五州恩承贼蹂践后涣经理缮葺有叙威令大振治平中河北地震民乏
粟率贱卖耕牛以苟朝夕涣在澶尽发公钱买之明年
民无耕牛价增十倍涣复出所市牛以元直与民澶民赖不失业历秦凤涇原真定定州
路总管四迁至镇宁军节度观察留后熙宁中还为工
部尚书致仕涣有才略临事无所避然锐于进取方开拓兆岷讨南安涣既老犹露章请
自效卒年八十一

刘沪

刘沪

沪字子浚以荫补三班奉职累迁右侍禁康定中为渭州瓦亭砦监押权静边砦击
破党留等族斩一骁将获马牛橐駝万计迁左侍禁韩
琦范仲淹荐授合门祗候又破穆宁生氏西南去洛阳二百里中有城曰水洛川平土沃
又有水轮银铜之利环城数万帐汉民之逋逃者归之
教其百工商贾自成完国曹玮在秦州尝经营不能得沪进城章川收善田数百顷以益
屯兵密使人说城主多斯纳令内附会郑戩行边沪遂
召多斯纳及其酋属来献结公水洛路罗甘地愿为属户戩即令沪将兵往受地既至而
氏情中变聚兵数万合围沪兵才千人前后数百里无
援沪坚卧因令晨炊缓食坐胡迹指挥进退一战氏溃追奔至石门酋皆稽颡请服因尽
驱其众隶麾下以通秦渭之路又败临洮氏于城下迁
内殿崇班戩以三将兵遣董士廉助筑城功未半会戩罢四路招讨使而涇原路尹洙以
为不便令罢筑且召沪不听日增版趣役洙怒使狄青
械沪士廉下狄氏众惊收积聚杀吏民为乱朝廷遣鱼周询程戩往视氏众诣周询请以
牛羊及丁壮助工役复以沪权水洛城砦主城成终以
违本路安抚使节制黜一官为镇戎军两路都巡检复内殿崇班疡发首卒居人遮道请
留葬水洛立祠城隅岁时祀之经略司言得熟户蕃官
牛装等状愿得沪子弟主其城乃命其弟淳为水洛城兵马监押城中有碑记沪事

△赵滋

赵滋字子深开封人父士隆天圣中以合门祗候为邠宁环庆路都监战没录滋三
班奉职康定初以右侍禁选捕京西叛卒有功迁左侍
禁后为涇原仪渭镇戎军都巡检会渭州得胜砦主姚贵杀监押崔绚劫宣武神骑卒叛
攻羊牧隆城滋驰至谕降八百余人贵穷走出砦招讨
使令滋给赐降卒及迁补将吏滋以为如是是诱其为乱藏其牒不用还为招讨使所怒

故赏弗行范仲淹韩琦经略陕西举滋可将领得合门
 祗候为镇戎军西路都巡检提举陕西京西路捉贼数月京西军贼张海平为京东东路
 都巡检富弼为安抚使举再任登州乳山砦兵叛杀巡
 检州将诛首恶数人不穷按滋奉檄验治得党与百余人付狱众莫敢动自东头供奉官
 超授供奉副使定州路驻泊都监韩琦以为真将帅
 材及琦在河东又奏滋权并代路钤辖改管句河东经略司公事建言代州宁化军有地
 万顷皆肥美可募人作田教战射为堡砦人以为利累
 迁西上合门副使历知安肃军保州会契丹民数违约乘小舟渔界河中吏惮生事累岁
 莫敢禁后又遣大舟十余自海口运盐入界河朝廷患
 之徙滋雄州滋戒巡兵舟至辄捕其人杀之犇其舟移文还涿州渔者遂绝知瀛州彭思
 永河北转运使唐介燕度皆以滋生事请罢之朝廷更
 以为能擢龙神卫四厢都指挥使嘉州团练使迁天武捧日四厢都指挥使英宗即位领
 端州防御使步军都虞候留再任未几卒赠遂州观察
 使滋在雄州六年契丹惮之契丹尝大饥旧米出塞不得过三斗滋令出米无所禁边人
 德之驭军严性尤廉谨惟傲慢自誉此其短也

钦定续通志卷三百四十五

●钦定续通志卷三百四十六 列传一百四十六

列传

宋【五十】

○宋五十

刘平【兼济郭遵】	任福【王珪	武英	桑怿耿傅	王仲宝】	景泰
王信	蒋偕	张忠	郭		
恩	张岳	张君平	卢鉴	郭谿	田敏
	侍其曙				
康德輿	张昭远				

刘平

任福

景泰

王信

蒋偕

张忠

郭恩

张岳

张君平

卢鉴
郭谿
田敏
侍其曙
康德輿
张昭远
△刘平

刘平字士衡开封祥符人父汉凝从太宗征河东岢岚宪州累迁崇仪使平善弓马读书强记进士及第补无锡尉擢大理评事知鄆陵县徙南充夷人寇涪井监平权泸州事率土丁三千击走之祠汾阴迁本寺丞以寇准荐为殿中丞知泸州夷人怨前败不敢扰边召拜监察御史数上疏论事为丁谓所忌久之除三司盐铁判官河北安抚改殿中侍御史陕西转运使徙知襄州仁宗即位迁侍御史初真宗知其才将用之丁谓乘闲曰平将家子素知兵若使将西北可以制敌后章献太后思谓言特改衣库使知汾州属户明珠磨糜族数反复平潜兵杀数千人以功领宾州刺史鄆延路兵马钤辖徙泾原路兼知渭州徙汝州改淮南江浙荆湖制置发运副使召还真拜信州刺史知雄州居四年迁忻州团练使知成德军景佑元年拜龙神卫四厢都指挥使永州防御使知定州徙环庆路副都总管进侍卫亲步军都虞候奏言元昊势且叛宜严备之寻坐被酒破锁入甲仗库为转运使苏耆所劾上疏自列召入问状复为步军都虞候知澶州徙沧州副都总管时吕夷简为宰相台谏官数言政事阙失平奏书愿明谕台谏官毋令越职仍不许更相引荐论者以为希夷简意改高阳关副都总管宝元元年以殿前都虞候为环庆路马步军副都总管会元昊反迁邕州观察使为鄆延路副都总管兼鄆延环庆路同安抚使顷之兼管句泾原路兵马进步军副都指挥使静江军节度观察留后献攻守之策曰五代之末中国多事唯制西戎为得之中国未尝遣一骑一卒远屯塞上但任土豪为众所伏者封以州邑征赋所入足以贍兵养士由是无边鄙之虞太祖定天下惩唐宋藩镇之盛削其兵柄收其赋入彼边方世袭宜异于此而误以朔方李彝兴灵武冯继业一切亦徙内地自此灵夏仰中国戍守千里运粮兵民并困其后灵武失守而赵德明惧王师问罪愿为藩臣于时若止弃灵夏绥银与之限山为界则无今日之患矣而以灵夏两州及山界藩汉户并授德明故蓄甲治兵渐窥边隙鄆延环庆泾原秦陇所以不能弛备也今元昊嗣国政刑惨酷众叛亲离复与嘉勒斯賚构怨此乃天亡之时元昊国势未强若乘此用鄆延环

庆泾原秦陇四路兵马分两道益以蕃汉弓箭手精兵
可得二十万收山界洪宥等州招集土豪縻之以职遣使谕嘉勒斯賚授以灵武节度使
挠河外族帐以窘元昊复出麟府石州蕃汉步骑猎取
河西部族招其酋帅离其部众然后以大军继之元昊不过鼠窜为穷寇尔何所为哉且
灵夏绥银每岁资粮取足洪宥而洪宥州羌户劲勇善
战夏人恃此以为肘腋我苟得之以山为界凭高据险下瞰沙漠此天险也庙朝之谋不
知出此而争灵夏绥银此议臣之罪也万一元昊潜结
契丹互为犄角则我一身二疾不可并治请召边臣与二府定守御长策疏奏未报属元
昊盛兵攻保安军时平屯庆州范雍以书召平平率兵
与石元孙合军趋土门既有告敌兵破金明围延州者雍复召平与元孙救延州平素轻
敌督骑兵昼夜倍道行平先发步军继进夜至三川口
西十里止营遣骑兵先趋延州争门时鄜延路驻泊都监黄德和将二千余人屯保安北
碎金谷巡检万俟政郭遵各将所部分屯范雍皆召之
为外援平亦使人趣其行将步骑万余结阵东行五里与敌遇敌兵涉水为横阵郭遵及
忠佐王信薄之不能入官军并进杀数百人乃退敌复
蔽盾为阵官军复击却之平左耳右颈中流矢日暮战士上首功及所获马语未已敌以
轻兵薄战官军引却二十步黄德和走保西南山众从
之皆溃平遣其子宜孙驰追德和当勒兵还并力抗敌德和不从驱马遁赴甘泉平遣军
校杖剑遮留士卒得千余人转鬪三日贼退还水东平
率余众保西南山立七栅自固敌使人伪为戍卒递文移平平杀之敌酋举鞭麾骑自山
西出合击绝官军为二遂与元孙皆被执初德和言平
降贼朝廷发禁兵围其家及命殿中侍御史文彦博即河中府置狱遣庞籍往讯具得其
实遂释其家德和坐腰斩而延州吏民亦诣阙诉平战
没状遂赠朔方军节度使兼侍中谥壮武赐信陵坊第封其妻赵氏为南阳郡太夫人子
孙及诸弟皆优迁未官者录之弟兼济

刘兼济

郭遵

刘兼济

兼济字宝臣以父荫补三年奉职为襄州兵马监押汉江暴涨兼济解衣涉水率众
捍城州赖以完擢合门祗候改左侍禁鄜延路兵马都
监权知保安军徙知笼竿城夏人寇边兼济将兵千余败之属其兄平战没于三川口特
授内殿崇班知原州累擢至西上合门使同管勾三班
院卒

郭遵

郭遵开封人少隶军籍稍迁殿前指挥使累迁左侍禁合门祗候为延州西路都巡
检使元昊寇延州遵以裨将属刘平敌出骁将扬言当
遵遵挥铁杵破其脑复持铁枪进所向披靡会黄德和引兵先溃敌战益急遵奋击期必
死独出入行闲军稍却即复马以殿又持大稍横突之
敌使人持大綦索立高处迎遵马辄为遵所断因纵使深入攒兵注射之被杀特赠果州
团练使遵用铁杵枪稍共九十斤其后耕者得其器于
战处乃并与其衣冠葬之

△任福

任福字佑之其先河东人后徙开封咸平中补卫士由殿前诸班累迁至遥郡刺史
元昊反除莫州刺史岚石隰州缘边都巡检使奏河东
地介大河斥堠疏阔愿严守备仁宗善之命知陇州擢秦凤路马步军副总管诏陕西增
城垒器械福受命四十日而战守之备皆具以忻州团
练使为鄜延路副总管管句延州东路蕃部事寻知庆州复兼环庆路副总管因经度所
过山川道路以为缓急攻守之备听便宜夏人寇保安
镇戎军福与子怀亮侄壻成曷自华池凤川镇声言巡边召诸将牵制敌势行至柔远砦
即部分诸将攻白豹城夜漏未尽抵城下四面合击平
明破其城焚巢穴获牛马橐驼委聚等以功拜龙神卫四厢都指挥使贺州防御使改侍
卫马军都虞候庆历元年春朝廷欲发泾原鄜延两路
兵西讨诏福诣泾原计事会元昊谋寇渭州安抚副使韩琦趋镇戎军出兵万八千人使
福将之以耿傅参军事泾原路驻泊都监桑怱为先锋
钤辖朱观都监武英泾州都监王珪各以所部从福节制琦戒福等并兵自怀远城趋得
胜砦至羊牧隆城出敌之后诸砦相距纔四十里道近
粮饷便度势未可战则据险设伏待其归邀击之福引轻骑数千趋怀远城捺龙川遇镇
戎军西路巡检常鼎刘肃与敌战于张家堡南斩首数
百夏人佯北怱引骑趋之福踵其后谍传敌兵少福等颇易之薄暮与怱合军屯好水川
观英屯龙落川 【按长编作笼络川】 相距隔山五
里约翌日会兵川口路既远刍饷不继士马乏食已三日追奔至笼竿城北遇夏军循川
行出六盘山下距羊牧隆城五里结阵诸将方知堕敌
计势不可留遂前格战怱驰犯其锋福阵未成列贼纵铁骑突之自辰至午阵动众傅山
欲据胜地俄伏发自山背下击士卒多坠崖堑相覆压
怱肃战死敌分兵数千断官军后福力战身被十余矢有小校劝福自免福曰吾为大将
兵败以死报国尔挥四刃铁简挺身决鬪枪中左颊绝
其喉而死乃并兵攻观英战既合王珪自羊牧隆城引兵四千阵于观军之西渭城驻泊
都监赵津将瓦亭骑兵五千继至珪屡出略阵阵坚不

可破英重伤不能视军敌兵益至官军遂大溃英津珪傅皆死内殿崇班柴贇西头供奉官王庆侍禁李简李禹亨刘钧亦战没军校死者数十人死者六千余人唯观以兵千余保民垣四向纵射会暮敌引去福子怀亮亦死之方元昊倾国入寇福临敌受命所统皆非素抚之兵既又分出趋利故至于甚败奏至帝震悼赠福武胜军节度使兼侍中赐第一区追封母为陇西郡太夫人妻为琅琊郡夫人录其子及从子凡六人

王珪

武英

桑怱

耿傅

王仲宝

王珪

王珪开封人少拳勇善骑射能用铁杵铁鞭年十九隶亲从官累迁殿前第一班押班擢礼宾副使泾州驻泊都监元昊寇镇戎军珪将三千骑为策先锋自瓦亭至狮子堡敌围之数重珪奋击披靡获首级为多语其下曰兵法以寡击众必在暮我兵少乘其暮击之可得志也有骁将持白帜植枪以詈曰谁敢与吾敌者枪直珪胸珪以杵碎其脑继又一将复以枪进珪挟其枪以鞭击杀之一军大惊遂引去珪亦以中箭而还仁宗特遣使抚谕之诏暴其功塞下以厉诸将是岁改泾原路都监明年为本路行营都监勒金字处置脾赐之寻至黑山焚敌族帐获首级马駝甚众会敌大入以兵五千从任福屯好水川连战三日诸将皆败任福陷围中望见麾帜犹在珪欲援出之军校有顾望不进者斩以徇乃东望再拜曰非臣负国臣力不能也独有死报尔乃复入战杀数十百人鞭铁挠曲手掌尽裂奋击自若马中镞凡三易犹驰击杀数十人矢中目乃还夜中卒珪少通阴阳数术之学始出战谓其家人曰我前后大小二十余战杀敌多矣今恐不得还我死可速去此无为敌所讎也及敌攻瓦亭购甚急果如所料镇戎之战以所得二枪植山下其后边人即其处为立祠赠金州观察使追封其妻录其子光祖光世光嗣

武英

武英字汉杰太原人父密与契丹战没赠西京左坊使录英为三班借职以右班殿直为忻代州同巡检会州将出猎敌百余骑果入寇英领众左右驰射悉禽获之以功迁左班殿直监雄州榷场改右侍禁合门祗候为环州都巡检使徙洪德砦主又徙庆州柔远砦元昊寇延州英主兵攻后桥以分敌势擢内殿承制环庆路驻泊都监破党平族又从任福破白豹城迁

礼宾副使寻兼泾原行营都监与任福合诸将战张家堡斩首数十百敌弃羊马伪遁诸将皆趋利争进英以为前必有伏众不听福等既败英犹力战矢尽遇害赠邢州观察使录其子侄

桑怱

桑怱开封雍邱人勇力过人善用剑及铁筒有谋略其为人不甚长大语言如不出其口卒遇之不知其勇且健也常遭大水有粟二廩将以舟载之见百姓走避水者遂弃其粟而载之得皆不死岁饥聚人共食其粟尽而止后徙居汝颖闲耕龙城废田数顷以自给诸县多盗怱自请补耆长得往来察奸里老父子死未敛盗夜脱其衣去父不敢告县怱疑少年王生者夜入其家得其衣不使之知也明日见而问之曰尔许我不为盗今里中盗尸衣者非尔邪少年色动即推仆地缚之诘共盗者姓名尽送县尝之郟城遇尉出捕盗招怱饮酒与俱行至贼所藏尉怯甚将去怱曰贼在此欲何之乃下马独杀数人因尽缚之又闻襄城有盗十许人独提一剑以往杀数人尽缚其余汝旁县为之无盗京西转运使奏其事补郟城尉移澠池尉羣盗保青灰山有宿盗王伯者尤为民害朝廷每授巡检使必疏姓名使捕之怱至官巡检伪为宣头以示怱怱不知其伪也因挺身入贼中与伯同卧起十余日伯遂与怱出至山口为巡检伏兵所执怱曰巡检惧无功尔即以伯与巡检使巡检俘献京师而怱不复自言朝廷知之为黜巡检擢怱右班殿直永安县巡检明道末京西旱蝗有恶贼二十三人枢密院召怱至京师授以贼名姓使往捕怱曰盗畏吾名必溃溃则难得矣宜先示之以怯至则闭栅戒军吏不得一人辄出居数日军吏不知所为数请出自效辄不许夜与数卒变为盗服以出踪迹盗所尝行处尽得居处之实明日部分军士尽擒诸盗手杀三人凡二十三人者一日皆获还京师枢密吏求银为致合门祇候怱不可吏怒匿其功状除兵马监押未行会宜州蛮叛杀海上巡检官军不能制因命怱往尽手杀之还乃授合门祇候怱让其赏以归己上者或讥以好名怱益辞不许宝元初迁西头供奉官广西驻泊都监元昊反参知政事宋庠荐其有勇略迁内殿崇班廊延路兵马都监踰月徙泾原路屯镇戎军与任福遇敌于好水川力战而死赠解州防御使子湜皇城使

耿侁

耿侁字公弼河南人祖昭化为蜀州司户参军骂贼不屈而死侁少喜侠高气初以父荫为三班奉职换伊阳县尉历明州司理参军迁将作监丞知永宁县河南守宋绶荐其材迁通判仪州徙庆州时议西讨以侁督一道粮馈会元昊入寇参任福行营军事遇敌姚家川诸将失利

敌骑益至武英劝傅避去傅不答英叹曰英当死君文吏无军责朱观亦谓傅避贼锋而傅愈前指顾自若被数创乃死始傅与观营笼落川夜作书遗福以持重自写题观傅死后韩琦得其书奏上之诏赠傅右谏议大夫官其子璵璩璋珪琬

王仲宝

王仲宝字器之密州高密人初为刑部吏补齐州章邱尉以捕羣盗有功用荐召对改右班殿直为镇定保深永宁天雄六州军巡检又以捕贼功迁左班徙河北西路提举捉贼擒磁州名贼王遇仙等擢合门祗候捕登州海贼百余人还为河北提举捉贼又捕斩百余人知信安军复为河北提举捉贼有盗百余依西山官军不能捕仲宝悉召出隶军籍奏以自随徙泽潞晋绛慈隰威胜军巡检使至官才八日获太行山宿贼八十人累赐金帛缗钱使契丹积迁内殿承制天圣初知镇戎军改供备库副使破康诺尔诏奖其功凡五年还巡护惠民河堤岸迁供备库使麟府路兵马钤辖知麟州会镇戎军蕃族内寇徙泾原路钤辖复知镇戎军又徙原环二州以西京左藏库使惠州刺史知利州徙并代州钤辖改西上合门使建言缘边博采羌苦之数逃去请宽其法使得复业以捍边境久之迁东上合门使元昊寇延州仲宝将兵至贺兰谷以分兵势败蕃将罗逋于长鸡岭迁四方馆使领濮州团练使为泾原路总管安抚副使兼管句秦凤路军马事与西羌战六盘山俘馘数百人时任福大败好水川别将朱观被围于姚家堡仲宝以兵救之拔观出围乘以从马时诸将皆没独仲宝与观得还徙环庆路副都总管知庆州未几兼本路经略安抚招讨副使破金汤城复赐诏奖谕徙澶州副总管安抚使范仲淹奏留之明年以磁州防御使知代州除左屯卫大将军致仕卒

△景泰

景泰字周卿普州人进士起家补坊州军事推官后以尚书屯田员外郎通判庆州即上言元昊虽称臣诚恐包藏祸心当选主将练士卒修城池储资粮以备不虞三统不报俄元昊反又上边臣要略二十卷迁都官知成州奏平戎策十有五篇会有荐泰知兵者召对称旨换左藏库使知盩州任福败徙原州元昊众十万一出刘璠堡一出彭阳城入攻渭州葛怀敏战崆峒北败敌骑逾平凉至潘原泰率兵五千从闲道赴原而先锋左班殿直张迥【按隆平集作张向】逗遛不进泰斩以徇遇敌彭阳西裨将夏侯观欲退守彭阳泰不许乃依山而阵未成列敌骑来犯泰阴遣三百骑分左右翼张旗帜为疑兵敌欲遁去将校请进击泰止之遣士搜山果得伏兵与战斩首千余级以功迁西上合门使知

镇戎军兼兵马钤辖久之领忠州刺史徙秦凤路马步军总管卒子思立熙宁中屡有战功为引进使忠州防御使知河州与郑戩部兵战没思忠以左藏库副使遂州驻泊都监击泸州夷人陷于格穆山下兄弟继死王事人皆怜其忠

△王信

王信字公亮太原人家故饶财少勇悍大中祥符中盗起晋绛泽潞数州信应募籍军与其徒生擒贼七十人累以功补龙神卫指挥使部使者表荐召阅其艺迁御前忠佐领河中府同干鄜延丹坊州庆成军管界捉贼又迁龙卫都虞候兼鄜延巡检康定初刘平石元孙战于三川信以所部兵薄贼斩首数十级迁捧日都虞候改西京作坊使知镇戎军徙保安军兼鄜延路兵马都监始至之夕敌众号数万傅城军吏气慑信领劲兵二千夜出南门与战失其前锋因按军不动迟明潜上东山整军乘势而下击走之获首级马牛居多迁钤辖兼经略安抚招讨都监领贵州刺史葛怀敏战败信出兵拒敌俘斩甚众进保州刺史就迁马步军都总管四路置招讨使遂为本路招讨副使累迁马步军都虞候象州防御使徙高阳关路王则反贝州用安抚使明镐奏为贝州城下都总管城破则遁信率兵执则而还余党自焚死拜感德军节度观察留后召为少军副都指挥使未至卒赠武密军节度兼侍中

△蒋偕

蒋偕字齐贤华州郑县人举进士补韶州司理参军以秘书省著作佐郎为大理寺详断官密州豪人王灏使奴杀一家四人偕当灏及奴皆大辟宰相陈尧佐欲宽灏判审刑院宋庠与偕持之不从偕以是知名陕西用兵数上书论边事迁秘书丞通判同州计置陕西钱粮逾年为沿边计置青白盐使用庞籍范仲淹荐改北作坊副使环庆路兵马都监历知汾涇二州徙原州边民苦属户为钞盗偕得数辈腰斩境上盗为息迁北作坊使兼本路钤辖明珠康诺尔诸族数为寇偕潜兵伺之斩首四百擒酋豪焚帐落获马牛羊千计徙华州兵马钤辖湖南蛮唐和内寇徙潭州钤辖贼平知忻州徙冀州降知霸州徙恩州领诏州刺史以州仓谬为入粟数作钞遣持至京师交钞得缗钱以补军食为御史弹奏降知坊州侂智高反除宫苑使韶州团练使为广南东西路钤辖贼方围广州徙军沙头安抚杨畋檄借焚粮储退保韶州坐此降潭州驻泊都监再降北作坊使忠州刺史命未至军次贺州太平场贼夜入营袭杀之赠武信军节度观察留后初偕入广州即数知州仲简留兵不袭贼纵兵馘平民可斩左右解之乃止卒以轻肆败

△张忠

张忠开封人以材武补三班借职陕西总管司指使数攻破堡砦杀剧贼张海郭邈山从平恩州功第一累迁如京使资州刺史历真定府定州高阳关京东西路兵马钤辖依智高反就移广东领英州团练使初智高围广州时洪州驻泊都监蔡保恭及知英州苏緘以兵八千人据边渡村扼贼归路忠夺而将之谓其下曰我十年前一健儿以战功为团练使若曹勉之于是不介骑而前会先锋遇贼奔忠手拉贼帅二人马陷泞不能奋遂中标枪死以其父率府副率致仕余庆为左监门卫大将军赐第一区给半俸终身封其母为河内郡夫人弟愿迁右班殿直合门祇候官其子永寿永吉永德及其壻刘鋹封其长女

△郭恩

郭恩开封人初隶诸班出为左侍禁合门祇候历延州四路都巡检环州肃远砦主累迁内殿承制秦凤路兵马都监开古渭州路为前锋斩首九百余级擢崇仪副使会掌乌族叛又率兵攻讨斩首八十五级迁六宅副使累劳补崇仪使为秦陇路兵马钤辖徙并代州钤辖管句麟府军马事夏人岁侵屈野河西地至耕获时辄屯兵河西以诱官军嘉佑二年自正月出屯至三月然后去通判并州司马光行边至河西是时知麟州武戡通判夏倚已筑一堡为候望与光议曰乘敌去出不意可更增二堡以据其地不过二旬壁垒可城然后废横戎临砦二堡彻其楼橹徙其甲兵以实新堡列烽燧以通警急有急则州及横阳堡出兵救之敌来耕则驱之种则蹂践之敌盛则入堡以避如是则堡外必不敢耕种州西五六十里之内晏然经略使庞籍遂檄麟州如其议五月恩及武戡走马承受公事内侍黄道元等以巡边为名往安视之会诇者言敌兵盛屯沙济兰恩欲止不行道元怒以言胁恩夜率步骑六千四百余人不甲者半循屈野河北而行无复部伍夏人举火卧牛峰戡指谓恩曰敌已知吾军至矣道元曰此尔曹故欲沮我师行至谷口恩欲休军须晓乃登山道元奋衣起曰几年闻郭恩名今日懦怯与贾逵何殊恩亦愠曰不过死耳乃行比明至呼喇堆敌数十人皆西走俄而起火敌骑张左右翼自南北交至堆东有堑其中有梁谓之断道堰【按长编作断道坞】恩等东据梁口与力战自旦至食时敌自两旁堑中攀缘而上四面合击恩众大溃夏倚方在红楼见敌骑自西山大下率城中诸军闭门乘城武戡走东山趣城东抉门以入恩道元及府州窳府砦兵马都监刘庆皆被执使臣死者五人军士三百八十七人亡失器甲甚众恩不肯降乃自杀赠同州观察使封其妻录其子弟有差给旧俸二年武戡坐弃军除名编管

江州

△张岳

张岳字子云府州府谷人以贵为牙将有胆略善骑射天圣中西夏观察使阿遇有子来归阿遇寇麟州虏边户约还子然后归所虏麟州还其子而阿遇辄背约安抚使遣岳诘问岳径造帐中谕以逆顺阿遇语屈留岳共食抽佩刀贯大鹫啖岳岳无所惮阿遇抚岳背曰真男子也翌日又与岳纵猎岳发两矢连毙二兔阿遇遗岳马橐駝悉归所虏州将补为来远砦主手杀伪首领夺其甲马时年十八名动一军元昊犯鄜延诏麟府进兵岳以都教练使从忻继闵破朗鸿达尔两族以功补下班殿侍三班差使时敌骑方炽中人促赐军衣至麟州不得前岳駝骑五十往护之至者眉浪遇贼接战流矢贯双颊岳拔矢鬪愈力夺马十二匹而还贼兵攻府州甚急城西南隅庖下贼将登众噉曰城破矣岳乘陴大呼搏贼贼稍却飞矢中右目下身被三创昼夜督守又帅死士开关护州人汲于河讫围解以劳迁右班殿直以岳为麟府州道路巡检至深柏堰遇贼数千分兵追击斩首百余级夺兵械马牛数百近郊民田比秋成未敢获岳以计于张亢得步卒九百人护之大败贼于龙门川从诸将通麟州粮道破贼于柏子砦改左班殿直内侍宋永诚传诏砦下岳护永诚遇贼三松岭贼以精骑挑战矢中岳臂犹跃马左右驰射诸将乘胜而进贼溃特改西头供奉官又迁内殿崇班贼破丰州岳与诸将一日数战破容州刺史耶布移守贵参砦俘获万计迁礼宾副使明镐在河东以岢岚军当云朔路奏岳为麟府路驻泊都监兼沿边都巡检使张亢修并砦堡障初议置安丰砦于石台神岳以为非要害之地遂徙砦于实时库堆以扼贼己而本道上言擅易砦地左迁绛州兵马都监二州未解严复麟府驻泊都监屯安丰累迁洛苑使尝从数骑夜入羌中伺机事既还羌觉追之岳随羌疾驰效羌语与羌俱数里乃得脱前后数中流矢创发臂闲卒

△张君平

张君平字士衡磁州滏阳人以父承训与契丹战死补三班差使殿侍黔州指挥使獠兵屡入寇君平引兵击破之以功迁奉职除驻泊监押徙容白等州巡检迁右班殿直以荐擢合门祗候管句汴口建言岁开汴口当择其地得其地则水湍驶而无留沙岁可省功百余万又请沿河县植榆柳为令佐使臣课取及瘞汴河流尸悉从其言天圣初议塞滑州决河以君平习知河事命以左侍禁签书滑州事兼修河都监召同提点开封府界县镇公事以尝护滑州堤有功特迁内殿崇班君平以京师数罹水灾请委官疏凿近畿诸州古沟恤久之稍完遂诏畿内及近

畿州县长吏皆兼管句沟洫河道自畿至泗州道路多寇君平谓两驿增置使臣专主捕盗而罢夹河巡检于是行者无患复为滑州修河都监迁供备库副使河平改西作坊使就迁钤辖卒君平明于水利死后录三子官子巩皇佑中嗣其父职云

△卢鉴

卢鉴字正臣金陵人累举进士不中授三班奉职监坊州酒税以右班殿直为鄜延路走马承受公事李继迁寇边与总管王荣败走之又与钤辖张崇贵击贼焚其积聚斩首级而还擢合门祗候为本路兵马都监复出荡族帐获羊牛万计徙凤翔秦陇阶成等州提点贼盗公事寻为都巡检徙利州都监初继迁声言石陨帐前有文曰天诫尔勿为中国患真宗问之鉴曰此诈为之以欺朝廷也宜益为备至是继迁陷灵武帝思其言特迁右侍禁知仪州州有制胜关最险要继迁欲乘虚袭取之放言将由此大入谍者以告有诏徙老幼刍粟于内地鉴曰此奸谋也且示虜弱摇民心臣不敢奉诏卒不徙己而贼亦不至再迁西头供奉官知利州会岁饥以便宜发仓粟振民提点河东路刑狱厯知保州广信军原州就为环庆路都监兼庆州徙环州平玛尔密族于合道镇坐事徙知丹州累迁西京左藏库使恩州刺史为环庆路钤辖兼知环州改西上合门使知秦州卒

△郭谿

郭谿字仲谋赵州平棘人举进士厯通利军司理参军中牟县主簿改大理寺丞知济阴县建言澶滑堤狭无以杀大河之怒故汉以来河决多在澶滑且黎阳九河之原今若引河出没于山下穿金堤与横陇合以达于海则害可息诏本道使者共议弗合监通利军税洺州肥乡县田赋不平岁久莫治转运使杨偕遣谿摄令以往既至闭合数日以千步方田法四出量括遂得其数除无地之租者四百家正无租之地者百家收逋赋八十万流民乃复偕奏其才迁殿中丞知馆陶县康定西征谿上战略献拒马抢阵法其制利山川险隘以骑士试上前擢通判镇戎军募兵教习会三司议均税法知谏院欧阳修言惟谿方田法简而易行诏谿与孙琳均蔡州上蔡县税用宰相吕夷简荐起为崇仪副使提举黄御河堤岸时富弼使契丹谿入对陈大水御戎之要其议决黎阳大河下与胡芦滹沱后唐河以注塘泊混界河使东北抵于海上溢鹳陂陂下注北当城南视塘泊界截虜疆东至海口西接保塞惟保塞正西水不可到请立堡砦以兵戍之诏储用兴役会契丹约和而止知丹利二州王则叛文彦博荐谿知冀州运粮助攻讨贼平徙忻州开渭渠导汾水兴水利置屯田转

运使任颢言谿有巧思自为兵械皆可用诏以所作刻漏圆楯独辕弩生皮甲来上帝颇嘉之除益州路兵马钤辖累迁英州刺史后为契丹祭奠副使知汾州未行言独辕弩可试改鄜延路兵马钤辖许置弩五百募土兵教之既成经略使夏安期言其便诏立独辕弩军以西上合门使知潞州又作鹿角车陷马枪请广独辕弩于他道诏谿置弩千分给并潞谿因上疏曰顷使契丹观幽燕地方无十万人一年之费若以术制之使举不得利居无以给不踰数年必弃幽州而遁臣经画河北大水界断敌疆乃其术也臣所创车弩若多设之助以大水取幽蓟如探囊中物尔时三司议均田租召还谿陈均括之法四十条复上平燕议曰契丹疆土虽广人马至少傥或南牧必率高丽渤海黑水宫真室韦等国会战其来既远其粮匮乏以臣所见请举庆历之策合众河于墉泊之北界以限戎马然后以景德故事顿兵自守又旁河郡邑可以水运以给保州应援来则战去则勿追幽州粮储既少敌不可久留不半年闲当遁沙漠则进兵断古北口砦松亭关传檄幽蓟燕南自定且彼之所恃者惟马而已但能多方致力使马不获伸用则敌可破幽燕可取诏置独辕弩二万同提举百司及南北作坊以完军器谿尝谓作汴乘素河三十六陂之流危京师请自巩西山七里店孤株岭下凿七十里导洛人汴可以四时行运诏都水监杨佐同往计度归未及论功而卒

△田敏

田敏字子俊本易州牙吏雍熙中王师讨幽蓟曹彬进兵涿州敌断其后王继恩募勇士持书抵彬敏应募闲行由祁沟关达相州彬得诏选壮士五十人卫敏还道遇贼力战仅以身免彬上其事太宗召见复令赍诏谕彬师还补敏易州静砦指挥使端拱初以所部兵屯定州契丹攻北唐河大将李继隆遣部将逆战为敌所乘奄至水南敏以百骑奋击敌引去又出狼山袭契丹至满城获首级甚众既而敌陷易州敏失其家所在帝擢敏本军都虞候使闲行求其父母得之以归徙屯镇州李继隆讨夏州奏隶麾下敏率兵至灵州遇敌斩获数万计继隆上其功迁御前忠佐马步军副都军头既而又从傅潜于定州时契丹断蒲阴路城中军士千余人不敢战敏率轻骑复出之真宗幸天雄军诏敏隶高琼使追贼至窳远军以功领涿州刺史王均乱西川从招安使雷有终败贼于灵池山贼平迁马步军都军头咸平中契丹复入寇敏从王显为镇定先锋大破之于遂城西羊山真授单州刺史后为邢州兵马钤辖从王起屯定州遇契丹于望都逆战斩首二千余级徙北平砦兵马钤辖领骑兵五千以当其冲先是两地供输民多为契丹乡导敏自鱼台北悉驱南徙凡七百余

户送定州迁北平砦总管复败契丹于杨村敏谍知契丹主去北平十里蒲阴驻砦夜率锐兵袭破其营契丹主大惊遂引去敌攻瀛州不下欲乘虚犯贝魏诏敏与魏能张凝三路兵入敌境纵击以牵其势敏出西路屯归石村虏获人畜铠仗以万计还定州遇敌于镇州之北复大破之契丹请和乃徙敏镇定路都钤辖迁本州岛团练使充镇定路总管徙永兴军陝州历鄜延环庆凤翔三路久之为环庆路都总管时后桥属羌数扰边敏诛违命者十八族又败罗古于三店川迁郑州防御使泾原路总管后徙环庆坐与部豪往还降左屯卫大将军昭州防御使既而以虢州团练使知隰州复为环庆路都总管仪州防御使卒

△侍其曙

侍其曙字景升父稹左监门卫大将军曙以父任为殿前承旨改右班殿直咸平中以合门祇候为苏杭湖秀等州都巡检使迁左侍禁领东西排岸司与谢德权提举在京仓草场尝于仓隙地牧牛羊为德权所讼真宗以问德权曰牛羊食仓粟邪曙闻而自劾帝勉谕之有告永兴民李琰将作乱命曙往按之捕琰党三十余人皆伏法青州卒庞德讼其校李绪谋以众叛帝疑其诬又命曙至青州劾无验遂弃德市知青州张齐贤奏曙擅戮人帝曰不尔无以安被告者进曙东头供奉官改内殿崇班祥符二年黎州夷人为乱诏曙乘驿往招抚其酋曙按行盐井夷人复叛曙率部兵百余生擒首领三人斩首数十级因上言蛮阻险拒命请必加讨诏知庆州孙正辞环庆驻泊都监张继勋领陝西兵同曙俱进所至皆降曙又请诛之真宗谓王旦曰已降而杀之何以信四夷不许迁内殿承制再迁如京副使知登州会岁饥请漕江淮米以振贫乏活者甚众累迁西京作坊使惠州刺史知桂州徙滑州迁西上合门使徙郢州提举在京诸司库务卒

△康德輿

康德輿字世基河南洛阳人父赞元崇仪使武州刺史以功录德輿三班奉职迁右班殿直泾原路走马承受擢阁门祇候河阳武埽诏遣德輿完筑历开封府西路都巡检句当榷货务皆兼领埽事改巡护开封府等六州黄河堤岸天圣中使夏州还句当汴口改西头供奉官用荐迁内殿崇班河阴兵马都监建沿汴斗门以节水会积雨汴水将溢德輿请自京西导水入护龙河水得不溢历知原州庆州益州路兵马钤辖久之领昭州刺史徙并代兵马钤辖管句麟府路军马事有蕃部密罗为殿侍有潜与贼通战则反射汉人密罗无以自明乃谋附贼指挥张岳以告德輿曰不可不杀德輿不听岳曰请为君召与饮仆崖谷中声言堕马死安知汉

杀之德輿犹豫不决岳计不得行贼果以密罗为向导
自后河川入袭府州蕃汉欲入城德輿闭门不纳或降贼或为贼所杀不可胜计贼既围
府州德輿与马步军副总管王元兵马钤辖杨怀忠按
兵不出战但移文转运司调军食转运副使文彦博籍民辇运至境以俟而德輿等终不
出及陷丰州纔出屯州城数里三日而还居民望见以
谓寇复至皆弃其所赍入保城郭然朝廷不悉闻德輿止坐不出战降为东染院使河阳
兵马都监寻复昭州刺史知保州徙真定府定州路总
管厯知代石仪三州大名府路钤辖提举金堤累迁西上合门使至和中河决小吴埽破
东堤顿邱口民居避水者趋堤上而水至不得达德輿
以巨船五十顺流以济之遂免垫溺复领果州团练使知冀州徙赵州有告云冀卒谋以
上元夜劫库兵为乱德輿会宾属燕饮自若阴遣人捕
首谋诛之徙陈州钤辖卒

△张昭远

张昭远字持正沧州无棣人父凝殿前都虞候盩州防御使契丹内寇凝与康保裔
伏兵瀛州陷围中昭远年十八挺身掖出之擢左班殿
直寄班祇候为忻州都巡检改合门祇候知狄山军管句河东缘边安抚司再迁内殿崇
班天禧初除西上阁门副使俄为河北缘边安抚副使
寻知瀛州改东上合门副使知定州以引进副使复知瀛州迁西上合门使会大雨陂塘
大溢昭远勒兵筑长堤以捍其冲徙鄜延路兵马钤辖
进都钤辖筑堡成平川领忠州刺史知成德军迁四方馆使溥沱河决坏城郭乃修五关
城外环以堤民至今为利擢捧日天武四厢都指挥使
新州防御使厯步军马军都虞候嘉州防御使知代州召还改莫州防御使罢管军授左
龙武军大将军昭州防御使卒特赠应州观察使

钦定续通志卷三百四十六

●钦定续通志卷三百四十七 列传一百四十七

列传

宋 【五十一】

○宋五十一

王安石【雱】 王安礼 王安国

王安石

王安礼

王安国

△王安石

王安石字介甫抚州临川人父益都官员外郎安石少好读书过目不忘属文动笔

如飞见者服其精妙友生曾巩携以示欧阳修修为之
延誉擢进士上第签书淮南判官旧制秩满许求试馆职安石独否再调知鄞县起堤堰
决陂塘为水陆之利贷谷与民立息以偿俸新陈相易
邑人便之安石遂自以其术可行于天下其后当国所措注皆本于此 【按宋名臣言行
录引晁以道论配享札子谓安石熙宁初为执政所
行之法皆本于此然知行于一邑则可不知行于天下不可也】 通判舒州文彦博为相
荐安石恬退乞不次进用以激奔兢之风寻召试馆职
不就修荐为谏官以祖母年高辞修以其须禄养言于朝用为羣牧判官请知常州移提
点江东刑狱入为度支判官时嘉佑三年也安石议论
高奇能以辨博济其说果于自用慨然有矫世变俗之志于是上万言书以为今天下财
力困穷风俗衰坏患在不知法度不法先王之政因天
下之力以生天下之财取天下之财以供天下之费自古治世未尝以财不足为公患也
患在治财无其道尔愿监苟且因循之弊后安石当国
其所措注大抵皆祖此书俄直集贤院先是馆阁之命屡下安石屡辞士大夫谓其无意
于世恨不识其面朝廷每欲畀以美官惟忠其不就也
明年同修起居注辞之累日阁门吏赍敕就付之拒不受吏随而拜之则避于厕吏置敕
于案而去又追还之上章至八九乃受遂知制造 【
伏读通鉴辑览 御批宋人动辄奏辞某官恶习相仍不复知有致身大义安石新进
小臣乃赍敕就付坚拒不已甚且避之于厕不恭实甚
迨除制造逐不更辞则其狡黠邀荣心事毕露乃仁宗与在廷诸臣方且想望丰采惟
恐其不就何其真也】 纠察在京刑狱自是不复辞官
矣有少年鬪鶡其侪求之不与恃与之昵辄持去少年追杀之开封当此人死安石驳曰
按律公取窃取皆为盗此不与而彼携以去是盗也追
而杀之是捕盗也虽死当勿论遂劾府司失入事下审刑大理皆以府断为是诏放安石
罪当诣合门谢安石不肯御史举奏之置不问时有诏
舍人院无得申请除改文字安石争之语皆侵执政终英宗世召不赴神宗在藩邸韩维
为太子庶子荐安石自代甫即位命知江宁府数月召
为翰林学士兼侍讲熙宁元年始造朝入对帝问为治所先对曰择术为先帝曰唐太宗
如何曰陛下当法尧舜何以太宗为哉帝曰卿可谓责
难于君一日讲席羣臣退帝留安石因言唐太宗必得魏征刘备必得诸葛亮然后可以
有为二子诚不世出之人也安石曰陛下诚能为尧舜
则必有皋夔稷禹诚能为高宗则必有傅说彼二子者何足道哉登州妇人恶其夫寝陋
夜以刃断之伤而不死狱上朝议皆当之死安石独以
为合从谋杀减二等论帝从安石说遂着为令二年拜参知政事上问卿所施設以何先

安石曰变风俗立法度正方今之所急帝以为然于是
设制置三司条例司【伏读通鉴辑览 御批什一而税方册可征而谓之古非特什
一是知聚敛之臣必恃覆邦之利口遂巧说以乱经
而无所忌惮至剥民财以增利禄欲使人知自重可以省刑尤为谬见不思墨吏之所以
病民者以其贪得无厌也即加之禄其贪犹是及其既
犯而绳之以法庶几惩一儆百乃豫竭万姓之膏以充百司之橐何异畏猛虎之噬人而
先剜肉以啖之乎】 令判知枢密事陈升之同领之安
石令其党吕惠卿预其事而农田水利青苗均输保甲免役市易保马方田诸役相继并
兴号为新法遣提举官四十余辈颁行天下青苗法者
以常平余本作青苗钱散与人户令出息二分春散秋敛均输法者以发运之职改为均
输假以钱货凡上供之物皆得徙贵就贱用近易远预
知在京仓库所当办者得以便宜蓄买保甲之法籍乡村之民二丁取一十家为保保丁
皆授以弓弩教之战阵【伏读通鉴辑览 御批
保甲本周礼比闾遗意使民自相友助以收诘奸禁盗之益有司徧籍考稽期无懈弛旷
废而已若督责过严人皆畏其束缚烦苦则非所以保
民而适以厉民且复授之弓弩教之战阵驱饮食耕凿之伦使日从事于击刺其为辍耒
舍业者不少矣柔熯者既无适于用桀骜者或因而横
行尤无益而有损是又泥寓兵于农之法而未达乎古今异宜之故也】 免役之法据家
费高下各令出钱雇人充役下至单丁女户本来无役
者亦一槩输钱谓之助役钱市易之法听人赊贷县官财货以田宅或金帛为抵当出息
十分之二过期不输息外每月更加罚钱百分之二保
马之法凡五路义保愿养马者户一匹以监牧见马给之或官与其直使自市岁一阅其
肥瘠死病者补偿方田之法以东西南北各千步当四
十一顷六十六亩一百六十步为一方岁以九月令佐分地计量验地土肥瘠定其色号
分为五等以地之等均定税数【伏读通鉴辑览

御批张时泰广义谓方田均税在神宗诸政中犹为彼善于此所见似是而非不知五
方土性不齐所产亦异岂能强而同之则壤成赋上期
无悖于十一而止必欲方量均额令佐履亩周行农氓已不胜其扰且自方帐以下多立
科条尤为烦琐无当民间未得均赋之利已受更张之
书善为政者必不出此也】 又有免行钱者约京师百物诸行利入厚薄皆令纳钱与免
行户祇应自是四方争言农田水利古陂废堰悉务兴
复又令民封状增价以买坊场又增茶盐之额又设措置河北余使司广积粮谷于临流
州县以备馈运由是赋敛愈重而天下骚然矣御史中
丞吕诲论安石过失十事帝为出诲安石荐吕公着代之韩琦谏疏至帝感悟欲从之安

石求去司马光答诏有士大夫沸腾黎民骚动之语安

石怒抗章自辨帝为巽辞谢 【伏读通鉴辑览 御批安石抗章神宗巽谢成何政体即安石果正人犹尚不可而况不正乎尝谓神宗之

信安石有若病狂此亦宋室治乱安危之所关有非人力之所能为者至赵抃素称骨鯁

竄不知新法病民何未闻出一言以救正及神宗因韩琦奏谕罢青苗机有可乘抃仍请俟安石之出是诚何心迨后悔恨求去所谓啜其泣矣何嗟及矣】 令吕惠卿谕旨韩絳又劝帝留之安石入

谢因为上言中外大臣从官台谏朝士朋比之情且曰奸人欲败先王之正道以沮陛下之所为此所以纷纷也帝以为然安石乃视事琦说不

得行安石与光素厚光援朋友责善之义三诒书反复劝之安石不乐帝用光副枢密光辞未拜而安石出命遂寝公着虽为所引亦以请罢新

法出知颍州言者相继去骤用秀州推官李定为御史惠卿遭丧去安石未知所托得曾布信任之亚于惠卿三年拜同中书门下平章事明年

春京东河北有烈风之异民大恐帝批付中书令省事安静以应天变放遣两路募夫责有司郡守不以上闻者安石执不下开封民避保甲有

截指断腕者知府韩维言之帝问安石安石曰此固未可知就令有之亦不足怪今士大夫睹新政尚或纷然惊异况于二十万户百姓固有蠢

愚为人所感动者岂应为此遂不敢一有所为耶帝曰民言合而听之则胜亦不可不畏也东明民或遮宰相马诉助役钱安石白帝曰知县贾

蕃乃范仲淹之壻好附流俗致民如是又曰治民当知其情伪利病不可示姑息帝用韩维为中丞安石憾曩言指为善附流俗以非上所建立

因维辞而止欧阳修乞致仕冯京请留之安石曰修附丽韩琦以琦为社稷臣如此人在一郡则坏一郡在朝廷则坏朝廷富弼以格青苗解使

相安石谓不足以阻奸至比之共鯨灵台郎尤瑛言天久阴星失度宜退安石即黥隶英州唐垸本以安石引荐为谏官因请对极论安石专作

威福及曾布等表里擅权凡六十事谪死文彦博言市易与下争利致崑岳山崩安石曰华山之变殆天意为小人发市易之起自为细民久困

以抑兼并尔于官何利焉阙其奏出彦博守魏礼部议正太庙太祖东向之位安石独定议迁僖祖于祧庙议者合争之弗得七年春天下久旱

饥民流离帝忧形于色对朝嗟叹欲尽罢法度之不善者安石曰水旱常数尧汤所不免此不足招圣虑但当修人事以应之帝曰今取免行钱

太重人情咨怨至出不逊语自近臣以至后族无不言其害两宫泣下忧京师乱起以为天旱更失人心安石曰近臣不知为谁若两宫有言乃

向经曹佾所为尔臣未之闻监安上门郑侠上疏绘所见流民扶老携幼困苦之状为图

以献曰旱由安石所致去安石天必雨侠又坐窜岭南
慈圣宣仁二太后流涕谓帝曰安石乱天下帝亦疑之遂罢为观文殿大学士知江陵府
自礼部侍郎超九转为吏部尚书吕惠卿服阕安石朝
夕汲引之至是白为参知政事又乞召韩絳代已二人守其成谟不少失时号絳为传法
沙门惠卿为护法善神而惠卿寔欲自得政忌安石复
来因郑侠狱陷其弟安国又起李士宁狱以倾安石絳觉其意密白帝请召之八年二月
复拜相安石承命即倍道来三经义成加尚书左仆射
兼门下侍郎以子雱为龙图阁直学士雱辞惠卿劝帝允其请由是嫌隙愈着惠卿为蔡
承禧所击居家俟命雱风御史中丞邓綰复弹惠卿与
知华亭县张若济为奸利事置狱鞫之惠卿出守陈十月彗出东方诏求直言及询政事
之未协民者安石率同列疏言晋武帝五年彗出轸十
年又有彗而其在位一十八年与乙巳占所期不合盖天道远先王虽有官占而所信者
人事而已天文之变无穷上下傅会岂无偶合今星工
所传占书又世所禁誊写讹误尤不可知窃闻两宫以此为忧望以臣等所言力行开慰
帝曰闻民间殊苦新法安石曰祁寒暑雨两民犹怨咨此
无庸恤帝曰岂若并祁寒暑雨之怨亦无邪安石不悦退而属疾卧帝慰勉起之其党谋
曰今不取帝素所不喜者暴进用之则权轻将有窥人
间隙者安石是其策 【伏读通鉴辑览 御批安石过恶所谓天变不足畏祖宗不足
法人言不足恤三言尽之至神宗强起复出专取帝
所不喜之人骤加进用以示权势其恶益明目张胆矣无将之诛尚可遁乎】 帝喜其出
悉从之时出师安南谍得其露布言中国行青苗助役
之法穷困生民我今出兵欲相拯济安石怒自草敕榜诋之华亭狱久不成雱以属门下
客吕嘉问练亨甫共议取邓綰所列惠卿事杂他书下
制狱安石不知也省吏告惠卿于陈惠卿以状闻且讼安石曰安石尽弃所学隆尚纵横
之末数方命矫令罔上要君又发安石私书曰无使帝
知者帝以示安石安石谢无有归以问雱雱言其情安石咎之雱愤患疽发背死安石暴
綰罪云为臣子弟求官及荐臣壻蔡卞遂与亨甫皆得
罪綰始以附安石居言职及安石与吕惠卿相倾綰极力助攻惠卿帝颇厌安石所为綰
惧失势屡留之于帝其言无所顾忌 【伏读通鉴辑
览 御批惠卿投匭请留盖揣知神宗方向用安石眷注未衰欲藉是以丐其援引且
所行新法又皆其一力赞成故甘受护法善神之讥耳
后此得致执政可以害安石者无所不用其智小人势尽交疏相倾相轧情态实可憎鄙
不独蠹国殃民貽千古唾骂已也】 亨甫险薄谄事雱
以进至是皆斥安石屡谢病求去 【伏读通鉴辑览 御批安石奸状败露始为神宗

所憎厌恶贯已盈邓绾虑其去而失势上书为乞恩
泽小人丑态毕现不复知有羞耻安石声言当黜盖自揣恩遇已衰藉此表其公正仍出于自固计非由衷之论也绾即以此贬斥而安石亦不久罢免心劳日拙作伪果何益哉】及子雱死尤悲伤不堪力请解几务罢为镇南军节度使同平章事判江宁府明年改集禧观使封舒国公
屡乞还将相印元丰三年复拜左仆射观文殿大学士换特进改封荆哲宗立加司空元佑元年卒年六十八赠太傅绍圣中谥曰文配享神宗
庙庭崇宁三年又配食文宣王庙列于颜孟之次追封舒王钦宗时杨时以为言诏停之高宗用赵鼎吕颐问言停宗庙配享削其王封初安石
训释诗书周礼既成颁之学官天下号曰新义晚居金陵又作字说多穿凿傅会黜春秋之书不使列于学官至目为断烂朝报性强忤遇事无
可否自信所见执意不回至议变法在廷交执不可安石傅经义出己意辩论辄数百言众不能诘甚者谓天变不足畏祖宗不足法人言不足
恤罢黜中外老成人几尽【伏读通鉴辑览 御批以六艺文奸言者王莽也安石继之莽流毒百姓二十余年光武起而拯之遂以宁谥
安石则祸肇熙宁讫徽钦犹未艾北狩南渡皆一人兆其机即谓其罪浮于莽可也】子雱

王雱

王雱

雱字符泽为人慁悍阴刻无所顾忌性敏甚未冠已著书数万言年十三得秦卒言洮河事叹曰此可抚而有也使西夏得之则吾敌强而边患博矣其后王韶开熙河安石力主其意义盖兆于此举进士调旌德尉雱气豪睥睨一世不能作小官作策二十余篇极论天下事时安石执政所用多少年雱亦欲预选安石欲帝知而自用乃以雱所作策及注道德经镂板鬻于帝遂传达于帝邓绾曾布又力荐之召见除太子中允崇政殿说书神宗数留与语受诏注诗书义擢天章阁待制兼侍讲书成迁龙图阁直学士以病辞不拜安石更张政事雱实导之常称商鞅为豪杰之士言不诛异议者法不行安石与程颢语雱囚首跣足携妇人冠以出问父所言何事曰以新法数为人所阻故与程君议雱大言曰泉韩琦富弼之头于市则法行矣安石遽曰儿悞矣【伏读通鉴辑览 御批安石雱父子济恶固君子之所弃然囚首跣足携妇人冠以见其父于对客之时此或出于恶皆归之之口未免已甚且安石乃伪为名高之人亦岂肯容其子如是哉】卒时纔三十三特赠左谏议大夫

△王安礼

王安礼字和甫安石之弟也早登科从河东唐介辟熙宁中鄜延路城娄鄂特河东发民四万负饷宣抚使韩绛檄使佐役后帅吕公弼将从之安礼争曰民兵不习武事今■〈区支〉之深入此不为寇所乘则冻饿而死尔宜亟罢遣公弼用其言民得归而他路遇敌者全军皆覆公弼荐于朝神宗召对欲骤用之安石当国辞以为著作佐郎崇文院校书他日得见命之坐有司言八品官无赐坐者特命之迁直集贤院出知润州湖州召为开封府判官尝偕尹奏事既退独留访以天下事帝甚乡纳直舍人院同修起居注苏轼下御史狱安礼从容言自古大度之主不以言语罪人轼以才自奋今一旦致于理恐后世谓陛下不能容才帝曰朕固不深谴也行为卿贲之轼以故得轻比进知制诰彗星见诏求直言安礼上疏曰人事失于下几象见于上意者左右大臣不均不直谓忠者为不忠不贤者为贤乘权射利者用力殫于沟瘠取利究于园夫足以干阴阳而召星变愿察亲近之行杜邪枉之门至于祈禳小数贬损旧章恐非所以应天者帝览数嘉叹以翰林学士知开封府事至立断前滞讼不得其情及具案而未论者几万人安礼剖决未三月三狱院及畿赤十九邑囚系皆空书揭于府辽使过而见之叹息夸异帝闻之喜特升一阶帝数失皇子太史言民墓多迫京城故不利国嗣诏悉改卜无虑数十万计众汹惧安礼谏曰文王卜世三十其政先于掩骼埋胔未闻迁入之冢以利其嗣者帝恻然而罢逆者连得匿名书告人不轨所涉百余家帝付安礼治之安礼验所指皆略同最后一书加三人有姓辞者安礼呼问曰若岂有素不快者耶曰有持笔来售者拒之鞅鞅去其意似见衔即命捕讯果其所为也即梟其首于市不逮一人京师谓为神明宗室令騑以数十万钱买妾久而斥归之诉府督元直安礼视妾既炙败其面矣即奏言此与炮烙之刑何异请勿理其直而加厚谴以为戒诏从之仍夺令騑俸后宫造油箔约三年损者反其价纔一年有损者中官持诣府请如约安礼曰庸詎非置之不得其地为风雨燥湿所坏耶苟如是民将无复得直卒不追以是宗室中贵人皆惮之元丰四年初分三省置执政拜中大夫尚书右丞转左丞王师问罪夏国经原承受梁同奏转运使叶康直饷米恶不可食帝大怒安礼曰此一梁同之言疑未必实当按之乃遣判官张大盩与同参核且械系康直以俟既而可用者什八九帝意解赦康直是时伐夏不得志李宪又欲再举帝以访辅臣王珪曰向所患者用不足朝廷今捐钱钞五百万缗以供军食有余矣安礼曰钞不可噉必变而为钱钱又变为刍粮今距西征之期纔两月安能集事帝曰李宪以为已有备彼宦者能如是卿等独无意乎唐平

淮蔡唯裴度谋议与主同今乃不出公卿而出于阉寺朕甚耻之安礼曰淮西三州尔有裴度之谋李光颜李愬之将然犹引天下之兵力历岁而后定今夏氏之强非淮蔡比宪材非度匹诸将非有光颜愬辈臣惧无以副圣意也【伏读通鉴辑览 御批西夏之罪浮于淮蔡廷臣乃无一人效裴度赞成谋画者且谓诸将非有光颜愬比其惮于行师沮挠不遗余力宜神宗有不出公卿而出于阉寺之诮也公卿既无足与谋转以阉寺能尽心而作之国事未有不日坏者明崇祯之亡国正复坐此然其时之公卿亦足见无一有人心者矣】帝悟而止后欲除宪节度使安礼又以为不可徐禧计议边事安礼曰禧志大才疏必误国及永乐败书闻帝曰安礼每劝朕勿用兵少置狱盖为是也久之御史张汝贤论其过以端明殿学士知江宁府元佑中加资政殿学士历扬青蔡三州又为御史言失学士移舒州绍圣初还职知永兴军二年知太原府苦风痹卧帐中决事下不敢欺卒年六十二赠右银青光禄大夫安礼伟风仪论议明辨常以经纶自任而阔略细谨以故数贻口语云

△王安国

王安国字平甫安礼之弟也幼敏悟未尝从学文词天成年十二遂以文章闻于世于书无所不通数举进士又举茂材异等有司考其所献序言为第一以母丧不试庐于墓三年熙宁初韩绛荐其材行召试赐及第除西京国子教授官满至京师帝以安石故赐对帝曰汉文帝何如主对曰三代以后未有也帝曰但恨其才不能立法更制尔对曰文帝自代来入未央宫定变故俄顷呼吸间恐无才者不能至用贾谊言待羣臣有节专务以德化民海内兴于礼义几致刑措则文帝加有才一等矣帝曰王猛佐苻坚以蕞尔国而令必行今朕以天下之大不能使人何也曰猛教坚以峻刑狱杀人致秦祚不传世今刻薄小人必有以是误陛下者愿颡以尧舜三代为法则下岂有不从者乎又问卿兄秉政外论谓何曰恨知人不明聚敛太急耳帝默然不悦由是别无恩命止授崇文院校书后改秘阁校理屡以新法力谏安石又质责曾布误其兄深悉吕惠卿之奸先是安国教授西京颇溺于声色安石在相位以书戒之曰宜放郑声安国复书曰亦愿兄远佞人惠卿衔之及安石罢相惠卿遂因郑侠事陷安国坐夺官放归田里既而复其官命下而安国卒年四十七

钦定续通志卷三百四十七

●钦定续通志卷三百四十八 列传一百四十八

列传

宋【五十二】

○宋五十二

李清臣 安焘 张璪 蒲宗孟 黄履 蔡挺【抗】
王韶【厚冢】 薛向 章粦 常秩
 邓綰【洵武】 李定 舒亶 蹇周辅【序辰】王广渊 王陶 王子韶

李清臣

安焘

张璪

蒲宗孟

黄履

蔡挺

王韶 【王厚 王冢】

薛向

章粦

常秩

邓綰

李定

舒亶

蹇周辅

王广渊

王陶

王子韶

△李清臣

李清臣字邦直魏人也七岁知读书经目辄诵举进士调邢州司户参军和川令岁满荐者踰十数应材识兼茂科治平二年试秘阁考官韩维曰荀卿氏笔力也置第一时大雨霖灾异数见论者归咎濮议及廷对清臣言天地之大譬如人一身腹心肺腑有所攻塞则五官为之不宁民人生聚天地之腹心肺腑也日月星辰天地之五官也善止天地之异者不止其异止民之疾痛而已策入等以秘书郎签书平江军判官名声籍甚既而诏举馆阁欧阳修荐之得集贤校理同知太常礼院使韩绛使陕西庆卒乱家属九指挥应诛清臣请于绛配与奴婢绛坐贬清臣亦通判海州 【按晁补之撰清臣行状云韩绛宣抚陕西奏公掌机密文字庆州兵乱其家属应诛者凡九指挥公言庆兵造意不谋妻子宜用恩州故事配隶将士为奴婢绛从之及绛贬公曰我岂负韩公者因通判海州又东

都事略云韩绛宣抚陕西奏清臣为属迁太子中允检
正中书吏房公事绛贬清臣因还所迁官通判海州】久之还故官出提点京东刑狱齐
鲁盗贼为天下剧设耳目略名捕且尽作韩琦行状神
宗读之曰良史才也召为两朝国史编修官撰河渠律历选举诸志同修起居注进知制
诰翰林学士授朝奉大夫六年拜尚书右丞哲宗即位
转左丞时熙丰法度一切厘正清臣固争之罢为资政殿学士知河阳徙河南永兴改知
真定府拜中书侍郎绍圣元年廷试进士清臣发策主
意皆绌元佑之政策士悟其指于是绍述之论大兴国是遂变范纯仁去位清臣独颀中
书亟复青苗免役法除诸路提举官觐为相顾苏辙轧
己乃撻辙尝以汉武比先帝激上怒辙罢时召章惇未至清臣心益觐之已而惇入相复
与为异惇既逐诸臣并籍文彦博吕公着以下三十人
将悉窜岭表清臣曰更先帝法度不为无过然皆累朝元老若从惇言必大骇物听帝乃
揭榜朝堂置余人不问鄜延路金明砦主将张兴战没
惇怒议尽戮全军四千人清臣曰将死亦多端或先登争利或轻身入敌令悉诛吏士异
时亡将必举军降虏矣于是但诛牙兵十六辈上幸楚
王第有狂妇人遮道叫呼告清臣谋反御史捕治本澶州娼而为清臣姑子田氏外妇者
清臣不能引去用御史言以大学士知河南寻落职知
真定府初蔡确子渭上书诉父冤造奇譖以陷刘摯罪清臣心知其诬弗之省坐夺学士
徽宗立入为门下侍郎仆射韩忠彦与之有连惟其言
是听出范纯礼张舜民不使吕希纯刘安世入朝皆其谋也寻为曾布所陷出知大名府
而卒赠金紫光禄大夫后朝议以复孟后罪追贬武安
军节度副使再贬雷州司户参军

△安焘

安焘字厚卿开封人登第调蔡州观察推官至太常丞主管大名府路机宜文字用
欧阳修荐为秘阁校理判吏部南曹荆湖北路转运判
官提点刑谏兼常平农田水利差役事时方兴新法奉行之吏或迎合求进司农符檄日
夜下如免役增宽剩造簿供手实青苗责保任追胥苛
切其类旁午焘平心奉法列其太甚于朝移使京东路过阙入见留检正中书孔目房修
起居注元丰初高丽新通使假焘左谏议大夫往报之
高丽迎劳馆饷有加礼使还即授所假官兼直学士院知审刑院决部滞讼五百余案因
言每蔽狱上省轻重有疑法官顾避稽停请自今以疑
狱谏者皆得轻论从之求知陈州还为龙图阁直学士判军器监命馆辽使方宴近郊至
肆仪将见逮辞日悉令如仪或谓细故无足较焘曰契
丹喜尝试人其渐不可长也俄权三司使改户部尚书六年同知枢密院夏人款塞乞还

侵疆焘言地有非要害者固宜予然羌情无厌当使知
吾宥过而息兵不应示以厌兵之意哲宗立复仍前议二府遂欲并弃熙河焘固争之于
是但以葭芦等四砦归之蔡确辈更用事焘循循其间
不能有所建明元佑二年进知院事时复洮河擒果庄青宜结二边少清而并塞犹苦寇
掠焘言为国者不可好用兵亦不可畏用兵好则疲民
畏则遗患今朝廷每戒疆吏非举国入寇毋得应之则固畏用兵矣虽仅保障戍实堕其
计中愿复讲攻扰之策且干顺幼竖梁氏擅权族党酋
渠多反侧顾望若有以离间之未必不回戈而复怨此一奇也其后夏人自相携贰使来
修贡悉如焘策大河北流宰相主水官议必欲回之东
注焘以河流入涑淀久必淤浅恐河朔无以御敌遂上言曰自小吴未决之前河虽屡徙
而尽在中国故京师得以为北限今决而西则河尾益
北如此不已将南岸遂属敌界彼若建桥梁守以州郡窥兵河外可为寒心今水官之议
不过论地形较功费而献纳之臣不考利害轻重徒便
于治河而以设险为缓非至计也帝虽然之而回河之议纷起东北萧然烦费功亦不就
三年同列皆序迁且新用执政焘独如初诏增其两秩
焘恳辞不受以母忧去卒丧拜观文殿学士知郑州徙颍昌及河南府入为门下侍郎宣
仁之丧诏宗室为三年服才越岁章惇拜相欲革为期
焘争之曰上以先后保佑之久追崇如恐不尽兹用明道故实耳遽改之播诸天下非佳
声也乃止焘与惇布衣交覬其助己焘不肯少下之阳
翟民盖渐有财讼而与谏官来之邵交通开封得其事惇右之邵欲薄其罪焘不可复欲
并劾开封焘又不可遂与惇隙谏官常安民言教坊不
当于相国寺作乐帝怒欲遂安民焘为救释惇遂潜其相表里出知郑州徙大名徽宗立
复知枢密院旧制内侍出使以所得旨言于院审实乃
得行后多辄去焘请按治之都知阎守懃领他职祈罢不以告亦劾之帝敕守懃诣焘谢
郝随得罪或揣上意且起用欲援赦为阶亦争之以老
避位帝将宠以观文殿大学士有闲之者曰是宰相恩典也但以学士知河南将行上疏
曰自绍圣元符以来用事之臣持绍述之名诬惑君父
熙宁元丰之间中外府库无不充衍绍圣以还倾竭以供边费使军无见粮吏无月俸公
私虚耗未有甚于此时而反谓绍述岂不为厚诬哉愿
陛下监之勿使饰偏辞而为身谋者复得行其说又言东京党祸已萌愿戒履霜之渐语
尤激切初建青唐邈川为湟州戍守困于供亿议者以
为可弃焘在枢府奏还之崇宁元年议其罪降端明殿学士再贬宣国军节度使使汉阳
军安置湟州复又降祁州团练副使鄜州之复又移建
昌军然弃鄜州时焘居忧不预也终不敢自明阅再岁始复通议大夫还洛卒年七十五

后五岁悉还其官职子扶靖康时为给事中金人入京
师责取金帛扶与梅执礼陈知质程振皆见杀

△张璪

张璪初名琥字邃明滁州全椒人洎之孙也早孤鞠于兄环欲任以官辞不就未冠
登第历凤翔法曹缙云令王安石与环善既得政将用
之而环已老乃引璪同编修中书条例授集贤校理知谏院直舍人院杨绘刘摯论助役
安石使璪为文诰之辞由是忤安石意神宗欲命璪知
制诰安石荐用布以璪同修起居注坐奏事不实解三职已而复之时建议武学璪言古
之太学舞干习射受成献功文武之才皆自此出未闻
偏习其一者也请无问文武之士一养于太学以集贤殿修撰知蔡州复知谏院兼侍御
史知杂事卢秉行盐法于东南操持峻急一人抵禁数
家为黥徙且破产以偿告捕二年中犯者万人璪条例其状又言行役法以来最下户亦
每岁纳钱乞度宽羨数均损之以惠贫弱后皆施行郑
侠事起璪媚吕惠卿劾冯京与侠交通致京于罪判司农寺出知河阳元丰初入权度支
副使遂知制诰知谏院判国子监荐蔡卞可为直讲建
增博士弟子员月书季考岁校以行艺次升立斋舍八十二其议多自璪发之苏轼下台
狱璪与李定杂治谋傅致轼于死详定郊庙奉祀礼文
议者多以国朝未尝躬行方泽之礼为非正诏议更制璪请于夏至之日备礼容乐舞以
豕宰摄事帝曰在今所宜无以易此事行其说为翰林
学士详定官制以寄禄二十四阶易前日省寺虚名为职事名始正四年拜参知政事改
中书侍郎哲宗立谏官御史合攻之谓璪奸邪便佞善
窥主意随势所在而依附之往往以危机陷入深交舒亶数起大狱天下共知其为大奸
疏入皆不报最后刘摯言璪初奉安石旋附惠卿随王
珪党章惇谄蔡确数人之性不同而能探情变节左右从顺各得其欢心今过恶既章不
可不速去如是踰岁乃以资政殿学士知郑州徙河南
定州大名府进大学士知扬州以卒赠右银青光禄大夫谥曰简翼

△蒲宗孟

蒲宗孟字传正闻州新井人第进士调夔州观察推官治平中水灾地震宗孟上书
斥大臣及宫禁宦寺熙宁元年改著作佐郎召试学士
院以为馆阁校勘检正中书户房兼修条例进集贤校理时三司新置提举帐司官禄丰
地要人人欲得之帝命与宗孟命察访荆湖两路奏罢
辰沅役钱及湖南丁赋远人赖之吕惠卿制手实法然犹许灾伤五分以上不预宗孟言
民以手实上其家之物产而官为注籍以正百年无用
不明之版图而均齐其力役天下良法也初无所扰何待丰岁愿诏有司勿以丰凶弛张

其法从之民于是益病俄同修起居注直舍人院知制
诰帝又称其有史才命同修两朝国史为翰林学士兼侍读特加佩鱼遂着为令枢密都
承旨张诚一预书局事挟中旨以胁同列宗孟持其语
质帝前因叩头白其奸帝察其不阿拜尚书左丞帝尝语辅臣有无人才之叹宗孟率尔
对曰人才半为司马光邪说所坏帝不语直视久之曰
蒲宗孟乃不取司马光邪未论别事只辞枢密一节朕自即位以来唯见此一人他人则
虽迫之使去亦不肯矣宗孟惭惧至无以为容仅一岁
御史论其荒于酒色及缮治府舍过制罢知汝州踰年加资政殿学士徙毫杭郓三州郓
介梁山冻素多盗宗孟痛治之虽小偷微罪亦断其足
筋盗虽为衰止而所杀不可胜计方徙河中御史以惨酷劾夺职知虢州明年复知河中
还其职帅永兴移大名宗孟厌苦易地复求河中卒年
六十六

△黄履

黄履字安中邵武人少游太学举进士调南京法曹又为高密广平王二宫教授馆
阁校勘同知礼院擢监察御史里行辞御史改崇政殿
说书兼知谏院神宗尝询天地合祭是非对曰国朝之制冬至祭天圆丘夏至祭地方泽
每岁行之皆合于古犹以有司摄事未足以尽于是三
岁一郊而亲行之所谓因时制宜者也合祭之非在所当正然今日礼文之失非独此也
愿敕有司正羣祀为一代损益之制诏置局详定命履
董之北郊之议遂定同修起居注进知制诰同修国史遭母忧去服除以礼部尚书召对
闽省苦盐法【按宋时称福建路无闽省名应系后
人传写之讹】神宗谓履自闽来将以为决履乃陈法甚便遂不复革乡论鄙之迁御史
中丞履以大臣多因细故罚金遂言罪在可议黜之可
也可恕释之可也岂可罚以示辱时又制侍郎以下不许独对履言陛下博访万务虽远
外微官犹令独对顾于侍从乃弗得邪遂刊其制御史
翟忠【按东都事略作翟思】言事有旨诘所自来履谏曰御史以言为职今乃究其
自来则人将惩之台谏不复有闻矣恐失开言路之意
事乃寝哲宗即位徙为翰林学士履素与蔡确章惇邢恕相交结每确惇有所嫌恶则使
恕道风旨于履履即排击之至是更自谓有定策功刘
安世发其罪以龙图阁直学士知越州坐举御史不当降天章阁待制历舒洪苏鄂青州
江甯应天颖昌府绍圣初复龙图阁直学士为御史中
丞极论吕大防刘摯梁焘垂帘时事乞正典刑又言司马光变更先朝已行之法为罪先
是北郊之论虽定犹不果行履又建言圣人因天祀天
因地祀地三代至汉其仪不易及王莽谄事元后遂跻地位同席共牢历世袭行不能全

革逮神宗考古揆今以正大典尝有意于兹矣今承先志当在陛下及二三执政哲宗询诸朝章惇以为北郊止可谓之社履曰天子祭天地盖郊者交于神明之义所以天地皆称郊故诗序云郊祀天地若夫社者土之神而已岂有祭大祗亦谓之社乎哲宗可之遂定郊议拜尚书右丞会正言邹浩以言事贬新州履曰浩以亲被拔擢之故敢犯颜纳忠陛下远斥之死地人臣将视以为戒谁复敢为陛下论得失乎乞徙善地坐罢知亳州徽宗立召为资政殿学士兼侍读复拜右丞未踰年求去加大学士提举中太一宫卒

△蔡挺

蔡挺字子政宋城人第进士调庆州推官秩满授陵州团练推官王尧臣安抚陕西辟管勾文字范仲淹宣抚陕西河东奏挺通判泾州徙鄜州河北多盗以挺知博州申饬属县严保伍得居停奸盗者数人使之察警盗每发辄得均博平聊城二县税岁衍巨万三司下其法于四方然大抵增赋也为开封府推官提点府界公事部修六塔河用李仲昌议塞北流入千六漈【按东都事略作六塔考宋史河渠志亦作六塔】一夕复决兵夫芟捷漂溺不可计降滁州言者以为轻乃贬秩停官越数岁起知南安军提点江西刑狱提举虔州监江闽盐贼率十百为州县害挺谕所部与期使首纳器甲原其罪得兵械万计官盐恶而价贵盗盐善而价且下私贩日滋挺简僚吏至淮转新盐明殿赏以官数之余畀之于是贼党破散宿弊遂绝岁增卖盐四十万改陕西转运副使进直龙图阁知庆州因上书论攻守大计夏人大入挺尽敛边户入保戒诸砦无出战谅祚亲帅军数万攻大顺挺料城坚不可破而柔远城恶亟遣总管张玉将锐师守之先布铁蒺藜大顺城旁水中骑渡水多蹶惊言有神谅祚督帐下决战挺伏强弩壕外飞矢贯其铠遂引却移寇柔远玉夜斫营夏人惊扰溃去环州熟羌思顺投谅祚为乡导挺宣言思顺且复来命葺其旧舍出兵西为迎候之举谅祚果疑思顺毒之死挺筑城马练平为荔原堡分熟羌三千人守之神宗即位加天章阁待制知渭州籍禁兵悉还府不使有隐占建勤武堂五日一训之甲兵整习常若寇至又分义勇为伍番三千人参正兵防秋与春以八月正月集四十五日而罢岁省粟帛钱缗十三万有奇括并边生地冒耕田千八百顷【按东都事略作四千八百顷】募人佃种以益边民闾市蕃部田八千顷以给弓箭手又筑城定戎军为熙窳砦开地二千顷募卒三千人耕守之谍告夏人候胡卢河挺出奇兵迎击之夏人溃分诸将蹶而讨之荡其七族进右谏议大夫赐金帛夏人复犯诸砦环庆兵不能御挺遣张玉以万人往解其围

庆州兵变挺讨平之进龙图阁直学士卒徙营众惮迁
欲为乱城中震扰挺惟斩首恶十九人讫徙蕃部岁饥以田质于弓箭手过期辄没挺为
资官钱岁息什一后遂推为蕃汉青苗助役法又自以
意制渡河大索及兵械皆获其用熙宁五年拜枢密副使帝问挺泾原训兵之法召部将
按于崇政殿下以诸郡法契丹议云中地挺请罢沿边
成人示以无事因乞置三十七将皆行其策七年冬奏事殿中疾作罢为资政殿学士判
南京留司御史台元丰二年薨年六十六赠工部尚书
谥曰敏肃挺譎而多知人莫能窥其城府在渭久郁郁不自聊寓意词曲有玉关人老之
叹中使至则使优伶歌之以达于禁掖神宗愍焉遂有
枢密之拜云兄抗

蔡抗

蔡抗

抗字子直中进士调太平州推官闻父疾委官去稍迁睦亲宅讲书英宗在藩邸器
重之请于安懿王愿得与游每见必衣冠尽礼义兼师
友再迁太常博士通判秦州为秘阁校理乞知苏州州并江湖民田苦风潮害抗筑长堤
自城属昆山亘八十里民得立媵竭大以为利徙广东
转运使岑水铜冶废官给虚券久不偿人无所取资抗尽给之番禺岁运盐英韶道远多
侵窃杂恶抗命十舸为一运择言主之岁终会其殿最
增十五万缗英宗立召为三司判官及入对谕曰卿乃吾故人朕望于卿者厚勿以常礼
自疏也以史馆修撰同知谏院【按东都事略作以
为工部郎中兼起居舍人同知谏院】方议安懿王典礼抗引礼为人后之谊指陈切至
涕泣被面帝亦感泣都城大水抗推原变异在濮园议
大臣畏其谏列白为知制诰迁龙图阁直学士知定州命为太子詹事未至而神宗立改
枢密直学士知秦州过阙帝见之悲恻不自胜曰先帝
疾大渐犹不忘卿遂赴镇秦有质院质诸羌百余人自少至老肩系之非死不出抗皆纵
释约毋得擅相仇杀莫敢奸令骤得疾卒特赠礼部侍
郎

△王韶【王厚 王宥】

王韶字子纯江州德安人第进士调新安主簿建昌军司理参军客游陕西访采边
事熙宁元年诣阙上平戎策三篇其略以为欲取西夏
当先复河湟则夏人有腹背受敌之忧夏人比年攻青唐不得克万一克之必并兵南向
大掠秦渭之间牧马于兰会断古渭境尽服南山生羌
西筑武胜遣兵时掠洮河则陇蜀诸郡当尽惊扰武威之南至于洮河兰鄯皆故汉郡县
所谓湟中浩亶大小榆枹罕土地肥美宜五种幸今诸

羌瓜分莫相统一此正可并合而兼抚之时也诸种既服则嘉勒氏敢不归而河西李氏在吾股掌中矣且嘉勒氏子孙栋戡差盛为诸羌所畏

【按宋史本传作辖珍差盛考神宗时栋戡尚在其孙辖珍于元佑三年始嗣立此时为诸羌所畏者不得指为辖珍详具下案】若招谕之

使居武胜或渭源城使纠合宗党制其部族习用汉法为肘腋之助且使夏人无所连结策之上也神宗异其言召问方略以韶管干秦凤经略

司机宜文字蕃部俞龙珂在青唐最大渭源羌与夏人皆欲羁属之诸将议先致讨韶因按边自变量骑直抵其帐谕其成败遂留宿明旦两种皆

遣其豪随以东久之龙珂率属十二万口内附所谓包顺者也韶又言渭源至秦州良田不耕者万顷愿置市易司颇笼商贾之利取其赢以治

田帝从其言改著作佐郎仍命韶提举经略使李师中言韶乃欲指占极边弓箭手地耳又将移市易司于古渭恐秦州自此益多事所得不补

所亡王安石主韶议为罢师中以竦舜卿代且遣李若愚按实若愚至问田所在韶不能对舜卿检索仅得地一顷既地主有讼又归之若愚奏

其欺安石又为罢舜卿而命韩缜缜遂附会实其事师中舜卿皆坐谪而韶为太子中允秘阁校理后帅郭逵上韶盗贷市易钱安石以为不足

校徙逵泾原帝志复河陇筑古渭为通远军以韶知军事五年七月引兵城渭源堡及乞神平破蒙罗嘉勒玛尔瑞巴等族初羌保险诸将谋置

阵平地韶曰当使险为吾有乃径趣玛尔邦山压敌军而阵令曰敢言退者斩贼乘高下鬪师小却韶躬披甲胄麾帐下兵逆击之羌大溃焚其

庐帐而还洮西大震会摩展渡洮为之援余党复集韶命别将由竹牛岭路张军声而潜师越武胜遇摩展首领辖裕勒等与战破之遂城武胜

建为镇洮军进右正言集贤殿修撰复击走摩展降其部落二万更名镇洮为熙州以熙河洮岷通远为一路韶以龙图阁待制知熙州六年三

月取河州迁枢密直学士降羌叛韶回军击之摩展以其间据河州韶进破格诺木桑城穿露骨山南入洮州境道陜隘释马徒行摩展留其党

守河州自将尾官军韶力战破走之河州复平连拔宕岷二州迭洮羌酋皆以城附军行五十有四日涉千八百里得州五斩首数千级获牛羊

马以万计进左谏议大夫端明殿学士七年入朝又加资政殿学士赐第崇仁坊还至兴平闻景思立败于踏白城摩展围河州日夜驰至熙熙

方城守命撤之选兵得二万议所向诸将欲趋河州韶曰贼所以围城者恃有外援也今知救之必设伏待我且新胜气锐未可与争当出其不

意以攻其所恃此所谓批亢捣虚形格势禁则自为解者也乃直扣定羌城破结河族断夏国通路进临窳河分命偏将入南山羌知援绝拔栅

去初思立之覆师也羌势复炽朝廷议弃熙河帝为之旰食数下诏戒韶持重勿出及是帝大喜韶还熙州以兵循西山绕出踏白后焚八千帐摩展穷蹙丐降俘以献拜韶观文殿学士礼部侍郎资政观文学士未几召为枢密副使熙河虽名一路而实无租入军食皆仰给他道转运判官马瑊据官吏细故韶欲罢瑊王安石右瑊韶始沮于是与安石异帝语安石勉留之安南之役韶言决里广源之建臣以为贪虚名而忘实祸因谓熙河事非其本意至以勤兵费财归曲朝廷帝由是不悦以故罢职知洪州又坐谢表怨慢落职知鄂州元丰二年还其职复知洪州四年病疽卒年五十二赠金紫光禄大夫谥曰襄敏韶用兵有机略尝夜卧帐中前部遇敌矢石已交呼声震山谷侍者往往股栗而韶鼻息自如人服其量子十人厚案最显厚字处道少从父兵间畅习羌事官累通直郎元佑弃河湟厚上疏陈不可不听绍圣中用荐者换礼宾副使干当熙河公事会羌酋辖珍隆赞争国河州守将王瞻与厚同献议复故地元符二年六月师出塞七月下邈川降辖珍九月次青唐隆赞出迎遂定湟鄯韶赐隆赞姓名曰赵怀德进厚东上合门副使知湟州既而他种叛合兵来攻厚不能支乃以畀怀德而贬厚右内府率再贬贺州别驾崇宁初蔡京复开边还厚前秩于是羌人多罗巴奉怀德之弟希沙罗萨谋复国怀德畏偪奔河南种落更挟之以令诸部朝廷患众羌扇结命厚安抚洮西遣内客省使童贯偕往多罗巴知王师且至集众以拒厚声言驻兵而阴戒行羌备益弛乃与偏将高永年异道出多罗巴三子以数万人分据险厚进击破杀之唯少子阿蒙中流矢去道遇多罗巴与俱遁遂拔湟州以功进威州团练使熙河经略安抚三年四月厚帅大军次于湟命永年将左军循宗水而北别将张诚将右军出宗谷而南自将中军趋绥远期会宗哥川羌置陈临宗水备北山厚麾游骑登山攻其背亲帅强弩迎射羌退走右军济水击之大风从东南来扬沙翳羌目遂大败罗萨以一骑驰去其母龟兹公主与诸酋开鄯州降厚将大军趣廓州酋落施军令结以众随入廓州超拜厚武胜军节度观察留后明年罗萨复入寇永年战死羌焚大通河桥以叛新疆大震厚坐逗遛降郢州防御使已而赵怀德约降未决厚以书谕之怀德纳款还厚旧官入朝提举醴泉观卒赠宣远军节度使谥曰庄敏案字辅道好学工词章登第至校书郎后以左道诛

△辞向

辞向字师正以祖颜任太庙斋郎为永寿主簿权京兆户曹为邠州司法参军夏人叛秦中治城侍御史陈洎行边向诣洎陈三敝言今板

筑暴兴吏持斧四出伐木无问井闾邱陇民不敢诉必不得已宜且葺边城函关秦东塞
今西乡设守是为弃关内乎三司贷龙门富人钱以百
年全盛之天下一方有警即称贷于民非义也泊上其说悉从之监在京榷货务连岁羨
缗钱当迁秩移与其兄三司判官董沔议改河北便余
行钞法向曰如此则都内之钱不继茶盐香象将益不售有司主沔议既而边余滞不行
沔出黜以向知鄜州大水冒城郭沈室庐死者相枕郡
卒戍延安诣主将求归视弗得皆亡奔至则家人无存者聚谋为盗民大恐向遣吏晓之
曰冒法以赴急人之常情而不听若背归此武将不知
变之过也亟往收溺尸贯汝擅还之罪众入庭下泣谢一境乃安又论河北余法之弊遇
谷贵则官余于澶魏载以给边新陈未交则散余价以
救民乏军食有余则坐仓收之此策一行谷将不可胜食朝廷是向计始置便余司于大
名以向为提点刑狱兼其事入为开封度支判官权陕
西转运副使制置解盐盐足支十年而岁调畦夫数千向奏损其数兼提举买马牧沙苑
养马岁得驹三百而费钱四千万占田千顷向请斥闲
田予民收租入以市之乃置场于原渭以羨盐之直市马于是马一岁至万匹昭陵复土
计用钱粮五十万贯石三司不能供亿将移陕西缘边
盐中于永安县向陈五不可以为失信商旅遂举所阙之数以献寻坐事罢知汝州甫数
月复以为陕西转运使凡将漕八年所入盐马刍粟数
累万民不益赋其课为最夏将嵬名山以绥州来归青涧城主种諤将往迎诏向与议諤
不俟命亟率所部出塞遂城之廷议劾諤擅兴諤既贬
向亦罢知绛州再贬信州移潞州神宗知向材以为江浙荆淮发运使纲舟历岁久篙工
利于盗货尝假风水沈溺以灭迹向募客舟分载以相
督察官舟有定数多为主者冒占悉夺还俾诣本曹受遣以地有美恶利有重轻为主等
式用所漕物为诛赏迁天章阁待制熙宁四年权三司
使迁向右谏议大夫河洮用兵县官费不可计向未尝乏供给及解严上疏乞戒将帅裁
溢员汰冗卒省浮费节横赋手敕褒纳进龙图阁直学
士辽人求代北地北边择牧加枢密直学士给事中知定州高阳关募兵敌阴遣人应选
向谍知之遣逻捕取之械送瀛州戮于市北使久留都
亭数出不逊语而云应点兵涿易治道金谓必渝盟向曰彼欲强议速成故多张虚势以
撼我使者惧不如其请故肆妖言以傲幸取成兵来不
除道其亦无能为也已后皆如向言迁工部侍郎元丰元年召同知枢密院向干局绝人
尤善商财计算无遗策用心至到然甚者不能无病民
所上课间失实时方尚功利三安石从中主之御史数有言不听也向以是益得展奋其
材业至于论兵帝所通畅明决遂得大用及在政地同

列质以西北事则养威持重未尝启其端会诏民畜马向既奉命旋知民不便议欲改为于是舒亶论向反复无大臣体斥知颍州又改随州卒年六十六元佑中谥曰恭敏子绍彭有翰墨名中子嗣昌

△章窶

章窶字质夫建州浦城人祖频为侍御史窶以叔得集荫为孟州司户参军应举入京闻父封对于魏弃不就试驰往直其冤还试礼部第一擢知陈留县历提举陕西常平京东转运判官提点湖北刑狱成都路转运使入为吏部考功右司员外郎元佑初以直龙图阁知庆州时朝廷戢兵戒边吏勿妄动且捐葭芦安疆等四砦予夏使归其永乐之人夏得砦益骄窶言夏嗜利畏威不有惩艾边不得休息遂乘便出讨以致其师夏果人围环州窶先用间知之遣骁将折可适伏兵洪德城夏师过之伏兵识其母梁氏旗帜鼓噪而出斩获甚众又预毒于牛圈潞水夏人马饮者多死召权户部侍郎明年除知同州绍圣初知应天府加集贤殿修撰知广州徙江淮发运使哲宗访以边事对合旨命知渭州至即上言城胡芦河川据形胜以偪夏筑二城于石门峡江口好水河之阴二旬有二日成赐名平夏城灵平砦方兴役时夏以其众来乘窶迎击败之既而环庆鄜延河东熙河皆相继筑城进拓其境夏人■〈目矐〉视不敢动夏主遂奉其母合将数十万兵围平夏不能克一夕遁去夏统军威明阿迈锡舒监军玛勒都尔伯皆勇悍善战窶谍其弛备遣折可适郭成轻骑夜袭直入其帐执之尽俘其家虏馘三十余【按东都事略作三千】牛羊十万夏主震骇哲宗亲御紫宸殿受贺累擢窶枢密直学士龙图阁端明殿学士进阶太中大夫窶在泾原四年凡创州一城砦九荐拔偏裨不间厮役至于夏降人折可适李忠杰朱智用咸受其馭夏自平夏之败不复能军屡请命乞和哲宗亦为之寝兵窶立边功为西方最时章惇用事窶与惇同宗其得兴事颇为世所疑徽宗立请老徙知河南入见留拜同知枢密院事踰年力谢事罢受资政殿学士中太一宫使未几卒赠右银青光禄大夫谥曰庄简窶七子縉综綜綰縵演縵縉縉最知名縉繇推官为户部员外郎提点淮南东路刑狱权知扬州兼提举香盐事时方铸崇宁大钱令下市区昼闭人持钱买物至日旰皇皇无肯售縉飭市易务致百货以小钱收之且檄仓吏糶米以大钱予之尽十日止民心遂安未几新钞法行旧钞尽废一时商贾束手或自杀縉得诉者所持旧钞为钱以千计者三十万上疏言钞法误民请如约以示大信上怒罢縉降两官縉第进士历陕西转运判官入为户部员外郎中书侍郎刘逵之妻縉姊也逵渐复元佑之政縉多赞之蔡京欲挤

逵且恇縲不附已使其党攻之出縲湖州论者不已差主管西京崇福宫及京复相遂兴制狱倾章氏降罢除名者十余人时论冤之

△常秩

常秩字夷甫颍州汝阴人举进士不中废居里巷以经术著称嘉佑中赐束帛为颍州教授除国子直讲又以为大理评事治平授忠武军节度推官知长葛县皆不受神宗即位三使往聘辞熙宁三年诏郡以礼敦遣母听秩辞明年始诣阙帝曰先朝累命何为不起对曰先帝亮臣之愚故得安闾巷今陛下严诏趣迫是以不敢不来非有所决择去就也帝悦问今何道免民于冻馁对曰法制不立庶民食侯食服侯服此今日大患也臣才不适用愿得辞归帝曰既来安得不少留即拜右正言直集贤院管干国子监俄兼直舍人院迁天章阁侍讲同修起居注仍使供兼职复乞归改判太常寺七年进宝文阁待制兼侍读命其子立校书崇文院九年病不能朝提举中太一宫判西京留司御史台还颍十年卒赠右谏议大夫秩平居为学求自得初隐居既不肯仕世以为必退者也后安石为相更法天下沸腾以为不便秩在闾阎见所下令独以为是一召遂起在朝廷任谏争为侍从低首抑气无所建明闻望日损为时讥笑秩长于春秋至斥孙复所学为不近人情着讲解数十篇自谓圣人之道皆在于是及安石废春秋遂尽讳其学

△邓綰

邓綰字文约成都双流人举进士为礼部第一稍迁职方员外郎熙宁三年冬通判宁州时王安石得君专政条上时政数十事以为习安玩治当事更化其辞盖媚王安石又贻以书颂极其佞谀安石荐于神宗驿诏对帝问安石及吕惠卿以不识对退见安石欣然如素交除集贤校理检正中书孔目房乡人在都者皆笑且骂綰曰笑骂从汝好官须我为之寻同知谏院献所著洪范建极锡福论明年迁侍御史知杂事判司农司时常平水利免役保甲之政皆出司农故安石藉綰以威众綰请先行免役于府界次及诸道利州路岁用钱九万六千缗而转运使李瑜率三十万綰言均役本以裕民今乃务聚敛积宽余宜加重黜富弼在毫不散青苗钱綰请付吏究治畿县民诉助役诏询其便否两行之綰与曾布辄上还堂帖中丞杨绘言未闻司农得缴奏者不报凡吕公着谢景温所置推直官主簿悉罢去之而引蔡确唐垆为御史五年春擢御史中丞又加龙图阁待制辽人来理边地屯兵境上声言将用师于是两河戒严且令河北修城守之具綰曰非徒无益且大扰费安石去位綰颇附吕惠卿及安石复相綰欲弥前迹乃发惠卿置田华亭事出知陈州又论三司使章

惇协济其奸出知湖州初惠卿弟和卿创手实法绾曰
凡民养生之具日用而家有之今欲尽令疏实则家有告讦之忧人怀隐匿之虑无所措
手足矣商贾通殖货财交易有无不过服食器用米粟
丝麻布帛之类或春有之而夏以荡析或秋贮之而冬已散亡公家簿书何由拘录其势
安得不犯徒使鬻讼者趋赏报怨以相告讦畏怯者守
死忍困而已诏罢其法迁翰林学士仍为中丞绾虑安石去失势乃上言宜录安石子及
壻仍赐第京师帝以语安石安石曰绾为国司直而为
宰臣乞恩泽极伤国体当黜又荐彭汝砺为御史安石不悦遽自劾失举帝谓绾操心颇
僻赋性奸回论事荐人不循分守斥知虢州踰岁为集
贤院学士知河阳元丰中以待制知荆南陈陝徙永兴军改青州奏言岁大稔斗粟五七
钱帝知其佞令提举官酌市价以闻进龙图阁直学士
知邓州元佑初徙扬州言者论其奸改滁州未去邓而卒年五十九子洵仁洵武洵仁大
观中为尚书右丞

邓洵武

邓洵武

洵武字子常第进士为汝阳簿绍圣中哲宗召对为秘书省正字校书郎国史院编
修官撰神宗史议论专右蔡卞诋诬宣仁后尤切史祸
之作其力居多迁起居舍人徽宗初改秘书少监既而用蔡京荐复史职御史陈次升陈
师锡言洵武父绾在熙宁时以曲媚王安石神宗数其
邪僻奸回今置洵武太史岂能公心直笔发扬神考之盛德而不掩其父之恶乎且其人
材凡近学问荒缪不足以当此选不听迁起居郎时韩
忠彦曾布为相洵武因对言必欲继志述事非用蔡京不可京出居外镇帝未有意复用
也洵武又为帝言陛下方绍述先志羣臣无助者乃作
爱莫助之图以献其图别为左右左曰元丰右曰元佑左序助绍述者执政中唯温益一
人余不过三四若赵挺之范致虚王能甫钱适之属而
已右序举朝辅相公卿百执事以百数帝出示曾布而揭去左方一姓名布请之帝曰蔡
京也洵武谓非相此人不可以与卿不同故去之布曰
洵武既与臣所见异臣安敢豫议明日改付温益欣然奉行请籍异论者于是决意相京
进洵武中书舍人给事中兼侍读修撰哲宗实录迁吏
部侍郎洵武疏言神宗稽古建官既正省台寺监之职而以寄禄阶易空名矣今在选七
阶自两使判官至主簿尉有带知安州云梦县而为河
东干当公事者有河中司录参军而监楚州盐场者有瀛州军事推官知大名府元城县
充濮州教授者般乱纷错莫甚于此谓宜造为新名因
而制禄诏悉更之迁刑部尚书又请初出官人兼用刑法试俾知为吏之方崇宁三年拜

尚书右丞转左丞中书侍郎妖人张怀素狱兴其党有
与洵武连婚者坐出知随州提举明道宫复端明殿学士知亳州河南府召为中太一宫
使连进观文殿学士为大名尹政和中夏祭入侍祠以
右神观使兼侍读留修国史改保大军节度使未几知枢密院五溪蛮扰边即仿陕西弓
箭手列募边民习知溪洞险易者置所司教以战阵劝
以耕牧得胜兵几万人以镇抚之迁特进拜少保封莘国公恩典如宰相宣和元年卒年
六十五赠太傅谥曰文简邓氏自缢以来世济其奸而
洵武阿二蔡尤力京之败乱天下祸源自洵武起焉

△李定

李定字资深扬州人少受学于王安石登进士第为定远尉秀州判官熙宁二年孙
觉荐之召至京师谒谏官李常常问曰君从南方来民
谓青苗法何如定曰民便之无不喜者常曰举朝方共争是事君勿为此言定即往白安
石且曰定但知据实以言不知京师乃不许安石大喜
谓曰君且得见盍为上道之立荐对神宗问青苗事其对如曩言于是诸言新法不便者
帝皆不听命定知谏院宰相言前无选人除谏官者遂
拜太子中允监察御史里行知制诰宋敏求苏颂李大临封还制书皆罢去御史陈荐疏
定顷为泾县主簿闻庶母仇氏死匿不为服诏下江东
淮浙转运使问状奏云定尝以父年老求归侍养不云持所生母服定自辩言实不知为
仇所生故疑不敢服而以侍养解官曾公亮谓定当追
行服安石力主之改为崇政殿说书御史林旦薛昌朝言不宜以不孝之人居劝讲之地
并论安石章六七上安石又白罢两人定亦不自安
解职以集贤校理检正中书吏房直舍人院同判太常寺八年加集贤殿修撰知明州元
丰初召拜宝文阁待制同知谏院进知制诰为御史中
丞劾苏轼湖州谢上表摘其语以为侮慢因论轼自熙宁以来作为文章怨谤君父交通
戚里逮赴台狱穷治会赦论不已窜之黄州方定自鞫
轼狱势不可回一日于崇政殿门外语同列曰苏轼乃奇才也俱不敢对请复六案纠察
之职并诸路监司皆得钩考从之彗出东方求直言太
史谓有兵变帝命者视卫士饮食定言一饭不足市恩适起小人之心乃止或议废明堂
祀帝以访定定曰三岁一郊或明堂祖宗以来未之有
改谁为此言愿治其妄帝曰听卿言足矣迁翰林学士坐论府界养马事失实罢知河阳
留守南京召为户部侍郎哲宗立以龙图阁学士知青
州移汝宁府言者争暴其前过又谪居滁州元佑二年卒公论恶之

△舒亶

舒亶字信道明州慈溪人试礼部第一调临海尉民使酒詈逐后母 【按东都事略

作逐其叔母】至亶前命斩之不服即自起斩之投
劾去王安石当国闻而异之御史张商英亦称其材用为审官院主簿使熙河括田有绩
迁奉礼郎郑侠既贬复被逮亶承命往捕遇诸陈搜侠
篋得所录名臣谏草有言新法事及亲朋书尽悉按姓名治之窜侠岭南冯京王安国诸
人皆得罪擢亶太子中允提举两浙常平元丰初权监
察御史里行太学官受赂事闻亶奉诏验治凡辞语微及者辄株连考以多为功加集贤
校理同李定劾苏轼作为歌诗讥讪时事亶又言王诜
辈公为朋比欲并诛司马光张方平范镇陈襄刘摯帝觉其言为过但贬轼诜而光等罚
金未几同修起居注改知谏院张商英为中书检正遗
亶手帖示以子壻所为文亶具以白云商英为宰属而干请言路坐责监江陵税始亶以
商英荐得用及是反陷之进知杂御史判司农寺超拜
给事中权直学士院踰月为御史中丞举劾多私气焰熏灼见者侧目独惮王安礼亶在
翰林受厨钱越法三省以闻命下大理初亶言尚书省
凡奏钞法当置籍录其数目乞违法不录为大臣欺罔为尚书省取台中受事籍验之亦
无录目亶遽杂他文书送省于是执政复发其欺大理
鞫厨钱事谓亶为误法官吴处厚驳之御史杨畏言亶所受文籍具在无不承之理帝曰
亶自盗为赃情轻而法重诈为录目情重而法轻身为
执法而诈妄媿是安可置也命追两秩勒停亶比岁起狱好以疑似排抵士大夫虽坐微
罪废斥然远近称快十余年始复通直郎崇宁初知南
康军辰溪蛮叛蔡京使知荆南以开边功由直龙图阁进待制明年卒赠直学士

△蹇周辅

蹇周辅字皤翁【按东都事略作礪翁】成都双流人少与范镇何郯为布衣交
年未冠试大廷不第镇郯既贵达周辅始特奏名再举
进士知宜宾石门二县通判安肃军为御史台推直官善于讯鞫钩索微隐皆用智得情
尝有诏狱事连掖庭掌宝侍史它司累月不能决乃命
周辅度不可追逮奏请以要辞示主者诘服之时以为知体及治李逢狱竟台臣杂治无
异辞神宗称其能擢开封府推官出为淮南转运副使
盗廖恩聚党闽中多害兵吏改使福建护诸将以讨之恩遂降元丰初循唐制归百司狱
于大理寺选为少卿迁三司度支副使先是湖南例食
淮盐周辅始请运广盐数百万石分鬻郴全道州又以淮盐增配潭衡诸郡湘中民愁困
法既行遂领于度支以集贤殿修撰为河北都转运使
进宝文阁待制召为户部侍郎知开封府事多不决授中书舍人不拜改刑部侍郎元佑
初言者暴其立江西福建盐法掊克欺诞负公扰民罢
知利州【按东都事略作和州】徙庐州卒年六十六周辅为吏深文刻核子序辰

蹇序辰

蹇序辰

序辰字授之登第后数年以泗州推官主管江西常平易京西旋提举江西常平继父行盐法为监察御史迁殿中侍御史右司谏哲宗立改司封员外郎周辅得罪以序辰成其恶降签书庐州判官起知楚州提点江东刑狱绍圣中迁左司员外郎进起居郎中书舍人同修国史疏言朝廷前日正司马光等奸恶明其罪罚以告中外实状彰着然踪迹深秘包藏祸心相去八年之间盖已不可究质其章疏案牒散在有司若不汇辑而藏之岁久必致沦弃愿悉讨奸臣所言所行选官编类人为一帙以示天下后世遂命序辰及徐铎编类由是缙绅之祸无一得脱者迁礼部尚书与安惇看详诉理事以奉使辽国无状黜知黄州阅四月除龙图阁待制知扬州徽宗立中书言序辰类元佑章牒傅致语言指为谤讪诏与惇并除名勒停放归田里蔡京为相复拜刑部礼部侍郎为翰林学士进承旨有言其在先帝遏密中以音乐自娱者黜知汝州二年徙苏州坐纵部民盗铸钱谪单州团练副使江州安置移永州会赦复官中奉大夫卒序辰善傅会深文刻核似其父云

△王广渊

王广渊字才叔大名成安人以进士为大理法直官编排中书文字裁定祖宗御书十卷仁宗嘉之英宗居藩邸广渊因见昵献所为文及即位除直集贤院谏官司马光言广渊交结奔竞世无与比当仁宗之世私自托于陛下岂忠臣哉今当治其罪而更赏之何以厉人臣之节帝不听用为羣牧三司户部判官加直龙图阁帝有疾中外忧疑不能寝食帝自为诏谕之曰朕疾少间矣广渊宣言于众神宗立言者劾其漏泄禁中语出知齐州改京东转运使章奏曾公亮王安石以方春农事兴而民苦乏兼并之家得以乘急要利乞留本道钱帛五十万贷之贫民岁可获息二十五万从之其事与青苗钱法合安石始以为可用召至京师御史中丞吕公着论其旧恶还故官程颢李常又论其抑配掊克迎朝廷旨意以困百姓会河北转运使刘庠不散青苗钱奏适至安石曰广渊力主新法而遭劾刘庠故坏新法而不问举事如此安得人无向背故颢与常言不行徙使河东擢宝文阁待制知庆州宣抚使兴师与夏境檄庆会兵方授甲卒长吴逵以众乱广渊亟召五营兵御之逵率二千人斩关出广渊遣部将姚兕林广追击降其众柔远三都戍卒欲应贼不果广渊阳劳之使还戍潜遣兵间道邀袭尽戮之犹以盗发所部削两秩二年进龙图阁直学士知渭州广渊小有才而善附会所辟置类非其人非贵游子弟即

胥史辈至于濮宫书吏亦预选已下诏切责卒年六十
赠右谏议大夫元丰初以其被遇先帝擢其弟临为兵部郎中直昭文馆子得君赐进士
出身

△王陶

王陶字乐道京兆万年人第进士至太常丞除太子中允嘉佑初为监察御史里行
卫卒入延福宫为盗有司引疏决恩降其罪陶曰禁省
之严不应用外间会降为比于是流诸海岛主者皆论罚中贵人导炼丹者入禁廷陶言
汉唐方士名为化黄金益年寿以惑人主者后皆就戮
请出之陈升之为枢密副使论其不当升之去陶亦知卫州改蔡州明年复以右正言召
陶言臣与四人同补郡独两人召请并还唐介吕诲等
英宗知宗正寺踰年不就职陶上疏言曰自至和中圣躬违豫之后天下颯颯无所寄命
交章抗疏请早择宗室亲贤以建储嗣陛下顺民欲而
安人心亲发德音锐为此举中外摇摇之心一旦定矣厥后浸润稽缓岂免忧疑流言或
云事由嫔御宦侍姑息之语圣意因而惑焉使远近奸
邪得以窥间伺隙可不惜哉既而韩琦决策遂立为皇子英宗即位加直史馆修起居注
为皇子伴读淮阳颍王府翊善知制诰进龙图阁学士
知永兴军召为太子詹事神宗立迁枢密直学士拜御史中丞郭逵以签书枢密宣抚陕
西召令还都陶言韩琦置逵二府至用太祖故事出师
劫制人主琦必有奸言惑乱圣德愿罢逵为渭州帝曰逵先帝所用今无罪黜之是章先
帝用人之失也陶既不得逞遂以琦不押文德常朝班
奏劾之陶始受知于琦骤加奖拔帝初临御颇不悦执政之专陶料必易置大臣欲自规
重位故视琦如仇力攻之琦闭门待罪帝徙陶为翰林
学士旋出知陈州入权三司使吕公着言其反复不可近又以侍读学士知蔡州历河南
府许汝陈三州以东宫旧臣加观文殿学士帝终薄其
为人不复用元丰三年卒年六十一赠吏部尚书谥曰文恪陶微时苦贫其友姜愚乐施
念陶奉母厚恤之捐数百千为之娶陶既贵尹洛愚老
而丧明往谒之陶对之邈然闻者益薄其为人

△王子韶

王子韶字圣美太原人中进士第王安石引入条例司擢监察御史里行出按明州
留振狱【按宋史无择传作苗振】安石恶祖无择
子韶迎其意发无择在杭州时事自京师逮对而以振狱付张载无择遂废子韶出知上
元县迁湖南转运判官御史张商英劾其不葬父母贬
知高邮县由司农丞提举两浙常平入对神宗与论字学留为资善堂修定说文官礼部
员外郎改库部元佑中历吏部郎中卫尉少卿迁太常

諫官刘安世言熙寧初士大夫有十钻之目子韶为衙内钻指其交结要人子弟如刀钻之利又陷祖无择于深文縉紳所共鄙薄岂宜污礼乐之地改卫尉卿安世复言因弹击而获超迁是启侥幸也乃出知沧州入为秘书少监迎伴辽使御下苛刻军吏因被酒刃伤子韶及其子又出知济州复以太常少卿召进秘书监拜集贤殿修撰知明州卒崇寧二年诏贈显謨阁待制

钦定续通志卷三百四十八

●钦定续通志卷三百四十九 列传一百四十九

列传

宋 【五十二】

○宋五十二

任颢	李参	郭申锡	傅求	张景宪	窦卞
张瓌	孙瑜	许遵	卢士宗		
钱象先	韩璠	杜纯【紘】	杜常	谢麟	王宗室
王吉甫					
任颢					
李参					
郭申锡					
傅求					
张景宪					
窦卞					
张瓌					
孙瑜					
许遵					
卢士宗					
钱象先					
韩璠					
杜纯					
杜常					
谢麟					
王宗望					
王吉甫					
△任颢					

任颢字诚之青州寿光人举进士得同学究出身至卫丞擢盐铁判官陕西铸康定

大铜钱颞曰坏五为一以一当十恐犯者众卒如其言夏人纳款遣使要请十一事甚者欲去臣称男颞押伴一切晓以义辞折而去出为京西转运使奏计京师元昊为下所杀遣杨守素来告哀守素乃始为元昊谋不称臣纳赐节者也仁宗记尝屈其使者复使押伴颞问守素其主所以死不能对讫去不取肆改知凤翔府帝语辅臣颞宜备朝廷委任留判三司凭由司为谅祚册礼使采摭西夏风物山川道里出入攻取之要为治戎精要三篇上之进直史馆迁河东转运使帝尝以禁帑金帛赐河北亦欲与河东颞辞曰受委制财用而先有求不敢颞为使者每行部必择僚佐之贤者一人与俱凡事必与议未尝以胥吏自随人安其政入为盐铁副使擢天章阁待制侂贼犯岭外以颞知潭州宣抚司以宣毅卒有功檄补军校颞察其色动曰必有异志执按之具服为贼内应搜其家得所记潭事甚悉梟首以徇诏书褒激赐白金五百两进龙图阁直学士知渭州坐在潭日贱市死商珠降为待制时四路以边警闻渭独无所上朝廷以斥候不密颞力言无他虞帝使覘之信乃还学士徙徐州以太子宾客致仕积官户部侍郎卒年七十八

△李参

李参字清臣郢州须城人以荫知盐山县岁饥谕富室出粟平其直予民不能余者给以糟粃所活数万通判定州知荆门军荆门岁以夏伐竹输荆南造舟积日久多蠹恶不可用牙校破产不偿责参请冬伐竹度其费以给余募商人与为市均得其利历知兴元府淮南京西陕西转运使部多戍兵苦食少参审订其阙令民自隐度麦粟之赢先贷以钱俟谷熟还之官号青苗钱经数年廩有羨粮熙宁青苗法盖萌于此朝廷患边费益广参建议犖钱边郡以平估余权罢入中法此其去省榷货钱千万计召为盐铁副使以右谏议大夫为河北都转运使移河东知荆南嘉佑七年召为三司使参知政事孙抃曰参为主计外台将承风刻剥天下乃改羣牧使治平初加集贤院学士知瀛州赐黄金百两帅臣有赐自参始再迁枢密直学士知秦州蕃酋药家族作乱讨平之得良田五百顷以募弓箭手居镇阅岁未尝以边事闻英宗遣使问故对曰将在边期于无事而已不敢妄以寇貽主忧以疾解边任判西京御史台起知曹濮二州神宗久知其才书姓名于殿柱以知永兴军未行卒年七十四参无学术然刚果严深喜发擿奸伏不假贷事至即决虽簿书纤悉不遗时称能吏

△郭申锡

郭申锡字延之魏人自言唐代公元振之后第进士为晋陵尉知博州州兵出戍有欲胁众为乱者申锡戮一人黥二人乃定奏至仁宗曰

小官临事如此岂易得即为御史台推直官数上疏论事大臣不便鞫狱庆州京东盗执濮州通判并渊迁知州事悉擒凶党斩以徇召为侍御史遂知杂事屡诋权幸无所避为盐铁副使相视决河坐讼李参失实黜知濠州帝明榜朝堂称其欺诬以儆在位旋加直史馆知江宁府再副盐铁进天章阁待制知邓州河中种谔取绥州申锡曰边患将自此始及谅祚死请捐前故听其子袭爵且言曰二虏赖岁币甚厚渝平岂其所利必有以致之但得重将守边不要功生事则善矣着边鄙守御策以给事中致仕卒年七十七

△傅求

傅求字命之考城人进士甲科通判泗州徙大名府府守吕夷简委以事夷简入相荐其才擢知宿州提点西川益州刑狱【按宋史地理志川峡四路益州为剑南西川节度西川本传讹江西今据改】为梓州路转运使夷獠寇合江钤辖司会兵掩击求驰往按所以状乃县吏冒取播州田獠故恐而叛即黥吏置岭南夷人闻之散去益州文彦博上其状进秩徙陕西关中行当十铁钱盗铸不可计求请变法时州县已散二百八十万缗亟下令更为当三民出不意荡产失业多自经死然盗铸遂止自康定用兵移税输边民力大困求令输本州岛而转钱以供边余民受其惠而兵食亦足召为户部副使陇右蕃酋凌戩献古渭州地秦州范祥纳之请缮城屯兵又括熟户田诸羌靳之相率叛夏人欲得渭地移文来索后帅张升以祥贪利生事请弃之诏求往视求以为城已讫役且已得而弃非所以强国威乃诏谕羌众反其田报夏人以渭非其有不应索正其封疆而还兵遂解进天章阁待制陕西都转运使加龙图阁直学士知庆州环之定边砦蕃官苏恩以小过疑惧而遁将佐议致讨泾原既出师境上求谓恩非素携贰者乘以兵必起边患但遣裨将从十数卒扣其帐开以祸福恩感泣还砦如初入判太常寺权发遣开封府迁枢密直学士知定州复以龙图阁学士权开封求本有吏能干局至是老病断狱数差失御史言其不胜任出知兖州卒年七十一

△张景宪

张景宪字正国河南人以父师德任淮南转运副使山阳令郑昉赃累巨万亲戚多要人景宪首案治流之岭外贪吏望风引去徙京西东转运使王逵居郢专持吏短长求请贿谢如所欲景宪上其恶编置宿州熙宁初为户部副使韩绛筑抚宁罗鄂特两城帝命景宪往视始受诏即言城不可守固不待到而后知也未几抚宁陷至延安又言罗鄂特邈然孤城凿井无水将何以守臣在道所见师劳民困之状非一愿罢徒

劳之役废无用之城严飭边将为守计恐黠羌多诈缓急或为内应宜亟止之陕西转运司议欲限半岁令民悉纳钱于官而易以交子景宪言此法可行于蜀耳若施之陕西民将无以为命其后卒不行加集贤殿修撰为河东都转运使议者欲分河东为两路景宪言本地道肥饶相杂州县贫富亦异正宜有无相通分之不便议遂寝改知瀛州上言比岁多不登民债逋欠今方小稔而官督使并偿道路流言其祸乃甚于凶岁愿以宽假帝从之仍下其事元丰初年知河阳时方讨西南蛮景宪入辞因言小丑跳梁殆边吏扰之耳且其巢穴险阻若动兵远征万一馈饷不继则我师坐困矣帝曰卿言是也然朝廷有不得已者明年徙同州以太中大夫卒年七十七景宪在仁宗朝为部使者时吏治尚宽独多深刺及熙宁以来吏治峻急景宪反济以宽方新法之行不刻一人居官不畏强御非公事不及执政之门自负所守于人少许可母卒一夕须发尽白世以此称之

△窦卞

窦卞字彦法曹州冤句人进士第二通判汝州秦悼王葬汝宗室来汝者众得兵三千郡守林潍以汝与其乡近因使犂薪刍铁石致其家众怨愤谋杀潍会日暮间闭不果遂挟大校叛卞启关招谕之曰汝曹特醉酒狂呼尔毋恐忽少定乃密推首恶羈之请于朝诏潍致仕悉配徙乱者加集贤校理知太常院知绛州开封府推官方禁销金为衣皇城卒捕得之属卞治以中禁为言奏曰真宗行此制自掖廷始命不正以法无以示天下且非祖宗立法意英宗从其请寻知深州熙宁初河决滹沱水及郡城地大震流民自恩冀来踵相接卞发常平粟食之吏白擅发且获罪卞曰俟请而得报民死矣吾宁以一身活数万人寻以请诏许之外间讹言水大至卞下令敢言者斩一日复报大水且至吏请闭门卞不可既而果妄时发六州卒筑武疆陈卒惰主者笞之不服卞曰厢兵犯将校法不至重然兴役聚工不可拘以常法命斩之以闻有诏嘉奖还为户部判官同修起居注进天章阁待制判昭文馆将作监寻坐王永年事夺职提举灵仙观卒年四十五

△张瓌

张瓌字唐公洎之孙也举进士以妇父王钦若嫌召试学士院赐第除秘阁校理同知太常礼院谥钱惟演曰文墨其子擿登闻鼓上诉仁宗使问状瓌条奏甚切朝廷不能夺乃赐谥曰思判吏部南曹为开封府推官知洪州营校督役苛急其徒三百人将以夜杀之求不获持甲噪于门请易校瓌召问谕遣明日推治黠者十人不为易校十年不会课文彦博为言特迁

之徙两浙转运使加直史馆知颍州扬州即拜淮南转运使三司下诸道贵羨财淮南独上金九钱三司使怒移文譙切瓌以赋数民贫对入修起居注知制诰草故相刘沆赠官制颇言其附会取显位沆子瑾帅子弟妇女衰经诣阙哭诉瓌挟私怨且丑诋其人执政以褒赠乃恩典瓌不当为贬词出知黄州然瑾亦竟不敢请父谥还判流内銓英宗时以在先朝乞蚤定储副进左谏议大夫翰林侍读学士复出濠州历应天府河南河阳请为太平州卒瓌当官遇言触忤势要至屡黜终不悔卒年七十

△孙瑜

孙瑜字叔礼博平人【按宋史孙奭传博平人徙居须城】以父任为将作监主簿贾昌朝荐为崇文检讨同知礼院开封府判官使契丹适西讨捷书至馆伴要入贺啖以厚饷瑜辞以奉使有旨不肯贺加秘阁校理两浙转运使入辞仁宗访其家世谓曰卿孙奭子邪奭大儒也久以道辅朕因面赐金紫先是郡县仓庾以斗斛大小为奸瑜奏均其制黜吏之亡状者民大喜有言其变新器非便迁知曹州寻有言瑜所作量法均一诚便乃还其元资徙知蔡州更相兗潍单四州单官工部侍郎【按东都事略孙奭传言瑜官至天章阁待制】卒年七十九始奭之亡朝廷录其子孙时瑜之子为诸孙长瑜曰吾忍因父丧而官吾子乎以兄之孤上之瑜天资整敏齐家以严称善与人交一受知终身不易所荐士有过或教使自言曰已知之而复挤之吾不为也

△许遵

许遵字仲涂泗州人第进士又中明法擢大理寺详断官知长兴县水灾民多流徙遵募民出米振济竟以无患益兴水利溉田甚溥邑人便利立石纪之为审刑院详议官知宿州登州遵累典刑狱强敏明恕为登州执政许以判大理遵欲立奇以自鬻会妇人阿云狱起初云许嫁未行嫌壻陋伺其寝田舍怀刀斫之十余创不能杀断其一指吏求盗弗得疑云所为执而诘之加讯掠乃吐实遵按云纳采之日毋服未除应以凡人论讞于朝有司当为谋杀已伤遵驳言云被问即承应用按问欲举自首条减等定罪审刑大理当绞刑非是事下刑部以遵为妄诏以赎论未几果判大理耻用议法坐劾复持前议言刑部弃敕不用但引断例一切按而杀之塞其自首之路殆非罪疑惟轻之义诏司马光王安石议光以为不可安石主遵御史中丞滕甫侍御史钱觐皆言遵所争戾法意自是廷论纷然安石既执政悉罪异己者遂从遵议虽累问不承者亦得为按问或两人同为盗劫吏先问左则按问在左先问右则按问在右狱之生死

在问之先后而非盗之情天下益厌其说熙宁间出知
寿州再判大理寺请知润州又请提举崇福宫寻致任累官中散大夫卒年八十一

△卢士宗

卢士宗字公彦潍州昌乐人举五经历审刑院详议编敕删定官提点江西刑狱侍
讲杨安国以经术荐之仁宗御延和殿诏讲官悉升殿
听其讲易明日复命讲泰卦授天章阁侍讲赐三品服加直龙图阁天章阁待制判流内
铨李参郭申锡有决河讼诏士宗劾之士宗言两人皆
为时用有罪当验问不宜逮鞠于是但黜申锡为州进龙图阁直学士知审刑院通进银
台司仁宗神主祔庙礼院请以太祖太宗为一世而增
一室以备天子事七世之礼士宗以为在礼太祖之庙万世不毁其余昭穆亲尽即毁示
有终也历引汉魏晋唐之事为言今大行祔庙僖祖亲
尽当迁于典礼为合不当添展一室诏抃等再议卒从增室之说议者咎之出知青州入
辞英宗曰学士忠纯之操朕所素知岂宜久处外命再
对论知人安民之要劝帝守祖宗法御史言其罕通吏事且衰病改沂州熙宁初以礼部
侍郎致仕卒士宗以儒者长刑名之学而主于仁恕故
在刑部审刑前后十数年

△钱象先

钱象先字资元苏州人进士高第吕夷简荐为国子监直讲历权大理少卿度支判
官河北江东转运使召兼天章阁侍讲详定一路敕成
当进勋爵仁宗以象先母老欲慰之独赐紫章服进待制知审刑院加龙图阁直学士出
知蔡州象先长于经术侍迩英十余年有所顾问必依
经以对反复讽谕遂及当世之务帝礼遇甚渥故事讲读官分日送进象先已得蔡帝犹
谕之曰大夫行有日矣宜讲彻一编于是同列罢进者
浹日徙知河南府陈州复兼侍讲知审刑院象先旁通法家说故屡为刑官条令多所裁
定尝以为犯敕者重犯令者轻请移敕文入令者甚众
又议告捕法以为罪有可去有可捕苟皆许捕则奸人将倚法以害善良因削去许捕百
余事其持心平恕类此复知许颖陈三州以吏部侍郎
致仕卒年八十一

△韩琦

韩琦字君玉卫州汲人登进士第知定州安喜县为政强力韩琦称其才为开封司
录嘉佑宽恤诸道分遣使者琦曰京师诸夏之本顾独
不蒙惠乎乃具徭役利害上之诏司马光陈洙详定条式遂革大姓渔并之弊提点利州
路河北刑狱以开封府判官迎契丹使使问南朝不闻
打围何也琦曰我后仁及昆虫非时不为耳熙宁初为梓州路转运使朝廷命诸道议更

役法璠首建并纲减役之制省役人五百又请裁定诸州衙簿于是王安石言璠所言皆久为公私病监司背公邀誉莫之或恤而独能体上意宜加赏乃下褒诏赐帛二百入为盐铁副使以右谏议大夫知澶州坐失举降太常少卿河决昼夜扞御神宗念其劳复改官太中大夫判将作监转正议大夫致仕卒年七十七璠吏事绝人阅按牍终身不忘澶州民怀思之他日郡守或欲有所为民必曰此已经韩大中矣以故辄止

△杜纯

杜纯字孝锡濮州甄城人以荫为泉州司法参军泉有蕃舶之饶杂货山积时官于州者私与为市价十不偿一惟知州关咏与纯无私买人亦莫知后事败狱治多相牵系独两人无与咏犹以不察免且檄参对纯愤懑陈书使者为讼冤咏得不坐熙宁初以河西令上书言政王安石异之引寘条例司数与论事荐于朝充审刑详议官或议复肉刑先以刖代死刑之轻者纯言今盗抵死岁不减五十以死惧民民常不畏而况于刖乎人知不死犯者益众是为名轻而实重也事遂寝秦帅郭逵与其属王韶成讼纯受诏推鞠得韶罪安石主韶变其狱免纯官韩绛为相以为检详三司会计安石再来乃请监池州酒久之为大理正上言比来或徒隶觖望或民相怨仇或意冒告赏但泛云某有罪某知状官不识所逮之囚囚不省见逮之故若许有司先计其寔而坐为欺者以诬告当无不竟矣曹州民王坦避水患以车载货入京征商者以为匿税将议黥坦纯复争之卿杨汲奏为立异废于家元佑元年范纯仁韩维王存孙永交荐之除河北转运判官初更役书司马光称其论议详尽予之书曰足下在彼朝廷无河北忧纯因建言河防旧隶转运今乃领属都水外丞计其决溢之变前日不加多今日不加少然出财之司则常忧费而缓不急用财之官则寘过计而无不及不如使之归一后如其言召为刑部员外郎大理寺卿擢侍御史言者诋其不由科第改右司郎中寻知相州徙徐州陕西转运使还拜鸿臚光禄卿权兵部侍郎谢病以集贤院学士提举崇福宫改修撰卒年六十四弟紘

杜紘

杜紘

紘字君章起进士为永年今岁荒民将他往召谕父老给印券使称贷于大家约岁丰为督偿于是咸得食无徙者明年稔偿不愆素神宗闻其才用为大理评断官检详枢密刑房修武经要略职事对帝翊日语宰相嘉其论奏明白未果用紘每议狱必傅经义民间有女幼许嫁未行而养于壻氏壻氏杀以诬人吏当如昏法紘曰礼妇三月而庙见未庙见而死则归葬

于家示未成妇也律定昏而夫犯论同凡人养妇虽非礼律然未成妇则一也议乃定又论天下囚应死吏懦不行法辄以疑讞夫杀人而有疑讞是纵民为杀之道也请治妄讞者不从擢刑部郎中元佑初为夏国母祭奠使时夏人方修贡入其国礼犹倨纘责之夏人畏惧加敬他日夏使至请归复侵疆纘逆之至馆使欲入见有所陈纘止之曰国主设有请必具表申朝廷肯以使人口语为可否乎乃不敢言迁右司郎中大理卿以直秘阁知齐邓二州复为大理卿权刑部侍郎加集贤殿修撰为江淮发运使知郢州狱系囚三百人纘至旬日处决立尽又以刑部召未至还之郢尝有揭帜城隅着妖言其上期为变州民皆震俄而草场白昼火盖所揭一事也民益恐或请大索城中纘笑曰奸计正在是冀因吾胶扰而发柰何堕其术中彼无能为也居无何获盗乃奸民为妖如所揣逐按诛之徙知应天府卒年六十二

△杜常

杜常字正甫卫州人昭宪皇后族孙也折节学问无戚里气习中进士第调河阳司法参军事富弼礼重之崇宁中至工部尚书以龙图阁学士知河阳军苦旱及境而雨大河决直州西上埽势危甚常亲护役徙处埽上埽溃水溢及常坐而止于是役人尽力河流遂退郡赖以安卒年七十九

△谢麟

谢麟字应之建州瓯宁人登第调会昌令民被酒夜与仇鬪既归而所亲杀之因诬仇麟知死者无子所亲利其财一讯得实再调石首令县苦江水为患堤不可御麟迭石障之自是人得安堵号谢公堤通判辰州章惇使湖湘拓沅州荐麟为守由太常博士改西上合门副使猺贼犯辰溪麟且捕且招一方以宣诏使经制宜州獠降其种落四千八百人纳思广洞民千四百室得铠甲二万褒赐甚渥加果州刺史知荆南泾邠二州元佑初复以朝议大夫直秘阁知潭州加直龙图阁历徙江宁凤翔府渭桂二州融江有夷警将吏议致讨麟以计平之戍兵从北来不能水土麟部土人使极南而北兵止屯近郡赖以全者甚众卒于官

△王宗望

王宗望字礪叟光州固始人以荫累擢夔州路转运副使哲宗即位行赦赏军万州弥旬不给庖卒朱明因众怒白昼入府宅伤守臣左右惊散他兵籍籍谋兆乱宗望闻变自夔疾驱至先命给赏然后斩明以徇且甯视守伤而不救者乃自劾朝廷嘉之历仓部郎中司农少卿江淮发运使楚州沿淮至涟州风涛甚险舟多溺议者谓开支氏渠引水入运河岁久不决宗

望始成之为公私利代吴安持为都水使者自大河有
东北流之异纷争十年水官无所适从宗望于内黄下埽自阡村而下创立新堤七十里
尽闭北流东还故道右正言张商英论其诞漫而宗望
奏已有成绩遂增秩三等加直龙图阁河北都转运使擢工部侍郎以集贤殿修撰知郓
州卒年七十九元符中河复决内黄北流乃治其导河
东流事以为附会元佑追所得恩典云

△王吉甫

王吉甫字邦宪同州人举明经练习法律试断刑入等为大理评事累迁丞正刑部
员外郎大理少卿舒亶以官烛引至第执政欲坐以自
盗吉甫谓不可执政怒移狱他所吉甫亦就辨亶乃用饮食论罪不以烛也南郊起幔城
役卒急于毕事董役者责之曰此殆类白露屋耳卒诉
之吏当以非所宜言论死吉甫谓非诅咒剖不应死遂求对从容敷陈不少帝为霁怒
其人得释苏轼南迁所过郡守有延馆之者走马使以
闻诏鞫之吉甫议当答宰相章惇不悦吉甫曰法如是难以增加成罪卒从答太仓火议
诛守者十余人亦争之皆得不死其持论宽平大抵类
此请知齐州徙梓州梓州在东州为壮藩户口最盛转运使欲增折配以取羨余吉甫谓
其僚曰民力竭矣一增之后不可复减吾宁贻使者怒
忍为国敛怨为民基祸哉竟却之厯提点梓州路京畿刑狱开封少尹知同邢汉三州以
中大夫卒年七十吉甫老于为吏廉介不回但一于用
法士恨其少缘饰云

钦定续通志卷三百四十九

●钦定续通志卷三百五十 列传一百五十
列传

宋 【五十四】

○宋五十四

孙长卿	周沆	罗拯	马仲甫	王居卿	孙构
张洸	苏棗	马从先	沈遘【辽		
括】	李大临	吕夏卿	祖无择	张问【陈舜俞	乐京刘蒙
】	苗时中	韩贄	楚建中	张	
颉	卢革【秉】				

孙长卿

周沆

罗拯

马仲甫

王居卿
孙构
张洸
苏棻
马从先
沈遘
李大临
吕夏卿
祖无择
张问
苗时中
韩贄
楚建中
张颢
卢革
△孙长卿

孙长卿字次公扬州人以外祖朱巽任为秘书省校书郎天禧中知楚州粮料院通判河南府秋大雨军营坏或言某众将叛洛中讙然长卿驰谕之推首恶一人诛之留宿其所众遂定诏汰三陵奉先卒汰者羣噪府下长卿矫制使还而具言不可汰之故朝廷为止知和州民诉人杀弟长卿察所言无理问其资曰上等也家几人曰惟此弟尔曰然则汝杀弟也鞫之服郡人神明之提点益州路刑狱历开封盐铁判官江东淮南河北转运使江浙荆淮发运使岁漕米至八百万或疑其多长卿曰吾非欲事羨羸以备饥岁尔议者谓楚水多风波请开盱眙河自雅趣高邮长卿言地阻山回绕役大难就事下都水调工数百万卒以不可成罢之时又将弛茶禁而收其征召长卿议长卿曰祖宗榷茶盖将备二边之余且不出都内钱公私以为便今之所行不足助边余什一国用耗矣乃条所不便十五事不从改陕西都转运使踰年知庆州州据险患无水盖尝疏引涧谷汲城中未几复绝长卿凿百井皆及泉泥阳有罗川马岭上构危栈下临不测之渊过者惴恐长卿访得唐故道辟为通涂加集贤院学士河东都转运使拜龙图阁直学士知定州熙宁元年河北地大震城郭仓庾皆隕长卿尽力缮补神宗知其能转兵部侍郎留再任明年卒年六十六长卿无文学而长于政事为能臣性洁廉不以一毫取诸人定州当得园利八十万悉归之公既没诏中使护其丧归葬

△周沆

周沆字子真青州益都人第进士知渤海县岁满县人请留既报可而以亲老求监州税通判凤翔历江西转运判官改知沂州历开封府推官迁湖南转运使蛮唐盘二族暴杀居民官军数不利沆言蛮骤胜方骄未易鬪力须秋冬进兵且其地险气毒人骁悍善用鋌盾北军不能捕请选邕宜融三州卒三千人习知山川技艺者径捣其巢布余兵络山足出则猎取之俟其势穷力屈乃可顺抚朝廷用其策二族皆降加直史馆知潭州他道兵来戍者率两期乃代多死瘴疠沆请以期为断戍人便之徙河东转运使民盗铸铁钱法不能禁沆高估钱价铸者以无利自息入为度支副使侂智高乱定仁宗命安抚广西谕之曰岭外地恶非贼所至处毋庸行对曰远民罹涂炭当布宣天子德泽遂往徧行郡邑民避寇弃业吏用常法满半岁则听人革佃沆曰是岂与凶年诡征役者同科奏申其期擢天章阁待制河北都转运使李仲昌建六塔河之议以为费省而功倍诏沆行视沆言近计塞商胡本度五百八十万工用薪刍千六百万今纔用功一万薪刍三百万均一河也而功力不相侔如是盖仲昌先为小计以求兴役尔况所规新渠视河广不能五之一安能容受此役若成河必泛溢齐博滨棣之民其鱼矣既而从初议河塞复决如沆言又徙河东转运使迁龙图阁直学士知庆州召知通进银台司判太常寺英宗既即位契丹贺干元节使至沆馆客令致书枢前使以非典故沆折之曰昔贵国有丧吾使至柳河即反今听于几筵达命恩礼厚矣尚何云使者立授书朝廷未知契丹主年沆乘闲杂他语以问得其实使者悔之曰今复应兄弟南朝矣进枢密院直学士知成德军以户部侍郎致仕卒年六十九【按宋史此下有李中师传虽有移淮粟济浙饥一事然用法深刻厚结中人别无善迹足录今从删】

△罗拯

罗拯字道济祥符人第进士历官知荣州州介两江闲每江涨辄犯城郭拯作东西二堤除其患选知秀州为江西转运判官提点福建刑狱泉州兴化军水坏庐舍拯请勿征海运竹木经一年民居皆复其旧迁转运使邵武之光泽不榷酒以课赋民号黄曲钱拯均之他三邑人以为便改江淮发运副使江淮故无积仓漕船系岸下俟余入乃得行盖官吏以淮南不受陈粟为逃谴计拯始请凡米至而不可上供者以廩军又贮浙西米于润仓以时运自是漕增而费省转正使拯使闽时泉商黄谨往高丽馆之礼宾省其王云自天圣后职贡绝欲令使与谨俱来拯以闻神宗许之遂遣金梯入贡高丽复通中国加天章阁待制居职七年徙知永兴军青

颍秦三州卒年六十五拯性和柔不与人校曲直时论

服其长者

△马仲甫

马仲甫字子山庐江人【按宋史马亮传亮为庐州合肥人兹仲甫为庐江人江字应是州字之讹】太子少保亮之子也举进士知登

封县轘辕道险危佣民凿为坦涂人便之通判赵州知台州为度支判官内侍杨永德言漕舟淮汴闲惟水递铺为便诏仲甫偕住订可否还言

其害十余条议遂格出为夔路转运使岁饥盗粟者当论死仲甫请罪减一等诏须奏裁复言饥羸拘囚比得报死矣请决而后奏徙使淮南真

扬诸州地狭米少官余之多价常踊登莱滨江【按登莱与海近江字应是海字之讹】

米狼戾而农无所售仲甫请移余以舒其患两益于

民从之遂繇户部判官为发运使自淮阴径泗上浮长淮风波覆舟岁罹其患仲甫建议凿洪泽渠六十里漕者便之拜天章阁待制知瀛州徙

秦州古渭介青唐之南夏人在其北中通一径小警则路绝仲甫得笮粟城故址自鸡川砦筑堡北抵南谷环数百里为内地诏赐名甘谷堡【

按宋史地理志秦州之甘谷非堡名者甘泉也】熙宁初守亳许扬三州纠察在京刑狱知通进银台司复为扬州提举崇禧观卒

△王居卿

王居卿字寿明登州蓬莱人以进士至知齐州历知扬州改京东转运使青州河贯城中苦泛溢为病居卿即城立飞梁上设楼榭下建门

以时启闭人诵其智徙河北路河决曹村居卿立软横二埽以遏怒流而不与水争朝廷赏其功建以为都水法召拜户部副使提举市易擢天

章阁待制河北都转运使知秦州太原府卒年六十二居卿俗吏特以言利至从官

△孙构

孙构字绍先博平人中进士第为广济军判官岁入圭田粟六百石构止受百石余以畀学官久之知黎州夷年墨数扰边用闲杀之蜀帅

吕公弼上其事擢知真州凶岁得盗令各指党伍悉真诸法境内为清迁度支判官夔州部夷梁承秀李光吉王兗导獠入寇转运判官张洸请

诛之选构为使倍道之官至则遣浯州【按宋史地理志浯州属夔州路浯字应是涪字之讹】豪社安【按宋史本传作社字应是杜字

之讹】募千人往袭自督官军及黔中兵击其后斩承秀入讨二族火其居余众保黑崖岭黔兵从闲道夜噪而进光吉坠崖死兗自缚降以其

地建南平军录功加直昭文馆徙湖北转运使章惇兴南北江蛮事构谕降懿治二州纳归附州十四北江酋彭师晏常持向背构知向水酋彭

儒武与有隙檄使攻之师晏降得其下溪州地五溪皆平进集贤殿修撰赐三品服交址入寇拜右谏议大夫知桂州声言将犄角捣其巢穴寇闻引去以疾提举崇福宫换太中大夫卒年六十四构喜功名勇于建立西南边事自此始云

△张洸

张洸字枢言建州浦城人第进士通判越州民患苦衙前役洸科别人户籍其当役者以钱雇充皆以为便知襄邑县擢夔路转运判官录辟土功加直集贤院改陕西转运副使召对帝曰朕未识卿每阅章奏独卿与蔡挺有所论请使人了然寻当以师事相属及入辞赐服金紫明年直龙图阁知秦州前此将吏贪功多从羌地猎射因起边患洸至申令毋得犯得一人斩诸境上羣羌感悦迁天章阁待制知熙州栋戩遣果庄逼岷州【按宋史外国列传栋戩始终臣顺未尝与中国抗栋戩死以种落付养子阿里库颇峻刑杀其下二年遂逼果庄使率众拒洸州本传载栋戩遣果庄逼岷州栋戩应是阿里库之讹宋史地理志洸岷通远州为一路洸州东至岷州界一百十三里果庄因拒洸州遂逼岷州也兹仍史原文并引外国传以附考】洸往讨破之于错凿城斩首万级元丰初加龙图阁直学士知成都府徙杭州将行复命权经各熙河事趣使倍道行时仓卒治戎有司计产调夫民多流亡洸中途诉其状乞敕剑外招抚之不报会灵武师罢乃赴杭道过京师帝访以西事对曰彼势虽弱而我师未锐边备未饬愿以岁月图功累官正议大夫卒年七十二洸廉于财平生不殖田业既建拓泸夷地被进用然不遑清议云

△苏宥

苏宥字公佐磁州滏阳人擢第调兖州观察推官受知于守杜衍为大理详断官迁审刑院详议御史台推直官知单州提点梓州益州路刑狱利州路转运使文州岁市羌马羌转买蜀货猾狙上下物价肆为奸渔宥议置折博务干货殖以易马宿弊顿绝入判太理寺为湖北淮南成都路转运使擢侍御史知杂事判刑部使契丹还及半道闻英宗晏驾契丹置宴仍用乐宥谓送者曰两朝兄弟国家君臣之义吾与君等一也遂为之彻乐进度支副使以集贤殿修撰知凤翔还纠察在京刑狱又出知潭州广州累转给事中知河南府入知审刑院卒

△马从先

马从先字子野祥符人少尽力于学父当任子推以与其弟由进士累官太常少卿知宿州宿在淮汴闲素难治从先取囊博者重坐者厚赏以求盗禁屠牛铸钱严甚大水发廩振流亡全活数十万代还知寿州以老辞英宗谕

遣之曰闻卿治行籍甚寿尤重于宿姑为朕往既至治如曩时由太子宾客转工部侍郎致仕从先性整严虽盛夏不袒跣年七十六而卒

△沈遘

沈遘字文通钱塘人以荫为郊社斋郎举进士第二通判江甯府归奏本治论仁宗曰近献文者率以诗赋岂若此十篇之书为可用也除集贤校理顷之修起居注遂知制诰以父扶坐事免求知越州徙杭州为人疏隽博达明于吏治民或贫不能葬给以公钱嫁孤女数百人倡优养良家子者夺归其父母善遇僚案刺闾巷长短纤悉必知小民有犯法者辄刺为兵提点刑狱鞠真卿将按其状遘为稍弛而刺者复为民召知开封府迁龙图阁直学士蚤作视事逮午而毕出与亲旧还往从容燕笑沛然有余暇士大夫交称其能拜翰林学士判流内铨丁母忧旋卒年四十弟辽从弟括

沈辽

沈括

沈辽

辽字叡达幼挺拔不羣长而好学尚友傲睨一世趣操高爽缥缥缈然有物外意用兄任监寿州酒税吴充使三司荐监内藏库熙甯初今审官建西院以为主簿辽故受知于王安石至是当国更张法令辽与之议论寢拂日益见疏于是坐与其长不相能罢去久之以太常寺奉礼郎监杭州军资库转运使使摄华亭县他使者适有夙憾因县民忿争相牵告辞语连及遂文致其罪夺官流永州更赦始徙池州留连江湖闲累年益偃蹇傲世既至池得九华秋浦闲翫其林泉喜曰使我自择不过尔耳即筑室于齐山之上名曰云巢好事者多往游辽追悔平生不自贵重悉谢弃少习杜门隐几闲作为文章雄奇峭丽尤长于歌诗曾巩苏轼黄庭坚皆与唱酬相往来然竟不复起元丰末卒年五十四

沈括

括字存中以父任为沭阳主簿县依沭水乃职方氏所书浸曰沂沭者故迹漫为污泽括新其二坊疏水为百渠九堰以播节原委得上田七千顷擢进士第编校昭文书籍为馆阁校勘删定三司条例故事三岁郊丘之制有司按籍而行藏其副吏沿以干利坛下张幔距城数里为园囿植采木刻鸟兽绵络其闲将事之夕法驾临观御端门陈杖卫以阅严警乘輿一器而百工侍役者六七十辈括考礼沿革为书曰南郊式即诏令点检事务执新式从事所省万计神宗称善迁太子中允检正中书刑房提举司天监日官皆市井庸贩法象图器大抵漫不知括始置

浑仪景表五壶浮漏招卫朴造新历募天下上太史占书杂用士人分方技科为五后皆
施用加史馆检讨淮南饥遣括察访发常平钱粟疏沟
浚治废田以救水患迁集贤校理察访两浙农田水利迁太常丞同修起居注时大籍民
车人未谕县官意又市易司患蜀盐之不禁欲尽实私
井而辇解池盐给之言者论二事如织皆不省括侍帝侧帝顾曰卿知籍车乎曰知之敢
问何用帝曰北边以马取胜非车不足以当之括曰车
战之利见于历世然古人所谓兵车者轻车也五御折旋利于捷速今之民闲輜车重大
日不能三十里故世谓之太平车但可施于无事之日
尔帝喜曰人言无及此者遂问蜀盐事对曰一切实私井而运解盐使一出于官售诚善
然患万戎泸闲夷界小井尤多不可猝绝也势须列候
加警臣恐得不足偿费帝颔之明日二事俱寝擢知制诰兼通进银台司自中允至是纔
三月为河北西路察访使先是银冶转运司置官收其
利括言近宝则国贫其势必然人众则囊橐奸伪何以检颐朝廷岁遗契丹银数千万以
其非比方所有故重利之昔日银城县银坊城皆没于
彼使其知凿山之利则中国之币益轻何赖岁饷邻衅将自兹始矣时赋近畿户出马备
边民以为病括言北地多马而人习骑战犹中国之工
强弩也今舍我之长技强所不能何以取胜又边人习兵唯以挽强定最而未必能贯革
谓宜以射远入坚为法如是者三十一事诏皆可之辽
肃禧来理河东黄嵬地留馆不肯辞曰必得请而后反帝遣括往聘括诣枢密院阅故牒
得顷岁所议疆地书指古长城为境今所争盖三十里
远表论之召对帝喜曰大臣殊不究本末几误国事命以画图示禧禧议始屈赐括白金
千两使至契丹庭契丹相杨益戒来就议括得地讼之
籍数十预使吏士诵之益戒有所问则顾吏举以答他日复问亦如之益戒无以应谩曰
数里之地不忍而轻绝好乎括曰北朝弃先君之大信
以威用其民非我朝之不利也凡六会契丹知不可夺遂舍黄嵬而以天池请括乃还在
道图其山川险易迂直风俗之纯庞人情之向背为使
契丹图上之拜翰林学士权三司使尝白事丞相府吴充问曰自免役令下民之诋訾者
今未衰也是果于民何如括曰以为不便者特士大夫
与邑居之人习于复除者无足恤也独微户本无力役而亦使出钱则为可念若悉弛之
使一无所预则善矣充然其说表行之蔡确论括首鼠
乖刺阴害司农法以集贤院学士知宣州明年复龙图阁待制知审官院又出知青州未
行改延州至镇悉以别赐钱为酒命麀市良家子驰射
角胜有轶羣之能者自起酌酒以劳之边人驩激执弓传矢唯恐不得进越岁得彻札超
乘者千余以援银宥功加龙图阁学士朝廷出宿卫之

师来戍赏赉至再而不及镇兵括以为卫兵虽重而无岁不战者镇兵也今不均若是且召乱乃藏敕书而矫制赐缗钱数万以驿闻诏报之曰此右府颁行之失非卿察事机必扰军政自是事不暇请者皆得专之蕃汉将士自皇城使以降许承制补授种谔师次五原值大雪粮饷不继殿直刘归仁率众南奔士卒二万人皆溃入塞居民怖骇括出东郊得奔者数千问曰副都总管遣汝归取粮主者为何人曰在后即谕令各归屯及暮至者八百未旬日溃卒尽还括出按兵归仁至括曰汝归取粮何以不持军符归仁不能对斩以徇大将景思谊曲珍拔夏人磨崖葭芦浮图城括议筑石堡以临西夏而给事中徐禧来禧欲先城永乐诏禧护诸将往筑令括移府并塞以济军用已而禧败没括以夏人袭绥德先往救之不能援永乐【按宋史夏国传言夏围永乐括等援兵为夏人所隔不得前】坐谪均州团练副使元佑初徙秀州继以光禄少卿分司居润八年卒年六十五括博学善文于天文方志律历音乐医药卜算无所不通皆有所论著又纪平日与宾客言者为笔谈多载朝廷故实耆旧出处传于世

△李大临

李大临字才元成都华阳人登进士第为绛州推官杜衍安抚河东荐为国子监直讲睦亲宅讲书文彦博荐为秘阁校理责监滁州税未几还故职仁宗尝遣使赐馆阁官御书至大临家大临贫无阜隶方自秣马使者还奏帝曰真廉士也以亲老请知广安军徙邛州还为羣牧判官开封府推官神宗雅知其名擢修起居注进知制诰纠察在京刑狱言青苗法有害无益王安石怒会李定除御史宋敏求苏颂相继封还词命次至大临大临亦还之合言故事台官必以员外郎博士近制但不限此非谓选人亦许之也定以初等职官超朝籍躐宪台幸门一开名器有限安得人人满其意复诏谕数四颂大临故争不已乃以累格诏命皆使归班大临以工部郎中出知汝州徙知梓州加集贤殿修撰复天章阁待制年七十致仕七年而卒大临清整有守论议识大体与宋敏求苏颂称为熙宁三舍人云

△吕夏卿

吕夏卿字缙叔泉州晋江人举进士为江宁尉编修唐书成直秘阁同知礼院仁宗选任大臣求治道夏卿陈时务五事且言天下之势不能常安当于未然之前救其弊朝廷颇采其策英宗之世历史馆检讨同修起居注知制诰帝尝访以政对曰两朝不惜金帛以和二边脱民锋镝之祸古未有也愿勿失前好出知颍州夏卿学长于史贯穿唐事又通谱学创为世系

诸表于新唐书最有功云

△祖无择

祖无择字择之上蔡人进士高第历知南康军海州提点淮南广东刑狱广南转运使入直集贤院时封孔子后为文宣公无择言以祖谥而加后嗣非礼于是改为衍圣公出知袁州首建学官置生徒郡国弦诵之风始盛同修起居注知制诰加龙图阁直学士权知开封府进学士知郑杭二州神宗立加通进银台司初词臣作诰命许受润笔物王安石与无择同知制诰安石辞馈不取置诸院梁上安石忧去无择用为公费安石闻而恶之熙宁初安石得政乃讽监司求无择罪知明州苗振以贪闻御史王子韶使两浙廉其状事连无择子韶小人也请遣内侍自京师逮赴秀州狱苏颂言无择列侍从不当与故吏对曲直御史张戢亦救之皆不听及狱成无贪状但得其贷官钱接部民坐及乘船过制而已遂谪忠正军节度副使【按东都事略所载与宋史本传不同事略云安石得政乃讽监司求无择罪遣御史王子韶按治子韶小人也摄无择对吏锻炼无所得坐借公使酒三百小瓶以送遗客遂责忠正军节度副使士大夫冤之有知明州光禄卿苗振监司亦由观望发其罪朝廷遣崇文院校书张载按治载贤者也悉为平反之罪止罚金其幸不幸如此附识】安石犹为帝言陛下遣一御史出即得无择罪乃知朝廷于事但不为未为之而无效者寻复光禄卿秘书监集贤院学士主管西京御史台移知信阳军卒无择为人好义笃于师友少从孙明复学经术又从穆修为文章两人死力求其遗文汇次之传于世以言语政事为时名卿用小累锻炼放弃讫不复振士论惜之【按宋史此下有程师孟传又有程师孟同此一人并同此一传一史两见从无此例考师孟居官尚有惠政存之循吏此处从删】

△张问

张问字昌言襄阳人也进士起家通判大名府羣牧地在魏岁久冒入于民有司按旧籍括之地数易主券不明吏苟趣办持诏书夺人田至毁室庐发邱墓问至则曰是岂朝廷意耶具上以闻立罢之擢提点河北刑狱大河决议筑小吴问言曹村小吴南北相直而曹村当水冲赖小吴堤薄水溢北出故南堤无患若筑小吴则左强而右伤南岸并京畿为害独可于孙陈两埽闲起堤以备之耳诏付水官议久不决小吴卒溃徙江东淮南转运使加直集贤院户部判官复为河北转运使所部地震河再决议者欲调京东民三十万自澶筑堤抵干宁问言堤未能为益灾伤之余力役劳民非计也神宗从之问十年不奏考课诏特迁其官入为度支副使

拜集贤殿修撰河东转运使坐误军须贬知光化军未
几复使河北诸葛公权之乱郡县株蔓连逮至数百千人问上疏申理止诛首恶熙宁末
知沧州自新法行问独不阿时好岁饥为帝言民苟免
常平助役之苦反以得流亡为幸语切直惊人元丰定官制王安礼荐问可任六曹侍郎
帝以其好异论不用厯知河阳潞州元佑初为秘书监
给事中累官正议大夫卒年七十五问处己廉洁尝仕鄜延幕府与种世衡善父丧世衡
遗汝州田十顷辞弗受使归未至而世衡卒其子古用
父治命亦不纳田芜秽者三十年后汝守请以给学朝廷命反诸种氏熙宁时有陈舜俞
乐京刘蒙亦以役法废黜

陈舜俞

乐京

刘蒙

陈舜俞

陈舜俞字令举湖州乌程人博学强记举进士又举制科第一熙宁三年以屯田员
外郎知山阴县诏俟代还试馆职舜俞辞缴中书帖上
之青苗法行舜俞不奉令上疏自劾曰民闲出举财物取息重止一倍约偿缗钱而谷粟
布缕鱼盐薪■〈廿敕〉耰鉏釜锜之属得杂取之朝
廷募民贷取有司约中熟为价而必偿缗钱欲如私家杂偿他物不可得故愚民多至卖
田宅质妻孥未尝不以贯贷为苦诏谓振民乏绝而抑
兼并然使十户为甲浮浪无根者毋得给俵则乏绝者已不蒙其惠此法终行愈为兼并
地尔何以言之天下之有常平非能人人计口受饷但
权谷价贵贱之柄使积贮者不得深藏以邀利尔今散为青苗唯恐不尽万一饥谨荐至
必有乘时贵粟者未知将何法以制之官制既放钱取
息富室藏镪坐侍邻里逋欠之时田宅妻孥随欲而得是岂不为兼并利哉虽分为夏秋
二科而秋放之月与夏敛之期等夏放之月与秋敛之
期等不过展转计息以给为纳使吾民终身以及世世每岁两输息钱无有穷已是为
一赋以敝海内奏上责监南康军盐酒税五年而卒舜
俞自号白牛居士一斥不复士大夫识与不识皆深悲之云

乐京

乐京荆南人为布衣时乡里称其行义事母至孝妻张氏家绝挟女弟自随京为嫁
之嘉佑初诏访遗逸以荐得校书郎为湖阳赤水二县
令神宗求言京上疏以畏天保民为请知张葛县助役法行京曰不便遂不肯治县事自
列劄去提举官劾之诏夺著作佐郎经十年乃复官监
黄州酒税以承议郎致仕元佑初召赴阙不至终于家

刘蒙

刘蒙字子明渤海人都转运使刘庠举遗逸召试第一知湖阳县常平使者召会诸县令议免役蒙以为不便不肯与议退而条上其害即投劾去归乡教授养亲元丰二年卒年四十

△苗时中

苗时中字子居其先自壶关徙宿州以荫主盩厔薄邑有古河久隍请开导以溉田为利甚博人谓之苗公河调潞州司法参军郡守欲入一囚于死执不可守怒责甚峻时中曰盩归田里法不可夺守悟而听之熙宁中以司农丞使梓州路密荐能吏十人后皆进用人卒莫之知交人犯边擢广西转运副使师讨交人罪次富良江久不进时中曰师无进讨意贼必从闲道来乘我不备冀万一之胜势穷然后降耳密备之既而果从上流来战败始纳款徙梓州转运副使韩存宝讨蛮奇迪逗遛不行时中曰师老矣将士暴露非计之善者存宝不听卒坐诛林广代存宝奇迪既降复逸去将士相视失色及暮刁斗不鸣时中问广广曰既失贼故纵兵追之不暇恤尔时中曰天子以十万众相付岂以一死为勇耶今入异境变且不测广悟亟止追者整军以进会得诏班师军行时中创为攒运法食以不乏迁两阶为发运副使河东转运使加直龙图阁知桂州进宝文阁待制至户部侍郎卒

△韩贄

韩贄字献臣齐州长山人登进士第至殿中侍御史坐微累黜监江州税道除知睦州复为侍御史荆湖灾出持节安抚湘中自马氏擅国计丁输米身死产竭不得免费奏除之改知谏院进天章阁待制宰相梁适以私容奸狄青起卒伍位枢密内侍王守忠迁官不次皆举劾无所讳出知沧瀛二州迁龙图阁直学士河北都转运使河决商胡而北议者欲复之役将兴贄言北流既安定骤更之未必能成功不若开魏金堤使分注故道支为两河或可纾水患诏遣使相视如其策才役三千人几月而毕入判都水监权开封府政简而治知河南府建永厚陵费省而不扰神宗称之还知审刑院纠察在京刑狱知徐州以吏部侍郎致仕贄性行淑均平居自奉至约推所得禄赐买田贍族党赖以活者殆百数退休十五年谢绝人事读书赋诗以自娱年八十五卒

△楚建中

楚建中字正叔洛阳人第进士知荣河县民苦盐税不平建中约田多寡以为轻重土管鄜延经略机宜文字夏人来正土疆往莅其事众暴至两骑传矢引满向之建中披腹使射曰吾不惮死骑即去众服其量元昊归款建中

白府请筑安定黑水八堡以控东道夏人果来闻有备
不敢入累迁提点京东刑狱盐铁判官昭陵建命裁定调度省数十万计历夔路淮南京
西转运使进度支副使神宗用事西鄙召欲用之言不
合旨出知沧州久之为天章阁待制陕西都转运使知庆州江甯成德军以正议大夫致
仕元佑初文彦博荐为户部侍郎不拜卒年八十一

△张颢

张颢字仲举其先金陵人徙鼎州桃源第进士调江陵推官岁旱饥朝廷遣使安抚
颢条献十事活数万人知益阳县县接梅山溪峒多蛮
獠出入颢按禁地约束召獠人耕垦上其事不报累迁开封府判官提点江西刑狱广东
转运使熙甯中章惇取南江地建沅懿等州克梅山与
杨光僭为敌颢居忧于鼎移书朝贵言南江杀戮过甚无辜者十八九浮尸蔽江民不食
鱼者数月惇疾其说欲分功啖之乃言曰颢昔令益阳
首建梅山之议今日成功权輿于颢诏赐绢三百匹寻擢江淮制置发运副使改知荆南
复徙广西转运使时建广源为顺州将城之颢谓无益
朝廷从其议坐粹骂参军沈竦罢归未几以直集贤院知齐沧二州进直龙图阁知桂州
时有献言者谓海南黎人陈被盖五洞酋领异时盛强
且为中国患今请出兵自劾宜有以抚纳之命颢处其事颢使一介往呼之出补以牙校
喜而去诏问何赏之薄对曰荒徼蛮蜚无他觊得是足
矣寻罢兵海外讫无事久之转运使马默劾其经理宜州蛮事失宜罢职知均州哲宗立
还故职知凤翔广州召为户部侍郎颢所历以严致理
而深文狡狴右司谏苏辙论之不报踰年以宝文阁待制出为河北都转运使徙知瀛州
湖北溪獠畔朝廷托颢素望复徙知荆南至都门暴卒

△卢革

卢革守仲辛湖州德清人少举童子首选至登第年才十六庆历中知龚州蛮入寇
桂管骚动革经画军须先事而集移书安抚使杜杞请
治诸郡城及易长吏之不才者又言岭外小郡合四五不当中州一大县无城池甲兵之
备将为贼困宜度远近并省之后依智高来九郡相继
不守皆如革虑知婺泉二州提点广东刑狱福建湖南转运使复请外遂为宣州以光禄
卿致仕卒年八十二子秉

卢秉

卢秉

秉字仲甫中进士甲科调吉州推官青州掌书记知开封府仓曹参军浮沈州县二
十年人无知者王安石得其壁闲诗识其静退方置条
例司预选中奉使淮浙治盐法与薛向究索利病出本钱业鬻海之民戒不得私鬻还奏

遂为定制检正吏房公事提点两浙淮东刑狱颛提举
盐事持法苛严追胥连保罪及妻孥一岁中犯者以千万数进制置发运副使东南饥诏
损上供米价以余秉言价虽贱贫者终难得钱请但偿
余本而以其余振赡是岁上计神宗问曰闻滁和民捕蝗充食有诸对曰有之民饥甚殍
死相枕籍帝恻然曰前此独赵抃为朕言之耳先是发
运使多献余羨以帝恩宠秉言职在董督六路财赋以时上之安得羨今称羨者率正数
也请自是罢献独以七十万缗偿三司逋加集贤殿修
撰知渭州五路大出西讨唯泾原有功进宝文阁待制夏境胡卢川距塞二百里恃险远
不设备秉遣将姚麟彭孙袭击之俘斩万计迁龙图阁
直学士夏酋目木多威丹举国入寇犯熙河定西城秉治兵瓦亭分两将驻静边砦指夏
人来路曰吾迟明坐待捷报矣及明果至见宋师警曰
天降也纵击之皆奔溃或言威丹已死有识其衣服者诸将请以闻秉曰幕府上功患不
实吾敢以疑似成欺乎他日物色之威丹果死诏褒赐
服马金币且使上所获器甲秉守边久表父革年老乞归移知湖州复诏还渭元佑中知
荆南刘安世论其行盐法虐民降待制提举洞霄宫卒

钦定续通志卷三百五十

●钦定续通志卷三百五十一 列传一百五十一
列传

宋 【五十五】

○宋五十五

滕元发 李师中 陆洗 赵高 孙路 游师雄

穆衍

滕元发

李师中

陆洗

赵高

孙路

游师雄

穆衍

△滕元发

滕元发初名甫字符发以避高鲁王讳改字为名而字达道东阳人将生之夕母梦
虎行月中堕其室性豪隽慷慨不拘小节九岁能赋诗
范仲淹见而奇之举进士廷试第三因声韵不中程罢再举复第三授大理评事通判湖
州孙沔守杭见而异之曰奇才也后当为贤将授以治

剧守边之略召试为集贤校理开封府推官盐铁户部判官同修起居注英宗书其姓名藏禁中未及用神宗即位召问治乱之道对曰治乱之道如黑白东西所以变色易位者朋党汨之也神宗曰卿知君子小人之党乎曰君子无党辟之草木绸缪相附者必蔓草非松柏也朝廷无朋党虽中主可以济不然虽上圣亦殆 【伏读通鉴辑览 御批滕元发此言简而中理胜欧阳修朋党论远矣】 神宗太息久之进知制诰知谏院御史中丞王陶论宰相不押班为跋扈神宗以问元发元发曰宰相固有罪然以为跋扈则臣以为欺天陷人矣拜御史中丞 【东都事略知开封府迁御史中丞】 种諤擅筑绥州且与薛向发诸路兵环庆保安皆出剽掠夏人诱杀将官杨定元发上疏极言谅祚已纳款不当失信边隙一开兵连民疲必为内忧又中书枢密制边事多不合中书赏战功而枢密降约束枢密诘修堡而中书降褒诏元发言战守大事也而异同如是愿敕二府必同而后下宰相以其子判鼓院谏官谓不可神宗曰鼓院传达而已何与于事元发曰人有诉宰相使其子达之可乎神宗悟为罢之京师郡国地震元发上疏指陈致灾之由大臣不悦出知秦州神宗曰秦州非朕意也留不遣河北地大震命元发为安抚使时城舍多圯吏民惧压皆幄寝芟舍元发独处屋下曰屋摧民死吾当以身同之瘞死食饥除田租修堤障察贪残督盗贼北道遂安除翰林学士知开封府夏国主秉常被篡元发言继迁死时李氏几不立矣当时大臣不能分建诸豪乃以全地王之至今为患今秉常失位诸将争权天以此遗陛下若再失此时悔将无及请择立一贤将假以重权使经营分裂之可不劳而定百年之计也神宗奇其策然不果用元发在神宗前论事如家人父子言无文饰洞见肝鬲神宗知其诚苾事无巨细人无亲疏辄皆问之元发随事解答不少嫌隐王安石方立新法天下汹汹然恐元发有言而帝信之也因事以翰林侍读学士出知郢州徙定州初入郡 【东都事略作入覲】 言新法之害且曰臣始以意度其不可耳既为郡乃亲见之岁旱求言又疏奏新法害民者陛下既知之矣但下一手诏应熙宁三年以来所行有不便者悉罢之则民心悦而天意解矣皆不听历青州应天府齐邓二州会妇党李逢为逆或因以挤之黜为池州未行改安州流落且十岁犹以前过贬居筠州或以为复有后命元发谈笑自若曰天知吾直上知吾忠吾何忧哉遂上章自讼有曰乐羊无功谤书满篋即墨何罪毁言日闻神宗览之恻然即以为湖州哲宗登位徙苏扬二州除龙图阁直学士复知郢州学生食不给民有争公田二十年不决者元发曰学无食而以良田饱顽民乎乃请以为学田遂绝其

讼时淮南京东饥元发虑流民且至将蒸为痲疫先度城外废营地召谕富室使出力为席屋一夕成二千五百闲井灶器用皆具民至如归所全活五万【按东都事略载元发在太原全活流民五万与本传异】徙真定又徙太原元发治边凜然威行西北号称名帅河东十二将其八以备西边分半番休元发至之八月边遽来告请八将皆防秋元发曰夏若并兵犯我虽八将不敌若其不来四将足矣卒遣更休防秋将惧扣合争之元发指其颈曰吾已舍此矣头可斩兵不可出是岁塞上无风尘警诏以四砮赐夏人葭芦在河东元发请先画境而后弃且曰取城易弃城难命部将訾虎领兵护边夏不敢近夏既得砮又欲以绥德城为说画境出二十里外元发曰是一举而失百里必不可九上章争之以老力求淮南乃为龙图阁学士复知扬州未至而卒年七十一赠左银青光禄大夫谥曰章敏

△李师中

李师中字诚之楚邱人年十五上封事言时政父纬为泾原都监夏人十余万犯镇戎纬帅兵出战而帅司所遣别将郭志高逗遛不进诸将以众寡不敌不敢复出纬坐责降师中诣宰相辩父无罪时吕夷简为相诘问不屈夷简怒以为非布衣所宜言对曰师中所言父事也由是知名举进士鄜延庞籍辟知洛川县民有罪妨其农时者必遣归令农隙自诣吏令当下者榜于民或召父老谕之租税皆先期而集民负官茶直十万缗追系甚众师中为脱桎梏语之曰公钱无不偿之理宽与汝期可乎皆感泣听命乃令乡置一匮籍其名许日输所负一钱以上辄投之书簿而去比终岁逋者尽足官移诸郡粟于边已而反之盛冬大雪劳且费至贱售予兼并家师中令过县愿输者听躬坐庾门执契以须数日得万斛使下其法于他县尝出乡亭见戎人杂耕皆兵兴时入中国人籍其力往往结为婚姻久而不归师中言若辈不可杂处言之经略使并索旁郡者徙诸绝塞庞籍为枢密副使荐其才召对转太子中允知敷政县权主管经略司文字夏人以岁赐缓移边曰愿勿逾岁暮诏吏报许师中更牒曰如故事枢密院劾为擅改制书师中曰所改者郡牒耳非制也朝廷是之薄其过提点广西刑狱桂州灵渠故通漕岁久石室舟滞师中即焚石凿而通之邕管有马军五百马凡遇夏多死师中谓地皆险阻无所事骑奏罢之初邕州萧注宜州张师正谋启边衅注欲以所管蛮峒酋豪往讨交址云不用朝廷兵食诏下经略使萧固转运使宋咸二人为注所饵合词称便而师中至诏以注奏付之师中邀注来难之曰君以酋豪伐交址能保必胜乎曰不能师中曰既不能保必胜脱有败衄奈何注知不

可遂罢议会蛮獠申绍泰入追亡者害巡检宋士尧注
又张皇为骇奏仁宗为之盱食师中言无足忧因劾注邀功生事掎斂失众心卒致将率
败覆按法当斩于是注责泰州安置并按固咸皆坐贬
师中摄师事 【东都事略作师中迁转运使既而摄帅事】 交址耀兵于边声言将入
寇师中方宴客饮酒自若草六榜揭境上披露其情遂
不敢动即日贡方物绍泰惧委巢穴遁去侂智高子宗旦保火峒众无所属前将规讨以
幸赏遂固守师中檄谕祸福立率其族以地降边人化
其德多画像立祠以事称为桂州李大夫还知济兗二州济水堙塞久师中访故道自兗
城西南启凿之功未半而去迁直史馆知凤翔府种谔
取绥州师中言西夏方入贡叛状未明恐彼得以借口徒启其衅端廊延路觐知西夏驻
兵绥银州檄诸路当牵制师中疏论牵制之害时诸将
皆请行师中曰不出兵罪独在帅非诸将忧也既而此举卒罢熙宁初拜天章阁待制河
东都转运使西人入寇以师中知秦州诏赐以班超传
师中亦以持重总大体自处前此多屯重兵于境寇至则战婴其锐锋而内无以遏其入
师中简善守者列塞上而使善战者居中令诸城曰即
寇至坚壁固守须其去出战士尾袭之约束既熟常以取胜王韶筑渭泾上下两城屯兵
以胁武胜军抚纳洮河诸部下师中议遂言今修筑必
广发兵大张声势及令蕃部纳土招弓箭手恐西蕃及洮河武胜军部族生疑今不若先
招抚青唐武胜及洮河诸族则西蕃族必乞修城砦因
其所欲量发兵筑城堡以示断绝夏人钞略之患部人必归心诏师中罢帅事韶又请置
市易募人耕缘边旷土师中奏阻其谋王安石方主韶
坐以奏报反复罪削职知舒州徙洪登齐复待制知瀛州又乞召司马光苏轼等置左右
师中言时政得失又自称荐曰天生微臣盖为圣世有
臣如此陛下其舍诸吕惠卿■〈易文〉其语以为罔上遂贬和州团练副使安置还右
司郎中卒 【按东都事略载遂贬和州团练副使安
置徙单州复分司南京提举太极观卒】 年六十六师中始事州县邸状报包拯参知政
事或云朝廷自此多事矣师中曰包公何能为今鄞县
王安石者眼多白甚似王敦他日乱天下必斯人也后二十年言乃信其志尚甚高每进
见多陈天人之际君臣大节请以进贤退不肖为宰相
考课法在官不贵威罚务以信服人至明而恕去之日民拥道遮泣马不得行杜衍范仲
淹富弼皆荐其有王佐才然好为大言以故不容于时
而屡黜气未尝少衰

△陆洗

陆洗字介夫余杭人进士起家签书北京判官贝州乱给事不乏力及贼平又条治其

狄无滥者加集贤校理通判秦州范祥城古渭洗主馈
饷具言非中国所恃而劳师屯戍且生事既而诸羌果怒争塞下大扰经二岁乃定判太
常礼院吏部南曹提点开封县镇咸平龙骑军皆故羣
盗牢廩不时得殴莅给官还营不自安大校柴元煽使乱诏洗往视许元以不死命取始
祸者自赎众皆帖然提点陕西刑狱时铸钱法壤议者
欲变大钱当一洗言民简素重小铜钱而贱大铁钱他日以一当三犹轻之今减令均直
大钱必废请以一当二则公私所损亡几而商贾可以
通行兼盗铸者计其直无赢将必自止从之徙洗南北转运使直集英院进集贤殿修撰
知桂州奏言邕去桂十八驿异时经略使未尝行飭武
备臣愿得一往使羣蛮知省大将号令因以声震南交诏可自依猛定后交人寢骄守帅
尝姑息洗至部其使者黎顺宗来偃蹇如故态洗绌其
礼召问折谕导以所当为慑伏而去洗遂至邕州集左右江四十五峒首诣麾下阅简工
丁五万补置将吏更铸印给之军声益涨交人滋益恭
遣使入贡召为天章阁待制知谏院命张田代之英宗戒以毋得改洗法道除知延州趣
入覲帝劳之曰卿在岭外施設无不当者鄜延最当敌
要今将何先对曰边事难以预度未审陛下欲安静也将威之也帝曰大抵边陲当安静
昨王素为朕言惟朝廷与帅臣意如此至如诸将无不
贪功生事者卿谓何如洗曰素言是也谅祚寇庆州以败还声言益发人骑且出嫚辞复
攻围大顺城洗谓由积习致然不稍加折销则国威不
立乃留止请时服使者及岁赐而移宥州问故帝喜曰固知洗能办此谅祚闻之大沮盘
旋不敢入乃报言边吏擅兴兵今诛之矣朝廷遣何次
公持诏书谕告洗以为未可明年又乞留赐冬服及大行遗留二使而自以帅牒告之故
谅祚始因洗谢罪供贡职银州监军嵬名山与其国隙
扣青涧城主种諤求内附諤以状闻遂欲因取河南地洗曰数万之众纳土容可受若但
以众来情伪未可知且安所置之戒諤毋妄动諤持之
力诏洗召諤问状与转运使辞向议抚纳洗向言名山诚能据横山以扞敌我以刺史世
封之使自为守故为中国之利今无益我而轻启西衅
非计也乃共画三策令幕府张穆之入奏而穆之阴受向指诡言必可成神宗意洗不协
力徙知秦凤諤遂发兵取绥州洗欲理諤不禀节制之
状未及而徙洗驰见帝请弃绥州而上諤罪帝愈不恚罢知晋州既諤抵罪向穆之皆坐
贬以洗知真定改龙图阁学士知成都青苗法出洗言
蜀峡刀耕火种民常不足今省税科折已重其民轻侈不为储积脱岁俭不能偿逋适陷
之死地愿罢四路使者诏独置成都府一路熙宁三年
卒年五十九子师闵 【按宋史此下有师闵附传师闵以言利见用其居官事迹一无可

取今从删】

△赵高

赵高字公才邛州依政人第进士为汾州司法参军郭逵宣抚陕西辟掌机宜文字种谔擅纳绥州降人数万朝廷以其生事议诛谔反故地归降人以解仇释兵高上疏曰谔无名兴举死有余责若将改而还之彼能听顺而亡绝约之心乎不若谕以彼众饿莩投死中国边臣虽擅纳实无所利持以往年俘我苏立景询辈尔可遣询等来与降人交归各遵纪律而疆场宁矣如其蔽而不遣则我留横山之众未为失也又徙逵帅鄜延为移书执政请存绥州以张兵势先规度大理河川建堡砦画稼穡之地三十里以处降者若弃绥不守则无以安新附之众援种世衡招蕃兵部敌屯青涧城故事朝廷从之活降人数万为东路捍蔽熙宁初夏人诱杀知保安军杨定等既而以李崇贵韩道喜来献且请和好朝廷欲官其任事之酋镌岁赐以为俸给因使纳塞门安远二砦而还绥州高言绥实形势之地宜增广边障乃无穷之利若存绥以观其变计之得也神宗召问状对曰绥之存亡皆不免用兵降二万人入吾肝脾衅隙已深不可亡备神宗然之除集贤校理夏人犯环庆后复来贺正高请边吏离其心腹因以招横山之众此不战而屈人兵也迁提点陕西刑狱韩绛宣抚陕西河东兵西讨高为绛言大兵过山界皆砂碛乏善水草又亡险隘可以控扼今窃危之若乘兵威招诱山界人户处之生地当先经画山界控扼之地然后招降不尔劳师远攻未见其利绛欲取横山纳种谔之策遂城啰兀以高权宣抚判官谔趣河东兵会银川规以后期将斩高白绛令谔自往中路迎东兵谔惧违节制乃不敢逞加直龙图阁知延州夏人屡欲款塞每虚声摇边诏问方略高审计形势为破敌之策以献遣裨将曲珍吕真以兵千人分巡东西路夏人方以四万众自闲道欲取绥道遇珍惶骇亟战真继至夏众败走夏自失绥意未能已高揣知其情奏言夏使请和必欲画绥界愿听本路经略司分画岁赐则俟通和之日复焉明年遂用高策以绥为绥德城初鄜延地皆荒瘠占田者不出租赋倚为藩蔽宝元用兵后凋耗殆尽其旷土为诸酋所有高因招问曰往时汝族户若干今皆安在对大兵之后死亡流散其所存止此高曰其地存乎酋无以对高曰听汝自募丁家使占田充兵若何吾所得者人尔田则吾不问也诸酋皆感服归募悉补亡籍又检括境内公私闲田得七千五百余顷募骑兵万七千高以异时蕃兵提空簿漫不可考因议涅其手属岁饥高令蕃兵愿刺手者贷常平谷一斛于是人人愿刺因训练以时精锐过于正兵神宗闻而嘉之擢天章阁待制交

址叛诏为安南行营经略招讨使总九将军讨之以中官李宪为贰高与议不合请罢宪神宗问可代者高以郭逵老边事愿为裨赞于是以逵为宣抚使高副之逵至辄与高偕高欲乘兵形未动先抚辑两江峒丁择壮勇啖以利使招徕携贰隳其腹心然后以大兵继之逵不听高又欲使人赍敕榜入贼中招纳又不听遂令燕达先破广源复还永平高以为广源闲道距交州十二驿趣利掩击出其不意川途并进三路致讨势必分溃固争不能得贼乘缓遂据江列战舰数百艘官军不能济高分遣将吏伐木治攻具机石如雨其舰被击皆废徐以罢卒致贼设矢击之斩首数千级馘其渠酋遂皆降逵忤于玩寇乃移疾先还逵既坐贬高亦以不即平贼降为直龙图阁知桂州后复天章阁待制权三司使时西师大举五路并进以高为河东转运使领降卒赴郾延饷种谔军谔抵罪高又坐馈挽不给黜知相州既而镌职知淮阳军居数月尽复故职知庆州羌伊特明桑诡称送币将入寇高知蕃主白信可使信适以罪系狱破械出之告以其故约期日使往果缚取以归明年夏人欲袭取新垒大治攻械高具上撓夏计及夏侵兰州高遣曲珍将兵直抵盐韦俘馘千驱孳畜五千其酋榘厥嵬名宿兵于贺兰原时出攻边高遣将李照甫蕃官归仁各将兵三千左右分击耿端彦兵四千趋贺兰原戒端彦曰贺兰险要过岭则砂磧也使敌入平夏无繇破之又选三蕃官各与轻兵五百取闲道出敌砦后邀其归路端彦与战贺罗平敌败果趋平夏千兵伏发敌骇溃斩馘甚众生擒嵬名斩首领六获战马七百牛羊老幼三万余迁龙图阁直学士复帅延安元佑初梁伊玛数扰边高知夏将入侵檄西路将刘安李仪曰夏即犯塞门汝径以轻兵捣其腹心后果来犯安等袭洪州俘斩甚众夏遂入贡既而以重兵压境诸将亟请益戍兵为备高徐谕之曰第谨斥堠整戈甲无为寇先戍兵不可益也因遣人诘夏夏兵遂去迁枢密直学士伊玛终不悛使闲以善意问伊玛何苦为仇必欲寇第恐所得不能偿所亡洪州是也能改吾善遇汝遣之战袍锦彩自是伊玛不复窥塞高乃纵闲国中疑而杀之五年拜端明殿学士迁大中大夫夏遣使以地界为请朝廷许还葭芦米脂浮屠安疆四砦以高领分画之议夏既得四砦犹未有恭顺意未几复犯泾原会高卒年六十五赠右光禄大夫绍圣四年以高与元佑弃地议系其名于党籍

△孙路

孙路字正甫开封人进士及第元丰中为司农丞邓润甫荐为御史召对其言不合新政神宗语辅臣以为不可用下迁主簿路求通判河州徙兰州夏人入寇论扞御功进五阶除陕西转运判官元佑初为吏部礼部员外郎侍

讲徐王府司马光将弃河湟邢恕谓光曰此非细事当
访之边人孙路在彼四年其行止足信可问也光亟召问路挟舆地图示光曰自通远至
熙州纔通一径熙之北已接夏境今自北关辟土百八
十里濒大河城兰州然后可以扞蔽若捐以予敌一道危矣光幡然曰赖以访君不然几
误国事议遂止迁右司郎中以直龙图阁知庆州章惇
柄国复议取弃地时诸道相视未进路声言修旧垒载器甲楼鹵顿大顺城下夜半趋安
疆迟明据之六日而城完加宝文阁待制遂筑兴平横
山进龙图阁直学士徙知熙州泾源城西安诏出师牵制其势路即将众临会州遂建取
青唐之策大将王愍王瞻捣邈州瞻先至下之愍与争
功路右愍颀属以兵瞻有请辄弗应瞻诉诸朝召拜路兵部尚书以龙图阁学士知成都
未行坐他事削职知兴国军徽宗立厯太原河南永兴
军河中府卒

△游师雄

游师雄字景叔京兆武功人学于张载第进士为仪州司户参军迁德顺军判官鄜
延将刘管与主帅议战守策欲自延安入安定黑水师
雄以地薄贼境惧有伏请由他道既而谍者言夏伏精骑于黑水傍管谢曰微君言吾不
返矣赵高帅延安辟为属时夏人扰边戍兵在别堡龙
安以北诸城兵力咸弱高患之师雄请发义勇以守多聚石城上待其至夏人知有备不
敢入但袭荒堆三泉而还岁饥行诸垒振贷计口赋粮
人无殍亡运石营田深沟缮城边备益固元佑初为宗正寺主簿执政将弃四砦访于师
雄师雄曰此先帝所立以控制夏人者也若何弃之不
惟示中国之怯将起敌人无厌之求傥泸戎荆粤视以为请亦将与之乎万一燕人遣一
乘之使来求关南十县为之柰何不听因着分疆录迁
军器监丞吐蕃寇边胁属羌构夏人为乱谋分据熙河朝廷择可使者与边臣措置诏师
雄行听便宜从事既至谍知夏人聚兵天都山前锋屯
通远境吐蕃将攻河州师雄欲先发以制之请于帅刘舜卿舜卿曰彼众我寡柰何师雄
曰在谋不在众遂分兵为二姚兕将而左种谊将而右
兕破六逋宗城斩首千五百级攻讲朱城断黄河飞梁青唐十万众不得度谊破洮州擒
鬼章及大首领九人斩首千七百级捷书闻百僚表贺
遣使告永裕陵将厚赏师雄言者犹以为邀功生事止迁一官为陕西转运判官提点秦
凤路刑狱夏人侵泾原复入熙河师雄言兰州距贼一
舍通远不百里非有重山复岭之阻宜于定西通渭之闲建安遮纳迷结珠三栅及护耕
七堡以固藩篱此无穷之利也诏付范育皆如初议入
拜祠部员外郎加集贤校理为陕西转运使 【东都事略作转运副使】 内地移粟于

边民以犍馱为病师雄言往者边土不耕仰给于内今
积粟已多军食自足宜令内地量转输致之直以免大费报可召诣阙哲宗劳之曰洮州
之役可谓隳功但恨赏太薄耳对曰皆上稟庙算臣何
力之有焉唯当时将士勋劳未录此为欠也因陈其本末拜卫尉少卿哲宗数访边防利
病师雄具庆厯以来边臣施置之臧否朝廷谋议之得
失及方今御敌之要凡六十事名曰绍圣安边策上之出知邠州改河中府进直龙图阁
知秦州未至诏摄熙州以夏人扰边诏使者与熙帅秦
帅共谋之使者锐于讨击师雄谓进筑城垒以自蔽席卷之师未应深入上章争之不报
既而使者知攻取之难卒用师雄策自复洮州之后于
阬大食佛林邈黎诸国皆惧悉遣使入贡朝廷令熙河限其二年一进师雄曰如此非所
以来远人也未几还秦徙知陕州卒年六十师雄慷慨
豪迈有志事功议者以用不尽其材为恨

△穆衍

穆衍字昌叔河内人徙河中第进士调华池令民牛为仇家断舌而不知何人讼于
县衍命杀之明日仇以私杀告衍曰断牛舌者乃汝耶
讯之具服后知淳化耀之属县衍从韩绛宣抚陕西遇庆卒溃乱衍念母在耀亟谒归信
宿走七驿比至庆卒尝戍华池知衍名不敢近时诸郡
捕贼兵粮糒无以给遂擅发常平仓且惧得罪衍曰饥之不恤则吾兵将为庆卒矣衍考
课为一路最元丰中种谔西征参其军事谔第赏以死
事为下衍曰此非所以劝忠也力争之谔还入塞诏往灵武援渭庆两军将行衍曰吾兵
甫归未及解甲安能犯不测于千里外哉谔乃止同幕
畏罪阳谢衍曰师不再举君之力也衍识其意曰全万众之命以一身塞责衍无憾焉元
佑初大臣议弃熙兰衍与孙路论疆事以为兰弃则熙
危熙弃则关中震唐自失河湟西边一有不顺则警及京都今二百余年非先帝英武孰
能克复若一旦委之恐后患如前悔将无及矣议遂止
改陕西转运判官金部户部员外郎熙河分画未决诏衍视之还言质孤胜如据两川美
田实彼我必争之地自西关失利遂废不守请界二垒
之闲城李诺平以控要害及他城堡皆起亭障以通泾原明年遂城李诺名曰定远三迁
左司郎中绍圣初以直秘阁为陕西转运使加直龙图
阁知庆州徙延安又徙秦州未行而卒年六十三敕河中官庀其葬后追录不弃兰州议
官其一子

钦定续通志卷三百五十一

●钦定续通志卷三百五十二 列传一百五十二

列传

宋【五十六】

○宋五十六

杨佐	李兑【先】	沈立	张揆	张焘	俞充
刘瑾	阎询	葛宫【江密书思			
】张田	荣諲	李载	姚涣	朱景【光庭】	李
琮	朱寿隆	卢士宏	单煦	杨仲	
元	余良肱【卞爽】	潘夙			

杨佐

李兑

沈立

张揆

张焘

俞充

刘瑾

阎询

葛宫【葛密 葛书思】

张田

荣諲

李载

姚涣

朱景

李琮

朱寿隆

卢士宏

单煦

杨仲元

余良肱【卞 爽】

潘夙

△杨佐

杨佐字公仪本唐靖恭诸杨后至佐家于宣及进士第为陵州推官州有盐井深五十丈皆石也底用柏木为干上出井口垂纆而下方能及水岁久干摧败欲易之而阴气腾上入者辄死惟天有雨则气随以下稍能施工晴则亟止佐教工人以木盘贮水穴窍洒之如雨滴然谓之雨盘如是累月井干一新利复其旧累迁河阴发运判官干当河渠司皇佑中汴水杀溢

不常漕舟不能属佐度地凿渎以通河流于是置都水
监命佐以盐铁判官同判京城地势南下涉夏秋则苦霖潦佐开永通河疏沟浚出野外
自是水患息又议治孟阳河议者谓不便佐言国初岁
转京东粟数十万今所致亡几儆不浚复旧迹后将废矣乃从其策出为江淮发运使孟
阳之役调民七八千夷邱墓百数怨声盈塞诏开封鞫
治官吏独舍佐不问纠察刑狱刘敞请加贬黜不听召为盐铁副使拜天章阁待制复判
都水知审官院权发遣开封府再使契丹卒于道年六
十一诏恤其家

△李兑

李兑字子西许州临颖人登进士第由屯田员外郎为殿中侍御史按齐州叛卒狄
成有欲夜夺囚者兑以便宜斩之人服其略张尧佐判
河阳兑言尧佐素无行能不宜以戚里故用改同知谏院狄青宣抚广西入内都知任守
忠为副兑言以宦者观军容致主将掣肘非计仁宗为
罢守忠进侍御史知杂事擢天章阁待制知谏院转运使制禄与郡守殊时有用弹劾夺
节及老疾请郡者一切得仍奉稍兑言非所以劝沮乃
诏悉依所居官格兑在言职十年凡所论谏不自表暴故鲜传世出知杭州帝书安民二
字以宠徙越州加龙图阁直学士知广州南人谓自刘
氏纳土后独兑着清节还知河阳帝又宠以诗徙邓州兑历守名郡为政简严老益精明
自邓归泊然无仕宦意对便殿力言退英宗命无拜以
为集贤院学士判西京御史台积官尚书右丞转工部尚书致仕卒年七十六谥曰庄从
弟先

李先

李先

先字渊宗起进士为虔州观察推官摄吉州永新令两州俗尚讼先为辨枉直皆得
其平知信州南安军抚楚州历利梓江东淮南转运使
寿春民陈氏施僧田其后贫弱往勺食僧所而僧逐之取僧园中笋遂执以为盗先诘其
由夺田之半以还之所至治官如家积官至秘书监致
仕兄兑尚无恙事之弥笃以子叙封得大中大夫闲居一纪卒年八十三子庭玉年六十
即弃官归养人贤其家法云

△沈立

沈立字立之历阳人举进士签书益州判官提举商胡埽采摭大河事迹古今利病
为书曰河防通议治河者悉守为法迁两浙转运使苏
湖水民艰食县戒强豪民发粟以振立亟命还之而劝使自称贷须岁稔官为责偿茶禁
害民山场榷场多在部内岁抵罪者辄数万而官仅得

钱四万立着茶法要览乞行通商法三司使张方平上其议后罢榷法如所请立召为户部判官奉使契丹适行册礼欲令从其国服不则见于门立折之曰往年北使讲见仪未尝令北使易冠服况门见耶契丹遂止迁京西北转运使都水方兴六塔河召与议立请祇修五股等河及漳河分杀水势以省役从之 【按长编载仁宗至和二年十二月尺河决大名馆陶殿中丞李仲昌请自澶州商湖河穿六塔渠入横陇故道以披其势富弼是其策诏发三十万丁修六塔河以回河道以仲昌提举河渠翰林学士欧阳修三上疏力谏其不可行帝不听嘉佑元年夏四月六塔河复决河北被害者凡数千里诏三司判官沈立往行视内使刘恢遂奏六塔之役非便诏罢其役英宗治平元年始命浚二股河以纾恩冀之患未几又并五股河浚之本传称立靖止修五股等河当在此时】 加集贤修撰知沧州进右谏议大夫判都水监出为江淮发运使居职办治数诏嘉之知越州杭州审官西院江甯府初立在蜀悉以公粟售书积卷数万神宗问所藏立上其目及所著名山水记徙宣州提举崇禧观卒年七十二

△张揆

张揆字文裕齐州历城人父蕴咸平初监淄州兵契丹内侵游骑至淄青闲州人将弃城蕴拔刀遮止于门力治守备游骑为之引去州守媿始谋掠为己功反陷以罪蕴受而不校揆幼笃孝蕴病剖股肉以疗举进士知益都县当督赋租置里胥弗用而民皆以时入石介献息民论请以益都为天下法丁内艰时隆寒徒跣举枢叩首流血与兄揆庐墓左明道中京东饥盗起以御史中丞范讽荐知莱州掖县民诉旱于州拒之揆自荐奏闻诏除登莱税通判永兴军为集贤校理四迁为龙图阁直学士知成德军宦者阎士良为钤辖多挠帅权用危法中军校揆直之而劾士良英宗登极朝廷使来告士良辞疾居家宴客自若奏抵其罪入判太常司农寺累官户部侍郎致仕熙宁七年卒年八十揆忠笃诚恇既老益康宁少从刘潜李冠游及其死率里人葬之置田贍其孥事揆如父理家必谿而行为乡党矜式

△张焘

张焘字景元枢密直学士奎之子也举进士通判郢州州卒谋乱期有日焘得告者徐诣营取首恶寘诸法知沂潍二州沂产布潍产绢而有司科赋相反焘始革之其役入损于旧五之四且命吏曰吾知守己而已无妨后人汝勿着为式提点河北刑狱摄领澶州七日而商胡决焘拯溺捋饥所全活者十余万犹坐免数年复提点河东陕西京西刑狱为盐铁判官淮南

转运使江淮发运副使泗州水城且坏煮悉力营护诏
宠其劳入为户部副使京师赋曲于酒人有常籍毋问售不售或厯产以偿煮请罢岁额
严禁令随所用曲多寡以售官修睦亲宅议取民居煮
言芳林园有余地宗室足自处无庸取民居从之迁天章阁待制陕西都转运使蒲津浮
桥坏铁牛皆没水中煮以策列巨木于岸以为衡绳石
其秒挽出之桥复其初保安二土豪善骑射为边人所惮故纵善马诱使取之而强以汉
法煮按得其状俱以隶军加龙图阁直学士知成都府
蜀人苦多盗煮严保伍使不得隐而申其捕限南蛮寇黎雅讨走之罢磨刀崖戍卒改知
瀛州母丧服阙故事起执政以诏近臣以堂帖神宗特
命赐诏判太常寺知邓许二州复判太常知通进银台司提举崇福宫由给事中易通议
大夫卒年七十煮才智敏给尝从范仲淹使河东至汾
州民遮道数百趋诉仲淹以付煮方与客弈局未终处决已竟英宗时三司前奏事帝诘
铸钱本末皆不能对煮悉论无隐帝是之顾左右识其
姓名后欲以为观察使守边曰卿家世事也煮对曰臣叔父亢有大才臣愚不可继遂止
△俞充

俞充字公达明州鄞人登进士第熙宁中为都水丞提举沿汴淤泥溉田为上腴者
八万顷检正中书户房加集贤校理淮南转运副使迁
成都路转运使茂州羌寇边充上十策御戎神宗遣内侍王中正司经制建三堡复永康
为军因诈杀羌众以为中正功与深相结至出妻拜之
中正还阙举充可任召判都水监进直史馆中书都检正御史彭汝砺论其媚事中正命
遂寝河决曹村充往救护还陈河防十余事加集贤殿
修撰提举市易岁登课百四十万故事当赐钱充曰奏课职也愿自今罢赐诏德之擢天
章阁待制知庆州庆阳兵骄小绳治辄肆悖充严约束
斩妄言者五人于军门闻有疾苦则巡抚劳饷死不能举者出私财以周其丧以故莫不
畏威而怀惠环州田与夏境犬牙交错每获必遭掠多
弃弗理充檄所部复以时耕植募家族山夷叛举户亡入西者且三百充遣将张守约耀
兵塞上夏人亟反之充之帅边实王珪荐欲以遏司马
光之入充亦知帝有用兵意屡倡请西征后言夏秉常为母梁所戕或云虽存而囚不得
与国政其母宣淫凶恣国人怨嗟实为兴师问罪之秋
也秉常亡将有桀黠者起必为吾患今师出有名天亡其国度如破竹之易愿得乘传入
覲面陈攻讨之略诏令掾属入议未及行充暴卒年四
十九

△刘瑾

刘瑾字符忠吉州人沆之子也第进士为馆阁校勘沆亡得褒赠知制诰张环草词

语涉讥贬瑾泣涕不能食阖门衰经邀宰相自言朝廷
为改书命黜环为州瑾亦坐衰服入公门罢职没丧不就官勺守坟墓王素为请以伸孝
子之志诏复职迁集贤校理通判睦州为淮南转运副
使召修起居注加史馆修撰河北转运使拜天章阁待制知瀛州坐与世居通问徙明州
未行改镇广州与枢密院论戍兵不合改虔州转擢都
监杨从先奉旨募兵不至擅遣其子懋纠诸县巡检兵集郡下瑾怒责之遽发悖谬语懋
诉瑾于朝遂废于家踰年复待制知江州历福州秦州
成德军卒瑾素有操尚所莅以能称然御下苛严少纵舍好面折人短以故多致訾怨

△ 阎询

阎询字议道凤翔天兴人少时以学问着闻擢进士第又中书判拔萃科累迁秘书
丞为监察御史里行诏治王素狱坐有媼嫌不以闻降
监河阳酒税累迁为盐铁判官使契丹询颇谙北方疆理时契丹在靴淀迓者王惠导询
由松亭往询曰此松亭路也胡不径葱岭而迂枉若是
岂非夸大国地广以相欺邪惠惭不能对加直龙图阁知梓州徙河东转运使言三路土
兵疲老者听其族以强壮者代之进集贤殿修撰知
河中府大河涨坏浮桥询易为长桥拜天章阁待制知广州不即赴罢职知商州神宗时
转右谏议大夫改邠同二州提举上清太平宫卒年七
十九

△ 葛宫 【葛密 葛书思】

葛宫字公雅江阴人举进士授中正军掌书记善属文上太平雅颂十篇真宗嘉之
召试学士院进两阶又献宝符阁颂为杨亿所称知南
充县东川饥民艰食部使者檄守资昌两州以惠政闻知南剑州土豪彭孙聚党数百凭
依山泽为盗吏民不可捕宫遣沙县尉许抗谕降之并
溪山多产铜银吏挟奸罔利课岁不登宫一变其法岁羨余六百万三司使闻于朝论当
赏宫曰天地所产吾固盗之又可为功乎卒不言徙知
滁秀二州秀介江湖闲吏为关涇读上以征往来闲有昏葬趋期者多不克宫命悉毁之
积官秘书监太子宾客治平中转工部侍郎熙宁五年
卒年八十一宫性敦厚恤录宗党抚孤嫠赖以存者甚众宫弟密亦以进士为光州推官
豪民李新杀人嫁其罪于邑民葛华且用华之子为证
狱具密得其情出之法当赏密白州使勿言仕至太常博士天性恬靖年五十忽上章致
仕媼党交止之笑曰俟罪疾老死不已而休官者安得
有余裕哉即退居号草堂逸老年八十四乃终子书思踵登第调建德主簿时密已老欲
迎以之官密难之书思曰曾子不肯一日去亲侧岂以
五斗移素志哉遂投辖归养十年余近臣表其志行以为泗州教授弗就密不得已许以

他日偕行始乞监新市镇居父丧哀毁骨立盛暑不释
苴麻终禫不忍去冢舍累年乃出仕历封邱涟水主簿时兄书元为望江令同隶淮南监
司有舍兄而荐己者移书乞改荐兄不许则封檄还之
其笃行类皆若此仕至朝奏郎亦告老父子归休皆不待年卒年七十三特谥曰清孝子
胜仲孙立方皆以学业至侍从世为儒家胜仲自有传

△张田

张田字公载澶渊人登进士第知应天府司录欧阳修荐其才通判广信军夏竦杨
怀敏建策增七郡塘水诏通判集议田曰此非御敌策
也坏良田浸冢墓民被其害不为便因奏疏极论调监郢州税久之通判冀州内侍张宗
礼使经郡酣酒自恣守贰无敢白者田发其事诏配西
陵洒扫摄度支判官裕享太庙又请自执政下差减赆费唐介论其亏损上恩出知蕲州
俄提点湖南刑狱介与司马光又状其倾险改知湖州
徙庐州治有善迹移桂州异时蛮使朝贡假道与方伯抗礼田独坐堂上使引入拜于庭
而犒贿加腆土豪刘纪卢豹素为边患讫田去不敢肆
京师禁兵来戍不习风土往往病于瘴疠田以兵法训峒丁而奏罢戍或告交址李日尊
兵九万谋袭特磨道诸将请益兵田曰交址兵不满三
万必其国有故长虚声以吓我耳谍既得实果其兄弟内相残惧边将乘之也宜州人魏
利安负罪亡命西南龙蕃从其使入贡凡十反至是龙
以烈来复从之田因其入谒诘责之梟其首欲并斩以烈叩头流血请命田曰汝罪当死
然事幸在新天子即位赦前汝自从朝廷乞恩乃密请
贷其死熙宁初加直龙图阁知广州广旧无外郭民悉野处田始筑东城环七里两旬而
成初役人相惊以白虎夜出田迹知其伪召戒逻者曰
今夕有白衣人出入林闲者谨捕之如言而获城既就东南微陷往视之暴卒年五十四
田为人伉直自喜好嫚骂气陵其下故死无哀者然临
政以清女弟聘马军帅王凯欲售珠犀于广顾曰南海富诸物但身为市舶使不欲自污
尔作钦贤堂绘古昔清刺史像日夕师拜之苏轼尝读
其书以侔古廉吏

△荣諲

荣諲字仲思济州任城人父宗范知信州铅山县诏罢县募民采铜民散为盗宗范
请复如故真宗嘉异擢提点江浙诸路银铜坑冶历官
九年諲举进士至盐铁判官晋州产矾京城大豪岁输钱五万缗颛其利諲请榷于官自
是数入四倍为广东转运使广有板步古河路绝险林
箐瘴毒諲开真阳峡至浣口古径作栈道七十闲抵清远趋广州遂为夷涂复入为开封
府判官太康民事浮屠法相聚祈禳号白衣会县捕数

十人送府尹贾黯疑有妖请杀其为首者而流其余諍持不从各具议上之中书是諍议但流其首而杖余人加直史馆知澶州改京东转运使莱阳产银砂民有私采者事露安抚使欲论以劫盗諍曰山泽之利人得有之所盗者岂民财耶贷免甚众又使成都府路召为户部副使以集贤殿修撰知洪州以疾故徙舒州未至而卒累官秘书监年六十五

△李载

李载字伯熙黎阳人少苦学隆暑读书置足于水虽得疾不舍去登进士第调冀州推官知大名冠氏县府守吕夷简入相荐其材知齐州钤辖赵瑜使酒殴载乃扃户避逸瑜得罪载坐不举劾黜为信阳军安抚使钱明逸等为之申理改常州知祥符县有巫以井泉饮人云可愈疾趋者旁午载杖巫堙其井厯知虢州涟水军载性笃孝侍母病不解带至病亟不能食载亦不食母知之为强食六为州以宽厚称以光禄卿提举仙源观卒年七十四

△姚涣

姚涣字虚州世家长安隋开皇中有景彻者以讨平泸夷策功为晋州刺史卒子孙遂家晋州涣第进士监益州交子务发奸隐万缗主吏皆当死涣曰戮人以干泽非吾志也义不蔽奸而已请于使者愿不受赏于是全活者众知峡州宜都民为盗所残县执囚讯服以狱上涣移劾于他有司居亡何真盗获大江涨溢涣前戒民徙储积迁高阜及城没无溺者因相地形筑子城埽台为木岸七十丈缭以长堤楗以薪石厥后江涨不为害民德之徙知涪州宾化夷多犯境涣施恩信拊纳酋豪争罗拜廷下讫涣去无警终光禄卿年六十七

△朱景

朱景字伯晦河南偃师人举进士调蒙泽簿西方用兵诏侍从馆阁举县令景预选知陇州汧源县累迁知汝州叶驿道远隶因为送者所虐多死俗传为叶家关景重禁以绝其患擢知寿州秩禄视提点刑狱始至亟发廩振给以劝富者出积谷所活数万城西居民三千室请建筑外郭环入之公私称便再迁光禄卿熙宁初病革自占遗表呼其子光庭书之其略云窃闻河北水灾地震陛下当减膳避殿斋居加省召二府大臣朝夕谘访阙失思所以弭咎凡数百言无一语求恩卒年七十一诏加赠录其子以官

光庭

光庭

光庭字公揆十岁能属文辞父荫擢第调万年主簿数摄邑人以明镜称厯四县令

曾孝宽以才荐神宗召见问欲再举安南之师光庭对曰得其地不可居得其民不可使何益也又问治何经对曰少从孙复学春秋又问今中外有所闻乎对曰陛下更张法度臣下奉行或非圣意故有便有不便诚能去其不便则天下受福矣帝以其言为疏阔不用签书河阳判官从吕大防于长安幕府五路出师讨西夏雍为都会事倚以办调发期会甚急光庭每执不从使者怒将加以乏兴罪光庭求免去大防为之解哲宗即位司马光荐为左正言首乞罢提举常平官保甲青苗等法论蔡确为山陵使而乃先灵驾而行为臣不恭又言章惇欺罔肆辩韩缜挟邪冒宠言甚切宣仁后喜其守正谕令尽言毋有所畏避迁左司谏又论苏轼试馆职发策云今欲师仁祖之忠厚而患百官有司不举其职或至于偷欲法神考之厉精而恐监司守令不识其意流入于刻臣谓仁宗难名之盛德神考有为之善志而不当以偷刻为议论望正其罪未几中丞傅尧俞侍御史王岩叟相继论列宣仁后曰详览文意是指今日百官有司监司守令言之非所以讽祖宗也遂止河北饥遣持节行视即发廩振民议者以耗积年兵食之蓄改左司员外郎迁太常少卿拜侍御史论蔡确怨谤之罪确贬新州拜右谏议大夫给事中乞补外除集贤殿修撰知亳州数月召还复为给事中坐封还刘摯免相制复落职守亳岁余徙潞州加集贤院学士邻境旱饥流民入境者踵接光庭日为食以食之常至暮自不暇食遂感疾犹力视事出祷雨拜不能兴再宿而卒年五十八绍圣中追贬柳州别驾元符初又停錡其诸子光庭始学于胡瑗瑗告以为学之本在于忠信故终身行之徽宗立复其官

△李琮

李琮字献甫江甯人登进士第调甯国军推官州庾积谷腐败转运使移州散于民俾至秋偿新者守将行之琮曰谷不可食强与民责而偿之将何以堪持不下守愧谢而止吕公着尹开封荐知阳武县役法初行琮处画尽理旁近民相率撻登闻鼓愿视以为则徽宗召对擢利州路江东转运判官行部至宣城按民田诡称逃绝者九千户他县皆然言于朝命以户部判官使江浙选强明吏立赏剔抉吏幸赏以多为功琮亦因是希进民患苦之得缗钱百余万进度支判官颁职式于诸道淮南赋入甲它部以为转运副使徙梓州路元佑初言者论其括隐税之害黜知吉州御史吕陶又言巴蜀科折已重琮复强民输税且无得以奇数并合人尤咨怨于是凡以括田受赏者悉夺之厯相洪潞三州潞有谋乱者为书期日揭道上部使者闻之惧檄索奸甚亟琮置不问以是日置酒高会讫无他

入为太府卿迁户部侍郎以宝文阁待制知杭州永兴
军河南瀛州卒年七十五琮长于吏治而所至主于掊克为士论嗤鄙子回绍兴初参知
政事

△朱寿隆

朱寿隆字仲山密州诸城人以荫知九陇县吏告民一家七人以火死寿隆曰盍有
尽室就焚无一脱者殆必有奸逾月获盗果杀其人而
纵火也知宿州宿多剧盗至白画被甲剽攻郡县不能制寿隆设方略耳目捕斩千余人
擢提点广西刑狱岭外新经侂寇修营城障桂州虐用
其人不能聊生寿隆驰诣州械守送狱奏黜之老稚妇女遭乱流转不能自还者檄所在
资送其还旧制溪蛮侵暴羈縻州虽杀人无得讎报寿
隆请听相偿蛮始畏戢厯盐铁度支判官夔路转运使巴峡地隘民困于役免其不应法
者千五百人复为盐铁判官京东转运使赐三品服岁
悉民移寿隆谕大姓富室畜为田仆举贷立息官为置籍索之贫富交利以少府监知扬
州卒年六十八寿隆为人和厚接谈恰恰必当于理而
不屈于权贵狄青讨贼欲杀裨将不用命者数人寿隆极论罪不当死孙沔在坐曰侂贼
害民万计此何足惜寿隆曰王师之来以除民害顾可
效贼为暴耶青感其言而止

△卢士宏

卢士宏字子高新郑人以父任屡更州县所至着清名知信阳军官捕为妖术者余
党惧及羣聚山谷闲士宏请减其罪招之即相率归命
徙知汉州校实民产使力役不滥人德之又知洋州先是圭田多虚籍士宏考校令随实
以输自部使者而下皆十损七八文彦博包拯以廉能
荐由三司开拆司擢夔州路转运使遂知广州或传安南舟数百泊海中将为寇岭徼惊
摇士宏灼其非是日从宾客宴游为乐民赖以安受代
还引疾旬便郡知郑州未几以光禄卿致仕卒年七十三凡衣衾棺槨之制皆有遗命戒
诸子勿为铭志

△单煦

单煦字孟阳平原人举进士知洛阳县民以妖幻转相教授煦迹捕戮三十余人当
得上赏不肯言转知昌州时诏城蜀治煦以蜀地负山
带江一旦毁篱垣而兴板筑其费巨万非民力所堪请但筑子城转运使即移诸郡如其
议徙清平军使有二盗杀人捕治不承煦纵使之食甲
食之既乙不下咽执而讯之果杀人者为御史台推直官江南人诬转运使吕昌龄以贿
中丞张昇讯而论之鞫未就敕煦往治煦不肯阿其长
卒直昌龄乞外迁知濮合二州合居涪汉闲夏秋患于淫潦煦筑东堤以御之赤水县盐

井涸奏蠲其赋累官光禄卿卒年七十七煦友爱兄熙尝殴人至死未有知者煦曰家贫亲老仰兄以养义当代之死即趋诣鬪所以待补已而死者苏惊问之煦以情告其人感叹遂辍讼

△杨仲元

杨仲元字舜明管城人第进士调宛邱主簿民诉旱守拒之曰邑未尝旱校吏导民而然仲元白之曰野无青草公日宴黄堂宜不能知但一出郊可见矣校吏非他实仲元也竟免其税知泽州沁水县民持物来输者视其价稍增之余则下其估官有所须不强赋民听以所有与官惟度其相当则止率常先办河外用兵督餉转西界夕宿洪谷口仲元相其地乃寇所由径路亟命去之民以困乏为辞不听寇果夜出劫诸部沁水独免初军期尚缓而仲元督行良急至则刍粮有不集者皆可贱市后期者物数倍其价民始知其为利州以买羊病民仲元更令户纚费钱百又遣吏市羔于他所明年以供州不科一钱徙知郟乡县宰相张士逊先莹隶境内将属之召不往至则按籍均役之虽堂帖求免不为减愿知光虔虢三州官光禄卿改中散大夫戒诸子曰吾入官五十年未尝以私怒加人虽杖刑之微苟有两比必传于轻典以是为报国耳卒年七十五

△余良肱 【卞 爽】

余良肱字康臣洪州分宁人第进士调荆南司理参军属县捕得杀人者既自诬服良肱视验尸与刃疑之曰岂有刃盈尺而伤不及寸乎白府请自捕逮未几更获真杀人者民有失财物逾十万逮平民数十人方暑榜掠号呼闻于外或有附吏耳语良肱阴知其为盗亟捕诘之赃尽得改大理寺丞出知湘阴县县逋麦数千石岁责里胥代输良肱论列之遂蠲其籍通判杭州江潮善溢漂官民庐舍垒石堤二十里障之潮不为害时王陶为属官常以气犯府帅吏或诉陶帅挟憾欲按之良肱不可曰使陶以罪去是以直不容也帅遂已后陶官于朝果以直闻知虔州士大夫死岭外者丧车自虔出多弱子寡妇良肱悉力振护孤女无所依者出俸钱嫁之以母老得知南康军丁母忧服除为三司使判官方关陕用兵朝议贷在京民钱良肱力争之会大臣亦以为言议遂格内府出腐币售三司三司吏将受之良肱独曰若赋诸军军且怨不则贷诸民民且病请付文思以奉帷幄改知明州朝廷方治汴渠留提举汴河司汴水淀淤流且缓执政主挟河议良肱谓善治水者不与水争地方冬水涸宜自京左浚治以及畿右三年可使水复行地中弗听又议伐汴堤木以资挟河良肱言自泗至京千余里江淮漕卒接踵者行多病喝藉

荫以休又其根盘错与堤为固伐之不便屡争不能得乃请不与其事执政虽怒竟不为屈改太常少卿知润州迁光禄卿知宣州治为江东最
请老提举洪州玉隆观卒年八十一七子卞爽最知名卞字洪范爽字荀龙皆以任子恩试校书郎卞博学多大略累为唐州判官湖北安抚司
勾当机宜文字讨叛蛮有功知沅州蛮杀沿边巡检卞设方略得平之加奉议郎先是良肱为鼎州推官五溪蛮叛良肱运粮境上周知其利害
上书言此弹丸地不足烦朝廷费不如弃与而就抚之当时是其议未果弃也及蛮叛断渠阳道扼官军不得进卞适使湖北帅唐义问即授卞
节制诸将阴选死士三千人夜衔枚绕出贼背伐山开道漏未尽数刻入渠阳黎明整众出贼大骇尽锐来战奋击大破之鼓行度险贼七遇七
败斩首数千级蛮遂降寻有诏废渠阳军为砦尽拔居入护出之绍圣初治弃渠阳罪免归徽宗即位复奉议郎管勾玉隆观未几复渠阳为靖
州又论前事免终于家爽尚气自信不少贬以合世应元丰诏上便宜十五事言过剗切元佑末爽复极言请太皇太后还政事章惇憾爽不附
己乃摘其言为谤讪以瀛州防御推官除名窜封州久之起知明州未行以言者罢监东岳庙崇宁中兴卞俱入党籍

△潘夙

潘夙字伯恭郑王美从孙也天圣中上书论时政授仁寿主簿久之知韶州擢江西转运判官提点广西湖北刑狱邵州蛮叛湖南骚动迁
转运使专制蛮事亲督兵破其团峒九十徙知滑州改湖北转运使知桂州坐在湖北时匿名书诬判官韩绛谪监随州酒税起知光化军大臣
以将帅才举之易端州刺史再迁徙鄜州召对访交广事称旨还司封郎中直昭文馆复知桂州交人败于占城伪表称贺以为大捷神宗诏之
曰智高之难方二十年中人之情燕安忽事直谓山僻蛮獠无可虑之理殊不思祸生于所忽唐六诏为中国患此前事之师也卿本将家子寄
要蕃宜体朕意悉心经度夙遂上书陈交址可取状且将发兵未报徙河北转运使历度支盐铁副使知河中府章惇察访荆湖讨南北江蛮獠
陈夙忧边状以知潭州再迁光禄卿知荆南鄂州卒年七十

钦定续通志卷三百五十二

●钦定续通志卷三百五十三 列传一百五十三

列传

宋 【五十七】

○宋五十七

徐禧 【李稷】

高永能

沈起

刘彝

熊本

萧注 陶弼 林广 种世衡
古 谔 谊 朴 师道 师中

徐禧
高永能
沈起
刘彝
熊本
萧注
陶弼
林广
种世衡
种古
种谔
种谊
种朴
种师道
种师中
△徐禧

徐禧字德占洪州分宁人少有志度博览周游以求知古今事变风俗利疾不事科
举熙宁初王安石行新法禧作治策二十四篇以献 【
按涑水记闻云布衣徐禧得洪州进士黄雍所著书窃其语上书褒美新法介甫赏其言
奏除官令于中书习学检正据此则禧所上治策盖窃
他人之语为之】 时吕惠卿领修撰经义局遂以布衣充检讨 【按王偁东都事略云
禧以进士充检讨】 神宗见其所上策曰禧言朝廷
用经术变士十已八九然窃袭人之语不求心通者相半此言是也宜试于有用之地即
授镇安军 【按东都事略作镇南军】 节度推官中
书户房习学公事岁余召对顾问久之擢太子中允馆阁校勘监察御史里行与中丞邓
绾知谏院范百禄杂治赵世居狱李士宁者挟术出入
贵人闲尝见世居母康以仁宗御制诗赠之又许世居以宝刀且曰非公不可当此世居
与其党皆神之曰士宁二三百岁人也解释其诗以为
至宝之祥及鞠世居得之逮捕士宁而宰相王安石故与士宁善百禄劾士宁以妖妄惑
世居致不轨禧奏士宁遗康诗实仁宗制今狱官以为
反臣不敢同百禄言士宁有可死之状禧故出之以媚大臣朝廷以御史杂知枢密承旨
参治而百禄坐报上不实贬进禧集贤校理检正礼房

安石与惠卿交恶邓绾言惠卿昔居父丧尝贷华亭富人钱五百万买田事诏禧参鞫禧阴右惠卿绾劾之会绾贬官狱亦解禧出为荆湖北路转运副使元丰初召知谏院惠卿在鄜延欲更蕃汉兵战守条约【按东都事略云初陕西缘边兵马番弓箭手与汉兵各自为军每阵多以番部为前锋而汉兵守城伺便利然后出不分战守每一路以数将通领之吕惠卿以为调发不能速集始变旧法杂汉番兵团结分守战每五千人随屯驻将具条约以上】诸老将不谓然帝颇采听将推其法于他路遣禧往经画禧是惠卿议谓帅蔡延庆亦以为不然帝召延庆还加禧直龙图阁使往代以母忧不行服除召试知制诰兼御史中丞官制行罢知制诰专为中丞邓绾守长安禧疏其过帝知其以惠卿故虽改绾青州亦左迁禧给事中种谔西讨得银夏宥三州而不能守延帅沈括欲尽城横山瞰平夏城永乐诏禧与内侍李舜举往相其事令括总兵以从李稷主馈饷禧言银州虽据明堂川无定河之会而故城东南已为河水所吞其西北又阻天堑实不如永乐之形势险阨窃惟银夏宥三州陷没百年一日兴复于边将事功实为俊伟军锋士气固已百倍但建州之始烦费不貲若选择要会建置堡栅名虽非州实有其城旧来疆塞乃在腹心已与沈括议筑砦堡各六砦之大者周九百步小者五百步堡之大者二百步小者百步用工二十三万遂城永乐十四日而成禧括舜举还米脂明日夏兵数千骑趋新城禧亟往视之或说禧曰初被诏相戒御寇非职也禧不听与舜举稷俱行括独守米脂先是种谔还自京师极言城永乐非计禧怒变色谓谔曰君独不畏死乎敢误成事谔曰城之必败败则死拒节制亦死死于此犹愈于丧国师而沦异域也禧度不可屈奏谔跋扈异议诏谔守延州夏兵二十万屯泾原北闻城永乐即来争边人驰告者十数禧等皆不之信曰彼若即来是吾立功取富贵之秋也禧亟赴之大将高永亨曰城小人寡又无水不可守禧以为沮众欲斩之既而械送延狱比至夏兵倾国而至永亨兄永能请及其未陈击之禧曰尔何知王师不鼓不成列禧执刀自率士卒拒战夏人益众分阵迭攻抵城下曲珍兵陈于水际官军不利将士皆有惧色珍白禧曰今众心已摇不可战战必败请收兵入城禧曰君为大将柰何遇敌不战先自退邪俄夏骑卒度水犯陈鄜延选锋军最为骁锐皆一当百银枪锦袄光彩耀日先接战而败奔入城蹂后陈夏人乘之师大溃死及弃甲南奔者几半珍与残兵入城崖峻径窄骑卒缘崖而上丧马八千匹遂受围水砦为夏人所据掘井不及泉士卒渴死者大半夏人蚁附登城尚扶创拒鬪珍度不可敌又白禧请突围而南永能亦劝李稷尽捐金帛

募死士力战以出皆不听大雨城陷四将走免禧舜举稷死之永能没于陈初括奏夏兵来逼城见官兵整故还帝曰括料敌疏矣彼来未出战岂肯遽退邪必有大兵在后已而果然帝闻禧等死涕泣悲愤为之不食赠禧金紫光禄大夫吏部尚书谥曰忠愍官其家二十人稷工部侍郎官其家十二人禧疏旷有胆略好谈兵每云西北可唾手取恨将帅怯尔吕惠卿力引之故不次用自灵武之败秦晋困棘天下企望息兵而沈括种谔陈进取之策禧素以边事自任狂谋轻敌猝与强敌遇至于覆没自是之后帝始知边臣不可信倚深自悔咎遂不复用兵无意于西伐矣子俯自有传

李稷

李稷

李稷字长卿邛州人父绚龙图阁直学士稷用荫历管库权河北西路转运判官修拓深赵邢三州城役无愆素性峭刻严忍察访使者以言都水丞程昉亦诉其越职诏令件析御史周尹又论稷父死二十年不葬仅徙东路俄提举蜀部茶场甫两岁羨课七十六万缗擢盐铁判官诏推扬其功以劝在位遂为陕西转运使制置解盐秦民作舍道傍者创使纳侵街钱一路扰怨与李察皆以苛暴著称时人语曰宁逢黑杀莫逢稷察种谔起兴灵议稷闻之亦上言可令边面诸将各出兵挠之使不得耕种则其国必困国困众离取可决也及出境稷督饷民苦挽运多散逸稷令骑士执之断其足筋宛转山谷闲凡数十人累日乃得死始稷受旨得斩郡守以下于是上下相临以峻法虽小吏护丁夫亦颡黻不请军食竟不继谔谋斩稷客吕大钧引义责之复使还取粮既集谔犹宣言稷乏军兴致大功不就至削两秩贬为判官永乐既城稷犖金银钞帛充牣其中欲夸示徐禧以为城甫就而中已实积金既多故受围愈急而稷守之不敢去以及于难李舜举别有传

△高永能

高永能字君举世为延州人至永能始家青涧少有勇力善骑射由行伍补殿侍稍迁供奉官种谔取绥州发永能兵六千先驱入啰兀五战皆捷转供备库副使治绥德城辟地四千顷增户千三百即知城事元丰初为鄜延都监秋太稔夏人屯一千骑于大会平将取稼永能简精骑突过其营骑卒惊溃获钐辖二人转六宅使夏人患之令曰有得高六宅者赏金等其身经略使吕惠卿行边永能伏骑谷中以备侵轶边骑果至驰出击走之夏兵二万犯当川堡永能以千骑与相遇度不能支依险设疑兵且鬪且却而令后骑扬尘若援兵至者奋而前遂解去擢本

路铃辖四年西讨永能为前锋围米脂城边人十万来援永能谓弟永亨曰彼恃众集易吾军营当大川宜严陈待其至张左右翼击之可破也
诘旦鏖战于无定河斩首数千级得马三千橐駝牛羊万计城犹未下密遣谍说降其东壁守将衣以文锦导以鼓吹耀诸城下酋乃降进东上
合门使盩州刺史以年老请不许又进四方馆使棗州团练使永乐之役献谋皆不用城既陷其孙昌裔欲援之从闲道出永能叹曰吾结发从事西羌战未尝挫今年已七十受国大恩恨无以报此吾死所也顾易一卒敝衣战而死其子世亮与昌裔求得尸以归诏赠房州观察使录其子世亮为忠州刺史诸孙皆侍禁殿直永能家世州将所领多故部曲拊之有恩惠遇敌则身先之下有伤者载以己副马故能得士死力远近喜言其事称之曰老高及死边人无不痛惜永能之亡延州将皇城使寇伟亦力战而没赠均州防御使

△沈起

沈起字兴宗明州鄞县人【宋史本传作明州郑人今据东都事略改】进士高第调滁州判官【按东都事略作滁州军事推官】
与监真州转般仓闻父病委官归侍以丧免有司劾其擅去终丧荐书应格当迁用帝谓辅臣曰观过知仁今由父疾而致罪何以厚风教而劝天下之为人子者乃特迁之知海门县县负海地卑闲岁海潮至冒民田舍民徙以避弃其业起为筑堤百里引江水灌溉其中田益辟民相率以归至立祠以报御史中丞包拯举为监察御史吏部格选吏以赃私絀法无轻重终身不迁起论其情可矜者可限年叙用遂着为令立县令考课法设河渠司领诸道水政乞采汉故事择卿大夫子弟入宿卫选贤良文学高第给事官省勿专任宦官宗室袒免亲令补外官复府兵汰冗卒书数十上以论兴国铁官事不合出通判越州改知蕲楚二州京东岁饥盗起除提点刑狱至则开首赎法携其伍盗内自啖疑转相束缚唯恐后改开封府判官为湖南转运使凡羽毛筋革舟楫竹箭之材多出所部取于民无制吏挟为奸起会其当用自与商人贸易所省什六七
召为三司盐铁副使直舍人院熙宁三年韩绛使陕西加起集贤殿修撰陕西都转运使庆州军变将寇长安起率兵讨平之会韩绛城绥州不利起亦罢知江甯府入知吏部流内铨奉使契丹至王庭其位着乃与夏使等起曰彼陪臣尔不当与王人齿辞不就列遂升东朝使者自是为定制六年拜天章阁待制知桂州自王安石用事始求边功王韶以熙河进章惇熊本亦因此求奋是时议者言交址可取朝廷命萧注守桂经略之注盖造谋者也至是复以为难起言南交小丑无不可取之理乃以起代注遂一意

事攻讨妄言密受旨擅令疆吏入溪洞点集土丁为保伍授以阵图使岁时练习继命指使因督饘盐之海滨集舟师寓教水战故时交人与州县贸易悉禁止之于是交址益贰太集兵谋入寇苏緘知邕州以书抵起请止保甲罢水运通互市起不听劾緘沮议起坐边议罢命刘彝代之

【此下按东都事略云徙知潭再阅月徙杭交人大举陷钦廉邕三郡】以守广日遏绝其表疏于是交人疑惧率众犯境连陷廉白钦邕四州死者数十万人事闻贬起团练使安置郢州徙越又徙秀而卒【按东都事略作谪为郢州团练副使会赦移温州卒】起生平喜谈兵尝以兵法谒范仲淹仲淹器其材注孙武书以自见卒用此败

△刘彝

刘彝字执中福州人幼介特居乡以行义称从胡瑗学瑗称其善治水凡所立纲纪规式彝力居多第进士为邵武尉调高邮簿移胸山令治簿书恤孤寡作陂池教种艺平赋役抑奸猾凡所以惠民者无不至邑人纪其事目曰治范熙宁初为制置三司条例官属以言新法非便罢神宗择水官以彝悉东南水利除都水丞久雨汴涨议开长城口彝请但启杨桥斗门水即退为两浙转运判官知处州俗尚巫鬼不事医药彝着正俗方以训斥淫巫三年七百家使以医易业俗遂变加直史馆知桂州禁与交人互市交址陷钦廉邕三州坐贬均州团练副使安置随州又除名为民编隶涪州徙襄州元佑初复以都水丞召还病卒于道年七十

△熊本

熊本字伯通番阳人儿时知学郡守范仲淹异其文进士上第为抚州军事判官稍迁秘书丞知建德县县令项包鱼池为圭田本弛以与民熙宁初提举淮南常平检正中书礼房事【按东都事略云改户房】六年泸川罗晏夷叛诏察访梓夔得便宜治夷事本尝通判戎州习其俗谓彼能扰边者介十二村豪为乡导尔以计致百余人梟之泸川其徒股栗愿矢死自赎本请于朝宠以刺史巡检之秩明示劝赏皆踊跃顺命独柯阴一酋不至本合晏州十九姓之众发黔南义军强弩遣大将王宣贾昌言率以进讨贼悉力旅拒败之黄葛下追奔深入柯阴窘乞降尽籍丁口土田及其重宝善马归之公上受贡职于是乌蛮罗氏鬼主诸夷皆从风而靡愿世为臣仆迁刑部员外郎集贤殿修撰同判司农寺神宗劳之曰卿不伤财不害民一旦去百年之患至于檄奏详明近时鲜俪焉赐三品服西南用兵蛮中始此蔡京时为秀州判官本言其学行纯茂练习新法荐为干当公事河湟初复本为秦凤路都转运使熙河法禁阔略蓄

积不支岁月本奏省冗官百四十员岁减浮费数十万
渝州南川獠木斗叛诏本安抚本进营铜佛坝抗其尤焚积聚以破其党木斗气索举秦
州地五百里来归为四砦九堡建铜佛坝为南平军初
熟獠王仁贵以木斗亲系狱本释其缚置麾下至是摧锋先登大臣议加本天章阁待制
帝曰本之文联所自知当典书命遂知制诰帝数称其
文有体命院吏别录以进又上疏云天下之治有因有革期于趋时适治而已议者猥用
持盈守成之说文苟简因循之治因以安常习故为俗
奋言纳忠者悠悠之徒相与蹙额吁衡而诋骂之陛下出大号发大政可谓极因革之理
然改制之始安常习故之羣圜视四起交讟而合噪或
诤于廷或谤于市或投劾引去者不可胜数陛下烛见至理独立不夺今虽少定彼将伺
隙而逞愿陛下深念之本之意专以媚王安石也范子
渊创浚河之役文彦博争之命本行视议如彦博安石白出本分司西京居三年起知滁
州改广州 【按东都事略作复集贤殿修撰知广州

】 召为工部侍郎宜州蛮扰边道除龙图阁待制知桂州至则谕溪洞酋长戒边吏勿生
事请选将练民代戍益市马以足骑兵宜州遂无事民
蔡宝瑜扇龙蕃与峒户相仇杀欲引兵致讨以为功本质之色动缚而投之海蛮夷以为
神谍告交人明年将入寇使者实其言诏访本曰使者
在道安得此藉使有谋何自先知之已而果妄是时既以顺州赐李干德疆画未正交人
缘是辄暴勿阳地而逐依智会智会来乞师本檄问状
干德敛兵谢本因请以宿桑八洞不毛之地赐之南荒遂安转运判官许彦先议通湖南
盐于西广计口授民度可得息三十万本言桂管民贫
地瘠恐不堪命议遂格入为吏部侍郎踰年力请外仍待制知洪州言者谓本弃八洞为
失谋夺一官徙杭州江甯府再知洪州召还卒于道

△萧注

萧注字岩夫临江新喻人磊落有大志尤喜言兵举进士摄广州番禺令依智高围
州数月方舟数百攻城南势危甚注自围中出募海滨
壮士得二千人乘大舶集上流因飓风起纵火焚贼舟破其众即日发县门纳援兵民持
牛酒刍粮相继入城中自是每战以胜归蒋偕上其功
擢礼宾副使广南驻泊都监贼还据邕管余靖患其啸诱诸洞以属注注挺身入蛮中施
结恩信狄青师次宾州召会诸将疑注倚贼声势为奸
利欲诛之注觉托为游辞不肯往贼破青始闻注前功以知邕州智高走大理国母与三
弟寓特磨道注帅师往讨获一裨将引致卧内与之语
具得贼情悉擒送阙下拜西上合门副使募死士使入大理取智高至则已为其国所杀
函首归献转为使居邕数年阴以利啖广源羣蛮密缮

兵甲乃上疏曰交址虽奉朝贡实包祸心常以蚕食王土为事往天圣中郑天益为转运使尝责其擅赋云河洞今云河乃落蛮数百里盖年侵岁吞驯致于是臣已尽得其要领周知其要害今不取异日必为中国忧愿驰至京师面陈方略未报而甲洞申绍泰犯西平五将被害谏官论注不法致寇罢为荆南钤辖提点刑狱李师中又劾其沮威嗜利略智高阉民为奴发洞丁采黄金无帐籍可考中使按验颇有实贬泰州团练副使淮南转运使言注椎牛屠狗招集游士部勒为兵教之骑射请徙大州以縻之诏改镇南军节度副使近臣有讼注广州功者起为右监门将军邠州都监熙宁初以礼宾使知邠州环庆李信之败列城皆坚壁注独启关夜宴如平时复合门使管干麟府军马辞云身本书生差长拊纳不闲战鬪惧无以集事时有言交人挫于占城众不满万可取也遂以注知桂州入覲神宗问攻取策对曰昔者臣有是言是时溪洞之兵一可当十器甲坚利亲信之人皆可指呼而使今两者不如昔交人生聚教训十五年矣谓折老幼安否均得其驩心故李干德动息必知之然有献征南策者辄不听会沈起以平蛮自任帝使代注而罢注归卒于道年六十一诏优录其子注有胆气嗜杀而能相人自陕西还帝问注韩绛为安抚使施設何如对曰庙算深远臣不能窥然知绛当位极将相帝喜曰果如卿言绛必成功问王安石曰安石牛目虎顾视物如射意行直前敢当天下大事然不如绛得和气为多惟气和能养万物尔王韶为建昌参军注曰君他日类孙沔但寿不及后皆如其言

△陶弼

陶弼字商翁永州人少倜傥放宕吴中行山闲有双鲤戏溪水上竚观之傍一老父顾曰此龙也行且鬪君宜亟去去百步许雷大震两岸圯木拔又出大云风暴怒二十七艘同时溺独弼舟得济人以是异之丁谓妻以宗女因从学兵法能持论纵横庆历中杨畋讨湖南獠弼上谒畋授之兵使往袭大破之以功得阳朔主簿依智高犯南海畋为安抚使辟参军谋使下英江会大将蒋偕战死余众畏亡将被诛多降贼弼数与之遇亟矫畋命揭榜道上谕使归许以不死凡得千五百人调阳朔令课民植木官道旁夹数百里自是行者无夏秋暑暍苦它郡县悉效之摄兴安令移书说桂守萧固浚灵渠以通漕不听至李师中卒浚之师征安南馈饷于是乎出大为民利知宾容钦三州换崇仪副使迁为使知邕州邕经依寇井隧荡然弼绥辑惠养至忘其勤诸洞献土物求内附弼降意抚答谢其贽皆感悦无犯边者邕地卑下水易集夏大雨弥月弼

登城望三边皆漫为陂泽亟窒垠江三门谕兵民即高避害俄而水大至弼身先版锺召僚吏赋役为土囊千余置道上水果从窞入随塞之城虽不坏而人皆乏食则为发廩以振于内方舟以饁于外水不及女墙者三板旬有五日乃退公私一无所死亡自横浔以东数州皆没弼久于邕请便郡徙鼎州章惇经理五溪蛮事荐为辰州迁皇城使降北江彭师宴授忠州刺史郭逵南征转弼康州团练使复知邕州民再罹祸乱散匿山谷弼率百骑深入左江峒民知其至扶老携幼以归逵帅官军临富良江使弼殿交人纳款逵欲班师恐为所袭乃以计夜起军不整骑步相蹈藉乱行贼隔江陵伺觇知弼殿弗敢追弼甲令帐下毋动迟明结队徐行逵赖以善还建所得广源峒为顺州桃榔为县进弼西上合门使留知顺州州去邕二千里多毒草瘴雾戍卒死者什七八弼亦疾甚然蚤莫劳军视其良苦意气激扬士莫不感泣强奋起为用交人袭取桃榔扬声欲图州独难弼素得人心贼动息皆先知获闲谍不杀谕以逆顺纵之去恩威两施以是终弼在不敢犯加东上合门使未拜而卒诏录其家五人弼能为诗好士乐施所得俸禄悉以与人家至贫不恤也既死妻在乡里僦屋以居

△林广

林广莱州人以捧日军卒为行门授内殿崇班从环庆蔡挺麾下李谅祚寇大顺城广射中之李信败于荔原广引兵西入破十二盘攻白豹金汤皆先登夜过洛河夏人来袭广扬声选强弩列岸侧实卷甲疾趋夏人疑不敢渡尝护中使临边将及乌鸡川遽率众循山行道遇熟羌以险告广不答夏人果伏兵于川计不行而去告者乃谍也夏人围桑远城广止守戒士卒即有变毋得轻动火夜起积薪中众屯守自若明日敌至马平川大持攻具来广被甲启他门鼓而出若将夺其马敌舍城救马广复入益修守备夜募死士斫其营夏人数失利始引退累迁礼宾使韩绛奏为本道将庆兵据北城叛广在南城望其众进退不一曰是不举军乱也挺身缒城出谕以逆顺皆投兵听命出者才三百人广语余众曰乱者去矣汝曹事我久能听命不唯得活仍有功得百余人激厉要束使反攻城下兵禽戮皆尽遂平北城出追乱者至石门山与之遇谕之不肯降纵兵尾击敌知不得免始请命广曰不从吾言今窘而就死非降也悉斩之迁本路都监诏入对神宗奖金汤石门之功慰赐甚厚将使开熙河辞以不习洮陇事乃迁钤辖使还徙鄜延攻踏白城功最迁皇城使进讨洮羌加带御器械环庆副都总管安南用师诣阙请行帝曰南方卑湿知卿病足西边方开拓宜复归擢神龙卫四厢都指挥使英州刺史边臣或言

往者刘平因救邻道战没今宜罢援兵广曰此乃制贼
长计也使贼悉力寇一路而他道不救虽古名将亦无能为已平之所以败非出援罪乃
止再转步军都虞候韩存宝讨泸蛮奇迪逗桡不进诏
广代之广至阅兵合将搜人材勇怯二分之日夕肄习闲椎牛享犒士心皆奋遣使开晓
奇迪仍索所亡卒奇迪归卒七人奉书降而身不至乃
决策深入陈师泸水率将吏东乡再拜誓之曰朝廷以存宝用兵亡状使我代之要以必
禽渠魁今孤军远略久驻贼境退则为戮冒死一战胜
负未可知纵死犹有赏愈于退而死也与汝等戮力而进可乎众皆踊跃广挟所得渠帅
及质子在军而令以次酋护饷以是入箐道而无钞略
之患师行有二途从纳溪抵江门近而险从窰远抵乐共坝远而平蛮意官军必出江门
盛兵阻隘而师趋乐共蛮不能支皆遁去广分兵绕帽
溪掩江门后破其险水陆皆通行益前进每战必捷奇迪遣叔父阿舒约降求退舍又约
不解甲广策其有异除阜为坛距中军五十步且设伏
明日奇迪拥千人出降匿弩士毡裘犹豫不前谢恩广发伏击之蛮奔溃斩阿舒及大酋
二十八人奇迪以所乘马授弟阿咱尔大将王光祖追
斩之军中争其尸奇迪得随江桥下脱走得其种落三万进次归徠州穷探巢穴发故酋
甫望个怒冢天寒士多堕指而奇迪竟不可得监军先
受密诏听引兵还遂班师拜卫州防御使马军都虞候西兵未解上疏求面陈方略及入
见言韩存宝虽有罪功亦多以今日朝廷待诸将存宝
不至死广还部至阆乡疽发断颈卒年四十八广为人有风义轻财好施学通左氏春秋
临事持重长于料敌以智损益八阵图又撰约束百余
条列上边地颇推行之其名闻于西夏秉常母梁氏将内侮论中国将帅独畏广闻其南
征乃举兵然在泸以敕书招蛮既降而杀之此其短也
遄被恶疾死或以为杀降之报云

△种世衡

种世衡字仲平放之兄子也少尚气节昆弟有欲析其贖者悉推与之惟取图书而
已以放荫补将作监主簿累迁太子中舍尝知泾阳县
里胥王知谦以奸利事败法当徙遁去比郊赦辄出世衡曰送府则会赦杖其脊而请罪
于府知府李谿奏释之后通判凤州州将王蒙正章献
后嫔家也所为不法尝千世衡以私不听蒙正怒乃诱知谦讼冤而阴助之世衡坐流窦
州徙汝州弟世材上一官以赎为孟州司马久之龙图
阁直学士李紘为辨其诬宋绶狄棐继言之除卫尉寺丞历签书同州鄜州判官事西边
用兵守备不足世衡建言延安东北二百里有故宽州
请因其废垒而兴之以当寇冲右可固延安之势左可致河东之粟北可图银夏之旧朝

廷从之命董其役夏人屡出争世衡且战且城之然处
险无泉议不可守凿地百五十尺始至于石石工辞不可穿世衡命屑石一畚酬百钱卒
得泉城成赐名青涧城迁内殿崇班知城事开营田二
千顷募商贾贷以本钱使通货赢其利城遂富实闲出行部族慰劳酋长或解与所服带
尝会客饮有得敌情来告者即以饮器予之繇是属羌
皆乐为用再迁洛苑副使知环州蕃部有牛家族诺尔阿者素崛强未尝出谒郡守闻世
衡至遽郊迎世衡与约明日当至其帐往劳部落是夕
大雪深三尺左右曰地险不可往世衡曰吾方结诸羌以信不可失期遂缘险而进诺尔
阿方卧帐中谓世衡必不能至世衡蹙而起诺尔阿大
惊曰前此未尝有官至吾部者公乃不疑我耶率其族罗拜听命羌酋慕恩部落最强世
衡尝夜与饮出侍姬以佐酒既而世衡起入内潜于壁
隙中窥之慕恩窃与侍姬戏世衡遽出掩之慕恩惭惧请罪世衡笑曰君欲之耶即以遗
之由是得其死力诸部有贰者使讨之无不克其后百
余帐皆自归莫敢贰因令诸族置烽火有急则举燧仲马以待葛怀敏败率羌兵数千人
以援泾原无敢后者尝课吏民射有过失射中则释其
罪有辞某事请某事辄因中否而与夺之人人自厉皆精于射繇是数年敌不敢近环境
迁东染院使环庆路兵马钤辖范仲淹檄令与蒋偕筑
细腰城世衡时卧病即起将所部甲士昼夜兴筑城成而卒初世衡在青涧城元昊未臣
其贵人雅尔康朗凌额奇兄弟有材谋皆号大王亲信
用事边臣欲以谋闲之会康朗凌令朗默特什奇玛尼等三人诣世衡请降世衡知其诈
曰与其杀之不若因以为闲留使监商税出入骑从甚
宠有僧王光信者趯勇善骑射习知蕃部山川道路世衡出兵常使为乡导数荡族帐奏
以为三班借职改名嵩世衡为蜡书遣嵩遗康朗凌言
朗默特等已至朝廷知王有向汉心命为夏州节度使奉钱月万缗旌节已至趣其归附
以枣缀画龟喻其早归之意康朗凌得书大惧自所治
执嵩归元昊元昊疑康朗凌贰已不得还所治且锢嵩奔中使其臣李文贵以康朗凌旨
报世衡且言不达所遗书意或许通和愿赐一言世衡
以白籍时朝廷已欲招附籍召文贵至谕以国家宽大开纳意纵使还报元昊得报出嵩
礼之甚厚使与文贵偕来自是继遣使者请降遂称臣
如旧世衡闻雅尔兄弟已诛为文越境祭之 【按东都事略及宋史西夏载记载此事与
本传异世衡遣王嵩遗书乃与旺荣非康朗凌也考
事略云世衡使嵩赍书遗以枣及画龟欲其早归以离闲之旺荣知见侮笑曰吾素奇种
将军今何儿女见识度嵩别有书索之嵩佯目左右既
而答以无有旺荣乃封其信上元昊锁嵩囚于地牢一日召入一官寺听事广楹皆垂斑

竹箛绿衣小童立其左右嵩意元昊宫室也少顷箛中有人出诘责嵩嵩对如前乃命曳出诛之嵩大号且言曰始将军遣嵩遗旺荣书戒不得妄泄今不幸空死不了将军事箛中急使人追问之嵩具以对乃褫纳衣取书以入命嵩就馆元昊于是始疑旺荣乃释嵩囚而使旺荣遣边将军送嵩还嵩既还而旺荣已报死矣世衡知谋将行因欲并闲康朗凌乃致祭境上作文书于版以吊多述旺荣与康朗凌相结有意本朝悼其垂成而失其文杂纸币伺有敌至急爇之而归版字不可遽泯夏人得之以献元昊康朗凌无以自明亦得罪元昊既失二将始悟为世衡所卖遂称臣据此则作文致祭乃所以闲康朗凌也附识】

籍疏嵩劳具言元昊未通时世衡画策嵩冒艰险闲其君臣遂成猜贰因此与中国通请优进嵩官迁三班奉职后嵩因对自陈又进侍禁合门祇候世衡死籍为枢密使世衡子古上书讼父功为籍所抑古复上书遂赠世衡成州团练使诏流内铨授古大县簿尉押还本贯籍既罢古复辩理下御史考验以籍前奏王嵩疏为定诏以其事付史官听古从官便郡世衡在边数年积谷通货所至不烦县官益兵增馈善抚养士卒病者遣一子专视其食饮汤剂以故得人死力及卒羌酋朝夕临者数日青涧及环人皆画像祠之子古【按东都事略作诘】 谩诊皆有将材关中号曰三种谊其幼子也孙朴师道师中

△种古

古字大质少慕从祖放为人不事科举当任官辞以与弟时称小隐君世衡卒录古为天兴尉累转西京左藏库副使泾原路都监知原州羌人犯塞古御之斩级数百筑城镇戎之北以据要害神宗召对迁通事舍人官其三弟与弟诊破坏州折姜会斩首二千级迁西上合门副使民有损直鬻田于熟羌以避役者古按其状得良田三千顷丁四千悉刺为民兵历环庆永兴军路钤辖坐讼范纯仁不当夺一官知甯州徙镇戎军熙河师十万道境上须刍粮僚佐以他路为言古曰均王师也命给之又徙鄜隰二州卒【按东都事略作以西上合门使知鄜州告老提举上清太平宫卒】 年七十古明达孝义弟谩坐擅兴系狱乞纳官赎其罪世衡遗张问田千亩问返之而世衡死古终不复受然世衡受知于范仲淹因立青涧功而古以私憾讼纯仁士论少之

△种谩

谩字子正以父任累官左藏库副使延帅陆诜荐知青涧城夏酋凌凌内附诜恐生事欲弗纳谩请纳之夏人来索诜问所以报谩曰必欲凌凌当以景询来易乃止询者中国亡命至彼者也夏将嵬名山部落在故绥州其弟夷

山先降谔使人因夷山以诱之赂以金盂名山小吏李文喜受而许降而名山未之知也谔即以闻诏转运使辞向及陆诜委谔招纳谔不待报悉起所部兵长驱而前围其帐名山惊援枪欲鬪夷山呼曰兄已约降何为如是文喜因出所受金盂示之名山投枪哭遂举众从谔而南得酋领三百户万五千兵万人将筑城诜以无诏出师召谔还军次怀远晨起方栉敌四万众垒集傅城而陈谔开门以待使名山帅新附百余人挑战谔兵继之鼓行而出至晋祠据险使偏将燕达刘甫为两翼身为中军乃闭垒悉老弱乘城鼓噪以疑贼已而合战追击二十里俘馘甚众遂城绥州诜劾谔擅兴且不禀节制欲捕治未果而诜徙秦言者交攻之遂下吏贬秩四等安置随州会侯可以言水利入见神宗问其事对曰种谔奉密旨取绥而获罪后何以使人帝亦悔复其官韩绛宣抚陕西用为鄜延钤辖绛城娄规横山令谔将兵二万出无定川命诸将皆受节度起河东兵会银州城成而庆卒叛诏罢师弃娄责授汝州团练副使再贬贺州别驾移单州又移华州绛再相讼其前功复礼宾副使知岷州栋戡将果庄聚兵于洮岷新羌多叛谔讨袭诛之从李宪出塞收洮州迁东上合门使文州刺史知泾州徙鄜延副总管上言夏主秉常为其母所囚可急因本路官捣其巢穴遂入对大言曰夏国无人秉常孺子臣往持其臂以来耳帝壮之决意西讨以为经略安抚副使诸将悉听节制谔即次境上帝以谔先期轻出使听令于王中正敌屯兵夏州谔率本路并畿内七将兵攻米脂三日未下夏兵八万来援谔御之无定川伏兵发断其首尾大破之捷书闻帝大喜羣臣称贺遣中使谕奖而罢中正谔留千人守米脂进次银石夏州不见敌始被诏当会灵武谔运枉不进士卒饥惫欲以粮运不继归罪转运使李稷驻军麻家平大校刘归仁以众溃诏令班师犹迁凤州团练使神龙卫四厢都指挥使谔谋据横山之志未已遣子朴上其策帝召朴问状擢为合门祇候将进城横山命徐禧李舜举使鄜延计议谔言横山延袤千里多马宜稼人物劲悍善战且有盐铁之利夏人恃以为生其城垒皆控险足以守御今之兴功当自银州始其次迁宥州又其次修夏州三郡鼎峙则横山之地已囊括其中又其次修盐州则横山强兵战马山泽之利尽归中国其势居高俯视兴灵可以直覆巢穴而禧与沈括定义移银州城永乐受围谔观望不救帝冀其后效置不问且虞贼至就命知延州疽发背卒年五十七谔善驭士卒临敌出奇战必胜然诈诞残忍左右有犯立斩或先刳肺肝坐者掩面谔饮食自若敌亦畏其敢战故数有功李稷之馈军也旦入谔营军吏鸣鼓声喏谔呼问吏曰军有几帅要当借汝头以代运使即叱斩之

稷惶怖遽出尝渡河猝遇敌给门下客曰事急矣可衣
我衣乘我马从旗鼓千骑亟趋大军客信之敌以为谩追之几不免自熙宁首开绥州后
再举西征皆其兆谋卒致永乐之祸议者谓谩不死边
事不已

△种谊

谊字寿翁 【按东都事略云侗有气节少力学举进士于六经百氏略通其意】
熙宁中古入对神宗问其家世命谊以官从高遵裕
复洮岷又平山后羌至熙河副将 【按东都事略云为熙河路第七部将】 使青唐栋
戩遣果庄迎候境上取道故为回枉以夸险远谊固习
其地里谓之曰尔跳梁坎井闲谓我不知远近邪命趋便道果庄怒胁以兵谊声气不动
卒改涂为外路都监自兰州渡河讨贼斩首六百累转
西京使元佑初知岷州果庄诱杀景思立后益自矜大有窥故土之心使其子诣宗噶尔
请益兵入寇且结属羌为内应谊刺得其情上疏请除
之诏遣游师雄就商利害遂与姚兕合兵出讨羌迎战击走之追奔至洮州谊亟进攻晨
雾蔽野跬步不可辨谊曰吾军远来彼固不知厚薄乘
此可一鼓而下也遂亲鼓之有顷雾霁先登者已得城果庄就执谊戏问之曰别后安否
不能对徐谓人曰我生恶种使今日果为所擒天不使
我复有故土命也遂俘以归拜西上合门使康州刺史徙知鄜州夏人犯延安赵高使谊
统诸将敌闻谊至皆溃去延人谓得谊胜精兵二十万
进熙河钤辖知兰州兰与通远皆绝塞中闲堡障不相接腴田多弃不耕谊请城李诺平
以扼冲要会迁东上合门使保州团练使卒年五十五
谊侗有气节喜读书莅军整严令一下死不敢避遇敌度不胜不出故每战未尝负败
岷羌酋包顺包诚恃功骄恣前守务姑息谊至厚待之
适有小过叱下吏将真法顺诚叩头伏罪愿效命以赎乃使输金出之羣羌畏惕及洮州
之役二人功最多

△种朴

朴以父任右班殿直积劳迁至皇城使昌州刺史徙熙河兰会钤辖兼知河州安抚
洮西沿边公事河南蕃部叛属羌阿章率他族拒官军
熙帅胡宗回使朴出讨时朴至州才二日以敌锋方锐且盛寒欲姑徐之而宗回驰徼至
六七不得已遂出兵羌知朴来伏以待朴遇伏首尾不
相应朴殊死战为所杀以马负其尸去羌乘胜追北师还遇隘壅迤不得行偏将王舜臣
者善射以弓挂臂独立败军后羌来可万骑有七人介
马而先舜臣念此必羌酋之尤桀黠者不先殪之吾军必尽乃宣言曰吾令最先行者眉
闲插花引弓三发隕三人皆中面余四人反走矢贯其

背万骑■〈目𠃉〉眙莫敢前舜臣因得整众须臾羌复来舜臣自申及酉抽矢千余发无虚者指裂血流至肘薄暮乃得踰隘将士气夺无敢复言战当是时微舜臣则师歼矣事闻赠朴雄州防御使官其后十人

△种师道

师道【按东都事略云师道初名建中避年号改为师极诏赐今名】字彝叔少从张载学以荫补三班奉职试法易文阶为熙州推官权同谷县县吏有田讼弥二年不决师道翻阅案牒穷日力不竟然所讼止母及兄而已引吏诘之曰母兄法可讼乎汝再期扰乡里足未吏叩头服罪通判原州提举秦凤常平议役法忤蔡京旨换庄宅使知得顺军又谓其诋毁先烈罢入党籍屏废十年以武功大夫忠州刺史泾原都钤辖知怀德军夏国画境其下焦彦坚必欲得故地师道曰如言故地当以汉唐为正则君家疆土益蹙矣彦坚无以对童贯握兵柄而西翕张威福见者皆旅拜师道长揖而已召诣阙徽宗访以边事对曰先为不可胜来则应之妄动生事非计也贯议徙内郡弓箭手实边而指为新边所募帝复访之对曰臣恐勤远之功未立而近扰先及矣帝善其言以为提举秦凤弓箭手时五路并置官帝谓曰卿吾所亲擢也贯滋不悦师道不敢拜以请得提举崇福宫久之知西安州【按东都事略载复以泾原钤辖知西安州】夏人侵定边筑佛口城率师往夷之始至渴甚师道指山之西麓曰是当有水命工求之果得水满谷累迁神龙卫四厢都指挥使洺州防御使知渭州督诸道兵城席茅平庀工敌至坚壁葫芦河师道陈于河浒若将决战者阴遣偏将曲充径出横岭扬言援兵至敌方骇顾杨可世潜军于其后姚平仲以精甲衷击之敌大溃斩首五千级获橐驼马牛万计其酋仅以身免卒城而还又诏帅陕西河东七路兵征桑达城期以旬日必克既薄城下敌守备甚固官军小怠列校有据胡迹自休者立斩之尸于军门令曰今日城不下视此众股栗噪而登城城即溃时兵至纔八日帝得捷书喜进侍卫亲军马军副都指挥使应道军承宣使从童贯为都统制拜保静军节度使贯谋伐燕使师道尽护诸将师道谏曰今日之举譬如盗入邻家不能救又乘之而分其室焉无乃不可乎贯不听既次白沟辽人噪而前士卒多伤师道先令人持一巨槌自防赖以不大败【伏读通鉴辑览 御批童贯高阳关之役造次指挥师道阻其轻进自属老成之见但业已交锋势惟有进无退岂可逆料其必败预戒军人为退逃计宿将统师固当如此示怯耶至云人持巨槌自防赖以不大败尤荒唐可笑试思一槌之利孰与五兵设当辙乱旗靡时长戟短戈尚不足支而欲恃木槌以御敌更不然矣

纪载之不足信大率如此】 辽使来请曰女真之叛本朝亦南朝之所甚恶也今射一时之利弃百年之好基他日之祸谓为得计可乎救灾恤邻古今通义惟大国图之贯不能对师道复谏宜许之又不听密劾其助敌王黼怒责为右卫将军致仕而用刘延庆代之延庆败绩于芦沟帝思其言起为宪州刺史知环州俄还保静军节度使复致仕金人南下趣召之加检校少保静难军节度使京畿河北制置使听便宜檄兵食师道方居南山豹林谷闻命即东过姚平仲有步骑七千与之俱北至洛阳闻斡里雅布已屯京城下或止勿行曰敌势方锐愿少驻汜水以谋万全师道曰吾兵少若迟回不进形见情露祇取辱焉今鼓行而前彼安能测我虚实都人知吾来士气自振何忧敌哉揭榜沿道言种少保领西兵百万来遂抵城西趋汴水南径逼敌营金人惧徙砦稍北敛游骑但守牟驼冈增垒自卫时师道春秋高天下称为老种钦宗闻其至喜甚开安上门命尚书右丞李纲迎劳时已议和入见帝问曰今日之事卿意如何对曰女真不知兵岂有孤军深入入境而能善其归乎帝曰业已讲好矣对曰臣以军旅之事陛下余非所敢知也拜检校少傅同知枢密院京畿两河宣抚使诸道兵悉隶焉以平仲为都统制师道时被病命母拜许肩舆入朝金使王訥在廷颀颀望见师道拜跪稍如礼帝顾笑曰彼为卿故也京城自受围诸门昼闭市无薪菜师道请启西南壁听民出入如常金人有擅过偏将马忠军者忠斩其六人金人来诉师道付以界旗使自为制后无有敢越俦者又请缓给金币使彼情归扼而歼诸河执政不可种氏姚氏皆为山西巨室平仲父古方以熙河入援平仲虑功名独归种氏乃以士不得速战为言达于上李纲主其议令城下兵缓急听平仲节度帝因遣使趣师道战师道欲俟其弟秦凤经略使师中至奏言过春分乃可击时相距纔八日帝以为缓竟用平仲斫营以及于败 【按宋名臣言行续录云初师道请简料勤王之师分为三等出战余皆守城先立赏格示之选将分总距敌寨二三里环营守之绝其剽掠使其乏食趣姚古以所领西师会河朔将兵选精锐五万人自河阳驻滑州进屯敌营之后克日并力攻之此必胜之策也不听平仲败师道复言劫寨已误然兵家亦有出其不意者今夕再遣兵分道攻之亦一奇也如犹不胜每夕以数千人扰之不十日敌去矣李邦彦等畏懦不能用】 既败李邦彦议割三镇师道争之不得李纲罢太学诸生都人伏阙愿见种李诏趣使弹压师道乘车而来众褰帘视之曰果我公也相率声喏而散金师退乃罢为中太一宫使御史中丞许翰见帝以为不宜解师道兵柄帝曰师道老矣难用当使卿见之令相见于殿门外师道

不语翰曰国家有急诏许访所疑公勿以书生之故不肯谈师道始言我众彼寡但分兵结营控守要地使彼粮道不通坐以持久可破也翰叹味其言复上奏谓师道智虑未衰尚可用于于是加检校少师进太尉换节镇洮军为河北河东宣抚使屯滑州实无兵自随师道请合关河卒屯沧卫孟滑备金兵再至朝论以大敌甫退不宜劳师以示弱格不用既而师中战死姚古败朝廷震悚召师道还太原陷又使巡边次河阳遇王汭揣敌必大举亟上疏请幸长安以避其锋大臣以为怯复召还既至病不能见十月卒年六十七帝临奠哭之恻赠开府仪同三司京师失守帝搏膺曰不用种师道言以至于此金兵之始退也师道申前议劝帝乘半济击之不从曰异日必为国患故追痛其语建炎中加赠少保谥曰忠宪

△种师中

师中字端孺历知环滨邠州庆阳府秦州侍卫步军马军副都指挥使房州观察使奉宣军承宣使金人内侵诏提秦凤兵入援未至而敌退乃以二万人守滑遣副姚古为河北制置使【按东都事略作河东制置使】古援太原师中援中山河闲或谓师中自磁相而北金人若下太行则势不能自还此段凝师于河上比也时大臣立议矛盾枢密主破敌而三省令护出之师中渡河即上言尼雅满已至泽州臣欲由邢相闲捷出上党捣其不意当可以逞朝廷疑不用翰里雅布还师中逼之出境尼雅满至太原悉破诸县为锁城法困之内外不相通姚古虽复隆德威胜扼南北关而不能解围于是诏师中由并陘道出师与古犄角进次平定军乘胜复寿阳榆次留屯真定时尼雅满避暑云中留兵分就畜牧觐者以为将遁告诸朝知枢密院许翰信之数遣使督师中出战且责以逗挠师中叹曰逗挠兵家大戮也吾结发从军今老矣忍受此为罪乎即日办严约古及张灏俱进辎重赏犒之物皆不暇从行抵寿阳之石坑为金人所袭五战三胜回趋榆次去太原百里而古灏失期不至兵饥甚敌知之悉众攻右军溃而前军亦奔师中独以麾下死战自卯至巳士卒发神臂弓射退金兵而赏赉不及皆愤怒散去所留者纔百人师中身被四创力疾鬪死师中老成持重为时名将诸军自是气夺刘翰言师中闻命即行奋不顾身虽古忠臣不过也请加优赠以劝死国者诏赠少师谥曰庄愍

钦定续通志卷三百五十三

●钦定续通志卷三百五十四 列传一百五十四
列传

宋 【五十八】

○宋五十八

司马光【康】

吕公着【希哲希纪】

范镇【百禄祖禹】

司马光

吕公着

范镇

△司马光

司马光字君实陕州夏县人父池天章阁待制光生七岁凜然如成人闻讲左氏春秋即了其大指羣儿戏于庭一儿登瓮足跌没水中众皆弃去光持石击瓮破之水迸儿得活其后京洛闲画以为图仁宗宝元初中进士甲科除奉礼郎时池在杭求签苏州判官事以便亲许之丁内外艰服除签书武成军判官事改大理评事补国子直讲枢密副使庞籍荐为馆阁校勘同知礼院中官麦允言死给卤簿光言繁纓以朝孔子且犹不可允言近习之臣非有元勋大劳而赠以三公给一品卤簿其视繁纓不亦大乎夏竦赐谥文正光言竦何人可以当之改文庄加集贤校理从庞籍辟通判并州麟州屈野河西多良田夏人蚕食其地为河东患籍命光案视光议筑二堡以制夏人募民耕之耕者众则余贱亦可渐纾河东贵余远输之忧籍从其策而麟将郭恩勇且狂引兵夜渡河不设备没于敌籍得罪去光三上书自引咎不报改直秘阁开封府推官交趾贾异兽谓之麟光言真伪不可知使其真非自至不足为瑞愿还其献又奏赋以风修起居注判礼部有司奏日当食故事食不满分或京师不见皆表贺光言四方见京师不见此人君为阴邪所蔽天下皆知而朝廷独不知其为灾当益甚不当贺从之同知谏院苏辙答制策切直考官胡宿将黜之光言辙有爱君忧国之心不宜黜诏寘末级仁宗始不豫国嗣未立廷臣莫敢言谏官范镇首发其议光在并州闻而继之且贻书劝镇以死争至是复面言臣昔通判并州所上三章愿陛下果断力行帝沈思久之曰得非欲选宗室为继嗣者乎此忠臣之言但人不敢及耳光曰臣言此自谓必死不意陛下开纳光退未闻命复上疏曰臣向者进说意谓即行今寂无所闻此必有小人言陛下春秋鼎盛何遽为不祥之事小人无远虑特欲仓卒之际援立其所厚善者耳定策国老门生天子之祸可胜言哉帝大感动曰送中书光见韩琦等曰诸公不及今定议异日禁中夜半出寸纸以某人为嗣则天下莫敢违琦等拱手曰敢不尽力未几诏英宗判宗正辞不就遂立为皇子又称疾不入光言皇子辞不资之富至于旬月其贤于人远矣然父召无诺君命召不俟驾愿以臣子大

义责皇子宜必入英宗遂受命兗国公主嫁李玮不相
能诏出玮卫州母杨归其兄璋主入居禁中光言陛下追念章懿太后故使玮尚主今乃
母子离析家事流落独无雨露之感乎玮既黜主安得
无罪帝悟降主沂国待李氏恩不衰进知制诰固辞改天章阁待制兼侍讲知谏院时朝
政颇姑息胥吏誼哗则逐中执法鞏官悖慢则退宰相
卫士凶逆而狱不穷治军卒詈三司使而以为非犯阶级光言皆陵替之渐不可以不正
充媛董氏薨赠淑妃辍朝成服百官奉慰定谥行册礼
葬给卤簿光言董氏秩本微病革方拜充媛古者妇人无谥近制惟皇后有之卤簿本以
赏军功未尝施于妇人时有司定后宫封赠法后与妃
俱赠三代光论妃不当与后同天圣亲郊太妃止赠二代而况妃乎英宗立遇疾慈圣光
献后同听政光上疏曰昔章献明肃有保佑先帝之功
特以亲用外戚小人负谤海内今摄政之际大臣忠厚如王曾清纯如张知白刚正如鲁
宗道质直如薛奎者当信用之猥鄙如马季良谗谄如
罗崇勋者当疏远之则天下服帝疾愈光料必有追隆本生事即奏言汉宣帝为孝昭后
终不追尊卫太子史皇孙光武上继元帝亦不追尊巨
鹿南君此万世法也后诏两制集议濮王典礼学士王珪等相视莫敢先光独奋笔书曰
为人后者为之子亦不得顾私亲王宜准封赠期亲尊
属故事称为皇伯高官大国极其尊荣议成珪即命吏以光手藁为案既上与大臣意殊
御史吕诲傅尧俞范纯仁吕大防赵鼎赵瞻争之力皆
斥去光乞留之不可遂请与俱贬初西夏遣使致祭延州指使高宜甲伴傲其使者侮其
国主使者诉于朝光与吕诲乞加宜罪不从明年夏人
犯边杀略吏士赵滋为雄州专以强悍治边光论其不可至是契丹之民捕鱼界河伐柳
白沟之南朝廷以知雄州李中佑为不材将代之光谓
国家当戎夷附顺时好与之计较末节及其桀骜又从而姑息之近者西祸生于高宜北
祸起于赵滋时方贤此二人故边臣皆以生事为能渐
不可长宜敕边吏疆场细故辄以矢刃相加者罪之仁宗遣赐直百余万光率同列三上
章谓国有大忧中外窘乏不可专用干兴故事若遣赐
不可辞宜计侍从上进金钱佐山陵不许光乃以所得珠为谏院公使钱金以遗舅氏义
不藏于家慈圣后还政有司立式凡后有所取用当覆
奏乃供光云当移所属使立供已乃具数白后以防矫伪曹佾无功除使相两府皆迁官
光言陛下欲以慰母心而迁除无名则宿卫将帅内侍
小臣必有觊望已而迁都知任守忠等官光复争之因论守忠大奸陛下为皇子非守忠
意沮挠大策离闲百端赖先帝不听及陛下嗣位反复
交构国之大贼乞斩于都市以谢天下责守忠为节度副使蕲州安置天下快之诏刺陕

西义勇二十万民情惊扰而纪律疏略不可用光抗言
其非持白韩琦琦曰兵贵先声谅祚方桀鹜使骤闻益兵二十万岂不震慑光曰兵之贵
先声为无其实也独可欺之于一日之闲耳今吾虽益
兵实不可用不过十日彼将知其详尚何惧琦曰君但见庆历闲乡兵刺为保捷忧今复
然已降敕榜与民约永不充军戍边矣光曰朝廷常失
信民未敢以为然虽光亦不能不疑琦曰吾在此君无忧光曰公长在此地可也异日他
人当位因公见兵用之运粮戍边反掌闲事耳琦嘿然
而讫不为止不十年皆如光虑 【伏读通鉴辑览 御批招集义勇本期适用惟贵简
练精熟岂在伍籍之多无端而按户索丁遍刺手背
士勇未厉而民先惊扰岂安边固圉之道且纪律疏略不堪行阵虽多亦奚以为即云兵
贵先声而无制胜之实徒尔号称十万恐敌人闻之不
能生惧而转为所轻琦素号知兵此举实为失当司马光所论殊中事理琦尚争辩不从
实不免护短矣】 王广渊除直集贤院光论其奸邪不
可近昔汉景帝重卫绾周世宗薄张美广渊当仁宗之世私自结于陛下岂忠臣哉宜黜
之以厉天下进龙图阁直学士 【按东都事略云改
右谏议大夫】 神宗即位擢为翰林学士光力辞帝曰卿有文学何辞为对曰臣不能为
四六帝曰如两汉制诏可也御史中丞王陶以论宰相
不押班罢光代之光言陶由论宰相罢则中丞不可复为臣愿俟既押班然后就职许之
遂上疏论修心之要三曰仁曰明曰武治国之要三曰
官人曰信赏曰必罚且曰臣获事三朝皆以此六言献张方平参知政事光论其不叶物
望帝不从还光翰林兼侍读学士光常患历代史繁人
主不能过览遂为通志八卷以献英宗悦之命置局秘阁续其书至是神宗名之曰资治
通鉴自制序授之俾日进读诏录颖邸直省官四人为
合内祇候光曰国初草创以左右旧人为腹心耳目非平日法也合门祇候在文臣为馆
职岂可使厮役为之西戎部将嵬名山欲以横山之众
取谅祚以降诏边臣招纳其众光上疏极论以为名山之众未必能制谅祚幸而胜之灭
一谅祚生一谅祚何利之有若其不胜必引众归我不
知何以待之若余众尚多还北不可入南不受穷无所归必将突据边城以救其命陛下
不见侯景之事乎上不听遣将种谔发兵迎之取绥州
费六十万西方用兵盖自此始矣百官上尊号光当答诏言先帝亲郊不受尊号末年有
献议者谓国家与契丹往来通信彼有尊号我独无于
是复以非时奉册昔匈奴冒顿自称天地所生日月所置匈奴大单于不闻汉文帝复为
大名以加之愿追述先帝本意不受此名帝手诏奖光
使善为答辞以示中外执政以河朔旱国用不足乞南郊勿赐金帛诏学士议光与王安

石同见光曰救灾节用宜自贵近始可听也安石曰常
袞辞堂饌时以为袞自知不能当辞位不当辞禄且国用不足非当世急务所以不足者
以未得善理财者故也光曰善理财者不过头会箕敛
尔安石曰不然善理财者不加赋而国用足光曰天下安有此理天地所生财货百物不
在民则在官彼设法夺民其害乃甚于加赋此盖桑羊
欺武帝之言争议不已帝曰朕意与光同然姑以不允答之会安石草诏引常袞事责两
府两府不敢复辞安石得政行新法光逆疏其利害迹
英进读至曹参代萧何事帝曰汉常守萧何之法不变可乎对曰盍独汉也使三代之君
常守禹汤文武之法虽至今存可也汉武取高帝约束
纷更盗贼半天下元帝改孝宣之政汉业遂衰由此言之祖宗之法不可变也吕惠卿言
先王之法有一年一变者正月始和布法象魏是也有
五年一变者巡守考制度是也有三十年一变者刑罚世轻世重是也光言非是其意以
风朝廷耳帝问光光曰布法象魏布旧法也诸侯变礼
易乐者王巡守则诛之不自变也刑新国用轻典乱国用重典是为世轻世重非变也且
治天下譬如居室敝则修之非大坏不更造也公卿侍
从皆在此愿陛下问之三司使掌天下财不才而黜可也不可使执政侵其事今为制置
三司条例司何也宰相以道佐人主安用例苟用例则
胥吏矣今为看详中书条例司何也惠卿不能对则以他语诋光光又曰平民举钱出息
尚能蚕食下户况县官督责之威乎惠卿曰青苗法愿
取则与之不愿不强也光曰愚民知取债之利不知还债之害非独县官不强富民亦不
强也昔太宗平河东立余法时米斗十钱民乐与官为
市其后物贵而和余不解遂为河东世世患臣恐异日之青苗亦犹是也帝曰坐仓余米
何如光曰不便惠卿曰余米百万斛则省东西之漕以
其钱供京师光曰东南钱荒而粒米狼戾今不余米而漕钱弃其有余取其所无农末皆
病矣侍讲吴起曰光言至论也它日留对光曰陛下
当论其是非今条例司所为独安石韩絳惠卿以为是耳陛下岂能独与此三人共为天
下邪帝欲用光访之安石安石曰光外托劄上之名内
怀附下之实所言尽害政之事所与尽害政之人而欲寘之左右使与国论此消长之大
机也光才岂能害政但在高位则异论之人倚以为重
安石以韩琦上疏卧家求退帝乃拜光枢密副使光辞之曰陛下所以用臣盖察其狂直
庶有补于国家若徒以禄位荣之而不取其言是以大
官私非其人也臣徒以禄位自荣而不能救生民之患是盗窃名器以私其身也陛下诚
能罢制置条例司追还提举官不行青苗助役等法虽
不用臣臣受赐多矣今言青苗之害者不过谓使者骚动州县为今日之患耳而臣之所

忧乃在十年之外非今日也夫民之贫富由勤惰不同
惰者常乏故必资于人今出钱贷民而敛其息富者不愿取使者以多散为功一切抑配
恐其逋负必令贫富相保贫者无可偿败散而之四方
富者不能去必责使代偿数家之负春算秋计展转日滋贫者既尽富者亦贫十年之外
百姓无复存者矣又尽散常平钱谷专行青苗它日若
思复之将何所取富室既尽常平已废加之以师旅因之以饥馑民之羸者必委死沟壑
壮者必聚而为盗贼此事之必至者也抗章至七八帝
使谓曰枢密兵事也官各有职不当以他事为辞对曰臣未受命则犹侍从也于事无不可
言者安石起视事光乃得请遂求去以端明殿学士
知永兴军宣抚使下令分义勇戍边选诸军骁勇士募市井恶少年为奇兵调民造干楯
悉修城池楼橹关辅骚然光极言公私困敝不可举事
而京兆一路皆内郡缮治非急宣抚之令皆未敢从若乏军兴臣当任其责于是一路独
得免徙知许州趣入覲不赴请判西京御史台归洛自
是绝口不论事而求言诏下光读之感泣欲嘿不忍乃复陈六事一青苗二免役三市易
四边事五保甲六水利此尤病民者宜先罢又移书责
宰相吴充事见充传蔡天申为察访妄作威福河南尹转运使敬事之如上官尝朝谒应
天院神御殿府独为设一班示不敢与抗光顾谓台吏
曰引蔡寺丞归本班吏即引天申立监竹木务官富赞善之下天申窘沮即日行元丰五
年忽得语涩疾疑且死豫作遗表置卧内欲畀所善者
上之官制行帝指御史大夫曰非司马光不可又将以为东宫师傅蔡确曰国是方定愿
少迟之资治通鉴未就帝尤重之以为贤于荀悦汉纪
数促使终篇赐以颍邸旧书及书成加资政殿学士凡居洛阳十五年天下以为真宰相
田夫野老皆号为司马相公妇人孺子亦知其为君实
也帝崩赴阙临卫士望见皆以手加额曰此司马相公也所至民遮道聚观马至不得行
曰公无归洛留相天下活百姓哲宗幼冲太皇太后临
政遣使问所当先光谓开言路诏榜朝堂而大臣有不悦者设六语云若阴有所坏犯非
其分或扇摇机事之重或迎合已行之令上以徼幸希
进下以眩惑流俗若此者罚无赦后复命示光光曰此非求谏乃拒谏也人臣惟不言言
则入六事矣乃具论其情改诏行之于是上封者以千
数起光知陈州过阙留为门下侍郎苏轼自登州召还缘道人相聚号呼曰寄谢司马相
公毋去朝廷厚自爱以活我是时天下之民引领拭目
以观新政而议者犹谓三年无改于父之道但毛举细事稍塞人言光曰先帝之法其善
者虽百世不可变也若安石惠卿所建为天下害者改
之当如揉焚拯溺况太皇太后以母改子非子改父众议甫定遂罢保甲团教不复置保

马废市易法所储物皆鬻之不取息除民所欠钱京东铁钱及茶盐之法皆复其旧或谓光曰熙丰旧臣多儉巧小人他日有以父子义闲上则祸作矣光正色曰天若祚宗社必无此事于是天下释然曰此先帝本意也元佑元年复得疾诏朝会再拜勿舞蹈时青苗免役将官之法犹在而西戎之议未决光叹曰四患未除吾死不瞑目矣折简与吕公着云光以身付医以家事付愚子惟国事未有所托今以属公乃论免役五害乞直降敕罢之诸将兵皆隶州县军政委守令通决废提举常平司以其事归之转运及提点刑狱边计以和戎为便谓监司多新进少年务为刻急令近臣于郡守中选举而于通判中举转运判官又立十科荐士法皆从之拜尚书左仆射兼门下侍郎免朝覲许乘肩輿三日一入省光不敢当曰不见君不可以视事诏令子康扶入对且曰毋拜遂罢青苗钱复常平糴籴法两宫虚己以听辽夏使至必问光起居敕其边吏曰中国相司马矣毋轻生事开边隙光自见言行计从躬亲庶务不舍昼夜宾客见其体羸举诸葛亮食少事烦以为戒光曰死生命也为之益力病革不复自觉谆谆如梦中语然皆朝廷天下事也是年九月薨年六十八太皇太后闻之恸与帝即临其丧明堂礼成不贺赠太师温国公谥以一品礼服赙银绢七千诏户部侍郎赵瞻内侍省押班冯宗道护其丧归葬陕州谥曰文正赐碑曰忠清粹德京师人罢市往吊岭南封州父老亦相率具祭都中及四方皆画像以祀光孝友忠信恭俭正直在洛时每往夏县展墓必过其兄旦旦年将八十奉之如严父保之如婴儿自少至老语未尝妄自言吾无过人者但平生所为未尝有不可对人言者耳天下敬信陕洛闲皆化其德于物澹然无所好于学无所不通绍圣初御史周秩首论光诬谤先帝尽废其法章惇蔡卞请发冢斲棺帝不许乃令夺赠谥仆所立碑而惇言不已追贬清远军节度副使又贬崖州司户参军徽宗立复太子太保蔡京擅政复降政议大夫京撰奸党碑令郡国皆刻石长安石工安民当镌字辞曰民愚不知立碑之意但如司马相公者海内称其正直今谓之奸邪民不忍刻官怒欲加罪乃乞免镌安民二字于石末恐得罪后世闻者愧之靖康元年还赠谥建炎中配飨哲宗庙庭

司马康

司马康

康字公休幼端谨不妄言笑事父母至孝敏学过人博通古书以明经上第光修资治通鉴奏检阅文字丁母忧哀毁几灭性光居洛士之从学者退与康语未尝不有得涂之人见其容止虽不识皆知其为司马氏子也以韩绛

荐为秘书由正字迁校书郎光薨得遗恩悉以与族人
服除召为著作佐郎兼侍讲上疏言比年以来早暵为虐民多艰食若复一不稔则公私
困竭盗贼可乘自古圣贤之君非无水旱惟有以待之
则不为甚害愿及今秋熟令州县广余民食所余悉归于官今冬来春令流民就食候乡
里丰穰乃还本土拜右正言以亲嫌未就职为哲宗言
前世治少乱多祖宗创业之艰难积累之勤劳劝帝及时向学守天下大器且劝太皇太后
每于禁中训迪其言切至迩英进讲言孟子于书最
醇正陈王道尤明白所宜观览康自居父丧居庐疏食寝于地遂得腹疾至是不能朝谒
赐告优 【按东都事略作除直集贤院提点崇福官
】 疾且殆犹具疏所当言者以待年四十一而卒诏赠右谏议大夫康为人廉洁口不言
财初光立神道碑帝遣使赐白金二千两康以费皆官
给辞不受遣家吏如京师纳之

△吕公着

吕公着字晦叔幼嗜学至忘寝食识虑深远有度量父夷简器异之曰他日必为公
辅恩补奉礼郎登进士第召试馆职不就通判颍州郡
守欧阳修与为讲学之友判吏部南曹仁宗奖其恬退赐五品服除崇文院检讨同判太
常寺言濮安懿王在殡请燕北使毋用乐辍上元游幸
废温成庙为祠多见听用擢天章阁待制兼侍讲寿星观营真宗神御殿公着言先帝已
有三神御而建立不已殆非祀无丰昵之义进知制诰
三辞不拜改天章阁待制兼侍读治平元年为谏议大夫时英宗修庆宁宫建本命殿公
着言畿内京东西淮南饥此岂修宫之时王畴为枢密
副使知制诰钱公辅坐封还词头贬公着极论公辅举职不宜出加龙图阁直学士方议
追崇濮王或欲称皇伯考公着曰此真宗所以称太祖
岂可施于王及下诏称亲且班诿又言称亲则有二父之嫌王诿但可避于上前不应与
七庙同诿吕晦等坐论濮王去公着言陛下即位以来
纳谏之风未彰而屡绌言者何以风示天下不听遂乞补外帝曰学士朕所重其可以去
朝廷请不已出知蔡州神宗立召为翰林学士兼侍读
顷之兼宝文阁学士知通进银台司司马光以论事罢中丞还经幄公着封还其命曰光
以举职赐罢是为有言责者不得尽其言也诏以告直
付合门公着又言制命不由门下则封驳之职因臣而废愿理臣之罪以正纪纲帝谕之
曰所以徙光者赖其劝学耳非以言事故也公着请不
已竟解银台司修英宗实录转礼部侍郎知开封府时夏秋淫雨京师地震公着上疏曰
自昔人君遇灾者或恐惧以致福或简诬以致祸上下
尽诚而变异不消者未之有也惟君人者去偏听独任之弊而不主先入之语则不为邪

说所乱盖佞人惟恐不合于君则其势易亲正人惟恐不合于义则其势易疏惟先格王正厥事未有事正而世不治者也礼官用唐故事请以五月御大庆殿受朝因上尊号公着言五月会朝始于唐德宗取术数厌胜之说宪宗以不经罢之况尊号非古典不系人主重轻从之近臣有请吏非领郡者毋任监司公着曰人才类伏下僚而资格愈峻则简拔愈难审其才可用宜不次用之试而无效则已之又请增馆阁之选以长育人文武官非素有罪戾者宜给奉以示始终多用其言二年为御史中丞时王安石方行青苗法公着极言曰自古有为之君未有失人心而能图治亦未有能胁之以威胜之以辩而能得人心者也昔日所谓贤者今皆以此举为非而主议者一切诋为流俗浮论岂昔皆贤而今皆不肖乎安石怒其深切帝使举吕惠卿为御史公着曰惠卿固有才然奸邪不可用帝以语安石安石益怒诬其言韩琦欲因人心不忍如赵鞅兴晋阳之甲以逐君侧之恶贬知颍州命知制诰宋敏求草制明着罪状敏求不从但言敷陈失实安石怒使陈升之改其语行之 【按宋史本传祇称诬以恶语出知颍州所载未为明晰谨遵通鉴辑览详载其事伏读 御批韩琦赵鞅时地不同可至有发甲以清君侧之事公着虽至愚亦必不为此言安石诬奏不问而知其妄盖安石既不悦琦复怒公着欲假此两伤之神宗不察公着遂尔坐贬无怪小人之志益逞也】 八年彗星见诏求直言公着上疏曰陛下临朝愿治为日已久而左右前复莫敢正言使陛下有欲治之心而无致治之实此任事之臣负陛下也夫士之邪正贤不肖既素定矣今则不然前日所举以为天下之至贤而后日逐之以为天下至不肖其于人材既反复不常则于政事亦乖戾不审矣古之为政初不信于民者有之若子产治郑一年而人怨之三年而人歌之陛下垂拱仰成七年于此然輿人之诵亦未有异于前日陛下独不察乎起知河阳召还提举中太一宫迁翰林学士承旨改端明殿学士知审官院帝从容与论治道遂及释老公着问曰尧舜知此道乎帝曰尧舜岂不知公着曰尧舜虽知此而惟以知人安民为难所以为尧舜也帝又言唐太宗能以权智御臣下对曰太宗之德以能屈己从谏尔帝善其言未几同知枢密院事有欲复内刑者议取死囚试剗刑公着曰试之不死则肉刑遂行矣乃止元丰元年以户部侍郎同知枢密院事三年改正议大夫枢密副使四年复同知枢密院事 【据宋史宰辅表增】 初夏人幽其主将大举讨之公着曰问罪之师当先择帅苟未得人不加勿举及兵兴秦晋民力大困大臣不敢言公着数白其害五年以疾勾去位除资政殿学士定州安抚使俄永乐城陷帝临朝叹

曰边民疲弊如此独吕公着为朕言之耳徙扬州加资政殿大学士将立太子帝谓辅臣当以吕公着司马光为师傅哲宗即位加银青光禄大夫以侍读还朝太皇太后遣使迎问所欲言公着曰先帝本意以宽省民力为先而建议者以变法侵民为务与己异者一切斥去故日久而弊愈深法行而民愈困诚得中正之士讲求天下利病协力而为之宜不难矣至则陈十事曰畏天爱民修身讲学任贤纳谏薄敛省刑去奢无逸又乞备置谏员以开言路拜尚书左丞门下侍郎元祐元年拜尚书右仆射兼中书侍郎三省并建中书独为取旨之地乃请事于三省者与执政同进呈取旨而各行之又执政官率数日一聚政事堂事多决于其长同列莫得预至是始命日集遂为定制与司马光同心辅政推本神宗之志凡欲革而未暇与革而未定者一一举行之民咸以为便光薨独当国除吏皆一时之选科举罢词赋专用王安石经义且杂以释氏之说公着始令禁主司不得出题老庄书举子不得以申韩佛书为学经义参用古今诸儒说毋得专取王氏复贤良方正科右司谏贾易以言事讦直诋大臣将峻责公着以为言止罢知怀州退谓同列曰谏官所论得失未足言顾主上春秋方盛虑异时有进谏说惑乱者正赖左右争臣耳不可豫使人主轻厌言者也众莫不叹服吐蕃首领果庄青宜结久为洮河患闻朝廷弭兵省戍阴与夏人合谋复取熙岷公着议遣军器丞游师雄以便宜谕诸将不逾月生致阙下帝宴近臣于资善堂公着乃集所讲书要语明白切于治道者凡百篇进之以备游意翰墨为圣学之助三年恳辞位拜司空同平章军国事宋兴以来宰相以三公平章重事者四人而公着与父居其二诏建第于东府之南启北扉以便执政会议凡三省枢密院之职皆得总理闲日一朝因至都堂其出不以时盖异礼也明年卒年七十二太皇太后见辅臣泣曰邦国不幸司马相公既亡吕司空复逝痛闵久之帝亦悲感即诣其家临奠赐金帛万赠太师申国公谥曰正献御书碑首曰纯诚厚德公着平居无疾言遽色于声利纷华泊然无所好简重清静盖天稟然其识虑深敏量阔而学粹遇事善决苟便于国不以私利害动其心与人交出于至诚好德乐善见士大夫以人物为意者必问其所知与其所闻参互考实以达于上每议政事博取众善以为善至所当守则毅然不为夺神宗尝言其于人材不欺如权衡之称物尤能避远声迹不以知人自处始与王安石善安石博辩骋辞人莫敢与亢公着独以精识约言服之安石尝曰疵吝每不自胜一诣长者即废然而反所谓使人之意消者于晦叔见之又谓人曰晦叔为相吾辈可以言仕矣后安石得志意其必助已而数用公议列其过失

以故交情不终于讲说尤精语约而理尽司马光曰每
闻晦叔讲便觉己语为烦其为名流所敬如此绍圣元年章惇为相以翟恩张商英周秩
居言路论公着更熙丰法度削赠谥毁所赐碑再贬建
武军节度副使昌化军司户参军徽宗立追复太子太保蔡京擅政复降左光禄大夫入
党籍寻复银青光禄大夫绍兴初悉还赠谥子希哲希
纯

吕希哲

吕希纯

吕希哲

希哲字原明以荫入官安石为政将寘其子雱于讲官以希哲有贤名欲先用之希
哲辞曰辱公相知久万一从仕将不免异同则畴昔相
与之意尽矣安石乃止公著作相希哲滞管库久乃判登闻鼓院力辞公着叹曰当世善
士吾收拾畧尽尔独以吾故置不试命也夫希哲母贤
明有法度闻公着言笑曰是亦未知其子矣终公着丧始为兵部员外郎范祖禹其妹婿
也言其经术操行宜备劝讲臣以妇兄之故不敢称荐
今方将引去窃谓无嫌诏以为崇政殿说书其劝导人主以修身为本擢右司谏辞不拜
会绍圣党论起御史刘拯论其进不由科第以秘阁校
理知怀州中书舍人林希又言吕大防由公着援引故进希哲以酬私恩凡大防辈欺君
卖国皆公着为之倡而公着之恶则希哲导成之岂宜
污华职于是但守本秩俄分司南京居和州徽宗初召为秘书少监为曹布所恶改光禄
少卿希哲力请外以直秘阁知曹州旋遭崇宁党祸夺
职知相州徙邢州罢为宫祠羁寓淮泗闲十余年卒子好问有传

吕希纯

希纯字子进登第为太常博士元佑祀明堂将用皇佑故事并飨天地百神皆以祖
宗配希纯言皇佑之礼事不经见嘉佑既已厘至正元
丰中但以英宗配上帝悉罢从祀羣神得严父之义请循其式从之历宗正太常秘书丞
哲宗议纳后希纯请考三代昏礼参祖宗之制博访令
族参求德配凡世俗所谓勘婚之书浅陋不经宜一切屏绝以防附会迁著作郎以父讳
不拜擢起居舍人权太常少卿宣仁太后崩希纯虑奸
人乘闲进说摇主听即上疏曰自元佑初年太皇太后听断所用之人皆宿有时望所行
之事皆人所愿行唯是过恶得罪之徒日伺变故捭阖
规利今必以更改神宗法度为说臣以为先帝之功烈万世莫掩闲有数事为小人所误
势虽颇有损益在于圣德固无所亏小人既误先帝复
欲误陛下不可不察未几拜中书舍人同修国史内侍梁从政刘惟简除内省押班希纯

以亲政之始首录二人无以示天下持不行由是阉寺
侧目章惇既相出为宝文阁待制知亳州谏官张商英憾希纯攻之力又以外亲嫌连徙
睦州归州名为易地实困之也公着追贬希纯亦以屯
田员外郎分司南京居金州又责舒州团练副使道州安置建中靖国元年还为待制知
瀛州徽宗闻其名数称之曾布忌希纯因其请觐未及
见亟以边遽趣遣之俄改颍州入崇宁党籍卒年六十

△范镇

范镇字景仁成都华阳人薛奎守蜀一见爱之馆于府舍俾与子弟讲学还朝载以
俱举进士礼部奏名第一故事殿廷唱第过三人则首
礼部选者必越次抗声自陈率得寘上列镇独不然至第七十九人乃从呼出应廷中皆
异之自是旧风遂革调新安主簿西京留守宋绶延置
国子监荐为东监直讲召试学士院当得馆阁校理主司妄以为失韵补校勘人为忿郁
而镇处之晏如宰相庞籍言镇有异材不汲汲于进取
超授直秘阁判吏部南曹开封府推官擢起居舍人知谏院上疏论民田困敝请约祖宗
以来官吏兵数酌取其中为定制以今赋入之数什七
为经费储其三以备水旱非常又言周以冢宰制国用唐以宰相判盐铁度支今中书主
民枢密主兵三司主财各不相知请使二府通知兵民
大计与三司同制国用契丹使至虚声示强大臣益募兵以塞责岁费百千万镇言备契
丹莫若宽三晋之民商人输粟河北取偿京师而榷货
不即予钞久而鬻之十才得其六或建议出内帑钱稍增价与市岁可得羨息五十万镇
谓外府内帑均为有司今使外府滞商人而内帑乘急
以牟利至伤国体仁宗遽止之葬温成后太常议礼前谓之园后谓之陵宰相刘沆前为
监护使后为园陵使镇曰尝闻法吏舞法矣未闻礼官
舞礼也请诘前后议礼异同状集贤校理刁约论圻中物侈丽吴克鞫真卿争论礼并补
外皆上章留之石全赟护葬转观察使他吏悉优迁两
官镇言章献章懿章惠三后之葬推恩皆无此比乞追还全赟等告敕时有敕凡内降非
准律令者并许执奏曾未一月大臣辄废不行镇乞正
中书枢密之罪帝天性宽仁言事者竟为激讦镇独务引大体非关朝廷安危生民利疚
则阔略不言陈执中为相镇论其无学术非宰相器及
嬖妾笞杀婢御史劾奏欲逐去之镇言今阴阳不和财匮民困盗贼滋炽狱讼充斥执中
当任其咎御史舍大责细暴扬燕私若用此为进退是
因一婢逐宰相非所以明等级辨堂陛识者黷之文彦博富弼入相诏百官郊迎镇曰隆
之以虚礼不若推之以至诚近时两制不得诣宰相居
第百官不得闲见是不推之以诚也愿罢郊迎除谒禁议减任子及每岁取士皆自镇发

之又乞令宗室疏属补外官时虽不行至熙宁初卒如其言帝在位三十五年未有继嗣嘉佑初暴得疾镇拜疏曰陛下不豫海内皇皇莫知所为陛下独以祖宗后裔为念是为宗庙之虑至深且明也昔太祖舍其子而立太宗天下之大公也真宗以周王薨养宗子于宫中天下之大虑也愿以太祖之心行真宗故事拔近属之尤贤者优其礼秩置之左右与图天下事以系亿兆人心章累上不报执政谕之曰柰何效希名干进之人镇贻以书曰比天象见变当有急兵镇义当死职不可死乱兵之下此乃镇择死之时尚何顾希名干进之嫌哉【按选宗室为继嗣范镇首发其议而司马光复贻书劝其力争伏读通鉴辑览御批仁宗是时春秋尚富未有皇嗣镇必欲援立近属其意何居且前后章十九上甚至君臣对泣成何景象及复贻书执政言天象示变必有急兵造为诞妄之语以荧惑人心尤为狂谬】除兼侍御史知杂事镇以言不从固辞执政谕镇曰今闲言已入为之甚难镇复书执政曰事当论其是非不当问其难易诸公谓今日难于前日安知异日不难于今日乎凡见上面陈者三言益恳切镇泣帝亦泣曰朕知卿忠卿言是也当更思之二年章十九上待命百余日须发为白朝廷知不能夺乃罢知谏院改集贤殿修撰纠察在京刑狱同修起居注遂知制诰镇虽解言职无岁不申前议至是因入谢首言陛下许臣今复三年矣愿早定大计又因裕享献赋以讽其后韩琦遂定策立英宗迁翰林学士中书议追尊濮王两制台谏与之异诏礼官检详典礼镇判太常寺率其属言汉宣帝于昭帝为孙光武于平帝为祖其父容可称皇考议者犹非之谓其以小宗合大宗之统也今陛下既以仁宗为考又加于濮王则其失非特汉二帝比凡称帝若考若寝庙皆非是会草制误迁宰相官改侍读学士明年迁翰林出知陈州陈方饥视事三日擅发钱粟以贷监司绳之急即自劾诏原之神宗即位复为翰林学士兼侍读知通进银台司故事门下封驳制旨省审章奏纠擿违滞皆着所授敕后乃刊去镇始请复之使知所守王安石改常平为青苗镇言常平之法起于汉盛时视谷贵贱发敛以便农末最为近古不可改而青苗行于唐之衰世不足法且陛下疾富民之多取而少取之此正百步五十步之闲耳吕惠卿在迺英言今预买紬绢亦青苗之比镇曰预买亦敝法也若府库有余当并去之岂应援以为比韩琦极论新法之害送条例司疏驳李常乞罢青苗钱诏命分析镇再封还诏五下镇执如初司马光辞枢密副使诏许之镇再封还帝以诏直付光不出门下镇奏曰由臣不才使陛下废法有司失职乞解银台司举苏轼谏官御史谢景温奏罢之举孔文仲制科文仲对策论新法

不便罢归故官镇皆力争之不报即上疏曰臣言不行
无颜复立于朝请谢事臣言青苗不见听一宜去荐苏轼孔文仲不见用二宜去李定避
持服遂不认母坏人伦逆天理而欲以为御史御史台
为之罢陈荐舍人院为之罢宋敏求吕大临苏颂谏院为之罢胡宗愈王韶上书肆意欺
罔以兴造边事事败则置而不问反为之罪帅臣李师
中及御史一言苏轼则下七路拑捩其过孔文仲则遣之归任以此二人况彼二人孰是
孰非其能逃圣鉴乎言青苗有见效者不过岁得什百
万缗钱缗钱非出于天非出于地非出于建议者之家盖一出于民耳民犹鱼也财犹水
也养民而尽其财譬犹养鱼而竭其水也疏五上其后
指安石用喜怒为赏罚曰陛下有纳谏之资大臣进拒谏之计陛下有爱民之性大臣用
残民之术臣知言入触大臣之怒罪且不测然臣职献
替而无一言则负陛下矣疏入安石大怒持其疏至手颤自草制极诋之以户部侍郎致
仕凡所得恩典悉不与镇表谢略曰愿陛下集羣议为
耳目以除壅蔽之奸任老成为腹心以养和平之福天下闻而壮之既退苏轼曰公虽退
而名益重矣镇愀然曰君子言听计从消患于未闻使
天下阴受其赐无智名无勇功吾独不得为政使天下受其害而吾享其名吾何心哉日
与宾客赋诗饮酒或劝使称疾杜门镇曰死生祸福天
也吾其如天何同天节乞随班上寿许之遂为令轼得罪下台狱索与镇往来书文甚急
犹上书论救久之徙居许哲宗立韩维言镇在仁宗时
首启建储之议具以十九疏上之拜端明殿学士起提举中太一宫兼侍读且欲以为门
下侍郎镇雅不欲起从孙祖禹亦劝止之遂固辞改提
举崇福宫祖禹谒诰归省诏赐以龙茶存劳甚渥复告老以银青光禄大夫再致仕累封
蜀郡公镇于乐尤注意自谓得古法独主房庶以律生
尺之说司马光谓不然往复论难凡数万言初仁宗命李照改定大乐下王朴乐三律皇
佑中又诏胡瑗等考正神宗时诏镇与刘几定之镇曰
定乐当先正律作律尺龠合升斗豆区鬴斛欲图上之又乞访求真黍以定黄钟而刘几
即用李照乐加用四清声而奏乐成诏罢局赐赉有加
镇曰此刘几乐也臣何与焉至是乃请大府铜为之逾年而成比李照乐下一律有奇帝
及太皇太后御延和殿召执政同阅视赐诏嘉奖下之
太常镇时已属疾乐奏三日而卒年八十一赠金紫光禄大夫谥曰忠文镇平生与司马
光相得甚驩议论如出一口且约生则互为传死则作
铭光生为镇传服其勇决镇复铭光墓云熙宁奸朋淫纵险诋儉猾赖神宗洞察于中其
辞峭峻光子康属苏轼书之轼曰轼不辞书惧非其家
福乃易他铭镇清白坦夷遇人必以诚恭俭慎默口不言人过临大节决大议色和而语

壮虽在万乘前无所屈笃于行义学本六经兄子百禄

范百禄

范祖禹

范百禄

百禄字子功镇兄锴之子也第进士又举才识兼茂科时治平水灾大臣方议濮礼百禄对策曰简宗庙废祭祀则水不润下昔汉哀尊共皇河南颍川大水孝安尊德皇京师郡国二十九大水盖太宗隆小宗杀宗庙重私祀轻今宜杀而隆宜轻而重变异所由起也对入三等以秘书丞知蒙阳县【据东都事略增】熙宁中提点江东利梓路刑狱加直集贤院利州武守周永懿以贿败百禄请复至道故事用文吏领兵以辖边界从之熊本治泸蛮事夷酋力屈请降裨将贾昌言欲杀以为功百禄谕之不听往谓本曰杀降不祥柰何容骄将横境内乎本矍然即檄止之七年召知谏院属岁旱请讲求急务收还法令之未便者论手实法曰造簿手实许令告匿户令虽有手实之文而未尝行盖谓使人自占必不以实告而明许告讦人将为仇然则礼义廉耻之风衰矣五路置三十七将专督所部兵至许辟置布衣参军谋百殿察其中或以恩泽市或以瘵败收或未历边方或起于羣盗疏列其无状者十四人请仍旧制将佐颛教阅余付之州县事多施行与徐禧治李士宦狱奏士宦荧惑童妇致不轨坐罪死不赦禧右士宦以为无罪执政主禧贬百禄监宿州酒元丰末入为司门吏部郎中起居郎哲宗立迁中书舍人司马光复差役法患吏受赇欲加流配百禄固争遂己元佑元年为刑部侍郎诸郡以故鬪杀情可矜者请讞法官曰宜贷光曰杀人不死法废矣百禄曰谓之杀人则可若制刑以为无足疑原情以为无足悯则不可今槩置之死则二杀之科自是遂无足疑悯者矣时又诏天下狱不当讞而辄讞者抵罪有司重于请至枉情以求合法百禄曰熙宁之法非可疑可悯而讞者免驳勘元丰则刊之近则有奏劾之诏故官吏畏避不惮论杀因条五年死贷之数以闻门下省犹驳正当贷者又例在有司者还中书百禄又争之后悉从其请改吏部侍郎议者欲汰胥吏吕大防趣废其半百禄曰废半则失职者众不若以渐消之自今阙吏勿补不数岁减斯过半矣不听都水王孝先议回河故道大防意向之命百禄行视百禄以东流高仰而河势顺下不可回即驰奏状且取神宗诏令勿塞故道者并上之大防犹谓大河东流中国之险限今塘泺既坏界河淤浅河且北注矣百禄言塘泺有限寇之名无御寇之实借使河从而北敌始有下流之忧乃吾之利也先帝明诏具在柰何妄动摇之乃止俄兼侍读进

翰林学士为帝言分别邪正之目凡二十余条愿槩斯事以观其情则邪正分矣以龙图阁学士知开封府勤于民事狱无系囚狱吏欲以圜空闻百禄曰千里之畿无一人之狱此至尊之仁非尹功也不许经数月复为翰林学士拜中书侍郎是岁郊祀议合祭天地礼官以昊天有成命为言百禄曰此三代之礼柰何复欲合祭乎成命之颂祀天祭地均歌此诗亦如春夏祈谷而歌噫嘻亦岂为一祭哉争久不决宰相曰百禄之言礼经也今日之用权制也陛下始郊见宜以并事天地为恭于是合祭熙河范育请进筑纳迷等三城百禄曰是皆必争之地我既城之若贼骑时出我何以耕后虽欲弃之为费已甚帝皆从之右仆射苏颂坐稽留除书免百禄以同省罢为资政殿学士知河中徙河阳河南卒年六十五赠银青光禄大夫子祖述监颍州酒税摄狱掾阅其狱活两死囚州人以为神知巩县凿南山导水入洛县无水患文彦博称其能以父堕党籍监中岳庙久之遂通判涇州知台州奏罢黄甘葛蕈之贡主管西京御史台靖康多难避地至汝州汝守赵子栎邀与共守旁郡尽陷汝独全累官朝议大夫卒从弟祖禹

范祖禹

祖禹字淳甫一字梦得祖锴父百之太常博士祖禹幼孤叔祖镇抚育如己子中进士甲科为校书郎知龙水县从司马光编修资治通鉴在洛十五年不事进取书成光荐为秘书省正字时王安石当国尤爱重之王安国与祖禹友善尝谕安石意竟不往谒富弼致仕居洛素严毅罕与人接待祖禹独厚疾笃召授以密疏大抵论安石误国及新法之害言极愤切弼薨人皆以为不可奏祖禹卒上之神宗崩祖禹上疏论丧服之制曰先王制礼君服同于父皆斩衰三年自汉以来不惟人臣无服人君遂不为三年之丧国朝外廷虽用易月之制宫中实行三年服君服如古典而臣下犹依汉制故十有二日而小祥朞而又小祥二十四日而大祥再朞而又见大祥既以日为之又以月为之此礼之无据者也古者再朞而大祥中月而禫禫祭之名非服之色今乃为之惨服三日然后禫此礼之不经者也服既降至葬又服之祔庙后即吉纔八月而遽纯吉无所不佩此又礼之无渐者朔望羣臣朝服造殡宫是以吉服临丧人主衰服在上是以先帝之服为人主之私丧此二者皆礼之所不安也哲宗立擢右正言吕公着执政祖禹以壻嫌辞改祠部员外郎又辞除著作佐郎修神宗实录检讨迁著作郎兼侍讲神宗既祥祖禹上疏宣仁后曰今即吉方始服御一新奢俭之端皆由此起凡可以荡心悦目者不宜有加于旧皇帝圣性未定所以训导成德者动宜有法今闻奉宸

库取珠户部用金其数至多恐增加无已愿止于未然崇俭敦朴辅养圣性则学问日益
圣德日隆此宗社无疆之福也会以夏暑权罢讲祖禹
言陛下今日之学与不学系他日治乱如好学则天下君子愿立于朝以直道事陛下辅
佐德业而致太平不学则小人皆动其心务为邪谄以
窃富贵且凡人之进学莫不于少时今圣质日长数年之后恐不得如今日之专窃为陛
下惜也迁起居郎又召试中书舍人皆不拜吕公着薨
召拜右谏议大夫首上疏论人主正心修身之学乞太皇太后日以天下之勤劳万民之
疾苦羣臣之邪正政事之得失开导上心使异日众说
不能惑小人不能进蔡京镇蜀祖禹言京小有才非端良之士如使守成都其还当使执
政不宜崇长时大臣欲于新旧法中有所创立祖禹以
为朝廷既察王安石之法为非但当复祖宗之旧若出于新旧之闲两用而兼存之纪纲
坏矣迁给事中吴中大水诏出米百万斛缗钱二十万
振救谏官乞加验考祖禹封还其章云国家根本仰给东南今一方赤子呼天赴愬开口
仰哺以脱朝夕之急奏灾虽小过实正当畧而不问若
稍施惩谴恐后无复敢言者矣兼国史院修撰为礼部侍郎论择监司守令曰祖宗分天
下为十八路上下相维轻重相制建置之道最为合宜
监司付以一路守臣付以一州令宰付以一县皆与天子分土而治其可不择乎祖宗尝
有考课之法专察诸路监司置簿于中书以稽其要今
宜委吏部尚书取当为州者条别功状以上三省三省召而察之苟其人可任则以次表
用之至官则令监司考其课绩终岁之后可以校优劣
而施黜陟焉如此则监司郡守得人不患县令不才也闻禁中觅乳媪祖禹以帝年十四
非近女色之时上疏劝进德爱身又乞宣仁后保护上
躬言甚切至既而宣仁谕祖禹以外议皆虚传祖禹复上疏曰臣言皇帝进德爱身宜常
以为戒太皇太后保护上躬亦愿因而勿忘今外议虽
虚臣闻于道路实怀私忧是以不敢避妄言之罪凡事言于未然则诚为过及其已然则
又无所及言之何益陛下盍受未然之言勿使臣等有
无及之悔拜翰林学士宣仁太后崩祖禹虑小人乘闲害政乃奏曰陛下方揽庶政延见
羣臣此国家隆替之本社稷安危之机生民休戚之端
君子小人进退消长之际天命人心去就离合之时也可不畏哉先后有大功于宗社有
大德于生灵九年之闲始终如一然羣小怨恨亦为不
少必将以改先帝之政逐先帝之臣为言以事离闲不可不察也先后因天下人心而更
化既改其法则作法之人有罪当退亦顺众言而逐之
岂有憎恶于其闲哉惟辨析是非深拒邪说有以奸言惑听者付之典刑痛惩一人以警
羣慝则帖然无事矣此辈既误先帝又欲误陛下天下

之事岂堪小人再破坏邪初苏轼约俱上章论列见祖禹疏遂附名同奏曰公之文经世之文也竟不复出其藁祖禹又言陛下承六世之遗烈当思天下者祖宗之天下一言一动如临之在上质之在傍则可以长享天下之奉先后以大公至正为心罢安石惠卿所造新法而行祖宗旧政日夜苦心劳力为陛下立太平之基愿守之以静恭己以临之虚心以处之则羣臣邪正万事是非皆了然于圣心矣小人之情专为私故不便于公专为邪故不便于正专好动故不便于静惟陛下以为刻骨之戒章累上不报忽有召内臣辈十余人祖禹言陛下亲政以来四海倾耳未闻访一贤臣而所召者乃先内侍必谓陛下私于近习望即赐追改因请对曰熙宁之初王安石吕惠卿造立新法悉变祖宗之政多引小人以误或又用兵开边天下愁苦百姓流徙赖先帝觉悟罢逐两人而所引羣小已布满中外不可复去蔡确连起大狱王韶创取熙河章惇开五溪沈起扰交管沈括徐禧俞充种谔兴造西事兵民死伤皆不下二十万以至吴居厚行铁冶之法于京东王子京行茶法于福建蹇周辅行盐法于江西李稷陆师闵俱行茶法市易于西川刘定教保甲于河北民皆愁痛嗟怨比屋思乱赖陛下与先后起而救之天下之民如解倒县惟是向来所斥逐之人窥伺事变妄意陛下不以修改法度为是如得至左右必进奸言万一过听而复用之臣恐国家自此不复振矣又论汉唐之亡皆由宦官自熙宁元丰闲李宪王中正宋用臣辈用事总兵权势震灼中正兼干四路口敕募兵州郡不敢违师徒冻馁死亡最多宪陈再举之策致永乐摧陷用臣兴土木之工无时休息罔市井之微利为国敛怨此三人者虽加诛戮未足以谢百姓宪虽已亡而中正用臣尚在愿陛下察之时绍述之论已兴有相章惇章祖禹力言惇不可用不见从遂请外上且欲大用而内外梗之者甚众乃以龙图阁学士知陕州言者论祖禹修实录诋诬又摭其谏禁中雇乳媪事连贬武安军节度副使昭州别驾安置永州贺州又徙宾化而卒年五十八祖禹在迳英守经据正献纳尤多尝讲尚书至内作色荒外作禽荒六语拱手再诵却立云愿陛下留听帝首肯再三乃退每当讲前夕必正衣冠俨如在上前命子弟侍先案讲其说开列古义参之时事简而当义理明白苏轼称为讲官第一祖禹尝进唐鉴十二卷帝学八卷仁宗政典六卷而唐鉴深明唐三百年治乱学者尤称之建炎二年追复龙图阁学士子冲绍兴中仕至翰林侍读学士儒林有传

钦定续通志卷三百五十四

●钦定续通志卷三百五十五 列传一百五十五

- 3585 -

列传

宋【五十九】

○宋五十九

苏轼【过】 苏辙【元老】

苏轼

苏辙

△苏轼

苏轼字子瞻眉州眉山人生十年父洵游学四方母程氏亲授以书闻古今成败辄能语其要比冠博通经史属文日数千言好贾谊陆贽书既而读庄子叹曰吾昔有见口未能言今见是书得吾心矣嘉佑二年试礼部主司欧阳修得轼刑赏忠厚论欲擢冠多士疑其客曾巩所为但寘第二复以春秋对义居第一殿试中乙科初授福昌主簿欧阳修以才识兼茂荐之制策入三等除大理评事签书凤翔府判官关中自元昊叛民贫役重岐下岁输南山木筏自渭入河经砥柱之险衙吏踵破家轼访其利害为修衙规使自择水工以时进止自是害减半治平二年入判登闻鼓院英宗自藩邸闻其名欲召入翰林知制诰宰相韩琦曰轼之才远大器也要在朝廷培养之今骤用之适足以累之也英宗曰且与修注如何琦曰记注与制诰为邻未可遽授不若于馆阁中近上帖职与之且请召试英宗曰未知其能否故试才如轼有不能邪琦犹不可及试二论复入三等得直史馆轼闻琦语曰公可谓爱人以德矣会洵卒既除丧熙宁二年还朝王安石执政素恶其议论异己以判官告院四年安石欲变科举兴学校诏两制三馆议轼上议曰得人之道在于知人知人之法在于责实使君相有知人之明朝廷有责实之政虽因今之法臣以为有余使君相不知人朝廷不责实虽复古之制臣以为不足庆历固尝立学矣至于今日惟有空名仅存今将变今之礼易今之俗又尝发民力以治宫室敛民财以食游士百里之内置官立师无乃徒为纷乱以患苦天下邪若乃无大更革而望有益于时则与庆历之际何异故臣谓今之学校特可因仍旧制使先王之旧物不废于吾世足矣至于贡举之法行之百年治乱盛衰初不由此陛下视祖宗之世贡举之法与今为孰精言语文章与今为孰优所得人才与今为孰多天下之士与今为孰辨今所欲变改不过数端或曰乡举德行而略文词或曰专取策论而罢诗赋或欲兼采誉望而罢封弥或欲经生不帖墨而考大义此皆知其一不知其二者也愿陛下留意于远者大者区区之法何预焉

【伏读通鉴辑览 御批学者专意经术固有资于根柢然或心术不正如两汉五鹿

充宗张禹孔光辈非不博通古谊世号经师卒之比附
权奸且为国蠹可知用人不尚虚言要视其力行何如耳况科举之制惟藉为登进先资
至得人之适用与否则尚需之历试苏轼所云设法取
士不过如此最为通论徒循名而不考其实经义之与词赋又何以异乎】 议上神宗悟
曰吾固疑此得轼议意释然矣即日召见问方今政令
得失安在对曰陛下天纵文武但患求治太急听言太广进人太锐愿镇以安静待物之
来然后应之 【伏读通鉴辑览 御批求治太急
进人太锐深切神宗之病至于听言太广之论尚有未中肯綮处盖神宗之失不在听之
广而在广而不得其要领熙宁之政惟以信任谰言不
能衷之舆论正患听言之未尽其道耳广谘博访岂足为累乎】 神宗悚然曰卿三言朕
当熟思之凡在馆阁皆当为朕深思治乱无有所隐轼
退言于同列安石不说命权开封府推官将困之以事轼决断精敏声闻益远会上元敕
府市浙灯且令损价轼疏言陛下岂以灯为悦此不过
以奉二宫之欢耳然百姓不可户晓皆谓以耳目不急之玩夺其口体必用之资此事至
小体则甚大愿追还前命即诏罢之时安石制行新法
轼上书论其不便曰臣之所欲言者三言而已愿陛下结人心厚风俗存纪纲人主之所
恃者人心而已自古及今未有和易同众而不安刚果
自用而不危者祖宗以来治财用者不过三司今陛下不以财用付三司无故又创制置
三司条例一司使六七少年日夜讲求于内使者四十
余辈分行营干于外夫制置三司条例司求利之名也六七少年与使者四十余辈求利
之器也以万乘之主而言利以天子之宰而治财君臣
宵旰几一年矣而富国之功茫如捕风徒闻内帑出数百万缗祠部度五千余人耳以此
为术其谁不能而所行之事道路皆知其难汴水浊流
自生民以来不以种稻今欲陂而清之万顷之稻必用千顷之陂一岁一淤三岁而满矣
陛下遂信其说即使相视地形访寻水利上糜帑廩下
夺农时堤防一开水失故道虽食议者之肉何补于民自古役人必用乡户今者徒闻江
淞之闲数郡雇役而欲措之天下单丁女户盖天民之
穷者也而陛下首欲役之富有四海忍不加恤自杨炎为两税租调与庸既兼之矣柰何
复欲取庸青苗放钱自昔有禁今陛下始立成法每岁
常行虽云不许抑配而数世之后陛下能保之乎且常平之法可谓至矣今欲变为青苗
坏彼成此所丧逾多亏官害民虽悔何及昔汉武帝以
财力匱竭用贾人之说买贱卖贵谓之均输于时商贾不行盗贼滋炽几至于乱不意今
日此论复兴立法之初其费已厚纵使薄有所获而征
商之额所损必多议者必谓民可与乐成难与虑始故陛下坚执不顾期于必行此乃战

国贪功之人行险侥幸之说未及乐成而怨已起矣臣之所愿陛下结人心者此也国家之所以存亡者在道德之浅深不在乎强与弱时数之所以长短者在风俗之薄厚不在乎富与贫臣愿陛下务崇道德而厚风俗不愿陛下急于有功而贪富强爱惜风俗如护元气圣人非不知深刻之法可以齐众勇悍之夫可以集事忠厚近于迂阔老成初若迟钝然终不肯以彼易此者知其所得小而所丧大也仁祖持法至宽用人有叙专务掩覆过失未尝轻改旧章德泽在人风俗知义议者见其末年吏多因循事不振举乃欲矫之以苛察齐之以智能招来新进勇锐之人以图一切速成之效多开骤进之门俾常调之人举生非望欲望风俗之厚岂可得哉近岁朴拙之人愈少巧进之士益多惟陛下以简易为法以清静为心而民德归厚臣之所愿陛下厚风俗者此也祖宗委任台谏未尝罪一言者纵有薄责旋即超升许以风闻而无官长言及乘舆则天子改容事关廊庙则宰相待罪台谏固未必皆贤所言亦未必皆是然须养其锐气而借之重权者将以折奸臣之萌也臣闻长老之谈皆谓台谏所言常随天下公议所与台谏亦与之公议所击台谏亦击之今者物论沸腾怨讟交至公议所在亦知之矣臣恐自兹以往习惯成风尽为执政私人以致人主孤立纪纲一废何事不生臣之所愿陛下存纪纲者此也轼见安石赞神宗以独断专任因试进士发策以晋武平吴以独断而克苻坚伐晋以独断而亡齐桓专任管仲而霸燕哱专任子之而败事同而功异为问安石滋怒使御史谢景温诬奏其丁忧归蜀时乘舟商贩诏下六路捕逮篙工水师穷治无所得轼遂请外通判杭州高丽入贡使者发币于官吏书称甲子轼却之曰高丽于本朝称臣而不稟正朔吾安敢受使者易书称熙宁然后受之时新政曰下轼于其闲每因法以便民民赖以安徙知密州司农行手实法不时施行者以违制论轼谓提举官曰违制之坐若自朝廷谁敢不从今出于司农是擅造律也提举官惊曰公姑徐之未几朝廷知法害民罢之有盗窃发安抚司遣三班使臣领悍卒来捕卒凶暴恣行争鬪杀人畏罪惊溃将为乱民奔诉轼投其书不视曰必不至此散卒闻之少安徐使人招出戮之徙知徐州河决曹村城将败富民争出避水轼曰富民出民皆动摇吾谁与守吾在是水决不能败城驱使复入轼诣武卫营呼卒长曰河将害城事急矣虽禁军且为我尽力卒长曰太守犹不避涂潦吾侪小人当效命率其徒筑东南长堤首起戏马台尾属于城两日夜不止城不沈者三版轼庐于其上过家不入使官吏分堵以守卒全其城复请调来岁夫增筑故城为木岸以虞水之再至朝廷从之徙知湖州表谢又以事不便民

者不敢言以诗托讽御史李定舒亶何正言摭其表语
并媒蘖所为诗以为讪谤逮赴台狱欲寘之死锻炼久之不决神宗独怜之以黄州团练
副使安置轼筑室东坡自号东坡居士神宗数有意复
用尝语宰相王珪蔡确曰国史至重可命苏轼成之珪有难色神宗曰轼不可姑用曾巩
巩进太祖总论神宗意不允遂手札移轼汝州轼未至
汝上书自言饥寒有田在常愿得居之奏入报可道过金陵见王安石曰大兵大狱汉唐
灭亡之兆祖宗以仁厚治天下正欲革此今西方用兵
连年不解东南数起大狱公独无一言以救之乎安石曰二事皆惠卿启之安石在外安
敢言轼曰在朝则言在外则不言事君之常礼耳帝所
以待公者非常礼公所以待帝者岂可以常礼乎安石厉声曰安石须说又曰人须是知
行一不义杀一不辜得天下弗为乃可轼戏曰今之君
子争减半年磨勘虽杀人亦为之安石笑而不言哲宗立复朝奉郎知登州召为礼部郎
中时司马光为门下侍郎惇知枢密院二人不相合惇
每以谗侮困光轼谓惇曰司马君实时望甚重不可慢惇以为然光赖以少安迁起居舍
人轼起于忧患不欲骤履要地辞于宰相蔡确确曰公
徊翔久矣朝中无出公右者轼曰昔林希同在馆中年且长确曰希固当先公邪卒不许
元佑元年轼以七品服入侍延和即赐银绯迁中书舍
人初差役法行久生弊安石相神宗改为免役司马光为相欲复差役差官置局轼与其
选轼曰差役免役各有利害免役之害掊敛民财十室
九空敛聚于上而下有钱荒之患差役之害民常在官不得专力于农而贪吏猾胥得缘
为奸此二害轻重盖畧等矣光曰于君何如轼曰法相
因则事易成事有渐则民不惊昔三代之法兵农为一至秦始分为二及唐中叶尽变府
兵为长征之卒自尔以来农出谷帛以养兵兵出性命
以卫农天下便之今免役之法实大类此公欲骤罢免役而行差役正如罢长征而复民
兵盖未易也光不以为然轼又陈于政事堂光忿然轼
曰昔韩魏公刺陕西义勇公为谏官争之甚力韩公不乐公亦不顾岂今日作相不许轼
尽言邪光笑而止寻除翰林学士二年兼侍读每进读
至治乱兴衰邪正得失之际未尝不反复开导辄有所启悟哲宗辄首肯之尝读祖宗宝
训因及时事轼言今赏罚不明善恶无所劝沮又黄河
势方北流而强之使东夏人入镇戎杀掠数万人帅臣不以闻每事如此恐寢成衰乱之
渐轼尝锁宿禁中召入对便殿宣仁后问曰卿前年为
何官曰臣为常州团练副使曰今为何官曰臣今待罪翰林学士曰何以遽至此曰遭遇
太皇太后皇帝陛下曰非也曰岂大臣论荐乎曰亦非
也轼惊曰臣虽无状不敢自他途进曰此先帝意也先帝每诵卿文章必叹曰奇才奇才

但未及进用卿耳轼不觉哭失声宣仁后与哲宗亦泣
左右皆感涕已而命坐赐茶彻御前金莲烛送归院三年权知礼部贡举会大雪苦寒士
坐庭中噤未能言轼宽其禁约使得尽其技巡捕内侍
每摧辱举子且持暧昧单词诬以为罪轼尽奏逐之四年积以论事为当轴者所恨轼恐
不见容请外拜龙图阁学士知杭州未行谏官言前相
蔡确知安州作诗借郝处俊事以讥太皇太后大臣议迁之岭南轼谓宣皇帝敕置狱逮
治太皇太后出手诏赦之宣仁后心善轼言而不能用
轼出郊用前执政恩例遣内侍赐龙茶银合慰劳甚厚既至杭大旱饥疫并作轼请于朝
免本路上供米三之一复得赐度僧牒易米以救饥者
明年春又减价糴常平米多作饘粥药剂遣使挟医分坊治病活者甚众轼曰杭水陆之
会疫死比他处常多乃哀羨缗得三千复发橐中黄金
五十两以作病坊稍蓄钱粮待之杭本近海地泉咸苦居民稀少唐刺史李泌始引西湖
水作六井白居易又浚西湖水入漕河自河入田所溉
至千顷湖水多葑自唐及钱氏岁辄浚治宋兴废之葑积为田水无几矣漕河失利取给
江潮舟行市中潮又多淤三年一淘为民大患六井亦
几于废轼见茅山一河专受江潮盐桥一河专受湖水遂浚二河以通漕复清堰闸以为
湖水蓄泄之限江潮不复入市以余力复完六井又取
葑田积湖中南北径三十里为长堤以通行者且募人种菱湖中葑不复生收其利以备
修湖取救荒余钱万缗粮万石及请得百僧度牒以募
役者堤成杭人名为苏公堤杭僧净源旧居海滨与舶客交通舶至高丽交誉之元丰末
其王子义天来朝因往拜焉至是净源死其徒窃附舶
往告义天亦使其徒来祭因持其国母二金塔云祝两宫寿轼不纳奏之曰高丽久不入
贡失赐予厚利意欲来朝未测吾所以待之厚薄故因
祭亡僧而行祝寿之礼若受而不答将生怨心受而厚赐之正堕其计今宜勿与知从州
郡自以理却之彼庸僧猾商为国生事宜痛加惩创朝
廷皆从之未几贡使果至旧例使所至吴越七州费二万四千余缗轼乃令诸州量事裁
损民获交易之利无复侵挠之害矣浙江潮自海门东
来势如雷霆而浮山峙于江中与渔浦诸山犬牙相错洄湊激射岁败公私船不可胜计
轼议自石门并山而东凿为漕河引浙江及溪谷诸水
二十余里以达于江又并山为岸不能十里以达龙山大慈浦自浦北折抵小岭凿岭六
十五丈以达岭东古河浚古河数里达于龙山漕河以
避浮山之险人以为便奏闻有恶轼者力沮之功以故不成轼复言三吴之水潴为太湖
溢为松江以入海海日两潮潮浊而江清潮水常欲淤
塞江路而江水清驶随辄涤去海口常通则吴中少水患昔苏州以东公私船皆以篙行

无陆挽者自庆历以来松江大筑挽路建长桥以扼塞
江路故今三吴多水欲凿挽路为十桥以迅江势亦不果用轼二十年闲再莅杭有德于
民家有画像饮食必祝又作生祠以报六年召为吏部
尚书未至以弟辙除右丞改翰林承旨轼在翰林数月复以谗请外乃以龙图阁学士出
知颍州先是开封诸县多水患吏不究本末决其陂泽
注之惠民河河不能胜致陈亦多水又将凿邓艾沟与颍河并且凿黄堆欲注之于淮轼
始至颍遣吏以水平准之淮之涨水高于新沟几一丈
若凿黄堆淮水顺流颍地为患轼言于朝从之郡有宿贼尹遇等杀捕盗吏兵朝廷以名
捕不获轼召汝阴尉李直方曰君能禽此当力言于朝
乞行优赏直方乃緝知盗所分捕其党与手戟刺遇获之朝廷以小不应格推赏不及轼
请以己之年劳当改朝散郎阶为直方赏不从其后吏
部为轼当迁以符会其考轼谓已许直方又不报七年徙扬州旧发运司主东南漕法听
操舟者私载货物征商不得留难故操舟者辄富厚所
载率皆速达无虞近岁一切禁而不许故舟弊人困多盗所载以济饥寒公私皆病轼请
复旧从之未阅岁以兵部尚书召兼侍读是岁哲宗亲
祀南郊轼为卤簿使导驾入太庙有赭伞犊车并青盖犊车十余争道不避仪仗轼使御
营巡检使问之乃皇后及大长公主时御史中丞李之
纯为仪仗使轼曰中丞职当肃政不可不以闻之纯不敢言轼于车中奏之哲宗遣使赍
疏驰白太皇太后明日诏整肃仪卫自皇后而下皆毋
得迎谒寻迁礼部兼端明殿翰林院侍读两学士为礼部尚书高丽遣使请书朝廷以故
事尽许之轼曰汉东平王请诸子及太史公书犹不肯
予今高丽所请有甚于此其可予乎不听八年宣仁后崩哲宗亲政轼乞补外以两学士
出知定州时国事将变轼不得入辞既行上书言天下
治乱出于下情之通塞至治之极小民皆能自通迨于大乱虽近臣不能自达陛下临御
九年除执政台谏外未尝与羣臣接今听政之初当以
通下情除壅蔽为急务臣日侍帷幄方当戍边顾不得一见而行况疏远小臣欲求自通
难矣然臣不敢以不得对之故不效愚忠古之圣人将
有为也必先处晦而观明处静而观动则万物之情毕陈于前陛下圣智绝人春秋鼎盛
臣愿虚心循理一切未有所为默观庶事之利害与羣
臣之邪正以三年为期俟得其实然后应物而作使既作之后天下无恨陛下亦无悔臣
恐急进好利之臣辄劝陛下轻有改变故进此说敢望
陛下留神社稷宗庙之福天下幸甚定州军政坏弛诸卫卒骄惰不教军校蚕食其廩赐
轼取贪污者配隶远恶缮修营房禁止饮博军中衣食
稍足乃部勒战法众皆畏伏有卒吏以赃诉其长轼曰此事吾自治则可听汝告军中乱

矣立决配之众乃定会春大阅将吏久废上下之分轼
举旧典帅常服出帐中将吏戎服执事副总管王光祖耻之称疾不至轼召书吏为奏光
祖惧而出讫事无一慢者契丹久和边兵不可用惟沿
边弓箭社与寇为邻以战射自卫犹号精锐故相庞籍守边因俗立法岁久法弛又为保
甲所挠轼奏免保甲及两税折变科配不报绍圣初御
史论轼掌内外制日所作词命以为讥斥先朝遂以本官知英州寻降一官未至贬监远
军节度副使惠州安置居三年又贬琼州别驾居昌化
故儋耳地非人所居初僦官屋以居有司犹谓不可轼遂买地筑室僦人运甓畚土以助
之独与幼子过处著书以为乐徽宗立移廉州改舒州
团练副使徙永州更三大赦还提举玉局观复朝奉郎轼自元佑以来未尝以岁课乞迁
故官止于此建中靖国元年卒于常州年六十六轼与
弟辙师父洵为文既而得之于天其体浑涵光芒雄视百代洵晚读易作易传未究命轼
述其志轼成易传复作论语说后居海南作书传自为
举子至出入侍从必以爱君为本忠规谏论挺挺大节羣臣无出其右但为小人忌恶挤
排不使安于朝廷之上高宗即位赠资政殿学士以其
孙符为礼部尚书又以其文寘左右读之终日忘倦谓为文章之宗亲制集赞赐其曾孙
峤遂崇赠太师谥文忠轼三子迈迨过俱善为文迈驾
部员外郎迨承务郎

苏过

苏过

过字叔党轼知杭州过年十九以诗赋解两浙路礼部试下及轼为兵部尚书任右
承务郎轼帅定武谪知英州贬惠州迁儋耳渐徙廉永
独过侍之凡生理昼夜寒暑所须者一身百为不知其难初至海上为文曰志隐轼览之
曰吾可以安于岛夷矣因命作孔子弟子别传轼卒于
常州过葬轼汝州郟城小峨眉山遂家颍昌营湖阴水竹数亩名曰小斜川自号斜川居
士卒年五十二初监太原府税次知颍昌府郟城县皆
以法令罢晚权通判中山府时称为小坡盖以轼为大坡也其叔辙每称过孝以训宗族
且言吾兄远居海上惟成就此儿能文也七子钥籍节
笈簞箬箭

△苏辙

苏辙字子由年十九与兄轼同登进士科又同策制举辙极言得失而于禁廷之事
尤为切至曰陛下即位三十余年矣平居静虑亦尝有
忧于此乎无忧于此乎臣伏读制策陛下既有忧惧之言矣然臣愚窃意陛下有其言耳
未有其实也往者西夏作难陛下昼不安坐夜不安席

天下皆谓陛下忧惧小心如周文王然自西方解兵陛下弃置忧惧之心二十年矣古之圣人无事则深忧有事则不惧夫无事而深忧者所以为有事之不惧也今陛下无事则不忧有事则大惧臣以为忧乐之节易矣臣闻近岁以来宫中贵姬至以千数歌舞饮酒优笑无度坐朝不闻咨谟便殿无所顾问三代之衰汉唐之季女宠之害陛下亦知之矣久而不止百蠹将由之而出内则蛊惑之所污以伤和伐性外则私谒之所乱以败政害事陛下无谓好色于内不害外事也今海内穷困生民怨苦而宫中好赐不为限极所欲则给不问有无司会不敢争大臣不敢谏契丹持敕迅若兵火国家内有养士养兵之费外有契丹西夏之奉陛下又自为一阱以耗其遗余臣恐陛下以此得谤而民心不归也策入辙自谓必见黜考官司马光第以三等范镇难之考官胡宿以为不逊请黜之仁宗曰以直言召人而以直言弃之天下其谓我何宰相不得已寘之下等授商州军事推官时父洵被命修礼书兄轼签书凤翔判官辙乞养亲京师三年轼还辙为大名推官神宗二年辙上书言事召对延和殿时王安石以执政与陈升之领三司条例命辙为之属吕惠卿附安石辙与论多相牾安石出青苗书使辙熟议曰有不便以告勿疑辙曰以钱贷民使出息二分本以救民非为利也然出纳之际吏缘为奸虽有法不能禁钱入民手虽良民不免妄用及其纳钱虽富民不免踰限如此则恐鞭捶必用州县之事不胜烦矣唐刘晏掌国计未尝有所假贷有尤之者晏曰使民侥幸得钱非国之福使吏倚法督责非民之便吾虽未尝假贷而四方丰凶贵贱知之未尝逾时有贱必余有贵必累以此四方无甚贵甚贱之病安用贷为晏之所言则常平法耳今此法见在而患不修公诚能有意于民举而行之则晏之功可立俟也安石曰君言诚有理当徐思之自此逾月不言青苗会河北转运判官王广兼奏乞度僧牒数千为本钱于陕西漕司私行青苗法春散秋敛与安石意合于是青苗法遂行安石因遣人使之四方访求遗利中外皆莫敢言辙往见陈升之曰昔嘉佑末遣使宽恤诸路各务生事还奏多不可行为天下笑今何以异此又以书抵安石力陈其不可安石怒将加以罪升之止之以为河南推官会张方平知陈州辟为教授寻授齐州掌书记改著作佐郎徙签书南京判官坐兄轼以诗得罪谪监筠州盐酒税移知绩溪县哲宗立以秘书省校书郎召元佑元年为右司谏宣仁后临朝用司马光吕公着欲革弊事而旧相蔡确韩缜枢密使章惇皆在位几伺得失辙皆论去之吕惠卿自知不免乞宫观以避贬窜辙具疏其奸以散官安置建州司马光以王安石雇役之害欲复差役辙言自罢差役仅二十年吏

民皆未习惯若不穷究首尾忽遽便行恐既行之后别生诸弊今州县役钱例有积年宽剩大约足支数年且依旧雇役尽今年而止催督有司
审议差役趁今冬成法来年役使乡户但使既行之后无复人言则进退皆便光又以安石私设诗书新义考试天下士欲改科举别为新格辙
言进士来年秋试日月无几诗赋虽小技比次声律用功不浅至于治经诵读讲解尤不轻易乞来年科场一切如旧惟经义兼取注疏及诸家
论议或出己见不专用王氏学仍罢律义令举人知有定论一意为学以待选试然后徐议元佑五年以后科举格式未为晚也光皆不能从初
神宗以夏国内乱用兵攻讨乃于熙河增兰州于延安增安疆米脂等五砦二年夏遣使贺登位使还未出境又遣使入境朝廷知其有请兰州
五砦地意大臣议弃守未决辙言曰顷者西人虽至疆场之事初不自言盖欲使此议发自朝廷得以为重朝廷深觉其意忍而不予彼若点集
兵马屯聚境上许之则畏兵而予不复为恩不予则边衅一开祸难无已况今日之事主上妙年母后听断将帅吏士恩情未接兵交之日谁使
效命惟乞圣心以此反复思虑早赐裁断无使西人别致猖狂于是朝廷许还五砦夏人遂服迁起居郎中书舍人朝廷议回河故道辙为公着
言河决而北自先帝不能回今不因其旧而修其未至乃欲取而回之其为力也难而为责也重是谓智勇势力过先帝也先着深然其言进户
部侍郎辙因转对言曰财赋之原出于四方而委于中都故善为国者藏之于民其次藏之州郡州郡有余则转运司常足转运司既足则户部
不困唐制天下赋税其一上供其一送使其一留州每有缓急王命一出舟车相衔大事以济祖宗以来诸道蓄藏之计犹极丰厚是以敛散及
时纵合由己利柄所在所为必成自熙宁以来言利之臣不知本末之术欲求富国而先困转运司转运司既困则上供不继而户部亦惫矣故
内帑别藏虽积如邱山而委为朽坏无益于算也寻又言臣以祖宗故事考之今日本部所行体例不同利害相远宜随事措置以塞弊原谨具
三弊以闻其一曰分河渠案以为都水监其二曰分胄案以为军器监其三曰分修造案以为将作监三监皆隶工部则本部所专其余无几出
纳损益制在他司顷者司马光秉政知其为害尝使本部收揽诸司利权当时所收不得其要至今三案犹为他司所擅自数十年以来羣臣每
因一事不举辄入建他司利权一分用财无艺他司以办事为效则不恤财之有无户部以给财为功则不问事之当否彼此各营一职其势不
复相知虽使户部得材智之臣终亦无益能否同病府库卒空今不早救后患必甚昔嘉佑中京师频岁大水大臣始取河渠案置都水监而大

不便者河北有外监丞侵夺转运司职事转运司之领河事也郡之诸埽埽之吏兵储蓄无事则分有事则合水之所向诸埽趋之吏兵得以并功储蓄得以并用故事作之日无暴敛伤财之患事定之后徐补其阙两无所妨自有监丞据法责成缓急之际诸埽不相为用而转运司不胜其弊矣此工部都水监为户部之害一也先帝并建六曹随曹付事故三司故事多隶工曹名虽近正而实非利昔胄案所掌今内为军器监而上隶工部外为都作院而上隶提刑司欲有兴作户部不得与议访闻河北道近岁为羊浑脱动以千计浑脱之用必军行过渡无船然后须之而其为物稍经岁月必至蠹败朝廷无出兵之计而有司营戢至使公私应副亏财害物若专任转运司必不至此此工部都作院为户部之害二也昔修造案掌百工之事事有缓急物有利害皆得专之今工部以办职为事则缓急利害谁当议之朝廷近以箔场竹箔积久损烂创令出卖上下皆以为当指挥未几复以诸处营造岁有科制遂令般运堆积以破出卖之计臣不知将作见工几何一岁所用几何取此积彼未用之闲有无损败而遂为此计本部虽知不便而以工部之事不敢复言此工部将作监为户部之害三也愿明诏有司罢外水监丞举北河事及诸路都作院皆归转运司至于都水军器将作三监皆兼隶户部使定其事之可否裁其质之多少而工部任其功之良苦程其作之迟速制出于一而后天下贫富可责之户部矣哲宗从之惟都水仍旧朝廷以吏部元丰所定吏额比旧额数倍命辙量事裁减辙白宰执请据实立额俟吏之年满转出或事故死亡者勿补及额而止不过十年羨额当尽吕大防命诸司吏任永寿与省吏数人典之遂背辙议裁损吏员复以好恶改易诸局次永寿旋以赃刺配大防畧依辙议行之代轼为翰林学士寻权吏部尚书使契丹还为御史中丞自元佑初一新庶政至是五年元丰旧党分布中外多起邪说以摇撼在位吕大防刘摯患之欲稍引用以平夙怨谓之调停宣仁后疑不决辙面斥其非复上疏曰臣近面论君子小人不可并处圣意似不以臣言为非者然天威咫尺言词迫遽有所不尽臣而不言谁当救其失者亲君子远小人则主尊国安疏君子在小人则主忧国殆此理之必然未闻以小人在外忧其不悦而引之于内以自遗患也故臣谓小人虽不可任以腹心至于牧守四方奔走庶务无所偏废可也若遂引之于内是犹患盗贼之欲得财而导之于寢室如虎豹之欲食肉而开之以坳牧无是理也且君子小人势同冰炭同处必争一争之后小人必胜君子必败何者小人贪利忍耻击之则难去君子洁身重义沮之则引退古语曰一熏一莸十年尚犹有臭盖谓此矣先

帝聪明圣智疾颓靡之俗将以纲纪四方比隆三代而臣下不能将顺造作诸法上逆天意下失民心二圣因民所愿取而更之上下忻慰则前者用事之臣今朝廷虽不加斥逐其势亦不能复留尚赖二圣慈仁宥之于外盖已厚矣而议者乃欲招而纳之与之共事谓之调停此辈若返必将戕害正人渐复旧事以快私忿人臣被祸盖不足言臣所惜者祖宗朝廷也惟陛下断自圣心勿使小人一进后有噬脐之悔则天下幸甚

疏入宣仁后曰辙疑吾君臣兼用邪正其言极中理调停之说遂已 【伏读通鉴辑览御批用人为致治大纲岂直稍参私意朝廷党援之弊在上者方当力为整饬以挽颓风若欲平臣下夙怨曲事调停尚复成何政体大防所见迂谬不若辙之持论正当也】 辙又奏曰窃见方今天下虽未大治而祖宗纲纪具在州郡民物粗安若大臣正己平心无生事要功之意因弊修法为安民靖国之术则人心自定虽有异党谁不归心但患朝廷举事类不审详曩者黄河北流正得水性而水官穿凿欲导之使东及陛下遣使按视知不可为犹或固执不从经今累岁回河虽罢减水尚存遂使河朔生灵财力俱困今者西夏青唐外皆臣顺朝廷招来之厚惟恐失之而熙河将吏创筑二堡以侵其膏腴议纳醇忠以夺其节钺功未可觊争已先形朝廷虽知其非终不明白处置若遂养成边衅关陕岂复安居如此二事则臣所谓宜正己平心无生事要功者也昔嘉佑以前乡差衙前民闲常有破产之思熙宁以后出卖坊场以雇衙前民闲不复知有衙前之苦及光佑之初一例复差官收坊场之钱民出衙前之费四方惊顾众议沸腾寻知不可旋又复雇去年之秋又复差法夫熙宁雇役之法三等人户并出役钱上户以家产高强出钱无艺下户昔不充役亦遣出钱故此二等人户不免咨怨至于中等昔既已自差役今又出钱不多雇法之行最为其便且如畿县中等之家例出役钱三贯若经十年为钱三十贯而已今差役既行农民在官日使百钱最为轻费然一岁之用已为三十六贯二年役满为费七十余贯罢役而归宽乡得闲三年狭乡不及一岁以此较之则差役五年之费倍于雇役十年赋役所出多在中等如此二事则臣所谓宜因弊修法为安民靖国之术者也四事不去彼心怀异同者有以借口多造谤议待时而发以摇撼众听矣伏乞宣谕宰执事有失当改之勿疑法或未完修之无倦苟民心既得则异议自消陛下端拱以享承平岂不休哉大臣耻过终莫肯改六年拜尚书右丞进门下侍郎初夏人来贺登极相继求和且议地界朝廷许之议久不决明年夏人以兵袭泾原杀掠弓箭手数千人朝廷不问遣使往赐策命夏人受礼倨慢不复入谢再犯泾原四年

来贺坤成节且议地界朝廷以岁赐予之地界又未决夏人乃以疆事多方侵求熙河将佐范育种谊等遂背约侵筑买孤胜如二堡夏人即平荡之育等又欲以兵纳赵醇忠及擅招其部人千余朝廷却而不受西边骚然辙乞罢种谊别择老将以守熙河宣仁后以为然大臣竟主种谊不从辙又面奏人君与人臣事体不同人臣虽明见是非而力所不加须至且止人君子事不知则已知而不能行则事权去矣臣今言此盖欲陛下收揽威柄以正君臣之分而已若听其所为不以渐制之及其太甚必加之罪事至如此岂朝廷美事故臣欲保全大臣非欲害之也六年熙河奏夏人十万骑压通远军境三日而退乞因其退急移近里堡砦于界乘利而往不须复守诚信下大臣会议辙曰当先定议欲用兵耶不用耶吕大防曰如合用兵亦不得不用辙曰凡用兵先论理之曲直我若不直兵决不当用朝廷顷与夏人议地界欲用庆历旧例以彼此见今住处当中为界此理最简直夏人不从朝廷遂不固执盖朝廷临事常患先易后难此所谓先易者也既而许于非所赐城砦依绥州例以二十里为界十里为堡铺十里为草地要约纔定朝廷又要两砦界首侵夏地一抹取直夏人见从又要夏界更留草地十里夏人亦许凡此所谓后难者也今欲于定西地与陇诺堡一抹取直所侵夏地凡百数十里陇诺祖宗旧疆岂所谓非所赐城砦耶此则不直致寇之大者也刘摯曰不用兵虽美然事有须用兵者亦不可不用也辙奏曰夏兵十万压熙河境上不于他处专于所争处杀人掘崖巉此意可见此非西人之罪皆朝廷不直之故熙河帅臣辄敢生事不守诚信请诘责之后屡因边兵深入夏地宣仁后遂从辙议时三省除李清臣吏部尚书给事中范祖禹封还诏书左正言姚鼐亦言之三省复除蒲宗孟兵部尚书辙奏前除清臣给谏纷然争之今又用宗孟恐不便宣仁后曰柰阙官何辙曰尚书阙官已数年何尝阙事今日用此二人正与去年用邓温伯无异此三人者昔与王珪蔡确辈并进意思与今日圣政不合见今尚书共阙四人若并用似此四人使党类互进恐朝廷自是不安静矣议遂止绍圣初哲宗起李清臣为中书舍人邓润甫为尚书左丞二人稍复言熙丰事以激怒哲宗意会廷试进士清臣撰策题即为邪说 【伏读通鉴辑览 御批润甫首倡绍述之说章吕党人接踵复进专务攻讦司马光诸人为事甚至发策以此相诋謫试士以此衡甲乙左袒右袒门户判然望纪纲肃清何可得哉】 辙谏曰伏见御试策题历诋近岁行事有绍复熙宁元丰之意臣谓先帝以天纵之才行大有为之志其所设施度越前古盖有百世不可改者在位近二十年而终身不受尊号宗室恩止袒免

减朝廷无穷之费役法雇募衙前免民闲破家之患黜罢诸科诵数之学训练诸将慵惰之兵置寄禄之官复六曹之旧严重禄之法禁交谒之私行浅攻之策以制西夏收六色之钱以宽杂役凡如此类皆先帝之睿算有利无害而元佑以来上下奉行未尝失坠也至于其它事有失当父作之于前子救之于后前后相济此则圣人之孝也汉武帝 盐铁榷酤均输之政民不堪命昭帝委任霍光罢去烦苛汉室乃定光武显宗以蔡为明以讖决事章帝即位深鉴其失代之以宽厚恺悌之政后世称焉本朝真宗右文偃武号称太平而羣臣因其极盛为天书之说章献临御揽大臣之议藏书梓宫以泯其迹及仁宗听政绝口不言英宗自藩邸入继大臣创濮庙之议及先帝嗣位或请复举其事寝而不答夫以汉昭章之贤与吾仁宗神宗之圣岂其薄于孝敬而轻事变易也哉臣愿陛下慎勿轻事改易若轻变九年已行之事擢任累岁不用之人人怀私忿而以先帝为辞僨事多矣哲宗览奏以为引汉武方先朝不悦落职知汝州居数月再责知袁州未至降朝议大夫试少府监分司南京筠州居住三年又责化州别驾雷州安置移循州徽宗即位徙永州岳州已而复大中大夫提举凤翔上清太平宫崇宁中蔡京当国又降朝议大夫罢祠居许州再复大中大夫致仕筑室于许号颍滨遗老自作传万余言不复与人相见政和二年卒年七十四追复端明殿学士淳熙中谥文定辙性沈静简洁为文汪洋澹泊似其为人不愿人知之而秀杰之气终不可掩其高处殆与兄轼相近三子迟适逊族孙元老

苏元老

苏元老

元老字子廷善属文轼谪居海上数以书往来轼喜其为学有功辙亦爱奖之举进士调广都簿历汉州教授西京国子博士通判彭州政和闲宰相喜开边西南帅臣多啖诱近界诸族使纳土分置郡县以为功致茂州蛮叛帅司遽下令招降元老叹曰威不足以服则恩不足以怀乃移书成都帅周焘曰此蛮跳梁山谷闲彼之所长我之所短惟施黔两州兵可与为敌者檄数千人使倍道往赴贤于官军十万也其次以为夔陕兵大集先以夔兵诱其前陕兵从其后不十日贼必破彼降而我受焉则威怀之道得今不讨贼而招之还必复叛不免重用兵矣焘得书即召与计事元老又策茂有两道正道自湿山趋长平绝岭而上其路险闲道自青崖关趋刁溪循江而行其路夷当使正兵阵湿山而阴出奇兵捣刁溪与石泉并力合攻贼腹背受敌擒之必矣焘皆不能用竟得罪后帅至如元老策蛮势蹙乃降除国子博士历秘书正字将作少监比

部考功员外郎寻除成都路转运副使为军器监司农卫尉太常少卿梁师成方用事自言为轼外子欲见之拒不答言者遂论元老苏轼从孙且为元佑邪说其学术议论颇仿轼辙不宜在中朝罢为提点明道宫元老叹曰昔颜子附骥尾而名显吾今以家世坐累荣矣未几卒年四十七有诗文行于时

钦定续通志卷三百五十五

●钦定续通志卷三百五十六 列传一百五十六

列传

宋 【六十】

○宋六十

吕大防【大忠 大钧大临】 刘摯 苏颂

吕大防

刘摯

苏颂

△吕大防

吕大防字微仲其先汲郡人祖通太常博士父蕢比部郎中葬京兆蓝田遂家焉大防进士及第调冯翊主簿永寿令县无井远汲于涧大防行近境得二泉用考工水地置泉之法以准之不旬日疏为渠民赖之号曰吕公泉迁著作佐郎知青城县故时圭田粟入以大斗而出以公斗获利三倍民虽病不敢诉大防始均出纳以平其直青城外控汶川与敌相接大防据要置逻密为之防禁山之樵采之严障蔽韩绛镇蜀称其有王佐才入权盐铁判官英宗即位改太常博士与范纯仁同监察御史里行首言纪纲赏罚未厌四方之望者有五进用大臣而权不归上大臣疲老而不得时退外国骄蹇而不择将帅议论之臣裨益阙失而大臣沮之疆场左右之臣有败事而被赏举职而获罪者是岁京师大水大防曰此阴阳之沴也即陈八事曰主威不立臣权太盛邪议干正私恩害公辽夏连谋盗贼恣行羣情失职刑罚失平会执政议濮王称考大防上言先帝起陛下为皇子馆于宫中凭几之命绪言在耳岂可生以为子没而背之今大臣首欲加王以非正之号使陛下顾私恩而违公义非所以结天下之心章累十数上出知休宁县神宗立通判淄州熙宁元年知泗州为河北转运副使召直舍人院韩绛宣抚陕西命为判官又兼河东宣抚判官除知制诏四年知延州大防欲城河外荒堆砦众谓不可守大防留戍兵修堡障有不从者斩以徇会环庆兵乱绛坐黜大防亦落知制诏以太常博士知临江军数月徙知华州华岳摧白山属渭河被害者众大防

奏疏援经质史以验时事其略曰畏天之威于时保之
先王所以兴也书云惟先格王正厥事愿仰承天威府酌时变为社稷至计除龙图阁待
制知秦州元丰初徙永兴神宗以彗星求言大防陈三
说九宜曰治本曰缓末曰纳言养民教士重谷治本之宜三也治边治兵缓末之宜二也
广受言之路宽侵官之罚恕诽谤之罪容异同之论此
纳言之宜四也时用兵西夏调度百出有不便者辄上闻务在宽民及兵罢民力比他路
为饶供亿军须亦无乏绝进直学士居数年知成都府
哲宗即位召为翰林学士权开封府馆伴契丹使其使黠语颇及朝廷大防密撻其隐事
诘之曰北朝试进士至心独运赋不知此题于书何出
使错遣不能对自是不敢复出嫚词迁吏部尚书夏使来诏访以待遇之计又向者所得
边地虽建立城堡终虑孤绝难保弃之则弱国守之又
有后悔大防言夏本无能为然屡遣使而不布诚款者盖料我急于议和耳今使者到关
宜令押伴臣僚扣其不贺登极以观厥意足以测情伪
矣新收疆土议者多言可弃此虑之不熟也至于守御之策惟择将帅为先太祖用姚内
斌董遵海守环庆西人不敢入侵昔以二州之力御敌
而有余今以九州岛之大奉边而不足用是言之在于得人而已元佑元年拜尚书右丞
进中书侍郎封汲郡公西方息兵青唐羌以为中国怯使
将犯边大防命洮州诸将乘闲致讨生擒之三年起拜尚书左仆射兼门下侍郎提举修
神宗实录大防见哲宗年益壮日以进学为急请敕讲
读官取仁宗迩英御书解释上之寘于坐右又摭干兴以来四十一事足以为劝戒者分
上下篇标曰仁祖圣学使人主有欣慕不足之意哲宗
御迩英阁召宰执讲读官读宝训至汉武帝籍南山提封为上林苑仁宗言山泽之利当
与众共之何用此丁度以为主上忧勤此本祖宗家法
大防因推广祖宗家法以进之曰本朝家法最善逾于前代祖宗以来事母后皆朝夕见
此事亲之法仁宗以侄事姑之礼见献穆大长公主此
事长之法宫禁严密内外整肃此治内之法母后之族皆不预政此待外戚之法宫殿止
用赤白此尚俭之法步自内庭出御后殿此勤身之法
燕居必以礼窃闻陛下昨郊礼毕具礼谢太皇太后此尚礼之法用法最轻臣下有罪止
于罢黜此宽仁之法陛下不须远法前代但尽行家法
足以为天下哲宗甚然之大防朴厚蠢直不植党朋与范纯仁并位同心戮力以相王室
立朝挺挺进退百官不可干以私不市恩嫁怨以邀声
誉凡八年始终如一恳乞避位宣仁后曰上方富于春秋公未可即去少须岁月吾亦就
东朝未果而后崩为山陵使复命以观文殿大学士左
光禄大夫知颖昌府寻改永兴军使使其乡社入辞哲宗劳慰甚渥曰卿暂归故乡行即

召矣未几左正言上官均论其堕坏役法右正言张商英御史周秩刘拯相继攻之夺学士知随州贬秘书监分司南京居郢州言者又以修神宗实录直书其事为诬诋徙定州兄大忠自渭入对哲宗询大防安否且曰执政欲迁诸岭南朕独令处安陆为朕寄声问之大防朴直为人所卖三二年可复相见也【伏读通鉴辑览 御批】哲宗称大防朴直似为知人何妨即行黜陟而必语其所亲如臣下委曲私致意者然不大可笑乎】大忠泄其语于章惇惇惧绳之愈力绍圣四年遂贬舒州团练副使安置循州至虔州信丰而病遂薨年七十一大忠请归葬许之大防身長七尺眉目秀发声音如钟自少持重无嗜好过市不左右游目燕居如对宾客每朝会威仪翼如神宗常目送之与大忠及弟大临同居相切磋论道考礼关中言礼学者推吕氏徽宗即位复其官高宗绍兴初又复大学士赠太师宣国公谥曰正愨

吕大忠

吕大钧

吕大临

吕大忠

大忠字进伯登第为华阴尉晋城令韩绛宣抚陕西以大忠提举永兴路义勇改秘书丞检详枢密院吏兵房文字令条义勇利害大忠言养兵猥众国用日屈汉之屯田唐之府兵善法也弓箭手近于屯田义勇近于府兵择用一焉兵屯可省矣为签书定国军判官熙宁中王安石议遣使诸道立缘边封沟大忠与范育被命俱辞行大忠陈五不可以为怀抚外国恩信不洽必致生患罢不遣令与刘忱使契丹议代北地会遭父丧起复知代州契丹使萧素梁颖至代设次据主席大忠与之争乃移次于长城北换西上合门使知石州大忠数与素颖会凡议屡以理折之已而复使萧禧来求代北地神宗召执政与大忠忱议将从其请大忠曰彼遣一使来即与地五百里若使魏王英弼来求关南则何如神宗曰卿是何言也对曰陛下既以臣言为不然恐不可启其渐忱曰大忠之言社稷大计愿陛下熟思之执政知不可夺议卒不决罢忱还三司大忠亦终丧制其后竟以分水岭为界焉元丰中为河北转运判官言古者理财视天下犹一家朝廷者家外计者兄弟居虽异而财无不同今有司惟知出纳之名有余不足未尝以实告上故有余则取之不足莫之与甚大患也乃上生财养民十二事徙提点淮西刑狱时河决飞蝗为灾大忠入对极论之诏归故官元佑初历工部郎中陕西转运副使知陕州以直龙图阁知秦州进宝文阁待制夏人自犯麟府环庆后遂绝岁

赐遣使来谢罪神宗将许之大忠言夏人强则纵困则服今阳为恭顺实惧讨伐宜且命边臣诘其所以来之辞若惟请是从彼将有以窥我矣
时郡余民粟豪家因之制操纵之柄大忠选僚窠自旦入仓虽斗升亦受不使有所壅阂民喜争运粟于仓负钱而去得百余万斛马涓以进士
举首入幕府自称状元大忠谓曰状元云者及第未除官之称也既为判官则不可又教以临政治民之要涓自以为得师尝献言夏人戍守之外战士不过十万吾三路之众足以当之彼屡犯王略一不与校臣窃羞之绍圣二年加宝文阁直学士知渭州付以秦渭之事奏言关陕民力未裕士气沮丧非假之岁月未易枝梧因请以职事对大抵欲以计徐取横山自汝遮残并迤邐进筑不求近功既而锺傅城安西王文郁亦用
事章惇曾布主之大忠议不合又乞以所进职为大防量移惇布陈其所言与元佑时异徙知同州旋降待制致仕卒诏复学士

吕大钧

大钧字和叔父蕢大防弟也中乙科调秦州右司理参军监延州折博务改光禄寺丞知三原县请代父蕢入蜀移巴西县蕢致仕大钧亦
移疾不行以忧去起为诸王宫教授求监凤翔船务改宣义郎会伐西夏鄜延转运司檄为从事既出塞转运使李稷馈饷不继欲还安定取粮
使大均请于种諤諤曰吾受命将兵安知粮道万一不继召稷来与一剑耳大均性刚直即日朝廷出师去塞未远遂斩转运使无君父乎諤意
折强谓大钧曰君欲以此报稷先稷受祸矣大钧怒曰公将以此言见恐邪吾委身事主死无所辞正恐公过耳諤见其直乃好谓曰子乃尔邪
今听汝矣始许稷还未几道得疾卒年五十二大均从张载学能守其师说而践履之

吕大临

大临字与叔通六经尤邃于礼其论选举曰今取人而用不问其可任何事任人以事不问其才之所堪故入流之路不胜其多为官择士
则常患乏才待次之吏历岁不调立士规以养德厉行更学制以量才进艺定试法以区别能否修辟法以兴能备用严举法以核实得人制考
法以责任考功庶几可以渐复古矣富弼致政于家为佛氏之学大临与之书谓此山谷避世之士独善其身者之所好非世之所以望于公者
元佑中为太学博士迁秘书省正字范祖禹荐其好学修身如古人可备劝学未及用而卒

△刘摯

刘摯字莘老永静东光人父居正摯十岁而孤鞠于外氏就学东平因家焉嘉佑中擢甲科历冀州南宫令县赋甚重输绢匹折税钱五百

绵两折钱三十民多破产摯援例旁郡条请裁以中价转运使怒将劾之摯固请曰独一州六邑被此苦决非法意但朝廷不知耳遂告于朝三司使包拯奏从其议自是绢为钱千三百绵七十有六民欢颂之是时摯与信都令李冲清河令黄莘皆以治行闻人称为河朔三令徙江陵观察推官用韩琦荐得馆阁校勘王安石一见器异之擢检正中书礼房才月余为监察御史里行即奏论亳州狱起小人意专在倾富弼以市住今弼已得罪愿少宽之又言程昉开漳河调发猝迫人不堪命赵子几擅升畿县等使纳役钱县民日数千人遮诉宰相京师喧然何以示四方张靚王廷老擅增两浙役钱督赋严急人情嗟怨此皆欲以羨余希赏愿行显责明朝廷本无聚敛之意及入见神宗面赐褒谕因问卿从学王安石邪安石极称卿器识对曰臣东北人少孤独学不识安石也乃上疏曰君子小人之分在义利而已小人才非不足用特心之所向不在乎义陛下有劝农之意今变而为烦扰陛下有均役之意今倚以为聚敛其有爱君之心忧国之言者皆无以容于其闲畏义者以进取为可取嗜利者以守道为无能此风浸成汉唐党祸必起矣臣愿陛下虚心平听审察好恶稍抑虚哗轻伪志近忘远幸于苟合之人渐察忠厚慎重难进易退可与有为之士又论率钱助役官自雇人有十害其略曰天下州县户役虚实轻重不同今等以为率则非一法所能齐随其所宜各自立法则纷扰散殊何以统率一也新法谓版籍不实故令别立等第且旧籍既不可信今何以得其无失不独骚扰生事患将使富输少贫输多二也天下上户少中户多上户役数而重故以助钱为幸中户役简而轻下户役所不及今槩使输钱则为不幸三也有司欲多得雇钱而患上户之寡故不用旧籍临时升降使民何以堪命四也岁有丰凶而役人有定数助钱不可阙非若税赋有倚阁减放之期五也谷麦布帛岁有所出而助法必输见钱六也二税科买色目已多又槩率钱以竭其所有斯民无有悦而愿为农者户口当日耗失七也侥幸者又将缘法生奸如近日两浙倍科钱数自以为功八也差法近者十余年远或二十年乃一充役民安习之久矣今官自雇人直重则民不堪轻则人不愿不免以力殴之就役九也且役人必用乡户家有常产则必知自爱性既愚实则罕有盗欺今一切雇募但得轻猾浮伪之人巧诈相资何所不至十也会御史中丞杨绘亦言其非安石使张琥作十难以诘之琥辞不为司农曾布请为之既作十难且劾摯绘欺诞怀向背诏问状绘惧谢罪摯奋曰为人臣岂可压于权势使天子不知利害之实即条对所难以伸其说且曰臣待罪言责采士民之说以闻于上职也今有司遽令分析是使之

较是非争胜负交口相直无乃辱陛下耳目之任哉愿以臣章并司农奏宣示百官考定当否不报摯明日复上疏曰陛下注意以望太平而自以太平为己任得君专政者是也二三年闲开阖动摇举天下无一物得安其所者盖自青苗之议起而天下始有聚敛之疑青苗之议未允而均输之法行均输之法方扰而边鄙之谋动边鄙之祸未艾而助役之事兴至于求水利行淤田并州县兴事起新难以徧举其议财则市井屠贩之人皆召至政事堂其征利则下至历日而官自鬻之推此而往不可究言轻用名器淆混贤否忠厚老成者摯之为无能狭少儇辩者取之为可用守道忧国者谓之流俗败常害民者谓之变通凡政府谋议经画除用进退独与一掾属决之然后落笔同列预闻反在其后故奔走乞匄之人其门如市今西夏之款未入反侧之兵未安三边疮痍流溃未定河北大旱诸路大水民劳财乏县官减耗圣上忧勤念治之时而政事如此皆大臣误陛下而大臣所用者误大臣也疏奏安石欲窜之岭外神宗不听谪监衡州盐仓绘出知郑州琥亦落职摯乞诣郛迁葬然后奔赴贬所许之先是仓吏与纲兵奸利相市盐中杂以伪恶远人未尝食善盐摯悉意核视且储其羨以为赏弊减什七父老目为学士盐久之签书南京判官会司农新令尽斥卖天下祠庙依坊场河渡法收净利南京阙伯庙岁钱四十六贯微子庙十二贯摯叹曰一至于此往见留守张方平曰独不能为朝廷言之耶方平瞿然托摯为奏曰阙伯迁商邱主祀大火火为国家盛德所乘历世尊为大祀微子宋始封之君开国此地本朝受命建号所因又有双庙者唐张巡许远孤城死贼能捍大患今若令承买小人规利冗褻渎慢何所不为岁收微细实损大体欲望留此三庙以慰邦人崇奉之意从之入同知太常礼院元丰初改集贤校理知大宗正等丞为开封府推官神宗开天章阁议新官制除至礼部郎中曰此南宫舍人非他曹比无出刘摯者即命之俄迁右司郎中初宰掾每于执政分厅时请闲白事多持两端伺意指摯始请以公礼聚见共决可否或不便摯所请坐以开封不置历事罢归明年起知滑州哲宗即位宣仁后同听政召为吏部郎中改秘书少监擢侍御史上疏曰陛下春秋鼎盛在所资养愿选忠信孝悌惇茂老成之人以充劝讲进读之任便殿燕坐时赐廷对执经诵说以广睿知仰副善继求治之志他曰讲筵进读至仁宗不避庚戌临奠张士逊侍读曰国朝故事多避国音国朝角音木也故畏庚辛哲宗问果当避否摯进曰阴阳拘忌圣人不取如正月祈谷必用上辛此岂可改也汉章帝以反支日受章奏唐太宗以辰日哭张公谨仁宗不避庚戌日皆陛下所宜取法哲宗然之摯又言谏官

御史员缺未补监察虽满六员专以察治官司公事而不预言责请增补台谏并许言事
时蔡确章惇在政地与司马光不相能摯因久早上言
洪范庶征肃时雨若五行传政缓则冬旱今庙堂大臣情志乖睽议政之际依违排狠语
播于外可谓不肃政令二三舒缓不振比日日青无光
风霾昏曠上天警告皆非小变愿进忠良通壅塞以答天戒蔡确为山陵使神宗灵驾发
引前夕不入宿摯劾之又疏确过恶大略有十论章惇
凶悍轻佻无大臣体皆罢去初神宗更新学制养士以千数有司立为约束过于烦密摯
上疏曰学校为育材首善之地非行法之所虽羣居众
聚帅而齐之不可无法亦有礼义存焉比以太学屡起狱讼有司缘此造为法禁烦苛愈
于治狱条目多于防盗博士诸生禁不相见教谕无所
施质问无所从月巡所隶之斋而已所至备礼请问相与揖诺亦或不交一言而退以防
私请以杜贿赂学校如此岂先帝所以造士之意哉治
天下者遇人以君子长者之道则下必有君子长者之行而应乎上若以小人犬彘遇之
彼将以小人犬彘自为而况以此行于学校之闲乎愿
罢其制执宪数月百僚敬惮时人以比包拯吕晦元佑元年擢御史中丞摯上疏曰上之
所好下必有甚朝廷意在总核下必有刻薄之行朝廷
务在宽大下必有苟简之事习俗怀利迎意趋和所为近似而非上之意本然也昨差役
初行监司已有迎合争先不校利害一槩定差一路为
之骚动者朝廷察其如此固已黜之矣向来黜责数人者皆以非法掎克市进害民然非
欲使之漫不省事昧者不达矫枉过正请立监司考绩
之制拜尚书右丞连进左丞中书侍郎迁门下侍郎胡宗愈除右丞谏议大夫王覲疏其
非是宣仁后怒将加深谴摯开救甚力帘中厉声曰若
有人以门下侍郎为奸邪甘受之否摯曰陛下审察毁誉每如此天下幸甚然愿顾大体
宗愈进用自有公议必致贬谏官而后进恐宗愈亦所
未安宣仁后意解覲得补郡守摯与同列奏事论人才哲宗及宣仁后嘉叹六年拜尚书
右仆射摯性峭直有气节通达明锐触机辄发不为利
诱威怵自初辅改至为相修严宪法辨白邪正与吕大防同位国家大事多决于大防惟
进退士大夫实执其柄然持心少恕勇于去恶竟为朋
谗奇中先是邢恕谪官永州以书抵摯摯故与恕善答其书有永州佳处第往以俟休复
之语排岸官茹东济倾险人也有求于摯不得见其书
阴录以示御史中丞郑雍侍御史杨畏二人方交章击摯遂笺释其语上之曰休复者语
出周易以俟休复者俟他日太皇太后复子明辟也又
章惇诸子故与摯之子游摯亦闲与之接雍畏谓延见接纳为牢笼之计以冀后福摯上
章自辨不得以观文殿学士罢知郢州七年徙大名又

为雍等所遏徙知青州绍圣初来之邵周秩论摯变法弃地罪夺职知黄州再贬光禄卿分司南京蕲州居住将行语诸子曰上用章惇吾且得罪若惇顾国事不迁怒百姓但责吾曹死无所恨正虑意在报复法令益峻柰天下何忧形于色无一言及迁谪意四年陷邢恕之谤贬鼎州团练副使新州安置惟一子从家人涕泣愿侍皆不听至数月以疾卒年六十八初摯与吕大防为相文及甫居丧在洛怨望服除恐不得京官抵书邢恕恕以示蔡硕蔡渭渭上书讼摯及大防等十余人陷其父确谋危宗社引及甫书为证时章惇蔡卞诬造元佑诸人事不已因是欲杀摯及梁焘王岩叟等以为摯有废立之意遂起同文馆狱用蔡京安惇杂治卒无佐验会摯卒京奏不及考验遂免其子官与家属徙英州凡三年死于瘴者十人徽宗立诏反其家属用子跂请得归葬跂又伏阙讼冤复摯中大夫蔡京为相降朝散大夫后又复观文殿大学士大中大夫绍兴初赠少师谥曰忠肃摯嗜书自幼至老未尝释卷少好礼学其究三礼尤粹晚好春秋跂能为文章遭党事为官拓落家居避祸以寿终

△苏颂

苏颂字子容泉州南安人父绅葬润州丹阳因徙居之第进士历宿州观察推官知江宁县划剔夙蠹成赋一邑简而易行诸令视以为法调南京留守推官留守欧阳修委以政曰子容处事精审一经阅览则修不复省矣时杜衍老居睢阳见颂深器之自以平生施設出处悉以语颂故颂后历政略似衍云皇佑五年召试馆阁校勘同知太常礼院至和中文彦博为相请建家庙事下太常颂议以为礼大夫士有田则祭无田则荐是有土者乃为庙祭也参合古今之制依约封爵之令为之等差嘉佑中诏礼院立故郭后神御殿于景灵宫颂谓敕书云向因忿郁偶失谦恭又云朕念自历长秋仅周一纪逮事先后祇奉寝园又云可追复皇后其祔庙谥册并停此则无可废之事有不当废之悔且有合祔庙及谥册之义祔郭皇后于后庙以成追复之道宰相曾公亮问曰议者谓阴逼母后是恐后有配祔之意颂曰若加一怀哀愍之谥则不为逼矣公亮叹重迁集贤校理编定书籍颂在馆下九年奉养祖母及母并及姑姊妹外族而妻子衣食常不及富弼尝称为古君子及与韩琦为相同表其廉退以知颍州仁宗崩建山陵有司以不时难得之物厉诸郡颂曰遗诏务从俭约岂有土不产而可强赋乎量其有无事亦随集英宗即位召提点开封府界诸县镇公事颂言周制六军出于六卿在三畿四郊之地唐设十二卫亦散布畿内郡县又以关内诸府分隶之皆所以临制四方为国藩卫国朝禁兵多屯京师及畿内东南诸县虽馈运为便而西边武备殊阙

今中牟长垣都门要冲二鄙驿置皆由此而旧不屯兵
閫无防守请置营益兵以备非常明年饥民果乘虚犯长垣戕官吏如颂虑颂又请以获
盗多寡为县令殿最法以为巡检县尉但能捕盗而不能使人不为盗能使其不为盗者县令也且民罹剽劫之害而长官不任其责可乎迁度
支判官送契丹使宿恩州驿舍火左右请出避颂不动
州兵欲入救闭门不纳徐使防卒扑灭之初火时郡人汹汹期使者有变救兵亦欲因而
生事赖颂安静而止使还命为淮南转运使召起居注
擢知制诰知通进银台司知审刑院时知金川张仲宣坐枉法赃罪至死法官援李希辅
例杖脊黥配海岛颂奏曰仲宣所坐止系违令可比恐
喝条视希辅有闲神宗欲免杖而黥之颂又言古者刑不上大夫所重者污辱衣冠耳得
免杖黥流海外遂为定法又言提举青苗官不能体朝
廷之意邀功争利务为烦扰大臣荐秀州判官李定召见擢太子中允除监察御史里行
宋敏求知制诰封还词头复下颂当制颂奏定不由铨
考擢授朝列不缘御史荐寘宪台虽朝廷急于用才度越常格然隳紊法制所损者大未
敢具草次至李大临亦封还神宗曰去年诏台官有阙
委御史台奏举不拘官职高下颂与大临对曰从前台官于太常博士以上中行员外郎
以下举充后为难得资叙相当故朝廷特开此制止是
不限博士员郎非谓选人亦许奏举者不拘官职高下并选人在其闲则是秀州判官亦
可为里行不必更改中允也今定改京官已是优恩更
处之宪台幸门一启则仕涂奔竞之人希望不次之擢执奏不已于是并落知制诰归工
部郎中班天下谓颂及敏求大临为三舍人岁余知婺
州方泝桐庐江水暴迅舟横欲覆毋在舟中几溺颂哀号赴水救之舟忽自正人以为纯
孝所感徙亳州加集贤院学士知应天府吕惠卿尝语
人曰子容吾乡里先进苟一诣我执政可得也颂闻之笑而不应凡更三赦大临还侍从
颂纔授秘书监知通进银台司吴越饥选知杭州一日
出遇百余人哀诉曰某以转运司责逋市易缗钱夜囚昼系虽死无以偿颂曰吾释汝使
汝营生奉衣食之余悉以偿官期以岁月而足可乎皆
谢不敢负果如期而足颂宴客有美堂或告将兵欲乱颂密使捕渠领十辈荷杖付狱中
迨夕会散坐客不知也及修两朝正史转右谏议大夫
使契丹还神宗问其山川人情向背对曰彼讲和日久颇窃中国典章礼义以维持其正
上下相安未有离贰之意昔汉武帝自谓高皇帝遗朕
平城之忧虽久勤征讨而匈奴终不服至宣帝呼韩单于稽首称藩唐自中叶以后河湟
陷于吐蕃宪宗每读贞观政要慨然有收复意至宣宗
时乃以三关七州归于有司由此观之外国之叛服不常不系中国之盛衰也颂意盖有

所讽神宗然之元丰初权知开封府颇严鞭朴谓京师
浩穰须弹压非毫颖卧治之比有僧犯法事连祥符令李纯 【按东都事略作孙纯】
颂置不治御史舒亶纠其故纵贬秘书监知濠州初颂
在开封府国子博士陈世儒之妻李恶世儒庶母欲其死既而母为婢所杀开封治狱久
不决至是移之大理意颂前次请求移御史台逮颂对
颂即手书数百言伏其咎帝览奏牋以为疑反复究实乃大理丞贾种民增减其文傅致
由是得白犹以为泄狱情罢郡未几知河阳改知沧州
入辞帝曰朕知卿久然每欲用辄为事夺命也夫卿直道久而自明颂顿首谢召判尚书
吏部兼详定官制唐制吏部主文选兵部主武选神宗
谓三代两汉本无文武之别议者不知所处颂言唐制吏部有三铨之法分品秩而掌选
事今欲文武一归吏部则宜分左右曹掌之每选更以
品秩分治于是吏部始有四选法因陞对神宗谓颂曰契丹通好八十余年盟誓聘使礼
币仪式皆无所考据欲修一书但患迁延不早成耳卿
度此书何时可就颂曰须一二年曰非卿不能如是之敏及书成帝读序引喜曰正类序
卦之文赐名鲁卫信录帝尝问宗子主祭承重之义颂
对曰古者贵贱不同礼诸侯大夫世有爵禄故有大宗小宗主祭承重之义则丧服从而
异制匹夫庶人亦何预焉近代不世爵宗庙因而不立
尊卑亦无所统其长子孙与众子孙无以异也今五服敕嫡孙为祖父为长子犹斩衰三
年生而情礼则一死而丧服独异恐非先王制礼之本
意世俗之论乃以三年之丧为承重不知为承大宗之重也臣闻庆历中朝廷议百僚应
任子者长子与长孙差优与官余皆降杀亦近古立宗
之法乞诏礼官博士参议礼律合承重者酌古今收族主祭之礼立为宗子继祖者以异
于众子孙之法士庶人不当同用一律使人知尊祖不
违礼教也除吏部侍郎迁光禄大夫遭母丧帝遣中贵人唁劳赐白金千两元佑初拜刑
部尚书迁吏部兼侍读奏国朝典章沿袭唐旧乞诏史
官采新旧唐书中君臣所行日进数事以备圣览遂诏经筵官遇非讲读日进汉唐故事
二条颂每进可为规戒有补时事者又谓人主聪明不
可有所向有则偏偏则为患大每进读至弥兵息民必援引古今以动人主之意既又请
别制浑仪因命颂提举颂既邃于律历以吏部令史韩
公廉晓算术有巧思奏用之授以古法为台三层上设浑仪中设浑象下设司辰贯以一
机激水转轮不假人力时至刻临则司辰出告星辰缠
度所次占候测验不差晷刻昼夜晦明皆可推见前此未有也颂前后掌四选五年每选
人改官吏求垢瑕故为稽滞颂敕吏曰某官缘某事当
曾某处仍引合用条格具委无漏落状同上自是吏不得逞每诉者至必取案牋使自省

阅诉者服乃退其不服者颂心往复诘难度可行行之
苟有疑则为奏请或建白都堂故选官多感德其不得所欲者亦心服而去迁翰林学士
承旨五年擢尚书左丞尝行枢密事边帅遣种朴入奏
得谍言契丹主阿里骨已死国人未知所立契丹官赵纯忠者谨信可任愿乘其未定以
劲兵数千拥纯忠入其国立之众议如请颂曰事未可
知其越境立君使彼拒而不纳得无损威重乎徐观其变俟其定而抚辑之未晚也已而
阿里骨果无恙七年拜右仆射兼中书门下侍郎颂为
相务在奉行故事使百官守法遵职量能授任杜绝侥幸之原深戒强场之臣邀功生事
论议有未安者毅然力争之贾易除知苏州颂言易在
御史名敢言既为监司矣今因赦令反下迁为州不可争论未决谏官杨畏来之邵谓稽
留诏命颂遂上章辞位罢为观文殿大学士集禧观使
继出知扬州徙河南辞不行告老以中太一宫使居京口绍圣四年拜太子少师致仕方
颂执政时见哲宗年幼诸臣太纷纭常曰君长谁任其
咎耶每大臣奏事但取决于宣仁后哲宗有言或无对者惟颂奏宣仁后必再禀哲宗有
宣谕必告诸臣以听圣语及贬元佑故臣御史周秩劾
颂哲宗曰颂知君臣之义无轻议此老 【伏读通鉴辑览诸臣奏事皆取决太后帝有言
或无对者独苏颂一人为帝所重则司马光吕公着
诸臣皆有不得辞其咎者而异日亲政大反所为驯致于乱哲宗固失德然其所以致是
者亦有由来矣】 徽宗立进太子太保爵累赵郡公建
中靖国元年夏至自草遗表明日卒年八十二诏辍视朝二日赠司空颂器局阔远不与
人校短长以礼法自持虽贵奉养如寒士于书无所不
通尤明典故朝廷有所制作必就而正焉尝议学校欲博士分经课试诸生以行艺为升
俊之路议贡举欲先行实而后文艺去封弥誉录之法
使有司参考其素行之自州县始庶几复乡贡里选之遗范论者韪之

钦定续通志卷三百五十六

●钦定续通志卷三百五十七 列传一百五十七

列传

宋 【六十一】

○宋六十一

王存

孙固

赵瞻

傅尧俞

梁焘

王岩

叟

王存

孙固

赵瞻

傅尧俞

梁焘

王岩叟

△王存

王存字正仲润州丹阳人庆历六年登进士第调嘉兴主簿擢上虞令豪姓杀人州吏受赇弗问存至按之豪赂他官变其狱存反罢去久之除密州推官为欧阳修吕公着赵槩所知治平中入为国子监直讲迁秘书省著作佐郎历馆阁校勘集贤校理史馆检讨知太常礼院存故与王安石厚安石执政数引与论事不合即谢不往存在三馆历年不少贬以干进尝召见便殿累上书陈时政因及大臣无所附丽皆时人难言者元丰元年神宗察其忠实无党以为国史编修官修起居注时起居注虽日侍而奏事必禀中书俟旨存乞复唐贞观左右史执笔随宰相入殿故事神宗趣其言听直前奏事自存始也明年以右正言知制诰同修国史兼判太常寺论圜丘合祭天地为非古当亲祀北郊如周礼官制行神宗切于用人存请自熙宁以来羣臣缘论事得罪或诋误被斥而情实纳忠非大过者随材召擢以备官使语合神宗意收拔者甚众又言赦令出上恩而比岁议法治狱者多乞不以赦降原减官司禁谒本防请托而吊死问疾一切杜绝皆非便执政不悦五年迁龙图阁直学士知开封府进枢密直学士改兵部尚书转户部哲宗立永裕陵财费不踰时告备宰相乘闲复徙之兵部太仆寺请内外马事得专达毋隶驾部存言先帝正省台寺监之职使相临制不可徇有司自便而隳已成之法元佑初迁户部固辞不受二年拜中大夫尚书右丞三年迁左丞有建议罢教畿内保甲者存言今京师兵籍益削又废保甲不教非国家根本久长之计且先帝不憚艰难而为之既已就绪无故而废之不可门下侍郎韩维罢存言去一正人天下失望忠说沮气谗邪之人争进矣又论杜纯不当罢侍御史王覲不当罢谏官四方奏献大辟刑部援比请贷都省屡以无可矜恕却之存曰此祖宗制也有司欲生之而朝廷破例杀之可乎河决而北几十年水官议还故道存争之曰故道已高水性趋下徒费财力恐无成功卒辍其役蔡确以诗怨讪存与范纯仁欲薄其罪确再贬新州存亦罢以端明殿学士知蔡州存之徙兵部确力也至是为确罢士大夫善其能损怨岁余加资政殿学士知扬州召为吏部尚书时在廷朋党之论寢炽存为哲宗言人臣朋党诚不可长然或不察则滥及善人庆历中或指韩琦富弼范仲淹欧阳修为党赖仁宗圣明不为所惑今日果有进此说者愿陛下察之由是复与任事者戾除知大名

府改知杭州绍圣初请老提举崇禧观迁右正议大夫致仕旧制当得东宫保傅议者指存尝议还西夏侵地故杀其恩典既而降通议大夫【按东都事略载存降通议大夫复迁右正议大夫】归老筑居首营家庙建中靖国元年卒年七十九赠左银青光禄大夫存性宽厚平居恂恂不为诡譎之行至其所守确不可夺司马光尝曰并驰万马中能驻足者其王存乎

△孙固

孙固字和父郑州管城人幼有立志徂徕石介一见以公辅期之擢进士第调磁州司户参军从平贝州为文彦博言胁从罔治之义与彦博意协故但诛首恶余无所及转霍邑令迁秘书丞为审刑详议官宰相韩琦知其贤谕使来见固不肯往琦引为编修中书诸房文字治平中神宗为颍王以固侍讲及为皇太子又为侍读即位擢工部郎中天章阁待制知通进银台司种谔取绥州固知神宗志欲经略西夏欲先事以戒即上言待远人宜示之信今无名举兵非计之得愿以汉韩安国魏相唐魏征论兵之略参校同异则是非炳然矣大臣恶其说出知澶州迁知审刑院复领银台封驳兼侍读判少府监神宗问王安石可相否对曰安石文行甚高处侍从献纳之职可矣宰相自有其度安石狷狭少容必欲求贤相吕公着司马光韩维其人也凡四问皆以此对及安石当国更法度固数议事不合青苗法出又极陈其不便及韩琦疏至神宗感动谓固曰朕熟计之诚不便固出语执政曰及上有意宜亟图之以福天下既而竟从安石固复领银台司孔文仲以对制策忤时政报罢固言陛下以名求士而士以实应今反遏之何哉胡宗愈坐言事逐苏颂陈荐以论李定罢固皆引谊争之时议尊僖祖为始祖固议曰汉高以得天下与商周异故太上皇不得为始封光武中兴不敢祖春陵而祖高帝宋有天下传之万世太祖功也不当替其祀请以为始祖而为僖祖别立庙禘祫之日奉其祧主东向以伸其尊合所谓祖以孙尊孙以祖屈之意韩琦见而叹曰孙公此议足以不朽矣加龙图阁直学士知真定府辽人盗耕解子平地岁且久吏争弗能还固微得其要领折愧之正疆地二百里熙宁末以枢密直学士知开封府元丰初同知枢密院事时征安南建顺州其地瘴疠不堪守固请弃之内徙者二万户谍者告夏人幽其主神宗欲西讨固数言举兵易解祸难神宗曰夏有衅不取则为辽人所有不可失也固曰必不得已请声其罪薄伐之分裂其地使其酋长自守焉神宗笑曰此真酈生之说耳时执政有言便当直度河不可留行固曰然则孰为陛下任此者神宗曰朕已属李宪固曰伐国大事也岂可使宦官为之今陛下任李宪则士大夫孰肯为用乎神宗不悦他日固

又曰今五路进师而无大帅就使成功兵必为乱神宗曰大帅诚难其人吕公着曰既无其人曷若已之固曰公着言是也初议五路入讨会于灵州李宪由熙河入辄不赴灵州乃自开兰会欲以弭责固曰兵法期而后至者斩今诸路皆进而宪独不行虽得兰会罪不可赦神宗不听其后师果无功神宗曰朕始以孙固言为迂今悔无及改大中大夫枢密副使进知院事以疾避位拜观文殿学士知河阳寻提举嵩山崇禧宫哲宗即位以正议大夫知河南府徙郑州元佑二年召除侍读提举中太一宫遂拜门下侍郎固数乞骸骨太皇太后曰卿先帝在东宫时旧臣今帝新听政勉留辅导或体中未安取文书于家治之可也固感激强起视事复知枢密院事累官右光禄大夫五年卒年七十五赠开府仪同三司谥曰温靖固宅心诚粹不喜矫亢与人居久而益信故更历夷险而不为人所疾害尝曰人当以圣贤为师一节之士不足学也司马光退处固每劝神宗召归及光为陈州过郑固与论天下大事至数十曰公行且相宜视先后缓急审处之绍圣时夺遗泽元符二年夺所赠官列元佑党籍政和中徽宗以固尝为神宗宫僚特出籍悉还所夺

△赵瞻

赵瞻字大观其先亳州永城人父刚太子宾客徙凤翔之盩厔瞻举进士第调孟州司户参军移万泉令捐圭田修学宫士自远而至改知夏县作八监堂书古贤令长治迹以自监又以秘书丞知永昌县筑六堰灌田岁省科敛数十万水讼咸息升太常博士知威州瞻以威茂杂羣獠险而难守不若合之而建郡于文川条着其详为因山别录后熙宁中朝廷经理西南就瞻取其书考焉迁尚书屯田员外郎英宗治平初自都官员外郎除侍御史上疏曰英断独化人主至权也当主以天下之大公揆以天下之正论如是而后权可一也若夫积久之弊刑赏施设之失可革则革号令言动之过可止则止辅相赖其用宜责其效台谏知其才宜信其说兵柄宜削诸宦官边议宜付宿将英宗称善久之诏遣内侍王昭明等四人为陕西诸路钤辖招抚诸部瞻以唐用宦者为观军容宣慰等使后世以为至戒宜追还内侍责成守臣章三上言甚激切会文彦博孙沔经略西夏别遣冯京安抚诸路瞻又请罢京使专委宿将夏人入侵王官庆帅孙长卿不能御加长卿集贤院学士瞻言长卿当黜不宜赏赏罚倒置京东盗贼数起瞻请易置曹濮守臣之不才者未报乃求退力言追还昭明等英宗改容纳其言二年秋京师大水诏百官言事多留中瞻请悉出章疏付两省详择以闻从之时议追崇濮安懿王中书议安懿王称亲瞻争曰仁宗既下明诏于陛下议者顾惑礼律所生

所养之名妄相訾难彼明知礼无两父贰斩衰之义敢裂一字之词以乱厥真臣请与之廷辩已而皇太后手书尊王为皇瞻复力陈会假太常少卿接契丹贺正使入对英宗问前事瞻仍如初说及使还闻吕诲等谏濮议皆罢去乞与同贬不报遂通判汾州神宗即位迁司封员外郎知商州又除提点陕西刑狱熙宁三年为开封府判官神宗问卿知青苗法便乎对曰青苗法唐行之于季世扰攘中掊民财诚便今欲为长久计爱养百姓诚不便初王安石欲瞻助已使其党饵以知杂御史瞻不应由是不得留京师出为陕西转运副使改永兴军转运使以亲老请知同州七年朝廷患钱重议以交子权之命瞻制置瞻议不合移京西转运使又以亲老不行徙陕判请还乡里除提举凤翔太平宫丁外艰服除易朝请大夫知沧州哲宗立转朝议大夫召为太常少卿迁户部侍郎元佑三年擢枢密直学士签书枢密院事明年以中大夫同知院事因进对言机政所急人才而已今臣选武臣难遽尽知请诏诸路安抚转运使举使臣科别其才第为三等籍之以备选注都水王令图请还河故道下执政议瞻固争之卒诏罢役如瞻所议洮河诸族以青唐首领寢弱可制欲倚中国兵威以废之边臣亟请兴师瞻曰不可御外国以大信为本且既爵命之彼虽失众心无犯王略之罪何辞而伐之若其不克则兵端自此复起矣乃止瞻又奏废渠阳军以纾荆湖之力乞诏谕西夏使归永乐遗民夏人听命五年卒年七十二太皇太后语辅臣曰惜哉忠厚君子也赠银青光禄大夫谥曰懿简绍圣中言者以傅会元佑诸臣追夺所赠官列于党籍四子孝湛瀛州录事参军献诚唐城令一蚤卒彦诒太康主簿

△傅尧俞

傅尧俞字钦之本郢州须城人徙孟州济源登第犹未冠尝监西京税院事留守晏殊夏竦皆重之知新息县累迁太常博士嘉佑末为监察御史充国公主下嫁李玮为家监梁怀吉张承照所闲与夫不相协仁宗斥二人于外未几复还主家出玮知卫州尧俞言主恃爱薄其夫陛下为逐玮而还隶臣甚悖礼为四方笑后何以诲诸女乎皇城逻卒吴清诬奏富民杀人鞫治无状有司须清辨内侍主者不遣尧俞言陛下惜清恐不复闻外事矣臣以为不若使付外暴其是非而行赏罚焉则事之上闻者皆实乃所以广视听也内侍李允恭朱晦屈法任其子赵继宠越次管当天章阁蔡世宁掌内藏而以珠私示内人尧俞以为嬖宠恩幸过失当防之于渐悉劾之时乏国用言利者争献富国计尧俞奏曰今度支岁用不足诚不可忽然欲救其弊在陛下自俭刻身先天下无夺农时勿害商旅徒欲纷更为之无益聚敛者用天下殆矣仁宗春秋高皇

嗣未立尧俞请建宗室之贤以慰天下望及英宗为皇子有司阙供馈仁宗未知尧俞言陛下既以宗社之重建皇嗣宜以家人礼使皇子朝夕侍膳左右以通慈孝之诚今礼遇有阙非所以隆亲亲重国本也于是诏有司供具甚厚英宗即位转殿中侍御史迁起居舍人旺太后与英宗同听政英宗有疾既平尧俞上书皇太后请还政久之闻内侍任守忠有谗闲语尧俞谏皇太后曰外闲物论纷惑两宫之情未通如诛窜谗人则慈孝之声并隆矣于是皇太后还政逐守忠尧俞言于英宗曰皇太后给事左右之人宜颇录其勤劳少加恩惠上慰母后下安反侧且守忠已去其余不问可也迁右司谏同知谏院英宗初躬庶政犹谦让任大臣尧俞言大臣之言是陛下偶以为然而行之可也审其非矣从而徇之则人主之柄安在愿君臣之际是是非非毋相面从总览众议无所适莫则威柄归陛下矣尝因论事英宗曰卿何不言蔡襄对曰若襄有罪何不自正典刑安用臣言英宗曰欲使台谏言以公议出之对曰若付之公议臣但见襄有功不见其罪臣身为谏官使臣受旨言事臣不敢言近边熟户颇逃失诏以内侍李若愚等为陕西四路钤辖转运使使招纳岁一入奏事尧俞言此安抚经略使职也且若愚等陛下不信其言则如不用言必见从则边帅之权移于四人矣寻罢之大臣建言濮安懿王宜称皇考尧俞曰此于人情礼文皆大谬戾与侍御史吕诲同上十余疏其言极切主议者知恟恟不可遏遂易考称亲尧俞又言亲非父母而何亦不可又因水灾言简宗庙则水不润下今以濮王为皇考于仁宗之庙简孰甚焉俄命尧俞与赵瞻使契丹比还吕诲吕大防范纯仁皆以谏濮议罢复除尧俞侍御史知杂事尧俞求罢去英宗面留之尧俞言诲等已逐臣义不当止因再拜辞遂出知和州通判杨洙乘闲问曰公以直言斥居此何为未尝言及御史时事尧俞曰前日言职也岂得已哉今日为郡守当宣朝廷美意而反咕咕追言前日之阙政与诽谤何异神宗即位徙知庐州熙宁三年至京师王安石素与之善方行新法谓之曰举朝纷纷俟君来久矣将以待制谏院处君尧俞曰新法世以为不便诚如是当极论之平生未尝好欺敢以为告安石愠之但授直昭文馆权盐铁副使俄出为河北转运使改知江宁府徙许州河阳徐州再岁六移官困于道路知不为时所容请提举崇福宫先是徐人告有谈天文休咎者尧俞以事未白不受辞谈者后伏诛尧俞坐不即捕削官职稍起监黎阳县仓草场郡掾行县尧俞从众出迎尽礼守为遣他吏代主出纳尧俞不可曰居其官安得旷其职虽寒暑必日至庾中治事凡十年哲宗立自明知州召为秘书少监兼侍讲擢给事中吏部侍郎御史中

丞御史张舜民以言事罢诏尧俞更举御史尧俞封还诏书请留舜民不听即以尧俞为吏部侍郎尧俞不可遂以龙图阁待制知陈州未几复为吏部侍郎御史中丞前宰相蔡确坐诗诽谤贬新州宰执侍从以下罢者七八人御史府为之一空尧俞曰确之党其尤者固宜逐其余可以一切置之水官李伟议大河可从孙材导之还故道尧俞言比遣使按之皆言非便而伟又缪悠不肯任责岂可以遽兴大役朝廷遂置伟议进吏部尚书兼侍读元佑四年拜中书侍郎六年卒年六十八太皇太后语辅臣曰傅侍郎清直一节终始不变金玉君子也赠银青光禄大夫谥曰献简绍圣中以元佑党人夺赠谥著名党籍后党锢解下诏褒赠录其子尧俞厚重言寡遇人不设城府人自不忍欺论事君前略无回隐退与人言不复有矜异色从孙察见忠义传

△梁焘

梁焘字况之郢州须城人父蒨兵部员外郎直史馆焘以父任为太庙斋郎举进士第编校秘阁书籍迁集贤校理通判明州检详枢密五房文字元丰时久早上书论时政曰陛下日者闵政事之阙惕然自责丁卯发诏癸酉而雨是上天顾听陛下之德言而喜其有及民之意也民刻于新法嗷嗷如焦而京师尤甚闾閻细民罔不失职智愚相视日有大变之忧陛下既惠以诏旨又施之行事一日之闲欢声四起距诞节三日而膏泽降是天以雨寿陛下之万年感圣心于大寤有以遂其仁政也然法令乖戾为毒于民者所变纔能万一人心之不解故天意亦未释而雨不再施陛下亦以此为戒而夙夜应之乎今陛下之所知者市易事耳法之为害岂特此邪青苗之钱未及偿而责以免役免役之钱未暇入而重以淤田淤田方下而复有方田方田未息而迫以保甲是徒扰百姓使不得少休于圣泽虽一有言之者必以下主吏主吏妄报以无是则从而信之恬不复问虽闲遣使循行而苟且宠禄巧为妄诞成就其事至请遍行其法上下相隐习以成风臣谓天下之患不患祸乱之不可去患朋党蔽蒙之俗成使上不得闻所当闻故政日以敝而祸乱卒至也疏入不报内侍王中正将兵出强千赏不以法焘争之不得出知宣州入辞神宗曰王中正功赏文书何为独不可曰中正罔冒侥觊臣不敢屈法以负陛下未几提点京西刑狱哲宗立召为工部郎中【按东都事略载焘在神宗时已为工部郎中哲宗即位迁太常少卿与宋史本传异】迁太常少卿右谏议大夫有请宣仁后御文德殿服袞冕受册者焘率同列谏引辞奎谏章献明肃皇后不当以王服见太庙事宣仁后欣纳又论市易已废乞蠲中下户逋负又乞次青苗下户不得令保人备

偿文彦博议遣刘奉世使夏国御史张舜民论其不当遣降通判虢州焘言御史持纪纲之官得以犯颜正论况臣下遇失安得畏忌不言哉今御史敢言大臣者天下之公议大臣不快御史者一夫之私心罪天下敢言之公议便一夫不快之私心非公朝盛事也时同论者傅尧俞等七人悉召至都堂敕谕以事当权其轻重故不惜一新进御史以慰老臣焘又言若论年齿爵禄则老臣为重若论法度纲纪则老臣为轻御史者天子之法官也不可以大臣鞅鞅而斥去愿还舜民以正国体章十上不听焘又面责给事中张问不能驳还舜民制命以为失职坐诟同列出为集贤殿修撰知潞州辞不拜曰臣本论张舜民不当罢如以为非即应受斥今乃得以微罪冒美职守剧郡如此则朝廷命令不能明辨曲直矣不报至潞值岁饥不待命发常平粟振民明年以左谏议大夫召既至上书言帝富于春秋未专宸断太皇太后保佑圣主制政帘帷奸人易为欺蔽愿正纲纪明法度采用忠言讲求仁术两宫嘉纳焉前宰相蔡确作诗怨谤焘与刘安世交攻之确窜新州焘进御史中丞邓润甫除吏部尚书焘论润甫柔佞不正巧为取进不听改权户部尚书不拜以龙图阁直学士知郑州旬日入权礼部尚书为翰林学士元佑七年拜尚书右丞转左丞蔡京帅蜀焘曰元丰侍从可用者多惟京轻险贪愎不可用又与同列议夏国地界不能合遂丐去哲宗令密访人才焘曰人才可大任者陛下自知之但须识别邪正公天下之善恶图任旧人中坚正纯厚有人望者不牵左右好恶之言以移圣意天下幸甚以疾罢为资政殿学士同醴泉观使故事非宰相不除使遂置同使以宠之力辞改知颍昌府绍圣元年知郢州朋党论起哲宗曰梁焘每起中正之论其开陈排击尽出公议朕皆记之以故最后责竟以司马光党黜知鄂州三年再贬少府监分司南京又贬雷州别驾化州安置卒徙其子于昭州徽宗立始得归焘自立朝一以引援人物为意在鄂作荐士录具载姓名曰出入侍从致位执政八年之闲所荐用之不尽负愧多矣其好贤乐善如此

△王岩叟

王岩叟字彦霖大名清平人仁宗初置明经科岩叟十八乡举省试廷对皆第一调栾城簿涇州推官甫两月闻弟丧弃官归养熙宁中韩琦留守北京辟为属后知定州安喜县有法吏罢居乡里导人为讼岩叟捕捥于市众皆竦然定州守吕公着叹曰此古良吏也有诏近臣举御史举者意属岩叟而未及识或谓可以往见岩叟笑曰是所谓呈身御史也卒不见哲宗即位用刘摯荐为监察御史入台明日即上书论社稷

安危之计在从谏用贤不可以小利失民心遂言役钱敛法太重民力不胜愿复差法如嘉佑时【按张耒撰岩叟墓志岩叟初为御史所上书不及役钱东都事略载岩叟论役钱敛法太重乃在哲宗下诏求言后与宋史本传异】又言河北榷盐法尚行民受其弊河北天下根本自祖宗以来推此为惠愿复其旧江西盐法害民诏遣使者往视岩叟言一方病矣必待使还而后改为恐有不及被德泽而死者愿亟罢之又极陈时事以为不绝害本百姓无由乐生不屏羣邪太平终是难致时下诏求民疾苦四方争以其情赴愬所司惮于省录颇成壅滞岩叟言不问则已言则必行之不然天下之人必谓陛下以空言说之后有诏命孰肯取信李定不持所生母仇氏服岩叟论其不孝定遂责授少府少监分司南京宰相蔡确为裕陵复土使还朝以定策自居岩叟言陛下之立以子继父百王不易之道且太皇太后先定于中而确敢贪天自伐章惇谗贼狠戾罔上蔽明不忠之罪盖与确等近帘前争役法词气不逊无事上之礼今圣政不出房闼岂宜容此大奸犹在廊庙于是二人相继退斥迁左司谏兼权给事中时并命执政其闲有不协时望者岩叟即缴录黄上疏谏既而命不由门下省以出岩叟请对言之益切退就合上疏曰臣为谏官既当言承乏给事又当驳非臣好为高论喜忤大臣怨命令斜出尤损纪纲疏凡八上命竟寝又言三省胥吏月飧厚奉岁累优秩而朝廷每举一事辄计功论赏不知平日禄赐将焉用之望飭励大臣事为之制迁侍御史两省正言久阙岩叟上疏曰国朝仿近古之制谏臣纔至六员复虚而不除岂以为治道已清而无事于言邪人材难称不若虚其位邪二者皆非臣所望于今日也愿趣补其阙多进正人正人进小人自消矣诸路水灾朝廷行振贷户部限以灾伤过七分民户降四等始许之岩叟言中户以上盖亦艰食乞毋问分数等级皆得贷庶几王泽无闲以召至和矣坐张舜民事改起居舍人不拜以直集贤院知齐州明年复以起居舍人召尝侍迓英讲进读宝训至节费岩叟曰凡言节用非偶节一事便能有济当每事以节俭为意则积久累日国用自饶读仁宗知人事岩叟曰人主常欲虚心平意无所偏倚观事以理则事之是非人之邪正自然可见司马康讲洪范至义用三德哲宗曰止此三德为更有德岩叟闻之因上疏曰三德者人君之大本得之则治失之则乱不可须臾去者也夫明是非于朝廷之上判忠邪于多士之闲不以顺己而忘其恶不以逆己而遗其善私求不徇于所爱公议不迁于所憎竭诚尽节者任之勿贰罔上盗宠者弃之勿疑惜纪纲谨法度重典刑戒姑息此人主之正直也远声色之好绝盘游之乐勇于救天下之弊果

于断天下之疑邪说不能移非道不能说此人主刚德也居万乘之尊而不骄享四海之富而不溢聪明有余而处之若不足俊杰并用而求之如不及虚心以访道屈己以从谏惧若临渊怯若履薄此人主之柔德也三者足以尽天下之要在陛下力行何如耳岩叟日侍讲奏曰圣贤之学非造次可成须在积累积累之要在专与勤屏绝他好始可谓之专久而不倦始可谓之勤愿陛下特留圣意哲宗然之进权吏部侍郎天章阁待制枢密都承旨湖北诸蛮互出扰边无有宁岁岩叟请专以疆事委荆南唐义问遂自草檄文喻义问以朝廷方敦尚恩信勿为徼幸功赏之意后遂安辑初夏人来争兰州地界岩叟谓质孤胜如二堡自元佑讲和在兰州界内夏以为形胜膏腴之地力争之二堡若失则兰州熙河遂危形势之地岂可轻弃议遂止及后筑定远城皆岩叟之力拜中书舍人滕甫帅太原为走马承受所撼徙颍昌岩叟言进退帅臣理宜重慎今以小臣一言易之使后人畏惮不自保此风寔长非委任安边之福乃止复为枢密都承旨权知开封府旧以推判官二人分左右厅共治一事多为异同或累日不竟岩叟创立逐官分治之法都城羣偷聚大房每区容数十百人渊藪诡僻岩叟令掩捕撤毁随轻重决之根株一空岩叟尝谓天下积欠多名催免不一公私费扰乞随等第立多寡为催法朝廷乃定五年十科之令元佑六年拜枢密直学士签书院事入谢因言圣学当深辨邪正正人在朝则朝廷安邪人一进便有不安之象非谓一夫能然盖其类应之者众上下蔽蒙不觉养成祸胎耳又言自古君子小人无参用之理若君子与小人竞进则危亡之基也不可不察两宫深然之上清储祥宫成太皇太后谓辅臣曰此与皇帝皆出合中物营之岩叟曰陛下不烦公不劳民真盛德事然愿自今以土木为戒又以宫成将肆赦岩叟曰昔天禧中祥源成治平中醴泉成皆未尝赦古人有垂死谏君无赦者此可见赦无益于圣治也哲宗选后既定太皇太后曰帝得贤后有内助功岩叟对曰内助虽后事其正家须在皇帝圣人言正家而天下定当慎之于始退取历代后事可为法者类为中宫懿范上之宰相刘摯右丞苏辙以人言求避位岩叟曰元佑之初排斥奸邪缉熙圣治摯与辙之功居多愿深察谗毁之意重惜腹心之人无轻其去就两宫然之后摯竟为御史郑雍所击岩叟连上疏论救摯去位御史遂指为党罢为端明殿学士知郑州明年徙河阳卒赠左正议大夫绍圣初追贬雷州别驾司马光以其进谏无隐称之

钦定续通志卷三百五十七

●钦定续通志卷三百五十八 列传一百五十八

- 3618 -

列传

宋【六十二】

○宋六十二

郑雍

孙永

元绛

许将

邓润甫

林希

【旦】

蒋之奇

陆佃

吴居厚

温益

郑雍

孙永

元绛

许将

邓润甫

林希

蒋之奇

陆佃

吴居厚

温益

△郑雍

郑雍字公肃襄邑人进士甲科调兖州推官召试秘阁校理知太常礼院英宗之丧论宗室不当嫁娶通判峡州知池州复还太常礼院历开封府判官熙宁元丰闲更制变令士大夫多违己以求合雍独静默自守改嘉王岐王府记室参军宣仁后临政擢为起居郎进中书舍人邓润甫除翰林承旨雍当制制未出言者交章攻之换为侍读学士雍言二职皆天下清选以润甫之过薄不当革前命以为奸邪不当在经幄今中外咸谓朝廷姑以是塞言者如此则邪正何由可辨善恶何由可明非所以示信天下之道润甫仍为承旨周种乞以王安石配享神宗庙雍言安石持国政不能上副属任非先帝神明远而弗用则其所败坏可胜言哉今种以小臣辄肆横议愿正其罪从之使契丹还徙右谏议大夫言朝廷重内轻外选用牧伯以阔阔轻浅者充员不复为来日虑须自今稍积资望以渐试之吴中大饥方议振恤以民习欺诞敕本部科检家至户到雍言此令一布吏专科民而不救灾民皆死于饥今富有四海奈何谨圭撮之滥而轻比屋之死乎哲宗悟追止之迁御史中丞时二府禁谒加严雍叹曰旁招俊义列于庶位足不及公卿之门者犹当物色致之奈何设禁若是且二府皆天子所改容而礼貌之者乃复防闲其私如此乎于是援贾谊廉耻节行之说以谏诏弛其禁刑部谏囚宰执论杀之有司以为可

生不奉诏得罪雍言是固可罪然究其用心在外广好生之德耳若遽以为罪恶恐邻于嗜杀今使有司欲杀而朝廷生之犹恐仁恩德意不白于天下而况反是者哉哲宗嘉纳囚遂得生初邢恕以书抵宰相刘摯答曰有自爱以俟休复之语排岸司茹东济录书以示雍与殿中侍御史杨畏雍畏释其语曰俟休复者俟他日太后复辟也遂并以此事论摯威福自恣乞罢之以收主柄又论王岩叟先光庭梁焘等三十人皆为摯党以闭其援雍之攻摯人以为附左相吕大防也拜尚书右丞改左丞绍圣初黜元佑诸臣雍顿首自列哲宗明其亡他心谕使勿去二年始以资政殿学士知陈州徙北京留守初章惇以白帖贬谪元佑臣僚安焘争论不已哲宗疑之雍欲为自安计谓惇曰熙宁初王安石作相常用白帖行事惇大喜取其案牍怀之以白哲宗焘言不行【伏读通鉴辑览 御批贬谪臣僚乃不由奏拟则威权尽归于下国事不可问矣哲宗以王安石曾有故事遽释其疑殊不知安石创为白帖以便其专擅之私坏法实甚顾不惩作俑之失转视为令甲之垂遂使小人益肆行无忌】雍虽以此结惇然卒罢政坐元佑党夺职知郑州数日改成都府元符元年提举崇福宫归未至而卒年六十八政和中复资政殿学士

△孙永

孙永字曼叔赵郡人祖冲给事中【按东都事略冲任集贤院学士】永以祖荫为将作监主簿擢进士第调襄城尉宜城令至太常博士韩琦引为诸王府侍读神宗为颍王出新录韩非子畀宫僚雋定永曰非险薄刻核其书背六经之旨愿毋留意及为皇太子进舍人即位擢天章阁待制安抚陕西民景询外叛诏捕送其孥勿以赦原永言陛下新御极旷泽流行恶逆者犹得亏除今缘坐者弗宥非所以示信也厯河北陕西都转运使时边用不足以解盐市马别为一司外台不得与永奏盐马国之大计不可使主者专其柄加龙图阁直学士知秦州王韶建取熙河策永折之曰边陲方安静无故骚动恐变生不测会新筑刘家堡失利众请戮偏裨以塞责永曰居敌必争之地军孤援绝兵法所谓不得而守者也尤人以自免于我安乎竟用是降天章阁待制知和州以详定编敕知审官东院召还神宗问青苗助役之法于民便否对曰法诚善然强民出息输钱代徭不能无重敛之患若用以资经费非臣所知也时仓法峻密庾吏受百钱则黥为卒府史亦如之神宗又问此法既下吏尚为奸乎对曰强盗罪死犯者犹众况配隶邪使人畏法而不革心虽在府史臣亦不敢必其无犯也议复肉刑事永奏曰刻人肌肤深害仁政汉文帝所不忍陛下忍之乎遂不果行复龙图阁直学士知瀛州河决于贝瀛冀尤甚

民租以灾免者州县惧常平法征催如故永连章论止
神宗从之仍命发廩粟以振白沟巡检赵用以辽人渔界河擅引兵北渡荡其族帐辽以此数侵边永请正用罪以谢未报辽屯兵连营亘四十
里永谕之曰疆吏冒禁已真之狱矣今何为者故意解进枢密直学士知开封府时行市易抵当法贷民钱而为之期有不能偿而死者诏永及
韩维究实永奏言市算下逮锥刀为人患苦御史张琥劾之罢为提举中太一宫元丰中判军器监有司病皮革不给严隐匿之科永请听人以
所藏之善者售于官得货其余讦讼既息国用亦济出知太原 【按东都事略永为御史张琥劾罢降龙图阁直学士知颍州会赦始复旧职
知太原府与宋史本传异】 且行神宗访以时务永言近者造戎器倍常外闲谓将有事于征讨兵非轻用之物愿軫不戢自焚之戒入判将作
进端明殿学士病不能朝踰年起知陈州徙颍昌哲宗召拜工部尚书太皇太后下诏求言永陈保马保甲免役三事最敝愿一切罢去复修监
牧保伍差徭之法皆纳之元佑元年迁吏部尚书以疾改资政殿学士兼侍读提举中太一宫未拜而卒年六十八赠银青光禄大夫谥曰康简
永外和内劲议论常持平不求诡异事或悖于理虽遏以势亦不为屈未尝以矫亢形于色辞与人交终身无怨仇范纯仁苏颂皆称之为国器

△元绛

元绛字厚之钱塘人举进士第调江甯推官摄上元令治狱以明决称厯知通州海门县 【按东都事略作静海县考宋史地理志海门静海二县并属通州】 淮民多盗贩盐制置使建言满二十斤者皆坐徒绛曰海滨之人恃盐以为命非羣贩比也笞而纵之擢江西转运判官
知台州州大水冒城民庐荡析绛出库钱即其处作室数千区命人自占与期三岁偿费流者皆复业又甃其城因门为闸以御湍涨后人守其
法入为度支判官依智高叛岭南宿军邕州而岁漕不足绛以直集贤院为广东转运使建濒江水砦数十以待逋寇缮治十五处楼堞械器皆
备军食有余以功迁工部郎中厯两浙河北转运使召拜盐铁副使擢天章阁待制知福州龙图阁直学士徙广越荆南为翰林学士知开封府
拜三司使参知政事数请老神宗命其子耆寔校书崇文院慰留之会太学虞蕃讼博士受贿事连耆寔当下狱绛请上还原职禄而容耆寔即讯
于外从之罢知亳州入辞帝谓曰朕知卿一岁即召矣卿意欲陈诉乎绛谢罪愿得颍即以为颍州明年加资政殿学士知青州过都留提举中
太一宫又明年以太子少保致仕绛所至有威名而无特操少仆矩在翰林诏事王安石及其子弟时论鄙之卒年七十六赠太子少师谥曰章

简

△许将

许将字冲元福州闽人举进士第一签书昭庆军判官代还通判明州神宗召对除集贤校理同知礼院编修中书条例自太常丞当转博士超改左正言明日直舍人院又明日判流内铨皆神宗特命举朝荣之初选人调拟先南曹次考功综核无法吏得缘文为奸选者又不得诉长吏将奏罢南曹辟公舍以待来诉者士无留难进知制诰契丹以兵二十万压代州境遣使请代地岁聘之使不敢行以命将将八对曰臣备位侍从朝廷大议不容不知万一北人言及代州事不有以折之则伤国体遂命将诣枢密院阅文书及至北境契丹使萧禧馆客禧果以代州为问将随问随答禧惭不能对使还神宗善之以将知审官西院直学士院判尚书兵部时河北保甲陕西河东弓箭社闽楚枪仗手虽有名籍其多少与年月不均以致阅按无法将一切整摄之进翰林学士权知开封府会治太学虞蕃讼释诸生无罪者【按东都事略作释上舍生不实】蔡确舒亶因陷之黜知蕲州明年以龙图阁待制起知秦州改扬州又改郢州条奏八事以为兵之事有三曰禁兵曰厢兵曰民兵马之事有三曰养马曰市马曰牧马兵器之事有二曰缮作曰给用及西方用兵神宗遣近侍问兵马之数将立具上之明日访枢臣不能对也以龙图阁直学士知成都府元佑三年再为翰林学士四年拜尚书右丞将自以在先朝为侍从每讨熙丰旧章以闻中旨用王文郁姚兕领军执政复议用张利一张守约将始与执政同议复密疏利一不可用言者论其窥伺主意徇直卖友罢为资政殿学士知定州移扬州又移大名府绍圣初入为吏部尚书上疏乞依元丰诏定北郊夏至亲祀拜尚书左丞中书侍郎章惇为相与蔡卞同肆罗织贬谪元佑诸臣奏发司马光墓哲宗以问将对曰发人之墓非盛德事方党祸作或举汉唐诛戮故事帝复问将对曰三代固有之但祖宗以来未之有本朝治道所以远过汉唐者以未尝辄戮大臣也哲宗皆纳之将尝议正夏人罪以泾原近夏而地广谋帅尤难乞用章榘榘果有功崇宁元年进门下侍郎累官金紫光禄大夫抚定鄯廓州边臣欲举师渡河朝议难之将独谓外国不可以爽信而兵机有不可失既而已戒具愿遂从之未几捷书至将以复河湟功转特进凡居政地十年御史中丞朱谔谓将左顾右视见利则回幡然改图初无定论元佑闲尝为丞辖则尽更元丰之所守绍圣初复秉钧轴则阴匿元佑之所为逮至建中尚此冒居则绍圣之所为已皆非矣强颜今日亦复偷安则建中之所为亦随改焉遂以资政殿大学士知河

南府言者不已降资政殿学士知颖昌府移大名加观文殿学士奉国军节度使召为佑神观使卒年七十五赠开府仪同三司谥曰文定子份龙图阁学士

△邓润甫

邓润甫字温伯建昌人尝避高鲁王讳以字行后复旧名第进士为上饶尉武昌令熙宁中王安石以润甫为编修中书户房事除集贤校理直舍人院改知谏院知制诰同邓绾张琥治郑侠狱深致其文入冯京王安国丁讽王尧臣罪擢御史中丞李宪措置熙河边事润甫率其属周尹蔡承禧彭汝砺上书切谏其略云自唐开元以来用杨思勳鱼朝恩程元振吐突承璀为将有功则负势骄恣陵轹公卿无功则挫损国威为四国笑今陛下使宪将兵功之成否非臣等所能预料然使国史所书以中人将兵自陛下始后世沿袭故迹视以为常进用其徒握兵柄则天下之患将有不可胜言者矣不听又言兴利之臣议前代帝王陵寝许民请射耕垦而司农可之熙宁着令本禁樵采遇郊祀则敕吏致祭德意可谓远矣小人掎克不顾大体愿绌创议之人一切如熙宁之令从之迁翰林学士因论奏相州狱为蔡确所陷落职知抚州移杭州以龙图阁直学士知成都府召复翰林学士兼掌皇子阁笔记哲宗立进承旨修撰神宗实录以母丧终制为吏部尚书梁焘论其草蔡确制妄称有定策功乃以龙图阁学士知亳州阅岁复以承旨召数月除端明殿学士礼部尚书请郡得知蔡州移永兴军元佑末以兵部尚书召绍圣初哲宗亲政润甫首陈武王能广文王之声成王能嗣文武之道以开绍述之说遂拜尚书左丞卒年六十八赠开府仪同三司谥曰安惠

△林希

林希字子中福州人举进士调涇县主簿为馆阁校勘集贤校理神宗朝同知太常礼院皇后父丧太常议服浅素希奏礼后为父降服替今服浅素不经及遣使高丽希闻命惧形于色辞行神宗怒责监杭州楼店务岁余通判秀州复知太常礼院迁著作佐郎礼部郎中元丰六年诏修两朝宝训上之元佑初历秘书少监进中书舍人言者疏其行谊浮伪不足以玷从列以集贤殿修撰知苏州更宣湖润杭亳五州加天章阁待制绍圣初进宝文阁直学士知成都府过阙会哲宗亲政章惇用事使希典书命逞毒于元佑诸臣且许以为执政希亦以久不得志将甘心焉遂留复为中书舍人修神宗实录兼侍读时方推明绍述尽黜元佑羣臣希皆密豫其议自司马光吕公着大防刘摯苏轼辙等数十人之制皆希为之其丑诋至以老奸擅国之语阴斥宣仁读者无不愤叹一日希草制罢掷笔

于地曰坏了名节矣 【伏读通鉴辑览 御批唐

宋儒臣草制或溢美以市谀或丑诋以泄忿或且公受馈遗谓之润笔褒王言而辱国体莫此为甚如林希之肆行诬诋敢于阴斥宣仁则又小

人无忌惮之尤要之所以致此当时为人君者不能辞其责】 迁礼部吏部尚书翰林学士擢同枢密院始惇疑曾布在枢府闲已使希为贰以相伺察希日为布所诱且怨惇不引为执政遂叛惇会邢恕论希罪惇因并去之罢知亳州移杭州旋以端明殿学士知太原府徽宗立徙大名上河东边计三策朝廷以其词命丑正之罪夺职知扬州徙舒州卒年六十七追赠资政殿学士谥曰文节弟旦

林旦

林旦

旦第进士熙宁中由著作佐郎主管淮南常平擢太子中允监察御史里行居台五月以论李定事罢守故官外之签书淮南判官入为太常博士工部考功员外郎元佑元年拜殿中侍御史甫莅职即上疏曰广言路然后知得失达民情然后知利病窃见去岁五月诏求谏言士民争欲自献及详覲诏语名虽求谏实欲拒言约束丁宁使不得观望迎合犯令干誉终之必行黜罚以恐惧之于是人人知戒言将出而复止闻初诏乃蔡确章惇造端其词尽出于惇今二人既去其余党常怀丑正恶直之心愿深留宸虑以折邪谋遂论吕惠卿邓綰虽罢扬州犹莅小郡小郡之民奚罪焉乞投之散地以谢天下又言近弹王中正石得一等虽已薄责得一所任肘腋小人如翟勅之徒亦宜编削诏并降支郡营校又论崔台符贾种民舞文深酷之罪皆逐之出为淮南转运副使历右司郎中秘书少监太仆卿终河东转运使子肤坐上书入元佑党籍

△蒋之奇

蒋之奇字颖叔常州宜兴人以伯父枢密直学士堂荫得官擢进士第中春秋三传科至太常博士又举贤良方正试六论中选及对策英宗览而善之擢监察御史神宗立转殿中侍御史上谨始五事一曰进忠贤二曰退奸邪三曰纳谏诤四曰远近习五曰闭女谒初之奇为欧阳修所厚制科既黜乃诣修盛言濮议之善以得御史复惧不为众所容因修妻弟薛良孺得罪怨修诬修帷薄事遂劾修问状无实贬监道州酒税至州上表哀谢神宗怜其有母改监宣州酒税新法行为福建转运判官时诸道免役推行失平之奇约僦庸费随算钱高下均取之民以为便迁淮东转运副使岁饥民流之奇募使修水利以食流者历江西河北陕西副使之奇在陕西经赋入以给用度公私用足移淮南擢江淮荆

浙发运迁使元丰六年漕粟至京比常岁溢六百二十万石锡服三品请凿龟山左肘至洪泽为新河以避淮险自是无覆溺之患诏增二秩加直龙图阁迁发运使元佑初进天章阁待制知潭州刺史韩山等皆言之奇小人不足当斯选改集贤殿修撰知广州妖人岑深聚党二千人势张甚之奇遣钤辖杨从先致讨生擒之加宝文阁待制南海饶宝货为吏者多贪声之奇取前世牧守有清节者吴隐之宋璟等绘其象建十贤堂以祀冀变其习徙河北都转运使知瀛州辽使耶律迪道死所过郡守皆再拜致祭之奇莫而不拜入为户部侍郎未几复出知熙州夏人论和请画封境之奇揣其非诚心务守备谨斥候常若敌至终之奇去夏人不敢犯塞绍圣中召为中书舍人改知开封府进龙图阁直学士拜翰林学士兼侍读元符末邹浩以言事得罪之奇折简别之责守汝州徙庆州徽宗立复为翰林学士拜同知枢密院明年知院事沅州蛮扰边之奇请遣将讨之以其地为徽靖二州崇宁元年除观文殿学士知杭州以弃河湟事夺职由正议大夫降中大夫以疾告归提举灵仙观卒年七十四后录其尝陈绍述之言尽复官职之奇以治办称且孜孜以人物为己任特以畔欧阳修之故为清议所簿子阶至侍从曾孙芾别有传

△陆佃

陆佃字农师越州山阴人过金陵受经于王安石熙宁三年应举入京适安石当国首问新政佃曰法非不善但推行不能如初意还为扰民如青苗是也安石惊曰何为乃尔又访外议佃曰公乐闻善未所未有然外闲颇以为拒谏安石笑曰吾岂拒谏者但邪说营营顾无足听佃曰是乃所以致人言也廷试擢甲科授蔡州推官初置五路学选为郢州教授召补国子监直讲安石以佃不附己专付之经术不复咨以政安石子雱用事好进者坌集其门佃待之如常神宗问大丧袭衾佃考礼以对神宗悦用为详定郊庙礼文官每有所议神宗辄曰自王郑以来言礼未有如佃者加集贤校理崇政殿说书进讲周官神宗称善始命先一夕进藁同修起居注元丰定官制擢中书舍人给事中哲宗立太常请复太庙牙盘食佃言太庙用先王之礼于用俎豆为称景灵官原庙用时王之礼于用牙盘为称不可易也卒从佃议迁吏部侍郎以修撰神宗实录徙礼部数与史官范祖禹黄庭坚争辨大要多是安石为之晦隐庭坚曰如公言盖佞史也佃曰尽用君意岂非谤书乎 【伏读通鉴辑览 御批实录纪一朝政治自应据事实书以昭传信即片辞只字不容任意增省重修已不可为典要况朝臣各持私见谤书佞史争辨纷纷尚复成何体制】 进权礼部尚书郑雍论其穿凿附会改龙图阁待制知颍州实录成

加直学士又为韩川先光庭所议诏止增秩徙知邓州未几知江甯府绍圣初治实录罪落职知秦州改海州复集贤殿修撰移知蔡州徽宗即位召为礼部侍郎上疏曰人君践祚要在正始正始之道本于朝廷近时学士大夫以善求事为精神以能讦人为风采以忠厚为重迟以静退为卑弱相帅成风莫之或止正而救之实在今日神宗延登真儒立法制治而元佑之际悉肆纷更绍圣以来又皆称颂夫善续前人者不必因所为否者更之善者扬焉元佑纷更是知更之而不知扬之之罪也绍圣称颂是知扬之而不知更之之过也愿咨谋人贤询考政事惟其当之为贵遂命修哲宗实录迁吏部尚书聘于辽徽宗欲亲祀北郊大臣以为盛暑不可徽宗意甚确朝退皆曰上不以为劳当遂行之李清臣不以为然佃曰元丰非合祭而是北郊公之议也今反以为不可耶清臣乃止御史中丞赵挺之以论事不当罚金佃曰中丞不可罚罚则不可为中丞佃执政与曾布比而持论多能近恕每欲参用元佑人才尤恶奔竞尝曰天下多事须不次用人苟安甯时人之才无大相远当以资历序进少缓之则士知自重矣又曰今天下之势如人大病向愈当以药饵辅养之须其安平苟为轻事改作是使之骑射也转左丞御史论吕希纯刘安世复职太骤请加镌抑且欲更惩元佑余党佃言不宜穷治乃下诏申谕揭之朝堂谗者用是诋佃曰佃名在党籍不欲穷治正恐自及耳遂罢为中大夫知亳州卒年六十一追复资政殿学士

△吴居厚

吴居厚字敦老洪州人第嘉佑进士熙甯初为武安节度推官奉行新法尽力核闲田以均给梅山徭计劳得大理丞转补司农属元丰闲提举河北常平增损役法五十一条赐银绯为京东转运判官升副使天子方兴盐铁居厚精心计笼络钩稽收羨息钱数百万即莱芜利国二冶官自铸钱岁得十万缗诏褒揭其能擢天章阁待制都转运使盐法搜剔无遗居厚起州县凡流无阙阅勋旧徒以言利得幸不数岁至侍从又请以盐息买绢资河东直发大铁钱二十万贯佐陕西军兴且募民养保马当时商功利之臣所在成聚居厚最为掎克元佑初以言者论其罪责成州团练副使安置黄州章惇用事起为江淮发运使疏支家河通漕楚海闲赖其利召拜户部侍郎迁尚书以龙图阁学士知开封府为永泰陵桥道顿递使坐积雨留滞罢知和州崇甯初复尹开封拜尚书右丞进中书门下侍郎以老避位为资政殿学士东太一宫使出为亳州洪州徙太原过阙留使佑神观复还政府还知枢密院政和三年以武甯军节度使知洪州卒赠开府仪同三司

△温益

温益字禹弼泉州人第进士历太宗正丞利州路湖南转运判官工部员外郎绍圣中由诸王府记室出知福州徙潭州邹浩南还过潭暮投宿村寺益即遣州都监将数卒夜出城逼使登舟竟凌风绝江而去他逐臣在其境内若范纯仁刘奉世韩川吕希纯吕陶率为所侵困用事者悦之徽宗以藩邸恩召为太常少卿迁给事中兼侍读陈瓘指言其过谓不宜列侍从处经帷不报改龙图阁待制知开封府犹兼侍读迁吏部尚书建中靖国元年拜尚书左丞【按宋史宰辅表作右丞盖陆佃于是年十一月转左丞益因得拜尚书右丞也】邓洵武献爱莫助之图帝初付曾布布辞改付益益阿附二蔡以为宜相蔡京时人恶之布与京争事帝前辞颇厉益叱曰曾布安得无礼帝不乐布由是得罪而京遂为相进益中书侍郎益在官无片善可纪至其狡谲傅合盖天稟然踰年卒年六十六子万石至尚书

钦定续通志卷三百五十八

●钦定续通志卷三百五十九 列传一百五十九

列传

宋【六十三】

○宋六十三

孙觉【览】	李常	李周	鲜于侁	顾临	李之
纯【之仪】	王觐【俊义】	马默			
刘安世	邹浩【田昼王回曾诞】	陈瓘	任伯雨		

孙觉

李常

李周

鲜于侁

顾临

李之纯

王觐

马默

刘安世

邹浩

陈瓘

任伯雨

△孙觉

孙觉字莘老高邮人甫冠从胡瑗受学登进士第调合肥主簿岁旱州课民捕蝗输之官觉言民方艰食难督以威若以米易之必尽力是为除害而享利也守悦推其说下之他县嘉佑中择名士编校昭文书籍觉首预选进馆阁校勘神宗即位直集贤院为昌王记室王问终身之戒为陈诸侯之孝作富贵二箴迁右正言神宗将大革积弊觉言弊政固不可不革革而当其悔乃亡神宗称其知理尝从容语及知人之难觉曰尧以知人为难终享其易盖知人之要在于知言人主用臣之道任贤使能而已功用之士可以处外而不可以处内可以责之事而不可责之言陛下欲兴太平之治而所擢数十人者多有口才而无实行臣恐贤人日远其为患祸尚可言哉愿观诗书之所任使无速于小利近功则王道可成矣邵亢在枢府无所建明神宗语觉欲出之用陈升以之代觉退即奏疏如所言神宗以为希旨通判越州复右正言徙知通州熙宁二年诏知谏院同修起居注知审官院王安石早与觉善骤引用之将援以为助时吕惠卿用事神宗询于觉对曰惠卿辨而有才特以为利之故屈身于安石安石不悟臣窃以为忧神宗曰朕亦疑之其后王吕果交恶青苗法行首议者谓周官泉府民之贷者至输息二十而五国事之财用取具焉觉条奏其妄曰成周賒贷特以备民之缓急不可徒与也故以国服为之息然国服之息说者不明郑康成释经乃引王莽计赢受息无过岁什一为据不应周公取息重于莽时况载师所任地漆林之征特重所以抑末作也今以农民乏绝将补耕助敛顾比末作而征之可乎国事取具盖谓泉府所领若市之不售货之滞于民用有买有予并賒贷之法而举之儆专取具于泉府则豕宰九赋将安用耶圣世宜讲求先王之法不当取疑文虚说以图治安石览之怒始有逐觉意会曾公亮言畿县散常平钱有追呼抑配之扰安石因请遣觉行视虚实觉既受命复奏辞不行且言如陈留一县前后晓示情愿请钱卒无一人至者以此见民实不愿与官中相交所有体量望赐寝罢遂以觉为反复出知广德军徙湖州松江堤没水为民患觉易以石高丈余长百里堤下化为良田徙庐州改右司谏以祖母丧求解官服除知苏州徙福州闽俗厚于婚丧其费无艺觉裁为中率减什伍连徙毫扬徐州知应天府八为太常少卿易秘书少监哲宗即位兼侍讲迁右谏议大夫时谏官御史论事有限毋得越职觉请申唐六典及天禧诏书凡发令造事之未便皆得奏陈论宰相蔡确韩缜进不以德确自讼有功无罪觉随所言折之确竟去缜白上迁觉给事中辞曰闲者执政畏人议己则迁官以饵之愿与缜俱罢踰月缜去进吏部侍郎领右选在选万五千员阙纔五之二至

有三年不得调者觉请自军功保甲进者补指使宗室祖免亲从员外置一曰得阙数千改主左选请磨勘岁以百人为限擢御史中丞以疾请罢除龙图阁学士兼侍讲提举醴泉观求舒州灵仙观以归卒年六十三绍圣中以觉为元佑党夺职追两官徽宗即位复官职弟览

孙览

孙览

览字傅师擢进士第知尉氏县有屯将遇下虐士卒谋因大阅杀之以叛览闻之驰往士犹羣语不顾览呼谕之曰将诚无状然天子何负汝辈乃欲致族灭耶皆感谢就列屯将徐至览命吏趋具奏众意遂安神宗壮其材以为司农主簿舒亶判寺且兼谏院欲引览自助览拒不答亶怒用帐籍违事劾之出提举利州湖南常平改京西转运判官入为右司员外郎荆湖开疆命往度其便览言沅州所招溪洞百三十宜从本郡随事要束勿建官置戍以为民困自诚州至融江口可通西广盐以省北道馈饷悉从之使还为河东河北转运副使加直龙图阁历知河中应天府江淮荆浙发运副使【按宋史本传作江淮发运使东都事略作江淮荆浙发运副使考文献通考庆历七年以后不置正使止设发运副使岁漕江湖粟六百万斛至绍兴八年始复置正使此系神宗年闲事据文献通考改】进宝文阁待制改知渭州夏人八边檄大将苗履御之履称疾移告立按正其罪窜诸房陵召知开封府至则拜户部侍郎与蔡京论役法不合以龙图阁直学士知太原夏人据横山并河为寨秦晋之路皆塞览谋复取葭芦阻险不得前夏人数万屯境上览下令吾兵少须满五万及西夏人闻而济师览不为动相持益久忽令具糗粮严兵械曰敌至矣居数日果大入览奋击败之遂城葭芦而还策勋加枢密直学士览虽立边功议论多触执政屡遭绌削历知河南永兴徙成都辞不行降为宝文阁待制卒年五十九

△李常

李常字公择南康建昌人擢进士第调江州判官宣州观察推官熙宁初为秘阁校理王安石与之善以为三司条例检详官改右正言知谏院安石立新法常疏言条例司始建已致中外之议至于均输青苗敛散取息傅会经义人且大骇安石见之遣所亲密谕意常不为止又言州县散常平钱实不出本勒民出息神宗诘安石安石请令常具官吏主名常以非谏官体落校理通判滑州岁余复职知鄂州徙湖齐二州历淮南西路提点刑狱元丰六年召为太常少卿迁礼部侍郎哲宗立改吏部进户部尚书或疑其少干才虑不胜任质于司马光光曰用常主邦

计则人知朝廷不急于征利聚敛少息矣诏百官转对常应诏上七事曰崇廉耻存乡举别守宰废贪赃审疑狱择儒师修役法时役法差免二科未定常谓法无新陈便民者良论无彼己可久者确今使民俱出资则贫者难办俱出力则富者难堪各从其愿则可久耳乃折衷条上之拜御史中丞兼侍读加龙图阁直学士论取士请分诗赋经义为两科以尽所长初河决小吴议者欲自孙村口导还故处【按秦观撰常行状作苏村口】及是役兴常言京东河北饥困不宜导河诏罢之谏官刘安世以吴处厚缴蔡确诗为谤讪因力攻确常上疏论以诗罪确非所以厚风俗安世并劾常徙兵部尚书辞不拜出知邓州徙成都行道卒年六十四【按宋史此下有孔文仲及弟武仲平仲传俱改入孔氏后传此从删】

△李周

李周字纯之冯翊人登主士第调长安尉岁饥官为粥以食饿者民坌集不可禁周设榷榷闲老少男女无一乱者转洪洞令县之南有涧支流溢入岁赋菑榷调徒遏之周始筑新堤民不告病改知云安县蠲盐井之征且百万通判施州州介羣獠不习服牛之利为辟田数千亩选谪戍知田者市牛使耕军食赖以足司马光将荐为御史欲使来见周曰司马公之贤吾固愿见但闻荐而往所谓呈身御史也卒不往神宗诏近臣举士孙固以周闻神宗召对谓曰知卿不游权门识今执政乎对曰不识也识司马光乎对曰不识也访御边之术曰四边手足尔若疲中国以勤远略致百姓穷困聚为盗贼惧成腹心之忧神宗颔之将以为御史执政意其异己请试以事除提点京西刑狱时方兴水利或请酺湍河为六渠以益钳卢陂水周曰湍河原高委下捍以堤犹患决溢若又导之必致为害乃疏言渠成未可必而费已不资盍姑凿其一而试之卒无功明年河溢邓城几没始思其议竟以直道罢判西京国子监慈圣后复土庀职陵下中贵人至者旁午次舍帘幕竞为华靡周曰臣子执丧不能寝苦枕块奈何又从而侈乎讫役山陵使第功载人人自言周独否哲宗立召为职方郎中朝廷议和西夏畀以侵地至欲弃兰州周曰陇右故为嘉勒氏所有为吾藩篱今嘉勒氏破灭若弃之必归夏人是尽得吐蕃之地非秦蜀之利也遂不果弃迁太常少卿进权工部侍郎旋以集贤院学士知邠州恩礼如待制徙凤翔河中府陝州提举崇福宫改集贤殿修撰卒年八十绍圣中追贬贺州别驾后复旧职周自为小官沈晦自匿未尝私谒执政辞向使三司欲辟为属及相见卒不敢言退而叹曰若人未易屈也以是不偶于世

△鲜于侁

鲜于侁字子骏阆州人举进士为江陵右司理参军庆历中天下旱诏求言侁推灾变所由兴又条当世之失有四其语剴切唐介称其名于上官交章论荐侁盛言李景阳高汝士之美乞移与之介益以为贤调黜令摄治婺源悉类屏迹通判绵州前吏徇贪成风至课卒伍供薪炭刍豆鬻果疏多取赢直侁一切弗取郡守以下效之赵抃荐于朝未及用从何郯辟签书永兴军判官万年令不任职系囚累百府使往治数日空其狱神宗诏求直言侁为蔡河拨发应诏陈十六事神宗爱其文又以范镇荐除利州路转运判官初王安石居金陵有重名士大夫期以为相侁恶其沽激要君语人曰是人若用必坏乱天下至是乃上书论时政曰可为忧患者一可为太息者二其它逆治体而召民怨者不可概举其意专指安石安石怒毁短之神宗曰侁文学可用有章奏在安石乃不敢言助役法行诏诸路各定所役缗钱利州转运使李瑜定四十万侁争之曰利州民贫地瘠半此可矣瑜不从各以其事闻神宗是侁议使颁诸路为式因黜瑜而升侁副使仍兼提举常平部民不请青苗钱安石遣吏廉按且诘之侁曰青苗之法愿取则与民自不愿岂能强之哉左藏库使周永懿守利州贪虐不法前使者莫敢问侁捕械于狱流之衡湘因请更以文臣为守并易班行领县事凡居部九年治所去阆中以姻戚旁午待之无所私各得其当苏轼称侁上不害法中不废亲下不伤民以为三难【按秦观撰侁行状云方新法初行诸路骚动而公平心处之乡人无异议者苏轼云云宋史本传止云侁待姻戚无所私各得其欢心附识】二税输绢绵侁奏听民以畸零纳直其役有李元辅者辄变而多取之父老流涕曰老运使之法何可改盖侁侄师中亦居是职故称老以别之徙京东西路河决澶渊议欲勿塞侁言东州汇泽惟两溲夏秋雨淫犹溢而害若纵大河注其中民为鱼矣作议河书上之神宗嘉纳后两路合为一以侁为转运使时王安石吕惠卿当路正人多不容侁曰吾有荐举之权而所列非贤耻也故凡所荐如刘摯李常苏轼苏辙刘攽范祖禹皆守道之士元丰二年召对命知扬州为举吏所累罢主管西京御史台哲宗立念东国困于役复以侁使京司马光言于朝曰以侁之贤不宜使居外顾齐鲁之区雕敝已甚须侁往救之安得如侁百辈布列天下乎士民闻其重临如见慈父母召为太常少卿侍从议神宗庙配享有欲用王安石吴充者侁曰先朝宰相之贤谁出富弼右乃用弼拜左谏议大夫侁见哲宗幼冲首言君子小人消长之理甚备又言制举诚取士之要国朝尤为得人王安石用事诋訾新政遂废其科今方搜罗俊贤

廓通言路宜复六科之旧又乞罢大理狱许两省谏官
相往来减特奏言举人严出官之法京东盐得通商复三路义勇以宽保甲罢戎泸保甲
以宽民力事多施行在职三月以疾求去除集贤殿修
撰知陈州诏满岁进待制卒年六十九后削职入元佑党籍 【按东都事略增】 侁刻
意经术为范镇孙复等所推许作诗平澹渊粹尤长于
楚辞苏轼读九诵谓近屈原宋玉自以为不可及也

△顾临

顾临字子敦会稽人通经学皇佑中举说书科为国子监直讲迁馆阁校勘同知礼
院熙宁初神宗以临喜论兵诏编武经要略且召临问
兵对曰兵以仁义为本动静之机安危所系不可轻也因条十事以献出权湖南转运判
官提举常平议事戾执政意罢归改同判武学进集贤
校理开封府推官请知颍州入为吏部郎中秘书少监以直龙图阁为河东转运使元佑
二年擢给事中朝廷方事回河拜临天章阁待制河东
都转运使于是翰林学士苏轼等言临资性方正学有根本慷慨中立无所回挠自处东
省封驳论议凜然有占人之风侥幸之流侧目畏惮宜
留寘左右以补阙遗别选深知河事者往使河者不报临至部请因河势回使东流复以
给事中召还历刑兵吏三部侍郎兼侍读为翰林学士
绍圣初以龙图阁学士知定州徙应天河南府中人梁惟简坐尝事宣仁太后得罪过洛
转运使郭茂恂徇时宰意劾临与之宴集夺职知歙州
又以附会党人斥饶州居住卒年七十二徽宗立追复之

△李之纯

李之纯字端伯沧州无棣人登进士第熙宁中为度支判官江西转运副使御史周
尹劾广西提点刑狱许彦先受鬯吏金命之纯往究其
端乃起于出婢之口以为羌俚之言不治彦先得免徙成都路转运使成都岁发官米六
千石损直与民言者谓惠民损上诏下其议之纯曰蜀
郡人恃此为生百年柰何一旦夺之事遂已秩满复留数岁始还朝神宗劳之白遐方不
欲数易大吏使剑外安靖年谷屡丰以彰朝廷绥远之
意汝知之乎以为右司郎中迁太仆卿元佑初加直龙图阁知沧州召为户部侍郎未至
改集贤殿修撰河北都转运使进宝文阁待制知瀛州
俄以直学士知成都府还为户部三迁御史中丞建言朝廷事下六部但随省吏视其前
后批以制缓急之序是为胥吏颺处命令也若大臣不
暇省宜令列曹长贰随其所承行止必禀而后决则吏不得舞权而下情达矣又言众贤
和于朝则万物和于野燮理阴阳辅相之职闲者国论
稍亏雍睦语言播传动系观望不可以不谨董敦逸黄庆基论苏轼托词命以毁先帝苏

辙以名器私所亲皆以监司罢之纯疏其诬罔乃更黜

之以疾改工部尚书绍圣中刘拯劾其阿附苏辙出知单州卒年七十五从弟之仪

李之仪

李之仪

之仪字端叔举进士从苏轼于定州幕府历枢密院编修官通判原州元符中监内
香药库御史石豫言其尝从苏轼辟不可以任京官诏

勒停徽宗初提举河东常平坐为范纯仁遗表及行状编管太平久之徙唐州终朝请大
夫之仪能为文尤工尺牍轼谓入刀笔三昧

△王觐

王觐字明叟泰州如皋人第进士熙宁中为编修三司令式删定官出为润州推官
二浙旱郡遣吏视苗伤承监司风旨不敢多除税觐受

檄覆按叹曰旱势如是民食已绝倒廩贍之犹惧不克济尚可责以赋邪尽除之监司怒
会朝廷遣使振贷觐为民言闲利病使者喜归荐之除

司农寺主簿转为丞拜命一日即求外韩绛高其节留检详三司会计绛出颍昌辟签书
判官坐免屏居累年起为太仆丞徙太常哲宗立吕公

着范纯仁荐其可大任擢右正言进司谏上疏言国家安危治乱系于大臣今执政八人
而奸邪居半使一二元老何以行其志哉因极论蔡确

章惇韩缜张璪朋邪害正章数十上相继斥去又劾窜吕惠卿朝论以大奸既黜虑人情
不安将下诏慰释之且戒止言者觐言舜罪四凶而天

下服孔子诛少正卯而鲁国治当是之时不闻人情不安亦不闻出命令以悦其党也盖
人君之所以御下者黜陟之柄而已陟一善而天下之

为善者劝黜一恶而天下之为恶者惧岂以为恶者惧而朝廷亦为之惧哉觐言虽切然
不能止也夏主新立有轻中国心觐曰小羌窥我厌兵

故桀骜若是然所当忧者不在今秋而在异日所当谨者不在边备而在庙谟翕张取予
之权必持重而后可洮东擒果庄槛至阙下觐曰老羌

虽就擒其子统众如故安可遽戮以贾怨宜处之洮岷秦雍闲以示含容好生之德又疏
将帅非其人者请易之茶盐之害民者请革之至逋债

振贍赋敛科须皆指陈其故差役法复行觐以为朝廷意在便民而议者遂谓免役法无
一事可用夫法无新旧惟善之从因采掇数十事于差

法有助可以通行者上之遂论青苗之害乞尽罢新令而复常平旧法曰聚敛之臣惟知
罔利自媒不顾后害以国家之尊而与民争锥刀之利

无以示天下又言刑罚世轻世重熙宁大臣谓刑罚不重则人无所惮令法令已行可以
适轻之时愿择质厚通练之士载加芟正于是置局编

汇俾觐预焉大抵皆用中典元佑敕是也神宗复唐制谏官分列两省至是大臣议徙之

外门而以其直舍为制敕院觐争之曰制敕院吏舍也
夺谏省以广吏舍信胥吏而疑诤臣何示不广也乃不果徙觐在言路欲深破朋党之说
朱光庭讦苏轼馆职策问吕陶辩其不然遂起洛蜀二
党之说觐言轼之辞不过失轻重之体尔若采考同异深究嫌疑则两岐遂分党论滋炽
夫学士命词失指其事尚小使士大夫有朋党之名大
患也帝深然之置不问寻改右司员外郎未几拜侍御史右谏议大夫以论尚书右丞胡
宗愈进君子无党论劾其不可执政出知润州 【伏
读通鉴辑览 御批王觐前论苏轼事言不当使士大夫有朋党之名持论甚正乃恶
胡宗愈进君子无党论因而劾之前后自相矛盾而范
纯仁既曰朝臣本无党又曰善恶邪正各以类分并录欧阳修朋党论以进则又为积习
所锢恬不为怪】 加直龙图阁知苏州州有狡吏善刺
守将意以挠权前守用是得讯讯觐穷其奸状置于法一郡肃然徙江淮发运使入拜刑
户二部侍郎与丰稷偕使辽绍圣初以宝文阁直学士
知成都府蜀地无闲田以葬觐索侵耕官地表为墓田江水贯城中为渠岁久湮塞积霖
潦而多水灾觐疏治复故民德之徙河阳贬少府少监
分司南京又贬鼎州团练副使徽宗即位还故职知永兴军过关留为工部侍郎迁御史
中丞改元诏下觐言建中之名重袭前代纪号非是宜
以德宗为戒时任事者多乖异不同觐言神宗作法于前子孙当守于后至于时异事殊
须损益者损益之于理固未为有失也当国者忿其言
遂改为翰林学士日食四月朔帝下诏责躬觐当制有惟德弗类未足以当天心之语宰
相去之乃力请外以龙图阁学士知润州徙海州罢主
管太平观遂安置临江军觐持正论始终再罹谴不少变卒年六十八绍兴初追复龙图
阁学士子俊义

王俊义

王俊义

俊义字尧明游学京师或荐之童贯欲厚聘之拒不答林灵素设讲席宝篆宫诏两
学选士问道车驾将临视推恩司成以俊义及曹伟应
诏俊义至讲所去御幄跣步内侍呼姓名俊义但望幄致敬不肯出次以太学上舍选奏
名徽宗亲程其文擢为第一及赐第望见容貌甚伟大
悦顾侍臣曰此朕所亲擢也真所谓俊义矣蔡京邀使来见俊义不往仅拜国子博士居
二年乃得改太学博士累迁右司员外郎为王黼所恶
以直秘阁知岳州卒俊义与李祁友善首建正论于宣和闲当是时诸公卿稍知分别善
恶邪正两人力也祁字肃远亦知名士官不显

△马默

马默字处厚单州成武人登进士第调临濮尉知须城县治平中张方平荐为监察御史里行遇事敢言时议尊崇濮安懿王台谏吕诲等力争以为不可悉出补外默请召还不报遂上言濮王生育圣躬人谁不知若称之为亲义无可据名之不正失莫大焉愿明诏寝罢以感召和气安七庙之神灵又言致治之要求贤为本仁宗以官人之权尽委辅相数十年闲贤而公者无几官之进也不由实绩今待制以上数倍祖宗之时至谋一帅臣则协于公议者十无三四庶僚之众不知几人一有难事则曰无人可使岂非不才者在上而贤不肖混淆乎愿陛下明目达聪务既其实厯试而超升之以幸天下刑部郎中张师颜提举诸司库务绳治不法众吏惧摇飞语谗去之默力陈其故以为将去积年之弊以兴太平必先官举其职宜崇奖师颜厉以忠勤则尸素括囊之徒知所劝矣西京会圣宫将创仁宗神御殿默言汉以诸帝所幸郡国立庙知礼者非之先帝未尝幸洛而创建庙祀实乖典则愿亟止此役以章清静奉先之意会地震河东陕西郡默以为阴盛虑为边患宜备之后数月西夏果来侵神宗即位以论欧阳修事通判怀州【按东都事略载默出通判怀州在神宗即位前据此则论欧阳修事乃濮议也】上疏陈十事一曰揽威权二曰察奸佞三曰近正人四曰明功罪五曰息大费六曰备凶年七曰崇俭素八曰久任使九曰择守宰十曰御边患除知登州沙门岛囚众官给粮者纔三百人每溢数则投诸海砦主李庆以二年杀七百人默责之曰人命至重胡不以乏粮告而颺杀之欲按其罪庆惧自缢死默为奏请更定配岛法凡二十条溢数而年深无过者移登州自是多全活者徙知曹州召为三司盐铁判官以默与富弼善且论新法不便出知济兖二州还提举三司帐司为神宗言用兵形势及指画河北山川道里应对如流神宗喜将用之大臣滋不悦以提点京东刑狱默性刚严疾恶部吏有望风投檄去者改广西转运使会安化等蛮岁饥内寇默上平蛮方略以疾求归知徐州属城利国监苦吴居厚之虐默皆革之召为司农少卿司马光为相欲尽修祖宗法问默以复乡差衙前法如何默曰不可如常平自汉为良法岂宜尽废去其害民者可也除河东转运使时议弃葭芦吴堡二砦默奏控扼险阻敌不可攻弃之不便由是二砦得不弃移兖州请褒录石介后诏官其孙东州荐饥流民大集所振活数万计入拜卫尉卿权工部侍郎转户部告老以宝文阁待制复知徐州改河北都转运使初元丰闲河决小吴因不复塞纵之北流元佑议臣以为东流便水官遂与之合默与同时监司上议以北流为便御史郭知章复请从东流于是作东西马头约水复故道为长堤壅河之

北流者劳费甚大明年复决而北竟不能使之东久之告老提举鸿庆宫绍圣时坐附司
马光落待制致仕元符三年复之卒年八十绍兴中赠
开府仪同三司加赠太保

△刘安世

刘安世字器之魏人父航第进士治邑有声历羣牧判官河南监牧使尝上御戎书
及新政不便者五条终太仆卿安世少时持论已有识
文彦博在枢府有所闻每呼安世告之安世从容言王介甫求去外议谓公且代其任彦
博曰安石坏天下至此之后人何可为安世拱手曰今
日新政果顺人所欲而为人利乎若不然公当去所害兴所利反掌闲耳登进士第不就
选从学于司马光咨尽心行己之要光教之以诚且令
自不妄语始调洛州司法参军司户以贪闻转运使吴守礼将按之问于安世安世云无
之既而心不自安曰司户实贪而吾不以诚对其违司
马公教乎后光入相荐为秘书省正字宣仁太后问可为台谏于吕公着公着以安世对
擢右正言时执政颇与亲戚官安世言祖宗以来大臣
子弟不敢受内外华要之职自王安石秉政务快私意累圣之制埽地不存今庙堂之上
犹习故态因历疏文彦博以下七人并请出臣章徧示
三省以戒将来章惇以强市昆山民田罚金安世言惇与蔡确黄履邢恕素相交结自谓
社稷之臣贪天之功徼幸异日天下之人指为四凶今
惇父尚在而别籍异财绝灭义理止从薄罚何以示惩会吴处厚上确安州所为诗安世
谓其指斥乘輿犯大不敬与梁燾等极论之窜之新州
迁起居舍人兼左司谏进左谏议大夫有旨暂罢讲筵且闻宫中尤乳婢安世上疏谏曰
陛下富于春秋未纳后而亲女色愿太皇太后保佑圣
躬为宗庙社稷大计频御经帷仍引近臣与论前古治乱之要以益圣学无溺于所爱而
忘其可戒邓温伯为翰林承旨安世言其出入王吕党
中始终反复今之进用实系君子小人消长之机乞行免黜不报遂请外改中书舍人辞
不就以集贤殿修撰提举嵩山崇福宫召为宝文阁待
制枢密都承旨吕惠卿复光禄卿分司西京安世争以为不可不听出知成德军章惇用
事尤忌恶之黜知南安军累贬新州别驾安置英州同
文馆狱起蔡京乞诛灭安世等家帝不许徙梅州惇与蔡卞将必寘之死擢一土豪为转
运判官使杀之判官疾驰将至梅梅守遣客来劝安世
自为计安世色不动对客饮酒谈笑徐书数纸付其仆曰我即死依此行之判官未至二
十里呕血而毙危得免刘后正位中宫惇卞发前谏乳
婢事以为为后设时邹浩既贬诏应天少尹孙磬以槛车收二人赴京师行数驿而徽宗
即位赦至移衡州寻改鼎州后以集贤殿修撰知郢州

徙真定府曾布又忌之不使入朝蔡京既相连七谪至峡州羈管稍复承议郎宣和六年复待制中书舍人沈思封还【按宋实录安世传载安世于宣和六年复直龙图阁是沈思封还之后安世以复直龙图阁卒附识】明年卒年七十八安世仪状魁硕音吐如钟初除谏官未拜命入白母曰朝廷不以安世不肖使在言路傥居其官须明目张胆以身任责脱有触忤祸谴立至主上方以孝治天下若以老母辞当可免母曰不然吾闻谏官为天子诤臣汝父平生欲为之而弗得汝幸居此地当捐身以报国恩傥得罪流放无问远近吾当从汝所之于是受命在职累岁正色立朝扶持公道其面折廷争或帝盛怒则执简却立伺怒稍解复前抗辞旁侍者蓄缩悚汗目之曰殿上虎家居未尝有惰容其忠孝正直皆法司马光年既老而名望益重梁师成用事心服其贤求得小吏吴默尝趋走前后者使持书来啖以即大用默因劝为子孙计安世笑谢曰吾若为子孙计不至是矣吾欲为元佑全人见司马光于地下还其书不答

△邹浩

邹浩字志完常州晋陵人举进士第调扬州颍昌府教授吕公着范纯仁为守皆礼遇之元佑中上疏论事其略言人材不振无以成天下之务苏颂荐为太常博士来之邵论罢之后累岁哲宗亲擢为右正言有请以王安石三经义发题试举人者浩论其不可而止陕西奏边功中外皆贺浩言兵家之事未战则以决胜为难既胜则以持胜为难惟其时而已愿申敕将帅毋狃屡胜图惟厥终京东大水浩言频年水异继作虽盈虚之数所不可逃而消复之方尤宜致谨书曰惟先格王正厥事不以为数之当然此消复之实也章惇独相用事威虐震撼浩所言每触惇忌仍上章劾数其不忠侵上之罪未报而贤妃刘氏立浩言立后以配天子安得不审今为天下择母而所立乃贤妃一时公议莫不疑惑诚以国家自有仁祖故事不可不遵用之尔盖郭后与尚美人争宠仁祖既废后并斥美人所以示公也及立后则不选于妃嫔而卜于贵族以远嫌所以为天下万世法也陛下之废孟氏与郭后无以异果与贤妃争宠而致罪乎抑其不然也二者必居一于此矣孟氏罪废之初天下孰不疑立贤妃为后及读诏书有别选贤族之语又闻陛下临朝慨叹以为国家不幸至于宗景立妾怒而罪之于是天下始释然不疑今竟立之岂不上累圣德臣观白麻所言不过称其有子及引永平祥符事以为证若曰有子可以为后则永平贵人未尝有子也所以立者以德冠后宫故也祥符德妃亦未尝有子所以立者以锤英甲族故也又况贵人实马援之女德妃无废后之嫌迥与今日事体不同顷年冬妃从享景灵宫是

日雷变甚异今宣制之后霖雨飞雹自奏告天地宗庙以来阴淫不止上天之意岂不昭然望不以一时改命为难而以万世公议为可畏追停册礼如初诏行之帝谓此亦祖宗故事对曰祖宗大德可法者多矣陛下不之取而效其小疵臣恐后之责人无已者纷纷也帝变色犹不怒持其章踌躇四顾若有所思因付外明日章惺诋其狂妄乃削官羁管新州徽宗立召还复为右正言迁左司谏上疏言公议不可不恤独断不可不谨惟恤公议于独断未形之前谨独断于公议已闻之后则人君所以致治者又安有不善乎伏见朝廷之事颇异于即位之初相去半年遽已如是自今以往将如之何愿陛下深思之改起居舍人进中书舍人又言陛下善继神宗之志善述神宗之事孝德至矣尚有五朝圣政盛德愿稽考而继述之以扬七庙之光贻福万世迁兵吏二部侍郎以宝文阁待制知江甯府徙杭越二州【按宋实录邹浩传止云徙杭州不及越州考浩道乡集有改除越州谢表云曾未几日就更两州皆二浙之上游为一时之盛遇盖自杭徙越也】初浩还朝帝首及谏立后事奖叹再三询谏草安在对曰焚之矣退告陈瓘瓘曰祸其在此乎异时奸人妄出一箠则不可辨矣蔡京用事素忌浩乃使其党为伪疏言刘后杀卓氏而夺其子遂再责衡州别驾【伏读通鉴辑览御批当邹浩进疏时史明言出付于外既非留中秘事则应存在有司况元符崇甯首尾不及四年浩即焚草私家岂故牒遂无可考若奸人密行毁弃益宜穷究根柢乃伪草前陈不复检稽原奏羣小之敢于欺蔽亦徽宗暗昧有以致之】寻窜昭州五年始得归初浩除谏官恐贻亲忧欲固辞母张氏曰汝能报国无愧于公论吾顾何忧及浩两谪岭表母不易初意复直龙图阁瘴疾作危甚杨时过常往省之仅存余息犹眷眷以国事为问语不及私卒年五十二高宗即位诏曰浩在元符闲危言谏论朝野推仰复其待制又赠宝文阁直学士赐谥曰忠浩所与游田昼王回曾诞皆良士也

田昼

王回

曾诞

田昼

昼字承君阳翟人为校书郎调磁州录事参军知西河县有善政与邹浩以气节相激励元符中浩为谏官昼监京城门往见浩曰平生与君相许者何如今君为何官浩曰天下事固不胜言意欲待深相信而后发贵有益也昼然之既而报立后昼谓人曰志完不言可以绝交矣浩得罪昼迎诸涂浩出涕昼正色责曰使志完隐默官京师遇寒疾不汗五日死矣岂独岭

海之外能死人哉愿君毋以此举自满所当为者未止
此也浩茫然自失谢曰君之赠投厚矣建中靖国初入为大宗正丞曾布数罗致之不为
屈欲与提举常平官辞请知淮阳军岁大疫日挟医问
病者药之遇疾卒

王回

回字景深仙游人第进士调松滋令入为宗正寺簿与邹浩友善皇后刘氏立浩将
论之密告回回曰事宁有大于此者乎子虽有亲然移
孝为忠亦太夫人素志也浩南迁人莫敢顾回敛交游钱与治装往来经理且慰安其母
遯者以闻逮诣诏狱御史鞫之对曰实尝预议不敢欺
也因诵浩所上章凡二千言狱上除名停废徽宗立召还旧官擢监察御史及蔡京为相
夺之仍列名党籍

曾诞

诞公亮从孙也孟后之废诞三与浩书劝力请复后浩不报及浩以言南迁诞着玉山
主人对客问以讥之其略以浩于孟后之废当其时
力言感悟天子则无今日刘氏之事贻朝廷于过举即使得罪必不若是酷以贻老母之
忧若浩者虽不得为知几之士然百世之下顽夫廉懦
夫有立志尚不失为圣人之清也议者以比韩愈诤臣论云诞仕亦不显

△陈瓘

陈瓘字莹中南剑州沙县人举进士甲科调湖州掌书记签书越州判官蔡卞察其
贤每事加礼瓘测知其心术常欲远之屡引疾求归章
不得上檄掇通判明州章惇入相瓘从众道谒惇闻其名独邀与同载询当世之务瓘曰
请以所乘舟为喻偏重可行乎移左置右其偏一也天
子待公为政敢问将何先惇曰司马光奸邪所当先辨瓘曰公误矣此犹欲平舟势而移
左以置右果然将失天下之望惇厉色曰光不务纘述
先烈而大改成绪误国如此非奸邪而何瓘曰不察其心而疑其迹则不为无罪若指为
奸邪又复改作则误国益甚矣为今之计唯消朋党持
中道庶可以救弊意虽忤惇然亦惊异至都用为太学博士会蔡卞党辞昂林自官学省
议毁资治通鉴瓘因策士题引神宗所制序文以问昂
自意沮迁秘书省校书郎绍述之说盛瓘言尧舜禹皆以若稽古为训若者顺而行之稽
者考其当否必使合于民情所以成帝王之治天子之
孝与士大夫之孝不同帝意感悦执政闻而憾之出通判沧州知卫州徽宗即位召为右
正言迁左司谏瓘论识持平务存大体不以细故借口
未尝及人掩昧之过尝云人主托言者以耳目诚不当以浅近见闻惑其聪明惟极论蔡
卞章惇安惇邢恕之罪御史龚夬击蔡京朝廷将逐夬

瓘言绍圣以来七年五逐言者常安民等五人皆与京异议而去今又罢夫将若公道何遂草疏论京未及上时皇太后已归政瓘言外戚向宗良兄弟与侍从希宠之士交通使物议籍籍谓皇太后今犹预政由是罢监扬州粮料院瓘出都门缴四章劾京并明宣仁诬谤事改知无为军明年还为著作郎迁右司员外郎兼权给事中宰相曾布使客告以将即真瓘语子曰吾与丞相议事多不合今若此是欲以官爵相饵也乃投书于布论其尊私史而压宗庙缘边费而坏先政布大怒出知泰州 【按曾布专主绍述取王安石熙宁闲所著日录以为依据故瓘书自尊私史而压宗庙云云见东都事略瓘不为布所饵而力诋其奸慝最为大节所系宋史本传不为明着仅附见陆佃传中今为增纂】 崇宁中除名窜袁州累移郴州稍复宣德郎正汇在杭告蔡京有动摇东宫迹杭守蔡薨执送京师并逮瓘狱具正汇流海上瓘亦安置通州瓘尝着尊尧集谓绍圣史官专据王安石日录改修神宗实录变乱是非不可传信深明诬妄以正君臣之义编置台州宰相何执中徧令所过州出兵甲护送至台每十日一徙告且命凶人石慊知州事使胁取尊尧集因以杀瓘窘辱百端终不能害在台五年乃得复承事郎累移楚州瓘平生论京卞皆披摘其处心发露其情慝最所忌恨故得祸最酷不使一日少安宣和六年卒年六十五靖康初诏赠谏议大夫官其子正汇绍兴二十六年高宗谓辅臣曰陈瓘昔为谏官甚有说议所著尊尧集明君臣之大分合于易天尊地卑及春秋尊王之法宜特赐谥以表之谥曰忠肃

△任伯雨

任伯雨字德翁眉州眉山人父孜名与苏洵埒仕至光禄寺丞伯雨邃经术中进士第调施州清江主簿知雍邱县县多盗自是外户不闭使者上其状召为大宗正丞甫至擢右正言时徽宗初政纳用说论伯雨首击章惇言惇久窃朝柄迷国罔上毒流搢绅乘先帝变故仓卒辄逞异意不复有臣子之恭向使其计得行将置陛下与太皇后于何地若贷而不诛则天下大义不明大法不立矣臣闻北使言去年辽主方食闻中国黜惇放箸而起称善者再谓南朝错用此人北使又问何为只若是行遣以此观之莫不以为可杀也章八上贬惇雷州继论蔡卞六大罪语在卞传建中靖国改元曾布欲谓和元佑绍圣之人故以中为名伯雨言人才固不当分党与然自古未有君子小人杂然并进可以致治者盖君子易退小人难退二者并用终于君子尽去小人独留唐德宗坐此致播迁之祸建中乃其纪号不可以不戒时议者欲西北典郡专用武臣伯雨谓李林甫致禄山之乱者此也又论锺传王瞻在边生事失与国心宜弃湟鄯之

地以安边息民张耒黄庭坚晁补之欧阳棐刘唐老等
宜在朝廷又上书皇太后乞暴蔡京之恶召还陈瓘以全定策之勋时以正月朔旦有赤
气之异诣火星观以禳之伯雨疏言尝闻修德以弭灾
未有禳祈以销变洪范以五事配五行说者谓视之不明则有赤眚赤祥乞揽权纲以信
赏罚专威福以殊功罪使皇明赫赫事至必断则乖气
异象转为休祥矣又言比日内降寢多或恐矫传制命汉之鸿都卖爵唐之墨敕斜封此
近监也王觐除御史中丞仍兼史官伯雨谓史院宰相
监修今中丞为属非所以重风宪远嫌疑已而觐除翰林伯雨复论曰学士爵秩位序皆
在中丞上今觐为之是谏官论事非特朝廷不行适足
以为人迁官尔伯雨居谏省半岁所上一百八疏 【伏读通鉴辑览 御批任伯雨半
岁而上百八疏无论伤于躁妄即实有不能缄默之
势亦安得如许忠谋谏论而言之悉中时弊邪至于君子小人本由事后论定当其时谁
甘自居小人者乃不实指其行事若何而但以进贤退
佞空言辨诘不已徒见有党同伐异之害】 大臣畏其多言俾权给事中密谕以少默即
为真伯雨不听抗论愈力且将劾曾布布觉之徙为度
支员外郎寻知虢州崇宁二年以党事削籍编管通州为蔡卞所陷徙昌化复逮其仲子
申先赴狱妻适死于淮伯雨处之如常申先在狱锻炼
无所傅致乃得释居海上三年而归宣和初以赦提点明道宫卒年七十三长子象先登
世科又中词学兼茂举有司启封见为党人子不奏名
调秦州户曹掾闻父谪弃官归养终身不复仕申先以布衣特起至中书舍人绍兴初诏
赠伯雨直龙图阁又加谏议大夫采其谏章追贬章惇
蔡卞邢恕黄履明着诬宣仁事以告天下淳熙中赐谥忠敏

钦定续通志卷三百五十九

●钦定续通志卷三百六十 列传一百六十

列传

宋 【六十四】

○宋六十四

陈次升 陈师锡 彭汝砺【汝方】 吕陶 张庭坚

龚夬 孙谔 陈轩 江公望

陈佑 常安民

陈次升

陈师锡

彭汝砺

吕陶

张庭坚

龚夬

孙谔

陈轩

江公望

陈佑

常安民

△陈次升

陈次升字当时兴化仙游人入太学时学官始得王安石字说招诸生训之次升作而曰丞相岂秦学邪美商鞅之能行仁政而为李斯解事非秦学而何坐屏斥既而第进士知安邱县御史中丞黄履荐为监察御史哲宗立使察访江湖先是蹇周辅父子经画江右盐法为民害次升举劾之还言额外上供之数未除异日必有非法之敛愿从熙宁以来勅行封桩名钱悉赐豁免又役法未定人情荧惑乞速定差雇及均数之等先为之节而审行之提点淮南河东刑狱绍圣中复为御史转殿中论章惇蔡卞植党为奸乞收还威福之柄禁中火彗出西方次升请修德求言以弭天变掖庭鞫厌魅狱次升言事关中宫宜付外参治今属于阉寺之手万一有冤滥貽后世讥济阳郡王宗景请以妾为妻论其以宗藩废礼为圣朝累初惇卞以次升在元佑闲外迁意其不能无怨望卞又与同乡里故延置宪府欲使出力为助挤排众贤而一无所附时方编元佑章疏毒流搢绅次升言陛下初即位首下诏令导人使谏亲政以来又揭敕榜许其自新今若考一言之失致于谴累则前之诏令适所以误天下后之敕榜适所以诳天下非所以示大信也又论卞客周穉贪鄙郑居中儉佞由是惇卞交恶之使所善太府少卿林颜致己意尝以美官次升曰吾知守官而已君为天子卿士而为宰相传风旨邪惇下益不乐乘闲白为河北转运使帝曰漕臣易得耳次升敢言不当去更进左司谏宣仁有追废之议次升密言先太后保佑圣躬始终无闲愿勿听小人销骨之谤帝曰卿安所闻对曰臣职许风闻陛下毋诘其所从来吕升卿察访广南次升言陛下无杀流人之意而升卿资性惨刻喜求人过今使逞志释憾则亦何所不至乃止不遣次升累章劾章惇皆留中乞不克去蔡卞诬其毁先烈拟谪监全州酒税帝为改南安军徽宗立召为侍御史极论惇卞曾布蔡京之恶窜惇于雷居卞于池出京于江宁迁右谏议大夫献体道稽古修身仁民崇俭节用六事言多规切崇宁初以宝文阁待制

知颖昌府降集贤殿修撰继以党籍落职除名徙建昌
编管循州皆以论京卞故致和中用赦恩复旧职卒年七十六

△陈师锡

陈师锡字伯修建州建阳人熙宁中游太学有俊声廷论奏名擢为第三调昭庆军掌书记郡守苏轼器之倚以为政轼得罪捕诣台狱亲朋多畏避不相见师锡独出钱之又安辑其家知临安县为监察御史上言宋兴享国长久号称太平者莫如仁宗窃考致治之本不过延直言御羣下进善退邪而已故能成庆历嘉佑之治愿稽皇祖纳谏御臣之意以兴治功帝善其言时诏进士习律师锡言陛下方大阐敷校用经术训迪士类不应以刑名之学乱之出知宿迁县元佑中以苏轼荐入为秘书省校书郎迁工部员外郎加秘阁校理提点开封县镇建言铨法今请托者溢数而寒峻有不足之患请为之限约畿内将官苛惨失士心方大阅羣卒哗噪将吏莫知所为师锡驰至军推首恶者致诸法按阅如初而劾斥其将县人叹服枢密院犹以事不先白为罪罢知解州历考功员外郎知宣州苏州徽宗立召拜殿中侍御史疏言元丰之末中外汹汹宣仁圣后再安天下委国而治者司马光吕公着尔章惇诬其包藏祸心至于追贬赠谥未还墓碑未复愿早摅宸略以慰中外之望蔡京为翰林学士【按宋史蔡京传作为翰林学士承旨】师锡言京与弟卞同恶迷国误朝而京好大喜功锐于改作日夜交结内侍戚里以觊大用若果用之天下治乱自是而分祖宗基业自是而隳矣京援引死党至数百人邓洵武内行污恶搢绅不齿岂可滓秽史笔向宗回宗良亦阴为京助是皆国之深患宜出之于外帝曰此于东朝有碍卿为我处之对曰审尔臣当具白太后遂上封事言蔡京阴通二向妄言宫禁预政以诬圣德不可不察诏索秘阁图画师锡引以唐山水图代无逸为监俄改考功郎中师锡复抗章论蔡京于是出知颖庐滑三州坐党论监衡州酒又削官置郴州卒年六十九绍圣中赠直龙图阁

△彭汝砺

彭汝砺字器资饶州鄱阳人治平二年举进士第一历保信军推官武安军掌书记彰州军事推官补国子直讲改大理寺丞擢太子中允御史中丞邓綰将举为御史召之不往既上章复以失举自列神宗怒逐綰用汝砺为监察御史里行首陈十事一正己二任人三守令四理财五养民六振救七兴事八变法九青苗十盐事指摘利害多人所难言者又论吕嘉问市易聚敛非法当罢俞充谄中人王中正不当检正中书五房事神宗为罢充及中正与李宪主西师汝砺言不当以兵付中人因及汉唐祸乱之

事神宗不怛语折之汝砺拱立不动伺闲复言神宗为
改容宗室以女卖婚民闲汝砺言此虽疏属皆天家子孙愿更着婚法元丰初以馆阁校
勘为江西转运判官代还提点京西刑狱元佑二年超
为起居舍人时相问新旧之政对曰今所更取士及差役法行之而士民皆怨未见其可
踰年进中书舍人会知汉阳事吴处厚得蔡确实安州诗
上之傅会解释以为怨谤谏官交章请治之又造为危言以激怒宣仁后欲置之法汝砺
谓此罗织之渐数以白执政不能救遂上疏论列不听
得确实命封还除目辨论愈切遂落职知徐州加集贤殿修撰入权兵刑二部侍郎有狱
当贷执政以特旨杀之汝砺持不下执政怒罚其属汝
砺言制书有不便许奏论汝砺属又何罪遂自劾请去章四上诏免属罚徙汝砺礼部真
拜吏部侍郎进权吏部尚书言者谓尝附会刘摯以宝
文阁直学士知成都府未行章数上又降待制知江州至郡数月而病其遗表略云土地
已有余愿抚以仁财用非不饶愿节以礼佞人初若可
悦而其患在后忠言初若可恶而其利甚博至于恤河北流移察江南水旱凡数百言朝
廷方以枢密都承旨命之而已卒乃以告赐其家年五
十四弟汝霖汝方 【按宋史此下有汝砺弟汝霖附传汝霖阿附曾布无事迹足录今从
删】

彭汝方

彭汝方

汝方字宜老以汝砺荫为荥阳尉临城主簿宣和初通判衢州使者疏其治状擢知
州事方腊起睦之青溪与衢接境无兵可御众望风奔
溃汝方独与其僚段约介守孤城 【按东都事略作段处约】 三日而陷骂贼而死年
六十六超赠龙图阁直学士通议大夫谥曰忠毅官其
家七人

△吕陶

吕陶字符钩成都人中进士第调铜梁令有直政知太原寿阳县府帅唐介辟签书
判每告以立朝事君大节曰君廊庙人也以介荐应熙
宁制科时王安石用新法陶对策枚数其过大略谓陛下初即位愿不惑理财之说不闲
老成之谋不兴疆场之事及奏第神宗顾安石取卷读
读未半神色丧沮神宗谓其言有理司马光范镇见陶皆曰自安石用事吾辈言不复效
不意君及此平生闻望在兹一举矣安石怒陶虽入等
纔通判蜀州张商英为御史请废永康军下旁郡议陶以为不可及知彭州威茂夷入寇
陶潜具守备城门启闭如平时因以永康前议上于朝
军遂不废王中正为将所施悉谬盩陶奏召还之李杞蒲宗闵来榷茶西州骚动陶言川

蜀产茶自来敷卖以供衣食盖与解盐晋矾不同今立法太严取息太重遂使良民枉陷刑辟宗闵怒劾其沮败新法责监怀安商税起知广安军召为司门郎中元佑初擢殿中侍御史首劾蔡确韩缜张璪章惇安焘李清臣数人相继罢去时议行差役陶言郡县风俗异制民之贫富不均当以新旧二法裁量厥中会陶谒告归诏于本道定议陶考究精密民以为便还朝遂正两路转运使李琮蒲宗闵之罪【按李琮为梓州路转运使以括田强民辅税被劾语见琮传又按宋史食货志及文献通考俱言宗闵为都大提举茶事其职视转运使非即为转运使也本属两事陶盖以还朝并劾之】又奏十事皆利害切于蜀者苏轼策馆职为朱光庭所论陶言台谏当徇至公不可假借事权以报私隙议者皆谓轼尝戏薄程颐光庭乃其门人故为报怨恐朋党之弊自此起由是两置之迁陶左谏议出为梓州淮西成都路转运副使入拜右司郎中起居舍人大臣上殿有乞屏左右及史官者陶曰屏左右已不可况史官乎大臣奏事而史官不得闻是所言私也诏定为令迁中书舍人奉使契丹归乞修边备进给事中哲宗始亲政陶言太皇太后保佑圣躬陛下所深知尊而报之惟恐不尽然臣犹以无可疑为疑不必言而言万一有奸邪不正之谋上惑渊听此乃治乱安危之机不可不察俄以集贤院学士知陈州徙河阳潞州坐元佑党夺职再贬库部员外郎分司衡州居住徽宗立复集贤殿修撰知梓州致仕卒年七十七

△张庭坚

张庭坚字才叔广安军人进士高第调成都观察推官为太学春秋博士通判汉州入为枢密院编修文字坐折简别邹浩免徽宗召对除著作佐郎擢右正言时庭坚与邹浩龚夬江公望常安民任伯雨皆在谏列一时翕然称得人庭坚在职逾月数上封事其大要言世之论孝必曰绍复神考夫前后异宜法亦随变而欲纤悉必复然则将蔽于一偏久必有不便于民而招怨者司马光因时变革以便百姓人心所归陈瓘执议论诤士论所推乞尽复光赠典召还瓘言职又士大夫多以继志述事劝陛下者必有营私之人欲主其言以自售将假名继述而实自肆焉今远略之耗于内者弃不以为守则兵可息特旨之重于法者删不为例则刑可省近以青唐反叛弃鄯守湟既以鄯为可弃则区区之湟亦安足守臣谓并弃湟州便是时议者往往指斥元佑旧臣庭坚为帝言司马光吕公着之贤且曰陛下践阼以来合人心事甚众惟夫邪正殊未差别如光公着甄叙但用赦恩初未尝别其无罪也又荐苏轼苏辙可用颇忤旨曾布因称其所论不当出为京东转运使判官改知汝州又

送吏部任伯雨争之乞以庭坚章付外考其所言毋使言者为三省所胁李清臣从而挤之改通判陈州初蔡京守蜀庭坚在幕府及京还朝欲引以为己用先令乡人谕意庭坚不肯往京大恨后遂列诸党籍又坐尝谈瑶华非辜事编管虢州再徙鼎州象州久之复故官卒年五十七绍兴初诏赠直徽猷阁

△龚夬

龚夬字彦和瀛州人清介自守有重名进士第三签书河阳判官绍圣初擢监察御史以亲老求通判相州知洺州徽宗立召拜殿中侍御史抗疏言好恶未明则人迷所向今奸党既破必将早夜熟计广为身谋遽革面以求自文申邪说以拒正论称祸福以动朝廷托祖宗以胁人主巧事贵戚阴结左右变乱是非宜洞察忠邪行之以决若小不忍则害大政又言朝廷累下赦令洗涤元佑愆负被坐之人至于官职资荫多未给还愿申诏有司亟为施行以伸先帝宽仁之意时章惇蔡卞用事夬首论其恶大略以为昔日丁谓当国号为恣睢然不过陷一窥准及至于惇而天下之所谓贤者一日之闲布满岭海盖其立进不根之语文致悖逆之罪是以人人危惧莫能自保尚何俟而不正典刑哉凡惇所为皆卞发之望采之至公昭示谴黜又论蔡京治文及甫狱本以偿报私仇始则上诬宣仁终则归咎先帝必将族灭无辜以逞其欲臣料当时必有案牒章疏可以见其锻炼附会愿考证其实以正奸臣之罪 【按曾布尔日录载夬劾蔡京疏既上帝有夬所言皆曾布之语云云布与京平时互相倾轧本属小人情态夬则史称为正人所言自系公论岂肯为布授意击京李焘谓布所录皆假托撰造之词不足为据】 于是三人者皆去又上疏乞正元佑后册位号及元符后不当并立书报闻已而元佑后册再废言者论夬首尾建言诏削籍编管房州继徙象又徙化徒步适贬所逢赦令得归政和元年卒年五十五绍兴中赠直龙图阁再赠右谏议大夫官其后二人弟大壮少有重名夬以为畏友

△孙谔

孙谔字符忠睢阳人登进士第调哲信主簿选为国子直讲陷虞蕃狱免元佑初起为太常博士迁丞哲宗卜后太史惑阴阳拘忌之说谔上疏太皇太后言家人委巷之语不足以定大计愿断自圣虑出为利梓路转运判官召拜礼部员外郎左正言绍圣治元佑党谔言汉唐朋党之祸其监不远蹇序辰编类章疏谔又言朝廷当示信以静安天下请如前诏书一切勿问尝侍对论星文变咎愿修省消复罢幸西池及寝内降除授帝每患台谏乏人谔立疏可用者二十二人章惇恶其拂己出知广德军徙唐州

提点湖南刑狱徽宗立复为右司谏首论大臣邪正政事可废置因革者帝称其鲠直议者欲以羣臣封事付外详定谩言君不密则失臣是将速忠臣之祸不宜宣泄乃止迁左司谏俄以疾卒谩与彭汝砺以气节相尚及再入谏省不能旬月时论惜之

△陈轩

陈轩字符輿建州建阳人进士第二授平江军节度推官元佑中为礼部郎中徐王翊善再迁中书舍人上疏言祖宗旧制诸道帅守使者辞见之日并召对便殿非特可以周知利害亦可观阅人才今视朝数刻而退惟执政大臣得在帝所或经旬阅站台谏官乃得覲余皆无因而前殆非所谓广览兼听之道愿诏有司使如故事又言所在巡检招惰游恶少以隶工军习暴横为田野患请使以厢卒代皆从之高丽入贡轩伴客其使求市历代史策府元龟钞郑卫曲谱皆为上闻礼部尚书苏轼劾其失体以龙图阁待制知庐州徙杭州江甯颍昌府徽宗立为兵部侍郎兼侍读论监司守臣数易之弊愿稍久其任又言比更定役法欲以宽民力而有司生事急切苟营赢羨散青苗以抑兼并拯难困不当以散多予赏入侍经闱每劝帝以治贵清净愿法文景之恭俭加龙图阁直学士知成都府改杭州福州卒年八十四

△江公望

江公望字民表睦州人举进士建中靖国元年由太常博士拜左司谏时御史中丞赵挺之与户部尚书王古用赦恩理逋欠古多所蠲释挺之劾古倾天下之财以为私惠公望以为天子登极大赦将与天下更始故一切与民岂容古行私惠于其闲因疏言挺之与古论事每不相合怀不平之心有待而发俚语有之私事官讎此小人之所不为而挺之安为之岂忠臣乎又言自先帝有绍述之意辅政非其人以媚于己为同忠于君为异借威柄以快私隙天下骚然元佑人才皆出于熙甯元丰培养之余遭绍圣窜逐之后存者无几陛下改元诏旨亦称思建皇极端好恶以示人本中和而立政岂宜渝之内苑稍蓄珍禽奇兽公望力言非初政所宜帝为刻公望姓名于杖头以职其谏蔡王似府史以语言疑似成狱公望极言论救【按宋史宗室传蔡王似徽宗弟也府史语言指斥公望恐及王故疏中有勿以无根之言加诸至亲云云本传所载于事未甚明晰附识】出知淮扬军召为左司员外郎以直龙图阁知寿州蔡京为政坐党籍编管南安军遇赦还卒建炎中与陈瓘同赠右谏议大夫

△陈佑

陈佑字纯益仙并人第进士元符末以吏部员外郎拜右正言上疏徽宗曰有旨令臣与任伯雨论韩忠彦援引元佑臣僚事按贾易岑象求丰稷张耒黄庭坚龚原晁补之刘唐老李昭玘人才均可用今若分别党类天下之人必且妄意陛下逐去元佑之臣复兴绍圣政事今绍圣人才比肩于朝一切不问元佑之人数十辄攻击不已是朝廷之上公然立党也迁右司谏言林希绍圣初掌书命草吕大防刘摯苏辙梁燾等制皆务求合章惇之意顷褫其职自大名移扬州忿躁不平谢章慢上不敬又论章惇蔡京蔡卞郝随邓洵武忤旨通判滁州卞乞贬伯雨等佑在数中编管澧州徙归州复承议郎卒

△常安民

常安民字希古邛州人年十四入太学熙宁以经取士学者翕然宗王氏安民独不为变安石欲见之不肯往登六年进士举授应天府军巡判官选成都府教授与安惇为同僚惇深刻奸诈尝偕谒府帅辄毁素所厚善者安民规之惇曰吾心实恶之姑以为面交尔安民曰君所谓匿怨而友其人惇笑曰直道还君富贵输我后惇贵遂陷安民秩满寓京师安民与蔡确为娅亲确时为相恶其人绝不相闻调知长洲县以主信为治人不忍欺盗为之息追科不下吏使民自输先他邑以办邑民颂其政元佑初廷臣交章论荐擢大理鸿胪丞是时元丰用事之臣虽去朝廷然其党分布中外起私说以摇时政安民贻书吕公着曰善观天下之势犹良医之视疾今虽登进忠良而不能援致海内之英才使皆萃于朝以胜小人恐端人正士未得安枕而卧也历引陈蕃窦武张柬之五王前世已然之祸谓怨忿已积一发害大及章惇作相其言遂验历太常博士转为丞与朱光庭论不合出为江西转运判官改宗正丞除开封府推官绍圣初召对为哲宗言愿奖进廉洁有守之士以厉风俗元佑进言者以熙丰为非今之进言者反是皆为偏论愿公听并观择其中而归于当拜监察御史论章惇颺国植党乞收主柄而抑其相惇遣所亲信语之曰少安静当以左右相处安民正色斥之惇益怒中官裴彦臣建慈云院户部尚书蔡京深结之强毁人居室诉于朝诏御史劾治安民言中官豪横与侍从官相交结同为欺罔愿重为降责以肃百官狱具惇主之甚力止罚金安民因论京奸定以惑众辩足以饰非巧足以移夺人主之视听力足以颠倒天下之是非内结中官外连朝士一不附己则诬以党于元佑非先帝法必挤之而后已今在朝之臣京党过半不可不逐去之他日羽翼成就悔无及矣又言张商英在元佑时上吕公着诗求进谏佞无耻近乞毁司马光及公着神道碑周秩为博士亲定光谥

为文正近乃乞斲棺鞭尸陛下察此辈之言果出于公论乎章疏前后至数十百上度终不能回遂丐外大飨明堂刘贤妃从侍斋宫安民以为万众观瞻亏损圣德语颇切直帝微怒曾布始以安民数撼章惇意其附己屡称之于朝其后并论曾布亦恨于是与惇比而排之乃取其所贻吕公著书文致其罪董敦逸再为御史欲劾苏轼兄弟安民谓二苏负重望恐不当尔至是敦逸并论之谪监滁州酒税满三岁通判温州【按东都事略作安民通判郟州又载于提点永兴军路刑狱后与宋史本传互异】徽宗即位朝论欲起为谏官曾布沮之以提点永兴军路刑狱蔡京用事入党籍流落二十年政和末卒年七十建炎四年赠右谏议大夫同为御史中丞自有传

钦定续通志卷三百六十

●钦定续通志卷三百六十一 列传一百六十一

列传

宋【六十五】

○宋六十五

孙馨	吴时	李昭玘	黄廉	朱服	张舜民
盛陶	章衡	颜复	孙升		
韩川	龚鼎臣	郑穆	席旦	乔执中	傅楫
沈畸	徐绩	张汝明	黄葆		
光夫	石公弼	张克公	毛注	洪彦升	锺傅
遹	毛渐	王祖道	张庄	赵	陶节

孙馨
 吴时
 李昭玘
 黄廉
 朱服
 张舜民
 盛陶
 章衡
 颜复
 孙升
 韩川
 龚鼎臣

郑穆
席旦
乔执中
傅楫
沈畸
萧服
徐绩
张汝明
黄葆光
石公弼
张克公
毛注
洪彦升
锺傅
陶节夫
毛渐
王祖道
张庄
赵通
△孙馨

孙馨字叔挣钱塘人用父任调武平尉捕获名盗数十再调越州司法参军守赵林荐其材知偃师县蒲中优人诡僧服隐民间以不语惑众相传有异法众奔凑其门馨收按奸状伏辜韩缜镇长安辟入府居五年签书西川判官召对擢提举广东常平徽宗初徙两浙由福建转运判官召为屯田员外馨微时与蔡京善常曰蔡子贵人也然才不胜德恐貽天下忧至是京还朝遇诸涂既见京谓馨曰我若用于天子愿助我馨曰公诚能谨守祖宗之法以正论辅人主示节俭以先百吏而绝口不言兵天下幸甚京默然既相出馨提点江东刑狱未几入为少府少监户部郎中县官用度无艺馨与尚书曾孝广侍郎许几谋曰日增一日岁增一岁天下之财岂能给哉共疏论之当国者不乐孝广几由是罢徙馨开封迁太仆卿殿中少监以显谟阁待制知曹州转大中大夫徙郟州邑人子为草祭之谣指切蔡京馨以闻京怒使言者诬以它谤提举鸿庆宫起知单州遂致仕靖康二年卒年八十六赠银青光禄大夫谥曰通靖

△吴时

吴时字伸道邛州人初举进士得学究出身再试中甲科知华州郑县转运使檄州
餽米五万输长安郑独当三万时贻书使者曰会三万
斛之费以车则千五百乘以卒则五万夫县民可役者纔二百五十八户诚能移兵于华
则前费可免使者从其言徽宗求言远臣上章封识多
不能如式有司悉却之时建言悉得达为睦亲宅教授提举永兴军路学事召为工部员
外郎改礼部兼辟雍司业大观兴算学议以黄帝为先
师时言今祠祀圣祖祝板书臣名亦释奠孔子但例中祀数学六艺之一耳当以何礼事
之乃止迁太仆少卿出知耀州又降通判鼎州未赴提
举河东常平岁饥发公粟以振民童贯经北方每访以边事辄不答还为大晟兴乐擢中
书舍人给事中内侍何欣摘监衡州酒犹领节度使时
奏夺之又因进对及取燕事曰祖宗盟血未干渝之必速乱蔡攸闻之以告王黼黼怒斥
为腐儒时求去以徽猷阁待制兼侍读俄提举上清太
平宫卒年七十八时敏于为文未尝属稿两学目之曰立地书厨

△李昭玘

李昭玘字成季济南人少与晁补之齐名为苏轼所知擢进士第徐州教授用李清
臣荐为秘书省正字校书郎加秘阁校理通判潞州潞
民死多不葬昭玘斥官地画兆窆具棺衾作文风晓之俗为一变入为秘书丞开封推官
俄提点永兴京西京东路刑狱坐元符党夺官徽宗立
召为右司员外郎迁太常少卿韩宗彦欲用为起居舍人曾布持之布使山陵命始下为
陈次升所论出知沧州崇宁初诏以昭玘尝倾摇先烈
每改元丰敕条倡从宽之邪说罢主管鸿庆宫遂入党籍 【按宋史徽宗本纪崇宁元年
九月己亥籍元佑及元符末宰相文彦博等侍从苏
轼等余官秦观等内臣张士良武臣王献可等凡百有二十人庚子以元符等未上书范
柔中以下五百余人邪等考百二十人碑内无昭玘
名昭玘当在柔中以下数内也】 初昭玘校试高密得侯蒙蒙执政思顾旧恩使人致己
意昭玘惟求秘阁法帖而已使陕西时延安小将车吉
者被诬为盗昭玘察知无它吉后立战功至皇城使遇昭玘京师拜于前曰感公生成之
恩愿以名马为献笑却之晚知歙州辞不行靖康初复
以起居舍人召而已卒绍兴初追复直徽猷阁 【按宋史此下有吴师礼王汉之涣之三
传无事迹足录并从删】

△黄廉

黄廉字夷仲洪州分宁人第进士历州县熙宁初或荐之王安石安石与之言问免
役事廉据旧法以对安石曰是必能办新法白神宗召
访时务对曰陛下意在便民法非不良也而吏非其人所以法行而民病陛下不尽察也

河朔被水河南齐晋旱淮浙飞蝗江南疫疠陛下不尽
知也帝即命廉体量振济东道除司农丞还报合旨权利州路转运判官复丞司农为监
察御史里行建言愿令两制近臣及转运使各得举士
诏各荐一人继言寒远下僚既得名闻于上愿令中书审其能而表用则急才之诏不虚
行于天下矣又言比年水旱民蒙支贷今幸岁丰有司
悉当举催久饥初稔累给并偿是使民遇丰年而思歉岁也请令诸道以渐督取之论俞
充结王中正致宰属并言中正任使太重河决曹村坏
田三十万顷民庐舍三十八万家受诏安抚京东发廩振饥远不能至者分遣吏移给择
高地作舍以居民流民过所毋征算转行者赋粮质私
牛而与之钱养男女弃于道者丁壮则役其力凡所活二十五万相州狱起邓伯温上官
均论其冤得谴去诏廉诘之竟不能正未几狱成始悔
之加集贤校理提点河东刑狱辽人求代北地廉言分水画境失中国险固其后契丹果
包取两不耕地下临雁门父老以为恨王中正发西兵
用一而调二转运使又附益之廉曰民腴剥至骨忍自竭根本邪即奏云师必无功当有
以善其后 【按宋史王中正传中正前经制西事非
一此云无功溃归乃系元丰四年李宪等分五道伐西夏中正将兵出河东盖是时廉官
河东故论其调发繁苛也】 大军溃归中正嫁罪于转
饷廉诣上党对理坐贬秩元佑元年召为户部郎中陆师闵茶法为川陕害遣廉使蜀按
察至则奏罢其太甚者定俸马岁额朝廷可其议使以
直秘阁提举明年进为左司郎中迁起居郎集贤殿修撰枢密都承旨上官均论其往附
蔡确为狱改陕西都转运使拜给事中卒年五十九

△朱服

朱服字行中湖州乌程人熙宁进士甲科以淮南节度推官充修撰经义局检讨历
国子直讲秘阁校理元丰中擢监察御史里行参知政
事章惇遣所善袁默周之道见服道荐引意以市恩服举劾之惇补郡免默之道官受诏
治朱明之狱故事制狱许上殿非本章所云者皆取旨
服论其非是罢之俄知谏院迁国子司业起居舍人以直龙图阁知润州徙泉婺宁庐寿
五州庐人饥服便宜振护全活十余万口明年大疫又
课医持善药分拯之赖以安者甚众绍圣初政力诋变乱法度之故召为中书舍人使辽
未返而母死丧除拜礼部侍郎湖州守马城言其居丧
疏几筵而独处它室谪知莱州徽宗即位加集贤殿修撰再为庐州越两月徙广州哲宗
既祥服赋诗为部使者所上黜知袁州又坐与苏轼游
贬海州团练副使蕲州安置改兴国军卒

△张舜民

张舜民字芸叟邠州人中进士第为襄崇令 【按东都事略作襄乐令】 王安石倡新法舜民上书言以堂堂之天下而与小民争利可耻也时人壮之元丰中讨西夏环庆帅高遵裕辟掌机密文字王师无功坐谪监邕州盐米仓又追赴鄜延诏狱改监彬州酒税会赦北还司马光荐其才气秀异刚直敢言以馆阁校勘为监察御史上疏论西夏强臣争权不宜加以爵当兴师问罪因及文彦博左迁监登闻鼓院通判虢州提点秦凤刑狱召拜殿中侍御史固辞改金部员外郎进秘书少监使辽加直秘阁陕西转运使知陕潭青三州元符中罢职徽宗立擢右谏议大夫居职才七日所上事已六十章陈陕西之弊曰以庸将而御老师役饥民而争旷土极论河朔之困言多剴切徙吏部侍郎旋以龙图阁待制知定州改同州坐元佑党谪楚州团练副使商州安置复集贤殿修撰卒舜民慷慨喜论事其使辽也见其太孙禧好音乐美姝名茶古画以为他日必有如唐张义潮挈十三州来归者不四十年当见之后如其言绍兴中追赠宝文阁直学士

△盛陶

盛陶字仲叔郑州人第进士熙宁中为监察御史神宗问河北事对曰朝廷以便民省役议废郡县诚便然沿边地相属如北平至海不过五百里其间列城十五祖宗之意固有所在愿仍旧贯庆州李复圭轻敌败国程昉开河无功藉水政以扰州县皆疏其过二人实王安石所主陶不少屈出签书随州判官久之人为太常博士考功员外郎工部右司郎中至侍御史陈官冗之敝谓恩泽举人宜取嘉佑治平之制选人改官宜准熙宁元丰之法谏官刘安世等攻蔡确为谤诗陶曰诗语近于捃摭不可以长告讦之风安世疏言陶居风宪附会观望纪纲何赖出知汝州徙晋州召为太常少卿进权礼部侍郎中书舍人以龙图阁待制知应天府顺昌府瀛州元符中夺职卒年六十七

△章衡

章衡字子平浦城人嘉佑二年进士第一通判湖州直集贤院改盐铁判官同修起居注言三司经费取领多寡率不预知急则敛于民仓卒趣迫故苦其难供愿敕三部判官簿正其数即有所赋先期下之三司使忌其能出知汝州颍州熙宁初还判太常寺建言自唐开元纂修礼书以国恤一章为豫凶事删而去之故不幸遇事则捃摭坠残茫无所据今宜为厚陵集礼以贻万世从之出知郑州奏罢原武监弛牧地四千二百顷以予民复判太常知审官西院使辽归复命言辽境无备因此时可复山后八州不听衡纂历代帝系名曰编年通载神宗览而善之谓

可冠冕诸史判吏部流内铨尝有员缺既拟注而三班院辄用之反讼吏部宰相主其说衡连奏疏与之辨至诉于御前神宗命内侍偕至中书以状上请相悟曰若尔吏部是矣乃罪三班未几知通进银台司直舍人院拜宝文阁待制知澶州会官立法禁民贩盐衡言民恃盐以生请如故便徙知成德军坐事免元佑中历秀襄河阳曹苏州加集贤院学士复以待制知扬庐宣颍州卒年七十五

△颜复

颜复字长道鲁人颜子四十八世孙也父太初以名儒为国子监直讲出为临晋簿嘉佑中诏郡国敦访遗逸京东以复言试于中书考官欧阳修奏复第一赐进士为校书郎知永甯县【按东都事略作永康县】熙宁中为国子直讲王安石更学法校诸直讲定其优劣复等皆罢元佑初召为太常博士建言请令礼官会萃古今典范为五礼书又请考正祀典俾大小羣祀尽合圣人之经迂礼部员外郎孔宗翰请尊奉孔子祠复因上五议欲专其祠飨优其田禄蠲其庙干司其法则训其子孙朝廷多从之兼崇政殿说书进起居舍人兼侍讲转起居郎请择经行之儒补诸县教官凡学者考其志业不由教官荐不得与贡举升太学拜中书舍人兼国子监祭酒太学诸生有诱进之法独教官未尝旌别似非严师劝士之道未踰年以疾改天章阁待制未拜而卒年五十七子岐建炎中为门下侍郎

△孙升

孙升字君孚高邮人第进士签书泰州判官哲宗立为监察御史朝廷更法度逐奸邪升多所建明尝上疏言愿于耳目之臣议论之际置党附之疑杜小人之隙迂殿中侍御史梁焘责张问升从而击之执政指为附和出知济州踰年提点京西刑狱召为金部员外郎寻拜殿中侍御史进侍御史时翰林承旨邓伯温为台臣所攻升论之尤力谓草蔡确制称其定策功比汉周勃欺天负国岂能亲承密命不报由起居郎擢中书舍人直学士院以天章阁待制知应天府董敦逸黄廷基劾之改集贤院学士绍圣初翟思张商英又劾之削职知房州归州贬水部员外郎分司又贬果州团练副使汀州安置卒年六十二【按刘延世孙公谈圃序徽宗即位尽复升官职】

△韩川

韩川字符伯陕人进士上第历开封府推官元佑初用刘摯荐为监察御史极论市易之害以为虽曰平均物直而其实不免货交以取利就使有获尚不可为况所获不如所亡果何事也愿使趣罢此法从之迂殿中侍御史疏

言近制大中大夫以上岁举守臣遇大州阙则选诸所
表推原旨意固欲得人然所谓大中大夫以上率在京师诸驰鹜请求者得之为易至于
淹厯郡县治状应法者顾出其下则是谨身修洁之人
不若营求一章之速化也于是诏吏部更立法张舜民论西夏事乞停封册朝廷以为开
边隙罢其御史梁焘张舜民争之川与吕陶上官均谓
舜民之言实不可行焘等去川亦改太常少卿不拜加集贤校理知颖州进为侍御史枢
密都承旨进中书舍人吏礼二部侍郎以龙图阁待制
复守颍徙虢州与孙升同受责由坊州郢州贬屯田员外郎分司岷州团练副使道州安
置徽宗立得故官知青襄二州卒

△龚鼎臣

龚鼎臣字辅之郓之须城人父诱衷武陵令鼎臣幼孤景佑元年第进士为平阴主
簿疏泄瀦水得良田数百千顷调孟州司法参军以荐
为泰宁军节度掌书记徂徕石介死讦者谓介北走辽诏兖州劾状郡守杜衍会问掾属
莫对鼎臣独曰介宁有是愿以阖门证其死衍曰吾既
保介矣君年少见义如是举为秘书省著作佐郎知莱芜县徙知蒙阳县转秘书丞又知
安印县以贤良方正召试秘阁转太常博士知渠州召
入编校史馆书籍转都官擢起居舍人同知谏院岁冬旱将锡春宴鼎臣曰旱灾太甚非
君臣同乐之时请罢宴以答天戒日当食阴云不见鼎
臣曰阳精既亏四方必见为异益大愿精思力行进贤远佞以应皇极又论内侍都知邓
保信罪状不应出入禁中凡大礼赦请准太平兴国诏
书前期下禁约后有犯不原以杜指赦为奸者开封三司于法外断狱朝廷多曲徇其请
愿先付中书审画仁宗悉从之寻兼管勾国子监判登
闻检院详定宽恤民力奏议淮南灾以鼎臣体量安恤蠲逋振贷全活甚众俄拜户部员
外郎兼侍御史知杂事转吏礼二部郎中论宗室宜岁
试补外官请汰滥官冗兵连劾辞向奸暴鬻盐市马皆罔上英宗登位屡乞延访臣下亲
决国事上疏劝皇太后早还政及卷帘而御玺未复又
极论谓昭陵宜俭葬景灵神御殿不宜增侈以彰先帝恭德鼎臣在言路阔略细故至大
事无所顾忌然其言每优游和平使人主易听故其事
多施行改集贤殿修撰知应天府徙江宁召还判太常寺兼礼仪事神宗即位判吏部流
内铨明堂议侑帝或云以真宗或云以仁宗鼎臣曰严
父莫大于配天未闻以祖也乃奉英宗配王安石侍讲欲赐坐事下礼官鼎臣言不可安
石不悦鼎臣求补外知兖州是时诸道方田使者希功
赏槩取税虚额及尝所蠲者加旧籍以病民鼎臣独按籍差次为十等一无所增究人德
之改吏部提举西京崇福宫复判太常寺留守南京时

河决曹村流殍满野鼎臣劳来振拊归者不胜计拜谏议大夫京东东路安抚使知青州改大中大夫请老提举亳州太清宫寻以正议大夫致仕年七十七元佑元年卒

△郑穆

郑穆字闳中福州侯官人性醇谨好学举进士第为寿安主簿召为国子监直讲除编校集贤院书籍岁满为馆阁校勘积官太常博士改集贤校理求外补通判汾州熙宁三年召为岐王侍讲改诸王侍讲岐嘉二王咸敬礼焉元丰三年出知越州加朝散大夫先是鉴湖旱干民因田其中延袤百里官籍而税之既而连年水溢民逋官租积万缗穆奏免之未几告老管句杭州洞霄宫元佑初召拜国子祭酒三年杨王荆王请为侍讲除直集贤院为杨王徐王翊善拜给事中五年除宝文阁待制俱兼祭酒旋请老提举洞霄宫太学之士数千人诣宰相请留不从明年卒年七十五子璆军事推官

△席旦

席旦字晋仲河南人元丰中举进士礼部不奏名时方求边功旦诣阙上书神宗嘉纳令廷试赐第历齐州司法参军郑州河阳教授敕令所删定官徽宗召对擢右正言迁右司监御史中丞钱遯率同列请废元佑皇后 而册刘氏为太后旦面质为不可遯劾旦阴佐元佑之政左转吏部员外郎改太常少卿迁中书舍人给事中俄拜御史中丞兼侍讲内侍郝随骄横旦劾罢之帝以其章有媚惑先帝之语嫌为指斥旋改吏部侍郎以显谟阁待制知宣州召为户部侍郎还吏部以显谟阁直学士知成都府议者言蜀土刁乱或导旦治以峻猛旦政和平徙郑州入见言蜀人性善柔自古称兵背叛皆非其土俗遂言蜀用铁钱以其难于转移故权以楮券而有司冀赢羨为之益多使民不敢信帝为损虚券别给缗钱与本业自是钱引稍仍故坐进对淹留黜知滁州久之帝思其治蜀功复知成都朝廷开西南夷黎州守诣幕府白事言云南大理国求入朝献旦引唐南诏为蜀患拒却之已而威州守焦才叔言欲诱保霸二州内附旦上章劾才叔为奸利敛困诸蕃之状宰相不悦徙旦永兴寻加述古殿直学士复知成都卒于长安年六十二赠大中大夫子益绍兴初参知政事

△乔执中

乔执中字希圣高邮人入太学补五经讲书王安石器之擢进士调须城主簿时河役大兴部役者不得人一夕噪而溃因致大狱执中往代遂帖然安石为政引执中编修熙宁条例选提举湖南常平章惇讨五溪檄执中取大田离子二峒峒路险绝期迫执中但走一校谕其酋即

相率归命录功徙转运判官召为司农丞提点开封县镇诸县牧地民耕岁久议者将取之当夷印墓伐桑柘万家相聚而泣执中请于朝神宗诏复予民改提点京西北路刑狱时河决广武埽危甚相聚莫敢登执中立其上众随之不日埽成元佑初为吏部郎中兼徐王府侍讲翊善迁起居舍人起居郎权给事中有司以天下谏狱失出入者同坐执中驳之曰先王重入而轻出恤刑之至也今一旦均之恐自是法吏不复肯与生此非好生治民之意也进中书舍人邢恕遇赦甄复执中言恕深结蔡确鼓唱扇摇今复其官惧疑中外迁给事中刑部侍郎绍圣初上官均摭执中为吕大防所用以宝文阁待制知郢州执中宽厚有仁心屡典刑狱雪活以百数卒年六十三

△傅楫

傅楫字符通兴化军仙游人少自刻厉从孙觉陈襄学第进士调扬州司户参军摄天长令发摘隐伏奸猾屏迹转福清丞知龙泉县孙觉为御史中丞语之曰朝廷欲用君盍少留楫曰仕宦所乐居中者免外台督责耳今俯首权门与外台奚择且外官已所当得也遂去不顾道除太学博士居四年未尝一迹大臣门楫丞福清时受知郡守曾巩弟布方执政荐为太常博士徽宗以端王就资善堂学择师傅为说书升楫记室参军进侍讲翊善中人莅事于府者多与宫僚狎楫独漠然不可亲一府严惮之邹浩得罪贬楫以赆行免官徽宗即位召为司封员外郎历监察御史与国子司业寻即拜中书舍人时曾布当国自以于楫有汲引恩冀为用楫略无所倾下凡命令有不当悉极论之布大失望帝以旧学故多所延访楫每以遵祖宗法度安静自然为言在朝岁余上疏丐去以龙图待制知博州卒年六十一

△沈畸

沈畸字德侔湖州德清人第进士历官州县崇宁中为尚书议礼编修官召对擢监察御史诣匭上十事言花石扰民土木弊国冗费多恩泽滥议论异同下情睽隔其论当十夹锡钱最为剗切略曰小钱之便于民久矣古者军兴用乏或以一当百至于当十此权时之术非可行于无事之世今当十之议固足纾目前然使游手鼓铸无故有倍称之息何惮而不为虽日加断斩势不可止东南小钱轻钱轻则物重物重则民愈困此盗贼所由起也陕西旧无铜钱故以夹锡为贵一改铸则由前日铁钱耳今东南方铸又将使西北效之是导民犯法也进殿中侍御史尝经国子监门有小内侍从数骑绝道突过驺卒追问不为止台檄诸司捕之不获畸曰风宪之地可但已乎入言之徽宗下内省迹治竟抵罪

蔡京兴苏州钱狱欲陷中书侍郎刘逵妇兄章縉兄弟遣开封尹李孝寿御史张茂直鞠之株逮至千百强抑使承盗铸罪死者甚众帝意其非辜遣畸及御史萧服往代京将啖以显仕畸至苏即日决释无佐证者七百人叹曰为天子耳目司而可傅会权要杀人以苟富贵乎遂阅实平反以闻京大怒削畸三秩贬监信州酒税未几卒建炎初赠龙图阁直学士子浚官至右正言

△萧服

萧服字昭甫庐陵人第进士调望江令治以教化为本知高安县尉获盗狱具矣服审其辞疑之视其刀室不与刃合顷之而杀人者得囚盖平民也徙知康州未行改亲贤宅教授提举淮西常平召为将作少监以使事得入对论人主听言之要以为唐虞盛世犹畏巧言而聖讒说纒纒数百言徽宗谓有争臣风擢监察御史奉诏作崇寔备官记帝称善诏辅臣曰服文辞劲丽宜居翰苑朕爱其鯁谏顾台諫中何可阙此人俄偕沈畸使鞫狱坐羈管处州踰岁得归张商英当国引为吏部员外郎送辽使得疾于道遂致仕既愈还旧职知蕲州卒年五十六

△徐绩

徐绩字符功宣州南陵人举进士调吴江尉选桂州教授王师讨交趾转运使檄绩从军饷路瘴险民当役者多避匿捕得千余人吏者使绩杖之绩曰姑涅臂以戒亦可已使者怒绩力争不变使者不能夺郭逵逗留不进绩谓副使赵高曰师出淹时而主帅无讨贼意何由成功因具蛮人情状疏于朝既而逵高果以无功贬求知建平县入为诸王宫教授通判通州濒海有捍堤废不治岁苦漂溺绩躬督防卒护筑之堤成民赖其利复教授广陵申王院改诸王府记室参军徽宗立擢宝文阁待制兼侍讲迁中书舍人修神宗寔录时绍圣党尚在朝人怀异意以沮新政帝谕绩因论择相之难云已召范纯仁韩忠彦绩顿首贺曰得人矣诏与蔡京同校五朝宝训绩不肯与京联职固辞奏京之恶引卢杞为喻迁给事中翰林学士上疏陈六事曰时要曰任贤曰求谏曰选用曰破朋党曰明功罪国史久不成绩言神宗正史今更五闰矣未能成书盖由元佑绍圣史臣好恶不同范祖禹等专主司马光家藏记事蔡京兄弟纯用王安石日录各为之说故议论纷然当时辅相之家家藏记录臣谓宜与取用参讨是非勒成大典帝然之命绩草诏戒史官帝之初政锐欲损革新法之害民曾布始以为然已乃密陈绍述之说帝不能决以问绩绩曰圣意姑务两存臣未见其可也又因论弃湟州请自今勿妄兴边事俄而遭忧京入辅摘绩行章惇词以为诋先烈服阙以主管灵仙

观入党籍中起知江甯府言者复论为元佑奸朋罢归大观三年知太平州召入覲极论茶盐法为民病帝曰不见卿久今日乃闻嘉言加龙图阁直学士留守南京以疾除显谟阁学士致仕卒年七十九赠资政殿学士正奉大夫绩挺挺持正尤为帝所礼重而不至大同时议惜之

△张汝明

张汝明字舜文世为庐陵人徙居真州登进士第历卫真江阴宜黄华阴四县主簿杭州司理参军亳州鹿邑丞滞州县二十年未尝出一语干进故无荐者大观中特改宣教郎擢监察御史尝摄殿中侍御史劾政府市恩招权以蔡京为首帝奖其介直京颇惮之徙司门员外郎犹虞其复用力排之出通判甯化军地界辽文移数往来汝明名触其讳辽以檄暴于朝坐责监寿州麻步场遇赦签书汉阳判官田法行受牒按境内故吏不得通贿赂而税均于一路最晚知岳州卒于官年五十四汝明事亲孝学精微研象数贯穿经史百家所著书不蹈袭前人语

△黄葆光

黄葆光字符晖徽州黟县人以从使高丽得官试吏部铨第一赐进士出身由徐州司理参军为太学博士迁秘书省校书郎擢监察御史左司谏言三省吏猥多如迁补升转奉入赏劳之类非元丰旧制者其大弊有十愿一切革去徽宗即命厘正之蔡京怒其异己密白帝请降御笔云当丰享豫大之时为衰乱减损之计徙葆光符宝郎省吏釀钱入宝篆宫作十道齐报上恩帝思其忠明年复拜侍御史辽人李良嗣来归上平夷书规进用擢秘书丞葆光论其不可大槩言良嗣凶黠忿鸷犯不赦之罪于邻国逃命遁死妄作平夷等书万一露泄为患不细中秘图书之府岂宜以罪人为之宜寘诸畿甸之外又言君尊如天臣卑如地君不可屈臣不可亢帝命近臣读其奏于殿中自崇甯后增朝士兼局多葆光以为言乃命蔡京裁定京阳请一切废罢以激怒士大夫葆光言如礼制局详议官至七员检官至十六员制造局至三十余员岂不能省去一二上副明天子之意时皆壮之政和末岁旱帝以为念葆光上疏言陛下恭俭敦朴以先天下而太师蔡京侈大过制非所以明君臣之分陛下以绍述为心而京所行乃背元丰之法强悍自专不肯上承德意太宰郑居中少宰余深依违畏避不能任天下之责此天气下而地不应大臣不能尚德以应陛下之所求也疏入不报京权势震赫举朝结舌葆光独出力攻之京惧中以他事贬知昭州立山县又使言官论其附会交结泄漏密语诏以章揭示朝堂安置昭州京致仕召为职方员外郎改知处州州当方腊残乱之后尽心牧养民列上其状加直秘阁再任卒

年五十八州人祠之葆光善论事不为横议所移时颇推重极论蔡京无所顾然其它不能不迎时好方作神霄万寿宫温州郭敦实泗州叶点皆坐是得罪葆光遂疏建昌军陈并秀州蔡密岳州傅惟萧祁门令葛长卿不即奉行制书存留僧寺形胜佛象及决罚道流乞行窜黜遂悉坐停废识者尤之

△石公弼

石公弼字国佐越州新昌人登进士第调卫州司法参军淇水监牧马逸食人稻为田主所伤密白郡守韩宗哲欲坐以重辟公弼曰禽兽食人食主者安得不御御之岂能无伤使上林虎豹出而食人可无杀乎既而使者来虑囚如公弼议章惇求太学官或荐公弼使往见谢曰丞相素侮人见者伺意苟容所不忍也再调涟水丞知广德县召为宗正寺主簿入见言朝廷比日所为直词罕闻颂声交至未有为陛下廷争可否者愿崇忠正以销谗佞通谏诤以阴壅蔽徽宗善之擢监察御史进殿中侍御史三舍法行士子计等第颇事告讦公弼言设学校者将以仁义渐摩欲人有士君子之行顾使之相告讦非建学本意又言删定敕令官寺监丞簿等皆以执政近臣子弟为之不习政事请一切汰遣以开寒畯之路从之由右正言改左司谏言东南军政之敝以有兵之籍为无用之按以太平之赋养积弊之兵异日惧有未然之患其后睦盗起如其言太史保章正朱汝楫以入奉得罪而内侍失察者皆不坐【按东都事略云大司局保章正朱汝楫冒请绢觉既论汝楫而有司失察者皆以中贵得不坐语较宋史本传明晰附识于此】公弼言是皆矫称诏旨安得勿论请自今中旨虽不当覆看亦令有司审奏迁侍御史苏杭造作局工成公弼陈扰民之害请革技巧之靡丽者稍罢进奉帝纳之蔡京始与公弼有连故因得进用至是意寔异京恚焉徙太常少卿迁起居郎兼定王嘉王记室故事初至宫例得金缯之数二百万公弼辞不受大观二年拜御史中丞水官赵霆建开直河议谓自此无水忧已而决坏巨鹿法当斩但削其官犹为太仆少卿公弼论为失刑霆坐贬京西转运使张徽言欲因方田籍增立汝襄邓三州税公弼以为掎克重敛诏罢之遂劾蔡京罪恶章数十上京始罢又言吏员猥冗戾元丰旧制于是应行裁并者多如制仕涂为清京虽上相印犹提举修实录公弼复言京盘旋京师无去志又因星变言之竟出京杭州及刘逵主国柄公弼复论其废绍述良法启用元佑邪党学术人以是知其非一意于正者进兵部尚书兼侍读上疏言崇宁以来臣下专务生事开边兴利营缮徭役靡民根本因之饥馑汴西挽运花石农桑废业徒弊所有以事无用宜

使之休息以承天意张商英入相欲引为执政何执中吴居厚交沮之以枢密直学士知扬州羣不逞为侠于闾里自号亡命社公弼取其魁杰痛治社遂破散江贼巢藏菰芦中白昼出剽公弼令督捕尽除之改述古殿直学士知襄州蔡京再辅政责秀州团练副使台州安置踰年遇赦归卒年五十五后三岁复其官公弼初名公辅徽宗以与杨公辅同改今名

△张克公

张克公字介仲颖昌阳翟人起进士大观中为监察御史迁殿中侍御史蔡京再相克公与中丞石公弼论其罪京罢克公徙起居舍人踰月进中书舍人改右谏议大夫京犹留京师会星文变克公复论之中其隐慝语在京传京致仕张商英为相与郑居中不合克公由兵部侍郎拜御史中丞治堂吏讼归曲商英且疏其罪十商英罢京复召衔克公弗置徽宗知之为徙吏部尚书京欲以铨综稽违中克公既又摘其知贡举事帝以为所取得人不问也居吏部六年卒赠资政殿学士

△毛注

毛注字圣可衢州西安人举进士知南陵高苑富阳三县皆以治办称大观中为主客员外郎俄擢殿中侍御史蔡克免相留京师注疏其擅持威福动摇中外以叶梦得为腹心交植党与帝逐梦得而迁注侍御史遂极论京受孟翊妖奸之书与逆人张怀素游处引凶朋林摠置政府用所亲宋乔年尹京其门人播传咸谓陛下恩眷不衰行且复用于是论者相继京遂致仕四年彗再见注又言臣累论蔡京罪积恶大天人交谴虽罢相致政犹怙恩恃宠偃居赐第以致上天威怒推原其咎实在于京考京之罪陛下去党碑以开自新之路京疾其异己而别为防禁陛下颁明诏以来天下之言京恶其议己而重致于法以严刑峻罚胁持海内以美官重禄交结人心钱钞屡更而商贾不行边事数易而国力大匮声焰所震中外愤疾宜早令去国消弭灾咎奏上京始出居钱塘注复采当世之急务曰省边事足财用收士心禁技巧大槩谓近年以来边民侥幸苟得昔所入贡者今必城为郡县昔所羁縻者今尽纳其土疆如夔渝新边宜在裁省运盐昔主于漕计今移于他司常平昔积于外州今输于都下经费安得不匮财货何以转移愿诏有司悉请复元丰旧制今学校养士盖有常额岁贡之余略无可进之地愿留贡籍三分暂存科举以待举外之士东南造作奇玩花石纲舟与后苑工徒京城营缮并宜暂罢以抑末敦本注所论切于世务类此迁左谏议大夫张商英为相言者攻之力注亦言其无大臣体然讫以与之交通罢提举洞霄宫居家数岁卒建炎末追复谏议大夫

△洪彦升

洪彦升字仲达饶州乐平人登第调常熟尉历彬州判官签书镇东南军节度判官辟广西经略府擢提举常平遂为监察御史迁殿中侍御史彦升孤立任言责论蔡京再居元宰假绍述之名一切更张败坏先朝法度朋奸误国公私困弊既已上印而偃蹇都城上凭眷顾之恩中怀跋扈之志愿早赐英断遣之出京何执中缘潜邸之旧德薄位尊当轴处中见利忘义唯货殖是图愿解其机政以全晚节他如邓洵仁蔡嶷刘极李孝称许光凝许畿盛章李諲任熙明之流皆条摭其过一不为回隐先是诏诸道监司具法令未备若未便于民者久而弗上彦升言吏窳于势随时俯仰不能上承德音因缘为奸者众宜遣官编汇辨其邪正以行赏罚皆从之迁给事中尝谒告一日而张商英复官之旨经门下言者以为顾避封驳出知滁州寻加右文殿修撰进徽猷阁待制知吉州久之知潭州年六十三赠大中大夫

△锺傅

锺傅字弱翁饶州乐平人用李宪荐为兰州推官坐对狱不实羈管彬州绍圣中章惇兴边事奏还其官得入对为哲宗言兵事命干当熙河泾原秦凤三路公事夏人陷金明渭帅毛渐出兵攻其没烟砦傅合击破之又与熙州王文郁进筑西安城论功加秘阁校理章榘帅渭命傅所置将苗履统众会泾原之灵平夏人悉力来拒傅骑二万出不意造河梁以济师遂作金城关又献白草原捷连进集贤殿修撰知熙州傅自始仕至此仅再岁遂擅帅熙秦骑四万出塞无功而还惇方主其议不加罪初傅请合三路兵从青诺尔沁或颠耳关筑天都城以包浅并且罗和市工既集复言水源不壮不可兴役朝论以所奏乖异将罢傅曾布为言但褫职俄而白草原诈增首虏事觉责监永州税再贬连州别驾崇宁中复起知河中府历郛瀛渭三州擢显谟阁待制建言河南要地灵武为根本乃条上十四事未报诏诸道进讨傅遣将折可适领锐骑出萧关至灵州川有功进龙图阁直学士会别将高永年没于西窰可适遇雨失道为虏所乘乃班师傅以稽违逗挠黜知汝州夺学士未几复为杭州真定永兴太原延安府以故职卒赠端明殿学士傅从布衣致通显所行事大抵欺妄故屡起屡僨云

△陶节夫

陶节夫字子礼饶州鄱阳人晋大司马侃之裔也第进士起家为广州录事参军知新会县崇宁初为讲议司检讨官进虞部员外郎迁陕西转运副使徙知延安府以招降羌有功加集贤殿修撰筑石堡等四城石堡以天涧为

隍可趋者惟一路夏人窖粟其间以千数既为宋有其
酋惊曰汉家取我金窟竭亟发铁骑来争节夫分部将士遮御之斩获统军以下数十百
人夏人度不可得敛兵退连擢显谟阁待制龙图阁直
学士方议城银州谍告夏人已东节夫料必西趋泾原官属不肯从节夫曰吾计之熟矣
乃遣裨将耿端彦疾驱至银州五日城成夏人果从泾
原至则城备已固遂遁去进枢密直学士节夫在延安日久蔡京张康国从中助之故唯
京意是徇夏人欲款塞拒弗纳放牧者执杀之夏人怨
怒大入镇戎军杀掠数万口节夫寻领经制环庆泾原河东边事言今既得石堡又城银
州遂陈取兴灵之策加龙图阁学士会朝廷罢经制司
且弃所城地节夫乃求内郡徙洪州改江甯府历青秦二州太原府羣盗李勉起辽州北
平之间河东河北骚动两路帅臣宪臣皆罢去至出台
郎督捕之节夫请悉罢所遣兵卒以计获免坐上疏乞留本道兵勿移戍降为待制知永
兴军数月卒追复龙图阁学士

△毛渐

毛渐字正仲衢州江山人第进士知甯乡县熙甯经理五溪渐条利害以上察访使
使者诱以区画遂建新化安化二县渐用是得著作佐
郎知安化县召为司农丞提举京西南路常平元佑初知高邮军迁广东转运判官渠阳
蛮扰边近臣言渐习知蛮事徙荆湖北路转运判官时
朝廷议弃地渐曰蛮獠畔服不常非稍威以兵未易怀德今一犯边即弃地非计也不报
渠阳既弃蛮复大入抄略荆土为大扰渐历提点江西
刑狱江东两浙转运副使浙部水溢案钱氏有国时故事起长安堰至盐官彻清水浦入
于海开无锡莲蓉河武进庙堂港常熟疏泾梅里入大
江又开昆山七耳茜泾下张诸浦东北道吴江开大盈顾汇柘湖下金山小官浦以入海
自是水不为患加集贤校理入为吏部右司郎中以秘
阁校理为陕西转运使摄渭秦熙三州未几复摄帅泾原日夜治兵乘夏人犯边遣将捣
其虚遂破没烟砦进直龙图阁知渭州命下卒优赠龙
图阁待制

△王祖道

王祖道字若愚福州人第进士调韩城尉知松阳白马二县为司农丞监察御史数
言事改司封员外郎知汀泉福三州入为户部吏部员
外郎左司谏言陕西兵未可减徽宗谓其论事无足行出知海州拜秘书少监再为福州
加直龙图阁知桂州蔡京开边祖道欲乘时徼富贵诱
王江酋杨晟免等使纳土夸大其辞言向慕者百三十峒宜开建城邑控制百蛮以武臣
为守置溪峒司主之诏以为怀远军置二砦为立学又

言黎人为患六十年道路不通今愿为王民得地千五百里遂以安口隘为允州中古州地为格州增提举溪峒官三员又言羁縻地文兰那四州罗文诚等皆请内附请于黎母山立镇州为下都督府赐军额曰静海徙万安军于水口南丹州莫公佞独拒命发兵讨擒之遂筑怀远军为平州格州为从州南丹为观州并允地文兰那五州置黔南路擢祖道显谟阁待制进龙图阁直学士召为兵部尚书未行与融州张庄谋使庄奏言海南一千二十峒皆已团结所未得者百七十峒于是徭黎渠帅不胜忿蜂起侵剽围新万安军及观州杀官吏初祖道徙城时言黎人伐木助役及是诏问不能对京庇之犹除端明殿学士知复州复以刑部尚书召大观二年卒赠宣奉大夫祖道在桂四年厚以官爵金帛挑诸夷建城邑调兵镇戍辇输内地钱布盐粟无复齐限地瘴疠戍者岁亡什五六实无尺地一民益于县官蔡京皆自以为功至谓混中原风气之殊当天下舆图之半祖道用是超取显美张商英为相治其诞罔追贬昭信军节度副使京再辅政复还之然其所创名州县不旋踵皆罢是后庞恭孙张庄赵遹程邻皆以拓地受上赏大抵皆规模祖道朝廷受其患云

△张庄

张庄应天府人也元丰三年擢进士第历提举司讲议司检讨官出提举荆湖夔州等路香盐事改提举荆湖北路常平本路提点刑狱进龙图阁直学士广南西路转运副使王祖道既请立朱崖诸州县徙万安军诏庄按覆相度实与祖道相表里授集贤殿修撰知桂州融州徙福州复知桂州奏安化上三州一镇地土及恩广监峒蒙光明等纳土共五万一千一百余户幅员九千余里寻又奏宽乐等州纳土十六州三十三县五十余峒幅员万里蔡京帅百官表贺进庄兼黔南路经略安抚使未几安化蛮纳土庄遣黄忱往筑州城忱蛮将也知蛮情伪力言不可庄怒遣忱护筑淡州别遣胡超依昌等筑安化城果为蛮所擒超等没者几千人中书舍人宇文粹中言祖道及庄擅兴师旅启衅邀功妄言诸蛮效顺纳款当时柄臣揽为绥抚四夷之功奏贺行赏张皇其事欺君莫大于此朝廷既追贬祖道庄责舒州团练副使永州安置再贬连州移和州起知荆南府徙江甯复进徽猷阁直学士历知渭亳襄州镇江东平府宣和六年坐缮治东平城不加功辄复摧圯降两官提举嵩山崇福宫卒赠宣奉大夫

△赵遹

赵遹开封人大观初以发运司句当公事为梓州路转运司判官泸戎诸夷纳土命遹相置以建立纯州县砦劳加直秘阁升转运副使俄

授龙图阁直学士为正使政和五年晏州夷酋卜漏反陷梅岭堡知砦高公老遁会泸帅贾宗谅以斂竹木扰夷部且诬致其酋罪夷人咸怨漏遂相结因上元张灯袭破砦虜公老妻及其器物四出剽掠遁行部昌州闻之倍道趋泸州贼分攻乐共城长宁军武宁县宗谅皆遣将拒却之已而乐共城监押藩虎诱杀罗始党族首领五十人其族蛮愤怒合漏等复攻乐共城遁并劾之诏斩虎罢宗谅代以康延鲁而听遁节制于是诏发陕西军义军上军保甲三万人以遁为泸南招讨使遁与别将马觉张思正分道出既抵晏州觉思正各以兵来会漏据轮缚大囤其山崛起数百仞林箐深密乃垒石为城外树木栅当道穿坑阱仆巨栢布渠谷夹以守障以俯瞰官军矢石所中皆历碎遁军不能进间从巡检种友直田祐恭按视其旁山崖壁特峭绝贼恃之无守备遁命友直祐恭军其下而身当贼冲番军迭攻之友直所部多思黔土丁习山险而山多生獠遁遣土丁捕之伐去蒙密缘崩石挽藤蔓而上得獠数十头束麻作炬灌以膏蜡缚于獠背暮夜复遣土丁负绳梯登崖巅乃缒梯引下人人衔枚挈獠蚁附而上比鸡鸣友直佑恭与其众悉登及贼栅出火然炬獠热狂跳贼庐舍皆茅竹獠窜其上火辄发贼号呼奔扑火益炽官军鼓噪破栅遁望见火麾军蹶云梯攻其前两军相应贼扰乱不复能抗俘斩数千人卜漏突围走至轮多囤追获之晏州平诸夷落皆降拓地环二千里遁为建城砦画疆亩募人耕种且习战守号曰胜兵诏置沿边安抚司以转运副使孙义叟为安抚使高公老妻不辱而死诏赠节义族姬加遁龙图阁直学士熙州兰湟经略安抚使遁既入对赐上舍出身拜兵部尚书遁与童贯有隙力请去以提举醴泉观出知成德拜延康殿学士赐其子永裔上舍出身秘书省校书郎涑水人董才聚众为贼攻败城邑辽人不能制中山帅府阴与才通诱使来归才寻为辽所破遂上书请取全燕以自效王黼童贯大喜将许之遁言不可曰今以侍从备帅臣而真定中山边接隙苟一开吾境得无事乎疏奏上然之又斥还才书才穷蹙转入河东诏问遁遁复具疏极论其害泊遁徙熙州黼等卒纳才又虑遁过阙入见有所陈趣使便道赴镇时议更陕西大铁钱价与铜钱轻重等遁上言虽厉其禁终不可行居数月以疾乞致仕命提举嵩山崇福宫起知中山顺昌应昌府金人举兵召遁赴阙寻卒永裔历知眉州言者论遁欺罔朝廷以军功永裔遂放罢

钦定续通志卷三百六十一

●钦定续通志卷三百六十二 列传一百六十二
列传

宋【六十六】

○宋六十六

郝质	贾逵	窦舜卿	刘昌祚	卢政
燕达	姚兕【麟 雄古】	杨燧		
刘舜卿	宋守约【球】	苗授【履】	王君万【贍】	张守
约	王文郁	周永清	刘绍能	
	王光祖	李浩	和斌	刘仲武
	郭成	贾崑	张整	曲珍
张蕴	王恩	杨应询	赵隆	刘闾
郝质				
贾逵				
窦舜卿				
刘昌祚				
卢政				
燕达				
姚兕				
杨燧				
刘舜卿				
宋守约【宋球】				
苗授【苗履】				
王君万				
张守约				
王文郁				
周永清				
刘绍能				
王光祖				
李浩				
和斌				
刘仲武				
曲珍				
刘闾				
郭成				
贾崑				
张整				

张蕴

王恩

杨应询

赵隆

△郝质

郝质字景纯汾州介休人少从军挽强为第一充殿前行门换供奉官为府州驻泊都监主管麟府军马与田肱将兵护军须馈麟州道遇西夏数千骑质先驱力战斩首获马数百又与肱行边至栢谷敌堑道以阻官军质御之于寒岭下转鬪逐北遂修复窳远诸栅以扼贼衡以功超迁内殿承制并代路都监贾昌朝荐为本路钤辖使讨贝州文彦博至命部城西回河上有亭甚壮彦博虑为贼焚遣小校藺千守而质使千往他营度战具亭焚彦博将斩千质曰质实使之罪乃在质彦博壮其义两释之质自此益知名贼平迁六宅使历高阳关定州并代钤转驻泊副都部署龙神卫捧日天武都指挥使马军殿前都虞候加领贺州刺史英州团练眉州防御使奉诏城丰州进步军副都指挥使宿州观察使还宿卫改马军英宗立迁武昌军节度观察留后加安德军节度使为殿前副指挥使神宗立易节度武军为都指挥使【按东都事略神宗即位迁殿前都指挥使从镇安武】元丰元年卒帝亲临其丧赠侍中谥曰武庄质御军有纪律犯者不贷而享犒丰渥公钱不足出己俸助之平居自奉简俭笃于信义从微至贵皆以功次迁云

△贾逵

贾逵真定藁城人隶供圣军为卒至殿前班副使换西染院副使从狄青征侬智高战于归仁驿既陈青誓众曰不待令而举者斩时左将孙节战死逵为右将军先锋将私念所部兵数困易衄兵法先据高者胜苟复待命而贼乘胜先登吾事去矣即日引军趋山既定贼至逵麾众驰下伏剑大呼断贼为二贼首尾不相救遂溃逵诣青请罪青拊其背劳谢之邕州城空青使逵入括公私遗坠固辞是时将校多以搜城故匿窃金宾独逵无所犯迁西染院使嘉州刺史秦凤路钤辖以母老辞不许徙并代路专主管麟府军马熟户散处边关苦于寇略逵差度远近聚为二十七堡次第相望自是害乃息复徙秦凤去之十日而代者郭思败朝廷以逵为能连擢捧日天武四厢都指挥使马步军殿前都虞候历泾原高阳关麟延路副都总管以利州观察使入为步军副都指挥使都城西南水暴溢注安上门英宗遣逵督护亟囊土塞门水乃止议者欲穴堤以泄其势逵请观水所行谕居民徙高避水然后决之军校营城外者每常朝即未

晓启门钥逵言禁城当谨启闭不宜凭报者迁马军副都指挥使复总鄜延兵延州旧有夹河两城始元昊入寇据险城几不能守逵相伏龙山九州岛台之间可容窥覘请于其地筑保障与城相望延人以为便转昭信军节度观察留后奏言种諤处绥州降人于东偏初云万三千户今乃千一百户耳逵逃之余所存纔八百自延州运粟至怀甯率以四百钱致一石而缘边居人壮者但日给一升罔冒何至大半徒欲妄兴边事自以为功不可不察元丰初拜建武军节度使殿前都指挥使请不俟郊赦赐三世官神宗曰逵武人能有念亲之志其特许之数月而卒年六十九赠侍中谥曰武恪

△竇舜卿

竇舜卿字希元相州安阳人以荫为三班奉职监平乡县酒税辟府州兵马监押夏人犯塞舜卿欲袭击举烽求援于大将王凯弗应舜卿度事急提州兵出战胜之明日经略使问状凯惧要以同出为报舜卿驩然相许不自以为功为青淄路都监海盜行劫执博昌镇官吏肆剽掠舜卿募士三百悉擒之使契丹主客马佑言昔先公客省善射君当传家法置酒请射舜卿发辄中佑使奴持二弓示之一挽皆折湖北蛮獠彭仕义叛徙为钤辖兼知辰州建请筑州城不扰而办帅师取富州蛮将万年州据石狗崖舜卿选壮卒奋击蛮矢石交下卒蒙盾直前发强弩射万年州毙于崖下遂拔之左右欲尽剿其众舜卿不许曰仕义愿内附特为此辈所胁今死矣何以多杀为引兵入北江仕义降擢康州刺史加龙神卫捧日天武四厢指挥使马军殿前都虞候三迁邕州观察使历邠甯环庆路副都总管熙甯中十上章求退且丐易文阶改刑部侍郎提举嵩山崇福宫以光禄大夫致仕再转金紫光禄大夫卒年八十八谥曰康敏

△刘昌祚

刘昌祚字子京真定人父贺战歿于定州录为右班殿直主秦州威远砦青唐聚兵盐并经年不散昌祚奉帅命往诘之诸酋曰闻汉家欲取吾井盐昌祚曰国家富有四海何至与汝争此邪与酋俱来犒賚之欢然帅众去迁西路都巡检使辽还神宗临试驰射授通事舍人夏人寇刘沟堡昌祚领骑二千出援虜伏万骑于黑山而伪遁卒遇之战不解薄暮大酋突而前昌祚抽矢一发殪之余众悉遁帅李师中上其功曰西事以来以寡抗众未有如昌祚者知阶州讨平穆济等族又平迭州转作坊使为熙河路都监从王中正入蜀破筰羌加皇城使荣州刺史秦凤路钤辖又加西上合门使果州团练使知河州元丰四年为泾原副都总管王师西征诏与总管姚麟率蕃汉兵五万受环庆高遵裕节制令

两路合军以出既入境而庆兵不至昌祚出胡卢川次玛伊克隘夏众十万扼险昌祚挟两盾先登夏人小却师乘之斩首千七百级进次鸣沙川取其窖粟遂薄灵州城先锋夺门几入遵裕驰遣使止之昌祚按甲勿攻是夕庆兵始距城三十里而军遇敌接战昌祚遣数千骑赴之迟明贼已退遵裕讶应援之缓有诛昌祚意怒未解欲夺其兵付姚麟麟不敢受乃已明日遣昌祚巡营凡所得马粮悉为庆兵所取泾师忿噪遵裕围城十八日不能下夏人决七级渠以灌遵裕师军遂溃即南还复命泾师为殿昌祚手剑水上待众济然后行为虜所及战退至渭州粮尽士争入城无复行伍坐贬永兴军钤辖明年复徙泾原加龙神卫四厢都指挥使知延州兼鄜延路经略安抚使【按宋史本传作知延州东都事略作鄜延经略安抚使考文献通考时知太原府及延庆熙秦等州皆以措置边事兼经略安抚使以重其任昌祚盖知延州兼鄜延路经略安抚使故下文有措置义合德靖诸砦绵亘七百里云云宋史与事略互见疏漏今补辑】时永乐方陷士气不振昌祚先修马政自义合至德靖砦绵亘七百里堡垒疏密不齐烽烽不相应昌祚度屯戍险易地望远近事力强弱立为定式上诸朝夏人寇塞门安远砦拒破之杀其统军额布勒茂密额默二人盖始谋攻永乐者哲宗立进步军都虞候雄州团练使知渭州厯马军殿前都虞候渭地宜牧养故时弓箭手人授田二顷有马者复增给之谓之马口分地其后马死不补而据地自若昌祚按举其法不二年耗马复初又括陇山闲田得万顷募士卒五千别置将统之劲悍出诸军右朝廷归夏人四砦昌祚以为不可再迁殿前副都指挥使冀州观察使武康军节度使卒赠开府仪同三司谥曰毅肃昌祚气貌雄伟最善骑射箭出百步之外夏人得箭以为神所著射法行于世

△卢政

卢政太原文水人以神卫都头从刘平与夏人战延州虜薄西南隅兵不得成列政自变量骑挑战发伏弩二百射却之日且暮政说平曰今处山间又逼污泽宜速退保后山须明决鬪不然彼夜出乘高蹙以御之平不听遂败政脱身归黄德和诬平降贼神宗引政问状政言平被执非降也因自陈失主将当死帝义其言赦之以为供奉官德州兵马监押预讨贝州率勇敢数百人飞环絙堞而登守者莫能亢大军乘之以入迁内殿承制南征依智高亦有功厯秦凤高阳关都钤辖治平熙宁中为捧日天武四厢都指挥使三卫都虞候副都指挥使泾原定州并代州等四路副都总管累转祁州团练昌州防御黔州观察使拜武泰军节度使政时年七十三气貌不衰能上马踊跃观者壮之暴卒赠开府仪同

三司

△燕达

燕达字逢辰开封人以材武隶禁籍授内殿崇班为延州巡检戍怀窰砦夏人三万骑薄城达所部止五百人跃马奋击所向披靡擢鄜延都监数帅兵深入敌境九战皆以胜归累迁西上合门使领英州刺史为秦凤副总管讨破河州羌遂降玛尔戩迁东上合门使副都总管真拜忠州刺史龙神卫四厢都指挥使郭逵招讨安南为行营马步军副都总管入辞神宗谕之曰卿名位已重不必亲矢石第激勉将士可也达顿首谢曰臣得凭威灵灭贼虽死何惮初渡岭闻前锋遇敌苦战欲往援偏校有言当先为家计然后进者达曰彼战已危讵忍为自全计下令敢言安营者斩乃卷甲趋之士皆自奋傅呼太尉来蛮惊溃即定广原师次富良江蛮舩鬪船于南岸欲战不得达默计曰兵法致人而不致于人吾示之以虚彼必来战已而蛮果来击之大败乃请降师还拜荣州防御使元丰中迁金州观察使加步军都虞候改马军超授副都指挥使以训阅精整除一子合门祇候数被诏奖进殿前副都指挥使武康军节度使哲宗立迁殿前都指挥使徙节武信卒赠开府仪同三司谥曰毅敏达起行伍喜读书神宗以其忠实可任每燕见未尝不从容尝问用兵当何先对曰莫如爱帝曰威克厥爱可乎达曰威非不用要以爱为先耳帝善之

△姚兕

姚兕字武之五原人父宝战死定川兕补右班殿直为环庆巡检与夏人战一矢毙其酋众溃因乘之遂破兰浪敌大举寇边诸砦皆受困兕时驻荔原堡先羌未至据险张疑兵伺便辄出有悍酋临阵甚武兕前射中其目斩首还一军驩呼明日来攻益急兕手射数百人裂指流血又遣子雄引壮骑驰掩其后所向必克敌度不可破乃退攻大顺城兕复往救转鬪三日凡斩级数千卒全二城庆军叛兕以亲兵守西关盗众不得入而奔兕追及下马与语皆感泣罗拜誓无复为乱神宗闻其名召入覲试以骑射屡中的迁环庆路都监徙鄜延泾原从攻河州飞矢贯耳战益力河州既得又为果庄所围兕曰解围之法当攻其所必救乃往击隆宗围遂解累迁皇城使迁钤辖从攻交址有功领雅州刺史破奇迪领忠州团练使进环庆路副都总迁东上合门使徙熙河与种谊合兵讨果庄于洮州破伦布宗城夜断浮桥援兵不得度遂擒果庄 【按东都事略载拜东上合门使移熙河果庄据洮州谍言青唐欲将兵由济准梁会于洮合寇我疆兕自河州率兵破伦布宗城夜遣骁将纵火济

准梁明日青唐兵至不得遂洮州之援果庄就擒语较宋史本传明晰】 即拜通州团练使改鄜延总管卒赠忠州防御使兕幼失父事母孝凡

图画器用皆刻大雉未报字力学兵法老不废书弟麟亦有威名鬪中号二姚子雄古

姚麟

姚雄

姚古

姚麟

麟字君瑞兄兕攻河州时俱在兵间中矢透骨镞留不去以强弩出之笑语自若积功至皇城使为秦凤副总管从李宪讨生羌擒凌结贝再转东上合门使英州刺史元丰西讨以泾原副总管从刘昌祚出战得胜转战向鸣沙趋灵州而高遵裕败还降为皇城使永兴军路钤辖复为泾原副总管夏人修贡且乞兰会壤土麟言夏人囚其主王师是征今秉常不废即为顺命可因以息兵矣独兰会不可与愿戒将帅飭边备示进讨之形以绝其望从之督诸将讨堪格平经略使卢秉上其功状元佑初擢威州团练使龙神卫四厢都指挥使历步军殿前都虞候马步军副都指挥使绍圣三年麟以建武军节度观察留后出知渭州安焘请留之曾布曰臣尝访麟御边之策及熙河强威俱不能知愿加敕使之力韩忠彦曰奏对语言非所以责此辈哲宗乃留麟不遣寻拜武康军节度使殿前副指挥使王瞻取青唐麟以为朝廷讨伐方息肩柰何复生此大患已而瞻果败徽宗立进都指挥使节度建雄定武军检校司徒卒赠开府仪同三司麟为将沈毅持重不少纵舍宿卫士尝犯法诏释之麟杖之于庭而后请拒诏之罪故所至肃然

姚雄

雄字毅夫少勇鸷有谋年十八即佐父征伐从讨金汤以百骑先登夺隘又成荔原之功安南泸川之役皆在军行历泾原秦凤将驻甘谷城知通远镇戍军岷州官累佐骐骥使绍圣中渭帅章榘城平夏雄部熙河兵策援夏人倾国来与之鏖鬪流矢注肩战采厉贼引却追蹶大破之斩首三千级俘获数万先五日折可适败于没烟士气方沮雄贾勇得隼诸道始得并力城成擢东上合门使秦州刺史明年虜攻平夏势锐甚城几不守雄与弟古合兵却之徙知会州熙河钤辖王瞻略地青唐羌人攻湟鄯诏雄与苗履援之邈川方急雄适至羌望见尘起惊而溃围既解徙河州种朴战没王瞻军陷敌中雄自鄯至湟四战皆捷拔出之遂筑安乡关夹河立堡以护浮梁通湟水漕运商旅负贩入湟者始络绎于道加复州防御使建中靖国初议弃湟州诏访雄利害雄以为可弃遂以赐赵怀德徙

雄知熙州进华州观察使蔡京用王厚复河湟治弃地
罪停雄官光州居住后复窜金州明年乃听归高永年死西窳诸戍阻绝起雄权经略熙
河安辑复新边使知沧州加捧日天武四厢都指挥使
复为熙州迁安德军节度观察留后步军副都指挥使拜武康节度使召诣阙为中太一
宫使引疾纳节钺改左金吾上将军又以武康节知熙
州熙河十八年间更十六帅唯雄三至未几以检校司空奉窳军节度使致仕卒赠开府
仪同三司谥武宪

姚古

古亦以边功累官熙河经略靖康元年金兵逼京城古与秦凤经略种师中及折彦
质折可求等俱勒兵勤王时朝命种师道为京畿河北
路制置使趣召之师道与古子平仲先已率兵入卫钦宗拜师道同知枢密院宣抚京畿
河北河东平仲为都统制上方倚师道等却敌而种氏
姚氏素为山西巨室两家子弟各不相下平仲恐功独归种氏忌之乃以士不得速战为
言欲夜劫斡里雅布营谋泄反为所败既而议和金兵
退诏古与种师中折彦质范琼等领兵十余万护送之尼雅满陷隆德府以古为河东制
置种师中副之古总兵援太原师中援中山河间诸郡
尼雅满围太原内外不相通古进兵复隆德府威胜军扼南北关与金人战互有胜负太
原围不解诏古与师中犄角师中进师平定军乘胜复
寿阳榆次等县朝廷数遣使趣战师中约古及张灏两军齐进而二人失期不至师中回
趣榆次兵败而死金人进兵迎古遇于盘陀古兵溃退
保龙德诏以解潜代之古之屯威胜军也帐下统制官焦安节妄传寇至以动军情既又
劝古遁去故两郡皆溃李纲召安节斩之中丞陈过庭
奏古罪不可恕诏安置广州

△杨燧

杨燧开封人善骑射应募隶军籍从征贝州穴城以入贼平功第一补神卫指挥使
又从征侂智高接战手杀数十人众乘之而捷擢万胜
军都指挥使迁荣州团练使京城左厢巡检英宗即位以为邓州防御使步军都虞候
环庆泾原鄜延二路副都总管至马军副都指挥使由
客州观察使拜窳远军节度殿前副都指挥使卒赠侍中谥曰庄敏燧初穴贝州城时为
叛兵所伤同行卒刘顺救之得免及贵顺已死访恤其
家甚至故人妻子贫不能活者一切收养之人推其义

△刘舜卿

刘舜卿字希元开封人父钧监镇戎兵马庆历中与子尧卿战死于好水舜卿年十
岁录为供奉官历昌州驻泊都监谕降泸水蛮八百人

知水洛城神宗经略西边近臣荐其能召问状对曰自元昊称臣秦中不复戒严今宜先自治帝善之命训京东将兵一年入闕于内殿帝叹曰坐作有度其可用也尔无忘世讎勉思忠孝期以尽敌舜卿泣谢即日加通事舍人环庆有警诏帅长安兵赴之乃单骑驰往庆州至则难已解知原州改秦凤钤辖袭击西市城先登有功迁皇城副使知代州加客省副使辽边谍盗西关锁舜卿密易旧钥而大之数日虜以锁来归舜卿曰吾未尝忘锁引视纳之不能受遂渐去诛谍者转西上合门使知雄州契丹系州民狱索之不听会有使者至因捕取其以相当必得释乃遣在雄六年恩信周浹元佑初进龙神卫四厢都指挥使高州刺史知熙州夏人聚兵天都连西羌果庄青宜结先城洮州将大举入寇舜卿欲乘未集击之会诸将议方略使姚兕种谊领兵分两路并洮水而进至临洮城下一鼓克之俘果庄并首领九人斩馘数千计迁马军都虞候再迁徐州观察使步军副都指挥使知渭州卒赠奉国军节度使谥曰毅敏舜卿知书晓吏事谨文法善料敌著名北州

△宋守约 【宋球】

宋守约开封酸枣人以父任为左班殿直至河北缘边安抚副使迁知恩州仁宗谕以乱后抚御之意对曰恩与他郡等耳而为守者犹以反侧待之故人心不自安臣愿尽力徙益州路钤辖累迁文州刺史康州团练使知雄州历龙神卫捧日天武都指挥使马步殿前都虞候入宿卫迁洋州观察使卫兵以给粟陈哗噪执政将付有司治守约遣一牙校语之众惧而听命进步军副都指挥使威武军留后神宗以禁旅骄惰为简练之法屯营可并者并之守约率先推行约束严峻或言其持军太急帝密戒之对曰臣为陛下明纪律不忍使恩出于臣而怨归陛下帝善之欲擢真枢府宰相难之乃止故事当郊之岁先期籍士卒之凶悍者配下军以警众当受粮而倩人负者罚久而浸弛守约悉举行之所居肃然无人声至蝉噪于庭亦击去人以为过莅职十年卒年七十一赠安武军节度使谥曰勤毅子球以荫干当礼宾院条秦川券马四弊羣牧使用其议马商便之再使高丽密访山川形势风俗好尚使还图纪上之进通事舍人积迁西上合门使枢密副都承旨

△苗授 【苗履】

苗授字授之潞州人父京庆厯中以死守麟州抗元昊授以荫至供备库副使王韶取镇洮授为先锋破香子城拔河府复简骑五百击败余羌羌惊乱斩首四千级又破之于牛精谷取阿纳城尽得河湟地知德顺军三迁西上合门使果庄寇河州诏授往一战克萨宗论功第一遂

知州事加四方馆使荣州刺史从燕达取银川降玛尔戩献之京师加引进使果州团练使泾原都钤辖召使契丹以为秦凤副总管徙熙河复知河州副李宪讨生羌于露骨山斩首万级羌族十万七千帐内附威震洮西拜昌州团练使龙神卫四厢都指挥使徙知雄州熙州元丰西讨授出古渭取定西【按东都事略载王师讨西夏授与李宪出古渭路】荡裕勒藏玛哈诸族降户口五万城兰州遇贼数万于诺尔结谷登山逆战败退伏垒中半夜遁去授踰天都山焚南牟屯没烟凡师行百日转鬪千里始入塞授遇事持议不苟合初在德顺或议城籛南授曰城阻大河粮道不济非万全计也役即止师征灵武诏令援高遵裕即条上进退利害甚切历进步军副都指挥使威武军节度观察留后元佑三年迁武泰军节度使殿前副都指挥使踰岁以保康节度知潞州提举上清太平宫卒赠开府仪同三司谥曰庄敏子履以护送玛尔戩至京得合门祗候历西上合门副熙河都监责右清道率府率监峡州酒税元符初寻以熙河兰会都钤辖知兰州诏同王瞻居青唐录功擢龙神卫四厢都指挥使历进奉日天武都指挥使孙傅在叛臣传

△王君万

王君万秦州窳远人以殿侍为秦凤指挥使王韶开边青唐大酋俞龙珂归国独别羌锡喇勒济不从经略使韩缜期诸将一月取之君万诈为猎者逐禽至其居稍相亲狎与同猎乘间撻之坠马斩首驰归以献甫及一月积功得合门祗候王师定武胜首领药萨布邀劫于阆贡物帅师讨焉君万出南山履险略地羌潜伏山谷间忽一骑跃出横矛将及君万亟侧身避之回首奋斩以徇其众惊号相率听命所斩乃药萨布也复破北关南市功最多擢熙河路钤辖进领英州刺史达州团练使洮西羌叛围河州君万请于王韶以纳木萨宗城小而坚强勇所聚若并兵破之围当自解韶用其计围果解累官客省使为副总管坐贷结余钱数万缗为转运使孙回所纠贬秩一等讨西山铁城有功复故言职君万怨孙回使番官木舟讼之鞠于秦陇又贬为凤翔钤辖籍家赀偿逋遂以愤卒子瞻

王瞻

王瞻

瞻始因李宪以进立战功积官至皇城使领开州团练使元符中知河州熙帅锺傅以冒白草原赏狱治于秦诏转运使张询谕诸将得自首瞻具伏诈增首级因说询云青唐人有叛辖戩意可取也询信之即具奏言已令瞻结约起兵哲宗罪其狂妄亟罢询而命孙回究实狱上夺瞻十一官犹令领州瞻欲以功赎过乃密画取青唐之策遣客诣章惇言状惇下其事于

孙路路以为可取贍遂引兵趣邈川路知贍狡狴难制
使总管王愍统军而以贍副贍为前锋度河先下陇朱黑城忌愍分其功给之曰晨食举
乃发愍信之夜半贍忽传发平明入邈川据府库径上
捷书不以白军府愍过午始至以事诉于路路亦怒颞以兵柄付愍而留贍屯邈川贍与
愍交讼又诉路指画相违悖王贍而不直路曰首谋者
贍也路又掩其功故抑贍乃徙路河南罢愍统制以胡宗回为帅时辖戡已来降青唐大
酋森摩沁展迎玛尔戡之子隆赞入守 【按宋史本
传云迎溪巴乌之子隆赞入守者宋史外国传隆赞系玛尔戡之子非溪巴乌之子也今
据改】 宗回日夜督贍出师遣使威以军法且声言欲
使王愍代将贍惧急进攻隆赞及森摩父子等皆出降贍入据其城诏建为鄯州进贍四
方馆使荣州防御使寻拜维州团练使为本路钤辖贍
纵所部剽斂羌众携贰森摩等结诸族帐谋复青唐其在山南者先发贍遣将李宾领二
千骑掩袭森摩羌败奔北四山皆空贍戮森摩等九人
悉捕斩城中羌积级如山初贍讽诸酋籍胜兵者涅其臂无应者绰尔结请归帅本路为
唱贍听之去遂啸集外叛以数千人围邈川夏众十万
助之城中危甚苗履姚雄来援围始解已而王吉魏钊种朴相继败没将士夺气书闻帝
震骇于是转运使李諲秦希甫劾贍盗取二城财物因
此致变又杀森摩沁展以灭口曾布言贍创造事端以生边害万死不塞责诏贬右千牛
将军房州安置言者论之不己熙河又奏青唐诸族怨
贍入骨髓日图报复枢密院乞斩贍以谢一方诏配昌化军行至穰县而缢崇宁初钱遹
讼贍功于是追赠保平军节度观察留后除其子珏通
事舍人

△张守约

张守约字希参濮州人以荫主原州截原砦招羌酋水凌布等十七族万一千帐为
广南走马承受公事当侂寇之后二年四诣阙陈南方
利害皆见纳用欧阳修荐其有智略知边事擢知融州峒将吴侂恃险为边患捕诛之修
复荐守约可任将帅为定州路驻泊都监徙秦凤居职
六年括生羌隐土千顷以募射手筑硖石堡甘谷城第功最多夏人万骑来寇守约适巡
边与之遇不解鞍筒兵五百逆战挺身立阵前自节金
鼓发强弩殪其酋敌遂退神宗开拓熙河召问曰王韶能办事否对曰以天威临之当无
不济但董毡忠勤效顺恐不宜侵逼因请名古渭为军
以根本陇右帝从之建为通远军加通事舍人熙河钤辖仍统秦凤羌兵驻通远河州羌
率众三万屯于敦波欲复旧地守约度洮水击破之取
窖粟食军羌老弱畜产走南山左右欲邀之守约曰彼非敢迎战逃死耳辄出者斩果庄

围岷州守约提敢死士鸣鼓张帜高山上贼惊顾而遁
遂知岷州降其守领千七百人迁西上合门使知镇戎军徙环州慕家族结格难制摇动
种落勒兵讨擒之余遁入夏国守约驻师境上檄取不
置居数日械以来斩于市从征灵武至清远军言于高遵裕曰此去灵州不三百里城中
惟僧道数百若裹十日粮疾驰三日可至军无事矣又
劝高遵裕令士众护粮饷以防抄掠不听果以败还守约有捍海南咸平之功亦不录进
为环庆都钤辖知邠州徙泾原鄜延秦凤副总管领康
州刺史夏人十万屯南牟畏其名引去知泾州泾水善暴城每春必增治堤堰费不赀适
岁饥罢其役或曰如水害何守约曰歉岁劳民甚于河
患吾且徐图之河神祠故在南塙祷而迁诸北以杀河怒一夕雷雨明日河徙而南其北
遂为沙碛以龙神卫四厢都指挥使召还道卒年七十
五守约典七州皆有惠爱可纪神宗尝问武臣可任者以燕达刘昌祚姚麟王崇极刘舜
卿等对其后皆为名将时称知人

△王文郁

王文郁字周卿麟州新秦人以供奉官为府州巡检韩琦荐其材加合门祗候麟府
驻泊都监熙宁西讨文郁败之托欢河其将香叶夜遣
使以剑为信欲举众降许之旦而至众情忽变噪以出文郁击之追奔二十里据险大战
矢下如雨文郁徐引渡河谓吏士曰前追强敌后背天
险韩信驱市人且破赵况尔曹皆百战骁勇邪士感奋进击夏人大溃降其众二千迁通
事舍人夏人踰济雅河掠塞上文郁追至长城坂尽夺
所掠而还神宗召见问以招纳香叶之议对曰此乃致敌上策恨未能多尔并边生羌善
驰突识乡导傥能抚乃之所谓以外夷而攻外夷也帝
于是决意招纳多获其用知文郁善左射并招其子弟阅肆殿庭文郁九发八中诏官其
二子知镇戎德顺军预定洮河迁左骥驎副使知麟州
夏众践稼袭败之部使者劾为生事夺郡印未几为熙河将从李宪讨灵武得羌户万余
迁本路钤辖夏人围兰州已夺两关门文郁募死士夜
缒而下持短兵突之贼即扫营去擢东上合门使知兰州谍知夏人将大入清野以俟果
举国趋皋兰文郁乘城御之杀伤如积围九日而解收
其尸为京观加荣州团练使以捧日天武都指挥使为副都总管以殿前都虞候知河州
筑安西城金城关进秦州防御冀州观察使卒年六十
六

△周永清

周永清字肃之世家灵州州陷祖美归京师永清以荫从仕宰相庞籍言其忠勇加
合门祗候押时服赐夏国至宥州夏人受赐不跪诘之

恐而跪迁通事舍人渭州钤辖渭兵劲而陈伍不讲永清训以李靖法帅蔡挺嘉其整图上之诏推于诸道知德顺军夏众入寇击擒其酋又募勇士夜驰百里捣贼巢穴斩首三百级俘数千人获橐驼甲马万计城中无知者并砦边地三百里盗耕不可禁永清拓籍数千顷置射士二千声闻敌廷降者引入帐下待之不疑多得其死力徙秦凤钤辖河北沿边安抚副使知代州契丹无名求地朝廷命韩缜分画永清贰焉入对言疆境不可轻与人臣职守土不愿行固遣之复上章陈利害竟以母病辞历高阳关定州泾原路钤辖知泾州保州又为定州路副总管终东上合门使

△刘绍能

刘绍能字及之保安军人世为诸族巡检父怀忠官内殿崇班合门祇候元昊叛力战以死录绍能右班殿直赐以名为军北巡检击破夏右枢密院所领羌族数万众于顺窰夏人围大顺城绍能为军锋毁其栅至纳旺川邀击于长城岭熙窰中又败夏人于博啰川皆策功最累迁洛苑使英州刺史鄜延兵马都监旧制内属者不与汉官齿至是悉如之仍以其子袭故职元丰西讨召诣阙言师旅还征储侍不继为大患若俟西成后因粮深入乃可帝以为然命统两军进讨绍能世世边将为敌所忌每设疑以间之帝独明其不然手诏云绍能战功最多忠勇第一此必夏人畏忌为间害之计耳绍能捧诏感泣尝坐谗速对按验卒无实守边圉四十七年大小五十战以皇城使简州团练使卒

△王光祖

王光祖字君俞开封人父珪为泾原勇将号王铁鞭战死好水川录光祖为供奉官合门祇候熙窰中同提点河北刑狱改沿边安抚都监进副使界河巡检赵用扰北边契丹以兵数万压境造浮桥如欲度者光祖在舟中对其众尽彻户牖或谓契丹方阵而以单舟临之如不测何光祖曰彼欲得赵用耳避之则势张吾死不足塞责已而契丹欲相与言光祖即命子襄往兵刃四合然语唯在用襄随机折塞之其将萧禧遽挥兵去且邀襄食付所戴青罗泥金笠以为信即上之除真定钤辖徙夔渝獠叛诏熊本安抚而命内藏库使杨万成都钤辖贾昌言梓夔都监王宣与光祖同致讨皆受本节度本疑光祖不为用分三道进师使光祖将后军出黄沙坎北发日已暮士以杖索涂相挽而前夜半抵绝顶质明獠望见大骇一鼓而溃万等困于松溪又亟往援斂险先登袭贼舍去旦始遇万等与俱还本愧谢上其功第一吐蕃围茂州光祖领兵三千会王中正破鸡宗关贼据石鼓村扼其半道中正召诸将问计光祖独谓行既抵石

鼓铎锐兵分袭吐蕃背皆惊遁遂会中正于茂泸夷奇
迪杀王宣诏从韩存宝讨之军于梅岭夷数万众驻落个栈欲老我师霖雨不止光祖劝
存宝早决战不听林广至复从征荡其巢窟积功至四
方馆使知泸州置泸南安抚使俾兼领边事迁客省使嘉州刺史泾原河东定州路副总
管卒

△李浩

李浩字直夫家本绥州徙西河浩务学通兵法以父定荫从军破侂智高韩绛城娄
领兵战赏堡岭川杀大首领阿克多叶斩首千三百余
级积官供备库副使广西都监哀西北疆事着安边策谒王安石安石言之神宗召对改
管干麟府兵马未行又从章惇于南江引兵由三路屯
镇江入遂州讨舒光贵破盈口栅下天府会于洽州入懿州蛮酋田元猛元喆合猎狝拒
官军浩分兵击之杀猎狝降元猛元喆遂城懿州进讨
黔江蛮复城黔江惇上其功擢引进副使熙河钤辖李宪讨山后羌浩将右军至合龙岭
会战遣降羌且扬轻骑突敌帐俘其酋凌结贝李密桑
馘三千迁东上合门使为副总管知河州安抚洮西五路大举浩将前军复兰州迁引进
使陇州防御使知兰州兼熙河泾原安抚副使坐西阙
失守及报上不实再贬秩旋以战吃齐老井连立功复之哲宗即位拜忠州防御使捧日
天武都指挥使马军都虞候进黔州观察使历鄜延太
原永兴环庆路副都总管再知兰州卒赠安化军留后

△和斌

和斌字胜之濮州邓城人选隶散直为德顺军指挥使数扞敌被重创十余知军事
刘兼济以兄平败没执送京师并逮其家斌慰安调护
平冤既伸兼济获免家赖以全定州之役将曹侯丧所乘马斌辍骑与之且战且行与俱
免狄青南征使部骑兵为前锋青驻宾州十日以怠寇
既乃倍道兼行斌以兵疾于险利在速战即日度关遇贼归仁驿孙节死斌引骑血战绕
出贼后遂败之擢文思副使权广西钤辖累岁徙泾原
召对议者谓交州可取斌盛言有害无益愿戒边臣无妄动神宗叹美之进带御器械渭
部饥帅王广渊命吏赈给斌择地营居养视有法所活
以万数安南入寇复徙广西累迁皇城使昭州刺史抚水蛮罗世念犯宜州守将战死斌
提步骑三千进讨方暑昼夜趣兵至怀远寨或曰柰何
背龙江邪笑曰是所以生也因示弱骄之蛮果大至斌选将迎敌戒以遇之则走诱至平
坂列八阵以待之张疑兵左右山上蛮登岭望见始大
惊斌分骑翼其旁自被甲步出为众士先殊死战蛮大败世念率酋党四千八百内附遂
以荣州团练使知宜州迁西上合门使知邕州以老请

还除高阳关副总管历永兴军路召拜龙神卫四厢都指挥至步军都虞候卒赠盩州防御使斌老于为将以恩信得边人心岭南珍一无所蓄边吏欲希功造事皆惮不敢发士大夫称之 【按宋史此下有斌子洗附传无迹足录今从删】

△刘仲武

刘仲武字子文秦州成纪人熙宁中试射殿庭异等补官数从军累转礼宾使为泾原将夏人谋犯天圣砦力战却之选皇城使熙河都监复湟川进东上合门使知河州吐蕃赵怀德朗阿克章众数万叛仲武相持数日潜遣二将领千骑扣其营戒曰彼出勿与战亟还伏兵道左二将还羌果追之遇伏大败斩首三千级复西盩州未几怀德等众皆降累进客省使荣州防御副使高永年西征仲武欲持重固垒永年易贼轻战遂大败仲武引咎自劾坐流岭南命未下与夏人战伤足朝廷闵之贷其罚以为西盩都护童贯招桥羌王子臧征普格收积石军邀仲武计事许以便宜普格果约降而索一子为质仲武即遣子锡往河桥亦成仲武帅师渡河掣与归贯掩其功仲武亦不自言徽宗遣使持钱至边访得仲武召对帝劳之曰高永年以不用卿言失律普格之降河南绥定卿力也子九人悉命以官锡阁门祇候仲武知西盩州徙渭州召为龙神卫都指挥使复出熙州秦州迁步军副都指挥使又以熙渭都统制摄之历拜徐州观察使保静军承宣使泸川军节度使以老提举明道宫再起为熙州卒年七十三赠检校少保谥曰威肃子琦别有传

△曲珍

曲珍字君玉陇千人世为着姓宝元康定间夏人数入寇珍诸父纠集族党御之敌不敢犯于是曲氏以材武长雄边关珍尝与叔父出塞游猎猝遇夏人陷其围中驰击大呼众披靡得出顾叔不至复持短兵还决鬪遂俱脱秦凤都钤辖刘温润奇其材一日出宝剑令曰能射一钱于百步外者与之诸少年百发不能中珍后至一矢破之从温润城古渭与羌战先登陷陈为绥德城监押提孤军拒寇斩其大酋加合门祇候有功洮西迁内殿崇班郭逵赵高南征为第一将进自右江抚按广原三州十二县降伪守已下百六十人老稚二万六千口是行也功最诸将迁西染院使得疾輿还京师神宗遣使临问复奖劳赐之弓箭鞍勒令有司蠲其乡徭赋擢鄜延钤辖进副总管从种谔攻金汤永平川斩二千级累迁客省使拜怀州防御使龙神卫四厢都指挥使徐禧城永乐珍以兵从版筑方兴羌数十骑济无定河觐役珍将追杀之禧不许谍言夏人聚兵甚急珍请禧还米脂而自居守明日果至禧复来珍白敌兵甚众公宜退处内栅

檄诸将促战禧笑曰曲侯老将何怯邪夏兵且济珍欲乘其未集击之又不许及攻城急又劝禧曰城中井深泉涸士卒渴甚恐不能支宜乘兵气未衰溃围而出使人自求生禧又不听数日城陷珍缢而免子弟死者六人亦坐贬皇城使帝察其无罪谕使自贍养以图后效元佑初为环庆副总官夏人寇泾原珍搗虚驰三百里破之曲律山俘斩千八百人解其围进东上合门使忠州防御使卒年五十九珍善抚士卒得其死力虽不知书而忠朴好义本于天性

△刘闳

刘闳字静叔青州北海人以拳力为军校从延州军出塞遇敌矢贯左耳战不顾众服其勇从文彦博讨贝州次城下攀垒欲登贼以曲戟钩其甲闳裂之而坠议者欲穿地道入闳曰穴地积土贼且知之城濒河若昼囊土而夜投诸河宜无知者彦博以为然穴成闳持短兵先入众始从遂登陴引绳而上迟明师毕入贝州平功第一擢虎翼指挥累迁宣武神卫都指挥使昭州刺史辰州团练使韩绛宣抚陕西诏闳自河东为掎角至铁冶沟夏人大集众惧闳自殿后率锐骁搏战飞矢蔽体不为却敌解去为冀州驻泊总管河水涨堤防势急闳请郡守开青杨道口以杀水怒莫敢任其责闳躬往浚决水退冀人赖之以左金吾大将军致仕卒年八十五

△郭成

郭成字信之德顺中安堡人也从军得供奉官王师趋灵武成将泾原兵击破夏人于莽伊克隘至城下有羌乘白马驰突成跃马梟其首以献进秩四等朝廷筑平夏城置将戍之又环以五砦渭帅章粦问谁可守者皆曰非郭成不可遂使往夏人恚失地空国入争郭成自没烟峡连营百里飞石激火昼夜不息成与折可适议乘胜深入以万骑异道并进遂俘阿穆尔多卜二大酋捷闻进雄州防御使泾原钤辖徽宗诏诸军并力筑绥戎怀戎二堡成独当合流之役暴露雪中感疾卒帝悼之甚赙以金帛官其子壻成轻财好施名震西鄙帝手书郭成尽忠报国有功于民宜载祀典榜其庙曰仁勇云子浩绍兴中为西边大将至节度使

△贾崑

贾崑字民瞻开封人少时善骑射起家从戎神宗选材武以为内殿承制庆州荔原堡都监林广讨泸夷辟将前锋又为河东将败西夏兵于明堂川累功转庄宅副使迁路监绍圣中夏兵数万围麟州神堂砦甚急崑以数百骑往援循屈野河行且五里据北拦坡岭上一矢殪百酋众骇溃哲宗嘉叹赐以袍带知皇城使威州刺史迁路钤辖崑在兵间二十年有智略能拊御士卒所乡辄胜时以良将入对留擢龙神卫四厢

都指挥使迁步军都虞候濠州团练使卒年五十二赠雄州防御使

△张整

张整字成伯亳州鄆阳人初隶皇城司御龙籍补供奉官为利文州都巡检使边夷岁钞内地吏习不与校至反遗之物整恶其贪暴无已密募死士俟其来掩击几尽有司劾生事神宗壮之不问调荆湖将领拓溪蛮地筑九城董兵镇守又破蛮于大田岁中三迁狷矜万众乘舟屯托口迫黔江城时守兵才五百人情大恐整伏其半于托口旁戒曰须吾旦度金斗崖举帜则噪而前及旦率其半缚滕艫建旗鼓泝流急趋贼望见大笑帜举伏发前后合击人人殊死鬪蛮腾跃投江中杀获不可胜计为广西钤辖坐杀降獠责监江州酒税复为泾原真定京东环庆钤辖整莅军严明哲宗擢为龙神卫四厢都指挥使管干马军司官至威州刺史卒

△张蕴

张蕴字积之开封将家子也从军为小校隶刘昌祚至灵州遇敌中矢拔镞复战以功赐金带从征安南次富良江诸将犹豫未进蕴褰裳先济众随之蛮遁走使巫被发登崖为厌胜蕴射之应弦而毙一军讙噪历京西泾原将知绥德怀宁顺宁军等六城储粟至三十万斛将兵取宥州破夏人于大吴神流堆宥州监军引铁骑数千趋松林堡蕴谍知之顿兵长城岭以待戒诸部曰贼远来气盛少休必困困而击之必捷果以胜归夏人寇顺宁蕴置伏陜中俘斩数百人获马械甚众累迁皇城使荣州刺史成州团练使通州防御使开德河阳马步军副总管卒年七十三赠感德军节度使谥曰荣毅

△王恩

王恩字泽之开封人以善射入羽林补供备库副使为河州巡检夏羌寇兰州恩搏战城下中两矢拔去复鬪意气弥厉迁泾原将尝整军出万惠岭士饥欲食恩倍道兼行众汹汹已而遇敌数万引兵先入壁井灶皆具诸将始服羌扣壁愿见恩单骑径出遥与语一夕羌引去哲宗召见留为神龙卫都指挥使迁马军都虞候契丹使来问泾原王骑将应曰然射三发皆中使叹息出为泾原副都总管并护秦渭延熙四路兵城西安筑临羌天都十余垒羌围平夏诸校欲出战恩曰贼倾国远寇难以争锋宜以谋制其敝彼野无所掠必携退而遇伏必败乃以万人设伏羌无所掠退师果大获徽宗立以卫州防御使徙熙河改知渭州括隐地二万三千顷分弓箭士耕屯为三十一部以省馈饷边臣献车战议恩曰古有之偏籍鹿角今人非所习缓急难用先自败耳迁马步军都指挥使殿前都指挥使武信军节度使属疾以检校司徒致仕卒年六十

二赠开府仪同三司

△杨应询

杨应询字仲谋章惠皇后族孙也历知信安保定军霸州塘泺之间地沮洳水潦易集居人浮板以济应询增堤防为长衢浚其旁以泄流民利赖之为河北沿边安抚使徽宗以归信容城两县弓手为契丹所惮欲增为千人或恐生事应询曰吾欲备他盗彼安能禁我卒增之知雄州朝廷多取西夏地契丹以姻娅为言遣使乞还不得拥兵并塞中外恟疑应询曰是特为虚声吓我耳愿治兵积粟示有备彼将闻风自戢复遣其相臣萧保先等来请诏应询逆于境应询固守前议寻兼高阳关路钤辖边人捕得北盗吕忞儿契丹谓略执平民有诏使纵释应询言吾知执盗耳因其求而遂与之是示以怯也不与以违诏贬秩再迁洋州观察使入提举万寿观复为定州真定大名副都总管卒赠昭化军节度使谥曰康理

△赵隆

赵隆字子渐秦州成纪人以勇敢应募从王韶取熙河大将姚麟出战被重创谓曰吾渴欲死得水尚可活时已暮有泉近贼营隆独身潜往渍衣泉中贼觉隆且鬪且行得归持衣绞水以饮麟乃苏又从李宪破西市师讨果庄外河诸羌皆以兵应之隆率众先至斧其桥果庄失援乃成擒为泾原将战平夏川功最多崇宁中钤辖熙河兵将前军出邈川预复鄯廓夏人寇泾原诏师至铁山隆先登士殊死战夏人解去召诣阙徽宗慰劳之童贯与论燕云事隆极言不可贯曰君能共此当有殊拜隆曰隆武夫岂敢千赏以败祖宗二百年之好异时起衅万死不足谢责贯知不可夺白以知西甯州充陇右都护帅刘法西讨隆以奇兵袭羌羌溃城震武迁温州防御使龙神卫捧日天武都指挥使仍为本道马步副都总管卒赠镇潼军节度使命词臣制碑帝篆额曰旌忠

钦定续通志卷三百六十二

●钦定续通志卷三百六十三

列传

宋【六十七】

○宋六十七

赵挺之	张商英【唐英】	刘正夫	何执中	郑居中	张	
康国	朱谔	刘逵	林摅	管		
师仁	侯蒙	唐恪	李邦彦	余深	薛昂	吴敏
王安中	赵野	曹辅	耿南			

仲

赵挺之

张商英 【张唐英】

刘正夫

何执中

郑居中

张康国

朱谔

刘逵

林摅

管师仁

侯蒙

唐恪

李邦彦

余深

薛昂

吴敏

王安中

赵野

曹辅

耿南仲

△赵挺之

赵挺之字正夫密州诸城人进士上第熙宁建学选教授登棣二州通判德州哲宗即位赐士卒缗钱守不时给卒怒噪持白挺突入府挺之坐堂上呼问状立发库钱而治其为首者魏境河屡决议者欲徙宗城县转运使檄挺之往视挺之云县距高原千岁矣水未尝犯今所迁不如旧必为民害使者卒徙之才二年河果瓌召试馆职为秘阁校理迁监察御史初挺之在德州希意行市易法黄庭坚监德安镇谓镇小民贫不堪诛求及召试苏轼曰挺之聚敛小人学行无取岂堪此选至是劾奏轼草麻有云民亦劳止以为诽谤先帝既而坐不论蔡确通判徐州俄知楚州入为国子司业历太常少卿权吏部侍郎除中书舍人给事中使辽辽主使近臣即馆享客挺之争正其礼徽宗立为礼部侍郎哲宗祔庙议迁宣祖挺之言上于哲宗兄弟同一世宣祖未当迁从之拜御史中丞为钦圣后陵仪仗使曾布以使事联职知禁中密指谕使建议绍述

于是挺之排击元佑诸人不遗力由吏部尚书拜左丞进左丞中书门下侍郎时蔡京独相帝谋置右辅京力荐挺之遂拜尚书右仆射既相与京争雄屡陈其奸恶且请去位避之以观文殿大学士中太一宫使留京师乞归青州将入辞会彗星见帝默思咎征尽除京诸蠹法罢京召见挺之曰京所为一如卿言加挺之特进乃为右仆射京在崇宁初首兴边事用兵连年不息帝曰朝廷不可与四夷生隙隙一开兵民肝脑涂地岂人主爱民恤物意哉挺之退谓同列曰上志在息兵吾曹所宜将顺已而京复相挺之仍以大学士使佑神观未几卒年六十八赠司徒谥曰清宪

△张商英 【张唐英】

张商英字天觉蜀州新津人长身伟然姿采如峙玉负气傲倨豪视一世调通州主簿渝州蛮叛说降其酋辟知南川县章惇经制夔夷询人才使者以商英告即呼入惇大喜延为上客归荐诸王安石因召对以检正中书礼房擢监察御史台狱失出劫盗枢密检详官刘奉世驳之诏纠察司劾治商英奏此出大臣私分愿收还主柄使耳目之官无为近臣所胁神宗为置不治商英遂言奉世庇博州失入囚因摭院吏徇私十二事语侵枢臣于是文彦博等上印求去诏责商英监荆南税更十年乃得馆阁校勘检正刑房商英尝荐舒亶可用至是亶知谏院商英以壻王汾之所业示之亶缴奏以为事涉干请责监赤岸盐税 【按东都事略作坐监鄂州汉川镇酒税】 哲宗初为开封府推官屡诣执政求进朝廷稍更新法之不利于民者商英上书言三年无改于父之道且移书苏轼求入台其庾词有老僧欲住乌寺呵佛骂祖之语吕公着闻之不悦出提点河东刑狱连使河北江西淮南哲宗亲政召为右正言左司谏商英积憾元佑大臣不用己极力攻之上疏曰司马光吕公着刘摯吕大防援引朋侪敢行讥议无非指撻抉扬鄙薄嗤笑翦除陛下羽翼于内击逐股肱于外今天青日明诛赏未正愿下禁省检索前后章牒付臣等看详签揭以上遂论内侍陈衍以摇宣仁至比之吕武乞追夺光公着赠谥仆碑毁冢又言文彦博背负国恩及苏轼范祖禹孙升韩川诸人皆相继受谴章惇安焘交恶商英欲助惇求所以倾焘者阳翟民盖氏养子渐先为祖母所逐以家资属其女诉理不得直商英论其冤导渐使遮执政及诣御史府讦焘姻家与盖女为地道哲宗不直商英徙左司员外郎既与渐交关事皆露责监江宁酒起知洪州为江淮发运副使入权工部侍郎迁中书舍人谢表历诋元佑诸贤徽宗出为河北都转运使降知随州崇宁初为吏部刑部侍郎翰林学士蔡京拜相商英雅与

之善适当制过为褒美寻拜尚书右丞转左丞复与京议政不合数诋京御史取商英所作元佑嘉禾颂及司马光祭文斥其反复罢知亳州入元佑党籍京罢相削籍知鄂州京复相以散官安置归陕两州大观四年京再逐起知杭州过关赐对奏曰神宗修建法度今诚一一举行则尽绍述之美法留为资政殿学士中太一宫使顷之除中书侍郎遂拜尚书右仆射京久盗国柄中外怨疾见商英能立同异更称为贤徽宗因人望相之时久旱彗星中天是夕彗不见明日雨徽宗喜大书商霖二字赐之商英为政持平谓京虽明绍述但借以劫制人主禁锢士大夫于是大革弊事改当十钱以平泉货复转般仓以罢直达行钞法以通商旅蠲横敛以宽民力勤徽宗节华侈息土木抑侥幸帝颇严惮之初杨戩除节度使商英曰祖宗之法内侍无至团练使讫持不下论者益称之然意广才疏何执中郑居中日夜酝织其短先使言者论其门下客唐庚窜之惠州有郭天信者以方技隶太史商英与语言往来事觉鞫于开封府御史中丞张克公疏击之以观文殿大学士知河南府旋贬崇信军节度副使衡州安置天信亦斥死京遂复用未几太学诸生讼商英之冤京惧乃乞令自便继复还故官职宣和三年卒年七十九赠少保商英作相适承蔡京之后小变其政故蒙忠直之名靖康褒表司马光范仲淹而商英亦赠太保绍兴中又赐谥文忠天下皆不谓然兄唐英字次功及进士第调谷城令英宗继大统唐英上谨始书又上书请立颖王为皇太子神宗即位擢殿中侍御史言王安石经术道德宜在陛下左右又论宗室禄宜以服为差杀天下苦差役不均其后略施行尝着仁宗政要宋名臣傅蜀棹机行于世

△刘正夫

刘正夫字德初衢州西安人未冠入太学有声元丰八年南省奏名在优选而犯高鲁王讳当黜宣仁后曰外家私讳颁未久不可以妨寒士命寘末级久之为太学录太常博士御史中丞石豫荐之召赴阙道除左司谏时方究蔡邸狱正夫入对徽宗语及之徐引淮南尺布斗粟之谣以对帝感动解散其狱待蔡王如初他日谓正夫曰兄弟之间人所难言卿独能及此后必为公辅又言元佑绍圣所修神宗史互有得失当折中其说传信万世遂诏刊定而以起居舍人为编修官不阅月迁中书舍人进给事中礼部侍郎蔡京据相位正夫欲附翼之奏言近命官纂录绍述先志及施行政事愿得陈力其间诏俾阅详焉京罢正夫又与郑居中阴援京京憾刘达次骨而逵善正夫京虽赖其助亦恶之因章紘铸钱狱辞及正夫讽有司追逮之帝知其情第贬两秩京又出之成都入辞留为翰林学

士京愈不能平谋中以事正夫作春宴乐语有紫宸朝
罢袞衣闲之句京党张康国密白帝曰袞衣岂可闲竟改龙图阁直学士知河南府召为
工部尚书拜右丞进中书侍郎太学诸生习乐成京欲
官之正夫曰朝廷长育人才规为时用而使与伶官齿策名以是得无为士子羞乎东封
仪物已具正夫力陈不可帝皆为之止益喜其不与京
同政和六年擢拜特进少宰才半岁属疾三上章告老除安化军节度使开府仪同三司
致仕病少愈丐东归诏肩輿至内殿长子阜民掖入坐
徙节安静军起充中太一宫使封康国公将行赐诗以荣其归至盱眙病亟命子弟作遗
牋自书留神根本深戒持盈八字遂卒赠太保谥文宪
再赠太傅正夫能迎时上下持禄养权性吝嗇惟恐不足于财晚年筑第杭州悉取其旁
军营民舍议者讥之帝眷念不衰以阜民为兵部侍郎
少子阜民徽猷阁待制

△何执中

何执中字伯通处州龙泉人进士高第调台亳二州判官亳数易守政不治曾巩至
颇欲振起之顾诸僚无可仗信者执中一见合意事无
纤巨悉委以剴决有妖狱株连寢多执中讯诸囚听其相与语谓牛羊之角皆曰股叩其
故不肯言而相视色变执中曰是必为师张角讳耳即
叩头引伏蒋之奇使淮甸号强明见执中喜曰一州六邑赖有君尔知海盐县入为太学
博士以母忧去寓苏州比邻夜半火执中拊枢号恸誓
与俱焚观者悲其孝绍圣中五王就傅选为记室转侍讲徽宗即位超拜宝文阁待制迁
中书舍人兵部侍郎工部吏部尚书兼侍读时选案籍
吏多藏于家以舞文取贿执中请置库架阁命官莅之是后六曹皆仿其法蔡京籍上书
人为邪等初无朝覲及入都之禁执中申言之且请任
在京职秩者皆罢遣辟雍成执中请开学殿使都人士女纵观大为士论所贬崇宁四年
拜尚书右丞大观初进中书门下侍郎积官金紫光禄
大夫一意谨事京三年遂代为尚书左丞加特进制下太学诸生陈朝老诣阙上书曰陛
下知蔡京奸解其相印天下之人鼓舞及相执中中外
默然失望执中虽不敢肆为非法若京之蠹国害民然碌碌庸质初无过人执中夤缘攀
附致位二府亦已大幸遽俾之经体赞元是犹以蚤负
文多见其不胜任也疏奏不省而眷注益异初赐第信陵坊更徙金顺坊建嘉会成功阁
帝亲书巨额以示宠执中与蔡京并相凡营立皆预议
略无所建明及张商英任事执中恶其出己上与郑居中合挤之陈瓘在台州执中起儉
人石慝知州事使胁取尊尧集谋必死瓘政和二年用
提举修哲宗史纪恩加少保入宴太清楼锡白玉带会正宰相官名转少傅为太宰又迁

少师封荣国公执中辅政一纪年益高赐宽告造朝命
止赴六参乃以少傅就第许朝朔望其在政府尝戒边吏勿生事重改作惜人材宽民力
性复谨畏至于迎顺主意赞饬太平则始终一致卒年
七十四帝为辍朝三日赠太师追封清源郡王谥曰正献

△郑居中

郑居中字达夫开封人登进士第崇宁中为都官礼部员外郎起居舍人至中书舍
人直学士院初居中自言为贵妃从兄弟妃从藩邸进
家世微亦倚居中为重由是连进擢会妃父绅客祝安中者上书涉谤讪言者并及居中
罢知和州徙颍州明年归故官迁给事中翰林学士大
观元年同知枢密院时妃宠冠后宫于居中无所赖乃用宦官黄经臣策以外戚秉政辞
改资政学士中太一宫使兼侍读蔡京以星文变免赵
挺之相与刘逵谋尽改京所为政徽宗颇悔更张之暴外莫有知者居中往来绅所知之
即入见言陛下建学校兴礼乐以藻饰太平置居养安
济院以周拯穷困何所逆天而致威谴乎帝大悟居中退语礼部侍郎刘正夫正夫继请
对语同帝意乃复相京京再得政居中厚责报京为言
枢密本兵之地与三省殊无嫌于用亲经臣方恃权力抗前说京言不效居中疑不已援
始怨之乃与张康国比而间京都水使者赵霖得龟两
首于黄河献以为瑞京曰此齐小白所谓象罔见之而霸者也居中曰首岂宜有二人皆
骇异而京独主之殆不可测帝谓居中爱我遂申前命
进知院事四年京又罢居中自许必得相而帝觉之不用妃正位中宫复以嫌罢为观文
殿学士政和中再知枢密院官累特进时京总治三省
益变乱法度居中每为帝言帝亦恶京专寻拜居中少保太宰使伺察之居中存纪纲守
格令抑侥幸振淹滞士论翕然望治丁母忧旋诏起复
踰年加少傅得请终丧服除以威武军节度使使佑神观还领枢密院加少师连封崇宿
燕三国公朝廷遣使与金约夹攻契丹复燕云蔡京童
贯主之居中力陈不可谓京曰公为大臣国之元老不能守两国盟约辄造事端诚非妙
算京曰上厌岁币五十万故尔 【按宋人输币靖边
原非得计但岁输五十万相沿百年于国未亏而疆圉尚幸无事暨蔡京童贯贪功开衅
以岁币迎合上心而军兴费重科敛益繁卒至辽币虽
废金币转加帑藏既空危亡旋见伏读通鉴辑览 御批以失算之中更为失算】 居
中曰公独不思汉世和戎用兵之费乎使百万生灵肝
脑涂地公实为之由是议稍寝其后金人数攻契丹日蹙王黼童贯复议举兵居中又言
不宜幸灾而动不听燕山平进太保自陈无功不拜入
朝暴遇疾退舍数日卒赠太师华原郡王谥文正子修年亿年皆至侍从亿年遭靖康之

难没入于金后遣事刘豫晚得南归秦桧以妇氏亲擢
为资政殿大学士桧死亦窜死抚州时又有安尧臣者亦尝上书论燕云之事其言曰宦
寺专命倡为大谋燕云之役兴则边衅遂开宦寺之权
重则皇纲不振艺祖拨乱反正躬擐甲冑当时将相大臣岂勇略智力不能下幽燕哉盖
以区区之地契丹必争不忍使吾民重困锋镝章圣澶
渊之役与之战而胜乃听其和亦欲固本而息民也今童贯深结蔡京同纳赵良嗣以为
谋主故建平燕之议臣恐异时边境有可乘之衅日夜
寒心伏望杜塞边隙务守旧好徽宗然之命尧臣以官后竟为奸谋所夺尧臣惇之族子
也

△张康国

张康国字宾老扬州人第进士知雍邱县绍圣中户部尚书蔡京整治役法荐以参
详利害使提举两浙常平发仓救荒江南就食者活数
万口移福建转运判官崇宁元年入为吏部左司员外郎起居郎二年为中书舍人徽宗
命为翰林院学士三年进承旨拜尚书左丞而以其兄
康伯代为学士寻知枢密院事康国始因蔡京进京定元佑党籍皆预密议故汲汲引援
之及得志寢为崖异帝恶京专愎阴令沮其奸尝许以
相是时西北边帅多取部内好官自辟置以力不以才康国请随阙选用定为格京使御
史中丞吴执中击康国康国先知之旦奏事留白帝愿
避位既而执中果陈其事帝叱去之他日康国朝退趋殿庐暴得疾卒年五十四赠开府
仪同三司谥曰文简康伯仕终吏部尚书

△朱谔

朱谔字圣与秀州华亭人进士第二调忠正军推官崇宁初由太常丞擢殿中侍御
史迁侍御史给事中进御史中丞入谢言前此中执法
类不知职守言事多妄至过天津桥见汴堤一角垫陷乞修葺如许细故何足论哉又言
陛下手诏屡下惻怛愿治然吏奉行多安于苟简或
怀二三柅置不行愿分命使者刺举诸道元佑纷更凡得罪于熙宁元丰者不问是否辄
陈冤诉自归无过之地彰先朝之失刑希合奸臣规求
进用门下侍郎许将于哲庙表泛为平词至宣和太后之前则含冤负痛其辞如此于陛
下绍述成功得无少损乎俄兼侍读徙兵礼吏三部尚
书大观元年拜右丞相卒赠光禄大夫谥忠靖谔出蔡京门善附合不能有所建白

△刘逵

刘逵字公路 【按东都事略作公达】 随州随县人进士高第调越州观察判官
入为太学太常博士礼部考功员外郎国子监司业崇
宁中连擢秘书少监太常少卿中书舍人给事中户部侍郎使高丽迁尚书由兵部同知

枢密院拜中书侍郎逵无他才能初以附蔡京故躡进
京以彗星见去相而逵贰中书首劝徽宗碎元佑党碑宽上书邪籍之禁凡京所行悖理
虐民事稍稍澄正逵与赵挺之同心然挺之多智虑后
患每建白务开其端而使逵终其说逵欲自以为功直情不顾未几帝疑逵擅政于是
御史余深石公弼论逵专恣反复尽废绍述良法凡所
启用多取为邪党学术者及邪籍中子弟庇其妇兄章縉使之盗铸罢知亳州京复相再
责镇江节度副使安州居住京再以星变去起知杭州
加资政殿学士以醴泉观使召及都而卒年五十赠光禄大夫

△林摅

林摅字彦振福州人徙苏父邵显谟阁直学士摅用荫至敕令检讨官 【按东都事
略作敕令删定官】 京讲明熙宁元丰故事引以为
属迁屯田右司员外郎时遣朝士察诸道摅使河北入辞言大府宜择帅边州宜择守西
山木不宜采伐保甲有艺者宜贡诸朝骄兵宜使更戍
钱贷文书阑出疆外者宜遏绝徽宗喜曰卿所陈已尽河朔利害毋庸行赐进士第擢起
居舍人进中书舍人俄直学士院遂为翰林学士初朝
廷数取西夏地夏求援于辽辽为请命摅报聘京密使激怒之以起衅入境授书即抗言
数夏人之罪谓北朝不能加责而反为之请礼出不意
辽之君臣不知所答及辞辽使摅附奏求还进筑夏人城栅摅答语复不巽辽人大怒空
客馆水浆绝烟火凡饗饩祖犒皆废归复命议者以为
怒邻生事犹除礼部尚书既而辽人以失礼言出知颖州寻召为开封尹张怀素妖事觉
摅与御史中丞余深及内侍杂治得民士交关书疏数
百摅请悉焚荡以安反侧而京与怀素游最密摅实为京地京深德之用鞫狱明允加秩
二等改兵部尚书进同知枢密院尚书左丞中书侍郎
繇朝散大夫九迁至右光禄大夫集英殿唱贡士摅当传姓名不识甄盎字御史论其寡
学黜知滁州罢提举洞霄宫拜端明殿学士久之知扬
州政以察察闻鉏大挾绳污吏下不敢欺徙大名府道过阙为帝言顷使辽见其国中携
贰若兼而有之势不可无摅盖以曩辱故修怨焉其后
北伐盖兆于此加观文殿学士拜庆远军节度使言孝复论罢之还姑苏瘡生于首而卒
申赠开府仪同三司录子伟直秘阁数月死嗣遂绝靖
康元年伟以京党追贬节度副使

△管师仁

管师仁字符善处州龙泉人中进士第为广亲睦亲宅教授通判澧州知建昌军有
善政擢右正言左司谏论苏轼苏辙深毁熙宁之政其
门下士吏部员外郎晁补之辈不宜在朝廷河北滨棣诸州岁被水惠民流未复租赋故

在请悉蠲减以绥徠之迁起居郎中书舍人给事中工部侍郎选曹吏多挠法为过师仁暂摄领发其奸抵数人于罪士论称之改吏部进刑部尚书以枢密直学士知邓州未行改扬州又徙定州时承平百余年边备不整而辽横使再至为西人请侵疆朝廷诏师仁设备至则下令增障浚隍缮葺甲冑僚吏惧不知所裁师仁预为计度一日而举众十万转盼迄成外间无知者于是日与宾客燕集以示闲暇使敌不疑帝手书诏奖激召为吏部尚书俄同知枢密院不两月病拜资政殿学士佑神观使卒年六十五赠正奉大夫

△侯蒙

侯蒙字符功密州高密人急义好施进士及第调宝鸡尉知柏乡县民讼皆决于庭受罚者不怨转运使黄湜闻其名率诸使者合荐之徙知襄邑县擢监察御史进殿中侍御史崇宁星变求言蒙疏十事曰去冗官容谏臣明嫡庶别贤否绝幸冀戒滥恩宽疲民节妄费戚里毋预事阉寺毋假权徽宗听纳有大用意迁侍御史西将高永年死于羌帝怒亲书五路将帅刘仲武等十八人姓名敕蒙往秦州逮治既行拜给事中至秦仲武等囚服听命蒙晓之曰君辈皆侯伯无庸以狱吏辱君第以实对案未上又拜御史中丞蒙奏言今羌杀吾一都护而使十八将繇之而死是自艾其支体也欲身不病得乎帝悟释不问迁刑部尚书改户部比岁郊祭先期告办尚书辄执政至是帝密谕之对曰以财利要君而进非臣所敢母丧服除归故官遂同知枢密院进尚书左丞中书侍郎先是御史中丞蔡薨诋张商英私事甚力有旨令廷辨蒙曰商英虽有罪宰相也蔡薨虽言官从臣也使之廷辨岂不伤国体乎帝以为然一日帝从容问蔡京何如人对曰使京能正其心术虽古贤相何以加帝颌首且使密伺京所为京闻而衔之赏有几事蒙独受旨京不知也京侦得之白于帝帝曰侯蒙亦如是邪罢知亳州旋加资政殿学士宋江寇京东蒙上书言江以三十六人横行齐魏官军数万无敢抗者其才必过人今清溪盗起不若赦江使讨方腊以自赎帝曰蒙居外不忘君忠臣也命知东平府未赴而卒赠开府仪同三司谥文穆

△唐恪

唐恪字钦叟杭州钱塘人四岁而孤闻人言其父辄悲泣以荫登第调郴尉县民有被害而尸不获吏执其邻人抑使自诬恪争之躬以访求旦而得尸遂获盗知榆次县豪子雄于乡萃逋庇奸不输公赋恪以理善晓之悟而自悔折节为长者最闻擢提举河东常平江东转运判官大观中■〈牛羊〉犊内附召为屯田员外郎持节招纳夷人夷始恫疑衷甲以逆恪尽

去兵卫从数十卒单行夷望见欢呼投兵听命以奉使
称职迁右司员外郎起居舍人迎辽使还言河北边备废弛宜及今无事以时治之徽宗
壮之命为都转运使加集贤殿修撰中贵人称诏有所
市恪不答愤而归中以他事降直龙图阁知梓州历五年徙沧州河决水犯城下恪乘城
救理都水孟昌龄移檄索船与兵恪报水势方恶船当
以备缓急沧为极边兵非有旨不敢遣昌龄怒劾之恪不为动益治水水去城得全诏书
嘉奖乃上疏请暂免保甲保马呈阅及复诸县租等第
赈贷以宽被水之民未报悉便宜罢行之进龙图阁待制知扬州召拜户部侍郎京师暴
水至汴且溢或请决南堤以纾宫城之患恪决金堤注
之河浹旬水平入对帝劳之恪因上疏言水阴类也至犯宫阙天其或者以阴盛之沴傲
告陛下乎愿垂意时事益谨天戒宣和初迁尚书帝许
以二府为宰相王黼所陷罢知滁州言者论其治第历阳扰民踰制提举鸿庆宫五年起
知青州召为吏部尚书徙户部复请外以延康殿学士
知潭州请往钱塘埽墓然后之官遂改杭州靖康初金兵入汴李邦彦荐之拜同知枢密
院事至则为中书侍郎时进见者多论宣和间事恪言
于钦宗曰革弊当以渐宜择今日之所急者先之而言者不顾大体至毛举前事以快一
时之愤岂不伤太上之心哉京攸黼贯之徒既从窜斥
姑可已矣他日边事既定然后白道君请下一诏与天下共弃之谁曰不可帝善之令以
此意布告在位进拜少宰兼中书侍郎帝注礼之甚渥
然恪为相无济时大略金骑再来邀割三镇恪集廷臣议以为当与者十九恪从之使者
既行于是诸道勤王兵大集辄谕止令勿前皆反旆而
去洎金兵薄城下始悔之密言于帝曰唐自天宝而后屡失而复兴者以天子在外可以
号召四方也今宜举景德故事留太子居守而西幸洛
连据秦雍领天下亲征以图兴复帝将从其议而开封尹何■〈〈鹵，欠代义〉上木下〉
入见力诋其不然帝幡然而改以足顿地曰今当
以死守社稷擢■〈〈鹵，欠代义〉上木下〉门下侍郎恪计不用从帝巡城为都人
遮击策马得脱遂卧家求去御史胡舜陟继劾其罪谓
恪之智虑不能经画边事但长于交结内侍今国势日蹙诚不可以备位乃以观文殿大
学士中太一宫使兼侍读罢■〈〈鹵，欠代义〉上木下〉代为相京城不守车驾至金帅营恪曰计失矣一入将不得还既而还恪迎拜道
左请入覲■〈〈鹵，欠代义〉上木下〉不可二年
正月复幸恪曰一之已甚其可再乎金人逼百官立张邦昌令吴玠莫俦入城取推戴状
恪既书名仰药而死

△李邦彦

李邦彦字士美怀州人父浦银工也邦彦喜从进士游声誉奕奕入补太学生进上舍及第授秘书省校书郎试符宝郎邦彦俊爽美风姿为文敏而工然生长闾阎习猥鄙事应对便捷善讴谑能蹴鞠每缀街市俚语为辞曲人争传之自号李浪子言者劾其游纵无检罢符宝郎复为校书郎俄以吏部员外郎领仪礼局出知河阳召为起居郎邦彦善事中人争荐誉之累迁中书舍人翰林学士承旨宣和三年拜尚书右丞五年转左丞浦死赠官赐谥邦彦起复与王黼不协乃阴结蔡攸梁师成等谗黼罢之明年拜少宰无所建明惟阿顺趋谄充位而已都人目为浪子宰相徽宗内禅命为龙德宫使升太宰知众议不与外患日逼抗疏丐宫祠金人既薄都城李纲种师道罢邦彦坚主割地之议太学生陈东数百人伏宣德门上书言邦彦及白时中张邦昌赵野王孝迪蔡懋李梈之徒为社稷之贼请斥之邦彦退朝羣指而大诟且欲殴之邦彦疾驰得免乃以特进观文殿学士充太一宫使不旬日吴敏为之请复起为太宰人皆骇愕言者交论之出知邓州遂请持余服提举亳州明道宫建炎初以主和误国责建武军节度副使浚州安置方蔡京王黼用事附丽者多援引入政府若余深辞昂吴敏王安中赵野史皆逸其事因附着于此云

△余深

余深福州人元丰五年进士及第崇宁元年为太常博士著作佐郎累官御史中丞兼侍读治张怀素狱事连蔡京与开封尹林摅曲为掩覆狱辞有及京者辄焚之京遂力引深与摅骤至执政大观二年以吏部尚书拜尚书左丞三年转中书侍郎四年转门下侍郎京既致仕身不自安累疏请罢乃以资政殿学士知青州政和二年京复赴都堂治事于是深复入为门下侍郎七年拜少宰宣和元年为太宰进拜少保封丰国公再封卫国加少傅时福建以取花果扰民深为言之徽宗不悦遂请罢出为镇江军节度使知福州靖康初加恩特进观文殿大学士故事凡仆射使相宣徽使皆判州府深以少傅节度知福州有司失之也深谄附蔡京结为死党京奸谋诡计得助多者深为首摅次之言者累章劾深深益惧丐致仕建炎二年降中大夫临江军居住寻以渡江恩赦还乡里卒子日章亦以言者罢徽猷阁待制

△辞昂

辞昂杭州人登元丰八年进士第崇宁初历太学博士校书郎著作佐郎累升给事中兼大司成昂寡学术士子有用史记西汉语辄黜之在哲宗时常请罢史学哲宗斥为俗佞拜翰林学士以不称职改刑部尚书转兵部大观

三年拜尚书左丞明年请补外出知江甯徙河南政和三年蔡京复用事昂复自尚书右丞为左丞迁门下侍郎寻请罢授彰化军节度使改特进充资政殿大学士昂与余深林摠始终附会蔡京至举家为京讳或误及之辄加笞责昂尝误及即自批其口靖康初言者斥其罪诏以金紫光禄大夫致仕杭州军乱昂不请命领州事责徽州居住

△吴敏

吴敏字符中真州人大观二年试辟雍列首选蔡京喜其文欲妻以女敏辞因擢浙东学事司干官为秘书省校书郎京荐之充馆职中书侍郎刘正夫以敏未尝过省不可京乃请御笔特召上殿除右司郎官御笔自此始繇是权幸争请御笔而缴驳之任废矣升中书舍人同修国史改给事中敏为蔡京所引郑居中方秉政敏数言其失居中衔之坐驳盗当死者罢为右文殿修撰提举南京鸿庆宫久之复为给事中权直学士院兼侍讲徽宗将内禅蔡攸探知上意引敏入对宰臣执政皆在敏前奏事且曰金人渝盟举兵犯顺陛下何以待上蹙然曰柰何时东幸计已定命户部尚书李棣先出守金陵敏退诣都堂言曰朝廷便为弃京师计何理也此命果行虽死不奉诏宰执以为言棣遂罢行皇太子除开封尹上去意益决李纲尝语敏以上宣传位如唐天宝故事敏遂荐纲明日宰臣奏事徽宗独留李邦彦语敏所对命除门下侍郎辅太子敏骇曰臣既画计当从陛下巡幸陛下宣传位而臣受不次之擢臣曷敢上曰不意卿乃尔敢言于是命敏草传位诏钦宗既立上皇出居龙德宫敏与蔡攸同为龙德宫副使迁知枢密院事拜少宰敏主和议与太宰徐处仁议不合纷争上前御史中丞李回劾之与处仁俱罢为观文殿大学士醴泉观使顷之言者论其庇蔡京父子出知扬州再贬崇信军节度副使涪州安置建炎初移柳州俄用范宗尹荐起知潭州敏辞免丐宫祠乃提举洞霄宫绍兴元年复观文殿大学士为广西湖南宣抚使卒于官

△王安中

王安中字履道中山阳曲人进士及第调瀛州司理参军大名县主簿历秘书省著作郎政和间自秘书少监除中书舍人擢御史中丞开封逻卒缚民为盗安中廉得冤状即出民抵吏罪徐禛以增广鼓铸之说媚蔡京京奏遣禛措置东南九路铜事且令搜访宝货禛图绘坑冶增旧几十倍且请开洪州严阳山坑迫有司承岁额又妄请得希世珍异与古之宝器乞归书艺局京主其言安中独论禛欺上扰下宜令九路监司覆之禛竟得罪时上方乡神仙之事蔡京引方士王仔昔以妖术见朝臣戚里夤缘关

通安中疏请自今招延山林道术之士当责所属保任
宣召出入必令察视其所经由仍申严臣庶往还之禁并言京欺君僭上蠹国害民数事
上悚然纳之已而再疏京罪上曰本欲即行卿章以近
天盃节俟过此当为卿罢京京伺知之大惧其子攸日夕侍禁中泣拜恳祈上为迁安中
翰林学士又迁承旨宣和元年拜尚书右丞三年为左
丞金人来归燕谋帅臣安中请行王黼赞于上授庆远军节度使河北河南燕山府路宣
抚使知燕山府辽降将郭药师同知府事药师跋扈府
事皆专行安中不能制俄加检校少保改少师时山后诸州俱陷唯平州为张觉所据金
人入燕以觉为临海军节度使其后叛金金人攻之觉
败奔燕金人来索急安中不得已缢杀之函其首送金郭药师宣言曰金人欲觉即与若
求药师亦将与之乎安中惧药师自是解体金人终以
是启衅安中以上清宝箓宫使兼侍读召还除检校太保健雄军节度使大名府尹兼北
京留守司公事靖康初言者论其缔合王黼童贯及不
讯察郭药师叛命罢为观文殿大学士提举嵩山崇福宫又责授朝议大夫秘书少监分
司南京随州居住又贬单州团练副使象州安置高宗
即位内徙道州寻放自便绍兴初复左中大夫子辟章知泉州迎安中往未几卒年五十
九【按宋史此下有王襄传无事迹足录今从删】

△赵野

赵野开封人登政和二年进士第历监察御史殿中侍御史累拜刑部尚书翰林学
士时蔡京王黼更秉政植党相挤一进一退莫有能两
全者野处之皆得其心京黼亦待之不疑宣和七年拜尚书右丞升左丞靖康初为门下
侍郎徽宗东幸诏野为行宫奉迎使以左司谏陈公辅
言罢野行金人再入出为北道都总管颜岐副之王襄为西道都总管张杲副之元帅府
建命与范讷为宣府司守东京寻帅师屯宛亭以待王
师王襄既责野亦降安远军节度副使邵州安置建炎元年复起知密州时盗贼充斥山
东车驾如淮南命令阻绝野弃城去军校杜彦等乘间
作乱追野以归彦坐堂上数之曰汝知州而携家先遁此州之人谁其为主野不能应遂
见杀家属悉为贼所分唯子学老得免

△曹辅

曹辅字载德南剑州人第进士政和二年以通仕郎中问学兼茂科历秘书省正字
自政和后帝多微行置行幸局局中以帝出日谓之有
排当蔡京谢表有轻车小辇七赐临幸自是邸报闻四方而臣僚阿顺莫敢言辅上疏略
曰陛下厌居法宫时乘小舆出入廛陌之中郊垌之外
极游乐而后反不意陛下当宗庙社稷付托之重玩安忽危一至于此昔仁祖视民如子

惘然惟恐或伤一旦宫闱不禁卫士辄踰禁城几触宝
瑟荷天之休帝躬保佑况今革冗员斥滥奉去浮屠诛胥吏蚩愚之民岂能一一引咎安
分万一当乘輿不戒之初一夫不逞包藏祸心发蠹蚤
之毒奋兽穷之计虽神灵垂护然亦损威伤重矣臣愿陛下身居高拱渊默雷声临之以
穹昊至高之势行之以日月有常之度及其出也太史
择日有司除道三卫百官以前以后若曰省烦约费以便公私则临时降旨存所不可阙
损所未尝用虽非祖宗旧制比诸微服晦迹下同臣庶
不犹愈乎上得疏出示宰臣令赴都堂审问太宰余深曰辅小官何敢论大事辅对曰大
官不言故小官言之官有大小爱君之心则一也少宰
王黼阳顾左丞张邦昌右丞李邦彦曰有是事乎皆应以不知辅曰兹事虽里巷细民无
不知相公当国独不知邪曾此不知焉用彼相黼怒其
侵己令吏从辅受辞辅操笔曰区区之心一无所求爱君而已退待罪于家黼奏不重责
辅无以息浮言遂编管郴州辅将言知必获罪召子绅
来付以家事乃闭户草疏夕有恶鸟鸣屋极声若纺轮心知其不祥弗恤也处郴六年黼
当国不得移辅亦怡然不介意靖康元年召为监察御
史守殿中侍御史除左谏议大夫御史中丞不旬日拜延康殿学士签书枢密院事汴都
失守金以康王握兵于相州请钦宗诏召之乃遣辅往
辅密启上曰方今外援独康王宜留在外使敌有所畏上是其言遂以公文回报车驾再
出郊辅力谏何■〈〈鹵，欠代义〉上木下〉不听
因从二帝留金军中张邦昌请归辅胁辅视事以死辞遂奔济州迎驾高宗即位辅仍旧
职未几卒诏厚恤其家

△耿南仲

耿南仲开封府人与余深同年登第提举两浙常平徙西路改转运判官提点广南
东路及夔州路刑狱荆湖江西两路转运副使入为户
部员外郎辟雍司业坐事罢知衢州政和二年以礼部员外郎为太子右庶子改定王嘉
王侍读俄试太子詹事徽猷阁直学士改宝文阁直学
士在东宫十年钦宗辞内禅得疾出卧福宁殿宰相百官班候李邦彦曰皇太子素亲耿
南仲可召之入南仲与吴敏至殿中侍疾明日帝即位
拜资政殿大学士签书枢密院事未几免签书帝以南仲东宫旧臣礼重之赐宅一区升
尚书左丞门下侍郎金人再举乡京师请割三镇以和
议者多主战守唯南仲与吴开坚欲割地康王使军前请南仲偕帝以其老命其子中书
舍人延禧代行金人次洛阳不复言三镇直请画河为
界于是议遣大臣往南仲以老辞聂昌以亲辞上大怒命南仲出河东昌出河北议割地
初南仲自谓事帝东宫首当柄用而吴敏李纲越次进

位居己上不能平因每事异议摈斥不附己者纲等谓不可和而南仲力沮之为主和议故战守之备皆罢走相州以上旨谕康王起河北兵入卫京师因联署募兵榜揭之人情始安与文武官吏劝进高宗既即位薄南仲为人罢为观文殿大学士提举杭州洞霄宫延禧以龙图阁直学士知宣州已而言者论其主和误国罪诏镌学士秩延禧亦落职与祠寻责南仲临江军居住御史中丞张澄又言南仲趣李纲往救河东以致师溃盖不恤国事用此报讎帝曰南仲误渊圣天下共知朕尝欲手剑击之命除授别驾安置南雄行至吉州卒建炎四年复观文殿大学士

钦定续通志卷三百六十三

●钦定续通志卷三百六十四 列传一百六十四

列传

宋 【六十八】

○宋六十八

何■ 〈〈鹵，欠代义〉上木下〉

孙傅

陈过庭

张叔夜

聂昌

张阁

张近

郑仅

字文昌龄【常】

许几

程之邵

龚原

蒲亘

谢文瓘

陆蕴

黄寔

姚佑

李伯宗

何常

叶祖洽

霍端友

蔡薏

何■ 〈〈鹵，欠代义〉上木下〉

孙傅

陈过庭

张叔夜

聂昌

张合

张近

郑仅

字文昌龄

许几

程之邵

龚原

蒲亘

谢文瓘

陆蕴

黄寔

姚佑

李伯宗

何常

叶祖洽

霍端友

蔡薳

△何■〈〈鹵，欠代义〉上木下〉

何■〈〈鹵，欠代义〉上木下〉字文績仙并人政和五年进士第一擢秘书省校书郎踰年提举京畿学事召为主客员外郎起居舍人迁中书舍人兼侍讲徽宗数从咨访欲付以言责或论■〈〈鹵，欠代义〉上木下〉与苏轼乡党宗其曲学出知遂宁府已而留为御史中丞论王黼奸邪专横十五罪黼既抗章请去而犹豫未决■〈〈鹵，欠代义〉上木下〉继上七章黼及其党胡松年胡益等皆罢■〈〈鹵，欠代义〉上木下〉亦以徽猷阁待制知秦州钦宗立复以中丞召阅月为翰林学士进尚书右丞中书侍郎会王云使金帅斡里雅布军还言金人怒割三镇缓却礼币弗纳日兼旬使不至则再举兵于是百官议从其请■〈〈鹵，欠代义〉上木下〉曰三镇国之根本奈何一旦弃之况金人亦安能保必信割亦来不割亦来宰相主割议■〈〈鹵，欠代义〉上木下〉论辨不已日河北之民皆吾赤子弃地则并其民弃之岂为父母意哉帝颇悟■〈〈鹵，欠代义〉上木下〉请建四道总管使统兵入援以胡直孺王襄赵野张叔夜领之兵既响应而唐恪耿南仲聂昌信和议急檄止之■〈〈鹵，欠代义〉上木下〉解政事俄以资政殿大学士领开封尹金兵长驱傅城下帝罢恪相而拜■〈〈鹵，欠代义〉上木下〉为尚书右仆射兼中书侍郎始复三省旧制时康王在河北信使不通■〈〈鹵，欠代义〉上木下〉建议请为元帅密草诏藁上之乃以康王充天下兵马大元帅【按建炎以来朝野杂记载何文績初相金再攻京师康王在河北文績请以帛书拜王为大元帅渊圣可之文績既北去御笔藏于其家绍兴中文績之弟桀持诣秦丞相乞进于朝秦方主和恶闻其事抑不奏】陈遘充兵马元帅宗泽汪伯彦充副元帅京城失守从幸金帅营遂留不返既而议立异姓金人曰唯何■〈〈鹵，欠代义〉上木下〉李若水毋得预议■〈〈鹵，欠代义〉上木下〉仰天大恸不食而死【按宣和录载靖康二年正月初九夜金人遣使致书欲车驾再出议和加金主徽号敌遣高尚书者持书来高奏云陛下不必亲出姑为书或遣亲王大臣以行如何钦宗亦不

欲亲出何■〈〈鹵，欠代义〉上木下〉独以为必
须亲出钦宗信之■〈〈鹵，欠代义〉上木下〉自都堂自草敕曰孙傅可太子少傅
谢克家可太子宾客辅太子监国来日车驾出幸金军
时■〈〈鹵，欠代义〉上木下〉复私自草敕曰孙傅可太子曰细雨共斜风作轻寒
左右及金使皆笑之又按宋名臣言行续录载金帅再
邀銮輿出外议未决■〈〈鹵，欠代义〉上木下〉奏事出云翌日车驾出城曹辅遽
云敌意殆不可测此行恐与前日不同■〈〈鹵，欠
代义〉上木下〉厉声诘辅辅又率冯澥共说之澥与■〈〈鹵，欠代义〉上木下〉
同乡齿长冀幸一听■〈〈鹵，欠代义〉上木下〉
不从宋史本传论曰钦宗之再诣金营■〈〈鹵，欠代义〉上木下〉寔误之一死不
足偿也】年三十九建炎初诏以为观文殿大学士提
举玉局观使禄其家讫闻赠开府仪同三司议者指其误国不行秦桧自北还具道其死
时状乃改赠大学士官其家七人

△孙傅

孙傅字伯野海州人登进士第中词学兼茂科为秘书省正字校书郎监察御史礼
部员外郎时蔡修为尚书傅为言天下事劝其亟有所
建修不能用迁秘书少监至中书舍人宣和末高丽入贡使者所过调夫治舟骚然烦费
傅言索民力以妨农功而于中国无丝毫之益宰相谓
其所论同苏轼奏贬蕲州安置给事中许翰以为傅论议虽偶与轼合意亦无他以职论
事而责之过矣翰亦罢去靖康元年召为给事中进兵
部尚书疏复祖宗法度钦宗问之傅曰祖宗法惠民熙丰法惠国崇观法惠奸时谓名言
十一月拜尚书右丞俄改同知枢密院金人围都城傅
日夜亲当矢石读邱浚感事诗有郭京杨适刘无忌之语于市人中访得无忌龙卫兵中
得京好事者言京能施六甲法可以生擒二将而扫荡
无余其法用七千七百七十七人朝廷深信不疑命以官赐金帛数万使自募兵无问技
艺能否但择其年命合六甲者所得皆市井游惰旬日
而足有武臣欲为偏裨京不许曰君虽材勇然明年正月当死恐为我累其诞妄类此敌
攻益急京谈笑自如云择日出兵三百可致太平直袭
击至阴山乃止傅与何■〈〈鹵，欠代义〉上木下〉尤尊信倾心待之或上书谏傅
曰自古未闻以此成功者惧必为国家羞傅怒曰京殆
为时而生敌中琐微无不知者幸与傅言若告他人将坐沮师之罪揖使出又有称六丁
力士天关大将北斗神兵者大率皆效京所为议者危
之京曰非至危急吾师不出■〈〈鹵，欠代义〉上木下〉数趣之徙期再三乃启宣
化门出戒守陴者悉下城毋得窃覘京与张叔夜坐城

楼上金兵分四翼噪而前京兵败退墮于护龙河填尸皆满城门急闭京遽白叔夜曰须自下作法因下城引余众南遁是日金人遂登城二年正月钦宗诣金帅营以傅辅太子留守仍兼少傅帝兼旬不返傅屡贻书请之及废立檄至傅大恸曰吾惟知吾君可帝中国耳苟立异姓吾当死之金人来索太上帝后诸王妃主傅留太子不遣密谋匿之民间别求状类太子者并宦官二人击杀之并斩十数死囚持首送之给金人曰宦者欲窃太子出都人争鬪杀之误伤太子因帅兵讨定斩其为乱者以献苟不已则以死继之越五日无肯承其事者曰吾为太子傅当同生死金人虽不吾索吾当与之俱行见金帅面责之庶或万一可济傅寓直皇城司其子来省叱之曰使汝勿来而竟来邪吾已分死国虽汝百辈来何益挥使速去子亦泣曰大人以身徇国儿尚何言愿力保太子遂以留守事付王时雍而从太子出至南熏门范琼力止之【按靖康要录载靖康二年正月十一日孙傅随太子至南熏门欲出范琼以死拒之范琼先以危言誓卫士然后益兵拥皇太子】金守门者曰所欲得太子留守何预傅曰我宋之大臣且太子傅也当死从是夕宿门下明日金人召之去明年二月死于朔廷绍兴中赠开府仪同三司谥曰忠定【按靖康要录载傅是夕留门下不动黎明金人开门以雅满命召之出自是后死者不可得而知也】

△陈过庭

陈过庭字宾王越州山阴人中进士第为馆陶主簿澶州教授知中牟县除国子博士何执中侯蒙器其才荐之擢祠部吏部右司员外郎使契丹过庭初名扬庭辞曰徽宗改赐今名时人或传契丹主苦风痹又箭损一目过庭归证其妄且劝帝以边备为念迁太常少卿起居舍人宣和二年进中书舍人纔七日迁礼部侍郎未尽一月又迁御史中丞兼侍读睦寇窃发过庭言致寇者蔡京养寇者王黼窜二人则寇自平又朱勔父子本刑余小人交结权近窃取名器罪恶盈积宜昭正典刑由是大与权贵连翻陷以不举劾之罪罢知蕲州未半道责海州团练副使黄州安置三年得自便钦宗立以集英殿修撰起知潭州未行以兵部侍郎召在道除中丞时节度使范讷丐归环卫过庭因言自崇宁以来建旄钺者多不由勋绩请除宗室及将帅立功者余并如讷例又乞辨宣仁后诬谤姚古拥兵不援太原陈其可斩之罪七窜诸岭表进礼部尚书擢右丞中书侍郎议遣大臣割两河与金耿南仲以老辞聂昌以亲辞过庭曰主忧臣辱愿効死帝为挥涕叹息固遣南仲昌及城陷过庭亦被金人拘之军中留不得还建炎四年卒于燕山年六十赠开府仪同三司谥曰忠肃

△张叔夜

张叔夜字稽仲侍中耆孙也少喜言兵以荫为兰州录事参军州本汉金城郡地最极边恃河为固每冰合必严兵以备士不释甲者累月叔夜曰此非计也不求要地守之而使敌迫河则吾既殆矣有地曰大都者介五路间羌人入寇必先至彼点集然后议所向每一至则五路皆竦叔夜按其形势画攻取之策讫得之建为西安州自是兰无羌患知襄城陈留二县蒋之奇荐之易礼宾副使通事舍人知安肃军言者谓太优还故官献所为文历知舒海秦三州大观中为库部员外郎开封少尹复献文召试制诰赐进士出身迁右司员外郎使辽宴射首中的辽人叹诧还图其山川城郭服器仪范为五篇上之从弟克公弹蔡京京迁怒叔夜摭微过贬监西安草场久之召为秘书少监擢中书舍人给事中时吏惰不虔凡命令之出于门下者预列衔使书名而徐填其事谓之空黄叔夜极陈革其弊进礼部侍郎又为京所忌以徽猷阁待制再知海州宋江起河朔转略十郡官军莫敢婴其锋声言将至叔夜使间者覘所向贼径趋海濒劫巨舟十余载卤获于是募死士得千人设伏近城而出轻兵距海诱之战先匿壮卒海旁伺兵合举火焚其舟贼闻之皆无鬪志伏兵乘之擒其副贼江乃降加直学士徙济南府山东羣盗猝至叔夜度力不敌乃取旧赦贼文俾邮卒传至羣盗闻果小懈叔夜会饮谯门示以闲暇遣吏谕以恩旨盗狐疑相持至暮未决叔夜发卒五十人乘其惰击之盗奔溃追斩数十级以功进龙图阁直学士知青州靖康改元金人南下叔夜再上章乞假骑兵与诸将并力断其归路不报徙邓州四道置帅叔夜领南道都总管金兵再至钦宗手札趣入卫即自将中军子伯奋将前军仲熊将后军合三万人翌日上道至尉氏与金游兵遇转战而前十一月晦至都帝御南熏门见之军容甚整入对言敌锋方锐愿如唐明皇之避禄山暂诣襄阳以图幸雍帝领之加延康殿学士闰月帝登城叔夜陈兵玉津园铠甲光明拜舞城下帝益喜进资政殿学士令以兵入城俄签书枢密院连四日与金人大战斩其金环贵将二人帝遣使赍蜡书以褒叔夜之事檄告诸道然迄无赴者城陷叔夜被创犹父子力战车驾再出郊叔夜叩马而谏帝曰朕为生灵之故不得不亲往叔夜号恸再拜众皆哭帝回首字之曰稽仲努力金人议立异姓叔夜谓孙傅曰今日之事有死而已移书二帅请立太子以从民望二帅怒追赴军中至则抗请如初遂从以北道中不食既至白沟馭者曰过界河矣叔夜乃矍然起仰天大呼遂不复语明日卒年六十三讣闻赠开府仪同三司

【按宋名臣言行续录载讣闻高宗遥拜观文殿学士醴泉观使】 谥忠文

△聂昌

聂昌字辛远抚州临川人始繇太学上舍释褐为相州教授用蔡攸荐召除秘书郎擢右司员外郎以直龙图阁为湖南转运使还为太府卿户部侍郎改开封尹复为户部昌本厚王黼既而从蔡京为黼所中罢知德安府又以乡人讼谪崇信军节度副使安置衡州钦宗立吴敏用事以昌猛厉径行为可助已自散地授显谟阁直学士知开德府道拜兵部侍郎进户部尚书领开封府昌遇事奋然不顾敢诛杀敏度不为用始惮之引唐恪徐处仁等共政独遗昌李纲之罢太学生陈东及士庶十余万人挝鼓伏阙下经日不退遇内侍辄杀之府尹王时雍麾之不去帝顾昌俾出谕旬即相率听命王时雍欲寘东等狱昌乃言不可乃止昌再尹京恶少年怙乱昼为盗掠官民家昌悉弹治正法而纵博奕不之问或谓令所禁昌曰姑从所嗜以懈其谋是正所以禁其为非尔昌旧名山至是帝谓其有周昌抗节之义乃命之曰昌京师复戒严拜同知枢密院入谢即陈扞敌之策曰三关四镇国家藩篱也闻欲以畀敌一朝渝盟何以制之愿勿轻与而檄天下兵集都畿坚城守以遏其冲简禁旅以备出击壅河流以断归路前有坚城后有大河劲兵四面而至彼或南下堕吾网中臣愿激合勇义之士设伏开关出不意扫其营以报帝壮之命提举守御得以便宜行事会金人再议和割两河须大臣报聘诏耿南仲及昌往昌言两河之人忠义勇劲万一不从必为所执死不瞑目倘和议不遂臣当分遣官属促勤王之师入卫许之行次永安与金将居雅满遇其从者称合门舍人止昌彻伞令用膀子赞名引见昌不可卒以客礼见昌往河东至绛绛人闭壁拒之昌持诏抵城下缒而登州钤辖赵子清麾众害昌抉其目而齑之年四十九建炎四年始赠观文殿大学士谥曰忠愍昌为人疏隽喜周人之急然恩怨太明睚眦必报王黼之死昌实遣刺客之弃尸道旁遂附耿南仲取显位左右其说以误国卒至祸变而身亦不免焉

△张合

张合字台卿河阳人第进士崇宁初由卫尉主簿迁祠部员外郎资阅浅为掌制者所议蔡京主之乃止俄徙吏部迁宗正少卿起居舍人属疾不能朝改显谟阁待制提举崇福宫疾愈拜给事中殿中监为翰林学士河北诸帅以缮城讫役降奖诏有中贵人为之地将继此策赏合言此牧伯常职若奖之恐开邀功生事之路徽宗以为是格不下京免相合当制历数其过词语道拔人士多传诵之京复相以龙图阁学士知杭州浙部和买绢杭独居十三户有至数百匹者合请均之他郡杭久阙守合经理有叙

去恶少年之为人害者州以理闻召拜兵部尚书兼侍
读复为学士上日特赠敕诏且有意大用未几卒年六十四合初出守杭思所以固宠辞
日乞自领花石纲事应奉由是滋炽云

△张近

张近字几仲开封人第进士累迁大理正发运使吕温卿以不法闻近受诏鞠治温
卿谩不肯置对近言温卿所坐明白佻听其蔓词惧为
株连者累诏以众证定其罪提举河北东路常平西路刑狱入为刑部员外郎大理少卿
以集贤殿修撰知瀛州辽使为夏人请命而宿兵以临
我近请亦出秦甲戌北道伐其谋边人吕忤儿入瓦桥为盗吏执之辽人因略宋民为质
近言朝廷方继好息民当使曲在彼一偷之得失不足
为轻重释之便沧民渔于海辽卒利其饶而私举网取鱼守兵与之鬪斩级三十二州将
请赏之或言所杀乃平人宜论如律议弗决近言边人
贪利喜功遂赏之则为国起怨然彼挟兵涉吾地谓之非盗可乎如罪以擅兴他日将谁
使御敌愿两置赏刑略而不问从之出镇高阳累加显
谟阁待制直学士徙知太原府以疾提举洞霄宫先承诏买马三千给牧户近悉敛诸民
而不予直为御史所劾失学士二年复之卒年六十五

△郑仅

郑仅字彦能徐州彭城人第进士为大名府司户参军留守文彦博以为材奏改司
法迁冠氏令河决府西檄夜下调夫急仅方阅保甲尽
籍即行先他邑至决遂塞使者怒劾之留守王拱辰争于朝犹坐罚金时河朔饥盗起独
冠氏无之且戒不入境知福昌县复值岁饥悉意赈贫
民不流亡提举京东常平入为户部员外郎至太府卿加直龙图阁为陕西都转运使论
馈饷河湟功进集贤殿修撰显谟阁待制仅请籍闲田
为官庄是岁镇戎德顺收谷十余万会西寇高永年战没熙河帅臣归咎官庄夺属羌地
致其怨畔诏罢之议者以为惜改知宬州诸军多杀老
弱持首要赏仅下令非强壮而能生致者赏半之有内附羌追寇得老人不忍杀擒之乃
其父也相持哭一军感动时诸路争进讨奏捷仅独保
境不生事寇亦不犯徙秦州复为都转运使召拜户部侍郎改吏部侍郎知秦州以显谟
阁直学士通议大夫卒年六十七赠光禄大夫谥曰修
敏子望之自有传

△宇文昌龄

宇文昌龄字伯修成都双流人进士甲科调荣州推官熊本经制梓夔辟干当公事
凡攻讨招袭建南平诸城砦皆出其画迁大理丞本归
阙言其功擢提举秦凤路常平改两浙神宗患司农图籍不肃选官厘整昌龄以使夔路

入辞留为寺主簿遂拜监察御史鄜延帅奏所部刘绍
能与西羌通将为患帝察其不然命昌龄鞠之果妄昌龄因请深戒守臣毋生事徼赏以
靖边人之心使还赐五品服尚书省建以为比部员外
郎时官曹更新统纪未立昌龄悉力从事具所立纲要请于朝而行之改吏部员外郎出
京西转运副使召为左司员外郎送辽使至雄州当宴
从者不待揖而坐昌龄诮其使使者阳若不服而心悟其非卒成礼去迁太常少卿诏议
郊祀合祭论者不一昌龄曰天地之数以高卑则异位
以礼制则异宜以乐舞则异数至于衣服之章器用之具日至之时皆有辨而不乱夫祀
者以类应类以气合气然后可以得而亲可以冀其格
今祭地于圜丘以气则非所合以类则非所应而求高厚之来享不亦难乎后竟用其议
改直秘阁知梓州历寿州河中府邓郛青三州徽宗立
召为刑部侍郎徙户部侍郎陕西馈刍粮于边旧制令内郡转给为民病昌龄建言止输
其州而令量取道里费助边余从之岁省余价五百万
公私便之以宝文阁待制知开封府后为户部侍郎知青杭越三州卒年六十五子常

字文常

字文常

常字权可政和未知黎州有上书乞于大渡河外置城邑以便互市者诏以访常常
言自孟氏入朝艺祖取蜀輿地图观之画大渡为境历
百五十年无西南夷患今若于河外建城立邑虏情携贰边隙寔开非中国之福寻提举
成都路茶马自熙丰以来岁入马蕃多至崇观间其法
始坏提举官岁以所入进羨余吏缘为奸市马裁十一二且负其直夷人皆怨常尽革其
弊马遂溢额加直秘阁改知夔州进秘阁修撰官累中
大夫卒

△许几

许几字先之信州贵溪人入太学擢第调高安乐平主簿知南陵县还民之托僧尼
为奸者数百人提举京西常平为开封府推官进至将
作监吏与匠比为奸欺凡斲削涂墍丹雘之工当以次用而始役即槩给其廩费亡艺而
患不均几逆为之程费省工倍再迁太常卿户部侍郎
以显谟阁待制知郛州梁山冻多盗皆渔者窟穴也几籍十人为保使晨出夕归否则以
告辄穷治无脱者几有吏干善理财由是四入户部至
尚书尝以摇泉布法罢又以治染院事失实知婺州进枢密直学士河北都转运使徙知
成德军知太原府张商英裁损更禄几预其议贬永州
团练副使安置袁州遇恩复中大夫卒

△程之邵

程之邵字懿叔眉州眉山人以父荫为新繁主簿熙宁更募役法常平使者欲槩州县民力以羨乏相补之邵曰此法乃成周均力遗意当各以一邑之力供一邑之役岂宜以此邑助他邑使者愧服辟之邵为属熊本察访蜀道归语诸朝曰田役法初行成都路为最详之邵力也诏召见入为三司磨勘官得隐匿数十万缗从副使蹇周辅计度江岭盐还除广东转运判官元佑初提举利梓路常平周辅得罪亦罢知祥符县俄知泗州为夔路转运判官夔守强狠不奉法劾正其罪大盗并盐为利博前议者辄储其半供公余鬻于民使先输钱盐不足给民以病告之邵尽发所储与之商贾既通关征增数倍除主管秦蜀茶马公事革黎州买马之弊岁以仲秋为市至四月止以羨茶入熙秦易战骑得良马益多知凤翔府民负债无以偿自焚其居而给曰遗火有主藏吏杀四婢人无知者之邵俱发擿岐人传诵徙郑州元符中复主管茶马市马至万匹得茶课四百万缗童贯用师熙岷不俟报运茶往博余发钱二十万亿佐用度连加直龙图阁集贤殿修撰三进秩为熙河都转运使秦凤出师命之经制即言已备十万骑可食三百日擢显谟阁待制敌犯熙河之邵摄师事屯兵行边境解去俄得疾卒方录功转大中大夫不及拜赠龙图阁直学士子唐至宝文阁学士

△龚原

龚原字深之【按东都事略作深父】处州遂昌人少与陆佃同师王安石进士高第元丰中为国子直讲以虞蕃讼失官哲宗即位诣诉理所得直为国子丞太常博士方议祀北郊原言合祭非理此汉儒陋说愿亟正之加秘阁校理充徐王府记室出为两浙转运判官绍圣初召拜国子司业旋兼侍讲迁秘书少监起居舍人权工部侍郎为曾布所重安惇论其直讲时事以集贤殿修撰知润州徽宗初入为秘书监进给事中时除郎官五人皆执政姻戚悉举驳之又论郝随得罪不得居京师邓洵武不宜再入史院谓帝为哲宗服当循三年礼主议者斥其妄黜知南康军改寿州俄用三年之制乃复修撰知扬州还朝历兵工二部侍郎除宝文阁待制知庐州陈瓘击蔡京原与瓘善或谓原实使之夺职居和州起为亳州命下而卒年六十七初王安石改学校法引原自助原亦为尽力其后司马光召与语讥切王氏原反复辨捋不少衰为司业时请以安石所撰字说洪范传及子雱论语孟子义刊板传学者故一时学校举子之文靡然从之其敝自原始【按宋史此下有崔公度传度媚附安石无事迹足录今从删】

△蒲亘

蒲亘字君锡阆州人中进士第历利州司户参军三泉主簿知合江金水县通判文州有献议者欲开文州径路达陕西亘言洮岷积石至文甚迤自文出江油邓艾取蜀故道异时鬼章欲从此窥蜀为其阻隘而止夏人志此久矣可为之通道乎议遂塞为睦亲宅教授提举湖北京西常平崇宁均田转运使以用不足将度费以定税亘曰诏旨所以嘉惠元元初不在增赋也宛穰地广沃国初募民垦田得为世业好讼者稍以易佃法摇之亘一切禁止有持献于权贵而降中旨给赐者亘言地盈千顷户且数百传子至孙久一旦改隶众将不安先朝明诏具在不可易也朝廷是其议提点湖南刑狱知鼎辽陇宁四州复提举潼州路刑狱有议榷酤于泸叙间云岁可得钱二十万亘言先朝念此地夷汉杂居故弛其榷禁以惠安边人今所行未见其利乃止累官中大夫卒年七十二

△谢文瓘

谢文瓘字圣藻陈州人进士甲科教授大名府元丰中上疏言臣下推行新法多失本意而榜笞禁锢民受其虐掎克聚敛不胜多门其不急之征非理之取宜罢减之大臣以为讪朝廷议置之罪神宗曰彼谓奉法者非其人尔匪讪也哲宗时御史中丞黄履荐为主簿三年不诣执政府召对除秘书省正字考功右司员外郎绍圣末都水使者议建广武四埽石岸黄流湍悍役人多死一方甚病功不可成而使者申前说愈力文瓘条别利害罢其役徽宗立擢起居舍人给事中诏修神宗宝训文瓘请择当时大政事大黜陟节其要旨而为之说然所论率是王安石谓神宗能察众多之谤任之而不贰于是朋党消而威柄立辽主洪基殂使往吊之令从者变服而入贬秩二等崇宁元年出知濮州寻治党事坐元丰上疏及尝诤吕公著书再调邵武军移处州帝披党籍曰朕究知文瓘本末命出籍乃以为集英殿修撰知济州卒子颢宣和中为驾部员外郎知汝州钦宗时上封事十篇论事切至使金还提点京西北路刑狱金人侵汝州颢自襄阳领兵往援战死【按宋史此下有沈铢传及铢弟锡附传又路昌衡传俱无事迹足录并从删】

△陆蕴

陆蕴字敦信福州侯官人少知名登进士第为太学春秋博士经废员省改国朝会要所检阅文字崇宁中提举河北两浙学事召对言元佑异意俗学近诏不以使一路而犹得为守令臣愚未知其可遂拜礼部员外郎转吏部迁辟雍司业太常少卿议原庙不合黜知瑞金县还为太常进国子祭酒中书舍人请葺诸州天庆观立学事司考课法迁大司成擢御史中丞蕴颇论事尝言御笔一日数下而前后相违非所以重

命令辅相大臣宦官戚里赐第营筑纵撤民居县官市材于民而不予直贵游子弟以从官领闲局奉朝请为员猥多无益于事又赐予过制中外用度多于赋入数幸私室乖尊卑之分亦非臣下之福其言皆中时病以龙图阁待制知福州改建州加显谟阁直学士引疾提举鸿庆宫方二浙用兵旁郡皆缮治守备蕴闻命就道使者劾为避事夺职稍复集英殿修撰卒

△黄寔

黄寔字师是陈州人登进士第历司农主簿积官提举京西淮东常平元丰末议罢提举官命未布寔舅章惇属蔡确徙寔提点开封县镇迁提点梓州路两浙刑狱京东河北转运副使哲宗议召用曾布及林希沮之乃以知陕州为江淮发运副使贺辽主登位及境迓者移牒来称为贺登宝位使寔报以受命无宝字拒不受还除太仆卿再擢宝文阁待制知瀛州徙定州朝旨籍民兵旁郡因缘扰困寔怀檄不下而画利害请之事得寝卒于官赠龙图阁直学士寔孝友敦睦世称其内行苏辙在陈与寔游因结昏其后又与轼友善绍圣党祸寔以章惇甥获免

△姚佑

姚佑字伯受湖州长兴人元丰末第进士徽宗末除夔州路转运判官且行会帝幸禁苑御弓矢佑奏圣武临射赋帝大悦留为右正言历陈绍述之说迁左司谏建议置辅郡以供京畿进殿中监六尚局官制成凡所以享上率属察举稽违殿最勤惰之法皆佑裁定以亲老请郡授显谟阁待制知江甯府时召捕张怀素佑追获之复为殿中监踰岁以直学士知郑州改秦州或请调熙河弓箭士徙边以省更戍佑谓人情怀土重迁丐以二年为更发之期满岁乐业而愿留者乃听且请择熙秦富民分丁授地蠲役借粮以劝耕植益广秦之东西川建城壁严保障以控熙河泾原皆从之复为殿中监改吏部侍郎命镇蜀用母老辞迁工部尚书加龙图阁学士为大名尹进延康殿学士复为工部尚书徙礼部母丧服除知太原府以提举上清宝篆宫卒赠特进谥曰文僖 【按宋史此下有楼异沈积中二传无事迹足录今从删】

△李伯宗

李伯宗字会之河阳人第进士知内邱咸阳太康县建言朝廷行方田均税之法令以丰岁推行今州县吏苟简怀异者指熟为灾而贪进幸赏者掩灾为熟望深察其违戾而寘诸罚括县壮丁为兵得千人上其名数与按阅之法知枢密院蔡卞喜而荐之提举京畿保甲使行其说增籍二万已而有诉者陈牒至八百七十左迁通判相州提举白波鞏运提点江淮坑冶铸钱入为将作少监历大理卿开封民有鬻神祠故帽

饰以龙者吏以为乘舆服御伯宗曰此无他当坐不应为尔尹不从具以请如伯宗议 【按宋史本传议坐开封民罪事载入为将作少监之

下厯大理之上考将作少监无谏狱论罪之责今移置厯大理寺卿之下】 入对言今情重法轻者许奏请而情轻法重者不得焉恐非仁圣忠

恕之意徽宗纳之迁刑部侍郎与王黼不相能用胥吏微过罢提举崇福宫明年知同州徙陕西都转运使进通奉大夫显谟阁待制卒赠光禄

大夫谥曰荣 【按宋史此下有汪漈传漈三十年以儒名官无事迹足录今从删】

△何常

何常字德固京兆人中进士第为开封府兵曹绍圣初或言苏轼主文柄取士之非毁宗庙者常预其间出通判原州厯将作丞陕西转运

判官熙河转运副使议者欲贷民金帛而使入粟塞下常曰车牛转输民力已病然未至于死亡者粟自官出而民无害也今强以金帛使自入

粟惧非贫弱之利熙帅及监军劾之贬秩徙成都路中使持御札至令织戏龙罗二千绣旗五百常奏旗者军器之饰敢不奉诏戏龙罗惟供御

服日衣一匹岁不过三百有奇今乃数倍无益也诏奖其言为减四之三除直龙图阁加集贤殿修撰以显谟阁待制知秦州转通议大夫谏告

夏人多筑堡栅朝议出兵牵制常言羌人生长射猎今困于版筑违所长用所短可待其敝镇秦六岁察访方邵劾其越法货酒借米曲于官狱

具责昭化军节度副使数月复其官终右文殿修撰卒年七十三

△叶祖洽

叶祖洽字敦礼邵武人熙宁初策试进士祖洽所对专投合用事者考官宋敏求苏轼欲黜之吕惠卿擢为第一金书奉国军判官判登闻

检院由国子丞知湖州留为校书郎元佑初厯职方兵部员外郎加集贤校理进礼部郎中给事中赵君锡论其对策讪及宗庙祖洽自辨苏轼

刘攽言祖洽谓祖宗纪纲法度因循苟简愿朝廷与大臣合谋而新之可以为议论乖谬若谓之讪则不可于是但出提点淮西刑狱绍圣中入

为左司郎中起居郎中书舍人给事中祖洽性狠愎喜谏附密言王珪于册立时有异论愿稽合羣情决之独断珪遂追贬又言司马光吕公着

获终牖下恩礼隆缙蔡确受遗定策而贬死岭外乞恤其孤其论率类此坐举王回出知济州徙洪州以牟利黷货闻祖洽与曾布厚人目为小

训狐布用事欲以吏部侍郎召韩忠彦不可白为宝文阁待制知青州未赴布竟引为吏部布罢乃出知定州且行大言于上至云当时蔡确稍

失事几王珪果遂奸谋则神宗遂失正统不如今日神器孰归臣为朝廷宗社明确之功正珪之罪劝沮忠邪于千万年以此报神宗足矣徽宗

怒其躁妄降集贤殿修撰提举冲佑观自是不复用久之知洪州改亳州加徽猷阁直学士政和末卒 【按宋史此下有时彦传事无足为劝 惩今从删】

△霍端友

霍端友字仁仲常州武进人徽宗即位策进士第一授宣义郎不阅月擢秘书省校书郎迁著作佐郎起居郎中书舍人服金紫故事舍人唯服黑角带帝曰给事舍人等尔而服饰相绝如是始命犀带佩鱼进给事中大司成礼部侍郎端友言朝廷尊安重内轻外可令内外侍从更出迭入以奉禁闼殿大邦俾天下之势如持衡庶无首重尾轻之患疏入即请补郡乃以显谟阁待制知平江改陈州为政以宽闻不立声威陈地污下久雨则积潦时疏新河八百里而去淮尚远水不时泄端友请益开二百里彻于淮自是水患遂去内侍石焘传诏索瑞香花数十本端友不可疏罢之复以礼部召转吏部官至通议大夫卒赠宣奉大夫 【按宋史此下有俞■〈〈鹵，欠代义〉上木下〉传与时彦传同今从删】

△蔡薺

蔡薺字文饶开封人崇宁五年以诸生试策揣蔡京且复用即对曰熙丰之德业足以配天不幸继之以元佑绍圣之纒述足以永赖不幸继之以靖国陛下两下求言之诏冀以闻至言收实用也而见于元符之末者方且幸时变而肆奸言乘间隙而投异意诋诬先烈动摇国是愿逆处其未至而绝其原于是擢为第一以所对颁天下甫解褐即除秘书省正字迁起居舍人未几为中书舍人自布衣至侍从纔九月前未有也旋进给事中一意附蔡京叙族属尊为叔父京命攸修等出见薺亟云向者大误公乃叔祖此诸父行也遽列拜之八宝赦恩诏两省差择元佑党人情轻者出籍薺不肯书言者论其不能推广上恩出知和州明年加显谟阁待制知杭州始薺未第时以书谒陈瓘称其谏疏似陆贄刚方似狄仁杰明道似韩愈及对策所持论顿异遂欲害瓘以绝口因其子正汇告蔡京不轨执送京师薺复人为给事中又与宰相何执中谋使石慊治瓘几不免事具瓘传御史毛注言薺巧言惑众造为衅端疏入不报范柔中者顷以上书入邪等至是进阶薺言柔中尝毁神考哲宗有弗共戴天之讎自今春党人复官士论骇愕有致疑于绍述者乞削其叙迁昭示好恶从之张商英作相常安民与之书激使为善薺弟莱剽其藁示薺即论之以摇商英薺迁翰林学士坐妄议政事罢提举洞霄宫起知建宁府方建神霄宫薺先一路奏办下诏褒奖召为学士承旨礼

部尚书尝阴附权幸事觉徽宗令入对将面诘之踰月不奉诏帝怒命黜之御史言薨游太学则挟诡计以钳诸生居侍从则挟私事以胁宰辅处门下则借国法以快私忿为郡守则妄尊大而蔑监司宜重寘诸罚遂贬单州团练副使房州安置宣和中复龙图阁直学士再知杭州为政喜怒徇情任荆太惨方腊乱后西北戍卒代归人得犒绢薨禁民与为市乃下其直强取之卒怒乘薨夜饮客纵火焚州治将杀之薨知事势汹汹踰垣走免诏夺职罢归明年以徽猷阁待制卒

钦定续通志卷三百六十四

●钦定续通志卷三百六十五 列传一百六十五

列传

宋 【六十九】

○宋六十九

贾易	董敦逸	上官均	杨畏	崔台符	杨汲
吕嘉问	李南公	虞策【奕】	郭		
知章	刘拯	钱遹	吴执中	刘曷	宋乔年【升】
蔡居厚	蒋静	贾伟节	崔鷗		
张根	仕谅	周常			

贾易

董敦逸

上官均

杨畏

崔台符

杨汲

吕嘉问

李南公

虞策

郭知章

刘拯

钱遹

吴执中

刘曷

宋乔年 【宋升】

蔡居厚

蒋静

贾伟节

崔鸥

张根

任谅

周常

△贾易

贾易字明叔无为人七岁而孤母彭以纺绩自给使从学年踰冠中进士甲科调常州司法参军自以儒者不闲法令岁议狱唯求合于人情曰人情所在法亦在焉讫去郡中称平元佑初为太常丞兵部员外郎迁左司谏论吕陶不争张舜民事与陶交攻遂劾陶党附苏轼兄弟及文彦博范纯仁宣仁后怒其讦欲谪之吕公着救之力出知怀州御史言其谢表文过徙广德军明年提点江东刑狱召拜殿中侍御史遂疏彦博至和建储之议为不然宣仁后命付史馆彦博不自安解平章而去苏辙为中丞易引前嫌求避改度支员外郎孙升以为左迁又改国子司业不拜提点河东刑狱复入为侍御史上书言天下大势可畏者五一曰上下相蒙而毁誉不得其真二曰政事苟且而官人不任其责三曰经费不充而生财不得其道四曰人材废阙而教养不以其方五曰刑赏失中而人心不知所向其言虽颇切直然皆老生常谈志于抵阨时事无他奇画苏轼守杭诉浙西灾潦甚苦易率其僚杨畏安鼎论轼姑息邀誉眩惑朝听乞加考实诏下给事中范祖禹封还之谓宜阔略不问以活百姓易遂言轼顷在扬州题诗以奉先帝遗诏为闻好语草吕大防制云民亦劳止引周厉王诗以比熙宁元丰之政弟辙蚤应制科试文缪不应格幸而滥进与轼昔皆讪怨先帝无人臣礼至指李林甫杨国忠为喻议者由是薄易出知宣州历京西转运副使徙苏州徐加直秘阁元符中累谪保静军行军司马邵州安置徽宗立召为太常少卿进右谏议大夫陈次升论其为曾布客改权刑部侍郎历工部吏部未岁为真以宝文阁待制知邓州寻入党籍卒年七十三

△董敦逸

董敦逸字梦授吉州永丰人登进士第调连州司理参军知穰县时方兴水利提举官调民凿马渡港云可灌田二百顷敦逸言于朝以为利不补害核实如敦逸言免役夫十六万全旧田三千六百顷徙知弋阳县宝丰铜冶役卒多困于诱略有致死者敦逸推见本末纵还乡者数百人稍迁梓州路转运判官元佑六年召为监察御史同御史黄庆基言苏轼昔为中书舍人制诰中指斥先帝事其弟辙相为表里以紊朝政

宰相吕大防奏曰先帝圣意本欲富国强兵鞭挞不庭一时羣臣将顺太过故事或失当及太皇太后与皇帝临御因民所欲随事掇改盖事理当然尔比惟元佑以来言事官用此以中伤士人兼欲动摇朝廷意极不善辙复奏曰臣昨日取兄轼所撰吕惠卿诰观之其言及先帝者有曰始以帝尧之仁姑试伯鯀终然孔子之圣不信宰予兄轼亦岂是谤毁先帝者邪臣闻先帝末年亦自深悔已行之事但未暇改尔元佑改更盖追述先帝美意而已宣仁后曰先帝追悔往事至于泣下皇帝宜深知于是敦逸庆基并罢敦逸出为湖州运判改知临江军绍圣初轼辙失位刘拯讼敦逸无罪哲宗记其人曰非前日白须御史乎复除监察御史论常安民为二苏之党凡论议主元佑者斥去之改工部员外郎迁殿中侍御史左司谏侍御史瑶华秘狱成诏诣掖庭录问敦逸察知冤状握笔弗忍书郝随从旁胁之乃不敢异狱既上于心终不安竟上疏其略云瑶华之废事有所因情有可察诏下之日天为之阴翳是天不欲废之也人为之流涕是人不欲废之也臣尝阅录其狱恐得罪天下哲宗读之怒蔡卞欲加重贬章惇曾布以为不可曰陛下本以皇城狱出于近习故使台端录问冀以取信中外今谪敦逸何以解天下后世之谤哲宗意解而止明年用他事出知兴国军徙江州徽宗即位加直龙图阁知荆南召入为左谏议大夫敦逸极言蔡京蔡卞过恶迁户部侍郎卒年六十九

△上官均

上官均字彦衡邵武人神宗熙宁亲策进士擢第二为北京留守推官国子直讲元丰中蔡确荐为监察御史里行时相州富人子杀人讞狱为审刑大理所疑京师流言法官窦莘等受赇蔡确引猜险吏数十人穷治莘等惨酷无敢明其冤均上疏言之乞以狱事诏廷臣参治坐谪知光泽县莘等卒无罪天下服其持平有巫托神能祸福人致货甚富均焚像杖巫出诸境还监都进奏院哲宗即位擢开封府推官元佑初复为监察御史议者请兼用诗赋取士宰相遂欲废经义均言经术以理为主所根者本诗赋以文为主所逐者末今不计本末而欲袭诗赋之弊未见其为得也自熙宁以来京师百司有谒禁均言以诚待人则人思竭忠以疑遇物则人思苟免愿除开封大理外余皆释禁以明洞达不疑之意遂论青苗以为有惠民之名而无惠民之实有目前之利而为终岁之患愿罢之复为常平余粟之法又言官冗之弊请罢粟补吏减任子员节特奏名之滥增摄官之举数抑胥吏之幸进以清入仕之源诏有司议久之不能有所省因请对力陈之宣仁后曰当从我家始乃自后属

而下至大夫悉裁其数又言治天下道二宽与猛而已宽过则缓而伤义猛过则急而伤恩间者监司务为惨刻郡县望风趣办不暇以便民为意陛下临御务从宽大为吏者又复苟简纵弛猛宽二者胥失愿明诏四方使之宽不纵恶猛不伤惠以起中和之风诏下其章蔡确弟硕盗贷官钱以万计狱既上均论确为宰相挟邪挠法当显正其罪以厉百官张璪李清臣执政与正人异趣相继击去之监察御史张舜民论边事因及宰相文彦博舜民左迁均言风宪之任许风闻所以广耳目也舜民之言是当行之其言非当容之愿复舜民职不从台谏约再论均谓事小不当再论王岩叟遂劾均反复岩叟移官均迁殿中侍御史内不自安引义丐去改礼部员外郎居三年复为殿中侍御史西夏自永乐之战怙胜气骄欲复故地朝廷用赵高计弃四砦至是又请兰州为砦地均上疏曰先王之御外国假惠以济威须威以行惠然后外国且怀且畏无怨望轻侮之心今西夏所争兰州砦地皆控握要路轻予恐夏人捣虚熙河数郡孤立难守若继请熙河故地将何辞以拒之是傅虎以翼借寇以兵不惟无益祇足为患不如治兵积谷画地而守使夏人晓然知朝廷意也时傅尧俞为中书侍郎许将为左丞韩忠彦为同知枢密院三人者论事多同异俱求罢均言大臣之任同国休戚庙堂之上当务协谐若幸幸然辩论不顾事体何以观视百寮尧俞等虽有辩论之失然事皆缘公无显恶大过望令就职诏从之御史中丞苏辙等尚以为言均上疏略曰天下之事以是非为主所论若当虽异不害其为善所论若非虽同未免为不善今尧俞等但不能协和实无大过苏辙乃以许将当时已定议既而背同列之议臣以为将舍同列之议上奉圣旨是能将顺其美不当反以为过恶若使不忠虽与同列协和是乃奸臣尔非朝廷之利也将罢均又言吕大防坚强自任每有差除同列不敢异唯许将时有异同辙素与大防善尽力排将期于必胜臣恐纲纪法令自此败坏矣因论辙当公是公非别白善恶不当妄言遂乞罢出知广德军改提点河北东路刑狱绍圣初召拜右正言时大防辙已罢政均论大防辙六罪并再黜大防史祸由此起又奏罢诗赋专以经术取士宰相章惇欲更政事专黜陟之柄阴去异已出吏部尚书彭汝砺知成都府召朱服为中书舍人均言汝砺不可出服不可用惇怒迁均为工部员外郎寻提点京东淮东路刑狱历梓州淮南转运副使知越州徽宗立入为秘书少监迁起居郎拜中书舍人同修国史兼哲宗实录修撰迁给事中太学生张寅亮应诏论事得罪屏斥均言寅亮虽不识忌讳然志非怀邪陛下既招其来又罪其言恐沮多士之气寅亮得免时宰相欲尽循熙丰法度为绍述

以风均均曰法度惟是之从无彼此之辩由是不协以龙图阁待制知永兴军徙襄州崇
寔初与元佑党籍夺职主管崇禧观政和中复集贤院
修撰提举洞霄宫久之复龙图阁待制致仕卒年七十八 【按宋史此下有来之邵叶涛
二传皆污险阿恣诋毁正人无善迹足录并从删】

△杨畏

杨畏字子安其先遂寔人父徙洛阳畏幼孤好学事母孝擢进士第调成纪主簿不
之官刻志经术以所著书谒王安石自是尊安石之学
以为得圣人之意除西京国子监教授舒亶荐为监察御史里行时有御史中丞出为郡
守监司荐之畏言侍从贤否上所素知监司乃敢妄荐
盖为异日地尔乞戒其观望舒亶有盗学士院厨钱罪为王安礼所白畏抗章辩论以为
可谓之失未可谓之故亶罢畏坐左转宗正丞出提点
夔州路刑狱元佑初请祠归洛畏恐得罪于司马光尝曰畏官夔峡虽深山羣獠闻用司
马光皆相贺至光卒畏复曰司马光若知道更是皋夔
稷契以不知道故于政事未尽也吕大防刘摯为相俱与畏善用畏为工部员外郎除监
察御史擢殿中侍御史畏助大防攻摯十事并言梁焘
王岩叟刘安世朱光庭皆其死党必与为地既而焘等果救摯皆不纳摯罢苏颂为相畏
复攻颂以留贾易除书为颂罪颂罢畏意欲苏辙为相
宣仁后外召范纯仁为右仆射畏又攻纯仁不报畏本附辙知辙不相复上疏诋辙不可
用其倾危反复如此百僚莫不侧目迁侍御史畏言事
之未治有四曰边疆曰河事曰役法曰内外官政时有旨令两省官举台官畏言御史与
宰执最为相关之地宰执既不自差使其属举之可乎
太常博士朱彦以议皇地祇祭不同自列乞罢畏言彦据经论理若彦罢出恐自是人务
观望不敢以守官为义宣仁后崩吕大防欲用畏谏议
大夫范纯仁以畏非端士不可大防乃迁畏礼部侍郎及大防为宣仁后山陵使畏首背
大防称述熙寔元丰政事与王安石学术哲宗信之遂
荐章惇吕惠卿可大任廷试进士李清臣发策有绍述意考官第主元佑者居上畏复考
悉下之拔毕渐第一惇入相畏遣所亲阴结之曰畏前
日度势力之轻重遂因吕大防苏辙以逐刘摯梁焘方欲逐吕苏二人觉罢畏言职畏迹
在元佑心在熙寔首为相公开路者也惇至徙畏吏部
引以自助中书侍郎李清臣知枢密院安焘与惇不合畏复阴附安李惇觉其情又曾布
蔡卞言畏平日所为于惇遂以宝文阁待制出知真定
府天下于是目为杨三变谓其进于元丰显于元佑迁于绍圣也寻落职知虢州入元佑
党后知郢州复集贤殿修撰知襄州移荆南提举洞霄
宫居于洛未几知邓州再丐祠以言者论列落职主管崇禧观蔡京为相畏遣子侄见京

以元佑末论苏辙不可大用等章自明又因京党河南尹薛昂致言于京遂出党籍寻复宝文阁待制政和二年洛人诣阙请封禅嵩山畏上疏累千余言极其谀佞方治行得疾卒年六十九畏颇为纵横学有才辩而多捭阖与邢恕缔交其好功名富贵亦同然恕疏而多失畏谋必中其究俱为缙绅祸云

△崔台符

崔台符字平叔蒲阴人中明法科为大理详断官校试殿帷仁宗赐以尽美二字熙宁中文彦博荐为羣牧判官除河北监牧使入判大理寺初王安石定按问欲举法举朝以为非台符独举手加额曰数百年误用刑名今乃得正安石喜其附已故用之厯知审刑院判少府监复置大理狱拜右谏议大夫为大理卿时中官石得一以皇城侦逻为狱台符与少卿杨汲辄迎伺其意所在以锻炼笞掠成之都人惴栗至不敢偶语数年间毙文法者且万人官制行迁刑部侍郎官至光禄大夫元佑初御史林旦上官均发其恶出知潞州又贬秩徙相州后兼监牧使卒年六十四旧制武臣至内殿崇班始荫其族台符言文吏州判司犹许用荫武臣五岁一迁自借职四十年乃得通朝籍轻重不相准请自供奉官即用荫从之尝使辽至其朝久立帐前候者不赞导问其故曰太子未至台符谓之曰安有君父临轩而臣子偃蹇不至久立使者礼乎候者惧赞导如仪

△杨汲

杨汲字潜古泉州晋江人登进士第调赵州司法参军州民曹浚者兄遇之不善兄子亦加侮焉浚持刀逐兄子兄挟之以走浚曰兄勿避自为侄尔既就吏兄子云叔欲给吾父止而杀之吏当浚谋杀兄汲曰浚呼兄使勿避何谓谋州用其言献上浚得不死主管开封府界常平权都水丞与侯叔献行汴水淤田法遂酺汴流涨潦以溉西部瘠土皆为良田神宗嘉之赐以所淤田千亩提点淮西刑狱提举西路常平修古芍陂引汉泉灌田万顷召判都水监为大理卿迁刑部户部侍郎元佑初以宝文阁待制知庐州崔台符被劾汲亦落职知黄州厯徐襄越州绍圣中复为户部侍郎卒

△吕嘉问

吕嘉问字望之以荫入官熙宁初条例司引以为属权户部判官筦诸司库务行连灶法于酒坊岁省薪钱十六万缗王安石用魏继宗议即京城置市易务命嘉问提举上建置十三事其一欲于律外禁兼并之家辄取利神宗去之安石执不可居二年连以羨课受赏神宗闻其扰

民语安石安石曰嘉问奉法不公以是媒怨神宗曰免行钱所收细琐市易鬻及果实大伤国体安石伪辩自解神宗曰即如是士大夫何故以为不便安石请言者姓名令嘉问条析七年旱帝忧心惻怛语韩维孙永集市人问之减坐贾钱千万安石遂持嘉问条析奏曰此皆百姓所愿不如人言也嘉问言朝廷所以许民输钱免行者盖人情安于乐业厌于追扰议者乃欲除去是殆不然今吏禄可谓厚矣然未及昔日取民所得之半市易所收免行钱亦未足以偿仓法所增之禄以此推穷则利害立见矣初市易隶三司嘉问恃势陵使辞向出其上曾布代向怀不平会神宗出手札询布布访于魏继宗继宗愤嘉问掠其功列其与初议异者布得实具上嘉问多收息干赏挟官府而为兼并之事神宗将委布考之安石言二人有私忿于是诏布与吕惠卿同治惠卿故憾布至三司召继宗及市贾问状其辞同乃胁继宗使诬布语言增加继宗不从布言惠卿不可共事神宗欲听之安石不可神宗遂诏中书曰朝廷设市易本为平准以便民若周官泉府者今顾使中人之家失业宜厘定其制布见神宗曰臣每闻德音欲以王道治天下今所为锲锲乎间架除陌矣嘉问又请贩盐鬻帛岂不诮四方笑神宗颔之事未决安石去位嘉问持之以泣安石劳之曰吾已荐惠卿矣既执政前狱遂成布得罪嘉问亦出知常州明年安石复相召检正中书户房安石罢以知江甯府岁余转运使何琬劾嘉问营缮越法徙润州复坐免久之入为吏部郎中光禄卿言者交论市易之患被于天下本钱无虑千二百万缗率二分其息十有五年间子本当数倍今乃仅足本钱盖买物入官未转售而先计息取赏至于物贷苦恶上下相蒙亏折日多空有虚名而已于是削嘉问三秩黜知淮阳军悉罪前被赏者绍圣中擢宝文阁待制户部侍郎加直学士知开封府专附章惇蔡卞多杀不辜焚去案牒以灭口尝荐邹浩浩南迁坐罢知怀州徽宗时屡暴其宿恶至分司南京光州居住郢州安置然为蔡氏所右其婿刘逵蹇序辰其死友邓洵武羽翼之故不久辄起以龙图阁学士大中大夫卒年七十七赠资政殿学士初嘉问窃从祖公弼论新法奏藁以示王安石公弼以是斥于外吕氏号为家贼故不得与吕氏同传

△李南公

李南公字楚老郑州人进士及第调浦江令郡猾吏恃守不输负租南公捕系之卒寘诸法知长沙县有嫠妇携儿以嫁七年儿族取儿妇谓非前子讼于官南公问儿年族曰九岁妇曰七岁问其齿曰去年毁矣南公曰男八岁而鬻尚何争命归儿族熙宁中提举京西常平提点陕

西河北刑狱京西转运副使入为屯田员外郎南公有女皆适人而同产女弟年三十不嫁寄他妹家为御史所论罢主管崇福宫为河北转运副使先是知澶州王令图请开迎阳归旧河于孙村置约回水东注南公与范子奇以为可行且欲于大吴北进锯牙约河势归故道朝廷命使者行视两人复以前议为非云迎阳下瞰京师孙村水势不便又为御史所论诏罚金加直秘阁知延安府夏人犯泾原南公出师捣其虚夏人解去进直龙图阁擢宝文阁待制知瀛州拜户部吏部侍郎户部尚书历知永兴军成都真定河南府郑州擢龙图阁直学士初哲宗主入庙南公修奉希执政指请祔东夹室礼官争之不得及更建庙室坐前议弗当夺学士未几复之遂致仕卒年八十三南公为吏六十年干局明锐然反复诡随无特操识者非之子諲【按宋史此下有李南公子諲附传及董必传俱无善迹足录并从删】

△虞策

虞策字经臣杭州钱塘人登进士第调台州推官知乌程县通判蕲州通判蒋之奇以江淮发运上计神宗访东南人才以策对王安礼李常咸荐之擢提举利州路常平湖南转运判官元佑五年召为监察御史进右正言数上书论事西夏未顺命策言今边备解弛戎备不修古之人善镇静者警备甚密务持重者谋在其中未有鹵莽阔疏而曰镇静持重者又乞诏内而省曹寺监外而监司守令各得以其职陈朝政阙失百姓疾苦星文有变乞顺天爱民警戒万事思治心修身之道勿以宴安为乐哲宗纳后上正始要言迁左司谏曾肇以议北郊事与朝论不合免礼部侍郎为徐州策时权给事中还其命以肇礼官不当以议礼得罪不从帝亲政条所当先者五十六事后多施行迁侍御史起居郎给事中以龙图阁待制知青州改杭州过阙留为户部侍郎历刑部户部尚书拜枢密直学士知永兴军成都府入为吏部尚书疏请徽宗均节财用属疾祈外加龙图阁学士知润州卒于道年六十六赠左正议大夫策在元佑绍圣时居言职不依人取进亦颇持两端党议故免

虞奕

虞奕

奕字纯臣中进士第虞策之同母弟也崇宁间提举河北西路常平洺相饥徙之东路既而西部盗起复徙提点刑狱时朝廷将遣兵逐捕奕条上方略请罢勿用而自计讨贼不阅月可定转运使张搏以为不可宰相主搏策数月不效卒用奕议悉降之擢监察御史亲祭北郊燕人赵良嗣为秘书丞侍祠奕白其长曰今亲卫不用三路人而良嗣以外国降子顾得预祠

事可乎长用其言具以请不报阳武民佣于富家其室
美富子欲私之弗得怒杀之而赂其夫使勿言事觉府县及大理鬻狱突受诏鞫讯皆伏
辜坐漏泄语言罢去再踰年还故职提点河北刑狱自
何承矩创边地为塘泺有定界既中贵人典领以屯田开拓为功肆侵民田民上诉屡出
使者按治皆不敢与直突曲折上之疏其五不可诏罢
屯田加直秘阁淮南转运副使入为开封少尹故时大理开封治狱得请实蔽罪其后率
任情弃法法益不用突言廷尉持天下平京师诸夏本
法且不行何以示万国请自今非情法实不相当毋得辄请从之迁光禄卿户部侍郎睦
州乱以龙图阁直学士知镇江府寇平论劳增两秩还
为户部内侍总领内藏予夺颛已视户部如僚属度支郎方讨理滞奉中旨令开封尹与
总领者来突白宰相曰计臣不才当去之而易能者不
可使他人侵其官即自劾不称职诏为罢内侍而徙突工部袭庆守张滂使郡人诣阙请
登封东平守王靓谏以京东岁凶多盗不当请封为政
者不悦将罪靓突言靓忧民爱君所当奖激奈何用为罪乎靓获免未几卒年六十赠龙
图阁学士

△郭知章

郭知章字明叔吉州龙泉人第进士从刘彝广西幕府知浮梁分宁县黄履荐为御
史以忧不克拜知海州濮州提点梓州路刑狱复以郑
雍顾临荐为监察御史哲宗亲政上书请用淳化天禧诏增谏官员又比岁选授监司多
繇寺监丞不过知县资序外官莫重于部使者岂宜轻
用若是宜稍限以节如转运判官择实任通判者提点刑狱择实任郡守者然后考其治
理简拔用之又言自大河东北分流生灵被害今水之
趋东者已不可遏顺而导之闭北而行东其利百倍矣迁殿中侍御史言先帝辟地进壤
建策四砮据高临下扼西戎咽喉元佑用事者委而弃
之愿讨曷议奏显行黜罚史院究神宗实录诬罔事知章请贬怡吕大防等绍圣复制科
知章校试言先朝既策进士即废此科近年复置诚无
所补遂复罢又请复元丰役法大抵迎合时好进左司员外郎改左司谏尝言爵禄庆赏
以劝天下之善刑罚诛戮以惩天下之恶愿无假借大
臣使行私恩快私忿忠于陛下者必见忌大臣党于大臣者必上负陛下惟明主裁察权
工部侍郎为中书舍人辽使萧德崇来为夏人请还河
西地命知章报聘知章曰夏人累犯边法当致讨以北朝劝和之故务为优容彼若恭顺
如初当自有恩旨非使人所能预知也归未至坐尝主
导河东流议以集贤殿修撰知和州徽宗立曾布用为工部侍郎加宝文阁直学士知太
原府召拜刑部尚书知开封府为翰林学士言者又论

河事罢知邓州旋入党籍数年复显谟阁学士政和初卒

△刘拯

刘拯字彦修宣州南陵人进士及第知常熟县有善政县人称之为元丰中为监察御史历江东淮西转运判官提点广西刑狱绍兴初复为御史言元佑修先帝实录以司马光苏轼之门人范祖禹黄庭坚秦观为之窜易增减诬毁先烈愿明正国典又言苏轼贪鄙狂悖无事君之义尝议罪抵死先帝赦之敢以怨忿形于诏诰丑诋厚诬策试馆职至及王莽曹操之事愿正其罪以示天下时祖禹等已贬轼谪英州而拯犹鸷视不愜也进右正言累至给事中徽宗立钦圣后临朝而钦慈后葬大臣欲用妃礼拯曰母以子贵子为天子则母乃后也当改园陵为山陵又言门下侍郎韩忠彦虽以德选然不可启贵戚预政之渐帝疑其阿私观望黜知瀛州改广州加宝文阁待制以吏部侍郎召还帝称其议钦慈事褻进两秩迁户部尚书蔡京编次元佑奸党拯言汉唐失政皆分朋党今日指前人为党安知后人不以今人为党乎不若定为三等某事为上某事为中某事为下而不斥其名氏京不乐又言户部月赋入不足偿所出京益怒徙之兵部旋罢知蕲州徙润州张商英入相召为吏部尚书拯已昏愤吏乘为奸又左转工部以枢密直学士知同州时商英去位侍御史洪彦升并劾之削职提举鸿庆宫卒

△钱遹

钱遹字德循婺州浦江人以进士甲科调洪州推官累通判越州至校书郎徽宗立擢殿中侍御史中丞丰稷论其回邪不可任风宪不报稷复言必用遹则愿罢臣乃以提举河北常平崇宁初召为都官员外郎殿中侍御史劾曾布援元佑奸党挤绍圣忠贤布去迁侍御史阅两月进中丞蔡京谋取青唐遹助成其议会籍元佑党遹以为多漏略给事中刘逵驳之左转户部侍郎俄迁工部尚书兼侍读踰年以枢密直学士知颍昌府言者疏其罪黜为滁州稍复显谟阁待制直学士徙宣州复为工部尚书举冯澥自代谓澥趣操端劲古人与稽尝建明典礼忠义凜凜搢绅叹服言者又疏其罪以待制知秀州中书舍人侯绶封还之又夺待制久之还故职改述古殿直学士屏居十五年方腊陷婺州逃奔兰溪为贼所杀年七十二【按宋史此下有石豫左肤附传及许敦仁传均无事迹足录并从删】

△吴执中

吴执中字子权建州松溪人登嘉佑进士第历官州县同门壻吕惠卿方贵盛不肯附以取进凡三十余年始提举河南常平连徙河东淮

南江南转运判官提点广东刑狱入为库部吏部右司郎中大观初擢兵部侍郎二年进御史中丞论开封府内侍省京畿秦凤违法干请诏奖其得风宪体又言开封之治事大理之决狱将作之营缮榷货之入中皆职所当为乃妄以为功一岁迁官之五六宜行抑损遂诏自今但赐束帛郑居中知枢密院执中言外戚不宜在政地帝还其章而谕所以用居中之意初蔡京忌张康国故言执中居言路执中先劾刘炳兄弟宋乔年父子皆京客也帝尝语执政嘉其不阿康国曰是乃为逐臣地耳已而章果至帝怒黜知滁州未几徙越州石公弼以为执中反复得罪未宜殿大府改提举洞霄宫以集贤殿修撰知扬州加显谟阁待制知河南府道过都复拜中丞帝以星变逐蔡京言者未已执中言进退大臣当全礼貌于是为京下诏京得不重贬庞恭孙赵适开梓夔诸夷州执中乞正其罪又言八行之举所得皆乡曲常人不足以为士愿下太学考其道艺而进退之所论多施行迁礼部尚书张商英罢御史张克公言执中与商英皆由郭天信以进除枢密直学士知越州寻降待制又夺职卒于家 【按宋史此下有吴材传无事迹足录今从删】

△刘曷

刘曷字子蒙开封东明人初名炳赐今名元符末进士甲科起家太学博士迁秘书省正字校书郎兄炜通乐律炜死蔡京擢曷大司乐付以乐正遂引蜀人魏汉津铸九鼎作大晟乐曷撰鼎书新乐书皆汉津妄出己意而曷为缘饰语在乐志累迁给事中京置局议礼曷又领之为翰林学士改工部尚书提举纪元厯有所损益为吴执中所论以显谟阁直学士知陈州曷与弟焕皆侍从而亲丧不葬坐夺职罢郡复以事免官京再辅政召为户部尚书曷尝为京画策排郑居中故京力援曷由废黜中还故班御史中丞俞■〈〈鹵，欠代义〉上木下〉发其奸利事京徙■〈〈鹵，欠代义〉上木下〉他官徽宗所储三代彝器诏晟讨定凡尊爵俎豆盘匝之属悉改以从古而载所制器于祀仪令太学诸生习肄雅乐阅数日曷与大司成刘嗣明奏有鹤翔宫架之上再为翰林学士东宫建为太子宾客又还户部大理议户绝法若祖有子未娶而亡不得养孙为嗣曷曰计一岁诸路户绝不过得钱万缗使岁失万缗而天下无绝户岂不可乎诏从其议加宣和殿学士知河南府积官金紫光禄大夫与王寀交通事败开封尹盛章议以死刑部尚书范致虚为请乃长流琼州死年五十七

△宋乔年 【宋升】

宋乔年字仙民宰相庠之孙也父充国刻意问学以乡书试礼部既自谓宰相子辄

罢举仁宗知之召试学士院赐进士出身签书河南判
官判登闻鼓院知太常礼院英宗祔庙议者欲祧僖祖藏夹室充国请配感生帝为宋始祖从之东西府建上二箴以戒大臣大臣不怵会庙飨
宿斋其妻遣两妾至寺充国自劾罢礼院遂致仕充国性刚介孝于奉亲平居得微物必先荐家庙乃敢尝官至大中大夫卒乔年用父荫监市
易坐与倡女私及私役吏失官落拓二十年女嫁蔡京子攸京当国始复起用崇宁中提举开封县镇府界常平改提点京西北路刑狱赐进士
第加集贤殿修撰京畿转运副使进显谟阁待制为都转运使改开封尹以龙图阁学士知河南府京罢相谏议大夫毛注御史中丞吴执中交
击之贬保静军节度副使蕲州安置京复相还旧官知陈州政和三年卒年六十七谥曰忠文子升升字景裕崇宁初由谯县尉为敕令删定官
数年至殿中少监时乔年尹京父子依凭蔡氏陵轹士大夫阴交谏官蔡居厚使为鹰犬以徽猷阁待制知陈州乔年贬升亦谪少府少监分司
南京未几知应天府乔年卒起复为京西都转运使莅葺西宫及修三山新河擢至显谟阁待制方是时徽宗议谒诸陵有司预为西幸之备升
治宫城广袤十六里创廊屋四百四十间费不可胜会髹漆至灰人骨为胎尽发洛城外二十里古冢凡衣冠垄兆大抵遭暴掘用是迁正议大
夫殿中监又奉命补治三陵泄水坑涧计役四百九十万工未几卒赠金紫光禄大夫延康殿学士谥曰恭敏 【按宋史此下有强渊明传无
事迹足录今从删】

△蔡居厚

蔡居厚字宽夫熙宁御史延禧子也延禧尝击吕惠卿兄弟有直名居厚第进士累官吏部员外郎大观初拜右正言奏疏曰神宗造立法
度旷古绝儼陛下继志广声政事具举愿如明诏敕有司勒为成书以明一代之制迁起居郎进右谏议大夫论东南兵政七弊及言学官书局
皆为要涂宜公选实学多闻之士无使庸常之徒得以幸进河北河东羣盗起太原真定守皆以不能擒捕罢去居厚言将帅之才不储养于平
时故缓急无所可用宜令观察使以上各举所知又言比来从事于朝者皆姑息胥吏至用为耳目倚为乡导假借色辞过为卑辱浸淫及于侍
从今庙堂之上稍亦为之愿重为之制改户部侍郎言者论其在谏省时为宋乔年父子用以集贤殿修撰知秦州降羌在州者逸入京师诉事
坐失察削职罢蔡京再相起知沧陈齐三州加徽猷阁待制为应天河南尹初建神霄宫度地污下为道士交诉徙汝州久之知东平府复以户
部侍郎召未至又以知青州病不能赴未几卒 【按宋史此下有刘嗣明传无事迹足录

今从删】

△蒋静

蒋静字叔明常州宜兴人第进士调安仁令俗好巫疫疠流行病者盍死不服药静悉论巫罪聚其所事淫像得三百躯毁而投诸江知陈留县与屯将不协罢去徽宗初立求言静上言多诋元佑间事蔡京第为正等擢职方员外中书舍人吴伯举封还之京怒黜伯举明年迁国子司业帝幸太学命讲书无逸篇赐服金紫进祭酒为中书舍人以显谟阁待制知寿州徙江宁府茅山道士刘混康以技进赐号先生其徒倚为奸利夺民苇场强市庐舍词讼至府吏观望不敢治静悉抵于法徙睦州移病提举洞霄宫越九年召为大司成出知洪州复告归加直学士卒年七十一赠通议大夫

△贾伟节

贾伟节开封人第进士累擢两浙转运判官条上民间利病加直秘阁为江淮发运副使蔡京坏东南转般法为直达纲伟节率先奉承岁以上供物径造都下籍催诸道逋负造巨船二千四百般非供奉物而辄运载者请论以违制花石海错之急切自此而兴论功进秩遂拜户部侍郎改刑部岁余以显谟阁直学士提举醴泉观卒

△崔鷗

崔鷗字德符雍邱人父毗徙居颍州遂为阳翟人登进士第调凤州司户参军筠州推官徽宗初立以日食求言鷗上言其略曰毁誉者朝廷之公议故责授朱崖参军司户司马光左右以为奸而天下皆曰忠今宰相章惇左右以为忠而天下皆曰奸此何理也夫乘时抵巇以盗富贵探微揣端以固权宠谓之奸可也包苴满门私谒踵路阴交不逞密结禁廷谓之奸可也奇伎淫巧荡上心以倡优女色败君德独操赏刑自报恩怨谓之奸可也蔽遮主听排斥正人微言者坐以刺讥直谏者陷以指斥以杜天下之言掩壅蔽之罪谓之奸可也凡此数者光有之乎惇有之乎光忠信直谅闻于华夷虽古名臣未能远过惇狙诈凶险天下士大夫呼曰惇贼贵极宰相人所具瞻以名呼之又指为贼岂非以其孤负主恩玩窃国柄邪京师语曰大惇小惇殃及子孙谓惇与御史中丞安惇也小人譬之蝮蝎其凶忍害人根乎天性随遇必发天下无事不过害陷忠良破善类至缓急危疑之际必有反复卖国跋扈不臣之心比年以来谏官不论得失御史不劾奸邪门下不驳诏令共持喑默以为得计顷邹浩以言事得罪大臣拱而观之同列无一语者又从而挤之夫以股肱耳目治乱安危所系而一切若此陛下虽有尧舜之聪明将谁

使言之谁使行之夫日者阳也食之者阴也四月正阳之月阳极盛阴极衰之时而阴干阳故其变为大惟陛下畏天威听明命独运干刚大明邪正毋违经义毋郁民心则天意解矣帝览而善之以为相州教授后蔡京复籍上书人以鷗为邪等免所居官久之调绩溪令移病归始居邾城治地数亩为婆娑园屏处十余年人无贵贱长少悉尊师之宣和六年起通判盩化军召为殿中侍御史既至而钦宗即位授右正言疏言诏书诏谏臣直论得失以求实是有以见陛下求治之切也数十年来王公卿相皆自蔡京出更持政柄无一人立异安得实是之言闻于陛下哉谏议大夫冯澥近上章曰士无异论太学之盛也澥尚敢为此奸言乎王安石除异己之人着三经之说以取士天下靡然雷同陵夷至于大乱此无异论之效也京又以学校之法驭士人如军法之驭卒伍一有异论累及学官若苏轼黄庭坚之文范镇沈括之杂说悉以严刑重赏禁其收藏其苛锢多士亦已密矣而澥犹以为太学之盛欺罔不已甚乎仁宗英宗选敦朴敢言之士以遗子孙安石目为流俗一切逐去司马光复起而用之元佑之治天下安于泰山及章惇蔡京倡为绍述之论以欺人主元符应诏上书者数千人京遣腹心考定之同己为正异己为邪澥与京同者也故列于正京之术破坏天下于兹极矣尚忍使其余蠹再破坏邪京奸邪之计大类王莽而朋党之众则大过之愿斩之以谢天下忽得挛疾不能行三求去乃以龙图阁直学士主管嵩山崇福宫命下而卒鷗平生为文至多辄为人取去篋无留者诗清峭雄深有法度无子壻卫昂集其遗文传于世

△张根

张根字知常饶州德兴人少入太学甫冠第进士调临江司理参军遂昌令当改京秩以四亲在堂冀以父母之恩封大父母而贖妻封及母遂致仕得通直郎如其志时年三十一屏处十年曾布曾肇邹浩及本道使者上其行义徽宗召诣阙为帝言人主一日万几所恃者心耳愿陛下清心省欲以窒祸乱之原遂请罢钱塘制造局帝改容嘉美以为亲贤宅教授未几通判杭州提举江西常平内侍走马承授举劾一路以钱半给军衣非是自转运使郡守以下皆罢根言东南军法与西北殊此事行之百五十年矣帅守监司分朝廷忧顾使有罪犹当审处岂宜以小奄尺纸空十郡吏哉诏皆令复还又言本道去岁蠲租四十万而户部责偿如初祖宗立发运上供额而给本钱数百万缗使广余以待用此希恩者乃献为羨余故岁计不足至为无名之敛诏贷所蠲租而以余本钱还之六路洪州失官锡系治兵吏千计根曰此有司失于几察之过

也今罗取无罪之人责以不可得之物何以召和气乃罢其狱大观中入对言陛下幸涤烦苛破朋党而士大夫以议论不一观望苟且莫肯自尽陛下毁石刻除党籍与天下更始而有司以大臣仇怨废锢自如为治之害莫大于此愿思所以励敕之即命为转运副使改淮南转运使加直龙图阁上书请常平止听纳息以塞兼并下户均出役钱以绝奸伪市易惟取净利以役商贾虽名若非正然与和买不讎其直什买而使之倍输额外无名无数之敛有间矣又请分举官为三科一县令二学官三县丞曹州郡亦分三等明言其人某材堪充某州某官某县令吏部据以注拟则遴选稍清视平配硬差远矣诏吏部户部相度以闻根又以水灾多乞蠲租赋散活口米常平青苗米振贷流民诏褒谕之徙两浙辞不行乃具疏付驿递奏大略谓今州郡无兼月之储太仓无终岁之积军须匮乏边备缺然东南水旱盗贼间作西北二国窥伺日久安得不豫为之计因条列茶盐常平等利病之数遂言为今之计当节其大者而莫大于土木之功今羣臣赐一第或费百万臣所部二十州一岁上供财三十万缗曾不足给一第之用以宠元勋盛德犹虑不称况出于闾阎千泽者哉又其次如锡带其直虽数百缗亦必敛于数百家而后足今乃下被仆隶使混淆公卿间贤不肖无辨如以其左右趋走不欲墨绶当别为制度以示等威可也书奏权幸侧目谋所以中伤之者言交上帝察根诚不之罪也寻以花石纲力陈其弊益忤权幸乃撻根所书奏牒注切草略为傲慢不恭责监信州酒既又言根非诋常平之法以摇绍述之政再贬濠州团练副使安置郴州寻以讨淮贼功得自便以朝散大夫终于家年六十根性至孝父病盥戒盐根为食淡母嗜河豚及蟹母终根不复食母方病每至鸡鸣则少苏后不忍闻鸡声子煮自有传 【按宋史此下有根弟朴附传朴附蔡京父子官至中书舍人无善迹足录今从删】

△任谅

任谅字子谅眉山人徙汝阳九岁而孤舅欲夺母志谅挽衣泣曰岂有为人子不能养其亲者乎母为感动而止谅力学自奋年十四即冠乡书登高第调河南户曹以兵书谒枢密曾布既见觉不能合径去布为相犹欲用之谅予书规以李德裕事布始怒蒋之奇章榘在枢府荐为编修官布持其奏不下为怀州教授徽宗见其所作新学碑曰文士也擢提举夔路学事历京西河北京东改转运判官着河北根本籍凡户口之升降官吏之增损与一岁出纳奇赢之数披籍可见上之朝张商英见其书谓为天下部使者之最提点京东刑狱梁山泅渔者习为盗荡无

名籍谅伍其家刻其舟非是不得辄入他县地错其间者饒石为表盗发则督吏名捕迹无所容加直秘阁徙陕西转运副使降人李阿雅卜知边廩不继阴阙地窖粟而叛遣西夏统军书称定边可唾手取谅谍知其谋亟输粟定边及诸城堡且募人发所窖得数十万石阿雅卜果入寇失藏粟七日而退他日复围观化堡而边储已足阿雅卜遂解去加徽猷阁待制江淮发运使蔡京破东南转般漕运法为直达纲应募者率游手亡赖盗用干没漫不可核人莫敢言谅入对首论之京怒会汴泗大水泗州城不没者两板谅亲部卒筑堤徙民就高賑以米粟水退人获全京诬以为漂溺千计坐削籍归田里执政或言水灾守臣职发运使何罪帝亦知其枉复右文殿修撰陕西都转运使寻复徽猷阁待制进直学士童贯更钱法必欲铁钱与铜钱等物价率十减其九诏谅与贯议谅言为六路害寝其策加龙图阁直学士知京兆府徙渭州以母忧去宣和六年提举上清宝箓宫修国史初朝廷将有事于燕谅曰中国其有忧乎乃作书贻宰相曰今契丹之势其亡昭然取之当以渐师出不可无名宜别立耶律氏之法使散为君长则我有存亡继绝之义彼有瓜分辐裂之弱与邻崛起之金国势相万也至是又言郭药师必反帝不听大臣以为病狂出提举嵩山崇福宫是冬金人举兵至燕山药师叛降皆如谅言乃复起谅为京兆未几卒年五十八

△周常

周常字仲修建州人中进士第以所著礼檀弓义见王安石吕惠卿二人称之补国子直讲太常博士以养亲求教授扬州年未五十即致仕久之御史中丞黄履荐其恬退起为太常博士辞元符初复申前命兼崇政殿说书迁著作佐郎疏言祖宗诸陵器物服饰务在质素自裕陵至宣仁后寝宫乃施金珠愿收贮景灵殿以遵遗训诏置之奉宸库擢起居舍人邹浩得罪常于讲席论救贬监彬州酒徽宗立召为国子祭酒起居郎从容言自古求治之主未尝不以尚志为先然溺于富贵逸乐蔽于谄谀顺适则志随以丧不可不戒元佑法度互有得失人才各有所长不可偏弃时以天暑令记注官卯漏正即勿奏事仍着为令常言本朝记注类多兼谏员故凡言动得以所闻见论可否神宗皇帝时修注官虽不兼谏职亦许以史事于崇政延和殿直前陈述陛下于炎暉之候暂停进对亦人情之常若着为定令则必记于日录传之史笔使后人观之将以为倦于听纳而忘先帝之美意矣事遂寝进中书舍人礼部侍郎蔡京用事不能容以宝文阁待制出知湖州寻又夺职居婺州复集贤殿修撰卒年六十七

钦定续通志卷三百六十五

●钦定续通志卷三百六十六 列传一百六十六

列传

宋 【七十】

○宋七十

何灌 李熙靖 王云 谭世绩 梅执礼 程振

刘延庆

何灌

李熙靖

王云

谭世绩

梅执礼

程振

刘延庆

△何灌

何灌字仲源开封祥符人武选登第为河东从事经略使韩缜虽数试其材而常沮抑之不假借久乃语之曰君奇士也他日当据吾坐为府州大山军巡检【按东都事略作为府州黄河东岸巡检】盗苏延福狡悍为二边患灌亲梟其首贾胡曈有泉辽人常越境而汲灌亲申画界堠遏其来忿而举兵犯我灌迎高射之发辄中或着崖石皆没镞敌惊以为神遂巡斂去后三十年契丹萧大师与灌会道曩事数何巡检神射灌曰即灌是也萧矍然起拜为河东将与夏人遇铁骑来追灌射皆彻甲至洞胷出背迭贯后骑羌惧而引郟知窰化军丰州徙熙河都监见童贯不拜贯憾焉张康国荐于徽宗召对问西北边事以笏画御榻指坐衣花纹为形势帝曰敌在我目中矣提点河东刑狱迁西上合门使领威州刺史知沧州以治城鄣功转引进使运粟三十万石于并塞三州灌言水浅不胜舟陆当用车八千乘沿边方登麦愿以运费增价就余奏上报可安抚使忌之劾云板筑未毕而冒赏夺所迁官仍再贬秩罢去未几知岷州引邈川水溉闲田千顷湟人号广利渠徙河州复守岷提举熙河兰湟弓箭手入言汉金城湟中谷斛八钱今西窰湟廓即其地也汉唐故渠尚可考若先葺渠引水使田不病旱则人乐应募而射士之额足矣从之甫半岁得善田二万六千顷募士七千四百人为他路最童贯用兵西边灌取古骨龙建筑震武军【按宋史本传作何灌取古骨龙马进武军考宋史地理志无马进武军政和六年建筑古骨龙城赐名震武城未几

改为震武军东都事略亦作取震武军今据改】 加吉
州防御使改知兰州又攻仁多泉城炮伤足不顾卒拔城斩首五百级寻改廓州防御使
宣和初刘法陷于敌震武危甚熙帅刘仲武使灌往救
灌以众寡不敌但虚张声骇之夏人宵遁灌恐覘其实遽反兵仲武犹奏其逗遛罢为淮
西钤辖从平方腊获贼帅吕师囊迁同州观察使浙东
都钤辖改浙西童贯北征檄统制兵马涿易平以知易州迁宣武军承宣使燕山路副都
总管又加龙神卫都指挥使金人取景州围蓟州贯诱
以兵事即复景城释蓟围郭药师统蕃汉兵灌白顷年折氏归朝朝廷必置一司专部汉
兵至于克行乃许同营今但宜令药师主常胜军而以
汉兵委灌贯不听召还管干步军司陪辽使射玉津园一发破的再发则否客曰太尉
不能耶曰非也以礼让客耳整弓复中观者诵叹帝亲
赐酒劳之迁步军都虞候金师南下悉出禁旅付梁方平守黎阳灌谓宰相白时中曰金
人倾国远至其锋不可当今方平扫精锐以北万有一
不枝梧何以善吾后盍留以卫根本不从明日又命灌行辞以军不堪战强之拜武泰军
节度使河东河北制置副使未及行而帝内禅灌领兵
入卫郛王楷至门欲入灌曰大事已定王何所受命而来导者惧而退灌竟行援兵二万
下能足听募民充数靖康元年正月二日次滑州方平
南奔灌亦望风迎溃黄河南岸无一人御敌金师遂直叩京城灌至乞入见不许而令控
守西隅背城拒战凡三日被创没于阵年六十二帐下
韩综雷彦兴奇士也各手杀数人从以死钦宗哀悼赐金帛命官护葬已而言者论其不
守河津追削官秩长子蓟至合门宣赞舍人从父战箭
贯左臂拔出之病创死绍兴四年中子薛以灌事泣诉于朝诏复履正大夫忠正军承宣
使

△李熙靖

李熙靖字子安常州晋陵人唐卫公德裕九世孙也祖均父公弼皆进士第公弼崇
宣初通判潞州以议三舍法不便使者劾其沮格诏令
坐削黜以死熙靖擢第又中词学兼茂选为辟雍录太学正升博士以父老丐外除提举
淮东学事使养命下乃得河东而为淮东者臧祐之也
盖省吏取佑之赂辄易之或教使自言熙靖曰事君不择地吾其可发人之私求自便也
宰相闻而贤之留为兵部员外郎遭父忧去还为右司
员外郎王黼以太宰领应奉司又方事燕云立经抚房于中书独专之他执政皆不得预
熙靖与言曰应奉之职非宰相所当预尚书枢密皆有
兵房足以治疆事经抚何为者哉黼积不乐同列五人皆躐躐禁从独滞留四年都水丞
失职移过于熙靖贬其两秩又将左转为国子司业执

政交言不可仅迁太常少卿黜罢乃拜中书舍人蔡攸又恶之出知洪州越两月复以故官召入对言燕山虽定宜益谨思患豫防之戒帝嘉之靖康初同谭世绩事龙德宫改显谟阁待制提举醴泉观道君待之甚厚常从容及内禅事曰外人以为吴敏功殊不知此自出吾意耳吾苟不欲人言且灭族谁敢哉或谓君似唐睿宗上畏天戒故为之吾有此心久矣熙靖再拜贺敏闻而忌之以进对不时受罚既拒张邦昌之命忧愤废食家人进粥药宽譬之终无生意故人视其病相持啜泣索笔书唐王维百官何日再朝天之句明日遂卒年五十五与世绩同赠端明殿学士

△王云

王云字子飞泽州人父献可仕至英州刺史知泸州黄庭坚谪于涪献可遇之甚厚时人称之为云举进士从使高丽撰鸡林志以进擢秘书省校书郎出知简州迁陕西转运副使宣和中从童贯宣抚幕入为兵部员外郎起居中书舍人靖康元年以给事中使斡里雅布军议割三镇以和使还传道斡里雅布之意以为聂赫得朝廷所与余覩蜡书坚云中国不可信欲败和约执政以为不然罢为徽猷阁待制知唐州金人陷太原召拜刑部尚书再出使许以三镇赋入之数云至真定遣从吏李裕还言金人不复求地但索五辂及上尊号且须康王来和好乃成钦宗悉从之且命王及冯澲往未行而车辂至长垣为所郤云亦还澲奏云诞妄误国云奏事势中变金人必欲得三镇不然则进兵取汴都中外震惊诏集百官议云固言康王旧与斡里雅布结欢宜将命帝虑为所留云曰和议既成必无留王之理臣敢以百口保之王遂受命而云以资政殿学士为之副前云奉使过磁相劝两郡彻近城民舍运粟入保为清野之计民怨之及是次磁州又与守臣宗泽有憾于是王出谒嘉应神祠云在后民遮道谏曰肃王已为金人所留王不宜北去厉声指云曰清野之人真奸贼也王出庙行或发云笥得鸟絀短巾盖云夙有风眩疾寝则以护首者民益信其为奸噪而杀之王见事势汹汹乃南还相州是役也云不死王必北行议者以是验天命云建炎初赠观文殿学士云兄霁崇宁时为谋议司详议官【按东都事略作为讲议司编修官考宋史职官志有讲议司无谋议司亦无详议官】上书告蔡京罪黥隶海岛钦宗复其官从种师中战死

△谭世绩

谭世绩字彦成潭州长沙八第进士教授郴州时王氏学盛行世绩雅不喜或问之曰说多而屡变无不易之论也置其书不观又中词学

兼茂科除秘书省正字时相蔡京子攸领书局同舍郎多翕附以取贵仕世绩独坐直庐继书竟日梁师成之客与为邻居数致师成愿交意谢不答在馆六年不迁京罢用久次为司门员外郎又三年迁吏部京复相嫌不附已罢提点太平宫久之复还吏部幸臣妄引恩泽任子持不与吏白有某例世绩曰岂当以暂例破成法已而取中旨行之进少府监擢中书舍人以谨命令惜名器广言路吝赐予正上供省浮费六事言于上又为当路所嫉以徽猷阁待制知婺州未行复留之徽宗禅位东幸且还使与李熙靖副执政奉迎遂同主管龙德宫请辨正宣仁国史之谤述钦圣遗旨以复瑶华大享神祖仍用富弼侑食释奠先圣不当以王安石配后皆施行秋七月彗出东方大臣或谓此四夷将衰之兆世绩面奏垂象可畏当修德以应天不宜惑谏说进给事中兼侍读内侍喧争殿门诏以赎论世绩驳其不恭因言童贯辈初亦甚微小恶不惩将驯至大患疏入同类侧目何■〈〈鹵，欠代义〉上木下〉建议分外郡为四道置都总管事得颛决世绩言裂天下以付四人而王畿所治者纔十六县独无尾大不掉之虑乎■〈〈鹵，欠代义〉上木下〉不乐改礼部侍郎金骑馘南下世绩言守边为上策今边不得守守河则京畿自固中策也巡幸江淮会东南兵以捍敌下策也金人既渡河又请遣大将秦元以所部京畿保甲分护国门使兵势连属首尾相援则金人不敢逼孙傅深然之又格于■〈〈鹵，欠代义〉上木下〉议再扈车驾至金师帐以十害说其用事者言讲解之利词意忠激金人耸听张邦昌僭国令与李熙靖同直学士院皆称疾卧不起以忧卒年五十四建炎初褒其守节赠端明殿学士

△梅执礼

梅执礼字和胜婺州浦江人第进士调常山尉未赴以荐为敕令删定官【按东都事略作为详定九域图志所删定官】武学博士大司成强渊明贤其人为宰相言相以未尝识面为嫌执礼闻之曰以人言而得必以人言而失吾求在我者而已卒不往谒历军器鸿胪丞比部员外郎比部职勾稽财货文牒山委率不暇经目苑吏有持茶券至为钱三百万者以杨戩旨意追取甚急执礼一阅知其妄欲白之长贰疑不敢乃独列上果诈也改度支吏部进国子司业兼资善堂翊善迁左司员外郎擢中书舍人给事中林摅以前执政赴阙宿留冀复故职执礼论去之孟昌龄居郗质人屋当赎不肯与而请中旨夺之外郡卒留役中都者以万数肆逞为奸诏悉令还杨戩占不遣内侍张佑董葺太庙僭求赏皆驳奏勿行迁礼部侍郎素与王黼善黼尝置酒其第夸示园池妓妾之盛有骄色执

礼曰公为宰相当与天下同忧乐今方腊流毒吴地疮
痍未息是岂歌舞宴乐时乎退又戒之以诗黼愧怒会孟享原庙后至以显谟阁待制知
蕲州寻夺职明年徙滁州复集英殿修撰时赋盐亏额
滁亦苦抑配执礼曰郡不能当苏杭一邑而食盐乃倍粟数民何以堪请于朝诏损二十
万滁人德之钦宗立徙知镇江府召为翰林学士道除
吏部尚书旋改户部方军兴调度不足执礼请以禁内钱隶有司凡六宫廩给皆由度支
乃得下尝有小黄门持中批诣部取钱而封识不用玺
既悟其失复取之执礼奏审诏责典宝夫人杖黄门金人围京都执礼劝帝亲征而请太
上帝后皇后太子皆出避用事者沮之泊失守金人质
天子邀金帛以数百千万计曰和议已定但所需满数则奉天子还阙执礼与同列陈知
质程振安抚皆主根索四人哀民力已困相与谋窒其
求而宦者挟宿怨语金帅曰城中七百万户所取未百一但许民持金银换粟麦当有出
者已而果然金帅怒呼四人责之对曰天子蒙尘臣民
皆愿致死虽肝脑不计于金缙何有哉顾比屋枵空亡以塞命耳帅问官长何在振恐执
礼遽前曰皆官长也帅益怒先取其副胡舜陟胡唐老
姚舜明王侯各杖之百执礼等犹为之请俄遣还将及门呼下马挝杀之而梟其首时靖
康二年二月也是日天宇昼冥士庶皆陨涕愤叹初车
驾再出执礼与宗室子昉诸将吴革等谋集兵夺万胜门夜捣金帅帐迎二帝以归而王
时雍徐秉哲使范琼泄其谋故不克死时年四十九高
宗即位诏赠通奉大夫端明殿学士议者以为薄复加资政殿学士

△程振

程振字伯起 【按东都事略及宋名臣言行录俱作字伯玉】 饶州乐平人少有
轶材入太学一时名辈多从之游徽宗幸学以诸生右
职除官为辟雍录升博士迁太常博士提举京东西路学事请立庙于邹祀孟轲以公孙
丑万章乐正克等配食从之提举京西常平入为膳部
员外郎监察御史辟雍国子司业左司员外郎兼太子舍人始至即言古者大祭祀登饩
受爵必以上嗣既礼经所载且元丰彝典具存昨天子
展事明堂而殿下不预非所以尊宗庙重社稷也太子矍然曰宫僚初无及此者由是特
加奖异方腊起振谓王黼宜乘此时建革天下弊事以
上当天意下顺人心黼不怍太子荐之甚力遂擢给事中黼曰振资浅且雅长书命请以
为中书舍人侍郎冯熙载出知亳州黼怨熙载欲振诋
以丑语振不肯黼使言者劾为党罢提举冲佑观居三年后还故官 【按东都事略云以
振为朋党责提举冲佑观明年复集英殿修撰宋名
臣言行录云明年复集撰寻复徽制中舍与宋史本传二年后还故官异】 靖康元年进

吏部侍郎上言柄臣不和论议多驳诏令轻改失于事
几金人交兵半岁而至今不解者以和战之说未一故也裁抑滥赏如黑白易分而数月
之间三变其议以私心不除各蔽其党故也今日一人
言之以为是而行明日一人言之以为非而止或圣断逾度而不暇畴咨或大臣偏见而
遂行播告所以动未必善处未必宜乃辄为之反汗其
势不得不尔也时金兵至河北振请纠诸道兵犄角击之曰彼势如此陛下尚欲守和议
不使少有怨乎上嗟味其言而牵于外廷不能用拜开
封尹故时大辟有情可矜多奏取原贷崇宁以来议者请鞫先弹压率便文杀之振请
复旧制诏捕亡命卒得数千人振请以隶步军除其罪
步军司欲论如法振曰方多事之际一日杀数千人必大骇观听乃尽释之改刑部侍郎
金骑在郊邀车驾出城振为何■〈〈鹵，欠代义〉〉
上木下〉言宜思所以折之之策■〈〈鹵，欠代义〉〉上木下〉不从未几及于难年
五十七金人去从子庭访得其首归葬之初王黼使其
客沈积中图燕振戒以后祸积中惧而言不可既而振乃用是死闻者痛之初宣和崇道
家之说振侍坐东宫从容言孔子以鸚鵡之诗为知道
其词不过曰迨天之未阴雨绸缪牖户而已老子亦云为之于未有治之于未乱今不固
根本于无事之时而事目前区区非二圣人意他日太
子为徽宗道之徽宗悟颇欲去健羨疏左右近习而宦寺杨戩辈方大兴宫室惧不得肆
因谗家令杨冯以为将辅太子幸非常徽宗震怒执冯
诛之而太子之言亦废振尹京时两宫方困于甚间振极意弥缝治龙德梁析狱宽其罪
不使有纤介可指高宗即位进秩七等仍官其子及亲
属三人又赠端明殿学士端平初曾孙东请谥赐谥刚愎同时死者礼部侍郎陈知质失
其传给事中安扶附见父安焘传

△刘延庆

刘延庆保安军人世为将家雄豪有勇数从西伐立战功积官至相州观察使龙神
卫都指挥使鄜延路总管迁泰宁军节度观察留后改
承宣使破夏人成德军擒其酋桑楚降王子尼玛丹津拜保信军节度使马军副都指挥
使从童贯平方腊节度河阳三城又从北伐以宣抚都
统制督兵十万渡白沟延庆行军无纪律郭药师扣马谏曰今大军拔队行而不设备若
敌人置伏邀击首尾不相应则望尘决溃矣不听至良
乡辽将萧干帅众来延庆与战败绩遂闭垒不出药师曰干兵不过万人今悉力拒我燕
山必虚愿得奇兵五千倍道袭取令公之子三将军简
师为后继延庆许之遣大将高世宣与药师先行即入燕城干举精甲三千巷战三将军
者光世也渝约不至药师失援败走世宣死之延庆营

于卢沟南干分兵断饗道擒护粮将王渊得汉军二人蔽其目留帐中夜半伪相语曰闻汉军十万压吾境吾师三倍敌之有余当分左右翼以精兵冲其中左右翼为应歼之无遗阴逸其一人归报明旦延庆见火起以为敌至烧营而奔相蹂践死者百余里自熙丰以来所储军实殆尽退保雄州朝议延庆丧师不可不行法坐贬率府率安置筠州契丹知中国不能用兵由是轻宋未几复为镇海军节度使靖康之难延庆分部守京城城陷引秦兵万人夺开远门以出至龟儿寺为追骑所杀光世自有传

钦定续通志卷三百六十六

●钦定续通志卷三百六十七 列传一百六十七

列传

宋 【七十一】

○宋七十一

李纲

李纲

△李纲

李纲字伯纪邵武人也自其祖始居无锡父夔终龙图阁待制纲登政和二年进士第积官至监察御史兼权殿中侍御史以言事忤权贵改比部员外郎迁起居郎宣和元年京师大水纲上疏言阴气太盛当以盗贼外患为忧朝廷恶其言谪监南剑州沙县税务七年为太常少卿时金人渝盟边报狎至朝廷议避敌之计诏起师勤王命皇太子为开封牧令侍从各具所见以闻纲上御戎五策具语所善给事中吴敏曰建牧之议岂非欲委以留守之任乎巨敌猖獗如此非传以位号不足以招徕天下豪杰东宫恭俭之德闻于天下以守宗社可也公以献纳论心为职曷不为帝极言之敏曰监国可乎纲曰肃宗灵武之事不建号不足以复邦而建号之议不出于明皇后世惜之主上聪明仁恕公言万一能行将见金人悔祸宗社底宁天下受其赐翌日敏请对具道所以因言李纲之论盖与臣同有旨召纲入议纲刺臂血上疏云皇太子监国典礼之常也今大敌入攻安危存亡在呼吸闲犹守常礼可乎名分不正而当大权何以号召天下期成功于万一哉若假皇太子以位号使为陛下守宗社收将士心以死捍敌天下可保疏上内禅之议乃决钦宗即位纲上封事谓方今中国势弱君子道消法度纪纲荡然无统陛下履位之初当上应天心下顺人欲攘除外患使中国之势尊诛锄内奸使君子之道长以副道君皇帝付托之意召对延和殿帝迎谓纲曰朕顷在东宫见卿论水灾疏今尚能诵之李邕使金议割地纲奏祖宗疆土当以死守不可以尺寸

与人钦宗嘉纳除兵部侍郎靖康元年以吴敏为行营副使纲为参谋官金将斡里雅布兵渡河徽宗东幸宰执议请帝出狩襄邓暂避敌锋纲曰道君皇帝挈宗社以授陛下委而去之可乎帝默然太宰白时中谓都城不可守纲曰天下城池岂有如都城者且宗庙社稷百官万民所在舍此欲何之今日之计当整军马固结民心相与坚守以待勤王之师帝问谁可将者纲曰朝廷以高爵厚禄崇养大臣盖将用之于有事之日白时中李邦彦等虽未必知兵然藉其位号抚将士抗敌锋乃其职也 【伏读通鉴辑览 御批汴都戒严白时中辈皆欲委弃而去独李纲力主坚守之说持义颇正及钦宗以命将为问纲意中岂无一二御侮之材可以陈荐者且目击君父之难亦何妨慷慨请行之漫以时中邦彦为对纲寔不知二人之庸懦无能尚欲冀其尽职盖由心嫉二人故不觉欲置之死地以观其僨事然时危论将不宜复参平日好恶之私纲固纯臣此则不能免责备之讥矣】 时中忿曰李纲莫能将兵出战否纲曰陛下不以臣庸懦使治兵愿以死报乃以纲为尚书右丞宰执犹守避敌之议有旨以纲为东京留守纲力陈所以不可去之意且言明皇闻潼关失守实时幸蜀宗庙朝廷毁于贼手今四方之兵不日云集陛下奈何轻举以蹈明皇之覆辙乎帝意颇悟会内侍奏中宫已行帝色变仓卒降御榻曰朕不能留矣纲泣拜以死邀之帝顾纲曰朕今为卿留治兵御敌之事专责之卿勿令有疏虞纲惶恐受命未几复决意南狩纲趋朝则禁卫擐甲乘舆已驾矣纲急呼禁卫曰尔等愿守宗社乎愿从幸乎皆曰愿守纲入见曰陛下已许臣留复戒行何也今六军父母妻子皆在都城愿以死守万一中道散归陛下孰与为卫敌兵已逼知乘舆未远以健马疾追何以御之帝悟遂命辍行纲传旨语左右曰敢复有言去者斩禁卫皆拜伏呼万岁六军闻之无不感泣流涕命纲为亲征行营使以便宜从事纲治守战之具不数日而毕敌兵攻城纲身督战募壮士缒城而下斩敌将十余人杀其众数千人金人知有备又闻徽宗已内禅乃退求遣大臣至军中议和纲请行帝遣李棣纲曰安危在此一举臣恐李棣怯懦而误国事也上不听竟使棣往金人须金币以千万计求割太原中山河闲地以亲王宰相为质棣受事自不措一辞还报纲谓所需金币竭天下且不足况都城乎三镇国之屏蔽割之何以立国至于遣质即宰相当往亲王不当往若遣辩士姑与之议所以可不可者宿留数日大兵四集彼孤军深入不得所欲亦将速归此时而与之盟则不敢轻中国而和可久也宰执议不合纲不能夺求去上慰谕曰卿第出治兵此事当徐议之纲退则誓书以行所求皆与之以皇弟康王少保

张邦昌为质 【伏读通鉴辑览 御批金币数逾

千万竭天下且不足微独李纲见及金将亦窳不之知则需索之多特举以相难意固不专在金币也钦宗是时自度力尚能抗则当从李纲言缓其议盟以待援兵四集为背城之战成败亦未可知若竟不能则徇大义以死社稷不犹愈于强颜称侄乎割地请盟苟延旦夕而仍无解于青城之逼五国之迁貽笑于天下后世何其怯也】 时四方勤王之师渐有至者种师道姚平仲亦以泾原秦凤兵至纲奏言金人贪婪无厌其势非用师不可且敌兵号六万而吾勤王之师集城下者已二十余万彼以孤军入重地犹虎豹自投槛穽中当以计取之不必与角一旦之力若扼河津绝饗道分兵复畿北诸邑而以重兵临敌营坚壁勿战如周亚夫所以困七国者俟其食尽力疲然后以一檄取誓书复三镇纵其北归半渡而击之此必胜之计也帝深以为然约日举事姚平仲勇而寡谋急于要功先期率步骑万人夜斫敌营不克半夜中使传旨谕纲令速援之纲将旦出封邱门与金人战幕天坡 【伏读通鉴辑览 御批靖康国步濒危李

纲计取之说亦不过侥幸万一种姚虽世为名将而当大势已失即并力和衷尚恐不能有济乃平仲不以国事为重嫉妬自私虑功名独归种氏浮言以促师期轻脱而僨军事遂使城下援兵消归乌有汴城之终于残破乎仲实不得辞其罪矣然李纲素持坚壁老师之见何以一闻士利速战速尔改图岂天厌宋德固非人力所能挽回耶】 以神臂弓射金人却之平仲惧诛亡去金使来宰相李邦彦语之曰用兵乃李纲姚平仲非朝廷意遂罢纲 【伏读通鉴辑览 御批

宋人纳叛召衅初不知讲备御之策继不能坚死守之谋大事已失钦宗复甘心屈辱举国请盟更自安于无用乃兵至则罢主战之臣以谢之兵退则罢主和之臣以挑之所谓既不能令又不受命此必亡之势耳】 以蔡懋代之太学生陈东等诣阙上书明纲无罪军民不期而集者数十万呼声动地帝亟召纲纲入见命复为尚书右丞充京城四壁守御使始金人犯城者蔡懋禁不得辄施矢石将士积愤至是纲下令能杀敌者厚赏众无不奋跃金人惧稍稍引却且得制三镇诏及亲王为质乃退师除纲知枢密院事纲奏请如澶渊故事遣兵护送且戒诸将可击则击之乃以兵十万分道并进将士受命踊跃以行宰相咎纲尽遣城下兵追敌恐仓卒无措急征还诸将已追及金人于邢赵闲遽得还师之命无不扼腕诏议迎太上皇帝还京初徽宗南幸童贯高俅等以兵扈从既行闻都城受围乃止东南邮传及勤王之师道路籍籍言贯等为变陈东上书乞诛蔡京蔡攸童贯朱勔高俅卢宗原等议遣聂山为发运使往图之纲曰使山

所图果成震惊太上此忧在陛下万一不果是数人者
挟太上于东南求剑南一道陛下将何以处之莫若罢山之行请于太上去此数人自可
不劳而定上从其言徽宗还次南都以书问改革政事
之故且召吴敏李纲纲请行曰此无他不过欲知朝廷事尔纲至具道皇帝圣孝思慕欲
以天下养之意请陛下早还京师徽宗泣数行下问卿
顷以何故去纲对曰臣昨任左史以狂妄论列水灾蒙恩宽斧钺之诛然臣当时所言以
为天地之变各有类应正为今日攻围之兆夫灾异变
故譬犹一人之身善医者能知之所以圣人观变于天地而修其在我者故能制治保邦
而无危乱之忧徽宗称善又询近日都城攻围守御次
第语渐浹纲遂言皇帝仁孝惟恐有一不当太上皇帝意每得诘问之诏辄忧惧不食
臣窃譬之家长出而强寇至子弟之任家事者不得不
便宜措置长者但当以其能保田园之计而慰劳之皇帝传位之初适当大敌入攻为宗
社计庶事不得不小有更革陛下回銮臣谓宜有以大
慰安皇帝之心勿闲细故可也徽宗感悟出玉带金鱼象简赐纲且曰卿辅助皇帝扞守
宗社有大功若能调和父子闲使无疑阻当遂书青史
垂名万世纲感泣再拜纲还具道太上意宰执进迎奉太上仪注耿南仲议欲屏太上左
右车驾乃进纲言如此是示之以疑也南仲怫然曰臣
适见左司谏陈公辅乃为李纲结士民伏阙者乞下御史置对上愕然纲曰臣与南仲所
论国事也南仲乃为此言臣何敢复有所辩愿乞身待
罪章十余上不允太上皇帝还纲迎拜国门翌日朝龙德宫退复上章恳辞上手诏谕意
曰乃者敌在近郊士庶伏阙一朝仓猝众数十万忠愤
所激不谋同辞此岂人力也哉不悦者造言致卿不自安朕深谅卿不足介怀臣敌方退
正赖卿协济艰难宜勉为朕留纲不得已就职上备边
御敌八事时北兵已去太上还宫上下恬然置事于不问纲独以为忧与同知枢密院事
许翰议调防秋之兵时太原围未解种师中战没师道
病归南仲曰欲援太原非纲不可帝以纲为河东北宣抚使纲言臣书生实不知兵今使
为大帅恐悞国事因拜辞不许退而移疾乞致仕章十
余上不允或谓纲曰公知所以遣行之意乎此非为边事欲缘此以去公则都人无辞耳
公坚卧不起逸者益肆帝怒且不测奈何许翰书杜邮
二字遗纲纲皇恐受命帝手书裴度传以赐纲纲言寇攘外患可以扫除小人在朝蠹害
难去书裴度论元稹魏洪简章疏要语以进帝优诏答
之宣抚司兵仅万二千人庶事未集纲乞展行期御批以为迁延趣行数四曰卿为朕巡
边便可还朝纲曰臣之行无复还之理臣以愚直不容
于朝使既行之后而死敌臣之愿也万一朝廷执议不坚臣当求去陛下宜察臣孤忠以

全君臣之义 【伏读通鉴辑览 御批三镇之不

可弃李纲所见极当虽金壬持议不协而其说自不可磨及既命为宣抚则投艰遗巨正人臣致力之秋纲纵不知兵而前此经理围城业着成效自当戮力中原以捍御都邑苟或不济死生以之此正理也乃当邦家屯险之时成命既降而移疾致仕之章凡十余上濒行复有自度不能即当求去之请以前次慷慨任事若出两人不能不致惜于瑕瑜之掩至台谏乞留纲朝廷既狃重内辄见而劝之起者亦惟虑怒且不测止为私谋而不恤国是尤卑卑不足道矣】 帝为之感动及陛辞言唐恪聂山之奸任之不已后必误国进至河阳望拜诸陵复上奏曰祖宗创业守成垂二百年以至陛下适丁艰难之秋强敌内侵中国势弱此诚陛下尝胆思报厉精求治之日愿深考祖宗之法进君子退小人兼固邦本以图中兴上以慰安九庙之灵下为亿兆苍生之所依赖于天下幸甚行次怀州有诏罢减所起兵纲奏曰太原之围未解河东之势甚危秋高马肥敌必深入宗社安危殆未可知使防秋之师果能足用不可保无敌骑渡河之警况臣出使未几朝廷尽改前诏所团结之兵悉罢减之今河北河东日告危急未有一人一骑以副其求甫集之兵又皆散遣臣诚不足以任此且以军法勒诸路起兵而以寸纸罢之臣恐后时有所号召无复应者矣疏上不报御批曰促解太原之围而诸将承受御画事皆专达宣抚司徒有节制之名纲上疏极谏节制不专之弊时方议和止纲进兵未几徐处仁吴敏罢相而相唐恪许翰罢同知枢密院而进聂山陈过庭李回等吴敏复谪置涪州纲闻之叹曰事无可为者矣即上奏丐罢乃命种师道以同知枢密院事领宣抚司事召纲赴阙寻除观文殿学士知扬州纲具奏辞免未几以纲专主战议丧师费财落职提举亳州明道宫责授保静军节度副使建昌军安置再谪监江金兵再至帝悟和议之非除纲资政殿大学士领开封府事纲行次长沙被命即率湖南勤王之师入援未至而都城失守先是康王至北军为金人所惮求遣肃王代之至是康王开大元帅府承制复纲故官且贻书曰方今生民之命急于倒垂谅非不世之才何以协济事功合下学穷天人忠贯金石当投袂而起以副苍生之望高宗即位拜尚书右仆射兼中书侍郎趣赴阙中丞颜岐奏曰张邦昌为金人所喜虽已为三公郡王宜更加同平章事增重其礼李纲为金人所恶虽已命相宜及未至罢之章五上帝曰如朕之立恐亦非金人所喜岐语塞而退岐犹遣人封其章示纲觐以沮其来帝闻纲至遣官迎劳锡宴趣见于内殿纲见帝涕泗交集帝为动容因奏曰陛下总师于外为天下臣民之所推戴内修外攘还二圣而抚万邦责在陛下

与宰相臣自视阙然不足以副陛下委任之意乞追寝成命帝曰朕知卿忠义智略久矣欲使敌国畏服四方安谧非相卿不可卿其勿辞纲顿首泣谢云昔唐明皇欲相姚崇崇以十事要说皆中一时之病今臣亦以十事仰干天听陛下度其可行者赐之施行臣乃敢受命一曰议国是谓中国之御四裔能守而后战能战而后和而靖康之末皆失之今欲战则不足欲和则不可莫若先自治专以守为策俟吾政事修士气振然后可议大举二曰议巡幸谓车驾不可不一到京师见宗庙以慰都人之心度未可居则为巡幸之计以天下形势而观长安为上襄阳次之建康又次之皆当诏有司预为之备三曰议赦令谓祖宗登极赦令皆有例程前日赦书乃以张邦昌伪赦为法如赦恶逆及罪废官尽复官职皆泛滥不可行宜悉改正以法四曰议僭逆谓张邦昌为国大臣不能临难死节而挟金人之势易姓改号宜正典刑垂戒万世五曰议伪命谓国家更大变鲜仗节死义之士而受伪官以屈膝于其庭者不可胜数昔肃宗平贼污伪命者以六等定罪仿之以励士风六曰议战谓军政久废士气怯惰宜一新纪律信赏必罚以作其气七曰议守谓敌情狡狴势必复来宜于沿河江淮措置控御以扼其冲八曰议本政谓政出多门纪纲紊乱宜归之于中书则朝廷尊九曰议久任谓靖康闲进退大臣太速功效蔑着宜慎择而久任之以责成功十曰议修德谓上始膺天命宜益修孝悌恭俭以副四海之望而致中兴翌日班纲议于朝惟僭逆伪命二事留中不出纲言二事乃今日政刑之大者邦昌当道君朝在政府者十年渊圣即位首擢为相方国家祸难金人为易姓之谋邦昌如能以死守节推明天下戴宋之义以感动其心敌人未必不悔祸而存赵氏而邦昌方自以为得计偃然正位号处宫禁擅降伪诏以止四方勤王之师及知天下之不与不得已而后请元佑太后垂帘听政而议奉迎邦昌僭逆始末如此昔刘盆子以汉宗室为赤眉所立其后以十万众降光武但待之以不死邦昌以臣易君罪大于盆子不得已而自归朝廷既不正其罪又尊崇之此何理也陛下欲建中兴之业而尊崇僭逆之臣以示四方其谁不解体又伪命臣僚一切置而不问何以厉天下士大夫之节时执政中有论不同者帝乃召黄潜善等议之潜善主邦昌甚力帝顾吕好问曰卿昨在围城中知其故以为何如好问附潜善持两端曰邦昌僭窃位号人所共知既以自归惟陛下裁处纲言邦昌僭逆岂可使之在朝廷使道路指目曰此亦一天子哉因泣拜曰臣不可与邦昌同列当以笏击之陛下必欲用邦昌第罢臣帝颇感动乃诏邦昌谪潭州

【伏读通鉴辑览

御批邦昌叛宋之臣高宗寤独不知乃闻李

纲讨贼之说犹必愿询宰执岂真以其罪状尚有可疑盖其始高宗未尝不虑邦昌挟可据之势将不利于己故当其遣使奉迎时尚谕宗泽按甲观变及邦昌身自劝进大位遂不劳而定高宗非惟不较其僭逆之迹且阴德拥戴之功则其终从窜放特因李纲执持大义知公论所在不得已而行之耳他日邦昌既诛旋即官其亲属虽藉以悦金而其阴曲亦从可见甚可鄙也】 吴玠莫俦而下皆迁谪有差纲又言近世士大夫寡廉鲜耻不知君臣之义靖康之祸能仗节死义者在内惟李若水在外惟霍安国愿加赠恤帝从其请仍诏有死节者诸路询访以闻乃谓纲曰卿今可以受命矣纲拜谢有旨兼充御营使入对奏曰今国势不逮靖康闲远甚然而可为者陛下英断于上群臣辑睦于下庶几靖康之弊革而中兴可图然非有规模而知先后缓急之序则不能以成功夫外御强敌内销盗贼修军政变士风裕邦财宽民力改弊法省冗官诚号令以感人心信赏罚以作士气择帅臣以任方面选监司郡守以奉行新政俟吾所以自治者政事已修然后可以起事此所谓规模也至于所当急而先者则在于料理河北河东者盖河北河东者国之屏蔽也料理稍就然后中原可保而东南可安今河东所失者恒代太原泽潞汾晋余郡犹存也河北所失者不过真定怀卫浚四州而已其余三十余郡皆为朝廷守两路士民兵将所以戴宋者其心甚坚皆推豪杰以为首领多者数万少者亦不下万人朝廷不因此时置司遣使以大慰抚之分兵以援其危急臣恐粮尽力疲坐受金人之困金人因得抚而用之皆精兵也莫若于河北置招抚司河东置经制司择有材略者为之使宣谕天子恩德所以不忍弃两河于敌国之意有能全一州复一郡者以为节度防御团练使如唐方镇之制使自为守非惟绝其从敌之心又可资其御敌之力使朝廷永无北顾之忧最今日之先务也帝善其言问谁可任者纲荐张所傅亮所尝为监察御史在靖康围城中以蜡书募河北兵士民得书皆喜应募者凡十七万人由是所声震河北故纲以为招抚河北非所不可傅亮者先以边功得官尝治兵河朔都城受围时亮率勤王之兵三万人屡立战功纲察其智略可以大用欲因此试之帝乃以所为河北招抚使亮为河东经制副使皇子生肆赦纲奏陛下登极旷荡之恩独遗河北河东而不及勤王之师天下缺望夫两路为朝廷坚守而赦令不及人皆谓已弃之何以慰忠臣义士之心勤王之师在道路半年擐甲荷戈冒犯霜露虽未效用亦已劳矣加以疾病死亡恩恤不及后有急难何以使人愿因今赦广示德意帝嘉纳之于是人情翕然闲有以破敌捷书至者金人围守诸郡之兵往往引去而山砦之兵应招抚

经制二司募者甚众有许高许亢者以防河而遁谪岭南至南康谋变守倅戮之或议其擅杀纲曰高亢受任防河寇未至而遁分途劫掠甚于盗贼朝廷不能正军法而一守倅能行之真捷吏也使受命捍贼而欲退走者知郡县之吏皆得以诛之其亦少知所戒乎上以为然命转一官开封守阙纲以留守非宗泽不可力荐之泽至抚循军民修治楼櫓屡出师以挫敌纲立军法五人为伍伍长以牌书同伍四人姓名二十五人为甲甲正以牌书伍长五人姓名百人为队队将以牌书甲正四人姓名五百人为部部将以牌书队将正副十人姓名二千五百人为军统制官以牌书部将正副十人姓名命招置新军及御营司兵并依新法团练有所呼召使令按牌以遣三省枢密院置赏功司受赂乞取者行军法遇敌逃溃者斩因而为盗贼者诛及其家属凡军政申明改更者数十条又奏步不足以胜骑骑不足以胜车请以车制颁京东西制造而教阅之又奏造战舰募水军及询访诸路武臣材略之可任者以备用又进三议一曰募兵二曰买马三曰募民出财以助兵费时朝廷议遣使于金纲奏曰陛下以二圣远狩沙漠思迎还两宫致天下养今日之事正当枕戈尝胆内修外攘使刑政修而中国强则二帝不俟迎请而自归不然虽冠盖相望卑辞厚礼恐亦无益今所遣使但当奉表通问两宫致思慕之意可也帝乃命纲草表以周望傅雱为二圣迎问使奉表以往且乞降哀痛之诏以感动天下使同心协力相与扶持以致中兴又乞省冗员节浮费帝皆从其言是时四方溃兵为盗者十余万人攻劫山东淮南襄汉之闲纲命将悉讨平之一日论靖康时事帝曰渊圣勤于政事省览章奏至终夜不寝然卒致播迁何耶纲曰人主之职在知人进君子而退小人则大功可成否则衡石程书无益也因论靖康初朝廷应敌得失之策且极论金人两至都城所以能守不能守之故因勉帝以明恕尽人言以恭敬足国用以英果断大事帝皆嘉纳又奏臣尝言车驾巡幸之所关中为上襄阳次之建康为下陛下纵未能行上策犹当且遂襄邓示不忘故都以系天下之心不然中原非复我有车驾还阙无期天下之势遂倾不复振矣帝为诏谕两京以还都之意读皆感泣未几有诏欲幸东南避敌纲极论其不可言自古中兴之主起于西北则足以据中原而有东南起于东南则不能以复中原而有西北盖天下精兵健马皆在西北一旦委中原而弃之岂惟金人将乘闲以扰内地盗贼亦将蠡起为乱跨州连邑陛下虽欲还阙不可得矣况欲治兵胜敌以归二圣哉夫南阳光武之所兴有高山峻岭可以控扼有宽城平野可以屯兵西邻关陕可以召将士东达江淮可以运谷粟南通荆湖巴蜀可以取财货

北距三都可以遣救援暂议驻蹕乃还汴都策无出于此者今乘舟顺流而适东南固甚安便第恐一失中原则东南不能必其无事虽欲退保一隅不易得也况尝降诏许留中原人心悦服奈何诏还未干遽失大信于天下上乃许幸南阳时黄潜善汪伯彦实阴主巡幸东南之议客或有谓纲曰外论汹汹咸谓东幸已决纲曰国之存亡于是焉分吾当以去就争之初纲每有所论谏其言虽切直无不容纳至是所言常留中不报已而迁纲尚书左仆射兼门下侍郎黄潜善除右仆射兼中书侍郎张所乞且置司北京俟措置有绪乃渡河北京留守张益谦潜善党也奏招抚司之扰又言自置司河北盗贼益炽纲言所尚留京师益谦何以知其扰河北民无所归聚而为盗岂由置司乃有盗贼乎有旨令留守宗泽节制傅亮即曰渡河亮言措置未就而渡河恐误国事纲言招抚经制臣所建明而张所傅亮又臣所荐用今潜善伯彦沮所及亮所以沮臣臣每览靖康大臣不和之失事未尝不与潜善伯彦议而后行而二人设心如此愿陛下虚心观之既而诏罢经制司召亮赴行在纲言圣意必欲罢亮乞以御笔付潜善施行臣得乞身归田 【伏读通鉴辑览 御批傅亮奉命经制不知励众遄征徒尔逍遥旷日已不得谓之尽心王事不过畏惧金兵不敢进托言持重耳如此怯懦之人奚堪复膺重寄李纲特以已所荐用曲为回护忿色力争则不免因私废公矣且后此永兴沦陷亮首先夺门出降纲暗于知人其能无愧于心乎】 纲退而亮竟罢乃再疏求去帝曰卿所争细事胡乃尔纲言方今人材以将帅为急恐非小事臣昨议迁幸与潜善伯彦异宜为所嫉然臣东南人岂不愿陛下东下为安便哉顾一去中原后患有不可胜言者愿陛下以宗社为心以生灵为意以二圣未还为念勿以臣去而改其议臣虽去左右不敢一日忘陛下泣辞而退初二帝北行金人议立异姓吏部尚书王时雍问于吴玠莫俦二人微言敌意在张邦昌时雍未以为然适宋齐愈自敌所来时雍入问之齐愈取片纸书张邦昌三字时雍意乃决遂以邦昌姓名入议状至是齐愈论纲募兵买马括财三事之非不报拟章将再上时方论僭逆附伪之罪于是逮齐愈引伏遂诛之东市 【伏读通鉴辑览 御批邦昌僭伪之议因齐愈书名而定其罪固无可宽然视王时雍吴玠莫俦范琼之甘心从贼者情稍有闲前此贬窜逆党齐愈既已漏网既欲追论其事亦当与时雍辈一律处分乃李纲恶其妄言时政遽尔重翻旧案寘之极刑寔不免为私意所累且巨憝尚止投荒附从反行肆市轻重失伦他日张浚劾奏遂据为口实不得谓非纲之自取也】 张浚为御史劾纲以私意杀侍从且论其买马招军之罪诏罢纲

为观文殿大学士提举洞霄宫尚书右丞许翰言纲忠
义舍之无以佐中兴会上召见陈东东言潜善伯彦不可任纲不可去东坐诛翰曰吾与
东皆争李纲东戮都市吾在庙堂可乎遂求去后有旨
纲落职居鄂州自纲罢张所以罪去傅亮以母病辞归招抚经制二司皆废车驾遂东幸
两河郡县相继沦陷凡纲所规画军民之政一切废罢
金人攻京东西残毁阙辅而中原盗贼蠹起矣绍兴二年除观文殿学士湖广宣抚使兼
知潭州是时荆湖江湘之闲流民溃卒羣聚为盗贼不
可胜计纲悉荡平之上言荆湖国之上游其地数千里诸葛亮谓之用武之国今朝廷保
有东南控驭西北如鼎澧岳鄂若荆南一带皆当屯宿
重兵倚为形势使四川之号令可通而襄汉之声援可接乃有恢复中原之渐议未及行
而谏官徐俯刘裴劾纲罢为提举西京崇福宫四年冬
金人及伪齐来攻纲具防御二策谓伪齐悉兵南下境内必虚佯出其不意捣颖昌以临
畿甸彼必震惧还掾王师追蹶必胜之理此上策也若
驻蹕江上号召上流之兵顺流而下以助声势使敌人不敢南渡然后以重师进屯要害
之地设奇邀击绝其粮道俟彼遁归徐议攻讨此中策
也万一借亲征之名为顺动之计使卒伍溃散控扼失守敌得乘闲深入州县望风奔溃
则其患有不可测矣往岁金人利在侵掠又方时暑势
必还师朝廷因得以还定安集今伪齐道之而来势不徒还必谋割据奸民溃卒从而附
之苟或退避则无以为善后之策昔苻坚以百万众侵
晋而谢安以徧师破之使朝廷措置得宜将士用命安知不大决胜望降臣章与二三大
臣熟议之诏纲所陈今日之急务付三省枢密院施行
时韩世忠屡败金人于淮楚闲有旨督刘光世张浚统兵渡河车驾进发至江上劳军五
年诏问攻战守备措置绥怀之方纲奏愿陛下勿以敌
退为可喜而以讎敌未报为可愤勿以东南为可安而以中原未复赤县神州陷放敌国
为可耻勿以诸将屡捷为可贺而以军政未修士气未
振而强敌犹得以潜逃为可虞则中兴之期可指日而俟议者或谓敌马既退当遂用兵
为大举之计臣窃以为不然生理未固而欲浪战以侥
幸非制胜之术也今朝廷以东南为根本将士暴露之久财用调度之烦民力科取之困
苟不大修守备先为自固之计何以能万全而制敌议
者又谓敌人既退当且保据一隅以苟目前之安臣又以为不然祖宗境土岂可坐视沦
陷不务恢复今岁不征明年不战使敌势益张而吾所
纠合精锐士马日以损耗何以图敌谓宜于防守既固军政既修之后即议攻讨乃为得
计至于守备之宜则当料理淮南荆襄以为东南屏蔽
近年以来大将拥众兵于江南官吏守空城于江北虽有天险而无战舰水军之制故敌

人得以侵扰窥伺今当于淮之东南及荆襄置三大帅屯重兵以临之分遣偏师进守支郡加以战舰水军上运下接自为防守敌马虽多不敢轻犯则藩篱之势盛而有守备矣然后议攻战之利分责诸路因利乘便收复京畿以及故都断以必为之志而勿失机会攻战之利莫大于是若夫万乘所居必择形胜以为驻蹕之所然后能制服中外以图事业建康自昔号帝王之宅江山雄壮地势宽博六朝更都之臣昔举天下形势而言谓关中为上今以东南形势而言则当以建康为便今者釜輿未复旧都莫若且于建康权宜驻蹕愿诏守臣治城池修宫阙立官府营壁使粗成规模以待巡幸盖有城池然后人心不恐有官府然后政事可修有营垒然后士卒可用此措置之所当先也至于西北之民皆陛下赤子荷祖宗涵养之深其心未尝一日亡宋特制于强敌陷于涂炭而不能以自归天威震惊必有结纳来归愿为内应者宜给之土田予以爵赏优加抚循许其自新使陷溺之民知所依帖莫不感悦益坚戴宋之心此绥怀之所当先也臣窃观陛下临御九年国不辟而日蹙事不立而日坏将骄而难御卒惰而未练国用匮而无赢余之蓄民力困而无休息之期使陛下忧勤虽至而中兴之效邈乎无闻则羣臣误陛下之故也陛下观近年以来所用之臣慨然敢以天下之重自任者几人平居无事小廉曲谨似可无过忽有扰攘则错愕无所措手足不过奉身以退天下忧危之重委之陛下而已大槩以和议为得计而以治兵为失策以退避为爱君而以进御为误国上下偷安不为长久之计天步艰难国势益弱职此之由今天启宸衷悟前日和议退避之失亲临大敌天威所临使北军数十万之众震怖不敢南渡潜师宵遁则和议之与治兵退避之与进御其效槩可观矣然敌兵虽退未大惩创安知其秋高马肥不再来扰我疆场使疲于奔命哉臣惟自昔创业中兴之主必躬冒矢石履行阵而不避此谓始忧勤而终逸乐也若夫退避之策可暂不可常可一不可再退一步则失一步退一尺则失一尺往时自南都退至维扬则关陕河北河东失矣自维扬退至江浙则京东西失矣万一敌骑南牧复将退避不知何所适而可乎航海之策万乘冒不测之险此又不可之尤者也惟当于国家闲暇之时明政刑治军旅选将帅修车马备器械峙糗粮积金帛敌来则御俟时而奋以光复祖宗之大业此最上策也臣愿陛下自今以往勿复为退避之计臣又观古者敌国善邻则有和亲仇讎之邦鲜复遣使岂不以衅隙既深终无讲好修睦之理耶金人造衅之深知我必报其措意为何如而我方且卑辞厚币屈体以求之其不见信决矣器币礼物所费不貲使轺往来坐索士气而又邀我以必不

可从之事制我以必不敢为之谋是和卒不成而徒为此扰扰也非特如此于吾自治自强之计动辄相妨实有所害金人二十余年以此策破契丹困中国而终莫之悟臣愿自今以往勿复遣和议之使俟吾之政事修仓廩实府库充器用备士气振力可有为乃议大举则兵虽未交而胜负之势已决矣抑臣闻朝廷者根本也藩方者枝叶也根本固则枝叶蕃朝廷者腹心也将士者爪牙也腹心壮则爪牙奋今远而强敌近而伪臣国家所仰以为捍蔽者在藩方所资以致攻讨者在将士惟陛下使君子小人各得其分则是非明赏罚当自然藩方协力将士用命虽强敌不足畏逆臣不足忧臣昧死上条六事一曰信任辅弼二曰公选人材三曰变革士风四曰爱惜日力五曰务尽人事六曰寅畏天威何谓信任辅弼夫兴衰拨乱之主必有同心同德之臣相与有为今陛下选于众以图任遂能捍御大敌可谓得人然臣愿陛下待以至诚无事形迹久任以责成功勿使小人得以闲之则君臣之美垂于无穷矣何谓公选人材夫治天下者必资于人才创业中兴之主所资尤多艰难之际非得卓犖瓌伟之才则未易有济然自昔抱不羣之才者多为小人所忌嫉而以道事君者安于义命不复自辨苟非至明之主深察人之情伪安能辨其非辜陛下临御以来用人多矣世之所许以为端人正士者往往闲废于无用之地而陛下寢寐侧席有乏材之叹盍少留意而致察焉何谓变革士风夫士风厚则议论正而是非明朝廷赏罚当功罪而人心服考之本朝嘉佑治平以前可知己数十年来奔竞日进论议徇私邪说利口足以惑人主之听元佑大臣持正论如司马光之流指为奸党颠倒是非政事大坏驯致靖康之变非偶然也窃观近年士风尤薄岂朝廷之福哉大抵朝廷设耳目及献纳论思之官固许之以风闻至于大故必须核实而后言使其无实得以中害善良皆非所以修政也何谓爱惜日力夫创业中兴如建大厦堂室奥序其规模可一日而成鸠工聚材则积累非一日所致陛下临御九年于兹境土未复僭逆未诛仇敌未报尚稽中兴之业者诚以始不为之规模而后不为之积累故也边事粗定之时朝廷所推行者不过簿书期会不切之细务至于攻讨防守之策国之大计皆未尝留意夫天下无不可为之事亦无不可为之时惟失其时则事之小者日益大事之易者日益难矣何谓务尽人事夫天之道其实一致人事尽于前则天理应于后今未尝尽人事敌至而先自退屈而欲责功于天其可乎臣愿陛下诏二三大臣协心同力尽人事以听天命则恢复土宇迎还两宫必有日矣何谓寅畏天威夫天之于王者犹父母之于子爱之至则所以为之戒者亦至故人主之于天威必恐

惧修省以致其寅畏之诚比年以来荧惑失次太白昼
见地震水溢或久旱不雨或久雨不霁或当暑而寒乃正月之朔日有食之此皆天意眷
佑陛下丁寔反复以致告戒惟陛下推至诚之意正厥
事以应之则变灾而为祥矣疏奏帝为赐诏褒谕除江西安抚制置大使兼知洪州有旨
赴行在奏事毕之官六年纲至引对内殿朝廷方锐意
大举纲陛辞言今日用兵之失者四措置未尽善者五宜预备者三当善后者二时宋师
与金人伪齐相持于淮泗者半年纲奏两兵相持非出
奇不足以取胜愿速遣骁将自淮南约岳飞为犄角夹击之大功可成已而宋师屡捷刘
光世张浚杨沂中大破伪齐兵于淮淝之上车驾进发
幸建康纲奏乞益饬战守之具修筑沿淮城垒且言愿陛下勿以去冬骤胜而自怠勿以
目前粗定而自安凡可以致中兴之治者无不为凡可
以害中兴之业者无不去要以修政事信赏罚明是非别邪正招徕人材鼓作士气爱惜
民力顺导众心为先数者既备则将帅辑睦士卒乐战
用兵其有不胜者哉淮西郟琼以全军叛归刘豫纲指陈朝廷有措置失当者深可痛惜
者及当监前失以图方来者凡十有五事奏之张浚引
咎去相位言者引汉武诛王恢为比纲奏曰臣窃见张浚罢相恐智谋之士卷舌而不谈
兵忠义之士扼腕而无所发僨陛下将谁与立国哉张
浚措置失当诚为有罪然其区区徇国之心有可矜者愿少宽假以责来效时车驾将幸
平江纲以为平江去建康不远徒有退避之名不宜轻
动复具奏曰臣闻自昔用兵以成大业者必先固人心作士气据地利而不肯先退尽人
事而不肯先屈今日之事岂可因一叛将之故望风怯
敌遽自退屈果出此谋六飞回驭之后人情动摇莫有固志士气销缩莫有鬪心我退彼
进使敌马南渡得一邑则守一邑得一州则守一州得
一路则守一路乱臣贼子黠吏奸氓从而附之虽欲如前日返驾还辕复立朝廷于荆棘
瓦砾之中不可得也借使敌骑冲突不得已而权宜避
之犹为有说今疆场未有警急之报兵将初无不利之失而遽为此扰扰弃前功挑后患
以自趋于祸败岂不重可惜哉八年王伦使北还纲闻
之上疏曰臣窃见朝廷遣伦使金奉迎梓宫今伦之归与金使偕来乃以诏谕江南为名
不着国号而曰江南不曰通问而曰诏谕此何礼也金
人毁宗社逼二圣而陛下应天顺人光复旧业自我视彼则仇讎也自彼视我则腹心之
疾也岂复有可和之理然而朝廷遣使通问冠盖相望
于道卑辞厚币无所爱惜者以二圣在其域中为亲屈己不得已而然犹有说也至去年
春两宫凶问既至遣使以迎梓宫亟往遄返不得其要
领今伦使事初以奉迎梓宫为指而金使之来乃以诏谕江南为名循名责实已自乖戾

则其所以罔朝廷而生后患者不待诘而可知臣以意料之金以此名遣使其邀求大略有五必降诏书欲陛下屈体降礼以听受一也必有赦文欲朝廷宣布班示郡县二也必立约束欲陛下奉藩称臣稟其号令三也必求岁赂广其数目使我坐困四也必求割地以江为界淮南荆襄四州尽欲得之五也此五者朝廷从前一则大事去矣金人变诈不测贪婪无厌纵使听其诏令奉藩称臣其志犹未已也必继有号令或使亲迎梓宫或使单车入覲或使移易将相或改革政事或竭取租赋或腴削土宇从之则无有纪极一不从则前功尽废反为兵端以为权时之宜听其邀求可以无后悔者非愚则诬也使国家之势单弱果不足以自振不得已而为此固犹不可况土宇之广犹半天下臣民之心戴宋不忘与有识者谋之尚足以有为岂可忘祖宗之业生灵之属望弗虑弗图遽自屈服冀延旦暮之命哉臣愿陛下且勿轻许深诏羣臣讲明利害疏奏虽与众论不合帝不以为忤曰大臣当如此矣九年除知潭州荆湖南路安抚大使纲具奏力辞曰臣迂疏无周身之术动致烦言今者罢自江西为日未久又蒙湔拔畀以帅权昔汉文帝闻季布贤召之既而罢归布曰陛下以一人之誉召臣以一人之毁去臣臣恐天下有以窥陛下之浅深今臣数年之闲亟奋亟蹶上累陛下知人任使之明实有系于国体诏以纲累奏不欲重违遂允其请次年薨年五十八讣闻帝为轸悼遣使赙赠抚问其家给丧葬之费赠少师官其亲族十人纲负天下之望以一身用舍为社稷生民安危虽身或不用用又不久而其忠诚义气凜然动乎远迩每宋使至燕山必问李纲赵鼎安否其为远人所畏服如此

钦定续通志卷三百六十七

●钦定续通志卷三百六十八 列传一百六十八

列传

宋 【七十二】

○宋七十二

宗泽 赵鼎 张浚【子构】

宗泽

赵鼎

张浚

△宗泽

宗泽字汝霖婺州义乌人母刘梦天大雷电光烛其身翌日而泽生泽自幼豪爽有大志登元佑六年进士第廷对极陈时弊考官恶直真

末甲调大名馆陶尉吕惠卿帅鄜延檄泽视河埽泽适丧长子奉檄遽行会朝廷大开御河方隆冬役夫僵仆于道中使督之急泽上书于帅请少需之至初春可不扰而办用其言上闻从之惠卿辟为属辞调衢州龙游令民未知学泽为建庠序设师儒讲论经术风俗一变调晋州赵城令下车请升县为军不听泽曰承平时固无虑他日有警当知吾言矣知莱州掖县通判登州境内官田数百顷皆不生殖岁输万余缗率横取于民泽奏免之朝廷遣使由登州结女真盟海上谋夹攻契丹泽语所亲曰天下自是多事矣退居东阳结庐山谷闲靖康元年中丞陈过庭等列荐假宗正少卿充和议使泽曰是行不生还矣敌能悔过退师固善否则安能屈节北庭以辱君命乎议者谓泽刚方不屈恐害和议乃不遣命知磁州时太原失守官两沔者率托故不行泽曰食禄而避难不可也即曰单骑就道从羸卒十余人磁经敌骑蹂躏之余人民逃徙帑廩枵然泽至缮城壁浚隍池治器械募义勇始为固守不移之计上言邢洺磁赵相五州各蓄精兵二万敌攻一郡则四郡皆应是一郡之兵常有十万人上嘉之除河北义兵都总管金人破真定引兵南取庆源恐泽兵蹶其后遣千骑直扣磁州城泽擐甲登城令壮士以神臂弓射走之开门纵击斩首数百级所获羊马金帛悉以赏军士康王再使金行至磁泽迎谒曰肃王一去不反今敌又诡辞以致大王愿勿行王遂回相州有诏以泽为副元帅从王起兵入援泽言宜急会兵李固渡断敌归路众不从乃自将兵趋渡道遇北兵遣秦光弼张德夹攻大破之金人既败乃留兵分屯泽遣壮士夜捣其军破三十余砦时康王开大元帅府檄兵会大名泽履冰渡河见王谓京城受围日久入援不可缓会签书枢密院事曹辅赉蜡封钦宗手诏至自京师言和议可成泽曰金人狡谲是欲款我师尔君父之望入援何啻饥渴宜急引军直趋澶渊次第进垒以解京城之围万一敌有异谋则吾兵已在城下汪伯彦等难之劝王遣泽先行自是泽不得预府中谋议矣 【伏读通鉴辑览 御批康王闻君父之难亟宜投袂入援而乃听信奸言濡迟不进坐视家国沦亡此与梁湘东王不援台城何异宜乎南渡以后忍耻事讎贻讥后世也独是康王出质金军时当鞞里布诘责而不为动似乎尚足有为何一旦恇怯至此岂前事云云固当日史官溢美之词不足尽信耶抑直一庸人遇大事懵然不能出一言史遂谓之不为动耶】 二年正月泽至开德十三战皆捷以书劝王檄诸道兵会京城又移书北道总管赵野河东北路宣抚范讷知兴仁府曾霖合兵入援三人皆以泽为狂不答泽以孤军进都统陈淬言敌方炽未可轻举泽怒欲斩之诸将乞贷淬使得效死泽命

淬进兵遇金人败之金人攻开德泽遣孔彦威与战又败之泽度金人必犯濮先遣三千骑往援金人果至败之金人复向开德权邦彦孔彦威合兵夹击又大败之泽兵进至卫南度将孤兵寡不深入不能成功先驱云前有敌营泽挥众直前与战败之转战而东敌益生兵至王孝忠战死前后皆敌垒泽下令曰今日进退等死不可不从死中求生士卒知必死无不一当百斩首数千级金人大败退却数十里泽计敌众十倍于我今一战而却势必复来使悉其铁骑夜袭吾军则危矣乃暮徙其军金人夜至得空营大惊自是惮泽不敢复出兵泽出其不意遣兵过大河袭击败之王承制以泽为徽猷阁待制时金人逼二帝北行泽闻即提军趋滑走黎阳至大名欲径渡河据金人归路邀还二帝而勤王之兵卒无一至者又闻张邦昌僭位欲先行诛讨会得大元帅府书约移师近都按甲观变泽复书于王曰自古奸臣在外为恭顺而中藏祸心未有窃据宝位改元肆赦恶状昭著若邦昌者今二圣诸王悉渡河而北惟大王在济天意可知宜亟行天讨兴复社稷且言邦昌伪赦或启奸进之意望遣使分谕诸路以定民心又上书言今天下所属望者在于大王大王行之得其道则有以慰天下之心所谓道者近刚正而远柔邪进公实而退私伪因累表劝进王即帝位于南京泽入见涕泗交颐陈兴复大计时与李纲同入对相见论国事慷慨流涕纲奇之上欲留泽潜善等沮之除龙图阁学士知襄阳府时金人有割地之议泽上疏曰天下者太祖太宗之天下陛下当兢兢业业思传之万世奈何遽议割河之东西又议割陕之蒲解乎自金人再至朝廷未尝命一将出一帅但闻奸邪之臣朝进一言以告和暮入一说以乞盟终致二圣北迁宗社蒙耻臣意陛下赫然震怒大明黜陟以再造王室今即位四十日矣未闻有大号令但见刑部指挥云不得誊播赦文于河之东西陕之蒲解是褫天下忠义之气而自绝其民也臣虽弩怯当躬冒矢石为诸将先得捐躯报国恩足矣上览其言壮之改知青州时年六十九矣开封尹阙李纲言绥复旧都非泽不可寻徙知开封府时敌骑留屯河上金鼓之声日夕相闻而京城楼櫓尽废兵民杂居盗贼纵横人情汹汹泽威望素着既至首捕诛舍贼者数人下令曰为盗者赃无轻重并从军法由是盗贼屏息民赖以安上疏请上还京俄有诏荆襄江淮悉备巡幸泽上疏言开封物价市肆渐同平时将士农民商旅士大夫之怀忠义者莫不愿陛下亟归京师以慰人心其倡为异议者非为陛下忠谋不过如张邦昌辈阴与金人为地尔除延康殿学士京城留守兼开封尹时金遣人以使伪楚为名至开封府泽曰此覘我也拘其人乞斩之有诏延置别馆泽曰国家承平

二百年不识兵革以敌国诞谩为可凭信恬不置疑不惟不严攻讨之计且有实欲贾勇思敌所恠之人士大夫不以为狂则以为妄致有前日之祸张邦昌耿南仲辈所为陛下所亲见也今金人假使伪楚来覘虚实臣乞斩之以破其奸而陛下惑于人言令迁置别馆优加待遇臣愚不敢奉诏以彰国弱上乃亲札谕泽竟纵遣之言者附潜善意皆以泽拘留金使为非尚书左丞许景衡抗疏力辨且乞厚加任使以成其功真定怀卫闲敌兵甚盛方密修战具为入攻之计而将相恬不为虑泽以为忧乃渡河约诸将共议事宜以图收复而于京城四壁各置使以领招集之兵又据形势立坚壁二十四所于城外沿河鳞次为连珠砦连结河东河北山水砦忠义民兵于是陕西京东西诸路咸愿听泽节制有诏如淮甸泽上表谏不报秉义郎岳飞犯法将刑泽一见奇之曰此将材也会金人攻汜水泽以五百骑授飞使立功赎罪大败金人而还遂升飞为统制飞由是知名 【伏读通鉴辑览 御批宗泽忠义凛然屡战克捷奉命留守东京赖以保全而前后所陈诸疏正论侃侃亦皆发于忠爱实为宋室纯臣且能拔岳飞于刑罪之中遂成中兴名将其明识尤有过人者】 泽视师河北还上疏请帝亟回汴京以慰元元之心不报复抗疏言坚守和议果不足以息民今之言迁幸者犹前之言和议为可行者也惟陛下熟思而审用之且京师二百年积累之基业陛下奈何轻弃以遣敌国乎诏遣官迎奉六宫往金陵泽上疏言京师天下腹心必不可弃遂条上五事其一言黄潜善汪伯彦赞南幸之非泽前后建议经从三省枢密院辄为潜善等所抑每见泽奏疏皆笑以为狂金将乌珠渡河谋攻汴京诸将请先断河梁严兵自固泽笑曰去冬金骑直来正坐断河梁耳乃命诸将刘衍趋滑刘达趋郑以分敌势戒诸将极力保护河梁以俟大兵之集金人闻之夜断河梁遁去二年金人自郑抵白沙去汴京密迩都人震恐僚属入问计泽方对客围碁笑曰何事张皇刘衍等在外必能御敌乃选精锐数千使绕出敌后伏其归路金人方与衍战伏兵起前后夹击之金人果败金将尼雅满据西京与泽相持泽遣部将李景良阎中立郭俊民领兵趋郑遇敌大战中立死之俊民降景良遁去泽捕得景良斩以徇既而俊民及燕人何仲祖等持书招泽泽数俊民曰汝失利死尚为忠义鬼今反为金持书相诱何面目见我斩之谓史曰我受此土有死而已汝为人将不能以死敌我乃欲以儿女子语诱我乎亦斩之谓仲祖胁从贷之刘衍还金人复入滑部将张撝请往掇泽选兵五千付之戒毋轻战以需援撝至滑迎战敌骑十倍诸将请少避其锋撝曰避而偷生何面目见宗公力战死之泽闻撝急遣王宣领骑五

千救之擣死二日宣始至与金人大战破走之泽迎擣丧归恤其家以宣权知滑州金人自是不复犯东京山东盗起执政谓其多以义师为名
请下令止勤王泽疏曰自敌围京城忠义之士愤懣争奋广之东西湖之南北福建江淮越数千里争先勤王当时大臣无远识大略不能抚而
用之使之饥饿困穷弱者填沟壑强者为盗贼此非勤王者之罪乃一时错置乖谬所致耳今河东西不从敌国而保山砦者不知其几诸处节
义之夫自黥其面而争先救驾者复不知其几此诏一出臣恐草泽之士一旦解体仓卒有急谁复有愿忠效义之心哉辽人王策为金将往来
河上泽擒之解其缚坐堂上为言契丹本宋兄弟之国以义激之策感泣愿效死因问敌国虚实尽得其详遂决大举之计召诸将谓曰汝等有
忠义心当协谋剿敌期还二圣以立大功言讫泣下诸将皆泣听命金人战不利悉引兵去泽疏谏南幸言臣为陛下保护京城自去年秋冬至
于今春又三月矣陛下不早回京城则天下之民无所依戴不报除资政殿学士又遣子颖诣行阙上疏曰今收复伊洛而金人渡河捍蔽滑台
而敌国屡败河东河北山砦义民引领举踵日望官兵之至中兴之兆可见在陛下见几乘时又言昔楚人城郢史氏鄙之今闻有旨于仪真教
习水战是规规为偏霸之谋传闻四方必谓中原不守但为江甯控扼之计时河北盗杨进聚众三十万与丁进王再兴李贵王大郎等拥众各
数万侵掠为患泽遣人谕以祸福悉招降之王善者河东巨寇众七十万欲据京东泽单骑驰至善营泣谕善解甲降先是泽去磁以州事付兵
马钤辖李侃统制赵世隆杀之至是世隆及弟世兴以兵二万来归众惧其变泽曰世隆本吾一校尔何能为世隆至责之曰河北陷没吾宋法
令与上下之分亦陷没邪命斩之时世兴佩刀侍侧众兵露刃庭下泽徐谓世兴曰汝兄诛汝能奋志立功足以雪耻世兴感泣金人攻滑州泽
遣世兴至掩其不备败之泽威声日着北方闻其名常尊惮之泽疏言丁进数十万众愿守护京城李成愿扈从还阙即渡河剿敌杨进等兵百
万亦愿渡河同致死力臣闻多助之至天下顺之陛下及此时还京则众心翕然何敌国之足忧乎又言爱其亲以及人之亲所以教人孝敬其
兄以及人之兄所以教人弟陛下当与忠臣义士合谋肆讨迎复二圣今上皇所御龙德宫俨然如旧惟渊圣皇帝未有宫室望改修宝篆宫以
为迎奉之所使天下知孝于父弟子于兄是以身教也上乃降诏择日还京既而不果 【伏读通鉴辑览 御批前儒谓高宗非不知和议之
不可恃恐二帝果还于己有不利耳此言实洞见其肺腑观李纲宗泽等屡请还京言之恳切而卒不见听及一闻信王入汴即有择日还京之

诏于讎仇则甘心避之于兄弟则投袂争之其忌出于天性乃知前论固不为过当也】
泽前后请上还京二十余奏每为潜善等所抑忧愤成疾疽发于背诸将入问疾泽矍然曰吾以二帝蒙尘积愤至此汝等能歼敌则我死无恨众皆流涕曰敢不尽力诸将出泽叹曰出师未捷身先死长使英雄泪满襟翌日风雨昼晦泽无一语及家事但呼过河者三而薨都人号恸遗表犹赞上还京赠观文殿学士通议大夫谥忠简泽质直好义亲故贫者多依以为活而自奉甚薄常曰君父侧身尝胆臣子乃安居美食邪始泽招集羣盗聚兵储粮结诸路义兵连燕赵豪杰自谓渡河克复可指日冀有志弗就识者恨之子颖居戎幕素得士心泽薨数日将士去者十五都人请以颖继父任会朝廷已命杜充留守乃以颖为判官充反泽所为颇失人心颖屡争之不从请持服归自是豪杰不为用羣聚城下者复为盗而中原不守矣颖官终兵部郎中

△赵鼎

赵鼎字符镇解州闻喜人生四岁而孤母樊教之通经史百家之书登崇宁五年进士第对策斥章惇误国累官为河南洛阳令宰相吴敏知其能擢为开封士曹金人陷太原朝廷议割三镇地鼎曰祖宗之地不可以与人何庸议已而京师失守二帝北行金人议立张邦昌鼎与胡寅张浚逃太学中不书议状高宗即位除权户部员外郎知枢密院张浚荐之除司勋郎官上幸建康诏条具防秋事宜鼎言宜以六宫所止为行宫车驾所止为行在择精兵以备仪卫其余兵将分布江淮使敌莫测巡幸之定所上纳之久雨诏求阙政鼎言自熙宁闲王安石用事变祖宗之法造生边患穷困民力败坏人才至崇宁初蔡京托绍述之名尽祖安石之政凡今日之患始于安石成于蔡京今安石犹配享庙廷而京之党未除时政之阙无大于是 【伏读通鉴辑览 御批王安石蔡京变法流毒固宋室致病之由但至高宗南渡以后宋之宗社朝不保暮其先务自当以讲求军事为急赵鼎乃谓时政之阙莫大于安石之配享未罢蔡京之党未除实迂缓而不切于事即如其言悉举而廓清之又岂遽能靖外患而维国本乎鼎固南宋名臣而此疏实不免书生肤末之见抑亦门户排斥之私耳】 帝乃罢安石配享擢右司谏旋迁殿中侍御史刘光世与韩世忠部将擅相杀夺鼎请鞫治诸将肃然中丞范宗尹言故事无自司谏迁殿中者帝曰鼎在言路极举职所言四十事已施行三十有六遂迁侍御史北兵至江上幸会稽召台谏议去留鼎陈战守避三策拜御史中丞请督王■〈王燮〉进军宣州周望分军出广德刘光世驻蕲黄为邀击之计又言经营中原当自关中始经营关中当自蜀始欲幸蜀

当自荆襄始吴越介在一隅非进取中原之地荆襄左
顾川陕右控湖湘下瞰京洛三国所必争宜以公安为行阙而屯兵于襄阳运江浙之粟
以资川陕之兵经营大业计无出此宰相吕颐浩请帝
幸浙西下诏亲征鼎以为不可轻举颐浩恶其异已改鼎翰林学士鼎不拜改吏部尚书
又不拜言陛下有听纳之诚而宰相陈拒谏之说陛下
有眷待台臣之意而宰相挟挫沮言官之威坚卧不出疏颐浩过失凡千言乃罢颐浩诏
鼎复为中丞除端明殿学士签书枢密院事金人攻楚
州鼎奏遣张俊往援之俊不行山阳遂陷金人留淮上范宗尹奏敌未必能再渡鼎曰勿
恃其不来恃吾有以待之三省当以敌退为陛下拔人
才修政事密院常虞敌至为陛下申军律治甲兵即两得之帝曰卿等如此朕复何忧鼎
以楚州之失上章丐去会辛企宗除节度使鼎言企宗
非军功忤旨出奉祠除知平江府寻改知建康又移知洪州京西招抚使李横欲用兵复
东京鼎言横乌合之众不能当敌恐遂失襄阳已而横
战不利走襄阳竟陷召拜参知政事宰相朱胜非言襄阳国之上流不可不急取上问岳
飞可使否鼎曰知上流利害无如飞者签枢徐俯不以
为然飞出师竟复襄阳鼎乞令韩世忠屯泗上刘光世出陈蔡光世请入奏俯欲许之鼎
不可伪齐宿迁令来归俯欲斩送刘豫鼎复争之俯积
不能平乃求去朱胜非兼知枢密院言者谓当国者不知兵乞令参政通知由是为胜非
所忌除鼎知枢密院川陕宣抚使都督川陕荆襄诸军
事鼎所条奏胜非多沮抑之鼎上疏言顷张浚出使川陕君臣相信古今无二而终致物
议以被窜逐今臣所请兵不满数千半皆老弱所赍金
帛至微除命甫下弹墨已行臣日侍宸衷所陈已艰难况在万里之外乎时人士皆惜其
去台谏有留行者会边报沓至鼎每陈用兵大计及朝
辞留拜尚书右仆射同中书门下平章事兼知枢密院事制下朝士相庆时刘豫子麟与
金人合兵大入举朝震恐鼎论战御之计诸将各异议
独张俊以为当进讨鼎是其言有劝上他幸者鼎曰战而不捷去未晚也帝亦曰朕当亲
总六师临江决战鼎喜曰累年退怯敌志益骄今圣断
亲征成功可必于是诏张俊以所部援韩世忠而命刘光世移军建康且促世忠进兵世
忠至扬州大破金人于大仪镇方警报交驰刘光世遣
人讽鼎曰相公自入蜀何事为他人任患世忠亦谓人曰赵丞相真敢为者 【伏读通鉴
辑览 御批高宗决计亲征赵鼎遂留襄赞此正
可转之机诸将闻之自当奋励同心力图兴复乃刘光世竟遣人讽鼎且敢云何事为他
人任患视军国之重如膜外忽君臣之义若路人丧心
若此虽寸斩亦不足以蔽其罪独世忠以忠诚自励扬州济师大仪克捷颇怀敌愆之心

乃亦有赵丞相真敢为之语何其与行事大相刺谬耶

【鼎闻之恐上意中变乘闲言陛下养兵十年用之正在今日若少加退沮即人心涣散长江之险不可复恃及捷音日至车驾至平江下诏声

逆豫之罪欲自将渡江决战鼎曰敌之远来利于速战遽与争锋非策也且豫犹遣其子岂可烦至尊耶帝为止不行 【伏读通鉴辑览

御批赵鼎力赞高宗亲征一洗累年委靡之习南渡以后差为快举然车驾未行即有济否非鼎所知之语则其中本无定见及平江闻捷高宗

遂欲渡江决战又复阻止是虽有亲征之名而无亲征之实故其功亦仅收得半非若澶渊之毅然一往勇断集事也论者以鼎比之寇准其志

虽同而才力不逮远甚】未几签书枢密院事胡松年自江上还云北兵大集然后知鼎之有先见也张浚久废鼎言浚可大任乃召除知枢密

院命浚往江上视师敌兵久驻淮南知南兵有备渐谋北归鼎曰金人无能为矣命诸将邀诸淮连败之金人遁去鼎奏金人遁归尤当博采羣

言为善后之计于是诏吕颐浩等议攻战备御措置绥怀之方五年上还临安制以鼎守左仆射知枢密院事张浚守右仆射兼知枢密院事都

督诸路军马鼎以政事先后及人才所当召用者条而置之座右次第奏行之制以贵州防御使瑗为保庆军节度使封建国公于行宫门外建

资善堂鼎荐范冲为翊善朱震为赞读朝论谓二人极天下之选诏范冲刊定神宗哲宗二史鼎以宰相监修是非各得其正上亲书忠正德文

四字赐鼎又以御书尚书一帙赐之鼎上疏谢刘豫遣子麟猊分路入寇时张俊屯盱眙杨沂中屯泗韩世忠屯楚岳飞驻鄂刘光世驻庐沿江

上下无兵帝与鼎以为忧鼎移书浚欲令浚与沂中合兵剿敌光世乞舍庐还太平又乞退保采石鼎奏曰豫逆贼也官军与豫战而不能胜或

更退守何以立国今贼已渡淮当亟遣张俊合光世之军尽扫淮南之寇然后议去留上善其策诏二将进兵浚军至藕塘与猊战大破之鼎命

沂中趋合肥以会光世光世已弃庐回江北浚以书告鼎鼎曰上诏浚有不用命者听以军法从事光世大骇复进至肥河与麟战破之麟猊拔

册遁去浚在江上尝遣其属吕祉入奏事所言夸大鼎每抑之上谓鼎曰他日张浚与卿不和必吕祉也后浚因论事语意微侵鼎鼎言臣初与

浚如兄弟因吕祉离闲遂尔睽异今浚成功当使展尽底蕴浚当留臣当去帝曰俟浚归议之浚尝奏乞幸建康而鼎与折彦质请回蹕临安暨

浚还乞乘胜攻河南且罢刘光世军政鼎言擒豫固易耳然得河南能保金人不内侵乎光世累世为将无故而罢之恐人心不安 【伏读通

鉴辑览 御批史称帝谓浚鼎不和必由吕祉若誉高宗有先见者夫其臣也皆其臣

也黜陟谁则司之而为此局外之论亦可鄙矣浚遂因
祉离闲生嫌固不免意存袒护及其请攻河南请罢刘光世鼎皆不以为然实亦有心立
异夫光世罪状昭著不可云无故而罢且谓得河南而
恐金人内侵岂株守临安转能保金之不侵乎二人尚具忠爱之忱者而各有所蔽宜其
迄无成事也】浚滋不悦鼎以观文殿大学士知绍兴
府七年帝幸建康罢刘光世以王德为都统制郦琼副之并听参谋兵部尚书吕祉节制
琼与德有宿怨诉于祉不得直执祉以全军降伪齐浚
引咎去位召鼎入对拜尚书左仆射同中书门下平章事兼枢密使台谏论淮西无备鼎
曰行朝拥兵十万敌来自足抗之设有他虞鼎身任其
责淮西迄无惊帝欲远窜浚鼎奏浚母老且有勤王功已而内批出浚谪置岭南鼎留不
下诘旦约同列掬解帝怒殊未释鼎力恳曰浚罪不过
失策耳凡人计虑岂不欲万全傥因一失便寘之死地后有奇谋秘计谁复敢言者此事
自关朝廷非私浚也帝意乃解遂以散官分司居永州
金废刘豫鼎遣闲招河南守将寿亳陈蔡之闲往往举城或率部曲来归得精兵万余马
数千知庐州刘锜亦奏言淮北归正者不绝度今岁可
得四五万金人遣使议和朝论以为不可信帝怒鼎曰陛下于金人有不共戴天之讎今
屈已请和不惮为之者以梓宫及母后耳羣臣愤懣之
辞出于爱君不可以为罪陛下宜谕之曰讲和非吾意以亲故不得已为之但得梓宫及
母后还敌虽渝盟吾无憾焉帝从其言羣议遂息潘良
贵以向子諲奏事久叱之退上欲抵良贵罪常同为之辨欲并逐同鼎奏子諲虽无罪而
同与良贵不宜逐二人竟出帝已有先入之言由是不
乐于鼎御笔和州防御使璩除节钺封国公鼎奏建国虽未正名天下皆知陛下有子社
稷大计也在今礼数不得不异所以系人心不使之二
三而惑也帝曰姑徐之鼎尝辟和议与秦桧意不合及鼎以争璩封国事拂上意桧乘闲
挤鼎又荐萧振为侍御史振本鼎所引及入台劾参知
政事刘大中罢之鼎曰振意不在大中也振亦谓人曰赵丞相不待论当自为去就会殿
中侍御史张戒论给事中勾涛涛言戒之击臣乃赵鼎
意因诋鼎结台谏及诸将帝闻益疑鼎引疾求免乃以忠武节度使出知绍兴府寻加检
校少傅改奉国军节度使桧率执政往饯其行鼎不为
礼一揖而去桧益憾之鼎既去王庶入对上谓庶曰赵鼎两为相于国大有功再赞亲征
皆能决胜又镇抚建康回銮无患他人所不及也先是
王伦使金从鼎受使指问礼数则答以君臣之分已定问地界则答以大河为界至是伦
与金使俱来以抚谕江南为名帝叹息谓庶曰使五曰
前得此报赵鼎岂可去耶初车驾还临安内侍移竹栽入内鼎见责之曰艮岳花石之扰

皆出汝曹今欲蹈前辙耶因奏其事上改容谢之有户部官进钱入宫者鼎召至相府切责之奏某人不当陛下不当求遂出其人与郡鼎尝荐胡寅魏矼晏敦复潘良贵吕本中张致远刘大本常同林季仲等数十人分布朝列又论赵霈胡世将周秘陈公辅之徒妒贤长恶帝为徙世将而公辅等寻补外帝尝中批二人付庙堂升擢鼎奏疏远小臣陛下何由得其姓名帝谓常同实称之鼎曰同知其贤何不露章荐引始浚荐秦桧可与共大事鼎再相亦以为言然桧机奔深险外和而中异浚初求去有旨召鼎鼎至越丐祠桧恶其逼已徙知泉州又讽谢祖信论鼎尝受张邦昌伪命遂夺节御史中丞王次翁论鼎治郡废弛命提举洞霄宫鼎自泉州归复上书言时政桧忌其复用讽次翁又论其尝受伪命干没都督府钱十七万缗谪官居兴化军论者犹不已移漳州又责清远军节度副使潮州安置在潮五年杜门谢客时事不挂口有问者但引咎而已中丞詹大方诬其受贿移吉阳军鼎谢表曰白首何归怅余生之无几丹心未泯誓九死以不移桧见之曰此老倔强犹昔在吉阳三年潜居深处门人故吏皆不敢通问惟广西帅张宗元时馈醪米桧知之命本军月具存亡申省鼎遣人语其子汾曰桧必欲杀我我死汝曹无患不尔祸及一家矣先得疾自书墓中石记乡里及除拜岁月至是书铭旌云身骑箕尾归天上气作山河壮本朝遗言属其子乞归葬遂不食而死时绍兴十七年也天下闻而悲之明年时旨归葬孝宗即位谥忠简赠太傅追封丰国公高宗祔庙以鼎配享庙庭擢用其孙十有二人鼎为文浑然天成凡高宗处分军国机事多其视草有拟奏表疏杂诗文二百余篇号得全集行于世论中兴贤相以鼎为称首云

△张浚

张浚字德远汉州绵竹人唐宰相九龄弟九皋之后父咸举进士贤良两科浚四岁而孤行直视端无诳言识者知为大器入太学中进士第靖康初为太常簿张邦昌僭立逃入太学中闻高宗即位驰赴南京除枢密院编修官改虞部郎擢殿中侍御史驾幸东南后军统制韩世忠所部逼逐谏臣坠水死浚奏夺世忠观察使上下始知有国法迁侍御史时乘輿在扬州浚言中原天下之根本愿下诏葺东京关陕襄邓以待巡幸拂宰相意除集英殿修撰知兴元府未行擢礼部侍郎除御营使司参赞公事浚度金人必来攻而庙堂晏然殊不为备力言之宰相黄潜善汪伯彦皆笑其过计建炎三年春金人南侵车驾幸钱塘留朱胜非于吴门捍御以浚同节制军马已而胜非召浚独留时溃兵数万所至剽掠浚招集甫定会苗傅刘正彦作乱改元赦书至平江浚命守臣汤东野秘不宣未几傅

等以檄来浚恸哭召东野及提点刑狱赵哲谋起兵讨贼时傅等以承宣使张俊为秦凤路副总管俊将所部至平江浚知上遇俊厚可谋大事握手语故相持而泣因告以将起兵问罪时吕颐浩节制建业刘光世领兵镇江浚遣人赉蜡书约颐浩光世以兵来会而命俊分兵扼吴江上疏请复辟傅等谋除浚礼部尚书命所部诣行在浚以大兵未集未欲诵言讨贼乃托云张俊骤回人情震聳不可不少留以抚其军会韩世忠舟师抵常熟张俊曰世忠来事济矣白浚以书招之世忠至对浚恸哭曰世忠与俊请以身任之浚因大犒俊世忠将士呼诸将校至前抗声问曰今日之举孰顺孰逆众皆曰贼逆我顺浚曰闻贼以重赏购吾首若浚此举违天悖人汝等可取浚头去不然一有退缩悉以军法从事众咸感愤于是令世忠以兵赴阙而戒其急趋秀州据粮道以俟大军之至世忠至秀即大治战具会傅等以书招浚浚报云自古言涉不顺谓之指斥乘輿事涉不逊谓之震惊宫阙废立之事谓之大逆不道今建炎皇帝不闻失德一旦逊位岂所宜闻傅等得书恐乃遣重兵扼临平亟除俊世忠节度使而诬浚欲危社稷责柳州安置俊世忠拒不受会吕颐浩刘光世兵踵至浚乃声傅正彦罪传檄中外率诸军继进初浚遣客冯輶以计策往说傅等会大军且至傅正彦忧恐不知所出輶知其可动即以大义白宰相朱胜非使率百官请复辟高宗御笔除浚知枢密院事浚进次临平贼兵拒不得前世忠等搏战大破之傅正彦脱遁浚与颐浩等入见伏地涕泣待罪高宗问劳再三曰曩在睿圣两宫隔绝一日啜羹小黄门忽传太母之命不得已贬卿柳州朕不觉羹覆于手念卿被谪此事谁任解所服玉带以赐高宗欲相浚浚以晚进不敢当傅正彦走闽中浚命世忠追缚之以献与其党皆伏诛初浚次秀州尝夜坐警备甚严忽有客至前出一纸怀中曰此苗傅刘正彦募贼公赏格也浚问欲何如客曰仆河北人粗读书知逆顺岂以身为贼用特见为备不严恐有后来者耳浚下执其手问姓名不告而去浚翌日斩死囚徇于众曰此苗刘刺客也私识其状貌物色之终不遇巨盗薛庆啸聚淮甸至数万人浚恐其滋蔓径至高邮入庆垒喻以朝廷恩意庆感服下拜浚留抚其众或传浚为贼所执吕颐浩等遽罢浚枢筦浚归高宗惊叹即日趣就职浚谓中兴当自关陕始虑金人或入陕取蜀东南不可保遂慷慨请行诏以浚为川陕宣抚处置使得便宜黜陟将行御营平寇将军范琼拥众自豫章至行在先是靖康城破金人逼胁君后太子宗室北行多琼之谋又乘势剽掠左右张邦昌为之从卫至是入朝悖傲无礼且乞贷逆党傅正彦等死罪浚奏琼大逆不道乞伸典宪翌日召琼至都堂数其罪送

棘寺论死分其军隶神武军然后行与沿江襄汉守臣议储蓄以待临幸初高宗问浚大计浚请身任陕蜀之事置幕府于秦川别遣大臣与韩世忠镇淮东令吕颐浩扈蹕来武昌复以张俊刘光世与秦川相首尾议既定浚行未及武昌而颐浩变初议浚既抵兴元金人已取鄜延骁将罗索贝勒引大兵渡渭攻永兴诸将莫肯相援浚至即出行关陕访问风俗罢斥奸赃以搜揽豪杰为先务诸将惕息听命会牒报金人将攻东南浚命诸将整军向敌已而金人大攻江淮浚即治军入卫至房州知金人北归复还关陕时金帅乌珠犹在淮西浚惧其复扰东南谋牵制之遂决策治兵合五路之师以复永兴金人大恐急调乌珠等由京西入援大战于富平【按建炎以来朝野杂记载张浚之使秦蜀也约以治兵三年而后用师进取浚甫至秦亭而乌珠至浙江帝浮海东征浚闻即将见兵十余万人入卫明年春至房陵闻敌骑已退乃还是秋浚闻敌再欲至江淮乃议出师以挠其势曲端为都统制以士不习战难之参赞军事刘彦冲亦以为非本计浚曰吾岂不知此顾东南方急不得不尔遂合战于富平然是冬达兰不能渡江而陕服之师遂为娄室所败时幕客独王子尚赞之吴玠为裨将亦以为难而不见】泾原帅刘锜身率将士薄敌阵杀获颇众会环庆帅赵哲擅离所部哲军将校望见尘起惊遁诸军皆溃浚斩哲以徇【按建炎以来朝野杂记载富平之役合五路之师四十万熙河经略使刘锡为统制永兴帅吴玠泾原帅刘锜环庆帅赵哲秦凤提刑郭浩皆在行闲时哲尝请分兵浚不听及败哲全师而返浚怒其先退斩之然哲当复辟时有功在西边又为名将故浚诛之当时不以为是】退保兴州命吴玠聚兵扼险于凤翔之和尚原大散关以断敌路关师古等聚熙河兵于岷州大潭孙渥贾世方等聚泾原凤翔兵于阶成凤三州以固蜀口浚上书待罪帝手诏慰勉绍兴元年金将乌鲁攻和尚原吴玠乘险击之金人大败走乌珠复合兵至玠及其弟璘复邀击大破之乌珠仅以身免亟鬻其须遁归拜浚检校少保定国军节度使浚在关陕三年训新集之兵当方张之敌以刘子羽为上宾任赵开为都转运使擢吴玠为大将守凤翔子羽慷慨有才略开善理财而玠每战辄胜西北遗民归附日众故关陕虽失而全蜀安堵且以形势牵制东南江淮亦赖以安将军曲端者建炎中尝迫逐帅臣王庶而夺其印吴玠败于彭原诉端不援富平之役端议不合其腹心张忠彦等降敌浚初超用端后卒下端狱论死会有言浚杀赵哲曲端无辜而任子羽开玠非是朝廷疑之三年遣王似副浚会金将撒离曷及刘豫叛党聚兵入攻破金州子羽为兴元帅约吴玠同守三泉金人至金牛宋师

掩击之斩馘及堕溪谷死者以数千计浚闻王似来求解兵柄且奏似不可任宰相吕颐浩不悦而朱胜非以宿憾日毁短浚诏浚赴行在初辛炳知潭州浚在陕以檄发兵炳不遣浚奏劾之至是炳为御史中丞率同列劾浚以本官提举洞霄宫居福州浚既去国虑金人释川陕之兵必将并力窥东南而朝廷已议讲解乃上疏极言其状未几刘豫之子麟果引金人入攻高宗思浚前言策免朱胜非复浚资政殿学士提举万寿观兼侍读入见高宗手诏辨浚前诬除知枢密院事浚既受命即日赴江上视师时乌珠拥兵十万于扬州约日渡江决战浚召韩世忠张俊刘光世议事将士见浚勇气十倍浚既部分诸路身留镇江节度之世忠遣麾下王愈诣乌珠约战且言张枢密已在镇江乌珠曰张枢密贬岭南何乃在此愈出浚所下文书示之乌珠色变夜遁 【伏读通鉴辑览 御批张浚与金交兵动辄败衄非有先声可畏乌珠方帅劲旅南下何至闻其来而遽变色思归乎盖金兵本因刘豫邀请以出馈道既已不继又闻太宗病笃故无功而还耳誉浚者遂饰为此说不足信也】 五年除尚书右仆射同中书门下平章事兼知枢密院事都督诸路军马赵鼎除左仆射浚与鼎同心辅治务在塞幸门抑近习时巨寇杨么据洞庭屡攻不克浚以建康东南都会而洞庭据上流恐滋蔓为害请因盛夏乘其怠讨之具奏请行至醴陵释邑囚数百皆杨么谍者给以文书俾招谕诸砦囚驩呼而往至潭贼众二十余万相继来降湖寇尽平帝赐浚书谓上流既定则川陕荆襄形势接连军力增倍天其以中兴之功付卿乎浚遂奏遣岳飞屯荆襄以图中原乃自鄂岳转淮东大会诸将议防秋之宜高宗遣使赐诏趣归召对便殿进中兴备览四十篇帝嘉叹置之坐隅浚以敌势未衰而叛臣刘豫复据中原六年会诸将议事江上榜豫僭逆之罪命韩世忠据承楚以图淮扬命刘光世屯合肥以招北军命张俊练兵建康进屯盱眙命杨沂中领精兵为后翼以佐俊命岳飞进屯襄阳以窥中原浚渡江徧抚淮上浚人覲奏请幸建康车驾进发浚先往江上谍报刘豫与子猊挟金人入攻浚奏金人不敢悉众而来此必刘豫兵也俊光世皆张大敌势浚谓贼豫以逆犯顺不剿除何以为国今日之事有进无退且命杨沂中往屯濠州刘麟逼合肥张俊请益兵刘光世欲退师赵鼎及签书折彦质欲召岳飞兵东下御书付浚令俊光世沂中等还保江浚奏俊等渡江则无淮南而长江之险与敌共矣且岳飞一动襄汉有警复何所恃诏书从之沂中兵抵濠州光世舍庐州而南淮西汹动浚闻疾驰至采石令其众曰有一人渡江者斩光世复驻军与沂中接刘猊攻沂中沂中大破之猊麟皆拔册遁帝手书嘉奖召浚

还劳之时赵鼎等议回蹕临安浚奏天下事不倡则不起三岁之闲陛下再临江士气百倍今六飞一还人心解体帝幡然从浚计鼎出知绍兴府浚以亲民之官治道所急条具郡守监司省郎馆阁出入迭补之法又以灾异奏复贤良方正科七年以浚却敌功制除特进未几加金紫光禄大夫问安使何苏归报徽宗皇帝宣德皇后相继崩殂上号恸擗踊哀不自胜浚奏天子之孝不与士庶同必思所以奉宗庙社稷今梓宫未返天下涂炭愿陛下挥涕而起敛发而趋一怒以安天下之民上乃命浚草诏告谕中外辞甚哀切浚又请命诸大将率三军发哀成服中外感动浚言陛下命臣雪此至耻而臣终隳成功使敌无惮今日之祸端自臣致乞赐罢黜再疏待罪不许乃请乘輿发平江至建康浚总中外之政凡事丛委以一身任之每奏对必言讎耻之大反复再三上未尝不改容流涕时事无巨细必以咨浚赐诸将诏往往命浚草之刘光世在淮西军无纪律浚奏罢光世以其兵属督府命参谋兵部尚书吕祉往庐州节制而枢密院以督府握兵为嫌乞置武帅乃以王德为都统制即军中取酈琼副之浚奏其不当琼亦与德有宿怨列状诉御史台乃命张浚为宣抚使杨沂中刘锜为制置判官以抚之未至琼等举军叛执吕祉以归刘豫祉不行詈琼等碎齿折首而死浚引咎求去位帝问谁可代者且曰秦桧何如浚曰近与共事方知其闇帝曰然则用赵鼎桧由是憾浚浚以观文殿大学士提举江州太平兴国宫先是浚遣人持手榜入伪地闲刘豫及酈琼叛去复遣闲持蜡书遗琼金人果疑豫寻废之台谏交诋浚落职以秘书少监分司西京居永州九年以赦复官提举临安府洞霄宫未几除资政殿大学士知福州兼福建安抚大使金遣使来以诏谕为名浚五上疏争之十年金败盟复取河南浚大治海舟千艘为直指山东之计十一年除检校少傅崇信军节度使充万寿观使免奉朝请十二年封和国公十六年彗星出西方浚将极论时事恐貽母忧母诵其父对策语曰臣宁言而死于斧钺不忍不言以负陛下浚意乃决上疏谓当今事势譬如养成大疽于头目心腹之闲不决不止惟陛下谋之于心谨察情伪使在我有不可犯之势庶几社稷安全不然后将噬脐事下三省秦桧大怒令台谏论浚以特进提举江州太平兴国宫居连州二十年徙永州浚去国几二十载天下士无贤不肖莫不倾心慕之金人惮浚每使至必问浚安在惟恐其复用秦桧惧浚为正论以害己令台臣有所弹劾论必及浚反谓浚为国贼必欲杀之以张炳知潭州汪召锡使湖南使图浚张常先使江西治张宗元狱株连及浚捕赵鼎子汾下大理令自诬与浚谋大逆会桧死乃免二十五年复观文殿大学士判

洪州浚时以母丧将归葬会星变求直言浚谓金人数
年闲势决求衅用兵而国家溺于宴安荡然无备乃上疏极言而大臣沈该万俟卨汤思
退等见之谓敌初无衅笑浚为狂台谏汤鹏举凌哲论
浚归蜀恐摇动远方诏复居永州服除落职以本官奉祠三十一年春有旨自便浚至潭
闻钦宗崩号恸不食上疏请早定守战之策未几金兵
大入中外震动复浚观文殿大学士判潭州时金骑充斥王权兵溃刘锜退归镇江遂改
命浚判建康府兼行宫留守浚至岳阳买舟冒风雪而
行遇东来者云敌兵方焚采石烟焰四达慎无轻进浚曰吾赴君父之急知直前求乘輿
所在而已时长江无一舟敢行北岸者浚乘小舟径进
过池阳闻海陵死余众犹二万屯和州李显忠兵在沙上浚往犒之一军见浚以为从天
而下浚至建康即牒通判刘子昂办行宫仪物请乘輿
亟临幸二十二年车驾幸建康浚迎拜道左卫士见浚无不以手加额时浚起废复用风
采隐然军民皆倚以为重车驾将还临安劳浚曰卿在
此朕无北顾之忧兼节制建康镇江府江州池州江阴军军马金兵十万围海州浚命镇
江都统张子盖往救大破之浚招集忠义乃募淮楚壮
勇以陈敏为统制且谓敌长于骑我长于步卫步莫如弩卫弩莫如车命敏专制弩治车
孝宗即位召浚入见赐坐降问浚从容言人主兢业自
持使清明在躬则赏罚举措无有不当人心自归敌讎自服除少傅江淮东西路宣抚使
进封魏国公翰林学士史浩议欲城瓜州采石浚谓不
守两淮而守江干是示敌以削弱怠战守之气不若先城泗州及浩参知政事浚所规画
浩必沮之 【伏读通鉴辑览 御批孝宗初政即
复用张浚可谓锐于任贤设能专心委畀或赞成恢复亦未可定顾以浩为藩邸旧臣使
预机密守淮之议与浚意见抵牾遂尔多方掣肘寢至
弃地丧师其误国不亚于桧人主用人顾不慎哉】 浚荐陈俊卿为宣抚判官帝召俊卿
及浚子栻赴行在浚附奏请上临幸建康以动中原之
心用师淮堧进舟山东以为吴璘声援帝见俊卿等问浚动静饮食颜貌曰朕依魏公如
长城不容浮言摇夺金人以十万众屯河南声言规取
两淮移文索海泗唐邓商州及岁币浚言金人诡诈不当为之动以大兵屯盱眙濠庐备
之卒以无事隆兴元年除枢密使都督建康镇江府江
州池州江阴军马时金将富察图们及知泗州大周仁屯虹县都督萧琦屯灵壁积粮修
城将为南攻计浚欲及其未发攻之会主宰殿前司李
显忠建康都统邵宏渊亦献捣二邑之策浚具以闻上报可召浚赴行在命先图两城乃
遣显忠出濠州趋灵壁宏渊出泗州趋虹县而浚自往
临之显忠至露壁败萧琦宏渊围虹县降图们周仁乘胜进克宿州中原震动孝宗手书

劳之曰近曰边报中外鼓舞十年来无此克捷浚以盛
夏人疲急召李显忠等还师会金帅赫舍哩志窳率兵至宿州与显忠战宏渊与显忠不
协部将各遁去显忠以势不可孤立乃夜引归浚上疏
待罪有旨降授特进更为江淮宣抚使宿师之还士大夫主和者皆议浚之非孝宗复赐
浚书曰今日边事倚卿为重卿不可畏人言而怀犹豫
前日举事之初朕与卿任之今日亦须与卿终之浚乃以魏胜守海州陈敏守泗州戚方
守濠州郭振守六合治高邮巢县两城为大势修滁州
关山以扼敌冲聚水军淮阴马军寿春大飭两淮守备帝复召栻奏事浚附奏云臣以孤
踪动辄掣肘陛下将安用之因乞骸骨帝览奏谓栻曰
朕待魏公有加不为浮议所惑寻诏复浚都督之号金帅布萨忠义贻书三省枢密院索
四郡及岁币不然以农隙治兵浚言金强则来弱则止
不在和与不和时汤思退为右相思退秦桧党也急于求和遂遣卢仲贤持书报金浚言
仲贤小人多妄不可委信已而仲贤果以许四郡辱命
朝廷复以王之望为通问使龙大渊副之浚争不能得未几召浚入见复力陈和议之失
帝为止誓书留之望大渊待命而令通书官胡昉杨由
义往谕金以四郡不可割若金人必欲得四郡当追还使人罢和议拜浚尚书右仆射同
中书门下平章事兼枢密使都督如故思退为左仆射
胡昉等至宿金人械系迫胁之昉等不屈更礼而归之孝宗谕浚曰和议之不成天也自
此事当归一矣二年议进幸建康诏之望等还思退闻
之大骇阴谋陷浚俄诏浚行视江淮时浚所招徕山东淮北忠义之士以实建康镇江两
军凡万二千余人万弩营所招淮南壮士及江西羣盗
又万余人陈敏统之以守泗州凡要害之地皆筑城堡其可因水为险者皆积水为堰增
置江淮战舰诸军弓矢器械悉备时金人屯重兵于河
南为虚声胁和有刻日决战之语及闻浚来亟彻兵归淮北之来归者日不绝山东豪杰
悉愿受节度浚以萧琦契丹望族沈勇有谋欲令尽领
契丹降众且以檄谕契丹约为应援金人益惧思退乃令王之望盛毁守备以为不可恃
令尹穉论罢督府参议官冯方又论浚费国不赀奏留
张深守泗不受赵廓之代为拒命浚亦请解督府诏从其请左司谏陈良翰侍御史周操
言浚忠勤人望所属不当使去国浚留平江凡八章乞
致仕除少师保信军节度判福州 【伏读通鉴辑览 御批孝宗初召张浚向用之意
甚殷既曰倚魏公如长城又曰虽乞去之章日上朕
决不许赐书又有须与卿终之之语若深相倚任者何以福州之命去曾无难色及虞允
文宣抚四川且戒以无效张浚迂阔又若夙所憎疾者
然何前后矛盾若此盖其始不过博取恢复美名藉以虚张声势后觉事竟难成遂无所

顾惜其情遂不觉流露直是无定见耳】浚辞改醴泉

观使朝廷遂决弃地求和之议浚既去犹上疏论尹穉奸邪必误国事且劝上务学亲贤或勉浚勿复以时事为言浚曰吾荷两朝厚恩久尸重任今虽去国苟有所见安忍弗言行次余千得疾手书付二子曰吾尝相国不能恢复中原雪祖宗之耻既死不当葬我先人墓左葬我衡山下足矣讷闻孝宗震悼辍视朝赠太保后加赠太师谥忠献浚幼有大志及为熙河幕官徧行边垒览观山川形势时时与旧戍守将问祖宗以来守边旧法及军阵方略之宜故一旦起自疏远当枢筦之任悉能通知边事本末在京城中亲见二帝北行皇族系虜生民涂炭誓不与敌俱存故终身不主和议每论定都大计以为东南形势莫如建康可以北望中原常怀愤惕至如钱塘僻在一隅易于安肆不足以号召北方与赵鼎共政多所引擢人号小元佑所荐虞允文汪应辰王十朋刘珙等为名臣拔吴玠吴璘于行闲谓韩世忠忠勇可倚以大事一见刘锜付以事任卒皆为名将一时称浚为知人浚事母以孝称学邃于易有文集十卷奏议二十卷子杕杕自有传

张杕

张杕

杕字定叟以父恩授承奉郎历广西经略司机宜通判严州浙西使者荐所部吏而不及杕孝宗特令召对差知袁州戢豪强弭盗贼尉获盗均察知其枉纵之未几果获真贼改知衢州兄杕丧无壮子请祠以营葬事主管五局观迁湖北提举常平改浙西督理荒政苏湖二州皆阙守命兼摄焉有执政姻党闭榷杕首治之帝奖其不畏强御迁两浙转运判官未几以直徽猷阁升副使改知临安府奏除逋欠四万缗米八百斛进直龙图阁都城浩穰奸盗聚慝杕分地以警捕夜户不闭张师尹纳女掖庭供给使恃以恣横杕因事痛绳之徙其家信州权兵部侍郎仍知临安修三闸复六井府治火延及民居上疏自劾诏削二秩移知鎮江召为户部侍郎言事违时相意高宗崩以集英殿修撰知绍兴府董山陵事召还为吏部侍郎光宗即位权刑部侍郎复兼知临安府绍熙元年为刑部侍郎仍为府尹内侍毛伯益冒西湖茭地为亭外戚有杀其仆者杕皆奏论如律进焕章阁学士知襄阳府未几进徽猷阁学士知建康府继复命还襄阳宁宗嗣位归正人陈应祥忠义人党琪等谋袭均州副都统冯湛闲道疾驰以闻杕不为动徐部分掩捕斩其为首者二人尽释党与反侧以安升宝文阁学士知平江府未行改知建康府升龙图阁学士知隆兴府兼江西安抚使奉新县旧有营田募民耕之亩赋米斗五升钱六十其

后议臣请鬻之始征两税和买且加折变民重为困构

悉奏蠲之进端明殿学士复知建康府以疾乞祠卒构吏材敏给所至以治办称南渡以来论尹京者以构为首云子忠纯忠恕自有传

钦定续通志卷三百六十八

●钦定续通志卷三百六十九 列传一百六十九

列传

宋 【七十三】

○宋七十三

朱胜非 吕颐浩 范宗尹 范致虚 吕好问

朱胜非

吕颐浩

范宗尹

范致虚

吕好问

△朱胜非

朱胜非字藏一蔡州人崇宁二年上舍登第靖康元年为东道副总管权应天府金人攻城胜非逃去会韩世忠部将杨进破敌胜非复还

视事逾年诣济州为康王言南京为艺祖兴王之地请幸之以图大计王即位南京建炎改元试中书舍人兼权直学士院时方草鞬胜非凭败

鼓草制辞气严重如平时上疏言仁义者天下之大柄中国持之则外夷服而诸夏尊国家与契丹结好百有余年一旦乘其乱弱为夹攻计是

中国失其柄而外侮所由招也陛下即位宜益明正始之道思其合于仁义者行之帝为嘉纳总制使钱盖进职胜非言盖为陕西制置使弃师

误国封还贴黄盖遂罢谏官卫肤敏坐论元佑太后兄子徙官胜非言以外戚故去谏臣非所以示天下二年除尚书右丞时宰执荫补多滥胜

非奏旧制宰执子弟例不堂除只就铨注罢政不以罪然后推恩赵普子弟皆作武臣普再相长子授庄宅使范纯仁再相子正平有文行竟死

选调章惇子援及持皆高科并为州县幕职监当惟夏竦子安期累作边帅授待制直学士王安石荐子雱为崇政殿说书除待制然安期犹有

才干雱犹有学问至蔡京子六人孙四人郑居中刘正夫子各二人余深王黼白时中蔡卞邓洵仁洵武子各一人并列从班宣和末谏官疏谓

尚从竹马之游已造荷囊之列今不可以不戒迁中书侍郎三年帝自镇江南幸留胜非经理命为控扼使已而拜宣奉大夫尚书右仆射兼御

营使会王渊签书枢密院事兼御营司都统制内侍复用事恣横诸将不悦于是苗傅刘

正彦与其徒王钧甫马柔吉王世修谋诬渊结宦官谋
反正彦手斩渊分捕中官皆杀之拥兵至行宫门外胜非趋楼上诘专杀之由帝亲御楼
抚谕傅正彦语颇不逊胜非乃从皇太后出谕傅等请
高宗避位太后抱皇子听政太后不可顾胜非曰今日正须大臣果决相公何无一言耶
胜非还告帝曰王钧甫乃傅等腹心适语臣云二将忠
有余而学不足此语可为后图之绪于是太后垂帘高宗退居显忠寺号睿圣宫胜非因
请降赦以安傅等又奏母后垂帘须二臣同对此承平
故事今日事机有须密奏乞许臣僚独对而日引傅徒二人上殿以弭其疑 【伏读通鉴
辑览 御批朱胜非自击贼人凌逼乘舆不能奋
身纾难縋楼往返徒代贼传言未闻有所捍掇已乖大臣安危相倚之义及隆佑太后出
门宣谕义正辞严胜非在侧使能引伸晓解示以祸福
安见不可折羣贼之气以杜逆谋乃始终箝口不语虽闻太后谕让尚尔嘿然转请高示
手书禅诏致成废立之势诚不知其是何肺肠即云委
蛇求济以徐图匡复或亦权宜应变之方顾事已经旬并无讨贼之计又未密约在外握
兵诸将以协力勤王使非张浚诸人慷慨誓师迅为匡
复胜非将遂安心坐视耶观其所建白不过日引贼党同奏以弭其疑舍此别无筹划是
惟知一身免祸于国事究何所赖绳以春秋之法亦岂
逃同恶之诛乎】 太后语帝曰赖相此人若汪黄在位事已狼藉矣傅正彦乞改年号及
移蹕建康胜非恐尽废其请则仓卒变生乃改元明受
傅等欲挟帝幸徽越胜非谕之以祸福而止傅闻韩世忠起兵取其妻子为质胜非给傅
曰不若遣之俾迓世忠而慰抚之则平江诸人益安矣
傅许诺胜非喜曰二凶直无能为也诸将皆至傅等惧胜非因谓之曰勤王之师未进者
使是闲自反正耳不然下诏率百官六军请帝还宫公
等置身何地乎即召学士李邴张守作百官章及太后手诏四月朔胜非率百官诣睿圣
宫亲掖帝乘马还宫既复辟胜非曰臣昔遇变义当即
死偷生至此欲图今日之事耳乃乞罢政帝问谁可代者胜非曰吕颐浩张浚问孰优曰
颐浩练事而暴浚喜事而疏 【伏读通鉴辑览
御批朱胜非既不能弭患于未萌复不能靖乱于临事及诸将戡定祸患实无颜复居政
府顾其乞罢时虽举吕颐浩张浚以代而一则谓其练
事而暴一则谓其喜事而疏力为贬抑隐然有二臣皆不己若之意则其庸碌恋栈肺肝
已不可揜而所为引过求退特藉以杜众人之口非真
能负疚自劾也】 帝曰浚太年少胜非曰臣向被召军旅钱谷悉付浚此举浚实主之御
史中丞张守论胜非不能预防致贼猖獗宜罢不报授
观文殿大学士知洪州寻除江西安抚大使兼知江州绍兴元年马进陷江州侍御史沈

与求论九江之陷由胜非赴镇太缓降授中大夫分司
南京江州居住二年吕颐浩荐兼侍读大荐都督江淮荆浙诸军事给事中胡安国侍御
史张躋交章论罢之颐浩力引其入再除兼侍读寻拜
尚书右仆射同中书门下平章事丁母忧去起复右仆射兼知枢密院事上吏部七司敕
令格式一百八十卷时员外郎江端友请营宗庙议者
非之以为国家期于恢复不常厥居胜非方主和议遂白帝营宗庙于临安徐俯罢参政
胜非荐胡松年侍御史常同劾松年乃王黼客胜非徙
同左史莫俦谪曲江其奴为胜非治疽而愈奴为俦请得复官姻家刘式尝言为兵官获
盗胜非不以付部用特旨改官会久雨胜非累章□□
且自论当罢者十一事魏矼亦劾其罪遂罢五年应诏言战守四事起知湖州引疾归胜
非与秦桧有隙桧得政胜非废居八年卒谥忠靖胜非
张邦昌友婿也始邦昌僭位胜非尝械其使及金人过江胜非请尊礼邦昌录其后以谢
敌苗刘之变保护圣躬功居多既去力荐张浚然李纲
罢胜非受黄潜善风旨草制极言其狂妄再相忌赵鼎宣抚川陕欲重使名以制吴玠
胜非从中沮抑之人以此益薄其品及着闲居录亦多
其私说云

△吕颐浩

吕颐浩字符直其先乐陵人徙齐州中进士第父丧家贫躬耕以赡老幼后为密州
司户参军以李清臣荐为邠州教授除宗子博士累官
至河北都转运使伐燕之役颐浩以转输随种师道至白沟既得燕山郭药师众二万契
丹军万余皆仰给县官诏以颐浩为燕山府路转运使
颐浩奏开边极远其势难守虽穷力竭财无以善后又奏燕山河北危急五事愿博议久
长之策徽宗怒命褫职贬官而视事如故寻复焉进徽
猷阁直学士金人入燕郭药师劫颐浩与蔡靖等以降敌退得归复以为河北都转运使
以病辞提举崇福宫高宗即位除知扬州车驾南幸除
户部侍郎进户部尚书剧贼张遇众数万屯金山纵兵焚掠颐浩单骑与韩世忠造其垒
说之以逆顺遇党释甲降进吏部尚书建炎二年金人
逼扬州车驾南渡镇江召从臣问去留颐浩叩头愿且留此为江北声援不然敌乘势渡
江事愈急矣驾幸钱塘拜同签书枢密院事江淮两浙
制置使还屯京口金人去扬州改江东安抚制置使兼知江甯府时苗傅刘正彦为逆逼
高宗避位颐浩至江甯奉明受改元诏赦会监司议皆
莫敢对颐浩曰是必有兵变其子抗曰主上春秋鼎盛二帝蒙尘沙漠日望拯救其肯遽
逊位于幼冲乎灼知兵变无疑也颐浩即遣人寓书张
浚浚亦谓颐浩有威望能断大事书来报起兵状颐浩乃与浚及诸将约会兵讨贼时江

盗士民汹惧颐浩檄杨惟忠留屯以安人心且恐苗傅等计穷挟帝繇广德渡江戒惟忠先为控扼备俄有旨召颐浩赴院供职上言今金人乘战胜之威羣盗有蠡起之势兴衰拨乱事属艰难岂容皇帝退享安逸请亟复明辟以图恢复遂以兵发江甯举鞭誓众士皆感厉将至平江张浚乘轻舟迓之相持而泣咨以大计颐浩曰颐浩曩谏开边几死宦官之手承乏漕挽几陷强敌之域今事不谐不过赤族为社稷死岂不快乎浚壮其言即舟中草檄进韩世忠为前军张俊翼之刘光世为游击颐浩单骑入朝颐浩奏所统将士忠义所激可合不可离傅等惧乃请高宗复辟师次秀州颐浩勉诸将曰今虽反正而贼犹握兵居内事若不济必反以恶名加我翟义徐敬业可监也次临平苗傅等拒战颐浩被甲立水次出入行阵督世忠等破贼傅正彦引兵遁颐浩等以勤王兵入城都人夹道耸观以手加额朱胜非罢相以颐浩守尚书右仆射中书侍郎兼御营使改同中书门下平章事车驾幸建康闻金人复入召诸将问移蹕之地颐浩曰金人谋以陛下所至为边面今当且战且避奉陛下于万全之地臣愿留常润死守帝曰朕左右不可以无相以韩世忠守镇江刘光世守太平驾至平江闻杜充败绩曰事迫矣若何颐浩遂进航海之策【按颐浩进航海之策其言曰敌兵多骑必不能乘舟袭我江浙地热必不能久留俟其退去复还二浙彼出我入彼入我出此兵家之奇也帝然之遂如明州伏读通鉴辑览 御批吕颐浩与诸将议迁都时即有且战且避之说其胷中早存航海一着以为长算至是遂进策请行无论他日章安之追几不免于祸而风涛漂泊詎可久居所谓万全之地顾如是耶又况奔逃跋涉出入无时实已损威失重乃犹自诩为兵家之奇亦庸陋不知耻矣颐浩处苗刘之变绰有远谟张浚亦称其能断大事何前后之不相符若此岂其识仅能集羣策以成事而不足独当一面乎】初建炎御营使本以行幸总齐军政而宰相兼领之遂专兵柄枢府几无所预颐浩在位尤颀恣赵鼎论其过四年移鼎为翰林学士吏部尚书鼎辞且攻颐浩章十数上颐浩求去除镇南军节度开府仪同三司醴泉观使奉化贼蒋璘乘乱为变劫颐浩寘军中高宗以颐浩故赦而招之寻除江东安抚制置大使兼知池州颐浩请兵五万屯建康等处又请王■〈王燮〉巨师古兵自隶将之镇而李成遣将马进围江州乃驻军鄱阳会杨惟忠兵请与俱趋南康遣师古救江州贼众麤战颐浩惟忠失利师古败奔洪州颐浩乞济师讨李成帝曰颐浩奋不顾身为国讨贼羣臣所不及但轻进其失也诏王■〈王燮〉以万人速往策应颐浩复军左蠡又得合门舍人崔增之众万余军势复振命■〈

王夔) 增击贼败之乘胜至江州则马进已陷城矣朝廷命张俊为招讨使俊既至遂败马进追斩之成以余众降刘豫诏以淮南民未复业须威望大臣措置以颐浩兼宣抚领寿春府徐庐和州无为军招降赵延寿于分盩得其精锐五千分隶诸将张琪自徽犯饶州有众五万时颐浩自左蠡班师帐下兵不满万人郡人皇骇颐浩命其将阎皋姚端崔邦弼列阵以待琪犯皋军皋力战端邦弼两军夹击大破之拜少保尚书左仆射同中书门下平章事共知枢密院事二年帝自越州还临安时桑仲在襄阳欲进取京城乞朝廷举兵为声援颐浩乃大议出师而身自督军北向高宗谕颐浩秦桧曰颐浩治军旅桧理庶务如种蠡分职可也二人同秉政桧知颐浩不为公论所与多引知名士为助欲倾之而擅朝权高宗乃下诏以戒朋党除颐浩都督江淮荆浙诸军事开府镇江颐浩辟文武士七十余人以神武后军及御前忠锐崔增赵延寿二军从行百官班送颐浩次常州延寿军叛刘光世歼其众又闻桑仲已死遂不进引疾求罢诏还朝以知绍兴府朱胜非同都督诸军事颐浩既还欲倾秦桧乃引胜非为助给事中胡安国论胜非必误大计胜非复知绍兴府寻以醴泉观使兼侍读安国持录黄不下颐浩特命检正诸房文字黄龟年书行安国以失职求去罢之桧上章乞留安国不报侍御史江跻左司谏吴表臣皆以论救安国罢程瑀胡世将刘一止张焘林待聘楼照亦坐论桧党斥台省一空遂罢桧相颐浩独秉政屡请兴师复中原谓太祖取天下兵不过十万今有兵十六七万矣然自金人南牧莫敢婴其锋比年韩世忠张俊陈思恭张崇屡奏人有战心天将悔祸又金人以中原付刘豫三尺童子知其不能立国愿睿断早定决策北向今之精锐皆中原人恐久而消磨他日难以举事时盗贼稍息颐浩请遣使循行郡国平狱讼宣德意李纲宣抚湖南颐浩言纲纵暴无善状请罢诸路宣抚之名纲止为安抚使时李光在江东与颐浩书言纲有大节远人畏服颐浩称光结党言者因论光罢之时方审量滥赏颐浩时有纵舍右司郎官王冈持不可曰公秉国钧不平谓何颐浩再秉政凡二年高宗以水旱地震下诏罪己求言一日谓大臣曰近苏湖地震泉州大水辄不以奏何也侍御史辛炳殿中常同论颐浩罪遂罢为镇南军节度使开府仪同三司提举洞霄宫改特进观文殿大学士五年诏问宰执以战守方略颐浩条十事以献除湖南安抚制置大使兼知潭州时郴衡桂阳盗起颐浩遣人悉平之帝在建康除颐浩少保浙西安抚制置大使知临安府行宫刘守明堂礼成进封成国公八年上将还临安除少傅镇南定江军节度使江东安抚制置大使兼知建康府行宫留守颐浩引疾求去

除醴泉观使九年金人归河南地高宗欲以颐浩往陕西命中使召赴行在颐浩以老病辞且条陕西利害谓金人无故归地其必有意召趋赴阙既至以疾不能见乃听归未几卒赠太师封秦国公谥忠穆颐浩有胆略善鞍马弓箭当国步艰难之际人倚之为重自江东再相胡安国以书劝其效法韩忠献以至公无我为先报复恩讎为戒颐浩不能用时军用不足颐浩与朱胜非勑立江浙湖南诸路大军月桩钱【伏读通鉴辑览 御批宋自王安石蔡京相继言利横征重敛民不聊生邦本因而不固高宗亲见闾阎疾苦定为差役法思欲与民休息曾几何时复有月桩之取百姓方凋敝已极区区免役小惠元气岂能遽复旋即加之朘削其何以堪况彼时仅余东南半壁尚使其罹于涂炭更安望能复侵地以保遗黎颐浩辈谋国不臧罪固无可他诿高宗明知复蹈之亦独何耶】于是郡邑多横赋大为东南患云

△范宗尹

范宗尹字觉民襄阳邓城人宣和三年上舍登第累迁侍御史右谏议大夫王云使北还言金人必欲得三镇宗尹请弃之以纾祸言者非之宗尹罢归张邦昌僭立复其职遣同路允迪诣康王劝进建炎元年李纲拜右仆射宗尹论其名浮于实有震主之威不报出知舒州言者论宗尹尝污伪命责置鄂州既召为中书舍人迁御史中丞拜参知政事吕颐浩罢相宗尹摄其位时诸盗据有州县朝廷不能制宗尹言太祖收藩镇之权天下无事百五十年可谓良法然国家多难四方帅守兵力单寡束手环视此法之弊今当稍复藩镇之法裂河南江北数十州之地付以兵权俾蕃王室较之弃地北敌岂不相远帝从其言授宗尹通议大夫守尚书右仆射同中书门下平章事兼御营使宗尹奏以京畿东西淮南湖北地并分为镇授诸将以镇抚使为名军兴听便宜从事然李成薛庆孔彦舟桑仲辈起于羣盗翟兴刘位土豪李彦光郭仲威皆溃将又无总率统属且不遣援通饷故诸镇多不能守其地宗尹请有司讨论崇观以来滥赏修书营缮应奉开河免夫狱空之类皆厘正之宣靖执政围城时受伪命之人反用赦申雪徐秉哲吴开莫侑等并量移吴敏王孝迪耿南仲孙覲蔡懋等并叙复侍郎季陵希宗尹意乞诏宰执于罪累中选材能量付以事沈与求劾陵因及宗尹宗尹求去帝为罢与求初宗尹廷对详定官李邦彦特取旨真宗尹乙科宗尹德之赠邦彦观文殿大学士枢密院副都承旨阙宗尹拟邢焕蓝公佐辛道宗三人焕戚里公佐管客省道宗不知兵人以此咎宗尹密院计议官王侁结公佐宗尹请除侁为宗正丞侍御史张延寿劾之罢侁绍兴元年二月辛巳日有黑子宗尹以辅

政无状请免帝不许又尝荐魏滂为江东通判谏官言其贪盗官钱滂遂罢李弼孺领营田谏官言其媚事朱勔二人俱罢论者以白州守晁公为扰民宗尹阴佑之会公为妻受囚金事觉帝罢公为宗尹不自安时明堂覃恩宗尹请与行讨论之事帝手札云朕不欲归过君父敛怨士大夫始宗尹建此议秦桧力赞之及见上意坚反挤宗尹帝亦恶其与辛道宗兄弟往来遂罢沈与求奏其罪状落职未几命知温州退居天台卒宗尹建议分镇以是得相位然其置帅多授剧盗为政多私屡为议者所诋云

△范致虚

范致虚字谦叔建州建阳人举进士为太学博士坐祖送邹浩停官徽宗嗣位召见除左正言出通判郢州崇宁初以右司谏召道改起居舍人进中书舍人蔡京建请置讲议司引致虚为详定官议不合改兵部侍郎自是入处华要出典大郡者十五年以附张商英贬通州政和七年复官入为侍读修国史寻除刑部尚书提举南京鸿庆宫初致虚在讲议司延康殿学士刘昺尝乘蔡京怒挤之后王寀坐妖言系狱事连昺论死致虚争之昺得减窜士论贤之迁尚书右丞进左丞母丧踰年起知东平府改大名府入见言不当用师契丹恐开边隙宰相谓其怀异遂听终丧服除知邓州改河南府中人规景华苑欲夺故相富弼园宅致虚言其不可乃止复移邓州提举亳州明道官帝方好老氏致虚希时好营飭道宇赐名炼真宫靖康元年召赴阙道除知京兆府时金人围太原声震关中致虚修战守备甚力除陕西宣抚使京师被兵诏致虚会兵入援时陕西节制钱盖兵十万至颍昌闻京师破而遁西道总管王襄南走致虚独与西道副总管孙昭远环庆帅王似熙河帅王倚合步骑号二十万以右武大夫马昌佑统之命杜常将民兵万人趋京师夏俶将万人守陵寝致虚以僧赵宗印为知兵俾充宣抚司参议官兼节制军马致虚以大军遵陆宗印以舟师趋西京金人破京师遣人持登城不下之诏以止援兵致虚斩之遂夺潼关作长城自关迄龙门所筑仅及肩宗印又以僧为一军号尊胜队致虚勇而无谋委己以听宗印宗印徒大言实未尝知兵致虚军出武关至邓州千秋镇金将罗索以精骑冲之不战而溃死者过半杜常夏俶先遁致虚斩之孙昭远王似王倚等留陕府致虚收余兵入潼关方致虚之鼓行出关也裨将李彦仙曰行者利速多为支军则舍不至淹败不至覆若众羣聚而出殽澠一蹶于险则皆溃矣致虚不听遂底于败高宗即位言者论其逗挠不进徙知邓州寻加观文殿学士复知京兆府致虚力辞而荐席益李弥大唐重自代诏以重守京兆致虚复

知邓州次年宗印领兵出武关与致虚合会金将伊珠兵压境致虚遁宗印兵不战走安抚使刘汲力战死焉致虚坐落职责授安远军节度副使英州安置高宗幸建康召复资政殿学士知鼎州行至巴陵卒赠银青光禄大夫

△吕好问

吕好问字舜徒侍讲希哲子也以荫补官崇宁初治党事好问以元佑子弟坐废两监东岳庙司提州仪曹时蔡卞为帅欲扳附善类待好问特异好问以礼自持卞不得亲及卞得政其党拔擢略尽独好问留滞卞讽之曰子少亲我即阶显列矣好问笑不答靖康元年以荐召为左司谏谏议大夫擢御史中丞钦宗谕之曰卿元佑子孙朕特用卿令天下知朕意向先是徽宗将内禅诏解党禁除新法尽复祖宗之故而蔡京党戚根据中外害其事莫肯行好问言时之利害政之阙失太上皇诏旨备矣虽使直言之士抗疏论列无以过此愿一一施行之又言陛下宵衣旰食有求治之意发号施令有求治之言逮今半载治效逾邈良由左右前后不能推广德意而陛下过于容养臣恐淳厚之德变为颓靡且今不尽革京贯等所为太平无由可致钦宗乡纳因疏蔡京过恶乞投海外黜朋附之尤者以厉其余又建白削王安石王爵正神宗配飨褒表江公望张庭坚任伯雨龚夬等除青苗之令湔元符上书获谴者章前后数十上每奏对帝虽当食辄使毕其说时金人既退大臣不复顾武备益弛好问言金人得志益轻中国秋冬必倾国复来御敌之备当速讲求今边事经画旬月不见施設臣僚奏请皆不行下此臣所深惧也及边警急大臣不知所出遣使讲解金人佯许而攻略自如诸将以和议故皆闭壁不出好问言彼名和而实攻朝廷不谋进兵遣将何也请亟集沧滑邢相之戍以遏奔冲而列勤王之师于畿邑以卫京城疏上不省金人陷真定攻中山上下震骇廷臣狐疑相顾犹以和议为辞好问率台属劾大臣畏懦误国出好问知袁州钦宗悯其忠下迁吏部侍郎既而金人薄都城钦宗思好问言进兵部尚书都城失守召好问入禁中军民数万斧左掖门求见天子好问从帝御楼谕遣之卫士长蒋宣帅其徒数百欲邀乘舆犯围而出左右奔窜独好问与孙傅梅执礼侍宣抗声曰国事至此皆宰相信任奸臣不用直言所致傅呵之宣以语侵傅好问晓之曰若属忘家族欲冒重围卫帝以出诚忠义然乘舆将驾必甲乘无阙而后动讵可轻耶宣屈服曰尚书真知军情麾其徒退帝再幸金营好问实从帝既留遣好问还慰抚都城已而金人立张邦昌邦昌入居都省好问曰相公真欲立邪抑姑塞敌意而徐为之图尔邦昌曰是何言也好问曰相公知

中国人情所向乎特畏金人兵威耳金人既去能保如
今日乎大元帅在外元佑皇太后在内此殆天意盍亟还政可转祸为福且省中非人臣
所处宜寓直殿庐母令卫士夹陛敌所遗袍带勿服车
驾未还所下文书不当称圣旨以好问摄门下省好问仍行旧职时邦昌虽不改元而百
司文移必去年号独好问所行文书称靖康二年吴开
莫俦请邦昌见金使于紫宸垂拱殿好问曰宫省故吏骤见御正衙必将愤骇变且不测
奈何邦昌矍然止始金人谋以五千骑取康王好问闻
即遣人以书白王言大王之兵度能击则邀击之不能即宜远避且言大王若不自立恐
有不当立而立者既又语邦昌曰天命人心皆归大元
帅相公先遣人推戴则功无在相公右者若迟疑不决他人声义致讨悔可追邪于是邦
昌谋遣谢克家奉传国宝往大元帅府须金人退乃发
金将将还议留兵以卫邦昌好问曰南北异宜北兵不习风土必不相安金欲留一贝勒
统之 【伏读通鉴辑览 御批王时雍等戴邦昌
已甘心为僭窃之臣好问小黠乃首发康王正位之议且止金人之留兵通济州之声问
得以渐杜奸谋其功固为可录但当议立邦昌时不闻
好问略为争执而权门下省之拜又受其伪署而不辞则知后之所为非始终忠于宋盖
觐知人心未厌宋故为急转之机以避罪邀名所谓小
人之尤耳】 好问曰贝勒贵人有如触发致疾则负罪益深乃不复留兵金人既行好问
趣遣使诣大元帅府劝进请元佑太后垂帘邦昌易服
归太宰位太后自延福宫入听政高宗即位太后遣好问奉手书诣行在所高宗劳之曰
宗庙获全卿之力也除尚书右丞丞相李纲以羣臣在
围城中不能执节欲悉按其罪好问曰王业艰难政宜含垢绳以峻法惧者众矣 【伏读
通鉴辑览 御批徽宗两朝一切委靡不振驯致
于亡李纲欲悉按围城中不能执节之罪非惟申严臣子大防且藉此可以防宪纪而佐
维新之治吕好问诡辞沮止不过以曾受伪职冀为自
免地耳视从逆为无关轻重且倡为艰难含垢之言峻法滋惧之说则是始终文过其心
更不容诛矣】 已而为侍御史王宾论劾高宗谓其心
迹非他人比好问力求去且言邦昌僭号之时臣若闭门洁身实不为难徒以世被国恩
所以受贤者之责冒围賚书于陛下疏入除资政殿学
士知宣州提举洞霄宫以恩封东莱郡侯避地卒于桂州子本中揆中弼中用中忱中孙
祖让祖俭本中祖让祖俭别有传

钦定续通志卷三百六十九

●钦定续通志卷三百七十 列传一百七十
列传

宋【七十四】

○宋七十四

李光 许翰 许景衡 张恚 张所 陈禾

蒋猷

李光

许翰

许景衡

张恚

张所

陈禾

蒋猷

△李光

李光字泰发越州上虞人童穉不戏弄亲丧哀毁如成人有致贖者悉辞之及葬礼皆中节游太学登崇宁五年进士第调开化令有政声改秩知常熟县朱勔父冲倚势暴横光械治其家僮冲怒风部使者移令吴江改京东西学事司管勾文字除太常博士迁司封首论士大夫谀佞成风至妄引荀卿有听从无谏诤之说以杜塞言路又言怨嗟之气结为妖沴王黼恶之徙桂州阳朔县刘安世闻光以论事贬贻书伟之李纲以论水灾去国居义兴光伺于水驿留数日定交而别除司勋员外郎迁符实郎郭药师叛光知徽宗有内禅意因纳符谓知枢密院蔡攸曰公家所为皆拂众心今日之事非皇太子则国家俱危攸矍然不敢为异钦宗受禅擢右司谏上皇东幸憺人间两宫光请集议奉迎典礼又奏东南财用尽于朱勔西北财用困于李彦天下根本之财竭于蔡京王黼名为应奉实入私室公家无半岁之储百姓无旬日之积乞依旧制三省枢密院通知兵民财计与户部量一岁之出入以制国用选吏考核使利源归一金人围太原援兵无功光言三镇之地祖宗百战得之一旦举以与敌何以为国望诏大臣别议攻守之策仍间道遣使檄河东北两路尽起强壮策应首尾掩击迁侍御史时言者犹主王安石之学诏榜庙堂光又言祖宗规模宏远安石欲尽废法度则谓人主当制法而不当制于法欲尽逐元老则谓人主当化俗而不当化于俗蔡京兄弟祖述其说五十年间毒流四海今又风示中外鼓惑民听岂朝廷之福蔡攸欲以扈卫上皇行宫因缘入都光奏攸若果入则百姓必致生变万一惊犯属车之尘臣坐不预言之罪望早黜责时已葺撝景园为宁德宫而太上皇后乃欲入居禁中光奏禁中者天子之宫陛下欲便温清奉迎入

内亦当躬禀上皇下有司讨论典礼于是太上皇后居懿德宫金人逼京城士大夫委职而去者五十二人罪同罚异士论纷然光请付理寺公行之太原围急奏乞就委折彦质尽起晋绛磁隰潞威胜汾八州民兵及本路诸县弓手俾守令各自部辖其土豪士人愿为首领者假以官名应副器甲协力赴援金人劫质亲王以三镇为辞势必深入请大修京城守御之备以伐敌人之谋又言朱勔托应奉胁制州县田园第宅富拟王室乞择清强官置司追摄勔父子及奉承监司守令如胡直孺卢宗原陆寘王仲闵赵霖宋晦等并根勘计资其强夺编户产业者还之会李擢复以谏官召光奏蔡京复用时会擢迭为台官禁不发一语金人围城与白时中李邦彦专主避敌割地之谋乞寝成命不报光丐外亦不报彗出寅艮间耿南仲辈皆谓应在外裔不足忧光奏孔子作春秋不书祥瑞者盖欲使人君恐惧修省未闻以灾异归之外裔也疏入监汀州酒税高宗即位擢秘书少监除知江州未几擢侍御史皆以道梗不赴建炎三年车驾自临安移蹕建康除知宣州时范琼过军光开门延劳琼留三日而去无敢哗者光以宣密迳行都乃缮城池聚兵粮籍六邑之民保伍相比谓之义社择其健武者统以土豪得保甲万余号精练军又栅险要二十三所谨戍之厘城止为十地分分巡内外昼则自便夜则守城有警则战苗租岁输邑者悉命输郡初讷言不便及守城之日贍军养民迄赖以济事闻授管内安抚许便宜从事进直龙图阁杜充败降金御营统制王■〈王燮〉王珉素不相能至是各拥溃兵索鬪光亲至营谕以先国家后私讎之义皆感悟解去时奔将散卒至者光悉厚赀给遗有水军叛于繁昌逼宣境即遣出贼不意击之遂宵遁进右文殿修撰光奏金人虽深入江浙然违天时地利臣已移文刘光世领大兵赴州并力攻讨乞速委宣抚使周望约日水陆并进盗邵青自真州拥舟数百艘剽当涂芜湖间光招谕之遗米二千斛青喜谓李公不疑我于是秋毫无犯他日舟过繁昌或给之曰宣境也乃掠北岸而去剧盗戚方破宣国县抵城下分兵四击光募勇敢劫之贼惊扰自相屠蹂朝廷遣统制官巨师古刘晏兼程来援贼急攻朝京门纔竹木为浮梁以济须臾军傅城列炮具立石对楼光命编竹若帘揭之炮至即反坠不能伤取桎木为撞竿倚女墙以御对楼贼引却刘晏率赤心队捣其砦贼退晏追之伏发遇害师古以中军大破贼贼遁去初戚方围宣与其副并马巡城指画攻具光以书傅矢射其副马前言戚方穷寇天诛必加汝为将家子何至附贼二人相疑攻稍缓始得为备而援师至矣尝寘匕首枕匣中与家人约曰城不可必保若使人取匕首我必死汝辈宜自杀无落贼手除

徽猷阁待制知临安府绍兴元年除知洪州固辞提举临安府洞霄宫除知婺州甫至郡
擢吏部侍郎上疏极论朋党之害议论之臣各怀顾避
莫肯以持危扶颠为己任驻蹕会稽首尾三载自去秋迄今敌人无复南渡之意淮甸咫
尺了不经营长江千里不为限制惴惴焉日为乘桴浮
海之计陛下驻蹕会稽江浙为根本之地使进足以战退足以守者莫如建康建康至姑
熟一百八十里其隘可守者有六曰江甯镇曰礪砂夹
曰采石曰大信其上则有芜湖繁昌皆与淮南对境其余皆芦葭之场或碕岸水势湍悍
难施舟楫莫若预于诸隘屯兵积粟命将士各管地分
调发旁近乡兵协力守御乞明诏大臣参酌施行时有诏金人深入诸郡守臣相度或守
或避令得自便光言守臣任人民社稷之重固当存亡
以之若预开迁避之门是诱之遁也愿追寝前诏帝欲移蹕临安被旨节制临安府见屯
诸军兼户部侍郎督营缮事光经营撙节不扰而办奏
蠲减二浙积负及九邑科配以示施德自近之意威方降以管军属节制甚惧拜庭下光
握手起之勉以忠义勿以前事为疑方谢且泣旋兼侍
读因奏金人内寇百姓失业为盗贼本非获己尚可诚感自李成北走羣盗离心傥因斯
时显用一二酋豪以风厉其党必更相效慕以次就降
擢吏部尚书大将韩世清本苗傅余党久屯宣城擅据仓库调发不行光请先事除之乃
授光淮西招抚使光假道至郡世清入谒缚送阙下伏
诛初光于上前面禀成算宰相以不预闻怒之未至道除端明殿学士江东安抚大使知
建康府寿春滁濠庐和无为宣抚使时太平州卒陆德
囚守臣据城叛光多设方略尽擒其党秦桧既罢吕颐浩朱胜非并相光议论素与不合
言者指光为桧党落职奉祠寻复宝文阁待制知湖州
除显谟阁直学士移守平江除礼部尚书光言驻蹕东南两浙非根本所因之地自冬及
春雨雪不已百姓失业乞选台谏察实以闻兼比岁福
建湖南盗作范汝为杨么相挺而起朝廷发大兵诛讨杀戮过当今诸路旱荒流丐满路
宜选良吏招怀抚纳责诸路监司按贪赃恤流殍议臣
欲推行四川交子法于江浙光言有钱则交子可行今已谓桩办若干钱行若干交子此
议者欲欺陛下使陛下异时不免欺百姓也若已桩办
见钱则目今所行关子已是通快何至纷纷其工部铸到交子务铜印臣未敢给降除端
明殿学士守台州俄改温州刘光世张俊连以捷闻光
言观金人布置必有主谋今已据东南形势敌人万里远来利于速战宜戒诸将持重以
老之不过数月彼食尽则胜算在我矣除江西安抚知
洪州兼制置大使擢吏部尚书踰月除参知政事时秦桧初定和议将揭榜欲籍光名镇
压帝意不欲用光桧言光有人望同郡杨炜上光书责

以附时相取尊官堕敌计隳大节光本意谓可因和而为自治之计既而桧议撤淮南守备夺诸将兵权光极言和不可恃备不可撤桧恶之桧以亲党郑亿年为资政殿学士光于榻前面折之又与桧语难上前因曰观桧之意是欲壅蔽陛下耳目盗弄国权怀奸误国不可不察桧大怒明日光丐去章九上乃除资政殿学士知绍兴府改提举临安府洞霄宫十一年冬中丞万俟卨论光阴怀怨望责授建宁军节度副使琼州安置仲子孟坚坐陆升之诬以私撰国史狱成吕愿中又告光与胡铨诗赋倡和讥讪朝政移昌化军论文考史怡然自适年踰八十始以郊恩复左朝奉大夫任便居住至江州而卒孝宗即位复资政殿学士赐谥庄简幼子孟传累官至太府丞韩侂胄愿见之孟传曰行年六十去计已决不敢闻也出知江州以朝请大夫直宝谟阁致仕卒年八十博学多闻著述宏富

△许翰

许翰字崧老拱州襄邑人登元佑三年进士第宣和七年召为给事中为书抵时相谓百姓困弊起为盗贼天下有危亡之忧愿罢云中之师修边保境与民休息高丽入贡调民开运河民间骚然中书舍人孙傅论高丽与国无功不宜兴大役傅坐罢翰谓傅不当黜时相怒落职提举江州太平观靖康初以给事中召时金人甫退翰造阙即日赐对除翰林学士寻改御史中丞上疏言边事因陈决胜之策张邦昌为太宰翰上疏力争之种师道罢为中太一宫使翰言师道名将沈毅有谋山西士卒人人信服不可使解兵柄钦宗谓其老难用翰曰秦始皇老王翦而用李信兵辱于楚汉宣帝不老赵充国而卒能成金城之功自吕望以来用老将收功者难一二数师道虽老可用且谓金人此行存亡所系令一大创使失利去则中原可保不然将来再举必有不救之忧宜起师道邀击之帝不能手擢中大夫同知枢密院论益不合以病去除延康殿学士知亳州坐言者落职提举南京鸿庆宫高宗即位用李纲荐召复延康殿学士既至拜尚书右丞兼权门下侍郎时河北山东大盗李成孔彦舟等聚众各数十万皆以勤王为名愿得张所为帅所尝论黄潜善奸邪由此得罪李纲为相以所为河北等路招抚使率成等众渡河号召诸路为兴复计潜善力沮之宗泽论车驾不宜南幸宜还京师且诋潜善等潜善等请罢泽翰极论以为不可李纲罢翰言纲忠义英发舍之无以佐中兴今罢纲臣留无益力求去高宗未许时潜善奏诛陈东翰谓所亲曰吾与东皆争李纲者东戮于市吾在庙堂可乎求去益力章八上以资政殿大学士提举洞霄宫复以言者落职绍兴元年召复端明殿学士提举万寿观辞不至二月复资政殿学士三年五月卒赠光禄大夫

翰通经术正直不挠历事三朝致位政府徒以黼攸潜善辈横遭口语志卒不展纲虽力引之不旋踵去翰亦斥逐而死云

△许景衡

许景衡字少伊温州瑞安人登元佑九年进士第宣和六年召为监察御史迁殿中侍御史是时王黼蔡攸用事景衡言尚书省比阙长官而同知枢密院亦久阙虽三公通治三省然文昌政事之本枢密本兵之地各有攸属安可久虚其位愿博采公议遴选忠贤以补政府之阙遂大忤黼意朝廷用童贯为河东北宣抚使将北伐景衡论其贪缪不可用者数十事不报睦寇平江浙郡县残毁而茶盐比较之法如故景衡奏茶盐之法当以食之众寡为岁额之高下今收复之后户版半耗民力萧然而茶盐比较不减于昔民欲无困得乎奏上遂得权免朝廷既兴燕云之师调度不继诛求益急景衡奏财力匱乏在节用民力困弊在恤民今不急之务若营缮诸役花石纲运其名不一吏员猥多军额冗滥又无名功赏非常赐予皆夤缘侥幸干请无厌宜节以祖宗之制而省去之且极论和买和余盐法之害不报会知洋州吴岩夫以私书抵执政道景衡之贤因从子壻符宝郎周离亨以达离亨以其书误致王黼黼用是中景衡遂之钦宗即位左正言召旋改太常少卿兼太子谕德迁中书舍人侍御史李光正言程瑀以鯁亮忤执政斥景衡为辨白坐落职予祠高宗即位以给事中召除御史中丞宗泽为东京留守言者附黄潜善等多攻其短欲逐去之景衡奏曰臣自浙渡淮以至行在闻泽之为尹威名政事卓然过人臣以为去冬京城内有如泽等数辈其祸变未至如是之酷今若较其小短不顾尽忠殉国之节则不恕己甚且开封宗庙社稷所在苟欲罢泽别遣留守不识搢绅中威名政事有加于泽者乎疏入上大悟封以示泽泽乃安杭州叛卒陈通作乱权浙西提刑赵叔近招降之请授以官景衡曰官吏无罪而受诛叛卒有罪而蒙赏赏罚倒置莫此为甚卒奏罢之除尚书右丞有大政事必请间极论潜善伯彦共排沮之或言正二月之交乃太一正迁之日宜于禁中设坛望拜高宗以问景衡对曰修德爱民天自降福何迎拜太一之有初李纲议建都以关中为上南阳次之建康为下纲既相遂主南阳之议景衡为中丞奏南阳无险阻且密迩盗贼漕运不继不若建康天险可据请定计巡幸潜善等倾纲使去南阳之议遂格至是谍报金人攻河阳汜水景衡又奏请南幸建康已而有诏还京罢景衡为资政殿大学士提举杭州洞霄宫至京口卒年五十七谥忠简诏赐温州官舍一区

△张恚

张恂字诚伯河间乐寿人登元佑六年进士第累迁龙图阁学士计度都转运使高宗为大元帅募诸道兵勤王恂飞挽踵道建议即元帅府印给盐钞以便商旅不阅旬得缗钱五十万以佐军高宗器重之命以便宜权大名尹兼北京留守马步军都总管恂初闻二帝北行率副总管颜岐等三上笺劝进最后恂上书极论中原不可一日无君高宗为之感悟建炎改元为户部尚书除同知枢密院事措置户部财用兼御营副使建言三河之民怨敌深入骨髓请依唐人泽潞步兵雄边子弟遗意募民联以什伍而寓兵于农使合力抗敌谓之巡社为法精详前此论民兵者莫及也诏集为书行之迁尚书左丞官至中书侍郎恂善理财论钱谷利害犹指诸掌在朝谔谔有大臣风节 【伏读通鉴辑览御批张恂官枢府首尾一年所与同列者黄潜善汪伯彦诸奸皆欲深锄异己恂果少以名节自持则议论之间必当立见齟齬乃周旋既久未尝失欢则平日之依违固位已可概见且因刘豫乡曲情谊上荐于朝遂启伪齐悖逆之渐尤不免于结党树私史称其谔谔有大臣风节诚何谓耶】 然论议可否不形辞色未尝失同列之欢卒谥忠穆

△张所

张所青州人登进士第历官监察御史高宗即位遣所按视陵寝还上疏言河东河北天下之根本昨者误用奸臣之谋始割三镇继割两河其民怨入骨髓至今无不扼腕若因而用之则可藉以守不则两河兵民无所系望陛下之事去矣且论还京之利谓国之安危在乎兵之强弱将相之贤不肖不在都之迁不迁又条上两河利害帝欲以其事付所会所言黄潜善奸邪不可用恐害新政乃罢所御史改兵部郎中寻贵所凤州团练副使江州安置后李纲入相欲荐所经略两河以其尝言潜善故难之一日与潜善从容言曰今河北未有人独一张所可用又以狂言抵罪不得已收拭用之使为招抚冒死立功以赎过不亦善乎潜善许诺乃借所直龙图阁充河北招抚使赐内府钱百万缗给空名告千余道以京西卒三千为卫将佐官属许自辟置一切以便宜从事所入见条上利害上赐五品服遣行命直秘阁王圭为宣抚司参谋官佐之河北转运副使张益谦附黄潜善意奏所置司北京非是且言自置招抚河北盗贼愈炽不若罢之专以其事付帅司李纲言张所今留京师招集将佐尚未及行益谦何以知其扰朝廷以河北民无所归聚而为盗故置司招抚因其力而用之岂由置司乃有盗贼乎今京东西羣盗公行攻掠郡县亦岂招抚司过耶时方艰危朝廷欲有所经理益谦小臣乃以非理沮抑此必有使之者上乃命益谦分析命下枢密院汪伯彦犹用其

奏诘责招抚司李纲与伯彦争于上前伯彦语塞所方招来豪杰以王彦为都统制岳飞
为准备将而李纲已罢相朝廷以王圭代之所落直龙
图阁岭南安置卒于贬所子宗本以岳飞奏补官

△陈禾

陈禾字秀实明州鄞县人举元符三年进士累迁辟雍博士时方以传注记问为学
禾始崇尚义理黜抑浮华入对契旨擢监察御史殿中
侍御史蔡京遣酷吏李孝寿穷治章縯铸钱狱连及士大夫甚众禾奏免孝寿京子儵为
太常少卿何执中壻蔡芝为将作监皆疏其罪罢之时
天下武备废弛东南尤甚禾请增戍缮城壁以戒不虞或指为生事格不下其后盗起人
服其先见迁左正言俄除给事中时童贯权益张与黄
经臣胥用事御史中丞卢航表里为奸搢绅侧目禾曰此国家安危之本吾位言责此而
不言一迁给舍则非其职矣未拜命首抗疏劾贯复劾
经臣怙宠弄权夸衒朝列每云诏令皆出其手言上将用某人举某事已而诏下悉如其
言夫发号施令国之重事黜幽陟明天子大权奈何使
宦寺得与臣之所忧不独经臣此涂一开类进者众国家之祸有不可遏愿亟窜之远方
论奏未终上拂衣起禾引上衣请毕其说衣裾落上曰
正言碎朕衣矣禾言陛下不惜碎衣臣岂惜碎首以报陛下此曹今日受富贵之利陛下
他日受危亡之祸言愈切上变色曰卿能如此朕复何
忧内侍请上易衣上却之曰留以旌直臣 【伏读通鉴辑览 御批折槛牵裾纪载家
共传为美谈夫槛不治犹可也衣无裾其何以服御

且既知旌直则何不去奸况不旋踵而禾乃以狂妄贬谪则此举之矫饰无味更不待言
】翌日贯等相率前愬谓国家极治家得此不祥语卢

航奏禾狂妄谪监信州酒税遇赦得自便还里初陈瓘归自岭外居于鄞与禾相好遣其
子正汇从学后正汇告京罪执诣阙瓘亦就逮经臣莅
其狱檄禾取证禾答以事有之罪不敢逃或谓其失对禾曰祸福死生命也岂可以死易
不义愿得分贤者罪遂坐瓘党停官遇赦复起知广德
军移知和州寻遭内艰服除知秀州王黼新得政禾曰安能出黼门下力辞改汝州辞益
坚曰盍饿死黼闻而衔之禾兄秉时为寿春府教授禾
依之以居适童贯领兵道府下谒不得入馈之不受贯怒归而譖之帝曰此人素如此汝
不能容耶久之知舒州命下而卒赠中大夫谥文介着
有易传九卷春秋传十二卷论语孟子解各十卷

△蒋猷

蒋猷字仲远润州金坛县人举进士政和四年拜御史中丞兼侍读有直声尝论士
风浮薄廷臣伺人主意承宰执风旨向背以特立不回

者为愚共嗤笑之此风不可长辅臣奏事殿上雷同唱和略无所可否非论道献替之礼内侍省不隶台察紊元丰官制杨戩不当除节度使赵良嗣不宜出入禁中上皆嘉纳至揭其章内侍省且诏自今无得规图节钺又疏孟昌龄徐铸等奸状迁兵部尚书兼礼制局详议官七年知贡举改工部吏部尚书以徽猷阁直学士知婺州明年请祠归宣和末召为刑部尚书兼资善堂翊善靖康初奉上表起居太上皇帝于淮阴且特诏贬童贯猷奏贯得罪天下愿黜远之太上以为然亟令宣诏趣贯赴贬所遂奉太上还京移兵部尚书累官正议大夫引疾授徽猷阁直学士提举嵩山崇福宫卒赠特进

钦定续通志卷三百七十

●钦定续通志卷三百七十一 列传一百七十一

列传

宋 【七十五】

○宋七十五

韩世忠【子彦直】 岳飞【子云】

韩世忠

岳飞

△韩世忠

韩世忠字良臣延安人风骨伟岸目瞬如电早年鸷勇绝人能骑生马驹家贫嗜酒尚气年十八以敢勇应募乡州隶赤籍挽强驰射勇冠三军崇德四年西夏骚动郡调兵捍御世忠在遣中至银州夏人婴城自固世忠斩关杀敌将擢首陴外诸军乘之夏人大败既而以重兵次蒿平岭世忠率精锐鏖战解去俄复出间道世忠独部敢死士殊死鬪敌少却顾一骑士锐甚问俘者曰监军驸马鄂伊特也跃马斩之敌众大溃经略司上其功童贯董边事疑有所增饰止补一资众弗平从刘延庆筑天降山砦为敌所据世忠夜登城斩二级割护城毡以献继遇敌佛口砦斩敌数级始补进义副尉至臧底河斩三级转进勇副尉宣和二年方腊反世忠以偏将从王渊讨之次杭州贼奄至势张甚渊惶怖无策世忠以兵二千伏北关堰贼过伏发众蹂乱世忠追击贼败而遁渊叹曰真万人敌也尽以所随白金器赏之且与定交时有诏能得腊首者授两镇节钺世忠穷追至睦州清溪峒贼深据岩屋为三窟诸将继至莫知所入世忠潜行溪谷问野妇得径即挺身仗戈直前渡险数里捣其穴格杀数十人擒腊以出辛兴宗领兵截峒口掠其俘为己功故赏不及别帅杨惟忠还阙直其事转承节郎三年议复燕山调诸军至则皆溃世忠

往见刘延庆与苏格等五十骑俱抵滹沱河逢金兵二千余骑格失措世忠从容令格等列高冈戒勿动属燕山溃卒舟集即命舣河岸约鼓噪助声势世忠跃马薄敌回旋如飞敌分二队据高阜世忠出其不意突二执旗者因奋击格等夹攻之舟卒鼓噪敌大乱追斩甚众时山东河北盗贼蠡起世忠从王渊梁方平讨捕擒戮殆尽积功转武节郎钦宗即位从梁方平屯浚州金人压境方平备不严金人迫而遁王师数万皆溃世忠陷重围中挥戈力战突围出焚桥而还钦宗闻召对便殿询方平失律状条奏甚悉转武节大夫诏诸路勤王兵领所部入卫时胜捷军张师正败宣抚副使李弥大斩之大校李复鼓众以乱淄青之附者合数万人山东复扰弥大檄世忠将所部追击至临淄河兵不满千分为四队布铁蒺藜自塞归路令曰进则胜退则死走者命后队剿杀于是莫敢返顾皆死战大破之斩复余党奔溃乘胜逐北追至宿迁贼尚万人方拥子女椎牛纵酒世忠单骑夜造其营呼曰大军至矣亟束戈卷甲吾能保全汝共功名贼骇栗请命因跪进牛酒世忠下马解鞍饮啖尽于是众悉就降黎明见世忠兵未至始大悔以功迁左武大夫果州团练使诏入朝授正任单州团练使屯滹沱河时真定失守世忠知王渊守赵遂亟往金人至闻世忠在攻益急粮尽援绝人多勉其溃围去弗听会大雪夜半以死士三百捣敌营敌惊乱自相击刺及旦尽遁后有自金国来者始知其渠帅是日被创死故众不能支迁嘉州防御使还大名赵野辟为前军统制时康王如济州世忠领所部劝进金人纵兵逼城人心恟惧世忠据西王台力战金人少却翌日率众数万至时世忠麾下仅千人单骑突入斩其帅遂大溃康王即皇帝位授光州观察使带御器械世忠请移都长安下兵收两河时论不从初建御营授左军统制命讨鱼台贼解大刀世忠破鱼台又击黎驿叛兵败之皆斩以献入备宿卫建炎二年升定国军承宣使帝如扬州世忠以所部从时张遇自金山来降抵城下不解甲人心危惧世忠独入其垒晓以逆顺众悉听命李民众十万亦降比至有反复状王渊遣世忠谕旨世忠知其党刘彦异议即先斩彦驱李民出缚小校二十九人送渊斩之事定授京西等路捉杀内外盗贼金人再攻河南翟进合世忠兵夜袭乌舍营不克时丁进失期陈思恭先遁世忠被矢如棘力战得免还汴诘先退者皆斩进由是与世忠有隙寻以叛诛召世忠还授鄜延路副总管加平寇左将军屯淮阳会山东兵拒尼雅满闻世忠扼淮阳乃分兵万人趋扬州自以大军迎世忠世忠不敌夜引归敌蹙之军溃于陶阳 【伏读通鉴辑览 御批韩世忠方会兵援濮其兵力必不甚微临阵果奋勇争先未尝不可以寡敌

众即不能与战岂并不足自守何遽弃军而走坐视金人乘胜长驱乎高宗自是不复再至江北偏安之局寔成于此世忠名将畏葸尚然刘光世之望风辄溃更不足责矣】合门宣赞舍人张遇死之三年帝召诸将议移蹕张俊辛企宗请往湖南世忠曰淮浙富饶今根本地讵可舍而之他人心怀疑一有退避则不逞者思乱重湖闽岭之遥安保道路无变乎淮江当留兵为守车驾当分兵为卫约十万人分半扈江淮上下止余五万可保防守无患乎在阳城收合散亡得数千人闻帝如钱塘即由海道赴行在苗傅刘正彦反张浚等平江议讨乱知世忠至更相庆慰世忠得书大恟举酒酬神曰誓不与此贼共戴天士卒皆奋见浚曰今日大事世忠愿与张俊身任之公无忧欲即进兵浚曰投鼠忌器事不可急急则恐有不测已遣冯轡甘言诱贼矣三月戊戌以所部发平江张俊虑世忠兵少以刘宝兵二千借之舟行载甲士绵亘三十里至秀州称病不行造云梯治器械傅等始惧矫制除世忠及张俊为节度使皆不受时世忠妻梁氏及子亮为傅所质防守严密朱胜非给傅令白太后封梁氏安国夫人俾迓世忠速其勤王梁氏即驱出城一日夜会世忠于秀州未几明受诏至世忠曰吾知有建炎不知有明受斩其使取诏焚之进兵益急傅等大惧次临平贼将苗翊马柔吉负山阻河为阵中流植鹿角梗行舟世忠合舟力战张俊继之刘光世又继之军少却世忠复舍马操戈而前令将士曰今日当以死报国面不被数矢者皆斩于是士皆用命贼列神臂弩持满以待世忠瞋目大呼挺刃突前贼辟易矢不及发遂败傅正彦拥精兵二千开涌金门以遁世忠驰入帝步至宫门握世忠手恟哭曰中军吴湛佐逆为最今尚留肘腋能先诛乎世忠即执湛戮于市又执贼谋主王世修以属吏诏授武胜军节度使御营左军都统制请于帝曰贼拥精兵距瓯闽甚迩倘成巢窟卒未可灭臣请讨之于是以为江浙制置使自衢信追击至渔梁驿与贼遇世忠步走挺戈而前贼望见咋曰此韩将军也皆惊溃擒正彦及傅弟翊送行在傅亡建阳追擒之皆伏诛世忠初陞辞奏曰臣誓生获贼为社稷刷耻乞殿前二虎贲护俘来献至是卒如其言帝手书忠勇二字揭旗以赐授检校少保武宁昭庆军节度使乌珠将入侵帝召诸将问移蹕之地张俊辛企宗劝自鄂岳幸长沙世忠曰国家已失河北山东若又弃江淮更有何地

【伏读通鉴辑览 御批韩世忠谓不当更弃江淮最为切要即以将才而论世忠剿灭苗刘已着成效而杜充为东京留守粮绝遄归其优劣不啻霄壤乃以江东节制付之杜充用人既为失当迨后此闻充败降而仓皇失据悔亦晚矣南宋是时势已颠蹶建康临安所争无几然长

留淮南以为屏蔽不更愈于专恃长江乎而楼照谬说顾以量力知己为辞视保淮为末务淮防既撤而江险亦不足凭其失算更甚矣】于是

以世忠为浙西制置使守镇江既而乌珠分道渡江诸屯皆败世忠亦自镇江退保江阴杜充以建康降敌乌珠自广德破临安帝如浙东世忠以前军驻青龙镇中军驻江湾后军驻海口俟敌归邀击之帝召至行在奏方留江上截金人归师尽死一战帝谓辅臣曰比吕颐浩在会稽尝建此策世忠不谋而同赐亲札听其留及金兵至则世忠军已先屯焦山寺金将李选降受之乌珠约战战将十合梁夫人亲执桴鼓金兵终不得渡尽归所掠假道不听请以名马献又不听达兰在潍州遣贝勒搭尼趋淮东以援相持黄天荡者四十八日搭尼贝勒军江北乌珠军江南世忠以海舰进泊金山下预以铁细贯大钩授骁健者明旦敌舟噪而前世忠分海舟为两道出其背每细一细则曳一舟沉之乌珠穷蹙求会语祈请甚哀世忠曰还我两宫复我疆土则可以相全乌珠语塞又数日求再会言不逊世忠引弓射之亟驰去谓诸将曰南军使船如使马奈何募人献破海舟策闽人王某者教其舟中载土平版铺之穴船版以棹桨风息则出江有风则勿出海舟无风不可动也又有献谋者曰凿大渠接江口则在世忠上流乌珠一夕潜凿渠三十里且用方士计刑白马剔妇人心自割其额祭天次日风止海舟不能运金人以小舟纵火矢下如雨孙世询严允皆战死敌得绝江遁去世忠收余军还镇江初世忠谓敌至必登金山庙观我虚实乃遣兵百人伏庙中百人伏岸浒约闻鼓声岸兵先入庙兵合击之金人果五骑闯入庙兵喜先鼓而出仅得二人逸其三中有绛袍玉带既坠而复驰者诘之乃乌珠也【伏读通鉴辑览 御批金山屹峙江心何能驰骑且乌珠是时志在济江岂肯行次中流舍舟以临险地致有疑当日金山与南岸相连属者不知浮玉之名即取其无所附丽而树影中流钟声两岸唐时名句流传苏轼亦有阻风金山之作则山之不能通陆自昔已然方輿纪要因于金山下增对岸二字谓庙在银山殊无确据况世忠屯戍焦山与金山银山东西相距均远登眺亦无所见其为傅会显然惟王象之及熊克皆云庙在北固较为可信盖北固踞江南岸既得振策以驰而山居东北与焦山正直故可登之以覘虚实二人皆以宋人纪宋事自当得实非若宋史成自元时仅据传闻而不详形势徒滋后世之疑议也至谓一人红袍玉带坠而复驰者即乌珠其说尤诞金源衣服至大定明昌间始酌用中国制度其初必无褰衣博带之人况身临战阵安有服袍玉以从事其为宋人夸饰附会无疑即此可证金山驰马之荒唐矣】是役也乌珠兵号

十万世忠仅八千余人帝凡六赐札褒奖拜检校少保武成感德军节度使神武左军都统制建安范汝为反辛企宗等讨捕未克贼势愈炽以世忠为福建江西荆湖宣抚副使世忠曰建居闽岭上流贼沿流而下七郡皆血肉矣亟领步卒三万水陆并进次剑潭贼焚桥世忠策马先渡师遂济贼尽塞要路拒王师世忠命诸军偃旗仆鼓径抵凤凰山俯瞰城邑设云梯火楼连日夜并攻贼震怖五日城破汝为窜身自焚斩其弟岳吉以徇禽其谋主谢向施逵及裨将陆必疆等五百余人世忠初欲尽诛建民李纲自福州驰见世忠曰建民多无辜世忠令军士驻城上毋下听民自相别农给牛谷商贾弛征禁胁从者汰遣独取附贼者诛之民感更生家为立祠捷闻帝曰虽古名将何以加赐黄金器皿世忠因奏江西湖南寇贼尚多乞乘胜讨平广西贼曹成拥余众在郴邵世忠旋师永嘉若将就休息者忽由处信径至豫章连营江滨数十里羣贼不虞其至大惊世忠遣人招之成方为岳飞所追遂率众降得战士八万遣诣行在遂移师长沙时刘忠众数万据白面山营栅相望世忠至欲急击宣抚使孟庾不可世忠曰兵家利害策之审矣非参政所知请期半月效捷遂与贼对垒突棊张饮坚壁不动众莫测一夕与苏格联骑穿贼营候者呵问世忠先得贼军号随声应之周览以出喜曰此天赐也夜伏精兵二千于白面山与诸将拔营而进贼兵方迎战所遣兵已驰入中军夺望楼植旗盖传呼如雷贼回顾惊溃麾将士夹击大破之斩忠首湖南遂平授太尉赐带笏仍敕枢密以功颁示内外诸将师还建康置背嵬军皆勇鸷绝伦九月为江南东西道宣抚使置司建康三年三月进开府仪同三司充淮南东西路宣抚使置司泗州时李横进师讨伪齐议遣大将以世忠忠勇故遣之赐赉甚渥并命诸州督发军食李横兵败还镇世忠不果渡江四年以建康镇江江东宣抚使驻镇江是岁金人与刘豫合兵分道入侵帝手札命世忠飭守备图进取辞旨恳切世忠受诏感泣曰主忧如此臣子何以生为遂自镇江济师俾统制解元守承州候金步卒亲提骑兵驻大仪当敌骑伐木为栅自断归路会遣魏良臣使金世忠撤炊爨给良臣有诏移屯守江良臣疾驰去世忠度良臣已出境即上马令军中曰视吾鞭所向于是引军次大仪勒五阵设伏二十余所约闻鼓即起击良臣至金军金人问宋师动息具以所见对聂嘒目勒闻世忠退喜甚引兵至江口距大仪五里别将托卜嘉拥铁骑过五阵东世忠传小麾鸣鼓伏兵四起旗色与金人旗杂出金军乱宋军迭进背嵬军各持长斧上堪人胷下斫马足敌被甲陷泥淖世忠麾劲骑四面蹂躪人马俱毙遂擒托卜嘉等二百余人所遣董旻亦击金人于天长县

之鸦口桥金攻承州解元设水军夹河而阵日合战十三相拒未决世忠遣成闵将骑士往援复大战俘获甚众世忠复亲追至淮金人惊溃相蹈藉溺死无算捷闻羣臣入贺帝曰世忠忠勇朕知其必能成功沈与求曰自建炎以来将士未尝与金人迎战今世忠连捷以挫其锋厥功不细帝曰第优赏之于是部将董旻陈桷解元呼延通等皆峻擢有差论者以此举为中兴武功第一时达兰屯泗州乌珠屯竹塾镇为世忠所扼以书币约战世忠许之且使两伶人以橘茗报聘会雨雪金馈道不通野无所掠杀马而食蕃汉军皆怨乌珠夜引军还刘麟刘猊弃輜重遁五年进少保六年授武宁安化军节度使京东淮东路宣抚处置使置司楚州世忠披草莱立军府与士同力役夫人梁亲织薄为屋将士有怯战者世忠遗以巾幗设乐大宴俾妇人妆以耻之故人人奋厉抚集流散通商惠工山阳遂为重镇刘豫兵数入寇辄为世忠所败时张浚以右相视师命世忠自承楚图淮阳刘豫方聚兵淮阳世忠即引军渡淮旁符离而北至其城下为贼所围奋戈一跃溃围而出不遗一镞呼延通与金将雅哈贝勒搏战扼其吭而禽之乘锐掩击金人败去既而围淮阳贼坚守不下乌珠与刘猊皆至世忠求援于张俊俊以世忠有见吞意不从事世忠勒阵向敌遣人语之曰锦衣驄马立阵前者韩相公也或危之世忠曰不如是不足以敌敌果至杀其导战二人遂引去寻诏班师复归楚州淮阳之民从而归者以万计三月除京东淮东宣抚处置使兼节制镇江府仍楚州置司赐号扬武翊运功臣加横海武宁安化三镇节度使九月帝在平江世忠自楚州来朝会边报急刘光世欲弃庐州还太平张俊亦请益兵都督张浚曰今日之事有进击无退保于是世忠引兵渡淮与金将额哩页战刘猊将寇淮东为世忠兵扼不得进初世忠移屯山阳遣间结山东豪杰约以缓急为应宿州马泰及太行羣盗多愿奉约束者金人废刘豫中原震动世忠谓机不可失请全师北讨招纳归附为恢复计会秦桧主和议命世忠徙屯镇江世忠言金人诡诈恐以计缓我师乞留此军蔽遮江淮又力陈和议之非愿效死节率先迎敌又言王伦蓝公佐交河南地界乞令明具无反复文状为后证章十数上皆慷慨激切且请单骑诣阙面奏帝率优诏褒答后金果渝盟咸如其言金使萧哲之来以诏谕为名世忠闻之凡四上疏言不可许愿举兵决战兵势最重处臣请当之又言金人欲以刘豫相待举国士大夫尽为陪臣恐人心离散士气凋沮且请驰驿面奏不许既而伏兵洪泽镇将杀金使以坏和议不克九年授少师十年金人败盟乌珠率萨里罕李成等破三京分道深入八月世忠围淮阳金人来救世忠迎击于泇口镇败之

又遣解元击金人于潭城刘宝击于千秋湖皆捷亲随将成闵从统制许世安夺淮阳门而入大战门内世安中四矢闵被三十余创复夺门出世忠奏其功擢武德大夫闵由是知名世忠进太保封英国公兼河北诸路招讨使十一年乌珠耻顺昌之败复谋再入诏大合兵于淮西以待既而金败于柘皋复围濠州世忠受诏救濠以舟师至招信县夜以骑兵败金人于闻贤驿至濠州濠破已三日与金人战于淮岸夜遣刘宝沂流将劫之金人伐木塞赤龙洲扼其归路世忠知之全师而还金人自涡口渡淮北去自是不复入侵世忠在楚州十余年兵仅三万而金人不敢犯奏桧收三大将权四月拜枢密使遂以所积军储钱百万贯米九十万石酒库十五归于国世忠既为桧所抑及魏良臣使金世忠又力言自此人情消弱国势委靡谁复振之北使之来乞与面议不许遂抗疏言桧误国桧讽言者论之帝格其奏不下世忠连疏乞解枢密柄继上表乞骸十月罢为醴泉观使奉朝请进封福国公节钺如故自此杜门谢客绝口不言兵时跨驴携酒从一二奚童纵游西湖以自乐平时将佐罕得见其面十二年改潭国公显仁皇后自金还世忠诣临平朝谒后在北方闻其名慰问者良久十三年封咸安郡王十七年改镇南武安宣国节度使二十一年八月薨进拜太师追封通义郡王孝宗朝追封蕲王谥忠武配飨高宗庙庭世忠初得疾敕尚医视疾将吏卧内问疾世忠曰吾以布衣百战致位王公赖天之灵保首领没于家诸君尚哀其死耶及死赐朝服貂蝉冠水银龙脑以敛世忠尝戒家人曰吾名世忠汝曹毋讳忠字讳而不言是忘忠也性戆直勇敢忠义事关庙社必流涕极言岳飞冤狱举朝无敢出一语世忠独撻桧怒语在桧传又抵排和议触桧尤多或劝止之世忠曰今畏祸苟同他日瞑目岂可受铁杖于太祖殿下时一二大将多曲徇桧苟全世忠与桧同在政地一揖外未尝与谈嗜义轻财锡赉悉分将士所赐田输租与编户等持军严重与士卒同甘苦器仗规画精绝过人今克敌弓连锁甲狻猊鍪及跳涧以习骑洞贯以习射皆其遗法也尝中毒矢入骨以强弩括取之十指仅全四不能动刀痕箭瘢如刻画然知人善奖用部曲起行伍秉将旄皆其甄拔云解兵政卧家凡十年澹然自如若未尝有权位者号清凉居士子彦直彦质彦古皆以才见用彦古户部尚书

韩彦直

韩彦直

彦直字子温生期年以父任补右承奉郎寻直秘阁六岁从世忠入见高宗命作大字即拜命跪书皇帝万岁四字帝喜之拊其背曰他日

令器也亲解孝宗牛角之繻傅其首赐金器笔研监书鞍马年十二赐三品服绍兴中登进士第调太社令父忧服除秦桧素衔世忠不附和议出彦直为浙东安抚司主管机宜文字桧死拜光禄寺丞迁屯田员外郎兼权右曹郎官张浚都督江淮军马檄权计议军事干道二年迁户部郎官主管左曹总领淮东军马钱粮会大军仓给粮径乘小輿往察之给米不如数捕吏寘于理拜司农少卿进直龙图阁江西转运兼权知江州时朝廷还岳飞家赀产多在九江岁久业数易主吏缘为奸产直搜剔隐匿尽还岳氏复为司农少卿总领湖北京西军马钱粮寻兼发运副使会时相不乐密启换武授利州观察使知襄阳府充京西南路安抚使七年授鄂州驻扎御前诸军都统制条奏军中六事乞备器械增战马革滥赏厉奇功选勇畧充亲随朝廷多从之先是军中骑兵多不能步战彦直命骑士被甲徒行日六十里令统制官以身帅之人人习于劳苦驰骋如飞事闻诏令三衙江上诸军仿行之八年勾归文班乃授左中奉大夫充敷文阁待制知台州勾祠养亲提举佑神观奉朝请进对乞复荆襄鄂渚为一军又乞并京西湖北转运为一司分官置司襄阳可一事体帝善之迁刑部侍郎明年兼工部侍郎同列议大辟三鞫之弗承宜令以众证就刑彦直持不可白丞相梁克家曰若是则善类被诬必多冤狱且笞杖之刑犹引伏方决况人命至重乎议卒格遣使于金方入境金使芬彻问接国书事论难往复数十芬彻理屈几罹祸者数主义不挠金卒礼遣之帝嘉叹迁吏部侍郎寻权工部尚书复中大夫改工部尚书兼知临安府以言罢提举太平兴国宫寻提举佑神观奉朝请出知隰州首捕巨猾王永年穷治之杖徙他州奏免民间积逋以郡余财代输然以累欠内帑坊场钱不发鑄一官海寇出没大洋劫掠彦直授将领土豪等方略不旬日生禽贼首海盜为清奏功进敷文阁学士以弟彦质为两浙转运判官引嫌易泉府勾祠奉亲差提举佑神观仍奉朝请特令佩鱼示异数也入对乞搜访靖康以来死节之士以劝忠义又上荐举乞选人已经关升实历六考无赃私罪犯者杂试以经术法律限其员额定其高下俾孤寒者得以自达定为改官之制帝悉嘉纳淳熙十年夏旱应诏言迯者滥刑为致旱之由明年入对论三衙皆所以拱扈宸居而司马乃远在数百里外乞令归司久之再为户部尚书会岁旱乞广余为先备又乞追贬部曲曾诬陷岳飞者以慰忠魂以言降充敷文阁学士帝追感世忠元勋且谓彦直有才力言者诬之彦直感泣奏谢寻提举万寿观进显谟阁学士尝摭本朝事分为类目名水心镜为书百六十七卷礼部尚书尤袤修国史白于朝取是书以进光宗称善进龙图阁学

士转光禄大夫致仕卒特赠开府仪同三司赐银绢九百爵至蕲春郡公

△岳飞

岳飞字鹏举相州汤阴人世力农父和能节食以济饥人有耕侵其地者割而与之
飞生时有大禽若鹄飞鸣室上因以为名未弥月河决
内黄水暴至母姚抱飞坐瓮中冲涛及岸得免人异之少负气节沈厚寡言家贫力学尤
好左氏春秋孙吴兵法生有神力未冠挽弓三百斤弩
八石学射于周同尽其术能左右射同死朔望设祭于其家父义之曰汝为时用其徇国
死义乎宣和四年真定宣抚刘鞬募敢战士飞应募相
有剧贼陶俊贾进和飞请百骑灭之遣卒伪为商入贼境贼掠以充部伍飞遣百人伏山
下自领数十骑逼贼垒贼出战佯北贼追之伏兵四起
先所遣卒擒二贼以归康王至相飞因刘浩见命招贼吉倩倩以众降补承信郎以铁骑
三百往李固渡尝敌败之从浩解东京围与敌相持于
滑南领百骑习兵河上敌猝至飞麾其徒曰敌虽众未知吾虚实当及其未定击之乃独
驰迎敌有梟将舞刀而前飞斩之敌大败迁秉义郎隶
留守宗泽战开德曹州皆有功泽大奇之曰尔勇智才艺古良将不能过然好野战非万
全计因授以阵图飞曰阵而后战兵法之常运用之妙
存乎一心泽是其言康王即位飞上书数千言大略谓陛下已登大宝社稷有主已具伐
敌之谋而勤王之师日集彼方谓吾素弱宜乘其怠击
之黄潜善汪伯彦辈不能承圣意恢复奉车驾日益南恐不足击中原之望臣愿陛下乘
敌穴未固亲率六军北渡则将士作气中原可复书闻
以越职夺官归诣河北招讨使张所所待以国士借补修武郎充中军统领所问曰汝能
敌几何飞曰勇不足恃用兵在先定谋栾枝曳柴以败
荆莫敖采樵以致绞皆谋定也所矍然曰君殆非行伍中人飞因说之曰国家都汴恃河
北以为固苟凭据要冲峙列重镇一城受围则诸城或
挠或救金人不能窥河南而京师根本之地固矣招抚诚能提兵压境飞惟命是从所大
喜借补武经郎命从王彦渡河至新乡金兵盛彦不敢
进飞独引所部鏖战夺其纛而舞诸军争奋遂拔新乡翌日战侯兆川身被十余创士皆
死战又败之夜屯石门山下或传金兵复至一军皆惊
飞坚卧不动金兵卒不来食尽走彦壁乞粮彦不许飞引兵益北战于太行山擒金将拓
跋雅勒呼居数日复遇敌飞单骑持丈八铁枪刺杀黑
风大王敌众败走飞自知与彦有隙复归宗泽为留守司统制泽卒杜充代之飞居故职
二年战胙城又战黑龙潭皆大捷从闾劾保护陵寝大
战汜水关射殪金将大破其众驻军竹芦渡与敌相持选精锐三百伏前山下令各以薪
刍交缚两束夜半爇四端而举之金人疑援兵至惊溃

三年贼黄善曹成孔彦舟等合众五十万薄南熏门飞所部仅八百众惧不敌飞曰吾为诸君破之左挟弓右运矛横冲其阵贼乱大败之又擒贼杜叔五孙海于东明借补英州刺史黄善围陈州飞战于清河擒其将孙胜孙清授真州刺史杜充将还建康飞曰中原地尺寸不可弃今一举足此地非我有他日欲复取之非数十万众不可充不听遂与俱归师次铁路步遇贼张用至六合遇李成与战皆败之成遣轻骑劫宪臣犒军银帛飞进兵掩击之成奔江西时命充守建康金人与成合寇乌江充闭门不出飞泣谏请视师充竟不出金人遂由马家渡渡江充遣飞等迎战王■（王燮）先遁诸将皆溃独飞力战会充已降金诸将多行剽掠惟飞军秋毫无所犯乌珠趋杭州飞要击至广德境六战皆捷擒其将王权俘签军首领四十余察其可用者结以恩遣还令夜斫营纵火飞乘其乱纵击大败之驻军钟村军无见粮将士忍饥不敢扰民金所籍兵相谓曰此岳家军争来降附四年乌珠攻常州宜兴令迎飞移屯焉盗郭吉闻飞来遁入湖飞遣王贵傅庆追破之又遣辩士马皋林聚尽降其众有张威武者不从飞单骑入其营斩之金人再攻常州飞四战皆捷尾袭于镇江东又捷战于清水亭又大捷横尸十五里乌珠趋建康飞设伏牛头山待之夜令百人黑衣混金营中扰之金兵惊自相攻击乌珠次龙湾飞以骑三百步兵二千驰至新城大破之乌珠奔淮西遂复建康飞奏建康为要害之地宜选兵静守仍益兵守淮拱护腹心帝嘉纳乌珠归飞邀击于静安败之诏讨戚方飞以三千人营于苦岭方遁俄益兵来飞自领千人破之于广德会张俊兵至方遂隆迁通泰镇抚使兼知泰州飞辞乞淮南东路一重难任使收复本路州郡乘机渐进使山东河北河东京畿等路次第而复会金攻楚急诏张俊援之俊辞乃遣飞行而命刘光世出兵援飞抵承州三战三捷杀高太保俘队长七十余人光世等皆不敢前飞师孤力寡楚遂陷诏飞还守通泰有旨可守即守如不可但于沙洲保护百姓伺便掩击飞以泰无险可恃退保柴墟战于南霸桥金兵大败渡百姓于沙上飞以精骑二百殿金兵不敢近飞以泰州失守待罪绍兴元年张俊请飞同讨李成时成将马进犯洪州连营西山飞曰贼贪而不虑后若以骑兵自上流绝生米渡出其不意破之必矣飞请自为先锋俊大喜飞重铠跃马潜出贼右突其阵所部从之进大败走筠州飞抵城东贼出城布阵飞设伏以红罗为帜上刺岳字选骑二百随帜而前贼易其少薄之伏发贼败走飞使人呼曰不从贼者坐吾不汝杀坐而降者八万余人进以余卒奔成于南康飞夜引兵至朱家山又斩其将赵万成闻进败自引兵十余万来飞与遇于楼子庄大

破成军追斩进成走蕲州降伪齐 【伏读通鉴辑览 御批史称岳飞行兵张岳字旗以慑敌盖其后威望众着藉此以先声夺人而楼子庄之战则不尽然盖飞设伏已定正欲以兵少诱贼使贼但见其易取而不复致疑斯为制胜之要若徒以旗帜虚名谓操胜券犹浅之乎论飞矣】 张用寇江西飞以书谕之用遂降江淮平俊奏飞功第一加神武右军副统制留洪州弹压盗贼授亲卫大夫建州观察使建寇范汝为陷邵武江西安抚李回檄飞分兵保建昌军及抚州飞遣人以岳字帜植城门贼望见相戒勿犯贼党姚达饶青逼建昌飞遣王万徐庆讨擒之升神武副军都统制二年贼曹成拥众十余万由江西历湖湘据道贺二州命飞权知潭州兼权荆湖东路安抚都总管付金字牌黄旗招成成闻飞将至惊曰岳家军来矣即分道而遁飞至茶陵奉诏招之成不从飞奏比年多命招安故盗力强则肆暴力屈则就招苟不略加剿除蠹起之众未可遽殄许之飞入贺州命士蓐食遶岭潜趋未明已至太平场破其砦成据险拒飞飞麾兵掩击贼太溃成走据北藏岭上梧关遣将迎战飞不阵而鼓士争奋夺二隘据之成又自桂岭置砦至北藏岭连控隘道亲以众十余万守蓬头岭飞部才八千一鼓登岭破其众成奔连州飞谓张宪等曰成党败去追而杀之则胁从者可悯纵之则复聚为盗今遣若等诛其酋而抚其众慎勿妄杀累主上保民之仁于是宪自贺连徐庆自邵道王贵自郴桂招降者二万与飞会连州进兵追成成走宣抚司降时以盛夏行师瘴地抚循有方士无一人死病者岭表平授武安军承宣使屯江州甫入境安抚李回檄飞捕剧贼马友郝通刘忠李通李宗亮张式皆平之三年虔吉盗连兵寇掠循梅广惠英韶南雄南安建昌汀邵武诸郡帝乃专命飞平之飞至虔州固石洞贼彭友悉众至雩都迎战跃马驰突飞麾兵即马上擒之余贼退保固石洞洞高峻环水止一径可入飞列骑山下令皆持满黎明遣死士疾驰登山贼众乱弃山而下骑兵围之贼呼丐命飞令勿杀受其降授徐庆等方略捕诸郡余贼皆破降之初以降佑震惊之故密旨令飞屠虔城飞请诛首恶而赦胁从不许请至三四帝乃曲赦人感其德绘像祠之余党高聚张成犯袁州飞遣王贵平之秋入见帝手书精忠岳飞字制旗以赐之授镇南军承宣使江南西路沿江制置使又改神武后军都统制仍制置使李山吴全吴锡李横牛皋皆隶焉伪齐遣李成挟金人入侵破襄阳唐邓随郢诸州及信阳军湖寇杨么亦与伪齐通欲顺流而下李成又欲自江西陆行趋两浙与么会帝命飞为之备四年除兼荆南鄂岳州制置使飞奏襄阳等六郡为恢复中原基本今当先取六郡以除心膂之病李成远遁然后

加兵湖湘以殄羣盜帝以諭趙鼎曰知上流利害莫如飛者遂授黃復州漢陽軍德安府制置使飛渡江中流顧幕屬曰飛不擒賊不涉此江抵郢州城下偽將京超號萬人敵乘城拒飛飛鼓眾而登超投崖死復郢州遣張憲徐慶復隨州飛趣襄陽李成迎戰左臨襄江飛笑曰步兵利險阻騎兵利平曠成左列騎江岸右列步平地雖眾十萬何能為舉鞭指王貴曰爾以長槍步卒擊其騎兵指牛皋曰爾以騎兵擊其步卒合戰馬應槍而斃後騎皆擁入江步卒死者無數成夜遁復襄陽劉豫益成兵屯新野飛與王萬夾擊之連破其眾飛奏金所愛惟子女金帛志已驕惰劉豫僭偽人心終不忘宋如以精兵二十萬直搗中原恢復故疆誠易為力襄陽隨郢地皆膏腴苟行營田其利為厚臣候糧足即過江北剿戮敵兵時方重深入之舉而營田之議自是興矣進兵鄧州成與金將鈕赫貝勒列砦拒飛飛遣王貴張憲掩擊敵眾大潰鈕赫貝勒僅以身免余黨高仲退保鄧城飛引兵一鼓拔之擒高仲復鄧州帝聞之喜曰朕素聞岳飛行軍有紀律未知能破敵如此又復唐州信陽軍襄漢平飛辭制置使乞委重臣經畫荆襄不許趙鼎奏湖北鄂岳最為上流要害乞令飛屯鄂岳不惟江西藉其聲勢湖廣江浙亦獲安妥乃以隨郢唐鄧信陽并为襄陽府路隸飛飛移屯鄂授清遠軍節度使湖北路荆襄潭州制置使封武昌縣開國子烏珠劉豫合兵圍廬州帝手札命飛解圍提兵趨廬偽齊已驅甲騎五千逼城飛張岳字旗與精忠旗金兵一戰而潰廬州平飛奏襄陽等六郡人戶闕牛糧乞量給官錢免官私逋負州縣官以招集流亡為殿最五年入覲封母國夫人授飛鎮寧崇信軍節度使湖北路荆襄潭州制置使進封武昌郡開國侯又除荆湖南北襄陽路制置使神武後軍都統制命招捕楊么飛所部皆西北人不習水戰飛曰兵何常顧用之何如耳先遣使招諭之賊黨黃佐曰岳節使號令如山若與之敵萬無生理不如往降節使誠信必善遇我遂降飛表授佐武義大夫單騎按其部拊佐背曰子知逆順者果能立功封侯豈足道欲復遣子至湖中視其可乘者擒之可勸者招之如何佐感泣誓以死報時張浚以都督軍事至潭參政席益與浚語疑飛玩寇欲以聞浚曰岳侯忠孝人也岳有深機胡可易言益慚而止黃佐襲周倫砦殺倫擒其統制陳貴等飛上其功遷武功大夫統制任士安不稟王■〈王燮〉令軍以此无功飛鞭士安使餌賊曰三日賊不平斬汝士安宣言岳太尉兵二十萬至矣賊見止士安軍并力攻之飛設伏士安戰急伏四起擊賊賊走會召浚還防秋飛袖小圖示浚浚欲俟來年議之飛曰已有定畫都督能少留不八日可破賊浚曰何言之易飛曰王四廂以王師攻水寇則難飛

以水寇攻水寇则易水战我短彼长以所短攻所长所以难若因敌将用敌兵夺其手足之助离其腹心之托使孤立而后以王师乘之八日之内当俘诸贼浚许之飞遂如鼎州黄佐招杨钦来降飞喜曰杨钦骁悍既降贼腹心溃矣表授钦武义大夫礼遇甚厚乃复遣归湖中两日钦说余端刘洗等降飞诡骂钦曰贼不尽降何来也杖之复令入湖是夜掩贼营降其众数万么负固不服方浮舟湖中以轮激水其行如飞旁置撞竿官舟迎之辄碎飞伐君山木为巨筏塞诸港汊又以腐木乱草浮上流而下择水浅处遣善骂者挑之且行且骂贼怒来追则草木壅积舟轮碍不行飞亟遣兵击之贼奔港中为筏所拒官军乘筏张牛革以蔽矢石举巨木撞其舟舟尽坏么投水牛皋擒斩之飞入贼垒余贼惊曰何神也俱降飞亲行诸砦慰抚之纵老弱归田籍少壮为军果八日而贼平浚叹曰岳侯神算也初贼恃其险曰欲犯我者除是飞来至是人以其言为讖获贼舟千余鄂渚水军为沿江之冠诏兼蕲黄制置使飞以目疾乞辞军事不许加检校少保进封公还军鄂州除荆湖南北襄阳路招讨使六年入覲面陈襄阳自收复后未置监司州县无以按察帝从之以李若虚为京西南路提举兼转运提刑又令湖北襄阳府路自知州通判以下贤否许飞得自黜陟张浚至江上会诸大帅独称飞与韩世忠可倚大事命飞屯襄阳以窥中原曰此君素志也飞移军京西改武胜定国军节度使除宣抚副使置司襄阳命往武昌调军居母忧降制起复飞扶柩还庐山连表乞终丧不许累诏趣起乃就军又命宣抚河东节制河北路首遣王贵等攻虢州下之获粮十五万石降其众数万张浚曰飞措画甚大令已至伊洛则太行一带山砦必有应者飞遣杨再兴进兵至长水县再战皆捷中原响应又遣人焚蔡州粮九月刘豫遣子麟猊分道寇淮西刘光世欲舍庐州张俊欲弃盱眙同奏召岳飞以兵东下欲使飞当其锋而已得退保张浚谓飞一动则襄汉何所制力沮其议帝虑俊光世不足任命飞东下飞自破曹成平杨么凡六年皆盛夏行师致目疾至是益甚闻诏即日启行未至麟败飞奏至帝语赵鼎曰刘麟败北不足喜诸将知尊朝廷为可喜遂赐札言敌兵已去淮卿不须进发其或襄邓陈蔡有机可乘从长措置飞乃还军时伪齐屯兵窥唐州飞遣王贵董先等攻破之焚其营奏图蔡以取中原不许飞召贵等还七年入见帝从容问曰卿得良马否飞曰臣有二马日啖刍豆数斗饮泉一斛然非精洁即不受介而驰初不甚疾比行百里始奋迅自午至酉犹可二百里褫鞍甲而不息不汗若无事然此其受大而不苟取力裕而不求逞致远之材也不幸相继以死今所乘者日不过数升而秣不择粟饮不

择泉揽辔未安踊跃疾驱甫百里力竭汗喘殆欲毙然此其寡取易盈好逞易穷弩钝之材也帝称善曰卿今议论极进拜太尉继除宣抚使兼营田大使从幸建康以王德邠琼兵隶飞诏谕德等曰听飞号令如朕亲行飞数见帝论恢复之略又手疏言金人所以立刘豫于江南盖欲荼毒中原以中国攻中国而尼雅满因得休兵观衅臣欲陛下假臣日月便则提兵趋京洛据河阳陕府潼关以号召五路叛将叛将既还遣王师前进彼必弃汴而走河北京畿陕右可以尽复然后分兵浚滑经略两河如此则刘豫成擒金人失势社稷长久之计实在此举帝答曰有臣如此顾复何忧进止之机朕不中制又召至寝阁命之曰中兴之事一以委卿命节制光州飞方图大举会秦桧主和遂不以德琼兵隶飞诏诣都督府与张浚议事浚谓飞曰王德淮西军所服浚欲以为都统而命吕祉以督府参谋领之如何飞曰德与琼素不相下一旦握之在上则必争吕尚书不习军旅恐不足服众浚曰张宣抚如何飞曰暴而寡谋尤琼所不服浚曰然则杨沂中尔飞曰沂中视德等尔岂能驭此军浚艳然曰浚固知非太尉不可飞曰都督以正问飞不敢不尽其愚岂以得兵为念耶即日上章乞解兵柄终丧服以张宪摄军事步归庐母墓侧 【伏读通鉴辑览 御批岳飞威望素着果以王德邠琼隶之必不致变而秦桧以和议阻其行所失更不止于控御无人之患至张浚论将昧于知人而疏于料事飞一一辨驳之语虽齟齬而议皆切当且于淮西之衅亿度不爽其明识岂浚所及乃浚竟以飞言忤意不能相容而听其去既貽国家有强臣叛逆之患复致大将蒙径情舍去之嫌浚实无所辞咎迨琼难既作而始悟飞言悔亦晚矣】 浚怒奏以张宗元为宣抚判官监其军帝累诏趋飞还职飞力辞诏幕属造庐以死请凡六日飞趋朝待罪帝慰遣之宗元还言将和士锐人怀忠孝皆飞训养所致帝大悦飞奏比者寝阁之命咸谓圣断已坚何至今尚未决臣愿提兵进讨顺天道固人心以曲直为老壮以逆顺为强弱万全之効可必又奏钱塘僻在海隅非用武地愿陛下建都上游用汉光武故事亲率六军往来督战庶将士知圣意所向人人用命未报而邠琼叛浚始悔飞复奏愿进屯淮甸伺便击琼期于破灭不许诏驻师江州为淮浙援飞知刘豫结尼雅满而乌珠恶刘豫可以间而动会军中得乌珠谍者飞阳责之曰汝非吾军中人张斌耶吾向遣汝至齐约诱致四太子汝往不复来吾继遣人问齐已许我今冬以会合寇江为名致四太子于清河汝所持书竟不至何背我耶谍冀缓死即诡服乃作蜡书言与刘豫同谋诛乌珠事因谓谍曰吾今贷汝复遣至齐问举兵期剗股纳书戒勿泄谍归以书示乌珠

乌珠大惊驰白其主遂废豫飞奏宜乘废豫之际捣其不备长驱以取中原不报八年还军鄂州王庶视师江淮飞与庶书今岁若不举兵当纳节请闲庶甚壮之秋召赴行在命诣资善堂见皇太子飞退而喜曰社稷得人矣中兴基业其在是乎【伏读通鉴辑览 御批高宗择孝宗为嗣当时多谓付托得人皆以艺祖后不克享有天下人心颇有余憾一旦见昌陵之裔复继大统不觉溢美任情至以中兴事业推许孝宗则实过矣孝宗虽承欢德寿向学右文不过蒙偏安之业端处晏然而已中原侵地未能恢复尺寸而符离之役任用非人遂致一败不振所谓中兴者安在岳飞退喜之言盖出于史家过誉不足信也】会金遣使将归河南地飞言金不可信和不可恃相臣谋国不臧恐贻后世讥桧衔之九年以复河南大赦飞表谢寓和议不便之意有唾手燕云复讎报国之语授开府仪同三司飞力辞谓今日之事可危而不可安可忧而不可贺可训兵饬士谨备不虞而不可论功行赏取笑敌人三诏不受帝温言奖谕乃受会遣士■〈亻 裹〉谒诸陵飞请以轻骑从洒扫实欲观衅以伐谋又奏金人无事请和此必有肘腋之虞名以地归我实寄之也桧白帝止其行十年金人攻拱亳刘锜告急令飞驰援飞遣张宪姚政赴之帝赐札曰设施之方一以委卿朕不遥度飞乃遣王贵牛皋董先杨再兴孟邦杰李宝等分布经略西京汝郑颍昌陈曹光蔡诸郡又命梁兴渡河纠合忠义社取河东北州县又遣兵东援刘锜西援郭浩自以其军长驱以阡中原将发密奏言先正国本以安人心然后不常厥居以示无忘复讎之意帝得奏大褒其忠授少保河南府路陕西河东北路招讨使寻改河南北路招讨使未几所遣诸将相继奏捷大军在颍昌诸将分道出战飞自以轻骑驻郾城兵势甚锐乌珠大惧会龙虎大王议以为诸帅易与独飞不可当欲诱致其师并力一战中外闻之大惧诏飞审处自固飞曰金人伎穷矣乃日出挑战且骂之乌珠合龙虎大王盖天大王与韩常之兵逼郾城飞遣子云领骑兵直贯其阵戒之曰不胜先斩汝麇兵数十合敌尸布野初乌珠有劲军皆重铠贯以韦索三人为联号拐子马官军不能当是役也以万五千骑来飞戒步卒以麻扎刀入阵勿仰视第斫马足拐子马相连一马仆二马不能行【伏读通鉴辑览 御批北人使马惟以控纵便捷为主若三马联络马力既有参差势必此前彼却而三人相连或勇怯不齐勇者且为怯者所累此理之易明者拐子马之说金史本纪兵志及乌珠等传皆不载惟见于宋史岳飞刘锜传本不足为确据况乌珠战阵素娴必知得进则进得退则退之道岂肯羁绊已马以受制于人此或彼时列队齐进所向披靡宋

人见其势不可当遂从而妄加之名目耳即所云马被重铠亦徒束缚而不能骋其腾骧之力尤理所必无纪事家或狃于兵车驷介之说强为傅会不足当有识者一晒千载传讹耳食之徒无能究其真伪皆为史策无稽之说所误不得不明辨之】官军奋击遂大败之乌珠大恟曰自海上起兵皆以此胜今已矣乌珠益兵来部将王贵以五十骑觐敌遇之奋斩其将飞时出视战地望见黄尘蔽天自以四十骑突战败之方郾城再捷飞谓云曰贼屡败必还攻颍昌汝宜速援王贵既而乌珠果至贵将游奕云将背嵬战于城西云以骑兵八百挺前决战步军张左右翼继之杀乌珠婿夏金吾副统军尼雅满苏贝勒乌珠遁去梁兴会太行忠义及两河豪杰等累战皆捷中原大震飞奏兴等过河人心愿归朝廷金兵累败乌珠等皆令老少北去正中兴之机飞进军朱僊镇距汴京四十五里与乌珠对垒而阵遣骁将以背嵬骑五百奋击大破之乌珠遁还汴京飞檄陵台令行视诸陵葺治之先是绍兴五年飞遣梁兴等布德意招结两河豪杰山砦韦铨孙谋等敛兵固堡以待王师李通胡清李宝李兴张恩孙琪等举众来归金人动息山川险要一时皆得其实尽磁相开德泽潞晋绛汾隰之境皆期日兴兵与官军会其所揭旗以岳为号父老百姓争挽车牵牛载糗粮以馈义军顶盆焚香迎候者充满道路自燕以南金号令不行乌珠欲签军以抗飞河北无一人从者乃叹曰自我起北方以来未有如今日之挫衄金帅乌凌阿思谋素号桀黠亦不能制其下但谕之曰毋轻动俟岳家军来即降金统制王镇统领崖庆将官李颢崔虎叶旺等皆率所部降以至禁卫龙虎大王下噶扎尔千户高勇之属皆密受飞旗牒自北方来降金将军韩常欲以五万众内附飞大喜语其下曰直抵黄龙府与诸君痛饮尔方指日渡河而桧欲画淮以北弃之风台臣请班师飞奏金人锐气沮丧尽弃輜重疾走渡河豪杰向风士卒用命时不再来机难轻失桧知飞志锐不可回乃先请张俊杨沂中等归而后言飞孤军不可久留乞令班师一日奉十二金字牌飞愤惋泣下东向再拜曰十年之力废于一旦飞班师民遮马恟哭请曰我等戴香盆运粮草以迎官军金人悉知之相公去我辈无噍类矣飞亦悲泣取诏示之曰吾不得擅留哭声震野飞留五日以待其徙从而南者如市亟奏以汉上六郡闲田处之方乌珠弃汴去有闽书生叩马曰太子毋走岳少保且退矣乌珠曰岳少保以五百骑破五十万京城日夜望其来何谓可守生曰自古未有权臣在内而大将能立功于外者岳少保且不免况欲成功乎【伏读通鉴辑览 御批岳飞奉诏班师议者病其不能达权以恢复此甚非也人徒见飞长驱逐北转战克捷

金之号令不能行于河北谓其功在垂成不知飞孤军深入内外无援安能保其长操必
胜此叩马书生所以逆料岳少保之且退也飞虽善战
亦止当一面耳及诸路大岳已撤中原无复宋师胁飞以不得不还之势至金牌促召固
已事不可为飞之悲泣回军实亦知难而退者区区功
罪之说犹未深察其时势之当然也惟是临安偏据已非一木所能支而复多方以挫抑
其良将自坏长城桧之奸不足置论高宗诚无人心者
耳】乌珠悟遂留飞既归所得州县旋复失之飞力请解兵柄不许自庐入覲帝问之飞
拜谢而已十一年谍报金分道渡淮飞语四诸帅之兵
破敌乌珠韩常与龙虎大王疾驱至庐帝趣飞应援凡十七札飞策金人举国南来巢穴
必虚若长驱京洛以捣之彼必奔命可坐而敝时飞方
苦寒■〈口敕〉力疾而行又恐帝急于退敌乃奏臣如捣虚势必得利若以为敌方在
近未暇远图欲乞亲至蕲黄以议攻郟帝得奏大喜赐
札曰卿苦寒疾乃为朕行国尔忘身谁如卿者师至庐州金兵望风而遁飞还兵于舒以
俟命帝又赐札以飞小心恭谨不专进退为得体乌珠
破濠州张俊驻军黄连镇不敢进杨沂中遇伏而败帝命飞救之金人闻飞至又遁时和
议既决桧患飞异己乃密奏召三大将论功行赏韩世
忠张俊已至飞独后桧又用参政王次翁计俟之六七日既至授枢密副使位参知政事
上飞固请还兵柄五月诏同俊往楚州措置边防总韩
世忠军还驻镇江初飞在诸将中年最少以列校拔起累立显功世忠俊不能平飞屈己
下之幕中轻锐教飞勿苦降意金人攻淮西俊分地也
俊始不敢行师卒无功飞闻命即行速解庐州围帝授飞两镇节俊益耻杨么平飞献俊
世忠楼船各一兵械毕备世忠大悦俊反忌之淮西之
役俊以前途粮乏誅飞飞不为止帝赐札褒谕有曰转饷艰阻卿不复顾俊疑飞漏言还
朝反倡言飞逗留不进以乏饷为辞至视世忠军俊知
世忠忤桧欲与飞分其背嵬军飞义不肯俊大不悦及同行楚州俊欲修城为备飞曰当
戮力以图恢复岂可为退保计俊变色会世忠军吏景
着与总领胡纺言二枢密若分世忠军恐至生事纺上之朝桧捕着下大理寺将以扇摇
诬世忠飞驰书告以桧意世忠见帝自明俊于是大憾
飞遂倡言飞议弃山阳且密以飞报世忠事告桧桧大怒初桧逐赵鼎飞每对客叹息又
以恢复为己任不肯附和议读桧奏至德无常师主善
为师之语恶其欺罔恚曰君臣大伦根于天性大臣而忍面谩其主耶乌珠遗桧书曰汝
朝夕以和请而岳飞力以河北图必杀飞始可和桧亦
以飞不死终梗和议已必及祸故力谋杀之以谏议大夫万俟卨与飞有怨风卨劾飞又
风中丞何铸待御史罗汝楫交章弹论大率谓今春金

人攻淮西飞略至舒蕲而不进比与俊按兵淮上又欲弃山阳而不守飞累章请罢枢柄寻还两镇节充万寿观使奉朝请桧志未伸也又谕张俊令劫王贵诱王俊诬告张宪谋还飞兵桧遣使捕飞父子证张宪事【证宪事帝曰刑所以止乱勿妄追证动摇人心桧矫诏召飞父子】使者至飞笑曰皇天后土可表此心初命何铸鞫之飞裂裳以背示铸有尽忠报国四大字深入肤理既而阅实无左验铸明其无辜改命万俟卨高诬飞与宪书令虚申探报以动朝廷云与宪书令措置使飞还军言其书已焚飞坐系两月无可证者或教卨以台章所指淮西事为言卨喜白桧簿录飞家取当时御札藏之以灭迹又逼孙革等证飞受诏逗留命评事元龟年取行军时日杂定之傅会其狱岁暮狱不成桧手书小纸付狱即报飞死【按三朝北盟会编载高宗绍兴十一年十月十三日戊寅岳飞下大理寺十二月二十九日癸巳飞死于狱中梟其首市人闻之凄怆有堕泪者】时年三十九云弃市【伏读通鉴辑览御批高宗于岳飞始则赐以精忠旗帜既复手敕褒嘉其于飞之心迹非不深知者乃桧欲召飞父子证事不能明其无罪第语勿妄追证及桧矫诏逮鞫致飞衔不白之冤于狱底高宗竟不复一言致诘虽甚愤愤不应若此然则桧之擅杀飞父子高宗实不得辞其责也】籍家赀徙家岭南幕属于鹏等从坐者六人初飞在狱大理寺丞李若朴何彦猷大理卿薛仁辅并言飞无罪卨俱劾去宗正卿士■〈亻裹〉请以百口保飞卨亦劾之窜死建州布衣刘允升上书讼飞冤下棘寺以死凡傅成其狱者皆迁转有差狱之将上也韩世忠不平诣桧诘其实桧曰飞子云与张宪书虽不明其事体莫须有世忠曰莫须有三字何以服天下时洪皓在金国中蜡书驰奏以为金人所畏服者惟飞闻其死酌酒相贺飞至孝母留河北遣人求访迎归母有痼疾药餌必亲母卒水浆不入口者三日家无姬侍吴玠素服飞愿与交驩饰名姝遗之飞曰主上宵旰岂大将安乐时却不受玠益敬服少豪饮帝戒之曰卿异时到河朔乃可饮遂绝不饮帝初为飞营第飞辞曰敌未灭何以家为或问天下何时太平飞曰文臣不爱钱武臣不惜死天下平矣师每休舍课将士注坡跳壕皆重铠习之子云尝习注坡马蹶怒而鞭之卒有取民麻一缕以束刍者立斩以徇卒野宿民开门愿纳无敢入者军号冻死不折屋饿死不卤掠卒有疾躬为调药诸将远戍遣妻问劳其家死事者哭之而育其孤或以子婚其女凡有颁犒均给军吏秋毫不私善以少击众欲有所举尽召诸统制与谋谋定而后战故有胜无败猝遇敌不动故敌为之语曰撼山易撼岳家军难张浚尝问用兵之术曰仁智信勇严阙一不可调

军食必蹙额曰东南民力耗敝极矣荆湖平募民营田又为屯田岁省漕运之半帝手书曹操诸葛亮羊祜三事赐之飞跋其后独指操为奸贼而鄙之尤桧所恶也张所死飞感旧恩鞠其子宗本奏以官李宝自楚来归韩世忠留之宝痛哭愿归飞世忠以书来谗飞复曰均为国家何分彼此世忠叹服襄阳之役诏光世为援六郡既复光世始至飞奏先赏光世军好贤礼士览经史雅歌投壶恂恂如书生每辞官必曰将士効力飞何功之有然忠愤激烈议论持正不挫于人卒以此得祸桧死议复飞官万俟卨谓金方愿和一旦录故将疑天下心不可及绍兴末太学生程宏图上书讼飞冤诏飞家自便初桧恶岳州同飞姓改为纯州至是仍旧中丞汪澈宣抚荆襄故部曲合辞讼之哭声雷震孝宗诏复飞官以礼改葬赐钱百万求其后悉官之建庙于鄂号忠烈淳熙六年谥武穆嘉定四年追封鄂王五子云雷霖震霆

岳云

岳云

云飞养子年十二从张宪战多得其力军中呼曰赢官人飞征伐未尝不与数立奇功飞辄隐之每战手握两铁椎重八十斤先诸军登城攻随破邓襄汉平功在第一飞不言逾年铨曹辩之始迁武翼郎杨么平功亦第一又不上张浚廉得其实曰岳侯避宠荣廉则廉矣未得为公也奏乞擢异数飞力辞不受尝以特旨迁三资飞辞曰士卒冒矢石立奇功始升一级男云遽躐崇资何以服众累表不受颖昌大战无虑十数出入行阵体被百余创甲裳为赤以功迁忠州防御使命带御器械飞又力辞之终左武大夫提举醴泉观以死年二十三孝宗初与飞同复原官以礼祔葬赠安远军承宣使雷忠训郎合门祗候赠武略郎霖朝散大夫敷文阁待制赠大中大夫初飞下狱桧令亲党王会搜其家得御札数篋束之左藏南库霖请于孝宗还之霖子珂汇次淮西十五御札辨验出师应援之先后皆可考嘉定间为吁天辨诬集五卷天定录二卷上之震朝奉大夫提举江南东路茶盐公事霆修武郎合门祗候

钦定续通志卷三百七十一

●钦定续通志卷三百七十二 列传一百七十二

列传

宋 【七十六】

○宋七十六

刘锜

吴玠

吴玠【挺】

李显忠

杨存中

郭

浩 杨政

刘锜

吴玠

吴玠

李显忠

杨存中

郭浩

杨政

△刘锜

刘锜字信叔秦州成纪人泸州军节度使仲武第九子也美仪状善射声如洪钟尝从仲武征讨宣和闲授合门祗候高宗即位录仲武后锜得召见特授合门宣赞舍人差知岷州为陇右都护与夏人战屡胜夏人儿啼辄怖之曰刘都护来张浚宣抚陕西以为泾原经畧使兼知渭州浚合五路师溃于富平慕洧以庆阳叛攻环州浚命锜救之留别将守渭自将救环未几金攻渭锜留李彦琪捍洧亲率精锐还救渭已无及进退不可乃走德顺军彦琪遁归渭降金锜贬秩知绵州兼沿边安抚绍兴三年复官为宣抚使统制金人攻拔和尚原乃分守陕蜀之地召还除江东路副总管六年权提举宿卫亲军帝驻平江解潜王彦两军交鬪俱罢命锜兼将之锜因表以前护副军及马军通为前后左右中军与游奕凡六军每军千人为十二将前护副军即彦八字军也于是锜始能成军扈从赴金陵七年帅合肥八年戍京口九年擢果州团练使龙神卫四厢都指挥使主管侍卫马军司十年金人归三京充东京副留守节制军马所部八字军纔三万七千人将发益殿司三千人皆携其孥将驻于汴家留顺昌锜自临安泝江绝淮凡二千二百里至涡口方食暴风拔坐帐锜曰此贼兆也主暴兵即下令兼程而进未至顺昌三百里金人果败盟来侵锜与将佐舍舟陆行先趋城中庚寅谍报金人入东京知府事陈规见锜问计锜曰城中有粮则能与君共守规曰有米数万斛锜曰可矣时所部选锋游奕两军及老稚輜重相去尚远遣骑趋之四鼓乃至及旦得报金骑已入境锜与规议敛兵入城为守御计人心乃安召诸将计事皆曰金兵不可敌也请以精锐为殿步骑遮老小顺流还江南锜曰吾本赴官留司今东京虽失幸全军至此有城可守奈何弃之吾意已决敢言去者斩惟部将许清号夜叉者奋曰太尉奉命副守汴京军士扶携老幼而来今避而走易耳然欲弃父母妻子则不忍欲与偕行则敌翼而攻何所逃之不如相与努力一战于死中求生也议与锜合锜大喜凿舟沉

之示无去意真家寺中积薪于门戒守者曰脱有不利
即焚吾家毋辱敌手也分命诸将守诸门明斥堠募土人为闲探于是军士皆奋男子备
战守妇人砺刀剑争呼跃曰平时人欺我八字军今日
当为国家破贼立功时守备一无可恃镒于城上躬自督厉取伪齐所造痴车以轮辕埋
城上又撤民户扉周匝蔽之城外有民居数千家悉焚
之凡六日粗毕而游骑已涉颍河至城下壬寅金人围顺昌镒豫于城下设伏擒千户阿
哈等二人诘之云韩将军营白沙涡距城三十里镒夜
遣千余人击之连战杀获颇众既而三路都统葛王褒以兵三万与龙虎大王合兵薄城
镒令开诸门金人疑不敢近初镒傅城筑羊马垣穴垣
为门至是与清等蔽垣为阵金人纵矢皆自垣端轶着于城或止中垣上镒用破敌弓翼
以神臂强弩自城上或垣门射敌无不中敌稍却复以
步兵邀击溺河死者不可胜计破其铁骑数千特授鼎州观察使枢密副都承旨沿淮制
置使时顺昌受围已四日金兵益盛乃移砦于城东李
村距城二十里镒遣骁将阎充募壮士五百人夜斫其营是夕天欲雨电光四起见敌辄
歼之金兵退十五里镒复募百人以往或请衔枚镒笑
曰无以枚也命折竹为𦉳如市井儿以为戏者人持一以为号直犯金营电所烛则皆奋
击电止则匿不动敌众大乱百人者闻吹声即聚金人
益不能测终夜自战积尸盈野退军老婆湾乌珠在汴闻之即索靴上马过淮留一宿
治战具备糗粮不七日至顺昌镒闻乌珠至会诸将于
城上问策或谓今已屡捷宜乘此势具舟全军而归镒曰朝廷养兵十五年正为缓急之
用况已挫贼锋军声稍振虽众寡不侔然有进无退且
敌营甚迩而乌珠又来吾军一动彼蹶其后则前功俱废使敌侵轶两淮震惊江浙则平
生报国之心反成误国之罪众皆感动思奋曰惟太尉
命镒募得曹成等二人谕之曰遣汝作闲事捷重赏第如我言敌必不汝杀今置汝辎路
骑中汝遇敌则佯作坠马为敌所得敌帅问我何如人
则曰太平边帅子喜声伎朝廷以两国讲好使守东京图逸乐也已而二人果遇敌被执
乌珠问之对如前乌珠喜曰此城易破耳即置鹅车炮
具不用翌日镒登城望见二人远来縋而上之乃敌械成等归以文书一卷系于械镒惧
惑军心立焚之乌珠至城下责诸将丧师众皆曰南朝
用兵非昔之比元帅临城自见镒遣耿训以书约战乌珠怒曰刘镒何敢与我战以吾力
破尔城直用靴尖趯倒耳训曰太尉非但请与太子战
且谓太子必不敢济河愿献浮桥五所济而大战乌珠曰诺乃下令明日府治会食迟明
镒果为五浮桥于颍河上敌由之以济镒遣人毒颍上
流及草中戒军士虽渴死毋得饮于河者敌用长胜军严阵以待诸帅各居一部众请先

击韩将军锜曰击韩虽退乌珠兵尚不可当法当先击
乌珠乌珠一动则余无能为矣时天大暑敌远来疲敝锜士气闲暇敌昼夜不解甲锜军
皆番休更食羊马垣下敌人马饥渴食水草者辄病往
往困乏方晨气清凉锜按兵不动逮未申闲敌力疲气索忽遣数百人出西门接战俄以
数千人出南门戒令勿喊但以锐斧犯之统制官赵搏
韩直身中数矢战不肯已士殊死鬪入其阵刀斧乱下敌大败是夕大雨平地水深尺余
乙卯乌珠拔营北去锜遣兵追之死者万数方大战时
乌珠被白袍乘甲马以牙兵三千督战兵皆重铠甲号铁浮图戴铁兜牟周匝缀长檐三
人为伍贯以韦索每进一步即用拒马拥之人进一步
拒马亦进退不可却官军以枪标去其兜牟大斧断其臂碎其首敌又以铁骑分左右翼
号拐子马号长胜军专以攻坚战酣然后用之自用兵
以来所向无前至是亦为锜军所杀战自辰至申敌败遽以拒马木障之少休城上鼓声
不绝乃出饭羹坐饷战士如平时敌披靡不敢近食已
撤拒马木深入斫敌又大破之弃尸毙马血肉枕藉车旗器甲积如山阜初有河北军告
官军曰我辈元是左护军本无鬪志所可杀者两翼拐
子马尔故锜兵力击之乌珠平日恃以为强者什损七八至陈州数诸将之罪韩常以下
皆鞭之乃自拥众还汴捷闻帝喜甚授锜武泰军节度
使侍卫马军都虞候知顺昌府沿淮制置使是役也锜兵不盈二万出战仅五千人金兵
数十万营西北亘十五里每暮鼓声震山谷然营中讙
哗中夜有声金遣人近城窃听城中肃然无鸡犬声乌珠帐前甲兵环列持烛照夜其众
分番假寐马上锜以逸待劳以故辄胜时洪浩在燕密
奏顺昌之捷金人震恐燕之重宝珍器悉徙而北意欲捐燕以南弃之故议者谓是时诸
将协心分路追讨则乌珠可擒汴京可复而王师亟还
自失机会良可惜也七月命为淮北宣抚判官副杨沂中破敌兵于太康县未几秦桧请
令沂中还师镇江锜还太平州岳飞以兵赴行在出师
之谋寝矣十一年乌珠复签两河兵谋再举诏大合兵于淮西以待之金人攻庐和二州
锜自太平渡江抵庐州与张俊杨沂中会而敌已大入
锜据东关之险以遏其冲引兵出清溪两战皆胜行至柘皋与金人夹石梁河而阵河通
巢湖广二丈锜命曳薪垒桥须臾而成遣甲士数队踰
桥卧枪而坐会沂中王德田师中张子盖之军俱至翌日乌珠以铁骑十万分为两隅夹
道而阵德薄其右隅引弓射一人毙之因大呼驰击诸
军鼓噪金人以拐子马两翼而进德率众鏖战沂中以万兵各持长斧奋击之敌大败锜
与德等追之又败于东山敌望见曰此顺昌旗帜也即
退走锜驻和州得旨乃引兵渡江归太平州时并命三帅不相节制诸军进退多出于张

俊而锜以顺昌之捷骤贵诸将多嫉之俊与沂中为腹
心而锜有隙故柘皋之赏锜军独不与诏班师而濠州告急俊与沂中锜趋黄连埠援之
距濠六十里而南城已陷沂中欲进战锜谓俊曰本救
濠今濠已失不如退师据险徐为后图诸将曰善三帅鼎足而营或言敌兵已去锜又谓
曰敌得城而遽退必有谋也宣严备之俊不从命沂中
与德将神勇步骑六万人直趋濠州果遇伏败还迟明锜军至藕塘则沂中军已入滁州
俊军已入宣化锜军方食俊遽至曰敌兵已近奈何锜
曰杨宣抚兵安在俊曰已失利还矣锜语俊无恐锜请以步卒御敌宣抚试观之锜麾下
皆曰两大帅军已渡我军何苦独战锜曰顺昌孤城旁
无赤子之助吾提兵不满二万犹足取胜况今得地利又有锐兵邪遂设三覆以待之俄
而俊至曰谍者妄也乃戚方殿后之军尔锜与俊益不
相下一夕俊军士纵火劫锜军锜擒十六人梟首槩上余皆逸锜见俊俊怒谓锜曰我为
宣抚尔乃判官何得斩吾军锜曰不知宣抚军但斩劫
砦贼耳俊曰有卒归言未尝劫砦呼一人出对锜正色曰锜为国家将帅有罪宣抚当言
于朝岂得与卒伍对事长揖上马去已皆班师俊沂中
还朝每言岳飞不赴援而锜战不力秦桧主其说遂罢宣抚判官命知荆南府岳飞奏留
锜掌兵不许诏以武泰之节提举江州太平观锜战荆
南凡六年军民安之魏良臣言锜名将不当久闲乃命知潭州加太尉复帅荆南府江陵
县东有黄潭建炎闲有司决水入江以御盗由是夏秋
涨溢荆衡闲皆被水患锜始命塞之斥膏腴田数千亩流民自占者几千户诏锜遇大礼
许奏文资仍以其侄汜为江东路兵马副都监三十一
年金海陵调军六十万自将南来弥望数十里不断如银壁中外大震时宿将无在者乃
以锜为江淮浙西制置使节制逐路军马八月锜引兵
屯扬州建大将旗鼓军容甚肃观者叹息以兵驻清江口金人以毡裹船载粮而来锜使
善没者凿沈其舟锜自楚州退军召伯镇金人攻真州
锜引兵还扬州帅刘泽以城不可守请退军瓜州金万户高景山攻扬州锜遣员琦拒于
阜角林陷围力战林中伏发大败之斩景山俘数百人
捷奏赐金五百两银七万两以犒师先是金人议留精兵在淮东以御锜而以重兵入淮
西大将王权不从锜节制不战而溃自清河口退师扬
州以舟渡真扬之民于江之南留兵屯瓜州锜病求解兵柄留其侄汜以千五百人塞瓜
州渡又命李横以八千人固守诏锜专防江锜遂还镇
江十一月金人攻瓜州汜以克敌弓射却之时知枢密院事叶义问督师江淮至镇江见
锜病剧以李横权锜军义问督镇江兵渡江众皆以为
不可义问强之汜固请出战锜不从汜拜家庙而行金人以重兵逼瓜州分兵东出江皋

逆趋瓜州汜先退横以孤军不能当亦却失其都统制
印左军统制魏友后军统制王方死之横汜仅以身免锜愤懑病益甚都督府参赞军事
虞允文自采石来督舟师与金人战允文过镇江谒锜
问疾锜执允文手曰疾何必问朝廷养兵三十年一技不施而大功乃出一儒生我辈愧
死矣召诣阙提举万寿观锜假都亭驿居之金之聘使
将至留守汤思退除馆以待遣黄衣谕锜徙居别试院锜发怒呕血数升而卒赠开府仪
同三司谥武穆锜慷慨深毅有儒将风金海陵之南也
下令有敢言锜姓名者罪不赦枚举南朝诸将问其下孰敢当者皆随姓名以答至锜莫
有应者海陵曰吾自当之然锜卒以病不能成功

△吴玠

吴玠字晋卿德顺军陇千人父葬于永洛城因徙焉 【按王纶撰玠神道碑载曾祖
谦太子太保祖遂太子太傅父宸少保累世显烈明
庭杰功绩记云三世皆以义烈闻】 少沉毅有志节知兵善骑射读书能通大义未冠以
良家子隶泾原军政和中夏人犯边以功补进义副尉
稍擢队将从讨方腊破之及击河北羣盗累功权泾原第十将 【按功绩记作权泾原第
十一正将】 靖康初夏人攻怀德军玠以百余骑追
击斩首百四十级擢第二副将 【按功绩记作擢本路十二副将】 建炎二年春金人
趋泾原都统制曲端守麻务镇命玠为前锋进据青溪
岭逆击大破之权泾原路兵马都监兼知怀德军金人攻延安府曲端进兵欲攻其必救
遂攻蒲城命玠攻华州拔之冬剧贼史斌寇汉中不克
引兵欲取长安曲端命玠击斩之迁忠州刺史三年宣抚处置使张浚巡关陕参议军事
刘子羽诵玠兄弟才勇浚与玠语大悦即授统制弟璘
掌帐前亲兵四年春升泾原路马步军副总管 【按神道碑及功绩记俱作熙河路马步
军副总管宋名臣言行别录作熙河路副总管】 金
罗索与萨里罕长驱入关端遣玠拒于彭原店而拥兵邠州为援金兵来攻玠击败之金
人整军复战玠军败绩端退屯泾原劾玠违节度降武
显大夫罢总管复知怀德军张浚惜玠才寻以为秦凤副总管兼知凤翔府时兵火之余
玠劳来安集民赖以生转忠州防御使九月浚合五路
兵欲与金人决战玠言宜各守要害须其弊而乘之 【按张浚三战本末略张浚谋大举
召端问之复谋之玠玠以宜守要害以待其弊然后
可以徐图浚曰吾宁不知此顾今东南之事方急不得不为是耳此数语乃浚谋牵制金
人本意浚与玠传俱不载附识】 及次富平都统制又
会诸将议战玠曰兵以利动今地势不利未见其可宜择高阜据之使不可胜诸将皆曰
我众彼寡又前阻苇泽敌有骑不得施何用他徙已而

敌骤至輿柴囊土藉淖平行进薄玠营军遂大溃五路皆陷巴蜀大震玠收散卒保散关东和尚原积粟缮兵列栅为死守计或谓玠宜退守汉中扼蜀口以安人心玠曰我保此敌决不敢越我而进坚壁临之彼惧吾蹙其后是所以保蜀也玠在原上凤翔民感其遗惠相与夜输刍粟助之玠偿以银帛民益喜输者益多金人怒伏兵渭河邀杀之且令保伍连坐民冒禁如故数年然后止绍兴元年金将摩哩自凤翔别将敖拉扎哈自阶成出散关约日会和尚原敖拉扎哈先期至阵北山索战玠命诸将坚阵待之更战迭休山谷路狭多石马不能行金人舍马步战大败移砦黄牛会大风雨雹遂遁去摩哩方攻箭箬关玠复遣将击退之两军终不得合始金人之入也玠与璘以散卒数千驻原上朝问隔绝人无固志有谋劫玠兄弟北去者玠知之召诸将歃血盟勉以忠义将士皆感泣愿为用张浚录其功承制拜明州观察使居母丧起复兼陕西诸路都统制金人自起海角犴常胜及与玠战辄北愤甚谋必取玠罗索死乌珠会诸道兵十余万造浮梁跨渭自宝鸡结连珠营垒石为城进攻和尚原玠命诸将选劲弓强弩分番迭射号驻队矢连发不绝繁如雨注敌稍却则以奇兵旁击绝其粮道度其困且走设伏于神盆以待金兵至伏发众大乱纵兵夜击大败之乌珠中流矢仅以身免张浚承制以玠为镇西军节度使璘为泾原路马步军副总管乌珠既败遂自河东归燕山复以萨里罕为陕西经畧使屯凤翔与玠相持二年命玠兼宣抚处置使司都统制节制兴文龙三州金久窥蜀以璘驻兵和尚原扼其冲不得逞将出奇取之时玠在河池金人用叛将李彦琪驻秦州睨仙人关以缀玠复令游骑出熙河以缀关师古萨里罕自商于直捣上洋【按功绩记及张发功绩记叙引建炎以来朝野杂记梁洋张棫撰其父浚墓志作上津】三年正月取金州二月长驱趋洋汉兴元守臣刘子羽急命田晟守饶风关以驿书招玠入援玠自河池日夜驰三百里以黄柑遗敌曰大军远来聊用止渴萨里罕大惊以杖击地曰尔来何速耶遂大战饶风岭金人被重铠登山仰攻一人先登则二人拥后先者既死后者代攻玠军弓弩乱发大石摧压如是者六昼夜死者山积而敌不退募敢死士得五千将夹攻会玠小校有得罪奔金者导以祖溪闲路出关背乘高以阬饶风诸军不支遂溃玠退保西县敌入兴元刘子羽退保三泉筑潭毒山以自固玠走三泉会之未几金人北归玠急遣兵邀于武休关掩击其后军坠涧死者以千计尽弃輜重去金人始谋本谓玠在西边故道险东来不虞玠驰至虽入三郡而得不偿失进玠检校少保充利州路阶成凤州制置使四年二月敌复大入攻仙人关先是璘在和尚

原饷馈不继玠又谓其地去蜀远命璘弃之经营仙人关右杀金平鞬筑一垒移原兵守之至是乌珠萨里罕及刘夔率十万骑入侵自铁山凿崖开道循岭东下玠以万人当其冲璘率轻兵由七方关倍道而至与金兵转战七昼夜始得与玠合敌首攻玠营玠击走之又以云梯攻垒壁杨政以撞竿碎其梯以长矛刺之璘拔刀画地谓诸将曰死则死此退者斩金分军为二乌珠阵于东韩常阵于西璘率锐卒介其闲左萦右绕随机而发战久璘军少惫急屯第二隘金生兵踵至人被重铠铁钩相连鱼贯而上璘以驻队矢迭射矢下如雨死者层积敌践而登萨里罕驻马四视曰吾得之矣翌日命攻西北楼姚仲登楼酣战楼倾以帛为绳挽之复正金人用火攻楼以酒缶扑灭之玠急遣统领田晟以长刀大斧左右击明炬四山震鼓动地明日大出兵统领王喜王武率锐士分紫白旗入金营金阵乱奋击射韩常中左目金人始宵遁玠遣统制官张彦劫横山砦王俊伏河池拒归路又败之以郭震战不力斩之是役也金本谓蜀可图既不得逞度玠终不可犯乃还据凤翔授甲士田为久留计自是不妄动捷闻授玠陕川宣抚副使复凤秦陇三州拜检校少师奉宁保定军节度使六年兼营田大使易保平静难节七年遣裨将马希仲攻熙州败绩又失巩州玠斩之玠与敌对垒且十年常苦远饷劳民屡汰冗员节浮费益治屯田岁收五十万斛又调戍兵命梁洋守将治褒城废堰民知灌溉可恃愿归业者数万家九年金人请和帝以玠功高授特进开府仪同三司迁四川宣抚使陕西阶成等州皆听节制遣内侍奉亲札以赐至则玠病已甚扶掖听命帝闻而忧之命守臣就蜀求善医且饬国工驰视未至玠卒于仙人关年四十七赠少师谥武安玠善读史凡往事可师者录寘座右用兵本孙武务远畧不求小近利故能保必胜御下严而有恩卒伍至下者得以情达故士乐为之死选用将佐视劳能为高下先后不以亲故权贵挠之玠死胡世将问玠所以制胜者璘曰璘从先兄有事西夏每战不过一进却之顷胜负辄分至金人则更进迭退忍耐坚久与之角逐滋久乃得其情选据形便出锐卒更迭挠之与之为无穷使不得休暇以沮其坚忍之势至决机于两阵之闲则璘有不能言者方富平之败秦凤皆陷金人一意睨蜀东南之势亦棘微玠身当其冲无蜀久矣故西人至今思之作庙于仙人关号思烈【按宋名臣言行别录载诏立庙仙人关赐额曰忠烈】淳熙中追封涪王子五人拱扶搃扩惚【按神道碑及功绩记林泉野记俱祇载子三人拱扶搃无扩惚名拱名武扶搃皆文官】拱亦握兵云

△吴璘

吴璘字唐卿玠弟也 【按王曦撰璘神道碑曾大父谦赠封魏国公大父遂追封楚
国公考宸追封鲁国公】 少好骑射从玠攻战积功
至合门宣赞舍人绍兴元年箭箬关之战断摩哩与敖拉扎哈兵使不得合金人遁璘功
居多超迁统制军马于是玠驻师河池璘专守和尚原
及乌珠大入玠兄弟以死守之敌阵分合三十余璘随机而应至神垒伏发金兵大败乌
珠中流矢遁张浚承制以璘为泾原路马步军副都总
管升康州团练使三年迁荣州防御使知秦州节制阶文是岁玠败于祖溪岭时璘犹在
和尚原玠命璘弃原别营仙人关以防金人深入四年
乌珠萨里罕果以大兵十万至关下璘自武阶路入援先以书抵玠谓杀金平地阔远前
阵散漫须后阵阻隘然后可以必胜玠从之急修第二
隘璘冒围转战会于仙人关敌果极力攻第二隘诸将有请别择形胜以守者璘奋曰兵
方交而退是不战而走也吾度此敌去不久矣诸军第
忍之震鼓易帜血战连日金兵大败自是不敢窥蜀者数年露布献捷迁定国军承宣使
熙河兰廓路经畧安抚使知熙州六年亲置行营两护
军璘为左护军统制九年升都统制寻除秦凤路经畧安抚使知秦州玠卒授璘神龙卫
四厢都指挥使时金人废刘豫归河南陕西地楼照使
陕以便宜欲命三帅分陕而守以郭浩帅鄜延杨政帅熙河璘帅秦凤欲尽移川口诸军
于陕西璘曰金人反复难信惧有他变今我移军陕右
蜀口空虚敌若自南山要我陕右军直捣蜀口我不战自屈矣当且依山为屯控其要害
待其情见力疲渐图进据照从之命璘与杨政两军屯
内地保蜀郭浩一军屯延安以守陕既而胡世将以四川制置权宣抚司事至河地璘见
之曰金太兵屯河中府止隔大庆一桥尔骑兵疾驰不
五日至川口吾军远在陕西缓急不可追集关隘不葺粮运断绝此存亡之秋也璘家族
固不足恤如国事何时朝廷恃和忘战欲废仙人关于
是世将抗奏谓当外固欢和内修守御今日分兵当使陕蜀相接并言谍知萨里罕密谋
取蜀敌情如是仙人关未宜遽废鱼关仓亦宜积粮于
是璘仅以牙校三队赴秦州留大军守阶成山砦戒诸将毋得撤备世将寻真除宣抚置
司河池十年金人败盟诏璘节制陕西诸路军马萨里
罕渡河入长安趋凤翔陕右诸军隔在敌后远近震恐时杨政在巩郭浩在鄜延惟璘随
世将在河池世将急召诸将议惟泾原帅田晟与杨政
同至参谋官孙渥谓河池不可守欲退保仙人原璘厉声折之曰懦语沮军可斩也璘请
以百口保破敌世将壮之指所居帐曰世将誓死于此
乃遣渥之泾原命田晟以三千人迎敌璘又遣姚仲拒于石壁砦败之诏同节制陕西诸
路军马璘以书遗金将约战金鹞眼郎君 【按三朝

北盟会编作胡璘郎君】以三千骑冲璘军璘使李师颜以骁骑击走之鹞眼入扶风复攻拔之获三将及百十有七人萨里罕怒甚自战百通坊列阵二十里璘遣姚仲力战破之授镇西军节度使升侍卫步军都虞候十一年与金统军和珍战剡家湾败之复秦州及陕右诸郡初和珍与希卜苏合军五万屯刘家圈【按神道碑及宋名臣言行别录三朝北盟会编俱作丁刘圈】璘请讨之世将问策安出璘曰有新立迭阵法每战以长鎗居前坐不得起次最强弓次强弩跪膝以俟次神臂弓约敌相搏至百步内则神臂先发七十步强弓并发次阵如之凡阵以拒马为限铁钩相连俟其伤则更代之遇更代则以鼓为节骑两翼以蔽于前阵成而骑退谓之迭阵诸将始犹窃议曰吾军其歼于此乎璘曰此古束伍令也军法有之诸君不识尔得车战余意无出于此战士心定则能持满敌虽锐不能当也及与二将遇遂用之二将老于兵据险自固前临峻岭后控腊家城谓我必不敢轻犯先一日璘会诸将问所以攻姚仲曰战于山上则胜山下则败璘以为然乃告敌请战敌笑之璘夜半遣仲及王彦珩枚截坡约二将上岭而后发火二将至岭寂无人声军已毕列万炬齐发敌骇愕曰吾事败矣希卜苏善谋和珍善战二人异议璘先以兵挑之和珍果出鏖战璘以迭阵法更休迭战轻裘驻马亟麾之士殊死鬪金人大败降者万人和珍走保腊家城璘围而攻之城垂破朝廷以驿书诏璘班师世将浩叹而已明年竟割和尚原以与敌撤戍割地皆秦桧主之也十二年入觐拜检校少师阶成岷凤四州经畧使赐汉中田五十顷十四年朝议析利州路为东西路以璘为西路安抚使治兴州阶成和凤文龙兴七州隶焉时和议方坚而璘治军经武常如敌至十七年徙奉国军节度使改行营右护军为御前诸军都统制安抚使如故二十一年以守边安静拜少保【按宋史高宗本纪及神道碑俱作二十一年拜太尉二十九年拜少保宋名臣言行别录作十七年加太尉】二十六年领兴州驻扎御前诸军都统制职事改判兴州渡江以来未有使相为都统制者时璘已为开府仪同三司故改命之三十一年拜四川宣抚使秋金海陵渡淮遣喀齐喀为西元帅以兵扼大散关游骑攻黄牛堡璘即肩輿上杀金平驻军青野原益调内郡兵分道而进授以方畧制置使王刚中来会璘计事璘寻移檄契丹西夏及山东河北声金人罪以致讨未几兼陕西河东招讨使【按神道碑及宋名臣言行别录俱作三十一年追封成国公明年拜少保】璘以病还兴州总领王之望驰书告执政谓璘多病猝有缓急蜀势必危请移璘侄京襄师拱归蜀以助西师凡五书未报璘已力疾复上仙人关三十二年璘

遣姚仲取巩王彦屯商虢陕华惠逢取熙河或久攻不下或既得复失竟无成功金人据大散关六十余日相持不能破仲舍巩攻德顺已踰四旬璘以知夔州李师颜代之遣子挺节制军马挺与敌战于瓦亭败之璘自将至城下守陴者闻呼相公来观望咨嗟矢不忍发璘按行诸屯预治黄河战地斩不用命者先以数百骑尝敌敌一鸣鼓锐士空壁跃出突璘军璘军得先治地无不一当十至暮璘忽传呼某将战不力人益奋搏敌大败遁入壁会天大风雷金人拔营去凡八日而克璘入城市不改肆父老拥马迎拜不绝璘寻还河池四月原州受围璘命姚仲以德顺之兵往援璘自趋凤翔视师诸将虽力战敌攻益急增兵至七万五月仲与敌战于原州之北岭仲败绩始璘出师王之望尝言此行士卒锐气不及前时仲年来数奇不可委以要地及仲至原璘亦遣仲书谓原围未即解且还德顺书未达而仲败璘亦无功还寻夺仲兵欲斩之或劝而止械系河池狱孝宗受禅赐璘札命兼陕西河东路宣抚招讨使 【按神道碑及宋名臣言行别录俱作隆兴元年拜少师】 璘策金人必再争德顺亟驰赴先下而完颜锡林等兵果来攻万户和和复领精兵自凤翔继至璘筑堡东山以守敌极力争之杀伤大牛终不能克时议者以为兵宿于外去川口远恐敌袭之欲弃三路遂诏璘退师敌乘其后璘将士死亡者甚众三路复为敌有拜少傅隆兴二年冬金人侵岷州璘提兵至祁山金人闻之退师遣使来告曰两国已讲和矣会诏至俱解去沈介为四川安抚制置使与璘议不协兵部侍郎胡铨上书语颇及璘璘抗章请朝上亲札报可未半道请罢宣抚使及致仕皆不允干道元年 【按神道碑及宋名臣言行别录俱作干道元年拜太傅进封新安郡王】 诣阙遣中使劳问召对便殿许朝德寿宫高宗见璘叹曰朕与卿老君臣也可数入见璘顿首谢两宫存劳之使相踵又命皇子入谒拜太傅封新安郡王越数日诏仍领宣抚使改判兴元府及还镇两宫宴饯甚宠璘入辞德寿宫泣下高宗亦为之怅然解所佩刀赐之璘至汉中修复褒城古堰溉田数千顷民甚便之三年卒年六十六赠太师 【按神道碑及宋名臣言行别录俱作请老之奏闻以太师致仕】 追封信王上震悼辍朝两日赙赐加等高宗复赐银千两初璘病笃呼幕客草遗表命直书其事曰愿陛下毋弃四川毋轻出兵不及家事人称其忠璘刚勇喜大节畧苛细读史晓大义代兄为将守蜀余二十年隐然为方面之重威名亚于玠高宗尝问胜敌之术璘曰弱者出战强者继之高宗曰此孙臆三驷之法一败而二胜也尝着兵法二篇大畧谓金人有四长我有四短当反我之短制彼之长四长曰骑兵曰坚忍曰重甲曰弓矢吾

集蕃汉所长兼收而并用之以分队制其骑兵以番休迭战制其坚忍制其重甲则劲弓强弩制其弓矢则以远克近以强制弱布阵之法则以步军为阵心左右翼以马军为左右肋拒马布两肋之闲至帖拨增损之不同则系乎临机知兵者取焉王刚中尝谈刘锜之美璘曰信叔有雅量无英槩天下雷同誉之恐不能当敌锜果无功以忧愤卒璘选诸将率以功有荐才者璘曰兵官非尝试难知其才以小善进之则侥幸者获志而边人宿将之心怠矣子挺 【按神道碑载璘子十二人】

吴挺

吴挺

挺字仲烈以门功补官以璘为中郎将部西兵诣行在高宗问西边形势兵力与战守之宜挺占对称旨超授右武郎浙西都监兼御前祗候寻差利路钤辖改利州东西路前军同统制绍兴三十一年金人渝盟璘以宣抚使总三路兵御之挺愿自力军前璘以为中军统制既复秦州金将喀齐喀贝勒介叛将张中彦以兵来争挺破其治平砦已而南市城贼亦犄角为援转战竟日挺令前军统制梅彦麾众直据城门众弗喻彦亦惧力不敌出兵殊死战挺率背嵬骑尽易黄旗绕出敌后凭高突之敌哗遂惊败挺不自为功状彦第一士颇多之璘亦引嫌并匿其功擢荣州刺史寻拜熙河经畧安抚使明年挺被檄与都统制姚仲率东西路兵攻德顺金左都监空平凉之众以援喀齐喀又遣精兵数万自凤翔来会仲驻军六盘挺独趋瓦亭自冒矢石众从之金人舍骑操短兵奋鬪挺遣别将尽夺其马金众遂溃挺勒兵追之禽千户耶律纠坚贝勒等百三十七人金人怨前衄悉兵趋德顺璘自秦州来督师先壁于险且治夹河战地金人果大至挺诱致之至所治战地盛兵蹙之敌不能支一夕遁去巩州久不下挺以选锋至城下诸将咸曰西北坡陲地易攻若分兵各当一面宜得利挺曰西北虽卑而土坚东南并河多沙砾善圯且兵分则少以少当坚城可得而下乎乃命悉众击东南陬不二日楼橹俱尽夜半其将雷千户约降黎明城破以功授团练使又以瓦亭功授郢州防御使孝宗即位加璘兼陕西河东路招讨宣抚使璘虑敌必再争德顺至自河池金人果合兵十余万列栅以拒有骑数千睨东山璘命挺领骑迎击却之遂据东山筑堡以守敌不能争乃益修攻具为大车载土其中将填隍而进挺命抡大木植中道车至不得前拜武昌军承宣使寻加龙神卫四厢都指挥使熙河路经畧安抚使中军统制时年二十五会朝廷主议和诏西师解严父子遂旋军干道元年升本军都统制三年以父命入奏拜侍卫亲步军指挥使节制兴州军马璘卒起复金州都统金房开达

安抚使改利州东路总管挺力求终丧服除召为左卫
上将军朝廷方议置神武中军五千人以属御前命挺为都统制挺力陈不当轻变祖宗
法事遂寝拜主管侍卫步军司公事挺每燕见从容尝
论两淮形势旷漫备多力分宜择胜地扼以重兵敌仰攻则不克越西南又不敢我以全
力乘其弊蔑不济者帝颇嘉纳淳熙元年改兴州都统
拜定江军节度使奏复军中互市岁市来羌马七百匹西路骑兵遂雄天下始武兴所部
就饷诸郡漫不相属挺奏以十军为名自北边至武兴
列五军曰踏白摧锋选锋策锋游奕武兴以西至绵为左右后三军而驻武兴者前军中
军营部于是井井除知兴州利州西路安抚使密修皂
郊堡增二堡缮戎器储于两库敌终不觉特加检校少保成州西和岁大侵挺力为賑恤
谕总赋者分军储以佐之全活殆数千万西和阶成凤
文龙六州器械弗缮挺节冗费庀工徒悉勦为之郡东北有二谷水挺作二堤以捍之绍
兴二年水暴发入城挺既賑被水者复增筑长堤民赖
以安诏问备边急务即建增储之策由是粮糗不乏四年春以疾乞致仕诏加太尉卒年
五十六赠少师开府仪同三司挺少起勋阀弗居其贵
拊循将士人人有恩璘故部曲拜于庭下辄降答之至失律诛治无少贷璘尝对孝宗言
诸子中惟挺可任

△李显忠

李显忠字君锡 【按张抡撰李显忠行状增】 绥德军清涧人也初名世辅南归
锡名显忠由唐以来世袭苏尾九族巡检年十七随父
永奇出入行阵金人犯鄜延经畧王庶命永奇募闲者显忠请行与张琦俱有敌人夜宿
陶穴显忠缒穴中得十七人皆杀之取首二级马二匹
余马悉折其足庶大奇之补承信郎充队将由是知名转武翼郎充副将金人陷延安授
显忠父子官永奇泣曰我宋臣也世袭国恩乃为彼用
耶会刘豫令显忠帅马军赴东京永奇密戒之曰汝若得乘机即归本朝无以我故贰其
志显忠至东京刘麟喜之授南路钤辖乃密遣其客雷
灿以蜡书赴行在己而豫废乌珠以万骑驰猎淮上与显忠独立马围场闲显忠戒吴俊
往探淮水可渡马处欲执乌珠归朝俊还显忠驰问之
为竹刺伤马而止乌珠授显忠承宣使知同州显忠至鄜省侍永奇教显忠曰同州入南
山乃金人往来驿路汝可于此擒其将渡洛渭由商虢
归朝第报我知我当以兵取延安而归显忠赴同州即遣黄土成等持书由蜀至吴报归
朝事元帅萨里罕来同州显忠以计执之驰出城至洛
河舟船后期不得渡与追骑屡战皆胜显忠憩高原望追骑益多乃与萨里罕折箭为誓
不得杀同州人不得害我骨肉皆许之遂推下山崖追

兵争救得免显忠携老幼长驱而北至鄜城县急遣人告永奇永奇即携家出城至马翅谷口为金人所及家属二百口皆遇害是日天昏大雪延安人闻之皆泣下显忠仅以二十六人奔夏国夏人问故显忠泣具言父母妻子之亡切齿疾首恨不即死愿得二十万人生擒萨里罕取陕西五路归于夏显忠亦得报不共载天之讎夏主曰尔能立功则不靳借兵时有羌豪号青面夜叉者久为夏国患乃令显忠图之请三千骑昼夜疾驰奄至其帐擒之以归夏主大悦即出二十万骑【按行状作夏主出兵十万授显忠乃鼓行而西】以文臣王枢武臣伊特鄂为陕西招抚使显忠为延安招抚使时绍兴九年二月十四日也显忠引兵至延安总管赵惟清大呼曰鄜延路今复归宋矣已有赦书显忠与官吏观赦书列拜大哭乃以旧部八百余骑往见王枢伊特鄂谕之曰显忠已得延安府见讲和赦书招抚可以本部军归国伊特鄂不从曰初经畧乞兵来取陕西今既到此乃令我归耶显忠知势不可乃出刀斫伊特鄂不及擒王枢缚之夏人以铁鹞子军来显忠以所部拒之夏兵大溃杀死蹂践无虑万人获马四万匹显忠揭榜招兵每得一人予马一匹旬日闲得万人皆骁勇少壮又擒害其父母弟侄者皆斩于东城之内行至鄜州已有马步军四万余萨里罕在耀州闻显忠来一夕遁去四川宣抚吴玠遣张振来抚谕云两国见议和好不可生事可量引军赴行在遂至河池县见玠玠抚之曰忠义归朝惟君第一从行使臣崔皋等六百余人列拜庭下玠又抚之犒以银绢诣行府受告敕金带除指挥使承宣使至行在高宗抚劳再三赐名加赉又锡田镇江以崔皋辈充将佐乌珠犯河南命显忠为招抚司前军都统制与李贵同破灵璧县乌珠犯合肥手诏以军与张俊会显忠至孔城镇与敌战败之乌珠谓韩常曰李世辅归宋不曾立功此人敢勇宜且避之乃焚庐江而走显忠欲追之与死战俊以奉旨监护虑失显忠遂各以军还太后至临安显忠入覲加保信军节度使浙东副总管显忠熟西边山川险易因上恢复策忤秦桧意金使言显忠私遣人过界遂降官奉祠台州居住复盗国军节度使升都统制三十一年金渝盟诏显忠以本部捍御遣统制官韦永寿等以二百骑至安丰军与金将小韩将军兵柝千人战于大人洲【按宋史高宗本纪绍兴三十一年冬十月李显忠遣统制孔福与金人战于大人洲又按三朝背盟会编载金渝盟系绍兴三十一年事本传作二十九年今既据改】败之俄又增兵万余来显忠率骑军出自旦至午气百倍以大力斫敌阵敌不能支杀获甚众掩入淮者不可计金海陵犯淮西朝廷命王权拒于合肥权退保和州又弃军渡江和州失守金军驻和之

鸡龙山将济采石朝廷诏以显忠代权命虞允文趣显忠交军军中大喜于是有采石之捷语在允文传显忠退军沙上得杨存中报车驾至平江可速进兵显忠选锐士万人渡江尽复淮西州郡军至横山涧与金射鵰军战统制顿遇重伤韦永寿死之敌兵败走金海陵切责诸将不用命诸将弑之而还是役也显忠所将一万九千八百六人皆行赏有差张振功为最诏赐显忠五子金带授淮南制置使京畿等处招讨使擢太尉盩厔军节度使主管侍卫马军司公事赴行在孝宗即位赐田百顷 【按行状作赐田七十顷】 兼权池州驻札御前诸军都统制节制军马隆兴元年兼淮西招抚使时金世宗新立山东河北豪杰蠡起耶律诸种兵数十万据数郡之地太行山忠义耿京王世隆辈皆欲挈地还于朝金惧亟请和显忠阴结金统军萧琦为内应请出师自宿亳趋汴由汴京以通关陕关陕既通则鄜延一路熟知显忠威名必皆响应且欲起其旧部曲可得数万人以取河东时张浚开都督府四月命显忠渡江督战乃自濠梁渡淮至陡沟琦背约用拐子马来拒与战败之琦复背城列阵显忠躬率将士鏖战琦败走遂复灵璧入城宣布德意不戮一人中原归附者踵接时邵宏渊围虹县未下显忠遣灵璧降卒开谕祸福金贵戚大周仁及富察图们皆出降宏渊耻功不自己出又有降千户诉宏渊之卒夺其佩刀显忠立斩之由是二将益不相能六月兵傅宿州城金人来拒显忠败之斩其左翼都统及首虏数千人追奔二十余里宏渊至谓显忠曰招抚真关西将军也显忠闭营休士为攻城计宏渊等不从显忠引麾下杨椿上城开北门不踰时拔其城宏渊等殿后趋之乃始渡濠登城城中巷战又斩数千人擒八十余人遂复宿州举寄居官刘时摄州事捷闻授显忠开府仪同三司殿前都指挥使妻周氏封国夫人宏渊欲发仓库犒士卒显忠不可移军出城止以见钱犒士士皆不悦金帅博索自南京率步骑十万来晨薄城列大阵显忠亲帅军遇于城南战数十合博索大败遂退走统制李福统领李保各以所部退避皆斩以徇翼日敌益兵至显忠约宏渊并力夹击宏渊按兵不动显忠独与所部力战百余合杀左翼都统及千户万户斩首五千余人俄增兵复来逼城显忠用克敌弓射却之宏渊顾众曰当此盛夏摇扇于清凉犹觉不堪况烈日中被甲苦战乎人心遂摇无鬪志至夜中军统制周宏鸣鼓大噪阳谓敌兵至与邵世雍刘侁各以所部兵遁继而统制左士渊统领李彦孚亦遁显忠移军入城殿司前军统制张训通马司统制张师颜池州统制荔泽建康统制张渊各遁去金人乘虚复来攻城显忠竭力捍御斩首二千余人积尸与羊马墙平城东北角敌兵二十余人已上百

余步显忠取军所执斧斫之敌始退却显忠曰若使诸军相与犄角自城外掩击则敌兵可尽金帅可擒河南之地指日可复矣宏渊又言金漆生兵二十万来倘我军不返恐不测生变显忠知宏渊无固志势不可孤立叹咤曰天未欲平中原耶何沮挠若此是举所丧军资器械殆尽幸而金不复南显忠以军还见浚纳印待罪责授果州团练副使潭州安置后朝廷知其故移抚州干道改元而还会稽复防御使观察使浙东副总管赐银三万两绢三万匹绵一万两提举台州崇道观召除威武军节度使左金吾卫上将军赐第京师上奇其状貌魁杰命绘像阁下复太尉乞祠提举兴国宫绍兴府居住岁赐米二千石淳熙四年召赴行在提举万寿观奉朝请赐内库金再葺前所赐第赐之七月卒年六十九赠开府仪同三司 【按行状载赠开府仪同三司陇西郡开国公官其后七人并载子十六人其一未仕师政师道皆战歿师颜右武大夫高州刺史陇西郡开国子】 谥忠襄

△杨存中

杨存中本名沂中字正甫绍兴闲赐名存中代州崞县人祖宗闵永兴军路总管守永兴与金人战死之父震知麟州建宁砦亦死于难存中魁梧沈鸷少警敏诵书数百言力能绝人慨然语人曰大丈夫当以武功取富贵焉用俯首为儒于是学孙吴法善骑射宣和末山东河北羣盗四起存中应募击贼积功至忠翊郎靖康元年金人再围汴京诸道兵勤王存中与张俊田师中从信德府守臣梁杨祖以万兵入援后隶张俊部曲上问将于俊俊以存中对召见赐袍带时元帅府草创存中昼夜护卫寝幄不顷刻去侧帝知其忠谨亲信之剧贼李昱据任城久不克存中以数骑入击杀数百人帝乘高望见介胄尽赤意其被重创召视之皆污贼血壮之饮以酒曰酌此血汉存中请复往帝止之存中曰此贼胆碎即成擒矣遂大破之复任城迁合门祗候建炎二年讨贼徐明于嘉兴先登主帅将屠城存中力谏止之戮其渠魁郡赖以全迁荣州刺史高宗南渡以胜捷军从张俊守吴门苗刘之变又从俊赴难迁贵州团练使寻为御前右军统领金人攻明州又从俊与田师中赵密死战破之以奇功迁文州防御使御前中军统制绍兴元年从俊讨李成诸将议多欲分道进存中曰贼势如此兵分则力弱又诸将位均势敌非招讨督之必不相为用俊然之整军至豫章存中率兵数千首破贼于玉隆观追至筠州贼骁将以众十万来援夹河而营存中谓俊曰彼众我寡击之当用奇愿以骑见属公以步兵居前俊从之存中夜衔枚渡筠河出西山驰下击贼俊以步兵夹攻俘八千人诸将夜见存中曰战未休降卒多

忽有变奈何非尽歼之不可存中曰杀降吾不忍诸将转告俊竟夜坑之乘胜追至九江成遂遁去迁宣州观察使二年春进神武中军统制存中固辞且谓神武诸帅如韩世忠张俊皆贵拥旄钺名望至重如臣么么一旦位与之抗实不自安不许遣中使宣押乃视事兼提举宿卫亲兵时中军卒不满五千疲癯者居半存中请拘神武卒借出于外者归军中由是军政寢修三年严州妖贼繆罗据白马源杀王官存中讨平之除带御器械加保信军承宣使权发遣鄜延路马步军副总管六年为龙神卫四厢都指挥使密州观察使先是张俊视师谋渡淮以图刘豫倚韩世忠为用世忠围淮阳从浚乞张浚将赵密为助浚拒之赵鼎语浚曰存中武勇不减于密宜令助之浚请于朝故有是命于是存中以八队万人趋督府助世忠十月存中与刘猷战于藕塘大破之猷之初入也淮西宣抚使刘光世欲弃庐州退保太平贼众十万已次濠寿闲浚命张俊拒之使存中往泗州与俊合及至泗则光世已舍庐去浚遣人谕之曰一人渡江即斩以徇光世不得已还庐驻兵与存中相应贼先犯定远县存中以兵二千袭败于越家坊既而与猷兵遇藕塘贼据山列阵矢下如雨存中急击之且使统制吴锡以劲骑五千突其阵阵乱存中鼓大军乘之自以精骑冲其胁大呼曰破贼矣贼错愕骇视前军统制张宗颜自泗来乘背击之贼大败猷以首抵谋主李愕曰适见髯将军锐不可当果杨殿前也即以数骑遁去余党万人僵立失措存中跃马叱之皆怖而降麟在顺昌孔彦舟方围光州闻之皆拔砦遁去北方大恐所得贼舟数百艘车数千两捷闻帝遣中使劳赐除保成军节度使殿前都虞候寻兼领马步帅七年为淮南西路制置使九年迁殿前副都指挥使十年金人取河南命存中为淮北宣抚副使引兵至宿州以步军退屯于泗金人诡令来告敌骑数百屯柳子镇存中欲即击之自将五百骑【按三朝北盟会编作自将骑兵五千】夜袭柳子镇黎明不见敌而还金人以精兵伏归路存中知之遂横奔而溃参议官曹勋不知存中存亡以闻朝廷震恐于是有权宜退保之命既而存中自寿春渡淮归泗人心始安冬引兵还行在十一年乌珠耻顺昌之败复谋来侵诏大合兵于淮西以待之于是存中以殿司兵三万戍淮与金人战于柘皋败之时张俊为宣抚使存中为副使刘锜为判官王德为都统制田师中张子盖为统制官金人以拐子马翼进存中曰敌恃弓矢吾有以居之使万人操长斧如墙而进诸军鼓噪奋击金人大败退屯紫金山是役也失将士九百人金人死者万计而濠围犹未解俊与存中锜先议班师会有云濠路已通者俊谓锜曰吾欲与杨太尉耀兵淮上安抚濠梁之民取宣化归

金陵杨太尉则渡瓜州还临安明日命二帅行谍报金攻濠甚急仓皇复回邀锜会于黄连埠距濠六十里闻城陷召存中锜谋之锜谓存中何以处此存中曰战尔相公与太尉在后存中当居前锜曰本来救濠濠已失进无所依人怀归心胜气已索不若退师据险俟其去为后图俊自以为功谓锜毋往命存中与德偕至濠列阵未定烟起城中金人伏骑万余分两翼出存中顾德曰何如德曰德小将焉敢预事存中以策麾军曰那回诸军以为令其走也遂散乱南奔无复纪律金人追杀甚众后一日韩世忠大军至已无及矣存中乃自宣化渡江归行在加检校少保开府仪同三司兼领殿前都指挥使盖录柘皋之功而揜濠梁之败也十二年徽宗梓宫攢永固陵命存中都护竣事拜少傅以保傅为管军自存中始十四年存中请诣太学谒先圣二十年封恭国公二十八年拜少师恩数视枢密使存中以凡重地皆有统制官独荆襄无之请于朝于是荆南襄阳初置诸统制存中在殿岩凡二十五载权宠日盛太常寺主簿李浩敕令所删定官陆游司封员外郎王十朋殿中侍御史陈俊卿相继以为言三十一年罢为太傅醴泉观使进封同安郡王赐玉带朝朔望时金海陵有南侵意存中上备敌十策步帅赵密谋夺存中权因指为喜功生事存中闻之上章乞免密竟代之未几边声日急九月诏存中为御营宿卫使刘汜战败于瓜州命存中往京口为守江计虞允文自采石来会存中与之协力拒敌敌不能济帝如建康诏存中扈蹕金使复请和存中请拘之江口移书审问若能归我族属还旧壤损岁币复白沟之界以通兄弟之好如是则和议可从不然后请斩其使亟图恢复会驾还以存中为江淮荆襄路宣抚使给舍不书黄命遂寝未几仍奉祠隆兴元年王师溃于符离复起存中为御营使二年金人再入关议割蜀之和尚原以畀之存中言此陇右之藩要敌得之则可以睥睨汉川我得之则可以下兵秦雍曩议予金人吴璘力争不从今璘在远不及知臣若不言非等负陛下亦有愧于璘近者王师尽锐而后得愿毋弃未几金人复攻淮甸诏存中同都督江淮事时诸军各守分地不相统一存中集诸将调护之于是始更相为援会金兵已深入朝议欲舍淮保江存中持不可乃已金兵在扬州或劝存中击之存中不敢渡独临江固垒以老之金人寻请盟干道元年班师加昭庆军节度使复奉祠时兴屯田存中献私田在楚州者三万九千亩二年卒年六十五追封和王谥武恭高宗追念旧臣贖钱十万存中天资忠孝敢勇大小二百余战身被五十余创宿卫出入四十年最寡过孝宗以为旧臣尤礼异之常呼郡王而不名父祖及母皆死难存中既显请于朝宗闵谥忠介震谥忠毅赐庙曰

显忠曰报忠又以家庙祭器为请遂许祭五世前所无也祖母刘流落蜀陇存中日夜禱祠访问闲关数千里卒迎以归御军宽而有纪所用将士专以才勇选不私部曲之旧李显忠以罪斥存中奏为统制官后为名将尝以克敌弓虽劲而蹶张难遂以意创马皇弩思巧制工发易中远人服其精子倏倏

△郭浩

郭浩字充道顺德军陇千人以父成任三班奉职徽宗时充环庆路部将尝率百骑抵灵州城下夏人以千骑追之手斩二骑以首还充渭州兵马都监从种师道进筑葺平砦敌据塞水源以渴我师浩率精骑数百夺之敌攻石尖山浩冒阵而前流矢中左肋怒不拔奋力大呼得贼乃已诸军从之敌遁去由是知名累迁中州刺史钦宗即位进安州团练使以种师道荐召对奏言金人暴露日久思归乞给轻兵闲道驰滑台时其半度可击会和战异议不能用帝问西事浩对曰夏人必乘闲盗边愿选将设备已而果攻泾原路取西安州怀德军绍圣开拓之地复尽失之种师道中制置河东辟以自随建炎元年知原州二年金人取长安泾州守臣夏大节弃城遁郡人亦降浩适夜半至郡所将纔二百人得金人不杀使之还曰为语汝将我郭浩也欲战即来决战金人遂引去升本路兵马钤辖知泾州权主管鄜延路经略安抚时二敌交侵鄜延之东皆金人西北即夏境其属朝廷者惟保安一军德静一砦浩闲道至德静置司招收散亡与敌对垒一年敌不能犯再除泾原路兵马钤辖知泾州浩去夏人复来权帅耿友谅仅以身免一路尽陷张浚为宣抚处置使以浩为秦凤路提点刑狱权经略使知秦州时浚经略陕西檄五路帅悉所部兵会于富平浩独谓敌锋方锐且当分守其地犄角相援俟衅而动浚不听师出果败五路俱陷浚复以浩旧官移知凤翔府又退保和尚原金人抵原下浩与吴玠随方捍御蜀以安全第功迁正任防御使绍兴元年金人破饶风岭盗梁洋入凤州攻和尚原浩与吴玠往援斩获万计迁邠州观察使徙知兴元府饥民相聚米仓山为乱浩讨平之徙知利州金人以步骑十余万破和尚原进窥川口浩与吴玠大破之迁彰武军承宣使玠按本路提点刑狱宋万年阴与敌境通利与浩所鞫不同由是不协朝廷乃徙浩知金州兼永兴军路经略使金州残弊特甚户口无几浩招辑流亡开营田以其规置颁示诸路他军以匱急仰给朝廷浩独积赢钱十万缗以助户部朝廷嘉之凡有奏请得以直达九年改金洋房州节制金人还河南地浩为龙神卫四厢都指挥使充陕西宣谕使知金州楼照行关中辟浩枢密院都统制节制陕西军马十年拜奉

国军节度使五路陷徙知夔州移金州仍永兴路经略安抚使节制陕西河东兼措置河
东路忠义军马十一年金人内侵安抚使胡世将召浩
及吴璘杨政会仙人原授以攻取之策浩遣裨将设伏破之十四年召见拜检校少保还
镇锡以御府金器绣鞍仍官一子文资赐田五十顷别
与一子阁职是岁分利州为东西两路以浩为金房开达州经略安抚使兼知金州枢密
院都统制屯金州仍建帅府十五年卒年五十九赠检
校少师谥恭毅淳熙元年赐立庙金州

△杨政

杨政字直夫原州临泾人父忠与夏战歿政甫七岁哀号如成人其母奇之宣和末
应募为弓箭手靖康初因拒夏人稍知名建炎闲从吴
玠击金人九战九捷累功至武显郎绍兴元年春金人趋和尚原又攻箭箐关政引兵大
破之迁右武大夫十月金兵大集号十万自宝鸡列栅
至原下吴玠相与持累日以政统领将兵迎敌日数十合士卒无一当百复出奇兵断
其粮道敌少却遮击之俘获千人拜恭州刺史时有嫉
政者以母妻尚留北境不宜属以兵权玠不听政益感奋二年金合步骑数千栅鱼龙川
口政帅精兵劫破之升陇州团练使移知方山原军储
刍谷咸在其中三月金大军来攻城且下政击败之改知凤州三年金攻饶风关政从玠
战关下凡六日改明州观察使四年萨里罕裒精兵十
万欲道仙人关入蜀至上奢田玠筑垒于关外政曰此地为蜀阨塞当坚守时出奇击之
玠用其言金人变态多端政随机应之连日百余战敌
帅督战益急政命卒以神臂弓射之又选甲士千余出山谷断其兵使不得进退又出敌
不意夜斫其营敌遂遁去追至河池而还授龙神卫四
厢都指挥使环庆路经略安抚使五年金人攻淮玠命政帅师乘机牵制至秦州一战而
拔抚定居民改经略安抚泾原兼帅环庆利路三镇事
丛集剖决无滞母留敌境闲遣人省视之母惟勉以忠义九年春和议成始得迎母及兄
弟归乞祠以便养不许诏封其母感义郡夫人以政为
熙河兰巩路经略安抚使知熙州进武康军承宣使十年徙利州又徙兴元会金人渝盟
政建迎敌之策兼川陕宣抚副使司都统制偕统制杨
从义劫金人于凤翔府城南砦败之获战马数百母卒起复遂帅师趣宝鸡渭水上以拒
敌冲凡大战七斩获甚多川陕宣抚副使胡世将奏凤
翔之捷政奋不顾身功效显著拜武当军节度使十一年秋金将和珍希卜苏合军五万
来攻政与吴璘郭浩会于仙人原世将授以攻取之策
政引兵夜入陇州界败金万户通检于宝鸡时通检居渭北政欲攻拔其城通检将精甲
万众出政帅勇士鏖战遣裨将突出阵后登山执帜金

军见之大呼曰伏发矣乃惊溃政乘胜掩杀擒通检和议成帝召政还军民诣部使者借留入见条奏帝善之十三年还镇加检校少保久之拜太尉二十七年卒年六十赠开府仪同三司谥襄毅政守汉中十八年六堰久坏失灌溉之利政为修复汉江水决为害政筑长堤捍之凡利于民者不敢以军旅废休兵十余年未尝升迁将士上下安之政故为吴璘裨将及与璘分道建帅执门下之礼益恭世颇贤之

钦定续通志卷三百七十二

●钦定续通志卷三百七十三 列传一百七十三

列传

宋 【七十七】

○宋七十七

王德

王彦

魏胜

张宪

杨再兴

牛皋

胡闳休

王德

王彦

魏胜

张宪

杨再兴

牛皋

胡闳休

△王德

王德字子华通远军熟羊砦人以武勇应募隶熙帅姚古会金人入侵古军怀泽间遣德谍之斩一将而还补进武校尉从十六骑径入隆

德府治执伪守姚太师左右惊扰手杀数十百人众愕眙莫敢前古械姚献于朝钦宗问状姚曰臣就缚时止见一夜叉耳时遂呼德为王夜叉

建炎元年以勤王师倍道趋阙改隶刘光世平济南寇李昱池阳寇张遇光世讨李成德为先锋以百骑觜贼至上蔡驿口桥贼疑为诱骑拥众

欲西德麾骑大呼曰王师大至矣贼骇遁追杀甚众成奔新息收散卒复战贼见光世张盖行阵不介胄知为主帅并兵围之德突围拥光世还

军遂袭败李成授武略大夫三年春迁前军统领屯天长金人攻扬州西军多溃德趋宣化会叛将张昱张彦围和州太守张绩求援于德德兵

傅城下贼不意其至大溃迟明接战斩昱 【按宋名臣言行别录载张育聚兵五万据和州令德听其节制德不从育亲领三千兵来劫之德

尽伏其兵于深林草中育至不见德乘马往来于草中寻之德与弟青并王世忠挺鎗跃

出刺育坠马斩之复移文城中招育诸将诸将皆降与本传互异】 俘其兵骑万数济自采石光世方讨苗刘之逆迎至建康谓德曰江都之扰诸军不窳则盗公可仗义夜涉大江徇国急变遂以军属光世会苗刘走闽中诏德追击隶韩世忠德欲自致功名而世忠必欲德为之使遣亲将陈彦章邀德于信州彦章拔佩刀击德德杀彦章尸诸市至浦城斩苗瑀擒马柔吉送行在世忠讼其擅杀下台狱当死帝命特原之编管郴州时光世屯九江得杨惟忠所失空头黄敕即以便复德前军统制遣平信州妖贼王念经行次饶州会贼刘文舜围城德引兵赴之文舜请降德纳而诛之倍道趋信州擒念经献于朝诏还旧秩加武显大夫荣州刺史四年光世镇京口以德为都统制金兵复南光世将退保丹阳德请以死捍江分军扼险度江袭金人收真扬数郡既而又遇敌于扬州北有被重铠突阵者直前刺德德挥刀迎之即坠马因麾骑乘之所杀万计绍兴元年平秀州水贼邵青初德与战于崇明沙青军大溃他日余党复索战谍言将用火牛德笑曰是古法也可一不可再先命合军持满阵始交万矢齐发牛皆返奔贼众歼焉青自缚请命德献俘行在召见便殿迁中亮大夫同州观察使三年命韩世忠代光世德自京口逆世忠徒步立道左抗言曰擅杀陈彦章请死世忠下马握其手曰知公好汉乡来纤介不足寘怀乃设酒尽欢而别为行营左护军前军统制金兵掠江北破滁州德越江袭夺之追至桑根擒万户隆布一人千户十余人改环庆副总管六年冬刘豫遣麟猊分道入寇德大败猊兵于藕塘猊挺身走麟在顺昌闻之亦拔砦遁德追至寿春弗及获其粮舟四百艘第功除武康军承宣使真拜相州观察使七年改熙河兰廓路副总管行营左护军都统制驻师合肥会光世罢宣抚诏德尽护其众以酈琼副之琼与德故等夷耻屈其下率众叛从刘豫八年命隶张俊名其军曰锐胜十年解颍昌围俊檄德就取宿州德倍道自寿春驰至蕲县与敌游骑遇遂入城偃旗仆鼓骑引去因潜师宿州夜半薄金营敌阻汴水邀战德策马先济步骑从之金将高统军投兵降守将马秦耶律温驰入城闭门坚守德至呼秦谕之乃自缢而下德叱其子顺先登秦率温降遣诣行在德乘胜趋亳州与俊会于城父时叛将酈琼屯亳闻德至谓三路都统制曰夜叉未易当也遂遁德入亳州白俊曰今兵威已振请乘破竹之势进取东都俊难之乃班师策功第一拜兴宁军承宣使龙神卫四厢都指挥使再迁侍卫亲军马步军都虞候封陇西郡侯十一年金人自合肥入侵游骑及江俊议分军守南岸德曰淮者江之蔽也弃淮不守是谓唇亡齿寒敌数千里远来饷道决不继及其未济急击之可以夺气若

迟之使稍安则淮非吾有矣俊犹豫未许德请益坚曰
愿父子先越江俟和州下然后宣抚北渡俊乃许德即渡采石俊督军继之宿江中德曰
明旦当会食历阳已而夜拔和州晨迎俊入敌退保昭
关又击走之追至柘皋与金人夹河而军诸将帅皆集惟张俊后至统制田师中欲待之
德怒曰事当机会复何待即与刘锜上马先迎敌杨沂
中继之乌珠以铁骑十余万夹道而阵德曰贼右阵坚吾当先击之麾军渡桥首犯其锋
一将被甲跃马始出德引弓毙之乘胜大呼令万兵持
长斧如墙而进敌大败退屯紫金山德复尾击之遂复庐州召拜清远军节度使建康府
驻扎御前诸军都统制历浙东福建总管荆南副都统
制二十五年卒赠检校少保再赠少傅二子琪顺亦以饶勇闻

△王彦

王彦字子才上党人性豪纵喜读韬略诣京师隶弓马子弟所徽宗临轩阅试补下
班祇应为清河尉从泾原路经略使种师道两入夏国
有战功金人攻汴州彦慨然弃家赴阙求自试讨贼时张所为河北招抚使异其才擢为
都统制使率裨将张翼白安民岳飞等十一将部七千
人渡河与金人战败之复卫州新乡县传檄诸郡金人以为大军至率数万众薄彦垒围
之数匝彦以众寡不敌溃围出诸将散归彦独保共城
西山遣腹心结两河豪杰图再举金人购求彦急彦虑变夜寝屡迁其部曲觉之相率刺
面作誓示无他意彦益感励抚爱士卒与同甘苦未几
两河响应忠义民兵首领傅选孟德刘泽焦文通等皆附之众十余万皆受彦约束金人
患之召其首领俾以大兵破彦垒首领曰王都统砦坚
如铁石未易图金人乃间遣劲骑挠彦粮道彦勒兵待之斩获甚众益治兵刻日大举告
期于东京留守宗泽泽召彦会议乃将兵万余渡河金
人以重兵袭其后而不敢击既至汴京泽大喜令彦宿兵近甸以卫根本彦即以所部兵
马付留守司量带亲兵趋行在时已遣宇文虚中为祈
请使议和彦见黄潜善汪伯彦力陈两河忠义延颈以望王师愿因人心大举北伐言辞
愤激大忤时相意遂降旨免对以彦为武翼郎合门宣
赞舍人差充御营平寇统领时范琼为平寇前将军彦知琼有逆节称疾不就乞致仕许
之知枢密院事张浚宣抚川陕奏彦为前军统制浚与
金罗索相持于富平欲大举会诸将议彦曰陕西兵将上下之情未通若少不利则五路
俱失不若且屯利阆兴洋以固根本敌入境则檄五路
兵来援万一不捷未大失也浚幕府不然其言彦即请为利路钤辖俄改金均房州安抚
使知金州时中原盗贼蠭起加以饥馑无所资食惟蜀
富饶巨盗往往窥觊桑仲既陷淮安襄阳乘势西向均房失守直捣金州白土关众号三

十万仲彦旧部曲也以申牒请于彦曰仲于公无敢犯愿假道入蜀就食耳彦乃遣统领官闵立为先锋击之立战死将士或请避之彦叱曰枢相张公方有事关陕若仲越金而至梁洋则腹背受敌大事去矣敢言避者斩即勒兵趋长沙平阻水据山设伏以待贼见官军少蚁附搏战彦执帜一麾士殊死鬪贼败走追奔至白磧复房州绍兴元年九月权京西南路副总管李忠反扰京西遂攻金州诸关贼众皆河朔人骁果善战彦与战不利关陷彦退屯秦郊令将士尽伏山谷间焚秦郊积聚伪若遁者募敢死士易麾帜设奇以待阅再宿贼至秦郊官军逆战大败之追袭至秦岭遂复干佑县以归忠走降刘豫初桑仲既败还襄阳乃鳩集散亡陷邓州凶焰复炽南攻德安西据均阳分众三道一攻注口关一出马郎岭一捣洵阳前军去金州不三十里彦曰仲以我寡彼众故分三道以离吾势法当先破其坚则脆者自走遣副将焦文通御注口自以亲兵营马郎相持一月大战六日贼大败仲为其下所杀又有王辟董贵祁守中阻兵窥蜀不减数万彦悉讨平之是冬伪齐秦凤经略使郭振以数千骑掠白石镇彦与关师古并兵御之贼大败获振复秦州张浚承制以彦节制商虢陕华州军马三年正月乌珠入侵浚召彦与吴玠刘子羽会于兴元萨里罕自上津疾驰不一日至洵阳统制官郭进死之彦退保石泉县金人入金州彦趋西乡复攻饶风关彦与吴玠御之不能却关破彦收余兵奔达州五月彦遣兵至汉阴与刘豫将周贵战大败之复金州浚承制进彦保康军承宣使兼宣无司参议彦不受五年四月差知荆南府充归峡荆门公安军安抚使彦因荆南旷土措置屯田自蜀买牛千七百头授官兵耕营田八百五十顷分给将士有差六年二月知襄阳府京西南路安抚使彦以岳飞嫌辞浚奏彦为行营前护军副都统制督府参谋军事六月以八字军万人赴行在至镇江闻母丧上疏乞解官不许诏免丧服趣入对遂以为浙西淮东沿海制置副使以所部屯通州之料角七年正月彦因遣将捕亡者于解潜军中军士交鬪于市言者论其军政不肃贬秩二等彦不自安乞终余服复洪州观察使知邵州彦入辞帝抚劳甚厚九年卒于官年五十彦称名将当建炎初屡破太敌威声振河朔时方挠于和议遽召之还又夺其兵柄而使之治郡士议惜之

△魏胜

魏胜字彦威淮阳军宿迁县人多智勇善骑射应募为弓箭手徙居山阳绍兴三十一年金人将南侵胜聚义士三百北渡淮取涟水军宣布朝廷德意涟水民翕然以听遂取海州郡守高文富

【按宋名臣言行别录作高文多

】 闻胜起遣兵来捕胜迎击走之追至城下众惊传

水陆悉有兵城中大恐文富闭门守驱民上城御之胜令城外多张旗帜举烟火为疑兵又遣人向诸城门谕以金人弃信背盟无名兴师本朝

宽大爱民之意城上民闻之即开门胜遣勇锐者登城楼余自门入莫有御者独文富与其子安仁率牙兵拒守胜整军与安仁父子战譙门内

杀安仁擒文富民皆按堵胜权知州事遣人谕胸山怀仁陶阳东海诸县皆定乃蠲租税释罪囚发仓库犒战士分忠义士为五军纪律明肃部

分如宿将胜自兼都统制益募忠义以图收复远近闻之响应旬日得兵数千即具其事报境上帅守左军统制董成谋出西北取沂州胜以军

中器甲未备戒成勿动成不从胜不获已率所部千余人直入沂州巷战杀其守及军士三千余众悉降得器甲数万后金人复集生兵成军几

败金人遣蒙恬镇国以兵万余取海州抵州北二十里新桥胜设伏于隘阵以待众殊死战伏发贼大败杀镇国馘千人降三百人军声益振山

东之民咸欲来附胜传檄招谕结集以待王师之至沂民壁苍山者数十万金人围之久不下砦首滕■〈日上狄下〉告急胜提兵往救之阵

于山下金人袭之胜单骑而殿以大刀奋击金人围之数重胜身被数十鎗冒刃出围金人追之马中矢踏步而入砦无敢当者金人绝其水砦

中食干糒杀牛马饮血胜祷雨有应遂得水金人周山为营胜度其必复攻海州因闲出砦趋城中金人旋解苍山围自新桥抵城下胜出战皆

捷金分兵四面攻之胜募士登城以御矢石如雨者七日金兵死伤者多遂遁去胜尝出战矢中鼻贯齿不能食犹亲御战起义久朝廷尚未知

沿海制置使李宝遣其子由海道觐敌至州始遣将诣行在白胜之功金海陵举兵渡淮虑胜睨其后分军数万来攻会李宝帅舟师往胶西破

金人舟舰胜遣人邀之同击金人于新桥大败之金兵退宝复以兵登舟备海道悉获金舟宝既捷胜亦还州为捍御计俄金兵营于城北砂巷

列阵将攻关门胜开门出谕之责其叛盟失信及兵逼关胜登关门张乐饮酒犒军士令固守勿出战踰时乃少遣士出凭险隘击之金人知不

可攻率军转而渡河袭关后胜敛兵入城金兵追将及胜独乘马逐之敌皆辟易士卒后入者不复敢追胜军已入城金兵径趋城东欲过砂堰

围城为营胜先据堰备之不得过寻以单骑逐之东门外大叱之金兵五百皆望风退胜又追十数里士得入城金兵复自西南来袭胜从后叱

之兵骇散手杀数人奏功授合门祗候差知海州兼山东路忠义军都统遣其子昌同

■〈山司〉崑山首领张荣持旗榜往结山东忠义胜善

用大刀能左右射旗揭曰山东魏胜金人望见即退走乃为旗十数书其姓名密付诸将

遇鏖战即揭之初胜起义时无州郡粮饷之给无府库
仓廩之储经画市易课酒榷盐劝桀豪右环海州度视敌兵攻取处筑城浚隍塞关隘在
军未尝一日懈弛恒如寇至获金谍者犒以酒食厚赂
遣还有自北方来归者与之同卧起共饮食示以不疑周其窳贫使之感激自是山东河
北归附者众得金人虚实悉以上闻又第其忠义士功
能假授官资因李宝转达于朝悉如所请金人复以兵十万攻海州时宝帅海舟抵城北
砂巷胜率众合宝军大破之斩首不可计堰水为之不
流余悉奔溃胜独率兵追北二十里尽获其鞍马器甲宝亦驻海州为进取计金人复遣
乌锦太师发诸路兵二十余万来攻海州先自州西南
断胜军饷道胜择勇悍士三千余骑拒于石阨堰金兵不能进逮夜始还留千人备险隘
金兵十万来夺胜率众鏖战杀数千人余皆遁去下令
守险勿追报宝宝以防海道登舟不复发兵金兵盛集胜力拒之自旦至暮敌不能夺无
何金兵环城围数重胜与统制郭蔚分兵备御偃旗仆
鼓寂若无人金军疑数日不敢攻已乃植云梯置炮石四面合围负土填壕胜俟其近城
鸣鼓张旗矢石俱发继以火牛金液凡三昼夜敌不能
近于是罢攻修营垒绝河道谋为固守胜俟其不备掩击或独出扰之使不得休息又间
夜发兵劫其营或焚其攻具既而金人并力急攻胜告
急于李宝宝以闻命张子盖率兵来解围子盖先帅骑兵至与胜大败金军斩首不可计
追数十里余兵皆遁胜与子盖议进讨子盖曰受诏解
围不知其它遂率军还时都督张浚在建康招胜询以军务转合门宣赞舍人差充山东
路忠义军都统制兼镇江府驻扎御前前军统制仍知
海州隆兴元年诏以镇江御前同统制魏全来守海州督府亦遣贾和仲充山东河北路
招抚使节制本路军马海州驻扎和仲忌胜谗胜于都
督罢其职改京东路马步军副总管都督府统制建康府驻扎既而督府知其诬复胜旧
职改忠州刺史海州城西南枕孤山敌至登山瞰城中
虚实立见故西南受敌最剧胜筑重城围山在内寇至则先据之不能害胜尝自创如意
战车数百两炮车数十两车上为兽面木牌大枪数十
垂毡幕软牌每车用二人推毂可蔽五十人行则载辘重器甲止则为营挂搭如城垒人
马不能近遇敌又可以御箭簇列阵则如意车在外以
旗蔽障弩车当阵门其上寘迹子弩矢大如凿一矢能射数人一发三矢可数百步炮车
在阵中施火石炮亦二百步两阵相近则发弓弩箭炮
近阵门则刀斧枪手突出交阵则出骑兵两向掩击得捷拔阵追袭少却则入阵间稍憩
士卒不疲进退俱利伺便出击虑有拒遏预为解脱计
夜习不使人见以其制上于朝诏诸军遵其式造焉二年以议和撤海州戍命胜知楚州

以本州岛官吏及部兵赴新治诏胜措置清河口时和议
尚未决金兵乘其懈以舟载器甲糗粮自清河出欲侵边胜觐知之身帅忠义士拒于清
河口金兵诈称欲运粮往泗州由清河口入淮胜知其
谋欲御之都统制刘宝以方议和不许金骑轶境胜率诸军拒于淮阳自卯至申胜负未
决金军增生兵来胜与之力战又遣人告急于宝宝在
楚州相距四十里坚谓方讲和决无战事迄不发一兵胜矢尽救不至犹依土阜为阵谓
士卒曰我当死此得脱者归报天子乃令步卒居前骑
为殿至淮阴东十八里中矢坠马死年四十五事闻赠保宁军节度使谥忠壮时淮南未
平诏于镇江府江口镇立庙赐号褒忠且令有司刻木
以敛葬于镇江官其二子赐银绢田宅以刘宝不出救兵削两镇节钺贬琼州死

△张宪

张宪岳飞爱将也飞破曹成宪与徐庆王贵招降其党二万有成党郝政率众走沅
州号白巾贼宪一鼓擒之飞遣宪复随州敌将王嵩不
战而遁进兵邓州距城三十里遇贼兵数万迎战与王万董先各出骑突击贼众大溃遂
复邓州绍兴十年金人渝盟入侵宪战颍昌战陈州皆
大捷复其城乌珠顿兵十二万于临颍县杨再兴与战死之宪继至破其溃兵八千乌珠
夜遁宪将徐庆李山复捷于临颍东北破其众六千获
马百匹追奔十五里中原大震会秦桧主和命飞班师宪亦还未几桧与张俊谋杀飞密
诱飞部曲以能告飞事者宠以优赏卒无人应闻飞尝
欲斩王贵又杖之诱贵告飞贵不肯曰为大将宁免以赏罚用人苟以为怨将不胜其怨
桧俊不能屈俊劫贵以私事贵惧而从时又有王俊者
善告讐号鸱儿以奸贪屡为宪所裁桧使人谕之王俊从桧俊谋以宪贵王俊皆飞将使
其徒自相攻发因及飞父子庶朝廷不疑俊自为状付
王俊妄言宪谋还飞兵令告王贵使贵执宪宪未至俊预为狱以待之属吏王应求白张
俊以为密院无推勘法俊不听亲行鞫炼使宪自诬谓
得云书命宪营还兵计宪被掠无全肤竟不伏俊手自具狱成告桧械宪至行在下大理
寺桧奏召飞父子证宪事帝曰刑所以止乱勿妄追证
动摇人心桧矫诏召飞父子至万俟卨诬飞使子鹏孙革致书宪贵令虚申惊报以动朝
廷云与宪书规还飞军其书皆无有乃妄称宪贵已焚
之但以众证具狱语在飞传宪坐死籍家赀绍兴三十二年追复龙神卫四厢都指挥使
阆州观察使赠宣远军承宣使录其家

△杨再兴

杨再兴贼曹成将也绍兴二年岳飞破成入莫邪关再兴走跃入涧张宪欲杀之再
兴曰愿执我见岳公遂受缚飞见再兴奇其貌释之曰

我不汝杀汝当以忠义报国再兴拜谢飞屯襄阳以图中原遣再兴至西京长水县之业
阳杀孙都统及统制满在斩五百余人俘将吏百人余
党奔溃明日再战于孙洪涧破其众二千复长水得粮二万石以给军民尽复西京险要
又得留马万匹刍粟数十万中原响应复至蔡州焚敌
粮飞败金人于郾城乌珠合龙虎大王盖天大王及韩常兵逼之飞遣子云当敌鏖战数
十合敌不支再兴以单骑入其军擒乌珠不获手杀数
百人而还乌珠愤甚并力复来屯兵十二万于临颖再兴以三百骑 【按三朝北盟会编
作五百骑】 遇敌于小商桥骤与之战杀二千余人
及万户萨巴贝勒千户百人再兴战死 【按三朝北盟会编与再兴同战没者王兰高林
会天大雨溪涧皆满金人不得进官军乃得还】 后
获其尸焚之得箭镞三升

△牛皋

牛皋字伯远汝州鲁山人初为射士聚众与金人战屡胜补保义郎讨剧贼杨进于
鲁山三战三捷累迁荣州刺史中军统领金人再攻京
西皋十余战皆捷加果州团练使京城留守上官悟辟为同统制兼西京南路提点刑狱
金人攻江西者自荆门北归皋潜军于宝丰之宋村击
败之转和州防御使充五军都统制又与贝勒战鲁山邓家桥败之转西道招抚使伪齐
乞师于金入寇皋设伏要地自屯丹霞以待敌兵悉众
来伏发俘其将郑务儿迁安州观察使寻除蔡唐州信阳军镇抚使知蔡州遇敌战辄胜
加亲卫大夫会岳飞制置江西湖北将由襄汉规中原
命皋隶飞军飞喜甚即辟为唐邓襄郢州安抚使寻改神武后军中部统领伪齐使李成
合金人入寇破襄阳六郡敌将王嵩在随州飞遣皋行
裹三日粮粮未尽城已拔执嵩斩之得卒五千遂复随州李成在襄阳飞遣皋以骑兵击
破之复襄阳金人攻淮西飞遣皋渡江自提兵与皋会
时伪齐驱甲骑五千薄庐州皋遥谓金将曰牛皋在此尔辈胡为见犯众皆愕然不战而
溃飞谓皋曰必追之去而复来无益也皋追击三十余
里金人相践及杀死者相半斩其副都统及千户五人百户数十人军声大振庐州平进
中侍大夫从平杨么破之么技穷举锺子仪投于水继
乃自仆皋投水擒么飞斩其首函送都督行府除武泰军承宣使改行营护圣中军统制
寻充湖北京西宣抚使左军统制加龙神卫四厢都指
挥使金人渝盟飞遣皋出师战汴许间以功最除捧日天武四厢都指挥使成德军承宣
使历荆湖南路马步军副总管绍兴十七年上巳日都
统制田师中大会诸将皋遇毒明日卒或言秦桧使师中毒皋云初桧主和未几金渝盟
入侵帝手札赐飞从便措置飞乃命皋及王贵董先杨

再兴孟邦杰李宝等经略东西京汝郑颖陈曹光蔡诸郡又遣梁兴渡河纠合忠义社取河东北州县未几李实捷于曹州捷于宛亭捷于渤海
 庙董先姚政捷于颖昌刘政捷于中牟张宪复颖昌淮宁府王贵之将杨成复郑州张应韩清复西京皋及傅选捷于京西捷于黄河上孟邦杰
 复永安军其将杨遇复南城军又与刘政捷于西京梁兴会太行忠义及两河豪杰赵云李进董荣牛显张峪等破金人于垣曲又捷于心水追
 至孟州之邵原金张太保成太保等以所部降又破金高太尉兵于济源乔握坚等复赵州李兴捷于河南府捷于永安军梁兴在河北取怀卫
 二州大破乌珠军断山东河北金帛马纲之路金人大扰未几岳飞还朝下狱死世以为恨云

△胡閔休

胡閔休字良弼开封人宣和初入太学时方讳兵閔休着兵书二卷靖康初勑知兵科閔休应试中优等补承信郎金人围城閔休分地而守二帝诣金营閔休欲结义士劫之何■〈〈鹵，欠代义〉上木下〉禁止之二帝北迁范琼散勤王师閔休曰勤王师可进不可退檄令随军而无靖康年号閔休得之泣下怀檄而走从辛道宗勤王南渡以忠义进两官湖湘盗起閔休作致寇御寇二篇言天地之气先春后秋招之不伏则讨之于是以岳飞为招讨使飞辟閔休为主管机宜文字以诛锺子仪功进成忠郎飞被诬死閔休发愤杜门佯疾十年卒有勤王忠义集藏于家孙照德安太守

钦定续通志卷三百七十三

●钦定续通志卷三百七十四 列传一百七十四

列传

宋【七十八】

○宋七十八

张俊	【从子子蓋】	张宗颜	刘光世	王渊	解元	曲
端	王友直	李宝	成閔	赵密		
	刘子羽	吕祉	胡世将	郑刚中		

张俊

张宗颜

刘光世

王渊

解元

曲端

王友直
李宝
成闵
赵密
刘子羽
吕祉
胡世将
郑刚中
△张俊

张俊字伯英凤翔府成纪人【按宋史地理志成纪属秦州不属凤翔宋名臣言行别录载俊秦州三阳人】好骑射负才气起于诸盗年十六为三阳弓箭手政和七年从讨南蛮转都指挥使宣和初从攻夏人仁多泉始授承信郎平郢州贼李太及河朔山东武胡羣寇功最进武德郎靖康元年以守东明县功转武功大夫金人攻太原种师中往援屯榆次金人以数万骑压之俊时为队将进击杀伤甚众获马千匹请乘胜要战师中以日不利急令退保金人谍俊计不行悉兵合围攻益急榆次破师中死之俊与所部数百人突围而出且行且战至乌河川再与敌遇斩五百级金人围汴京高宗时为兵马大元帅【按宋史钦宗本纪靖康元年冬十月命康王为天下兵马大元帅】俊勒兵从信德守臣梁杨祖勤王高宗见俊英伟擢元帅府后军统制累功转荣州刺史建炎元年正月从高宗至东平府【按建炎元年即靖康二年也三朝北盟会编载靖康二年正月三日癸巳兵马大元帅次东平府】时剧贼李昱据兖州命俊为都统制讨之与数骑突围挠战诸军争奋贼遂殄进桂州团练使寻加桂州防御使中书舍人张征自汴京赍蜡诏命高宗以兵付副帅还京高宗问大计俊曰此金人诈谋尔今大王居外此天授岂可徒往因请进兵高宗许之遂如济州开启干龙节迫夜有告高宗欲俟元帅谒香劫以叛羣议集诸军屯备俊曰元帅不出奸谋自破贼术穷黎明引军北遁俊勒兵追杀之进徐州观察使高宗以俊忠劳日积迁拱卫大夫既而汴京破二帝北迁俊恳辞劝进高宗涕泣不许俊曰大王皇帝亲弟人心所归当天下汹汹不早正大位无以称人望且白耿南仲奏之表三上高宗发济州俊便道扈行至应天府高宗始即位初置御营司以俊为御营前军统制遣还京迎隆佑太后权秦凤兵马钤辖寻奉太后及六宫以归除带御器械时江淮羣盗蜂起俊讨杜用于淮甯赵万郭青于镇江陈通于杭州蒋和尚等于兰溪皆平之落阶官除正任观察使二

年升秦凤路马步军副总管寻破秀州贼数万缚徐明
斩之进武宁军承宣使帝如扬州召诸军议恢复俊曰今敌势方张宜且南渡据江为险
练兵政安人心俟国势定大举未晚俊又请移左藏库
于镇江既而敌掩至已逼近旬俊亟奏饬甲乘从帝如临安苗傅刘正彦反俊时屯兵吴
江县傅等矫诏加俊捧日天武四厢都指挥使以三百
人赴秦凤命他将领余兵俊知其伪拒不授三军汹汹俊谕之曰当诣张侍郎求决即领
所部八千人至平江张浚语俊以傅等欲危社稷泣数
行下俊大恸浚谕以决策起兵问罪俊泣拜且曰此项侍郎济以机术毋惊动乘舆吕颐
浩至俊见之亦涕泣曰今日惟以一死报国刘光世以
所部至俊释旧憾韩世忠来自海上俊借一军与之俱世忠为前军俊以精兵翼之光世
次之战于临平傅等兵败开城以出世忠俊光世入城
见帝于内殿帝嘉劳久之拜镇西军节度使御前右军都统制寻为浙东制置使金人分
兵深入渡江攻浙杜充弃建康韩世忠自镇江退保江
阴帝如明州俊自越州引兵至乌珠攻临安帝御楼船如温州留俊于明州以拒敌癸卯
除夕金兵至城下俊使统制刘宝与战兵少却其将党
用邱横死之于是统制杨沂中田师中统领赵密皆殊死战沂中舍舟登岸力战殿帅李
质以班直来助守臣刘洪道率州兵射其旁大破之杀
数千人俊虑敌必再至下令清野多以轻舟伏弩闭关自守四年正旦忽西风起金人乘
之果复攻明州俊与刘洪道坐城楼上遣兵掩击金人
奔北死于江者无数夜拔砦去屯余姚且请济师于乌珠后七日敌再至俊引兵趋入台
州明州居民去者十七八未几江浙羣盗蠡起授俊两
浙西路江南东路制置使以所部招收羣盗命后军统制陈思恭隶之且令两浙宣抚使
周望以兵属俊刘光世韩世忠之外诸将皆受节度六
月改御前五军为神武军俊即本军为神武右军都统制除检校少保定江昭庆军节度
使十月浙西羣盗悉平改江南招讨使绍兴元年帝至
会稽时孔彦舟据武陵张用据襄汉李成尤悍强据江淮湖湘十余州连兵数万有席卷
东南意多造符讖蛊惑中外国江州久未解时方患之
范宗尹请遣将致讨俊慨然请行遂改江淮路招讨使成党马进在筠州豫章介江筠之
间俊急趋豫章且曰我已得洪州破贼决矣乃敛兵若
无人者金鼓不动居月余进以大书牒来索战俊以细书状报之贼以俊为怯俊谍知贼
怠乃议战岳飞为先锋杨沂中由上流径绝生米渡出
贼不意追奔七十里至筠州贼背筠河而阵俊用杨沂中计亲以步兵当其前精骑数千
授沂中及陈思恭俾从山后来击以午为期俊与贼鏖
战至午精骑自山驰下贼骇乱退走大败复筠州临江军追至北奉新楼子庄贼党商元

据草山挟险设伏俊遣步兵从间道直趋山椒杀伏夺
险乘胜追至江州成势迫绝江而遁号俊为张铁山复江州已而兴国军等处羣盗闻俊
兵至皆遁去俊引兵渡江至黄梅县亲与成战成怨奉
新失险之败据石矢坡凭山以木石投人俊亲冒矢石帅众攻险贼众数万俱溃马进为
追兵所杀成北走降刘豫诸郡悉平拜太尉四年十月
金人与刘豫分道入侵举朝震恐或请他幸俊谓赵鼎曰避将何之惟向前进一步庶可
脱当聚天下兵守平江徐为计鼎曰公言避非策是也
以天下兵守一州非也公但坚前议足矣遂以俊为两浙西路江南东路宣抚使屯建康
既而改淮西宣抚使濒江相距逾月敌不得入俊遣张
宗颜潜渡至六合出其背敌将引去复继遣王进薄诸淮大败之获其将程师回张延寿
以献五年刘麟入寇俊与杨沂中合兵拒于泗州六年
改崇信奉宁军节度使刘麟兵十余万犯濠寿诏并以淮西属俊杨存中 【按宋史本传
于绍兴六年后即称杨存中考三朝北盟会编绍兴
十年二月始赐杨沂中名存中附识】 亦听节制与俊合兵拒敌俊分遣存中与张宗颜
王玮田师中等自定远军次越家坊遇刘猺左右军击
走之俊率大军鼓行而前至李家湾遇猺大兵与战杀获略尽降者万余人猺仅以身免
拜少保加镇洮崇信奉宁军节度使七年改淮南西路
安抚使置司盱眙俊与韩世忠入见议移屯命俊自盱眙屯庐州九年金人约寝兵许之
赐俊安民靖难功臣拜少傅 【按宋史高宗本纪绍
兴九年金国通好张俊加少傅三朝北盟会编亦作九年本传作八年今依本纪改】 十
年金复渝盟破河南图顺昌府命俊策应刘锜 【按
三朝北盟会编载高宗绍兴九年五月金人败盟乌珠率李成孔彦舟郾琼赵荣入侵又
刘锜与乌珠战于顺昌城下系绍兴十年六月事宋史
本传作九年今依本纪改】 俊督军渡江金人引退继而金人三路都统自东南两京分
道来侵抵亳州北渡河俊收宿亳诸军击之尽复卫真
鹿邑等地师还十年郾琼在亳州俊以大军至城父都统制王德下符离乘胜趋亳与俊
合俊引军入城金人弃城遁遂复亳州留统制朱超守
之俊引军还寿春进少师封济国公十一年二月乌珠入合肥渐攻历阳江东制置大使
叶梦得见俊请速出军俊遣兵渡江谕诸将曰先得和
州者胜王德愿为诸军先士鼓噪而行敌已据之德率众渡采石先登俊宿中流德抵城
下金人退屯昭关后三日复败金将韩常于含山命关
师古复巢县遂复昭关使左军统制赵密偃兵篁竹出六丈河以分金势张守忠以五百
骑败金人于全椒未几敌断石梁以拒俊俊疾作力疾
引众涉流登岸追击之王德与杨存中刘锜会兵败金人于柘皋 【按三朝北盟会编载

绍兴十一年二月三日金人陷庐州十日张俊军统

王德渡江先入和州十八日张俊杨存中刘锜及金人战于柘皋镇大破其军二十日张俊克庐州三月四日金人攻濠州张俊杨存中刘锜在

庐州濠州登流星马告急者日三四适会俊存中锜军皆退庐州诸军各人负十日粮米欲越过定远县退还江上俊遂越过定远县不得已令

诸军趋黄连埠而城已陷九日杨存中率兵袭濠州不克宋史本传不载俊克庐州俊既不守庐又不援濠附识】拜枢密使俊知朝廷欲罢兵

首请纳所统兵力赞和议与秦桧意合言无不从荐士大夫监司郡守者甚众虽刘子羽自谪籍起家亦俊力也加太傅封广国公寻进益国公

十二年以殿中侍御史江邈论之罢为镇洮懿武奉懿军节度使充醴泉观使初桧以俊助和议德之故尽罢诸将以兵权付俊岁余俊无去意

故桧使邈攻之寻进封清河郡王奉朝请十六年改镇静江懿武静海军二十一年冬帝幸其第拜太师以其侄清海军承宣使子盖为安德军

节度使其它子弟迁秩者十三人南渡后俊握兵最早屡立战功与韩世忠刘锜岳飞并为名将世称张韩刘岳【伏读通鉴辑览 御批

南渡诸将世以张韩刘岳并称然当日始终未尝败衄者独一岳飞耳韩世忠虽时见失利而战功尚可指数至张俊辈之少着微劳不过削平

内地羣盗其与金人遇未尝不望风鼠窜也即如楚州之役张俊既畏缩辞避之五降御札光世讫不奉行逮后刘麟邀金师南下光世坐视迁

延弃庐州不守反告赵鼎以何事为他人任患几有无君之心高宗不能明抵其罪光世得以荣宠幸终而史官亦槩以中兴佐命目之无识甚

矣】然濠寿之役俊与锜有隙独以杨存中为腹心故有濠梁之劫【伏读通鉴辑览

御批俊懦蒞无能心多猜忌其于刘锜固久深嫉

之当金师克濠既不从其退师据险之谋及闻兵去又不信其严兵设备之说且阻锜无往遂至仓卒败逃死伤枕籍欲邀功而适以丧师不闻

问其失律之罪当时政令可知矣】岳飞冤狱韩世忠救之俊独助桡成其事心术之殊也远哉帝于诸将中眷俊特厚【伏读通鉴辑览

御批张俊才勇既不逮岳飞远甚又嫉其骤贵累立显功猜嫌日积竟至甘心作桡鹰犬百计倾诬织成冤狱其罪岂在桡下高宗任其肆意

妄为曾不加察转使之荣保功名非庸闇而何】然警敕之者不绝口二十四年卒年六十九追封循王子五人子琦子厚子颜子正子仁

张子盖

张子盖

子盖字德高父宏从俊军河上金人破开德府宏战死子盖初从韩世忠讨苗傅补

承信郎累功迁武功郎绍兴六年刘猊大举入寇过定远县将趋宣化窥淮诏遣俊会刘光世军剿之子盖从俊击猊于藕塘授合门宣赞舍人明年改昌州刺史江南东路马步军都总管十年金人再取河南以兴复宿亳功迁登州防御使兼宣抚司衙兵副统制十一年二月乌珠入庐州攻含山县渐攻历阳俊遣兵渡江子盖从王德拔和州又会刘琦击金人于柘皋败之军势赫张乌珠复攻濠州子盖又败之于州梁桥除兴甯军承宣使和议成改建康府驻扎御前诸军都统制累授安德军节度使三十二年春金人攻海州急以子盖为镇江府都统往援之即日渡江驰至楚州淮东漕臣龚涛谓之曰敌众十倍兵力不支宜张虚声攻淮阳使之必救则海州可解子盖曰彼若不救将如之何乃亟趋涟水取便道以进次石湫堰金人陈万骑于河东子盖率精锐数千骑击之谓麾下曰彼众我寡利在速战遣统制张玘略阵中流矢死子盖曰事急矣奋臂大呼驰入阵诸将继之殊死战敌大败拥溺石湫河死者半围遂解金人重整军来战子盖再率精锐击之获其车马铠仗万计退屯泗州孝宗即位召对赐鞍马铠甲束带且令招集勇敢相时而动子盖受命还招金大将萧扎巴耶律萨里将其众来降寻以疾还镇江授检校少保淮东招抚使未赴卒年五十一赐太尉谥恭壮

△张宗颜

张宗颜字希贤延安人父吉为泾原将解宣威城围死之宗颜以父恩补三班供职监阆乡酒税积官至泾原副将权殿前司统辖御营军统制张俊选为统领从俊讨浙西寇秀州军校徐明以城叛宗颜夜袭其城明遁转忠州刺史迁御前中军统制金人攻明州宗颜破其前军盗杨勅破松溪命宗颜及李捧陈思恭讨之宗颜次浦城不进勅又掠建州宗颜趋南剑州与勅遇遂归盗犹未平谬言已击退侍御史忱与求劾之贬二秩从俊讨李成与成将马进战玉隆观败之迁环庆路马步军副总管神武右军统制改麟州观察使伪齐挟金人攻宣化镇俊遣宗颜潜渡江出其后袭之不胜俊庇之以捷闻遂加沂州防御使继以兵袭击淮北复迁崇信军承宣使宣抚司前军统制伪齐入寇督府张浚遣杨沂中与俊合兵御之檄宗颜自泗州为俊继与猊遇于李家湾大破之擢龙神卫四厢都指挥使武信军承宣使八年知庐州总帅事故数百骑抵城下宗颜以骑百余御之敌退绍兴九年卒年四十四赠保静军节度使谥壮敏

△刘光世

刘光世字平叔保安军人延庆次子初以荫补三班奉职累升鄜延路兵马都监蕲州防御使方腊反延庆为宣抚使司都统遣光世自将

一军趋衢婺出其不意破之贼平授耀州观察使升鄜延路兵马钤辖时有事燕蓟光世从延庆取易州授奉国军承宣使金将郭药师降除威武奉宁承宣使延庆遣诸将捣虚趋燕以光世为后继光世不至诸将失援而溃降三官河北贼张迪掠浚州境诏光世讨之光世曰贼乌合非有纪律乃佯北以邀之贼竞进光世引骑贯其中贼大溃复承宣使统鄜延路马步军副总管靖康元年金兵攻汴京夏人乘间寇杏子堡堡有两山对峙地险扼光世据之敌至败去擢侍卫马军都虞候金再攻汴光世入援闻范致虚传檄诸路中引兵会之会有诏止勤王兵光世以为宜速进不可以诏示众既而闻京城事遂别道趋虢至济州谒康王命为五军都提举王即皇帝位命省视陵寝寻为提举御营使司一行事务行在都巡检使斩山东贼李昱迁奉国军节度使平镇江叛兵改滁濠太平州无为军江宁府制置使讨张遇于池州遇见官军不整越湖出官军后官军乱光世几被执王德救之得免遇循江而上光世整兵追至江州断其后军破之遇复东下又追击于江宁二年以功加检校少保命讨李成光世以王德为先锋大败之再战皆捷成遁执其谋主陶子思加检校少傅帝在扬州金骑掩至天长光世迎敌未至而军溃帝仓卒渡江命光世为行在五军制置使屯镇江府控扼江口寻加检校太保殿前都指挥使苗刘为乱素惮光世张浚在平江驰书谕以勤王光世不从吕颐浩遣使至镇江说之乃引兵会于丹阳兵进光世以选卒为游击仍分军殿后遇苗翊马柔吉军于临平与韩世忠等破之至行在迁太尉御营副使光世遣王德助乔仲福追傅至崇安县尽降其众傅仅以身免逆将范琼被执张浚使光世抚定其众又招贼靳赛降之命光世为江东宣抚使守太平及池州受杜充节制光世言受充节制有不可者六帝怒光世始受命隆佑太后在南昌命光世移屯江州为屏蔽既至日置酒高会金人自黄州渡江凡三日无知之者比金人至遂遁自信州引兵至南康酃琼围固始县光世遣人招降之又遣王德擒妖贼王念经于信州充御前巡卫军都统制召赴行在授浙西安抚大使知镇江府光世言安抚控制一路若但守镇江则他郡有警不可离任望别除守臣光世专充安抚使从便置司时光世虑金人必过江故预择便地帝觉之止许增辟通判右谏议大夫黎确疏其择便求佚帝释不问加宣武军节度使开府仪同三司以遣之光世乞便宜行事不许时韩世忠张俊兼领浙西制置使光世复言本路兵火之余不任三处需求遂罢世忠俊兼领时金兵留淮东光世颇畏其锋楚州被围已百日帝手札趣光世援楚者五竟不行但遣王德酃琼将轻兵以出时奏杀获而已楚州破命光

世节制诸镇力守通泰完颜昌屯承楚光世知其众思归欲携贰之乃铸金银铜三色钱文曰招纳信宝获敌不杀令持钱文示其徒有欲归者扣江执钱为信归者不绝因勦奇兵赤心两军昌遂拔砮去绍兴元年金人渡淮真扬皆阙守命光世兼淮南京东路宣抚使置司扬州措置屯田迄不行张俊讨李成又命光世分兵往舒蕲捣其巢穴光世以江北盗未平为辞命兼淮南宣抚使领真扬通承楚州涟水军郭仲威谋据淮南以通刘豫光世遣王德擒之并其众范宗尹言光世军多冗费请汰其罢软者帝因作手书与之淮北人多归附者命光世兼海泗宣抚使以安辑之五湖捕鱼人夏窳聚众千余掠人为食郭仲威余党出没淮南邵青据通州光世皆招降之光世请铸淮东宣抚使印给钱粮增将吏皆从其请仍给镇江府常州江阴军苗米三十七万斛为军中一岁费二年复命移屯扬州时至镇江视师光世不奉诏八朝言邻寇有疑或致生事愿仍领浙西为根本计右司谏方孟卿劾之乞召宰执与议使之必往光世犹以乏粮为辞光世之来以缿帛方物为献帝命分赐六宫中丞沈与求以为不可命还之吕颐浩奏光世军月费二千万缗乞差官考核诏御史江跻度支胡蒙至军点校终不得实帝方倚其成功寻诏两漕臣措置镇江酒税务又省织御服局七百万缗以助之加窳武窳国军节度使光世奏部将乔仲福靳赛防江有劳诏进一官给事中程瑀言光世兵未渡江金人或渡淮江浙必震光世方遣人按行宜兴湖泖之间以备退保诏以章示之光世迁延如故三年命光世与韩世忠易镇同召赴阙授检校太傅江东宣抚使世忠既至镇江城下奸人入城焚府库光世擒之皆云世忠所遣世忠屯登云门光世引兵出惧其扼已改途趋白鹭店世忠遣兵袭其后光世以闻帝遣使和解仍书贾复寇恂传赐之命为江东淮西宣抚使置司池州刘豫将王彦光扬兵淮上有渡江意光世扼马家渡遣酈琼屯无为军为濠庐援贼乃退光世奏酈延李佺充合门祗候言者论其涉私罢之金人刘豫入侵时光世张俊韩世忠权相敌且持私隙帝遣侍御史魏矼王军中谕以灭怨报国光世乃移书二帅二帅皆复书致情光世始移军太平以援世忠金兵退光世入覲迁少保请以所置淮东田易淮西田给事中晏敦复言其扰民而止又请并封其三妾为孺人南渡后诸大将封妾自此始会改神武军为行营护军以光世所部称左护军刘豫筑龙城以窥淮西光世遣王师晟破之加保静军节度使遂领三镇张浚抚淮上诸屯刘豫挟金人分道入侵命光世屯庐州以招北军与韩世忠张俊鼎立杨沂中将精卒为后距刘猊驱乡民伪为金兵布淮境光世奏庐难守欲还太平浚命吕祉驰往军

中督师光世已舍庐州退浚遣人厉其众曰若有一人渡江即斩以徇光世不得已驻兵与沂中相应遣王德邠瑒领兵自安丰出谢步遇金将三战皆败之张浚入对言光世骄惰不战不可为大将请罢之帝命与赵鼎议遂迁护国镇安安静军节度使右司谏陈公辅劾其不守庐州张浚言其沈酣酒色不恤国事乞赐罢斥光世亦引疾请罢军政又献所余金谷于朝拜少师充万寿观使奉朝请封荣国公赐甲第一区以兵归都督府初光世麾下多降盗素无纪律至是督府命吕祉节制其军邠瑒杀祉驱诸军降刘豫九年用讲和恩赐号和众辅国功臣进封雍国公陕西宣抚使弟光远疏其短中丞勾龙如渊再论光世不可遣而止十年金人围顺昌拜太保为三京招抚处置使以援刘锜光世请李显忠为前军都统又请王德自隶德不愿受其节制显忠行至宿泗军多溃进至和州秦桧主罢兵召还光世入见为万寿观使改封杨国公卒年五十四赠太师官其子孙甥侄十四人谥武僖干道八年追封安城郡王开禧元年追封鄜王光世在诸将中最先进律身不严驭军无法不肯为国任事建炎初结内侍康履以自固又蚤解兵柄与时浮沈不为秦桧所忌故能窃宠荣以终其身方之韩岳不逮远矣

△王渊

王渊字几道熙州人后徙环州善骑射应募击夏国屡有功累迁熙河兰湟路第三将部将权知巩州盩厔诸羌入寇经略司讨之表渊总领岷山蕃兵将兴师城泽州羌悉众来争渊奋击大破之追至邈川城移同总领湟州蕃兵将兼知临宗砦坐法免宣和三年刘延庆讨方腊以渊为先锋贼将据钱塘势张甚渊谕裨将韩世忠逆战而伪遁自以强弩伏数百步外贼追之伏弩卒发逐北至淳安贼据帮源峒遂围而平之授合门宣赞舍人权京畿提举保甲兼权提点刑狱公事继从延庆攻契丹护饷道战败为敌所获已而逃归犹以出塞迁武功大夫果州团练使又从杨惟忠辛兴宗破羣盗高托山等迁拱卫大夫盩厔观察使靖康元年为真定府总管就迁都统制吴湛据赵州叛渊讨平之金人攻汴京范讷统勤王兵以渊为先锋寻以所部归康王府明年张邦昌僭立康王如济州命渊以三千人入卫宗庙渊至汴都以朝服见邦昌纳谒曰参冢宰相公邦昌始易紫袍延之政事堂渊恸哭宣教康王即皇帝位渊与杨惟忠韩世忠以河北兵刘光世以陕西兵张俊苗傅等以帅府及降羣盗兵皆在行朝不相统一始置御营司以渊为都统制扈从累月不释甲帝如扬州授龙神卫四厢都指挥使寻改捧日天武四厢都指挥使进保大军承宣使时羣盗蠡起以渊为制置使平杭贼提兵四出所向皆捷平军贼

赵万于镇江诛杭贼陈通于杭州降张遇于杨子桥期
年羣盜略尽迁向德军节度使建炎三年二月金人攻扬州帝仓卒渡江渊从至镇江专
管江上海船诸将所部皆不能济刘光世见帝泣诉渊
忿其言斩江北都巡检皇甫佐以自解自是渊失诸将心帝欲留镇江以援江北羣臣亦
固请渊独言镇江止可捍一面若金人自通州渡江以
据姑苏将若之何不如钱塘有重江之险议遂决命渊守姑苏言戎器全缺兵匠甚少乞
括民匠营缮寻自平江赴行在拜签书枢密院事仍兼
都统制命下诸将籍籍帝闻之乃命免奏事签书仍解都统制以慰众心先是统制官苗
傅自负世将以渊骤用颇缺望刘正彦尝招巨盗丁进
亦以赏薄怨渊而内侍康履颇用事及渊入枢府傅正彦以其由宦官荐愈不平俟渊入
朝伏兵杀之并杀康履遂成明受之变渊时年五十三
渊为将轻财好义家无宿储每言朝廷官人以爵禄足代耕若事锥刀曷若为商贾邪然
多杀降人深交内侍故及于祸赠开府仪同三司累加
少保官其子孙八人绍兴四年又官二人干道六年谥襄愍子倚

△解元

解元字善长保安军德清砦人疏眉俊目猿臂善骑射起行伍为清涧都虞候建炎
三年隶大将韩世忠麾下擢偏将世忠出下邳闻金兵
大至士皆骇愕元领二十骑擒其生口知敌动息俄逢骑数百身自陷阵横刺敌将坠马
余皆遁去授合门宣赞舍人苗刘之变从世忠讨之战
于临平贼遁追擒于浦城四年三月金人攻浙西世忠治兵京口邀其归路以海舰横截
大江金人出小舟数十以长钩扳鉴元在别舸跃入敌
舟以短兵击杀数十人擒其千户授忠州团练使统制前军继从讨闽寇范汝为转讨湖
外诸盗时刘忠据白面山凭险筑垒世忠讨之贼因山
设望楼从高瞰下以兵守之屯壮锐于四山视其指呼而出战元单骑涉水薄贼砦周览
其形势归告世忠曰若夺据其望楼则技穷矣世忠然
之遣元率兵五百长戟居中翼以弓矢自下趋高贼众莫支乃据望楼立赤帜大军并进
夹击之贼遂平改相州观察使绍兴四年金人伪齐合
兵入侵世忠自镇江趋扬州命元屯承州元度金人将至城下遣百人伏要路百人伏岳
庙自以四百人伏路隅令曰俟金人过我当先出掩之
伏要路者视我麾旗则立帜以待金人必自岳庙走伏者背出又决河岸遏其归路金人
果走城下伏发金人进退无路乃走岳庙元追之获百
四十八人止遗二人时城中兵不满三千金万户黑头虎直造城下约降元匿其兵以微
服出伪若降者金人稍懈俄伏发擒黑头虎未几金兵
四集元战却之追北数十里金人赴水死者甚众改同州观察使六年从世忠出下邳以

数百骑破敌伏兵授保顺军承宣使十年略地淮阳至
刘令庄骑纒三百当敌骑数千元挥戈大呼众争奋敌披靡俄而救至后部疑惧元回顾
曰我在此若等无虑众乃安转战自辰至午敌退成列
而还加龙神卫四厢都指挥使明年世忠罢兵柄以元为镇江府驻扎御前诸军都统制
以统其众又明年进侍卫亲军马步军都虞候寻授信
保军节度使卒年五十四赠检校少保

△曲端

曲端字正甫镇戎人父涣任左班殿直战死端三岁授三班借职警敏知书善属文
长于兵略历秦凤路队将泾原路通安砦兵马监押权
泾原路第三将夏人入寇泾原帅司调统制李庠与端捍御庠驻兵栢林堡斥堠不谨为
夏人所薄端力战败之整军还夏人再入寇西安州怀
德军相继陷没镇戎当敌要冲无守将经略使席贡疾栢林功奏端知镇戎军兼经略使
统制官建炎元年金罗索攻陕西入长安凤翔关陇大
震端时治兵泾原招流兵溃卒所过人供粮秸道不拾遗金游骑入境端遣副将吴玠据
清溪岭与战大破之端乘其退遂下兵秦州而义兵已
复长安凤翔统领官刘希亮自凤翔归端斩之以集英殿修撰知延安府王庶为龙图阁
待制节制陕西六路军马遂授端吉州团练使充节制
司都统制端雅不欲属庶及金人复攻陕西庶召端会雍耀间端托辞不行庶无如之何
则檄责勒端还旧任遣陕西节制司将官贺师范趋耀
别将王宗尹趋白水且令原庆出师为援三帅各遣偏将刘世忠寇觶来与师范会庶欲
往耀督战已行会庞世才兵至邠端中悔以状白庶言
已赴军前庶乃止师范轻敌不戒卒遇敌于八公原战死二将各引去端遂得泾原兵柄
既而金人谍知端庶不协并兵攻鄜延时端尽统泾原
精兵驻淳化庶日移文趋其进又遣使十数辈往说端端不听庶知事急又遣属官鱼涛
督师端阳许而实无行意权转运判官张彬为端随军
应副问师期端曰兵不满万不幸而败则金骑长驱无陕西矣不如荡其巢穴攻其必救
乃遣吴玠攻华州拔之端自引兵趋耀之同官复迂路
由邠之三水与玠会襄乐金攻延安急庶收散亡往援知凤翔府王■〈王燮〉亦将所
部赴之比庶至甘泉而延安已陷庶无所归以军付■

〈王燮〉自将百骑与官属驰赴襄乐劳军庶犹以节制望端欲倚以自副端弥不平端
号令素严入壁者虽贵不敢驰庶至端令每门减其从
骑之半及帐下仅数骑而已端犹虚中军以居庶坐帐中端先以戎服趋于庭既而与
张彬及走马承受公事高中立同见帐中良久端声色
俱厉问庶延安失守状欲即军中杀庶夺其兵夜走盩州见陕西抚谕使谢亮请诛庶亮

曰使事有指今以人臣擅诛于外是跋扈也公为则自
为端意阻复归军明日庶见端为言已自劾待罪端拘縻其官属夺其节制使印庶乃得
去王■〈王燮〉将两军在庆阳端召之■〈王燮〉
不应会有告■〈王燮〉过邠军士劫掠者端怒命统制官张中孚率兵召■〈王燮〉
至庆阳■〈王燮〉已去遽遣兵要之不及初叛贼史
斌围兴元不克引兵还关中文兵统领张宗谔诱斌如长安而散其众欲徐图之端遣吴
玠袭斌擒之而自袭杀宗谔三年迁康州防御使泾原
路经略安抚使时延安新破端不欲去泾原乃以知泾州郭浩权鄜延经略司公事自谢
亮归朝廷闻端欲斩王庶疑有叛意以御营司提举召
端端疑不行议者喧言端反端无以自明会张浚宣抚川陕入辨以百口明端不反浚自
收揽英杰以端在陕西屡与敌角欲仗其威声承制筑
坛拜端为威武大将军宣州观察使宣抚处置使司都统制知渭州浚虽用端然未测端
意遣张彬以招填禁军为名诣渭州察之彬见端问曰
罗索以孤军深入吾境我合诸路攻之不难万一尼雅满并兵而来何以待之端曰彼将
士精锐且因粮于我我常为客彼常为主今当反之按
兵据险时出偏师以扰其耕获彼不得耕必取粮河东则我为主彼为客不一二年必自
困毙乃可图也万一轻举后忧方大彬以端言复命浚
不主端说四年春金人攻环庆端遣吴玠等拒于彭原店端自将屯宜禄玠先胜既而金
军复振玠大败端退屯泾州金乘胜焚邠州而去 【
按张魏公三战本末略金罗索与其父萨里罕及黑峰等攻邠州曲端拒之两战皆捷至
白店原金引众来攻又为端所败本传于端之败金不
及一语】 玠怨端不为援端谓玠前军已败不得不据险以防冲突乃劾玠违节制是秋
乌珠窥江淮浚议出师以挠其势端曰平原广野敌便
于冲突而我军未尝习水战金人新造之势难与争锋宜训兵秣马保疆而已俟十年乃
可端既与浚异浚积前疑竟以彭原事罢兵柄与祠再
责海州团练使万安州安置 【伏读通鉴辑览 御批曲端桀骜不驯屡形跋扈张浚
非不知之特以其临阵威声尚堪制胜为朝廷惜御
侮之才故以百口保端保其非叛委任不疑虽甚顽劣之人亦当为之感动出死力以相
报矣乃陕州之围复挟彦仙私嫌不遵檄赴救俨然仍
以王庶待浚浚见其怙终若此尚安望其同心集事乎他日恭州之狱虽由谗譖而成而
其致衅不可谓非自取者也】 是年浚为富平之役军
败诛赵哲贬刘锡浚欲慰人望下令以富平之役泾原军马出力最多皆缘前帅曲端训
练有方叙端左武大夫兴州居住绍兴元年叙正任荣
州刺史提举江州太平观徙阆州于是浚自兴州移司阆州欲复用之玠与端有憾言曲

端再起必不利于张公王庶又从而间之浚入其说亦畏端难制端尝作诗题柱曰不向关中兴事业却来江上泛鱼舟庶告浚谓其指斥乘輿于是送端恭州狱武臣康随者尝忤端鞭其背随恨端入骨浚以随提点夔路刑狱端闻之曰吾其死矣呼天者数声端有马名铁象日驰四百里至是连呼铁象可惜者又数声乃赴逮既至随令狱吏紮维之糊其口爇之以火端干渴求饮予之酒之酒九窍流血而死年四十一陕西士大夫莫不惜之 【伏读通鉴辑览 御批曲端抗违军檄坐视危急不援以致城陷将没奚止再三坐以失律之诛亦不为枉王庶以前诸事即不追咎而陕州彭原之致败皆张浚所目击若彼时即请朝命诛之谁得而议其非者乃于事后信萋菲之谗罗织逮系且以非法致之死恭州之狱论者咸以为冤浚实不能辞怀私端杀之罪矣】 寻追复宣州观察使溢壮愍端有将略使展尽其才要未可量然刚愎恃才凌物此其所以取祸云

△王友直

王友直字圣益博州高平人父佐以材武称友直年十二随父游谙兵法绍兴三十一年金人渝盟友直结豪杰志恢复乃矫制自拟承宣使河北等路安抚制置使以其徒王任为副使徧谕州县勤王未几得众数万制为十三军军置都统制等官统之进攻大名一鼓而克抚定众庶谕以绍兴年号乃与王任冯谷张升牛汝霖列奏于朝欲领众南归时金人尚在扬州久不报友直将由寿春涉淮道拜敕书勉以率众捣敌掎角应援除友直检校少保天雄军节度使王任等并授爵有差得便宜行事旋与敌遇相拒淮北敌兵来益众友直即率所部渡淮既而审所遇乃归师悔不袭击之高宗视师江上见于金陵赐金带章服锡赉及二子友直耻前功不遂自陈改复州防御使以忠义军统制隶镇江都统司越四月诏偕统制张子盖援海州方接战友直张一旗大书宋忠义将河北王九郎以自表潜由小径背敌阵因其辎重扼归道桥子盖知友直已乘敌后麾军进击敌溃走围遂解转宜州观察使孝宗受禅友直与统制宋窋数出奇转战张浚都督江淮一见喜之辟建康前军统制隆兴二年金人犯边宣谕使王之望命以前军戍昭关友直不踰时即行他军同戍者敌至辄退友直孤军坚守金兵驻黄山鼓柝相闻益整暇自持干道元年移镇江御前诸军统制俄改步司左军统制兼左骁卫上将军初淮北之战友直母子相失至是访得之乃与其妻李携二女自淮而还累迁侍卫亲步军都指挥使朝廷议遣马步二司移屯重地丞相虞允文欲先发步司友直请以马司先及马帅李显忠屯金陵友直奏马

军道途转徙困毙已甚有旨免移步司八年转承宣使旋除殿前副都指挥使淳熙元年授奉国军节度使四年总殿步司大阅于茅滩铠仗精明号令闲肃明年进殿前指挥使赐第中都赐田平江燕射咸预晚节宴安军政稍失隆宜州观察使寻罢宫观徙居信州以郊祀恩内徙三奉祠复武宁军承宣使卒年六十一追复节度使赠检校少保

△李宝

李宝河北人【按宋名臣言行别录作乘氏人】尝陷金拔身从海道来归金主南侵淮浙奸民倪询梁简等【按宋臣言行别录作倪询商简梁三儿】教金造舟且为乡导金使苏保衡造舟于潞河将繇海道袭浙江乃授宝浙西路马步军副都总管驻扎平江令与守臣督海舟捍御赐宝衣带鞍马尚方弓刀戈甲及银绢万数八月次江阴先遣其子公佐与边士宁潜伺敌动静虚实宝将启行军士争言西北风力尚劲逆之非利宝下令敢沮大计者斩遂发苏州大洋行三日风甚恶舟散不可收宝忼慨顾左右曰天以是试李宝邪宝心如铁石不变矣酌酒自誓风即止明日散舟复集士宁自密州回得敌耗甚悉且言公佐已挟魏胜得海州宝大喜趣众乘机进发适大风复作海涛如山宝神色不为动风少杀始纵舟泊抵东海敌已云合围海州旌麾数十里宝应兵登岸以剑画地令曰此非复吾境汝等当力战因握槊前行遇敌奋击将士贾勇无不一当十敌出不意亟引去胜出城迎宝奖其忠义勉以共立功名胜感泣乃维舟犒士遣辩者四出招纳降附声振山东豪杰如王世修辈各署旗集义勇争应援多者数万人宝列名上诸朝檄所部会密之胶西命公佐以郡事畀胜与俱发至胶西石臼岛敌舟已出海口泊唐岛相距仅一山时北风盛宝祷于石臼神俄有风自桅楼中来如钟铎声众咸奋引舟握刃待战敌操舟者皆中原遗民遥见宝船给敌兵入舟中使不知宋师猝至风驰舟疾过山薄敌鼓声震迭海波腾跃敌大惊掣碇举帆帆皆油纒弥亘数里风浪卷聚一隅窘束无复行次宝亟命火箭环射箭所中烟焰旋起延烧数百艘火所不及者犹欲前拒宝叱壮士跃登其舟短兵击刺之金所签中原旧民皆登岛脱甲归命俘大汉军三千余人斩其帅完颜郑嘉努等六人禽倪询等上于朝获其统军符印与文书器甲粮斛以万计余物众不能举者悉焚之火四昼夜不灭宝将乘势席卷公佐切谏以为金主方济淮闻通泰已陷得远失近且有腹背忧乃还军驻东海视缓急为表里援遣曹洋轻舟报捷诏奖谕书忠勇李宝四字表其旗帜除静海军节度使沿海制置使赐金器玉带宝战具精利率臣陈康伯取其长枪克敌弓弩俾所司为式制之卒赠检

校少保

△成闵

成闵字居仁邢州人靖康初应刘韜募捍金兵高宗即位闵领数百骑至扬州韩世忠追苗傅及袭乌珠讨范汝为闵皆在戎行又以力战却敌积功至武功大夫忠州刺史旋以取海州功擢磁州团练使召见赐袍带锦帛加宝玉束带时方与金盟世忠罢兵诏进闵棣州防御使殿前游奕军统制历迁保宁军承宣使绍兴二十四年拜庆远军节度使金主将南侵诏闵提禁旅三万镇武昌命湖北守漕创砦屋三万间以待之发折帛米钱茶引共百四十余万缗义仓和粳米六十三万石备军用仍赐金器剑甲临遣之闵至鄂未几进屯应城县八月除湖北京西制置使节制两路军马九月兼京西河北招讨使十一月诏回援淮西闵喜于得归冒雨兼程趋建康士卒多道死朝廷所给犒师物俱掩归己士卒有怨言闵斩之未几除淮东制置使驻镇江既而诏闵保上流发张成华旺军回驻鄂自引兵渡江趋扬州及金人渡淮北去闵列兵南岸军士声相闻金人笑之曰寄声成太尉有勤护送闵至泗州奏已克复淮东寻入朝凡侍从卿监合门内侍皆有赂遗左正言刘度劾之犹超拜太尉主管殿前司公事寻复为御史论列罢太尉婺州居住夺庆远节干道初听自便归湖州寻诏复节都统镇江诸军九年请祠致仕治园第于平江淳熙元年卒年八十一赠开府仪同三司子十一人

△赵密

赵密字微叔太原清源人幼知学嗜兵书用材武试崇政殿授河北队将戍燕高宗以大元帅开府檄统先锋援京师建炎元年从张俊讨李昱俊轻骑先行遇伏密奔射毙数人乃脱擢合门祗候俊置靖胜军以密统之平贼董青赵万徐明等累功转武节郎左军统领金兵陷扬州士民随乘輿渡江众数万密露立水滨麾舟济之苗傅之变破赤心军于临平金人攻明州俊遣密及杨沂中与殊死战败之进武功大夫升统制又破李成马进赐金带转亲卫大夫康州刺史总管泾原马步军平张莽荡寻诏入卫十年金攻亳宿从俊营合肥出西路时水潦暴涨涉六昼夜始达宿与敌遇败之明年敌分兵犯滁濠密进击之且命张守忠以五百骑出全椒县伏篁竹间敌疑宵遁密乃引兵出六丈河断其归路又败之进中卫协忠大夫和州团练防御使寻拜宜州观察使为龙神卫四厢都指挥使主管侍卫步军海寇朱明暴横密授张守忠方略曰海与陆异穷之则日月相持非策之善要在拊定之耳守忠用其计明降进定江军承宣使崇信军节度使以年劳转太尉拜开府仪同三司明年

领殿前都指挥使献本军酒坊六十六所积钱十万缗银五万两助军用诏奖之上疏告老以万寿观使奉朝请隆兴二年进少保致仕俄报金复犯淮诏密再为殿前都指挥使和议成罢为醴泉使干道元年致仕卒年七十一赠少傅

△刘子羽

刘子羽字彦修建州崇安人资政殿学士韜之长子也宣和末韜帅浙东子羽以主管机宜文字佐其父破睦贼入主太府太仆簿迁卫尉丞从韜守真定会金人入父子相誓死守金人不能拔而去由是知名除直秘阁京城不守韜死之既免丧除秘阁修撰知池州以书抵宰相论天下兵势当以秦陇为根本改集英殿修殿知秦州未行召赴行在除枢密院检详文字建炎三年大将范琼拥强兵江西召之来不肯释兵张浚与子羽密谋诛之一日命张俊以千兵渡江若备他盗者使皆甲而来因召俊琼及刘光世赴都堂议事为设饮食食已诸公相顾未发子羽坐庑下恐琼觉取黄纸趋前举以麾琼曰下有敕将军可诣大理置对琼愕不知所为子羽顾左右拥置輿中卫以俊兵送狱光世出抚其众数琼在围城中附金人迫二帝出狩状且曰所诛止琼尔汝等固天子自将之兵也众皆投刃曰诺有旨分隶御营五军顷刻而定琼竟伏诛浚以此奇其材宣抚川陕辟子羽参议军事至秦州立幕府节度五路诸将规以五年而后出师明年除徽猷阁待制金人窥江淮急浚念禁卫寡弱计所以分挠其兵势者遂合五路之兵以进子羽以非本计争之浚曰吾盍不知此顾今东南之事方急不得不为是耳遂北至富平与金人战不利金人乘胜而前宣抚司退保兴州人情大震官属有建策徙治夔州者子羽叱之曰孺子可斩也四川全盛敌欲入寇久矣直以川口有铁山栈道之险未敢遽窥耳今不坚守纵使深入而吾僻处夔峡遂与关中声援不相闻进退失计悔将何及今幸敌方肆掠未逼近郡宣抚但当留驻兴州外系关中之望内安全蜀之心急遣官属出关呼召诸将收集散亡分布险隘坚壁固垒观衅而动庶几犹可以补前愆奈何为此言乎浚然其言而诸参佐无敢行者子羽即自请北出复以单骑至秦州召诸亡将诸亡将闻命大喜悉以其众来会子羽命吴玠栅和尚原守大散关而分兵悉守诸险塞金人知有备引去明年金人复聚兵来攻再为玠所败浚移治阆州子羽请独留河池调护诸将以通内外声援浚许之明年玠戍河池王彦成金州二镇皆饥浚乃承制拜子羽利州路经略使兼知兴元府子羽至汉中通商输粟二镇遂安除宝文阁直学士是冬金人攻金州王彦失守退保石泉子羽亟移兵守饶风岭驰告玠玠大惊日夜驰三百

里至饶风列营拒守金人悉力仰攻死伤山积更募死
士由间道自祖溪关入绕出玠后玠遽邀子羽去子羽不可而留玠同守定军山玠难之
遂西子羽焚兴元退守三泉县从兵不满三百与士卒
取草牙不甲食之遣玠书诀别玠时在仙人关其爱将杨政大呼军门曰节使不可负刘
待制不然政辈亦舍节使去矣玠乃间道会子羽子羽
留玠共守三泉玠曰关外蜀之门户不可轻弃复往守仙人关子羽以潭毒山形斗拔其上
宽平有水乃筑壁垒十六日而成金人已至距营十
数里子羽据胡迹坐于垒口诸将泣告曰此非待制坐处子羽曰子羽今日死于此敌寻
亦引去自金人入梁洋西蜀复大震张浚欲移潼川子
羽遗浚书言已在此金人必不南浚乃止萨里■〈𠂔干〉由斜谷北去子羽谋邀之于
武休不及既回凤翔遣十人持书旗招子羽 【按宋
名臣言行别录载萨里■〈𠂔干〉遣十五辈赍书与旗来招子羽子羽斩其十四人令
一人还宋史与本传异】 子羽斩其九而纵其一还寄
语曰欲来即来吾有死尔何可招也先是子羽预徙梁洋公私之积至是金人深入馈不
继又腹背为子羽玠所攻死伤十五六疫疠且作亟遁
去子羽出师掩击堕溪涧死者不可胜计余兵不能自拔者悉降始金人攻蜀为必取计
浚虽衄师卒能全蜀子羽之力居多子羽还兴元四年
坐富平之役与浚俱罢 【伏读通鉴辑览 御批张浚富平之败心虽可原然失律之
法不可追也至刘子羽以参军枝拄其间既谏浚于
未战之前及浚屡欲退遁皆以子羽而止饶风之役亦不为无功朝议因其与浚同事并
从贬逐殊失黜陟之平岂其前后参画朝廷皆未之闻
乎】 寻为言者所论责授单州团练副使泉州安置吴玠始为裨将未知名子羽独奇之
言于浚浚与语大悦使尽护诸将至是除川陕宣抚副
使上疏论子羽之功请纳节赎其罪诏听子羽自便明年复原官提举江州太平观张浚
还朝议合兵大举乃请召子羽令谕旨西帅以集英殿
修撰知鄂州未几权都督府参议军事与主管机宜文字熊彦诗同抚谕川陕还言金人
未可图宜益兵屯田以俟机会时张浚以刘光世骄惰
密奏罢之而以其兵属子羽子羽辞乃以岳猷阁待制知泉州张浚罢相御史常同论子
羽十罪上批出白州安置同疏再上以散官安置漳州
十一年张浚荐子羽复原官知镇江府兼沿江安抚使金人入侵子羽建议清野淮东之
人皆徙镇江抚以恩信虽兵民杂居无敢相侵者既而
金人不至浚问子羽子羽曰异时金人入飘忽如风雨今久迟回必有他意盖金人以柘
皋之败欲急和也未几果遣使议和复徽猷阁待制秦
桧风谏官论罢之复提举太平观十六年卒子珙自有传

△吕祉

吕祉字安老建州建阳人宣和初上舍释褐建炎二年为右正言以论事忤执政通判明州绍兴元年为荆湖提刑招捕羣盗有方进直秘阁寻召赴行在韩世忠辟祉议军事除直徽猷阁充参议官辞不行三年升直龙图阁知建康府祉到官与通判府事吴若等共议作东南防守利便三卷上之大略谓立国于东南者当联络淮甸荆蜀之势今临安僻在海隅移躔江上然后可以系南北离散之心四年冬金人攻淮江左戒严独韩世忠统锐卒在高邮金既陷涟水破山阳盱眙遂攻承州祉上章言宜遣兵为世忠援既而援兵不至世忠退保镇江祉再上言置江北于度外非命帅宣抚两淮之意且恐失中原心唯当急遣诸将且乞亲御六师庶几上下协心可以不战而胜于是降诏亲征车驾至平江金人退师五年召为中书门下省检正诸房文字寻除兵部侍郎兼户部侍郎给事中六年迁刑部侍郎都督府参议军事俄迁吏部侍郎刘豫分道入寇时车驾驻平江或请回临安且令守江防海祉独抗言当振士气以挫敌锋不可遽退以示弱刘麟众十万已次濠寿刘光世在合肥欲移屯太平州军已行乃命祉驰往军前督其还七年迁兵部尚书升督府参谋军事往淮西抚谕诸军浚以刘光世骄惰罢之乃命王德为都统制酈琼副之琼与德素不协祉还朝琼与德交讼于都督府及御史台乃命德还建康以其军隶督府八月复命祉往庐州节制之祉至庐州琼等复讼德祉谕之曰若以君等为是则大相诬然张丞相但喜人向前傥能立功虽有大过亦阔略况此小嫌乎当力为诸公辨之保无他虑琼等感泣事小定祉乃密奏乞罢琼及统制官靳赛兵权其书吏漏语于琼琼令人遮祉所遣邮置尽得祉所言大怨怒会朝廷命张俊为淮西宣抚使置司盱眙杨存中为淮西制置使刘锜为副置司庐州召琼赴行在琼惧遂叛诸将晨谒祉坐定琼袖出文书示中军统制官张璟曰诸兵官有何罪张统制乃以如许事闻之朝廷邪祉见之大惊欲返走不及为琼所执璟及兵马钤辖乔仲福统制刘永衡皆死之琼遂率全军四万人渡淮降刘豫拥祉次三塔距淮三十里祉下马曰刘豫逆臣我岂可见之死则死于此又语其众曰军中岂无英雄乃随酈琼去从逆乎众颇感动凡千余人环立不行琼恐摇动众心急策马先渡祉遇害时有得祉括发之帛归吴中者其妻吴氏持帛自缢以徇葬闻者哀之庆元间诏立庙赐额以旌其忠云

△胡世将

胡世将字承公常州晋陵人宿之曾孙登崇宁五年进士第范汝为寇闽以世将为

监察御史福建路抚谕使入境韩世忠已平贼迁尚书右司员外郎又迁起居郎中书舍人赐三品服兼修政局坐言者落职奉祠未几除徽猷阁待制知镇江府入为礼部侍郎改刑部出知洪州兼江西安抚制置使建昌兵变杀守臣刘滂婴城以叛世将以便便宜发兵讨平之除兵部侍郎复知镇江未几召为给事中兼侍讲直学士院复迁兵部侍郎寻以枢密直学士出为四川安抚制置使兼知成都府宣抚吴玠以军无粮奏请踵至世将既入境约玠会议蜀之饶运邈嘉陵江千余里半年始达于是奏用转般折运之法军储稍充公私便之绍兴九年玠卒以世将为宝文阁学士宣抚川陕时关陕初复朝廷分军移屯熙秦鄜延诸道明年夏金人陷同州入长安诸路皆震蜀兵既分声援几绝时世将在河池吴玠请以百口保破敌世将壮之指所居帐曰世将誓死于此乃遣大将吴玠田晟出凤翔郭浩出奉天杨政由赤谷归河池不数日玠捷于石壁又拔扶风金人逡巡不敢度陇分屯之军得全师而还诏除端明殿学士十一年秋朝廷复用兵会母丧命起复遂复陇州破岐下诸屯又取华虢兵威稍振未几痲发于首除资政殿学士致仕卒年五十八命有司给葬事

△郑刚中

郑刚中字亨仲婺州金华人登进士甲科累官监察御史迁殿中侍御史刚中由秦桧荐桧主和议刚中不敢言移宗正少卿请去不许改秘书少监金归侵疆桧遣刚中为宣谕使参谋官及还除礼部侍郎复使宣谕川陕谕诸将罢兵寻充陕西分画地界使金使乌凌阿赞谟入境欲尽取阶成岷凤秦商六州刚中力争不从欲姑取商秦于大散关立界刚中又坚不从继除川陕宣抚副使乌珠遣人力求和尚原刚中恐败和好割秦商之半弃和尚原以与金刚中治蜀颇有方略宣抚司旧在绵阆间及胡世将代吴玠就居河池馈饷不继刚中奏利州在潭毒关内与兴洋诸关声援相接乞移司利州自是省费百万刚中始至即欲移屯一军大将杨政不从呼政语之曰刚中虽书生不畏死声色俱厉政即听命都统每入谒必庭参然后就坐吴玠升检校少师来谢语阖吏乞讲钧敌之礼刚中曰少师虽尊犹都统制耳傥变常礼是废军容行礼如故奏蠲四川杂征又请减成都府路对采及宣抚司激赏钱时刚中于阶成二州营田抵秦州界凡三千余顷岁收十八万斛又请分利州为东西路以兴元府利阆洋巴剑州大安军七郡为东路治兴元命杨政为安抚以兴阶成西和文陇凤七州为西路治兴州命吴玠为安抚而命郭浩为金房开达州安抚诸裨将领安抚者皆罢从之弛夔路酒禁复利州钱监为绍兴监

秦桧怒刚中在蜀专擅令侍御史汪勃奏置四川财赋
总领官以赵不弃为之不隶宣抚司不弃颇求刚中阴事言于桧桧阳召不弃归因召刚
中刚中语人曰孤危之迹独赖上知之耳桧闻愈怒遂
罢责桂阳军居住再责濠州团练副使复州安置再徙封州卒

钦定续通志卷三百七十四

●钦定续通志卷三百七十五 列传一百七十五

列传

宋 【七十九】

○宋七十九

白时中	徐处仁	冯澥	王伦	宇文虚中	汤思退
朱倬	王纶	尹穡	王之望		
徐俯	沈与求	翟汝文	王庶	辛炳	

白时中

徐处仁

冯澥

王伦

宇文虚中

汤思退

朱倬

王纶

尹穡

王之望

徐俯

沈与求

翟汝文

王庶

辛炳

△白时中

白时中字蒙亨寿春人登进士第累官为吏部侍郎坐事降秩知郢州已而复召用
政和六年拜尚书右丞中书门下侍郎宣和六年除特
进太宰兼门下封崇国公进庆国始时中尝为春官诏令编类天下所奏祥瑞其有非文
字所能尽者图绘以进时中进政和瑞应记及赞及为
太宰表贺翔鹤霞光等事圜丘礼成上言休气充应前所未有乞宣付秘书省时燕山日
告危急而时中恬不为虑金人入攻京城修守备时中

谓宇文粹中曰万事须是涉历非公尝目击守城之事吾辈岂知首尾邪钦宗即位召大臣决策守京师问谁可将者李纲言朝廷高爵厚禄蓄养大臣盖将用之有事之日时中辈虽书生然抚将士以抗敌锋乃其职也时中勃然曰李纲莫能将兵出战乎纲曰陛下橐使臣当以死报于是以纲为右丞充守御使时中寻罢为观文殿学士中太一宫使御史劾时中孱懦不才诏落职未几卒

△徐处仁

徐处仁字择之应天府谷熟县人中进士甲科为永州东安县令蛮人叛处仁入峒开示恩信蛮感泣誓不复反知济州金乡县以荐召见徽宗问京东岁事处仁以旱蝗对问邑有盗贼乎曰有上谓处仁不欺除宗正寺丞太常博士时初置算学议所祖或以孔子赞易知数处仁言仲尼之道无所不备非专门比黄帝迎日推策数之始也祖黄帝为宜擢监察御史迁殿中右正言给事中摄开封府裁决如流囚系常空进户部尚书继拜中大夫尚书右丞丁母忧免丧以资政殿学士知青州徙知永兴军童贯使陕西欲平物价处仁议不合曰此令一传则商贾弗行而积藏者弗出名为平价适以增之转运使阿贯意劾其格德音倡异论侵辱使者诏处仁赴阙寻改知河阳落职知蕲州久之以显谟阁直学士知颖昌府民有得罪宫掖者虽赦不原处仁为奏上童贯乘是挤之夺职提举鸿庆宫复延康殿学士知汝州再奉鸿庆祠知徐州召为醴泉观使徽宗访以天下事处仁对曰天下大事在兵与民今水旱之余赋役繁重公私凋敝兵民皆困不及今谋之后将有不胜图者除侍读复言昔周以豕宰制国用于岁之杪宜会朝廷一岁财用之数量入为出节浮费罢横敛百姓既足军储必丰帝称善诏置裕民局讨论振兵裕民之法蔡京不悦言者谓今设局曰裕民岂平日为不裕民哉乃罢局出处仁知扬州未几以疾奉祠归南都方腊为乱处仁亟见留守薛昂为画守战之策因语昂曰睢阳蔽遮江淮乃国家受命之地脱有非常吾助君死守语闻于朝起为应天尹河北盗起徙大名尹前尹王革惨而怯盗无轻重悉抵死小有警辄闭城以兵自卫处仁至即大开城门撤牙内甲兵人情遂安上备边御戎十策进观文殿学士召为宝篆宫使特升大学士旧制大观文非宰相不除前二府得除自处仁始钦宗即位金人攻汴处仁储粮列备合锐兵万人勤王奏乞下诏亲征以张国威奏至朝廷适下亲征诏书以李纲为行营使即移书纲言备御方畧金人北归处仁奏宜伏兵浚滑击其半济必可成功召为中书侍郎入见钦宗问割三镇处仁言国不竞亦陵且定武陛下之潜藩不当弃与吴敏议合敏荐处仁可相拜太宰

兼门下侍郎童贯部胜捷军卫徽宗东巡贯既贬军士有恶言徽宗将还都人汹惧或请为备处仁曰陛下仁孝思奉晨昏属车西还天下大庆宜郊迎称贺军士妄言臣请身任之乃以处仁为扈驾礼仪使统禁旅从出郊迄二圣还宫部伍肃然初处仁为右丞言六曹长贰皆异时执政之选而部中事一无所可否悉禀命朝廷夫人才力不容顿异岂有前不能决一职而后可共政者乎乞诏自今尚书侍郎不得辄以事诿上有条以条决有例以例决无条例则酌情裁决不能决乃申尚书省会处仁以忧去不果行及当国卒奏行之聂山为户部尚书兼开封尹库有美珠山密语宦德宫宦者用特旨取之处仁奏陛下鉴近患事必由三省今以珠为道君太上皇后寿诚细故且美事然此端一开则前日应奉之徒复纵臣为陛下惜之乃抵主藏吏罪处仁言论初与吴敏李纲合寻亦有异议常与敏争事擲笔中敏面鼻额为黑唐恪耿南仲聂山欲排去二人而代之位讽言者论之与敏俱罢处仁以观文殿大学士为中太一宫使寻知东平府提举崇福宫高宗即位起为大名尹北道都总管卒于郡处仁在宣和闲数请宽民力以弭盗贼尹大名以刚廉称及为丞相无大建明方进言以金人出境社稷再安皆由圣德俭勤致有天人之助种师道请合诸道兵屯河阳诸州为防秋计处仁谓金人岂能复来不宜先自扰以示弱南都受围时处仁在围城中都人指为奸细杀其长子庚幼子度吏部侍郎

△冯澥

冯澥字长源普州安岳人父山熙宣末为秘书丞通判梓州范祖禹荐于朝官终祠部郎中澥登进士第靖康初为左谏议大夫金人围太原朝廷命李纲宣抚两河澥奏罢之除尚书左丞金人围汴诏宗室郡王为报谢使澥与曹辅以枢密为副留金营三日归诏暂权门下侍郎钦宗诣金营澥扈从张邦昌僭位与澥有旧取之归【按三朝北盟会编载靖康二年三月二十三日张邦昌与金帅书乞还冯澥郭仲荀等金人得书遂遣左丞冯澥签书枢密院事曹辅太常少卿汪藻礼部侍郎谭世绩中书舍人孙覿及徐天民苏余庆郭仲荀沈晦黄夏卿等还】以澥康邸旧臣命为奉迎使总领迎驾仪物使建炎初除资政殿学士知漳州府绍兴三年以资政殿学士致仕卒澥论西事与蔡京忤然议论主熙丰绍圣而排邹浩李纲杨时君子少之

△王伦

王伦字正道莘县人文正公旦弟勛【按宋史王旦传及欧阳修撰旦神道碑俱作与弟旭友爱甚笃此作勛金史作勉】裔孙也家贫

无行为任侠往来京洛闲汴京失守钦宗御宣德门都人喧呼不已伦乘势径造御前曰臣能弹压之钦宗解所佩夏国宝剑以赐伦曰臣未有官岂能弹压遂自荐其才钦宗取片纸书曰王伦可除兵部侍郎伦下楼挟恶少数人传旨抚定都人乃息宰相何■〈〈鹵，欠代义〉上木下〉以伦小人无功除命太俊奏补修职郎斥不用建炎元年选能专对者使金问两宫起居迁朝奉郎假刑部侍郎充大金通问使合门舍人朱弁副之见金左副元帅宗维议事金留不遣有商人陈忠密告伦二帝在黄龙府伦遂与弁及洪皓以金遗忠往黄龙府潜通意由是两宫始知高宗已即位久之尼雅满使乌凌阿思谋即驿见伦语及契丹时事伦曰海上之盟两国约为兄弟云中之役我实馈师赞成厥功上国之臣尝欲称兵南来先大圣惠顾盟好不许厥后举兵以祸吾国果先大圣意乎主上恭勤期必复古盍归我二帝太母复我土疆亦足以慰先大圣之灵幸执事者赞之思谋沈思曰君言是也归当尽达之已而尼雅满至曰比上国遣使来问其意指多不能对思谋传侍郎语欲议和决非江南情实特侍郎自为此言耳伦曰使事有指不然来何为哉人定者胜天天定亦能胜人惟元帅察之尼雅满不荅是后宇文虚中魏行可洪皓崔纵张邵相继入使皆拘之绍兴二年尼雅满忽自至馆中与伦议和纵之归报是秋伦至临安入对言金人情伪甚悉帝优奖之除右文殿修撰主管万寿观官其二弟一侄时方用兵讨刘豫和议中格三年韩肖胄使金还金遣李永寿王诩继至二人骄倨以伦充伴使伦与道云中旧故骄倨少损遂拜诏乞事伦请祠刘光世求伦参议军事辞宰相赵鼎请召伦赴都堂稟议伦陈进取之策不合复请祠七年春徽宗及懿德后讫至复以伦为徽猷阁待制假直学士充迎奉梓宫使以朝请郎高公绘副之入辞帝使伦谓金左副元帅昌曰河南地上国既不有与其付刘豫曷若见归伦奉诏以行因附进太后钦宗黄金各二百两仍以金帛赐宇文虚中朱弁孙傅张叔夜家属之在金国者伦至睢阳刘豫馆之疑有他谋移文取国书伦报曰国书须见金主面纳若所衔命则祈请梓宫也豫胁取不已会迓者至渡河见达兰于涿州具言豫邀索国书无状且谓豫忍背本朝他日安保其不背大国是年冬预废伦及高公绘还左副元帅昌送伦等曰好报江南自今道涂无壅和议可以平达伦入对言金人许还梓宫及太后又许归河南地且言废豫之谋由已发之帝大喜赐予特异初伦既见昌昌遣使偕伦入燕见金主首谢废豫次致使指金主始密与羣臣定议许和遂遣伦还八年秋以端明殿学士再使金国知合门事蓝公佐为之副申问讳日期还梓宫伦至金国金主为设

宴三日遣签书宣徽院事萧哲左司郎中张通古为江南诏谕使偕伦来朝论以金使肆
嫚抗谕甚喧多归罪伦十一月伦至行在引疾请祠不
许趣赴内殿奏事时哲等骄倨受书之礼未定御史中丞句龙如渊诣都堂与秦桧议召
伦责曰公为使通两国好凡事当于彼中论定安有同
使至而后议者伦泣曰伦涉万死一生往来虎口者数四今日中丞乃责伦如此桧等共
解之曰中丞无他亦欲激公了此事耳伦曰此则不敢
不勉伦见通古以一二策动之通古恐遂议以桧见金使于其馆受书以归金许归梓宫
太母及河南地九年春赐伦同进士出身端明殿学士
签书枢密院事充迎梓宫奉还两宫交割地界使既又以伦为东京留守兼开封尹伦至
东京见金右副元帅乌珠交割地界乌珠还燕五月伦
自汴京赴金国议事初乌珠还密言于金主曰河南地本达兰宗盘主谋割之与宋二人
必阴结彼国今使已至汴勿令踰境伦有云中故吏隶
乌珠者潜以告伦伦即遣介具言于朝乞为备乌珠遂命中山府拘伦杀宗盘及达兰十
月伦始见金主于御子林致使指金主悉无所答令其
翰林侍御耶律绍文为宣勘官问伦知达兰罪否伦对不知又问无一言及岁币反求割
地汝但知有元帅岂知有上国邪伦曰比萧哲以国书
来许归梓宫太母及河南地天下皆知上国寻海上之盟与民休息使人奉命通好两国
耳既就馆金主复遣绍文谕伦曰卿留云中已无还期
及贷之还曾无以报反闲贰我君臣耶乃遣蓝公佐先归论岁贡正朔誓表册命等事拘
伦以俟报已而迁之河闲遂不复遣十年金渝盟乌珠
等复取河南伦居河闲六载至十四年金欲以伦为平滦三路都转运使伦曰奉命而来
非降也金益胁以威遣使来趣伦拒益力金杖其使俾
缢杀之伦厚赂使少缓遂冠带南乡再拜恸哭曰先臣文正公以直道辅相两朝天下所
知臣今将命被留欲污以伪职臣敢爱一死以辱命遂
就死年六十一于是河闲地震雨雹三日不止人皆哀之诏赠通议大夫赐其家金千两
帛千疋子述与述兄遵闲入金境至河闲得伦骨以归
官给葬事后谥愍节

△宇文虚中

宇文虚中字叔通成都华阳人登大观三年进士第历官州县入为起居舍人国史
编修官同知贡举迁中书舍人宣和闲承平日久兵将
骄惰蔡攸童贯贪功开边将兴燕云之役引金人夹攻契丹以虚中为参议官虚中以庙
谟失察主帅非人将有纳侮自焚之祸上书言用兵之
法必先计强弱策虚实知彼知己当图万全今边圉无应敌之具府库无数月之储安危
存亡系兹一举岂可轻议且中国与契丹讲和今踰百

年自遭金人侵削以来向慕本朝一切恭顺今舍恭顺之契丹不羁縻封殖为我藩篱而远踰海外引金人以为邻域金人藉百胜之势虚愒骄矜持卞庄两鬪之计引兵踰境以百年怠惰之兵当新锐难抗之敌以寡谋安逸之将角逐于血肉之林臣恐中国之祸未有寔息之期也王黼大怒降集英殿修撰督战益急虚中建十一策上二十议皆不报斡里雅布尼雅满分道入侵童贯闻之忧懣不知所为即与虚中及范讷等谋以赴阙禀议为遁归之计以九月至汴京是日报尼雅满迫太原帝顾虚中曰王黼不用卿言今金人两路并进事势若此柰何虚中奏今日宜先降诏罪己更革弊端俾人心悦天意回则备御之事将帅可以任之即命虚中草诏畧曰言路壅蔽面谀日闻恩幸持权贪饕得志上天震怒而朕不悟百姓怨怼而朕不知又言出宫人罢应奉等事帝览诏曰今日不吝改过可便施行时守御难其人欲召熙河帅姚古与秦凤帅种师道令以本路兵会郑洛外援河阳内卫京城以虚中为资政殿大学士军前宣谕使虚中檄趣姚古师道兵令直赴汴京应援金骑至城下放兵大掠至郑州为马忠所败遂收敛为一西路稍通师道姚古及其它西兵并得达汴京虚中亦驰归收合散卒得东南兵二万余人以便宜起致仕官李邈令统领于汴河上从门外驻兵会姚平仲劫金营失利西兵俱溃金人复引兵逼城下虚中缒而入钦宗欲遣人奉使辨劫营非朝廷意虚中承命即往都亭驿见金使王芮因持书复议和渡濠桥冒锋刃而进既至敌营露坐风埃金人注矢露刃周匝围绕久乃得见康王于军中次日侍王至金幕见二太子者礼节倨傲抵暮遣人随虚中入城要越王李邦彦吴敏李纲曹晟及金银骡马之类又欲御笔书定三镇界至方退军令虚中再往必请康王归虚中再出明年从康王还除签书枢密院事自是又三往金人固要三镇虚中泣下不言金帅变色虚中曰太宗殿在太原上皇祖陵在保州讷忍割弃金帅遂解兵北去言者劾以议和之罪罢知青州寻落职奉祠建炎元年窜韶州二年诏求使绝域者虚中应诏复资政殿大学士为祈请使杨可辅副之寻又以刘洵为通问使王觐为副明年春金人并遣归虚中曰奉命北来祈请二帝二帝未还虚中不可归于是独留虚中有才艺金人加以官爵即受之与韩昉辈俱掌词命明年洪皓至上京见而甚鄙之累官翰林学士知制诰兼太常卿封河内郡开国公书金太祖睿德神功碑进阶金紫光禄大夫金人号为国师然因是而知东北之士皆愤恨陷北遂密以信义结约金人不觉也金人每欲南侵虚中以费财劳人远征江南荒僻得之不足以富国王伦归言虚中奉使日久守节不屈遂诏福州存恤其家仍命其子

师瑗添差本路转运判官桧虑虚中沮和议悉遣其家往金国以牵制之金皇统四年转承旨加特进迁礼部尚书承旨如故虚中恃才轻肆好讥讪贵人达官往往积不平虚中尝撰宫殿榜署本皆嘉美之名恶之者搥其字以为谤讪由是媒蘖成其罪遂告虚中谋反罗织虚中家图书为反具虚中曰死自吾分至于图籍南来士大夫家家有之高士谈图书尤多干我家岂亦反邪并杀士谈 【按金史宇文虚中传云士谈字季默高琼之后宣和末为忻州巨曹参军人朝官至翰林直学士有文集行世】 虚中与老幼百口同日就焚死天为之昼晦淳熙闲赠开府仪同三司谥肃愍赐庙仁勇且为置后是为绍节 【按王伦宇文处中宋金两史俱有传宋史所载较详今删彼存此】

△汤思退

汤思退字进之处州人绍兴十五年以右从政郎授建州政和县令试博学宏词科除秘书省正字自是登郎曹贰中秘秉史笔二十五年繇礼部侍郎除端明殿学士签书枢密院事未几参大政先是秦桧当国恶直丑正必不异和议不撻己过始久于用时思退名位日进桧病笃招参知政事董德元及思退至卧内属以后事各赠黄金千两德元虑其以我为自外不敢辞思退虑其以我期其死不敢受高宗闻之以思退不受金非桧党信用之二十六年除知枢密院事明年拜尚书右仆射又二年进左仆射明年侍御史陈俊卿论其挟巧诈之心济倾邪之术观其所为多效秦桧盖思退致身皆桧父子恩也遂罢以观文殿大学士奉祠隆兴元年符离师溃召思退复相谏议大夫王大宝上章论之不报金帅黑舍哩志窳遗书三省枢密院索海泗唐邓四郡思退欲与和遣淮西安抚司干办公事卢仲贤加枢密院计议编修官持报书以往既行帝戒勿许四郡仲贤至宿州布萨忠义惧之以威仲贤惶恐言归当禀命遂以忠义遗三省枢密院书来上犹欲止割海泗思退遽奏以吏部侍郎王之望为通问使知合门事龙大渊副之将割弃四州张浚在扬州闻之遣其子栻入奏仲贤辱国无状帝怒会侍御周操论仲贤不应擅许四郡下大理究问召浚赴行在十二月拜思退左仆射浚右仆射二年浚以金未可与和请帝幸建康图进兵帝手批王之望等并一行礼物并回诏荆襄川陕严边备甯仲贤郴州思退恐奏请以宗社大计奏禀上皇而后从事帝批示三省曰卿犹欲言和今日敌势非秦桧时比卿议论秦桧不若思退大骇阴谋去浚遂令之望大渊驿疏兵少粮乏楼櫓器械未备又言委四万众以守泗州非计帝颇惑之乃命浚行边还兵罢招纳浚力乞罢政许之帝命思退作书许金四郡既而金专事杀戮帝意中悔思退复密令

孙造谕敌以重兵胁和帝闻有敌兵命建康都统王彦等御之仍命思退督江淮军辞不行布萨忠义自清河口渡淮言者极论思退急和彻备之罪遂罢相寻责居永州于是太学生张观等七十二人上书论思退王之望尹穉等奸邪误国招致敌人请斩之思退忧悸死思退始终与张浚不合浚以雪耻复讎为志思退每借保境息民为口实更胜迭负思退之计迄行然终以不免敌既得海泗唐邓又索商秦皆思退力也

△朱倬

朱倬字汉章唐宰相敬则之后七世祖避地闽中为闽县人世学易入太学宣和五年登进士第调常州宜兴簿金将侵边居民求避地倬为具舟给食众赖以济未几民告滂于郡郡檄倬考实乃除田租什九守怒不能夺张浚荐倬召对除福建广东西财用所属官宣谕使明橐再荐于朝时方以刘豫为忧倬因赐对策其必败高宗大喜诏改合入官与丞相秦桧忤出教授越州用张守荐除诸王府教授桧恶言兵倬论掩骼事又忤之梁汝嘉制置浙东表摄参谋有羣寇就擒属倬鞫问独窜二人余释不问曰吾大父尉崇安日获寇二百坐死者七十余人夫谓此饥民剽食尔乌可尽绳以法吾其可愧大父乎通判南剑建寇阿魏众数千剑邻于建兵慄不可用倬重赏募卒擒获境内迄平除知惠州陞辞因言尝策刘豫必败高宗记其言问卿久淹何所倬曰厄于桧帝愀然慰谕日送之旬日闲除国子监丞寻除浙西提举且命自今在内除提举官令朝辞上殿盖为倬设也除右正言累迁中丞尝言人主任以耳目非报怨任气之地必上合天心每上疏辄夙兴露告若上帝鉴临奏疏凡数十如发仓廩蠲米价减私盐核军食率焚稿不传知贡举迁参知政事绍兴三十一年拜尚书右仆射金兵偪江倬陈战备应三策且谓兵应者胜帝深然之又策敌三事上焉者为耕筑计中焉者守备下则妄意绝江金必出下策果如所料史浩虞允文王淮陈俊卿刘珙之进用皆倬所进也高宗自建康回銮有内禅意倬密奏曰靖康之事正以传位太遽盍姑徐之心不自安屡求去诏以观文殿大学士提举江州太平兴国宫孝宗即位谏臣以为言降资政殿学士明年致仕卒复元职恤典如宰相赠特进孙着淳熙十四年登第仕至吏部尚书

△王纶

王纶字德言建康人幼颖悟十岁能属文登绍兴五年进士第授平江府昆山县主簿历镇江府婺州临安府教授权国子正时初建太学亡旧规凭吏省记吏缘为奸纶厘正之其弊稍革迁敕令所删定官诸王宫大小学教授兼权兵部郎官言孔门弟子与后世诸儒有功斯文者

皆得从祀先圣今辟庠序修礼乐宜以其式颁诸郡县二十四年以御史中丞魏师逊荐为监察御史与秦桧论事忤其意师逊遂劾纶且言智识浅昧不能知纶由此罢去踰年知兴国军桧死召为起居舍人兼崇政殿说书寻兼权礼部侍郎二十六年试中书舍人高宗躬亲政事收揽威柄召诸贤于散地诏命填委多纶所草纶奏守臣裕民事乞毋拘五条从之兼侍讲帝喜读春秋左氏传纶进讲与帝意合尝同讲读官荐兴化军郑樵学行召对命官且给笔札录其所著史兼直学士院迁工部侍郎仍兼直院撰吴玠神道碑称上旨赐宗翰褒宠二十八年除同知枢密院事金将渝盟边报沓至宰相沈该未敢以闻纶率参知政事陈康伯同知枢密院事陈诚之共白其事乞备御已而纶病肺喝告请祠二十九年六月朝论欲遣大臣为之使觐敌且坚盟好纶请行乃以为称谢使曹勋副之至金馆礼甚隆一日急召使入金主御便殿惟一执政在焉连发数问纶条对金主不能屈九月还朝入见言邻国恭顺和好皆陛下威德所致宰臣汤思退等皆贺然当时金已谋入江特以善意给纶尔纶旧疾作力丐外除资政殿大学士知福州帝解所御犀带赐之明年知建康府兼行宫留守敌犯江纶每以守御利害驿闻帝多从之三十一一年卒赠左光禄大夫谥章敏无子以兄綽之子为后

△尹穉

尹穉字少稷建炎中兴自北归南绍兴三十二年与陆游同为枢密院编修官权知院史浩同知王祖舜荐其博学有文召对称旨二人并赐进士出身孝宗奖用西北之士隆兴元年除穉监察御史寻除右正言二年除殿中侍御史历迁谏议大夫未几而罢初符离师溃汤思退复相金帅移书索地诏侍从台谏集议穉时为监察御史以为国家事力未备宜与敌和惟增岁币勿弃四州勿请陵寝则和议可成既而卢仲贤出使为金所胁又将遣王之望张浚极言其不可穉为右正言惧和议弗就因劾浚跋扈未几罢政后将割四郡再易国书岁币如所索之数而敌分兵入侵帝意中悔穉为侍御史乞置狱取不肯撤备及弃地者劾其罪牵引凡二十余人时方以和为急擢穉为谏议大夫敌势寢张远近震动都督同都督相继辞行上书者攻和议之失且言穉专附大臣为鹰犬如张浚忠诚为国天下共知穉乃妄肆诋讪凡大臣不悦者皆逐之相与表里以成奸谋皆可斩帝虽怒言者而一时主议之臣与穉皆相继废黜先是胡铨力言主和非是大臣不悦命铨与穉分往浙东西措置海道二人挈家以行为言者所劾遂皆罢

△王之望

王之望字瞻叔襄阳谷城人后寓居台州之望登绍兴八年进士第教授处州入为太学录旋迁博士久之出知荆门军提举湖南茶盐改潼川府路转运判官寻改成都府路计度转运副使提举四川茶马朝臣荐其才召赴行在除太府少卿总领四川财赋金人渝盟军书旁午调度百出之望区画无遗事第括民质剂未税者搜抉隐匿得钱为缗四百六十八万众咸怨之升太府卿孝宗即位除户部侍郎充川陕宣谕使先是敌帅合喜寇凤州之黄牛堡吴璘击走之遂取秦州连复商陕原环等十七郡敌以璘精兵皆在德顺力攻之时陈康伯秉政方议罢德顺戍虞允文为宣谕使力争不从帝以手札命璘退师之望既代允文宣谕使赞璘命诸将弃德顺仓卒引退敌乘其后正兵三万还者仅七千人将领所存无几连营恸哭声震原野帝闻而悔之隆兴初右谏议大夫王大宝疏之望罪除集英殿修撰提举江州太平兴国宫未几除户部侍郎江淮都督府参赞军权事之望雅不欲战请朝因奏人主论兵与臣下不同惟奉承天意而已窃观天意南北之形已成未易相兼我之不可绝淮而北犹敌之不可越江而南也移攻战之力以自守自守既固然后随机制变择利而应之有旨留中俄兼直学士院汤思退力主息兵奏除之望吏部侍郎为通问使寻议先遣小使覘敌召之望还之望首以守备不足恃为告帝亟罢都督府以之望为淮西宣谕使甫拜命又擢右谏议大夫之望因上章极言廷臣执偏见为身谋乞明诏在廷平其心于议论之际时思退主和议浚主恢复之望实阴为思退地也既而视师江上金复侵边遂上和战二策且言措置守御之备疏奏未达拜参知政事既入俄兼同知枢密院事故兵交至濠楚守将或弃城遁帝命汤思退督淮江师未行复令之望督视改同都督力辞不行遂以参知政事劳师江淮之望先尝贻书敌帅至是王抃使敌军并割商秦地许归被俘人世为叔侄之国敌皆听许讲解而罢帝闻敌即退令督府择利击之之望下令诸将不得妄进朝廷趣行之望言王抃既还不可冒小利害大计言者论之罢为端明殿学士提举江州太平兴国宫居天台干道元年起知福州福建路安抚使捕海贼王大老捷闻加资政殿大学士移知温州寻复罢六年卒之望当秦桧时落落不合或谓其有守绍兴末年力附和议与思退相表里专以割地啖敌为得计地割而敌势益张之望迄以此废焉

△徐俯

徐俯字师川洪州分宁人以父禧死国事授通直郎累官至司门郎靖康中张邦昌僭位俯遂致仕时工部侍郎何昌言与其弟昌辰避邦

昌皆改名俯买婢名昌奴遇客至即呼前驱使之建炎初落致仕奉祠内侍郑谏识俯于江西重其诗荐于高宗胡直儒在经筵汪藻在翰苑迭荐之遂以俯为右谏议大夫中书舍人程俱言俯以前任省郎遽除谏议自元丰改制以来未之有考之古今非阳城种放则未尝不循序而进愿姑以所应者命之昔元稹在长庆闲擢知制诰真不忝矣缘其为荆南判司命从中出召为省郎便知制诰遂喧朝论时谓荆南监军崔潭峻实引之近亦传俯与宦寺倡酬称其警策恐或者不知陛下得俯之由不报俱遂罢绍兴二年赐进士出身兼侍读三年迁翰林学士俄擢端明殿学士签书枢密院事四年兼权参知政事宰相朱胜非言襄阳上流所当先取帝曰盍就委岳飞参政赵鼎曰知上流利害无如飞者俯独持不可帝不听会刘光世乞入奏鼎言方议出师大将不宜离军俯欲许之鼎固争俯乃求去提举洞霄宫九年如信州中丞王次翁论其不理郡事子祠明年卒

△沈与求

沈与求字必先湖州德清人登政和五年进士第累迁至明州通判以御史张守荐召对除监察御史上疏论执政迁兵部员外郎自劾以为言苟不当不应得迁诏行其言除殿中侍御史帝在会稽或劝幸饶信有急则入闽与求以为今日根本正在江浙宜进都建康以图恢复论范宗尹年少为相恐误国事帝不悦以直龙图阁知台州宗尹罢召还再除侍御史时军储窘乏措置诸镇屯田与求取古今屯田利害为集议二卷上之江西安抚知江州朱胜非未至而马进寇江州陷之与求论九江之陷由胜非赴镇太缓胜非罢去时方多事百司稽违与求援元丰旧制请许台谏官弹奏帝从之与求再居言路或疑凡范宗尹所引用者将悉论出之与求曰近世朋党成风人才不问贤否皆视宰相出处为进退今当别人才邪正而言之岂可谓一时所用皆不贤人服其言吕颐浩再相御营统制辛永宗枢密富直柔右司谏韩璜屡言其短与求劾直柔附会永宗兄弟为致身之资帝遂出永宗而璜直柔亦相继罢黜迁御史中丞时禁卫寡弱诸将各拥重兵与求言汉有南北军唐用府兵彼此相维使无偏重今兵权不在朝廷虽有枢密院及三省具房尚书兵部但行文字而已愿诏大臣益修兵政助成中兴之势浙西安抚刘光世来朝以缙帛方物为献帝已分讫六宫与求奏今为何时而有此时已暮疏入帝命追取斥还内侍冯益请别置御马院自领其事又擅穿皇城便门与求劾益专恣请治其罪谍报刘豫在淮阳造舟议者多欲于明州向头设备与求言使贼舟至此则入吾腹心之地海舟自京东入浙

必由泰州石港通州料角崇明镇等处次至平江南北洋次至秀州金山次至向头石港料角水势渚险必得沙上水手方能转运宜于石港料角等处拘收水手优给钱粮而存养之以备缓急两浙转运副使徐康国自温州进发宣和闲所制闲金销金屏障什物与求奏曰陛下俭侔大禹今康国欲以微物累盛德乞斥而焚之仍显黜康国从之与求历御史三院知无不言前后几四百奏其言切直自敌己下有不能堪者帝时有所训敕每曰汝不识沈中丞邪移吏部尚书兼权翰林学士兼侍读遂出为荆湖南路安抚使知潭州引疾丐祠许之四年出知镇江府兼两浙西路安抚使复以吏部尚书召除参知政事金师将入寇与求赞帝亲征帝书车攻诗以赐之曰朕以二圣在远屈己通和今豫逆乱如此安可复忍与求曰和亲乃金人屡试之策不足信也因奏诸将分屯江岸而敌人往来淮甸当遣岳飞自上流取闲道乘虚击之彼必有反顾之忧帝曰当如此措置五年兼权知枢密院事时张浚视师江上以行府为名言知泰州邵彪及其营田利害乞送尚书省有旨从之与求不能平曰三省枢密院乃奉行行府文书邪六年张浚复欲出视师不告之同列及得旨乃退而叹曰此大事也吾不与闻何以居位遂丐祠罢出知明州七年帝在平江召见除同知枢密院事从至建康迁知枢密院事卒赠左银青光禄大夫谥忠敏

△翟汝文

翟汝文字公巽润州丹阳人登进士第以亲老不调者十年擢议礼局编修官召对除秘书郎三馆士建议东封汝文曰治道贵清净今不启上述三化礼乐而师秦汉之侈心非所愿也责监宿州税久之召除著作郎迁起居郎皇太子就傅命汝文劝讲除中书舍人言者谓汝文从苏轼黄庭坚游不可当赞书之任必知襄州移知济州复知唐州以谢章自辨罢未几起知陈州召拜中书舍人外制典雅一时称之命同修哲宗国史迁给事中高丽使入贡诏班侍从之上汝文言春秋之法王人虽微序诸侯上不可卑近列而尊陪臣遂命如旧制内侍梁师成强市百姓墓田广其园圃汝文言于帝师成讽宰相黜汝文出守宣州司为吏部侍郎出知庐州徙密州密负海产盐蔡京屡变盐法盗贩者众有司穷治党与汝文曰祖宗法度获私商不诘所由欲靖民也今系而虐之将为厉矣悉纵之密岁贡牛黄汝文曰牛失黄辄死非所以惠农宜输财分市帝从之钦宗即位召为翰林学士改显谟阁学士知越州兼浙东安抚使建炎改元上疏言陛下即位赦书上供常数为后献利之臣所增者当议裁损如浙东和预买绢岁九十七万六千匹而越州乃二十万五百匹以一路计之

当十之三如杭州岁起之额盖与越州等杭州去年已
减十二万匹独越州尚如旧今乞视户等第减罢杨应诚请使高丽图迎二帝汝文奏应
诚欺罔君父若高丽辞以大国假道以至燕云金人却
请问津以窥吴越将何辞以对后高丽果如汝文言帝将幸武昌汝文疏请幸荆南不从
绍兴元年召为翰林学士兼侍讲除参知政事同提举
修政局时秦桧相四方奏请填委未决吏缘为奸汝文语桧宜责都司程考吏牒稽迟者
惩之汝文尝受辞牒书字用印直送省部人对乞治堂
吏受赂者桧怒而劾汝文专擅右司谏方孟卿因奏汝文与长官立异岂能共济国事罢
去卒先是汝文在密桧为郡文学汝文荐其才故桧引
用之然汝文性刚不为桧屈对案相诟至目桧为浊气云

△王庶

王庶字子尚庆阳人崇宁五年举进士第改秩知涇州保定县以种师道荐通判怀
德军契丹为金人所破举燕云地求援诏师道受降庶
谓师道曰国家与辽人百年之好今坐视其败亡不能救乃利其土地无乃因此基女真
之祸乎不听宣和七年金果入寇太宰李邦彦夜召庶
问计庶曰宿将无如种师道宜付以西兵使之入援邦彦以语蔡攸攸不然以庶为陕西
运判兼制置解盐事疆事益棘钦宗欲幸襄邓先命庸
益为京西安抚使益求庶自副高宗即位除直龙图阁鄜延经畧使兼知延安府累立战
功进集英殿修撰升龙图阁待制节制陕西六路军马
先是河东经制使王■〈王燮〉既遁归东京留守宗泽承制以庶权陕西制置使会宣
谕使谢亮入关庶移书曰夏人之患小而缓金人之患
大而迫秋高必大举盍仗节率兵举义驱逐渡河徐图恢复亮不能从金人大入庶调兵
自沿河至冯翊据险以守金人先已策兵渡河攻晋宁
侵丹州又渡清水河破潼关秦陇皆震庶传檄诸路会期进击泾原统制曲端雅不欲属
庶以未受命辞居数日告身至又辞金人知端与庶不
协并兵寇鄜延庶在坊州闻之夜趋鄜延以遏其冲金人诡道陷丹州州界鄜延之闲庶
乃自当延安路时端尽统泾原劲兵庶屡督其进端讷
不行遂陷延安语在端传初庶闻围急自收散亡往援观察使王■〈王燮〉亦将所部
发兴元庶至甘泉而延安已不守既无所归遂以军付
■〈王燮〉而自将百骑驰至襄乐劳军尚倚端为助庶至端令每门减从骑之半比至
帐下仅数骑端厉声问庶延安失守状且曰节制固知
爱身不知为天子爱城乎庶曰吾数令不从谁爱其身者端怒谋即军中诛庶而夺其兵
乃夜走宁州见谢亮曰延安五路襟喉今既失矣春秋
大夫出疆之义得以专之请诛庶亮曰使事有指今以人臣而擅诛于外是跋扈也公则

自为之端沮而归乃夺庶节制使印又拘縻其官属会
诏庶守京兆庶先以失律自劾得罢丁内艰时张浚自富平败归始思庶及端之言可用
乃并召之庶地近先至力陈抚秦保蜀之策劝浚收熙
河秦凤之兵扼关陇以为后图浚不纳求终制不许乃版授参议官浚念端与庶必不相
容端未至但复其官移恭州庶因谓浚曰端有反心浚
亦畏端得士始有杀端意矣语在端传绍兴五年起复知兴元府利夔路制置使庶以士
卒单寡籍兴洋诸邑及三泉县强壮两丁取一三丁取
二号义士日阅于县月阅于州厚犒之不半年有兵数万浚言于朝升徽猷阁直学士有
谗于浚者徙庶知成都改嘉州明年浚劾庶轻率倾险
落职奉祠寻起知遂宁固避得请六年除湖北安抚使知鄂州趋阙言绍复大业都荆为
可荆州左吴右蜀利尽南海前临江汉出三川涉大河
以图中原曹操所以畏关羽者也帝大异之复显谟阁待制知荆南府湖北经畧安抚使
又复直学士七年十月以兵部侍郎召明年春入对因
奏恢复之功十年未立其失在偏听在欲速在轻爵赏是非邪正混淆诚能赏功罚罪其
谁不服又口陈手画秦蜀利害帝大喜即日迁本部尚
书阅月拜枢密副使议者乞遣重臣行边遂命庶措置江淮边防京湖宣抚使岳飞闻庶
行边遗书曰今岁若不出师当纳节请闲庶壮之庶还
朝论金人变诈自渝海上之盟因及飞纳节之语当是时秦桧再相以和戎为事金使乌
凌阿思谋至诏趣庶还庶力诋和议乞诛金使其言甚
切金又遣萧通古来许割地还梓宫归太后庶曰和议之事臣所不知凡七疏乞免官乃
以资政殿学士知潭州御史中丞勾龙如渊劾庶本赵
鼎所荐欺君罔上庶罢归至九江被命夺职徙家居焉十三年御史胡汝明论庶讥讪朝
政责向德军节度副使道州安置至贬所卒孝宗思庶
言追复其官谥敏节子六人之奇干道中知枢密院事

△辛炳

辛炳字如晦福州侯官县人登元符三年进士第累官至监察御史兼权殿中侍御
史先是蔡京废发运司转般仓为直达纲舟人率侵盗
沈舟而遁户部受虚数人畏京莫敢言炳极疏其弊且以变法后两岁所得之数较常岁
亏欠一百三十有二万支益广而入寔微乞下有司计
度徽宗以问京京怒以炳为沮挠责监南剑州新丰场寻提举洞霄宫起知袁州移无为
军靖康初召为兵部员外郎高宗即位除左司员外郎
辞未几起直龙图阁知潭州明年张浚调兵潭州以炳懦怯不能罢之寻以起居舍人召
辞绍兴二年复以侍御史召首言今日公道壅塞风俗
颓薄连疏三省所行乖失数十事请谕大臣勿废都堂公见之礼时福建八州添差至百

八十余员炳言艰危多事之时冗食之官无益当罢从
之苏湖地震下诏求言炳言大臣无畏天之心何事不可为其言甚峻由是宰执吕颐浩
居家待罪炳劾罢颐浩知枢密院事张浚召赴行在炳
论其败事误国浚坐落职除御史中丞时方遣使议和炳言金人无信和议不可恃宜讲
求守御攻战之策以疾请外除显谟阁直学士知漳州
未赴而卒赠通议大夫

钦定续通志卷三百七十五

●钦定续通志卷三百七十六 列传一百七十六

列传

宋 【八十】

宋八十

○宋八十

朱弁 郑望之 张邵 洪皓【适遵迈】

朱弁

郑望之

张邵

洪皓

△朱弁

朱弁字少章徽州婺源人少颖悟读书日数千言既冠入太学晁说之见其诗奇之
与归新郑妻以兄女新郑介汴洛闲多故家遗俗弁游
其中闻见曰广靖康之乱家碎于贼弁南归建炎初议遣使问安两宫弁奋身自献诏补
修武郎借吉州团练使【按宋名臣言行续录作借
右武大夫吉州团练使】为通问副使至云中见尼雅满邀说甚切尼雅满不听使就馆
守之以兵绍兴二年金人忽遣宇文虚中来言和议可
成当遣一人诣元帅府受书还虚中欲弁与正使王伦探策决去留弁曰吾来固自分必
死岂应今日觐幸先归愿正使受书归报伦将归弁请
曰古之使者有节以为信今无节有印印亦信也愿留印使弁得抱以死死不腐矣伦解
以授弁弁受而怀之卧起与俱金人迫弁仕刘豫且誅
之曰此南归之渐弁曰豫乃国贼吾尝恨不食其肉又忍北面臣之吾有死耳金人怒绝
其饷遗以困之弁忍饥待尽誓不为屈金人亦感动致
礼如初久之复欲易其官弁曰自古兵交使在其闲言可从从之不可从则囚之杀之何
必易其官吾官受之本朝有死而已誓不易以辱吾君
也且移书耶律绍文等又以书诀后使洪皓曰杀行人非细事吾曹遭之命也要当舍生
以全义尔乃具酒食召被掠士夫饮半酣语之曰吾已

得近郊某寺地一旦毕命报国诸公幸瘞我其处题其上曰有宋通问副使朱公之墓于我幸矣众皆泣下莫能仰视弁谈笑自若曰此臣子之常诸君何悲也金人知其终不可屈遂不复强王伦还朝言弁守节不屈帝为官其子林赐其家银帛会尼雅满死弁密疏金国虚实曰此不可失之时也遣李发等闲行归报其后伦归又以弁奉送徽宗大行之文为献其辞有曰叹马角之未生魄消雪窖攀龙髯而莫逮泪洒冰天帝读之感泣官其亲属五人赐吴兴田五顷帝谓丞相张浚曰归日当以禁林处之八年金使乌凌阿思谋石庆至称弁忠节诏附黄金三十两以赐十三年和议成弁得归八见便殿弁谢且曰陛下与金人讲和上返梓宫次迎太母盟可守而诡诈之心宜嘿以待之兵可息而销弭之术宜详以讲之帝纳其言赐金帛甚厚弁又以金国所得六朝御容及宣和御书画为献秦桧恶其言敌情奏以初补官易宣教郎直秘阁有司校其考十七年应迁数官桧沮之仅转奉议郎十四年卒弁为文慕陆宣公援据精博曲尽事理诗学李义山词气雍容不蹈其险怪奇涩之弊金国名王贵人多遣子弟就学弁因文字往来说以和好之利及归述北方所见闻忠臣义士朱昭史玩张忠辅高景平孙益孙谷傅伟文李丹五台僧宝真妇人丁氏晏氏小校阎进朱绩等死节事状请加褒录以劝来者

△郑望之

郑望之字顾道彭城人显谟阁直学士仪之子也少登崇宁五年进士第自陈留簿累迁枢密院编修官历开封府仪工户曹以治办称临事劲正不受请托宦寺有强占民田者奏归之蔡京子欲夺人妾使人谕意望之拒不受除驾部员外郎兼金部靖康元年金人攻汴京假尚书工部侍郎俾为军前计议使未至金人遣吴孝民来因与偕还望之言金人意在金币且要大臣同议乃命同知枢密院事李梈与望之再使金帅遣萧三宝奴偕梈等还以书求割三镇欲得宰相交地亲王送大军过河时高宗在康邸慷慨请行遂与张邦昌乘筏渡濠自午至夜分始达金砦又除望之户部侍郎同梈再至金营仍以珠玉遗金人金人拘留之踰旬会姚平仲夜劫砦不克斡里雅布以用兵诘责诸使者邦昌恐惧涕泣王不为动金人遂不欲留王更请肃王乃以兵送望之诣国王砦诘问会再遣宇文虚中持割地诏至望之得还因盛言敌势强大我兵削弱不可不和既而金兵退朝廷以议和非策罢望之提举亳州明道宫建炎初李纲以望之张皇敌势沮损国威以致祸败责海州团练副使连州居住纲罢诏望之为户部侍郎寻转吏部侍郎兼主管御营司参赞军事论航海不便忤旨以集英殿修撰再领亳州明道宫起知宣州踰年

以言章罢绍兴二年会赦复徽猷阁待制致仕七年召赴行在升徽猷阁直学士复致仕三十一年卒年八十四赠中大夫

△张邵

张邵字才彦乌江人登宣和三年上舍第建炎元年为衢州刑曹会诏求直言邵上疏曰有中原之形势有东南之形势今纵未能遽争中原宜进都金陵因江淮蜀汉闽广之资以图恢复不应退自削弱三年金人南侵诏求可至军前者邵慨然请行转五官直龙图阁假礼部尚书充通问使武官杨宪副之即日就道至潍州接待使置酒张乐邵曰二帝北迁邵为臣子所不忍听请止乐至于三四闻者泣下翌日见左监军达兰命邵拜邵曰监军与邵为南北朝从臣无相拜礼且以书抵之曰兵不在强弱在曲直宣和以来我非无兵也帅臣初开边隙谋臣复启兵端是以大国能胜之厥后伪楚僭立羣盗蠡起曾几何时电扫无余是天意人心未厌宋德也今大国复裂地以封刘豫穷兵不已曲有在矣达兰怒取国书去执邵送密州囚于祚山砦明年又送邵于刘豫 【按宋名臣言行续绿载邵见监军郎君达兰于潍州逼公拜公不可执真昌邑寻徙密州祚山寨以兵守之四年夏邵闻达兰过密以书抵之云云达兰得书执付豫与宋史本传异】 使用之邵见刘豫长揖而已又呼为殿院责以君臣大义词气俱厉豫怒械置于狱杨宪遂降豫知邵不屈久之复送于金拘之燕山僧寺从者皆莫知所之后又作书于金言刘豫挟大国之势日夜南侵不胜则首鼠两端胜则如养鹰饱则扬去终非大国之利后益北徙会盩金尝大赦许宋使者自便还乡人人多占籍准北冀幸稍南惟邵与洪皓朱弁言家在江南十三年和议成与皓弁南归八月入见奏前后使者如陈过庭司马朴滕茂实崔纵魏行可皆歿异域乞早颁恤典邵并携崔纵枢归其家升秘阁修撰主管佑神观左司谏詹大方论其奉使无成改台州崇道观十九年以敷文阁待制提举江州太平兴国宫知池州再奉祠卒年六十一累赠少师邵负气遇事慷慨常以功名自许出使囚徙屡濒于死其在会盩金人多从之学喜诵佛书虽异域不废初使金时遇秦桧于潍州及归上书言桧忠节议者以是少之 【按宋名臣言行续录载邵上书言臣使北时道遇秦桧教臣坚持使节臣得奉以周旋又医官荣州团练使李子厚语臣云桧在中京尝代徽宗移书述海上盟约及用兵讲和利害结好基此会曹勋缴进其书诏付史馆又载邵初出疆遇桧于昌邑以忠义相勉故邵在丧相与通问邵因历叙金有归渊圣及诸王宗室意劝其遣使迎请桧寢不乐宋史本传不载附识】 后弟祁下大理狱将株连邵会稽死得免子孝览孝曾孝忠孝曾

后亦以出使歿于金金人知为邵子尚怜之

△洪皓

洪皓字光弼番易人 【按宋名臣言行续录载皓其先徽人唐末徙乐平之洪岩】少慷慨有奇节登政和五年进士第王黼朱勔皆欲婚之力辞宣和中为秀州司录大水民多失业皓白郡守以拯荒自任发廩损直以糗民盆集皓恐其纷竞乃别以青白帜涅其手以识之令严而惠徧浙东纲米过城下皓白守邀留之守不可皓曰愿以一身易十万人命讫留之州人号为洪佛子其后秀军叛纵掠惟过皓门不敢犯建炎三年帝将如金陵皓上书言内患甫平外敌方炽若轻至建康恐金人乘虚侵轶宜先遣近臣往经营俟告办回銮未晚时朝议已定不从既而悔之他日帝问宰辅近谏移蹕者为谁张浚以皓对时议遣使金国浚又荐皓于吕颐浩召与语大悦皓方居父丧颐浩解衣巾俾易衰经入对帝以国步艰难两宫远播为忧皓极言天道好还金人安能久陵中夏此正春秋邲郢之役天其或者警晋训楚也帝悦迁皓五官擢徽猷阁待制假礼部尚书为大金通问使龚璿副之令与执政议国书皓欲有所易颐浩不乐遂抑迁官之命时淮南盗贼踵起李成甫就招即命知泗州羈縻之乃命皓兼淮南京东等路抚谕使俾成以所部卫皓至南京比过淮南成方与耿坚共围楚州责权州事贾敦诗以降敌实持叛心皓先以书抵成成以汴泗虹有红巾贼军食绝不可往皓闻坚起义兵可撼以义遣人密谕之坚意动遂强成敛兵皓至泗境迎骑介而来龚璿曰虎口不可入皓遂还上疏言成以朝廷馈饷不继有引众建康之语今靳赛据扬州薛庆据高邮万一三叛连衡何以待之宜使人谕意优进成官秩畀之以京口纲运如晋明帝待王敦可也疏奏帝即遣使抚成给米五万石颐浩恶其直达而不先白堂奏皓托事稽留贬二秩皓遂请出滁阳路自寿春由东京以行至顺昌闻羣盗李阎罗小张俊者梗颖上道皓与其党遇譬晓之二渠魁皆听命领兵入宿卫皓至太原留几一年金遇使人礼日薄及至云中尼雅满迫二使仕刘豫皓曰万里衔命不得奉两宫南归恨力不能磔逆豫忍事之邪愿就鼎镬无悔尼雅满怒将杀之旁一人喟曰此真忠臣也目止剑士为之跪请得流涕冷山惟璿至汴受豫官冷山地苦寒四月草生八月已雪穴居百家陈王乌舍聚落也乌舍敬皓使教其八子 【按宋名臣言行录作教其二子】 或二年不给以食盛夏衣羸布尝大雪薪尽以马矢然火煨面食之或献取蜀策乌舍持问皓皓力折之乌舍锐欲南侵皓曰兵犹火也弗戢将自焚自古无四十年用兵不止者又数为言所以来为两国事既不受使乃令

深入教小儿非古者待使之礼也乌舍或答或默忽发怒曰汝作和事官而口硬如许谓我不能杀汝耶皓曰自分当死顾大国无受杀行人之名愿投之水以坠渊为名可也乌舍义之而止和议将成乌舍问所议十事皓条析甚至乌舍曰汝惟直不诳我吾与汝如燕遣汝归议遂行会莫将北来议不合事复中止留燕甫一月乌珠杀乌舍党类株连者数千人独皓与异论几死故得免方二帝迁居五国城皓在冷山密遣人奏书以桃梨粟面献二帝始知帝即位皓闻佑陵讣北向泣血旦夕临讳日撰文以祭其辞激烈旧臣读之皆挥涕绍兴十年因谍者赵德书机事数万言藏故絮中归达于帝言顺昌之役金人震惧燕山珍宝尽徙以北意欲损燕以南弃之王师亟还自失机会今再举尚可十一年又求得太后书遣李微持归帝大喜曰朕不知太后盗否几二十年虽遣使百辈不如此一书是冬又密奏书曰金已厌兵若和议未决不若乘势进击再造反掌尔又言胡铨封事此或有之金人知中国有人益惧张丞相名动异域惜置之散地又问李纲赵鼎安否献六朝御容徽宗御书其后梓宫及太后归音皓皆先报初皓至燕宇文虚中已受金官因荐皓金主闻其名欲以为翰林直学士力辞之皓有逃归意乃请于参政韩昉乞于真定或大名以自养昉怒始易皓官为中京副留守再降为留司判官趣行屡矣皓讫不就职昉竟不能屈金法虽未易官而曾经任使者永不可归昉遂令皓校云中进士试盖欲以计堕皓也皓复以疾辞未几金主以生子大赦许使人还乡皓与张邵朱弁三人在遣中金人惧为患独遣人追之七骑及淮而皓已登舟十二年七月见于内殿力求郡养母帝曰卿忠贯日月志不忘君虽苏武不能过岂可舍朕去邪请见慈宁宫帘人设帘太后曰吾故识尚书命撤之皓自建炎己酉出使至是还留北中凡十五年同时使者十三人惟皓邵弁得生还而忠义之声闻于天下者独皓而已皓既对退见秦桧语连日不止曰张和公金人所惮乃不得用钱塘暂居而景灵宫太庙皆极土木之华岂非示无中原意乎桧不怩除徽猷阁直学士提举万寿观兼权直学士院金人来取赵彬等三十人家属诏归之皓曰昔韩起谒环于郑郑小国也能引义不与金既限淮官属皆吴人宜留不遣盖虑知其虚实也彼方困于蒙古姑示强以尝中国若遽从之谓秦无人益轻我矣既而复上疏曰恐以不与之故或致渝盟宜告之曰俟渊圣及皇族归乃遣又言王伦郭元迈以身殉国弃之不取缓急何以使人桧大怒又因言实纳寄声桧怒益甚翌日侍御史李文会劾皓不省母出知饶州明年大水中官白鶚 【按宋名臣言行续录作向鶚】 从太后北归素知皓名宣言變理乖整洪尚书

名闻天下何不用桧闻之愈怒系锬大理狱寻流岭表谏官詹大方遂论皓与锬为刎颈
交更相称誉罢皓提举江州太平观其实锬初不识皓
也寻居母丧他言者犹谓皓睥睨钧衡终丧除饶州通判李勤又附桧诬皓责濠州团练
副使安置英州居九年始复朝奉郎徙袁州至南雄州
卒年六十八死后一日桧亦死帝闻皓卒嗟惜之复敷文阁学士赠四官久之复徽猷阁
学士谥忠宣皓虽久在北廷不堪其苦然为金人所敬
所著诗文争钞诵求锬梓既归后使者至必问皓为何官居何地性急义当艰危中不少
变懿节后之戚赵伯璘隶乌舍戏下贫甚皓赙之范镇
之孙祖平为佣奴皓言于金人而释之刘光世庶女为人豢豕赎而嫁之他贵族流落贱
微者皆力拔以出惟为桧所嫉不死于敌国乃死于谗
愿博学强记子适遵迈

洪适

洪遵

洪迈

洪适

适字景伯皓长子也幼敏悟日诵三千言皓使朔方适年甫十三能任家事以皓出
使恩补修职郎绍兴十二年与弟遵同中博学宏词科
高宗曰父在远方子能自立此忠义报也宜升擢遂除敕令所删定官后三年弟迈亦中
是选由是三洪文名满天下改秘书省正字甫数月皓
归忤秦桧出知饶州适亦出为台州通判垂满皓谪英州适复论罢往来岭南省侍者九
载皓卒服阕起知荆门军应诏上宽恤四事轻茶额钱
蠲他州代贡礼物辟试闈以复旧额官田不种者免输租改知徽州寻提举江东路常平
茶盐首言役法不均之弊会帝亲征适覲金陵言本路
旱百姓逐食于淮复遭金兵今各怀归而田产为官鬻请听其估赎之又上疏曰大定新
立诸或未必从宜多遣密诏传谕中原义士各取州县
因以畀之王师但留屯淮泗募兵积粟以为声援俟蜀汉山东之兵数道皆集见可而进
庶几兵力不顺可以万全升尚书户部郎中总领淮东
军马钱粮孝宗即位符离用兵馈饷繁伙适究心调度供亿无阙迁司农少卿隆兴二年
召贰太常兼权直学士院帝欲除诸将环卫官诏讨论
其制适具唐及本朝沿革十一条上之且言祖宗故事盖可法则除中书舍人时羽檄沓
至书诏填委咨访酬答率称上旨自此有大用意金既
寻盟首为贺生辰使金接待高嗣先自言其父司空有德于皓相与甚驩得其要领以归
干道初迁翰林学士仍兼中书舍人秦垞久废忽予祠
适奏曰李林甫死后诸子皆流配岭南秦桧稔恶自毙不肖之孙官职仍旧可谓幸矣宫

观虽小坝得之恐桧党牵连而进其命遂寝复缴还桧
党巫伋莫伋余尧弼迁复之命除端明殿学士签书枢密院事上谕参政钱端礼虞允文
曰三省事与洪适商量东西府始同班奏事八月拜参
知政事谏议大夫林安宅以铜钱多入北境请禁之即蜀中取铁钱行之淮上事既行适
言其不可帝问之适曰今每州止得千缗一州以万户
计之每家才得数百恐民闲无以贸易且客旅无回货盐场有大利害帝以为然乃寝前
命但于蜀中取十五万缗行之庐和二州拜尚书右仆
射同中书门下平章事兼枢密使未几春霖适引咎乞退林安宅抗疏论适既而台臣复
合奏除观文殿学士提举江州太平兴国宫寻起知绍
兴府浙东安抚使再奉祠淳熙十一年卒年六十八谥文惠适以文学闻望遭时遇主自
两制一月入政府骤居相位然无大建明家居十有六
年兄弟鼎立子孙森然以著述吟咏自乐近世备福鲜有及之子九人槻秘椹■〈木修
〉 檣桴楹橐栢

洪遵

遵字景严皓仲子也儿时端重如成人父留沙漠母亡遵孺慕攀号以父荫补承务
郎与兄适同试博学宏词科中魁选赐进士出身高宗
以皓远使擢为秘书省正字中兴以来词科中选即入馆自遵始秦桧子熿为官长警欬
为人轻重遵恬然不附丽二年弗迁皓南还与朝论异
出守遵遂乞外通判常婺越三州绍兴二十五年复入为正字兼权直学士院汤鹏举副
台端密荐为御史方赐对而父讦闻二十八年免丧召
对极陈父冤曰先臣与龚璘同出疆璘仕于刘豫妄杀兵官为豫所诛而秦桧赠以节旄
擢用其子先臣拒金人之命留十五岁乃得归顾南甯
岭外臣兄弟屏迹在外桧不分忠逆如此高宗悉为道谤语所起遂拜起居舍人奏乞以
经筵官除罢及封章进对宴会锡予讲读问答等事萃
为一书名之曰迩英记注其后干道闲又有祥曦殿记注又论铸钱利害迁起居郎兼权
枢密院都承旨奏复经筵官留身奏事且请修起居注
二十九年拜中书舍人殿前裨将辅逵转防御使王纲转团练使遵言近制管军官十年
始一迁今两人不满岁安德尔时勋臣子孙多躐居台
省遵乞禁止诏自今功臣子孙序迁至侍从并令久任在京宫观遵曰侍从朝廷高选非
如磨勘阶官安有迁序之制今内外将家无虑二十人
若以序迁不出十年西清次对皆可坐致太祖开国功臣子孙不过诸司今使穆清之地
类皆将种非所以示天下又言瑞昌兴国之闲茶商失
业聚为盗贼望揭榜开谕许其自新愿充军者填刺愿为农者放还帝皆可其奏论者欲
复鄱阳永平永丰两监鼓铸诏给舍议遵曰国朝分道

置使厘为三司自中兴以来置都大提点官属太多号令不一鼓铸益少窃以为复置便三十年正月试吏部侍郎选人诣曹改秩吏倚为市巧生沮阂遵明与约苟于大体无害先行后审荐员有定限而举者周遮重复或同时一章而巧为两牒或当荐五员而辄踰十数或当举职官而诡为京状或身系常调而妄称职司或东西分曹而交错换补或已予复夺而指云事故凡如是者得通劾之旧制致仕任子随所在审敕牒即请时议必令于元州判奏遵言士大夫或游宦数千里外临终谢事其家获归故里已为至难今复因此齟齬反复稽延是明与恶吏为地也乃仍旧贯平江湖秀三州水无以输秋苗有司抑令输麦遵言麦价殊不在米下民困如是愿量取其半被水害者悉免之金人来索绛阳郭小的安化刘孝恭二百家遵以蜀之李特可为至戒愿以根集未足为解报之迁翰林学士兼吏部尚书汪澈论汤思退罢相遵行制无贬词澈以为言遂丐去以徽猷阁直学士提举太平兴国宫三十一年遣李宝御金兵宝驻兵平江命遵知平江及宝以舟师捣胶西凡资粮器械舟楫皆遵供亿宝成功遵之助为多车驾幸金陵禁卫士丐索无艺先是朝廷虑商舶为贼得悉拘入官并海县团萃巨舰及募水手民兵皆繫留未得去必责圩户自阙筑且裁省募工钱米之半遵连疏争至乞遣朝臣覆按圩遂成松别治溧水永丰圩来调丁米木数甚广遵谓割股充喉执不从楚地旱遵简宾佐随远近壮老以差赋给蠲租至十九又告余于江西得活者万计戍兵乘时盗利曹伍剽于野尽执拘以归其军故当大札瘥而邑落晏然徙知建康府江东安抚使兼行宫留守孝宗谕当制舍人范成大褒其治绩且许入覲时虞允文当国有北征志先调侍卫马军出屯其在府者五军悉送其孥谋筑营砦无虑万灶特敕遵同宰执赴选德殿奏事进资政殿学士以行至则揭榜民苗米唯输正不输耗听民自持斛槩庾人不能轻重其手徧行郊野卜砦地求不妨民居不夷冢墓者营卒醉妄言摇众斩之三军无敢哗有画八旗亭挺刃椎垆者械付狱上奏未下统帅惧得谴请自治之孝宗怒罢统帅遵亦坐贬两秩未几五营成复元官仍拜资政殿学士淳熙元年提举洞霄宫卒年五十五谥文安

洪迈

迈字景卢皓季子也幼读书日数千言一过目辄不忘绍兴十五年中第授两浙转运司干办公事入为敕令所删定官皓忤秦桧投闲桧憾未已御史汪勃论迈知其父不靖之谋遂出添差教授福州累迁吏部郎兼礼部帝居显仁皇后丧当盈飧迈请宰相分祭奏可除枢密院检

详文字建议令民入粟赎罪以纾国用又请严法驾出入之仪三十一年议钦宗谥迈曰当如楚人立怀王之义号怀宗以系复讎之意不用吴璘病笃朝论欲徙吴拱代之迈曰吴氏以功握蜀兵三十年宜有以新民观听毋使尾大不掉知枢密院事叶义问出视师奏以迈参议军事至镇江闻瓜州军与金人相持遑遽失措会建康走驿告急义问遽欲还迈力止之迁左司员外郎三十二年春金主遣左监军高忠建来告登位且议和迈为接伴使知合门张抡副之帝谓执政曰向日讲和本为梓宫太后虽屈己卑辞有所不惮今两国之盟已绝宜正名称准疆土朝仪岁币所宜先定及迈抡入辞帝又曰朕料此事终归于和欲首议名分而土地次之迈于是奏更接伴礼数凡十有四事自渡江以来屈己含忍多过礼至是一切杀之用敌国体凡远迎及引接金银等皆罢既而高忠建有责臣礼及取新复州郡之议迈以闻且奏言土疆实利不可与礼际虚名不足惜礼部侍郎黄中闻之亟奏曰名定实随百世不易不可谓虚土疆得失一彼一此不可谓实兵部侍郎陈俊卿亦谓先正名分名分正则国威张而岁币亦可损矣时议遣使报聘诏侍从台谏各举初迈之接伴也既持旧礼折伏金使至是慨然请行于是假翰林学士充贺登位使欲令金称兄弟敌国而归河南地夏四月迈辞行书用敌国礼高宗亲札赐迈等曰祖宗陵寝隔阔三十年不得以时洒扫祭祀心实痛之若彼能以河南地见归必欲居尊如故正复屈己亦何所惜迈奏言山东之兵未解则两国之好不成至燕金合门见国事谓不如式必欲用旧礼迈执不可既而金锁使馆旦暮水浆不通三日乃得见议欲质留左丞相张浩持不可乃遣还孝宗即位殿中侍御史张震以迈使金辱命论罢之明年起知泉州干道二年复知吉州入对除起居舍人言起居注皆据诸处关报修纂景佑故事有迹英延曦二合汪记十年闲稍废不续陛下言动皆罔闻知恐非命侍本意乞命讲读官以日得圣语关送修注官使谨录之名曰祥曦记注制可三年迁起居郎拜中书舍人兼侍读直学士院仍参史事父兄皆历此三职迈又踵之迈奏三省事无巨细必先经中书书黄宰执书押当制舍人书行然后过门下给事中书读如给舍有所建明则封黄具奏以听上旨惟枢密院既得旨即书黄过门下例不送中书谓之密白则封驳之职似有所偏况今宰相兼枢密因而厘正不为有嫌望诏枢密院凡已被制敕并关左右省依三省书黄以示重出命之意报可除知赣州起学宫造浮梁士民安之郡兵素骄遣千人戍九江或怵以至则留不复返众遂反戈民讹言相惊迈遣一校婉说之俾归营徐诘什伍长两人械送浔阳斩于市辛卯岁饥赣适中熟

迈移粟济邻郡寻知建宁府富民有睚眦杀人者持刃拒捕迈正其罪黥流岭外十一年
知婺州奏金华田多沙势不受水五日不雨则旱境内
陂湖最当缮治命耕者出力田主出谷凡为塘堰及湖总八百三十七所婺军素无律春
给衣欲以缙易帛吏不可则羣呼啸聚郡将姑息如其
所欲迈至以计逮捕四十有八人置之理戮首恶二人梟之市余黥挞有差莫敢哗者事
闻迁敷文阁待制明年召对首论淮东边备六要地曰
海陵曰喻洳曰盐城曰宝应曰青口曰盱眙谓宜修城池严屯兵立游桩益戍卒又言许
浦宜开河三十六里梅里镇宜筑二大堰作斗门遇行
师则决防送船又言冯湛创多桨船底平橈浮虽尺水可运今十五六年修葺数少不足
用宜募濒海富商入船予爵招善操舟者以补水军帝
嘉之以提举佑神观兼侍讲同修国史预修四朝帝纪进敷文阁直学士直学士院讲读
官宿直帝时召入谈论至夜分拜翰林学士遂上四朝
史一祖八宗百七十八年为一书淳熙改元进焕章阁学士知绍兴府过阙奏事言新政
宜以十渐为戒帝曰浙东民困于和市卿往为朕正之
迈至郡核实诡户四万八千三百有奇所减绢以匹计者略如其数提举玉隆万寿宫明
年再上章告老进龙图阁学士寻以端明殿学士致仕
卒年八十赠光禄大夫谥文敏迈兄弟皆以文章取盛名跻贵显迈尤以博洽受知所修
钦宗纪多本之孙覲附耿南仲恶李纲所纪多失实云

钦定续通志卷三百七十六

●钦定续通志卷三百七十七 列传一百七十七

列传

宋 【八十一】

○宋八十一

张九成

胡铨

廖刚

李迥

赵开

△张九成

张九成字子韶其先开封人徙居钱塘权贵欲荐之馆阁九成笑却之绍兴二年策
进士诏考官直言者置高等九成对策略曰祸乱之作
天所以开圣人也愿陛下以刚大为心无以忧惊自沮前世中兴之主大抵以刚德为尚
去谗节欲远佞防奸皆中兴之本也今闾巷之人皆知
有父兄妻子之乐陛下贵为天子不得温清定省感时遇物凄惋于心可不思所以还二

圣之车乎又言阉寺闻名国之不祥当使之安扫除之
役凡结交往来者有禁干预政事者必诛擢寘首选授镇东军签判吏不能欺民冒鹾禁
提刑张宗臣欲逮捕数十人九成争之不能得即投檄
归赵鼎荐于朝遂以太常博士召既至改著作郎言陛下以省刑为急而理官不以恤刑
为念欲诏理官活几人者与减磨勘从之除浙东提刑
力辞乃与祠以归未几诏除宗正少卿权礼部侍郎兼侍讲兼权刑部侍郎法寺以大辟
成案上九成阅始末得其情因请覆实囚果诬服者朝
论欲以平反为赏九成辞之金人议和九成谓赵鼎曰金实厌兵而张虚声以撼中国因
言十事彼诚能从吾所言则与之和鼎既罢秦桧诱之
曰且成桧此事又曰立朝须优游委曲九成悉拒之帝问以和议九成曰敌情多诈不可
不察又在经筵言西汉灾异事桧甚恶之谪守邵州既
至仓库虚乏僚属请督酒租宿负苗绢未输者九成曰纵未能惠民其敢困民耶是岁赋
入更先他时中丞何铸言其矫伪欺俗倾附赵鼎落职
丁忧免丧桧取旨帝曰可与宫观先是径山僧宗杲善谈禅理从游者众九成时往来其
闲桧恐其议己令司谏詹大方论其与宗杲谤讪朝政
谪居南安军在南安十四年广帅致籛金九成曰吾何敢苟取悉归之桧死起知温州户
部遣吏督军粮民苦之九成移书痛陈其弊户部持之
九成即丐祠归数月病卒宝庆初特赠太师封崇国公谥文忠

△胡铨

胡铨字邦衡庐陵人建炎二年高宗策士淮海铨因御题问治道本天天道本民答
云汤武听民而兴桀纣听天而亡今陛下起干戈锋镝
闲外乱内讧而策臣数十条皆质之天不听于民又谓今宰相非晏殊枢密参政非韩琦
杜衍范仲淹策万余言高宗见而异之擢寘第五授抚
州军事判官未上会隆佑太后避兵赣州金人蹶之铨以漕檄摄本州岛幕募乡丁助官
军捍御第赏转承直郎绍兴五年张浚开督府辟湖北仓
属不赴有诏赴都堂审察兵部尚书吕祉以贤良方正荐赐对除枢密院编修官八年秦
桧决策主和金使以诏谕江南为名中外汹汹铨抗疏
言曰臣谨案王伦本一狎邪小人市井无赖顷缘宰相无识遂举以充使专务诈诞欺罔
天听骤得美官天下之人切齿今者诱致金使以诏谕
江南为名是欲刘豫找也刘豫臣事金人一旦猝而缚之曾不旋踵商鉴不远而伦又欲
陛下效之陛下一屈膝则祖宗庙社之灵数百年之赤
子天下士大夫皆当委弃异时无厌之求安知不加我以无礼如刘豫也哉伦之议乃曰
我一屈膝则梓宫可还太后可复渊圣可归中原可得
自变故以来主和议者谁不以此说啖陛下哉然而卒无一验则其情伪已可知矣而陛

下尚不觉悟竭民膏血而不恤忘国大譬而不报含垢
忍耻举天下而臣之甘心焉就令敌决可和尽如伦议天下后世谓陛下何如主况彼变
诈百出而伦又以奸邪济之所愿决不可得而此膝一
屈不可复伸国势陵夷不可复振可为痛哭流涕长太息矣向者陛下闲关海道危如累
卵当时尚不忍北面臣之况今国势稍张诸将尽锐士
卒思奋只如顷者固屡败之较之往时蹈海之危固已万万傥不得已而至于用兵则我
岂遽出其下哉今无故而反臣之欲屈万乘之尊以下
拜三军之士不战而气已索此鲁仲连所以义不帝秦非惜夫帝秦之虚名惜天下大势
有所不可也今谤议汹汹陛下不闻正恐一旦变作祸
且不测国之存亡未可知也虽然伦不足道也秦桧以心腹大臣而亦为之陛下有尧舜
之资桧不能致君如唐虞而欲导陛下为石晋近者礼
部侍郎曾开等引古谊以折之桧复遂非愆谏孙近傅会桧议遂得参知政事伴食中书
漫不敢可否桧曰可和近亦曰可和桧曰天子当拜近
亦曰当拜参赞大政徒取充位如此有如敌骑长驱尚能折冲御侮耶臣窃谓秦桧孙近
皆可斩也臣备员枢属义不与桧等共戴天区区之心
愿断三人头竿之藁街然后羁留金使责以无礼徐议兴师则三军之士不战而气自倍
不然臣有赴东海而死尔宁能处小朝廷求活耶书既
上桧以铨狂妄凶悖鼓众劫持诏除名编管昭州仍降诏播告中外给舍台谏及朝臣多
救之者桧迫于公论乃以铨监广州盐仓明年改签书
威武军判官十二年谏官罗汝楫劾铨饰非横议诏除名编管新州十八年新州守臣张
棣许铨与客唱酬谤讪怨望移谪吉阳军二十六年桧
死铨量移衡州铨之初上书也宜兴进士吴师古铍木传之金人募其书千金其谪广州
也朝士陈刚中以启事为贺其谪新州也同郡王廷珪
以诗赠行皆为人所许流谪远州三十一年铨得自便孝宗即位复奉议郎知饶州召对
言修德结民练兵观衅帝曰久闻卿直谅除吏部郎官
隆兴元年迁秘书少监擢起居郎论史官失职者四一谓记注不必进呈庶人主有不观
史之美二谓唐制二史立螭头之下今在殿东南隅言
动未尝得闻三谓二史立后殿而前殿不立乞于前后殿分日侍立四谓史官欲其直前
而合门以未尝预牒今日无班次为辞乞自今直前言
事不必预牒合门及以有无班次为拘诏从之兼侍讲国史院编修官进言乞都建康谓
汉高入关中光武守信都大抵与人鬪不搯其吭拊其
背不能全胜今日大势自淮以北天下之吭与背也建康则搯之拊之之地也若进据建
康下临中原此高光兴王之计也诏议行幸言者请纾
其期遂以张浚视师图恢复侍御史王十朋赞之克复宿州大将李显忠与邵宏渊不协

军大溃十朋自劾帝怒甚铨上疏愿毋以小衄自沮时旱蝗星变诏问政事阙失铨应诏上书数千言始终以春秋书灾异之法言政令之阙有十而上下之情不合亦有十且言陛下自即位以来号召逐臣与臣同召者张焘辛次膺王大宝王十朋今焘次膺十朋去矣大宝又将去惟臣在尔以言为讳而欲塞灾异之源臣知其必不能也又言近宿州之败士死于敌者满野而败军之将以所得之金赂权贵以自解上天见变昭然陛下非信赏必罚以应天不可金人求成铨曰金人知陛下锐意恢复故以甘言款我愿绝口勿言和帝以边事全倚张浚而王之望尹穡专主和排浚铨廷责之兼权中书舍人同修国史张浚之子栻赐金紫铨缴奏之谓不当如此待勋臣子浚雅与铨厚不顾也十一月诏以和戎遣使大询于庭侍从台谏预议者凡十有四人铨独上议曰京师失守自耿南仲主和二圣播迁自何■〈〈鹵，欠代义〉上木下〉主和维扬失守自汪伯彦黄潜善主和金之南侵自秦桧主和议者乃曰外虽和而内不忘战此向来权臣误国之言也一溺于和不能自振尚能战乎除宗正少卿乞补外不许先是金将富察图们大周仁以泗州降萧琦以军百人降诏并为节度使铨言受降古所难六朝七得河南之地不旋踵而皆失梁武时侯景以河南来奔未几而陷台城宣政闲郭药师自燕云来降未几为中国患今金之三大将内附高其爵禄优其部曲以系中原之心善矣然处之近地万一包藏祸心或为内应后将噬脐愿勿任以兵柄迁其众于湖广以绝后患二年兼国子祭酒寻除权兵部侍郎八月上以灾异避殿减膳诏廷臣言阙政急务铨以振灾为急务议和为阙政其议和之书曰自靖康迄今凡四十年三遭大变皆在和议则不可与和彰彰然矣肉食鄙夫万口一谈牢不可破非不知和议之害而争言和者是有三说焉曰偷懦曰苟安曰附会偷懦则不知立国苟安则不戒酖毒附会则觊得美官小人之情状具于此矣今日之议若成则有可吊者十若不成则有可贺者亦十何谓可吊者十真宗皇帝时宰相李沆谓王旦曰切勿与辽讲和出则无敌国外患者国常亡若一讲和自此中国必多事矣且不谓然既而遂和海内干耗始悔不用文靖之言此可吊者一也中原讴吟思归之人日夜引领望陛下拯救一旦议和则中原绝望后悔何及此可吊者二也海泗今日之藩篱咽喉也彼得海泗且决吾藩篱以瞰吾室扼吾咽喉以制吾命两淮决不可保两淮不保则大江决不可守大江不守则江浙决不可安此可吊者三也绍兴戊午和议既成桧建议遣二三大臣如路允迪等分往南京等州交割归地一旦叛盟劫执允迪等遂下亲征之诏旋复请和其反复变诈如此桧犹

不悟奉之如初事之愈谨赂之愈厚卒致金兵南侵惊
动辇毂太上言欲入海行朝居民一空覆辙不远忽而不戒臣恐后车又将覆也此可吊
者四也绍兴之和首议决不与归正人口血未干尽变
前议凡归正之人一切遣还如程师回赵良嗣等聚族数百几为萧墙忧今必尽索归正
之人与之则反侧生变不与则敌决不肯但已夫反侧
则肘腋之变深敌不肯但已则必别起衅端猝有他谋不知何以待之此可吊者五也自
桧当国二十年闲竭民膏血以饵敌国迄今府库无旬
月之储千村万落生理萧然重以蝗虫水潦自此复和则蠹国害民殆有甚焉者矣此可
吊者六也今日之患兵费已广养兵之外又增岁币以
十年计之其费无虑数万亿而岁币之外又有私觐之费有贺正生辰之使有泛使一使
未去一使复来生民疲于奔命帑廩涸于将迎瘠国以
肥敌陛下何惮而为之此其可吊者七也侧闻敌人嫚书欲书御名欲去国号大字欲用
再拜议者以为繁文小节不必计较臣切以为议者可
斩也夫四郊多垒卿大夫之辱献纳二字富弼以死争之今臣子欲君父屈己以从之则
是多垒不足辱献纳不必争此其可吊者八也臣恐再
拜不已必至称臣称臣不已必至请降请降不已必至纳土纳土不已必至衔璧衔璧不
已必至舆榘舆榘不已必至如晋帝青衣行酒然后为
快此其可吊者九也事至于此求为匹夫尚可得乎此其可吊者十也倪干刚独断追回
使者魏■〈木巳〉康湑等绝请和之议以鼓战士下
哀痛之诏以收民心天下庶乎其可为也如此则有可贺者亦十省数万亿之岁币一也
专意武备足食足兵二也无书名之耻三也无去大之
辱四也无再拜之屈五也无称臣之忿六也无请降之祸七也无纳土之悲八也无衔璧
舆榘之酷九也无青衣行酒之冤十也去十吊而就十
贺利害较然如以臣言为不然乞赐流放窜殛以为臣子出位犯分之戒时自符离之败
朝论急于议和弃唐邓海泗四州金又欲得商秦地邀
岁币留使者魏■〈木巳〉分兵攻淮铨以本职措置浙西淮东海道时金兵号八十万
刘宝弃楚州王彦弃昭关濠滁皆陷惟高邮守臣陈敏
拒敌射阳湖而大将李宝预求密诏为自安计拥兵不救铨劾奏之宝惧始出师犄角时
大雪河冰皆合铨先持铁锤锤冰士皆用命金人遂退
久之提举太平兴国宫干道初以集英殿修撰知漳州改泉州趣奏事留为工部侍郎入
对言少康以一旅复禹绩今陛下富有四海非特一旅
而即位九年恢复之效尚未赫然又言四方多水旱左右不以告谋国者之过也宜令有
司速为先备今致仕七年除宝文阁待制留经筵求去
以敷文阁直学士与外祠陞辞犹以归陵寝复故疆为言上所著易春秋周礼礼记解诏

藏秘书省寻复原官升龙图阁学士提举太平兴国宫
转提举玉龙万寿宫进端明殿学士淳熙六年召归经筵铨引疾力辞七年以资政殿学
士致仕卒谥忠简孙槻榘皆至尚书

△廖刚

廖刚字用中南剑州顺昌人登崇宁五年进士第宣和初自漳州司录除国子录擢
监察御史时蔡京当国刚论奏无所避以亲老求补外
出知兴化军钦宗即位以右正言召丁父忧服阙除工部员外郎以母疾辞绍兴元年盗
起旁郡官吏悉逃去顺昌民以刚为令刚谕从盗者使
反业既而他盗入顺昌部使者檄刚抚定刚遣长子迟谕贼贼知刚父子有信义亦散去
除本路提点刑狱寻召为吏部员外郎言古者天子必
有亲兵自将所以备不虞而强主威汉北军唐神策之类也祖宗军制尤严愿稽旧制选
精锐为亲兵居则以为卫动则以为中军此强干弱枝
之道又言国家艰难已极今方图新若会稽非久驻之地请经营建康亲拥六师往为固
守计以杜金人窥伺之意迁起居舍人权吏部侍郎兼
侍讲除给事中丁母忧服阙复拜给事中刚言国不可一日无兵兵不可一日无食今诸
将之兵备江淮初无储蓄日待哺于东南之转饷浙民
已困欲救此患莫若屯田因献三说将校有能耕当加优赏每耕田一顷与转一资百姓
愿耕假以粮种复以租赋诏令都督府措置时朝廷推
究章惇蔡卞误国之罪追贬其身仍诏子孙毋得官中朝至是章榘自崇道观知婺州章
仅自太府丞提举江东茶盐事刚封还诏书谓即如此
何以示惩乃并与祠权户部侍郎寻迁刑部侍郎求补外除徽猷阁直学士知漳州七年
二月日有食之诏内外官言事刚言陛下有建国之封
所以承天意示大公于天下后世也然而未遂正名者岂非有所待耶有所待则是应天
之诚未至也愿陛下昭告艺祖在天之灵正建国储君
之号布告中外不匿厥旨异时虽百斯男不复更易天下孰敢不服帝读之耸然即召刚
至阙拜御史中丞刚又奏经费不支盗贼不息事功不
立命令不孚及兵骄官冗之弊殿前司强刺民为兵及大将恃功希恩所请多废法刚知
无不言论列至于四五骄横者肃然郑亿年与秦桧有
连而得美官刚显疏其恶桧衔之金人叛盟刚乞起旧相之有德望者处以近藩桧闻之
曰是欲寘我何地耶改工部尚书而以王次翁为中丞
初边报至从官会都堂刚谓亿年曰公以百口保金人今已背约有何面目尚在朝廷乎
亿年奉祠去次翁与右谏议何铸劾刚荐刘昉陈渊相
为朋比以徽猷阁直学士提举亳州明道宫明年致仕以绍兴十三年卒子四人迟过遂
遽仕皆秉麾节邦人号为万石廖氏

△李迨

李迨东平人曾祖参仕至尚书右丞迨以荫补官初调渤海县尉时州县团结民兵民起田亩中不闲坐作进退之节或哗不受令迨立赏罚以整齐之累月皆精练部伍如法部刺史按阅无一人乱行伍者遂荐之朝累迁通判济州时高宗以大元帅过济郡守自以才不及迨迨行州事迨应办军须无阙会大元帅府劝进乘輿仪物皆未备迨谙熟典故裁定其制不日而办除随军辇运山东辇运改金部郎从驾至维扬敌犯行在所即取金部籍有关于国家经赋之大者载以行丁父丧诏起复以中散大夫直龙图阁为御营使司参议官兼措置军前财用苗傅刘正彦叛吕颐浩张浚集勤王之师迨谓诸将曰君第行无虑军食师行所至食皆先具事平同赵哲等入对帝慰劳之诏转三官辞不拜除权户部侍郎四年加显谟阁待制为淮南江浙荆湖路制置发运使寻以军旅甫定乞持余服诏许之绍兴二年知筠州明年移信州寻提举江州太平观五年以旧职除两浙路转运使言祖宗都大梁岁漕东南六百余万斛而六路之民无飞挽之扰盖所运者官舟所役者兵卒故也今驻蹕浙右漕运地里不若中都之远而公私苦之何也以所用之舟大半取于民闲往往凿井沈船以避其役如温明虔吉州等处所置造船场乞委逐州守臣措置募兵卒牵挽使臣管押庶几害不及民可以渐复漕运旧制诏工部措置寻加徽猷阁直学士升龙图阁直学士为四川都转运使兼提举成都等路茶事并提举陕西等路买马自熙丰以来始即熙秦戎黎等州置场买马而川茶通于永兴四路故成都府秦州皆有榷茶司至是关陕既失迨请合为一司名都大提举茶马司以省冗费从之踰年诏迨以每岁收支之数驿奏迨乃考其本末具奏条析绍兴四五七等年所收钱物暨所支关各若干万余缗云自来遇岁计有阙即添支钱引补助见今泛料太多引价顿落缘此未曾添印兼岁收钱物内有上供进奉等窠名若干系四川岁入旧额其劝谕激赏等项窠名钱物若干系军兴后来岁入所增比旧额已过倍其取于民可谓重矣臣尝考刘晏传是时天下岁入缗钱管榷居其半今四川榷盐榷酒一岁所入过于晏所榷已多诸窠名钱亦三倍其数彼以贍中原之军而有余今以贍川陕一军而不足又如折估及正色米一项止以绍兴六年朝廷取会官兵数计之官员之数比军兵之数约计六分之一军兵请给钱比官员请给不及十分之一即是冗滥在官员不在军兵也计司虽知冗滥力不能裁节之虽是宽剩亦未敢除减此朝廷不可不知也蜀人所苦甚者余买般运也盖余买不科敷则不能集事苟科敷则不能无扰般运事稍缓则船户独受

其弊急税户皆被其害欲省漕运莫如屯田汉中之地
约收二十五万余石若将一半充不系水运去处岁计米一半对减川路余买般发岁计
米亦可少宽民力兼臣已委官于兴元洋州就余夏麦
五十万石岷州欲就余二十万石兼用营田所收一半之数十二万石三项共计五十七
万石每年水运应付阆利州以东计米五十八万石若
得此三项可尽数免川路余买般运此乃恤民之实惠守边之良策也降诏奖谕以与吴
玠不合与祠九年金人归我三京命迨为京畿都转运
使孟庾时为权东京留守潜通北使迨察其隐微庾不能平讼于朝且使人告迨以兵至
恐之迨不为动降圣节庾失于行礼为迨所持庾自劾
迨因此求罢去乃落职与祠归而庾以京师降于金人迨寻复龙图阁待制知洪州十六
年以疾丐祠十八年卒

△赵开

赵开字应祥普州安居人登元符三年进士第大观二年权辟靡正用举者改秩即
尽室如京师买田尉氏与四方贤俊游因诤知天下利
病所当罢行者慨然有通变掇弊之志宣和初除礼制局校正检阅官数月局罢出知鄢
陵县七年除讲议司检详官开善心计自检详罢除成
都路转运判官遂奏罢宣和所增上供认额纲布十万疋减绵州下户支移利州水脚钱
十分之三又减蒲江六井所增盐额列其次第谓之鼠
尾帐揭示乡户岁时所当输折科等实数俾人人具晓乡胥不得隐匿窜寄尝言财利之
源当出于一祖宗朝天下财计尽归三司诸道利源各
归漕计故官省事理无牵掣窒碍之患因指陈榷茶买马五害大略谓黎州买马嘉佑岁
额纔二千一百余自置司榷茶岁额四千且获马兵踰
千人犹不足用多费衣粮为一害嘉佑以银绢博马价皆有定今长吏旁缘为奸不时归
货以空券给夷人夷人怨恨必生边患为二害初置司
榷茶借本钱于转运司五十二万缗于常平司二十余万缗自熙宁至今几六十年旧所
借不偿一文而岁借乃准初数为三害榷茶之初预俵
茶户本钱寻于数外更增和买或遂抑预俵钱充和买茶户坐是破产而官买岁增茶日
滥杂官茶既不堪食则私贩公行刑不能禁为四害承
平时蜀茶之入秦者十八九犹患积压难售今关陇悉遭焚荡仍拘旧额竟何所用茶兵
官吏坐糜衣粮未免科配州县为五害请依嘉佑故事
尽罢榷茶仍令转运司买马即五害并去而边患不生如谓榷茶未可遽罢亦宜并归转
运司痛减额以苏茶户轻立价以惠茶商如此则私贩
必衰盗贼消弭本钱既常在而息钱自足朝廷是其言即擢开都大提举川陕茶马事使
推行之时建炎二年于是大更茶马之法官买官卖茶

并罢参酌政和二年东京都茶务所勅并条约印给茶引使茶商执引与茶户自相贸易改成都旧买卖茶场为合同场买引所就场置茶市交易者必由市引与茶必相随茶户十或十五共为一保并籍定茶铺姓名互察影带贩鬻者凡买茶引每一斤春为钱七十夏五十旧所输市例头子钱并依旧茶所过每一斤征一钱住征一钱五分其合同场监官除验引称茶封记发放外无得干预茶商茶户交易事旧制买马及三千匹者转一官此但以所买数推赏往往有一任转数官者开奏请推赏必以马到京实收数为格或死于道黜降有差比及四年冬茶引收息至一百七十余万缗买马踰二万匹张浚宣抚川蜀素知开善理财即承制以开兼宣抚处置使司随军转运使专领四川财赋开见浚曰蜀之民力尽矣锱铢不可加独榷货稍存赢余而贪猾认为己有互相隐匿惟不恤怨詈断而敢行庶可救一时之急浚锐意兴复委任不疑于是大变酒法自成都始先罢公使卖供给酒即旧扑买坊场所置隔槽设官主之曲与酿具官悉自买听酿户各以米赴官场自酿凡一石米输三千【按宋史食货志作斛输钱三十】并头子杂用等二十二其酿之多寡惟钱是视不限数也明年遂徧四路行其法又于秦州置钱引务兴州鼓铸铜钱官买银绢听民以钱引或铜钱买之凡民钱当入官者并听用引折纳官支出亦如之民私用引为市于一千并五百上许从便增高其直惟不得减削法既流通民以为便初钱引两科通行纔二百五十万有奇至是添印至四千一百九十余万人亦不厌其多价亦不削宣司获伪引三十万盗五十人浚欲从有司议当以死开白浚曰相君误矣使伪引加宣抚使印其上即为真黜其徒使治币是相君一日获三十万之钱而起五十人之死也浚称善悉如开言最后又变盐法置合同场盐市与茶法大抵相类盐引每一斤纳钱二十五土产税及增添等共纳九钱四分所过每斤征钱七分住征一钱五分若以钱引输提勘钱共六十【按宋史食货志作别输提勘钱六十六】初变榷法怨詈四起至是开复议更盐法言者遂奏其不便诏以其章示浚浚不为变时浚荷重寄治兵秦州经营两河旬犒月赏期得士死力费用不费尽取办于开开悉知虑于食货算无遗策虽支费不可计而赢资若有余吴玠为四川宣抚副使专治战守于财计盈虚未尝问惟一切以军期趣办与开异趣数以饷馈不继诉于朝开亦自劾老惫丐去朝廷未许乃特置四川安抚制置大使命席益为之益前执政诏位宣抚司上开复与席益不和抗疏乞将旧未宣抚司年计应副军期不许他司分擘支用又指陈宣抚司截都漕运司钱就果闾余米非是又言应副吴玠军须绍兴四年总

为钱一千九百五十五万七千余缗五年视四年又增四百二十万五千余缗蜀今公私俱困无所取给乞许以茶马司奏计诣阙下尽所欲言朝廷既知开与玠及席益有隙乃诏开赴行在以李迨代之会疾作不行提举江州太平观七年复右文殿修撰都大主管川陕茶马开已病累疏丐去诏从所乞提举太平观十一年卒

钦定续通志卷三百七十七

●钦定续通志卷三百七十八 列传一百七十八

列传

宋 【八十二】

邓肃	李邴	滕康	张守	富直柔	冯康国
常同	张致远	薛徽言	陈渊		
魏矼	潘良贵	吕本中			

○宋八十二

邓肃

李邴

滕康

张守

富直柔

冯康国

常同

张致远

薛徽言

陈渊

魏矼

潘良贵

吕本中

△邓肃

邓肃字志宏南剑沙县人少警敏能文美风仪善谈论李纲见而奇之时东南贡花石纲肃作诗言守令搜求扰民用事者见之屏出太学钦宗嗣位召对便殿补承务郎授鸿胪寺簿被命诣金营留五十日而还张邦昌僭位肃义不屈奔赴南京擢左正言先是金人索帛一千万肃在其营密覘均与将士之数大约不过八万八至是为上言之且言金人不足畏但其信赏必罚不假文字故人各用命朝廷则不然有同时立功而功又相等者或已转数官或尚为布衣轻重上下只在吏手赏既不明谁肯自劝欲

望专立功赏一司使凡立功者得以自陈若功状已明而赏不行或功同而赏有轻重先后者并寘之法帝从之朝臣受伪命者众肃请分三等定罪乞委留守司按籍考之耿南仲得祠禄归其子延禧为郡守肃劾南仲父子同恶沮渡河之战遏勤王之兵今日割三镇明日截两河及陛下欲进援京城又为南仲父子所沮误国如此乞正典刑南仲尝荐肃于钦宗肃言之不恤上嘉其直赐五品服范讷留守东京肃言讷出师两河望风先遁语人曰留守之说有四战守降走而已战无卒守无粮不降则走奔军之将岂宜与此讷遂罢内侍陈良弼肩輿至横门外开封买入内女童肃连章论之时官吏多托故而去肃建议削其仕版而取其禄以给禁卫若夫先假指挥径徙江湖者乞追付有司以正其罪因入对言外夷之巧在文书简简故速中国之患在文书烦烦故迟太祖太宗之时法严而令速事简而官清未尝旁搜曲引以稽赏罚故能以十万精兵混一六合若今日献一策明日献一言烦冗琐碎惟恐不备此文书所以益烦而政事所以益缓也今兵戈未息岂可揖逊进退尚循无事之时欲乞限以旬日期于必至庶几法严事简赏罚之权不至濡滞肃在谏垣遇事感激不三月凡抗二十疏言皆切至上多采纳会李纲罢肃奏曰纲学虽正而术疏谋虽深而机浅固不足以副圣意惟陛下尝顾臣曰李纲真以身徇国者今日罢之而责词甚严此臣所以有疑也且两河百姓无所适从纲措置不一月闲民兵稍集今纲既去两河之民将如何哉伪楚之臣纷纷在朝李纲先乞逐逆臣邦昌然后叛党稍能正罪今纲既去叛臣将如何哉执政怒肃罢归居家绍兴二年避寇福唐以疾卒

△李邴

李邴字汉老济州任城县人【按宋名臣言行别录作巨野人】中崇宁五年进士第累官为起居舍人试中书舍人北方用兵酬功第赏日数十百邴辞命无留难除给事中同修国史兼直学士院迁翰林学士尝与禁中曲宴徽宗命赋诗高丽使入贡传录以归未几坐言者罢提举南京鸿庆宫钦宗即位除徽猷阁待制知越州久之再落职提举西京嵩山崇福宫高宗即位复徽猷阁待制【按宋名臣言行别录作复右文殿修撰】踰岁召为兵部侍郎兼直学士院苗傅刘正彦迫上逊位上顾邴草诏邴请得御札而后敢朱胜非请降诏赦邴就都堂草之除翰林学士初邴见苗傅面谕以逆顺祸福之理且密劝殿帅王元俔以禁旅击贼元唯唯不能用即诣政事堂白朱胜非适正彦及其党王世修在焉又以大义责之人为之危邴不顾也时御史中丞郑榘又抗疏言睿圣皇帝不当

改号于是邴穀为端明殿学士同签书枢密院事邴与张守分草百官章奏三奏三答及太后手诏与复辟赦文一日而具拜尚书右丞改参知政事寻为资政殿学士权知行台三省枢密院事以与吕颐浩论不合乞罢遂以本职提举杭州洞霄宫未阅月起知平江府会兄邺失守越州坐累落职明年引赦复之又升资政殿学士绍兴五年诏问宰执方略邴条上战阵守备措画绥怀各五事战阵之利五曰出轻兵务远略储将帅责成功重赏格大略谓关陕为之地淮南为保固之地关陕虽利于进取然不用师于京东以牵制其势则彼得一力以拒我今大将统兵者数人皆所恃以为根本万一失利将不复用偏裨中如牛皋王进杨珪史康明皆京东土人知地险易可各配以部曲三五千人或出淮阳或出徐泗彼将奔命之不暇此不动而分陕西重兵之一端也关陕今虽有二宣抚其体尚轻非遣大臣不可吕颐浩气节高亮李纲识量宏远威名素着愿择其一而用之必有以报陛下又言陛下即位之初韩世忠刘光世张俊威名隐然为大将今又有吴玠岳飞者出矣愿诏大将于所部举智谋忠勇可以馭众统帅各两三人朝廷籍记遇有事宜使当一队毋隶大将则诸人竞奋才智皆飞玠之俦矣大将爵位已崇难相统一自今用兵第可授以成算使自为战勿遣重臣临之以轻其权而分其功今却敌退师之后必论功行赏愿因此诏有司预定赏格谓如得城邑及近上首领之类自一命至节度使皆差次使足相当所谓守备之宜有五曰固根本习舟师防他道讲遗策列长戍大略谓江浙为今日根本欲保守则失进取之利欲进取则虑根本之伤古之名将内必屯田以自足外必因粮于敌诚得以功名自任者举淮南而付之使自为进取则不至虚内以事外臣闻朝廷下福建造海船七百只必如期而办乞仿古制建伏波下濑楼船之官以教习水战俾近上将佐领之自成一军而专隶于朝廷无事则散之缘江州郡缓急则聚而用之臣度敌人他年入寇惩创今日之败必先以一军来自淮甸为筑室反耕之计以缀我师然后由登莱泛海窥吴越以出吾左由武昌渡江窥江池以出吾右一处不支则大事去矣愿讲左支右吾之策夫兵之形无穷愿诏临江守臣凡可设奇以误敌者皆预为措画今长江之险绵数千里守备非一愿差次其最紧处屯军若干人一将领之听其郡守节制次紧稍缓差降焉有事则以大将兼统之既久则谙熟风土缓急可用与旋发之师不侔矣所谓措画之方有五曰亲大阅补禁卫讲军制订使事降敕榜大略谓建炎以来禁卫单寡乃藉五军以为重臣常寒心愿择忠实严重之将以为殿帅稍补禁卫之阙使隐然自成一军则其馭诸将也若臂之使指矣

今诸郡厢禁冗占私役者大郡二三千人小郡亦数百人臣愿讲求除郡守兵将官自禁军给事外余僉从衣粮使自僦人以役大抵杀厢军三分之二而以其衣粮之数尽募禁军金人自用兵以来未尝不以和好为言此决不可恃然二圣在彼不可遂已姑以余力行之臣谓宜专命一官如古所谓行人者当遣使人举成法而授之庶免临时斟酌之劳而朝廷得以专意治兵矣刘豫僭叛理必灭之谓宜降敕榜明着豫僭逆之罪晓谕江北士民此亦兵家所谓伐谋伐交者所谓绥怀之略有五曰宣德意先振恤通关津遣材能务宽贷大略谓山东大姓结为山寨以自保愿募有心力之人密往诏谕淮北遗民来归者令淮南州郡给以行由差船津济分人护送有官人先次注授差遣无官而贫乏者令沿江州郡以官舍居之仍量给钱米内有才智可用之人皆从宽贷使之有更生之望不报邴闲居十有七年卒于泉州年六十二谥文敏

△滕康

滕康字子济应天府宋城人登崇宁五年进士第又中词学兼茂科除秘书省正字迁著作佐郎尚书工部礼部员外郎国子司业靖康二年元帅府闻康习宪章召至济州康率羣臣劝进除太常少卿使定登极礼仪凡告天及肆赦之文皆康为之辞意激切闻者感动除起居舍人权给事中进起居郎兼讨论祖宗法度检讨官试中书舍人会显谟阁学士孟忠厚乞用父减年迁官康言忠厚隆佑太后之侄也太宗以来凡母后兄弟之子无为侍从者武义大夫康义用登极恩迁遥郡刺史康又封还词头言康义得转一官今自武义大夫躡上遥郡刺史名迁一官实升五等紊法之甚凡再降旨竟不肯行后军统制韩世忠以不能戢所部坐赎金康言世忠所部卒伍至夺御器逼谏臣于死地止罚金何以惩后诏降世忠一官知江州陈彦文用刘光世奏录其守城功迁龙图阁待制康以光世所上彦文功状前后抵牾阁而未下宰相力主彦文趣康行词康论不已宰相衔之会布衣省试卷子不合式康以其文取之谏官李处遯论奏遂以集英殿修撰提举杭州洞霄宫再除中书舍人奏曰去岁郊礼前日食而日官不以闻廷臣不以告使陛下所以应天者未至故逆臣敢萌不轨者无先事之戒也陛下即位行再岁矣恻怛爱民之政徒为空言百姓不被其恩哀痛责躬之诏不着事实四方不以为信忠佞并驰而多士解体刑赏失当而三军沮气臣愿陛下取建炎初元以来所下诏书所举政事熟思审度望参稽得失而罢行之帝称其有谏臣风除左谏议大夫旬日闲封章屡上遂擢翰林学士又除端明殿学士同签书枢密院事建炎三年宰相吕颐浩议幸武昌为趋陕之计既移蹕建康又议欲

尽弃中原徙居民于东南康力持不可帝悟而止未几
帝请太后奉神主如江西以参知政事李邴权知三省枢密院事康为资政殿学士同从
卫以行邴辞疾又命康权知以刘珣为贰赐康褒诏许
缀宰执班奏事康从卫至洪州刘光世护江不密金人绝流而渡康等仓卒奉太后趋虔
州殿中侍御史张延寿论康与珣无忧国之心至使太
后涉险为敌人追迫责授康秘书少监分司南京永州居住未几许自便复左朝请大夫
提举明道宫绍兴二年九月卒年四十八八年追复龙
图阁学士

△张守

张守字子固常州晋陵人家贫无书从人假借过目辄不忘登崇宁元年进士第中
词学兼茂科除详定九域图志编修官改宣德郎擢为
监察御史丁内艰去建炎初召还赐五品服上在维扬尼雅满将自东平历泗淮宰臣汪
伯彦黄潜善以为李成余党不足畏守独抗疏上防淮
渡江利害六事又别疏言金人入淮之路有四宜择四路帅守缮兵储粟以捍御之又请
诏大臣惟以选将治兵为急凡不急之务付之都司六
曹二相滋不悦遂建议遣守抚谕京城守闻命即就道三年正月还奏金人必来愿早为
图之未几金人果渡淮上幸临安累迁御史中丞苗刘
既平诏赦百官表奏皆守与李邴分为之守论宰相朱胜非不能思患预防致贼猖獗乞
罢政胜非罢吕颐浩初相举行司马光之言欲并合三
省诏侍从台谏集议守言光之所奏较然可行若更集众徒为纷纭既而悉无异论竟合
三省为一帝幸建康吕颐浩张浚叶议将奉帝幸武昌
为趋陕之计守与谏议大夫滕康皆持不可曰东南今日根本也陛下远适则奸雄生窥
伺之心又陈十害至殿庐谓康曰幸蜀之事吾曹当以
死争之议遂寝初守为副端时尝上疏曰陛下处宫室之安则思二帝母后穹庐毳幕之
居享膳羞之奉则思二帝母后膾肉酪浆之味服细暖
之衣则思二帝母后穷边绝塞之寒苦操与夺之柄则思二帝母后语言动作受制于人
享嫔御之适则思二帝母后谁为之使令对臣下之朝
则思二帝母后谁为之尊礼兢兢栗栗圣心不倦而天不为之助顺者万无是理也至是
诏陈阙政复申前说曰今罪己之诏数下而天未悔祸
实有所未至耳汉制灾异策免三公今任宰相者虽有勋劳然其器识不足以斡旋机务
愿更择文武全材海内所共推者亲擢而并用之上书
论事或有切直宜加褒擢以来言路除礼部侍郎迁翰林学士知制诰九月拜端明殿学
士同签书枢密院事扈从由海道至永嘉回至会稽四
年五月除参知政事守尝荐汪伯彦沈与求劾其短以资政殿学士提举洞霄宫起知绍

兴府寻以内祠兼侍读力辞改知福州时右司员外郎
张宗臣请令福建筑城守奏公私困敝请俟他年遂止寻以变易度牒钱百万余缗输之
行在助国用时刘豫导金入侵诸将献俘者相踵守上
疏曰两河山东之民皆陛下赤子驱迫以来岂得已哉宜谕以恩信贷之使归愿留者亦
听则敌兵可不战而溃金人既退诏诸将渡江追击守
复上疏以敌情难测愿留刘光世控御诸渡上既还临安又诏问攻战守备绥怀措置四
事守言四事莫急于措置其一措置军旅其二措置粮
食神武中军当专卫行在而以余军分戍三路一军驻于淮东一军驻于淮西一军驻鄂
岳或荆南择要害之地以处之使北至关辅西抵川陕
血脉相通号令相闻有唇齿辅车之势则自江而南可安枕而卧也然今之大将皆握重
兵贵极富溢前无禄利之望退无诛罚之忧故朝廷之
势日削兵将之权日重又为大将者万一有称病而赐罢或卒然不讳则所统之众将安
属耶臣谓宜拔擢麾下之将使为统制每将不过五千
人募布四路朝廷号令径达其军分合使令悉由朝廷然后可以有为也诸将既分屯诸
路则所患者财谷转输今宜举两浙之粟以饷淮东 【
按宋名臣言行别录作以两浙之粟专供行在而江东之粟以饷淮东】 江西之粟以饷
淮西荆湖之粟以饷鄂岳荆南量所用之数责漕臣将
输而归其余于行在钱帛亦然钱粮无乏绝之患然后戒饬诸将不得侵扰州县以复业
之民户口多寡为诸州殿最岁核实而黜陟之措置既
定俟至防秋复遣大臣为之统督使诸路之兵首尾相应绥怀之略亦在是矣守在闽四
年抚绥雕瘵且请于朝蠲除福州所贷常平缗钱十五
万累请去郡以提举万寿观兼侍读召还甫两月复引病丐去知平江府力丐祠以归六
年十二月召见除参知政事兼权枢密院事七年张浚
罢刘光世兵权而欲以吕祉往淮西抚谕诸军守以为必须得闻望素高能服诸将之心
者乃可浚不听遂有郈瑊之变及台谏交章论浚御批
安置岭表守力为解曰浚为陛下捍两淮罢刘光世正以其众乌合不为用今已验矣羣
臣从而媒蘖其短臣恐后之继者以浚为鉴谁肯为陛
下任事乎浚谪永州守亦引咎请去弗许八年正月帝自建康将还临安守言建康自六
朝为帝王都江流险阔气象雄伟且据都会以经理中
原依险阻以捍御强敌可为别都以图恢复赵鼎持不可守力求去以资政殿大学士知
婺州寻改洪州兼江南西路安抚使入对帝问以弭盗
之策守曰莫先德政伺其不悛然后加之以兵因请出师屯要害既至部揭榜郡邑开谕
祸福约以期限许之自新不数月盗平后徙知绍兴府
会朝廷遣三使者括诸路财赋所至以鞭撻立威韩球在会稽所敛五十余万缗守既视

事即求入覲为上言之诏追还三使时秦桧当国不悦
守亦不自安复奉祠建康谋帅上曰建康重地用大臣有德望者惟张守可至镇数月卒
守尝荐秦桧于时宰张浚及桧为枢密使守一日在省
阁执浚手曰守前者误公矣今同班列观其趋向有患失之心公宜力陈于上守在江右
以郡县供亿科扰上疏请蠲和买罢和采上欲行之时
秦桧方损度支为月进且日忧四方财用之不至见守疏怒曰张帅何损国如是守闻之
叹息卒谥文靖孙抑

△富直柔

富直柔字季申宰相弼之孙也以父任补官有才名靖康初召赐同进士出身除秘
书省正字建炎二年复以张浚荐授著作佐郎寻除礼
部员外郎起居舍人迁右谏议大夫言范致虚自谪籍召入不当复用出知鼎州还给事
中医官王继先以覃恩由团练使转防御使法当回授
得旨特与换武功大夫直柔论武功大夫惟有战功历边任负材武者乃迁不可以轻授
从之迁御史中丞除端明殿学士签书枢密院事故事
签书有以员外郎为之而无三丞为之者时直柔为奉议郎乃特迁朝奉郎绍兴元年诏
礼部太常寺讨论隆佑太后册礼直柔曰陛下推崇隆
佑天下以为当然愿陛下勿复致疑既而王居正言太后隆名定位已正于元符宜用钦
圣诏奏告天地宗庙其典礼不须讨论议遂定上虞县
丞娄寅亮上书言宗社大计欲选太祖诸孙伯字行下有贤德者视秩亲王使牧九州岛
以待皇嗣之生退处藩服疏入上大叹悟直柔从而荐之
召赴行在除监察御史于是孝宗立为普安郡王除同知枢密院事侍御史沈与求论直
柔附会辛道宗兄弟得进并论其所荐右司谏韩璜先
是直柔尝短吕颐浩于帝前颐浩与秦桧皆忌之由是璜责监浚州酒税而直柔以本官
提举洞霄宫六年丁所生母忧起复资政殿学士知镇
江府辞不赴复知衢州以失入死罪落职奉祠寻复端明殿学士徜徉山泽放意吟咏与
苏迟叶梦得诸人游以寿终于家

△冯康国

冯康国字符通本名輶遂寔府人为太学生负气节建炎中苗刘作乱张浚倡帅诸
将合兵致讨念傅等居中欲得辩士往说之时輶客浚
所慷慨请行至杭说傅正彦曰二公诛锄宦官为功甚大然主上春秋鼎盛天下不闻其
过岂可遽传位于襁褓之子二公本心为国奈何以此
负谤天下傅按剑大怒輶辞气不屈正彦乃善谕之曰张侍郎欲复辟固善然须用面议
乃遣輶还约浚至杭浚复傅书诵言其罪又遣輶移书
傅等告以祸福輶至傅党马柔吉誅之曰昨张侍郎书不委曲二公大怒已发兵出杭矣

君尚敢来耶輶曰畏则不来来则不畏王世修欲拘留
輶会浚谬为书遗輶云适有客自杭来方知二公于社稷初无不利之心甚悔前书之轻易也傅等见之喜輶得免俄勤王之兵大集傅等始惧
輶知其可动乃说宰相朱胜非曰今日之事当以渊圣皇帝为主睿圣皇帝宜复为大元帅少主为皇太侄太后垂帘胜非令与傅正彦议皆许诺
輶又请褒传正彦如赵普故事遂皆赐铁券高宗复辟诏补輶奉议郎守兵部员外郎赐五品服更名康国张浚宣抚川陕辟康国主管机宜
文字浚至蜀遣康国入奏事诏进两官为荆湖宣谕使帝方幸浙东不暇降诏旨康国以自意为之言者劾以擅造制书坐贬秩二等绍兴三年
康国与浚俱赴行在浚既黜御史常同因论康国罢之起知万州湖北转运判官浚相入为都官员外郎言四川正税重者科折轻正税轻者科
折重科折权衡与税平准故无偏重近年监司总漕悉改旧法取数务多失业逃亡皆由于此盍从旧法诏以其言下四川宪司察不如法者又
言蜀苦陆运当谕吴玠非防秋月分兵就粮兼选守牧治梁洋招集流散耕凿就绪则漕运可省浚去相位康国乞补外迁右司员外郎除直显
谟阁知夔州丁母忧起复抚谕吴玠军除都大主管川陕茶马卒

△常同

常同字子正邛州临邛人绍圣御史安民之子也登政和八年进士第靖康初辟元帅府主管机宜文字除太常博士高宗南渡辟浙江机
幕建炎四年召至行至为大宗丞绍兴元年乞郡得柳州三年召还首论朋党之祸自元丰新法之行始分党与邪正相攻五十余年章惇唱于
绍圣之初蔡京和于崇宁之后元佑臣僚窜逐贬死上下蔽蒙养成外祸今国步艰难而分朋缔交背公死党者固自若也臣以为欲破朋党先
明是非欲明是非先辨邪正则公道开而奸邪息矣帝曰君子小人皆有党同又对曰君子之党协心济国小人之党挟私害公为党则同而所
以为党则异且如元佑臣僚中遭谗谤窜殛流死而后祸乱成今在朝之士犹谓元佑之政不可行元佑子孙不可用盖今日士大夫犹宗京黼
等倾邪不正之论公论何自而伸愿陛下始终主张善类勿为小人所惑又奏自古禁旅所寄必参错相制汉有南北军周勃用之以安刘氏唐
李晟亦用神策军以复京师今国家所使惟刘光世韩世忠张俊三将之兵耳陛下无心腹禁旅可备缓急顷者苗刘之变亦可鉴矣除殿中侍
御史时韩世忠刘光世以私忿交兵同奏光世等不思待遇之恩而骄很尚气无所忌惮一旦有急其能相为唇齿乎望分是非正国典昔汉诸
侯王有过犹责师傅今两军幕属赞画无状乞先黜责上以章示两军吕颐浩再相同论

其十事且曰陛下未欲遽罢颐浩者岂非以其有复辟之功乎臣谓功出众人非一颐浩之力纵使有功宰相代天理物非以宰相赏功者也颐浩罢相复论张浚丧师失地遂诏浚福州居住金使李永寿等入见同言先振国威则和战常在我若一意见和则和战常在彼上因语及武备曰今养兵已二十万同奏未闻二十万兵而畏人者也伪齐宿迁令张泽以二千人来归泗州守徐宗诚纳之韩世忠以闻朝论令世忠却泽等而械宗诚赴行在同奏敌虽议和而两界人往来未尝有禁伪齐尚能置归受馆立赏以招吾民今乃却泽人心自此离矣况宗诚起土豪不用县官财赋募兵自养为国障捍今因受泽而械之以沮士气非策也诏处来归者于淮南释宗诚罪四年除起居郎中书舍人史馆修撰先是同尝上疏论神哲二史在绍圣时则章惇取王安石日录私书改修神宗实录在崇宁后则蔡京尽焚毁时政记日历以私意修定哲宗实录其闲所载是非颠倒不可信于后世宣仁保佑之德岂容异辞而蔡确厚诬圣后收恩私门望精择史官先修哲宗实录候书成取神宗朱墨史考证修定庶毁誉是非皆得其实上深嘉纳至是命同修撰且谕之曰向昭慈尝言宣仁有保佑大功哲宗自能言之因宫中有不得志于宣仁者因生诬谤欲辨白其事须重修实录以保立劳效昭示来世此朕选卿意也同乞以所得圣语宣付史馆仍记于实录卷末张俊乞复其田产税役令一卒持书瑞昌而凌悖其令郭彦参彦参系之狱俊诉于朝命罢彦参同并封还二命俄除集英殿修撰知衢州以疾辞除徽猷阁待制提举江州太平观七年秋以礼部侍郎召还未数日除御史中丞车驾自建康回临安同奏旋蹕之初去淮益远宜遣重臣出按两淮询人情利病察官吏侵扰纵民耕垦勿收租税数年之后田野加辟百姓足而国亦足矣乃遣枢密使王庶视师同乞以此奏付庶询究罢行又言江浙困于月桩钱民不聊生上为减数千缗又言吴玠屯师兴利尝讲屯田愿闻其积谷几何减馈运几何赵开李迨相继为都漕先后馈运各几何令制漕帅司条具以闻然后按实讲究以纾民力又言国家养兵不为不多患在于偏聚而不同力自用而不同心今韩世忠在楚张俊在建康岳飞在江州吴玠在蜀相去隔远情不相通陛下遣枢臣王庶措置边防宜令庶会集将帅谕以国体协心御敌常令诸军相接以常山蛇势缓急应援皆有素定之术诏付王庶出示诸将同乞郡除显谟阁直学士知湖州复召请祠诏提举江州太平观绍兴二十年卒

△张致远

张致远字子猷南剑州沙县人宣和三年中进士第宰相范宗尹荐其才召对擢枢

密院计议官建寇范汝为已降犹怀反侧而招安官谢向陆棠受贼赂阴与之通致远谒告归知其情还白执政请锄其根柢于是捕向棠及制置司属官施宜生付狱 【按程史施宜生变服为佣官购求弗得已而投金未尝付狱附识】 诏参知政事孟庾为福州宣抚使讨贼韩世忠副之辟致远主管随军机宜文字贼平除两浙转运判官改广东招抚剧盗曾袞等贼众悉降绍兴四年以监察御史召未至除殿中侍御史时江西帅胡世将请增和买绢折纳钱致远上疏言折纳绢钱本欲少宽民力而比旧增半是欲乘民之急而厚其敛也诏从折减金人与刘豫分道入侵宰相赵鼎劝帝亲征致远入对独赞其议迁侍御史言聚财养兵皆出民力善理财者宜固邦本请罢榷福建盐精择三司使副以常平茶盐合为一官令计经常量入为出先务省节次及经理诏户部讲究五年除户部侍郎进吏部寻复为户部言陛下欲富国强兵愿诏大臣力务省节明禁僭侈自宫禁朝廷始额员可减者减之司属可并者并之使州县无妄用归其余于监司监司无妄用归其余于朝廷朝廷无横费日积月聚惟军须是虑中兴之业可致也除给事中寻以母老丐外以显谟阁待制知台州朝廷以海寇郑广未平改知福州六月八月广等降致远选留四百人置营城外余遣还业复遣广讨他郡诸盗数月悉平八月正月再召为给事中出知广州寻以显谟阁待制致仕十七年卒年五十八致远夔亮有学识历台省侍从言论风旨皆卓然可观赵鼎尝谓其客曰自鼎再相除政府外从官如张致远常同胡寅张九成潘良贵吕本忠魏矼皆有士望他日所守当不渝识者谓鼎为知人云

△薛徽言

薛徽言字德老温州人登进士第为枢密院计议官绍兴二年遣使分行诸路徽言以权监察御史宣谕湖南时郴道桂阳旱饥徽言请于朝不待报即谕漕臣发衡永米以振而以经制银市米偿之所刺举二十人使还宰相吕颐浩以徽言擅易守臣而移用经制银出知兴国军俄入为郎迁右司擢起居舍人时秦桧主议和徽言与吏部侍郎晏敦复等七人同拜疏争之一日桧于上前论和徽言直前引义固争寻以疾卒赙绢百匹特与遗表恩

△陈渊

陈渊字知默沙县人瓘之孙有文学绍兴五年廖刚胡寅朱震张致远并言渊负材流落召充枢密院编修官李纲为江南西路安抚制置大使辟为制置司机宜文字七年诏侍从举直言极谏之士胡安国以渊应召对改官赐

进士出身九年除监察御史寻迁右正言入对论比年以来恩惠太滥赏给赉予所用既众而所入实寡此臣所甚惧也周官唯王及后世子不会说者谓不得以有司之法治之非周公作法开后世人主侈用之端也臣谓冢宰以九式均节财用有司虽不会冢宰得以越式而论之若事事以式虽不会犹会也臣愿陛下凡有赐赉法之所无而于例有疑者三省得以共议户部得以执奏则前日之弊息矣郑亿年复资政殿学士奉朝请召见于内殿渊言亿年有从贼之丑乞寝其职名不报亿年故相居中子秦桧之亲党也由是桧怒之除秘书少监兼崇政殿说书以祖名辞改宗正少卿以何铸论罢主管台州崇道观十五年卒

△魏矼

魏矼字邦达和州历阳人唐丞相知古后也少颖悟时方尚王氏新说矼独守所学宣和二年上舍及第建炎四年召赴阙改宣教郎除详定一司敕令所删定官绍兴元年迁枢密院计议官迁考功郎会星变矼因转对言治平闲彗出东方英宗问消弭之道韩琦以明赏罚为对比年以来赏之所加有未参选而官已升朝者有未经任而辄为正郎者罚之所加有未到任而例被冲替者有罪犯同而罚有轻重者大臣黜陟不公所以致异帝识其忠擢监察御史迁殿中侍御史临安火延烧数千家矼言春秋定哀闲数言火灾说者谓孔子有德而不能去季孙有恶而不能去故天降之咎今朝廷之上有奸慝邪佞之人未逐朋附奔竞之徒未汰公忠宿望有猷有守之士未用在位之人未闻推诚尽公宜鉴定哀之失甄别黜陟内侍李廙饮韩世忠家刃伤弓匠事下廷尉矼言内侍出入宫禁而很戾发于杯酒乃至如此建炎诏令禁内侍不得六通主兵官及预朝政违者处以军法乞申严其禁以谨履霜之戒于是廙杖脊配琼州迁矼侍御史赐五品服时朱胜非独相矼论胜非无所建明机务不决军政不修除授挟私贤士解体又疏其五罪诏令胜非持余服又言国家命令之出必先录黄其过两省则给舍得以封驳其下所属则台谏得以论列此万世良法也近时三省枢密院闲有不用录黄而直降指挥者亦有虽画黄而不下六部者望并依旧制时议亲征矼请扈从因命督江上诸军时刘光世韩世忠张俊三大将怀私隙莫肯协心矼首至光世军谕之曰敌众我寡合力犹惧不支况军自为心将何以战诸公当思为国雪耻释去私隙遂劝其贻书二帅示以无他二帅复书交欢由此众战屡捷军声大振帝至平江魏良臣王纶使金回约再遣使矼请罢讲和二字飭厉诸将力图攻取迁秘书少监矼在职七阅月论事凡百二十余章

寻乞补外除直龙图阁知泉州以亲老辞知建州寻召还丐祠不允除权吏部侍郎八年金使入境命砮充馆伴使砮言顷任御史尝论和议之非今难以专对秦桧召砮至都堂问其所以不主和之意砮具陈敌情难保桧谕之曰公以智料敌桧以诚待敌砮曰相公固以诚待敌第恐敌人不以诚待相公耳桧不能屈乃改命吴表臣诏金使人境欲屈己就和令侍从台谏条奏砮言贼豫为金人所立为之北面陛下承祖宗基业天命所归何藉于金国乎传闻奉使之归谓金人悉从所欲必无难行之礼如或有不可从之事一轻许之他时反为所制号令废置将出其手后有不从便生兵隙予夺在彼失信在我非计之得也虽使还我空地如之何而可保恐欲寝兵息民不可得也更愿酌之羣情择其经久可行者行之其不可从者以国人之意拒之速召大将各带近上统制官数人同来详加访问大将以为不可则其气益坚何忧此敌未几丁父忧免丧除集英殿修撰知宣州不就改提举太平兴国宫自是奉祠凡四任丁内艰以卒

△潘良贵

潘良贵字子贱婺州金华人【按宋名臣言行别录作天台人】以上舍释褐为辟雍博士迁秘书郎时宰相蔡京以爵禄钩知名士良贵屹然特立京数遣人致愿交意良贵正色谢绝除主客郎中寻提举淮南东路常平靖康元年召对钦宗问孰可秉钧轴者良贵极言何■〈鹵，欠代义〉上木下〉唐恪等四人不可用他日必误社稷陛下若欲扶危持颠非博询下僚明扬微陋未见其可当国者指为狂率黜监信州泅口排岸高宗即位召为左司谏既见请诛伪党使叛命者受刀国门即敌人不敢轻议宋鼎又乞封宗室贤者于山东河北以壮国体巡幸维扬养兵威以图恢复黄潜善汪伯彦恶其言改除工部良贵以不得其言求去主管明道宫越数年提点荆湖南路刑狱主管江州太平观除考功郎迁左司宰相吕颐浩从容谓良贵曰旦夕相引入两省良贵正色对曰亲老方欲乞外两省官非良贵可为也退语人曰宰相进退一世人才以为贤邪自当擢用何可握手密语先示私恩若士大夫受其牢笼又何以立朝即日乞补外以直龙图阁知严州到官两月请祠主管亳州明道宫起为中书舍人会户部侍郎向子諲入见语言类褻良贵故善子諲是日撮起居立殿上径至榻前厉声曰子諲以无益之谈久烦圣听叱之退者再高宗色变合门并弹之良贵求去以集英殿修撰提举江州太平观起知明州朞年除徽猷阁待制提举亳州明道宫既归不出者十年李光得罪良贵坐尝与通书降二官卒年五十七良贵刚介清苦壮老一节为

博士时王黼张邦昌俱欲妻以女拒之晚家居贫甚处
之超然秦桧讽令求郡亦不应其谏草焚削不传

△吕本中

吕本中字居仁元佑宰相公着之曾孙好问之子幼而敏悟公着奇爱之公着薨宣仁太后及哲宗临奠诸童穉立庭下宣仁独进本中摩其头曰孝于亲忠于君儿勉焉以公着遗表恩授承务郎绍圣闲党事起公着追贬本中坐焉元符中主济阴簿秦州士曹掾辟大名府帅司干官宣和六年除枢密院编修官靖康改元迁职方员外郎以父嫌奉祠丁父忧服除召为祠部员外郎以疾告去再直秘阁主管崇道观绍兴六年召赴行在特赐进士出身擢起居舍人兼权中书舍人内侍李琮失料厯帝以潜邸旧人不用保任特给之本中言若以异恩别给非所谓官府一体者帝见缴还甚悦令宰臣谕之曰自今有所见第言之监阶州草场苗亘【按宋名臣言行别录作苗亘】以赃败有诏从黥本中奏近岁官吏犯赃多至黥籍然四方之远或有枉滥何由尽知异时察其非辜虽欲按拭可得乎若祖宗以来此刑尝用则绍圣权臣当国之时士大夫无遗类久矣愿酌处常罚毋令奸臣得以借口从之七年帝幸建康本中奏曰当今之计必先为恢复事业求人才恤民隐讲明法度详审刑政开直言之路俾人人得以尽情然后练兵谋帅增师上流固守淮甸使江南先有不可动之势乃可观衅而动若徒有恢复之志而无其策邦本未强恐生他患今江南两浙科须日繁闾里告病倘水旱乏绝奸宄窃发未审朝廷何以待之近者臣庶劝兴师者不可胜数观其辞固甚顺考其实不可行大抵献言之人与朝廷利害绝不相侔言不酬事不济则脱身而去朝廷施設失当谁任其咎鸚鸟将击必匿其形今朝廷于进取未有秋毫之实所下诏命已传贼境使之得以为备非策也又奏江左形势如九江鄂渚荆南诸路当宿重兵临以重臣吴时谓西陵建平国之藩表愿精择守帅以待缓急内侍郑谔落致仕得兵官本中言陛下进临江浒将以有为今贤士大夫未能显用岩穴幽隐未能招致乃起谔以统兵之任何邪命遂寢引疾乞祠直龙图阁知台州不就主管太平观召为太常少卿八年迁中书舍人兼侍讲又兼权直学士院金使通和有司议行人之供本中言使人之来正当示以俭约客馆刍粟若务充悦适启其心且成败大计初不在此秦桧相私有引用本中封还除目桧勉其书行卒不从赵鼎素主元佑之学以本中为公着后又范冲所荐故深相知会哲宗实录成鼎迁仆射本中草制有曰合晋楚之成不若尊王而贱霸散牛李之党未如明是以去非桧大怒言于帝曰本中受鼎风旨伺和议不

成为脱身之计风御史萧振劾罢之提举太平观卒学者称为东莱先生赐谥文清

钦定续通志卷三百七十八

●钦定续通志卷三百七十九 列传一百七十九

列传

宋 【八十三】

○宋八十三

向子諲 陈规 季陵 卢知原【法原】 陈桷 李璆

李朴 王庠 王衣 卫肤敏

刘珣 胡舜陟 沈晦 刘一止【盩止】 胡交修 綦

崇礼

向子諲

陈规

季陵

卢知原

陈桷

李璆

李朴

王庠

王衣

卫肤敏

刘珣

胡舜陟

沈晦

刘一止

胡交修

綦崇礼

△向子諲

向子諲字伯恭临江人敏中元孙钦圣宪肃皇后再从侄也元符三年以后恩补假承奉郎历选知咸平县豪民席势犯法狱具上开封尹

盛章方以狱空觐赏却不受子諲以闻诏许自论决章大怒劾以他事勒停宣和初复官

除江淮发运司主管文字淮南岁旱漕不通有欲浚河

与江淮平者内侍主其议子諲言河高江淮数丈决难浚之使平曩三日一启闸复作澳

储水故水不乏比年行直达之法加以应奉往来启闭

无节堰闸率不存今复故制严禁约则无患使者用其言漕复通进秩一等召对除淮南转运判官以起发上供不及数降一官七年以直秘阁为京畿转运副使寻兼发运副使康王次济州子諲遣进士李植献金帛及本司钱谷之在济州者以助军费张邦昌僭位遣人持敕书往庐州问其家安否子諲檄郡守冯询提举范仲使拘之以俟王命邦昌又使其甥刘达赉手书来子諲不启封焚之械系达于狱遣子澹请康王率诸将渡河出其不意以救二帝遣将王仪统勤王兵至城下高宗即位迁直龙图阁江淮发运副使言去岁刘顺奉渊圣蜡诏令监司帅守募兵勤王臣即镂板徧檄所部而六路之闲漠无应者闲有团结起发者类如儿戏陛下复欲起天下之兵而诸路翫习故常恬不知畏将何恃以济艰难哉愿明诏大臣按劾诸路监司向承蜡诏废格不勤王及名为勤王而稽缓者悉加显黜命诸路提刑司究实以闻初邦昌为平章军国事子諲乞致仕避之坐言者降三官起复知潭州【按宋名臣言行别录载以宋良事降三官知袭庆府丁父忧明年夺丧知潭州据此非由降官起复也】禁卒为乱纵火掠市出浏阳县子諲遣通判孟彦卿等进及攸县平之金人破江西移兵湖南子諲闻警报率军民以死守金人围八日登城纵火子諲率官军夺南楚门遁坐敌至失守落职【按宋名臣言行别录载外援不至凡八日而外城破子諲率众入子城巷战两日乃焚敌栅夺门以出遂渡水军于湘西郡人以众义自奋无一人降者敌以故不敢离城纵掠留四日而去子諲即入城抚安上章自劾云宋史不载本传附识者以为下文贾收言张本也】罢转运副使贾收言子諲督兵巷战又收溃卒复入治事帝亦以子諲与他守臣望风遁者殊科诏复职绍兴元年移鄂州主管荆湖东路安抚司剧盗曹成据攸县子諲军于安仁遣使诏之成听命子諲又遣将西扼衡阳南守宜章成逡巡不敢南向者百余日诸郡遂得割获既而援兵不至成忿子諲扼已拥众而南子諲率兵拒之官军溃度不可遏单骑入贼中谕以国家威灵成不服执子諲去会宣抚司都统制马广遣人持吴敏檄谕成成许受招始释子諲诏提举江州太平观胡安国方避地湖南以书抵秦桧言子諲忠节以无救而陷于贼愿复加收用起知广州时恐贼度岭故就用子諲守之又以言者罢遂致仕寻起知江州改江东转运使进秘阁修撰江东当饷刘光世军适刘豫入寇光世军合淝以乏饷告亟退师子諲驰至合淝具见粮以闻光世由是得罪进徽猷阁待制徙两浙路为都转运使除户部侍郎入见论京都旧事颇及珍玩起居郎潘良贵闻其言甚怒既而子諲奏金国报聘及奠朱震事反复良久良贵径至榻前厉声叱

之子諲欲退上谓良贵曰是朕问之也又谕子諲歎语子諲复语久不止良贵叱之退者再上色变欲抵良贵罪中丞常同言良贵无罪愿许子諲补外上并怒同张九成言士大夫所以嘉子諲者以其能眷眷于善类今以子諲故逐柱史又逐中司非所以爱子諲也上意稍解批谕同同言不已于是三人俱罢子諲以徽猷阁直学士知平江府金使议和将入境子諲不肯拜金诏上章请却勿受忤秦桧意乃致仕子諲友爱诸弟置义庄赡宗族贫者初漕淮南时张邦昌伪诏至武尉徐端益不拜而走子諲言于朝易端益文资退闲十五年号所居曰芑林【按宋名臣言行别录载每入觐皆求归帝高之亲书芑林二字以赐据此非自号所居为芑林也】卒年六十八

△陈规

陈规字符则密州安邱人中明法科为安陆令以勤王兵赴汴至蔡州道梗而还会祝进攻德安府守弃城遁父老请规摄守事规遣射士张立率兵讨进却之既而王在复兴进合以炮石鹅车攻城规连战败之贼引去建炎元年除直龙图阁知德安府李孝义张世以步骑数万薄城阳称受诏招规登城视其营垒曰此诈也亟为备夜半孝义兵围城遂大败之与羣盗杨进相持十八日进技穷以百人自卫抵濠上求和规出城与语进感之折箭为誓而去董平引众窥城遣其党李居正黄进入城求犒规斩进授居正兵为前锋大破之升秘阁修撰寻除德安府复州汉阳军镇抚使赐三品服俄升徽猷阁待制时桑仲剽略襄汉闲其副霍明屯兵郢上规请于朝就以明守郢张浚都督蜀道仲引兵窥之为王彦所败仲怒从数百骑来谯明明杀之奔刘裕【按三朝北盟会编载王彦败弃仲于房州在建炎四年十一月霍明杀桑仲在绍兴二年四月霍明弃郢州走在绍兴二年五月宋史本传似是仲为彦所败因而谯明明因而杀之既杀仲因而奔其实各事并不联属明之弃郢因李横围城不退粮尽水乏乃弃郢城而避石崖号为石城城下即汉江兵不能近夜半缒石城而下与其众数百泛舟顺风而去附识】以书招规规械其使以闻李横围城造天桥填濠鼓噪临城规帅军民御之炮伤足神色不变围急粮尽出家财劳军士气益振会濠桥陷规以六十人持火枪自西门出焚天桥以火牛助之须臾皆尽横拔砮去累升显谟阁直学士徙知池州入对首言镇抚使当罢诸将跋扈请用偏裨以分其势上嘉讷迁龙图阁直学士改知庐州寻召赴行在以疾辞提举江州太平观复起知德安府金人南侵改知顺昌府葺城壁招流亡立保伍会刘锜领兵赴东京留守过郡规出迎坐未定传金人已入东京即告锜城中有粟数万斛勉

同为死守计相与登城区画分布诸将守四门且明斥
候募土人乡导闲谍布设粗毕金游骑已薄城矣金龙虎大王者提重兵踵至规躬擐甲
胄与锜巡城督战用神臂弓射之稍引退复以步兵邀
击溺于河者甚众规曰敌志屡挫必思出奇困我不若潜兵斫营使彼昼夜不得休可养
吾锐也锜然之劫其砦杀伤甚众乌珠拥精兵且至规
大飧将士酒半问策将安出诸将或谓今已累捷宜乘势全师而归规曰朝廷养兵十五
年正欲为缓急用况屡挫其锋军声稍振规已分一死
锜叱诸将曰府公文人犹誓死守况汝曹邪已而乌珠至下令晨饭府庭并兵十余万攻
城规与锜行城勉激诸将流矢及衣无惧色军殊死鬪
时方剧暑规谓锜母多出军第更队易器以逸制劳蔑不胜矣遂大败金兵锜奏功诏褒
谕之迁枢密直学士规至顺昌即广余粟麦实仓廩会
计议司移粟至河上规请以金帛代输至是得其用移知庐州兼淮西安抚既至疾作而
卒年七十赠右正议大夫有攻守方略传于世初规守
德安时尝条上营屯田事宜欲仿古制合射士民兵分地耕垦军士所屯之田皆相险隘
立堡砦寇至则保聚捍御无事则乘时田作射士皆分
半以耕民户所营之田水田亩赋粳米一斗陆田赋麦豆各五升满三年无逋输给为永
业流民自归者以田还之凡屯田事营田司兼行营田
事府县官兼行皆不更置官吏诏嘉奖之仍下其法于诸镇自绍兴以来文臣镇抚使有
威声者惟规而已规端毅寡言笑待人和易以忠义自
许好振施家无赢财尝为女求从婢得一妇甚闲雅怪而询之乃云梦张贡士女也乱离
夫死无所托鬻身求活规即辍女奩嫁之规功名与诸
将等而位不酬劳时共惜之干道八年诏刻规德安守城录颁天下为诸守将法立庙德
安赐额贤守追封忠利侯后加封智敏

△季陵

季陵字延仲处之龙泉人登政和二年上舍第三迁太学博士论学术邪正异同长
官怒譖之执政谪之舒城县未几除太常寺簿迁比部
员外郎高宗即位从至扬州历太常少卿金人南侵帝幸杭州朝廷仪物皆委弃之陵奉
九庙神主负之以行拜起居郎迁中书舍人三年六月
淫雨诏求直言陵言今将帅拥兵自卫浸成跋扈苗刘窃发勤王之师一至凌轹官吏莫
敢谁何此将帅之权太盛有以干阳也宦寺纵横上下
共愤卒碎贼手可为戒矣比闻复召蓝珪党与相贺此宦寺之习未革有以干阳也洪范
休征曰肃时雨若谋时寒若咎征曰狂恒雨若急恒寒
若自古天子之出必载庙主示有尊也前日仓卒迎奉不能如礼既至钱塘置太庙于道
宫荐享有阙留神御于河浒安奉后时此不肃之咎也

比年盜賊例許招安未几再叛反墮其計忠臣之憤不雪赤子之冤莫報此不謀之咎也
道路之言謂釜輿不久居此自臣臆度決無是事假或有之不几于狂乎軍興以來既結保甲又改巡社既招弓手又募民兵民力竭而猶誅求焉不几于急乎此皆陰道太盛所致帝嘉納之時除梁
揚祖為發運使陵封還錄黃又言防秋已迫願陛下先定兵衛及扈從之臣萬一敵勢猖獗便當整駕親按營壘召諸道兵以為援留將相大臣
相率死守勿效前日百官跣足奔竄以扈蹕為名棄城池以予敵使生靈塗炭財用填溝壑又論宣撫張浚太專忤旨罷為徽猷閣待制知太
平州未行落職與祠數月復職范宗尹荐其才命知臨安府復為中書舍人入對言事有可深慮者四尚可恃者一大駕未有駐蹕之地賢人皆
無經世之心兵柄分而將不和政权去而主益弱惟祖宗德澤尚在人心未忘所望以中興者此耳陛下宜有以結之今欲薄斂以裕民財而用
度方闕輕徭以舒民力而師旅方興罪己之詔屢降忧民之言屢聞丁寧切至終莫之信臣謂動民以行不以言陛下爵當賢祿當功刑當罪施
設注措無不當理天下不心服者未之有也朱勝非除江西帥未行陵言金人往年寓淮甸無去意患在朝夕可謂急矣若頤浩既去勝非未至
金人南向兵不素練糧不素積又不設險何以御之臣願陛下更擇賢副預為經畫以待詔劉洪道趣往池州措置防江范宗尹嘗仕偽楚故凡
受偽命者皆錄用陵因上疏曰前日士大夫名節不立以義責之固不容誅以情恕之亦不幸耳臣願明詔宰執于罪戾中選擇賢能量付以事
勿因一眚廢其終身仍詔台諫為國愛人勿復言詔榜其疏于朝堂侍御史沈與求劾陵承望宰執風旨罷官提舉杭州洞霄宮紹興元年復右
文殿修撰二年詔內外官言事陵言軍興以來朝廷誥牒非強以予民則莫售師旅糧草非強取于民則莫給舊例和買無本可支者久矣新行
和余能償其直几何一遇軍興事事責辦有不足者預借后年之賦雖名曰和實強取之雖名曰借其實奪之兵將衣食不取其飽暖取其丰美
器械不取其堅利取其华美務末勝本初無鬪心敵至則偽言退保敵去則盛言收復遇敗以千為一遇勝以一為千今乘輿服御之費十去七
八百官有司之費十去五六猶無益于國者軍太冗也張浚一軍以川陝贍之劉光世一軍以淮浙贍之李綱一軍以湖廣贍之上供之物得至
司農大府者无几也今當議者五一統領家口隨行一聞敵至擇精銳者護送老小其自隨祇辦走耳二虜掠婦女軍中多有養既不足寧免作
過三所至州軍邀求犒賞守令憚生事竭取民力以奉之四詭名虛券隨在批請枉費官物五或假關節或行賄賂寄名軍籍規冒功賞願詔有

司专意讲求革因循以作士气则军政立矣复徽猷阁待制帅广东先是惠州有狂男子聚众数千僭号作乱陵入境诱其徒曾袞令以功赎罪不旬日擒之在官三年卒年五十五赠中大夫陵喜言事奏疏可观然附范宗尹攻张浚幸医王继先授荣州防御使陵草其制时论亦以此少之

△卢知原

卢知原字行之湖州德清人以父任知歙县因近臣荐赴都堂审察累迁梓州路转运副使时承平既久戎备皆弛知原招补兵籍筑城亘二十余里王黼当国费出无艺知原因疏言之黼怒罢去久之起提点京东刑狱改江西转运副使过阙赐三品服先是纲运阻于重江吏卒并缘为奸知原悉意经理先诸道上京师进一官寻知直秘阁为江淮荆浙等路发运使升秘阁修撰提举河北以言者劾褫职高宗即位复龙图阁知温州时叶浓陷建州杨勍陷处州知原缮甲兵增城浚隍声势隐然帝东幸知原繇海道转粟及金缗十余万至台州召见称奖擢右文殿修撰提举安抚使在郡四年民绘像祠之王师讨范汝为召为添差两浙转运使罢提举太平观都督孟庾辟为参谋改徽猷阁待制知临安府谏官唐辉言知原为政乖谬诏复为都督府参谋官章再上遂以旧职奉祠绍兴十一年十月卒弟法原

卢法原

卢法原

法原字立之自知雍邱县积官太府少卿赐同上舍出身使辽还迁司农卿赐三品服为吏部尚书以官秩次第履历总为一书功过殿最开卷了然吏不能欺忤王黼罢为显谟阁待制绍兴元年提举临安洞霄宫张浚承制起知夔州寻为龙图阁学士川陕等路宣抚处置副使进端明殿学士金人攻关辅叛将史斌陷兴州诸郡多应者法原命诸将坚壁言战者斩众以为怯未几河东经制使王■〈王燮〉以乏食班师法原开关纳之与■〈王燮〉同破斌复兴州【按三朝北盟会编载建炎二年四月金人既退兵泾原将曲端遂下兵秦州而凤翔长安各为义兵收复端大怒凤翔刘彦希杀之会叛贼史斌侵兴元不克引兵还关中兴义兵首领张宗诱斌至长安而散其众欲徐图之端遣吴玠袭击斌斌走鸣犊镇为玠所擒端自袭张宗杀之收复长安玠以斌凌迟处斩不载有卢法原同破斌事宋史列传纪此事于绍兴元年所载互异】方巨盗充斥秦陇叛兵欲窥蜀法原极意拊循严为备御视山川险阻分地置将自洮岷至阶成关师古主之屯通川文龙至威茂刘錡主之屯

巴西前后屡捷法原素与吴玠不睦玠因奏功讼法原不济师不馈粮不铨录立功将士帝手诏诘问法原自辨甚力上颇不直之忧患卒于军

△陈桷

陈桷字季玉温州平阳人以上舍贡辟雍政和二年廷对第三授文林郎冀州兵曹参军累迁尚书虞部员外郎七年提点福建路刑狱福州调发防秋兵资粮不满望杀帅臣变生仓卒吏民奔溃桷入乱兵中谕以祸福贼气沮邀桷奏帅臣自毙桷诡从其请闲道驰奏以前奏不实待罪朝廷以桷知变释之叛兵既调行在道追杀首恶二十余人一方以安建炎四年复除福建路提刑寻以疾乞祠主管江州太平观绍兴三年召为金部员外郎升郎中抗言今言事者当专讲治道之本修政事以攘敌国不当以细故勤圣虑又言刺史县令不皆得人乞选监司重其权久其任除太常少卿又陈攻守二策在于得人心修军政五年除直龙图阁知泉州明年改两浙西路提刑乞置乡县三老以厚风俗凡宫室车马衣服器械定为差等重侈靡之禁八年迁福建路转运副使十年复召为太常少卿言袷祭用太牢此祀典之常驻蹕之初未能备礼止用一羊乞复用太牢十一年除权礼部侍郎赐三品服普安郡王出合奉诏与吏部太常寺讨论典故桷等议以国本未立宜厚其礼以系天下望乃以皇子出合礼例上之或以为太重诏以不详具典故专任己意怀奸附丽与吴表臣苏符等并罢寻以桷提举江州太平观十五年知襄阳府充京西南路安抚使襄汉兵火之余民物凋瘵桷请于朝乞重行蠲减明年金房兵叛桷遣将平之而后以闻汉水决溢漂荡庐舍躬率兵民捍筑堤岸赖以无虞以疾乞祠除秘阁修撰提举江州太平兴国宫二十四年改知广州充广南东路经略安抚使未至而卒年六十四桷宽洪酝藉以诚接物而恬于荣利当秦桧用事夤缘攀附者无不躐登显要桷独不附其节有足称者子汝楫汝贤汝谐孙峴以词学擢第官中书舍人直学士院

△李璆

李璆字西美汴人登政和进士第调陈州教授入为国子博士出知房州时既榷官茶复强民输旧额贫无所出被系者数百人璆至即日尽释之宣和三年廷议将取燕璆上疏切谏大略谓太祖以圣武得天下将士皆百战之余以是而取燕云宜易为力然赵普辈无敢赞其决者盖识天下大势且重民命故也今承太平之业父老幸不识兵虽不得燕云地何阙于宋疏奏不省及燕平责监英州清溪镇明年赦还为郎寻试中书舍人建言元佑名臣子孙久被废锢宜少宽之宦官谭稹出师河北以无功废将

复进用璆不肯书行山东盗起州县不能制河北无见
粮军士汹汹璆条奏十事忤大臣意罢绍兴四年以集英殿修撰知吉州江西兵素剽悍
璆始视事有相谋为乱者亟捕诛首恶抚循其余大布
恩信境内遂安累迁徽猷阁直学士四川安抚制置使成都旧城多毁圯璆至首命修筑
俄水大至民赖以安三江有堰可以下灌眉田百万顷
久废弗修璆率刺史合力修复竟受其利眉人感之绘像祠于堰所遭岁饥发仓振活无
虑百万家治蜀之政多可纪

△李朴

李朴字先之虔之兴国人登绍圣元年进士第调临江军司法参军移西京国子监
教授移虔州教授以尝言隆佑太后不当废追官勒停
会赦注汀州司户徽宗即位右司谏陈瓘荐朴有旨召对朴首言熙宁元丰以来政体屡
变始出一二大臣所学不同后乃更执圆方互相排击
失今不治必至不可胜救又言今士大夫之学惟王氏是听败坏心术莫大于此蔡京恶
朴鯁直复以为虔州教授又嗾言者论朴为元佑学术
不当领师儒罢为肇庆府四会令有奸民言邑东地产金宝立额买扑破田畴发墟墓厚
赂乃已朴至请罢之改承事郎知临江军清江县广东
路安抚司主管机宜文字钦宗在东宫闻其名及即位除著作郎半岁凡五迁至国子祭
酒以疾不能至高宗即位除秘书监未至而卒年六十
五赠宝文阁待制官其子孙一人朴自为小官天下高其名蔡京俾所厚道意许以禁从
冯熙载亦欲邂逅之皆力拒不见居官所至有声在广
南止其帅孙焱以文具勤王不若发常赋助边破漕使郑良引真腊取安南之计以息边
患人称其智

△王庠

王庠字周彦荣州人累世同居号义门王氏祖伯琪以义声着于乡父梦易登皇佑
第母向氏钦圣宪肃后之姑也庠幼颖悟七岁能属文
俨如成人年十三居父丧哀愤深切谓弟序曰制科先君之遗意也吾有志焉遂闭户穷
经史吕陶苏辙皆器重之元佑中吕陶以贤良方正直
言极谏科荐之庠以宋邦杰学成未有荐者推使先陶闻益加敬未几当绍圣诸臣用事
遂罢制科庠叹曰命也无愧先训以之行已足矣崇宁
壬午岁应能书为的首选京师蝗庠上书论时政得失谓中外壅蔽将生兵患张舜民见之
叹其危言下第径归奉亲养志不应举者八年大观庚
寅行舍法州复以庠应诏庠自陈苏轼苏辙范纯仁为知己吕陶王吉尝荐举黄庭坚张
舜民王巩任伯雨为交游不可入举求仕愿屏居田里
母卒终丧复举八行大司成考定为天下第一诏旌其门赐号处士寻改潼川府教授赐

出身及章服一日四命俱至竟力辞不受虽处山林唱
酬赋咏皆爱君忧国之言太后念其姑尝欲官庠以逊其弟侄及甥且以田均给庶兄及
前母之姊庠卒孝宗谥曰贤节序宣和闲以恩幸至徽
猷阁直学士庠浮沉其闲各建大第或者谓其晚节隐操少衰云

△王衣

王衣字子裳济南历城人以荫仕中明法科历深冀二州法曹掾入为大理评事
升寺正林灵素得幸将毁释氏以逞其私襄州僧杜德
宝毁体然香有司观望灵素意捕以闻衣据律自伤者杖内批坐以害风教窜流之停衣
官寻予祠历迁刑部员外郎建炎初为司勋郎中迁大
理少卿三年韩世忠执苗傅刘正彦献俘槛车几百两衣奏其中妇女有雇买及劫掠以
从者诏自傅正彦妻子外皆释之范琼有罪下大理寺
衣奉诏鞫之琼不服衣责以靖康围城中逼迁上皇擅杀吴革迎立张邦昌事琼称死罪
遂赐死释其亲属将佐四年升大理卿先是百司愆戾
付寺劾之至三问取伏状被劾者惧对莫敢辨衣奏曰伏与辨二事也若一切取伏是以
威迫之不使自直非法意也乞三问未承者听辨从之
同详定一司敕令删杂犯死罪四十七条书成帝嘉其议法详明绍兴元人权刑部侍郎
二年除集英殿修撰奉祠既而赵令时应诏荐之复召
为刑部侍郎为言者所格四年卒于家衣质直和易持法不阿议者贤之

△卫肤敏

卫肤敏字商彦华亭人以上舍生登宣和元年进士第授文林郎南京宗子博士寻
改教授召对改宣教郎秘书省校书郎命假给事中贺
金主生辰肤敏奏曰彼生辰后天竺节五日金人未闻入贺而反先之已失国体万一金
使不来为朝廷羞请至燕山候之彼若不来则以币置
境上而已帝可其奏既至燕金贺使果不至遂置币而返七年复假给事中以行及庆源
府逢许亢宗还语金国事曰彼且大入其势不可往肤
敏至燕报愈急众惧不敢进肤敏叱曰吾将君命以行其可止乎既至金国知其兵已举
殊不为屈及将还金人所答国书欲以押字代玺肤敏
力争曰押字岂所以交邻国论难往复卒易以玺及受书欲令双跪肤敏曰双跪乃北朝
礼安可令南人之哉争辨踰时卒单跪以受金人积
不说中道羁留且半年至涿州新城与斡里雅布遇遣人约相见拒之不可遂语之曰必
欲相见其礼当如何曰有例肤敏笑曰例谓趋伏罗拜
北朝止一君耳皇子郎君虽贵人臣也一介之使虽贱亦人臣也两国之臣相见而用君
臣之礼是北朝一国有二君也金人气折始曰惟所欲
肤敏长揖而入既坐金人出誓书示之肤敏却不视曰远使久不闻朝廷事此书真伪不

可知因论用兵事又以语折之几复为所留靖康初始
还进三官迁吏部员外郎会高丽遣使来贺命假太常少卿往接之朝论欲改称宣问使
肤敏曰国家厚遇高丽久矣今边事方作不可遽削其
礼失远人心乃复称接伴使既至明州会京师多难乃便宜称诏厚赐使者遣还建炎元
年复命自劾矫制之罪高宗嘉赏迁卫尉少卿建议两
河诸郡宜降蜡书许以世袭使各坚守陕西山东淮南诸路并令增陴浚隍徙民入城为
清野计命大臣留守汴京车驾早幸江甯帝颇纳之迁
起居舍人言前日金人凭陵都邑失守朝臣欲存赵氏者不过一二人而已其它皆屈节
受辱不以为耻甚者为敌人敛金帛索妃嫔无所不至
求其能诈楚如纪信者无有也及金人立叛臣僭窃位号在廷之臣逃避不从及约寇退
归位赵氏者不过一二人而已其它皆委质求荣不以
为愧甚者为叛臣称功德说符命主推戴之议草劝进之文无所不为求其击朱泚如段
秀实者无有也今陛下践祚之初苟无典刑何以立国
凡前日屈节敌人委质伪命者宜差第其罪大则族次则诛又其次窜殛下则斥之远方
终身不齿岂可犹畀祠禄使尘班列哉又言今二帝北
迁愿陛下愈自贬损不忘报雪卑宫室菲饮食恶衣服减嫔御斥声乐以至岁时上寿春
秋锡宴一切罢之虽飨郊庙亦不用乐必俟两宫还阙
然后复常庶几精诚昭格天地感动人心拜右谏议大夫兼侍读言行在颇兴土木之役
非所以示四方乞罢筑承庆院升阳宫又奏凡黜陟自
中出者皆由三省乃得奉行或戾祖宗成宪者皆许执奏时内侍李志道以赦恩复保庆
军承宣使添差入内都知肤敏极论罢之又起用围城
时致仕内侍容机肤敏言自古帝王未有求阉寺于闲退而用者命遂寝后父邢焕除徽
猷阁待制太后兄子孟忠厚除显谟阁直学士肤敏及
给事中刘珣皆言非祖宗法焕寻换武职忠厚自若俄迁肤敏中书舍人肤敏恳奏曰事
母后莫若孝待戚属莫若恩劝臣下莫若赏今陛下顺
太母以非法非所谓孝处忠厚以非分非所谓恩不用臣言而迁其官非所谓赏一举而
三失帝命宰相谕肤敏曰朝廷以次迁官非因论事肤
敏犹不拜居家逾月及忠厚改承宣使诏后族勿除从官肤敏始拜命又言中书根本之
地凡命令不合公议率封还之会肤敏知贡举有进士
向烈对省试策谬称臣谏官李处遯乞正考官卤莽之罪以集英殿修撰提举洞霄宫或
谓肤敏论事为黄潜善汪伯彦所恶故因事斥之三年
春召见平江肤敏曰臣顷言扬州非驻蹕之地乞早幸江甯今钱塘亦非帝王之都宜须
事定亟还金陵因陈所以守长江之策帝善其言扈蹕
至临安俄除刑部侍郎未拜谒告归华亭就医许之迁礼部侍郎卒年四十九特赠大中

大夫子仲英仲杰作循

△刘珣

刘珣字希范湖州长兴人登崇宁五年进士第初游太学以书遗中书舍人邹浩曰公始为博士多所论奏今庶政岂尽修明百官岂尽忠实从臣继去岂尽非才言官屡逐岂尽有罪信任踰曩昔而拱默不言天下之士窃有疑焉浩得书愧谢之宣和四年擢监察御史坐言事知舒州留为尚书主客员外郎靖康初议皇帝朝谒上皇仪欲以家人礼见于内庭珣请皇帝设大小次候上皇御坐宰臣导皇帝升自东阶拜于殿上则有君之尊有父之敬又谓皇帝朝谒宜令环卫士卒侍立于殿西宰执三衙侍从等官扶侍于殿上如请帝坐即宰执等退立西隅迁太常少卿讨论皇帝受册宝故事除中书舍人陈十开端之戒曰陛下即位罢御笔止营缮登俊又诘虚诞戢内侍之权开言者之路命令既当未尝数改任用既公率皆称职赏必视功政必核实此天下所以指日而徯太平也比者内降数出三省罕有可否此御笔之开端也教子弟既有其所又彻而新之长入祗候之班势若可缓亟而成之此营缮之开端也河阳付之庸才泾原委之贪吏此任用失当之开端也花石等滥赏既治复止马忠统兵累行累召此命令数易之开端也三省密院议论各有所见启拟各举所知持不同不比之说忘同寅协恭之议此大臣不和之开端也内路之帅擅作圣旨指挥行郡之守称为外任监当此臣下诞谩之开端也董局务者广辟官属侍帷幄者分争殿庐此内侍恣横之开端也两省缴奏多命以次行下或戒以不得再缴台谏言事失当率责为远小监当此言路壅塞之开端也恤民之诏累下多是空文无实德此政事失信之开端也随龙第赏冠带之士亦推恩金兵扣阙礼房之吏亦进秩此爵赏僭滥之开端也是十者杜而止之可以驯致治平因而循之虽有智者不能善其后詹度为都堂稟议中书舍人安扶持不可改命珣书行珣言伐燕之役度以书赞童贯大举去秋蔡靖屡以金人点集为言度独谓不应有此遂不设备请甯度岭表诏予宫祠李纲以观文殿学士知扬州安扶又持不可珣言韩琦好水之败韩绛西州之败皆不免黜责纲勇于报国锐于用兵听用不审数有败衄宜降黜以示惩戒纲改宫祠吏部侍郎冯澥言珣持两端为纲游说提举亳州明道宫建炎元年复召为中书舍人时李纲已议营南阳珣极言南阳兵弱财单乘輿无所取给乞驻蹕金陵以待敌汪伯彦黄潜善皆主幸东南帝遂如扬州潜善兄潜原除户部尚书珣言兄弟不可同居一省帝遣张恂谕旨珣论如初诏潜原提举醴泉观迁给事中论内降营缮二事曰陛下以前

朝房院而建承庆院议者以为营造寢广隆佑太后时有御笔工役领之内侍除授不归中书此人言所以籍籍也营缮悉归有司中旨皆许执奏则众论息矣迁吏部侍郎同修国史言淮甸备敌兵食为先今以降卒为见兵以余本为见粮无一可恃维扬城池未修军旅多阙卒有不虞何以待之已而金人果乘虚大入帝亟如临安以珏为龙图阁直学士知宣州俄复为吏部侍郎以久雨诏求言珏疏论消天变收人心数事词极激切并陈荆陕江淮守御之略愿申诏大臣悉屏细务惟谋守御自京及荆淮之郡置大帅屯劲兵命沿江之守各上措画之方明斥堠设险阻节大府之出广大农之入检察战舰而习之则守御详尽人心安天意回大业昌矣迁吏部尚书隆佑太后奉神主如江西诏珏为端明殿学士权同知三省枢密院事从行时诏元佑党籍及上书废锢人追复故官录用子孙施行未尽者珏悉奏行之又言常安民张克公尝论蔡京罪乞厚加恩至洪州疏言陛下遭时艰难躬履俭约前冬幸淮甸供帐弊旧道路险狭未尝介意今闻衢信以来除治道路科率民丁急如星火广市羊豕备造服用使农夫不得获齐民不得休非陛下俭以避难之意也乞降诏悉罢金人攻吉州分兵追太后舟至太和县卫兵皆溃珏奉太后退保虔州监察御史张延寿论珏罪珏亦上书自劾踰岭俟命落职提举江州太平观延寿论不已责授秘书少监贬衡州绍兴元年许自便明年以朝散大夫分司西京卒于梧州年五十五官其二子八年追复龙图阁学士

△胡舜陟

胡舜陟字汝明徽州绩溪人登大观三年进士第历州县官为监察御史奏御史以言为职与殿中侍御史同崇寔闲大臣欲便已遂变祖宗成宪南台御史始有不言事者多事之时以开言路为急乞下本台增入监察御史言事之文以复祖宗之制以内艰去服阙再为监察御史奏河北金兵虽退备御尤不可不讲钦宗即位又言今结成边患几倾社稷自归明官赵良嗣始请戮之以快天下遂诛良嗣又请诏内外之臣并举文武官才堪将帅者迁侍御史高宗即位舜陟论宰相李纲之罪帝不听言者论其尝事伪廷除集英殿修撰知庐州时淮西盗贼充斥庐人震恐日具舟楫为南渡计舜陟至修城治战具人心始安冀州云骑卒孙琪聚兵为盗号一海虾至庐舜陟乘城拒守琪邀资粮舜陟不与时出兵击其抄掠者琪宵遁舜陟伏兵邀击得其辎重而归济南僧刘文舜聚党万余纵剽掠舜陟遣介使招降之时丁进李胜合兵为盗蕲寿闲舜陟遣文舜破之张遇自濠州奄至梁县舜陟使毁竹里桥伏兵河西伺其半渡击败之又请守江北以护行宫帝壮其言擢徽猷阁待制充淮

西制置使范琼自寿春渡淮贻书责贍军钱帛舜陟谕以逆顺琼乃去以徽猷阁待制知建康府充沿江都制置使踰年改知临安府复为徽猷阁待制充京畿数路宣抚使寻罢迁庐寿镇抚使改准西安抚使庐州溃兵王全与其徒来降舜陟散财发粟流民渐归改知静江府御史中丞常同奏舜陟凶暴倾险罢之后十八年复为广西经略以知邕州俞僖有赃为运副吕源所按事连舜陟提举太平观先是舜陟与源有隙舜陟因讨郴贼劾源沮军事源讼舜陟受金盗马非讞朝政遣大理寺官袁杓燕仰之往推劾死狱中舜陟有惠爱邦人闻其死为之哭妻江氏诉于朝诏通判德庆府洪元英究实元英言舜陟受金盗马事涉暧昧其得人心虽古循吏无以过遂送杓仰之吏部

△沈晦

沈晦字符用钱塘人翰林学士沈遘孙宣和闲进士廷对第一除校书郎迁著作佐郎金人攻汴京借给事中从肃王枢出质斡里雅布军张邦昌伪立请金人归冯澥等晦因得还真为给事中高宗即位言者论晦虽使金艰苦而封驳之职不可以赏劳除集英殿修撰知信州帝如扬州将召为中书舍人侍御史张守论晦为布衣时事帝曰顷在金营见其慷慨士人细行岂足为终身累邪不果召历知明州处州帝如会稽移守婺州贼成皋入寇晦用教授孙邦策率民兵出城与战大败晦欲斩邦策已而释之时浙东防遏使傅崧卿在城中单骑往说皋遂降进徽猷阁待制以言者论晦妄用便宜指挥行事降集英殿修撰提举临安府洞霄宫寻复徽猷阁待制知宣州移知建康府以御史常同论罢绍兴四年起知镇江府两浙西路安抚使过行在面对言沿江千余里若令镇江建康太平池鄂五郡各有兵一二万以本郡财赋易官田给之敌至五郡以舟师守江步兵守隘使彼难自渡五郡合击敌虽善战不能一日破诸城也若围五郡则兵分势弱或以偏师缀我大军南侵则五郡尾而邀之敌安敢远去时方以韩世忠屯军镇江不果用刘麟入寇世忠拒于扬州晦乞促张俊兵为世忠援赵鼎称晦议论激昂帝曰晦诚可嘉然朕知其人言甚壮胆志颇怯晦亦不为世忠所乐寻提举临安府洞霄宫起为广西经略兼知静江府先是南州蛮酋莫公晟归朝用为本路钤辖羁縻之后遁去旁结诸峒蛮岁出为边患晦选老将罗统戍边招诱诸酋谕以威信皆诣府请降晦犒遗之结誓而去自是公晟孤立不复犯边晦在郡岁买马三千匹继者皆不能及进徽猷阁直学士召赴行在除知衢州改潭州提举太平兴国宫卒晦胆气过人不能尽循法度贫时尤甚故累致人言然其当官才具亦不可掩云

△刘一止

刘一止字行简湖州归安人试太学有司欲举八行不就登进士第为越州教授参知政事李邴荐为详定一司敕令所删定官绍兴初召试馆职言事不克济者患在不为不患其难圣人不畏多难高宗以所言剴切知治道欲骤用执政不乐除秘书省校书郎考两浙类试欲得通时务者得张九成众皆厌服迁监察御史上疏谓天下之治众君子成之而不足一小人败之而有余君子虽众道则孤小人虽寡势易蔓不加察则小人伺隙而入以败政矣时庶事草创有司以吏所省记为法吏缘为奸一止曰法令具在吏犹得舞文矧一切听其省记与夺在其牙颊患可胜言哉请以省记之文刊之颁行踰年而书成秦桧请置修政局一止言宣王内修政事修其外攘之政而已今之所修特簿书狱讼官吏迁降土木营建之务未见所当急也又谓人才进用太遽仕者或不由铨选朝士入而不出外官虽有异能不见召用非军事而起复皆幸门不塞之故请选近臣晓财利者仿刘晏法濒江置司以制国用乡村置义仓以备水旱增重监司之选后多采用其言迁起居郎因极陈堂吏宦官之蠹执政植私党无忧国心翼日罢主管台州崇道观召为祠部郎知袁州改浙东路提点刑狱为秘书少监复除起居郎擢中书舍人兼侍讲莫将赐出身除起居郎一止奏将以上书助和议骤自太府丞缀从班前此未有臣乃与将同命愿并臣罢之不报迁给事中徐伟达者尝事张邦昌为郎得知池州一止言伟达既仕伪廷今付以郡无以示天下孟忠厚乞试郡一止言后族业文如忠厚虽可为郡他日有援例者何以却之汪伯彦知宣州入覲诏以元帅府旧人特依见任执政给奉一止言伯彦误国之罪天下共知不当以郡守而例执政帝皆为罢之于凡贵近之请虽小事亦论执不置居琐闼百余日缴奏不已用事者始忌奏一止同周葵荐吕广问迎合李光罢提举江州太平观进敷文阁待制御史中丞何若奏一止朋附李光偃蹇慢上落职罢祠后八年请老复职致仕秦桧死召至国门以病不能拜力辞进直学士致仕卒年八十三一止冲澹寡欲尝诲其子曰吾平生通塞听于自然惟机械不生故方寸自有乐地博学无不通为文不事纤刻制诰坦明有体书诏一日数十辄办其草颜鲁公孙特命官制帝叹赏手书之子峦整从弟寔止

刘寔止

刘寔止

寔止字无虞登宣和进士甲科除太学录校书郎建炎初为浙西安抚大使司参议改两浙转运判官苗傅刘正彦之变寔止自毗陵驰诣

京口金陵见吕颐浩刘光世勉以忠义退而具军须以佐勤王除左司郎官辞帝复位除右司郎官给事中梁扬祖为发运使寔止再疏论驳以添差江淮荆湖制置发运副使扈从隆佑太后幸江西寻为两浙转运副使录勤王功直龙图阁进秘阁修撰主管崇道观提点江淮等路坑冶铸钱知镇江府兼沿江安抚进右文殿修撰寔止言京口控扼大江为浙西门户请分常州江阴军及昆山常熟二县隶本司庶防秋时沿江号令归一可以固守权户部侍郎总领三宣抚司钱粮张浚都督诸军以为行府属除吏部侍郎进徽猷阁直学士知秀州升显谟阁提举太平观卒寔止有文名慷慨喜论事当艰难时上疏言阙失指切隐微多人所难言乞禁王安石日录复贤良方正科用司马光十科荐士法仿唐制宰执论事以谏官倚立皆其显显者勤王之举实有输忠赞谋之劳

△胡交修

胡交修字已楙常州晋陵人登崇寔二年进士第授泰州推官试词学兼茂科置首选除编类国朝会要所检阅文字政和六年迁太常博士都官郎徙祠部迁左司官拜起居舍人起居郎除右文殿修撰知湖州建炎初以中书舍人召辞不至改徽猷阁待制提举杭州洞霄宫三年复以舍人召进给事中直学士院兼侍讲入对首论天下大势曰淮南当吾膺将士遇敌先奔无藩篱之卫湖广带吾胁羣盗乘闲窃发有腹心之忧江浙肇吾基根本久未立秦蜀张吾援指臂不相救宜诏二三大臣修政事选将帅搜补卒乘以张国势抚绥疲瘵以固国本帝访以弭盗保民丰财裕国强兵御戎之要疏言民惟其冻饿无聊日与死迫然后忍以其身弃之于盗贼陛下下宽大之诏开其自新之路禁苛慝之暴丰其衣食之源则悔悟者归其不变者党与携落亦为吏士所系获而盗可弭盗弭则可以保民矣盗区皆吾秔稻之地为盗者皆吾南亩之民陛下抚而纳之反其田里无急征暴敛启其不肖之心耕桑以时各安其业谷帛不可胜用而财可丰财丰则可以裕国矣日者翟兴连西路董平据南楚什伍其人为农为兵不数年积粟充牣雄视一方盗贼犹能尔况以中兴二百郡地欲强兵以御寇乎世以为名言李成盗江淮廷议欲亲征交修谓羣盗猖狂天子自将胜之则不武不胜则貽天下笑此将帅之责何足以辱王师议遂格盗寻遁周祀守常州坐残虐免会大旱帝问交修致旱之由对以殆祀佚罚之故乃以祀属吏祀疑为交修所逸上书告其罪遣大理寺丞胡蒙诣常按验交修无所絀然羣从多抵罪以徽猷阁待制提举太平观六年召为给事中刑部侍郎翰林学士知制诰兼侍读寻迁刑部尚书汀州寔化县论大辟十人狱已上知州事郑强

验问无一人当死交修乞治县令冒赏杀无辜罪江东留狱追逮者尚六百人交修言若待六百人俱至则瘐死者众矣请以罪状明白者论如律疑则从轻诏皆如其言朝论欲以四川交子行之诸路交修力陈其害谓崇盛大钱覆辙可鉴当时大臣建议人皆附和未几钱分两等市有二价奸民盗铸死徙相属以今交子校之大钱无铜炭之费无鼓铸之劳一夫挟纸日作十数万真贗莫辨售之不疑一触宪网破家坏产以赏告捕祸及无辜岁月之后公私之钱尽归藏镪之家商贾不行井市萧条比及悔悟恐无及矣时议大举交修言吾无以考验其实遽信之以举事岂不误国蜀帅席益既去帝问交修孰可守蜀者对以臣从子世将可用遂以世将为枢密直学士四川安抚制置使世将在蜀五年号为名帅自重兵聚关外以守蜀饷道险远漕舟自嘉陵江而上春夏涨而多覆秋冬涸而多胶绍兴初宣抚副使吴玠始行陆运调成都潼川利州三路夫十万县官部送邀赏争先十毙三四至是交修言养兵所以保蜀民不堪命则腹心先溃臣愚欲三月以后九月以前第存守关正兵余悉就粮他州则守关者水运可给分戍者陆运可免帝命学士院述交修意诏玠行之议徽宗配享功臣交修奏韩忠彦建中靖国初为相贤誉翕然时号小元佑从之人大允服八年夏以亲老除宝文阁学士知信州入辞上欲留侍经筵力言母老愿奉祠里中以便养改提举江州太平兴国宫九年六月召还除兵部尚书翰林学士兼侍讲时河南新复交修奏京西陕西取士之法乞如祖宗时设诸科之目以待西北之士别为号于南宫以收五路之才诏令五路讨论逾年复请补外除端明殿学士知合州却私请免上供以万计领州数月卒交修简重寡言进止有度在词苑号为称职自其从祖宿从父宗愈至交修世将皆在禁林中兴以后学士三入者自交修始

△綦崇礼

綦崇礼字叔厚高密人后徙淮之北海祖及父皆中明经进士科崇礼幼颖迈十岁能作邑人墓讣父见大惊曰吾家积善之报其在兹乎及入太学诸生溺于王氏新语少能词艺者徽宗幸太学崇礼出二表祭酒与同列大称其工登重和元年上舍第调淄县主簿为太学正迁博士改宣教郎秘书省正字建炎初除工部员外郎【按宋名臣言行别录作建炎戊申除尚书工部员外郎云云宋史本传似俱是徽宗时官而于下文驾如平江不合矣今据增】寻为起居郎摄给事中召试政事堂为制诰三篇不淹晷而就辞翰奇伟拜中书舍人赐三品服进用之速近世所未有车驾如平江有旨邹浩追复龙图阁待制崇礼当行词推帝所以褒恤遗

直之意有曰处心不欺养气至大言期寤意引裾尝犯
于雷霆计不顾身去国再迁于岭徼羣臣动色志士倾心又曰英爽不妄想生气之犹在
奸谀已死知朽骨之尚寒同列推重除试尚书吏部侍
郎寻兼直学士院以徽猷阁直学士知漳州其俗悍强号难治属有巨寇起建州声撼邻
境人心动摇崇礼牧民御众一如常日讫盗息环城内
外安堵如故徙知明州召为吏部侍郎兼权直学士院时有诏侍从官日轮一员具前代
及本朝事关治体者一二事以进崇礼谓非旧典且越
职望令讲读官三五日一进乃命学士与南省官如前诏又言驻蹕临安以浙西为根本
宜固江淮之守然后可以图兴复蜀在万里外当召用
其士夫慰安远人之心时兵革后省漕簿书残毁几尽崇礼再执铨法熟于典故讨论沿
革援据该审吏不得容其私后有诏重刊七司条敕崇
礼所建明悉书为令移兵部侍郎仍进直学士院御笔处分召至都堂令条具进讨固守
利害崇礼奏谍传金人并兵趣川陕盖以向来江左用
兵非敌之便故二三岁来悉力窥蜀其意以为蜀若不守江浙自摇故必图之非特报前
日吴玠一败而已今日利害在蜀兵之胜负九月御笔
除翰林学士自靖康后从官以御笔除拜自此始杨惟忠邢焕以节度使致仕告由舍人
院出崇礼言祖宗时凡节钺臣僚得谢并纳节别除一
官致仕熙宁闲富弼以元勋始令特带节钺致仕其后继者鲁公亮文彦博他人岂可援
以为例诏自今如祖宗故典进兼侍读兼史馆修撰时
有旨重修神宗哲宗正史兵火之后典籍散亡崇礼奏神宗实录墨本元佑所修已是成
书朱本出蔡卞手多所附会乞将朱墨本参照修定哲
宗实录崇宁闲蔡京提举编修增饰语言变乱是非难以据旧录修定欲乞访求故家
文献又奏知湖州汪藻所编类元符庚辰至建炎已西
三十年事迹乞下藻以已成文字赴本所参照并从之尝进唐太宗录刺史姓名于屏风
故事曰牧民之吏咸得其良则治功成苟能效当时之
事以守令姓名详列于屏简在帝心则人知尽心职业再入翰林凡五年所撰诏命数百
篇文简意明不私美不寄怨深得代言之体以宝文阁
直学士知绍兴府刘豫导金人入侵扬楚震扰高宗躬御戎衣次吴会崇礼以近臣承方
面谓浙东一道为行都肘腋之地备御不可不谨密疏
于朝得便宜从事于是缮城郭厉甲兵输钱帛以犒王师简舟舰以扼海道疚心夙夜殆
废食寝及春帝还七州晏然期年上印绶退居台州卒
年六十赠左朝议大夫 【按宋名臣言行别录作进爵高密侯赠朝议大夫】 崇礼覃
心辞章洞晓音律酒酣气振议论风生晚方登第以县
主簿骤升华要极润色论思之选端方亮直不惮强御秦桧罢政崇礼草词显著其恶无

所隐桧深憾之及再相矫诏下台州就崇礼家索其藁

【按宋名臣言行别录作称诏下台州取壬子八月所赐御笔与本传互异】 自于帝前
纳之且将修怨会崇礼已没故身后所得恩泽其家
畏惧不敢陈士大夫亦无敢为其任保云

钦定续通志卷三百七十九

●钦定续通志卷三百八十 列传一百八十
列传

宋 【八十四】

○宋八十四

章谊 韩肖胄 陈公辅 张翬 胡松年 曹勋

李植 韩公裔

章谊

韩肖胄

陈公辅

张翬

胡松年

曹勋

李植

韩公裔

△章谊

章谊字宜叟建州浦城人登崇宁四年进士第补怀州司法参军历漳台二州教授
杭州通判建炎初陈通寇钱塘部使者檄谊聚杭州七
县弓兵以张声势会王渊讨贼谊随渊得入城贼平旋加抚定人皆德之苗刘为变帝问
羣臣曰今日之事何如时希孟辄曰乞问三军谊越班
斥之曰问三军何义若将鼓乱邪希孟即立屏息帝嘉之事实定窜希孟吉阳军谊迁秩擢
仓部员外郎奉使二浙贸易祠牒以济军用以稽迟罢
召为驾部员外郎迁殿中侍御史张浚宣抚陕西谊奏事任已重处断太专当除副贰助
之何■ 〈〈鹵，欠代义〉上木下〉赠官谊论其折
冲无谋守御无策乃中国招祸之首乞寝免邵青自太平乘舟抵平江所至劫掠谊请置
水军于驻蹕之地且言古舟师有三等大为阵脚次为
战船小为传令皆可为战之备诏淮南三宣抚措置谊又献战守四策谓有江海必资舟
楫战守之具有险阻必资郡县防守之力有兵将必驾
馭抚循不可为将帅自卫之资有粮赋必漕运转输不可为盗贼侵据之用四者各付能
臣分路以办重赏严罚谁敢不用命诏问保民弭盗遏

寇生财之策谊对曰去奸贪残虐之吏则民可保用循良廉平之吏则盗可弭敌寇未遏以未得折冲御侮之臣财赋未裕以未得掌财心计之臣诏集议明堂配享谊言国家既以太祖配天子郊比周之后稷则太宗宜配帝于明堂以比周之文王后不果行绍兴二年除大理卿寻除权吏部侍郎乞诏有司编类四选通知之条与一司专用之法兼以前后续降指挥自成一书则铨曹有可守之法奸吏无舞文之弊改刑部侍郎兼详定一司敕令奏比修绍兴敕令格式其忠厚之意则本于祖宗其纲条之举则仍于旧贯今在有司为日既久州县推行渐见抵牾欲承疑遵用则众听惑而不孚欲因事申明则法屡变而难守乞诏监司郡守与承用官司参考祖宗旧典各摭新书之阙遗条具以闻然后命官审订删去着为定法迁徽猷阁直学士枢密都承旨奏今日神武兵萃于五军多逃亡之余市井之人殿班亲军倚以侍卫者曾无千百愿陛下酌汉唐南北禁卫之意修本朝遴选班直之法选五军及诸州各为一卫合取万人分为两卫则禁卫益增严四年金遣李永寿王翊来求还刘豫之俘及西北人在东南者又欲画江以益刘豫时议难之加谊龙图阁学士充军前奉表通问使至云中与尼雅满乌舍论事不少屈还至南京刘豫留之以计得归擢刑部尚书迁户部言祖宗设官理财内则户部外则诸路转运使东南委输最盛则又置发运以督诸路供输之入皆有移用补助之法户部仰以不乏者也今川广荆湖土贡岁输不入王府者累年矣皆发运使失职之罪也顷因定都汴京故发运使置司真泗今驻吴会则发运当在荆湖南北之闲望讨论发运置司之地选能臣以充其任又言户部左右曹之设诸路则运司左曹之属也提举则右曹之属也若复发运司于诸路各置转运使副二员以一员检察常平以应右曹之选则户部财用无陷失矣五年以疾请郡除龙图阁学士知温州适岁大旱米斗千文钱谊用刘晏招商之法置场增直以糶米商辐辏其价自平部使者以状闻诏迁官一等六年移守平江明年移躋建康复为户部尚书谊奏屯田之策谓今三大将各屯一路如各捐数县地均给将士收其余以省转输非小补也七年帝还临安以谊为端明殿学士江南东路安抚大使知建康府兼行宫留守未几提举亳州明道宫代还八年卒年六十一谥忠恪谊宽厚长者为台官独存大体士论归之子八人駟驹駟驎■〈马卒〉駟驰駟

△韩肖胄

韩肖胄字似夫相州安阳人曾祖琦祖忠彦再世为相父治肖胄以荫补承务郎历开封府司录赐同上舍出身除卫尉少卿赐三品服寻

假给事中充贺辽国生辰使既还时治守相州请祠肖胄因乞补外侍疾诏除直秘阁知相州代其父任在相四年王师傅燕肖胄策幽蓟且有变阴为守备已而金骑入境野无所掠而去建炎二年知江州入为祠部郎迁左司尝言中原未复所恃长江之险淮南实为屏蔽沃野千里近多荒废若广修农事则转饷可省兵食可足自是置局建康行屯田于江淮又应诏陈五事曰远斥堠戢戍兵防海道援中原修军政擢工部侍郎时川陕马纲路通塞不常请于广西邕州置司互市诸蕃马诏行之绍兴二年诏百官各言省费裕国强兵息民之策肖胄言天下财赋窠名旧悉隶三司今户部惟有上供之目问诸路窠名于户部户部不能悉问诸州窠名于漕司漕司不能悉失一窠名则此项遂亡愿诏诸路漕司括州县出纳可罢罢之可并并之立为定籍漕司总诸州户部总诸路则无失陷矣经费之大莫过养兵今人亡而冒请者众愿立诸军核实之法重将帅冒请之罪则兵数得实饷给不虚省费裕国此其大者生民常赋之外迫以军须吏缘为奸敛取百端复为寇所迫逐田桑失时寇去复业未及息肩催科之吏已呼其门矣愿诏郡邑招集流散官贷之种俟及三年始责其赋置籍书之以课殿最强兵息民此其先者时多所采纳又请复天地日月星辰社稷之祀于是下有司定一岁祭礼迁吏部侍郎时条例散失吏因为奸肖胄立重赏俾各省记编为条目舞文之弊始革阵亡补官得占射差遣而在部常调人守待不能注授肖胄请阵亡惟许本家用恩例异姓候经任收使遂无不均且严六部出入之禁而请托不行三年拜端明殿学士同金书枢密院事充通问使以胡松年副之肖胄奏和乃权时之宜他日国家安强军声大振誓当雪此讎耻今臣等行或半年不返命必复有谋宜速进兵不可因臣等在彼而缓之也将行母又勉之帝称为贤母封荣国夫人肖胄至金国金人知其家世甚重之往返纔半年前此金人未尝报聘至是始遣人偕来肖胄先北使入对与朱胜非议不合力求去以旧职知温州提举临安府洞霄宫五年诏问前宰臣战守方略肖胄言金人畏西兵劲锐善战今三帅所统多西人吴玠继有捷奏军声益振自荆襄至江淮绵亘数千里宜择文武臣僚案行计度求险阻之地屯兵积粮则形势相接今淮东西虽命宣抚使然将屯置司乃在江上所遣偏裨分守不过资以轻兵势孤力弱难以责其固志当移二将于江北使藩篱可固又言诸大将之兵自主庭户更相讎疾若欲并遣进兵宜先命总帅分以精锐自成一军号令既一则诸将听命畿甸山东关河之民当以安集流亡招怀归附为先今淮南江东西荒田至多若招境上之人授田给粮捐其赋租必将接迹而至

又奏江之南岸旷土甚多沿江大将各分地而屯军士旧为农者十之五六使之力耕农隙则试所习之技艺秋成则均以所种之禾麦或募江北流徙及江南无业愿迁之人分给之耒为营屯止则固守出败攻讨起知常州召赴行在提举万寿观寻除金书枢密院事和议已定复命为报谢使金人就馆议事肖胄随问随答众皆耸听其还给毡车及顿递宴设除资政殿学士知绍兴府寻奉祠与其弟膺胄寓居于越几十年事母以孝闻弟不至不食所得恩泽皆先给宗族卒年七十六谥元穆

△陈公辅

陈公辅字国佑台州临海人政和三年上舍及第调平江府教授朱勔方嬖幸公辅绝不与交移越州累迁权应天府少尹除秘书郎靖康初二府多宣和旧人公辅言蔡京王黼用事二十余年台谏皆缘以进唐重师驥为太宰李邦彦引用谢克家孙觌为纂修蔡攸引用及邦彦作相又附丽以进此四人处台谏之任臣知其决不能言宰相大臣之过愿择人臣中朴茂纯直不附权幸慷慨论事者则所任得人礼义廉耻稍稍振起敌国闻之畏服时吴敏李纲不协公辅奏陛下初临万几正赖其同心合谋而二臣不和已有其迹愿谕以圣训俾务一心以安国家徽宗渡江未还人情疑惧公辅力陈父子之义宜遣大臣迎奉钦宗嘉之擢为右司谏孟夏享景灵宫遂幸阳德佑神观公辅谏不当如平时事宴游论蔡京父子怀奸误国终未行遣今朝廷公卿百执事半出其门必有庇之者诏谪京崇信军节度副使德安府安置又奏朱勔罪恶乞勿许其子姓随上皇入京时有指公辅为李纲之党鼓唱士庶伏阙者公辅自列因辞位后陈三事其一言李纲书生不知军旅遣援太原乃为大臣所陷必败事其二言余应求不当以言远谪其三言方复祖宗法度冯澥不宜更论熙宁元丰之政语触时宰遂与应求程瑀李光俱得罪斥监合州税高宗即位召还除尚书左司员外郎明年始达维扬初李纲得政公辅自外除郎未至而纲罢改南剑州寻予宫观绍兴六年召为吏部员外郎疏言曰公卿大夫无气节忠义皆王安石学术坏之议者尚谓安石学术可取臣谓安石学术之非尤甚于政事政事害人才学术害人心三经字说诋诬圣人破碎大道春秋正名定分俾乱臣贼子惧安石使学者不治春秋史汉载成败安危存亡理乱安石使学者不读史汉以扬雄之仕莽为合于孔子无可无不可之义以冯道之事四姓八君为善避难存身使公卿大夫皆师安石之言宜其无气节忠义也复授左司谏言中兴之治在得天得人以孝感天以诚得民帝善其深得谏臣体赐五品服令尚书省写图以便观览公辅乞增轮对官令审计官告粮料

榷贷监仓及茶场等官皆许面对时有诏将驻蹕建康公辅上疏陈攻守之策且乞选大臣镇淮西增兵将守要害使西连鄂岳东接楚泗皆有
掎角之形徽宗讫至公辅请宫中行三年之丧视朝服淡黄羣臣未可纯吉服明堂未当以徽宗配宜罢临轩策士又乞权罢讲筵事不行迁尚
书礼部侍郎会赵鼎言进退人才乃其职分疏稍侵公辅因力请祠除集英殿修撰提举江州太平观寻知处州升徽猷阁待制仍提举太平观
卒年六十六赠大中大夫

△张翬

张翬字柔直福州人举进士蔡京当国求善训子弟者族子应之以翬荐翬再辞不获遂即馆京亦未暇与之接翬严毅耸拔意度凝然异
于他师诸生已不能堪忽谓之曰汝曹曾学走乎诸生骇而问曰尝闻先生教令读书徐行未闻教以走也翬曰天下被而翁破坏至此旦夕兵
来先至而家汝曹惟有善走庶可逃死尔诸子大惊亟以所闻告京京瞿然见翬深语翬慷慨言曰宗庙社稷危在旦夕宜亟引耆德老成置诸
左右以开道上心罗天下忠义之士分布内外遂以杨时荐翬后守南剑州迁福建路转运判官未行会范汝为陷建州遣叶彻拥众寇南剑时
统制官任士安驻军城西不肯力战翬独率州兵与之战分为数队令城中杀羊牛豕作肉串仍多具饭更迭交战士卒饱而力不乏彻中流矢
死众败走翬知士安惧无功即函彻首与之州兵皆愤翬曰贼必再至非与大兵合力不能破也士安得之大喜遂驰报诸司谓已斩彻未几彻
二子果引众声言复父讎縞素来攻于是士安与州兵夹攻大败之城赖以全再知处州尝欲造大舟幕僚不能计其直翬教以造一小舟量其
尺寸而十倍算之又筑绍兴园神庙垣召匠计之云费八万缗翬与匠者董役内官无所得以直龙图阁知处州荡平余寇进秘阁修撰卒后庙
食邵武

△胡松年

胡松年字茂老海州怀仁人幼孤贫母粥机织资给使学读书尤邃于易政和二年上舍释褐补潍州教授八年赐对便殿改校书郎兼资
善堂赞读为殿试参详官迁中书舍人时方有事燕云松年累章谓边衅一开有不胜言者拂时相意提举太平观建炎闲密奏中原利害召赴
行在出知平江府以兴利除害十七事揭于都市百姓便之加徽猷阁待制奏防江利害一曰立国无藩篱之固二曰遣将无首尾之援三曰不
攻敌技之所短召为中书舍人言武昌九江建康京口吴江钱塘明越宜各屯水战士三千以为备唐恪追复观文殿学士松年缴奏曰靖康之

祸何■〈〈鹵，欠代义〉上木下〉轻脱寡谋宜为罪首去年秦桧还朝力称其抗义
守正遂被褒赠已大拂士论今恪子琢自陈其父不获
伸迎请二帝之谋饮药死宜诏有司详考实状庶不为虚美以示激劝除给事中会选将
帅松年奏愿陛下亲出劳军即行伍搜简之必有可为
时用者又奏恢复中原必自山东始山东归附必自登莱密始不特三郡民俗忠义且有
通泰飞艘往来之便除兼侍讲王伦使金还言金人欲
再遣重臣来计议以松年试工部尚书为韩肖胄副充大金奉表通问使时使命久不通
人皆疑惧松年毅然往至汴刘豫令以臣礼见尚胄
未答松年曰圣主万寿豫曰圣意何在松年曰主上之意必复故疆而后已使还拜吏部
尚书岳飞收复襄汉令松年筹度守御事松年奏乞飞
班师徐窥刘豫意向若豫置不问其青叵测当饬将士谨疆场可也又条战舰四利一曰
张朝廷深入之军势二曰固山东欲归之民心三曰震
迭强敌使不敢窥江浙四曰牵制刘豫不暇营襄汉除端明殿学士金书枢密院事首奏
八事立规摹以定中兴之基振纪纲以尊朝廷之势馭
将帅使知畏抚士卒使知劝收予夺之柄察毁誉之言无以小疵弃人才无以虚文废实
效又荐张敌万在淮南诱敌深入步骑四集悉陷于淖
无得解者乞令统率军马别为任使庶几外阨渐多名将谍报刘豫于登莱海密具舟楫
淮阳顺昌积刍粟欲凭借金人侵我边鄙议者谓韩刘
岳各当一面可保无虞松年奏三人声势初不相属缓急必不相救况海道阔远苏秀明
越最为要冲乞选精兵万人命一大臣往驻建康亲督
世忠光世守采石马家渡以张两军之势仍以兵五千屯明州平江控御江海或无人可
遣臣愿疾驰以赴其急诏遣松年往江上与诸将会议
进讨因规敌情帝决意亲征遂次平江命松年权参知政事专治战舰张浚专治军器俄
以疾提举洞霄宫虽居闲不忘朝廷事屡言和余科敛
防秋利害帝皆嘉纳十六年卒年六十松年平生不喜蓄财喜宾客自持囊至执政所举
自代皆一时闻人方秦桧秉政松年独鄙之至死不通
一书

△曹勋

曹勋字公显阳翟人父组宣和中为合门宣赞舍人勋用恩补承信郎特命赴进士
廷试赐甲科为武吏如故靖康初为合门宣赞舍人勾
当龙德宫除武义大夫从徽宗北迁过河十余日谓勋曰不知中原之民推戴康王否翌
日出御衣书领中曰可便即真来掇父母并持韦贤妃
邢夫人信命勋闲行诣王又谕勋见康王第言有清中原之策悉举行之毋以我为念又
言艺祖有誓约藏之太庙不杀大臣及言事官违者不

祥勋自燕山遁归建炎元年七月至南京以御衣所书进高宗泣以示辅臣勋建议募死士航海入金国东京奉徽宗由海道归执政难之出勋于外凡九年不得迁绍兴五年除江西兵马副都监改浙东旋夺之十一年乌珠遣使议和授勋成州团练使副刘光远报之及淮遇乌珠遣还言当遣尊官右职持节而来盖欲亟和也勋还迁忠州防御使金使萧毅等来命勋为接伴使未几落阶官为容州观察使充金国报谢副使召入内殿帝洒泣谕以恳请亲族之意及见金主正使何铸伏地不能言勋反复开谕金主首肯许还梓宫及太后勋归金遣高安居等卫送太后至临安命勋充接伴使迁保信军承宣使枢密副使承旨二十九年拜昭信军节度使副王纶为称谢使时金主亮已定侵淮计勋与纶还言邻国恭顺和好无他人讥其妄孝宗朝加太尉提举皇城司开府仪同三司淳熙元年赠官少保

△李植

李植字符直泗州临淮人幼明敏笃学太史晁无咎以女妻焉靖康初高宗开大元帅府向子諲转运京畿时羣盗四起饷道阨绝有以植荐遂借补迪功郎使督四百艘总押犒师银百万粮百万石招募忠义二万余众自淮入徐趋济凡十余战卒以计达时高宗驻师巨野闻植统众至士气十倍首加劳问植占对详敏高宗大悦亲赐之食承制授承直郎留之幕府植三上表劝进三降手札奖谕植感激知遇言无不尽为汪伯彦黄潜善所忌高宗即位为东南发运司干办公事寻以奉议郎知潭州湘阴县经杨么荡析植披荆棘立县治发廩粟振困乏丞相张浚督师江上荐为朝奉郎鄂州通判大盗马友孔彦舟未平植请修战舰习水战分军马为左右翼大破彦舟伏兵诛马友二盗平浚以其功上于朝转朝奉大夫通判荆南府秩满除尚书户部员外郎时秦桧当国凡帅府旧僚率皆屏黜浚亦去国植即丐祠奉亲寓居长沙之醴陵十有九年杜门不仕桧死子諲以户部尚书居迓列语及龙飞旧事识植姓名除户部郎中召植始入见帝曰朕故人也方有意大用以母老每辞愿便养除知桂阳军丁母忧归葬哀毁庐墓有白鹭朱草之祥服阙以钱端礼荐差知琼州陞辞帝慨然曰卿老矣改知徽州民俗为变转朝请大夫直秘阁改知镇江府迁江淮荆湘都大提点坑冶铸钱公事踰年金人败盟朝廷将大举以植漕运有才略授直敷文阁京西北路计度转运使植措画有方廷议倚重干道元年迁提刑江西二年直宝文阁江南东路转运使兼知建康军府兼本路安抚使主管行宫留守司事上书言防江十策其略曰保荆襄之障以固根本审中军所处以俟大举搜选强壮以重军势度

地险阨以保居民避敌所长击其所短金人降者宜加
赏劝帝嘉其言以太府卿召赴阙有疾不克上道遂以中奉大夫宝文阁学士致仕还湘
每及国事必忧形于色始终以和议为恨年七十有六
卒谥忠襄子五人汝虞知桃源县汝士朝奉大夫汝工知昌化军

△韩公裔

韩公裔字子宸开封人初以三馆吏补官掌韦贤妃阁笺奏寻充康王府内知客金
兵入汴从王出使渡河将官刘浩吴湛私鬪公裔谕解
之次磁州军民戕奉使王云随王军入州廨公裔复谕退之王之将南也与公裔谋闲道
潜师夜起迟明至相磁人无知者自是亲爱愈笃张邦
昌遣人同三舅韦渊来献传国玺时渊自称伪官议者又谓邦昌不可信王怒将诛渊公
裔曰神器自归天意也王遂受玺命公裔掌之公裔力
救渊释其罪元佑后诏王入承大统府僚谓金兵尚近宜屯彭城公裔言国家肇基睢阳
王亦宜于睢阳受命时前军已发将趋彭城会天大雷
电不能前王异之夜半抗声语公裔曰明日如睢阳决矣既即帝位公裔累迁武功大夫
贵州防御使后以事忤黄潜善适帝幸维扬公裔丐去
潜善以为避事遂降三官送吏部帝幸越念其旧劳召复故官干办皇城司仍带御器械
累迁至广州观察使提举佑神观公裔给事藩邸三十
余年恩宠优厚每置酒慈宁宫必召公裔会修玉牒元帅府事多放佚秦桧以公裔帅府
旧人奏令修书官就质其事俄除保康军承宣使桧疑
其舍已而求于帝銜之右谏议大夫汪勃希桧意劾罢公裔遂与外祠帝眷之不衰桧死
即复提举佑神观赐第和宁门西升岳阳军节度使寻
致仕高宗既内禅尝与孝宗语其忠劳因诏所居郡善视之干道二年卒年七十五赠太
尉谥恭荣官其亲族八人公裔律身稍谨不植势不市
恩又敢与黄潜善秦桧异斯亦足取云

钦定续通志卷三百八十

●钦定续通志卷三百八十一 列传一百八十一

列传

宋【八十五】

○宋八十五

何铸 王次翁 范同 杨愿 楼照 句龙如渊

薛弼 罗如楫【愿】 萧振

何铸

王次翁

范同

杨愿
楼照
句龙如渊
薛弼
罗汝楫 【罗愿】
萧振
△何铸

何铸字伯寿余杭人登政和五年进士第历官州县入为诸王宫教授秘书郎御史中丞廖刚荐铸可备拾遗补阙之选即命对铸首陈动天之德莫大于孝感物之道莫过于诚诚孝既至则归梓宫于陵寝奉两宫于魏阙绍大业复境土又何难焉帝嘉纳之拜监察御史寻迁殿中侍御史上疏论士大夫心术不正徇虚以掠名托名以规利言不由中而首尾向背行险自售而设意相倾者为事君之失怀险巇之谋行刻薄之政轻儇不庄慢易无礼者为行己之失乞大明好恶申饬中外盖有所指也时迁温州诸宫殿神像于湖州有司迎奉所过骚然铸言孝莫大于寤神寤神莫大于得四海之欢心浙东旱荒若加勤动恐道路怨咨乞务从简约事遂已擢右谏议大夫寻拜御史中丞先是秦桧力主和议大将岳飞有战功金人所深忌桧恶其异己欲除之胁飞故将王贵上变逮飞系大理狱先命铸鞫之铸引飞至庭诘其反状飞袒而示之背背有旧涅尽忠报国四大字深入肤理既而阅实俱无验铸察其冤白之桧桧不悦曰此帝意也铸曰铸岂为一岳飞者强敌未灭无故戮一大将失士卒心非社稷之长计桧语塞 【伏读 御批通鉴辑览曰与罗汝楫辈交章论飞淮西事者铸也业已党附奸恶以兴大狱迨目击奇冤然后欲为昭雪亦已晚矣故论铸之罪视万俟卨等末减则可以为无罪则不可】 改命万俟卨飞死狱中子云斩于市桧衔铸时金遣萧毅邢具瞻来议事桧言先帝梓宫未反太后銮舆尚迁朔方非大臣不可祈请乃以铸为端明殿学士金书枢密院事为报谢使既返命桧讽万俟卨使论铸私岳飞为不反欲窜诸岭表帝不从止谪徽州时有使金者还言金人问铸安在曾用否于是复使知温州未几以端明殿学士提举万寿观兼侍读召赴行在力辞乃再遣使金使事秘而不传既归报帝复许以大用又力请祠除资政殿学士知徽州居数月提举江山太平兴国宫卒年六十五铸自绍兴己未以后徧历台谏所论如赵鼎李光周葵范冲孙近诸人多迎望风旨议者少之至于慈宁归养梓宫复还虽铸祈请之力而金谋盖素定矣先是金诸将皆已厌兵欲和难自己发故使桧尽室航海而

归密有公约绍兴以后宋师屡捷金欲和益坚至是遣铸衔命盖桧之阴谋以铸尝争岳飞之狱而飞竟死使金知之而其议速谐也铸死四十余年谥通惠其家辞焉嘉定初改谥恭敏

△王次翁

王次翁字庆鲁济南人礼部别头试第一授恩州司理参军历婺州教授辟雍博士出知道州燕云之役取免夫钱不及期辄以乏兴论次翁檄取属邑丁籍视民产高下以为所输多寡之数约期受输不扰而集除广西转运判官召对论事不合出知处州乞祠归寓于婺吕颐浩帅长沙辟为参谋官顷之力乞致仕秦桧召还遂以为吏部员外郎累迁工部侍郎兼侍讲留兼资善堂翊善改御史中丞论赵鼎不法罢知泉州部差李泗为鄂州巡检而湖北宣抚使不可次翁言法令沮于下不知朝廷之尊渐不可长帝令诘宣抚司宣赞舍人陈谔孙崇节即合门受旨升转次翁言合门径自画旨不由三省非祖宗法寝弗命呼延通因内教出不逊语次翁乞斩通以肃军且言着令寸铁入皇城者有常刑遂罢内教韩世忠与刘光世张俊与刘锜皆不相能次翁请遣使切责金人败盟入侵次翁为秦桧言于帝曰前日国是初无主议事有小变则更用他相后来者未必贤于前人而排斥异党收召亲故于国事初无补愿陛下以为至戒无使小人异议乘间而入桧德之先是桧兄子与其内兄王■〈日奂〉皆以恩幸得官桧初罢政二人摈斥累年至是次翁希桧旨言吏部之有审量皆暴扬君父过举有伤陛下孝治乞悉罢建炎绍兴前后累降指挥由是二人骤进初次翁既论罢赵鼎鼎归会稽上书言时政桧忌鼎复用乃令次翁又言之乞显置于法且言特进乃宰相阶官鼎虽谪降而阶官如故是未尝罢相也遂降散官谪居兴化军右谏议大夫何铸又论鼎罪重罚轻降朝奉大夫移漳州桧意犹未厌次翁又论鼎闻边警喜见颜色绳以汉法当伏不道之诛责以春秋当坐诛意之罚虽再行贬责然朝奉大夫视中大夫品秩不相远漳州比兴化尤为善地以此示罚人将玩刑再移潮州安置次翁除参知政事金人败于柘皋帝曰将帅成不战却敌之功乃辅弼奇谋指踪之力除一子职名桧召三大将论功行赏岳飞未至桧与次翁谋以明日率世忠俊置酒湖上欲出则语直省官曰姑待岳少保来益令堂厨丰其燕具如此展期以待者六七日飞既至皆除枢密使罢兵柄次翁归语其子伯庠曰吾与秦相谋之久矣太后回銮次翁为奉迎扈从礼仪使初太后贷金于金使以犒从者至境金使责偿乃入次翁以未得桧命且惧桧疑其私相结约欲攘其位坚不肯偿相持境上凡三日中外忧虑副使王■〈日奂〉

哀金与之太后归泣诉于帝曰王次翁大臣不顾国家利害万一有变则我子母不相见矣帝震怒欲暴其罪诛之次翁先白桧谓所以然者以未尝禀命故不敢专桧大喜力为营救奏为报谢使以避帝怒使还帝立中宫奏为册宝副使帝终恶之桧谕次翁辞位遂以资政殿学士奉祠引年归居明州桧怜之馈问不绝十九年卒年七十一赠宣奉大夫诸子壻亲戚族人添差浙东者又数人皆桧为开陈也桧擅国十九年凡居政府者莫不以微忤出去终始不二者惟次翁

△范同

范同字择善建康人登政和五年进士第再中宏词科累官至吏部员外郎与秦桧力主和议绍兴八年假太常少卿接伴金使萧哲张通古入境同北向再拜问金主起居军民见者多流涕除中书门下省检正诸房公事权吏部侍郎兼实录院修撰迁给事中十一年桧以和议患诸将难制同献计于桧请皆除枢府罢其兵权桧喜乃密奏以柘皋之捷召三大将赴行在论功行赏同入对帝命与林待聘分草三制世忠俊枢密使飞副使并宣押赴枢府治事张俊与桧意合且觉朝廷欲罢兵权即首纳所统兵帝召同入对复以同为翰林学士俄拜参知政事兼修实录同始赞和议为桧所引及在政府或自奏事桧忌之万俟卨因论同贰政之初首为迁葬之议自建康至信州调夫治道怨嗟藉藉近朝廷收天下兵柄归之宥密同辄于稠人中贪天功以为己有遂罢与祠桧意未已卨再谕责授左朝奉郎秘书少监谪居筠州十四年复朝奉大夫提举江州太平观移池州十八年复太中大夫知太平州卒年五十二

△杨愿

杨愿字原仲宣和末补太学录二帝北迁金人闻愿名索之愿匿民间上书执政请迎复元佑皇后又奔济州元帅府劝进辟为属高宗即位授修职郎御营司辟机宜文字历新昌县丞越州判官秦桧荐之召改枢密院编修官登绍兴二年进士第迁计议官召试馆职罢主管崇道观复除秘书郎议者谓外任未终改通判明州桧既专政召为秘书丞未几拜监察御史台长言愿资浅当先历郎官改司封员外郎迁右司起居舍人兼权中书舍人初修玉牒特以命愿愿言玉牒当载靖康推戴赵氏事以秦桧建议本末书之十三年权直学士院十四年为御史中丞踰月升端明殿学士金书枢密院事兼参知政事【按宋史宰辅表高宗绍兴十四年十二月辛丑杨愿自御史中丞迁端明殿学士除金书枢密院事不言兼参知政事】仍兼修玉牒十五年罢提举太平观初愿与张扩并居西掖一时书命藉扩润色扩咏二毫笔诗愿以为诮已诉

于桧誅御史李文会劾之高闾侍经筵帝问张九成安否翊日又问桧桧曰九成唱异惑众为台臣所论予郡乃力乞祠观其意终不为陛下用
帝曰九成清贫不可无禄桧疑闾荐之以语愿愿又嗾文会攻闾去藤州守臣言迁客李光作诗讽刺时政愿在中司傅会其说谓光纵横倾险
子弟宾客往来吴越诱人上书动摇国是光再移谪琼海文会既升西府愿觐桧意策厌即数其害政罢之后二日愿遂补其处帝与桧论事因
曰朕为进用士大夫一相之责也一相既贤则所荐皆贤愿曰陛下任相如此盖得治道之要又论史事桧曰靖康围城中失节者相与作私史
公肆挤排帝曰卿不推异姓宜其不容愿曰桧非独是时不肯雷同宣和间耿延禧为学官以其父在东宫势倾一时士皆靡然从之独桧守正
不易盖自桧再居相位每荐执政必选世无名誉柔佞易制者愿希桧意迎合附下罔上至是斥去天下快之又三年起知宣州玉牒书成加资
政殿学士移知建康府二十二年卒年五十二初愿守宣城表弟王炎调薪水令过之醉中谓愿曰尝于吕丞相处得公顷岁所通书其间颇及
秦丞相之短尚记忆否愿闻之色如死灰遂留炎不听去会愿移守金陵宴监司大合乐守卒皆怠炎即青溪得客舟以行愿忧挠而卒

△楼照

楼照字仲晖婺州永康人登政和五年进士第调大名府户曹累改尚书考功员外郎帝在建康照谓今日之计当思古人量力之言察兵
家知己之计力可以保淮南则以淮南为屏蔽权都建康渐图恢复力未可以保淮南则因长江为险阻权都吴会以养国力 【伏读通鉴辑
览 御批楼照谬说顾以量力知己为辞视保淮为末务淮防既撤而江险亦不足凭其失算更甚矣】 于是移躔临安擢右司郎中时铨曹
患员多阙少自俸贰以下多添差照言光武并省吏员今纵未能损其所素有安可置其所本无绍兴二年秦桧罢相照亦以言者论去六年召
为左司员外郎寻迁殿中侍御史明年迁起居郎言参仿唐制使户部长贰兼领诸路漕权内则可以总太计之出入外则可以制诸道之盈虚
诏三省相度措置卒施行之又言监司郡守系民甚切乞令侍从官各举通判资序或尝任监察御史以上可任监司郡守者一二人诏从之七
年宰相张浚之兄滉赐出身与郡中书舍人张焘封还乃命照行照又封还而竟为权起居舍人何抡书黄行下于是焘与照皆请补外以秘阁
修撰知温州未几除中书舍人迁给事中兼直学士院九年以金人来和传敕草赦文寻兼侍读除端明殿学士金书枢密院事继命往陕西宣
谕德意照奏京城统制吴革知环州田敢成忠郎卢大受皆以节义为范琼刘豫所害乞

赐褒恤又奏陕西诸路陷刘豫郡县有不从伪之人所籍赀产并令勘验给还照至东京檢視宫室寻诣永安军谒陵寢遂至长安会李世辅自夏国欲归朝照以书招之世辅以二千人赴行在寻至凤翔以便宜命郭浩帅鄜延杨政帅熙河兰巩吴玠帅凤翔照欲尽移川口诸军于陕西玠曰移军陕右则蜀口空虚金若自南山捣蜀要我陕右军则我不战自屈当依山为屯控守要害于是玠政二军独屯内地照又会诸路监司于凤翔皆言蜀边屯驻大军之久坐困四川民力乃下其议语在胡世将传照还朝以亲老求归省许之命给假迎侍十四年以资政殿学士知绍兴府过阙入见除金书枢密院事兼权参知政事寻为李文会詹大力所劾与祠久之除知宣州徙广州未行而卒年七十三后谥襄靖照蚤附蔡京改秩为台谏所论其后立朝至位二府皆与秦桧同时其宣谕陕西妄自尊大或论其好货失将士心云

△句龙如渊

句龙如渊字行父永康军道江人政和八年登上舍第沈浮州县二十年以张浚荐召试馆职绍兴六年除秘书省校书郎累迁起居舍人八年兼给事中同知贡举除中书舍人兼侍读直学士院面命草赵鼎罢相制如渊言陛下既罢鼎则用人才须耸动四方当速召君子显黜小人帝曰君子谓谁曰孙近李光小人谓谁曰吕本中先是词臣曾开以老病辞帝欲用如渊代之而赵鼎荐本中故如渊憾之又言臣观朝廷事非君臣情通未易能济大臣论一事不从尚未之觉至再至三遂以为陛下疏之或疑他人有以间之即不能尽诚陛下察其不诚又从而疑之安有君臣之间动相疑间而能久于其位者愿陛下明谕之帝曰前此未常有以此告朕者卿见秦桧亦宜语此时桧方得君如渊犹恐委桧未专故及之除御史中丞先是桧力主和执政侍从及内外诸臣皆以为非是上书谏止桧患之如渊为桧谋择人为台谏使尽击去桧大喜即擢如渊中司如渊凡事必言孟庾召节在途士论不与帝曰朕欲遣令使金国在廷莫更有小人否对曰如赵鼎为相尽隳纪纲乃窃贤相之名而去王庶在枢府尽用奸计乃以和议不合卖直而去刘大中以不孝得罪乃窃朝廷美职而去帝曰卿何不论对曰愿陛下不惜孟庾一人以正今日公论其它容臣一一为陛下别白之于是出庾知严州又连论庶大中皆罢之金国遣二使来议和许归河南地使者踞甚议受书之礼不决外议汹汹如渊建议取其书纳禁中于是同谏长请对又赴都堂与宰执议取书事宰执皆以为然帝亲笔召如渊李谊入对明日诏宰执就馆见金使受其书纳入人情始安九年奏召还曾开范同 【按范同于绍兴八年假太常

少卿为接伴使九年以吏部侍郎为实录院修撰至十一年自翰林学士除参知政事罢未尝在外无有奏请召还考熊克中兴小纪载绍兴八年秋七月御史中丞常同出知湖州冬十二月礼部侍郎曾开出知婺州范同或系常同之悞】而罢施庭臣莫将以谓开同之出虽曰语言之过而其心实出于爱君庭臣将之迁虽曰议论合而其迹终近于希进今国论既定好恶黜陟所宜深谨又论张邦昌时伪臣因赦复职非是帝是其言后卒不行如渊尝与施庭臣忿争庭臣谓如渊有指斥语帝谓秦桧曰以朕观之庭臣之罪小如渊之罪大【按中兴小纪及建炎以来系年要录俱作如渊奏庭臣有指斥语高宗言如渊身任台纲自合早论至一月后因忿方奏此告讦也告讦之风出于末世三代所未闻以朕观之庭臣之罪小如渊之罪大与宋史本传互异】桧请斥庭臣而徙如渊待其求去然后补外帝不可于是与庭臣皆罢初如渊与莫将及庭臣皆力主和议如渊缘此擢中司而将及庭臣皆峻用如渊入言路即劾二人至是与庭臣俱罢其后桧拟如渊知遂宁府帝曰此人用心不端遂已两奉祠卒年六十二如渊始以张浚荐召而终乃翼秦桧挤赵鼎讎吕本中逐刘大中王庶心迹固可见矣子佃僕以

△薛弼

薛弼字直老温州永嘉人登政和二年进士第调怀州刑曹杭州教授初颁五礼新书释奠先圣误用下丁弼据礼是正诏从其议监左藏东库内侍王道使奴从旁视绢美恶多取之弼白版曹穷治人严惮之靖康初金兵攻汴京李纲定议坚守惟弼意与纲同围解迁光禄寺丞尝言姚平仲不可恃未几而败纲求太原弼言金必再至纲不当去宜先事河北金人果再入始命刑部侍郎宋伯友提举河防弼以点检粮草从之为计划甚切皆不能用乃乞罢归改三门白波犂运寻主管明道宫提举淮东盐事改湖南运判杨么据洞庭【按杨么即杨太楚人谓年少者为么】寇鼎州王■〈王燮〉久不能平更命岳飞讨之么陆耕水战楼船十余丈官军徒仰视不得近飞谋益造大舟弼曰若是则未可以岁月胜矣且彼之所长可避而不可鬪也今大旱湖水落洪若重购舟首勿与战逐筏断江路藁其上流使彼之长坐废而精骑直捣其垒则破坏在目前矣飞曰善兼旬积寇尽平进直秘阁时道殣相望弼以闻帝惻然命振之且使讲求富弼青州荒政民赖以苏除岳飞参谋官飞母死遁于庐山张宗元摄飞事部曲汹汹生异语弼语诸将数言而足除户部郎官再知荆南桃源剧盗伍俊既招安复谋叛提点刑狱万俟卨不能制乃以委弼弼许俊以靖州俊喜曰我得靖则地过桃源远矣俊至则斩以徇迁秘阁

修撰陕西转运使以左司郎官召知虔州移黄州时福州大盗有号管天下伍黑龙满山红之属其众甚盛钤辖李贵为贼所获民作山砦自保守臣莫将议委漳泉汀建募强壮游手各千人为效用与殿司统制张渊同措置未及行诏升弼集英殿修撰与将两易弼至郡漕臣以游手易聚难散恐为他日患闻于朝事下弼议弼谓昔守章贡有武夫周虎臣陈敏者丁壮各数百皆能战视官军可一当十乃奏虎臣为副将敏为巡检选丁壮千人号奇兵日给糗粮责以灭贼凡四年而贼平弼后知广州擢敷文阁待制卒年六十三初秦桧居永嘉弼游其门弼结万俟卨且为桧用屡更事任通籍从官世以此少之

△罗汝楫 【罗愿】

罗汝楫字彦济徽州歙县人登政和二年进士第监登闻鼓院迁大理丞刑部员外郎奏命官犯公罪勿取特旨以终惠臣子又户口凋耗宜少宽养子之禁拜监察御史未踰月迁殿中侍御史与中丞何铸交章论岳飞罢其枢筦又言朱芾李若虚尝为飞议曹主帅有异意而不能谏又言飞狱具寺官聚断咸谓死有余罪寺丞何彦猷李若朴独以众议为非欲从轻典皆坐黜王庶谪道州郡丞孙行俭以官廨居之汝楫劾其无忌惮当斥且令庶徙居刘子羽知镇江上言和好非久远计宜及闲暇为备桧怒风汝楫论罢之尝言国家驻蹕临安淮南不可置度外当重防海之寄守长江之要革窜名赏籍以劝有功迁起居郎兼侍讲兼权中书舍人除右谏议大夫有南雄守奏对言太后之归和议之力也当尽案前言和不便者时相是之骤用为台官中外悚惧多束装待遣汝楫言皆不当罪宜以崇宁事党为戒议遂寝迁御史中丞更侍御史汝楫求去迁吏部尚书充国信使除龙图阁学士知严州秩满请祠居丧未终而卒年七十累赠开府仪同三司子颢吁颢颂愿类愿字端良朱熹特称重之知鄂州以父故不敢入岳飞庙一日姑往祠之甫拜遽卒于像前

△萧振

萧振字德起温州平阳人登政和八年进士第调信州仪曹时州郡奉神霄宫务侈靡振与守议不合会方腊寇东南距信尤近守檄振摄贵溪弋阳二邑又檄振督军饷振治办无阙大将刘光世见而喜之调婺州兵曹兼功曹时振妇翁许景衡以给事中召振祝之曰公至朝幸勿见荐今执政多私其亲愿为时革弊景衡然之时盗贼猖獗婺卒扬言欲叛以应贼官吏震恐振选诸邑士兵强勇者几千人日习武以备蓄异谋者稍惧有一兵官素得军士心守疑而罢之羣卒数百人被甲挺刃斩仪门入振闻即往厉色叱曰车驾南巡大兵咫尺汝速死耶可急释械

当为汝言众拜谢而去尝议城守振请以钱数万缗鸠工板筑未数月城垒屹然荐于朝授婺州教授改秩乞祠以执政荐召对敷奏数事皆中时病拜监察御史明年冬以亲老乞补外章七上不许面奏除提点浙西刑狱寻召为宗正少卿俄擢侍御史振本赵鼎所荐后因秦桧引入台时刘大中与鼎不主和议振遂劾大中以摇鼎大中既出鼎遂罢后振知绍兴府改兵部除徽猷阁待制知湖州陛辞奏曰国家讲和恐失诸将心宜遣使抚逾示以朝廷息兵宽民意虽两国通好战御之备宜勿弛白桧曰宰相如一元气不可有私私则万物为之不生桧不悦振至州桧欲取羨余振遗桧书谓财用在天下如血气之在一身移左以实右则病矣桧属以私事又不克尽从以亲老乞祠提举太平观后知台州海寇势张振至克之二十二年以杨炜狱词供涉镌徽猷待制谪居池州初炜将上书责李光侂秦桧议和时振为侍御史炜见振道书意振然其言及振知台州而炜治邑有声遂荐炜改秩又移书于桧从子秦昌时俾同荐之属吏密语振曰炜尝以书责李参政及太师昌时义不当举待制亦不可举振曰吾业已许之岂可中辍遂因炜狱中供前事而贬明年诏除敷文阁待制知成都府安抚置制使军储适阙仓吏以窘告振奏留对余米八万斛以足军食以其直归总计所总计者利在掊克即先告桧谓振唱为阙乏之语风御史劾振要誉复谪池阳而总计者以潜得蜀帅既而专用罗织掊克其民民益思振 【按建炎以来系年要录载绍兴二十四年秋七月右正言郑仲熊言萧振天资很戾趋向乖僻曩缘赵鼎用事倡为专门之说振阿附之自谓学出程颐初不知颐在先朝固尝见诋于识者如苏轼尤嫉其奸振亦何知乃藉为仕进之梯方台州之罢曾未数月起于谪籍付以四川之权朝廷屡下宽诏有可裕民者俾同诸司措画振为制置使略不关意乃敢言于朝欲以对余军粮八万石截留不发初非真有意于民特出矫情感众以沽一时之誉望赐窜斥以为窃名市私者之戒诏振落职依旧宫观池州居住太府卿总领四川财赋军马钱粮符行中充敷文阁待制四川安抚制置使兼知成都府据此劾振者郑仲熊所谓总计者符行中也又据系年要录称行中既帅蜀以郑霭总领四川财赋军马钱粮霭与行中在蜀中岁时馈遗秦桧不可胜计是行中实与郑霭相为狼狈其竭一路之膏血以媚权奸真全无人心者而郑仲熊希桧指论振诋及程子其人可知宋史未着其姓名兹录系年要录以当补阙】 桧死语得闻帝大感悟亟遣振还成都父老欢呼蜀道振至一切以宽治或问其故振曰承纵弛革之当严今继苛刻非宽则民力瘁矣帝嘉振治行进秩四等加敷文阁学士卒于成

都府治年七十二振两为蜀守威行惠孚死之日民无老稚相与聚哭于道好奖善类端人正士多所交识居濒江自父微时见过客与掌渡者争多溺死振造大舟佣工以济人感其德名其江为萧家渡云子诚忱

钦定续通志卷三百八十一

●钦定续通志卷三百八十二 列传一百八十二

列传

宋 【八十六】

○宋八十六

范如圭	吴表臣	王居正	晏敦复	黄龟年	程瑀
张阐	洪拟	赵逵	张焘		
黄中	孙道夫	曾几	句涛	李弥逊【弥大】	

范如圭

吴表臣

王居正

晏敦复

黄龟年

程瑀

张阐

洪拟

赵逵

张焘

黄中

孙道夫

曾几

句涛

李弥逊

△范如圭

范如圭字伯逵建州建阳人登进士第授左从事郎武安军节度推官始至帅将斩人如圭白其误帅为已署不易也如圭正色曰节下奈何重易一字而轻数人之命帅矍然从之居数月以忧去辟江东安抚司书写机宜文字近臣交荐召试秘书省正字迁校书郎兼史馆校勘秦桧力建和议金使来无所于馆将虚秘书省以处之如圭亟见宰相赵鼎曰秘府谟训所藏可使敌使居之乎鼎竦然为改馆既而金使至议多不可从如圭与同省十余人合议并疏争之既具草骇遽引却者众如圭独以书责桧以

曲学倍师忘讎辱国之罪且曰公不丧心病狂柰何为
此必遗臭万世矣草奏与史官六人上之金归河南地桧方自以为功如圭论对言两京
之版图既入则九庙八陵瞻望咫尺今朝修之使未遣
何以慰神灵萃民志乎帝泫然曰非卿不闻此言即日命判大宗正事士■〈亻 裹〉及
兵部侍郎张焘以行桧以不先白己益怒如圭谒告去
奉柩归葬故乡既窆差主管台州崇道观杜门十余岁起通判邵州又通判荆南府荆南
旧户口数十万寇乱后无复人迹时蠲口钱以安集之
百未还一二也议者希桧意遽谓流庸浸复而增之积逋二十余万缗他负亦数十万版
曹日下书责偿甚急如圭白帅悉奏蠲之桧死被旨入
对语甚切又论东南不举子之俗伤绝人理请举汉胎养令以全活之抑亦句践全聚报
吴之意也帝善其言又奏今屯田之法岁之所获官尽
征之而田卒赐衣廩食如故贪小利失大计谋近效妨远图故久无成功宜籍荆淮旷土
画为邱井仿古助法别为科条则农利修而武备饬矣
以直秘阁提举江西常平茶盐移利州路提点刑狱以病请祠时宗藩并建储位未定道
路窃有异言如圭在远外独深忧之掇至和嘉佑间名
臣奏章凡三十六篇合为一书囊封以献请深考羣言仰师成宪或以越职危之如圭曰
以此获罪奚憾帝感悟谓辅臣曰如圭可为忠矣即日
下诏以普安郡王为皇子进封建王复起如圭知泉州宗官寄治郡中挟势为暴占役禁
兵以百数如圭以法义正之宗官大沮恨密为浸润以
去如圭遂以中旨罢领祠如故僦舍邵武以居士大夫高之卒年五十九如圭所草具屯
田之目数千言未及上张浚视师日奏下其家取之浚
罢亦不果行子念祖念德念兹

△吴表臣

吴表臣字正仲永嘉人登大观三年进士第擢通州司理盛章者朱勔党也尝市婢
有武臣强取之章诬以罪系狱表臣鞫之卒直其事累
官监察御史迁右正言高宗诏台谏条陈大利害表臣请措置上流以长形势安辑淮甸
以立藩蔽择民兵以守险阻集海舶以备不虞其策多
见用乞选讲官以裨圣德且于古今成败民物情伪边防利害详熟讲究由是诏开经筵
迩臣有请用蔡京王黼之党者侍御史沈与求乞明指
其人显行黜责执政不悦夺其言职表臣争曰台谏为天子耳目所以防壅蔽杜奸邪若
咎其切直而黜之后谁敢言请还与求以开言路时防
秋议选守边者患乏才表臣曰唐萧复言于德宗陈少游任兼将相首败臣节韦皋幕府
下僚独建忠义以皋代游镇淮南则天下知逆顺之理
今取忠义不屈有已试之验者不次而用岂特可劝扞御方略亦堪倚仗于是陈敏等十

数人得录用久之以病请补外以直秘阁知信州绍兴元年召为司勋郎中迁左司诏百官陈裕国强兵策表臣条十事以献曰蠲税役以息闲田汰懦卒以省兵费罢添差以澄冗员停度牒以蕃生齿拘佃租以防干没委计臣以制邦用奖有功以厉将帅招弓手以存旧籍严和买以绝弊幸简法令以息疮痍宰相拟表臣为检正帝曰朕将自用之遂除左司谏给事中胡安国以论事不合罢表臣上疏留之前宰相朱胜非同都督江淮军马表臣力言都督不可罢除侍读又累疏争之不听遂罢表臣送吏部授台州黄岩丞寻除提点浙西刑狱召为秘书少监同修哲宗实录帝如建康诏表臣兼留司参议官除中书舍人累迁吏部尚书兼翰林学士时秦桧欲使使金议地界指政事堂曰归来可坐此表臣不答又以议大礼忤意罢去俄起知婺州会大水发常平米振贷以闻郡人德之课最除敷文阁待制三岁请祠进直学士提举江州太平兴国宫家居数年卒年六十七表臣晚号湛然居士自奉无异布衣时乡论推其清约

△王居正

王居正字刚中扬州人入太学时习新经字说者主司辄置高选居正语人曰穷达自有时心之是非可改邪黄齐知贡举置次选调饶州安仁丞荆州教授皆不赴大名镇江两帅交辟教授府学亦不就范宗尹荐于朝谓宗尹曰时危如此公不极所学拔元元涂炭中尚谁待入对言国势日弱敌气日骄昔人于难者勉强为之今以为难不复有所为故也今日虽难于前日安知他日不难于今日盖宣和以为难故有靖康之祸靖康以为难故有今日之忧除太常博士迁礼部员外郎建议合祭天地于明堂请奉太祖太宗配宗尹是之议遂定天地复合祭侍御史沈与求劾宗尹因及居正宗尹去居正乞补外不许抚州守高卫言甘露降于州之祥符观为图以献居正却其图试太常少卿兼修政局参议迁起居郎为集谏十五卷以广帝意诏以事务访羣臣居正献疏数千言论省费尤切曰宋兴百七十三年所行多弥文之事今不知随时以省事而乃随事以省费故今日例有减半之说究其实未始不重费愿诏大臣计百事之实而论定之苟非御寇备敌任贤使能振恤百姓一切姑置则费省而国裕居正素与秦桧善桧为执政与居正论天下事甚锐既相所言皆不酬居正疾其诡见帝言曰秦桧尝语臣共图中兴又自谓使桧为相数月必耸动天下今施設止是愿陛下以臣所闻问桧桧衔之出居正知婺州州贡罗旧制岁万匹崇宁后增五倍建炎中减为二万至是主计者请复崇宁之数居正力言于朝户部督趣愈峻居正置檄不行语其属曰吾

愿身坐不以累诸君呼吏为文书付之曰即有谴以此
自解复手疏五不可以闻诏如建炎中数漕司市御炭须胡桃文鹑鸽色者居正曰民以
炭自业者率居山谷安知所为胡桃文鹑鸽色耶入朝
以闻诏止之召为太常少卿迁起居舍人兼权中书舍人史馆修撰帝欲迁赵令憲居正
以为庶官得迁则宗室为承宣者不旋踵求为节度何
以却之遂寝其命陈东欧阳澈已赠官居正乞重贬黄潜善汪伯彦以彰二子杀身成仁
之美张俊遣卒至彭泽卒故县吏怙俊势侵辱令令郭
彦恭械之俊诉于朝帝为罢彦恭居正言彦恭不畏强御无可罪俊又乞免徭役居正言
兵兴以来士大夫及勋戚家赋役与编户均盖欲贵贱
上下共济国事以宽民力俊反不能体此乎和州请蠲进奉大礼绢居正言大礼进奉乃
臣子享上之诚初非朝廷取于百姓之物若察民力无
所从出不能预降旨蠲之至使州县自陈已为非是乞速如所请除目有自中出者居正
奏近习请托进拟不自朝廷所系非轻因录皇佑诏书
以进帝皆嘉纳兼权直学士院又除兵部侍郎入对以所论王安石父子之言不合于道
者哀得四十二篇名之曰辨学上之又曰陛下恶安石
之学圣心灼见其弊安在帝曰安石之学杂以伯道欲效商鞅富国强兵今日之祸人徒
知蔡京王黼之罪而不知生于安石居正曰安石得罪
万世者不止此因陈安石释经无父无君者帝作色曰是岂不害名教邪孟子所谓邪说
正谓是矣居正退序帝语系于辨学首出知饶州寻改
吉州侍御史谢祖信劾居正凶暴诡诈倾陷大臣罢官屏居括苍三载其弟驾部郎居修
入对帝曰卿兄今安在行大用矣中书舍人刘大中侍
帝论制诰帝曰王居正极得词臣体侍御史萧振论守令贤否帝举居正守婺免贡罗御
炭事曰守臣爱百姓皆如此朕复何忧起知温州是时
桧专国居正自知不为所容以目疾请祠言不及时事桧终忌之风中丞何铸劾居正为
赵鼎汲引欺世盗名夺职奉祠凡十年桧死复故职绍
兴二十一年卒年六十五

△晏敦复

晏敦复字景初丞相殊之曾孙第进士为御史台检法官绍兴初大臣荐召试馆职
不就特命为祠部郎官迁吏部以守法忤吕颐浩出知
贵溪县会有为敦复直其事者改通判临江军召为吏部郎官左司谏权给事中为中书
门下省检正诸房公事淮西宣抚使刘光世请以淮东
私田易淮西田帝许之敦复言光世帅一道未闻为朝廷措置毫发乃先易私亩比者岳
飞属官以私事干朝廷飞请加罪中外称美谓有古贤
将风光世自处必不在飞下乞以臣言示光世且令经理淮南收抚百姓以为定都建康

计中兴有期何患私计之未便权吏部侍郎兼详定一
司敕令渡江后庶事草创凡四选格法多所裁定敦复素刚严居吏部请谒不行铨综平
允除给事中冬至节旨下礼部取度牒四百充赐予敦
复奏兵兴费广凡可助用度者尤当惜矧两宫在远陛下当此令节欲奉一觞为万岁寿
不可得有司乃欲举平时例庆赐乎遂寝有卒失宣帖
得中旨给据太医吴球得旨免试敦复奏一卒之微乃至上渎圣聪医官免试皆坏成法
自崇宁大观以来奸人欺罔临时取旨谓之暗赢指挥
纪纲败坏驯至危乱正蹈前弊不可长也汪伯彦子召嗣除江西监司敦复论伯彦奸庸
误国其子素无才望难任澄清改知袁州又奏召嗣既
不可为监司亦不可为守臣居右省两月论驳凡二十四事议者惮之复为吏部侍郎彗
星见诏求直言敦复奏昔康澄以贤士藏匿四民迁业
上下相徇廉耻道消毁誉乱真直言不闻为深可畏臣尝即其言考已然之事多本于左
右近习及奸邪巧佞转移人主之意臣愿防微杜渐以
助应天之实又论比来百司不肯任责琐屑皆取决朝省事有不当上烦天听者例多取
旨由是宰执所治烦杂不减有司天子听览每及细务
非所以为政愿详其大略其细八年金遣使来要难行之礼诏侍从台谏条奏所宜敦复
言金两遣使直许讲和非畏我而然安知其非诱我也
且谓之屈己则一事既屈必以他事来屈我今所遣使以诏谕为名傥欲陛下易服拜受
又欲分廷抗礼还可从乎苟从其一二则此后可以号
令我小有违异即成衅端社稷存亡皆在其掌握矣时秦桧方力赞屈己之说外议羣起
计虽定而未敢行句龙如渊说桧宜择人为台官使击
去异论则事遂矣于是如渊施庭臣莫将皆据要地人皆骇愕敦复同尚书张焘上疏言
前日句龙如渊以附会和议得中丞今施庭臣又以此
跻横榻众论沸腾方且切齿莫将又以此擢口史夫如渊庭臣皆庸人但知观望将则奸
人也陛下柰何与此辈断国论乎乞加斥逐杜羣枉门
力为自治自强之策既又与焘等入对争之桧使所亲谕敦复曰公能曲从两地旦夕可
至敦复曰吾终不为身计误国家况吾姜桂之性到老
愈辣请勿言桧卒不能屈胡铨之谪也临安府遣人械送贬所敦复往见守臣张澄曰铨
论宰相天下共知祖宗时以言事被谪为开封者必不
如是澄媿谢为追还始桧拜相制下朝士相贺敦复独有忧色曰奸人相矣张致远魏玘
闻之皆以其言为过至是窜铨敦复谓人曰顷言秦之
奸诸君不以为然今方策国便敢尔他日何所不至耶权吏部尚书兼江淮等路经制使
寻请外以宝文阁直学士知衢州提举亳州明道宫闲
居数年卒年七十一敦复静默如不能言立朝论事无所避帝尝谓之曰卿鯁峭敢言可

谓无忝尔祖矣

△黄龟年

黄龟年字德邵福州永福人登崇宁五年进士第调洛州司理参军累官河北西路提举入为太常博士靖康元年除吏部员外郎拜监察御史寻除尚书左司员外郎中书门下检正诸房公事充修政局检讨官乞令检正官察通进司帝从其请时颐浩再相植党倾秦桧引朱胜非奉京词兼侍读恐中书舍人胡安国持录黄不下特令龟年书行议者讥其侵官迁殿中侍御史会边报王伦来归龟年劾桧专主和议沮止恢复植党专权渐不可长书上桧罢并劾桧党王■〈日兔〉王柄王守道皆罢之桧以观文殿大学士提举江州太平观官如故龟年又奏比论桧徇私欺君合正典刑投诸裔土以御魑魅今乃任便居住虽陛下曲全大臣之礼察桧奸状暴露复宠以儒学最上职名俾优游琳馆听其自如律断羣盗必分首从为之从者皆已伏诛独置渠魁可乎又曰臣闻恩莫隆于父子义莫重于君臣不义则后其君不仁则遗其亲君亲既然则何忌惮而不为桧厚貌深情矫言伪行进迫君臣之势阳为面从退恃朋比之奸阴谋沮格上不畏陛下中不畏大臣下不畏天下之议无忌惮如此欺君私己有一即可黜况桧之欺与私显著者乎章凡三上遂褫桧职复上章曰桧行诡而言譎外缩而中邪以巧诈取相位奸回窃国柄收召僉佞蟠结党与陛下以智临而辨之早以刚决而去之速故端人正士举手相庆盖以公天下之同恶耳臣愿陛下发明诏以桧潜慝隐恶暴白于天下使知陛下数易相位真不得已又所以破为臣奸胆庶朋比之风不致复作除太常少卿累迁起居舍人中书舍人兼给事中侍御史常同言龟年阴结大臣致身要地又交结诸将趣操不正罢归司谏詹大方希桧意劾龟年附丽匪人搢绅不齿落职本贯居住卒年六十三龟年微时永福簿李朝旌许妻以女既登第而朝旌已死家贫甚或劝龟年别娶龟年卒娶之任子恩先奏其弟之子人皆义之子衡仕至湖南提举

△程瑀

程瑀字伯■〈宀禹〉饶州浮梁人少有声太学累官至兵部员外郎金人入侵求可使者瑀请往未行会钦宗即位议割三镇命瑀往河东秦桧往河中瑀奏臣愿奉使不愿割地不报至中山诸将已得密谕城守不下瑀与金使王訥俱至燕山还除左正言即言股肱大臣莫肯以身任天下事且论欲慕祖宗而遁追无术欲斥奄宦而宠任益坚欲锄奸恶而薄示典刑欲汰滥缪而苟容侥幸兼听而不能行其言委任而不

能责其效苟且之习复成党与之私寢广最时病之大者帝曰朕非不知此虑有未尽决意行之有失耳瑀曰事固当熟虑然优柔不断实隳事功帝问李纲宣抚两路外议谓何瑀曰金论固以为宜然纲前与大臣议论不合须赖圣明照察其心任之无疑可也复言徐处仁庸俗吴敏昏懦唐恪倾险政事所以不振请尽黜免别选英贤共图大计帝嘉纳之时御史李光言星变帝疑以问瑀对言陛下毋问有无第正心修德则变异可消瑀尝论蔡京罪帝因言吴敏庇京又疑光党京谓瑀曰须卿作文字来瑀辞改屯田郎官谪添监漳州盐税高宗即位召为司封员外郎迁光禄少卿国子司业请祠主管亳州明道宫寻召赴行在疏十事以献除直秘阁提点江东刑狱召为太常少卿迁给事中兼侍讲时建修政局其目曰省费裕国强兵息民瑀条上十四事皆切时务时三卫单弱五军多出盗瑀言李捧崔增辈各将其徒张俊王■〈王燮〉本无兵机今吕颐浩出征捧增辈便可使隶戎行帝因言颐浩熟于军事在外总诸将桧在朝廷庶几内外相应然桧诚实但太执耳瑀曰如求机警能顺旨者极不难得但不诚实则终不可倚帝然之权邦彦除签书枢密院瑀言邦彦五罪疏三上不报求罢除兵部侍郎不拜以敷文阁待制知信州侍御史江公躋左司谏方公孟言瑀不可去复以为给事中久之复命知信州胡安国刘一止言瑀忠信可以备献纳正直可以司风宪不宜去遂复留颐浩荐席益既得旨以御批示后省官瑀曰益为人公岂不知何必用颐浩曰给事不见御批耶瑀曰已见矣公不能执奏乃先示瑀辈欲使不敢论驳耶然益之来非公福也颐浩赧然即劾益瑀未几以言者罢提举亳州明道宫寻复徽猷阁待制知抚州又提举江州太平兴国宫居父母丧服除知严州徙宣州复奉祠俄召赴行在除兵部侍郎兼侍读寻迁翊善论金人入侵未尝一大衄有轻我心岂可保其不背盟宜省费抑末常赋外一毫不取于民民日益厚兵日益强使金人不敢窥为长计帝曰且作十年瑀再拜曰十年之说愿陛下早夜毋忘除兵部尚书桧既主和瑀议论不专以和为是桧忌之改龙图阁学士知信州会大水桧见瑀奏牍谓同列曰尧之洪水不至如是瑀遂称疾提举江州太平兴国宫坐通书李光降朝议大夫卒年六十六瑀在朝无诡随尝为论语说至弋不射宿言孔子不欲阴中人至周公谓鲁公则曰可为流涕洪兴祖序述其意桧以为讥己逐兴祖魏安行侵版京西漕司亦夺安行官籍其家毁版桧死瑀子孙乃免辄云

△张闡

张闡字大猷永嘉人幼力学博涉经史善属文登宣和六年进士第调严州兵曹缘

兼治右狱时方腊作乱闾倡守御计有义士请身督战
既战稍却州将怒付闾治将杀之闾力争曰是士以义请战官军却势不得独前非首奔
者杀之何罪州将意解士得免李回帅江西席益帅湖
南皆辟置幕下羣盗据洞庭官军多西北人不闲水战闾建筑造战舰以大舰为营小舰
出战乘水涸直捣贼巢贼势以衰诸司交荐改秩吏部
以微文沮之闾弗辨求岳祠归厯鄂台二州教授绍兴十年诏侍从各举所知给事中林
待聘以闾闾召对时金人议和归关中地闾首言关中
必争之地愿固守以蔽巴蜀图中原次言监司郡守荐举之弊又乞严禁遏余以济江浙
水患召试馆职除秘书省正字迁校书郎时诸将恃功
迁爵赏有过则姑息又兵布于外禁卫单寡闾上疏极论之后稍进退诸将必当其实且
诏诸道兵以益禁旅皆如闾言十三年迁秘书郎兼国
史院检讨官秦桧每荐台谏必先谕以己意尝谓闾曰秘书久次欲以台中相处何如闾
谢曰丞相见知得老死秘书幸矣桧默然竟罢主管台
州崇道观厯泉衢二州通判二十五年起闾提举两浙路市舶入为御史台检法官升吏
部员外郎孝宗在王邸帝选宫僚谓庄重老成无踰闾
者改命祠部兼建王府赞读三十一年春大雨无麦苗荆浙盗起诏侍从台谏条陈弭灾
御盗之术闾上疏曰和议以来岁有聘币民不堪命臣
愿陛下毋以金人困中国归正人时有遣还之命怨声闻道路臣愿陛下毋使金人得以
甘心州县吏职卑地远渔夺之祸被于编籍臣愿陛下
严赃吏之诛蠲租之令已赦复征宽大之泽例为虚文臣愿陛下申诏令之禁是数者能
次第行之则足以动天地召和气灾异盗贼不足虑也
又言金人入侵宜守要害防海道三边不可无良将督视不可无大帅疏奏帝嘉纳迁将
作监进宗正少卿三十二年孝宗即位闾权工部侍郎
兼侍讲是冬给札侍从台谏条具时务闾上十事当时应诏数十人惟闾与国子司业王
十朋指陈剴切斥权幸无所回隐明日召两人对内殿
帝大加称赏赐酒及御书时进太上皇帝太上皇后册宝工部例进官闾辞隆兴元年真
拜工部侍郎会督府请受萧琦降诏问闾闾请受其降
俄报王师收复灵壁虹县闾虑大将李显忠邵宏渊深入无援奏请益兵殿后已而王师
果失利众论归罪于战闾曰陛下出师受降是也诸将
违节度且无援而败当矫前失安可遽沮锐气帝壮其言益出御前器甲付诸军手诏劳
浚军声复振时数易台谏闾力言之请增广谏员除工
部尚书兼侍读金副元帅赫舍哩志窳以书谕通好所请三事国书岁币之议已定惟割
唐邓海泗未决将遣王之望龙大渊通问而众言纷纷
不已闾谓不与四州乃可通和论议先定乃可遣使朝论黷之帝用真宗故事命经筵官

二员递宿学士院以备顾问闡入对尤数屡引疾乞骸骨帝不忍其去三年闡请益力乃除显谟直学士提举太平兴国宫陞辞帝问所欲言闡奏许和则忘祖宗之讎弃四州则失中原之心遣归正人则伤忠义之气惟陛下毋忘老臣平昔之言其指时事尤諄切帝眷益笃谕以秋凉复召加赐金犀带特许佩鱼居家踰月卒年七十四特赠端明殿学士子叔椿

△洪拟

洪拟字成季一字逸叟镇江丹阳人登进士甲科崇宁中为国子博士宣和中历监察御史迁殿中进侍御史时王黼蔡京更用事拟中立无所附会殿中侍御史许景衡罢拟亦坐送吏部知桂阳军改海州时山东盗起屡攻城拟率兵民坚守建炎闲居母忧以秘书少监召不起终丧为起居郎中书舍人言兵兴累年馈饷悉出于民无屋而责屋税无丁而责丁税不时之须无名之敛殆无虚日所以去而为盗今关中之盗不可急宜求所以弭之江西之盗不可缓宜求所以灭之高宗如越执政议移蹕饶信闲拟上疏力争谓舍四通八达而趋偏方下邑不足以示形势固守御迁给事中吏部尚书言者以拟未尝厯州县以龙图阁待制知温州宣抚使孟庾总师讨闽寇命拟犒师贼平加秩一等召为礼部尚书迁吏部修七司敕令命拟总之金人再攻准诏问攻守之策拟言国势强则战将士勇则战财用足则战我为主彼为客则战陛下移蹕东南前年幸会稽今年幸临安兴王之居未有定义非如高祖在关中光武在河内也以国势论之可言守未可言战时相姑议战以示武实不能战也绍兴三年以天旱地震诏羣臣言事拟奏曰法行公则人乐而气和行之偏则人怨而气乖试以小事论之比者监司守臣献羨余则黜之宣抚司献则受之是行法止及疏远也有自庶僚为侍从者卧家视职未尝入谢遂得美职而去若鼓院官移疾废朝谒则斥罢之是行法止及冗贱也榷酤立法甚严犯者籍家财充赏大官势臣连营列障公行酤卖则不敢问是行法止及孤弱也小事如此推而极之则怨多而和气伤矣寻以言者罢为徽猷阁直学士提举江州太平观始拟兄子驾部郎官兴祖与拟上封事侵在位者故俱罢起知温州提举亳州明道宫卒年七十五谥文宪初拟自海州还居镇江赵万叛兵逼郡守臣赵子崧战败遁去拟挟母出避遇贼至欲兵之拟曰死无所避愿勿惊老母贼舍之他贼又至临以刃拟指其母曰此吾母也幸勿怖之贼又舍去生平朴直端亮为秦桧所忌而能不挠云

△赵逵

赵逵字庄叔其先秦人徙蜀家于资州逵好聚古书考历代兴衰治乱之迹与当代名人巨公出处大节绍兴二十一年对策论君臣父子之情甚切擢第一时秦桧意有所属而逵对独当帝意桧不悦即罢知举王曷授逵左承事郎签书剑南东川帝尝问桧赵逵安在桧以实对久之帝又问除校书郎逵单车赴阙征税者希桧意搜行橐皆书籍才数金而已既就职未尝私谒桧意愈恨逵赓御制芝草诗有皇心未敢晏安图之句桧见之怒曰逵犹以为未太平耶又谓逵曰馆中禄薄能以家来乎逵曰亲老不能涉险远桧徐曰当以百金为助逵唯唯而已又遣所亲申前言讽逵往谢逵不答桧滋怒欲挤之未及而死帝临哭桧还即迁逵著作佐郎兼权吏部员外郎帝如景灵宫秘省起居惟逵一人帝屡目逵即日命引见上殿帝谓曰卿知之乎始终皆朕自擢自卿登第后为大臣沮格久不见卿秦桧日荐士未尝一语及卿以此知卿不附权贵真天子门生也诏充普安郡王府教授逵奏言路久不通乞广赐开纳勿以微贱为闲庶几养成敢言之气帝嘉纳之普安府劝讲至戾太子事王曰于斯时也斩江充自归于武帝何如逵曰此非臣子所能王意盖有所在也二十六年迁著作郎寻除起居郎入谢帝又曰秦桧炎炎不附者惟卿一人逵曰受陛下爵禄而奔走权门臣不惟不敢亦且不忍明年同知贡举尽公考阅以革旧弊遂得王十朋阎安中寻兼给事中未几除中书舍人登第六年而当外制南渡后所未有也帝语王纶曰赵逵纯正可用朕于蜀士未见其比朕所以甫二岁令至此报其不附权贵也先是逵尝荐杜莘老唐文若孙道夫皆蜀名士至是奉诏举士又以冯方刘仪凤李石郟次云应诏宰执以闻帝曰蜀人道远其闲文学行义有用者不因论荐无由得知前此蜀中宦游者多隔绝不得一至朝廷甚可惜也自桧颀权深抑蜀士故帝语及之逵以疾求外卒年四十一逵尝自谓司马温公不近非色不取非财吾虽不肖庶几慕之

△张焘

张焘字子公饶之德兴人秘阁修撰根之子也宣和八年进士第三人尝为秘书省正字靖康元年李纲为亲征行营使辟焘入幕纲贬亲知坐累者十七人焘亦贬建炎初起通判湖州苗刘之乱贼矫诏俾焘抚谕江浙焘不受帝既复辟诏求言焘上书略曰陛下践阼以来号令之发未足以感人心政事之施未足以慰人望夫天下治乱在君子小人用舍而已小人之党日胜则君子之类日退将何以弭乱而图治又言措置江防非计徒费民财损官赋不适于用又言侍从台谏观望意指毛举细务至国家大事坐视不言又言巡幸所至营缮困民越栖会稽似不

如是绍兴二年吕颐浩荐除司勋员外郎迁起居舍人言自古未有不知敌人之情而能胜者愿诏大臣诸将厚爵赏募可任用者往伺敌动静既审知之则战守进退在我皆备彼尚安得出不意侵吾行阙诏以付都督府及沿边诸帅迁中书舍人吕祉之抚谕淮西也焘谓张浚曰祉书生不更军旅何可轻付浚不从遂致郾琼之变七年张浚特赐进士出身浚浚兄也将母至行在帝引对而命之焘言宣和以来奸臣子弟滥得儒科陛下与浚图回大业当以公道革前弊今首赐浚第何以塞公议帝念浚功故有是命著作郎兼起居舍人何抡曰贤良之子宰相之兄赐科第不为过乃与书行焘不自安求去不许言者论之以集英殿修撰提举江州太平观明年以兵部侍郎召诏引对帝曰卿去缘张浚焘曰公论不与臣若不言岂惟负陛下亦负张浚帝因问朕图治一纪收效蔑然其弊安在焘曰自昔有为之君未有不先定规模而能收效者往者进临大江退守吴会未朞月而或进或退岂不为敌所窥乎陛下相与断国论者二三大臣而已一纪之闲十四命相执政递迁无虑二十余日月逝矣大计不容复误愿以先定规模为急寻权吏部尚书徽猷阁待制黎确卒诏赠官推恩焘言确素号正人一旦临变失臣节北面邦昌之庭且为将命止勤王之师今曲加赠恤何以示天下诏追夺职名时金使至境诏欲屈己就和令侍从台谏条上焘言金使之来欲议和好将归我梓宫归我渊圣归我母后归我宗社归我土地人民其意甚美其言甚甘庙堂以为信然而羣臣国人未敢以为信然也臣考人事以验天意陛下飞龙济州天所命也敌骑屡攻行阙不能为虞甲寅一战败敌师丙辰再战却刘豫丁巳郾琼虽叛实为伪齐废灭之资皆天所赞也愿益自修自强以享天心以俟天时今此和议姑为听之而必无信之可恃彼使已及境势难固拒使其果愿和好如前所陈必不复强我以难行之礼如其初无此心二三其说责我以必不可行之礼要我以必不可从之事便当绝之谨边防厉将士相时而动愿断自渊衷母取必于彼但取必于天而已乃若略国家之大耻置宗社之深讎躬率民臣屈膝而臣事之覬和议之必成非臣所敢知也帝览奏愀然变色曰卿言可为忠然朕必不至为彼所给焘顿首谢金使张通古萧哲至行在朝议欲帝拜金诏焘曰陛下信王伦之虚诈发自圣断不复谋议便欲行礼羣臣震惧罔措必已得梓宫已得母后已得宗族始可议通好经久之礼今彼特以通好为说意谓割地讲和而已陛下之所愿欲而切于圣心者无一言及之其情可见柰何遽欲屈而听之一屈之后不可复伸廷臣莫能正救曾鲁仲连之不如岂不获罪于天下万世既而监察御史施廷臣抗章

力赞和议擢为侍御史司农寺丞莫将忽赐第擢为起居郎朝论大骇焘率吏部侍郎晏敦复上疏曰仰惟陛下痛梓宫未还两宫未复不惮屈

己与敌议和特以众论未同故未轻屈幸小大之臣无复异议彼施廷臣乃务迎合辄敢抗章力赞此议姑为一身进用之资不恤君父屈辱之

耻罪不容诛乃由察官起擢柱史前日句龙如渊以附会而得中丞众论固已喧鄙之矣今廷臣又以此而跻横榻莫将者又以此议由侍丞擢

右史如渊廷臣庸人将则奸人此辈乌可与之断国论乎望加斥逐庶几少杜羣枉之门陛下贵重此身无轻于屈于是将廷臣皆不敢拜焘又

面折如渊曰君荐七人皆北面张邦昌今嗷嗷附会堕敌计他日必背君亲矣焘既力诋拜诏之议秦桧患之焘亦自知得罪托疾在告桧使楼

照谕之曰北扉阙人欲以公为直院焘大骇曰果有此言愈不敢出矣桧不能夺乃止和议成范如圭请遣使朝八陵遂命判大宗正士■〈亻 裹〉

与焘偕行且命修奉令荆湖帅臣岳飞济其役焘与士■〈亻 裹〉道武昌出蔡颍河南百姓欢迎夹道曰久隔王化不图今日复为宋民

九年五月至永安诸陵朝谒陵前石涧水久涸二使垂至忽涌溢父老惊叹以为中兴之兆焘等入柏城披鉏荆棘随所葺治留二日而还自郑

州历汴宋宿泗淮南以归即奏疏曰金人之祸上及山陵望修武备俟衅隙起而应之帝问诸陵寝如何焘不对唯言万世不可忘此讎帝默然

【伏读通鉴辑览 御批焘已疏言金人之祸及山陵高宗亦何忍复问设永昌以下诸陵之暴露发掘前此方庭实奉使归尝备言之亦何

待再问或责焘仅浑涵以对不能直陈其状以激动君心不知高宗始闻焘对而默然旋以不容于桧斥使出外即使焘尽情实对高宗亦且付

之无可如何而已又岂能奋发雪恨哉】焘因请永固陵不用金玉大略谓金玉珍宝聚而藏之固足以动人耳目又其为物自当流布于世理

必发露无足恠者又言顷刘豫初废人情恟恟我斥堠不明坐失机会今又闻敌于淮阳作筏造绳索不知安用诸将朝廷戒勿得遣闲探遂不

复遣我之动息敌无不知敌之情状我则不闻又黄河船尽拘北岸悉为敌用往来自若无一人敢北渡者愿饬边吏广耳目先事而防又言郾

琼部伍皆西陲劲兵今在河南尚可收用新疆租赋已蠲而使命络绎推恩费用犹循兵兴时例愿加裁损非甚不得已勿遣使以宽民力又论

陕西诸帅不相下动辄喧争请置一大帅统之庶首尾相应缓急可恃焘所言皆切中时病秦桧方主和惟恐少忤敌意悉置不问成都谋帅帝

谕桧曰张焘可第道远恐其惮行桧以谕焘焘曰君命也焉敢辞十月以宝文阁学士知成都府兼本路安抚使付以便宜陛辞奏曰蜀民困矣

官吏从而诛剥之去朝廷远无所赴愬俟臣至所部首宣德意俾一路咸沾惠泽因言官吏害民者请先罢后劾帝许之又言军兴十余年日不暇给今和议甫定愿汲汲以政刑为先务帝曰当书之座右焘在蜀四年戢贫吏薄租赋抚雅州蕃部西边不惊岁旱则发粟民得不饥暇则修学校与诸生讲论会有诏令宣抚司纳契丹降人焘为宣抚使胡世将言蜀地狭不能容前朝常胜军可为戒世将奏寝其事焘乞祠以李璆代之焘自蜀归卧家凡十有三年二十五年冬桧死旧人在者皆起焘除知建康府兼行宫留守金陵积岁负内库钱帛巨万悉为奏免进端明殿学士二十九年提举万寿观兼侍读以衰疾力辞不许除吏部尚书初帝知普安郡王贤欲建为嗣显仁皇后意未欲迟回久之显仁崩帝问焘方今大计焘曰储贰者国之本也天下大计无踰于此帝曰卿言契朕心又劝帝省赐予罢土木减冗吏止北货上嘉奖之金使施宜生来焘奉诏馆客宜生本闽人素闻焘名一见顾副使曰是南朝不拜诏者焘以首邱桑梓动之宜生于是漏敌情焘密奏早为备先是御前置甲库凡乘輿所需图画什物有司不能供者悉聚焉日费不貲禁中既有内酒库酿殊胜酤卖其余颇侵大庆焘因对言甲库萃工巧以荡上心酒库酤良酝以夺官课且乞罢减教坊乐工人数悉诏罢之屡以衰疾乞骸三十年以资政殿学士致仕寻迁太中大夫三十一年八月落职致仕复知建康府时金人窥江建业民惊徙过半闻焘至人情稍安寻诏沿江帅臣条上恢复事宜焘首陈十事大率欲预备不虞持重养威观衅而动期于必胜孝宗受禅除同知枢密院遣子埏入辞诏肩輿至宫给扶上殿首问为治之要言内治乃可外攘又乞命百执条弊事诏从之隆兴元年迁参知政事以老病不拜台谏交章留之除资政殿大学士提举万寿观兼侍读谒告将理许之及家固求致仕后二年卒年七十五谥忠定焘外和内刚帅蜀有惠政民祠之不忘其缴驳施廷臣之奏朝野归重焉

△黄中

黄中字通老邵武人初以族祖荫补官绍兴五年廷试言孝弟动上心擢进士第三人授保宁军节度推官二十余年秦桧死乃召为校书郎迁普安恩平府教授中在王府时龙大渊已亲幸后他教授多蒙其力中独不徙官迁司封员外郎兼国子司业芝草生武成庙官吏请以闻中不答官吏阴画图以献宰相谓祭酒周绾与中曰治世之瑞抑而不奏何耶绾未对中曰治世何用此为绾退谓人曰黄司业之言精切简当惜不为谏官充贺金生辰使还为秘书少监寻除起居郎累迁权礼部侍郎中使金回言其治汴宫必徙居见迫宜早为计上矍然宰相顾谓中

曰沈介归殊不闻此何耶居数日中白宰相请以妄言待罪汤思退怒语侵中已乃除介吏部侍郎徙中以补其处中犹以备边为言又不听遂请补外帝不许曰黄中恬退有守除左史且锡鞍马金使贺天申节遽以钦宗讣闻朝论俟使去发丧中驰白宰相此国家大事臣子至痛一有失礼谓天下后世何竟得如礼中自使还每进见辄言边事又独陈御备方略高宗称善不数月海陵已拥众渡淮中因入谢论淮西将士不用命请择大臣督师既而以殿帅杨存中为御营使中率同列力论不可遣敌既临江朝臣争遣家逃匿中独晏然比敌退唯中与陈康伯家属在城中众惭服天申节上寿议者以钦宗服除当举乐中言钦宗未葬不可作乐事竟寝兼给事中内侍迁官不应法谏官刘度坐论近习龙大渊忤旨补郡已复罢之中皆不书牒羣小相与媒蘖中罢去尹穉希意诋中为张浚党干道改元中年适七十即告老以集英殿修撰致仕进敷文阁待制居六年召为兵部尚书兼侍读中前在礼部尝谏止作乐事中去卒用之至是又将锡宴遂奏申前说诏遣范成大使金以山陵为请中言陛下圣孝及此天下幸甚然钦庙梓宫置不问有所未尽上善其言不能用未几岁有归志乃陈十要道以为用人而不自用以公议进退人才察邪正广言路核事实节用度择监司惩贪吏陈方略考兵籍帝亟称善中力求去除显谟阁提举江州太平兴国宫赐犀带香茗除龙图阁学士致仕其后帝手书遣使访朝政阙失进职端明殿学士属疾手草遗表犹以山陵钦宗梓宫为言深以人主之职不可假之左右为戒淳熙七年八月庚寅卒年八十有五诏赠正议大夫谥简肃

△孙道夫

孙道夫字太冲眉州丹棱人年十八贡辟雍时禁元佑学坐收苏氏文除籍再贡入优等张浚荐于高宗召对道夫奏愿修德以回天意定都以系人心任贤材图兴复以雪国耻帝在越浚遣道夫奏事赐出身改左承奉郎再诏对言汉中前瞰三秦后蔽巴蜀孔明蒋琬出图关辅未有不屯汉中者今欲进兵陕右当先经营汉中荆南东连吴会北通汉沔号用武之国晋宋以来尝倚为重镇武帝亦以荆南居上流故以诸子居之今守江当先措置荆南时至则蜀汉师出秦关荆楚师出宛洛陛下亲御六军由淮甸与诸将会咸阳孰能御之帝嘉纳召试馆职除秘书正字权礼部郎官徽宗凶问礼仪多所草定寻权左司员外郎帝问蜀中水运陆运孰便道夫奏水运迟而省费陆运速而劳民宣抚司初由水运率石费钱十千后以为缓从陆起丁夫十数万率石费钱五十余千帝曰水运便行之迁校书郎出知怀安军乞罢都运司以宽民力罢戍兵

以弭乱阶罢泛使以省浮费知资州宣抚郑刚中荐其治行第一移知蜀州盗不敢入境州产绫先是守以军匠置机买丝亏直民疾之道夫断其机遇事明了人目为水晶灯笼九年不迁盖非秦桧所乐也以吏部郎中入对言蜀民二税盐酒茶额之弊帝纳其言除太常少卿假礼部侍郎充贺金正旦使还擢权礼部侍郎兼侍讲奏敌有窥江淮意帝曰朝廷待之甚厚彼以何名为兵端道夫曰彼弑其父兄而夺其位兴兵岂问有名臣愿预为之图汤思退沈该不以为然道夫每进对辄言武事该疑其引用张浚忌之道夫不自安请出除知绵州 【按建炎系年要录内载权礼部侍郎兼侍讲孙道夫罢为右文殿修撰知绵州道夫数言武事沈该虑其引用张浚故出之据此则道夫之出不因自请也】 致仕卒年六十六道夫居官一意为民不可干以私仕宦三十年俸给多置书籍性刚直喜面折不容人短人以此多不合云

△曾几

曾几字吉甫其先赣州人徙河南府幼有识度事亲孝入太学有声赐上舍出身擢国子正迁辟雍博士除校书郎久之为应天少尹庭无留讼阍人得旨取金而无文书府尹徐处仁与之几力争不得靖康初提举淮东茶盐高宗即位改提举湖北江西浙西提刑会兄开为礼部侍郎与秦桧力争和议桧怒开去几亦罢逾月除广西转运副使徙京南路盗骆科起郴之宜章郴桂皆瀕洞宣抚司调兵未至谩以捷闻几疏其实朝廷遣他将平之请祠得崇道观侨居上饶七年桧死起为浙西提刑知台州治尚清净民安之黄岩令受贿为两吏所持令械吏寘狱一夕皆死几诘其罪或曰令丞相沈该客也治之益急贺允中荐召对以疾辞除直秘阁归故治未几复召对几言士气久不振陛下欲起之于一朝矫枉者必过直若卖直干誉者愿加优容时帝惩桧擅权之弊方开言路应诏者众几惧有获戾者先事陈之帝大悦授秘书少监几承平时已为馆职去三十八年而复至每会同舍多谈前辈言行台阁典章荐绅推重焉诏修神宗宝训书成权礼部侍郎兄楸开皆尝贰春官几复为之人以为荣吴越大水地震几举唐贞元故事反复论奏帝韪其言他日谓几曰前所进陆贽事甚切已遣漕臣振济矣引年请告帝留之提举玉隆观除集英殿修撰又三年升敷文阁待制金兵来中外大震帝召杨存中偕宰执对便殿谕以将散百官浮海避之左仆射陈康伯持不可存中言敌空国远来已闯淮甸此正贤智驰鹜不足之时臣愿率先将士从师死敌帝喜遂定议亲征有欲遣使诣敌求缓师者几疏言增币请和有大害为朝廷计正当尝胆枕戈且前日诏诸将传檄数金君臣之过何事可与之和耶

帝壮之孝宗受禅几又上疏数千言将召屡请老乃迁

通奉大夫致仕擢其子逮为浙西提刑以便养干道二年卒年八十二谥文清二子逢

曾开

曾开

开字天游少好学善属文崇宁闲登进士第调真州司户累迁国子司业擢起居舍人
人权中书舍人掖垣草制多所论驳忤时相意左迁太常少卿责监大监盐井匹马之官不以自卑召还监杭州市易务除直秘阁知和州恩
州复为中书舍人罢提举洞霄宫钦宗即位除显谟阁待制知颍昌府兼京西安抚使夺职奉祠建炎初复知潭州历湖南安抚使广东经略安
抚使奉诏驻潮阳招捕虔寇讫事乃之镇尽平羣盗提举太平观复以中书舍人召首论自古兴衰拨乱愿讲明大计使议论一定断而不行车
驾抚巡东南重兵所聚限以大江敌未易扰其所窥伺者全蜀愿择重臣与吴玠协力固护进宝文阁待制知镇江府兼沿江安抚使召为刑部
侍郎言畿甸屯营倍于天下周庐宿卫领以三衙今禁旅单弱愿参旧制增补帝悉嘉纳迁礼部侍郎兼直学士院时秦桧专主和议开当草国
书辨视体制非是论之不听遂请罢改兼侍读桧尝招开慰以温言且曰主上虚执政以待开曰儒者所争在义苟为非义高爵厚禄弗顾愿闻
所以事故之礼桧曰若高丽之于本朝耳开曰主上圣德臣民推戴公当强兵富国尊主庇民柰何自卑辱至此又引古谊以折之桧大怒曰侍
郎知故事桧独不知耶他日开又至政事堂问计桧执如初诏侍从台谏集议开复上疏争之桧曰此事大系安危开曰今日不当说安危只当
论存亡桧矍然会枢密编修胡铨上封事痛诋桧极称开由是罢以宝文阁待制知婺州旋议夺职同列以为不可提举太平观知徽州以病免
居闲十余年黄达如请籍和议同异为士大夫升黜即擢达如监察御史首劾开褫职复秘阁修撰卒年七十一桧死始复待制云

△句涛

句涛字景山成都新繁人登崇宁二年进士第调嘉州法掾川陕铸钱司属官建炎初通判黔州田佑恭兵道境上涛白守燕劳之佑恭感
厉郡得无犯湖湘贼王辟破秭归桑仲郭守忠攻茶务箭窠砦将犯夔门夔兵素单弱宣司檄佑恭捍御涛帅黔兵佐之贼溃去宣抚张浚奏涛
知巴州不赴翰林侍读学士范冲荐召见论五事除兵部郎中七年迁右司郎官兼校正日食上言八月迁起居舍人兼权中书舍人时沿边久
宿兵江浙罢于馈饷荆襄淮楚多旷土涛因进羊祜屯田故事事下诸大将于是边方议行屯田淮西都统制刘光世乞罢丞相张浚欲以吕祉

代之涛谓莫若就择将士素所推服者用之否则刘锜可浚不纳祉至果以轻易失士心未几郾琼叛祉死乱时帝驻蹕欲亟还临安涛入见曰今江淮列戍十余万苟付托得人可无忧顾适此危疑詎宜轻退以启敌心因荐刘锜帝即命以其众镇合肥川陕宣抚使吴玠言都转运使李迨腴刻赏格迨亦奏玠苛费帝以问涛涛曰玠功在西蜀纵费寔可琐核第移迨他路可尔帝然之会金人废刘豫金房镇抚使郭浩遣其弟沔奏事涛察沔警敏可任乞诏谕陕右诸叛将乘机南归帝命涛草诏沔持以往除中书舍人八年除史馆修撰重修哲宗实录帝谕之曰昭慈圣献皇后病革朕流涕问所欲言后怆然谓朕曰吾逮事宣仁圣烈皇后见其任贤使能约己便民忧勤宗社疏远外家古今母后无与为比不幸奸邪罔上史官蔡卞等同恶相济造谤史以损圣德其以笔属正官亟从删削以信来世朕痛念遗训未尝一日辄忘今以命卿六月实录成进一秩就馆赐宴复修徽宗实录涛以中书舍人吕本中荐丞相赵鼎谕旨宜婉辞纪载涛曰崇寔大观大臣误国以稔今祸藉有隐讳如天下野史何七月除给事中求去以徽猷阁待制知池州改提举江州太平观俄除荆湖北路安抚使知潭州秦桧尝令人谕意欲与共政涛以书谢之桧遂讽言官论劾涛上书论时事之害政者大臣密谕王伦变易地界一也蔡攸之妻近居临平咫尺行都略不畏避二也小大之臣凡在谪籍皆已甄叙恶如京黼尚蒙宽宥今侍从之臣初无大过理宜牵复三也河南故地复归中国新附之民延颈德泽承流之寄当加精选四也台谏为耳目之司今宰相引援皆同舍之旧倚为鹰犬五也帝叹其忠直赐以缙彩茶药且令事有大于此者悉以闻秩满提举太平观十一年帝谓秦桧曰句涛久闲性喜泉石可进职与一山水近郡桧对永嘉有天台雁荡之胜帝曰永嘉太远其以湖州命之俄以疾卒年五十九帝悼惜之赠左大中大夫涛以忠亮自许国有大议帝必委心延访往复酬诘料边情如在目前知名之士多所荐进

△李弥逊

李弥逊字似之苏州吴县人弱冠以上舍登大观三年第调单州司户再调阳谷簿政和四年除国朝会要所检阅文字特迁校书郎充编修六典校阅累官起居郎以封事剴切贬知卢山县改奉嵩山祠废斥隐居者八载宣和末知冀州金人侵河朔诸郡皆警备弥逊捐金帛致勇士修城堞决河护堑邀击其游骑斩首甚众乌珠北还戒师毋犯其城靖康元年召为卫尉少卿出知瑞州二年建康府牙校周德叛杀官吏弥逊以江东判运领郡事单骑扣贼闾以蜡书射城中招降贼通欵开关迎之弥逊谕以祸

福勉使勤王时李纲行次建康共谋诛首恶五十人抚
其余党一郡帖然改淮南运副后奉兴国宫祠知饶州召对首奏当坚定规模排斥奸言
又谓朝廷一日无事幸一日之安一月无事幸一月之
安欲求终岁之安已不可得况能定天下大计乎帝嘉其说直辅臣有不悦者以直宝文
阁知吉州绍兴七年迁起居郎弥逊自政和末以上封
事得贬垂二十年及复居是职直前论事鲠切如初试中书舍人奏六事曰固藩维以御
外侮严禁卫以尊朝廷练兵以壮国势节用以备军食
收民心以固根本择守帅以责实效试户部侍郎秦桧再相惟弥逊与吏部侍郎晏敦复
有忧色八年弥逊上疏乞外甚力诏不允赵鼎罢相桧
专国赞帝通和金国遣乌凌阿思谋等入界索礼军民皆不平桧要帝屈己从和枢密院
编修官胡铨上疏乞斩桧校书郎范如圭以书责桧曲
学背师忘讎辱国礼部侍郎曾开抗声引古谊以折桧相继贬逐弥逊请对言金使之请
和欲行君臣之礼有大不可帝以为然诏廷臣集议即
日入奏弥逊言陛下受金人空言未有一毫之得乃欲轻祖宗之付托屈身委命自同下
国而尊奉之倒持太阿授人以柄危国之道而谓之和
可乎借使金人姑从吾欲假以目前之安异时无厌之求从之则害吾社稷之计不从则
衅端复开是今日徒有屈身之辱而后患未已又言陛
下率国人以事金将何以作天下忠臣义士之气力陈不可者二桧尝邀弥逊至私第曰
政府方虚员苟和好无异议当以两地相浼荷曰弥逊
受国恩深厚何敢见利忘义今日之事国人皆不以为然独有一去可报桧默然次日弥
逊再上疏言愈切直又言送伴使揣摩迎合不恤社稷
乞别选忠信之人协济国事桧大怒弥逊引疾帝谕大臣留之时和议已决附会其说者
议论靡然九年春再上疏乞归田以徽猷阁直学士知
端州改知漳州十年归隐连江西山是岁乌珠分四道入侵明年又侵淮西取寿春竟如
弥逊之言十二年金兵既败桧收诸路兵复通和好追
仇向者尽言之臣曠言者论弥逊与赵鼎王庶曾开四人同沮和议于是弥逊落职十余
年闲不通时相书不请磨勘不乞任子不序封爵以终
其身二十三年卒诏复敷文阁待制

李弥大

李弥大

弥大字似矩登崇宁三年进士第以大臣荐召对除校书郎迁监察御史假太常少
卿充契丹贺正旦使迁起居郎试中书舍人同修国史
童贯宣抚永兴走马承受白锏恃贯不报师期朝廷止从薄责弥大为缴奏以为边报不
至非朝廷福锏坐除名弥大亦出知光州移知鄂州召

为给事中兼校正御前文籍详定官拜礼部侍郎金人大举入侵李纲定城守之策命弥大为参议与纲不合罢未几除刑部尚书初朝廷许割三镇畀金人既而遣种师道师中援河北姚古援河东弥大上疏乞起河东西境麟府诸郡及陕西兵以济古之师起河东路及京东近郡兵以济师道师中之师为腹背攻劫之图遂除弥大河东宣抚副使张师正领胜捷军败于河东溃归弥大诛之复遣余卒援真定余卒叛宣抚罢命弥大知陕州河东破小将李彦先来谒言军事弥大壮之留为将戍崤澠闲以遏敌诏遣使召援弥大未敢进会永兴帅范致虚亂兵勤王檄弥大充诸道计议行至方城道阻乃率众赴大元帅府建炎元年除知淮甯府到郡未几杜用等夜叛弥大縋城出贼散乃还坐贬秩寻召为吏部侍郎帝如杭州命权绍兴府试户部尚书兼侍读吕颐浩视师以弥大为参谋官弥大奏王导谢安为都督未尝离朝廷今边圉幸无他颐浩不宜轻动又言己为天子从官非宰相可辟乞于诸军悉置军正如汉朝故事以察官郎官为之陛下必欲留臣当别为一司伺察颐浩过失忤旨出知平江府中丞沈与求劾弥大谋闲君臣妄自尊大夺职归起知静江府奏广西边防利害入为工部尚书未几罢去广西提刑韩璜劾其在静江日断强盗死罪引绞入斩贬两秩绍兴十年卒年六十一

钦定续通志卷三百八十二

●钦定续通志卷三百八十三

列传

宋【八十七】

○宋八十七

陈俊卿 虞允文 辛次膺

陈俊卿

虞允文

辛次膺

△陈俊卿

陈俊卿字应求兴化人绍兴八年登进士第授泉州观察推官服勤职业同僚宴集恒谢不往一日郡中失火守汪藻走视之诸掾属方饮某所俊卿輿卒亦假之行于是例以后至被诘俊卿唯唯称谢已而知其实问故俊卿曰某不能止同僚之行又资其仆安得为无过时公方盛怒其忍幸自解重人之罪乎藻叹服秩满秦桧当国察其不附己以为南外睦宗院教授寻添通判南剑州未上而桧死乃以校书郎召孝宗时为普安郡王高宗命择端厚静重者辅导之除著作佐郎兼王府教授讲经辄寓规戒王

好鞠戏因诵韩愈谏张建封书以讽王敬纳之累迁监
察御史殿中侍御史首言人主以兼听为美必本至公人臣以不欺为忠必达大体御下
之道恩威并施抑骄将作士气则纪纲正而号令行矣
遂劾韩仲通本以狱事附桧冤陷无辜桧党尽逐而仲通独全刘宝总戎京口恣掎克且
拒命不分戍二人遂抵罪汤思退专政俊卿言冬日无
云而雷宰相上不当天心下不厌人望诏罢思退又疏言张浚忠荩白首不渝谗者言其
阴有异志夫浚忠义有素反是则人将去之谁复与为
变乎疏入未报因请对力言之上始悟数月以浚守建康又言内侍张去为阴沮用兵且
陈避敌计摇成算请按军法帝曰卿可谓仁者之勇除
权兵部侍郎金海陵渡淮俊卿受诏整浙西水军李宝因之遂有胶西之捷海陵被弑诏
俊卿治淮东堡砦屯田所过安辑流亡金世宗新立申
旧好廷臣多附和议俊卿奏和戎本非不得已若以得故疆为实利得之未必能守是亦虚
文而已今不若先正名名正则国威强岁币可损因陈
选将练兵屯田减租之策择文臣有胆略者为参佐俾察军政习戎务以储将材孝宗受
禅言为国之要有三用人赏功罚罪行之以至公愿留
圣意迁中书舍人时孝宗志在兴复方以阍外事属张浚以俊卿忠义沉静有谋以本职
充江淮宣抚判官兼权建康府事奏曰吴璘孤军深入
敌悉众拒战久不决危道也两淮事势已急盍分遣舟师直捣山东彼必还师自救而璘
得乘胜定关中我及其未至溃其腹心此不世之功也
会主和议方坚诏璘班师亦召俊卿奏陈十事定规模振纪纲励风俗明赏罚重名器遵
祖宗之法蠲无名之赋隆兴初元建都督府俊卿除礼
部侍郎参赞军事张浚初谋大举北伐俊卿以为未可会谍报敌聚粮边地诸将以为秋
必至宜先其未动举兵浚乃请于朝出师已而邵宏渊
果以兵溃俊卿退保扬州主和议者幸其败横议摇之浚上疏待罪俊卿亦乞从坐诏贬
两秩谏臣尹穉附思退议罢浚都督改宣抚使治扬州
俊卿奏浚果不可用别属贤将若欲责其后劾降官示罚古法也今削都督重权置扬州
死地如有奏请台谏沮之人情解体尚何后劾之图议
者但知恶浚而欲杀之不复为宗社计愿下诏戒中外协济使浚自劾疏再上帝悟即命
浚都督且召为相卒为思退穉所挤遣视师江淮俊卿
累章请罪以宝文阁待制知泉州请祠提举太平兴国宫思退既窜太学诸生伏阙下乞
召俊卿干道元年入对因极论朋党之弊除吏部侍郎
同修国史论人才当以气节为主气节者小有过当容之邪佞者纵有才当察之钱端礼
起戚里为参政窥相位甚急馆阁之士上疏斥之端礼
遣客密告俊卿已即相当引共政俊卿深拒不听翼日进读宝训适及外戚因言本朝家

法外戚不预政有深意陛下宜谨守帝首肯端礼憾之
知建康府逾年授吏部尚书时上未能屏鞠戏将游猎白石俊卿引汉桓灵唐敬穆及司
马相如之言力以为戒帝喜曰备见忠谏受诏馆金使
遂拜同知枢密院事时曾觐龙大渊怙旧恩窃威福士大夫颇出其门及俊卿馆伴大渊
副之公见外不交一语大渊纳谒亦谢不接洪迈白俊
卿人言郑闻除右史某当除某官信乎诘所从迈以渊觐告具以迈语质于帝帝曰朕曷
尝谋及此辈必窃听得之遂出渊觐中外称快金移文
边吏取前所俘俊卿请报以誓书云俘虏叛亡是两事俘虏发已多叛亡不应遣且本朝
两淮民上国俘虏亡虑数万本朝未尝以为言恐坏和
议使两境民不安镇江军帅戚方刻削军士俊卿奏内臣中有主方者当并惩之即诏罢
方以内侍陈瑶李宗回付大理究赃状十一月当郊而
雷帝内出手诏戒饬大臣叶颙魏■（木巳）坐罢俊卿参知政事时四明献银矿将召
冶工即禁中鍛之俊卿奏不务帝王之大而屑屑有司
之细恐为有识所窥从官梁克家莫济俱求补外俊卿奏二人皆贤其去可惜于是奏减
福建钞盐罢江西和余广西折米盐钱蠲诸道宿逋金
谷钱帛以巨万计政事稍归中书矣龙大渊死帝怜曾觐欲召之俊卿曰自出此两人中
外莫不称颂今复召必大失天下望臣请先罢遂不召
殿前指挥使王琪被旨按视两淮城壁还荐和州教授刘甄夫得召俊卿言琪荐兵将官
乃其职教官有才何预琪事会扬州奏琪传旨增筑城
已讫事俊卿请于帝未尝有是命俊卿曰若诈传上旨非小故奏言人主万几岂能尽防
闲所恃者纪纲号令赏罚耳不诛琪何所不为琪削秩
罢官先是禁中密旨直下诸军宰相多不预闻俊卿奏自今百司承御笔处分事须奏审
方行从之同知枢密院事刘琪进对争辨激切忤旨手
诏除琪端明殿学士奉外祠俊卿密奏即日奏札臣实草定以为有罪臣当先罢琪之除
命未敢奉诏陛下即位以来纳谏净体大臣皆盛德事
今琪以小事获罪恐自此大臣皆阿顺持禄非国家福帝悔久之命琪帅江西四年十月
制授尚书右仆射同中书门下平章事兼枢密使俊卿
以用人为己任所除吏皆一时选奖廉退抑奔竞或才可用而资历浅密荐于帝未尝语
人每接朝士及牧守自远至必问以时政得失人才贤
否虞允文宣抚四川俊卿荐其才堪相五年正月帝召允文为枢密使至则以为右相俊
卿为左相允文建议遣使金以陵寝为请俊卿面陈复
手疏以为未可五月帝以躬弩弦断伤目六月始御便殿俊卿疏曰陛下于骑射之末未
忘志图恢复故俯而从事以阅武备激士气耳愿任智
谋明赏罚恢信义则英声义烈不越尊俎固已震敌人于万里之远岂待区区骑射于百

步间哉愿以今日之事永为后戒 【伏读通鉴辑览

御批射为六艺之一习射固所不废处承平之日已当安不忘危况在偏安僻处之际乎孝宗留意驰射尚属志足有为或可藉此以先劳厉众然亦何至弩弦伤目亦可谓无能之甚矣而俊卿遂有当永为后戒之辞尔时君若臣之设施若此何怪其终不能恢复中原乎】 曾觐官满当代俊卿预请处以浙东总管帝曰觐意似不欲为此官俊卿曰前此陛下去二人公论甚愜愿捐私恩伸公议觐怏怏而去枢密承旨张说为亲戚求官惮俊卿不敢言会在告请于允文得之俊卿闻敕已出语吏留之说皇恐来谢允文亦愧犹为之请俊卿竟不与说深憾之吏部尚书汪应辰与允文不合上疏求去俊卿数奏应辰刚毅正直可为执政帝初然之后竟出应辰守平江自是帝意乡允文而俊卿亦数求去明年允文复申陵寝之议帝手札谕俊卿俊卿奏陛下痛念祖宗思复故疆臣虽疲弩岂不知激昂仰赞圣谟然于大事欲计其万全俟一二年间吾之事力稍充乃可不敢迎合意指误国事即请去以观文殿大学士帅福州陛辞犹劝帝远佞亲贤修政攘敌泛使未可轻遣既去允文卒遣使终不得要领曾觐亦召还建节钺躋保傅而士大夫莫敢言俊卿至福州政尚宽厚严于治盗海道晏清以功进秩转运判官陈峴建议改行钞盐法俊卿移书宰执极言福建盐法与淮浙异遂不果行明年请祠提举洞霄宫归第弊屋数楹怡然不介意淳熙二年再命知福州累章告归除特进起判建康府兼江东安抚召对垂拱殿因言将帅当由公选臣闻诸将多以贿得曾觐王抃招权纳贿进人皆以中批行之赃吏已经结勘而内批改正将何所劝惩帝曰卿言甚当朝辞奏曰去国十年见都城谷贱人安惟士大夫风俗大变士大夫奔觐抃之门公然趋附十已七八无复顾忌人材进退由私门大非朝廷美事帝曰抃则不敢觐虽时或有请朕多抑之自今不复从矣俊卿曰此曹声势既长侍从台谏多出其门毋敢为陛下言臣恐坏朝廷纪纲废有司法度败天下风俗累陛下圣德命二府饮钱浙江亭俊卿去建康十五年父老喜其再来为政宽简罢无名之赋时御前多行白札用左右私人持送俊卿奏非便帝手札奖谕除少保判建康府如故八上章告老以少师魏国公致仕十三年十一月卒年七十四赠太保命本路转运司给葬事赐谥正献子五人必有志于学终承奉郎自有传

△虞允文

虞允文字彬甫隆州仁寿人父祺登政和进士第仕至太常博士潼川路转运判官允文以父任入官丁母忧哀毁骨立念父之鰥且疾跬

步不忍离左右父死绍兴二十三年始登进士第通判彭州权知黎州渠州秦桧当国蜀士多屏弃桧死高宗欲收用之中书舍人赵逵首荐允文召对论士风之弊且极论四川财赋科纳之弊帝嘉纳之除秘书丞累迁礼部郎官金海陵修汴有南侵意允文上疏言金必败盟兵出有五道愿诏大臣豫思备御时三十年正月也十月借工部尚书充贺正使允文见运粮造舟者多辞归海陵曰我将看花洛阳允文还奏所见及海陵语申言淮海之备除中书舍人直学士院三衙管军以宦寺充承受允文言自古人主大权不移于奸臣则落于近幸秦桧盗权十有八年桧死权归陛下迩来三衙交结中官宣和明受厥鉴未远帝大悟立罢之金使王全高景山来贺生辰口传海陵语又得淮南地索将相大臣议事于是召三衙大将赵密等议举兵侍从台谏集议宰臣陈康伯传帝旨今日更不问和与守直问战当如何遣成闵为京湖制置使将禁卫五万御襄汉上疏允文曰兵来不除道敌为虚声以分我兵成其出淮奸谋尔不听卒遣闵七月海陵徙汴允文复语康伯闵军约程在江池宜令到池者驻池到江者驻江若敌兵出上流则荆湖之军捍于前江池之军援于后若出淮西则池之军出巢县江州军出无为可为淮西援是一军而两用之康伯然其说而闵军竟屯武昌九月海陵命李通为都督督造浮梁于淮水上海陵自将兵号百万毡帐相望钲鼓之声不绝十月自涡口渡淮先是刘锜措置淮东王权措置淮西至是权首弃庐州锜亦回扬州中外震恐陈康伯力赞亲征是月枢臣叶义问督江淮军允文参谋军事权自知州遁归锜回镇江尽失两淮矣十一月海陵率军临采石而别以兵争瓜洲朝命成闵代锜李显忠代权锜权皆召义问命允文往芜湖趣显忠交权军且犒师采石时权军犹在采石允文至采石权已去显忠未来敌骑充斥权败兵三五星散允文谓坐待显忠则误国事遂立招诸将勉以忠义曰金帛诰命皆在此待有功众曰今既有主请死战或曰公受命犒师不受命督战他人坏之公任其咎乎允文叱之曰危及社稷吾将安避至江滨见江北已筑高台对植绛旗二绣旗二中建黄屋海陵踞坐其下谍者言前一日刑白黑马祭天与众盟以明日济江晨炊玉麟堂先济者予黄金一两时敌兵实四十万马倍之宋军纔一万八千允文乃命诸将列大阵不动分戈船为五其二并东西岸而行其一驻中流藏精兵待战其二藏小港备不测部分甫毕敌已大呼海陵操小红旗麾数百艘绝江而来瞬息抵南岸者七十艘直薄宋军军小却允文入阵中抚时俊之背曰汝胆略闻四方立阵后则儿女子尔俊即挥双刀出土殊死战中流官军亦以海鳅船冲敌舟皆平沉敌半死半

战日暮未退会有溃军自光州至允文授以旗鼓从山后转出敌疑援兵至始遁又命劲弓尾击退射大败之僵尸凡四千余杀万户二人俘千户五人又获五百余人敌兵不死于江者海陵悉敲杀之怒其不出江也以捷闻犒将士谓之曰敌今败明必复来夜半部分诸将分海舟縋上流别遣兵截杨林口敌果至因夹击之复大战焚其舟三百始遁去再以捷闻既而敌遣伪诏来谕王权似有宿约允文曰此反间也仍复书言权已置宪典新将李世辅也愿一战以决雌雄海陵得书大怒遂焚龙凤车斩梁汉臣及造舟者二人乃趋瓜洲汉臣教海陵济江者也显忠至自芜湖允文语之曰敌入扬州必与瓜洲兵合京口无备我当往公能分兵相助乎显忠分李捧军万六千往京口叶义问亦命杨存中将所部来会允文还建康即上疏言敌败于采石将徼幸于瓜洲今我精兵聚京口持重待之可一战而胜乞少缓六飞之发至京口敌屯重兵滁河造三闸储水深数尺塞瓜洲口时杨存中成闵邵宏渊诸军皆聚京口不下二十万惟海鳅船不满百戈船半之允文谓遇风则使战船无风则使战舰数少恐不足用遂聚财治铁改修马船为战舰且借之平江命张深守滁河口扼大江之冲以苗定驻下蜀为援海陵至瓜洲允文与存中临江按试命战士踏车船中流上下三周金山回转如飞敌持满以待相顾骇愕海陵笑曰纸船耳一将跪奏南军有备不可轻愿驻扬州徐图进取海陵怒欲斩之哀谢良久杖之五十乙未海陵为其下所弑初海陵在瓜洲闻李宝由海道入胶西成闵诸军方顺流而下愈怒还扬州召诸将约三日济江否则尽杀之诸将谋曰进有渰杀之祸退有敲杀之忧柰何有万戴者曰杀主与南宋通和归乡则生矣众曰诺海陵有紫葺细军不临阵恒以自卫众患之有萧扎巴者给之曰淮东子女玉帛皆聚海陵且曠使往细军去而海陵被弑敌人退屯三十里遣使议和奏闻召入对帝慰藉嘉叹谓陈俊卿曰虞允文公忠出天性朕之裴度也诏免扈从往两淮措置允文至镇江奏收两淮三策不报明年正月帝至建康寻议回銮诏以杨存中充江淮荆襄路宣抚使允文副之给舍缴存中除命于是允文充川陕宣谕使陞辞言海陵既亡新生初立彼国方乱天相我恢复也和则海内气沮战则海内气伸帝以为然允文至蜀与大将吴玠议经略中原玠进取凤翔复巩州金治兵争陕西新复州郡蜀士欲弃之允文持不可孝宗受禅朝臣有言西事者谓官军进讨东不可过宝鸡北不可过德顺且欲用忠义人守新复州郡官军退守蜀口允文争之不得吴玠遂归河池盖用参知政事史浩议欲尽弃陕西台谏袁季任古附和其说允文再上疏大略言恢复莫先于陕西陕西五路新

复州县又系于德顺之存亡一旦弃之则窥蜀之路愈多前后凡十五疏且移书陈康伯康伯牵于同列不能回也上将召允文问陕西事执政忌其来以显谟阁直学士知夔州寻又命奏事隆兴元年入对史浩既素主弃地及拜相亟行之且亲为诏有曰弃鸡肋之无多免狼心之未已允文入对言今日有八可战帝问及弃地允文以笏画地陈其利害帝曰此史浩误朕以敷文阁待制知太平州寻除兵部尚书湖北京西宣抚使改制置使时朝廷遣卢仲贤使金议和汤思退又欲弃唐邓海泗手诏谓唐邓非险要可寘度外允文五上疏力争思退怒即奏曰此皆以利害不切于己大言误国以邀美名宗社大事岂同戏剧帝意遂定思退阳请召允文实欲去之也允文上印犹以四州不可弃为请乞致仕诏以显谟阁学士知平江府思退意决和议割唐邓二年金兵复至思退贬帝悔不用允文言陈俊卿荐允文堪大用除端明殿学士同签书枢密院事干道元年拜参知政事兼知枢密院事是秋金遣完颜仲有所议偃蹇不敬允文请斩之廷有异论不果会钱端礼受李宏玉带事连允文为御史章服所论罢政奉祠三年二月召至阙除知枢密院事兼参知政事吴璘卒议择代帝谕允文曰吴璘既卒汪应辰恐不习军事无以易卿凡事不宜效张浚迂阔军前事卿一一亲临之即拜资政殿大学士四川宣抚使寻诏依旧知枢密事归蜀一月召至阙不数月复使蜀太上赐御书圣主得贤臣颂帝又为之制跋陛辞复以所御双履及甲胄赐焉过郢奏筑黄鹰山城过襄阳奏修府城至汉中又往沔阳九月至益昌先被手诏戒九事泊至蜀悉奉而行尤以军政为急又奏阅实诸军第其壮怯为三上备战中下备辎重老者少者不预汰兵凡万人减缗钱四百万汰去兵有劳绩者置员阙处之绍兴初兴洋义士以七万计大散之战将不授甲驱之先官军死亡略尽命利帅晁公武核实得二万三千九百余人又得陕西弓箭手法参绍兴制为一书俾将吏守之以马政付张松奏依旧制分茶马为川秦司初在枢府萧扎巴以刷军中人为言允文尝奏谕三衙抚存之至是金洋兴元归正人二万遮道诉系縲之苦允文分给官田俾咸振业时叩蜀十四郡告饥荒政凡六十五事剑俸献羨钱五万却之五年八月拜右仆射同中书门下平章事兼枢密使允文多荐知名士如洪适汪应辰及为相籍人才为三等有所见闻即记之号材馆录凡所举帝皆收用如胡铨周必大王十朋赵汝愚晁公武李焘其尤章著者也帝以兵冗财匮为忧允文与陈俊卿议革三衙杂役汰冗籍三军无怨言六年陈俊卿以奏留龚茂良忤帝意帝震怒俊卿待命浙江亭两日不报允文请对极论体貌之道迭拜榻前遂命判福州诏

以范成大为祈请使为陵寝故金不从且谍报欲以三十万骑奉迁陵寝来归中外汹汹荆襄将帅皆请增戍允文谓金方惩海陵决不轻动不过以虚声撼我耳遂奏止之朝论纷然允文屹不动敌卒无他自庄文太子薨储位未定允文上疏恳陈七年正月上两宫尊号议始定下诏皇第三子恭王惇立为皇太子皇子愷以雄武保宁军节度使判宁国府皇太子寻尹临安侍卫马军司牧地旧在临安允文谓地狭不利刍牧请令就牧镇江缓急用骑过江便三军有怨语其后言者以此为言胡铨以台评去允文奏留之经筵铨荐朱熹帝问允文遂召熹熹不至检鼓院以六条抑上书人允文力言不可从之会庆节金使乌凌阿天锡入见金主婿也骄倨甚固请帝降榻问金主起居帝不许天锡跪不起侍臣错愕失措允文请大驾还禁中且谕之曰大驾既兴难再御殿使人来且随班上寿金使惭而退帝改仆射为左右丞相八年二月授允文特进左丞相兼枢密使梁克家为右丞相允文尝举克家自代不许是月以病乞解机政又荐克家靖重有宰相器至是始同相手诏付允文曰朕方欲武臣为枢密曹勋如何允文谓勋人品卑凡不可用既而以张说签书枢密院事右正言王希吕与台官交劾之帝怒希吕甚手诏与远恶监当允文缴回帝益怒梁克家曰希吕论张说台纲也左相救希吕国体也帝怒稍解遂薄希吕之罚四月御史萧之敏劾允文允文上章待罪帝过德寿宫太上曰采石之功之敏在何许毋听其去帝为出之敏且书扇制诗以留之允文言之敏端方请召归以辟言路帝谓其言宽厚命曾怀书之时政记帝命选谏官允文以李彦颖林光朝王质对三人皆鲠亮又以文章推重于时久不报曾觐荐一人赐第擢谏议大夫允文克家争之不从允文力求去授少保武安军节度使四川宣抚使进封雍国公陞辞帝谕以进取之方期以某日会河南允文言异时戒内外不相应帝曰若西师出而朕迟回即朕负卿若朕已动而卿迟回即卿负朕帝御正殿酌酒赋诗以遣之且赐家庙祭器九年至蜀大军月给米一石五斗不足贍其家允文损宣司钱三十万易米计口增给立户马七条括民马奏选良家子以储战用初北界有寇邻者拥众数万在商虢间允文秉政日纳款迨至蜀复遣人致书允文不报羈縻之而已既而邻谋觉金密遣人捕之叶衡奏闻允文上疏自辨因请纳缘不报帝尝谓允文曰丙午之耻当与丞相共雪之又曰朕惟功业不如唐太宗富庶不如汉文景故允文许上以恢复使蜀一岁无进兵期上赐密诏趣之允文言军需未备上不乐淳熙元年薨后四年上幸白石大阅见军皆少壮谓辅臣曰虞允文行沙汰之效也寻诏赠太傅赐谥忠肃允文慷慨有大志人

望而知为任重之器早以文学致身台阁晚际时艰出入将相垂二十年孜孜忠勤无二焉子三人公亮公着杭孙孙八人皆好修刚简最知名

△辛次膺

辛次膺字起季莱州人幼孤力学甫冠登政和二年进士第历官为单父丞值山东乱举室南渡属闽寇范汝为陷建州宰相吕颐浩以次膺宰蒲城遏贼冲比至寇党熊志窳已焚其邑于是披荆棘坐瓦砾中安辑吏民料丁壮治器械扼险阻号令不烦邑民便之数月韩世忠破贼复建州除审计司余党范黑龙破邻邑闽帅张守檄次膺俟贼平而后行乃募乡兵习强弩贼至与之夹水而阵矢齐发贼奔溃生致首领五人余悉宥之用参政孟庾荐召对奏用人贵于务实施令在于必行迁驾部愿敕郡邑省耕薄征务农抑末又奏中原人弃坟墓生业从巡江左饥寒殍仆愿加存拊可以坚中原僭后之心迁吏部郎湖北运判中途召还见高宗于建康行宫首言救世之弊帝称善敕以所奏榜朝堂擢右正言奏愿阅兵将亲简拔揽恩威之柄使人人知朝廷之尊左右近习久则干政愿杜其渐兵连不解十年于兹一岁用钱三千万米四百万石诸路常赋仅足支其半余悉取诸民乞罢不急之务节姑息之泽省冗官汰悞兵韩世忠男值秘阁次膺奏曰攻城野战世忠功也其子何与石渠东观图书府也武功何与幸门一启援例者众又奏今主义者见小利忽大计偏师偶胜遽思进讨便谓攻为有余警奏稍闻首陈退舍便谓守为不足愿严纪律谨烽燧明间探帝皆信纳闻韩世忠将自楚州移军镇江复陈可虑者五王伦使北请和次膺言宣和海上之约靖康城下之盟口血未干兵随其后今日之事当识其诈时秦桧在投拜为其妻兄王仲薨叙两官次膺劾仲薨奴事朱勔政府金人罪在不赦又劾知抚州王■〈日奂〉违法佃官田不输租其父仲山先知抚州屈膝金人■〈日奂〉继其后何颜见吏民■〈日奂〉桧之妻兄也章留中次膺再论之曰近臣奏二人继闻追寝除命是皆桧容私营救陛下曲从其欲国之纪纲臣之责任一切废格借使贵连宫掖亲如肺腑宠任非宜臣亦得论之而大臣之姻娅乃不得绳之耶望陛下奋干纲之威戒蒙蔽之渐求去除直秘阁湖南提刑先是湖南贼龙渊李朝拥众数万据衡之茶陵桧匿不奏乃以见阙处次膺陛辞帝曰卿以将母为请朕不得留湘湖风物甚佳且无盗贼职名异恩卒岁当召既抵长沙贼势方张戍将抽回始悟桧欲陷之即单车趋茶陵擒贼骁将戮之募贼党毛义龙麟等赍榜谕以朝廷抽回戍将务欲招安宜亟降待以不死龙渊李朝相继降仍请料精锐可得禁旅万余次膺笑曰是皆吾民正当弃兵甲持锄耰趣令复业奏茶陵

为军金好成赦书至衡阳次膺极陈其诈略曰臣昨在
谏列尝数论金人变诈无常愿陛下为宗社生灵深虑近观邸报枢密院编修官胡铨妄
议和好历诋大臣除名远窜已而得铨书藁乃知朝廷
遽欲屈己称藩臣未知其可大臣怀奸固位不恤国计媿娶趋和谬以为便臣不知天下
之人以为便乎降万乘之尊以求说于敌天下之人果
能遂忘怨痛以从陛下之志乎书奏不报金陷三京次膺罢奉祠秦桧以其负重名欲先
移书当稍收用次膺笑而不答阅十六年贫益甚亡毫
发求于人桧死起知婺州三日被召至国门以足疾求去加秘阁修撰还郡再召见厯言
仇怨当国老母几委沟壑因奏国本未立帝改容曰谁
可次膺曰知子莫若父擢权给事中蒋璨权户部侍郎次膺驳璨不守正事交结出璨知
平江御史中丞汤鹏举劾次膺假权报怨除待制宫观
起知泉州移福建帅丁母忧乞纳禄孝宗即位手诏趣召既至奏陛下用贤必考核事功
勿以一人誉用之一人毁去之出令要无反汗纳善要
如转圜练兵恤民经理两淮使敌不能乘虚而入是日除御史中丞朝德寿宫高宗一见
谓惜闲卿于强健时帝将以春飧迎高宗诣延祥观幸
玉津园次膺奏钦宗服未终方停策士且金人嫚书甫至意在交兵原野间警卫稀少当
过为之虑兼一出费十数万缗曷若以资兵食时两淮
尽为荒野次膺奏乞集遗曠归业借种与牛或令在屯兵从便耕种此足兵良法至若成
闵之贪饕汤思退之朋附叶义问之奸罔皆以次论劾
天下黷之帝方厉精政事次膺每以名实为言多所裨益隆兴改元三月知枢密院事符
离之师捷奏日闻次膺手疏千言乞持重未几军果溃
及见帝颜色不乐奏言师溃而归张浚弹压必无他此上天大儆戒于陛下帝叹其先见
拜参知政事以疾力祈免且奏曰王十朋除侍史虽上
亲擢天下皆知臣尝荐其贤汤思退召将至亦知臣尝疏其奸臣不引避人其谓何除资
政殿学士提举洞霄宫陛辞帝惜其去次膺奏臣与思
退理难同列帝曰有谓汤思退可用者次膺奏今日之事恐非思退能办思退固不足道
窃恐误国家事干道六年闰五月卒年七十九次膺孝
友清介立朝蹇谔仕宦五十年无丝毫挂吏议为政贵清静先德化所至人称其不烦

钦定续通志卷三百八十三

●钦定续通志卷三百八十四 列传一百八十四

列传

宋 【八十八】

○宋八十八

陈康伯

梁克家

汪澈

叶义问

蒋芾

叶颙

叶衡 葛邲 钱端礼 魏■〈木
巳〉 周葵 施师点 萧燧 龚茂良

陈康伯

梁克家

汪澈

叶义问

蒋芾

叶颙

叶衡

葛邲

钱端礼

魏■〈木巳〉

周葵

施师点

萧燧

龚茂良

△陈康伯

陈康伯字长卿信州弋阳人父亨仲提举江东常平康伯幼有学行宣和三年中上舍丙科累迁太学正丁内艰贵溪盗将及其乡康伯起义丁逆击俘其渠魁邑得全建炎末为敕令删定官预修绍兴敕令寻通判衢州摄郡事盗发白马原康伯督州兵济王师进讨克之除太常博士改提举江东常平茶盐高宗进躔建康康伯以职事过阙得对因请择将帝开纳绍兴八年除枢密院大计议官累迁户部司勋郎中康伯在太学与秦桧有旧桧当国康伯在郎省五年泊然无求不少迎合十三年始迁军器监借吏部尚书使金至汴将晡不供饷闭户卧勿问入夜馆人扣户谢不敏亦不对后因金使至诏康伯馆伴端午赐扇帕与论拜受礼言者以为生事罢知泉州海盜间作朝廷遣刘宝成闽逐捕康伯以帝意招怀盜多出降籍为兵久之不逞者阴倡乱康伯讯得实论杀之州以无事秩满三奉祠垂十年桧死起知汉州将出峡召对除吏部侍郎康伯首请节用宽民凡州县取民无艺许监司互察台谏弹劾寻兼理户部乞约岁用会所入储什之一二备水旱奏上议竟不决兼刑部前此有司希桧意兴大狱康伯平讞直冤士大夫存歿多赖之除吏部尚书寻拜参知政事自孙道夫使北还已闻金以买马非约为言朝廷特恃和康伯与同知枢密院事王纶白发其端纶使还乃言和好无他康伯持初论不变以通政

大夫守尚书右仆射同中书门下平章事例赐银绢康伯固辞减半又辞兼史院帝尝谓其静重明敏一语不妄发真宰相也又命与汤恩退辅政事勿惮商论拜光禄大夫尚书左仆射金遣使贺天申节出嫚言求淮汉地指取将相大臣且以渊圣凶问至康伯主礼部侍郎黄中之论持斩衰三年先是叶义问贺允中使还言金必败盟康伯请早为之备建四策一增刘锜荆南军以重上流二分画两淮地命诸将结民社各保其境三刘实独当淮东将骄卒少不可倚四沿江诸郡修城积粮以固内地至是召三衙帅及杨存中至都堂议举兵又请侍从台谏集议康伯传旨曰今日更不问和与守直问战当如何时帝意雅欲视师内侍省都知张去为阴沮用兵且陈退避策中外妄傅幸闽蜀人情汹汹右相朱倬无一语同知枢密院事周麟之受命聘金惮不欲行康伯独以为己任奏曰金敌败盟今日之事有进无退圣意坚决则将士之意自倍愿分三衙禁旅助襄阳待其先发应之康伯勉周麟之以国事麟之语侵康伯康伯曰使某不为宰相当自行大臣与国存亡虽死安避麟之竟以辞行罢寻贬责殿中侍御史陈俊卿言当用张浚且乞斩张去为以作士气康伯以俊卿振职奏权兵部侍郎【按宋史陈俊卿传俊卿言内侍张去为阴沮用兵且陈避敌计摇成算请按军法帝曰卿可谓仁者之勇除权兵部侍郎本傅称康伯以俊卿振职奏权兵部侍郎与俊传互异】金入侵庐州王权败归朝臣有遣家豫避者康伯独具舟迎家入浙且下令临安诸城门扃鏐率迟常时人恃以安敌迫江上召杨存中至内殿议之因命就康伯议康伯延之入解衣置酒帝闻之已自宽翼日入奏曰闻有劝陛下幸越趋闽者审尔大事去矣盍静以待之一日忽下手诏如敌未退散百官康伯焚之而后奏曰百官散主势孤矣帝意既坚乃请下诏亲征以叶义问督江淮军虞允文参谋军事【伏读通鉴辑览御批高宗平日畏金几如婴儿之善怖何以一旦能决策亲征盖尔时劲旅南来危在旦夕航海计既不行势已有进无退而前此平江之役诸将颇以捷闻因复冀侥幸于万一非真迫于建王康伯之言也然虚懦之气不久即消金师返旆而三招讨旋罢曾谓高宗有发愤自强之一日哉】允文寻败敌于采石海陵为其臣下所弑方金之入侵国人即立葛王褒三十二年始遣高忠建来告登位议授书礼康伯以谊折之于是报书始用敌国礼高宗倦勤有与子意康伯密赞大臣遂草立太子诏以进及行内禅礼以康伯奉册孝宗即位命兼枢密使进封信国公礼遇殊渥但呼丞相而不名康伯自建康扈从回即以病祈去位不允明年改元隆兴请益坚遂以太保观文殿大学士福国公判信州帝慰劳

甚勤且曰有宣召慎勿辞宰执即府饯别百官班送都门外已又辞郡丐外祠除醴泉观使二年八月起判绍兴府且令赴阙奏事复辞未几召陪郊祀时北兵再侵淮甸人情惊骇皆望康伯复相帝出手札遣使即家居召之未出里门拜尚书左仆射同中书平章事兼枢密使进封鲁国公亲故谓康伯实病宜辞康伯曰今国家危当舆疾就道闻边遽兼程以进至阙下诏子安节壻文好谦掖以见减拜赐坐间日一会朝许肩舆至殿门仍给扶非大事不署金师退寻以目疾免朝谒旬余一奏事干道元年正月上辛有事南郊康伯起陪祀已即丐归章屡上不许一日出殿门喘剧舆至第薨年六十有九赠太师谥文恭二子伟节安节康伯于庆元初配享孝宗庙庭改谥文正

△梁克家

梁克家字叔子泉州晋江人绍兴三十年廷试第一授平江签判海陵被弑众皆言可乘机进取克家移书陈俊卿谓敌虽退吾兵力未振不量力而动将有后悔俊卿归以白丞相陈康伯叹其远虑召为秘书省正字迁著作佐郎时灾异数见克家奏宜下诏求言从之克家条六事一正心术二立纲纪三救风俗四谨威柄五定庙算六结人心其论定庙算谓今边议不过三说曰将兵财语甚切直累迁中书舍人使金金人敬待之金人来贺庆会节克家请令金使入朝由南门百官由北门从者毋辄至殿门外以肃朝仪郊祀有雷震之变克家复条六事迁给事中凡三年遇事不可必执奏无隐尝条具风俗之弊列四条曰欺罔苟且循默奔竞帝手笔奖谕干道五年二月拜端明殿学士签书枢密院事明年参知政事又明年兼知院事初修金好金索所获俘启衅未已克家请筑楚州城环舟师于外边赖以安在政府与虞允文可否相济不苟同皇太子初立克家请选置官属增讲读员遂以王十朋陈良翰为詹事中外称得人允文主恢复克家奏用兵以财用为先今用度不足何以集事帝曰朕思卿言至当八年克家为右丞相兼枢密使允文既罢相克家独秉政虽近戚权幸不少假借而外济以和张说入枢府公议不与寝命俄复用说怒士夫不附已谋中伤之克家悉力调护善类赖之议金使朝见授书仪时又移文对境以正其礼克家议不合遂求去以观文殿大学士知建康府陞辞帝以治效为问克家劝帝无求奇功既而三省密院卒移牒泗州敌不从遣泛使来举朝震骇后二年汤邦彦坐使事贬天下益服克家之言淳熙八年起知福州在镇有治绩赵雄奏欲令再任仍知福州召除醴泉观使九年九月拜右丞相封仪国公逾月而疾命以内祠兼侍读十四年六月薨年六十赠少师谥文靖

△汪澈

汪澈字明远自新安徙居饶州浮梁第进士教授衡州沅州用万俟卨荐为秘书正字校书郎轮对乞令帅臣监司侍从台谏各举将帅行其言除监察御史进殿中侍御史时和戎岁久边防寢弛澈陈养民养兵自治豫备之说累数千言显仁皇后攒宫讫役议者欲广四隅士庶坟在二十里内皆当迁命澈按视还奏昭慈徽宗显肃懿节四陵旧占百步已数十年今日何为是纷纷汉长乐未央宫夹橨里疾墓未尝迁国朝宫陵仪制具在高宗大悟悉如旧叶义问使金还颇知其谋澈言不素备事至仓卒靖康之变可鉴今将骄卒惰宜加搜阅使有鬪心文武职事务选实才不限资格除侍御史左相汤思退不协人望澈同殿中侍御史陈俊卿劾罢又论镇江大将刘宝十罪诏夺节予祠三十一年上元前一夕风雷雨雪交作澈言春秋鲁隐公时大雷震电继以雨雪孔子以八日之间再有大变谨而书之今一夕间二异交至此阴盛之证殆为金人今荆襄无统督江淮乏备御因陈修攘十二事殿帅杨存中久握兵权内结阉寺王十朋陈俊卿等继论其罪高宗欲存护使去澈与俊卿同具奏存中始罢会金使高景山来求衅端澈言天下之势强弱无定形在吾所以用之陛下屈己和戎厚遗金缯彼辄出恶言以撼吾国愿陛下赫然睿断益兵严备布告中外将见上下一心其气百倍矣除御史中丞寻遣成闵以所部三万人屯荆襄以澈为湖北京西宣谕使过九江辟王炎为属鄂帅田师中老而怯立奏易之时欲置襄守荆南澈奏襄阳地重为荆楚门户不可弃敌将刘萼拥众十万扬声欲取荆南又欲分军自光黄捣武昌朝廷以敌昔由此入江南令吴拱严护武昌津渡拱将引兵回鄂澈闻驰书止拱而自发鄂之余兵戍黄州俾拱留襄敌骑奄至樊城拱大战汉水上敌众败走时唐邓陈蔡汝颖相次归职方未几海陵被弑澈乞出兵淮甸与荆襄军夹击其归师未报而金新主罢兵请和召澈入为参知政事与宰相陈康伯同赞内禅孝宗即位锐意恢复首用张浚使江淮澈以参豫督军荆襄将分道进讨赵撙守唐王宣守邓招皇甫侔于蔡襄汉沃壤荆棘弥望澈请于古长渠筑堰募闲民汰冗卒杂耕为度三十八屯给种与牛授庐舍岁可登谷七十余万斛民偿种私其余官以钱市之功绪略就隆兴元年入奏还武昌而张浚克期大举诏澈出师应之澈以议不合乞令浚并领荆襄谏议大夫王大宝论澈无制胜策皇甫侔以忠义结山砦扼敌要冲澈不能节制坐视孤军堕敌计赵撙以千五百人救方城败散五百余人澈漫不加省乞罢黜澈亦请祠除资政殿学士提举洞霄宫大宝疏再上落职仍祠禄明年知建康府寻除枢密使在

位二年以观文殿学士奉洞霄祠寻知鄂州兼安抚使
孝宗访边事澈奏向者我有唐邓为藩篱又皇甫侗控扼陈蔡敌不敢窥襄既失两郡侗
复内徙敌屯新野相距百里尔臣令赵撙王宣筑城储
粮分备要害有以待敌至于机会之来难以豫料孝宗善之时议废江州军澈言不可知
盩国府改福州福建安抚使复请祠寻致仕卒年六十
三赠金紫光禄大夫谥庄敏澈为殿中曰荐陈俊卿王十朋陈之茂为台官高宗次第用
之在枢府孝宗密访人材荐百有十八人自奉清约虽
贵犹布衣时

△叶义问

叶义问字审言严州寿昌人建炎初登进士第调临安府司理参军范宗尹为相义
问与沈长卿等疏其奸为饶州教授摄郡岁旱以便宜
发常平米赈民提刑黄敦书劾之诏勿问知江盩县召秦桧所亲役同僚不可义问曰释
是则何以服他人卒役之通判江州豫章守张宗元忤
桧或中以飞语事下漕臣张常先宗元道九江常先檄义问拘其舟义问投檄曰吾盩得
罪不为不祥常先白桧罢去桧死汤思退荐之帝记其
尝言范宗尹召至言台谏废置在人主桧亲党宜尽罢逐以言得罪者宜叙复擢殿中侍
御史枢密汤鹏举效桧所为植其党周方崇李庚置籍
台谏鉏异己者义问累章劾鹏举有一桧死一桧生之诏并方崇等皆罢之又言凡择将
遇一阙令枢密院具三名取上旨则军政尽出掌握迁
侍御史朱朴沈虚中奉祠里居义问劾其附秦桧皆移居郊祀赦义问言顷岁告讦者不
应例移放从之迁吏部侍郎兼史馆修撰寻兼侍读拜
同知枢密院事帝闻金有侵边意遣义问奉使觐之还奏彼造舟船备器械其用心必有
所在宜屯驻沿海要害备之金果南侵命视师义问素
不习军旅会刘锜捷书至读之至金人又添生兵顾吏曰生兵何物耶闻者掩口至镇江
闻瓜洲官军与敌相持大失措乃役民掘沙沟植木枝
为鹿角御敌一夕潮生沙沟平木枝尽去会建康留守张焘遣人告急义问乃遵陆云往
建康催发军市人皆媒骂之又闻敌据瓜洲采石兵甚
众复欲还镇江诸军喧沸曰不可回矣回则有不测遂趋建康已而海陵被弑师退义问
还朝力请退遂罢隆兴元年中丞辛次膺论义问顷护
诸将几败事且以官私其亲谪饶州干道元年诏自便六年卒年七十三

△蒋芾

蒋芾字子礼常州宜兴人之奇曾孙绍兴二十一年进士第二人孝宗即位累迁起
居郎兼直学士院时宦者梁珂事帝潜邸挠权尹穉论
珂与祠芾缴奏罢之签书枢密院事首奏加意防边又奏拔将才行伍间识其姓名一旦

披籍可立取具又料简归正人仍以北人将之或令深入山东或令自荆襄深入除权参知政事同知国用事芾奏方今财最费于养兵招兵耗蠹愈甚臣考核任事诸军每月逃亡事故常不下四百人若权停招兵一年有半俟财用稍足招丁壮不惟省费又得精兵帝悟一日因进呈边报顾芾曰将来都督非卿不可芾奏臣未尝经历兵闻又奏方今钱谷不足兵士不练将帅与臣不相识愿陛下更审思其人南郊礼毕宰相叶颙魏■〈木巳〉罢芾采众论参己见为筹边志上之明年拜右仆射同中书门下平章事兼枢密使会母疾卒诏起复拜左仆射芾力辞有密旨欲今岁大举手诏廷臣议或主和或主恢复使芾决之芾奏天时人事未至拂帝意服阕除观文殿大学士提举洞霄宫寻以言者论落职建昌军居住期年有旨自便再提举洞霄宫卒

△叶颙

叶颙字子昂兴化军仙游人登绍兴元年进士第为广州南海县主簿摄尉盗发州檄巡尉同捕巡检获益十余人归其劳于颙颙曰掠美欺君幸赏三者皆罪不忍为也帅曾开大善之知信州贵溪县时诏行经界郡议以上中下三等定田税颙请分为九等守从之令信之六邑以贵溪为式知绍兴府上虞县凡繇役令民自推货力甲乙不以付吏民欣然皆以实应催租各书其数与民约使自持户租至庭亲视其入咸便之帅曹泳令今岁夏租先期送什之八颙请少纾其期泳怒及麦大熟民输租反为诸邑最泳大喜许荐于朝颙固辞贺正中荐颙静退遂召见颙论国讎未复中原之民日企釜舆之返其语剴切高宗嘉纳除将作监簿知处州青田令陈光献羨余百万颙以所献充所赋汤思退之兄居处州家奴屠酤犯禁一绳以法思退不悦移知常州高宗视师建康道毗陵赐对舟次因言恢复莫先于将相故相张浚久谪无恙是天留以相陛下也颙初至郡无旬月储未一年余缗钱二十万或劝献羨颙曰名羨余非重征则横敛是民之膏血也以利易赏心实耻之召 为尚书郎除右司诏求直言颙上疏谓陛下以手足之至亲付州郡之重寄是利一人害一方也人称其直除吏部侍郎复权尚书时七司弊事未去上疏言选部所以为弊乃与郎官编七司条例为一书帝嘉之令刻板颁示除端明殿学士拜参知政事兼同知枢密院事武臣梁俊彦请税沙田芦场帝以问颙对曰沙田乃江滨地田随沙涨而出没不常芦场则臣未之详也且辛巳军兴芦场田租并复今沙田不胜其扰帝曰诚如卿言颙至中书召俊彦切责之曰汝言利求进万一为国生事斩汝不足以塞责俊彦惶恐汗下诏汗田芦场并罢御史林安宅请两淮行铁钱颙力言

不可安宅不能平既入枢府乃上章攻颺云颺之子受宣州富人周良臣钱百万得监镇江大军仓御史王伯庠亦论之颺乞下吏辩明乃以资政殿学士提举洞霄宫帝令知临安府王炎亲鞫无秋毫迹狱奏帝以安宅伯庠风闻失实并免所居官仍贬安宅筠州召颺赴阙劳之曰卿之清德自是愈光矣除知枢密院事未拜进尚书右仆射兼枢密使颺首荐汪应辰王十朋陈良翰周操陈之茂芮晔林光朝等可备执政侍从台谏帝嘉纳又言自古明君用人使贤使愚使奸使盗惟去泰甚帝曰固然虞有禹皋亦有共驩周有旦奭亦有管蔡在用不用颺曰诚如圣训但今日在朝虽未见有共驩管蔡在然有窃弄威福者臣不敢隐帝问为谁颺以龙大渊对【伏读通鉴辑览 御批用人固当随才器使贤愚各由生质固不妨并进兼收若奸盗法所必惩岂宜进取叶颺之言盖指管仲陈平者流耳然管仲陈平不常有而奸盗非尽有奇材也颺于龙大渊隐约其辞饰为不经之说思欲迁就调停不得谓之尽诚建白也】语在陈俊卿传帝以国用未裕诏宰相兼国用使参政同知国用事颺言今日费财养兵为甚兵多则有冗卒虚籍无事则费财有事则不可用虽曰汰之旋即招之欲足国用当严于汰缓于招可也帝以为然帝诏以建康刘源常赂近习欲遣王抃廉其奸颺曰臣恐廉者甚于奸者乃止干道三年冬至上亲郊而雷颺引汉故事上印绶以观文殿学士致仕提举太平兴国宫归王家不疾而卒年六十八赠特进谥正简

△叶衡

叶衡字梦锡婺州金华人绍兴十八年进士第调福州宁德簿摄尉以获盐寇改秩知临安府于潜县户版积弊富民多隐漏贫弱困于陪输衡定为九等自五以下除其籍而均其额于上之四等贫者顿苏征科为期限榜县门俾里正谕民不遣一吏而赋自足岁灾蝗不入境治为诸邑最郡以政绩闻召对遣还擢知常州时水潦为灾衡发仓为糜以食饥者或言常平不可轻发衡曰储蓄正备缓急可视民饥而不救耶疫大作衡单骑命医药自随徧问疾苦活者甚众檄晋陵丞李孟坚摄无锡县有政声衡荐于朝即除秀州衡除太府少卿合肥濒湖有圩田衡奏募民以耕岁可得谷数十万蠲租税二三年后阡陌成仿营田官私各收其半从之除户部侍郎时盐课大亏衡奏年来课入不增私贩害之也宜自煮盐之地为之制司火之起伏稽灶之多寡亭户本钱以时给之盐之委积以时收之择廉能吏以察之私贩自绝矣乃命淮南浙东西设措置官三人于通州明州秀州丁母忧起复知庐州未行除枢密都承旨奏马政之弊宜命统制一员各领马若干匹岁终计其数为殿最李屋

应贤良方正对策近讷直入第四等衡奏陛下赦其狂而取其忠足以显容谏之盛乃赐
厘制科出身有言江淮兵籍伪滥诏衡按视且命措置
民兵咸称得治兵之要知荆南成都建康府除户部尚书除签书枢密院事拜参知政事
衡奏二事一牧守将帅必择材以称其职必久任以尽
其材二令户部取湖广会子实数尽以京会立限易之从之拜右丞相兼枢密使帝锐意
恢复凡将帅器械山川防守悉经思虑奏对毕从容赐
坐讲论机密或不时召对一日帝曲宴宰执于舜碧帝曰自三代而下至于汉唐治日常
少乱日常多何也衡奏圣君不常有周八百年称极治
成康而已帝曰朕观无逸篇见周公为成王时历言商周之君享国长远真万世龟鉴衡
奏愿陛下常以无逸为龟鉴社稷之福帝又言朝廷所
用止论其人如何不可有党如唐牛李之党相攻四十年缘主听不明至此文宗曰去河
北贼易去朝中朋党难朕常笑之 【伏读通鉴辑览

御批党援固习最足为人心腹之患然当朝政清明举措公当门户攻讷之技自无
所施固一定之理也孝宗论列牛李旧事及用人大纲
未尝不明于治体乃未几入邦彦之讷而叶衡罢忤曾觌之党而龚茂良罢所谓公是公
非者安在言之易而行之难孝宗能无愧于心乎】 衡
奏文宗优游不断故有此语陛下英明圣武诚非难事御宝实封令与临安府窦思永改
合入宫衡奏选人改官非奏对称旨则用考举磨勘一
旦特旨与之非陛下爱惜人才之意帝亟收前命帝谕执政选使求河南衡奏司谏汤邦
彦有口辩宜使金邦彦请对问所以遣既知荐出于衡
恨衡挤己闻衡对客有讪上语奏之帝大怒即日罢相责授安德军节度副使郴州安置
邦彦以使辱命窜之岭南诏衡自便复官与祠年六十
有二卒赠资政殿学士

△葛邲

葛邲字楚辅其先居丹阳后徙吴县少警敏以荫授建康府上元丞会金人来侵上
元当敌冲调度百出邲不扰而办留守张浚王纶重之
登进士第萧之敏为御史荐其才除国子博士轮对论州县受纳及鬻爵之弊除著作郎
兼学士院权直除正言论征榷岁增之害如犖下都税
务绍兴间所趁茶盐岁以一千三百万缗为额干道六年后增至二千四百万缗成都府
一务初额四万八千缗今至四十余万缗通四川酒额
遂至五百余万缗民力重困至若租税有定数而暗耗日增折帛益多民安得不穷乎愿
明诏有司茶盐酒税比原额已增至一倍者毋更立新
额官吏不增赏庶少苏疲甍帝特召复令条陈邲以六事对皆切中时病除侍御史论救
荒三事累迁中书舍人岁旱诏求初政得失邲应诏大

略谓虞允文制国用南库之积日以厚户部之入日以削故近年以来常有不足之忧罢兵以来诸将皆以赂得升其势必至于掊刻取偿俄迁给事中张嶷以说之子除知阁裴良琮以显仁之侄女夫落官阶邲皆缴奏广西议更盐法邲言钞法之行漕臣常给羣商没入其货楮弊行之二广民必疑虑且有后悔除刑部尚书邲为东宫僚属八年孝宗眷遇甚渥光宗受禅除参知政事邲劝帝专法孝宗正风俗节财用振士气执中道恤民力选将帅收人才择监司明法令俱手疏历言之除知枢密院事绍熙四年拜左丞相专守祖宗法度荐进人物博采公论惟恐不闻之未朞年除观文殿大学士知建康府改隆兴请祠宁宗即位判绍兴府简稽期会钱谷刑狱必亲或谓大臣均佚有体邲曰崇大体而简细务吾不为也改判福州道行感疾除少保致仕卒年六十六赠少师谥文定配飨光宗庙庭

△钱端礼

钱端礼字处和临安府临安人父沉潼川军节度使端礼以恩补官绍兴间通判明州加直秘阁累迁右文殿修撰仕外服有声高宗材之知临安府御史中丞汪澈论判曹阙官当遴选权户部侍郎兼枢密都承旨端礼尝建明用楮为弊于是专委经画分为六务出纳皆有法几月易钱数百万孝宗锐意恢复诏张浚出师会符离稍失利汤思退遂倡和议端礼奏有用兵之名无用兵之实贾怨生事无益于国思退大喜奏除户部侍郎未几兼吏部端礼与户部尚书韩仲通同对论经费奏所入有限兵食日增更有调发不易支吾帝云须恢复中原财赋自足仲通奏恢复未可必且经度目前所用端礼奏仲通言是乞采纳思退与张浚议和战不决浚方主战帝意甚乡之思退诡求去端礼请对乞留又奏兵者凶器愿以符离之溃为戒早决国是为社稷至计于是思退复留命浚行边还戍兵罢招纳以端礼充淮东宣谕使王之望使淮西端礼入奏两淮名曰备守守未必备名曰治兵兵未必精有用兵不胜侥幸行险轻躁出师大丧师徒者必胜之说果如此皆误国甚明端礼既以是诋浚右正言尹穉亦劾浚罢都督自此议论归一矣端礼至淮还极言守备疏略恐召金兵宜早定和议遂除吏部侍郎再往淮上驿疏言遣使发兵当并行使以尽其礼兵以防其变不必待金书至而后遣使书中或有见胁之语不若先遣以释其疑于计为得帝云端礼所奏未是思退传旨撤海泗二州戍兵语在思退传金帅布萨忠义分兵入帝意中悔令思退都督江淮军马端礼试兵部尚书参赞军事思退畏怯不行端礼赴阙帝曰前后廷臣议谕独卿不变兼户部尚书俄拜端明殿学士签书枢密院事兼权参知政事帝尝问欲遣杨由义持金帅书而辞行甚力谁

可遣端礼请以王抃行俾与金帅议许割商秦地归彼俘人惟叛亡者不与余誓目略同
绍兴世为叔侄之国减银绢五万易岁贡为岁币及抃
还帝见书金皆听许端礼赞帝如其式报之抃遂行谍报北军已回端礼以和议既定乞
降诏除参知政事兼权知枢密院事时久不置相端礼
以首参窥相位甚急皇长子邓王夫人端礼女也殿中侍御史唐尧封论端礼帝姻不可
任执政不报迁尧封太常少卿馆阁士相与上疏排端
礼皆坐劾刑部侍郎王芾阴附端礼建为国是之说以助其势吏部侍郎陈俊卿抗疏力
诋其罪且谓本朝无以戚属为相逮进读宝训适及外
戚因言祖宗家法外戚不与政最有深意陛下所宜守帝纳其言端礼憾之出俊卿知建
宁府邓王夫人生子太上甚喜先两月恭王夫人李氏
亦生子于是恭王府直讲王淮白端礼云恭王夫人子是为皇长嫡孙端礼不怵翼日奏
嫡庶具载礼经讲官当以正论辅导不应为此邪说遂
指淮倾邪不正与外任邓王立为太子端礼引嫌除资政殿大学士提举德寿宫兼侍读
改提举洞霄宫起知宁国府移绍兴进观文殿学士端
礼籍人财产至六十万缗有指阙陈诉者帝闻之与旧祠侍御史范仲芑劾端礼贪暴不
悛降职一等淳熙四年复元职卒赠银青光禄大夫后
谥忠肃孙象祖嘉定元年为左丞相自有传

△魏■〈木巳〉

魏■〈木巳〉字南夫寿春人以祖荫入官绍兴十二年登进士第知宣州泾县从
臣钱端礼荐其才召对擢太常寺主簿进丞端礼宣谕
淮东■〈木巳〉以考功员外郎为参议官迁宗正少卿汤思退建和议命■〈木巳〉
为金通问使孝宗面谕今遣使一正名二退师三减岁
币四不发归附人■〈木巳〉条上十七事拟问对帝随事画可陛辞奏曰臣若将指出
疆其敢不勉万一无厌愿速加兵帝善之行次盱眙金
所遣大将布萨忠义赫舍哩志宁等方拥兵窥淮遣权泗州赵房长问所以来意求观国
书■〈木巳〉曰书御封也见主当廷授房长驰白布
萨忠义疑国书不如式又求割商秦地及归正人且欲岁币二十万■〈木巳〉以闻帝
命尽依初式再易国书岁币亦如其数忠义以未如所
欲遂与志宁分兵攻楚州战不利骁将魏胜死之帝怒金反复诏以礼物犒督府师■〈木巳〉
奏金若从约而金缗不具岂不瘠国体格事机
乎乃以礼物行至燕见金主具言天子神圣才杰奋起人人有敌忾意北朝用兵能保必
胜乎和则两国享其福战则将士蒙其利昔人论之甚
悉金君臣环听拱竦馆伴张恭愈以国书称大宋胁去大字■〈木巳〉拒之卒正敌国
礼【伏读通鉴辑览 御批金史世宗纪载魏■

〈木巳〉以国书来不称大称侄宋皇帝与宋史异则此云胁■〈木巳〉去大字已无足深信且两国名称相均当为敌体侄犹子也宋既称侄称名其与石晋之于契丹相去有几而以不去大字为正敌国礼所谓不揣其本而齐其末宋史臣虚词夸大岂能掩其实乎】 损岁币五万
不发归正人北还帝慰籍甚渥守起居舍人迁给事中同知枢密院事进参知政事右朴射兼枢密使 【按宋史宰辅表孝宗干道二年三月
癸酉魏■〈木巳〉自给事中吏部尚书除同知枢密院事兼权参知政事五月庚戌魏■〈木巳〉自枢密院事除参知政事八月戊子兼同
知枢密院事十二月甲申魏■〈木巳〉自参知政事除左正议大夫右仆射同平章事兼枢密使】 时方借职田请■〈木巳〉言圭租食功
养廉借之尚可夺之不可帝是其言■〈木巳〉以使金不辱命繇庶官一岁至相位帝锐意恢复■〈木巳〉左右其论会郊祀冬雷用汉制
灾异策免守左谏议大夫提举江州太平兴国宫六年授观文殿学士知平江府谏官王希吕论■〈木巳〉贪墨夺职后以端明殿学士奉祠
告老复资政殿大学士淳熙十一年十一月卒赠特进嘉泰中谥文节

△周葵

周葵字立义常州宜兴人少力学自乡校移籍京师宣和六年擢进士甲科调徽州推官高宗移蹕临安诸军交驰境上葵与判官摄郡事
应变敏速千里帖然教授临安府未上吏部侍郎陈与义密荐之召试馆职将试复引对除监察御史徙殿中侍御史在职仅两月言事至三十
章且厯条所行不当事凡二十条指宰相不任责高宗变色曰赵鼎张浚肯任事须假之权奈何遽以小事形迹之葵曰陛下即位已相十许人
其初皆极意委之卒以公议不容而去大臣亦无固志假如陛下有过尚望大臣尽忠岂大臣有过而言者一指乃便为形迹使彼过而不改罪
戾日深非所以保全之也高宗改容曰此论甚奇张浚议北伐葵三上章力言此存亡之机非独安危所系或言葵沮大计罢为司农少卿以直
秘阁知信州会鼎罢陈与义执政改湖南提刑以亲老易江东皆不就和议已定被召论为国有道战则胜守则固和则久不然三者在人不在
我矣除太常少卿时秦桧独相意葵前论事去必憾赵鼎再除殿中侍御史葵语人曰元镇已贬葵固不言虽门下客亦不及之也内降差除四
人奏言愿陛下以仁祖为法大臣以杜衍为法桧始不乐又言国用军政士民三弊高宗曰国用当藏之民百姓足则国用非所患又言荐举改
官之弊宜听减举员诏吏部措置桧所厚权户部尚书梁汝嘉将特赐出身除两府汝嘉闻葵欲劾之谓中书舍人林待聘曰副端将论君矣待

聘乘桧未趋朝亟告之桧即奏为起居郎葵方待引桧下殿谕合门曰周葵已得旨除起居郎隔下葵入后省出疏示待聘曰梁仲谟何其幸也
待聘始知为汝嘉所卖 【出疏示待聘云云见梁汝嘉传兹并载葵传中彼处应从删】
参政李光拟除吕广问馆职桧不许时有诏从官荐
士葵以广问应初不相知也光既绌葵以不附桧落职主管玉隆观复直秘阁起知湖州移平江府时金使络绎于道葵不为礼传运李椿年希
桧旨劾之落职主管崇道观屏居乡里忧患频仍人不能堪葵独安之桧死复直秘阁知绍兴府过阙权礼部侍郎寻兼国子祭酒奏科举所以
取士比年主司迎合大臣意取经传语可谏者为问目学者竞逐时好望诏国学并择秋试考官精选通今博古之士置之前列其穿凿乖谬者
黜之兼权给事中侍御史汤鹏举言葵以魏良臣荐躐处侍从吕广问葵之死党乞并罢之太学生黄作詹渊率诸生都堂投牒留葵翼曰博士
何甫等言于朝乞惩戒诏作渊皆送五百里外州编管葵出知信州随罢起知信州引疾改提举兴国宫加直龙图阁知太平州水坏圩堤悉缮
完凡百二十里傍郡圩皆没惟当涂岁熟市河久湮雨暘交病葵下令城中家出一夫官给之食并力浚导公私便之进集英殿修撰敷文阁待
制知婺州孝宗即位除兵部侍郎兼侍讲改同知贡举兼权户部侍郎孝宗数手诏问钱谷出入葵奏陛下劳心庶政日有咨询若出人意表今
皆微文细故此必有小人乘间欲售其私不可不察盖指龙大渊曾觐也孝宗色为动海陵被弑张浚自督府来朝密言敌失泗州其惧罪者皆
欲来归愿遣军渡淮赴之此恢复之机也葵请对谓不可轻举累数百言及遣李显忠邵宏渊取灵璧虹二县败绩孝宗思其言拜参知政事葵
始终守自治之说兼权知枢密院事尝乞召用侍从台谏孝宗曰安得如卿直谅者遂荐李浩龚茂良孝宗次第用之太常奏郊牛毙葵言春秋
麟鼠食牛角免郊况边虞未靖请展郊以符天意诏从之虞允文陈康伯相葵即求退除资政殿学士提举洞霄宫起知泉州告老加大学士致
仕淳熙元年正月卒年七十有七赠正奉大夫后以子升朝累赠太傅谥惠简

△施师点

施师点字圣与上饶人弱冠游太学寻授以学职以舍选奉廷对调福州教授未上丁内艰服除为临安府教授干道元年陈康伯荐赐对
言历年屡下诏恤民而惠未加浹陛下轸念惟恐一夫失所郡邑搜求惟恐财赋不集毋惑乎日降丝纶恩不沾被今明堂肆赦户自四等以下
逋自四年以前愿悉除免诏从之八年兼权礼部侍郎除给事中时太子詹事已除帝又特令增员为二命兼之赐对言比年人物骖骮士气耗

繭当广储人材以待用帝曰观卿所奏公辅器也假翰林学士知制诰兼侍读使金致命金廷立班既定相仪者以亲王将至命师点退位师点
屹立相仪者请数四师点正色曰班立己定尚欲何为不肯少动在廷相顾骇愕知其有守不敢复以为请九年使还有言其事于帝者帝嘉叹
余端明殿学士签书枢密院事入奏控免帝曰卿靖重有守职虑深远朕欲用卿久矣复诏兼参知政事兼同知枢密院事 【按宋史宰辅表
孝宗淳熙九年十二月丁丑施师点自朝请大夫给事中除端明殿学士签书枢密院事明年正月丙戌兼权参知政事八月戊申自端明殿学
士签书枢密院事兼权参知政事迁中大夫除参知政事兼同知枢密院事】 师点尝同
宰相奏事退复同枢密周必大进呈帝曰适一二事卿
等各陈所见甚关大体前此宰相奏事执政不措辞今卿等如此深副所望必大奏祖宗
时宰执奏事自相可否或至面相切责退不相衔自秦
桧用事执政畏避不敢言今陛下虚心兼听若止宰相奏事何用执政为师点复奏臣敢
不竭股肱之力帝因谕之曰朕欲天下事日往来胸中
未尝释也先是州郡上供或不时以进立岁终稽考法及是主计臣有喜为督促者乞不
待岁终先期行之画命已下师点矍然曰此策若行上
下逼迫民不聊生或谓令已出矣师点曰事有为天下病惟恨更之不速即追寝其议一
日入对帝曰朕前饮冰水过多忽暴下幸即平复师点
曰自古人君当无事时快意所为忽其所当戒其后未有不悔者帝深然之十三年辞兼
同知枢密院事权提举国史院权提举国朝会要十四
年除知枢密院事师点惓惓搜访人才手书置夹袋中谓蜀去朝廷远人才难以自见蜀
士之贤者俾各疏其所知差次其才行文学每有除授
必列陈之十五年春以资政殿大学士知泉州继除提举洞霄宫绍熙二年 【宋史本传
作绍兴二年考孝宗十六年二月光宗即位次年改
元绍熙兴乃熙字之讹今据改】 除知隆兴府江西安抚使三年得疾卒年六十九赠金
紫光禄大夫

△萧燧

萧燧字昭邻临江军人生而颖异绍兴十八年擢进士高第擢平江府观察推官时
秦桧当国其亲党密告燧秋试必主文漕台燧诘其故
曰丞相有子就举欲以属公燧怒曰初仕敢欺心耶桧怀之既而被檄秀州至则员溢就
院易一员往漕闱秦熺果中前列秩满当为学官避桧
调静江府察推而归三十二年授靖州教授孝宗初除诸王公大小学教授轮对论官当
择人不当为人择官帝喜制用人论以赐大臣淳熙二
年累迁至国子司业兼权起居舍人进起居郎先是察官阙朝论多属燧以未历县遂除

左司谏帝谕执政昨除萧燧若何龚茂良奏燧纯实无
华正可任言责燧首论辨邪正然后可以治时宦官甘昇之客胡与可都承旨王抃之族
叔秬皆持节于外有所依凭无善状燧皆奏罢之时复
议进取帝以问燧对曰今兵未强财未裕宜卧薪尝胆以图内治若恃小康萌骄心非臣
所知因劝帝正纪纲容直言亲君子远小人近习有劳
可赏以禄不可假以权帝皆嘉纳擢右谏议大夫五年同知贡举有旨下江东西湖南北
帅司招军燧言所募多市井年少利犒赆往往捕农民
以应数取细民以充军乞严戒诸郡庶得丁壮以为用从之夔帅李景享贪虐参政赵雄
庇之台臣谢廓然不敢论燧独奏罢之雄果营救复命
还任燧再论并及雄雄密奏燧误听景享仇人之言遂下临安府捕恭州士人锺京等置
之狱坐以罪景享复依旧职燧乃自劾诏以风闻不许
竟力求去徙刑部侍郎不拜固请补外出知严州吏部尚书郑丙侍郎李椿上疏留之帝
亦寻悔严地狭财匱始至官镪不满二千燧俭以足用
二年之间积至十五万以其羨余补积逋诸邑皆宽会遂安令媵士兵廩给羣言汹汹燧
急易令且呼卒长告戒悉畏服城中恶少羣扰市燧籍
姓名涅补军额人以安堵诏燧治郡有劳除敷文阁待制移知婺州父老遮道几不得行
送出境者以千数婺与严邻人熟至条教不劳而治岁
旱浙西常平司请移粟于严燧谓东西异路不当与然安忍以旧治坐视为请诸朝发太
仓米振之八年召还言江浙再岁水旱愿下诏求言仍
令诸司通融郡县财赋毋但督迫除吏部右选侍郎旋兼国子祭酒九年为枢密都承旨
除刑部尚书充金使馆伴十年兼权吏部尚书上言广
西诸郡民身丁钱之弊兼侍讲升侍读言命令不可数易宪章不可数改初官不许恩例
免试今或竟令注授既却羨余之数令反以出剩为名
诸路录大辟长吏当亲诘若死囚数多宜如汉制殿最以闻事多施行庆典霈泽丁钱减
半亦自燧发之高宗山陵充按行使除参知政事寻充
永思陵礼仪使权监修国史十六年权知枢密院以年及自陈除资政殿学士与郡复请
闲提举临安府洞霄宫绍兴四年卒年七十七谥正肃
子达

△龚茂良

龚茂良字实之兴化军人绍兴八年进士第为南安簿邵武司法丁父母忧以孝闻
调泉州察推以廉勤称改宣教郎以同知枢密院事黄
祖舜荐召试馆职除秘书省正字累迁吏部郎官除监察御史江浙大水诏陈阙失茂良
疏曰水至阴也其占为女宠为嬖佞为小人专制崇观
政和小人道长内则儉腐窃弄外则奸回充斥于是京城大水以至金人入侵今进退一

人施行一事命由中出人心哗然指为此辈臣愿先去
腹心之疾然后政事阙失可次第言矣内侍梁珂曾觐能大渊皆用事故茂良及之迂右
正言会内侍李珂没赠节度谥靖恭茂良谏曰中兴名
相如赵鼎勋臣如韩世忠皆未有谥如朝廷举行亦足少慰忠义之心今施于珂为可惜
竟寢其谥尝论大渊觐奸回至是又极言之孝宗谕以
皆潜邸旧人非他近习比且俱有文学敢谏争未尝预外事翼日再疏言唐德宗谓李泌
人言卢■〈木巳〉奸朕独不知何耶泌曰此其所以
奸邪也今大渊觐所为行道之人能言之而陛下更称颂其贤此臣所以深忧疏入不报
即家居待罪章再上除太常少卿五辞不拜除直秘阁
知建宁府自以不为羣小所容请祠不允帝后知二人之奸既逐于外起茂良广东提刑
就知信州即番山之址建学又置番禺南海县学既成
释奠行乡饮酒以落之城东旧有广惠庵中原衣冠没于南者葬之岁久废茂良访故地
更建海会浮图敢寄暴露者皆揜藏无遗召对崇政殿
左丞相陈俊卿欲留之右相虞允文不乐会俊卿亦罢除直显谟阁江西运判兼知隆兴
府帝以江西连岁大旱以一路荒政付之茂良戒郡县
免积税上户止索逋发廩赈赡以右文殿修撰再任疫病大作命医治疗全活数百万进
待制敷文阁赏其救荒之功召对奏潢池弄兵之盗即
南亩负耒之民今诸郡荒者极多愿诏监司守臣条陈募人从便请耕民有余粟虽驱之
为寇亦不从矣除礼部侍郎帝亟用茂良手诏问国朝
典故有自从官径除执政例明日即拜参知政事奏事赐坐帝曰朕每存公道设有悞卿
等宜力争君臣之间不可事形迹茂良曰大臣以道事
君遇有不可自当启沃岂容迹见于外请召有司刊定七司法淮南旱茂良奏取封樁米
十四万委漕帅赈济或谓救荒常平事今遽取封樁米
毋乃不可茂良以为淮南咫尺敌境民久未复业饥寒所迫万一啸聚患害立见盍能计
此米乎湖州守奏通判不法得旨下帅臣体访通判茂
良乡人也同列密以省吏付棘寺推鞫欲及茂良奏事退同列留身出狱案进帝茂良不
知也帝厉声曰参政决无此茂良逊谢不复辩叶衡罢
帝命茂良以首参行相事庆寿礼行中外觐恩茂良慨然叹曰此当以身任怨不敢爱身
以弊天下若自一命以上覃转不知月添给奉与来岁
郊恩奏补几何将何以给宣谕奖用廉退茂良奏朱熹操行耿介屡召不起宜蒙录用除
秘书郎未几手诏付茂良谓虚名之士恐坏朝廷熹迄
不至钱良臣侵盗大军钱粮累数十万茂良奏其事手诏令具析俄召良臣赴阙駸駸柄
用其后茂良之贬良臣与有力焉淳熙四年正月召史
浩于四明茂良亦觉眷衰因疾力求去帝曰朕以经筵召史浩卿不须疑时曾觐欲以大

资录其孙 【按茂良起为广东提刑时曾觐以逐久
 召还故当茂良执政时觐又在朝召还曾觐事见陈俊卿传】 茂良以文武官各随本色
 荫补格法缴进觐因茂良入堂道间俾直省官贾光祖
 等当道不避街司叱之光祖曰参政能几时茂良奏臣固不足道所惜者朝廷大体帝谕
 觐往谢茂良正色曰参知政事者朝廷参知政事也觐
 惭退帝谕茂良先遣人于觐冲替而后施行茂良批旨取贾光祖辈下临安府捩之手诏
 宣问施行太遽茂良待罪帝使人宣谕委曲令缴进手
 诏且谓卿去虽得美名置朕何地茂良即奉诏谢廓然赐出身除殿中侍御史廓然附曾
 觐者也中书舍人林光辅缴奏不书黄遂补外茂良力
 求去帝谕曰俟议恢复卿当再来是日除职与郡令内殿奏事乃手疏恢复六事帝曰卿
 五年不说恢复何故今日及此退朝甚怒曰福建子不
 可信如此谢廓然因劾之乃落职放罢寻又论茂良擅权不公矫传帝旨辄断贾光祖等
 罪遂责降安置英州父子卒于贬所 【伏读通鉴辑
 览 御批茂良以眷衰求去己不免于悻悻至省吏倚势敢于显抗参政不过一无知
 妄人何足与较亦何致遂伤大体执奏己为过当径取
 而捩之不更过乎不能惩忿而因以罹愆茂良实失之卞急而孝宗始事调停终加诘责
 亦不得谓非徇于私见也】 觐与廓然死后茂良家投
 匭讼冤遂复通奉大夫周必大独相进呈复职帝曰茂良本无罪遂复资政殿学士谥庄
 敏茂良平生不喜言兵去国之日乃言恢复事或谓觐
 密令人誅之云若论恢复必再留茂良信之遂手疏云
 钦定续通志卷三百八十四

●钦定续通志卷三百八十五 列传一百八十五

列传

宋 【八十九】

○宋八十九

刘琪	王藺	黄祖舜	王大宝	金安节	王刚中
李彦颖	范成大	黄洽	汪应辰		
王十朋	吴芾	陈良翰	杜莘老		

刘琪

王藺

黄祖舜

王大宝

金安节

王刚中
李彦颖
范成大
黄洽
汪应辰
王十朋
吴芾
陈良翰
杜莘老
△刘珙

刘珙字共父子羽长子也生有奇质从季父子翬学以荫补承务郎登进士乙科监绍兴府都税务请祠归杜门力学不急仕进主管西外睦宗院召除诸王宫大小学教授迁礼部郎官秦桧欲追谥其父召礼官会问珙不至桧怒风言者逐之桧死召为大宗正丞迁吏部员外郎置令式庭中使选集者得自翻阅与吏辨吏无得藏其巧兼权秘书少监兼权中书舍人金侵边王师北向诏檄多出其手词气激烈御史杜莘老劾宦者张去为忤旨左迁珙不草制莘老得不去从幸建康兼直学士院车驾将还诏以杨存中为江淮宣抚使珙不书录黄仍论其不可帝怒谓宰相曰刘珙父为张浚所知此特为浚地耳命再下宰相召珙谕旨且曰再缴则累张公珙曰某为国家计岂暇为张公谋执奏如初存中命乃寢真除中书舍人直学士院田师中死其家请以没入王继先第为赐李珂关通近习求为督府掾诏从中下珙皆论罢之出知泉州改衢州湖南旱李金为乱朝廷忧之以珙知潭州湖南安抚使入境声言发郡县兵讨击而移书制使沈介请以便便宜出师曰擅兴之罪吾自当之介即遣田宝杨钦以兵至珙知其暑行疲惫发夫数程外迎之代其负任至则犒赐过望军士感奋珙知钦可用檄诸军皆受节制下令能捕贼自献者除罪受赏钦与宝连战破贼追至莽山贼党曹彦黄珙执李金以降支党窜匿者尚众珙谕钦等却兵听其自降贼相率纳兵给据归田里第上诸将功状有差赐玺书奖之除翰林学士知制诰兼侍读言于帝曰世儒多病汉高帝不悦学轻儒生臣以为高帝所不悦特腐儒俗学耳使当时有以二帝三王之学告之知其必敬信功烈不止此因陈圣王之学所以明理正心为万事之纲帝亟称善拜中大夫同知枢密院事因言汪应辰陈良翰张栻学行才能皆臣所不逮愿亟召用帝可其奏兼参知政事奏除福建钞盐岁额二万万罢江西和籴及广西折米盐钱及蠲

诸路累年逋负金钱谷帛巨亿计上尝以久旱斋居祷雨一夕而应珙进言曰陛下诚心感格其应如响天人相与之际真不容发隐微纤芥之失其应岂不亦犹是乎臣愿益谨其独龙大渊曾觐既被逐未几大渊死帝怜觐欲还之珙言二人之去天下方仰威断此曹奴隶耳厚赐之可也若中以自近使与闻机事进退人才非所以光德业振纪纲命遂止殿前指挥使王琪被旨按视两淮城壁还密荐和州教授刘甄夫帝谕执政召之珙请曰此人名位微何自知之帝以琪告琪退追琪至叱使责戒励状会扬州奏琪檄郡增筑新城琪遂奏罢琪语在陈俊卿传琪时争之尤力以故独罢为端明殿学士奉外祠陈俊卿言琪正直有才肯任怨臣所不及愿留之诏改知隆兴府江西安抚使入辞犹以六事为献帝曰卿虽去国不忘忠信材美非他人所及行召卿矣至镇首蠲税务新额及罢苗仓大斛属邑奉新有复出租税穷民不能输相率逃去反失正税并奏除之除资政殿学士知荆南府湖北安抚使以继母忧去起复同知枢密院事荆襄安抚使珙六上奏恳辞词甚切最后言曰三年通丧三代未之有改汉儒乃有金革无避之说已为先王罪人今边陲无警臣乃欲冒金革之名以私利禄之实不亦又为汉儒之罪人乎服阕再除知潭州湖南安抚使过阙入见极论时事进资政殿大学士以行安南贡象所过骚然珙奏曰象之用于郊祀不见于经且使吾中国之疲民困于远夷之野兽岂仁圣之所为哉湖北茶盗数千人入境疆吏以告珙曰此非必死之寇缓之则散而求生急之则聚而致死揭榜谕以自新声言兵且至令属州县具数千人食盗果散去其存者无几珙乃遣兵戒曰来毋亟战去毋穷追不去者击之耳盗意益缓于是一战败之尽擒以归诛首恶数十余隶军籍淳熙二年移知建康府江西安抚使行宫留守会水且旱首奏蠲夏税钱六十万缗秋苗米十六万六千斛禁止上流税米遏余得商人米三百万斛贷诸司钱合三万遣官余米上江得十四万九千斛籍主客户高下给米有差又运米村落置场平价振糶贷者不敢偿起是年九月尽明年四月阖境数十万人无一人捐瘠流徙者进观文殿学士属疾请致仕疾革草遗奏言恭显佞文近习用事之戒今以腹心耳目寄之此曹朝纲以紊士气以索民心以离咎皆在此陈俊卿忠良确实可以任重致远张栻学问醇正可以拾遗补阙愿亟召用之既又手书诀栻与朱熹其言皆以未能为国雪耻为恨卒年五十七赠光禄大夫谥忠肃珙精明果断喜受尽言事有小失下吏言之立改临数镇民爱之若父母其歿也有相与祠之者

△王蔭

王藺字謙仲廬江人干道五年擢進士第為信州上饒簿鄂州教授四川宣撫司干
辦公事除武學諭孝宗幸學藺迎立道周帝目而異之
命小黃門問知姓名由是簡記遷樞密院編修官輪對奏五事讀未竟帝喜見顏色明日
諭輔臣曰王藺敢言宜加獎擢除宗正丞尋出守舒州
陛辭奏疏數條皆極言時事之未得其正者帝曰卿議論峭直尋出手詔除監察御史一
日帝袖出幅紙賜之曰比覽陸贄奏議所陳深切今日
之政恐有如德宗之弊者可思朕之闕失條陳來上藺即對曰德宗在於自用遂非疑天
下士退即上疏陳德宗之弊并及时政闕失帝嘉納之
遷起居舍人言朝廷除授失當台諫不悉舉職給舍始廢繳駁內官醫官藥官賜予之多
遷轉之易宜有以正之帝竦然曰非卿言朕皆不聞除
禮部侍郎兼吏部奉手詔舉剛正者為監司即荐潘時鄭矯林大中等八人母憂服除為
禮部尚書進參知政事光宗即位遷知樞密院事兼參
政拜樞密使光宗精勵初政藺亦不存形迹除目或自中出未愜人心者輒留之納諸御
坐或議建皇后家廟力爭以為不可因應詔上疏願陛
下先定聖志條列八事不報中丞何澹論之罷去起帥閩易鎮蜀皆不就後領祠帥江陵
寧宗即位改帥湖南台臣論罷歸里奉祠七年卒藺盡
言無隱然嫉惡太甚同列多忌之竟以不合去有奏議傳于世

△黃祖舜

黃祖舜福州福清人登進士第累任至軍器監丞入對言縣令付銓曹專用資格曷
若委郡守汰其尤無良者帝然之除戶部員外郎出通
判泉州將行言抱道懷德之士不應書干祿老于韋布乞自科舉后有學行修明孝友純
篤者縣荐之州州延之庠序以表率多士其卓行尤異
者州以名聞是亦鄉舉里選之意下其奏禮部遂留為倉部郎中遷右司權刑部侍郎兼
侍講詳定敕令司進論語講義金安節言其書詞義明
粹乃令國子監板行荐李寶為帶御器械兼權給事中戶部奏以官田授汰去使臣祖舜
言使臣汰者一千六百余人臨安官田僅為畝一千一
百計其請而給田則不過數十人事不行保義郎梁舜弼漢弼邦彥養孫也并閣門祇候
祖舜言閣門不可以恩澤補知池州劉堯仁升右文殿
修撰知新州韓彥直升秘閣修撰祖舜言修撰本以待文學不可幸得故資政殿學士楊
愿家乞遺表恩祖舜言愿陰濟秦桧中傷善類皆寢其
命又言秦熺預其父桧謀議不宜贈太傅追奪之遷同知樞密院事金海陵侵淮劉汜敗
王權走帝將誅權以勵其余祖舜言權罪當誅汜不容
貸第劉錡有大功聞其病已殆權泛誅錡必媿忿以死是國家一敗兵而殺三將得無快
于敵乎帝嘉納卒于官謚庄定

△王大宝

王大宝字符龟潮州人政和闲贡辟雍建炎初廷试第二授南雄州教授以禄不逮养移病而归阅数年差监登闻鼓院主管台州崇道观赵鼎谪潮大宝日从讲论语张浚谪居俸不时得大宝以经制钱给之浚曰如累君何大宝不为变代还言连英循惠新恩六州民居纔数百非懋迁之地月输免行钱宜蠲减高宗谓大臣曰守臣上殿令陈民事遂得知田里疾苦所陈五六得一可行其利亦不细矣乃命广西诸司具减数闻知袁州进诗书易解其书甚可采时经筵阙官遂除国子司业兼崇政殿说书奏江南诸州有月桩钱无定名数吏缘为奸刻剥民又有折帛钱方南渡兵兴物价翔贵令下户折纳务以优之今市帛匹四千而令输六千盍委监司核月椿为定制减折帛惠小民诏户部详具奏直敷文阁知温州提点福建刑狱道临漳有峻岭曰蔡冈藁薄蔽翳山石萃确盗乘闲剽劫大宝以囊金三十万募民抉藪磬道十余里行者便之提点广东刑狱孝宗即位除礼部侍郎大宝言古致治之君先明国是而行之以果断自军兴以来曰征曰和浮议靡定太上传丕基于陛下四方日徯恢复国论未定众志未孚愿陛下果断则无不济擢右谏议大夫首论朱倬沈该之罪皆行其言汪澈督师荆襄大宝劾其不能节制坐视方城之败疏再上澈落职谪台州大宝尝论及移蹕帝曰吾欲亟行大宝奏今日之势殆未可愿少宽岁月张浚复起为都督大宝力赞其议符离失律羣言汹汹大宝言危疑之际非果断持重何以息横议未几汤思退议罢督府力请讲和大宝奏谓今国事莫大于恢复莫难于攻守莫审于用人宰相以财计乏军储虚符离师溃名额不除意在核军籍减月给臣恐不惟边鄙饮忧而患起萧墙矣章三上除兵部侍郎求去胡铨奏曰近日王十朋王大宝相继引去非国之福帝曰十朋力自引去朕留之不能得大宝论汤思退太早令为兵部侍郎岂容复听其去未几以敷文阁直学士提举太平兴国宫他日铨奏事帝复谕之曰大宝留之经筵亦固求去势不两立铨奏自古台谏论宰相多矣若谓势不两立则论宰相者皆当去大宝寻请致仕督府既罢撤边防弃四州金复侵边诏思退都督军马辞不行帝震怒窜思退中外以大宝前言不用为恨干道元年落致仕召为礼部尚书入对言理财之道当务本抑末右正言程叔达奏大宝乞复免行钱非是以旧职提举太平兴国宫中书舍人阎安中欲留其行叔达并劾之诏大宝致仕寻卒年七十七

△金安节

金安节字彦亨歙州休宁人博洽经史尤精于易宣和六年繇太学擢进士第调洪

州新建县主簿绍兴初范宗尹引为删定官入对言司
马光以财用乏请用宰相领总计使宜以为法除司农丞又迁殿中侍御史论韩世忠子
彦直不当因父任除直秘阁不报任申先除待制致仕
安节劾其忿戾乞追夺秦桧兄梓知台州安节劾其附丽梁师成梓遂罢桧銜之未几丁
母忧去遂不出桧死起知严州除浙西提刊入为大理
卿首言治民之道先德后刑今守令虑不及远簿书期会赋税输纳穷日力办之而无卓
然以教化为务者愿申饬守令俾无专事法律苟可以
赞教化必力行之时获伪造盐引者大臣欲置之死安节力争以为事已十余年且自首
无死法因得减等两浙漕属王悦道鞠仁和令杨绩狱
不实事下大理安节并逮悦道悦道幸医王继先子也屡因人求免安节不从累迁礼部
侍郎将祠明堂时钦宗凶问至安节言宫庙行礼皆当
以大臣摄事从之迁侍讲给事中殿院杜莘老论张去为补外安节言不可因内侍而去
言官帝遂留莘老金海陵侵淮从幸建康海陵被杀安
节陈进取招纳备守三策而以备守为进取招纳之本帝将还临安命杨存中宣抚江淮
荆襄安节言存中顷以权太盛人言籍籍方解军政复
授兹职非所以全之又言方今正当大明赏罚乃首用刘宝王权刻剥庸懦之人何以激
劝将士帝皆纳之杨存中议省江淮州县安节言庐之
合肥和之濡须皆昔人控扼孔道曹丕东置合肥南守襄阳西固析山敌来辄破于三城
之下孙权筑濡须坞魏军累次不克守将如甘宁等常
以寡制众盖形势之地攻守百倍岂有昔人得之成功今日有之而反弃之耶且濡须巢
湖之水上接店步下接江口可通漕舟乞择将经理存
中议遂格孝宗嗣位给廷臣笔札陈当世事安节请严内降之科凡内侍省御药院内东
门司冗费一切罢去堂除省归吏部长官听辟僚属以
清中书之务文武荫补各有定制毋令易文资臣僚致仕遗表恩泽不宜奏异姓使得高
贲为市帝尝称其诚实一日因奏事面劳之曰近不见
缴驳有所见但缴驳朕无不听隆兴改元龙大渊曾觐并除知阁门事宰相知安节必以
为言使人讽之曰若书行即坐政府矣安节拒不纳封
还录黄时台谏相继论列不报安节与给事中周必大奏陛下即位台谏有所弹劾虽两
府大将当罢则罢当贬则贬独于二臣乃为迁就讳避
臣等若奉明诏则臣等负中外之谤大臣若不开陈则大臣负中外之责帝怒安节即自
劾乞窜帝意解命遂寝潜邸旧人李珂擢编修官安节
又奏罢之拜兵部侍郎金将布萨忠义遗三省枢密院书论和议乃画定四事诏羣臣议
安节谓世称侄国国号不加大字及用再拜二字皆不
可从海泗唐邓为淮襄屏蔽不可与必不得已盍少增岁币钦宗梓宫当迎奉陵寝地必

不肯归我宜每因遣使恭谒但讲好之后当益选将厉
兵以为后图已而请祠得请中书舍人胡铨缴奏谓安节太上之旧人而陛下之老成也
膂力未愆有忧国心岂宜从其引去帝遂留之踰年权
吏部尚书兼侍读自是力请谢事诏以敷文阁学士致仕干道六年卒年七十七赠通奉
大夫累赠开府仪同三司少保安节至孝与兄相友爱
田业悉推与之又以恩奏其孤子■〈亻与〉初筮仕未尝求荐于人及贵有举荐不令人
知其除司农丞或语之曰公是命张侍郎致远为中
司时所荐盍往谢之安节曰彼为朝廷荐人岂私我耶竟不往荐晁公武龚茂良可台谏
皆称职二人弗知也与秦桧忤不出者十八年及再起
论事终不屈人以此服之

△王刚中

王刚中字时亨饶州乐平人绍兴十五年进士第二人由推官改左宣义郎故事当
召试秦桧怒其不诣已授洪州教授桧死召见擢秘书
省校书郎迁著作佐郎孝宗为普安郡王刚中兼王府教授每侍讲极陈古今治乱之故
君子小人忠佞之辩迁中书舍人言今日先务在择将
帅搜战士实边储备器械使国势富强将良士勇帝韪其言以龙图阁待制知成都府制
置四川赐金带象笏进敷文阁直学士驭吏恩威并行
羽檄纷沓从容裁决皆中机会敌骑度大散关刚中夜驰二百里起吴玠于帐中责之曰
大将与国义同休戚临敌安得高枕而卧又以蜡书抵
张正彦济师西师大集金兵败走方议奏捷刚中倍道驰还谓其属李焘曰将帅之功吾
何有焉焘喟曰身督战而功成不居过人远矣已乃差
择将士众所推者上之朝备统帅选又疏蜀名士与幕府之贤备部使者州刺史之佐目
使颐指内外响应诸汰遣使臣困绝不能自存刚中以
为冒刃于少壮之年不可斥弃于既老之后悉召至有善射者复其禄秩以禁军阙额粮
给之其罢癯不堪事则给以义仓米成都万岁池广袤
十里溉三乡田岁久淤淀刚中集三乡夫共疏之累土为防上植榆柳表以石柱府学礼
殿东汉兴平中建后又建新学遭时多故日就倾圯属
九县缮完悉复其旧葺诸葛武侯祠平黄巢墓表贤瘝恶以小民有女巫蓄蛇为妖杀蛇
黥之孝宗受禅以宫僚进左朝奉大夫召赴阙以足疾
请祠提举太平兴国宫金侵淮有旨趣刚中入见陈战守之策除礼部尚书直学士院兼
给事中迁端明殿学士签书枢密院事进同知院事刚
中言战守者实事和议者虚名不可恃虚名害实事又奏四事开屯田省浮费选将帅汰
冗兵属疾卒年六十三赠资政殿大学士光禄大夫谥
恭简建炎闲诏阶成岷凤四州刺壮丁为兵众以为忧刚中言有五害罢之比去蜀父老

遮道有追送数百里者繇布衣至公卿无他嗜好公退
惟读书着文为乐云

△李彦颖

李彦颖字秀叔湖州德清人绍兴十八年擢进士第主余杭簿守曹泳豪斂酒家业
为官监利其费具彦颖争之泳怒戒吏煅炼不得毫发
罪调建德丞改秩时宰知其才将处之学官或劝使一见彦颖耻自献调富阳丞御史周
操荐为御史台主簿金败盟张浚督师进攻帝方向浚
执政坚主和陈良翰周操不以为然右正言尹穡阴符执政荐引同巳者数言和于帝前
帝惑之罢督府良翰操相继黜而穡迁谏议大夫一日
穡以和战守叩彦颖彦颖曰人所见固不同公既以和议为是曷不明陈于帝前以身任
之事成功归于公不成奉身而退若欲享其利而不及
其害国事将谁倚穡大怒曰自为谏官前后百余奏曷尝及一和字而台簿有是言自是
衔彦颖阴排之改国子博士权吏部郎中以父丧去免
丧复为吏部累迁权右史兼兵部侍郎经筵张栻讲葛覃言先王正家之道因及时事语
激切帝意不怍颜颖曰人臣事君岂不能阿谀取容栻
所以敢直言正为圣明在上得尽爱君之诚耳书曰有言逆于汝心必求诸道帝意遽解
立皇太子命彦颖兼左谕德首论建置宫僚以为詹事
于东宫内外无不当省事须白詹事而后行司马光论皇太子讲读官有奏疏录以进帝
大喜行之皇太子尹临安兼判官寻兼中书舍人张说
再登枢筦彦颖论说无寸长恐人心不服未几权礼部侍郎兼侍讲因言士习非委靡则
矫激宜择笃实夔亮者用之升詹事见帝言皇太子尹
临安已久虽欲更尝民事然非便宜一意讲学他日以告太子趣草奏辞尹事三辞乃免
兼吏部侍郎权尚书兼侍读月食淫雨言甲申岁以淫
雨求言今十年矣中闲非无水旱而不闻求言之诏岂以言多沽激厌之耶比欺蔽成风
侍从台谏犹慎嘿况其它乎阴沴之兴未必不由此时
廷臣多以中批斥去彦颖又言臣下有过宜显逐之使中外知获罪之由以为戒今潜毁
潜行斥命中出在廷莫测其故将恐阴邪得伸善类丧
气非盛世事也除吏部尚书迁端明殿学士签书枢密院事明年参知政事金使至帝遣
王抃谕金使稍变受书旧仪久不决彦颖曰须于国体
无损而事可济乃善若如去年张子颜之行不但无益时左司谏汤邦彦新进冀侥幸集
事自许立节彦颖言邦彦轻脱必误国不从遂以邦彦
为申议国信使且命福建造海船起两淮民兵赴合肥训练并诏诸军饬戎备中外骚然
彦颖复言两淮州县去合肥远者千余里近亦二三百
里令民户三丁起其二限三月而罢事未集民先失业矣帝作色曰卿欲尽撤边备耶彦

颖曰今不得已令三百里内家起一丁诣合肥三百里
外就州县训习日增给钱米限一月罢庶不大扰翌日复执奏从之洎邦彦辱命而还彦
颖论其罪贬新州彦颖在东府三岁实摄相事内降缴
回甚多内侍白札籍名造器械并篙师降旨发左藏封桩诸库钱动亿万计彦颖疏岁中
经费以进因言虞允文建此库以备边故曰封桩陛下
方有意恢复苟用之不节徒启他日妄费失封桩初意帝矍然曰卿言是自是绝不支坠
马在告力求去以资政殿学士知绍兴府勤约有惠政
提举洞霄宫复参知政事病羸艰拜起力辞帝曰老者不以筋力为礼孟享礼繁特免卿
谏官论其子殴人至死奉祠镌秩起知婺州禁民屠牛
捐属县税十三万三千缗复知绍兴府进资政殿大学士再奉词进观文殿大学士绍熙
元年【按宋史本传讹作绍兴元年今改正】致仕
家居凡十载与州县了不相闻卒年八十一赠少保谥忠文

△范成大

范成大字致能吴郡人绍兴二十四年擢进士第授户曹监和剂局隆兴元年迁正
字累迁著作佐郎除吏部郎官言者论其超躐罢奉祠
起知处州陛对论力之所及者三曰日力曰国力曰民力今尽以虚文耗之帝嘉纳处民
以争役器讼成大为朔义役随家贫富输金买田助当
役者甲乙轮第至二十年民便之其后入奏言及此诏颁其法于诸路处多山田梁天监
中作通济堰在松阳遂昌之闲激溪水四十里溉田二
十万亩岁久堰坏成大访古迹迭石筑防置堤闸四十九所上中下溉灌有序民食其利
除礼部员外郎兼崇政殿说书干道令以绢计赃估价
轻而论罪重成大奏承平时绢匹不及千钱而估价过倍绍兴初年递增五分为钱三千
今绢实贵当倍时直帝惊曰是陷民深文遂增为四千
而刑轻矣隆兴再讲和失定受书之礼帝尝悔之迁成大起居郎假资政殿大学士充金
祈请国信使国书专求陵寝盖泛使也帝面谕受书事
成大乞并载书中不从至燕山密草奏具言受书式怀之入初进国书词气慷慨金君臣
倾听成大忽奏曰两朝既为叔侄而受书礼未称臣有
疏措笏出之金主大骇曰此岂献书处耶左右以笏标起之成大屹不动必欲书达既而
归馆所金主遣伴使宣旨取奏成大之未起也金庭纷
然太子欲杀成大越王止之竟得全节而归【伏读通鉴辑览 御批宋之陵寝陷于
金地自当急图克还故壤初无恢复之谋徒以一介
行李乞哀吁请谁则怜其志而无端割地以卑之且遣使既已祈请为名而所争乃在受
书小节虽史称成大全节而归其于时事果何裨益耶

】除中书舍人初帝书崔实政论赐辅臣成大奏曰御书政论意在饬纲纪振积敝而近

日大理议刑递加一等此非以严致平乃酷也帝称善
张说除签书枢密院事成大当制留词头七日不下又上疏言之说命竟寢知静江府广西窘匮专藉盐利漕臣尽取之于是属邑有增价抑配
之敝诏复行钞盐漕司拘钞钱均给所部而钱不时至成大奏谓能裁抑漕司强取之数
以宽郡县则科抑可禁帝从之数年广州盐商上书乞
复令客贩宰相可其说成大出银钱助之人多以为非下有司议卒不易成大说旧法马
以四尺三寸为限诏加至四寸以上成大谓互市四十
年不宜骤改除敷文阁待制四川制置使疏言羌人桀黠臣当教阅将兵外修堡砦仍讲
明教阅团结之法使人自为战三者非财不可帝赐度
牒钱四十万缗成大谓西南诸边黎为要地增战兵五千奏置都监路分吐蕃入寇之路
十有八悉筑栅分戍羌众扰安静砦发飞山军千人赴
之料其三日必遁已而果然白水砦将王文才私取蛮女常导之寇边成大重赏檄羣蛮
使相疑贰俄擒文才以献即斩之蜀北边旧有义士三
万本民兵也监司郡守杂役之都统司又俾与大军更戍成大言其不可诏遵旧法蜀
知名士孙松寿年六十余樊汉广甫五十九皆挂冠不
仕表其节诏召之皆不起蜀士由是归心凡人才可用者悉致幕下用所长不拘小节其
杰然者露章荐之往往显于朝召对除权吏部尚书拜
参知政事为言者所论奉祠起知明州奏罢海物之献除端明殿学士寻帅金陵会岁旱
奏移军储米二十万振饥民减租米五万水贼徐五窃
发号静江大将军捕而戮之以病请闲进资政殿学士再领洞霄宫绍熙三年 【按宋史
本传讹作绍兴元年今改正】 加大学士四年卒成
大素有文名尤工于诗帝尝命陈俊卿择文士掌内制俊卿以成大及张震对焉

△黄洽

黄洽字德润福州侯官人隆兴元年赐第二人及第授绍兴府观察判官秩满就迁
不用前名例谒庙堂宰相陈俊卿白于帝改宣义郎除
国子博士改差浙东安抚司主管机宜文字继为枢密院编修官通判福州奉祠召为太
常丞请外孝宗曰黄洽厚德方任以事不许当对奏三
事备事莫若储才士卒当练其心军政必预为谋帝是之又奏愿戒飭州郡毋烦扰毋轻
易繇秘书郎迁著作郎帝谕词臣秘阁储英俊为异时
公卿用行黄洽词可及之除右正言迁侍御史会水旱频仍特诏诸路奉行荒政不力差
官按视安集洽奏一人兼二三路不过阅图账户口多
寡地里辽邈安能遍历乎若专责常平名正而职举事分而察精又奏艺祖惩藩镇偏重
之失不欲兵民之权聚于一夫之手今使主兵兼郡寄
是合兵民权为一且属边徼偏重尤甚帝皆嘉纳洽所论列未尝擻摭细故他愿以累其

终身除右谏议大夫在经筵言宰相抡才任职当尽公
心君子进则庶职举庶职举则天下治帝首肯再三除御史中丞奏荐举请托必竟于宰
执台谏之门若宰职台谏不为人觅举使士大夫咸自
率厉以公道得之岂不甚善或果知其人露章以荐亦何不可潭州奏强盗罪不至死应
配者坐加役流有旨具议洽曰强盗异他盗若止髡役
三年之后圈槛一弛豨突四出善良受害可胜数耶况役时必去防闲之具易于走逸患
尤甚焉帝深然之除参知政事上商榷除目洽罄竭无
所顾避帝大喜曰五十年无此差除除知枢密院事洽累章求去许之除资政殿大学士
知隆兴府光宗受禅特诏言事洽奏用人为万世不易
之论臣前以此纳忠寿皇今复告于陛下屡乞归田寻畀提举洞霄宫方未得请也人劝
之洽第洽曰吾书生蒙拔擢至此未有以报国而先营
私乎庆元二年致仕六年七月卒年七十九赠金紫光禄大夫洽质直瑞重有大臣体两
朝推为名臣云

△汪应辰

汪应辰字圣锡信州玉山人幼凝重家贫无膏油每拾薪苏以继晷十岁能诗未冠
首贡乡举试礼部居高选时赵鼎为相延之馆塾绍兴
五年进士第一人年甫十八御策以吏道民力兵势为问应辰答以为治之要以至诚为
本在人主反求而已帝览其对意其为老成之士及唱
第乃年少子帝甚异之初名洋特改赐应辰帝欲即除以馆职赵鼎言且令历外任养成
其材乃授镇东军签判应辰少受知于喻樗既擢第知
张九成贤问之于樗往从之游所学益进赵鼎为帅幕府事悉谘焉岁小旱命应辰祷雨
名山即应召为秘书省正字时秦桧力主和议王伦使
还金人欲以河南地来归应辰上疏谓和议不谐非所患和议谐矣而因循无备之可畏
异议不息非所患异议息矣而上下相蒙之可畏金虽
通和疆场之上宜各戒严今方且肆赦中外褒宠将帅以为休兵息民自此而始纵忘积
年之耻独不思异时意外之患乎此因循无备之所以
可畏也方朝廷力排羣议之初大则窜逐小则罢黜至有一言迎合则不次擢用是以小
人窥见闲隙轻躁者阿谀以希宠畏懦者循默以备位
而忠臣正士乃无以自立于羣小之闲此上下相蒙所以可畏也臣愿勿以和好之可无
虞而思患预防常若敌人之至疏奏秦桧大不悦出通
判建州遂请祠以归寓居常山之永年院饘粥不继处之裕如自是凡三主管崇道观张
九成谪邵州交游皆绝应辰时通问通判袁州始至或
以其书生易之已乃知吏师所不能及丞相赵鼎歿于朱崖扶丧过郡应辰为文祭之曰
两登上宰皆直艰危之时一斥南荒遂为死生之别事

已尽于盖棺恩特容于归骨吏付之火其子借三兵以归道出衢州章杰为守希桧意指应辰为阿附符移讯鞫徧搜行橐求祭文不可得时胡寅遗桧书谓此事不足竟事乃寝通判静江府广州时桧所深忌者赵鼎张浚鼎既死而浚独存未快其意江西运判张常先笺注前帅张宗元与浚诗言于朝其词连逮者数十家将诬以不轨而尽去之狱既具桧死应辰幸而免明年召为吏部郎官迁右司母老乞外乃出知婺州郡积欠上供十三万缗朝廷命宪漕究治应辰谓急则扰民乃与诸邑蠲宿逋去苛敛定期会室渗漏悉为补发寻丁内艰庐于墓侧服阙除秘书少监迁权吏部尚书李显忠冒具安丰军功赏五千余人应辰奏驳之权户部侍郎兼侍讲金渝盟诏求足食足兵之策应辰奏曰陆贽有云将非其人兵虽多不足恃操失其柄将虽才不为用臣之所忧不在兵之不足在乎军政之不修自讲和以来将士骄惰兵不阅习敌未至则望风逃遁敌既退则谩列战功不惟佚罚且或受赏望发英断赏善罚恶使人人洗心易虑以听上命然后号令必行矣三十二年建储集议太子本生父封爵应辰议称曰太子本生之亲议入内降曰皇太子所生父可封秀王暨内禅拟于传位日降赦应辰言唐太宗受禅于高祖明年正月始改元乃从其说又议改元重熙应辰谓契丹尝以纪年遂改隆兴一朝大典礼多应辰所定议太上尊号李焘陈康伯密议以光尧寿圣为称及集议或谓尊号始自开元罢于元丰今不当复况太上视天下如弃敝屣岂复顾此应辰主之尤力或又言主上奉亲乌得援元丰自却为比于是议状书者半不书者半应辰复与金安节等十二人各陈所见大槩谓光尧近乎神尧寿圣乃英宗诞节尝以名寺御史周必大亦以为问应辰答以尧岂可光是语有闻之德寿者高宗因帝过宫云汪应辰素不乐吾于是有诏尊号之议已尝奏知不容但已应辰连乞补外遂知福州未几升敷文阁待制举朱熹自代在镇二年会朝廷谋蜀帅乃以敷文阁直学士为四川制置使知成都府以书与宣抚使吴玠令以抚谕诏申严号令既至奏免利路民饷运及徙沿边戍兵就粮内郡纵保胜义士复业存左藏所解白契二百万以备不虞皆从之有谓蜀中纲马驿程由梁洋金房山路峻险宜浮江而下诏吴玠措置执政大将皆主其说应辰与夔帅王十朋力言其不便遂得中止二税勘合每贯取二十钱干道诏旨尝减三之一有欲增之者应辰与两漕臣列奏其不可乃止吴玠时驻蜀口武兴精兵为天下冠既老且病应辰密奏以关陕大将系国安危所当预图于是执政传旨若玠不起令制司暂领其任暨玠卒应辰遂摄宣抚蜀道晏然虞允文寻以知枢密院事宣抚四川应辰援张浚例

乞罢制司不许总所牒委官核四川匿税契应辰奏其不便者四曰妨农废业曰纵吏扰民曰违法害教曰长奸起讼比户部已令人自首州县收并已不少其未尽者有见行法令不宜为此烦扰帝为罢止之蜀大旱诏问救荒之策应辰奏利阡绵梓军马粮料随民力均敷官虽支余钱民不得半价若选官就岁熟处余之可以宽民力第无钱束手乞给度牒帝命给度牒四百永为余本賑济遂移书诸路漕臣亟救荒且以绵剑和余告之全蜀蒙惠刘珙拜同知枢密院事进言曰汪应辰陈良翰张栻学行才能臣所不及已得旨召还叩之安仁饥民起为盗害及旁郡即具奏且檄茶马使招捕旬月闲诛其渠魁余悉抚定或白之虞允文曰汪帅得无掩盗事不上闻乎宣司乃密奏使人给应辰曰叩寇事未敢奏不审制置司如何应辰以奏检报之允文内愧将行代纳成都一府激赏绢估三万三千九百八十四匹入覲以畏天爱民为言帝曰蜀中除虚额民闲当被实惠应辰奏虚额去则州县宽尚有两事曰预借曰对余预借乃州县累岁相仍对余则以补州县阙乏民输米一石即就余一石或半价或不支且多取赢陛下近捐百万除预领之弊对余患止数州愿并除之则弊革无余矣除吏部尚书寻兼翰林学士并侍读论爱民六事庙堂议不合不悦者众一日陈良佑登对帝告以汪应辰言卿在蜀多诞漫良佑奏臣与应辰昨同从班应辰请外得衢州臣惜其去同奏留之时边奏方急臣不知应辰将为便私计也奏既上应辰以此大憾乃为是说以中臣耳帝曰乃尔邪应辰在朝多革弊事中贵人皆侧目德寿宫方斲石池以水银浮金鳧鱼于上帝过之高宗指示曰水银正乏此买之汪尚书家帝怒曰注应辰力言朕置房廊与民争利自贩水银耶应辰知之力求去会赐发运使史正志缗钱二百万为均输和余之用应辰三十疏论之遂以端明殿学士知平江府韩玉被旨拣马过郡应辰简其礼玉归潜之曰臣所过州未有若平江之不治者帝怪之平江米纲至有折阅坐贬秩力疾请祠自是卧家不起矣 【伏读通鉴辑览

御批上皇谓水银买自汪尚书家孝宗既闻此言即当加体察如其事果实则以大臣而沽直牟利谴责固所应加否则宜为之辨白乃怀其夙昔建言之嫌勃然诘讽致应辰不安其官复假他事以罢之是非大公至正之道以致有实非买自应辰家之疑案盖孝宗既不能处之以光明正大故不免左袒应辰者为疑似之言也】 淳熙三年卒应辰接物温逊遇事特立不回流落岭峽十有七年桧死始还朝刚方正直敢言不避少从吕居仁胡安国游张栻吕祖谦深器许之尝释克巳之私如用兵克敌易愆忿室欲书刚制于酒愆室刚制皆克胜义好贤乐善出于天性

尤笃友爱尝以先畴逊其兄衢虽无屋可居不顾也子达继登进士第仕至吏部尚书端明殿学士

△王十朋

王十朋字龟龄温州乐清人资颖悟及长有文行聚徒梅溪受业者以百数入太学主司异其文秦桧死帝亲策士谕考官曰对策中有陈朝政切直者并寘上列十朋以权为对大略曰揽权者非欲衡石程书如秦皇传餐听政如隋文强明自任不任宰相如唐德宗精于吏事以察为明如唐宣宗盖欲陛下惩既往而戒未然威福一出于上而已尝有铺翠之禁而以翠羽为首饰者自若是岂法令不可禁乎抑宫中服澣濯之化衣不曳地之风未形于外乎法之至公者莫如选士名器之至重者莫如科第往岁权臣子孙门客类窃巍科有司以国家名器为媚权臣之具而欲得人可乎愿陛下正身以为本任贤以为助博采兼听以收其效帝嘉其经学淹通议论醇正遂擢为第一学者争传诵其策以拟古晁董帝用其言严销金铺翠之令取交址所贡翠物焚之谓十朋乃朕亲擢授绍兴府签判裁决如神吏奸不行时以四科求士府帅王师心谓十朋身兼四者独以应诏召为秘书郎兼建王府小学教授先是教授入讲堂居宾位十朋不可皇孙特加礼而位教授中坐金将渝盟十朋轮对言御敌莫急于用人今有天资忠义材兼文武可为将相者有长于用兵士卒乐为之用可为大帅者或投闲置散或老于藩郡愿起而用之以寝敌谋以图恢复盖指张浚刘锜也又言今权虽归于陛下政复出于多门是一桧死百桧生也杨存中以三衙而交结北司以盗大权汉之祸起于恭显王氏相为终始唐之祸起于北军藩镇相为表里今以管军位三公利源皆入其门阴结诸将相为党援枢密本兵之地立班甘居其后子弟亲戚布满清要台谏论列委曲庇护风宪独不行于管军之门何以为国至若清资加于吟伍高爵滥于医门诸军承受威福自恣甚于唐之监军皇城逻卒旁午察事甚于周之监谤将帅剥下赂上结怨三军道路捕人为卒结怨百姓皆非治世事帝嘉纳戢逻卒罢诸军承受更定枢密管军班次解杨存中兵权时十朋与冯方胡宪查钥李浩相继论事太学生为五贤诗述其事除著作郎三十一年正月风雷雨雪交作十朋以为阳不胜阴之验遗陈康伯书冀以春秋灾异之说力陈于上崇阳抑阴以弭天变迁大宗正丞亟请祠归金侵边起刘锜为江淮浙西制置使张浚帅金陵悉如其言孝宗受禅起知严州召拜司封郎中累迁国子司业言今居位者往往职之不举宜有以革之人主有大职三任贤纳谏赏罚是也帝嘉之除起居舍人升侍讲权除侍御史每见帝必陈恢复之计及

将北伐上疏曰天子之孝莫大于光祖宗安社稷靖康之祸亘古未有陛下英武慨然志在兴复窃闻每对羣臣奏事则曰当如朔业时又曰当以马上治之又曰其事当俟恢复后为之比因宣召语及陵寝圣容恻然曰四十年矣陛下之心真夏少康殷高宗周宣王汉光武之心奈何大臣不能仰副圣心愿戒在位者去附和之私心赞国家之大计则中兴日月可冀矣因论史浩八罪曰怀奸误国植党盗权忌言蔽贤欺君讪上帝为出浩知绍兴府十朋再疏绍兴密迳行都浩尝为属吏奸赃彰闻亦何颜复见其吏民遂改与祠史正志与浩族异拜浩而父事之十朋论正志倾险奸邪观时求进宜黜之以正典刑林安宅出入史浩龙大渊门盗弄威福至是诈病求致仕十朋并疏其罪皆罢去张浚出师复灵壁虹县归附者万计又复宿州十朋奏王师以吊民为主先之以招纳不获已而战伐随之乞以此指戒浚金将既降宜速加爵赏以劝来者帝皆嘉纳会李显忠邵宏渊不协王师失律张浚上表自劾主和者乘此倡异议十朋上疏言臣素不识浚闻其誓不与敌俱生心实慕之前因轮对言金必败盟乞用浚陛下嗣位命督师江淮今浚遣将取二县一月三捷皆服陛下任浚之难及王师一不利横议蠹起臣谓今日之师为祖宗陵寝为二帝复讎为二百年境土非前代好大生事者比益当内修俟时而动陛下恢复志立固不以一衄为羣议所摇然异论纷纷浚既待罪臣其可尚居风宪之职乞赐窜殛因言臣闻近日欲遣龙大渊抚谕淮南信否帝曰无之又言闻欲以杨存中充御营使帝嘿然改除吏部侍郎力辞出知饶州饶并湖盗出没其闲闻十朋至一夕遁去丞相洪适请故学基益其圃十朋曰先圣所居十朋何敢予人移知夔州饶民乞留不得至断其桥乃以车从闲道去众葺断桥以王公名之移知湖州召对刘珙请留之帝曰朕岂不知王十朋顾湖州被水非十朋莫能镇抚至郡户部责虚逋三十四万命吏持券往辨不听即请祠去起知泉州十朋前在湖割奉钱荆贡闾又为泉建之尤宏壮凡历四郡布上恩恤民隐士之贤者诣门以礼致之朔望会诸生学宫讲经询政僚属闲有不善反复告戒俾之自新民输租俾自槩量闻者相告宿逋亦愿偿讼至庭温词晓以理义多退听者所至人绘而祠之饶久旱入境雨至湖积霖入境即霁凡祷必应东宫建除太子詹事力辞诏州郡礼致遂力疾造朝以足疾不能趋诏给扶减拜谒东宫太子以其旧学待遇有加又诏免朝参赐裘衣金带疾革累章告老以龙图阁学士致仕命下而卒年六十绍熙三年【按宋史本传作绍兴三年误今改正】谥曰忠文十朋事亲孝友爱二弟郊恩先奏其名没而二子犹布衣书室扁曰不欺每以诸葛

亮颜真卿寇准范仲淹韩琦唐介自比子闻诗闻礼皆
笃学自立闻诗知光州提点江东刑狱闻礼知常州江东转运判官为治能守家法人亦
思慕之

△吴芾

吴芾字明可台州仙居人举进士第迁秘书正字与秦桧有旧至是桧已专政芾退
然如未尝识公坐旅进揖而退桧疑之风言者论罢通
判处婺越三郡知处州处旧苦丁绢重芾损之以新丁补其额何溥荐芾材中御史除监
察御史时金将败盟芾劝高宗专务修德痛自悔咎令
羣臣陈阙失求合于天地无愧乎祖宗则人心悦服天亦助顺矣帝韪其言迁殿中侍御
史两淮战不利廷臣争陈退避计芾言今日之事有进
无退既而海陵被弑上疏劝亲征车驾至建康芾请遂驻蹕以系中原之望高宗纳其说
会有密启还东者下侍从台谏议芾言今欲控带襄汉
引输湖广则临安不如建康便经理淮甸应接梁宋则临安不如建康近议者徒悦一时
扈从思归之人非为国计又言去岁两淮诸城望风奔
溃无一城能拒守者此秦桧壅塞言路挫折士气之余毒也能反其道则士气日振而见
危授命者有人矣知婺州孝宗初即位陞辞陈裴垕对
唐宪宗为治先正其心以为临御之初出治大原无越于此帝嘉纳至郡劝民义役金华
长仙乡民十有一家自以甲乙第其产相次执役几二
十年芾更其乡曰循理里曰信义以褒异之知绍兴府会稽赋重而折色尤甚芾以攒宫
在奏免支移折变鉴湖久废会岁大饥出常平米募饥
民浚治权刑部侍郎迁给事中改吏部侍郎以敷文阁直学士知临安府内侍家僮殴伤
酒家保芾捕治之徇于市权豪侧目执政议以芾使金
复除吏部侍郎且议以龙大渊为副芾曰是可与言行事者邪语闻得罢不行下迁礼部
侍郎力求去提举太平兴国宫时芾与陈俊卿俱以刚
直见忌未几俊卿亦引去中书舍人阎安中为孝宗言一臣之去非国之福起知太平州
移知隆兴府芾前后守六郡各因其俗为宽猛吏莫容
奸民怀惠利再奉祠屡告老以龙图阁直学士致仕卒年八十尝曰视官物当如已物视
公事当如私事与其得罪于百姓宁得罪于上官立朝
不偶晚退闲者十有四年自号湖山居士

△陈良翰

陈良翰字邦彦台州临海人蚤孤事母孝中绍兴五年进士第知温州瑞安县俗号
强梗吏治尚严良翰独抚以宽催租不下文符但揭示
之民竞乐输听讼咸得其情或问何术良翰曰第公此心如虚堂悬镜耳殿中侍御史吴
芾荐为检法官迁监察御史孝宗初元金主新立求和

而中原旧人多求归诏问何处以此良翰言议和复纳降皆非是必定计自治而和不和任之乃可张浚军淮泗以规进取而议者争献防江策
良翰言当固藩篱专委任今舍淮防江却地夺便朝廷过听使督府不得专阃外事误矣除右正言金再移书求故疆良翰言中原皆吾故土况
唐邓淮泗又金渝盟后以兵取之安得以故疆为言汤思退主遣小使卢仲贤李栻良翰言仲贤轻儆无耻栻自北来难信又言庙堂督府论议
不同边奏上闻皆阳唯诺而阴沮败之万一失事机督府安得独任其责帝称善朝廷遣史正志至建康与张浚议事乖牾良翰劾之帝曰正志
亦无罪良翰言陛下使浚守淮则任浚为重一郎官为轻且正志居中浚必为去就帝悟出正志为福建漕运杨存中为御营使总殿前军良翰
言存中久擅兵柄太上皇罢之奈何复假使名宜慎履霜之戒疏三上存中竟罢李栻不敢涉淮良翰奏夺其官仲贤至汴辄许金人以疆土岁
币而还帝大怒下仲贤吏欲诛之宰相叩头恳请得免复遣王之望龙大渊良翰言前遣使已辱命大臣不悔前失不谓秦桧复见今日且金要
我罢四郡屯兵以归之是不折一兵而坐收四千里要害之地决不可许若岁币则俟得陵寝然后与庶犹有名今议未决而之望遂行恐其辱
国不止于仲贤愿先驰一介往俟议决行未晚也诏侍从台谏议多是良翰遂以胡昉杨由义为审议官与敌议四郡不合困辱而归思退尚执
前论正言尹穡附思退以撼督府良翰为左司谏疏论思退奸邪误国宜早罢黜张浚精忠老谋不宜以小人言摇之孝宗曰思退前议固失然
朕爱其警敏冀可效卿其置之若魏公则今日孰出其右朕岂容有此意纵有之亦岂不谋卿等此殆言者有异意卿为朕谕之良翰顿首谢曰
陛下言及此天下幸甚宰相纵无全才盍取朴实犹缓急可倚赖思退庸狡小黠大痴将误国且警敏二字恐非明主卜相之法既退以上语谕
同列穡勃然变色明日亦请对遂罢良翰言职两淮既撤备金大入孝宗始深悔太学生数百人伏阙乞召用良翰胡铨王十朋而斩思退等思
退由是始败良翰累迁兵部侍郎除右谏议大夫奏以蜀汉之师下关陕以荆襄趋韩魏江淮捣青徐此今日大计四川既命大臣而荆淮未有
任责者亦当择重臣临之帝称善进给事中大将成闵冒请真俸有司坐获谴合门玉抃矫诏遣妄人谢显出境显既抵罪置闵与抃不问良翰
皆驳议请正典刑遂改礼部侍郎不拜以敷文阁待制提举江州太平兴国宫召为太子詹事既见帝属以调护之责一日召对选德殿出手书
唐太宗与魏征论仁德功利之说俾极陈今日所未至者良翰上疏畧曰仁德治之本功利治之效务本而效自至今承天意结民心任贤能退

小人择将帅收军情择监司吏久任皆行之有未至诚能革此八弊则仁德无累功利自致矣诏兼侍讲未几以疾告老除敷文阁直学士提举太平宫卒年六十五光宗立特谥献肃

△杜莘老

杜莘老字起莘眉州青神人唐工部甫十三世孙也绍兴闲第进士以亲老不赴廷对赐同进士出身授梁山军教授秦桧死魏良臣参大政莘老疏天下利害以闻良臣荐之主管礼兵部架阁文字彗星见东方高宗下诏求言莘老上书论彗鬣气所生多为兵兆国家为民息兵而将骄卒惰军政不肃今因天戒以修人事思患预防莫大于此因陈时弊十事时应诏者众帝命择其议论切当推恩以劝之后省以莘老为首进一阶迁敕令删定官太常寺主簿升博士轮对论金将败盟宜飭边备勿恃其不来恃吾有以待之帝称善再三迁秘书丞论江淮守备擢监察御史迁殿中侍御史陈俊卿既解言职力求去莘老奏曰多事之际令俊卿辈在论思之地必有补益帝以为然俊卿辈复留金遣使致嫚书传钦宗凶问请淮汉地指索大臣帝决策亲征莘老疏谓当待以不惧勿以小利钝为异议所摇谏言所惰则人心有恃而士气振矣宜不限早暮延见大臣侍从谋议国事申敕侍从台谏监司守臣亟举可用之才又言亲征有期而禁卫纔五千余羸老居半至不能介胄者愿亟留圣虑事皆施行知枢密院事周麟之初请使金及嫚书至闻金将盛兵侵边乃大恐建言不必遣使莘老劾麟之挟奸罔上避事辞难恐惧至于掩泣寻与宫观疏再上乃责瑞州幸医承宣使王继先怙宠干法富浮公室闻边警亟辇重宝归吴兴为避敌计莘老疏其十罪帝曰初以太后饵其药稍假恩宠不谓小人骄横乃尔莘老曰继先罪擢发不足数臣所奏其大槩耳帝作色曰有恩无威有赏无罚虽尧舜不能治天下诏继先福州居住子孙皆勒停籍其赀以千万计诏入御前激赏库专以赏将士天下称快内侍张去为取御马院西兵二百髡其顶都人异之口语籍籍莘老弹治帝疑其未审不乐莘老执奏不已乃罢去为御马院致仕而莘老亦以直显谟阁知遂宁府给事中金安节中书舍人刘珙封还制书改司农少卿寻请外仍与遂宁始莘老自蜀造朝不以家行高宗闻其清修独处甚重之一日因对褒谕曰闻卿出蜀即蒲团纸帐如僧然难及也未几遂擢用莘老官中都久知公论所予夺奸蠹者皆得其根本脉络尝叹曰台谏当论天下第一事若有所畏姑言其次是欺其心不敬其君者也及任言责极言无隐取众所指目者悉击去声振一时治郡课绩为诸州最孝宗受禅莘老进三议曰定国是修内政养根本寻卒年五

十八

钦定续通志卷三百八十五

●钦定续通志卷三百八十六 列传一百八十六

列传

宋 【九十】

○宋九十

周执羔 王希吕 陈良佑 李浩 陈橐 胡沂

唐文若 李焘

周执羔

王希吕

陈良佑

李浩

陈橐

胡沂

唐文若

李焘

△周执羔

周执羔字表卿信州弋阳人宣和六年举进士廷试徽宗擢为第二授湖州司士曹事俄除太学博士建炎初乘輿南渡自京师奔诣扬州

不及遂从隆佑太后于江西还覲会稽寻以继母刘疾乞归就养调抚州宜黄县丞时四境倣扰溃卒相挺为变令大恐不知所为执羔谕以祸

福皆敛手听命既又执首谋者斩以徇邑人德之绘像立祠历通判湖州平江府召为将作监丞累迁右司员外郎擢权礼部侍郎充贺金生辰

使往岁奉使官得自辟其属赏典既厚愿行者多纳金以请执羔始拒绝之使还兼权吏部侍郎同知贡举以言事忤秦桧御史劾罢之起知眉

州徙阆州又改夔州兼夔路安抚使溱播蛮叛其豪帅请遣兵致讨执羔谓曰朝廷用尔为长今一方驿骚责将焉往能尽力则贖尔一兵不可

得也豪惧斩叛者以献移知饶州寻除敷文阁待制干道初守婺州召还提举佑神观兼侍讲首进二说以为王道在正心诚意立国在节用爱

人二年复为礼部侍郎孝宗患人才难知执羔曰今一介干进亦蒙赐召口舌相高殆成风俗岂可使之得志哉上曰卿言是也拜本部尚书升

侍读固辞不许统元历差命执羔厘正用刘义叟法推日月交食考五纬羸缩以纪气朔寒温之候撰历议历书五星测验各一卷上之上尝问

丰财之术执羔以为蠹民之本莫甚于兵古者兴师十万日费千金今尺籍之数十倍于

此罢癯老弱者几半不汰之其弊益深论和余本以给
军兴豫凶灾盖国家不得已而为之若边境无事妨于民食而务为聚敛可乎旧余有常
数比年每郡增至一二十万石今诸路枯旱之余虫螟
大起无以供常税况数外取之乎宜视一路一郡一县丰凶之数轻重行之灾甚者蠲之
可也诏从之求去上谓辅臣曰朕惜其老成宜以经筵
留之除龙图阁学士提举佑神观在经筵二年每劝上以辨忠邪纳谏争上深知其忠明
年告老上谕曰祖宗时近臣有年踰八十尚留者卿之
齿未也命却其章未几复申前请诏提举江州太平兴国宫赐茶药御书时闽粤江西岁
饥盗起执羔陞辞以为言诏遣太府丞马希言使诸路
振救之干道六年卒年七十七执羔立朝无朋比治郡廉恕有循吏风手不释卷尤通于
易

△王希吕

王希吕字仲行宿州人渡江后自北归南既仕寓居嘉兴府干道五年登进士科六
年召试授秘书省正字除右正言时张说以攀援戚属
擢用再除签书枢密院事希吕与侍御史李衡交章劾之上疑其合党邀名责远小监当
既而悔之改授宫观去国之日屏徒御蹶履以行恬不
为悔由是直声闻于远迩淳熙二年除吏部员外郎寻除起居郎兼中书舍人淮右择帅
命希吕知庐州兼安抚使修葺城守安集流散兵民赖
之加直宝文阁江西转运副使五年召为起居郎累迁吏部尚书求去乃除端明殿学士
知绍兴府寻以言者落职希吕天性刚劲遇利害无回
护意惟是之从尝论近习用事语极切至佐漕江西日尝作拳石记以示僚属一幕官举
笔涂数字举坐骇愕希吕喜其不阿荐之治郡百废俱
兴尤敬礼文学端方之士操行廉洁至无屋可庐由绍兴归犹寓僧寺上闻之赐钱造第
后以疾卒于家

△陈良佑

陈良佑字天与婺州金华人年十九预乡荐入太学绍兴二十四年擢进士第调兴
国军司户以荐除太学录枢密院编修官累迁军器监
兼邓王府直讲隆兴元年出为福建路转运副使明道三年除起居舍人兼权中书舍人
迁起居郎寻除右司谏首言会子之弊愿捐内帑以舒
细民之急上曰朕积财何用发内府白金数万两收换会子收铜版勿造军民翕然未几
户部得请改造五百万又奏陛下号令在前不能持半
岁久以此令民谁能信之既而又欲造会子二千万屡争之不得遂请以五百万换旧会
俟通行渐收之当使不越千万之数上锐意图治以唐
太宗自比良佑言太宗政要愿赐省览择善而从知非而戒使臣为良臣勿为忠臣上曰

卿亦当以魏征自勉又言陛下躬行节俭弗殖货利或托肺腑之亲为市井之行以公侯之贵牟商贾之利占田畴擅山泽犯法冒禁非所以维持纪纲愿严戒敕时左相丁外艰起复良佑言起复非正礼今无疆场之事宜使之终丧遂寝迁右谏议大夫【按齐东野语载张说奏置酒延众侍从帝许之客毕集独良佑不至说不平奏臣奉旨而后敢集客陈良佑不至是违圣意也中批陈良佑除谏议大夫附识】兼侍讲同知贡举累迁吏部尚书时议遣使请地良佑奏遣使乃启衅之端万一敌骑侵边则民力困于供输州郡疲于调发兵连祸结未有息期且今之求地欲得河南曩岁尝归版图不旋踵而又失如其不许徒费往来若其许我必邀重币经理未定根本内虚又将随而取之矣必须遣使则祈请钦宗梓宫犹为有辞内视不足何暇事外迹者未怀岂能绥远奏入忤旨贬瑞州居住寻移信州九年许令自便淳熙四年起知徽州寻除敷文阁待制知建宁府卒

△李浩

李浩字德远其先居建昌迁临川浩早有文称绍兴十二年擢进士第时秦熺以宰相子魁多士同年皆见之浩独不往调饶州司户参军襄阳府观察推官继调金州教授改太常寺主簿寻兼光禄寺丞轮对首陈无逸之戒且言宿卫大将杨存中恩宠太过上悟旋令就第自秦桧用事塞言路及上总览权纲激厉忠说此习尚存朝士多务慎默至是命百官转对浩与王十朋冯方查钥胡宪始相继言事闻者兴起浩不安于朝请祠主管台州崇道观以归孝宗即位以太常丞召时张浚督师江淮宰相多抑之浩引仁宗用韩琦范仲淹诏章得象故事乞谕令同心协济兼权吏部郎官浩雅为汤思退所厚御史尹穉欲引之以共挤浚因荐浩及对乃明示不同之意二人皆不乐踰年始除员外郎兼皇子恭王府直讲在王府多所裨益未几宰相召为郎者四人将进用之尤属意浩浩嘿然无一辞同舍皆迁浩独如故踰年浙河水灾诏郎官馆职以上条时政阙失浩奏疏指论近臣并及宰执惟奉行台谏多迎合百执事顾忌畏缩反复数千言用事者深忌之乞外得台州州有拣中禁军五百人训练官贪残失众心不逞者因谋作乱浩推其为首者四人黥徙之迄无事除直秘阁并海有宿寇久不获浩募其徒自缚赎罪即得其魁里豪民郑宪以货给事权贵人门囊橐为奸事觉械系之死狱中尽籍其家徙其妻孥权贵人教其家讼冤且诬浩以买妾事言者用是挤之疏方上权参政刘珙越次奏曰李浩为郡捕治豪民为其所诬臣考其本末甚白帝曰守臣不畏强御岂易得耶遂留中不下大理观望犹欲还其

所没贖上批其后曰合州所断至甚允当郑宪家贖永不给还流徙如故浩始得安明年除司农少卿时胡廷和余米八万董其事者贱余湿恶隐克官钱户部不敢诘浩白发其奸下有司穷竟户部欲就支稽见数大理附会之浩争曰非但惠奸且亏军食上是其言遂除大理卿浩前在司农尝因面对陈经理两淮之策至是为金使接伴还奏曰臣亲见两淮可耕之田尽为废地心尝痛之条画营屯以为恢复根本又言比日措置边事甚张皇愿饬将吏备御无规微利近功日与大臣修治具结人心持重安静以俟敌衅上悉嘉纳宰相议遣泛使浩与辨其不可至以官职詅之浩怒以语触之且力求外以直宝文阁知静江府兼广西安抚使帝谕大臣曰李浩营田议甚可行大臣莫有应者浩至郡旧有灵渠通漕运及灌溉岁久不治命疏之民赖其利邕管所隶安平州其酋恃险谋聚兵为边患浩遣单使谕以祸福且许其引赦自新即谢过焚彻水栅听约束治广二年召还入对论俗不美者八其言曰陛下所求者规谏而臣下专务迎命所贵者执守而臣下专务顺从所惜者名器而侥幸之路未塞所重者廉耻而趋附之门尚开儒术可行而有险诋之徒下情当尽而有壅蔽之患期以气节而偷惰者得以苟容责以实效而诞慢者得以自售上问诞慢者谓谁浩具以实对翌日谓宰相曰李浩直谏遂除权吏部侍郎时政府有怙宠窃权者党与非一自浩之入已相侧目且欲以甘言诱之浩中立不倚于是嗾谏议大夫姚宪论浩以强狠之资挟奸谀之志寘之近列变乱黑白未及正谢而罢干道九年提举太平兴国宫明年夏夔路阙帅命浩以秘阁修撰往夔有羈縻州曰思州世袭为守则田氏与其犹子不协将起兵相攻浩草檄遣官为劝解二人感悟尽释前憾边得以宁踰年以疾请祠提举玉隆万寿宫命未至而卒年六十一诏特赠集英殿修撰浩天资质直涵养浑厚立朝以时事为已任忠愤激烈言切时弊不以利害动其心为郡尤洁已自海右归不载南海一物平生奉养如布衣时风裁素高人不敢干以私云

△陈橐

陈橐字德应绍兴余姚人登政和上舍第教授盩州以母老改台州士曹治狱平允易越州新昌令以恺悌称吕颐浩欲援为御史约先一见橐曰宰相用人乃使之呈身耶谢不往赵鼎李光交荐其才绍兴二年除监察御史论事不合诏以宰邑有治行除江西运判瑞昌令倚势受赂橐首劾罢之期年所按以十数至有望风解印绶者乞归养母诏橐善抚字移知台州台有五邑橐先尝摄其三民怀惠爱越境欢迎不数月丁母忧州人相率赴行在请起橐上谓近臣曰陈橐有古循吏风终丧以司勋郎中召累

迁权刑部侍郎时秦桧力主和议橐疏谓二圣远狩沙漠百姓肝脑涂地今天意既回兵势渐集宜乘时恢复以雪国耻否亦当按兵严备乘势而动舍此不为乃遽讲和何以系中原之望既而金厚有所邀议久不决将再遣使橐复言金每挟讲和以售其谋论者因其废刘豫又还河南地遂谓其有意于和臣以为不然金之立豫盖欲自为捍蔽使之南窥豫每犯顺率皆败北金知不足恃从而废之岂为我哉河南之地欲付之他人入则必以豫为戒故捐以归我往岁金书尝谓岁帑多寡听我所裁乃竟反复如此且割地通和则彼此各守封疆可也而同州之桥至今存焉恐其假和好之说骋谬悠之辞包藏祸心变出不测愿严战守之备使人人激厉常若敌至苟彼通和则我之振饬武备不害为立国之常如其不然决意恢复之图勿循私曲之说庶梓宫太后可还祖宗疆土可复矣桧憾之橐因力请去未几金果渝盟除徽猷阁待制知颍昌府时河南新疆初复无敢往者橐即日就道次寿春则颍已不守改处州又改广州兵兴后广东盗贼无宁岁十年九易牧守橐尽革弊政以恩先之民皆悦服初朝廷移韩京一军屯循州会郴寇骆科犯广西诏遣京讨之橐奏广东累年困于寇贼自京移屯敌稍知畏今悉军赴广西则广东危矣桧以橐为京地坐稽留机事降秩屡上章告老改婺州请不已遂致仕又十二年以病卒于家年六十六橐刚介不事产业先世田庐悉推予兄弟在广积年四方聘币一不入私室既谢事归剡中侨寓僧寺日余以食处之泰然王十朋为风土赋论近世会稽人物曰杜祁公之后有陈德应云

△胡沂

胡沂字周伯绍兴余姚人父宗伋不逐时好时称醇儒沂颖异六岁诵五经皆毕不忘一字绍兴五年进士甲科累任州县至二十八年始入为正字累迁右司员外郎孝宗受禅除国子司业邓王府直讲寻擢殿中侍御史有旨侍从侍从台谏条具方今时务沂言守御之利莫若今沿边屯田东作方兴且虑敌人乘时惊扰宜聚兵险隘防守诏行其言御史中丞辛次膺论殿帅成闵黜货不恤士卒之罪诏罢殿前司职事与祠沂再言其二十罪遂落太尉婺州居住沂又言将臣定十等之目令其举荐施之择将之顷则可施之养士则未也夫设武举立武学试之以弓马又试之以韬畧之文兵机之策盖将有所用也除高等一二名余皆吏部授以榷酤征商所养非所用所用非所养愿诏大臣详议中举者定品格分差边将下准备差遣则人人思奋应上之求矣从之时龙大渊曾覲以藩邸旧恩除知合门事沂论其市权招士请屏远之未听而谏

官刘度坐抗论左迁沂累章益恳切曰大渊觐不屏去安知无柳宗元刘禹锡辈挠节以从之者好进者嫉其言共排之沂亦以言不行请去遂以直显谟阁主管台州崇道观干道元年召为宗正少卿兼皇太子庆王府赞礼寻兼侍讲进中书舍人给事中进对论命令当谨之于造命之初上曰三代盛时如此卿职在缴驳事有当然勿谓拂君相不言除吏部侍郎兼权尚书沂奏请令敕令所官纂修七司法颁之中外诏行之寻以目疾丐祠六年以徽猷阁待制知处州复引疾提举江州太平兴国宫八年以待制除太子詹事寻复拜给事中进礼部尚书并兼领詹事又改侍读上顾沂厚有大用意而沂资性恬退无所依附数请去虞允文当国希旨建策复中原沂极论金无衅而我诸将未见可任此事者数梗其议遂以龙图阁学士仍提举兴国宫淳熙元年卒年六十八谥献肃

△唐文若

唐文若字立夫眉山人父庚在文苑传文若少英迈不羣为文豪健登进士第分教潼川府给事中勾涛荐自伐诏赴行在所既至而勾涛出不得见文若奏书请对翌日召对便殿高宗大悦特旨改合入官通判洋州洋之西乡县产茶亘陵谷八百余里山穷险赋不尽括使者韩球将增赋以市宠园户避苛敛转徙饥馑相籍文若力争之赋迄不增再通判遂宁府会大水民多漂死文若至城上发库钱募游者振活甚众又力请于朝除田租二万一千顷免场务税二十余所筑长堤以遏水势自是无水患秦桧死上访蜀士于魏良臣以文若对二十六年以光禄丞召改秘书郎为文思箴以献其畧曰于赫我皇兵既休矣兵休如何莫若治兵居安思危邦乃攸宁爰整其旅文王以兴载舞千羽舜仁用成向戍弭兵春秋所惩萧俛去兵祸乱乃萌师则多矣军则强矣纵弛不绳犹曰无人兵非以残以兵休兵凡千五百余言自桧主和朝论讳言兵故文若以此风焉迁起居郎劝上收用西北人材以固根本上深纳之将命以掌制时有为宣和参政请恩为司谏凌哲所弹文若喜其直作禾黍诗以美之侍御史周方崇以为讥已劾文若狂诞出知邵州上屡为近臣言唐文若无罪可改近郡知饶州兴学宫减田租奇耗二万石又请岁余常平义仓之储什三与民平市农未俱利而粟不腐遂以着令属邑有剧盗巡尉不能制文若遣牙兵捕而戮之加直敷文阁移知温州三十一年召为宗正少卿金人侵边文若首建大臣节制江上之议复除起居郎时诸将北出捷书日闻上下有狃志独文若忧之图上元嘉北伐故事未几诸军退守金主自将围大将王权于历阳权遁淮南尽没诏百官廷议文若画三策一请上亲征二乞遣大臣劳军三乞起张浚工部侍

郎许尹是其言众遂列奏上之不报文若寻面对上问曰今计安出卿熟张浚否文若曰浚守道笃学天下属望今四十年矣天不死浚岭海正为今日上矍然起浚知平江府盖上以浚虽忠恇将士多不附文若复言浚本以孤忠得众寻改浚镇建康府将以为江淮宣抚使中沮之而止乘輿幸江表以起居郎兼给事中直学士院同羣司居守驾还迁中书舍人孝宗嗣位张浚以右府都督江淮军事文若时以疾请外除敷文阁待制知汉州寻改都督府参赞军事浚使行边按守备未还除知鼎州改江州明年浚入相都督府罢其冬金复大入官军悉戍淮文若谓上流当严兵备以定民志奏籍乡丁五万训练有法人倚以固解严和余大起郡之数八万文若以民劳坚请得减什三千道元年卒年六十赠左通奉大夫

△李焘

李焘字仁甫眉州丹棱人唐宗室曹王之后也绍兴八年擢进士第调华阳簿再调雅州推官改秩知双流县仕族张氏子居丧而争产焘曰若忍坠先训乎盖归思之三日复来迄悔艾无讼又有不自白其母而鬻产者焘寘之理豪强敛迹焘耻读王氏书独博极载籍慨然以史自任本朝典故尤悉力研核仿司马光资治通鉴例断自建隆迄于靖康【按宋史本传作迄于建康误今改】为编年一书名曰长编仍效光体为百官公卿表史官以闻诏给札来上制置王刚中辟干办公事知荣州荣因溪为隍夏秋率苦水潦焘筑防捍之除潼川府路转运判官入境劾守令不职者四人县多聚敛焘括一路财赋额通有无酌三年中数定为科约上之朝颁之州县干道三年召对首举艺祖治身治家治官治吏典故以为恢复之治乞增置谏官许六察言事请练兵毋增兵杜诸将私献核军中虚籍除兵部员外郎兼礼部郎中会庆节上寿在郊礼散斋内议权作乐焘言汉唐祀天地散斋四日致斋四日建隆初郊亦然自崇宁大观法周礼祭天地故前十日受誓戒今既合祭宜复汉唐及建隆旧制庶几两得诏垂拱上寿止乐正殿为北使权用正除礼部郎中言中兴祭礼未备请以开宝通礼嘉佑因革礼政和新仪令太常寺参校同异修成祭法四年上续通鉴长编自建隆至治平凡一百八卷五年迁秘书少监兼权起居舍人寻兼实录院检讨官子屋试贤良方正直言极谏科焘素谓唐三百年不愧此科者惟刘去华心慕之尝以所著通论五十篇见蜀帅张焘欲应诏不偶而止至是吏部尚书汪应辰荐屋文行可应诏故有是命左相陈俊卿出知福州右相虞允文任恢复事更张旧典宰相以焘数言事不乐焘遂请去除直显谟阁湖北转运副使陞

辞以欲速变古为戒又奏禹贡九州岛荆田第八赋乃在三人功既修遂超五等今田多荒芜赋亏十八上命之条画既至奏荆湖之民结茅而庐筑土而坊佣牛而犁余种而殖谷苗未立睥睨已多有横加科敛者今宜宽侵冒之禁依干德诏书止输旧税广收募之术如咸平元丰故事劝课有劳者推恩诏从之总饷吕游问入奏煮掇其事岁饥发鄂州大军仓振之僚属争执不可煮曰吾自任不以累诸君寻如数偿之游问返果劾煮专上止令具析不之罪也八年直宝文阁帅潼川兼知泸州首葺石门堡以扼蛮界奏乞戒茶马司市叙州羈縻马毋溢额戒官民毋于夷汉禁山伐木造舟奏移锁水于开边旧池皆报可淳熙改元被召适城中火上章自劾提刑何熙志奏焚数不实且言长编记魏王食肥彘语涉诬谤上曰宪臣按奏火数失实职也何预国史命成都提刑李夔究火事诏熙志贬二秩罢煮止贬一秩煮及都门乞祠除江西运副且许临遣或劝以方被谗无及时事煮曰圣主全度如此竭忠所以为报遂奏日食地震皆阴盛不可不虑且申无变古无欲速两言又上快箴引太祖罢朝悔乘快决事以谏上曰朕当揭之座右进秘阁修撰权同修国史权实录院同修撰煮为左史时尝乞复行明堂礼谓南郊明堂初无隆杀合视圜坛特免出郊浮费至是申言之诏集议夔幸沮止其后周必大为礼部尚书申其说始克行权礼部侍郎七月壬戌雷震太祖庙柱坏鸱尾有司旋加修缮煮奏非所以畏天变当应以实上谕大臣曰煮爱朕屡进谏言赐金紫尝请正太祖东向之位四年驾幸太学以执经特转一官煮论两学释奠从祀孔子当升范仲淹欧阳修司马光苏轼黜王安石父子从祀武成王当黜李绩众议不叶止黜王雱而已真拜侍郎仍兼工部煮荐吕祖谦有学识召为秘书郎兼检讨官夜直宣引奏近者蒙气蔽日厥占不肖者禄股肱耳目宜谨厥与寻诏监视太史测验天文屋既中制科为秘书省正字寻迁著作郎兼国史实录院修撰检讨官父子同主史事搢绅荣之煮感上知遇论事益切每集议众莫敢发言独条陈可否无所避近臣复举其次子塾应制科以阁试不中程黜屋偶考上舍试卷发策问制科为御史所劾语连及煮屋罢煮亦知常德府初政和末澧辰沅靖四州置营田刀弩手募人开边范世雄等附会扰民建炎罢之干道闲有建请复置者煮为转运使尝奏不当复已而提刑尹机迫郡县行之田不能给煮至是又申言之请度田立额且约帅臣张栻列奏诏从之境多茶园异时禁切商贾率至交兵煮曰官捕茶贼岂禁茶商听其自如讫无警累表乞闲提举兴国宫明堂大礼成以其首议复除敷文阁待制顷之屋塾继亡上欲以吏事纾煮忧起知遂宁府七年长编

全书成上之诏藏秘阁焘自谓此书寔失之繁无失之略故一祖八宗之事凡九百七十八卷卷第总目五卷【按文献通考载淳熙九年知遂宁府李焘上言臣累次进所为续资治通鉴长编今重别写进共九百八十卷计六百四册其修换事总为目一十卷又缘一百六十八年之事分散为九百八十卷之闲文字繁多本末颇难立见畧存梗槩庶易检寻今创为建隆至靖康举要六十八卷并卷总目共五卷也上四种通计一千六十三卷六百八十七册又建炎以来朝野杂记载焘为遂宁守始其全书自建隆至靖康凡九百八十卷举要六十八卷帝甚重之以其书付秘书省又赵希弁读书附志载续资治通鉴长编九百四十六卷太祖至英宗一百七十五卷神宗朝二百二十八卷哲宗朝二百二十卷徽宗朝三百二十三卷希弁所藏蜀本视书坊所刊者为详弁自尝为续资治通鉴长编补注一书以补诏敕奏编等阙又陈振书录解题云其卷数虽如此而册数止余三百盖逐卷又自分子卷或至十余卷大畧皆温公旧规也又玉海载焘又撰江左方镇年表十六卷自晋永嘉讫陈贞明以孙氏不能保淮李氏不能输浙又无荆及巴蜀故削而不着又玉海载杨仲良为长编纪事本末一百五十卷宋史本传载一祖入宗之事凡九百七十八卷卷第总目五卷语未详备兹采各书附识】依熙宁修三经例损益修换四千四百余事上谓其书无愧司马迁焘尝举汉石渠白虎故事请上称制临决又请冠序上许之竟不克就又奏陛下即位二十余年志在富强而兵弱财匱与教民七年可以即戎者异矣一日召对延和殿讲臣方读陆贄奏议焘因言贄虽相德宗其实不遇今遇陛下可谓千载一时遂举贄所言切于今可举而行者数十事劝上力行之上有功业不足之叹焘曰功业见乎变通人事既修天应乃至进敷文阁学士提举佑神观兼侍讲同修国史荐尤袤刘清之十人为史官因转对乞用祖宗故事召宰执赴经筵太史言十一月朔日当食心八分焘复条上古今日食是月者三十四事因奏之曰心天王位其分为宋十一月于卦为复方潜阳时阴气乘之故比他食为重非小人害政即敌人窥中国明日对延和殿又及晋何曾讥武帝无经国远图十一年春乞致仕优诏不允上数问其疾增损给事中宇文价傅旨焘曰臣子恋阙非老病忍乞骸骨因叩价时事勉以忠荅久闻四川乞减酒课额犹手札赞庙堂行之病革除敷文阁学士致仕口占遗表云臣年七十死不为天所恨报国缺然愿陛下经远以艺祖为师用人以昭陵为则辞气舒徐乃卒上闻嗟悼赠光禄大夫谥文简他日谓宇文价曰朕尝许焘大书续资治通鉴长编七字且用神宗赐司马光故事为序冠篇不谓其

止此煮性刚大特立独行在从列每正色以订国论张栻尝曰李仁甫如霜松雪柏无嗜好无姬侍不殖产平生生死文字闲长编一书用力四十年叶适以为春秋以后纔有此书累赠太师温国公子屋■〈无上土下〉塾壁■〈直上土下〉壁■〈直上土下〉皆执政别有传

钦定续通志卷三百八十六

●钦定续通志卷三百八十七 列传一百八十七

列传

宋【九十一】

○宋九十一

尤袤 谢谔 颜师鲁 袁枢 李椿 刘仪凤

张孝祥 李衡 王自中 家愿

【杨恂】 张纲 张大经 蔡洸 莫蒙 周淙 刘章 沈作宾

尤袤

谢谔

颜师鲁

袁枢

李椿

刘仪凤

张孝祥

李衡

王自中

家愿【杨恂】

张纲

张大经

蔡洸

莫蒙

周淙

刘章

沈作宾

△尤袤

尤袤字延之常州无锡人少颖异入太学以词赋冠多士寻冠南宫绍兴十八年擢进士第尝为泰兴令问民疾苦皆曰邵伯镇置顿为金

使经行也使率不受而空厉民漕司输藁秸致一束数十金二弊久莫之去乃力请台阍

奏免之县旧有外城屡残于敌颓毁甚袤即修筑已而
金渝盟陷扬州独泰兴以有城得全吏民为立生祠注江阴学官需次七年为读书计从
臣以靖退荐召除将作监簿太宗正阙丞人争求之陈
俊卿曰当予不求者遂除袤累迁著作郎兼太子侍读先是张说自阁门入西府士论鼎
沸从臣因执奏而去者数十人袤率三馆上书谏且不
往见后说留身密奏于是梁克家罢相袤与秘书少监陈騏各与郡袤得台州前守赵汝
愚修郡城工纔什三属袤成之袤命更筑加高厚明年
大水正值水冲城赖以不没会有毁袤者帝疑之使人密察民诵其善政不绝口乃录其
东湖四诗归奏帝读而叹赏遂以文字受知除淮东提
举常平改江东岁旱单车行部核一路常平米通融有无以之振贷朱熹知南康讲荒政
下五等户租五斗以下悉蠲之袤推行于诸部民无流
殍累进直敷文阁江东提刑以梁克家荐召对言水旱之备惟常平义仓愿预饬有司随
市价禁科抑则人自乐输必易集事除吏部郎官太子
侍讲累迁枢密院正兼左谕德轮对又申言民贫兵怨者甚切夏旱诏求阙失袤上封事
大略言天地之气宣通则和雍遏则乖人心舒畅则悦
抑郁则愤催科峻急而农民怨关征苛察而商旅怨差注留滞而士大夫有失职之怨廩
给腴削而士卒有不足之怨奏献不时报而久系囚者
怨幽枉不获伸而负累者怨强暴杀人多特贷命使已死者怨有司买纳不即酬价负贩
者怨人心抑郁所以感伤天和方今救荒之策莫急于
劝分输纳既多朝廷吝于推赏乞诏有司检举行之淳熙十四年冬十月除太常寺少卿
自南渡后典礼散失每有讨论悉付之袤斟酌损益便
于今而不戾于古高宗庙号从袤所定也时诏皇太子参决庶务于议事堂袤言于太子
曰储副之位止于侍膳问安不交外事抚军监国自汉
至今多出权宜乞俟祔庙之后便行恳辞以彰殿下德权礼部侍郎兼同修国史侍讲
又兼直学士院力辞听免直学士孝宗尝论人才袤奏
曰近召赵汝愚中外皆喜如王藺亦望收召帝曰然兼权中书舍人复诏兼直学士院力
辞且荐陆游自代帝不许时内禅议已定犹未谕大臣
也是日谕袤曰旦夕制册甚多非卿孰能为者故处卿以文字之职袤乃拜命内禅一时
制册人服其雅正光宗即位甫两旬开讲筵袤奏愿谨
初戒始孜孜兴念又奏凡事失之于初则后不可救书曰慎厥终惟其始又历举唐太宗
不私秦府旧人为戒复论官制谓武臣诸司使八阶为
常调横行十三阶为要官遥郡五阶为美职正任六阶为贵品祖宗待边境立功者近年
旧法顿坏使被坚执锐者积功累劳仅得一阶权要贵
近之臣优游而历华要请举行旧法姜特立以为议已言者因以为周必大党遂与祠绍

熙元年起知婺州改太平州除焕章阁待制召除给事中既就职即昌言曰老矣无所补报凡贵近营求内除小碍法制者虽特旨令书有去而已必不奉诏甫数日中贵四人希赏欲自正使转横行袤缴奏者三竟格不下兼侍讲入对言愿上谨天戒下畏物情内正一心外正五事澄神寡欲保毓太和虚己任贤酬酢庶务陈源除在京宫观耶律库们除承宣使陆安转遥郡王成特补官谢渊李孝友赏转官吴元允夏永寿迁秩皆论驳之帝并听纳韩侂胄以武功大夫和州防御使用应办赏直转横行袤缴奏谓正使有正法可回授不可直转侂胄勋贤之后不直首坏国法开攀援之门奏入手诏令书行袤复奏侂胄四年闲已转二十七年合转之官今又欲超授四阶复转二十年之官是朝廷官爵专徇侂胄之求非所以为摩厉之具也命遂格帝以疾一再不省重华宫袤上封事曰寿皇事高宗历二十八年如一日陛下所亲见今不待倦勤以宗社付陛下当思所以不负其托望勿惮一日之勤以解都人之惑后数日驾即过重华宫侍御史林大中以论事左迁袤率左史楼钥论奏疏入不报封驳不书黄耶律库们复以手诏除承宣使一再缴奏辄奉内批特与书行袤言天下者祖宗之天下爵禄者祖宗之爵禄寿皇以祖宗之天下传陛下安可私用祖宗爵禄而加于公议不允之人哉疏入帝震怒裂去后奏付前二奏出袤以后表不报使吏收阁命遂不行中宫谒家庙官吏推赏者百七十有二人袤力言其滥乞痛裁节帝从之尝因登对专论废法用例之弊至是复申言之除礼部尚书驾当诣重华宫复以疾不出率同列奏言寿皇有免到宫之命愿力请而往庶几可以慰释羣疑增光孝治后三日驾随出兼侍读上封事曰近年以来给舍台谏论事往往不行如黄裳郑汝楷事迁延一月陈源奉祠人情固已惊愕至姜特立之召尤为骇闻向特立得志之时昌言台谏皆其门人窃弄威福一旦斥去莫不诵陛下英断今遽召之自古去小人甚难譬除蔓草犹且复生况加封植乎时帝已属疾国事多舛袤积忧成疾请告不报疾笃乞致仕又不报遂卒年七十遗奏劝帝以孝事两宫以勤康庶政察邪佞护善类赠金紫光禄大夫袤少从喻樗汪应辰游时目之为道学袤死数年侂胄擅国于是禁锢道学贤士大夫皆受其祸嘉定五年谥文简子棐概孙焞

△谢谔

谢谔字昌国临江军新喻人绍兴二十七年中进士第调峡州夷陵县主簿未上抚之乐安多盗监司檄谔摄尉条二十策大要使其徒相纠而以信赏随之羣盗果解散金渝盟诸军往来境上选行县事有治办声改吉州录事

参军囚死者旧瘞以鞣往往暴骨谩白郡取船官弃材以棺敛之郡民陈氏僮窃其筐以逃有匿之者陈诉于官词过其实反为匿僮者所诬帅龚茂良怒欲坐以罪谩为书白茂良陈氏获免茂良亦以是知之岁大侵饥民万余求廩官吏罔措谩植五色旗分部给粟顷刻而定知袁州分宜县县积负于郡数十万岁常赋外又征缙钱二万余谩乃疏其弊于诸监司请免之除干办行在诸司粮料院迁国子监簿寻擢监察御史奏减袁州分宜秀州华亭月桩钱谩里居时创义役法编为一书至是上之诏行其法于诸路民以为便迁侍御史再迁右谏议大夫兼侍讲尝因进讲论及边事帝有乘机会之谕谩曰机会虽不可失举事亦不可轻光宗登极献十箴又论二节三近所当节者曰宴饮曰妄费所当近者曰执政大臣曰旧学名儒曰经筵列职除御史中丞会废补阙拾遗官谩论其不可废不听权工部尚书请祠以焕章阁直学士知泉州又辞提举太平兴国宫绍熙五年卒年七十四赠通议大夫谩为文仿欧阳修曾巩初居县南之竹坡名其燕坐曰良斋人称良斋先生周必大荐士及谩姓名孝宗曰是谓良斋者耶朕见其圣学渊源五卷而得之云

△颜师鲁

颜师鲁字几圣漳州龙溪人绍兴中擢进士第历知莆田福清县常决水利滞讼辟陂洫绵四十里岁大侵发廩劝分有方而不遏余价船粟毕湊市余更平郑伯熊为常平使荐于朝帅陈俊卿尤器重之召为官告院迁国子丞除江东提举时天雨土日青无光都人相惊师鲁陛辞言田里未安犴狱未清政令未当忠邪未辨愿诏中外极陈得失求所以答天戒销患未形帝趣其言寻改使浙西役法敝甚细民至以鸡豚罌榻折产力遇役辄破家师鲁下教属邑预正流水籍稽其役之序宽比限免代输咸便安之盐课岁百余万本钱久不给亭宠私鬻禁不可止刑辟日繁师鲁搏帑缙尽偿宿负戒官吏毋侵移比旁路课独最帝谓执政曰儒生能办事如此予职直秘阁农民有垦旷土成田未及受租者奸豪多为己利师鲁奏但当正其租赋不应绳以盗种法失劝农重本意奏可遂着为令入为监察御史遇事尽言无所阿挠有自外府得内殿宣引且将补御史员缺师鲁亟奏宋璟召自广州道中不与杨思勳交一谈李墉耻为吐突承璀所荐坚辞相位不拜士大夫未论其才立身之节当以璟墉为法今其人朋邪为迹人所切齿纵朝廷乏才宁少此辈乎臣虽不肖羞与为伍命乃寝继累章论除职帅藩者比年好进之徒平时交结权幸一纾郡绂皆掎克以厚苞苴故昔以才称后以贪败淳熙十年繇太府少卿为

国子祭酒初帝谕执政择老成端重者表率太学故有是命首奏宜讲明理学严禁穿凿俾廉耻兴而风俗厚师鲁学行素孚规约率以身先与诸生言孳孳以治己立诚为本艺尤异者必加奖劝由是人知飭励帝闻之喜曰颜师鲁到学未久规矩甚肃除礼部侍郎寻兼吏部有旨改官班特免引见师鲁献规曰祖宗法度不可轻弛愿始终持久自强不息因言赐带多滥应奉微劳皆得横金如观瞻何且臣下非时之赐过于优隆焚舍不急之役亦加赐赉虽南帑封桩不与大农经费然无功劳而概与之是弃之也万一有为国制变御侮建功立事者将何以旌宠之与尤袤郑侨上议高宗庙号寻充遗留礼信使沿途宴设力请彻乐至燕山复辞簪花执射金主鉴其诚许之迁吏部侍郎寻除尚书兼侍讲屡抗章请老以龙图阁直学士知泉州台谏侍从相继拜疏引唐孔戣事以留行内引奏言愿亲贤积学以崇圣德节情制欲以养清躬在泉三年专以恤民宽属邑为政始至即蠲舶货诸商贾尤服其清再起知泉州致仕绍熙四年卒年七十五师鲁自幼庄重若成人孝友天至常曰穷达自有定分枉道希世徒丧所守故其大节确如金石虽动与俗情不合而终翕然信服嘉泰二年赐谥定肃

△袁枢

袁枢字机仲建之建安人幼力学周必大刘珙皆期以远器试礼部词赋第一人调温州判官教授兴化军干道七年为礼部试官就除太学录轮对疏三事一论开言路以养忠孝之气二论规恢复当图万全三论士大夫多虚诞饶荣利张说自合门以节钺签枢密枢方与学省同僚共论之帝虽容纳而色不怡枢即求外补出为严州教授枢常喜诵司马光资治通鉴苦其浩博乃区别其事而贯通之号通鉴记事本末参知政事龚茂良奏其书孝宗嘉叹他日问袁枢今日何官茂良实对帝曰可与寺监簿于是以大宗正簿召登对即因史书历陈往事自汉武而下至唐文宗偏听奸佞启祸乱且曰固有诈伪而似诚实儉佞而似忠鯁者苟陛下日与图事于帷幄中进退天下士臣恐必为朝廷累迁太府丞时士大夫颇有为党与者枢奏曰人主有偏党之心则臣下有朋党之患比年或谓陛下宠任武士有厌薄儒生之心猜疑大臣亲信左右内庭行庙堂之事近侍参君国之谋今虽总权纲专听览而或壅蔽聪明潜移威福愿可否惟听于国人毁誉不私于左右帝方锐意恢复枢奏古之谋人国者必示之以弱苟陛下志复讎臣愿蓄威养锐勿示其形复陈用宰执台谏之术时议者欲制宗室应举锁试之额限添差岳祠减臣僚荐举定文武任子严特奏之等展郊禋之岁缓科举之期枢谓此皆近来从窄之论人

君惟天是则不可行也遂抗疏劝帝推广大以存国体
兼国史院编修官分修国史传章惇家以其同里宛转请文饰其传枢曰子厚为相负国
欺君吾为史官书法不隐宁负乡人不可负天下后世
公议权工部郎官累迁兼吏部郎官两淮旱命廉视真扬庐和四郡归陈两淮形势谓两
淮坚固则长江可守今徒知备江不知备淮置重兵于
江南委空城于淮上非所以戒不虞瓜州新城专为退保金使过而指议淮人闻而叹嗟
谁为陛下建此策也迁军器少监除提举江东常平茶
盐改知处州枢之使淮入对也尝言朋党相附则大臣之权重言路壅塞则人主之势孤
时宰不悦至是赴阙奏事又言威权在下则主势弱故
大臣逐台谏以蔽人主之聪明威权在上则主势强故大臣结台谏以遏天下之公议今
朋党之旧尚在台谏之官未正纪纲言路将复荆榛矣
除吏部员外郎迁大理少卿通州民高氏以产业事下大理殿中侍御史冷世光纳厚贿
曲庇之枢直其事以闻帝怒立罢世光枢以朝臣劾御
史盖仅见手诏权工部侍郎仍兼国子监祭酒俄有予郡之命既而以事贬两秩寝前旨
光宗受禅叙复元官提举太平兴国宫知常德府宁宗
登位擢右文殿修撰知江陵府江陵濒大江堤坏辄为巨浸民无所托楚故城楚观在焉
为室庐徙民居之以备不虞种木数万以为捍蔽民德
之寻为台臣劾罢提举太平兴国宫开禧元年卒年七十五

△李桩

李桩字寿翁洛州永平人父升进士起家靖康之难升翼其父以背受刃与长子俱
卒椿年尚幼藁殡佛寺深窳而详识之奉继母南走寻
以父泽补迪功郎历官至宁国军节度推官吏才精强人称之为张浚辟为制司准备差遣
椿奔走淮甸绥流民布屯戍察庐寿军情相视山水砦
险要周密精审所助为多隆兴元年春诸将有以北讨之议上闻者事下督府椿方奉檄
至巢亟奏记浚曰今藩篱不固储备不丰将多而非才
兵弱而未练议论不定纵得其地未易守也既而师出无功浚尝叹才难椿曰岂可厚诬
天下无人唯不恶逆耳而甘逊志则庶其肯来耳浚复
除右相椿知事不可为因劝之去明年春浚出视师椿曰小人之党已胜公无故去朝廷
踪迹必危复申前说甚苦浚心是之而自以宗臣任天
下之重不忍决去未几果罢监登闻鼓院请通判廉州召对知鄂州请行垦田复户数千
旷土大辟移广西提点刑狱未竟者一以平决之释
所疑数十百人奏罢昭州金坑禁仕者毋市南物移湖北漕适岁大侵官强民振粟且下
其价米不至益艰食椿损所强粟数而不遏其直未几
米舟凑集价减十三每行部必前期戒吏具州县所当问事列为籍单车以行所至取吏

卒备使令凡以例致馈一不受言事者请下诸道为式
召为吏部郎官论广西盐法孝宗是其说遂改法焉除枢密院检详官小吏持南丹州莫酋表求自宜州市马者因签书张说以闻椿谓邕远宜近故迁之岂无意今莫氏方横奈何道之以中国地里之近小吏妄作将启边衅请论如法说怒椿因求去帝慰谕令安职迁左司复请外除直龙图阁湖南运副请减桂阳军月桩钱万二千缗损民税折银之直等十三事俱报可民刻石记之除司农卿椿会大农岁用米百七十万斛而省仓见米仅支一二月叹曰真所谓国非其国矣力请岁储二百万斛为一年之蓄命兼临安府视事三月竟以权幸不便解去椿在朝遇事辄言执政故不悦及是转对又以言逆执政出知婺州会诏市牛筋凡五千斤椿奏一半之筋纔四两是欲屠二万牛也帝悟为收前诏除吏部侍郎又极言阉寺之盛曰自古宦官用事始则人畏之甚则人恶之极则羣起而攻之汉唐勿论靖康明受之祸未远必有裁制之不使至极则国家免于前日之患宦官亦保其富贵门禁宫戒之外勿得预外事严禁士大夫兵将官与之交通帝纳疏袖中以入又言当预边备如欲保淮则楚州盱眙昭信濠梁涡口花压正阳光州皆不可以不守如欲保江则高邮六合瓦梁濡须巢湖北峡亦要地也以病请祠不许面请益力乃除集英殿修撰知宣国府改太平州赐尚方珍剂以遣既至力图上流之备请选将练习缓急列舰上可以援东关濡须下可以应采石上章请老以敷文阁待制致仕越再岁上念湖南兵役之余欲镇安之谓椿重厚可倚命待制显谟阁知潭州湖南安抚使累辞不获乃勉起至则抚摩凋瘵复酒税法人以为便岁早发廩劝分蠲租十一万斛常平米二万活数万人告归进敷文阁直学士致仕椿年十五岁避地南来贫无以为养不得专力于学年三十始学易巍然有守存心每主于厚淳熙十年卒年七十三

△刘仪凤

刘仪凤字韶美普州人绍兴二年登进士第后十年始赴调尉遂宣府之蓬溪监资州资阳县酒税为梁州荣州掾二十七年起居郎赵逵称其富有词华恬于进取宰执上其名除诸王宫大小学教授改国子监丞迁秘书丞礼部员外郎所草笺奏以典雅称孝宗受禅议上光尧寿圣尊号册宝有欲俟钦宗服除者太常博士林栗谓唐宪宗上顺宗册宝在德宗服中不必避备乐而不作可也仪凤独上议曰谨按上尊号事属嘉礼累朝必俟郊祀庆成然后举行太上皇帝为钦宗备礼终制见于诏书议者引宪宗故事考之唐史自武德以来皆用易月之制与本朝事体大相远也乞候钦宗终制检举以行议者虽是其言然谓事亲当权宜而从厚竟用

栗议寻兼国史院编修官权秘书少监干道元年迁兵部侍郎兼侍讲仪凤在朝十年每归即匿其车骑扃其门户客至无亲疏皆不得见俸入半以储书凡万余卷御史张之纲论仪凤录四库书本以传私室遂斥归蜀三年辅臣进前侍从当复职者帝曰刘仪凤无罪可与复集英殿修撰起知邛州改汉州果州罢归淳熙二年卒年六十六仪凤苦学至老不倦尤工于诗然颇慕晋人简傲之风不乐与庸辈接故平生多蹭蹬一跌遂不振云

△张孝祥

张孝祥字安国历阳乌江人年十六领乡书再举冠里选绍兴二十四年廷试第一时策问师友渊源秦垞与曹冠皆力攻程氏专门之学孝祥独不攻考官已定垞冠多士孝祥次之曹冠又次之高宗读垞策皆秦桧语于是擢孝祥第一授承事郎签书镇东军节度判官谕宰相曰张孝祥词翰俱美故事殿试第一人次举始召孝祥擢第甫一年即召为秘书省正字奏乞总揽权纲以尽更化之美又言王安石作日录一时政事美则归己秦桧信任之专非特安石臣惧其作时政记亦如安石专用己意乞取己修日历审正黜私说以垂无穷从之迁校书郎尚书礼部员外郎寻为起居舍人权中书舍人初孝祥登第出汤思退之门思退为相擢孝祥甚峻而思退素不喜汪澈孝祥与澈同为馆职澈老成厚重而孝祥年少气锐往往陵拂之至是澈为御史中丞首劾孝祥奸不在卢■〈木巳〉下孝祥遂罢提举江州太平兴国宫于是汤思退之客稍稍被逐寻除知抚州年未三十莅事精确老于州县者所不及孝宗即位复集英殿修撰知平江府事繁剧孝祥剖决庭无滞讼属邑大姓为奸利孝祥捕治籍其家得谷粟数万明年吴中大饥迄赖以济张浚自蜀还朝荐孝祥召赴行在孝祥既素为汤思退所知及受浚荐思退不悦孝祥入对乃陈二相当同心戮力以副陛下恢复之志且靖康以来惟和战两言遗无穷祸要先立自治之策以应之复言用才之路太狭乞博采度外之士以备缓急之用帝嘉之除中书舍人寻除直学士院兼都督府参赞军事俄兼领建康留守改除敷文阁待制留守如旧会金再侵边孝祥陈金之势不过欲要盟宣谕使劾孝祥落职复集贤殿修撰知静江府广南西路经略安抚使治有声绩复以言者罢俄起潭州为政简易时以威济之湖南道以无事复待制徙知荆南湖北路安抚使筑守金堤自是荆州无水患置万盈仓以储诸漕之运请祠以疾卒孝宗惜之有用才不尽之叹孝祥文章过人尤工翰墨尝亲书奏答高宗见之曰必将名世但渡江初大议惟和战张浚主复讎汤思退祖秦桧之说力主

和孝祥出入二人之门而两持其说议者少之

△李衡

李衡字彦平江都人幼善博诵为文操笔立就登进士第授吴江主簿有部使者怙势作威侵刻下民衡不忍以敲朴迎合投劾而归后知溧阳县夏秋二税以期日榜县门乡无吏迹而输送先他邑办历四年狱未尝系一重囚隆兴二年金犯淮堧官沿江者多送其孥衡独自浙右移家入县民心大安盗起旁境而溧阳靖晏自如帅汪澈等列上治状诏进一秩寻召入为监察御史厯司封郎中枢密院检详出知温婺台三州加直秘阁引年乞身帝累却其奏除秘阁修撰致仕帝思其朴忠旋召落致仕除侍御史以老固辞不获命差同知贡举会外戚张说以节度使掌兵柄衡力疏其事谓不当为人择官改除起居郎章五上请老愈力仍以秘撰致仕时给事中莫济不书敕翰林周必大不草制右正言王希吕亦与衡相继论奏同时去国士为四贤诗以纪之衡后定居昆山结茅别墅聚书万卷号曰乐庵卒年七十九

△王自中

王自中字道甫温州平阳人少负奇气自立崖岸繇是忤世干道四年议遣归附人自中伏丽正门争论且言今内空无贤外空无兵当搜罗豪俊广募忠力以图中原坐斥徽州放还淳熙中登进士第主舒州怀宁簿严州分水令以枢密使王藺荐召对帝壮其言将改秩为籍田令又俾举所知且向用矣以谏疏罢自中本韩彦古客王藺既荐之帝大喜韩彦直彦质辈恐其为彦古报讎力请交结于自中而密达意近习谓自中受彦古赂伏阙上书荐彦古为相帝遣人物色其事中书舍人王信恒惧自中入台将不利于王淮知彦直辈潜已行亟请对探上意退即走白右正言蒋继周继周方敢劾奏读至受赂伏阙处帝曰卿可谓中其膏肓继周奏臣非不知孤踪忤王兰但不敢旷职盖欲并中藺以媚淮帝但喜继周善论事不知曲折如此出通判郢州道除知光化军改信州丁内艰服阙还朝光宗即位言者不置主管冲佑观起知邵州兴化军命下而自中已疾庆元五年八月卒年六十

△家愿 【杨恂】

家愿字处厚眉山人父勤国庆厯嘉佑闲与苏轼辙兄弟为友因王安石废春秋学愤之着春秋新义愿弱冠游京师以广文馆进士登第时绍圣元年廷策进士中书侍郎李清臣拟进策问力诋元佑之政愿答策惟以守九年之所已行者为言时门下侍郎苏辙令愿诵所对惊喜曰故人子道同志合犹若是也杨畏覆考专主熙宁元丰遂居下第元符三年以日食求

言愿时为普州乐至令应诏上言极论时政凡万言其
大要有十一曰谨始以正本二曰敬德以格天三曰谨好恶以防小人四曰审信任以辨
君子五曰开言路以来直谏六曰详听言以观事实七
曰破党议以存至公八曰登硕德以服天下九曰从宽厚以尽人才十曰崇名节以厚士
风疏上不报崇宁元年诏籍元佑元符上书人姓名愿
以选人籍入邪下等谪监华州西岳庙时当改京秩迄不改禁錮不调凡十年大观四年
孛星出降赦党禁解始改秩调知双流县通判文州郡
守郑行纯凭内侍势自恣罢蕃夷互市启边隙愿争之不从径下令复其旧守怒交章互
奏俱报罢而愿以曾入党籍谪英州酒税量移黄州数
年始予祠兴元帅臣王庶荐自代通判果州靖康初左丞冯澥荐备谏列除开封府工曹
京城失守不克赴高宗南渡擢知阆州会张浚谋大举
愿谓浚厉兵足谷以俟机会浚不悦以便旨移彭州有论边防书名曰罪言守彭之明年
乞骸骨以归卒淳佑闲愿曾孙大酉侍讲经筵因从容
及愿上改容嘉叹宣取所上书又亲书西社同门友元符上书人十大字以赐愿同郡杨
恂丹陵人字信仲元丰五年登进士第元符初知广都
县与愿同时上书语甚切直越三年亦同入党籍邪下第五等其书以火不存

△张纲

张纲字彦正润州丹阳人入太学以上舍及第释褐徽宗知纲五中首选特除太学
正迁博士除校书郎入对论君子小人溷殽小人得志
邀功生事祸有不可胜言者今用事者大言罔上风俗侈靡背本趋末日甚一日宜以祖
考躬行之教为法帝称善论事与蔡京不合挤之去主
管玉局观久之还故官兼修国朝会要校正御前文字迁著作佐郎屯田司勋郎初朝议
遣童贯蔡攸使朔方纲立论不可出师状不报及金人
入汴命纲分守四壁旋解严诏登陴足月者迁纲曰主忧臣辱义当尔顾因此受赏邪卒
不自言出为两浙提刑移江东池将王进剽悍恣睢曹
官以小过违忤遂钉手于门事闻诏乘传穷竟时国势未安诸将往往易朝廷进拥甲骑
数百突至纲前纲叱进阶下即按问罪立具自是无越
法者以左司召权监察御史请令郡邑月具系囚存亡数申提刑司岁终较多寡行殿最
进起居舍人改中书舍人建言乞依祖宗法命大臣兼
领史事诏宰臣吕颐浩监修国史着为令试给事中宗至令愿特转大中大夫纲言庶官
超转侍从非法且自崇宁以来官职不循资任致纲纪
大坏今方丕变其俗奈何以令愿故复违旧章诏以次官命词舍人王居正复执不行命
遂寝宣抚使张俊驻师九江遣营卒以书至瑞昌县令
郭彦章揣知卒与狱囚通乃械系之俊愬于朝彦章坐免纲言近时州县吏多献谀当路

彦章不随流俗是能奉法守职今不奖而黜何以示劝
除给事中侍御史魏瓘劾纲提举太平观进徽猷阁待制引年致仕秦桧用事纲卧家二
十年桧死召为吏部侍郎兼侍读言比年监司资浅望
轻请择七品以上清望官或曾任郡守有治状者为之庶位望既重材能已试可举其职
从之时以彗出求言纲奏宜命有司详审章奏必究极
其情权吏部尚书除参知政事高宗频谕辅臣宽恤民力盖惩秦桧苛政期安黎庶纲乃
摘其切于利民八十事标以大指乞镂版宣布中外于
是人皆昭知上德意告老以资政殿学士知婺州寻致仕孝宗登极召纲陪祀南郊以老
辞命所在州郡恒存问仍赐羊酒卒年八十四初谥文
定特赐曰章简

△张大经

张大经字彦文建昌南城人绍兴十五年中进士第宰吉之龙泉有善政诸司列荐
赐对便殿出知仪真时两淮监司帅守多兴事邀功大
经独以平易近民民咸德之提举湖南常平提点湖北刑狱寻移江东他路有巨豪犯法
狱久不竟命移属大经豪挟权势求脱大经卒正其罪
孝宗重风宪之选命条上部使者十人独可大经遂除监察御史迁大理少卿守殿中侍
御史言今日不治由大臣不任责又言诸路荒政不实
飞蝗颇多愿益加恐惧申饬大臣俾有司输忠说修厥职外之监司守臣察贫理冤去苛
敛宽民力帝皆嘉纳因论近习韩侂荐士将恐无廉耻
者望风希旨伤毁士俗又论宦者董璘暴横将命淮甸所至诛求且自号董阎罗帝然之
即依奏镌罢甯南康军除侍御史尝言士风未厚吏治
未肃民力未苏和气未应皆由人心未正愿察公正明义利以彰好恶抑浮薄去贪刻则
莫不靡然洗濯一归于正又言监司治民之本不可限
以资格帝纳其言即选四寺丞同时临遣试右谏议大夫兼侍讲请通漕臣之计以补州
郡之有无拘户绝之租以广常平之储■〈彳侍〉严
赃罪改正法以惩贪黥收外路辟阙归吏部以杜私谒而通孤寒秋旱求言大经言民力
竭而愁叹多军士贫而怨嗟众二者当今大弊州县之
闲绢帛多折其估米粟过收其赢关市苛征榷酷峻禁中外兵帅多出贵幸之门营利自
丰素召众怨教阅灭裂军容不整且近习甲第名园越
法踰制别墅列肆在在有之非赂遗何以济欲愿陛下疏斥儉腐抑绝幸门垂意人主之
职责成宰辅一提其纲则天下事必有能办之者除礼
部尚书兼侍读屡请祠帝曰卿公廉必能为朕牧民以徽猷阁学士知建甯府未几移镇
绍兴辞不拜予祠进龙图阁学士告老以通奉大夫致
仕甯宗即位进正议大夫降诏抚问庆元四年七月卒年八十九赠银青光禄大夫谥简

肃

△蔡洸

蔡洸字子平其先兴化仙游人端明殿学士襄之后徙雪川父伸左中大夫洸以荫补将仕郎中法科除大理评事迁寺丞出知吉州召为刑部郎徙度支以户部郎总领淮东军马钱粮知镇江府会西溪卒移屯建康舳舻相衔时久旱郡民筑陂潴水灌溉漕司檄郡决之父老泣诉洸曰吾不忍获罪百姓也却之已而大雨漕运通岁亦大熟民歌之曰我潴我水以灌以溉俾我不夺蔡公是赖就除司农少卿言镇江三邑税户客户输丁各异请为一体不得自为同异所输丁绢依和买之直计尺折纳人给一钞官自买绢起发公私皆便帝嘉纳以户部侍郎召试吏部尚书移户部尚书求去除徽猷阁学士知益国府奉祠以归卒年五十七洸事亲孝曾祖襄未易名力请于朝赐谥忠惠所得俸每以振亲戚之贫者去朝之日囊无余资至售所赐银鞍鞞治行人服其清洁云

△莫蒙

莫蒙字子蒙湖州归安人以祖荫补将仕郎两魁法科累官至大理评事提举广南市舶张子华以赃败朝廷命蒙往鞫之蒙正其罪又言秦熿郑时中受子华赂计直数千缗还朝除大理寺正吏部火连坐者数百人久不决命蒙治之蒙察最可疑者留于狱出余人为耳目以踪迹之约三日复来遂得其实系者乃得释黄州倅奏亲擒盗五十余人上命蒙穷竟既至咸以冤告蒙命囚去桎梏引倅至庭询窃发之由鬪敌之所远近时日悉皆抵牾折之语塞蒙具正犯数人奏上余释之除户部员外郎朝廷遣蒙措置浙西江淮沙田芦场帝语之曰得此可助经费归日以版曹处卿蒙多方括责得二百五十三万七千余亩言者论其丈量失实征收及贫民责监饶州景德镇起知光化军谍知金渝盟郡乏舟众以为虑蒙力为办集及敌犯境民赖以济时饷馈急除淮南转运判官蒙迁延不之任右司谏梁仲敏劾其慢命罢官勒停宣谕使汪澈为言复旧职除湖北转运判官未几知鄂州召除户部左曹郎中出知扬州陛辞上以城圯命蒙增筑阅数月告成除直宝文阁学士大理少卿兼详定司敕令官权知临安府未几假工部尚书使金贺正旦金庭赐宴蒙以本朝忌日不敢簪花听乐金遣人趣赴蒙坚执不从竟不能夺使还除刑部侍郎改工部侍郎兼临安府少尹以言者罢起知鄂州卒于官年六十一赠奉正大夫

△周淙

周淙字彦广湖州长兴人父需官至左中奉大夫宣和闲淙以父任为郎历官至通

判建康府绍兴三十年命守滁阳未赴移越州又徙濠
梁淮楚旧有并山水置砦自卫者淙为立约束结保伍金海陵倾国南侵民赖以全活者
不可胜计除直秘阁再任孝宗受禅王师进取虹县中
原之民翕然来归淙计口给食行者犒以牛酒至者处以室庐张浚视师驻于都梁见淙
谋辄称叹且曰有急公当与我俱死淙亦感激浚入朝
悉陈其状进直徽猷阁帅维扬会钱端礼以尚书宣谕淮东复以淙荐进直显谟阁时两
淮经践蹂民多流亡淙极力招辑按堵如故劝民植桑
柘开屯田帝亦专以属淙屡赐亲札淙奉行益力进直龙图阁除两浙转运副使未几知
临安府上言自古风化必自近始贵近奢靡条上禁止
十五事帝嘉纳之临安驻蹕岁久民居日增河流秋隘舟楫病之淙请疏浚工毕除秘阁
修撰进右文殿修撰提举江州太平兴国宫以归帝念
之除敷文阁待制起知盩厔魏王出镇移守婺州明年春复奉祠亟告老十月卒年六
十积阶至右中奉大夫封长兴县男

△刘章

刘章字文孺衢州龙游人通小戴礼四冠乡举绍兴十五年廷对第一授镇江军签
判是冬入省为正字明年迁秘书郎兼普安恩平两王
府教授迁著作佐郎事王邸四岁受知孝宗自此始秦桧当国兼不附已风言者媒孽其
罪出倅筠州桧死召为司封员外郎检详枢密院文字
兼玉牒检讨官擢秘书少监起居郎使金还除权工部侍郎俄兼吏部兼侍讲御史论章
使胥长买绢高宗愕然曰刘章必无是事御史执不已
罢提举崇道观起居郎王佐讼其冤亦坐绌起知信州未久复请祠孝宗受禅命知漳州
为谏议大夫王大宝所格寻除秘阁修撰敷文阁待诏
召提举佑神观兼侍读遂拜礼部侍郎奏禁遏淫祀仍于三朝史中删去道释符瑞志大
略以为非春秋法朝廷议经略中原调诸郡兵民颇扰
少卿赵彦端指言非是或譖之彦端惧帝以问章对曰议论不同或者有之彦端获免进
权礼部尚书兼给事中告归以显谟阁学士食祠禄淳
熙元年子之衡由御史检法出守广德军当陛辞帝问章安否旋遣合门祗候宣问拜端
明殿学士赐银绢四百疋四年上表告老以资政殿学
士致仕卒年八十赠光禄大夫谥曰靖文

△沈作宾

沈作宾字宾王吴兴归安人以父任入仕监饶州永平监冶铸又承诏造雁翎刀称
旨连进两资中刑法科历江西提刑司检法官入为大
理评事改秩判绍兴府帅守邱密遇僚吏刚严作宾从容裨赞每济以宽秩满知台州首
访民疾苦弛盐禁宽租期均徭役更酒政决滞狱五十

日闲尽除前政之不便民者邦人胥悦而前守嫉其胜己巧媒孽之罢去民为立留贤碑
除大理正以亲嫌改太府丞迁刑部郎庆元初历官至
淮南转运判官以治办闻直华文阁累擢至太府卿以直龙图阁帅浙东知绍兴府入对
奏徽州南康军月桩不如期朝廷科降额比年曰权免
一次来年督促如初适足启吏奸重民害乞明诏示又楚州武锋一军已招三千五百余人
朝廷初欲减戍数年未就纪律一主将望轻二郡守
节制不为礼三训练不尽其能愿领本州岛少假借责之练习期以岁月考其绩而黜陟
之帝嘉纳韩侂胄方用事族有居越者私酿公行作宾逮
治之又论绍兴府和买事语在食货志除两浙转运副使权工部侍郎继兼户部侍郎奏
请修绍兴三十一年以前故事复敕令所删修官五员
以待选人有才者又乞申严保伍法以言者罢归起知镇江府除集英殿修撰改知宁国
府除宝谟阁待制知潭州除户部侍郎兼详定敕令官
奏湖北当储粟湖南当增兵未几除龙图阁待制知平江府请得节制许浦水军诏可郡
有使臣故海盗也作宾使招诱其党既至慰勉之锡衣
物又得强勇者几千人置将以统之号曰义士复募郡城内外恶少亦几千人号曰壮士
衣粮器械皆视官军而轻捷善鬪过之于是海道不警
市井无哗寻命参赞督府兼权镇江府请留戍兵千人又欲以江闽新军二千人易旧军
千人备不虞朝廷难之遂请祠言者继及之复召为户
部侍郎军兴以来国力殫耗见存金谷仅支旬日作宾考逋负梏吏奸阅三月即有半年
之储充馆伴使兼权工部尚书除权户部尚书以母忧
解服阁授显谟阁直学士知建宁府入覲乞申严诡户之禁除宝谟阁学士江西安抚兼
知隆兴府奏部内南安南康龙泉三县逼近溪峒三县
令尉及近峒之砦秀洲北乡莲塘并永新县之胜乡砦宜就委帅宪两司择才辟置量加
赏格又乞诏诸道监司分诣州郡选禁军精练阅改刺
其懦弱者为厢军在郡搏钱二十余万缗僚属请献诸朝作宾谓平生未尝献羨以半归
帅司犒师半隶本府除焕章阁学士提举隆兴府玉隆
万寿宫进显谟阁学士致仕卒于家赠金紫光禄大夫

钦定续通志卷三百八十七

●钦定续通志卷三百八十八 列传一百八十八
列传

宋 【九十一】

○宋九十一

周必大 留正 胡晋臣 赵汝愚【子崇宪】

周必大

留正

胡晋臣

赵汝愚

△周必大

周必大字子充一字洪道其先郑州管城人祖铎宣和中倅庐陵因家焉父利建太
学博士必大少英特父死鞠于母家母亲督课之绍兴
二十年第进士授徽州户曹中博学宏词科教授建康府除太学录召试馆职高宗曰掌
制手也守秘书省正字兼国史院编修官除监察御史
孝宗践阼除起居郎直前奏事帝曰朕旧见卿文其以近作进帝初御经筵必大奏经筵
非为分章析句欲从容访问裨圣德究治体先是左右
史久不除并记注壅积心大请言动必书兼修月进乃命必大兼编类圣政所详定官又
兼权中书舍人侍经筵尝论边事帝以蜀为忧对曰蜀
民久困愿诏抚谕事定宜宽其赋应诏上十事皆切时弊权给事中缴驳不辟权幸金索
讲和时旧礼必大条奏请正敌国之名金为之屈曾觐
龙大渊得幸台谏交弹之并迁知合门事必大与金安节不书黄且奏曰陛下于政府侍
从欲罢则罢欲贬则贬独于二人委曲迁就恐人言纷
纷未止旬日申前命必大格不行遂请祠去久之差知南剑州改提点福建刑狱入对愿
诏中外举文武之才区别所长为一籍藏禁中备缓急
之用除秘书少监兼直学士院兼领史职郑闻草必大制帝改窜其末引汉宣帝事必大
因奏曰陛下取汉宣帝之言亲制赞书明示好恶臣观
西汉所谓社稷臣乃鄙朴之周勃少文之汲黯不学之霍光至于公孙宏蔡义韦贤号曰
儒者而持禄保位故宣帝谓俗儒不达时宜使宣帝知
真儒何至杂伯哉愿平心察之不可有轻儒名帝喜其精洽欲与之日夕论文德寿加尊
号必大曰太上万寿文表称嗣皇帝为未安按建炎遥
拜徽宗表及唐宪宗上顺宗尊号册文皆称皇帝议遂定赵雄使金赉国书议受书礼必
大立具草略谓尊卑定分或较等威叔侄亲情岂嫌坐
起帝褒之曰未尝谕国书之意而卿能道朕心中事此大才也兼权兵部侍郎奏请重侍
从以储将相增台谏以广耳目择监司郡守以补郎官
寻权礼部侍郎兼直学士院同修国史实录院同修撰一日诏同王之奇陈良翰对选德
殿帝袖出手诏举唐太宗魏征问对以在位久功未有
成治效优劣苦不自觉命必大等极陈当否必大退而条陈陛下练兵以图恢复而将数
易是用将之道未至择人以守郡国而守数易是责实
之方未尽诸州长吏倏来忽去婺州四年易守者五平江四年易守者四甚至秀州一年
而四易守吏奸何由可察民瘼何由可苏帝善其言为

革二弊江湖旱请捐南库钱二十万代民输帝嘉之兼侍讲兼中书舍人未几辞直学士院从之张说再除签书枢密院给事中莫济封还录黄必大奏曰昨举朝以为不可陛下亦自知其误而止之矣曾未周岁此命复出贵戚预政公私两失臣不敢具草帝批王曦疾速譔入济必大予宫观说露章荐济必大于是济除温州必大除建宁府济被命即出必大至丰城称疾而归济闻之大悔必大三请祠以此名益重久之除敷文阁待制兼侍读兼权兵部侍郎兼直学士院帝劳之曰卿不迎合无附丽朕所倚重除兵部侍郎寻兼太子詹事奏言太宗储才为真宗仁宗之用仁宗储才为治平元佑之用自章蔡沮士气卒致靖康之祸秦桧忌刻逐人才流弊至今愿陛下储才于闲暇之日帝曰御球场必大曰固知陛下不忘阅武然太祖二百年天下属在圣躬愿自爱帝改容曰卿言甚忠得非虞衡之变乎正以讎耻未雪不欲自逸尔升兼侍读改吏部侍郎除翰林学士久雨奏请减后宫给使宽浙郡积逋命省部议优恤内直宣引论金星近前星武士击球太子亦与臣甚危之帝俾语太子必大曰太子人子也陛下命以驱驰臣安敢劝以违命陛下勿命之可也乞归弗许上欲召人与之分职因问吕祖谦能文否对曰祖谦涵养久知典故不但文字之工除礼部尚书兼翰林学士进吏部兼承旨诏礼官议明堂典礼必大定圜丘合宫互举之议必大在翰林几六年制命温雅周尽事情为一时词臣之冠除参知政事帝曰执政于宰相固当和而不同前此宰相议事执政更无语何也必大曰大臣自应互相可否自秦桧当国执政不敢措一辞后遂以为当然陛下虚心无我大臣乃欲自是乎惟小事不敢有隐则大事何由蔽欺帝深然之久旱手诏求言宰相谓此诏一下州郡皆乞赈济何以应之约必大同奏必大曰上欲通下情而吾侪阻隔之何以塞公论有介椒房之援求为郎者帝俾谕给舍缴驳必大曰台谏给舍与三省相维持岂可谕意不从失体从则坏法命下之日臣等自当执奏帝喜曰肯如此任怨耶必大曰当予而不予则有怨不当予而不予何怨之有帝曰此任责非任怨也除知枢密院山阳旧屯军八千雷世方乞止差镇江一军五千必大曰山阳控扼清河口若今减而后增必致敌疑扬州武锋军本屯山阳者不若岁拨三千与镇江五千同戍郭杲请移荆南军万二千永屯襄阳必大言襄阳固要地江陵亦江北喉襟于是留二千人帝谕以金既还上京且分诸子出镇将若何必大言敌恫疑虚喝正恐我先动当镇之以静惟边将不可不精择拜枢密使帝曰若有边事宜抚使惟卿可他人不能也上诸军升差籍时点召一二察能否主帅悚激无敢容私勅诸军点试法其在外解发亦

亲阅之金州谋帅必大曰与其私举不若明扬令侍从管军荐举或传大石林牙将加兵于金呼噜大王分据上京边臣结约夏国必大皆屏不省劝帝持重勿轻动既而所传果妄淳熙十四年二月拜右丞相首奏今内外晏然殆将二纪此正可惧之时当思经远之计不可纷更欲速秀州乞减大军总制钱二万吏请勘当必大曰此岂勘当时耶立蠲之封事多言大臣同异必大曰各尽所见归于一是岂可尚同陛下复祖宗旧制命三省覆奏而后行正欲上下相维非止奉行文书也高宗升遐议用显仁例遣三使诣金必大谓今昔事殊不当畏敌曲徇止之贺正使至或请权易淡黄袍御殿受书必大执不可遂为缟素服就帷幄引见十五年思陵发引援熙陵吕端故事请行乃摄太傅为山陵使明堂加恩封济国公十一月留身乞去帝奖劳再三忽宣谕比年病倦欲传位太子须卿且留必大奏圣体康强止因孝思稍过何遽至倦勤帝曰礼莫大于事宗庙而孟飧多以病分诣孝莫重于执丧而不得自至德寿宫欲不退休得乎朕方以此委卿必大泣而退十二月壬申密赐绍兴传位亲札辛卯命留身议定二月壬戌又命预草诏专以奉几筵侍东朝为意拜左丞相许国公参政留正拜右丞相壬子始以内禅意谕二府二月辛酉朔降传位诏光宗即位问当世急务奏用人求言二事三月拜少保益国公李嶬草二相制抑扬不同帝诏嶬令帖麻改定既而斥嶬予郡必大求去何澹为司业久不迁留正奏迁之澹憾必大而德正至是为谏长遂首劾必大诏以观文殿大学士判潭州澹论不已遂以少保充醴泉观使判隆兴府不赴复除观文殿学士判潭州复大观文坐所举官以贿败降荥阳郡公复益国公改判隆兴辞除醴泉观使宁宗即位求直言奏四事曰圣孝曰敬天曰崇俭曰久任庆元元年三上表引年遂以少傅致仕先是布衣吕祖泰上书请诛韩侂胄逐陈自强以必大代之嘉泰元年御史施康年劾必大首唱伪徒私植党与诏降为少保自庆元以后侂胄之党立伪学之名以禁锢君子而必大与赵汝愚留正实指为罪首二年复少傅四年卒年七十有九赠太师谥文忠宁宗题篆其墓碑曰忠文耆德之碑自号平园老叟著书八十一一种有平园集二百卷尝建三忠堂于乡谓欧阳文忠修杨忠襄邦乂胡忠简铨皆庐陵人必大平生所敬慕为文记之一子纶

△留正

留正字仲至泉州永春人六世祖从效事太祖为清远军节度使封鄂国公正绍兴十三年第进士授南恩州阳江尉清海军节度判官龚茂良守番禺正言在法劫盗赃满五贯死海盜加等小民饵利率身陷重辟请镂梓海上

使户知之民始知避用茂良荐赴都堂审察宰相虞允
文复荐于帝得对言国家右文而略武备祖宗以天下全力用于西夏承平日久边不为
备至敌人长驱而不能支今当改辙使文武并用孝宗
嘉叹书札中要语下三省施行知循州陞辞言士大夫名节不立国家缓急无所倚仗靖
康之变死义者少因乱谋利者多今欲恢复当崇尚名
节帝益喜明日谕辅臣留正奏事议论耿耿可与执事官除军器监簿厯官考功郎官太
常谥叶义问恭简正覆谥言义问将兵出疆不知敌人
情伪及金侵边督视寡谋几至败事下太常更议时论黜之擢起居舍人寻权中书舍人
光宗自东宫朝顾见正谓左右曰修整如此其人可知
乃请于帝兼太子左谕德正言记注进御非设官本意乞自今免奏御诏从之为中书舍
人兼侍讲兼权兵部侍郎除给事中张说子荐往视镇
江战舰挟势游观沈舟溺卒除知合门事枢密副承旨正封还词头洪邦直除御史正言
邦直为邑人所讼不宜任风宪兼权吏部尚书言用人
莫先论相陛下志在恢复而相位不能任辅赞望精选人才与图大计时相益不乐以显
谏阁直学士出知绍兴府侍御史范仲芑劾前帅赃六
十万有诏核责正明其非辜御史怒并劾正降显谏阁待制提举玉隆万寿宫寻复职知
贛州奏减上供米不报及为相蠲一万八千石知隆兴
府进龙图阁直学士四川制置使兼知成都府平西蜀折租价岁减酒课三十八万干道
初羌渡河据安静砦侵汉地几百里正密授诸将方略
擒其渠以归尽俘其党羌平进敷文阁学士寻诏赴行在正在蜀以简素化民归装仅书
数篋人服其清除端明殿学士签书枢密院事参知政
事同知枢密院事孝宗密谕内禅意拜右丞相一日奏事皇太子参决侍立帝顾谓太子
曰留正纯臣可托光宗受禅主管左右春坊姜特立以
随龙恩擢知合门事声势浸盛正列其招权预政状乞斥逐帝意犹未决会副参阙特立
谒正曰上以丞相在位久欲迁左相叶翥张杓当择一
人执政未知孰先正奏之帝大怒诏特立提举兴国宫孝宗闻之曰真宰相也绍熙元年
进左丞相正谨法度惜名器毫发不可干以私引赵汝
愚首从班卒与之共政用黄裳为皇子嘉王翊善世号得人嘉王感疾正言陛下止有一
子隔在宫墙外非便宜令早正元良之位入居东宫则
朝夕相见甚顺检汉文帝纪及于朝真宗仁宗典故并吕诲张方平两奏节其要语缴奏
帝不豫外议汹汹正与同列闲至福宁殿奏事处分得
宜人情以安进封申国公帝疾浸平正乞归政不许初正帅蜀虑吴氏世将谋去之至是
朝廷议更蜀帅正言西边三将为吴世氏袭兵柄号为
吴家军不知有朝廷遂以户部侍郎邱密行及吴挺死韩侂胄为吴氏地使吴曦世袭正

力请留曦环卫遣张诏代挺后数岁曦入蜀卒稔变寿
皇圣政成进少保封卫国公李端友以椒房亲手诏除郎正缴还帝不纳复执奏曰昔馆
陶公主为子求郎明帝不许今端友依凭内援恐累圣
德姜特立除浙东副总管寻召赴行在正引唐宪宗召吐突承璀事乞罢相帝批成命已
行朕无反汗卿宜自处正待罪六和塔奏言陛下近年
不知何人献把定之说遂至每事坚执断不可回天下至大机务至烦事出于是则人无
异词可以固执事出于非则众论纷起必须惟是之从
臣恐自此以往事无是非陛下壹持把定之说言路遂塞因缴进前后锡赉及告敕待罪
范村乞归田里不许寿圣太后将以冬至上尊号册宝
以正为礼仪使摄太傅于是帝遣左师徐谊谕旨正复入都堂视事是行也待罪凡一百
四十日册宝礼成拜少傅封鲁国公正力辞五年正月
孝宗疾革正数请车驾过宫一日上拂衣起正引裾泣谏随至福宁殿门正退上疏言极
激切六月戊戌孝宗崩光宗以疾未能执丧正率同列
屡奏乞早正嘉王储位又拟指挥付学士院降诏寻有手诏朕历事岁久念欲退闲正得
之始惧请对复不报即出国门上表请老末曰愿陛下
速回渊鉴追悟前非渐收人心庶保国祚正始议以上疾未克主丧宜立皇太子监国若
终丧未倦勤当复辟设议内禅太子可即位时从臣郑
湜奏与正同既而赵汝愚以内禅请于宪圣正谓建储诏未下遽及此他日必难处论既
违以肩舆逃去 【伏读通鉴辑览 御批光宗于
寿皇生不能视疾歿不能执丧孝道亏而天理绝实无辞以谢天下留正身为宰辅不请
其力疾临次以尽礼而请其早正储位以释谤已昧于
重轻先后之权衡乃见御札念欲退闲之语遽尔大惧佯仆请老止图独善其身而置国
事如末务大臣进退之节若此亦奚足称史册尚过为
褒予岂复知大义耶】 及嘉王即位尊皇帝为太上皇帝以正为大行攒宫总护使入谢
复出宪圣命速宣押时汝愚亦以为请帝亲札遣使召
正还侍御史张叔椿请议正弃国之罚乃徙叔椿吏部侍郎而正复相入贺且请车驾一
出慰都人心及定寿康宫南向撤去新增禁旅诏悉从
之进少傅屡辞不拜奏言陛下勉徇羣情以登大宝当遇事从简示天下以不得已之意
实非颁爵之时侂胄浸谋预政数诣都堂正使省吏谕
之曰此非知合日往来之地侂胄怒而退会经筵晚讲赐坐正执奏以为非帝不恠侍御
史黄度论马大同罪正拟度补外帝知其情除度右正
言正请推恩随龙人帝曰朕未见父母可恩及下人耶积数事失帝意侂胄从而闲之八
月手诏正以少师观文殿大学士判建康府寻又以谏
议大夫张叔椿言落职庆元元年六月诏正以上皇付正手诏进入宣付史馆复观文殿

大学士初刘德秀自重庆入朝未为正所知谒正客范仲黼请为言正曰此人若留之班行朝廷必不静乃除大理簿德秀憾之至是为谏议大夫论正四大罪褫职自是弹劾无虚岁以张釜言责授中大夫光禄卿分司西京邵州居住明年令自便给事中谢源明封还录黄量移南剑州再许自便复光禄大夫提举洞霄宫上章乞纳禄诏复元官职致仕又以御史林采言依旧官光禄大夫致仕俄复观文殿学士金紫光禄大夫嘉泰元年进封魏国公复少师观文殿大学士开禧二年七月卒年七十八赠太师宝庆三年谥忠宣子恭丙端孙元英元刚

△胡晋臣

胡晋臣字子远蜀州人登绍兴二十七年进士第为成都通判制置使范成大以公辅荐诸朝孝宗召赴行在入对疏当今士俗民力边备军政四弊试学士院除秘书省校书郎迁著作佐郎兼右曹郎官轮对论三事一无忽讲读官以仁宗为法二责谏官以纠官邪责宰相以抑奔竞三广听纳通下情以销未形之患又极论近幸帝览奏色动晋臣口陈甚悉至论及两税折变帝首肯久之赵雄时秉政手诏下中书问近幸姓名晋臣翼日至中书执政诘其故晋臣曰近习招权丞相岂不知之即条具大者以闻帝感悟自是近习严惮晋臣以亲年高求外补知汉州除潼川路提点刑狱以忧去服除再召以五事见曰选将帅广常平治渠堰更铨法通楮币帝谓辅臣曰胡晋臣言可行除度支郎累迁侍御史朱熹除兵部郎官以病足未供职侍郎林栗与熹论易不合因奏熹不即受印为傲慢晋臣上疏留熹而排栗光宗嗣位迁工部侍郎除给事中每以裁滥恩惜名器为重内降持不下帝嘉其有守拜端明殿学士签书枢密院事正谢日帝命条上军政利害既而朝重华宫孝宗谓曰嗣君擢任二三大臣深愜朕意闻外庭亦无异词晋臣拜谢除参知政事兼同知枢密院事帝自南郊后久不御朝晋臣与丞相留正同心辅政中外帖然其所奏陈以温清定省为先次及亲君子远小人抑侥幸消朋党启沃剴切弥缝缜密人无知者未几卒于位赠资政殿学士谥文靖

△赵汝愚

赵汝愚字子直汉恭宪王元佐七世孙居饶之余干县父善应字彦远官终修武郎江西兵马都监纯孝笃行称古君子汝愚早有大志每曰丈夫得汗青一幅纸始不负此生擢进士第一签书夔国军节度判官召试馆职除秘书省正字孝宗方锐意恢复始见即陈自治之策迁校书郎知合门张说擢签书枢密院事汝愚不往见率同列请祠未报会祖母讣至即日归因自劾帝不加罪迁著作郎知信州累迁秘书少监兼

权给事中内侍陈源有宠于德寿宫添差浙西副总管汝愚言祖宗以童贯典兵卒开边衅源不宜使居总戎之任孝宗喜诏自今内侍不得兼兵职旧制密院文书皆经门下省张说在西府托言边机不宜泄汝愚谓东西二府朝廷治乱所关中书庶政无一不由东省何密院不然孝宗命如旧制权吏部侍郎兼太子右庶子论知合王抃招权预政出抃外祠以集英殿修撰帅福建陛辞言国事之大者四其一谓吴氏四世专蜀兵非国家之利请渐抑之进直学士制置四川兼知成都府诸羌蛮相挺为边患汝愚至悉以计分其势孝宗谓其有文武威风光宗受禅趣召未至殿中侍御史范处义论其稽命除知潭州辞改太平州进敷文阁学士知福州绍熙二年召为吏部尚书先是高宗以宫人黄氏侍光宗于东宫及即位为贵妃后李氏意不能平是年冬十一月郊有司已戒而风雨暴至光宗震惧及斋宿青城贵妃暴薨驾还闻之恚是夕疾作内侍驰白孝宗孝宗仓卒至南内问所以致病之由不免有所戒责光宗常以五日一朝孝宗于重华宫至是往往以传旨免至会庆节上寿驾不出冬至朝贺又不出都人以为忧汝愚往复规谏帝意乃悟汝愚又属嗣秀王伯圭调护于是两宫之情始通光宗及后俱诣北内从容竟日四年汝愚知贡举与监察御史汪义端有违言汝愚除同知枢密院事义端言祖宗之法宗室不为执政诋汝愚植党沽名疏上不纳又论台谏给舍阴附汝愚一切緘默不报论汝愚发策讥讪祖宗又不报汝愚力辞帝为徙义端军器监给事中黄裳言汝愚事亲孝事君忠居官廉忧国爱民出于天性义端实忌贤不可不黜帝乃黜义端补郡汝愚不获已拜命未几迁知枢密院事辞不拜有旨趣受告汝愚对曰臣非敢久辞臣尝论朝廷数事其言未见用今陛下过重华留正复相天下幸甚惟武兴未除帅臣心不敢安帝遂以张诏代领武兴军汝愚乃受命光宗之疾生于疑畏其未过宫也汝愚数从容进谏光宗出闻其语辄悟入辄复疑五年春孝宗不豫夏五月疾日臻光宗御后殿丞相率同列入请帝诣重华宫侍疾从臣台谏继入合门吏以故事止之不退光宗益疑起入内越二日宰相又请对光宗令知合门事韩侂胄传旨云宰执并出于是俱至浙江亭俟命孝宗闻之忧甚侂胄奏曰昨传旨令宰执出殿门今乃出都门请自往宣押汝愚等乃还第六月丁酉夜五鼓重华大阉扣宰执私第报孝宗崩中书以闻汝愚恐帝疑或不出视朝持其札不上次日帝视朝汝愚以提举重华宫关礼状进帝乃许过北内至日昃不出宰相率百官诣重华宫发丧壬寅将成服留正与汝愚议介少傅吴玘请宪圣太后垂帘暂主丧事宪圣不许正等附奏曰臣等连日造南内请对不获

累上疏不得报今当率百官恭请若皇帝不出百官相与恸哭于宫门恐人情骚动为社稷忧乞太皇太后降旨以皇帝有疾薨就宫中成服然丧不可无主祝文称孝子嗣皇帝宰臣不敢代行太皇太后寿皇之母也请摄行祭礼盖是时正汝愚之请垂帘也以国本系乎嘉王欲因帘前奏陈宗社之计使命出帘帟之闲事行庙堂之上则体正言顺可无后艰而吴玕素畏慎且以后戚不欲与闻大计此议竟格丁未宰臣已下待对和宁门不报乃入奏云皇子嘉王仁孝夙成宜早正储位以安人心又不报越六日再请御批云甚好明日同拟旨以进乞帝亲批付学士院降诏是夕御批付丞相云厯事岁久念欲退闲留正见之惧因朝临佯仆于庭密为去计汝愚自度不得辞其责念故事须坐甲以戒不虞而殿帅郭杲莫有以腹心语者会工部尚书赵彦逾至私第语及国事汝愚泣彦逾亦泣汝愚因微及与子意彦逾喜汝愚知彦逾善杲因谬曰郭杲佯不同奈何彦逾曰某当任之约明乃复命汝愚曰此大事已出诸口岂容有所俟乎汝愚不敢入私室退坐屏后以待彦逾之至有顷彦逾至议遂定明日正以五更肩舆出城去人心益摇汝愚处之恬然自吴玕之议不谐汝愚与徐谊叶适谋可以白意于慈福宫者乃遣韩侂胄以内禅之意请于宪圣侂胄因所善内侍张宗尹以奏不获命明日往又不获命侂胄逡巡将退重华宫提举关礼见而问之侂胄具述汝愚意礼令少俟入见宪圣而泣宪圣问故礼曰圣人读书万卷亦尝见有如此时而保无乱者乎宪圣曰此非汝所知礼曰此事人人知之今丞相已去所赖者赵知院旦夕亦去矣言与泪俱宪圣惊曰知院同姓事体与他人异乃亦去乎礼曰知院未去非但以同姓故以太皇太后为可恃耳今定大计而不获命势不得不去将如天下何愿圣人三思宪圣问侂胄安在礼曰臣已留其俟命宪圣曰事顺则可令谕好为之礼报侂胄且云来早太皇太后于寿皇梓宫前垂帘引执政侂胄复命汝愚始以其事语陈騫余端礼使郭杲及步帅阎仲夜以兵卫南北内礼使其姻党宣赞舍人傅昌朝密制黄袍是日嘉王谒告不入临汝愚曰禫祭重事王不可不出翌日禫祭羣臣入王亦入汝愚率百官诣大行前宪圣垂帘汝愚率同列再拜奏皇帝疾未能执丧臣等乞立皇子为太子以系人心皇帝批出有甚好二字继有念欲退闲之语取太皇太后处分宪圣曰既有御笔相公当奉行汝愚曰兹事重大播之天下书之史册须议一指挥宪圣允诺汝愚袖出所拟太皇太后指挥以进云皇帝以疾至今未能执丧曾有御笔欲自退闲皇子嘉王扩可即皇帝位尊皇帝为太上皇帝皇后为太上皇后宪圣览毕曰甚善汝愚奏自今臣等有合奏事当取嗣君

处分然恐两宫父子闲有难处者须烦太皇太后主张又奏上皇病未平骤闻此事不无惊疑乞令都知杨舜卿提举本宫任其责遂召舜卿帘前面喻之宪圣乃命皇子即位皇子固辞曰恐负不孝名汝愚奏天子当以安社稷定国家为孝今中外人人忧乱万一变生置太上皇何地众扶入素幄披黄袍方却立未坐汝愚率同列再拜帝宗诣几筵奠哭尽哀须臾立仗讫催百官班帝衰服出就重华殿东庑素幄立内侍扶掖乃坐百官起居讫行禫祭礼汝愚即丧次召还留正长百僚命朱熹待制经筵悉收召士君子之在外者是月帝命汝愚兼权参知政事留正至汝愚乞免兼职乃除特进右丞相汝愚辞不拜曰同姓之卿不幸处君臣之变敢言功乎【伏读通鉴辑览 御批光熹授受事出非常废立之嫌实所不免观汝愚之对侂胄及其拜右相谓处君臣之变岂敢言功颇谓明于大义然口虽不自居功而于爪牙之臣则谓当推赏是于定策二字岂尽释然于胷中而当时物论纷纭皆以汝愚功在社稷不免推崇太过异日奸人构陷至称其实有异谋祸源未必不萌于此也】乃命以特进为枢密使【按贵耳集祖宗典故同姓可封王不拜相艺祖载诸太庙独赵忠定特出此典故随笔云不受相麻而除枢密使】汝愚又辞特进孝宗将攒汝愚议攒宫非永制欲改卜山陵与留正议不合侂胄因闲之出正判建康命汝愚为光禄大夫右丞相汝愚力辞不许汝愚本倚正共事怒侂胄不以告及来谒故不见侂胄慚忿签书枢密罗点曰公误矣汝愚亦悟复见之侂胄终不悛自以有定策功且依托肺腑出入宫掖居中用事朱熹进对以为言又约吏部侍郎彭龟年同劾之未果熹白汝愚当以厚赏酬劳勿使预政而汝愚谓其易制不为虑右正言黄度欲论侂胄谋泄以内批斥去熹因讲毕奏疏极言陛下即位未能旬月而进退宰执移易台谏皆出陛下之独断大臣不与谋给舍不及议此弊不革臣恐名为独断而主威不免于下移疏入遽出内批除熹宫观汝愚袖批还帝且谏且拜侂胄必欲出之汝愚退求去不许吏部侍郎彭龟年力陈侂胄窃弄威福为中外所附不去必貽患又奏近日逐朱熹太暴故欲陛下亦亟去此小人既而内批龟年与郡侂胄势益张侂胄恃功为汝愚所抑日夜谋引其党为台谏以摈汝愚汝愚为人疏不虞其奸赵彥逾以尝达意于郭杲事定冀汝愚引与同列至是除四川制置意不■〈匿上心下〉与侂胄合谋陛辞日尽疏当时贤者姓名指为汝愚之党帝意不能无疑汝愚请令近臣举御史侂胄密谕中司令荐所厚大理寺簿刘德秀内批擢德秀为察官其党牵联以进言路遂皆侂胄之人会黄裳罗点卒侂胄又擢其党京镗代点汝愚始孤天子益

无所倚信于是中书舍人陈傅良监察御史吴猎起居郎刘光祖各先后斥去羣儉和附疾正士如仇讎而衣冠之祸始矣侂胄欲逐汝愚而难其名或教之曰彼宗姓诬以谋危社稷则一网无遗侂胄然之擢其党将作监李沐为正言沐彦颖之子也尝求节度使于汝愚不得奏汝愚以同姓居相位将不利于社稷乞罢其政汝愚出浙江亭待罪遂罢右相除观文殿学士知福州台臣合词乞寝出守之命遂以大学士提举洞霄宫国子祭酒李祥言去岁国遭大戚中外汹汹留正弃相位而去官僚几欲解散军民皆将为乱两宫隔绝国丧无主汝愚以枢臣独不避损身灭族之祸奉太皇太后命翊陛下以登九五勋劳着于社稷精忠贯于天地乃卒受黯黹而去天下后世其谓何博士杨简亦以为言李沐劾祥简罢之太府丞吕祖俭亦上书诉汝愚之忠诏祖俭朋比罔上送韶州安置太学生杨宏中周端朝张衡林仲麟蒋傅徐范等伏阙言去岁人情惊疑变在朝夕当时假非汝愚出死力定大议虽百李沐罔知攸济当国家多难汝愚位枢府操兵柄指挥操纵何向不可不以此时为利今上下安恬乃独有异志乎书上悉送五百里外羁管侂胄忌汝愚益深谓不重贬人言不已以中丞何澹疏落大观文监察御史胡紘疏汝愚唱引伪徒谋为不轨乘龙授鼎假梦为符责寔远军节度副使永州安置初汝愚尝梦孝宗授以汤鼎背负白龙升天后翼寔宗以素服登大宝盖其验也而谗者以为言【伏读通鉴辑览 御批乘龙受鼎幻想不经汝愚果有此妖梦胡紘辈又孰从而知盖必自经传述以为翼寔宗素服即位之验故奸徒得执为左证劾其假梦为符耳大臣不幸处危疑之闲不自知危惧转侈谈定策之征所见已乖正道则其贾祸不得谓非自取】时汪义端行词用汉诛刘屈氂唐戮李林甫事示欲杀之意迪功郎赵师召亦上书乞斩汝愚汝愚怡然就道谓诸子曰观侂胄之意必欲杀我我死汝曹尚可免也至衡州病作为守臣钱鏐所窘暴卒天下闻而冤之时庆元二年正月壬午也汝愚学务有用常以司马光富弼韩琦范仲淹自期凡平昔所闻于师友如张栻朱熹吕祖谦汪应辰王十朋胡铨李焘林光朝之言欲次第行之未果聚族而居门内三千指所得廩给悉分与之菜羹蔬食恩意均洽人无闲言自奉养甚薄为夕郎时大冬衣布裘至为相亦然汝愚既没党禁寢解旋复资政殿学士大中大夫已而赠少保侂胄诛尽复元官赐谥忠定赠太师追封沂国公理宗绍配享寔宗庙庭追封福王其后进封周王子九人崇宪其长子也

赵崇宪

赵崇宪

崇宪字履常淳熙八年以取应对策第一时汝愚侍立殿上再拜以谢孝宗顾近臣曰汝愚年几何已有子如此越三年复以进士对策擢甲科帝谓执政曰此汝愚子即前科取应第一人者崇德初仕为保义郎监饶州赡军酒库换从事郎抚州军事推官汝愚帅蜀辟书写机宜文字改江西转运司干办公事监西京中岳庙汝愚既贬死海内愤郁崇宪阖门自处居数年复汝愚故官职多劝以仕改奉议郎知南昌县事奉行荒政所活甚众升藉田令制曰尔先人有功王室中更讒毁思其功而录其子国之典也崇宪拜命感泣陈疏力辞以为先臣之冤未悉昭白而其孤先被宠光非公朝所以劝忠孝厉廉耻之意俄改监行在都进奏院复引陈瓘论司马光吕公着复官事申言之乞以所陈下三省集议若先臣心迹有一如言者所论即近日恩典皆为冒滥先臣复官赐谥与臣新命俱合追寝如公论果谓诬蔑乞昭示中外使先臣之讒谤既谤既辨忠节自明而宪圣慈烈皇后拥佑之功德益显然后申饬史馆改正诬史垂万世之公又请正赵师召妄贡封章之罪究蔡璉与大臣为仇之奸毁龚颐正续稽古录之妄诏两省史官考订以闻己而吏部尚书兼修国史楼钥等请施行如章从之及诬史未正复进言其略谓前日史官徒以权臣风旨刊旧史焚元藁略无留难今诏旨再三莫有慨然奋直笔者何小人敢于为恶而谓之君子者顾不能勇于为善耶闻者愧之其后玉牒日厯所卒以重修龙飞事实进呈因崇宪请也未几赠汝愚太师封沂国公擢崇宪军器监丞改太府监丞迁秘书郎辞弗许寻为著作佐郎兼权考功郎官尝因阴雨求言乃上封事谓今日有更化之名无更化之实人才国之元气而忠鯁摈废之士死者未尽省录存者未悉褒扬言论国之风采其闲输忠亡隐有所规益者岂惟奖激弗加盖亦罕见施用偷安取容无所建明者岂惟黜罚弗及或乃遂阶通显至若勉圣学以广聪明教储贰以固根本戒宰辅大臣同寅尽瘁以济艰难责侍从台谏思职尽规以宣壅蔽防左右近习窃弄之渐察奸儉余党窥伺之萌皆恳恳为上言之请外知江州郡民岁苦和余崇宪疏于朝永蠲之且转余旁郡谷别廩储之以备岁俭瑞昌民负茶引钱新旧累积为一十七万有奇皆困不能偿死则以责其子孙犹弗贷会新券行视旧价几倍蕤崇宪叹曰负茶之民愈困矣亟请以新券一偿旧券二诏从之受赐者千余家刻石记事修陂塘以广溉灌凡数千所提举江西常平兼权隆兴府及帅漕司事迁转运判官仍兼帅事初汝愚捐私钱百余万创养济院俾四方宾旅之疾病者得药与食岁久寢移为它用崇宪至寻修复立规约数十条以愈疾之多寡为赏罚弃儿于道者亦收鞠之社仓

久敝访其利害而更张之以兵部郎中召寻改司封皆固辞遂直秘阁知静江府广西经略安抚使静江之属邑十地肥饶略等而阳朔修仁荔浦之赋独倍自张栻奏减之余人犹以为病崇宪请再加蠲减诏递损有差劾琮守非才激黎峒之变改辟能者代其任有萝蔓峒者仍岁寇钞为暴实民何向父子阴诱导之崇宪寘之法因严民夷交通之禁使边民相什伍寇至则鸣鼓召众先后掩击俘获者赏不至者惩先是都内郡邑有警辄移统府兵戍之在宜州者百人古县半之崇宪谓根本单虚非所以窒奸萌乃于其地各置兵如戍兵之数而敛戍者以归邕为边要害地自狄青平侬智高所以设扞防者甚至岁久寢弛而溪峒日强崇宪条上其议朝廷颇采其言然未及尽也崇宪天性笃孝能守家法所至以惠政闻

钦定续通志卷三百八十八

●钦定续通志卷三百八十九 列传一百八十九

列传

宋 【九十三】

○宋九十三

彭龟年 黄裳 罗点 黄度【周南】 林大中 陈騏

黄黼 詹体仁

彭龟年

黄裳

罗点

黄度 【周南】

林大中

陈騏

黄黼

詹体仁

△彭龟年

彭龟年字子寿临江军清江人七岁而孤事母尽孝性颖异读书能解大义登干道五年进士第授袁州宜春尉吉州安福丞郑侨张均同荐除太学博士殿中侍御史刘光祖以论带御器械吴端徙太府少卿龟年上疏乞复其位贻书宰相云祖宗尝改易差除以伸台谏之气不闻改易台谏以伸幸臣之私累迁秘书郎兼嘉王府直讲光宗尝亲郊值暴风雨感疾大臣希得进见久之疾平犹疑畏不朝重华宫龟年以书谏赵汝愚且上疏言寿皇之事高宗备极子道此陛下所亲覩也况寿皇今日止有陛下一

开李嶲京镗黄艾邓驿十人姓名示龟年云十人可充
讲官否龟年对曰陛下若招徕一世之杰如朱熹辈方厌人望不可专以潜邸学官为之
寻除侍讲迁吏部侍郎升兼侍读龟年知事势将变会
暴雨震雷因极陈小人窃权号令不时之弊遣充金国吊祭接送伴使初朱熹与龟年约
共论韩侂胄之奸会龟年护客熹以上疏见黜龟年闻
之附奏云始臣约熹同论此事今熹既罢臣宜并斥不报迨归见侂胄用事权势重于宰
相于是条数其奸谓进退大臣更易言官皆初政最关
大体侂胄窃弄威福不去必为后患帝览奏甚骇曰侂胄朕之肺腑信而不疑不谓如此
批下中书予侂胄祠己乃复入龟年上疏求去诏侂胄
与内祠龟年与郡以焕章阁待制知江陵府湖北安抚使龟年丐祠庆元二年以吕棐言
落职己而追三官勒停嘉泰元年复原官起知赣州以
疾辞除集英殿修撰提举冲佑观开禧二年以宝谟阁待制致仕卒赠宝谟阁直学士赐
谥忠肃未几加赠龙图阁学士而擢用其子钦

△黄裳

黄裳字文叔隆庆府普城人登干道五年进士第调巴州通江尉时蜀中饷师名为
和余实则取民裳赋汉中行讽总领李夔夔为罢余民
便之改兴元府录事参军以四川制置使留正荐召对论蜀兵民大计迁国子博士光宗
登极裳进对谓中兴规模与守成不同出攻入守当据
利便之势不可不定行都富国强兵当求功利之实不可不课吏治捍内御外当有缓急
之备不可不立重镇其论行都以为就便利之势莫若
建康其论吏治谓立品式以课其功计资考以久其任其论重镇谓自吴至蜀绵亘万里
曰汉中曰襄阳曰江陵曰鄂渚曰京口当为五镇以将
相大臣守之五镇强则国体重矣除太学博士进秘书郎迁嘉王府翊善讲春秋王正月
谓必书王正月所以一诸侯之正朔今天下境土比祖
宗时不能十之四然犹跨吴蜀荆广闽越二百州任吾民者二百州守也任吾兵者九都
统也苟不能统御则何以服之王曰何谓九都统裳曰
唐太宗年十八起义兵平祸乱今天王年过之而国家九都统之说犹有未知其可不汲
汲于学乎他日王擢用东宫旧人吴端端诣王谢王接
之中节裳因讲左氏礼有等衰问王比待吴端得重轻之节是得等衰之义王意益向学
于是作八图以献曰太极曰三才本性曰皇帝王伯学
术曰九流学术曰天文曰地理曰帝王绍运以百官终焉各述大旨陈之他日王过重华
宫寿皇问所读书以为太多王曰讲官训说明白心乐
之不知其多裳久侍王邸每岁诞节则陈诗以寓讽初尝制浑天仪与地图侑以诗章又
以王所讲三经为诗三章以进王为手书其诗以赐之

裳每劝讲必援古证今即事明理凡可以开导王心者无不言绍熙二年迁起居舍人奏曰自古人君不能从谋者其蔽有三一曰私心二曰胜心三曰忿心因私而生胜因胜而生忿忿心生则事有不得其理者焉如潘景珪常才也陛下固亦以常人遇之特以台谏攻之不已致陛下庇之愈力事势相激乃至于此宜因事静察三年试中书舍人时武备寢弛裳上疏曰寿皇在位三十年拊循将士常恨不得効死以报陛下诚能留意武事三军之士孰不感激愿为陛下用又论荆襄形势居吴蜀之中其地四平若金人捣襄阳据江陵按兵以守则吴蜀中断此今日边备之最可忧也宜分鄂渚兵一二万人屯襄汉之闲以张形势而壮重地不省未几除给事中赵汝愚除同知枢密院监察御史汪义端言祖宗之法宗室不为执政再疏丑诋汝愚乞免官裳奏汝愚事父孝事君忠居官清廉忧国爱民出于天性奴隶知其清明义端所见奴隶不如不可以居朝列于是义端与郡裳在琐闼甫一月封驳无虑十数韩侂胄落阶官郑汝谐除吏部侍郎裳皆缴其命改兵部侍郎不拜遂以显谟阁待制充翊善先是光宗以忧疑成疾不过重华宫裳疏请五日一朝至是复苦言之帝曰内侍杨舜卿告朕勿过宫裳请斩舜卿且以八事为奏曰念恩释怨辨谗去疑责己畏天防乱改过不报裳尝病疽及是忧愤创复作又奏陛下之于寿皇未尽孝敬之道意者必有所疑父子之闲小有猜疑此心一萌方寸遂乱宜及今幡然改过整圣驾谒两宫以交父子之欢会寿皇不豫中外忧危裳抗声谏帝起入宫裳挽其裾随之至宫门挥涕而出乃连章请外谓臣职有三曰待制曰侍讲曰翊善今三职俱废因出关待命及闻寿皇遗诏乃亟入临窆宗即位裳病不能朝改礼部尚书寻兼侍读力疾入谢引魏征十渐以为戒又奏言陛下近日所为颇异前日除授之际大臣多有不知盖是时韩侂胄已潜弄威柄而宰相赵汝愚未之觉故裳先事言之及疾革口占遗表而卒年四十九赠资政殿学士嘉定中谥忠文子瑾孙子敏

△罗点

罗点字春伯抚州崇仁人登淳熙三年进士第授定江节度推官累迁校书郎兼国史院编修官岁旱诏求言点上封事谓今时奸谀日甚议论凡陋无所可否则曰得体与世浮沈则曰有量众皆默已独言则曰沽名众皆浊已独清则曰立异此风不革陛下虽欲大有为于天下未见其可也自旱暵为虐陛下祷羣祠赦有罪曾不足以感动及朝求说言夕得甘雨天心所示昭然不诬独不知陛下之求言果欲用之否乎愿以所上封事反复详熟当者审而后行疑者咨而后决如此则治象日着而乱萌自消矣

迁秘书郎兼皇太子宫小学教授宣宗时以皇孙封英国公点兼教授入讲至晡时不辍左右请少憩点曰国公务学不休奈何止之又摭古事劝戒为鉴古录以进累迁太常少卿兼侍立修注官光宗受禅点被命使金告登宝位会金有国丧迫点易金带点曰登位吉事也必以吉服从事带不可易又诘点不当称宝位点曰圣人大宝曰位不加宝字何以别至尊金人不能夺帝尝谓点旧为宫僚有所欲言毋惮启告点言君子得志常少小人得志常多念君子之难进则极所以主张而覆护之念小人之难退则尽所以烛察而提防之皇子嘉王年及弱冠点言宜择端良忠直之士参侍燕闲遂除黄裳为翊善又言今道涂之言皆谓陛下每旦视朝勉强听断意不在事宫中燕游之乐锡赉奢侈之费已腾于众口强敌对境此声岂可出哉绍熙三年冬至车驾将朝贺重华宫既而中辍点言自天子达庶人节序拜亲无有阙者三纲五常所系甚大不当以常事而忽之上过宫意未决点奏陛下已涓日过宫寿皇必引领以俟陛下常人于朋友且不可以无信况人主之事亲乎今陛下久阙温清寿皇欲见不可得万一忧思感疾陛下将何以自解于天下尝召对便殿点言近者中外相传或谓陛下内有所制不能遽出溺于酒色不恤政事果有之乎帝曰无是点曰臣固知之窃意宫禁闲或有撻拂之事姑以酒自遣耳夫闾阎匹夫处闺门逆境容有纵酒自放者人主宰制天下此心如青天白日当风雨雷电既济之余湛然虚明岂容复有纤芥停留帝犹未过宫点又奏窃闻嘉王生朝称寿禁中以报劬劳之德父子欢洽宣不动心上念两宫延望之意点以言不见听求去不许十二月试兵部尚书五年四月帝将幸玉津园点请先过重华曰陛下为寿皇子四十余年一无闲言止缘初郊违豫寿皇尝至南内督过左右之人自此谗闲遂生忧疑以臣观之寿皇与天下相忘久矣今臣下皆无贰志设有离闲诛之不疑乃若深居不出久亏子道众口谤讟祸患将作不可以不虑帝曰卿等可为朕调护之点曰陛下一出即当释然帝犹未行点乃率讲官言之帝曰朕心未尝不思寿皇对曰陛下久阙定省虽有此心何以自白及寿皇不豫点又随宰执班进谏阁门吏止之点叱之而入帝拂衣起宰执引帝裾点亟前泣奏曰寿皇疾势已危不及今一见后悔何及羣臣随帝入至福宣殿内侍阖门众恸哭而退越三日点随宰执班起居诏独引点入点奏前日迫切献忠举措失礼陛下赦而不诛然引裾亦故事也帝曰引裾可也何得辄入宫禁乎点引辛毗事以谢且言寿皇止有一子既付神器惟恐见之不速耳寿皇崩点请帝奔丧许而不出拜遗诏于重华宫前后与侍从列奏谏请帝过宫者凡三十五疏自上

奏者又十六章而奏疏重华上书嘉王及面对口奏不
预焉 宣宗嗣位人心始定拜端明殿学士签书枢密院事帝有事明堂点扈从斋宫得疾
卒年四十五赠太保谥文恭点天性孝友无矫激崖异
之行而端介有守义利之辨皎如宰相赵汝愚尝谓宣宗曰黄裳罗点相继沦谢二臣不
幸天下之不幸也

△黄度 【周南】

黄度字文叔绍兴新昌人好学读书隆兴元年进士知嘉兴县入监登闻鼓院行国
子监簿言今日养兵为巨患救患之策宜使民屯田阴
复府卫以销募兵具屯田府卫十六篇上之绍熙四年守监察御史蜀将吴玠死度言玠
子曦必纳赂求袭位若因而授之恐为他日患乞分其
兵柄宰相难之后曦割关外四州赂金人求王蜀果如度言光宗以疾不过重华宫度上
书切谏极陈父子相亲之义且言太白昼见犯天关荧
惑句芒行入太微其占为乱兵入宫不听乞罢去又言以孝事君则忠臣父年垂八十菽
水不亲动经岁月事亲如此何以为事君之忠盖托己
为谕冀因有以感悟上心又与台谏官劾内侍陈源杨舜卿林亿年三人为今日祸根罪
大于李辅国又言孔子称天下有道则庶人不议夫人
主有过公卿大夫谏而改则过不彰庶人奚议焉惟谏而不改失不可盖使闾巷小人皆
得妄议纷然乱生故胜广黄巢之流议于下国皆随以
亡今天下无不议圣德者臣窃危之帝犹不听遂出修门帝谕使安职度奏有言责者不
得其言则去理难复入宣宗即位诏复为御史改右正
言韩侂胄用事丞相留正去国侂胄知度尝与正论事不合欲讽使挤之度与同列曰丞
相已去挤之易耳然长小人声焰可乎侂胄骤窃政柄
以意所好恶为威福度具疏将论其奸为侂胄所觉御笔遽除度直显谟阁知平江府度
言蔡京擅权天下所由以乱今侂胄假御笔逐谏臣 【
按四朝闻见录载御笔皆侂胄矫为其后玉津园之事郑发王斌邀侂胄车语以有御笔
押平章出国门侂胄仓忙曰御笔我所为也此时御笔
又为慈明所书附识】 使俛首去不得效一言非国之利也固辞丞相赵汝愚袖其疏入
白诏以冲佑禄归养俄知婺州坐不发觉县令张元■

〈弼文〉赃罪降罢自是纪纲一变大权尽出侂胄而党论起矣起知泉州辞乃进宝文
阁奉祠如故侂胄诛召除太常少卿寻兼国史院编修
实录院检讨官朝论欲函侂胄首以泗州五千人还金度以为辱国非之权吏部侍郎兼
修玉牒同修国史实录院同修撰屡移疾以集英殿修
撰知福州迁宝谟阁待制始至讼牒日千余度随事裁决进龙图阁知建康府兼江淮制
置使赐金带以行至金陵罢科余输送之扰活饥民百

万口除见税二十余万击降盗卞整斩盗胡海首以献招归业者九万家侂胄尝募雄淮
军已收刺者十余万人别屯数千人未有所属度忧其
为患人给钱四万复其役遣之迁宝谟阁直学士度以人物为己任推挽不休十上引年
之请不许为礼部尚书兼侍读趣入覲论艺祖垂万世
之统一曰纯用儒生二曰务惜民力帝纳其言谢病丐去遂以焕章阁学士知隆兴府归
越提举万寿宫嘉定六年十月卒进龙图阁学士赠通
奉大夫度志在经世而以学为本其壻周南字南仲平江人年十六游学吴下视时人业
科举心陋之文词雅丽精切而皆达于时用每以世道
兴废为己任登绍熙元年进士第 【按四朝闻见录载周南游太学有时名然颇任侠尝
与郑湜游湜有奏疏未报南尝见之会廷对策中微
讽帝以未报郑之意有司已第南为第一光宗读其策顾谓大臣曰湜之疏入纔六日耳
南何自知之遂就南卷首批云郑湜无削藁爱君之忠
周南显非山林恬退之士可降为第一甲十五人】 为池州教授会度以言忤当路御史
劾度并南罢之度与南俱入伪学党开禧三年召试馆
职南对策诋权要言者劾南罢之卒于家

△林大中

林大中字和叔婺州永康人入太学登绍兴三十年进士第知抚州金溪县郡督输
赋急大中请宽其期不听纳告勅投劾而归已而主太
常寺簿光宗受禅除监察御史上疏言臣昨簿正奉常实陪庙祀见祝于神者或舛于文
称于神者或讹其字所宜厚者或简不虔所宜先者或
废不用更制器服或岁月太疏夙兴行事或时刻太早是皆礼意所未顺人情所未安也
一日御札示大中谓言事觉察宜遵旧例大中曰台臣
不当踰分守固如圣训然必抗直敢言乃为称职迁殿中侍御史奏言进退人才当观其
趋向之大体不当责其行事之小节趋向果正虽小节
可责不失为君子趋向不正虽小节可喜不失为小人又论今日之事莫大于讎耻之未
复此事未就则此念不可忘此念存于心于以来天下
之才作天下之气倡天下之义此义既明则事之条目可得而言治功可得而成矣陈贾
以静江守臣入奏大中极论其庸回亡识命遂寝绍兴
二年春雷电交作有旨访时政阙失大中疏曰仲春雷电大雪继作以类求之则阴胜阳
之明验也男为阳而女为阴君子为阳而小人为阴当
辨邪正毋使小人得以闲君子当思正始之道毋使女谒之得行司谏邓驿以言事移将
作监大中言台谏以论事不合而迁臣恐天下以陛下
为不能容守侍御史兼侍讲知潭州赵善俊得旨奏事大中上疏劾善俊而言宗室汝愚
之贤当召帝用其言召汝愚而出善俊时江淮荆襄为

国巨屏而权任颇轻大中言宜选行实材略之人付以江淮荆襄经理之任旧制河北陕西分为四路以文臣为大帅武臣副之中兴初沿江置制置使自秦桧罢三大将兵权专归武臣而江东荆襄帅臣不复领制置之职宜仍旧制置而以诸将为副久其任重其权则边防立而国势张矣江浙四路民苦折帛和买重输大中曰有产则有税于税绢而科折帛犹可言也如和买折帛则重为民害盖自咸平马元方建言于春预支本钱济其乏绝至夏秋使之输纳则是先支钱而后输绢其后则钱盐分给又其后则直取于民今又令纳折帛钱以两缣折一缣之直大失立法初意朝廷以其言为减所输者三岁马大同为户部大中劾其用法峻帝欲易置他部大中曰是尝为刑部固以深刻称章三上不报又论大理少卿宋之瑞章四上又不报大中以言不行求去改吏部侍郎辞不拜乃除大中直宝谟阁而大同之瑞俱与郡给事中尤袤中书舍人楼钥上疏云大中言官当与被论者有别寻命知临安府又移赣州宁宗即位召还试中书舍人迁给事中寻兼侍讲知合门事韩侂胄来谒大中接之无他语阴请内交大中笑而却之侂胄怨由此始会吏部侍郎彭龟年抗论侂胄侂胄转一官与内祠龟年除焕章阁待制与郡大中同中书舍人楼钥缴奏曰陛下眷礼僚旧一旦龙飞延问无虚日不三数月闲或死或斥赖龟年一人尚留今又去之四方谓其以尽言得罪恐伤政体且一去一留恩意不侔请留龟年经筵而命侂胄以外任有旨龟年已为优异侂胄本无过尤可并书行大中复同奏龟年既已决去侂胄难于独留宜畀外任或外祠以慰公议不听太府寺丞吕祖俭以上书攻侂胄谪置韶州大中掾之汪义端顷为御史以论赵汝愚去至是侂胄引为右史大中驳之改吏部侍郎不拜以焕章阁待制知庆元府城南民田潮溢不可种大中捐公帑治石筑之民不知役而蒙其利郡讹言夜有妖大中谓此必黠贼所为立捕黥之人情遂安丐祠得请给事中许及之缴驳遂削职后提举冲佑观乞休致复原职监察御史林采论列再落职寻复之大中罢归屏居十二年时事一不以挂口及侂胄诛即召见落致仕试吏部尚书言吕祖俭以言侂胄得罪死于瘴乡虽赠官畀职而公议未厌彭龟年面奏侂胄过尤朱熹论侂胄窃弄威柄皆为中伤降官镌职卒以老死宜优加旌表其它因讥切侂胄以得罪者望量其轻重而旌别之除端明殿学士签书枢密院事嘉定改元兼太子宾客尝议讲和事帝曰朕不惮屈己为民讲和之后亦欲与卿等革侂胄弊政作家活耳大中顿首曰陛下言及此宗社生灵之福也是年六月卒年七十有八赠资政殿学士正奉大夫谥正惠

△陈骅

陈骅字叔进台州临海人绍兴二十四年试春官第一秦桧当国以秦垞居其上累官迁将作少监守秘书少监兼太子谕德太子尹临安
骅谓储宫下亲细务不得专于学非所以毓德也太子矍然亟辞崔渊以外戚张说进除秘书郎兼金部郎骅封还词头未几出知赣州易秀州
召还首言陛下锐意图治羣下急于自媒争献强兵理财之计及畀以职报效蔑闻宜杜邪谄之路迁秘书监兼崇政殿说书淳熙五年试中书
舍人兼侍讲同修国史帝欲采晋宋以下兴亡理乱之大端约为一书谓骅曰惟卿与周必大可任此事言者忌而攻之帝留章不下授提举太平兴国宫起知盩厔府改知太平州加集英殿修撰以言者罢起知袁州光宗受禅召试吏部侍郎绍熙元年同知贡举兼侍讲二年春雪雷诏
陈时政得失骅疏三十条如宫闈之分不严则权柄移内谒之渐不杜则明断息谋台諫于当路则私党植咨将帅于近习则贿赂行不求说论
则过失彰不谨旧章则取舍错宴饮不时则精神昏赐予无节则财用竭皆切于时病三年三月权礼部尚书六月同知枢密院事四年二月参
知政事光宗以疾不朝重华宫会庆节称寿又不果往骅三入奏廷臣上疏者以百数帝感悟以冬至日朝重华五年正月朔旦称寿于慈福宫
孝宗崩光宗以疾未临丧骅请正储位以安人心七月摄行三省事熈宗即位知枢密院事兼参知政事赵汝愚为右丞相骅素所不快未尝同
堂语汝愚拟除刘光祖侍御史骅奏曰刘光祖旧与臣有隙光祖入台臣请避之汝愚愕而止时韩侂胄恃传言之劳潜窃国柄吏部侍郎彭龟
年论侂胄将为国患不报于是龟年侂胄俱请祠骅曰以合门去经筵何以示天下龟年竟外补侂胄语人曰彭侍郎不贪好官固也元枢亦欲
为好人耶遂以资政殿大学士与郡辞诏提举洞霄宫庆元二年知婺州告老授观文殿学士提举洞霄宫嘉泰三年卒年七十六赠少傅谥文简

△黄黼

黄黼字符章临安余姚人也少游太学第进士累迁太常博士轮对言周以辅翼之臣出任方伯汉以牧守之最擢拜公卿唐不厯边任不
拜宰相本朝不为三司等属不除清望官乞于时望近臣中择才略谋虑可以任重致远者或畀上流或委方面习知边防利害地形险阨中外
军民亦孚其恩信熟其威名天下无事则取风绩显著者不次除拜以尊朝廷边鄙有警则任以重寄俾制方面出将入相行太常丞进秘书郎
提举江东常平茶盐召为户部员外郎寻除直秘阁两浙路转运判官进直龙图阁升副

使辞改直显谟阁浙东濒海之田以旱涝告常平储蓄
不足黼捐漕计贷之毗陵饥民取糠粃杂草根以充食郡县不以闻黼取民食以进乞捐
僧牒缙钱赈济所全活甚众除中书门下检正诸房公
事守殿中侍御史兼侍讲迁侍御史行起居郎兼权刑部侍郎以刘德秀论劾奉祠而卒
△詹体仁

詹体仁字符善建宁浦城人父慥赣州信丰尉体仁登隆兴元年进士第调饶州浮
梁尉郡上体仁获盗功状当赏体仁谢不就为泉州晋
江丞宰相梁克家荐于朝入为太学录升太学博士太常博士迁太常丞摄金部郎官光
宗即位提举浙西常平除户部员外郎湖广总领就升
司农少卿奏蠲诸郡赋输积欠百余万有逃卒千人入大冶因铁铸钱剽掠为变体仁语
戎帅此去京师千余里若比上请得报贼势张矣宜速
加诛讨帅用其言羣党悉散除太常少卿陛对首陈父子至恩之说谓易于家人之后次
之以睽睽之上九曰见豕负涂载鬼一车先张之弧后
说之弧匪寇婚媾往遇雨则吉天疑极而惑凡所见者皆以为寇而不知实其亲也孔子
释之曰遇雨则吉羣疑亡也盖人伦天理有闲隔而无
断绝方其未通也湮郁烦愤若不可以终日及其醒然而悟泮然而释如遇雨焉何其和
悦而条畅也伏惟陛下神心昭融圣度恢豁凡厥疑情
一朝涣然若揭日月而开云雾丕叙彝伦以承两宫之欢以塞兆民之望时上以积疑成
疾久不过重华宫故体仁引睽孤之义以开广圣意孝
宗崩体仁率同列抗疏请驾诣重华宫亲临祥祭辞意恳切时赵汝愚将定大策外庭无
预谋者密令体仁及左司郎官徐谊达意少保吴玠请
宪圣太后垂帘为援立计熈宗登极天下晏然体仁与诸贤密赞汝愚之力也时议帝谥
体仁言寿皇圣帝事德寿二十余年极天下之养諒阴
三年不御常服汉唐以来未之有宜谥曰孝卒用其言孝宗将复土体仁言永阜陵地势
卑下非所以妥安神灵与宰相异议除太府卿寻直龙
图阁知福州言者竟以前论山陵事罢之退居雪川日以经史自娱人莫窥其际始体仁
使浙右时苏思旦以胥吏执役后倚侂胄躡躑大官至
是遣介通殷勤体仁曰小人乘君子之器祸至无日矣乌得以污我未几果败复直龙图
阁知静江府阁十县税钱一万四千蠲杂赋八千移守
鄂州除司农卿复总湖广饷事时岁凶艰食即以便宜发廩振捄而后以闻侂胄建议开
边一时争谈兵以规进用体仁移书庙堂言兵不可轻
动宜遵养俟时皇甫斌自以将家子好言兵体仁语僚属谓斌必败已而果然开禧二年
卒年六十四

钦定续通志卷三百八十九

●钦定续通志卷三百九十 列传一百九十

列传

宋 【九十四】

○宋九十四

胡纮 何澹 林栗 高文虎 陈自强 郑丙
京镗 谢深甫 许及之 梁汝嘉

胡纮

何澹

林栗

高文虎

陈自强

郑丙

京镗

谢深甫

许及之

梁汝嘉

△胡纮

胡纮字应期处州遂昌人淳熙中举进士绍熙五年以京镗荐监都进奏院迁司农寺主簿秘书郎韩侂胄用事逐朱熹赵汝愚意犹未快遂擢纮监察御史纮未达时尝谒朱熹于建安熹待学子惟脱粟饭遇纮不能异纮曰此非人情遂亡去及是劾赵汝愚且诋其引用朱熹为伪学罪首婆愚遂谪永州侂胄以汝愚之门及朱熹之徒多不便于己欲尽去之谓不可一一诬以罪则设伪学之目以摈之用何澹刘德秀为言官专击伪学纮草疏欲攻熹会改太常少卿不果沈继祖以追论程颐得为察官纮遂以藁授之继祖论熹皆纮笔也宁宗以孝宗嫡孙行三年服纮言止当服期诏侍从台谏给舍集议释服于是徙纮太常少卿使草定其礼既而亲飨太庙纮既解言责复入疏云比年以来伪学猖獗图为不轨动摇上皇诋诬圣德几至大乱赖二三大臣台谏出死力而排之故元恶殒命羣邪屏迹自御笔有救偏建中之说或者误认天意急于奉承倡为调停之议取前日伪学之奸党次第用之以冀幸其它日不相报复往者建中靖国之事可以为戒陛下何未悟也宜且命退伏田里循省愆咎俄迁纮起居舍人诏伪学之党宰执权住进拟用纮言也自是学禁益急进起居郎权工部侍郎移礼部又移吏部坐同知贡举考宏词不当而罢未几学禁渐弛纮亦废弃卒于家

△何澹

何澹字自然处州龙泉人干道二年进士累官至国子司业迁祭酒除兵部侍郎光宗内禅拜右谏议大夫兼侍讲澹本周必大所厚始为学官二年不迁留正奏迁之澹憾必大及长谏垣即劾必大必大遂策免澹尝与所善刘光祖言之光祖曰周丞相岂无可论第其门多佳士不可并及其所荐者澹不听时姜特立譙熙载以春坊旧恩颇用事一日光祖过澹因语澹曰曾龙之事不可再澹曰得非姜譙之谓乎既而澹引光祖入便坐则皆姜譙之徒也光祖始悟澹谩诺明年澹同知贡举光祖除殿中侍御史首上学术邪正之章及奏名光祖被旨入院拆号澹谓曰近日风采一新光祖曰非立异也但尝为大谏言者今日言之耳既出同院谓光祖曰何自然见君所上章数夕恍惚饵定志丸他可知也进御史中丞澹有本生继母丧乞有司定所服礼寺言当解官澹引不逮事之文乞下给谏议之太学生乔嘉朱有成等移书于澹谓足下自长台谏此纲常之所系也四十余年以所生继母事之及其终也反以为生不逮而不持心丧可乎奉常礼所由出顾以台谏给舍议之识者有以窥之矣澹乃去终制除焕章阁学士知泉州移明州宁宗即位朱熹彭龟年以论韩侂胄俱绌澹迁为中丞怨赵汝愚不援引汝愚时已免相复诋其废坏寿皇良法美意汝愚落职罢祠又言专门之学流而为伪愿风厉学者专师孔孟不得自相标榜除同知枢密院事参知政事迁知枢密院吴曦贿通时宰规图帅蜀未及贿澹韩侂胄已许之澹持不可侂胄怒曰始以君肯相就黜伪学汲引至此今顾立异耶以资政殿大学士提举洞霄宫起知福州澹居外常怏怏以书祈侂胄有曰迹虽东冶心在南园侂胄怜之进观文殿学士寻移知隆兴府后除江淮制置大使兼知建康府移使湖北兼知江陵奉祠卒赠少师

△林栗

林栗字黄中福州福清人登绍兴十二年进士第调崇仁尉教授南安军宰相陈康伯荐为太学正守太常博士孝宗即位迁屯田员外郎皇子恭王府直讲时金人请和约为叔侄之国且以归疆为请栗上封事言宗庙之讎而事之以弟侄其忍使祖宗闻之乎无唐邓则荆襄有齿寒之忧无泗海则淮东之备达于真扬海道之防徧于明越矣为今日计宜停使勿遣迁延其期比至来春别无动息徐于境上移书论以两国誓言败之自彼信不由衷虽盟无益自今宜守分界休息生灵不烦聘使之往来各保疆场之无事焉用疲敝州县以供信使乎孝宗惩创绍兴权臣之弊躬揽权纲不以责任臣下栗言王侯贵戚善挠权左右近习善窃权至有以鹿

为马以鸡为鸾之语执政有诉于孝宗曰林栗谓臣等指鹿为马臣实不愿与之同朝乃出知江州有旨省并江州屯驻一军栗奏辛巳甲申两淮一再受敌赖江州一军分布故舒蕲黄三州独不被兵本州岛上至鄂渚七百里下至池阳五百里平时屯戍诚若无益万一有警鄂渚之戍上越荆襄池阳之师下流增备中闲千里藩篱诚为虚阙无以一夫之议而废长江千里之防由是军得无动以吏部员外郎召冬至有事南郊前期十日百执事听誓戒会庆节有旨上寿不用乐迨宴金使乃有权用乐之命栗以为不可致书宰相不听兼皇子庆王府直讲有旨令二王非时招延讲读官相与议论时政期尽规益栗以为不可疏言汉武帝为戾太子开博望苑卒败太子唐太宗为魏王泰立文学馆卒败魏王古者教世子与吾祖宗之所以辅导太子诸王惟以讲经读史为事若使议论时政则是对子议父无礼不可不留圣意除右司员外郎迁太常少卿太庙祫享之制始祖东向昭南向穆北向别庙神主祔于祖妣之下随本室南北向而无西向之位绍兴干道闲懿节安穆二后升祔有司设幄西向逮安恭皇后新祔有司承前失其西向之位几与僖祖相对栗辨正之除直宝文阁知湖州栗朝辞曰臣闻汉人贾谊号通达国体其所上书至于痛哭流涕者考其指归大抵以一身喻天下之势其言曰天下之势方病大瘡非徒瘡也又苦■（足炙）鼈又类辟且病痲臣每见士大夫好论时事辄举以问之今日国体于四百四病之中名为何病能言其病者犹未必能处其方不能言其病而辄处其方其误人必矣闻臣之言者不忿则默闲有反以诘臣即对之曰今日之病名为风虚其状半身不随是也风者在外虚者在内真气内耗故风邪自外而乘之忽中于人应时僵仆则靖康之变是也幸而元气犹存故仆而复起则建炎之兴是也然元气虽存邪气尚盛自淮以北皆吾故壤而号令不能及正朔不能加有异于半身不随者乎非但半身不随而已半身存者凛凛乎畏风邪之乘而不能以自安也欲起此疾者必禁其嗜欲节其思虑爱其气血养其精神使半存之身日以充实则阳气周流脉络宣畅将不觉舍杖而行若急于愈疾而不顾其本百毒入口五脏受风风邪之盛未可卒去而真气之存者日以耗亡故中风再至者多不能救臣愚有感于斯言窃谓贾谊复生为陛下言无以易此知兴化军又移南剑除夔路提点刑狱改知夔州加直敷文阁夔属郡曰施州其羈縻郡曰思州施民谭汝翼者与知思州田汝弼交恶会汝弼卒汝翼帅兵伐其丧汝弼之子祖周深入报复兵交于二州之境施黔大震汝翼复缮甲兵科丁壮以重币借兵诸洞而乞师于帅府栗曰汝翼实召乱者移檄罢兵乃选属

吏往摄兵职以渐收汝翼之权命兵马钤辖按阅诸州
密檄至施就摄州事汝翼不之觉已乃惶遽遁入成都事闻孝宗亲札赐粟及成都制置
使陈峴曰田氏犹是羈縻州郡谭氏乃夔路豪族又且
首为衅端帅阉不能弹压纵其至此如尚不悛未免加兵除其元恶汝翼逃归调集家丁
及役八砦义军列陈于沱河桥与官军战大溃汝翼遁
去俘其徒四十有三人取其巨恶者九人诛之田祖周由是惧与其母冉氏谋献黔江田
业计钱九十万缗以赎罪蛮徼遂安既而汝翼入都诉
栗受田氏金诏以汝翼属吏省札下夔州栗亲书奏状缴还并辨其事帝大怒会近臣有
救解者寻坐栗身为帅臣擅格上命镌职罢归既而理
寺追究事白贷汝翼死幽置绍兴府居顷之诏栗累更事任清介有闻复直宝文阁广南
西路转运判官累进集英殿修撰知隆兴府召对便殿
奏乞仿唐制置补阙拾遗左右各一员不以纠弹为责从之除兵部侍郎朱熹以江西提
刑召为兵部郎官熹既入国门未就职栗与熹相见论
易与西铭不合至是栗遣吏部趣之熹以脚疾请告栗遂论熹本无学术徒窃张载程颐
之绪余为浮诞宗主谓之道学妄自推尊所至辄携门
生十数人习为春秋战国之态妄希孔孟历聘之风绳以治世之法则乱人之首也今采
其虚名俾之入奏将置朝列以次收用而熹闻命之初
迁延道途邀索高价门生迭为游说政府许以风闻然后入门既经陛对得官除郎而辄
怀不满傲睨累日不肯供职是岂张载程颐之学教之
然也缘熹既除兵部郎官在臣合有统摄若不举劾厥罪惟均望将熹停罢姑令循省以
为事君无礼者之戒帝谓其言过当而大臣畏栗之强
莫敢深论太常博士叶适独上封事辩之曰考栗之辞始末参验无一实者其中谓之道
学一语无实最甚盖自昔小人残害良善率有指名或
以为好名或以为立异或以为植党近忽徧为道学之目郑丙唱之陈贾和之居要路者
密相付授见士大夫有稍务洁修粗能操守辄以道学
之名归之往日王淮表里台谏阴废正人盖用此术栗为侍从无以达陛下之德意志虑
而更袭郑丙陈贾密相传授之说以道学为大罪文致
言语逐去一熹固未甚害第恐自此游辞无实谗言横生善良受害无所不有愿陛下正
纪纲之所在绝欺罔于既形摧抑暴横以扶善类奋发
刚断以慰公言于是侍御史胡晋臣劾栗罢之出知泉州又改明州奉祠以卒谥简肃栗
为人强介有才而性狷急欲快其私忿遂至攻诋名儒
废绝师教殆与郑丙陈贾何澹刘德秀刘三杰胡纘辈党邪害正者同科虽畴昔论事雄
辨可观不足以盖晚节之谬也

△高文虎

高文虎字炳如四明人礼部侍郎闻之从子登绍兴庚辰进士第调平江府吴兴县主簿曾几守官在吴文虎从之游故闻见博洽多识典故除国子正迁太学博士孝宗幸两学祭酒林光朝访文虎具仪注文虎辑国朝以来临幸故事授之兼国史院编修官与修四朝国史出知建昌军擢将作丞兼实录院检讨官修高宗实录又兼玉牒所检讨官修神宗玉牒自熙宁以来史氏淆杂人无所取信文虎尽取朱墨本刊正缪妄一一研核既奏御又修徽宗玉牒考订宣和崇观以来尤为详审熈宗即位累迁祭酒中书舍人升实录院同修撰同修国史韩侂胄用事既逐赵汝愚朱熹以其门多知名士设伪学之目以摈之遂命文虎草诏西掖词命旧率以数人共一词文虎以为非所以崇训戒赞人才也乃人人各为之迁兵部侍郎除华文阁学士知建宁府力丐祠提举太平兴国宫以台臣言夺职卒文虎以博洽自负与胡纆合党共攻道学久司学校专困遏天下士凡言性命道德者皆绌焉

△陈自强

陈自强字勉之福州闽县人登淳熙五年进士第庆元二年入都待铨自以尝为韩侂胄童子师欲见之无以自通适僦居主人出入侂胄家为言于侂胄一日召自强比至则从官毕集侂胄设褥于堂乡自强再拜次召从官同坐侂胄徐曰陈先生老儒汨没可念明日从官交荐其才除太学录迁博士数月转国子博士又迁秘书郎入馆半载擢右正言谏议大夫御史中丞入台未踰月遂登枢府由选人至两地纔四年嘉泰三年拜右丞相历封祈卫秦国公韩侂胄颛朝权苞苴盛行自强尤贪鄙四方致书馈必题其缄云某物并献凡书题无并字则不开纵子弟亲戚关通货贿仕进干请必谐价而后予日押空名刺札送侂胄家须用乃填三省不与也都城火自强所贮一夕为煨烬侂胄首遗之万缗执政及列郡闻之莫不有助不数月得六十万缗遂倍所失之数创国用司自为国用使以费士寅张岩为同知国用事掎克民财州县骚动方侂胄欲为平章犹畏众议自强首率同列援典故入奏诏以侂胄为平章军国事常语人曰自强惟一死以报师王每称侂胄为恩王恩父而呼堂吏史达祖为兄苏师旦为叔侂胄将用兵遣使北行审敌虚实自强荐陈景俊以往金人有不宜败好之语景俊归自强戒使勿言侂胄乃决恢复之议吴曦有逆谋求归蜀厚赂自强自强语侂胄非曦不足以镇坤维乃纵之归曦卒受金人命为蜀王侂胄奸凶久盗国柄自强实为之表里既开边隙朝野汹汹三遣使请和金人欲缚送首议用兵贼臣侂胄恚愤复欲用兵中外大惧史弥远建议诛侂胄诏以自强阿附充位不恤

国事罢右丞相未几诏追三官永州居住又责武泰军节度使韶州安置中书舍人倪思
缴奏乞远窜籍其家诏从之再责复州团练副使雷州
安置后死于广州

△郑丙

郑丙字少融福州长乐人绍兴十五年进士积官至吏部尚书浙东提举朱熹行部
至台州奏台守唐仲友不法事宰相王淮芘之熹章十
上丙雅厚仲友且迎合宰相意奏近世士大夫有所谓道学者欺世盗名不宜信用盖指
熹也于是监察御史陈贾奏道学之徒假名以济其伪
乞摈斥勿用道学之目丙倡贾和其后为庆元学禁善类被厄丙罪为多尝知泉州为政
暴急或劝之尚宽丙曰吾疾恶有素岂以晚节易所守
哉闻者哂之丙官终端明殿学士卒谥简肃

△京镗

京镗字仲远豫章人也登绍兴二十七年进士第龚茂良帅江西见之曰子庙廊器
也及茂良参大政遂荐镗入朝孝宗诏侍从举良县令
为台官给事中王希吕曰京镗蚤登孺级两试令有声陛下求执法官镗其人也帝引见
镗问政事得失时帝初统万机锐志恢复羣臣进说多
迎合天子意以为大功可且暮致镗独言天下事未有骤如意者宜舒徐以图之帝善其
言镗于是极论今日民贫兵骄士气颓靡言甚切至帝
说擢为监察御史累迁右司郎官金遣贺生辰使来帝居高宗丧不欲引见镗为宾佐以
旨拒之使者请少留阙下镗曰信使之来以诞节也诞
节礼毕欲留何名乎使行帝嘉其称职转中书门下省检正诸房公事金人遣使来吊镗
为报谢使金人故事南使至汴京则锡宴镗请免宴郊
劳使康元弼等不从镗谓必不免宴则请彻乐遗之书曰镗闻邻丧者舂不相里殡者不
巷歌今镗衔命而来繄北朝之惠吊是荷是谢北朝勤
其远而悯其劳遣郊劳之使锡式宴之仪德莫厚焉外臣受赐敢不重拜若曰而必听乐
是于圣经为悖理于臣节为悖义岂惟贻本朝之羞亦
岂昭北朝之懿哉相持甚久镗即馆相礼者趣就席镗曰若不彻乐不敢即席金人迫之
镗弗为动徐曰吾头可取乐不可闻乃帅其属出馆门
甲士露刃向镗镗叱退之金人知镗不可夺驰白其主主叹曰南朝直臣也特命免乐自
是恒去乐而后宴镗孝宗闻之喜谓辅臣曰士大夫平
居孰不以节义自许有能临危不变如镗者乎使还入见帝劳之曰卿能执礼为国家增
气朕将何以赏卿镗顿首曰北人畏陛下威德非畏臣
也正使臣死于北庭亦臣子之常分耳敢言赏乎故事使还当增秩右相周必大言于帝
曰增秩常典尔京镗奇节今之毛遂惟陛下念之乃命

镗权工部侍郎四川阙帅以镗为安抚制置使兼知成都府镗到官首罢征敛弛利以予民泸州卒杀太守镗擒而斩之蜀以大治召为刑部尚书
书
宣宗即位甚见尊礼由政府累迁为左丞相当是时韩侂胄权势震天下其亲幸者由禁从不一二岁至宰辅而不附侂胄者往往沈滞不偶
镗既得位一变其素守于国事漫无所可否但奉行侂胄风旨而已又荐引刘德秀排击善类于是有伪学之禁后宦者王德谦除节度使镗乃请裂其麻帝曰除德谦一人而止可乎镗曰此门不可启节钺不已必及三孤三孤不已必及三公愿陛下以真宗不予刘承规为法以大观宣政闲童贯等冒节钺为戒帝于是谪德谦而黜词臣吴宗旦或曰亦侂胄意也居无何以年老请免相卒赠太保谥文忠后以监察御史倪千里言改谥庄定

△谢深甫

谢深甫字子肃台州临海人少颖悟刻志为学中干道二年进士第调嵎县尉岁饥有死道旁者一姬哭诉曰吾儿也佣于某家遭掠而毙深甫疑焉徐廉得姬子他所召姬出示之姬惊伏曰某与某有隙赂我使诬告耳越帅方滋钱端礼皆荐深甫有廊庙才调昆山丞为浙曹考官一时士望皆在选中司业郑伯熊曰文士世不乏求具眼如深甫者实鲜深甫曰文章有气骨如太山乔岳可望而知以是得之知处州青田县侍御史葛邲监察御史颜师鲁礼部侍郎王藺交荐之孝宗召见深甫言今日人才枵中侈外者多妄诞矫讦沽激者多眩鬻激昂者急于披露而或邻于好夸刚介者果于植立而或邻于太锐静退简默者寡有所合或邻于立异故言未及酬而已齟齬事未及成而已挫抑于是趣时徇利之人专务身谋习为软熟畏避束手因循苟且年除岁迁亦至通显一有缓急莫堪倚仗臣愿任使之际必察其实既悉其实则涵养之以蓄其才振作之以厉其气栽培封殖勿使沮伤帝嘉纳问当世人才对曰荐士大臣职也小臣来自远方不足以奉明诏帝颔之谕宰臣曰谢深甫奏对雍容有古人风除藉田令迁大理丞江东大旱擢为提举常平讲行救荒条目所全活一百六十余万人光宗即位以左曹郎官借礼部尚书为贺金国生辰使绍熙改元除右正言迁起居郎兼权给事中知合门事韩侂胄破格转遥郡刺史深甫封还内降云人主以爵禄磨厉天下之人才以法令堤防天下之侥幸今侂胄蹇越五官而转遥郡侥幸一启攀援踵至将何以拒之请罢其命进士俞古应诏言事语涉诋讦送瑞州听读深甫谓以天变求言未闻旌赏而反罪之则是名求而实拒也右司谏邓驿论近习左迁深甫请还驿谓不可以近习故变易谏官二年

知临安府三年除工部侍郎入谢光宗面谕曰京尹宽则废法猛则厉民独卿为政得宽猛之中进兼吏部侍郎兼详定敕令官四年兼给事中陈源久以罪斥忽予内祠深甫固执不可姜特立复诏用深甫力争特立竟不得入张子仁除节度使深甫疏十一上命遂寝每禁庭燕私左右有希恩泽者帝必曰恐谢给事有不可耳宁宗即位除焕章阁待制知建康府召为侍御史中丞兼侍读上言比年以来纪纲不立台谏有所论击不与被论同罢则反除以外任给事有所缴驳不命次官书行则反迁以他官监司有所按察不两置之勿问则被按者反得美除以奔竞得志者不复知有廉耻以请属获利者不复知有彝宪贪墨纵横莫敢谁何罪恶暴露无所忌惮隳坏纪纲莫此为甚请风厉在位革心易虑以肃朝着礼官议祧僖祖侍讲朱熹以为不可深甫言宗庙重事未宜遽革朱熹考订有据宜从熹议庆元元年除端明殿学士签书枢密院事迁参知政事再迁知枢密院事兼参知政事内侍王德谦建节深甫三疏力陈不可蹈大观覆辙德谦竟斥进金紫光禄大夫拜右丞相封申国公进岐国公光宗山陵为总护使还拜少保力辞改封鲁国公嘉泰元年累疏乞避位宁宗曰卿能为朕守法度惜名器不可以言去御笔书说命中篇及金币以赐之有余嘉者上书乞斩朱熹绝伪学且指蔡元定为伪党深甫掷其书语同列曰朱元晦蔡季通不过自相与讲明其学耳果有何罪乎余嘉虬虱臣乃敢狂妄如此当相与奏之行遣以厉其余 【按宋史传论云谢深甫出处旧史泯其迹若无可疵议者然庆元之初韩侂胄设伪学之禁网罗善类而一空之深甫秉政适与之同时诤曰不知不可也况于一劾陈傅良再劾赵汝愚形于深甫之章有不可掩者乎

附识】金使入见不如式宁宗起入禁中深甫端立不动金使俟于殿隅帝再御殿乃引使者进书迄如旧仪拜少保乞骸骨授醴泉观使明年拜少傅致仕有星陨于居第遂卒后孙女为理宗后追封信王易封卫鲁谥惠正

△许及之

许及之字深甫温州永嘉人隆兴元年第进士知袁州分宜县以部使者荐除诸军审计迁宗正簿干道元年林栗请增置谏员乃仿唐制置拾遗补阙以及之为拾遗班序在监察御史之上高宗崩及之言皇帝既躬三年之丧羣臣难从纯吉当常服黑带王淮当国久及之奏陛下即位二十七年而羣臣未能如圣意者以苟且为宗荣以姑息为仁恕以不肯任事为简重以不敢任怨为老成敢言者指为轻儇鲜耻者谓之朴实陛下得若人而相之何补于治哉淮竟罢职予祠光宗受禅除军器监迁太常少卿以言者罢绍熙元年除淮南运判兼淮东提刑以铁钱

滥恶不职贬秩知庐州召除大理少卿宁宗即位除吏部尚书兼给事中及之早与薛叔似同擢遗补皆为当时所予党事既起善类一空叔似累斥逐而及之谄事侂胄无所不至尝值侂胄生日朝行上寿毕集及之后至阍人掩关拒之及之俯偻以入为尚书二年不迁见侂胄流涕序其知遇之意及衰迟之状不觉膝屈侂胄惻然怜之曰尚书才望简在帝心行且进拜矣居亡何同知枢密院事当时有由竇尚书屈膝执政之语传以为笑嘉定二年拜参知政事进知枢密院事兼参政侂胄既启兵端欲令及之守金陵及之辞侂胄诛中丞雷孝友奏及之实赞侂胄开边及守金陵始诡计免行降两官泉州居住嘉定二年卒

△梁汝嘉

梁汝嘉字仲谔处州丽水人以外祖太宰何执中任人官调中山府司议曹事建炎初知常州武进县守荐其治状擢通判州事加直秘阁
历官至转运副使临安阙守火盗屡作命汝嘉摄事汝嘉修火政严巡徼盗发辄得火灾亦息遂命为真累迁户部侍郎进权尚书汝嘉素善秦桧殿中侍御史周葵将按之事见葵传以宝文阁直学士提举太平观未几升学士知明州知浙西沿海制置使更温宣鼎三郡复奉祠以归绍兴二十三年卒汝嘉长于吏治在临安风绩尤着

钦定续通志卷三百九十

●钦定续通志卷三百九十一

列传

宋【九十五】

○宋九十五

楼钥	李大性	任希夷	徐应龙	庄夏	王阮
王质	陆游	方信孺	王柟		
史浩	王淮	赵雄	权邦彦	程松	陈谦

张岩

楼钥

李大性

任希夷

徐应龙

庄夏

王阮

王质

陆游

方信孺

王栻

史浩

王淮

赵雄

权邦彦

程松

陈谦

张岩

△楼钥

楼钥字大防明州鄞县人隆兴元年试南宫有司伟其辞艺欲以冠多士策偶犯旧讳知贡举洪遵奏得旨以冠末等考官胡铨称之曰此翰林才也试教官调温州教授为敕令所删定官修淳熙法议者欲降太学释奠为中祀钥曰乘舆临幸于先圣则拜武成则肃揖其礼异矣可钧敌乎改宗正寺主簿历太府宗正寺丞出知温州属县乐清倡言方腊之变且复起邑令捕数人归于郡钥曰罪之则无可坐纵之则惑民编隶其为首者而驱其从出境民言遂定堂帖问故钥曰苏洵有言有乱之形无乱之实是谓将乱不可以有乱急不可以无乱弛丞相周必大心善之光宗嗣位召对奏曰人主初政当先立其大者至大莫如恢复然当先强主志进君德又曰今之网密甚矣望陛下轸念元元以设禁为不得已凡有勦意增益者寝而勿行所以保养元气除考功郎兼礼部吏铨并缘为奸多所壅底钥曰简要清通尚书郎之选尽革去之改国子司业擢起居郎兼中书舍人代言坦明得制诰体缴奏无所回避刑部言天下狱案多所奏裁中书之务不清宜痛省之钥曰三宥制刑古有明训力论不可会庆节上寿扈从班集乘舆不出己而玉牒圣政会要书成将进重华又屡更日钥言臣累岁随班见陛下上寿重华宫欢动宸极嘉王日趋朝谒恪勤不懈窃料寿皇望陛下之来亦犹此也又奏圣政之书全载寿皇一朝之事玉牒会要足成淳熙末年之书幸速定其日无复再展以全圣孝于是帝感悟进书成礼试中书舍人俄兼直学士院光宗内禅诏书钥所草也有云虽丧纪自行于宫中而礼文难示于天下荐绅传诵之迁给事中乞正太祖东向之位别立僖祖庙以代夹室顺祖翼祖宣祖之主皆藏其中祫祭即庙而飨从之朱熹以论事忤韩侂胄除职与郡钥言熹鸿儒硕学陛下悯其耆老当此隆寒立讲不便何如俾之内祠仍令修史少俟春和复还讲筵不报熹宗受禅侂胄以知合门事

与闻传命颇有弄权之渐彭龟年力攻之侂胄转一官与在京宫观龟年除待制与郡钥
与林大中奏乞留龟年于讲筵或命侂胄以外祠龟年
竟去钥迁为吏部尚书以显谟阁学士提举江州太平兴国宫寻知婺州移盩厔府罢仍
夺职告老至再许之侂胄尝副钥为馆伴以钥不附己
深嫌之 【按四朝闻见录载钥天性豁达与物无忤初尝与韩侂胄善独因草制以天下
公论不予侂胄故盩厔罢去侂胄心敬之亦不以憾也
钥久废侂胄亦迫于公论欲起而用之风钥之亲戚谕钥之子弟但求寒暄一纸书即召
矣亲戚具道侂胄意于钥之子弟从容以白钥欣然命
具纸札子弟曰已具矣钥引纸大书颜氏家训子弟累父兄事子弟自此不复敢言矣附
识】 侂胄诛诏起钥为翰林学士迁吏部尚书兼翰林
侍讲时钥年过七十精敏绝人词头下立进草院吏惊诧时和好未定金求韩侂胄首钥
言和好待此而决奸凶已毙之首又何足恤 【按四
朝闻见录载百官诣朝堂集议韩侂胄事枢密章良能建议以为奸凶已毙之首又何足
惜时王介抗议以侂胄首固不足惜而国体为可惜也
会倪思亦谓一侂胄头颅何必诸公争良能竟呼省吏伸黄纸揭于象魏曰今据礼部侍
郎倪思议到奸凶已毙之首又何足惜遂函侂胄首送
金非楼钥语附识】 诏从之 【伏读通鉴辑览 御批金人必欲得侂胄师旦之首
特恶其倡议用兵也在宋人则不当以此恶侂胄夫侂
胄之奸罪素着乃宋之罪人非金之罪人也恢复况非其罪即云用兵之议倡自侂胄盩
厔既从其谋岂可复委咎于下祇冀和议之成不顾事
理之非宜胡寅讥之也】 赵汝愚之子崇宪奏雪父冤钥乞正赵师召之罪重蔡璘之诛
毁龚颐正续稽古录以白诬谤除端明殿学士签书枢
密院事升同知进参知政事位两府者五年累疏求去除资政殿学士知太平州辞进大
学士提举万寿观嘉定六年卒年七十七赠少师谥宣
献

△李大性

李大性字伯和端州四会人其先积中尝为御史以直言入元佑党籍始家豫章大
性少力学尤习本朝典故以父任入官因参选进艺祖
庙谟百篇及公私利害百疏又言元丰制六察许言事章惇为相始禁之乞复旧制以广
言路从臣力荐之命赴都堂审察仅迁一秩为湖北提
刑司干官未几入为 主管吏部架阁文字丁母艰服阙进典故辨疑百篇皆本朝故实盖
网罗百氏野史订以日历实录核其正舛率有据依孝
宗嘉之擢大理司直迁敕令所删定官添差通判楚州郡守吴曦与都统刘超合议欲撤
城移他所大性谓楚城实晋义乌闲所筑最坚奈何以

脆薄易坚厚乎持不可台臣将劾其沮挠不果会从官送北客朝命因俾廉访具以实闻遂罢戎帅召大性除太府寺丞迁大宗正丞兼仓部郎寻改工部陈傅良以言事去彭龟年黄度杨方相继皆去大性抗疏言朝廷清明乃使言者无故而去臣所甚惜也数人之心皆本爱君知其爱君任其去而不顾恐端人正士之去者将不止此孝宗崩光宗疾未能执丧大性复上疏言今日之事颠倒舛逆况金使祭奠常引见于北宫素帷不知是时犹可以不出乎檀弓曰成人有兄死而不丧者闻子皋将为成宰遂为衰成人曰兄则死而子皋为之衰盖言成人畏子皋之来方为制服其服乃子皋为之非为兄也若陛下必待使来然后执丧则恐贻讥中外岂特如成人而已哉迁军器少监权司封郎提举浙东常平及浙东提刑兼知庆元府召为吏部郎中四迁为司农卿明年兼户部侍郎出知绍兴府甫一岁召为户部侍郎升尚书朝论将用兵大性条陈利害主不宜轻举之说忤韩侂胄意出知平江移知福州又移知江陵充荆湖制置使江陵当用兵后残毁饥馑继以疾疫大性首议振贷凡三十八万缗有奇前官虚羨凡十有四万五千缗率蠲放不督民流移新复业者皆奏免征榷边郡武爵本以励士冒滥滋众大性劾两路戎司冒受逃亡付身凡三千四百九十有七道率缴上毁抹左选为之一清江陵旧使铜镪钱重楮轻民持货入市有终日不得一钱者大性奏乞依襄郢例通用铁钱于是泉货流通民始复业除刑部尚书兼详定敕令寻迁兵部时金国分裂不能自存有举北伐之议者大性上疏以和战之说未定乞令朝臣集议从之寻以端明殿学士知平江府引疾丐祠卒于家年七十七赠开府仪同三司谥文惠李氏自积中三世官于朝父子兄弟相师友而大性与弟大异大东并跻从列为名臣云

△任希夷

任希夷字伯起其先眉州人四世祖伯雨为谏议大夫其后任闽因家邵武希夷少刻意问学为文精苦登淳熙三年进士第调建宁府浦城簿从朱熹学开禧初主太常寺簿奏绍熙以来礼书未经编次岁月滋久恐或散亡乞下本寺修纂从之迁礼部尚书兼给事中乞定周惇颐程颢程颐等谥进端明殿学士签书枢密院事兼权参知政事史弥远柄国久执政皆具员议者颇讥其拱默寻提举临安洞霄宫卒赠少师谥宣献

△徐应龙

徐应龙字允叔淳熙二年第进士调衡州法曹湖南检法官潭获劫盗首谋者已系狱妄指逸者为首吏信之及获逸盗治之急遂诬服吏

以成宪献于宪司应龙阅实其辞谓首从不明法当奏时周必大判潭州提刑卢彦德不欲反其事将寘逸盗于死应龙力与之辨先是彦德许应龙京削至是怒曰君不欲出我门耶应龙曰以人命传文字所不忍也彦德不能夺闻者多其有守交荐之改秩知瑞州高安县吕祖俭言事忤韩侂胄谪死高安应龙为之经纪其丧且为文诔之有劝之避祸者应龙曰吕君吾所敬虽缘此获谴亦所愿也主淮西机宜文字知南恩州陈自强当国乃旧同舍应龙丐雷州而去召监都进奏院迁国子博士守工部员外郎进户部侍郎历兼权工部侍郎时金主徙汴应龙言金人穷而南奔将溢出而蹈吾之境金亡更生新敌尤为可虑兼侍讲言人主不能尽知天下人材当责之宰相宰相不能尽知天下之人材当采之公论迁吏部侍郎进刑部尚书兼侍读应龙在讲筵多指陈时政一日读吴起为卒吮疽事应龙奏起恤士卒如此故能得其死力今军将得以贿迁专事掎克未免多怨帝惊曰债帅之风今犹未除耶宰相史弥远闻而恶之免侍读未几兼太子詹事会景献太子薨请老帝不许徙吏部尚书以焕章阁学士提举嵩山崇福宫嘉定十七年卒赠开府仪同三司谥文肃子荣叟深叟清叟各有传

△庄夏

庄夏字子礼泉州人淳熙八年进士庆元六年大旱诏求言夏时知赣州兴国县上封事曰君者阳也臣者君之阴也今威福下移此阴胜也积阴之极阳气散乱而不收其弊为火灾为旱蝗愿陛下体阳刚之德使后宫戚里内省黄门思不出位此抑阴助阳之术也召为太学博士言比年分藩持节诏墨未干而改除坐席未温而易地一人而岁三易节一岁而郡四易守民力何由裕迁国子博士召除吏部员外郎累迁宗正少卿兼国史院编修官寻权直学士院兼太子侍读时流民来归夏言荆襄两淮多不耕之田计口授地贷以屋庐牛具吾乘其始至可以得其欲彼幸其不死可以忘其劳兵民可合屯田可成此万世一时也试中书舍人兼太子右庶子左谕德言今日之患莫大于兵冗乞行下将帅令老弱自陈得以子若弟侄若壻强壮及等者收刺之代其名粮帝是之除兵部侍郎焕章阁待制与祠归嘉定十年卒

△王阮

王阮字南卿江州人曾祖韶神宗时开熙河擒玛尔戡祖厚继辟湟鄯父彦傅靖康时勤王皆有功阮少好学尚气节辞辩奋发四坐莫能屈尝谒袁州太守张栻栻令往见朱熹登隆兴元年进士第时孝宗初即位欲成高宗之志首诏经理建业以图进取而大臣巽懦幸安计未决

阮试礼部对策曰临安蟠幽宅阻面湖背海膏腴沃野足以休养生聚其地利于休息建康东南重镇控制长江呼吸之闲上下千里足以虎视
吴楚应接梁宋其地利于进取建炎绍兴闲敌人乘胜长驱直捣上皇遵养时晦驻临安为休息计三十年来较以曩昔倍万不侔主上独见远
览非以临安为不足居也战守之形既分动静进退之理异也古者立国必有所恃今东南王气鍾在建业长江千里控扼所会辍而弗顾退守
幽深之地如是而曰谋国果得为善谋乎倘六飞顺动中原在跬步闲况一建康耶知贡
举范成大得而读之叹曰是人杰也调南康都昌主簿
以廉声闻移永州教授献书阙下请罢吴楚牧马之政而积马于蜀茶马司以省往来纲
驿之费岁时分牧之资凡数千言绍熙中知濠州请复
曹玮方田修种世衡射法日讲守备与边民亲访北境事宜终阮在濠金不敢南侵改知
抚州韩侂胄宿闻阮名特命入奏将诱以美官夜遣密
客诣阮阮不答陛对毕拂衣出关侂胄闻之怒批旨予祠阮于是归隐庐山嘉定元年卒
△王质

王质字景文其先郢州人后徙兴国质博通经史善属文游太学与九江王阮齐名著论五十篇言历代君臣治乱谓之朴论中绍兴三十年进士第用大臣言召试馆职不就明年金主南侵御史中丞汪澈宣谕荆襄又明年枢密使张浚都督江淮皆辟为属入为太学正时孝宗屡易相国论未定质乃上疏曰陛下即位以来慨然起乘时有为之志而陈康伯叶义问汪澈在庭陛下皆不以为才于是先逐义问次逐澈独徘徊康伯难于进退陛下意终鄙之遂决意用史浩而浩亦不称陛下意于是决用张浚而浚又无成于是决用汤思退今思退专任国政又且数月臣度其终无益于陛下夫宰相之任一不当则陛下之志一沮前日康伯持陛下以和不成浚持陛下以战战不验浚又持陛下以守守既困思退又持陛下以和陛下亦尝深察和战守之事乎李牧在雁门法主于守守乃有战祖逖在河南法主于战战乃有和羊祜在襄阳法主于和和乃有守何至分而不使相合今陛下之心志未定规模未立或告陛下金弱且亡而吾兵甚振陛下则勃然有勒燕然之志或告陛下吾力不足恃而金人且来陛下即委然有盟平凉之心或告陛下吾不可进金不可入陛下又蹇然有指鸿沟之意使臣为陛下谋会三者为一天下乌有不治哉忌者共谗质年少好异论遂罢去会虞允文宣抚川陕辟质偕行一日令草檄契丹文辞气激壮允文起执其手曰景文天才也入为敕令所删定官迁枢密院编修官允文当国孝宗命拟进谏官允文以质鲠亮不回且文学推重于时可右正言时中贵人用事多畏惮质阴

沮之出通判荆南府改吉州皆不行奉祠山居绝意禄仕淳熙十五年卒

△陆游

陆游字务观越州山阴人年十二能诗文荫补登仕郎锁厅荐送第一秦桧孙埴适居其次桧怒至罪主司明年试礼部主司复置前列桧显黜之由是为所嫉桧死始赴福州盗德簿以荐除敕令所删定官时杨存中久掌禁旅游力陈非便帝嘉其言遂罢存中中贵人有市北方珍玩以进者游奏陛下以损名斋自经籍翰墨外屏而不御小臣不体圣意辄私买珍玩亏损圣德乞严行禁绝应诏言非宗室外家虽实有勋劳毋得辄加王爵顷者有以师傅而领殿前都指挥使复有以太尉而领合门事渎乱名器乞加订正迁大理寺司直兼宗正簿孝宗即位迁枢密院编修官兼编类圣政所检讨官史浩黄祖舜荐游善词章谳典故召见帝曰游力学有闻言论剴切遂赐进士出身入对言陛下初即位乃信诏令以示人之时而官吏将帅一切玩习宜取其尤沮格者与众弃之和议将成游又以书白二府曰江左自吴以来未有舍建康他都者驻蹕临安出于权宜形势不固馈饷不便海道逼近凜然意外之忧一和之后盟誓已立动有拘碍今当与之约建康临安皆系驻蹕之地北使朝聘或就建康或就临安如此则我得以暇时建都立国彼不我疑时龙大渊曾覲用事游为枢臣张焘言覲大渊召权植党荧惑圣听公及今不言异日将不可去焘遽以闻帝诘语所自来焘以游对帝怒出通判建康府寻易隆兴府言者论游交结台谏鼓唱是非力说张浚用兵免归久之通判夔州王炎宣抚川陕辟为干办公事游为炎陈进取之策以为经略中原必自长安始取长安必自陇右始当积粟练兵有衅败攻无事则守吴璘子挺代掌兵颇骄恣倾财结士屡以过误杀人炎不能制游请以玠子拱代挺炎曰拱怯而寡谋遇敌必败游曰使挺遇敌安保其不败就令有功愈不可驾驭及挺子曦僭叛游言始验范成大帅蜀游为参议官以文字交不拘礼法人讥其颓放因自号放翁后累迁江西常平提举江西水灾奏拨义仓赈济檄诸郡发粟以予民召还给事中赵汝愚驳之遂与祠起知严州过阙陛辞帝谕曰严陵山水胜处职事之暇可以赋咏自适再召入见帝曰卿笔力回斡甚善非他人可及除军器少监绍熙元年迁礼部郎中【按四朝闻见录载孝宗未内禅一日手批陆游除礼部郎据此游礼部郎中之除当在淳熙末年附识】兼实录院检讨官嘉泰二年以孝宗光宗两朝实录及三朝史未就诏游权同修国史实录院同修撰免奉朝请寻兼秘书监三年书成升宝章阁待制致仕游才气超逸尤长于诗嘉定二年卒年八十五

△方信孺

方信孺字孚若兴化军人有隼才以父崧卿荫补番禺县尉盗劫海贾信孺捕之盗方沙聚分卤获惶骇欲趋舟信孺已使人负盗舟去矣乃悉缚盗不失一人韩侂胄举恢复之谋诸将僭军边衅不已朝廷寻悔金人亦厌兵乃遣韩元靓来使而都督府亦再遣壮士遗金书然皆莫能得其要领近臣荐信孺可使自萧山丞召赴都命以使事信孺曰开衅自我金人设问首谋当何以答之侂胄矍然假朝奉郎枢密院检详文字充枢密院参谋官持督帅张岩书通问于金国元帅府至濠州金帅赫舍哩子仁止于狱中露刃环守之绝其薪水要以五事信孺曰反俘归币可也缚送首谋于古无之称藩割地则非臣子所忍言子仁怒曰若不望生还耶信孺曰吾将命出国门时已置生死度外矣至汴见金左丞相都元帅完颜宗浩出就传舍宗浩使将命者来坚持五说且谓称藩割地自有故事信孺曰昔靖康仓卒割三镇绍兴以太母故暂屈今日顾可用为故事耶此事不独小臣不敢言行府亦不敢奏也请面见丞相决之将命者引而前宗浩方坐幄中陈兵见之云五事不从兵南下矣信孺辩对不少诎宗浩叱之曰前日兴兵今日求和何也信孺曰前日兴兵复讎为社稷也今日屈己求和为生灵也宗浩不能诘授以报书曰和与战俟再至决之信孺还诏侍从两省台谏官议所以复命众议还俘获罪首谋增岁币五万遣信孺再往时吴曦已诛金人犹执初议信孺曰本朝谓增币己为卑屈况名分地界哉且以曲直较之本朝兴兵在去年四月若贻书诱吴曦则去年三月也其曲固有在矣如以强弱言之若得滁濠我亦得泗涟水若夸胥浦桥之胜我有凤凰山之捷若谓我不能下宿寿若围庐和楚果能下乎五事已从其三而犹不我听不过再交兵耳金人见信孺忠恳乃曰割地之议姑寝但称藩不从当以叔为伯岁币外别犒师可也信孺固执不许宗浩计穷遂密与定约复命再差充通谢国信所参谋官奉国书誓草及许通谢百万缗抵汴宗浩变前说怒信孺不曲折建白遽以誓书来有诛戮禁锢语信孺不为动将命曰此事非犒军钱可了别出事目信孺曰岁币不可再增故代以通谢钱今得此求彼吾有限首而已将命曰不尔丞相欲留公信孺曰留于此死辱命亦死不若死于此会蜀兵取散关金人益疑信孺还言敌所欲者五事割两淮一增岁币二犒军三索归正等人四其五不敢言侂胄大怒夺三秩临江军居住信孺自春至秋使金三往返金人愤其不屈议用弗就己而王栴出使定和议增币函首皆前信孺所指不可者栴白庙堂信孺辩折敌帅于强愎未易告语之时信孺当其难栴当其易栴每见金人必问信孺安在

公论所推虽敌人不掩也乃诏信孺自便寻知韶州累
迁淮东转运判官兼提刑知真州即北山匱水筑石堤袤二十里人莫知其所为后金人
薄仪真守将决水匱以退敌城乃获全山东初内附信
孺言豪杰不可以虚名驾驭武夫不可以弱勢弹压宜选威望重臣将精兵数万开幕山
东以主制客以重驭轻则可以包山东固江北而两河
在吾目中矣坐责降三秩再奉祠稍复官信孺性豪爽挥金如粪土所至宾客满其后车
使北时年纔三十既齟齬归营居室岩竈自放于诗酒
以卒

△王柟

王柟字汝良大名人祖伦同签书枢密院事伦使北死孝宗访求其孙之未禄者三
人官之柟其一也调通州海门尉乘轻舟入海捕剧盗
小吴郎并其徒十七人获之狱成不受赏韩侂胄以恢复起兵端天子思继好息民凡七
遣使无成绩遣信孺往将有成说矣坐白事忤侂胄得
罪欲再遣使近臣以柟荐擢监登闻鼓院假右司郎中使持书北行柟归白其母母勉之
乃拜命疾驱抵敌所金将乌库哩等四人列坐问韩侂
胄贵显几年矣柟对已十余年平章国事纔二年耳又问今欲去此人可乎柟曰主上英
断去之何难四人相顾而笑有完颜天宠者袖出文书
云王柟虽持韩侂胄书乃朝廷有旨遣其来元帅府议和宜详议以报于是金人知侂胄
已诛和议遂决柟持金人牒归求函侂胄首以起居郎
许奕为通谢使柟为通谢所参谋官柟自军前再还议以侂胄首易淮陕侵地从之柟奏
和约之成皆方信孺备尝险阻再三将命之功臣因人
成事乞录信孺功而蠲其过朝论以柟不掩人扬己多之守军器少监知楚州累官至太
府卿告归以右文殿修撰知太平州加集英殿修撰致
仕卒赠宝章阁待制

△史浩

史浩字直翁明州鄞县人绍兴十四年登进士第调绍兴余姚县尉历温州教授郡
守张九成器之秩满除太学正升国子博士因转对言
普安恩平二王宜择其一以系天下望高宗纳之除秘书省校书郎兼二王府教授三十
年普安郡王为皇子进封建王除浩权兼王府教授诏
建王府置直讲赞读各一员浩守司封郎官兼直讲一日讲周礼言膳夫掌膳羞之事岁
终则会惟王及后世子之膳羞不会至酒正掌饮酒之
事岁终则会惟王及后之饮酒不会世子不与焉以是知世子膳羞可以不会世子饮酒
不可以无节也王作而谢曰敢不佩斯训三十一年迁
宗正少卿会金师侵边下诏亲征时两淮失守廷臣争陈退避计建王抗疏请率师为前

驱浩为王力言太子不可将兵以晋申生唐肃宗灵武之事为戒王大感悟立俾浩草奏请扈蹕以供子职辞意恳到高宗方怒览奏意顿释知奏出于浩语大臣曰真王府官也既而殿中侍御史吴芾乞以皇子为元帅先视师浩复遣大臣书言建王生深宫中未尝与诸将接安能办此或谓使王居守浩复以为不可帝亦欲令王徧识诸将遂扈蹕如建康三十二年帝还临安立建王为皇太子浩除起居郎兼太子右庶子孝宗受禅遂以中书舍人迁翰林学士知制诰张浚宣抚江淮将图恢复浩与之异议欲城瓜洲采石浚奏不守两淮而守江不若城泗州除参知政事有诏议应敌定计洪遵金安节唐文若等相继论列宰执独无奏帝以问浩浩奏先为备御是谓良规倘听浅谋之士兴不教之师寇去则论赏以邀功寇至则敛兵而遁迹谓之恢复得乎荐枢密院编修官陆游尹穡召对并赐出身隆兴元年拜尚书右仆射首言赵鼎李光之无罪岳飞之久冤宜复其官爵禄其子孙悉从之李显忠邵宏渊奏乞引兵进取浩奏二将辄乞战岂督府命令有不行耶浚请入覲乞即日降诏幸建康帝以问浩浩陈三说不可退又以诘浚曰帝王之兵当出万全岂可尝试以图侥幸复辩论于殿上浚曰中原久陷今不取豪杰必起而收之浩曰中原决无豪杰浚曰彼民闲无寸铁待我兵至为内应浩曰必待我兵非豪杰矣浚因内引奏浩意不可回恐失机会乞出英断省中忽得宏渊出兵状始知不由三省径檄诸将浩语陈康伯曰吾属俱兼右府而出兵不与闻焉用相为不去尚何待乎 【伏读通鉴辑览 御批陈康伯非主和之人于史浩本不同臭味浩之入对将康伯与浚并从讥毁心曲可知则所谓焉用相为之语正欲激之同去姑以交相倚重之言聒之耳居心叵测若此岂特鄙夫不可与事君哉】因又言康伯欲纳归正人臣恐他日必为陛下子孙忧浚锐意用兵若一失之后恐陛下终不得复望中原御史王十朋论之出知绍兴府先是浩因城瓜洲白遣太府丞史正志往视之正志与浚论辩十朋亦疏史正志朋比并及浩遂与祠自是不召者十二年知绍兴府浙东安抚使持母丧归服阙知福州淳熙初除少保观文殿大学士醴泉观使兼侍读五年复为右丞相帝曰自叶衡罢虚席以待卿久矣浩奏蒙恩再相惟尽公道庶无朋党之币帝曰宰相岂当有党人主亦不当以朋党名臣下朕但取贤者用之否则去之枢密都承旨王抃建议以殿步二司军多虚额请各募三千人充之已而殿前司辄捕市人市城骚动被掠者多断指示不可用军人怙众因夺民财浩奏尽释所捕而禽军民首讙呶者送狱狱成议罪欲取兵民各一人梟首以徇浩曰诸军掠人夺货至于哄则始衅者军人

也军法从事固当若市人陆庆童特与抗鬪尔可同罚
乎陛下恐军人有语故一其罪以安之夫民不得其平言亦可畏等死死国可乎是岂军人语帝怒曰是比朕为秦二世也浩徐进曰自古民怨其上者多矣岂必二世寻求去拜少傅保宁军节度使充醴泉观使兼侍读后有言庆童之冤者帝曰史浩尝力争坐此求去至今悔之赵雄尝荐刘光祖试馆职光祖对策论科场取士之道帝亲批其后略曰用人之弊人主乏知人之哲宰相不能择人国朝以来过于忠厚宰相而误国大将而败军未尝诛戮要在人君择相相必为官择人懋赏立乎前诛戮设乎后人才不出吾不信也手诏既出中外大耸议者谓曾觐视草为光祖甲科发也帝遣觐持示浩浩奏唐虞之世四凶极恶止于流窜三考之法不过黜陟未尝有诛戮之科诛戮大臣秦汉法也太祖制治以仁待臣下以礼列圣传心迨至仁宗而德化隆洽本朝之治与三代同风此祖宗家法也圣训则曰过于忠厚夫为国而底于忠厚岂有所谓过哉臣恐议者以陛下自欲行刻薄之政归过祖宗不可不审也及自经筵将告归乃于小官中荐江浙之士十五人有旨令升擢皆一时选也如薛叔似杨简陆九渊石宗昭陈谦叶适袁燮赵静之张子智后皆擢用不至通显者六人而已十年请老除太保致仕封魏国公晚治第鄞之西湖上帝为书明良庆会名其阁【按建炎以来朝野杂记载宣政闲大臣赐书阁名得御笔阁名若蔡京曰君臣庆会王黼曰得贤治定是也绍兴初高宗以平江朱勔南园赐韩忠武题其赐书阁曰懋功后秦申王阁曰一德格天杨和王阁曰风云庆会史会稽王阁曰明良庆会又皇甫坦赐书阁名绍兴焕文】旧学名其堂光宗御极进太师绍熙五年卒年八十九封会稽郡王宁宗即位赐谥文惠御书纯诚厚德元老之碑赐焉嘉定十四年追封越王【按建炎以来朝野杂记载中兴宰相追封王爵者二人秦桧以久任史浩以旧恩皆异数也】改谥忠定配享孝宗庙庭浩喜荐人才尝拟陈之茂进职与郡帝知之茂尝毁浩曰卿岂以德报怨耶浩曰臣不知有怨若以为怨而以德报之是有心也莫济状王十朋行事诋浩尤甚浩荐济掌内制帝曰济非议卿者乎浩曰臣不敢以私害公遂除中书舍人兼直学士院待之如初子弥大弥正弥达弥坚弥远嘉定初为右丞相有传

△王淮

王淮字季海婺州金华人登绍兴十五年进士第为台州临海尉郡守萧振许以公辅器振帅蜀辟真幕府迁校书郎除监察御史寻迁右正言宰相汤思退无物望淮条其罪数十于是策免吏部侍郎沈介之欺世盗名都司方

师尹之狡险大将刘宝掎克结权幸皆劾罢之又奏自治之策治内有三正心术宝慈俭去壅蔽治外有四固封守选将帅明赏罚储财用帝深嘉叹除秘书少监兼恭王府直讲时恭王生子挺淮白于丞相曰恭王夫人李氏生皇嫡长孙乞讨论典礼钱端礼怒其名称奏准有年钧以长之说帝曰是何言也岂不启邪心出淮知建宁府改浙西提刑入见陈闽中利病甚悉帝褒喜之且令一至东宫皇太子待以师儒特施拜礼寻召除太常少卿除中书舍人兼直学士院龙大渊赠太师仍畀仪同三司恩数张说除太尉在京宫观皆封还诏书除翰林学士知制诰帝命择文学行谊之士淮荐郑伯熊李焘程叔达皆擢用淳熙二年除端明殿学士签书枢密院事辛弃疾平茶寇上功太滥淮谓不核真伪何以劝有功文州番部扰边吴挺奏库彦威失利靖州夷人扰边杨倬奏田洪失利淮谓二将战没若罪之何以劝来者除同知枢密院事参知政事时宰相久虚淮与李彦颖同行相事淮谓授官当论贤否不事形迹诚贤不敢以乡里故旧废之非才不敢以己私庇之擢知院事枢密使上言武臣岳祠之员宜省淮曰有战功者壮用其力老而弃之可乎赵雄言宗室岳祠八百员宜罢淮曰尧亲睦九族在平章百姓之先骨肉之恩疏可乎时辛弃疾平江西寇王佐平湖南寇刘焞平广西寇淮皆处置得宜论功惟允八年拜右丞相兼枢密事先是自夏至秋不雨至是得雨帝喜命口算诸郡绢钱尽蠲一年为缗八十余万赵雄罢相蜀士之在朝者皆有去意淮谓此唐季党祸之胎岂圣世所宜有皆以次进迁蜀士乃安枢密都承旨王抃怙宠为奸淮极陈其罪请人主受谤鲜不由此帝即斥之章颖论事狂直帝将黜之淮曰陛下乐闻直言士大夫以言相高此风可贺也黜之适成其名帝悦颖复留时以荒政为急淮言李椿年老成练达拟除长沙帅朱熹学行笃实拟除浙东提举以倡郡国其后推赏帝曰朱熹职事留意与升直徽猷阁成都阙帅帝加访问淮以留正对帝曰非闽人乎淮曰立贤无方汤之执中也必曰闽有章惇吕惠卿不有曾公亮苏颂蔡襄乎必曰江浙多名臣不有丁谓王钦若乎帝称善拜左丞相天长水害七十余家或谓不必以闻淮曰昔人谓人主不可一日不闻水旱盗贼记曰四方有败必先知之岂可不以闻镇江饥民强借菽粟执政请痛惩之淮曰令甲饥民罪不至死进士八人求以免举恩为升等淮曰八人得之则百人援之龚颐以执政之客补官求诣铨曹淮以此门不可启绝其请上章力求去以观文殿大学士判衢州淮力辞改提举洞霄宫光宗嗣位诏询初政淮对以尽孝进德奉天敬民用立政罔不在初淳熙十六年卒赠少师谥文定初朱熹为浙东提举淮素不喜

熹陈贾为监察御史上疏言近日道学假名济伪之弊

请诏痛革之郑丙为吏部尚书相与叶力攻道学熹由此得祠其后庆元伪学之禁始此

△赵雄

赵雄字温叔资州人为隆兴元年类省试第一虞允文宣抚四蜀辟干办公事入相荐于朝干道五年召见便殿孝宗即日手诏除正字范

成大使金将行雄当登对允文招与之语既进见雄极论恢复孝宗大喜曰功名与卿共之即除右史两月除舍人金使耶律子敬贺会庆节雄

馆伴子敬披露事情不敢隐迳者以闻帝夜召雄雄具以子敬所言对帝喜金使入辞故事当用乐雄奏卜郊有日天子方斋乐不可用帝难之

遣中使谕雄雄奏金使必不敢不顺即有他臣得引与就馆帝大喜雄请复置恢复局日夜讲磨条具合帝意除中书舍人时金将起河南之役

议尽归诸陵梓宫帝命雄出使贺生辰仍止奉迁陵寝及正受书仪雄既见金主争辩数四其臣屡喝起雄辞益力卒得请尝上疏论恢复计大

略谓莫若由蜀以取陕西得陕西以临中原是秦制六国之势也淳熙二年召为礼部侍郎除端明殿学士签书枢密院事一日奏事帝曰近世

士大夫好高论耻言农事微有西晋风岂知周礼与易言理财周公孔子曷尝不以理财为务且不独此士夫讳言恢复不知其家有田百亩内

五十亩为人所据亦投牒理索否雄曰陛下志在大有为敢不布尧言书之时政记升同知枢密院事五年参知政事十一月拜右丞相朱熹累

召不出雄请出以外郡命知南康军熹极论时事帝怒谕雄令分析雄奏熹狂生词穷理短罪之适成其名若天涵地育置而不问可也会周必

大亦力言之乃止绍兴帅张津献羨余四十万缗雄乞降旨下绍兴以其钱为民代输和买身丁折帛钱之半使取诸民者民复得之足以见圣

王之德自雄独相蜀人在朝者仅十数及眷衰有言其私里党者帝疑之已而陈岷为四川制置王渥为茶马命从中出雄求去诏勉留曰丞相

任事不避怨选才无乡旧盖有所激也先是蜀人未尝除蜀帅雄请外除观文殿大学士四川制置使王藺为御史以故事不可上疏论之雄乞

免改泸南安抚使帝思雄不忘改知江陵府请城江陵城成民不告抗光宗将受禅召雄雄上万言书陈修身齐家以正朝廷之道言甚剴切诏

授盩武军节度使开府仪同三司进卫国公改帅湖北疾甚改判资州又除潼川府改隆兴府绍熙四年卒年六十五赠少师嘉定二年谥文定

△权邦彦

权邦彦字朝美河闲人登崇宁四年太学上舍第调沧州教授入为太学博士改宣教郎除国子司业宣和二年使辽明年抗表请帝临雍

为学官积十余年改都官郎中直秘阁历知易州相州复召为都官郎中与王黼议不合
镌职知冀州金人再入高宗开大元帅府起两河兵卫
汴京邦彦提所部兵与宗泽自澶渊趋韦城据刀马河诸道兵莫有进者会敌兵大至移
屯南华二帝北迁邦彦与泽五表劝进建炎元年五月
召还命知荆南府改东平府时东州半已入金至是围益急邦彦誓以死守居数月城破
犹力战不已民义而从之突围以出遂奔行在有司议
失守罪将重坐之帝以其父母妻子皆没于敌纔贬二秩俄除宝文阁直学士兼知江州
本路制置使既抵镇二年冬闻父死乃解官四年起复
知建康府辞不许剧盗张琪残徽州邦彦遣裨将平之改江淮等路制置发运使以治办
称绍兴元年召为兵部尚书兼侍读三年除端明殿学
士签书枢密院事初邦彦献十议以图中兴大略谓宜以天下为度进图洪业恢复土宇
勿苟安于东南驾御诸将当威之以法而限之以爵命
读讲之臣取累朝训典及三代汉唐中兴故事日陈于前以裨圣学又监观伤善妨贤之
逸偷安苟容之辈市恩立威之奸怀谗罔上之欺听其
言察其事则忠邪判爱民先爱其力宽民先节其用脔己奉以佐国当自执政始分阃而
属大事类非偏裨之所能为必得贤臣大将然后可制
置一官可省宜令沿江州县各备境内总以漕帅上自荆鄂江池下至采石京口委任得
人乃防秋上策宗室中岂无杰然有人望可济艰难赞
密勿留宿卫者愿求其人置诸左右人事尽则天悔祸不可独归之数吕颐浩素善邦彦
荐用之给事中程瑀劾邦彦五罪三疏不报邦彦在枢
密又言宜乘机者三譬奕之争先安可随应随解不制人而制于人哉寻兼权参知政事
帝尝对辅臣言湖南事颐浩言李纲纵暴恐治潭无善
状帝曰纲在宣和闲论水灾已得时望邦彦曰纲元无章疏策略虚名耳盖助颐浩以排
纲也三年卒邦彦与政凡一年碌碌无所建明充位而
已无子以侄嗣衍为后

△程松

程松字冬老池州青阳人登进士第调湖州长兴尉章森吴曦使北松为僭从庆元
中韩侂胄用事曦为殿帅时松知钱塘县谄事曦以结
侂胄侂胄以小故出爱姬松闻以百千市之至则盛供帐舍诸中堂夫妇奉之谨居无何
侂胄意解复召姬姬具言松谨待之意侂胄大喜除松
干办行在诸军审计司守太府寺丞未阅旬迁监察御史擢右正言谏议大夫吕祖泰上
书乞诛侂胄苏师旦松与陈谏劾祖泰当诛祖泰坐真
决流岭南 【伏读通鉴辑览 御批松既与祖泰狎友及其上书获谴惟恐相累攻之
不遗余力小人叵测固不足论然松谄事侂胄祖泰

【松有不知臭味既已差池何必与之相狎取人不端谓非自贻患哉】松满岁未迁意殊怏怏乃献一妾于侂胄曰松寿侂胄讶其名问之答曰欲使贱姓名常蒙记忆尔除同知枢密院事自宰邑至执政纔四年开禧元年以资政殿大学士知成都府四川制置使侂胄决议开边以松为宣抚使兴元都统制吴曦副之寻加曦为陕西招抚使许便宜从事松将东军三万驻兴元曦将西军六万驻河池松至益昌欲以执政礼责曦庭参曦闻之及境而返松用东西军一千八百人自卫曦多抽摘以去松殊不悟曦遣其客纳款于金献关外四州地求为蜀王有告曦叛者松晒其狂及金人取成州守将弃关遁吴曦焚河池还兴州松以书从曦求援兵曦答以凤州非用骑之地汉中平衍可骑以驱驰当发三千骑往盖给之也未几金人封曦为蜀王曦遗松书讽使去松不知所为兴元帅刘甲茶马范仲任见松谋起兵诛曦松恐事泄取祸即揖二人起去会报金人且至百姓奔走相蹂躪一城如沸松亟望米仓山遁去由阆州顺流至重庆以书抵曦乞赈礼买舟称曦为蜀王曦遣使以匣封致馈松望见大恐疑其剑也亟逃奔使者追及松不得已启视之则金宝也松乃兼程出峡西向掩泪曰吾今获保头颅矣曦诛诏落职降三官筠州居住再除顺昌军节度副使泮州安置又谪果州团练副使宾州安置死宾州

△陈谦

陈谦字益之温州永嘉人干道八年进士授福州户曹主管刑工部架阁文字迁国子录敕令所删修官枢密院编修官陈中兴五事至李纲议建镇事帝曰纲何足道谦曰陛下用大臣审出纲上宜如圣训今顾出纲下远甚奈何帝蹙然遂极论踰数刻孝宗内禅通判江州知常州提举湖北常平辰州峒猺加直焕章阁除户部郎中总领湖广财赋谦乃丞相赵汝愚客会党论起坐斥后数年起为提点成都府路刑狱移京西运判复直焕章阁韩侂胄谋扰金人令献马者补官七州民相扇为盗谦移书侂胄曰今若倚羣盗行剽掠之策岂得以败亡为戏乎既而屡论襄帅皇甫斌李奕罪且求罢帝谕薛叔似协和之迁司农少卿湖广总领除宣抚司参谋官金兵深入陷应城焚汉川汉阳空城走武昌震惧谦以宝谟阁待制副宣抚未几夺职罢后复知江州侂胄死和议已决议复罢奉祠卒年七十三谦有隼声早为善类所予晚坐伪禁中废首称侂胄为我王士论繇是薄之也

△张岩

张岩字肖翁大梁人徙家扬州绍兴末渡江居潮州为人机警柔回善谐登干道五年进士第历官为监察御史与张釜陈自强刘三杰程

松等阿附时相韩侂胄诬逐当时贤者严道学之禁进殿中侍御史累迁给事中除参知政事以言者罢为资政殿学士知平江府旋升大学士知扬州时边衅方开诏岩与程松分帅两淮已而召还为参知政事兼同知国用事开禧二年迁知枢密院事明年除督视江淮军马时方信孺使金议和值吴曦以蜀叛议未决曦伏诛金人寻前议信孺再行侂胄趣岩遣毕再遇田琳合兵剿敌且募生擒伪帅未几川陕战屡衄大散关陷敌情复变岩开督府九阅月费耗县官钱三百七十余万缗见和议反复乃言不知兵固求去侂胄诛御史章燮论岩与苏师旦朋奸误国夺两官宁宗谓兵衅方开岩尝言其不可许自便复原官奉祠以银青光禄大夫致仕卒赠特进

钦定续通志卷三百九十一

●钦定续通志卷三百九十二 列传一百九十二

列传

宋 【九十六】

○宋九十六

徐谊 吴猎 项安世 薛叔似 刘甲 杨辅

刘光祖

徐谊

吴猎

项安世

薛叔似

刘甲

杨辅

刘光祖

△徐谊

徐谊字子宜一字宏父温州人干道八年进士累官太常丞孝宗论乐制谊对以宫乱则荒其君骄商乱则陂其官坏帝遽改容曰卿可谓不以官自惰矣知徽州至郡歙县有妻杀夫系狱以五岁女为证谊疑曰妇人能一掌致人死乎缓之未覆也会郡究实税于庭死者父母及弟在焉乃言我子欠租久系饥而大叫役者批之堕水死矣然后冤者得释吏皆坐罪移提举浙西常平守右司郎中迁左司孝宗疾寢棘光宗久稽定省谊入谏退告宰相曰帝慰纳从容然目瞪不瞬意思恍惚真疾也宜祷祠郊庙进皇子嘉王参决丞相留正不克用孝宗崩帝不能丧祭奠有祝有司不敢摄百官皆未成服谊与少保吴玠议请太皇太后临朝扶嘉王代祭及

将禅正忧惧仆于殿庭而去谊以书谓赵汝愚曰国家安危在此一举汝愚问策安出谊曰此大事非宪圣太后命不可而知合门事韩侂胄宪圣之戚也同里蔡必胜与侂胄同在合门可因以胜招之侂胄至汝愚以内禅议遣侂胄请于宪圣侂胄因内侍张宗尹关礼达汝愚意宪圣许之宁宗即位谊迁检正中书门下诸房公事兼权刑部侍郎进权工部侍郎知临安府侂胄恃功以赏薄寢缺望谊告汝愚曰异时必为国患宜饱其欲而远之不听汝愚雅器谊除授建明多咨访谊随事裨助不避形迹怨者始众尝劝汝愚早退汝愚亦自请名在属籍不宜久司揆事愿因阜陵乞事以去宁宗已许之侂胄出入禁中无度谊密启汝愚无计防之乃直面讽侂胄侂胄疑将排己首谒谊退束装冀谊还谒留之通殷勤谊不往吏部侍郎彭龟年论侂胄罪状侂胄疑汝愚谊知其情益怨恨以御史刘德秀胡紘疏谊责惠州团练副使南安军安置移袁州又移婺州久之许自便复官提举崇道观起守江州加集英殿修撰升宝谟阁待制移知建康府兼江淮制置使初金攻庐楚不下留兵缀濠州以待和时时钞掠淮人大惊复进流江南在建康者以数十万计谊昼夜拊循益严备御请专捍敌勿从中御朝廷惧生事移知隆兴府以卒谊尝与绍兴老将接于行阵之法分数奇正皆有指授自为图式后谥忠文

△吴猎

吴猎字德夫潭州醴陵人登进士第初主浔州平南簿时张栻经略广西檄摄静江府教授刘焯代栻栻以猎荐辟本司准备差遣盗李接起陷容雷高化贵郁林等州猎请赏劳诛罪焯于是录郁林功诛南流县尉郁林巡检人人惊励争死鬪不踰时盗悉就擒尉宰相王淮甥也猎坐降官久之知常州无锡县用陈傅良荐召试守正字光宗以疾久不覲重华宫猎上疏曰今慈福有八十之大母重华有垂白之二亲陛下宜于此时问安上寿恪共子职辞甚切又白宰相留正乞召朱熹杨万里时陈傅良以言过宫事不行求去猎责之曰今安危之机判然可见未闻有牵裾折檻之士公不于此时有所奋发为士大夫倡第洁身而去于国奚益傅良为改容谢之宁宗即位迁校书郎除监察御史帝趣修大内将移御猎言寿星破汉魏以来之薄俗服高宗三年之丧陛下万一轻去丧次将无以慰在天之灵又言陛下即位未见上皇宜笃厉精诚以俟上皇和豫而祇见焉会伪学禁兴猎言陛下临御未数月今日出一纸去宰相明日出一纸去谏臣昨又闻侍讲朱熹遽以御札畀祠中外惶骇谓事不出于中书是为乱政猎既驳史浩谥又请以张浚配享阜陵曰艰难以来首倡大

义不以成败利钝异其心精忠茂烈未有过于张浚也
孝宗皇帝规恢之志一饭不忘历考相臣终始此念足以上配孝宗在天之意亦惟浚一人耳议皆不合出为江西转运判官寻罢久之党禁弛
起为广西转运判官除户部员外郎总领湖广江西京西财赋韩侂胄议开边猎贻书当路请号召义士以保边场刺子弟以补军实增枣阳信
阳之戍以备冲突分屯阳罗五关以扞武昌杜越境诱窃以谨边隙选试良家子以卫府库且谓金人惩绍兴末年之败今其来必出荆襄踰湖
乃输湖南米于襄阳凡五十万石又以湖北漕司和籴米三十万石分输荆郢安信四郡蓄银帛百万计以备进讨拔董逵孟宗政柴发等分列
要郡厥后皆为名将召除秘书少监首陈边事乞增光鄂江黄四郡戍属江陵告饥除秘阁修撰主管荆湖北路安抚司公事知江陵府陞辞请
出大农十万缗以赈饥者道武昌遣人招商分籴至郡减价发粟米价为平猎计金攻襄阳则荆为重镇乃修成高氏三海筑金鸾内湖通济保
安四匱达于上海而注之中海拱辰长林药山枣林四匱达于下海分高沙东奖之流由寸金堤外历南纪楚望诸门东汇沙市为南海又于赤
湖城西南遏走马湖熨斗陂之水西北寘李公匱水势四合可限戎马金人围襄阳德安游骑迫竟陵朝廷命猎节制本路兵马猎遣张荣将兵
援竟陵又招神马陂溃卒得万人分援襄阳德安加宝谟阁待制荆湖宣抚使时金人再侵竟陵张荣死之襄阳德安俱急吴曦俄反于蜀警报
至猎请魏了翁摄参议官访以西事募死士入竟陵命其将王宗廉死守调大军及忠义保捷分道夹击金人遂去又督董逵等援德安董世雄
孟宗政等解襄阳之围西事方殷猎为讨叛计请于朝以王大才彭轺任西事仍分兵抗均房诸险漕粟归峡以待王师及曦诛除刑部侍郎充
四川宣谕使朝廷命旌别淑慝以敷文阁学士四川安抚制置使兼知成都府嘉定六年召还卒家无余资蜀人思其政画像祠之猎初从张栻
学干道初朱熹会栻于潭猎又亲炙湖湘之学一出于正猎实表率之谥文定

△项安世

项安世字平父其先括苍人后家江陵淳熙二年进士召试除秘书正字光宗以疾不过重华宫安世上书言陛下仁足以覆天下而不能
施爱于庭闱之闲量足以容羣臣而不能忍于父子之际有父子然后有君臣父子之情终无可断之理爱敬之念必有油然之时圣心一回何
用择日早往则谓之省暮住则谓之定疏入不报寻迁校书郎熹宗即位诏求言安世应诏言管夷吾治齐诸葛亮治蜀立国之本不过曰量地
以制赋量赋以制用而已用不量赋而至于侈且滥内外上下之积不得而不空天地山

川之藏不得而不竭今天下之费最重而当省者兵也
能用土兵则兵可省能用屯田则兵可省其次莫如宫掖兵以待敌国常畏而不敢省宫掖以私一身常爱而不忍省不敢省者事在他人不忍
省者在陛下也陛下肯省则省之宫中既省则外庭之官吏四方之州县从风而省时朱熹召至阙未几予祠安世率馆职上书留之不报俄为
言者劾去通判重庆府未拜以伪党罢安世素善吴猎二人坐学禁久废开禧用兵猎起帅荆渚安世方丁内艰起复知鄂州俄淮汉师溃薛叔
似以怯懦为侂胄所恶安世因贻侂胄书其末曰偶送客至江头饮竹光酒半醉书不成字侂胄大喜曰项平父乃尔闲暇遂除户部员外郎湖
广总领会叔似罢金围德安益急诸将无所属安世不俟朝命径遣兵解围高悦等与金人力战马雄获万户周胜获千户安世第其功以闻猎
代叔似为宣抚使寻以宣谕使入蜀朝命安世权宣抚使又升太府卿有宣抚幕官王度者吴猎客也安世招军名项家军多不逞好掳掠猎斩
其为首者安世憾之至是斩度于大别寺猎闻于朝安世坐免后以直龙图阁为湖南转运判官未上用台章夺职而罢嘉定元年卒

△薛叔似

薛叔似字象先其先河东人后徙永嘉游大学解褐国子录初登对论祖宗立国之初除二税外取民甚轻自熙宁以来赋日增而民困滋
甚孝宗嘉纳因曰朕在宫中如一僧叔似曰此非所望于陛下当论功业如何正使海内富庶如文景不过江左之文景法度修明如明章不过
江左之明章陛下即位二十余年国势未张未免牵于苟安无事之说帝默然后数日宰执进拟朝士帝出寸纸书叔似及应孟明姓名嘉其奏
对也迁太常博士寻除枢密院编修官时仿唐制置补阙拾遗宰臣启拟令侍从台谏荐人帝自除叔似左补阙叔似遂劾首相王淮去位光宗
受禅时传金使入界使名未正叔似奏自寿星一正匹敌之礼金人常有南顾之虞使名未正而遽受之祇以重其玩侮翼日复奏谋国者畏敌
太过帝奋然开纳除将作监出为江东转运判官俄以谏臣论罢主管冲佑观寻除湖北运判加直秘阁移福建召为太常少卿兼实录院检讨
官守秘书监权户部侍郎初丞相周必大请择侍从台谏忠直者提举太史局盖用神宗朝司马光与王安礼故事躔度少差豫图销弭遂命叔
似提举寻兼权枢密都承旨以刘德秀疏罢提举兴国宫起知赣州移隆兴府庐州召除在京宫观兼侍读进权兵部侍郎兼同修国史兼国用
司参议官两浙民有身丁钱叔似请于朝遂蠲之试吏部侍郎兼侍读充荆湖宣谕使时韩侂胄开边除兵部尚书宣抚使叔似方乞给降官会

分拨纲运募兵鬻马辟致僚佐而皇甫斌唐州之师已败矣遂劾斌南安军安置叔似料敌必侵光黄委总领陈谦按行五关发鄂卒守三关金果入侵谦驻汉阳为江左节制寻除叔似端明殿学士兼侍读时宣司兵戍襄阳都统赵淳副统制魏友谅与统制吕渭孙不相下渭孙死之叔似遂自劾委任失当叔似夙以功业自期逮临事绝无可称以御史王益祥论夺职罢祠侂胄诛谏官叶时再论降两官谪福州以兵端之开叔似迎合故也久之许自便嘉定十四年卒赠银青光禄大夫谥恭翼叔似雅慕朱熹穷道德性命之旨谈天文地理钟律象数之学

△刘甲

刘甲字师文其先永静军东光人元佑宰相摯之后也父着为成都漕幕葬龙游因家焉甲淳熙二年进士累官至度支郎中迁枢密院检讨兼国史院编修官实录院检讨官使金至燕山伴宴完颜者名犯仁庙嫌讳甲力辞完颜更名修自绍兴后凡出疆遇忌俱辞设宴皆不得免秦桧所定也九月二十三日金宴甲以宣仁圣烈后忌辞还除司农少卿进太常擢权工部侍郎升同修撰除宝谟阁待制知江陵府湖北安抚使甲谓荆州为吴蜀脊高保融分江流渚之以为北海太祖常令决去之盖保江陵之要害也即因遗址浚筑亘四十里移知庐州程松为四川宣抚使吴曦副之以甲知兴元府利东安抚使时蜀口出师败岷金陷西和成州曦焚河池县先是曦已遣姚淮源献四川于金金铸印立曦为蜀王甲时在汉嘉未至镇也金人破大散关兴元都统制毋思以重兵守关而曦阴彻募关之戍金自板盆谷绕出关后思挺身免甲告急于朝乞下两宣抚司协力扞御松谋遁甲固留不可遽以便宜檄甲兼沿边制置曦遣后军统制王钺准备将赵观以书致甲甲援大义拒之因卧疾曦又遣其弟旻邀甲相见甲叱而去之乃援颜真卿河北故事欲自拔归朝先募二兵持帛书遗参知政事李璧告变且曰若遣吴总以右职入川即可瓦解矣曦僭王位甲遂去官朝廷久乃微闻曦反状韩侂胄犹不之信甲奏至举朝震惊璧袖帛书进帝览之称忠臣者再召甲赴行在命吴总以直学士知鄂州多赐告身金钱使招谕诸军为入蜀计复命以帛书赐甲曰所乞致仕实难允从已降指挥召赴行在今朝廷已遣使与金通和襄汉近日大捷北兵悉已渡江而去恐蜀远未知更在审度事宜从长区处二兵皆补官甲舟行至重庆闻安丙等诛曦复还汉至上奏待罪诏趣还任甲奏叛臣子孙族属及附伪罪状公论快之会宣抚副使安丙以杨巨源自负倡义之功阴欲除之语在巨源传巨源既死军情叵测除甲宣抚使未几金自鹞岭关札金崖进屯八里山甲分兵进守诸关截潼川

戍兵驻饶风以待之金人知有备引去侂胄诛上念甲
精忠拜宝谟阁学士赐衣带鞍马是岁和议成朝廷闻彭辂与丙不协以书问甲又俾谕
丙减汰诸军勿过甚及访蜀人才之可用者盖自杨辅
召归西边诸事朝论多于甲取决人无知者绍兴中蜀军无见粮刍为科余孝宗闻其病
民命总领李夔以本所钱招余惧不给又命劝余其半
劝余之名自此始久之李昌图总计复奏令金梁守倅任责收余而劝余遂罢及是宣总
司令金洋兴元三郡劝余小麦三十万石甲乞下总所
照李夔成法措置从之明年罢宣抚司合利东西为一帅治兴元移甲知潼川府安丙既
同知枢密院事董居谊为制置使甲进宝谟阁学士知
兴元府利路安抚使节制本路屯驻军马朝廷计居谊犹在道命甲权四川制置司事先
是大臣抚蜀者诸将事之有所谓互送礼实贿赂也甲
下令首罢之凡丙所立茶盐柴邸悉废之又乞以阜郊博易铺场还隶沔戎司复通吴氏
庄岁收租四万斛有奇钱十三万以裨总计从之丙增
多田税甲命属吏讨论由一府言之岁减凡百六十万缗米麦万七千石边民感泣嘉定
七年卒于官年七十三甲幼孤多难母病刲股以进平
生常谓吾无他长惟足履实地昼所为夜必书名曰自监理宗诏谥清惠

△杨辅

杨辅字嗣勋遂宁人干道二年进士甲科召试馆职除秘书省正字迁校书郎出知
眉州累迁户部郎中总领四川财赋升太府少卿利西
安抚使吴挺病辅以吴氏世帅武兴久恐生变密白二府早择人望以镇方面又贻书四
川制置邱密言统制官李爽乃吴氏腹心缓急不可令
权军密然之挺卒密檄辅权帅事辅谓职为王人若轻往第疑军心遂索印即益昌领事
复数月奏以权兴州事杨虞仲兼权召守秘书监礼部
侍郎以显谟阁待制知江陵府移襄阳又移潼川召还寻以敷文阁直学士知成都府兼
本路安抚使韩侂胄决意用兵以吴曦为四川宣抚使
假以节制财利之权辅知曦有异志贻书大臣言自昔兵帅与计臣不相统摄故总领有
报发觉察之权今所在皆受节制内忧不轻因托言他
事遣人以矾书告于朝帝意辅能诛曦密诏授宝谟阁学士四川制置使许以便宜从事
时人望辅倡义刘光祖李道传旨勉之辅自以不习兵
事且内郡无兵可用迁延两月但为去计曦移辅知遂宁府辅遂以印授通判韩植而去
安丙杨巨源密谋诛曦以辅有人望谓密诏自辅所来
闻者皆信曦既诛丙趣辅还成都除四川宣抚使奏言臣以衰病软懦而居建元功者之
上徒恐牵制败事安丙才力强济赏罚明果乞以事任
付丙又论蜀中三帅惟武兴事权特重故致今日之变乞并置两帅分其营屯隶属安丙

奏乞两宣抚分司朝廷察丙与辅异召辅赴阙议者谓蜀乱初平如辅未宜去乃复以为制置使兼知成都府再被召踰年纔抵建康复引咎不进帝召辅益坚乃之镇江俟命著作佐郎杨简言辅尝弃成都不当召乃除兵部尚书兼侍读以龙图阁学士知建康府兼江淮制置使卒于官谥曰庄惠

△刘光祖

刘光祖字德修简州阳安人幼出于外祖贾晖后以晖遗泽补官登进士第廷对言陛下睿察太精宸断太严求治太速喜功太甚又言陛下躬擐甲胄闲驭球马一旦有警岂能亲董六师以督战乎夫人主自将危道也臣恐球马之事敌人闻之适以貽笑不足以示武除剑南东川节度推官辟潼川提刑司检法淳熙五年召对论恢复事请以太祖用人为法且曰人臣献言不可不察其一不量可否劝陛下轻出骤进则是即日误国其一不思振立苟且偷安则是久远误国除太学正召试守正字兼吴益王府教授迁校书郎除右正言知果州以赵汝愚荐召入光宗即位除军器少监兼权侍左郎官又兼礼部时殿中侍御史阙帝方严其选谓宰臣留正曰卿监郎官中其有人正沈思久之曰得非刘光祖乎帝曰是久在朕心矣光祖入谢劾罢户部尚书叶翥太府卿兼中书舍人沈揆结近习图进用徙太府少卿求去不已除直秘阁潼川运判改江西提刑又改夔州时孝宗不豫帝久不过宫光祖致书留正赵汝愚曰宜与羣贤并心一力若上未过宫宰执不可归安私第林陈二阍自以获罪重华日夜交谋其闲宜用韩魏公逐任守忠故事以释两宫疑谤大臣亦当收兵柄密布腹心俾缓急有可仗者闻孝宗崩又贻书汝愚勉以安国家定社稷之事熹宗即位除侍御史改司农少卿入对献谨始五箴又论人主有六易天命易恃天位易乐无事易安意欲易奢政令易怠岁时易玩又有六难君子难进小人难退苦言难入巧佞难远是非难明取舍难决又言陛下以隆慈之命践祚于素幄盖有甚不得已者宜躬自贬损尽礼于上皇使圣意欢然知释位之乐然后足以昭陛下之大孝帝悚然嘉纳进起居舍人论政令当出中书陛下审而行之人主操柄无要于此知合门事韩侂胄擅威福故首及之迁起居郎集议卜孝宗山陵与朱熹皆谓会稽山陵土薄水浅乞议改卜既而熹与祠光祖言汉武帝之于汲黯唐太宗之于魏征仁宗之于唐介皆慙怒旋悔熹明先圣之道为今宿儒又非三臣此今一旦无故去之可乎再疏不听以刘德秀劾出为湖南运判不就主管玉局观赵汝愚既罢相侂胄擅朝遂目士大夫为伪学逆党禁锢之光祖撰涪州学记谓学之大者明圣人

之道以修其身而世方以道为伪小者治文章以达其志而时方以文为病好恶出于一时是非定于万世谏官张釜指为谤讪比之杨恠谪居房州久之许自便起知眉州复职将漕利路以不习边事辞进直宝谟阁主管冲佑观吴曦叛诛以书属宣抚使杨辅讲行营田前日利归吴氏者悉收之公上以省饷军费奖名节旌死事以激忠烈之心除潼川路扬刑权知泸州侂胄诛召除右文殿修撰知襄阳府进宝谟阁待制知遂宁府改荆湖制置使以宝谟阁直学士知潼川府诏以闵雨求言光祖请改正宪圣慈烈皇后讳日先是后崩以庆元三年十一月二日郊禋期迫或谓侂胄曰帝亲郊不可不成礼且有司所费既伙奈何已之侂胄入其言五日祀圜丘六日始宣遗诏于是光祖言宪圣陛下之曾祖母克相高宗再造大业侂胄敢视之如卑丧迁就若此贼臣就戮盍告谢祖宗改从本日从之升宝谟阁直学士提举玉隆万寿宫引年不许提举西京嵩山崇福宫嘉定十五年卒进华文阁学士谥文节赵汝愚称光祖论谏激烈似苏轼恻似范祖禹世以为名言子端之靖之翊之竑之

钦定续通志卷三百九十二

●钦定续通志卷三百九十三 列传一百九十三

列传

宋【九十七】

○宋九十七

余端礼 李璧 邱密 倪思 宇文绍节 李繫

余端礼

李璧

邱密

倪思

宇文绍节

李繫

△余端礼

余端礼字处恭衢州龙游人第进士知湖州乌程县民闲赋丁绢钱率三氓出一缣不输绢而折其估一缣千钱后增至五千民不胜病端礼以告于府事得上闻又自诣中书陈便宜岁蠲缣钱六万召对时李宗志在恢复端礼言谋敌决胜之道有声有实敌弱者先声后实以善其气敌强者先实后声以俟其机昔越谋吴外讲盟好内修武备阳行成以种蠡阴结援于齐晋教习之士益精而献遗之礼益密用能一战而霸者伺其机而图之所谓先实而后声也今日之事与越相若愿阴设其备而密为之谋观

变察时则机可投矣古之投机者有四因其内衅而击之此投隙之机也因外患而伐之此捣虚之机也敌国不道因其敌而举之此乘乱之机也敌人势穷蹙其后而蹙之此乘弊之机也机之未至不可以先机之已至不可以后帝喜曰卿可谓通事体矣后以荐为监察御史迁大理少卿转太常少卿诏以来岁祈谷上帝仲春躬耕籍田令礼官讨论明道故事端礼言祈谷之制合祭天地于圜丘前期享于太庙视冬至郊祀之仪此国朝故事也若乃明道之制则以宫中火后考室落成故于太安殿恭谢天地此特一时谢灾之事耳今欲祈谷耕籍必合祭天地于圜丘前期朝享于景灵宫太庙欲如明道之制行于殿庭不可诏太常礼部集议有言礼可以义起者端礼曰礼固有可义起至于大体则不可易古者郊而后耕以其于郊故谓之郊犹祀于明堂故谓之明堂如明道谢灾之制则与祈谷异今以郊而施之殿庭亦将以明堂而施之坛壝乎帝为之止权兵部侍郎兼太子詹事进吏部侍郎出知太平州奉祠光宗立召见言天子之孝不与庶人同今陛下之孝于寿皇当如舜之于尧行其道可也武之于文继其志述其事可也凡寿皇睿谋圣训仁政善教所尝施于天下者愿与二三大臣朝夕讲求而力行之则足以尽事亲之孝矣授集英殿修撰知赣州还为吏部侍郎权刑部尚书兼侍讲以焕章阁直学士知建康府召拜吏部尚书擢同知枢密院事兴州帅吴挺死端礼谓枢密赵汝愚曰吴氏世握蜀兵今若复令承袭将为后患汝愚是其言合辞以奏光宗意未决端礼言汝愚所请为蜀计为东南计夫置大将而非其人是无蜀也无蜀是无东南也今军中请帅而迟迟不报人将生心不听后挺子曦卒以蜀叛如端礼言帝以疾不朝重华宫孝宗崩又不能发丧人情恟然端礼谓宰相留正曰公独不见唐肃宗朝羣臣发哀太极殿故事乎宜请太皇太后代行祭奠之礼于是宰执以请于太皇太后留正惧入临重华宫仆地致仕而去太皇太后垂帘策皇子嘉王即皇帝位王流涕逊避端礼奏太上违豫大丧乏主安危之机在于呼吸太皇太后非为陛下计乃为太上皇帝计为宗社计今坚持退让不思国家之大计是守匹夫之小节而昧天子之大孝也帝不得已侧身就御坐之半端礼与汝愚再拜固请帝乃正御坐退行禫祭礼进端礼知枢密院事兼参知政事汝愚去右丞相位端礼代之始端礼与汝愚同心共政汝愚尝曰士论未一非余处恭不能任及韩侂胄寢窃威柄汝愚等欲疏斥之谋泄而汝愚逐端礼不能遏但长吁而已浙西常平黄灏以放民租窜知婺州黄度以庇属吏褫职罢郡二人皆侂胄所憾端礼执奏竟不免于罪太府丞吕祖俭坐上书忤侂胄南迁端礼救解不

获公议始归责焉他日见帝言除从官中书不知朝纲
已紊祸良已滋即丐去不许进左丞相端礼在相位期年颇知拥护善类然为侂胄所制
抑郁不惬志称疾求退以观文殿大学士提举洞霄宫
居顷之判潭州移庆元复帅潭卒授少保郇国公致仕赠太傅谥忠肃子嵘工部尚书

△李璧

李璧字季章眉之丹棱人父焘典国史璧少英悟日诵万余言属词精博周必大见
其文异之曰此谪仙才也孝宗尝问焘卿诸子孰可用
焘以璧对以父任入官后登进士第召试为正字熈宗即位徙著作佐郎兼刑部郎权礼
部侍郎兼直学士院时韩侂胄专国建议恢复宰相陈
自强请以侂胄平章国事遂召璧草制同礼部尚书萧达讨论典礼命侂胄三日一朝序
班丞相上璧受命使金行次扬州忠义人朱裕挟宋帅
裘涟水金人愤甚璧乞梟裕首境上诏从其请璧至燕与金人言披露肝胆金人之疑顿
释璧归侂胄用师意方锐璧言进取之机当重发而必
至毋轻出而苟且既而陈景俊使北还赞举兵甚力钱象祖以沮兵议忤侂胄得罪贬璧
论襄阳形势深以心腹为忧欲待敌先发然后应之侂
胄意不悛于是四川荆淮各建宣抚而师出矣璧度力不能回乃入奏自秦桧首倡和议
使父兄百世之讎不复开于臣子之口今庙谋未定士
气积衰苟非激昂曷克丕应臣愚以为宜亟贬秦桧示天下以讎耻必复之志疏奏秦桧
坐贬王爵议者谓璧不论桧之无君而但指其主和其
言虽公特以迎合侂胄用兵之私而已初侂胄召叶适直学士院草出师诏适不从乃以
属璧由是进权礼部尚书侂胄既丧师始觉为苏师旦
所误一夕招璧饮酒酣及师旦事璧微撻其过觐侂胄意向乃极言师旦怙势招权使明
公负谤非窜谪此人不足以谢天下师旦坐贬官璧又
言郭倬李汝翼僭军误国之罪宜诛之以谢淮民拜参知政事金遣使来微示欲和意邱
密以闻璧贻密书俾遣小使致书金帅求成金帅报书
以用兵首谋指侂胄侂胄大恚不复以和为意璧言张浚以讨贼复讎为己任隆兴之初
事势未集亦权宜就和苟利社稷固难执一侂胄不听
以张岩代密璧力争言邱密素有人望侂胄变色曰方今天下独有一邱密邪吴曦叛据
蜀称王杨巨源安丙诛之事闻璧议须用重臣宣抚荐
制置使杨辅为宣抚使而使安丙辅之丙杀杨巨源辅恐召变以书举刘甲自代侂胄疑
辅避事璧曰孝宗闻吴璘病亟诏汪应辰权宣抚使职
事蜀赖以安此故事也于是命甲权宣抚使方信孺使北归言金人欲缚送侂胄故侂胄
忿甚用兵之意益急璧方与共政或劝其速去毋与侂
胄分祸璧曰嘻国病矣我去谁适谋此会礼部侍郎史弥远谋诛侂胄以密旨告璧及钱

象祖象祖欲奏审璧言事留恐泄侂胄迄诛璧兼同知
枢密院事御史叶时论璧反复诡譎削三秩谪居抚州后辅臣言诛侂胄事璧实预闻乃
令自便复官提举洞霄宫久之复以御史奏削三秩罢
祠越四年复除端明殿学士知遂宁府未至而溃兵张福入益昌戕王人略阆剽果至遂
宁璧传檄谕之福等读檄泣下约解甲降会官军至挑
贼贼忿尽燔其城顾府治曰李公旦夕来居此其勿毁璧驰书大将张威使调嘉定黎雅
砦丁牌手来会战威夜遣人叩门来言曰贼垒坚不可
破将选死士梯而登以火攻之璧曰审尔必多杀士卒盍先断贼汲路与粮道使不得食
即自成擒矣以长围法授之威用其谋贼遂平璧寻疾
奉祠嘉定十五年六月卒进资政殿学士谥文懿璧嗜学如饥渴羣经百氏搜抉靡遗于
典章制度尤综练为文隽逸璧父子与弟■〈直上土
下〉皆以文学知名蜀人比之三苏云

△邱密

邱密字宗卿江阴军人隆兴元年进士为建康府观察推官丞相虞允文奇其才奏
除国子博士孝宗谕允文举自代者允文首荐密有旨
赐对遂言恢复之志不可忘恢复之事未易举宜甄拔实才责以内治遵养十年乃可议
北向时方遣范成大使金祈请陵寝密言泛使亟遣无
益大计徒以骄敌孝宗不乐曰卿家坟墓为人所据亦须理索否密对曰臣但能诉之不能
请之孝宗怒密退待罪孝宗察其忠不谴也迁太常
博士出知秀州华亭县捍海堰废且百年咸潮岁大入坏并海田苏湖皆被其害密至海
口访遗址已沦没乃奏勅筑三月堰成三州鳧鹵复为
良田除直秘阁知平江府入奏内殿因论楮币折阅请公私出内并以钱会各半为定法
诏行其言天下便之知吉州召除户部郎中迁枢密院
检详文字被命接伴金国贺生辰使金历九月晦与统天历不合密接使者以恩意乃徐
告以南北历法异同合从会庆节正日随班上寿金使
初难之卒从其言孝宗喜谓密曰使人听命成礼而还卿之力也先是王抃为枢密密不
少下之方迓客时抃排定程顿奏上降付接伴令沿途
遵执密具奏谓不可以此启敌疑心不奉诏抃憾之訾密不礼金使子祠起知鄂州移江
西转运判官提点浙东刑狱进直徽猷阁知平江府升
龙图阁移帅绍兴府改两浙转运副使以忧去光宗即位召对除太常少卿兼权工部侍
郎进户部侍郎擢焕章阁直学士四川安抚制置使兼
知成都府密素以吴氏世掌兵为虑陛辞奏曰臣入蜀后吴挺脱至死亡兵权不可复付
其子臣请得便宜抚定诸军以俟朝命挺死密即奏乞
选他将代之仍置副帅别差兴州守臣并利州西路帅司归兴元以杀其权挺长子曦勿

令奔丧起复知和州属总领杨辅就近节制诸军檄利
路提刑扬虞仲往摄兴州朝廷命张诏代挺以李仁广副之遂革世将之患其后郭杲继
诏复兼利西路安抚杲死韩侂胄复以兵权付曦曦叛
识者乃服密先见帝宗即位赴召以中丞谢深甫论罢之居数年复职知庆元府既入奏
韩侂胄招以见出奏疏几二千言示密盖北伐议也知
密平日主复讎冀可与共功名密曰中原沦陷百年在我固不可一日忘然兵交胜负未
可知首事之祸其谁任之此必有夸诞贪进之人攘臂
以侥幸万一宜亟斥绝不然后必误国矣进敷文阁学士改知建康府将行侂胄曰此事姑
为迟之密因赞曰翻然而改诚社稷生灵之幸惟无摇
于异议则善矣侂胄闻金人置平章宣抚河南奏以密为签枢宣抚江淮以应之密手书
力论金人未必有意败盟宜申警军实使吾常有胜势
若衅自彼作我有辞矣宣抚议遂寝侂胄移书欲除密内职宣谕两淮密报曰使名虽异
其为示敌人以嫌疑之迹则同且彼平章宣抚既寝尤
不宜轻举侂胄滋不悦升宝文阁学士刑部尚书江淮宣抚使时宋师克泗州进图宿寿
既而师溃侂胄遣人议招收溃卒且求自解之计密谓
宜明苏师旦周筠等僨师之奸正李汝翼郭倬等丧师之罪密欲全淮东兵力为两淮声
援奏泗州孤立淮北所屯精兵几二万万一金人南出
清河口及侵天长等城则首尾中断堕敌计矣莫若还兵盱眙从之金人拥众自涡口侵
淮南或劝密弃庐和州为守江计密曰弃淮则与敌共
长江之险矣吾当与淮南俱存亡益增兵为防进端明殿学士侍读寻拜签书枢密院督
视江淮军马有自北来者韩元靖自谓琦五世孙密诘
所以来之故元靖言两国交兵北朝皆谓出韩太师意今相州宗族坟墓皆不可保故来
依太师尔密使毕其说始露讲解意密遣人护送北归
俾扣其实其回也得金行省幅纸密以闻于朝遂遣王文采持书币以行文采还金帅答
书辞顺密复以闻遂遣陈璧充小使璧回具言金人诘
使介既欲和矣何为出兵真州以袭我然仍露和意也密白庙堂请自朝廷移书续前议
又谓彼既指侂胄为元谋若移书宜黜免系衔 【伏
读通鉴辑览 御批北伐之谋衅端在宋自金人分道大举宋无不望风奔溃邱密受
命宣抚自不得不主和以纾国患顾侂胄之为首谋金
人久已深悉请于移书内暂免系衔以冀涂饰一时耳目金人其果可欺耶识见卑鄙适
足贻轻笑耳】 侂胄大怒罢密以知枢密院事张岩代
之既以台论提举洞霄宫落职侂胄诛以资政殿学士知建康府寻改江淮制置大使兼
知建康府淮南运司招辑边民二万号雄淮军月廩不
继公肆剽劫密乃随雄淮所屯分隶守臣节制其西路则同转运使张颖拣刺为御前武

定军以三万人为额分为六军余汰归农自是月省钱二十八万缗米三万四千石武定既成军伍淮西赖其力以病丐归拜同知枢密院事卒谥忠定密仪状魁杰机神英悟尝慷慨谓人曰生无以报国死愿为猛将以灭敌其忠义性然也

△倪思

倪思字正甫湖州归安人干道二年进士中博学宏词科累迁秘书郎除著作郎兼翰林权直光宗即位典册与尤袤对掌故事行三制并宣学士帝欲试思能否一夕并草除公师四制训词精敏权侍立修注官直前奏请增置谏官专责以谏事又乞召内外诸将访问以知其才否累除中书舍人兼直学士院同修国史寻兼侍讲初孝宗以户部经费之余则于三省置封樁库以待军用至绍熙移用始频【按宋史本传作绍兴考绍兴为高宗年号封樁库置于孝宗时不当云绍兴应是光宗年号绍熙之误今改正】会有诏发缗钱十五万入内帑备犒军思谓实给他费请毋发且曰往岁所入约四百六十四万缗所出之钱不及二万非痛加撙节则封樁自此无储遂定议犒军岁以四十万缗为额由是费用有节又言唐制使谏官随宰相入阁今谏官月一对耳乞许同宰执宣引庶得从容论奏帝称善除礼部侍郎帝久不过重华宫思疏十上言多痛切会帝召嘉王思言寿皇欲见陛下亦犹陛下之于嘉王也帝为动容时李皇后寢预政思进讲姜氏会齐侯于泲因奏人主治国必自齐家始家之不能齐者不能防其渐也始于褻狎终于恣横卒至于阴阳易位内外无别甚则离闲父子汉之吕氏唐之武韦几至乱亡不但鲁庄公也帝悚然兼权吏部侍郎出知绍兴府熈宗即位改婺州未上提举太平兴国宫召除吏部侍郎兼直学士院御史姚愈劾思出知太平州历知泉州建寧府皆以言者论去久之召还试礼部侍郎兼直学士院侂胄先以书致殷勤曰国事如此一世人望岂宜专以洁己为贤哉思报曰但恐方拙不能徇时好耳时赴召者未引对先谒侂胄或劝思不可入见首论言路不通自吕祖俭谪徙而朝士不敢输忠自吕祖泰编窜而布衣不敢极说胶庠之士欲有吐露恐之以去籍谕之以呈藁谁肯披肝沥胆触冒威尊近者北伐之举仅有一二人言其不可如使未举之前相继力争之更加详审不致轻动又言苏师旦赃以巨万计胡不黥戮以谢三军皇甫斌丧师襄汉李爽败绩淮甸秦世辅溃散蜀道皆罪大罚轻又言士大夫寡廉鲜耻列拜于势要之门甚者匍匐门窦称门生不足称恩坐恩主甚至于恩父者谀文丰赂又在所不论也侂胄闻之大怒思既退谓侂胄曰公明有余而聪不足堂中剖决如流此明有余为苏师旦蒙蔽此聪

不足也周筠与师旦并为奸利师旦已败筠尚在人言
平章骑虎不下之势此李林甫杨国忠晚节也侂胄悚然日闻所未闻司谏毛宪劾思予
祠侂胄殛复召首对乞用淳熙例令太子开议事堂闲
习机政又言侂胄擅命凡事取内批特旨当以为戒除权兵部尚书兼侍读求对言大权
方归所当防微一有干预端倪必且仍蹈覆辙厥今有
更化之名无更化之实今侂胄既诛而国人之言犹有未靖者盖以枢臣犹兼宫宾不时
宣召宰执当同班同对枢臣亦当远权以息外议枢臣
谓史弥远也金人求侂胄函首命廷臣集议思谓有伤国体 【按叶绍翁四朝闻见录云
先是有旨百官诣朝堂集议函首事枢密章良能建
议以为奸凶已毙之首又何足惜时王介抗议谓侂胄首固不足惜而国体为可惜良能
以语侵介介奋起争之会倪思亦谓一侂胄臭头颅何
必诸公争介议遂不胜良能径呼省吏伸黄纸揭于象魏曰今据礼部侍郎倪思议到奸
凶已毙之首又何足惜遂函侂胄首送金据此则国体
可惜之语盖发于王介而思实劝其勿争且章良能所议实定于思之一言兴宋史所载
殊异谨识】 徙礼部尚书史弥远拟除两从官参政钱
象祖不与闻思言奏拟除目宰执当同进比专听侂胄权有所偏覆辙可鉴既而史弥远
上章自辨思求去帝留之思乞对言前日论枢臣独班
恐蹈往辙宗社堪再坏耶宜亲擢台谏以革权臣之弊并任宰辅以鉴专擅之失弥远怀
恚思请去益力以宝谟阁直学士知镇江府移福州弥
远拜右丞相陈晦草制用昆命元龟语思叹曰董贤为大司马册文有允执厥中一言萧
咸以为尧禅舜之文长老见之莫不心惧今制词所引
此舜禹揖逊也天下有如萧咸者读之得不大骇乎乃上省牒请贴改麻制诏下分析弥
远遂除晦殿中侍御史即劾思藩臣僭论麻制镌职而
罢自是不复起矣 【按叶绍翁四朝闻见录云晦上章徧举累朝自赵普以下凡拜相麻
制用元龟事至六七且谓臣尝学词科于思非不记
此类文字特出于一旦私愤遂忘典故以藩臣而议麻制不愆无以示后思遂不复敢辩
免所居官晦与真德秀最厚盖辨明典故颇资于德秀
云此可补宋史所未备】 久之除宝文阁学士提举嵩山崇福宫嘉定十三年卒谥文节

△宇文绍节

宇文绍节字挺臣成都广都人祖虚中签书枢密院事父师瑗显谟阁待制父子皆
以使北死无子孝宗愍之命其族子绍节为之后补官
仕州县九年第进士累迁宝谟阁待制知庐州时侂胄方议用兵绍节至郡议修筑古城
剗造砦栅专为固圉计淮西转运判官邓友龙潜于侂
胄谓绍节但为城守徒耗财力无益于事侂胄以书让绍节绍节复书谓公有复讎之志

而无复讎之略有开边之害而无开边之利不量国力
为进取计非所敢知侂胄得书不乐乃以李爽代绍节召为兵部侍郎兼中书舍人兼直
学士院以宝文阁待制知镇江府吴曦据蜀趣绍节赴
阙任以西讨之事绍节至谓大臣曰今进攻则瞿唐一关彼必固守若驻军荆南徒损威
望闻随军转运安丙素怀忠义若授以密旨必能讨贼
成功大臣用其言遣丙所亲以帛书达上意丙卒诛曦权兵部尚书未几除华文阁学士
湖北京西宣抚使知江陵府统制官高悦在戍所肆为
杀掠远近苦之绍节召真帐前收其部曲俄有诉悦纵所部为寇者绍节杖杀之兵民皆
欢升宝文阁学士试吏部尚书寻除端明殿学士签书
枢密院事安丙宣抚四川或言丙有异志语闻廷臣欲易丙绍节曰方诛曦初安丙一摇
足全蜀非国家有顾不以此时为利今乃有他耶愿以
百口保丙丙卒不易朝廷于蜀事多所咨访绍节审而后言皆周悉事情嘉定六年卒进
资政殿学士致仕又赠七官为少师非常典也谥曰忠
惠

△李繁

李繁字清叔崇庆晋原人第进士为隆州判官摄绵州岁侵出义仓谷贱糴之而以
钱贷下户又听民以茅秸易米作粥及褚衣亲衣食之
活十万人明年又饥叩蜀彭汉成都盗贼蠡起绵独安堵知永康军移利州提点成都路
刑狱兼提举常平岁凶先事发廩蠲租所活百七十万
人知兴元府安抚利州东路汉中久饥剑外和余在州者独多繁尝匹马行阡陌闲访求
民瘼有老妪进曰民所以饥者和余病之也泣数行下
繁感其言奏免之民大悦徙仓部员外郎总领四川赋财军马钱粮升郎中淳熙三年廷
臣上言四川岁余军粮名为和余实科余也诏制置使
范成大同繁相度以闻繁奏诸州岁余六十万石若从官余岁约百万缗如于经费之中
斟酌损抑变科余为官余贵贱视时不使亏毫忽之价
出纳视量勿务取圭撮之赢则军不乏兴民不加赋乃书利民十一事上之前后三年繁
上奏疏者十有三天子降诏难问者凡八讫如其议民
既乐与官为市远迩讙趋军饷坐给而田里免科余始知有生之乐会岁大稔米价顿贱
父老以为三十年所无梁洋闲绘繁像祠之范成大驿
疏言关外麦熟倍于常年实由罢余民力稍纾得以尽于农亩孝宗览之曰免和余一年
田闲和气若此乃知民力不可重困也擢繁守太府少
卿范成大召见孝宗首问余事可久行否成大奏李繁以身任此事臣以身保李繁孝宗
大悦曰是大不可得李繁也上意方向用而繁亦欲奏
蠲监酒和买之弊以尽涤民害会有疾卒诏以繁能官致仕恩外特与遗表择一人庶官

前此所未有初繁宰眉山校成都漕试念吴氏世袭兵柄必稔蜀乱发策云久假人以兵柄未有不为患者以武宣之明不能销大臣握兵之祸以宪武之烈不能收藩镇握兵之权危刘氏殢唐室鲜不由此吴挺以为怨后繁总饷事挺谬奏军食恠恶孝宗以问繁繁缄其样以进挺之妄遂穷踰三十年吴曦竟以蜀叛安丙既诛曦每语人吾等焦头烂额耳熟如李公先见者乎繁讲学临政皆有源委云

钦定续通志卷三百九十三

●钦定续通志卷三百九十四 列传一百九十四

列传

宋【九十八】

○宋九十八

郑穀【王庭秀】	仇愈	高登	娄寅亮	宋汝为	王信
汪大猷	袁燮	吴柔胜	游仲		
李祥	王介	宋德之	杨大全		

郑穀

仇愈

高登

娄寅亮

宋汝为

王信

汪大猷

袁燮

吴柔胜

游仲

李祥

王介

宋德之

杨大全

△郑穀

郑穀字致刚建州人政和八年举进士授安陆府教授权信阳县尉召为御史台主簿张邦昌之僭号也挺身见高宗于济州既即位擢监察御史选右司谏升为谏议大夫帝至杭州穀奏曰陛下南渡出于仓卒省台寺监百司之臣获济者鲜当擢吴中之秀以为用况天下贤俟多避地吴越宜令守臣体访境内寄居待阙及见任宫观等京朝官以上各具姓名以闻简

拔任使庶几速得贤才以济艰危诏从之苗傅刘正彦等逆乱穀庭立面折二凶且谓逆贼凶焰炽甚非请外援无可为者乃上章待罪求去退见吕颐浩议兴复计太后降诏不允朱胜非言穀面折二凶事拜御史中丞时二凶窃威福之柄肆行杀戮日至都堂侵紊机政穀言黄门宦者之设本以给事内庭供扫除而已俾与政事则贪暴无厌待以兵权则惨毒无已皆前世已行之验也故宦官用事于上则生人受祸于下匹夫力不能胜则羣起而攻之是以靖康之初羣起而攻之者庶民也睿圣皇帝南渡驻蹕未安羣起而攻之者众兵也今当痛革前弊并令选择其人曾经事任招权纳宠者屏之远方俾无浸淫以激众怒则赏罚之柄自朝廷出国势尊矣仍谕军法便宜止行于所辖军伍其余当闻之朝廷付之有司明正典刑所以昭尊君之礼而全臣子忠义之节也疏留中不出穀对请付外行之又论黄潜善汪伯彦均于误国而潜善之罪居多今同以散官窜调湖南钱伯言与黄愿皆弃城吕源与梁杨祖皆拥兵而逃今愿罢官杨祖落职而源伯言未正典刑非所以劝惩诏窜削有差傅正彦日至都堂议事穀奏将帅之臣不可预政及闻以签书枢密院召吕颐浩以礼部尚书召张浚分张俊兵以五百人归陕西而浚不受尚书之命俟不肯分所部兵遂谪浚居郴州擢俊以节度知凤翔穀知出二凶奸谋具章乞留颐浩知金陵浚不当贬不报穀遂遣所亲谢向变姓名微服为贾人徒步如平江见俊等具言城中事以为严设兵备大张声势持重缓进使贼自遁无惊动三宫此上策也俊等闻之皆感激奋厉为赴难计俄诏睿圣皇帝为皇太弟天下兵马大元帅幼主为皇太侄即与大臣进议以为在庭公卿百司羣吏皆昔之臣属也今则与之比肩事主矣稽之于古则无所法行之于今则实逆天或者谓大元帅可以任军旅之大事臣窃以为不然昔舜之禅禹也犹命禹徂征有苗则禹虽受禅而征伐之事舜犹亲之唐睿宗传位皇太子以听小事自尊为太上皇以听大事如是无不可者则稽之于古为有法行之于今为得宜太后垂帘同听政以安人心退与御史王庭秀上疏力争太后召穀与宰执同对帘前穀乞召庭秀太后谕曰今欲令睿圣皇帝总领兵马来尔穀奏曰臣不知其它但人君位号岂容降改闻之天下孰不怀疑虽前世衰乱分裂之时固未有旬日之闲易两君一朝降两朝位号者也太后令穀至都堂朱胜非出朱昉等所上书以示穀庭秀穀庭秀力言昨日诏书不可宣布必召变胜非与执政颜岐王孝迪路允迪皆在坐尚书左丞张澄独曰事势若此岂争此名位耶澄欲出穀等共止之穀与李邴并为端明殿学士同签书枢密院事高宗复位进签书执政甫百日而卒高宗

甚悼之谓大臣朕丧元子犹能自排遣于穀殆不能释也

王庭秀

王庭秀

庭秀字颖彦慈溪人与黄庭坚杨时游其为学旁搜远绍不苟趣时好造诣深远操持坚正发为文辞俊迈宏远登政和二年上舍第历官州县侍御史李光荐为御史台检法官宣和靖康时进言皆发于忠义高宗即位御史中丞言伪楚时庶官中如虞谟王庭秀者初非疾病毅然致为臣而归愿褒擢之拜监察御史奏乞威断当出于人主而所遣宣谕官当令举廉吏又言刑名有疑虑者令州郡法官申宪司阅实具奏以取裁决迁殿中侍御史论黄潜善卖官售宠罢之既与郑毅力争降封高宗事未几出知瑞州右正言吕祉奏朝廷今日缘论大臣移一言官明日罢一言官则后日大臣行事有失谁敢言者遂召为吏部郎改左司言朝廷比来深疾贪吏然州县之闲岂无廉介自将沈于下僚者宜命五使所至以廉洁清修可以师表吏民者以名来上参之公议不次升擢以厉士风从之迁检正中书门下省诸房公事与宰相议多不合不自安引疾求去诏直秘阁主管崇道观而归

△仇愈

仇愈字泰然益都人大观三年进士授邠州司法谳狱详恕多所全活为邓城令满秩耆幼遮泣不得去徙武陟令属朝廷方调兵数十万于燕山愈馈饷毕给时主将纵士卒过市掠物不予直他邑官逃避愈先期趣备申严约束遂以不扰已而愈送运饷于涿值大军溃于卢沟河囊橐往往委以资敌愈闲关营护无一毫弃失调高密丞俗尚鬻讼愈摄县事剖决如流事无淹夕猾吏杨葢每阴疏令过胁持为奸愈暴其罪黥之无不悦服州阙司录命愈摄事既行邑氓万余邀留至拥归县廨时天寒皆然火警守愈由它道得出或追拜马首曰公舍我去我必使公复来它日愈方白事郡牙忽数千人径夺以归守将不能遏剧寇起莱密闲素闻愈名戒其党毋犯高密境民赖以安密卒闭关叛掠害官吏几尽独噉曰无惊仇公南迁知建昌军入为考功员外郎时仕者宛转兵闲亡失告牒十常七八而铨部无案籍愬丐者甚多真伪错乱愈亲为考核其可据者悉责保识因上闻行之迁右司及中书门下检正诸房公事俄为沿海制置使明守与宰相厚善给言士卒将为变致遣精兵密捕统制官徐文觉之初谋纵军剽略顷之泛海去呼曰我以仇公故不杀人不焚屋庐一城晏然犹坐削两官主管太平观以淮西宣抚知庐州刘

豫子麟合金兵大入民情汹惧宣抚司统制张琦者冀乘危为乱驱居民越江南走欲先
胁愈出拥甲士数千突入露刃登楼扬白麾左右惊溃
迫愈上马愈徐谓曰若辈无守土责吾当以死殉国寇未至而逃人何赖焉坚不为动神
色无少异琦等错愕遽散其徒人心遂定时金人出入
近境愈求援于宣抚司不报又遣其子自闲道赴朝廷告急虽旌其子以官而援卒不至
帝方下诏亲征而诏亦不至淮甸喧言将弃两淮为保
江计愈录诏语揭之郡县读者至流涕咸思自奋监押阎仅死于贼余众来归州帑匱竭
无以为赏愈悉引班坐犒以酒食慰劳之众皆感励募
庐寿兵得数百益乡兵二千出奇直抵寿春城下敌三战皆北却走度淮其后麟复增兵
来寇愈复寿春俘馘甚众获旗械数千焚粮船百余艘
降渤海首领二人初金人围濠州旬日未下属天寒马多僵死乃悉众向淮东枢密使张
浚方视师金陵愈以策说之曰金重兵在淮东师老食
匱若以精兵二万一自寿阳一自汉上径趋旧京当不战而退继以大军尾击蔑有不济
者昔人谓一日纵敌数世之患愿无失时之悔浚不能
用麟复以步骑数千至合肥谍言乌珠为之殿人心怖骇不知所为会京西制置使遣牛
皋统兵适至愈顾左右曰召牛观察来击贼皋既至以
忠义撼之皋素勇甚以二千余骑驰出短兵相接所向披靡敌稍慑散而复集者三其副
徐庆忽坠马敌竞赴之皋掖以上手制数人因免胄大
呼曰我牛皋也尝四败乌珠可来决死寇畏其名遂自溃以愈克复守御功加徽猷阁待
制明年宣抚司始遣大将王德来时寇已去德谓其伍
曰当事急时吾属无一人渡江击贼今事平方至何面目见仇公耶德麾下多女真渤海
归附者见愈像不觉以手加额初宣抚司既不以一卒
援诸郡但令焚积聚弃城退保文移不绝于道又请浚督行之浚檄愈度其宜处之愈谓
残破之余兵食不给诚不能支敌然帅臣任一路之责
誓当死守今若委城使金人有淮西治兵舰于巢湖必貽朝廷忧力陈不可浚韪其言而
卒全活数州之众寻诏诣阙军民号送之改浙东宣抚
使知明州以挫豪强奖善良为理吏受赇虽一钱不贷奸猾敛迹州罹兵火既毁愈斥厨
钱助其费买田行乡饮酒礼岁饥发官储损其直民无
死徙朝廷闻之进秩一等再召进对帝亲加褒谕欲留寘近密言者以愈在郡多黥胥吏
为惨酷请授外藩时峒獠未息乃进直学士为湖南安
抚使禁盗铸钱者趣使为农物价既平商贾遂通数月召还加宝文阁学士陕西都转运
使时金人无故归侵疆其计叵测愈力陈非策固辞不
行秦桧方主和议以为异己落职以左朝奉郎少府少监分司西京全州居住起知河南
府未行金人果复陷所归郡邑如愈言乃复待制再知

明州改知平江府陞辞言我军已习战非复前日故刘锜能以少击众敌大挫衄若乘已振之势鼓行而前中原可传檄而定帝嘉之以言罢提举太平观积官至左朝议大夫爵益都县伯卒赠左通议大夫愍性至孝母没时方崎岖转徙居丧尽礼沿海制置使陈彦文荐于朝起复之不就端方挺特自初官讫通显无所附丽令邓城时丞相范宗尹方为邑子以文谒愍愍他日语其父是子公辅器也宗尹既当国未尝以私见在明州尝欲荐一幕官问曰君日费几何对以十口之家日用二千惊曰吾为郡守费不及此属僚所费倍之安得不贪遂止

△高登

高登字彦先漳浦人少孤力学持身以法度宣和闲为太学生金人犯京师登与陈东等上书乞斩六贼廷臣复建和议夺种师道李纲兵柄登与东再抱书诣阙军民不期而会者数万王时雍纵兵欲尽歼之登与十人屹立不动钦宗即位擢吴敏张邦昌为相敏又雪前相李邦彦无辜乞加恩礼起复之登上书曰陛下自东宫即位意必能为民兴除大利害人人翘足以待惟新之政柰何相吴敏张邦昌又纳敏党与之言播告中外将复用李邦彦太上皇久处邦彦等于政府纲纪紊乱民庶愁怨方且日以治安之言诱误上皇以致大祸仓皇南幸不获寔居主辱臣死此曹当尽伏诛今乃偃然自恣朋比为奸蒙蔽天日陛下从敏所请人心自此离矣凡五上书皆不报因谋南归忽闻邦昌各与远郡一时小人相继罢斥与所言偶合者十七八登喜曰是可以尽言矣复为书论敏未罢不报初金人至六馆诸生将遁去登曰君在可乎与林迈等请随驾隶聂山帐中而帝不果出金人退师敏遂讽学官起罗织屏斥还乡绍兴二年廷对极意尽言无所顾避有司恶其直授富川主簿宪董弇闻其名檄谯六郡狱复命兼贺州学事学故有田舍法罢归买马司登请复其旧守从之摄狱事有囚杀人守欲奏裁曰阴德可为登曰阴德岂可有心为之杀人者死而可幸免则被死之冤何时销满秩士民丐留不获相率馈金五十万不告姓名白于守曰高君贫无以养愿太守劝其咸受登辞之不可复无所归请置于学买书以谢士民归至广会新兴大饥帅连南夫檄发廩振济复为糜于野以食之愿贷者听所全活万计岁适大稔而偿亦及数民投牒愿留者数百辈因奏辟终其任召赴都堂审察遂上疏万言及时议六篇帝览而善之下六议中书秦桧恶其讥已不复以闻授静江府古县令道湖州守汪藻馆之藻留与修徽宗实录固辞或曰是可以阶改秩登曰但意未欲尔遂行广西帅沈晦问登何以治县登条十余事告之晦曰此古人之政今人诈疑不可行对曰忠信可行蛮貊谓不

能行诚不至尔豪民秦琥武断乡曲持吏短长号秦大
虫邑大夫以下为其所屈登至颇革而登喜其迁善补处学职它日琥有请属登谢却之
琥怒谋中以危法会有愬琥侵贷学钱者登白郡及诸
司寘之法忿而死一郡快之帅胡舜陟谓登曰古县秦太师父旧治实生太师于此盍建
祠祀之登曰桧为相亡状祠不可立舜陟大怒摭秦琥
事移荔浦丞康寔以代登登以母病去舜陟遂创桧祠而自为记且诬以专杀之罪诏送
静江府狱舜陟遣健卒捕登属登母死舟中藁葬水次
航海诣阙上书求纳官赎罪帝闵之故人有为右司者谓曰丞相云尝识君于太学能一
见终身事且无忧上书徒尔为也登曰某知有君父不
知有权臣既而中书奏故事无纳官赎罪仍送静江狱登归葬其母讫事诣狱而舜陟先
以事下狱死矣事卒照白广漕郑鬲赵不弃辟摄归善
令遂差考试摘经史中要语命题策闽浙水灾所致之由郡守季仲文即驰以达桧桧震
怒坐以前事承旨编管容州漳州遣使臣谢大作持省
符示登登读毕即投大作上马大作曰少入告家人无害也登曰君命不敢稽大作愕然
比夜巡检领百卒复至登曰若朝廷赐我死亦当拜敕
而后就法大作感登忠义为泣下奋剑叱巡检曰省符在我手中无它语也汝欲何为吾
当以死捍之鬲不弃亦坐镌一官登谪居授徒以给家
事一不介意惟闻朝廷所行事小失则颦蹙不乐大失则恸哭随之临卒所言皆天下大
计后二十年丞相梁克家疏其事以闻何万守漳言诸
朝追复迪功郎后五十年朱熹为守奏乞褒录赠承务郎登事其母至孝舟行至封康闲
阻风方念无以奉晨膳忽有白鱼跃于前其学以慎独
为本云

△娄寅亮

娄寅亮字陟明永嘉人政和二年进士为上虞丞建炎四年高宗至越寅亮上疏云
先正有言太祖舍其子而立弟此天下之大公周王梦
章圣取宗室育之宫中此天下之大虑也仁宗感悟其说诏英祖入继大统文子文孙宜
君宜王遭罹变故不断如带今有天下者独陛下一人
而已属者椒寝未繁前星不耀孤立无助有识寒心天其或者深戒陛下追念祖宗公心
长虑之所及乎崇宁以来谀臣进说独推濮王子孙以
为近属余皆谓之同姓遂使昌陵之后寂寥无闻奔迸蓝缕仅同民庶恐祀丰于昵仰违
天监太祖在天莫肯顾歆是以二圣未有回銮之期金
人未有悔祸之意中原未有息肩之日臣愚不识忌讳欲乞陛下于子行中遴选太祖诸
孙有贤德者视秩亲王俾牧九州岛以待皇嗣之生退处
藩服并选宣祖太宗之裔材武可称之人升为南班以备环卫庶几上慰在天之灵下系

人心之望帝读之感悟枢密富直柔荐之绍兴元年召
赴行在以其言宗社大计也既入见复申前疏之请望宣告大臣行之擢监察御史时相
秦桧以其直柔所荐恶之讽言者论寅亮匿父丧不举
下大理鞫问无实犹坐为族父冒占官户罢职送吏部由是坐废

△宋汝为

宋汝为字师禹丰县人靖康元年金人犯京师阖门遇害汝为思报国家及父兄之
讎建炎三年金人再至谒部使者陈边事遣对行在高
宗嘉纳特补修武郎假武功大夫开州刺史奉国书副京东运判杜时亮使金时刘豫节
制东平丞相吕颐浩因致书豫汝为行次寿春遇完颜
宗弼军不克与时亮会独驰入其壁将上国书宗弼盛怒劫而缚之欲加僇辱汝为一无
惧色曰死固不辞然衔命出疆愿达书吐一辞死未晚
宗弼顾汝为不屈遂解缚延之曰此山东忠义之士也命往见豫汝为曰愿伏剑为南朝
鬼岂忍背主不忠于所事力拒不行乃至京师濒死者
数四豫僭号汝为持颐浩书与之开陈祸福勉以忠义使归朝廷豫悚而立曰使人使人
使豫自新南归人谁直我独不见张邦昌之事乎业已
至此夫复何言即拘留汝为然以汝为儒士乃授通直郎同知曹州以诱之固辞遂连结
先陷于北者凌唐佐李亘李侁为心腹以机密归报朝
廷唐佐等所遣僧及卒为逻者所获汝为所遣王琬邵邦光善达朝廷皆官之绍兴十三
年汝为亡归作恢复方略献于朝且曰今和好难定计
必背盟不可遽弛时秦桧当国置不复问独礼部尚书苏符怜之为言于朝换宣教郎添
差通判处州高宗亿其忠特转通直郎汝为遂上丞相
书言用兵之道取胜在乎得势成功在乎投机女真乘袭取契丹之锐一旦长驱直捣京
阙升平既久人不知兵故彼得投其机而速发既而关
右河朔豪杰士民避地转鬪将士戮力勇气万倍愿当一战加以金人兵老气衰思归益
切是以去岁顺昌孤垒力挫敌锋此国家乘胜进战之
时也惜乎王师遽旋抚其机而不发遂未能成恢复之功今闻其力图大举转输淮北其
设意岂小哉乌珠不死兵革不休虽欲各保边陲安可
得也今当乘去岁淮上得胜之势特降哀痛之诏声言亲征约诸帅某月日各到东京協
谋并力以攻获乌珠为急又言乌珠好勇再起兵端所
恃者不过自能聚兵合势料王师以诸帅分军尔今计其步骑不过十万王师云集其众
数倍合势刻期并进戮力何忧乎不胜若以诸帅难相
统属宜除川陕一路专当萨里罕权合诸帅为两节制公选大臣任观军容为宣慰之职
往来调和诸帅使之上下同心左右戮力则势既合不
为敌所料矣不然分军出陈蔡直捣东都敌必首尾势分复以重兵急击然后以舟师自

淮繇新河入巨野泽以步兵自洛渡怀卫入太行山以
袭其内舟师入巨野则齐鲁摇步兵入太行则三晋应敌势虽欲合而不分亦难乎为计
矣久之有告汝为于金人以蜡书言其机事者大索不
获寻知南归桧将械送金人汝为变姓名为赵复徒步入蜀汝为身長七尺疏眉秀目望
之如神仙杨企道者遇之溪上企道曰必奇士也款留
之见其议论英发洞贯古今靖康闲离乱事厯言之企道惊遂定交假僧舍居之桧死汝
为曰朝廷除此巨蠹中原恢复有日矣企道劝其理前
事汝为慨然太息曰吾结发读书奋身一出志在为国复讎收还土宇颇为诸公所知命
繆数奇轧于权臣今老矣新进贵人无知我者汝为能
知死期尝祭其先终日大恸将终神色不乱汝为倅傥尚气节博物洽闻饮酒至斗余未
尝见其醉或歌或哭涕泣俱下其客蜀也史载之邵博
宇文亮臣李焘相得甚欢赵沂王京鲁关民先杨竑惠畴经纪其丧事三十二年其妻钱
莫知汝为死诣登闻鼓院以状进诏索之不得隆兴二
年其子南强以汝为之死哀愬于朝参知政事虞允文钱端礼以闻特官一子

△王信

王信字诚之处州丽水人既冠入太学登绍兴三十年进士第试中教官授建康府
学教授进所著唐太宗论赞及负薪论孝宗嘉叹特循
两资授太学博士时须次者例徙外添差温州教授郡饥疫议遣官振救之父老愿得信
任其事守不欲以烦信请益力信闻之欣然为行徧至
病者家全活不可胜记差敕令所删定官法令有不合人情自相抵牾吏得以傅会出入
者悉厘正之转对言敌情不可测和议不可恃今日要
当先为自备之策以待可乘之机帝以为是又论太学正录掌规矩之员多博士掌训导
之员少请以正录两员升为博士从之论除官臞冗之
弊乞精选监司而择籍名郡将代半岁乃注人帝亲以其章授宰臣行权考功郎官蜀人
张公迁初八年免铨至是改秩吏妄引言复令梃之信
钩考其故吏怖服有三蜀士实碍式吏受赇为地工部尚书赵雄蜀人也以属信信持弗
听已而转吏部阅审成牒嗟激不已以闻于帝它日帝
谓尚书蔡沈曰考功得王信铨曹遂清武臣给告不书年齿磨转荫荐肆为奸欺为擿最
者数事告宰相付之大理狱事连三衙殿帅王友直锐
争之帝审知其非沮之曰考功所言公事也汝将何为狱具皆伏辜因请置籍以梃后患
授军器少监仍兼考功郎官丁母忧吏愿无再为考功
起知永州入奏事留为将作少监复考功郎官转军器少监兼右司郎官升员外郎四方
有以疑狱来上者信反复披览常至夜分升左司员外
郎转对论士大夫趋向之弊居官者逃一时之责而后之祸患有所不恤献言者求一时

之合而行之可否有所不计集事者以趣办为能而不
为根本之虑谋利者以羨余为事而不究源流之实持论尚刻薄而寔失祖宗忠厚之意
革弊类烦碎而不明国家宽大之体愿酌古之道当时
之宜示好恶于取舍之闲使天下靡然知向又论朝廷有恤民之政而州县不能行恤民
之实水旱州郡租赋或蠲放或倚阁住催然倚阁住催
之名可以并缘为扰愿明与减放又论豫备三说收逃亡之卒选忠顺之官严训练之职
又言屯田利害帝皆纳其说兼玉牒所检讨官提领户
部酒库久之帝谕信曰知朕意否行用卿虑书生不长于财赋故以命卿果能副朕所委
为中书门下检正诸房文字迁太常少卿兼权中书舍
人假礼部尚书使于金肄射都亭连中其的金人駮曰尚书得非黑王相公子孙耶谓王
德用也归言金人必衰之兆有四在我当备之策有二
帝首肯之太史奏仲秋日月五星会于轸信言休咎之征史策不同然五星聚者有之未
闻七政共集也分野在楚愿思所以顺天而应之因条
上七事又言陛下即位之初经营中原之志甚锐然功之所以未立者正以所用之人不
一其人不一故其论不一其论不一故其心不一愿豫
求至当之论使归于一宦者甘昇既逐远之矣属高宗崩用治丧事人莫敢言昇俄提举
德寿宫信亟执奏举朝皆悚翰林学士洪迈适入帝语
之曰王给事论甘昇事甚当朕持白太上皇后圣训以为今一宫之事异于向时非我老
人所能任小黄门空多类不习事独昇可任责分吾忧
渠今已归居室尚不能有岂敢蹈故态以是驳疏不欲行卿见王给事可道此意信闻之
乃止信遇事刚果论奏不避权要繇此人多嫉之信亦
力求去提举崇福宫诏求言信条十事以献其目曰法戒轻变令贵必行宽州郡以养民
力修军政以待机会郡当分其缓急县当别其剧易严
铜钱之禁广积聚之备处归附之人收逃亡之卒起知湖州信未涉州县据按剖析敏如
流泉擢集英殿修撰知绍兴府浙东安抚使奏免逋官
钱十四万绢七万匹绵十万五千两米二千万斛山阴境有■〈犭英〉■〈犭茶〉湖
四环皆田岁苦潦信创启斗门导停瀦注之海筑十一
坝化汇浸为上腴民绘像以祠更其名曰王公湖筑渔浦堤禁民不举子买学田立义冢
众职修理加焕章阁待制徙知鄂州改池州初信扶其
父丧归自金陵草履徒行虽疾风甚雨弗避也由是得寒湿疾及闻孝宗遗诏悲伤过甚
疾复作至是寢剧上章请老以通议大夫致仕有星陨
于其居光如炬不及地数尺而散数日信卒遗训其子以忠孝公廉

△汪大猷

汪大猷字仲嘉庆元府鄞县人绍兴七年以父恩补官授衢州江山县尉晓畅吏事

登十五年进士第授婺州金华县丞争财者谕以长幼之礼悦服而退李椿年行经界法约束严甚檄大猷覆视龙游县大猷请不实者得自陈毋遽加罪改建德迁知昆山县差总领淮西江东钱粮干官改干办行在诸司粮料院参知政事钱端礼宣谕淮东辟干办公事充参议官迁大宗丞兼吏部郎官又兼户部右曹入对言总核名实责任臣下因才而任毋违所长量能授官毋拘流品孝宗顾谓左右曰疏通详雅而善议论有用之才也除礼部员外郎丞相洪适荐兼吏部侍郎仍迁主管左选庄文太子初建东宫兼太子左谕德侍讲两日一讲孟子多寓规戒太子尝出龙大渊禁中所进侍燕乐章谕宫僚同赋大猷曰郑卫之音近习为倡非讲读官所当预白于太子而止迁秘书少监修五礼会要兼权刑部侍郎又兼崇政殿说书又兼给事中孝宗清燕每访政事尝曰朕每厌宦官女子之言思与卿等款语欲知朝政阙失民情利病苟有所闻可极论之大猷遂陈耆长雇直隶总经制司并缘法意使里正兼催科之役厉民为甚又论亭户未尝煮盐居近场监贷钱射利隐寄田产害及编氓宜取一等以上充役又论赐田勋戚豪夺相先陵辄州县惟当赐金使自求之又论没入贖产止可行于强盗赃吏至于仓库纲运之负陷者惟当即其业收租以偿既足则给还使复故业转对言捕酒之害及居官者不得铸铜为器帝嘉奖曰卿前后所言皆今日可行之事权刑部侍郎升侍讲言有司卒用新制弃旧法轻重舛舛无所遵承使舞文之吏时出以售其奸请明诏编纂书成上进帝大悦尚书周执羔韩元吉枢密刘珙以强盗率不处死无所惩艾右司林栗谓太祖朝强盗赃满三贯死无首从不问杀伤景佑增五贯固从宽今设六项法非手刃人例奏裁黥配何所惩艾请从旧法赃满三贯者斩大猷曰此吾职也遂具奏曰强盗乌可恕用旧法而痛惩之固可也天圣以来益用中典寢失禁奸之意今所议六项法犯者以法行之非此而但取财惟再犯者死可谓宽严适中若皆寘之死地未必能禁其为盗盗知必死将甘心于事主矣望稍开其生路遂从大猷议借吏部尚书为贺金国正旦使至盱眙得印榜云强盗止用旧法罢六项法还朝自劾求去帝闻之复行六项法改权吏部侍郎兼权尚书以言去绶敷文阁待制提举太平兴国宫起知泉州毘舍邪尝掠海滨居民岁遣戍防之劳费不貲大猷作屋二百区遣将留屯久之戍兵以真腊大贾为毘舍邪犯境大猷曰毘舍邪面目黑如漆语言不通此岂毘舍邪耶遂遣之故事蕃商与人争鬪非伤折罪皆以牛贖大猷曰安有中国用岛夷俗者苟在吾境当用吾法三佛齐请铸铜瓦三万诏泉广二州守臣督造付之大猷奏法铜不下海中国方禁销

铜柰何为其所役卒不与进敷文阁直学士留知泉州
改知隆兴府江西安抚使以大暑讨永新禾山洞寇不利自劾降龙图阁待制落职南康
军居住提举太平兴国宫复龙图阁待制提举上清太
平宫复敷文阁待制升学士卒赠二官大猷与丞相史浩同里又同年进士未尝附丽以
干进浩深叹美之好周施叙宗族外族为兴仁录率乡
人为义庄众皆欣劝

△袁燮

袁燮字和叔庆元府鄞县人生而端粹专静少长读东都党锢传慨然以名节自期
入太学登进士第调江阴尉浙西大饥常平使罗点属
任振恤燮命每保画一图田畴山水道路悉载之而以居民分布其闲凡名数治业悉书
之合保为都合都为乡合乡为县征发争讼追胥披图
可立决以此为荒政首除沿海制属熹宗即位以太学正召时朱熹诸儒相次去国丞相
赵汝愚罢燮亦以论去自是党禁兴矣嘉定初召主宗
正簿枢密院编修官累迁司封郎官因对言陛下即位之初委任贤相正士鳞集而窃威
权者从旁睨之彭龟年逆知其必乱天下显言其奸龟
年以罪而去权臣遂根据几危社稷陛下追思龟年盖尝临朝太息曰斯人犹在必大用
之固已深知龟年之忠矣今正人端士不乏愿陛下常
存此心天下何忧不治臣昨劝陛下勤于好问而圣训有曰问则明夫既知如是而明则
当知反是而闇迁国子司业秘书少监进祭酒秘书监
延见诸生必迪以反躬切己忠信笃实是为道本兼崇正殿说书除礼部侍郎兼侍读时
史弥远主和燮争益力台论劾燮罢之以宝文阁待制
提举鸿庆宫起知温州进直学士奉祠以卒燮初入太学陆九龄为学录同里沈焕杨简
舒璘亦皆在学以道义相切磨后见九龄之弟九渊发
明本心之指乃师事焉学者称之曰洁斋先生后谥正献子甫自有传

△吴柔胜

吴柔胜字胜之宣州人幼听其父讲伊洛书已知有持敬之学不妄言笑长游郡泮
人皆惮其方严登淳熙八年进士第调都昌簿丞相赵
汝愚知其贤差嘉兴府学教授将真之馆阁会汝愚去御史汤硕劾柔胜尝救荒浙右擅
放田租为汝愚收人心且主朱熹之学不可为师儒官
自是闲居十余年嘉定初主管刑工部架阁文字迁国子正柔胜始以朱熹四书与诸生
诵习讲义策问皆以是为先又于生徒中得潘时举吕
乔年白于长擢为职事使以文行表率于是士知趋向伊洛之学晦而复明迁太学博士
又迁司农寺丞出知随州时再议和好尤戒开边隙旁
塞之民事与北界相涉不问法轻重皆杀之郡民梁皋有马为北人所盗追之急北人以

矢拒皋皋与其徒亦发二矢北界以为言郡下七人于
狱柔胜至立破械纵之具始末报北界而已收土豪孟宗政扈再兴隶帐下后宗政再兴
皆为名将筑随州及枣阳城招四方亡命得千人立军
曰忠勇廩以总所阙额营栅器械悉备除京西提刑领州如故改湖北运判兼知鄂州甫
至值岁歉即乞余于湖广大讲荒政十五州被灾之民
全活者不可胜计改知太平州除秘阁修撰主管亳州明道宫卒谥正肃二子渊潜俱登
进士各有传

△游仲鸿

游仲鸿字子正果之南充人淳熙二年进士第初调犍为簿李昌图总蜀赋辟余买
官奇其才曰吾董饷积年惟得一士召入首荐之擢四
川制置司干办公事见重于制置使赵汝愚叙州董蛮犯犍为境宪将合兵讨之仲鸿请
行诘其衅端以州负马直也乃使人谕蛮曰归俘则还
马直不然大兵至矣蛮听命仲鸿受其降而归改秩知中江县总领杨辅檄置幕下时关
外营田凡万四千顷亩仅输七升仲鸿建议请以兵之
当汰者授之田存赤籍迟以数年汰者众耕者多则横敛一切之赋可次第以减辅然之
大将吴挺沮而止赵汝愚移帅闽举仲鸿自代制置使
京镗转运刘光祖亦交荐于朝绍兴四年赴召赵汝愚在枢密谓仲鸿直谅多闻访以蜀
中利病汝愚欲亲出经略西事仲鸿曰宥密之地斡旋
者易公独不闻吕申公经略西事当在朝廷之语乎汝愚悟而止差干办诸司粮料院光
宗以疾久不朝重华宫仲鸿遗汝愚书陈宗社大计书
有伊周霍光语汝愚读之骇立焚之不答又遗书曰大臣事君之道苟利社稷死生以之
既不死曷不去汝愚又不答孝宗崩仲鸿泣谓汝愚曰
今惟有率百官哭殿庭以请亲临宰相留正以病去仲鸿亟简汝愚曰禫日不决祸必起
矣汝愚又不答后三日嘉王即位于重华宫汝愚既拜
右丞相以仲鸿久游其门辟嫌不用初汝愚之定策也知阁韩侂胄颇有劳望节钺汝愚
不与侂胄方居中用事恚甚汝愚迹已危方益自严重
选人求见者例不许仲鸿劝以降意容接觐谒异论而汝愚以淮东西总赋积弊奏遣仲
鸿核实仲鸿曰丞相之势已孤不忧此而顾忧彼耶改
监登闻鼓院以行会侍讲朱熹以论事去国仲鸿上疏曰陛下宅忧之时御批数出不由
中书前日宰相留正之去去之不以礼谏官黄度之去
去之不以正近臣朱熹之去复去之不以道自古未有舍宰相谏官讲官而能自为聪明
者也愿亟还熹毋使小人得志以养成祸乱监察御史
胡纆希侂胄意诬汝愚久蓄邪心尝语人以乘龙授鼎之梦又谓朝士中有推其宗派以
为裔出楚王元佐正统所在者指仲鸿也初欲直书仲

鸿名同台张孝伯见之曰书其名则窜之矣凡阿附宰相本冀官爵此人沈埋六院且二年心迹可察卒不书其名庆元元年汝愚罢相仲鸿迁军器监主簿力丐外除知洋州朱熹闻其出曰信蜀士之多奇也越三年起知嘉定府擢利路转运判官数忤宣抚副使吴曦曦言仲鸿老病朝命易他部未几曦叛宣抚司幕官薛绂访仲鸿于果山仲鸿对之泣指案上一编书示绂曰开禧丁卯正月游某死谓家人曰曦逼吾死即填其日时宣抚大使程松已弃其师遁仲鸿以书劝成都帅杨辅讨贼辅不能用至是松至果仲鸿谓绂曰宣威肯留则吾以积奉二万缗犒兵护宣威之成都松不顾而去总赋刘崇之继至仲鸿遣其子偁往见以告松者告之崇之复不听未几曦诛参政李璧奏除利路提点刑狱寻乞休致予祠而归迁中奉大夫嘉定八年卒年七十八刘光祖表其隧道曰于乎庆元党人游公之墓绍定五年谥曰忠子偁淳佑五年为右丞相各有传

△李祥

李祥字符德常州无锡人隆兴元年进士为钱塘县主簿时姚宪尹临安俾摄录参选者以巧发为能每事下有司必监视锻炼囚服乃已尝诬告一武臣子谤朝政鞠于狱祥不使选者入门既而所告无实具以白尹尹惊曰上命无实乎祥曰即坐谴自甘宪具论如祥意帝骇曰朕几误矣卿吾争臣也遂赐宪出身为谏大夫祥调濠州录事参军安丰守臣冒占民田讼屡攻而不决监司委祥卒归之民累迁军器少监提举淮东常平茶盐淮西运判两淮铁钱比不定祥疏乞官赐钱米销滥恶者废定城兴国汉阳监更铸绍兴新钱从之迁国子司业宗正少卿国子祭酒丞相赵汝愚以言去国祥上疏争之曰顷寿皇崩两宫隔绝中外汹汹留正弃印亡去国命如发汝愚决策立陛下天下复安社稷之臣也柰何使精忠臣节怫郁黯闇何以示后世除直龙图阁湖南运副言者劾罢之于是太学诸生杨宏中周端朝等六人上书留之俱得罪主冲佑观再请老以直龙图阁致仕嘉泰元年八月卒谥肃简

△王介

王介字符石婺州金华人从朱熹吕祖谦游登绍熙元年进士第廷对陈时弊大略言近者罢拾遗补阙有远谏之意小人倡为朋党有厌薄道学之名帝嘉其直擢居第三人签书昭庆军节度判官厅公事除为国子录上疏言寿皇亲挈神器授之陛下孝敬岂可久阙乎又言妇事舅姑如事父母不可亏宫中之礼不报孝宗崩介又力请帝过宫报丧累疏激切人叹其忠熹宗即位介上疏言陛下即位未三月策免宰相迁

易台諫悉出内批非治世事也崇寧大观闲事出御批遂成北狩之祸杜衍为相常积内降十数封还今宰相不敢封纳台諫不敢弹奏此岂可久之道迁太学博士时韩侂胄居中潜弄威福之柄犹未肆也而文墨论议之士阴附之以希进于是始无所惮矣侂胄始疑介前封事诋己且其弟仰胄尝以旧职求自通介拒绝之侂胄怨益深添差通判绍兴府寻知邵武军会学禁起諫大夫姚愈劾介与袁燮皆伪学之党且附会前相汝愚主管台州崇道观久之差知广德军侂胄之隶人苏师旦忿介不通谒目为伪党并及甲寅廷对之语以告侂胄有劝其自明者介曰吾发已种种岂为鼠辈所使邪侂胄亦畏公议不敢发知饶州未赴召为秘书郎迁度支郎官师旦已建节介与同列谒政府遇之于庭客皆踰阶而揖介不顾于是殿中侍御史徐榘劾介资浅立异奉祠除都大坑冶侂胄诛朝廷更化介召还除侍左郎官兼右司太子舍人累迁国子祭酒会以不雨诏百官指陈阙失时宰相史弥远以母丧起复介手疏历论时政推本洪范僭恒旻若之证又言汉法天地降灾策免丞相乞令弥远终丧择公正无私者置左右王吕蔡秦之覆辙可以为戒接送伴金国贺生辰使还奏故事两国通庙讳御名而本朝止通御名高宗至光宗皆传名而不传讳绍熙初黄裳尝以为言而未及厘正愿正典礼以尊宗庙除秘书监升太子右谕德其在春宫笃意辅导每遇讲读因事规諫太子尝欲索馆中图画却而弗与及张灯设乐则諫止之且乞选配故家以正始绝令旨以杜请谒宫僚分日上直以资见闻迁宗正少卿兼权中书舍人缴驳不避权贵张允济以合职为州铃介谓此小事而用权臣例破祖宗制不可不封还词头丞相语介曰此中宫意介曰宰相而逢宫禁意向给舍而奉宰相风旨朝廷纪纲扫地矣居数日除起居舍人介奏宰相以私请不行而托威福于宫禁权且下移谁敢以忠告陛下者乞归老不许言本朝循唐入阁之制左右史不立前殿若御后殿则立朵殿下何所闻见而修起居注乎乞依欧阳修王存胡铨所请分立殿上吏部侍郎许奕以言事去国介奏曰陛下更化三年而言事官去者五人倪思傅伯成既去其后蔡幼学邹应龙相继而出今许奕复蹈前辙此五臣者四为给事一为諫大夫两年之闲尽听其去或谓此皆宰相意自古未有大臣因给舍论事而去之者是大臣误陛下也将恐成孤立之势疏奏乞补外以右文殿修撰知嘉兴府岁余升集英殿修撰知襄阳府京西安抚使徙知庆元府兼沿海制置使以疾奉祠嘉定六年卒年五十六端平三年郡守赵汝谈请于朝特赠中大夫宝章阁待制谥忠简子埜自有传

△宋德之

宋德之字正仲其先京兆人隋谏大夫远谪彭山子孙散居于蜀遂为蜀州人德之以应举擢庆元二年外省第一为山南东道掌书记召除国子正迁武学博士与诸生论八阵之象本乎八卦皆动物也奇正之变往来相生而不穷知此然后可以致胜迁编修枢密院时兵衅有萌会赤眚见太阴犯权星未浹日内北门■〈氏鸟〉尾灾延及三省六郡诏求言德之奏离为火为日为甲冑坎为水为月为盗为隐伏故火失其性赤气见忧在甲兵水失其性太阴失度忧在隐伏因疏七事皆当今至切之患乃曰人火小变不足虑天象之变臣窃危之他日又曰今敌未动而轻变祖宗常制命武臣帅边以自遗患晋叛将唐藩镇之祸基于此矣时吴曦在西陲皇甫斌在襄阳郭倪李爽在两淮德之预以为虑除太常丞出知阆州会曦变托跌足以避伪事平始赴阆擢本路提点刑狱制帅安丙奏德之傲视君命不俟代者之来径用观察使印领事诏降一官改潼川路转运判官湖南路提刑改湖北召为兵部郎官朝论有疑安丙意丞相史弥远首以问德之德之对曰蜀无安丙朝廷无蜀矣人有大功实不敢以私嫌废公议忤时相意遂罢安丙深感德之尝谓人曰丙不知正仲正仲知丙丙负正仲正仲不负丙请昏于德之不许论者益称德之之贤起知眉州监特奏名试得疾而卒德之大父耕性刚介一朝弃官去莫知所终从父廉语德之曰吾昔至临安府有人言蜀有宋宣教者过浙江而去吾适越求之则入四明矣德之渡浙江寻访至雪窦有蜀僧言闻诸耆老云山后有烂平山有三居士焉其一宋宣教也德之跻攀至烂平见丹灶置祠其上而归

△杨大全

杨大全字浑甫眉之青神人干道八年进士调温江尉摄邑有政声绍熙三年召除监登闻鼓院五年光宗以疾久不克省重华宫廷臣多论谏者太学生汪安仁等二百余人上书而龚日章等百余人以投匭上书为缓必欲伏阙大全谓院以登闻名实明目达聪之地也今乃使人视为具文吾以何颜尸此职乃为书以谏力请过宫不报大全于是三上疏其略曰陛下自夏秋以来执政从官之死者皆不信卒之果然乎不然乎建康赵济死武兴吴挺死今尚不以为然则事有几微于朕兆者可谏陛下乎万一变起萧墙祸生肘腋陛下必将以为不信坐受其危亡矣外闲传闻以为寿皇将幸越幸吴兴此爱陛下之深欲泯其迹也陛下当亟图所以解寿皇之忧疏入又不报宁宗即位迁宗正寺主簿庆元元年易宗正寺主簿迁司农寺丞修高宗实录充检讨官先是韩侂胄用事私台谏之选为己羽翼且欲得知名士借其望以压羣言一时之好

进者恨不预此选也会御史虚位有力荐大全者属大全一往见且曰公朝见除目夕下矣大全笑谢决不往明日遂丐外时实录将上帝必推恩大全去不少待于是除知金州至姑苏以病卒

钦定续通志卷三百九十四

●钦定续通志卷三百九十五

列传

宋【九十九】

○宋九十九

辛弃疾 何异 刘宰 刘燠 柴中行

辛弃疾

何异

刘宰

刘燠

柴中行

△辛弃疾

辛弃疾字幼安齐之历城人少师蔡伯坚与党怀英同学号辛党始筮仕决以著怀英遇坎因留事金弃疾得离遂决意南归海陵殂中原豪杰并起耿京聚兵山东称天平节度使节制山东河北忠义军马弃疾为掌书记即劝京决策南向僧义端者喜谈兵弃疾闻与之游及在京军中义端亦聚众千余说下之使隶京义端一夕窃印以逃京大怒欲杀弃疾弃疾曰苟我三日期不获就死未晚揣僧必以虚实奔告金帅急追获之义端曰我识君真相乃青兕也力能杀人幸勿杀我弃疾斩其首归报京益壮之绍兴三十二年京令弃疾奉表归宋高宗劳师建康召见嘉纳之授承务郎天平节度掌书记并以节使印告召京会张安国邵进已杀京降金弃疾还至海州与众谋曰我缘主帅来归朝不期事变何以复命乃约统制王世隆及忠义人马全福等径趋金营安国方与金将酣饮即众中缚之以归金将追之不及献俘行在斩安国于市仍授前官改差江阴佥判弃疾时年二十三干道四年通判建康府六年孝宗召对延和殿时虞允文当国帝锐意恢复弃疾因论南北形势及三国晋汉人才持论劲直不为迎合作九议并应问三篇美芹十论献于朝言逆顺之理消长之势技之长短地之要害甚备以讲和方定议不行迁司农寺主簿出知滁州州罹兵烬井邑凋残弃疾宽征薄赋招流散教民兵议屯田乃剏奠枕楼繁雄馆辟江东安抚司参议官留守叶衡雅重之衡入相力荐弃疾慷慨有大略召见迁仓部郎官提点江西刑狱平剧盗赖文政有功

加秘阁修撰调京西转运判官差知江陵府兼湖北安
抚迁知隆兴府兼江西安抚以大理少卿召出为湖北转运副使改湖南寻知潭州兼湖
南安抚益连起湖湘弃疾悉讨平之疏曰比年李全赖
文政陈子明李峒相继窃发皆能一呼啸聚千百杀掠吏民死且不顾至烦大兵翦灭良
由田野之民郡以聚敛县以科率吏以乞取豪民以兼
并盗贼以剽夺害之夫民为国本而贪吏迫使为盗今年剿除明年划荡譬之木焉日刻
月节不损则折望陛下申飭州县以惠养元元为意有
违法贪冒者使诸司各扬其职无徒按举小吏以应故事又以湖南控带二广与溪峒蛮
獠接连草窃闲作岂惟风俗顽悍实武备空虚所致乞
依广东摧锋荆南神劲福建左翼例别勦一军以湖南飞虎为名止拨属二牙密院专听
帅臣节制调度庶使夷獠知有军威望风慑服诏委以
规画乃度马营殷垒故基起葢砦栅招步军二千人马军五百人僉人在外战马铁甲皆
备先以缗钱五万于广西买马五百匹诏广西安抚司
岁带买三千匹时枢府数沮挠之弃疾行愈力卒不能夺经度费巨万计弃疾善斡旋事
皆立办议者以聚敛闻降御前金字牌俾日下住罢弃
疾受而藏之出责监办者期一月飞虎营栅成违坐军制如期落成开陈本末绘图缴进
帝遂释然时秋霖几月所司言造瓦不易问须瓦几何
曰二十万弃疾令厢官自官舍神祠外应居民家取沟■〈匚外敢内〉瓦二不二日皆
具僚属叹伏军成雄镇一方为江上诸军之冠加右文
殿修撰差知隆兴府兼江西安抚时江右大饥诏任责荒政始至榜通衢曰闭籴者配强
籴者斩次令尽出公家官钱银器召官吏儒生商贾市
民各举有干实者量借钱物逮其责令运籴不取子钱期终月至城下发棗于是连檣而
至其直自减民赖以济时信守谢源明乞米救助幕属
不从弃疾曰均为赤子皆王民也即以米舟十之三予信帝嘉之进一秩以言者落职久
之主管冲佑观绍熙二年起福建提点刑狱召见迁大
理少卿加集英殿修撰知福州兼福建安抚使弃疾为宪时尝摄帅每叹曰福州前枕大
海为贼之渊上四郡民顽犷易乱帅臣空竭急缓柰何
至是务为镇静未期岁积镪至五十万缗榜曰备安库谓闽中土狭民稠岁俭则籴于广
今幸运稔宗室及军人入仓请米出即棗之候秋价贱
以备安钱籴二万石则有备无患又欲造万铠招强壮补军额严训练则盗贼可以无
虞事未行台臣王藺劾其用钱如泥沙杀人如草芥旦
夕望端坐闽王殿遂丐祠归庆元元年落职四年复主管冲佑观久之起知绍兴府兼浙
东安抚使宁宗召见言盐法加宝谟阁待制提举佑神
观奉朝请寻差知镇江府进宝文阁待制又进龙图阁知江陵府令赴行在奏事试兵部

侍郎辞免进枢密院都承旨未受命卒赐对衣金带守
龙图阁待制致仕特赠四官弃疾豪爽尚气节识拔英俊所交多海内知名士尝跋绍兴
闲诏书曰使此诏出于绍兴之前可以无事讎之大耻
使此诏行于兴隆之后可以卒不世之大功帅长沙时士人或愬考试官滥取第十七名
春秋卷弃疾察之信然索亚榜春秋卷两易之启名则
赵鼎也弃疾怒曰佐国元勋忠简一人胡为又一赵鼎擲之地次阅礼记卷弃疾曰观其
议论必豪杰士也此不可失启之乃赵方也尝谓人生
在勤当以力田为先北方之人养生之具不求于是以无甚富甚贫之家南方多末作
以病农而兼并之患兴贫富斯不侔矣故以稼名轩为
大理卿时同僚吴交如死无棺敛弃疾叹曰身为列卿而贫若此是廉介之士也既厚贖
之复言于执政诏赐银绢弃疾尝同朱熹游武夷赋九
曲棹歌熹书克己复礼夙兴夜寐题其二斋室熹歿伪学禁方严门生故旧至无送葬者
弃疾为文往哭之曰所不朽者垂万世名孰谓公死凛
凛犹生弃疾雅善长短句悲壮激烈绍定六年赠光禄大夫咸淳闲史馆校勘谢枋得遇
弃疾墓旁僧舍有疾声大呼于堂上若鸣其不平自昏
暮至三鼓不绝声枋得秉烛作文旦且祭之文成而声始息德佑初枋得请于朝加赠少
师谥忠敏

△何异

何异字同叔抚州崇仁人绍兴二十四年进士调石城主簿知萍乡县丞相周必大
参政留正以院辖拟异孝宗问有无列荐正等以萍乡
政绩对乃迁国子监主簿迁丞转对所言帝喜之曰君臣一体初不在事形迹有所见闻
于银台司缴奏擢监察御史异奏与丞相留正旧同官
不敢供职御札不许引嫌遂拜命迁右正言时光宗愆于定省异入疏谏不报约台官联
名言奸人离闲父子当明正典刑又不报旬外授湖南
转运判官偶摄帅事长蛮侵扰邵阳异募山丁捕首乱者蒲来矢以众来降寻为浙西提
点刑狱累迁权礼部侍郎太常寺太庙芝草生韩侂胄
率百官观焉异谓其色白虑生兵妖侂胄不悦又以刘光祖于异交密言者遂以异在言
路不弹丞相留正及受赵汝愚荐劾罢之久乃予祠起
知夔州兼本路安抚异以夔民土狭食少同转运司余米椿积立循环通济仓七月丙戌
西北有星白芒坠地其声如雷异曰戌日酉时火土交
会而妖星自东南冲西北化为天狗蜀其将有兵乎旬祠以宝谟阁待制提举太平兴国
宫后四年吴曦果叛起知潭州乞闲予祠者再嘉定元
年召为刑部侍郎五月不雨异上封事言近日号令或从中出而执政不得与闻其事台
谏不得尽行其言陛下闵念饥民药病殍死遐荒僻峽

安得实惠多方称提不如缩造楮币阜通商米不如稍宽关市之征明年权工部尚书告老抗章言近臣求去类成虚文无以为风俗廉耻之劝以宝章阁直学士知泉州从所乞予祠进宝章阁学士转一官致仕卒年八十有一异高自标致有诗名

△刘宰

刘宰字平国金坛人既冠入乡校卓然不苟于去就取舍绍兴元年举进士调江甯尉江甯巫风为盛宰下令保伍互相纠察往往改业为农岁旱帅守命振荒邑境多所全活有持妖术号真武法穿云子宝华主者皆禁绝之书其座右曰毋轻出文引毋轻事榷楚缘事出郊与吏卒同疏食水饮去官惟篋藏主簿赵师秀酬倡诗而已调真州司法诏仕者非伪学不读周惇颐程颐等书才得考试宰喟叹曰平生所学者何卒弗与状授泰兴令有杀人狱具谓禱于丛祠以杀一人刃忽三跃乃杀三人是神实杀我也为请之州毁其庙斩首以徇邻邑有租牛县境者租户于主有连姻因丧会窃券而逃他日主之子征其租则曰牛鬻久矣子累年讼于官无券可质官又以异县置不问至是愬于宰宰曰牛失十载安得一旦复之乃召二勾者劳而语之故托以它事系狱鞠之勾者自诡盗牛以卖遣诣其所验视租户曰吾牛因某氏所租勾者辞益力因出券示之相持以来盗券者恍然为归牛与租富室亡金钗惟二仆妇在置之有司咸以为冤命各持一芦曰非盗钗者诘朝芦当自若果盗则长于今二寸明旦视之一自若一去其芦二寸矣讯之伏罪有姑愬妇不养者二召二妇并姑置一室或饷其妇而不及姑徐伺之一妇每以己饷馈姑姑犹呵之其一反之如是累日遂得其情韩侂胄方谋用兵宰适在京启邓友龙薛叔似极言轻挑兵端为国深害迄如其言为浙东仓司干官执事修举亟引去默观时变顿不乐仕寻告归监南岳庙屡辞辟召以直秘阁主管仙都观拜改秩予祠之命辞秘阁不允端平元年升直宝谟阁祠如故且尽还磨勘岁月未几迁太常丞郡守以朝命趣行不得已勉就道至吴门拜疏径归一时誉望收召略尽所不能致者宰与崔与之耳帝侧席以问侍御史王遂且俾宣抚迁将作少监又以直敷文阁知盩厔府皆不拜进直显谟阁主管玉局观帝犹冀宰一来也召奏事讫不为起寻卒乡人罢市走送袂相属者五十里宰刚大正直明敏仁恕施惠乡邦置义仓创义役三为粥以与饥者自冬徂夏日食凡万余人薪粟衣纩药饵棺衾之类靡谒不获某无田可耕某无庐可居某之子女长矣而未婚嫁皆汲汲经理桥有病涉路有险阻虽巨役必捐贖先倡而程其事宰生理素薄见义必为既竭其力藉质贷以继之若定折麦钱额更县斗斛

如制毁淫祠八十四所凡可以白于有司利于乡人者
无不为之隐居三十年无嗜好惟书靡所不读虽博考训注多所自得云

△刘燠

刘燠字晦伯建阳人与弟韬仲受学于朱熹吕祖谦干道八年举进士调山阳主簿燠正版权吏不容奸调饶州录事通判黄奕将以事污燠而已自以赃抵罪去都大坑冶耿某闵遗骸暴露议用浮屠法葬之水火燠贻书曰使死者有知祸亦惨矣请择高阜为丛冢以葬调连城令罢添给钱及纲运例钱免上供银钱及纲本二税甲叶钞盐军期米等钱大修学校乞行经界改知闽县治以清简庭无滞讼兴利去害知无不为差通判潭州未上丁父忧伪学禁兴燠从熹武夷山讲道读书怡然自适调赣州坑冶司主管文字差知德庆府大修学校奏便民五事又奏罢两县无名租钱纠集武勇民兵入奏言前者北伐之役执事者不度事势贻陛下忧今虽从和议愿益恐惧修省必开言路以广忠益必张公道以进人才必饬边备以防敌患提举广东常平令守臣岁以一半易新春末支及冬复偿存其半以备缓急逋欠亭户钱十万转运司五万燠以公使公用二库赢钱补之奏义仓客丁钱小官奉给举留守令吏商各弊召入首论公道明则人心自一朝廷自尊虽危可安也公道废则人心自二朝廷自轻虽安易危也帝嘉奖迁尚书左郎官请节内外冗费以收楮币转对言愿于经筵讲读大臣奏对反复问难以求义理之当否与政事之得失则圣学进而治道隆矣乞收拾人才及修明军政迁浙西提点刑狱巡按不避寒暑多所平反有杀人而匿权家者吏弗敢捕燠竟获之迁国子司业言于丞相史弥远请以熹所著论语中庸大学孟子之说以备劝讲正君定国慰天下学士大夫之心奏言乞罢伪学之诏息邪说正人心宗社之福又请以熹白鹿洞规颁示太学取熹四书集注刊行之又言浙西根本之地宜诏长吏监司禁戢强暴抚柔善良务储积以备凶荒禁科敛以纾民力兼国史院编修官实录院检讨官接伴金使于盱眙军还言两淮之地藩蔽江南干戈盗贼之后宜加经理必于招集流散之中就为足食足兵之计臣观淮东其地平博膏腴有陂泽水泉之利而荒芜实多其民劲悍勇敢习边鄙战鬪之事而安集者少诚能经画郊野招集散亡约顷亩以授田使毋广占抛荒之患列沟洫以储水且备戎马驰突之虞为之具田器贷种粮相其险易聚为室庐使相保护联以什伍教以击刺使相纠率或乡为一团里为一队建其长立其副平居则耕有警则守有余力则战帝嘉纳之进国子祭酒兼侍立修注官论贡举五弊兼权兵部侍郎改兼权刑部侍郎封建阳县开国男赐食邑权刑部侍

郎兼国子祭酒兼太子左谕德升同修国史实录院同
修撰时廷臣争务容默有论事稍切者众辄指以为异爚奏愿明诏大臣崇奖忠谏以作
士气深诫谀佞以肃具僚乞择州县狱官冬雷帝恐惧
爚奏遴选监司以考察贪吏为先访求民瘼有泽未下流令未便民者悉以实上变而通
之则民心悦而天意解矣又请择沿途边诸将兼工部
侍郎奏乞使沿边之民各自什伍教阅于乡有急则相救援无事则耕稼自若军政隐然
寓于田里之闲此非止一时之利也请城沿边州郡罢
遣贺正使试刑部侍郎兼职依旧赐对衣金带辞不允两请致仕不允奏绝金人岁币建
制置司于历阳以援两淮夏旱应诏上封事曰言语方
壅而导之使言人心方郁而疏之使通上既开不讳之门下必有尽言之士指陈政事之
阙失明言朝廷之是非或者以为好名要誉而陛下听
之则苦言之药至言之实陛下弃之而不恤甘言之疾华言之腴陛下受之而不觉矣乞
罢瑞庆圣节谢绝金使进封子爵权工部尚书赐衣带
鞍马兼太子右庶子仍兼左谕德每讲读至经史所陈声色嗜欲之戒辄恳切再三敷陈
之卒赠光禄大夫官其后赐谥文简

△柴中行

柴中行字与之余于人绍熙元年进士授抚州军事推官权臣韩侂胄禁道学校文
转运司移檄令自言非伪学中行奋笔曰自幼读程颐
书以收科第如以为伪不愿考校调江州学教授母丧免广西转运司辟为干官帅将荐
之使其客尝中行中行正色曰身为大帅而称人为恩
主恩相心窃耻之毋污我摄昭州郡事蠲丁钱减苗斛振饥羸转运司委中行代行部由
桂林属邑历柳象宾入邕管问民疾苦先行而后闻捐
盐息以惠远民嘉定初差主管尚书吏部架阁文字迁太学正升博士转对首论主威夺
而国势轻次论士大夫寡廉隅之骨鲠宜养天下刚毅
果敢之气末论权臣用事苞苴成风新旧习犹在宜举行先朝痛绳赃吏之法谓太学风
化首童子科覆试胄子舍迁有挟势者中行力言于长
守法无秋毫私迁太常主簿转军器监丞出知光州严保伍精阅习增辟屯田城濠营砦
器械糗粮百尔具备治行为淮右最又条画极边次边
缓急事宜上之朝廷大槩谓边兵宜如蛇势首尾相应敌或合兵大入则邻道援之分兵
轻袭则邻郡援之援兵既多虽危不败又言淮襄土豪
丁壮往者用兵倾赀效力者朝廷吝赏失信宜亟加收拾亦可激昂得其死力迁西京转
运使兼提点刑狱中行谓襄阳乃自古必争之地修御
尤宜周密时任边寄者政令烦苛日夜与民争利中行讽之不听天方旱尽捐酒税斥征
官黥务吏甘澍随至官取盐钞羸过重课日增入中日

寡钞日壅中行揭示通衢一钱不增商贾大集改直秘阁知襄阳兼京西帅仍领漕事江陵戎司移屯襄州兵政久弛中行白于朝考核军实旧额二万二千人存者纔半亟指补虚籍自是朝廷以节制之权归帅司重劾李珣不法以惩贪守明扈再兴有功以厉宿将迁江东转运司判官旋改湖南提点刑狱豪家习杀人或收养亡命横行江湖一绳以法华亭令贪虐法从交疏荐之中行笑曰此欲断吾按章也卒发其辜入为吏部郎官言好进好同好欺士大夫风俗三弊选曹法大坏吏缘为奸中行遇事持正不为势屈由是铨综平允擢宗正少卿上疏谓陛下初政则以刚德立治本更化则以刚德除权奸顾乃垂拱仰成安于无为夫刚德实人主之大权不可以久出而不收覆辙在前良可鉴也又曰朝廷用人外示涵洪而阴掩其迹内用牢笼而微见其机观听虽美实无以大服天下之心臣下纳说非观望则希合非回缓则畏避而面折廷诤之风未之多见此任事大臣之责也兼国史编修实录检讨孟春大雨震雷雷雹交作边烽告急至失地丧师淮甸震汹中行亟奏内外二失朝廷十忧大要言今日之事人主尽委天下以任一相一相尽以天下谋之三数腹心而举朝之士相视以目噤不敢言甚至边庭申请久不即报脱有阙误咎当谁执调秘书监崇政殿说书极论往年以道学为伪学者欲加远窜杜绝言语使忠义士箝口结舌天下之气岂堪再沮坏如此耶又谓欲结人心莫若去贪吏欲去贪吏莫若清朝廷大臣法则小臣廉在高位者以身率下则州县小吏何恃而敢为又论内治外患辨君子小人略谓执政侍从台谏给舍之选与三衙京尹之除皆朝廷大纲所在故其人必出人主之亲擢则权不下移今或私谒或请见或数月之前先定或举朝之人不识附会者进大臣为其说所误边境之臣实遁者按以为诬真怯者誉以为勇金帛满前是非交乱以欺庙堂以欺陛下愿明诏大臣绝私意布公道进秘阁修撰知赣州治盗有方境内清肃句祠得请以言罢理宗即位以右文殿修撰主管南鸿庆宫赐金带卒 【授宋史此下有李孟传传前李光传末已载孟传附传虽详略不同究系一人两见此从删】

钦定续通志卷三百九十五

●钦定续通志卷三百九十六 列传一百九十六

列传

宋 【一百】

○宋一百

陈敏

张诏

毕再遇

安丙

杨巨源

李好义

陈敏

张诏

毕再遇

安丙

杨巨源

李好义

△陈敏

陈敏字符功赣之石城人父皓有才武建炎末以破赣贼李仁功补官至承信郎敏
身长六尺余精骑射积官至忠靖郎以杨存中荐擢阁
门祇候时闽地多寇殿司兵往戍率不习水土至是始募三千兵置左翼军以敏为统制
漳州驻扎敏按诸郡要害凡有十三处悉分兵扼之盗
发辄获赣州齐述据城叛啸聚数万将弃城南寇敏闻之曰赣兵精劲善走岭若朝廷发
兵未至万一奔冲江湖闽广骚动矣不俟命领所部驰
七日径抵赣围其城踰月朝廷命李耕以诸路兵至破之累功授右武大夫封武功县男
领兴州刺史召赴阙高宗见其状貌魁岸除破敌军统
制寻以所部驻太平州绍兴三十一年海陵来攻成闵为荆湖路招讨使以敏军隶之升
马司统制军于荆汉间敏说闵曰金人精骑悉在淮汴
都必无守备若由陈蔡径捣大梁溃其腹心此救江淮之术也不听从闵还驻广陵时金
兵尚未渡淮敏又说闵邀其归师复不听敏遂移疾归
姑孰孝宗即位张浚宣抚江淮奏敏为神劲军统制浚视师改都督府武锋军都统制朝
廷遣李显忠北伐浚欲以敏偕行敏曰盛夏兴师非时
且金人重兵皆在大梁我客彼主胜负之势先形矣愿少缓浚不听令敏屯盱眙显忠至
符离果失律敏遂入泗州守之金人议和诏敏退守滁
阳敏请于朝谓滁非受敌之所改戍高邮兼知军事与金人战射阳湖败之焚其舟追至
沛城复败之干道元年迁宣州观察使召除主管侍卫
步军司公事居岁余敏抗章曰久任周庐无以効鹰犬况敌情多诈和不足恃今两淮无
备臣乞以故部之兵再戍高邮仍请更筑其城乃落常
阶除光州观察使分武锋为四军升敏为都统制兼知高邮军事仍赐筑城屯田之费敏
至郡板筑高厚皆增旧制自宝应至高邮按其旧作石
■〈石达〉十二所自是运河通泄无冲突患四年北界人侍旺叛于涟水军密款本朝
称结约山东十二州豪杰起义以复中原帝以问敏敏
曰旺欲假吾国威以行劫尔必不能成事愿勿听适屯田统领官与旺交通旺败金有间
言帝知非敏罪乃召敏为左骁卫上将军言事者议欲
戍守清河口敏言金兵每出清河必遣人马先自上流潜渡今欲必守其地宜先修楚州

城池蓋楚州为南北襟喉彼此必争之地长淮二千余里河道通北方者五清汴涡颖蔡是也通南方以入江者惟楚州运河耳北方舟舰自五河而下将谋渡江非得楚州运河无缘自达昔周世宗自楚州北神堰凿老鹳河通战舰以入大江南唐遂失两淮之地由此言之楚州实为两朝司命愿朝廷留意及是再出守高邮乃诏与楚州守臣左佑同城楚州佑卒遂移守楚州北使过者观其雉堞坚新号银铸城以归正人二百家逃归降授忠州团练使罢为福建路总管累除武锋军都统制兼知楚州复光州观察使以疾卒特赠庆远军承宣使

△张诏

张诏字君卿成州人少隶张俊帐下积功守和州尝被旨介聘一日金人持所绘佑献二陵像至馆中皆北地服诏向之再拜孝宗闻而嘉之由是骤用绍熙五年除兴州都统制兼知兴州代吴挺庆元二年赵彥逾帅蜀以关外去兴元远缓急恐失事机复请分东西为二帅诏遂兼西路安抚司公事先是赵汝愚为从官时每奏吴氏世掌蜀兵非国家之利请以张诏代领武兴之兵蓋汝愚之意欲以吴曦为文臣帅以杜他日握兵之渐而未及行也汝愚既知枢密院力辞不拜白于光宗曰若武兴朝除帅则臣夕拜命帝许之乃以诏为成州团练使兴州诸军都统制诏在兴州甚得士心六年卒郭杲代之

△毕再遇

毕再遇字德卿兖州人父进建炎间从岳飞护卫八陵转战江淮间积阶至武义大夫再遇以恩补官隶侍行马司武艺绝人挽弓至二石七斗背挽一石八斗步射二石马射一石五斗孝宗召见大悦赐战袍金钱开禧二年下诏北伐【伏读通鉴辑览 御批宁宗时事与高宗异高宗南渡之初去靖康覆亡不远且父兄俱留系金庭使能发愤自强雪国耻而还二帝用兵未尝无词且当时亦有韩岳诸将可资恢复之力也宁宗朝所谓老成宿将者为谁且当和议久成金羣臣咸请先举而金主坚守和约拒而不许乃无端称兵召衅曲直了然况誓书誓表口血未干忽欲借口复仇顿忘其为称臣称侄之国尚得谓之有名及援师直为壮以自解乎】以殿帅郭倪招抚山东京东遣再遇与统制陈孝庆取泗州再遇请选新刺敢死军为前锋倪以八十七人付之招抚司克日进兵金人闻之闭榷场塞城门为备再遇曰敌已知吾济师之日矣兵以奇胜当先一日出其不意孝庆从之再遇飡士卒激以忠义进兵薄泗州泗州有东西两城再遇令陈戈旗舟楫于石■〈匚外屯内〉

下如欲攻西城者乃自以麾下兵从陟山径趋东城南角先登杀敌数百金人大溃守城

者开北门遁西城犹坚守再遇立大将旗呼曰大宋毕
将军在此尔等可速降旋有淮平知县縋城而下乞降于是两城皆定郭倪来飡士出御
宝刺史牙牌授再遇辞曰国家河南八十有一州今下
泗州两城即得一刺史继此何以赏之且招抚得朝廷几牙牌来固辞不受寻除环卫官
倪调李汝翼郭倬取宿州复遣孝庆等继之命再遇以
四百八十骑为先锋取徐州至虹遇郭李兵裹创旋问之则曰宿州城下大水我师不利
统制田俊迈已为敌擒矣再遇督兵疾趋次灵壁遇孝
庆驻兵于凤凰山将引还再遇曰宿州虽不捷然兵家胜负不常岂宜遽自挫吾奉招抚
命取徐州假道于此宁死灵壁北门外不死南门外也
会倪以书抵孝庆令班师再遇曰郭李军溃敌必追蹶吾当自御之金果以五千余骑分
两道来再遇令敢死二十人守灵壁北门自领兵冲敌
阵金人见其骑遂遁再遇手挥双刀绝水追击杀敌甚众甲裳尽赤逐北三十里金将有
持双铁筒跃马而前再遇以左刀格其筒右刀砍其肋
金将堕马死诸军发灵壁再遇独留未动度军行三十余里乃火灵壁诸将问夜不火火
今日何也再遇曰夜则照见虚实昼则烟埃莫覩彼已
败不敢迫诸军乃可安行无虞汝辈安知兵易进而难退邪还泗州以功第一自武节郎
超授武功大夫除左骁卫将军于是邱密代邓友龙为
宣抚使檄倪还维扬寻弃泗州命再遇还盱眙遂知盱眙军改镇江中军统制兼守如故
以凤凰山功授达州刺史其冬金人以骑步数万战舡
五百余艘渡淮泊楚州淮阴间宣抚司檄再遇援楚遣段政张贵代之再遇既去盱眙政
等惊溃金人入盱眙再遇复定盱眙除镇江副都统制
金兵七万在楚州城下三千守淮阴粮又载粮三千艘泊大清河再遇谍知之曰敌众十
倍难以力胜可计破也乃遣统领许俊间道趋淮阴夜
二鼓衔枚至敌营各携火潜入伏粮车间五十余所闻哨声举火敌惊扰奔逸擒其将二
十三人金人复自黄狗滩渡淮涡口戍将望风遁濠滁
相继失守又破安丰再遇谓诸将曰楚城坚兵多敌粮草已空所虑淮西耳六合最要害
彼必并力攻之乃引兵赴六合寻命节制淮东军马金
人至竹镇距六合二十五里再遇登城偃旗鼓伏兵南土门列弩手土城上敌方临濠众
弩俱发宋师出战闻鼓声城上旗帜并举金人惊遁追
击大败之金将以十万骑驻成家桥马鞍山进兵围城数重欲烧坝水决濠水再遇令劲
弩射退之既而金帅合兵进攻益急城中矢尽再遇令
人张青盖往来城上金人意其主兵官也争射之获矢二十余万赫舍哩引兵退已乃益
增兵环城四面营帐亘三十里再遇令临门作乐以示
闲暇而间出奇兵击之敌昼夜不得休乃引退再遇料其且复来乃自提兵夺城东野新

桥出敌之背金人遂遁去追至滁大雪雨乃旋获骡马
一千五百余鞍六百衣甲旗帜称是授忠州团练使三年除镇江都统制兼权山东京东
招抚司事还至扬州除骁卫大将军金围楚州已三月
列屯六十余里再遇遣将分道挠击军声大振楚围解兼知扬州淮东安抚使扬州有北
军二千五百人再遇请分隶建康镇江军每队不过数
人使不得为变更造轻甲长不过膝披不过肘兜鍪亦杀重为轻马甲易以皮车牌易以
木而设转轴其下使一人之力可推可擎务便捷不使
重迟敢死一军本乌合亡命再遇能驾驭得其用陈世雄许俊等皆再遇所荐张健雄恃
勇桀骜再遇状其罪于朝命以军法戮之诸将慑服嘉
定元年除左骁卫上将军和好成累疏乞归田里赐诏不允除保康军承宣使寻令带职
奏事提举佑神观六年提举太平兴国宫十年以武信
军节度使致仕卒年七十赠太尉累赠太师谥忠毅再遇姿貌雄杰早以拳力闻属时寝
兵无所自见一旦边事起诸将望风奔衄再遇威声始
着遂为名将云

△安丙

安丙字子文广安人淳熙间进士调大足县主簿秩满诣阙陈蜀利病十五事言皆
剴切丁外艰服除辟利西安抚司干办公事调曲水丞
吴挺为帅知其才邀致之改秩知新繁县丁内艰服除知小溪县通判隆庆府嘉泰三年
郡大水丙白守张鼎发常平粟赈之寻又凿石徙溪自
是无水患知大安军岁旱民艰食丙以家财即下流籴米数万石以赈事闻诏加一秩开
禧二年边事方兴程松为四川宣抚使吴曦副之丙陈
十可忧于松继而松开府汉中道三泉夜延丙议丙又为松言曦必误国松不省盖丙尝
为其父客素知曦既而曦奏丙为随军转运司居河池
时梁洋义土方袭取和尚原旋为金人所夺守将弃甲而走十一月金人攻湫池堡破天
水繇四河入成州师溃曦置不问金人肆掠关外四州
如践虚邑曦已潜遣其客姚淮源交金人至是曦还兴州留丙鱼关已而檄还武兴十二
月金人持其诏及金印至置口曦密受之宣言使者欲
得四川以和驰书讽松去曦受金诏称蜀王榜谕四川二年正月曦僭号建官称臣于金
以其月为元年改兴州为兴德府以丙为中大夫丞相
长史权行都省事先是从事郎钱巩之从曦在河池尝梦曦祷神祠以银杯为琰掷之神
起立谓曦曰公何疑公何疑后政事已分付安子文矣
曦未省神又曰安子文有才足能办此巩之觉心异其事具以语曦事既炽丙不得脱度
徒死无益阳与而阴图之遂与杨巨源李好义等谋诛
曦语见巨源好义传徐景望在利州逐土人擅财赋丙遣弟焕往约诸将相与拊定及景

望伏诛军民无敢哗者于是传檄诸道按堵如故曦僭位凡四十一日三月陈曦所以反及矫制平贼便宜赏功状自劾待罪函曦首级违制法物与曦所受金人诏印及所匿庚牌附驿朝廷初闻变莫知所为韩侂胄与曦书亦谓嗣颁茅土之封亟召知镇江府宇文绍节问之绍节曰安丙非附逆者必能讨贼于是密降帛书曰安丙素推才具有志事功今闻曦谋不轨尔为所胁谅以凶焰方张恐重为蜀祸故权且从之尔岂一日忘君父者如能图曦报国以明本心即当不次推赏虽二府之崇亦无所吝更宜审度机便务在成事以副委属之意帛书未至露布已闻上下动色交庆加丙端明殿学士中大夫知兴州安抚使兼四川宣抚副使诏奖谕恩数视执政如帛书旨也 【伏读通鉴辑览 御批安丙当曦谋逆受其丞相长史之命腩颜赴召其视杨震仲等之抗词死节抱愧已多及其既至兴州又以称疾卧家坐观成败使非杨巨源等倡义诛讨则丙且终为逆党矣迨巨源与好义定约报丙始出视事则其庸怯畏缩之状已可概见乃事成之后丙遂掠有其功至杀巨源以灭口用心更为伎刻宋人既不能追讨其从逆之罪而反尽以定蜀之功归之当时刑赏失当总由于主暗臣邪耳】 时都统孙忠锐由凤州进攻大散关不克统领强德等出奇道由松林堡破金砦凤州以关钥付庸将陈显大散关复陷巨源自请收复丙遣朱邦熹佐之丙深恶忠锐檄赴司议事欲废之巨源至凤斩忠锐及其子揆丙遂以忠锐附伪进表之罪闻于朝先是以诛曦功巨源补朝奉郎与通判差遣巨源遣其亲校傅桧愬功于朝语见巨源传于是丙拜疏旬间至是金人揭示境上得丙首者与银绢二万匹丙即授四川宣抚时方议和丙独戒饬将士恫疑虚喝以攻为守威声甚着诏以蜀平遣吴玠抚谕四川时沿边关隘悉为金毁丙遗时相书略谓西和一面已修仇池聚粮积刍便军民可守若敌至则坚壁不战彼欲攻则不可欲越则不敢若西和可守成州自不被兵成州黑谷南 谷亦皆顿重兵天水虽不可守距天水十里所见创白环堡与西和相为犄角又增堡鸡头山咸以民卒守之及修黄牛堡筑兴赵原屯千余人凤州秋防原尤为险绝绍兴初州治于此宣抚吴玠尝作家计砦前即马岭堡正扼凤州之后凡此数堡既坚金人决不敢近而河池鱼关皆大军屯聚其它径路虽关之里如大安亦阴招民卒授以器械为掩击之备矣又云见于关表广结义士月给以粮俸各保田庐坟墓逮事定则系之尺籍而劝之耕庶可经久以丙所见直为守计则精选五万人亦为有余好义守西和谓四州兵后民不聊生请蠲租以惠创痍丙请于朝又以沔州都统司所统十军权太重故自吴玠至挺曦皆有尾

大不掉之忧乃请分置副都统制各不相隶以前右中
左后五军隶都统司踏白摧锋选锋策锋游奕五军隶副司诏皆从之时方信孺使还金
人和意未决且欲得首议兴师之人侂胄大怒上手书
赐丙谓金人必再至当激励将士戮力赴功侂胄既诛赐丙金器细币进资政殿学士和
议成还大散隔牙关丙分遣僚吏经量洋沔兴元大安
民田别定租税右丞相史弥远起复丙移书曰昔仁宗起复富郑公文潞公孝宗起复蒋
丞相皆力辞名教所系人言可畏祈阁下速辞成命以
息议者之口论者黷之升大学士四川制置大使兼知兴元府谍知金人还汴关辅豪杰
款塞愿降者众丙以为此正再闵告晋之时乃与宰臣
书谓当兴问罪之师朝论忧丙轻举乃诏丙益修守备七年春丙使所爱吏安蕃何九龄
合官军夜袭秦州败归王大才执九龄等七人斩之而
讼丙于朝三月诏丙同知枢密院事兼太子宾客赐手书召之行次广德军进观文殿学
士知潭州湖广安抚使至官留意学校请于太常劾大
成乐而政尚严酷转运判官章徠劾丙不报御史李安行并徠劾之徠罢丙授崇信军节
度使开府仪同三司万寿观使遣合门舍人闻人珣锡
命赐旗节金印衣带鞍马三辞还蜀董居谊帅蜀大失士心金人乘之破赤丹黄牛堡入
武休关直捣梁泽至大安宋师所至辄溃散入巴山十
二年聂子述代之时丙之子癸仲知果州述即檄兼参议官四月红巾贼张福莫简叛入
利州子述遁去总领财赋杨九鼎与贼遇走匿民舍贼
追杀之子述退保剑门檄癸仲兼节制军马任讨贼之责癸仲召戎帅张威等军来会贼
自阆趋遂宁所过无不残灭丙欲自持十万缗偕子述
往益昌募士子述曰大臣非得上旨未可轻出丙遂如果州时四川大震甚于曦之变张
方首奏勋望如丙今犹可用魏了翁移书宰执谓安丙
不起则贼未即平蜀未可定虽贼亦曰须安相公作宣抚事乃定耳李壁李篁时并镇潼
遂亦皆以国事勉丙五月丙至果州超起丙为四川宣
抚使予便宜寻降制授保宁军节度使兼知兴元府利东安抚使丙奏臣不辞老以报国
但事不任怨难以图成将恐腾谤交攻使臣独抱赤心
无从上白昔秦使甘茂攻宜阳至质之以息壤在彼魏使乐羊攻中山至示之以谤书一
篋君臣之间似不必尔然自古及今谤以疑间而成祸
以忌嫉而得况臣已伤弓于既往岂容不怨沸于方来诏曰昔唐太宗以西寇未平诏起
李靖靖慷慨请行不以老疾为解代宗有朔方之难图
任郭子仪闻命引道亦不以谗惑自疑皆能乘时立功焜耀竹帛朕甚慕之今蜀道俶扰
未宽顾忧朕起卿燕闲付以方面而卿忠于报国谊不
辞难朕之用人庶几于唐宗卿之事朕无愧于李郭矣勉图隳功以济国事寻命丁焞改

知兴元府发果州至遂宁贼犹负固于普州之茗山丙下令诸军合围绝其樵汲之路以困之未几张威李贵俘获张福等十七人以献丙命裔王大才以祭九鼎七月尽俘余党千余人皆斩之班师乃移治利州赐保宁军节度使印癸仲亦加三秩进直华文阁起复主管宣抚司机宜文字明年进丙少保丙以关表营田多遗利命官括之有文垓者方持母丧以便宜起复干办鱼关粮料院俾之措置且以宣抚副使印假之而冯安世者又即利州置根括局于是了翁遗丙书谓幕府举辟当用经术信厚之士不可用冒丧之人虽今日理财难拘故常然告绝产首白契评隐田伺富民过失纠盐酒户亏额报怨挟愤招权纳贿者必且纷然而公任其怨丙复书曰关外余买当用四百万缗而总所见缗止二十五万多方措置非得己而不已傥皆清流何由办事其后安世不法滋甚近臣有以书抵丙而安世之徒亦发其事丙械送大安穷治之丙卒以少傅致仕赠少师赐沔州祠额为英惠庙理宗亲札赐谥忠定

△杨巨源

杨巨源字子渊其先成都人父信臣客益昌因家焉巨源倜傥有大志善骑射涉猎诸子百家之书应进士不中武举又不中刘光祖见而异之荐之总领钱粮陈煜以右职举为凤州堡子原仓官驰骋射猎倾财养士沿边忠义咸服其才分差鱼关粮料院移监兴州合江赡军仓吴曦叛巨源阴有讨贼志结义士三百人给其钱粮有游奕军统领张林者力能挽两石弓队将朱邦宁身長六尺勇力过人皆为曦所忌虽屡战有功亦不加赏林等憾之时林在置口邦宁在合江巨源因与深相缔结并集忠义人朱福陈安傅桧之徒曦胁安丙为丞相张史丙称疾眉士程梦锡见丙丙叹曰世事如此世无豪杰梦锡因及巨源之谋丙乃属梦锡以书致巨源延之卧所巨源曰先生而为逆贼丞相长史耶丙号哭曰目前兵将我所知不能奋起必得豪杰乃灭此贼则丙无复忧巨源曰先生之意决乎丙指天誓曰若诛此贼虽死为忠鬼夫复何恨巨源大喜曰非先生不足以主此事非巨源不足以了此事当是时李好义好问亦结李贵杨君玉李坤辰凡数十人坤辰邀巨源与好义会巨源又大喜曰吾与长史议以三月六日邀曦谒庙合勇士刺之好义曰彼出则齟巷从卫且千人事必难济闻熟食日祭东园图之此其时也巨源然之好义愿一见长史以为信巨源曰吾今先为长史言之来日伪宫令长史问君先甘是己巨源以告丙明日好义在伪宫见丙擗之丙曰卿与尊父同僚杨省干盛谈才略旦夕以职事相委其谋乃决君玉先属其乡人曰子申拟诏文

不雅驯巨源更为之例用合江仓朱记巨源好义忧事
寢泄遂以三月乙亥未明好义率其徒入伪宫巨源持诏乘马自称奉使入内户曦启户
欲逸李贵执杀之卫者始拒鬪闻有诏皆却巨源好义
迎丙宣诏以曦首徇三军推丙权四川宣抚使巨源权参赞军事丙奏功于朝以巨源第
一诏补承事郎巨源谓丙曰关外四州为蜀要害盍乘
势复取好义亦以为言丙虑军无见粮巨源力言四州不取必有后患自请为随军措置
粮运于是分遣好义复西和州张林李简复成州刘昌
国复阶州孙忠锐复散关俄诏巨源转朝奉郎与通判差遣兼四川宣抚使司参议官丙
素恶忠锐闻忠锐失守散关檄其还欲废之先命巨源
偕邦盗以沔兵二千策应巨源至凤州因忠锐出迎伏壮士于幕后突出斩之并其子揆
丙遂以忠锐附伪贺表闻于朝且待罪先奖谕诛叛诏
书至沔州巨源谓人曰诏命一字不及巨源疑有以蔽其功者俄报王喜授节度使巨源
弥不平时赵彦呐以在夔诛禄禧得州通判巨源曰杀
禄禧与通判杀吴曦亦与通判耶以启谢丙曰飞矢以下聊城深慕鲁仲连之高谊解印
而去彭泽庶几陶靖节之清风又遣愬功于朝而从兴
元都统制彭轂乞书遗韩侂胄轂阳许而阴以白丙或言巨源与其徒米福车彦威谋为
乱丙命喜鞫之福彦威皆抵罪正将陈安复告巨源结
死士入关欲焚沔州州治俟丙出则杀之丙积前事因欲去巨源然未有以发也会巨源
在凤州以檄书遗金凤翔都统使其辞若用闲者且自
称宣抚副使而以参议官印印之金以檄至丙巨源方与金战败于长桥丙乃移书召巨
源巨源疑焉有梁泉主簿高岳成者巨源荐为随军拨
运来见巨源赞其归巨源信之时轂已至沔六月巨源还幕府丙密命轂收巨源巨源殊
不知以为谒己也语毕轂起巨源送之宾次武士就挽
其裾巨源犹叱之则己为驱至庭下巨源大呼曰我何罪丙隔屏遣人谓之曰若为诈称
宣抚副使命械送闾州狱巨源曰我一时用间异时必
有为我明其事丙饷以肴酒巨源曰一身无媿死且无憾惟有妹未嫁宣抚念之巨源舟
抵大安龙尾滩将校樊世显者呼于岸巨源知将见杀
指其地而语之曰此好一片葬地世显曰安有是舟行数步谓曰宣参久渴莫进杯酒巨
源辞以不饮又曰宣参荷械已久盍少苏巨源未及答
左右遽取利刃断其头不绝者踰寸遂以巨源自殪闻宣抚司后数日丙命瘞之巨源死
忠义之士为之扼腕闻者流涕剑外士人张伯威为文
以吊其辞尤悲切巨源之属吏也李璧在政府闻之曰嘻巨源其死矣丙以人清汹汹封
章求免杨辅亦谓丙杀巨源必召变请以刘甲代之初
巨源与好义结官军而丙密为反正之计各未相知合巨源于好义者李坤辰而合好义

于丙者巨源也巨源遗光祖书述丙酬答之语侵梓竞
传之丙已弗乐浸润不已遂成此祸成忠郎李珣投匭献所作巨源传为之讼冤朝廷亦
念其功赐庙褒忠赠宝谟阁待制官其二子制置使崔
与之请官给其葬加赠宝谟阁直学士大中大夫嘉熙元年理宗特赐谥忠愍子履正终
大理卿四川制置副使

△李好义

李好义下邳人祖师中建炎间以白丁守华州积官忠州团练使父定一兴州中军
统制好义弱冠从军善骑射西边第一初以准备将讨
文州蕃部有功开禧初韩侂胄开边吴曦主师好义为兴州正将数请出精兵袭金人曦
蓄异谋不纳未几关外四州俱陷金人长驱入散关曦
受金人说以蜀叛好义自青坊闻变亟归与其兄对哭谋诛之会曦遣李贵追杀宣抚程
松贵语其徒曰程宣抚朝廷重臣不可杀好义知其赤
心可以所谋告之贵遂约李彪张渊陈立刘虎张海等好义又密结亲卫军黄术赵亮吴
政等女弟夫杨君玉亦与知好义戒言曰此事誓死报
国救四蜀生灵慎毋泄留其母以质好义兄弟谋曰今日人皆可杀曦皆可为曦曦死后
若无威望者镇抚恐一变未息一变复生欲至期立长
史安丙以主事盖曦尝授丙伪丞相而丙托疾不往故兄弟有是谋也既而君玉与李坤
辰来坤辰因言丙亦与合江仓杨巨源阴结忠义欲图
曦好义遂遣君玉偕坤辰约巨源以报丙丙大喜曰非统制李定一之子乎此人既来断
曦之臂矣遂与好义约二月晦举事见巨源传乃约彪
术贵等七十有四人及士人路良弼王芾好义夜飨士麾众受甲与好古好仁及子姓拜
决于家庙属妻马氏曰日出无耗当自为计死生从此
决矣马氏叱之曰汝为朝廷诛贼何以家为我决不辱李家门户马氏之母亦曰行矣勉
之汝兄弟生为壮夫死为英鬼好义喜曰妇人女子尚
念朝廷不爱性命我辈当如何众皆踊跃既行小将禄祜引十卒来助各以黄帛为号好
义誓于众曰入宫妄杀人掠财物者死时伪宫门洞开
好义大呼而入曰奉朝廷密诏安长史为宣抚令我诛反贼敢抗者夷其族曦护卫千兵
皆弃挺而走遂至伪殿东角小门入世美堂近曦寝室
曦闻外闕仓皇而起露顶徒跣开寝户欲遁见贵复止以手捍内户贵前争户户纽折曦
走贵追及手执其髻举刃中曦颊曦素勇有力扑贵仆
于地不能起好义急呼王换斧其腰者二曦负痛手纵贵起遂斫其首引众拥曦首出伪
宫亟驰告丙宣诏持曦首抚定城中市不改肆好义请
乘时取关外四州巨源赞之丙大喜巨源辅行王喜忌其能沮之好义曰西和乃腹心之
地西和下则三州可不战而复矣今不图后悔无及愿

得马步千人死士二百赍十日粮可济丙从其请忠义响应次独头岭进士王荣仲兄弟率民兵会合十战至山砦高堡七日至西和好义率众攻城亲犯矢石金西和节使完颜钦奔遁好义整众而入籍府库以归于官好义初欲乘胜径取秦陇以牵制淮兵而宣抚司令谨守故疆不得侵越士气皆沮好义以中军统制知西和州卒丙以劳绩上于朝特赠检校少保仍给田以贍其家后吴猎为请谥曰忠壮好义喜诵孟子及左传以为终身行此足矣诛曦时惟幼子植留家迄事人争冒功赏君玉欲注植名好义指心曰惟此物不可欺曦既诛好义集于丙家王喜后至心怀邪谋欲刃好义丙力救解然日以杀好义为心及好义守西和喜遣其死党刘昌国听节制好义与之酬酢欢饮达旦好义心腹暴痛洞泻而昌国遁矣既殢口鼻爪指皆青黑居民莫不冤之摧锋一军几至于变既而昌国白日见好义持刃刺之惊怖仆地疽发而殁喜曦大将也贪淫狠悔诛曦之日不肯拜诏遣其徒入伪宫虏掠殆尽又取曦姬妾数人其后欲戕好义为曦复讎丙不能止便宜处以节度使知兴州而恨犹未已尝出兵于船栅岭锋未及交弃军先遁金人遂由黑谷长驱入境朝廷虑喜为变授节度使移荆鄂都统制而死

钦定续通志卷三百九十六

●钦定续通志卷三百九十七 列传一百九十七

列传

宋 【一百一】

○宋一百一

赵方 贾涉 扈再兴 孟宗政 张威

赵方

贾涉

扈再兴

孟宗政

张威

△赵方

赵方字彦直衡山人父棠少从胡宏学慷慨有大志尝见张浚于督府浚雅敬其才欲以右选官之棠不为屈累以策言兵事浚奇之命子栻与棠交方遂从栻学淳熙八年举进士调蒲圻尉疑狱多所委决授大盩监教授俗陋甚方择可教者亲训诱之人皆感励自是始有进士知青阳县告其守史弥远曰催科不扰是催科中抚字刑罚无差是刑罚中教化人以为名言主管江西安抚司机宜文字京湖帅李大性辟知随

州南北和议成诸郡寢弛备方独招兵择将拔土豪孟宗政等补以官提举京西常平兼
转运判官提点刑狱时刘光祖以耆德为帅方事以师
礼自言吾性太刚每见刘公使人更和缓尝请光祖书勤谨和缓四字揭坐隅以为戒以
兵部员外郎召寻加直秘阁改湖北转运判官兼知鄂
州升直焕章阁兼权江陵府增修三海八匱以壮形势进秘阁修撰知江陵府主管湖北
安抚司使兼权荆湖置司时金偪于兵计其必南徙日
夜为备荆门有东西两人险要方筑堡其上增戍兵以遏其冲进右文殿修撰金樊快明
谋归宋追兵至襄阳方遣孟宗政扈再兴以百骑邀之
杀千余人金人遁去权工部侍郎宝谟阁待制京湖制置使兼知襄阳府谍知金人决意
来攻乃下防夏之令金相高琪及其枢密乌库嘿庆寿
侵陈光化随枣阳信阳均州方夜半呼其子范葵曰朝廷和战之说未定观此益乱人意
吾策决矣惟有提兵临边决战以报国耳遂抗疏主战
亲往襄阳金人围枣阳急方遣宗政再兴等援枣阳仍增戍光化信阳均州以联声势已
而枣阳守赵观败金人于城外再兴宗政至与观夹击
又败之枣阳围解方申饬诸将当遏于境上不可使入而后拒时麦正熟方遣兵护民刈
之令清野以俟再疏力陈不可和者七战议遂定金将
完颜萨布入境兵号十万方部分诸将金人攻枣阳者宗政败之于尚家川攻随州者刘
世兴败之于磨子平相持踰年方调世兴移师与许国
再兴援枣阳张兴李雄韬援随州随州围解再兴等转战入枣阳时宗政守城伏兵城东
金人遇伏败走未几再至再兴又败之自是无日不战
金人三面来攻宗政出东门再兴出南门世兴出北门大合战败之金人朝进莫退力不
能捍诸将表里合谋国自南山进张威自灊河进世兴
李琪出城与会再兴出城与威会犄角追击金人遂溃光化守潘景伯亦设伏败金人
于赵家桥孟宗德又破之于随州鸭儿山擒萨布妻弟
王绰哈金人遂诛萨布方以功迁龙图阁待制封长沙县男赐食邑金人复大举命额尔
克围枣阳堑其外绕以土城方计其空国而来若捣其
虚枣阳围自解乃命国东向唐州再兴西向邓州又命子范监军葵后殿时宗政在城中
日夜鏖战焚其攻具金人不敢近城西师由光化境出
砦于三尖山拔顺阳县金人率众仰攻大败再兴与国两道并进掠唐邓境焚其城栅粮
储枣阳城坚金顿兵八十余日方知其气已竭乃召国
再兴还并东师隶于再兴克期合战再兴败金人于灊河又败之城南宗政自城中出夹
击杀其众三万金人大溃额尔克单骑遁获其赍粮器
甲不可胜计进方焕章阁直学士奏乞均官民军兵廩给自备马者倍之又奏使民兵夏
归以省月给秋复诣屯守御从之方料金人数不得志

于枣阳必将同时并攻诸城当先发以制之命国宗政出师向唐再兴向邓戒之曰毋深入毋攻城第溃其保甲毁其城砦空其资粮而已宗政进破湖阳县擒其千户赵兴尔国遣部将耶律均与金人战于北阳戮其将李提控再兴破高头城大败金兵遂薄邓州唐州兵来援迎败之降者踵至已而金兵至樊城方命再兴阵以待之方视其师金人三日不动遂遁金将驸马阿哈侵淮西枢密完颜硕啰屯唐州为后继方先攻唐伐其谋及使再兴发枣阳兵击其西国发桐柏兵击其东再兴败金人于唐城斩硕啰围其城五匝垂下会蕲黄继陷诏趣方遣救方亟命国保鄂再兴援淮西国还鄂州保江再兴军至蕲之灵山伺金人归而击之土豪祝文蔚横突入阵金人大败国遣张宝将兵来会李全等兵亦至金人遂溃再兴追逐六十里擒其监军哈达进方显谟阁直学士大中大夫权刑部尚书俄得疾进徽猷阁学士京湖制置大使归还力疾犒师第其功上之病革曰未死一日当立一日纪纲引再兴卧内勉以协心报国贻书宰相论疆场大计寻卒是夕有大星陨于襄阳以端明殿学士正议大夫致仕赠银青光禄大夫累赠太师谥忠肃方起自儒生帅边十年以战为守合官民兵为一体通制总司为一家持军严每令诸将饮酒勿醉当使日日可战淮蜀沿边屡遭兵祸而京西一境独全尝问相业于刘清之清之以留意人才对故知名士如陈晔游九功辈皆拔为大吏诸名将多在其麾下若扈再兴孟宗政皆起自土豪推诚擢任致其死力藩屏一方使朝廷无北顾之忧故其没也人皆惜之子董蕤范葵范葵有传

△贾涉

贾涉字济川天台人幼好读古书慷慨有大志以父任高邮尉改万安丞宝应择令堂差涉至邑请城之役兴以忧去金人侵光州起涉竟前役通判真州改大理司直知盱眙军淮人季先沈铎说楚州守应纯之以招山东人纯之令铎遣周用和说杨友刘全李全等以其众至先招石珪葛平杨德广通号忠义军珪等反毙铎于涟水纯之罢通判梁丙行守事欲省其粮使自溃珪德广等以涟水诸军渡淮屯南渡门焚掠几尽谓朝廷欲和金置我军何地丙遣李全季先拒之不止事甚危涉时在宝应上书曰降附踵至而金乃请和此正用高澄间侯景遗策恐山东之祸必移于两淮况金人所乏惟财与粮若举数年岁币还之是以肉啖馁虎啖尽将反噬至若忠义之人源源而来不立定额自为一军处之北岸则安能以有限之财应无穷之须饥则噬人饱则用命其势然也授淮西提点刑狱兼楚州节制本路京东忠义人兵涉亟遣傅翼谕珪等

逆顺祸福自以轻车抵山阳德广等郊迎伏地请死誓以自新金太子及布萨万忠卢国瑞等数十万大入且以计诱珪等涉虑珪等为金用亟遣陈孝忠向滁州珪与夏全时青向濠州先平德广趋滁濠李全李福要其归路以傅翼监军数日孝忠捷至珪屡破金人遂与先及李全趋安丰时金人环百余砦攻具甫毕珪等解其围李全挟布萨万忠以归见李全传金人不窥淮东者六七年南渡门之变平德广等实预涉既受降置弗问平等尚怀异志涉密使先以计杀之而先之势亦孤忠义诸军在涟水山阳者既众涉虑其思乱因滁濠之役分珪孝忠夏全为两屯李全军为五砦又用陕西义勇法涅其手合诸军汰者三万有奇涅者不满六万人正军常屯七万余使主胜客朝廷岁省费十三四涉又遣李全以万人取海州复取密潍王琳以盩海州归遂收登莱二州青州守张林以滨棣淄州降又取济沂等州自是恩博景德至邢洺十余州相继请降涉传檄中原以地来归及反戈自效者朝廷裂地封爵无所吝仍厉诸将图未下州郡擢太府少卿制置副使兼京东河北节制金十余万众侵黄州淮西帅赵善湘请援于朝涉遣李全等赴之翟朝宗等为后继丞相史弥远拟升全留后涉曰始全贫窶无聊能轻财与众同甘苦故下乐为之用逮为主帅所为反是积怨既多众皆不平近弃西城免死为幸若无故升迁以骄其志非全之福亦岂国家之福曷若待事定与诸将同升可也金人破黄陷蕲安庆甚危全驰至遂定全至久长镇与京湖制置使赵方二子范葵遇犄角连战俱胜遣彭义斌等追至下湾渡尽掩金人于淮迁权吏部侍郎金人再侵淮西先是蕲州受围余晖往援乃鼓众宵遁涉斩晖以徇诸将畏惧无不用命淮西之势大振初翟朝宗得玉玺献诸朝至是赵珙还又得玉印文与玺同而加大【按周密癸辛杂识载贾涉遣都统司计议官赵珙往河北蒙古军前议事得皇帝恭膺天命之宝玉玺以归及翟朝宗所得宝检并缴进于朝与本传所载朝宗得者为玉玺珙受命之宝后诸圣嗣服皆自为一宝以皇帝恭膺天命之宝为文京城破自定命宝外悉为金营所得而大宋受命之宝邵泽民侍郎取而藏之张邦昌遣使奉迎高宗于山东因以为献定命者宣和内禅藏龙德宫金人不知故不取】朝廷喜璧之归行庆赏涉遗书弥远谓天意隐而难明人事切而易见当思今日人事尚未有可答天意者昔之患不过金今之患又有山东忠义与北边宜亟图之弥远不怵李全卒以玺赏为节度使涉又言盗贼血气正盛官职过分将有后忧弥远不以为然涉曰朝廷但知官爵可以得其心盍知骄则将至于不可劝耶【按宋史李全传全忌季先潜于涉诱杀之先党迎石珪为统帅

全因请讨珪其后珪降蒙古涟水军遂并属于全是涉之处全皆为失策涉知庆赏过分足长其骄心不知全之骄涉有以成之也】涉时已疾力辞事任直金人大入强起视事金将时全赫林富珠哩达格率细军及众军三道渡淮涉以赫林善战乃命张惠当之惠金骁将所谓赛张飞者既归宋金人杀其妻所部花帽军有纪律他军不及也惠率诸军出战自辰至酉金人大败达格溺死陷失大半细军丧者几二千涉既病乃以所获京河版籍及金银牌铜印之属上于朝卒超赠龙图阁学士光禄大夫涉父伟尝守开江贻书丞相赵雄极论武兴守吴挺之横他日陞对又乞裁抑郭棣郭杲兵权孝宗嘉纳后反为所挤以歿涉弱冠直父冤不避寒暑泣愬十年至伏书阙下子似道有传

△扈再兴

扈再兴字叔起淮人也有膂力善机变每战被发肉袒徒跣挥双刃奋呼入阵人马辟易金人侵襄阳枣阳京西制置使赵方檄再兴等御之金人来自团山势如风雨再兴同孟宗政陈祥分三阵设伏以待既至再兴中出一陈佯却金人逐之宗政与祥合左右两翼掩击之金人三面受敌大败血肉枕藉山谷间授神劲统制金人又侵枣阳再兴率师赴援金人闻风夜溃既而益兵数万复围城相持九十日再兴夜以铁蒺藜密布地黎明佯遁金人驰中蒺藜者十踏七八遂却走追至十五里冈已而金兵攻城东隅薄南门北角再兴与宗政刘世兴各当一面战数十合大败金兵金帅完颜额尔克拥步骑数万傅城再兴与宗政纵之涉濠半渡击之又令守坝者佯走金人争坝急击之多堕水中金人剽对楼鹅车革洞决濠水运土石填城下再兴募死士着铁面具披毡列阵以待之金人计无所施而去弃旗甲辎重满野大战于范家庄金人败追之至泊湖禽其巡检杭实礼酒都监喇福昌降其壮丁获牛马甚众自是与宗政世兴无日不战再兴又破顺昌县夺甲马三千破浙川镇杀金人三百追至马磴砦焚其城栅又败其护驾骑军于灤河入邓州破高头败其步军五千骑军五百焚其积聚遂营于高头进攻唐州至三家河金骑军二千步军七千出城迎战又败之死者十七八追及城下金将从义者收残骑三百奔城再兴据门拒战斩从义遂围唐州分兵焚荡州境截其归路砦于久长严阵以待之搜剿残兵获其副统军广威将军纳达塔寻以病卒子世达亦以名将称官至都统制

△孟宗政

孟宗政字德夫绛州人父林从岳飞至随州因家焉宗政自幼豪伟有胆略常出没疆场间开禧二年金将完颜董侵襄郢宗政率义士据

险邀击夺其辎重宣抚使吴猎奇之补承节郎枣阳令京西路分赵方吴柔胜皆荐其才
转秉义郎京西钤辖驻扎襄阳嘉定十年金人侵襄阳
枣阳方檄宗政节制神劲报捷忠义三军宗政与统制扈再兴陈祥分为三军设伏三所
蹀血以战金兵败走寻报枣阳围急宗政午发岷首迟
明抵枣阳驰突如神金人大骇宵遁方时移帅京西闻捷大喜差权枣阳军初眠事一爰
仆犯新令立斩之军民股栗于是筑堤积水修治城堞
简阅军士十一年金帅完颜萨布拥步骑围城宗政与再兴合兵角敌历三月大小七十
余战宗政身先士卒金人战辄败忿甚周城开濠四面
控兵列濠外飞锋镝以絢铃自警铃响则犬吠宗政厚募壮士乘间突击金人不能支盛
兵薄城宗政随方力拒随守许国援师至白水鼓声相
闻宗政率诸将出战金人奔溃转武德郎十二年金帅完颜额尔克布拥步骑傅城宗政
囊糠盛沙以覆楼棚列瓮潴水以堤火募炮手击之一
炮辄杀数人金人选精骑二千号弩子手拥云梯天桥先登又募凿银矿石工昼夜埽城
运茅苇直抵圜楼下欲焚楼宗政先毁楼掘深坑防地
道剗战棚防城隕穿穿才透即施毒烟烈火鼓鞴以熏之金人窒以湿毡析路以剗土城
颓楼陷宗政撤楼益薪架火山以绝其路列勇士以长
枪劲弩备其冲距楼陷所数丈筑偃月城袤百余尺翼傅正城深坑倍仞躬督役五日成
金人摘强兵披厚铠毡衫铁面而前又湿毡濡革蒙火
山覆以冰雪拥云梯径抵西北圜楼登城城中军以长戈舂其喉杀之敢勇军自下夹击
金兵兵坠死燎焰自听至夕死伤踵接梯桥尽毁金人
俄乘顺风渡濠飞脂革烧战棚宗政激将士血战凡十五阵金兵死者千余弩子手十七
八射其都统殪天水风金人愈忿炮愈急会王大任领
锐卒一千冒重围转鬪入城内外合战士气大振贾勇入金营自晡至三更金人横尸徧
地夺其铜印十有六额尔克弃帐走获辎重牛马万计
捷至朝廷方录前战守功升武功大夫兼阁门宣赞舍人重赐金带制置司以湖阳县金
兵迫境檄宗政图之宗政一鼓而拔燔烧积聚夷荡营
砦俘掠以归金人自是不窥襄汉枣阳许国移金陵宗政代为荆鄂都统制仍知枣阳宗
政以迫濠而阵乃于西北濠外潴水为泞以限骑中原
遗民来归者以万数宗政发廩贍之为给田剗屋与居籍其勇壮号忠顺军俾出没唐邓
间威振境外俄病疽卒转右武大夫团练使防御使宗
政于有功者怨必赏有罪者亲必罚好贤乐善出于天性未尝学兵法而暗与之合死之
日边城为罢市恻哭子珙有传

△张威

张威字德远成州人策选锋军骑兵也隆庆府后军效用威贫甚卖药自给或言其

才勇乃令戍边开禧用兵威与金人战辄捷累功补本
军将领吴曦既诛遣将收复李贵复西和州威率众先登败金人战于板桥遂取西和升
统制由是威名大振天水县当金人西入路乃升县为
军命威为守屡立奇功擢充利州副都统制调荆鄂都统制襄阳府驻扎改沔州都统制
嘉定十二年金人分道入蜀侵狄池堡又侵白环堡威
部将石宣董照连却之既而金人侵成州威自西和退保仙人原时兴元都统制吴政战
死黄牛堡李贵代政亟走武休金人已破武休遂陷兴
元又陷大安军先是利州路安抚使丁焞闻金人深入亟遣书招威东入救蜀又檄忠义
总管李好古北上捍御好古出鱼关与统领张彪遇以
彪弃述竹关故斩之彪威弟也威闻彪死按兵不进焞闻之谓僚佐曰吴政身死李贵复
以兵败金人所惮惟威今好古擅杀其弟失威心柰何
且金人在东非威地分今可无好古不可无威遂因好古入见数其擅杀彪罪斩之遣书
速威进救蜀且使进士田遂往说之威感激夜半调发
鼓行而前破金人于金斗镇金人虽败未退威顿兵不动潜遣石宣等袭于大安军大破
之金人之来也择两齿马及精兵凡三千人至是歼焉
俘其将巴图鲁大将包长寿闻之宵遁兴元叛兵张福莫简作乱以红帕蒙首号红巾队
焚利州杀总领杨九鼎破阆果入遂窳游骑在潼汉界
将窥成都制置司谓贼势欲西非威不可御乃遣威提精兵六千人自剑绵至广汉盛夏
暑剧休士三日俄安丙檄威东进时贼自遂窳入普州
茗山威进兵重围绝其粮道未几擒福等十七人戮之简自杀贼遂平西夏来约夹攻金
人丙许之遣王仕信会夏人于巩又命威与利帅程信
兴帅陈立等分道并进威向秦州议初起威谓金人尚强夏人反复未可轻动丙不听卒
遣威威龟勉而行令所部毋得轻发诸将至城下无功
而还丙怒奏罢其兵柄是岁卒于利州终扬州观察使威初在行伍以勇见称进充偏将
每战辄克金人闻其名畏惮之临阵战酣精采愈奋两
眼皆赤时号张红眼又号张鹞眼威立净天鹞旗以自表每战不操他兵有木楛号紫大
虫鬪而不刃长不六尺挥之掠阵敌皆靡荆鄂多平川
广野威曰是骑兵之利也铁骑一冲吾步穷矣蜀中战法不可用乃意创法名撒星陈分
合不常闻鼓则聚闻金则散骑兵至则声金一军分为
数十簇金人随而分兵则又鼓而聚之倏忽之间分合数变金人失措然后纵击之以此
辄胜威御军纪律严整兵行常若衔枚罕闻其声每遇
百姓避路买食物则贾倍于市迄无敢喧云

钦定续通志卷三百九十七

●钦定续通志卷三百九十八 列传一百九十八

- 4100 -

列传

宋【一百二】

○宋一百二

汪若海 张运 柳约 李舜臣 孙逢吉 章颖
商飞卿 刘颖 徐邦宪 李宗勉
袁甫 刘黻 王居安

汪若海

张运

柳约

李舜臣

孙逢吉

章颖

商飞卿

刘颖

徐邦宪

李宗勉

袁甫

刘黻

王居安

△汪若海

汪若海字东叟歙人未弱冠游京师入太学靖康元年金人来侵朝廷下诏求知兵者若海应诏未三刻而文成擢高等时已割河北地其年冬再围京师若海谓河北国家重地当用河北以揽天下之权属康王起兵相州乃上书枢密曹辅请立王为大元帅拥兵镇抚河北以犄金人之后则京城之围自解辅大喜即以其书进钦宗用为参谋遣如康王所宰相何■〈鹵，欠代义〉上木下〉执异议以道梗为辞不果遣京城失守二帝北行袖书抗尼雅满请存赵氏缒而出谒康王于济州谓神器久虚异姓僭窃宜蚤即位以图中兴一日间三被顾问补修职郎充帐前差使高宗既即位推恩改承奉郎迁江南经制使转承事郎监登闻检院五府交辟改属右府朝廷以张浚宣抚川陕议未决若海曰天下者常山蛇势也秦蜀为首东南为尾中原为脊今以东南为首安能起天下之脊哉将图恢复必在川陕乃往见浚极谈终日浚大惊辟以自随以亲老辞继论军食连执政通判沅州以谗夺籍谪英州道出临川时节制江夏军马李允文拥众数十万跋扈不用命朝廷命招讨使张

俊屯江西参谋官汤东野与若海故得若海道中喜甚谓曰李允文怀反侧非君莫能开其自新若海即驰往谕以成败逆顺示以朝廷威德复谈三策以动之辞旨明畅允文大感悟即举军东下若海复为书招其徒张用曹成李宏马友同归朝廷用一见以其众二十万解甲效顺惟成疑贰有他志若海移书责之成怒将杀若海若海夜宿王林军帐以计得林军印遂夺其众五千人翼日成遂遁若海遗宏书使刺成以自归宏得书图成而力不胜复走长沙刺友羣盗解散若海遂以林五千人归招讨使张俊俊乃班师凯旋军容愈盛时朝廷方出师若海以为为国家者当化盗贼为我用不可失英雄为国患因献平寇策朝廷悉用之其后李宏为刘忠所并死长沙刘忠为韩世忠所破走刘豫曹成走广而复降湖湘遂安寻复承务郎监潭州南岳庙通判辰州绍兴九年复三京祇谒陵寝事还以前功旬月四迁至承议郎通判顺昌府金人奄至太尉刘锜甫至众不满三万遣人丐援于朝无敢往者若海毅然请行具述锜明方略善用兵以偏师济之必有成功朝廷从之金兵果败去辟淮北宣抚司主管机宜文字拓皋之役复以劳两转至朝散郎通判洪州未上丁内艰服除添差通判信州秩满迁湖北帅司参议知道州陞辞得对帝曰久不见卿卿向安在授直秘阁知江州丁父忧时方经略中原朝廷议起若海而若海死矣若海豁达高亮深沈有度耻为世俗章句学为文操纸笔立就蹈厉风发高宗尝以片纸书若海名谕浚曰似此人材卿宜收拾会浚去国不果召

△张运

张运字南仲信之贵溪人唐宰相文瓘之后父贯右通直郎累赠大中大夫运年二十五以太学生登宣和三年进士第赐同上舍出身调桂阳监蓝山县丞县阙令运摄县事县与诸獠接壤因俗为治吏民安之临武寇与诸獠合大剽掠运亲帅兵厉之迁潭州攸县尉高宗南渡剧贼王在据岐山潭帅征兵戍岳运将二千人先至岳贼平改临江新淦丞县新被兵令不能支沿江抚谕使张汇劾罢之以运摄县事运拨煨烬考版籍正租赋数月之间敝除而民定绍兴五年通判鼎州贼杨么黄诚拥众数万残破城邑跳梁湖北高宗遣张浚以都督董师岳飞以招讨举兵击之贼率轻锐径趋武溪南兴以临鼎州城中大震运与太守程昌■〈宀禹〉勒兵登城控扼上下以张其势贼宵溃澧贼雷德进栅险称乱帅檄运讨之运将都统梁吉等率兵直捣其巢破四十二栅降其众金人侵庐寿等州大将驻兵淮濡以拒之运给饷未尝乏绝丁母及父

忧服除起知桂阳监五月而境内称治与部使者奏升监为军大修庠序之教祠汉以来

守令有功德于桂阳者卫飒唐羌等七人于学刻续颜氏家训四时纂要等书散之民间使之修德而务本召入对除知达州方大旱入境而雨奏除病民五事召为度支郎中临安路店务钱岁三十余万缗请以十万归省额户部所储三佛齐国所贡乳香九万一千五百斤直可百二十余万缗请分送江浙荆湖漕司卖之以余军饷及陈诸路纲运七弊惩革十术远近递输以均劳逸事皆施行兼枢密院检详迁军器监寻改大理少卿请正两浙盐法以宽私鬻之禁尤明于治狱狱为之空拜刑部侍郎言诸斥逐累敕未还者宜从湔洗诸申请条制多重复抵牾失于太烦诸编置不以赦原不以荫论之类失于太重外路刑狱三经翻异移送大理刀锯数施非所以示远及诸不便皆从之又请广储蓄兴鼓铸修屯田作乡兵亦皆听纳兼权户部侍郎时久雨伤蚕麦及边报有警诏侍从台谏陈弭灾御侮之策运言天灾人事有甚可畏而不足畏者视吾政之修不修有甚可忧而不足忧者视吾自治之善不善及宜边淮建三大镇以守之会金人渝盟特迁户部侍郎以专馈饷丞相陈康伯议遣李宝自四明控制海道众论纷纭运直入赞决以为上策金人果败走因上疏乞降诏抚将士蠲租赋遣信使结豪杰坚城守督汉中将士趋关陕以制其后置四镇三帅于两淮襄汉之间以为内固以图进取以御营随军都转运使从帝劳师江上及驾还因入对固请补外乃授集英殿修撰出知太平州当兵饥疾疠之余殫劳徠安辑之方严斥堠攻守之备理财赋造战舰缮甲兵申禁令民赖以安孝宗既受禅运亦请老以敷文阁待制提举江州太平兴国宫寻授广东经略不赴乃复祠禄干道七年翻大饥运首发粟二千石以赈之自是民争出粟以济连上章致政不许以疾卒赠少师左光禄大夫官其后三人嘉定六年赠开府仪同三司

△柳约

柳约字符礼秀州华亭人大观三年上舍进士试中学官为霸州教授徙睦州入为辟府正迁博士改宣议郎充广亲宅宗子博士约深于经学属辞粹微大为学者师慕提举福建盐事召对论内外学正次乞罢内外官到堂日投牒求官以厚风俗授秘书省校书郎进著作佐郎徽州司录改通判宿州召拜监察御史靖康初兼权殿中侍御史论三镇不可弃改尚书工部员外进左司员外郎父忧去官服除以直显谟阁充御营司参谋官迁太常少卿高宗将幸平江约疏言兵可进毋退以示怯于敌乃以直龙图阁知台州未赴徙严州兼浙西兵马都监节制管内军马当是时金人大入杜充拥众北去列郡震恐莫有奔问官守者约于横溃中屹保孤

城悉力捍御境内安堵上书请纠合诸郡克复吴会帝嘉其忠进右文殿修撰守郡如故诏以军兴费出无艺吏慢弗虔柳约独谨赋输率先程督进秩一等又诏约郡当兵冲而能不辞难不避事益严列栅保绥一方朕甚嘉之其以约充集英殿修撰召入对奖劳再三擢权户部侍郎约于是感激尽言凡例外宣索皆执奏不进论吴开等罪未正非所以励臣节诸大将提兵入觐各名其家将有尾大不掉之患皆人不敢言者会高丽请修贡议遣使报聘上顾廷臣无出约右加试户部侍郎充其选且将大用当路患之讽言者诬以事罢为提举太平观居七年复秘阁修撰金人归侵疆起知蔡州被命而往一无顾避既而金人渝平传檄河南守臣皆举城降约独遣使数辈于武昌得报而后返未几以敷文阁待制食祠禄十有五年卒赠四官约天性至孝母病甚泣祷于天愿损寿以益母寿母寻愈约竟先母两月卒

△李舜臣

李舜臣字子思隆州井研人生四年知读书八岁能属文少长通古今推迹兴废洞见根本慨然有志于天下绍兴末张浚视师江淮舜臣应诏上书言乘舆不出无以定大计宜徙幸武昌又谓江东六朝皆尝取胜北方不肯乘机争天下宜为今日监着江东胜后之鉴十篇上之中干道二年进士第对策论金人无可和之议宰辅大臣不当以奉行文字为职业考官恶焉绌下第调印州安仁县主簿岁大侵饥民千百持鉏棘大呼响震邑市令惧闭门舜臣曰此非盗也何惧为亟出慰劳遣之教授成都府时虞允文抚师关西辟置幕府用举者改宣教郎知饶州德兴县专尚风化民有母子昆弟之讼连年不决为陈慈孝友恭之道遂为母子兄弟如初间诣学讲说邑士皆称蜀先生罢百姓预贷偿前官积逋踰三万缗民病差役舜臣劝纠诸乡以税数低昂定役期久近为义役期年役成民大便利迁宗正寺主簿重修裕陵玉牒当曾布吕惠卿初用必谨书或谓非执政除免格不应书舜臣曰治忽所关何可拘常法他所笔削类此尤邃于易尝曰易起于画理事象数皆因画以见舍画而论非易也画从中起乾坤中画为诚敬坎离中画为诚明朱熹晚岁每为学者称之子心传道传性传以性传官二府赠太师追封崇国公

△孙逢吉

孙逢吉字从之吉州龙泉人也隆兴元年进士第授郴州司户干道七年太常黄钧荐于丞相虞允文梁克家将处以学官逢吉竟就常德教授以归李焘刘珙郑伯熊刘焯相继荐之知萍乡县以治最闻绍熙元年迁秘书郎兼皇子嘉王府直讲二年春二月雷雪之沴交作诏求直

言疏八事去蔽谏亲讲读伸论驳崇气节省用度惜名器拔材武饬戎备擢为右正言建言都城之民安居惮徙宗戚营缮寢广每建一第撤民居数百咨怨者多时亲王方更造楼观未已闻之亟令罢役初工部侍郎兼知临安府潘景珪结贵幸以进司谏邓驿屡数其罪景珪反以计倾之除驿匠监逢吉曰优迁其官而罢言职后来者且以言为戒两疏乞收驿新命不报并劾景珪胁持台谏蔑视朝纲景珪遂罢在谏垣七十日章二十上词旨剴切皆人所难言者改国子司业求去为湖南提刑以秘书监召兼吏部侍郎未熹在经筵持论切直小人多不便潜激帝怒中批与祠刘光祖与逢吉同在讲筵吏请曰今日某侍郎轮讲以疾告孙侍郎居次请代之逢吉问某侍郎讲义安在取观之则讲诗权輿篇刺康公与贤者有始而无终与逐朱熹事相类逢吉欣然代之讲因于上前争论甚苦帝曰朱熹言多不可用逢吉曰熹议祧庙与臣不合他所言皆正朱见其不可用寢失帝意会彭龟年论韩侂胄专僭出补郡逢吉入疏曰道德崇重陛下所敬礼者无若朱熹志节端亮陛下所委信者无若彭龟年熹既以论侂胄去龟年复以论侂胄绌臣恐贤者皆无固志陛下所用皆庸鄙儉薄之徒何以立国侂胄见而恶之丞相赵汝愚既罢侂胄专国一日从臣扈从重华宫帝行礼毕驾兴扈从者出宫门上马忽传呼侂胄至扈从者却入敛板甚恭逢吉曰既出复入揖臣子事君父之礼当如是耶不揖而去会部中会食吏密报优人王喜除阁职逢吉即言于帝前效朱侍讲进趋以儒为戏者岂可令污阁职即抗疏力争之同列密以告侂胄时王喜之命实未出遂以诬诋出知太平州丐祠提举江州太平兴国宫起知赣州已属疾卒谥献简弟逢年逢辰皆有文学行义时称孙氏三龙

△章颖

章颖字茂献临江军人以兼经中乡荐孝宗嗣服下诏求言颖为万言书附驿以闻礼部奏名第一孝宗称其文似陆贽调道州教授会宜章寇为乱郡僚相继引去颖独留寇平郡守以功入为郎奏颖有协赞之功可大用乃召对除太学录礼部正奏第一人初任郎召对者自颖始久不迁及奏考试官孝宗曰章颖可乃知帝犹记其说论也顷之迁太学博士丁内艰服阙添差通判赣州除太常博士御史中丞何澹闻继母讣引不逮事之文颖定议解官除左司谏时左相留正去右相葛邲当国颖论邲不足任大事凡二十余疏从官议欲超除颖俾去言职庶可两留光宗曰是好谏官何以迁之邲始出颖屡疏请帝问安重华宫悉焚其藁熹宗即位除侍御史兼侍讲寻权兵部侍郎韩侂胄用事颖侍经帙

帝曰諫官有言及赵汝愚者卿等谓何同列漫无可否颖奏言天地变迁人情危疑加以敌人嫚侮国势未安未可容易进退大臣愿降诏宣谕汝愚无听其去不报奏请待罪于郡御史劾颖阿党罢太学生周端朝等六人伏阙辨汝愚被诬且谓章颖言发于忠首遭斥逐端朝等皆被罪自是党论遂起矣颖家居久之起知衢州侍御史林行可劾罢之寻知赣州御史王益祥复劾寝其命再祠需次知建宁府侂胄诛除集英殿修撰累迁刑部侍郎兼侍讲对延和殿帝叹曰卿为权臣沮抑甚久颖乞修改甲寅龙飞事迹诬笔除吏部侍郎寻迁礼部尚书升侍读诏颖以绍熙庆元谯令宪玉牒辨诬余端礼赵彦逾甲寅龙飞记及赵汝愚当时所记事考订削诬从实上之丐去奉祠以嘉定十一年卒年七十八颖操履端直生平风节不为穷达所移虽仕多偃蹇而清议与之方党论之兴朱熹遗以书略曰世道反复已足流涕而握其事者怒犹未已未知终安所至极耶然宗社有灵公论未泯异日必有任是责者非公吾谁望耶赠光禄大夫谥文肃

△商飞卿

商飞卿字翬仲台州临海人淳熙初由太学登进士第任无为军教授累官至工部郎官时韩侂胄柄国气焰熏灼飞卿既至未尝辄一造请踰月即丐去提举福建路常平茶盐事擢监察御史以言事迁侂胄罢为奉常请外以秘阁修撰为荆湖南路转运判官后改司农卿总领江东淮西军马钱粮金陵故有帅漕治所合戎骑二帅留钥内侍号六司宴饮馈遗费动万计飞卿以身率俭节缩浮苛粮饷时敛散稍稍以裕闻开禧中就擢户部侍郎侂胄将举师尝问饷计丰约飞卿以实告比调遣浩繁不克支属有旨俾飞卿军前传宣抚劳值金兵大至几不免以忧卒

△刘颖

刘颖字公实衢州西安人绍兴二十七年进士调溧阳主簿时张浚留守建康金师初退府索民租未入者颖白浚言师旅之后宜先抚摩当尽蠲逋赋浚喜即奏阁免由是知名遣其子栻与游教授全州改官知铅山县以外艰去再知常熟县签判潭州王佐为帅负其能盛气以临僚吏及陈峒反所擒贼多颖计策佐上其功曰签判宜居臣上召监进奏院进太常寺主簿迁丞兼兵部郎官提举浙西常平茶盐疏浚水湖以泄吴松江一水禁民侵筑毋使逼塞大流民田赖之就迁提刑以洗冤泽物为任间诣狱察不应系者纵遣之御史以介僻劾罢除江西运判江州德化县田逃徙大半守乞蠲税不报颖以见种之税均于荒莱民愿耕者第减之上供

自若而逃田尽复除直秘阁淮东转运副使初水败楚
州城修补未竟刘超欲移筑颖因接有金国使入对言国家何苦捐百万缗为军帅幸赏
地耶光宗从之除户部郎中淮东总领务场以额钞抵
赏阴耗饷计二十年无知此弊者颖究核得之以所卖数论赏而总饷增羨迁司农少卿
淮西总领前主计者请自为都酿抱净息而利羸余其
后稍亏反以大军钱佐之邀余江淮回易如负贩状颖以为失王人之体遂罢之内府宣
限既迫每移供军钱以应岁输颖搜吏弊汰冗员分月
纲解自是不复那移寻除直宝谟阁江东运副知平江府皆未行除宗正少卿迁起居郎
累除敷文阁待制致仕嘉定改元召赴行在落致仕除
刑部侍郎辞进龙图阁待制知婺州请老以宝谟阁直学士致仕六年卒于家年七十八
赠光禄大夫在孝宗朝人臣争承意自献颖奏今日之
失在轻听人言昔之施为今复弃置大损盛德孝宗嘉纳之光宗时论人主难克而易流
者四曰逸豫无节赐予无度儒臣易疏近幸易昵宁宗
时学禁初起党论日兴颖奏愿陛下御之以道容之以德不然元佑崇观之事可鉴也其
言皆切中于时自浙西请外凡徙麾节十余年有以淹
速讯之颖笑曰吾所欲也其在从班日韩侂胄旧与问旋无间方居中用事而颖谢绝之
常言士以不辱身为重其为少宗正丞相赵汝愚适归
相遇于废寺泥雨不能伸足但僧迹立语曰寄谢余参政某虽去而人才犹在朝廷幸善
待之颖曰相公人才即参政人才也使果贤参政之责
非宰相之忧也余参政端礼也余继相卒于善类多所全佑颖之助云

△徐邦宪

徐邦宪字文子婺州义乌人幼颖悟从陈傅良究名物义理以通史传百家之书绍
熙四年试礼部第一人登进士第三迁为秘书郎韩侂
胄开兵端同恶附和不敢先发一语议其非者邦宪独首言之丐外知处州陛辞力谏用
兵不可太骤再岁召还言求名义以息兵莫若因建储
而肆赦借殊常之恩为弭兵之名因行赦宥大霑德泽发仓粟以赈饿殍及农时而复民
业如此则建储之义正与息兵相为表里也又上侂胄
书侂胄恶其言嗾御史徐榘击之镌秩罢之未几复官除江西宪改江东漕以户部郎为
淮西总领侂胄已诛尚书倪思举邦宪自代召对上言
今日更化未可与绍兴乙亥同论秦桧专权天下犹可以缉理今侂胄专权天下败坏尽
矣权工部侍郎知临安府丐祠知江州奏乞郡得节制
屯戍兵至郡疾以宝谟阁待制致仕卒于官年五十七谥文肃

△李宗勉

李宗勉字强父富阳人开禧元年进士历黄州教授累迁国子博士宝庆初添差通

判嘉兴府三年召为秘书郎绍定元年迁著作郎入对
言边事宜夙夜震惧以消咎殃明年兼权兵部郎中时李全叛谋已露人莫敢言宗勉独
累疏及之又言欲人谋之合莫若通下情欲财计之丰
莫若节国用欲邦本之固莫若宽民力寻改兼侍右郎官明年入对言天灾甚切四年差
知台州明年直秘阁知婺州端平元年进直宝章阁依
旧任越月以宗正丞兼权右司召改尚左郎官兼职仍旧寻兼左司而对言四事守公道
以悦人心行实政以兴治功谨命令以一观听明赏罚
以示劝惩次言楮弊愿诏有司始自乘輿宫掖下至百司庶府核其冗蠹者节之岁省十
万则十万之楮可损岁省百万则百万之楮可损行之
既久损之既多钱楮相当所至流转则操吾赢缩之柄不在楮矣拜监察御史时方谋出
师汴洛宗勉言今朝廷安恬无异于常时士卒未精锐
资粮未充衍器械未犀利城壁未缮修守御犹不可而欲进取可乎借曰今日得蔡明日
得海又明日得宿毫然得之者未必可守万一含怒蓄
忿变生仓猝将何以济臣之所陈岂曰外患终不可平土宇终不可复亦欲量力以有为
相时而后动耳愿诏大臣爱日力以修内治合人谋以
严边防节冗费以裕邦财招强勇以壮国势仍饬沿边将帅毋好虚名而受实害左控右
扼毋失机先若使本根壮固士马精强观衅而动用兵
未晚已而洛师溃又言昔之所虑者在当守而冒进今之所虑者在欲守而不能何地可
控扼何兵可调遣何将可捍御何粮何给饷皆当预作
措画又言内降之弊皆大臣所当执奏迨其命令已下阙失已彰然后言事之人从而论
列之其累圣德多矣况言之未必听听之未必行乎进
左司谏明年兼侍讲首言均房安薪光化等处兵祸甚烈然江面可藉以无忧者犹有襄
州今又告变襄州失则江陵危江陵危则长江之险不
足恃江陵或不守则事迫势蹙必有存亡之忧拜殿中侍御史时淮西制置使兼沿江制
置副使史嵩之兼知鄂州就鄂建牙宗勉言荆襄残破
淮西正当南北之交嵩之当置司淮西则脉络相连可以应援邈在鄂渚岂无鞭不及腹
之虑若云防江为急欲藉嵩之于鄂渚经理然齐安正
与武昌对如就彼措置防扼则藩篱壮而江面安矣所谓欲保江南先守江北也当别择
鄂守径令嵩之移司齐安诏侍从两省台谏条陈边事
宗勉率合台奏蜀之四路已失其二成都隔绝莫知存亡诸司退保夔门未必能守襄汉
昨失九郡今郢破荆门又破江陵孤城何以能立两淮
之地人民奔迸呜呼危哉陛下诚能以身率先服御饮宴一从简俭放后宫浮食之女罢
掖庭不急之费止锡赉绝工役出内帑储蓄以风动四
方然后勤谕戚畹世臣随力输财以佐公家之调度分上流淮西淮东为三帅而以江淮

大帅总之以公私之财公给四处俾之招溃卒募流民
强壮者以充游兵以补运籍仍选沿流诸郡将士为捍御之图犹可支吾或谓其势强盛
宜于讲和欲出金缗以奉之是抱薪救火空国与敌矣
进工部侍郎兼给中仍侍讲擢谏议大夫兼侍读言边事当增兵防扼上流又言求谏非
难而受谏为难受谏非难而从谏为难进端明殿学士
同签书枢密院事未几进签书时王楫复求岁币银绢各二十万宗勉言轻诺者多后患
当守元约可也史嵩之开督府力主和议宗勉言嵩之
职在督战如收复襄光控扼施澧招集山砦保固江流皆今所当为若所主在和则凡有
机会可乘不无退缩之意必至虚损岁月坐失事功进
参知政事及拜左丞相兼枢密使守法度抑侥幸不私亲党召用老成尤乐闻谏言赵汝
腾尝以宗勉为公清之相以光禄大夫观文殿大学士
致仕卒赠少师谥文清

△袁甫

袁甫字广微宝文阁直学士燮之子嘉定七年进士第一签书建康军节度判官厅
公事授秘书省正字入对论君天下不可一日无惧心
今之可惧者大端有五端良者斥谄谀者用可惧也兵戈既兴馈饷不继可惧也独运密
谋之意胜虚心咨访之意微可惧也外患未弭内患方
深可惧也恭俭有余刚断不足可惧也其它祸几乱萌不可悉数次乞严守帅之选并大
军之权兴屯田之利迁校书郎转对言边事之病不在
外而在内偷安之根不去规模终不立壅蔽之根不去血脉终不通忌嫉之根不去将帅
终不可择欺诞之根不去兵财终不可治出通判湖州
考常平弊原以增积贮核隐产增附婴儿局迁秘书郎寻迁著作佐郎知徽州治先教化
崇学校访便民事上之请蠲减婺源紬绢万七千余匹
茶租折帛钱万五千余贯月桩钱六千余贯请照咸平绍兴干道宽恤指挥受纳徽绢定
每匹十两请下转运常平两司豫蓄常平义仓备荒兴
修陂塘勑筑桥梁丁父忧服除知衢州立旬讲务以理义淑士心岁拨助养士千缗西安
龙游常山三邑积窘预借为代输三万五千缗蠲四万
七千缗郡有义庄买良田二百亩益之移提举江东常平适岁旱亟发库庾之积凡州县
窠名隶仓司者无新旧皆住催为钱六万一千缗米十
有三万七千麦五千八百石遣官分行赈济饥者予粟病者予药尺籍之军弱者市民之
失业者皆曲轸之又告于朝曰江东或水而旱或旱而
水重以雨雪连月道殣相望至有举家枕籍而死者此去麦熟尚賒事势益急诏给度牒
百道助费时江闽寇迫饶信虑民情易动分榜谕安之
檄诸郡关制司闻于朝为保境捍患之图寇迄不犯遂提点本路刑狱兼提举移司番阳

霜杀桑春夏雨久湖溢诸郡被水连请于朝给度牒二
百道赈恤之盗起常山调他州兵千人屯广信以为备都城大火上封事言上下不交以
言为讳灾变之作端由于此愿下哀痛之诏以回天意
诏求直言复上疏言灾起都邑天意盖欲陛下因其所可见察其所不可见行至公无私
之心全保护大臣之体率属羣工大明黜陟与天下更
始词甚切直行部问民疾苦荐循良劾奸贪决滞狱所至诣学宫讲说岁大旱请于朝得
度牒缗钱绫纸以助赈恤疫疠大作勅药院疗之前后
持节江东五年所活殆不可数计转将作监领事如故继力辞常平事彗星见诏求直言
疏言皇天所以震怒者由愁苦之民众人民所以愁苦
者由贪冒之风炽愿一变上下交征之习为大公至正之归帝亲政以直徽猷阁知建宁
府明年兼福建转运判官闽盐隶漕司例运两纲供费
后增至十有二吏卒并缘为奸且抑州县变卖公私苦之甫奏复旧例丁米钱久为泉漳
兴化民患会知漳州赵以夫请以废寺租为民代输甫
并捐三郡岁解本司钱二万七千贯助之郡屯左翼军本备峒寇招捕司移之江西甫檄
使还营俄寇作唐石即调之以行而贼悉平迁秘书少
监入见奏无逸之义言知农夫稼穡艰难自然逸欲之念不起乞力守更化以来求贤如
不及之初意迁起居舍人兼崇政殿说书于经筵奏刚
之一字最切于陛下所谓真刚者当为之事必行不当为者则断在勿行又乞专意经训
养育精神务令充实兼中书舍人时相郑清之以国用
不足履亩使输券甫奏避贵虐贱有力者顽不应命而迫呼迫促破家荡产悲痛无聊者
大抵皆中下之户尝讲罢帝问近事甫奏惟履亩事人
心最不悦又尝读资治通鉴至汉高祖入关辞秦民牛酒因奏今日无以予人反横科之
其心喜乎怒乎本朝立国以仁陛下以为此举仁乎否
乎帝为惻然时朝廷以边事为忧史嵩之帅江西力主和议甫奏曰臣与嵩之父弥忠有
故嵩之易于主和弥忠每戒其轻易臣谓不特嵩之之
易于主和抑朝廷亦未免易于用人也疏入不报遂乞归不允授起居郎兼中书舍人未
几擢嵩之刑部尚书甫复奏论诰命不与书行乃出甫
知江州王遂抗疏力争帝曰本以授其兄袁肃报行误耳令遂勉甫无他志翼日乃与肃
江州而殿中侍御史徐清舆复论甫守沙日赃六十万
汤巾等又争之清舆亦悔未几改知婺州不拜嘉熙元年迁中书舍人入见帝问边事甫
奏当以上流为急议和恐误事时清舆与甫并召边而
清舆未至甫奏台谏风闻言事初亦何心今人物渺然有如清舆宜在朝廷辞避实惟臣
故乞趣其赴阙又奏备边四事曰固江陵堰瓦梁与流
民复业责边阆遣回敌使 【按甫奏备边四事宋史本传脱载责边阆回敌使一事当时

蒙古使窥觚虚实久未出境故疏及之今据甫所著

蒙斋集增】 嵩之移京湖沿江制置使知鄂州甫奏曰嵩之轻脱难信去年嵩之在淮西王楫由淮西而来北军踵之今又并湖南付之臣恐其复以误淮西者误湖南疏留中不行翼日权吏部侍郎引疾至八疏赐告一月迁兵部侍郎兼给事中岳珂以知兵财召甫奏珂总饷二十年焚林竭泽珂竟从外补迁吏部侍郎兼国子祭酒日召诸生叩其问学理义讲习之益时边遽日至甫条十事至为详明权兵部尚书暂兼吏部尚书卒赠通奉大夫谥正肃甫少服父训谓学者当师圣人以自得为贵又从杨简问学自谓吾观草木之发生听禽鸟之和鸣与我心契其乐无涯云

△刘黻

刘黻字声伯乐清人早有令闻年三十四以淳佑十年试入太学时丁大全方为台属劾奏丞相董槐迫逐去国将夺其位黻率同舍生伏阙上书忤执政送南安军安置归别其母解氏解氏曰为臣死忠以直被贬分也速行及大全贬黼还太学未几侍御史陈垓诬劾程公许右正言蔡荣诬劾黄之纯二公罢出黼又率诸生上书其略曰臣闻扶植宗社在君子扶植君子在公论祖宗建置台谏本以伸君子而折小人昌公论而杜私说乃今老饕自肆奸种相仍以谄谀承风旨以倾险设机阱以泆恣盗官爵宰相所不乐者外若示以优容而阴实颐指台谏以去之台谏所弹击者外若不相为谋而阴实奉承宰相以行之陛下万机之暇试以公许之纯与垓荣等熟思而静评之其言论孰正孰邪孰忠孰佞虽中智以下之主犹知判别是非况以陛下明圣而顾不察此自昔天下之患莫大于举朝无公论空国无君子脱有缓急彼一二儉人者陛下独可倚仗之乎又谏游幸言自十数年间创龙翔创集庆创西太一而又示之以游幸导之以祷祠蛊之以虚诞不经之说宰相以下希宠而不言与夫言之而不力皆非所以爱陛下也以材署昭庆军节度掌书记由学官试馆职咸淳三年拜监察御史论内降恩泽曰臣覩陛下自郊祀庆成以来恩数绸缪指挥烦数邸报之间以内批行者居其半前之恩数未竟后之恩数已乘宰执惧有所专而不敢奏给舍台谏惧有所忤而不敢言更如此者数年将何以为国四年改正字丁父忧服除授集英殿修撰沿海制置知庆元府事建济民庄以济士民之急资贡士春官之费备郡庠耆老缓急之需又请建慈湖书院八年召还拜刑部侍郎九年改朝奉郎试吏部尚书兼工部尚书兼中书舍人兼侍读疏请给王十朋祠堂田土十年丁母忧明年江上溃师丞相陈宜中起复黻为端明殿学士不起及贾

似道韩震死宜中谋拥二王由温州入海以兵逆黻共政将逊相位于是黻托宗祀于母弟成伯遂起及罗浮以疾卒其配林氏举家蹈海未几海上事亦瓦解矣

△王居安

王居安字资道黄岩人始名居敬字简卿避祧庙嫌易之始能言读孝经有从旁指曰晓此乎即答曰夫子教人孝耳入太学淳熙十四年举进士授徽州推官连遭内外艰柄国者以居安十年不调将径授职事官居安自请试民事乃授江东提刑司干官入为国子正太学博士入对言人主当以知人安民为要人未易知必择宰辅侍从之贤使引其类民未易安必求恺悌循良之吏以布其泽迁校书郎居安乞召试言祖宗时惟进士第一不试苏轼以高科负重名英宗欲授馆职韩琦犹执不从执政谓居安曰朝廷于节度尚不较况馆职乎居安因言节钺之重文非位极武非勋高胡可妄得丞相言不较过矣时苏师旦命且下故居安言及之改司农丞御史迎意论劾主管仙都观踰年起知兴化军既至条奏便民事乞行经界且言蕃舶多得香犀象翠崇侈俗泄铜镪有损无益宜遏绝禁止通商贾以损米价诛剧盗以去民害召为秘书丞转对言置宣司不闻进取之良规遣小使寂无确许之实报但当严飭守备益兵据险以待之此庙算之上也李璧尝语人曰比年论疆事无若王秘丞之明白者迁著作郎兼国史实录院检讨编修官兼权考功郎官擢右司谏首论侂胄以预闻内禅之功窃取大权数年之间位极三公列爵为王奸心逆节具有显状侂不明正典刑何以昭国法诚取侂胄肆诸市朝是戮一人而千万人获安其生也非常之罪当伏非常之诛讵可以常典论右丞相陈自强奸憝附丽黷乱国经较其罪恶与侂胄相去无几乞追责远窜以为为臣不忠朋侪误国者之戒又劾曦外嫔郭倪郭僎窜岭表天下快之继兼侍讲方侂胄用事箝天下之口使不得议己太府寺丞吕祖俭以谪死布衣吕祖泰上书直言中以危法流之远郡居安奏请明其冤以伸忠鯁之气赵彥逾与楼钥林大中章燮并召居安言钥与大中用宗庙社稷之灵天下苍生之福彥逾始以赵汝愚不与同列政地遂启侂胄专政之谋汝愚之斥死彥逾之力居多陛下乃使与二人者同升不几于熏莸同器邪正并用乎疏已具有微闻者除目夜下迁起居郎兼崇政殿说书于是为谏官才十有八日既供职即直前奏曰陛下特迁臣柱下史者岂非欲使臣不得言耶二史得直前奏事祖宗法也遂极论之又言臣为陛下耳目官谏纸未干乃以连权要徙他职不得其言则去臣不复留矣帝为改容御史中丞雷孝友论其越职夺一

官罢踰年复官知太平州当边遽甫定岁俭汰去军羣聚寇攘居安威惠流行晏然若无事时将副刘佑为怨家诣阙告密置狱金陵居安以书抵当路辩其冤或谓佑自诬服得无嫌于党逆乎居安曰郡有无辜死奚以守为事果白以直龙图阁提点浙西刑狱葛恠者用戚属恩补官豪于贄尝憾父之嬖既去而诬以盗株连殍死者数人恠乃未尝一造庭居安一阅得实立捕系论罪械送他州权工部侍郎以集英殿修撰知隆兴府初盗起郴黑风峒罗世传为之倡势张甚湖南所在发兵扼要冲义丁表里应少贼乏食援懈主兵者稍坚持之则就禽矣会江西帅欲以买降为功遣人间道说贼馈盐与粮贼喜谋益逞阴治械外送款身受官峒中不至公府义丁皆恚曰作贼者得官我辈捐躯坏产业何所得于是五合六聚各以峒名其乡李元励陈廷佐之徒并起为贼矣放兵四劫江西列城皆震朝廷调江鄂之兵屯衡赣而他兵驻龙泉者命吉守节制焉吉守率师往几为贼困池兵来援失利遂以居安为帅居安以书晓都统制许俊曰贼胜则民皆为贼官军胜则贼皆为民势之张翕决于此举居安督战于黄山胜之贼始惧走韶州为摧锋军所败势日蹙吉守以祠去命居安节制江池大军驻庐陵督捕颁郡事召土豪问便宜皆言贼恃险陟降如猿猱若钞吾粮吾事危矣居安曰吾自有以破贼会元励执练木桥贼首李才全至居安厚待才全而赏元励众皆感罗世传果疑元励之贰已遂交恶元励率众攻世传居安语俊曰两虎鬪于穴吾可成卞庄子之功世传喉练木桥贼党袭元励俘其孥禽元励以献时青草峒贼亦就禽并磔于吉之南门元励既诛世传以功负恃益骄蹇名效顺而实自保俊请班师居安不许俾因贼堡壁固守居亡何世传果与兄世禄俱叛乃密为方略遣官民兵合围之世传自经死斩其首以徇羣盗次第平居安之在军中也赏厚罚明将吏尽力始终用以贼击贼之策故兵民无伤者江西人祠而祝之刻石纪功徙镇襄阳以言者罢闲居十有一年嘉定十五年与魏了翁同召迁工部侍郎时方受宝皆贺入对言人主畏无难而不畏多难輿地宝玉之归盍思当时之所以失言极切至甫两月以集英殿修撰提举玉隆宫未几以宝谟阁待制知温州郡政大举理宗即位以敷文阁待制知福州升龙图阁直学士转大中大夫提举崇福宫将行盐寇起寗化居安以书谕汀守曰土瘠民贫业于盐可尽禁耶且彼执三首恶以自赎宜治此三人他可勿治部使者遣左翼军将邓起提兵往起贪夜冒险与寇角以死军溃民相惊逃去事闻命居安专任招捕居安既留募军校刘华邱锐者授以计划至汀而贼已至郡矣州人大惧贼知帅有抚纳意即引退华锐出入贼中指期约

降有以右班摄汀守者倔强好大言以知兵自任欲出不意为己功贼知其谋败降约而建剑诸郡并江西啸聚蜂起矣居安议不合叹曰吾可复求焦头烂额之功耶即拜疏归居安以书生于兵事不学而能必诛峒寇而降汀寇皆非苟然者卒累赠少保居安宅心公明待物不贰

钦定续通志卷三百九十八

●钦定续通志卷三百九十九 列传一百九十九

列传

宋 【一百三】

○宋一百三

崔与之 洪咨夔 许奕 陈居仁【卓】 刘汉弼

崔与之

洪咨夔

许奕

陈居仁

刘汉弼

△崔与之

崔与之字正子广州人少卓犖有奇节不远数千里游太学绍熙四年举进士广之士繇太学取科第自与之始授浚州司法参军郡守欲移兑常平之积坚不可守敬服更荐之调淮西提刑司检法官民有窘于豪民逋负殴死其子诬之者其长欲流之与之曰小民计出仓猝忍使一家转徙乎况故杀子孙罪止徒卒从之知建昌之新城岁适大歉有强发民廩者执其首折手足以徇盗为止劝分有法贫富安之开禧用兵军旅所需天下骚然与之独买以系省钱吏告月解不登曰宁罢去和余令下与之独以时贾余令民自槩通判邕州守武人苛刻衣赐不时给诸卒大哄漕司檄与之摄守叛者帖然乃密访其首事一人斩之阖郡以宁擢发遣宾州军事郡政清简寻特授广西提点刑狱徧历所部至浮海巡朱崖秋毫无扰州县而停车裁决奖廉劾贪风采凛然朱崖地产苦■〈廿登〉民或取叶以代茗州郡征之岁五百缗琼人以吉贝织为衣衾工作皆妇人役之有至期年者弃稚违老民尤苦之与之皆为榜免其它利疾罢行甚众琼之人次其事为海上澄清录岭海用刑惨酷贪吏厉民乃疏为十事申谕而痛惩之高惟肖尝刻之号岭海便民榜广右僻县多右选摄事者类多贪黷与之请授广东循梅诸邑减举员赏格以劝选人熙宁免役之法独不及海外四家民破家相望与之议举行未果以语颜戮戮守琼遂行之召为金部员外郎时郎官多养资望不省

事与之巨细必亲省决吏为欺者必杖之金南迁于汴朝议疑其进迫特授直宝谟阁权发遣扬州事主管淮东安抚司公事奏选于将集民兵为边防第一事既至浚濠广十有二丈深二丈西城濠势低因疏塘水以限戎马开月河置钓桥州城与堡砦城不相属旧筑夹土城往来为易以甃因滁有山林之阻创五砦结忠义民兵金人至淮西沿边之民得附山自固金人亦疑设伏自是不能深入扬州兵久不练分强勇镇淮两军月以三八日习马射令所部兵皆仿行之浙东饥流民渡江与之开门抚纳所活万人楚州工役繁士卒叛入射阳湖亡命多从之者与之给旗帖招之首谋者禽戮分其余隶诸军山东李全以众来归与之移书宰相谓自昔召外兵以集事者必有后忧宰相欲图边功诸将皆怀侥幸都统刘瑄承密札取泗州兵渡淮而后牒报瑄全军覆没与之忧愤驰书宰相言与之乘鄆五年子养士卒今以万人之命坏于一夫之手敌将乘胜袭我金人入境宰相连遣与之三书俾议和与之答曰彼方得势而我与之和必遭屈辱今山砦相望边民米麦已尽输藏野无可掠诸军与山砦并力剿逐势必不能久驻况东海涟水已为我有山东归顺之徒已为我用一旦议和则涟海二邑若为区处山东诸酋若为措置望别选通才以任和议与之自刘瑄败亟修守战备遣精锐布要害金人深入无功而和议亦寝时议将姑闕两淮制置命两淮帅臣互相为援与之启庙堂曰两淮分任其责而无制阃总其权则有警不能疾驰相救制阃俯瞰两淮特一水之隔文移往来朝发夕至无制阃则事事禀命朝廷必稽缓误事议遂寝召为秘书少监军民遮道垂涕与之力辞召命竟还将度岭趣召不已行次池口闻金人至边乃造朝奏今边声可虑者非一惟山东忠义区处要不容缓前后累书数千言每叹养虎自遗后患升秘书监兼太子侍讲权工部侍郎未几成都帅董居谊以黥货为叛卒所逐总领杨九鼎遇害蜀大扰与之以选为焕章阁待制知成都府本路安抚使至即帖然时安丙握蜀重兵久每忌蜀帅之自东南来者至是独推诚相与丙卒诏尽护西蜀之师开诚布公兼用吴蜀之士拊循将士人心悦服先是军政不立戎帅多不协和刘昌祖在西和王大才在沔州大才之兵屡衄昌祖不救遂弃阜郊吴政屯凤州张威屯西和金人自白还堡突入黑谷威不尾袭而迂路由七方关上青野原金人遂得入凤州与之戒以同心体国于是戎帅协和军政始立先是丙尝纳夏人和从之请会师攻秦巩而夏人不至遂有阜郊之败与之至是飭边将不得轻纳踰年夏人复攻金人遣百骑入凤州邀守将求救援兵与之都统李冲来言曰通问当遣介持书不当遣兵径入若边民不相悉或有相

伤则失两国之好宣敛兵退屯夏人知不可动不复有言初金人既弊率众南归者所在而有或疑不敢纳与之优加爵赏以来之未几金万户呼延棫等扣洋州以归与之察其诚纳之籍其兵千余人皆精悍善战金人自是不窥兴元既复鏖榜边关开谕招纳金人谍得之自是上下相疑多所屠戮人无固志蜀盛时四戎司马万五千有奇开禧后安丙裁去三之一嘉定损耗过半比与之至马仅五千与之移檄茶马司许戎司自于关外收市如旧严私商之禁给细茶增马价使无为金人所邀总司之给料不足者亦移檄增给之乞移大帅于兴元虽不果行凡关外林木厚加封殖以防金人突至隔第关盘车岭皆极边号天险因厚闲探者赏使覘之动息悉知边防益密总计告匱首拨成都府等钱百五十万缗助余本又虑关外岁余不多运米三十万石积沔州仓以备不测初至府库钱仅万余其后至千余万金帛称是蜀知名士若家大酉游似李性传李心传度正之徒皆荐达之沔帅赵彥呐方有时名与之独察其大言亡实它日误事者必此人移书庙堂欲因乞祠而从之不可付以边藩之寄后果如其言与之以疾丐归朝廷以郑损代既受代金谍知之大入与之再临边金人乃退召为礼部尚书不拜便道还广蜀人思之肖其像于成都仙游阁以配张咏赵抃名三贤祠端平初帝既亲政召为吏部尚书数以御笔起之皆力辞金亡朝廷议取三京闻之顿足浩叹俄授广东经略安抚使兼知广州摧锋军州摧锋军远戍建康留四年比撤戍归未踰岭就留戍江西又四年转战所向皆捷而上功幕府不报求撤戍又不报遂相率倡乱纵火惠阳郡长驱至广州城与之家居肩輿登城叛兵望之俯伏听命晓以逆顺祸福其徒皆释甲而首谋数人惧事定独受祸遂遁入古端州至是与之闻命亟拜即家治事属提刑彭铉讨捕俄而新调诸军毕集贼战败请降桀黠不悛者戮之其余分隶诸州帝于是注想弥切拜参知政事拜右丞相皆力辞乃访以政事之孰当罢行人才之孰当用舍与之力疾奏天生人才自足以供一代之用惟辨其君子小人而已忠实而有才者上也才虽不高而忠实有守者次也用人之道无越于此陛下厉精图治擢用老成然以正人为迂阔而疑其难以集事以忠言为矫激而疑其近于好名任之不专信之不笃如真德秀洪咨夔魏了翁方此柄用相继此而去至于敢谏之臣忠于国言未脱口斥逐随之人才岂易得而轻弃如此陛下悟已往而图方来昨以直言去位者亟言峻擢补外者蚤与召还收揽大权独断谓之悉归独断者必是非利害胸中卓有定见而后独断行之大抵独妍当以兼听为先傥不兼听而断其势必至于偏听实为乱阶威令虽行于上而权柄潜

移于下矣又曰边臣主和朝廷虽知而未尝明有施行忧边之士割切而言一鸣辄斥假使和而可保亦当议而行之可也又曰比年以变故层出盗贼跳梁雷雹震惊星辰乖异皆非细故京城之灾七年而两见惟有求直言可以裨助君德感格天心又曰戚畹旧僚凡有丝发夤缘者孰不乘闲伺隙以求其所大欲近习之臣朝夕在侧易于亲昵而难于防闲司马光谓内臣不可令其采访外事及问以羣臣能否盖干预之门自此始也帝览奏嘉叹趣召愈力控辞至十有三疏嘉熙三年乃得致仕以观文殿大学士提举洞霄宫廩禄之余皆以均亲党卒年八十有二封至南海郡公谥清献

△洪咨夔

洪咨夔字舜俞于潜人嘉定二年进士授如皋主簿寻试为饶州教授授南外宗学教授以言去丁母忧服除应博学宏词科直院庄夏举自代崔与之帅淮东辟置幕府边事纤悉为尽力邱寿隽代与之为帅金人攻六合扬州闭门设守咨夔亟诣寿隽言曰金人忌楚必未至扬乃先自示弱不特淮左之人心动而金人且骄必来矣第当远斥堠精闲探筒士马张外郡声援而大开城门晏然如平时若金人果来某当深任之寿隽愧谢与之帅成都请于帝授咨夔藉田令通判成都府与之为制置使首檄咨夔自近辞曰今当开诚心布公道合西南人物以济国事乃一未有闻而先及门生故吏是示人私也卒不受惟以通判职事往来效忠蜀人高之寻知龙州州岁贡麸金率科矿户咨夔曰将奉上乃厉民乎出官钱市之江油之民岁戍边复苦餽饷为请于制漕司免之毁邓艾祠更祠诸葛亮告其民曰毋事仇讎而忘父母还朝为秘书郎迁金部员外郎会诏求直言慨然曰吾可以尽言悟主矣其父见其疏曰吾能吃茄子饭汝无忧史弥远读至济王之死非陛下本心大悲掷于地转考功员外郎转对复言李全必为国患于是台谏李知孝梁成大交论镌二秩读书故山七年而弥远死帝亲政以礼部员外郎召入见帝问今日急务对以进君子而退小人开诚心而布公道且言在陛下一念坚凝又问在外人物对以崔与之护蜀而归闲居十年终始全德之老臣若趣其来可为朝廷重真德秀魏了翁皆陛下所简知当聚之本朝翼日与王遂并拜监察御史咨夔感激知遇谓遂曰朝无亲擢台谏久矣要当极本穷原而先论之乃上疏曰臣厯考往古治乱之原权归人主政出中书天下未有不治权不归人主则廉级一夷纲常且不立奚政之问政不出中书则腹心无寄必转而他属奚权之揽陛下亲政以来威福操柄收还掌握天下始知有吾君元首既明股肱不容于自惰撤副封罢先

行坐政事堂以治事天下始知有朝廷此其大权大政亦略举矣然中书之弊端其大者有四一曰自用二曰自专三曰自私四曰自固愿陛下于从容论道之顷宣示臣言俾大臣充初志而加定力惩往辙而图方来以仰称厉精更始之意帝嘉纳之又首乞罢枢密使薛极以厉大臣之节章三上卒出之其它得罪请议者相继劾去朝纲大振明年改元端平咨夔预乞于正月朔下诏求直言使人人得尽言无隐又乞令内职任之穹者各举所知皆从之时登进诸儒以广讲读说书之选咨夔言圣学之实所当讲明而推行者有六一亲睦本支二正始闺门三警肃侍御四审正邪用舍五储养文武之才六忧根本无生事邀功又言常平义仓盐课及苗税多取之弊京湖以八陵图来上咨夔援绍兴留司奉表八陵及东晋大都督亲谒五陵故事乞先诏制臣往省俟还别议朝祭擢殿中侍御史会王定入台察力诋蒋重珍咨夔乃按定疾视善良乞罢之越三日左迁定而擢咨夔中书舍人寻兼权吏部侍郎与真德秀同知贡举俄兼直学士院时咨夔口疮已深帝勉留之迁吏部侍郎兼给事中奏比徇私成俗化实未更所恃以一公铄万私者独陛下耳而好乐营缮亲原近属保护旧臣若未能无所系累帝在位踰一纪国本未立未有敢深言之者咨夔乞择宗室子养之并为济王立后擢给事中史嵩之入相召赴阙下进刑部尚书拜翰林学士知制诰求去愈力加端明殿学士卒御笔洪咨夔鯁亮忠恇有助新政与执政恩例特赠两官

△许奕

许奕字成子简州人以父任主长江簿丁内艰免丧调涪城尉庆元五年宁宗亲擢进士第一授签书剑南东川节度判官召为秘书省正字累迁起居舍人韩侂胄议开边奕贻书曰今日之势如元气仅属不足以当寒暑又因转对论今日之急惟备边而朝廷晏然百官充位如平时京西淮上之师败同罚异总领王人也而听宣抚司节制或为参谋庙堂之议外廷莫得闻护圣之军半发于外而禁卫单薄乞鞫勘赃吏永废勿用特与放行以启侥幸者宜加遏绝所言皆侂胄所不乐也蜀盗既平以起居舍人宣抚四川【按宋史职官志宣抚使统护诸将以二府大臣充宣谕使以从官为之奕时为起居舍人应是宣谕本传宣抚似误】奕谓使从中遣必淹时乃至既又徒云犒师而不以旌别淑慝为指无以慰蜀父老之望执政是其言遣奕使金奕与骨肉死诀诣执政趣受指请行执政曰金人要索议未决者尚多今将奈何奕曰往集议时奕尝谓增岁币归俘掳或可耳外此其可从乎不可行者当死守之寻迁起居郎兼权给事中以国事未济力辞不许金人闻奕名久礼迓甚恭

方清暑离宫相距二十里至是特为突还内方射突破的有十一乃卒行成还奏帝优劳久之突复奏和不可恃宜葺纪纲炼将卒使屈信进退之权复归于我权礼部侍郎条六事以献俄兼侍讲会谏官王居安傅伯成以言事去职突上疏力争之其后大因灾异申言曰比年上下以言为讳谏官无故而去者再矣以言名官且不得尽况疏远乎又论用兵以来资赏泛滥侥幸捷出宜加裁制夏旱诏求言突言当以实意行实政活民于死不可责偿于祷祠之闲而已也蝗至都城然后下礼寺讲酺祭孰非王士顾及境而惧偶不至辇下则终不以为灾乎又曰更化之初人有厚望久而无以相远此谤讟之所从生又曰内降非盛世事王璇进状不实而经营以求侥幸裴仲何人骤为带御器械时应诏者甚众突言最为剴切摄兼侍读每进读至古今治乱必参言时事愿陛下试思设遇事若此当何以处之必拱默移时俟帝凝思乃徐竟其说迁吏部侍郎兼权给事中论驳十有六事皆贵族近习之挠政体者而封还刘德秀赠典高文虎之奉祠士论尤黷之加杨次山少保永阳郡王突疏言自古外戚恩宠太甚鲜不祸咎又言史弥远力辞恩命宣从之以成其美疏入不报突遂卧家求补外以显谏阁待制知泸州弥远问所欲言突曰比观时事调护之功深扶持之意少非朝廷之力也嘉叙泸俱接夷壤东蛮米在大入俘杀兵民四路创安边司穷治其事突得夷人质之以致所掠由是迁安边司夷酋王粲浮檣木万计入贾突虑其荡水陆之险驱之安抚使安丙新立大功谗忌日闻宰相钱象祖出谤书问突突喟而言士不爱一死而困于众多之口亦可悲也突愿以百口保之象祖粲然曰公悉安子文若此乎适字文绍节宣抚荆湖还亦曰仆愿亦百口以信许公之言于是异论顿息移知夔州表辞不行改知遂宁府捐缗钱数十万以代民输复盐筴之利以养士为浮梁作堤数百丈民德之进龙图阁待制加宝谏阁直学士知潼州府霖雨坏城撤而筑之不以烦民又捐缗钱十二万为十县民代输会金人败盟蜀道震扰突请速选威望大臣宣抚信赏必罚以奖忠义收人心又言忠义之招体势倒持兵食顿增未知攸济且斩将之人未闻褒擢败军之将未见施行事势不决将有后时之悔御史劾突欺罔降一官诏提举玉隆宫未数月特复元官提举崇福宫还家草遗表曰自念本非衰病初染征疴当汤熨可去之时臣以疾而为讳及针石已穷之后医束手而莫图靖言膏肓所致之由大抵脉络不通之故皆寓讽谏之意进显谏阁直学士致仕赠通议大夫初突之守泸帝顾礼部尚书章颖曰许奕已去乎起居舍人真德秀侍帝前论人才上以骨鯁称之突天性孝友送死恤孤恩意备至

△陈居仁

陈居仁字安行兴化军人父膏初为汾州教授佐守臣张克戩捍金人后知惠州单马造繒袞垒譬晓降之鄞僧王法恩谋逆事觉或请屠城膏方为御史力论多杀非圣世事胁从者悉宽宥之居仁以荫授铅山尉绍兴二十一年举进士秦桧与膏有故有劝以一见可得美官居仁曰是有命焉终不自通移永丰令入监行在点检贍军激赏酒库所余场诏修高宗圣政与范成大并充检讨官淮甸交兵魏■〈木巳〉以宗正少卿使金辟居仁幕下时和战未决金兵驻淮北人情恟惧突骑大至弯弓夹道居仁上马犹从容举酒属■〈木巳〉天寒且醺此觴观者壮之乃谕金人开道入卒成礼减岁币而还因出疆赏转承议郎授诸王宫大小学教授■〈木巳〉秉国柄居仁忍贫需远次未尝求进虞允文欲引以为用不就允文欲与论兵谢不能退而贻书谓有定力乃可立事若徒为大言终必无成幸成亦旋败允文为之色动徙主军器监簿转对言立国须定规模陛下非无可致之资而规模未立孝宗初颇不恠曰朕未尝不立规模居仁奏陛下锐意恢复继乃通和和战守三者迄今未定孰为规模耶允文曰此正前日定力之论某今益知此言之当也历迁秘书丞入对论文武并用长久之术陛下奖进武臣深得持平救偏之道然未必得智谋勇略之士或多便佞轻躁之徒将复有偏胜之患帝嘉纳权礼部郎官尝言台阁宜多用明习典故之士帝问其人居仁以李焘莫济对甫数日召焘居仁力请外乃知徽州至郡告以天子节经费以惠俭瘠不能推广圣德吏则有罪乃招三衙军植二表于庭有输纳中度而遭抑退者抱所输立表下亲视之人无留滞吏不能措手输税者恒裹赢以归邻州有讼多诣台省乞决于居仁秩满郡人挽留由闲道始得去入对帝举新安之政奖之请编类隆兴以来宽恤诏令有曰法久则易玩事久则易怠惟申加戒饬有以儆其观听则千万年犹一日帝曰名言也又言归正忠顺过于优渥而遇战士反轻此曹出万死策勋今老矣添差已罢廩稍半给至勾于市军士解体乞加优恤以终始念功之意坚后生图报之心帝嘉之会驾大阅白石即命再添差两任衣粮全给三军为之呼舞留为户部右曹郎官命未下朝方推会要赏帝曰陈居仁治行为天下第一可因是并赏之特转朝议大夫兼权度支又兼权礼部会枢属阙员方进拟帝曰岂有人才如陈居仁而可久为郎乎即授枢密院检详文字寻为右司迁左司又迁检正中书门下省诸房公事历兼左藏诸库居仁亲视案牘有诬枉者七人皆当叙复执政难之居仁退疏其冤状帝曰居仁精审尚复何疑诏以旱求言居仁乞命公卿务行宽大假吏

部尚书使金还迁起居郎寻兼详定一司敕令兼权中
书舍人泛恩滥赏封缴无所避因言恩惠不及小民名为宽逋负实以惠顽民耳名为赦
有罪实以惠奸民耳愿尽放天下五等户身丁四等户
一半从之安定王子彤乞封妾为夫人居仁缴奏帝喜谓有补风教又论君人之道贵执
要今陛下亲细故而忽远猷事末节而忘大体愿举纲
要以御臣下省思虑以颐精神诘旦令清中书之务权直学士院帝曰内外制向委数人
今陈居仁一人当之不见其难乞诏大臣博议绝浮费
汰冗兵计当省之数定蠲除之目此富民之要术也以集英殿修撰知鄂州筑长堤扞江
新安乐寮以养贫病之民拨闲田归之进焕章阁待制
移建宁府岁饥出储粟平其价弛逋负以巨万计代输畸零虫税有因告余杀人者会赦
免居仁曰此乱民也释之将复出为恶遂诛之观察推
官柳某死贫不克归二子行勾于道闻而怜之予之衣食买田以养之择师以教之镇江
大旱又移居仁守镇江请以缗钱十四万给兵食不报
为书以义撼丞相然后许发时密往覘之闲遣余运于荆楚商人商人曰是陈待制耶争
以粟就余居仁区画有方所存活数万计因饥民治古
海鲜界港为石■〈石达〉丹徒境上蓄泄以时以通漕运加宝文阁待制知福州入境
有饥民啸聚部分牙兵遮击之首恶计穷自经死治宗
室之暴横申蛊毒之旧禁有召命求闲者再进华文阁直学士提举太平兴国宫卒赠金
紫光禄大夫居仁风度凝远处已应物壹以诚信临事
毅然有守所至号称循吏皆立祠祀之子

陈卓

陈卓

卓卓字立道绍熙元年进士其后知江州移宁国府丞相以故欲见之卓谢不往丞
相益器之李全叛褫其爵诏书至淮人益自励太庙灾
降罪已诏京师感动皆卓所草也为签书枢密院事未几勾祠还里平生不营产业以赞
书所酬金筑世纶堂闲居十有六年卒年八十有六将
葬事不能具丞相吴潜闻贻书制置使以助其孙定孙力请谥于朝廷乃谥清敏

△刘汉弼

刘汉弼字正甫上虞人生二岁而孤母谢氏抚而教之嘉定九年举进士授吉州教
授历江西安抚司干官浙西提举茶盐司干官召试馆
职改秘书省正字积官至户部侍郎致仕汉弼学明义利之辨为正字时应诏言事极论
致菑弭菑之道为校书郎转对举苏轼所言结人心厚
风俗存纪纲又论制阍当复其旧戎司当各还其所边郡守当用武臣又论决和战以定
国论合江淮以壹帅权公赏罚以励人心广规模以用

人才为著作佐郎言兵财楮币权不可分又言取士之法词学不当去宏博字混补不如复待补之便为著作为考功员外所陈皆切于时务及
为言官帝奖论曰以卿纯实不欺故此亲擢宜悉心以告汉弼以台纲久弛疏三事曰定规抚正体统远谋虑首论给事中钱相巧于迎合睥睨
政地直学士院吴愈不称其职罢去之又劾中书舍人濮斗南左正言叶贲疏留中不出贲松阳人为时相史嵩之腹心有使贲互按者明日贲
有他命而汉弼出知温州嵩之久擅国柄帝益患苦之既复以左司谏召首贲帝分别邪正以息众疑奏疏论立圣心正君道谨事机伸士气收
人才五事帝嘉其言并付外行之及为侍御史密奏曰自古未有一日无宰相之朝今虚相位已三月愿奋发英断拔去阴邪庶可转危而安否
则是非不两立邪正不并进陛下虽欲收召善类不可得矣臣闻富弼之起复止于五请蒋弼之起复止于三请今嵩之既六请矣愿听其终丧
亟选贤臣早定相位帝览纳遂决乃命范锺杜范并相百官举劾相庆汉弼之力为多又累章言金渊郑起潜陈一荐谢达韩祥濮斗南王德明
皆畴昔托身私门为之腹心盘据要路公论之所切齿者至论马光祖夺情总赋淮东乃嵩之预为引例之地乞勒令追服终丧以补名教帝尝
属汉弼以进人才退而条具以奏皆时望所归重汉弼以受知特异而奸邪未尽屏汰论议未能坚定为虑遂感末疾居亡何遂卒特赠四官谥
曰忠汉弼之没也太学生蔡德润等百七十有三人伏阙上书以为暴卒而程公许着汉弼墓铭亦与徐元杰并言其旨微矣

钦定续通志卷三百九十九

●钦定续通志卷四百 列传二百

列传

宋 【一百四】

○宋一百四

杜范 杨简【钱时】 张虑 吕午【流】 吴昌裔 汪纲

陈宓

杜范

杨简 【钱时】

张虑

吕午

吴昌裔

汪纲

陈宓

△杜范

杜范字成之黄岩人嘉定元年举进士调金坛尉再调婺州司法绍定六年迁大理司直端平元年改授军器监丞明年入对言陛下亲览大政致弊必有原救弊必有本积三四十年之蠹习有不可胜救者其原不过私之一字耳陛下固宜惩其弊原使私意净尽顾以天位之重而或藏其私憾天命有德而或滥于私子天讨有罪而或制于私情左右近习之言或溺于私听土木无益之工或侈于私费隆礼貌以尊贤而用之未尽温辞色以纳谏而行之惟艰此陛下之私有未去也和衷之美不着同列之意不孚纸尾押敕事不预知同堂决事莫相可否集议盈庭而施行决于私见诸贤在列而密计定于私门此大臣之私有未去也君相之私容有未去则教条之颁徒为虚文近者召用名儒愿以其讲明见之施行改秘书郎寻拜监察御史奏曩者权臣所用台谏必其私人其所弹击悉承风旨是以纪纲荡然风俗大坏陛下亲政首用洪咨夔王遂痛矫宿弊斥去奸邪然庙堂之上言及贵近或委曲回护而先行丐祠之请事有掣肘或彼此调停而卒收论罪之章亦有弹墨尚新而已颁除目沙汰未几而旋得美官自是台谏风采昔之振扬者日以铄朝廷纪纲昔之渐起者日以坏理宗深然之丞相郑清之妄邀边功用师河洛兵民死者十数万资粮器甲悉委于敌边境骚然中外大困范率合台论其事并言制阉之诈谋罔上于是凡侍从近臣之不合时望者监司都守之贪暴害民者皆以次论斥清之愈忌之改太常少卿转对言今日之病莫大于贿赂交结之风名誉已隆者贾左右之誉以固宠宦游未达者惟梯级之求以进身边方帅臣黄金不行于反闲而以探刺朝廷厚赐不优于士卒而以交通势要以致赏罚颠倒威令慢褻罪贬者拒命不行弃城者巧计求免提援兵者召乱而肆掠当重任者怙势而夺攘下至禁旅骄悍难制监军羣聚相剽劫望陛下毋以小恩废大谊毋以私情挠公法严制宫掖不使片言得以入于阉禁约阉宦不使谗诏得以售其奸范自入台屡丐祠至是复五上归田之请皆不允迁秘书监兼崇政殿说书元兵徇江陵范乞屯兵蕲黄以防窥江且令沿江帅臣兼江淮制置大使以重其权令淮西帅臣急调兵拨粮以援江陵拜殿中侍御史辞不获范始以不得其言不去为恨至是遂极言台谏失职之弊时襄蜀俱坏江陵孤危两浙震恐复言清之横启边衅几危宗祀及其子招权纳贿贪冒无厌盗用朝廷钱帛以易货外国且有实状并言签书枢密院事李鸣复与史寅午彭大雅以贿交结曲为之地鸣复抗疏自辨范又

极言其寡廉鲜耻鸣复将出关帝遣使召回范复与合台奏鸣复欺君罔上无所不至如臣等言是即乞行之所言若非早赐罢斥改起居郎范奏臣论鸣复未见施行忽拜左史之命则是所言不当姑示优迁臣前者尝奏台谏但为仕途之快捷方式初无益朝廷之纪纲躬言之躬蹈之臣之罪大矣即渡江而归授江东提点刑狱寻改浙西提点刑狱范力辞鸣复亦出守越嘉兴二年差知宁国府明年至郡适大旱范即以便宜发常平粟又劝寓公富人积粟者发之民赖以安始至仓库多空未几米余十万斛钱亦数万悉以代输下户粮两淮饥民渡江者多剽掠其首张世显尤勇悍拥众三千余人至城外范遣人犒之俾忽扰以俟处分世显乃阴有窥城之意范以计擒斩之余众悉使归四年还朝首言旱暵荐臻物价腾踊行都之内气象萧条左浙近辅殍死盈道流民充斥剽掠成风新兴北兵乘胜而喜鬪中原羣盗假名而崛起疆场之臣肆为欺蔽胜则张皇而言功败则掩覆而不言脱使乘上流之无备为饮马长江之谋其谁举捍之内忧外患之交至天心人心之俱失皆权相三十年酿成之耳于是范去国四载矣帝抚劳备至迁权吏部侍郎兼侍讲以久旱复言望陛下一洒旧习以新天下出宫女以远声色斥近习以防蔽欺省浮费以给国用薄征敛以宽民力且储贰未立国本尚虚乞选宗姓之贤者育之宫中而教导之又言铨法之坏庙堂既有堂除复时取部缺以徇人情士大夫既陷赃滥乃闲以不经推勘而改正凡此皆徇私忘公之害未几复上疏请诏中外臣庶思当今急务各务悉力尽思以陈持危制变之策拜吏部侍郎兼中书舍人复极言晏赐不节修造不时玩寇纵欲数事兼权兵部尚书改礼部尚书兼中书舍人淳佑二年擢同签书枢密院事范既入都堂凡行事有得失除授有是非悉抗言无隐情丞相史嵩之外示宽容内实忌之四年迁同知枢密院事以李鸣复参知政事范不屑与鸣复共政去之帝遣中使召回且敕诸城门不得出范太学诸生亦上书留范而斥鸣复并斥嵩之嵩之令谏议大夫留晋之等论范及鸣复范遂行会嵩之遭丧谋起复不果于是拜范右丞相范以逊游似不许遂力疾入覲帝亲书开诚心布公道集众思广忠益赐之范上五事曰正治本肃宫闈择人才惜名器节财用仍乞早定国本以系人心时亲王近戚多求降恩泽引前朝杜衍例范皆封还乞拨堂除阙归之吏部以清中书之务惟留书库架阁京教及要地干官人皆以为不便未几赴选调者无淹滞合资格者得美阙众始服帝命宰执各条当今利病与政事可行者范上十二事曰公用舍储材能严荐举惩赃贪专职任久任使抵饶幸重阍寄选军实招土豪疏沟洫治边理财时孟珙权

重兵久居上流朝廷素疑其难制至是以书来贺范复之曰古人谓将相调和则士豫附自此但相与同心徇国若以术相笼架非范所屑为也
珙大感服未几元军大入五河绝中流置营栅且以重兵缀合肥令不得相援为必取寿春之计范命维扬鄂渚二帅各调兵东西来应卒以捷
闻范记功行赏莫不曲当军士皆悦未几卒赠少傅谥清献

△杨简 【钱时】

杨简字敬仲慈溪人干道五年举进士授富阳主簿会陆九渊道过富阳问答有所契遂定师弟子之礼 【按陆九渊象山集象山过富
阳夜集双明阁数提本心二字因问如何是本心陆曰恻隐之心仁之端也只此是本心简曰儿时已晓此语毕竟如何象山终不易其说次日
有一鬻扇者讼至庭简断其曲直讫又问象山曰适来断扇讼是者知其为是非者知其为非此即君之本心简忽大省揖而归拱坐达旦质明
北面执弟子礼终身师事焉】 富阳民多服贾而不知学简兴学养士文风益振为绍兴府司理行狱必亲临端默以听使自吐露越陪都台府
鼎立简中平无颇惟理之从一府史触怒帅令鞫之简白无罪命鞫平日简曰吏过讷能免今日实无罪必撻往事置之法某不敢奉命帅大怒
简取告身纳之争愈力常平使者朱熹荐之先是丞相史浩亦以简荐差浙西抚干白尹张杓宜因凶岁戒不虞乃命简督三将兵接以恩信出
诸葛亮正兵法肄习之军政大修知乐平县兴学训士诸生闻其言有泣下者杨石二少年为民害简寘狱中谕以祸福咸感悟愿自赎由是邑
人以讼为耻夜无盗警路不拾遗绍熙五年召为国子博士会斥丞相赵汝愚简上书言汝愚之忠未几亦遭斥主管崇道观嘉定中历迁秘书
省著作佐郎兼权兵部郎官转对极言经国之要弭灾厉消祸变之道北境传诵为之涕泣诏以旱蝗求直言简上封事言旱蝗根本近在人心
入对答问往复漏过八刻帝目送久之以面对所陈未行求外补知温州移文首罢妓籍尊敬贤士私赉五百为羣过境内分司干官檄永嘉尉
及水砮兵捕之巡尉不白郡简惊曰是可轻动乎万一召乱貽朝廷忧兵之节制在郡将违节制是不严天子命应斩建旗立巡尉庭下数其罪
命斩之郡官交进为致悔罪意良久得释奏罢分司其纪律如此寓官置民田负其直简追其隶责之而赏所负势家第宅障官河即日撤之城
中讙踊名杨公河简在郡廉俭自将奉养菲薄常曰吾敢以赤子膏血自肥乎闾巷雍睦无分争声民爱之如父母咸画像事之迁驾部员外郎
改工部员外郎迁军器监兼工部郎官转朝奉大夫又迁将作监兼国史院编修官兼实录院检讨官转朝散大夫金人大饥来归者日以数千

万计边吏临淮水射之简戚然曰得土地易得人心难中土故民顾靳斗升粟而迎杀之
蕲脱死乃速得死岂相上帝绥四方之道哉即日上奏
哀痛言之不报会有疾请去益力乃以直宝谟阁主管玉局观除宝谟阁待制理宗即位
进宝谟阁直学士宝庆元年转朝议大夫慈溪县男寻
授华文阁直学士敷文阁直学士累加中大夫寻以宝谟阁待制太中大夫致仕卒赠正
奉大夫其论治务最急者五一曰谨择左右大臣近臣
小臣二曰择贤以久任中外之官三曰罢科举而行乡举里选四曰罢设法道淫五曰治
伍法修诸葛武侯之正兵以备不虞其次急者有八一
曰募兵屯田以省养兵之费二曰限民田以渐复井田三曰罢妓籍从良四曰渐罢和买
折帛暨诸无名之赋及榷酤而禁羣饮五曰择贤士教
之太学教成使分掌诸州之学又使各择井里之士聚而教之教成使各分掌其邑里之
学六曰取周礼及古书会议熟讲其可行于世者行之
七日禁淫乐八曰修书以削邪说此简之志也后咸淳闲制置使刘黻即其居作慈湖书
院门人钱时字子是淳安人幼奇伟不羣绝意科举究
明理学主讲席学者兴起政事多所裨益丞相乔行简知其贤特荐之朝且曰时夙负才
识尤通世务田里之休戚利病当世之是非得失莫不
详究而熟知之不但通诗书守陈言而已授秘阁校勘未几出佐领东昌幕太史李心传
奏召史馆检阅转对敷陈剴切皆圣贤之精微旋以国
史宏纲未毕求去授江东帅属归宝佑闲守季鏞祠于学

△张虑

张虑字子宓慈溪人庆元二年进士故事潜邸进士升名虑不以自陈授州教授为
浙东帅属帅督新昌旧逋虑手书谏曰越人之瘠宜咻
噢抚摩之今夏税当宽为之期尚可理旧逋耶力辞不行主管户部架阁文字改太学正
时新进者多逞小才害大体转对言立国有大经人主
当以静制天下之动今日之治或有邻于楔薄而拂人心伤国体者宜有以革之迁太常
博士又迁国子博士时金垂亡因论自治之道谓天下
之治必有根本城郭所以御敌也使沟壑有转徙之民则何敌之能御诸将所以备患也
使枵腹盼盼不得食则何患之能备缮城郭聚米粟恃
此而不惜乎民则其策下矣时以旱求言即上疏曰上天之心即我祖宗之心数年以来
盖有为祖宗所不敢为者议者惟知衰靡之俗不可不
振起圯坏之风不可不整刷不知元气已伤而不可再扰人心方苏而不可骇动也且造
楮初欲便民朝廷既以一切之政駮其听复以一定之
价迫之从郡县之闲遂骚然矣监司郡守老成迟钝者悉屏而不用而取夫新进喜功名
者为之见事则风生临事则痛决事未果集而根本已

腴国未有益而民生已困凡此皆有累于祖宗仁厚之德此旱势之所以弥甚也迁国子监丞转对愿力主正论勿使迎合之人得以投吾机迁秘书郎预编宁宗会要迁著作佐郎兼权都官郎官转对言边事有二病战者当知彼和则当请于彼惟守则自求诸己当明告天下日讲求其所以守之之策用人不可以尝试任人不可以自疑迁秘书丞改著作郎以疾乞外出知南康至郡剖决滞讼众皆悦服转运使以钱万二千缗置平余于郡虚复出钱万二千缗以增益之民赖其利将增建禁旅营地属民者素质剂视元直偿之徙知处州移知温州力辞遂直秘阁主管千秋鸿禧观参议置制使幕中使者尚威力愎谏自用虚守正不阿每济以宽大又上书论海防利便主管玉局观端平初召为国子司业兼侍讲以礼记月令进读至狱讼必端平之语因敷畅厥旨八陵来复将议修奉而论者未能协一虚议曰当乘此时遣官肃清威仪申祇奉故事如或为其所给功未即就亦足以感动天下忠臣义士之心力辞劝讲之职升国子祭酒以为月令之书虽出于吕不韦然人主后天而奉天时此书不为无助乃因已讲者为十二卷乞按月观之兼权工部侍郎兼国子祭酒命下而卒诏赠四官谥文靖 【按两浙名贤录载虚卒谥文靖宋史本传不载今据补】

△吕午

吕午字伯可歙县人嘉定四年进士授乌程主簿郡守致之幕下事一决于午守张忠恕丞相浚之孙荐午尤力调当涂县丞守吴柔胜谓午有操守俾其子渊潜定交焉会司理摄芜湖县庐州遣两兵会公事司理遂以庐兵夺县民为言柔胜怒悉寘狱属午问之午谓庐州有公棧不可谓夺民柔胜愈怒再以属午午执前说柔胜益加怒谓我不忍庐兵夺吾百姓欲黥二兵午徐曰庐州初无公棧则有则县不为处置而反罪庐兵恐不可久之卒从午请由是柔胜益知午陈贵谊守太平属午安集淮南流民江东提举徐侨知午在郡辟为幕属既而侨行部以田事连丞相史弥远以言罢午还当涂改知余杭县亦以言罢公论大不平然午自此名益重浙东提举章良朋留之幕良朋旋兼沿海制置司事海寇未平问策安在午廉知调军出海粮尽即还军获寇物官尽拘收乃与制置司干官施一飞议粮尽再给不许擅还贼舟所有悉以给军海道遂清差知龙阳县豪民陶守忠杀人正其狱诛之弥远虽非贤相犹置人才簿书贤士大夫以待用而午治县之政亦书之差两浙转运司主管文字运使罢以午护印半年或问弥远何以不注官弥远曰尔谓护印官不能耶午闻之力辞差监三省枢密院门兼监提辖封桩上库丁父

忧免丧迁太府寺簿拜监察御史帝亲擢也郑清之丧师至是丁黻死于成都史嵩之孟珙在京湖嵩之寻升督府陈鞞杜杲在淮泗王鉴在黄州计用兵十七万人围始解独周葵在淮东不受兵而坐视不出兵应援午疏论边阨角立当协心释嫌而乃幸灾乐祸无同舟共济之心葵以午党京湖制司而嵩之亦憾午乃迁宗正少卿兼国史院编修官实录院检讨官出知泉州初左丞相李宗勉深以葵之言为疑会来自淮东者乃言台官皆与葵交书独吕御史无之宗勉始以午为贤语人曰吕伯可独立无党者嵩之得弥远人才簿心知敬午而内怨所论兵事及午移浙东提刑嵩之令邓咏喉董复亨论罢中外不直嵩之提举崇禧观再移浙东提刑复为监察御史入见帝曰卿向来议论甚明切兼崇政殿说书嵩之不欲午之经筵欲撼之以午尝劾王瓚姻家史洽遂以瓚为右正言午即治装去帝手诏趣留之午力辞不允由是再留而议论愈不合迁起居郎兼史院官官至十奉大夫闲居一纪卒年七十有七累赠至华文阁学士通奉大夫子沆

吕沆

吕沆

沆字叔朝以恩补将仕郎端平三年铨试第一授黄岩县主簿改知于潜县重囚逸闻沆至自归通判婺州朱君章讼争田四十有二年吴王府争墓二十有九年沆皆决之历四辖六院之文思官告书拟尚书左右郎官事贾似道议行公田彗星见沆请罢公田还民及理宗崩似道矫诏废十七界会子行关子沆力言非便似道大怒调将作监簿久之与云台观起知兴国军未赴论仍云台观起知全州未赴与仙都官德佑元年三学伏阙上书讼沆屈召赴行在沆不复出卒年八十有一

△吴昌裔

吴昌裔字季永中江人蚤孤与兄泳痛自植立不逐时好得程颐张载朱熹诸书辄研绎不倦嘉定七年举进士闻汉阳守黄干得熹之学往从之调闽中尉利路转运使曹彦约闻其贤俾司余场时岁饥议余上流昌裔请发本仓所储数万而徐余以偿从之调眉州教授眉士故尚苏轼学昌裔取诸经为之讲说祠周惇颐及颍颐载熹揭白鹿洞学规仿潭州释奠仪簿正祭器士习丕变制置使崔与之荐之改知华阳县修学宫来四方士斥羨钱二十万缗买良田备旱通判眉州摄郡事御军有纪律寻权汉州核兵籍兴社仓郡政毕举兴元帅赵彦呐议东纳武仙西结秦巩人莫敢言昌裔独力辨其非未几武仙败二州之民果叛端平元年入为军器监簿改将作监簿太常少卿兼吴益王府教授转对首

陈六事其目曰天理未纯天德未健天命未敕天工未亮天职未治天讨未公凡君臣之纲兄弟之伦举世以为大戒而不敢言者皆痛陈之至于边臣玩令陟罚无章尤拳拳焉拜监察御史弹劾无所避时有争常州田万四千方平江亦数百亩株逮百余人视其牍乃赵善湘之子汝樛汝梓也州县不敢决昌裔连疏劾罢之冬洊雷春大雨雪昌裔草疏凡上躬缺失宫庭嬖私庙堂除授皆以为言又言将帅方命女宠私谒旧党之用边疆之祸皆此阴类又念蜀事阨危条四事以进实规樞审功赏访军实储帅才时有果阆州守臣逃遁而进职有知遂宁李炜父子足迹不至边廷而受赏僨军之赵楷弃城之朱扬祖皆不加罚又帅臣赵彦呐年老智衰其子淫刑黷货士卒不用命安癸仲耻遭枰弹经营复用欲起谪籍以代帅垣昌裔皆抗疏弹击又历言三边之事且援靖康之弊痛哭言之黜为大理寺少卿屡疏引去不许会杜范再入台击参政李鸣复谓昌裔与范善必相为谋者数谗之以权工部侍郎出参赞四川宣府司军事人曰此李纲救太原也太原不可救特以纲主战故出之耳昌裔曰君命也不可不亟行慷慨幞被出关忽得疾中道病甚帝闻之授秘阁修撰改嘉兴府昌裔曰吾以疾不能归救父母上负圣恩下负此心若舍远就近舍危就安人其谓我何辞至四五而言者以避事论矣改赣州辞以右文殿修撰主管鸿庆宫迁浙东提刑辞改知婺州婺告旱民日夜望之乃不忍终辞减驲从供帐遣僚佐召邑令周行阡陌蠲粟八万一千石钱二十五万缗有奇加集英殿修撰以宝章阁待制致仕卒昌裔刚正庄重遇事敢言典章多所娴习初昌裔与徐清叟杜范一日并入台皆天下正士四方想闻风采人至和三谏诗以侈之然才七阅月以迁故莫不惋惜云后谥忠肃

△汪纲

汪纲字仲举黟县人签书枢密院勃之曾孙也以祖任入官淳熙十四年中铨试调镇江府司户参军马大同镇京口强毅自任纲言论独不诡随议者欲以两淮铁钱交子行于沿江廷议令大同倡率行之纲贻书曰边面行铁钱虑铜宝泄于外耳私铸盛行故钱轻而物重今若场务出纳不以铁钱取息坚守四色请买旧制治铸定额不求余羨重禁以戢私铸支散边戍与在军中半者无异不以铁钱准折则淮民将自便之何至以敝内郡邪大同始悟试湖南转运司又中纲笑曰此岂足以用世泽物耶乃刻意问学精究义理调桂阳军平阳县令县连溪峒蛮蜚与居纲一遇以恩信科罚之害既三十年纲下车首白诸台罢之桂阳岁贡银二万九千余两而平阳当三分之二纲谓向者银矿坳发价轻可

勉以应今地宝已竭市于他郡其价倍蓰力请蠲损之岁饥旁邑有曹伍者羣聚恶少入境强贷发廩众至千余挟界头牛桥二砦兵为援地盘踞万山闲前后令未尝一涉其境不虞纲之至也相率出迎纲已夙具酒食令之曰汝何敢乱顺者得食乱者就诛夜宿砦中呼砦官诘责不能防守状皆惶恐伏地请死杖其首恶发粟赈衆民赖以安改知金坛县亲嫌更弋阳县父义知为侍御史丁父丧服除知兰溪县决擿如神岁旱郡倚办劝分纲谓劝分所以助义仓一切行之非所谓安富恤贫也愿假常平钱为余本使得循环迭济又躬劝富民浚筑塘堰大兴水利饥者得食其力全活甚众郡守张抑及部使者列纲为一道荒政之冠以言去邑人相率投匭直其事纲力止之继知太平县擢监行在左藏西库属金宣宗初立遣使来告袭位议者即欲遣币纲言使名不逊当止之境上姑命左帑视例计办或且留京口总司令盱眙守臣谕之曰纪年名节皆犯先朝避忌岁币乃尔前主所增今既易代当复隆兴大定之旧俟此议定而后正旦生辰之使可遣迟以岁月吾择边将葺城堡简军实储峙糗粮使沿边屹然有不可犯之势听其自相攻击然后以全力制其后庙堂黜之提辖东西库又干办诸司审计司以选知高邮军陞辞言扬楚二州当各屯二万人壮其声势而以高邮为家计砦高邮三面阻水湖泽奥阻戎马所不能骋独西南一路直距天长无险可守乃去城六十里随地经画或浚沟堑或备设伏以扼其冲又虑湖可以入淮招水卒五千人造百艘列三砦以戒非常兴化民田滨海昔范仲淹筑堰以障鹵鹵守毛泽民置石■〈石达〉函管以疏运河水势岁久皆坏纲乃增修之部使者闻于朝增一秩提举淮东常平淮米越江有禁纲念淮民有警则室庐莫保岁凶则转徙无归丰年可以少苏重以苛求自分畛域岂为民父母意哉请下金陵余三十万以通淮西之运京口余五十万以通淮东之运又言两淮之积不可多升润之积不可少平江积米数百万陈陈相因久而红腐宜视其收贮近久取饷犖下百司诸军江上岁餽当至京者贮之京口金陵转漕两淮中都诸仓亦当广余以补其数制置使访纲备御孰宜先纲言淮地自昔号财赋渊藪西有铁冶东富鱼稻足以自给淮右多山淮左多水足以自固诚能合两淮为一家兵财通融声势合一虽不假江浙之力可也祖宗盛时边郡所储足支十年庆厯闲中山一镇尚百八十万石今宜上法先朝令商旅入粟近塞而算清钱货于京师入粟拜爵守之以信则输者必多边储不患不丰州郡禁兵本非供役乃就粮外郡耳今不为战鬪用乃使之共力役缓急戍守专倚大军指日待更不安风土岂若土兵生长边地坟墓室家人自为守邪

当精择伉壮广其尺籍悉隶御前军额分擘券给以助州郡衣粮之功大率如山阳武锋军制则边面不必抽江上之戍江上不必出禁闾之师生券更番劳费俱息时有献言制司广买荒田开垦以为营田纲以为荒瘠之地不难办而工力水利非久不可弃产欺官良田终不可得耗费公帑开垦难就曷若劝民尽耕闲田剏浚堙塞则官为之助变瘠为沃使民有余蓄晷错入粟之议本朝便余之法在其中矣制司知其无益乃止淮东煮盐之利本居天下半岁久弊滋盐本日侵帑储空竭又会饷所复盐钞旧制弗许商人预供贴钞钱盐司坐是窘不能支纲抉摠隐伏凡虚额无实诡为出内飞走移易事制曲防课乃更羨纲约已率下辞台郡之互馈独增场官奉以养其廉擢户部员外郎总领淮东军马财赋纲核名实警稽慢区画处分饷事赖以不乏移疾乞闲得直秘阁知婺州改提点浙东刑狱皆屡辞不得请虑囚至婺有奴挟刃欲残其主不遇而杀其子■〈瞞，言代目〉谰妄牵连径出斩之释衢囚之冤者合盗锺百一非共盗尉觊赏躐甲制司纲谓治盗虽尚严岂得锻炼傅会以成其罪于是得减死祷雨龙瑞宫有物蜿蜒朱色盘旋坛上者三日纲曰吾欲雨而已毋为异以或众言未竟雷雨大至岁以大熟进直焕章阁知绍兴府主管浙东安抚司公事兼提点刑狱访民瘼罢行尤切萧山有古运河西通钱塘东达台明沙涨三十余里舟行则胶乃开浚八千余丈复创闸江口使泥淤弗得入河水不得泄于涂则尽罄以达城闾十里创一庐名曰施水主以道流于是舟车水陆不问昼夜暑寒竟行利涉欢欣忘勩属邑诸县濒海而诸暨十六乡濒湖荡泺灌溉之利甚博势家巨室率私植埤岸围以成田湖流既东水不得去雨稍多则溢入邑居田间寢荡濒海藉塘为固堤岸易圯咸卤害稼岁损动数十万亩蠲租亦万计以纲言诏提举常平司发田围奇援巧请一切峻却而湖田始复郡备缗钱三万专备修筑而海田始固纲谓是邦控临水道密拱都畿而军籍单弱乃招水军刺义手教习甚专不令他役创营千余闲宽整坚密增置甲兵威声赫然兼权司农卿寻直龙图阁因任理宗即位诏为右文殿修撰加集英殿修撰复因任又加宝谟阁待制宝庆三年大水纲发粟三万八千余缗钱五万赈之蠲租六万余石捐瘠顿苏无异常岁越有经总制窠名四十一万其中二十五万则绍兴以来虚额也前后帅惧负殿以修奉攒宫之资伪增焉纲谓负殿之责小罔上之罪大摭其实以闻诏免九万五千缗而宿弊因是着明也绍定元年召赴行在纲入见言臣下先利之心过于徇义为身之计过于谋国偷情退缩奔竞贪黷相与为欺宜有以转移之帝曰闻卿治行甚美越中民力如何对曰去

岁水潦诸暨为甚今岁幸中熟十年之闲于里晏平皆朝廷威德所及臣何力之有权户部侍郎越数月上章致仕特畀二秩守户部侍郎仍赐金带卒纲学有本原多闻博记遇事立决公庭如水卑官下吏一言中理慨然从之为文尤长于论事援据古今辨博雄劲服用不喜奢丽供帐车乘虽敝不更

△陈宓

陈宓字师复丞相俊卿之子少尝及登朱熹之门熹器异之长从黄干游以父任历泉州南安盐税知安溪县嘉定七年入监进奏院时无敢慷慨尽言者宓上封事言宫闈仪刑有未正朝廷权柄有所分政令刑赏多所舛逆奏入丞相史弥远不乐而中宫庆寿三牙献遗至是为之罢却寻迁军器监簿九年转对言人主之德贵乎明大臣之心贵乎公台谏之言贵乎直指陈敝事视前疏尤剴切焉宓遂请罢归在告日擢太府丞不拜出知南康军至官岁大侵奏蠲其赋十之九会流民羣集宓就役之筑江堤而给其食时造白鹿洞与诸生讨论改知南剑州时大旱疫蠲逋赋十数万且弛新输三之一躬率僚吏持钱粟药饵户给之创延平书院悉仿白鹿洞之规知漳州未行闻宁宗崩呜咽累日亡何请致仕宝庆二年提点广东刑狱章复三上迄不就以直秘阁主管崇禧观宓拜祠命而辞职名进职一等致仕卒初宓之在朝也寺丞丁焞往使金宓叹曰世讎未复何以好为后数年闻关外不靖以书抵焞曰蜀口去关外虽远实如一身近事可寒心皆士大夫之罪岂非贿道不绝之故耶焞服其言宓天性刚毅信道光笃尝为朱墨铭谓朱属阳墨属阴以验理欲分寸之多寡自言居官必如颜真卿居家必如陶潜而深爱诸葛亮身死家无余财库无余帛庶乎能蹈其语者端平初殿中侍御史王遂首言宓事先帝有论谏之直而不及俟圣化之更宜褒其身后以劝天下之为臣者帝为感动诏赠直龙图阁

钦定续通志卷四百

●钦定续通志卷四百一 列传二百一

列传

宋 【一百四】

○宋一百四

王霆 高定子 高斯得 张忠恕 唐璘

王霆

高定子

高斯得

张忠恕

唐璘

△王霆

王霆字定叟东阳人少有奇气试有司不偶去就武举嘉定四年中绝伦异等乔行简考艺别头喜曰吾为朝廷得一帅才矣授承节郎从鄂帅锺兴嗣戍边为随军都钱粮官总领綦奎委霆专一教阅总效军寻委帅师守御黄州沿江制置副使李■〈直上土下〉辟置幕下淮右兵叛遣霆招谕之霆于军事知无不言谓招募良家子不可以夤缘关节冒滥防守江面全藉正军若义勇民兵特可为声援耳而所谓大军羸病者多兵械损旧岂不败事调兵防江当于江岸创屋居之使之守心守御诸军伍法既废平居则无以稽其虚籍冒请之弊无以纠其窜逸生事之人缓急则无以稽其并力向敌之志无以连其逃陈不进之心此尉繚子所以着束部伍之令太公谓伍法为要者谓此也用兵不以人数多寡为胜负惟教习之精否则胜负之形可见矣理宗即位特差充浙西副都监湖州驻札时潘甫等起兵事甫定霆因绥抚之镇江都统赵胜辟为计议官时李全寇盐城攻海陵胜出戍扬州属官多惮从行霆慨然曰此岂臣子辞难之日身先士卒大小十八战无一不利夺贼壕筑土城焚城门贼气为慑差知应州兼沿边都巡检使节制黄莆后营弹压诸道军马诸道兵二十万将往收复楚州霆帅所部为犄角之助大帅荐之召试为合门舍人又对言恢复之说有二曰规橛曰机会顾今日之规橛安在哉守令所以牧民而惠养之未加将帅所以御军而拊循之未至邦财未裕而楮券之弊寢深军储未丰而和余之害徒惨官有土地而荒芜民因赋役而破荡狱讼类成冤抑铨曹率多淹留荐举无反坐贪徒得以引类而通班按刺不徇公微官易以连意而连谴以言郡计则纷耗于囊橐包苴以言战功则多私于亲昵故旧至如降卒中处养虎遗患轻敌开边以肉餵虎夫以规橛之切要者而不满人意如此臣敢轻进恢复之说以误上听诚惩其旧而图其新规橛既立然后义旗一麾诸道并进臣力尚壮愿效前驱帝称其言可采升武功大夫出知濠州节浮费余粟买马以备不虞寻差知安丰军臣僚上言王霆在濠人甚安之不宜轻易诏再任濠职事修举北兵至浮光其民奔遁相属于道朝论以为霆可守之乃知光州兼沿边都巡检使冒雪夜行倍道疾驰至州分遣闲探整饬战守之具大战于谢令桥光人遂安寻为吉州刺史仍知光州霆固辞丞相郑清之制置使史嵩之皆数以书留霆霆不从且曰士大夫当以世从道不可以道从世也再授合门舍人迁达州刺史右屯卫大将军兼知蕲

州不赴迁淮西马步军副总管兼淮西游击军副都统
制论游击军十事不报提举崇禧观知高邮军流民弟邦杰聚众三千人为盗霆剿其渠
魁余党悉散时议出师和者甚多霆以为莫若遣闲探
覘敌情如不得已然后行之否则无故自荡其根本是外兵未至而内兵先惨烈也诸军
毕行惟高邮迟之境内赖以安全由是与时连而谗者
益众提举云台观执政期论边事且谓朝廷即有齐安之命霆曰秋防已急边守不宜临
时更易盍少需之乃授带行左领军卫大将军充沿江
制置副使司计议官霆乃撰沿江等边志一编上之制置使董槐邓泳交荐差知寿昌军
改蕲州建学舍祠忠臣尝叹曰两淮藩篱也大江门户
也三辅堂奥也藩篱不固则门户且危门户既危则堂奥岂能久安乎于是贻书丞相杜
范乞瞰江审察形势也三新城蕲春置于龙眼矶安庆
置于孟城滁阳置于宣化不报卒初其父析业霆独以让其兄处宗族有恩章尝训其子
弟曰穷理尽性学之本也

△高定子

高定子字瞻叔利州路提点刑狱兼知沔州稼之弟也嘉泰二年举进士授鄞县主
簿吴曦畔乞解官养母曦诛摄府事宇文公以忠孝两
全荐之调中江县丞其父就养得疾定子衣不解带者六旬居丧哀毁骨立服除辟丹棱
令寻以同产弟魏了翁守眉改监资州酒务丁母忧服
除差知夹江县前是酒酤贷秫于商人定子给钱以糶且宽榷酤民以为便麻菽旧有征
定子悉弛之会水潦游饥发县廩给诸富家俾以时价
糶至秋而偿须臾米溢于市四川总领所辟主管文字同幕有以趣办为能迫促诸郡者
定子曰使者斥去之总领所治利州倚酒榷以佐军用
吏奸盘错定子躬自究诘酒政遂平后来者复欲增课定子曰前以吏蠹亦既革之今又
求益是再榷也乃止制置使郑损刚愎自用误谓总领
所擅十一州小会子之利奏请废之令下民疑而罢市定子力争谓小会子实以代钱百
姓贸易赖是以权川引罢则关陇之民交病况又隆兴
闲得旨为之非擅也乃得存其半损又欲增总领所盐课取旧贷军费定子辨其颠末损
乃释然寻差知长宁军长宁地接夷獠公家百需皆仰
涓井盐利来者往往因以自封殖制置可又榷入其半定子至争于制置使得蠲重赋差
知绵州元兵穿凤州塞破武休下兴元小校张钺以其
徒溃入文州杀守臣杨必复将自龙趋绵以闯成都安抚使黄伯固闻之亟奏定子兼参
议官措置文龙备御定子乃部分诸军扼清塘岭钺就
擒已而剑南大震定子语僚吏曰诸君去留不敢拘若某则守城郭封疆之臣有死而已
乃下令招溃卒人给缗钱五十米一石命都监陈训专

任接纳训忽奔告曰诸军虽受招不肯释甲奈何定子乃令帐下率衣甲于两庑以俟戒毋轻动俄而诸军盛陈兵以至吏士皆股栗定子坐堂上传令劳苦之诸军皆拜定子开谕以理使还本部以俟给犒诸将闻之亦来上谒定子复慰安之皆曰制置使未知存亡诸军无主定子曰大帅不过暂移治尔苟终不获我当为汝曹主张且诸军至此以无粮故吾州当任供亿又曰敌将复会于此盍避之定子曰我文官也不畏死汝将军也世世衣食县官乃欲避敌乎今诸军大集万一敌至能戮力出战是汝曹立功报国之机不犹愈于深入内郡为罪滋大乎众悦而去乃遣吏给犒如令辟寺观祠宇以舍之亡几何败将和彦威陈邦佐曹箠张涓姚承祖等皆集于彰明剽掠尤甚彦威遣邦佐入州大言骇众谓定子曰知府何不去和太尉兼两戎司威权甚重麾下兵且二万余欲来驻此今至矣定子谓曰本州岛素非备御之地大将以兵入欲何为者第来吾固有以相待邦佐色沮乃曰已遣幕府来议至则一游士尔缪为恭敬要素甚大定子答曰军将入吾境当受吾节制惟各守纪律则给以钱粮若敌至为国一死则忠臣孝子愈于病五日不汗死者幕府莫能对出彦威符移有云大府招戢散军人给钱米若干今所部不下二万人愿如数得之定子报曰本州岛已下此令何敢食言但所给者乃溃军就招免罪之人都统所部非溃也若以此例相给其肯受乎彦威得檄甚惭乃乞别给钱粮以饷军定子即捐四十万缗与之仍趣其还戍盖定子身任两司之责极其劳勩以收捕张钺功进三官以防遏招收溃兵功又进一官进直宝章阁再任顷之召入奏事极言时弊时史弥远执国柄久曰陛下优礼元勋俾得以弛繁机而养静寿朝廷得以新百度而革因循不亦善乎既对人为定子危之定子曰乖逢得丧是有命焉吾得尽言乃报君职分也越两月迁刑部郎中寻以直宝谟阁江南东路转运判官陛辞帝曰淮师巡边卿知之乎辅车之势漕运为急卿是行宜斟酌缓急以相通融定子疏论边事甚周悉帝嘉纳焉踰年召入奏事会稼死事于沔州引疾乞归田里不许寻迁军器监又迁太府少卿升计度转运副使有事于明堂天大雷雨诏求言定子反复论敬惧灾异之意复召入迁司农卿兼玉牒所检讨官入对言内治不修外惧不谨近亲有豫政之渐近习有弄权之渐小人有复用之渐国柄有陵夷之渐士气有委靡之渐主势有孤立之渐宗社有阽危之渐天变日多地形日蹙昔有危脉今有危形昔有亡理今有亡证又请明诏沿流帅守将吏思出奇乘险求为水陆可进之策升兼枢密都承旨又迁太常少卿兼国史院编修官累言边事迁起居舍人寻兼中书舍人参赞京湖江西督视府事定子

亲往周视新城大犒诸军激励守将迁礼部侍郎仍兼中书舍人即军中赐金带诏以督府事入奏既至帝劳问甚渥特进一官寻兼崇政殿说书兼直学士院未几改侍讲权礼部尚书升兼侍读入奏言国无仁贤无礼义无政事有类叔世帝竦然寻兼直学士修孝宗宁宗日历书成上进擢拜翰林学士知制诰兼吏部尚书升兼修国史实录院修撰乞召收李心传卒成四朝志传时礼部尚书杜范吏部侍郎李韶皆以伉直称或乞身求去或卧家不出定子言人主寄耳目者台谏补耳目之所不逮者法从之论思百官之轮对宜速返李韶以开不讳之门勉起杜范以伸敢言之气因乞归田甚力进端明殿学士签书枢密院事寻兼权参知政事仍旧职知福州福建安抚大使力辞退居吴中以资政殿学士转一官致仕卒赠少保

△高斯得

高斯得字不妄利州路提点刑狱知沔州稼之子也申成都路转运司试补入太学绍定二年举进士授利路观察推官越二年辟差四川茶马干办公事李心传以著作佐郎领史事即成都修国朝会要辟为检阅文字端平二年稼死事于沔时元兵屯沔斯得日夜西向号泣会其僮至自沔知稼战没处与斯得潜行至其地遂得稼遗体奉以归见者感泣服除哀伤不已无意仕进心传方修四朝史辟为史馆检阅秩同秘阁校勘盖创员也斯得分修光宁二帝纪寻迁史馆校勘又迁军器监主簿兼史馆校勘时丞相史嵩之柄国斯得遇对空臆尽言冬雷斯得应诏上封事乞择才并相由是迁嵩之意迁太常寺主簿仍兼史馆校勘时斯得叔父定子以礼部尚书领史事时人以为美谈会太学博士刘应起入对拄嵩之嵩之恚使其党言叔父兄子不可同朝以斯得添差通判绍兴府淳佑二年【按宋史本传作淳熙二年考淳熙孝宗年号也淳佑为理宗年号高孝光宁四朝国史成于理宗淳佑二年淳熙应为淳佑之误今改】四朝帝纪书成上之嵩之妄加毁誉于理宗济王改斯得所草宁宗纪末卷斯得与史官杜范王遂辨之然书已登进心传藏斯得所草题其末前史官高某撰而已踰年添差通判台州范既入相召为太常博士迁秘书郎六年正月朔日食斯得应诏上封事言大奸嗜权巧营夺服陛下奋独断而罢退之是矣谏宪之臣交疏其恶或请投荒或请勒休乃一切寝而不宣俾于袭经之时妄致挂冠之请因降祠命苟塞人言是以讹言并兴善类解体谓圣意之难测而大奸之必还莽卓操懿之祸将有不忍言者时监察御史江万里及它台谏累疏论嵩之罪恶竟不施行第因嵩之致仕予祠而已故斯得封事首及之又言大臣

贵乎以道事君今乃献替之义少而容悦之意多知耻之念轻而患失之心重内降当执奏则不待下殿而已行滥恩当裁抑则不从中覆而遽命嫉正庇邪喜同恶异任术诡道乐偷惮劳陛下虚心委寄所责者事而其应乃尔时范锺独当国过失日章故斯得及之又言便嬖侧媚之人尤足为清明之累阴奸伏蛊互煽交攻陛下之心至是其存者几希矣言尤切直帝嘉纳焉又言羣臣庞杂官禁奇袤黻货外交坐视不问大权旁落养成积轻之势以开窥觊之渐于是羣憚悚惧合力排摈斯得遂求补外在告百余日差知严州斯得三请乞祠不许严环山为郡虽丰岁犹仰他州夏旱斯得蠲租发廩招余劝分请于朝得米万石以赈济迁浙东提点刑狱遂劾知处州赵善瀚知台州沈璩等七人以势厉民疏上不报改江西转运判官斯得具辞免上奏曰臣劾奏赵善瀚等七人未闻报可善瀚者侍御史周坦之妇翁沈璩者签书枢密院事史宅之妻党祖宗以来未有监司按吏一不施行者臣身为使者劾吏不行反叨易节乞并臣镌罢以戒奉使无状章上七人竟罢去未几坦亦罢移湖广提点刑狱荐通判潭州徐经孙等六人攸县富民陈衡老以家丁粮食资强贼劫杀平民首吏受赇左右之斯得研鞫得其状黥配首吏追毁衡老官资簿录其家衡老婿吴自性与衡老馆客大学生冯炜等谋中伤斯得盗拆官棧斯得复正其罪具得自性等交通省部吏胥情状黥配自性及省寺高铸等二十余人加直秘阁湖南转运判官改礼部郎中权左司力辞内批兼侍立修注官言水灾曰愿陛下立罢新寺土木速反连旨诸臣遏绝衰说主张善良谨重刑辟爱惜士类抑远佞臣绝其干挠则天意可回和气可召会给事中赵汝腾去国斯得言汝腾一世之望宗老之重飘然引去臣深惜之时上封事言得失者众或恶其讷遂谓空言无补国事斯得因转对言诸臣之言上则切劘圣主下则砥砺大臣内则摧压奸邪外则销遏寇虐顾以为无补于实政乎空言之讥好名之说欲一网君子而尽去之其言易入其祸难言不可不深留圣虑者也监察御史萧泰来论罢踰年以直宝文阁知泉州力辞迁福建路计度转运使朝廷行自实田斯得言按史记秦始皇三十一年令民自实田主上临御适三十一年而异日书之史册自实之名正与秦向丞相谢方叔大媿即为之罢董槐入相召为司农卿程元凤入相改秘书监丁大全相监察御史沈炎论斯得以闽漕交承钱物安吉守何梦然奉行其事陵铄甚至无所得大全罢拜浙西提点刑狱炎浙西人泣于上前乞更之移浙东提举常平命下给事中章鉴缴还斯得杜门不出彗星见应诏上封事曰陛下专任一相虚心委之果得其人宜天心克享灾害不生而大

水为灾连年旱暵今妖星突出其变不小若非大失人心何以致天怒如此之烈似道匿不以闻度宗即位召为秘书监又论罢复迁秘书监屡辞不许擢起居舍人兼国史院编修官实录院检讨官兼侍讲进读之时每于天命去留之际人心得失之因前代治乱之故祖宗基业之难必反复陈之兼权工部侍郎元军下襄阳斯得疏论言事最为切要迁工部侍郎求外以显文阁待制知建宁府度宗崩陈宜中入相以权兵部尚书召斯得痛国事之陆危疏言诛奸臣以谢天下开言路以回天心聚人才以济国事旌节义以厉懦夫竭财力以收散亡忠愤激烈指陈当时之事无所遗擢翰林学士知制诰兼侍读进端明殿学士签书枢密院事兼参知政事台谏徐直方等四人论似道误国之罪乞安置岭表簿录其家丞相留梦炎庇护似道止令散官居住且谓簿录扰及无辜斯得谓散官则安置追降官分司则居住祖宗制也梦炎语塞梦炎乘间直罢去平章事王爚监察御史俞浙并罢斯得于是宋亡矣

△张忠恕

张忠恕字行父右仆射浚之孙以祖任监楼店务入府幕时韩侂胄权势熏灼尝夺民闲已许嫁女夫家以告忠恕白尹归其父母尹不能难再调广西转运司主管文字改通判沅州主管京湖宣抚司机宜文字知澧州开禧未入为籍田令属太庙鸱吻为雷雨坏神主迁御忠恕因轮对请广言路通下情宁宗嘉纳嘉定五年迁军器丞累迁司农丞知宁国府夏旱请于朝得赐僧牒五十米十万七千余石常平使者欲均齐而勿劝糴忠恕虑后无以济遂核户口计岁月严戒诸邑谕大家发盖藏 【按宋史本传藏字下旁注阙字下空白七字接所见寢异四字文理不属从删】 以言去主管冲佑观起知鄂州改湖北转运判官兼知鄂州召为屯田郎官丁内艰免丧为户部郎官入对极言边事理宗即位忠恕移书史弥远请法孝宗行三年丧既而宰辅率百僚请太母同听政忠恕复贻书史弥远谓英宗以疾仁哲以幼母后垂帘有不容已惟钦圣出于勉强务从抑损今吾君长矣若姑援以请此亦中策尔诏羣臣集议庙制忠恕谓九庙非古若升先帝则十世之庙昉于今日于礼无稽宝庆初诏求直言忠恕上封事陈八事一曰天人之应捷于影响正统所系不宜谗之分野二曰人道莫先乎孝送死尤为大事孝宗朝衣朝冠皆以大布迨宁考以适孙承重光宗虽有疾未尝不服丧宫中庆元闲再期而祥百僚始纯服吉今若甫经练祭虽朝臣一带之微不复有凶吉之别则是三年之丧降而为期害理滋甚三曰太母方却垂帘之请而庆寿前期陛下吉服称觴播为诗什此世俗之见非所以表仪于天下四

曰陛下斩然在疾大婚之期固未暇问然非豫讲夙定恐俚说乘闲而入望严取舍而正法度广询谋而协公议五曰陛下于济王之恩自谓弥缝曲尽矣然不留京师徙之外郡不择牧守混之民居一夫奋呼阖城风靡寻虽弭患莫副初心谓当此时优崇恤典选立嗣子则陛下所以身处者庶几无憾而造讹腾谤者靡所致力六曰近幸儉佞之徒凡直言正论率指为好名归过夫好名归过其自为者非也若首萌逆亿厌恶之心则自今言者望风见疑此危国之鸩毒七曰当今名流虽已褒显而搜罗未广遗才尚多经明行修如柴中行陈孔硕杨简识高气直如陈宓徐侨傅伯放金论所推史笔如李心传何惜一官不俾与闻是以正士不遇小人见亲八曰士习日异民生益艰第宅之丽声伎之美服用之侈馈遗之珍向来宗戚阍官犹或闲见今搢绅士大夫殆过之公家之财视为己物凡可以得贿者无不为之疏入朝绅传诵始魏了翁尝勉忠恕以植立名节无隳家声及是叹曰忠献有后矣真德秀闻之更纳交焉忠恕又因轮对引伯父栻告孝宗之语曰当求饶事之臣不求办事之臣欲求仗节死义之臣必求犯颜敢谏之臣语益剴切忠恕自知不为时所容力请外补遂以直秘阁知贑州抵郡才两月言者指为朋比落职降两官罢绍定三年复元官进秩一等提举冲佑观卒迁一官致仕魏了翁尝许忠恕拳拳体国似浚拨繁剗剧似其父杓敛华就实则有志义理之学尝有闻乎栻之教矣

△唐璘

唐璘字伯玉古田人游太学嘉定十年举进士时台臣李安行奏次对官不许论边事璘对策极诋之调吴县尉有杀人于货挟其舟亡者有司求贼急屠者自告吾儿实杀之儿亦自诬伏璘问舟安在钱何用其辞差为缓之果得贼太湖与舟俱至举县感服县有势家治圃将凿渠通舟谬言古有渠常平使者主之璘视干道故籍则诚民田也力争迁使者意移监县税璘遂以直闻调瑞州学教授用白鹿洞教法崇礼让后文艺士翕然知向监行在榷货务门辟淮东运司催辖纲运官属出师楚州捷闻以金人据淮阴欲乘势取之璘言捷奏多夸诘得信乎须聚兵二十万日费米斛余五千缗钱余二万调夫万人仅能使贼全师北去今出没涟海谋结北边政欲迭出挠我忧方大尔淮阴坚垒与楚城等濠之广又过之我士疲丁困可一拔得乎恢复美名也而贾实祸仆窃危之不听制司耻楚城之捷自赵范与葵出议赎淮阴二城为功泊闻金变即转攻之师死伤者六万璘在兵闲着说论直书其事上之知晋陵县邻州田讼至有泣愬诸使愿送晋陵可否者制置使陈鞞留守建康辟为

通判举府事以听监六部门擢监察御史台吏且至璘皇骇趋避不敢诣阙母曰人言此官好汝何得忧璘曰此官须为朝廷争是非一拂上意或迁权贵恐为大人累母曰尔第尽言吾有尔兄在璘入就职故事御史惟常服拜下有论奏缴进至是独召对缉熙殿疏言天变而至于怒民怨而几于离海宇将倾天下有不可胜讳之虑陛下谓此何时纵欲累德文过饰非疏远正人狎昵戚宦宰相不顾民命轻挑兵端不度事宜顿空国帑委政厥子内交商人贿涂大开媼媪敢预邪谋盖正无将之诛以着不忠之戒崔与之操行类杨绾虽修途暮景力不逮心而命下之日闻者兴起乔行简颇识大体朝望稍孚而除授偏私事多遗忘宜择家相赞宗子辅民物以慰父母之望又请号召土豪经理荆襄亟择帅臣安集淮西帝皆为改容嘉纳之至问边事甚悉璘感激知遇自是弹击无所避再疏郑清之妄庸误国乞褫职罢祠其子士昌招权纳贿拔庸将为统帅起赃吏为守臣乞削籍废弃郑性之懦而多私党庇奸庸臣受其改官举状尝蒙荐之国事至此不敢顾私李鸣复甘心谄郑损得荐入朝适清之议张天纲之狱迎合从轻遂擢台端赵伉夫遣史寅午嘱清之父子鸣复又结寅午得登政府会杜范亦论鸣复不行而范去璘遂力旬外疏七上授广西运判改知嘉兴府寻改江东运判时边事急置四察访使就诏璘分建康太平池州江西璘揭榜马前咨所部以利害又戒土豪团结渔业水手茶盐舟夫芦丁悉备燎舟之具人人思奋即选将总二州兵舟以耀敌檄当涂宿设战具防采石拨和余续生券且奏损总领所钱二十万缗助江防军声大振寻升直华文阁知广州广东经略安抚使梅州寇作璘示以威信寇寻息江淮旱议下广右和余璘言公家赤立余本无所办终恐日取于民重朝廷多事之忧明年上章乞致仕帝思见之亟命入奏擢太常少卿寻丁内艰璘居丧哀毁不食久之疾革卒璘立台仅百日世谓再见唐介至切劘上躬尽言无隐帝益严惮之居官大节则母教之助为多

钦定续通志卷四百一

●钦定续通志卷四百二 列传二百二

列传

宋 【一百四】

○宋一百四

娄机

沈焕【舒璘】

曹彦约

范应铃

徐经孙

汤

璿 蒋重珍

牟子才

朱貔孙

欧

阳守道

娄机
沈焕
曹彦约
范应铃
徐经孙
汤璠
蒋重珍
牟子才
朱貔孙
欧阳守道
△娄机

娄机字彦发嘉兴人干道二年进士授盐官尉调含山主簿郡委治铜城圩八十有四役夫三千有奇设庐以处之器用材植一出于官民乐劝趋两旬告毕七掇邻邑率以治绩闻调于潜县丞轻赋税正版籍简狱讼兴学校为江东提举司干办公事易淮东已而复旧改知西安县通判饶州平反冤狱蜀帅袁说友辟参议幕中不就改干办诸司审计司转对请裁损经费又论刑名疑虑之弊【按宋史刑法志绍兴末凡大辟虽刑法相当者多以刑名疑虑情理可悯奏裁贷减至孝宗干道中谳狱之弊益甚】 历迁秘书郎请续编中兴馆阁书目又请宽恤淮浙被旱州县时皇太子始就外傅遴选举官以机兼资善堂小学教授机日陈正言正道又以累朝事亲修身治国爱民四事手书以献太子寘之坐右迁太常丞仍兼资善旋迁右曹郎官秘书省著作郎改兼驾部都城大火机应诏上封事言朝臣务为奉承不能出己见以裨国论外臣不称职至苛刻以困民财将帅偏裨务为交结而不知训阅以强军律时年七十旬闲不许擢监察御史论京官必两任有举主年三十以上方许作县又论郡守轻滥太甚贻害千里苏师旦怙势妄作蒙蔽自肆语及者皆罪去而独惮机韩侂胄议开边机极口沮之谓恢复之名非不美今士卒骄逸遽驱于锋镝之下人才难得财力未裕万一兵连祸结久而不解奈何侂胄闻之不说其议愈密外廷罔测又上疏极论虽密谋人莫得知而羽书一驰中外皇惑侍御史邓友龙初不知兵腾书投合妄荐大将既召还专主此议机语友龙曰今日孰可为大将孰可为计臣正使以殿岩当之能保其可用乎迁右正言兼侍讲首论广蓄人才乞诏侍从台谏学士待制三牙管军各举将帅边郡一二人召问甄拔优养以备缓急进太常少卿兼权中书舍人诏遣宣谕荆襄机昌言曰使往慰安人情则可必欲开

边启衅有死而已不能从也泗州捷闻愈增忧危且曰
若自此成功以摅列圣之宿愤老臣虽死亦幸谪官但恐进锐退速祸愈深耳友龙至不能堪曰不逐此人则异议无所回机遂以言去侂胄诛
召为吏部侍郎兼太子左庶子还朝言至公始可以服天下权臣以私意横生败国殄民今当行以至公若因私恩未报首为汲引私讎未复且
为沮抑一涉于私人心将无所观感矣又言两淮招集敢勇不难于招而难于处若非绳以纪律课其勤惰必为后害仍请检校权臣内侍等没
人家货专为养兵之助机里人有故官吏部丧未举而子赴调者机谓彼既冒法禁而部胥不之问即挾数吏使之治而后来闻者黷之兼太子
詹事着历代帝王总要以裨考订迁给事中海巡入厢亲从都军头指挥使年劳转资恩旨太滥乞收寝未应年格之人年已及者予之帝称善
飞蝗为灾机应诏言和议甫成先务安静葺罅漏以成纪纲节财用以固邦本练士卒以壮国威迁礼部尚书兼给事中擢同知枢密院事兼太
子宾客进参知政事当干戈甫定信使往来之始疮痍方深敝蠹纷然机弥缝裨赞甚多尤惜名器守法度进退人物直言可否不市私恩不避
嫌怨嘉定二年八月行皇太子册命机摄中书令读册祀明堂为礼仪使数上章告老帝不许皇太子遣官属勉留之以资政殿学士知福州力
辞提举洞霄宫以归遂卒赠金紫光禄大夫加赠特进机居乡以诚接物是非枉直判于语下不为后言人惮服之称奖人才不遗寸长访问贤
能疏列姓名及其可用之实以备采取其所荐进亦不欲人之知也

△沈焕

沈焕字叔晦定海人试入太学始与临川陆九龄为友从而学焉干道五年举进士授余姚尉扬州教授召为太学录以所躬行者淑诸人
蚤暮延见学者孜孜诲诱长贰同僚忌其立异会充殿试考官唱名日序立庭下帝伟其仪观遣内侍问姓名众滋忌之或劝其姑营职道未可
行也焕曰道与职有二乎适私试发策引孟子立乎人之本朝而道不行耻也言路以为讪已请黜之在职纔八旬调高邮军教授后充干办浙
东安抚司公事高宗山陵百司次舍供帐酒食之需供给不暇焕亟言于安抚使郑汝谐曰国有大戚而臣子安乐自如安乎汝谐属焕条奏充
修奉官移书御史请明示丧纪本意使贵近哀戚之心重则芟舍菲食自安不烦弹劾而须索绝矣于是治并缘为奸者追偿率敛者支费顿减
岁旱常平使分择官属賑恤得上虞余姚二县无复流殍改知婺源三省类荐书以闻遂通判舒州卒丞相周必大闻之曰追思立朝不能推贤
扬善予愧叔晦益者三友叔晦不予愧也焕人品高明而其中未安不苟自恕常曰昼观

诸妻子夜卜诸梦寐两者无愧始可以言学追赠直华

文阁特谥端宪焕之友舒璘

舒璘

舒璘

璘字符质一字符宾奉化人补入太学张栻官中都璘往从之又从陆九渊游朱熹吕祖谦学于璘徒步往谒之举干道八年进士两授郡教授不赴继为江西转运司干办公事或忌璘所学望风心议及与璘处了无疑闲为徽州教授作诗礼讲解家传人习自是其学寔盛丞相留正称璘为当今第一教官司业汪逵首荐之知平阳县郡政颇苛及璘以民病告辞严义正守为改容秩满通判宜州卒璘乐于教人尝曰师道尊严璘不如叔晦若启迪后进则璘不敢多逊袁燮谓璘笃实不欺无毫发矫伪杨简谓璘孝友忠实道心融明楼钥谓璘之于人如熙然之阳春淳佑中特谥文靖

△曹彦约

曹彦约字简甫都昌人淳熙八年进士尝从朱熹讲學歷建平尉桂阳司录辰溪令知乐平县主管江西安抚司机宜文字知澧州未上辭叔似宣抚京湖辟主管机宜文字汉阳阙守檄摄军事时金人大入郡兵素寡弱彦约搜访土豪得许高俾总民兵赵观俾防水道党仲升将宣抚司军屯郡城金重兵围安陆游骑闯汉川彦约授观方略结渔户拒守南河观逆击斩其先锋且遣死士焚其战舰昼夜殊死战北渡追击金人大败去又遣仲升劫金人砦杀千余人仲升中流矢死奏观补成忠郎汉川簿尉赠仲升修武郎官其后二人彦约以守御功进秩二等就知汉阳嘉定元年诏求言彦约上封事谓敌岂不以岁币为利为其所向辄应所求辄得以我为易与而纵其欲莫若迟留敌使督责边备假以岁月当知真伪寻提举湖北常平权知鄂州兼湖广总领改提点刑狱迁湖南转运判官时盗罗世传李元砺李新等相继窃发桂阳茶陵安仁三县皆破壞地千里莽为盗区彦约至彼督运人心始定迁直秘阁知潭州【按彦约所著昌谷集有直秘阁知漳州谢表考宋史地理志漳州属福建路据本传彦约未尝知漳州也其谢表有云仍兼刍粟之官不改封圻之旧与传所载自湖南转运判官迁知潭州正合又云至若猩鬪之假息敢令貔虎之安怀亦指湖南羣盗言之本传潭州不误】湖南安抚时江西言欲招安李元砺朝命下湖广议招讨之宜彦约言今不行讨捕曲徇招安失朝廷威重若元砺设疑词以款重兵则兵不可撤戍民不得安业元砺果不降彦约乃督诸将逼贼巢而屯击破李新于酃湘

新中创死众推李如松为首如松降遂复桂阳世传素与元砺有隙至是密请像素砺自效彦约录赏格报之且告于朝世传遂禽元砺余党悉平世传既自以为功迟留以徼重赂时池州副都统许俊驻兵吉之龙泉厚赂以结世传超格许转官资世传遂以元砺解江西胡渠为右司欲以世传尽统诸峒而为之帅悉彻江西湖南戍兵彦约固争之然世传终桀黷不肯出峒彦约密遣罗九迁为闲诱胡友睦许以重赏友睦遂杀世传【按宋史王居安传作世传自经死】擢右侍郎官以右正言郑昭先言寝其命久之以为利路转运判官兼知利州关外乏食彦约悉发本司所储减价遣糴劝分免役通商蠲税民赖以济时沔州都统制王大牙骄横制置使董居谊既不得其柄反曲意奉之彦约以蜀之边面诸司并列兵权不一微有小警纷然奏议理财者归怨于兵弱握兵者归咎于财寡乃作病夫议献之庙堂大略谓古之临边求一贤者而尽付之兵权兵权正则事体重兵权专则号令一今使知事者不敢任事畏事者常至失事卒有缓急各持己见兵权财计互相归咎乃欲幸胜以为功苟安以求免时朝论未以为然差知盗国府又改知隆兴府江西安抚居亡何蜀边被兵内有张福莫简之变彦约之言无一不验迁大理少卿又权户部侍郎以宝谟阁待制知成都改知福州又改知潭州彦约力辞提举明道观寻以焕章阁待制提举崇福宫理宗即位擢兵部侍郎兼国史院同修撰宝庆元年入对劝帝讲学防近习次言当以庆历元佑听言为法以绍圣崇观讳言为戒愿陛下倚忠直如耆龟去袞佞若蠹贼其有沮挠谗言者必加斥逐会下诏求言彦约上封事曰陛下谨定省以事长乐开王社以笃天伦孝友之行宜足取信天下然兄弟至亲犹误于狂妄小人之手道路异说犹袭于尺布不缝之谣汉淮南王欲危社稷张苍冯敬等请论如法文帝既赦其罪废徙王不幸而死封其二子于故地此往事之明验本朝太宗皇帝之所已行也今若徇文帝缘情之义法太宗继绝之意虽不止谤而谤息矣又荐隆州布衣李心传素精史学乞真史馆从之寻兼侍读俄迁祠部侍郎加宝谟阁直学士提举佑神观兼侍读授兵部尚书力辞不拜改宝章阁学士知常德府陛辞言下情未通横敛未革帝曰其病安在对曰台谏专言人主不及时政下情安得通包苴公行于都城则州郡横敛无可疑者提举崇福宫卒以华文阁学士转通议大夫致仕赠宣奉大夫嘉熙初赐谥文简

△范应铃

范应铃字旗叟丰城人稍长厉志于学丞相周必大见其文嘉赏之开禧元年举进士调元新尉县当龙泉茶陵溪峒之衡寇甫平喜乱者

诈为惊扰应铃廉得主名猝而治之县十三乡寇扰者不时安抚使移司兼郡初奏弛八乡民租二年诏下如章既而复催以检核之数应铃力争不从即诣郡言于帅曰某非徒为八乡贫民乃深为州计耳民贫迫之急将以不肖之心应之租不可得而祸未易弭也帅色动令免下户既出令复征之应铃又力争讫得请民大感悦调衡州录事总领闻应铃名辟为属改知崇仁县始至明约束信期会正纪纲晓谕吏民使知所趋避然后罢乡吏之供需校版籍之欺蔽不数月省簿成即以其簿及苗税则例上之总领所自此赋役均听讼发摘如神事依期结无不心服将代整治而始至岁杪与百姓休息阁债负蠲租税释囚系恤生瘞死崇孝劝睦仁民厚俗之事悉举以行调提辖文思院干办诸军审计添差通判抚州以言者罢与祠内艰服除通判蕲州时江右峒寇为乱吉州八邑七被残毁差知吉州慨然曰此岂臣子辞难时耶即奉亲以行下车首以练兵足食为先务去冗吏核军籍汰老弱以次罢行永新禾山羣盗啸聚数日闲应者以千数应铃察过客赵希邵有才略檄之摄邑调郡兵结隅保分道捣其巢穴禽之诛其为首者七人一乡以定赣叛卒朱先贼杀主帅应铃曰此非小变也密遣谍以厚赏捕之部使者劾其轻发镌一官闲居六年养亲读书泊如也起广西提点刑狱多所平反丁钱蠹民力奏免之召为金部郎官入见首言今以朝行暮改之规樵欲变累年上翫下慢之积习以悠悠内治之敝政欲图一旦赫赫外攘之大功又曰公论不出于君子而参以逢君之小人纪纲不正于朝廷而牵于弄权之阉寺言皆说直识者韪之迁尚左郎官寻为浙东提点刑狱力匀便养改直秘阁江西提举常平并诡寄三万户风采凛然外艰服除迁军器监兼尚左郎官召见奏曰国事大且急者储贰为先陛下不断自宸衷徒眩惑于左右近习之言转移于宫庭嫔御之见失今不图奸臣乘夜半片纸或从中出忠义之士束手无策矣帝为之动容属盐法屡变商贾之赢上夺于朝廷之自鬻下夺于都郡之拘留九江豫章扼其襟喉江右贫民终岁食淡商与民俱困应铃力陈四善愿用祖宗入粟易盐之法授直宝谟阁湖南转运判官兼安抚司峒獠蒋何三族聚千余人执县令杀王官帅宪招捕逾年不至应铃曰招之适以长寇亟捕之可也即调飞虎等军会隅总禽蒋时选父子反凶渠五人诛之胁从者使之安业未一月全师而归授直焕章阁上疏谢事不允擢大理少卿再请又不允一旦籍府库校簿书处决官事已遂及家务纤悉不遗僚属劝以清心省事曰生死数也平生学力正在今日帅别之杰问疾应铃整冠肃入言论如平常之杰退即逝应铃光明磊落守正不阿别白是非见义必为不

以得失利害动其心书馈不交上官荐举不徇权门当官而行无敢挠以非义所至无留讼无滞狱绳吏不少贷亦未尝没其赀曰彼之货以悖入官又从而悖入之可乎进修洁案奸赃振树风声闻者兴起家居时人有不平不走官府而走应铃之门为不善者辄相戒曰无使范公闻之读书明大义尤喜左氏春秋徐鹿卿曰应铃经术似儿宽决狱似隼不疑治民似龚遂风采似范滂理财似刘晏而正大过之人以为名言

△徐经孙

徐经孙字中立初名于柔宝庆二年进士授浏阳主簿潭守俾部牙契钱至州有告者曰朝廷方下令颁行十七界会令若此钱皆用会小须则幸而获大利矣经孙曰此钱取诸保司出诸公库吾纳会而私取其钱外欺其民内欺其心奚可哉诘旦悉以所部钱上之辟永兴令知临武县通判潭州累擢监察御史劾京尹厉文翁言伪而辨直宝章阁福建提点刑狱号称平允岁余升安抚使召为秘书监兼太子谕德经孙为安抚时陈鞞家居门人故吏有挠法者不得逞相与摇撼至是鞞起家判本郡怀私逞忿无复交承之礼即日劾奏通判语侵经孙谓广卷府库而去于是罢通判削其秩经孙造朝具白于政府事上闻帝大怒谕宰执曰陈鞞老缪至此宜亟罢之于是经孙再诣政府言某鞞门生也前日之白公事也苟鞞以是得罪人谓我何请之不置俾自乞闲明通判无罪识者韪之迁宗正少卿起居舍人起居郎迁刑部侍郎兼给事中升太子左庶子太子詹事敷陈经义随事启迪太子入侍必以其所讲闻悉奏之帝未尝不称善景定三年春雷诏求直言经孙对曰三数年来言论者以靖共为主有怀者以哗评为戒忠谏之气郁不得行上帝降监假雷以鸣切中时病公田法行经孙条其利害忤丞相贾似道拜翰林学士知制诰未踰月讽御史舒有开奏免罢归授湖南安抚使知潭州不就拜端明殿大学士闲居十年卒赠紫金光禄大夫经孙所荐陈茂濂为公田官分司嘉兴闻经孙去国曰我不可以负徐公遂以亲老谢归终身不起

△汤璠

汤璠字君保浏阳人淳熙十四年进士调德安府学教授转三省枢密院架阁迁国子博士时召朱熹为侍讲未几辞归朝廷从其请予祠璠上疏言熹以正学为讲官四方颺望其有启沃之益曾未踰时辄听其去必骇物论宜追召熹还仍授讲职疏上不报由是浸恶权相意而璠之直声亦大闻于时历礼部驾部二郎官出知常州入为大理少卿进直徽猷阁卒璠负直概与韩侂胄陈自强不合故屡嗾言者中伤璠生平奉祠闲居之日多于扬历其在礼曹例掌三省奏记临安大火熹宗遇灾避正殿中书三

表请复不许璫属辞务持大体不为阿曲言者摭其语

涉汕上而朝廷实知其无他故起复制词有清风峻节之语搗尝择壻得蒋重珍云

△蒋重珍

蒋重珍字良贵无锡人嘉定十六年进士第一签判建康军改昭庆军寻易奉国军绍定二年召入对以自天子至庶人所当先知者本心外物之界限为言界限明则知有天下治乱而已何乐其尊知有生民休戚而已何乐其奉且论苞苴有昔所未有之物故吾民罹昔所未有之害苞苴有不可胜穷之费故吾民有不可胜穷之忧迁秘书省正字以伯父丧予告会行都火应诏言陛下临御八年未闻有所作为进退人才兴废政事天下皆曰此丞相意一时恩怨虽归庙堂异日治乱实在陛下焉有为天之子为人之主而自朝廷达于天下皆言相而不言君哉天之所以火宗庙火都城者殆以此臣所以痛心者九庙至重事如生存而彻小涂大不防于火之未至宰相之居华屋广袤而焦头烂额独全于火之未然【按绍定四年九月丙戌夜临安火延及太庙三省六部御史台秘书省玉牒所俱毁惟丞相史弥远府独全盖殿帅冯榘率卫卒力救之也】足见知有权势不知有君父矣他有变故何所倚仗陛下自视不亦孤乎帝读之感动授宝章阁主管云台观它日星变求言复申前说又进为君难六箴召为秘书郎兼庄文府教授端平初入对上五事且曰隐蔽君德昔咎故相故臣得以专诋权臣昭明君德今在陛下故臣得以责难君父乞召真德秀魏了翁用之帝曰人主之职无他惟辨君子小人重珍对曰小人亦指君子为小人此为难辨人主当精择人望处之要津正论日闻则必知君子姓名小人情状矣兼崇政殿说书每草奏斋心盛服有密启则手书削藁帝称其平实迁著作佐郎边帅以八陵图来上诏百官集议重珍言史嵩之既失相位犹欲邀功自固请择贤帅如汉用充国使之亲至边境审度事势条上便宜丞相主出师关洛重珍力争会边帅议和战不一复召集议重珍奏曩乞专意备守不得已则用应兵今不敢变前说不听遂自劾以密勿清光乃不能遏兵端乞免说书职迁著作郎兼权司封郎官起居舍人关洛师大衄复进兵重珍言若耻败而欲胜之则心不平而成忿气不平而成怒生灵之命岂可以忿怒用哉又论禁旅贫弱教习频严辄不能堪不稍变通非消变之道兼国史院编修官实录院检讨官言更化以来旧敝未去者五徇私调停覆护姑息依违是也今又益之以轻易迁起居郎以疾求去以集英殿修撰知安吉州权刑部侍郎三辞不许自劾其不能取信朝廷之罪乞鑄斥置闲散促覲愈力而疾不可起诏守刑部侍郎致仕卒赠朝请大夫谥忠文

△牟子才

牟子才字存■〈穴上夕下〉井研人少从其父客陈咸咸张乐大宴子才闭户读书若不闻见者咸异之学于魏了翁杨子谟虞刚简又
从李方子方子朱熹门人也嘉定十六年举进士对策诋丞相史弥远调嘉定府洪雅县尉改辟总领四川财赋所干办公事诏李心传即成都
修四朝会要辟兼检阅文字连丁内外艰成都破遂尽室东下免丧心传方修中兴四朝国史请子才自助擢史馆检阅入对首言大臣不公不
和六事次陈备边三策理宗顾问甚悉将下殿复召与语翼日帝谕宰相曰人才如此可峻擢之左丞相李宗勉拟秘书郎右丞相史嵩之怨子
才言已遽曰姑迁校勘俄宗勉卒嵩之独相亟请通判吉州转通判衢州日食诏求言上封事万言极陈时政得失且乞蚤定立太子入为国子
监主簿兼史馆校勘踰年迁太常博士郑清之再相子才条上便宜言今日有徽钦时十证又请为济王立后以回天怒校书郎徐霖言谏议大
夫郑窳临安府尹赵与■不报子才谓窳尤无耻请先罢窳至若嵩之谋复相清之误引嵩之之党别之杰共政皆厯厯为帝言之清之卒诏子
才还朝迁著作郎兼崇政殿说书子才随事奏陈兼国史院编修官实录院检讨官兼权礼部郎官时修四朝史乃复兼史馆检讨信州守徐谓
礼奉行经界苛急又以脊杖比校催科饥民啸聚为乱子才言于上立罢经界谪谓礼浙东福建九郡同日大水子才言今日纳私谒溺近习劳
土木庇小人失人心五者皆蹈宣和之失苟不恐惧修省臣恐宣和京城之水将至矣燮理阴阳大臣之事宣谕大臣息乖争以召和气除壅蔽
以通下情今遣使访问水灾德至渥也愿出内帑赈之又言君子难聚而易散今聚者将散其几有十又言谥以劝惩当出自朝廷毋待其家自
请左司徐霖言谏议大夫叶大有帝大怒逐霖给事中赵汝腾缴之徙他官汝腾即出关子才上疏留之大有遂劾汝腾子才上疏讼汝腾诬及
大有之欺未几罢大有言职故事早讲讲读官皆在晚讲惟说书一员宰相惧子才言己并晚讲于早自是不得独对迁军器少监御史萧泰来
劾高斯得徐霖右司李伯玉言泰来所劾不当上切责伯玉降两官罢子才言陛下更化召用诸贤今汝腾斯得霖相继劾去伯玉又重获罪善
人尽矣行都大火子才应诏上封事言甚切直兼直舍人院会泰来亦迁起居郎耻与泰来同列上疏力辞帝为出泰来而子才亦请去不已曰
泰来既去臣岂得独留帝不允又言蜀当以嘉渝夔三城为要欲保夔则巴蓬之闲不可无屯以控扼之欲保渝则利阆之闲不可无屯以遏截
之欲守嘉则潼遂之闲不可无屯以掎角之屯必万人而后可升兼侍读御史徐经孙劾

府尹厉文翁不报出关子才奏留之文翁改知绍兴府
又缴其命伯玉降官已逾年舍人院不敢行词子才曰故事文书行不过百刻即为书行
以为叙复地帝曰谪词皆褒语可更之子才不奉诏丞相又道帝意子才曰腕可断词不可改丞相欲改则自改之乃已淮东制置使贾似道以
海州之捷子才草奖谕诏第述军容之盛不言其功且
语多戒敕似道不乐又言全蜀盛时官军七八万人通忠义为十四万今官军不过五万
而已宜招新军三万并抚慰田杨二家使岁以兵来助
如此则蜀犹可保不则不出三年蜀必亡矣迁起居郎言外郡以进奉易富贵左右以土
木蛊上心小人哗竞朋比陷君子此天灾所以数见也
明堂礼成帝将幸西太乙宫款谢实欲游西湖尔子才力谏止又言首蜀尾吴几二万里
今两淮惟贾似道荆蜀惟李曾伯二人而已可为寒心
谓宜于合肥则立淮西制置司江淮别立荆湖制置司且于涟楚光黄均房巴阆绵剑要
害之郡或筑城或增戍以守之似道闻之怒曰是欲削
吾地也权兵部侍郎屡辞帝不允升同修国史实录院同修撰吴子聪之姑知古为女冠
得幸子聪因之以主得知阁门事子才缴之帝曰子聪
之除将一月矣乃始缴驳何也子才曰文书不过百刻此旧制也今子聪录黄二十余日
乃至后省盖欲俟其供职使臣不得缴之耳给舍纪纲
之地岂容此辈得行私其闲于是子聪改知澧州子才力辞去帝遣检正姚希得挽留不
可以集英殿修撰知太平州至郡首教民孝弟以前人
慈竹义木二诗刻而颁之闲诣学为诸生讲说经义修采石战舰百余艘造兵仗以千计
前政负上供纲及总所纲悉为补之蠲黄池酒息秋苗
夏税畸零益平余仓米又以缗钱二十六万抵库岁收其息以助余本召入对权工部侍
郎时丁大全与董宋臣表里浊乱朝政子才累疏辞归
初子才在太平建李白祠自为记曰白之斥实由高力士激怒妃子以报脱鞬之憾也力
士方贵倨岂甘以奴隶自处者白非直以气陵亢而已
盖以为扫除之职固当尔所以反其极重之势也其后分提禁旅蹠血宫庭虽天子且不得
奴隶之矣又写力士脱鞬之状为之赞而刻诸石属
有拓本遗宋臣宋臣持二碑泣愬于帝乃与大全合谋嗾御史交章诬劾子才在郡公燕
及馈遗过客为入已降两宫犹未已帝疑之密以槩问
安吉守吴子明子明奏曰臣尝至子才家四壁萧然人咸知其贫陛下无信谗言帝语经
筵宫曰牟子才之事吴子明乃谓无之何也众莫敢对
戴庆焞曰臣忆子才尝缴子明之兄子聪帝曰然事遂解盖公论所在虽仇讎不可废也
未几大全败宋臣斥诬劾子才者悉窜岭海外乃复子
才官职提举玉隆万寿宫帝即欲召子才会似道人相素惮子才又憾草诏事仅进宝章

阁待制知温州又嗾御史造飞语目子才为潜党将中以危祸上意不可夺遂以礼部侍郎召屡辞不许乃赐御笔曰朕久思见卿故有是命卿其勿疑为我强起故事近臣自外召者必先见帝乃供职子才至北关请内引奏事宦者在旁沮之帝特令见大说慰谕久之时似道自谓有再造功四方无虞皆其力故肆意逸乐恶闻说言子才言开庆之时天下岌岌殆矣今幸复安不知天将去疾遂无复忧耶抑顺适吾意基异时不可测之祸也奈何怀宴安以鸩毒而不明闲暇之政刑乎忠厚我朝之家法乃者小人妨国始用一切以戕其脉今当反其所为奈何愈益甚乎言论国之元气也言及乘輿尚见优假事关廊庙忿怒斯形朝政之阙失臣下之蔽蒙何由上达乎帝曰非卿不闻此言宣坐赐茶问外事甚悉子才具以由里疾苦对帝颦蹙久之即兼侍读寻兼同修国史实录院同修撰宋臣有内侍省押班之命举朝争之不能得子才入疏诘朝帝出其疏示辅臣皆曰子才有忧君爱国之真无要誉沽名之巧擢权礼部尚书祀明堂子才为执绥官帝问汉唐文物占对详贍时士大夫小连权臣辄窜流子才请重者量移轻者放还兼直学士院每直辄召对内殿语至夜分或就赐酒果兼给事中彗星见应诏上封事请罢公田更七司法正为尚书力辞不许升修国史实录院修撰徐敏子以星赦量移似道恶其为潜所用讽后省缴之子才不可叶李吕宙之等上书攻似道似道怒欲杀之以他事下天府狱子才请宥之似道径从天府断狱不复以闻盖惧子才再有所论驳也度宗在东宫雅敬子才言必称先生即位授翰林学士知制诰力辞请去进端明殿学士以资政殿学士致仕卒赠四官官其后二人子才性孝友在吉州文天祥以童子见即期以远大所荐士若李芾赵卯发刘黻家铉翁皆忠义士平江守吴渊籍富民田以千余亩遗子才皆却之身后家无余赀卖金带乃克葬子献大理少卿

△朱貔孙

朱貔孙字兴甫浮梁人淳佑四年进士授临江军学教授丞相史嵩之闻貔孙名欲致之馆下以禄未及亲辞丧父服除授福州学教授差充江东安抚司干办公事丁大全在台势焰熏灼天久阴雨貔孙贻书政府言回积阴之道去奸邪罢手实蠲米税奸邪指大全也丞相董槐得书嘉叹主管尚书刑工部架阁文字宦者董宋臣宠幸用事貔孙发策试胄子极论宦寺专权之患宋臣讽言者论罢之马光祖辟差江东安抚司机宜文字擢史馆校勘迁太学博士属帝亲擢监察御史兼崇政殿说书首疏论大全权奸误国之罪倡言学校六士之冤又以翕聚人才凝固人心精择人言增禁旅以壮帝畿择良守以牧内郡迁全才以守江面严舟师以防

海道因地募兵以应突至之敌并力合势以援必守之
地时有建议迁都四明者魏孙亟上疏言釜輿若动则三边之将士瓦解而四方之盗贼
蠡起必不可遂止魏孙在讲筵言及宋臣挠政事忤旨
迁大理少卿又迁司农少卿兼太子右谕德诏许乘马赴讲魏孙谕导得体衍说经义有
关于君道者必委曲敷畅阴寓警戒太子每为之改容
兼国史院编修官实录院检讨官兼权直舍人院迁宗正少卿母忧服除授秘书监兼太
子左谕德改监察御史兼崇政殿说书姓名已付外矣
寻复改命浙西行公田吏并缘为奸魏孙疏其弊推春秋尊王绌霸之旨劝帝崇仁政用
吉士行正论擢殿中侍御史兼侍讲请严京师淫声奇
服之禁他所论苗耗役害及经理川蜀皆当世急务宋臣复出朝论纷然魏孙因对力斥
其奸卒夺祠升侍御史兼侍讲长星出东方魏孙力诋
外戚内臣及进奉羨余失人心者且曰回天心自人心始辞旨恳切帝为之感动升侍读
魏孙之再入台属疆场多事屡陈备御之策理宗春秋
高倚成贾似道似道擅命魏孙随事进谏不肯阿附至若行公田之政屡于经筵密以告
帝似道自是深忌之魏孙累疏求去理宗崩度宗即位
擢右谏议大夫以疾乞辞言职迁吏部尚书不拜帝以旧学故雅欲留魏孙辞益力以华
文阁学士知盩厔府似道讽言者论罢久之提举太平
兴国宫复华文阁学士知袁州至郡宣布德意以戢暴禁贪为先务郡仓受租榜除斛面
取赢之敝许民自概量兴学校以劝士升敷文阁学士
知福州福建安抚使未几卒于袁之郡治赠四官与恩泽二令所在给丧事

△欧阳守道

欧阳守道字公权一字迂父吉州人初名巽自以更名应举非是当祭必称巽少孤
贫无师自力于学里人聘为子弟师主人矚其每食舍
肉密归遗母为设二器驰送乃肯食肉年未三十翕然以德行为乡郡儒宗江万里守吉
州守道适贡于乡万里独异视之淳佑元年举进士廷
对言国事成败在宰相人才消长在台谏昔者当国恶箴规言者疑触迁及其去位共谓
非才或有迎合时宰自效殷勤亦有疾恶乖方苟求疵
类以致忠邪不辨黜陟无章唱名徐伊夫为第一伊夫握守道起曰吾愧出君上矣授零
都主簿丁母忧服除调赣州司户万里入为国子祭酒
荐为史馆检阅召试馆职授秘书省正字安南国王陈日昃传位其子求封太上国王下
省官议守道谓太上者汉高帝以尊其父累朝未之有
改若赐诏书称太上国王非便南越尉佗尝自称蛮夷大长老礼方伯自称曰天子之老
大夫致仕曰老自称亦曰老自夷蛮言之则有尉佗之
故事自中国言之亦方伯致仕者之常易太以老无损或去上存太太所以别于少也谓

父为太则子为少矣迁校书郎兼景宪府教授迁秘书
郎转对言欲家给人足必使中外臣庶无复前日言利之风而后可以言罢徒步出钱塘
门唯书两篋而已理宗遗诏闻与其徒相向哭踊僮奴
孺子各为悲哀咸淳三年特旨与祠诏大臣举贤才少傅吕文德举九十六人守道预焉
添差通判建昌军以书谢庙堂曰史赞大将军不荐士
今大将军荐士矣而某何以得此于大将军哉幸尝蒙召擢备数三馆异时或者谓其放
废无聊托身诸贵人亏伤国体则窃得而解愿仍赋祠
禄足矣迁著作佐郎兼崇政殿说书兼权都官郎官经筵所进皆切于当世务帝为动色
迁著作郎卒家无一钱云

钦定续通志卷四百二

●钦定续通志卷四百三 列传二百三

列传

宋 【一百七】

○宋一百七

孟珙 杜杲 【庶】 王登 杨揆 张惟孝 陈

咸

孟珙

杜杲

王登

杨揆

张惟孝

陈咸

△孟珙

孟珙字璞玉随州枣阳人四世祖安尝从岳飞军中有功嘉定十年金人攻襄阳驻
团山父宗政时为赵方将以兵御之珙料其必窥樊城
献策宗政由罗家渡济河宗政然之越翼日诸军临渡布阵金人果至半渡伏发歼其半
宗政被檄援枣阳临阵尝父子相失珙望敌骑中有素
袍白马者曰吾父也急麾骑军突阵遂脱宗政以功补进勇副尉十二年完颜额尔克步
骑二十万分两路攻枣阳环集城下珙登城射之将士
惊服宗政命珙取它道劫金人破砦十有八斩首千余级大俘军器以归金人遁以功升
下班祇应十四年入谒制置使赵方一见奇之辟光化
尉转进武校尉十六年以功特授承信郎丁父忧制置使起复之珙辞乞葬趣就职又辞
转威忠郎理宗即位特授忠翊郎寻差峡州兵马监押
兼在城巡检京湖制置司差提督虎翼突骑军马又辟京西第五副将权管神劲左右军

统制初宗政招唐邓蔡壮士二万余人号忠顺军命江海总之众不安制置司以珙代海珙分其军为三众乃帖然绍定元年珙白制置司昞平堰于枣阳自城至军西十八里由八迭河经渐水侧水跨九阜建通天槽八十有三丈溉田十万顷立十庄三辖使军民分屯是年收十五万石又命忠顺军家自畜马官给刍粟马益蕃息二年升京西第五正将枣阳军总辖本军屯驻忠顺三军明年差京西兵马都监母忧起复京西兵马钤辖枣阳军驻扎仍总三军六年蒙古将诺延布展追金主完颜守绪逼蔡制置司檄珙戍鄂讨金唐邓行省武仙仙时与武天锡及邓守伊喇瑗相犄角为金尽力欲迎金主入蜀掠光化锋剽甚天锡者邓之农夫乘乱聚众二十万为边患珙逼其垒一鼓拔之壮士张子良斩天锡首以献乃授江陵府副都统制制置司檄珙问边事珙曰金人若向吕堰则八千人不为少然须木查腾云吕堰等砦受节制乃可济已而刘全雷去危两部与金人战于夏家桥小捷有顷金人向吕堰珙喜曰吾计得矣亟命诸军追击吕堰进逼大河退逼山险砦军四合金人弃辎重走伊喇瑗遣其部曲马天章奏书请降珙入城伊喇瑗伏阶下请死珙为之易衣冠以宾礼见初仙屯顺阳为宋军所挠【按金史武仙传仙自邓州还屯顺阳宋将孟珙帅兵五千袭之仙击败珙与数百人脱去生擒其统制统领等数十人与宋史本传所载异】退屯马蹬金顺阳令李英以县降申州安抚张林以州降珙言归附之人宜因其乡土而使之耕因其民人而立之长少壮籍为军俾自耕自守才能者分以土地任以职使各招其徒以杀其势制置司是之七月仙爱将刘仪领壮士二百降珙问仙虚实仪陈仙所据九砦其大砦石穴山以马蹬沙窝岵山三砦蔽其前三砦不破石穴未易图也若先破离金砦则王子山砦亦破岵山沙窝孤立三帅成擒矣珙翼日遣兵向离金卢秀执黑旋帅众入砦金人不疑为宋军乃分据巷道大呼纵火掩杀几尽是夜壮士杨青等捣王子山砦护帐军酣寝王建入帐中斩金将首囊佩之平明视之金小元帅也丙辰出师马蹬遣樊文彬攻其前门成明等邀截西路一军围讫石烈一军围小总师砦火烛天杀僇山积余逸去者复为成明伏军所得壮士老少万余人来归师还至沙窝西与金人遇大捷是日三战三克未几丁顺等又破摩和尔砦珙召仪曰此砦既破板桥石穴必震汝能为我招之乎仪曰晋德与花腿王显金镇抚安威故旧招之必来乃遣德行威见德叙情好甚欢介德往见显显即日以书乞降德复请珙遣刘仪候之显军约五千犹未解甲珙令作栲栳阵入阵周视良久乃去如素所抚循飧以牛酒皆醉饱歌舞珙料武仙将上岵山绝顶窥伺令樊文彬驻

军其下前当设伏后遮归路已而仙众果登山及半文彬麾旗伏兵四起仙众失措枕藉厓谷山为之頽杀其将乌舍擒七百三十人弃铠甲如山薄暮珙进军至小水河仪还具言仙不欲降谋往商州依险以守然老稚不愿北去珙曰进兵不可缓夜漏十刻召文彬等授方略明日攻石穴九砦时积雨未霁文彬患之珙曰此雪夜擒吴元济之时也策马直至石穴分兵进攻自寅至巳力战九砦一时俱破武仙走追及于鲇鱼砦仙望见易服而遁复战于银葫芦山军又败仙与五六骑奔追之隐不见降其众七万人获甲兵无算还军襄阳转修武郎鄂州江陵府副都统制元兵遣宣抚王楸约共攻蔡制置使谋于珙珙请以二万人行因命珙尽护诸将金兵二万骑繇真阳横山南来珙鼓行而前金人战败却走追至高黄陂布展遣图尔哈特默和克齐阿实克三人来迓珙与射猎割鲜而饮驰入其帐布展喜约为兄弟酌马湏饮之金兵万人自东门出战珙遮其归路掩入汝河擒其偏裨八十有七人得蔡降人言城中饥珙曰已窘矣当防突围珙与布展约南北军毋相犯决堰水布虎落布展遣万户张柔帅精兵五千人入城金人钩二卒以往柔中流矢如猬珙麾先锋救之挟柔以出黎明珙进逼石桥钩致生浮郭山战少却金人突至珙跃马入阵斩山以徇军气复张殊死战进逼柴潭立栅翼日命诸将夺柴潭楼金人争楼诸军鱼贯而上遂拔柴潭楼蔡人恃潭为固外即汝河潭高于河五六丈楼伏巨弩相传下有龙人不敢近将士疑畏珙召麾下饮再行曰楼伏弩能及远而不可射近彼所恃此水耳决而注之涸可立待皆曰堤坚未易凿珙曰凿其两翼可也潭果决实以薪苇遂济师攻城擒其两将斩之获其殿前右副点检温端礫之城下进逼土门端平元年正月黑气压城上日无光降者言城中绝粮已三月欲降者众珙下令诸军衔枚分运云梯布城下珙帅师向南门至金字楼列云梯令诸将闻鼓则进马义先登赵荣继之万众竞登大战城上降其丞相乌阵哩噶老杀其元帅乌凌阿及偏裨二百人门四开招布展入江海执其参政张天纲以归珙问金主所在天纲曰城危时即取宝玉寘小室环以草号泣自经曰死即火我珙还军襄阳特授武功郎主管侍卫马军行司公事擢建康府都统制兼权侍卫马军行司职事制置司奏留珙襄阳兼镇北军都统制镇北军者珙所招中原精锐百战之士万五千余人分屯灤北樊城新野唐邓闲俄令赴枢密院稟议授带御器械二年授主管侍卫马军司公事时暂黄州驻札朝辞帝曰卿名将之子忠勤体国破蔡灭金功绩昭著珙对曰宗社威灵陛下圣德三军将士之劳臣何力之有帝问恢复对曰愿陛下宽民力蓄人材以俟机会问和议对曰

臣介胄之士当言战不当言和赐赉甚厚兼知光州又兼知黄州三年珙至黄增埤浚隍搜访军实边民来归者日以千数为屋三万闲居之厚加赈贷又虑兵民杂处因高阜为齐安镇淮二砦以居诸军勦章家山毋家山两堡为先锋虎翼飞虎营兼主管管内安抚司公事节制黄蘄光信阳四郡军马蒙古兵攻蘄州珙遣兵解其围又攻襄阳随守张龟寿金门守朱阳祖郢守乔士安皆委郡去复州施子仁死之江陵危急诏沿江淮西遣援众谓无踰珙者乃先遣张顺渡江珙以全师继之蒙古兵发两路一攻复州一在枝江监利县编筏窥江珙变异旌旗服色循环往来夜则列炬照江数十里相接又遣外弟赵武等共战躬往节度破砦二十有四还民二万嘉熙元年封隋县男擢高州刺史忠州团练使兼知江陵府京西湖北安抚副使鄂州诸军都统制蒙古大将特默岱入汉阳境大将昆布哈入淮甸蘄守张可大舒州李士达委郡去光州董尧臣以州降合三郡人马粮械攻黄守王鉴江帅万文胜战不利珙入城军民喜曰吾父来矣驻帐城楼指画战守卒全其城斩逗留者四十有九人以徇将士弥月苦战病伤者相属珙遣医视疗士皆感泣二年授宣远军承宣使带御器械鄂州江陵府诸军都统制授枢密副都承旨京西北路安抚制置副使兼督视行府参谋官升制置使兼知岳州乃檄江陵节制司捣襄郢于是张俟复郢州贺顺复荆门军十二月刘全战冢头樊城郎神山屡捷三年春曹文鏞复信阳军刘全复樊城遂复襄阳授枢密都承旨制置使兼知鄂州全遣谭深复光化军息蔡降珙命以兵逆之得壮士百余籍为忠卫军初诏珙收复京襄珙谓必得郢然后可以通馈饷得荆门然后可以出奇兵由是指授方略发兵深入所至以捷闻珙奏略曰取襄不难而守为难襄樊为朝廷根本今百战而得之当加经理如护元气非甲兵十万不足分守乃置先锋军以襄郢归顺人隶焉谍报蒙古兵欲大举临江珙策必道施黔以透湖湘请粟十万石以给军饷以二千人屯峡州千人屯归州忠卫旧将晋德自光化来归珙奖用之珙弟瑛以精兵五千驻松滋为夔声援遣于德兴增兵守归州隘口万户谷蒙古兵自随窥江珙密遣刘全拒敌遣伍思智以千人屯施州蒙古大将塔喇海并图萨帅师入蜀号八十万珙增置营砦分布战舰遣张举提兵闲道抵均州防遏蒙古兵度万州湖滩施夔震动珙兄璟时为湖北安抚副使知峡州急以书谋备御珙请于督府帅师西上璟调金铎一军迎拒于归州大埡砦刘义捷于巴东县之清平村珙弟璋选精兵二千驻澧州防施黔路四年进封子珙条上流备御宜为藩篱三层乞勦制副司及移关外都统一军于夔任涪南以下江面之责为第一层备

鼎澧为第二层辰沅靖桂为第三层峡州松滋须各屯万人舟师隶焉归州屯三千人鼎澧辰沅靖各五千人郴桂各千人如是则江西可保又遣杨鼎张谦往辰沅靖三州同守倅晓谕熟蛮讲求思播施黔支径以图来上会谍知蒙古兵于襄樊随信阳招集军民布种积船材于邓之顺阳乃遣张汉英出随任义出信阳焦进出襄分路挠其势遣王坚潜兵烧所积船材又度师必因粮于蔡遣张德刘整分兵入蔡火其积聚制拜盩武军节度使四川宣抚使兼知夔州招集麻城县巴河安乐矾管公店淮民三百五十有九人皆沿边经战之士号盩武军令璋领之进封汉东郡侯兼京湖安抚制置使回鹘鼐尔巴图尔帅壮士老稚人马来降勦飞鹞军改鼐尔名艾忠孝充总辖乞补以官四川制置使陈隆之与副使彭大雅不协交章于朝珙曰国事如此合智并谋犹惧弗克而两司方勇于私鬪岂不愧廉蔺之风乎驰书责之厘蜀政之弊为条班诸郡县曰差除计属曰功赏不明曰减克军粮曰官吏贪黷曰上下欺罔又曰不择险要立砦栅则难责兵以卫民不集流离安耕种则难责民以养兵乃立赏罚以课殿最俾诸司奉行之兼夔路制置大使兼范田大使军无宿储珙大兴屯田调夫筑堰募农给种上屯田始末与所减券食之数降诏奖谕淳佑二年珙以京襄死节死事之臣请于朝建祠岳阳岁时致祭有旨赐名闵忠庙淮东受兵枢密俾珙应援遣李得帅精兵四千赴之珙子之经监军谍知京兆府伊克诺延以骑兵三千经商州取鹞领关出房州竹山遣王令屯江陵寻进屯郢州刘全屯沙市焦进提千人自江陵荆门出襄橛刘全赍十日粮取道南漳入襄与诸军合蒙古兵至三州珙下令应出戍主兵官不许失弃寸土权开州梁栋乏粮请还司珙曰是弃城也栋至夔州使高达斩其首以徇由是诸将禀命惟谨蒙古兵至泸珙命重庆分司发兵应援遣张祥屯涪州拜检校少保进封汉东郡公珙言沅之险不如辰靖之险不如沅三州皆当措置而靖尤急今三州粒米寸兵无所从出此京湖之忧一江防上自秭归下至寿昌亘二千里自公安至峡州滩碛凡十余处隆冬水涸节节当防兵讳备多此京湖之忧二今尺籍数亏既守滩碛又守关隘此京湖之忧三陆抗有言荆州国之藩表如其有虞非但失一郡当倾国争之若非增兵八万并力备御虽韩白复生无所展巧今日事势大略相似利害至重四年兼知江陵府五年御笔以职事修举转行两官许令回授珙至江陵登城叹曰江陵所恃三海不知沮洳有变为桑田者敌一鸣鞭即至城外盖自城以东古岭先锋直至三汉无所限隔乃修复内隘十有一别作十隘外有距城数十里者沮漳之水于旧自城西入江因障而东之俾遶城北

入于汉而三海遂通为一随其高下为匱蓄泄三百里
闲渺然巨浸土木之工百七十万民不知役绘图上之珙以身镇江陵而兄璟帅武昌故
事无兄弟同处一路者乞归田不允元大将大纳至江
陵遣杨全伏兵荆门以战珙先期谍知达于枢密檄两淮为备两淮不知也后果如所报
珙奏襄蜀荡析士无所归蜀士聚于公安襄士聚于郢
渚臣作公安南阳两书院以没入田庐隶之使有所教养请帝题其榜赐焉初珙招镇北
军驻襄阳李虎王旻军乱镇北亦溃乃厚招之降者不
绝行省范用吉密通降款以所受告为质珙白于朝不从珙叹曰三十年收拾中原人今
志不克伸矣病遂革乞休致授检校少师宣武军节度
使致仕终于江陵府治是月朔大星陨于境内声如雷卒之夕大风发屋折木特赠少师
三赠至太师封吉国公谥忠襄庙曰威爱珙忠君体国
之念可贯金石在军中与参佐部曲论事言人人异珙徐以词组折衷众志皆愜谒士游
客老校退卒壹以恩意抚接名位虽重惟建鼓旗临将
吏面色凜然无敢涕唾者退则焚香扫地隐几危坐若萧然事外远货色绝滋味其学邃
于易六十四卦各系四句名警心易赞亦通佛学自号
无庵居士

△杜杲

杜杲字子昕邵武人父颖仕至江西提点刑狱杲以父任授海门买纳盐场未上福
建提点刑狱陈彭寿檄摄闽尉江淮制置使李珣罗致
幕下滁州受兵檄杲提偏师往援甫至民蔽野求入避滁守固拒杲启钥纳之金人围城
数重杲登陴中矢益自鼓励卒全其城调江山丞两浙
转运使朱在辟监崇明镇崇明改隶淮东总领与总领岳珂议不合慨然引去珂以负芦
钱劾朝廷察芦无亏三劾皆寝淮西制置曾式中辟卢
州节度推官浮光兵变杲单骑往诛其渠魁守将争饷金币悉封贮一室将行属通判郑
准反之安丰守告戍将扇摇军情且为变帅欲讨之杲
曰是激使叛也请与两卒往呼将谕之曰而果无他可持吾书诣制府将即日行一军帖
然知六安县民有嬖其妾者治命与二子均分二子谓
妾无分法杲书其牒云传云子从父令律曰违父教令是父之言为令也父令子违不可
以训然妾守志则可或去或终当归二子部使者季衍
览之击节曰九州岛三十三县令之最也知定远县会李全犯边衍时为淮帅辟通判濠
州朝廷以杲久习边事擢知濠州制置大使赵善湘谋复
盱眙密访杲杲曰贼恃外援当断盱眙桥梁以困之卒用其策成功金众数万驻榆林阜
请降辎重甚富或请诱而图之杲曰杀降不仁夺货不
义纳之则有后患谕而遣之召奏事差主管官告院知安丰军善湘与赵范范弟葵出师

迁淮西转运判官诏问守御策杲上封曰沿淮旱蝗不任征役中原赤立无粮可因若虚内事外移南实北腹心之地必有可虑时在外谏出师者惟杲一人及兵败洛阳人始服其先见奉崇道祠再知濠州未行改安丰蒙古兵围城与杲大战明年大兵复大至又大战擢将作监御书慰谕之丞相李宗勉参知政事徐荣叟曰帅淮西无逾杜杲者诏以安抚兼庐州进大府卿淮西制置副使兼转运使复与蒙古兵战累疏请老不许权刑部尚书淳佑元年乞去愈力擢工部尚书遂以直学士奉祠帝欲起之帅广西以言者罢帝曰杜杲两有守功若脱兵权使有后祸朕何以使人乃起知太平州俄擢华文阁学士沿江制置使知建康府行宫留守节制安庆和无为三郡复与蒙古兵战于真州主敷文阁学士迁刑部尚书引见帝加奖劳乞归不许兼吏部尚书杲随资格通其碍铨宗为精梁成大子赂当国者求铨试杲曰昔沈继祖论朱文公成大亦论真文忠公皆得罪名教者子孙宜废锢安得仕进徽猷阁奉祀请老升宝文阁致仕帝思前功进龙图阁卒遗表上赠开府杲淹贯多能为文丽密清严善行草急就章晚岁专意理学尝言吾兵闲无悖谋左画得于四书子庶

杜庶

杜庶

庶字康侯幼倜傥有大志性刚劲通宋典故善为文从父兵闲习边事未入仕已立战功明堂恩补官蒙古兵围安丰兵将不相下庶调护咸得其欢心卒协力捍御杲帅淮西辟书写机宜文字迁将作监簿杲在建康庶通判和州权知真州郡素缺备庶大修守御后历迁司农丞知和州陛辞言今天时不可幸地利不可恃人和不可知苟恃天幸恃长江恃清野而付边事于素不谙历之人未见其可帝嘉纳寻兼淮西提点刑狱浚城濠增守备修学宫知真州兼淮东提点刑狱逾年进直秘阁移淮西兼庐州安抚副使治绩甚多就任加刑部郎中升宝文阁与蒙古兵战于望仙白沙城升华文阁开庆元年进大理少卿淮东转运副使两淮制置司参谋官特授两淮制置使如扬州射阳湖饥民啸聚庶曰吾赤子也遣将招刺得丁壮万余戮止首恶数人抗章自劾召赴行在寻直宝文阁知隆兴府江西转运副使卒

△王登

王登字景宋德安人少读书喜古兵法慷慨有大志不事生产出制置使孟珙幕府权知巴东县献俘制置司登念奋自书生不拜竟弃功去淳佑四年举进士调兴山主簿总领贾似道檄修江陵城条画有法明年制置使李曾

伯经理襄阳登在行以积功升寻以母忧去及吴渊为制置使边事甚亟因忆弟潜盛言王登才略具书币招之登方与客弈发书衣冠拜家庙长揖出门渊慨然曰事亟矣奈何登曰亟呼诸将共议众至驩跃曰景宋在此渊曰汝辈欲西门去景宋欲从方城如何众曰惟命岂曰用兵患不一登书生不过冯轼观战请五大帅中择一人为节制渊曰请监丞出正谓此也即书银牌曰监丞代某亲行将士用命不用命赏罚毕具申登至沙市椎牛酹酒得七千人誓曰登与诸将义同骨肉今日之事登不用命诸将杀登以献主帅诸将有一不用命登有制在不敢私也众股栗听命竟立奇功于沮河赵葵为制置使见登握手曰景宋一身胆惜相见晚也俾参宣抚司兼京西两节马光祖为制置使辟充参谋官迁军器少监京西提点刑狱登威声日振有余思忠及徐制几谗于光祖曰京湖知有王景宋不知有马制置非久易位矣光祖疑焉出登屯邓州后以干办锺蜚英调护情好如初侍御史戴庆烜劾思忠其党过元龙沈翥在幕中又倾之以是议论不合才略不能施议者惜焉开庆元年登提兵援蜀约日合战夜分登经理军事忽绝倒五藏出血幕客唐舜申至登尚瞪目视几上文书俄而卒他日舜申舟经汉阳有蜀声呼唐舜申者三左右曰景宋声是也夕舜申暴卒

△杨揆

扬揆字纯父抚州临川人少能词赋故人荐淮阩杜杲幕杲曰风神如许他日不在我下由是治法征谋多咨于揆逾年安丰被兵揆慨然请行乃以奇策解围奏补七官揆念置身行伍闲骑射所当工夜以青布藉地乘生马以跃初过三尺次五尺至一丈制置使孟珙辟于幕尝用其策珙尝燕客有将校语不逊命斩之揆从容曰斩之诚是第方会客广谋议非其地非其时也珙大服未几有大将立功珙坐受其拜揆为动色因叹曰大将立功庭参纳拜信兜鍪不如毛锥子也于是谢绝宾客治进士业遂登第调麻城尉向士璧守黄州檄入幕寻以战功升三官无何得心疾曰我不可用矣遂调潭州节度推官赵葵为京湖制置使揆与偕行王登迓于沙市极谈至夜分揆退曰王景宋满身是胆惜欠沈细者如揆副之何事不可为也但恐终以勇败后登死人以为知言逾时士璧守峡州招之病不果行而卒赠架阁

△张惟孝

张惟孝字仲友襄阳人长六尺通春秋下第乃工骑射城中乱争出关惟孝拔剑杀数人趋白河见一舟壮巨甚急登之舟人不可惟孝曰今日之事非汝即我能杀我者得此舟众披靡遂以舟达郢州兵乱奔沙洋别之杰为帅

尽隘诸湖不泄水惟孝令二人贾服前行密窥隘兵曰
易与耳乃与十骑衣黑袍假为敌兵曰后队亟至守隘四五百人悉溃舟趋藕池开庆元
年卜居江陵至沙市众舟大集不可涉顷有峩冠张盖
从者数十则宣抚姚希得之弟也令曰敢有争岸者投水中惟孝睥睨良久提剑驱左右
而出举白旗以麾令众船登岸毋敢乱次干官锺蜚英
见而异之以告唐舜申舜申曰吾故人也具言惟孝平生蜚英谓曰今日正我辈趋事赴
功之秋惟孝不答又叩之则曰朝廷负人明日蜚英导
希得罗致之宴仲宣楼蜚英酒酣曰有国而后有家天下如此将安归乎惟孝跃然曰从
公所命乃请空名帖三十以还逾旬以三十骑俱拥甲
士五千至旗帜鲜明部伍严肃上至公安下及墨山游踏相继希得大喜请所统姓名惟
孝曰朝廷负人福难祸易聊为君侯纾一时之难耳姓
名不可得也时鼎澧五州危甚于是击鼓耀兵不数日众至万人数战俱捷江上平制使
吕文德招之不就而遁物色之不可得或云已趋淮甸
后不知所终

△陈咸

陈咸字逢儒监察御史升卿次子为叔父巨卿后登淳熙二年进士第调内江县尉
县吏受贿赋民不均咸以闻于部使者为下令听民自
陈利病而委咸均其赋改知果州南充县转运司辟主管文字岁旱税司免下户两税转
运使安节以为亏漕计咸白安节曰苟利于民违之不可
因言今楮币行于四川者几亏三百万苟增印百万足以补放免之数安节从之军多
滥请咸每裁损帅属以为言咸曰咸首可断滥请不可
得蜀岁收激赏权输绢钱民以为病咸白安节核入节出奏岁减二十余万缗擢知资州
时久旱咸被命即请帅臣发粟二千余石以赈明年东
西川皆旱总制二司议蠲民赋而虑亏国课咸请增印未补发引百有九万以偿所蠲议
遂决大修学宫政以最闻改知普州开禧元年边事兴
四川宣抚使程松奇其才辟主管机宜文字咸首贻书论兵不可轻动劝松搜人才练军
实考图籍以疏财用之源视险要以决攻守之计约大
将面会以免疑忌之嫌捐金帛募死士以明闲探之远出虚捣奇之策审于当用幸胜趋
利之谋寝而勿行松复书深纳然实不能用副使吴曦
蔑视松易置将兵不关白正使松务为简贵咸忧之复说松收梁洋以北义士为缓急用
据险阨立关堡杜支径以备不虞松又不能用迂利路
转运判官及曦叛于金关外四州继没人情大骇咸留太安军督军粮檄其守杨震仲赈
流民备奸盗众稍安安丙密以曦反谋告咸咸即遣人
告松松不之察曦以咸蜀名士欲首胁之以令其余檄咸议事咸不往遂之利州李道传

问咸计将安出咸曰事极不过一死耳必不为吾蜀累也语家子钦曰咸受国厚恩义当击贼恨无兵权独有下策削发以全臣节会曦以书招之急咸答书劝其禀命既而欲亲谕之遂行知曦已僭乱曰吾书不可用矣还至后■〈金 敖〉入帐中以刀自断其结披缙而出景望遣兵拘咸于岸曦闻怒甚吴玠劝曦召咸主武兴寺因杀之安丙力为救解乃得释归曦既诛咸语诸子曰吾不能讨贼而弃官守罪也上表自劾安丙杨辅等皆勉其出丙寻奏以咸总蜀赋从之时僭乱后帑藏赤立咸至武兴与丙商榷利病兵政财计合为一家规画备至故军兴增支之数八千七百五十余万皆不取于民咸总赋之始瞻军帑廩缙不过一千四百五万余粮不过九十一万余料不过二万余咸昼夜精勤调度有方不二岁益昌大军库有楮引百八十万成都免引杨椿拨二百一十余万城下三仓军粮四十余万石预借米本一百一十余万又别贮军粮百四十九万石料七万余而布帛丝绵铜铁钱与祠牒不预焉蜀钱引旧约两界五千余万半藏于官自军兴引皆散于民宣总三司增劬三界通行八千余万价日益落咸捐一千二百余万缙以收九三界之半又与丙议合茶马司之力再收九十一界续造九三界以兑之于是引价复昂余价顿减嘉陵江流忽浅或云金人截上流咸疏而导之自益昌至于鱼梁馈运无阻金州地险咸增馈米以实之人皆曰金州之险金人不可向何益之为咸曰敌至而虑无及矣未几金人攻上津守赖以固召为司农少卿卒丙列奏其功赐谥勤节初宣谕使吴玠尝表其节诏进二秩咸乞回赠所生父母焉

钦定续通志卷四百三

●钦定续通志卷四百四 列传二百四

列传

宋 【一百八】

○宋一百八

赵汝谈 赵汝说 赵希鎰 赵彦呐 赵善湘 赵与欢

赵必愿

赵汝谈

赵汝说

赵希鎰

赵彦呐

赵善湘

赵与欢

赵必愿

△赵汝谈

赵汝谈字履常生而颖悟年十五以大父恩补将仕郎登淳熙十一年进士第丞相周必大得其文异之曰他日有大名于世调汀州教授改广德军添差江西安抚司干办公事尝从朱熹订疑义十数条熹嗟异之佐丞相赵汝愚定大策汝愚欲骤以词掖处之力辞去持祖母服汝愚去国与其弟汝谠上疏【按下汝谠传云汝谠兄弟昌言非是且上言讼汝愚冤是疏汝谈与汝谠同上也今据增与字】乞留汝愚斩侂胄兄弟罹党祸斥去寻调安庆府教授添差浙东安抚司干办公事丁母忧免丧召为大社令以参知政事李璧荐召试馆职擢正字是时吴曦叛上下束手或请就以曦为王汝谈诘之曰孰欲王曦者可斩其人不能对遂以言去主管崇道观添差通判嘉兴府改知无为军与光州守柴中行安丰守陆峻俱称循吏时金人内变有旨令献料敌备边二策宋沿边诸郡权大削所言后皆有验改湖北提举常平赈饥尽力知温州改知外宗正迁江西提举常平盍宗崩以哀痛得疾贺理宗表力寓劝戒陈硕曰此谏书也数旬祠授江西转运判官辞不获命之官一月以言者罢先是汝谈因疾去官言者谓其傲睨轩冕不乐为世用至是弥远不与祠乃杜门著述端平初以礼部郎官召入对言倚用老成广集忠智访求众弊之原辟取可行之策又言大佞似忠大奸似圣改秘书少监兼权直学士院时集议出师汝谈言反复不可轻战而和尤非计既而三京收复虽前言用兵不便者亦喜汝谈独有忧色未几洛师败朝论始服其先见迁宗正少卿兼崇政殿说书因讲论语而言汉元帝恭俭无过惟以刚不克改明不能绎优柔不断汉业遂衰权吏部侍郎升侍读兼直学士院兼同修国史院同修撰以所注易进讲时朝议履亩称楮汝谈言非便连时宰意京师军变宰相乞贬秩帝已允汝谈奏恐失体持不可草答诏以为贬秩易审举措难宰相滋不悦以言去国提举崇禧观起知婺州召赴行在权礼部侍郎兼学士院力辞兼直时金兵新破三阕增秩称提官楮四郡获赏汝谈独蹙额登对首疏言边面无可倚仗乞简拔俊杰如吴用周瑜鲁肃晋任祖逖陶侃故事使之各分方面推毂授权巴蜀一人荆襄一人两淮各一人一切便宜行事不复更从中御庶几伸缩由己机用出心盖推广乡者备边之策且曰臣之此策行于开禧未用兵之前决不至罹今日之患其论楮法尤中时弊权给事中权刑部尚书及卒转两官遗表上又转四官汝谈天资绝人沈思高识自少至老无一日去书册其论易以为为占者作书尧舜二典宜合为一禹功只施

于河洛洪范非箕子之作诗不以小序为信礼记杂出诸生之手周礼直傅会女主之书要亦卓绝特立之见为文章有天巧笃于伦谊而忘仇怨尝议论韩非李斯皆有荀卿之才惟其富贵利欲之心重故世得而贱之惟卿独能守其身不苟希合士何可不自重哉

△赵汝说

赵汝说字蹈中少倜傥有轶材智略出人上龙泉叶适尝过其家劝之学汝说折节读书与兄汝谈齐名天下称为二赵以祖遗恩补承务郎历泉州市舶务利州大军仓属从臣荐宗室之贤者监行在右藏西库韩侂胄谋逐赵汝愚汝说兄弟昌言非是且上言讼汝愚冤侂胄惧其词直使其党胡纆再攻汝愚以汝说兄弟受汝愚厚恩私属为之画策斥使去国坐废十年调华亭补东盐场弃职去辟浙西安抚司幕官调签书昭庆军节度判官皆不赴以前官改镇东军登嘉定元年进士第为大社令迁将作监簿大理司农丞与史弥远不合请外改湖南提举常平易江西寻提点刑狱瑞州犬姓幸氏贪徐氏田不可得强取其禾终不与诬以杀婢寘徐狱徐诉其冤汝说以反坐法黥窜幸氏籍其家幸氏走告急于中宫徙汝说湖南既至则表直臣龚夬墓浏阳有豪民罗氏夺民田汝说复惩以法迁知温州【按危稹传稹知漳州有经总制无名钱岁五千缗厉民为甚前守赵汝说奏蠲五之二此事本传不载是汝说又曾知漳州矣】卒汝说常言宗子不忘君孝子不辱身临难则功业当如朱虚立身当如子政

△赵希鋗

赵希鋗字君锡旧名希喆登庆元二年进士第改赐今名少扶父丧归道遇寇左右骇散希鋗拊棺恸哭不慑寇义而去学于陈傅良徐谊既举进士调汀州司户峒寇李元砺方起汀人震惧郡会僚佐议守城希鋗下坐无一语守异之日不言得无有所见乎希鋗曰守城非策也距城三十里有关曰古城若悉精锐以扼其冲贼不足虑矣守以付希鋗希鋗至关审形明闲申令谨候分画粗定贼已遣谍窥关希鋗得谍诘之纵其举火相示而羸师以误之夜半贼数百衔枚突至希鋗严兵以待则且至始命矢石俱下贼无一免余党闻风而遁事闻诏升州推官治疑狱决滞讼摄下邑弭乱卒调主管夔州路转运司帐司疏大窰盐井利病使者上诸朝民便之改知玉山县未行召对首言民力困于贪吏军力困于债帅国家之力则外困于归附之卒内困于浮冗之费次论四蜀铨科举之弊次论大窰盐井本末窰宗嘉纳之授大理寺丞迁大宗正丞权工部郎官会朝议燕邸近属赴朝参者少命希鋗易班希鋗力辞弗克特换授吉州刺

史提举佑神观未几廷臣言宗姓换班人尝举进士请
视朝士听轮对于是希館次对时首论今日多事之际未有办事之人朝绅以缄默为清
重以刻薄为举职以无所可否为识体阉寄以大言为
有志以使过为知恩臣非敢厚诬天下为无人患在选择未得其道器使未当其才尔授
成州团练使进和州防御使理宗即位进潭州观察使
以公族近邸恩特加厚又进安德军承宣使引对言初政急务莫先于明道总治统收人
心帝为动容越明年论祠祭不蠲禁卫不肃慈明宫上
寿升节度封信安郡公卒希館风资凝重胷抱魁磊扬人之善不记人之过急人之难不
忘人之恩居官祁寒盛暑未尝谒告衣食取裁足而已
追封信安郡王

△赵彦呐

赵彦呐字敏若居彭州 【按宋史本传作彭州人彦呐系宗室不得云彭州人今改】
登四川类试第少以材称吴曦叛以禄禧伪守夔
彦呐结义上杀之遂显名嘉定十二年关外西和州新被兵制使安丙檄使经理金人再
至战却之因请修州北水关募民耕战以守又劝丙尽
捐关外四州租结民兵使各自为守皆不行在州五年得军民心转提点刑狱寻帅沔时
誉甚都及崔与之代丙始察其大言无实谓他日误事
者必此人请庙堂毋付以边藩寻夺其节制宝庆元年乃移帅兴元三年会郑损弃四州
退保三关彦呐力争不胜罢归家者五年绍定四年桂
如渊代损起彦呐于副使更李■〈直上土下〉黄伯固皆彦呐副之端平元年遂升正
使丞相郑清之趣其出兵以应入洛之役不从秦巩之
豪汪世显久求内附至是彦呐为力请数四清之亦讫不从三年金人大入至三泉彦呐
大败贬衡州其子洸夫用事亦窜岭南史嵩之留之江
陵两年卒

△赵善湘

赵善湘字清臣濮安懿王五世孙父武翼郎不陋从高宗渡江闻明州多名儒徙居
焉善湘以恩补保义郎累转忠训郎庆元二年举进士
以近属转秉义郎换承事郎调金坛县丞五年知余姚县开禧元年添差通判婺州嘉定
元年以招茶寇功赴都堂审察提辖文思院出判无为
军十三年历迁进直宝文阁以平固始寇功赐金带许令服系十七年拜大理少卿进右
文殿修撰知镇江府封祥符县男赐食邑宝庆二年进
封子加食邑绍定元年以扞防江军盗淮军及平楚州畔寇刘庆福等功皆升其官三年
进焕章阁直学士仍任进封伯加食邑以李全犯淮东
进焕文阁学士江淮制置使乃命专讨许便宜从事四年进封侯加食邑及戮全善湘遣

使以露布上乃进兵部尚书仍兼任以平闽寇功转江
淮安抚制置使五年复泰州淮安州盐城淮阴县四城及策应京湖功进端明殿学士与
执政恩例仍任升留守加食邑以受金枢密副使纳哈
塔迈珠降复盱眙军泗寿二州功进资政殿学士加食邑遣使赐手诏金器等物九疏勾
归皆不许请愈力进大学士提举洞霄宫封天水郡公
加食邑监察御史劾奏善湘御笔以善湘有讨逆复城之功寝其奏嘉熙二年授沿海制
置使兼知庆元府即勾祠改知绍兴府兼浙东安抚使
三年两请休致四乞归田复提举洞霄宫淳佑二年帝手诏求所解春秋进观文殿学士
守本官致仕卒赠少师赠增加等

△赵与欢

赵与欢字悦道燕懿王八世孙嘉定七年进士调会稽尉改建宁司户参军中明法
科摄浦城县迁大理评事转对言天变民情国威三事
又言死囚以取会驳勘动涉岁时类瘐死而干证者多毙逆旅宜精择宪臣悉使详覆果
可疑则亲往鞫正必情法轻重可闵始许审奏迁籍田
令厯迁宗正丞兼权都官郎官改仓部权度支以直宝章阁知安吉州郡计仰榷醋禁网
峻密与欢首捐以予民设铜钲县门欲愬者击之冤无
不直丧母朝廷屡起之不可议使守边授淮西提点刑狱弗能夺再期以刑部郎官召乞
终禫奏祠复半载乃趋朝自恢复退师又议纳使与欢
言在朝迎合政出多门必得智识气节之士布列中外兼权检正迁宗正少卿兼权户部
侍郎寻兼知临安府浙西安抚使同详定剖决明畅罪
者咸服郊祀之夕大风雷与欢言国本未定又陈弭盗固本之策有以刑罚术数言于帝
者与欢言导民有本人心本善有感必从或谓厉以威
待以术者非知本之论且言朝令夕改非以示作新旁蹊曲径非以肃纪纲帝为悚然明
年改元嘉熙襄蜀残破或望风弃地召见便殿言韩琦
当仁宗朝犹昼夜泣血今主忧臣辱矣因具言防边之道其后多见施行与欢招刺三千
人为忠毅军又言禁卫虚籍及京口诸郡悉宜募兵统
以郡将财先贍军余始上供乞省不急之费荐文武士四十人迁户部侍郎兼权兵部尚
书论边事至为深切星变上章请罢大火力言灾变之
烈谓臣罪擢发莫数犹欲以去国为言少悟上听愿祇畏天威思以实德及民始自上躬
痛加节约广推振恤五请窜于是中书方大琮言与欢
素自洁修疏财轻爵人所共知不幸遇此观其待罪之章恳切至到未尝不叹其知义也
乞俞所请使小大之臣皆知引咎乃收一阶寻复之与
欢请先叙复同降官属又言艰难不可为之时当慷慨厉志深为人才兵力思迁户部尚
书兼权吏部累勾祠不许论楮币自嘉定以一易二失

信天下尝出内币收换屡称提而拆阅益甚尝请两界并展十年勿议造新贵州县毋以
损污抑沮至是遂请不立界限以绝其疑所以区画者
甚备其后诏宰相徧询侍从与欢又以前说陈之有欲以端平钱当五行使与欢谓开禧
尝以二当三何救于楮且曰士大夫不清白奉法恪意
扶持虽日易一法无掇于楮而国非其国矣每言端平以来窜赃吏禁包苴戒奔竞戢横
敛而风俗沈痼自若疏乞别邪正警偷惰奖用恬退质
直之士以绝躁竞浮靡之习内廷有关于除授者必斥暗室有涉于谤议者必思又言军
政弛而尺籍不明总兵者或缘功赏开嫌隙内则班行
维求速化守牧类多贪庸楮币日非浮冗不节指陈无虚日大风震雷数见因具陈边事
且言人才国用民力兵威愿乘此机加意根本迁吏部
尚书力求归田会潮汐啮堤执政道帝意留治之授端明殿学士知临安府浙西安抚使
江堤竣事狱空力勾罢依旧端明殿学士提举万寿观
出关遣使趣还会饥民相携溺死帝仍付临安府事恩例视执政与欢涕泣奉诏上则祈
哀公朝下则推诚劝分甘雨随至米商来集流移至者
有以济之力求纳禄授资政殿学士提举万寿观与欢三为府尹尽力民事都人称赵端
明必以手加额曰赵佛子也久之以旧职知温州政事
必亲吏不敢欺刼水砮修贡院以待读召辞不许入对言爵禄之滥因及国本事五旬归
又不许升大学士荐士六十人史嵩之将复入相人言
不已帝以问与欢言嵩之老师费财私昵贪富过立名誉必不宜复用时嵩之犹子璟卿
诵言其过忽毙而杜范刘汉弼徐元杰三贤暴死人皆
疑嵩之致毒与欢请优恤汉弼元杰家帝从之又请以兵财分任辅臣在讲筵官以坏证
付庸医仅支残息徒运巧心天下事尚堪再误耶时相
忌之寻授安德军节度使开府仪同三司万寿观使日食应诏言事益切建储未定乃申
言之又言人才乏使赃吏不悛民昔流而南今流而北
盗昔伏于远今伏于近体认不真贤否无别国将谁与立邪愿富一代之储使小人无闲
可投以绝隐伏之祸帝为改容袁士宋斌少从黄干李
燔登朱熹之门学禁方严羁旅困沮年且八十与欢延之事以父行奏乞用旌礼布衣故
事死葬西湖上岁一祭焉帝逐二谏臣与欢力争之五
乞免朝请三乞致仕俱不允赐泰卦诗忠邪辨自是国事皆缕缕言之有不胜书盖其忠
君忧国本诸天性拜少傅卒遗表犹不忘规正赙赠有
加诏有司治葬赠少师追封奉化郡王谥清敏累赠太师与欢尝谓士大夫有贪声则虽
奇才奥学徒以蠹国害民尔故敛之夕而金带犹质钱
民家云

△赵必愿

赵必愿字立夫广西经略安抚崇宪之子也以大父汝愚遗表补承务郎开禧元年铨监平江府粮料院调常熟丞嘉定七年举进士知崇安县剖判如流吏不能困修学政立催科法列户名为三等以三期为约足者旌之未足者宽以趣之踰期不纳者里胥程督之民皆感悻愿输革胥吏鬻盐之弊擅发光化社仓活饥民帅怒逮吏欲惩之必愿曰刍牧职也吏何罪束担俟遣帅无以诘而止旧有均惠仓无所储必愿捐缗钱增余至二千石力主义役之法乡选善士任以推排入资买田助役则免有产之家有感化者出己田以倡遂遍行一邑上下便之台府以闻下其式八郡四十八县秩满授湖广总所干办公事丁父忧贻书问学于黄干服除差充两浙运司主管文字再考特差充提领安边所主管文字差知全州陞辞奏乞下道江二州访周敦颐之后知常州改知处州陈折帛纳银之害皆得请移泉州罢白土课及免差吏榷铁讽诸邑行义役秋旱力讲行荒政乞拨永储广储二仓米赈救差主管官告院越五日诏依旧差兼知台州一循大父之政政教兼举端平元年以直秘阁知婺州至郡免催绍定六年分小户绫罗钱三万缗有奇立淳良顽慢二籍勤愆人户措置广惠仓及诸仓积谷奏乞宽减内帑绫罗申省免用旧例预解诸色窠名钱罢开化税场迁大府寺丞寻迁度支郎中诏以汝愚配享宁宗从必愿请也兼右司郎中引见疏言陛下英明密运断出于独固欲一切转移之然朝廷除授军国赏罚本至公也今有姓名未达于庙堂而迁擢忽由于中出斥逐三衙竟不指名罪状陛下虽有去弊之心而动涉可疑之迹陛下亦何乐此时论伟之三京兵败边事甚亟诏条上守御计必愿言十事下哀痛之诏合江淮之兵掇江陵之急节财用之宜縻议和之使抚无归之民处北来之众置镇抚之使择帅阃之代拔未用之将皆切于边要政府议楮币日轻欲令诸州再用印及他为称提之法【按建炎以来朝野杂记载称提钱者绍兴十四年郑仲亨为四川宣抚副使始命益梓利三路茶盐酒课及租佃官田应输钱引者每千别输三十钱为铸本于是三路每岁共得钱四十三万一千六百九十道二百九十一文以其二十四万七千缗为铸本又得其赢十八万缗有奇以助军食之用至今不减】必愿力争不可嘉熙元年贻书政府论边防事宜授右司郎中火灾必愿应诏上封事又论济王及国本事迁左司郎中又迁司农少卿兼左司转对言正气日消月沮毋令人臣以指斥怀疑毋致陛下以厌言得谤时直士相继去故必愿及之兼敕令所删修官拜司农卿兼职如故累迁宗正少卿诏依旧太府卿仍兼职且兼中书门下检正诸房公事转对言今日之事动无良策惟在侧身修

行祈天永命而已迁起居舍人兼职仍旧大水上封事谓宜合众谋屈羣策上而搢绅下而刍蕘各陈所见择其可用之策以授任事之臣庶几千虑一得暂兼权右郎官言财不可轻施妄用长此不已必至颠覆权吏部右侍郎兼国史修撰时边事急必愿应诏言宜敕彭大雅自重庆领王青之兵东下以复夔责李安民及归峡二守以自效调一将督中流之师以伐其顺流之谋调一将自闲道出鼎澧之后以折其捣虚之锋调一将助芮兴之势以备江陵之急又宜下湖南遣飞军及团结民兵之类守沅江益阳江以防冲突长沙尽收江上民船无资敌用区画皆中事机迁户部侍郎权户部尚书疏言端平元年洛师轻出连年丧失郡县去冬安丰危而复安特天幸尔君臣动色太平自贺雷作于雪宴之先期蜀警于大宴之盼命戒心一弛赫鉴已随之矣又乞谕太府丞核户部收支数目庶见多寡盈虚之实有余则储之以待朝廷之取拨阙则助之以示宫府之一体二疏连丞相史嵩之乞免官乞祠皆不许以司谏郑起潜论列以宝谟阁直学士奉祠辞职名不许淳佑五年以华文阁直学士知福州福建安抚使三辞不许闽人闻必愿至欣然叹羨必愿平易近民忠信厚俗惻怛勤政行乡饮酒旌退士奖高年裁僧寺实封之数尤留意武事甫入境即以军礼见戎帅申明左翼军节制事宜措置海道修水教士卒知劝居官四年累乞归及命召又三辞皆不许卒遗表上赠银青光禄大夫必愿才周器博心平量广而又蚤闻家庭忠孝之训师友正大之言故所立卓然可称云

钦定续通志卷四百四

●钦定续通志卷四百五 列传二百五

列传

宋 【一百九】

○宋一百九

史弥远 郑清之 史嵩之 董槐 叶梦鼎 马廷鸾

史弥远

郑清之

史嵩之

董槐

叶梦鼎

马廷鸾

△史弥远

史弥远字同叔浩之子也淳熙六年补承事郎八年转宣义郎铨试第一调建康府

粮料院改沿海制置司干办公事十四年举进士绍兴
元年授大理司直二年迁太社令三年迁太常寺主簿庆元二年复为大理司直寻改诸
王宫大小学教授轮对乞旌廉洁之士推举荐之赏浚
沟洫固堤防实仓廩均赋役课农桑禁末作为水旱之备葺城郭修器械选将帅练士卒
储粟谷明烽燧为边鄙之防丞相京镗屏左右曰君他
曰功名事业过镗远甚愿以子孙为托四年授枢密院编修官迁太常丞寻兼工部郎官
改刑部历迁起居郎开禧二年兼资善堂直讲韩侂胄
建开边之议以坚宠固位已而边兵大衄诏在位者言事弥远奏方具客曰侂胄必以奏
议占人情太夫人年高能无貽亲忧乎弥远曰时事如
此言入而益于国利于人吾得罪甘心焉封鄞县男兼权刑部侍郎三年改礼部兼同修
国史实录院同修撰仍兼刑部兵端既开败衄相属累
使求和金人不听都城震摇宫闱疑惧常若祸在朝暮然皆畏侂胄莫敢言弥远力陈危
迫之势皇子询闻之亟具奏乃罢侂胄并陈自强右丞
相既而台谏给舍交章论驳侂胄乃就诛 【按四朝闻见录载开禧三年十一月三日圣
旨韩侂胄久任国柄粗罄勤劳使南北生灵枉罹凶
害以致敌人专以首谋为言不令退避无以继好息民可罢平章军国事与宫观陈自强
专务阿谀不恤国务可罢右丞相日下出国门前一日
慈明出御批三其一以授钱象祖卫泾史弥远其一以授张镃又其一以授李孝纯二批
俱未发独象祖亟授殿岩夏震震初闻欲诛侂胄有难
色及视御批则曰君命也震当知死翼日震遂遣其帐下郑发王斌邀韩车于六部桥径
出玉津园夹墙用铁鞭中侂胄阴乃死臣寮雷孝友上
言十一月五日三省同奉圣旨依韩侂胄责授知州团练使送郴州安置陈自强追三官
送永州居住又臣寮上言十一月六日三省枢密院同
奉圣旨并依韩侂胄送英德府安置陈自强责武秦军节度副使依旧永州居住又臣寮
上言十一月六日三省同奉圣旨韩侂胄除名送吉阳
军安置陈自强改送韶州安置余依四朝闻见录又载侂胄死于玉津已三日寤皇犹未
悟其误国也史弥远阴僉书讽台谏给舍为此当时之
议以为既曰以御批付夏震诛之矣自当显言之殊未知寤皇动法祖宗每对左右以为
台谏者公论之自出心常畏之侂胄欲尽攻道学故探
上意嗾台谏以一网去之史盖因其卫而用之天下未为非者以侂胄之所以施于善类
者而反之云尔又按建炎以来朝野杂记载礼部史侍
郎弥远时兼资善堂翊善乃建去凶之策其议甚秘人无知者久之得密指乃以告钱参
政象祖李参政壁至是皇子荣王入奏遂有此旨仍命
殿前司中军统制权主管本司公事夏震选兵三百防护侂胄别选兵二百守其府门钱

参政欲奏留史侍郎夜往其府趣之李参政亦言恐事
留或泄乃已三日乙亥侂胄入朝至太庙夏震呵止之其从者诸散护圣安军准备将夏
挺以帐下亲遂二十四人拥侂胄以出中军政将郑发
王斌引所部三百执弓枪刀斧护送至玉津园侧殛杀之据两书所载侂胄就诛非因台
谏给舍交章论驳也然两书所载亦微有异处附识】
召弥远对延和殿帝欲命为签书枢密院事力辞乃迁礼部尚书 【伏读通鉴辑览
御批侂胄罪恶贯盈伏诛已晚然自当明正刑章乃
寔宗优柔寡断谋及后兄引用弥远诸人施为诡秘以锄奸之举几如盗杀死越三日仍
犹豫不信及审察得实始暴其罪于中外昏弱亦已甚
矣况除一恶臣亦何功之可论而弥远等遽因此进秩尤为滥赏纪纲不振若此毋怪一
奸去而一奸复来也】 兼国史实录院修撰询立为太
子兼詹事遣使诣金求和金人以太散隔牙二关濠州来归疏奏今两淮襄汉沿边之地
疮痍未瘳军实未充当勉厉将帅简阅士卒缮城堡葺
器械储糗粮当聘使既通之后常如干戈未定之日推择帅守以壮藩屏奖拔智勇以备
缓急拜同知枢密院事兼太子宾客进封伯嘉定元年
迁知枢密院事进奉化郡侯兼参知政事拜右丞相兼枢密使兼太子少傅进开国公丁
母忧归治葬太子请赐第行在令就第持服以便咨访
二年以使者趣行急乃就道起复右丞相兼枢密使兼太子少师四年落起复雪赵汝愚
之冤乞褒赠赐谥厘正诬史一时伪学党人朱熹彭龟
年杨万里吕祖俭虽已歿或褒赐易名或录用其后召还正人故老于外十四年赐家庙
祭器寔宗崩拥立理宗于是拜太师依前右丞相兼枢
密使进封魏国公六辞不拜因乞解机政归田里亟出关帝从之宝庆二年拜少师劝上
倾心顺令以事太后力学修德以答皇天眷佑以副四
海归戴绍定元年上太后尊号拜太傅八辞不拜得疾累疏乞归不许都城灾五疏乞罢
斥乃降封奉化郡公五年复爵六年将拜太师三具奏
辞乞免出命不许乃拜太师依前右丞相兼枢密使鲁国公又三具奏辞绍定五年上疏
乞谢事拜太傅未几拜太师左丞相兼枢密使上疏乞
解机政依前太师特授保宁昭信军节度使充醴泉观使进封会稽郡王卒遗表闻特赠
中书令追封卫王谥忠献遣使祭奠丧还遣礼官致路
祭于都门外赐纛佩玉黜纁初诛李全复淮安克盱眙第功行赏诸将皆望不次拔擢或
言于弥远弥远曰御将之道譬如养鹰饥则依人饱则
扬去曹彬下江南太祖未肯以使相与之况今边戍未撤警报时闻若诸将一一遂其所
求志得意满猝有缓急孰肯效死赵善湘以从官开阃
指授之功居多日夜望执政弥远曰天族于国有嫌高宗有诏止许任从官不许为执政

绍熙末庆元初因汝愚彦逾有定策功是以权宜行之
某与善湘姻家则又岂敢弥远亲密友周铸兄弥茂甥夏周篆皆寄以腹心人皆谓三人
者必显贵然铸老于布衣弥茂以执政恩入流周篆以
捧香恩补官俱止训武郎而已初弥远既诛韩侂胄相熈宗十有七年迨熈宗崩废济王
非熈宗意立理宗又独相九年擅权用事专任儉壬理
宗德其立己之功不思社稷大计虽台谏言其奸恶弗恤也弥远死宠渥犹优其子孙厥
后为制碑铭以公忠翊运定策元勋题其首济王不得
其死识者羣起而论之而弥远反用李知孝梁成大等以为鹰犬于是一时之君子贬窜
斥逐不遗余力云

△郑清之

郑清之字德源庆元之鄞人初名燮字文叔少从楼昉学嘉泰元年入太学十年登
进士第调陕州教授帅赵方严重靳许可清之往白事
命其子范葵出拜方掖清之无答拜且曰他日愿以二子相累湖北茶商羣聚暴横清之
白总领何炳曰此辈精悍宜籍为兵缓急可用炳亟召
募之号茶商军后多赖其用调湖广总所准备差遣国子监书库官十六年迁国子学录
丞相史弥远与清之谋废济国公事见皇子竑传俄以
清之兼魏惠宪王府教授迁宗学谕迁太学博士皆仍兼教授熈宗崩丞相入定策诏旨
皆清之所定理宗即帝位授诸王宫大小学教授迁宗
学博士宗正寺丞兼权工部郎兼崇政殿说书帝问外人因合子库进丝履有谤议清之
言禁中服用颇事新洁者帝曰故事月进鞦数两朕非
敝不易何由致谤清之奏孝宗继高宗故俭德易章陛下继熈考故俭德难着熈考自奉
如寒士衣领重澣革舄屡补今欲俭德着闻须过于熈
考方可帝嘉纳宝庆元年迁起居郎二年进给事中绍定元年迁翰林学士知制诰兼侍
读升兼修国史实录院修撰端明殿学士签书枢密院
事三年授参知政事兼签书枢密院事四年兼同知枢密院事六年弥远卒命清之为右
丞相兼枢密使端平元年帝既亲总庶政赫然独断而
清之亦慨然以天下为己任【伏读通鉴辑览 御批理宗受制权奸九年直待弥远
死后始亲政事前此之阙失既多即欲励精求治亦
复何及且郑清之因党附弥远而进其品谊已槩可知安望其有所树立乃腆然以天下
为任君若臣其将谁欺其亦无耻之甚矣】 召还真德
秀魏了翁崔与之季■〈直上土下〉徐侨赵汝谈尤焞游似洪咨夔王遂李宗勉杜范
徐清叟袁甫李韶时号小元佑大者相继为宰辅惟与
之终始辞不至遗逸如刘宰赵蕃皆见旌异是时金虽亡而入洛之师大溃二年上疏乞
罢不可拜特进左丞相兼枢密使三年八月霖雨大风

四疏勾去九月裡祀雷变请益力乃授观文殿大学士醴泉观使兼侍读四疏控辞依旧
大学士提举洞霄宫嘉熙二年封申国公淳佑四年依
前观文殿大学士醴泉观使兼侍读屡辞不允拜少保观文殿大学士醴泉观使兼侍读
进封卫国公五年正月上寿毕疏勾归不允拜少傅依
前观文殿大学士醴泉观使兼侍读进封越国公居无何丧其子士昌决意东还又不许
拜少师奉国军节度使依前醴泉观使兼侍读越国公
进读仁皇训典谓仁祖之仁厚发为英明故能修明纪纲而无宽弛不振之患孝宗之英
明本于仁厚故能涵养士气而无矫励峭刻之习盖仁
厚英明二者相须此仁祖孝宗所以为盛也帝褒谕之六年拜太保力辞故事许回授子
孙清之请追封高祖洽帝从之盖异恩也七年拜太傅
右丞相兼枢密使越国公中使及门清之方放浪湖山寓僧刹竟夕不归诘旦内引叩首
辞免帝勉谕有外间所不及知者甫退则中使接踵而
至帝以边事为忧诏赵葵以枢使视师陈韡以知枢密院事帅湖广二人方辞逊会清之
再相力主之于是战于泗水涡口木库皆以捷闻九年
拜太师左丞相兼枢密使辞太师不拜依前太傅每谓天下之财因于养兵兵费困于生
券思所以变通之遇调戍防边命枢属量远近以便其
道涂时缓急以次其遣发又议移岁调兵屯以戍淮面并军分头目以节廩稍先移镇江
策胜一军屯泗水公私便之诸路亏盐执其事者破家
以偿清之核其犯科者追理罢误者悉蠲之全活甚众沿江算舟之赋素重清之次第停
罢如池之雁汉有大法场之目其钱分隶诸司清之奏
罢其并缘渔取者盖数倍公家之入合分隶者从朝廷偿之执下清之方与客饮举杯曰
今日饮此酒殊快四上谢事之章十年进十龟元吉箴
一特敬二典学三崇俭四力行五能定六明善七谨微八察言九惜时十务实疏奏敬天
之怒易敬天之休难天怒可忧而天休可喜忧则惧心
生惧则怒可转而为休喜则玩心生玩则休或转而为怒帝大喜命史官书之十一年十
疏乞罢政皆不许拜太师力辞以太傅保宁军节度使
充醴泉观使进封齐国公致仕卒遗表闻特赠尚书令追封魏郡王赐谥忠定清之不好
立异汤巾尝论事侵清之及清之再相巾求去清之曰
已欲作君子使谁为小人力挽留之徐清叟尝论列清之乃引之共政赵葵视师年余乞
罢上未有以处之清之曰非使作相不足以酬劳陛下
岂以臣故耶臣必不因葵来遽引退臣愿为左使葵居右上讫从之然葵竟不果来清之
自与弥远议废济王竝立理宗駸駸至宰辅然端平之
间召用正人清之之力也至再相则年齿衰暮政归妻子而闲废之人或因缘以贿进为
世所少云

△史嵩之

史嵩之字子由弥远从弟弥忠之子嘉定十三年进士调光化军司户参军历通判襄阳府绍定元年以经理屯田襄阳积谷六十八万加其官权知枣阳军二年迁军器监丞兼权知枣阳军寻兼制置司参议官三年枣阳屯田成转两官以明堂恩封鄞县男赐食邑以直秘阁京西转运判官兼提举常平兼安抚制置司参议官四年迁大理少卿兼京西湖北制置副使五年加大理卿兼权刑部侍郎升制置使兼知襄阳府赐便宜指挥六年迁刑部侍郎仍旧职端平元年破蔡灭金献俘上露布降诏奖谕进封子加食邑移书庙堂乞经理三边不合旬祠归侍手诏勉留之会出师与淮阆协谋犄角嵩之力陈非计疏为六条上之诏令嵩之筹划粮饷嵩之奏言臣熟虑根本周思利害荆襄连年灾患极力赈救尚不聊生征调既繁夫岂堪命其势必至于主户弃业逃亡役夫中道窜逸无归之民聚而为盗饥馑之卒未战先溃若夫和好之与进取决不两立臣受任守边适当事会交至之冲雷同和附以致误国其罪当诛确守不移之愚上连丁盗之旨罪亦当诛连旨则止于一身误国则及天下丞相郑清之亦以书言勿为异同嵩之力求去朝陵之使未还而诸军数道并进复上疏乞黜罢权兵部尚书不拜乞祠进宝章阁直学士提举太平宫归养田里寻以华文阁直学士知隆兴府兼江西安抚使帝自师溃始悔不用嵩之言召见力辞权刑部尚书引见疏言结人心作士气核实理财等事且言今日之事当先自治不可专恃和议乞祠以前职知平江府母病乞侍医药不俟报可而归进宝章阁学士淮西制置使兼沿江制置副使兼知鄂州既内引赐便宜指运兼湖广总领兼淮西安抚使嘉熙元年进华文阁学士京西荆湖安抚制置使依旧沿海制置副使兼节制光黄蕲舒乞免兼总领从之庐州围解诏奖谕之以明堂恩进封伯加食邑条奏江淮各三事又陈十难又言江陵非孟珙不可守乞勉谕之汉阳受攻嵩之帅师发江陵奏诛张可大窜卢普李士达以其弃城也二年黄州围解降诏奖谕拜端明殿学士职任依旧恩数视执政进封奉化郡侯加食邑诏入覲拜参知政事督视京西荆湖南北江西路军马鄂州置司兼督视淮南西路军马兼督视光蕲黄夔施州军马加食邑城黄州复光州滁州三年授宣奉大夫右丞相兼枢密都督两淮四川荆西湖北军马进封公加食邑兼督江西湖南军马改都督江淮京湖四川军马荐士三十有二人其后董槐吴潜皆号贤相【按嵩之为相一时正人如杜范游 刘应起李韶赵汝腾等皆以不合逐去史但称其荐士而不言其斥去正人未免失实】复信阳以督府米拯淮民之饥复襄阳

嵩之言襄阳虽复未易守自是边境多以捷闻降诏奖
谕四年乞祠趣召奏事转三官依前右丞相兼枢密使眷顾特隆赐赉无虚日久早乞解
机政地震屡疏乞罢免皆不许淳佑元年进玉斧箴安
南入贡不用正朔嵩之议用范仲淹郗西夏书例以不敢闻于朝还之二年进高孝光
帝纪孝宗经武要略宁宗实录日厯会要玉牒进金紫
光禄大夫加食邑是冬封永国公加食邑四年遭父丧起复右丞相兼枢密使累赐手诏
遣中使趣行于是太学生黄恺伯等武学生翁日善等
京学生刘时举等宗学生与寰等凡三百余人及建昌军学教授卢钺皆上书论嵩之
不当起复不报将作监徐元杰奏对及刘镇上封事帝意
颇悟初嵩之从子璟卿尝以书谏曰伯父比所行寢不克终用人之法不待举刺而改官
者有之谴责未几而旋蒙叙理者有之丁难未几而遽
被起复者有之不知斯人者果能运筹帷幄驰身鞍马而得之乎抑亦献赂幕宾效鬻奴
仆而得之乎徒闻苞苴公行政出多门便嬖私昵狼狽
万状祖宗格法坏于今日也自开督府东南民力困于供需州县仓卒匱于应办犍金帛
挽刍粟络绎道路不知所干何事所成何功近闻蜀川
不守议者多归退师于鄂之失尽损藩篱深入堂奥伯父谋身自固之计则安其如天下
苍生何万一不畏强御之士绳以春秋之法声其讨贼
不效之咎当此之时虽优游菽水之养其可得乎异曰国史载之不得齿于赵普开国勋
臣之列而乃厕于蔡京误国乱臣之后遗臭万年果何
面目见我祖于地下为今之计莫若尽去在幕之羣小悉召在野之君子相与改弦易辙
戮力王事庶几失之东隅收之桑榆如其视失而不知
救视非而不知革天下大势駸駸曰趋于危亡之域矣居无何璟卿暴卒相传嵩之致毒
云嵩之为公论所不容居闲十有三年宝佑四年春授
观文殿大学士加食邑八月卒遗表上赠少师安德军节度使进封鲁国公谥忠简以家
讳改谥庄肃德佑初以右正言徐直方言夺谥

△董槐

董槐字廷植濠州定远人少喜言兵阴读孙武曹操之书曰使吾得用将泛扫中土
以还天子槐貌甚伟广颡丰颐又美髯论事慷慨自方
诸葛亮周瑜父永遇槐严闻其自方怒而嘻曰不力学又自喜大言此狂生耳吾弗愿也
槐心愧乃益自摧折学于永嘉叶师雍闻辅广者朱熹
之门人复往从广广叹其善学嘉定六年登进士第调靖安主簿丁父忧起为广德军录
事参军民有诬富人李楠私铸兵结豪杰以应李全者
郡捕系之狱槐察其枉以白守守不听守以忧去槐摄通判州事卒脱楠狱绍定二年迁
镇江观察推官明年入为主管刑部架阁文字迁籍田

令特差权通判镇江府会全判涉淮临大江槐即曰将兵济江而西全遁去嘉熙元年迁宗正寺簿出知常州提点湖北刑狱常德军乱夜纵火而噪槐骑从数人于火所问乱故乱者曰将军马彦直夺吾岁请吾属将责之偿不为乱也槐坐马上召彦直斩马前乱者还入伍中明曰乃戮首乱者七人而贖彦直之家差充归峡岳察访使二年兼权知常德府寻兼军器少监依旧提点刑狱三年以直宝谟阁知江州东都督府参谋流民渡江而来归者十余万议者皆谓方军兴郡国急储粟不暇食民也槐曰民吾民也发吾粟振之胡不可当是时宋与金为邻国而襄汉扬楚之闲豪杰皆自相结以保其族无赖者往往去为羣盗浮光人翟全寓黄陂有众三千余稍出掳掠槐命客说下全徙之阳乌洲使杂耕薪春闲又享赐之用为裨将于是曹聪刘清之属皆来自归四年进直华文阁知潭州主管湖南安抚司公事方三边急于守御督抚日夜征发民且因槐为画策应之令民不伤而军须亦不匮淳佑二年迁左司郎官进直龙图阁沿江制置副使兼知江州主管江西安抚司公事视其赋则吏侵甚下教曰吾莅州而吏犹为盗不自悔吾且诛之吏乃震恐愿自新槐因除民患害凡利有宜弛以利民惟恐不尽弛大计军实常若敌至裨将卢渊凶猾不受命斩以徇军中肃然累进集英殿修撰沿江制置副使江东安抚使兼知建康府兼行宫留守军政弛弗治乃为赏三等以教尉春秋教肄士卒坐作进退击刺之技岁余尽为精兵六年召至阙辞出知静江府兼广西经略安抚使又辞权广西运判兼提点刑狱即日就道至邕州上守御七策邕州之地西通诸蛮夷南引交址及符奴月乌流麟之属数寇边槐与约无相侵推赤心遇之皆伏不动又与交址约五事一无犯边二归我侵地三还掳掠生口四奉正朔正通贸易于是遣使来献方物大象南方悉定七年进宝章阁待制八年迁工部侍郎职事依旧兼转运使九年召赴阙封定远县男迁兵部侍郎升给事中上疏请抑损戚里恩泽以慰天下士大夫羣臣奏事少与法违惮槐不敢上进封子拜端明殿学士签书枢密院事进封侯十二年为同知枢密院事宝佑元人权参知政事二年进参知政事四川制置使余晦以战败夺官诏荆襄制置使李曾伯往视师曾伯辞槐曰事如此尚可坐而睨乎上疏请行顿重兵夔门以固荆蜀辅军之势诏报曰腹心之臣所与共理天下者也宜在朝廷不宜在四方复上疏曰天下之事不进则退人臣无敢为歧意者苟以臣为可任宜少听臣自效即臣不足与军旅之事愿上官爵不许进封濠梁郡公帝日乡用槐槐言事无所隐帝问余民粟积边对曰吴民困甚有司急余不复省民民惟邦本愿先垂意根本帝问修

太乙祠对曰土工洊起民罢于征发非所以事天也帝问边事对曰外有敌国计先自强
自强者人畏我我不畏人又言敌国在前宜拔财能用
之士大夫有过失为执法吏所刺劾终身摈弗用深为朝廷惜此苟非奸袞皆愿为昭洗
勿废其它善又遣谪之臣久堕遐方稍稍内徙令得生
还顾弗用可矣槐每奏帝辄称善三年拜右丞相兼枢密使槐自以为人主所振拔苟可
以利安国家无不为然务先大体任人先取故旧之在
疏远者在官者率满岁而迁嗜进者始不说矣又言臣为政而有害政者三戚里不奉法
执法大吏久于其官而擅威福皇城司不检士三者弗
去政且废愿除之于是嫉之者滋甚帝年浸高操柄独断羣臣无当意者渐喜狎佞人丁
大全善为佞窃弄威权帝弗觉悟大全已为侍御史遣
客私自结于槐槐曰吾闻人臣无私交吾惟事上不敢私结约大全度槐弗喜己衔甚乃
日夜刻求槐短槐入见极言大全袞佞不可近帝曰大
全未尝短卿勿疑 【伏读通鉴辑览 御批大全刻求槐短绝不一露端倪以静待槐
之举动而槐入告果极言其邪佞不觉已堕其术中
尚安望能听纳乎理宗未尝短卿卿勿疑之语论者止讥其曲事调停不知理宗亦为大
全所愚述而不悟意中固已轻董而重丁故于进言之
时不复能察其曲直一指之蔽不见泰山小人巧伪百出理宗乌足以语此】 槐曰臣与
大全何怨顾陛下拔臣至此臣知大全奸袞而噤不言
是负陛下也且陛下谓大全忠而臣以为奸不可与俱事陛下矣即上书乞骸骨不报四
年策免丞相以观文殿大学士提举洞霄宫时大全亦
论劾槐书未下自发省兵迫遣之于是太学诸生陈宜中等上书争之语见大全传五年
及景定元年俱用祀明堂恩加食邑进封吉国又进封
许国公三年卒遗表上赠太子少师谥文清

△叶梦鼎

叶梦鼎字镇之台之宁海人本陈待聘子后于母族少从直龙图阁郑霖宗正少卿
赵逢龙学以太学上舍试入优等两优释褐出身授信
州军事推官摄教事讲荒政迁太学录淳佑二年雷变上封事言召人才戒嫖近明年轮
对言君子直言军制楮币任官分阃六事召试馆授秘
书省正字四年升校书郎兼庄文府教授五年迁秘书郎转对言定国本求哲辅专阃帅
奖用介直雷变上言援唐康澄五可畏之说迁著作佐
郎六年拜军器少监兼兵部郎官转对言国计边事国体三事又言外有窥边之大敌内
有伺隙之巨奸奇袞蛊媚于宫闈熏腐依凭于城社强
藩悍将牙蘖易摇草窃奸宄肘腋阶变权知袁州转运司和余米三万斛梦鼎言袁山多
而田少朝廷免和余已百年自今开之百姓子孙受无

穷之害从之十一年本生母忧免丧拜司封员外郎论对言陛下惑于左右之谗说例视言者为好名近岁以来稍犯人主之所难者不显罢则阴黜不久外则投闲去者屡召而不还来者一鸣而辄斥兼玉牒检讨官以直秘阁提举江西常平兼知吉州节制悍将置社仓义仓平反李义山受赃之冤以国子司业召宝佑元年考试集英殿授崇政殿说书迁国子祭酒二年兼权礼部侍郎谏幸西太乙宫三年权礼部侍郎仍兼祭酒升兼同修国史实录院同修撰寻兼侍读五年以集英殿修撰差知赣州丁大全柄国欲挽梦鼎登朝卒辞谢之六年改知建宁府又改知隆兴府开庆元年复知建宁府作桥梁置驿舍建大安关决疑狱景定元年召为太子詹事迁吏部侍郎赐盩海县食邑二年权兵部尚书兼权吏部尚书三年迁兵部尚书兼修国史兼实录修撰迁吏部尚书拜端明殿学士同签书枢密院事同提举编修经武要略兼太子宾客进封盩海伯七年签书枢密院事主封临海郡侯以明堂恩进封临海郡公丞相贾似道欲造关子罢十七十八两界会子梦鼎以为厉民乃止罢十七界公田法行梦鼎又以为厉民故行之浙右而止五年进同知枢密院事权参知政事以彗星出梦鼎言政上下恐惧交修之日乞解机政不许奏免浙西经界理宗崩议太子即位太后垂帘听政梦鼎曰母后垂帘岂是美事进参知政事加食邑梦鼎力辞似道恳留之不可帝勉谕再三诏阖门封还奏疏理宗复土摄少傅竣事引疾归里累诏力辞授资政殿学士知庆元府沿海制置使肃清海寇罪止首恶羨余之费悉却不受建济民仓以备饥岁造驿舍以待宾旅咸淳三年再召为参知政事加食邑六辞不许诏著作佐郎卢钺与台州守项公采趣行拜特进右丞相兼枢密使累辞不许乃与似道分任利州转运使王价尝以言去官非其罪也及死其子懇求遗泽至是梦鼎明其无罪似道为恩不已出罢省部吏数人榜其姓名于朝梦鼎怒曰我断不为陈自强即求去似道之母让似道曰叶丞相安于家食未尝希进汝强与相印今乃牵制至此若不从吾言吾不食矣似道曰为官不得不如此会太学诸生亦上书言似道专权固位乃悔悟求解而梦鼎屡上章乞闲冬雷引咎求去愈力四年策杨妃宰相无拜礼吏赞拜梦鼎以笏挥之趋出明日乞还田里诏勉留之诏免诸州守臣上殿奏事梦鼎言祖宗谨重牧守之寄将赴官必令奏事盖欲察其人品及面谕以廉律己爱育百姓其至郡延见吏民具宣上意庶几求无负临遣之意今不远数千里而来咫尺天颜而不得见甚非立法本意又乞容受直言进少保五年引杜衍致仕单车宵遁故事累辞乃授观文殿学士判福州福建安抚大使进封信国公不拜充醴

泉观使又不拜七年再充醴泉使九年授少傅右丞相兼枢密使引疾立辞宰椽郎曹沓至趣行扶病至岷县请辞不获乞还山林疏奏愿上厉

精寡欲规当国者收人心固邦本励将帅飭州县重振恤扁舟径归 【伏读通鉴辑览

御批大臣进退当以礼自处非是则无以闲臣分

乃宋之士大夫习染相沿在位稍不得志往往不待报而行或遂遁去姑无论其人之贤否而乖君臣大体一节已不可问况梦鼎视国势倾危

竟尔怱然长往直是为避祸苟全之计更不止仅图自了矣】 使者以祸福告梦鼎语之曰廉耻事大死生事小万无可回之理似道大怒台臣

奏从归田之请诏仍少保观文殿大学士醴泉观使不请祠禄德佑初咨访故老梦鼎上封事曰敦教道训廉德厉臣节拯民瘼重士选劝吏廉

惩吏奸补军籍授判庆元府沿海制置大使力辞依前醴泉观使兼侍读不拜二年益王即位于闽召为少师太乙宫使航海遂行道梗不能进

南向恸哭失声而还后二年卒子应及大府寺丞知建德府军器少监驻戍军马应有朝请郎太社令

△马廷鸾

马廷鸾字翔仲饶州乐平人本灼之子继灼兄光后甘贫力学既冠里人聘为童子师遇有酒食饌则念母藜藿不给为之食不下咽登淳

佑七年进士第调池州教授以礼帅诸生宝佑三年迁太学录召试馆职时外戚谢堂厉文翁内侍卢允升董宋臣用事廷鸾试策言强君德重

相权收直臣防近习大与时连迁秘书省正字四年尤焞提举吏事辟为史馆校勘初丁大全令浮梁雅慕廷鸾弥欲钩致之廷鸾不为动试策

稍及大全及廷鸾当轮对大全私谓王持厘往矚焉廷鸾素厚持厘且同馆不虞其谋也密露大意持厘给曰君犹未改秩姑托疾为后图乎廷

鸾曰此微臣千一之遭其何敢不力持厘以告大全及复对殿门格不得见翼曰以监察御史朱熠劾罢宋臣遣索奏藁藁虽焚闻者寢广忌者

愈深而廷鸾之名重天下开庆元年吴潜入相召为校书郎景定元年兼沂靖惠王府教授时大全党多斥宋臣尚居中言路无肯言者廷鸾与

诸学官抗疏论之宋臣竟坐谪徙安吉州兼权枢密院编修官贾似道自江上还位望赫奕廷鸾未尝亲之迁枢密院编修官兼权仓部郎官二

年进著作佐郎兼右司迁将作少监廷鸾论贡举三事严乡里之举重台省之覆试访山林之遗逸又言荒政宜蠲除被灾州县租赋之不可得

者擢军器监兼左司兼太子右谕德升左谕德行国子司业兼翰林权直擢秘书少监升权直学士院四年擢起居舍人兼太子右庶子兼国史

院编修官实录院检讨官再召用宋臣廷鸾引何郯之说进极言宋臣不可用帝从之荐

士二十人进中书舍人程奎污秽诡秘不当补将仕郎
 王之渊为大全党不当通判江州朱熠不当知庆元府及为制置使林爽赵必■（亡昏）
 张称孙不当与郡皆缴还词头迁礼部侍郎度宗登
 极诏皆廷鸾所草兼侍读辞不许疏列孝宗之政以告升直学士院咸淳元年进端明殿
 学士签书枢密院事兼同提举编修经武要略三年同
 知枢密院事兼如旧人奏言培命脉植根本宗宽大行仁厚又言恢大度以优容虚圣心
 而延伫推内恕以假借忍难行而听纳则情无不达理
 无不尽奸人破胆直士吐气天下事尚可为也兼权参知政事五年进参知政事兼同知
 枢密院事进右丞相兼枢密使八年九疏乞罢政九年
 依旧观文殿大学士知绍兴府浙江安抚大使【按宋史宰辅表度宗咸淳八年十一月
 乙卯马廷鸾罢右相除观文殿学士知饶州已未免
 知饶州以观文殿学士鄱阳郡公提举洞霄宫九年十二月甲子除浙东安抚使知绍兴
 府】上疏辞免依旧职提举临安府洞霄宫廷鸾辞相
 位帝惻怛久之曰丞相勉为朕留廷鸾言臣死亡无日恐不得再见君父然国事方殷疆
 圉孔棘天下安危人主不知国家利害羣臣不知军前
 胜负列阍不知陛下与元老大臣惟怀永图臣死且瞑目顿首涕泣而退德佑初召不至
 自罢相归又十七年而卒子端临

钦定续通志卷四百五

●钦定续通志卷四百六 列传二百六

列传

宋【百十】

○宋百十

傅伯成	葛洪	曾三复	黄畴若	袁韶	危稹
程公许	罗必元	王遂			

傅伯成

葛洪

曾三复

黄畴若

袁韶

危稹

程公许

罗必元

王遂

△傅伯成

傅伯成字景初吏部员外郎察之孙少从朱熹学登隆兴元年进士第调连江尉试
中教官科授明州教授以年少嫌以师自居日与诸生
论质往复后多成才改知闽清县丁父艰服除知连江县东湖溉田二千余顷堤坏即下
流南港为石堤三百尺民蒙其利庆元初召为将作监
进太府寺丞言吕祖俭不当以上书贬又言于御史朱熹大儒不可以伪学目之又言朋
党之弊起于人主好恶之偏坐是不合出知漳州以律
己爱民为本推熹遗意而遵行之创惠民局以济民病革襍鬼之俗由郡南门至漳浦为
桥三十五治道千二百丈两为部使者迁工部侍郎时
权臣方开边语尚秘伯成言天下之势譬如乘舟中兴且八十年矣外望若坚致岁月既
久罅漏寢多苟安旦夕犹惧覆败乃欲徼幸图古人之
所难臣则未之知也相府灾同列相率唁丞相或以为偶然伯成正色谓天意如此官师
相规时也丞相色动遂陈三事一曰失民心二曰隳军
政三曰启边衅进右司郎官权幸有私谒者皆峻拒之出为湖广总领朝议欲纳金人之
叛降者伯成言不宜轻弃信誓乞戒将帅毋生事御史
中丞邓友龙遂劾伯成罢之嘉定元年召对面论前日失于战今日失之和使虽返要
求尚多陛下不获已悉从之使和议成犹可以纾一时
之急否则虚帑藏以资敌人驱降附以绝来者非计也今之策虽以和为主亦宜密为战
守之备权户部侍郎史弥远初拜相丐词有昆命元龟
之语闽帅倪思以为不当用御史劾罢思伯成因对及其事帝曰过当者再对曰思固过
当但恐摧抑太过遂塞言路乞明诏台谏侍从竭尽底
蕴无以思为戒李璧谪居抚州伯成言侂胄之诛璧与有功不酬进功乃追前罪他日负
罪之臣不容以功赎过矣伯成未为谏官也尝言弥远
谋诛侂胄事不遂则其家先破侂胄诛而弥远代之势也诸公要相协和共议国事若立
党相挤必有胜负非国之福又劝丞相钱象祖安危大
事以死争之差除小者何必乖异拜左谏议大夫抗疏十有三皆军国大义或致弥远意
欲使有所弹劾谓将引以共政谢之曰吾岂倾人以为
利哉疏乞诏大臣以公灭私左迁权吏部侍郎以集英殿修撰知建康府蔡元定谪死道
州归葬建阳乃雪其冤于朝进宝谟阁待制知镇江府
全活饥民瘞藏野殍不可胜数制置司欲移焦山防江军于图山石碑伯成谓虚此实彼
利害等耳包港在焦图之中不若两砦之兵迭戍焉圖
山砦兵素与海盜为地伯成廉知姓名会郡都试捕而鞫之无一逸去狱具请贷其死黥
隶诸军嘉定八年召赴阙病不能进除宝谟阁直学士
通奉大夫致仕理宗即位升直学士落致仕予祠进昭明天常扶持人极之说诏进一官
宝庆元年与杨简同召寻加宝文阁学士提举佑神观

奉朝请虽力以老病辞而爱君忧国之念不少衰闻大理评事胡梦昱坐论事贬蹙然语所亲曰向吕祖俭之谪吾为小臣犹尝抗论今蒙国恩叨窃至此而不言谁当言者遂抗疏曰臣恐陛下不复闻天下事矣方今内无良吏田里怨咨外无明将边陲危急而廉耻道丧风俗益偷贿赂流行公私俱困谓宜君臣上下忧边恤民以弭祸乱奈何今日某人言某事未几而斥明日某人言某事未几而斥则是上疏者以共工驩兜之刑加之矣不报伯成纯实无妄表里洞达每称人善不啻如己出语及奸人误国邪人害正词色俱厉不少假借常慕尸谏疏草毕亟命缮写朝服而逝年八十有四赠开府仪同三司端平三年赐谥忠简

△葛洪

葛洪字容父婺州东阳人从吕祖谦学登淳熙十一年进士第嘉定闲为枢密院编修官兼国史院编修官实录院检讨官迁守尚书工部员外郎兼权枢密院检详诸房文字上疏言今之将帅其才与否臣不得而尽知惟忠诚所在凡为人臣者斯须所不可离职思其忧谓之忠公尔忘私谓之忠纯实不欺谓之忠拊循士卒训齐戎旅帅之职也乞严饬将帅上下振厉申致军实常若有寇至之忧磨砺振刷以求更新亦庶乎其有用矣帝嘉纳之进直焕章阁为国子祭酒仍兼国史编修实录检讨迁工部侍郎仍兼祭酒兼同修国史实录院同修撰拜工部尚书亦兼祭酒兼侍读进端明殿学士同签书枢密院事拜参知政事封东阳郡公赞策讨平李全援王素谏仁宗却王德用进女事以止备嫔御世多称之以资政殿学士提举洞霄宫进大学士召赴行在仍旧职充万寿观使兼侍读寻提举万寿观兼侍读守本官致仕卒谥端献杜范称其侃侃守正有大臣风云

△曾三复

曾三复字无玷临江人干道六年进士淳熙未为主管官告院迁太府寺簿历将作大府丞登朝数年安于平进绍熙初出知池州改常州召为御史检法拜监察御史转太常少卿进起居舍人迁起居郎兼权刑部侍郎以疾告老诏守本官职致仕三复性耿介耻奔竞故位不速进在台余两年持论正平不随不激其没也士论惜之

△黄畴若

黄畴若字伯康隆兴丰城人淳熙五年举进士授祁阳县主簿邑民有诉僧为盗且杀人移鞫治畴若疑其无证以白提点刑狱马大同且争之甚力已而得真盗大同荐之调柳州教授又调灵川令会万安军黎蛮窃发经略司选畴若条画招捕事宜畴若谓须稽原始乱为区处之

方再任岭外用举考改知庐陵县州常以六月督畸零税畴若念民方艰食取任内县用钱三千余缗为民代输两年诸司举为邑最官召赴都堂审察差监行在都进奏院开熹元年都城火畴若应诏上言曰当今之急务有三一曰赋敛征求之无艺二曰都鄙军民之无法三曰守令牧养之无状历迁著作郎拜监察御史首章乞天子择宰相宰相择监司又言善为国者必以恐惧修省之训陈于前善为相者必以危亡灾异之事告于上韩侂胄败畴若上章劾去帝批其奏曰卿怀忠荃朕固知之畴若遂疏邓友龙陈景俊之恶先是江淮督府既罔功罢不更置畴若奏以为和战未决不遣近臣置幕府无以统诸将乞诏大臣科条人才为宣抚使帝即以邱密为江淮制置使寻迁畴若殿中侍御史兼侍讲朝廷与金人约和金人约函致侂胄首诏令台谏侍从两省杂议畴若与章燮等奏乞梟首然后函送敌人讥其有失国体又奏今帑藏无余岁币必睥睨于百姓愿自宫禁以及宰执百官共为撙节逐年桩积遂置安边所畴若乞令后省类聚更化以来臣下章奏察其可行者以闻付之中书都城谷踊贵诏减价棗桩管米十万石于是淮浙流民交集临安府按籍赈济仅不满五千人以三月后麦熟罢为限各给粮遣归畴若乞令核实近甸之人愿归就田者勿问其有未能归者更赈济两月淮民见在都城者其家既破又无赢赀必难遽去仍与赈恤俟早熟乃罢于是绍赈济至六月乃止帝以蝗灾令刺举监司不才者畴若同台监考察上之又言湖广黑风峒寇实由官不为决讼所致宜戒湖广诸司申明法禁平心决讼勿令砦官巡尉侵渔权户部侍郎自军兴费广朝廷给会子数多至是折阅日甚朝论颇严称提民愈不售畴若奏曰物少则贵多则贱理之常也曷若令郡县姑以渐称提先收十一界者消毁勿复支出上下流通则不待称提矣由是峻急之令少宽又乞拨买官田充余本以广常平之储会旱蝗又奏官吏苛刻科役频并赋敛繁重刑罚淹延四事进华文阁待制知成都府避讳改宝谟阁待制诏凡属军民利病吏治臧否并许谘访以闻当征积欠十余万畴若亟命榜九邑尽蠲之考官吏冗员非敕命差注者悉罢之为民代输六年布估钱二十万二千四百缗又别立库储二十五万三千缗期于异日接续代输又余米十五万石有奇足广惠仓之储又减他赋之重者民力遂宽初沈黎蛮屡犯边至则缕榜晓以祸福青弥两羌遂乞降四年董蛮合其部族入寇犍为利店亟调兵且设方略捕之皆遁去先是畴若廉知嘉定边备废弛而平戎庄子弟可用遂檄嘉定府权免平戎庄是年炭估麻租令庄子弟即日上边为守备会嘉定阙守蛮窥利店无备遂入寇畴若复选西军欲且

往防拓牒转运司折支不报蛮再犯龙坞堡转运司始颇从所请蛮复到龙门隘知有备乃退进龙图阁待制依旧知成都府大使司之师出东路提刑亦征兵三垂告警叙南之报复急两路震动畴若亟移书两军俾速还师守险为后图西师遂退守沐川既而畴若兼制叙州兵甲公事既得专行益严守备蛮首昔丑竟降朝廷赏平蛮功进畴若一秩畴若留蜀四年弊根蠹穴苗穉发栲如乞拣留移屯西兵义勇以防窃发以救偏重更用东南贤士使蜀四路而拔蜀守之有治功者为东南监司庶杜州县姻娅之私轻取钱引贴期之费以纾民力皆抗疏请于朝乞力行之复念大元城乃张仪所筑高骈所修圯坏岁久复修费重乃以节缩余钱四十万贯为修城备召对延和殿迁权兵部尚书太子右庶子八年四月不雨诏求直言畴若条具三事首言比称提楮币州县奉行切迫故因坐减陌被估籍者众乞与给还乞蠲阁下户畸零税赋乞赈贍雄淮军之乏寻皆行之落权升左庶子仍兼修中权太子詹事畴若引范镇故事乞归田里十年差知贡举试礼部尚书以足疾乞归进焕章阁学士知福州力辞乃改提举鸿庆宫关外军溃言者论及畴若落职罢祠后以焕章阁学士致仕

△袁韶

袁韶字彦淳庆元府人淳熙十三年进士嘉泰中为吴江丞苏师旦恃韩侂胄威福挠役法提举常平黄荣檄韶核田以定役师旦密谕意言吴江多姻党侂胄相容当荐为京朝官韶不听是岁更定户籍承徭赋皆师旦党师旦讽言者将论去荣亟以是事白于朝且荐之未几师旦败改知桐庐县桐庐多宗室持县事无有善去者韶始至绝私谒莫敢挠钱塘岸岁为潮啮率取石桐庐韶言庙子山有石不必旁取邻郡遂得求免嘉定四年召为太常寺主簿父老旗鼓蔽江以饒至于富阳泣谢曰吾曹不复输石矣后为右司郎官接伴金使使者索岁币语慢甚韶曰昔两国誓约止令输燕不闻在汴使者语塞十三年为临安府尹几十年理讼精简道不拾遗里巷争呼为佛子平反冤狱甚多绍定元年拜参知政事胡梦昱论济王事当远窜韶独以梦昱无罪不肯署文书李全叛扬州告急飞檄载道都城争有逃避者乃拜韶浙西制置使仍治临城镇遏之丞相史弥远惩韩侂胄用兵事不欲声讨韶与范楷言于弥远曰扬失守则京口不可保淮将如卞整崔福皆可用适福至韶夜与同见弥远言福实可用弥远从之遂讨全韶卒以言罢端平初奉祠卒年七十有七赠少傅后以郊恩累赠太师越国公韶之父为郡小吏给事通判厅勤谨无失因致丰饶夫妻俱近五十无子往临安置妾既得妾察之有忧色麻束发外以

采饰问之为故赵知府女家四川父歿家贫鬻以为归
葬计即送还其母聘财相奉闻其家尚不给囊中资尽与之遂独归妻迎问之曰妾安在
告以其故妻喜曰君设心如此行当有子矣明年生韶

△危稹

危稹字逢吉抚州临川人旧名科淳熙十四年举进士孝宗更名稹调南康军教授
历迁诸王宫教授稹谓以教名官而实未尝教请改创
宗子学立课试法如两学从之嘉定九年新学成改充博士其教养之规稹所论建迁秘
书郎著作佐郎兼吴益王府教授升著作郎兼屯田郎
官稹始进对请叙复军功之赏以立大信按拭功臣之罪以厉忠节置局以立武事遣使
以省边防厚赏以精间谍次论和战守利害而请颀意
于守是岁春至夏不雨稹应诏言安边所征敛之害与无罪而籍没之害楮币之改以一
夺二盐钞之更以新废旧至于沮格军赏放散死士皆
足以召怨而致旱又论谋国者欲以安靖为安靖忧国者欲以振厉为安靖自二议不合
是以国无成谋人无定志愿诏大臣合二议共图之且
欲下两淮帅臣讲明守御之备又言事无成规者皆不可为意向不明无以一众听信誓
不立无以结人心报应不亟无以趋事机赏罚不果无
以作士气番易柴中行去国稹赋诗送之连宰相出知潮州寻以通金华徐侨书论罢提
举千秋鸿禧观久之知漳州漳俗视不葬亲为常往往
栖寄僧刹稹命营高燥地为义冢三约期责之葬其无主名若有主名而力弗给者官为
葬之凡二千三百有奇刻石以识临漳台据郡西山最
胜处作龙江书院其上既成横经自讲人用歆动邑令有贿闻者劾去之籍其财以还民
郡有经总制无名钱岁五千缗厉民为甚前守赵汝说
奏蠲五之二稹疏于朝悉罢之会常平使有言稹不欲辩即自请以归久之提举崇禧观
与乡里耆艾七人为真率会卒年七十四稹性至孝父
疾愿损已算益亲年疾寻愈真德秀登从班举稹自代没又为铭其墓弟和字祥仲开禧
元年进士为上元主簿大辟祠宇祀程颀真德秀为记
知德兴賑荒有惠政

△程公许

程公许字季与一字希颖叙州宣化人少知孝敬大母候疾公许不交睫者数月病
革尝其痰沫既卒哀毁踰制嘉定四年举进士调温江
尉未上丁母忧服除授华阳尉再调绵州教授制置使崔与之大加器赏改秩知崇宁县
蠲预借免抑配人甚德之差通判简州改隆州未上会
金人侵阆中制置使桂如渊遁三川震动朝廷擢李■〈直上土下〉代之辟公许通判
施州行户房公事当兵将奔溃之后公许尽力佐之节

浮费疏利原民不增赋而用自足时诸将乘乱抄劫事定自危以重赂结幕府大将和彦威怀金宝以献公许正色却之吴彦斌增牒于书尾以进公许卷还之而责其使闻者畏服有献议招秦巩大姓于■〈直上土下〉者众多从舆独公许谓山东覆辙未远反复论难■〈直上土下〉从之其后赵彦呐开阍复行其策未几金人捣成都大姓者实导之始服公许先见端平初授大理司直迁太常博士嘉熙元年御史杜范论执政李鸣复不行徙右史竟拂衣东归鸣复坐政府自若公许论对言志士仁人婴逆鳞贾众怒不过为陛下通耳目为朝廷立纲纪而已今也假以职而弃其谏幸其退而优其迁则是自裂其纲纪自蔽其耳目遂使居是职者虽被亲擢言不得行始焉固辞而弗从终焉强留而饮愧臣恐自此同类沮失各起遐心来者相戒以为容默陛下愈孤立无助矣夏行都大火殿中侍御史蒋岷逢君希宠勑为邪说禁錮言者公许应诏曰羣臣忠告者众而圣意确不可回圣意不可回而言者不免于激陛下宜以大舜无藏怒宿怨为心而参酌于汉文帝之待淮南厉王我太宗待秦邸之故事以召和气弭眚灾特在一念转移之顷耳迁秘书丞兼考功郎官竟为岷劾去差主管云台观李宗勉入相以著作佐郎召兼权尚佐郎官兼直舍人院迁著作郎时谏官郭磊卿以论事不报出关徐荣叟亦抗章引去公许奏乞还言官俾安厥位既而史嵩之自江上入相台谏谢方叔王万及磊卿相继他徙公许又奏外难凭陵国势岌若缀旒朝廷上自为弗靖阳为迁除阴夺言职此中外所以怏怏迁将作少监大旱应诏疏时事四条又言储极虚位天下寒心时朝廷令侍从台谏条具易楮利害寻降旨以新造十八界折五行使公许缴申省谓庙堂决意更革本欲重十八界亦当令十六界十七界稍有分别若一时皆以五折一安保将来十七界与十八界并行而不折阅乎曷若将十七界且以三兑一使民闲尚知宝此一界不至一旦贸易不行令三界各有等第庶几公私两便嵩之格不行径揭黄榜公许谓不经凤阁鸾台不得为敕朝廷出令而宰相擅行如此则掖垣可废累上奏牒径欲引去宗勉及参知政事游似面奏留之兼国史编修实录检讨淳佑元年迁秘书少监轮对言蜀事十条兼直学士院拜太常少卿力请外为右正言濮斗南论罢寻以直宝谟阁知袁州请蠲和余之半改命郡吏部总所纲运而厚其贖免募平民民甚便之新周敦颐祠葺张栻书院聘宿儒胡安定为诸生讲说以杜范荐召拜宗正少卿再迁起居舍人濮斗南缴还疏有臣等耻与为伍之语遂以旧职提举玉局观范见疏曰程季与肯与汝为伍耶退处二年召赴行在属嵩之以父忧去位经营起复益惮公许密

柬韩祥喉殿中侍御史王赞奏寝召命帝虽曲从而意不悦及逐不才台谏擢公许起居郎兼直学士院公许入奏不可不坚凝者七帝语之曰卿一去三年今用卿出自朕意是日晚命下嵩之罢起复相范锺及杜范三制皆公许为之兼权中书舍人时一相尚逊机务多壅公许奏辅臣崇执谦逊避远形迹相示以色而不明言事几无穷日月易失今最急莫若疆场之事帅才不蓄一旦欲议易置茫然莫知所付九江择守至以近所废斥朋附为欺之台察充其选同时任言责者虽心迹有显晦过恶有重轻而获罪于清议则同一人拉拭之骤若是三人者宁不引领以望玷缺之复况近者言官方以刘晋之郑起潜濮斗南三人乞明正其罪以示警戒而忽闻龚基先之用议者咸谓改纪之初所为错缪邪枉窥伺善类何可高枕而卧帝见公许疏称善且言基先之用太早右史徐元杰暴亡司谏谢方叔御史刘应起言不报公许奏置狱鞫勘当于朝绅中选公正明决无所顾忌者专莅其事尽情研究务使得实不报物论沸腾临安尹赵与■奏乞置狱天府帝从之公许缴奏与■乃嵩之死党乞改送大理寺命台臣鞫之诏殿中侍御史郑霖回懦首鼠事竟不白然公论莫不伟公许权礼部侍郎郑起潜刘晋之及陈一荐以台臣论劾迁谪公许疏其附下罔上之罪乞下各州军严行押发郑清之以少保奉祠侍讲幄中批复其子士昌官职与内祠且许侍养行在所盖士昌尝以诏狱追逮或云诈以死闻清之造阙号泣请于帝故有是命公许缴奏士昌罪重京都浩穰奸宄杂糅恐其积习沉痼重为清之累莫若且与甄复少慰清之内祠侍养之命宜与收寝帝密遣中贵人以公许疏示清之项容孙以罪遣还家道死时叙官复职公许驳奏命遂格迁中书舍人进礼部侍郎嵩之免丧以观文殿大学士提举洞霄宫台谏给舍交章论奏公许疏乞睿断亟下明诏正邦典殿中侍御史章琰正言李昂英以论执政及府尹帝怒出二人公许力争之公许自缴士昌之命清之日夜于经筵短公许周坦妻与清之妻善因拜坦殿中侍御史坦首疏劾公许以宝章阁待制知建宁府谏议大夫郑霖又劾之命遂寝清之再相公许屏居湖州者四年再提举王隆观差知婺州未上帝欲召为文字官清之奏已令守婺帝曰朕欲其来乃授权刑部尚书屡辞弗获入对上疏言货财兴缮逐谏臣开边衅时弊之事荐知名士二十九人时罢京学类申散遣生徒公许奏京学养士其法本兴三学不侔往者立类申之法重轻得宜人情便安今既未能尽复旧数莫若权宜以五百为额仍用类申之法使远方游学者得以肄习其闲京邑四方之极而庠序一空弦诵寂寥非所以作成士气尊崇教化也清之益不乐授藁殿中侍

御史陈垓以劾公许参知政事吴潜奏留之帝夜半遣小黄门取垓疏入后二日二府奏公许不宜去同知枢密院徐清叟上疏论垓太学生刘黻等百余人布衣方和卿伏阙上书论垓朝廷寻授宝章阁学士知隆兴府而公许已死矣遗表上进龙图阁学士致仕赠宣奉大夫官其后公许冲澹寡欲晚年惟一僮侍食无重味一裘至十数年不易家无羨储敬爱亲戚备至蜀有兵难族姻奔东南者多依公许以居

△罗必元

罗必元字亨父隆兴进贤人嘉定十年进士调咸宜尉抚州司法参军崇仁丞复摄司法真德秀入参大政必元移书曰老医尝云伤寒坏证惟独参汤可救之然其活者十无二三先生其今之独参汤乎调福州观察推官有势家李遇夺民荔支园必元直之遇为言官以私憾罢之知余干县赵福王府骄横前后宰贰多为挤陷至是以汝愚墓占四周民山亦为直之言于州曰区区小官罢去何害人益壮其风力淳佑中通判赣州贾似道总领京湖克剥至甚必元上疏以为蠹国脉伤民命似道衔之改知汀州为御史丁大全按去后起干行在粮料院钱塘有海鳅为患漂民居诏方士治之都人鼓扇成风必元上疏力止之度宗即位以直宝章阁兼宗学博士致仕卒年九十一必元尝从危稹包逊学最为有渊源见理甚明风节甚高至今乡人犹尊慕之云

△王遂

王遂字去非一字颖叔枢密副使韶之玄孙后为镇江府金坛人嘉泰二年进士调富阳主簿历官差干办诸司审计司绍定三年福建寇扰甫定朝廷选贤能吏劳来安集以遂知邵武军兼福建招捕司参议官遂过江山浦城道中遇邵武避地之人即遗金为归资从者如市至郡抚摩创痍翦平凶孽民恃以安未几言者以遂妄自标致邀誉沽名罢改知安丰军迁国子监主簿又迁太常寺主簿拜监察御史疏奏极论主君子退小人又言正风俗息奔竞又言朝廷谓史嵩之小黠为大智近功为远略忽臣之言必欲侥幸嵩之于不败非为国至计也欺君误国天下知之而朝廷犹且惑焉势甚凛凛也迁右正言寻拜殿中侍御史疏言三十年来凶德参会未有如李知孝梁成大莫泽肆无忌惮者三凶之罪上通于天乞重其刑又取刘光祖为殿中侍御史时奏格择其关于风化切于时宜者请颁示中外皆从之又请于并淮置屯田且条上边事曰当今之急务在朝廷者五定规摹明意向一心力谨事权审号令在边阃者六恤归附精闲谍节财用练土兵择将才计军实又言君德必纯乎刚帝皆善之以宝章阁直学士知建宁府以历迁华文阁直学士差知隆兴府兼江西

转运副使改知太平州复知隆兴兼江西安抚使召赴阙授权工部尚书遂与同里刘宰素同志宰尝称遂为文雅健无世俗浮靡之气足以名世遂守平江宰赠之言曰士友当亲而贤否不可不辩财利当远而会计不可不明折狱以情毋为私意所牵荐士以才毋为权要所夺当言则言不视时而退缩可去则去不计利而迟回庶几名节之全不愧简册所载盖格言也

钦定续通志卷四百六

●钦定续通志卷四百七 列传二百七

列传

宋 【百十一】

○宋百十一

吴渊 余玠 汪立信 向士璧 胡颖 冷应澄

曹叔远 【幽】 王万 马光祖

吴渊

余玠

汪立信

向士璧

胡颖

冷应澄

曹叔远

王万

马光祖

△吴渊

吴渊字道父秘阁修撰柔胜之第三子也幼端重寡言苦志力学五岁丧母哭泣哀慕如成人嘉定七年举进圭调建德县主簿丞相史弥远馆留之语竟日大悦谓渊曰君国器也今开化新置尉即日可上欲以此处君渊对曰甫得一官何敢躁进况家有严君所当禀命弥远为之改容不复强至官就辟令江东九郡之冤讼于诸使者皆乞送渊改差浙东制置使司干办公事丁父忧诏以前职起复力辞弗许再辞且贻书政府曰人道莫大于事亲事亲莫大于送死苟冒哀求荣则平生大节已扫地矣他日何以事君时丞相史嵩之方起复或曰得无碍时宰乎渊弗顾诏从之服除知武陵县改杨子县兼淮东转运司干办公事添差通判真州入为将作监丞迁枢密院编修官兼刑部郎官再迁秘书丞仍兼刑部郎官以直焕章阁知平江府兼节制许浦水军提点浙西刑狱会衢严盗起调遣

将士招捕之歼其渠魁散其支党以功为枢密院检详
诸房文字兼国史院编修官实录院检讨官兼左司进右文殿修撰枢密副都承旨兼右
司兼检正适政府欲用兵以据关守河为说渊力陈其
不可出知江州改江淮荆浙福建广南都大提点坑冶都司未几边事果如渊言差知镇
江府定防江军之扰兼淮东总领以功迁太府少卿复
以总领兼知镇江加集英殿修撰知镇江兼总领进权工部兵部户部侍郎再为总领兼
知镇江时渊造阙下入对历陈九事甫下殿御史唐璘
击之璘盖渊所荐者也遂仍前职提举太平兴国宫久之加宝章阁待制再起知镇江兼
总领未几以户部侍郎兼知镇江府召赴行在以宝章
阁直学士知太平州寻兼江东转运使时两淮民流徙入境者四十余万渊慰抚凋济使
之什伍令土著人无相犯旁郡流民焚劫无虚日独太
平境内肃然升华文阁学士知隆兴府江西安抚使兼转运副使会岁大侵讲行荒政全
活者七十八万九千余人加敷文阁学士仍知隆兴府
安抚转运副使如故改知镇江府兼都大提举浙西沿海诸州军许浦澈浦等处兵船岁
亦大侵因渊全活者六十五万八千余人丁母忧服除
进龙图阁学士江西安抚使兼知江州寻为沿江制置副使兼提举南康军兵甲公事节
制蕲黄州安庆府屯田使湖南峒寇蔓入江右之境破
数县袁洪太震渊命将调兵生擒其渠魁乱遂平迁兵部尚书知平江府兼浙西两淮发
运使寻兼知平江府岁亦大侵因渊全活者四十二万
三千五百余人兼浙西提点刑狱知太平州兼提领两淮茶盐所以功进端明殿学士沿
江制置使江东安抚使兼知建康府兼行宫留守节制
和州无为军安庆府兼三郡屯田使朝廷付渊以光丰蕲黄之事凡勅司空山燕家山金
刚台三大砦嵯峨山鹰山竹子山等二十二小砦团丁
壮置军分立队伍星联棋布脉络贯通无事则耕有警则御诏以渊兴利除害所立二十
有五事究心军民拜资政殿大学士职任如旧与执政
恩例封金陵侯复赐锦绣堂忠勤楼大字进爵为公徙知福州福建安抚使改知平江府
兼发运使御史刘元龙劾渊帝寝其奏改知盩厔府累
具辞免且勾祠以本官提举洞霄宫起知太平兼提领江淮茶盐所转荆湖制置大使知
江陵府兼夔路策应大使兼京湖屯田大使带行京湖
安抚制置大使拜观文殿学士职任如旧兼总领湖广江西京西财赋湖北京西军马钱
粮渊调兵二万往援川蜀其后力战于白河沮河玉泉
宝佑五年正月朔以功拜参知政事越七日卒赠少师渊有材略迄济事功所至兴学养
士然政尚严酷好兴罗织之狱籍入豪横故时有蜈蚣
之谣其弟潜亦数谏止之

△余玠

余玠字义夫蕲州人家贫落魄无行喜功名好大言少为白鹿洞诸生常携客入茶肆殴卖茶翁死脱身走襄淮时赵葵为淮东制置使玠作长短句上谒葵壮之留之幕中未几以功补进义副尉擢将作监主簿权发遣招进军充制置司参议官进工部郎官嘉熙三年与元兵战于汴城河阴有功授直华文阁淮东提点刑狱兼知淮安州兼淮东制置司参谋官淳佑元年玠提兵应援安丰拜大理少卿升制置副使进对必使国人上下事无不确实然后华夏率孚天人感格又言陛下视文武之士勿令偏有所重偏必至于激文武交激非国之福帝曰卿人物议论皆不常可独当一面乃授权兵部侍郎四川宣谕使帝从容慰遣之玠亦自许其功日月可冀寻授兵部侍郎四川安抚制置使兼知重庆府兼四川总领兼夔路转运使自宝庆三年至淳佑二年十六年闲凡授宣抚三人制置使九人副四人终无成绩于是东西川无复统律遗民咸不聊生监司戎帅各专号令擅辟守宰荡无纪纲蜀日益坏及闻玠入蜀人心粗定始有安土之志玠大更敝政遴选守宰筑招贤之馆于府之左供帐一如帅所居下令曰集众思广忠益诸葛孔明所以用蜀也欲有谋以告我者近则径诣公府远则自言于郡所在以礼遣之高爵重赏朝廷不吝以报功豪杰趋期立事今其时矣士之至者玠不厌礼接咸得其欢心言有可用随其才而任之苟不可用亦厚遗谢之播州冉氏兄弟璘璞有文武才隐居蛮中前后阩帅辟召坚不肯起闻玠贤相谓曰是可与语矣遂诣府上谒玠素闻冉氏兄弟刺入即出见之与分廷抗礼宾馆之奉冉安之若素有耳数月无所言玠将谢之乃为设宴玠亲主之酒酣坐客方纷纷竞言所长璘兄弟饮食而已玠以微言挑之卒默然玠曰是观我待士之礼何如耳明日更辟别馆以处之且日使人窥其所为兄弟终日不言惟对踞以垩画地为山川城池之形起则漫去如是又旬日请见玠屏人曰某兄弟辱明公礼遇思有以少裨益非敢同众人也为今日西蜀之计其在徙合州城乎玠不觉跃起执其手曰此玠志也但未得其所耳曰蜀口形胜之地莫若钓鱼山请徙诸此若任得其人积粟以守之贤于十万师远矣巴蜀不足守也玠大喜曰玠固疑先生非浅士先生之谋玠不敢掠以归己遂不谋于众密以其谋闻于朝请不次官之诏以璘为承事郎权发遣合州璞为承务郎权通判州事徙城之事悉以任之命下一府皆諠然同辞以为不可玠怒曰城成则蜀赖以安不成玠独坐之诸君无预也卒筑青居大获钓鱼云顶天生凡十余城皆因山为垒碁布是分为诸郡治所屯兵聚粮为必守计且诛溃将以肃军令又移金戎

于大获以护蜀口移沔戎于青居兴戎先驻合州旧城
移守钓鱼共备内水移利戎于云顶以备外水于是如臂使指气势联络又属嘉定俞兴
开屯田于成都蜀以富实十年冬玠率诸将巡边直捣
兴元元兵与之大战十二年又大战于嘉定初利司都统王夔素残悍号王夜叉恃功骄
恣桀骜不受节度所至劫掠每得富家毒虐以胁取金
帛稍不遂意即死其手蜀人患苦之且悉敛部将俸马以自入将战乃高其估卖与之朝
廷虽知其不法在远不能诘也大帅处分少不赚其意
则百计挠之使不得有所为玠至嘉定夔帅所部兵迎谒才羸弱二百人玠曰久闻都统
兵精今疲敝若此殊不称所望夔对曰夔兵非不精所
以不敢即见者恐惊从人耳顷之班声如雷江水如沸声止圆阵即合旗帜精明器械森
然沙上之人弥望若林立无一人敢乱行者舟中皆战
悼失色而玠自若也徐命吏班赏有差夔退谓人曰儒者中乃有此人玠久欲诛夔独患
其握重兵居外恐轻动危蜀谋于亲将杨成成曰夔在
蜀久所部兵精前时大帅夔皆势出其右意不止此也视侍郎为文臣必不肯甘心从令
今纵弗诛养成其势后一举足西蜀危矣玠曰我久欲
诛之独患其党与众未发耳成曰侍郎以夔在蜀久有威名孰与吴氏夔固弗若也夫吴
氏当中兴危难之时能百战以保蜀得之四世恩威益
张根本益固蜀人知有吴氏而不知有朝廷一旦曦为叛逆诸将诛之如取孤豚况夔无
吴氏之功而有曦之逆心恃豨突之勇敢慢法度纵兵
残民奴视同列非有吴氏得人之固也诛之一夫力耳待其发而取之难矣玠意遂决夜
召夔计事潜以成代领其众夔才离营而新将已单骑
入矣将士皆愕眙相顾不知所为成以帅指譬晓之遂相率拜贺夔至斩之成因察其所
与为恶者数人稍稍以法诛之乃荐成为文州刺史戎
帅欲举统制姚世安为代玠素欲革军中举代之弊以三千骑至云顶山下遣都统金某
代世安世安闭关不纳且有危言然常疑玠图己属丞
相谢方叔家子侄自永康避地云顶世安厚结之求方叔为援方叔因倡言玠失利戎之
心非我调停且旦夕有变又阴嗾世安密求玠之短陈
于帝前于是世安与玠抗玠郁郁不乐宝佑元年闻有召命愈不自安一夕暴下卒或谓
仰药死蜀之人莫不悲慕如失父母玠自入蜀进华文
阁待制赐金带权兵部尚书进徽猷阁学士升大使又进龙图阁学士端明殿学士及召
拜资政殿学士恩例视执政其卒也特赠五官以监察
御史陈大方言夺职六年复之玠之治蜀也任都统张实治军旅安抚王惟忠治财赋监
簿朱文炳接宾客皆有常度至于修学养士轻徭以宽
民力薄征以通商贾蜀既富实乃罢京湖之饷边关无警又撤东南之戍自宝庆以来蜀

阍未有能及之者惜其遽以太平自托进蜀锦蜀笈过
于文饰久假便宜之权不顾嫌疑昧于勇退遂来谗贼之口而又置机捕官虽足以廉得
事情然寄耳目于羣小虚实相半故人多怀疑惧至于
世安拒命玠威名顿挫赍志以没有子曰如孙取当如孙仲谋之义遭论改师忠厯大理
寺丞为贾似道所杀

△汪立信

汪立信澈从孙也立信曾大父智从澈宣谕湖北道六安爱其山水因居焉淳佑元
年立信献策招安庆剧贼胡兴刘文亮等借补承信郎
六年登进士第理宗见立信状貌雄伟顾侍臣曰此阍帅才也授乌江主簿辟沿江制幕
荆湖制司干办通判建康府荆湖制置赵葵辟充策应
使司及本司参议官葵去马光祖代之立信是时犹在府也鄂州围解贾似道既罔上要
功悉阍外之臣与己分功乃行打算法于诸路欲以军
兴时支散官物为罪击去之光祖与葵素有隙且欲迎合似道即召吏稽勾簿书不能得
其疵乃以开庆二年正月望夕张灯宴设钱三万缗为
葵放散官物闻于朝立信力争之谓不可且曰方艰难时赵公莅事勤劳而公以非理攬
拾之公一旦去此后来者复效公所为可乎光祖怒曰
吾不才不能为度外事知奉朝命而已立信遂投劾去初立信通判江陵府葵制置荆湖
尝以公事劾立信及在沿江府亦谋议寡谐立信于葵
盖未尝有一日之驩也擢京西提举常平改知昭信军累官升江西安抚使乞祠禄差知
镇江寻充湖南安抚使知潭州至官供帐之物悉置官
库所积钱连岁代纳潭民夏税贫无告者予钱粟病者加药饵雨雪早潦军民皆有给兴
学校士习为变以潭为胡湘重镇勦威敌军所募精锐
数千人后来者赖其用权兵部尚书荆湖安抚使置知江陵府时襄阳被围危急立信上
疏请益安陆府屯兵凡边戍皆不宜抽减黄州守臣陈
弈素蓄异志朝廷宜防之乃移书似道谓今天下之势十去八九为今日之计者其策有
三夫内郡何事乎多兵宜尽出之江干以实外御算兵
帐见兵可七十余万人老弱柔脆十分汰二为选兵五十余万人而沿江之守则不过七
千里若距百里而屯屯有守将十屯为府府有总督其
尤要害处辄参倍其兵无事则泛兵长淮往来游徼有事则东西齐奋战守并用刁斗相
闻馈饷不绝互相应援以为联络之固选宗室亲王忠
良有干用大臣立为统制分东西二府以莅任得其人率然之势此上策也久拘聘使 【
按元史世祖本纪中统元年夏四月辛丑以即位诏
天下丁未以翰林侍读学士郝经为国信使使于宋先是贾似道还朝称颂鄂公通国不
知其遣宋京请和恐经至谋泄遂拘经真州凡十七年

】无益于我徒使敌得以为辞请礼而归之许输岁币以缓师期不二三年边遽稍休藩垣稍固生兵日增可战可守此中策也二策果不得行则天败我也若衔璧舆衬之礼则请备以俟似道得书大怒抵之地诟曰瞎贼狂言敢尔盖以立信目微眇云寻中以危法废斥之咸淳十年元兵大举伐宋似道督诸军出次江上以立信为端明殿学士沿江制置使江淮招讨使俾就建康府库募兵以援江上诸郡立信受诏不辞即日上道以妻子托爱将金明执其手曰我不负国家尔亦必不负我遂行与似道遇芜湖似道拊立信背哭曰不用公言以至于此立信曰平章平章瞎贼今日更说一句不得似道问立信何向曰今江南无一寸干净地某去寻一片赵家地上死第要死得分明尔既至则建康守兵悉溃而四面皆北军立信知事不可成叹曰吾生为宋臣死为宋鬼终为国一死但徒死无益耳率所部数千人至高邮欲控引淮汉以为后图已而闻似道师溃芜湖江汉守臣皆望风降遁立信叹曰吾今日犹得死于宋土也乃置酒召宾佐与诀手为表起居三宫与从子书属以家事夜分起步庭中慷慨悲歌握拳抚案者三以是失声三日扼吭而卒以光禄大夫致仕遗表闻赠太傅元丞相巴延入建康金明以其家人免或恶立信于巴延以其二策及其死告且请戮其孥巴延叹息久之曰宋有是人有是言哉使果用我安得至此命求其家厚恤之曰忠臣之家也金明以立信之丧归葬丹阳立信子麟内书写机宜文字在建康不肯从众降崎岖走闽以死初立信之未仕也家窶甚会岁大侵吴渊守镇江命为粥以食流民使其客黄应炎主之应炎一见立信与语心知其非常人言于渊渊大奇之礼以上客凡供粮服御视应炎为有加应炎甚怏怏渊解之曰此君吾地位人也但遭时不同耳君之识度志业皆非其伦也盖少下之是年试江东转运司明年登第后其践历略如渊而卒死于难人谓渊能知人云

△向士璧

向士璧字君玉常州人负才气精悍甚自好绍定五年进士累通判平江府以言罢起为淮西制置司参议官又以言罢起知高邮军制置使邱密又论罢起知安庆府知黄州累迁湖北安抚副使兼知峡州兼归峡施黔南平军绍庆府镇抚使迁太府少卿大理卿进直龙图阁合州告急制置使马光祖命士璧赴援数立奇功帝亦语羣臣曰士璧不待朝命进师归州且捐家赀百万以供军费其志足嘉进秘阁修撰枢密副都承旨乃旧职开庆元年涪州危又命士璧往援北兵夹江为营长数十里阻舟师不能进至浮桥时朝廷自扬州移贾似道以枢密使宣抚六

路进驻峡州檄士璧以军事付吕文德士璧不从以计断桥奏捷具言方略未几文德亦以捷闻士璧还峡州方怀倾夺之疑寻辟为宣抚司参议官迁湖南安抚副使兼知潭州兼京西湖南北路宣抚司参议官加右文殿修撰寻授权兵部侍郎湖南安抚使兼知潭州顷之升湖南制置副使元将乌兰哈达兵自交址北还前锋至城下攻围急士璧极力守御闻后队且至遣王辅佑率五百人往觐之以易正大监其军遇于南岳市一战有功潭州围遂解事闻赐金带令服系进兵部侍郎兼转运使余依旧职似道入相疾其功非独不加赏反讽监察御史陈寅侍御史孙附凤一再劾罢之送漳州居住又稽守城时所用金谷逮至行部责偿幕属方元善极意逢迎似道意士璧坐是死复拘其妻妾至征之其后元善改知吉水县俄归得狂疾常呼士璧时辅佑亦远谪及文天祥起兵召辅佑于谪所则死矣德佑元年诏追复元官仍还从官恩数立庙潭州明年太府卿柳岳乞录用其子孙诏从之

△胡颖

胡颖字叔献潭州湘潭人父瑛娶赵方弟雍之女二子长曰显有拳勇以材武入官数有战功事见赵范传颖自幼风神秀异机警不常成童即能倍诵诸经中童子科复从兄学弓马母不许曰汝家世儒业不可复尔也遂感励苦学尤长于春秋绍定三年范讨李全檄颖入幕颖常微服行诸营察众志向归必三鼓后全败遣颖献俘于朝以赏补官五年登进士第即授京秩历官知平江府兼浙西提点刑狱移湖南兼提举常平即家置司性不喜邪佞尤恶言神异所至毁淫祠数千区以正风俗衡州有灵祠吏民夙所畏事颖彻之作来谗堂奉母居之以枢密都承旨为广东经略安抚使潮州僧寺有大蛇能惊动人前后仕于潮者皆信奉之颖至广州闻其事檄潮州命僧舁蛇至至则其大如柱而黑色载以阑槛颖令之曰尔有神灵当三日见变恠过三日则汝无神矣既及期蠢然犹众蛇耳遂杀之毁其寺并罪僧移节广西寻迁京湖总领财赋咸淳闲卒赠四官颖为人正直刚果博学强记吐辞成文书判下笔千言援据经史切当事情临政善断不畏强御在浙西荣王府十二人行劫颖悉斩之一日轮对理宗曰闻卿好杀意在浙狱颖曰臣不敢屈太祖之法以负陛下非嗜杀也帝为之默然

△冷应澄

冷应澄字公定隆兴分宁人宝庆元年进士调庐陵王簿即以廉能着有愬事台府者必曰愿下庐陵清主簿尤为杨长孺所识拔调静江府司录参军治狱平恕转运使范应铃列荐于朝知万载县大修学舍招俊秀治其业旌

其通经饬行者以劝岁歉弃孩满道乃下令恣民收养
所弃父母不得复问全活甚众叶梦得列其行事风厉余邑通判道州入监行在榷货务
迁登闻鼓检院景定元年奉使督饷江上还知德庆府
前守政不立纵豪吏渔猎峒獠遂大为变徧城六十里而营应澄未入境驰檄谕之曰汝
等不获已至此新太守且上转祸为福一机也胁从影
附亦宜早计去就不然不免矣獠感悟欲自归惑谋主不果众稍引去应澄知其势解即
厉士马出不意一鼓擒之纵遣归农犹千余人乃请诸
监司归郡之避难留幕府者诛豪吏之激祸者属县租赋诿道阻久不至郡应澄为之期
曰首输者与减分末至则偿所减民惟恐后不一月讫
事凡诸纲官廩稍军券前政积不得者悉补还之期年报政奏罢抑配盐法及其用楮券
折银钢等五事以纾民力诏就升本道提举常平兼转
运使俾行其说首劾守令贪横不法十余人列郡肃然最闻加直秘阁时经略使陈宗礼
入为参知政事帝问谁可代卿者宗礼以应澄对旋召
为都官郎官未行就升直宝章阁知广州主管广南东路经略安抚司公事马步军都总
管领漕庾如故五司丛剧应澄即分时理务不扰不倦
常曰治官事当如家事惜官物当如己物方今国计内虚边声外震吾等受上厚恩安得
清谈自高以误世陶士行卜望之吾师也自闻襄樊受
围日缮器械裕财粟以备仓卒后卒赖其用屡平大寇未尝轻杀笞杖以降亦加审慎至
其临事辄断虽势要不为挠夺后卒于家

△曹叔远

曹叔远字器远温州瑞安人少学于陈傅良登绍熙元年进士第久之李璧荐为国
子学录迁韩侂胄罢通判涪州后守遂宁营卒莫简苦
总领所侵刻相率称乱势张甚入遂宁境辄戢其徒无肆暴曰此江南好官员也入朝为
工部郎出知袁州以太常少卿召权礼部侍郎遇事献
替多所裨益终徽猷阁待制谥文肃尝编永嘉谱识者谓其有史才子咸角孙郃皆登进
士第族子翮

曹翮

曹翮

翮字西士少从钱文字学登嘉泰二年进士第授安吉州教授调重庆府司法参军
郡守度正欲荐之翮辞曰章司录母老请先之正敬叹
改知建昌县复故尚书李常山房建斋舍以处诸生擢秘书丞兼仓部郎官出为浙西提
举常平面陈和余折纳之弊建虎邱书院以祀尹焞移
浙东提点刑狱寒食放囚归祀其先囚感泣如期至召为左司谏与王万郭磊卿徐清叟
俱负直声当时号嘉熙四谏上疏言立太子厚伦纪以

弭火灾又论余天锡李鸣复之过连旨迁起居郎进礼部侍郎不拜疏七上进古诗以寓
规正久之起知福州再以侍郎召为台臣所沮而止遂
守宝章阁待制致仕卒谥文恭子愉老亦登进士第

△王万

王万字处一家世婺州父游淮闲万因生长濠州少忠伉有大志究心当世急务尤
精于边防要害登嘉定十六年进士第调和州教授端
平元年主管尚书吏部架阁文字迁国子学录明年添差通判镇江府郑清之初谋乘虚
取河洛万谓当急为自治之规已而元兵压境三边震
动理宗下罪己诏吴泳起草又以咨万万谓兵固失矣言之甚恐亦不可今边民生意如
发宜以振厉奋发兴感人心为条具沿边事宜徧告大
臣要官论两淮形势用兵屯田又谓戎司旧分地戍守宜与尽还旧制及请宽边民请团
民兵请援浮光请边民之能捍边者常厚其赏而小其
官使常得其力其后兵兴用窘履亩之令行则又言之庙堂曰令民更化可反为故相之
所不为乎其它敷陈往往累数万言其自任之笃切于
当世如此三年授枢密院编修官嘉熙六年兼权屯田郎中因转对言天命去留原于君
心凡惻然有蠲于心而未能安者皆心之未能同乎天
者也天人合一天命在我矣差知台州至郡日惟蔬饭终日坐厅事事至立断吏无所售
往往改业散去民亦化之不复讼上下肃然郡以大治
才五月乞祠去三年迁屯田员外郎兼编修转对言君臣上下尽克私心以服人心以回
天心迁尚右郎官寻兼崇政殿说书四年擢监察御史
首论史宅之故相之子曩者弄权不当复玷从班帝命丞相再三谕旨迄不奉诏帝不得
已出宅之知平江府又论之疏凡五上史嵩之自江上
董师入相万又首论之谓其事体迫遽气象倾摇太学生欲趣其归则贿赂之迹已形近
或谓其族人发其私事肆为丑诋者以相国大臣而若
此非书之所谓大臣矣然当时论相之事已决疏入迁大理少卿万即日还常熟寓舍迁
官皆力辞乞休致诏特转朝奉郎守太常少卿致仕卒
嵩之罢相众方交论其非上思万先见亲赐御札谓万立朝蹇谔古之遗直为郡廉平古
之遗爱闻其母老家贫朕甚念之赐新会五千贯田五
百亩以贍给其家初万之学专有得于时习之语谓学莫先于言顾行言然而行未然者
非言之伪也习未熟也熟则言行一矣故终其身行无
不顾其言发于设施论谏皆根于中心云

△马光祖

马光祖字华父婺州金华人宝庆二年进士调新喻主簿已有能名从真德秀学改
知余干县差知高邮军迁军器监主簿累进直徽猷阁

江西转运副使兼知隆兴府以右正言刘汉弼言罢后九年起直徽猷阁知太平州进直
宝文阁迁太府少卿仍知太平州再迁司农卿淮西总
领兼权江东转运使拜户部尚书兼知临安府浙西安抚使帝谕丞相谢方叔趣入覲乞
严下海米禁厯陈京师艰食和籴增价海道致寇三害
加宝章阁直学士沿江制置使江东安抚使知建康府兼行宫留守兼节制和州无为军
安庆府三郡屯田使加焕章阁寻加宝章阁学士始至
官即以常例公用器皿钱二十万缗支犒军民减租税养鰥寡孤疾无告之人招兵置砦
给钱助诸军昏嫁属县税折收丝绵绢帛倚阁除免以
数万计兴学校礼贤才辟召僚属皆极一时之选拜端明殿学士荆湖制置知江陵府去
建康之民思之不已帝闻命以资政殿学士沿江制置
大使江东安抚使再知建康士女相庆光祖益思宽养民力兴废起坏知无不为蠲除前
政逋负钱八百万缗鱼利税课悉罢减予民修建明道
南轩书院及上元县学撙节费用建平余仓贮米十五万石又为库贮余本二百余万缗
修饬武备防拓要害边赖以安公田法行光祖移书贾
似道言公田法非便乞不以及江东必欲行之罢光祖乃可进大学士兼淮西总领召赴
行在迁提领户部财用兼知临安府浙西安抚使会岁
饥荣王府积粟不发廩光祖谒王辞以故明日往亦如之又明日又往卧客次王不得已
见焉光祖厉声曰天下孰不知大王子为储君大王不
于此时收人心乎王以无粟辞光祖探怀中文书曰某庄某仓若干王无以辞得粟活民
甚多进同知枢密院事寻差知福州福建安抚使以侍
御史陈尧道言罢以前职提举洞霄宫再以沿江制置江东安抚使知建康郡民为建祠
六所乞致仕不许咸淳三年拜参知政事五年拜枢密
院事兼参知政事以监察御史曾渊子言罢给事中卢钺复缴奏新命以金紫光禄大夫
致仕卒谥庄敏光祖在外练兵丰财朝廷以为京尹则
剽治浩穰风积凜然三至建康终始一纪威惠并行百废无不修举云 【按宋史汪立信
传有光祖欲报赵葵隙迎合似道立信争之不得一
事其为人可知矣本传所言不无溢词】

钦定续通志卷四百七

●钦定续通志卷四百八 列传二百八

列传

宋 【一百十二】

○宋一百十二

乔行简

范锺

游似

赵葵【兄范】

谢方叔

乔行简

范锺

游似

赵葵

谢方叔

△乔行简

乔行简字寿朋婺州东阳人学于吕祖谦之门登绍熙四年进士第历官知通州条上便民事主管户部架阁召试馆职为秘书省正字兼枢密院编修官升秘书郎为淮西转运判官知嘉兴府改淮南转运判官兼淮西提点刑狱提举常平言金有必亡之形宜静以观变因列上备边四事会近臣有主战者师遂出金人因破蕲黄移浙西提点刑狱兼知镇江府迁起居郎寻迁宗正少卿秘书监权工部侍郎皆任兼职理宗即位行简贻书丞相史弥远请帝法孝宗行三年丧应诏上疏曰求贤求言二诏之颁果能确守初意深求实益则人才振而治本立国威张而奸宄销臣窃观近事似或不然盖以所召者非久无宦情决不肯来之人则年已衰暮决不肯来之人耳彼风节素着持正不阿廉介有守临事不挠者论荐虽多固未尝收拾而召之也其所施行褒赏者往往皆末节细故无关于理乱粗述古今不至于抵触然后取之以示吾有听受之意其闲亦岂无深忧远识高出众见之表忠言至计有补圣德之聪者固未闻采纳而用之也夫贤路当广而不当狭言路当开而不当塞治乱安危莫不由此升侍读兼国子祭酒吏部侍郎权礼部尚书权刑部尚书拜端明殿学士同签书枢密院事进签书枢密院事太后崩疏言向者陛下内廷举动皆有禀承小人纵有蛊惑千求之心犹有所忌惮而不敢发今者安能保小人之不萌是心陛下又安能保圣心之不无少肆陛下为天下君当懋建皇极一循大公不应私徇小人为其所误以春秋方富之年居声色易纵之地万一于此不能自制必于盛德大有亏损又论火灾求言乞取其切者付外行之又论许国不当换文资其当虑者有五郑损不当帅蜀又言时青者以官则国家之节度以人则边陲之大将一日遽为李全所戕是必疑其终为我用虑变生肘腋故先其末发驱除之窃意军中必有愤激思奋之人莫若乘势就淮阴一军拔其光者以护其师然后明指杀青者之姓名俾之诛戮加赠恤之典于青则其势自分而吾得藉此以制之可以折其奸心而存吾之大体不然跋扈者专杀而不敢诛有功者见杀而不敢愬则所当虑者不独李全一人而已又言山阳民散财殫非凶贼久安之地当日夜为鸱张之计扬州城势坚壮足以坐制全淮此曹未必无窥伺之心或为所入则淮东俱非我有不可不先为之

虑也又请屯驻重兵海道内为吴越之捍蔽外为南北之限制又论李全攻围泰州剿除之兵今不可已此贼气貌无以踰人未必有长算深谋直剽捍勇决能长雄于其党耳况其守泗西城则失西城守下邳则失下邳守青社则失青社既又降北此特败军之将十年之内自白丁至三孤功薄报丰反背义忘恩此天理人心之所共愤惟决意行之后皆如行简所料拜参知政事兼知枢密院事时议收复三京行简在告疏言所忧有三愿坚持圣意定为国论以绝纷纷之说不果从进知枢密院事时议御阅不果反骤汰之殿司军哄为之黜主帅罢都司官给黄榜抚存军愈呼噪行简以闻戮为首者二十余人众乃帖息寻拜右丞相言三京挠败之余事与前异但当益修战守之备襄阳失守请急收复或又陈进取之计行简奏今内外事势可忧而不可恃者七言甚恳切师得不出端平三年九月有事于明堂大雷雨行简与郑清之并策免既去而独趋召行简还京留之拜左丞相援韩琦故事乞以边陲财用分委三执政请修中兴五朝国事十上章请谢事嘉熙三年拜平章军国重事封肃国公每以上游重地为念请建节度宣抚使提兵戍夔边事稍寔复告老章十八上四年加少师保宁军节度使醴泉观使封鲁国公淳佑元年二月薨于家年八十六赠太师谥文惠行简历练老成识量宏远居官无所不言好荐士多至显达至于举钱时吴如愚又皆当时隐逸之贤者

△范锺

范锺字仲和婺州兰溪人嘉定二年举进士历官调武学博士添差通州太平州知徽州召赴阙迁刑部郎官又迁尚右郎官兼崇政殿说书进对帝曰仁宗时甚多事锺对曰仁宗始虽多事乃以忧勤致治徽宗始虽无事余患至于今日帝悦寻迁吏部郎中兼说书又迁秘书少监国子司业迁兵部侍郎权兵部尚书嘉熙三年拜端明殿学士签书枢密院事四年授参知政事淳佑元年乞归田里不许四年知枢密院事五年特拜左丞相兼枢密使封东阳郡公再乞归田里不许六年复请许之加观文殿大学士醴泉观使兼侍读辞不拜以保晚节乃提举洞霄宫九年卒锺为相直清守法重惜名器虽无赫赫可称而清德雅量与杜范李宗勉齐名赠少师谥文肃

△游似

游似字景仁利路提点刑狱仲鸿之子嘉定十四年进士历官为大理司直升大理寺丞迁太常丞累迁军器监宗正少卿权礼部侍郎有事于明堂疏言欲尽事天之礼当尽敬天之心心存则政事必适其宜言动必当其理雨暘必循其序夷夏必安其生权礼部尚书言军赏冒滥

请给告之制奏功者书填真命付之候从军十年别能立功升至统领已上方许从所属保明申朝廷立名给告则冒滥者革功劳者劝迁礼部尚书又迁吏部尚书入侍经幄帝问唐太宗贞观治效何速如是似对曰人主一念之烈足以旋乾转坤或谓霸图速而王道迟不知一日归仁期月而可王道曷尝不速一念有时闲断则无以挽回天下之大势至于忧勤既切而佐理非人亦何以布宣九重之实乃摭太宗事以陈且谓太宗矜心易启渐弗克终仅止贞观之治陛下嗣服十有五年艰危之势滋甚回视太宗治效敏速相越乃尔意者亲儒而从谏敬畏以检身未若贞观之超卓乎节用以致爱选廉以共理未若贞观之切至乎愿陛下益加圣心嘉熙三年拜端明殿学士同签书枢密院事封南充县伯拜参知政事四年知枢密院事兼参知政事淳佑四年提举万寿观兼侍读仍奉朝请授知枢密院事兼参知政事进爵郡公五年拜右丞相兼枢密使十上章乞归田里帝不许七年特授观文殿大学士醴泉观使兼侍读进爵国公十一年转两官致仕卒特赠少师

△赵葵

赵葵字仲南京湖制置使方之子方在襄阳命葵专督饮食供养之事与兄范俱有志事功方器之聘郑清之全子才为之师又遣从南康李燔为有用之学每闻警报与诸将偕出遇敌则深入死战诸将惟恐失制置子尽死救之屡以此获捷一日方赏将士恩不偿劳军为变葵时十二三觉之亟呼曰此朝廷赐也本司别有赏赉军心赖一言而定人服其机警嘉定十年金兵侵襄阳围枣阳时边烽久熄金兵猝至人情震惧方帅范葵往战败走之十三年方遣葵及都统扈再兴攻金至高头高头金人必守之处也出劲兵拒战葵率先锋奋击再兴继进歼之翼日进次邓州金人阻泚河以拒葵麾军进击杨义诸将继至金兵亦大出合战大破之俘斩及降者几二万获万户而下十数人夺马八百逐北直傅城下而还十四年金人侵蕲州葵与范攻唐邓方命之曰不克敌无相见也三月丁亥至唐州薄城而陈金大将阿哈引兵出战葵帅精骑赴敌再兴从之大捷斩馘万余时金人陷蕲州者至天长数十骑出山椒葵帅杨大成以十四骑逐之金骑渐益至数百葵力战连破之而金步骑大集会范再兴军合战至夜分始解庚寅官军分二阵范将左再兴将右葵帅突骑左右策应金人背山亦分为二以相当而不先动范曰金人必复谋夜战以幸胜乃预备大鼓令军中闻迭鼓声始动若彼未至五十步内而辄动者斩未几金兵稍下山再兴遽冲之果为敌所乘遂逼范军范迭鼓麾军突鬪葵继进歼金兵数千敌并力向再兴葵率土豪祝文尉等以精骑横

冲之金人僵尸相属复相持至夜分金人虽敛而阵如
故范葵急会将校选死士数千黎明四面奋击呼声撼山谷金人走乘胜逐北斩首数千
级副都统投戈降拔所掠子女万余得輜重器械山积
补葵承务郎知枣阳军范授安抚司内机方卒十五年起复直秘阁通判庐州进大理司
直淮西安抚参议官十七年李全往青州淮东制置使
许国檄葵议兵葵至曰君侯欲图贼而坐贼弃中悔已无及惟有重帐前兵犹足制之尔
国曰兵不能集集不能精奈何曰请视两路兵别其精
锐君侯留三万帐前贼不敢动矣国曰不若集淮兵来阅而君董之既足示众亦可选锐
葵曰有兵之郡必当冲要守将岂可空壁以从制使命
耶必将力争于朝分留自卫一得朝命必匿其强壮遣老弱以备数本欲选锐适得其钝
本欲示众适示单弱徒启戎心国不听卒败宝庆元年
范知扬州乞调葵以强勇雄边军五千屯宝庆备贼葵在庐州数费私钱会诸将球射与
制置使曾式中不合葵去之言者以为擅遂奉祠三年
起为将作监丞绍定元年出知滁州二年全将入浙西告余实欲覘几甸也初全之献俘
也朝廷授以节钺葵策其必叛乃上书丞相史弥远曰
此贼若止于得粟尚不宜使轻至内地况包藏祸心不止告余若不痛抑其萌则自此肆
行无惮至滁以其地当贼冲又与金人对境实两淮门
户修城浚隍经武不少暇命秦喜守清平赵必胜守万山以壮形势葵母疾谒告省侍不
得割股杂药以寄之母卒葵求解官不许不得已卒哭
复视事全造舟益急葵复致书史弥远曰李全既破盐城反称陈知县自弃城盖欲欺朝
廷以款讨罪之师彼得一意修舟楫造器械窥伺城邑
或直浮海以捣腹心此其奸谋明若观火葵自闻盐城失守日夕延颈以俟制帅之设施
今乃闻遣王节入盐城祈哀于逆葵又闻遣二吏入山
阳请命于贼妇堂堂制阃如此举措岂不堕贼计貽笑天下又闻张国明前此出山阳已
知贼将举盐城之兵今若听国明言更从阔略则自此
人心解体万事涣散葵非欲张皇生事启衅李全决非忠臣非孝子丞相苟听葵之言翻
然改图发兵讨叛则岂独可以强国势安社稷葵父子
世受国恩亦庶几万一之报使丞相不听葵言不发兵讨贼则岂特不可以强国势安社
稷而葵亦不知死所不复可报君相之恩矣安危治乱
系朝廷之讨叛与不讨尔又言于朝曰葵父子兄弟世受国恩每见盗贼侵侮未尝不为
忠愤所激今大逆不道邈视朝廷负君相卵翼之恩无
如李全前此畔逆未彰犹可言也今已破荡城邑略无忌惮若更从隐忍则将何以为国
欲望特发刚断明其为贼即日命将遣师水陆并进诛
锄此逆以安社稷以保生灵葵虽不才愿身许朝廷如或不然乞将葵早赐处分以安边

鄙以便国事弥远犹未欲兴讨参知政事郑清之赞决
之乃加葵直宝章阁淮东提点刑狱兼知滁州范刻日约葵葵帅雄胜盩淮武定强勇步
骑万四千命王鉴扈斌胡显等将之以葵兼参议官显
颖之兄也拳力绝人方在襄阳每出师必使显及葵各领精锐分兵赴战摧坚陷阵聚散
离合前无劲敌以功至检校太尉已而全攻扬州东门
葵亲出搏战贼将张友呼城门请葵出及出全在隔濠立马相劳苦左右欲射全葵止之
问全来何为全曰朝廷动见猜疑今复绝我粮饷我非
背叛索钱粮耳葵曰朝廷资汝钱粮宠汝官职待汝以忠臣孝子而乃反戈攻陷城邑朝
廷安得不绝汝钱粮汝云非叛欺人乎欺天乎切责之
言甚多全无以对弯弓抽矢向葵而去于是数战皆捷四年正月壬寅遂杀全 【伏读通
鉴辑览 御批李全屡作不靖戕害朝臣叛迹久
已彰着且既降蒙古即非宋臣授以节镇已为失策及予而不受更非爵禄可饵而其不
臣之迹弥复显然尚安得为恭顺乃为其外饰之貌所
愚遣饷不绝转冀少宽北顾之忧宋室君臣何蒙懵乃尔赍盗粮而煽贼锋军士几因解
体使非赵范赵葵力主进攻淮乱其何能已乎】 事见
全传进葵福州观察使骁骑上将军葵辞不受召封枢密院稟议受宝章阁待制枢密副
都承旨依旧职仍落起复寻进兵部侍郎六年诏授淮
东制置使兼知扬州入对帝曰卿父子兄弟宣力甚多卿在行阵又能率先士卒捐身报
国此尤儒臣之所难朕甚嘉之葵顿首谢曰臣不佞忠
孝之义尝奉教于君子世受国恩当捐躯以报陛下端平元年朝议收复三京葵上疏请
出战乃授权兵部尚书京河制置使知应天府南京留
守兼淮东制置使时盛暑行师汴堤破决水潦泛溢粮运不继所复州郡皆空城无兵食
可因未几北兵南下渡河发水闸兵多溺死遂溃而范
上表劾葵诏与全子才各降一秩授兵部侍郎淮东制置使移司泗州嘉熙元年以宝章
阁学士知扬州依旧制置使二年以应援安丰捷奏拜
刑部尚书端明殿学士特予执政恩例复兼本路屯田使葵前后留扬八年垦田治兵边
备益饬淳佑二年进大学士知潭州湖南安抚使改福
州三年葬其母乞追服终制不允葵上疏曰移忠为孝臣子之通谊教孝求忠君父之至
仁忠孝一原并行不悖臣不佞戒谨持循惟恐失坠往
岁叨当事任服在戎行偕同气以率先冒万死而不顾捐躯戡难效命守封是以孝事君
之义也陛下昭示显扬优崇宠数使为人子者感恩为
人亲者知劝矣臣昨于草土被命起家勉从权制今释位去官已追服居庐乞从彝制又
不许再上疏命提举洞霄宫不拜淳佑四年授同知枢
密院事疏奏今天下之事其大者有几天下之才其可用者有几从其大者而讲明之疏

其可用者而任使之有勇略者治兵有心计者治财宽
厚者任牧养刚正者持风宪为官择人不为人而择官用之既当任之既久然后可以责
其成效又乞亟与宰臣讲求规画凡有关于宗社安危
治乱之大计者条具以闻审其所先后缓急以图筹策则治功可成外患不足畏又乞剏
游击军三万人以防江诏从之拜知枢密院事兼参知
政事又特授枢密使兼知政事督视江淮京西湖北军马封长沙郡公寻知建康府行宫
留守江东安抚使九年特授光禄大夫右丞相兼枢密
使封信国公四上表力辞言者以宰相须用读书人罢为观文殿学士充醴泉观使兼侍
读仍奉朝请寻判潭州湖南安抚使加特进宝佑二年
宣抚广西三年改镇荆湖城荆门及郢州改授湖南路安抚使判潭州再辞依旧职醴泉
观使五年进少保盩厔军节度使进封魏国公醴泉观
使四辞免开庆元年判庆元府沿海制置使寻授沿江江东宣抚使又授江东西宣抚使
节制调遣饶信袁临江抚吉隆兴官军民兵访问百姓
疾苦罢行黜陟并许便宜从事景定元年授两淮宣抚使判扬州进封鲁国公寻奉祠咸
淳元年加少傅二年乞致仕特授少师武安军节度使
进封冀国公舟次小孤山卒年八十一是夕五洲星陨如箕赠太傅谥忠靖

赵范

赵范

范字武仲少从父军中嘉定十三年尝与弟葵斫金人于高头十四年出师唐邓范
与葵监军孟宗政时知枣阳惮于供亿使人问曰金人
在蕲黄而君攻唐邓何也范曰不然彻襄阳之备以救蕲黄则唐邓必将蹶吾后且蕲黄
之寇正锐曷若先捣唐邓以示有余唐邓应我之不暇
则吾圉不守而自固敌在蕲黄师日以老然后回师蹙之可胜敌而无后患又败金人于
天长与弟葵俱授制置安抚司内机事具葵传十五年
丁父忧起复直秘阁通判扬州十六年为军器监丞以直秘阁知光州十七年入为知大
宗正丞刑部侍郎试将作监兼权知镇江府进直徽猷
阁知扬州淮东安抚副使刘全王文信二军老幼留扬州范欲修军政惧其徒漏泄兵机
乃时馈劳二家既大喜范即遣徐晞稷书令教二人挈
家归楚二人从之范厚赉以遣有孙海者其众亦八百范并请抽还楚州又请剏马军三
千招游手之强壮者及籍牢城重役人充之别籍民为
半年兵春夏在田秋冬教阅官免建砮而私不废农彭义斌使统领张士显见范请合谋
讨李全范告于制置使赵善湘曰以义斌蹙全如山压
卵然必请而后讨者知有朝廷也失此不右而右凶徒则权纲解纽矣万一义斌无朝命
而成大勋是又唐藩镇之事非计之得也莫若移扬州

增戍之兵往盱眙而四总管兵各留半以备金人余皆起发挥一能将统之命葵摘淮西精锐万人与会于楚州出许浦海道五十艘入淮以断贼归路密约义斌自北攻之事无不济四总管权位相侔刘瑄虽能得其欢心而不能制其死命如用瑄须令亲履行阵指踪四人不可止坐筹帷幄也不报范又曰国家讨贼则自此中兴否则自此不振若朝廷不欲张皇则范乃提刑职在捕盗但令范以本路兵措置楚州盐贼范当调时青张惠两军之半及其船数百径薄楚城以遏贼路调夏全范成进之半据涟海而守之又移扬州之戍以戍盱眙然后亲提精锐雄胜强勇等就时青于城外示贼以形势谕贼以祸福贼必自降若犹拒守则南北军民杂处必有内应者矣别约义斌攻之于北山阳下则进驻涟海以应之抚归附家属以离其党不出半月此贼必亡若是则不调许浦水军但得赵葵三千人亦足矣若朝廷惮费则全有豫买军需钱二十万在真州且涟楚积聚多自足用丞相史弥远报范书令谕四总管各享安靖之福范所遣计议官闻之曰但恐祸根转深不能安靖尔各挥涕归会全且至范又献计曰抚机不发事已无及今逆全不得志义斌而复虑四总管应之归据旧巢其谋必急然蹙之于丧败之余者易图之于休息之后者难矧事机既变局面不同若庙算果定不欲出教令但得密赐指授范一切伏藏不动只约义斌使自彼攻其所必救则机会在我而前日之策可用矣还报戒范无出位专兵范乃为书谢庙堂决之曰今上自一人下至公卿百执事又下至士民军吏无不知祸贼之必反虽先生之心亦自知其必反也众人知之则言之先生知而独不言不言诚是也内无卧薪尝胆之志外无战胜攻取之备先生隐忍不言而徐思所以制之此庙谟所以为高也然以抚定责之晞稷而以镇守责之范责晞稷者函人之事也责范者矢人之事也既责范以惟恐不伤人之事又禁其为伤人之痛恶其为伤人之言何哉其祸贼见范为备则必忌而不得以肆其奸他日必将指范为首祸激变之人劫朝廷以去范先生始未之信也左右曰可卿大夫曰可先生必将曰是何惜一赵范而不以纾祸哉必将缚范以授贼而范遂为宋晁错虽然使以范授贼果足以纾国祸范死何害哉欲望矜怜别与闲慢差遣弥远得书为之动心二年春奉祠二年知安庆府未行改知池州继兼江东提举常平弥远访将材于葵以范对进范直敷文阁淮东提点刑狱兼知滁州范曰弟而荐兄不顺以母老辞乃上书弥远曰淮东之事日异日新然有淮则有江无淮则长江以北港汊芦苇之处敌人皆可潜师以济江面数千里何从而防哉今或谓巽辞厚惠可以陷贼而不知陷彼款兵之计或谓敛兵退屯可

以缓贼而不知成彼深入之谋或欲行清野以婴城或欲聚乌合而浪战或以贼词之乍顺乍逆而为喜惧或以贼兵之乍进乍退而为宽紧皆失策也失策则失淮失淮则失江而其失有不可胜讳者矣夫有遏寇之兵有游击之兵有讨贼之兵今宝应之逼山阳天长之逼盱眙须各增戍兵万人遣良将统之贼来则坚壁以挫其锋不来则耀武以压其境而又观衅伺隙时遣偏师掩其不备以示敢战使虽欲深入而畏吾之捣其虚此遏寇之兵也盱眙之寇素无储蓄金人亦无以养之不过分兵掳掠而食当量分精兵授以勇校募土豪出奇设伏以剿杀之此游击之兵也维扬金陵合肥各聚二三万人人物必精将校必勇器械必利教阅必熟纪律必严赏罚必公其心术念虑必人人思亲其上而死其长信能行此半年而可以强国一年而可以讨贼矣贼既不能深入掳掠复无所获而又怀见讨之恐则必反而求贍于金人无余力及此则必怨之怒之吾于是可以嫁祸于金人矣或谓扬州不可屯重兵恐连敌祸是不然扬州者国之北门一以统淮一以蔽江一以守运河岂可无备哉善守者敌不知所攻今若设宝应天长二屯以扼其冲复重二三帅阍以张吾势敌将不知所攻而敢犯我扬州哉朝廷乃召范稟议复令知池州绍定元年试将作监知镇江府三年丁母忧求解官不许起复直徽猷阁淮东安抚副使寻转右文殿修撰赐章服金带不得已卒哭复视事又为书告庙堂请罢调停之议一请檄沿江制置司调王明本军驻泰兴港以扼泰州下江之快捷方式一请檄射阳湖人为兵屯其半高邮以制贼后屯其半瓜州以扼贼前一请速调淮西兵合滁阳六合诸军围救江面朝旨乃许范刺射阳湖兵毋过二万人就听节制范又遗善湘书曰今日与宗社同休戚者在内惟丞相在外惟制使与范及范弟葵耳贼若得志此四家必无存理于是讨贼之谋遂决遂戮全进范兵部侍郎淮东安抚使兼知扬州兼江淮制置司参谋官以次复淮东加吏部侍郎进工部尚书沿江制置副使权移司兼知黄州寻兼淮西制置副使未几为两淮制置使节制巡边军马仍兼沿江制置副使又进端明殿学士京河关陕宣抚使知开封府东京留守兼江淮制置使入洛之师大溃乃授江湖安抚制置使兼知襄阳府范至则倚王旻樊文彬李伯渊黄国弼数人为腹心朝夕酣狎了无上下之序民讼边防一切废弛属南北军将交争范失于抚御于是北军王旻内叛李伯渊继之焚襄阳北去南军大将李虎不救焚不定变乃因之劫掠城中官民尚四万七十有奇钱粮在仓库者无虑三十万弓矢器械二十有四库皆为敌有盖自岳飞收复百三十年生聚繁庶城高池深甲于西陲一旦灰烬祸至惨也言者劾范

降三官落职依旧制置使寻奉祠以言罢论者未已再降两官送建宁府居住嘉熙三年叙复官职与宫观四年知静江府后卒于家

△谢方叔

谢方叔字德方威州人嘉定十六年进士历官监察御史疏奏秉刚德以回上帝之心奋威断以回天下之势或者犹恐前习便嬖之人有以私陛下之听而悦陛下之心则前日之畏者怠忧者喜虑者玩矣左右前后之人进忧危恐惧之言者是纳忠于上也进燕安逸乐之言者是不忠于上也凡有水旱盗贼之奏者必忠臣也有谄谀蒙蔽之言者必佞臣也陛下享玉食珍羞之奉当思两淮流莩转壑之可矜闻管弦钟鼓之声当思西蜀白骨如山之可念又言崇俭德以契天理储人才以供天职恢远略以需天讨行仁政以答天意帝悦差知衡州除宗正少卿又除太常少卿兼国史编修实录检讨时刘汉弼杜范徐元杰相继死方叔言元杰之死陛下既为命官鞫狱立赏捕奸罪人未得忠冤未伸陛下苟不始终主持将恐纪纲扫地而国无以为国矣迁殿中侍御史进对言操存本于方寸治乱系于天下人主宅于法宫蠖濩之邃朝夕亲近者左右近习承意伺旨之徒往往觇上之所好不过保恩宠希货利而已而冥冥之中或有游扬之说潜伏而莫之觉防微杜渐实以是心主之又言今日为两淮谋者有五一日明闲谍二曰修马政三曰营山水砦四曰经理近城之方田五曰加重遏绝游骑及救夺掳掠之赏罚请行限田请录朱熹门人胡安定吕焘蔡模诏皆从之权刑部侍郎兼权给事中升兼侍讲正授刑部侍郎权国史编修实录检讨拜端明殿学士签书枢密院事参知政事淳佑九年拜参知政事封永康郡侯十一年特授知枢密院事兼参知政事寻拜左丞相兼枢密使进封惠国公劝帝以爱身育德属监察御史洪天锡论宦者卢允升董宋臣疏留中不下大宗正寺丞赵崇璠移书方叔云阉寺骄恣特甚宰执不闻正救台谏不敢谁何一新入孤立之察官乃锐意出身攻之此岂易得哉侧耳数日寂无所闻公议不责备他人责备宰相不然仓卒出御笔某人授少卿亦必无可遏之理矣丞相不可谓非我责也丞相得君最深名位已极傥言之胜宗社赖之言之不胜则去去则诸君必不容不争是胜亦胜负亦胜况未必去耶方叔得书有赭色翼日果得御笔授天锡大理少卿而天锡去国于是太学生池元坚太常寺丞赵崇洁左史李昉英皆论击允升宋臣而谗者又曰天锡之论方叔急也及天锡之去亦曰方叔意也方叔上疏自解于是监察御史朱应元论方叔罢相既罢允升宋臣犹以为未快厚赂太学生林自养上书力诋天锡方叔且曰乞诛方叔使天下明知宰相台谏之去出

自独断于内侍初无预焉书既上学舍恶自养党奸相
与鸣鼓攻之上书以声其罪授方叔观文殿大学士提举洞霄宫复以监察御史李衢两
劾褫职罢祠后依旧职与祠起居郎召泽中书舍人李
存劾罢监察御史章士元请更与降削窜广南景定二年请致仕乃叙复官职度宗即位
方叔以一琴一鹤金丹一粒来进丞相贾似道恐其希
望讽权右司郎官卢越左司谏赵顺孙给事中冯梦得右正言黄镛相继请夺方叔官职
封爵制置使吕文德愿以己官赎其罪咸淳七年诏叙
复致仕八年卒特赠少师方叔在相位子弟干政若谗余玠之类是也

钦定续通志卷四百八

●钦定续通志卷四百九 列传二百九

列传

宋 【一百十三】

○宋一百十三

吴潜 程元凤 江万里 王爚 章鉴 陈宜中

文天祥

吴潜

程元凤

江万里

王爚

章鉴

陈宜中

文天祥

△吴潜

吴潜字毅夫宣州宁国人秘阁修撰柔胜之季子嘉定十年进士第一授承事郎签
镇东军节度判官改签广德军判官丁父忧服除授秘
书省正字迁校书郎添差通判嘉兴府权发遣嘉兴府事转朝散郎尚书金部员外郎绍
定四年迁尚右郎官都城大火潜上疏论致灾之由愿
陛下齐戒修省恐惧对越阍臣之窃弄威福者勿亲女宠之根萌祸患者勿昵以暗室屋
漏为尊严之区以恒舞酣歌为乱亡之宅庶几天意可
回天灾可息又言重地要区当豫畜人才以备患又贻书丞相史弥远论事一曰格君心
二曰节奉给三曰賑恤都民四曰用老成廉洁之人五
曰用良将以御外患六曰革吏弊以新治道授直宝章阁改吏部员外郎迁太府少卿淮
西总领又告执政论用兵复河南不可轻易兵事一开
调度寢广百姓狼狽何所取资自后兴师入洛溃败死亡潜之言率验迁太府卿兼权沿

江制置知建康府江东安抚留守上疏论保蜀之方护
襄之策防襄之算备海之宜进取有甚难者三事端平元年诏求直言潜所陈九事一曰
顾天命以新立国之意二曰植国本以广传家之庆三
曰笃人伦以为纲常之宗主四曰正学术以还斯文之气脉五曰广畜人才以待乏绝六
曰实恤民力以致宽舒七曰边事当鉴前辙以图新功
八曰楮币当权新制以解后忧九曰贼盗当探祸端而图要策以直论忤时相罢奉千秋
鸿禧祠改秘阁修撰权江西转运副使兼知隆兴府主
管江西安抚司擢太常少卿奏造斛斗输诸郡租宽恤人户培植根本凡十五事进右文
殿修撰集英殿修撰枢密都承旨督府参谋官兼知太
平州五辞不允又言和战成败大计宜急救襄阳等事贻书执政论京西既失当招收京
淮丁壮为精兵以保江西权工部侍郎知江州辞不赴
请养宗子以系国本以镇人心改权兵部侍郎兼检正论士大夫私意之弊以为襄汉溃
决兴沔破亡两淮俶扰三川陷没欲望陛下念大业将
倾士习已坏以静专察郡情以刚明消众慝警于有位各励至公毋以术数相高而以事
功相勉毋以阴谋相讐而以识见相先协谋并智戮力
一心则危者尚可安而衰证尚可起也又请分路取士以收淮襄之人物试工部侍郎知
庆元府兼沿海制置使改知平江府条具财计雕敝本
末以宽郡民与转运使王埜争论利害授宝谟阁待制提举太平兴国宫改玉隆万寿宫
试户部侍郎淮东总领兼知镇江府言边储防御等十
有五事改宝谟阁直学士权兵部尚书浙西制置使申谕防拓江海团结措置等事进工
部尚书改吏部尚书兼知临安府乃论艰屯塞困之时
非反身修德无以求亨通之理乞遴选近族以系人望而俟太子之生帝嘉纳以台臣徐
荣叟论列提举南京鸿庆宫遂请致仕母忧服除转中
大夫试兵部尚书改端明殿学士签书枢密院事进封金陵郡侯以亢旱乞罢免改资政
殿学士提举洞霄宫改知福州兼本路安抚使徙知绍
兴府浙东安抚使召同知枢密院兼参知政事入对言国家之不能无弊犹人之不能无
病愿陛下笃任元老为医师博采众益为医工使臣辈
得效牛溲马勃之助不辱陛下知人之明淳佑十一年入为参知政事拜右丞相兼枢密
使明年以水灾乞解机政以观文殿大学士提举洞霄
宫又四年授沿海制置大使判庆元府至官条具军民久远之计告于政府奏皆行之以
久任勾祠且累章乞归田里进封庆国公判盩厔府还
家以醴泉观使兼侍读召入对论畏天命结民心进贤才通下情帝嘉纳拜特进左丞相
进封庆国公奏乞令在朝之臣各陈所见以决处置之
宜改封许国公元兵渡江攻鄂州别将由大理下交址破广西湖南诸郡潜奏今鄂渚被

兵湖南扰动推原祸根良由近年奸臣儉士设为虚议
迷国误军其祸一二年愈酷附和逢迎媵阿陷媚积至于大不靖臣年将七十捐躯致命
所不敢辞所深痛者臣交任之日上流之兵已踰黄汉
广右之兵已蹈宾柳谓臣坏天下之事亦可哀已又论国家安危治乱之原盖自近年公
道晦蚀私意横流仁贤空虚名节丧败忠嘉绝响谀佞
成风天怒人怨稔成兵戈之祸积为宗社之忧章鉴高铸尝与丁大全同官倾心附丽躐
跻要途萧泰来等羣小噂沓国事日非浸淫至于今日
陛下毋使小人翕聚以貽善类之祸沈炎实赵与■之腹心爪牙而任台臣甘为之博击
奸党盘据血脉贯穿以欺陛下致危乱者皆此等小人
为之又乞令大全致仕炎等与祠高铸羈管州军不报属将立度宗为太子潜密奏云臣
无弥远之材忠王无陛下之福帝怒潜卒以炎论劾落
职命下中书舍人洪芹缴还词头不报谪建昌军寻徙潮州责授化州团练使循州安置
潜预知死日语人曰吾将逝矣夜必雷风大作已而果
然四鼓开霁撰遗表作诗颂端坐而逝时景定三年五月也循人闻之咨嗟悲恻德佑元
年追复元官仍还执政恩数明年以太府卿柳岳请赠
谥特赠少师

△程元凤

程元凤字申甫徽州人绍定元年进士调江陵府教授端平元年差江西转运使干
办公事淳佑元年迁礼兵二部架阁父忧服阕迁宗学
博士以诗礼讲荣王府旁讽曲谕随时规正多所裨益王亦倾心敬听轮对极论世运剥
复之机及人主所当法天者理宗览之曰有古遗直风
六年进秘书丞兼权刑部郎官七年兼权右司郎官迁著作郎仍权右司郎官轮对指陈
时病尤激切当国者以为厉己勾外知饶州郡初罹水
灾元凤访民疾苦夙夜究心修城堞置义阡宽诛求察诬证进江淮荆浙福建广南都大
提点坑冶仍兼知饶州冶司岁有冬夏帐银悉举以补
郡积年诸税敛之不足者芝生治所众以治行之致元凤曰五谷熟则民蒙惠此不足异
也召奏事辞不允迁右曹郎官疏言实学实政国本人
才吏治生民财计兵威八事寻兼右司郎官拜监察御史丞相郑清之久专国柄老不任
事台官潘凯吴燧合章论列清之不满改迁之二人不
拜命去元凤上疏斥清之罪其言明白正大凯燧得召还有事于明堂元凤疏言祈天以
实不以文又言边备谓当申儆军实以起积玩之势及
言滥刑之弊十二年拜右正言兼侍讲以祖讳辞诏权以右补阙系衔余晦以从父天锡
恃恩妄作三学诸生伏阙上书白其罪状司业蔡抗又
力言之元凤数其罪劾之奏上以晦为大理少卿抗为宗正少卿元凤又上疏留抗而黜

晦以安士心乃命抗仍兼司业晦予郡升殿中侍御史
京城灾疏言辍土木无益之役以济暴露之民移缙流泛滥之恩以给颠沛之众务行宽大之政固结亿兆之心旁招俊乂而私昵无滥及之恩
屏去奸私而贪黷无覆出之患谨便嬖之防而不使之弄权抑恩泽之请而不至于无节
言多割切实佑元年兼侍读迁侍御史言法孝宗八事
荐名士二十余人进尚书吏部侍郎亟辞出关不允有事于南郊元凤为执绶官答问多
所开陈帝因欲幸西太乙宫力谏止之三年迁权工部
尚书力求补外特授端明殿学士同签书枢密院事签书枢密院事兼权参知政事进参
知政事寻进拜右丞相兼枢密使进封新安郡公力辞
御笔勉谕犹周回累曰而后治事疏奏正心待臣进贤爱民备边守法谨微审令八事高
孝光熹四朝国史未就奏转任尤焞领其事纂修成之
会丁大全谋夺相位凤力辞授观文殿大学士判福州福建安抚使又力辞依前职提举
洞霄宫开庆兵兴上手疏收人心重赏罚团结民兵
数事俄起判平江府兼淮浙发运使四上章乞免三年御笔趣行奏免修明局米五万石
拜特进依前职充醴泉观兼侍读度宗即位进少保咸
淳三年拜少傅右丞相兼枢密使进封吉国公以言罢依旧少保观文殿大学士醴泉观
使乞致仕不许四年罢观使以守少保观文殿大学士
致仕卒遗表闻特赠少师元凤之在政府也一契家子求贰令元凤谢之曰除授须由资
其人累请不许乃以先世为言元凤曰先公畴昔相荐
者以某粗知恬退故也今子所求躐次岂先大夫意哉矧以国家官爵报私恩某所不敢
有尝遭元凤论列者其后见其可用更荐拔之每曰前
日之弹劾成其才也今日之擢用尽其才也

△江万里

江万里字子远都昌人少神隽有锋颖连举于乡入太学有文声理宗在潜邸尝书
其姓名几研闲以舍选出身历池州教授沿江制置司
准备差遣两浙安抚司干办公事召试馆职累迁著作佐郎权尚左郎官知吉州创白鹭
洲书院兼提举江西常平茶盐召为屯田郎官未行迁
直秘阁江西转运判官兼权知隆兴府创宗濂书院迁考功郎官命旋寝久之以驾部郎
官召迁尚右兼侍讲史嵩之罢相拜监察御史仍兼侍
讲未几迁右正言殿中侍御史又迁侍御史未及拜万里器望清峻论议风采倾动一时
帝眷注尤厚尝勾祠省母疾不许属弟万顷奉母归南
康旋以母病闻万里不俟报弛归至祁门得讣而议者谓万里母死秘不奔丧反挟妾媵
自随于是侧目万里者相与腾谤万里无以自解坐是
闲废者十有二年后陆德舆尝辨其非辜于帝前贾似道宣抚两浙辟参谋官及似道同

知枢密院为京湖宣抚大使以万里带行宝章阁待制
为参谋官元兵围鄂似道以右丞兼枢密使移军汉阳万里迁刑部侍郎似道入相万里
迁权吏部尚书又拜端明殿学士同签书枢密院事随
以言者去官后以原职知建宁府兼权福建转运使已而加资政殿学士依旧职知福州
兼福建安抚使度宗即位召同知枢密院事又兼权参
知政事万里始虽俛仰容默为似道用然性峭直临事不能无言似道常恶其轻发故每
入不能久在位似道以去要君帝初即位呼为师相至
涕泣拜留之万里以身掖帝云自古无此君臣礼陛下不可拜似道不可复言去似道不
知所为下殿举笏谢万里曰微公似道几为千古罪人
然以此益忌之帝在讲筵每问经史疑义及古人姓名似道不能对万里常从旁代对时
王夫人颇知书帝语夫人以为笑似道闻之积惭怒谋
逐之万里四旬祠不候报出关加资政殿大学士知庆元府兼沿海制置使不拜予祠后
二年知太平州兼提领江淮茶盐兼江东转运使召拜
参知政事进封南康郡公既至拜左丞相兼枢密使勾祠加观文殿大学士知福州辞依
旧职提举洞霄宫又授知潭州湖南安抚大使加特进
寻予祠时咸淳九年万里年七十有六矣明年元兵渡江万里隐草野闲为游骑所执大
诟欲自戕既而脱归先是万里闻襄樊失守凿池芝山
后圃扁其亭曰止水人莫谕其意及闻警执门人陈伟器手曰大势不可支余虽不在位
当与国为存亡及饶州城破军士执万顷索金银不得
支解之万里竟赴止水死左右及子镐相继投沼中积尸如迭翼日万里尸独浮出水上
从者草敛之万里无子以蜀人王橐子为后即镐也事
闻赠太傅益国公后加赠太师谥文忠万顷历守大郡为提举江西常平茶盐官至正郎
城破时彬州守赵崇楹寓居城中亦死之

△王爚

王爚字仲潜一字伯晦绍兴新昌人登嘉定十三年进士第知常熟县绍定四年江
淮制置司辟通判泰州五年差知滁州端平元年知瑞
州熙嘉元年提辖左藏东西库兼提辖封桩下库二年迁籍田令兼督视干办公事淳佑
二年改监三省枢密院门乞免所居官诏从之四年再
任五年迁太府寺丞秘书丞户部郎官淮西总领主管右曹六年为尚书左司员外郎赐
对乞祠不许七年迁秘书少监以侍御史周坦言罢为
福建提点刑狱差知温州十年差知宁国府迁太府卿宝佑元年兼权兵部侍郎试司农
卿疏奏愿诏大臣相与忧乱而思治惧危而图安哀恫
警省修德行政摧抑羣阴之气焰保护微阳之根本使内治明如天日外治劲如风霆则
精神运动阳汇昭苏世道昌明物情熙洽上以迓续天

命于谴告之余下以固结人心于解纽之际其孰能御之以右文殿修撰提举太平兴国宫五年京湖宣抚大使赵葵辟为判官开庆元年召赴行在授集英殿修撰枢密都承旨权吏部侍郎景定元年为真侍郎兼太子左庶子极言正论太子听而说之帝闻之甚喜二年迁礼部尚书权吏部尚书加龙图阁学士知平江府淮浙发运使五年召赴行在进端明殿学士提举佑神观兼侍读召赴行在咸淳元年拜签书枢密院事同知枢密院事兼权参知政事二年以疾乞祠不许帝遣尚医视之复两乞归皆不许拜参知政事三年知枢密院事兼参知政事立皇太子加食邑三辞免官不许乞祠禄仍授资政殿学士知庆元府兼沿海制置使八年加观文殿学士提举万寿宫兼侍读诏遣刑部郎官董朴起之四上疏辞免始从之十年以燾为左丞相章鉴为右丞相并兼枢密使寻授燾特进加食邑乞致仕两乞辞免皆不许德佑元年两乞改命经筵又再乞以旧职奉京祠侍读皆不许右丞相章鉴参知政事陈宜中奏谕留燾以镇人心以康世道从之燾两请毋署省院公榷不许又奏乞将臣先赐罢斥臣本志誓死报国愿假臣以宣抚招讨等职臣当招募忠义共图兴复鉴宜中又奏燾单车绝江已至萧山乞遣中使趣还治事乃授观文殿大学士浙西江东路宣抚招讨大使置司在京以备咨访乞解大使职名不许进少保左丞相兼枢密使寻加都督诸路军马累辞皆不许奏言今天下所以大坏至此者正以一私蟠塞赏罚无章故也救之之策在反其所以坏之之由大明赏罚动合乎天庶几人心兴起天下事尚可为也因言贾似道误国丧师之罪于是始降诏切责似道不忠不孝六月庚子朔日食燾奏日食不尽仅一分白昼晦冥者数刻阴盛阳微灾异未有大于此者臣待罪首相上佐天子理阴阳下遂万物外镇诸侯皆其职也氛祲充塞而未能消生民涂炭而未能拯反复思之咎实在臣乞罢黜以答天谴答诏不许第降授金紫光禄大夫而已辞降官乞罢斥又不许寻进平章军国重事辞不许或请出宜中或梦炎出督吴门否则臣虽老无能为若效死封疆亦不敢辞诏三省集议乞罢平章事不许京学生上书诋宜中宜中亦上疏乞骸骨初宜中在相位政事多不关白燾或谓京学之论实燾喉之诏燾与宜中必难共处兼燾近奏乞免平章侍经筵辞气不平遂罢燾平章依前少保特授观文殿大学士充醴泉观使燾为人清修刚劲似道归天台葬母过新昌燾独不见之后以元老入相位值国势危亡之际天下所属望也而卒与宜中不协而去云

△章鉴

章鉴字公秉分甯人以别院省试及第累官中书舍人侍左郎官崇政殿说书进签

书枢密院事兼权参知政事迁同知枢密院事咸淳十年王爚拜左丞相鉴拜右丞相并兼枢密使明年元兵逼临安鉴托故径去遣使亟召还朝既至罢相予祠殿帅韩震之死鉴与曾渊子明震无他至是御史王应麟缴其录黄谓震有逆谋鉴与渊子曲庇之坐是削一官放归田里后有告鉴家匿宝玺者霜晨鉴方拥败衾卧兵士至大索其室惟敝篋贮一玉杯余无一物人颇叹其清约鉴在朝日号宽厚然与人多许可士大夫目为满朝欢云

△陈宜中

陈宜中字与权永嘉人也少甚贫而性特俊拔有贾人推其生时以为当大贵以女妻之既入太学有文誉宝佑中丁大全以戚里婢壻事权幸卢允升董宋臣因得宠于理宗擢为殿中侍御史在台横甚宜中与黄镛刘黻林则祖陈宗曾唯六人上书攻之大全怒使监察御史吴衍劾宜中削其籍拘管他州司业率十二斋生冠带送之桥门之外由是士论翕然称之号为六君子【按癸辛杂识载宜中丢六人以甲辰岁史嵩之起复上书时人号为六君子与宋史本传异附识】宜中谪建昌军大全既窜丞相吴潜奏还之贾似道入相复为之请有诏六人皆免省试令赴景定三年廷试而宜中中第二人六人中宜中尤达时务由绍兴府推官数年迁监察御史程元凤再相似道恐其侵权欲去之宜中首劾元凤纵丁大全肆恶基宗社之祸命格除太府卿宜中亦自请外为江东提举茶盐常平公事咸淳四年改浙西提刑五年召为崇政殿说书累迁礼部侍郎兼中书舍人七年闽阙帅以华文阁待制知福州在官得民心岁余入为刑部尚书十年拜签书枢密院事兼权参知政事德佑元年升同知枢密院事二月似道丧师芜湖乃以宜中知枢密院兼参知政事已而翁应龙自军中归宜中问似道所在应龙以不知对宜中以为似道已死即上疏乞正似道误国之罪似道行时以所亲信韩震总禁兵人有言震欲以兵劫迁者宜中召震计事伏壮士袖铁椎击杀之以示不党于似道【按癸辛杂识载德佑元年正月似道出师临行与殿帅韩震京尹曾渊子约曰或江上师有蹉跌即邀车驾航海且留二子于震家及师溃鲁港口似道以蜡书趣韩宜中本为似道所引至是一反贾政召震会议差天府增级顾信等数人拟之及至击杀之后北军入宜中乃挟二王航海去附识】时右丞相章鉴宵遁曾渊子等请命宜中摄丞相事诏以王爚为左丞相拜宜中特进右丞相四月爚还朝论事即与宜中不合台臣孙嵘叟请窜籍潜说友吴益李珣宜中以为簿录非盛世事祖宗忠厚未尝轻用之珣方召入朝遽加重刑恐后无以示

信燾力争以为当如嵘叟议会留梦炎自湖南入朝燾与宜中俱乞罢政请以梦炎为相太皇太后乃以宜中为左丞相梦炎为右丞相燾进平章军国重事燾拜命即日僦民居以丞相府让宜中宜中上疏以为一辞一受何以解天下之讥亦去遣使数辈遮留之始至时命张世杰等四道进师二丞相都督军马而不出督燾请以一丞相建阊吴门以护诸将不然则已请行宜中媿始与梦炎上疏乞行边事下公卿议不决七月世杰等兵果败于焦山燾奏言事无重于兵今二相并建都督庙算指授臣不得而知比者六月出师诸将无统臣岂不知吴门距京不远而必为此请者盖大敌在境非陛下自将则大臣开督今世杰以诸将心力不一而败不知国家尚堪几败邪臣既不得其职又不得其言乞罢免不允燾子乃熉京学生伏阙上书数宜中过失数十事其略以为赵潜与章鉴皆弃城遁宜中乃借使过之说以报私恩令狐榘潜说友皆以城降乃受其包苴而为之羽翼文天祥率兵勤王信谗而沮挠之似道丧师误国阳请致罚而阴佑之敌兵薄国门勤王师乃留之京城而不遣宰相当出督而畏缩犹豫第令集议而不行吕师夔狼子野心而使之通好乞盟张世杰步兵而用之于水刘师勇水兵而用之于步指授失宜因以败事臣恐误国将不止于一似道也书上宜中竟去遣使召之不至其后罢燾命临安府捕逮京学生召之亦不至太皇太后自为书遗其母杨使勉谕之宜中始乞以祠官入侍乃拜醴泉观使十月壬寅始造朝寻为右丞相然事已去矣宜中仓皇发京城民为兵民年十五以上者皆籍之人皆以为笑十一月遣张全合尹玉麻士龙兵援常州玉与士龙皆战死全不发一矢奔还文天祥请诛全宜中释不问已而常州破兵薄独松关邻邑望风皆遁宜中遣使如军中请和不得即率羣臣入宫请迁都太皇太后不可宜中痛哭请之太皇太后乃命装俟升车给百官路费银及暮宜中不入太皇太后怒曰吾初不欲迁而大臣数以为请顾欺我邪脱簪珥掷之地遂闭阁羣臣求内引皆不纳盖宜中实以明日迁仓卒奏陈失审耳宜中初与元丞相巴延期会军中既而悔之不果往巴延将兵至皋亭山宜中宵遁陆秀夫奉二王入温州遣人召宜中宜中至温州而其母死张世杰舁其棺舟中遂与俱入闽中益王立复以为左丞相井澳之败宜中欲奉王走占城乃先如占城谕意度事不可为遂不反二王累使召之终不至至元十九年元军伐占城宜中走暹后没于暹宜中为人多术数少为县学生其父为吏受赃当黜宜中上书温守魏克愚请贷之克愚以为黜吏卒寘之法其后宜中为浙西提刑克愚郊迎宜中报礼不书衔亦云部下民陈某克愚惶恐不敢受袖而谢之宜中

阳礼之而阴摭其过无所得其后克愚发贾德生冒借官木事忤似道废罢家居宜中入乃极言克愚居乡不法事似道令章鉴劾之贬严州克愚之死宜中挤之为多

△文天祥

文天祥字宋瑞又字履善吉之吉水人也体貌丰伟美皙如玉秀眉而长目顾盼炯然自为童子时见学宫所祠乡先生欧阳修杨邦乂胡铨像皆溢忠即欣然慕之曰没不俎豆其闲非夫也年二十举进士对策集英殿时理宗在位久政理寢怠天祥以法天不息为对其言万余不为藁一挥而成帝亲拔为第一考官王应麟奏曰是卷古谊若龟鉴忠肝如铁石臣敢为得人贺寻丁父忧归开庆初元兵伐宋宦官董宋臣说帝迁都人莫敢议其非天祥时入为盩海军节度判官上书乞斩宋臣以一人心【御批南渡僻处临安形势已失四明尤濒海小郡高宗播迁至此几不能以自存前车可鉴开庆疆圉日蹙国事更非理宗祇应博访盈庭息浮议以励战守乃董宋臣忽倡退避之谋何子举复主固守之策此南宋安危之关键而议迁议阻皆出自寺人之口可见举朝皆庸闇懦怯之流无一人实心为国者然宋室时势至此已无可为亦不系都之迁与不迁矣】不报即自免归后稍迁至刑部郎官宋臣复入为都知天祥又上书极言其罪亦不报出守瑞州改江西提刑迁尚书左司郎官累为台臣论罢除军器监兼权直学士院贾似道称病乞致仕以要君有诏不允天祥当制语皆讽似道时内制相承皆呈藁天祥不呈藁似道不乐使台臣张志立劾罢之天祥既数斥援钱若水例致仕时年三十七咸淳九年起为湖南提刑因见故相江万里万里素奇天祥志节语及国事愀然曰吾老矣观天时人事当有变吾阅人多矣世道之责其在君乎君其勉之十年改知赣州德佑初江上报急诏天下勤王天祥捧诏涕泣使陈继周发郡中豪杰并结溪峒蛮使方兴召吉州兵诸豪杰皆应有众万人事闻以江西提刑安抚使召入卫其友止之曰今敌兵三道鼓行破郊畿薄内地君以乌合万余赴之是何异驱羣羊而搏猛虎天祥曰吾亦知其然也第国家养育臣庶三百余年一旦有急征天下兵无一人一骑入关者吾深恨于此故不自量力而以身徇之庶天下忠臣义士将有闻风而起者义胜者谋立人众者功济如此则社稷犹可保也天祥性豪华平生自奉甚厚至是尽以家赀为军费每与宾佐语及时事辄流涕抚几言曰乐人之乐者忧人之忧食人之食者死人之事八月天祥提兵至临安除知平江府时以丞相陈宜中未还朝不遣十月宜中至始遣之朝议方擢吕师孟为兵部尚书封吕文德和义郡

王【伏读通鉴辑览 御批吕文焕丧心负国反面事敌不加以门诛已属宽典况危急之际怀去就者正多尤当明诛赏以就激励乃于叛臣族属不惟不申刑宪转重予褒崇将何以警乱贼之心而作忠义之气且文焕既已降元不复萦情故国又岂区区王爵足以其心者宋廷举措若此所见何异孩稚】欲赖以好师孟益偃蹇自肆天祥陛辞上疏言朝廷姑息牵制之意多奋发刚断之义少乞斩师孟衅鼓以作将士之气且言宋愆五季之乱削藩镇建郡邑一时虽足以矫尾大之弊然国亦以寢弱敌至一州则破一州至一县则破一县中原陆沈痛悔何及今宜分天下为四镇建都督统御于其中以广西益湖南而建阊于长沙以广东益江西而建阊于隆兴以福建益江东而建阊于鄱阳以淮西益淮东而建阊于扬州责长沙取鄂隆兴取蕲黄鄱阳取江东扬州取两淮使其地大力众足以抗敌约日齐奋有进无退日夜以图之彼备多力分疲于奔命而吾民之豪杰者又伺闲出于其中如此则敌不难却也时议以天祥论阔远书奏不报十月天祥入平江元兵已发金陵入常州矣天祥遣其将朱华尹玉麻士龙与张全援常至虞桥士龙战死朱华以广军战五牧败绩玉军亦败争渡水挽全军舟全军断其指皆溺死玉以残兵五百人夜战比旦皆没全不发一矢走归元兵破常州入独松关宜中梦炎召天祥弃平江守余杭明年正月除知临安府未几宋降宜中世杰皆去仍除天祥枢密使寻除右丞相兼枢密使如军中讲和与大元丞相巴廷抗论皋亭山丞相怒拘之偕左丞相吴坚右丞相贾余庆知枢密院事谢堂签书枢密院事家铉翁同签书枢密院事刘岷北至镇江天祥与其客杜浒十二人夜亡入真州苗再成出迎喜且泣曰两淮兵足以兴复特二阊小隙不能合从耳天祥问计将安出再成曰今先约淮西兵趋建康彼必悉力以扞吾西兵指挥东诸将以通泰兵攻湾头以高邮宝应淮安兵攻杨子桥以扬兵攻瓜步吾以舟师直捣镇江同日大举湾头杨子桥皆沿江脆兵且日夜望我师之至攻之即下合攻瓜步之三面吾自江中一面薄之虽有智者不能为之谋矣瓜步既举以东兵入京口西兵入金陵要浙归路其大帅可坐致也天祥大称善即以书遗二制置遣使四出约结天祥未至时扬有脱归兵言密遣一丞相入真州说降矣庭芝信之以为天祥来说降也使再成亟杀之再成不忍给天祥出相城垒以制司文示之闭之门外久之复遣二路分覘天祥果说降者即杀之二路分与天祥语见其忠义亦不忍杀以兵二十人道之扬四鼓抵城下闻候门者谈制置司下令捕文丞相甚急众相顾吐舌乃东入海道遇兵伏环堵中得免然亦饥莫能起从樵者乞得

余糝羹行入板桥兵又至众走伏丛筱中兵入索之执杜浒金应而去虞候张庆矢中目身被二创天祥偶不见获浒应解所怀金与卒获免募二樵者以蕒荷天祥至高邮泛海至温州闻益王未立乃上表劝进以观文殿学士侍读召至福拜右丞相寻与宜中等议不合七月乃以同都督出江西遂行收兵入汀州十月遣参谋赵时赏咨议赵孟滌将一军取盩都参赞吴浚将一军取零都刘洙萧明哲陈子敬皆自江西起兵亦会邹■〈彳 夙〉以招谕副使聚兵盩都元兵攻之■〈彳 夙〉兵败同起事者刘钦鞠华叔颜斯立颜起岩皆死武冈教授罗开礼起兵复永丰县已而兵败被执死于狱天祥闻开礼死制服哭之哀至元十四年正月元兵入汀州天祥遂移漳州乞入卫时赏孟滌亦提兵归独浚兵不至未几浚降来说天祥天祥缚浚缢杀之四月入梅州都统王福钱汉英跋扈斩以徇五月出江西入会昌六月入兴国县七月遣参谋张汴监军赵时赏赵孟滌等盛兵薄赣城邹■〈彳 夙〉以赣诸县兵捣永丰其副黎贵达以吉诸县兵攻泰和吉八县复其半惟赣不下临洪诸郡皆送款潭赵璠张虎张唐熊桂刘斗元吴希奭陈子全王梦应起兵邵永闲复数县抚州何时等皆起兵应天祥分盩武军建昌三县豪杰皆遣人如军中受约束元江西宣慰使李恒遣兵援赣州而自将兵攻天祥于兴国天祥不意恒兵猝至乃引兵走即邹■〈彳 夙〉于永丰■〈彳 夙〉兵先溃恒穷追天祥方石岭巩信拒战箭被体死之至空坑军士皆溃天祥妻妾子女皆见执时赏坐肩輿后兵问谓谁时赏曰我姓文众以为天祥擒之而归天祥以此得逸去孙■〈𠂇， 欠代义〉上木下〉彭震龙张汴死于兵繆朝宗自缢死吴文炳林栋刘洙皆被执归隆兴时赏奋骂不屈有系累至者辄麾去云小小笠厅官耳执此何为由是得脱者甚众临刑洙颇自辩时赏叱曰死耳何必然于是栋文炳萧敬夫萧焘夫皆不免天祥收残兵奔循州驻南岭黎贵达潜谋降执而杀之至元十五年三月进屯丽江浦六月入船澳益王殂卫王继立天祥上表自劾乞入朝不许八月加天祥少保信国公军中疫且起兵士死者数百人天祥惟一子与其母皆死十一月进屯潮阳县潮州盗陈懿刘兴数叛附为潮人害天祥攻走懿执兴诛之十二月趋南岭邹■〈彳 夙〉刘子俊又自江西起兵来再攻懿党懿乃潜遁元帅张弘范兵济潮阳天祥方饭五坡岭张弘范兵突至众不及战皆顿首伏草莽天祥仓皇出走千户王惟义前执之天祥吞脑子不死邹■〈彳 夙〉自颈众扶入南岭死官属士卒得脱空坑者至是刘子俊陈龙复萧明哲萧资皆死杜浒被执以忧死惟赵孟滌遁张唐熊桂吴希奭陈子全兵败被获俱死焉

唐广汉张栻后也天祥至潮阳见弘范左右命之拜不拜弘范遂以客礼见之与俱入厓山使为书招张世杰天祥曰吾不能扞父母乃教人叛父母可乎索之固乃书所过零丁洋诗与之其末有云人生自古谁无死留取丹心照汗青弘范笑而置之厓山破军中置酒大会弘范曰国亡丞相忠孝尽矣能改心以事宋者事皇上将不失为宰相也天祥泫然出涕曰国亡不能救为人臣者死有余罪况敢逃其死而二其心乎弘范义之遣使护送天祥至京师天祥在道不食八日不死即复食至燕馆人供张甚盛天祥不寝处坐达旦遂移兵马司设卒以守之时元世祖多求才南官王绩翁言南人无如天祥者遂遣绩翁谕旨天祥曰国亡吾分一死矣倘缘宽假得以黄冠归故乡他日以方外备顾问可也若遽官之非直亡国之大夫不可与图存举其平生而尽弃之将焉用我绩翁欲合宋官谢昌元等十人请释天祥为道士留梦炎不可曰天祥出复号召江南置吾十人于何地事遂已天祥在燕凡三年世祖知天祥终不屈与宰相议释之有以天祥起兵江西事为言者不果释至元十九年有闽僧言土星犯帝坐疑有变未几中山有狂人自称宋主有兵千人欲取文丞相京城亦有匿名书言其日烧蓑城苇率两翼兵为文丞相可无忧者时盗新杀左丞相阿哈玛特命撤城苇迁瀛国公及宋宗室开平疑丞相者天祥也召入谕之曰汝何愿天祥对曰天祥受宋恩为宰相安事二姓愿赐之一死足矣然犹不忍遽麾之退言者力赞从天祥之请从之俄有诏使止之天祥死矣天祥临刑殊从容谓吏卒曰吾事毕矣南乡拜而死数日其妻欧阳氏收其尸面如生年四十七其衣带中有赞曰孔曰成仁孟曰取义惟其义尽所以仁至读圣贤书所学何事而今而后庶几无愧

钦定续通志卷四百九

●钦定续通志卷四百十 列传二百十

列传

宋 【一百十四】

○宋一百十四

宣缜	薛极	陈贵谊	曾从龙	郑性之	余天锡
许应龙	林略	徐荣叟	刘伯		

正 李性传 陈鞞 【崔福】

宣缜

薛极

陈贵谊

曾从龙

郑性之

余天锡

许应龙

林略

徐荣叟

刘伯正

李性传

陈鞞 【崔福】

△宣缙

宣缙庆元府人嘉泰三年太学两优释褐历官以太学博士召试为秘书省校书郎升著作佐郎兼权考功郎官知吉州福建提点刑狱迁考功员外郎又迁秘书少监守起居舍人为起居郎编孝宗宝训试吏部侍郎权兵部尚书嘉定十四年同知枢密院事兼参知政事明年拜参知政事以资政殿学士奉祠端平三年召赴阙升大学士提举洞霄宫以观文殿大学士致仕卒赠少师诏缙尝预定策以王尧臣故事赠太师谥忠靖

△薛极

薛极字曾之常州武进人以父任调上元主簿中词科为大理评事通判温州知广德军以参知政事楼钥荐迁大理正刑部郎官司封郎中权右司郎中迁右司郎中拜司农卿兼权兵部侍郎寻为真嘉定八年疏奏愿陛下深思顾諟之难益怀兢业之念勿谓帝德罔愆而怠于进修勿以天灾代有而应不以实政纲虽举必求益其所未至德泽虽布必思及其所未周誓以今日遇灾警惧之心永为异时暇逸之戒迁权刑部尚书寻试户部尚书兼权吏部尚书遂为真十五年特赐同进士出身拜端明殿学士签书枢密院事绍定元年拜参知政事兼同知枢密院事寻知枢密院事兼参知政事封毗陵郡公以观文殿大学士知绍兴府兼浙东安抚使端平元年加少保和国公致仕卒 【按宋史宰辅表理宗绍定元年六月戊申薛极自参知政事除同知枢密院事十二月辛亥薛极进知枢密院事兼参知政事六年十月丁亥薛极自金紫光禄大夫知枢密院事进枢密使十二月庚辰薛极以观文殿大学士知绍兴府本传于极进枢密使不载】

△陈贵谊

陈贵谊字正甫福州福清人庆元五年进士授瑞州观察推官中博学宏词科授江

南东路安抚司机宜文字迁太社令再迁太学博士时
议更楮币法贵谊转对言人主令行禁止者以同民之所好恶楮券之令反使奸恶获逞
道路咨怨非所以祈天永命固结人心因援熙宁新法
为辞又言明锐果敢之才足以集事而失于剽轻老成宽博之士足以厚俗而失于循环
孰若举之以众取之以公主更币之法者乃摘新法等
语激怒时相且谓贵谊引类植党人为危之迁太常博士以兄贵谦兼礼部郎官引嫌迁
将作监丞兼魏惠宪王府小学教授转对谓言路虽开
触犯忌讳者指为好名切劘时政者指为玩令利害关于天下是非公于人心一人言之
未已或至累十数人言之则又指为朋党是非易位忠
佞不分史弥远益不乐迁秘书郎出知江阴军提举江西常平召赴行在未至授礼部郎
官属金人大扰淮蜀贵谊言人才所以立国今旁蹊曲
径幸门四辟言路所以通下清今媵阿循默囊括不言民力已竭而科敛之外馈遗以谋
进者未已军中耻言败北阵亡者不恤耻言弃溃逃窜
者复招又言婉顺巽从者是灾殃也非爱我也宜屏之外之矫拂救正者是药石也爱我
者且用之听之弥远滋不乐讽言者论罢主管崇禧观
起知徽州召授司封郎官兼翰林权直兼玉牒所检讨会有事明堂章首引包拯皇佑中
乞因肆赦除聚敛掎克之弊当察州县府库致羨之由
仿成周邦飨必及死王事者之子与汉置羽林孤儿专取从军死事之后教以五兵理宗
即位以为宗正少卿兼侍讲兼权直学士院寻迁起居
舍人宝庆初诏举贤能才识之士贵谊乃言曰世以容默滞固为贤以苛刻生事为能以
褊狭趣办为才以轻疏尝试为职及兹初政当求忠实
正直奉公爱民知礼义廉耻而不越防范者以充中外之选又言成王之初元臣故老警
以无逸者欲其克寿勉以敬德者欲其永命期以岂弟
者欲其受命之长则可谓爱君切而虑患深矣迁中书舍人升兼直学士院内侍滥受恩
赏辄封还诏书将郊贵谊以民生实艰吏员尚众征敛
几于夺取公费掩为私藏宜大明黜陟庶有以见帝于郊迁礼部侍郎仍兼中书舍人权
刑部尚书升修玉牒宫兼侍读为礼部尚书兼给事中
端明殿学士签书枢密院事绍定六年冬帝始亲政进参知政事帝面谕之曰顷闻忧国
之言朕所不忘兼同知枢密院事出师汴洛时贵谊已
移疾犹上疏力争五上章乞归转四官加邑封致仕卒赠少保资政殿大学士

△曾从龙

曾从龙字君锡左仆射公亮四世从孙初名一龙庆元五年擢进士第一始赐今名
授签书奉国军节度判官厅公事迁兵部员外郎左司
郎中起居舍人兼太子右谕德使金还转官疏言州郡累月阙守而以次官权摄者彼惟

其摄事也自知非久何暇尽心于民事狱讼淹延政令
玩弛举一郡之事付之胥吏幸而除授一人民望其至如渴望饮足未及境而复以他故
罢去矣且每易一守供张借请少不下万缗郡帑所入
岁有常数而频年将迎所费不可胜计然则轻于易置公私俱受其病欲望明诏二三大
臣郡守有阙实时进拟其有求避惮行者悉杜绝其请
其缴劾弹拄者疾速行之盖郡计宽则民力裕利害常相关故也开禧闲勾外知信州戍
卒行掠境内从龙寘于法索得妇人衣命梟于市召权
礼部侍郎兼中书舍人兼太子左谕德缴还张镃复官词头以镃抑令侄女竭资财结婚
苏师旦之子故也为吏部侍郎仍兼职权刑部尚书嘉
定六年秋阴雨乞放系囚进对言修德政蓄人材饬边备帝善其言七年知贡举疏奏国
家以科目网罗天下之英隽义以观其通经赋以观其
博古论以观其识策以观其才异时谋王断国皆繇此其选比来循习成风文气不振学
不务根柢辞不尚体要涉猎未精议论疏陋缀缉虽繁
气象萎蕤愿下臣此章风厉中外澄源正本莫甚于斯诏从之进端明殿学士签书枢密
院太子宾客改参知政事疾胡榘憺壬排沮正论陈其
奸罪榘喉言者劾罢以前职提举洞霄宫起知建宁府丁内艰服除为湖南安抚使抚安
峒獠威惠并行兴学养士湘人纪之石改知隆兴府复
提举洞霄宫改万寿观兼侍读奉朝请端平元年授资政殿大学士沿江制置使兼知建
康府兼行宫留守拜参知政事兼同知枢密院事时有
三京之役极论南兵轻进易退未几言验进知枢密院事兼参知政事以枢密院使督视
江淮荆襄军马疏言边面辽远声援不接请并建二阕
诏许之专畀江淮以荆襄属魏了翁朝论边用不给诏从龙了翁并领督府及从龙卒赠
少师弟用虎天麟治凤皆厯显任

△郑性之

郑性之字信之初名自诚福州人嘉定四年进士第一厯官知赣州改知隆兴府后
以宝章阁待制提举玉隆万寿宫进华文阁待制提举
上清太平宫进敷文阁待制知建宁府端平元年召为吏部侍郎入对言陛下大开言路
以通壅蔽心苟爱君谁不欲言言不切直何能感动譬
如积水久壅一决其势必盛其声必激故言者多则易于取厌言之激则难于乐受若少
有厌倦动于词色则谗谄乘闲或不自知矣又言愿陛
下明诏百辟涤去旧污一以清白相师权之所在势所必趋恐惧戒谨尤防以微以保终
誉毋招谤议则朝纲肃而国体尊矣又曰为君者不以
尧舜自期则无善治告君者不陈尧舜之道则无远猷擢左谏议大夫言台臣交章互诋
愿陛下监古今天下安危之变君子小人消长之机公

以处之乃得其当况夫听言之道宜以事观若言果有关国体有补治道有益主德则言之过激夫亦何伤彼虽采名我实有益惟虚心纳善若决江河则激者自平矣拜端明殿学士签书枢密院事进同知枢密院事兼权参知政事寻拜参知政事兼同知枢密院事寻知枢密院事兼参知政事加观文殿学士致仕宝佑二年卒【按宋史此下有李鸣复邹应龙二传无事迹足录今从删】

△余天锡

余天锡字纯父庆元府昌国人丞相史弥远延为弟子师性谨愿绝不预外事弥远器重之是时弥远在相位久皇子竑深恶之念欲有废置会沂王宫无后丞相欲借是阴立为后备天锡秋告归试于乡弥远曰今沂王无后宗子贤厚者幸具以来天锡渡江与越僧同舟舟抵西门天大雨僧言门左有全保长者可避雨如其言过之保长知为丞相馆客具鸡黍甚肃须臾有二子侍立全曰此吾外孙也日者尝言二儿后极贵问其姓长曰赵与莒次曰与芮天锡忆弥远所属其行亦良是告于弥远命二子来保长大喜鬻田治衣冠心以为沂邸后可冀也集嫫党且诧其遇以行天锡引见弥远善相大奇之计事泄不便遽复使归保长大惭其乡人亦窃笑之逾年弥远忽谓天锡曰二子可复来乎保长谢不遣弥远密谕曰二子长最贵宜抚于父家遂载与归天锡母朱为沐浴教字礼度益闲习未几召入嗣沂王迄即帝位是为理宗天锡嘉定十六年举进士历监慈利县税籍田令超授起居舍人迁权吏部侍郎兼玉牒所检讨官兼崇政殿说书迁户部侍郎兼知临安府浙西安抚使试户部侍郎权户部尚书皆兼知临安府升兼详定敕令官以宝文阁学士知婺州仍旧职奉祠起知盩厔府进华文阁学士知福州召为吏部尚书兼给事中兼侍读疏奏臣荷国恩起家分阃旋蒙趣覲躋玷迹联时权礼部侍郎曹豳实在谏省盖尝抗疏谓用臣太骤臣与豳交最久相知最深今观其所论于君父有陈善之敬友朋有责善之道而豳遂迁官臣竟污要路豳以不得其言累疏乞去夫亟用旧人而遂退亡庄士则将谓何哉豳老成之望直谅多益寘之近班可以正乃辟可以仪有位欲望委曲留行使之释然无疑安于就职则陛下既昭好贤之美而微臣亦免妨贤之媿帝从之嘉熙二年拜端明殿学士同签书枢密院事寻拜参知政事兼同知枢密院事封奉化郡公授资政殿学士知绍兴府浙东安抚使以观文殿学士致仕朱氏亦封周楚国夫人寿过九十将以生日拜天锡为相而天锡卒赐少师寻加太师谥忠惠弟天任为兵部尚书兄弟友爱方贫时率更衣以出终岁同衾从子晦历官尚书出帅全蜀常置义庄以贍宗

族然在蜀以违言论知阆州王惟忠死士论少之

△许应龙

许应龙字恭甫福州闽县人五岁通经旨坐客曰小儿气食牛应龙应声丈夫才吐凤为对四坐嘉叹入太学嘉定元年举进士调汀州教授差浙东宣抚司掾差户部架阁迁籍田令太学博士时李全时青辈归附应龙入对有莽蜂是惩养虎遗患之说后皆如所言迁国子博士国子丞宗学博士理宗即位应龙首陈正心为治国平天下之纲领迁秘书郎兼权尚左郎官迁著作郎勾外知潮州盗陈三枪起赣州出没江闽广闲势炽甚而盗鍾全相挺为乱枢密陈韡帅江西任招捕三路调军分道追剿盗逼境上应龙亟调水军禁卒土兵弓级分扼要害明闲谍守关隘断桥开堑斩水寨涂点集民兵激劝隅总谕以保乡井守室庐全妻子搜补亲兵日加训阅既而横冈桂屿相继以捷闻招捕司遣统领官齐敏率师由漳趋潮截赣寇余党应龙谕敏曰兵法攻瑕今鍾寇将穷陈寇猖獗若先破鍾则陈不战擒矣敏惟命于是诸寇皆平方未解严时有行旅数人隅总搜其橐中金银指为贼党应龙辨其非盗释之皆罗拜感泣始人疑应龙儒者不闲戎事及见其区画事宜分别齐民静练雍容莫不叹服僚属请上功应龙曰守职扞城保民何功之云距州六七十里曰山斜峒獠所聚勾耕土田不输赋禁兵与哄应龙平决之其首感悦率父老鸣缶击筒踊跃诣郡谢去之日阖郡遮道攀送端平初召为礼部郎官入对帝谓应龙曰卿治潮有声与李宗勉治台齐名应龙顿首曰民无不可化顾牧民者如何耳臣治州幸免旷瘵皆陛下德化所暨臣非曰能之兼荣文恭王府教授力辞迁国子司业祭酒徐侨议学校差职欲先誉望应龙以为不若差以资格资格一定则侥幸之门杜而造请之风息侨以为然时有凭势干职者力郤之迁国子祭酒摄侍右侍郎兼学士院权直是日罢郑清之乔行简制应龙所草也翼日文德殿宣布毕帝遣中使召应龙谕之曰草制甚善应龙复谢曰臣闻昔人有言进人若将加诸膝退人若将坠诸渊今二相乞罢机政与陛下体貌大臣之意两尽其美可也帝善之就令草敕书戒谕诸阉权吏部侍郎兼侍讲兼权直学士院试吏部侍郎升侍读权兵部尚书时楮币亏甚行简主行称提之说州县希旨奉承贫富猜惧应龙奏从民便节用二说行简然之兼吏部尚书迁兵部兼中书舍人三上章勾外不允兼给事中兼吏部尚书请外诏免兼中书拜端明殿学士签书枢密院事累辞会正言郭磊卿有论疏以端明殿学士提举洞霄宫卒年八十有一赠资政殿学士银青光禄大夫应龙不躁不竞不激不随不妄荐士而亦无伤人害物

之事潮州之治最可纪也

△林略

林略字孔英温州永嘉人庆元五年举进士历饶州大宁监教授辟干办四川茶马司公事崔与之帅蜀目之曰此台阁之端也荐之迁武学博士国子监丞太常寺丞奉祠拜宗正少卿兼崇政殿说书迁右司谏寻迁左司谏兼侍讲告于帝曰虚心以为从谏之本从谏以为永治之本拜殿中侍御史升侍御史试右谏议大夫嘉熙三年以端明殿学士同签书枢密院事以言罢提举洞霄宫以资政殿学士致仕淳佑三年卒特赠宣奉大夫

△徐荣叟

徐荣叟字茂翁焕章阁学士应龙之子嘉定七年举进士历官通判临安府迁太学博士兼崇政殿说书迁秘书郎升著作佐郎兼侍左郎官出为江东提点刑狱直秘阁知婺州迁著作郎兼礼部郎官以集英殿修撰知静江府兼广西经略安抚使召为行在司谏复兼说书兼侍讲嘉熙四年拜右谏议大夫入对言自楮币不通物价倍长而民始怨自米运多阻粒食孔艰而民益怨此见之京师者然也外而郡邑苛征横敛无所不有严刑峻罚靡所不施和余则科抑以取赢军需则并缘而规利逃亡强令代纳蠲放忍至重催犯私贩者不问多寡槩遭黥徒逋官课者不恤有无动辄监系圜圉充斥率是干连词讼追呼莫非枝蔓如此则民安得而不怨甚者富家巨室武断乡闲贵族豪宗侵牟民庶茹冤者不敢告负抑者不得伸怨气熏蒸天示之应此亢阳之所以为沴也迁权礼部尚书兼权吏部尚书拜端明殿学士签书枢密院事淳佑二年乞归田里以资政殿大学士提举洞霄宫六年转一官致仕卒 【按宋史此下有别之杰传无事迹足录今从删】

△刘伯正

刘伯正字直卿饶州余千人父简为丞相赵汝愚客伯正以开禧元年举进士调太平主簿通判枣阳军辟荆湖制置司机宜两浙转运司主管公事历军器将作太府三监主簿枢密院编修官兵部郎官监察御史有事于明堂雷电忽至执事者鲜不离次伯正立殿下伸笏俨然声色不动帝遂以大任期之迁左司谏疏言兵籍寢广粮饷益艰请预备军食又言铨选财计刑狱之积弊乞以愿治之心而急董正治官之图以勤政之思而申严察计吏之法又言所忧非一而急务之当虑者有三曰申饬边备区处流民堤防奸盗帝皆善其言升右正言以华文阁待制知广州兼广东经略安抚使改转运使以实章阁直学士知太平州召为礼部侍郎兼中

书舍人迁吏部侍郎权刑部尚书淳佑四年拜端明殿
学士签书枢密院事兼权参知政事真拜参知政事以监察御史孙起予言罢授资政殿
学士提举洞霄宫监察御史蔡次传言之降一官寻复
旧官致仕卒赠正奉大夫加少保时论谓伯正立朝以静重镇浮不求名誉善藏其用云
【按宋史此下有金渊传无事迹足录今从删】

△李性传

李性传字成之宗正寺主簿舜臣之子也嘉定四年举进士历干办行在诸军审计
事进对有崇尚道学之名未遇其实帝曰实者何在性
传对曰在陛下格物致知以为出治之本迁武学博士寻为太常博士升太常寺丞兼权
工部郎中兼权都官郎官迁起居舍人疏言东周以后
诸侯卿大夫皆以既葬而除服秦汉之际尤为浅促孝文定为三十六日之制则视孝惠
以前已有加矣东汉以后又损之为二十七日谓之以
日易月则薄之至也千数百年惟晋武帝魏孝文为能复古之制而羣臣沮格未克尽行
惟孝宗通丧三年近古所独陛下继之至性克尽前烈
有光乞以此疏付之史官庶几四海闻风民德归厚迁起居郎权刑部侍郎进礼部侍郎
以臣僚言罢寻以宝章阁待制知饶州改知宁国府再
知饶州复以言罢召为兵部侍郎权兵部尚书吏部尚书臣僚论舜臣立庙封爵事落职
提举太平兴国宫淳佑四年权礼部尚书五年拜端明
殿学士签书枢密院事兼权参知政事寻同知枢密院事未几落职于郡十二年以资政
殿大学士提举洞霄宫宝佑二年依旧职提举万寿观
以观文殿学士致仕卒特赠少保

△陈鞞 【崔福】

陈鞞字子华福州侯官人父孔硕为朱熹吕祖谦门人鞞让父郊恩与弟鞞登开禧
元年进士第从叶适学嘉定十四年贾涉开淮阡辟京
东河北干官鞞谓山东河北遗民宜使归耕其土给耕牛农具分配以内郡之贷死者然
后三分齐地张林李全各处其一其一以待有功者河
南首领以三两州来归者与节度使一州者守其土忠义人尽还北然后括淮甸闲田仿
韩琦河北义勇法募民为兵给田而薄征之择土豪统
率盐丁又别廩为一军此第二重藩篱也十五年淮西告捷鞞策金人必专向安丰而分
兵缀诸郡使卞整张惠李汝舟范成进各以其兵屯庐
州以待之金将卢鼓搥新胜于潼关乘锐急战当时久困之不过十日必遁设伏邀击必
可胜又使时青夏全候金人深入以轻兵捣其巢穴第
一策也其后金人果侵安丰鞞如盱眙犒师改淮东制置司干办公事再如盱眙见刘璋
调卞整张惠范成进夏全诸军应援捣虚皆行鞞策遂

有堂门之捷俘其四驂马者迁将作监丞又迁太府寺丞差知真州淮东提点刑狱加直宝章阁依旧提点刑狱兼知宝应州迁宗正寺丞权工部郎中改仓部员外郎入对言臣所陈夏周汉唐数君之事如布德兆谋任贤使能信实必罚区处藩镇不事姑息规摹莫大于此又言人主所以御天下者赏罚而已绍定二年冬盗起闽中帅王居安属鞞提举四隅保甲鞞有亲丧辞之转运使陈汶提举常平史弥忠告急于朝谓非鞞莫可平明年以宝章阁直学士起复知南剑州提举汀州邵武军兵甲公事福建路兵马钤辖同共措置招捕盗贼兼福建路招捕使未几加提点刑狱鞞籍土民丁壮为一军沙县紫云基告急沙县破贼由闲道趋城忠勇军破之于高桥贼乃趋邵武势益炽时有议当招不当捕者鞞言始者贼仅百计招而不捕养之至千又养之至万今复养之将至于无算求淮西兵五千人可图万全诏鞞兼福建路招捕使贼急攻汀州淮西帅曾式中调精兵三千五百人由泉漳闲道入汀击贼于顺昌胜之六月兵大合加福建提点刑狱七月鞞亲提兵至沙县顺昌将乐清流宣化督捕所至克捷九月分兵进讨十月主攻五贼营砦平之十一月破谭瓦礫贼起之地夷其巢穴十二月诛汀州叛卒谕降连城七十有二砦汀境皆平四年正月遣将破下瞿张原砦二月躬往邵武督捕余寇贼首晏彪迎降鞞以其力屈乃降卒诛之进右文殿修撰依旧提点刑狱招捕使兼知建宁府衢州寇汪徐来二破常山开化势张甚鞞命淮将李大声提兵七百出贼不意夜薄其砦贼出迎战见算子旗惊曰此陈招捕军也皆大哭急击之衢寇悉平六年进宝章阁待制知隆兴府赣寇陈三枪据松梓山砦出没江西广东所至屠残鞞遣官吏谕降贼辄杀之乃谓盗贼起于贪吏劾其尤者二人又谓寇盗稽诛以臣下欺诞事权涣散所致若决计荡除数月可毕十一月诏节制江西广东福建三路捕寇军马鞞奏遣将刘师直扼梅州齐敏扼循州自提淮西兵及亲兵捣贼巢穴十二月兼知赣州端平元年正月进华文阁待制江西安抚使二月至赣斩将士张皇贼势及掠子女货财者齐敏李大声所至克捷三月分兵守大石堡截贼粮道遂破松梓山三枪与余党縋崖而遁鞞亲督诸将乘春瘴未生薄松梓山贼悉精锐下山迎敌旗帜服色甚盛鞞军步骑夹击又纵火焚之士皆攀崖上贼巢荡为烟埃贼首张魔王自焚斩千五百级擒贼将十二得所掠妇女牛马及僭伪服物各数百计三枪中箭与敏军遇击败之贼遁翼日追及下黄又败之余众尚千余薙猕略尽三枪仅以数十人遁至兴宁就擒檻车载三枪等六人斩隆兴市初贼跨三路数州六十砦至是悉平诏称鞞忠勤体国计虑精密进权工部侍郎

仍知隆兴兼江西安抚使未几为工部侍郎改江东安抚使知建康府兼行宫留守二年入奏事帝称其平寇功鞞顿首言曰臣不佞徒有孤忠仗陛下威灵苟逃旷败耳何功之有迁权工部尚书又权刑部尚书沿江制置大使依旧江东安抚使知建康府往来巡视鄂州江面措置捍御三年加宝谟阁学士嘉熙元年进焕章阁学士四年拜刑部尚书辞免加徽猷阁学士知潭州荆湖南路安抚使淳佑四年召为兵部尚书拜端明殿学士同签书枢密院事兼参知政事寻拜参知政事兼同知枢密院事七年知枢密院事湖南安抚大使兼知潭州九年以观文殿学士福建安抚大使知福建五上章辞以旧职提举洞霄宫开庆元年召赴阙落致仕充醴泉观使兼侍读景定元年授福建安抚大使兼知福州久之提举佑神观力请致仕明年卒年八十有三赠少师谥忠肃崔福者故羣盗尝为官军所捕逸去因隶军籍初从赵葵收李全有功名重江淮又累从鞞捕贼积功至刺史大将军从后鞞留隆兴既而鞞移金陵而福犹在隆兴属通判与郡僚燕滕王阁福恚其不见招道遇民愬冤者福携其人直至饮所责以郡官不理民事麾诸卒尽碎饮具官吏皆惶恐窜去莫敢婴其锋鞞知之遂檄建康署为钤辖福又夺统制官王明鞍马及迫逐总领所监酒官亲属鞞戒谕之不听会淮兵有警步师王鉴出师鉴请福行鞞因厚遣之福不乐为鉴用遇敌不击托以葬女擅归亦不闻于制置司鉴怒遂白其前后过恶请必正其慢令之罪会鞞亦厌忌之遂坐以军法然后声其罪于朝且自劾专杀之罪下诏奖谕免其罪福勇悍善战颇着威声其死也军中惜之时论以为良将难得而鞞以私忿杀之然福跋扈之迹已不可掩杀身之祸亦有以自取之也

钦定续通志卷四百十

●钦定续通志卷四百十一 列传二百十一

列传

宋 【一百十五】

○宋一百十五

王伯大

郑霖

应■〈彳 繇〉

徐清叟

李曾伯

王埜

蔡抗

马天骥

皮龙荣

沈炎

王伯大

郑霖

应■〈彳 繇〉

徐清叟

李曾伯

王埜

蔡抗

马天骥

皮龙荣

沈炎

△王伯大

王伯大字幼学福州人嘉定七年进士历官主管户部架阁迁国子正知临江军岁饥赈荒有法迁国子监丞知信阳军改知池州兼权江东提举久之依旧直秘阁江东提举常平仍兼知池州端平三年召至阙下迁尚右郎官寻兼权左司郎官迁右司郎官试将作监兼右司郎中进直宝谟阁枢密副都承旨兼左司郎中进对言陛下亲政五年于兹盛德大业未能着见于天下而天下之谤议者藉藉未已夫以陛下之好恶用舍无非有招至人言之道诚能布所失于天下凡人言所不费者一朝赫然而尽去之如日月之更如风雷之迅则天下之谤自息矣又极言边事曲尽事情以直宝谟阁知婺州迁秘书少监拜司农卿后为秘书少监进太常少卿累官至刑部尚书淳佑七年拜端明殿学士签书枢密院事兼权参知政事八年拜参知政事以监察御史陈垓论罢以资政殿学士知建宁府宝佑元年卒

△郑窳

郑窳不详何郡人初历官为秘书省校书郎迁著作佐郎兼权侍右郎官升著作郎兼侍讲拜右正言言丞相史嵩之以父忧去遽欲起之意甚厚也奈何谤议未息事关名教有尼其行帝答曰卿言虽切事理进退大臣岂易事也擢殿中侍御史疏言台谏以纠察官邪为殿国之纪纲系焉比刘汉弼劾奏司农卿谢逵陛下已行其言矣未及两月忽复叙用何其速也汉弼虽亡官不可废臣非为汉弼惜为朝廷惜又奏劾王瓚龚基先胡清献镌秩罢祠皆从之三人者不才台谏也迁侍御史疏言比年以来旧章寢废外而诸阍不问勋劳之有无而爵秩皆得以例迁内而侍从不问才业之优劣而职位皆可以例迁执政之归休田里者与之贴职可也而凡补外者皆授之矣故自公侯以至节度有同序补自书殿以至秘阁错立周行名器之轻莫此为甚迁左谏议大夫淳佑七年拜端明殿学士同签书枢密院以监察御史陈求鲁论罢淳佑九年卒窳之居言路尝按工部侍郎曹翮主管吏部架阁文字洪芹则大伤公论云

△应■ 〈彳 繇〉

应■〈彳 繇〉字之道庆元府昌国人刻志于学嘉定十六年试南省第一遂举进士为临江军教授入为国子学录兼庄文府教授迁太学博士又迁秘书郎请蚤建太子八对帝问星变■〈彳 繇〉请修实德以答天戒帝问州县贪风■〈彳 繇〉曰贪黷由殉色而起成汤制官刑儆有位首及于巫风淫风者有以也帝问藏书■〈彳 繇〉请访先儒解经注史因及程迥张根所著书皆有益世教帝善之迁秘书省著作佐郎兼权尚左郎官兼翰林权直又迁著作郎仍兼职以言罢淳佑二年叙复奉祠迁宗正寺丞兼权礼部郎官以言罢差知台州召兼礼部郎官迁秘书少监仍兼职兼权直学士院又迁起居舍人权兵部侍郎时暂兼权吏部侍郎兼直学士院帝一夕召■〈彳 繇〉草麻夜四鼓五制皆就帝奇其才迁吏部侍郎仍兼职进翰林学士兼中书舍人八年授同知枢密院事兼参知政事九年拜参知政事封临海郡侯乞归田里以资政殿学士知平江府提举洞霄宫宝佑三年殿中侍御史丁大全论罢寻卒德佑元年诏复元职致仕

△徐清叟

徐清叟字真翁焕章阁学士应龙之子嘉定七年进士历主管户部架阁迁籍田令疏言迩者江右闽峽盗贼窃发监司帅守未免少立威名专行诛戮此特以权济事而已而偏州僻垒习熟见闻转相仿效亦皆不俟论报辄行专杀欲望明行禁止一变臣下嗜杀希进之心以无坠祖宗立国仁厚之意迁军器监主簿入对言太后举哀之日陛下以后服下同媵妾分别置大袖一袭文思院观望欲如后饰再造其一以进诏却之此真知嫡庶之辨者请宣付史馆以垂法后世迁太常博士入对疏言陛下亲政以来精神少振而气脉未复条目毕举而纲纪未张公道若伸而私意之未尽克者则亦风化之先务劝戒之大权与夫选用之要术犹有阙略而未之讲明者尔何谓风化之先务曰原人伦以释羣惑者是已何谓劝戒之大权曰惜名器以示大义者是已何谓选用之要术曰因物望而进人才者是已盖欲请复皇子竑王爵裁抑史弥远恤典召用真德秀魏了翁也兼崇政殿说书迁秘书郎升著作佐郎兼权司封郎官迁军器少监皆兼职依旧迁将作监拜殿中侍御史兼侍讲迁太常少卿兼权户部侍郎兼侍讲三疏劾外给事中洪咨夔起居舍人吴泳皆抗疏留之寻权工部侍郎以右文殿修撰知泉州集英殿修撰知静江府广西经畧安抚使迁侍右侍郎主管云台观召赴阙迁户部侍郎再为侍右侍郎以宝章阁直学士知温州改知福建安抚使改知婺州以焕章阁直学士差知泉州辞免改知袁州又改知绍兴府两浙东路安抚使辞免改知潭

州寻知广州兼广东经略安抚使召赴阙权兵部尚书
兼侍读淳佑九年兼同修国史实录院同修撰权吏部尚书迁礼部尚书拜端明殿学士
签书枢密院事进同知枢密院事封晋宁郡公奏修四
朝国史志传五上章乞改机政帝不许十二年拜参知政事寻知枢密院事兼参知政事
监察御史朱应元论罢以资政殿大学士提举玉隆万
寿宫改洞霄宫复以监察御史朱熠论罢久之以旧职提举洞霄宫开庆元年召赴阙以
旧职提举佑神观兼侍读出知泉州复提举佑神观景
定三年转两官致仕卒赠少师谥忠简清叟父子兄弟皆以风节相尚而清叟劾罢袁甫
于公论少贬去

△李曾伯

李曾伯字长孺覃怀人后居嘉兴历官通判濠州迁军器监主簿添差通判鄂州兼
沿江制置副使司主管机宜文字迁度支郎官授左司
郎官淮西总领寻迁右司郎官太府少卿兼左司郎官兼敕令所删修官迁太府卿淮东
制置使兼淮西制置使诏军事便宜行之曾伯疏奏三
事答天心重地势协人谋又言边饷贵于广积将材贵于素储赏与不可以不精战士不
可以不恤又条上淮面舟师之所当戒湖面险阻之所
当治加华文阁待制又加宝章阁直学士进权兵部尚书淳佑六年正月朔日食曾伯应
诏历陈先朝因天象以谨边备图帅材乞早易阍寄放
归田里又请修浚泗州西城加焕章阁学士言者相继论罢九年以旧职知静江府广西
经畧安抚使兼广西转运使陈守边之宜五事进徽猷
阁学士京湖安抚制置使知江陵府兼湖广总领兼京湖屯田使进龙图阁学士疏言襄
阳新复之地城池虽修浚田野未加辟室庐虽草创市
井未阜通请蠲租三年诏从之加端明殿学士兼夔路策应东阁进资政殿学士制置四
川边面与执政恩例寻授四川宣抚使特赐同进士出
身召赴阙加大学士知福州兼福建安抚使辞免以大学士提举洞霄宫起为湖南安抚
大使兼知潭州兼节度广南移治静江开庆元年进观
文殿学士以谏议大夫沈炎等论罢景定五年起知庆元府兼沿海制置使咸淳元年殿
中侍御史陈宗礼论劾褫职德佑元年追复元官曾伯
初与贾似道俱为阍帅边境之事知无不言似道卒嫉之使不竟其用云

△王埜

王埜字子文宝章阁待制介之子也以父荫补官登嘉定十二年进士第仕潭时帅
真德秀一见异之延致幕下遂执弟子礼德秀欲授以
词学埜曰所以求学者义理之奥也词科惟强记者能之德秀益加器重绍定初汀邵盗
作辟议幕参赞摄邵武县后复摄军事盗起唐石亲勒

兵讨之后为枢密院编修兼检讨襄蜀事急议遣使讲和时相依违不决史嵩之帅武昌首进和议桢言今日之事宜先定规模并力攻守上疏言八事继为副都承旨奏请出师绝和使命淮东西夹攻不然则害将深理宗深然之令枢密院下三阍谕旨嘉熙元年轮对采事系安危者四端而专以司马光仁明武推说复推广前所言八事以孝宗讲军实激发帝意淳佑初自江西赴阙奏祈天永命十事嵩之起复倾国争之桢上疏乞听终丧后又言嵩之当显绝而终斥之严君子小人之限拜礼部尚书奏十事终之曰陛下一心十事之纲纪也前后奏陈皆明正割切凿凿可行其为两浙转运判官以察访使出视江防首嘉兴至京口增修官民兵船守险备具为江西转运副使知隆兴府继有它命时以米纲不便就湖口造转船仓请事毕受代知镇江府兼都大提举浙西兵船江面几千里调兵捍御以分江尤重于淮瓜洲一渡甚狭请免镇江水军调发专一守江置游兵如吕蒙所言蒋钦将万人巡江上增创水舰就扬子江习水战登金山指麾之是冬扬子桥有警急调汤孝信所领游兵救之淳佑末迁沿江制置使江东安抚使节度和州无为军安庆府兼三郡屯田行宫留守巡江引水军大阅轴轳相衔几三十里凭高望远考求山川险阻谓要务莫如屯田讲行事宜修饬行宫诸殿室推京口法创游击军万二千蒙冲万艘江上晏然宝佑二年拜端明殿学士签书枢密院事封吴郡侯与宰相不合言者攻之以前职主管洞霄宫卒赠七官位特进桢因德秀知朱熹之学知建宁府创建安书院祠熹以德秀配工于诗书法祖唐欧阳询

△蔡抗

蔡抗字仲节处士元定之孙绍定二年进士其后差主管尚书刑工部架阁文字召试馆职迁秘书省正字升校书郎兼枢密院编修官迁诸王宫大小学教授疏奏权奸不可复用国本不可不早定帝善其言迁枢密院编修官兼权屯田郎官迁著作佐郎兼侍右郎官江东提点刑狱加直秘阁特授尚书司封员外郎进直宝章阁寻加宝谟阁移浙东召为国子司业拜宗正少卿进直龙图阁知隆兴府试国子祭酒拜太常少卿权工部侍郎迁工部侍郎时暂兼礼部侍郎兼权吏部尚书加端明殿学士同签书枢密院事差兼同提举编修经武要略同知枢密院事拜参知政事落职予祠起居郎林存请加窜削从之未踰年复端明殿学士提举洞霄宫乞致仕转一官守本官职致仕卒谥文简以犯祖讳更谥文肃 【按宋史此下有张璠传无事迹足录今从删】

△马天骥

马天骥字德夫衢州人绍定三年进士迁秘书省正字校书郎升著作佐郎轮对假司马光五规之名条上时弊词旨切直迁考功郎官入对言周世宗当天下四分五裂之余一念振刷犹能转弱为强陛下有能致之资乘可为之势一转移闲耳迁秘书省直秘阁知吉州迁宗正少卿以秘阁修撰知绍兴府主管浙东安抚司公事兼提举常平擢兵部侍郎授沿海制置使差知庆元府改知池州兼江东提举常平改知广东兼广东经略安抚使宝佑四年迁礼部侍郎拜端明殿学士同签书枢密院事封信安郡侯五年以殿中侍御史朱熠右正言戴庆珂监察御史吴衍翁应弼等论罢依旧职提举洞霄宫景定元年知衢州以兵部侍郎章鉴论罢诏依旧职予祠起知福州福建安抚使以职事修举升大学士改知平江府又改知庆元府兼沿海制置使提举洞霄宫褫职罢祠咸淳三年追夺执政恩数送信州居住四年放令自便后卒于家 【按宋史此下有朱熠饶虎臣戴庆珂三传俱无事迹足录并从删】

△皮龙荣

皮龙荣字起霖一字季远潭州醴陵人淳佑四年进士历官主管吏部架阁文字迁宗学谕授诸王宫大小学教授兼资善堂直讲入对请以改过之实易运化之名一过改而一善着百过改而百善融迁秘书郎升著作郎入对因及真德秀崔与之廉龙荣曰今天下岂无廉者愿陛下崇奖之以风天下执赏罚之公以示劝惩帝以为然兼兵部郎官差知嘉兴府召赴阙迁侍右郎官兼资善堂赞读又迁吏部员外郎兼直讲入对言忠王之学愿陛下身教之于内帝嘉纳迁将作监兼尚右郎官秘书少监兼吏部郎中宗正少卿起居郎兼权侍左侍郎兼给事中吏部侍郎兼赞读封醴陵县男迁集贤殿修撰提举太平兴国宫召见进刑部侍郎加宝章阁待制荆湖南路转运使权刑部尚书兼翊善景定元年四月拜端明殿学士签书枢密院进封伯权参知政事兼太子宾客二年拜参知政事仍兼太子宾客封寿沙郡公三年罢为湖南安抚使判潭州四年以资政殿大学士提举洞霄宫以右正言曹孝庆论罢咸淳元年以旧职奉祠殿中侍御史陈宗礼监察御史林拾先后论劾削一官它日帝偶问龙荣安在贾似道恐其召用阴讽湖南提点刑狱李雷应劾之雷应至官谒龙荣龙荣托故不出既退又斥骂之或以语雷应不能平遂疏其罪又谓每对人言有吾拥至尊于膝上之语诏徙衡州居住湖南提刑治衡州龙荣恐不为雷应所容未至而歿龙荣少有志略精于春秋学性忼直似道当国不肯降志又以度宗旧学卒为似道所摈德佑元年复其官致仕二年太府卿柳岳乞加赠谥未及行而宋亡

△沈炎

沈炎字若晦嘉兴人宝庆二年进士调嵯县主簿广西经畧司准备差遣湖南安抚司干办公事讨郴寇有功改知金华县擢为监察御史右正言左司谏殿中侍御史景定元年拜右谏议大夫加端明殿学士同签书枢密院事兼太子宾客二年拜同知枢密院事兼权参知政事以资政殿学士提举洞霄宫三年进大学士致仕卒赠少保炎居言路尝劾福建转运使高斯得观文殿学士李曾伯沿江制置司参谋官刘子澄左丞相吴潜然论罢右丞相丁大全及其党与则为公论也

钦定续通志卷四百十一

●钦定续通志卷四百十二 列传二百十二

列传

宋 【一百十六】

○宋一百十六

杨栋 姚希得 包恢 常挺 陈宗礼 常楙

家铉翁 李庭芝

杨栋

姚希得

包恢

常挺

陈宗礼

常楙

家铉翁

李庭芝

△杨栋

杨栋字符极眉州青城人绍定二年进士第二授签书剑南西川节度判官厅公事未上丁母忧服除迁荆南制置司改辟西川入为太学正父忧服除召试授秘书省正字兼吴益王府教授迁校书郎枢密院编修官入对言飞蝗蔽天愿陛下始终一德庶几感格天心消弭灾咎又言迩来中外之臣如主兵理财听其言无非可用迹其实类皆欺诬上下相蒙无一可信陛下先之以至诚而后天下之事可为也又言祖宗立国不恃兵财法惟恃民心固结而已愿陛下常有忠厚之意勿用峻急之人理宗悦以臣僚言奉祠起知兴化军孔子之裔有居涵头镇者栋为建庙辟田训其子弟迁福建提点刑狱寻加直秘阁兼权知福州兼本路安抚使迁都官郎官又迁左司郎官寻为右司郎官除宗正少卿进对

帝曰止是正心修身之说乎栋对曰臣所学三十年止此一说用之事亲取友用之治凋郡察冤狱至为简易时有女冠出入宫禁颇通请谒外廷多有以为言者栋上疏曰陛下何惜一女冠天下所侧目而不亟去之乎帝不谓然栋曰此人密交小人甚可虑也又言京襄两淮四川残破郡县之吏多是兵将权摄科取无艺其民可矜非陛下哀之谁实哀之帝从之迁太常少卿起居郎差知滁州以殿中侍御史周坦论罢起直龙图阁知建宁府不拜提举千秋鸿禧观迁起居郎兼权左侍郎继迁吏部侍郎以集英殿修撰兼中书舍人出知太平州以右补阙萧泰来论罢依旧职提举太平兴国宫起知婺州召奏事以旧职奉祠度宗立为太子帝亲擢栋太子詹事迁工部侍郎仍为詹事兼中书舍人兼直学士院权刑部尚书兼国子祭酒迁礼部尚书加端明殿学士同签书枢密院事兼太子宾客进同知枢密院事兼权参知政事拜参知政事台州守王华甫建上蔡书院言于朝乞栋为山主诏从之因卜居于台寻授资政殿学士知建宁府不拜以旧职提举洞霄宫复依旧职知庆元府沿海制置使以监察御史胡用虎言罢仍奉祠加观文殿学士知庆元府沿海制置使又不拜仍奉祠乃以资政殿学士充万寿观使卒遗表上帝特赠少保栋之学本诸周程氏负海内重望方贾似道入相登用故老列之从官栋亦预焉及彗星见栋乃言蚩尤旗非彗也故为世所少云或谓栋姑为是言阴告于帝谋逐似道似道觉之遂蒙疑而去云

△姚希得

姚希得字逢原一字叔刚潼川人嘉定十六年进士授小溪主簿待次三年朝夕讨论六经诸子百家之言调盘石令会蜀有兵难军需调度不扰而集更调嘉定府司理参军改知蒲江县巨室挟势邑号难治希得绥强扶弱声问着闻同知枢密院事游似以希得名闻召审察迁行在都进奏院通判太平州改福州徒步至侯官吏不知为通判也召为国子监丞迁大府寺丞时帝斥逐权奸收召名德举朝相庆希得以为外观形状似若清明之朝内察脉息有类危亡之证乃上疏言君子非不收召而意向犹未调一小人非不斥逐而根株犹未痛断大权若操握而不能无旁蹊曲径之疑大势若更张而未见有长治久安之道廷臣之所讽谏封囊之所奏陈非不激切而陛下固不之罪亦不之行此臣之所甚惧也内小学之建人皆知陛下有意建储然岁月逾迈未覩施行人心危疑无所系属秦汉而下嗣不蚤定事出仓卒或宫闱出令或宦寺主谋或奸臣首议此皆足以危人之国也今女冠者流众所指目近珰小臣时窃威福国有善类犹人有元气善类一败一消元气一病一衰善类

能几岂堪数消消极则国随之矣陛下明于知人公于用人固无权奸再用之意然道路之人往往窃议此元佑绍圣将分之机也祸根犹伏而未去不几于安其危乎帝改容曰朕决不用史嵩之迁知大宗正丞兼权金部郎官李韶以病告十上疏欲去希得言韶有德望虽以病告曷若留奉内祠侍经幄亦足为朝廷重又言财用困竭民生憔悴移此不移之费以实军储以厚民生敬天莫大于此岂在崇大宫宇庄严设像哉又条救钱楮三策请置惠民局帝皆以为可行进秘书丞寻迁著作郎授江西提举常平役法久坏临川富室有赂吏求免者希得竟罪之遂提点刑狱加直秘阁未几加度支员外郎寻直宝章阁移治赣州盗有伪号崔太尉者据石壁连结数郡刘老龙等聚众焚掠一方绎骚希得指授方畧不五旬平之以直宝谟阁广西转运判官兼权静江府寻授直徽猷阁知静江府主管广西经畧安抚司公事兼转运判官母丧免召为秘书少监兼中书门下省检正诸房公事入对言君子小人邪正之辩且曰君子犯颜敢谏拂陛下之意退甘家食此乃为国计非为身计也小人自植朋党挤排正人甘言佞语一切顺陛下之意遂取陛下官爵此乃为身计非为国计也迁宗正少卿兼权给事中兼权刑部侍郎时西方用兵有为嵩之复出计者谓非此人不能办帝有意再用之希得必执之出旨谕意希得毅然具疏密奏不报又缴邓泳予祠之命右正言邵泽监察御史吴衍殿中侍御史朱熠相继论罢久之以集英殿修撰提点千秋鸿禧观未几依旧职两淮宣抚使司判官俄加宝谟阁待制移京西湖南北四川诏叙复元官护江陵有功召为户部侍郎帝曰姚希得才望可为阍帅乃进焕章阁待制知庆元府沿海制置使继升敷文阁待制诏增沿海舟师希得为之广募水军造战舰蓄粮食蠲米一万二千石旧逋一百万去官库余羨悉以代民输召为工部尚书兼侍读入侍经筵帝问庆元之政甚悉以华文阁直学士沿江制置使知建康府江东安抚使行宫留守希得按行江上慰劳士卒众皆欢悦溧阳饥发廩劝分全活者众勅盗江军自建康太平至池州列砦置屋二万余闲屯戍七千余人帝闻之一再降诏奖谕加宝章阁学士寻加刑部尚书依旧任兼淮西总领景定五年召为兵部尚书乃言用人才修政事治兵甲惜财用四事拜端明殿学士签书枢密院事会星变上疏引咎乞解机务兼权参知政事度宗即位授同知枢密院事兼权参知政事寻授参知政事以言罢授资政殿学士提举洞霄宫起知潭州湖南安抚使以疾甚辞乃仍旧职奉祠请致仕诏不许力请以资政殿大学士金紫光禄大夫依旧潼川郡公致仕咸淳五年卒遗表闻赠少保希得忠亮平实清俭自将好引善

类不要虚誉盖有诵荐于上而其人莫之知者广西官署以锦为帘幕希得曰吾起身书生安用此命以缙纈易之蜀之亲族媼旧相依者数十家希得廩之终身昏丧悉捐己力晚年计口授田各有差

△包恢

包恢字宏父建昌人自其父扬世父约叔父逊从朱熹陆九渊学恢少为诸父门人讲大学其言高明诸父惊焉嘉定十三年举进士调金溪主簿邵武守王遂辟光泽主簿平寇乱建宁守袁甫荐为府学教授监虎翼军募土豪讨唐石之寇授掌故改沿海制置司干官会岁饥盗起金坛溧阳闲恢部诸将为十诛夷之沿江制置使陈鞬辟为机宜复有平寇功改知吉州永丰县未行差发运干官福建安抚使陈垵檄平寇迁武学谕宗正寺主簿添差通判台州徐鹿卿讨温寇辟兼提点刑狱司主管文字议收捕改通判临安府迁宗正寺主簿知台州有妖僧居山中号活佛男女争事之因为奸利豪贵风靡恢诛其僧进左司郎官未行改湖北提点刑狱未行移福建兼知建宁闽俗以九月祠五王生日靡金帛倾市奉之恢曰彼非犬豕安得一日而五子同生非不祥者乎而尊畏之若是众感悟为之衰止兼转运判官以侍御史周坦论罢光州布衣陈景夏上书云包恢刚正不屈之臣言者污蔑之耳又四年起为广东转运判官权经畧使迁侍右郎官寻为大理少卿即日除直显文阁浙西提点刑狱是时海寇为乱恢单车就道调许澈浦分屯建砦一旦集诸军讨平之嘉兴吏因和余受赇百万恢被旨虑囚曰吾用此消沴气乃减死断其手进直龙图阁权发运升秘阁修撰知隆兴府兼江西转运有母愬子者年月后状作疏字恢疑之呼其子至泣不言及得其情母孀居与僧通恶其子谏以不孝坐之状则僧为之也因责子侍养跬步不离僧无由至母乃托夫讳日入寺作佛事以笼盛衣帛因纳僧于内以归恢知之使人要之置笼公库逾旬吏报笼中臭达于外恢命沈于江语其子曰为汝除此害矣又姑死者假子妇棺以敛家贫不能偿妇愬于恢恢怒买一棺给其妇卧棺中以试就掩而葬之改湖南转运使罢景定初拜大理卿枢密都承旨权礼部侍郎寻为中书舍人林希逸奏恢守法奉公其心如水权刑部侍郎进华文阁直学士知平江府兼发运召赴阙辞改知绍兴又辞度宗即位召为刑部尚书进端明殿学士签书枢密院事封南城县侯郊祀礼成还以资政殿学士致仕恢历仕所至破豪猾去奸吏治蛊狱课盆盐理银欠政声赫然尝因轮对曰此臣心恻隐所以深切为陛下告者陛下恻隐之心如天地日月其闭而食之者曰近习曰外戚耳参知政事董槐见而叹曰吾等有惭色矣他日讲官因称恢疏

割切愿容纳理宗欣然曰其言甚直朕何尝怒直言经筵奏对诚实恳恻至身心之要未尝不从容淳至度宗至比恢为程颢程颐恢侍其父疾涤濯扫除之役不命僮仆年八十有七临终举卢怀慎卧箠穷约事戒诸子敛以深衣作书别亲戚而后卒遗表闻赠少保谥文肃

△常挺

常挺字方叔福州人嘉熙二年进士历官为太学录召试馆职迁秘书省正字升校书郎轮对乞以李若水配享高宗改秘书郎兼考功郎官出知衢州拜监察御史疏言边阨三事曰辟实才奏实功招实兵朝廷二事曰选良吏擢正人又言愿陛下深思宏远之规模奋发清明之志气立纲陈纪必为万世之法程昭德塞违以示百官之宪度迁太常少卿兼国子司业迁起居郎权工部侍郎兼直学士院迁工部侍郎给事中右谏议大夫陈尧道论罢以宝章阁直学士知漳州改知泉州权兵部礼部尚书迁吏部尚书咸淳三年授同知枢密院事兼权参知政事封合沙郡公拜参知政事四年致仕寻卒赠少保

△陈宗礼

陈宗礼字立之少贫力学袁甫为江东提点刑狱宗礼往问学焉淳佑四年举进士调邵武军判官入为国子正迁太学博士国子监丞转秘书省著作佐郎入对言火不循轨帝以星变为忧宗礼曰上天示戒在陛下修德布政以回天意又曰天下方事于利欲之中士大夫奔竞趋利惟至公可以遏之兼考功郎官升著作郎迁尚左郎官兼右司时丁大全擅国柄以言为讳宗礼叹曰此可一日居乎陛对言愿为宗社大计毋但为仓廩府库之小计愿得天下四海之心毋但得左右便嬖戚畹之心愿寄腹心于忠良毋但寄耳目于卑近愿四通八达以来正人毋但旁蹊曲径类引贪浊拜太常少卿以直宝谟阁广东提点刑狱进直焕章阁迁秘书监以监察御史虞虚言追两官送永州居住景定四年拜侍御史直龙图阁淮西转运判官迁刑部尚书以起居舍人曹孝庆言罢度宗即位兼侍讲拜殿中侍御史疏言恭俭之德自上躬始清白之规自宫禁始左右之言利者必斥蹊隧之私献者必诛以诗进讲因奏帝王举动无微不显古人所以贵于慎独也权礼部侍郎兼给事中进读孝宗圣训因奏安危治乱常起于一念虑之闲念虑少差祸乱随见天下之乱未有不起于微而成于着又言不以私意害公法乃国家之福帝曰孝宗家法惟赏善罚恶为尤谨宗礼言有功不赏有罪不罚虽尧舜不能治天下信不可不谨也迁礼部侍郎寻权礼部尚书乞奉祠帝曰岂朕不足与有为耶以华文阁直学士知隆兴府再辞依旧职与待次差遣逾年依旧职广东经

畧安撫使兼知廣州加端明殿學士簽書樞密院事尋
兼權參知政事疏奏國所以立曰天命人心因其警而加敬畏天命未有不可回也因其
未墜而加綏定人心未嘗不可回也卒遺表上贈開府
儀同三司盱江郡侯謚文定

△常楙

常楙字長孺顯謨閣直學士同之曾孫入太學淳佑七年舉進士調常熟尉公廉自
持不畏強御臨安府尹馬光祖又荐于朝辟差平江府
百萬倉檢察不受和余事例戢吏卒苛取發運使趙與■兼提點刑獄屬楙檢覆雪無錫
翟氏冤獄監江淮茶鹽所芑湖局不受商稅贏光祖益
敬之改知嘉定縣歲大水勸分和余按籍均敷發運使王燾提點刑獄孫子秀俱特荐于
朝簽書臨安府判官不為權勢撓有為淮東提舉常平
辟楙提管楙知其不可與共事笑而却之未几政府強楙行遂拂衣去主管城南廂听訟
嚴明豪右憚之都城火后瓦砾充斥差民船徙運在籍
者百五十家惟二十有五家應役余率為勢要宦官所庇楙悉追之不服者杖其人械于
他所無不聽命又力拒戶部科買葉夢鼎陳昉深期獎
焉添差臨岐通判朝命鞫封樁庫吏范成獄不肯承廟堂風旨無辜者悉出之知廣德軍
郡有水災發社倉粟以活飢民官吏難之楙先發而后
請專命之罪置慈幼局立先賢祠拜監察御史知無不言嘗論天變及賈似道家爭田事
論繼皇子竑嗣觸度宗怒遷司農卿尋為兩浙轉運使
禁戢吏奸不以急符督常賦海鹽歲為咸潮害稼楙請于朝捐金發粟復輟已帑大加修
築新塘三千六百二十五丈名曰海晏塘是秋風濤大
作塘不浸者尺許民得奠居歲復告稔遷戶部侍郎受四方民詞務通下情兼中書門下
省檢正諸房公事兼刑部侍郎極論檢覆之弊士進故
事首論雷雪非時之變帝意不悅旬祠不許以集英殿修撰知平江值旱蠲苗九萬稅十
三萬版帳十六萬又蠲新苗二萬八千大寬公私之力
飛蝗几及境疾風飄入太湖節浮費修府庫既代有送還事例自給吏卒外余金萬楮楙
悉不受吏驚曰人言常侍郎不愛錢果然改浙東安撫
使值水災捐萬楮以賑之復請余于朝得米萬石蠲新苗三萬八千又以諸暨被水尤甚
給二萬楮付縣折運民食不至乏絕民各祠于家兩浙
及會稽山陰死者暴露與貧而無以為殮者乃以十萬楮置普惠庫取息造棺以給之尋
以刑部侍郎召申明期赦叙改法與廟堂爭可否辨偽
關獄救八倉虧欠免死罪平反天井巷殺人獄全活者甚眾兼給事中封還隆國夫人从
子黃進觀察使錄黃帝怒似道以御書令委曲書行楙
迄不奉命以寶章閣待制提舉太平興國宮德佑元年拜吏部尚書以老病辭累召不許

专官趋行甚峻楸入见首言霄川之变非其本心置之
死过矣不与立后又过矣巴陵帝王之胄生不得正命死不得血食沉冤幽愤郁结四五
十年之久不为妖为札于冥冥中者几希愿陛下勿摇
浮议特发神断宗社幸甚于是诏国史院讨论典故以阐明堂礼成进端明殿学士提领
户部财用特与执政恩数楸以国步方艰非臣子贪荣
之时力辞恩数与庙堂议事不合以疾谒告二年拜参知政事为夏士林缴驳拜疏出关
后六年卒

△家铉翁

家铉翁眉州人以荫补官累官知常州政誉翕然迁浙东提点刑狱入为大理少卿
直华文阁以秘阁修撰充绍兴府长史迁枢密都丞旨
知建宁府兼福建转运副使权户部侍郎兼知临安府浙西安抚使迁户部侍郎权侍右
侍郎仍兼枢密都丞旨赐进士出身拜端明殿学士签
书枢密院事元兵次近郊丞相吴坚贾余庆檄告天下守令以城降铉翁独不署元帅遣
使至欲加缚铉翁曰中书省无缚执政之理坚奉表祈
请于元以铉翁介之礼成不得命留馆中闻宋亡旦夕哭泣不食饮者数月元以其节高
欲尊官之以示南服铉翁义不二君辞无诡对宋三宫
北迁铉翁再率故臣迎谒伏地流涕顿首谢奉使无状不能感动上衷无以保存其国见
者莫不叹息文天祥女弟坐兄故系奚官铉翁倾橐中
装赎出之以归其兄璧铉翁状貌奇伟身长七尺被服俨雅其学邃于春秋自号则堂改
馆河闲乃以春秋教授弟子数为诸生谈宋故事及宋
兴亡之故或流涕太息元成宗即位放还赐号处士赐赀金币皆辞不受又数年以寿终

△李庭芝

李庭芝字祥甫其先汴人十二世同居号义门李氏后徙随之应山县金亡襄汉被
兵又徙随然特以武显庭芝生时有芝产屋栋乡人聚
观以为生男祥也遂以名少颖异日能诵数千言而智识恒出长老上王旻守随庭芝年
十八告其诸父曰王公贪而不恤下下多怨之随必乱
请徙家德安以避诸父勉强从之未浹旬旻果为部曲挟之以叛随民死者甚众嘉熙末
江防甚急庭芝得乡举不行以策干荆帅孟珙请自効
珙善相人且夜梦车骑称李尚书谒已明日庭芝至珙见其魁伟顾诸子曰吾相人多无
如李生者其名位当过我时四川有警即以庭芝权施
之建始县庭芝至训农治兵选壮士杂官军教之期年民皆知战守善驰逐无事则植戈
而耕兵至则悉出而战夔帅下其法于所部行之淳佑
初始去举进士中第珙辟幕中主管机宜文字珙卒遗表举贾似道自代而荐庭芝于似
道庭芝感珙知己扶其柩葬之兴国即弃官归为珙行

三年丧似道镇京湖起为制置司参议移镇两淮与似道议栅清河五河口增淮南烽百二十继知濠州复城荆山以备淮南皆切中机会开庆元年似道宣抚京湖留庭芝权扬州寻以元兵在蜀奏知峡州以防蜀江口朝廷以赵与■为淮南制置李应庚为参议官应庚发两路兵城南城大暑中暍死者数万李璫窥其无谋夺涟水三城渡淮夺南城鄂兵解庭芝丁母忧去朝议择守扬者帝曰无如李庭芝乃夺情主管两淮制置司事庭芝再破璫兵杀璫将厉元帅夷南城而归明年复败璫于乔村破东海石圃等城又明年璫降徙三城民于通泰之闲又破蕲县杀守将庭芝初至扬时扬新遭火庐舍尽毁州赖盐为利而亭户多亡去公私萧然庭芝悉贷民逋负假钱使为屋屋成又免其假钱凡一岁官民居皆具凿河四十里入金沙余庆场以省车运兼浚他运河放亭户负盐二百余万亭民无车运之劳又得免所负逃者皆来归盐利大兴始平山堂瞰扬城元兵至则构望楼其上张车弩以射城中庭芝乃筑大城包之城中募汴南流民二万人以实之有诏命为武锐军又大修学为诗书俎豆与士行习射礼郡中有水旱即命发廩不足则以私财赈之扬民德之如父母刘盘自淮南入朝帝问淮事盘对曰李庭芝老成谨重军民安之今边尘不惊百度具举皆陛下委任得人之效也咸淳五年北兵围襄阳急夏贵入援大败虎尾州范文虎总诸兵再入又败文虎以轻舫遁兵乱士卒溺汉水死者甚众冬命庭芝以京湖制置大使督师援襄阳文虎闻庭芝至贻书似道曰吾将兵数万入襄阳一战可平但无使听命于京阙事成则功归恩相矣似道喜即除文虎福州观察使其兵从中制之文虎日携美妾走马击球军中为乐庭芝屡欲进兵曰吾取旨未至也明年六月汉水溢文虎不得已始出一师未至鹿门中道遁去庭芝数自劾请代不允竟失襄阳陈宜中请诛文虎似道庇之止降一官知安庆府而贬庭芝及部将苏刘义范友信广南庭芝罢居京口未几元兵围扬州制置印应雷暴死即起庭芝制置两淮庭芝请分淮西夏贵而已得专力淮东从之十年筑清河口诏以为清河军十二月元兵破鄂诏天下勤王庭芝首遣兵为诸道倡德佑元年春似道兵溃芜湖沿江诸郡或降或遁无一人能守者庭芝率所部郡县城守有李虎者持招降榜入扬州庭芝诛虎焚榜梟俊五人于市而日调苗再成战其南许文德战其北姜才施忠战其中时出金帛牛酒燕犒将士人人之为之死鬪朝廷亦以督府金劳之加庭芝参知政事七月以知枢密院事征入朝徙夏贵知扬州贵不至事遂已十月元丞相巴延入临安留元帅阿珠军镇江以遏淮兵阿珠攻扬久不拔乃筑长围困之冬城中食尽死者满道明

年二月饥益甚赴濠水死者日数百道有死者众争割啖之立尽宋亡谢太后及少帝为诏谕之降庭芝登城曰奉诏守城未闻有诏谕降也已而两宫北迁至瓜洲复诏庭芝曰比诏卿纳款日久未报岂未悉吾意尚欲固圉耶今吾与嗣君既已臣服卿尚为谁守之庭芝不答命发弩射使者毙一人余皆退去姜才出兵夺两宫不克复闭城守三月夏贵以淮西降阿珠驱降兵至城下以示之旌旗蔽野幕客有以言觐庭芝者庭芝曰吾惟一死而已阿珠使者持诏来招降庭芝开壁纳使者斩之焚诏俾上已而知淮安州许文德知盱眙军张思聪知泗州刘兴祖皆以粮尽降庭芝犹括民闲粟以给兵粟尽令官人出粟粟又尽令将校出粟杂牛皮曲蘖以给之兵有烹子而食者犹日出苦战七月阿珠请赦庭芝焚诏之罪使之降有诏从之庭芝亦不纳是月益王遣使以少保左丞相召庭芝庭芝以朱焕守扬与姜才将兵七千人东入海至泰州阿珠将兵追围之朱焕既以城降驱庭芝将士妻子至泰州城下俾将孙贵胡惟孝等开门降庭芝闻变赴莲池水浅不得死被执至扬州朱焕请曰扬自用兵以来积骸满野皆庭芝与才所为不杀之何俟于是斩之死之日扬之民皆泣下有宋应龙者为泰州咨议官泰守孙良臣之弟舜臣自军中说降良臣召应龙与计应龙极陈国家恩泽君臣大义请杀舜臣以戒持二心者良臣不得已杀之及泰州降应龙夫妇自经死提刑司咨议褚一正置司高邮督战被创没水死知兴化县胡拱辰城破亦死

钦定续通志卷四百十二

●钦定续通志卷四百十三 列传二百十三

列传

宋 【一百十七】

○宋一百十七

林勋 刘才邵 许忻 应孟明 曾三聘 徐侨 度正

牛大年 陈仲微

林勋

刘才邵

许忻

应孟明

曾三聘

徐侨

度正

牛大年

陈仲微

△林勋

林勋贺州人政和五年进士为广州教授建炎三年献本政书十三篇言国家兵农之政率因唐末之故今农贫而多失职兵骄而不可用是以饥民窜卒类为盗贼宜假古井田之制使民一夫占田五十亩其有羨田之家毋得市田其无田与游惰末作者皆驱之使为隶农以耕田之羨者而杂纽钱谷以为十一之税宋二税之数视唐增至七倍今本政之制每十六夫为一井提封百里为三千四百井率税米五万一千斛钱万二千缗每井赋二兵马一匹率为兵六千四百人马三千四百匹岁取五之一以为上番之额以给征役无事则又分为四番以直官卫以给守卫是民凡三十五年而役使一遍也悉上则岁食米万九千余斛钱三千六百缗无事则减四分之三皆以一同之租税供之匹妇之贡绢三尺绵一两百里之县岁收绢四千余匹绵三千四百斤非蚕乡则布六尺麻二两所收视绢绵率倍之行之十年则民之口算官之酒酤与凡茶盐香矾之榷皆可弛以予民其说甚备书奏以勋为桂州节度掌书记其后勋又献比校书二篇大畧谓桂州地东西六百里南北五百里以古尺计之为方百里之国四十当垦田二百二十五万二千八百顷有田夫二百四万八千出米二十四万八千斛禄卿大夫以下四千人禄兵三十万人今桂州垦田约万四十二顷丁二十一万六千六百一十五税钱万五千余缗苗米计五万二百斛有奇州县官不满百员官兵五千一百人盖土地荒芜而游手末作之人众是以地利多遗财用不足皆本政不修之故朱熹甚爱其书东阳陈亮曰勋为此书考古验今思虑周密可谓勤矣世之为井地之学者孰有加于勋者乎

△刘才邵

刘才邵字美中吉州庐陵人以大观二年上舍释褐为赣汝二州教授复为湖北提举学事管干文字宣和二年中宏词科迁司农寺丞靖康元年迁校书郎高宗即位以亲老归侍居闲十年御史中丞廖刚荐之召见迁秘书丞历驾部员外郎迁吏部员外郎典侍右选事先是宗室注宫观岳庙例须赴部远者或难于行才邵言许经所属以闻于部依条注拟行之迁军器监既而迁起居舍人未几为中书舍人兼权直学士院帝称其能文时宰忌之出知漳州即城东开渠十有四为闸与斗门以潴汇决溉田数千亩民甚德之两奉祠绍兴二十五年召拜工部侍郎兼直学士院寻权吏部尚书以疾请祠加显谟阁直学士卒赠通奉大夫才邵气和貌恭方权臣用事之时雍容逊避以保名节焉

△许忻

许忻拱州人宣和三年进士高宗时为吏部员外郎有旨引见是时金国使人张通古在馆忻上疏极论和议不便曰臣两蒙召见擢寘文馆今兹复降睿旨引对今见陛下于多故之时欲采千虑一得之说以广聪明是臣图报万分之秋也故敢竭愚而效忠臣闻金使之来陛下以祖宗陵寝废祀徽宗皇帝显肃皇后梓宫在远母后春秋已高久阙晨昏之奉渊圣皇帝与天族还归无期欲屈己以就和遣使报聘兹事体大固已诏侍从台谏各具所见闻矣不知侍从台谏皆以为可乎抑亦可否杂进陛下未有所择乎抑亦金不复邀我以难行之礼乎是数者臣所不得而闻也请试别白利害为陛下详陈之夫金人之始入也固尝云讲和矣靖康之初约肃王至大河而返已而挟之北行迄无音耗河朔千里焚掠无遗老稚系累而死者亿万计复破威胜隆德等州渊圣皇帝尝降诏书谓金又渝盟必不可守是岁又复深入朝廷制置失宜都城遂陷敌情惧我百万之众必以死争也止我诸道勤王之师则又曰讲和矣乃邀渊圣出郊次邀徽宗继往追取宗族殆无虚日倾竭府库靡有子遗公卿大臣类皆拘执然后伪立张邦昌而去则是金人所谓讲和者果可信乎此已然之祸陛下所亲见今徒以王伦缪悠之说遂诱致金人责我以必不可行之礼陛下遂已屈己从之臣是以不觉涕泗横流也夫彼以诏谕江南为名而来则是飞尺书下本朝岂讲和之谓哉我躬受之真为臣妾矣臣窃料陛下必不忍为也万一奉其诏令则将变置吾之大臣分部吾之诸将邀求无厌靡有穷极当此之时陛下从之无以立国不从之复责我以违令其何以自处乎脱或包羞忍耻受其诏谕而彼许我者不复如约则徒受其辱而貽万世之讥纵使如约则是我今日所有土地先拱手而奉敌人矣祖宗在天之灵以为何如徽宗皇帝显肃皇后不共戴天之讎遂不可复也岂不痛哉陛下审思之断非圣心所能安也国家两尝得胜于淮甸虽未能克复中原之地而大江之南亦足支吾军声粗震国势粗安故金人因王伦之往复遣使来尝试吾若从其请正堕其计不从其欲且复携我之金币而去亦何适而非彼之利哉为今之计独有陛下幡然改虑布告中外以收人心谓祖宗陵寝废祀徽宗皇帝显肃皇后梓宫在远母后渊圣宗枝族属未还故遣使迎请冀遂南归今敌来邀朝廷以必不可从之礼实王伦卖国之罪当行诛责以释天下之疑然后激励诸将谨捍边陲无堕敌计进用忠正黜远奸褻振纪纲修政事务为实效不事虚名夕虑朝谋以图兴复庶乎可矣今金使虽已就馆谓当别议区处之宜臣闻万人所聚必有公言在廷诸臣与中外一心皆

以金人之诏为不可从公言如此陛下独不察乎今日之举存亡所系愚衷感发不能自己望鉴其惓惓之忠特垂采纳更与二三大臣熟议其便社稷天下幸甚疏入不省后忻托故乞从外补乃授荆湖南路转运判官谪居抚州起知邵阳卒

△应孟明

应孟明字仲实婺州永康人少游太学登隆兴元年进士第试中教官调临安府教授继为浙东安抚司干官乐平县丞侍御史葛邲监察御史王藺荐为详定一司敕令所删定官轮对首论南北通好疆场无虞当选将练兵常如大敌之在境而可以一日忽乎贪残苛酷之吏未去吾民得无不安其生者乎贤士匿于下僚忠言壅于上闻无乃众正之门未尽开而兼听之意未尽乎乎君臣之闲戒惧而不自持勤劳而不自盗进君子退小人以民隐为忧以边陲为警则政治自修纪纲自张矣孝宗曰朕早夜戒惧无顷刻忘退朝之暇亦无他好正恐临朝或稍晏则万几之旷自此始矣次乞申严监司庇贪吏之禁荐举徇私情之禁帝嘉奖久之他日宰相进拟帝出片纸于堂中书二人姓名曰卿何故不及此其一则孟明也乃拜大理寺丞故大将李显忠之子家僮溺死有司诬以杀人逮系几三百家孟明察其冤白于长官释之出为福建提举常平陛辞帝曰朕知卿爱百姓恶赃吏事有不便于民宜悉意以闻因问当世人才孟明对曰有才而不学则流为刻薄惟上之教化明取舍正使回心向道则成就必倍于人帝曰诚为人上者之责孟明至部具以临遣之意咨访之帝一日御经筵因论监司按察顾谓讲读官曰朕近日得数人应孟明其最也寻除浙东提点刑狱以乡部引嫌改使江东会广西谋帅帝谓辅臣曰朕熟思之无易应孟明者即以手笔赐孟明曰朕闻广西盐法利害相半卿到任自可详究其事进直秘阁知静江府兼广西经畧安抚初广西盐易官般为客钞客户无多折阅逃避遂抑配于民行之六年公私交病追逮禁锢民不聊生孟明徐具驿奏除其弊诏从之禁卒朱兴结集党侣弄兵雷化闲声势渐长孟明遣将缚致辕门斩之光宗即位迁浙西提点刑狱寻召为吏部员外郎改左司迁右司再迁中书门下省检正诸房公事宁宗即位拜太府卿兼吏部侍郎庆元初权吏部侍郎卒孟明以儒学奋身受知人主官职未尝幸迁韩侂胄尝遣其密客诱以谏官俸诬赵汝愚孟明不答士论以此重之

△曾三聘

曾三聘字无逸临江新淦人干道二年进士调赣州司户参军累迁军器监主簿有旨造划车弩三聘谓划车弩六人挽之而箭之所及止

二百六十步今所用克敌弓较之工费不及十之三一人挽之而射可及三百六十步利害晓然乃不果造光宗不朝重华官中外疑惧三聘以书抵丞相留正正未及言会以他事不合求去三聘谓丞相今泯默而退耶亦将取今日所难言者别白言之而后退凡今阙庭之内闺门衽席之闲父子夫妇之际羣臣莫敢深言者避嫌远罪耳丞相身退计决言之何嫌乎迁秘书长郎帝欲幸玉津园三聘上疏言今人心既离大乱将作小大之臣震怖请命而陛下安意肆志而弗闻知万一敌人谍知驰一介之使问安北宫不知何以答之奸宄窥闲传一纸之檄指斥乘輿不知何以御之望亟备法驾朝谒不然臣实未知死所也孝宗病革复上疏言道路流言汹汹日甚臣恐不幸而有狂夫奸人托忠愤以行诈假曲直以动众至此而后悔之则恐无及矣帝意为动及孝宗崩帝疾不能执丧朝论益震汹三聘谓今日事势莫若建储或戒之曰前日台谏诸公谓汝夺其职今复有疏耶三聘曰此何时而可避烦言也宣宗立兼考功郎后知郢州会韩侂胄为相指三聘为故相赵汝愚腹心坐追两官久之复元官与祠差知郴州改提点广西湖北刑狱皆辞不赴侂胄诛诸贤遭窜斥者相继召用三聘禄不及终不自言嘉熙闲三聘已卒有旨特赠三官直龙图阁赐谥忠节

△徐侨

徐侨字崇甫婺州义乌人早从学于吕祖谦门人叶邦淳熙十四年举进士调上饶主簿始登朱熹之门熹称其明白刚直命以毅名斋入为秘书省正字校书郎兼吴益王府教授直宝谟阁江东提点刑狱以忤丞相史弥远劾罢宝庆初葛洪乔行简代为请祠迄不受禄绍定中告老得请端平初与诸贤俱被召迁秘书少监太常少卿趣入覲手疏数千言皆感愤剴切上劄主阙下逮羣臣分别黑白无所回隐帝数慰谕之顾见其衣履垢敝愀然谓曰卿可谓清贫侨对曰臣不贫陛下乃贫耳帝曰朕何为贫侨曰陛下国本未建疆宇日蹙权幸用事将帅非材旱蝗相仍盗贼并起经用无艺帑藏空虚民困于横敛军怨于掎克羣臣养骄而天子孤立国势阽危而陛下不悟臣不贫陛下乃贫耳又言今女谒阉宦相为囊橐诞为二竖以处国膏肓而执政大臣又无知缓之术陛下此之不虑而耽乐是从世有扁鹊将望见而却走矣时贵妃阎氏方有宠而内侍董宋臣表里用事故侨论及之帝为之感动改容咨嗟太息明日手诏罢边帅之尤无状者申儆羣臣以朋党为之戒命有司裁节中外浮费而赐侨金帛甚厚侨固辞不受侍讲开陈友爱大义用是复皇子竑爵请从祀周敦颐程颢程颐张载朱熹以赵汝愚侂胄食宣宗帝皆如

其请金使至侨以无国书宜馆之于外如叔向辞郑故事忤丞相意力勾休致帝谕留甚勤迁工部侍郎辞益坚遂命以内祠侍读不得已就职遇事尽言以疾申前请乃以宝谟阁待制奉祠卒谥文清侨学一以真践实履为尚奏对之言剖析理欲因致劝惩若其守官居家清苦刻厉之操人所难能也

△度正

度正字周卿合州人绍熙元年进士历官为国子监丞时士大夫无愚贤皆策李全必反而不敢言正独上疏极言之且献毙全之策有三其言鲠亮激切迁军器少监轮对言陛下推行圣学当自正家始进太常少卿适太庙灾为二说以献其一则用朱熹之议其一则因本朝庙制而参以熹之议自西祖东为一列每室之后为一室以藏祧庙之主如僖祖庙以次祧主则藏之昭居左穆居右后世穆之祧主藏太祖庙昭之祧主藏太宗庙仁宗为百世不迁之宗后世昭之祧主则藏之高宗为百世不迁之宗后世穆之祧主则藏之室之前为两室三年禘享则帷帐幕之通为一室尽出诸庙主及祧庙主并为一列合食其上往者此庙为一室凡遇禘享合祭于室名为合享而实未尝合享今增此三室后有藏祧主之所前有祖宗合食之地于本庙之制初无更革而颇已得三年大禘之义迁权礼部侍郎兼侍右郎官兼同修国史实录院同修撰迁礼部侍郎转一官守礼部侍郎致仕卒赠四官【按宋史此下有程瑛传瑛列爵为侯无善迹足录尝同宰相史弥远入禁中草矫诏史论谓其窃取富贵今从删】

△牛大年

牛大年字隆叟扬州人庆元二年进士历官将作监主簿入对言人生居富贵崇高之位重而承宗社之托尊而为臣辟之戴天心靡常则可畏也又言士气有扶持作兴之意而后搢绅无贪名嗜利之习无贪名嗜利之习而后有持正秉义之操陛下为之振起机括一运天下转移而风俗易矣迁军器监主簿太宗正丞四川提举茶马兼权总领知黎州节制黎雅州屯戍军马加直宝章阁为工部郎官入对请惩贪吏迁侍左郎中进直华文阁浙东提点刑狱迁守秘书少监宗正少卿升秘书监迁起居舍人升起居郎兼崇政殿说书以宝章阁待制提举太平兴国宫卒特赠四官大年清操凛然所至以廉洁自持

△陈仲微

陈仲微字致广瑞州高安人其先居江州旌表义门嘉泰二年举进士调莆田尉会守令阙通判又罢软不任台阉委以县事时齿凶部卒

并饥民作乱仲微立召首乱者戮之籍闭棗抑强余一境以肃囊山浮屠与郡学争水利久不决仲微按法曰曲在浮屠他日沿檄过寺其徒久揭其事钟上以为冤旦暮祝诅然莫省为仲微也仲微见之曰吾何心哉吾何心哉质明首僧无疾而死寓公有诵仲微于当路而密授以荐牍者仲微受而藏之踰年其家负县租竟逮其奴寓公有怨言仲微还其牍缄封如故其人惭谢终其任不敢挠以私迁海盐丞邻邑有疑狱十年郡命仲微按之一问立决改知崇阳县寝食公署旁日与父老樵竖相尔汝下情毕达吏无所措手通判黄州职兼饷馈以身律下随事检柅军兴赖以不乏制置使上其最辞曰职分也何最之有复通判江州迁干办诸司审计事知赣州江西提点刑狱忤丞相贾似道监察御史舒有开言罢久之起知惠州迁太府寺丞兼权侍右郎官轮对言禄饵可以钓天下之中材而不可啖尝天下之豪杰名航可以载天下之猥士而不可以陆沈天下之英雄似道怒又讽言者罢夺其官久之叙复时国势危甚仲微上封事其畧曰误襄者老将也夫襄之罪不专在于庸阨疲将孩兵也君相当分受其责以谢先皇帝在天之灵天子若曰罪在朕躬大臣宜言咎在臣等宣布十年养安之往繆深惩六年玩寇之昨非救过未形固已无极追悔既往尚愈于迷惟君相幡然改悟天下事尚可为也乃出仲微江东提点刑狱德佑元年迁秘书监寻拜右正言左司谏殿中侍御史益王即位海上拜吏部尚书给事中厓山兵败走安南越四年卒年七十有二仲微天稟笃实虽生长富贵而恶衣菲食自同窶人故能涵饫六经精研理致于诸子百家天文地理医药卜筮释老之学靡不搜猎云 【按宋史此下有梁成大李知孝二传成大知孝皆变诈倾险残害正人为史弥远鹰犬无一善迹可录并从删】

钦定续通志卷四百十三

●钦定续通志卷四百十四 列传二百十四

列传

宋 【一百十八】

○宋一百十八

吴泳

徐范

李韶

王迈

史弥巩

陈埴

赵与■

李大同

黄■〈然田〉

杨

大异

吴泳

徐范

李韶

王迈

史弥巩

陈埧

赵与■

李大同

黄■ 〈然田〉

杨大异

△吴泳

吴泳字叔永潼川人嘉定二年进士历官为军器少监行太府寺丞行校书郎升秘书丞兼权司封郎官兼枢密院编修官升著作郎时暂兼权直舍人院轮对言愿陛下养心以清明约己以恭俭进德以刚毅发强毋以旨酒违善言毋以嬖御嫉壮士毋以靡曼之色伐天性杜渐防微澄源正本使君身之所自立者先有其地夫然后移所留之聪明以经世务移所舍之精神以强国政移所用之心力以恤罢民移所当省之浮费以犒边上久戍之士则不惟可以消弭灾变攘除奸凶殄灭外患虽以是建久安长治之策可也他日入对又言诵往哲之遗言进谋国之上策实不过曰内修政事而已然所谓内修者非但车马器械之谓也袞职之阙所当修也官师之旷所当修也出令之所弗清所当修也本兵之地弗严所当修也直言敢谏之未得其职所当修也折冲御侮之弗堪其任所当修也陛下退修于其上百官有司交修于其下朝廷既正人心既附然后申警国人精讨军实合内修外攘为一事神州赤县皆在吾指顾中矣火灾应诏上封曰京城之灾京城之所见也四方有败陛下亦得而见之乎夫惨莫惨于兵也而连年不戢则甚于火矣酷莫酷于吏也而频岁横征则猛于火矣闽之民困于盗浙之民困于水蜀之民困于兵横敛之原既不澄于上包苴之根又不绝于下譬彼坏木疾用无枝而内涸之形见矣迁秘书少监兼权中书舍人寻迁起居舍人兼权吏部侍郎兼直学士院疏言世之识治体而忧时几者以为天运将变矣世道将降矣国论将更矣正人将引去而旧人将登用矣执持初意封植正论兹非砥柱倾颓之时乎若使廉通敏慧者专治财赋淑慎晓畅者专御军旅明清敬谨者专典刑狱经术通明使道训典文雅丽则使作训辞秉节坚厉使备风宪奉法循理使居牧守刚直有守者不听其引去恬退无竞者不听其居里功名慷慨者不佚之以祠庭言论闾爽者不寘之于外服随才器使各尽其分则短长小大安有不适用者哉又言谨政体正道揆厉臣节综军务四事权刑部尚书以宝章阁直学士知宝章阁直学士知宝章阁

府提举太平兴国宫进宝章阁学士差知温州道闻温州饥至处州乞蠲租科降救饥者四万八千有奇放夏税一十二万有奇秋苗二万八千有奇病者复与之药事闻赐衣带鞍马改知泉州以言罢

△徐范

徐范字彝父福州侯官县人少孤刻苦授徒以养母与兄同举于乡入太学未尝以疾言遽色先人丞相赵汝愚去位祭酒李祥博士杨简论救之俱被斥逐同舍生议叩阁上书书已具有闽士亦署名忽夜传韩侂胄将寘言者重辟闽士怖请削名范之友亦劝止之范慨然曰业已书名矣尚何变书奏侂胄果大怒谓其扇摇国是各送五百里编管范谪临海与兄归同往禁锢十余年至嘉定元年进士第授清江县尉辟江淮制置司准备差遣属边事纷纭营砦子弟募隶军籍者未及涅陶涵相惊一夕秉烛招刺千余人踊跃争奋差主管户部架阁改太学录迁国子监主簿入对言时平不急之务无用之官犹当痛加裁节矧多事之秋所贵全万民之命纾一时之急独奈何坐视其无救而以虚文自蔽哉愿惩既往之失废无用之文一意养民以培国本旬外添差通判泽州湖湘大旱振救多所裨益知邵武军寻召赴行在言功利不若道德刑罚不若恩厚杂伯不若纯王异端不若儒术谀佞不若直谏便嬖不若正人奢侈不若诗书盘游不若节俭玩好不若宵衣旰食穷黷不若偃兵息民是非两立明白易见几微之际大体所关积习不移治道舛矣迁国子监丞徙太常寺丞权都官郎官改秘书丞著作郎起居郎兼国史编修实录检讨以朝奉大夫致仕卒赠朝请大夫集英殿修撰

△李韶

李韶字符善弥逊之曾孙也父文饶为台州司理参军每谓人曰吾司臬多阴德后有兴者韶五岁能赋梅花嘉平四年与其兄窳同举进士调南雄州教授校文广州时有当国之亲故私报所业韶却之调庆元丞相史弥远荐士充学职韶不与袁燮求学宫射圃益其居亦不与燮以此更敬韶以廉勤荐迁主管三省架阁文字迁太学正改太学博士上封事谏济王竑狱且以书晓弥远言甚恳到又救太学生宁式迁学官旬外添差通判泉州郡守游九功素清严独异顾韶改知道州葺周惇颐故居录其子孙于学宫且周其家绍定四年行都灾韶应诏言事提举福建市舶会星变又应诏言事入为国子监丞改知泉州兼市舶端平元年召明年转太府寺丞迁都官郎官迁尚左郎官未几拜右正言奏乞以国事边防二事专委丞相郑清之乔行简各任责论汰兵节财及襄蜀边防又论史嵩之王遂和战异议迄无成功请出遂于要藩易嵩之于

边面使各尽其才史宅之将守袁州韶率同列一再劾之俱不报乞解言职拜殿中侍御史辞不允奏曰顷同臣居言职者四人未踰月徐清叟去未三月杜范吴昌裔免独臣尚就列清叟昨言三渐臣继其说李宗勉又继之陛下初不加怒而清叟竟去犹曰清叟倡之也今臣与范昌裔言未尝不相表里二臣出台臣独留岂臣言不加切于二臣邪抑先去二臣以警臣使知择而后言邪清叟所言三渐臣犹以为未甚切今国柄有陵夷之渐士气有委靡之渐主势有孤立之渐宗社有阽危之渐上下偷安以人言为讳此意不改其祸岂直三渐而已时魏了翁罢督予祠韶讼曰了翁刻志问学几四十年忠言谏论载在国史去就出处具有本末端平收召论事益切去年督府之遗体统不一识者逆知其无功了翁迫于君命龟勉驱驰未有大阙襄州变出肘腋未可以为了翁罪枢庭之召未几改镇改镇未久有旨予祠不知国家四十年来收拾人才如了翁者几人愿亟召还处以台辅又劾奏陈洵益刑余腐夫粗通文墨扫除贱隶窃弄威权乞予洵益外祠劾女冠吴知古在宫掖招权纳贿宜出之禁庭帝怒韶还笏殿陛乞归会祀明堂雷电免二相韶权工部侍郎正言迁起居舍人复疏洵益知古不报辞新命不许应诏上封事几数千言帝谕左右曰李韶真有爱朕忧国之心凡三辞不获以生死祈哀乞去帝蹙额谓韶曰曲为朕留退复累疏乞补外以集英殿修撰知漳州号称廉平朝廷分遣部使者诸路称提官楮韶疏极言其弊嘉熙二年召明年上疏乞寝召命云端平以来天下之患莫大于敌兵岁至和不可战不能楮券日轻民生流离物价踊贵遂至事无可为臣窃论以为必自上始九重菲衣恶食卧薪尝胆使上下改虑易听然后可图今二患益深虽欲效忠他莫有以为说此其不敢进者一史宅之故相子予郡外议皆谓扳援之徒将自是复用故尝论列至再今圣断赫然用舍由己人才一变矣环视前日在廷之臣流落摈弃臣虽欲贪进未知所以处其身此其不敢进者二始臣为郎蜀受兵方亟庙堂已遣小使至特起嵩之于家而言者攻击不已臣妄论以为讲和固非策而首兵亦岂能无罪故居言路首乞出高论者付以兵事使稍知敌情者尝试其说于阃外不知事势推移遂竟罢废而款敌无功者白麻扬廷矣或者将议臣前日有所附会此臣重不敢进者三又臣昨弹内侍女冠不行退惟圣主高明必不容其干政然未几首相去位臣亦出台传闻其人谓臣受庙堂风旨故决意勾外今臣言迄不行苟贪君命窃恐或者讥臣向何所闻而去今何所见而来此臣重不敢进者四四年诏趣赴阙辞迁户部侍郎再辞不允五年改礼部侍郎辞诏不允令所在州军护送至阙嵩之遣人谓

韶曰毋言济邸宫媪国本韶不答上疏曰臣生长淳熙初犹及见度江盛时民生富乐吏治修举事变少异政归私门绍定之末元气索矣端平更化陛下初意岂不甚美国事日坏其人或罢或死莫有为陛下任其责者考论至是天下事非陛下所当自任而力为乎左氏载史墨言鲁公世从其失季氏世修其勤盖言所由来者渐矣陛下临御日久宜深思熟念威福自己谁得盗之舍此不为悠悠玩愒乃几于左氏所谓世从其失者盖以世卿风嵩之也疏出嵩之不胜曰治春秋人下语毒当是时杜范亦在列二人廉直中外称为李杜迁吏部侍郎兼中书舍人三辞不许淳佑元年疏言济王国本宫媪三上疏乞归以宝章阁直学士知泉州辞乞畀祠不许既归三辞仍旧职提举鸿庆宫淳佑二年被召再辞诏本州岛通判劝勉赴阙迁礼部侍郎三辞迁权礼部尚书复三辞不许入见疏曰陛下所谋者嫔妃近习所言者贵戚近亲按政和令诸国戚命妇若女冠尼不因大礼等辄求入内者许台谏觉察弹奏乞申严禁廷之籍以绝天下之谤世臣贵戚牵连并进何示人以不广也借曰以才选他时万一有非才者援是以求进将何以抑之耶又曰闻之道路德音每下昆虫草木咸被润泽恩独不及于一枯槁威断出自公卿大夫莫敢后先令独不行于一老媪小大之臣积劳受爵皆得以延于世而国储君副社稷所赖以灵长独不早计而预定又疏乞还不许兼侍读三辞不许又三疏乞归时游似以人望用然有牵制之者韶奏云始而授之如不得已既乃疑之反使不得有所为是岂专任责成之体擢翰林学士兼知制诰兼侍读不拜诏不许又三辞不许嵩之服除有乡用之意殿中侍御史章琰正言李昉英监察御史黄师雍论列嵩之甚峻诏落职予祠韶同从官抗疏引春秋桓公五年书蔡人卫人陈人从王伐郑言陛下不能正奸臣之罪其过不专在上盖大臣百执事不能辅天子以讨有罪皆春秋所不赦乞断以春秋之义亟赐裁处诏嵩之勒令致仕既而嵩之进观文殿大学士韶上疏争之甚力未几琰昉英他有所论列并罢言职韶复上疏留之七年韶上十疏勾去以端明殿学士提举玉隆宫时直学士院应■〈亻 繇〉中书舍人赵汝腾拜疏留韶内祠未报韶陛辞疏甚剴切谓中书之手可束台谏之口可铃朝廷之事所当力为不可枚举皆莫有任其责者甚非所以示四方一体统改提举万寿观兼侍读即出国门力辞道次三衢趣韶受命再辞仍奉祠玉隆八年被召辞不许再辞仍旧职奉祠万寿兼侍读令守臣以礼趣行又辞不许九年仍奉祠玉隆十一年祠满再任卒年七十五韶忠厚纯实平粹简澹不溺于声色货利默坐一室门无杂宾云

△王迈

王迈字贯之兴化军仙游人嘉定十年进士为潭州观察推官调浙西安抚司干官考廷试详定官王元春欲私所亲寘高第迈显撻其谬元春怒嗾谏官李知孝诬迈在殿庐语声高免官调南外睦宗院教授真德秀方守福州迈竭忠以裨郡政赴都堂审察丞相郑清之曰学官掌故不足浼吾贯之俄召试学士院策以楮币迈援据古今考究本末谓国贫楮多弊始于兵干淳初行楮币止二千万时南北方休息也开禧兵兴增至一亿四千万矣绍定有事山东增至二亿九千万矣议者徒患楮穷而弗惩兵祸姑以今之尺籍校之嘉定增至二十八万八千有奇用寡谋之人试直突之说能发而不能收能取而不能守今无他策核军实窒边衅掣楮币第一义也又言修内司营缮广内帑宣索多厚施缙黄滥予嫔御若此未尝裁撙徒闻有括田榷盐之议者向使二事可行故相行之久矣更化伊始奈何取前所不屑行者而行之乎真德秀病危闻迈所对善之帝再相乔行简或传史嵩之复用迈上封事曰天下之相不与天下共谋之是必冥冥之中有为之地者且旧相奸儉刻薄天下所知复用则君子空于一网矣又言吴知古陈洵益挠政轮对言君不可欺天大臣不可欺君厚权臣而薄同气为欺天之着迈由疏远见帝空臆无隐帝为改容言者劾迈论边事过实魏了翁侍经筵为帝言惜其去改通判漳州裡祀雷雨迈应诏言天与寤考之怒久矣曲蘖致疾妖冶伐性初秋踰旬旷不视事道路忧疑此天与寤考之所以怒也隐刺覆绝攸燔尊宠纲沦法斲上行下效京率外兵狂悖迭起此天与寤考之所以怒也陛下不是之思方用汉灾异免三公故事环顾在廷莫知所付遥相崔与之臣恐与之不至政柄他有所属此世道否泰君子小人进退之机也于是台官李大同言迈交结德秀了翁及洪咨夔以收虚誉削一秩免蒋岷劾迈前疏妄论伦纪请坐以非所宜言之罪削二秩久之复通判赣州改福州建康府信州皆不行淳佑改元通判吉州右正言江万里袖疏榻前曰迈之才可惜不即召将有老不及之叹帝以为然有尼之者遂止知邵武军在郡诏以亢旱求言迈驿奏七事而以彻龙翔宫立济王后为先时郑清之再相以左司郎官召力辞以直秘阁提点广东刑狱亦辞改侍右郎官谏官焦炳炎论罢子祠卒赠司农少卿迈以学问词章发身尤练世务易被戒潭人曰此君不可犯夺势家冒占田数百亩以还民李宗勉尝论迈然迈评近世宰辅至宗勉必曰贤相徐清叟与迈有违言迈晚应诏谓清叟有人望可用世服其公云

△史弥巩

史弥巩字南叔弥远从弟也好学强记绍熙四年入太学升上舍时弥远柄国寄理不获试淹抑十载嘉定十年始登进士第时李■〈直上土下〉开鄂阍知弥巩持论不阿辟谘幕府事寿昌戍卒失律欲尽诛其乱者乃请诛倡者一人军心感服改知溧水县首严庠序之教端平初入监都进奏院转对有君子小人才不才之奏护蜀保江之奏嘉熙元年都城火弥巩应诏上书谓修省之未至者有五又曰天伦之变世孰无之陛下友爱之心亦每发见洪咨夔所以蒙陛下殊知者谓雪川之变非济邸之本心济邸之死非陛下之本心其言深有以契圣心耳矧以先帝之子陛下之兄乃使不能安其体魄于地下岂不干和气召灾异乎出提点江东刑狱岁大旱饶信南康三郡大稔谓赈荒在得人俾厘户为五甲乙以等第赈粟丙为自给丁余而戊济全活者口一百一十四万有奇徽之休宁有淮民三十余辈操戈劫人财逮捕法曹以不伤人论罪弥巩曰持兵为盗贷之是滋盗也推情重者僇数人一道以宁饶州兵籍溢数供亿不继请汰冗兵令下营门大噪乃呼诸校谓曰汰不当许自陈敢哗者斩咸叩头请罪诸营帖然廩给亦大省召为司封郎中以兄子嵩之入相引嫌勾祠遂以直华文阁知婺州时年已七十勾祠提举崇禧观里居绝口不道时事卒年八十真德秀尝曰史南叔不登宗袞之门者三十年未仕则为其寄理已仕则为其排摈皦然不污有如此五子长冑之终刑部郎官能之有之胄之俱进士冑之子蒙卿咸淳元年进士调江阴军教授蚤受业色川阳恪为学淹博著书立言一以朱熹为法

△陈埧

陈埧字和仲庆元府鄞人大父叔平与同郡楼钥友善死钥哭之埧纔四岁出揖如成人钥指盘中银杏使属对埧应声曰金桃问何所据对以杜诗鸚鵡啄金桃钥竦然曰亡友不死矣长受周官于刘着顷刻数千百言辄就试江东转运司第一试礼部复为第一嘉定十年登进士第调黄州教授丧父毁瘠考古礼定时祭仪制祭器行之忽叹曰俗学不足学乃师事杨简攻苦食淡昼夜不怠免丧史弥远当国谓之曰省元魁数千人状元魁百人而恩数踰等盍令省元初授堂除教授当自君始埧谢曰庙堂之议甚盛举自埧始得无嫌乎径部注处州教授以去士论高之理宗即位诏求言埧上封事曰今日之弊莫大于人心之不合纪纲之不振风俗之不淳国敝人偷而不可救愿陛下养之以正励之以实莅之以明断之以武而埧直声始着于天下与郡守高似孙不合去归奉其母召为太学录踰年始至转对言天道无亲民心难保日月逾迈

事会莫留始之锐久则怠始之明久则昏垂拱仰成盛心也不可因以负有为之志遵养时晦至德也不可因以失乘时之机帝嘉纳之迁太学博士主宗正寺簿都城火损步往玉牒所尽藏玉牒于石室诏迁官不受应诏言应上天非常之怒者当有非常之举动历陈致灾之由迁太常博士独为袁燮议谥余皆阁笔因叹曰幽厉虽百世不改谥有美恶岂谀墓比哉会朱端常子乞谥坝曰端常居台谏则逐善类为藩牧则务刻剥宜得恶谥以戒后来乃谥曰荣愿议出宰相而下皆肃然改容考功郎陈耆复议合宦者陈洵益欲改坝终不答李全在楚州有异志坝以书告弥远痛加警悔以同羣心蚤正典刑以肃权纲大明黜陟以饬政体不纳未几贾贵妃入内坝又言乞去君侧之蛊媚以正主德从天下之公论以新庶政弥远召坝问之曰吾甥殆好名邪坝曰好名孟子所不取也夫求士于三代之上惟恐其好名求士于三代之下惟恐其不好名耳力勾去添差通判嘉兴府弥远卒召为枢密院编修官入对首言天下之安危在宰相南渡以来屡失机会秦桧死所任不过万俟卨沈该耳侂胄死所任史弥远耳此今日所当谨也次言内廷当严宦官之禁外廷当严台谏之选于是洵益阴中之监察御史王定劾坝出知常州改衢州寇卜日发縠坑遵江山县而东坝获谍者即遣人致牛酒谕之曰汝不为良民而为劫盗不事耒耜而弄甲兵今享汝牛酒冀汝改业石则杀无赦于是自首者日以百数献器械者重酬之遂以溃散改提点都大坑冶徙福建转运判官侍御史蒋岷常与论中庸不合又劾之主管崇道观踰年迁浙西提点刑狱岁旱盗起捕斩之盗惧徙去安吉州俞垓与丞相李宗勉连婣恃势黥货坝亲按临之弓手戴福以获潘丙功为副尉宗勉倚之为心腹盗横贪害坝至福闻风而去贻书宗勉曰坝治福所以报丞相也传闲实走丞相贤辅弼不宜有此宗勉答书曰福罪恶贯盈非君不能治宗勉虽不才不敢庇奸凶惟君留意及获福豫章众皆欲杀之坝曰若是则刑滥矣乃加墨徇于市囚之圜土以吏部侍郎召及为国子司业诸生咸相庆以为得师未几兼玉牒检讨国史编修实录修撰乃辞兼史馆历陈境土之蹙民生之艰国计之匱又言明用舍以振纪纲躬节俭以汰冗滥屏奸妄以励将士抑贵近以宽桀余结乡社以防窃发黜增勑以培根本乞补外不许又辞免和余转官赏亦不许知温州未上以言罢坝家居时自娱于泉石四方学者踵至轻财急义明白洞达一言之出终身可复忽卧疾戒其子抽架上书占之得吕祖谦文集其墓志曰祖谦生于丁巳岁没于辛丑岁坝曰异哉我生于庆元丁巳今岁在辛丑于是一甲矣吾死矣夫子蒙年十八上书万言论国事吴子良奇

之妻以女为太府寺主簿入对极言贾似道为相时国政阙失为淮东总领似道诬以贪污贬建昌军簿录其家惟青毡耳德佑初礼部侍郎李珣乞放便以刑部侍郎召不赴卒

△赵与■

赵与■字德渊太祖十世孙居湖州嘉定十三年进士积官至吏部尚书以观文殿学士知绍兴府浙东安抚使复为淮浙发运使差知平江府特转两官致仕景定元年卒特赠少师与■所至急于财利几于聚敛之臣矣

△李大同

李大同字从仲婺州东阳人嘉定十六年进士历官为秘书丞兼崇政殿说书拜右正言兼侍讲疏言赵冀分野乃有荧惑之变则我师之出岂无当长虑而却顾者陛下勿以星文为小异而或加忽话言政事必求有以格于天心而弭灾异至于进兵攻讨尤切谨重迁太常少卿又迁起居郎拜殿中侍御史权刑部侍郎迁吏部侍郎进工部尚书以宝谟阁直学士知平江府提举江州太平兴国宫乞致仕不许后卒于家

△黄■〈𦉳田〉

黄■〈𦉳田〉字耕隆兴分宁人尝从郭雍朱熹学熹深期之而■〈𦉳田〉亦以道自任反复论辩必无所疑然后止举太学进士为瑞昌主簿兼文思院知卢阳县五溪獠犷悍■〈𦉳田〉为诗谕之獠感悦有公事莫敢违通判处州经总制有额无钱俗号殿最纲■〈𦉳田〉会十年中成赋酌取之阁免逋负钱额钧等独以最闻主管官告院大理寺簿军器监丞岁余三迁■〈𦉳田〉乃不乐闲行西湖慨然曰我昔在南北山一水一石无不自题品今无复情味何邪勾外知台州谢良佐子孙居台者既播越流落■〈𦉳田〉求之民闲收而教之勤苦夙夜先劝后禁讼牒销缩郡称治平为济棗仓为抵当库葬民之栖寄暴露者为棺千五百置养济院又勸安济坊以居病囚叶适谓■〈𦉳田〉条目建置忧民如家迁袁州哭从弟哀甚得疾卒

△杨大异

杨大异字同伯唐天平节度使汉公之后十世祖祥避地醴陵因家焉祥事亲孝亲亡哀毁泣尽继以血庐墓终身有白芝白鸟白兔之瑞事闻于朝褒封至孝公赐名木植墓道以旌其孝大异从胡宏受春秋大义登嘉定十三年进士第授衡阳主簿有惠政调龙泉尉摄邑令适岁饥提刑司遣吏和余米二万石于邑米价顿增民乏食大异即以提刑司所余者如价发棗民甚德之提刑赵与■大怒捃其罪弗得坐以方命移安远尉邑有峒寇扰民官兵致讨积年弗获檄大异往治之大异以一仆负告身自随

肩輿入贼峒传呼尉至贼露刃成列以待徐谕以祸福
皆伏地叩头愿改过自新留告身为质偕其渠魁数辈出降以赏迁吉州户曹改广西经
干复以弭盗赏除四川制置司参议官北兵入成都大
异从制置使丁黼巷战兵败身被数创死阖门皆遇难诘旦其部曹窃往瘞之大异复苏
负以逃获免进朝奉郎宰石门县就除通判溧阳摄州
事皆有惠政去官之日老弱攀号留之大异易服潜去擢知登闻鼓院迁大理寺丞平反
冤狱者七召对极言时政得失连宰相意出知澧州理
宗曰是四川死节更生者杨大异耶论事剴切有用之材也何遽出之对曰是人尤长于
治民命予节兼庾事进直秘阁提点广东刑狱兼庾事
时常平司逋负山积械系追索奸蠹百出大异与之约悉纵遣之负者如期毕输吏无所
容其奸访张九龄曲江故宅建曲江书院以祀九龄改
提点广西刑狱兼漕庾二司所至奸吏屏息寇盗绝迹凡可以为民兴利除害者必奏行
之复建宣成书院祀张栻吕祖谦广海幅员数千里道
不拾遗报政为最未六十即丐致仕不允章四上除秘阁修撰大中大夫提举崇禧观醴
陵县开国男食邑三百户赐紫金鱼袋归里第与居民
无异学者从之讲肄谆谆相与发明经旨条析理学食祠禄者二十四年卒年八十二子
霆霖霆在忠义传

钦定续通志卷四百十四

●钦定续通志卷四百十五 列传二百十五

列传

宋 【一百十九】

○宋一百十九

陆持之	徐鹿卿	赵逢龙	赵汝腾	孙梦观	洪天锡
黄师雍	徐元杰	孙子秀	李伯		

玉

陆持之
徐鹿卿
赵逢龙
赵汝腾
孙梦观
洪天锡
黄师雍
徐元杰
孙子秀

李伯玉

△陆持之

陆持之字伯微知荆门军九渊之子也七岁能为文九渊授徒象山之上学者数百人有未达持之为敷绎之荆门郡治火持之仓卒指授中程九渊器之韩侂胄将用兵持之忧时不怵乃历聘时贤将有以告见徐谊于九江时议防江持之请择僚吏察地形孰险而守孰易而战孰隘而伏毋专为江守具言自古兴事造业非有学以辅之往往皆以血气盛衰为锐惰故三国两晋诸贤多以盛年成功名公更天下事变多矣未举一事而朝思夕惟利害先入于中愚恐其为之难也谊怆然又之鄂谒辞叔似项安世之荆谒吴猎争欲留之寻皆谢归嘉定三年试江西转运司预选常平使袁燮荐于朝谓特之议论不为空言缓急有可倚仗不报嘉定十六年宁宗特诏持之秘书省读书固辞不获既至又诏以迪功郎入省乞归不许理宗即位转修职郎差干办浙西安抚司以疾请致仕特命改通直郎

△徐鹿卿

徐鹿卿字德夫隆兴丰城人博通经史以文学名于乡后进争师宗之嘉定十六年廷试进士有司第其对居二详定官以其直抑之犹寘第十调南安军学教授张九成尝以直道谪居鹿卿摭其言行刻诸学以训先是周惇颐程颢与其弟颐皆讲学是邦鹿卿申其教由是礼义之学复明立养士纲条学田多在溪峒异时征之无艺农病之鹿卿抚恤无逋租者其后盗作环城皆毁惟学宫免曰是无挠我者辟福建安抚司干办公事会汀邵寇作鹿卿赞画备御动中机会避寇者八城多方赈济全活甚众郡多火灾救护有方会都城火鹿卿应诏上封事言积阴之极其征为火指言惑嬖宠溺燕私用小人三事尤切真德秀称其气平论正有忧爱之诚心改知尤溪县德秀守泉辟宰南安鹿卿以不便养辞德秀曰道同志合可以拯民何惮不来鹿卿入白其母欣然许之既至首罢科敛之无名者明版籍革预偕决壅滞达冤抑邑以大治德秀寻帅闽疏其政以劝列邑岁饥处之有法富者乐分民无死徙最闻令赴都堂审察以母丧去诏服阕赴枢密禀议首言边事楮币主管官告院干办诸司审计司故相子以集英殿修撰食祠禄又帮司农少卿米麦鹿卿曰柰何为一入坏成法持不可迁国子监主簿入对陈六事曰洗凡陋以起事功昭劝惩以收主柄清班着以储实才重藩辅以蔽都邑用闽越舟师以防海合东南全力以守江帝皆嘉纳改枢密院编修官权右司赞画二府通而守法会右史方大琮编修刘克庄正字王迈以言事黜鹿卿赠以诗言者并

劾之太学诸生作四贤诗知建昌军未上而崇教龙会
两保与建黎原铁城之民修怨交兵鹿卿驰书谕之敛手听命既至则宽赋敛禁掊克汰
赃滥抑强御恤寡弱黜黠吏训戍兵勑百丈砦择兵官
城属县治行大孚田里歌诵督府横取秋苗斛面建昌为米五千斛鹿卿争之曰守可去
米不可得民恐失鹿卿请输之以共命鹿卿曰民为守
计则善矣守独不为民计乎卒争以免召赴行在将行盗发南丰捕斩渠首二十人余不
问擢度支郎官兼右司入对极陈时弊改侍右郎官兼
敕令删修官兼右司鹿卿又言当时并相之弊宰相以甘言诱鹿卿退语人曰是牢宠也
吾不能为宰相私人言者以他事诋鹿卿主管云台观
越月起为江东转运判官岁大饥人相食留守别之杰讳不诘鹿卿命掩捕食人者尸诸
市又奏援真德秀为漕时拨钱以助赈给不报遂出本
司积米三千余石减半价以糶及减抵当库息出缗钱万有七千以予贫民劝居民收字
遗孩日给钱米所活数百人宴集不用乐会岳珂守当
涂制置茶盐自诡兴利横敛百出商旅不行国计反屈于初命鹿卿核之吏争窜匿鹿卿
宽其期限躬自钩考尽得其实珂辟置贪刻吏开告讐
以罔民没其财民李士贤有稻二千石囚之半年鹿卿悉纵舍而劝以其余分皆感泣奉
命珂罢以鹿卿兼领太平仍暂提举茶盐事弛苛征蠲
米石芜湖两务芦税江东诸郡飞蝗蔽天入当涂境鹿卿露香默祷忽飘风大起蝗悉渡
淮之杰密请移鹿卿浙东提点刑狱加直秘阁兼提举
常平鹿卿言罢浮盐经界黻地先撤相家所筑就捕者自言我相府人鹿卿曰行法必自
贵近始卒论如法丞相史弥远之弟通判温州利韩世
忠家宝玩籍之鹿卿奏削其官初鹿卿檄衢州推官冯惟说决婺狱惟说素廉平至则辨
曲直出淹禁大家不快其为会乡人居言路乃属劾惟
说州索印纸惟说笑曰是犹可以仕乎自题诗印纸而去衢州郑逢辰以繆举鹿卿以委
使不当相继自劾且共和其诗御史兼二人劾罢之及
知泉州改赣州皆辞迁浙西提点刑狱江淮都大坑冶皆以病固辞遂主管玉局观及召
还又辞改直宝章阁知宝鼎国府提举江东常平又辞淳
佑三年以右司召犹辞丞相杜范遗书曰直道不容使人击节君不出岂以冯惟说故耶
惟说行将有命矣鹿卿乃出擢太府少卿兼右司入对
请定国本正纪纲立规模时事多艰人心易摇无独力任重之臣无守节仗义之士愿蚤
决大计帝嘉纳之兼中书门下省检正诸房公事兼崇
政殿说书逾年兼权吏部侍郎时议使执政分治兵财鹿卿执议不可以疾勾祠迁右文
殿修撰知平江府兼发运副使力勾祠帝谕丞相挽留
之召权兵部侍郎固辞帝令丞相以书招之鹿卿至又极言君子小人切于当世之务兼

国子祭酒权礼部侍郎鹿卿言琐冗之职无所不当问
比年命下而给舍不得知请复旧制从之帝眷遇深笃而忌者寢多有撰伪疏托鹿卿以
传播历诋宰相至百执事鹿卿初不知也遂力辨帝前
因乞去帝曰去则中奸人之计矣令临安府根捕事连势要狱不及竟迁礼部侍郎累疏
告老授宝章阁待制知盩厔国府而引年之疏五上不允
提举鸿禧观遂致仕进文华阁待制卒遗表闻赠四官鹿卿居家孝友喜怒不形恩怨俱
泯宗族乡党各得欢心居官廉约清峻毫发不妄取一
庐仅庇风雨溢清正

△赵逢龙

赵逢龙字应甫庆元之鄞人刻苦自修为学淹博纯实登嘉定十六年进士第授国
子正太学博士历知兴国信衢衡袁五州提举广东湖
南福建常平每至官有司例设供张悉命撤去日具蔬饭坐公署事至即面问决遣为政
务宽恕抚谕恻怛一以天理民彝为言民是以不忍欺
居官自常奉外一介不取民赋有逋负悉为代输尤究心荒政以羨余为平余本迁将作
监拜宗正少卿兼侍讲凡道德性命之蕴礼乐刑政之
事缕缕为上开陈疏奏甚众藁悉焚弃年八十有八终于家逢龙家居讲道四方从游者
皆为巨公名士丞相叶梦鼎出判庆元修弟子礼常谓
师门庠陋欲市其邻居充拓之逢龙曰邻里粗安一旦惊扰彼虽勉从我能无媿于心逢
龙寡嗜欲不好名■〈易文〉易历日久泊然不知富
贵之味或问何以裕后逢龙笑曰吾忧子孙学行不进不患其饥寒也

△赵汝腾

赵汝腾字茂实宗室子也居福州宝庆二年进士迁籍田令积官至礼部尚书兼给
事中兼修国史实录院修撰尝轮对言节用先自乘舆
宫掖始又奏言前后奸谀之臣伤善害贤自取穹官要职何益于陛下而深损于圣德兴
利之臣移东就西顺适宫禁自遂溪壑无厌之欲何益
于陛下而深戕于国脉则陛下私惠羣小之心可以息矣又言陛下有用君子之名无用
君子之实兼直学士院拜翰林学士兼知制诰兼侍读
辞归故里累召力辞以龙图阁学士知绍兴府浙东安抚使召至阙以端明殿学士提举
佑神观兼翰林学士承旨知泉州知州南外宗正事复
提举佑神观兼侍读兼翰林学士承旨景定二年卒遗表上特赠四官

△孙梦观

孙梦观字守叔庆元府慈溪人宝庆二年进士调桂阳军教授浙西提举司干办公
事差主管吏部架阁文字为武学谕轮对言人主不容
有所惮尤不容有所玩惮则有言而不能容玩则虽容其言而不能用力请外添差通判

严州主管崇道观召为武学博士太常寺丞兼诸王宫
大小学教授大宗正丞兼屯田郎官将作少监知嘉兴府仍旧班兼右司郎官将作监转
对极言风宪之地未闻有十人疏攻一竦者封驳之司
未闻有三舍人不肯草制者道揆不明法守滋乱天下之权将所有寄而倒持之患作当
路者滋不悦出知泉州兼提举市舶改知宁国府蠲逋
减赋无算泛入者尽籍于公帑户部遣官督赋急若星火阖郡皇骇莫知为计梦观曰吾
宁委官以去毋宁病民以留力勾祠且将以府印牒所
遣官所遣官闻之夜遁他日梦观去宁国人言之为之流涕丞相董槐召还帝问江东廉
吏槐首以梦观对帝说乃迁司农少卿兼资善堂赞读
轮对谓今内外之臣恃陛下以各遂其私而陛下独一无可恃可为寒心次论郡国为斯
民计朝廷当为郡国计乞命大臣应自前主计之臣夺
州县之利而归版曹者复归所属庶几郡国蒙一分之宽则斯民亦受一分之赐帝善其
言迁太府卿宗正少卿兼给事中起居舍人起居郎八
上章辞免以监察御史吴燧论罢直龙图阁与祠授秘阁修撰江淮等路提点铸钱司公
事甫至官即复召为起居郎兼侍右侍郎权吏部侍郎
奏事抗论益切以宠赂彰仁贤逝货物徧聚为言且谓未易相之前弊政固不少既易相
之后弊政亦自若在廷之士皆危之梦观曰吾以一布
衣蒙上恩至此虽捐躯无以报利钝非所计也力求补外以集英殿修撰知建宁府蠲租
税者刑罚俄得疾口授遗表不忘规谏遂卒帝悼惜久
之梦观退然若不胜衣然义所当为奋往直前其居败屋数间布衣蔬食而重名节云

△洪天锡

洪天锡字君畴泉州晋江人宝庆二年进士授广州司法调潮州司理势家夺民田
天锡言于守还之帅方大琮辟真州判官留置幕府改
秩知古田县行乡饮酒礼邑剧牒愬猥多天锡剖决无留难有倚王邸势杀人者诛之不
少贷调通判建宁府大水擅发常平仓赈之擢诸司粮
料院拜监察御史累疏言天下之患三宦官也外戚也小人也劾董宋臣谢堂厉文翁理
宗力护文翁天锡又言不斥文翁必为王府累帝令吴
燧宣谕再三天锡力争谓贵幸作奸犯科根柢蟠固乃迟回护惜不欲绳以法势焰愈张
纪纲愈坏异时祸成虽欲治之不可得矣帝又出御札
俾天锡易疏欲自戒饬之天锡又言自古奸人虽凭怙其心未尝不畏人主之知苟知之
而止于戒饬则凭怙愈张反不若未知之为愈也章五
上出阙待罪诏二人已改命宋臣续处之天锡言臣留则宋臣去宋臣留则臣当斥愿早
赐裁断越月天雨土天锡以其异为蒙力言阴阳君子
小人之所以辨又言修内司之为民害者蜀中地震浙闽大水又言上下穷空远近怨嫉

独贵戚臣阉享富贵耳举天下穷且怨陛下能独与数十人者共天下乎会吴民仲大论等列愬宋臣夺其田天锡下其事有司而御前提举所移文谓田属御庄不当白台仪鸾司亦牒常平天锡谓御史所以雪冤常平所以均役若中贵人得以控之则内外台可废犹为国有纪纲乎乃申劾宋臣并卢允升而枚数其恶帝犹力护之天锡又言修内司供缮修而已比年动曰御前奸赃之老吏迹捕之凶渠一窜名其间则有司不得举手狡者献谋暴者助虐其展转受害者皆良民也愿毋使史臣书之曰内司之横自今始疏上至六七最后请还御史印谓明君当为后人除害不当留患以遗后人今朝廷轻给舍台谏轻百司庶府而北司独重仓卒之际臣实惧焉言虽不果行然终宋世阉人不能窃弄主威者皆天锡之力而天锡亦自是去朝廷矣改大理少卿再迁太常皆不拜改广东提点刑狱五辞明年起知潭州久之始至官戢盗贼尊先贤踰年大治直宝谟阁迁广东转运判官决疑狱劾贪吏治财赋皆有法召为秘书监兼侍讲以曠辞升秘阁修撰福建转运副使又辞度宗即位以侍御史兼侍读召累辞不许在道间监察御史张桂劾罢之乃疏所欲对病民五事曰公田曰关子曰银纲曰盐钞曰赋役又言在廷无严惮之士何以寝奸谋遇事无敢诤之臣何以临大节进工部侍郎兼直学士院加显文阁待制湖南安抚使知潭州改漳州皆力辞又明年改福建安抚使力辞不许亭户买盐至破家陨身者天锡首罢之罢荔枝贡召为刑部尚书诏宪守之臣趣行无虚日不起久之进显文阁直学士提举太平兴国宫三降御札趣之又力辞踰年进华文阁直学士仍旧宫观寻致仕加端明殿学士转一官疾革草遗表以规君相特赠正议大夫谥文毅天锡言动有准绳居官清介临事是非不可回折

△黄师雍

黄师雍字子敬福州人少从黄干学入太学宝庆二年举进士诏为楚州官属出盗贼白刃之冲不畏不慑李全反状已露师雍密结忠义军别部都统时青图之谋泄全杀青师雍不为动全亦不加害秩满朝议褒异师雍耻出史弥远门不往见之调婺州教授学政一以吕祖谦为法李宗勉赵必愿赵汝谈皆荐之师雍慕徐侨有清望欲谒之会其有召命师雍曰今不可往也侨闻而贤之至阙以其学最闻宗勉在政府力言于丞相乔行简行简已许以朝除师雍以书见行简劝其归老行简不悦宗勉之请遂格知遂之龙溪转运使王伯大上其邑最行简罢宗勉与史嵩之入相召师雍审察将至而宗勉卒嵩之延师雍密示相亲意师雍不领迁粮料院又曰料院与相府密迹所以相处师雍亦不领嵩之

独相权势寔盛上下惧祸未有发其奸者博士刘应起首疏论嵩之帝感悟思逐嵩之师雍与应起相善故嵩之疑师雍左右之讽御史梅■〈木巳〉击师雍差知兴化军旋夺之改知邵武军及应起为监察御史师雍迁宗正寺簿寻亦拜监察御史首疏削金渊秩送外居住再疏斥赵纶项容孙史冒之嵩之终丧正言李昂英殿中侍御史章琰共疏乞窜斥之师雍亦上疏论列帝感悟即其日诏勒令致仕权直舍人院刘克庄封还词头乞畀嵩之以贴职如宰臣去国故事遂得守金紫光禄大夫观文殿学士致仕议者曰大夫官也观文职也元降御笔但云守官无本官职之辞观文之命自克庄启之朋邪顾望不可赦师雍遂劾克庄临事失身犯义免所居官琰亦继劾克庄师雍又乞籍嵩之家隶张叔仪皆从之未几昂英劾临安尹赵与■及执政琰亦劾执政帝怒昂英并及琰郑窳乘间劾琰昂英又嗾同列再疏以昂英属某人琰属师雍师雍毅然不从独击叶闾乃与■腹心琰昂英去国窳于是荐周坦叶大有入台首劾程公许江万里善类日危矣未踰月坦攻参政吴潜去陈垓为监察御史时窳与■坦垓大有合为一师雍独立窳恶之尤甚思所以去师雍未得招四人共谋之会大旱求言应诏者多指窳坦等为起灾之由牟子才李伯玉卢钺语尤峻坦等伪撰匿名书诬三士师雍榻前辨谓匿名书条令所禁非公论也不知何为至前因发其伪撰之迹适钺疏誉师雍窳乃以钺附师雍帝不听擢师雍左司谏未几窳入政府谢方叔赵汝腾疏其奸窳遂罢去师雍与丞相郑清之故同舍然以劾刘用行魏峴皆清之亲故清之不乐坦喜曰吾得所以去之矣遣其妇日造清之妻潜曰彼去用行峴乃去丞相之渐也帝将以师雍为侍御史清之曰如此则臣不可留迁起居舍人兼侍讲即力勾去清之犹冀师雍少贬师雍曰吾欲为全人终不屈数月坦卒劾师雍及高斯得俱罢久之以直宝文阁奉祠陈垓又嗾同列寢之清之卒起师雍为左史既而改江西转运使迁礼部侍郎命下而卒于江西官舍师雍简淡寡欲靖厚有守言若不出口而于褒正之辨甚明视外物轻甚故博采公论当官而行爱护名节无愧师友云

△徐元杰

徐元杰字仁伯信州上饶人幼颖悟诵书日数千言每冥思精索闻陈文蔚讲书铅山实朱熹门人往师之后师事真德秀绍定五年进士及第签书镇东军节度判官厅公事嘉熙二年召为秘书省正字迁校书郎奏否泰剥复之理因及右辖久虚非骨鲠耆艾身足负荷斯世者不可轻畀又言皇子竑当置后及早立太子乞早定大计时谏官蒋峴方力排竑置后之说遂力请外不许即谒告归勾祠章十二上三年迁著作

佐郎兼兵部郎官以疾辞差知安吉州辞召赴行在奏事辞益坚淳佑元年差知南剑州会峡阳寇作擒渠魁八人斩之余释不问父老或相语曰侯不来我辈鱼肉矣郡有延平书院率郡博士会诸生亲为讲说民讼率呼至以理化诲多感悦而去输苗听其自槩阖郡德之丁母忧去官众遮道跪留既免丧授侍左郎官言敌国外患乞以宗社为心言钱塘驻蹕宜抑文尚质兼崇政殿说书每入讲必先期斋戒尝进仁宗诏内降旨挥许执奏及台谏察举故事为戒语多切宫壶拜将作监进扬雄大匠箴陈古节俭时天久不雨转对极论洪范天人感应之理及古今遇灾修省之实辞益忠恳丞相史嵩之丁父忧有诏起复中外莫敢言惟学校叩阍力争元杰时适轮对言臣前日晋侍经筵亲承圣问以大臣史嵩之起复臣奏陛下出命太轻人言不可沮抑今观学校之书使人感叹家庭之变哀戚终事礼制有常臣窃料其何至于忽送死之大事轻出以犯清议士论所以懍懍者实以陛下为四海纲常之主大臣身任道揆扶翊纲常者也自闻大臣有起复之命虽未知其避就若何凡有父母之心者莫不失声涕零是果何为而然人心天理谁实无之臣恳恳纳忠何敢诋讦特为陛下爱惜民彝为大臣爱惜名节而已帝亦察其忠亮每从容访天下事经筵益申前议未几夜降御笔黜四不才台谏起复之命遂寝元老旧德次第收召元杰亦兼右司郎官拜太常少卿兼给事中国子祭酒权中书舍人杜范入相复延议军国事为书无虑数十所言皆朝廷大政边鄙远虑每裁书至宗社隐忧处辄阁笔挥涕书就随削橐虽子弟无有知者六月朔轮当侍立以暴疾谒告特拜工部侍郎随乞纳禄诏转一官致仕夜四鼓遂卒先元杰未死之一日方谒左丞相范锺归又折简察院刘应起将以翼日奏事是夕俄热大作诘朝不能造朝夜烦愈甚指爪忽裂以死朝绅及三学诸生往吊相顾骇泣帝震悼曰徐元杰前日方侍立不闻有疾何死之遽耶亟遣中使问状已而太学诸生伏阙愬其为中毒且曰昔小人有倾君子者不过使之自死于蛮烟瘴雨之乡今蛮烟瘴雨不在岭海而在朝廷望奋发睿断大明典刑于是三学诸生相继叩阍讼冤台谏交疏论奏监学官亦合辞闻于朝二子直谅直方乞以恤典充赏格有旨付临安府逮医者孙志寔及常所给使鞫治既又改理寺诏殿中侍御史郑棗董之且募告者赏缗钱十万官初品大理寺正黄涛谓伏暑证二子乞斩涛谢先臣然狱迄无成海内士人伤之帝悼念不已赐谥忠愍

△孙子秀

孙子秀字符实越州余姚人绍定五年进士调吴县主簿有妖人称水仙太保郡守

王遂将使治之莫敢行子秀奋然请往焚其庐碎其象
沉其人于太湖曰实汝水仙之名矣妖遂绝日诣学宫与诸生讨论义理辟淮东总领所
中酒库檄督宜兴县围田租既还白水灾总领恚曰军
饷所关而敢若此独不为身计乎子秀曰何敢为身计盗罪去尔力争之遂免调滁州教
授至官改知金坛县严保伍厘经界结义役一切与民
休息讼者使赍牒自诣里正并邻证来然后行不实者往往自匿其牒惟豪黠者有犯则
痛绳不少贷淮民流入以万计赈给抚恤树庐舍括田
使耕拔其能者分治之崇学校明教化行乡饮酒礼访国初茅山书院故址新之以待远
方游学之士通判庆元府主管浙东盐事先是诸场盐
百袋附五袋名五厘盐未几提举官以为正数民困甚子秀奏蠲之辟干办行在诸司粮
料院衢州寇作水冒城郭朝廷择守属子秀行子秀谓
捕贼之责虽在有司亦必习土俗之人乃能剪其凭依截其奔突乃立保伍选用土豪首
旌常山县令陈谦亨寓士周还淳等捍御之劳具表于
朝乞加优赏人心由是竞劝未几盗复起江山玉山间甫七日而众禽四十八人以来终
子秀之任贼不复动水潦所及则为治桥梁修堰闸补
城壁浚水原助葺民庐赈以钱米招通邻余奏蠲秋苗万五千石有奇尽代纳其夏税并
除公私一切之负坍溪沙壅之田请于朝永蠲其税民
用复苏南渡后孔子裔孙寓衢州诏权以衢学奉祀因循踰年无专飨之庙子秀撤废佛
寺奏立家庙如阙里既成行释菜礼以政最迁太常丞
以言罢未几迁大宗正丞迁金部郎官金部旧贵州郡以必不可办之泛数吏颠倒为奸
欺子秀日夜讨论给册转递以均其输人人如债切身
不遣一字而输足迁将作监淮东总领辞改知盩厔府辞为左司兼右司再兼金部与丞
相丁大全议不合去国差知吉州寻镌罢时嬖幸朱熠
凡三劾子秀开庆元年为浙西提举常平先是大全以私人之为尽夺亭民盐本钱充献
羨之数不足则估籍虚摊一路骚动亭民多流亡子秀
还前政盐本钱五十万贯奏省华亭茶盐分司官定衡量之非法多取者于是流徙复业
徙浙西提点刑狱兼知常州淮兵数百人浮寓贡院给
饷不时死者相继子秀请于朝创名忠卫军置砦以居截拨上供贍之盗劫吴大椿前使
者讳其事诬大椿与兄子焞争财自劫其家追毁大椿
官编置千里外徙黥其臧获子秀廉得实乃悉平反之寻以兼郡则行部非便得请专臬
事击贪举廉风采凛然狂狷为清进大理少卿直华文
阁浙东提点刑狱兼知婺州婺多势家有田连阡陌而无赋税者子秀悉核其田书诸牒
势家以为厉己喉言者罢之寻迁湖南转运副使以迎
养非便辞移浙西提点刑狱子秀冒暑周行八郡三十九县狱为之清安吉州有妇人愬

人杀其夫与二仆郡守捐赏万缗逮系考掠十余人终
莫得其实子秀密访之乃妇人赂宗室子杀其夫仆救之并杀以灭口一问即伏诛又释
伪会之连逮者远近称为神明初狱讼之滞皆由期限
之不应使者下车或亲书戒州县勿违而违如故则怒之怒之改匣又违则又重怒之至
再三而专卒四出巡尉等司缴限抱匣费不贲则其势
必违子秀与州县约到限者径诣庭下吏不得要素亦无违者其后创循环总匣属各州
主管官凡管内诸司报应皆并入匣一日一遣公移则
又总实于匣以往于是事无大小纤悉毕具而风闻者反谓专卒凌州县劾罢之子秀笑
而已移江东提点刑狱度宗即位进太常少卿兼右司
寻兼知临安府以言罢起知婺州卒子秀少从上虞刘汉弼游磊落英发抵掌极谈神采
飞动与人交久而益亲死生患难营救不遗力闻一善
则手录之

△李伯玉

李伯玉字纯甫饶州余千人端平二年进士第二初名诚以犯理宗潜讳更今名授
观察推官太学正兼庄文府教授太学博士召试馆职
历诋贵戚大臣直声暴起改校书郎奏言台评迎合上意论罢尤焞杨栋卢钺三人忠衰
不辨乞同罢帝不允监察御史陈垓连劾罢之奉云台
祠差知南康军迁著作佐郎兼沂靖惠王府教授兼考功郎官兼尚书右司员外郎引故
事弹台臣萧泰来迁著作郎帝怒降两官罢叙复知邵
武军改湖北提点刑狱移福建迁尚右郎官侍御史何梦然论伯玉乃吴潜之死党奉祠
迁福建提举常平淮西转运判官召赴经筵迁考功郎
兼太子侍读拜太府少卿秘书少监起居郎工部侍郎度宗即位兼侍讲权礼部侍郎升
兼同修国史实录院同修撰贾似道尝集百官议事忽
厉声曰诸君非似道拔擢安得至此众默然莫敢应者伯玉答曰伯玉殿试第二名平章
不拔擢伯玉地步亦可以至此似道虽改容而有怒色
既退即治归以显文阁待制知隆兴府右正言黄万石论罢召入覲擢权礼部尚书兼侍
读似道益专国柄帝以伯玉旧学进之卧内相对泣下
欲用以参大政似道益忌之而伯玉寻病卒伯玉尝请罢童子科以为非所以成人材厚
风俗赵汝腾尝荐八士各有品目于伯玉曰铜山铁壁
立朝风节大较似之

钦定续通志卷四百十五

●钦定续通志卷四百十六 列传二百十六

列传

宋 【一百二十】

○宋一百二十

刘应龙 潘昉 洪芹 赵景纬 冯去非 徐霖
徐宗仁 危昭德 陈埜 杨文仲

谢枋得

刘应龙

潘昉

洪芹

赵景纬

冯去非

徐霖

徐宗仁

危昭德

陈埜

杨文仲

谢枋得

△刘应龙

刘应龙字汉臣瑞州高安人嘉熙二年进士授零陵主簿饶州录事参军有毛隆者
务剽掠杀人州民被盜遥呼盜曰汝毛隆也盜亦曰我
毛隆也既讼于官捕隆置狱应龙曰盜誠毛隆其肯自謂因言于州州不可乃委它官隆
诬伏抵死未几盜敗应龙繇是著名改知崇仁县淮西
失守江西诸州有残破者县佐貳闻变先遁应龙固守不去先是理宗久未有子以弟福
王与芮之子为皇子丞相吴潜有异论帝已不乐元兵
渡江朝野震动逐丞相丁大全复起潜为相帝问潜策安出潜对曰当迁幸又问卿如何
潜曰臣当死守于此帝泣下曰卿欲为张邦昌乎潜不
敢复言未几北兵退帝语羣臣曰吴潜几誤朕遂罢潜相帝怒潜不已应龙朝受命帝夜
出象简书疏藁授应龙使劾潜应龙谓潜本有贤誉独
论事失当临变寡断祖宗以来大臣有罪未尝轻肆诛戮欲望姑从宽典以全体貌帝大
怒乃按劾丁大全请加窜斥疏言内莫急于苏民瘼以
固国本外莫急于讨军实以振国威又言时政四事广发廩以振民饥通商販以助民食
劝分富室以助官余严等第以核民数稽检放以苏民
穷严戢盜以除民害贾似道素忌潜会京师米贵应龙为劝巢歌宦者取以上闻帝闻知
应龙所作问似道米价高当亟处之似道访其由亦怒
应龙迁司农少卿寻以右谏议大夫孙附凤言遂去国景定三年湖南饥起提举常平以
掇荒功迁直宝章阁广南东路转运判官迁秘书监兼

国史编修实录检讨知隆兴府兼江西转运副使奏免和籴二十万石擢权户部侍郎兼侍讲时似道当国百官奏对稍切直者辄黜应龙言臣观今日之事可言者多矣迹日以来靖恭自守者以论事为忌指陈稍切者联翩引去岂两省缴驳过甚重其疑欤抑廷臣奏对拂意速其畏欤朝廷清明之时而言者已怀疑畏臣恐正臣夺气夔臣吃舌宜非盛世所有遂忤当路自侍从两省以下无不切齿未几以集英殿修撰知建宁府亟辞中书舍人卢钺希指封还录黄久之起为江东转运使辞南海寇作朝廷患之乃以显谟阁待制知广州广东经略安抚使寇闻应龙至遁去应龙剿逐之南海大治特旨屡召拜户部侍郎仍兼侍读七上奏辞免德佑元年迁兵部尚书宝章阁直学士知赣州兼江西兵马钤辖青海军节度使力辞隐九峯子元高亦举进士知侯官县没洪天锡叹曰朝廷失一御史矣

△潘枋

潘枋字庭坚福州闽人端平二年策进士枋对曰陛下承休上帝皈德匹夫何异为人子孙身荷父母劬劳之赐乃指豪奴悍婢为恩私之地欲父母无怒不可得也又曰陛下手足之爱生荣死哀反不得视士庶人此如一门之内骨肉之间未能亲睦是以僮仆疾视邻里生侮宜厚东海之恩裂淮南之土以致人和时对者数百人庭坚语最直会殿中侍御史蒋岷劾方大琮刘克庄王迈前倡异论并诬枋姓同逆贼策语不顺请皆论以汉法枋调镇南军节度推官衢州推官历浙西提举常平司迁太学正旬日出通判潭州日食应诏上封事曰熙宁初元日食诏郡县掩骼着为令故王一抔浅土其为暴骸亦大矣请以王礼改葬又移书丞相游似申言之似心善其言方将收用之而枋卒

△洪芹

洪芹尚书右仆射适之曾孙以大父泽入官甫更调登进士第自南平司法改钦州教授部使者爱其才先后并荐之有旨召审察丁内外艰入主省架阁迁太学博士轮对发明絜矩之道擢国子博士出通判南剑入为太常博士累迁将作少监属词臣无当上意慨然思得天下士丞相程元凤言当今地望无踰洪芹者进兼翰林权直秘书少监开庆元年升直学士院继权礼部侍郎中书舍人属兵兴帝悟柄任非人自贻国祸诏书所至闻者奋激盖芹所草也丁大全罢相出典乡郡芹迁礼部侍郎缴奏大全鬼蜮之资穿窬之行暴戾淫黷引用凶恶陷害忠良遏塞言路浊乱朝纲乞尽从谏臣所请追官远窜以伸国法以谢天下沈炎乘上怒攻丞相吴潜芹独缴奏曰方国本多虞潜星驰赴阙理纷镇浮陈力为多一旦视为弁髦得无如诗所谓将安将乐女转弃予乎慷慨敢言天下义之迁

礼部侍郎帝锐意乡用而以论去退寓永嘉怡然自适

咸淳初起知盩厔府卒

△赵景纬

赵景纬字德父临安府于潜人少勤学弱冠得周惇颐程颢兄弟诸书读之恨不及登朱熹之门熹门人叶味道谓之曰度正吾党中第一人遂往见首诲以求放心为本由是往来味道度正之间研索益精入太学登淳佑元年进士第授江阴军教授丁母忧以禄不逮养服阙不调召为史馆检阅特授秘书郎兼史馆校勘进直秘阁差知台州皆辞不许至郡以化民成俗为先务约束官吏扰民五事举遗逸车若水林正心于朝旌孝行平重刑惩哗讦治豪横建黄岩县社仓六十有六浚河道九十里筑堤路三十里节浮费为下户代输秋苗奏蠲五邑坊河渡钱期年之内乞归田里者再进考功郎官兼沂靖惠王府教授御笔兼崇政殿说书又皆辞不讦乃造朝侍缉熙殿以易进讲论圣人体元之妙在惟几人君得此则天下有治而无乱人事有吉而无凶矣又曰惕厉祇惧乃天心之所存圣人先处于忧故能无忧先处以危故能无危若乃先自处于安乐则忧危乘之矣又论监司守令与其糺劾于有罪之后而未必尽得其情孰若精择于未用之先而使之各称其职彗出于柳应诏上封事愿陛下捐内帑以绝壅利之谤出嫔嬙以节用度之奢弄权之貂寺素为天下之所共恶者屏之绝之毒民之恩泽侯尝为百姓之所愤者黜之弃之择忠鯁敢言之士置之台谏以通关鬲之壅选慈惠忠信之人使为守宰以保元气之残又必稽干淳以来凡利源窠名之在百司庶府者悉隶其旧以济经用之急公田派买不均之弊听民自陈随宜通变以安田里则人心悦天意解矣兼国史院编修官实录院检讨官拜太府少卿以直敷文阁知嘉兴府又皆辞不许至郡首以护根本正风俗为先务拜宗正少卿御笔兼侍讲兼权工部侍郎时暂兼权中书舍人又皆辞不许以礼记进讲开陈敬恕之义封还滥恩词头帝从之进权礼部侍郎兼修玉牒升兼侍读仍辞不许进圣学四箴一曰惜日力以致其勤二曰精体认以充其知三曰屏嗜好以专其业四曰谨行事以验其用五疏乞归里帝勉留之请益力特授集英殿修撰知建盩府辞不许乃还家召为中书舍人三辞不许请益力进显文阁待制依所乞予祠辞职名不许遂差提举玉隆万寿宫疾卒诏特赠四官至中奉大夫谥文安景纬天性孝友雅志冲澹亲没无意仕进故其立朝之日不久云

△冯去非

冯去非字可迁南康都昌人淳佑元年进士尝干办淮东转运司治仪真欧阳修东

园在焉使者黄涛欲以为佛寺时已许荐去非力争不得
得寔不受使者荐谒告而去宝佑四年召为宗学谕丁大全为左谏议大夫三学诸生叩
阁言不可帝为下诏禁戒诏立石三学去非独不肯书
名碑之下方监察御史吴衍翁应弼劾诸生下狱去非复调护宗学生之就逮者末几大
全签书枢密院事参知政事蔡抗去国去非亦以言罢
归舟泊金焦山有僧止谒去非不虞其为大全之人也周旋甚款僧乘间致大全意愿毋
遽归少俟收召诚得尺书以往成命即下去非奋然正
色曰程丞相蔡参政牵率老夫至此今归吾庐山不复仕矣斯言何为至我绝之不复与
言

△徐霖

徐霖字景说衢州西安人年十三有志圣人之道取所作文焚之研精六经之奥探
贻先儒心传之要淳佑四年试礼部第一知贡举官入
见理宗曰第一名得人嘉奖再三登第授沅州教授时宰相史嵩之挟边功要君植党颛
国霖上疏历言其奸深之状以为其先也夺陛下之心
其次夺士大夫之心而其甚也夺豪杰之心今日之士大夫嵩之皆变化其心而收摄之
矣且其变化之术甚深非章章然号于人使之为小人
也常于善类择其质柔气弱易以夺之者亲任二三其或稍有异已则潜弃而摈远之以
风其余彼以名节之尊不足以易富贵之愿义利之辨
亦终暗于妻妾宫室之私则亦从之而已疏奏见者为霖危之未几嵩之匿父丧求起复
君子并起而攻之【按癸辛杂识载淳佑初年乔行
简李宗勉皆去位嵩之以右丞相独用权三学生上书攻之明年除霖伏阙上书疏其罪
是岁仲冬嵩之父弥忠殁于家不即奔丧公论沸腾未
几御笔史嵩之起复将作监徐元杰少监史季温右史韩祥皆有疏论】帝大感悟丞相
范锺进所召试馆职二人上思霖之忠亲去其一易霖
名及试则曰人主无自强之志大臣有患失之心故元良未建凶奸未窜是时丞相杜范
已故而锺虽得位畏奸人复出为已祸故也擢秘书省
正字霖辞不获命遂就职会日食霖应诏上封事曰日阳类也天理也君子也吾心之天
理不能胜乎人欲朝廷之君子不能胜乎小人宫闈之
私昵未屏琐闼之奸袞未辨台臣之讨贼不决精裨感浹日为之食又数言建立太子迁
校书郎七年夏大旱霖应诏言谏议大夫不易则不雨
京兆尹不易则不雨不报去国帝遣著作郎姚希得留之不还御笔改合人官乃改宣教
郎霖屡辞曰向为身死而不敢欺其君父今以官高而
自眩于平生失其本心何以暴其忠志八年夏添差通判信州霖皆力辞寻令守臣勉谕
之特改宣教郎主管云台观霖乃拜受十二年迁秘书

省著作郎累辞不许【按癸辛杂识载霖去国传旨俾宰孰留之又令左史尹焕面留又令姚希得传旨勉谕毅然不从沽激太甚其居衢也屡有召皆不就除著作郎则翻然而来及乞罢台谏御笔谓其首鼠两端与外差遣尚迟回不去赵汝腾趣其出关盖霖之无忌惮皆汝腾成其狂后察官萧泰来数其十二狂不可治郡于是声名扫地与宋史本传所载异附识】兼国史编修实录检讨帝曰今日所当言者当备陈之霖复以正太子名为言兼权尚左郎官兼崇政殿说书乃上疏言叶大有阴柔奸黠为羣儉冠不宜久长台谏乞斥去不报兼权左司霖知无不言于是谗嫉者思以中伤而帝亦不悦乞补外知抚州祠先贤宽租赋赈饥穷诛悍将建营砦几一月而政举化行以言去士民遮道不得行及暝始由径以出宝佑元年差知衡州三年当之官遂辞差知袁州五年丁外艰明年开庆元年差主管崇禧观景定二年知汀州明年卒尚书省请加优异诏与一子恩泽度宗赐祭田百亩以旌直臣

△徐宗仁

徐宗仁字求心信之永丰人淳佑十年进士历官为国子监主簿开庆元年伏阙上书曰今天下如器之欹而未坠于地存亡之机固不容发环视四境类不足恃而所恃以维持人心奔走豪杰者惟陛下赏罚之微权在耳自干腹之兵越江踰广以来凡阅数月尚未闻有死战阵死封疆死城郭者岂赏罚不足以劝惩之耶今通国之所谓佚罚者不过丁大全袁玠沈翥张镇吴衍翁应弼石正则王立爱高铸之徒而首恶则董宋臣也廷绅抗疏学校叩阍至有欲借尚方剑为陛下除恶陛下乃释而不问彼方拥厚货挟声色高卧华屋三军之在行者捐躯兵革百姓之罹难者流血锋镝陛下亦当一念及此乎又极论边事谓惠褻而威不振又请使有言责者皆得以尽其言则国论伸而国威振迁国子监丞秘书省著作佐郎考功郎官太府少卿又迁太常少卿知宝国府监察御史郭闾论罢德佑元年起授吏部侍郎权礼部尚书兼益王府赞读卫益王走海上厓山兵败死焉

△危昭德

危昭德昭武人宝佑元年进士历官为史馆检阅校勘武学谕宗正寺簿兼崇政殿说书迁秘书郎疏言国之命在民民之命在士大夫士大夫不廉腴民膏血为己甘腴民不堪命矣又言愿陛下与二三大臣察利害之实究安危之本凡荒政之当举者不可一日而置念又言愿陛下举考课之事内以责诸弹纠之职外以责诸监司郡守之计进兼侍讲又言民者邦之命脉欲寿国脉必厚民生欲厚民生必宽民力且条上

厉民四弊又言愿陛下为万世根本之虑为一时仓卒之防必求安节之亨毋招不节之咎又乞察欣瘁休戚之故酌利害损益之宜迁起居舍人兼国史编修实录检讨寻迁殿中侍御史侍御史谏作宗阳宫权工部侍郎兼同修国史实录院乞致仕特转一官昭德在经筵以易春秋大学衍义进讲反复规正者甚多子彻孙咸淳元年进士

△陈埜

陈埜字子爽嘉兴人历京湖制置使司主管机宜文字差知德安府历迁太府卿司农卿权工部侍郎入奏言愿陛下转移世道之枢机砥砺士大夫之廉耻使知名养为重利禄为轻久去国以恬退闻者召之久立朝以更迭请者从之甘言容悦者必斥真情勾闲者勿留如此则君臣上下皆以真实相与四维既张士大夫难进易退之风当见于圣世以言罢未几进集英殿修撰知婺州改知太平州兼江东转运副使请蠲放诸郡灾伤加户部侍郎淮东总领寻提领江淮茶盐所兼知太平州发公帑代三县输折丝帛钱五十万九千三百六十贯又作浮淮书堂以处两淮之民而教之积官加端明殿学士咸淳四年卒谥清毅埜屡历麾节军民爱戴幕客盛多而埜又乐荐士焉

△杨文仲

杨文仲字时发眉州彭山人七岁而孤母胡年二十有八守节自誓教养诸子文仲既冠以春秋贡其母喜曰汝家至汝三世以是经收效矣淳佑七年文仲以胄试第一入太学九年又以公试第一升内舍时言路颇壅因季冬雷震首帅同舍叩阁极言时事有曰天本不怒人激之使怒人本无言雷激之使言一时争传诵之升上舍为西廊学录丞相谢方叔尝问文仲曰今日何事最急对曰国本未建莫大于此上意未喻当以死请可也宝佑元年登进士第调复州学教授转运使印应飞辟入幕明嫠妇冤狱应飞悉从文仲议且荐之荆湖宣抚使赵葵署文仲佐分司幕姚希得江万里合荐文仲学为有用辟四川宣抚司准备差遣添差沿海制置司干办公事召为户部架阁迁太学正升博士时从叔父栋为祭酒讲学益臻精邃迁国子博士勾外添差通判台州故事守贰尚华侈正月望取灯民间吏以白文仲曰为吾然一灯足矣劾农东郊守因欲泛湖文仲即先驰归添差通判扬州牙契旧额岁为钱四万缗累政增至十六万开告讦以求羨文仲曰希赏以扰民吾不为也卒增十八界一而已制置使李庭芝檄主管机宜文字时有沙田使者欲举行之文仲力争以为事不可妄兴盖与民之惠有限不扰之惠无穷事遂不行召为宗学博士近辅兵变水患轮对言皇天眷命垂四百年天命久熟之余国脉癯老之

候此岂非一大喜惧之交乎愿陛下内扩聪明自作主宰又曰春多沈阴岂但麦秋之忧于时为夬尤轸菟陆之虑天目斗洪水发焉苏湖则弄兵兴焉峩冠于于而每见大夫之乏使佩印累累而常虑贪渎之无厌将习黄金横带之娱兵疲赤藉挂虚之冗蚩蚩编氓得以轻统府琐琐警遽辄以忧朝廷设不幸事有大于此者国何赖焉帝竦听顾问甚至迁太常丞寻兼权仓部郎官兼崇政殿说书迁将作少监又迁将作监文仲在讲筵每以积诚感动常进读春秋帝问五霸何以为三王罪人文仲奏云齐桓公当王霸升降之会而不能为向上事业独能开世变厉阶臣考诸春秋桓公初年多书人越二十年伐楚定世子之功既成然后书侯之辞迭见此所以为尊王抑霸之大法然王岂徒尊哉盖欲周王子孙率修文武成康之法度以扶持文武成康之德泽则王迹不熄西周之美可尊如此方副春秋尊王之意盛夏建宗阳宫坏徙民居畿甸骚然文仲疏谏移闾阎之聚为香火之庭不得为善计矣陛下绍祖宗之位岂以黄老之居为轻重哉翌日面奏益恳至诏卿监以上荐人才文仲荐陈存吕折锺季玉等十有八人名士二人金华王栢天台车若水也兼国子司业兼侍立修注官又以掾太学教谕彭成天迕似道主管崇禧观出知衡州运饷有法而民不扰以所当得米八千石立思济仓召为秘书少监寻兼崇政殿说书以疾乞致仕不许兼国史院编修官实录院检讨官迁太常少卿兼国子司业迁起居舍人少帝即位授权工部侍郎兼权侍右郎官寻兼给事中有事明堂议以上公摄行文仲议曰今祇见天地之始虽在幼冲比即丧次已胜拜跪执礼无违所当亲飨时丞相王爚陈宜中不协文仲疏言事危且急矣祖宗所深赖亿兆所寄命在乎二相苟以不协之故今日不战明日不征时不再来后悔何及寻兼国子祭酒元兵渡江畿甸震动朝士多弃去者侍从班惟文仲一人诏旌在列不去者二阶文仲疾益甚勺祠以集英殿修撰知漳州三上章乞致仕改知泉州因将家踰岭南待次卒而宋亡矣

△谢枋得

谢枋得字君直信州弋阳人也为人豪爽每观书五行俱下一览终身不忘性好直言一与人论古今治乱国家事必掀髯抵几跳跃自奋以忠义自任徐霖称其如惊鹤摩霄不可笼繫宝佑中举进士对策极攻丞相董槐与宦官董宋臣意擢高第矣及奏名中乙科除抚州司户参军即弃去明年复出试教官中兼经科除教授建宁府未上吴潜宣抚江东西辟差干办公事团结民兵以扞饶信抚科降钱米以给之枋得说邓傅二社诸大家得民兵万余人守信州暨兵退朝廷核诸军费几至不免五年彗星出

东方枋得考试建康擢似道政事为问目言兵必至国必亡漕使陆景思衔之上其橐于似道坐居乡不法起兵时冒破科降钱且讪谤追两官谪居兴国军【伏读通鉴辑览谨按 御批试士而以政事为问目孰是孰非原不妨于缕指至于国家废兴则非草野所宜妄论且明知大势已去为臣子者隐痛尤深何忍于盈庭发策之时斥言宗社枋得固素知大义者而其情过激遂乖敬慎之常又何怪权奸之借端指摘乎】咸淳三年赦放归德佑元年吕文焕导大元兵东下鄂黄蕲安庆九江凡其亲友部曲皆诱下之遂屯建康枋得与吕师夔善乃应诏上书以一族保师夔可信乞分沿江诸屯兵以之为镇抚使使之行成【伏读通鉴辑览谨按 御批师夔举族降元并受官职叛迹显然而其部曲又争相降附吕氏之罪恶更无可原枋得固素称守道重者何亦徇于私交保其可信且欲藉以行成其视司马迁之于李陵殆有甚矣迨次年安仁之战卒败于师夔能无有悔耶】且愿身至江州见文焕与议从之使以沿江察访使行会文焕北归不及而反以江东提刑江西招谕使知信州明年正月师夔与武万户分定江东地枋得以兵逆之使前锋呼曰谢提刑来吕军驰至射之矢及马前枋得走入安仁调淮士张孝忠逆战团湖坪矢尽孝忠挥双刀击杀百余人前军稍却后军绕出孝忠后众惊溃孝忠中流矢死马奔归枋得坐敌楼见之曰马归孝忠败矣遂奔信州师夔下安仁进攻信州不守枋得乃变姓名入建宁唐石山转茶坂寓逆旅中日麻衣蹑屨东乡而哭人不识之以为被病也已而去卖卜建阳市中有来卜者惟取米屨而已委以钱率谢不取其后人稍稍识之多延至其家使为弟子论学【伏读通鉴辑览谨按 御批枋得固讲理学者战而败死国事可也乃变姓名而窜犹以论学为人所宗正所谓进退无据史尚有与辞岂正见哉】天下既定遂居闽中至元二十三年集贤学士程文海荐宋臣二十二人以枋得为首辞不起又明年行省丞相蒙古岱将旨诏之执手相勉劳枋得曰上有尧舜下有巢由枋得名姓不祥不敢赴诏丞相义之不强也二十五年福建行省参政管如德将旨如江南求人材尚书留梦炎以枋得荐枋得遗书梦炎曰江南无人材求一瑕吕饴甥程婴杵臼厮养卒不可得也纣之亡也以八百国之精兵而不敢抗二子之正论武王太公懍懍无所容急以兴灭继绝谢天下殷之后遂与周并立使三监淮夷不叛武庚必不死殷命必不黜夫女真之待二帝亦惨矣而我宋今年遣使祈请明年遣使问安王伦一市井无赖狎邪小人谓梓宫可还太后可归终则二事皆符其言今一王伦且无之则江南无人才可见也今吾年六十余矣所欠一

死耳岂复有它志哉终不行郭少师从少帝北迁既而南归与枋得道时事曰大元本无意江南屡遣使使顿兵令毋深入待还岁币即议和无枉害生灵也张晏然上书乞敛兵从和上即可之兵交二年无一介行李之事乃挈数百年宗社而降因相与痛哭福建行省参政魏天佑见时方以求材为急欲荐枋得为功使其友赵孟■〈讠卸〉来言枋得骂曰天佑仕闽无毫发推广德意反起银冶病民顾以我辈饕奸邪及见天佑又傲岸不为礼与之言坐而不对天佑怒强之而北枋得即日食菜果二十六年四月至京师问谢太后攒所及少帝所在再拜恸哭已而病迁悯忠寺见壁间曹娥碑泣曰小女子犹耳吾岂不汝若哉留梦炎使医持药杂米饮进之枋得怒曰吾欲死汝乃生我邪弃之地终不食死伯父徽明以特奏恩为当阳尉摄县事于天基节上寿元兵奄至徽明出兵战死二子趋进抱父尸亦死

钦定续通志卷四百十六

●钦定续通志卷四百十七 列传二百十七

列传

辽【一】

○辽一

耶律赫噜 耶律实纳齐【隆科 佛德】 耶律允 耶律
哈里 耶律达喇 萧痕笃 康默记【
延寿】 韩延岳【德枢 绍动 绍芳】 韩知古【匡嗣 德源 德凝
】 耶律迪里【伊济】 耶律都沁【古 图鲁
卜】 王郁 耶律图勒锦 耶律嘉哩 高模翰 赵
思温 耶律乌鲁斯 张砺

耶律赫噜

耶律实纳齐

耶律允

耶律哈里

耶律达喇

萧痕笃

康默记【康延寿】

韩延徽【韩德枢 韩绍勋 韩绍芳】

韩知古

耶律迪里

耶律都沁

王郁

耶律图勒锦

耶律嘉哩

高模翰

赵思温

耶律乌鲁斯

张砺

△耶律赫噜

耶律赫噜字库门一字洪隐德呼勒部人祖实默克简猷皇帝兄父乌苏约尼时为本部额尔奇木赫噜性质厚在髻鬢与太祖游从父舒鲁奇之曰兴我家者必二儿也太祖既长相与易裘马为好然赫噜事太祖弥谨会华格弑其父舒噜太祖顾赫噜曰华格弑父料我必不能容将反噬我今彼归罪特顺为解我姑与之是贼吾不忘也自是赫噜常佩刀从太祖以备不虞居久之赫噜父乌苏病召赫噜曰按巴坚神略天授汝率诸弟赫心事之太祖来问疾乌苏执其手曰尔命世奇才吾儿赫噜他日可委以事吾已讫之矣太祖为塔玛辖实呼参预部族事赫噜领数骑召小黄室韦来附太祖素有大志而知赫噜贤军国事非赫噜议不行会讨裕尔库与乌尔固部赫噜为前锋战有功及太祖为德呼勒部额尔奇木讨奚部其长珠尔偃险而垒攻莫能下命赫噜持一笥往谕之既入为所执乃说奚曰契丹与奚言语相通实一国也我额尔奇木于奚岂有轘轹之心哉汉人杀我祖奚首额尔奇木怨制骨日夜思报顾力弱使我求援于奚传矢示信耳额尔奇木受命于天抚下以德故能有此众也今奚杀我违天背德不祥莫大焉且兵连祸结当自此始岂尔国之利乎珠尔感其言乃降太祖为裕悦秉国政欲命赫噜为德呼勒部额尔奇木辞曰贼在君侧未敢远去太祖讨黑车子室韦幽州刘仁恭遣养子赵霸率众来救赫噜伏兵桃山俟霸众过半而要之与太祖合击斩获甚众遂降室韦太祖会李克用于云州赫噜侍克用顾而壮之曰伟男子为谁太祖曰吾族赫噜也会约尼哈陶津汗歿羣臣奉遗命请立太祖太祖辞曰昔吾祖额尔奇木雅里尝以不当立而辞今若等复为是言何欤赫噜进曰曩吾祖之辞遗命弗及符瑞未见第为国人所推戴耳今先君言犹在耳天人所与若合符契天不可逆人不可拂而君命不可违也太祖曰遗命固然汝焉知天道赫噜曰闻裕悦之生也神光属天异香盈幄梦受神诲龙锡金佩天道无私必应有德我国削弱日久天生圣人以兴起之汗知天意故有是命且约尼九营綦布非无可立

者小大臣民属心裕悦天也天时人事几不可失太祖犹未许是夜独召赫鲁责曰众以遗命迫我汝不明吾心而亦俛随耶赫鲁曰在昔额尔奇木雅里虽推戴首众辞之而立苏尔威为汗相传十余世君臣之分乱纪纲之统隳委质他国若缀旒然羽檄蠡午民疲奔命兴王之运实在今日应天顺人以答顾命不可失也太祖乃许明日即皇帝位命赫鲁总军国事时制度未讲国用未充扈从未备而诸弟埒克等往往覬非望太祖宫行营始置腹心部选诸部豪健二千余充之以赫鲁及萧达鲁总焉已而诸弟乱作太祖命赫鲁总领军事讨平之以功为德呼勒部额尔奇木时民更兵焚剽日以抗敝赫鲁抚辑有方畜牧盛滋民用富庶讨乌尔固部破之自是震慑不敢复叛乃请制朝仪建元率百官上尊号太祖备礼受册拜赫鲁为阿勒达尔裕悦阿勒达尔者辽言盛名也后太祖伐西南诸部数为前锋神册二年从逼幽州与唐节度使周德威拒战汗州西败其军遂围幽州未下太祖班师留赫鲁与卢国用守之俄而救兵继至赫鲁等以军少无援退【按五代史云契丹数为李嗣源等所败乃解去通鉴亦云契丹大败俘斩万计此云兵少无援退讳词也】三年七月皇都成燕羣臣以落之赫鲁是日得疾薨年四十七既葬赐名其阡音德山曰裕悦峪诏立石纪功清宁间命立祠上京初赫鲁病革太祖临视问所欲言赫鲁曰陛下圣德宽仁羣生咸遂帝业隆兴臣既蒙宠遇虽瞑目无憾惟析德呼勒部议未决愿亟行之及薨太祖流涕曰斯人若延三五载吾谋蔑不济矣太祖二十一功臣各有所拟以赫鲁为心云子塔喇萨喇俱不仕

△耶律实纳齐

耶律实纳齐字萨喇六院部锡里尼固察之族始字堆音早隶太祖幕下尝有疾赐罇酒饮而愈辽言酒尊曰萨喇故诏易字焉太祖即位掌腹心部天赞初分德呼勒部为北南院实纳齐为北院额尔奇木帝西征至流沙诸部溃散命实纳齐抚集之及讨渤海围辉罕城大譴譟降已而复叛诸将分地攻之实纳齐感励士伍鼓噪登陴敌震慑莫敢御遂破之天显中卒年七十居佐命功臣之一侄隆科佛德

耶律隆科

耶律佛德

耶律隆科

隆科字萨兰其母湏钦皇后姊也隆科幼养宫掖既长沉毅有勇略隶太祖帐下既即位屡有战功埒克之乱也欲乘不备为掩袭计给降太祖将纳之命隆科耶律允勒士卒以防变逆党知有备惧而遁以功授右皮室详裘典

宿卫太祖侵燕赵遇唐兵云碧店隆科恃勇轻敌直犯
其锋战久之被数创归营而卒太祖深悼惜之佐命功臣其一也

耶律佛德

佛德字乌库哩弱冠事太祖天显初为左皮室详袞典宿卫迁南院额尔奇木治有声石敬瑭破张敬达军于太原北时佛德勒兵为援敬达遁敬瑭追至晋安寨围之佛德领轻骑袭潞州塞其饷道唐诸将惧杀敬达以降会同初改德呼勒部额尔奇木为大理即拜佛德既而加采访使旧制肃祖以下宗室称院德祖宗室号三父房称横帐百官子弟及籍没人称着帐耶律实迪言横帐班列不可与北南院并太宗诏在廷议皆曰然乃诏横帐班列居上佛德曰横帐始图爵位之高愿与北南院参任兹又耻与同列夫横帐与诸侯皆臣也班列奚以异帝乃诏乃旧制其强直不挠如此佛德状貌秀伟初太祖见之曰是子风骨异常儿必为国器后果然卒年四十九【按圣宗本纪统和元年赐佛德等汤药二年以佛德为南京统军使四年败宋军于固安统和去天显几六十年佛德弱冠事太祖年止四十九安能逮事圣宗本纪所载当别是一人宏简录缀之本传恐未深考耳】

△耶律允

耶律允字锡里雅图鲁卜部人祖塔雅克约尼时为北边伊喇简献皇后与诸子之罹难也尝倚之以免太祖思其功不忘又多允严重有济世志乃命典司近部以遏诸族觊觎之想允既见器重益感奋思报太祖始置宫分自卫允率门客首附宫籍帝益嘉其忠诏以塔雅克配享庙廷及平呼克等乱以功迁奚德呼勒部额尔奇木从征渤海有功天显初卒后诸帝以太祖之器允也往往取其子孙为友宫分中称八房皆其后也弟辖哩终奚六部图哩

△耶律哈里

耶律哈里字鼐尔昆约尼兆固汗之裔太祖传位哈里与有力焉时属籍比局萌觊觎而约尼故族尤觊望哈里多先帝知人之明又素服太祖威德独归心焉以故太祖托为耳目数从征讨既靖内乱始置约尼详袞令哩里领之天显初征渤海哈里将约尼紮破辉罕城班师卒

△耶律达喇

耶律达喇字和抡约尼森济汗之子太祖践阼与详袞哈里同心辅政太祖知其忠实命掌礼仪且委以军事后以平内乱功代辖哩为奚六部图哩卒达喇善骑射颇好礼文

△萧痕笃

萧痕笃字裕勒沁德呼勒部人其先相约尼氏痕笃少慷慨以才能自任早隶太祖帐下数从征讨既践阼除北府宰相痕笃事亲孝为政尚宽简

△康默记 【康延寿】

康默记本名照少为蓟州衙校太祖侵蓟州得之爱其材隶麾下蕃汉相涉事属默记所衷之悉合帝意时诸部新附文法未备默记推析律意论决重轻不差毫厘拜左尚书神册三年始建都默记董役人咸劝趋百日而讫事五年为皇都伊勒希巴太祖出师居庸关命默记将汉军进逼长芦水寨俘馘甚众天赞四年从征渤海后大譴譟叛命诸将攻之默记分薄东门率骁勇先登复与韩延徽下长岭府 【按太祖纪默记攻长岭府时为额尔奇木】 军还已下城邑多叛默记与阿固察平之破辉发城归营太祖山陵毕卒佐命功臣其一也孙延寿少倜傥善骑射尝谓其所亲曰大丈夫为将当效节边垂马革裹尸景宗特授千牛卫大将军朱人攻南京延寿奋击阵前敌遂大溃以功遥授保大军节度使干宁三年卒 【披辽无干宁年号考景宗本纪干亨二年宋主围南京以本传合之当是干亨之误】

△韩延徽 【韩德枢 韩绍勋 韩绍芳】

韩延徽字藏明幽州安次人父梦殷累官蓟儒顺三州刺史延徽少年敏燕帅刘仁恭奇之召为幽都府文学平州录事参军授幽州观察度支使及守光为师延徽来聘太祖怒其不屈留之使牧羊马舒噜后曰彼秉节弗挠贤者也奈何困辱之太祖召与语合帝意即命参军事攻党项室韦服诸部落延徽之筹居多乃请树城郭分市里以居汉人之降者又为定配偶教垦艺以生养之故逃亡者少居久之慨然怀其乡里赋讨见意遂亡归唐已而与他将王緘有隙惧及难乃省亲幽州行过常山匿故人王德明舍德明问所适延徽曰吾将复走契丹德明不以为然延徽笑曰彼失我如失左右手见我必喜既至太祖问故延徽曰忘亲非孝弃君非忠臣虽挺身逃臣心在陛下臣是以复来帝大悦赐名曰伊呀伊呀辽言复来也命为守政事令崇文馆大学士中外事悉令参决天赞四年从征渤海以功拜左仆射又与康默记攻长岭府拔之太宗朝封鲁国公仍为政事令使晋还改南京三司使世宗朝迁南府宰相建政事省设张理具称尽力吏天禄五年 【辽史本传作三年今据本纪改】 河东请行册礼帝召延徽定其制一遵太宗册晋帝礼应历中致仕子德枢镇东平诏许每岁东归省九年卒年七十八赠尚相令葬幽州之鲁郭世为崇文令公初延徽南奔太祖梦白鹤自帐中出比还复梦鹤入帐中诘旦

谓侍臣曰延徽至矣已而果然太祖初元庶事草创凡营都邑建宫殿正君臣定名分法度井井延徽力也为佐命功臣之一子德枢自幼器宇不凡年甫十五太宗见之谓延徽曰是儿卿家之福朕国之宝真英物也未冠守左羽林大将军迁特进太尉时汉人降与转徙者多寓东平丁岁奸饥馑疾疠德枢请往抚字之授辽兴军节度使整纷剔蠹恩煦信孚劝农桑兴教化期月民获苏息入为南院宣徽使遥授天平军节度使平滦营三州管内观察处置等使门下平章事已而加开府仪同三司行侍中封赵国公保宁元年卒孙绍勋绍芳绍勋仕至东京户部使大延琳叛被执不屈贼以锯解之愤骂至死绍芳开泰九年为枢密都承旨 【据百官志增辑】 太平四年为枢密道学士 【据圣宗纪增辑】 重熙间参知政事加兼侍中时延议征李元昊力谏不听出为广德军节度使闻败呕血卒曾孙资让大安八年参知政事为中京留守 【据道宗纪增】 寿隆初知枢密院事拜中书侍郎平章事坐事出为崇义军节度使 【语见道宗纪】 改镇辽兴卒

△韩知古

韩知古蓟州玉田人善谋有识量太祖平蓟时知古六岁为淳钦皇后兄允所得后来嫔知古从焉久之未得省见怏怏不得志挺身逃庸保以供资用其子匡嗣得亲近太祖因间言太祖召与语贤之命参谋议太祖破刘守光军诏赴龙化州建碑以纪功德 【据太祖纪增入】 神册初遥授彰武军节度使信任益笃总知汉儿司事兼主诸国礼仪时仪法疏阔知古据典故酌国俗与汉仪杂就之使国人易知而行顷之拜左仆射 【按太祖纪未建元之三年知古已为左仆射】 与康默记将汉军征渤海有功迁中书令天显中卒为佐命功臣之一子匡嗣

韩匡嗣

韩德源

韩德凝

韩匡嗣

匡嗣以善医直长乐宫皇后视之犹子应历十年为太祖庙详袞宋王喜隐谋叛辞引匡嗣帝置不问景宗在藩邸善匡嗣即位拜上京留守加封燕王改南京留守保宁末以留守摄枢密使时耶律和克使宋还言宋人必取河东合先事为备匡嗣沮之已而宋人果敢太原乘胜逼燕匡嗣与南府宰相刷特哩袞休格侵宋军于满城方阵宋人请降匡嗣欲纳之休格曰彼军气甚锐疑诱我也不听俄而宋军鼓噪以进匡嗣仓卒谕诸将毋当其锋众既奔遇伏兵扼要路匡嗣弃旗鼓遁其众走易州山帝怒数之

曰违弃众谋深入敌境尔罪一也号令不肃行伍不整
尔罪二也弃我师旅挺身鼠窜尔罪三也侦候失机守御弗备尔罪四也捐弃旗鼓损威
辱国尔罪五也促令诛之皇后引诸内戚为解帝重违
其请良久乃杖而免之既而遥授晋昌军节度使干亨二年 【按景宗纪作三年】 改
西南面招讨使卒后追赠尚书令五子德源德让后赐
名隆运德盛德崇德凝德源德凝附传余各有传

韩德源

德源性愚而贪早侍景宗邸及即位列近侍保宁间 【按保宁原文作统和据传德
源以干亨初卒干亨为景宗年号统和为圣宗年号
卒在先任反在后考德源父子兄弟俱早侍景邸其弟德让德威德凝迁擢俱始于保宁
德源为长兄不应始仕于圣宗朝其为保宁之讹无疑
谨据改】 官崇义兴国二军节度使加检校太师以贿名德让贻书谏之终不悛后加同
政事门下平章事遥摄保宁军节度使干亨初卒

韩德凝

德凝谦逊廉谨保宁中迁护军司徒统和中 【按统和原文作开泰考圣宗纪统和
三年德凝由彰武军节度使为崇义节度使又属国
表统和十九年西南面招讨使奏党项之提而佚其名以事考之当即德凝则开泰为统
和之误无疑谨据改】 累迁护卫太保都宫使崇义军
节度使移镇广德秩满部民请留从之改西南面招讨使党项隆伊特叛平之迁大同军
节度使卒于官子果桑终天德军节度使孙高嘉努终
南院宣徽使果实终辽兴军节度使

△耶律迪里

耶律迪里字乌埒济裕悦赫噜之弟初太祖为裕悦迪里以谨愿宽恕见器使既即
位入侍帷幄与闻政事神册三年赫噜薨命迪里为德
呼勒部额尔奇木属以南方事会讨党项皇太子为先锋迪里副之军至天德云内分道
并进迪里率偏师渡河力战斩获甚众天赞初大元帅
略燕地迪里徇山西所至城堡皆下从伐渤海拔扶余城留迪里与伊德实守之天显二
年留守东京十年卒年五十六弟伊济

耶律伊济

耶律伊济

伊济子字乌里字伊德森幼豪爽不羣长嗜学通诸部语太祖经营之初多预军谋
天显元年渤海平立皇太子为东丹王以伊济为中台
省右次相时人心未安伊济莅事勤恪威信并行太宗即位上表曰渤海昔畏南朝阻险
自卫居辉罕城今去上京辽邈既不为我用又不罢戍果

何为哉先帝因彼离心乘衅而动故不战而克天授人与彼一时也遗种寢以蕃息今居
远境恐为后患梁水之地乃其故乡地衍土沃有木铁
盐鱼之利乘其微弱徙还其民万世长策也彼得故乡又获木铁盐鱼之饶必安居乐业
然后选徒以翼吾左突厥党项室韦夹辅吾右可以坐
制南邦混一天下成圣祖未集之功贻后世无疆之福帝嘉纳之是岁诏徙东丹国民于
梁水 【太祖本纪作东平按辽史地里志神册四年
葺辽阳故城以渤海汉户建东平郡天显三年迁东丹国民居之升为南京梁水即郡之
东梁河也】 人皇王奔唐伊济镇抚国人一切如故以
功加守太傅迁中台省左相会同初以册礼赴阙加特进卒子和尔终东京留守

△耶律都沁

耶律都沁字达年六院部人祖博果济约尼氏时再为木部额尔奇木耶律朗德等
既害元祖暴横益肆博果济以计诱其党悉诛夷之都
沁幼有志节太祖为裕悦常居左右后即位梁人遣使求辕轴材太祖难之都沁曰梁名
求材实觐吾轻重宜荅曰材之所生必深山穷谷有神
司之须白鼻赤驴祷祠然后可伐如此则其语自塞矣已而果然天赞三年将伐渤海都
沁谏曰陛下先事渤海则西夏必蹶吾后请先西讨太
祖从之及淳钦皇后称则恶都沁囚之誓曰铁锁朽当释汝既而召之使者欲去锁都沁
曰铁木朽可释乎后闻嘉叹趣召释之天显二年卒弟
古图鲁卜

耶律古

耶律图鲁卜

耶律古

古字鼐尔昆初名实默克太祖为裕悦常从略地山右会李克用于云州古侍克用
异之曰是儿骨相非常不宜使在左右太祖颇忌之时
方西讨诸弟乱作闻变太祖问古与否则曰无喜曰吾无患矣趣召古议古陈殄灭之策后
皆如言神策末南伐以古佐右皮室详袞隆科与唐兵
战于云碧店隆科中流矢伤甚太祖疑古阴害之古知帝意请遣使问之太祖使问隆科
对曰臣于古无可疑者帝意乃释隆科卒遂以古为右
皮室详袞既卒太祖谓左右曰古死犹长松自倒非吾伐之也

耶律图鲁卜

图鲁卜字托辉幼聪敏嗜学事太祖见器重及制契丹大字图鲁卜赞成为多未几
为文班林牙领国子博士知制诰明年受诏撰决狱法
太祖略燕诏与皇太子及王郁攻定州师还至顺州幽州马步军指挥使王千率众来袭
图鲁卜射其马蹶擒之天质二年皇子耀库济为大元

帅图鲁卜为副既克平州进军燕赵攻下曲阳北平至易州李景章出降言城中无鬪志大元帅将修攻具图鲁卜谏曰我师远来人马疲惫势不可久留乃止军还大元帅以其谋闻太祖大悦赐赉优渥车驾西征复与大元帅为先锋伐党项有功太祖犒师水精山大元帅东归图鲁卜留屯西南部讨党项多获而还太祖伐大諲譔图鲁卜先登渤海平承诏铭太祖功德于永兴殿壁渤海州郡复叛从大元帅攻破之淳钦皇后称制有飞语中伤者后怒图鲁卜惧而亡太宗知其无罪名还天显三年讨乌尔固部俘获甚众伐唐以图鲁卜为左翼攻唐军霞沙寨降之十一年送晋主石敬瑭入洛及大册总礼仪事加特进检校太尉会同五年卒

△王郁

王郁京兆万年人唐义武军节度使处直之孽子伯父处存镇义武卒三军推其子郃袭处直为都知兵马使梁王朱全忠攻定州郃遣处直拒于沙河兵败入城逐郃乱兵推处直为留后郃之亡也郁从之晋王克用妻以女用为新州防御使处直阴使郁北导契丹入塞以牵晋兵且许为嗣神册六年奉表送款举室来降太祖以为养子未几郁兄都囚父自为留后帝遣郁从皇太子讨之【按五代史王处直传都反唐遣王晏球讨之都与郁复招契丹为援契丹遣万骑救都为晏球所败与本传异】至定州都坚壁不出掠居民而还明年从皇太子攻镇州遇唐兵丁定州破之天赞二年秋郁及阿固齐略地燕赵攻下磁窑务从太祖平渤海战有功加同政事门下平章事改崇义军节度使太祖崩郁与妻会葬其妻泣诉于淳钦皇后求归乡国许之郁奏曰臣本唐主之婿王已被弑北行夫妻岂能相保愿常侍太后后喜曰汉人中惟王郎最忠孝以太祖尝与李克用约为兄弟故也寻加政事令还宜州卒

△耶律图勒锦

耶律图勒锦字额哩音肃祖子学顺之孙幼善骑射勇而有谋略尝侍从帷幄太宗立晋之役其父德里古为五院额尔奇木歿于兵帝即以其职授图勒锦会同元年改北院大王尝屏左右与议大事占对合帝意从讨石重贵杜重威拥十万余众拒滹沱桥力战数日不得进帝曰两事争渡人马疲矣计将安出诸将请缓师为从图帝然之图勒锦厉色进曰陛下乐于安逸则谨守四境可也既欲扩大疆宇出师远攻讵能无厯圣虑若中路而止适为贼利则必陷南京夷属邑争战未已吾民无奠枕之期矣且彼步我骑何虑不克如选轻骑先绝其饷道事兢不济矣帝喜从其言重威果降明年春卒军中

△耶律嘉哩

耶律嘉哩字布当图鲁卜部人世为小吏嘉哩早隶太宗麾下擢为军校天显间唐攻定州既陷嘉哩为唐兵所获晋高祖立始归国太宗贯其罪拜御史大夫会同九年伐晋师次滹沱河夺中渡桥降其将杜重威嘉哩与降将张彦泽率骑兵趋河南所至无敢当其锋既入汴嘉哩等迁晋王重贵于开封府彦泽恣杀掠乱宫掖嘉哩不能禁军驾至京斩彦泽嘉哩亦被诘责寻释之天禄间加守太子太傅应历初置本部令袭嘉哩世其职卒

△高模翰

高模翰一名松渤海人有膂力善骑射好谈兵初太祖平渤海模翰避地高丽王妻以女因罪亡归坐使酒杀人下狱太祖知其才贯之天显十一年唐遣张敬达杨光远攻太原石敬瑭求救太宗许之征兵出太原模翰与敬达军接战败之太原围解帝召赐酒饌翼日复战又败之光远斩敬达降帝谕模翰曰朕自起兵百余战卿功第一虽古名将无以加乃授上将军会同元年册礼成宴百官及诸国使于二仪殿帝指模翰曰此国之勇将朕统一天下斯人力也及晋叛盟出师南伐模翰为统军副使与僧额前驱拔赤城破德贝诸寨遂兼总左右铁鹞子军下关南城邑数十明年敕虎官杨覃赴干宁军为沧州节度使田武名所围模翰与赵延寿聚议往救俄有光自模翰目中出萦绕旗矛焰焰如流星模翰嘉曰此天赞之祥遂进兵杀获甚众以功加侍中略地盐山破饶安晋人震怖不敢接战加太傅晋杜重威领兵三十万来拒模翰谓左右曰军法在整不在多以多陵少不义必败其晋之谓乎诘旦以麾下三百人逆战杀其先锋梁汉璋余兵败走手诏褒美顷之杜重威等复至滹沱河模翰守中渡桥复败之车驾入汴加特进检校太师封愬郡开国公赐玺书剑器为汴州巡检吏平汜水诸山土贼迁镇中京天禄二年加开府仪同三司赐对衣鞍勒名马应历诏召为中台省右相时北汉为周所侵遣使求援命模翰赴之模翰以苇筏渡胡卢河攻冀州周人莫敢应获丁壮数百人而还 【据穆宗本纪及资治通鉴增入】 九年正月迁左相卒

△赵思温

赵思温字文美卢龙人少果锐膂力兼人隶燕帅刘仁恭幕李存勖问罪于燕思温统偏师拒之流矢中目裂裳渍血战犹不已为存勖将周德威所擒存勖壮而释之日见信用与梁战于莘县以骁勇闻授平州刺史兼平营蓟三州都指挥使神册二年太祖遣将略燕地思温来降及伐渤海以思温为汉军都团练使力战拔扶余城身被数创太祖亲为调药太宗即位以功擢检校太保保静军节度使天显十一年唐攻太

原石敬瑭求救帝命思温自岚宪间出兵扰之既罢兵改南京留守卢龙军节度使管内观察处置等使开府仪同三司兼侍中赐协谋静乱翊圣功臣寻改临海军节度使会同初使晋行册礼还加检校太师二年卒赠太师魏国公子延昭【通鉴作延照为晋祁州刺史】延靖官至使相

△耶律乌鲁斯

耶律乌鲁斯六院额尔奇木博果济之后负勇略每战被重铠挥铁槊所向披靡会同间伐晋帝至河而猎纵海东青鹞搏雉晋人隔水以鸽引去帝顾左右曰谁为我得此人乌鲁斯请内厩马济河擒之并杀救者数人还帝大悦优加赏赉既而晋将杜重威逆于望都据水勒战乌鲁斯介马突阵余军继之被围众言阵薄处可出乌鲁斯曰恐彼有他备竟引兵冲坚而出回视众所指皆大堑也其料敌多此类是年总领迪里皮室单坐私免部曲夺官卒

△张砺

张砺磁州人初仕唐为掌书记迁翰林学士会石敬瑭起兵唐主以砺为招讨判官从赵德钧援张敬达于河东及敬达败砺入契丹太宗见砺刚直有文彩擢翰林学士临事必尽言无所避帝益重之未几谋亡归为追骑所获帝责之砺对曰臣不习北方土俗饮食居处意尝郁郁以是亡耳帝顾通事高彦英曰朕尝戒汝善遇此人何乃使失所而亡杖彦英而谢砺会同初升翰林承旨兼吏部尚书从帝伐晋入汴诸将萧翰耶律朗鄂汉达辈肆杀掠砺奏曰今大辽始得中国宜以中国人治之不可专用国人及左右近习苟政令乖失则人心不服虽得之亦将失之帝不听改右仆射兼门下侍郎同中书门下平章事【按辽史百官志门下侍郎隶门下省同中书门下平章事隶中书省系砺兼官原文作门下侍郎平章事者误也谨依五代史改正】帝在汴将视朝有司给砺三品冠服砺曰吾在上国时晋奉册北朝赉二貂冠其一宰相韩延徽冠之其一命我服之今其可降服耶卒冠貂蝉以朝【据五代史增入】车驾北还至栾城崩时砺卧病恒州萧翰等以兵围其第数日汝何故于先帝言国人不可为节度使我以国勇之亲有征伐功先帝留我守汴汝独以为不可又譖我掠人财物子女今必杀汝趣锁之砺抗声曰此国家大体安危所系吾实言之欲杀即杀奚以锁为满达以砺大臣不可专杀乃救止之是夕砺恚愤卒

钦定续通志卷四百一十七

●钦定续通志卷四百十八 列传二百十八

列传

辽【二】

○辽二

耶律乌哲【唐古】 耶律厚【和勒博】 耶律安图 萧塔喇噶
耶律塔喇 耶律伊勒哈 萧和斯
高勋 耶律萨哈 耶律贤适 室昉 纽哩 刘景
郭袭 耶律苏色 耶律阿穆尔 邢抱
朴 马得臣 耶律和克【穆尔古】

耶律乌哲

耶律厚

耶律安图

萧塔喇噶

耶律塔喇

耶律伊勒哈

萧和斯

高勋

耶律萨哈

耶律贤适

室昉

纽哩

刘景

郭袭

耶律苏色

耶律阿穆尔

邢抱朴

马得臣

耶律和克

△耶律乌哲

耶律乌哲字达年系出孟父房姿简静有器识重然诺遇事造次处之从容人莫能测博学知天文会同闲为特哩袞太宗崩诸大臣立世宗太后闻之怒甚遣皇子鲁呼以兵逆击败于泰德泉鲁呼尽执世宗臣僚家属谓守者曰我战不克先殪此曹人皆恟恟军次潢河横渡隔岸相拒时乌哲从太后世宗以乌哲善筹欲行闲乃设事奉书以试太后太后得书以示乌

哲乌哲曰太后佐太祖定天下故臣愿竭死力若太后见疑臣虽欲尽忠得乎为今之计莫若以言和解事必有成否即宜速战以决胜负人心一摇国祸不浅又曰鲁乎永康王皆太祖子孙神器非移他族太后宜思长策与永康王和议太后曰谁可遣者对曰太后不疑臣臣请往万一永康王见听庙社之福太后乃遣乌哲授书于帝帝遣宣徽使耶律哈斯复书辞多不逊乌哲谏曰书意如此国家之忧未艾也能释怨以安社稷则臣以为莫若和帝曰彼众乌合安能敌我乌哲曰即不敌奈骨肉何况未知孰胜借曰幸胜诸臣之族执于鲁呼者无噍类矣左右闻者皆失色帝让之曰女与朕属尤近何反助太后乌哲曰臣以社稷至重不可轻付故如是耳 【原文在许立永康下今依弘简录改】 良久帝问曰若何而乌哲对曰与太后相见各纾忿恚和之不难不然决战非晚帝然之遂遣哈斯诣太后约和往返数日议乃定始相见怨言交让殊无和意太后谓乌哲曰汝当为我画之乌哲进曰太后与大王若能释怨臣乃敢进说太后曰汝第言之乌哲借谒者筹执之谓太后曰昔人皇王在何故立嗣圣太后曰立嗣圣者太祖遣旨又语帝曰大王何故擅立不禀尊亲答曰人皇王当立而不立我正当立乌哲正色曰人皇王舍父母之国而奔唐子道当如是耶大王见太后不少逊谢惟怨是寻太后牵于偏爱托先帝遗命妄授神器如此何敢望和当速交战掷筹而退太后泣曰向太祖遭诸弟目天下荼毒疮痍未复庸可再乎乃索筹一帝曰父不为而子为又谁咎也亦取筹而执左右感激大恸太后复谓乌哲曰议既未定神器竟谁归乌哲曰太后若授永康王顺天合人复何疑鲁呼厉声曰我在乌裕安得立乌哲曰礼有世嫡不传诸弟昔嗣圣之立尚以罪为非况公暴戾残忍人多怨讟万口一辞愿立永康王不可夺也太后顾鲁呼曰汝实自为之乃许立永康天禄二年耶律天德萧翰谋反下狱特哩袞瑠格及其弟瓚都结天德等为乱耶律实喇潜告乌哲乌哲遽引入见白其事瑠格等不服事遂寝未留瑠格邀驾观樗蒲捧觞上寿袖刃而进帝觉命执之亲诘其事瑠格自誓帝复不问乌哲奏曰当使瑠格与实喇对状不可辄恕帝曰卿为朕鞠之乌哲率剑士讯之天德等皆伏罪三年为右皮室详袞 【按辽史传系之五年考察克传乌哲列察克奸状时已为右皮室详袞而察克之行弑在五年盖因事联属而误缀谨改正】 表列泰宁王察克阴谋事帝不听五年秋察克弑帝乌哲闻有言衣紫者不可失乃易衣而出亟遣人召诸王及喻禁卫长皮室等同力讨贼时寿安王归帐乌哲遣弟冲迎之王至尚犹豫乌哲曰大王嗣圣子贼若得之必不容羣臣将谁事社稷将谁赖万一落贼手

悔将何及王始悟诸将闻乌哲出相继而至迟明整兵
出贼不意围之遂诛察克乱既平穆宗即位谓乌哲曰朕之性命实出卿手命知国事以
逆党财产尽赐之乌哲固辞应历五年为北院大王总
山西事保宁初宋围太原以乌哲率兵往援至白马岭遣劲卒闲遣疾驰驻太原西鸣鼓
举火宋兵以为大军至惧而宵遁 【按太原之围辽
纪不载通鉴宋太祖开宝二年围太原北汉兵屡败辽遣南大王者将兵来援会署雨军
士多疾乃还时辽保宁元年也意所云南大王者即系
乌哲而通鉴失其名与】 以功加裕祝四年汉刘继元遣使来贡致币于乌哲乌哲以闲
帝命受之五年 【辽史传作是年据景宗纪改】
五年薨年五十七子唐古

耶律唐古

耶律唐古

唐古字敌隐廉谨善属文统和二十四年述乌哲安民治盗之法以进补小将军迁
西南面巡检历壕州刺史唐古都详袞严立科条禁奸
民鬻马于宋夏界因陈弭私贩安边境之要太后嘉之诏边境遵行着为令朝议欲广西
南封域黑山之西绵亘数千里唐古言戍垒太远卒有
警急赴援不及非良策也从之西蕃来侵诏议守御计命唐古劝督耕稼以给西军田于
胪胸河侧是岁大熟明年移屯镇明年移屯镇州凡十
四稔积粟数十万斛斗米数钱重熙闲改乌延党项部节度使先是筑哈屯城以镇西域
诸部纵民畜牧反招寇掠重熙四年上疏曰自建哈屯
城以来西蕃数为边患每烦远戍岁月既久国力耗竭不若复守故疆省罢戍役不报是
年致仕乞勒其父乌哲功于石帝命耶律庶成制文勒
石上京崇孝寺卒年七十八

△耶律厚

耶律厚字赫鲁六院部额尔奇木博果济之后端恣好施不事生产太宗特加倚任
会同六年为南院大王莅事精简人不敢以年少易之
时晋主石重贵表不称臣辞多倨慢厚言晋罪不可不伐及帝亲征以所部兵从既入汴
诸将皆取内帑珍异厚独取马铠帝嘉之及帝崩于栾
城无遗诏军中忧惧不知所为厚诣北院大王耶律翰议曰天位不可一日旷若请于太
后则必属鲁呼暴戾残忍詎能子民必欲厌人望则当
立永康王翰然之会耶律安图来意与厚合遂定义立永康王是为世宗以功加采访使
赐以宝货辞曰臣位已高敢复求富臣从弟达鲁诸子
坐事籍没陛下哀而出之受赐多矣帝曰厚舍重赏而以族入为请其贤远甚许之仍赐
宫户五十时有取当世名流作七贤传者厚与其一天

祿三年卒年三十九子和勒博

耶律和勒博

耶律和勒博

和勒博字实讷尝与耶律乌哲平察克乱穆宗以其父厚首议立世宗故不显用晚年为本族敞史及景宗即位受昭德军节度使为北院大王时黄龙府军将燕颇杀守臣以叛和勒博讨之破于鸭绿江坐不亲追击以至失贼杖之干亨闲卒

△耶律安图

耶律安图曾祖扬珠元祖之长子 【按皇子表扬珠实元祖次子】 祖春博里为本部额尔奇木父迪里幼多疾时太祖为塔玛辖实呼常加抚育神册六年为特哩衮从太祖将龙军讨准布党项有功天赞三年为南院额尔奇木征渤海攻辉罕城俘斩甚众太祖崩淳钦皇后称制欲以大元帅嗣位迪里建言帝位宜先嫡长今东丹王赴朝当立由是忤旨以党附东丹王诏下狱讯鞫加以炮烙不伏杀之籍其家安图自幼若成人居父丧哀毁过礼见者伤之太宗屡加慰谕尝曰此儿必为令器既长寡言笑重然诺动遵绳矩事母至孝以父死非罪未葬不预宴乐世宗在藩邸尤加怜恤安图密自结纳太宗崩于栾城诸将欲立世宗议未决时安图直宿卫世宗密召问计安图曰大王聪明宽恕人皇王之嫡长天下属意今若不断后悔无及会有自京师来者安图诈以鲁呼死传报军中皆以为信于是安图诣南北二大王计之北院大王斡曰先帝常欲以永康王为储贰今日之事有我辈在孰敢不从但恐不白太后而立为国家启衅安图曰永康王贤明人心乐附今天下甫定稍缓则大事去矣若白太后必立鲁呼如社稷何南院大王厚曰此言是也乃奉世宗即位帝王以安图为腹心总知宿卫是岁约和于潢河横渡太后问安图曰吾与汝有何隙安图以父死对太后默然及置北院枢密使命安图为之赐奴婢百口宠任无比事皆取决焉然性太宽事循苟简豪猾纵恣不能制天祿末察克兵犯御幄又不能计中外短之穆宗即位以立世宗之故不复委用应历三年或诬安图与齐王雅斯哈谋乱系狱死侄索吉左皮室详衮

△萧塔喇噶

萧塔喇噶字托实六院部人素刚直太祖时坐叔祖特顺谋杀裕悦舒噜没入弘义宫世宗即位以舅氏故出其籍补国舅别部敞史或言泰宁王察克有无君心塔喇噶曰彼纵忍行不义人孰肯从他日侍宴酒酣塔喇噶捉察克耳强饮之曰帝固知汝傲狠然以国属曲加矜悯使

汝在左右且度汝才何能为若长恶不悛徒自取赤族之祸察克不能答强笑曰何戏之虐也天禄末为北府宰相及察克作乱塔喇噶醉詈曰吾悔不杀此逆贼寻为察克所害

△耶律塔喇

耶律塔喇字尼噜袞六院部郎君尼固察之后沈厚多智有任重才年四十未仕会同闲为边部令袞应历初升南院大王均赋役劝耕稼部人化之户口豊殖时周人侵汉以塔喇都统西南道军援之周已下太原数城汉人不敢战及闻塔喇兵至周主遣郭从义尚钧等【按五代史契丹志及辽史穆宗纪俱作符彦卿通鉴作李筠张永德此又作郭从义尚钧盖皆当时别将也】率精骑拒于忻口塔喇击败之获其将史彦超【按通鉴言彦超恃勇轻进为辽所杀而本传言获者或即春秋胡氏传所云大夫生死皆曰获之义欤】周军遁归复所陷城邑汉主诣塔喇谢及汉主殂宋师来伐帝命塔喇为行军都统【穆宗纪作兵马总管】发诸道兵救之既出雁门宋谍知而退保宁元年加兼政事令致政干亨初召之帝见须发皓然精力犹健问以政事厚礼之以疾薨年七十九塔喇凡用兵赏罚信明得士卒心河东单弱不为周宋所并者塔喇有力焉在治所不修边幅百姓无称年谷屡稔时耶律乌哲居北院塔喇居南院俱有政迹朝议以为富民大王云

△耶律伊勒哈

耶律伊勒哈字苏色本官分人检校太师吓噜【按此与前卷赫噜非一人】之子应历初以父任入侍数岁始为殿前都点检时帝新即位疑诸王有异志引伊勒哈为布衣交一切机密事必与之谋迁寄班都知赐宫户时帝酗酒数以细故杀人有监雉者因伤雉而亡获之欲诛伊勒哈谏曰是罪不应死帝竟杀之以尸付伊勒哈曰收汝故人伊勒哈终不为止复有监鹿详袞亡一鹿下狱当死伊勒哈谏曰人命至重岂可为一兽杀之良久得免辽法麇岐角者惟天子得射会秋猎善为鹿鸣者呼一麇至命伊勒哈射应弦而踏帝大悦赐金银名马及黑山东穆辰之地后穆宗被弑坐守卫不严被诛

△萧和斯

萧和斯字延宁世为北院吏累迁御史中丞总典羣牧部籍应历初迁左客省使未几拜御史大夫时诸王多坐事系狱帝以和斯有才干诏穷治称旨改北院枢密使仍命世预宰相选和斯辞曰臣子孙贤否未知得一客省使足矣从之帝晚岁酗酒用刑多滥和斯居要地■〈𠂔 齿〉自保未尝一言匡救议者以是少之年五十七卒

△高勋

高勋字鼎臣晋北平王信韬之子性通敏仕晋为合门使会同九年与杜重威来降太宗入汴授四方馆使好结权贵能服勤大臣多推誉之天禄闲为枢密使总汉军事五年奉使册刘崇为帝应历初封赵王出为上京留守寻移南京会宋欲城益津勋上书请假巡徼以扰之帝然其奏宋遂不果城十七年宋略地益津关勋击败之【按益津之役宋史不载辽纪应历一三年命勋扰宋之勋之请则系之十七年与传互异当以本传为是】知南院枢密事景宗即位以定策功进王秦保宁中以南京郊内多隙地请疏畦种稻帝欲从之林牙耶律昆宣言于朝曰高勋此奏必有异志果合种稻以水为畦设以京叛官军何自而入帝疑之不纳寻迁南院枢密使以毒药馈驸马都尉萧卓林事觉流铜州寻又谋害尚书令萧逊诏诛之没其产赐逊家

△耶律萨哈

耶律萨哈字萨兰伊实部人南府宰相乌鲁斯子天禄闲始仕应历中拜伊实大王兼知兵马事干亨初宋来侵诏以本部兵守南京北院大王希达等败走独萨哈全军还帝谕之曰拒敌当如此卿勉之无忧不富贵加守太保统和闲卒

△耶律贤适

耶律贤适字阿克展裕悦罗卜科之子嗜学有大志滑稽玩世人莫之知惟裕悦乌哲器之尝谓人曰是人当国天下幸甚应历中朝臣多以言获谴贤适乐于静退游猎自娱与亲朋言不及时事会讨乌尔固还擢右皮室详袞景宗在藩邸常与韩匡嗣纽哩等游言或刺讥贤适劝宜早绝由是穆宗终不见疑贤适之力也景宗立以功加检校太保寻遥受宁江军节度使赐推忠协力天臣帝初践祚疑诸王或萌非望阴以贤适为腹心加特进同中书门下平章事保宁二年秋拜北院枢密使兼侍中赐保节功臣三年为西北路兵马都部署贤适忠介肤敏推诚待人虽燕息不忘政务以故百司首职罔敢偷惰累年滞狱悉决之时高勋纽哩席宠放恣及帝姨母保母势熏灼纳赂请谒门若贾区贤适患之言于帝不报以病解职又不允令铸手印行事干亨初疾笃得请明年封西平郡王薨年五十三子观音大同军节度使

△室昉

室昉字梦奇南京人幼谨厚笃学不出户外者二十年虽里人莫识会同初登进士第为卢龙巡捕官太宗入汴受册礼诏昉知制诰总礼仪事天禄中为南京留守判官应历闲累迁翰林学士出入禁闼十余年保宁闲兼政事

舍人数延问古今治乱得失奏对称旨改南京副留守
决讼平允人皆便之迁工部尚书寻改枢密副使参知政事顷之拜枢密使兼北府宰相
加同政事门下平章事干亨初监修国史统和元年告
老不许进尚书无逸篇以谏太后闻而嘉奖二年秋诏修诸岭路昉发民夫二十万一日
毕功是时昉与韩德让耶律色珍相友善同心辅政整
析蠹弊知无不言务在息民薄赋以故法度修明朝无异议八年复请致政诏入朝免拜
赐几杖太后遣合门仗李从训持诏劳问令常居南京
封郑国公初晋国公主建佛寺于南京帝许赐额昉奏曰诏书悉罢无名寺院今以主请
赐额不惟违前诏恐此风愈炽帝从之表进所撰实录
二十卷手诏褒之加政事令赐帛六百匹九年荐韩德让自代不从以年老赐貂皮衾褥
许乘辇入朝病剧遣翰林学士张干就第授中京留守
加尚父卒年七十五赐尚书令遗言戒厚葬恐人誉过情自志其墓

△纽哩

纽哩字鼐尔昆逸其氏族补积庆宫人应历初为习马实达尔以母尔去一日至雅
伯山见一巨人惶惧走巨人止之曰勿惧我地祇也葬
尔母于斯当速诣阙必贵纽哩从之累迁马羣侍中时景宗在藩邸以纽哩出自本宫待
遇殊厚纽哩亦倾心结纳及穆宗遇弑纽哩奔赴景宗
集禁兵五百以卫既即位以翼戴功加政事令契丹行宫都部署寻加守太尉北汉主刘
继元闻纽哩信任遇其生日必致礼纽哩素贪同列萧
安巴达亦好贿二人相善人有毡裘为臬耳子所著者或戏曰若遇纽哩安巴达必尽取
之传以为笑保宁末坐私藏甲属有司方案诘于纽哩
袖中又得杀枢密使萧逊贼书赐死纽哩善识马常行郊野见数马迹指其一曰此奇骏
也以己马易之果然

△刘景

刘景字可大河闲人四世祖怵即朱滔之甥唐右仆射卢龙军节度使父守敬南京
副留守景端厚好学能文燕王赵延寿辟为幽都府文
学应历初迁右拾遗知制诰为翰林学士九年周人侵燕留守萧逊上急变帝欲俟秋出
师景谏曰河北三关已陷于敌今复侵燕安可坐视不
听会父忧去未几起复旧职一日召草赦既成留数月不出景奏曰唐制赦书日行五百
里今稽期弗发非也亦不报景宗即位以景忠实擢礼
部侍郎迁尚书宣政殿学士帝方欲倚用书其笏曰刘景可为宰相顷之为南京副留守
时留守韩匡嗣因扈从北上景与其子德让其理京事
俄召为户部使历武定开边二军节度使统和六年致仕加兼侍中卒年六十七赠太子
太师子慎行孙一德二玄三嘏四端五常六符皆具六

符传

△郭袭

郭袭不知何郡人性端介识治体久淹外调景宗即位召见对称旨拜南院枢密使寻加兼政事令以帝数游猎上书谏曰昔唐高祖好猎苏世长言不满十旬未足为乐高祖即日罢史称其美伏念圣祖创业艰难修德布政宵旰不懈穆宗逞其无厌之欲不恤国事天下愁怨陛下继统海内翕然望中兴之治十余年闲征伐未已而寇贼未弭年谷虽登而疮痍未复正宜戒惧修省以怀永圆侧闻恣意游猎甚于往日万一有衔檠之变搏噬之虞悔将何及况南有强敌伺隙而动闻之得无生心乎伏望陛下节从禽酣饮之乐为生灵社稷计则有无疆之休帝览而称善赐协赞功臣拜武定军节度使卒

△耶律苏色

耶律苏色字阿敏性忠直简毅练武事应历初为侍从累迁图鲁卜部节度使历霸济祥顺圣五州都总管俄为敦睦宫太师保宁三年改九部都详袞四年伐党项屡立战功统和初皇太后称制西边甫定苏色安集诸蕃利害辄具以闻太后益信任之凡临戎与士卒同甘苦所获均赐将校赏顺讨逆威信大振在边二十年卒

△耶律阿穆尔

耶律阿穆尔字布琳约尼兆固汗之四世孙幼聪敏保宁中为南院宣徽使统和初皇太后称制与耶律色珍参预国论为都统以征高丽功迁北院宣徽使加政事令四年春宋将曹材米信等侵燕从帝亲征为都监屡破敌十二年行在多盗阿穆尔立禁捕法盗始息先是叛逆之家兄弟不知情者亦连坐阿穆尔谏曰夫兄弟虽曰同胞赋性各异一行逆谋虽不与知辄坐以法是刑及无罪也自今虽同居兄弟不知情者免连坐太后嘉纳着为令致仕卒阿穆尔性好聚敛每从征所掠人口聚而建城请为豊州就以家奴阎贵为刺史时议鄙之子贤格左伊勒希巴

△邢抱朴

邢抱朴应州人刑部郎中简之子性颖悟好学博古保宁初为政事舍人知制诰累迁翰林学士加礼部侍郎统和四年山西州县被兵抱朴镇抚之民始安【安大同府志应州西南有龙首书院辽翰林学士邢抱朴建谨附识】加户部尚书迁翰林学士承旨与室昉同修实录决南京滞狱还优诏褒美十年【按圣宗纪作十二年】拜参知政事以枢密使韩德让荐按察诸道守令能否而黜陟之大协人望以母忧

去官诏起视事表乞终制不从宰相密谕帝意乃视事及耶律休格留守南京又多滞狱复诏抱朴平决之人无冤者改南院枢密使卒赠侍中初抱朴与弟抱质受经于母陈氏皆以儒术显抱质亦官至侍中时人荣之

△马得臣

马得臣南京人好学博古善属文尤长于诗保宁闲累迁政事舍人翰林学士常预朝议以正直称干亨初宋师屡犯边命为南京副留守复拜翰林学士承旨圣宗即位皇太后称制兼宣政殿学士【按原文作侍读学士考辽百官志有诸王伴读而无侍读学士今依圣宗纪改】帝阅唐高祖太宗玄宗三纪得臣乃录其行事可法者进之及扈从伐宋进言降不可杀亡不可追二三其德者别议诏从之俄兼谏议大夫知宣徽院事时帝击鞠无度上书谏曰臣窃观房玄龄杜如晦隋季书生向不遇太宗安能为一代名相臣虽不才陛下在东宫幸列侍从今又得侍圣读陛下尝问臣贞观开元之事臣请略陈之臣闻唐太宗侍太上皇夏罢则挽辇至内殿玄宗与兄弟欢饮尽家人礼陛下祠祖考之祚躬侍太后可谓至孝臣更望定省之余睦六亲加爱敬则陛下亲亲之道比隆二帝矣臣又闻二帝耽玩经史数引公卿讲学至于日昃当时天下翕然向风今陛下游心典籍分解章句臣愿研究经理深造而笃行之二帝之治不难致矣臣又闻太宗射豕唐俭让之玄宗臂鹰韩休言之二帝莫不乐从今陛下以球马为乐愚臣思之有不宜者三窃以君臣同戏不免相争君得臣愧彼负此喜一不宜跃马挥杖纵横驰骛不顾上下之分争先取胜失人臣礼二不宜轻万乘之尊图一时之乐万一有衔勒之失其如社稷太后何三不宜倘陛下不以臣言为迂少赐省览天下之福羣臣之愿也书奏帝嘉叹良久未几卒赠太子太保诏有司给葬

△耶律和克

耶律和克字海兰六院额尔奇木迪里之孙少颖悟重然诺保宁初补御璫郎君十年使宋还以宋取河东之意闻于帝燕王韩匡嗣曰何以知之 and 克曰诸僭号之国宋皆并收惟河东未下今宋讲武习战意必在汉匡嗣力沮之明年宋果伐汉帝以和克能料事器之援涿州刺史统和初皇太后称制召赴京师与韩德让以事相忤德让怒取护卫所执戎仗击其脑卒子穆尔古

耶律穆尔古

耶律穆尔古

穆尔古字遥隐有智识善射统和初拜南面林牙四年宋侵燕太后亲征穆尔古为前锋手中流矢拔而复进太后既至穆尔古以创不能

战与北府宰相萧继先巡逻境上累迁北院大王七年伐宋为先锋与耶律诺袞破其将李忠吉于定州【按辽圣宗统和七年宋太宗端拱二年也宋史及通鉴不载此事辽纪统和六年宋定州守将李兴以兵来拒耶律休格击败之大名年次与本传不符未知即此事否】此疾卒于军

钦定续通志卷四百一十八

●钦定续通志卷四百十九 列传二百十九

列传

辽【三】

○辽三

耶律休格【玛格】

耶律色珍

耶律学古【额布勒】

耶律沙

萧斡【托果】

萧达林

萧观音努

耶律托色

耶律辖哩

萧柳

和硕鼐

耶律斡拉

耶律世良

张俭

萧朴

耶律巴格

耶律舒噜【乌鲁斯】

王继忠

陈扎袞

萧和卓

武白

高正

大康又

耶律休格

耶律色珍

耶律学古

耶律沙

萧斡

萧达林

萧观音努

耶律托色

耶律辖哩

萧柳

和硕鼐

耶律斡拉

耶律世良

张俭

萧朴

耶律巴格

耶律舒噜

王继忠

陈扎袞

萧和卓

武白

高正

大康又

△耶律休格

耶律休格字逊宁祖实嚕隋国王父乌苏南院额尔奇木休格少有公辅器初乌尔古室韦二部叛休格从北府宰相萧斡讨之应历末为特哩袞干亨元年宋侵燕北院大王希达等败绩南京被围帝命休格代希达将五院军往救遇敌众于高粱河【续通鉴作大梁河】与耶律色珍分左右翼击败之追杀三十余里斩首万余级休格被三创明旦宋主遁去休格以创不能骑轻车追至涿州不及而还九月【原文作是年冬谨据景宗纪及宋史太宗纪改】帝命韩匡嗣耶律沙伐宋以报围城之役休格率本部兵从战于满城宋人请降匡嗣信之休格曰彼众整而锐必不肯屈乃诱我耳宜严兵以待匡嗣不听休格引兵凭高而视须臾南兵大至匡嗣败绩休格整兵进击敌乃却诏总南面戍兵为北院大王明年车驾亲征围瓦桥关宋兵来救守将张师突围出帝亲督战休格斩师余众退走入城宋阵于水南将战帝以休格马介独黄虑为敌所识乃赐玄甲白马易之休格率精骑渡水击败之追至莫州横尸满道鞞矢俱罄生获数将以献帝悦赐御马金盃劳之师还拜裕悦圣宗即位太后称制令休格总南面军务以便宜从事休格均戍兵立更休法劝农桑修武备边境大治统和四年宋复来侵其将范密【圣宗纪及通鉴俱作潘美】杨继业【按通鉴及宋史并作杨业考业在北汉时赐姓刘名继业辽史故仍其旧名欤】曹彬米信等四出时北南院奚部兵未至休格力寡不敢出战夜以轻骑出两军闲杀其单弱昼则以精锐张其势又设伏林莽绝其粮道曹彬等退保白沟月余复至休格以轻兵薄之伺彼蓐食击其离伍单出者由是南军自救不暇太后军至彬等遁太后益以锐卒追及之乘势围之至夜彬信以数骑亡去余众悉溃追至易州东宋师尚有数万濒沙河而鬬击之宋师望尘奔窜堕岸相蹂死者过半沙河为之不流太后旋旆休格收宋尸为京观封宋国王又上言可乘宋弱略地至河为界书奏不纳及太后南征休格为先锋败宋兵于望都时宋将刘廷让以数万骑卒并海而出约与李敬源合兵声言取燕休格闻之先以兵扼其要地会太后军至杀敬源廷让走瀛州执知

雄州贺令图遂陷邢深德三州 【据通鉴增】 七年

朱复遣廷让等乘暑潦攻易州休格率锐卒逆击于沙河之北杀伤数万获辎重不可计太后嘉其功诏免拜不名自是宋不敢北向时宋人欲

止儿啼乃曰裕悦至矣 【按通鉴端拱二年宋尹继伦袭休格于徐河众皆惊溃休格方食失箸短兵中其臂乘善马而遁本传讳言其败故

不载】 休格以燕民疲弊省赋役恤孤寡戒戍兵无犯宋境虽马牛逸于北者悉还之远近向化边鄙以安十六年薨诏立祠南京休格智略宏

远料敌如神每战胜让功诸将故士卒乐为之用身更百战未尝杀一无辜二子果巴官至节度使果实终裕悦孙玛格

耶律玛格

耶律玛格

玛格字额特埒兴宗时以散职入见帝问卿奉佛乎对曰臣每旦诵太祖太宗及先臣遗训未暇奉佛帝悦清宁中迁唐古部节度使咸雍

中累匡义军节度使太康初致仕卒

△耶律色珍

耶律色珍字韩隐裕悦赫噜之孙性明敏不事生产保宁元年枢密使萧思温荐色珍有经国才帝曰朕知之第佚荡岂可羈屈对曰外虽

佚荡中未可量乃召问以时政占对剴切帝器重之妻以皇后之侄命节制西南面诸军及援河东改南院大王干亨初宋再攻河东从耶律沙

至白马岭沙等战不利色珍赴之令麾下万矢齐发敌气褫而退是年秋宋下河东乘势袭燕耶律希达逆战败绩退屯清河北色珍取希达青

帜军于得胜口以诱敌敌果争赴色珍出其后奋击败之及高粱之战与耶律休格分左右翼夹击大败宋军统和初皇太后称制益见委任为

北院枢密使太后亲帅师救燕以色珍为山西路兵马都统色珍至安定遇贺令图军击破之追至五台斩首数万级明日至蔚州敌不敢出乃

书帛射城上谕以招慰意宋军来救令都监耶律迪斯伏兵险阨城守者见救至突出色珍击其背二军俱溃追至飞狐斩首万余级取蔚州贺

令图潘美等复以兵来色珍逆于飞狐又败之宋军在浑源应州者皆弃城走色珍闻杨继业出兵令萧达兰伏兵于路明旦继业兵至色珍佯

退伏兵发至狼牙村继业被擒色珍归阙以功加守太保从太后南伐卒于军庶子果勤官至小将军

△耶律学古

耶律学古字伊实扬裕悦斡之庶孙颖悟好学工译鞬及诗保宁中补御盞郎君干亨元年宋侵燕学古受诏往援始至京宋师围城三周

穴地而进城中民怀二心学古以计安反侧随宜备御昼夜不少懈适有敌三百余人夜登城学古战却之会援军至围遂解学古开门列阵四面鸣鼓居民大呼声震天地旋有高梁之捷以功遥授保静军节度使为南京马步军都指挥使二年伐宋乞将汉军从之改彰国军节度使时南境未静民思休息学古禁寇掠以安之宋将潘美来侵学古以军少虚张旗帜杂丁黄为疑兵是夜适独虎峪举烽火遣人侦视见敌俘掠村野击之悉获所掠物擒其将领自是学古与潘美各守边约无相侵轶民获安业以功为特哩衮卒弟额布勒

耶律额布勒

耶律额布勒

额布勒字留隐严重有膂力善属文统和中伐宋屡任军事尝与杨珠不相能因曰尔奴才何所知杨珠讼于北院枢密使韩德让德让怒问曰尔安得此奴额布勒对曰三父异籍时亦易得德让笑而释之后从萧恒德伐博啰满达部以功为东路统军都监及德让为大丞相荐其才可任统军使太后曰额布勒尝不逊于卿何善而荐德让奏曰臣忝相位于臣犹不屈况于其余若任使之心必能镇抚诸番太后从之加金紫崇禄大夫检校太尉而弟果啰以罪亡额布勒及其母俱下吏恐祸及母阴使人召果啰给曰太后知事之诬汝第来勿畏果啰至送有司坐诛其后退归田里以疾卒

△耶律沙

耶律沙字安隐其先尝相约尼氏应历闲累官南府宰相景宗即位总领南面边事保宁闲宋攻河东沙将兵救之有功加守太保干亨初宋复北侵沙将兵由闲道至白马岭阻大涧遇敌沙与诸将欲待后军至而战冀王迪里监事耶律穆济等以为急击之便沙不能夺迪里等以先锋渡涧未半为宋人所袭兵溃迪里及其子斡格沙之子德里令公图敏详袞唐古等五将俱没会耶律色珍兵至敌始退沙勒兵还宋乘锐侵燕沙与战于高梁河稍却遇耶律休格及色珍等邀击败宋军以功释前过是年复从韩匡嗣伐宋败绩帝欲诛之皇后营救得免睿智皇后称制赐几杖复从伐宋则刘廷让李敬源之军赐赉优渥统和六年卒

△萧斡

萧斡小字辖哩字博迪北府宰相达鲁之子性质直初察克之乱其党和克齐与斡善使人召之斡曰吾岂能从逆臣缚其人送寿安王贼平拜羣牧都林牙复以伐乌尔古功迁北府宰相改图鲁卜部节度使干亨初宋侵燕诏斡拒之战于高梁河斡与耶律休格等并力败之自是

每征伐必参决军事加政事令二年宋兵围瓦桥夜袭营斡及耶律允古战却之时皇后以父呼斡及后为皇太后称制斡数条奏便宜多见听用统和四年卒侄托果

萧托果

萧托果

托果字括宁性忠简应历初始入侍会冀王迪里宣徽使哈斯谋反托果密以闻帝嘉其忠诏尚朴敬公主【按公主表不载盖皇族女也】保宁末为南京统军使干亨初宋侵燕托果与北院大王希达拒之不克退屯清河帝闻其败遣使责之托果惧援兵至奋力以败宋军遂释其罪降为南京侍卫亲军都指挥使四年卒

△萧达林

萧达林字驰宁斯温之再从侄父珠埒哩善相马应历闲为马羣侍中达林幼敦厚有才略通天文堡宁初为宿直官累任薨剧统和四年宋杨继业来侵达林以诸军副部署从枢密使耶律色珍败之擒继业于朔州六年秋改南院都监从驾南征攻沙堆力战被创太后亲临视明年加右监门卫上将军检校太师遥授彰德军节度使十一年与东京留守萧恒德伐高丽破之高丽称臣奉贡十二年夏人梗瀛皇太妃受命总乌尔古及永兴宫分军讨之达林为准布都详袞凡军中号令太妃并委之师还以功加兼侍中封兰陵郡王十五年德呼部人杀详袞叛遁于西北荒达林将经骑逐之因讨准布之未服者诸蕃岁贡方物充于国自后往来若一家焉因赐诗嘉奖仍命林牙耶律昭作赋以述其功达林以诸部叛服不常上表乞建三城以绝边患从之俄召为南京统军使复伐宋擒其将王先知【宋史及辽本纪俱作王继忠】破其军于遂城下祁州【按宋史是年达林率众攻威虏顺安军诸路都部署击败之攻北平砦及保州定州冀州皆为州兵所败与本传异】手诏奖谕进至澶渊宋主军于城中未接战达林出按地中伏斡卒子缙古南京统军使

△萧观音努

萧观音努字伊聂奚王达哈之孙统和十二年为右祗候郎君班详袞迁奚六部大王先是俸秩外给獐鹿百数皆取于民观音努奏罢之及伐宋与萧达林为先锋阪祁州下德清军乃加优赏同知南院事卒

△耶律托色

耶律托色字胜隐北府宰相乌里之孙善射工画保宁闲为御盞郎君九年奉使于汉深加礼重统和二年与西边详袞耶律苏巴讨图勒锦大破之四年托色从北院枢密使耶律色珍败贺令图于安定授西南面招讨都监宋

兵守蔚州急召外援托色伏兵道旁俟授兵过未半而
击之城中军出色珍复邀之两军俱溃奔飞狐地隘不得进杀伤甚众贺令图复集败卒
来袭蔚州逆战破之应州守将自遁进围寰州冒矢石
登城宋军大溃色珍擒继业于朔州托色功居多是年冬复与萧达林由东路击宋俘获
甚众后闻宋兵屯易州率兵逆之至易境而卒初托色
破令图宋将有因伤而仆托色绘其状以示人咸嗟神妙

△耶律辖哩

耶律辖哩字乌库哩图吉部人统和四年宋将杨继业攻山西辖哩从耶律色珍击
之常居先锋候有功是岁伐宋宋人拒于溥沱河率
精骑便道先济获其将康保威以功诏世预节度选太平元年稍迁本部节度使六年从
萧老攻甘州不克会准布攻围三克军 【按辽史国
语解三克统军官名犹云三帅也】 与都监耶律尼噜固往救至哈屯城西南遇敌不能
阵中流矢卒

△萧柳

萧柳字图们淳钦皇后弟阿古齐五世孙幼养于伯父巴雅尔多知能文膂力绝人
统和中叔父恒德临终荐其才诏入侍卫十七年南伐
宋将范庭召列方阵而待时皇弟隆庆为先锋问诸将佐谁敢当者柳曰若得骏马则愿
为之先隆庆授以甲骑遂驰而前敌少却隆庆席势攻
之南军遂乱中流矢裹创而战众皆披靡时巴雅尔留守东京奏柳为四军兵马都指挥
使明年为北女真详袞政济宽猛部民畏爱迁东路统
军使秩满百姓愿留许之从伐高丽师还致仕柳好滑稽虽君臣燕饮诙谐无所忌临终
谓人曰吾少有致君志不能直遂故以谐进冀万有一
补俳优名何避顷之被寝衣而坐呼曰吾去矣言讫而逝

△和硕鼐

和硕鼐字筹宁奚汗之裔保宁中为奚六部长统和初皇太后称制以耶律休格领
南边事和硕鼐为南面行军副部署四年宋曹彬米信
等来侵与休格破宋兵于燕南军还怙欢挝无罪人李浩至死帝以其功释之冬南征将
本部军由别道进击敌军于狼山俘获其众八年表正
奚王府官制从之十三年迁都部署伐乌舍利其俘掠请降不许城中皆死战和硕鼐知
不能克乃掠地东南循高丽北界而还地远粮绝士马
死伤诏降封爵卒子乌页郎君班详袞

△耶律斡拉

耶律斡拉字斯宁奚德呼勒部人趯捷有力善骑射保宁初补护卫车驾猎颡山有
豪猪伏丛莽帝射中猪突出御者舍辔而避斡拉复射

毙之及猎赤山奔鹿突前路隘不容避垂犯蹕斡拉以身当之鹿触而颠帝谓曰朕因猎两濒于危赖卿以免始见尔心迁护卫太保从枢密使耶律色珍破宋将杨继业军于山西统和十三年为行军都监从都部署奚王和硕鼐伐乌舍数月不能下萧恒德欲深入大掠斡拉曰恐所得不偿所损恒德不从略地东南人马多死诏夺诸将官斡拉以前议得免寻加同政事门下平章事为东京留守开泰中卒

△耶律世良

耶律世良小字斡六院部人才敏给练达国朝典故及世谱北院枢密使韩德让病帝问孰可代卿德让曰世良可北院大王耶律舒噜复问北院之选德让曰无出世良统和末为北院大王开泰初加检校太尉同政事门下平章事时边部拒命诏北院枢密使耶律华格将兵以世良为都监往御之明年华格还将罢兵世良上书曰华格以为无事而还不思师老粮乏敌人已去焉能久守若益兵可克也帝命华格益兵与世良追之至安真河大胜而还自是边境以宁以功王岐拜北院枢密使三年命选马駞于乌尔古都会德呼勒部人伊喇叛攻陷巨穆古城世良率兵压境招降之名复故地四年伐高丽为副都署都统刘慎行逼邈失期执还京师世良独进兵明年至北都护府破追兵于郭州以暴疾卒

△张俭

张俭宛平人性端悫不事外饰统和十四年举进士第一调云州幕官故事车驾经行长吏当有所献圣宗猎云中节度使进曰臣境无他产惟幕僚张俭一代之实愿以为献先是帝梦四人在侧赐食人二口至闻俭名始悟召见容止朴野访及世务占奏三十余事由此顾遇特异践履清华号称明干开泰中累迁同知枢密院事【按圣宗本纪俭以开泰二年为政事舍人七年守司徒兼政事令】太平五年出为武定军节度使移镇大同六年入为南院枢密使帝方眷倚参知政事吴叔达与俭不相能帝怒出叔达为康州刺史拜俭左丞相封韩王帝不豫受遗诏辅立太子是为兴宗赐贞亮弘靖保义守节耆德功臣拜太师中书令加尚父徙王陈重熙五年帝幸示豊部贡院及亲试进士皆俭发之进见不名赐诗褒美俭衣唯紬帛食不重味月俸有余调给亲旧方冬奏事便殿帝见衣袍敝恶密饮近侍以火夹穿孔记之屡见不易帝问其故俭对曰臣服此袍已三十年时尚奢靡故以此微讽喻之帝怜其清贫令恣取内府物俭奉诏持布三端而出益见奖重俭弟五人帝欲俱赐进士第固辞有司获盗八人既戮之乃获正贼家人诉冤俭三乞申理帝勃然曰卿欲朕

偿命耶俭曰八家老稚无告少加存恤使得收葬足慰存没矣乃从之俭在相位二十余年裨益为多致政归第会宋书辞不如礼帝将亲征幸俭第尚食先往具饌却之进葵羹干饭帝食之美徐问以策俭极陈利害且曰第遣一使问之何必远劳重驾帝悦而止 【按资治通鉴长编云河北既罢兵雄州治城垒不辍辽主问张俭曰南朝尚修城备得毋违誓俭曰知雄州李允则其人长者不足疑与本传所载相类谨附志焉】 复即其第赐宴器玩悉与之十二年薨年九十一敕葬宛平县

△萧朴

萧朴字延宁国舅少父房之族父鲁库以善属文为圣宗诗友朴幼如老成人及长博学多智开泰初补牌印郎君为南院承旨权知转运事寻改南面林牙帝问以攻朴具陈百姓疾苦国用豊耗帝悦曰吾得人擢左伊勒希巴时萧和卓为枢密使朴知部署院事以酒废事出为兴国军节度使召为南面林牙太平三年守太子太傅明年拜北府宰相迁北院枢密使时太平日久帝留心翰墨始画谱牒以别嫡庶由是争讼纷起朴有吏才知人主意敷奏称旨朝议多取决封兰陵郡王进王恒加中书令及大延琳叛召安抚东京以便宜行事兴宗即位皇太后称制国事一委弟孝先仁德皇后被诬朴屡言其冤不报每念至此为之呕血重熙初改王韩拜东京留守及迁太后于庆州朴徙王楚升南院枢密使四年王魏薨年五十赠齐王子道拉国舅详袞

△耶律巴格

耶律巴格字乌库哩五院部人幼聪慧书一览辄成诵统和中以世业为本部吏未几升扎萨克辖转枢密院侍御宋将曹彬米信侵燕巴格以扈从功擢上京留守开泰四年为北院枢密副使顷之留守东京七年东平王萧巴雅尔伐高丽巴格为都监至开京大掠而还济茶陀二河高丽追兵至诸将皆欲俟敌渡河击之独巴格不可曰敌若渡两河必殊死战乃危道也不若击于两河之闲巴雅尔从之败绩明年还东京奏渤海承奉官宜有以统领之帝从其言置都知押班后以茶陀之败削使相降西北路都监 【按圣宗本纪太平六年巴格复为东京留守】 卒

△耶律舒噜

耶律舒噜字伊实扬六院部人魁岸美容仪圣崇同年生帝爱之甫冠补祗候郎君未几为宿直官及出师伐宋为队帅从南府宰相耶律诺袞统军使萧达林略地赵魏有功加检校太师为北院大王 【按圣宗纪舒噜自奚王

府监军为南院大王盖洵历南北院也】 攻拔通利

军宋和议成特进门下平章事赐推诚竭节保义功臣以本部俸羊多阙部人空乏请以羸老之羊及皮毛岁易南中绢彼此利之拜北院枢密

使封韩王自韩德让知北院职多废旷舒噜拜命之日朝野相庆从驾猎松林至沙岭卒年四十四赠守司徒政事令二子实绅努乌鲁斯实绅

努南院大王

耶律乌鲁斯

耶律乌鲁斯

乌鲁斯字留隐少有大志未冠补祗候郎君开泰初为本部司徒秩满闲居征为郎君班详袞迁右皮室详袞将本部兵从东平王萧巴雅

尔伐高丽至茶陀二河战不利乌鲁斯独全军还帝嘉赏终西南面招讨使

△王继忠

王继忠本宋之开封人以任仕宋为郢州刺史殿前都虞候统和二十一年宋遣继忠屯定之望都以轻骑觐军遇南府宰相耶律诺袞等

获之太后知其贤授户部使以康默记族女妻之继忠亦自激昂事必尽力宋以继忠先朝旧臣每遣使必有附赐圣宗许受之二十二年宋使

来聘遣继忠弧矢鞭策及求和札子且曰如许通和即当使往请诏继忠与宋使相见仍许讲和 【按王曾笔录云继忠既陷契丹渐被亲任

乃说契丹与宋和时石普守莫州与继忠善乃致书于普普奏其事宋弗之信继忠书复至意甚切会契丹举兵深入乃遣曹利用往契丹国母

大喜即日议定其事是宋与契丹和议目继忠倡成之也谨附识】 赐宫户三十加左武卫上将军摄中京留守检校太师 【据本纪增辑】

开泰五年为汉人行宫都部署封琅琊郡王六年进楚王赐国姓帝尝宴饮议以萧和卓为北院枢密使继忠曰和卓虽有刀笔才闇于大体萧

迪里才行兼备可任不纳竟用和卓及遣和卓伐高丽继忠为行军副部署攻兴化镇月余不下师还帝谓明于知人拜枢密使太平三年致仕

卒子怀玉 【按宋史继忠子有怀节怀敏怀德怀政本传止云怀玉盖继忠仕辽时所生而复仕于辽者欤】 仕至防御使

△陈扎袞

陈扎袞小字旺吉云州人工译鞬勇而善射统和中补祗候郎君为奚伊喇详袞累迁敦睦宫太保兼掌围场事开泰五年秋大猎帝射虎

以马驰太速矢不及发虎奋怒将犯蹕左右辟易扎袞舍马捉虎两耳骑之虎骇且逸帝命卫士追射扎袞大呼止之虎虽轶山扎袞终不堕地

伺便拔佩刀杀之鞬至帝前慰劳良久即日设燕悉以席上金银器赐之特加节钺迁围

场都太师赐国姓命张俭吕德懋赋以美之迁归义军

节度使同知上京留守厯西南面招讨都监卒

△萧和卓

萧和卓字和抡图鲁卜部人始为本部吏统和初以谨恪补南院侍郎十八年韩德让举为中丞奉太后遗物使宋还迁北院枢密副使开泰三年为左伊勒希巴和卓久居近职明习典故善占对以是尤被宠渥升北院枢密使时议以为无完行不可大用南院枢密使王继忠又讥其短帝颇不悦六年遣伐高丽为都统无功而还时求进者多附之然其服食仆马不加于旧帝知其廉以族属女妻其子诏许亲友馈献豪贵奔趋于门太平五年有疾帝欲临视辞曰臣无状猥蒙重任今形容毁瘁恐陛下见而动心帝从之会北府宰相萧朴问疾和卓执其手曰吾死君必为枢密使慎勿举胜己者者朴出而鄙之子乌尔古终本部节度使

△武白

武白不知何郡人为宋国子博士差知相州至通利军为辽军所俘诏授上京国子博士改临潢县令迁广德军节度副使先是有讷宰相刘慎行阴事者有司出其罪圣宗诏白鞫之白正其事使新罗还权中京留守时慎行诸子皆处权要以白断百姓分籍事不直坐左迁寻迁尚书左丞知枢密事拜辽兴军节度使致仕卒

△高正

高正不知何郡人统和初举进士第累迁枢密直学士帝将伐高丽遣正先往谕意及还迁右仆射高丽王询表请入覲诏许之遣正率骑兵千人迓之馆于路为高丽将卓思正所围与麾下壮士突围出士卒死伤者众帝悔轻发释其罪明年迁工部侍郎为北院枢密副使开泰五年卒

△大康又

大康又渤海人开泰闲累官南府宰相出知黄龙府善绥抚东部怀服额尔德尼部长布延与伊勒必来附送于朝且言博啰满达界多渤海人乞取之诏从其请康又领兵至大石河图卜准城掠数百户以归未几卒

钦定续通志卷四百一十九

●钦定续通志卷四百二十 列传二百二十
列传

辽 【四】

○辽四

耶律隆运 【德威 达鲁 制心】

耶律巴固济

萧塔喇噶

夏行美 萧迪里【巴拉】 萧必塔
耶律扬珠 耶律鸿果 萧华善【特默】 萧博诺 耶律古裕
耶律都沁 刘六符 耶律纽斡哩 杜
防 耶律哈尔吉 杨皙 杨佶

耶律隆运

耶律巴固济

萧塔喇噶

夏行美

萧迪里

萧必塔

耶律扬珠

耶律鸿果

萧华善

萧博诺

耶律古裕

耶律都沁

刘六符

耶律纽斡哩

杜防

耶律哈尔吉

杨皙

杨佶

△耶律隆运

耶律隆运本姓韩名德让西南面招讨使匡嗣之子也统和十九年赐名德昌二十二年赐姓耶律二十八年复赐名隆运重厚有智略明治体喜建功立事侍景宗以谨饬闻加东头承奉官补枢密院通事转上京皇城使【按辽百官志原名上京城隍使】遥授彰德军节度使代其父匡嗣为上京留守权知京事甚有声寻复代父守南京时人荣之宋兵侵燕五院乱详袞【景帝纪作北院大王】希达统军萧特库等败归宋兵围城隆运日夜守御援军屋围解及战高粱河宋兵败走隆运邀击又破之以功拜辽兴军节度使征为南院枢密使景宗疾大渐与耶律色珍俱受顾命立梁王为帝皇后为皇太后称制隆运总宿卫事太后益宠任之统和元年加开府仪同三司兼政事令【按圣宗纪统和三年以隆运兼政事令元年隆运方丁父丧未加迁擢传悉误】四年宋遣曹彬米

信来侵从太后出师败之加守司空 【圣宗纪作司徒】 封楚国公师还兴北府宰相室昉其执国政上言西州数被兵加以岁饥宜轻税赋以来流民从之六年太后观击鞠呼鲁苏突隆运坠马命立斩之诏率师伐宋围沙堆敌夜袭隆运严军以待败走之封楚王九年复言燕人狭奸苟免赋役贵族因为囊橐可遣使戒谕从之十一年丁母忧诏强起之明年室昉致政以隆运代为北府宰相仍领枢密使监修国史赐兴化功臣十二年六月 【按圣宗纪十二年七月室昉为中京留守加尚父上文所云明年室昉致政是也此五字疑误】 奏三京诸鞫狱官吏多因请托曲加宽贷或妄行榜掠乞行禁止帝可其奏又奏请任贤去邪太后喜曰进贤辅政真大臣之职优加赐赉服阙加守太保兼政事令会北院枢密使耶律色珍薨诏隆运兼之久之拜大丞相进王齐总二枢府事以南京平州岁不登奏免百姓农器钱及请平诸郡商贾价并从之二十二年从太后南征许宋成而还徙王晋授尚书令

【据契丹志增】 赐姓出宫籍隶横帐季父房后乃改赐今名位亲王上入朝不拜上殿不趋 【据契丹志增】 赐田宅及陪葬地从伐高丽还薨年七十一赐尚书令谥文忠建庙干陵侧无子清宁三年以魏王塔卜子页鲁为嗣天祚立以皇子额噜温继之弟德威侄制心

耶律德威

耶律达鲁

耶律制心

耶律德威

德威性刚介善驰射保宁初历上京皇城使儒州防御使改北院宣徽使统和初丁父丧 【按本纪圣宗即位之年韩匡嗣薨原文作干亨初误】 强起复职权西南招讨使党项寇边一战却之赐剑许便宜行事领图鲁卜德呼勒二紮军以讨平霜库赫功真授招讨使夏州李继迁内附德威请纳之诸部皆从玺书褒奖与特哩袞耶律善补败宋将杨继业加开府仪同三司政事门下平章事寻以山西城邑多陷夺兵柄李继迁受宋赂潜怀二心奉诏率兵往谕继迁托以西征不出德威至灵州俘掠而还十五年河西党项叛复诏讨之奏捷于朝 【据圣宗纪增】 未几卒年五十五赠兼侍中子帕克戡终彰国军节度使早卒孙色实达鲁色实终特哩袞

耶律达鲁

达鲁字遵宁幼养宫中授小将军重熙初历北院宣徽使右林牙副点检拜特哩袞改西北路招讨使封漆水郡王请减军籍三千二百八

十人后以私取回鹘使者獭毛裘及私取准布贡物事觉决大杖削爵免官俄起为北院宣徽使十九年改乌尔固德呼部都详袞寻为东北路袞详封混同郡王清宁初徙王邓擢拜南府宰相以年老乞骸骨更王汉太康中薨年八十达鲁神情秀彻圣宗子视之兴宗待以兄礼虽贵愈谦初为都点检扈从猎黑岭获熊帝因乐饮谓达鲁曰汝有求乎对曰臣富贵踰分不敢他望惟臣叔先朝优遇身歿之后不肖子坐罪籍没诸孙中得赦一人以主祭臣愿毕矣诏免籍复其产子燕五官至南京步军都指挥使

耶律制心

制心小字汗努父德崇善医视人形色辄决其病累官至武定军节度使制心善驯鹰隼统和中为归化州刺史开泰中拜上京留守进汉人行宫都部署封漆水郡王以皇后外弟恩遇日隆枢密副使萧和卓用事制心秦和卓寡识度无行检帝默然每内宴欢洽辄避之皇后不悦曰汝不乐耶制心对曰宠贵鲜能长保以是为忧耳太平中历中京留守特哩袞南京留守徙王燕迁南院大王【按圣宗纪俱作韩制盖合两字为一字也】或劝制心奉佛对曰吾不知佛法惟心无私则近之矣一日沐浴更衣而卧家人闻丝竹声怪而入视则已逝矣年五十三赠政事令追封陈王守上京时酒禁方严有捕获私酝者一饮而尽笑而不诘卒之日部民若哀父母

△耶律巴固济

耶律巴固济字保诺延六院额尔奇木博果济之后勇悍善治生保宁中为天德军节度使历南京侍卫马步军都指挥使以讨平党项羌阿里沙密丕勒布密迁南院大王圣宗即位太后称制会羣臣议军国事巴固济上疏陈便宜数事称旨兼领山西路诸州事统和四年宋将曹彬等侵燕巴固济击之甚力赐输忠保节致主功臣总知山西五州会有告巴固济曲法虐民者按之有状以大杖决之八年为南京统军使卒子雅里官至详袞

△萧塔喇噶

萧塔喇噶字雄隐五院部人八世祖珠噜约尼氏时尝为虞人唐安禄山来攻珠噜战于黑山之阳败之以功为北府宰相世预其选塔喇噶仕开泰闲累迁西南面招讨使重熙十一年使西夏谕伐宋事约元昊出别道以会十一年改右伊勒希巴同知南京留守转左伊勒希巴俄授东京留守以世选为北府宰相二十一年复为南京统军使【依弘简录增】卒

△夏行美

夏行美渤海人太平九年大延琳叛时行美总渤海军于保州延琳使人说与俱叛

行美执送统军使耶律布库又诱贼党百人 【按圣宗纪作八百余人】 杀之延琳谋沮乃婴城自守数月而破以功加同政事门下平章事锡赉甚厚明年擢忠顺军节度使重熙十七年迁副部
署从点检耶律义先讨富珠哩获其酋托多罗以归致仕卒

△萧迪里

萧迪里字尼噜衮宰相塔喇四世孙识度弘远为乡里推重始为牛羣敞史帝闻其贤召入侍迁国舅详袞统和二十八年将伐高丽迪里
谏曰国家征讨连年士卒抗敝况陛下在谅阴年谷不登创痍未复岛夷小国城垒元固胜不为武万一失利恐貽后悔不如遣一介之使往问
其故伏罪则已不然俟服阕岁丰举兵未晚时令已下言虽未行识者韪之明年同知左伊勒希巴事改右伊勒希巴开泰初率兵巡西边时额
尔奇木部下扎萨克辖布喇奇实卜克率部民遁迪里追擒之令复业迁国舅详袞从枢密使耶律世良伐高丽还加同政事门下平章事拜上
京留守迪里为人宽厚达政体廷臣皆谓有王佐才王继忠荐其材可为枢密使帝疑其党而止为中京留守卒族子和克有传弟巴拉

萧巴拉

萧巴拉

巴拉字布哩音多智善骑射开泰闲以兄为右伊勒希巴始补郎君累迁奚六部图
噜太尉太平末大延琳叛巴拉将北南院兵往讨遇于
蒲水南院兵少却至手山复与贼遇巴拉乃易两院旗帜力战破之手诏褒奖赐内厩马
重熙中迁四捷军详袞谢事归乡里数岁起为昭德军
节度使寻改国舅详袞卒

△萧必塔

萧必塔字苏隐一名昌裔驸马都尉恒德之子生未弥月父母俱死育于禁掖既长
尚秦晋王公主拜驸马都尉为殿前副点检统和八年
改北面林牙太平四年迁殿前都点检出为国舅详袞九年大延琳叛劫掠邻部必塔先
率本管及家兵据要害绝其西渡之计 【据圣宗纪
增辑】 诏与南京留守萧孝穆往讨筑重城围之遂擒延琳东京平以功封兰陵郡王十
一年圣宗不豫先是钦哀与仁德皇后有隙以必塔尝
为后所爱忌之护卫豊嘉努上变诬珠卜与必塔谋逆公主窃闻其诬谓必塔曰尔将无
罪被戮与其死何若奔女直国以全其生必塔曰朝廷
诟肯以飞语害忠良宁死弗适他国及钦哀摄政杀之

△耶律扬珠

耶律扬珠字布尔锦积庆宫人父海古勒室韦部节度使扬珠笃学廉介有经世志

统和十年累迁至积庆宫使圣宗尝谕扬珠曰闻卿正直是以进用国有利害尔言宜无所隐由是所陈多见嘉纳驾征高丽破康肇军于铜州扬珠之力为多王询乞降羣臣皆谓宜纳扬珠曰王询始战而败遽求纳款此诈耳纳之恐堕其奸计待势穷力屈纳之未晚已而询果遁清野无所获其众阻险而垒攻之不下扬珠以计降之擢拜四蕃部详袞时招讨使耶律佛德为总管扬珠耻居其下上表曰臣先朝旧臣今既垂老乞还新命觐得常侍左右帝曰朕不使汝久处是任且命无隶招讨得专奏事到部戢暴怀善政绩显著卒于官

△耶律鸿果

耶律鸿果 【按此与前卷鸿果非一人】 字巴尔诺延约尼森济汗之后统和初尝以军事任为伊喇详袞寻徙南京统军使十三年徇地南鄙克敌于四岳桥斩首百余级攻宋以战功迁东京留守封楚国公后伐高丽副先锋耶律博诺擒康肇于铜州三十年西北部叛从南府宰相耶律诺袞讨之及典禁军号令整肃诸部多降寻迁侍中卒

△萧华善

萧华善字洪宁国舅大父房之后忠直多志略开泰初补御盖郎君寻为内史太医等局都林牙使宋贺正将宴典仪者告班节度使下华善曰班次如此是不以大国之使相礼且以锦服为贖如待蕃部果如是吾不预宴宋臣不能对易以紫服位视执政使礼始定八年秋为唐古部节度使卒弟特默

萧特默

萧特默

特默字何宁为人机辨任气太平中累迁安东军节度使有能称十一年召为左祗候君班详袞未几迁左伊勒希巴重熙十年 【兴宗纪作十一年】 累迁北院宣徽使与刘六符使宋归称旨加同政事门下平章事诏城西南浑底甸还复为北院宣徽使卒

△萧博诺

萧博诺字留隐奚王楚卜宁之后幼孤贫佣于医家牧牛伤人稼数遭笞辱其佣主见博诺熟寐有异兆遂收养之教以谓书聪敏嗜学不数年涉猎经史习骑射既冠意气豪迈开泰闲选充护卫稍进用俄坐罪黥流乌尔固部久之召还累任剧迁奚六部大王治有声太平九年大延琳叛博诺为都监将右翼军战蒲水中军御博诺与左翼夹攻之据高丽女直要冲使不得求援又败贼于手山延琳走入城博诺不介马而驰追杀余贼大军围东京博诺讨诸叛邑平吼山贼延琳既被擒以功加兼侍中重熙六

年改北准布副部署再授奚六部大王十八年 【史
传作十五年今据兴宗纪及西夏传改】 为西南面招讨使西征夏国博诺以兵二千据
河桥聚巨舰数十艘仍作大钩人莫测战之日布舟于
河绵亘三十余里大军既失利适大水奔流而下势将坏浮梁断归路操舟者争钩致之
桥得不坏明年复西征悬兵深入大掠而还复为奚六
部大王致仕卒

△耶律古裕

耶律古裕字穆尔沁北院林牙图鲁卜四世孙有膂力工驰射开泰闲为乌尔固德
呼部都监会部人叛从枢密使耶律世良讨平之以功
授千年卫上将军 【依弘简录增】 镇抚西北部教以种树畜牧不数年民多富实中
京盗起命古裕为巡逻使悉擒之从征渤海有功累迁
御史中丞寻授开远军节度使徙镇归德重熙二十一年改天成军节度使卒于官年七
十赠同中书门下平章事二子伊苏鄂摩伊苏重熙闲
从萧惠讨西夏惠败绩伊苏一军独全拜北院大王鄂摩太康三年为汉人行宫副部署
伊苏诬害太子词连鄂摩帝释之是和伊苏复奏其与
萧杨结弘议宫壶事被害干统闲赠同中书门下平章事

△耶律都沁

耶律都沁字达年积庆宫人仕统和闲性疏简不顾小节人初以是短以后侵宋分
总羸师以从及战取緋帛被介冑以自标显驰突出入
敌阵格杀甚众太后望见喜厚赏之由是多以军事属任俄授东北详袞开泰二年讨准
布克之重熙闲历东路统军使天德军节度使十七年
城西边命都沁相地及造战舰因成楼船百三十艘上置兵下立马規制坚肚称旨及西
征都沁由别道会于河滨敌兵阻河而阵帝御战舰绝
河击之大捷亲赐卮酒仍问所欲都沁对曰臣幸被圣恩得効骀驾万死不能报国又将
何求帝愈重之手书都沁衣裾曰勤国忠君举世无双
卒于官年七十子迪里历观察节度使

△刘六符

刘六符父慎行圣宗朝由膳部员外郎累迁至北府宰相监修国史时帝多即宴饮
行诛赏慎行谏曰以喜怒加威福恐未当帝悟谕政府
自今宴饮有刑赏事翌日稟行为都统伐高丽以失军期下吏议贵乃免出为彰武军节
度使赐保节功臣历顺义辽兴节度使 【据圣宗纪
增】 子六人一德二玄三嘏四端五常六符德早世玄终上京留守常历三司使武定军
节度使嘏端符皆第进士嘏端俱尚主为驸马都尉三
嘏献圣宗一矢毙集鹿赋帝嘉其贍丽与公主不谐奔宋归杀之四端以卫尉少卿使宋

贺生辰方宴大张女乐竟席不顾入悼其严还拜枢密直学士权知宣徽南院事 【据圣宗纪增】 六符有志操能文重熙初迁政事舍人擢翰林学士七年参知政事 【据兴宗纪增】 十一年与宣徽使萧特默使宋索十县地还为汉人行宫副部署会宋遣使增岁币以易十县复与耶律仁先使宋还加同中书门下平章事及宋币至命六符为三司使以受之六符与参知政事杜防有隙防曰六符尝受宋赂出为长宁军节度使俄召为三司使道宗即位将行大册礼北院枢密使萧格曰行大礼备仪物必择广地莫若黄川六符曰不然礼仪国之大体帝王之乐不奏于野今中京四方之极朝觐各得其所直中京行之乃从其议寻以疾卒 【按契丹志六符迁至中书令子孙为节度观察使六十余人】

△耶律纽斡哩

耶律纽斡哩字海兰六院额尔奇木博果济之后风神爽秀工于画重熙闲累迁同知点检司事驸马都尉萧呼敦为夏人所执奉诏索之三返以归转永兴宫使右祗候郎君班详袞纽斡哩将娶秦晋长公主孙其母与公主婢有隙谓纽斡哩曰能去婢乃许尔婚纽斡哩以计杀之婚成事觉有司以大辟论写圣宗真以献得减坐长流边戍复以写真召拜同知南院宣徽事使宋贺正写宋主容以归清宁闲复使宋宋主赐宴瓶花隔面未得其真陛辞仅一视及境以像示饒者骇其神妙闻重元乱不即勤王贼平入贺帝责让之咸雍中加太子太师卒

△杜防

杜防涿州归义县人开泰五年擢进士甲科累迁起居郎知制诰人以为有宰相器本平中迁政事舍人拜枢密副使重熙九年夏人侵宋宋遣郭祜来告请与夏和 【谨按宋史仁宗纪康定元年遣使以讨元昊告契丹辽史兴宗及西夏纪亦云遣郭祜以伐夏来报无请和之说与本传异】 命防使夏解之如约罢兵各归侵地拜参知政事韩绍芳刘六符忌之防待以诚十二年绍芳等罢愈见信任十三年 【按史传作十二年据典宗纪改】 拜南府宰相防生子帝幸其第赐名王门奴以进奏有误出为武定军节度使十七年 【按兴宗纪重熙十六年出防为武定节度使十七年召复任史传作十四年谨改正】 复召为南府宰相二十一年秋祭仁德皇后诏儒臣赋诗防为冠赐金带道宗谅阴为大行皇帝山陵使清宁二年谕防曰朕以卿年老嗜酒不欲烦以剧务朝廷之事总纲而已顷之拜右丞相加尚父卒赠中书令谥曰元肃子公谓终南府宰相

△耶律哈尔吉

耶律哈尔吉字特们六院额尔奇木博果济之后重熙中累迁西南面招讨都监充宋国生辰使馆于白沟驿宋宴劳优者嘲萧惠河西之败哈尔吉曰胜负兵家常事我嗣圣皇帝俘石重贵至今兴中有石家寨惠之一败行呢较哉宋人惭服帝闻之曰优伶失辞何可伤两国交好鞭二百免官清宁初起为怀化军节度使七年入为北院大王【按道宗纪咸雍七年哈尔吉自东北路详袞入为南院大王与本传异】封幽国公历辽兴军节度使东北路详袞加兼待中致仕卒哈尔吉明达勤恪怀柔有道置诸宾馆及西边营田皆自哈尔吉发之

△杨皙

杨皙字昌时安次人幼通五经大义圣宗闻其颖悟诏试诗授秘书省校书郎太平十一年擢进士乙科为著作佐郎重熙十二年累迁枢密副使历长宁军节度使山西路转运使知兴中府清宁初入知南院枢密使与姚景行同总朝政请行柴册礼封赵国公以足疾复知兴中府咸雍初徙封齐召赐同德功臣尚书左仆射兼中书令拜枢密使改封晋给宰相枢密使两厅兼从封赵王屡请归政益赐保节功臣致仕太康五年例改辽西郡王薨

△杨佖

杨佖字正叔南京人幼颖悟异常读书自能成句识者奇之弱冠声名籍甚统和二十四年举进士第一历校书郎大理正开泰六年转仪曹郎典掌书命加谏议大夫出知易州治尚清简征发期会必信入为大理少卿累迁翰林学士文章号得体八年燕地饥疫民多流殍以售同知南京留守事发仓廩振之绝贫民鬻子者计佣而出之宋遣梅询贺千龄节诏售迎送多唱酬询每见称赏复为翰林学士重熙元年升翰林学士承旨丁母忧起复工部尚书忠顺军节度使朔武等州观察处置使天德军节度使加特进检校太师同中书门下平章事复拜参知政事兼知南院枢密使十五年出为武定军节度使境内亢旱苗稼将稿视事之夕雨泽沾足百姓歌曰何以苏我上天降雨谁其抚我杨公为主■

〈注累〉阳水失故道岁为民害乃以已俸创长桥人不病涉及被召郡民攀辕泣送帝御清凉殿宴劳之即日除吏部尚书【按兴宗纪重熙十一年售自宣政殿学士为吏部尚书与本传异】异门下侍郎同中书门下平章事谕曰卿今日何减吕望之遇文王佖对曰吕望比臣遭际有十年之晚帝悦其居相位以进贤为已任事总大纲责成百司人乐为之用三请致政许之月给钱粟兼隶四时遣使存问

钦定续通志卷四百二十

●钦定续通志卷四百二十一 列传二百二十一

列传

辽 【五】

○辽五

耶律仁先【托卜嘉】

耶律义先【信先】

耶律罕巴

萧珠展【药师努】

耶律玦

耶

律布勒图

萧布达

耶律浩善

耶律图丹

萧乌页

萧迪里

萧页噜

萧托辉

萧罕扎

萧阿噜岱

耶律纳延

耶律辰嘉努

萧苏

色【穆喇斡】

耶律大悲努

萧罕嘉努

萧德

萧惟信

萧约音努

耶律迪里

姚景行

耶律仁先

耶律义先

耶律罕巴

萧珠展

耶律玦

耶律布勒图

萧布达

耶律浩善

耶律图丹

萧乌页

萧迪里

萧页噜

萧托辉

萧罕扎

萧阿噜岱

耶律纳延

耶律辰嘉努

萧苏色【穆喇斡】

耶律大悲努

萧罕嘉努

萧德

萧惟信

萧约音努

耶律迪里

姚景行

△耶律仁先

耶律仁先字扎林小子扎位孟父房之后父贵音南府宰相封燕王仁先魁伟爽秀有智略重熙三年补护卫帝与论政才之仁先以不世遇言无所隐授宿直将军累迁殿前副点检改和拉唐古部节度使俄召为北面林牙十一年升北院枢密副使时宋请增岁币银绢以偿十县地产仁先【宋史误作耶律仁起】与刘六符使宋既还同知南京【兴宗纪作东京】留守事十三年伐夏留仁先镇边未几召为契丹行宫都部署奏复王子班郎君及诸宫杂役十六年迁北院大王【按兴宗纪十五年自都部署为南院大王十九年自南院大王知北院枢密使事】奏今两院户口殷庶乞免他部助役从之十八年再举伐夏仁先与皇太弟重元为前锋萧惠失利于河南帝犹欲进兵仁先力谏乃止后知北院枢密使迁东京留守女直恃险侵掠不止仁先乞开山通道以控制之边民安业封吴王清宁初为南院枢密使以耶律华格譖出为南京兵马副元帅守太尉更王隋六年复为北院大王民欢迎数百里如见父兄时北南院枢密官尼嚕古萧呼都克等忌之请以仁先为西北路招讨使耶律伊苏奏曰仁先旧臣德冠一时不宜补外复拜南院枢密使更王许七月帝猎太子山重元谋逆帝趣仁先捕之仁先出且曰陛下宜谨为之备未及介马重元犯帷宫帝欲幸北南院仁先曰陛下若舍扈从而行贼必蹶其后且南北大王心未可知也仁先子托卜嘉曰圣意岂可违乎仁先怒击其首帝悟悉委仁先以讨贼事乃环车为营拆行马作兵仗率官属近侍三十余骑交战贼众多降尼嚕古中矢被擒重元被伤而退仁先以五院部萧塔喇所居最近亟召之分遣人集诸军黎明塔喇兵至仁先乃背营而阵乘便奋击贼溃重元与数骑遁去帝执仁先手曰平乱皆卿之功也加尚父进封宋王为北院枢密使诏画滦河战图以旌其功咸雍元年加裕悦改封辽王与耶律伊苏共知北院枢密事伊苏恃宠不法仁先抑之由是见忌出为南京留守改王晋恤孤惇禁奸慝宋闻风震服准布达尔罕叛命仁先为西北路招讨使锡鹰纽印及剑许便宜从事仁先严斥埃扼敌冲怀柔服从庶事整饬达尔罕复来寇仁先逆击追杀八十余里大军继至又败之别部巴尔斯士默特等来救见其屡挫不敢战而降北边遂安八年卒年六十遗命家人薄葬弟义先信先俱有传子托卜嘉

耶律托卜嘉

耶律托卜嘉

托卜嘉字和尔沁清宁二年补祗候郎君累迁永兴宫使以平重元之乱遥授忠正军节度使赐定乱功臣同知殿前点检司事历高阳临海二军节度使左皮室详袞太康六年授西北路招讨使率诸部酋长入朝加兼侍中自萧达鲁为招讨朝廷务姑息多择柔愿者用之诸部渐跋扈托卜嘉含容尤甚边防益废寻改西南面招讨使准布酋长默古斯来侵西北路招讨使和口木萨噶战不利诏托卜嘉代之默古斯之为酋长也托卜嘉有力焉至是遣人诱致之默古斯给降托卜嘉逆于镇州西南沙磧间禁士卒无得妄动敌至裨将耶律乌苏徐烈见其势锐不及战而走遂被害年五十八赠侍中谥曰贞悯

△耶律义先

耶律义先裕悦仁先弟也美丰姿举止严重重熙初补祗候郎君班详袞十三年车驾西征为十二行紂都监战功最改南院宣徽使时萧格同知枢密院事席宠擅权义先疾之因侍宴言于帝曰格狡佞喜乱一朝大用必谋国家言甚激切他日侍宴帝命羣臣博负者罚一巨觥义先当与格对恍然曰臣纵不能进贤退不肖安能与国贼博哉帝止之曰卿醉矣义先厉声诟不已帝大怒欲加之罪赖皇后救得解翌日帝谓格曰义先无礼当黜之格借以自饰故对曰义先天性忠直今以酒失而出谁敢言人之过帝转谓格忠直益加信任义先郁郁不自得然敢愤之气未尝少沮十六年为殿前都点检讨富珠哩多所招降获其酋长托多罗以归以功改南京统军使封武昌郡王奏请统军司钱营息以贍贫民未期军器完症民得休息二十一年拜特哩袞进王富春薨年四十二义先常戒其族人曰国中三父房皆帝之昆弟不孝不义尤不可为其接下无贵贱贤否皆与均礼其妻晋国长公主之女每遇中表亲非礼服不见故内外多化之清宁间追赠许王弟信先

耶律信先

耶律信先

信先兴宗以其父贵音为刺血友幼养于宫善骑射重熙十四年为左护卫太保同知殿前点检司事十八年兼右祗候郎君班详袞帝问所欲信先曰先臣贵音与陛下分如同气然不及王封使蒙恩地下臣愿毕矣帝曰此朕遗忘之过追封燕王是年从萧惠伐夏败于河南被责清宁初为南面林牙卒

△耶律罕巴

耶律罕巴字嘲隐倜傥有大志北院详袞古之五世孙太平中游京师寓行宫侧惟囊衣匹马而已帝微服出猎见而问之曰汝为何人罕巴初不识漫应曰我北院部人罕巴来觅官耳帝与语知有长才阴识之会北院奏南京疑狱久不决帝诏罕巴驰驿审录举朝皆驾罕巴量情处理人无冤者帝嘉之籍羣牧马阙其二同事者多恇扰罕巴略不加诘即先驰奏帝益信任景福元年为左伊勒希巴徙北面林牙眷遇优异重熙六年改北院大王政务宽仁复为左伊勒希巴十二年再为北院【兴宗纪作南院】大王入朝帝从容谓曰卿守边任重当实府库掙贫乏以报朕既受诏愈竭忠谨知无不言便益为多卒年五十五死之日篋无旧蓄施无新衣罕巴平居不屑细务喜愠不形尝失所乘马家僮以同色者代之数月不觉

△萧珠展

萧珠展字锡伦李穆弟果济之子以戚属加监门卫上将军重熙十三年将卫兵讨李元昊有功迁兴圣宫使富珠哩部长托多罗叛珠展为统军都监从都统耶律义先击之擒托多罗珠展与义先不协诬义先罪免官稍迁西南面招讨都监坐事下狱以太后言杖而释之清宁初为国舅详袞西北路招讨使私取官粟三百斛及代留产令主者鬻之以偿后族弟呼都克到部发其事帝怒决以大杖免官寻起为昭德军节度使征为北院宣徽使九年复为西北路招讨使训士卒增器械省追呼严号令人不敢犯边境晏然十年入朝封柳城郡王咸雍二年拜北府宰相为北院枢密使耶律伊苏所忌诬珠展与护卫萧和克等谋害伊苏诏狱无状罢相出镇顺义军【道宗纪作武定军节度使】卒追王晋宋梁三国姓药师努

药师努

药师努

药师努幼颖悟谨礼法补祗候郎君太康中为兴圣宫使累迁同知殿前点检司事迁右伊勒希巴夏王李干顺为未所攻求解帝命药师努持节使宋请罢兵通好宋从之拜南面林牙改汉人行宫副部署干统初出为安宋军【按辽地理及百官志无安宋军名岂以药师努平宋及夏而特设此名以宠之欤】节度使卒

△耶律玦

耶律玦字乌展约尼森济汗之后重熙初召修国史补符宝郎累迁知北院副都署事入见太后后顾左右曰先皇谓玦必为伟人果然除枢密副使出为西南面招讨都监厯同签南京留守事南面林牙皇弟秦国王为辽兴军

节度使以玦同知使事多所匡正十年复为枢密副使
咸雍初兼北院副部署及秦国王为西京留守请玦为佐从之岁中狱空者三召为孟父
房详袞玦不喜货殖帝知其贫赐宫户十尝谓宰相曰
契丹忠正无如玦者汉人则刘伸而已然熟察之玦优于伸先是西北诸部久不能平帝
遣玦问状执弛慢者痛绳之以酒疾卒

△耶律布勒图

耶律布勒图字燕隐六院林牙图鲁卜四世孙开泰间为本班郎君有捕盗功枢密
使萧朴荐之迁率府率 【按辽百官志东宫官名隶
太子率府】 太平中同知南院宣徽事累迁彰圣军节度使重熙 【据西夏传增】 十
六年知兴中府以狱空闻十八年伐夏摄西南面招
讨使十九年夏人侵金肃军败之斩首万余级加右武卫上将军时近边羣牧数被寇掠
迁倒塌岭都监以治之桴鼓不鸣二十年知金肃军事
宰相赵惟节总领边城桥道刍粟请貳帝命布勒图副之以称职闻清宁初历长宁匡义
二军节度使致仕咸雍间卒子阿固齐终倒塌岭都监

△萧布达

萧布达字弹隐统和初为南院承旨开泰六年出为乌尔固部节度使七年迪里部
叛讨平之徙乌尔固德呼勒部都监取北准布名马以
献赐诏褒奖太平十年为伊实部大王 【据本纪增辑】 重熙初改乌尔固德呼勒部
都详袞讨诸蕃有功布达深练边事能以悦使人有所
俘获悉散麾下由是大得众心历西南面招讨使党项叛入西夏布达讨之中流矢歿于
阵

△耶律浩善

耶律浩善字托纽北院额尔奇木博果济之后祖彻珍北院大王父和克黄皮室详
袞浩善初为西南巡边官以廉洁称寻为北院大王迁
南京统军使 【按兴宗纪善先为北院大王后除统军使原文误谨改正】 重熙十一
年党项部叛浩善受诏巡西边沿河要地多建城堡以
镇之徙东京留守十三年与知府萧乌鲁斯讨博啰满达部有功加兼侍中致仕卒

△耶律图丹

耶律图丹字和尔沁太师古裕之子重熙初为左护卫将禁兵从伐夏有功授十二
行紉司徒再举伐夏图丹括山西诸郡马还迁伊喇详
袞西南未平命图丹同知金肃军事夏人来侵击败之进纳喇阿尔威部节度使清宁元
年召为皇太后左护卫太保四年改宁远军节度使东
路饥奏振之历五国乌尔固部辽兴事三镇节度使四捷军详袞太康元年卒追赠同中
书门下平章事子阿苏有传

△萧乌页

萧乌页字草隐其先出兴圣宫分观察使塔哩济之孙性孝悌尚礼法雅为乡党所称重熙中补护卫兴宗见其勤恪迁护卫太保佐耶律仁先平重元乱以加加团练使时德呼勒部数为邻部侵扰民多困弊命乌页为德呼勒部节度使恤困穷省徭役不数月部人以安寻以母老归养于家母亡尤极哀毁服阕历官兴圣延庆二宫使卒

△萧迪里

萧迪里字国宁约尼森济汗宫人重熙初遥摄镇国军节度使六年奉诏使宋伤足而跛不告遂行帝怒及还决以大杖降同签南京留守事遥授静江军节度使历羣牧都村牙迁右伊勒希巴以才干见任会车驾西征元昊乞降遣迪里往规诚否因为元昊陈述祸福听命乃还拜北院枢密副使出为中京留守十九年改西京留守卒

△萧页噜

萧页噜字和尔沁五院部人父扬珠历官节度使页噜重熙间为牌印郎君清宁九年扬珠既平重元之乱其党果玖等亡页噜追捕获之迁护卫太保咸雍元年使宋议边事称旨知殿前副点检事五年准布叛为行军都监击败之俘获甚众初军出止给五月粮过期粮乏士卒往往叛归页噜坐失计免官降戍西北部未行会北部兵起页噜将乌尔固德呼勒兵击败之每战以身先释前罪命总知乌尔固德呼勒部九年德呼勒叛往来掠边境页噜屡出兵败走之时德呼勒方为边患准布亦相继寇掠边人疲弊朝廷以地远不能时益援兵而卒使疆圉帖然者皆页噜力也帝嘉其功拜左皮室详袞会宋求天池之地诏页噜兼统两皮室军屯达里库山以备之太康中准布叛【按道宗纪及属国表准布在太康年间岁修职贡未尝以叛闻耶律纳延传载卓克筭事云西北诸路扰边与部族表符合本传准布字恐误】迁西北招讨都监从都统耶律卓克筭征讨有功改南京统军都监黄皮室详袞迁东北路统军都监卒弟都勒斡具独行传

△萧托辉

萧托辉字乌库哩宰相辖达六世孙刚直有威重咸雍初任马羣太保素知羣牧名存实亡悉阅旧籍除其羸病录其实数上书曰羣牧以少为多以无为有上下相蒙积弊成风不若括见真数着为定籍公私两济从之畜产岁以蕃息大安中【按道宗纪托辉以大安七年为契丹行宫都部署下文所云九年西圉不宁亦正与本纪相合原文误作太康今改正】累迁契丹行宫都部署帝尝谓羣臣曰北枢密院军国重

任久阙其人耶律阿苏萧额特埒二人孰愈羣臣各誉所长托辉独默然帝问卿何不言托辉曰额特埒懦而败事阿苏有才而贪将为祸基不得已而用败事犹胜基祸帝曰托辉虽魏征不能过但恨吾不及太宗尔然竟以阿苏为枢密使由是阿苏衔之九年西圉不宁阿苏奏曰边隅事大可择重臣镇抚帝曰托辉何如阿苏曰诚如圣旨遂拜西南面招讨使阿苏阴与萧阿古岱诬奏贼掠漠南牧马及居民畜产托辉不及追捕罪当死诏免官久之起为托本城节度使未行疽发背卒托辉负气怒则须髯辄张每有大议必毅然决之虽帝有难色未尝遽已见权贵无少屈竟为阿苏所陷时人惜之二子曰图们锡实阿苏死始获进用

△萧罕扎

萧罕扎国舅之族性端简谨愿动循礼法清宁中为护卫太保太康二年迁知北院枢密副使三年经画西南边天池旧堑立堡砦正疆界刻石而还为汉人行宫都部署是年秋猎堕马卒

△萧阿噜岱

萧阿噜岱字伊实音威部人父宁古仕至紮详袞阿噜岱少习骑射晓兵法清宁间始仕累迁本部司徒改乌尔固德呼勒统军都监【道宗纪作详袞】大安七年迁山北副都署九年达勒达博索摩二部来侵屡击郟之加金吾卫上将军封兰陵县公寿隆元年第功加同中书门下平章事进爵郡公改西北路招讨使干统三年坐留守俘为奴免官后被征以老疾致仕卒

△耶律纳延

耶律纳延字伊实年额尔奇木博果济之后父斡常为北克从伐夏战歿季父卓克斡始为宿直官累迁至北面林牙咸雍四年【道宗纪作三年】拜北院大王改西南面招讨使太康中西北诸部扰边拜西北路招讨使兼行军都统平之以功复为北院大王纳延敦厚才敏帝以其父斡死王事九岁加诸卫小将军为题里司徒寻召为宿直官太康三年为约尼克大安九年为倒塌岭节度使明年冬北准布叛与招讨都监耶律呼哩往讨破之纳延荐呼哩为汉人行宫副部署寿隆元年复讨达勒达博索摩等有功改乌尔固德呼勒部统军使边境以宁部民乞留诏许再任干统六年拜中京留守改北院大王薨纳延为人廉介长于理民每有鬪讼亲核曲直不尚威严常曰凡治人本欲分别是非何事迫胁以立名故所至以惠化称

△耶律辰嘉努

耶律辰嘉努字绵辛懿祖弟噶拉八世孙重熙中补牌印郎君坐直日不至降本班

耶律仁先荐其健捷授御盏郎君厯鷹坊尚厩四方馆副使改图噜库皮室详袞会太后生辰进诗献驯鹿太后嘉奖兄萨巴卒辰嘉努闻讷不告而去帝怒鞭之清宁初累迁右伊勒希巴适帝与燕国王射鹿俱中应制进诗帝喜解衣以赐后皇太子废帝疑辰嘉努党附罢之时西北诸部寇边以为乌尔固部节度使行军都监讨诸部擒其酋送于朝侦候者见马踪意寇至辰嘉努遣报元帅耶律爱努视之曰此野马也将出猎贼至爱努战歿有司诘案辰嘉努不伏诏释之 【按道宗纪寿隆二年诸部平辰嘉努以功加尚书右仆射与本传异】 由是感激每事竭力后诸部复来侵辰嘉努率兵三往皆克边境遂宁以老告归不从寿隆六年为南院大王 【据道宗纪增】 道宗崩为山陵使致仕年八十卒
△萧苏色 【穆喇斡】

萧苏色字特默五院部人重熙间始仕累迁北院承旨彰愍宫使清宁初厯左皮室详袞右伊勒希巴咸雍四年为中京留守 【据道宗纪增】 五年博和哩部叛苏色讨降之率其酋长来朝徙北院林牙改南院副部署卒子穆喇斡字和琳初补伊勒希巴郎君迁文班太保太康中改南京统军使为右伊勒希巴与枢密使耶律阿苏论事不合出为马羣太保北部来侵穆喇斡破之以功迁同知乌尔固德呼勒统军仍许便宜行事后以谗毁降领西北路戍军复为马羣太保卒

△耶律大悲努

耶律大悲努字纠坚王子班尼噜固之后咸雍中为汉人行宫都部署 【据道宗纪增】 太康中厯永兴建昌宫使右皮室详袞会准布叛奉诏招降之寿隆二年拜殿前都点检干统初厯上京留守特哩袞复为都点检改西南面招讨使请老不许天庆中留守上京领北南枢密院点检中丞诸司等事以彰国军节度使致仕卒大悲努举止驯雅好礼仪为时人所称

△萧罕嘉努

萧罕嘉努 【按辽使萧罕嘉努有三一见文学传一见天祚本纪一系本传谨附志】 字固宁奚长布伦之后性孝友太平中补祗候郎君累迁敦睦宫使伐夏为左翼都监迁北面林牙俄为南院副部署赐玉带改奚六部大王治有声重熙六年为都部署 【据兴宗纪增】 清宁初封韩国公厯南京统军使北院宣徽使封兰陵郡王九年重元乱帝仓卒欲避于北南院与耶律仁先执轡固谏乃止明旦重元复诱奚猎夫来罕嘉努独出谕之曰汝曹去顺效逆徒取族灭何若悔过转祸为福猎夫投仗首服以功迁殿前都点检封荆王赐资忠保义奉国竭贞平乱功臣咸雍二年迁西南面招讨使太康初徙王吴皇太子为伊苏所构幽于上京罕嘉

努上书力言其冤不报四年复为西南面招讨使例削

一字王爵改王兰陵薨 【按道宗纪咸雍八年罕嘉努知左伊勒希巴事太康初为东北路统军使三年加尚父封吴王七月为汉人行宫都

部署八月薨五年例削一字王爵降兰陵郡王考其年次明系一人而纪传互异如此】

子杨结终右祗候郎君班详袞赠同中书门下平章事

△萧德

萧德字特们绰特部人性和易笃学好礼法太平中领牌印直宿累迁北院枢密副使敷奏详明多称旨重熙中 【据耶律庶成传增】

诏与林牙耶律庶成修律令改契丹行宫都部署赐宫户十有五清宁元年迁同知北院枢密使封鲁国公帝以德为先朝眷遇拜南府宰相五

年转南京统军使九年复为南府宰相重元之乱摧锋力战斩尼噜固首以献论功封汉王咸雍初告老不许久之加尚父致仕卒年七十二

△萧惟信

萧惟信字伊聂绰特部人五世祖锡兰南府宰相曾祖乌尔固中书令祖阿固齐知平州父果巴多智数博览古今开泰初为北院承旨稍

迁右伊勒希巴以干敏称拜南府宰相累迁倒塌岭节度使知兴中府复为右伊勒希巴琳沁诱众作乱事觉果巴按之止诛首恶余并释之归

奏称旨终南院大王 【据道宗纪增】 惟信资沈毅笃志于学能辩论重熙初始仕累迁左中丞十五年徙燕赵国王傅帝谕之曰燕赵左右

多面谏不闻忠言寢以成性汝当以道规诲使知君父之义有不可处王邸者以名闻惟信辅导以礼十七年迁北院枢密副使坐事免官寻复

职兼北面林牙十八年使宋告伐夏 【据西夏外纪增】 清宁九年重元作乱惟信从耶律仁先破之赐竭忠定乱功臣加太子太傅 【据

道宗纪增】 咸雍间历南京留守左右伊勒希巴知北南两院枢密使事七年为南府宰相兼契丹行宫都部署太康中以老乞骸骨不听枢密

使耶律伊苏潜废太子中外知其冤无敢言者惟信数廷争不得复告老加守司徒卒

△萧约音努

萧约音努字布当奚六部详袞图鲁卜六世孙父巴拉三岁古父母丧毁瘠过甚养于家奴锡喇布重熙初兴宗猎奚山过巴尔所居锡喇

布言于近臣巴尔得入见年甫十岁气象如成人帝悦之锡赉甚厚既长有远志不乐仕进隐于奚王岭之察克谷帝以其名家又有时誉就拜

锡里军详袞约音努貌伟言辨通辽汉文字善骑射击鞠所交皆一时名士年四十始为护卫平重元之乱以功迁护卫太保改本部南克俄为

旗鼓伊喇详袞拜五蕃部节度使卒子扬阿

△耶律迪里

耶律迪里字萨兰采访使吼五世孙宽厚好学工文词重熙未补牌印郎君兼知起居注清宁元年稍迁同知永州事禁盗有功改北面林牙承旨九年重元作乱迪里赴援力战平之遥授临海军节度使十年徙武安州观察使咸雍五年累迁长宁宫使来括户部司立出纳经画法公私便之太康四年为南院大王秩满部民请留同知南京留守事有疾命乘传赴阙遣太医视之迁上京大安中改塔布城节度使以疾致仕加兼侍中赐一品俸八年卒

△姚景行

姚景行始名景禧祖汉英本周将应历初来聘用敌国礼帝怒留之隶汉人宫分及景行既贵始出籍贯兴中县景行博学重熙五年擢进士乙科为将作监改燕赵国王教授不数年至翰林学士枢密副使参知政事性敦厚廉直人望归之道宗即位多被顾问为北府宰相九年秋告归道闻重元乱收集行旅得三百余骑勤王比至贼已平帝嘉其忠赐以逆人财产咸雍元年出为武定军节度使明年拜南院枢密使帝有意伐宋召景行问曰宋人好生边事如何对曰自圣宗皇帝以威德怀远宋修职贡迨今几六十年若以细故用兵恐违先帝成约帝然其言而止致仕不踰月复旧职丁家艰起复兼中书令帝问古今儒士优劣占对称旨知兴中府改朔方军节度使太康初徙镇辽兴以上京多滞狱命为留守不数月以狱空闻累乞致政不从复请乃许之加守太师卒追封柳城郡王谥文宪寿隆五年诏为立祠

钦定续通志卷四百二十一

●钦定续通志卷四百二十二 列传二百二十二

列传

辽【六】

○辽六

耶律额特埒	哈里	窦景庸	耶律音济	杨绩	
赵徽	王观	耶律吉逊			
耶律阿苏	耶律俨	刘伸	耶律呼哩	杨遵勳	
王棠	牛温舒	耶律达鲁	萧道		
拉	耶律唐古	萧德勒岱	萧绰哈	萧扬阿	耶
律珠展	萧托斯和	耶律阿息保	萧		
伊苏	苏呼敦	李处温	张琳	萧乌纳	耶律
实鲁	耶律伊都				

耶律额特埒

哈里

窦景庸

耶律音济

杨绩

赵徽

王观

耶律吉逊

耶律阿苏

耶律俨

刘仲

耶律呼哩

杨遵勳

王棠

牛温舒

耶律达鲁

萧道拉

耶律唐古

萧德勒岱

萧绰哈

萧扬阿

耶律珠展

萧托斯和

耶律阿息保

萧伊苏

萧呼敦

李处温

张琳

萧乌纳

耶律实鲁

耶律伊都

△耶律额特埒

耶律额特埒字伊实音许国王伊德实六年孙初补本班郎君时耶律伊苏擅权残害忠良额特埒恐祸及深自抑畏太康中为宿直官历

左右护卫太保大安初升燕王傅徙左伊勒希巴四年改北院枢密副使迁知北院枢密使事赐翼圣佐义功臣北准布酋长默古斯叛额特埒进讨会天大雪败默古斯四别部斩首千余级寿隆初拜西北路招讨使封漆木郡王赐宣力守正功臣寻拜南府宰相讨扎古呼喇巴部破之召为契丹行宫都部署先是北南府有讼各州府得就按之比岁非奉枢密檄不得鞠问故讼者稽留额特埒请如旧从之五年复为西北路招讨使禁军都统累奏尼都格尔捷六年擒默古斯加守太保赐奉国匡化功臣干统初乞致仕不许止罢招讨使仍为南院枢密使封混同郡王迁北院枢密使加守太师赐推诚赞治功臣致仕薨谥曰敬肃

△哈里

哈里字呼纽回鹘人其先太祖时来贡愿留因任用之重熙间哈里历近侍长清宁九年讨重元乱有功加金吾卫上将军赐平乱功臣累迁殿前都点检以宿卫严肃称太康初加守太子太保二年加同中书门下平章事三年改同知南院宣徽使事会耶律伊苏出守中京哈里入贺及议复召陈其不可伊苏再入枢府出哈里为广利军节度使皇太子被诬哈里当连坐诏勿问大安初历丕勒达噜噶部节度使寿隆五年卒年七十七

△窦景庸

窦景庸中京人中书令振之子聪敏好学清宁中第进士授秘书省校书郎累迁少府少监咸雍六年授枢密直学士寻知汉人行宫副部署事大安初迁南院枢密副使监修国史知枢密院事赐同德功臣封陈国公有疾请致仕不从加太子太保授武定军节度使审决冤滞轻重得宜以狱空闻七年拜中京留守九年薨谥曰肃宪子瑜三司副使

△耶律音济

耶律音济字阿古丕勒部人父双库镇西边二十余年治尚严肃不殖货利时多称之音济寅畏好义以荫补官累迁东京副留守北枢密院侍御时萧格萧特古斯等以佞见任鬻爵纳贿意济以直道处其间无所阿唯改客省使时朝廷遣使括三京隐户不得以音济代之得数千余户昭怀太子知北南院事选音济为转导枢密使伊苏将倾太子恶音济在侧奏出之为羣牧林牙太康元年伊苏请赐牧地音济奏曰今牧地褊陋畜不蕃息岂可分赐臣下帝乃止伊苏由是益嫉之除怀德军节度使徙漠北猓水马羣太保卒

△杨绩

杨绩 【按续通考作马续误】 良乡人太平十一年进士及第累迁南院枢密副

使与杜防韩知白等擅给进士堂帖降长宁军节度使
徙知涿州清宁初拜参知政事兼同知枢密院事为南府宰相九年闻重元乱与姚景行
勤王十年知兴中府咸雍初入知枢密院事二年乞致
仕不许拜南枢密院使帝以续旧臣特诏燕见论古今治乱人臣邪正续拜贺曰何代无
贤世乱则独善其身主圣则兼济天下陛下铢分邪正
升黜分明天下幸甚 表告归不许封赵王太康中以例改王辽西致仕加守太保薨子
贵忠知兴中府

△赵徽

赵徽南京人重熙五年擢甲科为太子中舍赐绯衣银鱼 【据兴宗纪增】 累迁
大理正清宁二年铜州人妄毁三教徽按鞫之以状闻
称旨历烦剧有能名累迁翰林学士承旨咸雍初为度支使三年拜参知政事出为武定
军节度使及代军民请留后同知枢密院事兼南府宰
相门下侍郎平章事致仕卒追赠中书令谥文宪

△王观

王观南京人博学有才辩重熙七年中进士乙科兴宗崩充夏国报哀使还除给事
中咸雍初迁翰林学士寻兼干文阁学士七年改南院
枢密副使赐国姓参知政事兼知南院枢密事坐矫制修私第削爵为民卒

△耶律吉逊

耶律吉逊字盈隐永兴宫分人兴宗在青宫尝居左右辅导召宗大渐吉逊与丰嘉
努告仁德皇后同宰相萧珠卜等谋逆及钦哀为皇太
后称制吉逊尤见宠任重熙中其子尼格为近侍坐事伏诛帝以吉逊有翼戴功且悼其
子罪死欲世其官吉逊无所出之部因见马印文有丕
勒部号使隶其部拜南府宰相寻出为东北路详袞卒

△耶律阿苏

耶律阿苏字萨巴北院枢密使伊苏之弟 【据道宗纪增辑伊苏具奸臣传】 清
宁初补祗候郎君以善射掌猎事进渤海近侍详袞重
元之乱与护卫苏射杀尼嚕古赐号靖乱功臣徙契丹行宫都部署大安初兼知北院大
王事封漆水郡王寿隆元年 【原传作十一年据本
纪改】 为北院枢密使监修国史道宗崩受顾命加裕悦录伊苏党人阿苏受贿多所宽
贲萧赫嚕尝言当修边备阿苏力沮其事后以风疾失
音致仕加尚父封赵王薨年八十追封齐国王

△耶律俨

耶律俨字若思析津人本姓李氏父仲禧重熙中始仕清宁初同知南院宣徽使事
四年城鸭子混同二水间拜北院宣徽使咸雍初坐悞

奏事出为榆州刺史俄复旧职迁汉人行宫都部署七年 【原文作六年据道宗纪改】
赐国姓封韩国公改南院枢密使时枢臣伊苏等诬
陷皇太子诏仲禧偕伊苏鞫之蔓引无辜未尝雪正伊苏荐仲禧可任拜广德军节度使
复为南院枢密使卒谥钦惠伊仪观秀整好学有诗名
登咸雍进士第守著作佐郎补中书省令史以勤敏称太康初历都部署判官将作少监
后两府奏事论羣臣优劣唯称伊才俊改少府少监知
大理正赐紫六年迁大理少卿奏谏详平明年升大理卿丁父忧夺服同签部署司事大
安初为景州刺史绳胥徒禁豪猾抚老恤贫未数月善
政流播郡人刻石颂德二年改御史中丞诏按上京滞狱多所平反同知宣徽院事提点
大理寺六年冬改山西路都转运使刮剔垢弊奏定课
额益州县俸给事皆施 寿隆初授枢密直学士 【按道宗纪伊在大安时已授此职】
以母忧去官寻召复旧职宋攻夏李干顺求和解帝
命伊如宋平之拜参知政事帝晚年倦勤用人不能自择令各掷骰子以采胜者官之伊
尝得胜采帝曰上相之征也迁知枢密院事赐经邦佐
运功臣封越国公修皇朝实录 【按天祚纪干统三年召伊纂太祖帝实录与本传异】
帝大渐伊与北院枢密使阿苏同受顾命干统三年
徙封秦国六年封漆水郡王天庆中薨赠尚父谥曰忠懿伊素廉洁一介不取于人经籍
一览成诵又善伺人主意其妻尝出入禁中由是权宠
益固三子处贞太常少卿处廉同知中京留守事处能少府少监

△刘伸

刘伸字济时宛平人少颖悟长以辞翰间重熙五年登进士第历彰武军节度使掌
书记大理正因奏狱帝适与近臣语不顾伸进曰臣闻
自古帝王必重民命愿陛下省臣奏帝大惊异擢枢密都承旨权中京副留守诏徙富民
以实春泰二州伸以为不可奏罢之迁大理少卿人以
不冤升大理卿改西京副留守以父忧终制为三司副使加谏议大夫提点大理寺伸明
法而恕案冤狱全活者众徙南京副留守俄改崇义军
节度使政务简静民用不援改户部使岁入羨余钱三十万缙拜南院枢密副使道宗尝
谓大臣曰今之忠直耶律玦刘伸而已拜参知政事谕
之曰卿弗惮宰相时北院枢密使伊苏势焰方炽伸奏曰臣于伊苏尚不畏何宰相之畏
伊苏衔之相与排诋出为保静军节度使帝终欲大用
加守太子太保迁上京留守伊苏以事徙镇雄武复以崇义军节度使致仕适燕蓟民饥
伸与致仕赵徽韩造日济以糜粥所活不胜算大安二
年卒

△耶律呼哩

耶律呼哩字苏色弘义宫分人其先允佐太祖有功父扬鄂特左监门卫大将军呼哩性谦谨于事无适莫重熙末补寝殿实达尔以善职屡更华要迁千年卫大将军大安中北准布酋默古斯叛为招讨都监与耶律纳延讨平之以功为汉人行宫副部署兼知太和宫事致仕加同中书门下平章事卒

△杨遵勳

杨遵勳字益诚涿州范阳人重熙十九年登进士第调儒州军事判官累迁枢密院副承旨咸雍三年为宋国贺正使还迁都承旨四方之事从于枢府簿书填委遵勳一日五行俱下剖决如流敷奏详敏帝嘉之奉诏征户部逋钱得四十余万缗拜枢密直学士改枢密副使太康初参知政事徙知枢密院事兼门下侍郎平章事拜南府宰相耶律伊苏诬皇太子诏遵勳与雅克按其事遵勳不敢正言时议短之寻拜北府宰相大安中暴卒年五十六赠守司空谥康懿子晦终昭文馆直学士

△王棠

王棠涿州新城人博古善属文重熙十五年擢进士乡贡礼部廷试对皆第一累迁上京盐铁使或诬以贿无状释之迁东京户部使太康二年辽东饥民多死请振恤从之三年入为枢密副使拜南府宰相大安末卒棠练达朝政临事不怠在政府修明法度有声

△牛温舒

牛温舒范阳人刚正尚节义有远器咸雍中擢进士第滞小官大安初累迁户部使转给事中知三司使事国民兼足帝以为能加户部侍郎改三司使寿隆中拜参知政事兼同知枢密院事摄中京留守部民诣阙请真拜从之召为三司使干统初复参知政事知南院枢密使事五年夏为宋所攻来请和解温舒与萧德勒岱使宋方大宴优人为道士装索木泥药炉优曰土少不能和温舒遽起以手籍土怀之宋主问其故温舒对曰臣奉天子威命来和若不从则当卷土收去宋人大惊遂伐夏和还加中书令卒

△耶律达鲁

耶律达鲁字萨兰清宁初为本班郎中稍迁宿直官干统中从伐准布有功加奉宸扈卫太保改弘义宫副使时上京梟贼赵锺哥跋扈达鲁擒之加泰州观察使为达噜噶部节度使天庆中知兴中府加金吾卫上将军为贼所杀

△萧道拉

萧道拉字绥兰约尼温汗宫人祖尼噜古北院枢密副使父萨满字和尔沁重熙初

补祗候郎君累迁北面林牙十九年从耶律伊苏萧博
诺伐夏至萧惠败绩之地人烟聚落多国人陷没而不能还耆尽俘以归拜大父详袞知
山北道边境事清宁初历西南面西北路招讨使加同
中书门下平章事卒道拉体貌丰伟骑射绝人由祗候郎君升汉人行宫副部署后为乌
尔固德呼统军使克敌有功加龙虎卫上将军授西北
路招讨使因陈北边利害请以本路诸部与倒塌岭统军司连兵屯戍再表不纳改东北
路统军使干统元年复为西北路招讨使北准布额都
格尔率邻部来侵道拉逆击追奔数十里二年乘其无备以轻骑袭之获马万五千匹牛
羊称是先是有诏方面无事招讨副统军都监内一员
入覲是时同僚皆阙道拉以军事付幕吏而朝坐是免官改西京留守复为东北路统军
卒于官

△耶律唐古

耶律唐古字富僧额六院郎君噶拉之后太康中补本班郎君累迁至大将军性坦
率好别白黑人有不善必尽言无隐时号强唐古在朝
数论宰相得失由是久不得调后出为西北戍长干统三年萧德勒岱为西北路招讨使
以后族慢侮僚吏唐古不屈乃罢之唐古讼之朝不省
天庆初乌尔固德呼叛召拜乌尔固部节度使部谕降之 【天祚纪作保大三年】 遂
出私财及发富民积以振其困乏部民大悦加镇国上
将军会萧德勒岱以都统率兵与金人战败绩唐古请以军法论且曰臣虽老愿为国破
敌不纳保大元年乞致仕明年天祚出奔唐古谒于倒
塌岭见帝流涕帝慰止之复拜乌尔固部节度使及至部德呼以五千人来攻唐古率家
奴击破之加太子太傅年七十二卒

△萧德勒岱

萧德勒岱字紉邻晋王孝先之孙父萨布历官使相德勒岱短而倮外谨内倨太康
中补祗候郎君策迁兴圣宫副使兼同知中丞司事大
安中燕王妃生子德勒岱以妃叔故历宁远军节度使长宁宫使寿隆二年监讨达勒达
博索摩二部多俘而还改同知南京留守事干统元年
为北面林牙同知北院枢密事受诏与北院枢密使耶律阿苏治伊苏余党阿苏纳贿多
出其罪德勒岱不能制亦附会之四年知北院枢密事
夏主李干顺为宋所攻遣使请和解诏德勒岱与牛温舒使宋平之宋既许德勒岱受书
之日乃曰奉命取要约归不见书辞岂敢徒还遂对宋
主发函而读既还朝议为是天庆三年加守司徒封兰陵郡王金兵初起廷臣多欲乘其
未备举兵往讨德勒岱独阻之以至败衄天祚以德勒
岱不合人望出为西南面招讨使八年召为北院枢密使宠任弥笃是时诸路大乱飞章

告急者络绎而至德勒岱不即上闻有功者亦无甄别
由是将校怨怒人无鬪志保大二年金兵至岭东耶律萨巴等谋立晋王事泄帝召德勒
岱议曰反者必以此见为名若不除去何以获安德勒
岱唯唯竟无一言申理王既死人心益离金兵踰岭天祚率卫兵西遁元妃萧氏德勒岱
之侄谓德勒岱曰尔任国政致君至此何以生为德勒
岱但谢罪不能对天祚怒逐之及其子穆尔萨德勒岱既去为耶律高善努执送金兵脱
身亡归复为耶律纠坚所得送之耶律淳时淳已僭号
德勒岱自知不免诡曰吾不能事僭窃之君不食数日卒子穆尔萨为金兵所杀

△萧绰哈

萧绰哈字额勒本国舅少又房之后祖阿拉终采访使父必埒哩以后父封赵王绰
哈貌雄伟性和易年十四尚越国公主拜驸马都尉为
祗候郎君班详袞 【按道宗纪绰哈封郡王时官殿前副点检】 年十八封兰陵郡王
迁汉人行宫都部署兼知枢密院事 【据道宗纪增
】 时帝欲立皇孙为嗣恐无以解天下疑出绰哈为国舅详袞降皇后为惠妃迁于干州
初绰哈母入朝擅取驸马至是觉夺其封号复与妹鲁
姐为巫蛊伏诛诏绰哈与公主离婚籍兴圣宫流乌尔固德呼部天庆中以妹复尊为太
皇太妃召绰哈为南女直详袞迁征东副统军时广州
渤海作乱乃与驸马都尉萧罕嘉努 【按此与前卷及后文苑传之萧罕嘉努均非一人
】 袭其不备平之复败敌将侯槩于川州是岁东京
陷绰哈率麾下力战没于阵追赠龙虎卫上将军 【按萧绰哈与公主离婚不入外戚传
】

△萧扬阿

萧扬阿字稍隐端毅简严识辽汉字通天文相法父卒自五蕃部亲挽丧车至奚王
岭人称其孝年十九为本班郎君历铁林铁鹞大鹰三
军详袞干统元年由乌尔固德呼部屯田太保为易州刺史幸臣刘彦良尝以事至州怙
宠恣横为扬阿所沮彦良归妄加毁訾寻遣人代扬阿
州民千余诣阙请留授武安州观察使历乌尔固聂呼顺义彰信等军节度使权知东北
路统军使事耶律朗布都勒斡等叛独引麾下三十余
人追捕之身被二创生擒十余人送之行在坐不获首恶免官未几权南京留守卒

△耶律珠展

耶律珠展字能登裕悦博果济之后魁伟雄辨干统初补祗候郎君六年加观察使
天庆五年受诏监都统耶律鄂尔多战及败左迁银州
刺史徙咸州紜将尝与耶律章努谋立魏国王淳及闻章努自鸭子河亡去引麾下数人
往会之 【按天祚纪天庆五年绵州刺史耶律木者

叛应张家努官职叛党均异本传】 道为游兵所执送行在杀之

△萧托斯和

萧托斯和字伊实音图鲁卜部人祖哩巴阿尔威部节度使托斯和谨愿不妄交幼如成人补笔砚实达尔累迁祇候郎君转枢密院侍御咸雍五年迁崇德宫使会有诉北南院听讼不直者事下托斯和悉改正之为耶律阿苏所忌帝欲召用辄为所沮厯马羣太保久不调干统九年徙天齐殿宿卫明年谷价翔踊宿卫士多不给托斯和出私廩赈之召同知南院枢密使事天庆四年为汉人行宫副部署时金兵初起攻陷宁江州天祚召羣臣议托斯和曰金国虽小其人勇而善射我兵久不练若遇强敌稍有不利诸部离心不可制矣为今之计莫若大发诸道兵以威压之庶可服也北院枢密使萧德勒岱曰如是徒示弱耳不用其计数月间边兵屢北人益不安饶州渤海结构投下城以叛有步骑三万余招之不下托斯和帅兵往讨擒其渠魁斩首数千级耶律章努叛托斯和兴留守耶律大悲努为守御章努既平托斯和请曰今边兵懈弛若清暑岭西则汉人啸聚民心益摇臣愚以为宜罢此行不纳乃命控扼东路招集散卒后以太子太傅致仕卒

△耶律阿息保

耶律阿息保字达尔丹五院部人祖呼喇太祖时徙居西北部世为招讨司使阿息保慷慨有大志年十六以才干补内史口庆初转枢密院侍御金人起兵城境上遣往诘之金人曰若归阿苏敢不听命还具以闻金兵陷宁江州边兵屢败遣与耶律章努等赍书而东阿息保曰臣前使依诏开谕略无所屈将还谓臣曰若所请不遂无相见今臣请独往不听将行别萧德勒岱曰不肖适异国必无生还愿公善辅国家既至果见执久乃遁归迁都巡捕使六年从阿苏讨耶律章努加领军卫大将军阿苏将兵而东阿息保送至军乃还天祚怒其专鞭之三百寻为奚六部图哩太尉阿苏反阿息保以偏师进击临阵坠马被擒因阿苏有旧得免时阿苏好杀屢劝止之全活者众阿苏败乃还囚中京数岁保大二年金兵至中京始出狱寻为德呼勒皮室详袞是时魏王淳僭号屢招之阿息保封其书以献因谏曰东兵甚锐未可轻敌及实讷图 【按实讷图原文作石鞬绎通鉴纲目同天祚本纪作石鞬驿盖传写之讹而辽史此传又讹石为右今并改】 之败天祚奔窜召阿息保不时至疑

有贰心并怒为淳所招杀之初阿息保知国将亡前后谏甚切及死之非罪人尤惜之

△萧伊苏

萧伊苏字特默国舅少父房之后性谨愿寿隆间累任剧官天庆初知国舅详袞事

迁殿前副点检金兵起为行军副都统往援宾州 【据天祚纪增】 以战失利罢职六年出为武定军节度使迁西京留守明年讨剧贼董庞儿战易水西大破之以功为北府宰相加左仆射兼东北路都统十年金兵陷上京诏为上京留守知盐铁内省两司东北路统军司事 【据天祚纪增】 为政宽猛得宜众咸爱之保大二年金兵大至伊苏军溃左迁西南面招讨使以部民流散不赴及天祚播迁给侍从不阙拜殿前都点检凡金兵所过诸营败卒复聚上京遣伊苏为上京留守以安抚之 【按天祚纪保大四年伊苏知北院枢密使事】 明年庐彦伦以城叛伊苏被执数月以居官无过得释后为耶律达实所杀

△萧呼敦

萧呼敦字哈准其先苏克济太祖时愿隶宫分遂为太和宫分人曾祖达噜明医世预太医选子孙因之入官者众呼敦为人便佞与物无忤清宁初补近侍大安元年为彰愍宫太师寿隆二年转永兴宫太师天庆初累迁至殿前副点检五年从天祚东征为先锋都统临事犹豫进至拉林水与金兵战败绩及讨耶律章努以籍禾奴为军迁知北院枢密使事卒呼敦长于骑射见天祚好游畋每言从禽之乐以逢其意天祚悦而从之国政隳废自此始云

△李处温

李处温析津人伯父俨赐姓耶律雅与北枢密使萧奉先友善俨卒奉先荐处温为相处温心阿附以固权位而贪污尤甚凡所接引类多小人保大初金兵陷忠京天祚奔夹山兵势日迫处温与族弟处能子奭外假怨军声援结都统萧干立魏国王淳称天锡皇帝以处温守太尉处能直枢密院奭为少府少监左企弓以下赐官有差会魏国王病自知不起密授处温番汉马步军都元帅意将属以后事及魏国王卒萧干攘兵立王妃萧氏为太后权主军国事以后命召处温至追毁元帅剖子处能惧及祸落发为僧处温尝遗易州富民赵履仁书达宋将童贯欲挟萧后纳土归宋事觉后执处温问之处温曰臣父子于宣宗有定策功宜世蒙宥后曰向使魏国王如周公则终享亲贤之名于后世误王者皆汝父子何功之有并数其前罪恶处温无以对乃赐死奭亦伏诛

△张琳

张琳涿州人幼有大志寿隆末为秘书中允天祚即位累迁户部使顷之擢为南府宰相天庆六年渤海叛遣琳讨之以败免官 【据天祚纪增】 初天祚之败于金也意谓萧奉先不知兵乃召琳付以东征事琳奏曰前日之

败失于轻举若用汉兵二十万分道进讨无不克者乃
许其半仍诏中京上京长春辽西四路计户产出军时有起至二百军者生业荡散民甚
苦之四路军甫集寻复遁去及中京陷天祚幸云中留
琳与李处温佐魏国王淳守南京处温父子召琳欲立淳为帝琳曰王虽帝胄初无上命
摄政则可即真则不可处温曰今日之事天人所与岂
可易也琳虽有难色亦免从之淳既称帝诸将咸居权要琳独守太师十日一朝平章军
国大事阳以元老尊之实则不使与政琳由是郁悒而
卒

△萧乌纳

萧乌纳一名托卜嘉字达敏六院部人其先尝为西南面伊喇乌纳魁伟简重善骑
射清宁初兄托多以事入见帝问族人可用者托多以
乌纳对补祗候郎君迁近侍敞史护卫太保太康初为北院宣徽使时伊逊巴害太子因
言宋魏国王和啰噶之子淳可为储嗣羣臣莫敢言唯
乌纳及伊勒希巴萧托辉谏曰舍嫡不立是以国与人也帝犹豫不决五年帝出猎伊逊
请留皇孙帝欲从之乌纳奏曰窃闻车驾出游将留皇
孙苟保护非人恐有他变果留臣请侍左右帝乃悟命皇孙从行由此始疑伊逊顷之同
知南院枢密使事出伊逊淳等帝嘉其忠封兰陵郡王
授殿前都点检帝谓王师儒耶律固等曰乌纳忠纯虽狄仁杰辅唐乌哲立穆宗无以过
也卿等宜达燕王知之自是令乌纳辅导燕王益见优
宠大安初诏尚越国公主乌纳固辞改南院枢密使奏请掾史宜以岁月迁叙从之寿隆
元年拜北府宰相初天祚在潜邸乌纳数以直言忤旨
及嗣位出为辽兴军节度使守太傅佛殿实达尔王华诬乌纳借内府犀角诏鞫之乌纳
奏曰臣在先朝诏许日取帑钱十万为私费臣未尝妄
取一钱肯借犀角乎天祚愈怒夺太傅官降宁边州刺史寻改临海军节度使乌纳上书
曰自萧哈里亡入女真波有轻朝廷心宜益兵以备不
虞不报天庆元年知黄龙府事改东北路统军使复上书曰臣治与女真接境观其所为
其志非小宜先其未发举兵图之章数上皆不听及金
兵来侵战于宁江州其孙伊德济死之乌纳退走入城留官属守御自以三百骑渡混石
江而西城遂陷复与萧迪里拒金兵于长泝军败免官
五年天祚亲征乌纳殿复败绩后数日乃与百官入见授上京留守六年耶律章努叛攻
京城乌纳发府库赉士卒谕以顺逆完城池以死拒战
章努无所恃而去以功授副元帅寻为契丹都宫使天祚以乌纳先朝重臣有定策勋每
延问以政乌纳对甚切上虽优容终不能用以疾卒

△耶律实鲁

耶律实鲁字楚音六院部人祖都丹南院大王父爱实仕至统军副使实鲁秉性刚直有经世志始为牌印郎君太康初为伊勒希巴郎君时枢密使耶律伊逊诬杀皇后谋废太子斥忠贤进奸党实鲁恶其所为伊逊觉之太子既废以实鲁附太子流镇州天祚即位召为御史中丞时方治伊逊党有司不以为意实鲁上书曰伊逊身出寒微位居枢要窃权肆恶不胜名状蔽先帝之明诬陷顺圣构害忠讒败国罔上自古所无赖庙社之休陛下获纂成业积年之冤一旦洗雪正陛下英断克成孝道之秋如萧德勒岱实伊逊之党耶律赫鲁亦不为早辨赖陛下之明遂正其事臣下见陛下多疑故有司顾望不切推问伊逊在先帝朝权宠无比先帝若以顺考事为实则伊逊为功臣陛下岂得立耶先帝黜逐嬖后诏陛下在左右是亦悔前非也陛下讵可忘父讎不报宽逆党不诛今灵骨未获而求之不切逆党未除大冤不报上无以慰顺考之灵下无以释天下之愤怨气上结水旱为沴臣愿陛下明诏求顺考之瘞所尽收逆党以正邦宪快四方忠义之心昭国家赏罚之用然后致治之道可得而举矣谨别录顺圣升遐及伊逊等事具疏以闻书奏不报闻者莫不叹惋干统中遥授静海军节度使卒子玛格同中书门下平章事

△耶律伊都

耶律伊都一名伊楞古国族之近者也慷慨尚义气保大初历官副都统其妻天祚文妃之妹文妃生晋王最贤国人皆属望时萧奉先之妹亦为天祚元妃生秦王奉先恐秦王不得立深忌伊都将潜图之适耶律达哈拉之妻会伊都之妻于军中奉先讽人诬伊都结驸马萧昱达哈拉谋立晋王尊天祚为太上皇天祚杀昱及达哈拉妻赐文妃死伊都在军中闻之惧即引兵千余并骨丹军帐叛归金会大霖雨道途留阻天祚遣知奚王府萧锡默北宰相萧德恭等追捕甚急至间山及之诸将议曰萧奉先恃宠蔑害官兵伊都宗室雄才素不肯下若擒之则他日吾辈皆伊都矣不如纵之还给云追袭不及伊都既降金为其国前锋引罗索贝勒兵攻陷州邵天祚大惊知不能敌率卫兵入夹山伊都在金为监军久不调息不自安乃假游猎遁西夏夏人不纳卒

钦定续通志卷四百二十二

●钦定续通志卷四百二十三 列传二百二十三

列传

金 【一】

○金一

锡馨

和诺克【萨克达】乌春【温都布拉】

拉必【玛察】

埒克 阿苏

锡馨

和诺克 【萨克达】

乌春

拉必 【玛察】

埒克

阿苏

△锡馨

锡馨乌凌阿部人昭祖以条教约束诸部锡馨陆梁不可制及景祖为诸部长自山页赫图们扎兰托卜古伦各国皆从服会辽使赫噜林牙来索逋人锡馨拒不听命景祖攻之不能克遂以诡计取之乃以锡馨阻绝海东路请于辽辽帝使人让之曰汝何政阻绝鹰路审无他意遣其酋长来锡馨使其长子颇克绰欢入朝辽人厚赐遣还曰汝父信无他宜身自入朝锡馨信之明年入见于春搜颇克绰欢从辽主谓锡馨曰罪在汝不在汝子乃命颇克绰欢还而流锡馨于边地颇克绰欢蓄怨未发会哈勒琿水赫舍哩部拉必玛察起兵颇克绰欢往从之及败于穆棱水玛察先遁去颇克绰欢与拉必就擒及其党与皆献之辽主久之世祖复使人言曰颇克绰欢不还其部人疑惧且乱辽主以为然遂遣颇克绰欢及前后所献罪人皆还之

△和诺克 【萨克达】

和诺克萨克达国相雅达之子也居完颜部伊敦村雅达称国相不知其所从来景祖尝以币与马求于雅达得国相以命肃宗和诺克兄弟尝事景祖世祖初季父伯赫有异志阴诱和诺克欲与为乱会世祖从昭肃皇后往伊敦村与和诺克萨克达被酒纷争自是谋益甚间数年乌春叛世祖亲拒之和诺克兄弟遂起兵肃宗拒以偏师世祖戒之曰可和则和否则战至乌噜斯哈珠水既阵肃宗使富德贝勒和和诺克恃乌春之在北也和无意富德来报或请退军诱之宽地肃宗惑之乃令军少却未成列和诺克萨克达乘之肃宗遂败和诺克乘胜大肆抄略世祖闻之引众经舍琿特克两水取和诺克萨克达之家焚其所居杀略百许人而还未至军肃宗又败世祖至责让失利之状使罕都伊克以本部七穆昆助之复遣人议和和诺克萨克达欲得英格之大赤马希卜苏之紫骝马世祖不许遂与博都哩部布呼富察部萨克苏及混同江左右布克坦水北诸部兵皆会厚集为阵鸣鼓作气和诺克恃其众有必胜之心下令曰今天门开矣悉以尔车自随乌古鼐夫妇宝货财产资尔

取之有不从者俘略之而去和诺克至北陆甸世祖将出兵闻伯赫已死乃遣肃宗求援于辽戒希卜苏整军速进使待于托果原将战世祖并人与穆宗私语兵败则乞师以报讎仍令穆宗勿预战事介马以观胜负先图去就乃弃旗提剑身为军锋尽锐搏战和诺克步军以干盾进世祖之众以长枪击之步军大败希小苏从后奋击之骑兵亦败尽获所弃车甲马牛军实颁于将士和诺克萨克达寻以其属来降布呼犹保萨喇村招之不出萨克苏据乌鲁斯哈珠村世祖遣人与之议和萨克苏谩言戏答有人从道傍射之中口死布呼之属舒噜亦杀布呼而降

△乌春

乌春阿卜萨水温都部人以鍛铁为业因岁歉策杖负担与其族属来归景祖与之处以本业自给既而知其果敢善断命为温都部长遣其甥完颜富德送归世祖初嗣节度使叔父伯赫阴怀觊觎间诱和诺克萨克达及乌春乌木罕等为变乌春由是颇贰于世祖而虐用其众部人来诉世祖使人让之乌春曰吾与汝父等辈旧人汝为长能几日千汝何事世祖内畏伯赫恐羣朋为变曲意怀抚乌春欲发兵无以为端瓜尔佳部鄂博合亦铁工也以被甲九千来售乌春闻之使人来让曰甲吾甲也拉林水以南布克坦水以北皆吾土也何故辄取吾甲其亟以归我世祖曰彼以甲来市吾与直而售之乌春意沮诡言必欲和解则使伯赫之子色克及色埒来世祖度其意非真不得已而遣之乃谓色埒曰色克无害彼且执汝矣宜辞疾勿往既而同行者强之乌春果厚礼色克而执色埒曰得甲则生否则死世祖与以甲色埒乃得归乌春自此益无所惮后数年乌春举兵来战由色辰岭涉和伦拉林水舍于珠格部阿勒哈村时十月中大雨累昼夜不止冰斯覆地乌春不能进乃引去沃呼部人博诺旧事景祖至是亦有他志与乌春乌木罕结约乌春举兵度岭世祖驻军温辟村以待将战命肃宗自上风纵火击之乌春大败复获博诺献于辽而城苏素海甸以据之世祖与拉必玛察战乌春助拉必以古哩甸兵百十七人世祖擒拉必献于辽并言乌春助兵之状仍以不修鹰道罪之辽主使人问状乌春为谰言答之拉必既败世祖尽得古哩甸兵乃使罕都为都统破乌春乌木罕于实都而自将过沃济岭至乌木罕村和伦瓜尔佳部双宽贝勒居乌雅部富哲固纳以所部与乌春近请分一军由所部伐之乃使色埒默雅尔盘以支军道其所居世祖自将大军与罕都合至阿卜萨水岭东诸部皆会实图美亦以所部兵来是时乌春前死乌木罕闻知世祖来伐诉于辽人乞与和解使者已至其家世祖军至乌木罕请缓师尽以前所纳亡人归之世祖使乌凌阿果多欢贝勒往受

乌木罕以三百骑乘懈来攻世祖败之辽使恶其无信
不复为主和乃进军围之太祖衣短甲行围号令诸军乌木罕使托云潜出城攻之托云
驰马援枪将及太祖和尔和击断其枪太祖乃得免色
埒默至色辰水用固纳计取乌春军二十人益以土军来助乌木罕自知不敌乃遁去遂
克其城尽以赀产分赉军中诸部皆安辑焉穆宗常嘉
固纳功后以色埒默之女守宁妻其子呼尔罕乌春之后为温都氏裔孙曰布拉

温都布拉

温都布拉

温都布拉始居长白山阿布伞河徙隆州额勒敏河初从希尹征伐摄明安穆昆事
遇贼突出力击败之手杀二十余人擢修武校尉天德
初充护卫迁宿直将军海陵以其善射赏以玉鞍銜往海兰路选可充护卫者使还称旨
迁伊啰斡羣牧使改辽州刺史正隆伐宋召为武翼军
副都总管将兵二千至汝州南遇宋兵二万余邀击败之手杀将士十余人时嵩汝两州
百姓多逃去布拉招集使复其业改莫州刺史征为太
子左卫率府率再迁陇州防御使历镇西呼尔哈显德军节度使致仕卒

△拉必 【玛察】

拉必玛察者哈勒浑水赫林乡赫舍哩部人也兄弟七人素有名声人推服之及乌
春乌木罕等为难乘机结屯水之民浸不可制其同里
中有避之者徙于必罕村野居女真中拉必怒将攻之乃约乌库哩部萨兰贝勒富哲达
兰呼实默贝勒和罗贝勒温绰欢贝勒和罗温绰欢间
使人告野居女真为备拉必等败归复由南路袭野居女真胜之俘略甚众和罗温绰欢
呼实默畏拉必求援于世祖命色埒默以轻兵邀击于
特默图村败之尽得所俘拉必玛察驱掠拉林水牧马世祖至混同江与穆宗分军世祖
自图克勒津倍道兼行马多乏皆留之路傍从五六十
骑遇拉必于野鹊水日已曛立必兵众世祖突阵力战中四创不能军穆宗自额图琿津
渡江遇敌于巴尔密特水矢着弓箠是岁拉必玛察使
其徒吉逊通阿及托迪剽取呼拉布添牧马四百及富哲尼堪之马合七百余匹过青岭
东与乌春乌木罕交结世祖自将伐之拉必等伪降还
军拉必复求助于乌春乌木罕乌木罕以古哩甸兵百有十七人助之 【按乌春传拉必
求援乌春助以古哩甸兵百有十七人此又云乌木
罕以古哩甸兵百有十七人助之意乌春乌木罕比周为党故拉此互言之欤】 拉必据
穆棱水保固险阻为世祖所擒尽获其兵世祖既歿肃
宗袭节度使玛察据哲克依水缮完营堡招纳亡命杜绝往来者恃屯水民为之助招之
不听使康宗伐之是岁白山混同江大溢水与岸齐康

宗自阿林冈乘舟至于刷水舍舟沿刷水而进使太祖从东路取玛察家属尽获之康宗围玛察玛察突围遯去太祖与呼噜古分道追之至哲克依水玛察弃马入萑苇罕都射中其首擒而杀之献馘于辽

△埒克

埒克图们琿春水合流之地乌库哩部人呼沙呼之子卓多琿春水安春之呼沙呼之子也间诱乌孙乌塔两部之民作乱达萨塔通恩皆叛而与埒克卓多合两党扬言曰图克坦部之党十四部为一乌库哩部之党十四部为一富察部之党七部为一凡三十五部完颜部十二而已以三十五部战十二部三人战一人也胜之必矣世祖降附诸部亦皆有离心穆宗使萨哈伐埒克使们图琿伐达萨塔既而太祖以七十甲诣萨哈军中道分四十甲与们图琿实图美之军与们图琿会于穆噜密斯罕城下而通恩将援埒克闻们图琿兵寡先攻们图琿们图琿实图美迎击大破之遂降获通恩达萨塔皆释弗诛太祖至萨哈军明日遂攻破埒克城乌塔城亦撤守备而降埒克先在辽乌塔已税身在外由是皆未获卓多诣普嘉努降太祖释之于是诸部皆安业如故久之埒克乌塔皆来降

△阿苏

阿苏锡馨水赫舍哩部人父阿哈事景祖世祖破乌春还阿哈率官属士民迎谒献黄金五斗世祖喻之曰乌春本微贱吾父抚育之使为部长而忘大恩乃结怨于我遂城大乱自取灭亡吾与汝等三十部之人自今可以保安休息我死汝等当念我竭力以辅我子弟若乱心一生则灭亡如乌春矣未几世祖没阿哈亦死阿苏继之阿苏自其父时常以事来昭肃皇后甚怜爱之每至必留月余乃遣归阿苏既为贝勒尝与图克坦部卓多贝勒争长肃宗治之乃长阿苏穆宗嗣节度闻阿苏有异志召赐鞍马深加抚谕阿苏谋益甚复召之不来遂与同部穆都哩等起兵穆宗自玛奇岭攻之萨哈自和伦岭往略定珊沁锡馨两路攻下通恩城穆宗至阿苏城阿苏往诉于辽辽人来止勿攻穆宗不得已留和卓守阿苏城而归五年【按金世纪穆宗三年丙子留和卓守阿苏城七年庚辰穆都哩降则是已历五年也原文作二年今改正】阿苏在辽不敢归穆都哩乃降辽使复为阿苏来穆宗闻之使乌凌达舒噜济师且戒和卓令易衣服旗帜与阿苏城中同色使辽使不可辨辽使至乃使呼噜密逊俱至和卓军和卓诡曰吾等自相改干汝何事谁识汝之太师乃刺杀呼噜密逊所乘马辽使惊去遂破其破杀阿苏弟达呼布阿苏复诉于辽辽使伊喇来问状穆宗因使矩威图塔水人伪阻绝鹰路者而使人言平鹰路非生女真节度使不可辽主信之穆宗畋于屯水谓

辽人曰吾平鹰路也辽人使来赏之而阿苏事遂止阿苏在辽无所归后二年使其徒德济至生女真界上海兰甸人畏穆宗执而送之及太祖伐辽底辽之绩告于天地而以阿苏亡命辽人不与为言凡与辽往复书命必及之大辅六年栋摩罗索略定天德等州获阿苏军士问之曰尔为谁曰我破辽鬼也太祖杖而释之

钦定续通志卷四百二十三

●钦定续通志卷四百二十四 列传二百二十四

列传

金 【二】

○金二

罕都【默音】	伊克【阿里布	固纳	额尔古讷芬彻】	希卜苏
【宗亨 宗贤】	萨哈【宗宪】	斡		
鲁 乌楞古	博勒和【乌哲库】		尼楚赫【古云】	玛奇【
乌色】	巴尔斯			

罕都 【默音】

伊克

希卜苏

萨哈

斡鲁

乌楞古

博勒和

尼楚赫

玛奇

巴尔斯

△罕都 【默音】

罕都完颜部人祖舒噜与昭祖同时同部同名交相得誓曰生则同川居死则同谷葬土人呼为贤舒噜而别昭祖为勇舒噜昭祖尝同贤舒噜虏舒舒水人二女长曰达呼幼曰济色各纳其一以为妾舒噜生噶顺景祖时举部来归罕都噶顺子也世祖初袭节度使伯赫蓄异谋不可制诸部相继为变罕都入与谋议出临战阵未尝去左右沃呼部人博诺自景祖时与其兄弟俱居安春水之北及乌春作难博诺与之相结欲先除去罕都会其家破火阴约隶人布格苏诬放火为罕都遣人谓世祖曰布格苏来告曰前日之火罕都等纵之若不弃旧好其执纵火之人以来世祖疑之苏尔噶勒曰博诺兄弟也岂以一二人之故而与兄弟构怨乎不如与

之便罕都被甲执戟而起曰彼为乱之人若取太师兄弟亦与之平今取我辈我辈决不可往若必用战当尽力致死穆宗曰壮哉罕都赠以马曰战则乘此世祖往见博诺隔必喇水而与之言曰所告纵火之由谨当如约当先遣布格苏来布格苏至世祖于马前杀之拉必玛察与世祖遇于野鹊水罕都入敌阵鏖击之左右出入者数四乌春乌木罕据哈勒浑水世祖既许之降以萨喇达兰不助军欲因军还灭之达兰者贞惠皇后之弟也罕都下马执辔而谏曰独不念费扬古与弟妇乎世祖感其言遂止费扬古汉语幼弟也世祖母弟中穆宗最少故云然穆宗德之后以达兰女妻其子古绅太祖追玛察罕都射中其首遂获之辽人命穆宗太祖希卜苏罕都俱为详袞额森乌尔图以古哩甸兵来归使萨布抚定之富察部古实巴克实等诱其众入城陷三百余人罕都为都统往治萨布失军之状尽解萨布所将军大破乌春乌木罕于实都擒古实巴克实初纳哈塔部萨巴之弟曰安扎与人争部族官不得来归穆宗安扎之甥曰萨塔告安札必为变穆宗不信而杀之后穆宗晨出猎安扎纠率七八人操兵入宅夺据寝门劫贞惠皇后及家人等罕都入见安扎曰闺门眷属岂足劫质汝固议我盍以我为质安扎从之贞惠皇后乃得解而质罕都萨哈使人告急于猎所穆宗亦心动罢猎中途逢告者日午至安扎谓穆宗曰可使女真知名官僚送我兄弟亲属由咸州路入辽图库金厩马与我勿惜罕都亦当送我至辽境然后还穆宗皆从之遂执罕都等七人以衣裾相结送至辽境乃释之罕都至黄龙府使人驰要安扎党属具报于辽辽人流之和勒端城初穆宗袭位诸父之子锡林萨布及诸兄有异言曰君相之位皆渠辈为之柰何罕都曰汝辈若纷争则吾必不默默但已众闻之遂帖然自是不复有异言者罕都事四君出入四十年世祖尝曰吾有罕都则何事不成肃宗委任冠于近僚穆宗嗣位凡图辽事皆专委之康宗尤加敬礼康宗十一年得疾避于默勒们水薨年六十三丧归康宗亲迓于路送至其家亲视葬事天会十五年追赠仪同三司代国公明昌五年赠开府仪同三司谥曰忠敏子古绅默音古绅自有传默音当安扎之难从罕都代为质后与宗峻俱侍太宗宗峻坐默音上帝怒命坐其下贝勒拉巴哩博克顺希卜苏三人争千户帝曰汝辈能如罕都父子有劳于国者乎乃命默音为千户三人者皆隶焉其眷顾如此天辅五年十二月卒天会十五年赠太子少傅

△伊克

伊克系出景祖居舍音水为完颜部贝勒与同部人巴哩贝勒安图贝勒及诸部贝

勒俱来归金国自此益大肃宗拒和诺克再失利世祖
命罕都伊克以本部穆昆之兵助之伊克与罕都常在世祖左右居则与谋议出则莅行
阵未尝不在其间天会十五年赠银青光禄大夫明昌
五年赠特进谥忠济与罕都和卓博诺巴达俱配享世祖庙庭子阿里布固纳额尔古讷
萨克达萨克达子芬彻

阿里布

固纳

额尔古讷

芬彻

阿里布

阿里布魁伟多知略勇于战未冠从军下咸州东京辽人来取海州从贝勒玛奇往
援道遇重敌力战斩首千级从乌楞古攻豪懿州以十
余骑破敌七百命徇北城招降营帐并民户数千时已下西京栋摩攻应州未下退营于
州北夜遣阿里布率兵伺敌城中出兵三千来袭阿里
布与之遇斩首百余获马六十后辽兵三万出马邑以千骑击之斩其将于阵天会初宋
王宗望讨张觉遣与阿勒达迎击应州援兵斩馘数千
而还复从其足约罕率兵三千攻干州约罕道病卒代领其众至干州降其军与布呼攻
下义州宗望伐宋与郭药师战于白河命阿里布以二
穆昆先登奋战赏赉特异至汴破淮南援兵斩其二将大军退次孟阳姚平仲来袭阿里
布适当其中力战败之还屋河闻大名开德合兵十余
万来争即夜发轻兵诘旦至卫县遇敌斩首数千级余皆溃去师次邢州滹沱桥已焚阿
里布先以偏师营于水上比军至而桥成宗望大喜赏
以真定库物论功迁长胜军千户再从伐宋破敌于井陘遂下栾城自大名济河屯于洺
州之境时宋康王留相州大名府以兵来攻我营阿里
布乘夜以骑二百潜出其后反击败之居数日敌复来以三百骑出战大败甚众生擒苏
统制杀之大军既克汴京遂下洺州从达兰攻恩州还
洺人复叛阿里布先至城下城中出兵来战败之执其守佐遂与富埒瑋取信德军梁王
宗弼取开德阿里布以步兵五千赴之大名境内多盗
命阿里布留屯其地贼犯莘县闻阿里布至即溃去追袭一昼夜至馆陶及之皆俘以归
从宗弼袭康王既渡淮阿里布以兵四千留和州总督
江淮间戍将以讨未附郡县遂攻下太平州隳其城庐州叛以偏师讨之败其骑六十明
日复破敌二万于慎县张永合步骑数万来战阿里布
兵止二千敌围之溃围力战竟败之追杀四十里获马三百而还再攻庐州与达呼布败
敌万众于柘皋至庐州骑兵五百出战败之师还宗弼

趋陕西道闻大名复叛遣阿里布经略之独与译者至城下招之大名果降悉收民间兵器吏民按堵如故擢为大名开德路都统齐国建阿里布屯兵于汴城外天会十五年诏废齐国已执刘麟乃先入汴京备变明年除归德尹割河南地与宋入为燕京内省使宗弼复河南命先济河抚定诸郡再为归德尹河南路都统宋兵来取河南地宗弼召诸将会于汴阿里布以敌在近独不赴而宋将岳飞刘光世等果乘间袭取许颖陈三州【按宋史绍兴十年岳飞收复顺昌颖昌淮宁诸府及蔡郑汝赵等州顺昌即颍州颖昌即许州淮宁即陈州也】兵犯归德阿里布连击败之复取亳宿等州河南平阿里布功最皇统五年为行台参知政事改元帅右监军博索路统军归德军节度使累阶仪同三司海陵在军中尝恶之发其在汴时取官舍材木构私第于恩州遂论死阿里布以将家子从征伐屡立功历官有惠爱得民心及死人皆惜之大定三年赠仪同三司诏以其子为右卫将军袭明安及亲管穆昆

固纳

固纳善骑射有才干从讨和诺克萨克达乌春乌木罕埒克之叛皆有功从太祖伐辽力战宁江州珠赫店破辽主亲军皆受赏赉袭其父穆昆宗翰伐宋令以右翼军佐尼楚赫守太原是时汾州岚宪潞团柏榆次皆有兵来援固纳皆破之大军围汴复引万户军屡败其援兵宪潞等州复叛引兵取之并收抚保德火山而还后领军镇夏边在职十二年天会八年授世袭明安天眷初为天德军节度使致仕累迁开府仪同三司卒年八十五子喜格袭明安加宣武将军

额尔古讷

额尔古讷姿质魁伟年十四隶宗翰军中善驰驿日能千里常领兵行前为侦候大军袭辽主北部勇者通古来援临阵擒之引甲骑六十追辽招讨徒山获之又以七骑追获辽公主额布勒以献及伐宋屡遣将命以行天会八年从宗翰在燕闻伊都反于西北令驰驿以往黎明走天德及至日未曛也皇统元年以功授宁远大将军哈喇唐古部节度使五年授千户六年迁西北路招讨使九年再迁天德尹西南路招讨使天德四年迁临洮尹加金紫光禄大夫卒于官

芬彻

芬彻自上京密齐显河徙屯天德初为元帅府章京使按四方能得其实皇统间除同知开远军节度使斥候严整边境无事正隆初为中都路兵马判官捕京畿盗四十余人百姓获安改安化军节度副使大定二年领行军万户充邳州刺史知军事领本州岛万户管所屯九明安军

昌武军节度使山东副都统萨哈南征行元帅府副统事入为太子少詹事袭伯父固纳明安厯博索路兵马都总管西北路招讨使卒芬彻性廉洁忠直临事能断凡被任使无不称云

△希卜苏

希卜苏昭祖之孙乌肯彻次子也希卜苏健捷能左右射世祖袭节度与肃宗拒和诺克萨克达战于乌噜斯哈珠水已再失利世祖使希卜苏先阵于托果改原而身出搏战败其步军希卜苏自阵后奋击之败其骑军所乘马中九矢不能驰遂步趋而出是役也希卜苏之功居多世祖尝疑珠嘉布勒图与乌春等为变遣希卜苏单骑往观布勒图与呼噜置酒楼上以令之希卜苏闻其私语昵昵若将执已者一跃下楼傍出藩篱之外弃马而归其勇趋如此博诺约乌春举兵世祖至苏素海甸与乌春遇肃宗前战色埒希卜苏佐之束蕴纵火烟焰蔽天大败乌春执博诺以归太祖获玛察献馘于辽人赏功穆宗太祖罕都希卜苏皆为详袞焉后与鄂兰哈玛尔威泰佐萨哈攻埒克城下之太祖伐辽使领兵千人夹侍左右珠赫店之役惟希卜苏之策与太祖合卒破十万之师挫其军锋遂与太宗萨哈等劝进收国元年七月为爱满贝勒天辅七年太宗与希卜苏居守郛王昂违律失众法当死于时辽人以燕京降宋人约岁币三月世宗生希卜苏谓太宗曰兄弟骨肉以恩掩义宁屈法以全之今国家迭有大庆可减昂以无死若主上有责言以我为说太宗然之遂杖昂以闻太祖每伐辽辄命希卜苏与太宗居守虽无方面功而倚任与萨哈侔矣是岁七月薨正隆二年赠开府仪同三司追封曹国公大定三年进封金源郡王配飨太祖庙庭谥忠毅子呼沙呼国初有功天会中为真定留守孙宗亨宗贤

宗亨

宗贤

宗亨

宗亨本名托卜嘉性忠谨天辅初充护卫擒宗盘宗隼有功加忠勇校尉迁昭信校尉尚厯局直长三年升本局副使丁父忧时宗正官属例以材选宗亨在选中遂起复为乌克逊达宗室将军改会宁府少尹厯登州献州刺史泽州定为特们羣牧使同知北京路转运使改泽州定国军节度使海陵南伐以本职领武阳军都总管过淮世宗即位班赐手诏即入朝大定二年授右宣徽使未几为西北路兵马都统讨契丹贼斡罕富察世杰等以七穆昆军与之战失利及斡罕败其赏瓜里扎巴率众南奔宗亨追及之扎巴诈称降宗亨信之扎巴诡曰瓜里走愿往邀

宗亨纵之去 【原文作宗亨不听按斡罕传扎巴诳宗亨宗亨纵之去益都明安欲追之宗亨不听原文盖删节之误也今改正】 复纵军士

取贼所弃囊橐人畜多自有之瓜里扎巴亡入于宋坐降宁州刺史

宗贤

宗贤本名色哩从都统杲袭辽主于鸳鸯泺又从普嘉努以兵助达兰袭耶律玛格普嘉努使诸将率兵分行招谕获辽留守迪越家人辎重并降羣牧官穆喇斡得马甚多色哩等趋伊德遂以偏师深入敌邀击之萨哈战没普嘉努至旺国崖西色哩以兵会之累官至右副点检天眷二年方捕宗隽色哩坐会饮其家夺官爵未几复官皇统四年授世袭穆昆转都点检封豳国公拜平章政事累加太保左丞相监修国史进太师领三省事兼都元帅出为南京留守领行台尚书省事兼西京留守色哩自护卫未十年位兼将相常感激思自效于悼后为母党后专政色哩未尝附丽熙宗未有嗣子色哩请选后宫以广继嗣后以此怨之与海陵同在相位不少假借为海陵所忌因与后其排出之色哩亦不以是少变胙王常胜死熙宗纳其妻宫中顷之杀悼后将以常胜妻为后未果也及海陵弑熙宗诡以熙宗将议立后召诸王大臣色哩闻召将入宫谓人曰帝必欲立常胜妻为后我当力争之及被执犹以为熙宗将立常胜妻而先杀之也曰谁能为我言者我死固不足惜独念主上左右无助尔遂遇害

△萨哈

萨哈韩国公和卓长子景祖之孙也穆宗初袭位念和卓长兄不得立命为国相穆宗锄除强梗不服者使萨哈取玛奇岭道攻阿苏穆宗自将期会阿苏城下萨哈行次阿卜萨水乌雅部色埒贝勒来谒谓萨哈曰闻国相将与太师会攻阿苏此为深入必取之策宜先抚定珊沁锡馨路落其党附夺其民人然后合军未晚也萨哈从之攻通恩城请济师穆宗与之萨哈遂攻下通恩城而与穆宗会阿苏城下时通恩在南阿苏在北穆宗闻萨哈用色埒计先取通恩颇不然之及辽使来止勿攻阿苏然后深以先取通恩为功也寻以国相都统讨埒克卓多乌塔等军埒克卓多乌塔通恩皆降康宗没太祖称达贝勒与萨哈分治诸部必塔水以北太祖统之拉林水人民萨哈统之明年太祖伐辽战于界上获色实太祖使告克于萨哈赐以所获色实乘马萨哈及将士皆驩呼曰义兵始至辽界一战而胜灭辽自此始矣遣子宗翰及完颜希尹来贺捷因劝进太祖未之从也十月克宁江州破辽军十万余于鸭子河师还太宗及萨哈希卜苏率诸将复劝进收国元年正月朔太祖即位行国相如

故时羣臣奏事萨哈等前跪太祖起泣止之曰今日成功皆诸君协辅之力虽处大位未易改旧俗也萨哈等感激再拜谢天辅后始正君臣之礼焉七月萨哈为古伦贝勒九月加古伦乌赫哩贝勒天辅五年薨太祖往吊乘白马斃额哭之恸及葬复亲临之萨哈为人敦厚多智长于用人家居纯俭好稼穡自始为国相能驯服诸部讼狱得其情及伐辽每以宗臣为内外倚重天会十五年追封燕国王正隆时降封陈国公大定三年改赠金源郡王配飨太祖庙庭谥忠毅十五年诏图像于衍庆宫子宗翰宗宪宗翰别有传

宗宪

宗宪

宗宪本名阿兰年十六选入学习女真字书兼通契丹汉字未冠从宗翰伐宋汴京破众人争趋府军取财物宗宪独载图书以归朝廷议制度礼乐往往因仍辽旧宗宪曰方今奄有辽宋当远引前古因时制宜成一代之法何乃近取辽人制度哉希尹由是器重之达兰宗隽倡议以齐地与宋宗宪力争不听后以捕宗盘宗隽功授昭武大将军修国史累官尚书左丞宗弼复取河南陕西地熙宗从容谓之曰卿向以河南陕西地不当与宋今复取之犹用卿言也卿识虑深远自今以往其尽言无隐遂摄门下侍郎初熙宗以疑似杀左丞相希尹久之察其无罪将录用其孙以语宗宪宗宪对曰不先明死者无罪生者何由得仕熙宗曰卿言是也即日复希尹官爵用其孙守道为应奉翰林文字皇统五年将肆赦议覃恩止及女真人宗宪奏曰莫非王臣庆幸岂可有间耶遂改其文使均被焉转行台平章政事天德初为中京留守武安军节度使封河内郡王改太原尹进封巨鹿郡王正隆例夺王爵再迁震武武定军节度使世宗即位遣使召之宗宪先已弃官来归与使者遇于中都遂见世宗于小辽口除中都留守即遣赴任诏与元帅完颜古云同议军事明年改西京留守八月改南京布萨忠义自行台朝京师宗宪摄行台尚书省事召为太子太师世宗谓宗宪曰卿年老旧人更事多矣皇太子年尚少谨训导之俄拜平章政事太子太师如故赐以太祖实录伊喇高善努前为宁州刺史以贪污免世宗以其祖父有功擢为秘书少监宗宪曰高善努傲很贪墨不可致之左右世祖即追还制命有司言诸路明安穆昆怙其世袭多援民请同流官以三十月为考诏下尚书省议宗宪乃上议曰昔太祖皇帝抚定天下誓封功臣袭明安穆昆今若改为迁调非太祖约臣谓当明核善恶进贤退不肖有不职者更择弟侄贤者代之遂从其议进拜右丞相大定六年薨命百官致尊以贖以重彩银

绢

△斡鲁

斡鲁韩国公和卓次子康宗初与乌巴佐威泰伐沃赫拔其城以归高丽筑九城于海兰甸乌色母疾病斡鲁代将其兵者数月亦对筑九城与高丽抗出则战入则守乌色用之卒败高丽收国二年四月诏斡鲁统诸军与栋摩芬彻都古噜讷合咸州路都统乌楞古等伐高永昌永昌渤海人在辽为牌将以兵三千屯东京八甬口见辽政日败覬觐非常乘东京汉人与渤海人有怨乃诱诸渤海并其戍卒入据东京旬月之间远近响应有兵八千人遂僭称帝改元隆基辽人讨之久不能克永昌使托卜嘉标哈以币求救于太祖且愿并力取辽太祖使华沙布往谕之永昌使托卜嘉呼图克与华沙布偕来而表辞不逊且请还所俘渤海人太祖留呼图克不遣遣大药师努与托卜嘉往招谕之斡鲁方趋东京辽兵六万来攻昭苏城额图珙贝勒乌鲁斯准与战于伊都大破之五月斡鲁复败辽军遂进取浑州永昌大惧使家奴道拉赍金印银牌来愿去名号称藩斡鲁使华沙布萨巴往报之会渤海高禛降言永昌非真降者特以缓师尔斡鲁进兵永昌遂杀华沙布等率众拒于鄂尔和我军既济敌军不战而郤逐北至东京城下明日复战大败之遂以五千骑奔长松岛初太祖下宁江州获东京渤海人皆释之往往中道亡去诸将请杀之太祖曰既已克敌下城何为多杀此辈亡去后日当有效用者至是所释东京人恩胜努仙格等执永昌妻子以城降未几托卜嘉执永昌及道拉以献皆杀之于是辽人南路系籍女真及东京州县尽降以斡鲁为南路都统德特贝勒留乌珍知东京事诏除辽法省赋税置明安穆昆一如本朝之制矩威水部锡勒哈塔杀绰哈布古德斡鲁分和隆果乌珍之兵讨之至希尔哈河锡勒哈塔遁去追及于哈达拉山诛其首恶四人抚定余众赐诏嘉奖令以其民三百户为一穆昆择众所推服者领之仍质其子弟斡鲁乃还天眷中从都统袭辽主辽主西走西京已降复叛敌据城西浮图下射攻城者斡鲁与哈布尔攻浮图夺之复以精锐乘浮图下射城中遂破西京夏国主使李仁辅将兵三万来救辽次于天德斡鲁与罗索合军击败之拜西南路都统宗望副之袭辽主于阴山青冢间使巴喇伞萨噶尔玛克以兵二百袭辽权六院司喀勒扎于白水泝获之辽主留鞬重于青冢领兵一万往应州遣卓哩布达各率兵邀之宗望奄至辽主营尽俘其妻子宗族得其传国玺斡鲁使使奏捷诏徧谕有功将士俟朕至彼当次第推赏辽主戚属勿去其輿帐善抚存之辽主伶俜去国恐陨其命如招之肯来以其宗族付之辽赵王

实讷埒及诸官吏并释其罪太祖还京师命副宗翰为西北西南两路都统奏言夏人不尽归户口资币又以宋人侵赐地求援兵宋之边臣将取所赐夏人疆土盖有异图诏令谨守备尽索在夏户口通闻两国事审处之斡鲁复请勿割山西与宋则辽主不能与宋郭药师交通诏从之宗翰等伐宋斡鲁行西南西北两路都统事天会五年薨皇统五年追封郑国王天德二年配飨太祖庙庭子萨巴银青光禄大夫孙色哩

△乌楞古

乌楞古贝勒宗室子也太祖伐辽使乌楞古阿鲁抚谕斡瑋集赛两路系辽女真与辽节度使托卜嘉战败之斩托卜嘉古讷岭乌尔图罕等十四达哈藩及斡瑋集赛两路皆降复败辽都统锡埒于咸州西斩之与罗索克咸州图们呼图以所部降邻部户七千亦来归遂与辽将赫伯战破其军数万人太祖嘉之以为咸州军师佐斡鲁伐高永昌辽秦晋国王耶律聂呼来伐都古噜讷罗索博勒和等将二万众合乌楞古咸州兵往击之呼图克叛入于辽居东京南永昌据东京太祖索之以归乌楞古伐永昌以便宜署呼图克为千户苏都哩鄂勒博皆无功亦以便宜除官及以便宜解权穆昆哈布尔黄格达希布等职皆非其罪太祖闻之尽复哈布尔等穆昆呼图克等皆罢去时乌楞古军中阙马官马多匿私家命检括之耶律聂呼佛德遗乌楞古书请和乌楞古以聂呼书并所答书来上且请曰复有书问宜如何报之诏曰若彼再来请和汝当答以归我行人萨喇及送叛臣阿苏等则和好之议方敢奏闻仍恐议和非实无失备御耶律聂呼军蒞藜山乌楞古以兵一万戍东京太祖使都古噜讷罗索复以兵一万益之诏将士拒命者讨之服者抚安之毋肆杀戮因命传诏聂呼曰汝等诚欲请和当废黜昏主择立贤者副朕吊伐之意然后可议约不然当尽并尔国其审图之聂呼复书乌楞古求还降人赫伯则送阿苏等帝以赫伯等乃交兵之后来降与阿苏平日以罪亡去者异复诏聂呼令此月十三日送阿苏至显州各遣重臣议疆场事乌楞古等攻显州知东京事完颜鄂伦兵来会即渡辽水薄显州郭药师乘夜来袭鄂伦击走之乌楞古等大败聂呼等于蒞藜山追至额勒津陂获佛德家属进攻显州城军士实都先登烧其佛寺烟焰扑人守陴者不能立诸军乘之遂拔显州于是干懿豪徽成川惠等州皆降聂呼再以书来请和乌楞古承前诏以阿苏为言答之驻军显州以听命赐乌楞古等诏曰辽主未获人心易望不可恃战胜而失备御乌楞古久在咸州多立功亦多自恣和勒博双宽等告乌楞古知辽主在中京而不追袭咸州粮草丰足而奏事不以实攻显州获生口财畜多自取遂以栋格代为咸州路

都统栋格亦宗室子也既治咸州诏使于新迁显州降附之民择其才可用者授之穆昆其豪右诚心归款者拟为明安录其姓名以闻饥贫之民官振给之而使栋摩为其副统云久之辽通祺双辽四州之民八百余家诣咸州都统降命分置诸部择善地以处之太祖召乌楞古自问之乌楞古引伏诏降为穆昆天辅六年讨贼于牛心山道病卒天眷中赠特进天德二年配飨太祖庙庭大定十五年谥庄翼

△博勒和

博勒和安帝五代孙太祖伐辽使征都古嚕讷兵失期杖之后与瑋楚以四千人助罗索尼楚赫攻黄龙府齐达勒部人萨里罕察必达尔兄弟尝寇扎兰路穆宗遣博勒和讨之至阿里玛河萨里罕伪降遂略马畜而去复掠沃楞部二十五寨太祖复使博勒和讨之专勒和渡索欢河招降房近诸部因籍丁壮为军至特通额水察必达尔伪降复叛去执而杀之博勒和进破德里城萨里罕遁去执其妻子萨里罕乃降齐达勒部产良马太祖使赫舍哩阿实罕掌其畜牧博勒和及子博索俱为穆昆天辅五年摘取诸路明安万余家屯田于泰州博勒和为都统赐耕牛五十博勒和旧居按春水自是徙居泰州而遣实登扎克丹阿里托欢锡勒塔等俱徙焉太祖取燕京博勒和为右翼兵出居庸关大败辽兵遂取居庸萧妃遁去都监高禄等乞降实古纳追萧妃至古北口不及而还帝令博勒和和色哩率轻骑追之萧妃已远去获其从官统军察喇宣徽扎拉并其家族及银牌二印十有一及达喇叛博勒和实古纳讨平之其羣官率众降者就使领其所部太祖以空名宣头及银牌给之同时有博勒和者监罗索军平陕西后为平阳尹西南路招讨使终庆阳尹泰州博勒和守边有功天会十二年加同中书门下平章事天眷元年驻乌尔古德呼勒地薨赠开府仪同三司谥刚毅子博硕袭明安天眷二年为泰州副都统子威泰广威将军博索官特进孙乌哲库

乌哲库

乌哲库

乌哲库善骑射年二十以本班祇候郎君都管从征伐有功授修武校尉皇统二年权领泰州军平陕西至泾州大破宋兵于马西镇超迁宁远大将军袭明安【按金皇统二年宋绍兴十二年也是岁和议已成终熙宗之世未闻有侵伐之兵本传所载恐有谬误】正隆末从海陵伐宋契丹反与德昌军节度使伊苏玛勒同讨契丹许以便宜从事大定初除咸平尹驻军泰州俄改临潢尹摄元帅左都监与右都监实图美解临淇之围契丹引众东行乌哲库追及余斡里山为押军明安契丹呼噜苏以所部

助敌攻官军官军失利泰州节度使乌哩页来救未至
临潢与敌遇乌哩页败仅以数骑脱归敌攻泰州四面登城押军明安乌克逊阿里布率
军士循城力战斫刈甚众敌乃退泰州得完乌哲库乃
使穆昆富埒瑋徙百姓旁邑及险阨之地以俟大军明年聚甲士万三千于济州会元帅
默音败斡罕于长冻战霜■〈雨上松下〉河又战陷
泉皆有功改呼尔哈节度使卒乌哲库有才智善用兵常出敌不意能以寡敌众所向必
克号为鹞军云

△尼楚赫

尼楚赫宗室子太祖嗣位使普嘉努如辽取阿苏事久不决使实古纳尼楚赫继往
还言辽主荒于政上下解体太祖遂决意伐辽太祖与
耶律鄂尔多战于达噜噶城辽兵二十余万尼楚赫与罗索率众陷阵大败辽军遂与罗
索戍边俱攻黄龙府太祖拒辽兵尼楚赫字达噜噶城
收国二年分雅达纳阿拉所迁穆昆二千户以尼楚赫为穆昆屯宁江州从都统杲克中
京尼楚赫与实古纳芬彻哈布尔率兵三千击奚王锡
默于京西锡默弃兵遯辽主西奔天德尼楚赫以兵绝其后辽主遂见获后从宗翰伐宋
攻太原未下宗翰还西京命尼楚赫留兵围之宋樊夔
施洗高豊等军来救太原分据近部尼楚赫与实实博啰乌苏大破之种师中出井陘据
榆次救太原尼楚赫使鄂伦击之破其军和尼斡师中
于杀麋岭进攻宋制置使姚古军于隆州谷大败之萨喇图败宋军于回马口郭企忠歼
宋军于五台及宗翰定太原与宗望会兵于汴尼楚赫
等攻汴城克之师还尼楚赫降岢岚宁化等军攻岚州拔之招降火山军与希尹同赐铁
券宗翰趋洛阳尼楚赫取邓州杀其将李操等 【按
徐梦莘三朝北盟会编云尼楚赫寇邓州安抚使刘汲被杀节度使判官李操叛降于金
本传亦以杀称岂其降而旋杀欤】宗翰会伐康王尼
楚赫守太原天会十年为燕京留守十三年致仕加保大军节度使同中书门下平章事
迁中书令封蜀王天眷三年薨以正隆例赠金源郡王
配飨太宗庙庭大定十五年谥武襄改配飨太祖庙庭子古云

古云

古云

古云本名达兰幼警敏有志略年十六尼楚赫授以甲使从伐辽常为先锋授世袭
穆昆尼楚赫围太原古云在行间及拔太原下河东诸
州攻汴京皆有功与都统玛武徇地汉上至上蔡以先锋破孔家军睿宗攻开州古云先
登流矢中其口睿宗亲视之创未愈强起之攻大名府
第功宗弼第一古云次之攻东平古云居最为巴尔斯先锋袭宋康王于扬州追宋孟后

趋潭州宋大兵在常武古云以选兵薄其城败千余人
明日城中兵出战古云以五百骑败之遂攻常武巴尔斯以诸军为大阵居后古云以五
百骑当前行麾兵驰宋军宋军乱遂大败之其后河东
郡县多叛古云以先锋克绛州复攻沁州飞炮击其右胁舁归营中诸军攻沁州三日不
能下别将固纳强起古云指麾士卒克之摄河东路都
统将三千余骑从左监军伊喇伊都招西北诸部平其九部以先锋破宋吴山军再战再
胜复衄之于隘宋兵遯去宗弼再攻和尚原古云以本
部破宋五万人夺新义口时大雪道路皆冰宋兵势重不可径取宗弼用古云策入自旁
近高山丛薄翳荟间出其不意遂取和尚原古云请速
入大散关自以本部为殿以备伏兵宗弼至仙人关古云先攻之宗弼敛兵退乃班师古
云殿且战且却遂达秦中齐国初废命萨里罕抚治诸
郡至同州故齐观察使李世辅出迎阳坠马称折臂舁归萨里罕入城世辅诈使通判献
甲以壮士十人被甲上厅事世辅自壁后突出执萨里
罕古云方索马于外变起仓卒城已闭不得入至东门遇哈达领骑三十余遂与斩门者
而入而世辅拥众自西门出古云与哈达袭之世辅虑
救兵至乃要萨里罕与之盟使勿追留萨里罕于道侧古云至与骑而归除安远大将军
摄太原尹四境咸治兼摄河东南北两路兵马都总管
朝廷复取河南陕西地师至耀州宋人每旦出城张旗阅队抵暮而还道隘骑不得逞古
云请兵五百薄暮伏山谷间先使五十人趋山巅视敌
出举帜为号明日城中人出阅如前伏发宋兵争驰入城古云麾军登城拔宋帜立金军
旗帜宋军后者望见不敢入遂降城中人亦降 【按
宋史高宗纪绍兴十年金人围耀州郭浩遣兵救之金兵解去与本传异】 宋吴玠拥重
兵据泾州泾原以西多应之元帅萨里罕欲退守京兆
俟河南河东军古云曰我退守吴玠必取凤翔京兆同华据潼关吾属危矣不如速战萨
里罕从之吴玠兵自西原来古云锡卜察击其左右自
旦至午吴玠左右军少退萨里罕当其前冲击之大败玠军僵尸枕籍自此蜀人丧气不
敢复出关陕遂定 【按续通鉴建炎四年吴玠败于
彭原绍兴三年溃于饶风关至金人复陷河南陕西州郡则已在绍兴十年时萨里罕之
兵一败于吴玠再败于刘锜而吴玠已死矣本传所载
得无以饶风关之役误次于再复关陕之后欤】 历行台吏部工部侍郎从宗弼巡边迁
刑部尚书转元帅左都监天德二年迁右都监元帅府
罢改山西路统军使领西北西南两路招讨兵马坐无功降临海军节度使历平阳太原
尹正隆末为中都留守兼西北都统讨契丹萨巴驻军
归化州世宗即位辽阳使古云侄阿尔法持诏往归化命古云为左副元帅就遣使召陕

西统军图克坦喀齐喀宣大定改元诏赦于西南西北
招讨司河东河北山东诸路州镇调明安军屯京畿古云受诏以元帅令下诸路所至皆
听命大定元年十一月古云以军至中都驻兵通州见
世宗于三河诏古云以便宜规措河南陕西山东边事二年正月至南京遂复汝颍嵩等
州县授世袭明安入拜平章政事罢为东京留守未行
改济南尹初古云恃功在南京颇黷货不恤军民在相位多自专及除留守益忿忿虽近
臣往皆不见世宗怒遂改济南寻改平阳尹致仕起为
西京留守母忧起复俄复为东京历上京十五年致仕会修太宗睿宗实录世宗以当时
旧人亲见者惟古云在诏修撰温特赫提克德往北京
就其家问之多更定焉卒

△玛奇

玛奇尼楚赫母弟也年十五隶军中从破高丽兵下宁江州平系辽女真克黄龙府
皆身先力战以功为穆昆继领明安破奚兵千余从乌
楞古攻下咸信浑州及东京诸城皆有功都统杲取中京玛奇与素赫和硕台别降绰里
特部屯兵高州以兵援蒙克贝勒大破敌兵复败恩州
兵五万人讨平辽人聚中京山谷者降三千余人战于高州境上伏矢射之中目遂卒玛
奇大小三十余战所至皆捷皇统中赠银青光禄大夫
谥毅敏子乌色

乌色

乌色

乌色年十七隶军中从巴尔斯击辽将马武败之玛奇死领其职宗望伐宋至河上
宋兵屯河外以二舟来伺我师乃遣乌色率勇士以一
舟往迎尽俘以还从袭康王于江淮间还驻东平及废齐屯兵河北招降旁近诸营多获
产畜兵仗军帅嘉之赏以甲马从攻陕西为右翼都统
师还以功正授穆昆迁华州防御使属关中岁饥盗贼充斥乌色募兵讨平之部以无事
郡人列状匈留不报未几除德呼勒部族节度使以任
事用廉入为都水使秩满同知燕京留守事为西北路招讨使萨巴秋满已数月冒俸不
解乌色发其事萨巴反乌色遇害

△巴尔斯

巴尔斯尼楚赫弟 【按宗室表尼楚赫列巴尔斯之下注云族子巴尔斯本传又称为
尼楚赫弟所戴互异】 天辅六年宗翰在北安州
将会舍音于奚王岭辽兵奄至古北口使博勒和琿楚各领兵二百击之琿楚请济师宗
翰欲自往希尹罗索请以千人破之琿楚前行遇其游
兵逐入山谷辽人以步骑万余迫战琿楚退据关口希尹罗索至巴尔斯乌木罕呼实罕

摧锋奋击大破之尽获甲冑辎重罗索拒夏人出陵野
岭留巴尔斯守之尼楚赫围太原近县已降宋军来救者复据太谷祁县巴尔斯阿古喇
复取之又败宋姚古军于隆州谷击走张灏兵天会四
年克太原巴尔斯为管勾太原府路兵马事复与罗索败宋兵于文水遂从宗翰围汴与
尼楚赫略地襄邓克均唐蔡陈四州文颖昌府遂与托
云玛武袭宋康王于扬州十五年迁元帅左都监萨里罕经略陕西巴尔斯大破宋军于
渭州渭州德顺军皆降陕西平迁元帅左都监加金吾
术上将军卒谥敏定

钦定续通志卷四百二十四

●钦定续通志卷四百二十五 列传二百二十五

列传

金 【三】

○金三

罗索【和尼 默音仲 哈里】 宗翰 德克德 额图琿

瓜尔佳实讷 赫木颇 阿里

杲 昂

罗索

宗翰

德克德

额图琿

瓜尔佳实讷

赫木颇

阿里

杲

昂

△罗索

罗索字斡里延完颜部人年二十一代父布达为七水诸部长太祖克宁江州使罗
索招谕系辽籍女真遂降伊腾伊罕路达哈藩昭苏等
败辽兵于布尔罕山复擒两将军既而伊克尼玛兰两路皆降进克咸州诸部降者相继
辽都统耶律鄂尔多以二十余万众戍边太祖趋达噜
噶城次宁江州西召罗索见于军中使隶左翼宗翰军与尼楚赫纵兵冲其中坚凡九陷
阵皆力战而出复与尼楚赫攻黄龙府帝使完颜琿楚
博勒和实古纳以兵四千助之败辽兵万余于白马泺完雄等下金山县使罗索分兵二
千招沿山逃散之人又与乌楞古破耶律聂呼军于彘

黎山取显州太祖取黄龙府罗索谓曰黄龙一都会且僻远苟有变则邻郡相煽而起请以所部屯守太祖然之仍合诸路穆昆命罗索为万户守黄龙府进都统从杲取中京与希尹等袭走达鲁和尚伊勒希等败奚王锡默降奚部西节度额哩呼辽主自鸳鸯泺西走罗索等追至白水泺获其内库宝物遂与栋摩攻破西京至天德云内宁边东胜其官吏皆降夏人救辽兵次天德候兵托纽布以二百骑败没额图瑋复以二百骑往遇伏独额图瑋脱归时久雨诸将欲且休息罗索曰吾兵再破若不复往将以我怯即来攻我矣乃选千骑与实实巴尔斯往迟明出陵野岭留巴尔斯以兵二百据险守之获生口问其帅李良辅也登高望之夏人恃众不整方济水为阵乃使人执斡鲁因分军为二更出迭入进退转战三十里过宜水斡鲁军亦至合击败之辽都统达实犯奉圣州壁龙门东二十五里罗索与卓哩马和尚等以兵取之生获达实其众遂降后从宗望追辽帝与芬彻以二十骑候敌败其军三千人于三山夏人屯兵于哈屯馆宗翰遣罗索戍朔州筑城于霸德山西南二十里遂破朔州西山兵二万擒其帅赵公直其后获辽帝于伊都谷赐铁券尼楚赫围太原宋统制刘臻救之罗索击破其众十万于寿阳继于榆次败宋兵数千宋张灏军出汾州巴尔斯击走之灏复营文水罗索与托克索巴尔斯与战灏大败宗翰定太原罗索取汾石二州及其属县温泉方山离石芬彻降寿阳取平定军及乐平复招降辽州及榆社辽山和顺诸县宗翰趋汴州使罗索等自平阳道先趋河南实实萨喇达等连破宋兵降河阳罗索军至渡河薄西京城中兵来拒战实实击败之西京降罗索取偃师永安军巩县降萨喇达败宋兵于汜水于是荥阳荥泽郑州中牟相次皆降宗翰已与宗望会军于汴使罗索率师趋陕津攻河东郡县之未下者罗索破薄解之军二万尽覆之安邑解州皆降遂克河中府降绛慈隰石等州宗翰往洛阳使罗索取陕西败宋将范致虚军下同华二州克京兆府获宋制署使傅亮遂克凤翔 【按续通鉴云罗索既陷永兴引兵侵熙河都监刘惟辅逆击于新店斩其将黑锋又侵泾原吴玠击之罗索败走同华本传特举其成功而言故俱不载】 宗翰会宗辅伐康王命罗索芬彻专事陕西以博勒和胜额监战胜额等遇敌于蒲城及同州皆破之罗索芬彻克丹州破临真进克延安府遂降绥德军及静边怀远等城寨十六复破青涧城宋安抚使折可求以麟府豊三州及堡寨九降于罗索晋宁所部九寨皆降而晋宁军久不下城中无井日取河水以饮及决渠泄其水城中遂困李位石乙启郭门降诸将人城守将徐徽言据子城战众溃出奔获之与统制孙昂皆不屈乃并杀之降

安定堡渭平寨及鄜坊二州于是罗索博勒和守延安折可求屯绥德芬彻还守蒲州延安鄜坊州皆残破人民存者无几罗索置官府辑安之
京兆府叛罗索复讨平之遂与阿里布穆里延至三原额克沁阿古尔击败淳化兵罗索攻干州已筑甬道列炮具而州降遂进克邠州陕西城
邑已降者辄复叛睿宗以右副元师总陕西征伐与张浚战于富平宗弼左翼军已却罗索时已有疾以右翼力战军势复振宋军遂败睿宗以
所用犀玉金银器及甲胄并马七匹与之 【按大金国志云金兵自攻陕西大战有三危范致虚战于陕府曲端战于汾州刘锡战于耀州守
兵皆败而陇右州郡尽为金有矣史以经营陕西之功归称罗索其以是夫】 天会八年薨十三年赠泰宁军节度使兼侍中加太子太师皇统
元年赠开府仪同三司追封莘王以正隆例改赠金源郡王配享太宗庙庭谥庄义子和尼默音实古纳

和尼

默音

仲

哈里

和尼

和尼年十七从攻宁江州力战创甚扶出阵间太祖赐之药观抚慰之其攻济州败敌八千与敌遇于信州伊喇本陷于阵和尼力战出之
敌遂北败耶律佛德等于浑州及宗翰袭奚王锡默和尼以兵三百败敌二千从攻伊实部破其二营塔喇部族叛率二穆昆突入大破之常从
罗索围太原宋将种师中以兵十万来援和尼击败之大军至河无船不得渡罗索遣和尼循水上下和尼率兵三百先济大军于是皆继之宋
将郭京出兵数万趋罗索营和尼从旁奋击敌乱遂破之师还破敌于平陆渡得其船以济又破敌于张店原时屯留太平翼城皆有重敌并破
之又分兵取陕西蒲州降留和尼镇之攻凤翔和尼先登睿宗定陕西和尼为都统进攻泾州王开山以兵拒归路再击败之遂降京兆凤翔诸
县罗索薨袭哈济明安代为黄龙府路万户天眷三年为元帅右都监迁左监军元帅府罢改安化军节度使历京兆尹封广平郡王以正隆例
改封代国公进封隋国公卒谥贞济

默音

默音勇力过人善用长矛突战天眷间充牌印祗候授显武将军擢符宝郎皇统四年其兄和尼袭济州路万户以亲管哈济明安让默音
朝廷从之天德三年为顺天军节度使历河间临潢尹改博索路兵马都总管萨巴反默

音往讨之时世宗为东京留守自将讨瓜里还遇默立
于常安县尽以甲士付之世宗还东京完颜福寿高忠建率所部南征军亡归东京默音
亦率其众来附即以臣礼上谒遂杀高存福李彦隆等
默音福寿忠建率诸将吏民劝进世宗即位拜右副元帅都统白彦敬副统赫舍哩志宁
在北京拒不受命默音伐之遇其众于建州皆不肯战
彦敬志宁遂降大定二年默音率诸军讨斡罕合甲士万三千人持数日粮轻骑追之是
时斡罕新败于泰州将走济州默音兵至长泺南获其
谍者知敌将由别路邀粮运遂分军往迎之敌吏吉勒扎来降默音用其计因夜亟往邀
敌辎重忽大风路暗莫相辨比晓纔行三十里而都统
志宁克宁等已败敌众二万余于长泺追杀甚众默音贪卤掠不复追以故敌得纵去遂
涉懿州界陷灵山同昌惠和等县窥取北京西攻三韩
县惟克宁军追蹶默音托马弱引还懿州帝闻之下诏切责以布萨忠义为右副元帅代
之赫舍哩志宁为右监军代完颜福寿默音至京师以
为同判大宗正事其子色克暴横军中勒归本贯未几率宾路军士珠勒呼告色克寄书
与默音谋反有司并上其书世宗察其诬诏鞫珠勒呼
诛之初斡罕方炽帝使温特赫阿噜岱守古北口及斡罕败于陷泉入于奚中率诸奚攻
古北口袭杀士卒甚众阿噜岱坐除名诏默音芬彻乌
哩页富察通以兵三千会旧屯兵击之擒贼党明安和卓未几斡罕平乃还七年出为北
京留守改东京留守封荣国公十一年薨默音性忠厚
善击球射猎虽智略不及其父而勇敢肖之

仲

仲本名实古纳体貌魁伟通女真契丹汉字其兄斡鲁 【按前后传罗索子无名斡
鲁者考续通鉴宋建炎二年金人侵晋宁知军事徐
徽言败之斩罗索之子而不载其名岂所谓斡鲁者即其人欤】 爱仲才欲使通吏事每
视事常在左右通事辄问之应对如响皇统初充护卫
授世袭穆昆天德元年摄其兄和尼济州万户部内称治除滨州刺史母忧起复知积石
军事转同知河南尹正隆六年伐宋为神勇军副都总
管还徐同知大兴尹将兵二千益遵化屯军备契丹迁西南路招讨使兼天德军节度使
政尚忠信决狱公平蕃部不敢寇边召为左副都点检
宿卫严谨每事有规矩后来者守其法莫能易也大定五年宋人请和仲为报问使仲请
与宋主相见礼仪至宋一一如礼正隆用兵宋人执商
州刺史完颜守能至是仲取守能与俱还帝嘉之转都点检兼侍卫亲军都指挥使迁河
南路统军使赐厖马金带玉吐鹞以罪解职久之起为
西北路招讨使改北京留守卒

哈里

哈里罗索族子体貌丰伟善用稍从罗索徙舒吉鄂特又从罗索追及辽主于朔州阿敦山辽主从数十骑逸去罗索遣哈里及珠敦往见辽主谕之使降辽主已穷蹙待于阿敦山之东罗索因获之赏哈里金银币帛睿宗经略陕西哈里战却吴玠军于泾邠之南寻遣修横道宋人恐机道成以兵来拒哈里破之天眷元年擢宿直将军与定宗盘宗隳之乱再迁广威将军历武宁军节度使广宁尹卒

△宗翰

宗翰本名尼玛哈萨哈长子年十七以勇闻及议伐辽与太祖意合为右军大败辽人于达噜噶城天辅五年四月宗翰奏曰辽主失德中外离心我朝兴师大义既定而根本弗除后必为患今乘其衅可袭取之时不可失太祖然之即命诸路戒备军事五月戊戌射柳宴羣臣太祖酌酒饮宗翰曰今议西征若谋元帅无以易汝汝当治兵以俟师期寻为伊拉齐贝勒副普嘉努西袭辽帝不果行十一月宗翰请曰诸军久驻人思自奋马亦壮健宜乘此时进取中京于是乌赫哩贝勒杲都统内外诸军普嘉努宗翰宗干宗盘副之宗峻领哈济明安皆受金牌伊都为向导进克中京宗翰复率偏师趋北安州与罗索图克坦绰里合兵大败奚王锡默北安遂降宗翰驻军北安遣希尹经略近地获辽护卫耶律实讷埒知辽主猎于鸳鸯泺杀其子晋王额鲁温众益离心西北西南两路兵马皆羸弱不可用宗翰使诺延温都伊喇保报都统杲杲使瑄都与伊喇保回报曰顷奉诏旨不令便趋山西当审详徐议时宗翰已整众俟兵期及瑄都至知杲无意进取恐失机会即决策进兵复使伊喇保往报都统宗干劝杲当如宗翰策杲意乃决约以奚王岭会议宗翰至奚王岭与杲会杲军出青岭宗翰军出瓢岭期于羊城泺会军宗翰以精兵六千袭辽主闻辽主自五院司来拒战宗翰倍道兼行一宿而至辽主遁去使希尹等追之西京复叛耿守忠以兵五千来救至城东四十里富察乌里固纳先击之斩首千余宗翰宗雄宗干宗峻继至宗翰率麾下冲击其中使余兵从旁射之守忠败走宗翰弟扎巴台战没后赠特进宗翰已抚定西路州县部族谒太祖于行在所遂从取燕京燕京平七年太祖以燕京与宋人还军次鸳鸯泺不豫将归京师以宗翰为都统斋贝勒昱德特贝勒斡鲁副之驻军云中太宗即位宋人来请割诸城宗翰奏言宋人不归我叛亡阻绝燕山往来道路后必败盟请勿割山西郡县太宗曰先皇帝尝许之矣当与之诸将获耶律玛格宗翰归之京师诏以马七百匹给宗翰军以田种千石米七千石赈新附之民仍度地以

居之宗翰请分宗望等兵讨诸部诏别给精锐五千宗翰朝太祖陵入见奏曰先皇帝征辽之初图宋协力夹攻故许以燕地宋人既盟之后请加币以求山西诸镇先皇帝辞其加币盟书曰无容匿逋逃诱扰边民今宋数路招纳叛亡厚以恩赏累疏叛人姓名索之一无所致盟未期年已如此万世守约其可望乎西鄙未宁割付山西诸郡则诸军失屯据之所将有经略或难持久请姑置勿割太守悉如所请时斡鲁栋摩宗望俱请伐宋于是安班贝勒杲领都元帅居京师宗翰为左副元帅自太原路伐宋发自河阴降朔州克代州围太原府宗望自河北趋汴久不闻问宗翰乃留尼楚赫等围太原自率师而南降定诸县至泽州宋使至军中始知割三镇讲和事诏宗翰取文水及孟县复留尼楚赫围太原宗翰乃还山西宋少帝诱萧仲恭贻书伊都以兴复辽社稷动之仲恭献其书诏复伐宋八月宗翰发自西京九月克太原执宋经略使张孝纯等十一月田子宗翰自太原趋汴降威胜军克隆德府遂取泽州萨喇达等先已破天井关进逼河阳破宋兵万人降其城宗翰攻怀州克之丁亥渡河闰月宗翰至汴与宗望会兵宋约画河为界复请修好不从丙辰尼楚赫等克汴州辛酉宋少帝诣军前舍青城十二月癸亥少帝奉表降诏元帅府曰将帅士卒立功者第功行赏其没于王事者赐赠官爵厚恤其家使勛就军中劳赐宗翰宗望明年四月以宋二主及宗族四百七十余人及珪璋宝印袞冕车辂祭器大乐灵台图书与大军北还七月赐宗翰铁券赐予甚厚宗翰奏河北河东府镇州县请择前资官良能省任之以安新民乃遣耶律晖等从宗翰行诏黄龙府路南路东京路于所部各选如耶律晖者遣之宗翰遂趋洛阳宋董植以兵至郑州郑州人复叛宗翰使诸将击董植军复取郑州遂迁洛阳襄阳颍日汝郑均房唐邓陈蔡之民于河北而遣罗索平陕西州郡是时河东寇盗尚多宗翰乃分留将士夹河屯守而还师山西昏德公致书请立赵氏奉职修贡宗翰受其书而不答康王遣王师正奉表密以书招诱契丹汉人获其书奏之太宗下诏伐宋河北诸将欲罢陕西兵并力南伐河东诸将不可曰陕西与西夏为邻兵不可罢宗翰曰初与夏约夹攻宋人夏人弗应而耶律达实在西北交通西夏吾舍陕西会师河北彼必谓我有急难宜先事陕西略定五路既弱西夏然后宋可取也议久不决奏请于太宗太宗曰康王当穷其所往而追之俟平宋当立藩辅如张邦昌者陕右之地亦未可置而不取于是罗索芬彻帅师胜额博勒和监战平陕西尼楚赫守太原耶律伊都留西京宗翰会东军于黎阳津遂会睿宗于濮进兵至东平宋知府权邦彦弃家宵遁降其城官会金币分给诸军袭庆府

来降宋知济南府刘豫以城降于达兰乃遣巴尔斯乌凌阿托云玛武袭宋主于扬州至城下宋主已于前一日渡江矣时宗弼等分道南伐取建康入杭州宋主入海阿里富瑒瑒等自明州行海追之弗及宗弼乃还其后宗翰欲用徐文策伐江南睿宗宗弼议不合乃止【按大金国志宗翰于天会中用高庆裔计立刘豫大索两河之民令诸郡置牢地窃盗及一钱以上者死试举人于白水泊大失士心此本传皆不书附议于此】初太宗以舍音为安班贝勒天会八年舍音薨久虚此位而熙宗宗峻子太祖嫡孙宗翰朝京师遂与宗干希尹定议入言于太宗请之再三太宗以宗翰等皆大臣义不可夺乃从之立熙宗为安班贝勒宗翰为古伦右贝勒兼都元帅熙宗即位拜太保尚书令领三省事封晋国乞致仕不许天会十四年薨【按续通鉴载左丞相高庆裔以口下岳宗翰乞免为庶人以赎其罪金主不许斩庆裔于市宗翰之党连坐者甚众乃恚闷绝食而死本传讳而不载】追封周宋国王正隆二年例封金源郡王大定间改赠秦王谥桓忠配享太祖庙庭孙秉德色克秉德入逆臣传色克累官同知哈斯罕节度使事大定初除刑部侍郎充都统与副统完颜布呼自东京先赴中都辄署置官吏私用官中财物世宗至中都事觉诏宽减色克除名布呼削两阶解职二年起为大宗正丞除祁州刺史坐赃枉法当死诏杖一百五十除名家徙鄜州久之起同知兴中尹迁唐古部族节度使历开远顺义军色克前在云内受赃御史喜劾奏世宗谓宰臣曰色克今三犯矣盖其资质鄙恶如此令强干吏鞫之狱成法当死以其祖有大功特免死杖一百五十除名久之复起为劝农副使

△德克德

德克德温特赫部人祖哲克讷父阿固岱世为和伦水部长德克德年二十余代领父穆昆攻宁江州败辽援兵获甲马财物攻破奚营回至韩州遇敌二千人击走之乌楞古与辽人战于咸州兵已却德克德以本部兵力战诸军复振遂大破之呼岱巴冈之役伊里布贝勒陷敌中德克德援出之攻黄龙府身被数创授明安天辅七年从帝至山西病卒天眷中赠光禄大夫

△额图瑒

额图瑒温等赫部人年十七从萨哈维泰等评平诸部皆身先力战从乌色御高丽于海兰甸为前锋率三十人夜渡海岛袭高丽屯兵焚其营栅战舰大破之遂下图吉城既而八城皆下功最又击败辽兵于宁江州东门以功授穆昆从攻黄龙府力战身被数十创竟登其城后与鄂兰沙津援昭苏城乘其不备夜过伊图水急击诘朝大败之翰鲁上其功赐币与马天

辅四年卒遣使吊祭额图瑋为人孝悌好施惠健捷善

戈猎至角抵击鞠咸精其能

△瓜尔佳实讷

瓜尔佳实讷隆州讷尔瑋河人祖阿哈率所部来归献器用甲仗父布尔噶苏袭本部贝勒从太祖伐辽授世袭明安亲管穆昆为海兰路都统实讷长身多髯善骑射通女真契丹汉字随父见太祖命佩金牌总领左翼护卫西京未下实讷获城中生口知城中人求救于外都统府得为之备却其救兵遂下西京自燕京还过盘尼纳遇敌于隘实讷身先士卒射杀先锋二人敌溃走从攻和尚原出仙人关宋兵据险实讷选麾下五十人与战克之与吴玠相拒乌哩页行阵不整吴玠乘之实讷领兵逆战敌大败计前后功袭其父明安穆昆宗弼复取河南陕西宋人欲潜兵袭取石闰诸营实讷自渭南大禹镇败其伏兵除华州防御使入为工部侍郎迁本部尚书改平凉尹昭义军节度使大定初卒

△赫木颇

赫木颇珠卜奇水锡默部人性忠直宽厚重节义勇于战父阿古图赠金吾卫上将军穆宗时赫木颇内附先遣子宁嘉间道送款遂使和勒端与赫木颇合军攻降诸部因领其众与弟和摩尔噶欢塔侄阿里等攻下诸城又从萨哈破乌塔城穆宗屡赏之破高丽戍兵与硕硕欢讨平诸部富察部雅里贝勒与其兄弟和拜松科等欲叛归辽赫木颇执之送于康宗赐赉甚厚破高丽海兰甸及下托啰城有功天辅六年卒天眷中赠银青光禄大夫

△阿里

阿里父欢塔穆宗时与兄赫木颇和摩尔噶皆内附数有战功阿里年十七从和摩尔噶讨卓多获其弟萨勒扎欢塔攻高丽于穆尔茂甸力战久之阿里挺鎗驰刺其将于阵中敌遂溃复败敌兵取其二城高丽兵复入寇以我兵屯守要害不得进乃还阿里追及于海兰水乘敌走水上杀略几尽遂合兵千硕硕欢道遇敌余五万击走之又破敌七万硕硕欢厚赐之从哈萨额特布攻图吉城阿里凿墉为门会暮不可入至旦遂取其城额特布赐以被甲乘马从太祖下宁江州授明安又从攻信州宾州皆克之辽人来攻贝勒和索哩城阿里牵百余骑往救之以兵少令军士裂衣多为旗帜出山谷间辽兵望见遯去苏复州叛众至十万旁近女真皆保于太尉和硕家筑垒为固敌围之数重守者粮刍俱尽夜缒二人出告急于阿里阿里赴之内外合击破其众千必尔罕水上剿杀几尽契丹奚人聚舟千艘将入于海阿里以二十七舟邀之中流矢

卧舟中中夜始苏敌船已入王家岛即夜取海路追及之再中流矢力战不退竟破之尽获其舟于是苏复州博索路皆平攻显州下灵山县取梁鱼务败伊都兵功皆最后与苏都哩屯高州契丹扎古雅纠坚合兴中兵数万攻和尔合寨阿里以八穆昆兵救之和尔台先往取于城下阿里指挥前绯衣者二十余人曰此必贼酋也麾兵奋击皆杀之余众大溃来州隰州兵围和尔台城闻阿里来救即解围去栋摩讨张觉有兵出楼峯口山谷间阿里苏都哩呼拉布三明安击败之再败平州兵及伐宋阿里别击败宋兵明年再伐宋至保州中山累破之进围真定阿里与罗索赫噜乘风纵火焚其楼櫓诸军毕登克其城渡河诸将分出大名境阿里破之敌尽殪遂围汴汴中夜出兵来焚攻具阿里与穆昆察逊伊克御之其众大遣还攻降赵州天会六年伐宋攻取阳谷莘县败海州兵八万降破贼船万余于梁山泊招降滕阳东平泰山羣盗盗攻范县击走之获船七百艘宗弼攻下睢阳与乌雅富埒瑋先以二千人往招寿春具舟淮上连破宋兵宗弼至江宁阿里富埒瑋别降广德军先趋杭州败宋伏兵二千宗弼至杭宋主走明州阿里与富埒瑋以精骑四千袭之破东关兵济曹娥江败宋兵于高桥镇至明州失利乃退军余姚宋主自昌国走温州阿里由海路追三百余里弗及遂隳明州与宗弼俱北归睿宗经略陕西阿里先取渭州睿宗趋熙河阿里与彩赫韩常为前军十二年与高彪监护水运宋以舟师阻亳州河路击败之获其将萧通破涟水寨尽得其大船遂取涟水军招徠安辑之天眷间盗据石州阿里往讨克其城石州平宗弼再伐宋阿里已老督造战船宋称臣诏赐阿里钱千万自结发从军大小数十战尤习舟楫江淮用兵无役不从为德呼勒部节度使历顺义泰宁军归德济南尹天德初致仕加特进封王正隆例封韩国公召赴阙命造战船以疾薨谥智敏阿里性忠直多智略兄弟相友爱家故饶财以已明安及财物尽与弟阿布哩弟不肯受逃避岁余阿里终与之

△杲

杲本名萨里罕安帝六代孙泰州博勒和之族和勒博伞之子雄伟有才略太祖爱之博勒和为泰州都统宗族皆随迁杲尝为太祖养子独得不迁仍居按春水宗翰宗望既克汴分遣诸将定河北左都监栋摩攻雄州李成弃城走杲邀击大破之雄州遂降睿宗经略山东留杲于河上真定有贼众自称元帅大王杲击破其众斩之从平陕西降德顺军及泾原路镇戎军进平熙河降甘泉二堡遂取保川城同瓚都讨平河外降宁洮安陇二寨并降下河及乐州西宁于是木波族长等皆迎降攻庆阳降其城慕

洧以环州来降时宗弼军败于和尚原帝褒美杲而戒
励宗弼睿宗已定陕西留兵屯冲要使杲总之居无何请收剑外十三州与宋王彦军七
千人【续通鉴作三千人】遇于沙会泝败之遂攻
金州连破吴玠诸军于饶风关取真符县及洋州入兴元府败吴玠兵于固镇擒其两将
【按续通鉴萨里罕破饶风关至金牛镇为刘子羽
吴玠兵所扼乃由斜谷北去无战于固镇事与本传异】天会十四年为元帅右监军天
眷三年【按宋元通鉴及熙宗乌珠复河南并在天
眷三年此讹作二年谨改正】宗弼取河南杲自河中出陕西至凤翔击走宋军时宋军
在京兆西者甚众诸将以暑雨欲驻军且闻宋兵九万
会于泾州都元帅遣河南步卒来会军杲留请将屯环庆以轻骑败宋兵于泾州追至渭
州大败之未几为右副元帅皇统三年封应国公赐赉
甚厚海陵升蒲州为河中府以杲兼河中尹自陕西入朝从容言曰唐建成不道太宗以
除之即位后力行善政后世称贤陛下以前主失德大
义废绝宜行善政如唐太宗海陵闻言色变既而进封国王从行官吏皆当之海陵忌杲
久握兵柄颇得士心以为行台左丞相兼左副元帅又
恐不奉命赐尊以殊礼使系属籍以玉带玺书赐之杲至汴诏谕行台右丞相右副元帅
大■〈白上大下〉无使杲预军事■〈白上大下〉
久在河南将帅畏而附之杲始至势孤争事不得白于朝大臣知海陵旨报曰如梁王教
及诏使至汴还■〈白上大下〉有附奏杲不得预闻
人皆知海陵使■〈白上大下〉图之矣会海陵忌辽王舍音诸子及宗义等元帅府令
史约索希旨诬杲父子并宗义穆里延等谋逆学杲手
署及印文诈为契丹小字书从左都监瑄都上变封题作已经开折书纸作白字隐约若
曾经水浸玖字画分明者称其子宗安于宫门外遗此
书约索拾得之有司鞫问安宗曰使真有此书安得于朝门下遗之竟不服而死乃寘萨
古于炉炭山笞掠宗义皆诬服使色埒瑒杀杲于汴族
其家而无写书及传书者主名有哲格者能契丹小字旧尝从杲特默者陕西旧将尝以
左副元帅事驰驿赴阙二人皆族诛杲亲属坐死者二
十余人鲁王【按乌哲世祖子宗室表及乌哲传皆作封鲁王此讹作潞谨改】乌哲
孙页噜候杲于汴亦执而杀之海陵不问迂约索同知
博州事后与萧裕谋反伏诛大定间诏复杲官爵追封金源郡王谥庄襄配享太宗庙庭
△昂

昂本名瑄都景祖弟伯赫之孙咱斡之子幼待太祖太祖令数人两两角力昂迎仆
六人太祖喜曰汝吾宗弟也自今勿远左右赐金牌令
佩以待年十七从太祖伐辽及平燕策功赐甲第一区天会二年南京叛军帅栋摩遣昂

分兵讨之宗望伐宋承制以为河南诸路兵马都统及
攻汴州宗弼与昂以兵三千为前锋比暮昂先以兵千人驰入北门宗望至汴令栋摩达
兰等屯于城之东北隅遣昂等率轻骑环城巡逻昂所
领止八穆昆遇敌万人与战败之七年大军渡江败宋兵于江上帅府遣昂等以兵追宋
主宋主入会稽若为坚守计有兵数千列阵于郭东竹
苇间诸将欲击之昂曰此诈也不若急攻城不然将由他门逸去诸将犹豫未决而宋主
果出他门以单舟入海宗弼经略西秦遣昂与萨里罕
领兵八千攻取河西郡县昂等遂取宁洮安陇二寨进至河州其通判率士民迎降攻乐
州其都护及河州安抚使郭宁偕降复进取三寨至西
宁州都护许居简以城降吐蕃酋长之系赵琴辖率其所部木波首领五人来降昂别领
军四千往积石军降其军及所部五寨官吏追吐蕃钤
辖等十二人至廓州招之不下攻取之天眷元年授镇国上将军除东平尹明年夏宋将
岳飞以兵十万来攻东平东平军五千仓卒出御时桑
柘方茂昂使多张旗帜于林闲为疑兵自以精兵陈于前飞不敢动相持数日而退昂勒
兵袭之至清口飞众泛舟逆水而去时霖雨昼夜不止
昂附水屯营夜将半促众北行诸将皆谏昂怒不应鸣鼓督之遂弃营去是夜宋人来劫
营无所得而去诸将问故昂曰沿流而下者走也沂流
而上者诱我必追也今大雨泥淖彼舟行安我陆行劳士卒饥乏弓矢败弱我军居其下
流势不便利其袭我必矣众皆称善岳飞以兵十万围
邳州甚急城中兵纔千余守将惧遣人求救昂曰我尝至下邳城中西南隅有堑深丈余
可速实之守将如其教填之岳飞果自此穴地以入知
有备遂止昂举兵以为声援飞乃退在东平七年改为都尹迁东北路招讨使改崇义军
节度使迁会宁牧天德初改安武军节度使迁元师右
都监转左监军授上京路额勒敏哈尔瑋河世袭明安海陵曰汝有大功一明安不足酬
也益以四穆昆昂以三穆昆让其族兄弟拜枢密副使
转太子少保进枢密使尚书左丞相久之拜太尉封潯国公进太保判大宗正事封楚国
公累进封莒卫齐兼枢密使太保如故海陵南伐分诸
路军为三十二总管分隶左右领军大都督府遂以昂为左领军大都督世宗即位辽阳
昂使人杀皇太子光英于南京遣其子宗浩与其婿辉
罕等奉表贺登宝位大军北还昂恐宋人蹶其后即以罢兵移书于宋二年入见世宗慰
劳之进封汉国公拜都元帅太保如故置元帅府于山
东经略边事未几奉迁睿宗皇帝梓宫于山陵以昂为敕葬使事毕还山东三年召至京
师以疾薨昂在海陵时纵饮沉醉海陵常面戒之得间
辄饮如故大定初还自扬州妻子为置酒私第未数行辄卧不饮甚妻大氏海陵从母姊

也怪而问之昂曰吾本非嗜酒者但向时不以酒自晦
则汝弟杀我久矣今遭遇明时正当自爱闻者称之睦于兄弟尤善施于亲族贫困者必
厚给之子宗浩自有传

钦定续通志卷四百二十五

●钦定续通志卷四百二十六 列传二百二十六

列传

金【四】

○金四

卢彦伦 毛子廉 李三锡 孔敬宗 李师夔 沈璋

刘彦宗【笞仲海】 时立爱 韩

企先 郦琼 李成 孔彦舟 徐文 施宜生

卢彦伦

毛子廉

李三锡

孔敬宗

李师夔

沈璋

刘彦宗

时立爱

韩企先

郦琼

李成

孔彦舟

徐文

施宜生

△卢彦伦

卢彦伦临潢入辽天庆初萧贞一留守上京置为吏以材干称时临潢多盗城中兵
无统属府以彦伦为材荐授殿直句当兵马公事辽兵
败于珠赫店还至临潢散居民家令给养之军士纵恣侵扰留守耶律彻格尔不能禁戢
众莫敢言彦伦独极论之天辅四年从留守托卜嘉出
降授夏州观察使权发遣上京留守事师还托卜嘉以城叛【按太祖纪托卜嘉之降在
天辅四年五月时以天暑旋师无降而复叛之事核
之辽史亦同意者逆命未几旋即抚定故从略耶】彦伦乃率所部逐托卜嘉尽杀城中
契丹遣使来报未几辽将耶律玛格以兵攻临潢彦伦

拒守者七月会援兵至解围去天会二年知新城事城邑初建彦伦为经画民居公宇皆有法改静江军节度留后知咸州烟火事寻授静江军节度使天眷初行少府监兼都水使者充提点京城大内所彦伦性机巧能迎合悼后意由是颇见宠用岁余迁侍卫亲军马步军都指挥使为宋国岁元使改礼部尚书加特进封郟国公天德二年出为大名尹明年诏彦伦营造燕京宫室以疾卒子玠终左宣徽使孙亨嗣为莒州刺史尽友爱之道当世称之

△毛子廉

毛子廉本名八十临潢长泰人材勇善射辽季羣盗起募勇士廉应募辽主召见赐甲仗率百人会所在官兵捕盗以功授东头供奉官天辅四年遣穆昆辛额特埒伊喇库色勒招谕临潢子廉率户二千六百来归令就领其众佩银牌招未降军民卢彦伦怒子廉先降【按太祖纪天辅四年六月托卜嘉以城降六年七月毛八十率二千余户降考辽史前后年月正相符合今彦伦传既云从留守托卜嘉出降而本传又云怒子廉先降纪事恐有谬误】杀子廉妻及二子使健将孙延寿引骑兵二千伺取子廉与搏战生擒之余众溃去天会三年除上京副留守久之兼盐铁事天眷中除燕京曲院都监辽王宗干谓宰相曰子廉之功十倍彦伦在临潢十余年吏民畏爱如一日谁能及此时卢彦伦已除节度使故引以为比俄除宁昌军节度使海陵杀熙宗子廉叹曰曾不念国王定策之功耶及致仕大定二年卒

△李三锡

李三锡字怀邦锦州安昌人以货得官辽季盗攻锦州人推三锡主兵事设机应变城赖以完录功授左承制辽主走天德三锡将兵保白云山金兵次来州【按金地理志莱州隶山东东路济南府在宋为东莱郡时方攻燕京岂能及此考北京大定府下有瑞州即辽之来州也本传误来作莱谨据改】三锡以其众降摄临海军节度使参预元帅府军事改知严州宗望伐宋三锡领行军明安败郭药师军于白河进官汝州防御使再克汴京三锡从栋摩获宋二主北归复知严州改归德军节度副使还为庆州刺史三迁武胜军节度使察廉第一迁三阶改安国军节度使除河北西路转运使致仕三锡政事强明所至称治世宗旧闻其名大定初起为北京路都转运使制下而三锡已卒

△孔敬宗

孔敬宗字仲先其先东垣人石晋末徙辽阳辽季敬宗为宁昌刘宏幕官乌楞古兵至境上敬宗劝刘宏迎降遂以敬宗为乡导拔显州以

功补顺安令天辅二年诏敬宗与刘宏率懿州民徙内地授世袭明安知安州事将兵千人从宗望伐宋汴京平即命守汴迁静江军节度使历石辰信磁四州刺史阶光禄大夫其后以敬宗从军积劳余宁昌军节度使累徙归德军致仕大定二年卒

△李师夔

李师夔字贤佐奉圣永兴人少倜傥有大志似荫入仕为本州岛曲监天辅六年太祖袭辽主于鸳鸯泺郡守委城遁去众无所属请师夔主郡事师夔许之乃搜卒治兵都古噜讷引兵至师夔与其故人沈璋密谋出降即率亲信十数辈出城见伊都与之约曰今已服从愿无以兵入城及俘掠境内伊都许诺诏授武定军节度使沈璋佐之俾招未附者许便宜从事明年加左监门卫大将军剧贼张胜以万人逼城师夔度众寡不敌伪与之和日致馈给胜信之师夔乘其不备使人刺杀胜以其首徇曰汝辈皆良民胁从至此今元恶已诛可弃兵归复其所贼众大惊皆散去别贼焦望天尹智穆率兵数千来寇师夔设伏归路使人反间之望天先引去智穆势孤亦还遇伏而败遂执斩之是后贼不敢入境以劳迁静江军节度留后累迁武平军节度使历东京路陕西东路转运使致仕封任国公卒

△沈璋

沈璋字之达奉圣州永兴人学进士业都古噜讷军至上谷璋与李师夔迎降明日择可为守者众皆推璋璋固称李师夔以璋为节度副使累迁鸿臆卿丁母忧起复山西路都转运副使加卫尉卿从伐宋众争趋货璋独载书数千卷而还太行贼陷潞州杀其守姚璠官军讨平之命璋权知州事璋至招复逋逃赈养困饿收横尸葬之民皆安辑初贼党据城潞之军卒当缘坐者七百人帅府牒璋尽诛之璋不从帅府召璋呵责且欲杀璋璋从容对曰招亡抚存璋之职也此辈为贼所胁初无叛心故招之复来今欲杀之是杀降也苟利于众璋死何憾帅府怒解因召潞军曰吾始命戮汝今汝使君活汝矣皆感泣而去朝廷闻而嘉之拜左谏议大夫知潞州事百姓为之立祠移知忻州改同知太原尹加尚书礼部侍郎时介休人张觉聚党亡命山谷钞掠邑县招之不肯降曰前降者皆被杀今恐诱而杀我必得侍郎沈公一言乃无疑于是命璋往招之觉即日降转吏部侍郎西京副留守累迁镇西军节度使天德元年以病致仕卒子宜中天德三年赐杨建中榜及第

△刘彦宗

刘彦宗字鲁开大兴宛平人其先六世仕辽相继为宰相父霄至中京留守彦宗擢

进士乙科天祚走天德奏晋国王耶律曷盱自立于燕
擢彦宗留守判官萧妃摄政迁签书枢密院事太祖至居庸关萧妃自古北口遯去都监
高陆送款于太祖太祖驻蹕城南彦宗与左企弓等奉
表降太祖一见器遇之俾复旧职迁左仆射使宣慰张觉太祖还上京留宗翰都统军事
彦宗佐之及张觉败奔于宋众推张敦固为都统攻之
不下乃以彦宗同中书门下平章事知枢密院事佐宗望军宗望方图攻取凡州县之事
委彦宗裁决天会二年诏彦宗遣使谕中京两路务勤
稼穡其官民犯在降附前者勿论未几大举伐宋彦宗画十策诏兼领汉军都统【按大
金国志天会三年宗翰宗望分道南侵东路之军建
枢密院于燕山以刘彦宗主院事西路之军建枢密院于云中以时立爱主院事盖即此
时也】师还宗望分将士屯安肃雄霸广信之境留栋
摩彦宗于燕京节制诸军明年再伐宋已围汴京彦宗谓宗翰宗望曰萧何入关秋毫无
犯惟收图籍辽太宗入汴载路车法服石经以归皆令
则也二帅嘉纳之六年卒追封郟王正隆二年制降封开府仪同三司大定十五年追封
衮国公谥英敏子萼次子箬

刘箬

刘仲诲

刘箬

箬幼以荫隶合门不就去从学辽末调兵箬在选中辽兵败左右多散亡选箬为扈
从授左承制辽主西奔萧妃摄政赐箬进士第授尚书
左司员外郎寄班合门天辅七年太祖取燕箬从其父兄出降迁尚书左司郎中授殿中
少监太祖崩宋夏遣使吊慰凡馆见礼仪皆箬详定迁
卫尉少卿授西上合门使仍从事元帅府凡约束废置及四方号令多从箬经画累迁至
礼部侍郎改彰信军节度使权签中书省枢密院事天
眷二年改左宣徽使熙宗幸燕法驾仪仗箬讨论者为多皇统元年假中书侍郎充江南
封册使至临安宋人榜其居曰行宫箬曰未受命而曰
行宫非也请去榜而后行礼宋人服其有识乃厚贿之奉金珠三十余万箬不之顾六年
【按本纪皇统六年以刘箬为行台右丞相此讹作
五年谨改正】为行台尚书右丞相兼判左宣徽使事留京师或请厘革河南官吏之滥
杂者箬曰今抚定未久姑数人心柰何为是纷更遂仍
其旧七年帅府议于馆陶筑三城有警即令北军入居之箬曰今天下一家孰为南北设
或有变军人入城独能安耶初以河外三州赐夏人或
言秦之在夏者数千人皆愿来归诸将请约之箬又言三小州不足为轻重恐失朝廷大
信并从箬议陕西边帅请完沿边城郭以备南寇箬曰

我利车骑而不利城守今城之则劳民而结怨况盟已定岂可妄动遂罢之九年拜司空封吴国公天德初封滕王进封郑王未几以疾求解政务授燕京留守进封曹王居数月乞致仕箐自为宣徽使以能得悼后意致位宰相海陵即位意颇鄙之及箐求致仕诏略曰不为暗于临事不为谄于事君未许告归姑从解职箐因惭惧而死子仲诲

刘仲诲

仲诲字子忠宰相箐之子皇统初任授忠勇校尉九年赐进士第除应奉翰林文字海陵严暴臣下应对多失次尝访问时政仲诲从容敷奏海陵称赏之大定初迁待制诏与左司员外郎富察富色克廉问所过州县还奏称旨累迁翰林直学士改棣州防御使厌次县捕盗数十人诣州欲以全获希赏仲诲疑其有冤缓其狱择老穉者先释之未几乃获真盗人为礼部侍郎兼左谕德迁太子詹事帝曰东宫讲书或论议间当以孝俭德行正身之事告之顷之改御史中丞十四年为宋国岁元使宋主欲变亲起接书之仪遣馆伴王抃来议要以必从仲诲曰使臣奉命修好信约所载未敢辄变卒用旧仪成礼而还迁吏部尚书转太子少师仍兼御史中丞坐失纠举大长公主事削一阶十九年卒仲诲立朝峻整容色庄重前后为东宫官多进规戒显宗每见仲诲特加礼敬云

△时立爰

时立爰字昌寿涿州新城人父承谦以财雄乡里岁饥发仓廩赈贫乏假贷者与之折券辽太康九年立爰中进士第累官御史中丞迁辽兴军节度使兼汉军都统太祖已定燕京使平州人韩询持诏招谕平州立爰使人来送款诏曰朕亲巡西土号令所加城邑皆下爰嘉忠款特示优恩大小官员皆充旧职诸囚配隶并从释免时辽主尚在天德平州虽降民也未固奚王和勒博军所在保聚蓟州已降复叛民间流言立爰虽开谕而不肯信乃上表乞下明诏遣官分行郡邑宣谕德意他日兵临于宋讨逆抚顺兵不劳而天下定矣帝览表嘉之诏答曰卿始率吏民归附复条利害悉合朕意山西部族缘辽主未获恐阴相连结故迁处于岭东西京人民既无异望皆安堵如故已谕诸部及军师约束兵士秋毫有犯必刑无赦今遣沃赫阿里等为卿副贰以抚斯民其告谕所部使知朕意其后以平州为南京用张觉为留守时立爰遂去平州归新城太祖以燕蓟与宋新城入于宋宋累诏立爰立爰见宋攻日坏不肯起戒其宗族不得求仕及宗望再取燕山立爰诣幕府上谒拜同中书门下平章事任其子侄数人从军数年谋画居多封陈国公表求解机务不从天会九年为侍中知枢密院事久之加中书令十五年致仕加开府

仪同三司郑国公卒于家

△韩企先

韩企先燕京人九世祖知古仕辽为中书令徙居柳城世贵显干统间企先中进士第固翔不振都统杲定中京擢枢密副都承旨稍迁转
运使宗翰为都统经略山西表署西京留守天会六年同中书门下平章事知枢密院事
七年迁尚书左仆射兼侍中封楚国公十二年为尚书
右丞相召至上京时方议礼制度损益旧章企先博通经史知前代故事或因或革咸取
折衷企先为相密谏显谏弥缝阙漏专以培植奖励后
进为已任一时台省多君子宗翰宗干雅敬重之世称贤相焉皇统元年封濮王六年卒
大定八年配享太宗庙庭十一年将图功臣像于衍庆
宫帝以前后汉人宰相无能及企先者诏置功臣像中以劝后人十五年谥简懿子铎终
顺天军节度使

△郦琼

郦琼字国宝相州临漳人补州学生宋宣和间盗贼起琼乃更学击刺挽强试弓马
隶宗泽军寻告归括集义军七百人复从泽泽署琼为
七百人长泽死调戍滑州时宗望伐宋将渡河戍军乱杀其统制赵世彦推琼为主琼因
诱众勤王行收兵比渡淮有众万余宋主以为楚州安
抚使 【按续通鉴时琼降于刘光世】 淮南东路兵马钤辖累迁武泰军承宣使未几
率所领步骑十余万降于齐 【按续通鉴载琼后与
王德同隶岳飞麾下会飞乞终丧张浚以王德为部统郦琼副之德与琼素不相下交欣
于吕祉祉密奏罢琼兵琼大怨怒率全军四万人渡淮
降刘豫吕祉遇害本传略而不载】 授靖难军节度使知拱州齐国废以为博州防御使
用廉迁骠骑上将军宗弼复河南以琼为山东路弩手
千户知亳州事宗弼再伐江南以琼素知南方山川阴易召至军与计事问以江南成败
琼曰江南军势怯弱皆败亡之余又无良帅吾以大军
临之彼君臣且心破脆裂何以御我既而江南果称臣宗弼喜琼为知言初琼去毫未几
宋兵陷毫以州人宋超守之及大军至超以州事委钤
辖卫经而遁去帅府使人招经经不下及城溃百姓惶惧待命琼请于元师曰城所以不
下者凶竖劫之也民何罪愿慰安之因戮卫经而释其
州人复命琼守毫凡六年毫人德之历镇正宁泰宁军迁归德尹贞元元年加金紫光禄
大夫卒于官

△李成

李成字伯友雄州归信人宋宣和初试弓手挽强异等累官淮南招捉使聚众为盗
钞掠江南宋遣兵破之成遂降刘豫累除知开德府从

大军伐宋齐废再除安武军节度使成在降附诸将中最勇鸷号令甚严众莫敢犯临阵身先诸将士卒未食不先食有病者亲视之不持雨具虽沾湿自如也有告成反者宗弼察其诬使成自治成杖而释之以此士乐为用所至克捷宋李兴据河南府成引军入孟津兴率众薄城鼓噪请战成不应日下昃兴士卒倦且饥成开门急击大破之兴走汉南成遂取洛阳嵩汝河南平宗弼奏成为河南尹都管押本路兵马尝取官羨粟充公费坐夺两官解职正隆间起为真定尹封齐国公卒 【按宋史建炎二年河北京东捉杀使李成叛四年请降于江州以为四川镇抚使已而复叛张俊累败之遁归刘豫绍兴元年以成在顺昌恐复为乱谕淮宁蔡州将士募人擒斩之与本传不符附识于此】

△孔彦舟

孔彦舟字巨济相州林虑人亡赖不事生产避罪之汴占籍军中坐事系狱说守者解其缚乘夜踰城遁去宋靖康初应募累官京东西路兵马钤辖 【续通鉴作东平军校】 闻大军将至山东遂率所部劫掠居民渡河南去宋人复招之以为沿江招捉使彦舟暴横不奉约束宋人将以兵执之走之齐 【按宋史建炎二年孔彦舟叛犯黄州诏谕降之以为湖北捉杀使后累官至安抚使反复不常绍兴二年叛降刘豫与本传稍异】 从刘麟伐宋为行军都统改行营左总管齐国废累知淄州从宗弼取河南克郑州破孟邦杰于登封授郑州防御使讨平太行车辕岭贼从征江南渡淮破孙晖兵万余人下安豊霍邱及攻濠州以彦舟为先锋顺流薄城擒其水军统制邵青遂克濠州师还累官工兵部尚书河南尹封广平郡王正隆例降金紫光禄大夫改南京留守彦舟荒于色有禽兽行惟破濠州时诸军俘获彦舟号令毋辄杀免者数千人人颇以此称之正隆五年除南京留守死于汴遗表言伐宋当先取淮南云

△徐文

徐文字彦武莱州掖县人徙胶水少时贩盐为业宋季盗起募战士为密州板桥左十将勇力过人挥巨刀重五十斤所向无前隶王龙图麾下与夏人战生擒一将补进武校尉东还破羣贼杨进等转承信郎宋康王渡江召文为枢密院准备将擒苗傅及韩世绩以功迁淮东浙西沿海水军都统制大将阎皋与文有隙因譖文有北归志宋使统制朱师敏袭文文乃率战舰数十艘泛海降刘豫豫以文为海密二州沧海都招捉使兼水军统制迁海道副都统兼总管说豫自海道袭临安豫不能用齐国废元帅府承制以文为南京步军都虞候权马步军都指挥使天眷元年破太行贼以本职兼水军统制朝廷以河南与宋除文山东路兵马钤辖宗弼

复取河南文破宋将李宝于濮阳孟邦杰于登封宋蒋知军据河阳文迟明至其城下使别将攻城东北自将精锐袭南门城中悉众救东北乃斩关入城宋军溃去追击败之破郭清郭远于汝州郑州叛复取之击走宋将威方河南既平充行军万户从宗弼取庐濠等州超授武义将军知济州在职七年移知泰安军海陵即位录旧功累迁中都兵马都指挥使改浚州防御使海陵谋伐宋改行都水监监造战船于通州东海县人徐元张旺作乱县人房真等上变州府合兵攻之累月不下诏文等率舟师讨之文等至东海与贼战斩首五千余级获徐元张旺余众请降迁定海军节度使赏房真等官死贼者皆赠官赐银绢有差大定二年自陈年老求致仕许之以覃恩迁龙虎卫上将军卒于家

△施宜生

施宜生字明望郡武人【大金国志作建阳人元好问中州集作逋城人未知孰是】博闻强记未冠入太学宋政和四年擢上舍第授颍州教授王师入汴宜生走江南复以罪北走齐上书陈取宋之策齐以为大总管府议事官失意于刘麟左迁彰信军节度判官齐国废入朝为太常博士迁殿中侍御史转吏部员外郎进本部郎中寻改礼部出为隰州刺史天德二年参政张浩荐宜生可备顾问海陵召为翰林直学士撰太师梁王宗弼墓铭进官两阶正隆元年出知深州复召为尚书礼部侍郎迁翰林侍讲学士四年冬为宋国正旦使宜生自以得罪北走耻见宋人力辞不许宋命张焘馆之都亭因间以首邱风之宜生顾其介不在旁为度语曰今日北风甚劲又取几间笔扣之曰笔来笔来于是宋始警副使耶律必勒哩还以闻坐是烹死初宜生困于场屋遇僧善风鉴谓之曰子面有权骨可公可卿而视子身之毛皆逆上且覆腕必有以合乎此而后可贵也宜生闻言大喜竟从范汝为于建剑汝为败变服为佣于泰之吴翁吴翁尝燕客执事咸俊宜生独逊诸侪撤器有叹声翁异之识其非真佣也屏人固诘之宜生以实告翁赉之金夜济进以北试一日获熊三十六赋擢第一其后竟如僧言

钦定续通志卷四百二十六

●钦定续通志卷四百二十七 列传二百二十七
列传

金【五】

○金五

完颜希尹【守道 守贞 守能】

乌雅富埒瑋 持嘉暉

大■〈白上大下〉【盘】 洪果达

呼布 富察和珍 瓜尔佳沃哩布 王伯龙 高彪 赵元

完颜希尹

乌雅富埒瑋

持嘉晖

大■〈白上大下〉

洪果达呼布

富察和珍

瓜尔佳沃哩布

王伯龙

高彪

赵元

△完颜希尹

完颜希尹本名古绅罕都之子也自太祖举兵常在行阵与诸将征伐皆有功金初用契丹字太祖命希尹撰本国字备制度希尹乃依仿

汉人楷字因契丹字制度合本国语制女真字书成太祖大悦命颁行之谓之女真大字后熙宗亦制女真字谓之小字与希尹所制俱行用辽

人达鲁和尚伊勒希弃中京走希尹与都尔古讷罗索伊都袭之降其旁近人民而还宗翰驻军北安使希尹经略近地获辽护卫耶律实讷埒

大破辽兵于古北口遂与宗翰至奚王岭期会于羊城泺宗翰袭辽帝于五院司希尹为前驱所将纔八骑与辽主战一日三败之明日希尹得

降人玛展言辽主在漠北委辎重将奔西京追至白水泺南辽主以轻骑遯去遂降西京使芬彻守之希尹至伊实部不及辽主而还宗翰入朝

希尹权西南西北两路都统时夏人已受盟辽主已获耶律达实自立而夏国与罗索书责诸帅弃盟军入其境多掠取者希尹上其书且奏夏

人约达实取山西诸郡盟不可信帝命严备之及大举伐宋希尹为元帅右监军师还赐希尹铁券从宗翰伐宋追宋主于扬州后与宗翰俱朝

京师请立熙宗为储嗣熙宗即位希尹为尚书左丞相兼侍中加开府仪同三司天眷元年乞致仕不许罢为兴中尹二年复为左丞相兼侍中

俄封陈王与宗干其诛宗盘宗隼时熙宗未有皇子嫉希尹者譖之竟赐死并杀右丞萧庆及希尹子同修国史 【熙宗纪作昭武大将军】

巴达符宝郎满达皇统三年帝知希尹无罪赠仪同三司刑国公改葬之天德三年追封豫王正隆二年例降金源郡王大定十五年谥贞宪孙

守道守贞守能

完颜守道

完颜守贞

完颜守能

完颜守道

守道本名实纳埒以祖古绅功擢应奉翰林文字皇统九年同知卢龙军节度使事历献祁滨蓟四州刺史世宗幸中都过蓟父老遮地请留再任迁昭毅大将军授左谏议大夫内族晏以恩旧拜左丞相守道谏曰陛下初即位边惊未息方大有为之时恐晏非其材必欲亲爱莫若厚与之禄俾勿事事乃授以太尉致仕【按熙宗纪大定元年十月晏拜左丞相十一月兼都元帅二年四月命为太尉七月致仕事非出自一时传特类叙之以志转圜之美】世宗欲煽扈从将士而帑藏空竭议货民财守道曰人罹虐政方喜更生今仁恩未及而征敛遽出如羣望何宁出宫中所有无取于民遂从其言契丹叛辽东明安穆昆或附从之朝议欲徙之内地守道极陈其不可右副元帅默音将兵讨贼不即击守道力言于朝诏遣布萨忠义赫舍哩志宁往代之东方以平大定二年宫中十六位火方事完葺时已入夏颇妨民力守道谏而罢未几改太子詹事兼右谏议大夫驰驿规画山东两路军粮及赈民饥守道籍大姓户口限以岁储使尽输其赢入官复给其直以是军民皆足拜参知政事兼太子少保悬辞不许时契丹余党未附者尚众北京临潢泰州民皆不安诏守道佩金符往安抚之给羣牧马千匹以备军用守道招致契丹呼敦纽赫等内附民以宁息进尚书左丞兼太子少师尝从猎近郊有虎伤猎夫帝欲亲射之守道叩马极谏而止俄拜平章政事迁右丞相监修国史复迁左丞相授世袭穆昆二十年修熙宗实录成帝因谓曰卿祖古绅行事有未尝者皆不为隐真直笔也进拜太尉尚书令改授尚书左丞相未几乞致仕不许二十五年坐擅支东宫诸皇孙食廩夺官一阶寻改兼太子太师特录其子珪袭穆昆充符宝祗候章宗为原王诏习骑鞠守道谏曰哀制中未可帝曰此习武备耳自为之则不可从朕之命庸何伤乎然亦不可数也二十六年恳求致仕优诏许之特赐宴于庆春殿帝手饮以卮酒锡与甚厚以其子珪侍行又赐次子璋进士第明昌四年卒太常议谥曰简宪帝改曰简靖盖重其能全终始云

完颜守贞

守贞本名苏页贞元二年袭祖古绅穆昆大定初充符宝祗候授通进除彰德军节度副使迁北京留守移上京坐娶安置契丹户民女杖一百除名二十五年起为西京警巡使世宗爱其刚直授中都左惊巡使迁大兴府治中进同知改同知西京留守事御史台奏守贞治有善状

世宗因谓侍臣曰守贞材能胜其兄它日可用也章宗即位召为刑部尚书兼右谏议大夫守贞与修起居注张暉奏言皇帝视朝不令臣等侍立凡有圣训及所议政事臣等无缘得知何所记录何所开说似非设官之义帝从之寻为贺宋生日使还拜参知政事帝新即位锐意于治尝问汉宣帝综核名实之道守贞诵枢机周密品式详备以对帝曰行之果何始守贞曰在陛下厉精无倦耳久之进尚书左丞授上京世袭穆昆明昌三年夏旱天子下诏罪已守贞惶恐表乞解职乃出知东平府事命参知政事瓜尔佳衡论之仍赐金币厩马以宠其行它日右丞刘玮曰方今人材无出守贞者淹留于外诚可惜也帝默然寻改西京留守四年召拜平章政事封萧国公赐玉带旧制监察御史八员汉人四员皆进士女真四员则文资右职参注守贞以监察及清要之职请一体纯用进士一日奏事次帝问司吏移转事守贞曰今吏权重而积弊深移转为便帝尝叹文士出伦者难得守贞曰培养久则人材自出因论国家选举之法又言节用省费之道并嘉纳焉先是帝诛郑王允蹈等以其家产均给诸王又以董寿为宫籍监都管勾并下尚书省议守贞奏陛下欲以允蹈等家产分赐懿亲恩命已出恐不可改如董寿罪人也特恩释之已为幸矣不宜更加爵赏帝是其言自明昌初北边屡有警或请出兵击之帝曰今方南议塞河而复用兵于北可乎守贞曰彼屡突轶吾圉今一惩之后当不复来帝因论守御之法守贞曰惟有皇统以前故事舍此无法耳守贞读书通法律明习国朝故事金有国七十年礼乐刑政因辽宋旧制章宗即位乃更定修正为一代法其仪式条约多守贞裁订故明昌之治号称清明又喜推毂善类接援后进朝廷正人多出入门下时张汝弼妻高国干狱起帝意并疑镐王允中右谏议大夫贾守谦上疏陈时事思有以宽解帝意右拾遗路铎继之言尤切直帝不悦守贞持其事狱久不决帝疑有常出守贞知济南府事董师中路铎等皆补外俄以在政府日尝与近侍窃语宫掖事而妄称奏下帝命有司鞫问守贞款伏夺官一阶解职遣中使持诏责谕之仍以守贞不公事宣谕百官于尚书省承安元年降授河中防御使五年改博勒和扎萨克节度使迁知都府事时南鄙用兵帝以山东重地须大臣安抚乃移知济南府卒帝闻而悼之敕有司致祭赙赠礼物依故平章政事富察通例谥曰肃守贞刚直明亮帝尝与泛论人材辄迹其心术行事臧否无少隐故为胥持国辈所忌竟以直罢后赵秉文上书言愿陛下进君子退小人帝问君子小人谓谁秉文对君子故相完颜守贞小人今参知政事胥持国其为天下推重如此

完颜守能

守能本名呼喇累官商州刺史正隆末宋人陷商州守能被执大定五年宋人请和完颜仲为报问国信使求守能遂及新息县令完颜按辰俱归至京师入见诏给旧官之俸十九年为西北路招讨使时诏徙斡罕余党于临潢泰州伊喇密拉尝从斡罕其弟斋达当徙伪称身亡以马賂守能固匿不遣又受賂补赛音蕃部通事事觉是时乌库哩实垒部族节度副使实绅安巴杖杀无罪镇边明安尚书省俱奏其事诏向者招讨司官多进良马橐驼鹰鹞等物盖假此率敛自今并罢之因责守道曰守能自刺史躡迁招讨外官之尊无以踰此前招讨扎克丹以贪墨伏诛守能岂不知乃敢如此尔之亲弟何不先训戒之也尚书省奏守能两赃俱不至五十贯抵罪实绅安巴解见居官并解世袭穆昆帝曰此旧制之误居官犯除名者与世袭并罢之非犯除名者勿罢遂着于令诏守能杖二百除名【按金史本纪诛扎克丹事在大定十九年罢招讨使进马驼等物则在二十年而守能除名则在二十一年本传俱系之十九年特总其事之前后而书之耳】

△乌雅富埒瑋

乌雅富埒瑋海兰路乌克敦山人父巴古喇为龙虎卫上将军富埒瑋膂力绝人能挽强射二百七十步与兄呼沙呼俱以勇健隶栋摩军攻黄龙府力战有功栋摩败于兔耳山张觉重整兵来诸将皆不敢战富埒瑋登山望之给云敌少急击可破若入城不可复制诸将遂合战破之郭药师蔡靖以燕京降富埒瑋率九十骑先伺察城中居民去就遂将汉兵千隶完颜蒙克攻真定进攻赞皇取之获人畜甲仗万余汴城破日已暮宋人犹力战枪刺中富埒瑋手战益力遂败宋军睿宗为右辆元帅承制以富埒瑋为河北西路兵马都总管及宋主在扬州富埒瑋与蒙克将万骑袭之宋主已渡江破其余兵后与锡默阿里俱从宗弼取江宁隳明州而归天眷二年授镇国上将军除安国军以疾去官皇统六年授世袭穆昆起为延安尹寻致仕海陵迁中都起为归德尹令驰驿之官淹留踰限复听致仕召赴京师至蓟州见海陵于猎所射获一狐海陵嘉其老而健捷赐以御服封豳国公除太子少师进太子太保改真定尹入判太宗正事从海陵伐宋以本官行右领军副都督事大定二年至中都谒世宗除东京留守时年七十三矣帝曰卿宿将久练兵事年虽老精神不衰因命到官每旬月一视事进阶开府仪同三司仍封豳国公是岁卒十八年孙扎昆迁广威将军袭乌克敦山世袭明安并亲管穆昆

△持嘉暉

持嘉暉字仲明其先附于辽居张皇堡故长以张为氏后家来州【按辽史地理志

中京道来隰迁润四州接壤无莱州金史本传讹作

莱今改】 晖体貌雄伟慷慨有志略才游乡校辽季以破贼功授礼宾副使领来隰迁润四州屯兵天辅六年降仍命领其众从栋摩定兴中府义锦等州及破张觉皆与有功以粟万五千石助军授洺州刺史孟阳之战敌之中军径薄宗望营晖与诸将击败之讫师还数立战功明年再举伐宋从攻下保州真定进围汴宋人夜出兵二万焚我攻具晖以二穆昆兵击走之凡城中兵出战晖所当无不胜捷克宋还从攻河间敌将李成以雄莫之兵来援晖迎击马伤而堕辄奋起步鬪竟败成兵是日七战皆胜贼将刘先生以兵二万夜袭营晖力战达旦贼始败走晖复傅城力战如是连月诸军四面合攻遂克之加桂州管内观察使留抚河间时居民皆为军士所掠老幼存者亡几晖下令军中听赎还之从睿宗攻下青州须从栋摩攻潍州晖督其裨校先登城中所积之刍茭乘风纵火发机石晖率将士冲冒而下力战败之军还复以三十骑破敌于范桥帅府承制加静江军节度使进攻城中炮出几中晖晖益奋攻卒破其城又从克泗州还屯汶阳破贼众于梁山泝获舟千余移军攻济州敌败遂降晖约束军士无秋毫犯自是曹单等州皆闻风而下从攻寿春归德及渡淮为先锋连败重敌于秀州苏州遂至余杭通粮饷治桥道晖之力为多军还载资治通鉴版以归大军过江宁徙其官民北渡时暑多疾疫老弱转死道路知府陈邦光诉于宗弼怒将杀之晖曰此义士也力为营救得免富平之战晖左右翼遇泞而败睿宗令其前功杖而释之师至熙河晖别降诸寨及吐蕃酋长并民户万五千余兰州叛与鄂勒博等攻下之获河州安抚使白常熙河路副都总管刘惟辅以献还攻庆阳两败重敌杀其将戴巢师还迁归德军节度使宋州旧无学晖为营建学舍劝督生徒肆业者复其身属县民家奴王夔者尝业进士晖以钱五十万赎之使卒其业夔后至显官密州吏庞乙卒于官其孤贫不克葬晖为营治且资给其家丁母忧服阙以旧职起复既废齐为安化军节度使天眷二年复河南宋人乘间陷海州帅府以登莱沂密四州委晖经画敌无敢窥其境者转定海军寻改济南尹累迁光禄大夫俄以罪罢久之起镇昌武军天德二年迁南京留守改河南路统军使授世袭明安封河内郡王寻拜平章政事封戴王正隆降王爵为枢密副使降封荣国公卒大定间谥曰武康子师直登进士第

△大■〈白上大下〉

大■〈白上大下〉本名托卜嘉其先辽阳人世仕辽有显著太祖伐辽辽人征兵

■〈白上大下〉在选中辽兵败■〈白上大下〉走

宁江城破复逃为军士所获太祖问其家世因收之收国二年为东京奚民穆昆时初破高永昌东京旁郡邑未服属使■〈白上大下〉伺察反侧有闻必达太祖以为忠实授明安兼同知东京留守事取中西两京隶栋摩军辽军二十万来战使以本部守营■〈白上大下〉坚请出战既合战栋摩军少却辽兵蹶之■〈白上大下〉麾兵横击杀数百人由是显名天会三年宗望伐宋欲攻信德府恐不能亟下议未决■〈白上大下〉独选善射者射其城楼别以轻锐潜登楼角遂克其城军至浚州宋人已烧河桥宗望下令能先济者功为上■〈白上大下〉捕得十余舟使勇悍者径渡击其守者而夺其戍栅由是大军俱济明年为河间路都统巴克河间栋摩怒其不早降因纵军大掠■〈白上大下〉谏止之已掠者官为赎还除河间尹从攻袭庆府先一日■〈白上大下〉命军士预备畚鍤及薪既傅城诸将方经营攻具未鸣鼓■〈白上大下〉军有素备遂先登宗弼伐江南济淮宋将时康民率兵十七万来拒■〈白上大下〉率扈部从击败之复以骑二千与当堪击败淮南贼十万王善来降将渡江■〈白上大下〉军先渡舟行去岸尚远宋列兵江口■〈白上大下〉视其水可涉乃麾兵舍舟趋岸疾击之宋兵走大军相继而济俄遇杜充兵于江宁之西■〈白上大下〉与呼拉布击走之师还留■〈白上大下〉为扬州都统经略淮海高邮之间再为河间尹兼总河北东路兵马十一年入见迁太子太保改元帅右都监齐国废■〈白上大下〉守汴京天眷三年罢汉渤海千户穆昆以■〈白上大下〉旧臣独命依旧世袭千户是岁拜元帅右监军累进左监军天德二年改右副元帅进行台右丞相海陵疑左副元帅萨里罕以为行台左登相使■〈白上大下〉伺察之诏军事不令萨里罕与闻萨里罕不知海陵意旨每与■〈白上大下〉争军事遂与■〈白上大下〉有隙海陵竟杀萨里罕召■〈白上大下〉入朝拜尚书右丞相封神麓郡王四年请老为东京留守贞元三年拜太傅领三省事累封汉国王是岁卒赠太师晋国王谥杰忠遣使护丧归葬正隆夺王爵赠太傅梁国公子盘

盘

盘

盘本名富色克太傅■〈白上大下〉之子累官登州刺史袭明安大定三年除嵩州刺史从布萨忠义伐宋有功五年召为符宝郎迁拱卫直都指挥使初盘以伐宋功进官一阶盘心少之颇形于言帝闻之下吏按问杖一百五十改左卫将军诏求良弓盘多自取及护卫入直者

辄以己意更代护卫罗索告其事诏默检司诘问盘有妹在宫中为宝林盘属内侍僧儿
员思忠言于宝林使宝林以无罪诉于帝帝怒使僧儿
一百盘责陇州防御使迁武宁军节度使坐事除名起为韩州刺史改祁州复坐事削四
官解职

△洪果达呼布

洪果达呼布世居锡馨水从破宁江取咸州平东京路及诸山寨栅皆有功从玛奇
破辽将和尚节使兵七千于上京复破纳延军二万再
从玛奇遇敌于阿林甸玛奇被创不能战达呼布率兵击败之从攻回鹘城破其兵九万
败玛勒戡直萨兵于山后又败扎古雅之兵三千获其
家属而还攻平州张觉乌春被围于西山达呼布引兵救之解其围并获粮五千斛招降
户口甚众从平兴中抚安其民天会间大军伐宋达
呼布从取浚开德大名及济南高唐棣密等州皇统间以功袭穆昆移屯于寿光县界为
千户六年授世袭千户棣州防御使卒

△富察和珍

富察和珍安春水人年十八从军其父塔斯死袭为穆昆天辅间夏兵三万出天德
路和珍从罗索迎战以兵三百败敌二千天会三年大
军攻太原城中兵万余出战和珍以所领千户军击之复败敌兵三万于榆次境六年从
罗索攻京兆屡与宋人接战皆有功七年耶邠州遇宋
人二十余万我军右翼少却时和珍为左翼千户摧锋陷阵敌遂败去败张浚于富平复
有功十二年 【按金史作十三年据宋史高宗本纪
兴四年四月甲午关师古叛以洮岷二州降伪齐考宋绍兴四年为金天会十二年安得
有十三年再击师古之事三字当是二字之讹今改】
击关师古于临洮又从破德顺泰巩临洮河兰等州授德顺州刺史改陇州防御使凤翔
尹卒

△瓜尔佳沃哩布

瓜尔佳沃哩布南图珲河人徙天德父温屯讨乌春乌木罕有功沃哩布隶罗索帐
下攻系辽女真招降达哈藩昭苏等从罗索救乌楞古
于咸州 【按金史太祖本纪乌楞古败辽军于咸州西完颜罗索克咸州又考乌楞古本
传与罗索克咸州罗索本传进兵咸州一事数见皆
作咸此处讹作威今据改】 败辽兵于雅勒呼城辽军营辽水沃哩布以五穆昆军夜击
之辽军惊溃杀获几尽从斡鲁伐高永昌以四十骑伏
于津要获生口因尽知永昌虚实太祖嘉之赏奴婢八人永昌驻军于兔儿陁先据津要
军不得渡沃哩布与萨巴射杀其先锋二人永昌众稍
却大军遂渡辽水及攻广宁复与持嘉和木欢各领所部突阵大军继之遂拔广宁太祖

攻临潢沃哩布面被重创奋击自若赏以辽宫女二人
辽王杲已取中京沃哩布以四十骑觐敌获辽喉舌人因知辽主所在后从都统斡鲁定
云中从宗翰屯应州辽军在近境沃哩布以所部击败
之从宗望伐宋宋安抚使蔡靖诣降罗索攻陕西诸部往往复叛沃哩布讨平之败张浚
军于富平沃哩布以先锋攻下兰州加昭武大将军授
世袭明安累官布塔布部族节度使以老致仕封芮国公沃哩布多智略膂力过人虽甚
老勇健不少衰大定初剧贼啸聚出特布关沃哩布率
乡里年少击之贼党溃事闻赏赉甚厚二十六年卒一旦有五岁

△王伯龙

王伯龙涿州双城人辽末聚党为盗天辅二年率众二万及其辎重来降授世袭明
安知银州兼知双州四年 【按金史太祖本纪天辅
四年五月攻辽上京即临潢府也又考辽史本纪天庆十年五月金主亲攻上京查辽天
庆十年即金天辅四年本传记作三年谨据改】 太祖
攻临潢伯龙与韩庆和以兵护粮饷庆和将兵前行伯龙从粮居后遇辽兵五千余邀于
路伯龙率挽夫击败之获马五十四六年 【按金史
太祖本纪天辅六年正月乙亥取中京又考辽史本纪保大二年正月乙亥金克中京辽
保大二年即金天辅六年本传误作四年谨据改】 从
攻下中京并克境内诸山寨为静江军节度留后天会元年 【按金史本纪太宗以天辅
七年九月改元至十一月始命宗望统领栋摩兵讨
张觉则此处应作天会元年为是本传记作五年又不冠以年号显系误刊谨据改】 真
授节度使从宗望讨张觉于平州伯龙先登手杀数十
百人迁右金吾卫将军白河之战伯龙突其左军遂败宋军宗望伐宋伯龙为先锋次保
州破敌五万招降新乐军民十余万大军围汴数败宋
何■（卤上木下，欠代义）军及破汴伯龙以治攻具有功进同知保州兵马安州司
事又破孔彦舟郾琼众三万于洺州遂将兵数千攻拔
北平复取保州河间睿宗经略山东伯龙从攻青州城中兵夜袭其营伯龙不及甲独挺
刃拒敌击杀数十人已而军士皆甲杀伤宋兵不可胜
计及下青州论功第一六年还攻莫州降之加太子少保莫州安抚使破李固寨众十余
万于濮州濮城守城中镞铁挥我军攻之不能克伯龙
被重甲首冠大釜挺枪先登杀守阵者二十余人大军相继而上遂克之进攻徐州复先
登充徐宿邳三路军马都统败高托山之众十五万于
情河击走韩世忠于邳州与大军会宿迁追世忠至扬州还攻泗州守将以城降屯军岷
阳破陈宏贼众四十余万破黄戩于单州进攻归德军
帅遣伯龙立功具伯龙从二十余骑行视地形城中忽出兵千余欲生得伯龙伯龙纵骑

驰之敌兵乱墮隍而死者几二百人破王善之众于巢
县及取庐州和州伯龙之功多军渡采石击败岳飞刘立路尚等兵获刍粮数百万计还
过真扬道遇酈琼韩世忠军败之复为莫州安抚改知
泽州平太行羣贼天眷元年为燕京马军都指挥使从元帅府复收河南权武定军节度
使兼本路都统击走宋兵据许州者招其人民复业是
年秋平泰安叛卒张贵皇统元年以本部从宗弼南伐攻破濠州而还三年为武定军节
度使改延安尹宁昌军节度使天德三年改河中尹徙
益都尹封广平郡王卒正隆间例赠特进定国公

△高彪

高彪本名昭和硕辰州渤海人祖安国辽兴辰开三镇节度使父禄格左承制官至
刺史彪始生其父以术者言其时日不利于已欲不举
其母为营护居数岁竟逐之彪匿于外家及辽人调兵禄格已老当从军怅然谓所亲曰
吾儿若在可胜兵矣所亲具以实告因代其父行战于
珠赫店辽兵败走彪独力战军帅见之曰此勇士也令生致之斡鲁攻东京禄格率其乡
人迎降以为榆河州千户久之告老彪代领其众都统
杲攻中京彪领穆昆从斡鲁破辽将克尔叟及韩庆民于高惠之境已而驻军武安克尔
叟以劲兵二万来袭从斡鲁出战与所部皆去马奋击
败之奚人负险拒命彪屡战有功从宗望攻平州徇地西北道招降石家山寨再从宗望
代宋师次真定彪率兵士七十人临城筑甬道城中夜
出兵焚攻具彪击走之大军围汴以五十骑屯于东南水门再败宋兵师还屯镇河朔复
破敌于霸州擒其裨将祝昂河间夜出兵二万袭营彪
率三穆昆兵败之天会五年授静江军节度使寿州刺史明年伐宋从帅府徇地山东攻
城克敌数被重赏七年师至睢彪以所部招诱京西人
民次柘县其官吏出降彪独与五十余骑入城城中三千余人复叛彪率众力战败之抚
安其民而还从梁王宗弼袭宋主至杭州师还宋将韩
世忠以战舰数百扼于江北宗弼引而西将至黄天荡敌舟三十余来逼南岸其一载兵
士二百余先至彪以钩拽之率勇士数十跃入其舟所
杀甚众余皆死水中明年从攻陕西师至宁州彪与宗人昂率兵三千取廓州始至有来
降者言城东北隅守兵将谋为内应彪即夜从家奴二
人以登左右守者觉之彪与从者皆殊死战诸军继进遂克其城从攻和尚原及仙人关
与阿里监护漕粮并战舰至亳州宋人以舟五十艘阻
河路击败之擒其将萧通击涟水贼水寨进取涟水军其官民已遁去悉招降之齐既废
掇滕阳军以东诸路兵马都统抚谕徐宿曹单滕阳及
其属邑皆安堵如故为武宁军节度使颇黷货尝坐赃海陵以其勋旧杖而释之改忻州

防御使历安化安国武胜军节度使迁行台兵部尚书
改京兆尹封郃国公以忧去官起复为武定军节度使归德尹正隆例授金紫光禄大夫
久之致仕复起为枢密副使舒国公赐名彪卒谥桓壮
彪勇健绝人能日行三百里被重铠历险如飞临敌身先士卒大小数十战率以少击众
未尝败衄性机巧通音律人无贵贱皆温颜接之

△赵元

赵元字善长涿州范阳人辽天庆八年登进士第仕至尚书金部员外郎辽亡郭药师为宋守燕以元掌机宜文字金师取燕药师降枢密使刘彦宗辟元为本院令史天会间同知蓟州事有贼杀人横道官吏圜视莫知所为路人耕夫聚观甚众元指田中释耒而来者曰此贼也叱左右缚之遂伏僚吏问其故元曰偶得于眉睫间耳其后朝廷立磨勘格凡尝仕宣和者皆除名籍元在磨勘中齐国废置行台省于汴选元备官属授行省兵部郎中宗弼再取河南元皆摄户部事赋调兵食取办天眷三年为行台右司员外郎因有杀人当死者行台欲宥之元不从反覆数四势不可夺乃仰天叹曰如杀人者可宥死者复可辜何欲徼己福而乱天下法乎行台竟不能夺改左司员外郎摄吏部事在行台凡十年吏事明敏宗弼甚重之为同签汴京留守事改同知大名尹用廉迁河北西路转运使历彰德武胜等军节度使以老致仕卒于家 【按马讽以辽人两登宋金进士出处未得为正金史旧载高进基传后今从删谨识】

钦定续通志卷四百二十七

●钦定续通志卷四百二十八 列传二百二十八

列传

金 【六】

○金六

程霖 任熊祥 范拱 张通古 张浩【汝霖】

张元素 张汝弼 纳哈塔椿年 祁宰

诺延温都思忠【谦 乌达】 高楨 白彦敬 张景仁

左光庆

程霖

任熊祥

范拱

张通古

张浩

张元素

张汝弼

纳哈塔椿年

祁宰

诺延温都思忠

高桢

白彦敬

张景仁

左光庆

△程案

程案字公弼燕之析津人祖冀仕辽为广德军节度使冀凡六男父子皆擢科第士族号其家为程一举冀次子四穆辽崇义军节度使案四穆之季子也自幼如成人及冠笃学中进士甲科累迁殿中丞天辅七年太祖入燕授尚书都官员外郎改直史馆修撰熙宗时历翰林待制兼右谏议大夫案上疏言事其畧曰比见陛下校猎只羽卫从臣无贵贱皆得执弓矢驰逐而圣驾崎岖沙砾之地加之林木丛郁易以迷失窃惟古天子出入警蹕清道而行以备非常陛下膺祖宗付托之重奈何独与数骑出入林麓沙漠之中前无斥候后无羽卫恐贻宗庙社稷之忧又曰臣伏读唐史追尊高祖以下谥号或加至十八字前宋大中祥符闲亦加至十六字亡辽因之近陛下亦受崇天体道钦明文武圣德十字臣窃谓人臣以归美报上为忠天子以追崇祖考为孝太祖武元皇帝受命开基八年之闲奄有天下功德葳盛振古无前止谥武元二字理或未安愿诏有司定议谥号又曰古者天子巡狩无非事者或省察风俗或审理冤狱或问民疾苦以布宣德泽之銜轂省方愿宪古行事又曰尚书省天子喉舌之官纲纪在焉臣愿诏尚书省戒励百官各扬其职以立纲纪如吏部天官以进贤退不肖为任使升黜有科任得其人则纲纪理而民受其赐前代兴替未始不由此者又曰臣伏见本朝富有四海礼乐制度莫不一新宫禁之制尚未严密胥吏健卒之辈皆得出入莫有呵止甚非严禁卫明法之意疏奏帝嘉纳之始命有司议上太祖尊谥皇统八年由翰林侍读学士为横海军节度使移彰德军节度使卒

△任熊祥

任熊祥字子仁八代祖圜后唐宰相圜孙睿随石晋北迁遂为燕人熊祥登辽天庆八年进士第为枢密院令史太祖平燕以其地畀宋熊祥至汴授武当丞宋法新附官不厘务熊祥言于郡守杨皙请止给半俸养亲皙喜其廉金人取均房州熊祥归朝仍为枢密院令史时高庆裔

摄院事无敢忤者熊祥未尝阿意事之后杜充刘筈同知燕京行省法制未一日有异论熊祥为折衷之天德初累官镇西军节度使被诏为会试主文以事不避难臣之职为赋题海陵大喜以为翰林侍读学士未几致仕大定初起为太子少师时契丹贼斡罕窃号北鄙用兵未息帝以为忧熊祥请以恩信招怀之帝问孰可使者对曰臣虽老凭国威灵尚堪一行帝曰卿老矣无烦为此七年复致仕卒熊祥事母以孝闻母没时年已七十不食三日人皆称之

△范拱

范拱字清叔济南人九岁能属文深于易学宋末登进士第寻事刘豫撰谒庙文豫奇之累擢中书舍人上初政录十五篇纳其说而不能用也豫以什一税氏名为古法其实衰敛刑法严急吏夤缘为暴右丞相张孝纯及拱兄侍郎巽极言其弊请仍履亩法豫不从巽坐贬官自是无复敢言者拱曰吾言之则为党兄不言则百姓困弊乃上疏大略以为国家惩宋重敛之弊什一税民本务优恤官吏奉行太急驱民犯禁非良久计豫虽未即从而亦不加谴齐废梁王宗弼领行台省事访求百姓利病拱以减税为请宗弼从之减旧三分之一拱慎许可而乐推荐李南张辅刘长言皆拱荐也长言自汝州郟城酒监擢省郎人不知其所以进拱亦不自言皇统四年以疾求退致仕斋居读书罕对妻子世宗在济南闻其名大定初拱上封事七年召赴阙除太常卿议郊祀或有言前代因所都定五岳今既都燕当别议五岳名拱曰轩辕居上谷在恒山西舜居蒲坂在华山北以此言之未尝据所都而改岳祀也遂不改拱尝言礼官当守礼法官当守法若汉张释之可谓能守法矣九年复致卒于家

△张通古

张通古字乐之易州易县人读书过目不忘该综经史善属文辽天庆二年进士第补枢密院令史丁父忧起复恳辞不获因遯去屏居兴平太祖割定燕京与宋以通古有素望召之通古辞谢隐居易州太行山下宗望复燕京侍中刘彦宗与通古素善荐其才召为枢密院主奏改兵刑房承旨天会四年初建尚书省除工部侍郎兼六部事高庆裔设磨勘法仕宦者多夺官通古亦免去辽王宗干为论理之除中京副留守

【熙宗纪交聘表天眷元年八月以河南地与宋遣右司郎中张通古等使江南此处与纪表稍异】为诏论江南使宋主欲南面使通古北面通古曰天子以河南陕西予宋宋约奉表称臣使者不可以北面遂索马欲北归宋主遽命设东西位使者东面宋主西面受诏拜起皆如

仪使还闻宋已置戍河南谓送伴韩肖胄曰天子裂壤地益南国当思图报大恩今辄置守戍自取嫌疑若兴师问罪将何以为辞肖胄驰白宋主宋主遽命罢戍通古至上京具以白宗干且曰及其部署未定当议收复宗干嘉曰是吾志也即除参知行台尚书省事未几诏宗弼复取河南通古请先行至汴谕之比至汴宋人已去或言宋人诈退将自许宿来袭我通古曰宣言来者正所以走耳使人覘之宋人果溃去宗弼抚髀笑曰谁谓书生不能晓兵事哉海陵欲除胙王常胜会汴卒孙进诈称皇弟谋作乱因指名胙王以诬构之遣护卫塔斯就汴京鞠治行台欲导孙进引胙王通古极力辩正及塔斯状海陵譖塔斯故出遂杀胙王并塔斯行台诸人惧诛通古曰以正获罪死贤于生海陵既杀胙王不复缘害他人由是行台不坐天德初迁行台左丞进拜平章政事封谭王改封郟王以疾求解机务不许拜司徒封沛王海陵御下严厉数威柄亲王大臣未尝少假以颜色惟见通古必以礼貌正隆元年以司徒致仕进封曹王是年薨通古天资乐易不为表襮虽居宰相自奉如寒素焉子沈天德三年赐杨建中榜及第

△张浩

张浩字浩然辽阳渤海人本姓高东明王之后曾祖霸仕辽为张氏天辅中辽东平浩以策干太祖擢为承应御前文字天会八年赐进士及第授秘书郎太宗将幸东京浩提点缮修大内超迁卫尉卿权签宣徽院事管勾御前文字初定朝仪求养亲去职起为赵州刺史官制行以中大夫为大理卿天眷二年详定内外仪式厯户工礼三部侍郎迁礼部尚书田谷党事起台省一空以浩行六部事簿书丛委决遣无留人服其才以疾求外补除彰德军节度使迁燕京路都转运使俄改平阳尹平阳多盗临汾男子夜掠妇人浩捕得掳杀之盗遂衰息近郊有淫祠郡人争事之浩撤其祠屋投其像水中强宗黠吏屏迹莫敢犯者郡中大治乃缮葺尧帝祠作击坏遗风亭海陵召为户部尚书拜参知政事天德二年丁母忧起复旧职进拜尚书右丞三年广燕京城营建宫室浩与刘箬等监护工作贞元元年进拜平章政事赐宴鱼藻池浩请四方之民欲居中都者给复十年以实京城从之拜尚书右丞相兼侍中封潞王未几改封蜀王进拜左丞相正隆二年改封鲁国公表乞致仕不许海陵欲伐宋将幸汴汴京大内失火使浩兴敬嗣晖营建南京宫室浩从容奏曰往岁营治中都天下乐然趋之今民力未复而重劳之恐不似前时之易成也不听浩朝辞海陵问用兵利害浩欲止海陵用兵对曰赵构无子榼立竦属其势必生变可不烦用兵而服之海陵虽喜其言而不能

从也浩至汴海陵时使宦者梁琉来视工役辄指某处不如法撤之浩不能抗汴宫成费累巨万海陵迁居之浩拜太傅尚书令进封秦国公时治兵南伐部署诸将浩欲奏事不得见乃因周福儿附奏曰诸将皆新进少年恐误国事宜求旧人习兵者为千户穆昆而海陵部署已定恶闻其言杖之海陵发汴京浩留治尚书省事世宗即位于辽阳浩遣户部员外郎完颜默音上贺表【按本纪世宗以正隆六年十月即位于辽阳时完颜默音为博索路总管以兵五千自长安来附与默音传相符不应有为浩奉表事当属纪事之误】明年二月朝京师拜太师尚书令封南阳郡王世宗曰卿在正隆时为首相不能匡救恶得无罪惟在省十余年练达政务故复相卿当自勉毋负朕意浩顿首谢居数日世宗论浩举人材可用者浩举赫舍哩志宁等后皆为名臣大定三年以疾请退除判东京留守疾不能赴任因致仕是岁卒谥曰文康初近侍有欲罢科举者帝曰吾见太师议之浩入见帝问浩曰自古帝王有不用文学者秋浩对曰有谁欤曰秦始皇帝顾左右曰岂可使我为始皇事遂寝【按刘祁归潜志言浩为尚书令时定制以进士为省吏尝言省庭为天下仪表如用胥吏必致货赂混淆用进士所以清其源也议者皆以为当然趋走使令与掾吏不殊士大夫往往不就云】明昌五年配享世宗庙庭泰和元年图像衍庆宫子汝为汝霖汝能汝方汝猷

张汝霖

张汝霖

汝霖字仲泽少聪慧好学贞元元年【按翟永固传张汝霖试进士在贞元元年本传讹作二年今改正】赐吕忠翰榜进士第授左补阙擢大兴县令迁礼部员外郎翰林待制大定八年除邢部郎中明年授太子左谕德兼礼部郎中寻擢刑部侍郎以忧解起复为太子詹事迁太子少师兼御史中丞世宗召谓曰卿尝言监察御史所察州县官多因沽买以得名誉良吏奉法不为表襮必无所称今为台官可革其弊寻改中都路都转运使太子少师兼礼部尚书俄转吏部为御史大夫时将陵主簿高德温多收税户米逮御史狱汝霖具二法上世宗责之曰朕以卿为公正故登用之德温有人在宫掖朕颇详其事朕肯以宫掖之私挠法耶不谓卿等顾徇如是汝霖跪谢复坐失山大兴推官高公美罪谪投棣州防御使顷之复为太子少师兼礼部尚书拜参知政事后因朝奏日论事帝前世宗谓曰朕观唐史见太宗行事初甚厉精晚年与羣臣议多饰辞且有过举朕虽不能比迹圣帝明王然常思始终如一今虽年高敬慎之心无时或怠汝霖对曰古人有言靡不有初鲜克有终魏

征所言守成难者正谓此也帝以为然二十五年章宗以原王判大兴府事帝命汝霖但涓视事日且加辅导久之迁尚书右丞二十八年进拜平章政事兼修国史封芮国公世宗不豫与太尉图克坦克宁右丞相襄同受顾命章宗即位加银青荣禄大夫进封莘时帝在谅阴初出猎谏院联章言新丧中未宜其后冬猎汝霖谏之诏答曰卿能每事如此朕复何忧然时异事殊难同古昔如能斟酌得中斯为当矣时有司言民间收藏制文恐因而滋讼乞禁之汝霖谓王者之法譬犹江河欲使易避而难犯本朝法制坦然明白已着为不刊之典天下之人无不闻诵若令私家收之则人皆晓然不敢为非亦助治之一端也不禁为便诏从之明昌元年三月表乞致仕不许十二月卒谥文襄汝霖通敏习事凡进言必微揣帝意及朋附多人说故言尝不忤章宗新即位改造殿庭诸陈设物日用绣工一千二百人帝以多费意辍造汝霖曰此非帝服用未为过侈将来外国朝会殿宇壮观亦国体也其后奢用浸广盖自汝霖导之

△张元素

张元素字子贞与浩同曾祖祖佑父匡仕辽至节度使元素以荫得官高永昌据辽阳元素在其中斡鲁军至乃开门出降特授世袭铜州明安天会间历西上合门使客省使东宫计司天眷元年以静江军节度使知涿州察廉最进官一阶皇子魏王道济遥领中京以元素为魏王府同提点寻改节度使正隆末年天下盗起元素发民夫增筑城郭未几邻郡皆被寇掠兴平独安世宗即位素来见于东京初元素在东京希海陵旨言世宗尝取在官黄粮及摭其数事至是来见世宗一切不问元素与李石力言宜早幸燕京帝深然之迁户部尚书出镇定武遂致仕卒元素厚而刚毅人皆惮之

△张汝弼

汝弼字仲佐父元征彰信军节度使元素之兄也汝弼初以父荫补军正隆二年中进士第调蒲州乐郊县主簿母高氏与世宗母贞懿皇后有属世宗纳汝弼女弟为次室是为元妃生赵于永中世宗即位于辽阳汝弼与叔元素俱往归之擢应奉翰林文字自皇统以来内藏诸物费用无度吏夤缘为奸多亡失汝弼与宫籍直长高公穆八殿寔达尔王添儿阅寔以类为籍作四库贮之于是内藏库使王可道等皆杖一百汝弼等各进阶顷之兼修起居注转右司员外郎母忧去官起复吏部郎中累迁吏部尚书拜参知政事帝因出猎女真明安穆昆徙中都者前诈以所给近郊官地皆瘠薄不可种艺其腴田皆豪民久佃专为已有诏拘官田在民久佃者与之因命汝弼议其事汝弼请条约立限令百姓

自陈过限许人首告实者与赏帝可其奏仍遣同知转运使张九思拘籍之帝问高丽夏皆称臣使者至高丽与王抗礼夏王立受使者拜何也
汝弼等对曰故辽与夏为甥舅夏王以公主故受使者拜本朝与夏约和誓书称一遵辽旧仪今行之已四十年不可改也帝曰卿等言是也拜
尚书右丞进左丞与族弟参知政事汝霖同日拜时以为荣久之坐擅增诸皇孙食料与汝霖及丞相守道右丞钮祜禄额特埒各削官一阶汝
弼在病告帝谓宰相曰汝弼久居执政练习制度颇能斟酌人材而用心不正乃罢为广宁尹汝弼为相不能正谏帝所欲为则顺而导之所不
欲为则微言以观其意帝责之则婉辞引过且黻货以计取诸家名园甲第珍玩奇好士论薄之大定二十七年卒汝弼既与永中甥舅阴相为
党章宗即位汝弼妻高氏每以邪言怵永中觊非望有司鞫治高氏伏诛事连汝弼帝以事觉在汝弼死后得免削夺

△纳哈塔椿年

纳哈塔椿年本名乌页初置女真字立学官于西京椿年与诸部儿童俱入学最号警悟久之选诸学生送京师俾上京教授页嚕教之椿
年在选中补尚书省令史累官殿中侍御史改监察御史海陵为相荐为右司员外郎编定新制海陵篡立以为谏议大夫椿年有酒失海陵使
之戒酒遂终身不复饮改秘书监修起居注授世袭明安为翰林学士兼御史中丞正隆初起上京诸明安于中都山东等路安置以劳赐玉带
厩马奉迁山陵还为都点检赐今名拜参知政事荐大理寺丞赫舍哩罗索为右司员外郎罗索后赐名良弼世宗时号贤相焉二年椿年薨海
陵亲临哭之追封特进谭国公谥忠辩以长子萨木哈为定远大将军袭明安次子哈达为忠武校尉椿年有宰相才好推挽士类然颇营产业
冒占西南路官田八百余顷大定中括检田土百姓陈言椿年子萨木哈等三十余家占据官地贫民不得耕种诏诸家除牛头税地各再给十
顷其余尽赋贫民种佃世颇以此讥椿年云

△祁宰

祁宰字彦辅江淮人宋季以医术补官王师破汴得之后隶太医累迁中奉大夫太医使海陵将伐宋宰欲谏不得见会元妃有疾召宰诊
视既入见即上疏略言国朝之初祖宗以有道伐无道曾不十年荡辽戡宋当此之时上有武元文烈英武之君下有宗翰宗雄谋勇之臣然犹
不能混一区宇举江淮巴蜀之地以遗宋人况今谋臣猛将异于曩时加以大起徭役缮治甲兵调发军旅赋役烦重民人怨嗟此人事之不修
也闲者昼星见于牛斗荧惑伏于翼轸已岁自刑害气在扬州太白未出进兵者败此天

时不顺也舟师水涸舳舻不继而江湖岛渚之闲骑士
驰射不可驱逐此地利不便也言甚激切海陵怒命戮于市籍其家产天下哀之綦戩宰
堦也海陵疑奏疏戩为之辞曰实不知也乃杖之大定
四年赠资政大夫复其田宅章宗即位诏访其子忠勇校尉平定州酒监公史擢尚药局
都监泰和初诏定功臣谥尚书省掾李秉钧上言故赠
资政大夫祁宰以忠言被诛慕义之士尽伤厥心世宗即位赠之以官陛下录用其子甚
大惠也而有司拘文以职非三品不在议谥之例臣以
为非常之人当以非常之礼待之乞诏有司特赐谥以旌其忠制曰可下太常谥曰忠毅
△诺延温都思忠

诺延温都思忠本名伊里布阿卜萨水人太祖伐辽未有文字凡军事当密覆者诸
将皆口授思忠思忠面奏受诏还军传致诏辞往复数
千言无少误及辽人议和思忠与乌凌阿赞谟为札拉往来专对其闲自收国元年正月
辽人遣僧嘉努来议和前后十三遣使和议终不可成
其后思忠从宗翰伐宋封刘豫为齐帝以为傅宣使俄授穆昆后从宗弼克和尚原还为
西京留守天眷初改蒲州防御使陕西帅府官属往往
豪压贫民为奴遣工匠千人东至河上思忠留止其人以闻诏皆还之为行台尚书左丞
黷货无厌时赞谟为行台参知政事心甚鄙之两人由
是交恶海陵杀左丞相秉德于行台赞谟妻秉德乳母也思忠因构赞谟杀之是岁思忠
入为尚书右丞进平章政事封郃国公拜左丞相兼侍
中改封沂国天德三年致仕贞元二年起拜太傅领三省事封齐国王寻拜太师兼劝农
使复为尚书令海陵欲定封爵制度令思忠建白封王
者皆降封公惟封思忠广平郡王赐以玉带思忠言百官不当封妻海陵从之惟对思忠
次室为郡夫人思忠亦自谓太祖旧臣颇自任虽海陵
遂非拒谏而思忠尽言无所避海陵将伐宋问诸大臣皆不敢对思忠曰不可海陵不悦
谓思忠曰汝勿论可否但云何时克之思忠曰十年海
陵曰何久也思忠曰太祖伐辽犹且数年今百姓愁怨师出无名江淮闲暑湿湫热不堪
久居未能以岁月期也海陵怒顾视左右若欲取兵刃
者思忠无所畏恐复曰老臣历事四朝位公相苟有补于国家死亦何憾有顷海陵曰自
古帝王混一天下然后可为正统尔耄夫固不知此其
后海陵运四方甲仗于中都思忠曰州郡无兵何以备盗贼又尽籍丁壮为兵思忠曰山
后契丹诸部恐未可尽起皆不听后州郡盗起守令不
能制契丹萨巴斡罕果反正隆六年思忠薨海陵深悼惜之大定十二年诏复乌陵阿赞
谟官爵赠特进初思忠已构杀赞谟遂纳其妻曹氏尽
取其家财产章宗即位赞谟女五十九乞改葬诏赐葬地于怀州并以思忠原取家资付

之子谦

诺延温都谦

诺延温都乌达

诺延温都谦

谦本名伊德累官御史中丞世宗谓之曰省部官受请托有以室家传达者官刑不肃士风颓敝如此其纠正之初世宗至中都放宫人还家有称心等数人在放遣之例所司失于检点不得出宫心常怏怏大定二年闰二月癸巳夜【按世宗纪太和厚德殿在闰二月辛卯与此互异】遂于十六位放火延烧太和神龙殿帝命近臣迹火之所发诛称心等谦意宫殿被火将兴工役上表乞权纾修建帝诏谦曰朕思正隆比年徭役百姓疮痍未复边事未息岂遽有营缮耶久之袭父思忠济州明安利涉军节度副使乌凌阿楚呼追捕逃军至明安中谦畏其扰乃釀民财赂楚呼事觉楚呼抵罪谦坐夺明安遇赦使复其所

诺延温都乌达

乌达思忠侄也天会闲充女真字学生通书史工为诗选为尚书省令史累官同知大兴尹京城盗贼止息事无留滞历刑兵吏三部尚书正隆伐宋为武定军都总管世宗即位遣使召之授咸平尹为北边行军都统改会宁尹时初定斡罕人心未安乌达为治宽简多备御谨斥候边郡以宁改北京留守以廉察举乌达所在有能名无私过由是入拜参知政事世宗谕之曰凡在卿上者行事或不当理咨禀不从卿以所见奏闻下位有可用之才当推荐之俄以疾卒人之帝谓侍臣曰朕乐得忠直之人有如乌达者乎卿等为朕举之其见思如此

△高桢

高桢渤海人辽太师牟翰五世孙少好学尝业进士翰鲁讨高永昌已下涿州永昌惧伪送款以缓师是时桢母在涿州遂来降告以永昌降款非诚翰鲁乃进攻既破永昌以桢同知东京留守事授明安天会六年迁尚书左仆射判广宁尹加太子太傅在镇八年政令清肃吏畏而人安之十五年加太子太师提点河北西路钱帛事天眷初同签会宁牧熙宗幸燕改同知燕京留守封戴国公魏王道济出守中京以桢为同判俄改行台平章政事为西京留守封任国公时奚霫军民皆南徙穆昆布木因之啸聚为盗海陵患之以桢为中京留守贼平封河内郡王海陵至中京桢警夜严肃有近侍冯僧嘉努李街喜皆得幸海陵尝夜饮干禁桢杖之濒死由是权贵皆震慑迁太子太傅行御史大夫封莒王策拜司空进封代王桢久在台弹劾无所避每进对必以区别流品进善退恶为言当路忌

之荐张忠辅马讽为中丞欲令以事中桢正隆例封冀
国公桢因固辞曰臣为众小所嫉恐不能免尚可受封爵耶海陵知其忠直慰而遣之及
疾革书空独语曰某事未决某事未奏死有余恨卒海
陵悼惜之桢性方严家居无声伎之奏虽甚暑未尝解衣缓带对妻孥危坐终日不一谈
笑其简默如此

△白彦敬

白彦敬本名约索博勒和部族人初名彦恭避睿宗讳改焉祖额布根父阿苏仕辽
为率府率彦敬善骑射起家为吏补元帅府令史除都
元帅府知事招谕部部授以金牌行数千里有功超迁兵部郎中熙宗罢统军司改招讨
司遣彦敬分僚属收牌印谕诸部隶招讨司还为本部
侍郎改刑部侍郎怨家诬开府慎思与西北路部族谋叛彦敬鞫得其实海陵嘉之迁签
书枢密院事正隆六年调诸路兵伐宋及调民马使彦
敬主会宁扶余呼尔哈三年事改吏部尚书充南征万户迁枢密副使契丹萨巴反枢密
使布萨呼图克等以无功坐诛以彦敬为北面行营都
统许以便宜行至北京闻南征诸军逃归者皆奔东京欲推戴世宗彦敬与副统赫舍哩
志宁谋阴结会宁尹完颜富色里利涉军节度使通吉
义以图之世宗已即位使舒穆噜伊德伊喇赫伯等九人招彦敬志宁彦敬拒之杀伊德
等及完颜默音将兵攻北京彦敬使偏将拒于建州通
吉义先归世宗富色里称疾不至世宗密遣人揭榜于北京市购以官赏彦敬志宁恐人
图已遂降以为哈斯罕节度使不数月召为御史大夫
翰罕平召彦敬为兵部尚书出为凤翔尹累改河中尹大定九年卒于官

△张景仁

张景仁字寿甫辽西人果官翰林待制贞元元年 【原文作二年今依翟永固传改】
与翟永固俱试礼部进士以尊祖配天为赋题忤
海陵旨杖之大定二年布萨忠义伐宋景仁掌其文辞宋人议和已改奉表为国书称臣
为侄但不肯世称侄国往复七书然后定其书皆景仁
为之指事达意世宗称其能五年罢兵入为翰林直学士七年迁侍讲八年为详读官迁
翰林学士兼同修国史十年兼太常卿学士转承旨兼
修国史改河南尹二十一年召为御史大夫仍兼承旨修国史世宗谓景仁曰卿博学老
儒求如古之御史大夫斯为称矣卿醉中颇轻脱失言
当以酒为戒初朝臣言景仁有文艺而颇率易不可任台察景仁被诏就台中治监察罪
辄以便服视决罚帝闻之召责景仁未几劾奏平章政
事乌库哩元忠辄断六品官无人臣礼帝是其奏传诏戒敕元忠元忠尚豫国公主怙宠
自任倨慢朝士景仁劾之朝廷肃然是岁卒

△左光庆

左光庆字君锡蓟州人宰相企弓之孙也幼颖悟沈厚少言以荫补合门祗候迁西上合门副使丁父忧起复东上合门副使再转西上东上合门使兼太庙署令光庆好古读书识大义喜为诗善篆隶尤工大字世宗行郊礼受尊号及受命宝皆光庆篆凡宫庙榜署经光庆书者人称其有法典领原庙坤厚陵寿安宫王役不为苛峻使劳逸相均身兼数职勤慎周密未尝自伐世宗独察之迁同知宣徽院事改少府监丁母忧起复右宣徽使世宗幸上京光庆治仪仗制度人以为得宜大定二十五年卒平时喜为善言蓄善药号善善道人时信浮屠法自作真赞语皆任达云

钦定续通志卷四百二十八

●钦定续通志卷四百二十九 列传二百二十九

列传

金【七】

○金七

温特赫富拉塔 伯特德哩布 萧旺嘉努 田颢 赵臧
耶律图善 乌雅呼尔喀 乌雅沃哩布 萧恭
耶律恕 郭企忠 乌苏额琳 延扎们都 布萨欢塔
郑建充 乌库哩萨哈 高松 通吉义
乌雅富埒赫 乌雅普霞努【札拉】 李师雄 尼玛哈楚呼
瓜尔佳札拉 图克坦喀齐喀

温特赫富拉塔

伯特德哩布

萧旺嘉努

田颢

赵臧

耶律图善

乌雅呼尔喀

乌雅沃哩布

萧恭

耶律恕

郭企忠

乌苏额琳

延扎们都

布萨欢塔

郑建充

乌库哩萨哈

高松

通吉义

乌雅富埒赫

乌雅普霞努

李师雄

尼玛哈楚呼

瓜尔佳札拉

图克坦喀齐喀

△温特赫富拉塔

温特赫富拉塔隆州伊兰明安噶勒珠寨人魁梧美髯有谋畧以智勇闻都统杲取中京富拉塔权明安领军五千遇契丹万余与战败之出恭古鲁道败敌八千至拉们华道设伏败敌万人有顷贼三千余复寇拉们华道富拉塔整队先登贼识其旗帜望风而遁遂奋击之亲执贼师旺统元年从梁王宗弼伐宋留军唐州敌众奄至富拉塔击之大名军万四千富立塔率亲管明安冲击敌少却乃张左右翼并击敌众散走复以兵三千击走援兵二万时邳州土贼啸聚几二十万富拉塔军三千分数队急攻贼溃去南京路遇敌军二万是日有兵自城中出者击败之二年迁定远大将军同知凤翔尹六年改京兆尹转宁州刺史改西北路招讨都监迁永定军节度使海陵南征改武卫军都总管大定三年授开远军节度使改泰宁军卒十九年以功官其子

△伯特德哩布

伯特德哩布奚五王族人辽御院通进天会初与父托卜嘉归朝授世袭穆昆后以京兆尹致仕德哩布招降松山及平州蓟州【按金史地理志无苏州惟蓟州与平州俱隶中都路此处苏州当是蓟州之讹谨改】未附军民督之耕作宗室伐宋德哩布为军马明安留与诸将规取保遂安三州攻安肃军与河闲雄保援兵先战大事继至大破其兵遂拔安肃德哩布摄通判事降将胡愈结众谋乱德哩布勒兵擒愈及其众五十余人改安肃为州就除同知州事改磁州捕获太行羣盗元帅府以磁相二州屯兵属之擒王会孙小十苗清等羣盗平迁滨州刺史廉入优等丁母忧起复本州岛改刺涿州入为工部郎中从张浩营缮东京宫室及田谷党事起朝省一空德哩布摄行六部事迁大理卿出为同

知东京留守天德闲丁父忧起复洺州防御使正隆盗起州县无兵不能御洺旧有河附城下乃引水注壕中盗弗能近州赖以安迁崇义军节度使未几告老归田里卒德哩布为人孝谨为政简静不事蓄积凡调官行李止车一乘婢仆数人而已

△萧旺嘉努

萧旺嘉努奚人居奎腾河魁伟多力未冠仕辽为太子率府率天辅七年都统臬定奚地旺嘉努率其乡人来降命为千户领之奚王和勒博既死其亲党彻辰阿固齐犹保色克山旺嘉努与托纽往讨生擒之降其余众时平泺多盗旺嘉努以所部屡破贼兵数被赏赉从宗望伐宋败郭药师于白河至河上宋兵扼津要与诸将击败之进围汴破其东门明年再伐宋宗望军至中山诸门分兵出战焚我攻贝祁州【按金史地理志祁州河闲皆与中山相近宋史亦同此处误作祁谨据改】河闲各以兵来扰怕败之师还屯镇河朔从临淄贝勒卓琳讨滨州贼葛进领穆昆先登力战破其众数万明年攻沧州宋兵拒战复从卓琳击走之宋将徐文以舟百艘泊海岛即以商船十八进袭斩首七百级获舟二十天会八年除静江军节度使授世袭千户从梁王宗弼征伐为万户还为五院部族节度使天德二年改乌尔古德呼勒招讨都监卒

△田颢

田颢【按太祖本纪天辅七年二月辽来州节度使田颢等降考辽史作田颢本纪既误颢作显而传中又误颢为灏殊未画一应从辽史为是谨据改】字默之兴中人辽天庆八年进士历官金部员外郎权归德节度使太祖定燕颢举四州版图归朝加都官郎中权节度使事四迁知真定府事招降齐博游贵等贼众五千余人己而贵复判去颢遣齐博伪叛从贵伺闲杀之降其众贼垒悉平三迁行台左丞彰德军节度使是时新定力役颢蠲籍之半而上之故相之繇赋比他州独轻从同知河北东路都总管改同签燕京留守司事民遮留不得出易服夜去改河东南路转运使寻改绛阳军节度使居三年以疾谢事不允移镇震武军【按金史地理志有震武军隶河东北路无振武军名此处讹作振谨据改】入为刑部尚书居三月请老卒于家

△赵臧

赵臧字德固辽阳人其妇翁以优伶得幸于辽主臧补合门祗候累迁太子左卫率后居滦州宗望讨张觉臧踰城出降授洛苑副使累迁棣州刺史侍卫步军都虞候再伐宋攻真定与有功改刺商州历沿边安抚使陇州团练使【按王圻续文献通考云辽南面官有汉军都团

练使金不置考金地理志有陇州防御使而无团练使之官然则本传所云盖防御使之误也】天会十年改知石州臧久治兵不善治民坐谤议谪监中州甜水盐齐国废河南皆以宿将守之授臧宿州防御使统本路军民臧重义接儒士尝以事至汴有故人子负官钱百万臧以橐金赠之其子恚为私费复代输之顷子有讼徐帅不法者诏臧鞫治臧委曲营护坐是废罢寓居于燕海陵出领行台省至燕臧往见因诉其事及海陵即位起为保有军节度使贞元初改内省使【按王圻续文献通考云辽南面内省官曰内省使金则分领于宣徽使而不设内侍省则内省使亦辽官名也岂臧为辽人故传亦多仍辽旧欤】未几为中都路都转运使明年再徙顺义兴平入为太子詹事镇汝南以疾卒后十余年臧子孙及司徒张通古子孙皆不肖淫荡破费财世宗闻之诏自今官民祖父亡没子孙不得分割居第止以嫡幼主之母致鬻卖仍着于令

△耶律图善

耶律图善系出约尼氏在辽世为显族图善仕至金吾卫大将军辽帝奔天德图善以所部降宗翰承制授西北路招讨使从伐宋率本部为先锋至汾州遇宋将折家军请济师并力破之攻太原隆德府克洛阳及罗索平夹右图善皆从天会七年授太子少保十年迁尚书左仆射致仕卒正隆例赠特进郃国公

△乌雅呼尔喀

乌雅呼尔喀海兰路锡馨水人后授爱呼穆昆因家焉从栋摩围平州有功及伐宋围汴与五穆昆遇宋兵万人于城南驰击败之天会五年攻宗城县敌弃城走恩州呼尔喀追杀千余人获车四百辆七年讨平泰山羣盗毁其营栅复破兖州山寇三年余八年攻庐州至柘皋镇呼尔喀领甲士三十为先锋执宋所遣持书与刘锜者七人复以先锋军攻和州设伏获姚观察九年【按宋建炎三年金天会七年也宋高宗纪建炎三年八月金人犯庐州又昭和州金太宗纪天会八年十二月宗辅以陕西事状闻诏奖谕之以事考之八年九年字俱误】定陕右呼尔哈以所部遇敌千人败之生擒甲士一人尽得敌之虚实又从富埒瑋徇地熙奏败敌兵二千于秦州前后皆被赏宋人屯襄阳府监事阿巴遣呼尔喀领四明安往攻宋兵三千方营壁垒乘其未就突战破之梁王宗弼复河南将攻陈州遣呼尔喀以甲士三十捕侦候人至蔡州西败敌兵八十余获南顿县令及攻陈州夜半敌溃走呼尔喀亟追袭明安托克索亦领军继至大败之皇统二年迁定远大将军历同知京兆尹兼本路兵马都总管大定闲累授归顺军节度使十年移镇显德卒于官十九年诏授其子

五十六武功将军世袭本路博德和河穆昆

△乌雅沃哩布

乌雅沃哩布海兰路禅岭人徙大名路天会中从其父达希布隶元帅右监军麾下达兰以事赴阙以达希布自随沃哩布领其父穆昆从大军攻沧州方夷壕隍城中兵来拒沃哩布击却之王师下青州力战有功获马百匹降贼党甚众青州戍将德克济布以莱州兵众请济师于帅府沃哩布将十二穆昆兵往救降四营拔一营得户四千又败贼兵五万于恩州降户五万获牛畜万余将至临清败敌兵三千擒贼首以献时德克济布败于恩州沃哩布复以兵四千往救破敌万余宋兵十万在单父闲沃哩布领其亲管穆昆从伊楞古往攻之力战有功大军经畧密州沃哩布将兵三千为前锋败敌万人于高密追至城下杀戮殆尽获马牛三千余又与伯胜败贼王义军十余万于州南是夜贼兵数千袭营复以兵击走之天眷二年袭其父世袭明安授宁远大将军皇统七年益以亲管穆昆天德三年除同知归德尹正隆初为唐古部族节度使大定二年为保大军节度使改镇通远时宋军十余万入河陇元帅左都监喀齐喀奏请益兵诏益兵七千遣沃哩布与彰化军节度使宗室璋等七人偕往以备任使进阶龙虎卫上将军卒于军中

△萧恭

萧恭字敬之纳琳奚王之后父翊天辅闲归朝从政兴中遂以为兴中尹师还以恭为质子宗望伐宋翊领建兴成川懿五州兵为万户军帅以恭材勇使代其父行时年二十三至中山先以所部击败宋兵经山东及渡淮袭宋主皆在军中师还帅府承制授德州防御使奚人之屯滨棣闲者皆隶焉改棣州防御使皇统闲累迁兵部侍郎授世袭穆昆坐问禁中起居状决杖夺一官贞元中历兵部尚书经昼夏国边界还过临潼失所佩金牌至太原忧患成疾而卒海陵深悼惜之命其子玖格护丧以还赙赠甚厚

△耶律恕

耶律恕字忠厚本名耨埒辽横帐秦王之族也为人谨愿有志喜读书通契丹大小字与耶律果巴来归罗索问果巴曰与尔同来者谁可任军旅事果巴对曰耨埒可罗索与宗翰伐宋恕隶前锋取和尚原攻仙人关为睿宗所知再除太原真定少尹萨里罕辟署陕西参谋委以军务迁行台兵部侍郎再迁尚书左司郎中海陵为平章政事谓恕曰君亦有党乎恕正色曰不以其道得之非恕之志也何朋党之有久之为沁南军节度使迁行台工部尚书行台罢改安国军节度使为参知政事以疾求解为兴中

尹入为太子少保正隆元年致仕封广平郡王卒二年

例赠银青光禄大夫

△郭企忠

郭企忠字符弼唐汾阳王子仪之后自子仪至承勋皆节镇北方唐季承勋入辽子孙继为天德军节度使至昌金降为副使企忠幼孤事母孝谨年十三居母丧哀毁如成人服除袭父官加左散骑常侍天辅中大军至云中遣耶律坦招抚诸部企忠来降军师命同句当天德军节度使事徙所部居韩州及见太祖问知其家世礼遇优厚天会三年领西南诸部蕃汉军兵为明安从破雁门屯兵遥领桂州观察留后镇代州明年贼杨麻胡等聚众数千于五台企忠与同知州事里讨平之迁知汾州事时汾州初下居民多被掠城邑萧然企忠言之帅府听其亲旧赎还未几完实如故石州贼阎先生众数万至城下僚属虑有内变请为备企忠曰吾于汾人有德保无他乃率吏民城守会援至合击破之六年改静江军节度留后迁天德军节度使汴京步军都指挥使累迁金吾卫上将军秩满权沁州刺史到官岁余卒

△乌苏额琳

乌苏额琳善骑射袭父萨哈穆昆从蒙克攻东京及广宁击北京山贼皆有功萧布展来攻恩州额琳以六十骑侦之逮夜遇敌数百骑掩击之生获三人知市展众九万且至故蒙克得以为备遂破布展从宗望伐宋破尉氏中牟援兵取其城又以兵百五十人破敌于沧州西明年再伐宋蒙克戍开州额琳以骑四百守河复败千余人斩首七百余宗弼渡淮闻王善兵扼其前使额琳济师败王善于和州北李成以兵七万据乌江额琳复败之宗弼遂渡江至江宁天会十五年沂州窦防御叛额琳败而获之录前后功授明安加昭武大将军宗弼再取河南额琳以五十骑败杨家贼五百于徐州东复以功授赏天德二年除唐州刺史移淄州迁实垒部族节度使行至北京病卒

△延扎们都

延扎们都隆州巴尔嘉山人身长美须髯天会闲从其兄扬阿在军中方取汴京其兄战歿遂擐甲代之睿宗定陕西以们都为佛宁隶监军杲亲管万户攻饶风关至坊州杲欲与总管富勒呼会于凤翔遣们都领六十骑先往期会及还迁备得地形阨天眷初叛将李世辅伪邀杲至私署以献甲为名遂以兵劫执而去们都突出以告押军明安完颜达兰同率兵追及杲由此得脱以功迁明威将军复从杲招复陕西刘豫初废诸路多反复不一杲授们都牌札令往抚定们都所至多张甲兵从者安之违者讨

之帖然无复叛者皇统闲历知保安军事正隆初为宁
州刺史大定初宋将吴璘等以军数十万人据秦陇元帅府承制以们都为勇烈军都总
管领军讨之宋人保据德顺都监喀齐喀领军四万来
赴遂复德顺州明年奏陇平以功迁金吾卫上将军授通远军节度使五年改庆阳尹兼
本路兵都都总管卒于官十九年录功以子禄格世袭
本路海兰乌珠明安都伦赫绅穆昆授武功将军们都性忠谨安置营壁尤能慎密临敌
泰然自若如平时由是人益安附功易成焉

△布萨欢塔

布萨欢塔扶余路嘉们人身长七尺勇健善骑射年十六从其父和木索征伐初授
修武校尉为宗弼章京天眷二年与宋岳飞相拒欢塔
领六十骑深入觐何至鄢陵败宋护粮饷军七百余人多所俘获皇统九年除慈州刺史
再迁利涉军节度使授世袭济州和卓海兰明安舍哩
斡实穆昆贞元初以忧去官起复旧职历泰宁永定军改咸平尹海陵杀欢塔弟枢密使
呼图克召欢塔至南京以有功旧释之改兴平军节度
使世宗即位以为广宁尹斡罕反为行军都统与海兰路总管图克坦克宁俱在左翼败
斡罕于长泆改临潢尹贼平赐金帛改海兰路兵马都
总管徙显德军庆阳尹致仕大定十二年帝恩旧功复起为利涉军节度使寻以金紫光
禄大夫致仕卒欢塔历一十七官未尝为佐贰性沈厚
有识明于听断所至有声

△郑建充

郑建充字仲实其先京兆人占籍鄜州仕宋累官知延安府事天会七年来降仍知
延安屯兵三千宋刘光烈兵八万来攻相拒四十余日
攻益急建充遣人会缓赫军来击破之俘其裨将贺贵迁节制司统制军马改京兆府路
兵马都监败宋曲端于彭原高昌宗据延安为宋守建
充击之尽复城邑复知延安军府事累迁博州团练使知宁州齐国废朝廷以地与宋建
充为宋环庆路经畧安抚副使仍知宁州天眷初复取
陕西仍以建充为经畧安抚使知庆州从破甘谷城改平凉尹时营建南京宫室大发河
东陕西材木浮河而下经砥柱之险筏工多沈溺有司
不敢以闻乃诬以逃亡锢其家建充白其事请至砥柱解筏顺流散下令善游者下流接
出之锢者得释正隆军兴括筋角造军器百姓往往椎
牛取之或生拔其角建充白其事于朝廷充性刚暴常畜獠犬十数奴仆有罪既答复
犬啮之骨肉都尽虽谦逊下士于敌已上一无所屈省
部支移有不应法辄即毁裂在位者衔之军胥李免窃用公帑自度不得免乃诬建充藏
甲欲反再鞫皆无状奏上摄事者素与建充有隙恐其

得释使吏持文书给建充曰朝省有命奈何建充曰惟汝所为是夜死于狱中长子懋亦死焉

△乌库哩萨哈

乌库哩萨哈海兰路爱呼河人后徙真定睿宗闻其勇畧选充章京后从宗弼征伐补曲院都监从伐宋与宋兵遇于颍州先登破之皇统元年领汉军千户师府再以军四千隶焉除同知郑州防御使事大定初迁太子少詹事帝以萨哈昔事睿宗积劳苦又辅佐太子宣力为多因改洺州防御使以酬其劳迁永定军节度使历临潢凤翔尹陕西路统军使东平尹节制州郡躬行俭约政先宽简边庭久宁人民获安召为签书枢密院事卒十八年世宗追录萨哈旧劳授其子大兴河北西路爱呼河世袭明安阿里玛河穆昆阶武力将军

△高松

高松元名搏多澄州析木人年十九从军为佛宁有力善战宗弼闻其名召置左右从破汴京及和尚原累官咸平总管府判官世宗即位充管押东京路渤海万户兵部尚书克实谋反前同知延安尹李老僧曰我与万户高松谋之必从我矢众曰若得此军举事易矣老僧往见松说松曰君有功旧人至今不得大官何也松曰我一县令也每念圣恩累世不能报尚取攻望乎老僧遂不敢言松从征斡罕以功迁咸平少尹四迁至崇义军节度使卒

△通吉义

通吉义本名呼拉布哈斯罕人徙居辽阳之阿穆济山祖辉罕父密拉收国二年哈斯罕来附密拉领户三百遂为穆昆义以质子至上京善女真契丹字为管句御前文字天会十五年擢右监门宁大将军除宁化州刺史察廉迁德呼勒部族节度使历河南路统军都监武胜军节度使边郡妄称寇至统军司徒居民于汴义不听曰梁王南伐彼死亡未复岂敢先发此城中有权场若自动彼将谓我无人既而果无事贞元时历利涉军节度使世宗即位义即日来京以为参知政事帝谓义曰正隆率诸道兵伐宋若反旆北指计将安出义曰正隆多行无道杀其嫡母阻兵虐众必将自毙陛下太祖之孙即位此其时也正隆已渡淮斡罕未炽将士在南家属皆在此惟早幸中都为便帝纳之次榛子岭世宗闻海陵死于军中谓义曰信如卿所料大定二年罢为益都尹兼本路兵马都总管以疾致仕卒于家子和尚大定初除应奉翰林文字佩金牌持诏书宣谕中都以南州郡和尚为奉使擅废置州县官辄行杀戮诏尚书省鞫治之十九年诏以义孙引寿为实喇达哈世袭穆昆义性辩给

善谈论服玩不尚奢侈食不兼味云

△乌雅富埒赫

乌雅富埒赫率宾路卓多明安人改属海兰路祖色埒预平乌春乌木罕之乱及伐辽宋皆有功追授明安赠银青光禄大夫父古页袭明安富埒赫从太祖伐辽勇闻军中天眷三年袭明安受宁远大将军累官武宁军节度使迁京兆尹海陵伐宋行武威军都总管军还为顺义军节度使图克坦喀齐喀定秦陇富埒赫统完颜实讷埒延扎们都兵救德顺州改延安平凉尹致仕封任国公大定十九年卒

△乌雅普霞努

乌雅普霞努率宾路锡馨河人也后改隶海兰路父呼实罕天辅初追授明安亲管穆昆普霞努身长有力多智略袭其父明安穆昆阶宁远大将军天德二年授陈州防御使贞元元年改昌武军节度使以善绥抚再任海陵南征改归德尹为神策军都总管当屯济州比至盗已据其城普霞努领十余骑往觐之为贼众所围乃与军士皆下马射杀百余人贼众败走迤邐袭之至暮而还明日攻破其城令士卒毋害居民郡中获安民感之立祠以祭大定二年为庆阳尹元帅左都监图克坦喀齐喀奏宋军十余万据险阻请益师诏益兵七千与旧兵合为二万遣普霞努与延安尹高景山等分领其军以往卒于军子札拉

乌雅普札拉

乌雅普札拉

札拉力兼数人勇果无敌手持两铁筒重数十斤正隆伐宋诸明安穆昆兵皆行州县无备契丹瓜里陷韩州围信州远近震骇札拉道出咸平遂率本部亟还信州与战败之已而贼重整兵环攻势且登城札拉下巨木压之杀贼甚众瓜里解去札拉追及于韩州东八里许贼方就平野为阵札拉身率锐士击之贼不能成列乃易马督军复击之贼众大败遂走东京咸平隆州民复帖然世宗即位札拉谒见充护宁为骁骑副都指挥使领万户击斡罕战于和托大军未集札拉领左翼六百骑与战杀贼三千余人富察世杰战不利走札拉军贼合围攻之札拉拒战宗亨军来援贼乃引去西过诺尔岭追及陷泉贼先犯右翼札拉迎之贼退走伪护卫阿卜萨身长有力奋大刀自后斫札拉札拉回击之折其右臂与赫舍哩志宁军合击贼遂大败斡罕平以为宿直将军父忧起复袭其父明安除蔡州防御使改宿州迁昌武军节度使徙镇邠州为贺宋岁元使射淮上柳树矢入其树饮羽宋人异之改凤翔尹入为右副点检复出尹兴中改博索路总管高丽惮其威名凡以事至者望而跪之

大定二十五年为兴平军节度使卒于官札拉贞懋寡言平居极和易及临战奋勇见者无不辟易虽重围万众出入若无人之境云

△李师雄

李师雄字伯威鴈门人有材力善谈兵宋宣和中以骑射登科累官大名清平尉王师至大名师雄与府僚出降摄本路兵马都监齐国建以为大总管府先锋都统制知淄州齐废为汴京马军都虞候历知宁海军曹州刺史皇统二年为武胜军节度使正隆末为河州防御使宋将吴璘军攻秦陇会师雄以事就逮临洮宋兵至城下州人乘城拒守谋欲出降师雄止之宋将权仪鞭马方上浮桥师雄射之坠桥下遂擒权仪宋师退后从元帅左监军图克坦喀齐喀攻河州有功未几以疾归汴卒

△尼玛哈楚呼

尼玛哈楚呼哈萨罕人初为大■〈白上大下〉章京补元帅府通事宋将韩世忠率军数万围邳州楚呼将轻骑数百与侦人数辈闲道往救连败敌兵宋人攻济州夺战舰畧尽时楚呼往宿州分富勒呼军还至大河与敌遇力战败之尽复战舰王师复河南宋别将由胡陵夜袭贝勒布呼营士卒尽没楚呼从东平总管并力战却之楚呼勇敢善伺敌虚实以此屡捷帅府承制加忠显校尉为蕃部图哩将之官河闲尹大■〈白上大下〉白于元帅请留楚呼以给边事许之录功授庆阳少尹前后赐银币甚厚海陵将伐宋而契丹反枢密使布萨呼图留守萧怀忠等皆以无功诛乃命楚呼与都统白彦敬副统赫舍哩志宁进讨会世宗即位于辽阳楚呼迎谒迁辅国上将军与都统乌哲库副统琿讨斡罕楚呼行至斡里与斡罕遇左军小却楚呼挺枪驰入其阵手杀二十余人贼乃退元帅布萨忠义自和托往追楚呼以前锋追及于陷泉遂大败之事平迁西北路招讨使改东北路楚呼与完颜思敬有隙思敬为东京留守奉诏至招讨司楚呼不出钱帝闻之遣使切责既而思敬为平章政事北路招讨使楚呼以私取诸部进马事觉被逮楚呼为人尚气次海滨县慨然曰吾岂能为思敬辱哉遂缢而死大定十九年诏以楚呼旧功授其子和尚世袭布呼明安徙图罕穆昆

△瓜尔佳札拉

瓜尔佳札拉状貌魁伟善女真契丹书天德初以功臣子充护卫历知平定军事海陵南伐为武威军副都总管大定二年授景州刺史迁同知京兆尹时宗室璋等与宋将吴璘相拒于德顺州元帅左都监图克坦喀齐喀遣札拉与诸将议破敌策璋等议曰我兵屡胜而敌不退者知我军少故也须都监亲至方可破敌于是喀齐喀领兵四万至遂下德顺州入为殿前

右卫将军袭父明安改左卫将军迁右副点检有疾丞
相良弼目为国器亲往视之九年出为东北路招讨使兼德昌军节度使到官治有勤绩
其断狱公平道不拾遗迁临潢尹兼本路兵马都总管
蕃部畏服边境以安改西北路招讨使十二年卒札拉性忠实内明敏每论大事超越伦
辈太师勛尝以方之古人云

△图克坦喀齐喀

图克坦喀齐喀上京速苏海水人父佛宁世袭明安喀齐喀魁伟膂力过人一经闻
见终身不忘天辅闲从金源郡王罗索为音京天会六
年以功为穆昆寻领罗索亲管明安帅府闻其才命权左翼军事皇统二年为陇州防御
使连败宋兵于高陵秦州凤翔皆以少击众领二穆昆
拒饶风关宋兵二千来夺关口奋击败之诸军乃得遇险累迁平凉临洮延安尹时关陕
以西初去兵革民多失业喀齐喀守之以静还归者甚
众正隆六年为西蜀道兵马都统大定二年为元帅右都监表陈伐宋方畧诏许便宜从
事转左都监破宋兵于华州时宋吴璘兵十余万侵占
镇分据大散关和尚原神义口玉女潭大虫岭石壁寨宝鸡县陷河州镇戎军喀齐喀乞
济师诏以河南兵万人益之乃遣丹州刺史持嘉乌苏
埒克以兵四千守德顺吴璘悉兵围之统军都监舒穆鲁迪里将万人破宋兵于河州还
过德顺驻平凉求益兵于喀齐喀以解德顺之围喀齐
喀遣万户完颜实讷埒大良顺宁州刺史延扎们都各将本部兵合二万人以顺义军节
度使使乌雅富埒赫统押之与迪里会吴璘使偏将将
兵五千人来迎前锋都尔苏乌页奚王和尚击败之追至德顺城南小溪边璘自将大军
蔽冈阜而出乌页等驰击之迪里富埒赫继至并力战
日暮乃解已而璘报云宋主遣使至两国讲和请各罢兵璘遂遁去 【按宋史纪事本末
德顺之战璘自将督师无不以一当百至暮搏战益
力敌大败黎明师再出会大风雪金人拔营去与本传互异】 富埒赫亦引军还顷之吴
璘复犯陕西州郡诏以兵七千益喀齐喀庆阳尹乌雅
普霞努延安尹高景山分领之彰化军节度使璋通远军节度使乌雅沃哩布宁州刺史
伊喇高善努京兆少尹宗室聂赫恩州刺史完颜摩罗
欢皆备军前任使宋人驱率商虢及华山南山之民五万人来围华州押军万户费摩苏
拉欲坚壁守之明安伊喇萨尔拉曰宋兵虽多半是居
民不习战不如击之于是苏拉以千骑败宋前锋追及其大军亦败之已而璋败宋姚良
辅军于原州宋戍军自宝鸡以西至于大虫岭皆自散
关遯去顷之吴璘闻持嘉乌苏埒克乌雅富埒赫军已去德顺率兵复据德顺陷巩州临
洮府临洮少尹赫舍哩萨哈死之喀齐喀以璋权都统

实讷埒副统将兵二万攻之连战宋兵虽败璘恃其众不肯去分其兵之半守秦州喀
齐喀乃自行驻水洛城东自六盘山西抵石山头分兵
守之当德顺秦州之闲断其饷道璘乃引去都统璋副统实讷埒邀击宋经畧使荆皋杀
数千人擒宋将朱永以下将校十二人宋张安抚守德
顺弃城遯遂复德顺州宋之守秦州者亦自退高景山定商虢宗室聂赫取环州于是尽
复临洮巩秦河陇兰会原洮积石镇戎德顺商虢环华
等州府陕西平诏书奖谕赐以玉带将士各以阶级迁资受赏战没者赠官赐银钱有差
五年置陕西路统军使兼京兆尹元帅府移治河中府
统军使璋朝辞帝曰镇防利害可访问喀齐喀七年入为枢密副使改东京留守赐衣带
佩刀九年入为平章政事奏睿宗收复陕西功数事帝
嘉纳之藏之秘府封定国公十年薨帝方击球闻讣遂罢有司致祭备礼以葬二十一年
帝念其功迁其孙萨哈武功将军授世袭本明安海兰
别克绅穆昆泰和元年配享世宗庙庭

钦定续通志卷四百二十九

●钦定续通志卷四百三十 列传二百三十

列传

金 【八】

○金八

赫舍哩良弼 石琚 唐古安礼 伊喇道【光祖】 苏保衡

翟永固 魏子平 孟浩 梁肃

伊喇慥 伊喇子敬

赫舍哩良弼

石琚

唐古安礼

伊喇道

苏保衡

翟永固

魏子平

孟浩

梁肃

伊喇慥

伊喇子敬

△赫舍哩良弼

赫舍哩良弼本名罗索辉发川人曾祖呼兰祖特伯烈父太宇世袭佛宁徙宣宁天

会中良弼方童丕选入西京为女真字学生谒见丞相
希尹于传舍希尹称为令器年十四为北京教授学徒常二百人后多成名年十七补尚
书省令史簿书过目辄得其隐奥虽大文牒口占立成
词理皆到除吏部主事天德初累官右司郎中借秘书少监为宋主岁元使时纳哈塔椿
年为参知政事荐良弼才出己右用是为刑部尚书 【
按纳哈塔椿年传椿年荐良弼海陵用为右司员外郎与本传异】 赐舍名父忧起复改
侍卫亲军马步军都指挥使寻拜参知政事进尚书右
丞转左丞海陵伐宋良弼谏不听以为右领军大都督海陵在淮南诏良弼与监军图克
坦贞抚定上京辽右世宗即位良弼乃还汴京海陵死
世宗就以良弼为南京留守兼开封尹再兼河南都统召拜尚书右丞斡罕败于陷泉入
奚中诏良弼佩金牌及银牌四往北京招抚奚契丹还
拜尚书左丞上言祖宗以来未录功赏者臣考按得三十二人宜差第封赏诏五品以上
官闻奏六品以下及无官者尚书省约量迁除自是功
劳毕赏进拜平章政事封宗国公初山东两路明安穆昆与百姓杂居诏良弼度宜易置
使与百姓异聚与民田互相犬牙者皆以官田对易之
自是无复争讼大定六年进拜右丞相监修国史左丞完颜守道奏近都两明安父子兄
弟往往析居其所得之地不能赡日益困乏帝以问宰
臣良弼封曰必欲父兄聚居宜以所分之地与土民相换易虽暂援然经久甚便右丞石
琚曰百姓各安其业不若依旧便帝竟从良弼议太宗
实录成赐良弼金带重采良弼请于榷场市马毋拘牝牡以备边警帝从之八年同知清
州防御事常德晖上书言吏部格法止叙年劳虽有材
能拘滞下位刺史县令多不得人乞摆能吏任亲民之职帝是其言因语良弼等注意选
择进拜左丞相监修国史如故良弼为相既久练达朝
政帝所询访尽诚开奏垂绅正笏不动声气议政多称帝意是时夏国王李仁孝乞分国
之半以封其臣任得敬帝曰此非仁孝本心不可从良
弼议与市议合既而夏国果诛任得敬参知政事宗叙请置沿边濠堑良弼曰敌国果来
伐此岂可御哉帝曰卿言是也高丽国王王晁表让国
于其弟皓帝疑之以问良弼良弼策让国非实其后赵位宠求内附表言皓实篡兄如良
弼策进睿宗实录赐重采通犀带是年有事南郊良弼
为大礼使自收国以来未尝讲行是礼历代典故又多不同良弼讨论损益各得其宜帝
与良弼守道论明安穆昆官多年幼不习教训可依汉
制置卿老选廉洁正直可为师范者使教导之良弼奏曰圣虑及此亿兆之福也十四年
宋主遣工部尚书张子颜知合门事 【交聘表作明
州观察使】 刘密来请免亲接国书帝与诸臣议良弼奏曰宋国免称臣为侄免奉表为

书恩赐已多今又乞免亲接国书是无厌也必不可从
平章政事完颜守道参知政事伊喇道与良弼议合左丞石琚右丞唐古安礼以为不从
所请必至用兵帝谓琚等所言非理遂从良弼议帝问
宰臣求内外官举贤能良弼请申明前诏朝官六品以上名官五品以上各举所知从之
帝欲徙斡罕逆党分散置之辽东良弼奏此辈已经赦
宥徙之生怨望帝曰此目前利害朕为子孙后世虑耳良弼曰非臣等所及也于是以尝
预乱者徙居乌库哩实垒部帝问宰臣曰尧有九年之
水汤有七年之旱而民不病饥今一二岁不登而人民乏食何也良弼对曰古者地广人
淳崇尚节俭而又惟农是务故蓄积多而无饥馑之患
也今地狭民众又多弃本逐末耕之者少食之者众故一遇凶岁而民已病矣帝深然之
于是命有司惩戒荒纵不务生业者十七年以疾辞相
位不许十八年表乞致仕归田里帝遣使慰谕授和伦松科明安使其子摄事给良弼丞
相俸廉致仕归其后尚书省奏差除帝曰丞相良弼拟
注差除未尝苟与而荐举往往得人钮祜禄额特埒伊喇慥费摩余庆皆其所举至于私
门请托绝然无之尝问良弼每旦暮曰色皆赤何也良
弼曰旦而色赤应在东高丽当之暮而色赤应在西夏国当之愿陛下修德以应天则灾
变自弭矣既而夏国有任德敬之乱高丽有赵位宠之
难其言皆验云是岁薨帝悼惜之遣使敕葬祭奠追封金源郡王命翰林待诏伊喇履勒
铭墓碑谥诚敏良弼性聪敏忠正善断决言论器识出
人意表起寒奏致位宰相尽心国事荐举人材常若不及居家清俭亲旧贫乏者周给之
与人交久而愈敬居位几二十年赞成太平号贤相焉
大定十五年图像衍庆宫加谥武定明昌五年配飨世宗庙庭

△石琚

石琚字子美定州人沈厚好学父皋补郡吏廉洁自持称为长者从鲁王栋摩攻青
州州人坚守不降栋摩怒及城破命皋计州民人数将
使诸军分掠之皋缓其事栋摩让之皋曰大王为朝廷抚定郡县当使百姓安堵无或侵
苦之若取城邑而残其民则未下者必死守以拒我栋
摩感悟乃下令曰敢有犯州人者以军法论皋随守定州唐县人王八谋为乱书其县人
姓名于籍无虑数千人其党持籍诣州发之皋主鞫治
时冬月皋抱籍上厅事佯为顿仆覆其籍炉火中尽焚之不可复得其姓名止坐为首者
余皆得释琚生七岁读书过目成诵既长博通经史工
词章天眷二年中进士第一调邢台县令邢守贪暴属县掊取民财以奉所欲琚独无所
与既而守以赃败他令佐皆坐累琚以廉辨改秀容令
复擢行台礼部主事召为左司都事累迁吏部郎中贞元三年以父丧去官寻起复为本

部侍郎大定二年擢为谏议大夫侍郎如故奉命详定
制度据上疏六事大概言正纪纲明赏罚近忠直远邪佞省不急之务罢无名之役帝嘉
纳之迁吏部尚书据自员外郎至尚书皆在吏部典选
且十年凡宋齐换授官格南北通注铨法能缕指而次第之寻拜参知政事与右丞苏保
衡共监护十六位工役许从宜规画帝谓据曰此役不
欲烦民丁匠皆给雇直毋使贪吏缘为奸利卿等勉称朕意图克坦喀齐喀定陕西据谓
曲赦秦陇以安百姓帝从之毋忧起复拜尚书右丞天
长观灾诏有司营缮有司辟居民以广大之费钱三十万贯蔚州采地蕈役数百千人据
奏之帝曰自今凡称御前者皆禀奏据与孟浩对曰圣
训及此百姓之福也时议禁网捕狐兔等物累计其获或至徒罪据奏曰捕禽兽而罪至
徒恐非陛下意杖而释之可也帝曰然久之进左丞兼
太子少师世宗将行郊祀议配享据曰周郊祀以后稷配天汉魏晋皆以一帝配之唐宋
之初皆以三帝配终竟依古配以一祖将来亲郊合依
古礼帝曰唐宋变古不足为法止当奉太祖皇帝配之据尝请命太子习政事或潜据希
恩东宫世宗察其无他以此言告之据因乞解少师十
年二月祭社有司奏请御署祝版帝问据曰当署乎据曰故事有之帝曰祭祀典礼卿等
慎之无遗讥后世宗谓据曰女真人往往径居要达不
知闾阎疾苦卿尝为丞簿知民间事凡利害极陈之帝与宰臣议铸钱因问据曰古亦有
百姓铸钱者乎对曰使百姓自铸则小人图厚利钱愈
薄恶古所以禁也时民间往往造作妖言相为党与谋不轨帝问宰臣曰南方尚多反侧
何也据对曰南方无赖之徒假托释道以妖幻惑人愚
民无知遂至犯法帝曰如僧智究是也此辈不足恤但军士讨捕利取民财害及良民不
若杜之以渐也智究大名府僧假托钞化诱惑愚民潜
结奸党谋取东平诸州府事觉伏诛宗室子或不胜任官事世宗欲授散官量与廩禄以
问宰臣据对曰尧亲九族周家内睦九族皆帝王盛事
也据之将顺多此类参知政事唐古安礼忤帝意出镇横海军数年不召据从容进曰安
礼忠直久在外官世宗深然之遂自南京留守召为尚
书右丞又尝举室绍先为右司员外郎十七年拜平章政事封莘国公明年拜右丞相修
起居注伊喇杰上书言朝奏屏人议事史官亦不与闻
无由纪录帝以问宰相据与唐古安礼对曰古者史官天子言动必书以儆戒人君庶几
有畏不可避也帝曰朕观政要唐太宗与臣下议论始
议如何后竟如何此政史官在侧记而书之耳若恐漏泄凡事则择慎密者任之朝奏屏
人议事记注官不避自此始数以老病乞致仕许之诏
以一孙为合门祗候既归乡里帝每称石据举能其官最为知人二十二年以疾卒于家

谥文宪泰和元年图像衍庆宫配享世宗庙庭 【初

世宗将立元妃为后以问琚琚对曰元妃之立本无异辞如东宫何世宗悟而止金世内燕惟亲王公主驸马得预一日特召琚入谓诸王以下曰使我家人有今日之乐者此人力也二事见原史赞中附识于此】

△唐古安礼

唐古安礼本名乌楞古字子敬好学通经史工词章知为政大体贞元中累官临海军节度使翰林侍读学士及彰化军节度使大定初迁益都尹召为大兴尹帝曰京师好讹言府中奸吏为民患卿虽年少有治才去其宿弊毋为因仍察廉入第一等进阶荣禄大夫七年五月大兴府狱空诏锡宴劳之久之拜参知政事 【按世宗纪大定四年以大兴尹唐古安礼参知政事本传次之七年之后恐误】 罢为横海军节度使历南京留守以丧去官起复尚书右丞转左丞他日帝曰荐举大臣之职外官五品犹得举人宰相无所举何也安礼对曰孔子称才难贤人君子世不多有陛下必欲得人当广取士之路区别器使之斯得人矣帝曰除授格法不伦天下一家独女真有超迁格何也安礼对曰祖宗以来立此格恐难辄改进拜平章政事封芮国公授世袭穆昆安礼尝议科目言于帝曰臣观近日士人不以策论为意今若诗赋策论各场考试文理俱优者为中选以时务策观其器识庶得人也帝曰卿等议之二十一年拜右丞相进封申国公固辞帝曰朕知卿正直且练习政事其毋多让安礼顿首谢是岁薨泰和元年配享世宗庙庭

△伊喇道

伊喇道本名照苏其先伊实部人徙咸平为人宽厚有大志以大孝著名通女真契丹汉字皇统初补刑部令史再迁大理司直母忧起复迁户部员外郎正隆三年徙临潢咸平路毕沙河等三明安屯戍噶尔萨还迁本部郎中海陵伐宋为都督府长史海陵死师还无复纪律百姓苦俘掠有男女二百余人自愿与道为奴道受之至淮俟诸军毕济乃悉遣还大定二年复为户部郎中与梁球安抚山东招谕盗贼民或避盗避役者并令归业布萨忠义讨斡罕道参谋幕府事贼平元帅府以俘获生口分给官僚道悉纵遣之迁翰林直学士兼修起居注世宗曰道清廉有干局翰林文雅之职不足以尽其才乃改同知中都路都转运事诏送河北山东等路廉察善恶升降官员制敕迁大理寺卿五年宋人请和罢兵道往山东阅实军器振赡戍兵妻子再除同知大兴尹亲军百人长完颜额森博勒非禁直日带刀入宫其夜入左藏库杀都监郭良臣盗取金珠点检司执其疑似者八人掠笞三人死五人者自诬帝命道参问道缓其狱既

而额森博勒鬻金事觉伏诛诏赐掠死者钱人二百贯周其家不死者人五十贯迁户部尚书改西北路招讨使赐金带故事招讨使到官诸部皆献驼马多至数百道皆却之父丧去官起复参知政事初诸部有狱讼招讨司例遣胥吏按问往往为奸利道请专设一官帝嘉纳之招讨司设勘事官自此始帝谓宰臣曰比闻大理寺断狱辄经旬月何耶道奏曰在法决死凶不过七日徒刑五曰杖刑三曰帝曰法有程限而辄违之此官吏之责也严戒约以去其弊进尚书右丞乞致仕不许除南京留守赐通犀带入拜平章政事道弟临潼令约博犯罪至死道待罪于家诏起视事是时县令多关帝以问宰相道奏曰散官宣武以上借除以充之帝曰廉察八品以下已去官者录事丞簿有清干之誉者县尉入优等者散官至五品无贪污旷职之名者皆与县令俟县令不阙即如旧制二十三年罢为咸平尹封莘国公致仕归咸平二十四年薨赠有君诏图像藏秘省擢其子光祖为合门祇候

伊喇光祖

伊喇光祖

光祖字仲礼幼名巴噶以荫补合门祇候累官至秘书监右宣徽使兴定二年十一月诏集百官议所以为长久之利者光祖等三人议曰募士人假以方面权任俾人自劝各保一方由是公府封建之论兴焉语在九公传三年转左宣徽使五年卒

△苏保衡

苏保衡字宗尹云中天成人父京辽进士为西京留守宗翰兵至西京京出降久之京病笃以保衡属宗翰京死宗翰荐之朝赐进士出身补太子洗马调解州军事判官左监军萨里罕驻军陕西辟幕府参议军事累官同知兴中尹天德闲缮治中都张浩举保衡分督工役改大兴少尹督诸陵工役迁工部尚书海陵治兵伐宋与徐文等造舟于通州兵兴保衡为浙东道水军都统制率舟师泛海径趋临安为宋兵所败副统制郑家死之大定二年召赴中都时山东盗贼啸聚百姓困弊诏保衡安抚山东发仓粟以振之还除刑部尚书与工部尚书宗永兵部侍郎完颜额哩页往河南山东陕西宣问屯田军人有曾破大敌及攻城野战立功者具姓名以闻布萨忠义伐宋保衡行户部于关中兼纠察许以便宜黜守令不法者十余人邠守傅慎微忤用事者被谗构下狱保衡力救得免入为太常卿迁刑部尚书【按世宗纪保衡以大定三年六月由刑部尚书参知政事本传作礼部谨改正】拜参知政事三年宋人请和诏保衡往南京与布萨忠义斟酌事宜行之入奏进右丞六年冬

有疾求致仕不许未几卒

△翟永固

翟永固字仲坚中都良乡人太祖以燕归宋宋人以经义兼策取士永固中第一授开德府仪曹参军金破宋永固北归中天会六年词赋科历枢密院令史辟左副元帅宗翰府掾求固家贫求外补宗翰爱其能不许以钱三千贯周之荐于朝摄左司郎中累迁工部员外郎母忧去官起复礼部郎中迁翰林直学士海陵篡立以侍卫亲军都指挥使完颜思恭为报谕宋使永固为副使还改礼部侍郎久之分护燕京宫室役事永固请写无逸图于殿壁不纳俄迁太常卿考试贞元元年进士出尊祖配天赋题忤海陵意杖之顷之升礼部尚书正隆二年转翰林学士承旨召至内殿问以将亲伐宋事对曰宋人事本朝无衅隙伐之无名纵使可伐亦无烦亲征遣将帅可也由是大忤海陵意因请致仕归卧于家大定二年起拜尚书左丞请依旧制廉察官吏革正隆守令之污从之明年出为真定尹五年恳乞致仕许之六年卒

△魏子平

魏子平字仲均弘州人登进士第调五台主簿累除太府监正隆三年为贺宋主生日副使使还入见海陵方谋伐宋问江左事且曰苏州与大名孰优子平对曰江湖地卑湿夏服蕉葛犹不堪暑安得与大名比海陵不悦世宗即位除户部侍郎大定二年丞相布萨忠义伐宋置元帅府于南京子平掌馈运给金牌一银牌六粮道给办进户部尚书六年复为贺宋主生日使久之拜参知政事帝问子平曰戍卒逋亡物故今按物力高者补之可乎对曰富家子弟駸懦不可用以守戍请按物力多寡赋之募材勇骑射之士不足则调兵家子弟补之庶几官收实用帝从之他日帝问曰前日令内任官六品以上外任五品以上并举所知未闻有举之者岂无其才盖知而不举也子平曰请令当举之官每任须举一人泽州刺史刘德裕祁州刺史色格沧州同知额哩页易州同知额哩埒楚邱县令刘春格以赃污抵罪帝欲诏示中外丞相守道以为不可子平曰臣闻惩一戒百陛下固宜行之遂降诏焉宋人于襄阳汉江上造舟为浮梁三南京统军司闻而奏之帝问宰臣子平曰臣弭襄阳薪刍皆于江北取之殆为此也既而河南统军使宗叙求入见奏边事帝使修起居注钮祐禄额特埒就问额特埒召诘言边事者皆无实状行至境上问让阳浮桥乃樵采之路如子平策还奏诏凡妄说边关兵事者徒二年帝问宰臣曰祭宗庙用牛牛尽力稼穡有功于人杀之何也子平对曰惟天地宗庙用之所以异大祀之礼也十一年罢为南京留守未几致仕十五年起

为平阳尹复致仕二十六年卒于家

△孟浩

孟浩字浩然溧州人辽末年登进士第天会三年为枢密院令史除平州观察判官天眷初选入元帅府备任使承制除归德少尹充行台吏礼部郎中入为户部员外郎韩企先为相拔擢一时贤能皆置机要浩与田■〈穀，去一〉皆在尚书省■〈穀，去一〉为吏部侍郎浩为左司员外郎既典选善铨量人物分别贤否所引用皆君子而蔡松年豊望之许霖求与■〈穀，去一〉相结■〈穀，去一〉薄其为人拒之松年初在行台省巧得宗弼意宗弼当国引为刑部员外郎望之为尚书省都事霖为省令史皆怨■〈穀，去一〉等短之于宗弼企先薨■〈穀，去一〉出为横海军节度使选人裘夷鉴除名值赦赴吏部铨得预覃恩■〈穀，去一〉已除横海部吏以夷鉴白■〈穀，去一〉■〈穀，去一〉乃倒用月日署之许霖在省典覃恩而行台省工部员外郎张子周亦与■〈穀，去一〉有怨以事至京师嗾许霖发之诋以专擅朝政诏鞫治■〈穀，去一〉与夷鉴等皆拟死其妻子及所往来孟浩等三十四人皆徙海上遇天德赦令还乡里多物故惟浩与■〈穀，去一〉兄谷王补冯煦王中安在世宗知田■〈穀，去一〉党事皆松年等构成大定二年召浩为侍御史谷为大理丞补为工部员外郎煦为兵部主事安知火山军事而浩寻复为右司员外郎浩笃实遇事辄言无所隐帝嘉甚忠每对大臣称之有疾求外补除祁州刺史致仕归七年起为御史中丞浩已年老世宗不次用之再阅月拜参知政事中丞拜执政者自浩始世宗敕有司于东宫凉楼前增建殿位浩谏曰皇太子义兼臣子若所居与至尊宫室相侔恐制度未宜固宜示以俭德帝曰善遂罢其役帝宴羣臣于东宫谓羣臣曰参政孟浩公正敢言自中丞为执政卿等能如是朕亦不次用之初海陵以近习掌记注记注不明帝谓当时行事实录不载众人共知之者宜访书之浩对曰良史直笔君举必书帝王不自观史记注之臣乃得尽其直笔又奏曰厯古以来不明赏罚而能治者未之闻也国家赏善罚恶盖亦多矣而天下莫能知乞自今凡赏功罚罪皆具事状颁告之使君子知劝以迁善小人知惧以自警从之进尚书右丞兼太子少傅罢为真定尹十三年薨田谷自大理丞累官同知中京留守终于利涉军节度使二十九年章宗诏尚书省曰故吏部侍郎田■〈穀，去一〉等皆中正之士小人以朋党陷之由是得罪世宗用孟浩为右丞当时在者俱已用之亡者未加追复其议以闻张汝霖持不可汝霖死后章宗复诏尚书省追复田■

〈穀，去一〉等官爵其子孙并加恩恤

△梁肃

梁肃字孟容奉圣州人自幼勤学天眷二年擢进士第调平遥县主簿迁望都绛县令以廉入为尚书省令史定海军节度副使迁山东西路转运副使营治汴宫肃分护役事摄大名少尹正隆末境内盗起平人陷贼人不能自辨者数千人皆系大名狱肃到官考验得其情献出者十八九大定二年赵植上书言梁肃勤恪清廉愿加进擢于是迁中都转运副使改大兴少尹肃上疏言方今用度不足非但边兵耗费而已吏部以常调除漕司僚佐皆年老资高者为之类不称职臣谓凡军功进士诸科门荫人知钱谷利害能使国用饶足而不伤民者许上书自言就择其可用授以职事每五年委吏部通校有无水旱屯兵视其增耗而黜陟之民闲粟麦岁为酒所耗者十常二三宜禁天下酒曲不报三年坐捕蝗不如期贬川州刺史削官一阶解职寻除河北东路转运副使是时鞞罕乱后兵食不足诏肃措置沿边兵食移牒肇州北京广宁盐场许民以米易盐兵民皆得其利四年通检东平大名两路户籍物力称平允他使者所至皆以苛刻增益为功百姓苦之朝廷敕诸路以东平大名通检为准七年父忧去官起复都水监河决李固诏肃视之【按河渠志大定八年河决李固九年遣肃往视之本传统系之七年者省文也】还奏决河水六分旧河水四分今障塞决河复故道为一再决而南则南京忧再决而北则山东河北皆可忧不若止于李固南筑堤使两河分流以杀水势帝从之改大理卿时东京久不治帝自择肃为同知东京留守事迁中都都转运使转吏部尚书上疏论台官自大夫至监察谏官自大夫至拾遗陛下宜亲择不可委之宰相恐树私恩塞言路也帝嘉纳之肃举同安主簿高旭除平阳酒使肃奏曰明君用人必器使之旭儒士优于治民若使坐列肆榷酒酤非所能也臣愚以为诸道盐铁使依旧文武参注其酒税使副以右选三差俱最者为之帝曰善改刑部尚书宋主屡请免立受国书之仪世宗不从及大兴尹璋为十四年正旦使宋人就馆夺其书而重赂之璋还杖一百五十除名以肃为宋国详问使肃至宋宋主一一如约立接国书还至泗州先遣都管赵王府长史图们富尼玛入奏世宗大喜欲以肃为执政左丞相良弼曰梁肃可相但使宋还即为之宋人自此轻我矣帝乃止久之为济南尹上疏曰刑罚世轻世重今取辽季之法徒一年者杖一百是一罪二刑也刑罚之重于斯为甚今太平日久有司犹用重典臣实痛之乞自今徒罪之人止令居作更不决杖不报未几致仕起复彰德军节度使召拜参知政事肃奏

汉之羽林皆通孝经今之亲军即汉之羽林也臣乞每百户赐孝经一部使之教读庶知臣子之道帝曰善诏与护卫俱焉肃上疏论生财舒用八事一曰罢随司通事二曰罢酒税司句栏人三曰天水郡王远族可罢养济四曰裁减随司契丹吏员五曰罢榷醋以利与民六曰量减盐价使私盐不行民不犯法七曰随路酒税许折纳诸物八曰今岁大稔乞广余粟麦使钱货流出帝曰赵氏养济一事乃国家美政不可罢其七事宰相详议以闻肃又论正员官被差权摄官有公罪及正员还任皆准去官勿论往往其人苟且不事其事乞于县令中留十人备差无差正员官帝曰自今权摄有公罪正员虽还而本职未替者勿以去官论之肃与宰相奏事既罢复跪而言曰四时畋猎虽古礼圣人亦以为戒陛下春秋高属时严寒法宫燕处亦足怡神愿为宗社自重帝曰朕诸子方壮使之习武故时一往尔肃又论盗贼不息请无禁兵器帝曰所在有兵器其利害如何肃曰他路则已中都一路上农夫听置之似乎无害帝曰朕将思之凡使宋者宋人致礼物大使金二百两银二千两副使半之帑帛杂物称是及推排物力肃自以昔同平章事父博啰准备任使官都统杲克中京辽主西走留博啰督辎重已而被掠博啰自髡逃于山林子敬读书好学皇统闲特进伊喇因修辽史辟为椽属辽史成除同知辽州事本厅旧占民田州官岁取课数百贯地主以为例未尝辩子敬悉却之秩满郡人请留于行台省不许天德三年入为翰林修撰迁礼部郎中正隆元年诸将巡边诏子敬监战军帅以战获分状士子敬独不受及还海陵以子敬家贫不苟得甚嘉之凡同僚所取者皆没入于官迁翰林待制大定二年同修国史时斡罕余党散居诸明安穆昆中诏子敬往抚之令勿相害使还改秘书少监兼修起居注修史如故常召入讲论古今及时政利害或至夜半子敬有良马平章政事完颜元宜索之子敬以其为相也不与至是元宜乞致仕罢为东京子敬乃以此马赆行识者韪之迁右谏议大夫起居注如故帝幸西京州县官入见明安穆昆不得随班子敬奏军民一体合令明安穆昆随入见帝嘉维诏依子敬奏行之子敬言山后禁猎地太广有妨百姓耕垦帝用其言遂以四外猎地与民迁秘书监谏尝使宋所得礼物多而身为执政当为庶民率先乃自增物力六十余贯论者多之二十三年肃请老从之诏以其子汝翼为合门祗候二十八年薨谥正宪

△伊喇慥

伊喇慥本名伊德尔契丹伊啰勒部人通契丹汉字尚书省辟契丹令史摄知除擢右司都事正隆南伐兼领契丹汉字两司都事大定二

年除真定尹入为侍御史母忧去官起复右司员外郎累官陈州防御使左丞相赫舍哩良弼致仕帝问谁可代卿者对曰伊喇慥清干忠正臣不及也遂召为太府监改刑部侍郎十九年为大理卿被诏典领更定制条慥取皇统旧制及海陵续降通类校定通其窒碍删其繁碎有例该而条不载者用例补之特阙者用律增之凡制律不该及疑不能参决者取旨画定凡特旨处分及权宜条例内有可常行者收为永格其余未可削去者别为一部凡一千一百九十余条为十二卷书奏诏颁行之摄御史大夫改御史中丞同修国史历刑吏二部尚书改大兴尹复为西京留守改临洮尹卒

△伊喇子敬

伊喇子敬字同文本名鄂克多啰辽五院人曾祖巴格议起居如故帝将如凉陁子敬与右补阙钮祜禄额特埒左拾遗杨伯仁奏曰车驾至和尔和西北招讨司圉于行宫之内地矣乞迁之于界上以屏蔽环卫帝曰善诏尚书省曰招讨锡里库可徙界上治蕃部事都监萨巴仍于燕子城治明安穆昆事转签书枢密院事同修国史出为河中尹改兴中尹子敬女自懿州来兴中省谒遇盗途中剽掠其行李且尽既而还之谢曰我辈初不知为府尹家也尹有德于民尚忍侵犯邪徙咸平广宁尹二十一年致仕卒于家子敬尝使宋及受诸部进贡所受礼物皆散之亲旧及卒家无余财其子质宅以营葬事

钦定续通志卷四百三十

●钦定续通志卷四百三十一 列传二百三十一

列传

金【九】

○金九

杨伯雄【伯渊】

张用直

刘枢

毛硕

李上达

高德基

完颜鄂博库

刘徽柔

贾少冲【益】

伊喇鄂尔多

珠勒根彦忠

张九思

高衍

杨邦

基

丁暉仁

曹望之

大怀贞

卢孝俭

李偲

杨伯雄

张用直

刘枢

毛硕

李上达

高德基
完颜鄂博库
刘徽柔
贾少冲
伊喇鄂尔多
珠勒根彦忠
张九思
高衍
杨邦基
丁暉仁
曹望之
大怀贞
卢孝俭
李偲
△杨伯雄

杨伯雄字希云真定藁城人皇统二年进士海陵留守中京其父邱行在幕府伯雄来省海陵深器之久之调韩州军事判官有二盗诈称贾贩实欲劫取伯雄伯雄执而诘之并获其党十余人一郡骇服迁应奉翰林文字是时海陵执政属使时至其第伯雄不往他日怪问之对曰君子受知于人当以礼进附丽奔走非素志也海陵篡立问治道何贵对曰贵静乙夜复问鬼神事伯雄曰汉文帝前席贾生不问百姓而问鬼神后世讥之陛下不以臣愚陋幸及天下大计鬼神之事未之学也固问乃曰臣家有书记人死复生或问冥官何以免罪答曰旧置一历白日所为暮夜书之无不可书者故复生耳海陵为之改容夏日与登瑞云楼纳凉命赋诗卒章云六月不知蒸郁到清凉会与万方同海陵忻然以示左右曰伯雄出语不忘规戒为人臣当如是矣海陵议征江南伯雄奏晋武平吴皆命将帅何劳亲总戎律不听仍落起居注不复召见大定初为少詹事兄子蟠为左赞善言听谏从时论荣之集古太子贤不肖为书号瑶山往鉴进之及进羽猎保成等箴皆见嘉纳六年帝幸西京欲因往凉陞避暑伯雄谏不听及至凉陞徼巡果有疏虞帝还谓近臣曰羣臣有干局者众矣如伯雄忠实皆莫及也十二年丞相石琚致仕举伯雄以代时论以为得人复权詹事知无不言匡救甚多凡官僚有诡随者人必称杨詹事以愧之寻除平阳尹先是张浩治平阳有惠政及是百姓称之曰前有张后有杨徙河中尹卒谥庄献弟伯杰伯仁族兄伯渊

杨伯渊

杨伯渊

伯渊字宗之早孤事母以孝闻天会十四年赐进士知泰安军有惠政百姓刻石纪其事四迁山东东路转运使正隆末羣盗蠡起州郡往往罹害独济南赖伯渊保全大定三年致仕卒

△张用直

张用直临潢人少以学行称辽王宗干延置门下海陵与其兄充皆从之学天眷二年赐进士及第除礼部郎中海陵即位为太子詹事尝谓曰朕虽不能博通经史亦粗有所闻皆卿平昔辅导之力太子方就学宜善导之朕父子并受节学亦儒者之荣也为贺宋国正旦使卒于汴海陵深悼惜之养子始七岁特授武义将军

△刘枢

刘枢字居中通州三河人少以良家子从军屯河间同辈皆骑射独枢刻意经史登天眷二年进士调唐山主簿改飞狐令蔚州刺史恃功贪污怒枢无所奉摭以他事系狱将致之死会廉察使至得实守倅而下皆抵罪废录枢治状入优等躡迁奉直大夫张浩营建燕京宫室选枢分治工役迁尚书刑部员外郎鞫治太原尹图克坦额呼楚克反状旬日狱具大定间为中都路转运使卒于官

△毛硕

毛硕字仲权甘陵人宋末试弓马子弟硕中选调高阳阙路安抚司准备差使历河间尉兵马都监宗望军至硕以本部迎降齐国建由淮东路第一副将擢知滑州刘麟伐宋充行营中军统制军马天眷间历汴京路山东西路兵马都监皇统元年权知拱州宋将张俊据亳州柘城酒监房人杰叛以应俊硕发兵讨之至柘城谕其耆老县人缚人杰以降硕召百姓慰安众皆感悦刻石纪其事四年真授拱州刺史元帅宗弼承制授武义将军改知曹州有书生投书于硕辞涉谤讟硕延之上座谢曰使硕常闻斯言庶乎寡过士论嘉之迁郑州防御使寻改通州天德二年充陕西路转运使硕奏陕右边荒种艺不过麻粟荞麦赋入甚薄市井交易惟川绢干姜商贾不通酒税又耗减请视汴京燕京例给交钞通行【按食货志金初用辽宋旧钱贞元二年蔡松年始复钞引法遂制交钞与钱并用本传载硕之奏在天德间则交钞固不始于蔡松年也】而巩会德顺道路多险盐引斤数太重请一引分作三四以从轻便朝廷皆从之秦州仓粟陈积百姓有支移者止就本州岛折纳其直公私便之改河东南路转运使上言顷者定立商酒课不量土产厚薄户口多寡及今昔物价

之增耗一概理责之致监官被系失身破家折佣逃窜
或奸吏盗有实钱而以賒券输官故河东积负至四百余万贯公私苦之请自今禁约酒
官不得折准賒贷惟许收用实钱则官民俱便秩满除
南京路都转运使大定六年致仕卒于家硕文雅好士性谨饬每见古人行事有益于时
者常书置座右以为莅官之戒云

△李上达

李上达字达道曹州济阴人在宋时以荫补官累迁东平府司户参军达兰取东平
上达降并给军须号称办治齐国建为吏部员外郎摄
户部事刘豫行什一之法乐岁输多歉岁寡取之然收敛之时民不以实输官官亦不肯
尽信于是告讦起而狱讼繁公私苦之上达论其弊豫
改定为五等之制齐国废以河南与宋人上达随地入宋宗弼复取河南上达为同知大
名尹按察陕西河南是时关陕蒲解汝蔡民饥上达辄
以便宜发仓粟赈百姓累迁知山东西路转运使上达到官再期比旧增三十余万贯户
部以其法颁之邻路上达长于吏事能治繁剧猾不能
欺所至称之卒于官

△高德基

高德基字符履辽阳渤海人皇统二年登进士第六年为尚书省令史海陵为相专
愎自用德基每与之详辨及篡位欲都燕京命德基摄
燕京行台省都事累迁户部郎中正隆时营建南京宫室德基与李筹萧中一俱为营造
提点转同知开封尹大定三年以察廉治状不善下迁
同知北京路都转运使事是年秋土河泛滥水入京城德基遽命开长乐门疏入御沟以
杀其势水不为害迁刑部侍郎七年改中都路都转运
使九年转刑部尚书有犯罪当死者宰相欲从末减德基曰法无二门失出犹失入也不
从及奏上帝是刑部议因论诸尚书曰自朕即位以来
以政事与宰相争是非者德基一人而已自今部上省三议不合即具以闻为宋主生日
使及还宋人礼物外附进腊茶三千胯不亲封署德基
曰侄献叔而不署是无名之物也却之十一年改户部尚书上疏乞免军须房税等钱减
农税及盐酒等课未报随朝官俸粟折钱增高市价与
之多出官钱几四十万贯帝以其取悦宰执近臣滥出官钱决杖八十诏自大定十一年
十一月【按世宗纪大定十一年十一月丁亥有事
于圜丘此处误作八月谨据改】郊祀赦后尚书省御史台户部转运司警巡院多支俸
粟折钱皆追还之德基降兰州刺史十二年卒子锡入
忠义传

△完颜鄂博库

完颜鄂博库会宁府海古勒寨人年十三选充女真字学生补上京女真吏再习小字兼通契丹文字充尚书省令史天德初除吏部主事鞫问扎兰路诈袭穆昆事人称其能擢右拾遗累迁右司郎中大定二年秩满当代世宗喜其公忠善敷奏特诏再任鞞罕已平诏罢契丹明安穆昆其原管户口及从鞞罕作乱来降者皆隶女真明安穆昆遣鄂博库分置人户赈赡其乏其未经罢去明安穆昆合承袭者仍许承袭兼括买契丹马匹顷之改同知大兴尹迁横海军节度使谏囚能得其情人以为不冤五年卒于官

△刘徽柔

刘徽柔字君美大兴安次人天眷三年擢进士第历真定栾城主簿迁洪洞令徽柔明敏善听断县人杨远诉夜雨屋坏压其侄死徽柔熟视曰汝利侄财而杀之乃诬雨耶叱付狱其人立伏遂寘于法秩满县人遮恋为立生祠刻石颂德正隆二年入为大理评事迁司直大定二年同知河东南路转运使事以廉第一改知平定军累迁中都路转运使卒于官

△贾少冲

贾少冲字若虚通州人勤学家贫甚尝道中获遗金访甚主归之天会中再伐宋调及民兵少冲甫冠代其叔行中天眷二年进士刘箬欲妻以妹辞不就调营州军事判官迁定安令蔚州刺史恃贵不法少冲独守正不阿用廉进官一阶累迁河中府判官见海陵寢失道秩满乃不求仕大定二年调御史台典事迁副部郎中往北京决狱奏诛首恶率连者怕释之全活凡千人以本职摄右司员外郎除同知河间尹数月入为秘书少监兼起居注左补阙十四年为宋主生日副使宋人别致珍异少冲曰行人受赐自有常数敢以赂辱君命乎不受使还迁右谏议大夫秘书起居注如故十七年请老不许除卫州防御使历顺天军节度使卒少冲外柔内刚尝执奏刑名甚坚帝嘉其有守性简易不喜言利尝教诸子曰荫所以庇身筦库不可为也闻者尚之子益

贾益

贾益

益字损之少颖悟如成人大定十四年父少冲使宋益侍行时宋人常争起立接书之礼少冲问益曰即宋人欲变礼持议不决奈何益曰守死无辱可谓使矣少冲大奇之中大定十九年进士调河油主簿丁父忧去官察廉起复矾山令蛄尚书省令史丁母忧服阙除定海军节度副使累官顺天军节度使大安初召为吏部尚书改镇安国军益调民夫修完城郭为职守备按察司止之不听曰治城守臣事也按察何预既

而兵至以有备解去改横海定国军节度使道阻不赴贞佑二年召为太常卿上防秋十三事与户部尚书李革论迁河北军民不便不报明年致仕元光元年卒

△伊喇鄂尔多

伊喇鄂尔多一名巴锦系出辽五院司通契丹字天会三年从伐宋遇战辄先登屡获侦人以功补尚书省令史十五年籍发诸部兵将与右丞萧庆会于山后时官军窜而南者凡数千鄂尔多邀击之尽获其辎重悉送有司迁修武校尉宗弼复河南鄂尔多督诸路帅臣进讨事定迁宣武将军皇统二年同知昭德军节度使事以廉升孟州防御使正隆间转同知北京留守事会伊克河阑子山等明安契丹谋乱时方发兵讨之别遣鄂尔多押尔南下至松山县为贼党讲格所执欲推为主盟鄂尔多怒曰我受国厚恩岂能从汝反耶贼欲害之鄂尔多说其监奴因得脱还大定初为博州防御使迁利涉军节度使先是有农民避贼入保郡城以钱寄邻家贼平索之邻人不与诉于县县官以无契验却之乃诉于州鄂尔多阳怒械系之捕其邻人诘之曰汝邻坐劫杀人指汝同盗邻人惧始自陈有欺钱之隙乃责归所隐钱而释之郡人骇服改通远军节度使卒

△珠勒根彦忠

珠勒根彦忠本名斡克善哈斯罕人好学通吏事天会十四年选充兵部孔目官升尚书省令史除右司都事天眷七年改大理丞为会宁少尹进同知会宁府事入为吏礼部郎中贞元二年进本部侍郎海陵凡有所疑常使彦忠裁决彦忠据法以对间有不合召让之彦忠执奏如前终无阿屈海陵壮之明年除御史中丞历户部侍郎侍卫亲军副都指挥使海陵南伐除南京路都转运使大定二年改大名尹兼本路兵马都总管四年入为刑部尚书诏规措北边艰食户口及泰州临潢接境度宜安置堡戍七驻兵万三千刍粮之用就经画之还朝未及入对以疾卒彦忠性孝友尝使宋所得金帛尽分兄弟亲友云

△张九思

张九思字全行锦州人皇统初补行台省女真译史除易州同知三迁亳州防御使副归德尹刘仲延受宋国岁贡于泗州往岁受岁贡者每以币物不精责宋使者宋使私馈银币以为常九思独不肯受仲延从之自是私馈遂绝自大理评事再迁大理少卿清池令双由陈其父虔于天眷初知永安军遇叛寇孟邦杰执而胁之不从遂被害乞正班用荫大理寺议虔子止合杂班叙九思曰虔奋不顾身守节以死其子宜正

班用荫以劝忠孝世宗从之改工部郎中大兴少尹同知中都都转运使事转刑部侍郎改工部九思所守清约然急于进取一切以功利为务不恤百姓诏检括官田凡地名疑似者如皇后店太子庄【食货志作太子务】燕乐城之类不问民田契验一切籍之复有邻接官地冒占幸免者世宗召还责之转御史中丞奏言屯田明安人为盗征偿家贫辄卖所种屯地请家贫不能征偿者令事主以其地招佃收其人估贾与征偿相当即以其地还之临洮尹完颜让乞用九思议诏从之迁工部尚书帝谓左丞张汝弼曰九思毫矢颇强执自用欲令外补何如时九思子若拙为尚书省令史冒镇诏敕事觉亡命汝弼奏其事帝曰九思岂不知若拙处耶可免其官捕若拙获日授职九思闻命惶惧因感疾卒

△高衍

高衍字穆仲辽阳渤海人敏而好学自少有能赋声同舍生欲试其才使一日赋十题衍执笔怡然未暮十赋皆就俱可观登进士第乞归养逾二年调溲阴丞召为尚书省令史除右司都事母丧去官起复吏部员外郎摄左司员外郎大奉国臣者永宁太后族人先为东京警巡院使以赃免去欲因太后求见海陵不许衍与奉国臣有乡里旧拟为贵德县令海陵大怒杖衍降为清水县主簿居二年为大理司直累迁吏部郎中大定初转左君郎中世宗孜孜求谏羣臣承顺旨意无所匡正使衍传诏台省百司曰凡上书言事或为沮遏许进表以闻迁吏部尚书每季选人至吏部托以检阅旧籍谓之检卷有滞留至后季犹不得去者衍三为吏部知其弊岁余铨事修理选人便之五年为贺宋国生日使中道得疾去职七年卒

△杨邦基

杨邦基字德懋华阴人父绚宋末为易州州佐宗望伐宋蔡靖以燕山降易州来附绚被杀邦基匿僧舍中得免既长好学天眷二年登进士第调滦州军事判官迁太原交城令太原尹图克坦恭贪污不法命属县输金邦基独不与秉德【熙宗纪天眷八年遣参知政事秉德廉察官吏本传误乘德谨据改】廉察官吏尹与九县令皆免去邦基以廉为河东第一召为礼部主事迁兵部员外郎摄吏部差除坐铨注李庆之忤海陵意降坊州宜君【按地理志坊州隶县二宜君其一也原文作宜春今改正】主簿转高密令大定初太师张浩荐邦基人材可用请除刑部郎中帝许之改太府少监累迁秘书监兼左谏议大夫修起居注中都警巡使张子衍道遇皇太子卫仗立马市门不去伞卫士诃之子衍鞭卫士御史台劾奏子衍邦基以姻故为子衍求解及入见显宗求脱子衍罪诏

削子衍官两皆邦基坐削官一阶出为西京留守石知
徙山东东路转运使永定军节度使致仕二十一年卒邦基能属文善画尤以画名当世
云

△丁暉仁

丁暉仁字藏用大兴府宛平人父筠以吏补州县所至有治声致仕后乡里鬪讼者
多就质焉暉仁冲澹寡欲读书外无他好辽季避难间
关道涂未尝释卷皇统二年登进士第调武清县丞县经兵革后无学校暉仁召邑中俊
秀子弟教之学百姓欣然从之调磁州军事判官以廉
摄守事迁知川令前令罢奕不事事羣小越法千禁无所惮暉仁申明法禁皆屏息有董
佑者最强悍畏服暉仁以刀断指誓终身不复犯法凡
租赋与百姓前为率比他邑先办历北京推官再迁大理司直大定三年除定武军节
度副使而节度使同知皆阙暉仁为政无留讼改大理
丞吏部员外郎转户部郎中时贾少冲为刑部郎中帝以少冲为人柔缓不称刑部之职
乃以暉仁易之坐尚荫局官私用官舄违格解职改祁
州刺史祁州【按金地理志祁州与定武军俱属河北西路传称为定武支郡则当是祁
州至祁州则属河东北路矣原本讹祁为祈谨改正
】为定武支郡士民间暉仁之官欢迎界上相属不绝改同知西京留守事首兴学校以
明养士之法徙陕西西路转运使二十一年卒于官

△曹望之

曹望之字景萧其先临潢人辽季移家宣德天会间选充女真字学生年十四业成
除西京教授历行台省令史除右司都事吏部侍郎田
■〈穀，去一〉素薄望之望之愿交不肯纳遂与蔡松年许霖构致党狱陷■〈穀
，去一〉等于死天德元年调同知石州事坐事免久之
除絳阳军节度副使入为户部员外郎诏望之以牛万头分给安春八明安徙居南京者
萨巴反望之转致甲仗八万自洺州输燕子城又运米
八十万斛由蔡水入淮馈伐宋诸军一日而至进本部郎中特赐进士及第大定初讨斡
罕望之为主军食给与有节帅府以捷入告议者欲遂罢
转输望之以为元恶未诛不可弛备既而大军追讨果赖以济以劳进一阶兼同修国史
请于大盐泺设官榷盐听民以米贸易民成聚落可以
固边圉其利无穷从之其后凡贮米二十余万石及东北路岁饥赖以济者不可胜数三
年帝以正隆兵兴农桑失业遣望之及魏子平李滌等
分道劝农廉问职官臧否望之还奏乞汰诸路胥吏可减其半诏胥吏如故惟禁用贴书
迁本部侍郎领核实缮修大内财用费用大者复以劳
进阶望之家奴袁一言涉妖妄大兴府鞫治望之恐使户部令史刘公辅闲其事于大兴

少尹王全全具语其事御史台劾奏刘公辅等泄狱情
决杖除名顷之运河湮塞不治乃用陆运世宗责望之往治之太宗实录成望之等赐银
币有差望之叹赏薄世宗以其不忠出为德州防御使
到官有惠政百姓为立生祠改同知西京留守事上书论便宜事其一论山东河北明安
穆批与百姓杂处民多失业陈蔡汝颍之间土广人稀
宜徙百姓以实其处复数年之赋以安辑之百姓亡命及避役军中者阅实其人使还本
贯或编近县以为客户或籍姓名留为佃户州县与明
安事干涉者无相党匿庶几军民协和盗贼弭息其二论荐举之法宜令宰执岁举三品
二人御史大夫以下内外官终秩举二人终秩不举者
遇转官勒停三品者削后任俸三月其待以不次者宰执具才行功实以闻吏部每季图
上外路职官姓名大书赃污者于其名下使知畏慎年
六十以上者终更赴调有司察其视听精力老疾不堪厘务给以半禄罢遣其三论守边
将帅及沿边州县官渔剥军民多兴力役宜岁遣监察
御史周行察之边部狱讼招讨司无得辄遣白身人征断宜于省部有出身女真契丹人
及县令丞簿中择廉能者因其风俗略定科条务为简
易征断羊马入官籍数如边部遇饥馑即以此账给之军中旧籍马死一村均钱补买往
往鬻妻子卖耕牛以备之臣恐数年后边防困弊临时
赈济费财十倍而无益当早为之所以实边备官给军前用尽则买补皆朽钝不堪用可
每岁给官箭一分以补其阙边民阙食给米地远负重
往往就仓贱卖而去可计口支钱则公私两便陕西正副宜如明安穆昆用土人一员队
将亦宜参用土人久居其任增弓箭田复其赋役以廉
吏为提举举察总管府以下官农隙校阅以严武备则太平之时有经略之制矣又论六
盐场用人宜令户部公议辟举论漕运先计河仓见在
几何通州容受几何京师岁费几何今近河州县岁税或六七万石小民有入资之费富
室收转输之利宜计实数以科税入论民间私钱苦恶
宜以官钱五百易私钱千期一月而尽过期以销钱法坐之论州府力役钱物户部颁印
署白簿使尽书之以俟审阅有畏避不书者坐之论工
部营造调发妨民生业诸路射粮军约量人数习武艺期以三年成以息调民书奏多见
采纳以本官行六部事于北边召拜户部尚书时户部
尚书高德基坐高估俸粟责降世宗念望之吝出纳或惩德基也使人谕之曰要在平占
而已望之久习事有治钱谷名性刚愎颇沾沾自露希
觐执政世宗以望之急于见知涉躁进未及用寻卒以其子渊为奉御泽为笔砚承奉望
之初不学及贵稍知读书遂刻苦自致有诗集三十卷

△大怀贞

大怀贞字子正辽阳人皇统五年除合门祇候累官右宣徽使正隆伐宋为武胜军都总管大定二年除洺州防御使累迁彰国安武军节度使县尉获盗得一旗上图亢宿诘之有谋叛状株连几万人怀贞止以乱民之刑请诛其首乱者十八人余皆释之尝以私忌饭僧数人就中一僧异常怀贞问其曾为盗杀人否对曰无之后三日诘盗果引此僧皆服其明察改兴中尹锦州富民萧鹤寿涂中杀人匿府少尹家有司捕不得怀贞以计取之寘于法改彰德军节度使卒

△卢孝俭

卢孝俭宣德州人登天眷二年第累官太原少尹大定二年陕西用兵尚书省发本路税粟赴平凉期甚严迫孝俭易以金帛驰至用省而不失期并人称之用廉进官二阶迁同知广宁尹广宁大饥民多流亡失业乃借僧粟使平其价市与贫民累迁山东东路转运使孝俭素褊躁与同僚王公谨失欢其子尝私用官帑孝俭不知也既而改河北西路转运使公谨乃发其事孝俭闻被逮莫测所以行至章邱自缢死

△李偲

李偲字子友定州安善人中天眷二年进士调辽山簿累官户部主事除同知河东南路转运使事大定初改同知中都路转运使事三年权知登闻检院再迁户部侍郎改沂州防御使沂南边郡户部借民闲田种禾取藁秸以备警急偲曰如此则农民失业具奏止之转运司牒郡输粟胸山调急夫数万人时久雨泥泞挽运不能前偲遣吏往胸山刺取其官廩见储粮数可支半岁即具其事牒运司请缓期毋自困百姓先是郡县街陌间听民作廩舍取其僦直至是罢收僦直廩舍一切撤毁他郡奉承号令督百姓必尽撤去偲独教民撤治前却不齐者三五所使巷道端正民便之改陕西西路转运使卒

钦定续通志卷四百三十一

●钦定续通志卷四百三十二 列传二百三十二

列传

金 【十】

○金十

富察世杰	萧怀忠	伊喇谙达	富珠哩阿老罕	完颜
萨哈	庞迪	伊喇成	舒穆鲁卞	
伊喇道	杨仲武	赵兴祥	舒穆鲁荣	敬嗣晖
富察通				
钮祜禄额特埒				
富察世杰				

萧怀忠
伊喇谙达
富珠哩阿老罕
完颜萨哈
庞迪
伊喇成
舒穆鲁卞
伊喇道
杨仲武
赵兴祥
舒穆鲁荣
敬嗣晖
富察通
钮祜禄额特埒
△富察世杰

富察世杰本名阿萨尔哈斯罕鄂都河人徙辽阳初隶宗弼军每与武士角力赌羊辄胜能以拳击四岁牛折其肋有粮车陷淖中七牛挽不能出世杰手出之宗敏为东京留守召置左右海陵篡位用为护卫赂以重赏令除兄弟有异志者世杰受诏而不肯为海陵怒面责之世杰曰臣不以非道害物海陵爱其勇不之罪也正隆四年尽籍诸路兵伐宋他使者唯恐不如诏得数多世杰往海兰路得数少海陵怪问之对曰海兰地接高丽今若多籍其丁即有缓急何以为备海陵喜曰他人用心不能及也除同知安国军节度使事时征发不已民不堪命犯法者众邢人【按金地理志邢州宋信德府天会七年降为邢州置安国军节度使世杰时为节度同知邢人正其属也本传讹作那人谨改正】无长吏狱囚积四百余人世杰到官月余决遣略尽入为宿直将军以事往呼尔哈路还奏契丹部族大抵皆叛百姓警扰不安今举国南伐贼若乘虚而入虽得江淮无益也宜先讨平契丹南伐未晚海陵不悦曰诏令已出矣今以三万兵选将屯中都以北足以镇压世杰又曰若东土大族附于贼恐三万众未易当也海陵不听及发汴京授郑州防御使领武捷军副总管大军渡淮世杰以军三千护粮运东下败宋兵数千人夺其战船甚众至和州境击宋兵五万人走之明日使其子乌达领二百八十骑为应兵自领八百骑前战宋兵奔溃大定初世杰取陕州败宋兵石壕镇复败宋援兵三千人遂围陕州宋兵三千自潼关来世杰以兵二百四十迎击之

射杀十余人宋兵败走复败之于土壕山生擒一将复以四穆昆军败宋兵于土华复围陕州亲率选卒二百余人穴地以入城遂拔再破宋军三万人复虢州未几为卫州防御使改河南路统军都监召赴关帝慰劳良久除西北路副统赐厩马弓矢佩刀从布萨忠义讨契丹贼平改华州防御使与图克坦喀齐喀经略陇右喀齐喀复德顺至东山堡宋兵捍绝樵路世杰击走之追至城下城中出兵约二万余复败之宋经略使荆皋弃德顺走世杰与左都监璋追破其军改亳州防御使四迁通远军节度使宋人辄入巩境粟米面有司执之世杰署案作归附人纵遣之译吏蔡松寿诬府主谋叛坐贬十八年起为弘州刺史母忧去职累迁亳州防御使卒世杰少贫然疏财尚气每临阵破敌必戒士卒毋纵杀掠平居非忠孝不言亲贤乐善甚获当世之誉云

△萧怀忠

萧怀忠本名海呼奚人也为西北路招讨使萧裕等谋立辽后使萧珠展往西北路结怀忠并结节度使耶律朗为助怀忠与朗有隙遂执珠展并执朗遣使上变裕等既诛怀忠为枢密副使赐今名复为西北路招讨使西京留守封王改南京留守契丹萨巴反复以怀忠为西京留守西南面兵马都统与枢密使布萨师恭北京留守萧曠石卫将军萧图喇护卫十人长鄂勒博往讨之大军追萨巴不及海陵疑怀忠与萧裕皆契丹人本同谋恐其与萨巴合又以图喇无功怀忠曠师恭逸贼于是杀师恭曠怀忠皆族灭其家并诛鄂勒博图喇大定三年追复怀忠等官爵

△伊喇谳达

伊喇谳达辽横帐人父瑠和与耶律伊都俱来降西京下复叛瑠和遇害谳达以父死事授左奉宸熙宗初充护卫累官东京副留守完颜守道经略北方谳达摄咸平路屯军都统入为兵部侍郎除武定军节度使以招徕边部功迁东北路招讨使改临潢尹卒谳达骑射绝伦善相马尝阅马于市见马甚羸瘦以善价取之他日果良马也

△富珠哩阿老罕

富珠哩阿老罕隆州伯尔克山人年八岁选习契丹字再选习女真字既壮为黄龙府路万户令史贞元二年试外路胥吏第一补宗正府令史累擢尚书省令史布萨忠义讨斡罕辟置幕府掌边关文字斡罕既平阿老罕招集散亡复业者数万人复从忠义伐宋楼入奏事论列可否宋人请和忠义使阿老罕往和议定入奏忠义荐阿老罕有才干授尚书省都事除同知顺天军节度事累迁侍御史复以赫舍哩良弼荐迁

劝农副使兼同修国史侍御史如故改右司郎中奏请徙河南戍军屯营城中者于十里外从之迁吏部侍郎除山东统军都监徙置河南八明安迁武胜节度使入为吏部尚书改西南路招讨使有司督本路明安人户所贷官粟阿老罕乞俟丰年从之军人有以甲叶贸易诸物天德榷场及界外岁采铜矿或因私挟兵铁与之市易皆一切禁绝土番军不许用亲戚奴婢及雇人营堑损圯以时葺治不与所部明安穆批会宴故兵民皆畏爱之改陕西路统军使兼京兆尹陕西军籍有阙旧例用子弟补充多不堪用阿老罕于伊勒希旗鼓手内选补军人以春牧马经夏不收饲瘠弱多死阿老罕命以时数秣之故死损者少仍春秋督阅军士骑射以严武备终南采漆者节其期限检其出入以防奸细帝以阿老罕为人沈厚所至称治召为参知政事命条上天德陕西行事帝称善以疾乞致仕除北京留守卒

△完颜萨哈

完颜萨哈上京纳尔珲河人其先居乌楞古河身长多力善用枪金师南征睿宗为右副元帅置麾下佩以金牌使督军事天德元年授本班祗候郎君详袞后从军泰州路军帅以萨哈为万户领尼楚赫等明安戍北边数有战功二年正月遣使夏国谕以即位事因令同彼之意既还称旨为兵部郎中改同知会宁尹累迁海兰路都总管海陵伐宋授卫州防御使为武震军都总管世宗即位遣使召萨哈至除武昌军节度使改安化军兼山东路副都统大定四年徙镇安武仍兼副统领山东大名东平三路军八万余渡淮会大军伐宋进至楚州宋遣使奉岁币还邳州卒

△庞迪

庞迪字仲由延安人少倜傥喜读兵书习骑射学推步孤虚之术无所用乃应募隶泾原路第三副将破贼有功授保义郎尝从百余骑经行山谷遇夏人数千众骇惧请避迪跃马犯阵敌皆披靡身被重创完军以还自是知名擢为正将寻以张中孚荐授迪权知怀德军兼沿边安抚使夏军五万薄城迪开门待之敌不敢入因以数千骑分门突出遂破之获军资甚众复破关师古兵擢佑镇戎军寻权淮南东路马步军副总管总制沂密淮阳兼权知沂州寻为环庆路兵马都钤辖权知邠州齐国废改华州防御使【按金地理志华州宋镇潼军节度使国初因之皇统二年降为防御使本传除授在天眷以前而云防御使者从乎其后也】军变被执已而贼众悔曰公为政素善岂宜劫辱纵之还复领州事天眷初历临洮尹兼熙秦路兵马都总管陕西大饥流亡四集迪开渠溉田民咸利

之官制行迪以博州团练使 【按金地理志博州有
防御使无团练使】 特授定远大将军皇统七年除庆阳尹历三考不易以治最闻诏书
褒美正隆元年迁凤翔尹屡上章求退不许海陵南伐
征敛烦急官吏因缘为奸富者用贿以免贫者益困迪悉召民使其议增减不加威督而
役力均人情大悦五年徙汾阳军节度使大定初复为
临洮尹迁南京路都转运使以省事惜费安静为政河南称之徙绛阳军节度使卒于官
迪性约孝父疾医药弗效迪仰天泣祷刲股作羹由是
获安昆弟析家财迪尽以与之官爵之荫率先诸侄疾革沐浴朝服而逝

△伊喇成

伊喇成本名娄其先辽横帐人沈勇有谋通契丹汉字天会间隶达兰为行军明安
与宋人战楚泗间以所部先登大破宋军功最诸将刘
麟约会天长军成与瓜尔佳察噶纳俱为达兰前锋得宋生口为乡导遂达天长睿宗嘉
之后从宗弼将兵废齐国及再伐宋攻濠州每战辄先
登多所摧破宗弼再取河南成及萧怀忠等八明安先渡河南平第功授宣武将军除威
州刺史用廉擢同知延安尹再迁昭义军节度使正隆
南伐为武毅军都总管萨巴反海陵以事诛契丹名将成以本军守磁即遣妻子还汴海
陵用是不疑时人高其有识改神武军都总管与富珠
哩定方乡 浙东道先锋使由淮阴进兵以所部护粮赴扬州敌兵乘夜来攻成整兵奋击
蕲刘甚众会海陵死军还复镇昭义大定二年以廉在
优等改河中尹再除临洮尹招降乔嘉等族首领扎实结迁南京留守召拜枢密副使封
任国公改北京留守卒讣闻帝悼惜之授其子舒苏鄂
博武功将军世袭咸平路察察哩明安下哲伯埒穆昆扎实结者西番唃廝囉之裔其先
栋戡及子巴沁结始附宋赐姓赵改名顺忠 【续文

献通考作忠顺】 传至世昌受宋官袭巴延族长朝廷定陕西果尔族长京臧杀世昌朝
廷遣兵执京臧斩之以世昌子特尔格为巴延族都管
大定四年宋人破洮府特尔格弟扎实结走入乔嘉族避之乔嘉族首领巴尔布与邻族
木波隆普庞巴巴哩四族耆老大僧等立扎实结为木
波四族长其地高寒无丝枲五谷惟产青稞与野菜合酥酪食之疆境八千里合四万余
户随水草畜牧迁徙不常扎实结念朝廷为其父报讎
欲弃四族归朝四族不许成至临洮使人招扎实结乃率四族来附焉

△舒穆鲁卞

舒穆鲁卞本名阿尔噶哩五代祖旺古辽骑马都尉父乌锦为羣牧使从睿宗秋山
卞年十三已能射连获二鹿睿宗奇之天会末宗弼为
右监军居卞隶帐下时宗盘为太师达兰为左副元帅人争附之召卞卞不往后宗磐达

兰皆以罪诛人多其识从宗弼与宋人战于颍州卞身被七创率勇士十余骑奋击大败之还授忠勇校尉迁宣武将军除河间少尹察廉升遂州刺史改寿州再改唐州海陵伐宋卞为武毅军都督总管由别道进兵遇宋伏兵击败之遂下信阳军及罗山县至蒋州【按金地理志无奖州宋志载绍兴二十八年以避海陵子光英讳改光州为蒋州其地与汝州相接正宋金边境也本传误作奖州今据改】宋守将弃城遁因取其城大定二年余郑州防御使以本官领行军万户伐宋迁武胜军节度使宋人请和明年有水牛数百头自淮南走入州境僚佐欲收之卞不听复驱过淮还之迁河南尹转西南路招讨使改大名尹大名多盗而城郭不完卞请修城制可城完葺盗不得发徙临洮尹卒于官

△伊喇道

伊喇道本名按宗室伊喇古为山东东路兵马都总管辟掌军府簿书往来元帅府计议边事右副元帅宗弼爱其才召为元帅府令史补尚书省令史特除监察御史再迁大理丞兼工部员外郎海陵南伐使督运刍粮所在盗起道路梗塞间关至淮南上谒具言盗贼状海陵恶闻其言杖之大定二年除工部郎中奉诏招抚诸奚是时茂巴尔明安下穆昆等皆欲降制于明安和卓不敢解甲道发兵掩袭和卓子妇及穆昆瑠珠佛宁博索等妻孥适斡罕遣博索发茂巴尔明安军闻家人被获遂来降改礼部郎中奉使河南劝课农桑密访吏治得失累迁御史中丞同修国史廉问职官殿最改同知大兴尹事诏曰京师士民辐辏犯法者众罪状自实毋为文所持断之以公勉副朕意迁刑部尚书尚廩局使宗夔副使舒穆噜成格勒私用官刍事觉点检乌凌阿天锡属刑部使轻其罪刑部以付大兴府鞠治于是道及天锡皆坐解职寻起为大理卿兼签书枢密院事再迁西京留守卒

△杨仲武

杨仲武字德威保安人父遇以勇闻关西为宥州团练使仲武谒宋经略使王庶求自效遂用为先锋罗索入关仲武与鄜延路兵马都监郑建充俱降为安塞堡环庆路兵马都监皇统初将兵戍凤翔屡却宋军除知宁州关中荐饥境内盗贼纵横仲武悉平之改坊州刺史复知宁州迁同知临洮尹改同知河中府海陵营缮南京典浮桥工役临洮地接西羌与木波杂居边将贪暴木波苦之遂相率为寇掠仲武前治临洮从数骑入其营谕以祸福羌人喜悦寇掠遂息至是木波复掠熙河熙河主帅使人谕之不肯去曰杨总管来我乃解去熙河具奏诏复遣仲武仲武至与其酋帅相见责以负约对曰边将苦我今之来求诉于上官耳幸见公愿终身

不复犯塞乃举酒酌天折箭为誓罗拜而去及伐宋以
仲武为威定军都总管驻兵归德大定三年除武胜军节度使改陕西西路转运使卒

△赵兴祥

赵兴祥平州卢龙人六世祖思温辽燕京留守封天水郡王父瑾辽静江军节度使
兴祥以父任合门祗候谒告省亲于白霫会辽季士贼
据郡作乱兴祥携母及弟妹奔燕京不能进乃自柳城涉砂磧夜视星斗而行仅达辽军
不知辽主所向遂还柳城及罗索获辽主兴祥乃归国
从宗望伐宋为六宅使天眷初累官同知宣徽院事母忧去官熙宗素闻兴祥孝行及英
悼太子受册以本官起复护视太子转右宣徽使天德
初改左宣徽使海陵尝问兴祥欲使子弟为官当自言兴祥辞谢海陵善之迁济南尹改
绛阳军节度使召为太子少保封广平郡王改封巨鹿
正隆初例夺王爵迁太子少傅封申国公起为定武军节度使世宗即位兴祥来见于平
州世宗嘉其诚款以为秘书监复为左宣徽使命传诏
罢神龙殿凉位工役久之以其孙珣为合门祗候大定十五年帝幸安州春水召兴祥赴
万春节谒于良乡感风眩未几卒

△舒穆鲁荣

舒穆鲁荣子昌祖七世祖仕辽封顺国王辽主奔天德荣父特页挺身赴之荣时方
六岁母鸿特们携之流离道路宗室实库得之纳为次
室荣就养于实库家特页见辽主委以军事军败被执将杀之金源郡王尼楚赫曰彼忠
于所事杀之何以劝后遂释之后从伐宋卒于军中荣
年长隶宗翰幕府天眷二年充护卫熙宗宴饮合胙王元与劳角力荣胜之连仆力士六
七人熙宗亲饮之酒赐以金币迁宿直将军天德初除
开远军节度使其母尚在实库家入谢不筮泣下海陵问故以实对乃诏其母与俱行累
改延安东平尹海陵南征为神果军都总管留驻泗州
以遏逋卒大定初还镇东平与户部尚书梁球按治山东盗贼二年以本官充山东东西
大名等路都统有疾改太原尹徙益都尹丁母忧起复
召为签书枢密院事历北京东京南京西京留守坐高贾卖私物抑贾买民物削两阶解
职久之除临潢尹改临洮尹卒

△敬嗣晖

敬嗣晖字唐臣易州人登天眷二年进士第调怀安丞迁弘政令补尚书省令史有
才辩海陵为相爱之及篡立擢起居注历左宣徽使拜
参知政事正隆六年伐宋留张浩及嗣晖于南京治尚书省事世宗即位御史大夫完颜
元宜劾奏萧玉嗣晖许霖等六人不可用嗣晖降通议
大夫放归田里寻以练习朝仪起为丹州刺史母忧起复为左宣徽使世宗颇好道术谓

嗣晖曰尚食官毋于禁中杀羊豕朔望上七日有司毋
奏刑名久之有榜匿名书于通衢者称海陵旧臣怨望将图不轨帝知其诬因谓嗣晖曰
卿性明达能辨但颇自衒钓众人之誉所以致此媒孽
后当改之大定十一年【按世宗纪大定十一年十一月丁亥有事于圜丘前一月壬寅
朔嗣晖拜参知政事本传说作十年今据改正】将
有事南郊复拜参知政事以执政冠服摄太常礼成而卒

△富察通

富察通本名富埒瑋中都路额特赫格们明安人熙宗选护卫以父老恳乞就养朝
廷义而从之后以门阀加昭信校尉授顿舍改御院通
进海陵伐宋以通领隆州诸军至淮率骑二百先济觐敌及弇中敌兵喔出有舞槊来刺
者通射之应弦而毙诸军并击败之至扬州通营别屯
闻海陵遇弑哀闷仆地众掖而起径入营门哭之军还入见世宗授尚厩局副使鞞罕反
命通佩金符诣军前督战贼破以功授世袭穆昆奚人
乱承诏继往莅军迁本局使以母忧免起为殿前右卫将军兼领闲厩寻命其子富色哩
尚卫国公主出为肇州防御使寻擢扶余路节度使累
除殿前都点检大定十七年拜尚书右丞转左丞诏议推排明安穆昆事大臣皆以止验
见在产业定贫富依旧科差为便通言必须通括各穆
昆人户物力多寡则贫富自分贫富分则版籍定如有缓急验籍科差富者不得隐贫者
不重困矣帝是通言阅三岁【按世宗纪以左丞富
察通平章政事在大定二十一年三字当系五字之误】进平章政事封任国公世宗将
幸上京命通为上京留守先往镇抚之二十五年除知
真定府事未几改知平阳府事移凤翔致仕明昌四年帝以通先朝重臣年虽高而未衰
命知广宁府事累表请老复以开府仪司三司致仕承
安三年薨旧制致仕宰相无祭葬礼通以旧臣懿戚特命敕祭及葬初通在政府举太子
率府完颜守贞监察御史裔俱可大用后皆为名臣世
多其知人云

△钮祜禄额特埒

钮祜禄额特埒盖州巴哩玛明安帝楚穆昆人贞元初以习女真字试补户部令史
历右补阙修起居注九年河南统军宗叙上书言宋人
欲起兵衅帝遣额特埒就问其实至汴召凡言边事者诘之皆无状还报世宗喜曰朕固
知妄也授左司员外郎十年以夏国发兵筑祁安城及
袭杀乔嘉族首领扎实结又谍言夏与宋人通谋犯边诏大理卿李昌图与额特埒往按
其事夏人报言扎实结以兵犯夏境故杀之祁安城本
上国所赐旧积石地发兵修筑以备他盗耳又察知宋夏无交通状及乔嘉族民户愿令

扎实结侄赵师古为首领具以闻世宗甚悦转右将军
十二年为夏国生日使还授右司郎中迁右副都点检久之出为河南路统军都监十七
年授昌武军节度使兼领前职明年入为刑部尚书拜
参知政事二十二年委提控代州阜通监二十三年进尚书右丞二十六年转左丞世宗
与宰臣议可授执政者额特埒奏曰宗浩干能可任遂
用宗浩二十八年为上京留守明昌二年致仕承安初有事北方朝廷欲任旧臣起为东
京留守明年改上京留守许以便宜行事二年九月还
朝拜平章政事封芮国公在位数月薨谥成肃额特埒性温厚酝籍尝为丞相赫舍哩良
弼所荐世宗以良弼为知人在相位十余年甚见宠遇
唯奏定五品官子与外路司吏同试都令史及令随朝使员得试国史院书写世宗以为
非云

钦定续通志卷四百三十二

●钦定续通志卷四百三十三 列传二百三十三

列传

金 【十一】

○金十一

图克坦克宁 宗浩 襄 【思烈】 瓜尔佳清臣 瓜尔佳衡

完颜安国 裕尔伯特

图克坦克宁

宗浩

襄

瓜尔佳清臣

瓜尔佳衡

完颜安国

裕尔伯特

△图克坦克宁

图克坦克宁本名锡馨其先金源县人徙居北古土之地后徙置明安于山东遂占
籍莱州克宁资质浑厚寡言笑善骑射有勇略通女真
契丹字舅氏希尹荐其材以为符宝祗候累迁至忠顺军节度使克宁娶宗干女嘉祥县
主同母兄富勒坚判大宗正事海陵心忌之出为西京
留守构致其罪诛之因降克宁知滕阳军历海兰路兵马都总管大定初诏克宁以本路
兵会东京迁左翼都统从右副元帅完颜默音讨契丹
斡罕趋济州默音用契丹降吏奇彻计袭贼辎重克宁与赫舍哩志宁为殿与贼遇于长
泆默音使伏兵于左翼之侧贼二万余蹶其后又以骑

四百余突出左翼伏兵之间克宁与善射二十余人拒之众欲俟大军至克宁不可于是奋击贼乃却左翼万户襄与大军合击之贼遂败追奔十余里时二年四月一日也越九日复追及于霏■〈雨上松下〉河左翼军先与贼战克宁以骑三千追掩十五里贼迫涧不得亟渡杀伤甚众而大军尚未至贼遂引而南时斡罕已再北元帅默音利虏掠驻师白冻世宗讶其持久遣问之默音以马弱为辞朝廷乃召还默音以平章政事布萨忠义兼任右副元帅【按世宗纪及布萨忠义传皆作兼右副元帅此处误出都元帅谨改】师将发贼声言乞降克宁曰贼初困蹙且无降意所以扬言者欲缓吾师也不若乘其未备急击之可一战而定也忠义以为然乃与克宁出中路败贼兵于娄博啰之地贼奔七渡河负险为栅克宁觐栅背可上乃潜师夜登俯射之大军自下攻贼溃皆遁去契丹平克宁除太原尹未阅月宋吴璘侵陕右元帅左都监图克坦喀齐喀乞益兵遣克宁佩金牌驻军平凉诏喀齐喀曰朕遣克宁参议军事此其智勇足敌万人不必益军也克宁至下令安辑未几民皆完聚改益都尹兼山东路兵马都总管行军都统四年诏益克宁兵二千出军楚泗之间以伐宋宋将魏胜取弊舟凿其底贯以大木列植水中别以船载巨石贯以铁锁沈之水底以塞十八里口及淮渡舟路以步兵四万人屯于淮渡南岸运河之间克宁使锡默和尚选善游者拔出植木彻去沈船进至淮口宋兵来拒隔水矢石俱发锡默和尚以竹编篱捍矢石师遂入淮与宋兵夺渡口合战数四明安长寿先行薄岸水浅率劲卒涉水登岸败其津口兵五百人余众皆济宋兵四百余自清河口来镇国上将军富察鄂兰哈玛尔以步遗百人御之宋大兵整阵来拒克宁麾兵前战自旦至午宋兵败踰运河为阵明安楚呼战不利克宁以明安萨喇九十骑横击之宋兵大败追至楚州射杀魏胜遂取楚州及淮阴县是役也萨喇功居多时宋屡遣使请和布萨忠义赫舍哩志宁约以世为叔侄国割还海泗唐邓四州兵罢改大名尹历河间东平尹召为都点检迁枢密副使兼知大兴府事改太子太保枢密副使如故弄平章政事封密国公克宁女嫁为渾王永成妃得罪罢为东京留守明年改南京留守兼河南统军使至京师入见复拜平章政事授世袭伯奇图河明安兼亲管穆昆徙其亲族在山东者居之近地二十年【原文作十九年依世宗纪改】拜右丞相徙封谭国公【按王圻续文献通考及金百官志载封国之号八十而不及谭岂封号迭有变更而志未之载欤】克宁为相持正守大体至于簿书期会不屑屑然也二十一年为左丞相徙封定国公屡求致仕不许未几以司徒兼枢密使二十二年诏

赐今名三十三年复以年老为请帝曰卿昔在政府劝劳夙夜除卿枢密使亦可以优逸矣朕念旧臣无几人万一边隅有警选将师授方略山川险要兵道军谋舍卿谁可与其者勉为朕留克宁乃不敢复言二十四年世宗幸上京皇太子守国诏左丞相守道与克宁俱留中都辅太子二十五年左丞相守道赐宴北部诏克宁行左丞相事时世宗在天平山清暑皇太子薨于京师诸王妃主入临奴婢从入者多颇喧杂不严克宁遣出之身护宫门严饬殿廷宫门警卫皆如法章宗时为金源郡王哀毁过甚克宁谏曰哭泣常礼也郡王身居冢嗣岂以常礼而忘宗社之重乎召太子侍读完颜匡谨视郡王勿去左右讫至天平帝闻克宁严饬宫卫谨护皇孙嘉其忠诚愈重之帝还京师克宁表请立金源郡王为皇太孙以系天下之望踰月有诏起皇孙判大兴尹封原王二十六年以克宁为太尉兼左丞相原王为右丞相因使克宁辅导之世宗与宰相论钱弊帝曰今京师积钱止五百万贯除屯兵路分其它郡县钱可运至京师克宁曰郡县钱尽入京师民间钱益少矣若起运其半其半变折轻赍庶几钱货流在也帝嘉纳之克宁以原王未正太孙之位屡请于世宗十一月戊午入见于香阁率宰臣屏左右奏立太孙世宗许之庚申诏立原王右丞相为皇太孙明年正月复求解机务帝勉留之乃给假归乡土以四月还朝未几以丞相监修国史帝问史事奏曰臣闲古者人君不观史愿陛下勿观帝曰朕岂欲观此深知史事不详故问之耳初卢沟河决久不能塞乃封卢沟水神为安平侯久之水复故道帝曰鬼神感应如此克宁奏曰神之所佑者正也人事乖则弗享矣报应之来皆由人事帝是其言世宗颇信神仙浮图之事故克宁及之宋孝宗即位遣使进前主遗物帝怪其薄克宁曰此非常贡责之近于好利帝是之二十八年十一月癸丑帝幸克宁第赐金器绵绣重彩克宁亦有献帝饮欢甚诏画克宁像藏内府十二乙亥世宗不豫诏克宁辅皇太孙乙酉诏太孙与诸王大臣俱宿禁中克宁奏曰皇太孙与诸王宜别嫌疑正名分宿止同处礼有未安诏太孙居庆和殿东庑丙戌诏克宁以太尉兼尚书令封延安郡王平章政事襄为右丞相右丞张汝霖为平章政事戊子诏克宁襄汝霖宿于内殿二十九年正月癸巳世宗崩于福安殿是日克宁等宣遗诏立皇太孙为皇帝是为章宗徙封为东平郡王诏克宁朝朔望朝日必为克宁设坐克宁侍立益敬即位诏文凡除名开落官吏并量材录用张汝霖奏真盗枉法不可恕克宁曰陛下初即位行非常之典赃吏误沾恩宥其害小国之大信不可失也章宗深然之无何进拜太傅兼尚书令赐尚衣玉带乞致仕不许尚书省奏明安穆昆颇试进士

者听之帝曰其应袭明安穆昆者学于太学可乎克宁曰承平日久今之明安穆昆其材武已不及前辈万一有警使谁御之习辞艺忘武备于国弗便帝曰太傅言是也章宗初即位颇好辞章而疆场方有事故克宁言及之明昌元年【原文作二年依章宗纪改】克宁属疾章宗往视之即杨前拜太师封淄王加赐甚厚二年正月【原文蒙上二年之误作是岁二月今并依本纪改正】薨遗表言人君往往重君子而反疏之轻小人而终昵之愿陛下慎终如始安不忘危而言不及私诏有司护丧事归葬莱州谥曰忠烈五年配享世宗庙庭图像衍庆宫大安元年改配享章宗庙庭

△宗浩

宗浩字师孟昭祖四世孙汉国公昂之子也贞元中为海陵寝殿实达尔世宗即位辽阳昂遣宗浩驰贺命充符宝祗候大定二年冬昂以都元帅置幕山东宗浩领万户从行仍授山东东路兵马都总管丁父忧起复承袭因绵乌尔衮明安授河南府判官授同知陕州防御使事察廉能第一等进官一阶累迁哈斯罕节度使二十三年征为大理卿踰年授山东路统军使兼知益都府事二十六年为贺宋主生日使还授刑部尚书俄拜参知政事章宗即位出为北京留守三转同判大睦亲府事北方有警命宗浩佩金虎符驻泰州便宜从事朝廷发上京等路军万人以戍宗浩以粮储未备且度敌未敢动遂分军就食隆肇间是冬果无警北部光嘉喇者尤桀骜屡胁诸部入塞宗浩请乘其春暮马弱击之时准布亦叛内族襄行省事于北京议欲留光嘉喇以牵准布宗浩奏国家以堂堂之势不能扫灭小部顾欲藉彼为捍乎臣请先破光嘉喇然后提兵北灭准布章再上从之宗浩规知哈达济与博斯和等相结光嘉喇之势必分彼方畏讨而复掣肘仇敌理必求降可呼致也因遣主簿萨领军二百为先锋戒之曰若光嘉喇降可就征其兵以图哈达济仍侦余部所在速使来报哈达济者与占楚瑄皆北方别部恃强中立无所羁属往来准布光嘉喇间连岁扰边皆二部为之萨入敌境光嘉喇果降遂征其兵万四千骑驰报以待宗浩北进命人赍三十日粮报萨会于伊玛河其击敌而所遣人误入博斯和部由是东军失期宗浩前军至特尔格山遇占楚瑄所统舒噜欢塔两部击走之进至和硕水敌势大蹙于是哈达济部长布古岱占楚瑄部长呼巴拉及博斯和所遣和和者皆乞降宗浩承诏谕而释之呼巴拉因言所部必里克图近在伊玛河不肯偕降乃移军讨之哈达济等西渡伊玛弃辎重遁去萨与光嘉喇部长塔里瑄追蹶及之于沃哩布水纵击大破之军还博斯和乞内属并请

置使乃优诏哀谕迁光禄大夫以所获马六千置牧以处之明年拜枢密使封荣国公初朝廷置东北路招讨司泰州去境三百里每敌入出兵追袭敌已遁去至是宗浩奏徙之金山以据要害设副招讨二员分置左右由是敌不敢犯中都山东河北屯驻军人地土不贍官田多为民所占命宗浩行肖事诣诸道括籍凡得地三十余万顷还坐以倡女自随被劾出知真定府事徙西京留守复为枢密仗进拜尚书右丞相超授崇进时北边不宁议筑壕垒以备守戍廷臣多言不可宗浩独谓便乃命宗浩行省事以督其役功毕褒赉甚厚萨里部长图克勒入塞宗浩以兵追蹶与布萨揆军合击之杀获甚众敌遁去征还优诏奖谕躡迁仪同三司进拜左丞相时举兵南伐会平章政事揆病乃命宗浩兼都元帅往督进讨宗浩驰至汴大张兵势亲赴襄阳巡师而还宋人大惧乃命知枢密院事张岩以书请和宗浩以辞旨未顺却之仍谕以称臣割地缚送元谋奸臣等事岩复遣方信孺赍其主誓藁来且言并发三使将贺天寿节及通谢仍报其祖母哀并致书于都元帅信孺自以和议遂成辄自称通谢使所参议官宗浩怒其轻妄数而遣之【按续通鉴开禧三年以方信孺为国信所参议官如金军又称信孺以口舌折冲置死生于度外本传所云殆非信孺之罪也】而复张岩书反复开谕其后宋人竟请以叔为伯增岁币备犒军银函奸臣韩侂胄苏师旦首以献而乞盟焉泰和七年九月薨于汴讣闻帝为辍朝命特绘像至都将亲临奠赙赠甚厚谥通敏

△襄

丞相襄本名安昭祖五世孙祖实古纳从太祖平辽以功授上京世袭明安历东京留守父阿噜岱皇统初北伐有功拜参知政事襄幼有志节善骑射多勇略年十八袭世爵大定初从左副元帅默音讨斡罕战于肇州长泆襄足中流矢裹创鏖击七战皆胜追贼于霭■〈雨上松下〉河贼乘风纵火襄亦纵火立空地以竣战十余合贼益困襄卒众搏战大败之俘获万计会朝廷遣布萨忠义代默音将襄从忠义追贼至诺尔岭西之陷泉率右翼身先奋击贼大溃及斡罕就擒论功第一授亳州防御使时年二十三宋人犯南鄙襄为颍寿都统率甲士二千渡颍水败敌兵五千复颍水生擒宋师杨思次濠州宋将郭太尉退保横涧山襄攻之伏弩射中其膝督攻愈急拔之获郭太尉既而趋滁州襄为先锋将至清流关得宋侦者知敌欲发兵三道夜出襄乃率骑二千分二道一由冲路自以千兵间道潜登既近敌始觉襄攻克之据其关及宋乞盟班师召为拱卫直都指挥使累迁海兰路兵马都总管左丞相志宁疾甚世宗临问之志宁荐襄智勇兼济有经世才即召授殿前左副都点

检为宋生日使宋方祈免亲接国书襄折之成礼而还授陕西路统军使入为吏部尚书转都点检世宗谓宰执曰襄为人甚蕴藉非直日亦入宫规画诸事事有所付乃退其公勤如此擢御史大夫踰月拜尚书右丞进拜左丞襄在外任治有异效至是朝廷以褒赏廉吏诏天下列其名以示奖励二十三年进拜平章政事封萧国公皇孙将加王爵诏择国号襄曰为天下大计必先正其本原者本也请封原从之初诸部族节度使僚属多用乱人颇有私纵不法者议改用诸色人襄曰北边虽无事恒须经略若杜此门其后有劳绩何以处之请如旧他日议及古有监军之事襄曰汉唐初无监军将得专任故战必胜攻必克叔世始监以内臣动为所制故多败而少功若将得其人监军诚不必置并嘉喇之诏授北部进贡使还世宗问边事具图以进因上羁縻属部镇服达实之策诏悉行之进拜右丞相徙封戴世宗不豫与太尉图克坦克宁及平章政事张汝霖宿内殿同受顾命章宗初即政议罢僧道奴婢太尉克宁奏曰此盖成俗日久若遽更之于人情不安襄曰出家之人安用仆隶乞悉放为良若寺观物力元系奴婢之数推定者并合除免诏从襄言由是二税户多为良者明昌元年同知棣州防御使膏上封事历诋宰执克宁奏襄预知出知平阳府事历西京留守召授同判大睦亲府事进枢密使复拜右丞相改封任会左丞相瓜尔佳清臣北御边措画乖方命襄代将其众佩金牌便宜从事时呼必乱亦叛啸聚北京临潢之闲襄至遣人招降寻出师大盐冻复遣右卫将军

【瓜尔坐清臣传作左卫将军】

完颜充进军乌噜斯城欲屯守俟隙进兵绘图以闻议者异同即召面论厚赐遣还未几遣西北路招讨使

【完颜安国传作两路都统】

完颜安国等趋多泉子密诏进讨乃分支军出东道襄由西道而东军至龙驹河为准布所围三日不得出求援甚急襄即鸣鼓夜发迟明距敌近众请少憩襄曰吾所以乘夜疾驰者欲掩其不备尔缓则不及向晨压敌突击之围中将士亦鼓噪出大战众皆奔斡勒嘉河遣安国追蹙之众散走降其部长遂勒勋九峯石壁捷闻遣使厚赐以劳之别诏许便宜赏赉士卒九月赴阙拜左丞相监修国史封常山郡王十月准布复叛襄出屯北京会羣牧契丹图卜苏德寿等据信州叛伪建元曰身圣众号数十万远近震惊襄闲暇如平日人心乃安初襄出镇谓僚属曰北部犯塞不足虑第恐奸人乘隙而动北京近地军少当预为之备即遣官发上京等军六千至是果得其用分遣临潢总管乌库哩道远咸平总管富察守纯进讨擒德寿等送京师契丹之乱廷臣议罢郊祀又欲改用正月上辛帝遣使问之对曰郊为重礼且先期诏天下又藩国已报表贺

今若中罢何以副四方之望至改用正月上辛乃祈谷之礼非郊见上帝之本意也大礼不可轻废请决行之臣乞于祀前灭贼既而贼破果如所料郊礼成进封南阳郡王始讨契丹自龙虎卫上将军节度使以下许承制授之襄以为赏罚之柄非人臣所预不敢奉诏贼平请委近臣谕旨将士使知上恩乃遣李仁惠持宣三十敕百五十视功给之方德寿之叛诸乱亦剽略为民患襄虑其与之合乃移诸乱居之近京地或虑其生变襄曰乱虽杂类亦我边民若抚以恩焉能无感我在此必不敢动后果无患寻诏参知政事裔代领其军入见赐钱五千万明年以内艰免寻起服视事时议以契丹户之驱奴尚众乞尽鬻以散其党襄以为非便奏请量存口数余悉官赎为良从之北部复叛裔战失律复命襄为左副元帅莅师寻拜枢密使兼平章政事屯北京民方艰食乃减价出巢仓粟以济之民皆悦服时议北讨襄奏遣同判大睦亲府事宗浩出军泰州又请左丞衡于抚州行枢密院出军西北路以邀准布而自帅兵出临潢帝从其策其后色彻部族诣抚州降乃专使问襄襄以为受之便赐宝剑诏度宜穷讨乃令士自赍粮以省挽运进屯于默音埒里额穆尔苏等山以逼之因请就用步卒穿壕筑障起临潢左界北京路以为阻塞诏可襄亲督视之军民并役兼募饥民五旬而毕于是西北西南路亦治塞如所请无何泰州军与敌接战宗浩督其后杀获过半诸部相率送款襄纳之自是北陲遂定襄还临潢减屯兵四万马二万匹帝以信符召还入献边机十事皆为施行仍厚赐之复拜左丞相四年正月进拜司空领左丞相如故襄重厚寡言务以镇静守法每掾有所禀必问诸相云何及当从某议识者谓其得相体时颇更定制度初置提刑司又议设清闲职位如宋朝宫观使以待年高致仕之官襄言朝廷养以俸廩恩礼至渥老不为退复有省会之法所以抑贪冒长廉节若拟别设恐涉于滥又言省事不如省官今提刑官吏多无益于治徒乱有司事皆听纳之俄乞致仕不许时方旱襄等上表待罪帝下罪已诏仍慰论襄等视事泰和元年承命驰祷于亳州太清宫及后土方岳以其世封远特改授河间府路算卓和明安明年既祀嵩岳还次芝田之府店遂以疾薨谥曰武昭命张行简铭其碑襄明敏才武过人帝亲待之厚故所至有功在政府二十年明练故事简重能断器局尤宽大待掾吏尽礼用人各得所长为当世名将相大安间配享章宗庙庭子思烈

思烈

思烈

思烈自五六岁入宫充奉御宣宗入承大统呼沙呼跋扈思烈尚在髫鬮尝涕泣跪

抱帝膝曰愿早诛权臣以靖王室帝急顾左右掩其口
自是甚器重之天兴元年汴京被围哀宗以思烈行省事于邓州会武仙引兵入援思烈
亦发兵过密县遇元兵不用武仙阻涧之策遂败绩于
京水寻守中京元兵围之未能下崔立遣人监其子于城下招之使降思烈不顾令军士
射之既而知崔烈已以汴京归顺病数日而死初思烈
与仙论义不合左右司员外郎王渥劝曰武仙大小数百战经涉不为不多兵事当共议
已而思烈果败渥歿于阵 【按刘祁归潜志云定兴
初渥从持嘉喀齐喀出援武山大战歿于阵中州集则云中牟失利不知所终所载与本
传互异】 渥字仲泽太原人博学善谈论工尺牍字画
清美兴定二年进士为奥屯邦猷完颜埒默所知多在兵间后辟宁陵令有治迹入为尚
书省令史使宋至扬州应对敏给宋人重之及思烈往
邓州以渥从行

△瓜尔佳清臣

瓜尔佳清臣本名阿卜萨呼尔哈路罕都人姿状雄伟善骑射皇统八年袭祖布达
明安世宗即位率本部军六千赴中都以功迁昭武大
将军从右副元帅赫舍哩志宁为管押万户接应左都监完颜思敬逐斡罕余党败之柔
远至茂巴勒达悉获之贼平迁镇国上将军知颖顺军
事会宋兵二万陷汝州杀刺史乌克逊满丕河南统军宗尹 【按世宗纪大定二年河南
统军使宗尹复汝川此处误作宗正谨据改】 遣清
臣与万户富珠哩定方等领骑兵四千往击之宋人弃城遁遂复汝州大定三年从志宁
复取宿州大败宋将李世辅复以兵追袭又败之捷闻
授宿州防御使移博州改西北路招讨都监迁乌尔古实垒部族节度使十二年历左右
副都点检出为陕西路统军使兼知京兆府事二十六
年改西京留守阅三岁迁枢密副使明昌元年以其女为昭仪眷倚益重二年拜尚书左
丞顷之进平章政事封芮国公四年迁右丞相监修国
史未几迁崇进改封戴寻上表丐闲不许固请乃赐告省亲给假五十日驰驿以往清臣
省覲还谒帝帝问呼尔哈路风俗何如对曰视旧则稍
知礼貌而勇劲不及矣因言西南西北等路军人其娴习弓矢亦非复曩时六年迁仪同
三司进拜左丞相改封密受命出师行尚书省事于临
潢府清臣遣人侦知虚实以轻骑八千令宣徽使伊喇敏为都统左卫将军充招讨使完
颜安国为左右翼分领前队自选精兵一万以当后队
进至哈里河前队敏等于栲栳泺攻下十四营同迎大军属部色彻掩其所获羊马资物
以归清臣遣人责其贖罚北准布由此叛去大侵掠上
遣责清臣命右丞相代之承安五年降授横海军节度使兼沧州管内观察使寻复致仕

泰和二年薨子伊扎尔袭明安初议征讨清臣主其事
既而领军出征虽屡获捷而贪小利遂致北边不宁者数岁天下尤之

△瓜尔佳衡

瓜尔佳衡本名阿里布山东西路萨塔明安伊克达巴穆昆人大定十三年勅设女真进士衡中第四补东平府教授累改应奉翰林文字
世宗尝谓宰臣曰女真进士中如图克坦谟瓜尔佳衡尼玛哈鉴皆有用材也迁修起居注章宗立为侍御史转右司员外郎敷奏称旨升左司
郎中明昌二年擢御史中丞未几拜参知政事三年八月以病表乞致仕诏抚慰不许四年诏赐今名参知政事胥持国言区种法衡曰若苟有利古已行之且用功多而所种少复恐荒废土田徒劳民无益也进尚书右丞六年迁尚书左丞寻出行省于抚州泊还入朝闻父忧去上亟召
同起复本职承安二年出为上京留守寻改枢密副使行院规画边事三年以修完封界赐诏褒论四年正月就拜平章政事封英国公薨赠
有加谥曰贞献

△完颜安国

完颜安国字正臣本名栋摩其先占籍上京世有战功祖锡伯授西南路世袭哈济穆昆安国有谋画尤善骑射正隆元年从军为穆昆常
以少击众大定中为常山簿转虹县令会王府新建选充虞王府掾再迁仪鸾局副使明昌元年改本局使会达实部长有乞修岁贡者朝廷许
其请诏安国往抚之至则率众远迓至帐望阙罗拜执礼无惰容时准布迫近塞垣邻部欲立功议邀安国往讨安国以未奉诏辞不可或以危
言怵之不动众壮之馈饷如礼既还以奉使称旨升武卫军都指挥使出为西北路副招讨六年左丞相瓜尔佳清臣出兵以安国为先锋都统
适临潢泰州属部叛安国先讨定之以功迁本路招讨使兼威远军节度使承安元年大盐冻之战杀获甚众诏赐金币既而右丞相襄总大军
进安国为两路都统大捷于多泉子襄遣安国追敌金言粮道不继安国曰人得一羊可食十余日不如驱羊以袭之便遂从其计安国统所部
万人疾驱以薄之降其部长捷闻进官四级迁左翼都统二年以营边堡功召签枢密院事赐虎符还边以便宜从事时并塞诸部降谕使轮贡
如初进拜枢密副使泰和元年特授世袭西南路延晏河明安兼哈济穆昆帝幸庆宁宫命安国严飭边备奏西南路边戍私窜者乞招诱以安
人心帝是其言三年以疾致仕封道国公四年起复前职卒赠特进安国在军旅十五年号令严明善伺知敌人虚实及山川险易战必身先士卒
卒故所向辄克诸部入贡安国能一一呼其祖先弟侄名字以戒谕之诸部皆震悚甚为

邻国所畏服

△裕尔伯特

裕尔伯特北京路库本明安托啰山穆昆人以军功历海滨令迁徐王府掾以称职再任御史台察廉升同知震武军节度使事明昌初为唐州刺史寻授西北路招讨副使未几改东北路六年正月北兵围庆州急伯特率本路军往救敌解去承安元年丞相襄北伐伯特为先锋副统进军至龙驹河为准布所围会襄引大军至得解俄值六羣牧人叛伯特为都统领步骑一万次懿州敌数万逆战伯特陷阵奋力击郟之身中二创捷闻迁一官二年乱军干余出没剽掠锦懿闲伯特追败之复获所掠悉还本户三年从宗浩为左翼都统战伊玛河及骨堡子西杀获甚众五年授知广宁府事俄改东北路招讨使以捍边有功赐诏褒谕三迁为崇义军节度使泰和六年卒赠金紫光禄大夫伯特勇决善战自幼以军功显任兵镇十余年所向克捷凡再迁官赐金币甚为帝倚注云

钦定续通志卷四百三十三

●钦定续通志卷四百三十四 列传二百三十四

列传

金 【十二】

○金十二

伊喇履 张万公 程辉 刘玮 董师中 王脩

马惠迪 马琪 尼玛哈鉴

黄久约 李晏【仲略】 李愈 王贲 许安仁 温特赫提

克德

伊喇履

张万公

程辉

刘玮

董师中

王脩

马惠迪

马琪

尼玛哈鉴

黄久约

李晏

李愈

王贲

许安仁

温特赫提克德

△伊喇履

伊喇履字履道辽东丹王托云七世孙也父约啰早七其族兄兴平军节度使德元无子以履为后方五岁卧庑下见徽云往来大际忽谓乳母曰此所谓卧看青天行白云者耶德元闻之惊曰是子当以文学名世及长博学多艺善属文初举进士恶搜检烦琐去之荫补为承奉班祗候国史院书写世宗兴儒术诏译经史擢经史院编修官一日世宗召问曰朕读贞观政要见魏征嘉谋忠节良可称叹近世何故无如征者履曰忠嘉之士何代无之但上之人用与不用耳世宗曰刘仲晦张汝震屡有忠言朕超用之安得谓之不用履曰臣未闻其谏也海陵杜塞言路天下缄口愿陛下惩艾前事开谏诤之门天下幸甚初议以时务策设女真进士科礼部以所学不同未可槩称进士诏履定其事乃上议曰进士之科起于隋大业中始试以策唐初因之高宗时杂以箴铭赋诗至文宗始专用赋进士之初本博试策今女真诸生以试策称进士又何疑焉世宗大悦事遂施行 【按元好问中州集载世宗问宋名臣敦优履以苏轼对因论轼经济良材求之古人陆贄而下未见其比明日录轼奏议上之诏国子监刑行本传于载谨识于此】 大定十五年授应奉翰林文字兼前职俄迁修撰二十年诏提控衍庆宫画功臣像过期降应奉踰年复为修撰转尚书礼部员外郎章宗为金源郡王喜读春秋左氏传闻履博洽召质所疑履曰左氏多权诈驳而不纯尚书孟子皆圣贤约全之道愿留意焉王嘉纳之二十六年进本部郎中兼同修国史翰林修撰表进宋司马光古文孝经指解曰臣窃覲近世皆以兵刑财赋为急而光独以此进诚取其辞施诸宇内则元元受赐以疾乞补外遂授蓟州刺史无几召为翰林侍制同修国史明年擢尚书礼部侍郎兼翰林直学士世宗崩遗诏移梓宫寿安宫章宗诏百官议皆谓当如遣诏履独曰非礼也天子七月而葬同轨毕至其可使万国之臣朝大行于离宫乎遂殡于大安殿二十九年三月进礼部尚书兼翰林直学士赐大定三年孟崇献榜下进士及第七月拜参知政事提控刊修辽史明昌元年进尚书右丞二年六月卒是日履所生也谥曰文献履通悟精历算书绘事初德元以履为后既而生子震德元歿尽推家赀与之其自礼部兼直学士为执政乃举前代光院故事以钱五十万送学士院学者荣之

△张万公

张万公字良辅东平东阿人幼聪悟喜读书登正隆二年进士第调新郑簿大定四年为东京辰漾盐副使课增迁长山令时士寇万人猝至城下万公登陴谕以乡里亲旧意众感悟相率而去邑人赖之为立生祠久之补尚书省令史累迁侍御史尚书右司员外郎俄授郎中敷奏明敏世宗嘉之谓侍臣曰张万公纯直人也迁刑部侍郎章宗即位选为南京路提刑使以治最迁御史中丞会北边屡有警帝命枢密使瓜尔佳清臣发兵击之万公言劳民非便诏百官议于尚书省遂罢兵寻为彰国军节度使明昌二年知大兴府事参知政事踰年以母老乞就养不许赐告省亲还帝问山东河北粟贵贱及今春苗稼万公具言雨未沾足且曰陛下即位以来兴利除害无不举行至于旱灾皆由臣等若依汉典故皆当免官帝曰卿等何罪殆朕所行有不逮者对曰天道虽远实与人事相通方今宜崇节俭不急之务无名之费可俱罢去帝由是以万公言下诏罪已进士李邦又上封事因论世俗侈靡讥涉先朝有司议言者罪万公曰讥斥先朝固当治罪然旧无此法今当定立使人知之乃命免邦又罪惟殿三举其奏对详敏多类此四年复乞侍养特畀乡郡授知东平府事六年改知河中府时军兴调发丛剧悉为宽假使民力易办人为绘像于熏风楼又建去思堂移镇济南以母忧去职卒哭诏起复拜平章政事躡迁资善大夫封寿国公帝时惑于李淑妃欲立为后大臣多不可帝怒竟进封元妃而边事方殷连岁旱暵灾异数见又多变更制度万公颇嫌畏不敢强谏须帝有问然后言帝亦弗行也于是两上表以衰病旬闲特赐告两月复起视事初明昌间沿临潢达泰州开筑壕堑役者三万人连年未就御史台言所开旋为风沙所平无益于御侮而徒劳民帝因旱灾问万公所由致万公对以劳民之久恐伤和气宜从御史台所言罢之为便后丞相襄师还卒为开筑民甚苦之主兵者言比岁征伐军多败衄盖屯田地寡无以养赡故兵无鬪志愿括民田之冒税者分给之则士气自倍朝臣议已定万公独上书言其不可者五大略以为军旅之后百姓疮痍未复不可重扰一也通检未久田有定籍括之必不能尽适足以增猾吏之敝长告讐之风二也浮费侈用不可胜计可推之以养军三也兵士失于选择强弱不别而使同田共食振厉者无以尽其力疲劣者得以容其奸四也夺民而与军得军心而失天下心其祸有不可胜言者五也必不得已乞以冒地之已括者召民蒔之以所入赡军则军有坐获之利而民无被夺之怨矣皆不报万公尝言天久阴晦由人君用人邪正不分君子当在内小人当在外帝问孰谓小人万公奏张炜田栌张嘉贞等虽有才干无德可称帝即命三人补外泰

和元年迁荣禄大夫赐其子进士及第连章求去皆不允三年加银青光禄大夫三月历举朝臣有名者以自代求去甚力加金紫光禄大夫致仕六年南鄙用兵特起万公知济南府山东路安抚使山东连岁旱蝗万公虑民饥盗起当预备赈济乃上言乞将僧道度牒师德号观院名额并盐引付山东行部于五州给卖纳粟易换又言督责有司禁戢盗贼之方帝皆从之宋人请和复乞致仕许之加崇进仍给平章政事俸之半七年卒赠仪同三司谥文贞万公淳厚刚正门无杂宾典章文物多所裁正帝尝有意春搜顾视万公万公曰动何如静帝改容而止辅政八年其所荐引多廉让之士大夫元年配享章宗庙庭

△程辉

程辉字日新蔚州灵仙人皇统二年擢进士第由尚书省令史升左司都事久之为南京路转运使以宫殿火降授磁州刺史有吴僧者杀州人张善友而取其妻辉督捕之命张母以长锥刺僧与其妇无完肤以死改陕西东路转运使再迁户部尚书大定二十三年拜参知政事辉年虽老遇事敢言略无隐默世宗嘉之旧庙祭用牛世宗晚年欲易以他牲辉奏曰凡祭用牛者以牲之最重故号太牢古礼不可废也二十四年世宗幸上京尚书省奏来岁正旦外国朝贺事帝以地远天寒悯使人劳苦欲即南京受宋书辉奏外国使来必面见天子今半途受书异时宋人托事效之何以为辞力言不可于是议权免一年会有司市面不时酬直世宗怒监察不举劾杖责之辉曰监察君之耳目所犯罪轻不赎而杖亦一时之怒也其敢言类如此二十六年以老致仕次年复起知河南府事辉辞以衰老而河防责重忧不胜任于是特诏不预河事章宗立时辉年七十六复乞致仕许之乃给参政半俸承安元年卒谥忠简

△刘玮

刘玮字德玉咸平人唐卢龙节度使仁敬之裔祖弘辽季镇懿州国初兵至弘以州降太祖俾知咸州后以同平章政事致仕父君诏同知宣徽院事玮幼警悟业进士举熙宗录其旧特赐及第调安次丞累转尚书省都事大定初迁户部员外郎时将东巡命玮同工部郎中宋中往营行宫就升郎中改同知宣徽院事为使宋国信副使玮父兄皆以是官使江左当时荣之世宗将幸上京以行在所须皆隶太府欲玮领其事授户部侍郎明年擢户部尚书时河决于卫害被清沧诏玮兼工部尚书往塞之或以谓天灾流行非人力所能御惟当徙民以避其冲璋曰不然天生五材递相休王今河决者士不胜水也俟秋冬之交水势稍杀以渐兴筑庶几可塞明年春玮斋戒祷于河工役齐举河乃复故召还增

秩为宋吊祭副使世宗不豫拜参知政事仍领户部既而为山陵使寻上表请外出知济南府移镇河中明昌二年徙知大名府仍领河防事三年入拜尚书右丞帝尝问考课法今可行否玮曰考课之法本于综核名实今提刑司体察廉能赃滥以行赏罚亦其意也若别议设法恐涉太繁明年六月卒谥安敏玮有才干临事闲雅而用心不正故自世宗朝逮辅章宗于事知而不言朝论少之

△董师中

董师中字绍祖洺州人少敏赡好学强记擢皇统九年进士第调泽州军事判官改平遥丞捕杀剧贼王一一境遂安时大军后野多枯槁驿舍有旅衬悉为葬之迁绵上令补尚书省令史再考擢监察御史迁尚书省都事初师中为监察时漏察大名总管呼喇不公事及呼喇以罪诛师中坐削一阶降授沁南军节度副使累迁坊州刺史明昌元年选为陕西路提刑副使坐修公廨滥支官钱罪以赎论寻召为大理卿御史中丞吴鼎枢举以自代尚书省亦奏其才行遂擢中丞时西北路招讨使宗肃以平章瓜尔佳清臣荐知大兴府事师中上言宗肃近以赃罪鞫于有司狱未竟不宜改除帝纳其言命复送有司四年帝将幸景明宫师中及侍御史贾铉治书侍御史钮祜禄遵古谏言方今边鄙不驯反侧无定必里克巴噶贪暴强悍深为可虑况都内苑囿近畿山川足以优佚皇情阅习武事何必草居露宿逼介边陲远烦侦候以冒不测之悔哉帝不纳师中等又上疏曰近年水旱为沴明诏罪已罢不急之役省无名之费天下欣幸今方春东作而亟遣有司修建行宫揆之于事似为不急况西北二京临潢诸路比岁不登加以民有养马签军挑壕之役财力大困流移未复米价甚贵若扈从至彼又必增价臣恐饥饿之徒将有起而为乱者矣况南北两属部数十年捍边者今为必里克巴噶诱胁倾族随去边境荡摇如此可虞矧夫逸游古人所戒远自周秦近速隋唐与辽皆以是生衅可不慎哉左补阙许安仁右拾遗路铎亦皆上书论谏是日帝御后合召师中等赐对即从其奏寻为宋生日国信使还以所得金帛分遗亲旧五年帝复如景明宫师中及台谏官各上疏极谏皆不报擢吏部尚书初监察御史富拉塔等纠弹完颜守贞数事师中辨其诬而举守贞正人可用守贞由是复拜平章政事及守贞以罪斥师中左迁陕西西路转运使岁余征为御史大夫命与礼部尚书张暉看读陈言文字拜参知政事进尚书左丞他日奏事帝语辅臣曰御史姬端修 【按中州集载泰和初元妃李氏方宰幸兄喜儿有杨国忠之权德州教授田庭方上书言近臣怙宠道陵顾谓绍祖曰近臣怙宠者为谁时喜儿侍立殿上绍

祖倒笏指之曰莫非谓喜儿之属否颌之本传祇云姬端修所载互异谨识于此】言小人在侧果谁欤师中曰应谓李喜儿辈帝默然承安四年表乞致仕诏赐宅一区留居京师以寒食乞还家上冢许之泰和二年卒诏依见任宰执例葬祭仍贖赠之谥文定师中工文性通达疏财尚义平居乐易临事刚决不可夺弟师俭初业进士欲籍其资荫师中保任之密令人代给常帖使之肆业师俭感激力学后遂登第方在政府以子思荫与其侄帝义之以其侄为肇砚承奉【按中集载师中师王彦潜而与之同榜登科彦潜歿待其子思礼殷重不减骨肉正与荫侄事相类谨附识焉】与胥持国同辅政颇相亲附世以此少之

△王脩

王脩字脩然涿州人皇统二年进士累官刑部员外郎坐请囑故人奸罪杖四十降泰定军节度副使四迁大兴府治中【中州集作大兴府少尹】授户部侍郎世宗谓宰臣曰王脩前为外官闻有刚直名今闻专务出罪且非理从轻若果刚直则当忘身以为国履正以无偏何必卖法以徼福耶寻命賑济密云等三十六县明安人户冒请粟三万余石夺官一阶出为北京留守同知帝曰人多言王脩能官以朕观之直一老奸耳章宗即位迁礼部尚书兼大理卿会葬孝懿皇后父图克坦贞帝欲用前代故事班剑鼓吹宰臣以贞与弑熙宗诛死难之诏下礼官议脩直言其不可明昌二年改知大兴府事时僧徒多游贵戚门脩恶之严禁午后不得出寺有一僧犯禁皇姑大长公主为请脩杖杀之京师肃然后坐故出人罪削官特授定海军节度使乞致仕不许泰和七年卒

△马惠迪

马惠迪字吉甫灤阴人擢天德三年进士第再调昌邑令察廉第一补尚书省令史大定中出为西京留守判官以治最擢同知崇义军节度使事累迁左君郎中世宗爱其明敏而朴实超授御史中丞拜参知政事时乌达噶叛亡世宗已遣人讨之又欲益以甲士毁其船楫惠迪奏曰得其人不可用有其地不可居恐不足劳圣虑明昌元年为南京留守致仕卒

△马琪

马琪字德玉大兴宝坻人正隆五年擢进士第调清源主簿三迁永清令永清畿县号难治琪以治闻授同知定武军节度使事兴中府治中召为户部员外郎改侍御史主奏高德温狱于富户寄钱事皆略不奏世宗以为宽纵语宰臣曰称职之才何其难也寻转左司员外郎扈从东巡迁右司郎中移左司特遣使宋国还授吏部侍郎改户部章宗即位除中都路转运

使帝命宰臣选可任户部者或举琪帝然之曰琪不肯欺官亦不肯害民是可用也遂擢为户部尚书久之削官一阶初琪病告近侍传旨不具服曳履而出有司议当徒二年减外犹追官解任大理少卿阎公贞以为琪本遑遽失措与非病告有违不同宜减徒二年三等论之帝从公贞议任职如故明昌四年拜参知政事五年 【河渠志作二月八月】 河决阳武灌封邱而东琪行尚书省事往治之讫役而还迁中大夫承安元年北边用兵连岁旱暵表乞致仕不许明年出镇武安军致仕卒子师周合门祗候琪性明敏习吏事其治钱谷尤长然性吝好利颇为帝所少云

△尼玛哈鉴

尼玛哈鉴本名威喇隆州人识女真小字及汉字登大定十三年进士第调隆安教授改即墨主簿召授国子助教擢近侍局直长世宗器其材改太子侍丞踰年迁应奉翰林文字兼右三部司正世宗谓宰臣曰鉴尝近侍朕知其正直干治及为东宫侍丞保护太孙礼节言动犹有国裕纯厚旧风朕甚嘉之章宗立累迁户部侍郎兼翰林直学士俄转同知大兴府用大臣荐改知大兴府事明昌五年拜参知政事卒谥文肃

△黄久约

黄久约字弥大东平须城人曾祖孝绰有隐德号潜山先生父胜通判济州母刘氏尚书右丞长言之妹 【按中州集长言宋相莘老之孙父迹终仪真令工诗能文有南荣集行世】 岁子梦鼠衔明珠寤而久约生擢进士第调郓城主簿三迁曹州军事判官有盗窃民财诉者以为强郡守欲傅以重辟久约阅实囚得免死累擢翰林修撰升待制授磁州刺史磁素多盗既获而款伏者审录官或不时至系者多以杖杀或死狱中久约惻然曰民虽为盗而不死于法可乎乃尽谏之而后行久之入为翰林直学士寻授左谏议大夫兼礼部侍郎为贺宋生日副使道经宿泗见贡新枇杷子者州县调民夫递进还奏罢之时以贫富不均或欲令富民分贷贫者下有司议久约曰贫富不均亦理之常若强富民分贷适足以敛怨非损有余补不足之道章宗时领右丞相颺其议寻迁太常卿仍兼谏职时郡县多阙官久约言世岂乏材阙于资格故也明诏每责大臣守格法而滞人材乞断自宸衷而力行之世宗从之即日授刺史者数中久约又言宜令亲王以下职官递相堆举世宗曰方今县令最阙宜令刺史以上举可为县令者朕将察其实能而用之又谓久约曰近日察举好官皆是诸科监临全无进士何也岂荐举之法已有奸弊不可久行乎久约曰诸科中岂无廉能人但不因察举有终身不至县令者此法未可

废也故事宰相奏争则近臣退避久约尝侍朝欲趋出
世宗止之自是谏臣不避以为常章宗即位久约以国富民贫本轻末重任人太杂吏权
太重官盐价高妨商害民与夫选左右择守令八事为
献皆嘉纳之再乞致仕不许授横海军节度使以优佚之明昌二年致仕卒久约隽明敢
言性友弟为文典贍有外祖之遗风云

△李晏

李晏字致美泽州高平人【中州集云唐顺宗第十六子福王绾之苗裔】性警
敏倜傥尚气皇统六年登经义进士第调岳阳丞【
中州集作临汾丞】历中牟令海陵营汴京运木于河晏领之晏以经三门之险前后失
败者众乃驰白行台以其木散投之水使工取于下流
人皆便之召补尚书省令史辞去为卫州防御判官世宗素识其才名召为应奉翰林文
字时方议郊礼命摄太常博士俄而真授为高丽读册
官累迁礼部郎中除西京副留守世宗谓侍臣曰翰林旧入少新进士类不学至诏赦册
命之文鲜有能者可选外任有文章士为之左右举晏
于是召为翰林直学士兼太常少卿以母老乞归养授郑州防御使未赴母卒起复为翰
林直学士世宗尝问晏县令阙员取之何道晏对曰国
朝设科取士始分南北两选北选百人南选百五十人合词赋经义入仕之人既多所以
县令未尝阙员甚后南北通选止设词赋一科每举限
取六七十人入仕之人既少县令阙员盖由此也帝以为然诏后取人毋限以数寻擢吏
部侍郎兼前职俄为中都路推排使迁翰林侍讲学士
兼御史中丞初锦州龙宫寺辽主拨赐户民俾输税于寺岁久皆以为奴有欲诉者害之
岛中晏乃具奏乞尽释为良世宗纳其言于是获免者
六百余人故同判大睦亲府事默音家有民质券积息不能偿因没为奴投匭自言事下
御史台晏得其情奏免之寻为贺宋正旦国信副使及
世宗不豫命宿禁中一时诏册皆晏为之章宗立宴画十事以上一曰风俗奢僭宜定制
度二曰禁游手三曰宜停铸钱四曰免上户管库五曰
太平直兴礼乐六曰量轻租税七曰减盐价八曰免监官赔纳亏欠九曰有司尚苟且乞
申明经久远图十曰禁网差密宜尚宽大又奏乞委待
制党怀英修撰张行简更直进读陈言文字以广视听皆采纳之改礼部尚书兼翰林学
士承旨越二年授沁南军节度使久之致仕帝念其先
朝旧人复起为昭义军节度使【据中州集改时泽潞旱甚晏擅发仓粟二万石救饿者
因上章请罪章宗义而释之史赞所谓君明臣良者
此类是也谨附识于此】明昌九年归老得疾承安二年卒谥曰文简子仲略

李仲略

李仲略

仲略字简之聪明力学登大定十九年【中州集作二十二年】词赋进士第调代州五台主簿以母忧去服阙转韩州军事判官累迁太常博士改授左司都事为立夏国王读册官还权领左司未几转员外郎以亲病求侍特授泽州刺史以便禄养以父丧免起为户部郎中时帝命六品以上官十日以次转对乃进言曰凡救其末不若正其本所谓本者厚风俗去冗食养财用而已厚风俗在乎立制度禁奢僭去冗食在乎宠力农抑游惰养财用在乎广储蓄时敛散又条陈制度之宜帝嘉纳之俄授翰林宜学士充经义读卷官帝问有司言经义不若词赋罢之何如仲略奏曰明经所以适用非词赋比乞自今以经义进士为考试官庶得硕学之士帝可其奏改吏部郎中迁侍郎兼翼王傅俄兼宛王傅时知大兴府事赫舍哩执中坐赃帝命仲畧鞫之罪当削解权要竟言太重仲略奏曰教化之行自近者始京师四方之则也此而不惩何以励后况执中凶残很愎岂可宥之帝曰卿言是也未几授山东东西路按察使泰和五年卒赠朝列大夫谥襄献仲略性豪迈有父风刚介特立不阿权贵临事明敏无留滞故所任以干济称

△李愈

李愈字景韩絳之正平人正隆五年中词赋进士第调河南澠池主簿察廉优等为平阳酒副使累迁解州刺史章宗即位召授同知中都路都转运使事改同知济南府明昌二年授曹王傅兼同知定武军节度使事王奉命宴赐北部愈从行还过京师表言诸部所贡之马止可委招讨使受于界上量给回赐务省费以广边储拟自临潢至西夏沿边创设重镇十数仍选明安穆昆勋臣子孙有材力者使居其职田给予军者许募汉人佃种不必远挽牛头粟而兵自富强矣下尚书省议会愈迁同知西京留守过关复上言前表可采乞断自宸衷帝纳用焉自是命五年一宴赐人以为便改棣州防御使未几授大兴府治中北京提刑副使范楫知归德府事邓俨各举愈以自代由是擢河南路提刑使上言随路提刑司乞留官一员余分部巡按又言本司见置许州乞移治南京为便并从之宪台廉察九路提刑司以愈为最五年入见论河决事谓宜遣大臣视护以慰人心帝是其言明年改河平军节度使承安二年徙顺义军奏陈屯田利害帝遣使宣谕仍降金牌俾领其事四年召为刑部尚书旧制陈言者漏所言事于人并行科罪仍给告人赏愈言比年以来诏求直言及命朝廷转对又许外路官言事此皆乐闻忠谏之意请除去旧条以广言路帝嘉纳焉寻为贺宋正旦副使泰和二年春帝将幸长乐川愈切谏

曰方今戍卒贫弱三又尤近北陲恒防外患兼闻泰和宫在两山间地形狭隘固不若北宫池台之胜帝不从夏四月愈复谏曰北部侵我旧疆不谋雪耻复欲北幸一旦不警臣恐丞相襄枢密副使栋摩等不足恃也况皇嗣未立羣心未定岂可远事逸游哉帝异其言未几授河平军节度使改知河中府事致仕六年卒谥清献

△王贲

王贲字文孺其先自临潢移宛平曾祖士方正直敢言辽道宗信枢密使耶律伊苏之讒杀其太子士方击义锤以诉辽主感悟诛伊苏厚赏士方授承奉官父中安擢进士第坐田■〈穀，去一〉党事废世宗即位党禁解终沂州防御使贲登进士累擢右三部检法司正侍卿史贾铉举贲安静有守不尚奔竞政府亦言其廉擢河北东西大名府路提刑判官选授尚书省都事以丧去用荐起复刑部员外郎累迁南京路按察使卒贲勤敏好学性孝友敦厚尚义不营产业比歿家甚窶帝闻悯惜之赠朝列大夫仍厚恤其家弟质字敬叔登大定二十五年进士第以才干举仕至礼部尚书

△许安仁

许安仁字子静献州交河人幼孤能自刻苦读书善属文登大定七年进士第调河间县主簿累迁太常博士兼国史院编修官章宗为皇太孙安仁以讲学被选东宫转左补阙应奉翰林文字帝即位改国子监丞徙翰林修撰同知制诰兼职如故贾铉路伯达交章称其立已纯正超授礼部郎中仍兼左补阙朝议以流人实边安仁言昔汉有募民实边之议盖度地营邑制为田宅故民轻去故乡而易于迁徙如使被刑之徒寒饿困苦靡所顾藉非所宜行帝然之明昌四年春帝将幸景明宫安仁与同列谏曰金莲千里之外邻沙漠隔关岭万一有警何以应变疏奏遂罢幸出为泽州刺史作无隐论上之凡十篇曰本朝曰情欲曰养心曰田猎曰公道曰养源曰冗官曰育材曰限田曰理财在郡二年徙同知河南府事升汾阳军节度使致仕泰和五年卒谥文简安仁质实无华澹然有古君子风故为时人所称云

△温特赫提克德

温特赫提克德该习经史以女真字出身累官国史院编修官大定十五年迁著作佐郎译解经书十九年改左赞善以母老求养帝谓其有伦之才特留之转翰林待制卒明昌五年赠翰林学士承旨谥文成子二十累官左谏议贞佑四年上疏乞缓征科务从简易及采访忠孝节义湮没无闻者

钦定续通志卷四百三十四

●钦定续通志卷四百三十五 列传二百三十五

列传

金 【十三】

○金十三

梁襄 路伯达 费摩亨 沃呼忠 张大节 张亨
巨构 贺扬庭 焦旭 刘仲
洙 李完 马百禄 刘玗【琬】 康元弼 伊喇益

卢庸

梁襄

路伯达

费摩亨

沃呼忠

张大节

张亨

巨构

贺扬庭

焦旭

刘仲洙

李完

马百禄

刘玗 【刘琬】

康元弼

伊喇益

卢庸

△梁襄

梁襄字公赞绛州人少孤养于叔父宁性颖悟日记千余言登太定三年进士第调耀州同官主簿三迁邠州淳化令有善政察廉升庆阳府推官召为薛王府掾世宗将幸金莲川襄上疏极谏曰金莲川在重山之北自古极边之壤也气候殊异中夏降霜非圣躬将摄之所凡奉养之具远劳飞挽其费数倍至于顿舍之处军骑关塞主客不分夺攘蹂躪未易禁止百官卫士穴居露处輿台皂隶不免困踣此犹细故耳便有大于此者行宫之所非有殿宇城池之固挂申常坐之马日暴雨蚀必羸瘠矣御侮待用之军令啖寒眠必疲瘵矣卫宫周庐才容数人一旦霖

潦积旬衣甲弓刀沾湿柔脆岂堪为用犹且远幸松林以从畋猎往来动踰旬月转输移徙更倍于前设于行猎之际烈风暴至宿雾涨天以致翠华有崑陵之避襄城之迷百官狼狈于道途卫士参错于队伍当此宸衷宁无戒悔况所次之宫草略尤甚殿宇周垣唯用毡布押宿之官驱驰饥渴已不胜倦更使彻曙巡警露坐不眠精神有限何以克堪燕都地处雄要北倚山峻南压区夏本地所生人马勇劲又有宫阙井邑之繁丽仓府武库之充实非同曩日之陪京也居庸古北松亭榆林等关东西千里山峻相连近在都畿易于据守皇天本以限中外开大金万世之基奈何越居草莱轻不费之圣躬爱沙磧之微凉忽祖宗之大业臣窃惜之臣闻汉唐离宫去长安纔百许里然武帝幸甘泉遂中江充之奸太宗居九成几致结社之变皆可为殷鉴也今者累岁北幸狃于无虞往而不止臣甚惧焉议者谓辽国之君春水秋山冬夏巴纳真得快乐之趣故陛下效之臣愚以谓三代之政今有不可行者况辽之过举哉且辽基业在山北之临潢臣知其所游不过临潢之旁无重山之隔而契丹之人以逐水草牧畜为业穹庐为居又壤地褊小仪物殊简辎重不多然犹隔三五岁方能一行我朝皇业根本在山南之燕岂可舍燕而之山北乎况辎重浩穰随驾殆逾百万以一身之乐岁使百万之人困于役伤于财不得其所陛下其忍之欤议者又谓陛下远监前世守文之主生长深宫志气销懦筋力拘柔临难战惧束手就亡故不惮远幸金莲至于松漠名为坐夏打围实欲服劳讲武臣愚以为事贵适中不可过当况欲习武不必度关涿易雄保顺苏之境地广又平猎田以时谁曰不可伏乞陛下回北轅之车塞鸡鸣之路安处中都不复北幸则宗社无疆之休也世宗纳之为罢行襄由是以直声闻 【按中州集载襄有贺章宗即位表与自河南府倅移华州防御使谢表并称于世本传佚其文并佚其事附识之】 擢礼部事累迁通远军节度使以丧去服阕授安国军节度副使累迁保大军节度使卒襄长于春秋左氏传至于地理氏族无不该贯自蚤达至晚贵膳服常淡薄云

△路伯达

路伯达字仲显 【中州集作名仲显字伯达】 冀人沈厚有识博学能诗登正隆五年进士第调诸城主簿累除兴平军节度副使入为大理司直大定二十四年世宗将幸上京伯达上书谏曰人君以四海为家岂独旧邦是思空京师而事远巡非重慎之道书奏不报阅岁改秘书郎兼太子司经时章宗初向学伯达以文行知名选为侍读以忧去会安军节度使王克温举伯达行义起为西京路转运同知召为礼部员

外郎兼翰林修撰敕与张行简进读陈言文字升刑部郎中帝问羣臣曰方今何道使民
务本业广储蓄伯达对曰布德流化必自近始请罢畿
内采猎之禁广农田以示敦本轻币重谷去奢长俭遵月令开籍田以先天下如是而农
不劝粟不广者未之有也是时采捕禁严自京畿至真
定沧冀北及飞狐数百里内皆为禁地民有盗杀狐兔者有罪故伯达及之累迁刑部郎
太常卿拜安国军节度使未几改镇安武尝使宋回献
所得金二百五十两银一千两以助边未及上而卒甚妻傅氏言之帝嘉其诚赠大中大
夫仍以金银还之傅以伯达尝修冀州学乃市信都枣
强田以贍学有司其以闻帝贤之赐号成德夫人子铎钧钧字叔和登大定二十五年进
士第终莱州观察判官铎最知名别有传

△费摩亨

费摩亨字仲通本名哈希其先世居辽海祖华善天辅闲移屯东受降城以御夏人
后徙居临潢亨性敦敏习儒大定闲收充奉职二十八
年擢第升为奉御问以上古为治之道亨奏陛下欲兴唐虞之治要在进贤退不尚信赏
罚薄微敛而已章宗即位擢监察御史内侍梁道儿恃
恩骄横朝士侧目亨劾奏其奸迁镐王府尉出为定国军节度副使三迁同知大名府事
先是豪猾从卫亨下车宣明约束圉境帖然承安四年
改河南路按察副使就迁本路副统军中都西京等路按察使时世袭家豪夺民田亨检
其实悉还之泰和五年改安武军节度使岁大雪民多
冻殍亨输已俸调贍及勒率僚属大姓同出物以济转河东南北路按察使卒于官赠嘉
护大夫亨性谨密出入宫禁数年谏议忠言多所裨益
谏藁悉焚之虽家人辈莫知也所历州郡皆有政绩可纪云

△沃呼忠

沃呼忠本名苏布盖州人习女直契丹字历兵部枢密院尚书省令史累迁右三部
司正练达边事尝奉命使北致马四千余匹诏褒谕之
大定二十六年为监察御史转尚书省都事章宗立迁兵部员外郎出为沧州刺史 【按
金地理志沧州贞元二年来属置横海军节度使是
沧州乃节镇非刺史州也本传云刺史与志异】 河东路提刑副使图克坦伊勒呼举以
自代改滕州刺史尝调发黄河船数以稽期听赎授北
京副留守入为同签枢密院事兼沂王傅承安二年拜武宁军节度使致仕太和三年卒
忠性敦悫通法律以直自守不交权贵时誉归之

△张大节

张大节字信之代州五台人擢天德三年进士第调崞县丞改东京市令世宗判留
务甚重爱之海陵修汴京以大节领其役世宗即位辽

东或劝赴之大节曰富贵自有定分何遽尔随例补尚书省令史累擢左警巡使以杖杀豪民为有司所劾削一阶解职未几授洺州防御使同知入为太府丞工部员外郎卢沟水囓安次承诏护视堤成擢修内司使推排东京路户籍人服其平进工部郎中时阜通监铸钱法弊与吏部员外郎麻哇莅其事积铜皆窳恶或欲征民先所给直大节此有司受纳之过民何与焉以其事闻卒得免征就改户部郎中定襄退吏诬县民匿铜者十八村大节廉得其实抵吏罪民斲石颂之召授工部侍郎改户部世宗东巡徙太府监寻为宋生日使还授横海军节度使郡境有巨盗久不获大节以方略擒之后河决于卫横流而东沧境有九河故道大节即相宜缮堤水不为害章宗即位擢中都路转运使因言河东赋重以他路田赋质之遂命减焉乞致仕不许徙知太原府近郭有男子被杀者闻其妻哭声不哀召而审之果为奸夫所杀人以为神西山有晋叔虞祠旧以施钱输公仗库大节还其庙以给营缮徙知大兴府治有能名授震武军节度使部有银冶有司以为争盗由此生议以官权为便大节曰山泽之利当与民其且贫而无业者虽严刑能禁其窃取乎宜明谕民授地输课则游手者有所资于官亦便帝从其议复乞致仕许之仍擢其子刑部员外郎岩叟为忻州刺史以便禄养承安五年卒大节素廉勤好学能励勉后进 【接中州集载大节好奖进士类沧州徐黈太原王泽大兴吕造经其指授卒成名士与本传相符附识于此】 自以得学于任侗待侗子加厚又善奕碁时推第一世宗尝谓宗臣曰张大节赋性刚直果于从政惜乎用之太晚其见知如此子岩叟字孟弼大定十九年进士官至沁南军 【中州集作集庆军】 节度使大安三年朝廷议塞诸城门以备元兵岩叟曰是任城而不任人也不若选兵择将背城疾战时议多之

△张亨

张亨字彦通大兴溹阴人登皇统六年进士第调樊山丞以廉干闻授弘州军事判官历巨鹿宜川令大定二年补尚书省令史除大理司直累迁尚书左司郎中授户部侍郎移吏部擢中都路都转运仗坐失劾草场使邓汝霖盗草事解职起授户部尚书时车驾东巡费用百出自辽以东泉货甚少计司患其不给欲辇运以支调度亨谓上京距都四千里若挽钱而行是率三而致一也不若行会便法使行旅便于囊橐国家无转输之劳而用自足矣俄出为绛阳军节度使章宗即位以亨为河东南北路提刑使兼劝农采访事访其利病条为十三事以闻帝嘉纳之亨明达吏事在职每存大体略苛细御史以宽缓不事事劾之降授蔡州防御使明年

迁南京路转运使转知归德府事致仕泰和二年卒

△巨构

巨构字子成蓟州平谷人幼笃学年二十登进士第由信都丞察廉为石城令补尚书省令史授震武军节度副使改同提举解盐司事以课增入为少府监丞再迁知登闻检院兼都水少监大定二十五年除南京副留守帝谓宰臣曰巨构外淳质而内明悟第乏刚鲠耳若任以长官必有可称章宗即位擢横海军节度使承安五年致仕卒构性宽厚寡言所治以镇静称性尤恬退故人既贵不复往来先遗以书则裁答寒温而已大定中诏兴近臣同经营香山行宫近臣私谓构曰我欲举奏公行将大任构辞之以廉慎守法在考功籍始终无过云

△贺扬庭

贺扬庭字公叟曹州济阴人登天德三年经义进士第调范县主簿兼尉有治声大定十三年由安肃令补尚书省令史授沁南军节度副使入为监察御史历侍御史右司员外郎扬庭性疾恶纤介不少容世宗喜其刚果俄以廉能迁户部郎中进官二阶顷之授左司郎中改刑部侍郎山东东路转运使章宗即位授山东东西路提刑使明昌二年除洺州防御使时岁歉民饥扬庭论蓄积之家令出所余以赈之饥者获济洺人为之立石颂德改陕西西路转运使致仕卒

△焦旭

焦旭字明锐沃州柏乡人第进士调安喜主簿再转大兴令摄左警巡事以杖亲军百人长有司议其罪当杖决世宗曰旭亲民吏也若因杖有官人复行杖之何以行事其令收赎改良乡令平章政事石琚荐旭干能可甄用帝然之召为右警巡使初旭部民有请出贱为良者旭以无文据付本主道逢监察御史诉其事即收付旭旭释之不问为御史所劾削官两阶出为大名府推官寻受右三部检法司正以中丞李晏荐代韩天和为监察御史而改天和获鹿令章宗初即位太傅克宁右丞相襄请帝出猎旭劾奏其非帝慰谕之为罢猎明昌元年登闻鼓院初设官宰执复奏司谏郭安民补阙许安仁及旭皆堪擢用改侍御史四迁都水监以治河防劳进官一阶授西京路转运使卒旭性警敏练达时政与王儵刘仲洙辈并称能吏

△刘仲洙

刘仲洙字师鲁宛平人大定三年登进士第历龙门主簿再调深泽令县近滹沱河时秋成水忽暴溢仲洙极力护塞竟无害有盗夜发居民震惊仲洙率县卒生执其一余众遂溃旦日掩捕皆获寻以廉能进官一阶升河北西

路转运司度支判官入为刑部主事六迁右司员外郎
俄转吏部二十九年出为祁州刺史以六善为教民化之章宗即位除中都西京等路提
刑副使先是田穀等以党罪废锢者三十余家仲洙知
其冤上书力辩帝从之复穀官爵党禁遂解明昌二年授并王傅兼同知大同府事寻改
平阳移德州防御使转运郭邦杰节度李晏皆举仲洙
以自代升为定海军节度使岁饥仲洙表请开仓未报先为赈贷有司劾之罪以赎论时
仲洙兄仲渊以罪责石州仲洙上书请以莱易石朝廷
义而不许久之以年老乞致仕累表方听泰和八年卒年七十五仲洙性刚直口语甚讷
而长于治民所在皆有功迹以才行见称

△李完

李完字全道朔州马邑人经童出身复登词赋进士第调澄城主簿有遗爱民为立
祠用廉迁定襄令召补尚书省令史世宗选能吏八人
按行天下廉问县令完其一也明昌初为监察御史言尚书省令史正隆闲用杂流大定
初以太师张浩奏请始纯取进士天下以为当今乞以
三品官子孙及终场举人委台官辟用帝纳其言 【按选举志明昌三年用三品职事官
子弟及终场举人充省通事而罢见役吏人省令史
则仍依旧制盖纳完之言而酌行其意欤】 擢尚书省都事出为同知横海军节度使事
河闲府治中提刑司言完习法律有治剧材升沁州刺
史迁同知广宁府初辽滨民崔元入城饮不归求得尸于水中有司执同饮者讯之皆诬
服提刑司疑其冤以狱畀完完廉得其贼乃舟师也遂
免同饮人改北京临潢路提刑副使承安二年迁陕西西路转运使寻授南京路按察使
卒完长于吏治所至奸恶屏迹民皆便之

△马百禄

马百禄字天锡通州三河人父柔德天会初第进士累迁翰林修撰坐田穀党免官
迨世宗朝解党禁复召用焉百禄幼志学事继母以孝
闻登大定三年词赋进士第调武清主簿历龙山令改榷货副使平阳府判官入为国子
博士朝廷以宰县日清白有治迹特迁官一阶升同知
北京路转运使委录南北路刑狱所至无冤召为户部员外郎为中都等路推排使明昌
初迁耀州刺史吏民畏爱提刑司以状闻授韩王傅同
知安武军节度事改同知兴平军复以提刑司举廉升孟州防御使再迁南京路提刑使
御史台以刚直能干闻转知河中府承安四年致仕卒
谥贞忠

△刘玘 【刘琬】

刘玘字仲璋益都人登天德三年进士第大定初为太常博士改左拾遗兼许王府

文学累除同知漕运司事尝奏言漕户雇直太高虚费
官物宜约量裁损若减三之一岁可省官钱一十五万余贯帝是其言授户部员外郎条
上便宜数事世宗谓宰臣曰玠言河堤种柳可省每岁
堤防之费及言官钱利害甚可取卿等议其可者行之玠向言漕运省费事尽心公家不
厚赏无以劝来者乃赐钱三千贯擢潍州刺史徙知济
州未几迁同知北京留守事坐曲法放免奴婢诉良者左降管州刺史明昌二年入为国
子司业转祭酒寻擢太常卿以昏耄不任职为御史台
所纠罢承安二年卒兄琉字伯玉幼名太平以功臣子补合门祗候遭父丧求终制会海
陵篡立不许改充护卫海陵忌宗室琉坐与往来斥居
乡里世宗即位琉昼夜兼驰上谒世宗大悦以为护卫十人长往招宗叙白彦敬赫舍哩
志宁皆相继来附还报帝喜其有功改御院通进与乌
居仁等往南京发遣六宫百司琉建议留尚书右丞赫舍哩良弼经略淮右余皆北来迺
从之丁母忧起复三迁武库署令车驾辛酉京留琉为
中都总管判官累迁太子少詹事兼引进使寻为陕西统军都监召为同知宣徽院事迁
右宣徽使与张谨言典领昭德皇后园陵襄事转左宣
徽使以疾求补外除定海军节度使以其弟太府监玮为同知宣徽院事琉朝辞帝曰朕
用卿弟在近密如见卿也赐赆甚厚卒于官

△康元弼

康元弼字辅之大同云中人幼敏学善属文登正隆二年进士第调汝阳簿累迁同
知河北西路转运使事召为大理丞大定二十七年河
决曹濮闲民苦垫溺朝廷遣元弼往视相其地如盎而城在盎中水易为害请于朝徙筑
于北原曹人赖焉出为弘州刺史阅岁授大理少卿先
是卫城为河所坏增筑苏门以寓州治水既退民不乐迁欲复归卫于是遣元弼按视还
言治故城便遂复其旧转秘书少监兼著作郎改通州
刺史兼领漕事章宗立诏充副卫尉再转大理卿以丧去起复为刑部侍郎兼郅王傅迁
南京路转运使承安三年致仕卒

△伊喇益

伊喇益字子迁本名托摩布中都路呼喇图明安人以荫补国史院书写积劳调除
州录事召为枢密院知法三迁翰林修撰时北边有警
诏百官集议尚书省太尉克宁锐意用兵益言天时未利宜俟后图御史台举益刚正可
任遂兼监察御史未几改户部员外郎明昌三年畿内
饥擢授霸州刺史同授刺史者十一人皆以材选诏谕之曰亲民之职惟在守令比岁民
饥卿等往抚育之益至首出俸粟以食饥者于是倅以
下及郡人递出粟以佐之且命属县视以为法多所全活郡东南有堤久颓圯水屡为害

益增修之民以为便为益立祠升辽东路提刑副使五年宋主新立诏以泗州当使客所经守臣宜择人宰臣进拟数人皆不合帝意帝曰托摩布安在此人可也即授防御使召为户部侍郎寻转兵部属羣牧人叛益同殿前都点检袞往招降之承安二年边鄙佛宁召朝官四品以上入议便殿益谓守为便若王师轻出少有不便利非惟损大国之威恐启敌人侵玩之心出为山东西路转运使有敕使按鹰于山东益奏乞止令调于近甸何必惊远方耳目书闻帝命有司治使者罪迁河东南北路按察使旧制在位官有不任职委所属上司体访州府长贰幕职许互相举申益上言以为伤礼让之风亦恐同官因之不睦别生奸弊乞止令按察司纠劾似为得体又言随路点军官与富人饮会公通献遣宜依准监临官于所部内犯罪究治帝皆纳焉泰和二年卒于官

△卢庸

卢庸字子宪苏州丰润人大定二十八年进士调唐州军事判官再调定平县令治旧堰引泾水溉田民赖其利累改中都户籍判官察廉迁礼部主事历凤翔治中大安三年改干州刺史入为吏部郎中至宁元年改陕西按察副使夏人犯边庸缮治平凉城池积刍粟团结士兵为备十一月夏人掠镇戎陷泾邠遂围平凉庸出府库赏有功者人乐为死城赖以完贞佑二年诏赏平凉功庸进官四阶迁按察转运使三年诏诸道按察司讲究防秋庸陈便宜曰自鄜延至积石虽多沟坂无长河大山为之屏蔽恃弓箭手以御侮其人皆刚猛善鬪熟于地利夏人畏之向者徙屯他所夏人实时犯边此近年深患也人情乐土且耕且战缓急将自奋又曰防秋之际宜先清野又曰掌军之官不宜临时易代无何有言庸老不胜任者即罢之寻改定海军节度使山东乱不能赴被劾当夺两官审理官直之以病致仕兴定三年卒

钦定续通志卷四百三十五

●钦定续通志卷四百三十六 列传二百三十六

列传

金 【十四】

○金十四

完颜匡

完颜纲

图克坦谟

通吉思忠

穆延萨克达

完颜匡

完颜纲

图克坦谟

通吉思忠

穆延萨克达

△完颜匡

完颜匡本名苏色始祖九世孙事幽王永成为其府教读大定十九年显宗命詹事乌凌阿愿择德行淳谨才学该通者使教章宗兄弟愿举匡及徐王府教读布萨额尔克显宗召见于承华西便殿问其年对曰二十八岁显宗曰詹事乃云三十岁何也匡曰詹事谓臣出入宫禁故增言之耳显宗顾谓近臣曰笃实人也命择日使皇孙行师弟子礼七月丁亥宣宗章宗皆就学显宗曰每日先教汉字至申时汉字课毕教女直小字习国朝语顷之世宗诏匡额尔克俱充太子侍读寝殿实达尔图们玖珠问匡曰伯夷叔齐何如人匡曰孔子称夷齐求仁得仁玖珠曰夷齐轻去其亲不仓周粟饿死首阳山仁者固如是乎匡曰夷齐全父子兄弟之恩正君臣之分为天下后世虑至远也非仁人能若是乎是时世宗如春水显宗从二人者马上相语遂后显宗问故玖珠以对显宗称善者良久显宗命匡作睿宗功德歌教章宗歌之其词曰我祖睿宗厚有阴德祚有传储嗣当立满朝疑惧独先启策徂征三秦震惊来附富平百万望风奔仆灵恩光被时雨春暘神化周浹春生冬藏盖取宗翰与睿宗定策立熙宗及平陕西破张浚于富平也二十三年三月万春节显宗命章宗歌此词侑觞世宗大喜顾谓诸王侍臣曰朕念睿宗皇帝功德恐子孙无由知皇太子能追念作歌以教其子嘉哉盛事朕之乐岂有量哉卿等亦当诵习以不忘祖宗之功酒行极欢一夜乃罢二十五年匡中礼部策论进士是岁世宗在上京显宗监国三月甲辰【按选举志御试以三月二十日试策大定二十五年正月为乙酉朔则甲辰正三月二十日也原文作二月误今改正】御试匡下第布萨额尔克中四十五人后显宗谓匡曰但善教金源郡王无以额尔克登第快快也是岁显宗薨章宗立为皇太孙匡仍为太孙侍读二十八年匡试诗赋漏写诗题下注字不取特赐及第除中都路教授侍读如故章宗即位除近侍局直长迁翰林直学士使宋令权更名弼以避宋祖讳迁秘书监累迁签书枢密院事承安元年行院于抚州河北西路转运使【章宗纪作尚书户部侍郎】温昉行六部事主军中馈饷屈意事匡以马币为献及私以官钱佐匡宴会费监察御史姬端修劾之时方委匡以边事遂寝其奏寻入守尚书左丞【章宗纪作右丞】兼修国史进世宗实录章宗立提刑司专糾察黜陟当时号为外台匡与司空囊参政揆奏息民不如省官圣朝旧无提刑司皇统大定闲数岁一遣使廉察郡县称治自立此官冀达下情乃是非混淆徒烦圣听乞自今提刑司不使兼采

访廉能之任而岁遣监察体察仍不时选使廉访帝从其议于是监察体访之使出矣初匡行院于抚州章格将攻边境会西南路通事洪果安春使乌都温部知其谋奔告行院匡为之备迎击章格败之安春与八品职迁四官匡迁三官匡奏乞以所迁三官让其兄奉御赛音许之改枢密副使授世袭穆昆宋韩侂胄尝再为国使窥知朝廷虚实与苏师旦倡议复讎泰和五年使边将寇确山邓州境以尝试朝廷遂平县获宋人王俊唐州获宋谍者李件备言侂胄谓大国西北用兵连年公私困竭可以得志江州鄂岳屯兵期以五月大入河南统军司奏请益兵为备乃诏布萨揆宣抚河南遗书宋人宋人辞曰盗贼也边臣不谨今黜之矣朝论皆言江南败衄之余不敢渝盟匡曰彼置忠义保捷军取先世开宝天禧纪元岂忘中国者哉及河南统军使赫舍哩子仁使宋还奏宋主修敬有加无他志帝问匡匡徐对曰子仁守疆圉不妄生事职也书曰有备无患在陛下宸断耳于是罢河南宣抚司布萨揆还朝六年【按宋史是年四月陈孝庆复泗州五月复虹县原文俱系之二月今删正】宋人陷散关取泗州虹县灵壁四月复诏布萨揆行省事于汴制诸军顷之以匡为右副元帅匡奏布萨揆大军渡淮宋人聚兵襄沔以窥唐邓汴京留兵颇有掣肘之患请出唐邓从之遣前锋都统乌库哩庆寿以骑八千攻枣阳遣左翼提控完颜江山以骑五千取光化右翼都统乌克逊尼敦取神马坡皆克之匡军次白虎粒都统完颜谿达取随州乌库哩庆寿扼赤岸断襄汉路宋随州将雷太尉遁去遂克随州于是宋邓城樊城戍兵皆溃赐诏奖谕戒诸军毋虏掠焚坏城邑匡进兵围德安分遣诸将徇下安陆应城云梦汉川荆山宜城等县十二月败宋兵二万人于信州之东诏匡以右副元帅权尚书右丞行省事先取襄阳以屏蔽蜀汉布萨揆得疾还诏右丞相宗浩代之七年九月宗浩薨匡为平章政事兼左副元帅封定国公代宗浩总诸军行省于汴京初布萨揆至汴购得韩侂胄族人元靓使行闲于宋元靓渡淮宋督视江淮兵马事邱密奏之宋主时宋主见兵屡败以为忧得密奏命遣人护元靓北归因请议和密使其属刘佑送元靓申和议于揆揆曰称臣割地献首祸之臣然后可及宗浩代揆方信孺至宗浩以信孺轻佻当遣忠实人诣军前议于是左司郎中王柟至汴以宋主及侂胄情实为请依靖康二年正月请和故事世为伯侄国增岁币为三十万两匹犒军钱三百万贯苏师旦等俟和议定当函首以献以侂胄书上元帅府匡察其不妄乃具奏章宗诏匡移书宋人当函侂胄首赎淮南地改犒军钱为银三百万两时宋吏部侍郎史弥远用事定计杀侂胄和好自此成矣廷议诸军已取

关隘不可与王柟再以宋参政钱象祖书来请归川陕关隘所画银两悉力祇备韩侂胄首必当函送遵上国之命匡奏闻诏报曰侂胄渠魁既请函首宋之悔服可谓诚矣匡乃遣王柟还而复书许还陕西关隘王柟之归也匡要以先送叛亡驱掠然后割赐淮南川陕及彼誓书草木有犯庙讳字及文义有不如体制者谕令改之宋人以叛亡驱掠散在州县一旦拘刷未易聚集岁币犒军物多非旬月可办钱象祖复以书来匡即具奏诏报曰侂胄师旦首函及诸叛亡至濠州即听通谢人使入界军马即当撤还川陕关隘候岁币犒军银两至下蔡画日割赐匡得诏即谕宋人使如诏书从事八年四月乙未宋献韩侂胄苏师旦首函至元帅府匡遣平南抚军上将军赫舍哩贞露布以闻五月丁未御应天门受宋献之庙社以露布颁中外竿侂胄师旦首并二人画像于通衢百姓纵观然后漆其首藏之军器库丙辰匡朝京师进官两阶罢元帅府仍为枢密院十一月丙辰章宗崩匡与元妃李氏俱受遗诏立卫诏王匡欲专定策功遂构杀李氏大安元年四月拜尚书令封申王十二月薨匡自章宗幼年侍讲读最亲幸致位将相怙宠自用官以贿成承安中拨赐家口地土匡乃自占济南真定代州上腴田辄夺民业及限外自取尝受人玉吐鹞然后与官公论鄙之

△完颜纲

完颜纲字正甫明昌中为奉御累官左拾遗迁刑部员外郎纲言诸犯死罪除名移推官司相去二百里并犯徒罪连逮二十人以上者并令就问如上京路移推临潢路北京留守司移推西北路招讨司动经数月愈致积留乞依旧制令移推官司追取其人归问从之泰和元年为赐夏主生日使转工部郎中上言太府监官兼尚食局官乞于少府监注能干官一员兼仪鸾局仪鸾局官一员兼少府监相须检治从之四年诏纲与乔宇宋元吉编类陈言文字纲等奏凡关涉宫庭及大臣者摘进其余以省台六部各为一类凡二十卷迁同签宣徽院事六年与宋连兵陕西诸将颇相异同以纲为蜀汉路安抚使都大提举兵马事与元帅府参决西事调羌兵之未附者呼里族帅曰埒尔锦吐蕃之种也据古迭州有四十三族十四城三十余万户东邻宕昌北接临洮积石西行四十日至河外南行十日至笋竹大山盖蛮境也埒尔锦卒子额尔袞嗣宋不能制縻以官爵传六世至青伊克尤劲勇得众曹佛哩为洮州刺史有智略能结诸羌青伊克畏慕佛哩请举国内附朝廷以与宋盟不许明昌闲属羌伊伯杀郡佐反时纲为奉御奉诏与曹佛哩计事因召青伊克会兵击破伊伯佛哩迁同知临洮尹兼洮州刺史子普贤为洮州管

内巡检使纲屡以事至洮佛哩每言青伊克愿归朝出其至情纲辄奏之帝终不纳及纲部署陕西帝密敕经略西事时佛哩已死纲至洮驰召普贤传箭入羌中青伊克大喜率诸部长籍其境土人民诣纲请内属纲奏其事帝以青伊克为迭州副都总管加广威将军曹普贤真授同知洮州事纲迁拱卫直都指挥使进三阶宋程松袭据和尚原富察贞遣将击破之连败宋兵尽复故地十月纲与富察贞舒穆鲁仲温完颜璘分道出师宋将吴曦时为昭武军节度使成都潼川夔利等路宣抚副使遣兵出秦陇闲与纲等诸军相拒帝闻韩侂胄忌曦威名可以闲诱致之梁益居宋上游可得志于宋封曦蜀国王铸印赐诏诏纲经略之纲次临江进之水洛访得曦族人端署为水洛城巡检使遣持诏闲行谕曦曦得诏意动以程松尚在兴元未敢发及松兵败曦乃遣掌管机宜文字姚圆【宋史作姚淮源】与端奉表送款纲遣前京兆府录事张仔

【原文遣仔字】会吴曦于兴州之置口【原文作置口误】曦尽出告身付张仔以报仍献阶州【按续通鉴开禧二年四月吴曦遣

其客献阶成和凤四州于金求封蜀王十一月完颜纲以金主命遣人持诏书金印立曦为蜀王与宋纪所载相符是志乎叛者曦也本传序金人之绩故先言赐诏封曦而以曦之叛及献阶州事次于后云】寻遣使奉表献蜀地图志及吴氏谱牒七年正月召纲赴京师以为陕西宣抚

副使进三阶还军顷之宋安丙杀吴曦帝闻之遣使责纲诏以端之子为曦后宋人复陷阶州及西和州纲至凤翔诏撤五州之兵退保要害其愿徙内地者厚抚集之富察贞撤黄牛戍宋安丙乘之遂陷昔散关巩州钤辖完颜爱实死之纲夺官一阶降兵部侍郎权宣抚副使遣尼玛哈

怀忠按治纲以下将吏未至纲与贞遣兵潜自昆谷西山养马涧入四面攻之复取散关斩宋将张统领遣使奏捷诏书奖谕贞等释不问八年

宋献韩侂胄苏师旦而诏以陕西关隘还之首罢兵纲还京师卫绍王即位除陕西路按察使累官尚书左丞至宁元年纲行省事于缙山图克

坦镒使人谓纲曰高琪驻兵缙山甚得人心士皆思奋与其行省亲往不若益琪兵为便纲不听图克坦镒复使人止之曰高琪措画已定彼之

功即行省之功纲不从至缙山兵大败呼沙呼斩关入中都迁卫绍王于宁邸命纲子安和作家书使亲信人召纲纲至押至市口使张霖卿数

以失四川败缙山之事杀之贞佑四年安和权复州刺史上书讼父冤乃追复尚书左丞弟鼎努亦知名仕至参知政事

△图克坦镒

图克坦镒本名安春上京路苏苏保子明安人父乌尼音北京副留守镒颖颖悟绝

伦甫七岁习女直字大定六年选诸路学生三十余人
令编修官温特赫提克德教以古书习作诗策镒在选中遂通契丹大小字及汉字该习
经史九年八月诏策女直进士问以求贤为治之道镒
等二十七人及第镒授两宫余授一官上三人为中都路教授四名以下除各路教授十
五年镒自中都路教授选为国子助教左丞相赫舍哩
良弼尝到学中 与镒谈论深加礼敬寻除国史院编修官太尉完颜守道荐镒有材力可
任政事帝亦以镒容止温雅其心平易久之兼修起居
注累迁翰林待制兼右司员外郎章宗即位迁左谏议大夫兼吏部侍郎明昌元年为御
史中丞无何拜参知政事监修国史章宗锐意于治平
镒上书其略曰臣窃观唐虞之书臣之进言于君曰戒哉懋哉曰吁曰都既陈其戒复导
其美君之为治也必曰稽于众舍己从人既能听之又
能行之陛下诚宜稽古崇德留意于此又云唐陆贽尝陈隔塞之九弊上有其六下有其
三陛下能慎其六为臣子者慎其三则大纲举而羣目
张矣进尚书右丞修史如故三年罢为横海军节度使改定武军节度使知平阳府事历
西京上京留守承安五年拜平章政事封济国公淑妃
李氏擅宠兄弟恣横朝臣往往出入其门是时烈风昏暝连日诏问变异之由镒上疏略
曰今五常不立五德不兴缙绅学古之士弃礼义忘廉
耻细民违道畔义迷不知返非一朝一夕之故也今宜正风俗顺人心父子夫妇各得其
道然后和气普洽福祿荐臻矣因论为政之术一宜正
臣下之心二宜导学者之志其言皆切时弊帝纳其说而不能行一日帝问汉高帝光武
优劣镒曰光武再造汉业在位三十年无沈湎冒色之
事高祖惑戚姬卒至于乱由是言之光武优帝默然镒盖以元妃李氏隆宠过盛故微谏
云泰和四年罢知咸平府五年改南京留守六年徙知
河中府兼陕西安抚使布萨揆行省河南陕西元帅府虽受揆节制实颡方面帝思用谋
臣制之由是升宣抚使一品镒改知京兆府事充宣抚
使陕西元帅府并受节制镒言初置急递铺本为转送文牒今一切乘驿非便帝深然之
始置提控急递铺官邮达自此无滞七年吴曦死宋安
丙分兵出秦陇闲十月诏镒出兵金房以分掣宋人梁益汉沔兵势镒遣行军都统沃呼
雅尔副统巴噶罕完颜果啰以步骑五千出商州十一
月雅尔拔鹞岭关果啰别将攻破燕子关新道口巴噶罕取小湖阅敖仓至营口镇破宋
兵千余人追至上津县斩首八百余级遂取上津县雅
尔破宋兵二千于平溪将趋金州宋王柟以书乞和诏镒召雅尔军退守鹞岭关八年正
月宋安丙遣景统领由梅子溪新道口朱砂谷袭鹞岭
关巴噶罕果啰击走之斩景统领于阵是岁罢兵镒迁特进赐赉有差改知真定府事大

安初加仪同三司封濮国公改东京留守寻充辽东安抚副使三年改上京留守平章政事通吉思忠败绩于会河堡中都戒严镒曰事急矣乃选兵二万遣同知乌克逊鄂屯将之入卫中都朝廷嘉之拜尚书右丞相监修国史镒言自用兵以来彼聚而行我散而守以聚攻散其败必然不若入保大城并力备御昌桓抚三州素号殷富人皆勇健可以内徙益我兵势人畜货财不至亡失平章政事伊喇 【按本史国语解伊喇曰刘考卫绍王时亦无伊喇姓为平章政事者此处恐有脱误】 参知政事梁■〈王堂〉曰如此是自蹙境土也卫绍王以责镒镒复奏曰辽东国家根本距中都数千里万一受兵州府顾望必须报可误事多矣可遣大臣行省以镇之卫绍王不从其后失昌桓抚三州乃大悔顿之东京不守卫绍王自讼曰我见丞相耻哉顷之镒堕马伤足在告闻呼沙呼难作命驾将入省遇兵士索人于闾巷镒乃还第呼沙呼诣镒问疾镒从容谓之曰翼王章宗之兄显宗长子众望所属元帅决策立之万世之功也呼沙呼默然而去乃迎宣宗于彰德呼沙呼既杀图克坦南平欲执其弟知真定府事铭镒说之曰车驾道出真定镐王家在威州河北人心易摇图克坦铭有变朝廷危矣不如与之金牌奉迎车驾铭必感元帅之恩呼沙呼从之至宁贞佑之际转败为功惟镒是赖焉 【谨按通鉴辑览 御批云图克坦镒身为丞相遇国家大变既不能讨贼又不能尽节徒以定计策立委蛇自免岂得为忠臣哉史以转败为功与之谬矣】 宣宗即位进拜左丞相封广平郡王授中都路德勒图世袭明安富尔锦必喇穆昆明年镒建议和亲言事者请罢按察司镒曰今郡县多残毁正须按察司抚集不可罢遂止宣宗将幸南京镒曰銮辂一动北路皆不守矣今已讲和聚兵积粟固守京师策之上也南京四面受兵辽东根本之地依山负海其险足恃备御一面以为后图策之次也不从是岁薨诏赠从优镒博学明敏一时名士多出其门尝叹文士委顿当以仁义道德为本乃着学之急道之要二篇太学诸生刻之石有弘道集六卷

△通吉思忠

通吉思忠本名迁嘉努明昌六年为行省都事累迁同签枢密院事承安三年除兴平军节度使改西北路招讨使初大定闲修筑西北屯戍西自塔木色东至呼尔根几六百里工役促迫虽有墙隍无女墙副堤思忠增缮计工七十五万止用戍军役不及民帝嘉其劳优诏奖赐入为签枢密院事转吏部尚书拜参知政事泰和五年宋将渝盟左丞相崇浩 【按宗端修傅章宗因避睿宗讳凡太祖诸子皆加山为崇改宗

氏为姬氏考宗浩本传仍称原名此称崇浩从改名也】 曰宋久败之国必不敢动耳思忠曰未虽羈栖江表未尝一日忘中国但力不足耳后果如思忠策六年四月上议伐宋大臣犹言无足虑者思忠坚执前议帝深然之七年正月元帅左监军赫舍哩执中围楚州久不能下宰臣奏请命大臣节制其军及益兵攻之思忠请行乃用唐宰相宣慰诸军故事以思忠充淮南宣慰使持空名宣敕赏立功者诏百官集议于广仁殿既而宋人请和议遂寝顷之进拜尚书右丞大安初拜平章政事三年与参知政事承裕将兵屯边方缮完乌沙堡思忠等不设备元兵奄至取乌云营思忠不能守坐解职

△穆延萨克达

穆延萨克达临潢路人其先以功授世袭穆昆萨克达幼袭爵守边有劳泰和六年南鄙用兵授蔡州防御使同知五月宋将李爽围寿州田俊迈陷蕲县布萨揆遣安国军节度副使纳喇邦烈与萨克达以精骑三千戍宿州俊迈率步骑二万来袭邦烈萨克达逆击大破之郭倬李汝翼以众五万继至攻城甚力城中丛射敌不能逼会淫雨潦溢敌路处劳倦邦烈潜遣骑二百突出敌后敌乱萨克达率骑击之杀伤数千人敌复闻援军将至遂夜遁邦烈萨克达复追击大破之获田俊迈十月揆以行省兵三万出颍寿萨克达为骁骑将中军副统克安丰军战霍邱花靛功居多十二月从攻和州 【按宋史宁宗纪开禧二年十一月金人破和州及安丰军十二月金人去和州纪月互异】 中流矢卒萨克达形不过中人而拳勇善鬪所用枪长二丈又工用手箭箭长不盈握散置铠中以百数遇敌抽箭以鞭挥之或以指钳取飞掷数矢齐发无不中敌以为神其箭皆以智创虽子弟不能传其法在北部守厌山营敌畏不敢近及死将士皆惋惜之

钦定续通志卷四百三十六

●钦定续通志卷四百三十七 列传二百三十七

列传

金 【十五】

○金十五

贾铉	张铎	孙即康	萧贡	张翰	任
天宠	孟铸	宗端修	完颜闾山		
路铎	完颜伯嘉	珠格筠寿	张炜	高竑	
李复亨					

贾铉
孙铎
孙即康
萧贡
张翰
任天宠
孟铸
宗端修
完颜闾山
路铎
完颜伯嘉
珠格筠寿
张炜
高竑
李复亨
△贾铉

贾铉字鼎臣博平人性纯厚好学问中大定十三年进士调滕州军事判官补尚书省令史章宗为右丞相深器重之累迁右司谏上疏论边戍利害帝嘉纳之迁左谏议大夫兼工部侍郎与党怀英同刊修辽史铉上书曰亲民之官任情立威所用决杖分径长短不如法式甚者以铁刃置于杖端因而致死闲者阴阳愆戾未必不由此也愿下州郡申明旧章检察不如法者具以名闻制可复上书论山东采茶事以为茶树随山皆有一切护逻以夺民利因而执诬小民吓取货赂宜严禁止仍令按察司约束帝从之承安四年迁礼部尚书谏议如故时有诏凡奉敕商量照勘公事皆期日闻奏铉言若如此恐官吏迫于限期姑务苟简反害事体况簿书自有常程御史台治其稽缓如事有应密三月未绝者令具次第以闻下尚书省议如省部司即定夺者复三月拟奏如取会案牒卒难补勘者先具次第奏知更限一月结绝违者准稽缓制书罪之泰和二年崇妃薨帝欲成服苑中行登门送丧之礼以问铉铉对以古无是礼遂已改刑部尚书三年拜参知政事亳州医者孙士明大书敕赐神针于纸尾年月闲摹作宝样朱篆青龙二字以诳惑市人有司捕治欵伏值赦大理寺议宜准伪造御宝虽遇赦不应原铉奏天子有八宝其文各异今用笔描成既非八宝文论以伪造御宝非本法意帝悟遂赦原六年铉与审官院掌书大中漏言除授事出为安武军节度使改知济

南府致仕贞佑元年卒

△孙铎

孙铎字振之其先滕州人徙恩州历亭县铎性敏好学登大定十三年进士第调海州军事判官卫县丞补尚书省令史为右都管仲宋及还章宗即位除同知登闻检院事铎言凡上诉者皆因尚书省断不得直乞断自宸衷勿复送省帝以为然承安元年累迁中都路都转运使初置讲议钱谷官十人铎为选首四年迁户部尚书铎因转对奏曰比年号令或已行而中辍或既改而复行更张太烦百姓不信乞自今凡将下令再三讲究如有益于治则必行无恤小民之言帝然之泰和二年户部侍郎张复亨议三合同钞可行铎面与诘难复亨议诘帝嘉其刚正三年孙即康贾铉皆除参知政事铎再任户部尚书心少之对贺客诵古人诗【中州集作布衣张在诗】曰唯有庭前老柏树春风来似不曾来御史大夫卞劾铎怨望降同知河南府事改彰化军节度使复为中都转运使七年拜参知政事左司郎中刘昂等坐私议朝致下狱尚书省奏其罪铎进曰昂等非敢议朝政但如郑人游乡校耳帝悟乃薄其罪铎上言民闲钞多宜收敛院务课程及诸窠名钱须全收交钞秋夏税本色外尽令折钞不拘贯例农民知之迤渐重钞比来州县抑配行市买钞无益徒扰之耳乞罢诸处钞局惟省库仍旧小钞无限路分可令通行帝览奏即诏有司速行之大安初迁尚书左丞兼修国史以议李新喜罪降浚州防御使改安国军节度使徙绛阳军宣宗即位召赴阙以兵道阻宣宗迁汴铎上谒于宜村除太子太师贞佑三年致仕是岁卒

△孙即康

孙即康字安伯其先沧州人辽徙河北实燕蓟远祖延应在徙中占籍析津仕至涿州刺史曾祖克构辽检校太傅启圣军节度使即康中大定十年进士第为尚书省令史章宗即位累迁户部员外郎讲究盐法利害除耀州刺史入为吏部左司郎中帝谓宰臣曰孙即康向为省掾言语拙讷今才力大进非向时比也迁御史中丞与同签大睦亲府事鞫治镐王永中狱还奏永中父子皆赐死时论冤之顷之迁泰宁军节度使改知延安府事承安五年以司空襄荐复召即康为御史中丞泰和三年除参知政事明年进尚书右丞六年宋渝盟有端大臣犹以小盗窃发不足恤惟即康与左丞布萨端参政通吉思忠谓必当用兵帝以为然进左丞宋人请和进官一阶章宗崩卫绍王即位即康进拜平章政事封崇国公大安三年致仕是岁薨

△萧贡

萧贡字贞卿京兆咸阳人【按中州集云唐太傅真十七代孙】大定二十二年进士历涇州观察判官补尚书省令史旧例试补两月乃补用贡至数日执政以为能擢监察御史提刑司奏涇州有美政迁北京转运副使亲老归养董师中杨伯通荐其文学除翰林修撰上书请擢真才以振浇俗核功能以理职业慎名器以抑侥幸重守令以厚邦本又论时政五弊言路四难词意切至改右司郎中迁刑部侍郎【按中州集言贡为右司郎中预修泰和律令所上条画悉当帝心章宗叹曰汉有萧相国我有萧贡刑狱吾不忧矣兼刑部侍郎多所平反帝悉从之传皆不载附识于此】 历河东北路南京路转运使御史中丞户部尚书兴定元年致仕元光二年卒谥文简贡好学读书至老不倦有注史记一百卷

△张翰

张翰字林卿忻州秀容人大定二十八年进士谓隰州军事判官有诬昆弟三人为劫者廉得其状白于州释之大安闲参知政事承裕处置乖方翰充左右司郎中屡争之不见省承裕就逮宁绍王知翰尝有言召见抚慰之迁侍御史宣宗迁汴翰规措扈从粮草至真定上书言五事一曰强本谓当哀兵徒徙豪民以实南京二曰足用谓当按蔡汴旧渠以通漕运三曰防乱谓当就集军假之官印使相统摄以安反侧四曰省事为县邑不能自立者宜稍并之既以省官且易于备盗五曰推恩谓当推恩以示天子所在称幸之意帝略施行之翰雅有治剧才所至辄办迁河北军节度使都水监提控军马使俄改户部尚书时帝初至南京庶事草略翰经度区处皆有条理是岁卒谥达义

△任天宠

任天宠字清叔曹州定陶人明昌二年进士为威戎县令县故堡寨无文庙学舍天宠以废署建有兄弟讼田者谕以理义委曲周至皆感泣而去累迁国子祭酒贞佑初为中都路都转运使时京师戒严粮运艰阻天宠悉力营办曲尽劳瘁出家货以济饥者全活甚众迁户部尚书三年中都不守天宠继走南京中道遇兵死之谥纯肃

△孟铸

孟铸大定末补尚书省令史明昌元年御史台奏荐铸刚正可用除刑部主事累迁河平军节度使泰和四年入为御史中丞召见于香阁谓之曰朕自知卿非因人荐举也御史责任甚重往者台官乃推求细故弹劾小官至巨室重事则畏徇不言其勤乃职无废朕命是岁自春至夏诸郡少雨铸奏依种麻菜法择地形稍下处拨畦种谷穿土作井随宜灌溉帝从其言

区种法自此始无可奏弹知大兴府赫舍哩执中贪残
专恣不奉法令自奉圣州罪解后怙过不悛失师帅之体乞行黜退以厌人望帝以执中
东宫旧人颇右之谓铸曰执中羸人似有跋扈者铸曰
明天子在上岂容有跋扈之臣帝悟诏尚书省问罢之五年唐邓河南屡有警议者谓宋
且败盟六年正月宋贺正旦使陈克俊等朝辞帝使铸
谕以国家涵容之意时改提刑司为按察司铸论其权削望轻自今诸疑狱并令按察司
从正与决庶几可慰人望从之八年除绛阳军节度使
至宁元年复为御史中丞 【按宏简录卫绍王立召铸为参知政事崇庆元年复任御史
大夫与本传稍异】 赫舍哩执中作乱召铸及右谏
议大夫张行信问曰汝辈向来弹我者耶各以正言答之乃遣还家曰且须后命既而执
中死铸亦寻卒

△宗端修

宗端修字平叔汝州人章宗避睿宗讳上一字改宗为姬 【按中州集卫绍王避世
宗讳改宗为姬与本传异】 端修好学喜名节中大
定二十二年进士第明昌中补尚书省令史承安元年擢监察御史时元妃李氏兄弟干
预朝政端修上书乞远小人帝遣李喜儿传诏问小人
为谁对曰李仁惠兄弟仁老喜儿赐名也喜儿不敢隐具奏之帝虽责喜儿兄弟而不能
去也四年复上书言事宰相恶之坐以不经喜官直进
奏帖削一官章宗知修不为众所容释之改大理司直泰和四年迁大理丞赫舍哩执中
陈言涉私端修议治其罪诏以端修别出情见议不当
削一官解职久之为节度副使卒于官端修以直道不振于时自守愈笃汝州司候游彦
哲将之官问为政端修曰为政不难治气养心而已心
正则不私气平则不暴为政之术尽于此矣

△完颜闾山

完颜闾山盖州明安人明昌二年进士调观察判官累迁沁南军节度使入为工部
尚书贞佑三年知京兆府事四年知凤翔府事兴定元
年冬诏陕西行省伐宋闾山权元帅右都监参议军事宋兵千余人伏吴寨谷率骑兵掩
击败之改知平凉府败宋人于步落塌迁官一阶三年
召为吏部尚书廷议选户部官往往举聚敛刻吏应诏闾山曰民劳至矣复用此辈将何
以堪识者称之五年朝廷以晋安行元帅府图门呼图
克们暴刻以闾山代之是岁卒

△路铎

路铎字宣叔伯达子明昌三年为左三部司正上书言事召见便殿迁右拾遗明年
【河渠志作三年六月】 卢沟河决铎请自玄同口

以下丁村以上无修旧堤纵使分流以杀减水势诏工部尚书胥持国与铎同检视章宗将幸景明宫是岁民饥御史中丞董师中上书谏铎与左补阙许安仁继之赐对御阁乃罢行尚书左丞完颜守贞每论政事守正不移与同列不合罢知东平府事台谏因挤之铎上书论守贞贤可复用言太切尚书右丞乌凌阿愿参政瓜尔佳衡奏铎以梁冀比右丞相瓜尔佳清臣所言狂妄不称谏职帝曰周昌以桀纣比汉高祖不以为忤路铎以梁冀比丞相耳顷之守贞入为平章政事五年复谏幸景明宫语多激切赫忠愈狱起事密谏官不能察其详而议者颇谓事涉镐王永中思有以宽解帝意铎上封事尤切直帝优容之尚书省奏拟铎同知河北西路转运使事诏再任右拾遗谓宰相曰铎敢言但识短耳铎因召对论宰相权太重宰相持国深衔之及守贞持镐王永中事久不决铎等亦上言切谏持国并指以为党帝乃出守贞知济南府荐者皆黜降出铎为南京留守判官承安二年召为翰林修撰帝问赵晏所言十事因及董师中张万公优劣铎奏师中附胥持国以进赵枢张复亨张嘉贞皆出持国门下嘉贞复趋走丞相襄之门俱不可用持国党闻之怒甚寻改监察御史参政杨伯通引用乡人李浩铎劾伯通以公器结私恩左司郎中贾益承望风旨不详检御史大夫张暉抑铎奏不行帝命同知大兴府贾铉诘问铉奏张暉言弹劾大臣须有实迹恐所劾不当台纲愈壤贾益言除授皆宰执公议不见伯通私任形迹于是诏责铎言事轻率顷之迁侍御史复坐奏事不实夺两官解职寻复起为泰定军节度副使改景州刺史铎述十二训以教民诏遍谕州郡迁陕西路按察副使坐与属官宴饮罢免泰和六年复召为翰林待制除孟州防御使贞佑初城破投沁水死

△完颜伯嘉

完颜伯嘉字辅之北京路额尔袞必喇明安人明昌二年进士调中都左警巡判官孝懿皇后妹晋国夫人家奴买漆不酬直伯嘉钩致系狱晋国白章宗章宗曰姨酬其价则奴释矣由是豪右屏迹累迁监察御史因劾奏平章政事布萨揆迁平凉治中贞佑初起震武军节度使四年伯嘉奏西京副统程琢智勇过人持心忠孝诏赐琢姓完颜氏迁元帅左监军历知太原归德河南府事时甫经兵后乏军食伯嘉令输枣栗菜根足之皆以为便兴定元年召为吏部尚书二年改御史中丞初富察伊尔必斯为右副元帅备御潼关兵溃逸去御史完颜药师劾请穷治诏释之伊尔必斯使其子上书请图后劾伯嘉劾之曰古之为将者受命之日忘其家临阵之日忘其身伊尔必斯膺国重寄握兵数万未阵而

溃既不能援枹鼓以死敌又不能负斧钺而请罪圣恩曲赦其死自当奔走关庭惶恐待命乃安坐要君略无忌惮乞尸诸市以戒不忠宣宗曰中丞言是业已赦之矣乃止除名五月帝忧旱宰执以为冤狱所致伯嘉奏燮和阴阳宰相之职汉制灾异策免三公顾归之有司邪臣谓今日之旱圣主自用宰相谄谀百司失职实此之由礼部郎中穆延呼喇勒以言事忤旨集五品以上官显责之伯嘉谏曰尧舜纳谏桀纣拒谏呼喇勒所言是无益于身所言不是无损于国陛下廷辱如此独不欲为尧舜乎时宰相请修山寨以避兵伯嘉谏曰建议者必曰据险可以安君父独不见陈后主之入井乎假令入山寨可以得生顾能复为国乎是年冬以权参知政事行省河中廷议欲弃河东徙民实陕西伯嘉上言中原之有河东如人之有肩背万一失之恐未易取大忤宰执意召还入奏曰如臣弩钝固宜召还更须速遣大臣镇抚退复上疏曰国家兵不强力不足以有为财不富赏不足以周众独特官爵以激劝人心近日以功还官赴都求调者有司往往驳之非所以劝功也乞应军功迁官宣敕无伪者即准用之又曰自兵兴以来河北桀黠往往聚众自保未有定属乞赐招抚无为他人所得又曰河东河北有能招集余民完守城寨者乞无问其门地皆超躐等级授以本处见任之职又曰河中晋安被山带河保障关陕此必争之地今虽残破形势犹存若使他人据之因盐池之饶聚兵积粮则河津以南太行以西皆不足恃矣四年秋河南大水充宣慰副使按行京东奏曰亳州灾最甚合免三十余万石三司止奏除十万石民将重困诏治三司奏灾不实罪伯嘉行至蕲县闻前有红袄贼不敢至泗州监察御史乌克逊纳绅劾伯嘉违诏不徧按视诏有司鞫问会赦免五年起为彰化军节度使改翰林侍讲学士伯嘉纯直不能与时仰昂尝曰生为男子当益国泽民高汝砺力希宠固位伯嘉论事辄与之忤由是毁之者众元光元年坐言事过切降遥授同知归德府事二年三月遥授集庆军节度使权参知政事行省河中率陕西精锐与平阳公史咏共复河东以病卒

△珠格筠寿

珠格筠寿贞佑闲为器物局直长迁副使工部取牯皮治御用鞬仗筠寿以其家所有鞬仗进因奏曰中都食尽远弃庙社陛下当坐薪悬胆之日奈何以球鞬细物动摇民闲使屠宰耕牛以供不急之用乎宣宗不恠擢仗笼中出为桥西提控

△张炜

张炜字子明洺州永年人本名燬避章宗嫌名改焉大定二十五年进士累官户部

员外郎承安五年天久阴晦平章政事张万公奏请远
小人章宗问为谁万公以炜对乃出为同知镇西军节度使事转同知西京转运使事丁
母忧起复桓州刺史奏请以盐易米所言利害甚多寻
充宣差西北路军储自言敛不及民可以足用大抵多募商贾妄指产业逮系邻保一路
为之疲敝以旧毡故缯折给军士皆弃于道而去岁余
改户部郎中丞相崇浩奏炜长于恢办比户部给钱三十万已增息十四万矣泰和八年
伐宋炜进银五千两诏曰人之短汝朕皆知之惟能兴
利斯惟汝功自西北路召还句计诸道仓库以中都转运户籍判官王谦代炜谦至西北
路尽发炜前后散失钱物以巨万计大安三年河东兵
败军士犹云张宣差刻我欲倒戈杀之宣宗迁汴炜佐尚书右丞胥鼎修南京宫阙坐事
降官未几致仕宣宗初以炜有才既察其无实遂不复
用炜贞佑四年卒

△高竑

高竑渤海人以荫补官累迁左藏库副使元妃李氏以阜币易红币竑独拒不肯元
妃奏之章宗大喜遣人谕曰所执甚善今姑与之后不
得为例大安中越王永功判中山竑同知府事改同知河南大名充安抚使贞佑二年迁
河北西路按察转运使寻致仕卒

△李复亨

李复亨字仲修荥州河津人登进士第调临晋主簿护送官马入府宿逆旅有盗杀
马复亨曰不利而杀之必有仇者尽索商人过客同邑
人橐中盛佩刀谓之曰刀蔑马血火煨之则刃青其人欵伏迁南和令盗割民家牛耳复
亨尽召里中人至使牵牛遍过之至一人前牛忽惊跃
诘之乃引伏累迁同知震武节度使贞佑闲厯左司郎中迁翰林直学士行三司事兴定
三年上言近曰兴师伐宋恐宋人乘虚掩袭故籍边民
为军今大军已还乞遣归本业从之复亨举陈留县今程震等二十九人农桑有效征科
均一朝廷皆迁擢之时置京东西南三路行三司掌劝
农催租军需科差及盐铁酒榷等事复亨摄西路奏民闲销毁农具以供军器臣窃以为
未便汝州鲁山宝丰邓州山皆产铁募工置冶可获利
且不厉民又奏阳武设卖盐官以佐军用乞禁止沧滨盐勿合过河河南食阳武解盐河
北食沧滨盐南北俱济诏尚书省行之四年拜参知政
事河南雨水害稼复亨为宣慰使凡官吏贪污不治者得废罢推治复亨奏乞禁宣慰司
官吏不得与州府司县各官会饮又奏民养驿马困民
最甚可依旧设回马官使者食料皆官给之河南闲田多可招河东河北移民耕种被灾
及沿边郡县租税全免内地半之诏有司议行焉无何

被诏提控军兴粮草复亨奏河渡不通陕西盐价踊贵乞以粟互易足兵食诏户部从长
规措复亨有会计才号能吏当时推服故骤至通显既
执政颇矜持以私自营誉望顿减五年廷试进士复亨监试进士卢元谬误滥放及第乃
罢为安国军节度使元光元年十一月城破自杀赠资
德大夫

钦定续通志卷四百三十七

●钦定续通志卷四百三十八 列传二百三十八

列传

金 【十六】

○金十六

承晖 穆延尽忠 布萨端 李英 富珠哩德裕 乌
库哩庆寿 布萨安贞 田琢 完颜
弼 蒙古纲 必喇阿鲁岱

承晖

穆延尽忠

布萨端

李英

富珠哩德裕

乌库哩庆寿

布萨安贞

田琢

完颜弼

蒙古网

必喇阿鲁岱

△承晖

承晖字维明本名福兴益都尹郑嘉子也好学淹贯经史章宗时为近侍局使孝懿
皇后妹夫乌页尔世宗时以罪斥去乙夜诏开宫城门
召之承晖不奉诏明日奏曰乌页尔得罪先帝不可召章宗曰善累迁北京留守副留守
李东阳素贵承晖非公事不与交一言改知大名府召
为刑部尚书兼知审官院裕尔罕都平章镒之甥也将招授官承晖驳奏之卒从其议寻
改知大兴府事宦者李新喜有宠用事借大兴妓乐承
晖拒不与豪民与人争种稻水利厚赂元妃兄左宣徽使李仁惠仁惠使人属承晖右之
承晖杖遣豪民曰可以报宣徽也复改知大名府事及
伐宋迁山东路统军使时盗贼渠魁往往潜匿泰山岩穴闲按察司请发数万人刊除林

木使无所隐承晖奏曰齐人易动驱之入山必有冻饿失所之患此海盜非止盜也天下之山亦多矣豈可尽赭哉议遂寢是时行限钱法承晖上疏略曰货聚于上怨结于下不报卫绍王即位拜参知政事驸马都尉图克坦默埒与其父南平干政事大为奸利承晖面质其非至宁元年为横海军节度使贞佑初承晖为尚书右丞 【按宣宗纪承晖为尚书右丞亦在诛赫舍哩执中后】 妻子留沧州沧州破妻子皆死赫舍哩执中伏诛进拜平章政事兼都元帅封邹国公中都被围承晖出护和事宣宗迁汴徙封定国公与皇太子留守中都承晖以尚书左丞相穆延尽忠久在军旅悉以兵事付之顷之庄献太子遁去右副元帅富察齐锦以其军出降中都危急诏元帅左监军永锡将中山真定兵元帅左都监乌库哩庆寿将大名军御史中丞李英运粮大名行省富珠哩德裕调遣继发救中都承晖闲遣人以矾写奏求诸军倍道来援已而李英败于霸州北庆寿永锡军亦溃时高琪居中用事忌承晖成功诸将皆顾望无一至中都者承晖与尽忠会议约同死社稷尽忠谋南奔承晖怒召尽忠腹心完颜实库至谓曰始我谓平章知兵故推心以权畀之尝许与我俱死今忽异议行期且在何日宝库曰今日向暮且行承晖变色曰社稷若何实库不能对叱斩之承晖起辞谒家庙作遗表付尚书省令史师安石皆谕国家大计辨君子小人治乱之本厯指邪正数人谓高琪赋性阴险终害国家因引咎以不能保都城为谢举家号泣承晖神色泰然方与安石举白引满谓曰承晖于五经皆经师授谨守而力行之不为虚文既被酒取笔与安石诀最后倒写二字投笔叹曰遽尔谬误得非神志目邪谓安石曰子行矣安石出门闻哭声复还问之则已仰药死矣 【大金国志云承晖安归于汴随亦被诛按承晖之死续通鉴及纪事本本俱无异词甯汴被诛则穆延尽忠事也志误矣】 是日暮尽忠出奔中都不守贞佑三年五月二日也师安石奉遗表奔赴行在奏之宣宗设奠于相国寺哭之尽哀赠开府仪同三司太尉尚书令广平郡王谥忠肃承晖生而页富居家类寒素常置司马光蘓轼像于书室曰吾师司马而友苏公平章政事完颜守贞素敬之与为忘年交

△穆延尽忠

穆延尽忠本名托恩多上京路明安人大定二十八年进士第调高阳朝城主簿北京临潢提刑司知事御史台与廉能迁顺义军节度副使累迁山东按察副使坐虚奏和余常平粟降虢州刺史泰和闲累迁中都西京按察使与赫舍哩执中不协阴伺其过申奏及执中走还中都诏尽忠为左副元帅兼西京留守 【西京二字系原史阙文字据宏简录补入】 以保

全西京功进官三阶贞佑二年宣宗迁汴与右丞相承
晖守中都为左都元帅十月进拜平章政事中都受围承晖以尽忠久在军旅付以兵事
约同死社稷及乌库哩庆寿等兵溃外援不至谋南奔
中都妃嫔闻尽忠出奔皆束装至通元门尽忠谓之曰我当先出启途乃与爱妾及所亲
先出城不复顾中都遂陷尽忠至南京帝释不问仍以
为平章政事尽忠与高琪素不相能语其兄乌哩页曰迩来帝颇疏我此高琪所为若再
生兵必不置此人未几尚书省奏尽忠谋逆帝命有司
鞠治兄弟皆伏诛

△布萨端

布萨端本名齐锦中都路明安人事亲孝选充护卫累迁都点检历河南陕西统军
使泰和三年召为御史大夫明年拜尚书左丞六年诏
大臣议伐宋皆曰此小寇无足虑者端曰小寇当昼伏夜出丰敢白日列陈耶宜早为之
所帝深然之平章政事布萨揆伐宋诏端主南京行省
留务宋屡遣使乞和七年布萨揆以暑雨班师【按续通鉴开禧三年二月布萨揆卒于
下蔡时金泰和七年也暑雨班师恐误】端还朝初
武卫军士妻阿里布生二女而寡常托梦中言以惑众言梦中屡见白头老父指其二女
曰皆有福人也若侍掖庭必得皇嗣时章宗在位久皇
子未立端请纳之章宗从之既而京师久不雨阿里布复言梦见白头老父使已祈雨三
日必大澍过三日雨不降章宗疑其诞妄下有司鞠问
阿里布引伏诏让端端上表待罪诏释不问顷之进拜平章政事封申国公八年十一月
章宗崩遣诏内人有娠者两位生子立为储嗣卫绍王
即位命端与尚书左丞孙即康护视二十二日太医副使仪师颜状诊得范氏胎气有损
明年四月有人告元妃李氏教承御贾氏诈称有身元
妃承御皆诛死端进拜右丞相授世袭穆昆宣宗贞佑二年以端判南京留守解围表请
南迁凡三奏耿端义赞之帝意乃决【按迁汴之议
大金国志载孙大鼎再入疏聂希古赞成之而史不及此二人志恐误】明年中都失守
宣宗至南京以端知开封府事进都元帅行省陕西招
谕完颜格尔及成格勒阿凌结汪三郎等皆相继内附汪三郎赐姓完颜俊为西方名将
四年以疾请致仕不许遣近侍与太医诊视端虽癯老
凡朝使至必远迓宴劳不懈故谗构不果行兴定元年卒赠延安郡王谥忠正【按宣宗
纪兴定元年布萨端卒原传误作四年并系以奏承
裔改行元帅府事于巩州今改正】

△李英

李英字子贤其先辽阳人徙益都明昌五年进士第调通远令补尚书省令史大安

三年上章议兵事荐珠格高琪乌克逊鄂屯纳喇奎腾
穆延尽忠先朝尝任使可与商略又曰比来敌人增筑城郭修完楼櫓事势可知山东河北不大其声援则京师为孤城矣不报贞佑初珠格高琪辟为经略官乃上书高琪曰中都之有居庸犹泰之崤函蜀之剑门也迩者撤居庸兵我势遂去今士豪守之朝廷当遣官节制失此不图忠义之士将转为他矣又曰可镇抚宣德德兴余民使之从戎所在自有宿藏足以取给是国家不费斗粮尺帛坐数所失之关隘也居庸咫尺北门而不能卫护英实耻之高琪奏其书即除工部员外郎充宣差都提控居庸等关隘悉隶焉二年正月乘夜与壮士李雄郭仲元郭兴祖等出城缘西山进至佛岩寺招募军民旬日得万余人时时出战被创召还俄迁翰林侍制因献十策大槩谓居中士以镇四方委亲贤以收中都立藩屏以固关隘集人力以防不虞养马力以助军威爱禾稼以结民心明赏罚以劝百官选守令以复郡县并州县以省民力颇施行之【按英献十策原文祇载九条姑仍其阙】宣宗南迁召为御史中丞英念兵兴以来百务皆弛激浊阳清奖进人材为已任因言近年改定四善二十七最之法徒为虚文大定闲数遣使者分道考察廉能当时号为得人愿改前日徒设之文遵大定已试之效帝嘉纳之自兵兴以来亟用官爵为赏程英又奏名器不可以假人上恩以难得为贵伏见兰州西关堡守将王格尔坚守关城诱杀贼使忠节诚有可嘉急于劝奖遂擢节钺加阶二品赐或姓若取兰州又将何以待之陕西名将项背相望格尔藐然贱卒一朝处众人之右为统领之官恐众望不灰难得其死力不听中都久围丞相承晖告急英收河闲清沧义军自清州督粮运救中都行至大名得兵数万然馭众素无纪律复被酒与元兵遇于霸州北大败尽失所运粮英死士卒歼焉加恩赠通奉大夫谥刚贞

△富珠哩德裕

富珠哩德裕本名富拉塔隆安路明安人累官少府监丞明昌末修北边濠堑立堡寨以劳进官三阶授大理正累迁左监军兼临潢府路兵马都总管都统诸达私率官兵救护家属德裕蔽之御史劾奏谪宁海州刺史迁武胜军节度使贞佑二年召为御史中丞拜参知政事兼签枢密院事行省大名诏发河北兵救中都凡真定中山保涿等兵元帅左监军永锡将之大名河闲清沧观霸河南等兵德裕将之并护清沧粮运德裕不时发及李英至霸州兵败粮尽亡失坐弛慢兵期责授沂州防御使寻知益都府事兴定元年卒

△乌库哩庆寿

乌库哩庆寿河北西路明安人由知把书画充奉御除近侍局直长再转本局使御边有劳进一阶赐金带泰和四年诏庆寿按视漕河六年伐宋从右副元帅完颜匡出唐邓为先锋都统攻下枣阳顷之完颜匡军次白虎粒遣都统完颜谳达取随州遣庆寿以兵五千扼赤岸断襄汉路行与宋兵遇斩首五百终宋随州将雷太尉遁去遂克随州于是宋邓城樊城戍兵皆溃遂与大军渡汉江围襄阳元帅匡表荐庆寿谋略出众帝嘉之迁拱卫直都指挥使提点如故贞佑二年迁元帅右都监以保全平州功进官五阶宣宗迁汴改右副点检兼侍卫亲军副指挥使三年中都危急改元帅左都监将大名兵万八千西南路步骑万一千河北兵一万救中都次霸州北兵溃顷之中都失守改大名府权宣抚使未几知河中府权河东南路宣抚副使四年迁元帅右监军【宣宗纪作左监军】兼陕西统军使驻兵延安败夏人于安塞堡战于鄜州之沧曲谷有功兴定元年与签枢密院事完颜萨布经略伐宋败宋兵于泥河湾石濠村复破宋兵于樊城县以军士多被伤奏不实诏有司鞫问已而释之历镇南集庆军节度使卒

△布萨安贞

布萨安贞本名阿哈以大臣子充奉御尚刑国长公主贞佑初改右副点检迁元帅左都监二年中都解严除山东路统军安抚等使初益都县人杨安儿聚剽掠诏州郡招捕之安儿降累官刺史防御使大安闲安儿亡归与张汝楫聚赏攻劫州县山东大扰安贞至益都败安儿于城田安儿奔莱阳莱州徐汝贤以城降贼势复振登州刺史耿格开门纳伪都统郊迎安儿遂僭号改元天顺伪元帅郭方三据密州李全略临朐安贞以沂州防御使布萨瑠嘉为左翼安化军节度使完颜额珠为右翼【按续通鉴安儿奔登州山东行省完颜迁与经历洪鄂将化帽军讨贼败之兴本传互异】七月安贞军昌邑东徐汝贤等以三州之众十万来拒杀获甚众安贞军至莱州伪宁海刺史史澄立以二十万阵于城东瑠嘉败之杀获且半安贞遗莱州黥卒曹全等诈降于汝贤以为内应遂复莱州斩徐汝贤耿格史泼立皆降宣差伯特完袭杀郭方三复密州十二月辛亥耿格伏诛安儿脱身走入海舟人曲成等击之坠水死四年二月安儿党郝定等复扰山东安贞讨之连战皆克降者三万余皆安慰复业兴定二年下诏伐宋安贞至安丰宋兵拒战完颜呼喇勒冲击败之追至淝水安贞至大江乃班师【按续通鉴载金人围安丰军进攻扬州真州建康大震贾涉遣李全拒之战于化胡坡杀金数将得其金牌乃解诸州之围而去全追击之复败之于曹家庄因致金牌

于涉云已杀驸马安贞矣本传叙安贞之续故第云至大江乃班师】 兴定三年安贞伐宋有淝水之捷五年复伐宋安贞军于七里镇宋兵据净居山遣兵击败之遂夺黄土关入默林关拔麻城县抵大江克黄州进攻靳州克之安贞每获宋壮士辄释不杀因用其策亦有功宣宗谓宰臣曰阿哈将略固善此辈无虑数万既不可杀安所置之宰臣不对安贞忧谗以金玉带赂近侍局六月尚书省奏安贞谋叛宣宗疑不实令英王守纯覆案之质成其诬并其二子杀之以祖忠义父揆有大功免兄弟缘坐安贞尝曰三世为将遂家所忌至是果验云

△田琢

田琢字器之蔚州定安人明昌五年进士官怀安令补尚书省令中贞佑二年中都 被围琢请由闲道往山西招集义勇遂使经略山西琢与宏州刺史魏用有隙自飞狐还蔚州用伏甲于路将邀之琢知其谋即别道入定安用破蔚州杀判官李宜马士成永兴县令张福劫府库仓廩攻琢于定安琢与战败之用脱身走易州刺史芬彻缚送中都元帅府杀之琢至蔚州 诛用同恶数人遣沈思忠招集西京荡析百姓得万余人皆愿徙河南为 上书以请从之琢复遣沈思忠宫楫招宏州蔚州百姓得五万余人可充军者万五千人分屯蔚州顷之西山诸隘皆不能守琢移军沃州贞佑三年诏尽徙屯陕琢至陕上书曰河北失业之民侨居河南陕西旷土多而浮民众乞选能吏劝课公私皆得耕垦富者备牛出种贫者佣力服勤教之区种期于尽辟而后已宣宗深然之兴定二年改山东东路转运使 【归潜志作兵马都总管中州集作宣抚使】

权知益都府事李旺据胶西琢遣益都治中张林讨擒之棣州裨将张聚据州叛袭滨州琢遣提控赫舍哩绰哈讨平之遂复二州李全据安邱琢遣总领提控王政王廷玉讨之太府少监伯特完擅率政兵攻安邱败焉琢奏治特完罪会赦而止既而昌乐令珠格罕都等破李全于日照县琢承制各迁官一阶诏许之治中张木素凶险耻出琢下会于海牟佐据莱州琢遣林讨之林伺琢出即率众噪入府中琢仓猝与战不胜行至章邱兵变东平行省蒙古纲以状闻宣宗度不能制林乃遣人召琢还至寿张疽发背卒

△完颜弼

完颜弼本名达希布盖州明安人从丞相襄戍边功最泰和六年从完颜匡攻襄阳破雷太尉兵积功至右副都点检至宁元年以言事忤旨谪云内州防御使 【按金地理志云内州置远军节度使非防御州也此云防御使沿革未详】 贞佑初宣宗驿召赴中都寺云内已受兵

弼善马稍与数骑突出将赴阙会有诏除元帅左都监驻真定弼奏外兵日增军无鬪志村寨城邑有勇敢可使者乞招用之又曰河朔郡县皆以拘文不相应救由此残破乞敕州府有告急征兵即须赴救又曰河北军器乞权宜弛禁仍令团结堡寨以备外兵及劝迁都讲防御诸策宣宗颇采用其言大名军变诏弼镇抚之未几改陕西路统军使三年改知东平府事山东西路宣抚副使时刘二祖余党孙邦佐张汝楫保济南勤子堦【本纪作大沫堦】弼遣人招之皆降八月【按宣宗纪贞佑三年四月招降张汝楫等八月复叛杀之原文误作四年令改正】汝楫复谋作乱邦佐密告弼弼飡汝楫伏甲杀之手诏褒谕封密国公是年元兵围东平弼百计应战久之乃解围去五月疽发于脑俄卒弼平生无所好惟善读书闲暇延引儒士歌咏投壶以为常所辟得人皆立方面功治东平爱民省费军民无相讼有古良将之风焉

△蒙古网

蒙古网本名呼尔根咸平府明安人承安五年进士除国子助教贞佑初自请招集西山兵民迁都水监丞寻加遥授永定军节度副使三年权山东宣抚副使四年行元帅府事奏杨安儿余党据险作乱至今未息乞普赐恩宥宣宗即命赦之兴定元年徙知东平府事权参知政事行尚书省遣默呼讨花帽贼于曹济闲三年奏恩州武城县艾家凹水泝清河县涧口河泝险固可恃因其地形少加浚治足以保御请迁州民其中又以山东恃东平为重镇而兵卒太少请募选以益兵咸制可是岁益都桃林寨总领张林号张大刀据险为乱四年侵掠东平纲遣王庭玉讨之生擒张林林乞贖死自劾纲为请于朝官之山东不能守林乃降于宋初东平提控郑侗生擒宋将李资纲奏赏侗宰臣谓李资自称宋将无所凭据请详究其实纲奏此辈力屈就擒丰肯虚称伪将以重获者功今多故之际赏功后时将士且解体诏即赏之五年二月东平解围纲与王庭玉东莒公燕宁各迁一阶是岁燕宁战死纲势孤奏请移军河南诏百官议许纲内徙率所部女真契丹汉军五千人行省邳州左监军王庭玉将余军屯黄陵冈自此山东事势去矣时宿州连年饥馑加之重敛百姓离散纲奏乞一切停止诏议行之元光二年以邳州经略司隶纲令募勇敢收复山东碭山首领怀忿作乱引水环城以自固构浮桥河上结红袄贼为援纲奏碭山北近大河南近汴堤其闲干滩泥淖步骑俱不可行惟宜轻舟往来当选锐卒数千与水军埽兵由便道断浮梁绝红袄之援募胆勇有口辨者持牒密谕之以离闲其赏与乞赐空名告身从便迁赏无何碭山贼袭永城县诏与副总领高琬等并力讨之纲御下严邳州军

不乐属纲八月辛未朔经略使纳哈塔禄格都统金山

颜俊率沂州军士百余晨入行省杀纲及僚属于省署十月壬辰 【按宣宗纪作十一月辛丑盖本传记克敌之期而帝纪则书报捷之日也

】 总帅约赫德围邳州急攻之红袄贼高显等杀禄格函首以献

△必喇阿鲁岱

必喇阿鲁岱贞佑初累官宁化州刺史二年权河北大名宣抚副使三年以保全皇功加遥授安武军节度使改昭义军阅月权元帅左都监遣都统鄂屯喜格复取威州及获鹿县既而诏择义军为三等阿鲁岱奏自去岁初置帅府已按阅本军去其冗食部分既定上下相亲故能所向成功一旦析之彼居中下将气挫心懈而不可用且义军率皆农民已散归田亩趋时力作征集旬日农事废而岁计失乞无轻变易诏许之泽州旧隶昭义近年改隶孟州阿鲁岱奏泽州城部坚完器械具备今闻议迁于青莲寺山寨距州既远地形狭隘一旦有急徒弃名城以失太行之险则沁南昭义不通问矣乃复隶昭义军 【按地理志泽州旧为刺斗郡贞佑四年始隶潞州昭义军后改隶孟州元光二年升为节镇与本传所云旧隶昭义复隶昭义皆不合】 是岁潼关失守阿鲁岱趋备蓝田商州陈河北利害略曰今忻代撤戍太原帅府众纔数千平阳行省兵亦不多河东河北之势全恃潞州潞兵强则国家基本渐可复立乞复置潞州帅府兴定闲权参知政事行尚书省于益都阿鲁岱复立潞州最有功识辽州刺史郭文振举以为将既而阿鲁岱去潞州以张开代领其众与文振不相得遂不能守

钦定续通志卷四百三十八

●钦定续通志卷四百三十九 列传二百三十九

列传

金 【十七】

○金十七

纳塔谋嘉	邹谷	高霖	孟奎	乌凌阿与
温特赫达	王扩	伊喇富森	鄂	
屯忠孝	富蔡思忠	完颜寓	富察伊埒图	完颜仲元 完颜
阿林	完颜霆	乌库哩长寿	完颜佐【	
耀珠】	舒穆鲁仲温	富察阿里	完颜富拉塔	瓜尔佳锡尔格 珠
嘉臣嘉	赫舍哩和勒端	完颜伊尔必斯		
完颜特尔格	纳喇呼喇勒			

纳塔谋嘉

邹谷
高霖
孟奎
乌凌阿与
温特赫达
王扩
伊喇富森
鄂屯忠孝
富察思忠
完颜寓
富察伊埒图
完颜仲元
完颜阿林
完颜霆
乌库哩长寿
完颜佐 【耀珠】
舒穆噜仲温
富察阿里
完颜富拉塔
瓜尔佳锡尔格
珠嘉臣嘉
赫舍哩和勒端
完颜伊尔必斯
完颜特尔格
纳喇呼喇勒
△纳塔谋嘉

纳塔谋嘉上京路音德尔明安人大定末年选入东宫教郅王琮瀛王瓌读书以终场举人试补上京提刑司书史以廉能著称承安元年契丹图卜苏掠韩州信州提刑司择诸书史入奏者谋嘉请行五年特赐同进士出身调东京教授累除翰林修撰兼修起居注监察御史贞佑初迁吏部员外郎侍御史完颜寓举谋嘉才行志在匡国可预军政充元帅府经历官中都被围尝出资以贍贫民胥鼎奏应计所贍迁官谋嘉不受宣宗议迁都谋嘉曰不可河南地狭土薄他日宋夏交侵河北非我有疾当选诸王分镇辽东河南中都不可去也不听除唐州刺史入为

太常少卿兼左拾遗摄御史中丞未几摄太子詹事兴定元年潼关失守迁河南统军使兼昌武军节度使摄签枢密院事行院许州汰去冗食军士二千余人上书谏伐宋不听三年降颍州防御使宋人将袭颍州闻谋嘉有备乃引去四年召为翰林侍讲学士兼兵部侍郎同修国史五年卒

△邹谷

邹谷字应仲密州诸城人大定十三年进士第累官浑王府文学以吏才称职改授同知曹州军事召为刑部主事转大理寺丞时议差接送伴宋国使官令史周昂具数员呈请左司都事李炳乘醉见之怒曰吾口举两人即是安用奏为言官劾之事下大理寺众议当科违制谷曰口举两人一时之言耳当杖赎帝从谷议历官定海泰宁军节度使泰和六年致仕贞佑初卒

△高霖

高霖字子约东平人大定二十五年进士调安国军节度判官以父忧还乡里教授生徒恒数百人服除为国史院编修官建言黄河所以为民害者皆以河流有曲折适逢隘狭故致湍决今若开鸡爪河以杀其势可免数埽之劳凡卷埽工物皆取于民大为时病乞并河堤广树榆柳数年之后堤岸既固埽材亦便民力渐省朝廷从之改都水监丞签陕西路按察司事体访官员能否赴阙待对时南征调发繁急民稍稽滞有司皆坐失误军期罪霖言其枉悉出之贞佑二年除河平军节度使请城宜村为卫州以护北门帝从之寻改中都留守穆延尽忠弃中都南奔霖与子义杰率其徒夜出不能进谓义杰曰汝可求生吾死于此矣霖死义杰伏羣尸中以免事闻赠翰林学士承心谥文简

△孟奎

孟奎字符秀辽阳人大定二十一年进士补尚书省令史从参政马琪塞澶渊决河改中都左警巡使平章完颜守贞礼接士大夫在其门者号冷岩十俊奎其一也改上京等路提刑判官有契丹人额里页尝杀驿使有司以同名者系狱奎谏而出之别获杀驿使者迁同知西京路转运使事改武州刺史上言亲民之寄部选颇轻仗皆计资而得权归胥吏自今宜参用士人使纪纲其事未几调同知中都路转运使岁旱诏审录冤狱多所平反大安初除博州防御使凡属县事应赴州者不得泊于逆旅以防吏奸人皆便之俄为行六部侍郎劾奏监军完颜恩楚虚造功状恩楚坐免官诏以奎为宣差都提控贞佑初以疾卒谥庄肃

△乌凌阿与

乌凌阿与本名和卓大名路纳琳必喇明安人累官武胜军节度使贞佑二年改西安军节度使入为兵部尚书上言按察转运司【按百官志泰和八年以转运司权轻不能规措钱谷令诸路按察使并兼转运使故云按察转运司】拘榷钱谷纠弹非违此平时之治法今四方兵动民心未定军士动见刻削乞权罢按察及劝农使又东平屯兵万余可运滨盐易粮刍给之潼关及黄河津要将校皆出卒伍类庸懦不可用乞选材武者代之袞曹濮浚诸郡皆可屯重兵敕州县官劝民力穡至于防秋则清野保城下尚书省竟不施行又奏新制利买军器材物稽缓者的决此令若行有司必督责趣办民将不堪可量罚月俸从之兴定三年卒

△温特赫达

温特赫达字子达本名蒙古勒盖州安春明安人性敦厚寡言笑初举进士廷试搜阅官易其首小谓曰汝欲求作官邪达曰取人以才学不以年貌众咸异之明昌五年中第调固安主簿累迁太常少卿充陕西元帅府经历官兴定元年摄侍御史上疏论伐宋又言辽东兴王之地尹瑀图不能守走还南京度今之势可令濮王守纯行省盖州以系一方之心宣宗曰一子非所爱但幼不更事讵能辨此逾月上言天下轻重系于宰相迺来每令权摄甚无谓也今之将帅谋者不能战战者不能谋岂无其人但用之未尽耳宣宗曰人才难知故先试其称否卿所谓用之未尽者为谁对曰陕西统军使巴古喇忠直干略知延安府瓜尔佳寔伦深沈有谋能得士心虽有微过不足为累宰相高琪高汝砺恶其言俄充陕州行枢密院参议官累迁集庆军节度使时东方荐饥上疏言亳州户旧六万今存者无十一何以为州且调发数倍于旧乞量为减免是岁大水碭山下邑野无居民转运司方忧兵食达闻二县无主稻田且万顷收可数万斛即具奏诏户部尚书高夔专治其事所获无几夔坐累抵罪达自念失奏因感愧发病寻卒

△王扩

王扩字充之中山永平人明昌五年进士调邓州录事迁怀安令猾吏张执中诬败二令扩到官执中挈家避去累官德州防御同知诏赈贷山东西路饥民棣州尤甚扩于限数外给之泰和中山东盗起安抚张万公牒往督甫扩行章邱道中遇一男子与止不常捕讯果历城大盗也众以为神再迁监察御史被诏详谳冤狱时凡鬪杀奏决者章宗辄减死中外断狱皆以出罪为贤扩谓同辈曰生者从谳死者何辜非法也时将置三司治财扩上书曰大定闲曹望之为户部财用殷阜亦存乎人而已今三司职掌皆户部旧式官乃户部旧官吏亦户部旧吏愚于户

部而智于三司乎乃罢 【按百官志秦和八年省户部官员置三司贞佑闲罢之则是章宗时未尝罢也与传异】 张炜职办西北路粮草王谦发其奸蠹诏扩按之无所假借炜旧与扩厚使人让扩曰君不念同舍邪扩曰既奉诏安得顾故人大安中 【中州集作崇庆初】 为河北路按察签事贞佑二年上书陈河东守御策大槩谓分军守隘散则不成军合则势重馈饷一涂以逸待劳以主待客此上策也又曰军校猥众分例过优乞以千人为一军择望重者一人为万户两明安四穆昆教阅约束岂不简易而省费哉又曰按察兼转运本欲假纠劾之权以检括钱谷迹来军兴粮道军府得而制之太原代岚三军皆其州府长官如今通掌资储则弊立革按察职举矣又曰数免租税科余益繁民不为恩徒增廩给教练无法军不足用书奏不见省迁汴后召为户部侍郎迁南京路转运使太府监奏羊瘦不可供御宣宗召扩诘问扩奏官无羊皆取于民今民心未安宜崇节俭帝首肯之平章政事高琪阅尚食物谓扩曰上焦劳万机赖膳羞以瞻养臣子宜尽心扩曰此尚食监事何劳宰相高琪默然衔之有司夺市人衣以给往戍潼关军士京师大扰扩白宰相请三日造高琪怒不从潼关已破元兵至近郊遣扩行六部事侃办刍粮偕户部郎张好礼往商虢过中牟不可进高琪奏扩畏避削两阶降授陇州防御使规办秦巩军食逾月权陕西东路 【中州集作陕西西路】 转运使致仕兴定三年卒谥刚毅扩博学多才梗直不容物以是不振于时云

△伊喇富森

伊喇富森东北路乌尔呼河明安人以荫补吏部令史累官顺义军节度副使部内明安穆敦掠民妇女藏之窟室人无敢发者富森迹其所在率众入索之得四十三人穆敦抵罪徙莫州刺史上言沿边军官私役军人边防不治及扰动等事乞严勒禁诏行之大安初同知兴中府事督民缮城濠为御守备顷之兵果至攻其北城既接战使备其西薄暮果来攻以有备解去寻改广宁崇庆元年秋被牒如邻郡元兵薄城其子铜和尚率家奴拒战广宁赖以完富森还悉放奴为良终不言子之功识者多之未几充辽东宣抚副使岁大饥出沿海仓粟先赈后奏优诏奖谕至宁元年除巩傅兼吏部郎中呼沙呼作难富森称疾不出宣宗封呼沙呼泽王百官皆贺亦不往呼沙呼欲罪之除寿州防御使贞佑三年迁山东转运使久之致仕兴定二年宣宗御登贤门召致仕官赐食问时政得失富森乃上书曰为今之计惟先招徕乱人然后中都可复辽东可通今西北多虞而南鄙不敢撤戍刍粮调度仰给河南宜开宋人讲和之端抚定河朔策之上也山东残破羣盗满黦若宋人资以粮饷假

以官爵为患愈大当选官招捕谕使复业募其壮悍为兵亦致胜之一也又曰自承安用兵军中设监战官论议之闻动相矛盾平居选材勇自卫一旦有急驱疲懦出战宁不败事书奏朝廷略施用焉元光元年卒

△鄂屯忠孝

鄂屯忠孝字全道本名雅格懿州呼图克明安人幼孤事母孝大定二十二年进士调蒲州司候累迁翰林待制权户部侍郎佐胥持国治决河以劳进一阶除河平军节度使兼都水监遂疏七祖佛河及王村周平道口鸡爪孙家港复开东明南阳冈马蹶孙村诸河垒石为岸十余里民不胜病贞佑初附呼沙呼议欲降卫绍王为庶人宣宗不从顷之拜参知政事中都围急粮运道绝诏忠孝搜括民粟存两月食用悉令输官酬以银钞或僧道戒牒是时胥鼎计划军食奏许纳粟买官鼎已籍者忠孝再括之今百姓两输欲为己功左谏议大夫张行信上疏曰民食止存两月而又夺之便当绝食不独归咎有司亦怨朝廷之不察也宣宗善其言谓忠孝曰国家本欲得粮今既得矣姑从民便可也行信复奏忠孝平生矫伪不近人情急于功名诡异要誉惨刻害物忍而不恤句当河防河朔居民不胜其病军负民钱抑不令偿力荐呼沙呼后果作难犹自谓有功议籍没其子孙又云不当其偏党不公如此乃使与政如社稷何于是出知济南府事改知中山府寻卒谥惠敏

△富察思忠

富察思忠本名乌延隆安路海兰乌珠明安人大定二十五年进士为潞王傅被诏与学士张行简讨论武成王庙配等列思忠奏配享诸将不以世代为先后按唐祀典李靖李绩居吴起乐毅上圣朝太祖以二千之众破百万之师太宗克宋成此帝业秦王宗翰宋王宗望罗索古绅与前代之将各以功德明列可也泰和六年【按本史礼志议武成王庙配享事亦在是年】屡被宋兵诏议备御攻守之法思忠曰但当选择贤将宜攻宜守临时制变无不可者帝以为然贞佑初呼沙呼请废卫绍王为庶人思忠阿附其议曰窃人之财犹谓之盗况偷大位以私己乎宣宗不从二年春享于太庙思忠摄太尉醉殴礼直官御史台劾奏降秘书监顷之迁翰林学士同修国史卒

△完颜寓

完颜寓本名恩楚西南路明安人大定二十八年进士累官右司郎中翰林待制兼侍御史贞佑初议卫绍王事与呼沙呼相抗中都围急诏内外士庶皆得言事有王守信者本一村夫敢为大言■〈宀禹〉荐于朝诏署行军都统募市井无赖教阅为兵进退跳掷大似童戏因与

其众出城杀百姓之樵采者以为功又荐贾耐儿本岐路小说人俚语诙嘲以取衣食制运粮车千两时材木甚艰所费浩大观者皆窃笑之草泽李栋在卫绍王时尝事司天监李天惠依附天文假托占卜趋走贵臣俱为司天官尝密奏白气贯紫微主京师兵乱幸不贯彻得不成祸既而高琪杀呼沙呼宣宗益信之左谏议大夫张行信奏曰狂子庸流猥蒙拔擢参预机务甚无谓也司天之官占见天象据经陈奏使人主饬己修政转祸为福如有天象乞令诸监官公同陈奏所见或异则各以状闻不宜偏听帝召行信与■〈宀禹〉面订守信事复与近侍就决于高琪言守信不可用帝始以行信之言为然兴定元年■〈宀禹〉行山东路元帅府事苗道润与伊喇特尔格不协诏■〈宀禹〉和辑之十二月密州破为乱军所杀

△富察伊埒图

富察伊埒图东京明安人勇健多力为武器署令从军兵溃被执贞佑二年与降兵万余俱脱归三年充辽东上京等路宣抚使与上京行省富察乌锦争权及卖隆安战马擅造银牌睚眦杀人已而矫称宣召奔隆安赴南京宣宗皆释不问兴定二年行枢密院于邓州御史台奏伊埒图在军中买沙覆道盗用官银矫制收禁书指斥銮輿使亲军守门护卫押宿拟前后卫仗婢妾效内人妆饰等事诏吏部尚书阿布哈布卜苏鞬之坐诛

△完颜仲元

完颜仲元本姓郭氏中都人大安中兴阿林俱应李雄募数有功赐姓完颜氏仲元兵最强号花帽军贞佑三年权山东东路宣抚副使四年山东乏粮仲元欲屯军于黄河侧上书乞补京官且面陈恢复河朔策诏曰卿兄弟鸠集义旅所在立功今求入见其意固嘉东平方危正赖卿等相为声援俟兵势稍缓即徙军附河屯驻此时卿来盖未晚也未几改河北宣抚副使屡有功以本职为从宜招抚使计约苏尔坦等图恢复时红袄贼据涟水县仲元遣提控罗索击破之败祝春擒郭伟余众奔溃遂复涟水县是岁改商州经略使未几潼关失守仲元连趋商虢复至嵩汝皆弗及仲元因上书欲伐西夏以张兵势【按西夏纪仲元请伐夏在兴定元年】又曰陕西一路最为重地潼关禁坑及商州诸隘俱当预备可选精兵分地戍之兴定元年为单州经略使败宋兵于厓山复败步骑于盱眙败红袄贼于百里港获老幼万余人皆纵遣之宋人围海州仲元军高桥令阿林遶出其后夹击之宋兵解去三年仲元乞以所部渡河诏屯宿州与右都监赫舍哩德同行帅府事元光元年知凤

翔府事凤翔被围左监军持嘉喀齐喀来济军仲元让喀齐喀总兵事喀齐喀曰公素得众心不必以官位见让仲元请身先士卒谕诸将士有奇功者即承制超擢延扎哈玛尔力战功最辄授通远军节度使围解奏请擅除拜之罪宣宗嘉其功皆奖谕之正大闲为兵部尚书寻卒 【按大金国志云蔚州人郭忠率山后军民与元兵战屡败之金人名其军曰花帽军又云清州郭仲元与苗仙武等聚兵扼险元主问罪于金乃召回赐死以本传核之志恐误】 仲元沈毅有谋南渡后最称名将云

△完颜阿林

完颜阿林本姓郭氏大安中李雄募兵与兄完颜仲元等俱应募贞佑初为通州防御使宣宗迁汴累迁横海军节度使赐以国姓是时仲元亦积功知济南府赐姓完颜与阿林俱加从宜招抚使且令约苏尔坦等恢复中都阿林所部黄鹤袖军驻鱼台者桀骜不法有司乞徙于滕州诏阿林就处置之顷之破红袄贼郝定于泗水县柘沟村擒送京师斩之未几改辉州经略使阿林有众万五千诏分五千隶东平行省其众不欲行阿林以为请帝然之加遥授知河南府事应援陕西阿林将兵西赴至潼关闻京兆已被围游骑至华州陕西行院欲令驻军商虢拒东向之路阿林上奏臣本援陕西遇难而止岂人臣之节自古用兵步骑相参乃可以得志今各有所属临难不救互相彼此臣所统皆步卒愿赐马军千人则京兆之围不足解矣宣宗谓皇太子曰阿林赴难不回而军势单弱且驻内地以观事变并付以虢州兵五千使乘隙而进兴定二年 【按阜角堡裴家庄诸捷及阿林战没宣宗纪俱在兴定二年原文作元年误今删正】 伐宋宋统制吴筠守阜角 【原注角又作郊】

再克其次城宋兵纵火而出阿林以骑兵邀之遣步卒袭其后宋兵败生获吴筠及将校二百人再败宋兵于裴家庄又败之于寒山岭复败之于稍子岭是时三月宿麦方滋阿林留兵守之已而宋兵大至兵败战没赠金紫光禄大夫西京留守

△完颜霆

完颜霆本姓李氏中都宝坻人贞佑初县人共推霆为四乡部头招集离散纠合义合众赖以安招抚司奏其事迁两官与弟云率数千巡遼固安永清闲遥授宝坻县丞充义军都统刘璋说使出降霆缚送经略司中都仓尽霆遣军分护清沧河路召募贾船通饷道从河北路宣抚使完颜仲元保清沧仲元奏其功乞赐金牌廷议霆辈忠勇绝人遂与之改大名路提控复取玉田三河香河三县副将孙江以沧州降于王楫楫使江将兵围观州霆乃诈作书与江约复取沧州王楫得书果疑江与霆有谋召还杀

之霆乃定观州而还进官三阶赐姓完颜氏屯海州俄
权单州经略司事充宣差总领都提控兴定元年泰安滕兗土寇蠡起东平行省侯摯遣
霆率兵讨之降其党二万人红袄贼于忙儿寇海州霆
击走之二年宋高太尉兵二万驻胸山霆军乏粮采野菜麦苗杂食之宋兵栅胸山下隔
湖港霆作港中暗桥遣万户胡仲珪副统刘赞率死士
由暗桥登山霆率兵四千趋山下约以昏时举火为期上下夹击宋兵大败斩高太尉彭
元帅于阵余众溃去逾月宋兵复至霆逆战驻兵于城
外宋人踰城而入经略使阿布哈努色尔等率兵扼战城赖以完元米元年为京兆安抚
使二年卒

△乌库哩长寿

乌库哩长寿临洮人本姓包氏泰和闲伐宋有功贞佑初夏人攻会州长寿与战于
窄上峡先登陷阵诏录前后功遥授同知陇州防御事
世袭本族都巡检二年赐今姓夏人围临洮扼渭堡内外不通统军司募人侦察消息长
寿应募馘二人擒一人问得临洮及夏兵事势以劳迁
宣武将军 【按西夏纪载贞佑二年夏人攻环州刺史乌库哩庆寿败之于境上四年败
夏兵于寇安堡其官则右都监也纪官纪事俱异本
传】 招降诸蕃族兴定元年夏人大入陇西长寿拒战二年伐宋宋守戍者舍诸部族兵
来拒长寿击败之复破其援兵四千于荔川寨拔宕昌
县进攻西和州宋兵入保城坚壁不出乃还 【按宋史宁宗纪是年王逸等率忠义复阜
郊斩宗颜赞长寿仅以身免本传专录其功故不载
】 遥授陇安军节度使升总领都提控改通远军节度使夏人攻定西时长寿弟世显已
降夏人夏人执至定西城下谓曰若不速降即杀汝弟
长寿不顾奋战夏兵退世显既降二子公政重寿当缘坐宣宗嘉长寿守定西功释公政
兄弟有司廩给之未几夏人复攻会州移兵临洮长寿
伏精兵五千于定西险要闲败夏兵三万骑既而复至攻城甚急长寿乘城拒战矢石如
雨乃解去是岁卒

△完颜佐 【耀珠】

完颜佐本姓梁氏为武清县巡检完颜辉珠本姓李氏为柳口镇巡检久之以佐为
都统耀珠副之戍直沽寨贞佑二年虬军遣张晖等三
人来招佐佐执之翌日刘永昌率众二十人持文书来署其年曰天赐佐擢之麾众执永
昌及晖等并斩之宣宗嘉其功迁佐奉国上将军耀珠
镇国上将军皆赐姓完颜氏诏曰自今有忠义如是者并一体迁授

△舒穆噜仲温

舒穆噜仲温本名罗哈懿州呼图克明安人累官左副点检迁知临洮府事泰和闲

伐宋青伊克内附进爵二级诏曰青伊克之来乃汝管内与有劳焉顷之诸道进兵仲温以陇右步骑五千出盐川八年罢兵改知河中府崇庆初迁陕西统军使贞佑二年宋人攻泰州仲温率兵败之寻充本路安抚使改镇南军节度使致仕兴定三年卒

△富察阿里

富察阿里兴州路人以荫补官累迁右卫副将军宋兵犯分道铺驰驿赴边伺其入以伏兵掩之改提点器物局泰和闲伐宋从右副元帅匡为副统攻宜城县取之八年以功迁武卫军副使指挥使大安元年同知南京留守事徙寿州防御使迁兴平军节度使崇庆初迁元帅右都监明年转左都监时都城被围道路梗塞阿里由太原至真定率师赴援抵中山不克进贞佑二年移驻大名征河南镇防军图再举众既惮于行而阿里遇之有厚薄军变遇害众因逃散宣宗诏元帅左都监完颜弼安集其军赦首恶以下河南统军司更加抚谕

△完颜富拉塔

完颜富拉塔西南路安春必尔罕明安人充护卫除泰定军节度副使累官原州刺史坐买部内马亏直夺官一阶降北京兵马都指挥使宁远军刺史历同知临洮府西京留守事崇庆元年迁镇武军节度贞佑四年【按宣宗纪贞佑四年罢河北诸路宣抚司更置经略司是续通考谓金无经略使者误也特百官志未之详载耳本传不纪其年特为增入】初置东西面经略司就充西面经略使上言管内太和岭诸隘屯兵控制边要行元帅府辄分臣兵万二千戍真定余众不足守御近日复简精锐二千七百人以往今兵不满万老羸者十七八臣死固不足惜顾国定之事不可不虑新设经略移文西京太原河东取军马大数并称非臣所统诏真定元帅府还其经锐二千七百人西京太原岚州有警急约为应援州郡皆不欲属经略司遂罢经略官入为签枢密院事迁兵部尚书兴定四年卒

△瓜尔佳锡尔格

瓜尔佳锡尔格上京路明安人明昌五年进士为宿州提控兴山东宣抚完颜弼攻大沫堠贼众千余戏战锡尔格以奇兵击之尽殪提控默呼入自北门遂擒刘二祖兴定元年破宋兵于宿州以功遥授安化军节度使移定海军卒

△珠嘉臣嘉

珠嘉臣嘉北京路明安人袭父穆昆泰和闲伐宋隶陕西完颜纲麾下历同知河闲府事兴定元年行枢密院于寿州由寿泗渡淮伐宋二

月破宋兵三千于渐湖滩斩三百级有诏蹂践宋境上毋深入臣嘉驻霍邱植冈村纵轻骑钞掠焚毁积聚获宋谍者张聪知宋兵二千屯高柳桥老幼甚众其寨两城环之以水臣嘉遣张聪持牒召之不从先令水军径渡攻之军士牛青操戈刺门卒皆披靡散去遂登陴大军继之夷其寨而还遇宋兵数千于梅景村臣嘉伏兵林闲以步卒诱致之伏发宋兵溃追奔十余里生擒其将阮世安等五人获器仗甚众二年赏征南功升职一等迁元帅右都监转左都监元光元年卒

△赫舍哩和勒端

赫舍哩和勒端西南路和抡松科明安人袭兄尼楚赫穆昆泰和闲伐宋屡破宋兵大安三年擢为东路宣抚司都统击败伊喇瑠格于御河寨贞佑三年布什万努叛取咸平东京藩澄诸州侵博索近境复掠上古城和勒端屡遣将击却之九月万努兵出宜风及易池和勒端率兵与战其众溃去因招降之择其丁男补军攻城邑之未下者四年充徐州界都提控红袄贼数万攻邳州和勒端破之于黄山贼围沂州同知防御事布萨萨哈突围出求救和勒端率兵赴之萨哈还入沂州与内外夹击杀万余人贼乃去枢密副使布萨安贞上其功因奏曰和勒端天资忠实深晓军事萨哈勇而有谋皆得军民心乞加擢用进金紫光禄大夫兴定元年自新息渡淮伐宋破沙度店至定城以少击众战不留行未几充宣差参议官复渡淮连破宋兵获其将沈俊四年冬上言窃闻宋人与李全将并力来攻当预为之防枢密院奏可召和勒端与朝臣面议五年正月召至京师疾病不能入见力疾草奏大略以南北皆用兵当豫防其患乃防河数策遂卒

△完颜伊尔必斯

完颜伊尔必斯字彦成海兰路特克绅必喇明安人明昌五年进士为赫舍哩执中经历官执中围楚州纵兵大掠坐不谏正决杖五十贞佑初累官迁国子祭酒擢河平军节度使河北西路宣抚副使权右副元帅参知政事兴定元年真拜参知政事为博索路元帅布什万努据辽东侵掠博索之境肇州守江山参议官伯特呼图皆有异志宣抚使海努不迎制使坐而受诏伊尔必斯械系之辄矫制大赦诸道众乃稍安然后请罪于朝初知广宁府事温特赫成格勒与伯特呼图约为兄弟成格勒兵隶伊尔必斯猜忌不协宣宗闻之召成格勒不受诏伊尔必斯杀之呼图怒乃率众攻伊尔必斯遂还害伊尔必斯宽厚爱人敏于吏事能治剧要识者以为用之未尽云

△完颜特尔格

完颜特尔格性淳直体貌雄伟年二十四袭父率宾路海兰哈达明安授为广威将军御下惠爱累迁同知武胜军节度使事从完颜匡攻光化军拔鹿角夺门以入遂克之进攻襄阳为前驱获生口知江渡可涉处阴植标庆识之大军至导之毕济屡战皆捷匡围德安特尔格总领攻城筑垒于凤凰台并城作甬道立鹅车对楼攻之击走张统制兵时暑还屯邓州兵罢进官两阶贞佑二年入卫中都迁东北路招讨使布什万努在咸平忌特尔格兵强牒取所部骑兵二千又召泰州军三千及户口迁咸平特尔格察其有异志不遣宣抚使承充召特尔格赴上京命伐扶余路既还适万努代承充为宣抚使摈前不发军罪下狱被害谥勇毅

△纳喇呼喇勒

纳喇呼喇勒大名路博尔欢明安人性直淳直寡言笑好读书博通今古承安二年进士第一被诏括牛于临潢上京等路丞相襄有田在肇州家奴匿牛不以实闻械正其罪豪民惧无敢匿者使还襄称其能居父丧尽礼御史举其清节服除转修撰寻除曹州刺史豪民布萨素赫立私渡于定陶闲逃兵盗劫皆籍为蠹橐呼喇勒捕治之穷竟其党阖郡肃然贞佑二年权河东南路宣抚副使是时兵兴呼喇勒完城郭缮器械料才壮为乡兵延问耆老招致儒士咨以备御策筹划储侍劝富民出粟郡赖以完赐诏褒谕改权经略使被召以疾不能行卒于绛州

钦定续通志卷四百三十九

●钦定续通志卷四百四十 列传二百四十

列传

金 【十八】

○金十八

张暉【行简行信】 贾益谦 刘炳 珠格高琪 伊喇

托卜嘉

张暉

贾益谦

刘炳

珠格高琪

伊喇托卜嘉

△张暉

张暉字明仲莒州日照县人博学该通正隆五年进士调陈留主簿累迁太常丞兼左赞善大夫章宗初立充宋国报谕使至盱眙宋人请赴宴暉曰大行在殓未可及受赐不舞蹈宋人服其知礼明冒元年太傅图克坦克宁薨

章宗欲亲为烧饭是时孝懿皇后梓宫在殡暉奏太祖
时享尚且权停若为大臣烧饭礼有未安乃止上封事者言提刑司可罢暉曰天下守令
安得皆称其职提刑之任诚不可罢因举汉刺史六条
以奏帝曰卿与朕合意礼部尚书孙即康鞫治镐王永中事诏暉复讯奏论如法承安元
年召问南郊大祀今用度不给俟他年可乎暉曰陛下
即位于今八年大礼未举宜亟行之帝复问僧道三年一试八十取一不亦少乎对曰此
辈浮食无益有损不宜滋益帝曰周武帝唐武宗后周
世宗皆贤君其寿不永似亦有因对曰三君矫枉太过今不毁除不崇奉是为得中矣是
岁郊见上帝焉三年为御史大夫恳辞不许明年坐奏
事不实夺一官解职起为武安军节度使致仕暉自妻卒后不复娶亦无姬侍斋居与二
子讲论古今诸孙课诵夜分乃罢最明古今礼举家法
为士族仪表子行简行信

张行简

张行信

张行简

行简字敬甫颖悟力学淹贯经史大定十九年进士第一除应奉翰林文字章宗即位
累迁礼部郎中司天毫刘道用改进新历诏学士院
更定历名及覆奏乞覆校俟将来月食无差然后赐名及覆校测验果差乃不用行简奏
往年饥民弃子或勺以与人其后诏书官为收赎或其
父母衣食稍充即识认官断与之自此饥荒流离道路人不肯收养饿死沟中乞诏以后
不得复归帝是其言时百官贺皇太子元正生日皇太
子立受不答拜贺宰执则坐答揖行简以为近于坐受其礼重于皇太子恐于义未安特
奏论之宰执立答之礼自此始行简因论典故之学乞
于太常博士之下置检阅官二员又奏国朝虽有集礼至于食货官职兵刑沿革未有成
书乞定会要以示无穷泰和五年迁顺天军节度使帝
谓行简曰卿未更治民今至保州民之情伪卒难臆度若何治之对曰臣奉行法令不敢
违失狱讼之事以情察之钤制公东禁抑豪猾以镇静
为务庶几万分之一六年召为礼部尚书七年帝念镐郑二王误于天常藁葬郊野欲复
爵改葬使行简草诏文行简乃具汉淮南厉王长楚王
英唐隐太子建成巢刺王元吉譙王重福故事为奏并诏草遂施行焉贞佑初转太子太
傅上书论议和事是时百官议者虽有异同大槩以和
亲为主焉三年卒谥文正行简端慤慎密与弟行信同居数十年人无闲言着有文章十
五卷礼列纂一百二十卷

张行信

行信字信甫先名行患避庄献太子讳 【归潜志作避末帝旧讳按末帝名承麟归潜志以哀宗为末帝则守礼其旧讳也庄献太子名守宗以本传为是】 改焉大定二十八年进士泰和三年签河东路按察司事四年召见因言二事一依旧移转使目以除民害一除邳地下宜麦税粟许纳麦以便民帝是其言崇庆二年为左谏议大夫时呼沙呼已除名为民赂遗权贵将复进用举朝无敢言者行信乃上言斥其残忍凶悖今若复用恐为害更甚前日书再上不报及呼沙呼弑逆人甚危之行信坦然而不顾也 【按中州集云时呼沙呼自为太师尚书令行信为礼部尚书一日下礼部铸监国实行信持不可呼沙呼大怒然亦竟不能杀也本传载行信为礼部尚书在贞佑三年】 宣宗即位上疏请立太子慎选宫僚辅成德器帝嘉纳之又言自兵兴以来将帅甚难其人愿令重臣各举所知才果可用即赐召见褒显奖论令其自效必有奋命报国者委任责成毋拘文法使得尽其智能则克复之功可差又奏御兵之道无过赏罚窃见内族额尔克护粮通州遇兵辄溃宜明正其罪诏报曰卿意具悉额尔克等已下狱矣时中都受兵方遣使请和握兵者畏缩不敢战曰恐坏和事行信上言和与战二事本不相干奉使者自事议和将兵者惟当主战自崇庆以来皆以和误顷北使既来然犹破东京略河东今我使方行和之成否盖未可知宜及时拒战使敌气少阻则和议亦不日可成矣帝心知其善而不能行三年迁安武军节度使上书言四事一曰官军讨贼宜明敕有司严为禁约毋令劫掠平民二曰郡县官勿数遣代庶几人尽其才事易以立三曰当军官有敢进战者即当责以立功不宜便授他职四曰山东军储皆鬻爵所获及持牒求仕选曹往往驳退倘复欲鬻爵其谁信之朝廷多用其议八月召为吏部尚书转礼部尚书四年尚书省奏王恉尝言本朝绍高辛黄帝之后当为黄帝立庙又初兴旗帜尚赤当修火德之祀行信奏曰按始祖实录止称高丽而来未闻出于高辛国初因完颜部多尚白故取金之不变以为国号章宗时议以继亡宋火行之绝定为土德恉言狂妄帝是之兴定元年拜参知政事时高琪为相专权用事恶不附己者衣冠之士动遭窘辱惟行信屡引旧制力诋其非会宋兵侵境朝议遣使详阅高琪等以为失体行信独上疏曰今以遣使为不当臣窃惑之议者不过曰遣使则为示弱其或不报报而不逊则愈失国体臣独以为不然彼幸吾衅隙数肆侵掠我大国不责以辞而敌以兵兹非示弱乎至于问而不报报而不逊曲自在彼何损于我且国步多艰戍兵滋久不思所以休息之如民力何惟陛下察之帝复令尚书省议高琪等奏今日之事与昔不同而高

汝砺亦上言先遣使不便议遂寝二年出为彰化军节度使兼泾州管内观察使去未几帝谕宰臣曰自张行信降黜卿等遂缄默矣行信至泾即上书请捐银市马又言战士有功朝廷遣论赐以官赏此诚得激劝之方也然赠遣使者或马或金至敛所部以应之且有因而获罪者乞令有司明立等夷无伤大体帝多采纳焉元光元年改靖难军节度使未几致仕哀宗即位起为尚书左丞言事稍不及前寻复致仕家居惟以经书教子孙为事葺园池汴城东筑亭号静隐时与侯摯辈游艺其闲正大八年卒于嵩山崇福宫行信为人纯正真率不事修饰两登相位殆若无官遇事辄发无所畏避每奏事帝前旁人动色而行信坦如也卒之日虽平昔甚媚忌者亦曰正人亡矣

△贾益谦

贾益谦字彦亨沃州人【归潜志作东平人】本名守谦避讳改焉大定十年词赋进士历仕州郡以能称明昌闲入为左司郎中五年夏帝将幸景明宫清暑益谦连上疏谏之时镐王以疑忌下狱帝怒甚朝臣无敢言者益谦上章论其不可言极恳切既而以议卫王事有违帝意解职贞佑三年召尚尚书省右丞会宣宗始迁汴益谦乃建言汴之形势惟恃大河今河朔受兵羣盗并起宜严河势以备不虞凡自北来而无公凭者勿听渡是时河北民迁避河南者甚众侍御史刘元规上言侨户宜与土民均应差役益谦曰河北人户本避兵而来族寓仓皇之际无以为生若又与地著者并应供亿必骚动不能安居矣岂主上矜恤流亡之意乎帝甚嘉赏三年八月进拜尚书左丞四年致仕居郑州兴定五年尚书省奏修卫王实录初呼沙呼弑卫王立宜宗一时朝臣皆谓卫王失道天命绝之呼沙呼实无罪且有推戴功独张行信抗章言之不报举朝遂以为讳及是史官因益谦尝事卫王宜知其事乃遣编修一人就郑访之益谦曰我闻海陵被弑能暴其恶者辄得美官故当时之所附会若卫王为人勤俭慎惜名器较其行事中材不及者多矣吾知此而已设欲饰言以实其过吾亦何惜余年朝议伟之正大三年卒三子贤卿颐卿翔卿皆以门资入仕

△刘炳

刘炳葛城人每读书见前古忠臣烈士为国家尽策虑万世安辄叹息景慕贞佑三年中进士第即日上书条便宜十事一曰任诸王以镇社稷臣观往岁王师屡战屡衄率皆自败承平日久人不知兵将帅非才既无靖难之谋又无效死之节外托持重之名而内为自安之计择骁果以自随委疲懦以临阵法度日紊土地日蹙自大驾南巡远近相望益无固志愿陛下

择诸生之英明者总监天下之兵北驻重镇移檄远近
则四方闻风者皆将自奋前死不避折冲夫人情可以气激不可以力使一卒先登则万
夫齐奋此古人所以先身教而后威令也二曰结人心
以固基本天子惠人不在施予在于除其所同患因所利而利之之艰危之后易于为惠
臣愿宽其赋役信其号令凡事不便者一切停罢时遣
重臣按行郡县延见耆老问其疾苦选廉正黜贪残拯贫穷恤孤独劳来还定则效忠徇
义无有二志矣三曰广收人材以备国用河南陕西车
驾临幸当有大慰士民之心其有操行为民望者稍擢用之四曰选守令以安百姓郡
守县令天子所恃以为治百姓所依以为命者也今众
庶已敝官吏庸暗与奸为市公有斗粟之赋私有万钱之求远近嚣嚣无所控告自今非
才器过人政迹卓异者不可使任此职五曰哀忠义以
励臣节忠义之士奋身效命力尽城破而不少屈事定之后有司略不加省弃职者顾以
恩贷死事者反不见录使为臣者皆知杀身之无益临
难可以苟免甚非国家之利也六曰务农力本以广积旧此强兵富民要术也七曰崇节
俭以省财用今海内虚耗田畴荒芜宜拙习从俭以纾
生民之急八曰去冗食以助军资兵革之后人物凋丧郡县官吏署置如故甚非审权救
弊之道九曰修军政以习守战自古名将料敌制胜训
练士卒故可使赴汤蹈火百战不殆兵法曰器械不利以其卒与敌也卒不服习以其将
与敌也将不知兵以其主与敌也主不择将以其国与
敌也可不慎哉十曰修城池以备守御保障国家惟都城与附近数郡耳此地不守是无
河朔矣黄河岂足恃哉书奏宣宗异焉复试策问炳对
以审择守将则城邑固兵不侵民则兵民和敛散相权则钞法通劝农薄赋则物价平宣
宗虽异其言而不能用但补御史台令史而已

△珠格高琪

珠格高琪西北路明安人以护卫累官临洮府同知泰和六年伐宋守备巩州宋兵
自辘轳岭入高琪奋击破之大安三年升缙山县为镇
州以高琪为防御使领乱军贞佑初诏移军守御中都每战辄败赫舍哩执中戒再不胜
军法从事出复败高琪惧诛遂以兵围执中第杀之持
首诣阙待罪宣宗赦之诏曰呼沙呼畜无君之心形迹露见高琪诛之实由朕意顷之拜
平章政事大府监丞游茂以高琪权重密奏请裁抑之
不听完颜苏呼复奏曰高琪本无勋望向以畏死擅杀呼沙呼妒贤能树当与窃弄威权
自作威福去岁都下书生樊知一诣高琪言乱军不可
信恐生乱高琪以刀杖决杀之遂无复敢言军国利害者以臣观之此贼灭乱纪纲祸害
忠良实有不欲国家平治之意惟陛下断然行之社稷

之福也宣宗曰朕徐思之慎无泄也四年元兵取潼关次嵩汝闲御史台言兵踰潼关啼
洩深入重地近抵西郊彼知京师屯宿重兵不复叩城
索战但以游骑遮绝道路而别兵攻击州县是亦困京师之渐也请以陕西兵扼拒潼关
与右副元帅富察伊富必斯为犄角之势选在京勇敢
之将十数人各付精兵随宜伺察且战且守复论河北亦以此待之诏付尚书省高琪止
欲以重兵屯驻南京以自固州郡残破不复恤也未几
进拜尚右丞相请修南京里城又请伐宋以广疆土四月遣乌库哩庆寿完颜萨布经
略南边自是与宋绝矣兴定元年右司谏许古劝与宋
议和高琪沮之集贤院咨议官吕鉴言隆冬沍寒吾骑得骋当重兵屯境上驰书往论城
为大便若俟春和则利在于彼难与议矣高琪以为狂
妄胥鼎复谏止伐宋高琪曰大军已进无复可议遂寝二年宣宗以南北用兵深以为忧
右司谏吕造上章乞诏内外百官各上封事直言无讳
宣宗嘉纳诏集百官议河北陕西守御之策高琪心忌之不用一言时筑汴京里城濠未
及浚宣宗曰无濠可乎高琪曰苟防城有法兵来自可
效力宣宗曰曷若不令至此为善高琪无以对 【按续通鉴云时金主虑扰民募致譬五
十万者迁一官百万升一等及城成高琪受金鼎之
赏建碑书功于会朝门本传略而不载或以其功为无足录欤】 高琪自为宰相专固权
宠与高汝砺相唱和高琪主机务高汝砺掌利权附己
者用不附己者斥凡言事忤意及负材力或与己颡颃者对帝阳称其才使干当于河北
阴置之死地自罢枢密元帅后常欲得兵权遂力劝伐
宋置河北不复为意凡精兵皆置河南苟且岁月不肯辄出一卒以应方面之急英王守
纯欲发其罪密召布什萨喇勒富察呼鲁等谋之布萨
纳木舍布以告高琪英王惧不敢发顷之高琪使奴萨布杀其妻及归罪萨布送开封府
杀之以灭口事觉宣宗久闻高琪奸恶遂因此事诛之
【按归潜志载高琪杀其妻为宰执所奏法当退避高琪忿然索马遽归宣宗命亲兵擒
下狱以大不敬论杀之较本传尤详尽附识之】 时
兴定三年十二月也初宣宗将迁南欲置乱军于平州高琪难之及迁汴戒托恩多厚抚
此军托恩多辄杀乱军以至于败宣宗尝曰坏天下者
高琪托恩多也终身以为恨云

△伊喇托卜嘉

伊喇托卜嘉东北路明安人明昌元年累官西上合门使二年袭父穆昆泰和闲伐
宋有功累迁武宁军节度使招徠中都乱军无功平章
高琪芘之召为武卫军都指挥使应奉翰林文字寻知河南府事徙彰化军节度使上言
尽籍山东河闲大名明安人为兵老弱城守壮者捍御

又言河东地险人勇步兵为天下冠可尽调以戍诸隘从之自是河东郡县屯兵少不可守矣改知临洮府事兼陕西副都统贞佑三年十一月破夏兵于熟羊寨平章高琪率宰臣入贺曰托卜嘉以少败众盖陛下威德所致宣宗曰自古兴国皆赖忠贤今兹立功皆将帅诸贤之力也乃以托卜嘉为劝农使兼知平凉府事进阶银青荣禄大西四年伐西夏攻威灵安会等州兴定元年知庆阳府事三年迁元帅左都监卒

钦定续通志卷四百四十

●钦定续通志卷四百四十一 列传二百四十一

列传

金 【十九】

○金十九

高汝砺 胥鼎 侯摯 巴古喇 师安石

高汝砺

胥鼎

侯摯

巴古喇

师安石

△高汝砺

高汝砺字岩夫应州金城人大定十九年进士第莅官有能声承安元年为左司郎中一日奉事紫宸殿时侍臣皆回避帝凉扇忽堕案下汝砺非职不敢取进帝谓其知体未几擢左谏议大夫以赋调军须郡县有司或不得人追胥走卒规取货赂深为民害建言自今若因兵调发有犯者乞依法治之时遇奏事台臣亦令回避汝砺上言国家置谏臣以备侍从盖欲周知时政以参得失非徒使排行就列而已请自今有司奏事谏官得以预闻帝从之又言年前十月尝举行推排之法寻以踰时而止诚知圣上爱民之深也近年以来边方屡有调发贫户益多如止循例推排奸弊百端欲望物力均一难矣莫若据实通检预令有司严立罪赏截日立限其闲有可以轻重者斟酌行之使富者不得以苟避困者有望于少息则赋税易办人免不均之患矣是岁十月帝谕尚书省遣官诣各路通检民力命户部尚书贾执刚与汝砺先推排在都两警巡院令诸路所差官视以为法焉泰和六年拜户部尚书 【按食货志载汝砺论钞法在泰和七年归潜志则云汝砺为三司副使倡行钞法考三司置于泰和八年当以本传为是】 时钞法不能流转汝砺随事上言多所更定民甚便之贞佑二年拜汝砺为参知政事三年朝议徙河北

军户家属于河南留其军守卫郡县汝砺言如此则所过百姓必将惊疑况军人已去其家而令护卫他人以情度之其不肯尽心必矣不报军户既迁将括地分授之汝砺奏民佃官田久远之计也一旦夺之则忿心生矣惟当倍益官租以给军粮之半复以系官荒田牧马草地量数付之令其自耕帝从其请寻迁尚书右丞四年朝廷议发兵河北护民芟麦而民闲流言谓官将尽取之高琪奏遣兵居冲要镇遏土寇仍许收逃户之田则军民两便汝砺曰甚非计也河朔之民所恃以食者惟此麦耳今已有流言而复以兵往是益使之疑惧也不若听其自便令宣抚司禁戢无赖不致侵扰足矣逃户田令有司收之以充军储可也于是罢不发兵汝砺以数乞致仕不从乃上言曰立非常之功必待非常之人今大兵既退正完葺关隘简练兵士之时须得通敏经纶之才预为筹划俾济中兴伏见尚书左丞兼行枢密副使胥鼎才擅众长身兼数器乞召还朝省不从时高琪欲岁阅民田征租汝砺言不可者三每岁检括略无休息民将厌避耕种失时一也检括之时里胥得以暗通货赂上下其手虚为文具二也民田与军田犬牙相错彼或阴结军人以相冒乱临时少于原额则资储阙误三也议遂寝兴定元年上疏曰言者请姑与宋人议和窃以为非计宋人边备未撤则议和与否既无以异或礼例之外别有求索言涉不逊将若之何宋弃信背盟侵我边鄙曲在彼也彼若请和于理为顺岂当先发此议而自示弱耶时朝廷以贾全苗道润等相攻不和将分界州县别署名号以处之汝砺言河北诸帅多本土义军非若素宦于朝知礼义识名分之人也姑牢笼用之彼互相攻劫则势寝弱勢弱则朝廷易制今若分地与之久之弱者皆并于强强者之地不可复夺是愈难制也不若姑令行省羁縻和辑多方牵制使不得逞异时边事稍息气力渐完若辈又何足患哉议遂寝帝尝谓汝砺侍朝恐不任其劳许坐殿下汝砺以君臣分甚严不敢奉命三年王三锡建议榷油高琪以用度方急劝帝行之汝砺上言古无榷法自汉以来始置盐铁酒榷均输官以佐经费末流至有算舟车税闲架其征利之术固已尽矣然亦未闻榷油也利归于公则害及于民当此之际民可以重困乎若从三锡议是以举世通行之货为榷货私家常用之物为禁物自古不行之法为良法窃为圣朝不取也帝是之重违高琪意诏集百官议礼部尚书杨云翼翰林侍读学士赵秉文等皆以为不可乃罢之四年拜尚书右丞相封寿国公五年屡乞致政元光二年又乞致仕皆不许及哀宗初即位谏官上言汝砺欺君固位天下所共嫉宜黜之以厉百官又有投匿名书高某不退当杀之

【按归潜志言汝砺在中书十年无正言

直谏闻于外及出支军粮颇靳且折支他物军民号不支本传载其为众所愤嫉高琪传言其相为唱和盖以此也】 汝砺因是告老优诏不许
正大元年卒汝砺为人慎密廉洁能结人主知然循嘿避事故为相十余年未尝有谴诃贪恋不去当时士论颇以为讥云

△胥鼎

胥鼎字和之尚书右丞持国子大定二十八年进士累官右司郎中转运工部侍郎至宁初由户部尚书拜参知政事贞佑元年为泰定军节度使未赴改知大兴府事二年京民阙食鼎奏有能贍给贫人者宜计所贍迁官遂定权宜鬻恩例格全活甚众改知平阳府事兼河南路兵马都总管权宣抚使三年建言利害十三事若积军储备黄河选官谏狱简将练卒钞法版籍之类帝颇采用焉又言郡再被兵庾廩无两月食比闻北方聚兵野狐岭势将深入战御有期储积未备乞降空名宣敕及度牒以补军储诏有司亟给之朝廷钦起代州戍兵五千鼎言代为边要正宜益兵岂可撤兵乃止又言近闻朝廷令臣清野窃谓臣所部乃河东南路太原则北路也元兵若来必始于北当先北而后南况北路禾稼早熟其野既清兵无所掠势当自止不然是资兵而召之南也臣已移文北路宣抚司矣乞更诏谕之既而元兵果出北境以无所获而止寻以能设方略退兵进官一阶四年元兵围平阳急攻十余日鼎遣兵屡却之上言臣以便宜立官赏招还胁从人万余俱今复业窃谓凡被俘未归者更宜多方招诱已归者优加存恤制可二月拜枢密副使权尚书左江行省平阳时河南粟麦不令过河恐生内患伏望听其输贩以纾解州之急从之又言河东兵革之铨有司宜奉德意以谋安集而潞州帅府遣官于辽沁诸郡搜括余粟鞭捶械系所在骚然是兵未来而先自敝也愿急止之又言霍州诸阨戍卒几千令元兵既去农事将兴乞量留候余悉遣归有警复征既休民力且省县官万一兵来亦足御遏诏趋行之既而鼎闻元兵已越关乃遣潞州元帅左监军必喇阿鲁岱孟州经略使图克坦伯嘉领兵济河以趋关陕亲率平阳精兵直抵京师是时元兵已过陕州自关以西皆列营栅连互数十里鼎虑近薄京畿又遣布萨萨固珠领军趋陕西并力御之且移檄绛解吉隰孟州经略司会兵夹攻已而元兵果由三门集津北渡还平阳鼎遣兵拒战遂复潼关 【原本但钦元兵之退而未及其克复之功今依绩通鉴改】 兴定元年正月帝命鼎选兵付图们呼图克们统之西征鼎驰奏以为非便遂止是月进拜平章政事封莘国公鼎以祖父名章乞避职诏不从朝廷诏鼎举兵伐宋且令勿复有言以沮成算鼎上书曰大安之后元兵大举天下骚然器械多损民

力疲乏而日勤师旅远近动摇其不可一也元兵北还姑自息养未暇及我如闻王师南征乘隙并至三面受敌首尾莫救其不可二也宋自泰和再修旧好练兵峙粮缮修营垒十年于兹矣今闻王师已出唐邓必徙民渡江所在清野我军无所得而徒自劳费其不可三也我兵皆山西河北无依之人素非能练习也以不练之军深入敌境进不得入食无所掠将复遁逃啸聚为腹心患其不可四也沿边人户不胜困惫其寓河南者类皆衣食不给如宋人诱以厚利使为乡导突而入寇则内有叛民外有勍敌其不可五也春事将兴若进兵不还必违农时以误防秋之用其不可六也臣愚以为止当遴选材武将士分布近边州郡敌至则追击去则力田以广储蓄至于士气益强民心益固自可恢廓先业成中兴之功诏付尚书省宰臣以为诸军既进无复可议既而元帅承裔等取宋大散关焚毁而还【按宣宗纪焚大散关事在兴定二年木传叙鼎因伐宋上书故系之元年以终其事】二年四月鼎乞致仕不许三年上言近制军前立功犯罪之人行省行院帅府不得辄行诛赏夫赏由中出则恩有所归兹固至当至于部分犯罪主将不得施行则下无所畏而令莫得行矣乃诏自今四品以下皆得裁决时元帅内族承裔伊喇布哈伐宋所下城邑多所焚掠鼎乞谕帅臣所得城邑务慰抚之则其余不攻自下帝甚是其言遂诏谕之是时元兵大举入陕西鼎多料敌之策朝臣或中沮之帝谕枢密院官曰胥鼎规画必无谬误自今卿等不须指授也四年进封温国公致仕元光元年晋阳公郭文振奏河朔受兵有年胥鼎威望甚隆乞付重兵使总制公府庶几人皆响应明年宣宗崩哀宗即位正大二年起复拜平章政事进封英国公行尚书省于卫州大河以北皆受节制鼎力疾赴镇来归者益众病不能自持请退不许三年七月卒鼎通达吏事有度量为政镇静所在无贤不肖皆得其欢心南渡以来书生镇方面者惟鼎一人而已

△侯摯

侯摯初名师尹避违改今名字莘卿【归潜志作华卿】东阿人明昌元年进士贞佑初元兵围燕都时摯为中都曲使请出募军已而婴城有功擢为右补阙宣宗南渡转劝农副使提控紫荆等关俄迁行六部侍郎三年四月珠勒根额琳等谓车驾驻南京河南兵不可动侯摯有过人才若使募兵转粮事无不克于是以摯行尚书六部事往来应给之摯遂上章言九事一曰省部总天下纪纲随路宣差不宜札付六部二曰近置四帅府兵校不为不众然而弗克取胜者一处受敌余徒旁观师老将怯故也将帅之道惟陛下察之三曰率民御寇督民运粮各有

所职而帅府每令杂进累遇寇至军未战而丁夫已通行伍错乱败之由也四曰雄保安肃诸郡据白沟易水西山之固宜亟选勇猛才干者分典之五曰漳水自卫至海宜沿流设备以固山东使力穡之民安服田亩六曰近都官吏往往逋逃盖以往来敌中转输应给秩满乃与各处一体资考实负其人乞优定等级以别异之七曰兵威不振罪在将帅轻敌妄举八曰河北民失稼穡官无俸给皆欲逃窜宜优加矜恤亟招抚之九曰掌兵者多用世袭之官自幼骄惰心胆懦弱何足倚办宜选骁勇过人者勿问门资用之帝略施行焉时元帅富察齐锦以通州叛累遣谋者闲摯摯恐为所陷上章自辩诏谕之曰朕素知卿岂容闲耶无以猜嫌自沮八月拜参知政事行尚书省于河北四年正月进拜尚书右丞尝上言宜开沁水以便馈遗是时河北大饥诏许贩粟北渡然每石官余其八商无所利不复涉河摯请止官余纵民输贩诏尚书省行之时红袄贼数万人入临沂费县境官军败之擒伪宣徽使李寿甫讯问云杨安儿刘二祖散亡之余今复聚及六万贼首郝定已攻破邳州碭子堰得船数百艘遣人北构南运皆成约行将跨河为乱摯以其言上闻遂诏摯行省事于东平以招诱之兴定元年济南泰安滕兖等州土贼并起摯遣完颜霆讨之招降伪元帅石花五夏全余党壮士二万人二年诏遣置行省于河北兼行三司安抚事既行上言曰臣近历黄陵冈南岸多贫乏老幼自陈本河北农民避敌南迁今欲复归耕种而河禁邀阻臣谓河禁本以防闲自北来者此乃由南而往安所容奸乞令有司验实放渡诏速放之贼首李全据密州及胶西高密诸县摯督兵讨之会高密贼陈全等四人愿为内应遂复密州城且拔高密焉帝遣谕摯卿勤劳王定不避患难身居相职而往来山堙水寨之闲保庇农民收获二麦忠恪之意朕所具知虽然防秋之际亦须择地而处俄移邳州行省邳海之闲兵多民少摯虑其艰食乞自十月给粮使充成役至二月选之人授地三千亩贷之种粒而验所收获量数取之逮秋复隶兵伍且战且耕公私俱利被俘之民易于招集也诏施行之是时枢密院以海州军食不足艰于转输乞迁于内地诏问摯摯奏海州连山阻海与沂莒邳密皆边隅冲要之地比年来为贼渊藪若弃而他徙则直抵东平无非敌境地大气增后难图矣朝廷所以欲迁者止虑粮储不给耳臣请尽力规画劝喻农民趋时耕种且令煮盐易粮或置场宿迁以通商旅可不劳民力而办仍择沐阳之地可以为营屯者分兵护还虽不迁无患也帝是其言乃止邳州副提控王汝霖沂州防御使程戩同谋叛将结宋兵为外应摯遣兵捕之讯竟具伏皆就诛四年迁荣禄大夫致仕天兴元年复起为平章

政事封萧国公行京东路尚书省事以军三千护送就舟张家渡行至封邱敌兵觉不能进诸将卒谋倒戈南奔留数骑卫摯摯知其谋下马坐语曰敌兵环视进退在我汝曹不思持重吾宁死于汝曹之手不忍为乱兵所蹂以辱君父之命诸将诺而止得全师以还闻者壮之寻复致仕居汴中有园亭日与耆旧燕饮及崔立以汴城降为元兵所杀摯为人威严御兵人莫能犯在朝遇事敢言又喜荐士如张文举雷渊麻九畴辈皆由摯进用南渡后宰执中人望最重

△ 巴 古 喇

巴古喇不详其初起贞佑二年五月宣宗南迁由左谏议大夫擢为御前经历官三年十一月出为彰化军节度使兼泾州管内观察使四年五月改知京兆府事兼本路兵马都总管充行省参议官兴定二年召为御史中丞上言国家取人惟进士之选为重不求备数务在但贤今会试考官取人泛滥宜革其弊寻拜参知政事擢左副元帅与平章胥鼎同事防秋三年平凉地震巴古喇乞明谕有司敬畏天戒帝嘉纳之四年行尚书省元帅府于京兆时陕西运粮以助关东民力寢困帝从巴古喇议用舟楫自渭入河顺流而下时以为便五年朝议欲复取会州巴古喇上言今农事将兴更调十余万人以饷此军则数郡春种尽废矣纵得此城不免戍守是飞挽之役无时而已也止宜令承裔军于定西巩州之地护民耕稼俟敌意怠然后取之诏付省院谓其言甚当从之三月上言延安凤翔巩州边隅重地帅府固当仍旧德顺平凉等处宜皆罢去河南行院帅府存沿边并河者余亦宜罢之制可是年西北兵攻延安巴古喇遣完颜哈达纳哈塔迈珠御之遂保延安先是巴古喇以西北兵势甚大屡请兵于朝帝由是恶之元光元年罢参知政事以知河中府事权安抚使于是瓜尔佳德新上言曰巴古喇廉直忠孝朝廷之良臣也去岁兵入延安巴古喇遣将调兵城赖以完今哈达迈珠各授世封而巴古喇改知河中府使谋略之臣不获展力宜复行省之任使与承裔共守京兆令哈达迈珠捍御延安以藩卫河南则内外安矣不报寻召为大司农复拜参知政事帝问曰郡县盗贼如何可息对曰赋役省则盗贼息矣如行院帅府扰之何帝令禁止之初巴古喇拜命日都将把玖锦来贺为御史钮祜禄阿里所劾诏论曰卿昔行省陕西擅出系囚朕为卿地因肆赦以弭众口今玖锦有职守且握兵柄而纵至门下法当责降朕重卿素有直气故复曲留卿其戒之二年帝谕幸臣曰陕右兵将退当审后图巴古喇深悉利害其遣往陕西规画防秋事哀宗即位进拜平章政事正大元年卒诏加赠右丞相东平郡王巴古喇为人忠实忧国

奉公及亡吏民皆嗟惜之

△师安石

师安石字子安【归潜志作仲安】清州人本姓尹氏避国讳改焉承安五年词赋进士补尚书省令史奉史都留守承晖遗表闲道走汴以闻帝嘉之擢枢密院经历时哀宗在春宫领枢密院事遂见知遇元光二年累迁御史中丞上章言事其一曰自古所以安国家息祸乱不过战守避和四事而已为今之计守和为主所谓守者必求智谋之士内足以得戍卒之心外足以挫敌人之锐不惟彼不能攻又可以伺其隙而败之其所谓和则汉唐之君固尝用此策矣乞令有司详议而行其二曰今敌中来归者颇多宜厚其接遇择有心力者潜往以诱致其余来者既众彼必转相猜贰然后徐起而图之则中兴之功不远矣帝嘉纳之九月坐劾英王守纯附奏不实决杖追官哀宗即位累擢至尚书右丞正大五年台谏劾近侍张文寿张仁寿李麟之安石亦论列三人不已帝怒甚有旨谕安石曰汝便承取贤相朕为昏主止矣安石骤蒙任用遽遭摧折疽发脑而死帝甚悼惜之

钦定续通志卷四百四十一

●钦定续通志卷四百四十二 列传二百四十二

列传

金【二十】

○金二十

完颜苏呼 陈规 许古 杨云翼 赵秉文 韩玉

冯璧 李献甫 雷渊 程震

完颜苏呼

陈规

许古

杨云翼

赵秉文

韩玉

冯璧

李献甫

雷渊

程震

△完颜苏呼

完颜苏呼一名翼字伯扬至宁元年策论进士贞佑初累迁监察御史二年宣宗迁

汴留皇太子于燕都既而召之苏呼曰太子在彼则声势俱重都城可无虞也帝从高琪言竟召太子七月车驾至汴苏呼上书曰善救乱者必迹其乱之所由生善革弊者必究其弊之所自起陛下龙兴辄谨南迁诏下之日士民相率上章请留启行之日风雨不时桥梁数坏人心天意亦可见矣自今尤宜戒慎又曰国家不可一日无兵兵不可一日无食陛下为社稷计宜精选军官以恤妄费三年自中都计议军事回密奏高琪奸恶【详见珠格高琪传】帝曰此乃大事汝敢乃之甚善苏呼复奏丞相福兴国之勋旧乞召还京以镇雅俗帝曰朕徐思之厥后帝以苏呼屡进直言命再任监察御史四年三月奏令随朝七品外路六品以上官各举堪充司县长官者仍明着举官姓名他日察其能否同定赏罚诏有司议行之哀宗为皇太子春宫新设师保赞论之官多非其人于是苏呼上章言皇太子仁孝聪明出于天资倘更选贤如周召之侑者使夹辅之则成周之治不足俟矣帝称善兴定二年四月以布什万努叛遣苏呼与近侍局副使内族额尔克同赴辽东及还授翰林待制正大元年转刑部郎中时南阳人布陈谋叛坐系者数百人苏呼止坐者悉及拟伪将相者数人余悉释之七年迁金安军节度使既而召还朝行至陕被围久之亡奔行在道中遇害苏呼莅官以修谨得名惟苛细不能任大事然进言多有补益其居父丧不饮酒庐墓三年时论以为难

△陈规

陈规字正叔绛州稷山人明昌五年词赋进士南渡为监察御史贞佑三年十一月上章论参政侯摯不报又论警巡使冯祥诏即罢祥职四年正月上言河北艰食请勿禁物斛北渡三月言赫舍哩鹤寿讨红袄贼乃大掠良民乞明敕有司俱放免之四月乞罢河北瀕河州县寨兵制可七月上章条陈八事一曰责大臣以任安危元兵起自边陲深入吾境大小之战无不胜捷以致神都覆没翠华南狩大河以北莽为盗区宰相大臣皆社稷生灵所系以安危者岂可使亲其细而不图其大乎伏愿特出睿断若军余器械常程文牒即听枢府专行至于战守大计征讨密谋皆须省院同议可否则为大臣者知有所责而天下可为矣二曰任台谏以广耳目人主有政事之臣有议论之臣政事之臣者宰相执政与天子经纶于庙堂之上者也议论之臣者谏官御史与天子辨曲直正是非者也国朝虽设谏官每遇奏事皆令回避或兼他职或为省部所差不过责以纠察官吏照刷案牒巡视仓库而已伏愿遴选学术该博通晓世务骨鲠敢言者以为台谏凡事关利害皆令预议三曰崇节俭以答天意自兵兴以来州县残毁存者复为土寇所扰独河南稍安然大驾所在其费不

赏愿陛下痛自撙节罢冗员减浮费戒豪侈庶皇天悔
祸太平可致四曰选守令以结民心县令之弊无甚于今桀黠者乘时贪纵庸懦者权归
猾吏近虽遣官廉察治其奸滥易其疲软然代者亦非
选择所谓除狼得虎也复乞明敕尚书省公选廉洁无私才堪牧民者以补州府官仍清
县令之选五曰谘羣臣以定大计古昔人君将举大事
则谋及乃心谋及卿士庶人卜筮乞自今凡有大事必令省院台谏及随朝五品以上官
同议为便六曰重官赏以劝有功官本虚名特出于人
主之口而天下之人极意趋慕者以朝廷爱重耳若不计勋劳朝授一官暮升一职则被
坚执锐效死行阵者何所劝哉伏愿陛下重惜将来无
使公器为寻常之具功赏为侥幸所乘七曰选将帅以明军法夫将者国之司命天下所
赖以安危者也今之将帅大抵先论出身官品平居则
意气自高遇敌则首尾退缩将帅既自畏怯士卒夫谁肯前伏乞明敕大臣精选通晓军
政者分诣诸路编列队伍要必二十五人为一穆西四
穆昆为一千户五千户为一万户谓之散将万人设一都统谓之大将总之帅府数不足
者皆并之其副统副提控及无军虚设都统万户者悉
罢省仍敕省院大臣及内外五品以上各举方略优长武勇出众材堪将帅者一二人不
限官品以充万户都统元帅之职千户以下选军中有
谋略武艺为众所服者充之居常教阅必使将帅明于奇正虚实之数士卒熟于坐作进
退之节则将帅得人士气日振可以待敌矣八曰练士
卒以振兵威比者凡战多败非由兵少正以其多而不分健懦故为敌所乘懦者先奔健
者不能独战而遂溃此所以取败也今莫若选差习兵
公正之官将己籍军人随其所长而类试之其武艺出众者别作一军量增口粮时加训
练视等第而赏之如此则人人激励争效所长而哀懦
者亦有可用之渐矣帝览书不悦寻出为徐州帅府经歴官 【按宣宗纪是年十一月遣
御史陈规等充河南宣差安抚捕盗官则似言事后
未尝出为经歴也岂规以言事被出而纪特称其旧官欤抑纪传同是一事而见闻各异
欤】正大元年召为右司谏时诏羣臣议修复河中府
规与杨云翼等谏止之 【按谏修河中府哀宗纪载杨云翼赵秉文苏呼传言苏呼与陈
规盖当时奉诏集议不一其人故纪载各异】二年
规及台谏同奏五事一乞尚书省提控枢密院如大定明昌故事二简留亲卫军三沙汰
冗军减行枢密院帅府四选大臣为宣抚使招集流亡
以实边防五选官置所议一切省减略施行之四月以大旱诏规审理冤滞临发上奏今
行院帅府皆得以便宜杀人冤狱在此不在州县又曰
雨水不寺则责审理然则职變理者当何如帝善其言而不能行四夫十月规与右拾遗

李大节上章劾萨哈连谄佞招权纳贿及不公事由是
萨哈连竟出为中京留守朝廷快之五年又与大节言三事一将帅出兵每为近臣牵制
二近侍送宣传旨公受赂遗三罪同罚异何以使人帝
嘉纳焉初宣宗尝召文绣署令王寿孙作大红半身绣衣且戒以勿饮陈规知后出为中
京副留守未赴卒士论惜之规博学能文诗亦有律度
浑源刘从益见其所上八事叹曰宰相材也死之日家无一金知友为葬之子良臣

△许古

许古字道真安仁子也明昌五年【中州集作承安中】词赋进士贞佑初拜监
察御史时宣宗迁汴信任高琪无恢复谋古上章曰臣
闻安危所系在于一相今之所急莫若得人如前御史大夫费摩德仁工部尚书孙德渊
忠谅明敏可以大用愿复起而任之必能有所建立以
利国家太子太师致仕孙铎虽颇衰疾有大议犹可召问方时多难固不容碌碌之徒备
员尸素以塞贤路也惟陛下宸衷刚断黜陟一新以幸
天下又闻将者民之司命故古之人君必重其选为将者亦必以天下为己任愿令腹心
之臣及闲于兵事者各举所知果得真才优加宠任则
战功可期如河东宣抚使胥鼎山东宣抚使完颜弼涿州刺史内族苏尔坦昭义节度使
必喇阿噜岱或忠勤勇干或重厚有谋皆可任之以扞
方面又河北诸路以都城既失军户尽迁州县官往往逃奔河南乞令所在根括立钥遣
还未离任者议加恩赉愿自效者亦听陈请并令长贰
官兼领军职许择有才略胆勇者为头目加爵命以收其心别遣忠实干济者以文檄官
赏招诸胁从彼苦于敌役来者必多敌势自削不知出
此而但为清野计可谓大戾矣又曰京师诸郡根本宜使百姓有所蓄积今有司搜括余
粮致转贩者无复敢入宜即止之诏付尚书省略施行
焉时丞相高琪立法职官有犯皆的决古及左司谏穆延呼喇勒上言曰礼义廉耻以治
君子刑罚威狱以治小人近者朝廷急于求治职官有
犯应赎者亦多的决车驾所驻科征小过皆以军期罪之夫百官皆朝廷遴选多由文行
武功阀阅而进今乃与凡庶等为上者将曰官犹不免
民复何辞则苛暴之政日行为下者将曰彼既亦然吾复何耻则陵犯之心益肆其弊可
胜言哉帝初欲行之而高琪固执以为不可遂寝四年
兼侍御史时元兵越潼关而东诏尚书省集百官议古上言曰兵踰关而朝廷始知此盖
诸将欺蔽罪也然元兵驻阆乡数日不动意者恐吾河
南之军逆诸前陕西之众议其后所以观望未遽进也此时正宜选募锐卒并力奋击之
且开其归路彼既疑惑遇敌必走我从而袭之其破必
矣高琪沮其议不果行兴定元年帝闻宋兵连陷赣榆涟水诸县且获伪檄辞多诋斥因

谕百官议于都堂古曰宋人孱弱畏我素深且知北方
兵强将恃我为屏蔽计必不敢深入其侮慢之语特市井屠沽儿所为乌足较之止当命
有司移文谕以本朝累有大造彼若复寻旧好则又何
求其或怙恶不俊举众讨之亦未晚也既而高琪奏百官议咸请严兵设备以逸待劳帝
信之后古以朝廷欲举兵伐宋复上疏谏曰昔世宗章
宗之隆府库充实天下富庶犹先俯屈以即成功今元兵少息若复南边无事则太平不
远矣如专用威武彼见吾势大必坚守不出我军仓猝
无得须还就粮彼乘而袭之使我欲战不得欲退不能则休兵之期乃未见也况彼有江
南蓄积我止河南一路征敛之弊可为寒心愿陛下与
宋通和俾无掣肘元兵闻之亦将敛迹河南既得息肩然后经略朔方则陛下享中兴之
福天下赖涵养之庆矣帝是其言即命古草议和牒文
宰臣言有哀祈意自示微弱遂不用监察御史钮祜禄苏卜实劾榷货提举毛端卿贪污
不法古为删定其奏颇有脱漏苏卜实以闻坐削官免
殿三年谏官阙员复拜左补阙寻以失出人罪削官哀宗即位召为左司谏 【中州集作
右司谏】 未几致仕居伊阳郡守为起伊川亭古性
嗜酒老而未衰每乘舟出村落闲留饮或十数日不归及泝流而上老穉争为挽舟数十
里不绝其为人爱慕如此正大七年卒古平生好为诗
及书然不为士大夫所重时论但称其直云天兴闲有右司谏陈岢者遇事辄言无少隐
帝尝面奖及汴京被兵屡上封事请战一书尤为剴切
时相沮之策不行识者惜焉岢字和之沧州人

△杨云翼

杨云翼字之美其先赞皇檀山人六代祖忠客平定之乐平县遂家焉云翼天资颖
悟登明昌五年进士第一词赋亦中乙科 【归潜志
作擢词赋第又经义魁按选举志承安闲词赋经义同日御试兼试者听词赋第一名状
元经义魁次之与词赋第二人同归潜志所云似与金
制较合】 特授承务郎应奉翰林文字累官签上京东京等路按察司事大安元年翰林
承旨张行简荐其材且精术数召授招点司天台兼翰
林修撰俄兼礼部郎中贞佑三年迁礼部侍郎四年元及西夏兵入鄜延潼关失守朝议
以兵部尚书富察伊尔必斯为副元帅以御之云翼言
其人言浮于实必误大事不听后果败兴定二年拜礼部尚书三年筑京师子城役兵民
数万夏秋之交病者相藉云翼提举医药躬自调护多
所全济四年改吏部尚书凡军兴以来以战功迁授者事定之后有司辄以程序罢去云
翼奏曰赏罚国之大信此辈宜从宽录以劝将来迁御
史中丞有言宗室承立不法者诏云翼鞫之奏曰承立近所坐皆细事不足问向元兵掠

平凉以西承立坐拥强兵瞻望不进鄜延帅臣完颜哈
达以孤城当兵冲屡立战绩愿陛下明功罪以行诛赏则天下知所劝惩矣承立由是免
官哈达遂掌机务正大三年复为礼部尚书诏集百官
议省费云翼曰省费事小户部司农足以办之军旅大事社稷系焉宰相乃不得预闻欲
使利病两不相蔽得乎帝嘉纳之是年 【按益政院
之设在正大三年见哀宗纪及百官志本传误作四年谨改正】 设益政院云翼为选首
每召见赐坐不名时讲尚书云翼言帝王之学一皆本
于正心诚意寻进龟鉴万年录圣学圣孝之类凡二十篇当时朝士廷议多顾望依违一
日经筵毕因言事君之礼臣固当尽然国家之利害生
民之休戚不能一一陈之则所谓礼者特虚器耳姑徇事君之虚礼而不知事君之大义
国家何赖焉帝变色曰非卿朕不闻此言云翼尝患风
痹至是稍愈帝问愈之之方对曰但治心耳心和则邪气不干治国亦然人君先正其心
则朝廷百官莫不一于正矣帝矍然知其为医谏也夏
人既通好遣学士李弁来议互市往返不能决云翼往议乃定 【按交聘表及西夏纪正
大元年和议成至四年而夏遂亡矣本传序次恐有
谬误】 五年卒谥文献云翼天性雅重自律甚严待人则宽交分一定死生祸福不少变
国家之事知无不言贞佑中主兵者不能外御而欲取
偿于宋频岁南伐云翼建言国家之虑不在未得淮南之前而在既得淮南之后淮南平
江北尽为战地进而争利于舟楫之闲劲弓良马恐不
得骋彼扼江为屯潜师于淮以断饷道或决水以潴淮南之地则我军何以善其后及时
全倡议南伐又言将有事于宋者非贪其土地也第恐
西北有警而南又缀之则我三面受敌矣故先动以阻其进假使宋人失淮彼江之南其
地尚广岂不能伺我有警而出师耶且今之事势与泰
和不同泰和以冬征今以夏往冬则水涸而陆多夏则水潦而涂淖泰和举天下全力驱
虬军为前锋天时地利人事俱不同矣请以夏人观之
向日弓箭手在西边者一遇敌则搏战祖射彼已奔北不暇今乃陷吾城而执守臣败吾
军而擒主将夏人既非前日奈何以宋人独如前日哉
章奏不报时全果大败于淮上一军全没宣宗责诸将曰当使我何面目见杨云翼耶所
著文集校大金礼仪绩通鉴周礼辨左氏庄列赋五星
聚井办县象赋句股机要象数杂说等藏于家

△赵秉文

赵秉文字周臣磁州滏阳人幼颖悟登大定二十五年进士明昌六年同知制诰上
书论宰相胥持国当罢宗室守贞可大用章宗召问言
颇差异法当追解帝不欲以言罪人免焉起为同知岢岚军州事转北京路转运司度支

判官泰和三年刺平定州政从宽简旨日盗悉屏迹岁
饥出禄粟倡豪民以赈全活甚众大安初元兵南向议备边策秉文言今我军聚于宣德
列营城外涉暑雨器械弛败人且病俟秋敌至将不利
当出其不意攻其必救遣临潢一军捣其虚则山西之围可解卫王不能用果以败闻贞
佑初建言时事一迁都二导河三封建朝廷略施行之
明年上书愿为国家守残破一州以宣布朝廷恤民之意帝曰秉文志固可尚然卿宿儒
当在左右不许兴定闲拜礼部尚书知贡举坐取进士
卢亚重用韵削两阶因请致仕金自泰和大安以来科举之文其弊益甚有司惟守格法
所取之文卑陋陈腐苟合程度而已稍涉奇峭即遭黜
落于是文风大衰贞佑初秉文主省试得李献能赋虽格律稍疏而词藻颇丽擢为第一
举人遂大喧噪诉于台省且作诗谤之久之方息俄而
献能复中宏词入翰林而秉文竟以是得罪五年复为礼部尚书每进见从容为帝言人
主当俭勤慎兵刑以祈天永命帝嘉纳焉哀宗即位改
益政院说书官进无逸直解贞观政要申鉴各一通正大九年汴京戒严帝命秉文为赦
文以布宣悔悟哀痛之意秉文指事陈义辞情俱尽及
兵退大臣欲奉表称贺秉文曰春秋新宫火三日哭今园陵煨烬酌之以礼当慰不当贺
遂已三月草天兴改元诏 【按哀宗纪天兴元年注
云是岁本正大九年正月改元开兴四月又改元天兴秉文草诏以三月则非开兴可知
原文误今改正】 洛阳人拜诏毕举城痛哭甚感人如
此是年卒秉文在正大闲同杨云翼作龟鉴万年录上之又进君臣政要一编其它著作
甚富朝使至自河湟者多言夏人问秉文起居状其为
四方所重如此

△韩玉

韩玉字温甫其先相人 【按中州集云五世祖继宁仕晋居析津其曾孙曰知白曰
孚仕辽赐田盘山遂为渔阳人】 曾祖锡仕为济南
尹玉明昌五年经义辞赋两科进士入翰林为应奉应制一日百篇文不加点作元勋传
称旨章宗叹曰勋臣何幸得此家作傅耶泰和中建言
开通州潞水漕渠船运至都升陕西东路转运司使大安三年都城受围夏人连陷邠涇
陕西安抚司檄玉以凤翔总管判官为都统府募军得
万人与战败之时夏兵围平凉疑大军将至夜解去当路者忌其功反奏玉与寇有谋朝
廷疑之遣使者授玉河平军节度副使且覘其军先是
华州李公直以都城隔绝谋举兵入援而玉恃其兵为可用亦欲为勤王之举乃传檄州
郡公直军且行将佐有不从者辄以军法从事京兆统
军使谓公直据华州反遣都统杨珪袭取之遂寘极刑公直曾为书约玉玉初不知为安

抚所得诬玉亦预其谋玉道出华州被囚死于郡学临
终书二诗壁闲士论冤之子不疑字居之以父死非罪誓不禄仕藏其父临终时手书云
此去冥路吾心皓然刚直之气必不下沈儿可无虑世
乱时艰努力自护幽明虽异宁不见尔读者恻然

△冯璧

冯璧字叔献真定县人承安二年经义进士调辽滨主簿县有和余粟未给价者十
余万斛散贮民居掌以富人腐败则责偿民殊苦之璧
白漕司即日放散民大悦五年伐蜀章宗欲招降吴曦诏先以文告晓之然后用兵及攻
散关兵多杀获璧言与诏旨相反主帅憾之令招两当
溃卒即日率凤州已降官属谈刚李果偕行道逢军士所得子女金帛皆夺付刚使归其
家军士以违制决遣之比到两当军民三万余鼓舞迎
劳璧宣朝旨慰遣之俄转太学博士呼沙呼弑逆遂去官贞佑三年迁翰林修撰时山东
河朔军六十余万口率不逞辈窜名其闲诏璧摄监察
御史汰逐之案劾总领萨哈琿冒券四百余口诏杖杀之所至争自首减几及半初监察
御史本温被命汰苏尔坦军于孟州军士谋变本温惶
惧无措北军沈思忠以下四将屯卫州余众叛入太行诏璧代本温竟其事璧驰至卫召
四将喻以帝意将士惭服不日就汰者三千人进大理
丞与台官行关中劾奏宗室重福等奸赃自是权贵侧目四年伐宋总帅赫舍哩约赫德
奉诏攻盱眙约赫德违命由滁州畷宣化无功而归诏
璧鞫之璧驰入其军易以他帅下约赫德于狄兵士哗噪璧怒责曰元帅欲以兵抗制使
岂待罪之礼耶约赫德伏地请死璧曰兵法进退自博
有失机会以致覆败者斩即拟以闻时议壮之寻改礼部员外郎诏问时务壁上六事言
减冗食备选锋缓疑似以慎刑择公廉以检吏屯戍革
朘削之弊权贵严请托之科又条自治策四别贤佞信赏罚听览以通下情贬损以谨天
戒时御史道远从完颜伯嘉宣慰河南发永城令簿奸
赃伯嘉与令有违付令有司释簿不问又许参佐克忠等台职璧皆劾之伯嘉竟得罪去
河朔叛军有窃谋南渡者行院事呼图克们都水监使
摩和纳易其人不为备叛军联筏南渡残下邑而去命璧鞫之璧以闻寇弛备来不战去
不追在法皆当斩或言二将皆宠臣而都水费累巨万
若求援禁近必从轻典君徒结怨何益耶璧叹曰门廷之寇且不能御况大于此者乎即
具所拟闻四年迁刑部郎中关中旱诏审理冤狱时河
中帅阿固岱及僚属十数人皆以弃城罪当死系狱待报官僚承望风旨璧曰河中今日
重地拟为驻蹕之所若失此则河南陕西有唇亡之忧
以彼宗室勋贵故使镇之平居无事竭民膏血为浚筑计一旦有警乃遽焚荡而去此而

不诛三尺法无用矣竟论死未几改同知集庆军节度

使致仕【按中州集载璧制诰典丽尺牍又其专门致仕后赋诗饮酒放浪山水闲人望以为神仙本传详其政事故不载】正大九年河南破北归又数年卒

△李献甫

李献甫字钦用献能从弟兴定五年登进士第正大初夏使来请和命翰林待制冯廷登往议献甫为表表官从行夏使有口辩廷登不能折至以岁币为言献甫从旁进曰夏国与我和好百年今虽易君臣之名为兄弟之国使兄输币宁有据耶使者曰未岁输吾国币二十五万匹典故具在君独不知耶献甫作色曰使者尚忍言耶宋以岁币饵君家而赐之姓岸然以君父自居诚谓使者当以为讳乃今公言之使者果能主议从赐姓例虽岁币五十万当不吝夏使语塞和议乃定天兴元年充行六部员外郎守备之策时相倚任之以功迁镇南军节度副使兼右警巡使死于蔡州之难所著有天倪集传于世

△雷渊

雷渊字希颜一字季默应州浑源人父思名进士仕至同知北京转运使注易于世渊庶出最幼诸兄不齿父歿不能安于家乃发愤入太学衣敝履穿坐榻无席恒兀坐读书其友商衡每赍恤之后从李之纯游遂知名登至宁元年【按宁绍王纪崇庆二年五月改元至宁而试进士则以三月故中州集作崇庆二年】词赋进士调涇州录事摄遂平县事击豪右发奸伏一邑大震称为神明寻改东平河朔重兵所在骄将悍卒倚外敌为重自行台以下皆摩抚之渊出入军中偃然不为屈不数月闾巷多画渊像虽大将不敢以新进书生遇之兴定末召为英王【中州集作荆王按宣宗子守纯传兴定元年改封英王正大元年始进封荆王当依本传】府文学寻拜监察御史言五事称旨弹劾不避权贵出巡郡邑所至有威誉奸豪不法者立捶杀之至蔡州杖杀五百人号雷半千坐此为人所讼罢去久之用宰束侯摯荐起为翰林修撰一夕暴卒正大庚寅倒回谷之役渊尝上书破朝臣孤注之论引援深切主兵者沮之策道不行

△程震

程震字威卿东胜人与兄鼎俱擢第震入仕有能声兴定初任陈留令治为河南第一召拜监察御史弹劾无所挠时皇子荆王为宰相家僮辈席势侵民震劾奏荆王【按守纯以正大元年进封荆王此奏在兴定初当依归潜志作英王为定】以陛下之子任天下之重不能上

赞君父同济艰难顾乃专恃权势蔑弃典礼开纳货赂进退官吏纵奴隶侵渔细民名为和市其实胁取诸所不法不可枚举陛下不能正家而欲正天下难矣于是上责荆王出内府银以偿物直杖大奴尤不法者数人未几震为故吏所讼罢官岁余呕血卒【按归潜志云震既闲居慨然有志于学将延致名师执弟子礼会卒士论惜之】

钦定续通志卷四百四十二

●钦定续通志卷四百四十三 列传二百四十三

列传

金【二十二】

○金二十一

乌陵阿呼图 赫舍哩约赫德 完颜哈达 伊喇布哈

乌陵阿呼图

赫舍哩约赫德

完颜哈达

伊喇布哈

△乌陵阿呼图

乌陵阿呼图初为都尉戍潼关正大八年被旨入援至偃师闻元兵径渡白坡直趋少室夜至少林寺时登封县官民已迁太平顶御寨呼图使人给县官云吾军中家属辎重欲留此山即率兵赴汴京因掇县官下山使之前导军随而上山既险固粮亦充足遂有久住之意寻纵军下山劫掠牛畜粮糗亦分有之恒山公武仙参政色埒两行省军屯登封城南遣人约之入京呼图不肯下不得已分军四千与色埒俱东两行省军溃于中牟呼图狼狈上山色埒行省于中京征兵同保洛阳呼图惧罪乃往留其半以为巢穴天兴二年色埒卒呼图代行省事六月敌势益重即领轻骑弃城南奔遂失中京初呼图在太平顶既顾望不进又惧人议己乃出榜募人为救驾军得不逞之徒二十余人促令赴京行及卢店即行劫械至杖之人无不窃笑既而走蔡州帝召见慰问而心薄之会宋人攻唐州元帅乌库哩黑汉屡遣人告急即命呼图援之大败仅存三十骑而还既而以呼图为殿前都点检罢权参政元兵围蔡呼图守西面其奴窃呼图金牌夜缒城降朝士喧播谓呼图纵之往将有异志乎图内不自安乞解军职帝慰之且赐饌以安其心呼图初罢机政颇有怨言至是始感恩无他卢矣寻权参政防守如故蔡城破投汝水死

△赫舍哩约赫德

赫舍哩约赫德一名志本出亲军贞佑间布萨安贞宣抚山东以约赫德为军中提

控时山东羣盗蜂起安贞遣约赫德破巨蒙等四堠又破马耳山砦杀降贼党甚众积功授行山东西路兵马都总管府事兼武宁军节度使徐州管内观察使兴定二年宋兵攻泗州约赫德赴援大破之又围盱眙宋人坚守不出以骑兵刀掠境内而时遣羸卒薄城诱之宋人来拒约赫德佯北伏发击之宋人复来援合击败之移兵赴青平宋兵突出战少却旋以轻骑扼其后故逗遛不与战纵之走东南薄诸河败之师还又败宋兵于连塘村三年正月败宋人于濠州之香山村二月又败之于滁州拔小江寨又拔辅嘉平山寨三月提控鄂屯沃里布已败宋兵还至濠州宋人来拒战约赫德夹击败之宋将时青袭破泗州西城五年二月约赫德将兵取之募死士以梯冲并进大败宋兵时青南奔乃陈兵横截击之宋兵大溃遂复泗州西城三月复出兵宋境以报其役破团山贾家等诸寨进逼濠州九月率兵渡淮大破宋兵于团山元光元年以京东便宜总帅兼行户工部事宋人潜渡淮至聊林尽伐堤柳寨汴水以断粮道约赫德遣精甲破之汴流复通二年四月上言赏罚国之大信向中军战歿者皆廩给其家近以楮币折支往往不给自今愿支本色令得贍济以积储方艰诏有司给其半红袄贼寇寿颖约赫德率兵渡淮攻之连破两栅焚其封坞数十还遇宋兵阵淮南岸击杀其半寻有兵自东南来追复大败之纳哈塔禄格据邳州约赫德围之宋将高显等其诛禄格持其首缢城降招降红袄伪监军徐福统制王喜等宣宗大喜正大四年约赫德复取平阳是岁元兵既灭夏国进攻陕西德顺秦州清水等城遂自凤翔入京兆关中大震六年【按宋史纪事本绍定二年蒙古兵围金庆阳宋绍定二年金正六年也与哀宗纪相符原文误作五年今改正】围庆阳与副枢布哈签枢密院事内族额尔克将兵救之七年正月战于大昌原庆阳围解诏为左副元帅屯京兆初元误格楞来行省因留之既解庆阳之围志气骄满乃遣还语甚不逊元主大怒亲统兵入陕西八年约赫德迁居民于河南弃京兆东还【按归潜志载约赫德事云北兵入境移镇京兆军败召还与本传稍异】至闕乡病死约赫德为人鸷狠狼戾好结小人不听朝廷节制尤不喜文士僚属有长裾者辄以刀截去凡朝使至辄加凌侮以酒食困之司农少节张用章以行户部过宿辞疾不饮趋左右扶卧于迹灸之数十又以银符佩妓屡往州郡取赇州将妻皆远迎迓御史康锡上章劾之朝廷竟不治其罪好用鼓椎击人因呼曰卢鼓椎子名阿里哈呼之曰小鼓椎尝为元帅与富察官努作乱伏诛康锡字伯禄赵州人至宁元年进士正大初由省掾拜御史劾侯摯师安石非相材近侍局宗室萨哈连声势熏灼请托

公行不可使在禁近时论黷之

△完颜哈达

完颜哈达名瞻子景山少长兵间习弓马能得人死力贞佑三年授临潢府推官权元帅右监军时临潢避迁与全庆两州民共壁平州哈达隶经略使乌凌阿奇珠会燕南诸帅将兵复中都行至迁安县军变杀奇珠拥哈达还平州推为师哈达以计诛首乱者数人是年六月元兵至平州哈达逆战知事势不敌以本军降留半岁令还守平州率所部及州民并海西南归国进镇南军节度使兴定三年伐宋为元帅右都监屡败宋兵拔麻城县四月夏人犯通秦哈达出兵安寨堡抵隆州夏人出步骑逆战败之四年夏人攻绥德驻兵于拄天山哈达将兵击之别遣提控樊泽等各率所部分三道以进俱会于山巅见夏人数万骑傅山而阵即纵兵分击泽先登推其左军诸将继攻其右败之五年知延安府事上言诸军官以屡徙故往往不知所居地形迂直险易缓急之际恐至败事自今乞勿徙又言河南陕西镇防军皆分屯诸路在营惟老稚而已乞选老成人为各路统军以镇抚之且督其子弟习骑射皆从之十一月夏人攻安寨堡哈达与征行元帅纳哈塔迈珠潜军裹粮倍道兼进夜袭之夏人大溃坠崖谷死者不可胜计又战于延安以功赐金有差【按续通鉴载是年蒙古侵夏夏人以兵附之入葭州进攻延安鼓鼙震天金兵大乱追杀七千余人哈达走入延安坚壁不出核之本传大不相符岂哈达隐败报捷习为固然而传即仍其旧欤】元光元年拜参知政事行省事于京兆上言北将阿勒楚尔率兵入隰吉翼州寢及荣解如此则河东非我有也河南陕西调度仰给解盐今正漉盐之时而敌扰之将失其利乞速济师捍御河中荣解司县官与军民多不相谙守御之间或失事机乞从旧法使兼军民庶几上下相得易以集事又言敌兵迫境盐利不以分人孰肯冒险而取之自输运者十与其八则人争赴以济国用从之以葭州提控王公佐言奏请驰至延安与迈珠议以兵护公佐军民屯吴堡伺隙而动诏省院议之于是命哈达率兵取葭州哈达上言屡获谍者皆云北方已约夏人将由河中葭州以入陕西防秋宜预陕西重兵两行省分制之然京兆抵平凉六百余里万一敌梗其间使不得通是自孤也宜令平凉行省内族博索领军东下与臣协御以屏潼陕敌退后复议分司为便诏许之二年以保凤翔功进功时河中已破哈达提兵复之正大二年陕西旱甚哈达斋戒请雨雨澍岁大稔民立石颂德延安既残毁哈达招集散亡助其耕垦稍复耕稼之利讨田瑞于巩州瑞弟济杀瑞以降三年诏迁平凉行省四年二月征还拜平章

政事封芮国公七年授枢密副使初帝哈面奏哈达久在军中今多事之际用违其长臣等欲与协力军务擢之相位似亦未晚故有此授十月与布哈救卫州以亲卫兵三千先尝之北兵小退翼日围解未几与布哈同行省事于阌乡以备潼关八年北帅苏布特攻破小关残卢兵朱阳潼关总帅纳哈塔迈珠求救于二省二省以陈和尚忠孝军一千都尉瓜尔佳军军一万往应北军退二省辄称大捷以闻既而元军攻凤翔二省提兵出关与渭北军交至晚复收兵入凤翔遂破二者遂弃京兆留庆善努守之九月元兵入河中时二相防秋还陕量以军马出冷水谷为声援十一月元兵道饶峯关由金州而东于是二省军入邓元兵渡汉江与战于禹山前元兵小却二相似大捷驿报百官表贺九年二省军溃于阳翟之三峯山初禹山之战两军相拒元军散漫而北金军惧其乘虚袭京城乃谋入援时元兵趋河上已二十余日所过残破焚积聚金军由邓而东无所仰给乃并山入阳翟出兵袭之且行且战至三峯山遂溃哈达知大事已去欲下马战而布哈已失所在哈达走钧州元兵塹其城外攻之不得出匿窟室中城破被杀哈达熟知敌情习于行阵重义轻财与下同甘苦遇敌辄身先之众亦乐为之用左丞张行信尝荐之曰完颜哈达今之良将也

△伊喇布哈

伊喇布哈本契丹人哀宗为皇太子选充亲卫军总领宣宗大渐令布哈屯兵艮岳以备非常及即位授权枢

密院判官军国大计多从决之正大四年河朔军突入商州布哈逆战获游骑一人辄以捷闻人知其罔上而无敢言六年权枢密副使率完颜陈和尚忠孝军一千驻邠州且令观敌势八月再复潞州诏与总帅约赫德权签枢密院事额尔克救庆阳七年战于太昌原元军退庆阳围解还京兆未几以权参知政事与哈达行省子阌乡八年正月元军入陕西凤翔破与哈达弃京兆而东十二月元兵济自汉江两省军入邓州召诸将议由光化截江与战为便放之渡而战为便张惠曰截江便若纵之渡我腹空虚必为所溃布哈达之曰彼在沙碛且当往求之况今自来平鼎珠高樊皆然其言哈达问之阿达茂茂以为不然然不能夺布哈之议二十日探元兵北渡是夜进军比晓至禹山元骑已尽济矣两省立军高山各分据地势步迎于山前骑屯于山后元兵来观观竟不前散如鴈翅转山麓出骑兵之后分三队而进哈达曰今日事势不当战且待之俄而元兵突前以短兵相接战三交元兵少退其在西者绕布哈骑后而突之为富察鼎珠力拒而退时高英军方北顾而元兵出其背

拥之英军动哈达几斩英英复督军力战元兵稍却英军定复拥樊泽军哈达斩一千夫
长军殊死鬪乃却之元兵回阵南向两省复议彼虽号
二万【绩通鉴作三万】而辎重三之一相持二三日不得食乘其却退当拥之布哈
曰江路已绝黄河不冰彼入重地将安归乎何以速为
乙亥元兵忽不知所在己卯遇骑还乃知元军在光化对岸枣林中昼作食夜不下马望
林中往来不五六十步而不闻音响庚辰两省议入邓
就粮到林后元兵忽来突以百骑邀辎重而去金兵几不成列逮夜乃入城九年正月癸
未大军发邓州趋京师骑二万步十三万骑帅富察鼎
珠富察达希布郎将阿达茂忠孝军总领瓜尔佳谙达内族达尔欢总领瓜尔佳额特埒
提控步军临淄郡王张惠珍寇都尉完颜阿巴高英樊
泽中军陈和尚与恒山公式仙杨沃衍军合次五朵山下取鸦路元兵以三千骑尾之遂
驻营伏骑于邓州道元骑来袭金军引之而东伏发元
兵南避癸巳至沙河元骑五千待于河北金军夺桥以过元军既西避复南渡沙河金军
欲盘营元军复渡河来袭明旦元兵增及万人且行且
战至黄榆店雨雪不能进盘营三日丙申近侍入军传旨令悉赴京师复有密旨云近知
张家湾透漏二三百骑已达卫孟两省当切防领旨讫
军即行元军前后以大树塞其路沃衍夺路得之军遂进至三峯山武高拥其西南杨樊
拥其田北元军俱却张惠阿达茂立山东望元兵二三
十万约厚二十里谋曰此地不战欲何为耶乃率骑兵万余乘上而下拥之元兵却须臾
雪大作白雾蔽空人不相覩泥淖汲胫军士僵立雪中
枪槊结冻如椽有不食至三日者元军四外围之炽薪燔牛羊肉更递休息乘金军困惫
乃开钧州路纵之走而以生军夹击之金军遂溃声如
崩山忽天气开霁日光皎然无人得逃者武仙率三千骑入竹林中杨樊阳三军争路
元兵围之数重及高英残兵其战于柿林村南沃衍泽
英皆死张老步持大枪奋战而没布哈走京师未至追擒之械至官山问降否往复数百
言但曰我金国大臣惟当境内死耳遂见杀

钦定绩通志卷四百四十三

●钦定续通志卷四百四十四 列传二百四十四

列传

金【二十二】

○金二十二

博索 持嘉喀齐喀 图克坦乌登 实嘉纽勒欢 富察官努

博索

持嘉喀齐喀

图克坦乌登

实嘉纽勒欢

富察官努

△博索

博索一名承裔末帝承麟兄也兴定元年为元帅左都监行帅府事于凤翔是年诏陕西行省伐宋出盐井屡败宋兵遂拔西和州克成州夷其险而还三年破虎头关遂取兴元及洋州宣宗大悦进博索官一阶时朝议以兰州当西夏冲久为敌据将遣博索复之博索奏曰臣近入宋境经涉险阻数千里士马疲弊未得少休而欲重为是举甚非计也不若息兵养士以备从之未几权参知政事行省平凉四年夏兵三万由高峯岭入寇定西州环城为栅博索遣乌库哩长寿等出战大败之先是夏兵数十万分寇龛谷鄜延大通诸城帝召博索等授以方畧命发兵袭其浮桥遂趋西凉别遣将取大通城畧夏地博索驰至临洮遣总管钮祜禄古尔锦积石州刺史图克坦牙武各摄帅职率兵西入攻大通克之因招来被胁僧俗人皆按堵如故二年冬哀宗即位边事益急正大五年拜平章政事博索居西陲几十年当宋夏之交虽颇立征效皆出诸将方本恇怯无能性复贪鄙及为相博索尤甚尝恶堂食不适口以家膳自随国家颠覆初不恤也九年正月诸军败绩于三峯山元兵长驱趋汴令史杨居仁请乘其远至击之博索不从乃遣完颜莽伊苏等部民万人开短堤决河水以固京城功未毕而骑兵奄至莽伊苏等皆被害丁壮无得反者初元兵破卫州宣宗南迁移州治于宜村渡筑新城于河北岸去河不数步惟北面受敌而以石包之岁屯重兵于此元兵屡至不能近至是弃之随为元兵所据三月京城被攻大臣分守四面博索主西南受攻最急楼橹垂就辄摧传令取竹为护帘大索竟无所得博索怒欲斩之员外郎张袞附所司耳语所司怀金三百两径往赂博索家僮果得之己而兵退朝廷议罢之博索不自安乃谓令中元好问曰我妨贤路久矣为我撰乞致仕表时己遣使持诏至其第令致仕既废军士恨其不战误国扬言欲杀之博索惧一夕数迁十月复起博索为平章政事画出京计十二月车驾至黄陵冈博索奏曰圣体不便鞍马且不可令元兵知帝所在今司驻归德臣等率降将往东平俟诸军到可一鼓而下帝以为然时帝己遣官努将三百骑探沔麻冈未还帝将御船赐博索剑得便宜从事决东平之策明年正月朔归德守臣以粮来饷遂就其舟以济命博索攻卫州诸将皆听节度萨布谓帝曰北行议己决不可中变帝曰丞相当与平章和同完颜仲德持御马衔苦谏曰存亡在此一举

卫州决不可攻帝麾之曰参政不知博索发自蒲城迁延八日始至卫猝无攻具及闻元兵济自张家渡遂班师元兵踵其后战于白公庙败绩博索等弃军遁【按宋史纪事本末云博索往卫州纵军四掠哭声满野所过邱墟公私皇皇人情始叛故卫州坚守而蒙古之追无一援者以至于败】车驾还次蒲城东三十里博索至仓皇言于帝曰今军已溃元兵近在堤外请圣主幸归德帝遂登舟时夜已四更矣狼狈入归德博索收溃兵大桥惧不敢入帝遣护卫迎之既至并其子下狱诸都尉司军以博索不战而退发愤出怨言帝乃暴其罪囚之七日饿死博索目不知书奸黠有余簿书政事闻之即解善谈议接人则煦煦然好货殖能捭阖中人王心遂浸渍以取将相既富贵起第于汴之西城规模拟宫掖婢妾百数皆衣金缕奴隶月廩与列将等犹以为未足帝尝遣中使责之曰卿汲汲于此将无北归意耶博索终不悛以及于祸

△持嘉喀齐喀

持嘉喀齐喀性刚愎好自用朝廷以才干任之宣宗时累迁兰州刺史提控军马贞佑四年夏人围定西鞏致攻具将取其城喀齐喀及杨噶拉等率兵鏖战走之兴定元年授同知临洮府事陕西行省奉诏伐宋喀齐喀骑来远寨以张声势二年宋兵侵临洮喀齐喀击走之三年迁元帅左都监行元帅府事于巩州四年夏人犯边喀齐喀讨之与提控乌库哩世鲜都统王定等屡败夏兵于新泉城夏人攻巩州喀齐喀生擒夏将讯知其谋飭兵严备俄而兵至搏战却之杀伤以万计夏人拔栅而去喀齐喀伏甲要地邀之复蹶其后斩首甚众以功遥授平西军节度使元光元年元将蒙古布哈攻凤翔朝廷命喀齐喀将兵援之二年元兵及夏人步骑数十万围凤翔东自扶风岐山西连汧陇皆其营栅攻城甚急喀齐喀尽力御之是岁升签枢密院事哀宗即位拜参知政事权枢密副使正大八年邓州驰报元兵破饶峯关由金州东下院官同奏元军冒万里之险历二年之久方入武林劳苦已极为吾计者以兵屯睢郑昌武归德及京畿诸县以大将守洛阳潼关怀孟等处严兵备之京师积精数百万斛令河南州郡坚壁清野彼深入之师欲攻不能欲战不得师老食尽不击自归矣帝太息曰敌至不能迎战徒自保何以为国乃诏哈达布哈等屯军襄邓九年两省军溃于三峯山元兵进簿京师三月庚子议曹王出质元兵北行苏布特攻城既有纳质之请即云我受命攻城但曹王出则退不然不罢也【按续纲目曰金主遣曹王额尔克为质请和苏布特闻之曰我受命攻城不知其它与本传语异】癸卯曹王出诣军前元兵并力进攻喀齐喀先以守凤翔自夸及其守西北隅其地受攻最急

语言失措面无人色凡十六昼夜始罢攻喀齐喀以大兵退议入贺诸相皆不欲独喀齐喀以守城为己功持论甚力权参政内族色埒曰城下之盟诸侯以为耻况以罢攻为可贺欤喀齐喀怒曰社稷不亡帝后免难何为不喜会学士赵秉文不肯撰表议遂寝是月喀齐喀罢枢密有投匿名书于御路云副枢喀齐喀总帅萨哈参政恩楚皆国贼朝廷不杀众军亦须杀之卫士以开萨哈饮药死恩楚称疾不出惟喀齐喀坦然若无事者帝亦无所问由是军国之事尽归喀齐喀矣是

【按天兴元年即正大九年也本传已书九年矣于此复纪天兴元年易涉蒙紊今改正】七月【归潜志作八月】权参政知政事色埒恒

山公武仙合军自汝州入援诏以喀齐喀为枢密使统京城军万五千应之八月驻于近郊候益兵乃进屯中牟古城凡三日闻色埒军溃即夜弃輜重驰还言者谓喀齐喀始则抗命不出中则逼遑不进终则弃军先遁不斩无以谢天下帝贷其死免为庶人籍其家以赐军士会元将苏布特遣人招之喀齐喀即治装欲行崔立邀饯于省廨以白金二百明日复诣省别立方对语适归德行省文书至传哀帝语谕曰卿朕老臣中间虽废出未尝忘卿今崔立为变卿处旧人尚多若能反正与卿世袭公相立怒叱左右系之狱斩之

△图克坦乌登

图克坦乌登不知其所始累官中京留守招亡命千人号熊虎军剽掠南鄙宋人亦时时报复边民骚动乌登资性深刻而好设耳目凡诸将官属下及民家细事令亲昵日报之务为不可欺天兴元年正月元兵入饶风移乌登行省闾乡以备潼关图克坦伯嘉为关陕总帅便宜行事会召乌登入援遂与潼关总帅纳哈塔和硕秦蓝总帅完颜重喜高平都尉苗秀荡寇都尉珠嘉茂振武都尉张翼及虎威鹰扬葭州刘赵二帅军十一万骑五千尽撤秦蓝诸隘备从虢入陕同华闾乡军粮数十万斛备关船二百余艘皆顺流木下闻元兵近粮皆不及载船悉空下复尽起州民运灵宝硖石食粟游骑至杀掠不胜计又遣陕州观察副使穆延苏页以船往运潼关闾乡量行及灵宝北河夹滩会元将古鲁罕扎攻义军张信侯三水寨不克苏页船至即降元兵得之遂破侯张初乌登发闾乡拜天赏军人白金三两将校有差又日造银器及兵幕牌印库藏一空欲劫民财以资军苏呼谏之而止有李先生者谏曰元兵今在河南河北空虚可失取卫州出其不意彼必分兵北渡京师即得少宽相公入援亦易为矣乌登大怒谓泄军机斩之遂行军士各以老幼自随商贾亦从迁避妇女皆嫁士卒竟亦有强娶夺者是日军出两东门不遵

洛阳路由州西南径入大山冰雪中诸帅皆叛去山路积雪昼日冻释泥淖及胫随军妇女弃掷幼稚哀号盈路至铁岭元兵绝其归路金兵已数日不食困惫不支完颜重喜先降元军斩于马前郑侗劫苗英降英不从杀之携其首以降于是士卒大溃乌登和硕提数十骑走追骑擒得杀之是役也荡寇鹰扬诸都尉及西安金鸡等军脱走者百才一二苏呼窜归有报图克坦伯嘉迎之陕州自军出日有逃还者伯嘉皆抚纳之军稍振七月复召伯嘉入援以权西安军节度使阿布哈努色尔代之巩昌知府元帅完颜呼沙呼入陕州诏拜参知政事行尚书省事寻召呼沙呼赴南阳留山寺又以努色尔权参知政事行省时赵伟为河解元帅屯金鸡堡军食尽屡白陕省无粮可给乃自往永宁劝喻伟颇为小民所信往往献粮或导其发藏南县把陆军提控以伟横恣言于行省行省遣赵提控者权元帅守永宁元村寨伟还金鸡元兵已破元村寨伟攻解州不能下密遣总领王茂入陕州乘夜召伟军入百渡河入城劫杀行省以下官属二十一人诬奏努色尔等谋反朝廷知其冤而莫敢诘就授伟元帅左监军明年三月降于元伟之变绛州录事张升谓知识者曰我本小人受国家恩不能从反贼赴水死及图克坦伯嘉郑西之败闲道入京为帝言铁岭败状于是籍重喜和硕乌登定贲暴乌登为罪首榜之通衢

△实嘉纽勒欢

实嘉纽勒欢本名实禄兴定三年为元帅右都监行平凉元帅府事上言镇戎赤沟川东西四十里地无险阻当夏人往来之冲明年春当城镇戎彼必来挠乞征旁郡兵声言防护且令鄜巩各屯兵境上示进伐之势以掣其肘臣领平凉之众入攻其心腹则镇戎可城而彼亦不敢来犯又所在官军多河北山西失业之人家属仰给县官每患不足镇戎肥沃平衍若授以荒田使耕且战则县官省费而食亦足矣其余边郡亦宜一体措置帝嘉纳焉迁昌武军节度使又言商洛重地西控秦陕东接河南军务繁密宜选才干士为防御使摄帅职镇之旧来诸隘守御官并从帅府辟置多其亲昵殖产营私当代又复保留为害最甚宜令枢密选举以革其弊又州之戍兵艰于馈运合依屯田以免转输又每年防秋诸隘守者不过数十人余尽屯保安石门大荆洛南为应援相距远至百里仓庾岂能征集宜近隘筑营徙见兵居之以待缓急又南边所设巡检十员兵卒千人此乃平时以诘奸细者已有大军宜悉罢去朝廷畧施行之正大九年以行枢密院事守归德元将特默岱来攻提控张定夜出斫营发数炮而还定平日好谈兵纽勒欢令自募一军使为提控小试而胜上下遂恃以为可用元军中有献决河之策者主将从之水

从西北而下至城西南入故濉水道城反以水为固围稍缓天兴二年帝至归德时城中止有马用一军七百人【哀宗纪作二百八十余人

】官努忠孝军四百五十人河北溃军至者皆纵遣之【按宋史纪事本末云时随驾亲军及河北溃军渐集纽勒欢惧不能给乃遣令出城

及就粮于徐陈宿三州是纵遣官军致富察官努之变者纽勒欢也本传不载其谋谨识于此】帝时召用计事而不及官努做官努有异心朝

廷知两人不协恐生变命宰相锡宴省中和解之用遂撤备官努乃以兵攻用杀之遂驱纽勒欢至言自车驾到上供不给汝罪何辞拥至其家

检出所有金具然后杀之即提兵入见言实嘉纽勒欢等反臣杀之矣帝不得已就赦其罪且暴纽勒欢之恶后其侄大安入蔡上言求湔雪帝

乃复其官

△富察官努

富察官努少尝为元兵所据后自拔归收充忠孝军万户月给甚优日与羣不逞博为有司所劾诏勿问伊喇布哈攻平阳官努请行论功

第一迁提控三峰山之败走襄阳说宋制使以取邓州自效己而知汴城罢攻复谋北归遣伊喇瑠格说邓帅聂赫称欲劫南军为北归计瑠格

以情告聂赫聂赫欲就瓮城中擒之官努知事泄乃缚忠孝军提控姬旺诈为唐州太守械送北行因得入汴或言其出入南北军行数千里不

慑智畧可取使权副都尉未几提军数百驰入元军猎骑中生挟一回纥而还又以军至黄陵几获镇州大将是中外皆以为可用遂拜元帅

统马军天兴元年十二月从哀宗北渡平章博索率诸将战官努功居多及渡河朔惟官努一军号令明肃秋毫无犯明年正月帝王归德知府

实嘉纽勒欢以军众食寡请令河北溃军至者就粮徐宿陈三州亲卫军亦遣出城就食帝不得已从之乃召谕官努曰纽勒欢尽散卫兵卿当

小心是时惟官努忠孝军四百五十人马用军七百人留府中用本果毅都尉帝至归德始升为元帅又尝召之谋事而不及官努故官努始有

图用之志官努既总兵柄私与国用安谋欲邀帝幸海州不从又请北渡再图恢复纽勒欢沮之自是有异心矣帝窃忧之以马军总领赫舍哩

阿里哈内族锡馨阴察其动静二人知官努不能制反泄帝意官努遂杀马用纽勒欢遣都尉马实劫直长把纳绅于帝前帝掷剑于地曰且留

待我实不敢迫而退凡杀朝官右丞蹊己下三百余人军将禁卫民庶死者三千郎中完颜呼喇勒都事冀禹锡赴水死【按原史此下附冀

禹锡传令改作博传归忠义门此从删】帝不得已赦其罪以为枢密副使权参知政事初官努之母为元兵所得至是帝命因其母请和官努

密与元将特默岱约欲劫帝以降特默岱信之还其母乃日往来讲议帝密令以金银牌与其来使勿令还营因知王家寺大将所在官官努画斫营之策五月五日祭天阴备火枪战具率忠孝军四百五十人自南门登舟由东而北夜杀外提逻卒遂至王家寺四更接战初小却再进官努以小船分军伍七十出栅外腹背攻之持火枪突入元军不能支即大溃溺水死者凡三千五百余人尽焚其栅而还遂拜官努参知政事兼左副元帅兵既退官努入亳州留锡馨总其军帝御照碧堂无一人敢奏对者日自悲泣于是密谋诛官努再召之还谕以幸蔡事官努愤愤而出帝决意诛之复召议事奉御钮祜禄温绰伏照碧堂门间官努进见从后刺其肋遂杀之忠孝军闻难皆擐甲帝亲抚慰以安反侧初官努尝从内族色埒默过蔡知备御不及睢阳力争幸蔡议号于众曰敢言南迁者斩众以官努为无君讽帝早为计遂诛之后遣乌库哩布什如蔡还言其城池兵粮果不足恃上已在道无可奈何及蔡受兵始悔不用官努之言特诏尚书省月给其母妻粮俸无失所

钦定续通志卷四百四十四

●钦定续通志卷四百四十五 列传二百四十五

列传

金 【二十三】

○金二十三

苗道润 王福 伊喇重嘉努 武仙 张甫

靖安民 郭文振 胡天作【史咏】 张

开 燕宁

苗道润

王福

伊喇重嘉努

武仙

张甫

靖安民

郭文振

胡天作【史咏】

张开

燕宁

△苗道润

苗道润贞佑初为河北义军队长宣宗迁汴河北土人往往团结为兵或为羣盗道

润有勇畧能得众心累战有功略定城邑遣人诣南京求官封宣宗召问河南转运使王扩扩对曰兼制天下者以天下为度道润得众有功因而羈縻使自为守策之上也今不许彼负其众何不可为于是除道润同知顺天军节度使事累功迁中都路经略使前后抚定五十余城兴定元年诏道润恢复中都以山东兵益之道润奏去年臣遣总领张子明招降蠡州通吉齐锦近日河北东路兵马都总管伊喇特尔格移军蠡州袭破子明军臣将提兵问罪重以特尔格自拔来归但备之而已今欲复取都城乞无罪特尔格直令受臣节制庶可集事宰相奏二人不协不可相统属完颜■〈宀禹〉行元帅府事以和辑之初道润与顺天军节度使李琛不相能琛遣兵攻满城完州道润军拒战杀琛兄荣及弟明等奏琛以众叛琛亦奏道润与潞州提控乌凌阿乌登日谋侵害杀臣兄弟将为后患又奏乞令河北州府官不相统摄并听帅府节制仍遣官增减诸路兵力使权均势敌无相并吞则百姓安农亩矣廷议令山东行省枢密院谕琛行省在彼自当俱听节制何待帅府士兵本以义团结且耕且战今乃聚之城寨遂相并吞百姓不安皆由官长无所忌惮使之然也以后严为约束依时树艺无致生事有诏道润与伊喇特尔格合兵抚定河北既而道润与贾全贾瑀互相攻击贾瑀诈约和道润信之遂伏兵刺杀道润朝廷不能问经畧副使张柔因攻贾瑀杀之道润死提控靖安民代领其众自后乃封建矣初贞佑四年司谏珠嘉直敦乞封建河朔诏尚书省议事寝不行兴定三年太原不守河北州县不能自立诏百官议所以为长久之利者乃封沧州经畧使王福为沧海公河间路招抚使伊喇重嘉努为河间公真定经畧使武仙为恒山公中都东路经畧使张甫为高阳公中都西路经畧使靖安民为易水公辽州从宜郭文振为晋阳公平阳招抚使胡天作为平阳公昭义军节度使完颜开为上党公山东安抚副使燕宁为东营公九公皆兼宣抚使阶银青荣禄大夫赐号宣力忠臣总帅本路兵马署置官吏征敛赋税赏罚号令得以便宜行之

△王福

王福本河北义军积战功累迁沧州经畧副使兴定元年福遣提控张聚王进复滨棣二州以聚摄棣州防御使进摄滨州刺史久之福与聚有隙聚以棣附于益都张林三年福上言沧州东滨沧海西连真定北备元兵乞选重臣为经畧使得便宜从事以镇抚军民朝廷以福初率义兵复沧州有众万余自雄一方与张林张聚邻境今利津已破辽东道阻且其意本欲自为因而授之可使招集滨棣之人通辽东音问乃以

福为本州岛经略使仍令自择副使四年封为沧海公以清沧观州盐山无棣乐陵东光宁津吴桥将陵阜城蓀县隶焉四月红袄贼李二太尉寇乐陵棣州张聚来攻福皆击却之李二复寇盐山经略副使张文与战大败之后张林与张聚日来攻掠沧州危蹙遂纳款于林东平元帅府请讨福朝廷以防秋在近乃止

△伊喇重嘉努

伊喇重嘉努积战功累官河间路招抚使赐姓完颜氏兴定四年封河间公以献蠡安深州河间肃宁安平武强饶阳六家庄郎山寨隶焉兴定末所部州县皆不可守元光元年移屯信安本张甫北境张甫因奏地当冲要乞权改为府以重之诏改为镇安府兴甫合兵复取河间府及安蠡献三州明年同保镇安各当一面别遣总领提领孙汝楫杨寿提控袁德李成分保外垣遂全镇安未几重嘉努奏镇安距迎浆堦海口二百余里实辽东往来之冲甫有海船在镇安西北可募人直抵辽东以通中外之意今拟应募者特迁忠显校尉授八品职仍赏宝泉五千贯官职已至忠显八品以上者迁两官升职一等回日再迁两官升职二等诏从之

△武仙

武仙 【续通鉴作武善】 威州人尝率乡兵保威州又破石海于真定兴定四年累迁知真定府兼经略使无可封恒山公以中山真定府沃冀威镇宁平定州抱犊寨栾南宫县隶焉兄贵亦为安国军节度使史天祥击之与仙同归元仙与史天倪俱治真定且六年积不相能惧天倪图己尝欲南走宣宗招之正大二年贼杀天倪复以真定来降元将萨纳台讨击之仙乃奔汴五年召见复封恒山公置府卫州七年卫州被围内外不通诏平章政事哈达枢密副使布哈救之徙仙兵屯胡岭关扼金州路八年元兵涉襄汉哈达布哈驻邓州仙由荆子口会邓州军天兴元年哈达布哈败绩于三峯山仙遂走南阳收溃军得十万人屯留山及威远寨立官府聚精食修器仗兵势稍振三月汴京被围擢为河南行省诏与邓州行省色埒合兵入援至密县东遇元将苏布特兵仙即按军山口山店报色埒曰阻涧结营待仙至俱进不然败矣色埒急欲至汴不听行至京水元兵乘之不战而溃仙走还留山哀宗诏曰色埒不知兵向使从卿阻涧之策岂有败哉军务一以付卿戮力一心以图后举十一月复召仙山不欲行乃上疏陈利害请缓三月生死入援洪果萨哈降元苏布特署守裕州萨哈诈以书约仙取裕仙信之萨哈与元兵夹击败仙于柳河仙走圣朵寨时哀宗在归德遣修撰魏璠间道召仙仙阅兵选锋尚十万璠曰主上旦夕望公不宜久留此仙怒几杀璠璠还归

德仙奏请诛璠哀宗不听已而圣朵乏食仙徙军邓州仰给于邓州总帅伊喇瑗 【瑗宋史纪事本末作琮】 瑗畏逼以女女仙仙不疑纳之乃还顺阳瑗终疑仙与城降宋 【按续通鉴武山次顺阳与武天锡伊喇瑗相掎角谋迎金主入蜀宋孟珙逼天锡垒斩之武仙败走瑗孤立而惧乃降与本传异】 宋孟珙来袭仙迎击大败珙兵惧复来徙浙川之石穴时哀宗在蔡州遣近侍乌页责仙曰朕平日未尝负卿国家危难至此忍拥兵自恃坐待灭亡耶将士闻之相视哽咽皆愿赴难仙惧众心有变乃杀马牛歃血盟誓不负国家众乃大喜复谓众曰蔡州道梗吾兵食少恐不能到且蔡不坚守纵到亦无益近覘宋金州百姓据山为栅广袤百里积精三百万石今取此为根本然后趋蔡迎帝西幸未晚也众未及应即令戒行李取浙川泝流而上路险水悍溺死不可胜数军士绝食亡者八九仙进退失据遂谋北走 【按续通鉴绍定六年孟珙大败武仙于马磴山时仙徙石穴分据九砦珙六日破其七分兵进攻遂破石穴连败之仙与五六骑遁去本传第言进退失据而不详其事恐有遗漏】 行部尚书卢芝侍郎石玠曰吾等知仙不恤国家久矣谏之不从去之未可事至今日正欠蔡州一死耳假若不得到蔡死于道中犹胜死于仙也既去仙追玠杀之芝至南阳为土贼所害明年蔡州破将士大怨皆散去仙从十八人北渡河趋泽州为戍兵所杀

△张甫

张甫初归顺元涿州刺史李奇嚙招之兴定元年与张进俱来降东平行省蒙古纲承制除甫中都路经略副使二年甫与永定军节度使贾全不协以兵相攻朝廷怪奇嚙不能和辑诏纲讲睦纲奏张甫本受奇嚙招降情意厚善今遣同知安武军王郁先与奇嚙议所以平之者然后可诏从纲奏未几全复捕甫部民杀甫参议官刑■〈王毕〉甫率兵攻之全败走自缢甫请符印以安辑部众诏与之无何李奇嚙归元甫为中都东路经略使三年甫奏真定兵冲乞遣重臣与武仙并力守之不报及真定不守甫复奏权元帅右都监柴茂保冀州水寨孤立无援乞益兵助之四年封高阳公以雄莫霸州高阳信安文安大成保定静海宝坻武清安次县隶焉元光元年赐姓完颜二年张进累迁元帅左监军亦赐姓完颜

△靖安民

靖安民永兴人初充义军隶苗道润麾下累功迁中都路总领招抚使兴定二年道润死行省侯击承制以李奇嚙权中都路经略使道润之众不服愿得安民代之三年分雄霸以东为中都东路奇嚙领之易州以西为中都西

路安民领之俱任经略使四年安民上书曰苗道润抚定州县五十余城为西京路经略使刘铎嫉其功竟以阴谋贼害铎又僭刘智元等掠镇抚孙资招抚杨得胜家口若铎常居此恐致败事铎亦遣副使刘璋诣南京自诉言安民冒滥封拜诱惑人心强抑总领冯通王彦晖等仗刘智元杀杜贵事廷议以铎本行招诱逋亡今乃与安民互相论列起争端苗道润死安民实代领其众彦晖等军本隶道润当听安民节制乃召铎还顷之封安民易水公以涿易安肃保州君氏川季鹿三保河北江矾山寨青白口朝天寨水谷欢谷东安寨隶焉十月安民出兵至矾山复取檐车寨元兵围所居山寨提控马豹以安民妻子及老弱出降安民军中闻之骇乱众议欲降安民乃经厯官郝端不肯从遂遇害诏赠金紫光禄大夫

△郭文振

郭文振字拯之太原人承安二年进士累官辽州刺史深得众心兴定三年权元帅左都监【宣宗记作右都监】行河东北路元帅府事招降大原东山二百余村得壮士七千分驻防秋与张开合兵复取太原四年上疏曰河朔自用兵后郡邑萧然并无官长武夫悍卒因缘得志瓜分角竞以相侵扩乞行帅府擅请便宜朝廷因而抚之假权传授至与各路帅府力侔势均陕西行省路远道梗卒难闻之故飞扬跋扈无所畏惧自平阳城破以来河北不置行省朝廷信臣不复往来但令伊喇行报而已所司劳以酒食悦以货财借其声誉共欺朝廷臣夙夜忧惧乞分遣公廉之官徧诣访察庶知所在利害之实泽潞等处粮广民众地多险阻乞选重臣复置行省皆听节制上下相维则国势日重奸恶不萌矣时泽潞已诏张开规画不能尽用其言但令南京兵马使珠嘉赛音行帅府于怀孟而已是岁封晋阳公河东北路皆隶焉文振复奏武仙所统境上甚大虽与林州元帅府共招抚之乞更选州县官同与安集臣所统岚管隰石宁化保德诸州境土阔远不能周知利害葭州刺史瓜尔佳芬彻智勇过人深悉河东事势乞令行元帅府事或为本路兵马都总管与臣分治诏皆许之上党公张开以厚赏诱文振将士颇有亡归者诏分辽潞粟賑太原饥开不与文振奏闻迺遣使慰谕之文振又请分上党粟以贍太原诏与张开计度元光元年林州行元帅府惟良得罪召还文振奏惟良在林州五岁政尚宽厚大得民心今兹被召军民遮路泣留其去未几义尖之众作乱逐招抚使康塘乞遣还为便不许又奏乞起前平章胥鼎行省河北诸公府帅府并听节制诏谕百姓使知不忘遗黎之意然后以河南陕西精锐并力恢复不报二年诏文振应援史

咏复河东是岁辽州不能守徙其军于孟州部将汾州招抚使王遇与孟州防御使纳喇蒙古勒不相能复徙卫州然亦不可为军迄正大间寓于卫而已

△胡天作 【史咏】

胡天作字景山管州人以乡兵守御本州岛累功迁管州刺史兴定二年平阳失守三年复取之天作言汾潞皆置帅府平阳大镇今稍完复州县不下十万户复业者相继不绝过汾潞远甚宜一体置之乃以天作充便宜招抚使四年封平阳公以平阳晋安府隰吉州隶焉天作守平阳屡有功诏录其子定格为奉职元光元年青龙堡危急诏遣瓜尔佳实伦会张开郭文振兵救之次弹平寨东三十里不得进知府事珠格和色哩总领提控王和各以兵归顺于元兵民皆溃执天作出降诏诛和色哩子定格承应如故天作已受元官招抚怀孟之民定格闻之自经死赠信武将军睢州同知诏张开郭文振招天作天作至济源欲脱走先遣人奏表南京元将恶其反复遂诛之宣宗以史咏权行平阳府事后封平阳公平阳破获咏父祚母萧氏使招咏祚自缢萧氏逃归咏妻梗氏亦自死赠祚荣禄大夫京兆郡公谥成忠萧氏封京兆郡太夫人赐号归义梗氏赠京兆郡夫人谥义烈未几咏乞内徙徙解州河中府

△张开

张开景州人至宁末河北兵起开团结乡兵为固守累功遥授同知青州防御事贞佑四年率所部复取河间府及沧献二州十有三县又复青州迁观州刺史权经略使赐姓完颜观州粮尽徙军辉州乞麦种三千石驴羸三百户部不与御史台奏开自观州转战来此久着劳绩欲令其军耕种自给有司计小费拒不与乞断自宸衷诏与之是岁潼关不守诏召入卫南京兴定三年与郭文振共复太原四年封上党公以泽潞沁州隶焉元光元年复取高平县及泽州二年大战壶关有功既而潞州危急开乞升泽沁二州为节镇以重守御诏以泽为忠昌军沁为军胜军正大间潞州不守开居南京部曲敌散与匹夫无异天兴初起复与刘益为西面元帅领安平都尉纪纲军五千攻卫州败绩于白公庙时哀宗走归德开与刘益谋收溃兵从卫不果遂与承裔西走皆为民家所杀初置公府开兴武仙最强后驻兵马武山遣人间道请粮用事者斩之止给二千石开置酒召诸将曰顷以粮竭为请祈二万而得二千是君相不以武仙辈待我也是时郭文振处开西北当兵之冲民贫地瘠开又不奉命以粮赈文振军文振穷窜开势愈孤以至于败

△燕宁

燕宁初为莒州提控守天胜寨与益都田琢东平蒙古纲相依为辅车之势山东虽残破犹倚三人为重红袄贼五公喜据注子堠率众袭据沂州宁击走之遂复沂州招降胡七胡八引为腹心贼中多欲降者与定四年封东莒公益都府路皆隶焉五年以保全东平功迁金紫光禄大夫还天胜战死纲奏宁克尽忠孝虽位居上公祖考未有封爵没后老稚无所衣食乞降异恩以励节义之士诏赠故祖皋银青荣禄大夫祖母张氏范阳郡夫人父希迁金紫光禄大夫母彭氏继母许氏妻霍氏皆为范阳郡夫人族属五十二人皆廩给之

钦定续通志卷四百四十五

●钦定续通志卷四百四十六 列传二百四十六

列传

金 【二十四】

○金二十四

白华

锡默受实

完颜纳绅

聂天骥

持嘉乌绅

图克坦伊都

钮祜禄经实

王宾

钮祜禄纳绅

乌库哩鎬

张天纲

白华

锡默爱实

完颜纳绅

聂天骥

持嘉乌绅

图克坦伊都

钮祜禄经实

王宾

钮祜禄纳绅

乌库哩鎬

张天纲

△白华

白华字文举澳州人贞佑三年进士初为应奉翰林文字累官枢密院经历正大二年武仙以真定来归朝廷方经理河北宋将彭义斌乘之遂由山东耶那洺磁等州华上奏曰元兵有事河西故我得少宽今彭义斌招降河朔郡县寢及真定宜及此大举以除后患时院官不欲行即遣华相视彰德实挤之也事竟不行三年集百官议和宋时夏全自楚州来奔诏问全所以来华具奏因是为帝所知全至后盱眙楚州王义

深张惠范成进相继以城降和宋议寝五年增筑归德城拟工数百万遣华往相役见行
院温扎辛语以民劳朝廷爱养之意减工三之一六年
以华权枢密院判官帝以李全据楚州谕忠孝军总领富察鼎珠经历王仲泽户部郎中
刁璧及华招之华对曰李全何足介怀所虑者元兵方
强耳今元方有事未暇南图一旦事定必来攻矣与我争天下者此也为今计者姑养士
马以备北方帝沉思久之明日遣鼎珠还屯尉氏时北
兵欲攻河中而卫州帅府与恒山公府并立虑一旦有警节制不一欲合为一又恐其不
和命华往经画之 【按哀宗纪载经画卫州事在正
大五年】 如期而还奏曰元军入军已三百余里若纵之下秦川则何以救当一战摧之
与其战于近里之平川不若战于近边之险隘帝以为
然七年庆阳围解华奏凡今之计兵食为急除密院已定忠孝军及马军都尉司步军足
为一战之资此外应河南府州亦须签拣防城军秋聚
者放依古务农讲武之义各令防本州岛府城无致他日为资敌之用五月华真授枢密
判官元军自去岁入陕西翱翔京兆同华之间破南山砦
栅六十余所已而攻凤翔金军自阌乡屯至澠池两行省晏然不动宰相台谏皆以枢院
瞻望逗逼邈为京兆士庶横议蜂起以至诸相力奏帝
前因遣白华与右司郎中夹谷八里门道宰相百官所言谕两省以帝意华等观二相见
元兵势大皆有惧心还奏之帝曰我固知其怯不敢动
矣八年元兵陷凤翔至河中庆善努报粮尽将弃京兆而东华奏为今计者与其就襄汉
御之诸军比到可行半月不若径往河中一日可渡此
如得利彼襄汉军马必当迟疑不进矣未几哈达自陕州进奏帖亦为此事帝甚喜布哈
时在洛阳驿召至帝问河中可捣否市哈言我兵骑虽
多计皆冗杂元兵少而精无非选锋我军北渡彼必屯鞬重于不阳之北匿其选锋百里
之外放我师渡然后断我归路恐不得利召哈达至亦
言河中之事与前日上奏时势不同不敢自主议遂寝十二月河中府破九年京城被攻
兵退改元天兴并枢密院归尚书省华退罢十二月朔
帝遣近侍局提点伊喇宁古即白华所居问计将安出华附奏车驾当出就外兵可留皇
兄荆王使之监国任其裁处如此则太后皇族可存正
如春秋纪季入齐为附庸之事于是起华为右司郎中召谕之曰亲巡之计已决但所往
羣议未定有言归德四面背水可以自保者或言可沿
西山入邓或言不如取陈蔡路转往邓下卿以为如何华曰归德城虽坚久而食尽坐以
待毙决不可往欲沿西山入邓既汝州有苏布特断不
能往以今日事势止有背城力战与之一决外可激三军之气内可慰都人之心或止为
避迁计人心顾恋家业未必毅然从行可详审之帝不

能决寻召完颜正大等议遂以二十五日启行二年正月朔帝就归德餽船北渡至蒲城与元军接战莫能支遂拥帝登舟军资一切委弃元军逼之兵遂溃帝王归德崔立以汴京降时宁古之兄瑗为邓州节度命华召邓兵入援既至以事久不济淹留于馆会瑗以邓入宋华亦从至襄阳宋署为均州提督后范用吉送款于元华因而归元士大夫以华夙儒贵显国危不能以义自处为贬云用吉者本姓富珠哩名玖珠初归入宋未几纳款于元后家人诬以欲叛为同列所害

△锡默爱实

锡默爱实字正之策论进士累官翰林直学士天兴元年正月以点检瓜尔佳萨哈为总帅率步骑三万巡河渡命宿直将军内族长乐监其军行至封邱而还明日元兵【本史及弘简录俱讹作金兵今改正】遂合于是爱实上言萨哈统兵三万本欲乘元兵远至喘息未定而击之出京纔数十里不逢一骑已畏缩不敢进设遇重敌其肯用命乎乞斩二人以肃军政不报又言卫绍镐厉二王家属防护之严过于狎狎男女婚嫁人之大欲岂有幽囚终世永无伉俪之望在他人尚不忍况骨肉乎哀宗感其言始听自便未几有青城之难爱实愤时相非人尝累数曰平章博索固权市恩击丸外百无一能丞相萨布菽麦不分即谓乏材亦不至此人为相参政喀齐喀羸暴一马军之材乃令兼将相右丞延扎舒噜居相位已七八年碌碌无补患难之际倚注此类欲冀中兴难矣于是舒噜罢相萨布乞致仕而博索喀齐喀不恤也时京城虽罢攻以害唐庆绝和议命转运使完颜珠赫等掠京城粟前御史大夫内族哈昭与左丞李蹊总其事先令各家自实壮者存石有三斗幼者半之敢有匿者以升斗论罪内族完颜玖珠尤酷暴有寡妇二口实豆六斗内有蓬子三升玖珠执以令于众妇泣诉曰妾夫死于兵姑老不能为养故杂蓬糗以自食非敢为军储也不从竟死杖下京欣闻之股粟或白于哈昭昭曰花不损何由成蜜且京师危急欲存社稷耶存百姓耶当时皆莫敢言爱实奏言罢括粟则改虐政为仁政散怨气为和气不报时所括不能三万斛而京城萧然死者相枕贫富束手待毙而已帝闻之命出太仓米作粥以食饿者爱实叹曰与其食之宁如勿夺为奉御博诺所告又近侍干预朝政将相大臣不敢与抗爱实奏曰自古仆御之臣必选择正人今不论贤否惟以世胄或吏员为之以使令之贱役预社稷之大计此辈果何所知乎章既上近侍泣诉曰爱实以臣等为奴隶置至尊于何地耶帝益怒送有司近侍局副使李大节从容开释乃赦之出为中京留守后不知所终

△完颜纳绅

完颜纳绅字正甫苏呼弟也策论进士累官吏部侍郎命鞫近侍张文寿仁寿李麟之受敌馈遣得其奸状皆斥去朝论快之再使元以劳拜参知政事天兴元年元兵驻郑州遣使招降纳绅往乞和不许攻汴益急哀宗议亲出捍御以纳绅兼枢密副使完颜萨尼雅布权参知政事总诸军留守京师十二月辛丑帝出京以兵部侍郎李辛跋扈密谕纳绅等羈繫之帝既行纳绅等召辛辛惧谋欲出降踰城而走纳绅等遣人追斩之汴民以帝亲出师日听捷报且以二相持重幸以无事俄闻军败卫州苍黄走归德民大恐时汴京内外不通米升银二两殍者相望搢绅士女多行入至有自食其妻子者及归德遣使迎两宫人情益不安于是民间有立荆王监国以城归顺之议而二相皆不知也二年正月丙寅【原文作戊辰因下文再纪戊辰与归潜志及本纪相符故此处从改】省令史许安国诣讲议所言古者有大疑谋及卿士谋反庶人今事势如此可集百官士庶问保社稷活生灵之计左司都事元好问以白纳绅纳绅曰此论甚佳可与萨尼雅布议之好问以告且言曰民间汹汹相公何以处之萨尼雅布曰吾二人惟有死耳好问曰死不难诚能安社稷救生灵死可也如其不然徒欲一身饱五十红衲军亦谓之死耶萨尼雅布自我知之矣即命召京城官民明日皆聚省中计议有父老七人陈词云云纳绅拱立无词独萨尼雅布反复申谕国家至此无可柰何凡有可行当共议之且继以涕泣明日西面元帅崔立为变率甲卒横刀入省中拔剑指二相曰京师危困已极二公坐视百姓饿死恬不为虑何也二相大骇曰汝辈有事当其议之何遽如是立麾其党先杀萨尼雅布次杀纳绅及左司郎中纳哈塔德晖等余见崔立传

△聂天骥

聂天骥字符吉五台人至宁元年进士兴定初为尚书省令史时胥吏擅威士人往往附之独天骥不用假借寻授吏部主事权监察御史夏使贺正旦互市于会同馆外戚有身贸易于其间者天骥上章曰大官近利失朝廷体且取轻外方遂忤太后旨出为同知汝州防御使事寻知卫州行尚书六部事庆阳围急遣宿州卫总帅约赫德救之以大骥充经歴官围解从别帅守邠州帅欲弃州而东左骥力劝止之不从帅坐逮天骥降职寻有讼其冤者即召为开封签事崔立之变天骥被创甚卧十有余日其女舜英谒医救瘥天骥叹曰吾幸得死儿女曹乃尚欲我活耶竟郁郁以死舜英葬其父明日亦自缢有传天骥沉静寡言不妄交起于田亩能以雅道自将践历台省若素宦然人多自以为不及也

△持嘉乌绅

持嘉乌绅字大用上京人当袭其父穆昆不愿就中明昌五年策论进士累官监察御史言诸王驸马至京师和买诸物失朝廷体有诏禁止迁镇南军节度副使息州刺史耕鞠场种禾两禾合穗进于朝特诏褒论丞相高汝砺尝荐其才可任宰相元光二年正月召为户部侍郎未几权参知政事二月为户部尚书正大元年拜尚书右丞哀宗欲修宫室乌绅极谏至以卧薪尝胆为言帝悚然从之内族萨哈连有定策功帝倚信之乌绅谏曰萨哈连奸谀之最日在天子左右非社稷福帝悔悟出为中京留守朝论快之五年致仕居汴崔立之变召家人付以后事望睢阳恸哭以弓弦自缢而死子栋齐没于兵间

△图克坦伊都

图克坦伊都不详其履历累官延安总管正大九年行省徐州时庆善努撤东方之备入援未至睢州徐邳义胜军总领侯进杜政张兴率本军降元兵于永州元兵守张盆渡伊都到官才三日惧兵少不能守即令伊喇长寿率甲士千人迎元兵长寿军无纪律元兵掩之一军皆覆徐危甚伊都籍州人及运粮扫兵得万人元兵传城烧南开而去侯进既降元引军来袭坎南城而上守者皆散走伊都闻之不及甲率夜直兵三百由黄楼而南方战御敌军势稍振复夺张盆渡败萧县破白塔救被俘老幼五十还徐既而进亡命驻灵壁政兴亦虑为元所害穷窘自归伊都抚纳之兴留徐政还邳州伊都资禀仁厚二子两侄为军将颇侵渔军民青州人王佑为埽兵总领伊都常倚之虽有过的不责以故佑横恣与张祚李闰丰绅成进忠辈乘军政废弛夜烧草场作乱时张兴卧病佑恐事不成起兴与同行伊都疑左右皆叛挈妻子缒城而出张兴推佑为都元帅【按金史哀宗本纪载丰绅据徐州推张兴行省事与此小异】复惧佑图己遂诛佑并张祚杀之大掠城中国用安率兵至徐执斩兴遂以丰绅为元帅兼节度使主徐州伊都奔宿州节度使赫舍哩阿古不纳与诸将驻城南城中镇防千户高拉格夜半开门纳徐州总领王德全及妻弟高元格军缚阿古父子杀之请伊都主师府事伊都不从曰吾为将帅久不能周防致失重镇今方逃罪不暇岂有夺城池以降外方乎即日率官吏行至谷熟东遇元兵不屈而死

△钮祜禄经实

钮祜禄经实不知其始正大中累官亳州节度使九年游骑自邓至亳径鹿邑鹿邑令高昂霄夜趋亳道出卫真呼县令楚珩谕县人以避迁之意遂同走亳是日军至亳州州止有镇安军四百人皆红袄余党变诈反复提控杨

春邢某都统戴兴屯已六年悉籍丁壮为军修守具而元兵亦不暇攻经实拥降民不去五月纵迁民收麦老幼得出丁壮悉留之民往往不肯留而遁数日城为之空经实遣将领招之并将领亦不返乃请于归德得甲骑百余杨春戴兴疑其谋已乘夜掩杀之经实出走卫真杨春北降元石总管入州以春为总管戴兴为同知留党项军千人戍之属县皆下惟城父令李用宜不降其妻子在亳春以为质竟不屈而死副提控邢某为人刚直循理时卧病闻春乱流涕不自禁春遣人舁致之邢指春大骂春慙恧无言春欲杀经实家邢力劝止之且令给道路费逸之出城邢寻病卒天兴二年元特默岱攻归德春以戴兴提精卒往与疲弱守城州人王宾反正春渡河北遁而崔富格为乱杀王宾朝廷不得已授富格节度使就其兵仗入蔡既而春复攻亳州入据之宋人来攻春出降刘均者林虑人时为亳州观察判官春既逐经实纳款元兵胁均同降均归家取朝服服之谓妻子曰我起身刀笔佐大藩死亦足矣今头颅如此假使有十年寿何以见先帝于地下乎即仰药死

△王宾

王宾字德卿亳州人贞佑二年进士外若旷达而深有谋画为尚书省令史坐事罢归大兴元年正月亳州军变杨春以州出降宾与前谯县尉王进魏节亨吕钧约城中军民复其州杨春遂遁遣节亨诣归德以闻哀宗嘉之授进节度使宾同知节度使节亨节度副使斌观察判官哀宗迁蔡宾奉迎于州北之高安帝与语大悦恨用之晚擢刑部尚书帝初至亳宾等适征民负甲入蔡及会计忠孝军家属口粮留参知政事张天纲董之就迁有功将士时亳之粮储不广军士怨宾吝及运甲之役复不欲行会天纲与宾等于楼上铨次立功等第镇防军崔富格王六十之徒哗噪而登拽宾及吕钧往市中钧且行且跪涕泪俱下宾岸然不惧大叫曰不过杀我乃杀之魏节亨王进等皆被害进赏应经实之募由间道入汴纳奏赏赐皆不受又散家所有济贫民以死自励一时甚称之

△钮祜禄纳绅

钮祜禄纳绅由任子入官或曰策论进士天兴间擢陈州防御使陈自兵兴军民皆避迁他郡纳绅择官吏明号令完城郭立庐舍实仓廩备器械未几聚流亡数十万口危困之民望而归者指为东南生路哀宗走归德改陈州为金兴军拜参知政事行尚书省于是纳绅立五都尉以将其兵时交战无虚日州所屯军十余万纳绅减所给军粮月一斛五斗者作一斛又作八斗又作六斗将领则不给人心稍怨李顺尔等因而有异志纳绅知其谋常以兵自防及闻元兵往朱仙镇市易纳绅遣李顺尔将兵袭项

城寨令孙镇抚召顺尔议兵事孙至其家顺尔已擐甲
孙欲观其刀顺尔拔示之孙色动即出门奔去顺尔追杀之乃上马引兵入省说军士曰
行省克减军粮汝辈欲饱食则从我不欲则从行省于
是省中军士皆坐不起纳绅闻变走后堂追杀之顺尔令五都尉军皆甲守街曲自称行
省遣赫舍哩正之送款于汴崔立乃遣其弟倚就加顺
尔淮阳军节度使行省如故未几虎威都尉富察哈达尽杀顺尔之徒举城走蔡州元兵
觉追及孙家林老幼数十万少有脱者刘天起者起于
匹夫汴京戒严上书假一职以自效天兴元年授都招抚使召见乞往陈州运粮一时皆
窃笑及至陈行军殊有方略出战数有功陈人甚倚重
之顺尔之变天起偃蹇不从为所杀同时唐古招抚者亦不屈死

△乌库哩镐

乌库哩镐本名噶老东北路招讨司人由护卫起身累迁蔡息陈颍等州便宜总帅
二年哀宗在归德富察官努国用安欲帝幸海州未决
会镐餽米四百余斛至且请幸蔡帝意遂决车驾发归德由亳入蔡以镐为御史大夫总
帅如故初镐守蔡门禁甚严男女樵采必以墨识其面
人有以钱出者十取一分有半以贍军帝至蔡或言其非便即弛其禁时从官近侍率皆
穷乏悉取给于镐镐亦不能人满其欲日夕交谮于帝
甚以尚食阙供为言帝怒召见特疏小罗索与舒穆鲁珍珠有隙怨镐为珍珠辨曲直厚
诬镐罪帝颇信之镐忧愤郁抑常称疾在告右丞仲德
每见帝必称镐功业宜令预参机务帝怒少解及参政穆延乌登行省息州镐遂权参知
政事九月元兵围蔡镐守南面忠孝军元帅蔡巴尔副
之【按哀宗纪镐守南面总帅元志副之蔡巴尔则西面副守也与此异今仍原文】
未几城破被执杀之

△张天纲

张天纲字正卿霸州益津人至宁元年词赋进士性宽厚端直论议醇正累官监察
御史以鲠直闻哀宗东幸扈从至归德擢吏部侍郎屡
言元帅官努反状帝不听官努果变遂擢权参知政事从迁蔡留亳州适军变天纲以便
宜授作乱者官州赖以安及入蔡转御史中丞仍权参
政扶沟县招抚司知事刘昌祖上封事请大举伐宋其畧云官军在前饥民在后南践江
淮西入巴蜀颇合帝意命天纲面诘语无可取然重违
帝命且恐塞言路奏以为尚书省委差官妖人乌库哩先生自言能使军士服气可不费
粮帝颇然之天纲力言其言遂止军吏舒穆鲁和尔自
谓有奇计退敌出马面具如狮子状而恶别制青麻布为足尾因言元兵所恃者马而已
欲制其人先制其马如我军进战以驯骑百余皆此状

系大铃于颈壮士乘之以突彼骑骑必惊逸我军鼓噪继其后此田单所以破燕也天纲言彼众我寡此不足恃祇取敌人笑耳亦罢之蔡城破为宋将孟珙所得械至临安宋主命知府薛琼问曰有何面目到此天纲对曰国之兴亡何代无之我金之亡比汝二帝何如琼奏其语宋主召问曰天纲真不畏死耶对曰大丈夫患死之不中节尔何畏之有因祈死不听有司令供状必欲书金主名天纲曰杀即杀焉用状为有司不能屈天纲但书故主而已后不知所终

钦定续通志卷四百四十六

●钦定续通志卷四百四十七 列传二百四十七

列传

元 【一】

○元一

穆呼哩【博啰 塔斯 苏肯彻尔 纳颜 巴图尔 托克托】 博尔济【伊实特穆尔】 博勒呼【塔齐尔】

穆呼哩

博尔济

博勒呼

△穆呼哩

穆呼哩扎拉尔氏世居鄂诺水东父崆根果斡以威里故在太祖麾下从平默尔奇斯征柰曼部数立功后柰曼又叛太祖与六骑走中道乏食擒水际橐驰杀之燔以啖太祖追骑垂及而太祖马毙五骑相顾骇愕崆根果斡以所乘马济太祖身当追骑死之太祖获免有子五人穆呼哩其第三子也沉毅多智略猿臂善射与博尔济博罗罕济拉袞事太祖俱以忠勇称号都尔本库鲁克犹华言四杰也一日太祖从三十余骑行溪谷间顾谓曰此中或遇寇当柰何对曰请以身当之既而寇果自林间突出矢下如雨穆呼哩引弓射之三发中三人其酋呼曰尔为谁曰穆呼哩也寇遂引去克呼王汗与柰曼部讎战求援于太祖太祖遣穆呼哩及博尔济等救之尽杀柰曼之众于阿勒台之下既而王汗谋袭太祖其下巴尔台知之密告太祖太祖遣穆呼哩选精骑夜斫其营王汗走死诸部闻风款附岁两寅太祖即皇帝位首命穆呼哩博尔济为左右万户辛未从伐金薄宣德遂克德兴壬申攻云中九原诸郡拔之进围抚州金兵号四十万阵野狐岭北穆呼哩曰彼众我寡弗致死力战未易破也率敢死士策马横戈大呼陷阵帝麾诸军并进大败金兵癸酉攻居庸关壁坚不得入遣别将哲伯统兵趋紫荆口金兵溃遂拔涿州因

分兵攻下益都滨棣诸城遂次霸州史天倪萧伯特率众来降并奏为万户甲戌从围燕金主请和北还命统诸军征辽东次高州卢琮金朴以城降乙亥【按攻降北京续通鉴作甲戌年九月事与本传异】裨将萧额森以计平定东京进攻北京金守将伊木沁率众二十万逆战败之斩首八万余级城中食尽其下杀伊木沁遂举城降以乌页尔权兵马都元帅镇之遣高德玉刘布斯格尔招谕与中府同知乌里布不从杀布斯格尔德玉走免未几吏民杀乌里布举城降锦州张鲸聚众十余万杀节度使称临海郡王至是来降诏穆呼哩以鲸总北京十提控兵从多果朗南征未附州郡穆呼哩密察鲸有反侧意请以萧额森监其军至平州鲸谋遁去萧额森执送之在诛之【按平定东京及监张鲸军事详见舒穆鲁额森传此作萧额森从其旧姓也】鲸弟致愤其兄被诛据锦州叛略平栾瑞利义懿广宁等州穆呼哩率蒙古布哈等军讨之州郡多降进逼红罗山主将杜秀降丙子致陷兴中府进兵临兴中先遣乌页尔等攻溜石山又遣蒙古布哈屯永德县东候之致遣鲸子东平将兵援溜石蒙古布哈引兵趋之驰报穆呼哩夜半引兵疾驰遇于神水县东夹击之斩东平及士卒万余级拔开义县进围锦州致遣张太平高益出战又败之围守月余高益缚致出降伏诛广宁刘炎懿州田和尚降穆呼哩曰此叛寇存之无以惩后除工匠优伶外悉屠之拔苏复海三州斩完颜重嘉努咸平宣抚富森等率众十余万遁入海岛丁丑诏封太师国王都行省承制行事赐誓券曰子孙传国世世不绝分鸿吉哩伊奇喇斯乌噜古莽果等十军及乌页尔契丹蕃汉等军并属麾下乃建行省于云燕以图中原遂自燕南攻遂城及蠡州诸城拔之冬破大名府遂东定益都淄登莱潍密等州戊寅攻太原忻代泽潞汾霍等州悉降之遂徇平阳金守臣弃城遁以前锋托卜安札尔统蒙古军镇之己卯以萧特穆尔等出云朔攻降岢岚火山军以浩里济达为元帅达噜噶齐攻拔吉隰州击絳州克之庚辰复由燕徇赵至满城武仙举真定来降权知河北西路兵马事史天倪进言曰中原粗定所过犹纵兵抄掠非王者吊民意也穆呼哩曰善下令禁无剽掠军中肃然吏民大悦兵至滏阳金邢州节度使武贵迎降进攻天平寨破之遣蒙古布哈分兵略定河北卫怀孟州入济南严实籍所隶各州户三十万诣军门降时金兵屯黄陵冈号二十万遣步兵二万袭济南穆呼哩以轻兵五百击走之遂会大军薄黄陵冈大败之进攻楚邱拔之攻下单州围东平以实权山东西路行省戒之曰东平粮尽必弃城走汝伺其去即入城安辑之勿苦郡县留苏噜克图以蒙古军三千屯守之辛巳东平粮尽金行省孟占奔

汴苏噜克图邀击之斩七千余级孟古自变量百骑遁去实入城抚其民先是郡王岱逊攻洛不下至是遣石天应拔之还军野狐岭宋涟水忠义统辖石珪京东安抚使张琳皆来降郑遵亦以枣乡蓀县降复由云中历太和寨入葭州金将王公佐遁以石天应权行台兵马都元帅进取绥德破马蹄寨距延安三十里止舍金行省完颜哈达出兵三万阵于城东蒙古布哈请以伏兵取胜从之夜半大军衔枚齐进伏于城东两谷间明日蒙古布哈进兵望见金兵即弃鼓旗走金兵追之伏发鼓声震天地万矢齐下金兵大败哈达走保延安围之旬日不下乃南徇洛川克鄜州北京权帅石天应擒送金骁将张铁枪穆呼哩欲解其缚诸将怒其不屈竟杀之遂降坊州大飨士卒闻金复取隰州以希禅为经略使于是复由丹州渡河围隰克之留和卓统蒙古军镇吉隰间以田雄权元帅府事壬午秋令蒙古布哈引兵出秦陇以张声势大兵道云中攻下孟州四蹄寨迁其民于州拔晋阳义和寨进克三清岩入霍邑山堡迁其人于赵城县薄青龙堡金平阳公胡天祚拒守裨将富察鼎珠监军王和【按金史胡天祚传云知府事珠格和色哩总领提控王和人名官名均异本传】开壁降迁天祚于平阳冬十月过晋至绛拔荣州胡瓶堡所至望风归附河中久为金有至是复来归穆呼哩召石天应谓曰蒲为河东要害我择守者非君不可乃以天应权河东南北路陝石关西行台平阳李守忠太原攸哈喇巴图隰州田雄并受节制命天应造浮梁以济归师乃渡河拔同州下蒲城径趋长安金京兆行省完颜哈达拥兵二十万固守不下乃分麾下乌尔古纳台哈布哈兵六千屯守之遣阿齐将兵三千断潼关遂西击凤翔月余不下谓诸将曰吾奉命专征不数年取辽西辽东山东河北不劳余力前攻东平延安今攻凤翔皆不下岂吾命将尽耶乃驻兵渭水南遣蒙古布哈南越牛岭关徇宋凤州而还时金将侯小叔【按续通鉴云金元帅都监侯小叔取河中杀蒙古石天应元史于本传作中条山贼侯七于安札尔传则称金侯将军今并依续通鉴改正】聚众十余万伺大兵既西谋袭河中石天应战死城陷贼烧毁庐舍杀掠人民还走中条先锋元帅鄂齐尔邀击败之斩数万级侯小叔复遁去穆呼哩以天应子乌格袭领其众癸未春师还浮梁未成顾诸将曰桥未毕工安可坐待乎复攻下河西堡寨十余渡河还闻喜县疾笃召其弟岱逊曰我为国家助成大业无复遗恨第恨汴京未下耳汝其勉之卒至治元年诏封崆峒果鞞鲁国王谥忠宣穆呼哩鲁国王谥忠武子博啰嗣

博啰

塔斯

苏肯彻尔

纳颜

巴图尔

托克托

博啰

博啰沈毅魁杰宽厚爱人通诸国语善骑射年二十七人朝行在所时太祖在西域夏国主李王阴结外援蓄异图密诏博啰诗之甲申秋攻银州克之斩首数万俘监府塔尔海命都元帅蒙古布哈将兵守其要害而还乙酉春复朝行在所同知真定府事武仙叛杀都元帅史天倪胁居民遁于双门寨仙弟质于军中挈家逃归遣赛罕追及于紫金关斩之命天倪弟天泽代领帅府事丙戌夏诏封功臣户口为食邑曰十投下博啰居其首宋将李全陷益都执元帅张琳送楚州博啰引兵入齐先遣李喜孙招论全全欲降部将田世荣等不从杀喜孙丁亥春全突围欲走邀击败之四月城中食尽全降【按李全之降太祖纪作丙戌十二月续纲目作丁亥五月此云丁亥四月纪年互异】诏博啰便宜处之乃以全为山东淮南楚州行省郑衍德田世荣副之郡县闻风款附山东悉平时滕州尚为金守诸将或言炎暑未可进攻博啰不听促进兵金兵出战败之它幼开门出降以州属石天禄俾先锋元帅萧鼎尔台统蒙古军屯济兗库布哈以兵三千屯潍沂莒以备宋千户阿里统大军驻河北备金九月师还至燕闻太祖崩趋赴北庭哀毁遘疾戊子夏卒至治元年诏封鲁国王谥忠定子七人长塔斯次苏肯彻尔次巴图尔【按元明善撰东平忠宪王碑以巴图尔为塔斯第二子与此互异】次拜纳次额默根次额布根次阿尔济逊

塔斯

塔斯一名扎拉古年十八袭爵遂至云中庚寅秋叛将武仙围潞州太宗命塔斯救之仙闻之退军十余里金将伊喇布哈来袭我师与战不利退守沁南贼还攻潞州城陷主将任存死之冬十月帝亲征遣万户扬珠济达与塔斯复取潞州仙夜遁邀击之斩首七千余级以任存侄代领其众帝攻凤翔命塔斯守潼关以备金兵河中自石天应死复为金有辛卯帝亲攻拔之金元帅完颜和拉遁塔斯追斩之壬辰春睿宗与金兵相拒于汝汉间帝命塔斯与亲王阿齐台昆布哈合军先进以为声援至三峯山塔斯冒矢石先挫其锋诸军继进大败金兵擒伊喇布哈完颜哈达单骑走钧州追斩之遂拔钧州三月帝北还诏塔斯与呼图克统兵略定河南

诸郡皆降惟汴京归德蔡州未下塔斯请分攻汴京帝命卜之不利乃止癸巳秋从定宗于潜邸东征擒金咸平宣抚完颜万努于辽东甲午秋朝行在所时诸王大会帝顾塔斯曰先皇帝肇开大业垂四十年诸国皆已臣附惟东南一隅尚阻声教朕欲躬行天讨卿等以为何如羣臣未对塔斯曰臣家累世受恩顾仗天威扫清淮浙何劳大驾亲临不测之地哉帝悦命与皇子库春总军南征乙未冬拔枣阳库春别徇襄邓塔斯引兵攻郢郢壁坚不能下俘生口数万而还丙申冬复出邓州遂至蕲黄蕲州遣使犒师及舍之遂进拔符镇六安县焦家寨丁酉秋由八柳渡河入汴京守臣刘甫置酒大庆殿塔斯曰此故金主所居我人臣不可处此遂宴于甫家复与昆布哈攻光州主将黄舜卿降昆布哈别略黄州塔斯攻大苏山斩首数十级戊戌春至安庆府官民皆遁至北峡关宋汪统制率兵三千降迁之尉氏己亥春卒子苏都尔幼弟苏肯彻尔袭苏都尔既长诏别赐民三千户为食邑得建国王旗帜置官属如列侯故事苏都尔卒子呼图克华袭呼图克华卒子呼图克特穆尔袭呼图克特穆尔卒子宝格袭宝格卒子道通袭

苏肯彻尔

苏肯彻尔性严厉赏罚明信人莫敢犯与兄塔斯从太宗攻凤翔有功将兵抵潼关与金人战屡捷既灭金皇子库春攻宋枣阳入郢苏肯彻尔皆与焉岁己亥苏肯彻尔袭爵即上京之西阿尔察图置营总中都行省蒙古汉军凡他行省监镇事必先白之而后上闻帝尝遣使至见其威容凜然纪纲整肃还朝以告帝曰真穆呼哩家儿也他国可有至者每见皆仓皇失次左右或谏曰诸王百司既莫敢越而复示之以威使人怖畏盍少加宽恕以待之苏肯彻尔曰尔言诚是然时有不同宽猛各有所宜施天下初附民心未安万一守者自纵事变忽起悔之何及寻卒延佑三年追封东平郡王谥忠宣子四人长和尔齐袭王爵曰纳颜日姜卫曰萨满姜卫自有传

纳颜

纳颜性谦和好学以贤能称苏肯彻尔既薨宪宗择于诸子命纳颜袭爵纳颜力辞曰臣有兄和尔齐当袭帝曰朕知之然柔弱不能胜和尔齐亦固让纳颜力辞不得命乃曰王爵必不敢受愿代兄行军国之事于是和尔齐袭为国王事无巨细必与纳颜谋议剖决精当无所壅滞世祖在潜藩常与论事谓左右曰纳颜后必可大用因号之曰色辰犹华言大贤也纳颜虽居贵要而小心谨畏每诲羣从子弟勿骄惰以堕先业及病卒世祖为之悲悔至正八年赠中奉大夫辽阳等处行中书省参知政事护军追

封鲁郡公子二人曰硕德曰巴延彻尔硕德通敏有干才世祖即位入宿卫典朝兵后同知通政院事尝言辽东温绰济喇敏二种民数为寇宜遣近臣谕之帝方难其人金曰惟硕德元勋世胄可使帝然之以问硕德硕德请行至则集诸万户陈兵冲要诘其渠魁诛之胁从者皆降帝大悦赏赉有差后从征纳颜及使西域屡建殊勋卒谥忠敏追封鲁郡公

巴图尔

巴图尔世祖征伐为先锋元帅累立战功世祖在潜邸从容语巴图尔曰今天下稍定我欲劝主上驻蹕回鹘以休兵息民何如对曰幽燕之地龙蟠虎踞形势雄伟大王果欲经营天下驻蹕之所非燕不可世祖恍然曰非卿言我几失之己未秋命巴图尔率诸军由蔡南伐宋且移檄谕宋沿边诸将遂与世祖兵合而南五战皆捷遂渡大江傅于朝会宪宗崩于蜀额呼布格构乱和林世祖北还留巴图尔总军务以待命世祖至开平即位还定都于燕尝曰朕居此以临天下巴图尔之力也师还中统二年卒于军大德八年追赠东平王谥武靖夫人特穆尔昭睿顺圣皇后同母姊也子四人长安图次定通次巴尔和坦他姬子曰和通袭国王安图别有传

托克托

托克托父萨满幼颖异自襁褓时世祖抚之若子及长时侍左右帝有意大任之会以疾卒不果年仅一十有七托克托幼既失怙其母博啰罕笃意教之稍长直宿卫世祖复亲诲导既冠喜与儒士语每闻一善言善行终身不忘至元二十四年从征纳颜帝驻蹕于山巔托克托擐甲率家奴数十人疾驰击之众皆披靡帝望见嗟赏顾谓近臣曰萨满可谓有子矣由是深加器重得预闻机密之事其后哈坦复为乱成宗时在潜邸督师往征之托克托引众率先跃马蹙之其众大溃托克托马陷于泥淖中哈坦兵复挑战托克托弟阿喇卜丹奋戈冲击遂大败之成宗即位宠顾尤笃常侍禁闼出入惟谨拜上都留守政令严肃克修其职大德三年【原文脱大德二字今据纪增】擢江浙等处行中书省平章政事时朱清张瑄以海运之故致位参知政事恃其势位多行不法恐事觉以金珠赂托克托求蔽其罪托克托大怒击之有司遣使者以闻帝喜益宠赉之有豪民白昼杀人托克托立命有司按法诛之自是豪猾屏息民赖以安十一年卒于位子多尔济别有传

△博尔济

博尔济阿尔拉氏始祖勃端察尔以才武雄朔方父诺海阿尔斯兰与烈祖神元皇

帝接境敦睦邻好博尔济善战知兵事太祖于潜邸征伐四出无往不从时诸部未宁博尔济每惊夜寓直于内语及政要或至达旦初伊勒锦部卒盗牧马博尔济追之时年十三知众寡不敌乃出奇从旁夹击之盗舍所掠去及战于和济格尔两军相接下令殊死战时步勿退博尔济系马于腰蹠而引满分寸不离故处太祖嘉其勇胆又尝溃围于奇■（口未）太祖失马博尔济拥帝累骑而驰顿止中野会天雨雪与穆呼哩张毡裘以蔽帝足迹不移及旦雪深数尺遂免于难默尔奇斯之战风雪迷阵再入敌中求太祖不见急趋辎重则帝已还卧憩车中闻博尔济至曰此天赞我也丙寅岁太祖即位遂以博尔济及穆呼哩为左右万户各以其属翊卫位在诸将上皇子察罕台出镇西域有旨从博尔济受教博尔济教以人生经涉险阻必获善地所过无轻舍止太祖谓皇子曰朕之教汝亦不踰是未几赐广平路万七千余户为分地以老病卒大德五年追封广平王谥武忠子博罗台袭爵万户追封广平王谥忠定孙伊实特穆尔

伊实特穆尔

伊实特穆尔

伊实特穆尔世祖时尝宠以不名赐号伊噜勒诺延弱冠袭爵统阿勒台部众世祖闻其贤驿召赴阙时重太官内膳之选特命领其事至元十二年拜御史大夫江南既定益封功臣后遂赐全州清湘县户为分地其在中台务振宏纲弗亲细故兴利之臣欲援金旧制并宪司入漕府当政者又请以郡府之吏互照宪司检底伊实特穆尔曰风宪所以戢奸若是有伤监临之体其议及沮遇事廷辩吐辞鲠直世祖每为之霁威二十四年世祖征纳颜至半道伊实特穆尔已退敌数旬之间三战三捷获纳颜以献世祖还留伊实特穆尔剿其余党乃执酋金嘉努以献戮其同恶数人于军前明年纳颜之遗孽哈坦多罗干复叛再命出师两与之遇皆败之乃过黑龙江捣其巢穴杀戮殆尽哈坦多罗干莫知所终夷其城抚其民而还诏加太傅开府仪同三司申命御边杭海二十九年加录军国重事知枢密院事宗王帅臣咸禀命焉三十年成宗以皇孙抚军北边伊实特穆尔辅行请授皇孙以储闈旧玺诏从之三十一年世祖崩皇孙南迁宗室诸王子会于上都定策之际伊实特穆尔起谓晋王噶玛拉曰宫车晏驾已踰三月神器不可久虚畴昔储闈符玺既有所归王为宗盟之长奚俟而不言噶玛拉遽曰皇孙践阼愿北面而事之于是宗亲大臣合辞劝进伊实特穆尔复位曰大事已定吾死且无憾皇孙即位进秩太师还镇北边元贞元年冬议边事入朝两宫赐宴如

家人礼以疾卒大德五年追封广平王谥贞宪子三人穆哩库仍袭爵为万户次托里次托克托呼为御史大夫

△博勒呼

博勒呼学顺氏从太祖起朔方直宿卫为和尔齐和尔齐者佩橐鞬侍左右者也太祖平诸国宣力为多与穆呼哩等以功称四杰身百余

战竟歿于敌是时官制简古止为第一千户后封于淇州又食沅州赠太师追封淇阳王

【按忠武王伊彻察喇碑文云太祖佐命元勋曰穆

呼哩曰博尔济博勒呼朝廷议功选德必首三家元史叙三家于诸臣之首而本传最略其事散见于从孙塔齐尔传中今采辑补正】子托欢

袭职从宪宗四征不庭有括地功子实勒们镇徼外从征六诏等城亦歿于兵子伊彻察喇性仁厚勤俭事母以孝闻世祖雅闻其贤且闵其父

之死年十六召见喜曰实勒们有子矣即命领四集赛太官至元十七年长一集赛明年诏为宣徽使二十六年帝讨海都 【原文作叛者今

据续通鉴改】于杭爱众皆阵伊彻察喇请与安图巴延伊鲁勒战不许二十七年僧格既立尚书省杀异己者箝天下口以刑爵为货纪纲大

紊尚书平章政事伊苏岱尔太官属也潜以其事白伊彻察喇请奏劾之僧格伏诛 【按续通鉴至元二十八年学士赵孟俯劝奉御彻尔奏

僧格罪恶彻尔乘间入言之僧俗由是伏罪纪年纪事均异本传】帝择湖广行省西连番洞诸蛮南接交趾岛夷延袤数千里其间土沃人稠

畚丁溪子善惊好鬪思得贤方伯往抚安之伊彻察喇举哈喇洽斯达尔罕以为行省平章政事凡八年威德交孚洽于海外入为丞相天下称

贤世以伊彻察喇为知人二十八年都水使者请凿渠西导白浮诸水经都城中东入潞河帝亟欲其成敕四集赛人及诸府人专其役刻日使

毕工伊彻察喇率其属着役者服操畚鍤趋者云集依刻而渠成赐名曰通惠河公私便之成宗即位加开府仪同三司太保录军国重事枢密

宣徽使大德四年拜太师初金山南北叛王海都都勒斡据之不奉正朔垂五十年时入为寇尝命亲王统左右部宗王诸帅屯列大军备其冲

突五年朝议北师少怠纪律不严命伊彻察喇副晋王以督之是年海都都勒斡入寇大军分为五队伊彻察喇将其一锋既交伊彻察喇身先

陷阵一军随之出敌之背五军合击大败之海都都勒斡遁去 【按续通鉴云海都与都勒斡诸部大举人寇哈尚躬督五军合击破之阿实

克射都勒斡中膝号哭遁去与此互异】厥后都勒斡请臣附时武宗亦在军伊彻察喇遣使诸武宗及诸王将帅议曰都勒斡请降为我大利

固当待命于上然往返再阅月必失事机宜遣使许其臣附众议皆以为允既遣使以事

闻帝曰伊彻察喇深识机宜既而玛古哈喇复命由是
叛人稍稍来归十年冬叛王穆尔特穆尔等屯于金山武宗帅师潜踰金山伊彻察喇以
诸军继往穆尔特穆尔乃降彻伯尔者海都长子也海
都死嗣领其众至是掩取其部人凡两部十余万口至大元年伊彻察喇遣使奏曰诸王
托和木本怀携贰而彻伯尔游兵近境叛党素无悛心
倘合谋致死则为国患臣以为昔都勒斡先众请和虽死宜遣使安抚其子库春使不我
异又诸部降人宜处之金山之阳吾军屯田金山之北
军食既饶又成重戍就彼有谋吾已捣其腹心矣奏入帝曰是谋甚善卿宜移军阿达哈
赛音萨哈地伊彻察喇既移军彻伯尔托和木果欲奔
库春不见纳遂相率来降于是北边始宁诏为和琳等处行中书省右丞相依前太师录
军国重事持封淇阳王四年入朝帝宴于大明殿眷礼
优渥寻疾薨于第谥忠武

塔齐尔

塔齐尔

塔齐尔一名布展居官山博勒呼从孙也骁勇善战幼直宿卫太祖平燕睿宗监国
闻燕京盗贼恣意残杀乃遣塔齐尔耶律楚材穷治其
党盗屏迹太宗伐金塔齐尔从师授行省兵马都元帅分宿卫与诸王军士俾统之下河
东诸州郡济河破潼关取陕洛辛卯从围河中府拔之
壬辰从渡白坡时睿宗已自西和州入兴元由武关出唐邓太宗遣使约期会兵合进与
金人战于三峯山大破之诏塔齐尔等进围汴城金主
以兄子曹王额尔克为质太宗与睿宗还河北塔齐尔复与金兵战于南熏门癸巳金主
迁蔡州塔齐尔复帅师围蔡甲午灭金遂留镇抚中原
分兵屯大河之上以遏宋兵丙申破宋光息诸州诏以息州军民一千户赐之戊戌卒子
必里克台袭父职总管四万户蒙古汉军攻宋两淮悉
定边地戊午会师围宋襄阳逼樊城力战死之次曰都木达至元七年袭蒙古军万户八
年再攻襄阳围樊城进战鄂岳汉阳江陵归峡诸州皆
有功十二年受诏为隆兴出征都元帅尽平江西十一城又徇岭南广东宋亡还师卒

钦定续通志卷四百四十七

●钦定续通志卷四百四十八 列传二百四十八

列传

元 【二】

○元二

察罕【伊埒萨哈勒喇勒智喇斡】 彻伯尔和卓 卓沁台

实讷台【玛古岱尔乌尔图】 乌页

鄂约达勒

察罕

彻伯尔和卓

卓沁台

实讷台

乌页尔

苏布特

阿勒楚尔

鄂约达勒

△察罕

察罕初名伊德唐古鄂摩克氏父吹辰类为夏臣甚妾方怀察罕不容于嫡母以配掌羊羣者及察罕稍长嫡母已有弟矣察罕武勇过人幼牧羊于野太祖出猎与语异之乃挈以归语光献皇后曰今日出猎得佳儿可善视之命给事内廷及长赐姓蒙古妻以宫人鸿吉理氏从帝略云中桑干金将达实拥重兵守野狐岭帝遣察罕觐虚实还言彼马足轻动不足畏也帝命鼓行而前遂破其军围白楼七月拔之以功为御帐前首千户从帝征西域布哈尔赛玛尔堪二城回回国主札拉鼎拒守铁门关兵不得进察罕先驱开道斩其将余众悉降又从攻西夏破肃州师次甘州察罕父吹辰类居守城中察罕射书招之且求见其弟时弟年十三命登城高处见之且遣使谕城中使早降其副恩楚等三十六人合谋杀吹辰类父子并杀使者并力拼守城破帝欲尽坑之察罕言百姓无辜止罪三十六人进攻灵州夏人以千万众赴援帝亲与战大败之还次六盘夏主坚守中兴帝遣察罕入城谕以祸福众方议降会帝崩诸将擒夏主杀之复议屠中兴察罕力止之驰入安集遣民太宗即位从略河南皇子库春胡土克图伐宋命察罕为斥候又从亲王昆布哈南伐岁乙未【按库春克枣阳续通鉴作丙申岁八月事】克枣阳及光化军未几召昆布哈赴行在以全军付察罕丁酉复与昆布哈进克光州戊戌【按本纪乙巳岁皇后称制命马步军元帅察罕等攻拔寿泗诸州此云戊戌则当在太宗十年矣疑误】授马步军都元帅率诸翼军攻拔天长县及滁寿泗等州定宗时命拓江淮地宪宗即位以都元帅兼领尚书省事赐汴梁归德河南怀孟曹濮太原三千余户为食邑及诸处草地合一万四千五百余顷户二万余乙卯卒追封河南王谥武宣子十人长穆呼哩事宪宗直宿卫从攻钓鱼山以功授四鄂尔多齐哩克昆千户至元

四年攻宋自江陵略地回至安阳滩宋兵扼其归路穆呼哩奋击败之都元帅阿珠坠马宋军追及之穆呼哩挟之上马鏖战退宋兵为蒙古军万户复攻襄樊有功卒于军追封梁国公谥武毅从孙

伊埒萨哈勒

伊埒萨哈勒

喇勒智喇斡

伊埒萨哈勒

伊埒萨哈勒祖吹且佐太祖时得召见属皇子察罕台为扎尔古齐父阿卜呼事诸王阿勒呼本居西城至元十年择贵族子备宿卫名伊埒萨哈勒至阙下以为舒库尔齐掌服御事甚见亲幸有大政时以访之称之曰秀才尝奉使河西还奏诸王哲伯特穆尔用官太滥帝嘉之擢河东提刑按察使逐平阳路达噜噶齐台哈布哈进南台中丞时丞相阿哈玛特之子呼逊为江淮行省平章政事恃势贪秽伊埒萨哈勒发其奸奏诛之并劾江淮释教总摄嘉木扬喇勒智诸不法事诸道竦动二十一年改北京宣慰使诸王纳颜镇辽东伊埒萨哈勒察其有异志密请备之二十三年罢宣慰司立辽阳行省以伊埒萨哈勒为参知政事已而纳颜果反帝自将征之时诸军皆会伊埒萨哈勒掌运粮储军供无乏东方平帝嘉其先见且饷运有劳加左丞二十七年命尚诸王算济女改四川行省左丞元贞元年入朝卒弟喇勒智喇斡

喇勒智喇斡

喇勒智喇斡为裕宗东宫笔且齐典文书至元十八年蜀初定帝闵其地久受丘择近臣抚安之以喇勒智喇斡为嘉定路达噜噶齐时方以辟田均赋弭盗息讼诸事课守令喇勒智喇斡奉诏甚谨民安之会盗起云南声言欲寇成都喇勒智喇斡驰入告急帝曰南人生长乱离岂不厌兵畏祸其归以朕意告诸将叛则讨之服则舍之毋多杀以伤主意则人心定矣喇勒智喇斡至蜀宣布上旨俄召为泉府卿后迁刑部尚书有小吏诬告漕臣刘献盗仓粟丞相僧格方事聚斂众阿其意鍛炼枉服喇勒智喇斡曰刑部天下持平今鞫毂之下漕臣以冤死何以正四方乎即以实闻以是忤丞相出为江东道宣慰使在官务兴学诸生有俊秀者拔而用之为政严明豪民猾吏不敢犯元贞二年迁四川行省参知政事大德三年以参知政事为湖南宣慰使继改荆湖荆湖多弊政而公田为甚部内实无田随民所输租取之户无大小皆出公田租虽水旱不免喇勒智喇斡问民所不便凡十数事上于朝而言公田尤切朝议遣使理之民力少苏七年再迁四川行省参知政事八年进左丞云南

王入朝所在以驿骑纵猎喇勒智喇斡曰驿骑非有急不得驰况猎乎王憚为之止猎蜀人饥亲劝分以赈之有死无葬者则以己钱买地使葬且修宽政以抚其民部内以治十年迁湖广行省左丞湖广岁织币上供以省臣领工作遣使买丝他郡多为奸利工官又为刻剥故臣户日贫造币益恶喇勒智喇斡令工视贾人藏丝者择买之工不告病至大三年以疾卒于官谥忠惠子二人长玛南翰林学士承旨次吉纳御史大夫孙达尔玛内府宰相

△彻伯尔和卓

彻伯尔和卓赛音人赛音西域部之族长也因以为氏和卓其官称也太祖与克噶王汗有隙一夕王汗潜兵来众军溃太祖遽引去从行者仅十九人彻伯尔与焉至班珠尔河粮尽无所得食会一野马北来诸王哈扎尔射之殪遂煮而啖之太祖举手仰天而誓曰使我克定大业当与诸人同甘苟苟渝此言有如河水将士莫不感泣王汗既灭西域诸部次第亦平乃遣彻伯尔使金金不为礼而归金人恃居庸之塞冶铁锢关门布铁蒺藜百余里守以精锐彻伯尔还报太祖遂进师距关百里不能前召彻伯尔问计对曰从此而北黑树林中有闲道终夕可至太祖乃令为前导日暮入谷黎明已在平地疾趋南口金人犹睡未知也比惊起已莫能支吾锋镝所及流血被野关既破中都大震已而金人迁汴太祖览中都山川形势顾谓左右曰朕所以至此者彻伯尔之功为多乘舆北归留彻伯尔与诸将守中都授天下都达鲁噶齐彻伯尔每战被重甲舞槊陷驰突如飞众莫能当卒年一百一十八追封凉国公谥武定二子阿里哈密拉齐阿里哈蚤从彻伯尔出入行阵勇而善谋宪宗伐蜀尝为天下质子兵马都元帅云

△卓沁台

卓沁台鄂尔和达氏其先琳沁巴丹以材武雄诸部生子曰鄂尔和达莽果当开创之先协赞大业厥后太祖即位命其子孙因其名为氏朔方既定举六十五人为千夫长鄂尔和达之孙曰卓沁台其一也初奇■〈口耒〉王汗之子星根有智勇诸部畏之奇雅喇哈喇克沁沙陀等帅众来侵兵战不利近臣驰告太祖曰羣下忠勇无踰卓沁台者宜急遣之拒敌从之卓沁台承命单骑陷阵射杀星根降其大将实勒们等遂并有奇■〈口耒〉之地奈曼默尔格台合兵来侵卓沁台俘其主嘉克坚布及二女以归诸部悉平与嘉克坚布盟而归之未几复叛卓沁台以计袭杀之遂平其国卓沁台始从征奇雅喇闲关万里每战必为先锋帝赐嫔御茂巴哈必济音济萨巴俾统乌噜古四千人世世无替子

奇塔特材武过人自太宗及世祖历事四朝以劳封德清郡王赐德州户二万为食邑至元十八年增食邑二万一千户肇庆路连州德州泊属邑俱隶焉奇塔特薨子都沁巴图尔袭爵为郡王太宗时与伊拉噶台战胜帝即以伊拉噶台妻赐之世祖之征额呼布格也奇塔特子哈达跪而前曰臣父祖在先朝屡立战功今王师北征臣愿力战自効既得请战于实默温都尔之地兵始交获其将哈坦斩之威喇之军遂败衄又战于实喇雅图噶之地当帝前混战至日晡胜之李璫叛帝遣哈必齐等讨之哈达亦在行璫平与有功焉哈达子托欢亦尝从诸王齐齐克图讨珠尔噶台获之又尝破锡里济永和尔于伊苏摩哩及征纳颜托欢弟庆通亦在军虽病犹力战奇塔特二子曰都沁曰哈达哈达三子曰托欢曰额琳沁巴勒曰庆通托欢二子曰达实特穆尔曰多喇达实特穆尔一子曰实喇布哈自奇塔特而下凡九人皆封郡王

△实讷台

实讷台图伯特克呼氏以忠勇侍太祖命领蒙古军从太师国王为先锋兵至河北史天泽父率老幼降国王承制授天泽兄天倪河北西路都元帅领真定乙酉副师武仙杀天倪以真定叛天泽遣监军李伯佑诣军前请援国王命实讷台率精甲三千与天泽合兵进围中山仙遣其将葛铁枪来援实讷台奋击败之会日暮阻水为营实讷台料其气索乘胜进击大败之擒铁枪守将宵遁遂克中山取无极拔赵州仙弃真定奔西山抱犊寨实讷台与天泽入城抚定其民未几仙潜结内应夜开南门纳仙复据其城实讷台仓卒以步兵七十踰城奔藁城迟明部曲稍集兵威复振袭取真定仙弃城遁将士怒民之反复驱万人出将屠之实讷台曰此民为贼所驱胁有何罪乃皆释之 【按史天泽传云实讷台怒驱万余人将杀之天泽力争得释语异本传】 整兵前进下太原略太行拔长胜寨斩仙守将卢治中围仙于双门寨仙遁去引兵出太行山东败宋将彭义斌追至火炎山斩之至大名守将苏元帅以城降遂引兵临东平败安抚王立刚于阳谷园东平立刚走连水金守将弃城遁遂定东平又与蒙古布哈徇河北怀孟卫从国王定益都壬辰渡河略汴京徇睢州遇金将完颜庆善努与战斩之金主入蔡诸军围之实讷台史天泽攻城北面血战连日金亡朝廷以实讷台功多赐东平户三百 【按食货志止称东平一百户此云三百小异】 俸食其赋寻以老病卒于东平归葬漠北子七人玛古岱尔乌尔图知名

玛古岱尔

乌尔图

玛古岱尔

玛古岱尔岁戊戌从国王和尔齐行省于襄阳略地两淮己未从渡江攻鄂州中统元年追阿勒达尔瑋塔哈预有战功二年从北征败额呼布格于实默温都尔之地三年又与李璫战有功授提举本投下诸色匠户达噜噶齐卒子四人和尼齐江南行台御史大夫

乌尔图

乌尔图中统三年授本军千户至元十年攻樊城十一年渡江有功十二年军至建安卒于军子托罗该彻尔袭职从参政阿喇罕攻独松关有功命管领侍卫军二十年江西行省命讨武宁叛贼董琦平之改授江州万户府达噜噶齐二十四年移镇潮州值贼张文惠罗半天等啸聚江西行枢密院檄讨之领兵破贼寨斩贼首罗大老李尊长等寻卒于军

△乌页尔

乌页尔沙卜珠氏父曰图噜噶克察以武勇称太祖庚午乌页尔与珠卜纳颜克金东京有功甲戌从太师穆呼哩取北京授北京总管都元帅【太祖纪作乙亥年二月事】留抚其人绥怀有方自京以南相继来降时金将达噜图复北疆乌页尔以锐兵击败之斩达噜于军中有赵守玉者据兴州乌页尔讨平之丙子张致以锦州叛又攻破之丁丑兴州监军绰尔以兵叛乌页尔往征之大破贼军庚辰从征山东战于东平驰赴陷阵生挟二将以还辛巳从征延安矢中右股力战破之俄又取葭酈二州擒金梟将张铁枪以献壬午克凤翔及所属州郡癸未从帝亲征河西明年下之乙酉从穆呼哩围益都【按太祖纪及穆呼哩传俱言穆呼哩卒于十八年癸未此云二十年从穆呼哩围益都疑误】越二年下三十余城太宗即位入覲命与萨里台和尔齐征辽东下之辛卯又与萨里台征高丽下受开龙宣泰葭等十余城高丽惧请和乌页尔曰若能以子为质当休兵辛丑遣其族子【原传脱去族字今据太宗纪增】綽从乌页尔来朝帝大悦厚加赐予俸充北京东京广宁盖州平州泰州开元府七路征行兵马都元帅宪宗初召问东夷事对曰臣虽老藉威灵指麾三军敌国犹可克况东夷小丑乎帝壮其言俄病归丁巳复来朝帝悯其老谓自太祖时效劳至今者独卿无愆赐赉甚厚以都元帅授其中子阿哈明年卒封营国公谥忠勇【据元文类乌页尔封谥制增】子辖哩最有名太宗时授北京等路达噜噶齐至元七年改授河闲总管

△苏布特

苏布特蒙古乌梁海人【按苏布特原作雪不台后卷又有雪不台传其事迹大略

相同显系重出今删彼存此】 其先世诺尔布生布克图布古图雄勇有智略三世孙和实衮生喀巴喀巴二子长哈勒琿次苏布特俱骁勇善骑射太祖在班珠尔河时喀巴驱羣羊以进遇盗被执哈勒琿与苏布特继至以枪刺之遂免父难哈勒琿以百户从帝征奈曼立战功苏布特以质子事帝为百户岁壬申攻金桓州先登拔其城丙子征默尔奇斯苏布特请行帝壮而许之己卯至蟾河与默尔奇斯战尽降其众其部主辉图奔钦察苏布特与钦察战于玉峪败之壬午帝征回回国其主默呼委国而去苏布特追之默呼逃入海病死尽获其所弃珍宝以献癸未讨定钦察遂收其境又与俄罗斯部大小穆尔奇札尔战降之略阿苏部而还复从帝西征丙戌攻下萨里辉和尔塔勒齐木等部及德顺镇戎兰会洮河诸州己丑太宗即位以塔玛噶公主妻之从攻潼关失利帝责之睿宗时在藩邸请令立功自効遂命引兵从睿宗经理河南壬辰师集三峯山金兵围之数匝会风雪大作金士卒僵仆师乘之杀戮殆尽自是金军不能复振夏 【原文作壬辰夏按本纪太宗四年二月及金师战于三峯山三月帝还四月避暑官山俱系壬辰年事本传及安扎尔傅均于还师之日再纪壬辰宜并加改正】 睿宗还驻官山留苏布特统诸道兵围汴癸巳金主渡河北走追败之复南走归德未几复走蔡州汴降俘其后妃及宝器以献进围蔡州毋午蔡州破金亡时汴梁受兵日久岁饥苏布特纵其民渡河就食乙未太宗命诸王巴图西征巴齐玛克以苏布特为先锋巴齐玛克闻苏布特至大惧逃入海中辛丑讨俄罗斯部遣苏布特督战获其主额勒本克托里实克城尽取俄罗斯所部而还经哈扎尔山攻满济勒噶部苏布特为先锋与诸王巴图等五道分进战失利诸王欲还苏布特曰王欲归自归我不至塔纳河玛察克城不还也乃驰至玛察克城诸王亦至遂攻拔之太宗崩诸王大会巴图欲不往苏布特劝之甲辰会于伊奇哩河丙午定宗即位既朝还图喇河上戊申卒追封河南王谥忠定子乌兰哈达

乌兰哈达

乌兰哈达

乌兰哈达初事太祖护宪宗于潜邸遂分掌宿卫岁乙巳领兵从定宗征女真国破万努于辽东继从诸王巴图征钦察俄罗斯博罗尔诸部丙午又从巴图讨博罗尔纳琳穆苏部平之戊申 【原文讹作巳酉今据定宗纪改】 定宗崩巴图与宗室大臣议立宪宗久未决乌兰哈达曰此议已先定矣不可复变巴图曰乌兰哈达言是也 【宪宗纪作乌兰哈达曰巴图之言良是与此互异】 议遂定宪宗即位明年世祖

以皇弟总兵讨西南夷乌蛮白蛮鬼蛮诸国以乌兰哈达总督军事癸丑秋大军自旦当岭入云南境摩紫二部降遂至金沙江乌兰哈达分兵入察罕意盖白蛮也所在寨栅俱下独阿塔刺所居半空和寨牢不可拔遂遗其子阿珠击之寨兵退走因并其弟阿叔城俱拔之进取龙首关翊世祖入大理国城甲寅秋分兵取附都善阐转攻哈喇章屠之哈喇章盖乌蛮也前次罗部府破其大酋高升 【世祖纪作高祥地理志作高升泰】 兵于洩河浪山下遂进至乌蛮所都押赤城城险且坚乃大震鼓钲进而作作而止使不知所为如是者七日伺其困乏夜遣其子阿珠潜师跃入斫之遂大溃至昆泽擒其国王段智兴以献又攻纤寨拔之至干德哥城乌兰哈达病委军事于阿珠环城立炮以草填堑率所部搏战城上城遂破乙卯攻拔不花合因阿合阿因等城及赤秃哥山寨乘胜击破鲁厮国塔浑城又取忽兰城鲁厮国及阿伯国请降复攻阿鲁山寨进攻阿鲁城克之出师二年平大理五城八府四郡泊乌白等蛮三十七部兵威所加无不款附丙辰征白蛮国波丽国阿珠生擒其骁将献俘阙下诏以便宜取道与托克岱尔兵合遂出乌蒙趋泸江划秃刺蛮三城欲宋兵三万奋其船二百艘于马湖江遂通道于嘉定重庆抵合州济蜀江与托克岱尔会丁巳云南平遣使献捷且请依汉故事以西南夷悉为郡县从之加大元帅还镇大理遂经六盘至临洮与大营合月余复西征乌蛮秋九月遣使招降交趾不报进兵压其境国主陈日昷 【庙碑作光炳】 隔江列象骑步卒甚盛乌兰哈达分军为三队济江授齐齐克图方略曰汝军既济勿与之战伺便夺其船必成擒矣齐齐克图违命蛮虽败得驾舟逸去乌兰哈达怒齐齐克图惧饮药死师入交迹为久驻计越七日日昷请内附于是还军押赤城戊午引兵入宋境其地炎瘴军士皆病乌兰哈达亦病将于师阿珠战马为秃刺蛮所掠分军搜访知有三寨藏马山巔阿珠亲率将士攀崖而上破其诸寨生擒贼酋尽得前后所盗马乃屠押赤城宪宗遣使谕旨约明年正月会军长沙乃率四王骑兵三千蛮僮万人破横山寨辟老苍关徇宋内地宋陈兵六万以俟遣阿珠与四王潜自闲道冲其中坚大败之乘胜蹴贵州蹂象州入静江府连破辰沅二州直抵潭州城下潭州出兵二十万断我归路乌兰哈达分兵夹击破之大小十三战杀宋兵四十余万擒其将大小三人时世祖已渡江驻鄂州遣伊埒蒙古 【续通鉴作玛尼齐】 领兵来援遂自鄂北渡与大军合庚申世祖即位夏四月乌兰哈达至上都后十二年 【庙碑作至元八年】 卒子阿珠自有传

△阿勒楚尔

阿勒楚尔永古特氏其先居云中塞上父达袞为金羣牧使岁辛未驱所牧马来归太祖终其官【按赵世延传元太祖得其所牧马达袞死之语异本传】阿勒楚尔幼鞠于外祖兆斋家讹言为赵家因姓赵氏年十四隶皇子察罕台部赏从大猎射杀二虎由是以善射名皇子深器爱之甲戌太祖西征塔实千阿里玛图等国以功为千户丁亥从征积石围河州破临洮攻德顺所至皆立功太宗即位尊察罕台为皇兄以阿勒楚尔为元帅戊子镇删丹州置驿通西域从定关陇辛卯从围凤翔选死士先登拔其城斩金将刘兴格分兵攻西和州宋将强俊领众数万坚壁清野以老我师阿勒楚尔以奇兵夺其城擒俊余众退保仇池进击拔之平凉庆阳邠原宁皆降泾州复众议屠之阿勒楚尔但诛首恶师还原州降民夜亡走遣人谕之民皆复归豪民陈苟集数千人潜新寨诸洞阿勒楚尔偕数骑抵寨召苟遥语折矢为誓苟相呼罗拜皆降金人守潼关攻之不克睿宗分兵由山南入金境阿勒楚尔为先锋趣散关宋人烧绝栈道复由两当县出鱼关军沔州假道于宋兴元制置使桂如渊如渊遣人导师由武林关东抵邓州西破小关金人大骇其平章完颜哈达枢密使伊喇布哈帅兵相拒我师不与战直趋钧州与亲王阿齐台等兵合阵三峯山下阿勒楚尔先率所部迎击诸军乘之金师败绩甲午金亡金将郭斌保金兰定会四州阿勒楚尔攻破之遂定四州金将汪世显守巩州阿勒楚尔往招之世显率众来降拜征行大元帅丙申大军伐蜀皇子出大散关宗王穆济等出阴平郡期会于成都阿勒楚尔为先锋破宕昌残阶州攻文州数月不下谍知城中无井乃夺其汲道率勇士梯城先登拔之招徕吐蕃酋长十族略定龙州遂与皇子军合进克城都师还而成都复叛丁酉阿勒楚尔言于宗王曰西汉阳当陇蜀之冲宋及吐蕃利于入寇宜得良将镇之宗王曰无以易汝遂分蒙古千户五人隶麾下以往谨斥堠严巡逻西南诸州不敢犯戊戌从元帅塔尔海伐蜀克隆庆己亥攻重庆庚子围万州败宋师于夔门辛丑伐西川破二十余城成都守将开北门以纳师壬寅会大军破遂宁泸叙等州癸卯破资州庚戌阿勒楚尔安辑泾邠二州宋制置使余玠玖兴元文州降将士德新乘隙自阶州叛执扈牛二镇将领众走江油宪宗召阿勒楚尔还旧镇阿勒楚尔遣将直捣江油夺扈牛以归世祖即位亲王有异谋者其将阿勒达尔瑋塔哈图据关陇帝遣宗王哈坦哈必齐阿哈玛特西讨阿勒楚尔引兵出删丹之耀碑谷从阿哈玛特与之合战获阿勒楚尔瑋塔哈等捷闻帝锡玺书褒美四年卒延佑元年封秦国公谥武宣子十人彻尔国宝最知名彻尔袭职为元帅从父攻泸州降宋将

刘整姚德后以病废卒国宝一名赫色倜傥有谋略父为元帅军务悉以委之所至多捷从攻重庆降宋都统张实并掠合州以归中统元年从攻阿勒达尔有功阿勒达尔叛将辉图据吐蕃之达实岭国宝出其不意擒杀之乃还谢鼎与弟国能持金帛说降吐蕃酋长入觐又建言文州险阨宜筑城屯兵镇之授蒙古汉军元帅兼文州吐蕃万户府达噜噶齐时扶州诸羌未附国宝宣上威德诸酋长皆归款至元四年卒延佑元年封梁国公谥忠定子世荣世延国宝将卒以世荣幼命弟国安袭其职至元十五年讨叛王图噜于六盘获之请解职授世荣帝嘉其让兼以六盘功进招讨使世荣袭职后以功进吐蕃宣慰使议事都元帅世延自有传

△鄂约达勒

鄂约达勒莽果人与兄乌页俱事太祖时大畴强监乌页率其属归之鄂约达勒力止之不听乃还事太祖太祖嘉其诚更名为色辰色辰者聪明之谓也太祖与克噶王汗对陈于哈喇沁师少不敌鄂约达勒先出陷阵大败之至晡时犹追逐不已敕使止之乃还脑中流矢帝亲傅以药留处帐中月余卒帝深惜之及王污灭帝分济勒济沙民百户隶其子仍令收完莽果人民之散亡者太宗思其功复以北方万户封其子孟克为郡王岁丙申增封为二万户孟克卒孙珠尔噶岱奇塔特鲁斯呼图克乌纳和啰噶齐俱袭封为郡王

钦定续通志卷四百四十八

●钦定续通志卷四百四十九 列传二百四十九

列传

元 【三】

○元三

察苏【布敦】

特默齐【呼图克特穆尔塔尔海】

安扎尔

乌木罕

锡琳干布【爱鲁克】 绰尔

济都勒斡

实喇济苏

哈苏纳

布扎尔

扎拉台

绰和尔

库库布哈

巴延巴图尔

舒库尔

赵阿克盘

沙扎该

察苏

特默齐

安扎尔

乌木罕

锡琳干布

绰尔济都勒斡

实喇济苏
哈苏纳
布扎尔
扎拉台绰和尔
库库布哈
巴延巴图尔
舒库尔
赵阿克盘
沙扎该
△察苏

察苏柰曼部人又号达鲁其先迪延为柰曼部主太祖讨不庭其祖库楚类失其部落父察罕奔契丹卒察苏尚幼与其母跋涉闲行归太祖奉中宫旨侍宫掖察苏年二十五即从征伐破代石二州不避矢石鴈门之战复屡捷会太宗命睿宗平金察苏执锐以从袭金兵于三峯山睿宗上其功授万户镇守随州招集居户每千人以官一员领之后移镇颖以疾归大名岁戊申卒子布敦

布敦

布敦

布敦在襁褓时父察苏方领兵平金与其祖母喀喇氏在三皇后宫庭察苏卒母张氏迎布敦以归张尝从容训之曰人有三成人知恐惧成人知羞耻成人知艰难成人否则禽兽而已布敦因受教唯谨甲寅袭父职为副万户镇守随颖等处布敦善刀舞尤精骑射士卒咸畏服之世祖即位委任尤专授寿颖二州屯田府达噜噶齐为民除虎害至元十三年授明威将军信阳府达噜噶齐十六年进宣威将军常德路副达噜噶齐同知李明秀作乱布敦单骑往招之谕以朝廷恩德明秀遂与俱来布敦闻于朝明秀伏诛贼遂平三十一年迁池州路达噜噶齐大德十三年进昭勇大将军台州路达噜噶齐卒

△特默齐

特默齐赫呼氏善骑射初事呼兰皇后帐前尝命为捫马官从太祖定西夏太宗朝从皇子库春呼图克行省特默塔拉定河南累有战功宪宗伐宋世祖以皇弟受命攻鄂闻乌兰哈达由广西至长沙遣特默齐将兵迎之乌兰哈达得援抵江夏北涉黄州特默齐与有力焉世祖即位命从征叛王于实默图之地劳绩益着至元七年授蒙古诸万户府鄂啰总管十九年以疾卒子八年呼图克特穆尔最显

呼图克特穆尔

塔尔海

呼图克特穆尔

呼图克特穆尔好读书与学士大夫游字之曰汉卿仁宗尝顾左右曰呼图克特穆尔字汉卿汉名卿不让也其母姓刘氏故人又称之曰刘汉卿至元十一年从丞相巴延渡江既取宋遣视宋故宫室获帑藏谕下明越等州从平章鄂罗入覲授总把二十二年【按下文叙二十一年从征交趾二十二年事不应逆叙于前疑是十二年事】授荆湖占城等处行中书省理问官尝以军事久奏敷陈警捷世祖大悦平章政事程鹏飞建议征日本奏呼图克特穆尔为征东省郎中及还丞相阿尔哈雅以湖广行省机密事重舍呼图克特穆尔无可用人遣郎中伊噜伊纳克奏留从之二十一年从皇子镇南王征交趾比还鄂时权臣方擅威福遂退处于家二十八年诏太傅友丞相顺德王达尔罕擒权奸于鄂达尔罕遂拜湖广行中书省平章政事询旧人知方面之务者众荐之遣使驿致武昌奏事京师擢给事中居再岁擢提刑按察司改肃政廉访司台臣奏授广西海北道副使陞辞仍留旧职既而湖广行省平章政事刘杰奏伐交趾【按世祖纪至元三十年命刘国杰从诸王亦吉里督诸军征交趾考刘国杰传与纪相符本传恐有脱误】造战船五百于广东以呼图克特穆尔督臣南方事既集帝崩迁福建行省郎中湖南宣慰副使峒酋岑雄叛奉诏开论顽犷帖服改河南行中书省郎中同金枢密院事拜礼部尚书大臣奏核实江南民田呼图克特穆尔奉诏使江西以田额旧定重扰民不便置不问止奏置茶漕局及增中统课缗五十万转兵部尚书未几命为荆湖道宣慰使已命复留之延佑三年大臣以浙东倭奴商舶贸易致乱奏遣呼图克特穆尔宣慰闽浙抚戢兵民海陆静谧从子塔尔海

塔尔海

塔尔海世祖时从托克托充哈喇齐至元二十四年扈驾征纳颜二十六年入覲帝命充博罗齐扈驾至和林赐济逊冠服大德四年授中书直省舍人迁中书客省副使武宗即位进和林行省理问所官改通政金院历和宁路总舌改汴梁先是朝廷令民自实田土有司绳以峻法民多逃窜流移者塔尔海言其弊于朝由是省民闲虚粮二十二万民赖以安后改任庐州时有飞蝗北来塔尔海祷于天蝗乃引去民乏食开廩减直粟之所活甚众天历元年授命书枢密院事未几西军犯南阳督诸卫兵往平之进大都督累官资善大夫

△安扎尔

安扎尔托卜氏尝扈从太祖南征岁丙子复从定诸部有功命领蒙古军为前锋时穆呼哩为太师国王都行省承制行事兵临燕辽营青齐鲁赵韩魏皆下岁己卯河中府降兵北还以安扎尔领前锋总帅乃统所部兵屯平阳以备金摄国王事时金将赫舍哩氏拥兵数为边患然畏安扎尔威名不敢轻犯其境岁壬午元帅石天应守河中府屯中条山金将侯小叔【原文作金侯将军今依续通鉴改正】率兵袭之城陷天应死焉遂燔其城屠其民将趋中条安扎尔进兵击之斩首数万逃免者仅十数穆呼哩卒迨以子博啰袭其爵时平阳重地合安扎尔居守庚寅博啰由云中围绛州赫舍哩引兵袭其后博啰战失利辎重人口皆陷没安扎尔妻讷迪氏亦被获拘于大梁金主闻安扎尔威名召讷迪氏谓曰今纵尔还能偕尔夫来当厚赏讷迪氏佯诺之遂得还太宗闻而义之召见褒赉甚厚遂诏预其夫前锋事帝征潞州凤翔败金将完颜哈达于三峰山三月【原文作明年壬辰春三月误今依太宗纪删正】帝班师北还命偕都元帅苏布特围汴城中识安扎尔旗帜惧曰其妻犹勇且义况其夫乎甲午金亡诏封功臣赐平阳户六百一十有四驱户三十猎户四未几以疾卒子二曰莽哈曰珠勒齐格尔至元十五年莽哈为管军千户二十四年从征纳颜二十六年从征海都二十七年授蒙古侍卫亲军千户元贞元年命领特默齐军偕赫伯元帅从宗王彻伯尔西征改授昭信校尉右都威卫千户大德元年召还至大四年卒子柰曼袭珠勒齐格尔人宿卫从世祖征鄂汉以功赐白金至元三年从征李璫战死其子库库楚为御史台都事至元三十一年国王苏肯彻尔之子实迪既没家有故玺将鬻之命库库楚以示中丞崔彧御史杨桓辨其文曰受命于天既受永昌盖秦玺也彧请献之徽仁裕圣皇后成宗即位近臣以其事闻授库库楚汉中廉访佥事仕至湖广廉访使

△乌木罕

乌木罕蒙古巴喇呼岱氏与父布格齐俱事太祖征伐有功帝尝问攻城略地兵仗何先对曰攻城以炮石为先力重而能及远故也帝悦即命为炮手岁甲戌太师国王穆呼哩南伐帝谕之曰乌木罕言攻城用炮之策甚善汝能任之何城不破即使为随路炮手远嚕噶齐乌木罕选五百余人教习之后定诸国多赖其力太宗即位留为近侍以讲武艺壬辰从攻河南有功壬子宪宗授为都元帅癸丑从宗王锡里库征拉里西番斜巨山桃里寺河西诸部悉下之卒子图们岱尔以从战功袭炮手总管至元十年修立正阳东西二城置炮二百余座与宋人战却之

十三年从丞相巴延伐宋驻军临安之皋亭山同蒙古岱等八人率甲三百入宋宫取传国宝宋太后请解兵延见内殿期明日奉宝乞降至期果遣贾余庆等奉宝至军前【按世祖纪十三年正月宋主遣尹甫吉甫等赍传国玉玺及降表诣军前三月安塔哈阿喇罕诣宋主宫撤宋主同太后入覲叙次与本传互异】以功授行省断事官复令其子呼图克岱尔袭炮手总管十四年进炮手万户镇平江之常熟有叛民拥众自号太尉者行省会诸军讨之呼图克化尔父子自为一军奋戈陷阵斩贼酋戴太尉擒朱太尉帝嘉其功十五年兼平江路达鲁噶齐寻迁徽州湖州卒呼图克岱尔后升炮手万户改授达鲁噶齐卒

△锡琳干布

锡琳干布唐古人锡琳兵太祖时命同呼图克特穆尔招论沙州州将伪降设伏以待首帅至伏发马蹶干布以所乘马与首帅使奔自乘所蹶马而殿帝闻之曰卿临死地而易马与人何也干布对曰小臣阵死不足重轻首帅乃陛下器使宿将不可失也帝以为忠岁乙未定宗宪宗皆以亲王与苏布特征西域明年启行干布亦在行中又明年从诸王巴图征俄罗斯至额里齐城大战七日拔之己亥至乌苏默奇斯城负固久不下明年干布率敢死士十人蹶云梯先登大呼城破矣众蚁附而上遂拔之赐西马西锦锡名巴图尔明年班师授千户寻还断事官丙午定宗即位进秩大名路达鲁噶齐宪宗以布扎尔来莅行台命干布同署既又出监大名己未世祖南征供给军饷以疾舆归卒于家子爱鲁克

爱鲁克

爱鲁克

爱鲁克袭为大名达鲁噶齐至元五年从征云南金齿请部斩千余级诸部震服六年再入定其租赋平火不麻等二十四砦七年改中庆路达鲁噶齐兼管爨僰军十三年诏开乌蒙道帅师至玉连等州所过城砦未附者尽击下之十四年忙部也可不薛叛讨平之迁广南西道左右两江宣抚使兼招讨使十六年迁云南诸路宣慰使副都元帅十七年复立云南行省拜参知政事十八年乌蒙罗佐山白水江蛮叛复讨平之十九年召诣阙进左丞也可不薛复叛诏与西州都元帅伊苏岱尔湖南行省托里齐会师进讨禽也可不薛送京师【按经世大典云爱鲁克等进兵伊苏岱尔曰我等可回粮乏瘴起不便事闻命药刺海守其地久之贼穷困遂纳款与本传互异】二十二年乌蒙阿叛与右丞拜达勒往征之分道进击生擒阿蒙以归二十四年进右丞复改行尚书右丞镇南王征交

趾诏爱鲁克将兵六千人从之大小一十八战乃至其
王城与诸军会战又二十余合功为多二十五年感瘴疠卒赠平章政事谥毅敏子嘉琿
中书平章政事请于朝赠其祖锡琳甘布太师谥贞献
加赠爱鲁克太师追封魏国公改谥忠节

△绰尔济都勒斡

绰尔济都勒斡蒙古克呼氏从太祖征柰曼西夏有功命为太师国王穆呼哩前锋
岁辛未破辽东西诸州唯东京未下获金使遣往谕之
绰尔济都勒斡曰东京金旧都备严而守固攻之未易下请易服与其使偕往说之俟其
门开继以大军赴之则可克矣卒如其计徇地河北攻
大名大小数十战城垂陷中流矢卒武宗时赠太傅追封卫国公谥武敏子萨奇森布哈
嗣将其军太宗元年乙丑安辑河北山东诸州时史天
泽为真定河闲济南东京大名五路万户庚寅命萨奇森布哈以总师行省监其军金宣
宗之徙都于汴也立河平军于新卫以自固萨奇森布
哈数攻不拔壬辰太宗自白坡济河而南睿宗由峭石滩涉汉而北萨奇森布哈渡自河
阴至郑郑守马伯坚降及金哀宗出奔帝命萨奇森布
哈追之会其节度萨尼雅布弃卫入汴萨奇森布哈遂据而有之哀宗自黄陵冈济河谋
复卫萨奇森布哈与其将博索战败之哀宗窜归德萨
奇森布哈追蹙其后薄北门而军癸巳四月其将官努夜来斫营腹背受敌萨奇森布哈
一军皆没嗣国王塔斯承制以其弟明安岱尔领其行
营寻有旨以为蒙古汉军万户明安岱尔善骑领从征淮安因粮于敌未尝匮乏癸丑宪
宗遣从实勒们太子南伐死于钧州五子长都呼幼布
呼齐都呼从世祖北征叛王挺戈出入其阵帝壮之赐号巴图尔及平李璫之乱亦有战
功帝呼齐仕为光禄大夫徽政使金亡分封功臣赐新
卫民二百户萨奇森布哈谥忠武明安岱尔谥武毅爵皆卫国公

△实喇济苏

实喇济苏幼从太祖征回回河西诸国俱有战功太宗时从睿宗西征师次京兆府
会伊埒哈达作乱实喇济苏挺身斫贼阵下马搏战贼
众披靡睿宗嘉其功妻以侍女萨古台世祖尤爱之军旅田猎未尝不在左右子达春为
博啰齐德济鄂尔多千户达春子迁嘉努色埒默迁嘉
努从征纳颜力战而死帝命籍纳颜人口财物以赐之色埒默年十六从世祖讨额呼布
格有功赐号巴图尔授光禄少卿仍袭为德济鄂尔多
千户改同金宣徽院进金院事以管军千户从征纳颜有功复入为同知宣徽院事成宗
时拜宣徽使加大司徒卒

△哈苏纳

哈苏纳奇雅喇氏太祖时从征王汗有功后管领鄂尔根军从太祖征西域下赛玛尔堪布哈尔等城至太宗时授平阳太原两路达鲁噶齐后以疾卒子讷古伯袭从宪宗攻钓鱼山有功以疾卒

△布扎尔

布扎尔蒙古多托尔台氏父诺尔节善骑射能造弓矢尝因拜诺延见太祖视所挟弓矢甚佳问谁为造者对曰臣自为之适有野鳧翔于前射之获其二并以二矢献而退拜诺延至所居见布扎尔奇之妻以女父子遂俱事太祖尝从征讨赐诺尔节巴图尔名从征回回俄罗斯等国布扎尔奋身力战身中数矢闷仆几绝太祖命取一牛剖其腹纳布扎尔于牛腹浸热血中移时遂苏诺尔节卒宪宗以布扎尔为大都行天下诸路伊克扎尔古齐印造宝钞又赐蔚州定安为食邑布把尔卒子五人长好礼事世祖备宿卫会丞相巴延伐宋以功授水军翼万户府达鲁噶齐拜特穆尔吏部尚书巴尔塔斯云南宣慰使布呼齐袭父职为水军翼万户招讨使伊鲁鄂勒哲布哈辽阳省理问

△扎拉台绰和尔

扎拉台绰和尔初事太祖时有哈喇齐萨勒珠特都尔本塔塔尔鸿吉哩伊奇喇斯等谋奉扎木哈克为帝将不利于太祖绰和尔知其谋驰告太祖遂以兵诛扎木哈克等【按太祖本纪帝起兵逆战于哈里雅尔台和啰噶之地破之扎木哈克脱走与传互异】惟鸿吉哩入降太祖赐以达尔罕之名子纳沁事世祖为伊克扎尔古齐纳沁歿子巴克伞袭巴克伞卒子呼噜古台袭致和元年执都尔苏起军之使察罕布哈并其金字圆牌以献尝奏言有犯法者治之当自贵人始穷乏不给者救之当自下始其言良切于事弊云

△库库布哈

库库布哈阿勒坦塔塔喇氏以善射知名岁庚寅太祖命穆呼哩伐金分特默齐为五部库库布哈为五部前锋都元帅以威信怀附所至无残破略定滨棣诸州俘获焦林诸处民四百余籍其姓名遣归乡里徇益都守将降得其财物马畜悉分赐士卒后从太宗渡河攻汴梁归德分兵渡淮攻寿州守将无降意射书城中谕之城中人感泣以彩舆奉金公主开门送款库库布哈下令军中辄入城虏掠者死城中帖然公主义宗之姑也岁丙申太宗命五部将分镇中原括其民匠得七十二万户以三千户赐五部将库库布哈镇益都济南得分户六百立官治其赋得荐置长吏岁从官给其所得五户丝以疾卒子和托代领特默齐为元帅从巴延取宋道死子托噶玛勒袭

△巴延巴图尔

巴延巴图尔蒙古扎拉台氏幼事太祖赐名巴图尔太宗命领扎拉军一千六百人与塔海干布征关西有功宪宗命与阿陶总帅王德臣

【按宪宗纪及续通鉴载治利州城系汪德臣事德臣世显子也原文误作世显今据改】创立利州城领兵紫金山破宋军鹿角寨从都元帅耨埒城成都及领兵围云顶山下其城帝亲征留镇成都降属县诸城得其民悉抚安之诸王哈坦纳尔珙托克托等征大理还命领兵迎之道过新津寨与宋潘都统遇贼败之中统二年授蒙古鄂啰官至元六年告老孙鄂摩克台代其军从行省伊苏岱尔征诸国有功十六年从大军征鄂端又有功二十一年诸王珠卜命鄂摩克台往喀实噶尔之地为游击军时敌军二千余鄂摩克台以勇士五十人与战擒其将额布根和卓以献王壮之援蒙古军万户三十年卒

△舒库尔

舒库尔默尔吉特氏太祖时命同饮班珠尔河之水扈从亲征已而从破信安略地河西复从伐金破河南太宗命领济南大名信安等处军马复从国王达实出征岁辛亥辛子巴图袭巴图卒子呼图克袭移睢州从世祖渡江攻鄂还镇恩州中统三年从征李璫有功寻命修立邳州城领兵镇两淮十一年从巴延渡江有战功又从董文炳沿海出征还镇嘉兴行安抚事十六年授浙西道宣慰使加招讨使奉诏征占城以其国降表贡物入见帝嘉之二十四年从征交趾明年还师授邳州万户府万户三十年没于军

△赵阿克盘

赵阿克盘图伯特乌思臧多族氏始附宋赐姓赵氏世居临洮祖巴莽富甲诸羌父阿克昌金贞佑中以军功至熙河节度使金亡来归皇子库腾之镇西土也承制以昌为垒州安抚使时兵兴城无居人至则招逃亡立城垒课耕桑以安辑之卒于官阿克盘事亲以孝闻从伐蜀破大安功最授同知临洮府事斩朝天关乘嘉陵江至间州获蜀船二百艘攻利州生得其刘太尉战败宋师于潼川未制置使刘雄飞进攻青居山阿克盘击之宵溃四川大震进逼成都略嘉定平峨眉太平寨擒其将陈侍郎田太尉余众悉降大小五十余战皆先陷阵岁壬子世祖以皇弟南征大理见而奇之命摄元帅城益昌宪宗出蜀以为先锋攻西安下之授临洮府元帅帝驻钓鱼山合州守将王坚夜来斫营阿克盘率壮士逆战手杀数百人坚遂引去赐名曰巴图尔中统建元诏还镇临洮岁饥发私廩以赈贫乏给民农种粟二千余石芫菁子百石人赖不饥郡

当孔道传置旁午有司敝于供给阿克盘以私马百匹充驿骑羊千口代民输帝嘉之诏酬其直阿克盘曰我岂以私惠邀公赏耶卒不受以军事赴青居山道为宋兵所邀遂死千敌谥桓勇士重喜始给侍皇子库腾为亲卫从世祖征哈喇章数有功中统元年从征瑛塔哈以功授征行元帅四年从讨呼图克德济沙卜珠岱等克之迁临洮府达鲁噶齐重喜在郡劝农兴学省刑敦教以善治闻请致仕不许诏其长子袞吹嘉勒袞为达鲁噶齐升重喜巩昌二十四处宣慰使卒谥桓襄袞吹嘉勒性靖退辞官闲处二十余年仁宗闻其名召不起子德寿云南左丞

△沙扎该

沙扎该萨木坦氏弱冠宿卫太祖帐下从征西域诸国有功太宗时充益都行省军民达鲁噶齐从大帅达春破徐州擒金帅国用安丁酉迁京兆行省都达鲁噶齐至怀值大疫士卒困惫诏以本部兵就镇怀孟己亥同僚王荣潜畜异志欲杀沙扎该伏甲繫之断其两足跟以帛缄口置佛祠中沙扎该妻实喇巴尔率众攻荣家奋出之沙扎该裹疮从二子驰旁郡请兵讨荣杀之朝廷遣使以荣妻孥贖产赐沙扎该家且尽驱怀民万余口郭外将戮之沙扎该力争曰为恶者止荣一人其民何罪若果尽诛待守空城何为苟朝廷罪使者以不杀请以身当之使者还奏帝是其言民赖不死沙扎该给荣妻孥券放为民遂以其宅为官廨秋毫无所取郡人德之寻卒皇庆初赠温国公谥忠襄子昂阿喇袞

钦定续通志卷四百四十九

●钦定续通志卷四百五十 列传二百五十

列传

元 【四】

○元四

巴哩珠阿勒坦德济 和斯摩哩 阿喇勒乌苏 哈勒噶齐必噜【额琳特穆尔】 塔塔图该 伊琳特穆尔 莽吉苏 博罗哈雅 赛音谔德齐沙木斯鼎【尼雅斯拉鼎呼逊】

巴哩珠阿勒坦德济

和斯摩哩

阿喇勒乌苏

哈勒噶齐必噜

塔塔图该

伊琳特穆尔

莽吉苏

博啰哈雅

赛音谔德齐沙木斯鼎

△巴哩珠阿勒坦德济

巴哩珠阿着坦德济伊都呼伊都呼者高昌国主号也先世居辉和尔之地曰布克汗传三十余君是为伊噜勒德济数与唐人相攻战久之议和亲以息民于是唐以金莲公主妻伊噜勒德济之子格呼勒德济伊噜勒德济卒乃迁于交州居九百七十余载【按金莲公主降格呼勒德齐唐书公主传及文献通考所纪和蕃公主俱不载无可纪其年然自唐高祖之初至宋帝昺之末不过七百余载而此处已云九百七十余载然则原传所云树瘿裂而得婴而焚福山以弱其国尤不足信也姑删存其略以见世系之所自起云】至巴哩珠阿勒坦德济臣于契丹岁己巳闻太祖兴朔方遂杀契丹所置监国等官欲来附未行帝遣使使其国巴哩珠阿勒坦德济【按史原傅巴哩珠阿勒坦德济及其孙和尔齐哈喇德济并称伊都呼今各改从其名】大喜即遣使入奏愿率部众为臣是时帝征迪延汗射其子托克托杀之托克托之子达都齐拉袞等将奔巴哩珠阿勒坦德济不纳遂与战于檐河巴哩珠阿勒坦德济遣其国相来报帝复遣使还谕遂以金宝入贡辛未朝帝于吉鲁尔河奏曰臣愿得与陛下四子之末竭犬马之力帝感其言使尚公主伊埒鄂端且得序于诸子与哲伯纳颜征哈马尔苏尔坦回回诸国将部曲万人以先纪律严明所向克捷从帝征尼沙布尔征河西皆有大功既卒而次子谔格埒齐德济嗣谔各埒齐德济卒子茂穆尔德济嗣将万人从宪宗伐宋合州攻钓鱼山有功还火州卒至元三年世祖命其子和尔齐哈喇德济嗣为伊都呼海都特们德尔之乱辉和尔之民遭乱解散诏命和尔齐哈喇德济收抚之其众复辑十二年都勒斡布斯必等率兵围火州和尔齐哈喇德济誓死不从围六月不解都勒斡以书系矢射城中曰能以女与我则休兵其民请与之和尔齐哈喇德济曰吾岂惜一女而不以救民命然终不能与之相见以其女伊埒伊克默色必济厚载以茵引绳缒城下而与之都勒斡解去其后入朝帝嘉其功妻以公主曰巴克巴噶尔定宗女也还镇火州屯于州南北方军忽至大战力尽遂死之子纳琳德济尚幼诣阙请兵北征以复父讎帝壮其志妻以公主曰布尔罕太宗孙女也公主薨又尚其妹曰巴拜彻尔会吐蕃图沙玛作乱诏以平章政事领本部探马等军万人镇吐蕃宣慰司民赖以安武宗召还嗣为伊都呼复署其部押西护司之官仁宗朝加封高昌王

别以金印赐之其王印行诸内郡伊都呼印行诸辉和尔之境巴拜彻尔公主薨复尚公主曰乌拉戡安西王女也【按公主表安西王阿南达也】领兵火州复立辉和尔城池延佑五年卒子二人长曰特穆尔布哈次曰齐吉皆巴拜彻尔公主所生特穆尔布哈大德中尚公主曰多尔济斯满库腾太子孙女也至大中从父入覲备宿卫又事皇太后于东朝领大都护事出为巩昌等处都总帅达鲁噶齐奔父丧于永昌请以王爵让其叔父奇彻台叔父力辞乃嗣为伊都呼高昌王至治中领甘肃诸军仍治其部泰定中召还与威顺王库春布哈宣靖王迈努靖安王扣布哈分镇襄阳俄拜开府仪同三司湖广行省平章政事文宗召至京师佐平大难天历元年拜开府仪同三司上柱国录军国重事知枢密院事明年以旧官勋封拜中书左丞相加太子詹事复拜御史大夫其弟齐吉嗣为伊都呼高昌王

△和斯摩哩

和斯摩哩西域古则鄂尔多人初为西辽库陵汗近侍后为古则鄂尔多所属喀三拜斯哈勒长官太祖西征和斯摩哩率喀三等城酋长迎降帝命从大将哲伯为先锋攻柰曼克之斩其主库楚类哲伯令和斯摩哩持库楚类首往徇诸城皆望风降附又从征尼沙布尔城谕下之帝亲征至赛玛尔堪与其主扎拉鼎合战败之追袭扎拉鼎等于阿尔噶城又败之追至哈克伞城西寨又败之扎拉鼎逃入于海和斯摩哩收其珍宝以还取伊噜格勒德沁两城继而哈克伞城亦下帝遣使趣哲伯疾驰讨钦察命和斯摩哩招谕奇尔台实喇乌苏等城悉降至库尔哲部及阿克苏部以兵拒敌皆战败而降又招降赫林城进击俄罗斯于题勒山克之寻征喀喇又败其军进至钦察亦平之军还哲伯卒会帝亲征河西和斯摩哩持所获珍宝迎见于阿拉斯布拉斯帝就以所进金宝赐之仍命与色辰额呼为笔且齐又从太祖征汴至怀孟令领鄂啰事岁壬辰太宗【按本纪太宗四年壬辰帝由白坡渡河攻克钧州获金将哈达原传统叙于太祖征汴之下今依太宗纪补正】由白坡渡黄河攻金将哈达败之授怀孟州达鲁噶齐癸巳金将强元帅围怀州和斯摩哩率其众力战金兵退又遣富察哈纳赫舍哩扎鲁招谕金总帅范真来降己亥帝以和斯摩哩从军西域宣力居多命其长子诺绰巴袭为怀孟达鲁噶齐次子穆里济袭为笔且齐令和斯摩哩为扎尔古齐归西域大帅察罕行省特们德尔奏留之帝允其请庚子进怀孟河南二十八处都达鲁噶齐所隶州郡不从者制令籍其家乙卯卒子穆哩济复为怀孟达鲁噶齐中统三年从攻淮西与宋战死

△阿喇勒乌苏

阿喇勒乌苏回鹘巴鄂尔氏仕其国为干夫长太祖征西域率其部曲来降从帝亲征既破瀚海军又攻轮台高昌于阗塔实千等没于军子阿喇卜丹从世祖北征有功至元二十九年卒寿百二岁子沙木斯鼎有子五人长乌玛喇次博贝次实都次阿哈玛特次额森博贝骑勇善骑射历事成宗武宗仁宗数被宠遇积官荣禄大夫佩三珠虎符子阿都玛勒袭职致和元年自上都逃来丞相雅克特穆尔任为裨将率壮士百人围穆尔特穆尔等于托啰克台驿擒之以献天历元年充行院同佥从击呼喇台满济勒噶等军于卢沟桥败之进枢佥院寻以降镇卫都指挥使兼领拱卫司

△哈勒噶齐必噜

哈勒噶齐必噜辉和尔人也性聪敏国王约苏特穆尔闻名征为断事官约苏特穆尔卒其子幼西辽主珠尔汗遣使据其国且召哈勒噶齐必噜为诸子师后归太祖一见大悦即令诸皇子受学焉仍令其子伊德实伊纳克以质子入宿卫从帝西征至巴实伯里东独山见城空无人帝问其故对曰往岁大饥民皆流移然此地当北来要冲宜耕种以为备臣愿移居此于是父子皆留居焉后六年太祖西征还见田野垦辟民物繁庶大悦问哈勒噶齐必噜则已死矣乃赐伊德实伊纳克都督印章兼独山城达噜噶齐伊德实伊纳克卒子奇彻森和拉太宗时袭爵赐号达尔罕子四人曰塔塔尔曰贺珍曰和尔斯满曰裕勒斯满世祖命和尔斯满从舒苏德济镇云南裕勒斯满事宪宗袭父爵后徙平凉与其子谙达默色特穆尔入觐世祖诏入宿卫为笔且齐命从安西王莽噶拉出镇六盘成宗即位授汝州达噜噶齐积官秘书大监卒子额琳特穆尔

额琳特穆尔

额琳特穆尔

额琳特穆尔善国书多闻识历事累朝繇翰林待制累迁学士承旨英宗时日侍左右陈说祖宗以来及克先哲王嘉言善行翻译诸经纪录故实总治诸王驸马番国朝会之事天历初北迎明宗入正大统帝曰此朕师也三年进知经筵事子实喇卜累拜中书平章政事大司徒宣政院使

△塔塔图该

塔塔图该辉和尔人也性聪慧通本国文字柰曼迪延汗尊之为傅掌其金印太祖西征柰曼国亡塔塔图该怀印逃去俄就擒帝问是印

何用对曰出纳钱谷委任人材皆用之以为信帝善之命居左右是后凡有制旨始用印章仍命掌之命教太子诸王以辉和尔字书国言太宗即位命其妻为皇子哈喇彻尔乳母时加赐予塔塔图该谕诸子曰上以汝母鞠育太子赐子甚厚汝等当先供太子用有余则可分受帝称其廉数加礼遇以疾卒至大元年追封鴈门郡公子四人长永和尔默色次隆和默色次索罗该次多尔玛永和尔默色少有勇略瑋塔哈叛率其众与战败之追至卓巴勒适遇阿勒达尔合兵复战死之隆和默色有膂力尝猎于野遇盗三人搏之尽仆遂缚以还帝召见选力士与之角无与敌者帝壮之令备宿卫索罗该袭父职多尔玛旧事皇子哈喇彻尔世祖即位从其母入见欲官之以无功辞命统宿卫奉使辽东卒封鴈门郡公子阿必实克陕西行省平章政事

△伊琳特穆尔

伊琳特穆尔回鹘人辉和尔国相多伊克之裔也其兄必里克布哈年十六袭国相达尔罕时西契丹命太师僧沙克嘉来临其国骄恣奢淫辉和尔王患之谋于必里克布哈率众围沙克嘉斩之以功加号必里克呼尔敦左右有疾其功者潜于王曰沙克嘉珥珠先生宝也必里克布哈匿之王怒索宝甚急必里克布哈度无以自明乃亡附太祖赐食三十三郡寻卒弟伊琳特穆尔从太祖征讨多战功皇弟鄂齐锦求师傅帝命伊琳特穆尔往训导诸王子以孝弟敦睦仁厚不杀为先帝闻而嘉之从平河南授河南等处军民都达噜噶齐所得上方赏赉悉辇归故郡以散亲旧且盛陈汉官仪卫以激励之道出河西所过榛莽或时乏水为之凿井置墩居民使客相庆称便太宗即位选充大断事官从鄂齐锦出镇顺天等路布德化宽征徭盗遁奸革州郡清宁寻复监河南等处军民卒于保定谥庄简子哈喇布哈见忠义传

△莽吉苏

莽吉苏辉和尔人世居巴实伯里古北庭都护之地年十五尽通本国书太祖召至阙下一见大悦以授睿宗使视显懿庄圣皇后分邑岁赋复事世祖于潜藩日见亲用宪宗崩莽吉苏言于世祖曰太祖嫡孙唯王最长且贤宜即皇帝位诸王塔齐尔等咸是其言世祖即位眷顾益重南征时与近臣布扎尔为断事官及诸王额呼布格叛相拒漠北布扎尔有二心莽吉苏奏徙之中都帝以为忠数命收召豪杰凡所引荐皆极其选诏与安图并拜丞相固辞帝语安图及丞相巴延等曰贤哉莽吉苏求之彼族诚为罕也莽吉苏为人刚严谨信蚤居帷幄谋议世莫得闻至元四年卒谥敏惠武宗朝追封武都王改谥智敏子九人多至大官

△博啰哈雅

博啰哈雅辉和尔人也祖伊勒必哈雅父济达哈雅俱以功为其国世臣博啰哈雅幼孤依舅氏家就学未几善其国书尤精骑射年十八随其主内附充宿卫太祖西征扈从有功帝以吉鲁汗女舒穆鲁氏配之太祖崩总理燕京财帛庄圣太后闻其廉谨求之太宗命统中官军民匠户之在燕京中山者授真定路达噜噶齐辛卯拜燕南诸路廉访使未几授断事官得专生杀时有民误殴人死吏论以重法其子号泣请代博啰哈雅戒吏使擒于市惧则杀之既而不惧乃曰误殴人死情有可宥子而能孝义无可诛遂并释之征讨之际隶军籍者往往募人代行又军中多逃归者朝廷下制募代者杖百逃归者死命博啰哈雅按顺天等路募者闻命潜遣家人易代募者博啰哈雅欺曰募者已惧罪往易逃者因单弱思归情皆可矜遂奏其状皆得轻减有丁多产富而家人不往及未至役所至即逃者则曰此而不杀何以戒后其执法平允类如此世祖即位择信臣宣抚十道使真定真定富民出钱贷人者不踰时倍取其息博啰哈雅正其罪使偿息如本而止后定为令中统钞法行以金银为本本至乃降新钞时庄圣太后已命取真定金银由是真定无本钞不可得博啰哈雅遣人谓平章王文统曰真定南北要冲之地居民商贾甚多今旧钞既罢新钞不降何以为正且以金银为本岂若以民为本太后之取金帛以赏推戴功也其为本不亦大乎文统不能夺立降钞民赖以便俄迁顺德等路宣慰使至元二年卒博啰哈雅性孝友造大宅于燕京迎母事之得禄不入私室幼时叔父阿勒巴哈雅欺之尽有其产及贵显筑室宅旁迎居之终无闲言初博啰哈雅拜廉使命下之日希宪适生喜曰吾闻古以官为姓天其以廉为吾宗之姓乎故子孙皆姓廉氏大德初追封魏国公谥孝懿子希闵希宪希恕希尹希颜希愿希鲁希贡希中希括孙五十三人登显仕者代有之希宪自有传

△赛音谔德齐沙木斯鼎

赛音谔德齐沙木斯鼎一名乌玛喇回回人拜阿布勒之裔其国言赛音谔德齐犹华言贵族也太祖西征率千骑迎降命入宿卫从征伐以赛音谔德齐呼之而不名太宗时为燕京断事官宪宗即位命行六部事迁燕京路总管多惠政擢采访使帝伐蜀主馈饷未尝阙乏世祖即位立十路宣抚司擢燕京宣抚中统二年拜中书平章政事至元元年置陕西五路西蜀四川行中书省【按百官志中统元年以商挺领秦蜀五路四川行省事三年改立陕西四川行中书省治京兆至元十八年以陕西行中书省分省四川本传所云与志互异】出为平章政事莅

官三年户钞日增诏褒之七年分镇四川宋将咎万寿守嘉定与赛音谔德齐军对垒一以诚意待之不为侵掠及赛音谔德齐召还万寿请置酒为好左右皆难之赛音谔德齐竟往不疑酒至左右复言未可饮赛音谔德齐笑曰若等何见之小邪咎将军能毒我其能尽毒我朝人乎万寿叹服八年命行省事于兴元专给粮饷十一年命抚云南受命退朝即访知云南地理者并图其山川城郭驿舍军屯以进帝大悦拜平章政事行省云南时宗王图古勒方镇云南【按世系及诸王表云南王和克齐世祖第五子也此云图古勒互异】惑于左右之言恐夺其权具甲兵以备赛音谔德齐乃遣其子尼雅斯拉鼎先至王所请曰天子以云南守者非人致诸国背叛故命臣来安集之今未敢专愿王遣人共议王闻遽骂其下曰吾几为汝辈所误遂遣亲臣苏默乌克哈纳等至赛音谔德齐款宴甚欢且曰二君虽宗王亲臣未有名爵不可以议国事欲各授行省断事官未敢擅授令一人先禀王王大悦由是政令一听赛音谔德齐所为十二年奏宣慰司兼行元帅府事并听行省节制又奏置令长并从之十三年以所改郡县上闻云南俗无礼义男女往往自相配偶亲死则火之不为丧祭无秬稻桑麻子弟不知读书赛音谔德齐教之拜跪之节婚媾行媒死者为棺槨奠祭教民播种为陂池以备水旱创建孔子庙明伦堂购经史授学田由是文风稍兴云南民以贝代钱时初行钞法民不便之赛音谔德齐闻于朝许仍其俗又患山路险远盗贼出没为行者病相地置镇每镇设土酋吏百夫长各一人往来者或值劫掠则罪及之有土吏数辈怨其不已用至京师诬其专僭数事帝曰赛音谔德齐忧国爱民朕洞知之此辈何敢诬告即命械送赛音谔德齐处治之既至脱其械且谕之曰若曹不知帝以便宜命我故诉我专僭今不汝罪且命汝以官能竭忠自赎乎皆叩头谢誓以死报交趾叛服不常湖广省发兵屡征不利赛音谔德齐遣人谕以祸福且约为兄弟交趾王大喜遂乞永为藩臣萝盘甸叛往征之有忧色从者问故赛音谔德齐曰吾非忧出征忧汝曹冒锋镝不幸以无辜死又忧汝曹劫掠平民使不聊生及民叛则又从而征之耳师次萝盘城三日不降诸将请攻之赛音谔德齐不可遣使以理谕之萝盘主曰谨奉命越三日又不降诸将奋勇请进兵赛音谔德齐又不可俄而将卒有乘城进攻者赛音谔德齐怒遽鸣金止之召万户叱责之曰天子命我安抚云南未尝命以杀戮也萝盘主闻之曰平章宽仁如此吾拒命不祥乃举国降由是西南诸夷翕然款附夷酋每来见例有所献纳赛音谔德齐悉分赐从官或以给贫民秋毫无所私为酒食劳酋长制衣冠袜履易其卉服草履酋皆感

悦至元十六年卒百姓巷哭交趾王遣使致祭有生我育我慈父慈母之语帝思赛音谓德齐之功诏云南省臣尽守其成规不得辄改大德元年赠咸阳王谥忠惠子五人长尼雅斯拉鼎次哈克伞广东道宣慰使都元帅次呼逊次舒苏丹额默勒建昌路总管次巴苏呼云南诸路行中书省平章政事

尼雅斯拉 【鼎呼逊】

尼雅斯拉 【鼎呼逊】

尼雅斯拉鼎累官云南路宣慰使都元帅至元十六年 【按经世大典云至元十四年尼雅斯拉鼎由云南率蒙古爨僰军征缅甸至江头城招降诸砦纪年互异】 迁帅大理以军抵金齿蒲骠曲蜡缅甸招安夷寨三百籍户十二万余定租赋置邮传立卫兵会其父歿云南省臣失抚绥之方世祖忧之近臣以尼雅斯拉鼎为言十七年授云南行省右丞建言云南省规措所造金薄贸易病民宜罢且请罢元帅府及官员子弟入质臣奏可寻进拜平章政事奏减哈喇竟冗官二十一年从皇太子托欢征交趾有功二十八年进拜陕西行省平章政事二十九年卒封延安王子十五人巴延中书平章政事乌讷尔江浙行省平章政事扎哈哩荆湖宣慰使呼逊云南行省平章政事实迪云南行省左丞阿荣太常礼仪院使巴延彻尔中书平章政事赠奉元王谥忠宪呼逊至元初以世臣子备宿卫十五年出为河南等路宣慰司同知河南多盗官军收捕失利呼逊遣土豪持檄谕之未几贼二人来归赐之官巾且谕之曰汝既自归即良民矣俾侍左右寻放还令徧谕其党数日后招集其为首者十辈来罗拜庭下顾视异常众悉惊怖呼逊命为民俾随侍左右夜则令卧户外时呼而饮食之羣盗闻之相断款附除南京总管大德元年迁云南行省右丞既至条具诸不便事言于宗王请更张之王不可呼逊与左丞刘正驰还京师有旨令宗王协力施行由是一切病民之政悉革而新之豪民规避徭役往往投充王府宿卫有司不胜供给呼逊按元额所无者悉籍为民马龙州酋谋叛阴与外贼通事觉宗王将释不问呼逊与刘正反复研鞫奸状尽得竟斩之军粮支給吏夤缘为奸呼逊按军户姓名及仓廩处更番支給吏奸始除先是沙木斯鼎为云南平章时建孔子庙为学校拨田五顷以供祭祀教养后为大德寺所有呼逊夺归之复下诸郡邑徧立庙学选文士为教授文风大兴王府畜马繁多悉纵之郊败民禾稼而牧人又在民家宿食室无宁居呼逊度地置草场构屋数十闲使为牧所民得以安广南酋沙奴素强悍梗化呼逊诱致之置酒宴劳讽令入覲帝大悦大德五年缅甸主负固不臣呼逊遣人谕之曰我老赛音

谔德齐平章子也惟先训是遵凡官府于汝国所不便
事当为汝更之 緬国主遂与使者皆献白象一既入帝赐緬国王以世子之号乌蛮等租
赋岁发军征索乃集呼逊以利害榜谕不遣一卒而租
赋咸足俄有为飞语及符讖以惑宗王者呼逊引刘正密为驰奏造言之徒悉诛八年迁
为四川行省左丞改江浙行省至大元年拜江西行省
平章政事明年以母老谢职归养又明年卒天历元年赠雍国公谥忠简子二人巴罕中
庆路达噜噶齐库哩湖南道宣慰使

钦定续通志卷四百五十

●钦定续通志卷四百五十一 列传二百五十一

列传

元 【五】

○元五

耶律楚材【铸】 札哈 钮祜禄重山 杨惟中

耶律楚材

札哈

钮祜禄重山

杨惟中

△耶律楚材

耶律楚材字晋卿辽东丹王托云八世孙父履以学行事金世宗终尚书右丞楚材
三岁而孤母杨氏教之学及长博极羣书旁通天文地
理律历术数及释老医卜之说为文若宿构金制宰相子例试补省掾章宗诏问疑狱数
事同试者十七人楚材对独优遂辟为掾后仕为开州
同知贞佑二年宣宗迁汴完颜福兴行中书事留守燕辟为左右司员外郎太祖定燕闻
其名召见之曰辽金世讎朕为汝雪之对曰臣父祖尝
委质事之既为之臣敢讎君耶帝重其言处之左右夏人常八斤以善造弓见知于帝每
自矜曰国家方用武耶律儒者何用楚材曰治弓尚用
弓匠为天下者岂可不用治天下匠耶帝闻之甚喜日见亲用壬午八月长星见西方楚
材曰女真将易主矣【谨按通鉴辑览 御批金
距此时逾一年四月始易主何系于长星之见且彼时南有宋而北有金蒙古亦方兴之
国而西方则西夏之地长星究为谁见耶此不过附会
楚材明天文之说而不知其怪诞已甚也】明年金宣宗果殂帝每征讨必命楚材卜帝
亦自灼羊脾以相符应甲申帝至东印度驻铁门关有
一角兽形如鹿而马尾其色绿作人言谓侍卫者曰汝主宜早还帝以问楚材对曰此瑞
兽也名角端好生恶杀此天降符以告陛下愿承天心

以全民命帝即日班师丙戌从下灵武诸将争取子女金帛楚材独收遗书及大黄药材既而士卒病疫得大黄辄愈帝自经营西土未暇定制州郡长吏生杀任情燕蓟留后长官舒穆鲁轩达布尤贪暴楚材奏请州郡非奉玺书不得擅征发囚当大辟者必待报违者罪死于是贪暴之风稍戢燕多剧贼时睿宗以皇子监国遣楚材穷治之楚材询察皆留后亲属及势定子尽捕下狱戮十六人于市民始安己丑秋太宗将即位楚材告亲王察罕台曰王虽兄臣也礼当拜王然之率皇族及臣僚拜帐下元制尊属有拜礼自此始时朝集后期应死者众楚材言于帝悉宥之中原甫定民多误触禁纲而国法无赦楚材议请肆宥诏自庚寅正月朔日以前事勿治且条便宜一十八事帝悉从之奏立燕京等十路征收课税使凡长贰悉用士人廩籍充足拜中书令事无巨细皆先白之楚材奏凡州郡宜令长吏专理民事万户总军政所掌课税权贵不得侵之又举扎哈钮祜禄均与之同事权贵不能平轩达布以旧怨尤疾之谮于宗王宗王遣使以闻帝察其诬责使者罢遣之属有讼轩达布不法者帝命楚材鞠之奏曰此人倨傲故易招谤今将有事南方他日治之未晚也帝私谓侍臣曰楚材不较私讎真宽厚长者中贵克斯布哈奏采金役夫及种田西域与栽葡萄户帝令于西京宣德徙万余户充之楚材曰先帝遣诏山后民质朴缓急可用不宜轻动今将征河南请无残民以给此役帝可其奏壬辰帝南征将涉河诏逃难民来降者免死楚材请制旗以给降民使归田里全活甚众汴梁将下大将苏布特言金人拒抗持久城下之日宜屠之楚材驰入奏曰得地无民将焉用之帝犹豫楚材曰奇巧之工厚藏之家皆萃于此若尽杀之将无所获帝然之止罪完颜氏余勿问时避兵居汴者得百四十七万人楚材请求孔子后得五十一代孙元措奏袭衍圣公命数太常礼乐生召名儒梁陟王万庆赵着等使直释九经进讲东宫又率大臣子孙执经解义俾知圣人之道置编修所于燕京经籍所于平阳由是文治兴焉时河南初破有旨居停逃民及资给者灭其家乡社连坐由是逃者多殍死道路楚材从容进曰河南既平民皆陛下赤子走复何之帝悟命除其禁金既亡唯秦巩二十余州未下楚材曰往年吾民逃罪或萃于此故以死拒若许以不杀将不攻自下矣诏下诸城皆降乙未朝议将四征不庭欲遣回回人征江南汉人征西域楚材曰中原西域相去辽远未至敌境人马已疲兼水土异宜疾疫将生宜各从其便从之丙申诸王大集帝亲执觞赐楚材曰朕所以得安枕者卿之力也帝议裂州县赐亲王功臣楚材曰裂土分民易生嫌隙不如多以金帛与之帝曰已许柰何楚材曰若朝廷置吏收

其贡赋岁终颁之使毋擅科征可也帝然其计遂定天下赋税朝议以为太轻楚材曰作法于凉其弊犹贪后将有利进者则今已重矣时侍臣托欢奏简天下室女诏下楚材尼之不行帝怒楚材进曰向择美女二十有八人足备使令今复选拔臣恐扰民欲覆奏耳帝良久曰可罢之

丁酉楚材奏曰制器者必用良工守成者必用儒臣儒臣事业非积数十年殆未易成帝曰果尔可官其人楚材曰请校试之乃命宣德州宣课使刘中随郡考试以经义词赋论分为三科儒人被俘为奴者亦令就试其主匿弗遣者死得士凡四千三百人免为奴者四之一至于一衡量给符印立钞法定均输布递传明驿券庶政略备民稍苏息焉有二道士争长诬其讎之党人为逃军给中贵及通事杨惟忠执而虐杀之楚材接收惟忠中贵憾因诉楚材违制帝怒系楚材既而悔命释之楚材不肯解缚曰臣备位公辅国政所属陛下初令系臣以有罪也今赦臣是无罪也岂宜轻易反复如戏小儿国有大事何以行焉帝温言慰之楚材因陈时务十策曰信赏罚正名分给俸禄官功臣考殿最均科差选工匠务农桑定土贡制漕运悉施行之太原路转运使吕振副使刘子振以赃抵罪帝责楚材曰卿言孔子之教可使儒者为好人何故乃有此辈对曰圣人之教如天之有日月岂得缘一夫之失废万世常行之道乎帝意乃解帝素嗜酒日与大臣酣饮楚材屡谏不听乃持酒槽铁口进曰曲糵能腐物铁尚如此况五脏乎帝悟敕近臣日进酒三锺而止自庚寅定课税格岁有增羨至戊戌增至一百一十两译史安天台引温都尔哈玛尔扑买课税【按口浚大学衍义补云扑买之名起于宋开宝三年谓通计应得税钱任办此数先输之官而听其取赢于民也】又增至二百二十万两楚材极力辨谏至声色俱厉言与涕俱帝不听楚材叹曰民之困穷自此始矣楚材当国日久得禄分其亲族未尝私以官行省刘敏从容言之楚材曰睦亲之义但当资以金帛若使从政违法吾不能徇私恩也岁辛丑冬十一月帝出猎崩于行在所皇后尼玛察氏称制庶政多紊温都尔哈玛尔以货得政柄廷臣悉畏附之楚材面折廷争言人所难言人皆危之居无何朝廷用兵事起仓卒后欲西迁以避之楚材进曰朝廷天下根本根本一摇天下将乱臣观天道必无患也后数日乃定后以御宝空纸付温都尔哈玛尔使自书填行之楚材曰朝廷自有宪章今欲紊之臣不敢奉诏事遂止又有旨凡温都尔哈玛尔所建白令史不为书省断其手楚材曰国之典故先帝悉委老臣令史何与事若合理自当奉行口不可行死且不避况截手乎后不悦楚材大声曰老臣事太祖太宗三十余年无负于国皇后岂能无罪杀臣也后虽憾

之亦以先朝旧勋深敬悼焉甲辰卒【续通鉴作癸卯】皇后哀悼赙赠甚厚后有谮楚材者言其在相位日久天下贡赋半入其家后命近臣玛尔结覆视之唯琴阮十余及古今书画金石遗文数千卷至顺元追封广宁王谥文武子铉铸

耶律铸

耶律铸

铸字成仲幼聪敏善属文尤工骑射楚材歿嗣领中书省事时年二十三上言宜疏禁纲遂采历代德政合于时宜者八十一章以进岁戊午宪宗征蜀诏镇领侍卫骁果以从屡出奇计攻下城邑己未宪宗崩额呼布格叛铸弃妻子自朔方来归世祖嘉其忠中统二年拜中书左丞相诏将兵备御北边后征兵扈从败额呼布格于上都之北至元元年奏定法令三十七章吏民便之二年行省山东未几征还初清庙雅乐止有登歌诏铸制宫悬八佾之舞四月春乐舞成上之赐名大成十九年复拜中书左丞相二十年坐不纳职印妾奏东平人聚谋为逆闲谍幕僚及党众囚阿里沙遂罢免仍没其家货之半徙居山后二十二年卒子十一人希征希勃希亮希宽希素希固希周希光希逸余失其名至顺元年赠懿宁王谥文忠

△扎哈

扎哈齐哩台氏初以军伍长从太祖同饮班珠尔河水与诸王百官大会郭诺河上太祖尊号曰青吉斯皇帝岁庚午从太祖征柰曼有功【按太祖纪元年丙寅征柰曼禽博啰汗以归柰曼部由是遂亡此元庚午则是太祖之五年也恐误】赐良马一壬申从攻库楚克诸国为锡里巴从攻塔塔尔钦察唐古哲袞契丹女真河西诸国所俘生口悉以上献命屯田于阿喇罕立镇海城戍守之壬申从太祖谋定汉地师次隆兴与金将呼齐呼战矢中臆闲裹疮而出者复数四既破燕拜中书右丞相己丑太宗即位扈从至西京攻河中河南钧州癸巳攻蔡州以功赐恩州一千户先是收天下童男童女及工匠置局宏州既而得西域织金绮纹工三百余户及汴京织毛褐工三百户皆分隶宏州命镇海世掌焉定宗即位以扎哈为先朝旧臣仍拜中书左丞相卒子十人博果斯断食封邑从世祖征花马其大理率兵千人结浮桥于金沙江以济师中统初论功授益州等路宣抚使二年改东平路副达噜噶齐讨平叛寇寻迁济南等路宣慰至元二年迁南京路达噜噶齐四年讨平蕲县叛民以病乞谢事特授保定路达噜噶齐归老于家卒

△钮祜禄重山

钮祜禄重山金源贵族也国初为质子遂委质焉太祖使为宿卫官笔且齐从平诸
国有功围凉州执太旗指麾六军手中流矢不动已而
为侍从官数得侍宴内廷因谏曰臣闻天子以天下为忧忧之未有不治忘忧未有能治
者也置酒为乐此忘忧之术也帝嘉纳之岁辛卯授左
丞相时耶律楚材为右丞相【按重山入相据本纪系太宗三年原传作太宗时事今改
正又按太宗纪三年以耶律楚材为中书令重山为
左丞相扎哈为右丞相与此互异】凡建官立法任贤使能与夫分郡邑定课赋通漕运
足国用多出楚材而重山佐成之乙未从伐宋诏军前
行中书省事师入宋境江淮州邑望风款附降其民三十余万取定城天长二邑不诛一
人复入中书视事卒封魏国公谥忠武戊戌诏其子江
淮安抚使纳罕嗣行军前中书省事时大将察罕下寿春欲屠其城纳罕劝止之初世祖
伐宋军于汴纳罕曰李璫承国厚恩坐制一方然其人
多诈叛无日矣帝亦患之中统元年两迁宣抚使三年迁秦蜀五路四川行中书省事其
年李璫反帝使谕纳罕曰卿言犹在耳璫果反矣卿守
谨守西鄙对曰臣谨受诏不敢以西鄙为陛下忧明年授中书平章政事以病卒封魏国
公谥宣昭子博袞彻尔知河中府

△杨惟中

杨维中字彦诚宏州人金末以孤童子事太宗知读书有胆略太宗器之年二十奉
使西域三十余国宣畅国威俾皆籍户口属吏以归帝
于是有大用意皇子库春伐宋命惟中于军前行中书省事克宋枣阳光化等军光随郢
复等州及襄阳德安府得名士数十人收伊洛诸书送
燕都立宋大儒周惇颐祠建太极书院延儒士赵复王粹等讲授其闲遂通圣贤之学慨
然欲以道济天下拜中书令定宗即位平阳道断事官
希产横恣不法诏惟中宣慰惟中按诛之金将武仙余党散入太原真定闲聚众剽掠诏
会诸道兵讨之不克惟中谕降其渠帅余党悉平宪宗
即位世祖以太弟镇金莲川得开府专封拜乃立河南道经略司于汴梁奏惟中等为使
俾屯田唐邓申裕嵩汝蔡息亳颍诸州刘福为河南道
总管贪鄙残酷虐害遗民惟中至召听约束福称疾不至惟中设大挺于坐复召之福不
得已以数千人拥卫见惟中惟中握大挺击仆之数日
福死河南大治迁陕西四川宣抚使时诸军帅横侈病民郭千户者尤甚惟中戮之以徇
关中肃然岁己未世祖总统东师奏惟中为江淮荆湖
南北路宣抚使俾建行台以先启行宣布恩信蒙古汉军诸帅并听节制师还卒于蔡州
中统二年谥忠肃

钦定续通志卷四百五十一

●钦定续通志卷四百五十二 列传二百五十二

列传

元【六】

○元六

塔本【阿尔济苏特穆尔 德呼威苏 索约勒哈陶默巴】 苏克

孟克萨喇【博迪苏】 李楨

高智耀【睿】 特尔格

塔本

苏克

孟克萨喇

李楨

高智耀

特尔格

△塔本

塔本伊吾庐人人以其好扬人善称之曰扬公初从太祖讨诸部屡阨艰危复从围燕征辽西下平滦白霏诸城戒军士毋妄杀太祖闻而喜之俾镇抚白霏诸郡号行省都元帅久之徙治兴平兴平兵火伤残惨无生意塔本召父老问所苦除之薄赋敛役有时归者四集始至户止七百不一二年乃至万户庚寅诏益中山平定平原隶行省甲午盗李仙赵小哥等作乱塔本止诛首恶宥其誥误癸卯卒追封营国公谥忠武子阿尔济苏特穆尔

阿尔济苏特穆尔

德呼威苏

索约勒哈陶默色

阿尔济苏特穆尔

阿尔济苏特穆尔嗣父职为兴平等处行省都元帅一遵先政兴学养士轻刑薄徭虽同僚不敢私役一民从伐高丽有功岁丙辰卒追封营国公谥武襄子阿勒台宪宗时命为平滦路达鲁噶齐始至蠲银盐酒等税八分之一至元十年岁饥发粟振民全活甚众僚属始至阿勒台必遗之盐米羊畜什器曰非其它也欲其不剥民耳姻族穷者月有常给民丧不能葬者与之棺槨冻为孤竹故国乃庙祀伯夷叔齐以励风俗二十五年卒追封永平郡公谥忠亮子德呼威苏

德呼威苏

德呼威苏少好读书成宗时入宿卫累迁河间路总管属岁饥出俸金及官库所积

振之活数十万人河间当水陆要冲因方供亿皆取给焉德呼威苏立法调遣民便之复增置便习弓马尉益逻兵之数于是盗贼屏息陵州羣凶为官民害悉收系死狱中后升辽阳行省参知政事子索约勒哈陶默色

索约勒哈陶默色

索约勒哈陶默色十二宿卫英宗潜邸当服御诸物英宗即位拜监察御史【按索约勒哈陶默色为监察御史时首言国家政柄总归中书不得隔越奏事凡有奏行布告并从中书省送国史翰林详定可否廷议是之着为令语具载元典章本传失载】至治元年诏起大刹于京西寿安山与御史观音保等上章极谏以为东作方始而兴大役以耗财病民非所以祈福也初丞相特们德尔疾忌台谏至是特们德尔之子索诺木为治书侍御史密奏宿卫旧臣讪上以扬已之直大不敬也乃杀索约勒哈陶默色泰定初追封永平郡公谥贞愍【按续通考作追封永平郡王元史类编作谥忠愍并与此异谨附识】

△苏克

苏克蒙古奇■〈口末〉氏世传李唐外族父辉图事太祖尝从令班珠尔河水苏克沈勇有谋雅为太宗所知命使金覘其虚实至河金人闭之舟中七日始登南岸又三旬乃达汴及见金主曰天子念尔土地日狭民力日疲故遣我致命尔能修岁币通好则转祸为福矣金主取金卮饮之酒曰归语汝主必欲加兵敢率精锐以相周旋岁币非所闻也苏克饮毕即怀金卮以出默识其地理阨塞城郭人民之强弱既复命以金卮献帝喜曰我得金于汝手矣复以赐之始征兵南伐兵至河北岸方舟钦渡金军阵于河南帝令仪卫导苏克中行亲率偏师乘阵西策马渡河会睿宗军亦由襄邓至两军夹攻之及金亡诏赐金护驾士五人曰以旌汝为使之不辱也岁乙未授山西大达噜噶齐受命方出有回回六人讼事不实将抵罪遇诸途急止监者曰始缓其刑当入奏复见帝曰此六人名著西域徒以小罪诛之非所以怀远人也愿以赐臣使自悔悟迁善为他日用帝意解召六人谓之曰生汝者苏克也其竭力事之其宽大爱人多类此卒追封宣宁王谥忠襄子六曰察罕曰伊噜古都斯曰哈瑠图曰呼兰曰和塔拉布哈曰布哈察罕伊噜古都斯哈瑠图皆从乌拉齐太子出征以战功显呼兰袭职鉏强植弱均役平刑阖郡安辑时西方之盗有甄军判者率羣盗往来阜平曲阳间杀人而夺之财呼兰曰此大盗也县岂能制哉即遣千人捕甄杀之剿其余党害乃除卒追封云国公谥康忠子托多约苏袭爵养母完颜氏以孝闻卒追封云国公谥显毅

△孟克萨喇

孟克萨喇察罕扎拉尔氏曾祖齐拉袞克酬祖绰鄂父诺海并事烈祖及太祖嗣位年尚幼所部多叛亡绰鄂独不去皇弟柴济萨哈勒阴
擿之去谢不从绰鄂精骑射帝甚爱之号为默尔根帝尝与贼遇将战有二飞鹞至命绰鄂射之一发而坠贼望见惊曰善射若此飞鸟且不能
逃况人乎不战而去从征柰曼敌率锐兵鼓而进绰鄂按兵不动敌疑畏不敢前太祖征默尔奇斯兵溃绰鄂与其弟左右力战以卫会乌梁海
哲哩木来援敌乃引退诺海事太祖备历艰险未尝形于言帝嘉其忠且念其世勋诏封怀洛阳百七十五户孟克萨喇事睿宗恭谨过其父尝
从攻凤翔首立奇功定宗升为断事官刚明能举职宪宗在藩邸深知其人从征俄罗斯阿拉钦察诸部常身先诸将及颁所俘宝玉则一无所
取宪宗益重之倍治藩邸之分民虽太后及诸嫔御小有过失知无不言以故邸中人咸敬惮之乃以为断事官之长其位在三公上犹汉中大
将军也既拜命出问其僚曰我当以何道守官众默然又问夏人果斡进曰夫札尔古齐之逆犹宰之割羊也解肩者不使伤其脊在持平而已
孟克萨喇即起入帐内为帝言之果斡由是知名定宗崩宗王巴图罕大会宗亲议立宪宗辉和尔巴拉曰实勒们皇孙也宜立诸大臣莫敢言
孟克萨喇独曰先皇后立定宗时汝何不言耶有异议者吾请斩之众不敢异乃奉宪宗立之 【按宪宗纪载巴拉欲立实勒们穆格折之巴
拉语塞乌兰哈达及巴图赞成之议遂定与本传异】 宪宗既立察哈台之子及阿齐台等谋作乱刳车辕藏兵其中以入辕折兵见哈苏齐上
变孟克萨喇即发兵出迎悉就禽宪宗亲简有罪者付之鞠治孟克萨喇悉诛之由是委任益博有当刑者辄以法刑之乃入奏帝无不报可癸
丑辛帝以孟克萨喇当国时多所诛戮及是咸胜谤言 【按王恽撰史天泽家传云监郡孟克萨喇以兵数万散处州郡间伐桑蹂稼井里骚
然是谤言亦非无因也本传不载监郡之官岂其有讳词也】 乃为诏谕其子历叙其祖父之忠勤以申警戒之意至顺四年追封袞国公子四
人长托欢次托尔齐次额森特穆尔次特穆尔布哈特穆尔布哈子曰特济讷曰噶勒哈斯曰博迪苏

博迪苏

博迪苏

博迪苏幼入宿卫为博啰齐历事成宗武宗由光禄少卿擢同知宣徽院事还授左丞相延佑四年 【原文误作二年今依仁宗纪及宰相年表改正】 拜中右丞相时方承平日久君臣端拱百姓又安一时号称极治英宗时

以大宗正札尔古齐出镇北方边民安堵泰定闲还朝
加太保【按三公表泰定元年巴延彻尔为太保其二年至四年则图古勤也博迪苏为太保表失载】及都尔苏构兵上都兵溃博迪苏奉
玺绶来上文宗嘉之拜太傅卒博迪苏为人清慎宽厚号称长者其歿也贫无以为敛人皆叹其廉追封威平王三子长茂穆尔德济次普尔普次巴朗朗朗而孤其母吉雅展氏二十而寡守节不他适后为大宗正府札尔古齐

△李楨

李楨字干臣其先西夏国族子也金末楨以经童中选既长入为质子以文学得近侍太宗嘉之赐名鄂尔绰勒笔且齐从皇子库春伐金下河南诸郡往唐邓二州数民实振恤饥寒归者如市戊戌从大将察罕下淮甸以功授军前行中书省左右司郎中奏访天下儒士令所在优贍之辛丑师围寿春不下楨单骑入敌垒晓以利害明日与其将二人率众来降楨表言襄阳乃吴蜀之要冲宋之喉襟得之可为他日取宋之基定宗嘉其言庚戌授襄阳军马万户丙辰党宗命楨率师巡哨襄樊戊午帝亲征召楨议事卒于合州

△高智耀

高智耀河西人世仕夏国曾祖逸大都督府尹祖良惠右丞相智耀登本国进士第夏亡隐贺兰山太宗时召见将用之遽辞归皇子库腾镇西凉儒者皆隶役智耀言非便请除之皇子从其言欲奏官之不就宪宗即位智耀入言儒者学尧舜禹汤文武之道用之则治宜养其材以资用帝问儒家何如巫医对曰儒以纲常治天下岂方技所得比帝曰善前此未有以是告朕者诏复海内儒士徭役无有所与世祖在潜邸已闻其贤及即位召见又言儒术有补治道反复数千言帝铸印授之命凡免役儒户皆从之时淮蜀士遭俘虏者皆没为奴智耀奏请除之以风厉天下帝然之即拜翰林学士命循行郡县区别得数千人或言其诡滥帝诘之对曰士譬则金也金色有浅深谓之非金不可才艺有浅深谓之非士亦不可帝悦更宠赉之智耀又言国初庶政草创纲纪未张宜仿前代置御史台以纠肃官常至元五年立御史台用其议也擢西夏中兴等路提刑按察使会西北藩王遣使入朝帝求聘使智耀请行至上京卒追封宁国公谥文忠子睿

高睿

高睿

睿资禀直亮智耀之北使也携之以行及卒近臣以睿见时年十六授符宝郎出入禁闕恭谨详雅授指挥副使累官嘉兴路总管有宿盗

昼掠民财睿下令生擒之一郡以宁擢江东道提刑按察使部内草窃陆梁声言围宣城郡将怯懦城门不开睿责之曰官先示弱民何所凭命密治兵卫洞开城门寇以有备不敢进遂讨平之迁浙西道肃政廉访使盐官州民有结党持郡邑短长者睿悉按以法改淮东道肃政廉访使盗窃真州库钞有司追逮平民睿谏得其情纵遣之未几果得真盗拜南台御史中丞务持大体有儒者风延佑元年卒追封宁国公谥贞简子纳麟自有传

△特尔格

特尔格嘉纳克氏克实密尔人父鄂拓克齐与叔父纳摩俱学浮屠氏兄弟相谓曰世道扰攘吾国将亡东北有天子气盍往归之乃偕入见太宗礼遇之定宗师事纳摩使鄂拓克齐省民瘼宪宗尊纳摩为国帅总天下释教鄂拓克齐亦贵用事领克实密尔万户奉诏往谕克实密尔为其国主所杀帝发兵诛国主元贞元年封代国公谥忠遂鄂拓克齐之歿特尔格甫四岁从纳摩入见帝方食鸡辍以赐之特尔格捧而不食帝问故对曰将以遗母帝奇之世祖即位召见命隶丞相博罗备宿卫先是世祖事宪宗甚亲爱后以谗稍疏国师导世祖宜加敬慎遂友爱如初至是帝将用特尔格曰吾以酬国师也于是特尔格年十七命掌饗膳汤药日益亲密至元十六年特尔格奏曰武臣佩符古制也今长民者亦佩符请省之以彰武职从之十七年进尚膳监时高州人言境多野兽愿捕以充贡特尔格曰捕兽充贡徒扰民耳不可听从之进司农寺达噜噶齐从猎巴雅尔之地猎人射兔误中名驼帝命诛之特尔格曰杀人偿畜刑太重帝惊曰误耶史官必昼亟释之庾人有盗凿秬米者罪当死特尔格谏曰臣鞠庾人其母病盗秬欲食母耳请贷之牧人有盗割驼峯者将诛之特尔格曰生割駝峯诚忍人也然杀之恐乖陛下仁恕之心诏皆免死二十二年奏司农寺宜升为大司农司【按百官志至元二十年改务农司为司农寺二十三年又改为大司农司本传记年均与志异】秩二品使天下知朝廷重农之意制可桓州饥民鬻女子为食奏以官帑贖之二十四年从征纳颜至苏尔图之地叛王塔布岱率兵奄至特尔格奏曰彼众我寡当设疑以退之于是帝张盖据迹特尔格从容进酒敌惧有伏遂引去二十九年进中书平章政事大德三年乞解机务仍授平章政事议中书省事俾掌诸王朝见之礼七年复拜中书平章政事平滦大水奏请散财振恤从之十年辽王托克托入朝从者执兵入大明宫特尔格劾止之王惧谢从幸晋山饥民相望特尔格辄发廩振之既及陈疏自劾帝称善武宗即位有诉宁远王库库楚逆谋者

命诛之特格辨其诬得免死徙高丽仁宗皇庆元年授开府仪同三司太傅录军国重事乃进奏世祖子惟宁远王在宜赐还从之二年卒追封秦国公谥忠穆加封延安王谥忠献子六人呼察淮东宣慰使平安努太平路达噜噶齐额实赫同知山东宣慰使事呼喇台同知真定总管府事伊克玛勒同知都护府事重喜隆禧院副使孙八人

钦定续通志卷四百五十二

●钦定续通志卷四百五十三 列传二百五十三

列传

元 【七】

○元七

史天倪【楫 权 枢】 史天祥 史天泽【格】

史天倪

史天祥

史天泽

△史天倪

史天倪字和甫燕之永清人曾祖伦少好侠金末中原涂炭乃建家塾招徕学者所藏活豪士甚众士族陷为奴隶者辄出金赎之甲子岁大侵发粟八万石振饥者士争附之祖成珪倜傥有父风父乘直读书尚气节癸酉太师国王穆呼哩南伐乘直率里中老稚数千人诣涿州军门降穆呼哩欲用乘直乘直辞而荐其子乃命乘直管领降人家属屯霸州甲戌从穆呼哩攻北京授行尚书六郡事庚寅以老归乡里卒三子天倪天安天泽天倪姿貌魁杰穆呼哩见而奇之以万户统诸降卒从略地至东海所过城邑皆下因进言曰金弃燕迁汴辽水东西诸郡金之腹心也我若得大宁以■〈才 戾〉其喉襟则公虽有辽阳终不能保矣穆呼哩善之先伦卒时河朔诸郡结清乐社岁时像伦而祠之至是天倪选其壮勇号清乐军以从兄天祥为先锋所向无敌分略三河蓟州诸砦望风款服甲戌朝太祖于燕陈奇谋授马步军都统管领二十四万户从穆呼哩攻高州又从攻北京皆不战而克乙亥授右副都元帅奉诏南征降平州进兵真定真定武仙固守不下遂移军图大名破其城丙子会穆呼哩兵于燕南清州监军王守约平州推官哈达俱以城叛谋越海归金天倪追袭至乐安败之杀守约擒孟古丁丑徇山东诸郡军中肃然远近响应己卯从穆呼哩徇河东至绛州其国楼牢不可破天倪命穴其旁地虚楼陷遂拔之庚辰还军真定武仙降穆呼哩承制以天倪为河北西路兵马都元帅行府事仙副之天倪乃言于穆呼哩下令有剽掠者以军法从

事辛巳降怀潞泽三州壬午破泽南水砦癸未徇山西
遂克三关不浹旬定四十余砦兵至河卫严实以兵来会请自攻河卫天倪曰哈达布哈
亦勍敌也实曰易与耳明日实与布哈兵战竟为所执
天倪曰哈达以实归汴必在今夕急命冯存杜必贵率壮士伏延津柳渡遇存等与战败
之实得脱归必贵战死未几帝命天倪回军真定甲申
夏大名总管彭义斌以宋兵犯河朔天倪逆战于恩州义斌入保大名乙酉师还闻武仙
之赏据据腰水铁壁二砦以叛天倪捣其巢掩杀之仙
怒谋作乱乃设宴邀天倪天倪往为仙所杀 【按金史武仙傅载仙与史天倪积不相能
尝欲南走宣宗招之仙得牒大喜乃贼杀史天倪以
真定降】 天倪之走真定也秉直戒之曰观武仙辞气终不为我用宜备之天倪曰我以
赤心待人人或相负天必不容愿无虑秉直乃携其孙
楫权还北京至是人服其先识天倪死时妻程氏闻乱恐污于贼乃自杀子五人其三人
尚幼俱死于难惟楫权在

史楫

史权

史枢

史楫

楫字大济岁己亥知中山府事寻迁征南行军万户翼经略徇地蕲黄所向有功壬
寅天泽引见太宗乞解职授之帝以楫为真定兵马都
总管辛亥朝廷始征包银楫请以银与物折仍减其元数诏从之又请立银钞相权法人
以为便或请运盐按籍计口给民以食楫争其不可议
遂寝有愆府僚于达官者质之无实将抵之死楫曰诛之固足以惩后未若宥之以愧其
心乃杖而遣之中统元年授真定路总管同判本道宣
抚可事真定表山带河连属三十余城生杀进退咸倚专决楫谨身率众明政化信赏罚
任贤良汰贪墨恤羸独民咸德之所举州县佐吏有文
学者三十余人后皆知名会天泽言兵民之柄不可并居一门行之请自臣家始楫即日
解绶归卒子炫常德管军总管辉知孟州燧同知东昌
府事煊潼关提举煊金广西按察司事

史权

权字伯衡勇而有谋初以权万户从天泽南征岁壬子天泽以万户改河南经略使
乃以权代其任甲寅屯军邓州败宋将高达于樊城己
未世祖将兵伐宋权出迎于淮西渡江次鄂州宪宗崩世祖北还命权总兵镇武矾山中
统元年授沿边镇守诸军总管万户至元六年召问征
南之策对曰襄阳乃江陵之藩蔽樊城乃襄阳之外郭先克樊城则襄阳不战自降然后

驻兵嘉定耀武淮泗事必有济帝善其计七年宋兵侵边权引兵破之宋将夏贵以船万艘载壮士欲夺江权进攻破之既而转粮于随员复引兵扼我前又破之制授河南等路宣抚使寻充江汉大都督总制军马总管屯田万户改真定等路总管兼府尹徙东平又徙河间卒

史枢

枢字子明父天安从秉直降太师穆呼哩以天倪为万户而质天安军中于丑从讨锦州叛人张致平之己卯从略地关右生擒鄜州骁将张资禄乙酉武仙杀天倪于真定天安率众来会天泽并力攻仙败走之以功授行北京元帅府事抚治真定庚寅宋聚兵为仙援遣其徒赵和行间城中诬卒副李甲刘清尝输款为内应守将械两人送府大帅趣命戮之天安揣知其诈请自鞠之果得其情遂斩和以徇壬辰从伐金师还讨剧盗梁满苏杰等悉平之甲午权真定等路万户乙卯卒枢年二十余以勋臣子知中山府有治绩甲寅天泽奏为征行万户配以真定彰德卫州怀孟新军戍唐邓乙卯败宋舟师于汉水之鸳鸯滩戊午宪宗伐宋入蜀从天泽诣行在朝帝于大散关门帝劳之命为前锋宋剑州侨治于苦竹崖【续通志作苦竹隘】前阻绝涧深数百尺恃险而不备帝使枢侦之枢率健卒数十缒而下得其所以致师处以闻帝趣枢急取之宋人惧乃降己未从天泽击败宋将吕文德于嘉陵水追至重庆而还中统二年从天泽扈驾北征三年李璫叛复从天泽往讨之夹涧而城竖木栅于涧中淫雨暴涨栅尽坏枢曰贼乘吾隙俟夜必出命作苇炬数百置城上三鼓贼果至飞炬掷之风怒火烈弓弩齐发贼大溃自相蹂躏死者不可胜计未几璫就擒至元四年宋兵围开达诸州以枢为左壁总帅悉擒河南山东太原等军宋兵闻之解去六年高丽人金通精据珍岛以叛【按洪福源及高丽传至元六年高丽权臣林衍叛讨之七年衍死余党裴仲孙等立承化侯为王窜入珍岛八年破珍岛斩承化侯其党金通精走耽罗十年拔耽罗诛之本传偏举通精故与二传不甚符合】讨之岁余不下七年进凤州经略使枢至谓将佐曰贼势方张未易力胜宜分军为三多张旗帜以疑之吾与诸君潜师捣其巢穴破之必矣与战大破之其地悉平十二年复以万户从丞相巴延伐宋宋平署安吉州安抚使时新附之初民所在依险阻自保枢以威信招怀之复业为民者以千万计十四年枢称疾还十九年超为东京路总管辞不赴二十三年拜山东山西道宣慰使治济南后又治益都明年卒子焕后卫亲军都指挥使辉秘书少监

△史天祥

史天祥父怀德秉直弟也岁癸酉穆呼哩从太祖伐金天祥随秉直迎降于涿穆呼哩命怀德就领其黑军隶帐下署天祥都镇抚选降卒二百人使领之招徕丁壮得众万余从取霸州文安第二十余城东下淄沂密三州所至皆先登诏从大军攻燕不克甲戌略地高州拔惠和金源等十五城惟大宁固守不下乃合众攻其城怀德先登为流矢所中歿于军乃以所统黑军命天祥领之天祥愤痛其父之死攻之愈急乙亥与大帅乌页尔降其北京留守音达珙同知乌库哩进攻北京傍近诸寨悉降之得老幼数万胜兵八千西干河达鲁五指山杨昭努固守不下天祥击之大小百余战昭努战死达鲁败走得户二万授西山总帅兵马兴州节度使赵守玉反天祥与乌页尔分道讨平之达鲁复聚众攻龙山天祥败之达鲁战死进克中兴府张致盗据锦州从穆呼哩讨平之会契丹汉军擒关肃复利州诸寨悉平丙子觐太祖于鱼儿泺授提控元帅拔盖金苏复等州获金完颜努耶律实图美迁利州节度使所部降民都总管监军兵马元帅丁丑缚金将巢元帅又灭绰尔盗众万人城庚州之军河己卯权兵马都元帅蒙古汉军黑军并听节制下河东平阳等八十余城庚辰至真定穆呼哩使天祥攻城天祥请谕降之乃往见守将武仙谕以祸福仙悟乃降穆呼哩以秉直之子天倪为河北西路兵马都元帅镇真定以天祥为左副都元帅引兵屯邢西山兄贵以万人壁于山上负固不下天祥由鸟道扳援而上尽掩捕【按金史武仙传云兄贵为安国军节度使史天泽击之亦归顺于元】遂下邢磁相三州从战黄尼冈破单胜兗三州辛巳从取绥德鄜坊等五十余城壬午穆呼哩攻青龙金胜诸堡花帽军坚守不下既破欲屠之天祥力谏而止癸未春还军河中穆呼哩上其功授蒙古汉军兵马都元帅总十二万户镇河中徇西夏破贺兰山甲申归北京授右副北京等七路兵马都元帅庚寅朝太宗于胪胸河乞致仕不允辛卯太宗用兵河南强之从行转漕河上给饷诸军壬辰命屯霸州行元帅府事初天祥夜中流矢镞入颊骨不能出至是镞自口出睿宗闻而闵之授海滨和众利州等处总管兼领霸州御衣局人匠都达噜噶齐行北京七路兵马都元帅府事宪宗即位俾仍旧职戊午卒子彬江东提刑按察副使槐袭霸州御衣局人匠都达噜噶齐

△史天泽

史天泽字润甫秉直季子也善骑射勇力绝人从其兄天倪帅真定乙酉天倪遣护送其母北归既而天倪为武仙所害府僚王守道追及天泽于燕曰变起仓猝部曲散走多在近郊公能回辔南行不招自至矣天泽毅然曰兄弟之讎义所当复虽死不避况未必死耶即倾赀装易

甲仗南还行次满城得士马甚众天泽摄行军事遣监军李伯佑诣国王博啰言状且乞济师天泽时为帐前军总领博啰承制命嗣兄职为都元帅俾实纳岱将蒙古军三千人授之合势进攻庐奴仙骁将葛铁枪者拥众万人来拒战天泽迎击之生擒葛铁枪余众悉溃遂下中山略无极拔赵州进军野头会其兄天安亦提兵至共击仙败之仙奔双门遂复真定宋大名总管彭义斌阴与仙合欲复取真定天泽同实纳岱扼诸赞皇仙不得进义斌势蹙焚山自守天泽以铁骑摧锋而入缚义斌斩之仙复令谍者结死士于城中为内应夜斩关入据其城天泽踰城东出至藁城求援于董俊俊授以锐卒数百夜赴真定而实纳岱兵亦至捕叛者三百余人仙挟数骑走保西山抱犊砦实纳岱怒忿民之从贼驱万余人将杀之【实纳岱传载将士欲屠其民实纳岱力争释之】天泽曰彼皆吾民但为贼所胁耳力争得释乃缮城壁立楼橹为不可犯之计招集流散存恤困穷以抱犊诸砦仙之巢穴急攻下之仙遁去相卫诸州皆降太宗即位议立三万户【按续纲目云三万户史天泽刘黑马萧扎拉是也】分统汉兵天泽适入觐命为真定河间大名东平济南五路万户庚寅武仙复屯兵于卫天泽合诸军围之金将完颜哈达率众十万来援天泽以千人绕出其后与大军合攻之仙逸去遂复卫州壬辰太宗由白坡渡河诏天泽以兵由孟津会河南至则皇弟图类巴破哈达军于三峯山乃命略地京东招降太康柘县瓦冈睢州追斩金将完颜庆善努于阳邑癸巳金主令完颜博索自黄龙冈【金史作黄陵冈】来袭新卫天泽率轻骑驰赴之比至围巴合奋戈突至城下呼守者曰汝等勉力援兵且至复跃出众皆披靡遂与大军急击博索等败走蒲城天泽尾其后博索等兵尚八万俘斩殆尽金主以单舸东走归德天泽追至归德与诸军会新卫金主迁蔡元帅布展率军图之天泽当其北面给棧潜渡汝水甲午正月蔡破天泽还真定时政烦赋重贷钱于西北贾人以代输累倍其息谓之羊羔利民不能给天泽奏请官为偿一本息而止继以岁饥假货充贡赋积银至一万三千錠天泽倾家赉率族属官吏代偿之又请以中户为军上下户为民着为定籍乙未移军伐宋从皇子库春拔枣阳及攻襄阳宋兵以舟数千陈于峭石滩天泽挟一舟载死士直前捣之覆溺者万计丁酉从宗王昆布哈破光州复州进攻寿春适宋兵夜出斫营天泽手击杀数人麾下兵继至悉驱其兵入淮水死乘胜而南所向辄克壬子入觐世祖时在藩邸极知汉地不洽河南尤甚请以天泽为经略使至则兴利除害诛郡邑长贰之尤贪横者二人境内大治阿勒达尔钩较诸路财赋锻炼罗织无所不至天泽以勋

旧独见优容天泽曰我为经略使今不责而罪余人我何安乎由是得释者甚众戊午从宪宗伐宋己未驻合州之钓鱼山宋将吕文德以艨艟千余泝嘉陵江而上北军迎战不利帝命天泽御之分军为两翼跨江注射亲率舟师顺流纵击追至重庆而还中统元年世祖召问治安之道疏对立省部以纪纲设监司以督诸路霈恩泽以安反侧退贪残以任贤能颁奉秩以养廉禁贿赂以防奸帝俱嘉纳之继命往鄂渚撤江上军还授河南等路宣抚使俄兼江淮诸翼军马经略使二年夏拜中书左丞相天泽既秉政定省规十条以正庶务【按天恽中堂事纪云天泽既相事皆议同官曰天泽本武臣何克负荷但庶务未安者老夫通译其间为诸君条达耳相则何敢当众服其谦退史传不载附录于此】宪宗初年括户余百万至是诸邑占役者大半天泽悉奏罢之三年李璫叛同亲王哈必齐讨之闻璫入济南笑曰豕突入豈无能为也因说哈必齐曰璫多谲而兵精不宜力角当以岁月毙之乃深沟高垒绝其奔轶四阅月城中食尽军溃出降生擒璫斩于军门初天泽将行帝临轩授诏责以专征俾诸将皆听节度天泽未尝以诏示人及还帝慰劳之悉归功于诸将天泽在宪宗时尝奏臣始摄兄天倪军民之职天倪有二子一子管民政一子掌兵权臣复入叨奇遇一门之内处三要职分所当辞臣可退休矣帝不许至是言者谓李璫之变由诸路权太重天泽复奏兵民之权不可并于一门行之请自臣家始于是史氏子侄即日解兵符者十七人至元三年皇太子燕王领中书省兼判枢密院事以天泽为枢密副使四年改中书左丞相六年帝以宋未附议攻襄阳诏天泽与驸马呼喇珠往经画之至则相要害立城堡以绝其声援为必败之计寻以疾还燕八年进开府仪同三司平章军国重事十年与平章阿珠等进攻樊城拔之襄阳降十一年诏与丞相巴延总大军水陆并进天泽至郢州疾作命北归还至真定卒遗奏愿天兵渡江慎勿杀掠语不及他赠太尉谥忠武进封镇阳王天泽平居未尝自矜其能及临大节论大事毅然以天下之重自任年四十始折节读书拜相之日门庭悄然或劝以权自张天泽举唐韦澳告周墀之语曰愿相公无权爵禄行赏天子之柄何以权为言者惭服子格

史格

史格

格字晋明为亳州万户从攻襄阳下之众军渡江平章阿珠将二十五万户居前每五万户择一人为帅统之格居其一格军先渡为宋将程鹏飞所却身被三创丧其师二百寻复大战中流矢鹏飞身亦被七创乃败走其后枢

密院奏格轻进请罪之帝念其功而薄其罪从平章阿
尔哈雅攻潭州炮击栅木伤肩矢贯其手裹创先登拔之遂以军民安抚留戍从攻静江
众以輶辘自蔽凿城格所当炮礮蔽地车不可至乃伺
隙率众攀堞而上拔之徇广西十三州广东三州皆下静江受兵之初溪洞诸夷皆降云
南格遣使谕之来者五十州云南争之事闻诏听格节
度升广南西道宣慰使宋亡张世杰据福州立益王传檄岭海诈言夏贵已复濒江州郡
诸戍将以江路既绝不可北归皆托计事还静江格曰
君等亦为虚声所惧邪待贵踰岭审不可北归吾与诸君取涂云南而还未为不可敢辄
弃戍哉行省议弃广东之肇庆德庆封州并兵戍梧州
格曰弃地撤备示敌以怯不可宜增兵戍之剧贼苏仲集溃卒据镇龙山劫掠于外耕植
于内闻大兵至则伪出降官军畏暑不敢深入横象宾
贵四州皆被其害格策堡于其界守以土兵令官军火其庐栅民践其禾稼仲穷蹙遂降
益王余众破浔州斩李辰李福静江北抵泉永皆城守
罗飞围永凡七日不下判官潘泽民间道来告急格分兵赴之殄其众益王死卫王立趣
广州避海中崖山遣曾渊子据雷州谕之降不听进兵
攻之渊子犇碭州世杰将兵数万欲复取雷州戍将刘仲海击走之后悉众来围城中绝
粮士以草为食格漕钦廉高化诸州粮以给之世杰解
围去诏格戍雷州卫王死岭东西悉平入覲拜湖广行中书省右丞旋进平章政事卒子
耀福建行省平章政事荣邓州旧军万户

钦定续通志卷四百五十三

●钦定续通志卷四百五十四 列传二百五十四

列传

元 【八】

○元八

董俊【文蔚 文用 文忠】 汪德臣【良臣惟正】

董俊

汪德臣

△董俊

董俊字用章真定藁城人少力田长涉书史善骑射金贞佑间边事方急藁城令哩
迪募兵拔俊为将将所募兵迎敌岁乙亥国王穆呼哩
帅兵南下俊峰己卯以劳擢知中山府事金将武仙据真定定武诸城皆应仙俊率众夜
入真定逐仙走之定武诸城复来附庚辰金大发兵益
仙俊军时屯曲阳仙锐气来战败之黄山下仙降穆呼哩承制授俊龙虎卫上将军行元
帅府事驻藁城俊谒穆呼哩曰武仙黠不可测终不为

我用请备之穆呼哩然其言承制授左副元帅乙酉仙叛旁郡县皆为仙守俊孤军拒守永安仙攻之期年无所利俊出兵掩击之仙败走久之俊复夜入真定仙走死乃纳史大倪弟天泽为帅【按太祖纪武仙杀史天倪以真定叛天倪弟天泽击仙走之复真定天泽传所载亦同与此互异】壬辰会诸军围汴明年金主弃汴奔归德追围之金兵夜出薄诸军于水俊力战死焉俊早丧父事母以孝闻待族亲故人皆有恩意里夫家僮亦接之有道克汴时以待其轴为贤延归教诸子诫诸子曰吾一农夫耳遭天下多故徒以忠义事人仅立门户愿汝曹力田读书勿求非望为吾累也每慕马援为人曰马革裹尸援固可壮故战必持矛先士卒先是戊子岁朝于行在诸将献户口各增数要利俊曰民实少而欺以数多他日上需求无应必重敛以承命是我独利而民日困也永安节度使刘成叛俊下令曰逆者一人余能去逆即忠义士与其家财仍奏官之众果去成降沃州民砦天台为盗既破降之他将利其子女欲掠之俊曰城降而俘其家仁者不为也南征时人多归俊愿为奴既归悉纵为民邻境人有被掠卖者亦与直赎还之大小百战无不克捷为政宽明所至民惟恐其去封寿国公谥忠烈改封赵国公子文炳文蔚文用文直文忠文炳自有传

董文蔚

董文用

董文忠

董文蔚

文蔚字彦华兄文炳为藁城令辛丑起民兵南征文炳命文蔚率十有七人自为一队与众军渡淮甲寅世祖收大理还驻六盘山文炳以文蔚孝谨公勤解所佩金符以让帝嘉之授藁城等处行军千户南镇邓州时沿边城壁未筑是年冬修光化乙卯立昆阳丙辰筑枣阳文蔚悉总之见执役者常以善言抚恤弗事威猛众咸感之丁巳攻襄樊城兵不得渡文蔚夜领兵士于湖水狭隘处伐木拔根立于水实以薪草为桥梁至晓师悉渡围已合城中大惊文蔚复统巴图军以当前行夺其外城论功居最己未宪宗伐宋入川蜀文蔚奉诏将兵西上由褒斜历创阁长驱而前至钓鱼山崖壁巉峭惟一径可登恃险阻未即降帝命攻之文蔚激厉将士挟云梯冒飞石履崎岖以登直抵其寨苦战顷之兵士被伤乃还中统二年世祖置武卫军文蔚以邓兵入为千户帝北狩留屯上都三年李璿反文蔚以军围济南城破璿诛奏功还至元五年卒子上都之炭山弟文忠时为枢密佾院乞护丧南还帝甚悯之泰定中赠陇西郡伯

董文用

文用字彦材弱冠试词赋中选时以真定藁城奉庄圣太后汤沐庚戌太后命择邑中子弟来上文用从文炳谒太后子和琳世祖在潜藩命文用主文书讲说帐中常见许重癸子世祖征云南大理文用与弟文忠从军督粮械赞军务丁巳世祖命授皇子经己未伐宋文用理军需将攻鄂州宋贾似道吕文德将兵来拒军容甚盛世祖临江阅战文炳求先进战文用与文忠偕行大破宋师世祖即位建元中统文用招诏宣谕边郡且择诸军充侍卫二年以兵部郎中参议都元帅府事三年李璫叛从元帅库库岱统兵诛之山东平阿珠奉诏伐宋召文用为其属文用谢病不行至元改元召为西夏中兴等路行省郎中中兴自瑋塔哈之乱民间相恐动窜匿山谷文用置书通衢谕之民乃安始开唐来汉延秦家等渠垦中兴西凉甘肃瓜沙等州之土为水田民之归者四五万户悉授田种颁农具更造舟置黄河中受诸部落及溃叛之来降者时诸王哲伯特穆尔镇西方其下纵横需索省臣不能制文用辄折以法其徒积忿潜文用于王王怒使左右杂问之文用请与王傅辨王即遣其传讯文用其傅中朝旧臣不肯顺王意文用谓之曰王以重戚镇远方而其下毒虐百姓凌暴官府于事体不便因历指其不法数十事其傅惊起去白王王召文用谢之自是潜不行而省府事颇立二年入奏经略事宜还以谕旨行之中兴遂定八年授山田东西道巡行劝农使山东自更叛乱野多旷土文用巡行劝励无间幽僻入登州境见其垦开有方以郡守为能作诗表异之于是列郡咸劝五年之间政绩为天下劝农使最十二年丞相安图奏为工部侍郎代赫舍哩【赫舍哩名亨见阿哈玛特传】赫舍哩阿哈玛特私人也其徒既谗间安图罢相即使鹰监奏工部侍郎不给鹰食鹰且瘦死帝怒召治之因急捕文用入帝望见曰董文用乃为尔治鹰食者耶置不问十三年出为卫辉路总管郡当冲要民为兵者十之九余皆单弱贫病不堪力役会初得江南图籍金玉财帛之运日夜不绝于道惊卫输挽日役数千夫文用虑妨耕作乃从转运主者言州县吏卒足以备用不必重烦吾民主者曰万一有不虞罪将谁归文用即手书具官姓名保任之民得以时耕而运事亦不废诸郡运江淮粟于京师卫当运十五万石文用集旁郡议立驿置法民力以舒十四年汴漕司议通沁水合流御河以便漕文用曰卫为地最下大雨时行沁水辄溢不得达于河即浸淫及卫今又引之使来岂惟无卫将无大名长芦矣会朝廷遣使相地形上言卫州浮屠最高者纔与沁水平势不可开事遂寝十六年受代归田里读书赋诗怡然燕居裕宗在东宫数为台臣言董文

用勋旧忠良何以不见用十八年台臣奏起为山北辽
东道提刑按察使不赴十九年朝廷选用旧臣召为兵部尚书自是朝廷有大议未尝不
与闻二十年江淮省臣建议以行台隶行省朝议未决
文用坚持不可从之转礼部尚书迁翰林集贤二院学士知秘书监时中书右丞卢世荣
以货利得幸权要以掊克为能乃建议曰我立法治财
视常岁当倍增而民不扰诏下会议人无敢言者文用曰此钱取于右丞之家耶将取之
于民耶取于右丞之家则不敢知若取诸民则有说矣
牧羊者岁尝雨翦其毛今牧人日翦其毛而献之则主者固悦其得毛之多矣然而羊无
以避寒热即死且尽毛又可得哉民财有限取之以时
犹惧伤残今刻剥无遗犹有百姓乎世杰不能对丞相安图谓坐中曰董尚书真不虚食
俸禄者议者出皆谢文用世荣竟以是得罪二十二年
拜江淮行中书省参知政事时行省长官贵傲同列莫敢仰视跪起禀白如小吏事上官
文用至则坐堂上侃侃与论是非无所迁就虽数忤之
不顾也有以帝命建佛塔于宋故宫者有司奉行甚急天大雨雪入山伐木死者数百人
犹欲并建大寺文用请缓之长官者曰参政奈何格上
命文用曰困民力而失民心岂上意耶其人意沮遂稍宽其期二十三年朝廷将用兵海
东征敛益急有司大为奸利文用请入奏事大略言疲
国家可宝之民力取僻陋无用之小邦列其条目甚悉言上事遂罢二十五年拜御史中
丞文用曰中丞不当理细务吾当先举贤才乃举胡祗
遹王恽雷鹰荆幼纪许楫孔从道十余人为按察使徐琰魏初为行台中丞当时以为极
选时僧格当国恩宠方盛近戚贵人见之皆屏息逊避
文用独不附之僧格令人风文用颂己功于帝前又自示意文用皆不答会朔方军兴粮
糗粗备而诛求愈急文用见僧格极言其弊益忤僧格
意乃摭拾台事百端文用日与辩论不为屈于是具奏僧格奸状僧格日譖文用于帝帝
曰御史职也何众之有且董文用端谨朕所素知汝善
视之迁大司农时欲畚民田为屯田文用固执不可迁为翰林学士承旨二十七年降福
太后在东宫欲使文用授皇孙经具奏以帝命命之文
用每讲说经旨必附以朝廷故事反复开悟皇孙亦特加敬礼三十一年帝命文用以其
诸子入见文用曰臣蒙国厚恩死无以报臣之子何能
为命至再三终不以见是岁世祖崩成宗将即位上都太后命文用从行既即位巡狩赛
音布拉克之地每召入帐中问先朝故事文用亦盛言
先帝虚心纳贤开国经世之务谈说或至夜半是年诏修先帝实录命文用知制诰兼修
国史文用于祖宗世系功德近戚将相家世勋绩皆记
忆贯穿史馆有所考究质问文用应之无遗失大德元年请老官一子于乡郡待养寻卒

子八人士贞士亨士楷士英士昌士恒士廉士方赠寿

国公谥忠穆

董文忠

文忠字彦诚岁壬子入侍世祖潜邸癸丑从征南诏己未伐未与兄文炳文用败宋兵于阳罗堡世祖即位置符宝局以文忠为郎居益近密尝呼董八而不名文忠不为容悦随事献纳中禁事秘外多不闻至元二年安图以右丞相入领中书建陈十事忤旨文忠曰丞相素有贤名今秉政之始人方倾听所请不得后何以为遂从旁代对恳恟详切始得允可十一年伐宋民困供馈文忠奏免常岁横征从之帝尝见宋降将问宋所以亡者皆曰贾似道当国薄武人而重文儒将士怨之故大军至争解甲归命也帝问文忠此言何如文忠因诘之曰似道薄汝矣而君则未尝薄汝也有怨于相而移于君坐视亡国如臣节何然则似道薄汝固预知汝曹不足恃耳帝深善之有旨徙大都猎户于郢中文忠奏止之又请罢官鬻田器之税听民自为时多盗诏犯者杀无赦文忠言杀人取货与窃一钱者均死恐乖陛下好生之德敕革之或告汉人殴伤国人及太府监属卢甲盗翦官布帝怒命杀以惩众文忠言宜付有司阅实以俟后命乃遣文忠及近臣图们分核之皆得其诬状诏原之帝责侍臣曰方朕怒时卿曹皆不言非董文忠开悟朕心则杀及无辜取议中外矣自安图北伐阿哈玛特独当国大立亲党惧廉希宪复入相奏希宪以右丞行省江陵文忠言希宪国家名臣今宰相虚位不可使久居外宜早召还从之【按廉希宪传云阿尔哈雅下江陵请重臣镇之帝使希宪行省荆南希宪疾久不愈文忠言江陵卑湿如希宪病何帝即召还事异本传】十六年礼部尚书谢昌元请立门下省封驳制敕以绝口书风晓近习奏请之弊帝锐意欲行之诏廷臣杂议廷臣奏以文忠为侍中及其属数十人近臣进言曰陛下将别置省须得人以任今闻盗诈之臣与居其间不可其言多指文忠文忠忿办曰上每称臣不盗不诈今彼顾臣而言意实在臣其显言臣盗诈何事帝令言者出文忠犹诉不止且攻其害国之奸帝曰朕自知之彼不汝言也其人欲中害之然以文忠清慎无过乃求交驩文忠却之文炳为中书左丞卒太傅巴延荐文忠可相帝使继其官文忠辞曰臣兄有平定南方之劳可居是位臣何功敢冒居重职乎十八年升典瑞监卿改金书枢密院事车驾行幸诏文忠留居大都凡宫苑城门直舍徼道环卫营屯禁兵太府少府军器尚乘诸监皆领焉兵马司旧隶中书并付文忠时权臣累请夺还中书不报是冬卒封寿国公谥忠贞【名臣事略作正献】

△汪德臣

汪德臣字舜辅赐名特格巩昌盐州人陇西公世显子也 【按元史汪德臣等传附汪世显传后今移世显入贰臣酌存德臣傅而以其子若弟附于其后】 年十四袭爵巩昌等二十四路便宜都总帅从征蜀将前军出忠涪进攻运山所乘马中飞石死步战拔外城宋将余玠攻汉中德臣驰赴之玠遁去宪宗命城沔州沔据嘉陵要路德臣缮治室庐部署官属数日而集进攻嘉定敌潜军夜出德臣迎战杀百人还至左绵云顶宋军乘夜斫营觉之杀千人生擒百人进次隆庆宋军仍夜出与力战尽杀之及马漕沟遇伏兵与战获其统制罗廷鄂又命城益昌诸戍皆听节制世祖以皇弟有事西南德臣入见乞免益昌徭赋及漕糟屯田为良久计并从之即命置行部于巩立漕司子沔通贩鬻给馈饷奏乞以兄忠臣摄府事使已得专事益昌益昌为蜀襟喉蜀入惮其威名诸郡环视莫敢出鬪甲寅春旱嘉陵漕舟水涩议者欲弃去德臣曰国家以蜀事付我有死而已柰何弃之尽杀所乘马飧士袭嘉川得粮二千余石云顶吕远将邀战即阵擒之复得粮五千石既而水陆运至屯田麦亦登食用遂给获宋提辖崔忠郑再立纵令持檄谕苦竹守将南清以城降所俘民悉归之东南戍卒数百有去志德臣揣知之给券纵去皆泣谢未几山寨相继输款宋将余晦遣都统甘闰以兵数万城紫金山德臣即选精卒衔枚夜进大破之闰仅以身免南清北覲其下杀清妻子以叛蜀将焦远领兵饷之德臣击败远尽获所饷资粮蜀兵至又败之戊午帝亲征次汉中嘉陵白水交会势汹涌帝问船几何可济德臣曰大军旦万非可淹延当别为方略即命系舟为梁一夕而成如履坦途苦竹既逆命至是攻之岩壁峭绝或请建天桥帝以问德臣曰臣知先登陷阵而已建桥非所知既而桥果无功乃率将士鱼贯进帝望见叹曰人言特格胆勇岂虚誉邪宋将赵仲武纳款而杨礼犹拒战奋击尽杀之宋龙州守将王德新遣所亲愿效顺以郡民为祈奏如其请复拔长宁斩守将王佐帝东下德臣为先锋抵大获山夺水门宋将杨大渊遣子乞活数万人命引至帝前为请明日大渊率众降 【按杨大渊传云遣王仲入招大渊大渊杀之宪宗怒督诸军力攻大渊惧遂降与本传异】 已而运山青居大良皆降进攻钓鱼山守臣王坚负险不下德臣单骑至城下大呼曰王坚我来活汝一城军民宜早降语未既几为飞石所中遂感疾帝遣使问劳俾还益昌奏曰陛下尊为天子犹昌寒暑服劳于外臣待罪行伍死其分也寻卒追封陇西公谥忠烈长子惟正袭弟良臣

汪良臣

汪惟正

汪良臣

良臣年十六七从兄德臣出征以功擢裨将癸丑岁以德臣荐为巩昌帅领所部兵屯白水宪宗亲征军至六盘良臣还巩昌治供亿事集而民不扰诏权便宜总帅府事良臣奏愿与兄德臣定四川帝曰行军馈饷所系不轻汝任其责自可立功既奉命治桥梁平道路营舟车水陆无壅世祖即位阿勒达尔浑塔哈逆命劫六盘西陲骚动诏良臣讨之至耀碑谷两军相当良臣慷慨誓诸将会大风扬沙昼晦良臣手刃数十人众军乘之贼大溃获阿勒达尔浑塔哈杀之中统二年和尔叛复讨平之累授阆蓬广安顺庆等路征南都元帅良臣以钓鱼山险绝不可攻请就近筑城以扼其往来四年春良臣攻重庆与宋将朱禕孙兵交良臣塞其归路引兵横击之断敌兵为二敌败走趋城不得入尽杀之至元六年授东川副统军迁西川行枢密院事十一年进攻嘉定咎万寿坚守不出良臣度有伏兵大搜山谷进垒薄城大破之万寿乞降紫云泸叙相继款附还围重庆十三年宋涪州安抚杨立帅兵救重庆良臣败走之安抚张珣袭据泸州良臣还军平之十五年张珣遣众鏖战良臣奋击大破之珣所部赵安开门纳降珣潜遯良臣禁俘掠发粟振饥民大悦四川悉平入覲授中书左丞行四川中书省事良臣陈治蜀十五事世祖喜纳还至成都以蜀疮痍之余极意抚循行省罢改授安西王相不赴十八年卒追封梁国公谥忠惠

汪惟正

惟正字公理幼颖悟喜从文士论议古今尤喜谈兵时出游猎则勒从骑为攻守状父德臣卒于军袭爵守青居山初宪宗遣浑塔哈以骑兵二万守六盘又遣奇塔特布哈守青居至是浑塔哈叛奇塔特布哈发兵为应惟正即命力士缚斩之世祖嘉其功诏东川军事悉听处分中统三年部长辉图叛民大援惟正谓将吏曰辉图今若豺犬方肆狂啮当胜以不战乃发兵踵之贼欲战不得休则挠之若是者两月知其粮尽势蹙曰可矣与战屡捷辉图遣人来约降阳许之因潜兵蹶其后出其不意擒杀之至元七年宋人修合州诏立武胜军以拒之惟正临嘉陵江作栅扼其水道夜悬灯栅间编竹为笼中置火炬顺地势转走照百步外以防不虞宋人知有备不敢近九年丞相巴延克襄阳议取宋惟正奏曰蜀未下者数城耳宜并力攻余杭愿以本兵由嘉陵下夔峡与巴延会钱塘帝优诏答之未几两川枢密院合兵围重庆命益兵助之惟正夺其洪崖门获宋将何统制皇子安西王出镇秦蜀召惟正还十四年冬皇子北伐藩王图

嚙叛于六盘王相府命布巴岱领兵进讨惟正为副布色岱不习兵师行无纪惟正为正部曲肃行陈严斥堠凡军政一倚重焉进次平凉简巩兵锐者八十人与俱至六盘图嚙先据西山惟正分安西兵为左右翼巩兵独居中去里许皆下马手弓图嚙遣骑突阵惟正令引满毋发将及又命曰视必中而发于是矢下如雨突骑中者三之一余尽驰还图嚙军遂走麾兵逐之三踰山图嚙就擒安西王亟称其功授开城路宣慰使十七年迁中书左丞行秦蜀中书省事蜀士荐罹兵革民无完居惟正留意抚循人便安之二十二年改授陕西行中书省左丞入覲上都还至华州卒谥贞肃

钦定续通志卷四百五十四

●钦定续通志卷四百五十五 列传二百五十五

列传

元【九】

○元九

严实【忠济忠嗣】 刘通 岳存 王玉汝 刘伯林【黑
马 元振 元礼】 郭宝【玉德海侃】 石天
应

严实

刘通

岳存

王玉汝

刘伯林

郭宝玉

石天应

△严实

严实字武叔泰安长清人志气豪放不治生产喜交结施与落魄里社间屡以事系狱侠少辈为出死力乃得脱岁癸酉太祖率兵自紫荆口人分略山东河北河东而归金东平行台调民兵以实为百户甲戌泰安张汝楫据灵岩遣别将攻长清实破走之以功授长清尉戊寅权长清令宋取益都乘胜而西行台檄实守御实出督租比还而长清破俄以兵复之有潜于行台者谓实与宋有谋行台以兵围之实挈家避青崖宋因以实为济南治中分兵四出所至无不下于是太行之东皆受实节制庚辰金河南军攻彰德守将单仲求救实以兵赴之比至而仲被擒实知宋不足恃乃谒太师穆呼哩于军门挈所部彰德大名磁洺恩博滑浚等州三十万

户来归穆呼哩承制会实行尚书省事进攻曹濮单三
州皆下之偏将李信留镇青崖尝有罪惧诛乘实出杀其家属降于宋辛巳实以兵复青
崖擒信诛之进攻东平金守将赫尔根 【太祖纪及
穆呼哩传俱作孟古续通鉴亦作赫尔根按金史蒙古纲传云一名赫尔根故纪载各异
】 弃城遁入居之壬午宋将彭义斌率师取京东州县
实将晁海以青崖降尽掠实家乙酉义斌围东平实约次将布尔罕合兵攻之兵久不出
城中食且尽乃与义斌连和义斌亦欲藉实取河朔而
后图之请以兄事实七月义斌下真定过西山与布尔罕等军相望分实以帐下兵阳助
而阴伺之实赴布尔罕军与之合遂与义斌战宋兵溃
擒义斌京东州县复为实有是冬穆呼哩之弟岱逊取彰德明年取濮东平又明年穆呼
哩之子博啰取益都实皆有功焉庚寅朝太宗于牛心
之幄殿甲午朝于和琳授东平路行军万户丁酉诏实毋事征伐初岱逊下彰德继破濮
州皆欲屠之赖实言得免其后于曹楚邱定陶上党皆
然时兵由武关出襄邓实在徐邳间以为河南破屠戮必多乃载金缿往赎之且约束诸
将毋敢妄有杀掠灵璧一县当诛者五万人实悉救之
会大饥民北徙者多饿死又法藏匿逃者保社皆坐逃亡无所托殍尸蔽野实命作糜粥
置道旁全活者众实部曲有逃归益都者数十人益都
破皆获之以为必杀实置不问王义深者义斌之别将闻义斌败将奔河南实族属在东
平皆为所害河南破实获义斌妻子厚周恤之送还乡
里庚子卒中统二年追封鲁国公谥武惠子忠贞忠济忠嗣忠范忠杰忠裕忠佑

严忠济

严忠嗣

严忠济

忠济一名忠翰字紫芝辛丑从其父入见太宗命袭东平路行军万户管民长官开
府布政一法其父治为诸道第一领兵略淮汉偏裨部
曲戮力用命定宗宪宗即位之始皆加褒宠忠济初统千户十有七乙卯朝命括新军忠
济弟忠嗣忠范为万户以次诸弟暨勋将之子为千户
忠济皆统之己未世祖南伐诏率师由间道会鄂亲率勇士梯冲登城师还忠济选勇敢
二千人命千户将之甲仗精锐所向无前有言其威名
太盛者中统二年召还京师命忠范代之忠济治东平日尝贷财为部民纳逋赋岁久愈
多及谢事债家执券来征帝闻之命发内藏代偿东平
庙学故隘陋改卜高爽地于城东教养诸生后多显者幕僚如宋子贞刘肃李昶徐世隆
俱为名臣至元二十三年授中书左丞行浙江省事以
老辞二十九年召其子瑜入侍三十年卒谥庄孝

严忠嗣

忠嗣少从张澄商挺李桢学知经史大义辛亥其兄忠济授以东平人匠总管遥领单州防御使事山卯统东平路管军万户丁巳从忠济略地阳州取邵伯埭首立战功己未南征从忠济渡淮分兵出桂车岭与宋兵相拒三昼夜杀获甚众渡江抵鄂分部攻城九十余日战甚力中统三年李璿叛宋兵攻蕲州势张甚徐州总管【世祖纪作徐邳总管】李浩格降于宋忠嗣从大帅安图救蕲县复徐州执李浩格杀之攻邹之峰山滕之牙山多所杀获四年朝廷惩青齐之乱大藩子弟不得亲政于是罢官家居至元十年卒

△刘通

刘通字仲达东平齐河人初从严实来归实荐于太师穆呼哩以通为齐河总管授德州总管行军千户宋将彭义斌攻齐河城率众夜登通与六七人鼓噪而起宋人惊惧坠溺死者甚众明日复合围通令守陴者植槩如栲俄撤去宋人惧其向己也大溃义斌仅以数骑免迁德州万户军民总管岁丙辰卒子复亨袭为行军千户宪宗西征命摄万户统东平军马攻钓鱼山苦竹寨有功师还兼德州军民总管李璿叛遣使招复亨复亨立斩之时大兵讨贼集济南乏食复亨尽出家资以济师世祖嘉之至元十年迁征东左副都元帅统军征日本与倭兵十万遇战败之还招降淮南诸郡邑累官淮西道宣慰使至元二十年卒子渊至元十一年授徐邳屯田总管下千户十二年从右丞巴尔默色攻淮安十三年与宋人战昭信军南靖平山俱有功进管军总管十五年从元帅张宏范征闽广漳韶诸州又攻崖山迁副招讨二十四年从征交趾镇南王托欢命领水步军二万攻万劫江继攻灵山城众迎敌大败之二十八年捕寇濶东三十一年兼领绍兴濶江五翼军守杭州大德十一年卒

△岳存

岳存字彦诚大名冠氏人归东平严实授帅府都总领保冠氏会金从宜郑倜据大名距冠氏仅三十里遣兵来攻不得志复自将万人合围势甚张存率死士百余突出西门金人退走存追之越境乃还岁己丑从严实及武仙战于彰德西败之庚寅存率步骑五百人还至开州南与金将张开遇开众万余存军依大林戒其军曰彼众我寡不可轻动当听吾鼓声为节乃命骑士居前步卒次之与敌相去仅二十步鼓作无一当百开众大溃追二十余里不损一卒而还立丑升本县丞移治楚邱乙卯告老中统三年卒子天祜袭父职冠氏县军民弹压从围襄樊

修立百丈山鹿门等堡天祜率锐士冒矢石从樊城东北先登为■〈木垒〉木所伤堕地复蹶梯以登手刃数人战焦山平奉化贼录功升管军千户江南平从元帅张宏范觐帝于柳林授福州路总管平尤溪贼秩满改吉州平永新贼后迁建康首定救荒之政至大二年卒子果会昌州同

△王玉汝

王玉汝字君璋郟人少习吏事行台严实入据郟署为掾史补行台令史中书令耶律楚材过东平奇之版授东平路奏差官以事至京师游楚材门待之若家人父子戊戌议裂东平地分封诸勋贵各私其入与有司无相关玉汝曰若是则严公事业存者无几矣夜静哭于楚材帐后楚材恻然使诣帝前直愬玉汝进言曰严实以三十万户归朝廷崎岖兵间三弃其家室卒无异志岂与他降者同今裂其土地析其人民非所以旌有功也帝嘉玉汝忠款且以其言为直由是得不分实子心济袭职授左左司郎中遂总行台之政宪宗即位有旨令常赋外岁山银六两谓之包垛银玉汝曰民力不支矣纠率诸路管民官愬之阙下得减三分之一累官泰定军节度使兼兖州管内观察使充行台参议以病谢归日以经史自娱后忠济使人谓之曰君闲久矣可暂起为吾分忧以参议印强委之不得已起事仅五六日裁画一新逾月卒

△刘伯林

刘伯林济南人金末为威宁防城千户岁壬申太祖围威宁伯林以城降帝问在金为何官对曰都提控即以原职授之与太傅耶律托辉同征讨招降山后诸州太祖北还留伯林屯天成遏金兵前后数十战进攻西京录功充西京留守兼兵马副元帅癸酉从征山东攻下梁门遂城乙亥同国王穆呼哩攻破燕京丁丑复从大军攻下山东诸州戊寅同攻下太原平阳己卯破潞絳及火山闻喜诸州县时欲徙闻喜民实天成伯林以北地丧乱人艰于食力争而止部曲获俘万计悉纵之在威宁十余年务农积谷与民休息尝曰吾闻活千人者后必昌吾之所活何啻万余子孙必有兴者辛巳以疾卒封泰国公谥忠顺子黑马

刘黑马

刘元振

刘元礼

刘黑马

黑马名嶷字孟方始生时家有白马产黑驹故以为小字后遂以小字行骁勇有志略年几弱冠随父征伐大小百余战出入行阵略无惧

色尝独行遇金兵围本部十三人即奋剑入围手杀数人十三人皆得脱岁壬午袭父职为万户兼都元帅癸未从国王穆呼哩攻凤翔不克回屯绛州又从博啰攻西夏唐古甲申从阿禅诺延攻破东平大名乙酉金降将武仙据真定以叛从博啰讨之破真定武仙遁去又破金将呼齐呼于野狐岭斩之己丑太宗即位始立三万户以黑马为首重喜史天泽次之授金虎符充平阳宣德等路管军万户仍总管汉军从征回回河西诸国及破凤翔西河沔州诸城堡庚寅睿宗入自大散关假道于宋以伐金命黑马先驱至三峰山遇金将哈达大破之乘胜破香山寨及钧州会增立七万户仍以黑马为首重喜史天泽严实等次之【按徐霆黑达事略云汉地万户四人严实有山东之兵史天泽有河东河北之兵张柔有燕南之兵刘黑马有燕蓟之兵本传言三万户七万户且不及张柔与事略互异】癸巳从破南京甲午从破蔡州灭金乙未同都元帅塔海干布征西川辛丑改授都总管万户统西京河东陕西诸军万户入觐帝慰劳之命巡抚天下察民利病应州郭志全反胁从诖误者五百余人有司议尽戮之黑马止诛为首者数人余悉从轻典癸丑从宪宗至六盘山命守商州宋人不敢犯丁巳入觐请立成都以图全蜀帝从之命管领新旧军民小大诸务中统元年廉希宪商挺宣抚川陕时密喇卜和卓握兵希宪与挺虑其为变以黑马有胆智使乘驿矫诏诛之三年命兼成都路军民经略使泸州被围黑马已属疾犹亲督转输不辍未几卒封秦国公谥忠惠子十二人元振元礼显

刘元振

元振字仲举随父入蜀镇商邓以元振摄万户时年二十既莅事号令严明赏罚不妄蜀将皆敬服之宪宗伐宋驻蹕钓鱼山以元振与纳琳为先锋中统元年世祖即位廉希宪商挺奏以为成都经略使总管万户宋泸州守将刘整密送款求降黑马遣元振往受之诸将皆疑整诈元振曰宋权臣当国将士离心整此举无可疑者遂行至泸整开门出迎元振弃众下马示以不疑明日请入城元振释戎服从数骑与整联辔而入款燕至醉整心服焉宋泸州主帅俞兴率兵围泸州攻五月城几陷或劝元振曰整本非吾人与俱死无益元振曰人以诚归我岂可以急而弃之且泸之得失关国家利害吾有死而已杀所乘马犒将士募善游者赍蜡书至成都求援未几援兵至元振与整出城合击兴兵败走捷闻赐赉甚厚至元七年议以勋旧之家事权太重宜稍裁抑遂降为成都副万户十一年命兼潼川路副招讨使十二年卒子纬数从父行军元振卒纬袭职为万户守潼川创立遂宁诸处山寨从围钓鱼山数战有功攻合州授潼州

路副招讨累迁至陕西行省参知政事卒

刘元礼

元礼性浑厚有谋常从父在军中岁甲寅为京兆路鄂啰万户再迁潼川路汉军都元帅至元二年宋制置夏贵率军犯潼川元礼屡破之复大战于蓬溪自寅至未胜负不决激厉将士曰丈夫当以死战取功名时不可失也即持长刀大呼突阵所向披靡将士咸奋大败贵兵斩首万余级生擒千余人捷奏赐赉有加召入朝命复遇潼川立蓬溪寨奏修眉州城屯兵以扼嘉定往来之路世祖从之四年命平章赵宝臣往视可否或以为眉州荒废已久立之徒费财力元礼争之遂兴役七日而毕元礼镇眉州五年召入朝乞解官养母从之九年起授延安路总管卒

△郭宝玉

郭宝玉字玉臣华州郑县人唐中书令子仪之裔也金末封汾阳郡公引军屯定州岁庚午会太师穆呼哩军至宝玉举军降穆呼哩引见太祖问取中原之策宝玉对曰西南诸蕃勇悍可用宜先取之藉以图金必得志焉又言建国之初宜颁新令帝从之于是颁条画五章出军不得妄杀刑狱惟重罪处死其余杂犯量情笞决军户蒙古色目人每丁起一军汉人有田四顷人三丁者金一军年十五以上成丁六十衰老站户与军户同民匠地一顷僧道无益于国有损于民者悉行禁止帝将伐西藩授宝玉绰满都镇抚癸酉从穆呼哩取永清破高州降北京龙山从锦州出燕南破太原平阳诸州县甲戌从帝讨契丹遣族历库徐克国鄂尔多等城破其兵三十余万宝玉胷中流矢帝命剖牛腹置其中少顷乃苏寻复战收伯实巴里必实南等城次呼展河西人列两阵迎拒战方酣宝玉呼曰西阵走矣其兵果走追杀几尽进兵下塔实干城次阿穆尔河敌筑十余垒陈船河中俄风涛暴起宝玉令发火箭一时延烧乘胜直前破护岸兵五万遂屠诸垒数玛勒四城辛巳库奇雅国威锡苏尔坦汗破柰曼国引兵据塔实干闻帝将至弃城南走屯大雪山宝玉追之遂奔印度壬午从哲伯苏布特二先锋收契丹渤海等国有功累迁断事官卒于贺兰山子德海德山德山以万户破陕州攻潼关卒

郭德海

郭侃

郭德海

德海字大洋金末击宋将彭义斌于山东败之知父宝玉北降遁入太行山大军至乃出降为绰满弹压从先锋哲伯西征渡克色勒伯页攻铁山斩首三万级踰雪岭西北万里进军次达哩国悉平之乙酉还至崢山吐蕃帅纽

抡回纥帅呵必鼎反复破斩之戊子从元帅库库楚游
骑入关中金人闭关拒守德海引骁骑斩关入直捣凌风渡寨后兵不至引还己丑破南
山八十三寨陕西平假道汉中历荆襄而东与金将武
仙军遇于白河败走之斩首二万余级复破金伊喇聂赫军于邓至钧州辛卯 【据太宗
纪应作壬辰】 睿宗军自洛阳来会三峰山金人沟
地立军围之雪深三尺沟中军僵立刀槊冻不能举我军冲围而出金人死者三十余万
其帅完颜哈达伊喇布哈走匿浮图上德海命掘浮图
基出其柱而焚之 【按金史完颜哈达伊喇布哈传载哈达走钧州藏窟室中城破发而
杀之布哈走京师追及擒之械至官山被杀本传并
为一事与金史互异】 完颜色呼默单骑遁还洛阳又破金将喀齐喀兵于中牟完颜色
埒默复帅军来拒战又破之以功迁右监军壬辰破金
师于黄龙冈癸巳取申唐二州甲午河南复叛德海往讨之炮伤其足以疾归卒先是太
宗诏大臣呼图克等试天下僧尼道士选精通经文者
千人有能工艺者则命小通事哈达等领之余皆为民又诏天下置学廩育人材立科目
选之入仕皆从德海之请也子侃

郭侃

侃字仲和幼为丞相史天泽所器留于家教养之弱冠为百户鸷勇善谋壬辰破金
将博索兵于新卫州遂渡河袭金主至归德败其兵于
阙伯台即从苏布特攻汴西门金帅崔立降以功授总把从天泽屯太康复以下德安功
为千户壬子改绰满诺延从宗王锡里库西征癸丑至
穆锡国破其兵五万下一百二十八城丙辰至奇塔卜其城在檐寒山上悬梯上下守以
精兵筑夹城围之莫能克侃架炮攻之乃降又说降乌
尔古纳丁巳至乌喇尔城设伏以待敌至尽杀之又西至阿伊鼎破其游兵三万至克实
密尔部降之西戎大国地方八千里传四十二世胜兵
数千万侃兵至破其兵七万屠西城又破其东城东城殿宇皆构以沈檀木举火焚之香
闻百里得七十二弦琵琶五尺珊瑚灯檠其国主自缚
诣军门降拔三百余城又西行三千里至大房其将周清致书请降左右信之不为备侃
曰欺敌者亡乃严备以待周济果来邀我师侃败之下
其城一百八十五又西行四十里至密实勒会日暮已休复驱兵起留数病卒西行十余
里衔枚转前敌潜兵夜来袭杀病卒见军至大惊遂降
戊午锡里库命侃西渡海收布拉特侃喻以祸福即来降师还至实喇资敌人来拒侃直
出掠阵一鼓败之至布图侃以奇兵掩击大败之己未
破乌林游兵四万得城一百二十西南至奇勒杨和达玛鼎迎降西域平侃告捷至钓鱼
山会宪宗崩乃还邓开屯田立保障世祖即位侃上疏

陈建国号筑都城立省兴学校等二十五事及平宋之策其略言宋据东南以荆襄为要地若先取襄阳直趋临安则江淮巴蜀不攻自平后皆如其策中统二年擢江汉大都督府理问官三年李璿及徐州总管李浩格俱反宋夏贵复来犯边史天泽荐侃世祖召见问计所出口筑城环之坐待其困计日可擒也帝然之授徐邳二州总管浩格之弟复与夏贵来以兵擒边境侃出战败之至元二年有言当解史天泽兵权者天泽遂迁他官侃亦调同知滕州三年侃上言请伐宋并请立屯田于淮北四年徙高唐令兼治夏津武城等五县五年邑人吴乞儿济南道士胡王反讨平之七年改白马令僧减罗汉与彰德赵当驴反又平之帝以侃习于军务擢为万户从军下襄阳江南平迁知宁海州居一年卒侃行军有纪律所至兴学课农吏民畏服子秉仁秉义

△石天应

石天应字瑞之兴中永德人太祖时太师国王穆呼哩南下天应率众迎谒穆呼哩承制授兴中府尹兵马都提控俾从南征天应造战攻之具临机应变捷出如神以功拜元帅右监军戍燕屡从穆呼哩大小二百余战常以身先士卒累功迁右副元帅辛巳秋从穆呼哩征陕右攻拔葭州因说太师曰此州当金夏之冲宜命将守之多造舟楫以备不虞穆呼哩然之表授陕西河东路行台兵马都元帅以劲兵五千留守葭芦遂造舟楫建浮桥分兵四出悉定葭绥之地一日谒穆呼哩于汾水东穆呼哩谕以进取之策天应还镇谓将佐曰闻河东西皆平川广野可以驻军规取关陕诸君以为何如或言河中虽用武之地南有潼关西有京兆皆金军所屯且民新附其心未一守之恐贻后悔天应曰河中虽迫于二镇实用武立功之地北接汾晋西连同华若起漕运以通馈饷则关内可克期而定关内既定长河以南在吾目中矣遂移军河中既而金军果潜入中条袭河中天应先遣骁将吴泽 【张匡衍撰穆呼哩行录作吴权】 伏兵要路泽勇而嗜酒是夕方醉卧林中金兵由间道直抵城下时兵燹后守具未完新附者争缒城而去敌乘隙入天应见火举知敌已入奋身角战或劝西渡河天应曰先时人谏我南迁吾违众而来此事急弃去是不武也纵太师不罪我何面目以见同列乎少顷敌兵四合天应饮血力战至日午死之子焕中知兴中府事执中行军千户受中兴中府相副官 【按穆呼哩传云以天应子乌格袭领其众今考天应子无名乌格者岂名有不同故彼此互异欤】 天应死事时侄佐中在军中伺敌少懈突围而出趋穆呼哩行营求得蒙古军数千回与敌战败之穆呼哩嘉其勇奏授兴中府千户子安琬袭职从征大理讨李

璿皆有功至元十三年分宁叛行省檄安琬讨之贼背山而阵安琬突阵而入手刃中贼背生擒之累功至右卫亲军副都指挥使后授大同等处万户屯田红域大德三年李万户当戍和宁亲老且病安琬请代其行及还以病卒子居谦袭职后改忠翊侍卫亲军都指挥使

钦定续通志卷四百五十五

●钦定续通志卷四百五十六 列传二百五十六

列传

元 【十】

○元十

耶律瑠格 耶律阿哈 耶律托噶 伊喇聂呼【迈努 元臣】
王珣【荣祖】 舒穆鲁额森 舒穆鲁明安

耶律瑠格

耶律阿哈

耶律托噶

伊喇聂呼

王珣

舒穆鲁额森

舒穆鲁明安

△耶律瑠格

耶律瑠格契丹人仕金为千户太祖起兵朔方金人疑辽遗民有他志瑠格不自安岁王申遁至隆安韩州纠壮士剽掠州发卒追捕瑠格击走之因与伊德募兵众至十余万推瑠格为都元帅伊德副之威震辽东太祖命阿禅等行军至辽遇之问所从来瑠格且陈效顺之意乃率所部会于金山白马白牛北望折矢以盟阿禅曰吾还奏当以征辽之责属尔金人遗和硕帅军六十万来攻瑠格瑠格度不能敌亟驰表闻帝命阿禅专多欢阿鲁达哈引千骑来援瑠格以侄安努为先锋横冲和硕军大败之以所俘辎重献帝召阿禅还以克特格尔副瑠格屯其地癸酉众推瑠格为王立妻约啰氏为妃以其属伊实布为郡王布色僧嘉努伊德李嘉努等为丞相元帅尚书图克勒珠巴克行元帅府事国号辽

【按续通鉴云改元元统传失载】甲戌金遣青格诱以重禄使降不从青格度势不可反臣之金主怒复遣宣抚万努领军攻之瑠格逆战金兵大溃万努奔东京安东同知阿琳惧遣使求附于是尽有辽东州郡遂都咸平号为中京乙亥瑠格破东京克特格尔娶万努之妻李僊娥

瑠格不直之有隙既而伊实布等劝瑠格称帝瑠格与其子实沙奉金币入觐帝大悦问

旧何官对曰辽王 【按续通鉴云蒙古主以为元帅
令居广宁与此异】 帝命赐金虎符仍辽王征其户籍三千人为质遣蒙古三百人往取
之瑠格使奇努等与俱行命诘克特格尔拘繫以来克
特格尔惧与伊实布等以众叛杀所遣三百人丙子奇努金山青格图克勒等推伊实布
僭帝号于澄州国号辽改元天威以瑠格兄都呼为平
章方阅月其元帅青格叛归于金伊实布为其下所杀推其丞相奇努监国与其行元帅
雅尔分兵民为左右翼屯开保关金将众嘉努引兵攻
败之瑠格引蒙古军数千适至得兄都呼并妻约啰氏遂追击雅尔军还渡辽河招抚懿
州广宁徙居临潢府奇努走高丽为金山所杀金山自
称国王改元天德图克勒复杀金山而自立哈沙又杀之亦自立戊寅瑠格引蒙古契丹
及东夏诸国军围哈沙高丽助兵四十万克之哈沙自
经死自乙亥岁辽东反复至己卯春瑠格复定之庚辰瑠格卒妻约啰氏入奏会帝征西
域皇太弟承制以约啰氏权领其众丙戌帝还约啰氏
携次子善格特尔格永安及从子塔塔尔孙寿果努见帝于河西慰劳甚至约啰氏奏曰
瑠格既没官民乏主其长子实沙扈从有年愿以次子
善格代之使归袭爵帝曰实沙积功为巴图尔不可遣当令善格袭其父爵约啰氏拜泣
曰实沙者瑠格前妻所出嫡子也善格者婢子所出若
立之是私己而蔑天伦窃以为不可帝叹其贤给驿骑四十从征河西许以实沙袭爵而
留善格塔塔尔寿果努于朝遣其季子永安从约啰氏
东归丁亥帝谓实沙曰朕以兄弟视尔父则尔犹吾子尔其与吾弟布拉噶台并辖军马
为第三千户实沙受命己丑从太宗南征有功庚寅帝
命与萨里台东征收其父遗民移镇广宁府行广宁路都元帅府事自庚寅至丁酉连征
高丽东夏万努国复户六十有奇戊戌实沙卒子寿果
努袭爵行广宁府路总管军民万户府事易名实喇征高丽有功辛亥睿宗命佐诸王伊
克及扎拉台控制高丽己未卒长子古纳嗣中统元年
征河西三年征李璫破峰山以功皆受赏至元六年朝廷并广宁于东京去职是岁卒子
特格实沙弟善格赐名蒙古岱命从亲王昆布哈己丑
从攻破天城堡凤翔府以功袭充巴图尔壬辰引兵三千会大军平金后伐宋拔光州枣
阳由千户迁广宁尹至元元年卒子天佑袭广宁千户
改广宁县尹

△耶律阿哈

耶律阿哈辽故族也金桓州尹实巴尔之孙尚书奏事官图卜德勒之子也金季遣
使王汗见太祖姿貌异常因言金国不治戎备亡可立
待帝喜曰汝肯臣我以何为信阿哈曰愿以子弟为质明年复出使与弟托噶俱往遂以

为质直宿卫阿哈参预机谋常在左右岁壬戌王汗叛盟谋袭太祖太祖与宗亲大臣同休戚者饮河水为盟阿哈兄弟预焉既败王汗金人讶其使久不还拘家属于瀛阿哈殊不介意攻战愈厉帝妻以贵臣之女给户俸食其赋癸亥进攻西夏诸国累有功丙寅帝即位敕左帅萨巴略地汉南阿哈为先锋辛未破乌沙堡鏖战宣平大捷浚河遂出居庸耀兵燕北癸酉拔宣德德兴乘胜次北口萨巴攻下紫荆关阿哈奏曰兴创之始愿止杀掠以应天心帝嘉纳焉遂分兵略燕南山东部郡还驻燕之近郊金主惧请和谕使送阿哈妻子来归师还出塞甲戌金人走汴阿哈以功拜太师行中书省事封托噶为太傅濮国公命托噶从穆呼哩取中原阿哈从帝攻西域下布哈塔实千等城留监塔实千专任抚绥之责未几卒至元十年追封忠武公子三人长蒙古台次穆苏格尔次聂尔科蒙古台在太祖时为御史大夫管领契丹汉军守中都招安水泊等处卒无子聂尔科在太祖时为右丞行省辽东万努叛举家遇害穆苏格尔袭太祖监塔实干城久之请还内郡守中都路伊克达噜噶齐卒子遇格太祖时为奉御袭父中都之职戊午从攻蜀师次钓鱼山卒于军妻伊喇氏以哀毁卒特赠贞静子七人里玛备宿卫为笔且齐仕至右卫亲军都指挥使至元二十五年戌哈达图有战功

△耶律托噶

耶律托噶契丹人世枯桓州太祖时率众来归后随太祖同饮班珠尔河水从伐金大破呼齐呼军又从穆呼哩收山东河北有功拜太傅总领伊克诺延封濮国公统万户扎拉尔刘黑马史天泽伐金卒于西河州子珠格嗣仍统刘黑马等七万户与都元帅塔海干布同征四川卒于军子保通嗣以疾不任事珠格弟迈珠嗣而以保通充随路新军总管迈珠言于宪宗曰欲略定西川当先定成都以为根本帝从之命率诸军往成都攻嘉定未下而卒子和尔岱嗣总诸军立成都府卒于军以兄百嘉努嗣自珠格至百嘉努并袭太傅总领伊克诺延图们岱尔者百嘉努之弟和尔岱之兄也常留中宿卫后百嘉努解兵柄为他官乃授成都管军万户代将其军至元十一年从呼敦攻嘉定修平康寨以守之十二年从汪良臣【按元史作从汪特格考特格传特格以宪宗九年死于钓鱼山之战其弟良臣于至元十一年进攻嘉定据此则为良臣无疑今改正】攻九顶山破之嘉定降从呼敦徇泸叙诸城围重庆守合江口又以舟师塞龙门濠遏其援兵十三年泸州叛从汪良臣攻之重庆遣兵援泸击破之泸坚守不下夜率兵攻水城以进黎明先登克之复从布哈围重庆守将张珪搏战败之城下重庆降授夔路招讨使累迁

四川等处行尚书省右丞卒蒙古岱保通子也世祖时袭父职为随路新军总管统领山西两路新军从行省伊苏岱尔征蜀及思播建都诸蛮夷有功升万户从攻罗必甸至云南诏以其众入缅迎云南王时诸蛮往往伏险要为备蒙古岱击破之凡十余战至缅境开金齿道奉王以还迁副都元帅从诸王阿勒台征交趾至白鹤江与交趾伪昭文王战夺其战舰又从云南王攻罗必甸破之二十九年入觐成宗即位援乌撒乌蒙等处宣慰使兼管军万户迁大理金齿等处宣慰使都元帅六年乌撒罗罗斯叛率师讨平之九年讨叛贼阿填诛之遥授云南诸路行中书省左丞行大理金齿等处宣慰使都元帅卒于军至大四年追封濮国公谥威愍子和尼齐袭万户

△伊喇聂呼

伊喇聂呼契丹人也沈毅多谋略金以为参议留守等官皆辞不受闻太祖举兵诣军门献十策帝与语奇之拜名赛音笔且齐又因其生霸州号为霸州元帅乙亥拜兵马都元帅佐太师穆呼哩取北京下高利兴松义锦等二十六城破五十四寨平利州贼刘四禄及锦州贼张致

兵势方炽且盗名号穆呼哩命聂呼与大将乌页尔等合兵讨之聂呼出奇兵掩击斩致

【按穆呼哩传云致将高益缚致出降伏诛与本传

异】第功迁兵马都提控元帅继取辽东西广宁金复海盖等城兴州监州绰尔反复与乌页尔讨平之戊寅从攻东平辛巳从攻延安壬午从

围凤翔先登杀数十人臂中流矢裹创进攻丹延穆呼哩止之对曰创未至死敢自爱耶穆呼哩壮之与所乘白马明日介其马饰以朱纓简骁

卫七十人与金兵战穆呼哩乘高见其驰突万众中曰此霸州元帅也诸军继进金兵败走丹延十余城皆降迁军民都达噜噶齐都提控元帅

兼兴胜府尹癸未从帝征河西取甘合辛蛇等州师还从攻益都下莱胶淄等三十二城戊子得疾归高州卒追封兴国公谥武毅子迈努

迈努

元臣

迈努

迈努蚤从父习战阵初入见太祖曰此儿甚肖乃父以为高州等处达噜噶齐兼征行万户庚寅命攻高丽花凉城监军张翼刘霸都殒于

敌迈努怒曰两将陷贼义不独生力战破之进攻关州州将金实默逆战擒之遂下龙宣云泰等十四城癸巳从诸王阿齐台征女真有功未几

召还兴州赵祚反土豪杨买驴等附之帝命从亲王察罕台讨之斩贼将董蛮等围买驴于险树寨迈努令健卒即寨北小径上大树以绳潜引

百人登寨直前买驴投崖死余党悉平 【按太宗纪癸巳系太宗五年下文乙未则太宗七年也原文于此处误入太宗即位四字今删正】

乙未从征高丽入王京取其西京而还加征东大元帅复命出师高丽将行以疾卒追封兴国公谥显懿子元臣

元臣

元臣别名哈喇哈斯年十六入宿卫应对进止有度世祖谓丞相和尔果斯曰此勋臣子非凡器也以为集赛笔且袭千户将其父军从伐宋攻淮西戍清口取瓜洲下通泰累有功至元十二年从丞相巴延平宋进中卫亲军总管十四年珠尔噶岱叛围应昌府时皇女鲁国公主在围中元臣以所部军击之擒珠尔噶岱公主赐赉甚厚奏请留元臣镇应昌以安反侧居镇四载召还京师二十二年进同佥江淮行枢密院事行院罢归高州帝亲征纳颜元臣率家僮五十人见行在所愿效前驱二十八年 【原传误作八年显系脱文今补正】 移金湖广行枢密院事谕降溪洞施容等州蛮獠三十年卒于官追封兴国公谥忠靖子迪湖广宣慰使都元帅

△王珣

王珣字君实本姓耶律氏世为辽大族金正隆末契丹斡罕叛祖成从母氏避难辽西更姓王氏遂为义州开义人父伯俊伯父伯亨无子以珣为后河朔兵动豪强名拥众据地珣慨然曰世故如此大丈夫当自振拔否则为人所制乃召诸乡人谕以保亲族之计众从之推珣为长招集遗民至十余万岁乙亥太师穆呼哩略地奚霁珣出迎承制以珣为元帅兼领义川二州事丙子张致僭号锦州阴结杨伯杰等来掠义州珣出战伯杰引去会致兄子以千骑来冲珣选十八骑突其前复令左右犄角之其众溃走时兴中亦叛穆呼哩围之召珣以全军来会致觐其虚夜袭之家人皆遇害及兴中平珣无所归穆呼哩留之兴中遣其子荣祖驰奏帝谕之曰俟逆赏平彼之族属城邑人民一以付汝父子世为大官珣以穆呼哩兵复开义擒伯杰等杀之进攻锦州致部将高益缚致妻子及其党千余人以献穆呼哩悉以付珣珣但诛致家余皆释之始还义州丁丑入朝加兵部尚书都元帅镇辽东便宜行事兼义川等州节度使从穆呼哩略山东至满城令还镇以子荣祖代领其众甲申卒子四人荣祖袭

王荣祖

王荣祖

荣祖字敬先珣卒袭崇义军节度使义州管内观察使从嗣国王博啰入朝帝闻其

勇选力士三人迭与之搏皆应手而倒欲留署宿卫会
金平章政事葛布格行省于辽东咸平路宣抚使布什万努僭号于开元遂命荣祖还副
萨里台进讨之拔益州宣城等十余城葛布格走死金
帅郭琛据石城复攻拔之方城未下时荣祖遣卒贾实穴其城城崩实被压众谓已死弗
顾也荣祖曰士忘身死国安忍弃去发石取之犹生一
军感激乐为效死有言义人怀反侧者萨里台将屠之荣祖驰驿奏辨事乃止己丑授北
京等路征行万户伐高丽围其王京高丽王遣其兄怀
安公 【按高丽传云遣其弟怀安公王佺请和本传作其兄未知孰是】 奉表纳贡进
讨万努擒之赵祁以兴州叛从诸王阿齐台平之祁党
犹剽掠景蓟间复从大将唐古特讨之将行荣祖请无戮无辜唐古特然之由是免死者
众再从征高丽破十余城高丽遣子縉入质又从诸王
雅勒呼略地三韩降天龙诸堡皆禁暴掠民悦服之破五里山城请于主将全其民遂下
瓮子城竹林寨苦苦数岛帝嘉其功官其子兴为千户
仍赏其部曲移镇高丽平坏荣祖乃募民屯戍辟地千里尽得诸岛屿城垒高丽遣其世
子僰出降遂以僰入朝 【经世大典作中统元年事

】 中统元年迢荣祖诣阙进沿边招讨使兼北京等路征行万户还镇以病卒子十三人
通泰兴遇逵廷璲皆着仕籍

△舒穆噜额森

舒穆噜额森 【穆呼哩传作萧额森按舒穆噜额森旧作石抹也先别卷又有石抹
阿辛传其家世事迹大略相同显系重出今删彼存
此】 辽人也其先尝从萧后举族入突厥及后还而族留至辽为舒噜氏号称后族辽亡
改氏为舒穆噜氏其祖格呼勒誓不食金禄率部落远
徙父推勒博奇尔亦不仕有子五人额森其仲子也年十岁从其父问宗国之所以亡即
愤曰儿能复之及长勇力过人多智略金人闻其名征
为奚部长即让其兄实特讷曰兄姑受之为保宗族计遂匿居北野山闻太祖起朔方匹
马来归首言东京为金开基之地荡其根本中原可传
檄而定太祖悦命从太师国王穆呼哩取东京穆呼哩令率千骑为先锋额森曰兵贵奇
胜何以多为谍知金人新易东京留守将至额森从数
骑邀杀之怀其所受诰命至东京谓守者曰我新留守也入据府中问列兵于城何谓吏
以边备对额森曰吾自朝廷来中外晏然奈何陈兵以
动摇人心即命撤之下令易置其将佐部伍三日穆呼哩至入东京不费一矢得地数千
里定城邑三十二金人丧其根本之地始议迁河南岁
乙亥移师围北京城久不下及城破将屠之额森曰既降而屠之则未下者将死守天下
何时定乎因以上闻赦之授御史大夫领北京达噜噶

齐时石天应据兴中府额森分兵降之寻奉命监张鲸等军征燕南未下州郡至平州鲸称疾不进额森执鲸送行在所帝责之鲸曰臣实病非敢叛帝曰今呼汝弟致为质当汝汝鲸诺而宵遁额森追戮之致已杀使者应其兄矣致既伏诛额森以御史大夫提控诸路元帅府事后从穆呼哩攻蠡州北城先登中石死子四人曰扎拉曰锡锡曰博罗曰喀尔扎拉袭御史大夫戊寅从穆呼哩攻平阳太原诸郡下之遂攻益都久不下及降众欲屠其城扎拉曰杀降不祥遂免己卯从南征败金将博索官努于河渡河再战尽杀之长驱破汴京入自仁和门收图籍而还癸巳从国王塔斯攻金南京先登众军乘之而进遂克之辛丑太宗嘉其功授真定北京两路达噜噶齐癸卯卒于柳城子库噜默袭职中统三年从征李璫中流矢卒子良辅袭至元十七年以功累升沿海副都元帅二十一年改沿海上海副万户大德十一年告老子继祖袭万户锡锡之子都呼攻樊城战死

△舒穆噜明安

舒穆噜明安桓州人岁壬申太祖破金抚州将南向金主命招讨赫舍哩纠坚【续通鉴作完颜纠坚】来援时明安在其麾下临阵策马来降命领蒙古军抚定云中东西两路既而帝欲休兵于北明安谏曰金有一十七路今我所得惟云中东西两路而已若置不问待彼并力而来则难敌矣今以重兵临之传檄可定帝从之即命引兵南进所至民皆迎降尽有河北诸郡而还帝复命明安及僧格巴图将兵徇景蓟檀顺诸州诸将欲屠之明安奏曰此辈当死今若生之则未附者皆闻风自至矣帝从之乙亥取通州金右副元帅富察齐锦迎降明安命复其职置之麾下遂驻军于京南建春宫金御史中丞李英等领兵议军食以援中都帝遣右副元帅实沙迎战明安将五百骑继之遇于永清佯败金兵来追回击大破之获李英得粮千余车遂招询永清不降拔而屠之金将完颜和卓监军阿星宗噶尔复以步兵万二千人援中都明安将三千骑击之遇于涿州宣封寨获阿星宗噶尔和卓遁去尽得其辎重还屯建春宫攻万宁宫克之取富昌丰宜二关拔固安县将攻中都金相完颜福兴饮药死城中官民开门请降明安悉令安业仍以粟振之众皆感悦明安早从军旅料敌制胜算无遗策尝与士卒同甘苦所得府库金玉悉具其数上进未尝有纤毫私中都既下右太傅邵国公兼管蒙古汉军兵马都元帅丙子以疾卒于燕城子二人长轩达布袭职为燕京行省次呼图克华燕京等处行尚书省事兼蒙古汉军兵马都元帅

钦定续通志卷四百五十六

●钦定续通志卷四百五十七 列传二百五十七

列传

元 【十一】

○元十一

何伯祥【玮】

李守贤

何实

赫哈尚巴图

赵璠【秉温】

张荣

刘亨安

张子良【懋】

齐荣显

石天禄

刘斌【思敬】

何伯祥

李守贤

何实

赫哈尚巴图

赵璠

张荣

刘亨安

张子良

齐荣显

石天禄

刘斌

△何伯祥

何伯祥易州易县人幼从军于金从张柔来归太祖定河朔保定王子昌信安张进坚守不下子昌金骁将也柔命伯祥逼其城子昌出走追及之子昌反射中手贯枪伯祥拔矢弃枪策马直前徒手搏之擒子昌进闻之遁去遂平西山诸寨后攻汴梁拔洛阳围归德破蔡州论功居多授易州等处军民总管丁酉从主帅察罕伐宋伯祥拔三十余栅获战舰千余又破芭焦望乡大洪张家等寨俘获甚众壬子诸军入宋境察罕自他道遽还诸军食皇失措伯祥率兵突战直抵司空寨疏布营垒为攻取势既夜命为五营营火十炬伏精锐于营侧天将明令士卒速行而鸣鼓其后宋兵果来追伏发惊溃追击破之他军皆赖以出世祖南伐伯祥参预军事多献纳卒于军追封易国公谥武昌子玮

何玮

何玮

玮始袭父职知易州兄行军千户卒玮复袭之镇亳州从围襄樊宋将夏贵率舟师来救玮特建营于城东北贵兵纵火焚北关玮率众死战开营门以身先之贵败走至元十一年丞相巴延受命伐宋辟玮为帐前都镇抚师次

阳罗堡夏贵率战舰列江上下玮从轧帅阿珠率众先渡诸军继之贵复败走宋丞相贾似道率舟师拒于丁家洲玮将勇敢士出战夺舟千余艘似道遁去授管军总管宋既平进太平路军民达噜菟齐累迁湖南宣慰使三十一年拜中书参知政事时宰相凡十一人【按宰相年表至元三十一年自鄂勒哲而下凡十二人其一则是年十一月勅增也故本传祇云十一人】玮曰古者一相专任贤也今政出多门转相疑忌请损之不从遂乞代大德四年授侍御史以母病辞七年授御史中丞京师孔子庙成玮言唐虞三代国都闾巷莫不有学今孔庙既成宜建国学于其侧从之赛音谔德齐巴图果勒等【巴图果勒宰相年表作巴特玛琳沁】还自贬所复相玮言奸党不可复用宜选正人以居庙堂帝深然之监察御史郭章劾郎中哈喇哈斯受赃具服而哈喇哈斯密结权要以枉问诬章玮率台臣入奏辩论剴切章遂得释成宗崩丞相阿固台奉皇后旨集廷臣议祔庙及摄政事玮难之阿固台曰中丞独不畏死耶玮从容曰死畏不义耳苟死于义夫复何畏未几以疾去位武宗即位于上都临朝问孰可为中丞玮出拜帝曰朕知卿能以忠直为国朕有不逮卿当勉辅至大元年擢河南行省平章政事提调屯田事帝面谕曰汴省事重屯田久废卿当为国竭力玮至汴建诸葛亮祠立书院三年改河南行尚书省平章政事卒追封梁国公谥文正

△李守贤

李守贤字才叔大宁义州人祖小字放军尝从金将攻宋淮南有功金大安初守贤暨兄庭植弟守正守忠从兄伯通伯温【按伯温传以伯温为守贤毅之子盖因传末毅子十一人伯温见忠义传二语相连而误也至以守正为伯温之子则尤与此不符矣】归款于太师国王穆呼哩朝太祖于行在所即命庭植为右副元帅崇义军节度使守贤授锦州临海军节度观察使弟守忠为都元帅守河东朝廷以全晋为要害之地人心未定迁守贤为河东南路兵马都总管岁戊子朝于和琳知平阳府事兼本路兵马都总管辛卯平阳当移粟万石输云中守贤奏以百姓疲敝不任挽戴帝纳之时河中未下守贤请自北面凿城先登如其言城果下明年破赵雄兵于芮城时方会师围汴留守贤屯嵩汝金兵十余万保太平寨守将癸巳正月望夕击球为嬉守贤潜遣轻捷者数十人缘崖以登杀其守卒遂纵兵入破之不两旬诸寨望风俱下未尝妄杀一人及攻河南其渠魁强元帅及秦蓝帅王佑以次来降关东洛西遂定甲午冬至子毅副岁丁酉从太师塔海干布征蜀汉有功明年攻碉门又明年征万州会战于瞿塘获战舰千余艘辛丑朝行在所授河东道行军万户兼

总管乙巳攻成都蜀之余孽团聚为梗穀衔枚疾进贼
兵败走长驱至成都破之戊午秋宪宗南伐己未入梁州师次江上造舟为梁以通援兵
会江涨梁绝宋将率舟师万艘逆战穀以一旅先犯之
诸军继进遂破之明日帝召谓诸将曰汝辈自负鸷勇及临敌不能立尺寸功独李穀摧
锋陷阵视敌蔑如言勇者如穀乃可耳中统三年改河
东路总管未几转洛磁路至元七年卒子十一人伯温见忠义传

△何实

何实字诚卿其先北京人曾祖搏霄以善人称祖鼎敬父道忠仕金为北京留守实
少孤依叔父居及长骁勇善骑射岁乙亥中原盗起锦
州张鲸自立为临海郡王遣使纳款于太祖寻以叛伏诛鲸弟致初以叛谋于实实厉声
叱责之丙子春来归大将穆呼哩与论兵事奇变百出
大加称赏遂引见太祖献军民之数帝大悦命从穆呼哩充前锋时张致复据锦州实与
遇于神水挺身陷阵杀获甚众穆呼哩奏为帐前军马
都弹压丁丑穆呼哩东下齐数郡使实取燕南齐西之地击邢州徇赵郡居魏邺下博关
袭曹濮恩德泰安济宁势如破竹薄潍州与穆呼哩会
迁兵马都镇抚从取大同鴈门等州引兵掠太原平阳诸城所向款附录功授元帅左监
军癸未穆呼哩卒子博啰嗣武仙复叛据邢州实帅师
围之城破武仙走逐北四十里下令禁止剽掠军中肃然士民安堵博啰命戍邢多着善
政邢民敬之如神明甲申博啰征西夏以实分兵攻汴
陈蔡诸州邑所至有功博啰复命驻兵邢州丁亥命便宜行元帅府事乙未诏以实之子
仲泽为质子丁酉太宗召入见朝于幄殿帝欢甚赐坐
与论军政事曰卿效力有年朕欲授以征行元帅后当重任实叩头谢曰小臣从事锋镝
二十余年身被十余创右臂不能举已为废人不敢辱
命帝不悦命入宿卫密使人觇之实臂果不能举固辞十余始可奏命充御用局人匠达
噜噶齐子孙世其爵丁巳卒于官子九人孙十七人

△郝哈尚巴图

郝哈尚巴图太原人以小字行幼为蒙古兵所掠在郡王奇塔特麾下长通译语善
骑射太祖遣使宋往往返数四以辩称岁戊子以为九
原府主帅庚寅率兵南伐略地潼陕有功辛卯授行军千户乙未从皇子南伐至襄阳宋
兵逆战领先锋数百人直前冲其阵宋兵溃丙申从都
元帅塔尔海征蜀下兴元宋将王连以兵守剑阁乃募敢死士十二人乘夜破关入蜀诸
城悉下明年取夔府抵大江宋兵军于南岸郝哈尚巴
图乘轻舸先登横驰阵中宋兵不能支由是以善战名庚子太宗嘉其劳拜宣德西京太
原平阳延安五路万户甲辰朝定宗于行宫 【按本

纪定宗即位丙午岁此称甲辰则太皇后称制时也】 戊申奉诏还治太原己酉升万户为行省得便宜从事凡四年壬子卒追赠冀国公谥

忠定子十二人天益仲威天举天佑天泽天麟天挺俱以仕显

△赵瑁

赵瑁云中蔚州人父昆仕金为帅府评事兄珪以万户守飞狐城岁庚午昆卒珪鞬其母如蠡州留瑁于飞狐癸酉太祖南伐瑁诣县曰大兵压境不降何待众从之丁丑太师国王穆呼哩驻兵桓州署为百户从攻蠡州金兵闭城拒守国王裨将舒穆鲁额森战死王怒将屠其城瑁泣曰母与兄在城中乞以身赎一城之命哀恳切至国王义而许之从攻相州流失中鼻镞出脑后拔矢再战七日破其城论功授冀州行军都元帅瑁让其兄珪朝廷从之改授瑁军民总管迁易州达鲁噶齐太宗下河南瑁自易州输矢二十余万至行在帝喜命权中都省事癸巳赵扬据兴州叛瑁平之迁中心真定一路达鲁噶齐中统元年授顺天宣慰使至元十四年迁河南道提刑按察使十六年致仕明年卒皇庆元年追封定国公谥襄穆子秉温

赵秉温

赵秉温

秉温事世祖于潜邸从征吐蕃云南大理中统初诏行右三部事至元七年创习朝仪阅试称旨授尚书礼部侍郎知侍仪司事 【按礼乐立志侍仪司授赵秉温职在至元八年】 明年授秘书少监购求天下秘书十九年迁昭文馆大学士知太史院侍仪司事二十九年编国朝集礼成帝特命其子慧袭侍仪使皇庆元年赠云国公谥文昭子慧仕至昭文馆大学士

△张荣

张荣字世辉济南历城人尝从军为流矢贯眦拔之不出令人以足抵其额而拔之神色自若金季山东羣盗蜂起荣率乡民据济南簧堂岭众稍盛略章邱邹平淄州等地而有之岁丙戌东平顺天皆内属荣遂举其兵与地纳款于阿齐台诺延引见太祖授山东行省尚书省兼兵马都元帅知济南府事庚寅朝廷议取汴荣请先六军以清蹕道帝嘉之诏位诸侯上辛卯军至河上荣率死士宵济守者溃诘旦敌整阵至荣驰之望风披靡夺战船以济师众军继进破张盘二山寨俘获万余大将额苏伦欲尽杀之劳力争而止癸巳汴梁下从额苏伦为先锋攻睢阳议欲杀所获俘烹其油以灌城又力止之既而城下荣单骑先入抚其民甲午攻沛沛守将苏克夜来捣营荣击杀之乘胜破其城就攻徐州亦破之守将国用安赴水死乙未拔邳州丙申从诸王库腾破宋棘阳仇城等三县时河南

民北徙至济南荣令民闲分屋与地居之俾得树畜旷野辟为乐土是岁中书考绩为天下第一世祖即位封济南公致仕卒子七人邦杰邦直邦彦邦允邦孚邦昌邦宪孙四十人

△刘亨安

刘亨安其先范阳人后迁辽东川州初国王穆呼哩经略辽东世英率宗族乡人隶麾下分兵攻燕赵云朔河东以功充行军副总管庚辰世英言于国王曰自古建国以民为本今河东杀掠殆尽异日我师复来孰给转输收存恤亡此其时也王善之奏授世英绛州节度使兼行帅府事卒于师无子国王博罗命其族兄德仁袭职丙戌金将伊喇副枢攻绛州城陷死之穆呼哩承制命亨安领其众奏授绛州节度使行元帅府事兼观察使庚寅冬从王帅渡河入关辛卯克凤翔历秦陇屯渭南出阶城沿汉抵邓壬辰会大军于钩州败金人于三峰山甲午宋兵攻汴将趋洛都元帅塔齐尔使亨安拒之与宋军遇于龙门北横槊跃马奋突而前宋师奔溃丙申都元帅塔尔海征巴蜀【按太宗纪八年丙申皇子库腾破成都至塔尔海征蜀则在六年甲午与此互异】攻散关破剑门出奇制胜战功居多进围成都亨安为先锋大破之于城西生擒宋将陈侍郎有乔长官与亨安争功及攻城乔为炮所伤亨安负之以出乔感愧亨安从军十年累着勋伐所获金帛悉推与将佐故士卒咸乐为用癸卯辛子贞嗣职孙三人宏强孳

△张子良

张子良字汉臣涿州范阳人金末四方兵起所在募兵自保子良率千余人入燕蓟闲聚舟阻流水治舟筏取蒲鱼自给子良部勒定兴新城数万口就食东平东平守弃东平还汴檄子良南屯宿州又屯寿州夏全劫其民出鸡口子良走归宿因以宿帅之众夺全所劫以还全怒连徐邳之军来攻子良与宿帅斫其营全走死扬州时金受重围于汴声援尽绝国用安因以涟水之众入援道阻游兵不能进子良与一偏将昼伏夜行得入汴达用安意金君臣曲赐劳来凡所欲皆如用安请因以徐宿授子良总管陕西东路兵马仍治宿州时令已不行于陕而用安亦卒不得志徐宿之闲民无食者出城拾稻稊以食子良严兵护之以防抄掠猝遇敌子良被重伤乃率其众就食泗州泗守阅兵将图之子良与麾下十数人即军中生缚其守岁戊戌率泗州西城二十五县因元帅阿珠来归太宗命为东路都总帅升京东路行尚书省兼都总帅管领元附军民至元七年【原文脱至元二字今增】授大名路总管兼府尹八年卒追封清河郡侯谥翼叙子懋

张懋

张懋

懋字之美嗣子良官东京领其众从丞相阿珠军立归德府以其军镇之至元七年耀济南诸路新军千户十一年丞相巴延南征其行阵以铍车弩为先众军继之懋以勇鸷将弩前行凡所过山川道路险隘通梁筏平堑穿安营设伏出纳奇计巴延信用之擢为省部镇抚师临临安灭宋命懋往谕淮西夏贵贵出迎设宾礼懋示逆顺祸福辞旨雄厉贵顿首上地图驰还报巴延大喜复令徇镇东安丰寿春怀远等州郡皆下之录功授泗州安抚司达噜噶齐十六年改吉州路总管郡万户苏良恃势为暴为之翼者有十虎之目民甚苦之乃上其实于宪府尽诛十虎夺良虎符而黜之民大悦有羣盗将白昼劫城懋闻之率从骑捣其穴缚其酋长以归民之流亡与远郡之来归者数千家十七年卒追封清河郡侯谥宣敏

△齐荣显

齐荣显字仁卿聊城人父旺金同知山东西路兵马都总管荣显幼聪悟九岁代父任千户从外舅严实来归屡立战功攻濠州宋兵背城为陈荣显薄之所向披靡其属王孝忠力战中钩戟荣显断戟拔孝忠出复逐北入其郭而还兵趋五河口抵大堤荣显偕数骑前行覘敌值逻骑数十从者将退走荣显曰彼众我寡若示以怯必为所乘援弓策马射杀两人乃还进拔五河口升权行军万户守宿州堕马伤股不能复从军改提领本路课税又改本路诸军镇抚兼提控经厯司值断事官钩校诸路积逋官吏往往遭诟辱荣显从容办理悉为蠲贷从实入朝授东平路总管府参议兼领博州防御使时攻淮南道出东平民闲供给不贖荣显诣断事官愬之得折充赋税民赖以不困中统初谒告侍亲闲居十年卒

△石天禄

石天禄父珪山东诸路都元帅陷金死节天禄爵博啰承制授东平路元帅时宋将彭义斌取大名及中山天禄与布尔罕率兵败之获义斌又败金将武仙屡立战功壬辰皇太弟图类南渡河天禄为前锋夜至归德城下袭其营杀三百余人金将追围天禄天禄溃围复战金兵退走提兵掠亳及徐所过望风降附癸巳归德降甲午入觐改授征行千户济兗单三州管民总管乙未从扎拉袞和尔齐渡淮攻随州至襄阳夹河寨战退宋兵又从攻蕲黄时诏天禄括户东平军民赋税并依天禄已括籍册严实不科收旋以病不任职又以子兴祖袭明年卒子十人兴

祖袭千户己未从伐宋攻鄂州至元四年繇宿州率兵抄沿淮诸郡获宋规伺者十余辈
十二年攻常州功在诸将上升管军总管戍温州土贼
林大年等构乱出兵围之斩首千余级招辑南溪山寨归农者三万余户十九年卒

△刘斌

刘斌济南历城县人从济南张荣起兵为管军千户以功授中翼都统攻睢阳军军
杏堆距陈州七十里闻陈整军于近郊斌率众夜破之
又击走太康守兵擒其将三日太康陷移屯襄阳军乏食斌知青陵多积谷前阻大泽水
深不可涉彼必恃险不我虞取可必也乃率百骑夜发
获敌人使道之行遇敌兵斌舍马挥槊突敌败之得其粮数千斛迁官知中外诸军事从
攻六安先登破其城累官济南新旧军万户移镇邳州
宋将惮之病作戒其子曰居官当廉正自守毋黷货以丧身家卒赠彭城郡公谥武庄子
思敬

刘思敬

刘思敬

思敬赐名哈巴尔图袭父职为征行千户世祖南征从董文炳攻台山寨先登中流
矢伤甚帝亲劳赐酒累授西川副统军至元九年宋嘉
定守臣咎万寿乘虚攻成都哈巴尔图击败之战于青城夺所俘二千人还十二年攻
嘉定取留泸叙忠涪诸郡及筹胜龟云石笋等寨十九
族西南夷五十六部悉来降十三年泸州复叛哈巴尔图妻子没焉乃率兵讨之擒其将
任庆攻破盘山寨俘九千余户遂复泸州十六年蜀平
拜四川行省参知政事十七年授江西行省参知政事二十年卒追封滨国公谥忠肃子
思恭 【按裕宗珍馔传参政刘思敬遣其弟思恭
以民户来献裕宗曰归语汝兄云云则思恭乃思敬弟也本传疑有错简】 右卫亲军都
指挥使思义昌国州军民达噜噶齐

钦定续通志卷四百五十七

●钦定续通志卷四百五十八 列传二百五十八

列传

元 【十二】

○元十二

薛塔喇海

高诺尔

王义

王玉【枕】

赵迪

邸顺【琮】

王善【庆

端】

杜丰

舒穆噜拜达勒

贾塔尔琿

鄂屯世英

田雄

张巴图

张荣

赵天锡【贲亨】

薛塔喇海
高诺尔
王义
王玉
赵迪
邸顺
王善
杜丰
舒穆鲁拜达勒
贾塔尔琿
鄂屯世英
田雄
张巴图
张荣
赵天锡
△薛塔喇海

薛塔喇海燕人也岁甲戌太祖引兵至北口塔喇海帅所部来归命为炮手都元帅屡有功进炮手军民诸色人匠都元帅从征回回河西钦察辉和尔诸国俱以炮立功太宗三年睿宗引兵自洛阳渡河塔喇海由陇右假道金商遂会师于钧州三峰山败金师四年破南京唐邓钧许诸州取鄢陵扶沟卒子达实拉袭都元帅攻江淮有功卒弟结桑袭宪宗八年从世祖攻钓鱼山苦竹崖大林平青居山破重庆马湖天水中统三年李璫叛济南又以炮破其城至元五年从围襄阳卒丞相阿珠欲以千户刘添喜摄帅府事子肆嘉努年十六请从军自劾帝壮而许之八年始袭父爵十年襄樊未下肆嘉努立炮攻之明年正月【世祖纪作至元十年二月事】襄阳宋吕文燠降继从丞相巴延南伐自郑州下沿海诸城堡至建康十二年与宋将夏贵战于峪溪口夺其船二百余艘屠常州取苏州十三年围扬州宋将李庭芝弃城走追获之将兵平浙东诸郡从征福建深江与宋兵力战破之十六年镇扬州后改为万户

△高诺尔

高诺尔女真人从征西域复从库春太子察罕诺延连岁出征累功授总管理山前十路匠军岁己未宪宗悯其老命子元长袭从世祖渡江攻鄂还镇随州至元五年从元帅阿珠修立白河口新城庆门山等处城堡围襄樊七年充季阳军马总管十一年从渡江鼓战舰

上流与宋人战杀三百余人十二年进兵丁家洲与孙虎臣等大战杀五百余人又败夏贵于焦湖从征常州先登又攻杭州二十一年从太子托欢征交趾追袭交趾世子于大海口夺其战舰以还二十三年升季阳万户复以兵追袭交趾世子于海之三义口与敌军合战中毒矢卒子默尔根袭父职领兵镇广东移戍惠州平盗谭大獠朱珍等元贞元年移戍袁州盗陀头以众犯境悉剿除之寻广之南恩盗起复平之还没于袁州

△王义

王义字宜之真定宁晋人金人迁汴河朔盗起县人聚而谋曰时事如此吾侪欲保全家室宜有所统属乃推义摄行县事太师国王穆呼哩兵至城下义以宁晋归即授为令兼赵州以南招抚使是时兵乱民废农耕宁晋东有藪泽百余里中有保曰沥城义曰沥城虽小而完尚有鱼藉菱芡之利不可失也留偏将李直守宁晋身率众保沥城由是全活者众岁乙亥金将李伯祥据赵州穆呼哩遣义捣其城会天大风雨挟长梯疾趋夜四鼓齐登杀守陴者城中乱伯祥走天坛寨一州遂定丁丑大军南取巨鹿洺州还至唐阳遇金监军纳兰率冀州节度使柴茂等将兵万余北行义伏兵桑林以百骑挑之纳兰迎战因稍却诱近桑林伏起金兵大乱奔还获纳兰二弟及万户李虎戊寅拔束鹿进攻深州守帅以城降升深州节度使深冀赵三州招抚使金武仙以兵四万攻束鹿义随机应拒积三十日不能下一夕召将佐曰今城守虽有余然外无援兵食且尽岂可坐而待毙乃率精锐衔枚夜出道捣仙营仙军乱杀数千人仙率余众遁还真定庚辰拔冀州获柴茂械送军前上功授武安军节度使辛巳【按太祖纪十五年庚辰武仙降二十年乙酉复以真定叛与金史武仙传所载相符本传序谋袭赵州事于辛巳年恐误】仙复遣其将卢秀李伯祥率兵谋袭赵州并取沥城率战舰数百沿河而下义具舟楫于纪家庄截其下流击破之擒秀伯祥退保沥城义引兵拔之伯祥西走邢州盗聚众数千据任县固城水寨义引兵薄其城一鼓下之余党悉平义招集散亡劝率种艺深冀之闲并为乐土云

△王玉

王玉赵州宁晋人金季为万户镇赵州穆呼哩下中原玉率众来附领本部军从攻邢洺磁三州及济南诸郡号长汉万户从攻潞州不下玉力战流矢中左目竟拔其城又破平阳下太原汾代等州师还署元帅府监军以赵州四十寨隶焉先是武仙既降复叛宋将彭义斌在大名阴与仙合玉从史天泽攻败武仙生擒义斌驻军宁晋东里寨仙遣人賚诰命诱玉妻妻

曰妾岂可使夫怀二心于国家耶仙围之数匝杀其子
宁寿玉闻之领数骑突围斩获数百人而还仙遣人追之不敢进皆曰王将军胆气骁雄
我辈非敌也仙乃尽发玉先世冢玉从诸将击仙于赵
州仙走双门寨围之会大风仙脱走斩其将四十三人真定平权真定五路万户假赵州
庆源军节度副使中统元年卒子忱

王忱

王忱

忱字允中幼明敏平章赵璧引见裕宗潜邸命宿卫掌钱谷计簿授山北辽东道提
刑按察司副使驸马博和哩数田猎蹂民田忱以法绳
之宪吏耿熙言征北京宣慰司积年逋负计可得钞二十万锭帝遣使核实熙惧事露擅
增制语有并打算大小一切诸衙门等事凡十二字追
系官吏至数百人忱验问知其诈熙乃款代改河北河南道提刑按察副使省部以正军
余田出调发忱言士卒冲冒寒暑远涉江海宜加优恤
从之劾罢镇南帅唐古特唐古特结援大臣诬奏于帝系忱至京师得面陈状世祖悟抵
唐古特罪起忱为燕南河北道肃政廉访副使至大三
年拜云南行省参知政事未行卒

△赵迪

赵迪真定藁城人幼孤事母孝金末为义军万户郡将出六均强弩募能挽者迪能
之即署真定尉迁藁城丞太祖兵至迪率众迎降岁壬
午改藁城为永安军以迪同知节度使事尝从帝西征迪治军严所过无犯先是真定既
破迪亟入索藁城人在城中者得男女千余人诸将却
分取之迪曰是皆我所掠当以归我诸将许诺迪乃召其人谓曰吾惧若属为他将所得
则分奴之矣故索以归我今纵汝往以各遂生产为良
民众感泣而去时兵荒之余骸骨蔽野迪为大家收瘞壬子岁卒子七人椿龄真定路转
运使

△邸顺

邸顺保定行唐人占籍于曲阳县金末盗起顺会诸族集乡人豪壮数百人与其弟
常筑两砦分据以守岁甲戌率众来归太祖授行唐令
丙子真定饥羣盗据城叛顺擒杀数百人朝廷升曲阳为恒州以顺为安抚使金将武仙
据真定帅众来攻顺与战大破之加恒州等处都元帅
庚辰武仙屯兵于黄尧两山顺及弟常击败之时西京郝道章阴结武仙抄掠州县顺擒
道章杀之仙退真定以自保又从穆呼哩败之于王柳
口以功赐顺名察纳格尔弟常赐名济农格尔辛卯春从太宗攻河南诸郡招降民十余
万以顺知中山府己亥为行军万户管领诸路元差军

五千人从大军破归德府留顺戍之丙辰卒子浹袭顺族弟琮

邸琮

邸琮

琮太祖时从行唐元帅常来降岁乙酉金降将武仙复据真定叛琮败之于黄台癸巳从元帅布展灭金有功授管军总押镇徐州宋兵入境琮战却之己亥从大将察罕攻滁州力战中流矢卒子泽袭移镇颍州宋兵攻颍泽战败之至元十一年从攻沙洋夺六舰十二年从攻潭州及静江累官郴州路总管府达噜噶齐二十八年移镇杭州卒 【按元文类载姚燧所撰神道碑叙泽战功颇详本传俱略而不载】

△王善

王善字子善真定藁城人父增监本县酒务以孝行称善多智略尤精骑射金贞佑播迁田畴荒芜善求食以奉母乞亥羣盗蜂起众推为长善备御有方盗不能犯戊寅权中山府治中时武仙镇真定阴蓄异志忌善威名密令知府李济府判郭安图之济安张宴伏兵召善计事善觉即还治众仓卒得八十人慷慨与盟人争自奋遂诛济安乃谕其党曰造衅者李郭耳余无所问善夜卧城上戒麾下曰勿以我累汝家当取吾首献帅府众曰公何为出此言我辈惟有効死而已遂率众来归授同知中山府事是年冬以兵三百攻武仙仙率精锐拒战善擒斩之仙走获鹿复战拔之军势大振自中山以南降州郡四十二迁中山真定等语招讨使壬午升藁城为匡国军以善行帅府事奏未 【太祖纪作庚辰年事】 仙穷迫请降诏复还镇善奏仙狼子野心终必反复请修城隍备之未几仙果叛率众来攻火及西门善出战却之仙自是不敢入真定壬辰从征河南至郑州州将马伯坚素闻善名登陴大呼曰藁城王元帅在军中否愿以城降之善直前免胄与语伯坚率众出降善令军中秋毫无犯民皆安堵愿从北渡者以万计授之土田以安集之丙申兼河北西路兵马副都总管后改授知中山府事属县新乐地居冲要迎送供给倍于他县善均其劳逸所征或未给辄出家货代输民德之癸卯卒追封冀国公谥武靖子庆渊为行军千户征淮南死次庆端

王庆端

王庆端

庆端字正甫初为郡筦库进水军提领训练士卒常如临敌败李璿于老僧口监筑大都城移戍清口宋兵来攻守将战死城欲陷庆端拔刀誓众裹创力战城得以全羣盗四起复击走之累迁侍卫军都指挥使建威武营以处卫兵经画田庐使各安业别立神锋军亲教以蹶张弩

技作整暇堂屏利局浚渠构室如治家事至元十九年改詹事丞时有司欲就威武营贷粟数万石济饥民裕宗在东宫以问庆端对曰兵民等耳何闲焉即命与之帝亲征纳颜命庆端以所部从时年六十余与士卒同甘苦昼擐甲执兵夜卧不解衣暇则俾士卒为军市自相懋迁征东之功庆端赞画居多成宗即位拜金吾卫上将军中书左丞行徽政副使兼隆福宫左都威卫使大德二年加平章政事金书枢密院事卒

△杜丰

杜丰字唐臣汾州西河人仕金为平遥义军穆昆太祖取太原丰率所部降授兵马都提控从国王安扎尔攻平阳克絳州解州诸堡招集流民三万余家升征行元帅左监军金人南遁遂以丰守河北庚辰上党张开以万众寇汾州丰率精骑五千败之从下怀孟破温谷木润等寨攻洪洞西山斩首六百余级攻松平山破之王午授河南北路兵马都元帅破玉女割渠等寨俘获千余人丙戌从昂吉诺延攻益都金守将突围出丰战扼之益都下遂略地登莱降岛民万余己丑以本部取沁州由是铜鞮武乡襄垣绵山沁源诸县皆下辛卯命丰抚定平阳太原真定及辽沁未降山寨皆平之乙未升沁州长官长官者元初高爵也在沁十余年宽徭薄赋劝课农桑民以富足丁未请老丙辰卒于家子思敬事世祖潜邸由平阳路同知累迁治书侍御史阿哈玛特败台臣皆罢去思敬以帝所眷知独留出为安西路总管再入中台为侍御史时僧格以罪诛风纪为之振肃拜参知政事升中书左丞致仕卒谥文定

△舒穆噜拜达勒

舒穆噜拜达勒契丹人仕金为霸州平曲水寨管民官太师国王穆呼哩师至霸州拜达勒迎降擢为千户岁甲戌覲太祖于雄州充汉军都统帝次牛阑山欲尽戮汉军穆呼哩以拜达勒可用奏释之因请隶麾下从平高州乙亥授左监军从多果郎实里巴徇地山东大名比至洺州城守甚坚师不得进拜达勒不避矢石率众先登拔之丁丑从平益都沂密莱淄戊寅从定太原忻代平阳诸州郡升霸州等路元帅以黑军镇守固安水寨既至令兵士屯田且耕且战披荆棘立庐舍数年之闲城市悉完为燕京外蔽辛卯从国王塔斯征河南癸巳从讨万弩于辽东所至有功以疾卒于官

△贾塔尔琿

贾塔尔琿冀州人太祖用兵中原募能用炮者籍为兵授塔尔琿四路总押以将之及攻益都下之加行元帅左监军师还驻谦谦州古乌孙国也岁己丑将所部及契丹女真唐古汉兵攻鄂托罗尔城塔尔琿督诸军穴城先入

破之即军中拜元帅从睿宗入散关略关外四州经兴
元渡汉江略唐邓申裕诸州河南平升总领都元帅从大帅塔沁攻徐邳平之十六年【
按本传上文己丑为太宗元年下文戊午为宪宗八
年考本纪自太宗至宪宗俱不及十六年三字必自脱误】卒子绰尔齐袭从诸王伊逊
克塔齐尔南征戊午卒于军子吉噜袭卒弟六十八袭
至元闲诸军团襄樊六十八师所部戍骆驼岭一字城立炮樊城南不发以怠敌心俄帅
锐卒突出攻其城西破之十一年诸军南征渡江明年
宋常州守臣姚嵩坚守不下六十八发炮摧其城壁宋援兵突至力战却之常州既克帅
府令总新附炮手军临安降从诸军追宋二王至海下
三十余城累功授炮手军匠万户二十六年卒

△鄂屯世英

鄂屯世英女真人其先世仕金为淄州刺史岁癸酉太祖下山东淄州民奉世英及
弟保和迎降皆授以万户世英由万户迁德兴府尹时
金经略使苗道润率众欲复山西世英克之将尽杀所俘其母责之曰汝华族也畏死而
降此卒伍尔驱之死战何忍杀之耶遂止巡部定襄卒
于军保和由万户升德兴府元帅领真定保定顺德诸道农事凡辟田二十余万亩改真
定路劝农事兼领诸署寻致仕子希恺袭劝农事郡县
有水旱必力请蠲租调南征时置军储仓于汴卫岁输河北路粟以实之分冬月三限
失终限者死寻以劝农使兼知冀州至元二年升知河
中府秩满归调时阿哈玛特专政官以贿成希恺不往见降知景州希元彰德漕运使希
鲁泮州路总管希尹中统三年李璫叛济南丞相史天
泽讨之希尹谒天泽面陈利害愿击贼自効试其骑射壮之命充真定路行军千户与贼
战矢无虚发贼败走城中希尹请筑外城围之深沟高
垒俟其粮绝不战而坐待其困天泽从之璫就擒录功自右卫经历累迁至同知广东道
宣慰司事卒

△田雄

田雄字毅英北京人金末署军都统岁辛未太祖军至北京雄率众绛隶穆呼哩麾
下从征兴中广宁诸郡定府州县二十有九平锦州张
鲸兄弟之乱从攻柏乡邢相辛巳从攻鄜坊绥葭诸州有功授雄隰吉州刺史兼镇戎军
节度使行都元帅府事平汾西霍山诸栅太宗时从攻
西和兴元诸州又从攻夔万诸州授行军千户召为御前先锋奉旨招纳河南降附得户
十三万有奇民皆安堵而别部将校纵兵掳掠民惶惧
悔降雄力为救护民得免于害癸巳授镇抚陕西总管京兆等路事时关中苦于兵革郡
县萧然雄披荆棘立官府开陈祸福四山堡砦闲来附

者日众乃教民力田京兆大治定宗时入觐于和琳以疾卒追封西秦王子八人

△张巴图

张巴图昌平人岁辛未太祖南征巴图率众来附颇为前驱遂留备宿卫从近臣呼图克西征回纥河西诸番道陇蜀入洛屡战流矢中颊不少却帝闻而壮之赐名巴图甲午金亡以呼图克为炮手诸色军民人匠都元帅守真定卒无子以巴图代之及呼图克兄子沙克嘉少长巴图请于朝归其政而终老焉子蒙古台从宪宗攻蜀钓鱼山苦竹二垒以勇敢闻中统元年为行军千户从征襄樊有功卒子世泽袭从丞相巴延南征大小十余战皆有功又从平广西收琼万诸州迁副万户从镇南王托欢伐交趾既还及再举将校旧尝任者许留恤之有当行者适病不能起世泽曰吾祖父以武勇称吾蒙余泽荷国厚恩当输忠王室增光前人岂可苟为自安计耶力请代之凯还人服其义云

△张荣

张荣清州人岁甲戌从金太保明安降授元帅左都监略东平益都诸郡戊寅领军匠从太祖征西域诸国至穆棱河不能涉太祖召问济河之策荣请造舟乃督工匠造船百艘遂济河太祖嘉其能赐名乌苏齐升炮水手元帅甲申从征河西乙酉从征关西五路攻凤翔炮伤右髀帝命养疾于云内州庚寅卒子诺尔布袭炮水手元帅太祖伐金命由关西小口收附金昌州等郡中辰领蒙古汉军守均州戊申宋兵袭均州诺尔布拒战大败宋师己酉复与宋兵战流矢中右臂中统三年卒子君佐袭戍蔡州五年都元帅阿珠命将炮手兵攻襄阳至元八年调守襄阳一字城橐駝岭攻南门牛角堡破之攻樊城亲立炮摧其角楼十一年从军下汉江至沙洋丞相巴延命率炮手军攻其北面焚城中民舍几尽遂破之又以火炮攻破阳罗堡十二年从大军与宋将孙虎臣战于丁家洲复从攻扬州破常州十三年屯军真扬闲绝宋粮道宋制置李庭芝都统姜才弃城走【续纲目云李庭芝姜才死之按庭芝固守扬州力战不下会福州召命至乃令副使朱爨守扬而自与姜才率兵趋泰州将东入海被执不屈俱死本传序荣孙君佐续故褒贬异词】扬州平授安庆府安抚司军民达噜噶齐十四年安庆野人原及司空山天堂贼将攻安庆时城中军仅数百人君佐命搯贼出没要道贼不敢入乃寇黄州行省命君佐率众复黄州因以为黄州达噜噶齐十九年命率新附汉军修胶西闸坝以通漕运二十一年兼海道运粮事卒

△赵天锡

赵天锡字受之冠氏人金贞佑之乱父林保冠氏有功授冠氏令大安末天锡入粟

佐军补修武校尉太祖遣兵南下防御使苏政以为冠氏令乃挈县人壁桃源天平诸山岁辛己归行台东平严实隶帐下从征上党以功迁元帅左都监兼令如故甲申宋将彭义斌据大名冠氏元帅李全降之【按宋史宁宗纪及李全传嘉定十一年戊寅李全降宋十五年壬午彭义斌复京东州县时严实将晁海以青崖峒降是李全未尝降于义斌也本传记年纪事俱不相符疑有错误】天锡率将佐往依大将布尔罕军未几破义斌于真定授同知大名路兵马都总管事李全在大名结其帅苏椿纳金河南从宜郑侗日以取冠氏为事天锡每战辄胜一日侗自将万人来攻天锡率死士乘城力战三昼夜侗度不能下乘风霾遁去戊戌征宋驻兵蕲黄闲被病还卒子贲亨

赵贲亨

赵贲亨

贲亨字文甫袭行军千户从国兵渡江攻鄂有功至元五年总管山东诸翼军征宋出抄蕲黄以五百人拔野人原写山砦修白河新城七年命为征行千户攻樊城冒矢石拥盾先登破之十一年修东西正阳城败夏贵于淮从攻镇江与宋将孙虎臣张世杰大战于焦山杀掠甚众江南平以功授处州路总管府达噜噶齐未行适盗发澈浦行省檄为招讨使率兵平之处州青田县季文龙章焱杀知府叛贲亨获其赏始知七县俱反文龙据处州天庆观贲亨率众围之陈于下河门贼出战以精骑蹂之遂弃城突围走贲亨乃招散亡立官府焱复合众来攻陈恶溪南贲亨分兵拒守自将精锐乱流冲击属万户呼图克台以援兵至贼方退文龙溺死呼图克台以处即山为州无城壁可恃且反侧却屠之贲亨曰我受命来监此郡贼固可杀良民何辜不从十五年龙泉县张三八合众二万杀庆元县达噜噶齐伊苏岱尔且屠其家贲亨将骑士五百往讨与贼将战于浮云乡败之军还贼众水陆俱设伏贲亨择步卒骁悍者使前贼不敢近既而衢州陈千二遂昌叶丙六聚众数万助之贲亨前后悉平之十七年改处州路管军万户二十二年还冠氏卒

钦定续通志卷四百五十八

●钦定续通志卷四百五十九 列传二百五十九

列传

元【十三】

○元十三

张晋亨【好古】

王珍

杨格济格

刘敏

王楫

王守道

高宣

焦德

裕 石天麟

李邦瑞 杨奂

贾居贞

张晋亨

王珍

杨格济格

刘敏

王楫

王守道

高宣

焦德裕

石天麟

李邦瑞

杨奂

贾居贞

△张晋亨

张晋亨字进卿冀州南宫人其兄同知安武军节度使事颢以冀州数道之众附严实于青崖后从实来归进安武军节度使西征战没岁

戊寅穆呼哩承制署晋亨袭爵晋亨涉猎书史临事周密实器之以女妻焉实遣子忠贞入质命晋亨与俱丁亥从国王博啰征益都以功迁恩

州刺史兼行台马步军都总领实征淮楚河南晋亨毕从甲午命为东平路行军千户围安庆攻定城略信阳拔六安大小数十战策功居多实

卒其子忠济奏晋亨权知东平府事东平贡赋率倍他道迎送供亿簿书狱讼日不暇给历七年吏畏而民安之宪宗即位从忠济入覲时包银

制行朝议户赋银六两诸道长吏有辄请试行者晋亨面责之曰诸君职在亲民民之利病且不知乎今天颜咫尺知而不言罪也承命而归事

不克济罪当何如且五方土产各异随其产为赋则民便而易足必责输银虽破民之产有不能办者大臣以闻明日召见如前言以对 【按

王玉汝传作玉汝纠诸路管民官愬之阙下两传互异】 帝然之得减户额三之一仍听民输他物定为制擢恩州管民万户中统三年李璫叛

晋亨从严忠范战于遥墙泺胜之改本道鄂啰万户四年分将本道兵戍宿州首言汴堤南北沃壤闲旷宜屯田以资军食乃兵分列营以时种

艺选千夫长督劝之期年皆获其利至元八年改淄莱路总管兼军事十一年诏伐宋晋亨在选中闻命就道曰此报效之秋也分道由安庆渡

江丞相巴延留之戍镇江兼与民政战焦山瓜州皆有功十三年卒子好古

张好古

张好古

好古字信甫勇而有谋晋亨权知东平府事严忠济承制以好古欢其父军戍宿州戊午奏镇授行军千户攻樊城身中流矢战不少却略扬州循泰兴海门而还击邵伯埭拔之中统元年还宿州忠济命兼恩州刺史未几移戍蕲州宋人攻蕲好古率兵迎击力战死之弟好义袭【按世祖纪至元元年以千户张好古歿王事命其弟好义好礼并袭职是好古弟尚有好礼也传失载】下江淮有功

△王珍

王珍字国宝大名南乐人金末盗起南乐人杨铁枪聚众保乡里太祖攻破河朔铁枪以兵应之行营帅安扎署珍军前都弹至铁枪战死苏椿领其众宋将彭义斌侵大名椿战不利降之义斌遂据大名珍弃家走还军中安扎嘉其诚待遇益厚从苏勒呼击走义斌苏椿以大名降授大名路治中军前行元帅府事俄以取宁海胙城功复授统摄开曹滑浚等处行元帅府事兼大名路安抚使苏椿复欲叛归金珍觉之与元帅梁仲先发兵攻椿椿开南门遁授珍同知大名府事兼兵马都元帅从拉卜台经略河南破金将武仙于郑州复与金人战于萧县其将国用安据徐邳珍从塔沁额苏伦攻拔之授同签大名行省事从伐宋破光州棘阳庐寿滁州宋城五河口珍帅死士二十人夺之宋人遁乘胜进师连破濠泗涡口岁庚子入见太宗授总帅本路军马管民次官珍言于帝曰大名困于赋调贷借西域贾人银及逋粮五万斛若复征之民无生者矣诏官偿所借错复尽蠲其逋赋朝议分蒙古汉军戍河南以珍戍睢州修城隍明斥堠宋兵不敢犯己酉进本路征行万户在镇九年卒子文干袭为行军万户李璫叛从哈必赤讨平之论功语以官赏文干曰增秩则荣及一身赐金则恩逮麾下乃以白金二千两器册百事杂彩数百缣赏之文干悉颁之军中中统三年改同知大名路总管府事累迁江东建康道按察使卒于官

△杨格济格

杨格济格燕京宝坻人太祖略地燕赵率族属来附从攻辽左及从元帅额苏伦定西夏诸部有功额苏伦知其材略出诸将右命裁决军务从攻信安城四面阻水其师张进数月不降格济格曰彼恃巨浸我师进不得利退不得归不若往说之进见其来怒曰吾已斩二使汝不惧死耶格济格曰今齐鲁燕赵地方数千里郡邑闻风纳降独君恃此一城内无军储外无兵援亡可立待为君计不如请降可以保富贵而免死亡进默然凡三往乃降辛卯大名守苏椿叛讨获之滑浚等州闻风纳款壬辰师次徐州

阻河不得济格济格侦知有贼兵操舟楫伏草泽中率
劲卒凭河击之夺其舟众遂得渡获河南诸郡降人三万余户进攻徐州金将国用安拒
战格济格率百余骑突入阵中截击大败之丁酉从额
苏伦攻归德麾诸将缚草作筏渡壕抵城下梯城先登拔之由是进攻得五州十县四堡
二寨己亥宋兵至巳登城格济格拒战败之率舟师追
击转战中流溺死子孝先金江北淮东道肃政廉访司事孝友镇江路总管

△刘敏

刘敏字有功宣德青鲁人岁壬申太祖师次山西敏时年十二从父母避地德兴禅
房山兵至父母弃敏走大将怜而收养之一日帝宴诸
将于行营敏随入帝见其貌伟异之俾留宿卫习国语阅二岁能通诸部语帝嘉之赐名
乌楚肯出入禁闼初为奉御帝征辽西及回回诸国敏
皆从行寻授安抚使兼燕京路征收税课漕运盐场等事给西域工匠千余户及山东山
西兵士立两军戍燕置二总管府以敏从子二人为之
长命敏总其役奏李臻为参谋初耶律楚材总裁都邑契丹人居多其徒往往中掖挟弓
矢掠民财官不能禁敏戮其渠魁令诸市又豪民冒籍
良民为奴者众敏悉归之选民习星厯者为司天太史氏兴学校进名士为之师太师即
位改造行宫幄殿及城和琳建万安宫设宫闾司局立
驿传以便贡输既成宴赐甚渥辛丑授行尚书省诏敏所行有司不得预闻俄而伊罗斡
齐自西域回奏与敏同治汉民帝允其请伊罗斡齐素
刚尚气耻不得自专俾其属莽噶尔诬敏以流言敏出手诏示之乃已帝闻之罢伊罗斡
齐令敏独任复辟李臻为左右司郎中臻在幕府二十
年多所参赞定宗即位诏敏同行省事宪宗立召赴行在所仍命与伊罗斡齐同政敏请
以子世亨自代帝许之敏退居年丰世祖南征过年丰
敏入见谕之曰我太祖励精图治见而知者惟卿耳汝春秋高其汇次以为后法未几病
卒于燕

△王楫

王楫字巨川凤翔虢县人弱冠入终南山读书涉猎孙吴金泰和中诣阙上书给事
缙山元帅府特赐进士出身授副统军守涿鹿太祖兵
将南下楫鏖战三日兵败见执将戮之神色不变太祖问曰汝曷敢抗我师对曰臣以布
衣受恩哲捐躯报国令既僨军得死为幸帝义而释之
授都统令招集山西溃兵从大军破紫荆关取涿易保州中山军次雄州节度使孙吴坚
守不下楫入城喻以祸福吴遂以城降甲戌授宣抚使
从僧格巴图太傅明安率兵南征下古北口攻蓟云顺等州进围中都乙亥中都降楫进
言曰国家以仁义取天下不可失信于民宜禁俘掠以

慰民望时城中绝粒人相食乃许军士给粮入城转粟故土得金帛而民获粒食又议田野久荒而兵后无牛宜索军回所驱牛十取其一以给农民从之复业者众又招谕保定新城信安雄霸文安清沧诸城皆望风款附置行司于沧州镇之河闲清沧复叛帝命檄讨之复命驸马巴图分蒙古军及乂汉军三千属檄遂复河闲得军民万口巴图恶其反复欲尽诛之檄曰驱羣羊使东西者牧人也羊伺知哉歼其渠魁足矣释此辈迁之近县强者使从军弱者使为农此天所以畀我也何以杀为巴图曰汝能保此辈不复反耶曰可即移文保任之俱得全活帝命实里巴与皇太弟国王分拨诸侯王城邑谕实里巴曰汉人中若王宣抚者可任使之遂以前职兼判三司副使后又命省臣总括归附工匠之数将俾大臣分掌之帝曰旧人王宣抚可任是职遂命檄掌之时都城庙学毁于兵檄取旧枢密院地创立之春秋率诸生行释菜礼仍取旧岐阳石鼓列庑下丙戌从征西夏及秦州夏人尽撤桥梁为备军阻不得前檄夜督士卒运木石比晓桥成军乃得进戊子奉监国公主命领省中都属盗起信安结北山盗李密转掠近县檄曰都城根本之地何可无备引水环城调度经费遣男守谦率军讨诸盗平之庚寅从征关中进克凤翔请于太宗曰此臣乡邦也愿入城访求亲族得数十口以归癸巳奉命持国书使宋宋人甚礼重之遣使入贡檄前后凡五往以和议未决隐忧致疾卒宋人归其柩于燕

△王守道

王守道字仲履真定平山人金亡羣盗并起州县吏多乘乱贪暴不法民往往杀令丞及属吏宣抚司署守道为县尉众悦之因转摄令改真定主簿史天倪为河北西路都元帅镇真定既收大名泽潞怀孟城邑之未附者以为府经歴及金武仙降署为史天倪副帅守道谓天倪曰是人位居公下意每不平安能郁郁于此宜先事为备天倪不以为然未几果为所害及天泽为主帅攻仙复真定仙走保西山诸砦执守道家人以重币诱之守道不顾曰与史氏部曲昆弟征发调度以复讎卒逐仙遁去后擢庆源军节度使天泽为五路万户署守道行军参谋兼检察使中统三年天泽拜左丞相即授真定等路万户府参谋至元七年卒以子颢贵追封寿国公谥忠惠

△高宣

高宣辽阳人太宗即位诏宣为元帅统兵从睿宗攻大名宣进曰今奉命出师伐罪吊民愿勿嗜杀以称上意睿宗下令军中如宣言及城破兵不血刃民心悦服壬辰从破金兵三峯山降宣者三千余户籍以献立打捕鹰坊都

总管府统之以宣为都总管仍令世其职卒追封营国
公谥简僖子天锡事世祖潜邸为笔且齐入宿卫中统二年授以其父官四年改燕京诸
路鄂啰总管迁按察副使语丞相博啰左丞张文谦曰
农桑者衣食之本不务本则民衣食不足教化不可兴古之王政莫先于此愿留意焉丞
相以闻帝悦命立司农司以天锡为中都山北道巡行
劝农使寻迁司农少卿又迁户部侍郎进兵部尚书卒追封营国公谥庄懿子谅终兵部
尚书谅子塔斯布哈成宗命世其祖父官以居丧辞大
德元年授奉议大夫章佩监丞历官至大司农英宗居东宫塔斯布哈集前代嘉言善行
名曰承华事略【按裕宗及王恹传承华事略二十
篇乃裕宗在东宫时王恹所进者也本传云塔斯布哈进之英宗丰仿其意而行之者欤
】并画豳风图以进帝覽之奖谕曰汝能辅太子以正
朕甚嘉之命置于东宫俾太子时时观看延佑六年改集禧院使退居于家卒

△焦德裕

焦德裕字宽父雄州人父用仕金为千户守雄州北门太祖兵至州人开南门降用
犹力战遂生获之帝以其忠壮释不杀复旧官徇地山
东未尝妄杀一人以德裕贵追封恒山郡公谥正毅德裕通左氏春秋少拳勇善射从其
舅解昌军中金将武仙杀史天倪既败走其党赵贵王
显齐福等保仙故垒数侵掠太行太宗择廷臣有才辩者往招之杨惟中以德裕荐遂使
真定降齐福擒赵贵王显亡走德裕追射杀之中统四
年为闾蓬等处都元帅府参议宋夏贵围宣抚使张庭瑞于虎啸山实薪土塞水源人无
从得饮帅府檄德裕援之夜薄贵营令卒各持三炬贵
惊走追及鹅溪馘千人至元十一年从丞相巴颜南征授金行中书省事遂从下安庆至
镇江焦山寺主僧诱居民叛丞相阿珠既诛其魁欲尽
坑其徒德裕谏止之命德裕入城抚定宋平赐予有加平章阿哈玛特潜巴延杀丁家洲
降卒奏以德裕为中书参政欲假一言证成之德裕辞
不拜十四年改淮东宣慰使淮西贼保司空山檄淮东四郡守为应元师特尔格逻得其
檄即械郡守四人使承反状德裕言四人者皆新降将
天子即宠绥之有地有民盈所望矣安有他觐宁知非反闲耶尽复其官拜福建行省参
知政事二十五年卒追封恒国公谥忠肃子简余姚州
知州洁信州治中

△石天麟

石天麟字天瑞顺州人年十四入见太宗留宿卫帝命中书令耶律楚材厘正庶务
选贤能为参佐天麟在选赐名蒙古台宗王征西域以
天麟为断事官宪宗六年遣使海都拘留久之既而边将劫皇子北安王以往寓天麟所

天麟与其用事臣相亲狎因语以宗亲恩义及臣子逆顺祸福之理海都闻之悔悟遣天麟与北安王同归天麟被拘留二十八年始得选世祖大悦赏赉甚厚拜中书左丞兼断事官辞曰臣奉使无状陛下幸赦弗诛何可复叨荣宠胎庙堂羞不敢奉诏帝嘉其诚褒慰良久从之有潜丞相安图尝受海都官爵者帝怒天麟奏曰海都实宗亲偶有违言非仇敌比安图不拒绝之所以释其疑心导其臣顺也帝怒乃解天麟年七十余帝以所御金龙头仗赐之曰卿年老出入宫掖杖此可也时权臣用事凶焰熏炙人莫敢言天麟独斥其奸无所忌成宗即位加司徒武宗即位进平章政事至大二年卒追封冀国公谥忠宣子珪南台御史中丞

△李邦瑞

李邦瑞字昌国京兆临潼人幼嗜学读书通大义尝被掠逃至太原为金将小史从守阎漫山寨穆呼哩攻下诸城堡金将走邦瑞率众来归守臣惜其材具鞍马遣至行在所中书以闻岁庚寅受旨使宋至宝应不得入未几命复往谕行省李全护送宋仍拒之又使道出蕲黄宋遣贱者来迎邦瑞怒叱出之宋改命行人乃议如约而还太宗慰劳赐旃裘车骑邦瑞因奏千戈之际宗族离散乞归寻访许之甲午从诸王库春经略河南凡所历河北陕西州郡四十余城绘图以进授宣差军储使寻卒

△杨奂

杨奂字焕然干州奉天人年十一母歿哀毁如成人金末举进士不中作万年策指陈时病未及上而归教授乡里【按元一统志载奂隐居鄠县讲道授徒学者称为柴阳先生】岁癸巳金元帅崔立以汴京降奂微服北渡冠氏帅赵寿之延致之待以师礼东平严实闻奂名数问其行藏奂终不一诣戊戌太宗诏宣德税课使刘用之试诸道进士奂试东平两中赋论第一从监试官北上谒中书耶律楚材奏授河南路征收课税所长官兼廉访使将行言于楚材曰仆以书生理财赋已非所长况河南兵荒之后遗民无几烹鲜之喻正在今日急而扰之糜烂必矣愿假以岁月使得抚摩疮痍以为朝廷爱养基本万一之助楚材甚善之奂既至约束简易按行境内亲问监务月课几何难易若何有以增额言者奂责之曰剥下欺上汝欲我为之耶即减元额四之一公私便之在官十年乃请老于燕之行台以疾卒谥文宪奂不治生产家无十金之业而喜周人之急虽力不瞻犹勉强为之人有片善则委曲称奖唯恐其名不闻或小过失必尽言劝止不计其怨怒也所著有还山集六十卷大兴近鉴三卷正统书六十卷行于世

△贾居贞

贾居贞字仲明真定获鹿人【按金史贾守谦官尚书右丞次子颺卿居贞颺卿子也见姚燧所撰神道碑】弱冠为行台从事有馈黄金五十两者居贞却之世祖在潜邸知其贤召用之俾监筑上都城中统元年授中书左右司郎中从帝北征每陈说资治通鉴一日帝问郎俸几何居贞以数对帝谓其太薄敕增之居贞辞曰品秩宜然不可以臣而紊制刘秉忠奏居贞为参知政事又辞曰他日必有由郎官援例求执政者将何以处之不拜至元五年改给事中纂修国史十一年丞相巴延伐宋居贞以宣抚使议行省事既渡江下鄂汉巴延以大军东下留左丞阿尔哈雅与居贞分省镇之居贞曰江陵要地宋制阨重兵所屯闻诸将不睦迁徙之民盈城复皆疾疫刍薪乏阙杜门不敢樵采不乘隙先取迨春水涨上流为彼所乘则鄂危矣驿闻十二年命阿尔哈雅领兵取江陵居贞以佥行省事留鄂于是发仓廩赈流亡免榷商税并湖荻禁一方安之娄安邦以信阳来归遣入覲裨将陈思聪屠其家居贞以计召至数思聪罪而诛之宋幼主既降其相陈宜中等挟二王逃闽广民争应之蕲州寇起司空山属县民傅高亦起兵应居贞移檄谕以祸福其众往往涣散压以官军遂削平之高变姓名逃逸获而戮之十四年除湖北宣慰使明年迁江西行省参知政事时逮捕民闲受宋二王文帖者甚急坐系巨室三百余居贞至悉出之投其帖于水火士卒有挟兵入民家者皆痛绳以法南安李梓发作乱居贞虑将帅出兵扰民率千人亲往营于城北遣人谕之贼众闻居贞至皆散匿不复为用梓发闭妻子一室自焚死比还不戮一人十七年朝廷征日本造战舰于江南居贞将入朝奏罢其事未行以疾卒追封定国公子钧字符播由榷茶提举拜监察御史累官参知政事为政持大体不子子钧名誉皇庆元年从幸上都疾卒于家

钦定续通志卷四百五十九

●钦定续通志卷四百六十 列传二百六十

列传

元【十四】

○元十四

洪福源【俊奇 君祥 万】 郑鼎【制宜】 李进

舒穆噜安扎

洪福源

郑鼎

李进

舒穆鲁安扎

△洪福源

洪福源其先中国人唐遣才子八人往教高丽洪其一也子孙世贵于三韩名所居曰唐城父大宣以都领镇麟州福源为神骑都领因家焉岁丙子金源契丹【高丽传作契丹人金山元帅禄格等】九万余众窜入高丽夺江东城据之太祖命哈齐济扎拉将兵谢讨大宣迎降与哈齐济等共击之降其元帅赵忠壬午遣扎古雅等窥覘纳款虚实遇害辛卯太宗命札塔萨喇达讨之福源率先附之民攻未附州县进至王京高丽王■〈日育文〉遣其弟怀安公佺请降遂置王京及州县达鲁噶齐七十二人以镇之师还高丽复叛杀所置官驱国人入据江华岛福源招集北界四十余城遗民以待太宗复遣萨喇达将兵来讨中流矢卒其副将特尔格引兵还唯福源留屯癸巳高丽悉众来攻西京屠其民劫大宣以东福源遂以所招集北界之民处于辽阳沈阳之闲帝嘉其忠授管领归附高丽军民长官仍令招讨本国未附人民乙未帝命唐古巴图尔与福源进讨攻拔龙冈咸从二县凤海洞三州山城及慈州又拔金山归信昌朔州乙巳定宗命阿木哈将兵与福源共拔威州平虏城癸丑宪宗命从诸王伊勒呼攻禾山东州春州三角山杨根天龙等城拔之甲寅与扎拉台合兵攻光州安城忠州玄凤珍原甲向玉果等城又拔之【按宪宗五年乙卯纪云是岁改命扎拉台与洪福源同征高丽后此又连二岁攻拔其光州安城忠州玄凤珍原甲向玉果等城与本传记年互异】戊午高丽族子王綽入质阴欲并统本国归顺人民潜福源于帝遂见杀后赠沈阳侯谥忠宪子俊奇君祥

洪俊奇

洪君祥

洪万

洪俊奇

俊奇小字茶邱幼从军以骁勇受知世祖尝以小子呼之中统二年茶邱雪父冤世祖闵之命袭父职管领归附高丽军民总管至元六年高丽权臣林衍叛诏从国王特讷克讨平之迁江华岛所有臣民归王京复命茶邱率兵往凤州等处立屯田总管府八年林衍余党裴仲孙等立高丽王植亲属承化侯为王引三别抄军据珍岛以叛茶邱偕经略使实都进兵破其军杀承化侯其党金通精率余众走耽罗茶邱得通精之侄金永等七人俾招之通精不从留金永余尽杀之十年诏茶邱与实都率兵渡海击破耽罗获通精杀之高丽平十一年授东征右副都元

帅与都元帅呼敦【经世大典及日本传俱作实都】等领师二万渡海征日本拔对马一岐宜蛮等岛【按日本传云时官军不整又矢尽唯掠四境而归与本传异】十七年进征东行省右丞十八年与实都将舟师四万由高丽金州合浦以进再征日本风坏舟而还二十四年纳颜叛车驾亲征命率高丽女真汉军扈从猝遇纳颜骑兵万余时茶邱兵不满三千众有惧色茶邱夜令军中多裂裳帛为旗帜断马尾为旄掩映林木张设疑兵纳颜大惊以为官兵大至遂降凯还授辽阳行省右丞二十七年以疾辞时叛王哈坦等窜入高丽侵挠其国西京距辽阳二千里皆骚动中书省特起茶邱镇辽左二十八年卒子万

洪君祥

君祥小字双叔【巴延传作双寿】年十四随兄茶邱见世祖于上京帝悦令选师儒诲之至元三年籍高丽民三百人为兵令君祥统之从巴延等军筑万寿山复从开通州运河帝尝阅江南海东舆地图欲召知者询其险易巴延以君祥应奏对详明帝悦谓巴延曰是儿远大器也六年林衍叛从特讷克征之十年从元帅布尔罕袭淮东之阳湖十一年巴延伐宋命右卫替挥使图们岱率轻锐攻淮安以牵制之君祥以蒙古汉军都镇抚从行巴延既渡江图们岱还军萧县时君祥奉使巴延军中宋黄州制置使陈奕降其子岩知涟水军巴延遗三十骑往招之因令君祥入奏帝曰卿可急还陈知府降即偕来也及与俱入朝宴劳甚厚从元帅博啰罕攻清河拔之巴延师次镇江【按巴延传云军至崇德宜中使都统洪模持书来见本传作师次慎江互异】谍报有宋洪都统者为都督府将巴延谓君祥曰汝同姓可往招致也洪都统欣然来见君祥厚遇之师次临平洪都统来报曰宋丞相陈宜中殿帅张世杰皆已逃去惟三宫未行宜早定计以活生民巴延令君祥偕洪都统护宋三宫北还宋平累迁同佥枢密院事二十四年纳颜叛从世祖亲征之每驻驛君祥辄以兵车外环为营卫布置严密帝嘉之凯还类次车驾起居为东征录二十八年加集贤大学士仍同佥枢密院事议者欲自东南海口辛桥开河合滦河运粮至上都春旨与中书右丞阿里相其利害还极言不便罢之成宗即位诏裁减久任官知枢密院安巴等奏君祥在枢密十六年最为久者帝曰君祥始终一心可勿迁也大德三年奉使江浙闲问民疾苦使还退居昌平皇华山绝口不论时事者五年九年擢司农俄拜中书右丞【按成宗纪宰相年表俱作大德七年】改浙江行省右丞武宗即位进平章政事卒子迈同知开元总管府事

洪万

万小字重喜至元十八年袭为高丽军民总管二十四年纳颜叛率兵至萨里图噜之地同都万户实喇特穆尔与纳颜将黄海战大败之又从世祖与塔布台战败之奉旨留蒙古女真汉军镇哈喇河复从御史大夫伊苏特穆尔至扎穆尔图与金嘉努战败之追至纳古尔江遂平金嘉努塔布台等师还哈坦巴尔噶齐再叛重喜从诸王阿雅噶齐平章达春【按达春传作辽都东道宣慰使】万户实喇特穆尔征之次玛古布拉克时诸王托欢四千余人与其赏战稍却重喜率骑兵援之大破其众从诸王与叛王兵战于乌珠站又战于黑龙江塔玛噶处皆败之二十五年从伊苏特穆尔出师至果勒河与哈坦多罗干战获功又从征茂巴尔与辉图多罗干战克之二十八年从平章色彻肯至高丽青州与哈坦战屡败之累功授辽阳行省右丞至大二年谪漳州行玉杭遇赦明年卒子滋袭爵

△郑鼎

郑鼎泽州阳城人幼孤能自立既长勇力过人善骑射初为泽潞辽沁千户岁甲午从塔海干布征蜀攻二里散关屡立战功还屯秦中宋将余侍郎烧绝栈道以兵围兴元鼎率众修复之破宋兵解兴元之围庚戌从宪宗征大理国自六盘山经临洮下西蕃诸城抵雪山山径盘屈舍骑徒步尝背负宪宗以行敌据扼险要鼎奋身力战敌败北至金沙河波涛汹涌帝临水旁危石立马观之鼎谏曰此非圣躬所宜亲扶下马帝嘉之俄围大理昼夜急攻城陷擒其主大理平师还命鼎居后道经吐蕃全军而归辛亥入朝帝问以时务鼎敷对详明赐名伊克巴图己未从世祖南伐攻大胜关破之继破台山寨乘胜独进前陷泥淖遇伏兵突出葭苇问坤奋击连杀三人余众遁去帝驻蹕江浒鼎首夺南岸众军毕渡进围鄂州别攻兴国军遇宋兵五千力战破之擒其将桑太尉斩之中统元年以功迁平阳太原两路万户阿勒达尔瑋塔哈之乱鼎率本道兵分讨之二年统征西等军戍雁门关隘至元三年迁平阳路总管是岁大旱鼎下车而雨平阳地狭人众常乏食鼎乃导汾水溉民田千余顷开潞河鹈黄岭道以来上党之粟修学校励风俗建横涧故桥以便行旅民德之七年改金书西蜀行省事将兵巡东川过嘉定遇蜀兵与战江中擒其将李越悉获战船十四年授湖北道宣慰使镇鄂州蕲黄二州叛鼎将兵讨之战于樊口舟覆溺死赠中书右丞谥忠毅后追封潞国公谥忠肃子制宜

郑制宜

郑制宜

制宜小字纳怀性聪敏庄重有器局通习国语至元十四年袭太原平阳万户仍戍鄂州摄府事十九年朝廷将征日本造楼船何家洲洲地狭众欲徙旁居民制宜不从改授宽地居民德之有盗伏近郊晨暮剽劫流言将入城俄有数男子自城外至顾盼异常制宜命吏缚入狱问之无验行省将释之不从明日再出城东遇一人乘白马貌服殊异制宜叱下讯之乃与前数男子同为盗者遂正其罪一郡帖然二十四年扈驾东征纳颜请赴敌自效命从伊噜勒诺延别为一军以战功授枢密院判官二十八年迁湖广行省参知政事陞辞帝曰汝父死王事赏未汝及近者约苏穆尔伏诛已籍没其财产人畜汝可择其佳者取之制宜对曰彼以赃败臣复取之宁无污乎帝贤其有守三十年除湖广行枢密副使湖南地阔远羣寇依险出没昭贺二州及庐陵境民常被害制宜率偏师徇二州道经庐陵永新获首贼及其赏皆杀之茶乡谭计龙者聚恶少年匿兵器为奸既捕获其家纳赂以缓狱事制宜悉以劳军斩计龙于市自是湖以南无复盗贼元贞元年有制行枢密院添置副使一员与制宜联署制宜以员非常设先任者富罢入朝授大都留守领少府监兼武卫亲军都指挥使大德十年卒追封泽国公谥忠宣

△李进

李进保定曲阳人幼隶军籍初从万户张柔屯■〈木巴〉之三叉口筑堡千龙冈会淮水泛涨宋舟师猝至进率兵十五人载一舟转鬪十余里夺一巨舰以功授百户戊午宪宗西征时丞相史天泽经略河南选诸道兵之骁勇者从命进为总把由陈仓入兴元度米仓关其地荒塞不通进伐木开道七百余里至定远七星关其关上下皆筑连堡宋以五百人守之巴渠江水还堡东流天泽命进往关下说降之不从进潜视闲道归白天泽曰彼可取也夜二鼓进率勇士七十人掩其不备攻之脱门枢而人者二十人守门者觉拔刀拒之进被伤悬门俄闭诸军不得入进与二十人力战杀伤三十人兵走上堡进乃毁悬门纳诸军宋兵不能敌俱散走遂得其堡守之关路始通诸军尽度己未天泽兵至行在所围合州钓鱼山寨宋由嘉陵江以舟师来援泊黑石峡东北军船泊峡西帝立马东山拥兵二万夹江而阵天泽下令于众曰听吾鼓视吾旗毋少息也顷之闻鼓声视其旗东指诸军遂鼓噪而入宋前锋溃战舰继乱顺流纵击死者不可胜计帝顾谓诸将曰白旗下服红半臂突而前者谁也天泽以进对赏锦衣名马又战浮图关前后凡五战皆以功授上赏至元十二年从略地湖北湖南宋平以兵马使分兵屯鄂州十九年移屯西域巴实伯里二十三年海都及都勒斡等叛领军至洪水山进与力战众寡不

敌军溃被擒从玉吹巴尔遁还二十六年授左翼屯田万户元贞元年卒子雯袭授武德将军左翼屯田万户

△舒穆鲁安扎

舒穆鲁安扎契丹人世居太原父大嘉努率汉军五百人归太祖岁戊午安扎代领其军从都元帅耨埒攻成都时宋兵聚于虚泉安扎以所部兵与战大败之杀其将韩都统又从都元帅阿敦攻泸州以战舰七十行至马湖江宋军先以五百艘控扼江渡安扎击败之时宋兵于沿江撤桥据守安扎相地形造浮桥师至无留行宋欲挠其役兵出辄败自马湖以达合江涪江清江凡立浮桥二十余所论功居最己未宋以巨舰载甲士数万屯清河浮桥相距七十日水暴涨桥坏西岸军多漂溺安扎军东岸急彻浮桥聚舟岸下士卒得不死又援出别部军五百余人宪宗遣使慰谕赏赐甚厚叙州守将横截江津军不得渡安扎聚军中牛皮作浑脱及皮船乘之与战破宋军夺其渡口作浮桥以济师中统三年授河中府船桥水手军总管至元六年行省伊苏岱尔领兵趋泸州遣安扎运器械粮食由水道进宋兵复扼马湖江安扎击败之生获四十人夺其船五艘复以水军一千运粮于眉简二州军中赖之九年从征建都蛮岁余不下安扎先登其城力战遂降之军还道病卒子布拉代领其军从攻嘉定以巨舰七十艘据其上流于府江红岸滩造浮桥以渡十二年嘉定降宋将鲜于都统率众遁布拉追至大佛滩尽毙之行院汪良臣【原文作汪特格按特格汪德臣赐名也德臣卒于宪宗己未年本传事迹与汪良臣传相符】攻取紫云泸叙等城布拉功最多及诸军围重庆布拉先以战舰三百艘绝其走路十三年领随翼军五百人会招讨伊勒哈竖栅于白水江岸以为备布拉乘夜袭宋军直抵重庆城下攻千斯门宋军惊溃涪州守将率舟师来援布拉击败之从攻泸州勒所步兵攻神臂门蚁附以登明日复战破之十五年复攻重庆太平门布拉先登宋都统赵安以城降总管黄亮乘舟遁布拉追擒之十六年命袭父职为船桥军马总管十八年大小盘诸峒蛮叛命诸翼蒙古汉军戍施州既而蛮酋悉平遂进保宁等处万户

钦定续通志卷四百六十

●钦定续通志卷四百六十一 列传二百六十一

列传

元【十五】

○元十五

董文炳【士选】

张弘范【弘略】

- 4626 -

董文炳

张弘范

△董文炳

董文炳字彦明俊之长子也幼警敏善记诵岁乙未以父任为藁城令同列皆父时人轻文炳年少吏亦不之惮文炳明于听断未几同列束手下之县贫重以旱蝗而征敛日暴文炳出私谷数千石与县县得以宽民前令因军兴乏手称贷于人以民蚕麦偿之文炳曰民困矣乃以田庐计直与贷家朝廷初料民令敢隐实者诛籍其家文炳使民聚口而居少为户数众以为不可文炳曰为民获罪吾所甘心由是赋敛得大减旁县民有讼不得直者皆诣文炳求决时府索无厌文炳抑不予府欲中害之即弃官去癸丑世祖征南诏文炳率四十六骑往人马路死殆尽至吐番止两人能从乏食日行不能二三十里然志益厉期必至军会使者遇之还言其状世祖命其弟文忠解尚厩五马载糗粮迎文炳既至世祖壮其忠由是日亲贵用事己未从伐宋至淮西台山寨命文炳往取之文炳驰至寨下谕以祸福守者惧遂降师次阳罗堡宋兵筑堡于岸陈船江中军容甚盛文炳请于世祖曰长江天险宋所恃以为国不夺其气不可即与敢死士数百当其前率弟文用文忠载艨艟鼓棹疾趋锋既交文炳麾众趋岸搏之宋师大败世祖方驻香炉峯闻战胜扶鞍起立竖鞭仰指曰天也且命他师毋解甲明日将围城既渡江会宪宗崩班师中统元年命文炳宣慰燕南诸道还奏曰人久弛纵一旦遽束以法不可宜赦天下与之更始世祖从之反侧者遂安二年擢山东东路宣抚使遥授侍卫亲军都指挥使三年李璫反会诸军围之文炳抵城下呼璫将田都帅降众遂乱璫兵有沂涟【原传作浙涟误今依续通鉴改正】两军二万余人皆善战主将怒其与贼配诸军使阴杀之文炳当杀二千人言于主将曰彼为璫所胁耳杀降恐非圣天子之意主将从之璫伏诛山东犹未靖乃以文炳为经略使率亲军以行出金银符五十有功者听与之文炳至益都留兵于外从数骑入居府不设警宁召璫故将吏立庭下谕之所部大悦山东以安至元三年授邓州光化行军万户河南等路统军副使造战舰五百艘习水战预谋取宋方略帝尝召文炳密谋欲大发河北民丁文炳曰河南密迩宋境人习江淮地利宜使河北耕以供军河南战以辟地俟宋平后则河北长隶兵籍河南削籍为民如是为便又请颁将校俸钱帝皆从之七年改山东路统军副使治沂州沂与宋接境镇命仰内郡饷运有诏和余本部文炳命收州县所移文众谏以违诏文炳曰但止之乃遣使入奏略曰敌人接壤知吾虚实一不可边民借

顿甚劳二不可困吾民以惧来者三不可帝大悟罢之
九年迁枢密院判官行院事于淮西筑正阳两城夹淮相望以缀襄阳及捣宋腹心十年
拜参知政事夏会霖雨水涨涿淮西制置使夏贵帅舟
师十万来攻文炳登城御之一夕贵去复来飞矢贯文炳左臂着胁文炳拔矢张弓发四
十余矢遂闷绝几殆明日水入外郭文炳麾士卒却避
贵乘之压军而陈文炳病创甚子士选请代战文炳壮而遣之复自起束创手剑督战士
选以戈击贵将获之以献贵遂去不敢复来十一年会
巴延于安庆安庆守将范文虎以城降文炳请前行巴延许之宋都督贾似道弃师走次
当涂文炳复言于巴延曰采石当江之南和州对峙不
取必有后顾遂进攻之降知州事王喜时扬州真州坚守不下常州苏州既降复叛张世
杰等陈大舰万艘碇焦山下文炳身犯之载士选别船
从子士表请从许之文炳乘轮船建大将旗鼓士选士表船翼之大呼突陈诸将继续进飞
矢蔽日战酣短兵相接宋兵亦殊死战横尸委仗江水
为之不流自寅自午宋师大败世杰走文炳追及于夹滩世杰收溃卒复战又破之遂东
入于海宋力自此遂穷诸军复分三道而进文炳居左
由江并海趋临安江阴军金判李世修以城来附所过民不知兵凡获生口悉纵遣之张
瑄有众数千负海为横文炳命士选往降之得海舶五
百十三年师次盐官招之不下将佐请屠之文炳遣人入城谕意县降遂会巴延于临安
城北张世杰欲以其主逃之海文炳绕出城南戍浙江
亭世杰计不行乃窃宋主弟吉王昷广王昺南走宋主遂降巴延命文炳入城罢宋官府
散诸军封库藏收礼乐器及诸图籍文炳取宋主诸玺
符上于巴延巴延以宋主入觐有诏留事一委文炳时翰林学士李盘奉诏招宋士至临
安文炳谓之曰国可灭史不可没宋十六主有天下三
百余年其太史所记具在史馆宜悉收以备典礼乃得宋史及诸注记归之国史院宋宗
室福王与芮赴京师徧以重宝致诸贵人文炳独却不
受及官录与芮家具籍受宝者惟文炳无名巴延入朝奉曰臣等奉天威平宋宋既已平
怀徕安集之功董文炳居多帝曰文炳忠勤朕所素知
乃拜中书左丞时张世杰奉吉王昷走台州闽中亦为宋守敕文炳进兵所过禁士马无
践田麦于是南人感之不忍以兵相向次台州世杰遁
尽纵诸将所俘州民得免者数万口由温州逾岭而南闽人扶老来迎漳泉建宁邵武诸
郡皆送款来附十四年帝在上都适北边有警将亲征
急召文炳文炳至自临安入见请事北边帝曰朕召卿意不在是竖子盗兵朕自抚定山
以南国之根本也尽以托卿卒有不虞便宜处置以闻
中书省枢密院事无大小咨卿而行文炳避谢不许因奏曰臣在临安时阿勒巴奉诏检

括宋诸藏货宝迫索没匿人实苦之宋人未洽吾德遽苦之以财恐非安怀之道即诏罢之还大都更日至中书枢密不署中书案平章政事阿哈玛特方恃宠用事生杀任情惟畏文炳尝执笔请曰相公官为左丞当署省案请至再终不肯或问故文炳曰主上所付托者在根本之重非文移之细且吾少徇则济奸不徇则致谗谗行则身危深失付托本意吾是以预其大政而略其细务也十五年有疾奏请解机务召赴上郡命金书枢密院事未几卒 【按元明善董氏家传云文炳死后十余年奸臣僧格败事帝召文炳子士选入曰汝父忠勤不欺成吾大事汝不必远学学汝父足矣又曰曹彬不杀降一事较之汝父未足为多本传及士选传俱不载附识于此】 赠平章政事谥忠献子士元士选士元见忠义传

董士选

董士选

士选字舜卿文炳次子也幼从文炳居兵闲文炳总师与宋兵战焦山士选战甚力大败之追至海而还及降张瑄等奏功为管军总管宋平诏置待卫亲军诸卫以士选为前卫指挥使未几以职让其弟士秀帝命士秀将前卫而以士选同金行院事于湖广宗王纳颜叛帝亲征召士选至行在所与李庭同御之飞矢及乘舆士选等出步卒横击之败其众帝称善寻迁中书左丞镇浙西听辟举僚属至部察病民事悉以帝意除之有聚敛臣为奸利事发得罪且死诈言所遣舶商海外未至请留以待之士选曰海商至则捕录之不系斯人之存亡也遂竟其罪成宗即位拜江西行省左丞赣州盗刘六十伪立名号 【按经世大典云刘六十名季自号刘王】 聚众万余朝廷遣兵讨之主将观望退缩守吏又因以扰民贼势益盛士选请往率掾史二人至赣境捕官吏害民者治之进至兴国县去贼巢不百里命将校分兵守地察激乱之人悉寘于法复诛奸民之为囊橐者于是民争出自効不数日遂擒贼魁散余众归农军中获贼所为文书旁近郡县富人姓名具在悉焚之民心益安遣使上于朝中书问其使曰董公上功簿邪使者曰某且行左丞授之言曰朝廷若以军功为问但言镇抚无状得免罪幸甚何功之可言因出其书但请黜赃吏数人不言破贼事廷议叹其不伐拜江南行御史台中丞俄拜御史中丞时丞相谔勒哲用刘深言出师征八日媳妇国远冒烟瘴及至士卒死者十已七八驱民转饷溪谷闲民死者亦数十万中外骚然而谔勒哲说帝江南之地尽世祖所取陛下不与此役则无功可见于后世帝入其言用兵意甚坚无敢谏者士选独言今刘深出师以有用之民而取无用

之地就令当取亦必遣使谕之谕之不从然后聚粮选兵视时而动岂得轻用一人言致百万生灵于死地帝色变曰事已成卿勿复言士选曰以言受罪臣职所当他日以不言罪臣臣死何益帝麾之出未数月帝闻师败绩慨然曰董士选之言验矣悟愧之始为罢兵诛刘深等久之迁汴梁行省平章政事又迁陕西士选平生以忠义自许号廉介自门生部曲无敢通馈献者尤敬礼贤士在江西以属掾元明善为宾友既又得吴澄而帅之延虞汲于家塾教其子及迁南行台又招汲子集与范梈等数人皆以文学显子守忠云南行省参知政事守憲侍正府判官守思知威州

△张弘范

张弘范字仲畴易州定兴人柔第九子也年二十时兄顺天路总管弘略【按虞集庙堂碑云顺天者故保州以柔故升府后改今名曰保定】上计寿阳行都留弘范摄府事吏民服其明决蒙古军所过肆暴弘范杖遣之入其境无敢犯者中统三年授行军总管从亲王讨李璘于济南柔戒之曰汝围城勿避险地汝无怠心兵必致死主者虑其险苟有来犯必赴救可因以立功弘范营城西璘出军突诸将营独不向弘范弘范曰璘必以奇兵来袭遂筑长垒内伏甲而外为壕开东门以待之夜令浚壕益深广璘不知也明日果拥飞桥来攻未及岸军陷壕中得跨壕而上者突入垒门遇伏皆死至元元年授顺天路管民总管俄移守大名岁大水漂没庐舍租税无从出弘范辄免之朝廷罪其专擅弘范奏曰今岁水潦不收倘必责民输仓库虽实而民死亡殆尽明年租将安出曷若活其民使不致逃亡则岁有恒数矣帝嘉其知体勿问六年括诸道兵围宋襄阳授益都淄莱等路行军万户戍鹿门堡以断宋饷道且绝郢救兵弘范建言曰国家规取襄阳为淹久计者所以重人命而欲其自毙也然其境南接江陵归峡商贩行旅络绎不绝宁有自毙之时乎若城万山以断其西栅杈子滩以绝其东则庶几速毙之道也帅府奏用其言移弘范兵戍万山既城与将士较射出东门宋师奄至众欲退弘范曰吾与诸君在此何事敌至将不战乎即擐甲上马遣偏将李庭当其前亲率二百骑为长阵令曰闻吾鼓则进宋军步骑相闲突阵弘范军不动再进再却弘范曰彼气衰矣鼓之前后奋击宋师奔溃九年攻樊城流矢中其肘裹疮见主师曰襄樊相为唇齿故不可下若截江道断其援兵水陆夹攻樊必破矣樊破则襄阳无所恃从之明日出锐卒先登拔之十一年丞相巴延伐宋弘范率左部军循汉江东略郢西南取武矶堡渡江宋相贾似道督兵阻芜湖殿帅孙虎臣据丁家洲弘范转战而

前诸军继之宋师溃长驱至建康 【按苏天爵名臣事略云巴延至建康大会诸将出库金行赏弘范后至巴延曰尔何敢后弘范徐进曰临阵未尝后受赏耻居先何为不可巴延为之俛首史传不载谨附识】 十二年五月帝遣使谕巴延驻兵弘范进曰圣恩待士卒诚厚然缓急之宜非可遥度今敌已奋气正当乘破竹之势取之岂宜迂缓使敌得计耶巴延然之驰诣阙面论形势得旨进师十二年次瓜洲宋都统姜才劲兵二万出扬子桥弘范佐都元帅阿珠与战败之宋将张世杰孙虎臣等率水军于无山决战弘范以一军从旁横击至鬪山东夺战舰八十艘俘馘无数上其功改亳州万户左丞董文炳由海道会巴延次临安近郊入城取宋主降表来上师还授江东道宣慰使十五年宋张世杰立广王昺于海上闽广响应帝命弘范往平之授蒙古汉军都元帅陛辞赐锦衣玉带不受以剑甲为请帝出武库剑甲听其自择将行荐李恒为副至扬州选将校水陆二万分道南征以弟弘正为先锋戒之曰迂汝骁勇非私汝也军法重我不敢以私挠公勉之弘正所向克捷进攻三江寨寨据险乘高兵皆持满以待弘范令下马治朝食若将持久者持满者疑不敢动而他寨不虞也忽麾军连攻他寨回捣三江尽拔之至漳州军其东门命别将攻西南乃乘虚破其北门拔之又拔鲍浦寨濒海郡邑皆望风降附获宋丞相文天祥于五坡岭使之拜不屈弘范义之待以宾礼送至京师获宋礼部侍郎邓光荐命子珪师事焉十六年由潮阳港发舶入海至甲子门获宋斥堠将知广王所在进次崖山宋军千余艘碇海中建楼橹其上隐然坚壁也弘范引舟师赴之崖山东西对峙其北水浅舟胶非候潮不可进乃由山之东转南入大洋始得逼宋舟 【按经世大典云宋人以乌蛋船千余舩大舟之北弘范夜操小艇带劲兵潜取之船中皆海民不习战攻杀靡遗即取乌蛋船载草乘风纵火宋预以泥涂舰悬水筒无数人船至钩而沃之竟莫能毁乃与李恒画图定计本传从略附录于此】 别出奇兵断其汲路烧其宫室世杰有甥在弘范军中三使招之不应李恒自广州至授以战舰使守北面将战或请先用炮弘范曰火起则舟散不如战也四分其军弘范自将一军与宋军相去里许下令曰宋舟潮至必遁急攻之勿令得去闻吾乐作乃战先麾北军乘潮而战不克恒等顺潮而退乐作宋将以为且宴少懈弘范舟师突犯其前众继之豫构战楼于舟尾以布幙障之俾将士负盾而伏令之曰闻金声则起飞矢集如猬伏盾者不动舟将接鸣金撒幙弓弩火石交发顷刻并破七舟宋师大溃宋臣陆秀夫抱其主昺赴水死世杰走交趾风坏舟死海陵港余将吏皆降岭海悉平是年卒赠平章政事谥

武略至大四年加赠齐国公改谥忠武延佑六年加封淮阳王谥献武子珪自有传兄弘略

张弘略

张弘略

弘略字仲杰柔第八子也尝从其父镇■〈木巳〉徙亳权顺天万户从征四川宪宗以其幼赐锦衣还镇李璿反宋夏贵乘虚北夺亳滕徐宿邳沧滨七州新蔡符离蕲利津四县弘略率战船遏之涡口贵退保蕲更发亳军攻之宋兵焚城宵遁尽复所陷州县璿诛追问当时与璿通书者独弘略书皆劝以忠义事得释俾解兵柄宿卫京师及城大都佐父柔为筑城总督城成授淮东道宣慰使寻移江西饶州盗起犯都昌弘略谓饶非吾属然与南康止隔一湖此寇不灭则吾境必有相煽起者遗兵直捣其巢生缚贼首磔于市今日不操兵者皆为平民一无所问顷之以疾归亳有谗贵臣子在江南买田宅乐而忘归者辞连弘略或曰公未尝在江南宜入见自辨弘略曰辨之则言者获谴矣吾宁称疾家居后见帝于龙虎台命为河南参政卒封蔡国公谥忠毅

钦定续通志卷四百六十一

●钦定续通志卷四百六十二 列传二百六十二

列传

元 【十六】

○元十六

刘秉忠【秉恕】 张文谦 郝经

刘秉忠

张文谦

郝经

△刘秉忠

刘秉忠字仲晦初名侃因从释氏又名子聪其先瑞州人曾祖仕金为邢州节度副使因家焉庚辰岁穆呼哩取邢州立都元帅府以其父润为都统厯距鹿内邱两县提领秉忠年十七补府令史尝投笔叹曰吾家累世衣冠乃汨没为刀笔吏乎丈夫不遇于世当隐居以求志耳即弃世隐武安山中久之天宁禅师招致为僧使掌书记后游云中会海云禅师被召邀与俱行入见应对称旨屡承顾问秉忠于书无所不读尤邃于易乃邵氏经世书至天文地理律历三式【按三式雷公大乙六王也见唐六典】六王遁甲之属无不精通论天下事如指诸掌世祖

大爱之遂留藩邸父丧服除 【按王盘神道碑云初丁母忧毁瘠朋立衣一敝裘三岁不易及父卒身虽从天竺之教而服食贬损容倪哀戚与循典礼执通丧者无少异】 奉旨还秋林上书数千言其略曰天下之大非一人之可及万事之细非一心之可察当择开国功臣子孙分为京府州郡监守督责旧官以遵王法仍差按察官守治者升否者黜天下不劳而定也天下户过百万自呼图克诺延断事之后差徭甚大加以军马调发使臣烦剧官吏乞取民不能当是以逃窜宜比旧减半或三分去一就见在之民以定差税招逃者复业再行定奋官无定次清洁者无以迁污滥者无以降可比附古例定百官爵禄仪仗使家足身贵有犯于民设条定罪威福者君之权奉命者臣乙县今百官自行威福进退生杀惟意之从宜加禁治天下之民未闻教化见在囚人宜从赦免明施教令使之知畏则犯者自少其教令既施罪不至死者皆提察灰后决死犯刑者覆奏然后听断不致刑及无辜天子以天下为家兆民为子国不足取于民民不足取于国相须如鱼水有国家者置府库设仓廩亦为助民民营产业辟田野亦为资国用也今宜核算官民欠负若实为应当差发所借宜依前旨一本一利官司归还凡赔偿无名及虚契所负者并免追取纳粮就远仓有一废十者宜从近仓以输为便当驿路州城饮食祇待偏重宜计所费以准差发关市津梁正税十五分取一宜从旧制禁横征以利百姓仓库加耗甚重宜令权量度均为一法使锱铢圭撮尺寸皆平以存信去诈珍贝金银乏所出淘砂炼石实不易为一旦以缠丝缕节皮革涂木石妆器使取一时之华丽废为尘而无济甚可惜也宜从禁治除帝胄功臣大官以下章服有制外无职之人不得僭越今地广民微赋繁敛重民不聊生何力耕耨宜差劝农官二员率天下百姓务农桑营产业实国之大益古者庠序学校未尝废今郡县虽有学并非官置宜修建三学设教授开选举取士以经义为上词赋策论次之更宜择开国功臣子孙亦令入学选达才任用之天下莫大于朝省亲民莫近于县宰虽朝省有法县宰宜择县辛正民自安矣关西河南地广土沃以兵马之所出入治而未丰宜设官招抚不数年民归土关军资攸济实国之大事伊喇中丞拘榷盐铁诸产商贾酒醋货殖诸事以定宣课已不为轻鄂罗哈玛尔奏请于旧额加倍榷之科取民闲民无所措手足宜从旧例办榷更或减轻毋从献利之徒削民害国鰥寡孤独废疾者宜设孤老院给衣粮以为养使臣到州郡宜设馆不得于官衙民家安下孔子为百王师立万世法今庙堂虽废存者尚多宜令州郡祭祀释奠如旧仪近代礼乐器具靡散宜令刷会征太常旧人教引后学使器

备人存渐以修之实太平之基本化之本令天下广远虽青吉斯皇帝威福之致亦天地神明所佑也宜访名儒循旧礼奠祭上下神祇和天地之气顺时序之行使德极幽明天下赖一人之庆见行辽历日月交食颇差闻司天台改成新历未见施行宜因新君即位颁历改元令京府州郡置更漏使民知时国灭史存古之常道宜撰修金史令一代君臣事迹不坠于后世国家广大如天万中取一以养天下名士宿儒之无营运产业者使不致困穷或有营运产业者止输差税其余大小杂泛并行蠲免育才励人大也明君用人如大匠用材随其巨细长短以施规矩绳墨小知大受各当尽其才而用之成功之道也私欲妄说常人有之蔽一心人君有之蔽天下宜选左右谏臣使讽谕于未形忖度于至密也君子之心一于理义小人之心一于利欲今言利者众非图利国实欲自利也宜将国中人民必用场治付各路课税所以定榷办其余言利者并行罢去古者治世均民产业今穷乏者益损富盛者增加宜量为节限笞捶之制宜会古酌今使无过越禁私置牢狱及鞭背之刑以彰爱生之德立朝省以统百官分有司以御众事以至京府州县亲民之职无不备纪纲正于上法度行于下故天下不劳而治也今新君即位之初可立朝省以为政本其余百官不在员多惟在得入焉耳书上世祖嘉纳焉又言邢州旧万余户兵兴以来不满数百凋坏日甚得良牧守如真定张耕洺水刘肃者治之犹可完复朝廷以耕为邢州安抚使肃为副使由是流民复业升邢为顺德府征大理云南及伐宋每以赞天地之好生王者之神武不杀故克城之日未尝妄戮一人中统元年世祖即位问以治天下之大经养民之良法秉忠采祖宗旧典参以古制之宜于今者条例以闻于是下诏建元纪岁中立书省宣抚司朝廷旧臣山林遗逸之士咸见录用文物粲然一新秉忠虽居左右不改旧服时人称为聪书记至元元年翰林学士承旨不鄂奏言秉忠侍藩邸积有岁年忠勤茂着宜被褒崇圣明御极万物惟新而秉忠犹仍其野服散号深所未安帝覽奏即日拜光禄大夫位太保参预中书省事诏以学士窦默女妻之赐第奉先坊秉忠既受命以天下为己任事无巨细凡有关于国家大体者知无不言燕闲顾问辄推荐人物凡所甄拔后悉为名臣初帝命秉忠相地于桓州东泝水北建城郭于龙冈三年而毕名曰开平继升为上都而以燕为中都四年又命秉忠筑中都城始建宗庙宫室八年奏建国号曰大元而以中都为大都他如颁章服举朝仪给俸禄定官制皆自秉中发之 【按徐世隆祭文云扈从王师柔服哀牢公于是时蜀之韦皋堂上出奇鄂江飞渡公于是时晋之杜预是秉忠尚有战功也史氏

特叙其创制之功故不载】 为一代成宪十一年扈从至上都无疾而卒帝惊悼谓羣臣曰秉忠事朕三十余年小心慎密不避艰险言无隐情其阴阳数术之精占事知来若合符契惟朕知之他人莫得闻也遣礼部侍郎赵秉温护其丧追封赵国公谥文贞成宗时改谥文正仁宗时又进封常山王秉忠自幼好学至老不衰虽位极人臣而齐居蔬食澹然不异平昔每以吟咏自适其诗萧散闲淡类其为人有文集十卷无子以弟秉恕子兰璋后

刘秉恕

刘秉恕

秉恕字长卿好读书年弱冠受易于刘肃遂明理学方秉忠事世祖以荐士自任嫌于私亲独不及秉恕左右以闻召见遂同侍潜邸世祖尝赐秉忠白金千两辞曰臣山野鄙人侥幸遭际服器悉出尚方金无所用世祖曰卿独无亲故遗之邪乃受而散之以二百两与秉恕秉恕曰兄勤劳有年宜蒙兹赏秉恕无功可冒恩乎终不受擢礼部侍郎历彰德怀孟淄莱顺天太原五路总管所至皆有惠政召除礼部尚书复出为湖州平阳两路总管卒于官

△张文谦

张文谦字仲卿邢州沙河人幼聪敏善记诵与刘秉忠同学世祖居潜邸受邢州分地秉忠荐文谦可用召见命掌王府书记刑州当要冲初分为勋臣食邑岁遣人监领征求百出民弗堪命文谦与秉忠言于世祖曰今民生困弊莫刑为甚盍择人往治之责其成效使四方取法则天下均受赐矣乃选近侍托克托尚书刘肃侍郎李简往三人至邢协心为治不期月流亡复归户增十倍由是世祖益重儒士任之以政皆自文谦发之世祖征大理国相高泰祥【原误作国主高祥今据大理传改】拒命杀信使遁去世祖怒将屠其城文谦与秉忠姚枢谏曰杀使拒命非民之罪请宥之乃止己未世祖帅师伐宋文谦与秉忠言王者之师有征无战当一视同仁不可嗜杀世祖曰期与卿等守此言既入境分命诸将毋妄杀毋焚人室庐所获生口悉纵之世祖即位立中书省首命王文统为平章政事文谦为左丞建立纲纪讲明利病以安国便民为务诏令一出天下有太平之望而文统素忌克谏谋之际屡相可否积不能平文谦遂求出诏以本官行大名等路宣抚司事至官蠲常赋什之四商酒税什之一二年来朝复留居政府会阿哈玛特领左右部总司财用欲专奏请不关白中书诏廷臣议之文谦曰分制财用古有是理中书不预无是理也若中书弗问天子将亲莅之乎帝曰仲卿言是也至元元年复以中

书左丞行省西夏中兴等路羌俗素鄙野事无统纪文
谦得蜀士陷于俘掠者五六人理而出之使习吏事旬月闲簿书有品式子弟亦知读书
俗为一变浚唐来汉延二渠溉田十数万顷人蒙其利
三年还朝诸势家言有户数千当役属为私奴者议久不决文谦谓以乙未岁户帐为断
未占籍者归之势家其余良民无为奴之理议遂定守
以为法五年淄州妖人胡玉惑众事觉逮捕百余人文谦曰愚民无知为所诬诱诛首恶
足矣帝即命文谦往决其狱惟三人坐弃市余皆释之
七年拜大司农卿奏立诸道劝农司巡行劝课请开籍田行祭先农先蚕等礼复兴实默
请立国子学选贵胄子弟教育之时阿哈玛特议拘民
闲铁官铸农器高其价以配民创立行户部于东平大名以造钞及诸路转运司干政害
民文谦悉于帝前极论罢之十三年迁御史中丞阿哈
玛特虑宪台发其奸乃奏罢诸道按察司以撼之文谦奏复其旧然自知为奸臣所忌力
求去会世祖以大明历岁久寢差命许衡等造新历乃
授文谦昭文馆大学士领太史院事十九年拜枢密副使岁余卒文谦蚤从刘秉忠洞究
术数晚交许衡尤粹于义理之学为人刚明简重数忤
权幸是非得丧一不以经意家惟藏书数万卷尤以引荐人材为己任封魏国公谥忠宣
子晏 【按虞集张氏新莹记云中统初政术与时高
下独成均之教彝伦大农之兴稼穡历象之授人时凡出文谦所为皆隐然有不可变者
】 仕至御史中丞

△郝经

郝经字伯常泽州陵川人祖天挺元裕尝从之学金末父思温辟地河南鲁山河南
乱居民匿窖中乱兵以火熏灼之民多死经母许亦死
经以蜜和寒菹汁决母齿饮之即苏时经九岁人皆异之金亡徙顺天家贫负薪为养暮
则读书为守帅张柔贾辅所知延为上客二家藏书皆
万卷经博览无不通宪宗元年世祖开邸金莲川诏经谕以经国安民之道条上数十事
大悦遂留王府是时连兵于宋世祖总统东师经从至
濮会有得宋奏议以献其言谨边防守冲要凡七道下诸将议经曰古之一天下者以德
不以力今宋未有败亡之衅我乃空国而出诸侯窥伺
于内小民凋弊于外经见其危未见其利也王不如修德布惠结盟饬备以待西师上应
天心下系人望顺时而动宋不足图也世祖以经儒生
愕然曰汝与张巴图议邪经对曰经少馆张柔家尝闻其论议此则经臆说耳柔不知也
复进七道议七千余言乃以杨惟中为江淮荆湖南北
等路宣抚使经副之将归德军先至江上宣布恩信招纳降附闻宪宗在蜀师久无功进
东师议其略曰经闻图天下之事于未然则易救天下

之事于已然则难已然之中复有未然者使往者不失而来者得遂是尤难也国家奋起朔漠灭金源并西夏蹂荆襄克成都平大理躡踪诸夷奄征四海垂五十年今又阖国大举以之伐宋而图混一以志则锐以力则强而术则未尽也苟于诸国既平之后创立法制敷布条纲任将相选贤能平赋足用屯农足食内治既举外御亦备而后伺隙观衅以正天伐自东海至襄邓重兵数道联帜按武以为正兵自汉中至大理轻兵捷出批吭抵胁以为奇兵帅臣得人师出以律高拱九重之内而海外有截矣比者西师既构猝不可解兵连祸结底安于危王宜遣人禀命行在遣使喻宋令降名进币割地纳质姑与之和偃兵息民以全吾力而图后举禀命不从而后进师示以恩信晓以祸福使知王不得已而用兵之意命一军出襄邓一军出寿春一军出维扬三道并进东西连衡王处一军为之节制庶几举动出于万全若宜抵振迅锐而图功一举而下金陵举临安则可也如兵力耗弊役成迁延进退不可反为敌人所乘悔可及乎臣愚所以谆谆于东师反复致论谓不在于已然而在于未然者此也及渡江围鄂州闻宪宗崩召诸将议经复进言曰国家自平金以来惟务取进不遵养时晦老师费财卒无成功三十年矣今国内空虚塔齐尔实喇诸王观望所立莫不岷觐神器一有狡焉或启戎心先人举事腹背受敌大事去矣且额呼布格已行赦令令托里齐为断事官行尚书省据燕都按图籍号召诸道虽大王素有人望且握重兵独不见金世宗海陵之事乎宜亟定大计留劲兵把截江面与宋议和定疆界岁币置辚重驿骑驰归则彼之奸谋僭志冰释瓦解遣一军逆大行灵輿收皇帝玺召诸王驸马会丧和林差官于诸路抚慰安辑命王子珍戡镇燕都则大宝有归而社稷安矣会宋守师贾以道亦遣使乞和乃班师世祖即位以经为翰林侍读学士充国信使使宋告即位且定和议经入辞帝曰朕初践阼庶事草创卿当远行凡可辅朕者亟以闻经奏便宜十六事皆立政大要时经有重名平章王文统忌之阴属李璫潜师侵宋欲假手害经经至济南璫遗书止经经以璫书闻于朝行次宿州遣副使刘人杰参议高□请入国日期不报时贾似道方以却敌为功恐经至谋泄遂以李璫为辞拘之真州经上表宋主曰顾附鲁连之义排难解纷岂知唐俭之徒歟兵误国又数上书宋王及宰执极陈战和利害且请入见及归国皆不报驿吏棘垣钥户昼夜守逻欲以动经经不屈谕从者曰死生进退听其在彼我终不能屈身辱命汝等不幸宜忍死待之我观宋祚殆不久矣居七年从者死过半经独与六人处别馆 【按苏天爵名臣事略云宋人既留经词气不屈明年遣伴使朱实臣伪报本朝

兵乱经弗听复累言之经厉声曰此事断无有设有之当遣我辈还国元史本传不载谨附识】 又九年丞相巴延南伐帝遣尚书哈雅及经弟庸入宋问执行人之罪宋惧遣总管段佑以礼送经归贾似道之谋既泄寻亦窜死明年至阙锡燕大庭咨以政事赏赉有差寻卒谥文忠明年宋平经为人尚气节为学务有用 【按苟宗道行状云经尝自诵曰不学无用学不读非圣书世世之为词章者始则羣聚讪笑终亦拱视而服之】 拘留十六年思托言垂后撰续后汉书及易春秋外传诸书凡数百卷其文丰蔚豪宕善议论从者皆通于学书佐苟宗道后官至国子祭酒经还之岁汴民射雁金明池得系帛书诗云霜落风高恣所如归期回首是春初上林天子援弓缴穷海縲臣有帛书后题曰至元五年 【按陶宗仪辍耕录作中统十五年且云是时南北隔绝不知中统之改至元也考经还之岁实至元十一年本传云至元五年盖史氏易其文而误耳】 九月一日放雁获者勿杀国信大使郝经书于真州忠勇军营新馆其忠诚如此二弟彝庸皆有名子采麟仕至肃政廉访使

钦定续通志卷四百六十二

●钦定续通志卷四百六十三 列传二百六十三

列传

元 【十七】

○元十七

姚枢 许衡 窦默 【李俊民】

姚枢

许衡

窦默

△姚枢

姚枢字公茂柳城人后迁洛阳少力学负王佐略杨淮中与偕覲太宗值南伐诏枢从惟中即军中求儒道释医卜者会破枣阳主将将尽坑之枢力辩非诏书意乃蹙数人逃之篁竹中脱死拔德拔得名儒赵复始见程朱性理之书辛丑为燕京行台郎中时行台伊罗斡齐事货赂以枢幕长分及之枢拒绝因弃官去携家之辉州作家庙别为室奉孔子及宋儒周惇颐等象刊诸经惠学者读书鸣琴若将终身时许衡在魏至辉就录程朱所注书既而尽室依枢以居世祖在潜邸遣赵璧召枢至大喜待以客礼询及治道首陈帝王之道治国平天下之大经汇为八目曰修身力学尊贤亲亲畏天爱民好善远佞次柔救时之弊为条三十曰立省部则庶政出一纲举纪张令不行于朝而变于夕辟才行举逸

遗慎铨选汰职员则不专世爵而人才出班俸禄则赃秽塞而公道开定法律审刑狱则邱山之罪不致苟免毫发之过免罗极法设监司明黜陟则善良奸窳可得而举刺阁征敛则部族不横于诛求简驿傅则州郡不困于需索修学校崇经术旌节孝以为育人才厚风俗美教化之基使士不偷于文华重农桑宽赋税省徭役禁游惰则民力纾不趋于浮伪且免习工技者岁加富溢勤耕织者日就饥寒肃军政使田里不知行营往复【二字系原史阙文今据元文类补】之扰攘周匱乏恤鰥寡使颠运无告者有养布屯田以实边戍通漕运以禀京都倚债负则贾胡不得破称货之家广储蓄复常平以待凶荒立平准以权物估却利便以塞幸涂杜告讦以绝讼原各疏弛张之方其下书奏世祖奇其才动必召问且使授世子经宪宗即位诏凡军民在齐拉袞山南者听世祖总之世祖既奉诏宴羣下罢酒将出遣人止枢问曰顷者诸臣皆贺汝独默然何耶对曰今天下土地之广人民之殷财赋之阜有加汉地者乎军民王尽有之天子何为异时廷臣闲之必悔而见奋不若惟掌兵柄余皆付之有司则势顺理安世祖曰虑所不及者乃以闻宪宗从之枢又请置屯田经略司于汴置都司于卫转粟于河以图宋宪宗大封同姓敕世祖于南京关中自择其一枢曰南京河徙无常土薄水浅鹵生之不若关中厥田上上古名天府陆海于是世祖愿有关中壬子从世祖征大理至察逊诺尔之地夜宴陈宋太祖遣曹彬取南唐事明日世祖据鞍呼曰汝昨夕言曹彬不杀吾能为之枢马上贺曰仁明如此生民之幸有国之福也明年师及大理城饬枢裂帛为旗书止杀之令分号街陌由是民得相完保久之或谗王府得中土心宪宗遣阿勒达尔大为钩考置局关中以百四十二条推集经略宣抚官吏下及征商无遗世祖闻之不乐枢曰帝君也兄也大王为皇弟臣也事难与较远将受祸莫若尽王邸妃主自归朝廷为久居谋疑将自释及世祖见宪宗相持泣下竟不令有所白而止因罢钩考局世祖即位以枢宣抚东平既至郡置劝农检察二人为监均赋役罢铁官中统二年拜太子太师枢曰皇太子未立安可虚设官称所以受制还中书改大司农枢奏曰昔太宗以孔元措袭封衍圣公卒其子与族人争袭讼之潜藩帝时曰第往力学俟有成德达才我则官之又曲阜有太常雅乐宪宗命鞞其歌工舞郎与乐色俎豆至日月山帝亲临观饬东平守臣员阙充补无辍肄习且陛下闵圣贤之后诗书不通与凡庶等既命洛士杨庸选孔颜孟三族诸孙俊秀者教之乞眞授庸教官以成国家育材待聘风动四方之美王镛练习故实宜令提与礼乐使不致崩坏皆从之俄诏赴中书议事及议定条格【

按姚□撰神道碑云枢奏内地之民不耐劳苦第可使出财以资国用西京北京诸路之民习武耐劳可尽复其差赋充本路保甲屯田汉军除守御外可选三万屯燕京东西置营以壮神都左右中三卫从此起】李璿谋叛帝问卿料何如对曰使璿乘吾北征之衅濒海捣燕闭关居庸惶骇人心为上策与宋连和负固持久数扰边使吾罢于奔救为中策如出兵济南待山东诸侯应援此成擒耳帝曰今贼将安出对曰出下策初帝尝论天下人材及王文统枢曰此人学术不纯以游说干诸侯他日必反至是文统果因璿矢诛四年拜中书左丞奏罢世侯置牧守或言中书政事大坏帝怒省臣罪且不测枢上言太祖开创跨越前古施治未遑自后数朝国难并兴天开圣人纘承大统创始治道正宜上答天心下结民心睦亲族以固本建储副以重祚定大臣以当国开经筵以格心修边备以防虞蓄粮饷以待歉立学校以育才劝农桑以厚生则可以光先烈成帝德遗子孙流连誉迹者伏闻聪听日烦朝廷政令日改月异如木始栽而复移屋既架而复毁远近臣民不胜战惧惟恐大本一废远业难成为陛下之后忧国家之重害帝怒为释至元十年【原文脱至元二字今依世祖纪增】拜昭文馆大学士详定礼仪事其年襄阳下遂议取宋枢奏如求大将非右丞相安图知枢密院巴延不可十一年又言陛下降不杀人之诏巴延济江兵不踰时西起蜀川东薄海隅降城三十户踰百万自古平南未有如此之神捷者今自夏徂秋一城不降皆由军官不思国之大计利财剽杀所致宜申止杀之诏使赏罚必立恩信必行圣虑不劳军力不费矣十三年拜翰林学士承旨十七年卒谥文献【按神道碑载至大三年追封鲁国王赠制见元文类】子炜

△许衡

许衡字仲平怀之河内人世为农父通避地河南生衡于新郑七岁入学授章句问其师读书何为师曰取科第耳曰如斯而已乎师大奇之每授书又能问其旨义稍长嗜学如饥渴贫无书尝从日者家见书疏义因请寓宿手钞归既逃难岨崂山【按孙奇逢理学宗传云以家贫为郡从事见州县追呼旁午叹曰民不聊生矣遂弃去】始得王辅嗣易注易思昼诵言动必揆诸义而后发尝暑中过河阳渴甚道有梨众争取啖衡危坐自若或问之曰非其有而取之不可也人曰世乱此无主曰梨无主吾心独无主乎转鲁留魏人见其有德稍稍从之居三年闻乱且定乃还怀往来河洛闲从柳城姚枢得程朱二氏书益大有得寻居苏门与枢及窦默相讲习慨然以斯道为己任尝语人曰纲常不可一日亡于天下苟在上者无以任之则在下之责也凡丧祭娶嫁必征诸礼以倡其乡人学

者寔盛甲寅世祖出王秦中召衡为京兆提学 【按耶律有尚考岁略云乙卯廉希宪宣抚关中奏授衡京兆提学仍给月俸辞不受往返凡六七不能强所载与史传异】 秦人新脱于兵欲学无师闻衡来莫不喜幸郡县皆建学校民大化之世祖南征乃还怀世祖即位召至京师时王文统以言利进为平章政事衡枢辈入侍言治乱休戚必以义为本窆默又日于帝前排其学术文统患之疑衡与之为表里乃奏枢为太子太师默为太子太傅衡为太子太保阳示尊用实不使数侍帝也默屡攻文统不中欲因东宫以避祸与枢拜命将入谢衡日此不安于义也礼师傅与太子位东西乡师傅坐太子乃坐公等度能复此乎不能则师道自我废也乃相与怀制立殿下五辞得免改衡国子祭酒未几谢病归至元二年帝以安图为右丞相欲衡辅之复召至命议事中书省衡乃上书陈时务一曰立国规模 【谨按通鉴辑览 御批立国规模惟当权其法之善与不善而折衷于圣人之道若云必行汉法而后可则历代破国亡家者非行汉法之人乎盖许衢汉人修史者又出于汉人之手遂有此不经之论耳如衡之说正有陆行者不知有舟木行者不知有车泥古之见物而不化未为通达政体之今谨依元文类叙次删存其目】 二曰中书大要三曰为君难四曰农桑学校五曰慎微书奏帝嘉纳之衡每见帝必有敷陈及退皆削其草故其言多秘世罕得闻衡多病帝听五日一至省四年听归怀逾年复召还与太常卿徐世隆定朝仪成帝临观甚悦又与太保刘秉忠左丞张文谋定官制衡历考古今分并统属之序举省部院台郡县与夫后妃储藩百司所联属统制定为图七年奏上之使集公卿杂议中书院台行移之体衡曰中书佐天子总国政院台宜具呈时商挺在枢密高鸣在台皆不乐欲定为咨禀因大言以动衡曰台院皆宗亲大臣若一忤祸不可测衡曰吾论国制耳何与于人遂以其言质帝前帝曰衡言是也吾意亦若是未几阿哈玛特以中书领尚书省六部事因擅权一时大臣多阿之衡每与议必正言不少议己而其子又有金枢密院之命衡执奏曰国家事权兵民财三者而已今其父典民与财子又典兵不可帝曰卿虑其反耶对曰彼虽不反此反道也阿哈玛特由是衔之亟荐衡宜在中书欲因事中之俄除左丞衡屡入辞帝命左右掖衡出衡出及阙还奏曰陛下命臣出岂出省邪帝笑曰出殿门耳从幸上京乃论列阿哈玛特专权罔上蠹政害民若干事不报因谢病请解机务帝惻然召其子师可入谕旨且命举自代者衡奏曰用人天子之大柄臣下泛论其贤否则可若授之以位当断自宸衷不可使臣下有市恩之渐也帝久欲开太学会衡请罢益力乃从其请八

年改集贤大学士兼国子祭酒亲为择蒙古弟子俾教之衡闻命喜曰此吾事也国人子大朴未散视听专一若置之善类中涵养数年必为国用乃请征其弟子王梓刘季伟韩思永耶律有尚吕端善姚燧高凝白栋苏郁姚焯孙安刘安中十二人为斋长时所选弟子皆幼稚衡待之如成人爱之如子出入进退其严若君臣其为教因觉以明善因明以开蔽相其动息以为张弛课诵少暇即习礼或习书算少者则令习拜跪揖让进退应对或射或投壶负者罚诸书若干遍久之诸生人人自得尊师敬业下至童子亦知三纲五常为生人之道【按耶律有尚国学事迹云衡说书章数不务多惟恳款周折见学者有疑问则喜溢眉宇尝谓书中无疑看得有疑有疑却看得无疑方是有功又曰教人与用人正相反用人当用其所长教人当教其所短谨附识】十年权臣屡毁汉法诸生禀食或不继衡请还帝以问翰林学士王盘盘对曰衡教人有法诸生行可从政此国之大体宜勿听其去竄默为衡恳请之乃听衡还以赞善王恂摄学事耶律有尚苏郁白栋为助教以守衡规十三年诏王恂定新历恂言历家知数而不知理宜得衡领之乃以集贤大学士兼国子祭酒领太史院事召至京衡言冬至者历之本而求历本者在验气今所用宋旧仪自汴迁至京师已自乖舛加之岁久规环不叶乃与太史令郭守敬等新制仪象圭表其法视古皆密一本天道自然之数可以施之永久十七年历成上之赐名授时历颁天下寻以疾请还怀皇太子使东宫官来谕曰公毋以道不行为忧也公安则道行有时矣其善药自爱十八年衡病革家人祠衡曰吾一日未死宁不有事于祖考扶而起奠献如仪既撤家人餽怡怡如也已而卒衡善教其言煦煦虽与童子语如恐伤之故所至皆乐从所去人不忍舍服念其教如金科玉律终身不敢忘或未尝及门传其绪余而折节力行者往往有之丞相安图一见衡语同列曰若辈自谓不相上下盖十百与千万也王盘气槩一世少所与可独见衡曰先生神明也大德二年赠司徒谥文正至大二年加封魏国公皇庆二年诏从祀孔子庙庭延佑初又诏立书院京兆以祀衡给田奉祀事名鲁斋书院鲁衡居魏时所署斋名也

△竄默

竄默字子声初名杰字汉卿广平肥乡人幼知读书毅然有立志会国兵伐金被俘同时三十人皆见杀惟默得脱归母亡遂南走渡河遇医者王翁妻以女使业医转客蔡州名医李浩授以铜人针法金主迁蔡默恐兵且至又走德安孝感令谢宪子以伊洛性理之书授之默自谓昔未尝学而学自此始隐于大名与姚枢许衡朝暮讲习至忘寝食继还肥乡以经术教

授乡里世祖在潜邸遣召之默变姓名自晦使者俾其友人往见而微服踵其后默不得已乃拜命既至问以治道默首举三纲五常为对一日凡三召与语皆称怕由是敬待加礼世祖问今之明治道者默荐姚枢即召用之俄命皇子珍戡从默学久之请南还世祖即位召至上都问曰朕欲求如唐魏征者有其人乎默对曰犯颜谏诤刚毅不屈则许衡其人也深识远虑有宰相才则史天泽其人也天泽时宣抚河南帝即召拜右丞相以默为翰林侍讲学士时初建中书省平章政事王文统颇见委任默上书曰陛下应天顺人诞登大宝天下生民欢忻踊跃引领盛治然平治天下必用正人端士唇吻小人一时功利之说必不能定立丕基为子孙久远计若夫钩距揣摩以利害惊动人主之听者无他意在排斥诸贤独执政柄耳此苏张之流也惟陛下察之他日默与王鹗姚枢俱在帝前复面斥文统曰此人学术不正久居相位必祸天下帝曰然则谁可相者默曰以臣观之无如许衡帝不悦而罢文统深憾之乃请以默为太子太傅辞曰太子位号未正臣不敢先受太傅名【按姚枢传以此为枢之言许衡传则云默欲因东宫以避祸与枢拜命俱入谢衡止之三传不同未知孰是】乃复以为翰林侍讲学士俄谢病归文统诛帝追忆其言谓近臣曰曩言王文统不可用惟窦汉卿一人向使更有一二言者朕宁不之思耶召还赐第京师命有司月给廩禄国有大政必咨访之默与王盘等请分置翰林院专掌蒙古文字其翰林兼国史院仍旧纂修国史典制诰备顾问又言三代所以风俗淳厚历数长久者皆设学养士所致今宜建学立师博选贵族子弟教之以示风化之本帝皆纳之默尝与利秉忠姚枢刘肃商挺侍帝侧默言君有过举臣当直言都俞吁咈古之所尚今君曰可臣亦以为可君曰否臣亦以为否非善政也明日复侍帝于幄殿猎者失一鹞帝怒侍臣或从旁大声谓宜加罪帝恶其迎合命杖之释猎者不问既退秉忠等贺默曰非公诚结主知安得感悟至此至元十七年加昭文馆大学士卒讷闻帝深嗟悼厚加赠赐命有司护丧归葬肥乡默为人乐易平居未尝评品人物至论国家大计面折廷诤人谓汲黯无以过之帝尝曰朕求贤三十年惟得窦汉卿及李俊民二人又曰如窦汉卿之心姚公茂之才合而为一斯可谓全人矣封魏国公谥文正子履集贤大学士

李俊民

李俊民

李俊民字用章泽州人得河南程氏之学金承安中举进士第一应奉翰林文学未几弃官归以所学教授乡里士多从之金源南迁隐于

嵩山后徙怀州俄复隐于西山既而变起仓猝人服其先知俊民在河南时隐士荆先生者授以邵雍皇极数时之知数者无出刘秉忠右亦自以为弗及世祖在潜藩以安车召之延访无虚日遽乞还山世祖重违其意遣中贵人护送之又尝令张仲一问以祲祥及即位其言皆验而俊民已卒赐谥庄静先生

钦定续通志卷四百六十三

●钦定续通志卷四百六十四 列传二百六十四

列传

元 【十八】

○元十八

宋子贞

商挺

赵良弼

赵璧

宋子贞

商挺

赵良弼

赵璧

△宋子贞

宋子贞字周臣潞州长子人与族兄知柔同补太学生俱有名金末潞州乱子贞走赵魏闲东平行台严实招置幕府用为详议官兼提举学校岁壬辰实戍黄陵金人悉力来攻与战不利敌势颇张曹濮以南皆震有自敌中逃归者言金兵且大至人情恟惧子贞请于实斩扬言者以令诸城境内乃安汴梁既下饥民北徙饥殍盈道子贞多方赈救全活者万余人金士之流寓者悉周给且荐用之拔名儒张特立刘肃李昶辈于羁旅与之同列四方之士闻风而至故东平一时人材多于他镇乙未太宗命子贞为行台右司郎中中原略定事多草创行台所统五十余城州县官率为贪私以病民子贞仿前代观察采访制命官分三道纠察官吏立程序定期会黜贪惰奖廉勤始有纪纲民得苏息东平将校占民为部曲户谓之脚寨擅其赋役子贞令悉归州县人以为便实卒子忠济袭爵请于朝授子贞参议东平路事兼提举太常礼乐子贞作新庙学延诸名儒招致生徒俾习经艺齐鲁儒风为之一变己未世祖南伐召至濮问以方略对曰本朝威武有余仁德未洽所以拒命者特畏死尔若投降者不杀胁从者勿治则宋之郡邑可传檄定也世祖善其言中统元年授益都路宣抚使未几拜右三部尚书李璫叛诏子贞参议军前行省事子贞单骑至济南观璫形势因说丞相史天泽曰璫拥众东来坐守孤城宜增筑外城防其奔突彼粮尽援绝不攻自破矣议与天泽

合遂擒瓊子貞還上書陳便宜十事大略謂官爵人主之柄選法宜盡歸吏部律令國之紀綱宜早刊定監司總統一路乞選公廉有才德者為之州縣官相傳以世非法賦斂民窮無告宜遷轉以革其弊又請建國學教胄子敕州郡提學課試諸生三年一貢舉帝命中書次第施行之至元二年遷翰林學士參議中書省事奏請班俸祿定職田從之俄拜中書平章政事復陳時務十二策帝頗悔用子貞晚未幾以年老求退特敕中書凡有大事即其家訪問子貞私居每聞朝廷事不便必封疏上奏愛君憂國不以進退異其心當疾革諸子請遺言子貞曰吾平昔教汝者不少今尚何言子渤

△商挺

商挺字孟卿曹州濟陰人父衡金行省員外郎以戰死挺年二十四汴京破北京東平严实聘為諸子師實卒子忠濟嗣辟為經歷贊忠濟興學養士【按元明善撰墓碑云聘康■〈日昱〉說書李昶說春秋李楨說大學東州多士公實作之】世祖在潛邸聞挺名征至鹽州入對稱旨閑陪宴語因曰挺來時李瓊城胸山東平當饋米萬石東平至胸山率十石致一石且車淖于雨必后期后期罪死請輸沂州使瓊軍取食便世祖曰愛民如此忍不卿從楊惟中宣撫關中挺為郎中兵火之余八州十二縣戶不滿萬皆驚憂無聊挺佐惟中黜貪暴出淹滯定規程主簿責務農薄稅通其有無期月民乃安且請減關中常賦之半明年惟中罷廉希憲來代升挺為宣撫副使尋命兼治懷孟戊午罷宣撫司挺還東平憲宗親征蜀世祖將趨鄂漢軍于小濮召問軍事挺對曰蜀道險遠萬乘豈宜輕動世祖默然久之曰卿言正契吾心憲宗崩世祖北還道遣張文謙與挺計事挺曰軍中當嚴符信以防奸訪文謙急追及言之世祖大悟罵曰無一人為我言此非商孟卿幾敗大計速遣使至軍立約未幾額呼布格之使至軍中執而斬之召挺至開平與廉希憲密贊大計世祖既即位以希憲及挺宣撫陝蜀至京兆時哈喇布哈瑋塔哈駐六盤山以兵應額呼布格挺謂希憲曰為六盤有三策悉銳而東直搗京兆上策也聚兵六盤觀衅而動中策也重裝北歸以應和琳下策也希憲曰彼將何從挺曰必出下策已而果然于是與希憲定議令巴崇汪良臣發兵御之六盤之兵既北而阿勒达尔自和琳引兵南來遇于甘州哈喇布哈以語不合遂北去阿勒达尔乃與瑋塔哈合軍而南時諸王哈坦率騎兵與巴崇汪良臣兵合乃分為三道以拒之大戰甘州東殺阿勒达尔瑋塔哈事聞帝大悅曰商孟卿古之良將也改宣撫司為行中書省進希憲右丞挺金行省事中統二年進參知政事興元判官費寅【

廉希宪传作蜀人费正寅】有罪惧诛以借兵完城事讼挺与希宪于朝帝召挺便殿问曰卿在关中怀孟两着治效而毁言日至岂同僚有沮卿者耶抑位高而志怠耶对曰臣在秦三年多过其或从权以应变者有之若功成归已事败分咎于人臣必不敢请就既刃出帝顾斤臣数挺前后大计凡十有七因叹曰挺有功如是犹自言有罪谁复为朕戮力耶至元元年入拜参知政事建议修辽金二史三年帝留意经举挺与姚枢窦默王鹗杨果纂五经要语凡二十八类以进六年同佥枢密院事八年升副使定军官品级给军使屯田收其获以饷亲军汰不胜军者户三万户一丁者亦汰之丁多业宾业多丁寡财力相资合出一军着为令九年封皇子莽噶拉为安西王以挺为王相挺进十策于王曰睦亲邻安人心敬民时备不虞厚民生一事权清心源谨自治国本根察下情王为置酒嘉纳王薨王妃使挺请命于朝以子阿南达嗣帝曰年少祖宗之训未习卿姑行王相府事初运使郭琮郎中郭叔云与王相赵炳构隙或告炳不法妃命囚之六盘狱以死朝廷疑擅杀之鞫琮等伏辜有王府女奚楚彻以预二郭谋临刑望以求生有暧昧语连挺及其子璘帝怒召挺拘炳家璘下狱帝命诸儒谳其罪尚书留梦炎以议勋奏曰臣宋儒不知挺向来之功可补今之过否帝不悦符宝郎董文忠奏曰梦炎不知挺何如人臣以曩时推戴之功语之矣帝良久曰其事果何如对曰臣目未覩耳固闻之杀人之谋挺不与也帝默然十六年始释挺及璘二十年复枢密副使我以疾免明年赵氏子复讼父冤又被系百余日乃释【按苏天爵名臣事略云挺再被系得释乃二葺小圃于都城南有阜曰左山因以自号】二十五年卒延佑初追封鲁国公谥文定子琥

字台符至元十四年以姚枢许衡荐拜江南行台御史多政绩二十七年征拜中书御史属地震琥上书言昔汉文帝有此异而无其应盖以恭行德化而弭也因条陈汉文时政以进又言为国之道在立法任人二者而已法不徒立须人而行人不滥用惟贤是择因举天下名士十余人帝从之皆召用三十年迁国子司业卒

△赵良弼

赵良弼字辅之女真人【名臣事略作赵州赞皇人】父兄诸子俱死事于金良弼明敏多智略初举进士教授赵州世祖在潜藩召对称旨会立邢州安抚司擢为幕长区画有方事或掣肘则请诸藩邸再阅岁邢大治户口增倍世祖在潜藩时分地在关陕奏以廉希宪商挺宣抚陕西以良弼参词司事阿勒达尔刘太平钩校京兆钱谷煅炼羣狱死者二十余人众皆股栗良弼力陈大义词气慷慨二人卒不能诬故宣

抚司一无所坐己未世祖南征召参议元帅府事兼江淮安抚使亲执桴鼓率先士卒五战皆捷所至宣布恩德民皆安堵世祖北还遣如京兆
访秦蜀事宜得实还报曰宗王穆各无他心宜以西南六盘悉委属之瑛塔哈屯军六盘士马精强咸思北归恐事有不意耨埒总秦川蒙古诸
军年少鸷勇轻去就当宠以重职疾解其兵柄刘太平霍鲁怀声音办集粮饷阴有据秦蜀志伯嘉努刘黑马汪惟正兄弟蒙被德惠俱悉心俟
命后皆如其言中统元年复以廉希宪商挺宣抚奏蜀良弼为参议良弼先行时瑛塔哈判北归良弼执其赏元帅奇尔台布哈密喇卜和卓诛
之希宪及挺虑有擅杀名遣使入奏待罪良弼具密状授使者言始遣捕二帅时止令囚以俟报臣窃以为张皇不便宜急诛之擅杀在臣实不
在宣抚司若上怒希宪等愿者即出此奏帝竟不问蜀人费寅【与廉希宪及商挺传并异】以私憾诬希宪挺在京兆有异志者九事引良
弼为证帝召良弼诘问良弼泣曰二臣忠良保无是心愿剖臣心以明之意意不释会平李璿得王文统交通书益疑二臣切责良弼良弼誓死
不变帝意乃解费寅卒以反诛至元七年【按日本国传良弼使日本在至元六年】奉使日本先是数遣使通日本卒不得要领至是良弼
请行乃授秘书监给兵三千以从良弼辞独与书状官二十四人俱舟至金津岛其国人望见使舟举刀来攻良弼舍舟登岸喻旨金津守延入
板屋以兵环之灭烛大噪良弼凝然自若天明其国太宰府官陈兵四出问使者来状良弼数其不恭罪仍喻以礼意太宰府官愧服求国书良
弼曰必见汝国王始授之越数日复来求书至以兵胁良弼良弼曰不见汝国王宁持我首去书不可得也日本知不可屈遣使介十二人入覲
送良弼至对马岛十年良弼至自日本入见帝询知其故曰卿可谓不辱君命矣后帝将讨日本数问良弼良弼言勿击便帝从之【按日本
国传至元十一年十七年十八年洪茶邱等累征日本则是未尝从良弼之言也传恐误】十一年同金书枢密院事丞相巴延伐宋良弼言宋
重兵在扬州宜以大军先捣临安后讫如其计帝尝从容问曰高丽小国也匠工奕技皆胜汉人至于儒人皆通经书学孔孟汉人惟务课赋吟
诗将何用焉良弼对曰此非学者之病在国家所尚何如耳久之以疾辞得旨居怀孟良弼别业在温县故有地三千亩乃析为二六与怀州四
与孟州皆永隶庙学以贍生徒自以出身儒素示不忘本也或问为治之要良弼曰人性易发而难制者惟怒为甚必克己然后可以制怒必顺
理然后可以忘怒能忍所难忍容所难容事斯济矣二十三年卒追封韩国公谥文正子训陕西平章政事

△赵璧

赵璧字宝仁云中怀仁人世祖在潜邸闻其贤召见呼秀才而不名赐三僮给薪水命后宫亲制衣衣之宠遇无比命驰驿西方聘名士王鹗等又令蒙古生十人从璧授儒书敕璧习国语译大学衍义【按虞集道园谥议云译论语大学中庸孟子诸书传未详载】时从马上听其陈说辞旨明贯辄大喜宪宗尝召璧问曰天下何如而治对曰请先诛近侍之尤不法者宪宗不悦璧退世祖曰秀才汝浑身是胆耶一日断事官伊啰斡齐持其印请于帝曰此先朝赐臣印也今陛下登极将仍用此旧印抑易以新者耶时璧侍帝呵之曰用汝与否取自圣裁汝乃敢以印为请耶夺置帝前帝为默然既而曰朕亦不能为此也自是伊啰斡齐不复用岁壬子为河南轻略使有刘万户者素贪暴其党董主簿尤恃势为虐强取民女有色者三十余人璧至按其罪立斩之尽还民女刘大惊会雨雪因请璧酌酒贺曰经略下车诛锄强猾故雪为瑞应璧曰如董主簿比者尚有其人俟尽诛之瑞应将大至矣刘屏气不敢出语归卧病而卒时人以为怖死世祖中统元年拜燕京宣慰使时供给蜀军府库已竭及用兵北边璧经昼馈运相继不绝中书省立援平章政事三年李璫反益都从亲王哈必齐讨之璫已据济南诸军乏食璧从济河得粟及羊豕以馈军军复大振至元元年帝欲作文檄宋执笔者数人不称旨乃召璧为之文成帝喜曰惟秀才曲尽我意改枢密副使六年命诣鹿门山都元帅阿珠营同行汉军都元帅府事宋将夏贵率兵自武昌遡流入援襄阳时汉水暴涨璧据险设伏待之贵果中夜潜上璧策马出鹿门行二十余里发伏夺其五舟大呼曰南船已败我水军宜速进贵惧不敢动及旦阿珠领骑兵璧率水军合战于虎尾洲贵大败走高丽王植为其臣林衍所逐帝召璧还改中书左丞同国王特讷克行东京等路中书省事聚兵平壤时衍已死璧与王议曰高丽迁居江华岛有年矣外虽卑辞臣贡内恃其险故使权臣无所畏忌擅逐其主今衍虽死王实无罪若朝廷遣兵护归使复国于古京可以安兵息民策之上也因遣使以闻帝从之师还迁中书右丞十年复拜平章政事十三年卒大德三年赠大司徒谥忠亮子仁荣同知归德府事仁恭集贤直学士

钦定续通志卷四百六十四

●钦定续通志卷四百六十五 列传二百六十五

列传

元【十九】

○元十九

安图【谔都岱】 廉希【宪希贤】

安图

廉希宪

△安图

安图穆乎哩四世孙巴图尔长子也中统初世祖追录元勋召入长宿卫年十三位在百寮上母鸿吉哩氏【元世家作特默伦氏】时睿皇后姊也四年执额呼布格党千余将置之法安图侍侧帝问之对曰人各为其主陛下甫定大难遽以私憾杀人何以怀服未附帝惊曰卿年少何从得老成语由是深重之至元二年拜中书右丞相帝召许衡至令入省议事衡以疾辞安图亲候其馆与语良久既还念之不释三年帝谕衡曰安图尚幼未更事善辅导之衡对曰安图聪敏且有执守告以古人所言悉能领解臣敢不尽心四年安图奏内外官须用老成人宜令儒臣姚枢等入省议事帝从之五年廷臣密议立尚书省以阿哈玛特领之乃先奏以安图宜位三公商挺倡言曰安图国之柱石若为三公是崇以虚名而实夺之权也甚不可事遂罢八年陕西省臣伊苏岱尔言盗贼滋横请显戮一二以示惩安图曰强窃均死恐非所宜罪至死者宜仍旧待报从之十一年奏阿哈玛特蠹国害民数事又奏各部与大都路官多非才乞加黜汰从之十二年诏以行中书省枢密院事从太子北平王出镇极边二十一年从王归待罪阙下帝即召见慰劳之【按续通鉴云太宗长孙曰海都居北方日寻干戈至元十二年诏封皇子诺木罕为北平王率兵镇守而以安图总省院之政为海都所拘十年始还有谮安图受海都官者帝怒石天麟为之辨意始解事见巴延及石天麟传故不詳载】遂留寝殿语至四鼓及出复拜中书右丞相二十三年中书奏拟漕司诸官姓名帝曰如平章右丞等朕当亲择余皆卿等职也安图奏曰此闻圣意欲倚近侍为耳目近臣乃伺隙援引非类私署奏目付中书施行臣常废格不行虑其党有短臣者幸陛下详察帝曰卿言是也今后若此者勿行其妄奏者即入言之二十四年纳颜叛帝亲讨平之宗室诬误者命安图按问多所平反尝退朝诸免罪者争迎谢安图毅然不顾有言其悖慢者帝曰汝等岂知安图所为特辱之使改过耳是岁复立尚书省安图切谏曰臣力不能回天乞不用僧格别相贤者犹或不至虐民误国不听二十八年罢相仍领宿卫事三十年以疾卒大德七年赠东平忠宪王子谔都岱

谔都岱

谔都岱

谔都岱器度宏达世祖时袭长宿卫父安图歿凡赠賻之物一无所受以素车朴马归葬先莹事母以孝闻成帝即位拜大司徒领太常寺事常侍掖庭赞画大政帝及中宫咸以家人礼待之大德六年卒至大二年赠东平王谥忠简子拜珠自有传

△廉希宪

廉希宪字善甫博啰哈雅子也幼魁伟举止异凡儿九岁家奴四人盗马逃去既获将付有司希宪泣之之俱得免死世祖为皇弟希宪年十九得入侍恩宠殊绝希宪好经史一日方读孟子闻召急怀以进世祖问其说遂以性善义利仁暴之旨为对世祖嘉之曰曰廉孟子由是知名尝与近臣校射三发皆中众惊服曰真文武材也岁甲寅世祖以京兆分地命希宪为宣抚使希宪讲求民病抑强扶弱暇日从名儒许衡桃枢辈谘访治道请用衡提举学校教育人材为根本计初世祖受命宪宗经理河南关右谗者谓王府人多专擅王法命阿勒达尔刘太平检核所部大开告许希宪曰宣抚司事由己出僚属何预事竟卒无获罪者己未世祖渡江取鄂州命希宪入籍府库希宪引儒生百余拜伏军门因言俘获士人宜遣还以广异思世祖嘉纳之还者五百余人宪宗崩帝希宪请速还京正大位以安天下祖然之命希宪先行审察事变对曰刘太平和啰海在关右瑛塔哈在六盘征南诸军散处秦蜀太平要结诸将其性险诈设有异谋渐不可制宜遣赵良弼往覘人情事宜从之世祖命希宪赐膳于宗王塔齐尔希宪即劝王首建翊戴之谋王然之庚申至开平宗室诸王劝进谦让未允希宪复以天时人事进言愿早定大计世祖遂即位希宪上言高丽王子僂久留京师今闻其父死宜遣还国又言鄂兵未还宜遣使与宋讲好敕诸军北归帝皆从之赵良弼还自关右奏刘太平和啰海反状皆如希宪言初分汉地为十道乃并京兆四川为一道以希宪为宣抚使太平和啰海闻之乘驿急入京兆密谋为变后三日希宪至宣布诏旨遣使安谕六盘未几瑛塔哈反杀所遣使且谕其赏密喇卜和卓奇塔特布哈使各以兵来援又多与蒙古军鄂啰官乌努呼等金帛尽起新军且约太平和啰海同日俱发希宪得报遣刘黑马等掩捕太平和啰海获之尽得其奸谋悉置于狱复诛密喇卜和卓及奇塔特布哈具以驿闻时关中无兵备命汪惟良【世祖纪作汪良臣】将秦巩诸军进六盘惟良以未得上旨为辞希宪曰此怕身承密旨君但办吾事制符已飞奏矣惟良遂行又发蜀卒更戍及在家余丁推节制诸军蒙古官巴崇将之谓之曰六盘兵精勿与争锋但张声势使不得东则大事济矣会有诏赦至希宪命绞太平等于狱尸于通衢方出迎诏人心遂安

乃遣使自劾停赦行刑征调诸军擅以惟良为帅等罪
帝深善之西川将耨埒鄂啰官将举兵应瑋塔哈巴崇获之系其党五十余人于干州狱
送二人至京兆请杀之希宪谓僚佐曰众志未一彼军
见将校执人或别生心为害不细今因其惧死并力宽释使之感恩效力就发此军余丁
往隶巴崇上策也初巴崇既执诸校其军疑惧骇乱四
出莫可禁遏及知诸校获全大喜过望巴崇亦悟果得精骑数千将与俱西诏以希宪为
中书右丞行奏蜀省事瑋塔哈闻京兆有备遂西渡河
趋甘州阿勒达尔复自和琳合兵分结陇蜀诸将于是成都帅伯嘉努等遣使言人心危
疑事不可测希宪遣使深谕戒之两川诸将素惮希宪
威名按堵从命瑋塔哈阿勒达尔合军而东诸将失利河右大震西土亲王哲伯特穆尔
辘重皆空就食秦雍朝议欲弃两川退守兴元希宪力
言不可乃止会亲王哈坦及淮惟良巴崇等兵战西凉大败之俘斩略尽得二叛首以
送梟之京兆市事闻帝大嘉之曰希宪真男子也进拜
平章政事希宪奏四川降民皆散处山谷宜申赦军使毋得俘掠又禁诸人无贩易生口
由是四川遂安奇彻获宋臣张炳震王政二人俱以母
老遣还因为书与宋四川制置余玠谕以天道人事玠得书愧感不敢复轻动巩明帅府
言镇戎州有谋为叛者连引四百余人希宪详推之惟
诛首恶五人宋将刘整以泸州降尽系前归宋者数百人希宪奏释之且致书宰臣待整
以恩当得其死力【按辍耕录云刘整初附来谒希
宪据中坐令整入展拜侧立整求退谓曰汝欲有所言明日当诣政事堂或问其故曰刘
整虽贵卖国叛臣也故折辱之本传所载盖在既见之
后欵】整后首建取襄阳之策果立勋效李璿反山东事连王文统平章赵璧素忌希宪
勋名因言文统为希宪荐引希宪得民心有商挺赵良
弼为之辅此事宜关圣虑帝曰希宪幼事朕朕知其心挺良弼皆正士何虑焉蜀伶人费
正寅【按希宪家传云宋俘费寅以利口才捷同知
兴元府事希宪悉其人不用寅乘闲逸公本传作伶人费正寅互异】以私怨潜希宪修
城治兵潜畜异志帝惑之命中书右丞纳罕代为行省
诏希宪还京陛见言曰方关陕川蜀宋宁事急星火臣随宜行事不谋佐贰如寅所言罪
止在臣臣请逮系有司帝慰谕良久进拜中书平章政
事一日夜半召希宪入禁中从容道藩邸时事因及赵璧所言希宪曰昔刘秉忠张易称
王文统才习士诏问臣臣对亦闻之实未尝识其人也
帝曰朕亦记此希宪在中书振举纲维综核名实当时翕然称治又建言国家自开创以
来凡纳士及始命之臣咸令世守前古所无宜更张之
使考课黜陟始议行迁转法奸臣阿哈玛特领左右部专总财赋会其党相攻击帝命中

书推核希宪穷治其事以闻杖阿哈玛特罢所领归有司帝嘉奖之有内侍传旨入朝堂言某事当尔希宪曰此阉臣预政之渐不可启也遂入奏杖之言者讼丞相史天泽亲党布列中外威权日盛诏罢天泽使待鞫问希宪剖陈其冤事遂解又有讼四川帅奇彻者帝敕中书急遣使诛之明日希宪覆奏帝怒对曰奇彻大帅以一小人言被诛民心必骇宜令与讼者廷对然后明其罪于天下诏遣使按问竟无实奇彻得免希宪每奏议帝前论事激切帝曰卿昔事朕王府多所容受今为天下臣乃尔木强耶希宪对曰王府事轻天下事重故不敢面从也方士请炼大丹希宪具陈秦汉故事且曰尧舜得寿不因大丹也帝遂却之时方尊礼国师帝命希宪受戒对曰臣受孔子戒矣帝曰孔子亦有戒耶对曰为臣当忠为子当孝孔子之戒如是而已五年始建御史台继设各道提刑按察司阿哈玛特专总财利乃曰庶务责成诸路钱谷付之转运今绳治之如此事何由办希宪曰立嘉察古制也内则弹劾奸邪外则察视非常若去之使上下专恣贪暴事岂可集耶阿哈玛特不能对七年诏释京师系囚西域人【家传作回鹘官】 鼐智密鼎累资巨万为怨家所告系大都狱既释之矣怨家复诉于帝帝曰诏释囚耳岂有诏释鼐智密鼎耶希宪对曰不释鼐智密鼎臣等亦未闻有此诏帝怒遂与左丞相耶律铸同罢一日帝问侍臣希宪居家何为侍臣以读书对帝曰读之而不肯用多读何为意责其罢政而不复求进也嗣国王特讷克行省镇辽阳有言其扰民不便者十一年诏起希宪为北京行省平章政事辽东多亲王使者传令旨官吏立听希宪至始革正之有西域人自称驸马营于城外系富民诬其祖父尝贷息钱索偿甚急民诉之行省希宪命收捕之其人怒乘马入省堂坐榻上希宪命摔下跪而问之曰法无私狱汝何敢擅系民令械系之其人惶惧求哀国王亦为请乃稍宽今待对举营夜遁俄诏国王归国希宪独行省事长公主及国婿入朝纵猎扰民希宪欲入奏国婿请以钞偿民自是贵人过者皆莫敢纵十二年右丞阿尔哈雅下江陵请令重臣开大府镇之帝急召希宪还使行省荆南复诏令希宪承制授三品以下官希宪冒暑疾驱以进至镇阿尔哈雅率属郊迎望拜尘中荆人大骇即日禁剽夺通商贩兴利除害民安堵录宋故宣抚制置二司幕僚以备采访仍择二十余人随材授职时宋故官谒大府必致珍玩希宪拒之皆感激谢去令凡俘获之人敢杀者以故杀平民论为军士所虏病而弃之者许人收养病愈故主不得复有立契券质卖妻子者重其罪仍没入其直先时江陵城外蓄水扞御希宪命决之得良田数万顷以为贫民之业发沙市仓粟二十万斛以赈公安之

饥大纲既举乃曰教不可缓也逐大兴学选教官置经籍旦日亲诣讲舍以厉诸生西南溪洞及思播田杨二氏重庆制置赵定应俱越境请降事闻帝曰希宪能令数千百里外越境纳土其治化可见也希宪疾久不愈十五年近臣董文忠言江陵湿热如希宪病何即召希宪还江陵民泣留不得相与画像建祠希宪还囊橐萧然琴书自随而已至上都太常卿田良忠来问疾希宪谓曰上都圣上龙飞之地天下视为根本慎勿令妄谈地理者感动上意未几果有以徙置都邑事奏者帝问忠良忠良以希宪语对帝曰希宪病甚犹虑及此耶议遂止会议立门下省帝曰侍中非希宪不可为阿哈玛特所沮十六年诏复入中书希宪称疾笃皇太子遣侍臣问疾因问治道希宪曰君天下在用人用君子则治用小人则乱方今大奸专政羣小阿附殿下宜开圣意急为屏除不然日就沈疴不可药矣戒其子曰丈夫见义勇为祸福无预于己谓皋夔稷契伊傅周召为不可及是自弃也又曰汝读狄梁公传乎梁公有大节为不肖子所坠汝辈宜慎之明年冬希宪卒大德八年追封魏国公谥文正加赠恒阳王子六人孚金辽阳等处行中书事恪台州路总管恂中书平章政事忱郡武路总管恒御史中丞惇江西等处行中书省参知政事从弟希贤

廉希贤

廉希贤

希贤字达甫一名珠德哈雅年二十余与从兄希宪同侍世祖至元初北部王拘杀使者世祖使往谕之至则布上意辞旨条畅王悔谢还奏帝喜寻进兵部尚书左丞相巴延伐宋既渡江至元十二年命希贤持国书使宋至独松关守关者不知为使袭而杀之明年宋亡诏遣使护希贤丧归

钦定续通志卷四百六十五

●钦定续通志卷四百六十六 列传二百六十六

列传

元 【二十】

○元二十

巴延

△巴延

巴延蒙古巴林部人曾祖苏鲁克图事太祖为巴林部左千户祖阿拉袭父职兼断事官平呼察有功得食其地父舒库尔台世其官从宗王锡里库开西域 【按巴延庙碑苏鲁克图谥武定阿拉谥武康舒库尔台谥武靖俱追

封淮安王】巴延长于西域至元初锡里库遣入奏事世祖贤之敕以中书右丞相安图女弟妻之二年七月拜中书左丞相诸曹白事有难决者徐以一二语决之众咸服四年改中书右丞七年迁同知枢密院事十一年大举伐宋以巴延领河南等路行中书省所属并听节制会师襄阳分军为三道并进巴延与平章阿珠由中道循汉江趋郢州遇霖雨水溢不能涉巴延曰吾且飞渡大江而惮此潢潦耶召壮士负甲仗前导麾诸军毕济次盐山距郢州二十里宋人筑新郢且设守于黄家湾堡以御之乃遣李庭等攻黄家湾堡拔之由藤湖入汉江诸将请取郢巴延曰大军之出岂为此一城哉遂舍郢顺流下巴延阿珠殿后郢将赵文义范兴以骑二千【阿珠传作宋骑兵千人】来袭巴延阿珠迎击之巴延手杀文义擒范兴杀之遂次沙洋命杨仁风及吕文焕先后招降皆不应日暮风大起巴延命顺风掣金汁炮焚其庐舍城遂破生擒守将王虎臣王大用等【经世大典作串楼王】四人余悉屠之进次新城令列沙洋所馘于城下射檄文于城中以招之其总制黄顺副都统制任宁俱降独守将边居谊【本纪作边居义】不出乃令总管李庭攻破其外堡诸军蚁而登拔之居谊举家自焚遂并诛王虎臣王大用等四人次复州知州翟贵以城降遂谕诸将不得入城违者以军法论阿珠使右丞阿尔哈雅来言渡江之期巴延不答明日又来又不答阿珠乃自来巴延曰此大事也可使余人知乎潜刻期而去进军次蔡店宋淮西制置使夏贵等以战舰万艘分据要害都统王达守阳罗堡荆湖宣抚朱禔孙以游击军扼中流兵不得进乃围汉阳声言出汉口渡江贵果移民援汉阳诸将自汉口开坝引船入沧河径趋沙芜遂入大江巴延战舰万计相踵而至令修攻具进军阳罗堡攻之三日不克乃密谋于阿珠使夜以铁骑三千泛舟直趋上流为捣虚之计分遣右丞阿尔哈雅等以步骑攻阳罗堡夏贵来援阿珠出其不意泝流西上为其都统程鹏飞所却阿珠血战中流擒其将高邦显等死者无算鹏飞被创败走遂起浮桥成列而渡舳舻相衔直抵夏贵贵引麾下军数千先遁诸军乘之杀溺不可数计追至鄂州东门而还巴延挥诸将急攻破阳罗堡斩王达宋军大溃数十万众死伤几尽夏贵仅以身免诸将请追之巴延曰阳罗之捷吾欲遣使前告宋人而贵走代吾使不必追也阿珠还渡江议兵所向或欲先取蕲黄阿珠曰先取鄂汉可为万金计巴延从之师次鄂州焚其战舰三千艘火照城中两城大恐知鄂州张晏然知汉阳军王仪知德安府来兴国皆以城降程鹏飞以其军降乃撤宋兵分隶诸将遣使奏渡江之捷留右丞阿尔哈雅等于鄂规取荆湖巴延与阿珠以大

军水陆东下十二年至黄州知州陈奕降巴延承制授
奕松江大都督奕遣书至涟水招其子岩岩降遣吕文焕陈奕以书招蕲州安抚使管景
模【原作管宗模考本纪及宋史俱作景模今据改】
】巴延至蕲州景模出降即承制授以淮西宣抚使阿珠复以舟师先趋江州宋兵部尚
书【续通鉴作都督参赞】吕师夔任江州知州
钱真孙遣人迎降巴延至江州即以师夔为江州守知南康军叶闾知安庆府范文虎皆
出降巴延承制授文虎两浙大都督师次池州都统制
张林以城降通判权州事赵昂发与其妻自经死宋宰臣贾似道遣宋京致书请还已降
州郡约贡岁币巴延遣使谓似道曰未渡江议和入贡
则可今沿江诸郡皆内附欲和则当面议遂发池州次丁家洲贾似道都督诸路军马十
三万孙虎臣为前锋夏贵以战舰二千五百艘横亘江
中似道将后军巴延命左右翼万户率骑兵夹江而进炮声震百里宋军阵动责先遁似
道仓皇失措遽鸣金收军军溃阿珠挺身登舟手舵冲
敌船以小旗麾何玮李庭等并舟深入巴延命步骑左右掎之追杀百五十余里溺死无
算似道东走扬州太平和州等城以次俱降师进建康
之龙湾大赍将士宋沿江制置赵溍遁潘兄淮起兵溧阳就执而死都统徐王荣翁福等
以城降知镇江府洪起畏遁总管石祖忠以城降知宁
国府赵与可遁知饶州唐震死而江东诸郡皆下淮西滁州诸郡亦相继降国信使廉希
贤与严忠范等奉命使宋请兵自卫巴延曰行人以言
不以兵兵多徒累使事希贤固请与之至独松岭果为宋人所杀巴延以行中书省驻建
康时江东饥巴延赈之民赖以安宋遣都统洪模移书
徐王荣等请罢兵通好巴延遣张羽等持王荣答书至平江驿宋人又杀之诏以时暑方
炽不利行师俟秋再举巴延奏曰宋人之据江南如兽
保险今已扼其吭少纵则逝矣世祖语使者曰将在军不从中制兵法也宜从丞相言复
命奉御额森传旨召巴延赴阙及渡江北行入见于上
都进中书右丞相让功于阿珠遂以阿珠为左丞相【按宰相表至元十二年安图为右
丞相呼图克彻尔为左丞相而不及巴延阿珠考百
官志行中书省有左丞一员右丞一员然则巴延阿珠盖行省中书左右丞相也】受命
还行省付以诏书俾谕宋主乃取道益都行视沂州等
军垒谓淮东都元帅博啰罕副都元帅阿里布以所部兵泝淮而进会师淮安城下巴延
与博啰罕阿里布亲临南城堡拔之遂围扬州召诸将
指授方略留博啰罕阿里布守湾头新堡众军南行分军为三道期会于临安参政阿喽
罕等为右军以步骑自建康出四安趋独松岭参政董
文炳等为左军【姜卫传作姜卫率左军参政董文炳为副】以舟师自江阴循海趋

澈浦华亭巴延及右丞安塔哈中道节制诸军水陆并进军至常州谕降不从乃亲督帐前军临南城昼夜攻之浙西制置文天祥遣尹玉麻士龙来援皆战死巴延叱帐前军先登竖赤旗城上诸军毕登宋兵大溃拔之屠其城知州姚嵩及通判陈照都统王安节俱死之【按续通鉴云巴延命降人王良臣役城外居民运土为垒土至并以筑之且杀民煎膏取其油作炮及城破尽屠其民唯七人伏桥下获免史以巴延比之曹彬故不详载】以马恕为常州尹遣实喇特穆尔等据无锡蒙古岱扬恰尔巡太湖伊克呼台及索多等趋平江复遣降人游介实奉诏书副本使于宋仍以书谕宋大臣师次无锡宋将作监【续纲目作工部侍郎】柳岳等奉其国主及太皇太后书并未之大臣与巴延书来见垂泣而言曰太皇太后年高嗣君幼冲且在衰经中自古礼不伐丧望班师修好巴延以柳岳来使事及严奉使所赍国书入奏众军次平江都统王邦杰通判王矩之率众出降遣囊嘉特同其使柳岳还临安以蒙古岱范文虎行两浙大都督事既而囊嘉特同宋尚书夏士林侍郎吕师孟宗正少卿陆秀夫以书来请为任侄且修岁币巴延弗许十三年次嘉兴安抚刘汉杰以城降宋遣御史刘岳奉宋主称臣表文副本及致书巴延约会长安镇进临平镇次皋亭山宋主遣贾余庆【宋纪作御史杨应奎】同宗室尹甫吉甫奉传国玺及降表诣军前巴延受讫遣囊嘉特以余庆等还临安召宋宰臣出议降事进军至临安北十五里遣将巡视城堡安谕军民囊嘉特洪模来报益王广王下浙江航海而南惟谢太后及幼主在宫巴延丞遣阿喽罕鄂啰及董文炳范文虎据守浙江以劲兵追之不及而还遣吕文焕谕临安中外军民俾安堵如故遣程鹏飞洪双寿等入宫慰谕谢后谢后遣丞相吴坚文天祥枢密谢堂安抚贾余庆内宫邓惟善来见巴延慰遣之顾天祥举动不常留之军中天祥数请归巴延笑而不答令蒙古岱索多馆伴羁縻之驻军临安城北之湖州市遣千户囊嘉特等以宋传国玺入献巴延巡临安城观潮于浙江罢文天祥所招募义兵二万余人分置三衙诸司兵于各翼以俟调遣分遣招谕衢信诸州仍遣别将徇地浙东西于是严婺台处诸州并降巴延承制以临安为两浙大都督府蒙古岱范文虎入治府事复命张惠阿喽罕等入城籍其军民钱谷之数阅实仓库收百官诰命符印图籍悉罢宋官府取宋主居之别室分遣招谕南北两广四川未下州郡仍禁人不得侵坏宋氏山陵谢后命吴坚贾余庆诸臣赴阙请命巴延拜表称贺帝命囊嘉特传旨召巴延偕宋君臣入朝巴延以阿喽罕董文炳留治行省事经略闽粤蒙古岱以都督镇浙西索多以宣抚使镇浙东唐古特

李庭护送宋君臣北上巴延以宋主至上都世祖御大安阁受朝降授宋主■〈显，去页〉开府仪同三司检校大司徒封瀛国公命巴延告于天地宗庙大赦天下帝劳巴延巴延再拜谢曰奉陛下成算阿珠效力臣何功之有复拜同知枢密院初海都称兵内向诏以右丞相安图佐皇子北平王诺摩罕统诸军于阿里玛图备之十四年诸王锡里济劫北平王拘安图胁宗王以叛命巴延率师讨之与其众遇于鄂勒欢河掩其不备破之锡里济走死十八年世祖命燕王抚军北边以巴延从谕之曰巴延才兼将相故俾从汝不可以常人遇之燕王每与论事尊礼有加是岁颁羣臣食邑诏益以藤州等处四千九百七十七户巴延之取宋而还也诏百官郊迎以劳之平章阿哈玛特先百官道谒巴延解玉钩绦遗之阿哈玛特谓其轻已诬以平宋时取其玉桃盏帝命按之无验遂复其任阿哈玛特既死有献此盏者帝愕然曰几陷我中良伯奇里克默色尝诬巴延以死罪未几以它罪诛敕巴延临视巴延与之酒怆然不顾而返帝问其故对曰彼自有罪以臣诛之人将不知天诛之公也二十二年宗王阿济格失律诏巴延代总其军二十四年或告纳颜反诏巴延窥覘之既至纳颜乃设宴谋执之巴延觉驰还白状从世祖亲征擒纳颜二十六年知枢密院事出镇和林二十九年宗王莽赉特穆尔挟海都以叛诏巴延讨之相值于额森呼图克岭矢下如雨巴延先登陷阵诸军望风争奋大破之军还卒遇伏兵巴延坚壁不动遂引去巴延追击之斩首二千级俘其余众以归诸将言古礼兵胜必禡旗于所征之地欲用囚虏为牲巴延不可众皆叹服未几海都复犯边廷臣有谮巴延久居北边与海都通好诏以御史大夫伊宝特穆尔代之居巴延于大同以俟后命伊实特穆尔未至巴延遣人语之曰公姑止待我剪此寇而来未晚也巴延与海都兵交且战且却诸将以为怯巴延曰海都悬军涉吾地邀之则遁诱其深入一战可擒也诸军必欲速战若失海都谁任其咎诸将曰请任之即还军击败之海都果脱去乃君伊实特穆尔至授以印而行时成宗以皇孙奉诏抚军北边举酒以饯曰公何以教我巴延举所酌酒曰可慎者惟此与女色耳三十年驿召至自大同世祖不豫明年世祖崩巴延总百官以听成宗即位于上都之大安阁亲王有违言巴延握剑立殿陛宣扬顾命述所以立成宗之意辞色俱厉诸王股栗趋殿下拜【按伊实特穆尔传云定策之际伊实特穆尔谓晋王噶玛拉曰神器不可久虚王为宗盟之长奚俟而不言王曰王孙即位愿北面事之于是宗亲大臣合辞劝进遂即位语异本传】拜开府仪同三司太傅录军国重事依前知枢密院事时相有忌之者巴延语之曰幸送

我两罌美酒与诸王饮于官前余非所知也冬十二月
卒巴延深略善断将二十万众伐宋若将一人诸师仰之若神明毕事还朝归装惟衣被
而已未尝言功大德八年追封淮安王谥忠武至正四
年进封准王子满达勒命枢密院事囊嘉特枢密副使孙沙克嘉实哩同佥枢密院事集
贤学士至治末省先莹于巴济拉山闻有变赴上都或
劝少避之曰我与国同休戚可避难乎至上都果见囚久之得释寻迁江南行台御史大
夫曾孙布达实哩皆能世其家

钦定续通志卷四百六十六

●钦定续通志卷四百六十七 列传二百六十七

列传

元 【二十一】

○元二十一

阿珠

阿尔哈雅

姜卫

托克托呼 【绰

和尔】

阿珠

阿尔哈雅

姜卫

托克托呼

△阿珠

阿珠乌哩特氏都帅乌兰哈达子也宪宗时从其父征西南夷所向摧陷至平大理
克诸部降交趾无不在行世祖即位留典宿卫中统三
年从诸王征李璫有功拜征南都元帅治兵于汴至元元年略地两淮攻取战获军声大
振四年观兵襄阳遂入南郡取僊人铁城等栅军还宋
兵邀襄樊间阿珠乃自安阳滩济江立虚寨诱敌斩首万余级初阿珠过襄阳驻马虎头
山宿汉东白河口曰若筑垒于此襄阳粮道可断也五
年筑鹿门新城等堡继又筑台汉水中与夹江堡相应自是宋兵扰襄者不能进六年大
霖雨汉水溢宋将夏贵范文虎相继来援复分兵出入
水岸林谷间阿珠谓诸将曰此张虚形不可与战宜整舟师备新堡明日宋兵果趋新堡
大破之遂治战船分水军筑圜城以逼襄阳文虎复率
舟师来救来兴国又以兵百艘侵百丈山俱败走之九年破樊城外郭增筑重围以逼之
宋裨将张顺张贵自上流入襄阳阿珠攻之顺死贵仅
得入城俄乘船东走阿珠追战至柜门关擒贵余众尽死是年加同平章事先是襄樊两
城汉水出其间宋兵植木江中联以铁锁中设浮梁以
通援兵樊恃此为固至是阿珠以锯断木以斧断锁焚其桥襄兵不能援十年 【按拔樊

城及吕文焕出降原传作九年十二月事误今据世祖记及阿尔哈雅传改正】遂拔樊城襄守将吕文焕惧而出降奉命略淮东抵扬州城下宋以千骑出战阿珠设伏擒其骑将王都统十一年入覲奏请伐宋帝可其奏诏益兵十万与丞相巴延参政阿尔哈雅等同伐宋进平章政事师次郢之盐山得俘民言宋沿江九郡精锐尽聚郢江东西两城不若取黄家湾堡由东河口拖船入湖转以下江为便遂舍郢而去行大泽中忽宋兵千骑突至时从骑纔数十人阿珠奋槊驰击斩一百余级生擒其将赵范二统制进攻沙洋新城拔之前次复州守将翟贵迎降时夏贵扼江汉口两岸备御坚严阿珠用军将马福计回舟沦河口从阳罗堡西沙芜口入江进攻阳罗堡不克乃谓巴延曰若分军船之半循岸西上伺隙捣虚可以得志从之明日阿珠遥见南岸沙洲率众趋之与宋将程鹏飞战于中流鹏飞败走即抵沙洲步鬪又破之追至鄂东门而还夏贵闻阿珠飞渡引兵先遁余皆溃走遂拔阳罗堡巴延议师所向阿珠劝取鄂汉于是水陆并进汉阳鄂州相继皆降十二年黄蘄江州降阿珠率舟师趋安庆范文虎迎降继下池州宋丞相贾似道拥重兵拒芜湖遣宋京来请和巴延商之阿珠阿珠曰今日惟当进兵事若有失罪归于我师进次丁家洲与宋前锋孙虎臣对阵夏贵以战舰横亘冲中似道殿其后阿珠挺身登舟手自持柂突入敌阵诸军继进宋兵遂大溃世祖以宋重兵皆驻扬州临安以之为重命阿珠分兵围扬州进次真州败宋兵于珠金沙既抵扬州造战具于瓜洲漕粟于真州树栅以断其粮道宋都统姜才领步骑二万夹河为阵阿珠击之坚不能郤众军佯北才逐之遂奋而回击才军不能支擒其副将张林斩首万八千级宋两淮镇将张世杰孙虎臣以舟师万艘驻焦山东每十船为一舫联以铁锁以示必死阿珠选善射者千人载以巨舰分两翼夹射阿珠居中合势进击继以火矢烧其蓬檣烟焰张天宋兵争赴水死后军散走自是宋人不复能军矢十月诏拜中书左丞相时诸军进取临安阿珠驻兵瓜州以绝扬州之扰巴延遂平宋十三年夏贵举淮西诸城来附阿珠谓诸将曰今宋已亡独庭芝未下若绝其声援塞彼粮道必东走通泰乃栅扬之西北丁村以扼其馈运贮粟湾头堡以备捍御留屯新城以逼泰州又遣千户巴延彻尔率甲骑三百助湾头兵势且戒之曰庭芝水路既绝必从陆出宜谨备之六月姜女知高邮米运将至果夜犯丁村栅【按续通鉴云自夜达旦元兵多败董士元战死事详士元传】巴延彻尔来援所将皆阿珠牙下精兵旗帜画双赤月众军望而呼曰丞相来矣宋军识其旗皆遁才脱身走追杀几尽李庭芝以朱焕守扬州挟姜才东走

阿珠追袭杀步卒千人庭芝仅入泰州遂筑垒守之朱
焕以扬州降泰州守将孙良臣【宋史作孙贵胡惟李】开北门纳降执李庭芝姜才
戮之申禁暴掠两淮悉平入见世祖于大明殿陈宋俘
第功行赏实封泰兴县二千户二十三年受命北伐叛王实喇穆尔等明年凯旋继又西
征至哈喇和卓以疾卒追封河南王

△阿尔哈雅

阿尔哈雅辉和尔人聪辨有胆略家贫常躬耕舍耒叹曰大丈夫当立功朝廷何至
效细民事畎亩乎去求其国书读之逾月又弃去事世
祖于潜邸世祖即位渐见擢用由左右司郎中进金河南行省事至元五年命与元帅阿
珠刘整取襄阳又加参知政事始帝遣诸将命毋攻城
但围之以伏其自降乃筑长围以绝之宋兵入授者皆败去然城中粮储多围之五年终
不下阿尔哈雅以为宜先攻樊城樊城下则襄阳可不
攻而得乃入奏报可会有西域人伊斯玛音献新炮法以其人来军中十年为炮攻樊破
之先是宋兵为浮桥以通襄阳之援阿尔哈雅发水军
焚其桥襄援不至城乃拔遂移攻具以向襄阳炮中樵楼声如雷霆城中汹汹诸将多踰
城降者刘整欲立碎其城阿尔哈雅不许乃身至城下
劝吕文焕降折矢为誓文焕感而出降帝以文焕为襄汉大都督阿尔哈雅行荆湖等路
枢密院事镇襄阳阿尔哈雅奏曰襄阳既克宜乘胜顺
流长驱宋可必平平章阿珠亦赞其说帝乃大征兵拜巴延为行省左丞相阿珠为平章
阿尔哈雅进行省右丞十一年会师襄阳遂破郢州及
沙洋新城师出沙芜口宋制置夏贵守诸隘甚固阿尔哈雅麾兵攻阳罗堡【原作武矶
堡今依巴延及阿珠传改归画一】贵趋援之阿珠
遂西渡青山矶宋都统程鹏飞迎战败之江中会贵兵亦败走庐州知鄂州张晏然以城
降鹏飞以水军降巴延与诸将会鄂城下遣阿尔哈雅
戍鄂而与阿珠将大兵以东阿尔哈雅集鄂民宣上德惠禁将士毋侵掠民大悦遣人徇
寿昌信阳德安诸郡皆下进徇江陵十二年与安抚高
世杰兵遇于巴陵世杰败走追降之遂下岳州至沙市城不下纵火攻之沙市立破宣抚
朱禔孙制置高达以城降乃入江陵释系囚放戍军除
其徭赋及法令之繁细者传檄郢归峡常德澧随辰沅靖复均房迤荆门及诸洞无不降
者尽奏官其所降官以兵守峡籍其户口财赋来上帝
喜曰巴延兵东阿尔哈雅以孤军戍鄂朕甚忧之今荆南定东兵无后患矣亲作手诏褒
之命右丞廉希宪守江陵促阿尔哈雅还鄂且以沿江
新附诸城委之阿尔哈雅至鄂招潭州守臣李芾不听乃移兵长沙拔湘阴射书城中以
示芾复不答乃决隍水部分诸将以炮攻之破其木堡

流矢中胸创甚督战益急十三年帝力屈及转运使锺蜚英都统陈义皆自杀其将刘孝忠以城降诸将欲屠之阿尔哈雅不可复发仓以食饥者遣使徇彬全道桂阳永衡武冈宝庆袁韶南雄诸郡其守臣皆率其民迎降曰闻丞相所过秋毫无犯民今复见太平矣宋经略使马暨守静江不下使总管俞全招之皆为所杀及会宋主以国降手招谕暨暨复杀之阿尔哈雅乃又为书以开暨终不听因入朝贺平宋拜平章政事使招谕如静江谕暨暨焚之斩其使静江以水为固乃筑堰断大阳小溶二江以遏上流决东南棣以涸其隍破其城民闻城破即纵火焚居室多赴水死暨及总制黄文政总管张虎俱被执因悉坑其民暨暨于市分遣万户托噶布哈徇宾融柳钦横邕庆远齐荣祖徇郁林贵廉象托里徇浔容藤梧皆下之特磨王侬士贵南丹州牧莫大秀皆奉表求内附奏官其降官乃还潭既而宋二王称制海中雷琼全永与潭属县之民文才喻等咸起兵应之舒黄蕲相继亦起诏命讨之且略地海外阿尔哈达既定才喻等使人谕琼州安抚赵与珞降不听遂航海执与珞及冉安国黄之纪皆裂杀之尽定琼南宁万安吉阳地降八蕃罗甸蛮并置安抚以镇之十八年奏请徙省鄂州所定州凡五十八峒夷山獠不可胜计大率以口舌降之未尝专事杀戮又其取民悉定从轻赋民所在立祠祀之二十三年入朝加湖广行省左丞相卒封楚国公谥武定至正八年进封江陵王子和斯哈雅湖广行中书省左丞袞格根江西行中书省平章政事孙苏尔约苏哈雅自有传

△姜卫

姜卫国王苏肯彻尔之子也性弘毅重厚喜延士大夫听读经史以故临大事决大议言必中节至元十一年世祖命总鸿吉哩等五投下兵从伐宋由正阳取安丰略庐克和攻司空山平野人原道安庆渡江东下会丞相巴延兵于润州分三道并进姜卫率左军参政董文炳为副

【按巴延传言参政董文炳为左军宋纪言董文炳范文虎俱不及姜卫与此互异】部署将校申明约束江阴华亭澈浦上海悉望风款附进屯盐官巴延已驻师临安城下得宋主降表姜卫乃移兵瓜洲与阿珠兵合临扬州都统姜才攻扬子桥率诸将击败之十三年入觐授征西都元帅时亲王海都叛命领汪总帅兵以镇西土十四年召拜江南诸道行台御史大夫乃陈便民一十五事帝皆纳焉浙东盗起浙西宣慰使锡里伯纵兵肆掠俘及平民乃遣御史商琥阅治之释者以数千计遂执锡里伯还治其罪十六年入觐会左丞崔斌等言平章阿哈玛特不法事诏命姜卫及知枢密院博啰共鞫之阿哈玛特称疾不出博啰欲回姜卫厉声曰奉旨

按问敢回奏耶令輿疾赴对既引伏有旨释免仍谕姜
卫曰朕知卿不惜颜面复令还南行台十八年左丞范文虎参政李庭以兵十万航海征
倭遭飓风士卒十丧六七帝震怒复命行省左丞相塔
尔海征之一时无敢谏者姜卫遣使入奏谓当预修战舰练士卒使彼闻之深自备御迟
以岁月俟其疲惫乘风疾往可一举而下也帝遂罢其
役【按日本国二十年命塔尔等募兵造舟淮西宣慰使昂吉尔上言民劳乞寝兵与本
传异】十九年又奏阿尔哈雅占降民一千八百户
为奴阿尔哈雅以为征讨所得又自陈其功比巴延当赐养老户御史滕鲁瞻劾之有旨
遣使赴行台逮问姜卫曰滕御史何罪即驰奏使者竟
归二十年以疾请入覲进译语资治通鉴帝即以赐东宫经筵讲读拜江淮行省左丞相
二十一年卒子蠡州子阿喇卜丹南行台御史大夫

△托克托呼

托克托呼其先库春居伊埒巴尔山因以为氏号其国曰钦察其地去中国三万余
里库春生苏穆鼐苏穆鼐生伊纳克实世为钦察国王
太祖征默尔奇斯其主辉图莽钦察伊纳克实纳之太祖命将往讨国中大乱伊纳克实
之子和拉苏默遣使自归于太祖宪宗帅师至和拉苏
默之子巴图彻尔举族迎降从征默尔奇斯有功又从世祖征大理伐宋以强勇称尝侍
左右掌尚方马畜托克托呼巴图彻尔子也中统元年
父子从世祖北征俱以功受上赏巴图彻尔卒乃袭父职备宿卫至元十四年诸王托克
托穆尔锡里济叛托克托呼率兵讨败之珠尔噶岱构
乱托克托穆尔引兵应之中途遇托克托呼获其候骑托克托穆尔乃引去遂灭珠尔噶
岱追托克托穆尔等至图喇河寻复败之十五年大军
北征诏率钦察骁骑千人以从追锡里济踰金山擒扎哈台等以献又败库春格尔等俘
获甚众还朝帝亲慰劳之有旨钦察人为民柔隶诸王
者皆别籍之以隶托克托呼选其才勇以备禁卫累迁至枢密院副使二十三年兼都指
挥使听以宗族将吏备官属海都兵犯金山诏与大将
托多尔海其御之二十四年宗王纳颜叛阴遣使来结额布根锡里哈为托克托呼所执
尽得其情以闻寻令锡里哈入朝将由东道进托克托
呼言于北安王曰彼分地在东脱有不虞是纵虎入山林也乃命从西道进既有言额布
根叛者众欲先闻于朝然后发兵托克托呼曰兵贵神
速即日启行七昼夜渡图喇河战于博恰岭大败之世祖时亲征纳颜遣使命托克托呼
收其余党沿河而下遇叛王时尔格军击走之擒叛王
哈喇倭等献俘行在所诛之时成宗以皇孙抚军于北诏以托克托呼从追纳颜余党于
哈拉衮诛叛王乌塔噶尽降其众二十五年诸王伊奇

哩为叛王哈喇哈斯所攻复从皇孙移师援之败诸乌尔呼还至哈拉衮山败叛王哈坦尽得辽左诸部置东路万户府二十六年从皇孙晋王征海都诸军失利托克托呼直前鏖战翼晋王而出追骑大至乃选锐设伏以待寇不敢逼世祖巡幸北边召见慰谕之曰昔太祖与其臣同患难者饮班珠尔河之水以纪功今日之事何愧昔人还至京师论功行赏帝欲先钦察之士托克托呼言蒙古将吏宜先帝曰尔毋饰襄蒙古人诚取汝右力战岂在汝右耶二十九年略地金山获海都之户三千余还至和琳有诏进取奇尔济苏三十年师次欠河【地理志作谦河】冰行数日始至其境尽数其五部之众屯兵守之海都闻取奇尔济苏引兵至欠河复败之二年诸王附海都者率众来归边民惊扰身至伊噜哈斯界馈饷安集之导诸王永和尔等入朝大德元年拜同知枢密院事钦察亲军都指挥使奉命还北边至宣德府卒追封延国公谥武毅后加封升王子八人其第三子曰绰和尔

绰和尔

绰和尔

绰和尔初以大臣子奉诏从太师阿尔娄行军战于布达山有功拜左卫亲军都指挥使大德元年袭父职领征北诸军帅师踰金山攻巴林之地败其将达兰台于达噜噶河追奔五十里还次达噜噶河与海都所遣援巴林之将博贝军遇又击败之二年北边诸王都勒斡齐齐克图等袭和啰噶图之地兵据高山绰秋尔选勇而善步者持挺刃四面上奋击尽覆其军三年入朝拜枢密院事钦察都都指挥使太仆太卿复还边是时武宗在潜邸领军朔方军事必谘于绰和尔及战尝为先四年叛王图们俄罗斯等犯边绰和尔及其未阵薄之敌遁追之踰金山乃还五年海都兵越金山而南止于特济根山因高以自保绰和尔急引兵败之复与都勒斡相持于乌尔图之地以精锐驰其阵左右奋击都勒斡兵几尽事闻诏问战胜功状咸称绰和尔功第一七年入朝帝嘉奖之拜枢密院副使九年诸王都勒斡彻伯尔莽赉特穆尔等因与托克托呼及绰和尔屡战无功遣使请罢兵通好帝许之于是罢兵入朝特为置驿以通往来十年知枢密院事成宗崩武宗时在衮穆苏之海上绰和尔请急归定大业武宗纳其言即日南还及即位加拜平章政事还边复封荣国公至大二年入朝加封句容郡王【按绰和尔加封句容郡王武宗纪至大三年仁宗绝延佑三年并载此事本传作至大二年未知孰是】延佑元年败叛王额森布哈等军于伊特格库默色之地二年复败其将额布根呼图克特穆尔于齐默根之地追玉铁门关遇其大军又败之四年

帝念其功而悯其老召入商议中书省事待以宗室亲王之礼玉治二年卒后累封扬王子六人雅克特穆尔自有传

钦定续通志卷四百六十七

●钦定续通志卷四百六十八 列传二百六十八

列传

元 【二十二】

○元二十二

来阿巴齐

耨埒【伊苏岱尔】

阿喽罕

安塔

哈 索多【伯嘉努】

李恒

来阿巴齐

耨埒

阿喽罕

安塔哈

索多

李恒

△来阿巴齐

来阿巴齐宁夏人父济苏和尔归太祖选居宿卫继掌膳事宪宗即位大举伐宋攻钓鱼山济苏和尔建言请城重庆合州二城之间命将

守之与成都旧兵相出入不时扰之以牵制其援师然后水陆东下破忠涪万夔诸小郡出三峡下荆楚与鄂州渡江诸军合势则东南一举可

定诸将以其言为迂卒不用于是博选宿卫中材力可任用者以阿巴齐奉命往监元帅耨埒军竭宋人援兵驻重庆下之铜罗峡宋都统甘顺

泝流西上乘舟来攻阿巴齐顺流而进宋人力战不能支退保西岸明日复至阿巴齐率精兵缘厓而下宋人败走杀伤数千人帝闻而壮之宪

宗崩阿巴齐从其父倍道归燕世祖即位问以川蜀之事阿巴齐历陈始末诵其父前所言以对世祖抚掌曰当时若从东南其足平乎朕在鄂

渚日望上流之声势耳至元七年南征襄樊发河南北器械粮储命阿巴齐督运二日而毕十八年授益都等路宣慰使都元帅发兵开运河阿

巴齐往来督视寒暑不辍河既开迁胶莱海道漕运使二十一年辽左不宁授征东招讨使阿巴齐招徕降附远近帖然二十二年皇子镇南王

征交趾授湖广等处行中书省右丞二十四年改湖广等处行尚书省右丞诏四书 【按安南国传四省江淮江西湖广及云南】 所发士马

俾阿巴齐阅视领中卫亲军千人翊导皇子至思明州贼阻险拒守于是选精锐战于女儿关斩馘万计进至交州陈日烜空其城而遁屡遣使

约降欲以缓我师诸将皆信其说久之军乏食曰烜不降拥众据竹洞安邦海口阿巴齐率兵往攻之贼兵败遁会将士多疫不能进而诸蛮复叛所得关隘皆失守乃议班师选诸军步骑命先启行且战且行贼据高险射毒矢将士裹创以战诸军护皇子出贼境阿巴齐中毒矢遂卒子吉逊平黎蛮有功官雷州路总管

△耨埒

耨埒沙十珠岱人祖博啰岱为太祖宿卫从太宗平金戍河南父丹达尔佐宪宗征阿苏钦察等国有功拜都元帅岁壬子率陕西西海巩昌诸军攻宋入蜀癸丑与总帅汪特格立利州甲寅攻碉门黎雅等城乙卯入重庆获都统制张实是岁卒耨埒伟貌长身勇力绝人且多谋略常从父军中丁巳宪宗命将兵万人略地自利州下白水直抵夔门戊午还钓鱼山引军欲会都元帅阿多古等于成都宋制置使蒲择之遣安抚刘整都统制段元鉴等率众据遂宁江箭滩渡以断东路耨埒军至与战斩首二千余级遂长驱至成都蒲择之命杨大渊等守剑门及灵泉山自将兵取成都会阿多古死诸王额布根与诸将扎里台等推耨埒为长耨埒率诸将大破宋军于灵泉山蒲择之兵溃进围云顶山城扼宋军归路其主将仓卒失计遂以其众降城中食尽亦杀其守将以降成都彭汉怀绵等州悉平威茂诸蕃亦来附捷闻即军中真拜都元帅冬帝进军至大获山耨埒发成都遣张威为前锋水陆并进谋锁重庆江以绝吴蜀之路缚桥资州之口以济师千户温都尔率舟师而下耨埒将步骑而南鼓噪渡泸放舟而东蒲择之以兵分道要遮遇辄败之耨埒至涪造浮桥驻军桥南北以杜宋援兵明年朝行在所还讨思播二州宋将吕文焕攻涪浮桥时士马不耐水土多病死有旨督战不得已出师大败文焕军遂班师文焕以兵袭其后耨埒战郤之中统元年耨埒遣梁载立招降黎雅碉门岩州偏林关诸蛮得汉蕃二万余户未几招苏克分西川兵及陕西诸军属耨埒镇秦巩唐古之地三年宋将刘整以泸州降吕文焕围之诏以兵往援文焕败走遂徙泸州民于成都潼川四年为刘整所谮征至上都验问无状诏释之还至昌平卒子伊苏岱尔

伊苏岱尔

伊苏岱尔

伊苏岱尔勇智类其父至元十一年入见世祖以属行枢密院和塔齐使习兵事从围嘉定以三千人至三龟九顶山相地形势败宋安抚咎万寿兵以功授六翼达噜噶齐既而嘉定三龟九顶紫云诸城皆降从行枢密副使呼敦率兵徇下流诸城皆望风来附呼敦会东川行枢密

院哈达围重庆岁余不下帝命副使布哈代将布哈将兵至城下伊苏岱尔率二十余骑攻其门宋都统赵安出战伊苏岱尔三入其军再挟猛士以出大兵四集斩首五百余级赵安开门降制置使张珩遁追至涪州擒之捷闻授四川西道宣慰使加都元帅罗氏鬼国亦奚不薛叛诏以四川兵会云南江南兵讨之亦奚不薛遣先锋阿麻阿豆等迎敌伊苏岱尔驰入其军斩之亦奚不惧率所部降【按经世大典载至元十六年罗氏国主阿察叛十七年讨之阿察遣阿口阿麻至宣慰司自言无反意伊苏岱尔等分兵三道攻会宁关亦奚不薛遣其部阿侯拒战败逃入山箐亦奚不薛及阿察俱遁伊苏岱尔定议班师命将守之贼穷困至二十年乃纳款事异本传】以功拜西川等处行中书省右丞西南夷雄左都掌蛮得兰右叛诏以兵讨降之改四川等处行枢密副使乌蒙蛮阴连都掌蛮以叛诏以兵会云南行院拜达勒进讨伊苏岱尔擒乌蒙蛮进同知四川等处行枢密院事成宗即位拜四川等处行中书省平章政事武宗时由四川迁云南加左丞相南征叛蛮感瘴毒还至成都卒长子囊嘉特官至四川行省平章政事孙达实巴图尔自有传

△阿喽罕

阿喽罕扎拉尔氏祖传绰氏太祖为博啰齐数有战功太祖即位从征陇北陕西身先战士死焉父伊埒肯从皇子库春南征累功拜诸翼军马都元帅统大军攻淮东西都郡戊午战死扬州阿喽罕袭为诸翼蒙古军马都元帅己未从世祖渡江至鄂而还世祖即位宗王额埒布格称兵内向阿喽罕以所部军击破之中统三年李璫叛阿喽罕败之于老仓口璫伏诛授都元帅至元四年从阿珠伐宋师次安阳滩逆战宋兵败之五年大军围襄樊阿喽罕守百丈山漫河滩兵累交宋不能师十年樊城破襄阳降十一年丞相巴延与阿珠会师襄阳遣阿喽罕率诸翼军攻郢复诸州夺郢州南门堡巴延阿珠欲取汉口渡江宋人以精兵扼汉口乃遣阿喽罕击沙芜堡遂入江取鄂州阿喽罕略寿昌顺流东下沿江州郡悉降十二年屯驻建康巴降受诏赴阙以阿喽罕留治省事拜参知政事巴延还分军三道共进阿喽罕由西道趋溧阳攻破银树东坝至护牙山庆丰圩连败宋军破建平县进攻广德军独松关宋广德守张濡率兵来拒战败追斩之十三年宋以国降诏阿喽罕同左丞董文炳高兴等攻浙东温台衢婺处明越及闽中诸郡降其运使提刑等五百人追袭宋嗣秀王赵与檠至安福县【按安福县宋史作瑞安考宋二王纪景炎间升福州为福安府温州为瑞安府元地理志福州路有福安县然则安福误也与檠宋史作与罍】与檠以军三万拒战阿喽

罕渡江鏖战斩其步帅观察使李世达生擒与釋及其将吏百八十人悉斩之泉州蒲寿庚降江南平以参知政事行江东宣慰使十四年入覲进行中书省左丞俄迁右丞仍宣慰江东十八年召拜中书左丞行中书省事统蒙古军四十万征日本行次庆元卒于军子贝降袭贝降卒弟伊苏岱尔袭

△安塔哈

安塔哈痕都斯坦人祖塔尔海巴图尔骁勇善战尝从太祖同饮黑河水以功为千户父布哈袭职卒安塔哈袭千户从大帅乌兰哈达征云南身先行阵师还事世祖于潜邸至元九年命驰驿督诸军攻襄阳十年襄阳下第功授镇国上将军淮西行枢密院副使十一年筑正阳东西城宋将夏贵乘淮水溢来争正阳安塔哈率众御之贵走追至安丰城下而还拜中书右丞行枢密院事十二年渡江与丞相巴延军合克池州师次建康宋镇江摄守石祖忠遣使乞降扬州守将李庭芝闻之遣兵突围出击安塔哈救之宋兵退走时真泰诸城尚为宋守镇江城壁不固安塔哈乃立木栅以保居民又分兵屯瓜洲以绝扬州之援宋将张世杰孙虎臣帅舟师陈于江中焦山下其势甚张安塔哈与平章阿珠督诸军破之宋殿帅张彦与平江都统刘师勇袭吕城遣万户辉图击之斩彦克常州降平江嘉兴十三年【按原传降平江嘉兴以前诸事统叙于至元九年之下同以宋降为十二年事与本纪及巴延阿珠等传俱不合谨按年次改正】会兵临安降诏与阿珠议淮南事宜淮南平授平章政事行中书省事十五年召赴阙行拜中书省左丞相移治临安二十年迁征东行省丞相征日本遇风舟坏丧师二十二年行同知沿江枢密院事二十三年行江西中书省事入朝二十四年扈从征纳颜师还奉朝请居京师二十六年卒追封顺昌郡王谥武敏子阿里玛累官江南诸道行御史台御史大夫

△索多

索多拉拉尔民骁勇善战入宿卫从征花马国有功李璿叛从诸王哈必齐平之还言于朝日郡悬恶少年多从间道鬻马于宋境乞免其罪籍为兵从之得兵三千人以千人隶索多为千户命守蔡州至元五年阿珠等围襄阳命索多巡逻夺宋金刚台寨笮基窝青涧寨大洪山归州洞诸隘尝猝遇宋兵千余持羈勒欲窃马索多战败之六年宋将范文虎率舟师驻罐子滩丞相史天泽命索多拒郟之升总管九年攻樊城索多先登城遂破襄阳降升郟复等处招讨使十一年移戍郢州之高港败宋师从大军济江鄂汉降十二年建康降参政达春命索多入城招

集改建康安抚使攻平江嘉兴皆下之十三年【按巴延传巴延驻军皋亭山乃十三年事此传统叙于十二年内今据增】舟师会巴延于皋亭山宋平诏巴延以宋主入朝留参政董文炳守临安以索多副之时衢婺诸州皆复起兵文炳使索多镇严州衢婺徽连兵来攻索多战郟之复婺州败宋将陈路钤于梅岭之下又复龙游县攻衢州拔之宋丞相留梦炎降攻处州及建宁府松溪怀安等县皆下之十四年升福建道宣慰使行征南元帅府事参政达春令取道泉州泛海会于广州之富场将行信州守臣来求援曰今邵武方聚兵观衅元帅旦往邵武兵夕至矣索多乃还周万户等往招降之索多趋建宁遇宋兵于崇安击败之宋丞相文天祥南剑州都督张清合兵将袭建宁索多夜设伏败之转战至南剑败张清夺其城至福州王积翁以城降攻兴化军破其城巷战终日获知军陈瓚支解以徇至漳州先遣其子伯嘉努往会达春留攻之知府何清降攻潮州知府马发不降索多恐失富场之期乃舍之而去十五年至广州达春令还攻潮发城守益备二十余日不能下索多令于众曰有能先登者拜爵已官者增秩总管乌兰噶尔先登诸将继之宋兵溃潮州平进参知政事行省福州入见帝升左丞行省泉州十八年改右丞行省占城十九年率战船浮海伐占城占城迎战斩溺五万余人及败之于大浪湖占城降复伐乌里越里诸小夷皆下之积谷十五万以给军二十一年镇南王托欢征交趾诏索多帅师来会败交趾兵于清化府奋义安关托欢命索多屯天长以就会与大营相距二百余里二十二年有旨班师托欢引兵还索多不知也交趾使人告之弗信及至大营则空矣交趾遮之于干满江力战死事闻溢襄愍子伯嘉努

伯嘉努

伯嘉努

伯嘉努至元五年从元帅阿珠攻襄阳筑新城数立功七年以质子从郡王哈达败宋兵于罐子滩八年宋殿帅范文虎等督促粮道输之襄阳伯嘉努顺流出击累获战功于是河南行省命为管军总把后隶丞相巴延麾下擢为知印十一年【按巴延传伯嘉努从攻鄂州破金牛霸事皆在至元十一年今据增】从攻鄂州深入郟敌身被数创攻沙洋及新城登城力战拔之巴延以功上闻世祖大悦从围汉阳自沙芜口【原作沙武口今据巴延及阿尔哈雅传改归画一】曳船入江宋制置夏贵来迎战伯嘉努突入击之宋兵溃遂登江南岸获其战船器甲甚多未几复攻破金牛坝十二年取鸡笼洞还遂至瑞昌县遇夏贵溃兵复击败之是时宋遣兵救瑞昌未至而县已下矣围江州宋安抚吕

师夔以城降东定池州击宋平章贾似道及孙虎臣于丁家洲追逐百余里擒宋统制王文虎因定黄池略地宣州伯嘉努为前锋败敌兵于喃呢湖于是太平州望风歛附攻丹阳吕城破常州皆有功至苏州宋守臣王安抚以城降秀州湖州皆不烦兵而下诸军乘胜趋临安宋主出降十三年领新附军守镇江未几复从平章博啰罕攻泰寿二州中创遂攻后数日攻泰州新城力疾先登破之复被两创已而从阿珠攻下扬州诸郡得宋制置李庭芝都统姜才以功升管军总管镇高邮白马湖徇地福建定衢婺信等州至新安击斩宋赵监军詹知县擒江通判鼓行而东沈安抚以建宁府降攻陷南剑州张清聂文庆遁去闽清怀安二县传檄而定至福州谕以威德王安抚率众出降攻破兴化擒陈安抚及白牒都统别击东华乡张世杰军于泉州俄领诸军乘战船入海追逐张世杰于甲子门进至答关寨濒海县镇悉招谕下之白望丹王虎陈以战船三十余艘来降宋二王遣倪宙奉表诣军门降遂进兵至广州诸郡县以次降附明年春振旅还复攻下德胜等寨至蒲仙江聂文庆复败走攻潮州破之诛马发寺数人广东遂平引宙奉降表来朝未至授管军万户七月朝于上都升海外诸蕃宣慰使兼福建道长司宣慰使都元帅是时福建多水灾伯嘉努出私钱市米以振贫民全活者甚众二十二年从父索多征交趾索多战死伯嘉努遂与托欢引兵薄交趾境水陆转战战辄有功二十七年除建康路总管武宗即位迁镇江路总管至大四年金疮发卒于家

△李恒

李恒字德卿其先姓于弥氏唐末赐姓李世为西夏国主太祖经略河西有守乌讷尔城者夏主子也城陷不屈死子惟忠方七岁求从父死主将异之报以献宗王哈扎尔王留养之及嗣王伊逊克立惟忠从经略中原有功以为达噜噶齐惟忠生恒恒生有异质王妃抚之犹己子中统三年命恒为尚书断事官恒山让其兄李璫反涟海恒从其父弃家入告变璫怒系恒阖门狱中璫诛得出世祖嘉其功授淄莱路鄂啰总管至元七年改益都淄莱新军万户从伐宋襄阳守将吕文焕时出拒敌殿帅范文虎复援之恒筑堡万山绝其陆路文焕等又以渔舟渡汉水窥伺军形恒设伏败之水路亦绝遂进攻樊城十年恒以精兵渡汉自南面先登樊城破襄阳亦降十一年丞相巴延会师襄阳进至鄂州守以舟师截汉水巴延舍郢进攻沙洋新城留恒为后拒败其追兵至阳罗堡宋制置夏贵遣其子公来逆战恒先陷陈额中流矢战益力卒射松杀之夏贵败走鄂州汉阳俱下遂从巴延东下十二年宋将高世杰复窥汉沔乃遣恒还守

鄂州时豪民聚众侵江陵命恒讨之恒谕使降得生口
十余万悉纵为民仍禁军毋得虏掠十三年从右丞阿尔哈雅至洞庭生擒世杰下岳州
进攻沙市拔之宋制置高达以江陵降留恒镇守传檄
归峡辰沅靖澧常德诸州皆下未几徙镇常德以扼湖南之冲俄有诏分三道出师以恒
为左副都元帅从都元帅苏都尔台出江西开府江州
师次建昌县擒都统熊飞 【按宋纪云飞率兵巷战兵败赴水死与此互异】 遂围隆
兴转运使刘盘请降恒察其诈密为之备盘果以锐兵
突至恒击败之下抚瑞建昌临江进攻吉州知州周天骥降遂定赣南安广东经略徐直
谅奉蜡书纳其所部十四郡前江西制置黄万石亦以
邵武降隆兴帅府诬富民与敌通已诛百三十家恒还审其非罪尽释之宋丞相陈宜中
及其大将张世杰立益王皇于闽中郡县豪杰争起兵
应之恒遣将破吴浚兵于南丰世杰遣都统张文虎与浚合兵十万期必复建昌恒复遣
将败之浚走从文天祥于瑞金又破之天祥走汀州遣
镇抚孔遵追之并破赵孟营军取汀州迁江西宣慰使天祥复取汀州兵出兴国县连破
诸邑围赣州尤急或请发天祥祖父坟墓恒不许乃分
兵援赣自率精兵潜至兴国天祥走追至空坑擒招讨使赵时赏降其众二十万有旨令
与右丞阿里哈左丞董文炳合兵追益王众请宜趋福
建恒曰若诸军俱在福建彼必窜广东则梅岭江西非我有矣宜从广东夹攻之众以为
然兵至梅岭果与宋兵遇败之乃遁走碭州十四年拜
参知政事行省江西十五年益王殂其枢密张世杰陆秀夫等复立卫王昺守广东诸郡
诏以恒为蒙古汉军都元帅经略之恒进兵取英德府
清远县败其制置凌震运使王道夫遂入广州世杰等移屯崖山时都元帅张弘范舟师
未至恒分遣诸将略定梅循诸州凌震等复抵广州恒
击败之十六年弘范至自漳州直指崖山恒率所部赴之张世杰集海舰千余艘贯以巨
索为栅以自固恒断其汲路其势日迫谕降不可乃搗
其栅索绝世杰犹死战弘范督诸军合击大败之陆秀夫先沈妻子于海乃抱卫王赴海
死从死者十余万人是日黑气如雾有乘舟南遁者恒
以为卫王追至高化始知卫王已死遁者张世杰也世杰继亦溺死于海陵港 【宋史张
世杰传作平章山下】 岭海悉平功成入覲帝赏劳
甚厚十七年拜中书左丞行省荆湖十九年乞解军职乃命其长子萨满达袭为本军万
户二十一年 【据世宗纪补】 诏从皇子镇南王征
交趾结筏渡海夺天长府交趾遂空其国航海而遁恒封其宫庭府军追袭至海洋败之
会军中疾作霖潦暴涨浸濯营地众议班师恒弗能夺
遂还蛮兵追败后军王命恒殿后且战且行毒矢贯膝至思州毒发卒谥武愍追封滕国

公子萨满达江西行省平章政事囊嘉特章益都淄莱

万户苏都尔台同知湖南宣慰使司事

钦定续通志卷四百六十八

●钦定续通志卷四百六十九 列传二百六十九

列传

元 【二十三】

○元二十三

彻尔

博果密

鄂勒哲

鄂尔根萨里 【岳柱】

彻尔

博果密

鄂勒哲

鄂尔根萨里

△彻尔

彻尔杨珠济达氏曾祖塔沁为马步军都元帅从太祖定中原以功封徐邳二州因家于徐彻尔幼孤母富察氏教以读书至元十八年世

祖召见悦之俾侍左右时有所咨访从征东北还因言大军所过民不胜扰宜加振给帝从之赖以存活者众擢利用监二十三年奉使江南省

风俗访遣逸时行省理财力急卖所在学田以价输官彻尔止之二十四年分中书为尚书省僧格为相引用党与钩考天下钱粮凡昔权臣阿

哈玛特积年负逋举以中书失征奏诛二参政行省乘风督责尤峻主无所偿则责及亲戚或逮邻党自裁及死死狱者以百数中外骚动廷臣

莫敢言彻尔乃具呈僧格奸贪误国害民状帝怒谓其毁诋大臣命左右批其颊彻尔辩愈力帝大悟即命往籍其家得珍宝如内藏之半僧格

既诛诸枉系者始得释复奉旨往江南籍僧格姻党江浙省臣乌玛喇默呼实都王济湖广省臣约苏穆尔等皆弃市天下快之进拜御史中丞

俄升福建行省平章政事汀漳剧盗欧狗久不平引兵征之所过秋毫无犯有降者则慰遣之他栅闻之悉款附未几欧狗为其党缚致于军梟

首以徇胁从者不戮一人汀漳平三十一年帝不豫彻尔驰还京师帝崩与诸王大臣共定策迎立成宗大德元年拜江南诸道行台御史大夫

寻改江浙行省平章政事江浙税粮甲天下平江嘉兴湖州三郡当江浙什六七而其地极下水鍾为震泽由吴松江入海岁久淤塞泛滥为患

朝廷命疏导之彻尔董其役凡四阅月毕工九年 【按宰相年表大德十年二月至十月彻尔为中书平章政事与本传不符今考姚燾所撰

神道碑亦作九年则年表误也】 召入为平章政事十月卒追封徐国公谥忠肃至治二

年追封武宁王谥正宪子多尔济江浙省右丞

△博果密

博果密一名时用字用臣世为哈喇部大人康里即汉高车国也祖哈哩巴尝事克
呼王汗王汗灭即弃家从骑西北驰去太祖遣使招之
去莫知所之子十人皆为太祖所虏雅克章最幼太祖以赐庄圣皇后后怜而育之遣侍
世祖于藩邸长从征伐有功世祖威名日盛宪宗将伐
宋命以居守雅克章曰主上素有疑志今乘輿远涉危地殿下以皇弟独处安全可乎世
祖然之因请从南征宪宗喜即分兵命趋鄂州而自将
攻蜀之钓鱼山令额呼布格居守宪宗崩雅克章统世祖留部觉额呼布格有异志奉皇
后策引而南与世祖会于上都世祖即位雅克章未及
大用而卒博果密其仲子也 【姚燧撰神道碑作元子】 命给事裕宗东宫师事太子
赞善王恂恂从北征乃受学于国子祭酒许衡日记数
千言衡称以为有公辅器世祖尝欲观国子所书字博果密年十六书贞观政要数十事
以进帝知其寓规谏意嘉叹久之至元十三年与同舍
生坚通塔塔图噜等上疏历陈前代崇儒兴学之效请先于大都弘阐国学本人伦明物
理然后续立郡县之学求以化民成俗奏入帝览之喜
十四年授利用少监十五年出为燕南河北道提刑按察副使帝遣通事托克托护送西
僧往作佛事还过真定榷驿吏几死诉之按察使不敢
问博果密受其状以僧下狱托克托直欲出僧辞气倔强博果密令去其冠庭下责以不
职托克托逃归以闻帝曰博果密素刚正必尔辈犯法
故也继而燕南奏至帝曰我固知之十九年升提刑按察使二十一年召参议中书省事
时榷茶转运使卢世荣阿附宣政使僧格言能用已则
国赋可十倍于旧帝以问博果密对曰自昔聚敛之臣如桑弘羊字文融之徒操利术以
惑时君始者莫不谓之忠及其罪稔恶着国与民俱困
虽悔何及帝不听以世荣为右丞博果密遂辞参议不拜二十二年世荣以罪被诛擢吏
部尚书时方籍没阿哈玛特家其奴张伞扎尔等罪当
死谬言阿哈玛特家货隐寄者多如尽得之可资国用遂勾考捕系连及无辜京师骚动
帝命丞相安图集六部长贰官询问其事博果密曰是
奴为阿哈玛特心腹爪牙死有余罪岂可复受诬嫁祸善良耶急诛此徒则怨谤自息丞
相以其言入奏帝悟命博果密鞫之具得其实伞扎尔
等伏诛捕系者尽释之二十三年改工部尚书迁刑部河东按察使阿哈玛特以货财谄
媚权贵贷钱于官约偿羊马至则抑取部民所产以输
事觉遣使按治皆不伏及博果密往治得其不法事会大同民饥博果密以便宜发仓廩
振之阿哈玛特所善幸臣奏博果密擅发军储又锻炼

阿哈玛特使自诬服帝曰使行发粟以活吾民乃其职也何罪之有命移其狱至京师审讯阿哈玛特竟伏诛托克托呼求钦察之为人奴者增益其军而多取编民中书僉省王遇验其籍改正之托克托呼遂奏遇有不臣语帝怒欲斩之博果密谏止遇得不死二十四年僧格奏立尚书省诬杀参政杨居宽郭佑博果密争之不得僧格深忌之因其退食责以不坐曹理务欲加之罪遂以疾免二十七年拜翰林学士承旨知制诰兼修国史二十八年彻尔等劾奏僧格罪状帝问博果密具以实对帝大惊乃决意诛之罢尚书省复以六部归中书欲用博果密为丞相博果密曰朝廷勋旧齿爵居臣右者尚多今不次用臣无以服众帝曰然则孰可对曰太子詹事鄂勒哲可曩籍没阿哈玛特家其赂遣近臣皆有簿籍唯无鄂勒哲名又尝言僧格为相必败国事今果如其言是以知其可也乃拜鄂勒哲右丞相博果密平章政事王师征交趾失利复谋大举博果密曰岛夷诡诈天威临之宁不震惧兽穷则噬势使之然今其子曰燇袭位若遣使谕以祸福彼能悔过则不烦兵而下矣帝如之于是交趾感惧遣其伪昭明王等诣阙谢罪【按张立道传载此事在二十年其上表谢罪者则阮代之何维岩二臣也与本传互异】敏珠尔丹请复立尚书省专领右三部博果密庭责之事遂寝或劝征琉球及赋江南包银皆谏止之僧格党人尼雅斯拉鼎等既诛帝以实都长于理财欲释不杀博果密力争之不从日中凡七奏卒正其罪或言京师蒙古人宜与汉人间处以制不虞博果密曰新民乍迁犹未能居若复纷更必致失业乃图写国中贵人宅第已与民居犬牙相制之状上之而止有谮鄂勒哲徇私者帝以问博果密对曰鄂勒哲与臣俱待罪中书设如所言岂得专行宜使面质明示责降言者果屈帝每顾侍臣称苏珠克展之能博果密问其故帝曰彼事宪宗常阴资朕财用博果密曰是所谓为人臣怀二心者今有以内府财物私结亲王陛下以为若何帝急挥以手曰卿止朕失言三十一年【原文作三十年今依世祖纪补】帝大渐与御史大夫伊噜诺延太傅巴延并受遗诏留禁中遂定大策其后发引升祔请谥南郊皆博果密领之成宗即位躬揽庶政听断明果廷议大事多采博果密之言太后亦以博果密先朝旧臣礼貌甚至河东守臣献嘉禾大臣欲奏以为瑞博果密曰无益于民何足为瑞遂罢遣之西僧为佛事请释罪人祈福犯法者皆赂之以求免有杀主杀夫者西僧请被以帝后御服乘黄犊出宫门释之云可得福博果密曰人伦者王政之本风化之原岂可容其乱法如是帝责丞相曰朕戒汝无使博果密知今闻其言朕甚愧之因使人谓之卿且休矣朕今从卿言然自是以为故

事有奴告主者主被诛诏即以其主所居官与之博果密言若此必大坏天下之风俗使人情愈薄无复上下之分矣帝悟追废前命执政奏以为陕西行省平章政事【按续通鉴云博果密为中书平章得与顾命丞相鄂勒哲以其年位在下深忌之又云丞相以下多与议论不合奏以为陕西行省平章政事本传乃鄂勒哲传俱未载附识于此】太后谓帝曰博果密朝廷正人先皇帝所付托岂可出之于外帝复留之竟以与同列多异议称疾不出元贞二年拜昭文馆大学士平章军国重事辞曰是职也国朝惟史天泽尝为之臣何功敢当此制去重字大德二年命行中丞事三年兼领侍仪司事有因父官受贿赂御史必欲归罪其大博果密曰风纪之司以宣政化励风俗为先若使子证父何以兴孝枢密臣受人玉带征赃不叙御史言罚太轻博果密曰大臣若加笞辱非刑不上大夫之义人称其平恕四年卒武宗特赠鲁国公谥文贞子和和陕西行省平章政事库库自有传

△鄂勒哲

鄂勒哲图卜布延氏祖图萨从太祖起朔方平诸部太宗伐金命太弟睿宗由陕西进师以击其不备图萨为先锋破金兵于杨翟金亡从攻兴元阆利诸州拜都元帅取宋成都斩其将陈隆之赐食邑六百户父锡津宿卫禁中掌御膳【按锡津封秦益国公谥忠献制见元文类】中统初从世祖北征四年拜中书丞相与诸儒臣论定朝制鄂勒哲以大臣子选为裕宗王府僚属裕宗为皇太子署詹事长入参谋议出掌环卫甚器重之裕宗薨成宗以皇孙抚军北方鄂勒哲两从入北至元二十八年僧格伏诛世祖咨问廷臣特拜中书右丞相既入相革僧格弊政请自中统初积岁逋负之钱粟悉蠲免之民赖其惠三十一年世祖崩鄂勒哲受遗诏合成威大臣之议启皇太后迎成宗即位诏谕中外建议加上祖宗尊谥庙号致养皇太后示天下为人子之礼元贞以来朝廷恪守成宪诏书屡下散财发粟不惜巨万以颁赐百姓大德四年加太傅录军国重事位望益崇而处于安静不急于功利故吏民守职乐业世称贤相云七年卒追封兴元王谥忠宪

△鄂尔根萨里

鄂尔根萨里辉和尔人祖阿勒台萨里精佛氏学生奇塔特萨里袭先业通经律论业既成师名之曰万全至元十二年入为释教都总统拜统制使卒子三人鄂尔根萨里其中子也以子字为全民幼聪慧受业于国师帕克斯巴既通其学且解诸国语世祖闻其材俾习中国之学于是经史百家及阴阳历数图纬方技之说皆通习之后事裕宗入宿卫深见器重至元

十二年有西域僧自言能知天象译者皆莫能通其说
帝诏鄂尔根萨里与论难僧大屈服帝悦令宿卫内朝会有江南人言宋宗室反者命遣
使捕至阙下使已发鄂尔根萨里入谏曰若果反郡县
何以不知言者不出郡县而言之阙庭必其仇也帝悟召使者还械系言者下郡治之言
者立伏果以尝贷钱不从诬之自是命日侍左右二十
一年擢左侍仪奉御劝帝治天下必用儒术帝嘉纳之遣使求贤置集贤馆以待之命为
集贤学士兼太史院事士之应诏者尽命馆谷之凡饮
食供帐车服之盛皆喜过望有官于宣徽院者欲阴败其事盛陈所给廩饩于内前帝过
而问焉对曰此一士之日给也帝怒曰汝欲使朕见而
损乎十倍此以待天下士犹恐不至况欲损之谁肯至者鄂尔根萨里又请立国子监置
博士弟子员宜优其廩饩使学者日盛从之二十四年
立尚书省僧格用事诏鄂尔根萨里与同视事固辞不许授尚书右丞继拜平章政事僧
格为政暴横且进其党与鄂尔根萨里数切诤之久与
乖刺惟以廉正自持僧格奏立征理司理天下逋欠使者相望于道所在囹圄皆满无敢
言者会地震北京鄂尔根萨里请罢之以塞天变诏下
百姓皆庆未几僧格败以连坐亦籍其产后知其无罪诏还之 【按世祖纪至元二十八年
正月僧格罢二月始罢征理司本传所载恐失其
实续通鉴云尚书省臣僧格及鄂尔根萨里以罪免所以深贬之也】 二十八年乞罢政
事并免太史院使诏以为集贤大学士司天刘监丞言
其在太史院时数言国家灾祥事大不敬请下吏治帝大怒以为诽谤大臣当抵罪鄂尔
根萨里力争之乃得释三十年复领太史院事明年帝
崩成宗在边裕宗太后命为书趣成宗入正大位又命率翰林集贤礼官备礼册命明年
加守司徒集贤院使领太史院事初裕宗即位世祖欲
定皇太子以问鄂尔根萨里即以成宗对成宗及裕宗皇后皆莫之知也数召鄂尔根萨
里不往成宗抚军北边帝遣奉皇太子宝于成宗乃一
至其邸及即位语鄂尔根萨里曰朕在潜邸谁不愿事朕者惟卿虽召不至今乃知卿真
得大臣体自是召对不名赐坐视诸侯王等大德三年
复拜中书平章政事十一年卒延佑四年追封赵国公谥文定祖阿勒台萨里谥端愿父
奇塔特萨里谥通敏追封赵国公子三人长岳柱

岳柱

岳柱

岳柱字止所一字兼山幼颖悟有远识既长日记千言年十八从丞相达实密备宿
卫出入禁中至大元年授集贤学士即以荐贤举能为
事皇庆元年升湖广道宣慰使日接见儒生询求民瘼至顺二年累迁至江西等处行中

书省平章政事时有诬告富民负永宁王官帑者中书遣使诸路征之使至江西岳柱曰事涉诬罔不可奉命僚佐重违宰相意岳柱曰民惟邦本伤本以敛怨亦非宰相福也令使者以此意复命时雅克特穆尔为丞相闻言感悟命刑部诘治得诬罔状桂阳州民张思进等啸聚二千余众州县不能治广东宣慰司请发兵捕之岳柱坚持不可遣千户王英往谕以祸福贼曰致我为非者两巡检司耳我等何敢有异心谕其众皆使复业一方以宁三年迁河南江北等处行中书省平章政事旋以军事至扬州得疾明年冬卒岳柱嗜经史自天文医药之书无不究极度量弘扩有欺之者括不为意子三人长布达次额森次仁寿皆以仕显

钦定续通志卷四百六十九

●钦定续通志卷四百七十 列传二百七十

列传

元 【二十四】

○元二十四

苏克

囊嘉特

蒙古台

鄂啰齐

鄂勒哲图

拜特穆尔

辉图

伊克默色

贝降

博尔欢【巴图】

苏克

囊嘉特

蒙古台

鄂啰齐

鄂勒哲图

拜特穆尔

辉图

伊克默色

贝降

博尔欢

△苏克

苏克蒙古人父呼鲁古尔国王穆呼哩麾下卒也后更隶塔海特尔格军有口辩慎重不泄奏白机务往返未尝失期太宗以为才赐名栋格矩宪宗时卒苏克以壮勇居军中岁甲寅命从都元帅特尔格和尔齐等入蜀乙卯万户刘齐格阿尔娄阿里与宋兵战巴州陷敌中苏克驰入其军奋刘齐格等以归戊午【按耨埒传败刘整事在戊午岁此传统叙乙卯岁之后

系脱误今据增】从都元帅耨埒败宋将刘整破云

顶山城耨埒受诏会涪州至马湖江苏克夜渡江至行在所陈道梗失期帝慰遣之未几复自涪州入奏事遇宋军于三曹山众仅百余奋兵疾战败之己未宋兵攻涪州浮桥部将和尼齐战陷苏克破围出之又以白事诸王穆格所复败宋军于三曹山还至石羊与刘整遇复击败之中统二年命隶耨埒军至元三年从行院塔齐战九顶山四年行省伊苏岱尔署为本军总管从取泸州七年从伊苏岱尔败宋军于马湖江用平章政事赛音谔德齐荐迁行尚书省员外郎九年建都蛮叛诏诸王鄂啰齐及伊苏岱尔诗之苏克为先锋破黎州水尾砦攻连云关克之军至建都战于东山斩其酋布库所过城邑皆下十年讨碉楼诸蛮袭破连环城还败宋军于七盘山授新军万户十一年真授管军万户领成都高乌格等六翼及京兆新军教习水战伊苏岱尔进围嘉定苏克率舟师会平康城修筑怀远等砦守其要害十二年行枢密副使呼敦等军至与伊苏岱尔会于红崖遣苏克守龙坝城中大震宋将陈都统鲜于团练率舟师遁苏克追击溺死者不可胜计遂与中使沈达罕徇下流诸城紫云泸叙皆降进围重庆苏克以所部兵镇白水马湖江口十三年分兵五道水陆并进攻之众军不利唯苏克获战舰三百艘涪州守将遗书纳降苏克往察其情伪至涪果降遂入其城重庆守臣张万率众来袭苏克凡与十八战斩首三百余级万败走宋几复至又战败之十四年泸州复叛苏克从大军讨平之重庆受围久其守将赵安出降制置使张珩遁苏克追破之以功授成都水军万户寻改重庆夔府等路宣抚招讨两司军民达噜噶齐十六年除四川南道宣慰使镇重庆夔施黔忠万云涪泸州十九年亦实布什蛮叛以苏克为宣慰使经理诸蛮二十四年降八番金竹百余等砦悉以其地为郡县二十九年入朝加都元帅改河东陕西等处万户府达噜噶齐三十一年命书四川行枢密院事诏开土番道土番叛以兵围茂州苏克率师败之元贞元年行院罢苏克家居数岁卒子苏布特齐袭河东陕西等处万户府达噜噶齐

△囊嘉特

囊嘉特柰曼人曾祖巴勒巴仕其国位羣臣之右祖哈扎尔管帐前军兼统国攻仕至太师太祖平柰曼父穆彻来归太祖命总管蒙古汉军从世祖伐宋破额呼布格于实默图从诸王噶必齐及库库岱平李璿皆有功后以子贵赠太傅追封梁国公谥桓武囊嘉特幼从穆彻习战陈有谋略从阿珠下襄阳授汉阳千户从丞相巴延攻复州败宋师于风波湖渡江后巴延攻鄂州阿珠攻汉阳囊嘉特与张弘范等焚其蒙冲

三千艘两城大恐皆出降巴延兵次安庆贾似道遣宋京来请和军至池州遣囊嘉特偕宋京报似道似道复遣阮思聪 【经世大典作袁克已】 偕囊嘉特军人仍请议和时暑雨方涨世祖遣使令缓师巴延阿珠与诸将议乘势径前遂进军丁家洲似道师溃大军次建康帝闻囊嘉特亲与贾似道语召赴阙具陈其说遣还谕巴延勿轻入敌境而大军已入平江矣宋使柳岳夏士林吕师孟刘岳等踵至皆命囊嘉特同往报之师逼临安复遣囊嘉特入取降表玉玺征宋将相文武百官出迎王师宋主乃遣贾余庆等同囊嘉特以降表玉玺至皋亭山巴延遣令驰献世祖还传密旨还宋君臣北上授安抚司达噜噶齐与阿喇罕董文炳等取台温福州寻领蒙古军副都万户江东道宣慰使寻擢为都元帅管领通事军马东征日本未至而还诏守建康改拜云南行省参知政事讨金齿緬国得疾召还京师授南京等路宣慰使改河南道宣慰使特旨命袭父职为蒙古军都万户武宗在潜邸囊嘉特尝从北征屡与海都战皆有功寻以疾归成宗崩昭圣元献太后与仁宗在怀州太后召囊嘉特布琳济达托音布哈巴尔斯台等谕之曰今宫申晏驾皇后欲立安西王阿南达等当毋忘世宗裕宗在天之灵尽力奉二皇子囊嘉特顿首曰臣等愿效死力既至京师内外汹汹犹豫莫敢决囊嘉特独赞诸王图喇定计先发归白仁宗曰事贵速成后将受制于人矣太后与仁宗意乃决 【按武宗纪和琳定策之先仁宗用右丞相哈喇哈斯谋遂言于太后决计诛阿固岱齐喇等而迎武宗与此互异】 武宗即位拜同知枢密事以旌定策之功寻以老病乞骸骨不允仁宗即位以其家河南特授河南江北平章政事终其身封浚都王子嘉琿济尔噶台孙托卜嘉世袭有位

△蒙古台

蒙古台蒙古塔塔尔氏祖塔斯和尔齐从太祖定中原有功为东平路达噜噶齐位在严实上蒙古台事世祖至元八年改邓州新军蒙古万户治水军于万山南岸以兵攻樊拔古城继败宋军于安阳滩转战八十里擒其将郑高大军攻樊分军为五道蒙古台当其一夺西南角入城命部将据仓粟功在诸将右十一年从丞相巴延平章阿珠南征命与万户实格会盐山岭遇宋兵蒙古台突阵诸军继进败之自郢州黄家原荡舟入湖直抵新城鏖战大败之宋复州守将翟贵以城降乃率舟师至沙步 【巴延及阿珠等传俱作沙芜口】 入江遇宋兵来拒进击走之次阳罗堡 【按元史本传作武矶堡今据巴延阿珠传改正】 宋将夏贵坚守不下平章阿珠率蒙古台实格等雪夜泝流西上黎明至

青山矾北岸宋将程鹏飞败走夏贵奔黄州遂拔阳罗堡斩守将王达巴延进次鄂州遣蒙古台谕降宋守臣张晏然及程鹏飞等乃留军镇鄂
汉率诸将水陆东下十二年蒙古台谕蕲黄安庆池州诸郡皆下之次丁家洲宋贾似道孙虎臣来拒蒙古台击之夺虎臣所乘巨舟与宋降将范文虎以兵五百谕降知州及无为镇巢二军攻常州拔其木城宋降将赵溍叛于溧阳巴延命蒙古台击之战于丰登庄大捷行省第其功承制授行两浙大都督府事十四年改闽广大都督行都元帅府事时宋二王逃遁入海蒙古台奉旨率诸军与江西右丞【索多传作参政】达春会兵攻之次漳州谕降宋守将何清十五年师还福州拜参知政事诏与索多等行省于福镇抚濒海八郡召赴阙升左丞十六年沙县盗起诏蒙古台预行省事讨平之初蒙古台北还左丞索多行省福建中书言其麾下扰民致南建等路往往杀长吏叛帝命蒙古台往招来七十二寨建宁漳汀稍获安集十八年转右丞时宣慰使王刚中以士人饶费颇擅作威福蒙古台虑其有变奏移之他道二十一年拜江淮行省平章政事初宋降将陈义尝助张弘范擒史天祥助鄂勒哲图讨陈大举又助安塔哈征日本俱有功至是福建省臣言其有反侧意请除之帝使蒙古台察之蒙古台携义入朝保其无事且乞宠以官爵丞相亦以为言及授义同知广东道宣慰司事二十二年以逸召赴阙封其定贲按验无状未几拜行省左丞相还镇江浙时浙西大饥乃弛河伯禁发府库官货抵其直贸粟以振之二十三年奏以振鬻私盐者皆海岛民今征日本可募为水工从之二十五年诏江淮管内并听蒙古台节制二十六年朝廷以中原民转徙江南令有司遣还蒙古台言其不可遂止闽越盗起诏与博啰默色哈雅等合兵讨之御史大夫伊苏特穆尔奏宜选将帝曰蒙古台已往无虑也未几悉平之屡以病乞骸骨乃召还二十七年特命为丞相兼枢密院事出镇江西威德并着在官四十日卒蒙古台在江浙专愎自用又易置戍兵平章布琳济达言其变更巴延阿珠成法帝每戒敕之既死台臣劾郎中张斯立罪状而蒙古台迫死刘宣及屯田无状事始闻于帝云子三人特穆尔布哈布呼齐袭万户伊拉齐中书参知政事

△鄂啰齐

鄂啰齐扎拉台人曾祖鸿和彻尔骁果善骑射太祖出征每为前驱祖舒尔罕有胆力尝被谗不许入见一日俟驾出趋前曰臣果有罪速杀臣不然赦臣愿得自效帝笑而复用之辛未与金人战于野狐岭中流矢战愈力克之还拔矢血出昏眩竟不起帝悲悼曰舒尔罕朕之一臂

今亡矣父特穆尔台从太宗征喀喇部俘部长以献从征西夏有功特命行省事领鲁鲁
莽果等五部军平河南以功赐户二千河南土人德之
皆为立祠鄂啰齐性朴鲁智勇过人早事宪宗特见亲任戊午扈驾征蜀攻钓鱼山至元
五年攻襄阳授蒙古军万户明年袭父职领蒙古军四
万户十一年诏丞相巴延伐宋以所部从渡江围鄂宋兵固守鄂啰齐白丞相遣许千户
同所获宋将谕降未臣张晏然诸郡望风而靡十二年

【据巴延传增】 分兵出独松关宋将坚守鄂啰齐令益树旗帜于山上率精骑突之守
兵惊溃弃关走十三年宋主降分讨未下州郡诏行
中书省参知政事未几以参知政事行湖北道宣慰使兼领蒙古军时州郡初附戍以重
兵民惊惧往往逃匿山泽间鄂啰齐止侵暴恤单弱号
令严明民悉复业俄征诣阙升中书左丞行宣慰使十八年诏移行省于鄂宣慰于潭时
湖南剧贼周龙张虎聚党行劫随宜招捕梟二贼首余
悉纵遣复召入见拜行省右丞二十三年拜湖广等处行中书省平章政事命佐镇南王
征交址启王分军为三因险制变蛮不能支窜匿海岛
余寇扼师归路鄂啰齐转战以出改江西行省平章政事二十六年以疾求退不允授同
知湖广等处行枢密院事大德元年卒追封郑国公谥
忠宣子拜珠蒙古侍卫亲军副都指挥使托欢布哈蒙古军都万户

△鄂勒哲图

鄂勒哲图 【按原史别有鄂勒哲巴图尔传与此略同盖因赐名巴图尔而误作两
人也今删彼存此】 钦察氏其先彰德人 【原文
作钦察人今据后传增改】 父哈喇和卓从宪宗征讨有功鄂勒哲图骁勇而乐善岁丙
辰以材武从军己未从攻鄂州先登受赏中统三年从
诸王噶必齐讨李璫于济南凡两战皆有功至元四年从万户穆呼哩略地荆南还至襄
阳西安阳滩遇宋军败之既而从平章阿珠围襄樊水
陆大战者四勇敢出诸军右十一年授彰德南京新军千户从丞相巴延南征攻沙洋新
城领丞相帐前噶必齐军十二年与宋将孙虎臣战于
丁家洲大捷攻泰州战扬子桥战焦山破常州十三年入临安下扬皆有功江南平入见
赐名曰巴图尔授管军总管高邮军达鲁噶齐十六年
迁管军万户漳州陈吊眼聚赏数万劫掠汀漳诸路十七年命鄂勒哲图讨之加福建等
处征蛮都元帅率兵以往时黄华聚党扰建宁号头陀
军鄂勒哲图先引兵压其境惧而纳款乃闻于朝请与俱讨贼朝廷从之制授华征蛮副
元帅 【按经世大典云华败自焚死事在至元二十
年与此互异】 遂为前驱至贼所破其五寨十九年追陈吊眼至千壁岭擒之斩首漳州
市余党悉平军还授管军万户高邮路总管府达鲁噶

齐有虎为害鄂勒哲图射杀之二十二年拜江浙行省左丞递升江西等处行枢密院事使成宗即位授江浙行省平章政事大德二年卒追封

林国公谥武宣子十四人皆仕而特默图奎苏伯勒格图尤显孙二十四人仕者亦多云
△拜特穆尔

拜特穆尔钦察人也至元中充哈喇齐入备宿卫以忠谨授金左卫亲军都指挥使司事二十四年征叛王纳颜隶御史大夫伊苏特穆尔麾下败纳颜兵擒其党金嘉努二十五年哈坦王叛从诸王柰玛岱讨之连败其党阿尔图巴喇噶齐军转战至特默哈必尔噶又败之进至明安鄂伦哈坦迎战败走追至特尔勒图挺身陷阵身中三十余箭而还车驾亲征哈坦拒王师拜特穆尔首战郟之获其赏驸马阿喽罕二十六年师还复遣戍伊律大王之境海都谋扰边命拜特穆尔以其军先来行至吉鲁尔河值布雅叛即移兵致讨擒其赏巴延以献升上万户二十七年哈坦复入高丽命偕彻尔特穆尔进讨二十八年至鸭绿江与哈坦子罗丹战失利帝命柰玛岱色彻肯等征之仍命拜特穆尔为先锋前合攻哈坦败之拜特穆尔将百骑追获其妻奴哈坦尚有八骑拜特穆尔止余三骑再战两骑士皆重伤不能进拜特穆尔单骑追之至一大山日暮遂失哈坦所在二十九年闻叛王伊奇哩尚在浩里仓拜特穆尔率兵进击追至陈河伊奇哩脱身走遂定其地成宗即位俾仍其官车驾幸上京征其兵千人从岁以为常云

△辉图

辉图谥鲁讷台民祖额斯伦与太祖同饮黑河水从征辽东女真诸部复帅师讨西夏大战于哈喇哈扎尔擒夏主继总军南伐攻拔信安下宿泗等州诸王塔齐尔以额斯伦年老俾其子布哈袭职中统二年布哈卒子幼兄子辉图继领其职李璫叛诏辉图从亲王噶必齐讨之围璫济南璫夜山冲突辉图直前奋击璫退入城辉图昼夜勒兵与战破济南诛璫噶必齐第其功居最诏领蒙古汉军攻海州略淮南庐州至元三年充邳州监战万户四年领山东路统军司从主帅南征至襄阳西渡汉江宋遣水军绝归路辉图选士卒浮水杀宋军六年次淮南天长至五河口与宋兵战败之七年诏守鹿门山曰河口一字城九年攻樊之古城堡夺之斩宋将韩拔发擒蔡路铃十年【据世宗纪及阿里哈雅传增】襄阳降帅师屯蔡息出巡淮安还城正阳略地安丰十一年宋将夏贵来攻正阳辉图逆战退之十二年北渡至栅江堡值宋军与战败之复南渡江驻兵镇江谍报宋平江兵出常州遂领兵至无锡与宋兵战歼其众权枢密院事守镇江宋殿帅张彦安抚刘师勇攻吕城辉图与

万户呼喇珠特穆尔追战至常州擒张殿帅范总管从右丞相塔哈攻常州宋朱都统自苏州赴援辉图遇于横林店击破之进取苏州徇秀州仍抚治临安迤东新附军民十三年同元帅巴埒默特穆尔张弘范徇温州福建所至州郡迎降十四年授浙东宣慰使讨台庆叛者战于黄奢岭又战于温州白塔屯寨转战至于漳泉兴化平之十六年诏至阙下授行省参知政事至处州以疾卒子巴噶岱尔官浙东道宣慰使都元帅平浙东建宁盗贼数有功布哈子呼图克岱尔既长分袭蒙古军千户从平宋有功累迁平章政事

△伊克默色

伊克默色辉和尔人至元二年入备宿卫九年奉世祖命使海外八罗孛国十一年偕其国人以珍奉表来朝十二年再使其国与其国师以名药来献十四年授兵部侍郎十八年拜荆湖占城等处行中书参知政事招谕占城二十一年召还二十二年复以参知政事管镇南王府事与平章阿尔哈雅右丞索多征占城战失利索多死焉伊克默色言于镇南王请屯兵大浪潮观衅而后动竟全军而归【按经世大典及索多传镇南王衍班师在索多战死之与此小异】二十四年使马八儿国浮海阻风行一年乃至得其良医善药遂与其国人来贡二十九年议征卓斡立福建行省伊克默色与史弼高兴并为平章诏军事付弼海道事付伊克默色仍谕之曰汝等至卓斡当遣使来报其余小国可招徕之军次占城先遣郝成刘渊谕降南巫里速大都刺不鲁不都八刺刺诸小国三十年攻葛郎国降其主合只葛当又遣郑珪招谕木由来诸小国皆来降卓斡主堦土罕必阁耶既降归国复叛诸将议班师伊克默色欲俟帝旨遣使奏弼与兴不从【按史弼高兴二传时土罕必阁耶既降乞归易降表弼与伊克默色许之兴深言其非后果杀使者以叛与本传功罪互异】遂引兵还以所俘及诸小国降人入见帝罪其与弼纵土罕必阁耶没家赀三之一寻复还以卒平章政事为集贤院使告老家居仁宗念其屡使绝域诏封吴国公卒

△贝降

贝降北庭人父呼图克武勇过人由宿卫为南宿州镇将分守开县后从世祖南征年几七十每身先士卒战功居多徙居大名路清丰县封渔阳郡侯呼图克卒贝降生甫数月母徐氏曰吾惟一子不可使不知学顾县僻无良师友遂遣从师大名城中郡守每朔望入学见贝降容止讲解大异羣儿甚爱奖之比弱冠仪表甚伟丞相阿珠南征攻襄阳江陵诸郡以偏裨隶麾下军行至安阳滩宋骑直前突阵贝降引弓毙数

人宋骑稍郟复率众战败之至元五年围襄樊战有功十一年从阿珠渡江水陆遇敌先登陷阵勇冠一军宋平以功授江浙省理问官时事方草创省臣有所建白及事须奏闻者以贝降善敷奏数令驰驿往咨于朝及引见世祖遥识之喜曰黑髯使臣复来耶其见器重如此二十七年迁江西行尚书省都镇武适獠獠扰边从丞相蒙古台讨定之二十九年迁庆元路治中岁大饥状累上行省不报贝降即躬诣行省力请得发粟四万石民赖全活元贞问两浙盐运使同知范某阴贼为奸侵暴细民人咸侧目贝降至官遂置范于刑时论多焉大德元年迁浙东廉访副使令行禁止豪强慑伏同寅有贪秽者即抗章劾免之后升工部尚书有能声至大二年仁宗为皇太子奉皇太后避暑五台贝降供给道路无有阙遗比至都改资国院使母徐氏卒遂奔丧于杭时酒禁方严帝特命以酒十罌官给传致墓所以备奠礼初徐氏盛年守节教子甚严比贝降贵特旌其门贝降居丧尽礼延佑二年卒于家赠江浙左丞谥贞惠

△博尔欢

博尔欢鄂约达勒之曾孙也年十六为本部断事官从世祖讨额呼布格数有功中统三年李璫叛帅莽果一军围济南分兵掠益都莱州悉平之诏录燕南狄猷决明允皇子云南王阿雅噶齐为其省臣保赫鼎毒死事觉将治其狱丞相锡津请以博尔欢往辞以年少帝乃以吏部尚书拜特穆尔辅其行未至保赫鼎密以金馈祈勿究博尔欢阳诺之至则竟其狱诛毒王者而归其金于省陛见帝谓锡津曰卿举得其人矣受右卫亲军都指挥使会伐宋授金吾卫上将军中右丞诏分大军为二右军受巴延阿珠节度左军受博尔欢节度俄兼淮东都元帅罢山东经略司而以其军隶焉军于下邳博尔欢顿大兵为疑兵以轻骑倍道袭海州东海石秋三城皆下清河亦降进军拔淮安南堡战白马湖及宝应掠调邮自西小河及漕河抵湾头断通泰援兵遂下扬州淮东平益封桂阳德庆二万一千户至元十四年 【原文脱至元字今据世祖纪增】 讨叛臣珠尔噶岱于德昌平之拜中书右丞行省北京未几召还时江南新附招募民能者从讨使自为一军听节度于其长博尔欢奏曰今疆土寔广胜兵百万何假此无藉之徒彼一践南土则肆行俘掠恐叛者愈众奏上帝大悟尽罢所募军十六年以海拉苏布尔噶苏鄂喇昆诸部不相统命博尔欢监之十八年以中书右丞行省甘肃二十年拜御史大夫行御史台事以疾归二十四年 【据世祖纪增】 诸王纳颜叛帝将亲征博尔欢曰征莽果等五诸侯之兵足以当之何至上烦乘舆哉臣请事东征帝乃命督五诸侯兵与纳颜战败之 【按世祖纪

载纳颜叛帝将自征之巴延等传并云从帝亲征本传叙恐有脱误】其党塔布岱以兵来拒转战二日身中三矢大破之斩其驸马和抡适太师伊噜喏延大军来会遂平纳颜擒塔布岱既而其党哈坦复叛诏与诸王柰玛台讨之哈坦死斩其子罗丹于阵凯旋授河南宣慰使改行中书省拜平章政事时汴南诸州莽为巨浸博尔欢躬行决口督有司缮完之成宗立迁陕西行中书省平章政事未行留镇河南近臣奏伐宋功益封高邮五百户大德元年叛王永和尔乌鲁斯布哈来归博尔欢遣使驰奏请弃其前恶以劝未至帝深以为然命以平章政事行省湖广会并福建行省入江浙拜江浙等处行中书省平章政事居岁余卒加封泰安王谥武穆子昆都巴图额森特穆尔博罗

巴图

巴图

巴图幼颖异不以家世自矜长嗜书史大德五年擢江东道廉访副使拜江南行台侍御史累迁陕西行台御史大夫延佑元年拜甘肃行省平章政事甘州气寒地瘠少稔岁民饥则发粟振之春阙种则贷之于是兵饷既足民食亦给四年移江浙行省平章政事入为太子宾客上书陈正心修身之道帝嘉纳之迁江南行台御史大夫皇太后谓东宫官不宜使外止其行遂以疾辞去寓高邮英宗即位陛见以疾固辞命以平章之禄归养于家巴图以所给禄归有司泰定元年还京师卒朝廷知其贫仍还所辞禄妻鸿吉哩氏弗受曰始巴图仕于朝不敢虚受廩禄今歿矣苟受是禄非其意也卒辞之子多尔济将作院判官

钦定续通志卷四百七十

●钦定续通志卷四百七十一 列传二百七十一

列传

元【二十五】

○元二十五

彻辰巴图尔 奇奇哩【桑噶苏】 塔本哲尔【塔尔齐 重喜】 尼古尔【阿都齐 嘉琿 济延布哈】
阿尔斯兰 哈玛尔图 阿穆尔 博罗哈达
约翰实 摩哩 特默齐

巴图尔

彻辰巴图尔

奇奇哩【桑噶苏】

塔本哲尔【塔尔齐 重喜】

尼古尔 【阿都齐 嘉琿 济延布哈】

阿尔斯兰

哈玛尔图

阿穆尔

博罗哈达

约斡实

摩哩

特默齐

巴图尔

△彻辰巴图尔

彻辰巴图尔钦察人初事太宗掌牧马从攻凤翔战潼关皆有功后从大将苏布特攻汴京拔金人木栅于河南师还金将高都尉邀于路

彻辰巴图尔迎击斩其首以归从攻蔡州前锋搭搭尔与金将战金将摔其须彻辰巴图尔进斫金将蔡州破金将守立城上以铁椎击杀之帝

嘉其能命从皇子攻枣阳继从宗王昆布哈攻光州一曰五战光州下升百户从攻滁州与宋兵大战至暮追杀之世祖伐宋募能先绝江者彻

辰巴图尔首应命率众逼南岸诏与托欢同宋使谕鄂州使降鄂守将杀使者来袭奋击大破之中统三年授蔡州蒙古汉军万户宋人犯西平

彻辰巴图尔逐北踰淮至元二年由安庆入庐州闻宋兵至亟设伏于竹林击杀之五年从元帅阿珠围襄阳击夺宋将夏贵米舟阿珠以其有

功俾与扎拉尔引军南下略地淮东十一年遣招鄂州十二年招滁州诛王安抚改管军千户十三年复略地淮东获其总管二人以献迁滁州

总管府达噜噶齐宋都统姜才率军取粮高邮从史万户夺其马及粮橐二万 【按宋史姜才护饷至马家渡史万户将兵击夺之史万户名

弼事亦见弼传】十四年从讨叛人珠尔噶丹于和啰海图改滁州路总管府达噜噶齐十七年率其子托欢孙茂入见帝命以托欢为管军总

管茂为滁州路总管府达噜噶齐其后托欢以征倭及征卓斡功累升镇守无为滁州万户府达噜噶齐

△奇奇哩 【桑噶苏】

奇奇哩斡尔喀氏太宗南伐以千户从库腾攻安丰寿州又从诸王塔齐尔攻荆山破之与万户鼐尔台以兵守沂郯略涟海又从元帅辉

图攻襄阳卒子桑噶苏袭从丞相阿珠攻襄樊又从达春筑正阳堡泸军乘舰来窥壁垒桑噶苏率征骑逆之夹淮水而军射死者甚众至元十

二年从御史大夫博罗罕平涟海秋九月从丞相巴延攻淮安南门破之又从元帅博罗

罕筑湾头堡权领蒙古女真汉人三万户十三年 【

原文于十二年秋九月下突接夏五月显有脱误今据世祖纪增】 夏五月宋扬州都统姜才引兵来侵从丞相阿珠袭制置使李庭芝及姜才

于泰州皆杀之十四年加管军总管累升蒙古侍卫亲军副指挥使司事子尼古尔岱元贞元年为蒙古侍卫亲军百户大德六年袭父职延佑

四年升左翊蒙古侍卫亲军都指挥使

△塔本哲尔 【塔尔齐 重喜】

塔本哲尔苏尔嘉氏太宗时以招讨使将兵出征破信安河南以功授征行万户岁甲寅卒子塔尔齐袭已未率兵渡江破十字寨子重喜

与敌兵战于洋隘口夺战舰一流矢中左足勇气愈倍世祖亲劳之及塔齐尔卒以重喜袭职 【按原史别立重喜传与本传所载略同显系

重出今删归本传】 中统三年从征李璫有功至元二年筑十字路城以备守御重喜率兵南巡为游击军四年从招布哈出征至泗州北古城

时蔡千户为敌兵所围重喜奋战救出之十一年宋兵围正阳从战败之十二年从下连海诸城俄命率五千人从出征与宋将李提辖等战大

败之遂驻兵瓜洲十三年宋都统姜才围城堡败之从兵袭击李庭芝等于秦州十四年进婺州路总管府达噜噶齐未几卒庆孙袭初授管军

总管二十四年领诸翼军镇太湖教习水战征行上万户皇庆二年卒子布呼齐袭

△尼古尔 【阿都齐 嘉琿 济延布哈】

尼古尔宪宗时与额哩页乌苏三十人来归后从征钓鱼山讨李璫皆有功子阿都齐世祖时围襄阳下江南败实喇及征纳颜皆以功受

赏后事成宗武宗为扎萨固逊仁宗时历官至左阿苏卫千户卒子嘉琿初为舒库尔齐继袭父职平必里克图天历元年从丞相雅克特穆尔

战居庸北有功迁章佩卿子济延布哈初事仁宗为舒库尔齐天历元年迎文宗于河南命为伊勒都齐往居庸关料敌道逢二军谓特默齐曰

今北兵且至其避之济延布哈恐摇众心即拔所佩刀斩之进兵部尚书领军六百人迎敌通州会丞相雅克特穆尔至檀子山与图们岱尔战

败之迁大司农丞

△阿尔斯兰

阿尔斯兰阿苏特氏初宪宗闚其城阿尔斯兰偕其子额森展迎谒军门帝赐手诏命博领阿苏特人以额森展置左右道遇实呼格叛军

额森展力战死之帝遣使裹尸还葬之阿尔斯兰复以次子尼古尔献帝命从乌苏哈达征哈喇章有功又从伐宋中流矢死子呼尔敦岱尔充

管军百户世祖命从博啰诺延使哈喇茂之地以疾卒子呼图克特穆尔武宗潜邸时从

征海都至大元年授左卫阿苏亲军副都指挥使四年卒

△哈玛尔图

哈玛尔图苏页氏宪宗时从攻钓鱼山又从亲王塔齐尔北征充千户所都镇抚后从托伦伐宋没于阵子察罕从塔察攻樊城西门领扬州等处游击军与宋兵战有功至元十一年从呼图克特穆尔攻江陵东南城堡又从阿喇罕败宋兵于阳罗堡之南十二年分隶托克托总管与宋兵战败之又从攻独松千秋拨出等关及诸山寨其降民悉绥抚之十三年授瑞安县长达噜噶齐始至招集逃移民十万余户十四年升管军总把并领新附军五百人从宣慰唐古特战于司空山有功命以其职兼都镇抚累升至左翼屯田万户府副万户大德五年卒子塔纳袭

△阿穆尔

阿穆尔巴图都喀喇氏初从苏布特诺延征钦察攻河西城数西关破河南继从定宗略地阿努皆有功又从四太子南伐命充齐哩克昆阿都齐博克逊又从兵渡江攻鄂以疾卒于军子伊苏岱尔从讨阿勒达尔瑛塔哈征李璫伐宋累功授管军总把至元十四年从攻福建兴化招古田等处民五千余户以功授千户又招手号亲军二千五百余人升总管二十年从攻重庆以功迁征行元帅二十一年命统蒙古特默齐军从征金齿蛮平之都元帅蒙古岱征罗必甸博啰哈达率游兵先行江水暴溢率众泅水而渡诸军会城下先登拔其城遂屠之又从征八百媳妇国诸王库库命博啰哈达往招之不听进兵攻之毁其北门木遂入其寨其地悉平授云南万户府达噜噶齐卒子孟克布哈袭管军千户约斡实阿苏特人父伊埒巴图尔从其国主来归太宗命充宿卫从宪宗征蜀数有功尝出猎遇虎于隘下马搏虎抉其舌刺杀之帝壮其勇别立阿苏军使领之从世祖征额呼布格又从亲王噶必齐征李璫俱有功授本军千户从下襄阳又从下沿江诸城宋洪安抚既降复叛诱其入城宴乖醉杀之长子伊苏岱尔代领其军从攻扬州中流矢卒约斡实袭为阿苏军千户从丞相巴延平宋赐巢县二千余户珠尔噶岱叛击之斩其将其众悉平诸王和琳及实喇等判从皇子北安王征日本进万户递迁钦察亲军都指挥使二十四年从征纳颜有功明年卒追封成武郡公谥显敏

△博啰哈达

博啰哈达蒙古鸿吉哩氏祖安珠努太祖时率蒙古军千人从诸王察罕台征河西攻下定会阶文诸州以功为元帅驻军汉阳礼店戍守

西和阶文南界及西蕃边境父彻尔袭职从都元帅耨埒攻成都宋将刘整以重兵守云顶山彻尔击败之进拔其城攻重庆彻尔将兵千人为先锋【耨埒传作以张威为前锋】败宋兵于马老山诸军还屯灰山宋兵夜来击营彻尔击败之世祖即位为鄂啰元帅改征行元帅至元二年以老疾不任事诸王阿济格命博啰哈达代领其事八年【按世祖纪咎万寿攻成都在至元九年】制授管军千户宋将咎万寿攻成都金省严忠范遣博啰哈达将兵御之流矢中颊战愈力大败其军十一年行院汪良臣【原作汪特格今据汪良臣传改】以兵围嘉定博啰哈达率众攻九顶山破之嘉定降进攻重庆宋军突围出博啰哈达追之斩首二百级泸州叛还军讨之破宝子寨岁余不下乃造云梯先登急击遂破之杀虏殆尽十六年取重庆以功迁武略将军征行元帅二十一年命统蒙古特默齐军千人从征金齿蛮平之都元帅孟古代征罗必甸博啰哈达率游兵先行江水暴溢率众泅水而渡去越三百步而营居七日诸军会城下乃进攻之博啰哈达登拔其城遂屠之又从征八百媳妇国至车厘车厘者其酋长所居也诸王库库命博啰哈达将游骑三百往招之降不听进兵攻之都镇抚侯正死焉博啰哈达毁其北门遂入其寨其地悉平赐金虎符授怀将大將軍云南万户府达噜噶齐卒孟古布哈袭

△约斡实

约斡实阿苏特人父伊埒巴图尔从其国主来归太宗充宿卫从宪宗征蜀数有功尝出猎遇虎于隘抉其舌刺杀之帝壮其勇使领阿苏军从世祖征额呼布格又从亲王哈必齐征李璫俱有功授本军千户从下襄阳又下沿江诸城宋洪安抚既降复叛诱入城宴乘醉杀之长子伊苏岱尔代领其军从攻扬州中矢而卒约斡实袭为阿苏军千户从巴延平宋赐巢县二千余户珠尔噶岱叛击之悉平诸王和琳及实喇等判从皇子北安王讨之北安王战失利陷敌阵中约斡实追至金山王乃得脱进前卫亲军都指挥使诸王纳颜叛世祖亲征约斡实为前锋屡败之擒纳颜纳颜余党塔布岱金嘉努聚兵茂诺海从大军讨平之既而哈坦复叛追击其军渡河而遁又与海都将巴林特尔格岱必溜齐等战屡捷成宗时在潜邸帝以海都连年犯边命出镇金山约斡实率所部在行从皇子库库楚丞相托多尔海击海都军突阵而入大破之复从诸王永和尔丞相托多尔海击海都将巴林败之海都复以图古木领精兵三万据险来袭约斡实率善射者三百人守其隘注矢以射全军而归武宗镇北边海都复入寇约斡实败之时扎尔古齐博啰特穆尔所将兵为海都困于小谷约斡实援出之武宗南还命约斡实后从敌惧莫

敢近因留之戍边后海都子彻伯尔等遣人请和朝廷许之遂撤边备约斡实乃还大德十年卒子伊奇尔台袭

△摩哩

摩哩绰克台氏祖实里济诺延从太祖与王汗战同饮班珠尔河水以功授千户领彻尔台部征讨诸国卒于河西父穆济袭职从太宗定中原以疾卒摩哩袭职从定宗略定钦察阿苏俄罗斯诸国从宪宗伐宋有功世祖即位诸王呼瑋叛摩哩与其弟僧格达喇率所部击之一月八战夺其所掠诸部民以还已而僧格达喇为呼瑋所杀帝闻而怜之遣使者迎至摩哩赐号曰达尔罕寻卒子图古勒

△特默齐

特默齐图鲁卜台人从诸王穆尔齐征蜀后以兵从塔海干布和尔齐耨埒诸大帅岁戊午耨埒攻涪州还军至马湖江宋兵连舰绝江不得进特默齐率精兵击之夺其舟以济又于横江嘉定宣化三县造浮桥以达成都耨埒以为能命从万户锡勒塔克略地碉门黎雅土蕃锡勒塔克死行院塔齐以特默齐为万户领其军中统四年授蒙古汉军万户至元九年从行省伊苏岱尔征建都战于梅子岭大败之复与左丞奇尔济苏乘胜进击建都势蹙请降十一年又从行院汪良臣【原文作特格误今据汪良臣传改正】呼敦等攻嘉定重庆泸叙诸州以功兼崇庆府达噜噶齐十九年卒子巴延袭蒙古军万户戍甘州

△巴图尔

巴图尔阿苏特氏世居上都宜兴宪宗在潜邸与兄阿索勒布尔罕及玛达喇苏帅众来归玛达喇苏从征穆克尔苏城为前锋时身中二矢奋战拔其城又从征蜀至钓鱼山歿于军巴图尔从征李璿围济南身二十余战世祖嘉其能命领阿苏军常居左右后从塔布岱南征与敌军战于金刚台师还命充博克逊兼领阿苏军至元二十三年授后卫亲军副都指挥使明年从征纳颜擒金嘉努塔中岱以归大德元年卒子巴济拉袭至大四年河东陕西巩昌等地诸翼卫争草地讼者二百余起命往究之悉正其罪致和元年从丞相雅克特穆尔擒都尔苏党额上德呼勒等领诸卫军守居庸关及诸要害地【按本纪泰定帝致和元年即文宗天历元年也擒额上德呼勒事在文宗即位之初故系之致和元年之下】天历元年复从丞相击旺沁兵败之寻以疾辞子伊埒图袭

钦定续通志卷四百七十一

●钦定续通志卷四百七十二 列传二百七十二
列传

元 【二十六】

○元二十六

昂吉尔 哈喇岱 沙全 特穆尔布哈 萨奇苏 额讷
格尔 实保 特哩 阿锡页 库
库 图古勒

昂吉尔

哈喇岱

沙全

特穆尔布哈

萨奇苏

额讷格尔

实保

特哩

阿锡页

库库

图古勒

△昂吉尔

昂吉尔张掖人姓额卜氏世为西夏将家岁辛巳父额卜干布率所部归太祖以其军隶蒙古军籍 【按原史别立额卜干布传楼载昂
吉尔官爵及其子昂哈图事显系重出今并归本传】 从穆呼哩出征病卒昂吉尔领其父军从征诸国有功至元六年授本军千户略地淮南所向无前时宋输粮金刚台意将深入昂吉尔将兵驰往断其输道因上言请城信阳以扼宋得旨令率河西军一千三百人城之城成九年加信阳军万户丞相巴延渡江留阿珠定淮南东道其西道则属之昂吉尔驻兵和州宋淮西制置夏贵遣侯都统将兵四万来攻有谋内应者悉诛之潜兵出千秋涧塞其归路因出城奋击大败之镇巢军降阿苏军戍之人不堪其横都统洪福尽杀戍者以叛昂吉尔攻拔其城擒福及董统制遂攻庐州宋亡夏贵举所部纳款 【按宋史洪福传及续通鉴云洪福者夏贵家僮也知镇巢军贵既降使其从子招福福斩之贵请单骑入城门发而伏兵起福被执不屈而死本传云镇巢军降且叙夏贵纳款于福死之后均异宋史】 昂吉尔入庐州民安堵无所犯迁淮西宣慰使宋丞相文天祥复起兵海道舒民张德兴应之袭破兴国德安诸郡还据司空山诏昂吉尔攻之一战而定江左初平官制草莽权臣阿哈玛等纳赂鬻爵江南官僚冗滥为甚昂吉尔入朝具为帝言之即奉命偕平章赫伯左丞

崔斌等减汰之选曹以清时两淮兵革之余荆榛蔽野
昂吉尔请立屯田以给军饷帝从之累迁行尚书省右丞兼淮西宣慰使都元帅日本不
庭帝命安塔哈等征之昂吉尔上疏请罢兵息民不从
既而师果无功昂吉尔屡为直言台臣虑其难制以雅伊密实为本道按察使以察之雅
伊密实时摺摭昂吉尔细故以闻及廷辨帝察其无他
辄迁其官后竟以微过罪之 【按富珠哩翀作刘天福神道碑云昂吉尔阉淮二十年操
制兵民潜结中奥纵盗出没淮海天福捕其党七人
殉于市帝闻遣使驰讯昂吉尔以罪废本传所云恐失其实】 元贞元年卒子昂哈图充
舒库尔齐至元二十四年从征纳颜有功代其父职二
十六年授庐州蒙古汉军万户府达噜噶齐大德六年领兵讨宋隆济等还镇庐州以私
财筑室居军士之贫者事闻升其秩泰定四年卒

△哈喇岱

哈喇岱哈鲁氏初从军攻襄樊蒙古四万户府辟为水军镇抚至元十一年从丞相
巴延渡江改管军百户十二年从丞相阿珠与宋兵战
焦山败之进攻江阴许浦金山上海崇明金浦皆下之遂戍澈浦海口十三年宋将张世
杰舟师至庆元胸山东门海界哈喇岱追之守定海港
口两退宋兵复引兵至温州青■〈山奥〉门遇宋兵遣使谕守臣家之柄以城降至福
州擒毛监丞等十四年授沿海招讨副使镇守沿海
上下南至福建北距许浦督造海船千艘从右丞达春攻广南进沿海招讨使时宋处州兵
复温州哈喇岱率兵复取之进至潮阳县宋都统陈懿
等兄弟以畚兵七千人降达春攻广州踰月未下哈喇岱继至谕宋安抚张镇孙侍郎谭
应斗以城降从攻张世杰于大洋谕南恩州宋合门宣
赞舍人梁国杰以畚军万人降十五年入覲擢沿海左副都元帅庆元路总管府达噜噶
齐将所部军戍海口十六年海贼贺文达顾润等寇掠
海岛哈喇岱谕降之十八年从征日本值飓风舟回 【按日本传至元十八年征日本至
平壶岛风破舟弃士卒十余万于山下本传仅云舟
回讳词也】 明年还戍庆元二十五年拜中书左丞行浙东道宣慰使大德五年征入见
擢云南行省右丞偕刘深征八百媳妇国至顺元土官
宋隆济等叛 【原文作至顺元年宋龙济等叛按成宗纪宋隆济叛在大德五年考经世
大典云刘深等征八百媳妇国道经顺元土官宋隆
济叛则年字乃土官字之讹龙字乃隆字之讹也今并改正】 丧师而还深伏诛哈喇岱
亦以罪废十一年卒皇庆元年赠巩国公谥武惠子哈
喇布哈袭沿海万户府达噜噶齐

△沙全

沙全哈喇娄氏父沙迪世居沙漠从太祖平金戍河南柳泉因家焉全初名绰尔齐甫五岁为宋军所虏年十八留刘整幕下宋人以其父名沙迪使以沙为姓而名曰全中统二年整以泸州来归全与之同行授管军百户至元三年整出兵云顶山与宋将夏贵兵遇全击杀甚众五年整领都元帅事围襄樊以全为镇抚遣攻仙人山陈家洞诸寨破之升千户败宋将张贵拔樊城与刘整军会修正阳城引兵渡淮与宋将陈安抚战败之十二年从丞相阿珠与宋将张也杰孙虎臣大战于焦山水陆并进宋人不能支败走进攻常州克之乘胜下沿海诸城至华亭戒士卒毋杀掠遂倾城出降以功授华亭军民达鲁噶齐时有未附盐徒聚众劫掠全击破之籍其名请千行省遣屯田于淮之芍陂行省以邑人新附时有反侧欲屠其城全言盐卒多非其土人若屠之枉死者众以死保其不叛遂止寻升华亭为府以全为达鲁噶齐招降盗贼境内得安改松江万户府达鲁噶齐专领军政二十二年召见迁隆兴万户府达鲁噶齐得请复旧名曰绰尔齐未几帝以松江濒海重地复命镇之卒于官

△特穆尔布哈

特穆尔布哈塔塔尔岱人父塔齐岁乙未【按太宗纪六年甲午遣塔海干布征蜀此云岁乙未则是太宗之七年也互异】同都元帅塔海干布将兵入蜀攻下兴元成都诸郡中统二年授西川便宜都元帅俄进行枢密院率诸军略定西川未下郡邑至元元年迁益都等路统军使死军中特穆尔布哈中统初入备宿卫至元七年授淄莱水军万户赴襄阳与宋将范文虎战于灌子滩大败之十一年授益都淄莱新军万户从丞相巴延伐宋败其大将夏贵于阳罗堡大军渡江论功最多又从下鄂蕲黄江建康常秀苏杭诸郡从参知政事阿喇罕略定绍兴温州福建诸郡授台州路总管府达鲁噶齐迁广东宣慰使十六年加都元帅追宋将张世杰于香山岛世杰死降其众广东诸郡及海岛尽平入见授中书左丞行省江西二十五年拜四川等处行尚书省平章政事兼总军务改行中书省平章政事其兄特穆尔托噶【经世大典作持穆尔托欢】初以蒙古军千户从伐蜀有功授万户从大军攻重庆重庆降收其众徇下流诸城留镇夔门兼本路安抚司达鲁噶齐递升诸蛮夷部宣慰使加都元帅伊实布什蛮叛与雅尔哈会兵讨平之征缅甸都元帅死于军

△萨奇苏

萨奇苏回鹘人其国阿达都督托果斯之次子也初为太祖弟乌珍笔且齐领王傅乌珍薨长子济伯格蚤世嫡孙塔齐尔幼庶兄托迪欲

废嫡自立萨奇苏与和尔果斯驰自皇后及授塔齐尔以皇太弟宝袭爵为王以功分治黑山以南之地从宪宗攻钓鱼山建言乘势定江南帝嘉纳焉宪宗崩额呼布格争立诸王多附之萨奇苏驰见塔齐尔力言宜协戴世祖塔齐尔从之及世祖即位授北京宣抚使锄奸抑强辽东以宁会高丽有异志帝遣使究治则委罪于其臣洪察呼械送京师道辽东萨奇苏访知洪察呼以直谏违意即奏疏为直其事帝命释之李璫叛命帅师从宗王哈必齐讨之璫伏诛哈必齐欲屠城萨奇苏力争止之众大悦授山东行省都督迁经略统军二使 【按世祖纪云分益都军民为二董文炳领军萨奇苏治民与本传异】 兼益都路达鲁噶齐时兵燹后民之牛具为之上闻验民丁力官给之统军超布哈田游无度害稼病民元帅伊苏岱尔据民田为牧地萨奇苏随时表闻有旨仗超布哈令伊苏岱尔还其田璫故将毛璋欲率诸部谋执萨奇苏以归宋璋党上变乃袭璋斩之萨奇苏尝慕古人举亲举雎之义叛帅故卒得与子姓参用公论多之山东岁屡歉为请粟具恤又奏蠲其田租山东人刻石颂德卒谥襄惠

△额讷格尔

额讷格尔字正卿其先属永古特部徙居临洮之狄道金略地尽室迁辽东曾祖特穆尔英格仕金为马步军指挥使官名有马因以马为氏祖博索玛伊尔徙净州 【按元地理志净州路领县天山原文作静州误今改正】 之天山宣宗迁汴父实喇齐苏为凤翔府兵马判官死国事额讷格尔好学负气会国兵破汴时母北行间关锋镝中北见宪宗命赞布扎尔为断事官以燕故城为治所额讷格尔慨然以治道自任政事修举岁壬子料民丁于中原凡业儒者试通一经即不同编户着为令甲儒人免丁实额讷格尔始之也尝建言立常平仓举贤士杨春卿张孝纯辈分布诸郡号称得人又罗致名士敬鼎臣授业馆下荐引马文玉牛应之辈为参佐后皆位至卿相己未世祖以亲王南征从行至汴令专馈饷及世祖即位将亲征额呼布格额讷格尔市马以助军帝厚贍其家拜礼部尚书四年南边不靖建言光颖等处立榷场岁得铁以铸农器易粟输官不惟官民两便因可以镇服南方诏以本职兼领煽治未行以疾卒赠梁郡侯谥忠懿子孙登仕籍着甚众曾孙祖常自有传

△实保

实保辉和尔人父奇凌贝鄂齐尔智勇过人领兵来归太祖从征回回国数立功将重赏之自请为本国古鲁城达鲁噶齐从之卒实保事世祖潜邸命长笔且齐中统元年为户部尚书宗正府扎尔古齐额呼布格之叛帝命实

保诣河西督粮至西京北闻万户阿实克特穆尔将从额噶布格实保矫制召其军赴行在委曲谕之且以西京钱粮给其军遂率见帝帝曰战阵之间得一夫之助犹为有济实保以二万军至其功岂少哉海都叛世祖将讨之先命实保传旨往谕海都听命既退军置驿【按特哩传云使至海都欲伺其隙谋害之与此所云听命退军者互异】而丞相安图军先巴克和尔和大王部曲海都谓实保曰我不难于杀汝念我父尝受书于汝姑遣汝归以安图之事闻非我罪也实保以闻命为中书右丞商议政事妻以宗王之女博啰章公主明年复使海都谕之来归海都辞以畏死不敢实保奏使奔走三年时年已七十矣命为翰林承旨给全俸养老后卒子乌噜斯哈美至元二十三年授浙东宣慰使浙东盗起铸印玺僭称天降大王乌噜斯哈美讨平之移镇广西峒蛮罗天佑作乱招降之卒子耀珠宗正府扎尔古齐

△特哩

特哩奈曼人居绛州祖拜布哈为宗王巴图傅特哩有谋略早岁宿卫王府巴图分地平阳以特哩监隰州中统初调平阳马步站达噜噶齐至元初宗王海都叛廷议欲伐之世祖以宗室之情欲择谨密者往使焉左右以特哩对遂召见帝嘉其辩宪曰止事非汝不可然必先诣巴图蒙古特穆尔王所相与计事而后行使二人副之特哩既奉命欲直造海都境副者弗从以上命不可特哩曰亲承密旨汝辈违则当诛副者惧而从之既至海都日召宗亲宴饮将伺其隙谋害之【与前传互异】特哩厉声曰且食勿语望语言脱口相摭为罪耶良久海都曰直哉因厚赠以行既至巴图蒙古特穆尔王所具告以故王曰祖宗有训叛者人得诛之如通好不从奉师以行天罚我即外应剿绝不难矣特哩还悉以事闻后屡使巴图王所道遇海都游兵副者前行遇害特哩后至曰我为天子使可以非礼犯耶游兵语屈乃释之遂独得还帝尝谓侍臣曰有特哩则朕之宗族将不失和矣海都觐伺巴图王为备已严意乃帖然特哩始终凡四往返历十四年帝谓曰在朝官之要重者惟汝所择对曰臣母在绛州老且病得侍朝夕幸也诏从其请授绛州达噜噶齐十五年平阳李二谋乱特哩捕问尽得其状十八年病卒于官子达兰台嗣官

△阿锡页

阿锡页西域佛琳人通西域诸部语工星历医药初事定宗直言敢谏时世祖在藩邸器之中统四年命掌西域星历医药二司事后改广惠司仍命领之世祖尝诏都城大作佛事集教坊妓乐及仪仗以迎导阿锡页奏曰高丽

新附山东初定江南未下天下疲弊此无益之费甚无谓也帝嘉纳之至元五年从猎保定日且久乃于帝前语供给之民曰得无妨尔耕乎帝为罢猎十三年丞相巴延平江南还奸臣以飞语谗之阳锡页叩头谏得解【按巴延传云巴延取宋而还阿哈玛特诬以平宋时取其玉桃盏帝命按之无验遂复其任】寻奉诏使西北宗王鄂勒欢所既还拜平章政事固辞擢秘书监领崇福使迁翰林学士承旨兼修国史大德元年授平章政事成宗崩内旨索星历秘文阿锡页厉色拒之仁宗时封秦国公卒追封佛琳忠献王子阿里雅秦国公崇福使达罕翰林学士承旨哈斯光禄卿奇尔济苏同知泉府院事老哈广惠司提举

△库库

库库字子清本默尔奇斯氏部族世居布尔罕呼尔敦之地其俗骁勇善骑射诸族颇惮之国初举族内附世祖居潜邸选库库为近侍岁甲辰世祖闻王鹞贤征至问以治道命库库与廉希宪皆师事之库库每旦起盛饰其冠服鹞让之库库悔晤明日纯素以进鹞乃悦壬子奉命金诸路军籍所至无扰人皆德之及还命领燕京匠局世祖即位特授中书左丞未几迁大名路宣抚使卒子坚通字永叔少孤甫十岁即从王鹞游既长奉命入国学复从许衡游弱冠入侍禁廷累官御史台侍御史至元二十四年扈从东征屡战有功迁燕南河北道肃政廉访使遂拜河南行省平章政事驿召赴阙未拜以疾卒

△图古勒

图古勒字亲臣喀喇伊聂之孙雅尔塔实第九李也自幼侍世祖命与额森特穆尔博果密从许衡游帝问其所学图古勒对曰三代治平之法也帝喜除蒙古学士客省使进兵部郎中迁金太史院尝燕见世祖屡陈古今治乱政要多所裨益至元二十年迁中书右司郎中未几大宗正色彻肯荐掌其府判署阅诸狱文案尝暮归愀然曰今日所议死案于心有疑未得所以活之他日归喜曰我得之矣于法当流徙边地迁吏部尚书时哈喇哈斯为湖广平章尝与图古勒同在大宗正素知其贤举以自辅遂授湖广右丞时湖南北多盗图古勒擒杀盗首乔大使尸诸市羣盗顿息湖南宣慰张国纪创征夏税民弗堪图古勒屡请罢之【二事见哈喇哈斯传并作哈喇哈斯事】二十九年辰州蛮叛副枢刘国杰金院苏玛拉移文索辰澧沅间弩士哈喇哈斯以民弗习战弗许图古勒曰因蛮政蛮古所利遂与之果以此获胜成宗即位迁江浙右丞适岁旱方至而雨民心大悦未几召还迁枢密副使大德七年卒赠赵国公谥文肃子

舒苏晋宁路总管

钦定续通志卷四百七十二

●钦定续通志卷四百七十三 列传二百七十三

列传

元 【二十七】

○元二十七

达春 巴延 伊克德济 额森鼐尔 托里实克 呼喇珠 丹
珠尔 托欢 锡里巴 布噶齐 齐喇
安巴 伊苏岱尔 实都尔

达春

巴延

伊克德济

额森鼐尔

托里实克

呼喇珠

丹珠尔

托欢

锡里巴

布噶齐

齐喇

安巴

伊苏岱尔

实都尔

△达春

达春蒙古扎拉尔氏父扎拉台历事太祖宪宗岁甲寅奉命伐高丽破之举国遁入海岛已未高丽遂内附扎拉台之功居多达春以勋臣

子累迁东京等路行中书省右丞改授辽东道宣慰使达春探知纳颜谋叛驰驿上闻有旨命与皇子阿雅噶齐同力备御女真硕达勒达官民

与纳颜连结达春遂弃妻子与麾下十二骑直抵建州与纳颜党岱逊巴图尔等合战两中流矢继知其赏欲袭皇子阿雅噶齐遂扈从皇子渡

辽水纳颜军来袭达春转鬪而前射其酋特古斯岱堕马死追兵乃退遂车懿州州人罗拜泣曰非宣慰公吾属无遗种矣至辽西小龙泊得叛

酋史托里台卢全等纳款书期而不至遣将讨擒之又获其赏王色克复与齐达勒大王等战破之追纳颜余党北至金山二十八年充蒙古军

万户是岁复领军讨哈坦还攻建州逐阿哈投江死明年哈坦涉海南袭高丽达春复进兵讨之入朝拜辽阳等处行中书省平章政事卒于位

子达兰特穆尔

△巴延

巴延河西人父胡土克图以质子从太祖征河西太祖立质子军号图鲁格遂以胡土克图为百户宪宗朝都元帅耨埒承制以为千户从

征西川呼图克叛于临洮世祖命胡土克图等从大军往讨之寻卒巴延袭至元九年授征行千户十年宋师侵成都迎击大败之又从行省伊

苏岱尔攻嘉定从行院呼敦取泸叙攻重庆数有战功十二年为东西两川蒙古汉军万户总帅汪良臣 【原文作汪特格误今据汪良臣传

改】 用兵忠州命巴延将兵二千往涪州策应宋人以舟师邀于清江巴延引兵驰赴擒其部将李春等十七人十三年泸州复叛行院遣巴延

领兵趋珍珠堡败其将王世昌移戍暗溪砦宋合州兵来援复生擒百余人戮之遂克泸州行院副使布哈进围重庆遣巴延将兵游击重庆降

制授蒙古汉军总管十九年升管军万户卒子塔齐尔嗣

△伊克德济

伊克德济实喇娄人祖实达尔摩哩归太祖从征回回诸国又从睿宗及彻伯尔谕降河西诸城后从攻临洮死焉父密喇卜和卓从太宗

灭金又从宪宗攻蜀为万户府达噜噶齐歿于军中统二年伊克德济为千户数有战功下五花石城白马等砦至元七年宋兵入成都伊克德

济以兵四百人相拒四日宋兵退追击破之授蒙古实喇娄河西汉军万户戍眉州从围嘉定筑怀远砦以守其要害宋兵出战辄败十二年入

朝加上万户会围重庆尽督马湖江两岸水陆军马十四年从围泸州先登拔之从攻重庆屯佛图关屡战有功移屯堡子头宋守将赵安开门

降重庆既平略地思州进四川宣慰使都元帅十七年征鄂端拜云南行省参知政事二十一年 【经世大典作二十年】 与右丞台布诸王

桑阿克达尔分道征緬攻江头城拔之命都元帅袁世安守之图其地形势遣使诣阙具陈所以攻守之方遣哈迪尔杨林等谕緬使降不报遂

督军水陆并进击破之建都金齿等十二城皆降命都元帅哈达万户布都玛着等戍之二十八年改四川行枢密副使卒子和尼齐德济云南

都元帅额埒苏袭蒙古军万户

△额森鼐尔

额森鼐尔辉和尔人父都沁哈雅从太祖太宗平金及西夏俱有功额森鼐尔幼事世祖于潜藩从征土蕃云南常为前驱岁己未至宋至

鄂州先登夺其外城中统元年从征额呼布格与其赏遇大呼驰击之其众骇溃明年讨李璿以功授西道都元帅土蕃宣慰使额森鼐尔素熟夷情恩威兼着顽犷悦服历二十四年迁云南行省平章政事寻改江西行省平章政事巨盗锺明亭积年为害额森鼐尔讨擒之成宗即位召还改陕西行省平章政事谢事归陇右十年卒赠巩国公【按王圻续通考载元贞初封巩国公此云歿后追赠互异】 谥敏忠子鄂勒哲中书平章政事

△托里实克

托里实克辉和尔人祖巴尔斯呼图克托噶阿古齐国初以兵从攻四川歿于军父特尔格齐托噶阿古齐宪宗命长哈玛尔及察逊诸宗藩之地瑋塔哈阿勒达尔叛执特尔格齐械系之破械脱走入覲世祖赐令袭父职命率所部兵就征之又从诸王鄂罗齐讨建都升罗罗斯副都元帅同知宣慰司事至西蕃境上蕃酋遮道不得进特尔格齐战却之道遂通卒于官托里实克袭职所部有产金户叛服不常托里实克讨平之定昌路总管古纳叛与其千户阿夷谋率众渡巴斯哩河托里实克引兵战擒阿夷杀之德平路落来民叛又讨平之亦奚不薛地未附民多立寨依险自保诏从左丞爱鲁克往讨之托里实克先至拔其寨爱鲁克命率兵攻罗羽及怯儿地皆破之遂平亦奚不薛又与行省参政阿哈巴克实攻蛮子童降其众进管军副万户蛮细狗折兴等及威龙州判官阿遮皆凭险为乱托里实克夜入据其寨贼散走遣兵搜获阿遮斩之籍其民为农入覲授罗罗斯宣慰使兼管军万户既还日州苏你巴翌等作乱奉云南王命讨降之徙其众于昌州平川镇守千户任世禄乘间遁去托里实克据其要路阨之世禄降复入覲卒于京师子索诺木巴勒官至镇国上将军

△呼喇珠

呼喇珠蒙古氏曾祖鄂齐尔事太祖为博罗齐祖齐都尔从太祖征钦察喀喇回回等国有功又收河南关西诸路得民户四万余为涿州达噜噶齐卒【按原史别立齐都尔钱与本传所载略同显系重出今删归本传】 伯父哈拉珠袭职以功稍迁益都路蒙古万户歿于军呼喇珠袭职至元十二年攻宋六安军行省命领诸军战舰遇宋军败之军次安庆又败宋孙虎臣于丁家洲战于朱金沙又败之战于焦山江中时丞相阿珠督战呼喇珠与董文炳冒矢石沿流鏖战身被数伤裹创力战胜之宋张殿帅攻吕城呼喇珠与万户辉图生擒之从下常州略地苏湖秀州至长桥大败宋军十三年【据巴延传增】 至临安巴延命呼喇珠守浙江

亭及北门败扬州军于扬子桥又败真州军追李庭芝
至通州海口尽降淮东诸州江南平迁湖州路达噜噶齐十四年进淮南宣慰使奉旨屯
守上都累迁江淮行省除右丞拜江浙行省平章政事
卒

△丹珠尔

丹珠尔蒙古达勒达岱人至元七年从征蜀败宋兵于马湖江九年从征建都蛮十
一年从攻嘉定败宋兵于夹江又从下泸叙诸州进围
重庆败宋将张万泸州叛诸军将攻泸丹珠尔先将其众据红米湾与宋兵战败之进至
安乐山连败宋军破石盘寨十四年抵泸州夺其战舰
五艘还至安乐山复败宋兵从诸军拔泸州张万举兵欲向合州丹珠尔以锐卒邀击于
龙坎万引郟授管军千户从征鄂端至甘州升总管十
九年从诸王赫伯元师蒙古岱军至鄂端与叛王约罗等战胜之二十年诸王巴拜叛丹
珠尔独破之进副万户还戍长宁军宋好止寨以兵来
袭击走之二十六年授平阳等路万户达噜噶齐卒子济延图布哈袭

△托欢

托欢把拉尔台氏父托多为万户从皇子库春呼图克图略汴宋睢宿等州岁癸丑
镇蔡州托多卒子布哈袭布哈卒弟阿勒达尔袭阿勒
达尔卒弟长寿袭并为千户守蔡长寿卒托欢袭至元十一年从丞相阿珠攻阳罗堡累
有战功渡江攻鄂汉诸州下之十二年 【按世祖纪
及阿珠传攻阳罗堡至元十一年会宋军于丁家洲在十二年传宋详载今据增】 会宋
军于丁家洲托欢突入夺战舰数艘攻建康太平等郡
下之宋都统姜才攻扬子桥堡托欢连击败之会万户实喇罕入朝道滁州为宋兵所遮
托欢击败宋兵出实喇罕从攻扬州至泥湖还宋军夺
三十余艘遂进兵苏州与宋军战擒柳奉使十三年右丞相遣托欢援高邮军击宋高邮
都统败之十四年授太平路总管府达噜噶齐会珠尔
噶岱寇北边帝命托欢往讨之有功十五年从亲王乌尔古岱丞相博啰西征有功加福
州路总管府达噜噶齐平闽盗改武昌路卒

△锡里巴

锡里巴蒙古人祖齐呼勒图从太祖经略西夏有功又隶诸王卓沁台领博啰齐与
金人战歿于阵父玛拉噶嗣从征阿勒达尔亦有功锡
里巴世其职由枢密院断事官为河南行中书省断事官至元七年引水军四万攻襄阳
八年宋将范文虎来援锡里巴取其军进围樊城先登
战于鹿门擒其将张贵十年迁管军万户领襄阳诸路新军十二年 【据巴延传增】
从丞相巴延等渡江破独松关下长兴取湖州行安抚

司事十四年授湖州总管进淮西道宣慰使十八年卒子达喇齐曲靖等路宣慰使

△布呼齐

布呼齐鸿吉哩氏世居应昌祖孟克以后族备太祖宿卫父娄实克状貌魁伟有谋善骑射太祖尝问以军旅之事应对称旨即命为千户

寻以为齐王府司马后从睿宗伐金有功诏还宿卫以疾卒布呼齐英迈有父风幼孤能自刻属暇日习弓马夜则读书承母训期以成父之志

从军有功袭父官为齐王司马世祖亲征纳颜以齐王兵从布呼齐跃马陷阵所向披靡纳颜遁走世祖大悦授信州路达噜噶齐时江南初附

布宣上意与民更始期年郡大治俄以疾卒追封范阳郡侯子托音布哈郴州路达噜噶齐

△齐喇

齐喇西域人世居太原由中书译史从平章政事赛音谔德齐经略川陕至元十二年【百官志作十一年】立云南行省署为幕官诸

洞蛮夷酋长款附齐喇功居多十五年分省大理会緬人入寇齐喇即以战具资军士讨平之授行中书省左右司员外郎十八年平章尼雅斯

拉鼎遣诣阙敷奏边事世祖爱其聪辨练达拜镇西平緬【原文脱平字今据地理志增】麓川等路宣抚司达噜噶齐兼管军招讨使成都

乌蒙诸驿阻绝齐喇市马给传往来便之俄被召问以征绅事宜奏对称心诸王桑阿克达尔右丞台布征绅命率兵船为乡导拔其江头城复

从云南王入绅招徕其党由是复业者众后入覲命绅中行中书省事颁诏于緬宣布威德緬王稽顙称谢遣世子信合八的入贡【按信合

八的经世大典作僧加八的入贡事在大德元年】累迁云南诸路行中书省左丞大德四年卒

△安巴

安巴唐古人祖森济图迎太祖于布琳塔尔哈纳之地太祖嘉其效顺命为图尔哈笔且齐兼克呼穆尔齐父图噜齐袭职事宪宗累官至

文州礼店元帅府达噜噶齐安巴弱冠入宿卫性严重刚果有大志尝亲迎于炖煌阻兵不得归乃客居于于阗宗王阿勒呼木之所世祖遣色

彻肯等使阿勒呼木以通好阿勒呼木留使者数年弗遣安巴乘以巴马驼廐之令逃去色彻肯等得脱归具以白世祖世祖叹久之既而命元

帅布哈特穆尔等征于阗安巴乘间至行营布哈特穆尔承制命充枢密院客省使俄有旨护送其妻子来京师未几宗王纳颜叛世祖亲征安

巴在行间屡捷命为克复叟布尔噶博勒卓等处万户诸王哈鲁等叛安巴率所部兵与战身中七创鏖战愈力生擒哈鲁以献世祖嘉其功命

长唐古卫兼金枢密院事历同金副枢同知至知枢密院事于位赠宁夏郡公谥忠遂子阿齐拉知枢密院事琳沁巴勒自有传

△伊苏岱尔

伊苏岱尔喀喇人父阿勒巴巴勒呼太祖时率众来归从南方力战而死伊苏岱尔世其官从丞相巴延经略襄樊攻百丈山灌子滩功居最及襄樊围合即被甲先登明年破复州杀其将以功升百户寻加千户督五路招讨至元十六年改管军总管江南平录功进管军万户领江淮战舰数百艘东征日本全军而还特赐养老一百户二十二年移镇泰州时籍民丁为兵得万人以伊苏岱尔为钦察亲军指挥使统之大德三年卒

△实都尔

实都尔钦察氏父托苏隶蒙古军籍中统三年从丞相巴延讨李璫以功授百户至元十年告老以实都尔代之十一年从大军南征攻取襄阳唐邓申裕钧许等州累功授管军总把将其父军十四年从诸王拜穆尔追击珠尔噶岱雅布萨尔等平之十七年升侍卫军百户时亡宋犹有未附城邑实都尔愿自举兵下之诸城闻风而附二十四年进汉洞右江万户府达噜噶齐从镇南王征交趾驻兵万劫右丞阿巴齐【按阿巴齐传至元二十四年改湖广等处行尚书省右丞此处原文讹作左丞且脱去齐字谨增改】命进兵拔其一字城明年大兵进逼伪兴道王居与交人战于塔儿山臂中毒矢洒血奋战射死交人二十余仍督诸军乘胜继进大败之遂入其都城又战于韩村堡擒其将黄泽既而镇南王引兵还以实都尔为前军行次陷泥关【安南国传作内傍关】战数十合交人却遂还迎镇南王于女儿关交人四万余【安南国传作三十余万】截其要道时我军乏食且疲于战将佐相顾失色实都尔率勇士奋戈冲击之交人却遂全师而还二十六年授炮手军匠万户府达噜噶齐大德二年卒子额森特穆尔袭

钦定续通志卷四百七十三

●钦定续通志卷四百七十四 列传二百七十四

列传

元【二十八】

○元二十八

唐仁祖	多尔济	和尚【齐诺】	刘容	嘉鲁克鼐达实	奇
尔济苏	巴勒丹	乌鲁斯	多罗台		
	额森布哈	伊奇哩	郑温		

唐仁祖
多尔济
和尚
刘容
嘉鲁克鼐达实
奇尔济苏
巴勒丹
乌鲁斯
多罗台
额森布哈
伊奇哩
郑温
△唐仁祖

唐仁祖字寿卿辉和尔人祖曰唐古直子孙因以唐为氏父骥豪爽好射猎世祖即位命为裕宗潜邸笔且齐升达噜噶齐仁祖少颖悟父没母教之读书通诸方语言尤邃音律中统初诏诸贵胄为质帝亲阅之见仁祖曰是唐古直孙耶聪明无疑也俾习国字至元六年选充蒙古掾十六年录囚平阳平反冤滞免死者十七人十八年授翰林直学士时真定保定两路钱谷逋负屡岁不决遣仁祖往阅其牍皆中统旧案亟还奏罢之拜参议尚书省事时丞相僧格秉政威焰方炽仁祖屡忤之迁工部尚书僧格以曹务烦剧困之仁祖处之甚安寻出使云人僧格考工部织课稍缓怒遣驿骑追还遽命直吏拘往督工且促其期曰违期必致汝于法左右皆为之惧仁祖退召诸署长从容谕之曰丞相怒在汝等勿惧宜力加勉众皆感激昼夜倍加工期未及而办乃罢已而僧格系狱有旨命仁祖籍其家明日僧格以左右之援得释众骇然悉踰垣以窜仁祖独不为之动僧格竟败二十八年除翰林学士承旨辽阳饥奉旨偕近侍苏克左丞实都往赈实都欲如户籍口数大小给之仁祖曰昔之小口今已大矣可皆以大口给之俄除将作院使大德五年再授翰林学士承旨知制诰谦修国史以疾卒追封洹国公谥文贞子恕

△多尔济

多尔济字道明西夏宁州人父旺扎勒结世掌其国史初守西凉率父老以城降太祖有旨副赛音达呼为中兴路管民官世祖即位旺扎勒结卒遗奏请谨名爵节财用帝嘉纳焉多尔济年十五通古注论语孟子尚书帝召见于香阁奏对称旨因问欲何仕多尔济以西夏营田十

未垦一若以南军子弟之成丁者别编入籍以实屯力则地利多而兵有余矣请为其总管以尽措画帝可之乃授中兴路新民总管至官三载
赋额增倍就转营田使秩满入覲升潼川府尹时公府无禄田多尔济乃以官旷地给民视秩分亩而薄其税潼川仕者有禄自此始未几台臣
奏为云南廉访副使时云南诸蛮叛僚佐悉称故去多尔济独守居又八月省臣大惧归符印欲遁多尔济乃白于梁王得檄而后出迁山南廉
访副使复调云南廉访使会行省丞相特们德尔贪暴擅诛杀罗织安抚使布格呼丹将置于极刑多尔济力争之竟获免寻复其官后卒子仁
通为云南省理问天历二年云南诸王与万户布呼等叛仁通率官兵捕之没于陈

△和尚

和尚裕勒巴拉巴约特氏祖哈喇彻尔率所部归太祖父古都斯膂力过人岁壬辰
从睿宗破金将哈达军于三峯山以功赐号巴图尔金
亡授管军百户从攻宋唐邓颖蔡等州屡立战功乙卯从攻汉上铁城寨歿于军赠沅国
公溢武愍和尚袭父战己未从世祖攻鄂州中统三年
李璫叛从国兵讨之战老僧日斩获甚众升阿喇罕万户府经历至元五年攻襄阳军务
繁剧赞画有方十一年从丞相巴延渡江与宋军战于
柳子鲁湫新滩沌口有功十二年从平章阿尔哈雅攻拔岳州取沙市至江陵谕降宋安
抚使高达以功升行省郎中从国兵围潭州十三年城
破诸将欲屠其城和尚止之由是湖南诸郡闻风皆下改行省断事官徇地广西督前军
攻破静江遂兼行宣抚事广西平授常德路达鲁噶齐
以治最闻擢岭南广西道提刑按察使时阿尔哈雅恃功骄恣和尚劾奏不少贷迁江南
浙西道提刑按察使浙西宋故都民众事繁在职惟务
镇静人服其知大体卒于官追封沅国公溢庄肃子齐诺

齐诺

齐诺

齐诺以御史大夫伊噜诺延荐入见大安阁世祖即位其父官授之拜江南浙西道
提刑按察使二十六年迁淮西江北道提刑按察使时
僧格秉攻擅权人莫敢言齐诺入朝极陈其罪状帝为之改容及僧格诛又言其赏犹布
中外宜早处分三十一年迁江东道肃政廉访使时东
平大名诸路有诸王牧马草地与民田相间互相侵冒连岁争讼不能定命齐诺治之讼
遂息大德二年奉诏使淮东西问民疾苦察官吏能否
还奏军民便宜三十事多见采用历江西湖东江南湖北两道廉访使时中书平章巴延
等固位日久党与众盛所任之人徇情弄法齐诺摭其
实上于宪台以闻巴延等皆被黜七年授大都路总管兼大兴府尹驭吏治民有方俄同

金枢密院事上疏言蒙古军在山东河南者往戍甘肃
跋涉艰苦请以近甘肃之兵戍之而免山东河南诸军诏从之未几迁参议中书省事赞
决机务精练明敏成宗崩迎仁宗于潜邸奉武宗即位
拜平章政事商议枢密院事左翼万户府达鲁噶齐提调屯田事延佑五年致事给半俸
终其身家居七年卒追封卫国公谥景宪子伦布监察
御史寿通洪泽屯万户布呼济南台御史观音保袭洪泽屯万户巴延呼图克翰林国史
院经历

△刘容

刘容字仲宽其先西宁青海人高祖阿勒华西夏王尚食西夏平徙西宁民于云京
容父海川在徙中后遂为云京人容幼颖悟稍长喜读书善骑射中统初入侍皇太子于东宫命专掌库藏每退直即诣国子祭酒许衡衡亦与
进之至元七年世祖闻容知吏事命权中书省掾事以
忠直称十五年奉旨使江西抚慰新附之民或劝其受遗以赂权贵容曰剥民利己吾心
何安使还惟载书籍数车献之皇太子忌嫉者从而议
之由是稍疏容容亦终不辩会立詹事院容上言曰太子天下本苟不得端人正士左右
辅翼之使倾邪侧媚之徒进必有损令德闻者是之俄
命为太子司议改秘书监未几出为广平路总管以疾卒于官

△嘉鲁克鼐达实

嘉鲁克鼐达实辉和尔人通天竺教及诸国语世祖召入朝命从国师习其法及言
与字期年皆通以辉和尔字译西天西番经论西南小
国星噶尔德威二十余种来朝嘉鲁克鼐达实于帝前敷奏其表章诸国惊服朝议兴兵
讨暹罗国斛马八儿俱蓝苏木都刺诸国嘉鲁克鼐达
实请遣使谕以祸福不服而后攻之帝纳其言命使往降者二十余国至元二十四年擢
翰林学士承旨遣侍成宗于潜邸且俾以节饮致戒成
宗即位迁大司徒仁宗即位加开府仪同三司是年卒

△奇尔济苏

奇尔济苏蒙古阿齐台氏曾祖巴尔斯布哈从攻奈曼钦察俄罗斯满济勒噶回回
诸国常为先锋破敌太祖嘉之及谕降丰州云州擢充
宣抚使祖呼雅克和斯袭职改河中府达鲁噶齐卒父伊实摩建康路达鲁噶齐致仕奇
尔济苏初以宿卫克博啰齐至元二十五年擢司农少
卿累升行湖广平章讨平海南生黎诸峒寨大德三年 【按地理地征东行省立于大德
三年原文作二年误今改正】 改征东省平章政事
高丽刑政无节官冗民稀因悉加裁正以闻有旨征入见俾条析便民事宜五年复拜湖
广平章踰年改陕西以目疾还京师加官至云南诸路

行省左丞相卒子鄂勒哲湖广右丞征广西贼卒于军

△巴勒丹

巴勒丹辉和尔人 【按原史旧作苏尔约苏图和琳传而多载其子巴勒丹事迹今
改作巴勒丹传】 父苏尔约苏图和琳太祖时来归
从征回回国还事睿宗于潜邸以为真定路断事官巴勒丹事世祖为博啰齐鹰房万户
从征哈喇章及额呼布格俱有功后从裕宗北征至托
哈尼嚕衮命归守真定未几改隆兴府达嚕噶齐遥授中书右丞居三年海都叛奉旨从
噶玛拉太子往征之师还卒赠司徒子阿里实登德服
阿萨尔琳沁俱以仕显

△乌鲁斯

乌鲁斯喀喇氏曾祖哈斯巴延为庄圣太后宫牧官祖海都从宪宗征钓鱼山歿于
阵父莽赉特穆尔世宗时为笔且齐乌鲁斯以内府笔
且齐至元中拜监察御史迁云南行省理问后以忤僧格被谮籍其家唯金玉带各一黄
金五十两皆帝所赐者乃获免二十六年置八番罗甸
宣慰司进宣慰使时诸蛮叛服不常乌鲁斯平之乃立安抚等司以守焉 【经世大典及
元地理志并作至元十六年事本传系之二十六年
恐误】 二十八年平杨都要等累官至四川行省平章政事至大二年召还皇庆二年卒
赠益国公子博啰布哈初直宿卫至大元年为翰林侍
讲学士以父疾归侍延佑四年复入侍至治二年袭授河南府同知子察罕布哈萨禧总
管府副达嚕噶齐

△多罗台

多罗台唐古氏祖苏尔楚太祖时以业弓进赐名齐勒乌兰命为弓匠百户卒父塔
尔呼台袭职额呼布格叛从战于苏玛勒图之地死之
多罗台从万户伊苏岱尔伊啰斡齐等累战有功授前卫亲军百户积官芍陂屯田千户
所达嚕噶齐后以疾退弟库库楚亦业弓尝献所造弓
帝称善问知为塔尔呼台之子因试之射命为近侍明年武备寺臣复以其弓献且瘠用
之擢为大同路广胜库达嚕噶齐广胜者贮兵器之所
时总管唐古哈雅以库作公署寘甲仗于虚廩多被蛊鼠之害库库楚言于帝复之使者
色辰布哈纳苏罗丹以檄取鹰房军衣甲弓矢库库楚
责其入文书领去宪副巴埒默令毋入文书库库楚不从事闻帝命笞色埒默罢之累官
大宁路总管卒于官多罗台之子托观初直宿宁厯官
至四川廉访司佥事枢密院都事升断事官尝上疏请停罢修寺及省减供佛饭僧之费
又请富商大贾宜与军民一体应役回回诸色人等不
许赉宝中卖以虚国用其辞恳当时称之

△额森布哈

额森布哈蒙古齐喇氏祖实喇阿古尔兄弟四人长图卜布哈次齐哩克季哈喇阿古尔方太祖微时齐哩克已深自结纳偕兄弟率属来归太祖遇之特异他族命为笔且齐长实喇阿古尔早世其子博尔欢事睿宗入宿卫宪宗即位与蒙古萨勒密赞谋议拜中书右丞相遂专国政至元元年以党附额噶布格论罪伏诛于四人额森布哈初世其职为笔且齐长裕宗封燕王世祖命为之传且谓之曰额森布哈旧臣子孙闲习典故尔每事问之必不使尔为不善也二十三年拜云南诸路行中书省平章政事时阿郎可马丁诸僰夷为变讨平之遂立登云等路府州县六十余所官其酋长定其贡税边境以宁大德二年迁湖广行省平章为政明决会汴梁行省有妖狱飞语连湖广平章政事刘汉杰右丞燕公楠朝廷诏二人入二人与额森布哈尝有违言至是急遣使附奏明其无他二人皆得释八年迁平章河南行省河决苍黎堤督有司备之汴以无患【按河渠志载大德九年黄河决徙附近汴梁几至浸没本处官司权宜开辟卒无成功语异本传】九年进拜湖广等处行省左丞相至大二年卒天历二年赠恒阳王谥文贞子五人曰额琳沁曰图噜曰塔斯曰齐喇曰阿勒坦事成宗袭长宿卫有旨给传往侍其父以孝行闻拜海北海南道宣慰使都元帅时海岛生黎叛服不常阿勒坦威望素着夷人帖服皆愿输贡税至大二年奔父丧于武昌以哀毁致疾卒天历二年追封特进赵国公中书左丞相谥贞孝

△伊奇哩

伊奇哩女真人幼颖悟及长以孝友闻事世祖潜邸得备宿卫中统初命参议陕西行院事未几改行省断事官复入宿卫李璿平朝议选宿宁之事监汉军伊奇哩监军于岷阳至元七年命为监战以所领军围襄阳筑一字堡以张军势一时名将索多刘国杰李庭等皆隶麾下攻樊城率其军先登破之所受赐悉分将士十一年从丞相巴延次郢州时粮储不继伊奇哩攻江陵龙湾堡得粟万石众赖以济大军东下宋将夏贵迎战于阳逻湫【阿珠巴延等传并作阳罗堡】巴延未至众欲少俟之伊奇哩曰兵贵神速机不可失宜及其未定而击之遂直前冲贵军获战船百余贵败走十二年攻常州伊奇哩造云梯绳桥以登遂克之徇下安吉诸州十三年宋降巴延命伊奇哩监守其宫号令严肃秋毫无犯入朝录功迁浙江宣慰使镇守绍兴十九年卒子齐拉袞江东廉访使托克托淮东宣慰使

△郑温

郑温真定灵寿人初从中书钮祜禄纳罕南征授千户宪宗征西川温四月不解甲史天泽言其功帝曰朕所亲见也赐名伊克巴图还至
阆州奉旨分军守逻天泽命统四千人警逻钓鱼山中统三年李璿叛诏温以军还讨至
济南大军围其城贼将乘夜斫营温力战却之至元六
年进右卫副都指挥使九年诏统蒙古汉人女真高丽诸步军渡海征耽罗平之【耽罗
国传作至元十年事】十二年率三卫军从攻岳州
江州皆有功十八年迁江淮行省参知政事杭民饥出米二十万石赈之俄阳常州官田
三十顷二十三年升江浙左丞命以新附汉军于淮安
云山泉塘立屯田二十八年卒子钦利用监丞釭榷茶都运使铨右卫亲军千户镛袁州
路判官

钦定续通志卷四百七十四

●钦定续通志卷四百七十五 列传二百七十五

列传

元【二十九】

○元二十九

王盘

王鸮

高鸣

李冶

李昶

刘肃

王思廉

李谦

徐

世隆

孟祺

阎复

王盘

王鸮

高鸣

李冶

李昶

刘肃

王思廉

李谦

徐世隆

孟祺

阎复

△王盘

王盘字文炳广平永年人父禧金末入射佐军兴补进义副尉国兵破永年将屠其
城礼复罄家赀以助军费众赖以免金人迁汴乃举家
南渡河居汝之鲁山盘年方冠从麻九畴学于郾城正大四年擢经义进士第授归德府
录事判官不赴及河南被兵盘避难转入淮襄间襄阳

兵变乃北归至洛会杨惟中被旨招集儒士得盘深礼遇之遂寓河内东平总管严实兴学养士迎盘为师受业者常数百人中统元年即拜益都等路宣抚副使顷之以疾免李璫素重盘以礼延致盘亦乐青州风土乃买田涨河上题其居曰鹿庵有终焉之意及璫谋不轨盘觉之脱身入京师因侍臣以闻世祖即日召见嘉其诚节抚劳甚厚璫据济南大军讨之帝命盘参议行台事璫不召拜翰林直学士同修国史 【按苏天爵元文类载王盘以金有天下凡九帝共一百二十年其守成之善者莫如世宗谨就实录中摭其行事一百八十余条于至元二年同徐世隆王鹗上进名曰大定治绩本传不载谨附识】 出为真定顺德等路宣慰使时蝗起真定朝廷遣使者督捕役夫四万人以为不足欲牒邻道助之盘曰四万人多矣何烦他郡使者怒责盘状期三日尽捕蝗盘不为动亲率役夫走田间设法捕之三日而蝗尽灭使者惊以为神复入翰林为学士入谒宰相首言方今害民之吏转运司为甚至税人白骨宜罢去之以苏民力由是运司遂罢阿哈玛特讽大臣请合中书尚书两省为一拜右丞相安图为三公阴欲夺其政柄有诏会议盘言合两省为一而以右丞相总之实便不然则宜仍旧三公既不预政事虚设何为议遂沮 【按阿哈玛特传至元七年立尚书省以阿哈玛特平章尚书省事九年并尚书省入中书省以阿哈玛特为中书省平章政事与百官志相符本传及安图陈佑传并云其事遂罢岂已罢而复行欤抑传失其实欤】 迁太常少卿时宫阙未建朝仪未立凡遇称贺臣庶杂至帐殿前喧扰不能禁盘上疏曰按旧制天子宫门不应入而入者谓之阑入阑入之罪由第一门至第三门轻重有差宜令宣徽院籍百官姓名各依班序听通事舍人传呼赞引然后进其越次者殿中司纠察定罚不应入而入者准阑入罪庶朝廷之礼渐可整肃于是仪制始定曲阜孔子庙历代给民百户以供洒扫复其家至是尚书省以括户之故尽数为民盘言林庙户百家岁赋钞不过六百贯仅比六品官终年俸耳圣朝疆宇万里财赋岁亿万计岂爱一六品官俸不以待孔子哉且于府库所益无多其损国体甚大时论黷之盘尝于会议之际数言前代用人二十从政七十致仕所以资其财力闵其衰老养其廉耻之心也今入仕者不限年而老病者不能退彼既不自知耻朝廷亦不以为非甚不可也至是引年乞致仕帝遣使谕之曰卿年虽老非任剧务何以辞为盘不得已复起时方伐宋凡帷幄谋议有未决即遣使问之所陈每称上意帝将用兵日本问以便宜盘言今方伐宋当用吾全力庶可一举取之若复分兵岛夷恐旷日持久功卒难成江南既下盘上疏言宜禁戢军士选择官

吏赏功罚罪推广思信所以抚安新附销弭寇盗其言要切皆见施行朝议汰冗官权近以按察司不便欲并省之盘奏曰各路州郡去京师遥远贪官污吏侵害小民无所控告惟赖按察司为之申理若指为冗官一例罢去则小民冤死而无所诉矣由是按察司得不罢朝廷录平宋功迁至宰相执政者二十余人因议更定官制盘奏曰历代制度有官品有爵号有职位官爵所以示荣宠职位所以委事权臣下有功有劳随其大小酬以官爵有才有能称其所堪处以职位此人君御下之术也臣以为有功者宜加迁散官或赐五等爵号不宜任以职位日本之役师行有期盘入谏曰日本小夷海道险辽胜之则不武不胜则损威臣以为勿伐便帝震怒谓非所宜言且曰此在吾国法言者不赦汝岂有他心耶盘对曰臣赤心为国故敢言且臣年已八十无子他心欲何为耶明日帝遣侍臣温言慰抚盘以年老累乞骸骨诏致仕仍给半俸终身命其壻著作郎李穡宾为东平判官以便养盘资性刚方不妄言笑每奏对必以正不肯阿顺帝尝以古直称之阿哈玛特方得权致重币求碑文盘拒弗与所荐士皆为名臣年九十二卒封洛国公谥文忠

△王鹗

王鹗字百一曹州东明人金正大元年中进士第一授应奉翰林文字金主迁蔡诏尚书省移书恒山公武仙进兵金主览书问谁为之省丞以鹗对曰朕即位时状元耶召见惜擢用之晚授尚书省右司郎中蔡陷将被杀万户张柔闻其名救之辇归馆于保州世祖在藩邸访求遣逸士遣使聘之及至使者数辈迎劳召对进讲孝经书易及齐家治国之道世祖曰我虽未能即行汝言安知异日不能行之耶岁余乞还仍命近侍库库等五人从之学继命徙居大都尝因间请曰天兵克蔡金主自经其奉御经实焚葬汝水之傍礼为旧君有服愿往葬祭世祖义而许之庚申世祖即位首授翰林学士承旨制诰典章皆所裁定至元元年奏言自古帝王得失兴废可考者以有史在也国家以神武定四方天戈所临无不臣服皆出太祖皇帝庙谟雄断所致若不乘时纪录窃恐久而遗亡宜置局纂就实录除修辽金二史又言唐太宗始定天下置弘文馆学十一人宋太宗承开创之后设内外学士院史册烂然号称文治堂党国朝岂无英才如唐宋者乎皆从之由是始立翰林学士院鹗遂荐李冶李昶王盘徐世隆高鸣为学士【按李愷名臣言行录云初鹗侍潜邸尝举杨奂元好问修金史未及召而卒又举李冶李昶王盘徐世隆图克坦公履高鸣为学士杨恕孟攀鳞为待制王恽雷膺为修撰周砥胡祜孟祺阎复刘元为应奉凡前后遗老及当时鸿儒搜抉殆尽

【所载较本传为详】复奏立十道提举学校官有言事者谓宰执非其人诏儒臣廷议可任宰相者时阿哈玛特巧佞欲乘隙取相位众知其非莫敢言鹗奋然掷笔曰吾以衰老之年无可报国即欲举任此人为相吾不能插驴尾矣振袖而起奸计为之中止五年乞致仕诏有司岁给廩禄有大事则遣使就问之十年卒谥文康鹗性乐易为文章不事雕饰尝曰学者当以穷理为先分章析句乃经生举子之业非为已之学也着论语集义一卷汝南遗事二卷讨文四十卷名曰应物集

△高鸣

高鸣字雄飞真定人少以文学知名诸王锡里库将征西域闻其贤遣使者三辈召之鸣乃起为王陈西征二十余策王数称善荐为彰德路总管世祖即位授翰林学士兼太常少卿至元五年立御史台以鸣为侍御史风纪条款多所裁定天下初定中书枢密事多壅滞言者请置督事官各二人鸣曰官得人自无滞致臣职在奉宪愿举察之毋为员外置人也七年议立三省鸣上封事曰臣闻三省设自近古其法由中书出政移门下议不合则有驳正或封还诏书议合则还移中书中书移尚书尚书乃下六部郡国方今天下大于古而事益繁取决一省犹曰有壅况三省乎且多置官者求免失政也但使贤俊萃于一堂联署参决自免失政岂必别官异坐乎不如一省便世祖深然之议遂罢川陕盗起省臣患之请专戮其尤者以止盗朝议将从之鸣谏曰制令天下上死囚必待论报所以重用刑惜民生也今从其请是关天下擅杀之路害仁政甚大世祖今速止之鸣每以敢言被上知尝入内值大风雪帝谓御史大夫塔齐尔曰高学士年老后有大事就问可也九年迁吏部尚书十一年病卒年六十六谥文献

△李冶

李冶字仁卿真定栾城人登进士第辟知钧州事金亡冶微服北渡流落忻崞问世祖在潜邸闻其贤遣使召之既至问河南居官者孰贤对曰险夷一节惟完颜仲德耳又问魏征曹彬何如对曰征忠言谏论知无不言以唐诤臣观之征为第一彬伐江南未尝妄杀一人儼之方叔召虎可也又问今之臣有如魏征者乎对曰今以侧媚成风欲求魏征之贤实难其人又问今之人材贤否对曰天下未尝乏材求则得之理势然也今儒生如魏璠王鹗李献卿兰光庭赵复郝经王博文辈皆有用之才又皆贤王所尝聘问者举而用之何所不可但恐用之不尽耳又问天下当何以治之对曰为治之道立法度正纪纲而已纪纲者上下相维持法度者赏罚示惩劝今则大官小吏下至编氓皆自纵恣以私害公

是无法度也有功未必赏有罪未必罚甚则有功者或被辱有罪者反获宠是无法度也
法度废纪纲坏天下不变乱已为幸矣又问昨地震何
如对曰天裂为阳不足地震为阴有余夫地道阴也阴太盛则变常合之地震或奸邪在
侧或女谒盛行或谗慝交至或刑罚失中或征伐骤举
五者必有一于此矣夫天之爱君如爱子故示此以惊之苟能上当天心下协人意则可
转咎为休矣世祖嘉纳之治晚家元氏买田封龙山下
及世祖即位复聘至欲处以清要治以老病恳还山至元二年再以学士召就职寻辞去
卒于家所著有敬斋文集四十卷壁书藁削十二卷泛
说四十卷古今难四十卷测圆镜海十二卷益古衍疑三十卷

△李昶

李昶字士都东平须城人父世弼从外家受孙明复春秋得其宗旨昶年十六已能
为程文兴定二年廷试父子同以春秋中进士第褒贬
各异时人比之向歆昶释褐授孟州温县丞国兵下河南奉亲还乡里行台严实辟为都
事实卒子忠济嗣迁昶为经历时朝廷裁抑诸侯法制
寝密忠济纵侈自若昶以亲老求解不许俄以父忧去官杜门教授一时名士李谦马绍
吴衍辈皆出其门世祖伐宋次濮州闻昶名召见问治
国用兵之要昶上疏论治国则以用贤立法务本清源为对论用兵则以伐罪救民不嗜
杀为对世祖嘉纳之及即位召至开平访以国事昶知
无不言时征需烦重行省科税赋虽逋户不贷昶移书时相曰百姓困于弊政久矣圣上
龙飞首颁明诏天下之人如获更生拭目倾耳以俟太
平半年之间人渐失望良以渴仰之心太切兴除之政未孚故也侧闻欲据工已户籍科
征租税比之见户或加多十六七比验见户应输犹恐
不逮复令包补逃故必致艰难苟不以抚字安集为心惟事供亿则诸人皆能之岂圣上
擢贤更化之意哉于是省府为蠲逋户之赋中统二年
内难平昶上表贺因进諷諫曰患难所以存儆戒祸乱将以开圣明伏愿日新其德虽休
勿休安不忘危治不忘乱恒以北征宵旰之勤永为南
面逸豫之戒帝称善久之会严忠济罢以其弟忠范代忠范表请昶师事之特授翰林侍
讲学士行东平路总管军民同议官昶条十二事划除
宿弊【按苏天爵名臣事略云朝议令老疾输赋昶上书曰圣主即位之初凡鳏寡疾废
之人命所在优恤去岁省府常有榜谕俾给粮收养
旬月之间一子一夺非所以示信也元史称昶条十二事此或其一欤】至元元年迁转
之制行减并路府州县官员于是谢事家居五年起为
吏礼部尚书品格条式选举礼文之事多所裁定凡议大政宰相延置上座倾听其说六
年奸臣阿哈玛特议升制国用使司为尚书省昶请老

以归八年授山东东西道提刑按察使务持大体不事苛细未几致仕二十六年卒昶尝集春秋诸家之说折衷之曰春秋左氏遗意二十卷取孟子新旧说矛盾者参考归一附以已见为孟子权衡遗说五卷

△刘肃

刘肃字才卿威州洺水人金兴定二年词赋进士尝为尚书省令史调新蔡令先时县赋民以牛多寡为差民匿不耕肃至命树畜繁者不加赋民遂殷富濒淮民有窜入宋境籍为兵而优其粮间有归者颇艰于衣食时出怨言曰不如渡淮告者以谋叛论肃曰淮限宋境一水耳界欲不难往也口虽言而心无实准律当杖八十奏可继擢户部主事金亡依东平严实辟行尚书省左司员外郎东平岁赋丝银复输绵十万两色绢万匹民不能堪肃赞实奏罢之世祖居潜邸以肃为邢州安抚使肃兴铁冶及行楮币公私赖焉中统元年擢真定宣抚使时中统新钞行罢钞银不用公私嚣然莫知所措肃建三策一曰仍用旧钞二曰新旧兼用三曰官以新钞如数易旧钞中书从其第三策遂降钞五十万贯二年授左三部尚书官曹典宪多所议定未几见商议中书省事以年老致仕四年卒肃性舒缓有执守尝集诸家易说曰读易备忘追赠邢国公谥文献子宪礼部侍郎恣 【按虞集撰刘赓神道碑云赓官一品年七十而父恣无恙史传作肃子宪恣无恣名疑有缺误】 大名路总管孙赓自有传

△王思廉

王思廉字仲常真定获鹿人幼师太原元好问既冠张德辉 【原作张德耀误谨据张德辉传改正】 宣抚河东辟掌书记复谢归至元十年董文忠荐之世祖问曰汝何由知王思廉贤对曰乡人之善者称之也召见授符宝局掌书十四年迁翰林待制尝进读通鉴至唐太宗有杀魏征语及长孙皇后进谏事命内官引至皇后合讲衍其说每侍读必命诸大臣咸听授焉帝尝御延春合大赉羣臣俸十人为列以进思廉偶在卫士之列帝责董文忠曰思廉儒臣岂宜列卫士十九年帝幸白海时千户王着矫杀奸臣阿哈玛特于大都辞连枢密副使张易帝召思廉至行殿屏左右问曰张易反若知之乎对曰未也帝曰反已反已何未也思廉徐奏曰僭号改元谓之反亡入他国谓之叛羣聚山林贼害民物谓之乱张易之事臣实未之详也帝曰朕往者有问于寡默其应如响盖心口不相违故不思而得朕今有问汝能然乎且张易所为张仲谦知之否思廉即对曰仲谦不知帝曰何以明之对曰二人不相安臣故知其不知也思廉以儒素进帝眷注优渥裕宗居东宫思廉进曰殿下府

中宜建学官俾左右近侍尝亲正学必能裨辅明德裕宗然之二十三年改同知大都留守藩王纳颜叛帝亲征思廉谓留守段贞曰藩王反侧地大故也汉晁错削地之策实为良图贞见帝以闻帝曰汝何能出是言贞以思廉对帝嘉之大德元年迁翰林学士以病归三年起为工部尚书拜征东行省参政十一年授太子宾客旋以翰林学士承旨致仕延佑七年卒封恒山郡公谥文恭

△李谦

李谦字受益郓之东阿人始就学日记数千言为赋有声与徐世隆孟祺阎复齐名教授东平时教授无俸郡敛儒户银百两备束修谦辞曰家幸非甚贫岂可聚货以自殖乎翰林学士王盘以谦名闻召为应奉翰林文字至元十八年升太子左谕德侍裕宗于东宫陈十事曰正心睦亲崇金几谏戢兵亲贤尚文定律正名革弊裕宗薨又命傅成宗于潜邸所至以谦自随转侍读学士二十六年以足疾辞归大德六年召为翰林承旨寻引年致仕仁宗即位召十六人谦居其首【按续纲目载至大四年召先朝旧臣知政务者老臣程鹏飞董士选李谦张律陈天祥尚文刘正郝天挺董士珍萧口刘敏中王思廉韩从益赵君信程文海十五人诣阙同议庶政与史传较异】至行在疏言九事曰正心术以正百官崇孝治以先天下选贤能以居辅相之位广视听以通上下之情恤贫乏以重邦家之本课农桑以丰衣食之源兴学校以广人材之路颁律令使民不犯练士卒居安虑危至于振肃纪纲纠察内外台宪之官尤当选素着清望深明治体不事苛细者为之帝嘉纳焉迁集贤大学士归卒于家谦文章醇厚有古风不尚浮巧学者宗之号野斋先生子偁官至大名路总管

△徐世隆

徐世隆字威卿陈州西华人金正大四年进士辟为令其父戒之曰汝年少举未至母急仕进俟三十入官未晚也世隆遂辞官益笃于学明习前代典故尤精律令父歿奉母北渡河严实招致东平幕府俾掌书记世隆劝实收养寒素一时名士多归之世祖在潜邸召见于日月山时方图征云南以问世隆对曰君人者不嗜杀人天下可定况蕞尔之西南夷乎世祖曰诚如卿言吾事济矣实时得金太常登歌乐世祖遣使取观世隆典领以行【按礼乐志载宪宗二年命东平万户严实立局肄习五月召太常礼乐人赴日月山学士徐世隆郎中姚枢等以乐工李明昌等五十人见于行宫本传作世祖取观与志异】既见世祖勉留之辞以母老中统元年擢燕京等路宣抚使中书省檄诸路养禁卫

羸马以万计吏白军需责重宜先戒备也隆曰国马牧于北方往年无饲于南者上新临天下京畿根本地烦扰之事必不为之马将不来遂弗为备马果不至三年宣抚司罢世隆还东平请增宫县大乐文武二舞令旧工教习以备大祀制可徐世隆太常卿以掌之【礼乐志作敕太常少卿王鍊领东平乐工常加肄习以备朝廷之用】兼提举本路学校事帝尝问为君之道世隆取书所载尧舜禹汤事以对帝喜曰汝为朕直解进读朕将敬听之书成帝命翰林译写以进至元元年迁翰林侍讲学士兼太常卿朝廷大政谘访而后行世隆奏事之大者首惟祭祀祭必有庙因以图上乞敕有司以时兴建从之踰年而庙成遂迎祖宗神御奉安太室行大飨礼帝悦俄兼户部侍郎承诏议立三省遂定内外官制又奏定百官朝会议七年迁吏部尚书撰选曹八议九年乞补外授东昌路总管至郡专务以德率下不事鞭撻吏不忍欺民亦化服十四年为山东提刑按察使时有妖言狱逮捕数百人世隆剖析诬误者十八九悉纵遣之寻移淮东有告宋将许琼匿官库财物有司追击其妻孥世隆曰琼所匿者教宋之物岂得与今盗官财者同论抗章辩白行台是之释不问十七年召为翰林学士以疾辞二十二年安图再入相言世隆虽老尚可用遣使征之不至附奏便宜九事寻卒有瀛洲集百卷文卷若干卷

△孟祺

孟祺字德卿宿州符离人幼敏悟早知问学侍父徙居东平时严实修学校招生徒立考试法祺就试登上选辟掌书记廉希宪宋子贞皆器遇之以闻于朝擢国史院编修官迁应奉翰林文字至元七年持节使高丽还称旨十二年丞相巴延伐宋诏选宿望博学可赞画大计者与俱行遂授祺行省咨议时军书填塞祺酬应剖决略无凝滞及战焦山宋军下流祺曰不若乘势速进以夺彼气如其言遂大破之巴延喜曰不意书生乃知兵若是诸将利劫掠争趋临安巴延问计祺对曰若以兵相迫彼必窜闽一旦盗起临安三百年之积焚荡无遗矣莫若以计安之令彼不惧正如取果稍待时日耳巴延然其言乃草书遣人至临安以安辑之宋乃不复议迁闽【按宋史陈宜中传云元兵薄独松关宜中入宫请凭都太后不许宜中痛哭请之太后命具装以俟及暮宜中不入乃不果迁本传所言特史氏假以表祺之功耳】祺复自请为使征降表至则会宋相于三省夜三鼓议未决祺正色曰国势至此夫复何待遂议书成宋谢太后内批用宝携之以出复启太后于内殿取国玺十二枚出巴延将亲封之祺止之曰管钥自有主者非所宜亲一有不谨恐异时奸人妄相染污终不可白遂止江南平巴延奏祺前后功多且言

祺可任重升授嘉兴路总管祺至首以兴学为务创立规制在官未久以疾归东平十八年卒赠鲁郡公谥文襄子二人遵遁

△阎复

阎复字子靖其先平阳和州人致仕且衍仕金歿王事父忠辟兵山东之高唐遂家焉复弱冠入东平学师事名儒康煜时严实领东平行台招诸生肄进士业迎元好问校风其文预选者四人复为首辟掌书记至元八年王盘荐为翰林应奉以才选充会同馆副使扈驾上京赋应制诗寓规讽意世祖顾和尔果斯曰有才如此何可不用十四年出金河北河南道提刑按察司事十六年入为翰林学士以州郡校官多不职建议定铨选之法二十八年尚书省罢复立中书省帝急于择相一日召入便殿谕之曰朕欲命卿执政何如复谢不足胜任帝谓侍臣曰书生识义理存谦让是也勿强乃改授浙西道肃政廉访使先是僧格当国尝有旨命翰林撰僧格辅政碑僧格既败诏有司踣其碑复坐是免官成宗即位以旧臣召入朝除集贤学士元贞元年上疏言京师宜首建宣圣庙学定释奠雅乐又言曲阜守冢户不宜听有司并入民籍其后诏赐孔林洒扫二十八户祀田五千亩皆复之请也三年因星变又上疏言定律令颁封赠增俸给通调内外官且曰古者刑不上大夫今郡守以征租受杖非所以属廉隅江南公田租重宜减以贷贫民后多采用大德四年帝召复至榻前密谕之曰中书庶务繁重左相难其人卿为朕举所知以哈喇哈斯对帝大喜即命入相【按哈喇哈斯入相宰相表作大德三年哈喇哈斯传作二年本传载在四年互异】复亦拜翰林学士承旨复首陈三事曰惜名器明赏罚择人材言皆剴切未几遥授平章政事复力辞不许上疏乞骸骨从之皇庆元年卒谥文康有靖轩集五十卷

钦定续通志卷四百七十五

●钦定续通志卷四百七十六 列传二百七十六

列传

元【三十】

○元三十

杨大渊【文安】 李呼喇济 李庭 史弼 高兴

刘国杰

杨大渊

李呼喇济

李庭

史弼

高兴

刘国杰

△杨大渊

杨大渊天水人与兄大全弟大楫皆仕宋大渊总兵守阆州岁戊午宪宗兵至阆州之大获山遣宋降臣王仲入招大渊大渊杀之宪宗怒督诸军力攻大渊惧遂以城降宪宗命诛之汪特格谏止乃免命以其兵从招降逢广安诸郡进攻钓鱼山拜侍郎都行省悉以平蜀之寄委之世祖中统元年诏遗民进攻礼义城掠其馈运获总管黄文才等以归二年调兵出通川与宋将鲜恭战获统制白继源三年出开达与宋兵战于平田复战于巴渠擒其知军范燮统制魏兴等先是大渊建言谓取吴必先取蜀取蜀必先据夔乃遣兄子文安攻宋巴渠至万安寨守将卢埴降复使文安相夔达要冲城蟠龙山山四面岩阻可以进攻退守城未异宋夔路提刑郑子发率兵来争文安悉力备御大渊遣文仲往援宋兵宵遁诏以大渊麾下将士有功赐给海青符二俾事亟则驰以闻大渊请于利州大安军以盐易军粮从之入覲拜东川都元帅俾与征南都元帅奇彻同署事大渊还复于渠江演筑虎啸城以逼宋大良城不踰时而就四年宋贾似道遣杨琳赍空名告身及蜡书金币诱大渊南归文安擒之以闻诏珠琳至元元年大渊谍知宋总统祁昌由闲道运粮入得汉城并欲迁其郡守向良及官吏亲属于内地乃自率军掩袭遇之于椒坪连战三日擒祁昌俘获无算宋都统张思广引兵来援复大破之二年大渊遣文安以向良等家人往招得汉城未下而卒八年追封阆中郡公谥肃翼子文粲袭兄子文安

杨文安

杨文安

文安字泰叔父大全仕宋守叙州以战死官其长子文仲文安依大渊于阆州戊午大渊降授侍郎都行省文仲亦授安抚使中统元年授文安监军三年以功迁开达忠万梁山等处招讨使佐文渊城蟠龙山筑虎啸城至元元年宋兵攻蟠龙大战败之文安擒裨将陈亮复筑方斗城为蟠龙声援宋兵攻潼州文安赴援败宋师于射洪之纳坝宋总统祁昌以重兵运粮饷得汉城且迁其官属于内地大渊命文安邀击之获祁昌俘得汉守臣向良家属以招良良以城降攻未开达等州擒其统制张刚总管伏林宋兵由开州运粮饷达文安率奇兵闲道邀击之获总管方富攻夺宋金州断虎隘杀其将梁富擒路钤赵贵等三年与千户李吉等略开州以

大通获统制陈德等总帅汪惟正遣其将李木波等由闲道袭开州文安遣千户王福引兵助之福先登破其城宋将庞彦海投崖死擒副将刘安仁留兵戍其地宋诸路兵来救四年文安率兵断其粮道宋兵战甚力飞矢中文安面拔矢力战大破之杀其将张德等五年文安卒诏文安充夔东路安抚使军民元帅夔州累遭兵变户口润耗文安教以耕桑鰥寡不能自存愿相配偶者并为一户充役民始复业遣千户马才张琪略达州擒宋将范伸王德解明等六年遣蔡邦光李吉嵇永兴略达州之朱师郑市擒总管周德新裨将王迁又遣把总王显略达州之泥埧总管张威遣兵掠大宁之曲水擒副将王仁七年从严奩省攻重庆大战于龙坎败宋兵攻铎铁寨擒其将袁宜何世贤等攻达州之圣耳城擒宋将杨普时安芟其禾而还又遣元帅蔡邦光略开州擒宋将陈俊八年春遣蔡邦光攻达州战于圣耳城下擒其将蒲桂又战开州之沙平擒其将王顺宋朱禊孙帅蜀数遣闲谍动摇人心文安屡获其谍夔州竟无虞寻遣千户嵇永兴攻开州战于平炖曲水擒总管王道等军还擢东川路征南招讨使九年领军出小宁措置屯田遣韩福攻达州九军山擒宋将张俊遣元帅蔡邦光会蓬州兵邀宋师于永睦战胜之复遣嵇永兴杨彪破圣耳外城获寨主杨桂筑金汤城以积屯田之粮且以逼宋龙爪城虑宋兵来争遣韩福出兵通川牵制之与宋兵遇于铎耳山败之俘总管蔡云龙等出达州牛门断宋兵回路擒总管李佺李德宋兵输粮达州遣兵于卢滩峡邀击之擒统制孙聪张顺等遣元帅李吉略开州战于泻油坡擒其提举李贵及石笋寨主雍德宋兵复由罗顶山输粮开达遣蔡邦光李吉伏兵遮之擒裨将吴金等覆其粮船蓬州兵攻拔龙爪城东川统军司命文安兼领之时蓬州兵已去宋都统赵章复据之且出兵迎敌文安与战破之擒总管王元而还宋都统阎国宝监军张应庚运粮于达州文安邀之于泻油坡夺其粮并擒二将宋开州守将鲜汝忠邀遮归路与战败之获总辖秦兴翰林且谭友孙十一年文安率军屯小宁得俘者言鲜汝忠等将取蟠龙之麦即遣千户王新德杨彪等散掠宋境文安自戍蟠龙以备之李吉略由山擒其将叶胜遣蔡邦光杨彪掠竹山寨擒其将郑桂庄俊攻宋夔东拔高阳夔巫等寨擒守将严贵窦世忠赵兴因跨江为桥遏宋兵往来之路还攻牛头城以火箭焚其官舍民居遣蔡邦光略九君山擒其将孙德柳荣赵威时宋以鲜汝忠赵章易镇开达二州汝忠家属尚留开文安曰达未易攻若先拔开州俘其家属以招汝忠则达可不烦兵而下矣乃遣蔡邦光率千户呼延顺等往攻开州而盛兵驻蟠龙以为援十二年诸军夜衔枚薄其城遣死

士先登斩关以入宋军溃散擒赵章及守将韩明父子
文安迁汝忠家属于蟠龙遣元帅王师能拔檄往达州招之汝忠率所部诣文安军门降
悉还其妻孥财物赵章子桂楫守师姑城遣兵招之亦
降洋州龙爪城守将谢益固守并力攻之擒统制王庆益弃城走复遣元帅李吉嵇永兴
千户王新德等将兵以鲜汝忠往招由山等处八城寻
遣兄子应之往招都胜茂竹广福三城皆降之进攻梁山宋将袁世安坚守文安焚其外
城拔忠胜军杀守将王智擒部辖景福移兵攻牛头城
杀守将何威迁其民进围万州守将上官夔战守甚力文安解围去攻石城堡谕降守将
谭汝和又招降鸡冠石马三圣由木牟家下隘等城进
围白帝城夔帅张起岩坚守不出文安以师老乃还宋都统戈德复据开州文案筑城神
仙山以逼之十三年朝廷遣安西王相李德辉经画东
川宋梁山守将袁世安遣使约降文安以白德辉德辉即遣文安将兵招之世安遂降复
进军攻万州遣徐政谕守臣上官夔降夔不从夔帅张
起岩来救遣镇抚彭福寿击破之尽杀其舟师俘其将宋明万州夺气文安悉力攻城夔
巷战死遣使招铁檠三宝两城守将杨宜黎拱辰降分
兵略施州擒统制薛忠杀守帅何良夺其城十四年进攻咸淳府擒其守马堃十五年攻
绍庆守将鲜龙迎敌兵败就擒蜀境已定独夔坚守不
下朝廷命荆湖都元帅达海由巫峡进兵西川金院挟夔守将亲属往招之文安遣元帅
王师能将舟师与俱张起岩遂以城降八覲文安以所
得城邑绘图献之帝劳之曰汝攻城略地之功何若是多也擢四川南道宣慰使十七年
谕降散毛诸洞蛮遥授文安参知政事行四川南道宣
慰使十九年进中书左丞行江西省事到官踰月卒子良之袭

△李呼喇济

李呼喇济一名庭玉陇西人父节仕金岁乙未自巩昌石门山从汪世显以城降呼
喇济隶皇子奎腾为质子从征四川累功为管军千户
都总领佐汪德臣【按元史作汪惟正误今据汪德臣传改正】立利州乙卯将兵三
万取合江大获山宋刘都统率众谋焚利州沙市次青
山呼喇济设伏取之俘获甚众戊午以兵趋剑门觐伺宋兵运粮于长宁追至运曲填夺
之宪宗南征呼喇济掌桥道馈饷事从攻苦竹隘山寨
先登斩守将杨立获都统张实招降长宁青居大获山运山龙州等寨大获山守臣杨大
渊纳款已而逃归宪宗怒将屠其城德臣谓呼喇济曰
大渊之去事颇难测亟追之乃单骑至城下大呼入城曰皇帝使我来抚汝军民一卒引
入甲士环立呼喇济下马执大渊手谓之曰上方宣谕
赐赏不待而回何也大渊曰诚不知国朝礼法且久出恐城寨有他变是以亟归遂与偕

来一军皆喜呼喇济入奏宪宗曰杨安抚反乎对曰无也宪宗曰汝何以知之对曰军马整肃防内乱也城门不闭无他心也一闻臣言即抚绥军民从臣以出以是知之宪宗曰汝不惧乎对曰臣恐上劳圣虑下苦诸军又为一郡生灵命脉所寄故不知其惧宪宗悦复大渊故官己未总帅江德臣没于军命呼喇济以其军殿后宋兵水陆昼夜接战皆败之部军皆青居人赏赉独厚遂与富察察元帅守青居治城壁储刍粮招纳降附宗王穆格承制命呼喇济为巩昌元帅中统元年瑋塔哈据六盘山以叛世祖遣哈喇济从汪良臣进讨力战杀瑋塔哈等于阵二年授巩昌后元帅辉图叛遁入西蕃从宗王追袭擒之四年诏赐虎符呼喇济不受对曰臣闻国制将万军佩虎符若汪氏将万军已佩之臣何可复佩帝命于总帅汪惟正下充巩昌路元帅所属官悉听节制达吉叛于西蕃呼喇济以千骑往执之至元元年入觐命与汪良臣还蜀守青居六年授夔东路招讨使立章广平山寨置屯田出兵以绝大梁平山两道十年成都失利帝遣人问所以失之之故及今措置之方呼喇济附奏曰初立成都惟建子城军民止于外城别无城壁宋军乘虚来攻失于不备军官皆年少不经事之人以此失利西川地广人稀宜修置城寨以备不虞选任材智广畜军储最为急务今蒙古汉军多非正身半以驱奴代宜严禁之所谓修筑城寨练习军马措画屯田规运粮饷创造舟楫完缮军器六者不可阙一又当任贤达谗信赏必罚修内治外战胜攻取选用良将随机应变则边陲无虞矣寻将兵赴成都与察克布哈同权省事已复还守章广平山寨前后七年每战辄胜十四年授延安路管军招讨使十五年图噜叛于六盘山呼喇济以本路军会巴尔斯台赵炳及总帅府兵于六盘山败之于武川俘其孥还授四川北道宣慰使二十年改四川南道宣慰使时思播以南施黔鼎澧辰沅之界蛮獠叛服不常二十二年诏四川行省讨之参政奇尔济苏左丞汪惟正一军出黔中僉省巴拜一军出思播都元帅托察一军出澧州呼喇济一军自夔门会合诸将凿山开道绵互千里诸蛮迎敌者尽杀之遣谕其酋长率众来降独散毛洞贾顺走避崑谷力屈始降二十三年以老病乞归帝悯之得还巩昌元贞二年入觐授陕西行省右丞议本省公事卒谥襄敏

△李庭

李庭小字劳山本金人富察氏家于济阴后徙寿光至元六年以材武选隶军籍权管军千户从伐宋襄阳守将吕文焕以万五千人来攻万山堡万户张弘范方与接战庭单骑横枪入阵杀二人枪折倒持回击一人坠马庭亦

被二枪复夺后军枪力战败之九年进攻襄阳东堡焚
其楼破一字城十年大军攻樊城庭运薪刍土牛填城壕立云梯屢中炮坠城下裹创再
登杀获甚多樊城破襄阳降以功授管军总管十一年
从巴延发襄阳次郢州郢在汉水东宋人复于汉水西筑新郢 【按巴延传巴延次盐山
距郢州二十里郢在汉水北宋人又于汉水南筑新
郢与此作东西互异】 以遏我军庭与刘国杰攻黄家湾堡拔之荡舟由藤湖入汉攻沙
洋新城炮伤左肋破其外堡复中炮坠城下矢贯胷气
垂绝巴延命剖水牛腹纳其中良久乃苏授益都新军万户师次汉口宋将夏贵锁战舰
横截江面军不得进乃用庭及马福计由沙芜口入江
武矶堡四面皆水庭决其水攻之大军渡江武矶堡亦破遂从阿珠转战至鄂州顺流而
东十二年与宋将孙虎臣战丁家洲夺船二十余宋军
溃宋兵断真州江路庭焚其船击斩其护岸军闻夏贵欲由太湖援临安亟出兵逆战裕
溪口败之诸军攻常州庭鏖战夺北门入十三年至临
安宋主降巴延命庭等护其内城收集符印珍宝仍令庭与唐古特等防护宋主赴燕世
祖嘉其劳有旨汝在江南多出死力男儿立功要在西
北上也今有违我太祖成宪者汝其往征之加汉军都元帅庭至哈喇和琳鸿和尔之地
越岭北与色埒默诸军大战败之移军河西击走叛臣
和和追至大碛而还诸王锡里济托克托穆尔反庭袭获之启皇子哲伯特穆尔赐之死
复引兵会诸王纳尔珣渡塔密尔河击走其余党河西
悉平十四年入朝赐益都居第单河官庄拜福建行省参知政事十九年授中书左丞东
征日本十八年军次竹岛遇风船尽坏庭抱坏船板漂
流抵岸下收余众由高丽还京师士卒存者十一二继以父歿归益都二十四年宗王纳
颜叛驿召至上都统诸卫汉军从帝亲征塔布岱金嘉
努来拒战众号十万帝亲麾诸国围之庭调阿苏军继进流矢中胷贯肋裹创复战帝遣
止之乃已令军中卫百弩侯敌列阵百弩齐发乃不复
出庭策纳颜必遁乃引壮士十人持火炮夜入其阵炮发敌惊溃帝问何以知之庭曰其
兵虽多无纪律见车驾驻此而不战必疑有大军在后
是以知其将遁帝大喜命庭将汉军与阿尔娄将蒙古军并进遂擒纳颜帝南还庭又亲
获塔布岱金嘉努以功遥受中书省左丞二十五年纳
颜余党哈坦多罗干复叛于辽东诏庭讨之大小数十战弗克整军再战流矢中左肋及
右股追至一大河选锐卒潜负火炮夜沂上流发之马
皆惊走大军潜于下流毕渡天明进战其众无马遂败徐坦多罗干走高丽死进尚书左
丞商议枢密院事庭因奏今汉军之力困于北征若依
江南军每岁二八放散以次番上甚便帝可其奏着为令宗王海都犯边帝命阿尔娄与

庭议所以为备庭请下括马之令凡得马十一万匹军中赖其用拜平章政事商议枢密院事成宗即位眷遇尤至武宗出镇北边庭请从行成宗悯其老不许继奉旨北征辉图至野马川而还俄有中使传旨拘汉军马以济北军且令焚其鞍辔行粮诸物扈从至上都大德八年卒至大二年追封益国公谥武毅子大用以哀毁卒大椿益都新军万户大诚后卫亲军都指挥使

△史弼

史弼字君佐蠡州溥野人曾祖彬有胆勇穆呼哩兵南下蠡守闭城自守彬谓诸子曰吾所恃者郡守也今弃民自保吾与其束手以死曷若死中求生乃率乡人数百家请降穆呼哩书帛为符遣还既而州破独彬与同降者得免弼长通国语膂力绝人能挽强弓里门凿石为狮重四百斤弼举之置数步外潼关守将王彦弼奇其材妻以女又荐其材勇于左丞相耶律铸弼从铸往北京近侍和尔台见弼所挽弓以名闻世祖召之试以远垛连发中的令给事左右授管军总管命从刘整伐宋攻襄樊至元十年诸将分十三道围樊城弼攻东北隅凡十四昼夜破之杀其将牛都统襄阳降上其功升副万户从丞相巴延南征攻破沙洋堡至阳罗堡巴延誓众曰先登南岸者为上功弼率健卒直前宋兵逆战奋呼击走之巴延登南岸论弼功第一鄂州平进军驻瓜洲巴延授弼三千人使立木堡据扬子桥宋将姜才以万众乘夜来攻人挟束薪填堑弼戒军中无哗俟其至下櫺木发炮石击之杀千余人败走十三年才复以兵夜至弼三战三胜天明才见弼兵少进复围之骑士挟火鎗刺弼弼挥刀御之左右皆仆手刃数十百人及出围追者尚数百骑弼殿后敌不敢近【按宋史姜才传云才出真州高邮万户史弼将兵击夺才与战达旦弼几殆与此互异】会援兵至大破之才奔泰州守将朱焕以扬州降制授扬州路总管府达噜噶齐兼万户俄迁黄州等路宣慰使十五年升江淮行中书省参知政事行黄州等路宣慰使盗起淮西司空山弼平之十七年平南康都昌盗十九年改浙西宣慰使二十一年黄华反建宁春复霖雨米价涌贵弼即发米十万石平价糴之而后闻于省省臣欲增其价弼曰吾不可得信宁辍吾俸以足之省不能夺益出十万石民得不饥改淮东宣慰使二十六年平台州盗杨镇龙拜尚书左丞入朝时世祖欲征瓜哇谓弼曰诸臣为吾腹心者少欲以瓜哇事付汝对曰陛下命臣臣何敢自爱二十九年拜福建行省平章政事往征瓜哇以伊克默色高兴副之弼之五千人合诸军【按经世大典云会福建江西湖广三行省兵二万海舟千艘赍一年粮谨附识】发泉州风急涛涌舟掀簸

士卒皆数日不能食过七洲洋万里石塘历交趾占城
界明年至东董西董山牛崎屿入混沌大洋橄榄屿假里马答句阑等山驻丘伐木造小
舟以入时瓜哇与邻国葛郎构怨瓜哇主哈只葛达那
加刺已为葛郎主哈只葛当所杀其壻土罕必阁耶攻哈只葛当不胜退保麻塔入歇闻
弼等至遣使以其国山川户口及葛郎国地图迎降求
救弼与诸将进破葛郎兵哈只葛当走归国高与言瓜哇虽降倘中变与葛郎合则孤军
悬绝事不可测弼遂分兵三道攻葛郎至答哈越葛郎
兵十余万迎敌自且至午葛郎兵败入城自守遂围之哈只葛当出降并取其妻子官属
以归土罕必阁耶乞归易降表及所藏珍宝入朝弼与
伊克默色许之遣万户敦珠卜丹甘珠尔布哈以兵二百人护之还国土罕必阁耶于道
杀二人以叛乘军还夹路攘夺弼自断后且战且行行
三百里得登舟行六十八日夜达泉州士卒死者三千余人有司数其俘获金宝香市等
直五十余万又以没理国所上金字表及金银犀象等
物进于是朝廷以甚亡失多杖十七没家赀三之一元贞元年起同知枢密院事阿尔娄
奏弼等以五千人渡海二十五万里入近代未尝至之
国俘其王及谕降旁近小国宜加矜怜遂诏以所籍还之拜江西行省右丞三年平章政
事加封鄂国公卒于家

△高兴

高兴字功起蔡州人力挽二石弓尝步猎南阳山中遇虎跳踉大吼众皆惊走兴神
色自若发一矢毙之至元十一年挟八骑诣黄州谒宋
制置陈奕奕使隶麾下且奇其貌以甥女妻之十二年丞相巴延伐宋至黄州兴从突出
降授千户从破瑞昌之乌石堡张家寨进拔南陵行省
上其功世祖命兴专将一军常为先锋宋张濡杀使者严忠范等于独松关巴延使兴讨
之由闲道夺独松关进至武康擒张濡十三年宋降巴
延北还留兴以兵取郡县之未下者降建德守方回婺州守刘怡衢婺二州已降复叛章
焞自为婺未兴以五千人复婺州擒章焞斩之进薄衢
州连战赤山陈家山围江山县斩首三千级俘五百人献魏福兴等七人于行省余尽戮
之衢州平追宋嗣秀王举榘入闽与榘据桥阵水南兴
率奇兵夺桥进战杀观察使李世达擒与榘父子及其小王二下兴化降宋参知政事陈
文龙【按宋史陈文龙传文龙知兴化军城陷被执
文龙即不食械系至杭饿死是未尝降也本传】制置印德传等迁管军万户十四年还
镇婺州充衢婺招讨使复从都元帅蒙古台平福建漳
三州破敏阳寨屠福成寨十五年诏兴立行都元帅府于建宁以镇之讨降叛人黄华高
日新高从周等十六年入朝悉献江南所得珍宝世祖

曰卿何不少留对曰臣素贫贱今幸富贵皆陛下所赐何敢隐俘获之物帝悦曰直臣也兴因奏所部士卒战功颁爵赏有差迁浙东道宣慰使讨处州福建及温台海洋羣盗平之十七年漳州盗数万据高安寨官军讨之久不能下诏以兴为福建征蛮右副都元帅与都元帅鄂勒哲图讨之直抵其壁贼乘高瞰下击之兴命人挟束薪蔽身进至半山弃薪而退如是六日诱其矢石殆尽乃燃薪焚其栅遂平之十八年盗陈吊眼聚众十万连五十余寨扼险自固兴攻破其十五寨吊眼走保千壁岭兴上至山半诱与语接其手掣下擒斩之漳州悉平十九年改浙西道宣慰使降人黄华复叛急攻建宁兴疾趋与福建军合获华将二人追至赤岩华赴火死二十三年累拜江淮浙东行省参知政事平婺州处州温州徽州漳州诸盗二十九年复立福建行省【按百官志至元十五年并江西行省于福建十七年福建自为行省二十二年以福建行省并入江西二十三年又并入江浙而不载复立行省事岂传误欤抑志阙欤】拜右丞瓜哇黥使者孟琪诏兴为平章政事与史弼伊克默色帅师征之明年浮海抵瓜哇伊克默色将水军兴将步军会八节润瓜哇主婿土罕必阁耶降进攻葛郎国降其主哈只葛当又谕降诸小国哈只葛当子昔刺八的昔刺丹不合逃入山谷兴独师千人深入俘获之还至答哈城史弼伊克默色已遣使护土罕必阁耶归国具入贡礼兴深言其失计土罕必阁耶果杀使者以叛合众来攻兴等力战却之遂诛哈只葛当父子以归诏治纵瓜哇者弼与伊克默色皆获罪兴独以不预议得免成宗即位复拜福建行省平章政事大德三年汀州总管府同知阿里挟怨告兴不法召入对尽得其诬状阿里伏诛改江浙行省平章政事十年改河南至大初召见拜左丞相商议河南省事皇庆二年卒追封梁国公谥武宣元统三年加封南阳王子玖珠

△刘国杰

刘国杰字国宝本女真乌库哩氏少从军涟海以材武为队长至元六年选涟海兵取襄阳授益都新军千户从张弘范戍万山堡宋兵窥伺众出取薪大出兵来攻堡国杰等以数百人败之斩首四千级由是有名从略荆南抵归峡转战数千里还破宋兵于襄阳下再攻樊城被伤血战世祖闻其勇召见迁管军总管从巴延南征十一年次郢州宋兵扼汉水不得下巴延谋取黄家湾堡以入汉国杰先登拔之从破沙洋新城十二年败孙虎臣于丁家洲进万户复从阿珠取淮南别军扬子桥扼宋兵道宋以万众夜夺堡击走之擒其都统张林宋将张世杰盛兵出焦山来御师施铁绳联战船碇江中以示必死阿珠率诸军进战万户刘琛由江南绕其

后国杰与董文炳左右夹击之焚其战船世杰军大溃
追奔圖山奋黄鹞船数百艘帝壮之因呼曰刘二巴图以汉军都元帅将卫兵定北方十
六年诸王托克托珠反寇和琳国杰度其众悉至营中
必虚选轻骑袭之获其众万计托克托珠屡战不利又残暴失众心众杀之来降十九年
召为征东行省左丞征日本 【按百官志及日本国
传立征东行省及征日本事并在至元二十年】 会黄华反建宁乃命国杰以征东兵会
江淮参政等讨之破赤岩寨黄华自杀二十二年罢征
东省除金书沿江行枢密院二十三年朝廷以湖广多盗拜本省左丞国杰至羣盗以次
降诸将校请曰此辈久乱急则降降而有衅复反不如
尽坑之国杰曰多杀不可况杀降乎吾有以处之矣乃相要地为三屯在衡曰清化在永
曰乌符在武冈曰白仓迁其众守之每屯五百人以备
贼且垦废田榛棘使贼不得为巢穴降者有故田宅尽还之无者使杂耕屯中后皆为良
民会讨广西诸盗诏国杰趋赴之斩数百人进平怀集
诸寨贼二十六年肇庆清远怀集金林诸贼保险自固国杰凿山而入掩杀殆尽由贺州
移军道州攻拔赤水贼寨二十七年江西盗起龙泉下
令往击之诸将曰此他省盗也国杰曰纵寇生患将难图岂可以彼此言耶乃选轻兵
弃旗鼓去纓饰一日夜趋贼境贼众数千逆战望见军
容不整曰此乡丁也易之国杰以数十骑陷阵众从之贼大贼夺所掠男女日暮忽收兵
去堡中民望见怪之莫知其谁明日又忽至召堡民归
其男女曰吾刘二巴图也民惊以为神因告别盗所在国杰乘雾突入其巢贼众惊乱官
军搏之擒杀甚众二十八年置湖广等处行枢密院 【
按百官志至元十九年诏于岳州立行院二十八年徙岳州行院于鄂州则非于是年始
置也传恐误】 迁副使还军武昌时知上思州黄圣许
恃其险远与交趾为表里寇边二十九年诏国杰讨之贼众劲悍出入岩洞篁竹中如飞
鸟发毒矢中人无愈者国杰身率士奋战贼不能敌走
象山山近交趾皆深林不可入乃度其出入列栅围之徐伐山通道拔其寨圣许走交趾
擒其妻子斩之 【按经世大典至元二十九年圣许
叛元贞元年败走交趾获其妻女大德元年遣其子志宝赴宣慰司复挟宝走交趾六年
使人告降且乞还其妾朝廷羈縻之纪年纪事并异本
传】 国杰三以书责交趾索圣许交趾竟匿不与师还尽取贼败巢地为屯田募度远獐
人耕之为两江蔽障蛮人莫敢犯三十年入朝帝谓朝
臣曰湖广重地惟刘二巴图足以镇此他人不能也命无迁他官初黔中诸蛮既内附复
叛巴洞何世雄犯澧州泊崖洞田万顷楠木洞孟再师
犯辰州朝廷赏讨降之升泊崖为施溶州以万顷知州事三十一年万顷复叛成宗即位

赦万顷等亦不降帝以命国杰国杰驰至辰败贼鲁万丑于桑木溪破其巢焚之进攻施溶部将田荣祖请曰施溶万顷之腹心石农坎三羊峯其左右臂也宜先断其臂国杰从之麾诸军攻石农坎贼不能支弃寨遁遂拔施溶擒万顷斩之复穷捕其赏攀崖缘木进至千余里元贞元年即军中加湖广行省平章政事辰浓地接溪洞宋时尝选民立屯免其徭役使御之在澧者曰隘丁在辰者曰寨兵宋亡皆废国杰悉复其制继又经画茶陵衡郴道桂阳凡广东江西盗所出入之地南北三千里置戍三十有八分屯将士守之由是东尽交广西亘黔中诸蛮不能复寇盗贼遂息大德五年罗鬼女子蛇节反乌撒乌蒙东川芒部诸蛮从之陷贵州诏国杰将诸翼兵合四川云南思播兵讨之贼兵巧利且多健马官军战失利国杰令人持一盾布钉其上俟阵合即弃盾伪遁贼乘之马奋不能止遇遁皆仆国杰鼓之贼大败追战数千里七年擒斩蛇节宋隆济等西南夷悉平诏领其将士入见张宴享之赏赐加厚八年还镇国杰久行边患瘴至是病笃僚属入问疾国杰曰交贼不臣若病幸小愈得灭此酋则死无憾矣问以家事不言遂卒国杰性雄猛视死如归尝语人曰吾为国宣力虽身膏草野不恨何必马革裹尸还葬哉且善推诚得士心故能立功如此追封齐国公谥武宣子托欢尚宪宗孙女

钦定续通志卷四百七十六

●钦定续通志卷四百七十七 列传二百七十七

列传

元 【三十一】

○元三十一

李德辉

张雄飞

张德辉

马亨

程思廉

乌尔古泽

赵炳

李德辉

张雄飞

张德辉

马亨

程思廉

乌尔古泽

赵炳

△李德辉

李德辉字仲实通州潞县人幼嗜读书束于贫无以自资乃辍业年十六监酒丰州

禄食稍足市笔札录书夜诵不休时世祖在潜藩用刘秉忠荐使侍裕宗讲读癸丑宪宗封宗亲割京兆地隶世祖择廷臣能理财赋者俾调军食立从宜府以德辉与博德纳为使时汪德臣【原文作汪世显考世显卒于癸卯岁距宪宗癸丑已十年显系讹误今依汪德臣传改归正】屯重兵于利州扼四川衿喉以观进取每苦乏食德辉乃募兵入粟绵竹散钱币给盐券为直陆挽兴元水漕嘉陵未期年而军储充羨中统元年授燕京宣抚使燕多剧贼造伪钞结死党杀人德辉悉捕诛之令行禁止然事多不白中书由是忤平章王文统意去位三年文统以反诛遂起为山西宣慰使权势之家籍民为奴者咸按而免之复业近千人至元元年授太原路总管五年征为右三部尚书七年命德辉录囚山西河东民有魏氏发得木偶持告其妻挟左道为厌胜谋不利于己移数狱词皆具德辉察其冤疑其爱妾所为鞫之立服遂杖其夫而论妾以死皇子安西王镇关中奏以德辉为辅改安西王相至则视濒涇营牧故地可得数千顷起庐舍疏沟浚假牛种田具与贫民二千家屯田其中岁得粟麦刍藁万计十二年诏以王相抚蜀时重庆犹城守不下朝廷分建行枢密院于东西川合兵万人围之德辉至成都两府争遣使咨受兵食方略德辉戒之曰宋已亡矣重庆以弹丸地不降何归政以公辈利剽掠民不得有其子女惧而不来耳响者中使奉玺书来赦公辈不能正言明告反示以诈使惧而叛去坚其必死之心中使不论诈计竟以不奉明诏复命非玩寇而何况复军政不一行且败矣宋几泸州叛重军围亦溃十四年诏以德辉为西州行院副使复泸州十五年再围重庆拔之绍庆【原作绍兴误今依地理志改正】南平夔施思播诸山壁水寨皆下而东川枢府犹故将也恶相属愿独军围合州德辉乃出合俘系顺庆狱者纵之使归语州将张珏又为书以礼义祸福反复譬解之珏未及报而德辉还王邸既而合州遣李兴张合侦事成都皆获之释不杀复为书纵归使谕其将王立词益剴切立亦计夙与东府有深怨惧诛即使兴等导帅干杨獬怀蜡书闲至成都德辉从兵纔数百人赴之东府害其来皆言立狙诈不信特以计致公延命晷刻耳德辉曰昔合以重庆存故力能同恶今已孤绝穷而来归亦其势然吾非攘人之功者诚惧公等愤其后服快心屠戮吾来为国活此民耳即单舸济江薄城下呼立出降川蜀平复以王相还邸十七年置行中书省以德辉为安西行省左丞是年西南夷罗施鬼国既降复叛诏云南湖广四川合兵三万人讨之将压境德辉适被命在播遣安珪驰驿止三道兵勿进复遣张孝思谕鬼国趣降其酋阿察熟德辉名曰是活合州李公耶其言明信可恃

即身至播州泣具告曰吾属百万人微公来死且不降
今得所归蔑有二矣德辉以其言上闻诏许其降乃改鬼国为顺元路其后有以受鬼国
马千数潜德辉于朝者帝曰是人朕所素知虽一羊不
妄受宁有是耶及卒蛮夷闻讣哭之哀如私亲为位而祭王立衰经率吏民拜哭播州安
抚使何彦清亦率其民立庙祀之

△张雄飞

张雄飞字鹏举琅琊临沂人父琮仕金守盱眙金人疑之罢其兵柄徙居许州寻复
命守河阴留家人于许雄飞幼失母琮妾李氏养之国
兵屠许雄飞方十岁李变服与俱还寓潞州金亡雄飞不知父所在往来泽潞求之十余
年已而入关陕历怀孟潼华终弗得遂入燕居数年尽
通国言及诸部语至元二年廉希宪荐于世祖授同知平阳路转运司事帝问处士罗英
谁可大用者对曰张雄飞公辅器也帝命驿召至问以
方今所急对曰太子天下本愿早定以系人心帝称善他日与江孝卿同召见帝曰今任
职者多非材政事废弛卿辈能任此乎孝卿谢不敏雄
飞对曰古有御史台为天子耳目凡政事得失民闲疾苦皆得言百官奸邪贪秽不职者
即纠劾之如此则纪纲举天下治矣帝曰善乃立御史
台以前丞相塔济尔为御史大夫雄飞为侍御史且戒之曰卿等既为台官职在直言朕
为汝君苟所行未善亦当极谏况百官乎雄飞益自感
励知无不言会议立尚书省雄飞力争于帝前忤旨左迁同知京兆总管府事宗至公主
有家奴逃渭南民闲为赘壻主适过临识之捕其奴与
妻及妻之父母皆械系之尽没其家赀雄飞与主争辨辞色俱厉主不得已惟挟其奴以
去入为兵部尚书平章阿哈玛特在制国用司时与伊
玛都木达有隙至是罗织其罪同僚争相附会雄飞曰所犯在制国用时平章独不预耶
众默然秦长卿刘仲泽亦以忤阿哈玛特皆下吏欲杀
之雄飞持不可阿哈玛特使人啖之曰诚能杀此三人当以参政相处雄飞曰杀无罪以
求大官吾不为也阿哈玛特怒奏出雄飞为澧州安抚
使而三人竟死狱中时澧州初下民怀反侧雄飞至布宣德教民遂安有巨商二人犯匿
税及欧人事僚佐欲宽其罪雄飞绳之益急或曰此细
事何执之坚雄飞曰吾非治匿税殴人者欲改宋弊政惩不畏法者尔细民以乏食羣聚
发富家廩所司欲论以强盗雄飞曰此盗食欲杀死非
强也宽其狱全活者百余人澧西南接溪洞獠人乘闲钞京雄飞遣杨应申等往谕诸獠
悉感服迁荆湖北道宣慰使有告常德富民十余家与
德山寺僧将为乱众议以兵讨之雄飞曰告者必其仇也且新附之民当以静镇之兵不
可遽加除察之果如所言先是荆湖行省阿尔哈雅以

降民三千八百户没入为家奴自置吏治之岁责税赋【按阿尔哈雅传载行省荆湖时禁将士母俘掠其下无敢取民之菜者又云其取民悉定从轻赋语异本传】雄飞请归其民于有司不从雄飞入朝奏其事诏还籍为民十六年拜御史中丞行御史台事阿哈玛特以子呼逊为中书右丞行省江淮恐不为所容奏留雄飞不遣阿哈玛特死拜参知政事阿哈玛特用事日久卖官鬻狱纪纲大坏雄飞乃先自降一阶于是幸幸超躐者皆降呼逊有罪敕中书杂问呼逊历指宰执曰汝曾受我家钱何得问我雄飞曰我曾受否曰公独否雄飞曰如是则我当问汝矣遂伏辜二十一年册上尊号议大赦天下雄飞谏曰古人言无赦之国其刑必平故赦者不平之政也圣明在上岂宜数赦帝嘉纳之遂止降轻刑之诏雄飞刚直廉慎始终不易其节尝召见于便殿谕曰若卿可谓真廉者矣闻卿贫甚今特赐卿银钞将出又诏加赐金及金酒器雄飞受赐封识藏于家后阿哈玛特之党以雄飞罢政矫诏追夺之中书左丞耶律埒克劝雄飞自辨雄飞曰吾不敢轻用而封识以俟者政虞今日耳又可自辨乎二十三年起为燕南河北道宣慰使卒于官子师野宿卫东宫时阿尔哈雅入覲请以为荆南总管雄飞固止之归谓师野曰今日欲有官汝者汝宿卫日久固应得官然我方为执政天下必以我私汝我一日不去此位汝辈勿望有官也其介慎如此

△张德辉

张德辉字辉卿冀宁交城人少力学试掾御史台金亡北渡史天泽开府真定辟为经历官岁乙未从南征筹划调发多出德辉丁未世祖在潜邸召见问曰子孔歿已久今其性安在对曰圣人与天地终始无往不在殿下能行圣人之道性即在是矣又问或云辽以释废金以儒亡有诸对曰辽事臣未周知金秀乃所亲睹宰执中虽用一二儒臣余皆武弁世爵及论军国大事又不使预闻大抵以儒进者三十之一国之存亡自有任其责者儒何咎焉世祖然之因问德辉曰祖宗之法度具在而未尽设施者甚多将如之何德辉指银盘喻曰创业之主如制此器精选白金良匠规而成之畀付后人传之无穷当求谨厚者司掌及永为宝用否则不惟缺坏亦恐有窃而去之者矣世祖良久曰此正吾心所不忘也又访中国人材德辉举魏璠元裕李冶等二十余人又问农家作劳何衣食之不赡德辉对曰农桑天下之本衣食之所从出也男耕女织终岁勤苦择其精者输之官余羸恶者将以仰事俯育而亲民之吏复横敛以尽之则民鲜有不冻馁者矣戊申春释奠致胙于世祖世祖曰孔子庙食之礼何如对曰孔子为万代王者师有国者尊之则严其庙貌修其时祀其崇与

否于圣人无所损益但以此见时君崇儒重道之意何如耳世祖曰今而后此礼勿废世祖又问典兵与宰民者为害孰甚对曰军无纪律纵使残暴害固非轻若宰民者头会箕敛以毒天下使祖宗之民如蹈水火为害尤甚世祖默然曰然则奈何对曰莫若更遣族人之贤如昆布哈者使掌兵权勋旧则如呼图克者使主民政则天下均受赐矣是年得告将还更荐白文举郑显之赵元德李造之高鸣李盘李涛数人升辞又陈先务七事曰敦孝友择人才察下情贵兼听亲君子信赏罚节财用世祖嘉纳壬子与元裕北觐请世祖为儒教大宗师世祖悦而受德辉因启累朝有旨蠲儒户兵赋乞令有司遵行从之仍命提调真定学校世祖即位授河东南北路宣抚使下车系豪强黜赃吏均赋役耆耄不远数千里来见曰六十年不复见此太平官府矣戴之若神明中统二年考绩为十路最帝劳之命疏所急务条四事一曰严保举以取人材二曰给泰禄以养廉能三曰易世官而迁都邑四曰正刑罚而勿屡赦迁东平路宣慰使东平赋伙狱繁遇赃奸穷之不少贷【按王恽行状云时宣慰使巴拉以盗贼充斥获者欲处之死德辉曰吾岂敢曲法从汝妄杀乎巴拉以闻帝曰张耀卿所言准合条例可从之史传不载谨附识】奏免远输豆粟二十万斛和棗粟十万斛保赫鼎议官赋玺丝令民税而后输德辉曰是诬上以毒下也且后期之责孰任之遂罢其事至元三年召参议中书省事五年有言沿边将校冒代军士虚糜廩币者敕按之奏曰在昔将校备尝养阻与士卒同甘苦今年少子弟袭爵或以微劳进用岂知军旅之事乎若痛绳以法则人不自安宜易其部署选武毅才略者任之又时委司宪者体究庶革其弊有旨命德辉议御史台条例德辉奏曰御史执法官今法令未明何据而行此事行之不易陛下宜慎思之有顷复召曰朕虑之熟矣卿当力行之对曰必欲行之乞立宗王府以正皇族外戚得以纠弹女谒母令奏事诸局承应人皆得究治帝良久曰其徐行之【按行状云有旨令赵彝使日本命中书议敕高丽诏以进德辉曰彝本宋人万一所言不实恐妄生轔衅奏止之史传不载谨附识】德辉请老命举任风宪者疏乌库哩贞等二十人以闻寻卒德辉天资刚直博学有经济器毅然不可犯望之知为端人与元裕李冶游封龙山时号为龙山三老云

△马亨

马亨字大用刑州南和人少孤事母孝金季习为吏庚寅太宗始建十路征收课税使河北东西路使王晋辟亨为掾以才干称擢转运司副使庚戌太保刘秉忠荐亨于世祖召见潜邸甚器之既而籍诸路户口以亨副巴崇孟

克抚谕西京太原平阳及陕西五路俾民弗扰癸丑世祖征云南留亨为京兆榷课所长官亨以宽简治之不事掊克凡五年民安而课裕丁巳宪宗遣阿勒达尔等核藩府钱谷亨时犂岁课银五百铤输藩府道出平阳适与之遇亨策曰见之则银必拘留不见则必以罪加我与其银弗达王府宁获罪焉避而过之阿勒达尔果怒遣使逮之世祖询亨曰汝往得毋摭汝罪乎对曰无害愿一行既至拘系之穷治百端竟无所得已未从攻鄂州北还遣亨驰驿往西京罢所僉军并抚谕山西河东陕西汉中既还复遣转饷江上军实中统元年迁陕西四川规昔军储转运使寻进行省命亨兼陕西行省左右司郎中时兴元畜粮五万石欲转饷太安军计佣直万缗众推亨往亨以兵官丁产均其役不阅月而事集四年迁陕西西蜀廉访都转运使亨上便宜六事一曰东宫保傅当用正人以固国本二曰中书大政择任儒臣以立朝纲三曰任相惟贤官不必备今宰相至十七员宜加裁汰四曰左右郎署毗赞大政今用豪贵子弟岂能赞襄五曰六曹之职分理万几今止设左右二部事何由办六曰建元以来便民条画已多有司往往视为文具宜令宪司纠举务在必行至元三年进户部尚书时有贾胡特制国用使阿哈玛特欲贸交钞本私平准之利以增岁课为辞帝以问亨对曰交钞可以权万货者法使然也法者主上之柄今使一贾擅之废法从私将何以令天下事遂寝七年立尚书省仍以亨为尚书领左部亨上言尚书省专领金谷百工之事其铨选宜归中书以示无滥寻为平章阿哈玛特所忌以诬免官会国兵围襄樊廷议河南行省调发军饷诏以阿里为右丞姚枢为左丞亨为僉省任其事水陆供馈未尝有关十年还京师帝方欲柄用之遽婴疾卒子绍廷

△程思廉

程思廉字介甫东胜州人父恒为沿边监榷规运使解州盐使思廉用太保刘秉忠荐给事裕宗潜邸以谨厚闻命为枢密院监印哈坦行省河南署为都事时方规取襄樊使任转饷筑城置仓以受粟转输者与民争鬪不时至思廉馈行者异路粟至多露积一夕大雨思廉安卧不起省中召诘之思廉曰此去敌近中夜骚动众必惊疑或致他变纵有漂湿不过军中一日粮耳闻者赅之至元十二年入为监察御史以劾权臣阿哈玛特系狱寻出为河北河南道监察副使道过彰德闻两河岁饥征租益急欲止之有司谓法当上请思廉曰若然民已不堪命矣即移文罢征后果得请二十年河北复大饥流民渡河求食朝廷遣使者集官属绝河止之思廉曰民急亲食岂得已哉天下一家河北河南皆吾民

也悉纵之且曰虽得罪死不恨章上不之罪也卫辉怀孟大水思廉临视赈贷全活甚众水及城不没者数版即修堤防露宿督役水不为患卫人德之二十六年立云南行御史台【百官志作二十七年事】思廉为御史中丞始至蛮夷酋长来贺词若逊而意甚倨思廉宣布威德使毋自外闻者慑服云南旧有学校而礼教不兴思廉力振起之始有从学问礼者成宗即位除河东山西廉访使平阳诸郡岁输租税于北方民甚苦之思廉为请得输河东近仓旧法决事咸有议札权归曹吏思廉自判牒尾某当某罪吏皆束手思廉累任风宪刚正疾恶言事剴切与人交有终始其于宗族尤尽恩意好荐达人物或者以为好名思廉曰若避好名之讥人不复敢为善矣卒谥敬肃

△乌尔古泽

乌尔古泽字润甫临潢人其先女真乌尔古部因以为氏父仲侗有奇节遭金季世愤无所施用遂纵酒作狂以自晦然教泽特严泽性刚毅读书举大略才干过人世祖将取江南泽以选输钞至淮南饷军丞相阿珠奇之补淮东大都督府掾至元十四年元帅索多下兵闽越辟为元帅府提控案牒时宋广王据福州其将张世杰攻泉州兴化守臣陈瓚举郡应之文天祚置都督府于南剑州守臣张清行都督府事谋复建宁闽中郡县往往复从宋索多时军浙东信州告急谋于众曰我军当何先泽曰彼据闽广而我往浙右非策之善譬之伐木务除其根当先向南遂度兵闽关入战而至南剑杀其守臣张清宋师遂退收福州进攻兴化拔之索多怒其民反复下令屠城泽谏曰世杰不虞我军遽至方急攻泉州旦暮且失守若出兴化遣民使走泉南煽动之彼将贍落而溃是不战而完泉州捷于吾兵之驰救也索多喜开南门纵民去因得脱死者甚众世杰得逃民知兴化已破乃解泉州围去明年索多自广州还击潮州守将马发备御甚固泽曰潮人所以城守不下者以外多壁垒为之援也第翦其外应潮必覆矣乃分兵攻大垒破之余垒尽散遂拔潮马发死焉命知兴化军为路授泽行总管府事民歌舞迎侯于道曰是吾民复生父母也郡新残于兵白骨在野首下令掩埋之又衣食其流离之民有弃子于道者置慈幼曹籍而抚育之郡中恶年少以资求窜民卒伍冀后得计功版授官吏恐激变不敢诘泽悉追毁所授诛其尤无良者贪暴始戢始陈瓚以郡应张世杰民多战死者至是吏援例将籍其产泽语吏曰国家至仁诛止陈瓚从瓚者犹蒙宥民柰何连坐焉为令曰民不幸诖误从陈瓚诛及鬪死无后者其田庐资产并给其族姻有司无所与吏不能逆乃止当江南未定民自相什伍保卫乡里及时平行省议籍为兵泽白

行省曰国兵非少今籍民以示少非所以安反侧也且当籍省众民或有他心议遂格泽又兴学校召长老及诸生议肄经义行乡饮酒礼士知向慕二十一年调永州路判官湖广平章政事纳苏穆尔贪纵淫虐诛求无厌有使至永泽戒吏美供帐丰酒食务顺适其意使者感愧无所发其毒因闲以利害晓之一郡由是获安二十六年丞相僧格建议考校钱谷天下骚动泽叹曰民不堪命矣即自上计行省约苏穆尔怒曰郡国钱粮无不增羨永州何为独不然此直府判倚其才辨慢我亟拘系之二十八年【原传蒙上二十六年作明年今据世祖纪及僧格传改正】僧格败约苏穆尔伏诛泽始得释二十九年授广西两江道宣慰副使两江荒远与百蛮接不知礼法泽作司规三十有二章以渐为教民至今遵守之岁饥发官粟以赈既发乃上其事邕管徼外蛮数为寇泽循行得阨塞处布画远迩募民伉健者四千六百户置雷留那扶十屯列营堡以守陂水垦田筑八塌以节潴泄得稻田岁收谷为军储边民赖之诏擢为海北海南廉访使故例圭田至秋乃入租后遂计月受之泽视事三日民输租五百石泽曰事君者先其事后其食吾莅政日浅而受禄四倍非情所安量食而入余悉委学官给诸生以劝业雷州地近海潮汐啮其东南陂塘黧农病焉而西北广衍平袤宜为陂塘泽行视城阴曰三溪徒走海而不以灌溉此史起所以薄西门豹也乃教民浚故湖筑大堤塌三溪潴之为斗斗七堤塌六以制其羸耗酬为渠二十有四以达其注输渠皆支别为闸设守视者时其启闭计得良田数千顷濒海广舄并为膏土民歌之曰泻卤为田兮大父之教渠之泐泐兮长我秔稻自今有生兮无旱无涝至大元年改福建廉访使泽宿有德于闽人安之以母年踰八十求归养长沙岁余母丧泽以哀毁卒谥正宪妻杜以夫死饮食不入口者十有三日不死及复食子良楨自有传

△赵炳

赵炳字彦明惠州滦阳人父宏国初为征行兵马都元帅炳幼失怙恃鞠于从兄岁饥往平州就食遇盗欲杀之兄解衣就缚炳年十二泣请代盗惊异舍之去甫弱冠以勋旧子侍世祖于潜邸世祖次桓抚闲以炳为抚州长中统元年命判北京宣抚司事北京控制辽东番夷杂处号称难治时杨果为宣抚使闻炳至喜曰吾属无忧矣至元九年授京兆路总管兼府尹皇子安西王开府于秦诏治宫室悉听炳裁制王府吏卒横暴扰民即建自绳以法王命之曰后有犯者勿复启请若自处之自是豪猾敛戢秦民以安先是以解州盐赋给王府经费岁久积逋二十余万缗有司追理仅获三之一民已不堪炳启王曰十年之逋责偿一日其孰能堪与其

哀敛病民孰若施泽于民乎王善其言遽命免征会王
 北伐诏以京兆一年赋充军资炳复请曰所征逋课足佐军用可贷岁赋以苏民力令下
 秦民大悦十四年加安西王相王府冬居京兆夏徙六
 盘山岁以为常王既北伐六盘守者构乱炳自京兆率民捕诛之十五年六盘再乱复讨
 平之王薨被旨入见询及民闲利病炳悉陈之因言王
 薨后运使郭琮郎中郭叔云窃弄威柄恣为不法帝大怒令乘传偕敕使数人往按琮等
 至则琮假嗣王旨收炳及其妻孥囚之平凉北崆峒山
 炳子仁荣诉于上诏近侍驰驿脱炳且械琮赏来琮等留使者先遣人毒炳于狱中帝闻
 之抚髀叹曰失我良臣俄械琮等百余人至帝亲鞫问
 尽得其情既各伏辜命仁荣手刃琮叔云于东城籍其家以畀之仁荣曰不共戴天之人
 所蓄物何忍受之帝称善别赐钞为治丧具诏雪炳冤
 赠中书左丞谥忠愍子六人仁显仁表仁荣仁旭仁举仁轨俱登显仕

钦定续通志卷四百七十七

●钦定续通志卷四百七十八 列传二百七十八

列传

元 【三十二】

○元三十二

杨恭懿

王恂

郭守敬

杨桓

杨果

王构

魏初

焦养直

孟攀鳞

尚野

李之绍

杨恭懿

王恂

郭守敬

杨桓

杨果

王构

魏初

焦养直

孟攀鳞

尚野

李之绍

△杨恭懿

杨恭懿字符甫奉元人力学强记书无不读尤深于易礼春秋后得朱熹四书集注
 叹曰人伦日用之常天道性命之妙皆萃此书矣父没

水浆不入口者五日居丧尽礼宣抚司行省以掌书记辟不就至元七年与许衡俱被召恭懿不至【按世祖纪召高陆儒者恭懿不至事在至元九年与此异】衡拜中书左丞数于丞相安图前誉其贤丞相以闻十年诏遣使召之以疾不起十一年太子下教中书俾如汉惠聘四皓故事丞相遣郎中张元智为书致命乃至京师既入见世祖遣国王和通劳其来又亲询其乡里氏族师承子姓无不周悉十二年侍读学士图克坦公履请设取士科诏与恭懿议之恭懿言宜敕有司举有行检通经史之士使无投牒自焦试以经义论策庶几从事实学则士风还淳民俗趋厚国家得才矣帝善之会北征恭懿遂归田里十六年诏安西王相敦遣赴阙入见诏于太史院改历十七年进奏曰臣等徧考自汉以来历书四十余家精思推算旧仪难用而新者未备故日行盈缩月行迟疾五行周天其详皆未精察今权以新仪木表与旧仪所测相较得今岁冬至暑景及日躔所在与列舍分度之差大都北极之高下昼夜刻长短参以古制创立新法推算成辛巳历虽或未精然比之前改历者附会历元更日立法全踵故习顾亦无愧于必每岁测验修改积三十年庶尽其法可使如三代日官世专其职测验良久无改岁之事矣又合朔议曰日行历四时一周谓之一岁月踰一周复与日合谓之一月言一月之始日月相合故谓合朔自秦废历纪汉太初止用平朔法大小相闲或有二大者故日食多在晦日或二日测验时刻亦鲜中宋何承天测验四十余年进元嘉历始以月行迟速定小余以正朔望使食必在朔名定朔法有三大二小时以异旧法罢之唐傅仁均造戊寅历定朔始得行贞观十九年四月频大人皆异之竟改从平朔李淳风造麟德历虽不用平朔遇四大则避人言以平朔闲之又希合当世为进朔法使无元日之食至一行造大衍历谓天事诚密四大二小何伤诚为确论然亦循常不改臣等更新新历一依前贤定论推算皆改从实今十九年历自八月后四月并大实日月合朔之数也是日方列跪未读奏帝命许衡及恭懿起曰卿二老毋自劳也授集贤学士兼太史院事十八年辞归后屡征诏皆不行三十一年卒

△王恂

王恂字敬甫中山唐县人【名臣事略作中山闻喜人】父良潜心伊洛之学天文律历靡不作究恂颖悟三岁家人示以书帙辄议风丁二字十三学九数辄造其极岁己酉太保刘秉忠北上途经中山见而奇之及南还恂从学于磁之紫金山癸丑荐之世祖召见于六盘山命辅道裕宗为太子伴读中统二年擢太子赞善三年裕宗封燕王守中书令兼判枢密院

事敕两府大臣凡有咨禀必令恂与闻初中书左丞许衡集唐虞以来嘉言善政为书以进世祖令恂讲解且命太子受业焉又诏恂于太子起居饮食慎为调护非所宜接人之勿令侍左右恂言太子天下本付托至重当延名德与之居处况兼领中书枢密之政诏条所当循览庶务亦当屡省又言官吏以罪免者毋使更进军官害人改用之际尤不可非其人民至愚而神变乱之余吾不之疑则反复化为忠厚帝深然之恂早以算术名裕宗尝问焉恂曰算数六艺之一定国家安人民乃大事也每侍左右必发明三纲五常为学之道及历代治忽兴亡之所以然又以辽金之事近妾耳目者区别善恶论著得失上之裕宗问以心之所守恂曰人心如印板板本不差则虽摹千万纸皆不差板既差则摹之于纸无不差者诏择勋戚子弟使学于恂恂卓然以师道自任及从裕宗抚军青海乃以诸生属许衡衡告老去复命恂领国子祭酒国学之制实始于此帝以国朝承用金大明历岁久寢疏欲厘正之知恂精于算术遂以命之恂荐许衡能明历之理诏赴阙命领改历事官属悉听恂辟置恂与衡及杨恭懿郭守敬等徧考历书四十余家昼夜测验创立新法参以古制推算极为精密至元十六年授太史令十七年历成赐名授时历颁行天下寻以居父丧哀毁日饮勺水帝遗内侍慰谕之未几卒延佑二年追封定国公谥文肃子宽宾并从许衡游得星历之传于家学裕宗尝召见语之曰汝父起于书生贫无货蓄今赐汝钞五千贯用尽可复以闻恩恤之厚如此

△郭守敬

郭守敬字若思顺德邢台人祖荣通五经精于算数水利时刘秉忠张文谦张易王恂同学紫金山荣使守敬从秉忠学中统三年文谦荐守敬习水利巧思绝人【按齐履谦作行状云先是顺德城北有石桥通达活泉兵后桥淤失所在守敬甫冠为审视壙形按指其处得之河东元裕文其事于石】世祖召见面陈水利六事其一中都旧漕河东至通州引玉泉水以通舟岁可省雇车钱六万缗通州以南于兰榆河口径直开引由蒙村跳梁务至杨村还河以避浮鸡■〈汭〉盘浅风浪远转之患其二顺德达泉引入城中分为三渠灌城东地其三顺德漕河东至古任城失其故道没民田千三百余顷此水开修成河其田即可耕种自小王村径滹沱合入御河通行舟楫其四磁州东北滏漳二水合流处引水由滏阳鄆鄆洺州永年下经鸡泽合入澧河可灌田三年余顷其五怀孟沁河虽浇灌犹有漏堰余水东与丹河余水相合引东流至武陟县北合入御河可灌田二千余顷其六黄河自孟州西开引少分一渠经由新旧

孟州中闲顺河古岸下至温县南复入大河其闲亦可灌田二千余顷每奏一事世祖叹曰任事者如此人不为素餐矣授提举诸路河渠寻加副河渠使至元元年从张文谦行省西夏先是古渠在中兴者一名广来其长四百里一名汉延长二百五十里他州正渠十皆长二百里支渠大小六十八灌田九万余顷兵乱以来废坏淤浅守敬更立闸堰皆复其旧二年迁都大少监守敬言向自中兴沿河四昼夜至东胜可通漕运及见查泊乌梁海古渠甚多宜加修理又言金时自燕京之西麻峪村分引卢沟一支东流穿西山而出是谓金口其水自金口以东燕京以北灌田若干顷利不可胜计兵兴以来典守者惧有失因以大石塞之今若按视古迹使水得通流上可致西山之利下可广京畿之漕又言当于金口西预开减金口西南还大河令其深广以防涨水突入之患帝善之十二年丞相巴延南征议立水站命守敬行视河北山东可通舟者为图奏之初秉忠以大明历自辽金承用二百余年寢以后天议欲修正未果十三年江左既平帝思用其言遂以守敬与王恂率南北日官分掌测验以文谦与张易领之左丞许衡参预其事守敬首言厯之本在于测验而测验之器莫先仪表今司天浑仪宋皇佑中汴京所造不与此处天度相符比量南北二极约差四度表石年深亦复欹侧守敬乃尽考其失而移置之既又别图高爽地以木为棚重创作简仪高表相用比覆又以为天象附极而动昔人尝展管望之未得其作候极仪极辰既位天体斯正作浑天象象虽形似莫适所用作玲珑仪以表之矩方测天之正圆莫若以圆求圆作抑仪古有经纬结而不动守敬易之作立运仪日有中道月有九行守敬一之作证理仪表高景虚罔象非真作景符月虽有明察景则难作阙凡历法之验在于交会作日月食仪天有赤道输以当之两极低长标以指之作星晷定时仪又作正方案九表悬正仪座正仪为四方行测者所用又作仰规覆矩图异方浑盖图日出入永短图与上诸仪互相参考十六年改局为太史院以恂为太史令守敬为同知太史院事给印章立官府及奏进仪表式守敬当帝前指陈理致至于日晏帝不为倦守敬因奏唐一行开元闲令南宫说天下测景书中见者凡十三处今疆宇比唐尤大宜遣使远方测验日月交会分数时刻不同昼夜长短不同日月星辰去天高下不同即日测验人少可先南北立表敢直测景帝可其奏遂设监候官一十四员分道测验东至高丽西极滇池南踰朱崖北尽铁勒凡二十七所十七年新历告成守敬与诸臣同上奏曰臣等窃闻帝王之事莫重于历自黄帝迎日推策帝尧以闰月定四时成岁舜在璇玑玉衡以齐七政爰及三代历无定法周

秦之闲闰余乘次西汉以后历经七十改创法者十三家迨至圣朝专命臣等改治新历臣等用创造简仪高表凭其测实数所考正者凡七事一曰冬至二曰岁余三曰日躔四曰月离五曰入交六曰二十八宿距度七曰日出入昼夜刻所创法凡五事一曰太阳盈缩二曰月行迟疾三曰黄赤道差四曰黄赤道内外度五曰白道交周其法视古皆密可以施之永久十九年恂卒时历虽颁然其推步之式与夫立成之数尚智未有定稿守敬于是比次编类整齐分秒裁为推步七卷立成二卷历议拟藁三卷转神选择二卷上中下三历注式十二卷二十三年继为太史令遂上表奏进又有时候笺注二卷修改源流一卷其测验书有仪象法式二卷二至晷景考二十卷五星细行考五十卷古今交食考一卷新测二十八舍杂坐诸星八宿去极一卷新测无名诸星一卷月离考一卷并藏诸官二十八年有言滦河自永平挽舟踰岭而行可至开平有言卢沟自麻峪可至寻麻林朝廷遣守敬相视滦河既不可行卢沟舟亦不通守敬因陈水利十有一事其一大都运粮河不用一亩泉旧原别引北山白浮泉水西而南经贫山泊自西水门入城环汇于积水潭复东折而南出南水门合入旧运粮河每十里置一闸至通州凡为闸七距闸里许上重置斗门互为堤阙以过舟上水【河渠志作坝闸一十处共二十座节水以通漕运】帝览奏喜曰当速行之于是复置都水监俾守敬领之帝命丞相以下皆亲操畚闸倡工侍守敬指授而后行事【按王圻续文献通考云首事于二十九年之春告成于三十年之秋凡置闸之处往往于地中得旧时砖木人服其识】先是通州至大都陆运官粮岁数十万石方秋霖雨驴蓄死者不可胜计至是皆罢之三十年帝还自上都过积水潭见舳舻蔽水大悦名曰通老河赐守敬钞万二千五百贯仍以旧职兼提调通惠河漕运事守敬又言于澄清闸稍东引水与北坝河接且立闸丽正门西令舟楫得环城往来志不就而罢三十一年拜昭文馆大学士知太史院事大德二年召至上都议开铁幡竿渠守敬奏山水频年暴下非大为渠堰广五七十步不可执政吝于工费以其言为过缩其广三之一明年大雨山水注下渠不能容漂没人畜庐帐戎犯行殿成宗谓宰臣曰郭太史神人也惜其言不用耳七年诏内外官年及七十并听致仕独守敬不许其请自是翰林太史司天官不致仕着为令延佑三年卒

△杨桓

杨桓字武子兖州人幼惊悟读论语至宰子画寝章慨然有立志由是终身非疾病未尝画寝中统四年补济州教授后召为太史院校书

郎奉敕撰仪表铭历日序文辞典雅迁秘书监丞至元三十一年拜监察御史有得玉玺于穆呼哩曾孙硕迪家者桓辨识其文曰受天之命既寿永昌【崔或传作受命于天既寿永昌】乃顿首言曰此历代传国玺也亡久矣今皇太孙龙飞而玺复出天其彰端应于今日乎即为文述玺始末上之成宗即位桓上时务二十一事一郊祀天地二亲享太庙备四时之祭三先定首相四朝见羣臣访问时政得失五诏羣臣以时侍讲六设太学及府州儒学教养生徒七行诰命以褒善叙劳八异章服以别贵贱九正礼仪以肃宫庭十定官制以省内外冗员十一讲究钱谷以裕国用十二访求晓习音律者以协太常雅乐十三国子监不可隶集贤院宜正其名十四试补六部寺监及府州司县吏十五增内外官吏俸禄十六禁父子骨肉奴婢相告讦者十七定婚姻聘财十八罢行用官钱营什一之利十九复笞杖以别轻重之罪二十郡县吏自中统前仕官者宜加优异二十一为治之道宜各从本俗疏奏帝嘉纳之未几升秘书少监预修大一统志秩满归兖州大德三年以国子司业召未赴卒桓博览羣籍尤精篆籀之学着六书统六书泝源书学正韵行于世

△杨果

杨果字正卿其先蒲阴人徙居许昌以章句授徒为业登金正大元年进士第为偃师令以廉干称金亡杨免辟为河南课税司经历史天泽经略河南复用为参议时兵革之余法度草创果随宜赞画民赖以安世祖中统元年命为北京宣抚使明年拜参知政事至元六年出为怀孟路总管大修学庙俄以老致政卒于家谥文献果性明敏美风姿工文章尤长于乐府征时避乱河南娶羈旅中女后登科历膺仕竟与偕老不易其初心人以是称之有西庵集

△王构

王构字肯堂东平人父公渊遭金末之乱其兄三人挈家南奔公渊独誓死守坟墓伏草莽中诸兄呼之不出号恸而去卒得存其家而三兄不知所终构少颖悟弱冠以词赋中选为东平行台掌书记至元十一年授翰林国史院编修官时遣丞相巴延伐宋先下诏让之命构屡草以进世祖大悦宋亡构与李盘同被旨至杭取三馆图籍大常天章礼器仪仗归于京师十三年迁应奉翰林文字升修撰历吏部礼部郎中虑囚河南多所平反改太常少卿定亲享太庙仪注擢治书侍御史属僧格为俾与平章【墓志作翰林承旨】博果密检核燕南钱穀兼督逋负以十一月晦行期岁终复命明年春还宿庐沟驿度逾期祸且不测谓博果密曰设有罪构当身任不以累公也会僧格诛乃免成宗立由侍

讲为学士纂修实录书成参议中书省事有上书陈利便请搜括田赋者执政欲从之构与平章何荣祖力言其不可得不行以疾归东平久之起为济南路总管诸王从者怙势行州县民莫敢忤视精弭诸朝徙之北境学田为牧地所侵者理而归之官贷民粟岁饥而责偿不已构请输以明年武宗即位以纂修国史召拜翰林学士承旨未几卒【按袁桷撰墓志云赠大司徒鲁国王谥文肃】构历仕三朝练习台阁典故祖宗谥册册文皆所撰定朝廷每有大议必咨访焉喜荐引寒士前后省台翰苑所辟无虑数十人后居清要皆有名于时子士熙南台御史中丞士点淮西廉访司佥事皆以文学世其家

△魏初

魏初字太初弘州顺圣人从祖璠金贞佑三年进士补尚书省令史宣宗求直言璠首论将相非人及不当立德陵事疏奏不报金将武仙军次五垛山【金史武仙传作圣垛寨】不进使璠往谕之闻仙率余众保留山璠直趣仙所仙引一吏与璠辨璠大言曰王人虽微序于诸侯之上将军奈何不加礼欲以小吏置对耶且将军跳山谷而左右无异心者以天子大臣故也苟不知尊天子安知麾下无如将军者仙不能屈璠复激使进兵不应比还金主已迁归德复辽蔡州【按金史武仙传初保留山及败于柳河乃走圣垛寨哀宗走归德遗璠闲道召之与本传叙次互异】金亡璠乃北还世祖居潜邸闻璠名征至和琳访以当世之务璠条陈三十余事卒于和琳赐谥靖肃无子以初为后初好读书尤长于春秋中统元年辟为中书省掾史兼掌书记未几以祖母老辞归隐居教授会诏左丞许衡学士窦默及京师储儒各陈经史所载前代帝王嘉言善政选进读之士有司以初应诏帝雅重璠名询知初为璠后叹槩久之授国史院编修官寻拜监察御史首言法者持天下之具御史台则守法之司也方今法有未定百司无所持循宜参酌考定颁行天下帝宴羣臣于上都有不能酌大卮者免其冠服初上疏曰臣闻君犹天也臣犹地也尊卑之礼不可不肃方今内有太常有史官有起居注以议典礼记言动外有高丽安南使者入贡以观中国之仪昨闻锡宴大臣威仪弗谨非所以尊朝廷正上下也疏入帝欣纳之仍谕侍臣自今毋复为此举时襄樊未下将括民为兵或请自大兴始初言京师天下根本要在殷盛建邦之初詎宜骚动遂免又言旧制常参官诸州刺史上任三日举一人自代况风纪之职与常员异请自今监察御史按察司官在任一岁各举一人自代所举不当有罚不惟砥砺风节亦可为国得人遂举劝农副使刘宜自代出佥陕西四川按察使事历为中丞卒子

必复集贤院侍讲学士

△焦养直

焦养直字无咎东昌堂邑人夙以才器称至元十八年以真定路儒学教授超拜典瑞少监二十八年赐宅一区入侍帷幄陈说古先帝王政治帝听之每忘倦尝语及汉高帝起自侧微诵所旧闻养直从容论辨帝即开纳由是不薄高帝大德元年成宗幸柳林命养直进请资治通鉴因陈规谏之言赐酒及钞万贯三年迁集贤侍讲学士七年诏傅太子于宫中启沃诚至至大元年授集贤太学士谋议大政悉与焉告老归而卒谥文靖子德方兴国路总管府判官

△孟攀鳞

孟攀鳞字驾之云内人曾祖彦甫以明法为西北路招讨司知事有疑狱当死者百余人彦甫执不从后三日得实皆释之攀鳞幼日诵万言能缀文时号奇童金正大七年擢进士第仕至招讨使岁壬辰汴京下北归居平阳陕西帅府辟为详议官遂家长安世祖中统三年授翰林待制同修国史至元初召见条陈数十事大抵劝上以郊天地祀太庙制礼乐建学校行科举择守令以守民储米粟以贍军省无名之赋罢不急之役百司庶府统于六部纪纲制度悉由中书是为长久之计此祖悉嘉纳之一日与论王鹗许衡优劣对曰王鹗文华之士可置翰苑许衡明经传道可为后学矜式帝深然之又尝召问宗庙郊祀仪制悉据经典以对时帝将亲祀命同太常议定礼仪攀鳞夜昼郊祀及宗庙图以进帝皆亲览之俄以病西归帝令就议陕西四川行中书省事四年卒延佑三年赠平原郡公谥文定

△尚野

尚野字文蔚其先保定人徙满城至元十八年征为国史院编修官二十年出为汝州判官廉介有为二十八年迁南阳县尹初至官狱讼充斥野裁决无留滞涉旬遂无事改怀孟河渠副使会遣使问民疾苦野建言水利有成法宜隶有司不宜复置河渠官事闻河渠官遂罢大德六年迁国子助教诸生入宿卫者岁从幸上都丞相哈喇哈斯始命野分学于上都以教诸生上都分学自野始俄升国子博士每谓诸生曰学未有得徒事华藻若持钱买水所取有限能自凿井及泉而汲之不可胜用矣仁宗在东宫野为太子文学多所裨益时从宾客姚燧谕德萧□入见帝为加礼至大元年除司业近臣奏分国学西序为大都路学辛巳可其奏野谓国学郡学混居不合礼制事遂寝四年拜翰林直学士知制诰同修国史诏野赴吏部试用荫补官野多所优假或病其太宽野曰今初设此法冀

将来者习诗书知礼义耳非心责效目前也众乃服延
佑元年升集贤侍讲学士兼国子祭酒未几移疾归四方来学者益众六年卒追封上党
郡公谥文懿野性开敏志趣正大事继母以孝闻文辞
典雅一本于理子师易蕲州路总管府判官师简奎章阁侍书学士

△李之绍

李之绍字伯宗东平平阴人幼从李谦学家贫教授乡里学者咸集至元三十一年
纂修世祖实录荐授翰林国史院编修官直学士姚燧
欲试其才凡翰林应酬之文积十余事并付之之绍援笔立成燧惊喜曰可谓名下无虚
士矣大德二年闻祖母疾辞归复除编修官延佑二年
累迁国子祭酒夙夜孳孳惟以教育人材为事至治二年拜翰林侍讲学士知制诰同修
国史踰年告老而归泰定三年八月卒之绍平日自以
其性优游少断故号果斋以自励

钦定续通志卷四百七十八

●钦定续通志卷四百七十九 列传二百七十九

列传

元 【三十三】

○元三十三

张禧【弘纲】

贾文备

解诚

管如德

周全

孔元

朱国宝

张立

齐秉节

郭昂

蔡公直

杨赛勒布哈

完颜宝珠

张禧

贾文备

解诚

管如德

周全

孔元

朱国宝

张立

齐秉节

郭昂

蔡公直

杨赛音布哈

完颜实珠

△张禧

张禧东安州人父仁义金末徙家益都太宗下山东仁义乃走信安时燕蓟以下独信安犹为金守国兵围信安仁义开门出战围解以功署军马总管守信安踰十年度不能承乃与主将举城内附授管军元帅复攻归德飞矢入口镞出项后卒禧年十六从大将额苏伦南攻徐州归德复从元帅察罕攻寿春安丰庐滁黄泗诸州皆有功禧素峭直为主将所忌诬以他罪欲寘之法时王鄂侍世祖于潜邸禧密往依之鄂荐禧与其子弘纲俱入见岁己未从世祖攻鄂州诸军穴城以入宋树栅为夹城于内进辄不利乃命以厚赏募敢死士禧与弘纲俱应募由城东南入战将至城下帝悯其父子俱入险地遣论禧父子止一人进战禧所执枪中弩矢而折取弘纲枪以入破城东南角身中十八矢一镞贯腹闷绝复苏世祖亟命疗之创愈复从大将鼐喇呼与宋兵战于金口李家洲皆捷世祖即位授新军千户中统三年从征李璫时宋乘璫叛遣夏贵袭取蕲县宿州等城禧移兵攻之贵走尽复诸城至元元年升唐邓等州总管四年改水军总管八年从攻襄樊江水暴溢宋遣范文虎以战舰千余艘来援元帅阿珠命禧率轻舟夜衔枚入其阵中插苇以识水之深浅及还阿珠即命禧率四翼水军进战宋兵溃追至浅水夺战舰七十【阿珠传载此作至元六年事】九年攻樊城焚其串楼败宋将张贵于鹿门山十年行省集诸将问破襄阳策禧言襄樊夹汉江而城敌人横铁锁置木橛于水中今断锁毁橛以绝其援则樊城必下樊城下则襄阳可图矣行省用其计破樊城而襄阳继降丞相巴延命为水军先锋十二年败宋将孙虎臣于丁家洲寻移屯黄池以断宋救兵十三年从下温台福建十四年授江阴路达噜噶齐水军万户十七年进都元帅朝廷议征日本禧请行拜行中书省平章政事与右丞范文虎左丞李庭【日本国传作右丞阿喇罕左丞范文虎】同率舟师泛海东征至平湖岛禧即舍舟筑垒约束战舰各相去五十步止伯以避风涛触击俄飓风大作他战舰悉坏禧所部独完文虎等议还禧曰士卒溺死者半其脱死者皆壮士也曷若乘其无回顾心因粮于敌以进战文虎等不从曰还朝问罪我辈当之公不与也禧乃分船与之时平湖岛屯兵数千乏舟禧曰我安忍弃之遂悉弃舟中所载马以济其还至京师文虎等皆获罪禧独免于弘纲

张弘纲

张弘纲

弘纲字宪臣年十八父禧为主将所诬系狱弘纲直入狱中并受系弘纲佯狂谑笑

守者易之既寢遂与其父逸去后从父攻城徇地屡有
功为招讨使袭镇江阴盗起安吉弘纲率兵往捕未踰旬擒之从参政高兴破建德溪寨
诸贼授河南诸翼征行万户从右丞刘深征八百媳妇
国师次八番与叛蛮宋降济等力战而歿追封齐郡公谥武宣

△贾文备

贾文备字仲武祁州蒲阴人父辅仕金为祁州刺史武仙惮辅胆略密令所亲图之
辅以众归太祖诏隶张柔柔开帅府于满城命辅行元
帅府事于祁州从定山东累功改行军千户文备袭父职张柔命屯三汉口宋兵来攻战
却之中统四年授万户领张柔所部军屯亳州宋兵时
钞掠淮甸文备屡战却之至元八年改河南等路统军围襄樊九年移蔡州兼督水陆漕
运十一年复授万户汉军都元帅领刘整军驻亳州宋
将夏贵知亳无备盛引兵来袭文备出奇邀击大破之从丞相巴延伐宋抵郢州宋筑二
城夹江布战舰数千艘军不得进文备泛舟由沧河径
出大江攻武矶堡从阿珠先渡江大军继之遂取鄂汉命守鄂州十二年从平章政事阿
尔哈雅趣湖南至潭州城下文备冒锋镝炮伤右手流
矢中左臂攻愈急宋臣李芾死之转运判官锺蜚英等以城降 【按阿尔哈雅传至元十
三年春正月芾力屈及转运使锺蜚英都统陈义皆
自杀其将刘孝忠以城降与此互异】 十三年移守潭州十四年衡永郴等郡寇发文备
悉讨平之十五年进湖南道宣慰使徇琼崖等州及广
东濒海诸城累迁荆湖占城行省参知政事二十四年致仕后十七年以疾卒延佑四年
追封武威郡公谥庄武

△解诚

解诚易州定兴人善水战从伐宋设方略夺敌船千计以功授金符水军万户兼都
水监使焦湖之战获战舰三百艘宋以舟师来援诚据
舟厉声呵之援兵不敢动急移舟抵岸乘势追杀之既又从攻安豊寿复泗亳诸州俱有
功又从下云南大理国及从攻鄂州杀溺敌军甚众世
祖嘉其功尝降制奖之至元三十年卒追封易国公谥武定子汝楫初从讨李璿及平宋
累获功后袭公职卒追封易国公谥忠毅子特尔格袭
从征广西下静江府改授水军招讨使寻复为万户从征交趾有功卒赠平阳郡公谥武
宣

△管如德

管如德黄州黄陂县人父景模为宋将以蕲州降授淮西宣抚使如德为江州都统
制亦以城降先是如德尝被俘思其父与同辈七人闲
道南驰为逻者所获械送于郡如德同逻者怠破械脱走闲关万里达父所至是入覲世

祖笑曰是孝于父者必忠子朕矣援以强弓二如德以左手兼握右手悉引满之帝曰得无伤汝臂乎后母复然尝从猎遇大沟马不可越如德即解衣浮渡帝壮之称为巴图帝问朕何以得天下宋何以亡如德对曰陛下以福德胜之襄樊宋咽喉也咽喉被塞不亡何待帝称善帝尝语如德曰朕治天下重惜人命凡有罪者必令面对再四果实也而后罪之非如宋权奸擅权书片纸数字即杀人也汝但一心奉职毋惧忌嫉之口授湖北招讨使总管本部军马丞相阿珠南伐如德以军为前锋攻扬州渡江招安浙西东诸郡初世祖以宝刀赐如德及与敌战刀刃尽缺宋平入覲如德以刀上呈曰陛下向所赐刀从军以来刃缺如是矣帝嘉其朴至元十二年迁浙西宣慰使上使政五条一曰立额薄征二曰息兵怀远三曰立法用人四曰省役血民五曰设官制禄时法制未备仕多冗员又方用兵日本而军民之官廩禄未有定制故如德言及之二十四年迁江西行省参知政事赣汀二州盗起如德讨平之胁从者多所全宥二十六年迁江西行尚书省左丞时锺明亮以循州叛杀掠州县帝命如德统四省兵讨之先遣使谕以祸福贼感如德诚信即拥十余骑诣赣州乞降平章政事鄂罗齐怒其跋扈不臣欲以事杀明亮如德曰皇元仁厚未尝杀降明亮叛人何足惜所重者信不可失耳【按世祖纪载明亮诏缚至阙下如德等留不遣明亮复率众寇赣州枢密院以如德等违诏纵贼请诘之诏罢江西行枢密院本传略而不载】寻卒于军赠平昌郡公谥武襄

△周全

周全汝宁光州人仕宋为广南西路马步军副总管至元十二年巴延下江南全率众来归授管军千户从元帅宋都木达下江西诸城邑明年进兵福建宋制置使黄万石降从征广东至韶州严攻具率勇士先登杀其安抚使熊飞以游骑巡广中过灵星海石门敌势甚张全奋戈杀敌乘胜夺其旗鼓火其船及诸军下广州全功居多十四年从攻广西静江府宋安抚李梦龙率众来降两广平第功授管军总管十五年盗据赣州崖石山寨全率兵讨平之进管军副万户镇守龙兴二十年以疾去官大德九年卒追封汝南郡侯子祖瑞袭

△孔元

孔元字彦亨真定人骁勇有智略岁丁酉弃家从军隶丞相史天泽麾下戊戌从取焦湖围寿春先登拔其西堡己亥从征安丰己酉从围泗洲俱有功戊午从攻樊城亲王塔齐尔命取樊西堡元率死士挺枪大呼击杀数百人中统元年扈驾北征二年宣授管军总把至元十一年

从伐宋为前锋所向克捷十五年进侍卫亲军千户明年国兵讨叛王实勒们等从行院拜奇页勒密实追其众至乌苏洋而还分军之半扼其要害余众遂溃加右卫亲军总管十九年以疾卒子鹰扬袭

△朱国宝

朱国宝其先除州人后徙宝坻父存器历官修内司使宪宗将伐宋募兵习水战国宝以职官子从军隶水军万户解诚麾下从攻鄂州摄千户率锐卒于中流遇宋师凡十七战诸军毕济中统三年从征襄阳督造战舰筑万山堡至元十一年拔沙洋隳新城皆与有功初师次江上国宝愿当前锋夺船二十艘以献巴延壮之宋据上流方舟数百结为堡栅指示曰复能夺取是乎国宝即奋往破其栅既渡江下鄂汉十二年进兵临岳州与宋兵战于桃花滩获其将高世杰进管军总管命统蒙古诸军镇常德府知安抚司事时湖南既降惟辰沅靖镇连未下宋将李信李发结武冈洞蛮分据扼塞国宝击败之其众退保飞山新城思播蛮来援国宝复与战破之擒张星沈举等三百余人进攻新城获信发等献俘江陵十四年会诸道兵攻广西静江拔之进管军万户镇守梧州领安抚司事初宋临安之破也张世杰挟二王由闽蹈海众复滋蔓时南恩新州何华张翼举兵兴复军势甚盛国宝选精锐击破之悉擒其赏降其民三万余户十六年迁海北海南道宣慰使蛮贼连结郁林广州诸洞恣行剽掠复讨平之任龙光等率所部五千户降寻移琼州立官程更弊政训兵息民具有条制南宁谢有奎负固不服国宝开示信义有奎感悟以其属来归于是黎峒民降者三千户蛮洞降者三十所十八年破临高蛮寇五百人招降居亥番毫铜鼓等十九洞遣部将韩旺率兵略大黎密塘横山诛首恶李实火其巢生致大锤小锤诸部长十有八人二十五年进都元帅参知政事行尚书省事以军事至赣州卒于传舍子斌袭

△张立

张立泰安长清人初历严实麾下略江淮有功署为百户岁戊午宪宗征蜀征诸道兵立从行次大获山宋人阻山为城带江为池以自固立统锐卒攻陷外堡夺战船百余艘中统初从世祖北征迁左卫亲军副指挥使至元十四年【原文无至元二字今据世祖纪补】辅粟赴和琳道出应昌会酋帅帕克谋不轨以射士三千踵其后欲乘闲夺其资粮立觉其有异急命环车为栅以备之贼众已合矢如雨下初立之发上都也每车载二板以备不虞至是建板于军矢不能入骑卒稍前即以戈撞之强弩继发贼不得近相持连日乃解去是岁增置前后卫兵进

后卫亲军都指挥使以老致仕子珪袭

△齐秉节

齐秉节字子度滨州蒲台人父珪摄征行千户兼总管镇枣阳中统三年李璫叛征诸道兵进讨枣阳精锐尽行留羸卒千余与宋襄郢对垒敌来觐虚实珪城守周密以东门外壕狭小可越命浚之为备宋将摄都统陈总管果率兵万余抵城东门以板渡壕壕广板不能及珪力战却之城赖以完至元三年告老举秉节自代秉节魁伟沈毅涉猎书史稍知兵法袭父职仍镇枣阳五年从伐宋筑新城白河口堡鹿门山略地郢州大洪山黄仙洞数着战功升上千户十一年从丞相巴延至郢荡舟由陆入江攻武矶堡擒宋将阎都统十二年国兵败宋贾似道舟师于丁家洲命秉节屯建康与宋将赵淮战于西离山追至溧阳从定太平安庆诸郡与宋将张咨议战于昆山杀之十四年授管军总管时黄州复叛令秉节往讨斩余总辖于阵二十三年移镇饶州擒安仁剧贼蔡福一余党悉平升枣阳万户府副万户二十八年卒子英袭

△郭昂

郭昂字彦高彰德林州人习马槊能挽强赵通经史至元初上书言事授山东统军司知事迁沅州安抚司同知招降溪洞八十余栅播州张华聚众容山昂率兵屠之山獠木猫土獠诸洞尽降十六年徇沅州西南界复新化安仁二县擒剧贼张虎纵之曰汝非吾敌愿降即来不然吾复擒汝不难也明日虎降并其众三千余人悉使归民籍军还众敛曰金以献一无所受众从至江陵致金而去昂悉上之行省二十六年江西盗起昂讨之进逼南安明扬上龙岩湖绿村石门鴈湖赤水黑风峒诸蛮立太平寨而还会大饥以贼酋家资分赈之授万分镇抚州未几行省檄赴广东监造战船行至广东界遇贼移檄谕以祸祸昂威信素着贼见其檄即降授广东宣慰使卒

△綦公直

綦公直益都乐安人世业农至元九年为沂莒胶密宁海五州都城池所千户十年督造征日本战船于高丽时宋未下世祖知其勇遣使召见俾领兵同行荆南等处招讨司事抵峡州青州滩霖雨不进还屯玉泉山率兵三千攻安进下寨破之襄阳既下命领邓州光化唐州汉军及郢复熟券军从诸军南伐十二年至隆兴宋军突出城门逆战公直败之追抵城下遂踰壕拔栅焚其楼橹隆兴降南安吉赣皆望风款附公直令第三子蒙古岱攻梅关破淮德山寨入广东至南海皆下之诏授公直管军万户时巴延巴尔达噶图古勒叛于西夏公直率军讨平之十

八年移镇巴赛伯里二十三年【按世祖纪至元二十六年海都犯边帝亲征巴延传二十九年明里特木尔挟海都叛诏巴延讨之本传作

二十三年疑误】诸王海都叛公直从丞相巴延准战于洪水山败之追击渐远授兵不至第五子瑗力战死公直与妻及蒙古岱俱陷焉明年蒙古岱奔还授中卫亲军副都指挥使讨衢州山贼有功

△杨赛音布哈

杨赛音布哈初名汉英字熙载其先太原人唐季南诏陷播州道杨端者以应募起复播州遂使领焉世为播州安抚使至元十三年宋亡汉英父邦宪奉版籍内附授为绍庆珍州南平等处沿边宣慰使卒谥惠敏汉英生五岁而孤二十二年母田氏携至上京见世祖于大安殿帝呼至御榻前熟视其眸子抚其颈者久之谕宰臣曰杨氏母子孤寡万里来庭朕甚悯之遂命袭父职【按世祖纪至元二十三年封杨邦宪妻田氏为永安郡夫人】赐名赛音布哈二十五年再入覲时十二帝见其应对明敏授宣抚使【世祖纪作至元二十九年事】寻升侍卫亲军都指挥使大德五年宋隆济叛诏湖广行省平章刘国杰指挥使额森呼图克偕赛音布哈讨之六年师出播境连与贼遇破之前驻蹉泥贼骑猝至赛音布哈奋击先进大军继之贼溃乘胜逐北遂降阿苴下竿笼望尘送款者相继七年进山暮窝贼众复合又与战于墨特川大破之擒斩隆济等西南夷悉平至大四年播南卢崩蛮内侵率兵讨之卒于军追封播国公谥忠宜子嘉贞嗣

△完颜实珠

完颜实珠祖德珠仕金为管军千户金纳珠归太祖从征西域河西又从太宗攻下凤翔同州有功授同州管民达噜噶齐兼征行千户以年老命实珠袭已未实珠从世祖征哈喇章还都元帅耨埒攻马湖江实珠夺浮桥与宋兵战有功军龙化县与宋兵战大败之中统二年授征行万户从都元帅特尔格攻嘉定有功至元四年败宋兵于九顶山五年攻泸州拔五获寨渡马湖江迎击宋兵败之从行省伊苏岱尔攻建都蛮建都降从攻嘉定复泸州取重庆实珠之功居多二十年拜四川行省参知政事卒

钦定续通志卷四百七十九

●钦定续通志卷四百八十一 列传二百八十一 列传

元【三十四】

○元三十四

王綽

随世昌

罗璧

刘恩

石高山

巩彦晖

蔡珍

张泰亨

贺祉

孟德

张荣实【玉】

舒穆鲁格根

楚鼎

张均

信苴日

王实

喇 赵宏伟

王綽

随世昌

罗璧

刘恩

石高山

巩彦晖

蔡珍

张泰亨

贺祉

孟德

张荣实

舒穆鲁格根

楚鼎

张均

信苴日

王实喇

赵宏伟

△王綽

王綽高丽王瞰之犹子也美容仪慷慨有志略以质子入朝岁癸丑高丽权臣高令公叛宪宗命雅勒呼大王东征綽奉旨为使讲和仍镇守其地时高丽人户新附者就命綽总之中统元年授总管兼领军民至元七年高丽臣林衍叛世祖遣特纳克国王讨之綽签领部民一千三百户同行寻以疾还家居二十年卒子阿拉克特穆尔袭至元八年将兵讨叛贼金通精贼败走耽罗十一年从都元帅呼图克征日本国预有战功十五年加安抚使高丽军民总管升东征右副都元帅十八年复征日本遇风涛没于军弟威袭二十四年纳颜叛力战屡捷复从伊噜勒诺延讨塔布岱托欢大王与巴勒噶齐托欢相拒绝流战黑龙江箭中右臂忍伤复战敌大败二十五年征哈坦多罗千隶平章库哩特穆尔麾下论功居多二十七年哈坦等入寇高丽境遣威镇守修城壁严卒伍军威大振贼遂潜遁九月哈坦多罗千复寇察楚克威引兵击却之二十

九年升总管高丽女真汉军万户府

△随世昌

随世昌莱阳人父宝金末为管军都总领镇行村海口太宗下山东宝遂来归授莱阳令世昌其第四子也善骑射锻浑铁为鎗重四十余斤能左右击刺岁癸丑选充队长宋兵来攻海州世昌战却之己未攻涟水城世昌树云梯攀缘而上身被数鎗众从之克其城擢马军千户中统初涟水复叛归宋世昌军于东马寨击败宋兵至元七年迁淄莱万户府副都镇抚守万山堡九年败宋兵于鹿门山元帅刘整筑新门使世昌总其后樊城出兵来争且拒且筑不级夜而就复令立炮帘于樊城栏马墙外夜大雪城中矢石如雨军校多死伤达旦而炮帘立宋人列舰江上世昌乘风纵火烧其船百余樊城出兵鏖战栏马墙下世昌流血满甲勇气愈倍樊城道破十一年引兵由黄湾堡入汉江破沙洋攻新城世昌坎其城而先登中数矢伤臂兜鍪皆裂昏眩坠地少苏复进遂下新城明日丞相巴延视所坎城高一丈五尺余论功为上十二年从战于丁家洲以功升管军千户十三年围扬州世昌绝其粮道兼搜湖泊宋兵闻铁鎗名不敢近扬州平从平章阿珠入见授管军总管十四年戍扬州击野人原司空山等七寨皆下之进安抚使镇溱浦二十三年改沂郯上副万户世昌前后数百战体皆金疮竟以是疾卒封定海郡侯谥忠勇

△罗璧

罗璧字仲玉镇江人父大义为宋将璧年十三而孤长从朱禔孙入蜀累官利州西路步军副总管禔孙移荆湖璧从之至江陵右丞阿尔哈雅领军江陵璧从禔孙降授管军千户讨歙寇有功领本州岛安抚事至元五年从元帅张弘范定广南擢管军总管镇金山居四年海盗并绝徙镇上海督造海舟十九年用丞相巴延言初通海道漕运抵直沽以达京城立运粮万户三以璧与朱清张瑄为之 【按食货志云立万户府二以朱高为中万户张瑄为千户蒙古台为万户府达噜噶齐与传互异】 乃首部漕舟由海洋抵杨村不数十日入京师进管军万户兼管海道运粮二十四年纳颜叛璧复以漕舟自辽阳浮海抵锦州小凌河至广宁十寨诸军赖以济二十五年督漕至直沽仓潞河决水溢几及仓璧树栅率所部畚土筑堤捍之升同知淮西道宣慰使事请两淮荒闲之田给贫民耕垦三年而后量收其入从之岁得粟十万斛大德三年广东道宣慰使都元帅山海獠夷负固反侧乃诱致诸洞蛮夷酋长假以官位由是咸率众以归除都水监通州故多水患凿二渠以分水势又浚

阜通河而广之 【按阜通河河渠志作坝河浚河事在大德六年】 岁增漕六十余万石奉命括两淮屯田得疾归镇江卒

△刘恩

刘恩字仁甫威州人勇而有谋以材武隶军籍累功为管军总管从入蜀数有战功至元三年宋将以战船五百艘载甲士三万人夹江上游先以一万人据云顶山欲取汉州恩平千人渡江与战杀其将二人士卒三千余人授成都路管军副万户六年从平章赛音谔德齐攻嘉定过九顶山与宋运遇生擒其部将十八人械送京师九年从皇子西平王行省伊苏岱尔征建都恩将游兵为先锋师次其地一日三战皆捷时师久驻食且尽恩画策招谕沿江诸蛮得粮三万石牛羊二万头士气益振建都因山为城山有七巔恩夺其五断其没道尽都穷蹙乃降入朝升管军万户戍眉州十二年移戍嘉定安西王遣使召恩至六盘山问曰江南已平四川未下柰何恩曰若以重臣之不徇私者奉诏督责之则半年可下矣王即遣恩乘传以闻帝以为然命丞相布哈等行枢密院于西川授恩同佥院事十五年重庆降守将张万走夔府以兵固守布哈遣恩招之万以城降旬月间得其大小州邑六十四十六年擢四川西道宣慰使率军万人征鄂端进都元帅师次甘州奉诏留屯田得粟二万余石十八年进兵鄂端恩设伏以待大败之海都又遣巴拜率众三万来侵恩以众寡不敌成师而还二十二年佥行枢密院事卒子德禄袭

△石高山

石高山德兴府八父呼噜古以待卫军从太祖定中原太宗赐以东昌广平四十余户遂从居广平之洺水中统三年高山因平章塔齐尔入见世祖因奏曰在昔太祖所集安扎尔博啰库哩台博啰罕巴图库库布哈五部特默齐军金亡之后散居牧地多有入民籍者国家土字未一宜加招集以备驱策帝太悦即命与诸路同籍其数仍命高山领之四年授管军总镇息州军令严肃居四年边境晏然至元八年从取光州克枣阳进攻襄樊皆有功十年从阿珠略地淮上十一年从下江南十二年丞相巴延命以所部兵取宁国下令无抄掠既至城下喻以祸福守者出降复从至焦山与宋兵转战百余里杀获甚多宋平巴延朝京师帝问有瘦而善战者朕忘其名巴延以高山对且盛称其功帝即召见命自择一大郡以佚老而以所部军俾其子领之高山辞曰臣筋力尚壮犹能为国驱驰岂敢为自安计帝从之命领兵北征屯尹图山十六年命同和塔拉领三卫军戍和琳因屯田以给军储岁不乏用纳颜叛督战有功授蒙古侍卫亲军都指挥使守卫东宫成宗悯其老以其子库库

布哈袭职大德七年卒于家

△巩彦晖

巩彦晖易州人与兄彦荣俱以武勇称初彦荣以百矢长隶千户何伯祥麾下累有战功后请老以彦晖代之诸军伐宋彦晖从破枣阳斩首甚众万户张柔之驻曹武也彦晖与伯祥别将一军破大洪诸寨宋人出荆鄂选兵二万救之彦晖与伯祥进战生擒曹路分等一十六人是夜宋兵来攻彦晖率甲士三十人追击于曹武镇敌溃走擒其主将以归战光州柔军于东北命彦晖率功卒伏西南夜五鼓东北声振天地彦晖植梯先登众继之破其外城遂急攻并其子城城之战滁州彦晖率浮浑脱者十人夜渡池水入栏马墙杀守军三铺焚其东南角排寨木帘大军继之比明拔其城会大军攻黄州诸将壁垒未定有舟来觐柔遣彦晖伏甲二百于赤壁下敌军夜半果水陆并至彦晖俟其过半而击之敌大挠死者无算师还又破张家寨以守将献从攻寿州夺其门生擒三人以出泗州之城诸将自四鼓集城下为堑水所阻黎明无敢渡者两军交射如雨彦晖被重甲径渡敌将来御彦晖刺其胷搏杀之众军渡至晡得其外城寻登其月城彦晖将下顾伯祥失所在乃反求之敌追袭彦晖力战翼伯祥以出事闻兼镇抚事岁己未兵渡江次武昌宋援兵四集有舟数十来挑战彦晖逐之入湖中伏出被围数匝左右莫能近彦晖矢尽短兵接身受重伤度不可免遂投水中敌援之出载诣江州见宋官不屈问以事不对竟死子信袭授管军总把至元四年从元帅阿珠南征九年从攻樊城先登夺其土城焚西南角楼宋将矮张以舟兵来援自高头堡战鬪八十余里抵襄阳城下夺战舰二获其裨将二人十一年从丞相巴延攻沙阳堡率勇士五十人火焚其寨敌军大乱遂破之十二年从战丁定洲江南平以功升管军千户镇太平州

△蔡珍

蔡珍彰德安阳人父兴从宗王昆布哈出征权管军百户兴请老以珍代之珍素骁勇岁戊午从宪宗攻宋合州钓鱼山中统元年从世祖征额呼布格三年从征李璫后从镇襄阳徇安庆攻五河所至有功南方平遂入备宿卫尝扈驾驻黑城珍遣兵士储刍藁筑土室军府赖其用道遇冻者必扶入密室温煦之军粮必为搏节不使顿绝以致饥困至元十七年擢中卫亲军总把时白海初建行营命珍督役率事民不知扰虽草木无纤介损帝临幸问其故近臣以蔡珍号令严肃对帝嘉之二十七年进后卫亲军千户元贞元年告老归子恕袭

△张泰亨

张泰亨堂邑人父山为管军百户泰亨袭职从攻宋钓鱼山及樊城征努尔阿着坦有功中统二年授侍卫亲军总把至元四年从征四川有功七年从攻襄阳矢中右臂十年从攻樊城十二年授管军总管从攻潭州矢中鼻拔矢奋战却敌兵十三万从征广西破静江府军还至潭州金沧发卒子继祖袭移镇鄂州舟过洞庭溺死以兄显祖代之二十四年从征交趾陷没焉

△贺祉

贺祉益都人父进赏平涟水有功授千户守胶州祉初以质子入宿卫至元六年袭父职七年宋兵攻胶州祉固守战退之十年领舟师为先锋攻五河口城军还殿后时宋兵以巨索横截淮水号混江龙祉用大刀断之却其救兵清河城遂降攻泗州获战船五百艘镇新城绝淮安宝应粮道降之得战船及器械上于行院遂命领宝应军民事二十年建宁路黄华反以所领军捕之有功二十四年以征交趾请行湖广行省檄令守辚重屯思明州军还至建康卒

△孟德

孟德济南人国初由邹平县令累官至同知济南路事岁丙申诸王库腾命德为元帅领济南军攻宋徐州光州下之甲辰定宗母六皇后称制大王阿齐台以德为万户攻濠泗蕲黄等州积有战功癸丑宪宗命守睢州乙卯移守海州宋安抚吕文德以兵扰边德败之俘其太尉刘海丁巳从巴延攻襄樊己未与子义从世祖攻鄂州先登中统三年从征李璫璫平德以老告归义袭为万户领兵守沂郯至元六年从山东统军塔齐如五河宋军拒南岸义率兵渡河击之数战有功九年迁宿州万户十一年宋制置夏贵攻正阳义击败之十二年掠地至安庆等处攻扬子桥获功十三年从下福建温台等处十六年累功授招讨使二十二年复为沂郯万户元贞初以老辞职子智袭

△张荣实

张荣实霸州保定人父进金季封北平公守信安城岁壬辰率所部兵民降太宗命为征行万户甲午征河南与金将国用安战徐州死焉荣实始以质子入宿卫充征行水军千户甲辰从大将察罕军至淮上遇宋将吕文德与战败之从攻江陵略襄阳宋以舟师横截汉水兵不得渡荣实战却之又破宋军于太湖己未从世祖南征驻阳罗渡宋兵十万舟二千迎战横截江水帝以荣实习于水命居前列遂取轻舟率麾下鏖战北岸斩宋将吕文信中统元年授水军万户至元五年从丞相阿珠攻襄阳败夏贵擒张顺又攻樊城俘其二将十一年从丞相巴延渡江

以所部军先进诸将继渡鄂汉皆降从阿尔哈雅攻岳州降宋将高世杰征江西隆兴擒宋将密佑抚州降十三年进兵广东破降韶州十五年累功授湖北道宣慰使诸路水军万户是年卒 【按安南传大德五年三月遣使持诏谕曰燔中书省复移牒取万户张荣实等二人与去使偕还据此当成宗朝荣实尚在与本传异】 子玉

张玉

张玉

玉袭父职十六年讨吉安贼有功加都元帅兼水军万户镇黄州二十年广东盗起遏绝古城粮运二十一年玉率兵讨平之二十二年鄱阳湖贼起诏徙水军万户府于南康二十四年从参政乌玛喇征交趾累战有功二十五年师还南安以兵迎战水洞舟不能行玉死焉子辅袭

△舒穆鲁格根

舒穆鲁格根契丹人曾祖高努岁卒未太祖至威宁高努与刘伯林瓜尔佳常格等以城降会置三万户三十六千户以总天下兵遂以高努为千户遥授青州防御使己丑从太宗伐金为征行千户卒子军祖常山总管万户父奇尔袭至元二年从都元帅阿敦镇潼川四年从攻蓬溪砦死焉格根少从征伐以壮勇称八年从金省严忠范以兵围重庆攻朝阳砦先登九年宋将咎万寿率众袭成都格根以蒙古军二千击败之十六年授管军总管戍遂宁十七年进管军副万户亦奚不薛蛮叛从招讨使雅尔哈讨平之行省伊苏岱尔讨都掌乌蒙蚁子诸蛮战于鸭楼关格根最有功二十一年以蒙古军八百从征散猫蛮战于菜园坪渗水溪皆败之诸蛮降二十四年迁夔路万户移戍重庆二十六年卒子安图袭

△楚鼎

楚鼎安丰蒙城人父■〈王弁〉仕金为寿春防御使金亡归宋命守宿州岁己亥以州降宋兵来攻城破■〈王弁〉死之宋人囚鼎于镇江府凡十有四年会赦免至元十二年师渡江鼎从知太平州孟之缙降行省遣鼎谕宁国守将孙世贤下之授鼎管军总管镇宁国建平广德诸盗鼎与权万户博啰台护招抚使李铨男汉英归徽州谕铨下其城十三年汉英叛旌德太平两县民附之鼎与乌尔古维进兵用徽人郑安策兵不血刃而乱定十八年东征日本鼎率千余人从左丞范文虎渡海大风忽至舟坏鼎挟破舟板漂流三昼夜至一山会文虎船因得达高丽之金州合浦海屯驻散兵亦漂泛来集遂领之以归

△张均

张均济南人父山从军伐宋以功为百户俄升总把战死均袭百户从亲王塔尔尔攻鄂州面中流矢中统三年从征李璫有功升千户领兵守淄州至元六年从左丞董文炳攻宋五河口转战濠州遇伏兵均力战败之十年攻涟州夺孙村堡十二年从攻芜湖夺宋战船又从丞相安塔哈战有功二十四年从镇南王征交趾 【按安南传镇南王次内傍关贼兵大集王击破之命万户张均以精锐三千人殿力战出关本传从略】 二十六年从北征累迁前卫亲军副指挥使成宗即位命屯田和琳规画有法诸王永和尔北征给饷赖之未尝乏绝大德元年改和琳等处副元帅升都元帅延佑元年卒子世忠袭

△信苴日

信苴日 【按滇志信苴官名本名实后讹为日】 僰人也姓段氏其先世为大理国王后累为权臣高氏所废岁癸丑世祖奉命南征诛其臣高祥以段兴智主国事乙卯兴智与其季父信苴福入覲诏使归国丙辰献地图请悉平诸部并条奏治民立赋之法宪宗大喜赐兴智名玛哈啰磋命悉主诸蛮白衅等部以信苴福领其军兴智遂委国任其弟信苴日自与信苴福率僰衅军二万为前锋导大将乌兰哈达讨平诸郡之未附者攻降交趾入朝兴智卒于道中统二年诏信苴日领大理善阐威楚统失会川建昌腾越等城自各万户以下皆听节制至元元年乌蛮长舍利畏结威楚统失兰阐及三十七部诸衅各杀守将以叛善阐屯守官不能御遣使告急信苴日率众进讨大败之于威楚宝满伊复遣博啰攻贼于统失城又大破之遂定统失舍利畏又以众十万谋攻大理诏都元帅额森与信苴日讨之师至安宁击走之遂复善阐降威楚定新兴进攻石城肥腻皆下之衅部平十一年以信苴日为大理总管未几舍利畏复叛信苴日遣实默等诡为商旅执赘往见挺矛撞杀之及其赏梟首于市于是置郡县署守令行赋役施政化与中州等十三年 【缅甸传作十四年】 缅甸拥象骑数万掠金齿南甸欲袭大理信苴日与万户呼图克领骑兵千人御之绅众败走十八年与其子阿庆入覲帝嘉其忠勤进云南诸路行中书省参知政事十九年诏同右丞拜达勒率兵征緬行至金齿卒子阿庆袭

△王实喇

王实喇保定人初事世祖以其有勇略赐名实喇巴图从攻钓鱼山及额呼布格累功授武卫亲军千户中统三年从征李璫四年元师阿珠驻兵河南遣实喇将蒙古汉军复立宿州至元六年升海州万户引兵攻盐林山寨多所俘获十年授东川行枢密院同佥十五年征夔府有

功寻从镇万州卒于军子二日宏日宁枢密院拟宁袭职宁让其兄宏于是授宏中卫都指挥使而以宁代宏为千户宁从阿尔台哈噶逊北征追击托克托穆尔之军于阿纳尔图之地师还复从和尔果斯北征有功累升前卫都指挥使司僉事

△赵宏伟

赵宏伟字子英甘陵人后徙颖川至元十三年国兵攻宋宏伟以书谒元帅宋都木达于军中奇之俾以兵略地临江至吉州宋主将管忠节路分邹超悉众出战宏伟败之追北二十余里薄其城示以祸福知州周天骥举城降以功署吉州参佐官宋总管王昌张云诱新附五营军为乱事觉昌就擒宏伟夜袭云斩首以献俘其赏五百人宋都木达欲尽诛之宏伟曰此属诖误非得己也今悉就诛何安反侧众得免死授泰和县尹宋相文天祥署其将罗开礼叶良臣集众谋复吉赣临江宏伟斩良臣俘开礼释其余众十七年迁衡州路总管府治中时羣盗出没其境宏伟兴屯田民既足食盗亦为农郡遂宁谧大德五年金浙西道肃政廉访司事镇江旱蠲民租九万余石吏畏飞语复征于民民无所出行台令宏伟核实卒蠲之大风海溢润常江阴等州庐舍多荡没民乏食宏伟发仓廩以赈有司以未得报为辞宏伟曰民旦暮饥欲死擅发有罪我当坐遂发之全活者十余万十一年江南饥宏伟复请以赃罚钱赈之民赖以生至大二年召为内台都事寻出为浙东廉访副使宏伟至浙东闻郡人许谦得朱熹道学之传延致为师于是人知向慕未发擢江南行台治书侍御史皇庆二年致仕泰定三年卒追封天水郡侯谥贞献子思恭思敬孙璉自有传

钦定续通志卷四百八十

●钦定续通志卷四百八十一 列传二百八十一

列传

元 【三十五】

○元三十五

张立道 张庭珍【庭瑞】张惠 刘好礼 王国昌【通】 姜彧
张础 吕■〈或，土代一〉 王

恠

张立道

张庭珍

张惠

刘好礼

王国昌

姜彧

张础

吕■〈或，土代一〉

王恠

△张立道

张立道字显卿大名人父善登金进士岁壬辰国兵下河南善以策于太弟图类命为笔且齐立道年十七备宿卫至元四年奉使西夏以干敏称皇子和克齐封云南王往镇其地命立道为王府文学立道劝王务农以厚民即署立道大理等处劝农官兼领屯田事寻使安南定岁贡之礼时云南都元帅保赫鼎专制日久有窃据之志忌王来设宴置毒酒中且赂王相府官无泄其事立道闻之趋入见门者拒之立道怒与争王闻其声使召之乃得入为王言之王引其手使探口中肉已腐矣是夕王薨保赫鼎遂据王座使人讽王妃索王印立道潜结义士得十三人约共讨贼刺臂血和金屑饮之推一人走京师告变【按世祖纪云曹禎发其事岂走京师告变者禎即其人欤】事颇露保赫鼎囚立道将杀之大匠提举张忠者燕人也于立道为族兄结壮士夜劫诸狱共亡至土番界遇帝所遣御史大夫博尔欢王傅必图【傅尔欢传作吏部尚书拜特穆尔】与告变人俱来遂与立道俱还按保赫鼎及王府官尝受赂者皆伏诛召立道等入朝问王薨状帝歔歔久之曰汝等为我家事甚劳苦今欲事朕乎事太子乎事安西王乎惟汝意所向立道等奏愿留事陛下于是赐立道金以旌其忠张忠等皆授官有差【以上世祖纪作至元八年事】八年复使安南宣建国号诏立道并黑水跨云南以至其国岁贡之礼遂定十年中书以立道熟于云南奏授大理等处巡行劝农使其地有昆明池介碧鸡金粟间环五百余里夏潦暴至必冒城郭立道求泉源所自出役丁夫二千人治之泄其水得壤地万余顷皆为良田衅燹人虽知蚕桑而未得其法立道始教之饲养收利十倍于旧由是罗罗诸蛮慕之相率来降收其地悉为郡县十五年除忠庆路总管先是云南未知尊孔子祀王逸少为先师立道首建庙学择蜀士之贤者迎为弟子师岁时率诸生行释菜礼人习礼让风俗稍变十七年入朝力请于帝以云南王子额森特穆尔袭王爵帝从之寻命立道为临安广西道宣抚使会禾泥路首领必思反扇动诸蛮发兵讨之拔其城邑鼓行而前徇金齿甸七十城越麻甸抵可蒲皆下之以驯象金凤献诸朝二十二年又籍两江侬士贯岑从毅【经世大典作从义至元

十三年与利瓦伊屏俱降】利瓦伊屏所部户二十五万有奇归有司复创庙学于建水路书清白之训于公廨以警贪墨风化大行二十七年安南世子陈日燇遣陪臣诣京师告袭爵先是其国主陈日烜累召不至仅遣其族父遗爱入贡朝廷因封为安南王遗爱还日烜阴害之遣使问罪不受命遂遣将讨之失利而还帝怒欲再发兵丞相谏勒哲平章博果密言蛮夷小邦不足以劳中国张立道尝再使安南有功今复使往宜无不奉命帝召至谕之立道对曰臣愚恐不足专任乞重臣一人与俱臣为之副帝曰卿朕腹心臣使一人居卿上必败卿谋遂授礼部尚书以行至安南界谓郊劳者曰语尔世子当出郭迎诏日燇率属焚香伏谒道左既抵府拜跪听诏如礼立道传上命数其罪为书晓之日燇曰比三世辱公使公大国之卿小国之师也何以教我立道曰昔镇南王奉词致讨汝非能胜之也由其不用向导率众深入不见一人迟疑而还曾未出险风雨骤至弓矢尽坏众不战而自溃天子亦既知之汝所恃者山海之险瘴疠之恶耳且云南与岭南之人习俗同而掖力等今发而用之继以北方劲旅汝复能抗哉汝战不利不过遁入海中岛夷乘衅必来寇抄汝汝食少不能支必为彼屈汝为其臣孰若为天子臣乎今海上诸夷岁贡于汝者亦畏我大国之尔与也圣天子有德于汝甚厚前年之师殊非上意边将谗汝尔汝曾不悟辄称兵抗拒逐我使人以怒我大国之师今祸且至矣惟世子计之日燇拜且泣曰公言良是天子使公来必能活我北面再拜誓死不敢忘天子德遂迎立道入出奇宝为贿拒不受要日燇入朝日燇曰贪生畏死人之常情诚有诏贷以不死臣将何辞乃先遣其臣阮代之何惟岩等随立道上表谢罪修岁贡之礼如初且言所以愿朝之意廷臣有害其功者以为必先朝而后赦曰燇惧卒不至 【谨按通鉴辑览御批安南负固不臣屡干王命托欢海口之败至于折将损兵亟应声罪以张天讨若以其为穷荒卉服不足以烦动师徒则当早持以镇定付之不问乃日燇并未稍知悔过转遣使征以入朝跋涉徒劳仍然抗命不至岂不自损威重迄元之世南交终于梗化皆由措置乖方不能使之警栗倾诚耳】二十八年迁陕西汉中道肃政廉访使三十年皇曾孙苏克伞封梁王出镇云南大德二年廷议求旧臣可为王辅者复以立道为云南行省参政视事期月卒立道凡三使安南官云南最久土人德之立祠庙善阐 【按原作鄯善误今据安南国传改正】城西所著诗文有效古集平蜀总论安南录云南风土记六诏通说若干卷子元云南行省左右司郎中

△张庭珍

张庭珍字国宝临潢全州人父楫金商州南仓使岁壬辰籍其民数千来降太宗命为北京都转运使因家焉宪宗即位以庭珍为笔且齐高丽不请命徙居江华岛遣庭珍诘问之其王言大军岁入侵掠避而走险非得已也且赂庭珍庭珍却之归以状闻帝为禁戍兵无擅入其地高丽以安世祖即位自将北伐以庭珍熟知西京入漠南路遣立沙井诸驿兼给粮运至元六年安南入贡不时以庭珍为安南国达鲁噶齐【按安南国传以呼鲁洽雅为达鲁噶齐张庭珍副之事在至元五年并与此异】由吐蕃大理诸蛮至其地世子光晒立受诏庭珍责之曰皇帝不欲以汝土地为郡县而听汝称藩遣使谕旨德至厚也王犹与宋为唇齿妄自尊大今百万之师围襄阳拔在旦夕席卷渡江则宋亡矣王将何恃且云南兵不两月可至汝境覆汝宗祀有不难者其审谋之光晒惶恐下拜受诏既而语庭珍曰圣天子怜我而使者来多无礼汝官朝列我王也相与抗礼古有之乎庭珍曰有之王人虽微序于诸侯之上光晒曰汝过益州见云南王拜否庭珍曰云南王天子之子汝蛮夷小邦特假以王号岂得与亲王比况天子命我为安南长位居汝上耶光晒曰既称大国何索吾犀象庭珍曰贡献方物藩臣职也光晒无以对使卫兵露刃环立以恐庭珍庭珍解所佩弓刀坦卧室中曰听汝何为光晒及羣下皆服【按安南国传七年中书省移牒贡光晒受诏不拜符使介不以王人之礼八年光晒复书力辨十年复移牒责之十二年光晒又请罢本国达鲁噶齐其诏并倨本传言光晒下拜受诏及羣下皆服恐不免于溢美】明年遣使随入贡庭珍见帝具以闻帝大悦命付翰林纪之授襄阳行省郎中会宋将吕文焕遣黑杨都统来议维欸将遣之还报庭珍曰彼来或以计觐我未能必其果降此人吕氏腹心不如留之以伐其谋元帅阿珠然之乃留不遣明日文焕举城降累迁开封府尹开封有控鹤军士十余人赁大宅聚居纵横街陌庭珍始至察其必为盗急捕之得宝玩器服子女满室穷索其党俱杀之民以为神河决太康漂溺千里庭珍括商人渔子船柔缚木为筏载糗粮四出救之全活甚众水入善利门庭珍亲督夫运薪上捍之不能止乃颓城为堰水既退即发民增外防百三十里人免水忧俄卒于官庭珍性情慎丞相巴延尝语人曰诸将渡江无不荒贪唯我与国宝始终自守闻者以为知言弟庭瑞

张庭瑞

张庭瑞

庭瑞字天表以宿卫从宪宗伐蜀为先锋中统二年授元帅府参议留戍青居诸军攻开州达州庭瑞将兵城虎啸山扼二州路宋将夏贵

以师数万围之城当炮皆穿筑栅以守栅坏更依大树张牛马皮以拒炮贵知城中人饮于涧外绝其水庭瑞取人畜溲沸煮之泻上中以泄臭人日饮数合唇皆疮裂坚守踰月援兵不敢进庭瑞度宋兵稍懈夜劫贵营宋兵惊溃杀都统栾俊等五人庭瑞亦被伤数处以功授知高唐州徙四川屯回经略副使东西川行枢密院发兵围重庆朝廷知庭瑞练习军事换成都总管舟楫兵仗粮储皆倚以辨蜀平升诸蛮夷部宣慰使碉门羌与妇人老幼入市争价杀人碉门鱼通司系其人羌酋怒断绳桥谋入劫之左丞江惟正问计庭瑞曰羌俗暴悍以鬪杀为勇今如蜂毒一人而即以门墙之寇待之不可宜遣使往谕彼悟当自回矣惟正曰使者无过于君遂从数骑抵羌界羌陈兵以待庭瑞进前让之其酋长弃枪弩罗拜乃论杀人者余尽纵遣之遂与约自今交市者以碉门为界无相出入官贾蜀茶增价鬻于羌人以为患庭瑞定每引纳二缗而付文券与民听其自市羌蜀便之都掌蛮叛善飞鎗联松枝为牌自蔽命庭瑞讨之所射矢出其牌半斲蛮惊即请服授叙州等处蛮夷部宣抚使改潭州路总管时湖广省臣方剥民为功庭瑞知不可夺乃辞归卒于家

△张惠

张惠字廷杰成都新繁人宋尚书右仆射商英之裔孙也年十四国兵入蜀被俘至杭海居数年尽通诸国语丞相茂苏苏荐之入侍世祖藩邸以谨敏称赐名乌尔古鼐尔图世祖即位授燕京宣慰副使为政宽简奏免分数钱罢硝碱局至元元年迁参知政事行省山东赎俘囚三百余家为民其不能归者使为僧建寺居之李璫之乱山东民被掠者众惠至大括军中悉纵之又奏选良吏去冗官以苏民困累迁中书右丞十二年巴延伐宋诏惠主馈饷凡江淮钱谷皆领之十三年宋降巴延命惠等入城按阅府库版籍数太庙及景灵宫礼筑器物册宝郊天仪仗籍江南民为工匠凡三十万户惠选有艺业者十余万户余悉奏还为民巴延以宋主北去俾惠居守惠不待命辄启府库封钥事闻诏诘责征还京师二十年拜平章政事行省扬州二十二年改杭州至无锡卒惠所至有能声及老颇以沉浮取谗 【按世祖纪载阿哈玛特子呼逊等以崔斌论列免官至元十五年张惠请复之此亦浮沉取谗之一节也】 子遵海

△刘好礼

刘好礼字敬之保定完州人宪宗时廉访府辟为参议至元元年以侍仪廉希逸荐召见言举人材数事称旨五年应诏建言凡有司奏请宜启皇太子俾得阅习庶政以为社稷生民之福陕西重地宜封皇子诸王以镇之创筑都城宜给直以市民地选格不宜以中统三年为限后

是者不录帝然其言敕中书省施行七年迁益兰州等五部断事官 【按河西志云好礼为奇尔济苏哈卜塔噶谦州益兰州等处断事官大修官库置传舍以益兰为治所】 益兰距京师九千余里民俗不知陶冶水无舟航好礼请工匠于朝以教其民民便之或言榷盐酒可以佐经费好礼曰朝廷设官要荒务以绥远宁欲夺其利耶言者惭服十年北方诸王叛执好礼军中其大将以好礼善应对释之十六年叛王召好礼至欠欠州曰皇帝疑我至有今日好礼曰不疑果疑王召王至京师肯还之耶明年好礼率众走别部守阨以待兵至遇叛王军迫之西踰雪峩岭好礼自度踰是则无望生还遂以衣服赂其下始获东出铁壁山口间道南走数日从者继至中道粮绝捕猎以为食至珠尔海始与戍兵接得乘传至昌州入见帝赐之食与钞十八年授澧州路总管十九年入为刑部尚书改吏部二十一年出为北京路总管再入为户部尚书二十五年卒子鼐河西陇右道肃政廉访使

△王国昌

王国昌胶州高密人初为胶州千户中统元年入覲世祖察其能迁左武卫亲军千户召问军旅事国昌奏对甚悉帝嘉之至元五年有上书言高丽境内黑山海道至宋境为近帝命国昌往视泛海千余里海涛汹涌从者恐劝还国昌神色自若徐曰奉天子威命未毕事而遽返可乎遂至黑山乃还帝延见慰劳时东夷皆内属惟日本不受正朔帝知隋时曾与中国通遣使谕以威德令国昌率兵护送道经高丽会高丽有叛臣据珍岛因与经略使茂图史枢等攻拔之八年 【日本国传作七年】 复遣使往日本命国昌屯于高丽之义安郡以为援卒于军子通嗣

王通

王通

通初袭千户十二年从诸军伐宋渡江镇鄂州时潭州不下兵薄其城通以千人破其栅宋兵遁去通纵兵追击杀获甚众从攻静江下之十五年上书言南方已定而北陲宋安靖屯田于和林率所部自劾帝慰劳遣之从破敌兵于金山俘获生口及马羊牛驼不可胜计从讨叛王纳延又屯田瓜沙诸州武宗即位迁屯储卫亲军都指挥使镇海口以疾卒

△姜彧

姜彧字文卿莱州莱阳人父椿避乱依济南张荣因家焉彧颖悟好学荣守济南辟为掾升参议官中统二年彧与荣孙宏入朝因言益都李璿反状已露宜先其未发制之不报明年璿果反袭据济南彧弃家从荣招集散亡迎

诸王哈必齐进讨之捕得生口言城中粮尽势蹙彧乃
请见王曰闻王陛辞面受诏曰发兵诛叛毋及无辜今旦夕城且破王宜早谕诸将分守
城门勿令纵兵不然城中无噍类矣王曰汝言城破解
阴阳耶彧曰以人事知之若待城破言之晚矣王悟明日贼众开门出降王下令诸军敢
入城者论以军法璫就擒城中按堵如故彧以功授大
都督府参议改知滨州时行营军士多占民田为牧地纵牛马坏民禾稼彧言于中书遣
官分画疆畔捕其强猾者寘之法乃课民种桑岁余新
桑遍野人名为太守桑及迁东平府判官民遮请留马为之不行至元五年为河北河南
道提刑按察使累迁行台御史中丞以老病归济南寻
擢燕南河北道提刑按察使三十年卒子迪吉

△张础

张础字可用其先渤海人父范为真定劝农官因家焉础业儒岁丙辰平章廉希宪
荐于世祖潜邸时真定为诸王额呼布格分地以础不
附己衔之遣使言于世祖曰张础我分地中人当以归我世祖命使者复曰兄弟至亲宁
有彼此且我方有事于宋如础者实所倚任待天下平
定当遣还也已未从伐宋凡征发军旅文檄悉出其手中统元年立中书省以础权左右
司事寻出为彰德路拘榷官历知献州威州有妇人乘
驴过市者投下官昂吉之奴引鸣镝射妇人坠地取匿昂吉家础将以其事闻昂吉惧乃
出其奴论如法至元十四年擢江南浙西道提刑按察
副使宣慰使实哩贪暴掠良民为奴础劾黜之遂安县民聚众负险为乱命础与同知浙
西道宣慰使刘宣领兵捕之础曰江南新附守吏或失
抚绥宜遣人招谕以全众命宣不可础曰谕之不来加诛未晚从之逆党果自缚请罪础
释之宣乃叹服迁岭南广西道提刑按察使宣慰使伊
埒图强夺民财础按其罪后改授安丰路总管三十一年卒于官封清河郡公谥文敏子
淑卫辉路推官

△吕■〈或，土代一〉

吕■〈或，土代一〉字伯充河内人父佑归附初隶兵籍转徙北郡复至关中家
焉廉希宪宣抚京兆聘许衡教授生徒■〈或，土代
一〉从衡学衡为国子祭酒举■〈或，土代一〉为伴读至元十三年擢陕西道按察
使知事未行会宋降者言襄汉新附民情未安有吕子
开者向为襄阳制置司参谋官今退居鄂其人悉知宋事宜征用之朝廷议遣使而难其
人■〈或，土代一〉闻之慨然请行偕子开入覲陈
安抚襄汉便宜诏以子开为翰林直学士辞不就十四年授■〈或，土代一〉四川行
枢密院都事时宋制置使张珩守重庆安抚使王立守

合州诏枢府分兵取之李德辉行西院事于成都获立侦卒张合等数人将杀之■〈或，土代一〉曰彼不即降者以昔尝抗命惧诛耳今宜释合等俾归谕立未几立果遣合等赉蜡书至成都德辉请与东院同受降后期不至德辉承制授立乃为安抚使知合州开仓赈民禁戢剽掠泸叙崇庆思播夔万等郡闻之相继送款东院耻无功诬德辉越境邀功械立于长安狱将诛之■〈或，土代一〉适以事至京师言于许衡衡白留守贺仁杰遂奏释立仍旧官■〈或，土代一〉亦以平定功升四川行省左右司郎中三十年改华州知州劝农兴学具有成效及代民争留之大德中河东关陇地震月余不止■〈或，土代一〉与集贤学士萧□设问答数千言以究其理且移书庙堂陈救灾弭患之道仁宗即位召拜翰林侍读学士时方议行科举■〈或，土代一〉曰经明行修质而少华非惟士有实行国家亦当得真才以登治平未几致仕遣使给驿还关中卒追封东平郡公谥文穆子三人杲果楨皆显仕

△王恽

王恽字仲谋卫州汲县人父天铎金正大初以律学中首选仕至户部主事恽好学善属文与东鲁王博文渤海王旭齐名中统元年左丞姚枢宣抚东平辟为详议官时省部初建令诸路各上儒吏之能理财者一人恽以选至京师上书论时政擢为中书省详定官【按恽自着中堂事记云初高丽国相有书致寒暄于省府欲命恽为答书恽曰境外之交非人臣所宜止范文正书论元昊遂得罪于裕陵也遂止谨附识】二年转翰林修撰同知制诰寻兼中书省左右司都事治钱谷议典礼考制度咸究所长至元五年建御史台首拜监察御史论事凡百五十余章时都水刘晟交结权势没官粮四十余万石恽暴其奸利又言晟监修太庙毕功特转官锡赏今纔数年梁柱摧朽事涉不敬宜论如法晟竟以忧卒九年出为平阳路总管府判官十四年除翰林侍制拜燕南河北道按察副使十八年裕宗在东宫恽进承华事略其目曰广孝立爱端本进学择术谨习听政达聪抚军崇儒亲贤去邪纳诲几谏从谏推恩尚俭戒逸知贤审官凡二十篇【按裕宗纪抚军下有明分一条戒逸下无知贤一条与此互异】裕宗览之喜甚令诸皇孙传观称其书裨益良多十九年改山东木西道提刑按察副使在官一年以疾还卫二十二年召为左司郎中时右丞卢世荣以聚敛进用屡趣之不赴或问其故恽曰力小任大剥众利己未闻能全者远之尚恐见浼况可近乎二十六年擢福建闽海道提刑按察使奏言福建所辖郡县五十余连山距海实为邀徼重地而民情轻诡由平定以来官吏贪残故山寇往往啸

聚愚民因而蚁附及官兵致讨复蹂践之甚非朝廷一视同仁之意今行省官僚尚缺宜复选清望素著者使镇静之庶几治安可期矣时行省讨剧贼锺明亮无功恠复条陈利害曰福建归附之民户几百万黄华一变十去四五今刻贼猖獗又酷于华况其地有溪山之险东击西走出没难测招之不降攻之不克宜选精兵申明号令专命重臣节制以计讨之使彼势穷力竭庶可取也二十八年召至京师见帝于柳林行宫上万言书极谏时政授翰林学士成宗即位献守成事鉴一十五篇所论悉本诸经旨元贞元年加知制诰同修国史奉敕纂修世祖实录因集圣训六卷上之大德五年乞致仕授其子公孺为卫州推官以便养八年卒追封太原郡公谥定其著述有相鉴五十卷汲郡志十五卷承华事略中堂事记乌台笔补玉堂嘉话并杂着诗文合为一百卷

钦定续通志卷四百八十一

●钦定续通志卷四百八十二 列传二百八十二

列传

元 【三十六】

○元三十六

陈祐【天祥】

刘宣 何荣祖

陈思济 秦

长卿

赵与■〈票上...下〉

姚天福

许国祯【宸】

陈祐

刘宣

何荣祖

陈思济

秦长卿

赵与■〈票上...下〉

姚天福

许国祯

△陈祐

陈祐一名天佑字庆甫赵州宁晋人少好学家贫母张氏尝剪发易书使读之岁癸丑穆王分土于陕洛表佑为河南府总管甫下车礼金季名士李国维杨杲李微薛元咨访治道奏免征西军数百家及椒竹诸税粮料等钱世祖即位分陕洛为河南西路真除祐为总管以清慎称至元二年调官法行改南京路治中适东方大蝗徐邳尤甚责捕至急佑曰捕蝗虑其伤稼也今蝗虽盛而谷已熟不如令早刈之庶力省而有

得三年朝廷授卫辉路总管申明法令创立孔子庙修比于墓且请于朝着于祀典尝上书言树太平之本有三一曰太子国本建立宜早二曰中书政本责成宜专三曰人材治本选举宜审时论称之六年置提刑按察司首以佑为山东东西道提刑按察使【按百官志云国初立提刑按察司四道一曰山东东西道至元六年以提刑按察司兼劝农事与此不合】时中书尚书省二省并立帝厌其烦欲合为一集大臣杂议佑还朝命预议阿哈玛特为尚书平章欲奏升中书右丞相安图为太师因罢中书省惧祐有异议许进祐尚书参知政事以陷之及入议祐极言中书政本祖宗所立不可罢三公古官今徒存其虚位未须设事遂寝阿哈玛特怒其忤已除金中兴等路行尚书省事会朝廷大举伐宋遣祐金军山东民多逃匿闻祐来皆曰陈按察来必无私遂皆出应期而办十二年转南京总管兼开封府尹吏多震慑失措祐因谓曰何必若是前为盗跖今为颜子吾以颜子待之前为颜子今为盗跖吾以盗跖待之由是吏知修饬不敢弄法许蔡间有巨盗祐捕之急逃入宋境宋亡随制置夏贵过汴祐斥下马挝杀之民间帖然十四年迁浙东道宣慰使时江南初附军士俘获温台民数千口祐悉夺还之未几行省榷民商酒税祐请曰兵火之余伤残之民宜从宽恤不报遣祐检覆庆元台州民田及还至新日值玉山乡盗仓猝不及备遂遇害【按虞集撰陈思济神道碑云时盗起新昌玉山宣慰陈祐率师往讨为飞矢所中而殒与本传所载略异】追封河南郡公谥忠定祐能诗文有节斋集子夔芍陂屯田万户初在扬州闻父遇盗死泣请于行省愿复父讎擒其贼魁戮于绍兴市孙思谦自有传弟天祥

陈天祥

陈天祥

天祥字吉甫因兄祐仕河南徙家洛阳少隶军籍善骑射李璫叛据济南结宋为外援河北河南宣慰司承制授天祥千户屯田汉口防遏宋兵事平罢归居偃师南山躬耕读书从游者日众其居近缙氏山因号缙山先生至元十一年为郢复州等处招讨司经历从国兵渡江论军事深为行省参政贾居贞所器十三年兴国军以籍兵器致乱行省命天祥权知本军事甫入境父老来谒谕之曰捍卫乡井诚不可无兵任事者籍之过当故致乱尔今令汝辈权置兵仗自卫何如众称便乃条其事于行省行省许以便宜处置由是流移复业以至邻郡之民来归者相继天祥命以十家为甲十甲有长弛兵禁以从民便人心既安军势稍振用士兵收李必聪山寨不戮一人他寨闻之各自散去境内悉平时州

县官吏市有俸禄天祥从便规措而月给之以正其贪民用弗扰居岁余代者至变更旧政治隐匿兵者甚急未几兴国复变邻郡寿日府及大江南北诸城邑多乘势杀守将以应之声音攻阳罗堡鄂州大震天祥言于居贞曰阳罗堡依山为垒素有严备彼若来攻我之利也且南人浮躁轻进易退官军凭高据险区区乌合之众辄来相敌死伤必多遁逃者十八九我出精兵以击之乘胜取黄州寿曰如摧枯拉朽耳居贞深然之力趣行省进兵次青山明日大败其众如天祥所料初行省闻变尽执鄂州城中南人将杀之以防内虑居贞救之不能得天祥曰是州之人

与彼势本不相接欲杀之者利其财耳力止之至是被执者皆纵去复遣天祥权知寿昌府事为乱者闻官军至皆弃城依险自保天祥遣谕各归田里惟生擒乱首斩于鄂州市由是无复叛者二十一年拜监察御史会右丞卢世荣以聚敛骤升执政御史中丞崔彧言之帝怒欲致之法世荣焰益张左司郎中周载因议事微有可否世杰诬以沮法奏合杖一百然后斩之于是臣僚震慑无敢言者 【按崔彧及卢世荣传彧与周载论列卢世荣事并在二十二年】 二十二年天祥上疏极言世荣奸恶其略曰世荣以商贩所获之费趋附权臣营求入仕擢江西榷茶转运使屡犯赃私动以万计已经追维今竟不悛狂悖愈甚虽居丞辖实专大政恣行苛刻大肆诛求欲以一岁之期将致十年之积考其行事不副所言始言能令钞法如旧钞今愈虚始言能令百物自贱物今愈贵始言课程增添三百万锭不取于民而辨今却迫胁诸路官司增数包认凡若所为动为民扰脱不早有更张须其自败正犹蠹虽除去木病亦深矣疏闻帝使召天祥与世荣俱至上都面质之缚世荣于宫门外明日入对天祥于帝前再举其所言与未及尽言者帝皆称善世荣遂伏诛朝廷录天祥平兴国寿昌功擢吏部郎中二十三年除治书侍御史命理算湖北湖南行省钱谷至别州即上疏劾平章约苏穆尔凶暴不法时僧格窃国柄与为姻党诬天祥以罪欲致之死系狱几四百日二十五年遇赦得释元贞元年授山东东西道廉访使时盗贼羣起山东居多诏求弭盗方略天祥奏曰古者盗贼之起各有所因除岁凶饥馑诱之天时宜且勿论他如军旅不息工役荐兴苛敛繁刑皆足致盗中间保护存养之者赦令是也赦者小人之幸君子之不幸彼强梁之徒执兵杀人有司尽力以擒之朝廷加恩以释之旦脱縲囚暮即行劫既不感恩又不畏法凶残悖逆诚非善化能移惟以严刑可制所拟事条皆切于寺弊于是严督有司捕杀积盗南至汉江二千余里无得脱者平阴县女子刘金莲假妖术以惑众所至官为立神堂势寢大天祥命系之杖于市自此

神怪屏息大德三年迁河北河南廉访使六年擢河南行台御史中丞上章论征西南夷事曰八百媳妇国乃荒裔小邦刘深欺上罔下帅兵伐之经过八番纵横自恣中途变生所在皆叛既不能制乱反为乱众所制食尽计穷仓皇退走丧兵十八九弃地千余里朝廷再发四省军以图收复湖北湖南大起丁夫运粮至二十余万正当农时兴此大役比闻从征败卒言西南远夷皆重山复岭陡涧深篝军行径路仅容一人一骑上如登天下如入井又其瘴毒之气皆能伤人羣蛮知大军至或乘险邀击或清野远遁阻其要害以老我师进不得前旁无所掠将有不战自困者矣且自征伐倭国古城交趾爪哇缅甸以来近三十年未尝见有尺土一民内属之益计其所费钱财死损军数可胜言哉去岁西征及今此举亦复何异乞早正深罪下明诏招谕彼必自相归顺未须远劳王师与区区小丑争一旦之胜负也若谓欲罢不能亦当详审成败筹定而行彼诸蛮皆乌合之徒必无久能同心敌我之理急之则相救援之则相疑以计使之互相讎怨待彼有可乘之隙我有可动之时徐命诸军数道俱进服从者恩之以仁拒敌者威之以武恩威相济功乃易成若舍恩任威蹈深覆辙恐他日之忠有甚于今日也不报遂谢病归七年召拜集贤大学士商议中书省事八月地震河东尤甚诏问弭灾之道天祥上章极言阴阳不和天地不位皆人事失宜所致执政者抑不以闻天祥自被召至京且一岁未尝得见帝言事常郁郁不自释久之移疾去至通州中书追留之不返帝闻赐钞五千贯仍命给传专官护送至家天祥望阙拜谢辞所赐钞而行九年拜中书右丞使者五致诏不赴仁宗即位复遣使召之以老疾辞延佑三年卒于家追封赵国公谥文忠

△刘宣

刘宣字伯宣其先潞人也金未避陕徙太原宣沉毅清介自幼喜读书有经世志宣抚张德辉至河东见而器之荐为中书省掾暇则往祭酒许衡讲明理学初为河北河南道巡行劝农副使至元十二年改行省郎中从丞相巴延统军平江南赞画居多江南平命宣沙汰江淮冗官其所存革悉合公论二十二年历官吏部尚书时将伐交趾宣上言曰连年日本之役百姓愁戚官府扰攘今春停罢江浙军民欢声如雷安南小邦臣事有年岁贡未尝愆期边帅生事兴兵彼因避窜海岛使大举无功将士伤残今又下令再征闻者莫不恐惧自古兴兵必须天时中原平土犹避盛夏交广炎瘴之地毒气害人甚于兵刃今以七月会诸道兵于静江比至安南病死必众缓急遇敌何以应之又交迹无粮水路难通无车马牛畜驮载一夫担米五斗往还自食外官得其半若十万石用四十万人止供

一二月军粮广西湖南调度频数民多离散户令供役亦不能办况湖南密迩溪洞寇盗常多大兵一出乘虚生变虽有留后人马疲弱衰老卒难应变臣窃虑之及再征日本宣复谏曰近议复置征东行省再兴日本之师此役不息安危系焉前者索多建伐占城哈雅言平交趾交趾与我接境蕞尔小邦遣亲王提兵深入未见报功索多为贼所杀自遗羞辱况日本海洋万里疆土阔远非二国比今此出师动众履险纵不遇风可到彼岸倭国地广徒众猥多彼兵四集我师无援万一不利欲发救兵其能飞渡耶帝纳其言二十三年中书传旨议更钞用钱宣言国朝废铁已久一旦行之功费不貲非为远计大抵利民权物其要自不妄用始若欲济邱壑之用非惟铸造不敷抑亦不久自弊矣属僧格谋立尚书省以专国柄钱议遂罢二十五年由集贤学士除行台御史中丞时江浙行省丞相蒙古岱悍戾纵恣常虑台臣发其奸尤忌宣遗其赏造建康伺台中违失台官皆竦惧阴求自解惟宣屹然不动蒙古岱愈衔之罗织宣之子系扬州狱又令建康酒务淘金等官及录事司官以罪免者诬告行台沮坏钱粮以闻于朝朝廷遣官置狱行省鞫问宣及御史六人俱就逮既登舟行省以军船列兵卫驱迫之宣自到于舟中始宣将行时以一緘付从子自诚令勿启宣死视其书云触怒大臣诬构成罪岂能与经断小人交口辩讼屈膝为容于怨家之前身为台臣义不受辱当自引决但不获以身殉国为恨耳呜呼天乎实鉴此心别具遗藁列蒙古岱罪状涂注句抹辞句难辩前治书侍御史霍肃为叙次其文读者悲愤宣既引决行省白于朝以为宣知罪重自杀前后构成其事者即郎中张斯立也延佑四年从子看持上宣行实御史台以闻追封彭城郡公谥忠宪

△何荣祖

何荣祖字继先其先太原人金亡徙家广平何氏世业吏荣祖尤所通习遂以吏累迁中书省掾擢御史台都事始折节读书阿哈玛特方用事置总库于其家以收四方之利号曰和市监察御史范方等斥其非论甚力阿哈玛特知荣祖主其谋奏为左右司都事以隶己欲因事中伤之未几除治书侍御史又出为山东按察使卒莫逞其志历御史中丞复出为山东东西道按察使时宣慰使乐实姚演开胶州海道有制禁戢诸人沮挠粮舶遇暴风多漂覆乐实弗信督诸漕卒偿之擄掠惨毒自杀者相继按察官惧违制莫敢言荣祖曰第言之若朝廷见谴吾自当之即草辞以奏诏免其征召入为尚书省参知政事会僧格专政亟于理算钱谷人受其害荣祖请罢之帝不从屡恳不已乃稍缓之而畿内民

困尤甚荣祖每以为辞至忤旨不少屈未踰月而害民之弊皆上闻帝乃思其言召问所宜荣祖请于岁终立局考校人以为便定为例程僧格败改中书右丞奏行所定至元新格【按续通志元初未有法守有司断理狱讼循用金律颇伤严刻右丞何荣祖乃以公规治民御盗理财等十事辑为一书名曰至元新格丁巳诏颁行之】请改提刑按察司为肃政廉访司而立监治之法又上国家用度不可不足天下百姓不可不安今理财者弗顾民力之困言治者弗图国计之大且当用之人恒多而得用之人恒少要之省部实为根本必择才而用之按察司虽监临一道其职在于除弊安民苟有弗至则台省又当遣官体察庶有裨益帝深然之屡以老疾乞解机务诏免署事惟预议中书省事又加平章政事以水旱请罢不允先是荣祖奉旨定大德律令书成已久至是乃得请于上诏元老大臣聚听之未及颁行适子秘书少监惠没遂归广平卒追封赵国公谥文宪【按虞集谥议云荣祖谥忠肃与史传异】

△陈思济

陈思济字济民柘城人以才器见称于时世祖在潜邸闻其名召备顾问既即位始建省部俾掌敷奏时廉希宪行省陕西思济实与偕多行所赞画中统三年召希宪入中书思济还仍掌敷奏会阿哈玛特入省耻位在希宪左每欲肆意而行希宪不从及希宪去位省臣晨集掾属皆惮阿哈玛特不敢前思济独先以文牒进阿哈玛特辄于希宪位署押思济据掩以手曰此非相君署位也阿哈玛特怒目视之思济神色自若至元五年分命中书省总百揆御史台正百官一时黜陟登庸宪章程序多出其手拜监察御史时阿哈玛特立尚书省权在中书右思济与魏初等劾其不法帝以近臣证之御史各以次对思济独厉声曰御史言官也非为辩讼设拂袖而出出知沁州迁同知绍兴路总管府事谏狱桐庐有囚羸瘠将死纵遣还家候期来决囚拜请曰闻公名久矣若不早决恐终不可保为阅其案而释之俄以二十三年同知浙东道宣慰司事时浙西大水民饥浙东仓廩殷实即转输以赈之全活者众【按虞集神道碑云僧格用事遍理筭钱粮檄思济分理浙东思济曰濒海民贫而犷必激变得寢其行史传不载谨附识】改池州路总管江浙行省平章伊苏岱尔威势赫然摘沌金户三千括民间田亩檄下力上章止之累迁金河南江北行省事大德五年冬卒追封颖川郡侯谥文肃子诚监察御史

△秦长卿

秦长卿洛阳人性倜傥尚风节世祖在京兆潜藩闻其名既即位以布衣征与刘宣同在宿卫以气岸相高是时尚书省立阿哈玛特专政

长卿上书曰臣愚赣能识阿哈玛特其为政擅生杀人人畏惮之因莫敢言然怨毒亦已甚矣观其禁绝异议杜塞忠言其情似秦赵高私蓄踰公家覬觐非望其事似汉董卓春秋人臣无将请及其未发诛之事下中书阿哈玛特为人便佞善伺人主意又其货足以动人中贵人力为掇解事遂寢然由是大恨长卿徐兴和宣德同知铁冶事竟诬以折阅课额数万缙逮长卿下吏籍其家吏狱吏杀之狱吏懦纸塞其口鼻死未几王着聚徒杀阿哈玛特帝后悟亦追罪之斲棺戮尸并诛其子而长卿冤终不白长卿从子山甫为建康府判官闻长卿冤状即日弃官累荐不起以疾卒

△赵与■〈票上...下〉

赵与■〈票上...下〉字晦叔宋宗室子尝登进士第为鄂州教授至元十一年丞相巴延既渡江与■〈票上...下〉率宗人之在鄂者诣军门上书力陈不嗜杀人可以一天下且乞全其族党后巴延朝京师世祖问宋宗室之贤者首以与■〈票上...下〉对十三年召至上京幅巾深衣以见言宋败亡之故悉由误用权奸词旨激切帝为之动容授翰林侍制朝廷立法多所咨访与■〈票上...下〉忠言谏论无所顾惜进直学士转侍讲疏陈江南科敛急督移括大姓宋世邱垄暴露皆大臣擅易明诏所为二十七年京师雾四塞明年虎入南城与■〈票上...下〉又疏言权臣专政之咎退而家居待罪未几僧格败平章博果密奏与■〈票上...下〉贫窶有守世祖曰得非指权臣为虎者耶赐钞万三千贯累迁翰林学士其伯祖师渊尝从朱熹学家庭授其具有端绪【按闻复墓志云师渊纂次通鉴纲目凡例微言奥语耳受身履故与■〈票上...下〉所行尤近】于是与许衡论伊洛阃奥衡雅敬之大德七年卒家贫无以为葬成宗命有司赙钞五千贯给舟车还葬赠天水郡侯谥文简

△姚天福

姚天福字君祥绛州人幼读春秋通大义及长以材辟怀仁丞至元五年诏立御史台拜监察御史每廷折权臣帝嘉其直锡名巴尔斯谓不畏强悍犹虎也【按陶宗仪辍耕录云条奏宰相阿哈玛特罪二十有四召廷辩天福枚数之至于三气沮色丧上曰此三首罪已不在宥因目天福曰巴尔斯】乃厚赐以旌其忠时御史台置二大夫纲纪无统天福言于世祖曰古称一蛇九尾首动尾随一蛇二首不能寸进今台纲不张有一蛇二首之患陛下不急拯之久则紊不可理帝诏伊苏特穆尔及博啰谕之博啰以年少引退天福时按行畿内有出使者凌民取

贿天福乃易服间行得其状奏戮之以徇豪右慑服十二年诏罢各道按察司天福自御史大夫曰是司之设所以广视听虞非常虑至深远不但绳有司已也大夫骇然曰微公言几失之夜入帝卧内奏其言帝大悟诏复立之权臣不悦左迁天福衡州路同知 【按富珠哩神道碑云会驾北幸阿哈玛特驰骑士缚天福阅其家脱粟数斛外得言事故藁罗纤苛毒天福抗声曰乘輿行狩戕害言臣宰相宁欲反耶据摭无所得斥迁衡州本传未经详载附识于此】 起为河东道提刑按察副使时北鄙兵兴转输烦急河东民苦徭役天福以反侧为忧劾执政失计奏罢其役十六年江南既平授淮西道按察使二十年迁山北道按察使其民鲜知稼穡天福教以树艺皆致蕃富三十一年历授陕西汉中道肃政廉访使寻除真定路总管真定驿传之需多为民害天福更议措置之方省臣以其事闻诏从之颁其制为天下式大德四年拜参知政事大都路总管兼大兴府尹六年以疾卒初天福拜御史时其母戒之曰古称公尔忘私委质为臣当罄所衷以塞其职勿以我为恤天福亦请于宪府曰监察责当言路有犯无隐苟获谴乞不为亲累或以闻帝叹曰巴尔斯母子义烈之言当于古人中求之子祖舜秘书监著作郎侃内藏库副使

△许国祯

许国祯字进之绛州曲沃人世业医国祯博通经史尤精医术世祖在潜邸征至瀚海留掌医药庄圣太后有疾国祯治之刻期而愈拜牲王妃病目治者用针误损其明世祖怒欲坐以死国祯从容谏曰罪固当死然原其情乃恐怖失次所致即诛之后谁敢复进者世祖意解且奖之曰国祯之直可作谏官世祖过饮马湏得足疾国祯进药味苦却不服国祯曰古人有言良药苦口利于病忠言逆耳利于行已而足疾再作世祖曰不听汝言果困斯疾对曰良药苦口既知之矣忠言逆耳愿留意焉世祖大悦岁癸丑从征云南机密皆得参与己未围鄂州获宋人数百族诸将欲尽坑之国祯力请止诛其凶暴余皆获免及师还招降民数十万口疲饿颠仆者盈道国祯请发蔡州军储粮赈之全活甚众世祖即位提点太医院事至元十二年迁礼部尚书国祯尝上疏言慎财赋禁服色明法律严武备设谏官均卫兵建学校立朝仪事多施行凡所荐引皆知名士士亦归重之帝与近臣言及勋旧大臣因谓国祯曰朕昔出征同履艰难者惟卿数人在尔遂拜集贤大学士卒谥忠宪后追封蓟国公子宸

许宸

许宸

宸字君黼一名和尔果斯从父国祯事世祖于潜邸世祖喜庆赐今名俾从许衡学入备宿卫每外国使至必命与之语辞理明辨莫不倾服改尚医太监有窃大安阁礼神之币者将诛之羣臣莫敢言和尔果斯独谏曰敬神善事也因置人于死地臣恐神不亨所祭帝即命释之与丞相安图善国政多所赞益僧格忌之数譖于帝不听僧格败系于左掖门帝命和尔果斯往唾其面辞不可帝称其仁厚成宗朝出为陕西行中书省右丞时关中饥发仓粟赈之同列以未得请于朝不可和尔果斯曰民为邦本今饥馑如此苦俟命下无及矣擅发之罪当独任之不以累公等遂大发粟不数日命亦下明年旱祷于终南山而雨岁以大熟民怕画像祀之寻召还以足疾不能行特敕乘小輿入禁中访以旧事特授大司徒食其禄终身追封赵国公谥僖简

钦定续通志卷四百八十二

●钦定续通志卷四百八十三 列传二百八十三

列传

元 【三十七】

○元三十七

贺仁杰

贾实喇

刘哈喇巴图尔

舒穆尔明里

谢仲温

高觶

张九思

王伯胜

贺仁杰

贾实喇

刘哈喇巴图尔

舒穆噜明里

谢仲温

高觶

张九思

王伯胜

△贺仁杰

贺仁杰字宽甫京兆鄂人父贲有才略善攻战关中兵后积尸满野贲买地金天门外为大冢收瘞之尝治室于毁垣中得白金七千五百两时世祖以太弟受诏征云南驻六盘山持往献之世祖曰天以赐汝焉用献对曰殿下新封秦金出秦地此天以授殿下臣不敢私愿以助军且言其子仁杰可用状即召入宿卫世祖即位授贲总管京兆诸军鄂啰卒追封雍国公

谥贞宪仁杰从世祖南征云南北征纳颜皆着劳绩与董文忠居中事上同志协力多所裨益帝深重之至元十三年宋平川蜀久不下四川制置使张瑄守重庆合州安抚使王立守钓鱼山相拒二十余年诏建东西行枢密院分兵进攻哈坦奇尔济苏领东院攻钓鱼山布哈李德辉领西院攻重庆德辉至钓鱼山受王立降东院诬奏德辉越境邀功并下立长安狱仁杰为言于帝帝召枢臣责之曰汝等以人命为戏耶今召王立立生则已死则汝等亦从之立至仍以为合州安抚使帝一日召仁杰至榻前出白金谓之曰此汝父六盘所献者闻汝母来可持以归养辞不许乃归白母尽散之宗族帝欲选民间童女充后宫及有司买物多非其土产山后盐禁久为民害仁杰皆奏罢之十七年上都留守阙宰相拟廷臣以十数皆不纳帝顾仁杰曰无以易卿者特授上都留守兼本路总管开平府尹明年进中书右丞僧格用事奏上都钱谷多失实召留守呼鲁古尔及仁杰廷辩仁杰曰臣汉人不能禁吏戢奸致钱谷耗伤臣之罪呼鲁古尔曰臣为长印在臣手事未有不关白而能行者臣之罪帝曰以爵让人者有之未有争咎归己者置勿问仁杰在官五十余年为留守者居半车驾春秋行幸出人供亿未尝致责谴其妻刘没帝欲为娶贵族固辞乃娶民间女已而丧明相敬如初大德九年请老以子胜袭仁宗入清内难念世祖旧臣欲有所咨访召赴阙行至樊桥而卒追封雍国公谥忠贞延佑六年追封奉元王子胜自有传

△贾实喇

贾实喇燕之大兴人岁甲申从睿宗于和琳典司御膳以其须黄赐名实喇其亲幸之世祖即位立尚食尚药二局命提点司事兼领进维御膳生料年老谢事卒追封闻喜郡侯谥敬懿子酬尼赉从征云南跃马入水斫战船破其军帝奇其勇敢己未从伐宋还自鄂州卒追封临汾郡公谥显毅子和尔齐智勇绝人额呼布格之叛出其家名马以助军从幸和林中道值大风昼晦敌猝至击走之尝入侍帝问治天下何为本曰重农为本何为先曰用贤为先帝深善之超拜宣徽使辞改佥院事仍领尚膳使卒子图沁布哈袭世职为尚药尚食局提点世祖以故家子独奇之谓他日可大用使在左右从征纳颜军次杭爱敌猝至帝念急击之擒其首将以归移军辉罕敌兵千人鼓噪以进图沁布哈奋击身被十余创犹力战复大破之杭爱叛者请降众议诛之图沁布哈独曰杭爱本吾人或诱之以叛岂其本心哉且兵法杀降不祥宜赦之帝然其言升同佥宣徽院事每论政帝前言直而气不慑令察宿卫士有才器者以闻论荐数十人用之皆称职成宗即位诸侯王会于上京凡刍饩宴享

之节赐子多寡疏戚之分无不曲当帝喜曰宣徽得图沁布哈足矣进同知宣徽院事大德九年朔方克噜伦部大雪奏买驼马补其死损出衣币于内府身往给之全活数万人至大二年诏出金帛大赉北边以图沁布哈明习事宜使即军中与主师定议分给之诸部大悦拜宣徽使为同官贾廷瑞所嫉廷瑞请以宣徽院为门下省尚书省奏廷瑞擅易官制帝大怒欲杀之图沁布哈力谏不可帝曰贾廷瑞毁卿不直一钱卿何力言邪对曰廷瑞所坐不当死不敢以臣私隙误陛下失利遂得免延佑四年朔方复被风雪为灾图沁布哈请赈之如大德时时特克实王廷显皆同官也仁宗赐特克实海舶图沁布哈曰此军国之所资上不宜赐下不宜受又赐廷显玉带廷显欲取大官羊钱万缗充其价执不可于是怨之者众英宗即位特克实竟潜杀之后特克实以大逆伏诛事乃白追封冀国公谥忠隐后进封冀安王加封其曾祖实喇祖酬尼赉为绛国公父和尔齐为临汾王

△刘哈喇巴图尔

刘哈喇巴图尔河东人家世业医至元八年世祖驻蹕白海以近臣言得召见遂留侍左右初赐名哈喇鄂拓克齐十七年擢太医院管勾锡里济叛宗王布色特穆尔奉命往征帝喻哈喇巴图尔曰当行者多避事汝善医复习骑射能从行乎对曰事君不辞难臣不行将何为即请授甲帝曰汝安用甲对曰臣愿备一战士帝曰医汝事也甲不可得惟赐以环刀弓矢裘马等物将行闻母疾请归省帝命给驿归既见母不敢以远役告母微知之谓曰汝第行我疾安矣遂辞去驰至王所及将战从王请甲王曰帝不与我何敢与因留之使领輜重哈喇巴图尔不肯曰大丈夫当効命行陈乃守营帐如妇人耶见有甲者饮以酒高价取之明日被以往王望见其介而驰使人问之免胄曰我也因慨然曰一人兴善万人可激我为万人激耳中道三遇贼贼射之皆不中王喜甚解衣衣之曰此所以识也既获锡里济命哈喇巴图尔献俘行宫帝见其瘠甚辍御膳羊馐以赐既拜受先割其美者怀之帝问故对曰臣始与母诀今归母幸存请以君赐遣之帝嘉其志以功授和林等处宣慰副使二十四年升宣慰使二十五年海都犯边尚书省以和林屯粮当得知缓急轻重者掌其出纳奏用奇卜帝曰钱谷非奇卜所知哈喇鄂拓克齐可使也遂偕奇卜往二十六年海都兵至皇子北安王使来报与奇卜南行六日止巴尔布拉克地距海都军五六十里奇卜大惧曰事急矣不如顺之哈喇巴图尔见其有二心潜遁去奇卜遣骑追拒却之道遇送军装者护之至盐海及入见帝喜曰人言汝陷贼乃能来耶更其名曰察罕鄂

拓古齐二十七年迁河东山西道宣慰使居二年召还帝谕之曰自此而北纳颜故地曰阿巴拉呼者产鱼吾今立城而以额斯琿哈努森奇尔济苏三部人居之名其城曰肇州汝往为宣慰使仍别赐汝名曰小龙儿或曰哈喇巴图尔汝可自择之对曰龙非臣下所敢承帝曰然则哈喇巴图尔可也既至定市瑞安民居一日得鱼九尾皆千斤遣使来献俄召还三十一年授咸平宣慰使元贞元年拜御史中丞行至懿州卒

△舒穆噜明里

舒穆噜明里契丹人世典内膳国制内膳为近臣非笃敬素著者不得掌明里祖赫噜事太祖睿宗尝求之于帝帝听往敕之曰皇子方总兵辟地朕辍尔以事之能以事朕之恭事之将用黄金覆汝身矣后从太宗西征在道绝汲赫噜晨起聚草上霜煮羹以进睿宗问曰何从得水因告之故师还赐金帛甚厚中统初明里入见世祖令侍臣送明里于裕宗且曰此亲臣之子也今以事汝令典膳事裕宗尝入侍从者十人四人列于明里上帝曰第五人非明里耶对曰然帝曰上之明里越一人立帝又曰更上之明里又越一日立帝曰止比出侍臣以明里后来反居上相与耳语帝闻之曰明里之祖赫噜事太祖睿宗以及朕兄弟尔时汝辈安在顾谓后来耶授典膳令食尚书禄以老

△谢仲温

谢仲温字君玉豊州豊县人公睦欢以赏雄乡曲间大兵南下转客乌拉城太祖攻西夏过其城睦欢与其帅迎降从攻西方力战先登贯三矢仆城下太宗命军校拔其矢剝牛裸而维诸腹中良久乃苏誓以死报每遇敌必身先之官至太原路金银铁冶达噜噶齐仲温略涉书史初见世祖于野狐岭命备宿卫己未大军围鄂令督诸将时守江军士乏食仲温教之罾鱼以充膳帝喜谓侍臣曰朕思不及此饮以驼乳他日不忘汝也一夕帝闻敌军晔命警备仲温奉绳床帝凭其肩以行至旦不能寐中统元年擢平阳太原两路宣抚使至元九年迁顺德路总管时方用兵江淮有寡妇鬻子以偿转输之直仲温出俸金赎还之二十二年改淮东宣慰使岁旱仲温导白水塘溉民田公私赖焉三十年入见帝曰汝非谢仲温乎从容语及攻鄂时事帝喜其谕曰汝将复官乎对曰臣老矣无能为也有孙巴鄂特幸陛下怜之即命备宿卫大德六年卒

△高觭

高觭字彦解渤海人父守忠国初为千户岁甲戌从亲一昆布哈攻黄州歿于兵觭事世祖备宿卫至元初立燕王为皇太子诏选才儁士充官属以觭掌艺文兼领中酝宫卫监门事又监作皇太子宫规制有法帝嘉之十八年

授工部侍郎行同知王府都总管府事十九年皇太子从帝北幸时丞相阿哈玛特留守大都专权贪恣益都千户王着与高和尚等因构变谋杀之三月十七日觴宿卫宫中西蕃僧二人至中书省言今夕皇太子与国师来建佛事省中疑之俾尝出入东宫者杂视觴等皆不识也乃作西蕃语询二僧曰皇太子及国师今至何处二僧失色又以汉语诘之仓皇莫能对遂执二僧屡吏讯之不伏觴恐有变乃与尚书张九思集卫士持弓矢为备顷之枢密副使张易亦领兵驻宫外觴问果何为易曰夜后当自见觴固问乃附耳语曰皇太子来诛阿哈玛特也夜二鼓忽闻人马声遥见烛笼仪仗将至宫门其一人前呼启关觴谓九思曰他时殿下还宫必以鄂勒哲赛音二人先请得见二人然后启觴呼二人不应即语之曰皇太子平日未尝行此门今何来此也贼计穷趋南门亟走南门伺之但闻传呼省官姓名烛影下见阿哈玛特及左丞郝禎已被杀觴乃与九思大呼曰此贼也叱卫士急捕之着就擒黎明觴等驰驿往上都以其事闻帝以中外未安当益严武备遂遣亟还高和尚等寻伏诛久之迁河南等路宣慰使卒

△张九思

张九思字子有燕之宛平人父滋蓟州节度使至元二年九思入备宿卫裕宗居东宫一见奇之以父荫当补外特留不遣江南平以宋库藏金帛分授东宫置都总管府主之九思以工部尚书兼府事十九年世祖巡幸上都皇太子从丞相阿哈玛特留守妖僧高和尚千户王着等谋杀之夜聚数百人为仪卫称太子入建德门直趋东宫传令启关甚遽九思适直宿宫中命主者不得擅启关贼知不可给循垣趋南门外击杀丞相阿哈玛特左丞郝禎时变起仓卒众莫知所为九思叱宿卫士并力击贼尽获之贼之入也矫太子命征兵枢密副使张易易不加审遽以兵与之易既坐诛刑官复论以知情将传首四方九思启太子曰张易应变不审而授贼以兵死复何辞若坐以与谋则过矣请免传首皇太子言于帝乃止九思讨贼时右卫指挥使颜进在行中流矢卒怨家诬为贼党将籍其孥九思力辩之得不坐是年立詹事院以九思为丞遂举名儒士上党宋卫保定刘因曹南瓜尔佳之奇东平李谦分任东宫官属二十二年皇太子薨朝议欲罢詹事院九思抗言曰皇孙宗社人心所属詹事所以辅成道德者也柰何罢之众以为允三十年进拜中书左丞兼詹事丞成宗嗣位改詹事院为徽政以九思为副使会修世祖裕宗实录命兼领史事大德二年拜中书平章政事五年加大司徒六年卒 【虞集撰墓志云赠鲁国公谥忠献】

△王伯胜

王伯胜霸州文安人兄伯顺给事内廷为世祖所亲幸因以弟入见命备宿卫帝顾谓伯顺曰此儿当胜卿可名伯胜帝尝沃盥水温冷甚称旨帝曰此儿他日必知为政达人情矣至元二十五年从征纳颜以功授拱卫直都指挥使初拱卫直隶教坊卫卒多市井无赖窜名及伯胜为指挥使尽募良家子易之大德五年扈从上都天久雨夜闻城西北有声如战鬻然伯胜率卫卒出视之乃大水暴至立具畚鍤集土石既罨以塞门令决壕隍以泄其势至旦始定丞相鄂勒哲以闻帝嘉之九年以侍成宗疾忤安西王出为大宁路总管伯顺亦出为梁王傅武宗即位为大都留守兼少府监初大都土城岁必衣苇以御雨日久土益坚劳费益甚伯胜奏罢之仁宗立拜辽阳行省平章辽阳省治懿州俗弊陋民不知学伯胜至为增郡学弟子员择贤师教之择隙地为馆廡度闲田百顷募民耕种以给廩饩岁大旱斋戒步祷祷毕即雨人谓之平章雨延佑二年复召为大都与守辽阳民状其行事乞留不报民涕泣而去至治二年奉诏监修文武楼勅咸宁殿建太庙泰定三年卒追封蓟国公谥忠敏

钦定续通志卷四百八十三

●钦定续通志卷四百八十四 列传二百八十四

列传

元 【三十八】

○元三十八

尚文	申屠致远	雷膺	胡祗遹	王
利用	畅师文	张照		
袁裕	张昉	郝彬	高源	杨湜
吴鼎	梁德珪			
尚文				
申屠致远				
雷膺				
胡祗遹				
王利用				
畅师文				
张照				
袁裕				
张昉				

郝彬

高源

杨湜

吴鼎

梁德珪

△尚文

尚文字周卿保定人张文谦宣抚河东辟掌书记至元六年始立朝仪太保刘秉忠言于世祖诏文与诸儒采唐开元礼及近代礼仪之可行于今者斟酌损益凡文武仪仗服色差等皆文掌焉明年朝仪成帝临观之大悦遂为定制十九年进户部郎中奏罢怀卫竹税提举司二十二年徐御史台都事行台御史上封事言上春秋高宜禅位皇太子太子闻之惧中台秘其章不发特济格阿萨尔等知之请数内外百司吏案索天下埋没钱粮欲因以发其事文拘留秘章不与特济格闻于帝命宗正色彻肯取其章文即日御史大夫曰是欲上危太子下陷大臣流毒天下其谋至奸也且特济格乃阿哈玛特余党赃罪狼籍宜先发以夺其谋御史大夫与丞相入言状帝震怒曰汝等无罪耶丞相顿首曰臣等无所逃罪丘此辈名载刑书此举动摇人心宜选重臣为之长庶靖纷扰帝怒稍解可其奏既而特济格受人金竟坐死元贞初拜中台侍御史时行台御史劾江浙行省平章不法者十七事遣文往按平章坚不服且许御史违制取会防镇军数帝命省台大臣杂议咸曰平章勋臣之后所犯者轻事宜宥御史取会军数法当死文抗言平章罪状明白不受簿责无人臣礼其罪非轻御史纠事之官因兵卒争愬责其帅如旧均役情无害法即有罪亦轻廷辩数四与台省入奏市悟各杖遣之寻授河北河南廉访使大德元年【河渠志作三年】河决蒲口台檄文按视防河之策文建言长河自陈留抵睢阳东西百有余里南岸视水高六七尺或四五尺北岸故堤水视田高三匹尺或高下等大概南高于北约八九尺堤安得不坏水安得不北也蒲口今决千有余步迅速东行得河旧渎行二百里至归德横堤之下复合正流或强湮遏上决下溃功不可成揆今之计河北郡县宜顺水性远筑长堤以御泛滥归德徐邳民避冲溃听从安便被患之家量给河南退滩地以为业异时河决他所者亦如之一时救灾良策也蒲口不塞便帝从之会河朔郡县山东宪部争言不塞则河北桑田尽为鱼鳖之区塞之便帝复从之明年蒲口复决塞河之役无岁无之自后水北入复河故道竟如文言七年召拜中书左丞奏请选十道使者巡行天下问民疾苦又奏斥罢南方白云宗【

按释老传序云曰禅曰教各守其业唯白云宗白莲宗颇通奸利盖释教中之一门也】
与民均役西域贾人有奉珍珠进售者价六十万锭省
臣顾谓文曰此所谓雅库特大珠也一坐传玩文竟不为动因疾告老归延佑六年拜太子詹事使三往乃起仁宗命尽言以教太子待以殊礼
泰定三年进中书平章政事致仕明年卒 【按富珠哩狮撰神道碑云追封齐国公谥正献】

△申屠致远

申屠致远字大用东平寿张人世祖南征驻兵小濮荆湖经略使荐为经略司知事
军中机务多所谟画至元七年 【按崔斌传至元四年守东平六年金枢密院事寻金河南行省事本传作七年恐误】 崔斌守东平聘为学
宫十年授太常太祝兼奉礼郎帝遣太常卿博罗问毛
血之荐致远对曰毛以告纯血以告新礼也宋平两浙宣慰举为都事首言宋图籍宜上
之朝江南学田当仍以贍学行者从之改杭州总管府
推官宋驸马杨镇从子玠节富于货守藏吏姚溶窃其银惧事觉诬玠节阴与宋广益二
王通有司榜笞诬服狱具致远谏之得其情溶服辜玠
节以贿为谢致远怒绝之西僧嘉木杨喇勒智作浮图于宋故宫欲取高宗所书九经石
刻以筑甚致远力拒之乃止二十年拜江南行台御史
江淮行省宣慰使郗显李兼愬平章蒙古岱不法有诏勿问仍以显等付蒙古岱鞫之系
狱抵死致远虑囚浙西知其冤将释之蒙古岱胁以势
致远不为动亲脱显等械僧格当国治书侍御史陈天祥奉使湖广劾平章约苏穆尔僧
格摘其疏中语诬以不道奏遣使逮讯行台御史惮其
威莫敢往致远慨然请行比至累章极论其诬僧格气沮江西行省平章玛哈穆特于商
税外横加征取呼逊籍乡民为匠户转运使卢世荣榷
茶牟利致远并劾之又言占城日本不可涉海远征徒费中国铨选限以南北优苦不均
宜考其殿最量地远近立为定制他如罢香莎米弛竹
课禁设司狱官医学职员怕自致远发之大德二年金淮西北道廉访司事行部至和州
得疾卒致远清修苦节耻事权贵聚书万卷名曰墨庄
所著忍斋行藁四十卷释奠通礼三卷杜诗纂例十卷集验方二十卷集古印章三卷子
七人

△雷膺

雷膺字彦正浑源人少孤母侯氏织纆为业课膺读书膺笃志于学事母以孝闻太
宗时诏郡国设科选试凡占儒籍者复其家膺年甫弱
冠得与其选遂以文学称丞相史天泽镇真定辟掌书记中统二年翰林承旨王鹗王盘
荐膺为翰林修撰同知制诰兼国史院编修官至元二

年拜监察御史首以正君心正朝廷百官为言又斥聚敛之臣不宜作相十四年出为山南湖北道提刑按察副使时江南新附诸将市功且利俘获往往滥及无辜或强籍新民为奴隶膺出令得还为民者以数千计二十年迁行台侍御史分司湖广江西奏劾按察使二人及行省官吏之不法者二十二年以母忧去官明年起复授江南浙西道提刑按察使苏湖多雨伤稼百姓艰食膺请于朝发廩米二十万石振之行省谓其数太多议存三之一膺曰布宣皇泽惠养困穷行省臣职也岂可效有司出纳之吝耶旋致仕归老于山阳成宗即位朝会上都召诸故老咨询国政膺为称首多所建白大德元年卒于京追封冯翊郡公谥文穆子肇顺德路总管府判官

△胡祗遹

胡祗遹字绍开磁州武安人少孤既长读书见知于名流中统初张文谦宣抚大名辟为员外郎至元元年授应奉翰林文字调石司员外郎时阿哈玛特当国进用羣小官冗事烦祗遹建言省官莫如省吏省吏莫如省事以是忤权贵出为太原路治中兼提举本路铁冶将以岁赋不办责之及莅职乃以最闻累擢荆湖北道宣慰副使有佃民诉其田主谋不轨祗遹察其冤坐告者十九年改济宁路总管上军政八事于枢府曰役重曰逃户曰贫难曰正身入役曰伪署文牒曰官吏保结曰有名无实曰合并偏颇枢府是之以其言着为定法济宁移治巨野县自经兵戈居居未集风俗朴野祗遹选郡子弟择师教之亲为讲论期变其俗久之升山东田西道提刑按察使所至抑豪右扶寡弱以敦教化厉士风民有父子兄弟相讼者必恳切谕以天伦之重不获已则绳以法召拜翰林学士不赴寻告归二十九年朝廷征耆德者十人祗遹为首以疾辞三十年卒延佑五年赠礼部尚书谥文靖子持太常博士

△王利用

王利用字国宾通州潞县人幼颖悟弱冠与魏初同学遂齐名事世祖于潜邸中统初命监铸百司印章历安肃汝蠡赵四州知州入拜监察御史蓟州有禁地民不得射猎其中逯者诬州民冒禁籍其家利用纠之逯者诉于上利用辨愈力以所没入悉归之民擢翰林待制兼兴文署奉旨程试上都隆兴等路儒士迁直学士与耶律铸同修实录出为四川提刑按察使都元帅塔尔海抑巫山县民数百口为奴民屡诉不决利用承檄覆问尽出为民改安西兴元两路总管减职田租额站户之役于他郡者悉除之有妇毒杀其夫问药所从来吏教妇指富商所货狱上利用曰家富而货责药岂人情哉讯之冤果白未几致仕居汉中成宗朝 【按本传中

统初后即纪成宗大德二年又复纪成宗朝叙次疑

有脱误】起为太子宾客疏上十七事曰谨畏天戒取法祖宗孝事母后敬奉至尊抚爱百姓敦本抑末清心听政寡欲养身酒宜节饮财宜节用有功必赏有罪必罚杜绝谗言求纳直谏官职量材而授工役相时而动俾近侍时赴经筵讲读经史帝及太子嘉纳之寻卒利用每言平生读书于恕字稍有得廉希宪当时名相慎许可尝语人曰方今文章政事兼备者王国宾其人也武宗即位封潞国公谥文贞

△畅师文

畅师文字纯甫南阳人父讷有诗名注地理指掌图师文幼警悟不忘弱冠谒许衡与衡门人姚燧高凝相友善至元五年陈时政十六策丞相安图奇其才辟为右三部令史十二年巴延伐宋选为掾从定江南及归舟中惟载书籍十三年编平宋事迹上之十六年除潼川路治中修府舍发地得银五十锭同僚分取师文独不受二十三年入拜监察御史上所纂农桑辑要书二十四年迁陕西汉中道巡行劝农副使置义仓教民种艺法三十一年改金山南道廉访司事松滋枝江有水患岁发民防水往返数百里民困于供给师文以江水安流悉罢其役驸马伊都呼家人怙势不法师文治其甚恶者流之大德七年以疾家居十年起太常少卿转翰林侍读学士至大元年预修成宗实录三年请补外除太平路总管当涂民坐杀牛祈两囚系者六十余人师文悯而出之公田米积盈屋师文曰一官数口能尽食此乎怎散之皇庆二年复召入为翰林侍读学士奉旨撰王勃成道记序延佑四年主考河南乡试归卒于传舍追封魏郡公谥文肃子曰笃

△张照

张照字彦明济南人幼颖悟力学始补吏济南上计寿阳行省有积年勾考未输银一十万五千两照条陈利害切至遂获免征中统元年辟中书省掾俄迁右司提按案牍至元八年知兖州事时州境亢旱吏民恳祷不雨照始至甘雨沾足属邑有桀黠吏挟官府肆为暴横照绳之以法杖出境外民害遂息十一年改授淮西行省左右司郎中丞相安塔哈领军进攻瓜洲镇江照运粮储给战具赞画之力居多十三年扬州未下丞相阿珠攻之宋将李庭芝弃城遁泰州照领兵招谕制置宋焕以城降升扬州路总管府达噜噶齐商议行省事时行省在扬州据南北要津照抚绥劳来上下安之十六年改镇江路谢病归购书八万卷以万卷送济南府学资教育二十五年卒追封清河郡侯谥敬惠子用中沂州山场同提举

△袁裕

袁裕字仲宽洛阳人幼孤从兄避难聊城因家焉稍长嗜学中统初辟中书右司掾始建言给重囚衣粮医药殴人至死者免籍其孥产止令出焚瘞钱后着为令顺天路民王住儿因鬪误杀人其母年七十言于朝曰妾寡且老恃此儿以为生儿死则妾亦死矣裕言于执政乞宥之执政以闻帝从之囚得免死南京总管刘克兴掠良民为奴隶后以矫制获罪当籍奴产之半裕言于中书止籍其家奴得复为民者数百至元六年迁开封府判官洧川县达噜噶齐贪暴盛夏役民捕蝗禁不得饮水民不胜忿击之而毙有司坐以大逆寘极刑者七人连坐者五十余人裕曰达噜噶齐自犯众怒而死安可悉归罪于民议诛首恶者一人余各杖之部使者录囚至县疑其太宽裕陈其状于刑曹竟从裕议八年授西夏中兴等路新民安抚副使时徙鄂民万余于西夏流离载道裕请于朝计丁给地立三屯使耕以自养民德之又言西夏羌浑杂居莠良莫辨宜验已有从良书者则为良民从之得八千余人官给牛具使力田为农十八年调知南阳府明年召拜刑部侍郎出为顺德路总管郡有铁冶提举张鉴无子买妾其妻妬而杀之裕捕其妻讯之服辜裕用法平允而嫉恶不少贷如此二十一年卒于官

△张昉

张昉字显卿东平汶上人性缜密确然有守严实行台东平辟为掾乡人有执左道惑众者事觉逮捕诘误甚众诸僚佐莫敢言昉独别白出数百人实才之进幕职时兵后吏曹杂进不习文法东平民众事系簿书填委漫无统纪昉坐曹躬阅案牒左酬右答事无留滞同里张氏以丝五万两寄昉家他适俄而被火家人惶骇走避费用悉焚昉力完所寄丝付张氏乙卯权知东平府事以疾辞家居养母至元元年入为中书省左右司郎中甄别能否人无怨言三年迁制国用使司郎中竭诚赞画出纳惟谨赋不加敛国用以饶七年转尚书省左右司郎中九年改中书省昉有识虑损益古今裁定典宪时皆宜之十一年拜兵刑部尚书卒封东平郡公谥庄宪克遯平阴县尹

△郝彬

郝彬字景文霸州信安人世祖初年十六充太子宿卫擢扬州路治中鄞县贼顾闰聚众海岛侵扬州境彬计擒之泰兴人有被杀二年而盗不获者吏诬平人狱已具彬疑其诬讞之果得真盗御史荐彬同知淮西宣慰司事核户版理屯田诸废修举江淮财赋总管府掌东宫田赋其官属皆从詹事院奏授不隶中书往往为奸利诛求无厌彬为总管入见请授宪司纠

察以革其弊罢所隶六提举司以苏民瘼从之遂罢其
四国家盐利两淮独当天下之半法日以坏以彬行户部尚书经理之彬请度舟楫所通
道理所均建六仓煮盐于场运积之仓岁首听羣商于
转运司探仓筹定其所乃买券又定河商江商市易之法着为令入为户部尚书拜中书
参知政事俄免归尚书省立拜参知政事辞家居七年
仁宗朝召为大司农卿未几谢病延佑七年卒

△高源

高源字仲渊晋州人幼孤事母孝补县吏中统初授卫辉路知事升齐河县尹有遗
爱累迁浙西道提刑按察司佥事劾常州路达鲁噶齐
马恕夺民田及他不法事恕惧走赂权臣阿哈玛特以他事诬源既系狱时源所居邻里
多阿哈玛特亲戚素知源事母孝至是闻源坐非辜悉
诣阿哈玛特曰源孝子也天必知之若妄杀源悖天不祥阿哈玛特感悟得不死寻除河
闲等路都转运副使抚治有条灶户逃者皆复业常赋
外羨余几十万缗至元二十八年迁都水监开通惠河人蒙其利授同知湖南道宣慰司
事卒

△杨湜

杨湜字彦清真定藁城人习章程学工书算始以府吏迁检法中统元年辟为中书
掾与中山杨珍无极杨卞齐名时人以三杨目之中书
省初立国用不足湜论钞法宜以榷货制国用朝廷从之命掌其条制四年迁左司提控
掾请严赃吏法至元三年立制国用司总天下钱谷以
湜为员外郎改宣徽院参议湜计帑立籍具其出入之算每月终上之遂定为令加诸路
交钞都提举上钞法便宜事谓平准行用库白金山入
有偷滥之弊请以五十两铸为錠文以元宝用之便七年改制国用司为尚书省拜部
侍郎仍兼交钞提举时用壬子旧籍定赋役高下湜言
贫富不常岁久寢易其可以昔时之籍而定今之赋役哉因俾第其轻重人以为平湜心
计精析时论经费者咸推其能焉

△吴鼎

吴鼎字鼎臣燕京人至元十七年入东宫为宿卫后积官至礼部尚书宣徽副使大
德十一年山东诸郡饥诏鼎往振之朝议发米四万石
钞折米一万石鼎曰民得钞将何从易米同使者曰朝议已定恐不可复得鼎曰人命岂
不重于米耶言于朝卒易米以行至大元年改保定路
总管时皇太后欲幸五台山言者请开保定西五回岭以取快捷方式遗鼎视地形计工费
鼎言荒山斗入人迹久绝非乘輿所宜往太后命寝其役三
年召授同知中政院事两浙财赋隶中政者巨万计前任者率多取赢鼎治之一无私浙

有两富豪曰朱张 【海漕万户朱清张瑄也】 家多
贷与民钱后诛没而券之已偿者亦入官官唯验券征理民不能堪鼎力为辩白始获免
四年改京畿漕运使皇庆二年进崇祥院使延佑三年
卒封蓟国公谥孝敏

△梁德珪

梁德珪字伯温 【续通鉴云一名温都尔】 大兴良乡人初给事昭睿顺圣皇后
宫令习国语通奏对年十一见世祖至元十六年为中
书左司郎中六迁至参议尚书省事三十一年执政入奏事帝询其曲折不能对德珪从
旁辨析明白通畅帝大悦拜参知政事在省日久凡钱
谷出纳之制铨选进退之宜诸藩赐子之节命有骤至不暇阅简牒同列莫知措辞德珪
数语即定闲遇疑事则曰某事当如某律某年尝有此
旨验之不爽帝阅州郡报囚之数怪其过多德珪方在右司对曰当国者急于征索蔓延
收系故致此帝感悟为大赦中外逋负民赖以苏成宗
即位以安静为治求进者不得逞其志朋聚兴怨摭事中伤德珪会帝有疾言者盛气致
诘德珪慷慨引咎遂安置湖广帝疾愈问知之召使复
位 【按续通鉴载大德七年坐受朱清张瑄赂罢戍远边八年复为平章政事盖即此时
也本传特隐约其词耳】 既至帝问卿安在德珪涕
泣不能语以气疾乞骸骨归大德八年卒于家

钦定续通志卷四百八十四

●钦定续通志卷四百八十五 列传二百八十五

列传

元 【三十九】

○元三十九

刘因	吴澄	程巨夫	赵孟俯	邓文原	袁桷
曹元用	齐履谦				

刘因

吴澄

程巨夫

赵孟俯

邓文原

袁桷

曹元用

齐履谦

△刘因

刘因字梦吉保定容城人世为儒家父述刻意问学邃性理之说中统初刘肃宣抚真定辟为武邑令以疾辞因天资绝人七岁能属文甫弱冠才器超迈日阅方册思得如古人者友之作希圣解国子司业砚弥坚教授真定因从之游【按畿辅志云弥坚应城人元兵徇濮上招致而北因家真定为人清苦严重学问醇正文文章质实屡以忠孝之道训迪诸生化服者众谨附识】初为经学究训诂疏释之说辄叹曰圣人精义殆不止此及得周邵程朱之书一见能发其微曰我固谓当有是也尝诤其学之所长曰邵至大也周至精也程至正也朱子极其大尽其精而贯之以正也其高见远识率类此因蚤丧父事继母孝性不苟合不妄交接家其贫非其义一介不取弟子造其门者随材器教之皆有成就公卿过保定者众闻因名来谒辄避不与见或以为傲弗恤也爱诸葛孔明静以修身之语表所居曰静修博果密荐于朝至元十九年征拜右赞善大夫初裕宗建学东宫命赞善王恂教近侍子弟恂卒命因继之未几以母疾辞归二十八年诏复召为集贤学士固辞且上书宰相曰向者先储皇以赞善之命来召即与使者俱行再奉旨令教学亦实时应命后以老母中风请还家省视不幸弥留竟遭忧制遂不复出初岂有意于不仕邪今圣天子选用贤良一新时政虽前日隐晦之人亦将出面仕矣况因平昔非隐晦者邪况加以不次之宠处之以优崇之地邪是以形留意往命与心违病卧空斋惶恐待罪使者持恩命至因窃谓供职虽未能扶病而行而恩命不敢不扶病而拜若稍涉迟疑不惟臣子之心不安而踪迹高峻已不近于人情矣是以即日拜受留吏者候病势稍退与之俱行迁延至今服疗百至略无一效乃请使者先还望阁下俯加矜悯曲为保全始终成就之书上朝廷不强致帝叹曰古有所谓不召之臣其斯人之徒欤【按陶宗仪辍耕录云初许衡之应召也道过真定因谓曰公一聘而起无乃太速乎衡曰不如此则道不行及因不受集贤之聘或问之曰不如此则道不尊谨附识】越二年卒无子闻者嗟悼延佑中追封容城郡公谥文靖因所著有四书精要三十卷诗五卷号丁亥集又有文集十余卷及小学四书语录皆门生故友所录惟易系辞说乃因病中亲笔云

△吴澄

吴澄字幼清抚州崇仁人高祖煜【按元明善传云其先自豫章丰城迁崇仁七世祖周生子璇璇生煜煜生铎铎生枢枢生澄据此当作曾祖煜与史传异】初居咸口里当华盖临川二山闲澄生三岁颖悟日发教之古诗随口成诵五岁口受千余言夜读书至旦母忧其过勤

节膏火不多与澄候母寝燃火复诵习既长通经传知用力圣贤之学尝举进士不第隐居布才谷着孝经章句校定易书诗春秋仪礼大小载
记至元中程巨夫奉诏求贤江南起澄至京师未几以母老辞归巨夫请置所著书于国子监以资学者朝廷命有司即其家录上元贞初游龙
兴按察司经歴赦文迎至郡学日听讲论录其问答数千言行省掾元明善尝问澄诸经奥义叹曰与吴先生言如探渊海遂执弟子礼终其身
左丞董士选延于家亲执馈食曰先生天下士也既入朝荐澄有道擢应奉翰林文字未到官除江西儒学副提举居三月以疾去至大元年召
为国子监丞先是许衡为祭酒始以朱子小学等书授弟子久之渐失其旧澄至旦燃烛堂上诸生以次受业日昃退燕居之室执经问难者接踵而至澄各因其材质反复训诱之每至夜分虽寒暑不易也皇庆元年迁司业用程颢
学校奏疏胡瑗六学教法朱子学校贡举私议约之为
教法四条一曰经学二曰行实三曰文艺四曰治事未及行又尝为学者言朱子于道问学之功居多而陆子静以尊德性为主问学不本于德
性则其蔽必偏于言语训释之末故学必以德性为本庶几得之议者遂以澄为陆氏之学非许氏尊信朱子本意然亦莫知朱陆之为何如也
澄一夕谢去诸生有不谒告而从之南者英宗即位超迁翰林学士有旨集善书者粉金为泥写浮屠藏经诏澄为序澄曰主上写经为民祈福
甚盛举也若用以追荐臣所未知盖福田利益虽人所乐闻而轮回之事彼习其学者犹或不言不过谓为善之人死则上通高明其极品与日
月齐光为恶之人死则下沦污秽其极致与沙虫同类其徒遂为荐拔之说以惑世人今列圣之神上同日月何庸荐拔且国初以来凡写经追
荐不知几举若未效是无佛法矣若已效是诬其祖矣撰为文辞不可以示后世会帝崩而止泰定元年初开经筵首命澄与平章政事张珪国
子祭酒邓文原为讲官在至治末诏作太庙议者习见同堂异室之制乃作十三室未及迁奉而国有大故有司疑于昭穆之次命集议之澄议
曰世祖混一天下悉考古制而行古者天子七庙庙各有宫太祖居中左三庙为昭右三庙为穆昭穆神主各以次递迁其庙之宫颇如今之中
书六部今省部之设亦仿金宋岂以宗庙序次而不考古乎时澄已有去志会修英宗实录命总其事居数月实录成未上即移疾不出中书左
丞许师敬奉旨赐宴掖史院仍致朝廷勉留意宴罢即出城中书遣官驿追不及而还澄弱冠时尝著书曰道之大原出于天神圣继之尧舜而
上道之元也尧舜而下其亨也洙泗邹鲁其利也濂洛关闽其贞也分而言之上古则义黄其元尧舜其亨禹汤其利文武周公其贞乎中古之

统仲尼其元颜曾其亨子思其利孟子其贞乎近古之统周子其元程张其亨也朱子其利也孰为今日之贞乎未之有也然则可以终无所归哉其早以斯文自任如此故出登朝署退归于家与郡邑之所经士大夫皆迎请执业而四方之士不惮数千里来学山中者常不下数千百人少暇即著书至将终犹不置也于易春秋礼记各有纂言尽破传注穿凿以发其蕴条归纪叙精明简洁卓然成一家言作学基学统二篇使人知学之本与为学之序尤有得于郡子之学校定皇极经世书又校正老子庄子太玄经乐律及八阵图郭璞葬书初澄所居草屋数闲程巨夫题曰草庐故学者称草庐先生天历三年朝廷以澄耆老特命次子京为抚州教授以便奉养明年卒追封临川郡公谥文正子文同知柳州路总管府事京翰林院国史院典籍官孙当自有传

△程巨夫

程巨夫名文海避武宗庙讳以字行其先自徽州徙郢之京山后家建昌叔父飞卿仕宋通判建昌世祖时以城降巨夫人为质子授管军千户他日召见问贾似道何以人巨夫条对甚悉命给笔札书二十余幅以进帝奇之问今居何官以千户对帝谓侍臣曰朕观此人貌应贵显听其言论尤聪明有识改授应奉翰林文字且曰自今政事得失及朝臣邪正皆为朕言之寻进翰林修撰屡迁集贤直学士兼秘书少监至元十九年奏陈五事一曰取会江南仕籍二曰通南北之选三曰立考功历四曰置贪赃籍五曰给江南官吏俸朝廷多采行之赐地京师安贞门以筑居室二十三年见帝首陈兴建国学乞遣使江南搜访遗逸御史台按察司并宜参用南北人帝嘉纳之二十四年立尚书省诏以为参知政事巨夫固辞又命为御史中丞台臣言巨夫南人且年少帝大怒曰汝未用南人何以知南人不可用自今省部台院必参用南人遂以巨夫为侍御史行御史台事求贤于江南【按世祖纪程巨夫为侍御史及访求江南人材在至元二十三年本传序次在二十四年立尚书省后与纪互异】初书诏令皆用蒙古字及是特命以汉字书之帝素闻赵孟頫叶杆名巨夫临行密谕必致此二人巨夫又荐赵孟俯余恁万一鄂张伯淳胡梦魁曾晞颜孔洙曾冲子凌时中包铸第二十余入帝皆擢置台宪及文学之职还朝陈民闲利病五事拜集贤学士仍还行台二十六年时相僧格专政法令苛急巨夫上疏曰臣闻天子之职莫大于择相宰相之职莫大于进贤苟不以进贤为急而惟以货殖为心非为上为德为下为民之意也今权奸用事立尚书省钩考钱谷以剥割生民为务所委任者率皆贪饕邀利之人江南盗贼窃发良以此也臣窃以为宜

清尚书之政损行省之权罢言利之官行恤民之事于国为会僧格大怒奏请杀之凡六奏帝皆不许三十年迁闽海道肃政廉访使兴学明教吏民畏爱之大德四年改江南湖北道至官首治行省平章家奴为民害者上下肃然八年召拜翰林学士商议中书省事十年以亢旱暴风星变巨夫应诏陈弭灾五策曰敬天尊祖清心持体更化帝称善云南省臣言世祖亲平云南民愿刻石点苍山以纪功德诏巨夫撰其文至大元年修成宗实录三年复拜山南江北大道肃政廉访使寻召赴阙赐对便殿留为翰林学士承旨皇庆元年修武宗实录二年旱应诏陈森林六事忤时宰意帝劳之曰中书集议惟卿言甚当后临事其极言之于是诏巨夫偕平章李孟参政许师敬议行贡举法巨夫建言经学当主程颐朱熹传注文章宜革唐宋宿弊帝命草诏颁行之以病乞骸骨给驿南还敕行省及有司常加存问居五年卒泰定二年追封楚国公谥文宪

△赵孟俯

赵孟俯字子昂宋太祖子秦王德芳后也五世祖秀王子偁生崇王伯圭及孝宗伯圭赐第于湖州故孟俯为湖州人曾祖师垂祖希永父与豈仕宋皆至大官孟俯幼聪敏读书过目成诵为文操笔立就年十四用父荫补官试中吏部铨选调真州司户参军【按徐象梅两浙名贤录云成进士为润州录事参军】宋亡家居益自力于学至元二十三年行台侍御史程巨夫奉诏搜访遗逸以孟俯入见神采焕发世祖顾之喜仗坐右丞叶李上时方立尚书省【世祖纪作二十四年事】命孟俯草诏帝览之喜曰得朕心所欲言矣诏集百官于刑部议法众欲计至元钞二百贯贓满者死孟俯曰始造钞时以银为本虚实相权今二十余年轻重相去至数十倍故改中统为至元又二十年后至元必复如中统使民计钞抵法疑于太重古者以米绢民生所须谓之二实银钱与二物相权谓之二处四者为直虽升降有时终不大相远也以绢计贓最为适中或以孟俯年少来自南方辄议国法意颇不中孟俯曰奉诏与议不敢不言今中统钞虚故改至元钞谓至元钞终无虚时岂有是理公不揆于理欲以势相陵可乎二十四年授兵部郎中时至元钞滞涩不能行诏与尚书刘宣驰驿至江南问行省丞相慢令之罪凡左右司及储路官则径答之孟俯受命而行此还不答一人大忤丞相僧格意有王虎臣者言平江路总管赵全不法即命虎臣往按之叶李执奏不听孟俯进曰虎臣前守此郡多强买人田纵宾客为奸利全数与争今往必将陷全事纵得实人亦不能无疑帝悟乃遣他使僧格万钟初鸣时即坐省中六曹官后至者则答之孟俯偶后至断事官遽引受答孟俯入诉于都堂右丞叶

李曰古者刑不上大夫所以养其廉耻教之节义且辱士大夫是辱朝廷也僧格亟慰之使出他日行东御墙外道险马跌墮于河僧格闻之在于帝移筑御墙稍西二丈许二十七年迁集贤直学士是岁地震北京【五行志作泉州及武平路】尤甚地陷黑沙水涌出人死伤无算帝时驻驛龙虎台遣鄂尔根萨里驰还召集贤翰林两院官询致灾之由议者畏忌僧格但泛引经传及五行灾四之言以修人事应天变为对莫敢指切时政孟俯与谔尔根萨里善劝令奏帝赦天下尽与蠲除庶几天变可弭谔尔根萨里入奏如孟俯言帝从之诏草已具僧格怒曰此必非帝意孟俯曰凡钱谷未征者其人死亡已尽非及是时除免之他日言事者倘以失陷数千万归咎尚书省岂不为丞相深累耶僧格悟民始获苏帝尝问叶李留梦炎优劣孟俯对曰梦炎臣父执素重厚笃于自信好谋而能断有大臣器叶李所读之书臣皆读之其所知所能臣皆知之能之帝曰汝以梦炎贤于李耶梦炎在宋为状元位丞相当贾似道悞国罔上梦炎依阿取容李布衣乃伏阙上书是贤于梦炎远甚汝以梦炎父友不敢斥言可赋诗讥之孟俯赋诗有往事已非那可说且将忠直报皇元之语帝叹赏焉孟俯退谓奉御彻尔曰帝论贾似道悞国责留梦炎不言今僧格罪甚于似道而我等不言他日何以辞其责侍臣中慷慨有大节又为帝所亲信无踰公者夫捐一旦之命为万姓除残贼仁者事也公必勉之既而彻尔至帝前数僧格罪恶帝怒命卫士批其颊血涌口鼻委顿地上少闲复问之对如初时大臣亦有继言者帝遂按诛僧格罢尚书省大臣多以罪去帝欲使孟俯与闻中书攻事孟俯固辞有旨令出入宫门无禁每见必从容语及治道多所裨益孟俯自念久在帝侧必为人所忌力请补外二十九年出同知济南路总管府事及修世祖实录召还命书金字藏经既成除江浙等处儒学提举仁宗在东宫知其名及即位召除集贤侍讲学士延佑三年拜翰林学士承旨帝以字呼之而不名帝赏与侍臣谕文学士以孟俯比唐李白宋苏轼又尝称孟俯操履纯正博学多闻书画绝伦旁通佛老之言皆人所不及有闲之者帝初若不闻又有上书言国史所载不宜使孟俯与其事帝曰赵子昂世祖所简拔朕特优以礼貌置于馆阁典司述作传之后世此属嗶嗶何也初孟俯以程巨夫荐起家为郎及巨夫以翰林承旨致仕去孟俯代之先往拜其门而后入院寻得请南归至治元年英宗遣使即其家令书孝经明年卒追封魏国公谥文敏所著诗文清邃奇逸篆籀分隶真行草书无不冠绝古今遂以书名天下其画山水木石花竹人马尤精致子雍奕并以书画知名【按书史会要补云孟俯妻管氏善辞章亦能

书仁宗尝取其书合孟俯及雍书装潢成帙识以御
实令藏秘书监曰使后世知我朝有一家夫妇父子皆善书者谨附识】

△邓文原

邓文原字善之一字匪石绵州人父漳徙钱塘文原年十五通春秋宋时以流寓试浙西转运司魁四川士至元二十七年辟为杭州路儒学正大德五年擢应奉翰林文字至大初预修成宗实录寻授江浙儒学提举皇庆元年召为国子司业科举制行文原校文江浙虑士守旧习大书朱子贡举私议揭于门延佑四年迁翰林待制踰年出金江南浙西道肃政廉访司事屡雪冤狱吴兴民夜行巡逻者执之系亭下其人遁去有追及之者制其胁仆地明旦家人得之以归比死问刺汝者何如人曰白帽青衣长身者也家人愬于官有司问直初更者曰张福儿执之使服焉械系三年文原录之曰福儿身不满六尺未见其长也刃伤右肋而福儿素用左手伤宜在左何右伤也鞫之果得真杀人者六年移江东道徽宁国广德三郡岁入茶课钞三千锭后增至十八万锭竭山谷所产不能充其半余皆取之民闲时转运司官得专制有司凡五品以下听杖决州县莫敢谁何文原请罢其专司俾郡县领之不报至治二年召为集贤直学士地震诏议弭灾之道文原复申前议请罢榷茶转运使又不报明年兼国子祭酒泰定元年以疾致仕归屡召不赴天历元年卒谥文肃文原内严而外恕家贫而行廉初客京师有一书生病笃取橐中金嘱文原以归其亲既死而同舍生窃金去文原买金偿死者家终身不以言人子衍【按陶宗仪书史会要云文原尝自题其居曰素履人遂称素履先生为文精深典雅诗简古而丽正行草书早法二王后法李北海虞集云大德延佑闲渔阳吴兴巴西翰墨擅一代谨附识】 荫授江浙等处儒学副提举

△袁桷

袁桷字伯长庆元人举茂才异等授丽泽书院山长大德初阎复程文海王构荐为翰林国史院检阅官时初建南郊桷进十议曰天无二日天既不得有二五帝不得谓之天作昊天五帝议祭天岁或为九或为二作祭天名数议园兵不见于五经郊不见于周官作圜丘非郊议后土社也作后土即社议三岁一郊非古也作祭天无闲岁议燔柴见于古经周官以禋祀为天其义各有旨作燔梁泰坛议祭天之牛角茧栗用牲于郊牛二合配而言之增羣祀而合祠非周公之制矣作郊不当立从祀议郊质而尊之义也明堂文而亲之义也作郊明堂礼仪异制议郊用辛鲁礼也卜不得常为辛作郊非辛日议北郊不见于三礼尊地而遵北郊郑玄之说

也作北郊议礼官推其博洽多采用之转应奉翰林文字同知制造兼国史院编修官请购求辽金宋三史遗书【按张溥名臣奏议有袁桷上国学议本传不载】久之迁集贤直学士改翰林直学士至治元年拜侍讲学士泰定初辞归桷在词林朝廷制册勋臣碑铭多出其手所著有易说春秋说清容居士集四年卒追封陈留郡公谥文清

△曹元用

曹元用字子贞汝上人幼嗜书每夜读书常达曙不寝始以镇江路学正考满游京师翰林承旨闾复于四方士少许可及见元用出所为文示之元用辄指其疵复大奇之荐为翰林国史院编修官即论史院僚属非材请较试取其优者用之转中书省右司掾与清河元明善济南张养浩同时号为三俊迁礼部主事时累朝皇后未有谥议元用言后为天下母岂可直称其名宜加徽号以彰懿德延佑六年授太常礼仪院经历属英宗躬修祀事锐意礼乐其亲祀仪注鹵簿舆服之制率所裁定初太庙九室合飨于一殿仁宗崩无室可祔乃于武宗室前结彩为次英宗召礼官集议元用言古者宗庙有寝有室宜以今室为寝而更营大殿于前为十五室【按祭祀志以今殿为室别作前庙十五闲中三闲通为一室以奉太祖余以次为室与本传所云较异】帝嘉其议授翰林直学士至治三年特克实之变贼党俱至京师收百司印趋召两院学士北上元用独不行曰此非常之变吾宁死不曲从也泰定二年为礼部尚书遇大朝会为纠仪官申卷班之令俾以序退无争门而出之扰又谓太医仪凤教坊等官不当序正班令自为一列后皆行之时宰执有欲罢科举法者元用谓国家文治所系不宜轻罢止当革冒滥严考核以收真才之用又有欲损太庙四时之享止存冬祭者元用谓禴祠蒸尝四时之享不可阙一乃经礼之大者其可惜费而废礼乎三年帝以日食地震星变诏议所以弭灾者元用上言应天以实不以文修德明政应天之实也宜撙浮费节财用选守令恤贫民严禋祀汰佛事止造作以纾民力慎赏罚以示劝惩皆切中时弊拜翰林侍讲学士兼经筵官预修仁宗英宗两朝实录又纂集甲令为通制译唐贞观政要为国语凡大制造率元用所草天历二年遣祀曲阜孔子庙还以司寇像及代祀记献帝甚喜卒封东平郡公谥文献诗文四十卷号超然集子伟仪

△齐履谦

齐履谦字伯恒【按一统志作魏郡沙鹿人】父义善自术履谦生六岁从父至京师读书一过即能记忆年十一教以推步星历尽晓

其法十三闻圣贤之学自以穷理为务至元十六年初立太史局【按百官志立太史院在至元十五年】改治新历履谦补星历生同辈皆可天台官子太史王恂问以算数莫能对履谦随问随答恂大奇之新历既成复预修历经历议二十九年授星历教授都城刻漏旧以木为之其形如碑故名碑漏内设曲筒铸铜为丸自碑首转行而下鸣铙以为节其漏经久废坏晨昏失度大德元年中书俾履谦视之因见刻漏旁有宋旧铜壶四于是按图考定莲花宝山等漏刻命工改作又请重建鼓楼增置更鼓并守漏卒当时遵用之二年迁保章正始专历事三年八月朔时加巳依历当日蚀二分有奇至其时不蚀【按成宗纪及天文志并载是月己酉朔日有食之与此互异】众皆惧履谦曰常蚀不蚀在古有之矧时近午阳盛阴微宜当蚀不蚀遂考唐开元以来当蚀不蚀者凡十事以闻六年六月朔时加戌依历日当蚀五十七秒众以涉交既浅且复近浊欲匿不报履谦曰吾所掌者常数也其食与否则系于天独以状闻及其时果食众尝争没日不能决履谦曰气本十五日而闲有十六日者余分之积也故历法以所积之日命为没日不出本气者为是众服其议七年八月戊申夜【成宗纪及五行志并作辛卯夜】地大震诏问致灾之由及弭灾之道履谦按春秋言地为阴而主静妻道臣道子道也三者失其道则地为之弗宁弭之之道大臣当反躬责己去专制之威以答天变不可徒为禳祷也时成宗寝疾宰臣有专威福者故履谦言及之九年始立南郊祀昊天上帝履谦摄司天台官旧制享祀司天虽掌时刻无钟鼓更漏往往至旦始行事履谦白宰执请用钟鼓更漏俾早晏有节从之至大二年太常请修社稷坛及浚太庙庭中井或以岁君所直欲止其役履谦曰国家以四海为家岁君岂专在是明年升授时郎秋官正仁宗即位嘉尚儒术台臣言履谦有学行可教国学子弟擢国子司业与吴澄同被命时号得人每五鼓入学风雨寒暑未尝少怠其教养有法诸生皆畏服未几复命命太史院事皇庆二年彗星出东井履谦奏宜增修善政以答天意因陈时务八事仁宗为之动容自履谦去国学澄亦移病归学制遂废延佑元年诏择善教者于是复以履谦为国子司业律已益严教道益张每斋置伴读一人为长虽助教阙员而诸生讲授不绝时初命国子生岁贡六人以入学先后为次第履谦曰不考其业何以兴善而得人乃酌旧制立升斋积分等法每季考其学行以次递升既升上斋又必踰再岁始与私试每孟仲月试经疑经义季月试古赋诏诰章表策蒙古色目试明经策问辞理俱优者一分辞不理优者为半分岁终积至八分者充高等以四十人为额然后集贤礼

部定其艺业及格者六人以充岁贡三年不通一经及在学不满一岁者并黜之帝从其议至治元年拜太史院使泰定二年以本官奉使宣抚江西福建黜罢官吏贪污者四百余人蠲免括地虚加粮数万石州县有以先贤子孙充房夫诸役者悉罢遣之福建宪司职田每亩岁输米三石民不胜苦履谦命准令输之由是召怨及还京宪司果诬以他事未几诬履谦者皆坐事免履谦始得直复为太史院使天历二年卒履谦笃学勤苦家贫无书及为星历生在太史局会秘书监鞏亡宋故书留置本院因书夜讽诵深究自得故其学博洽精通自六经诸史天文地理礼乐律历下至阴阳五行医药卜筮无不淹贯尤精经籍着太学四传小注一卷中庸章句续解一卷论语言仁通旨二卷书传详说一卷易系辞旨略二卷易本说四卷春秋诸国统纪六卷以皇极之名见于洪范皇极之数始于邵氏经世书数非极也特寓其数于极耳着经世书入式一卷经世书有内外篇内篇则因极而明数外篇则由数而会极着外篇微旨一卷授时历行五十年未尝推考履谦日测晷景并晨昏五星宿度自至治三年冬至至泰定二年夏至天道加持真数各减见行历书二刻着二至晷景考二卷授时历虽有经串而经以着定法申以纪成数然求其法之所以然数之所从出则略而不载作经串演撰八法一卷元立国百有余年郊庙之乐沿袭宋金履谦谓乐本于律律本于气可择僻地为密至取金门之竹及河内葭莩候之上可以正雅乐荐郊庙和神人下可以同度量平物货厚风俗列其事上之又得黑石古律管一长尺有八寸外方内为圆空中有隔隔中有小窍盖以通隔上九寸其空均直约径三分以应黄钟之数隔下九寸其空自小窍迤邐杀至管底约径二寸余盖以聚其气而上之其制与律家所说不同盖古所谓玉律者是也适迁他官事遂寝至顺三年追封汝南郡公谥文懿

钦定续通志卷四百八十五

●钦定续通志卷四百八十六 列传二百八十六

列传

元 【四十】

○元四十

崔斌	崔彧	叶李	燕公楠	马绍	姚燧	郭
贯	瓜尔佳之奇	刘赓	耶律有			
尚	郝天挺	张孔孙				
崔斌						
崔彧						

叶李

燕公楠

马绍

姚燧

郭贯

瓜尔佳之奇

刘赓

耶律有尚

郝天挺

张孔孙

△崔斌

崔斌字仲文马邑人【按一统志云宏州马邑人彘之兄也】性警敏多智略世祖在潜邸召见应对称旨命佐布琳济达戍淮南斌领骑兵觐敌形势潜出袭之多所杀获授总管中统元年改西京参议宣慰司事世祖尝命安国举汉人识治体者安国举斌入见敷陈时政得失危言谏论无有所讳帝幸上都尝召斌命之骑因问为治大体今当何先斌以任相对帝问谁可为相者斌以安国史天泽对帝默然斌曰陛下岂以臣猥鄙所举未允公议耶今近臣咸在乞采舆论裁之帝俞其请斌立马扬言曰有旨问安图为相可否众驩然呼万岁帝悦遂以二人并为相【按宰相年表史天泽之相在中统二年安国人相在至元二年传盖统言之耳】除斌左右司郎中每论事帝前羣言终日不决者斌数言决之凡所献替虽近臣有不得与闻者以此人多忌之会阿哈玛特立制国用使司专以掎克为事斌曰与其有聚敛之臣宁有盗臣于帝前屡斥其奸恶至元四年出守东平五年大兵南征卒有夺民席投其赤子于地以死诉于斌斌驰谓主将曰未至敌境而先杀吾民国常有常刑汝亦当坐遂下其卒于狱岁大侵征赋如常年斌以免复请于朝得楮币十万缗振民饥襄樊之役命斌金河南行省事时调曹濮民丁囤田南阳斌议罢曹濮屯民以近地兵多者补之民以为便又议户部给滨棣青沧盐券付行省募民以米贸之仍增价和余远近输贩者辐辏馈饷不劳而集时河南四路籍兵二万以为益襄樊斌驰奏曰河南户少而调度繁实不堪命宜减其半从之十年诏丞相巴延总兵南征改行省为河南宣慰司充宣慰使巴延既渡江分阿尔哈雅定湖南以斌为行省参政围潭州攻西北铁坝阿尔哈雅中流矢不能军【按阿尔哈尔传云流矢中胸督战益急夺其城与此互异】斌以军夜集栅下誓师衔枚潜登铁坝梯其楼

火之且竖木栅城上诘旦布云梯斌挟盾先登阿尔哈雅持酒劳曰取此城公之力也斌曰潭人胆破矣若敛兵许其来降则重湖以南连城数十可传檄定也从之即遣人开示祸福城中争出降捷闻进行省左丞十一年奉旨抚谕广西寻命还治湖南衡山以南寇贼蜂起斌驻兵南岳凡来降者诛其首恶胁从者尽释之十五年被召入覲时阿哈玛特擅权日甚斌从帝至察罕淖尔帝问江南各省抚治如何斌对以治安之道在得人因极言阿哈玛特奸蠹帝令御史大夫姜卫枢密副使博啰按间之汰其冗员黜其亲党罢天下转运司海内无不称快适尚书留梦炎言江淮行省事至重而省臣无一人通文墨者乃迁斌江淮行省左丞既至凡蠹国渔民之政悉加厘正仍条具以闻阿哈玛特虑其害已捃摭其细事遮留使不获上见因诬构以罪竟为所害裕宗在东宫闻之方食投箸惻然遣使止之已不及矣天下冤之至大初追封郑国公谥忠毅子良知维恩孙敬皆为大官

△崔彧

崔彧字文卿小字拜特穆尔宏州人负才气刚直敢言世祖甚器重之至元十六年奉诏往江南访求艺术之人及还首言呼图克岱尔索亡宋财货烦扰百姓身为使臣乃契妻子以往所在取索鞍马刍粟世祖虽听其言然虚实竟不辨决也十九年奉旨钩考枢密文牒遂拜御史中丞奏言台臣于国家政事得失生民休戚百官邪正虽王公将相亦宜纠察近唯御史得有所言臣以为台官皆当建言庶于国家有补至选用台察官若申中书必有偏徇之弊御史宜从本台选择初用汉人六员今用蒙古十六员相参巡历为宜皆从之二十年复言时政十八事一曰开广言路多选正人番直上前以司喉舌二曰当阿哈玛特擅权台臣莫敢纠其非迨其事败然后接踵随声徒取讥笑宜别加选用三曰枢密院定夺军官赏罚不当听阿哈玛特风旨宜择有声望者为长贰四曰翰苑亦颂阿哈玛特功德宜博访南北耆儒硕望以重此选五曰郝禎耿仁等虽正典刑若是者尚多罪同罚异公论未伸合次第屏除六曰贵游子弟用即显官幼不讲学何以从政得如左丞许衡教国子学则人才辈出七曰今起居注所书不过奏事检目宜择蒙古汉人之厚重者分居其任言动必书以垂法于无穷八曰宪曹无法可守是以奸人无所顾忌宜定律今为一代法九曰近议裁冗官若徒省石贝并一职亦非经久之策宜参众议以定成规十曰官僚无以养廉责其贪则苛乞将诸路大小官有俸者量增无俸者特给十一曰内地百姓流移江南避赋役者已十五万户乞降诏招集复业十二曰凡丞相安图迁转良臣悉为

阿哈玛特摈黜或居散地或在远方并掌拔擢十三曰簿录奸党货财本国家之物不可视为横得遂致滥用宜以之实帑藏供岁计十四曰大都非如上都止备巡幸不应立留守司直易置总管府十五曰中书省右丞二而左丞缺宜改所增右丞置诸左十六曰在外行省不必置丞相平章止设左右丞以下庶几内重不致势均十七曰阿尔哈雅总制兵民子侄姻党分列权要威权不在阿哈玛特下宜罢职理算其官吏亦当量转他所勿使久据荆湖十八曰铨选汇奏贤否莫知自今三品以上必引见而后授官疏人即日命中书行其数事余命与御史大夫伊实特穆尔议行之又言江南盗贼相挺而起皆由拘刷水手与造海船民不聊生激而成变日本之役宜姑止之又江西四省军需宜量民力勿强以土产所无凡给物价与民者必以实召募水手当从其所欲伺民气稍苏我力粗备后谏东征未晚世祖以为不切曰尔所言如射然挽弓虽可观发矢则非是矣彘又言昨差官度量大都州县地方本以革权势兼并之弊初非扰民而近者浮言胥动恐失农时乞降旨省谕又言建昌者多孰是孰否中书宜集议可行者行之不可则明谕言者为便又言各路每岁选取室女亟宜停罢又言宋文思院小口斛出入官粮无所容隐宜颁行皆从之二十一年以劾奏卢世荣不可居相职忤旨罢二十三年加集贤大学士累拜中书右丞奏言僧格当或四年中外诸官多以贿进其昆弟故旧妻族皆授要官美地唯以欺蔽九重腴削百姓为事宜令两省严加考核凡入其赏者皆汰逐之又僧格所设衙门其闲冗之官徒费禄食宜令百司集议汰罢自今调官宜如旧制又大都高赀户多为僧格等所容庇凡百徭役止令贫民当之今宜核实均输有敢如前以贿求容庇者罪之又军站诸户每岁官吏非名取索赋税倍蓰民多流移请自今非奉诏敢私敛民及役军匠者论如法皆从之二十八年复迁御史中丞彘奏行御史台言建宁路总管马谋因捕盗延及平民擄掠多死又俘掠人财迫通处女狱未具会赦如臣等议马谋以非罪杀人不在原例宜明白定罪又言皆行台御史周祚劾尚书省官蒙古岱嘉晖达尼雅斯拉鼎默呼奸赃尼雅斯拉鼎默呼反诬祚以罪遣人告僧格僧格暧昧以闻流祚于鸣达苏妻子家财并没入官祚至和琳遇乱走还僧格又遣诣云南理算钱谷以赎其罪今阅其状词为罪甚微宜复其妻子皆从之二十九年彘又奏尼雅斯拉鼎默呼实都王巨济赏比僧格恣为不法楮币铨选盐课酒税无不更张变乱理算江南积逋期限严急胥卒追逮半于道路民至嫁妻卖女殃及亲邻维扬钱塘受害尤惨无故而殒其生者五百余人近遣舍哩按问悉皆首实请死天下乃知圣天

子仁爱元元而使之至此极者实僧格及其凶党所为也莫不顾食其肉请将此三人从公论罪以谢天下从之又言行台官言去岁僧格既败使臣至自上所者或不持玺书口传谕旨纵释有罪擅籍人家真伪莫辨请自今凡使臣必降玺书省台院诸司必给印文以杜奸欺帝曰何人乃敢尔耶对曰裕噜伊纳克巴延彻尔比尝传旨纵罪人帝悉可其奏又言诸官吏受賕在朝则诣御史台首告在外则诣按察司首告已有成宪自僧格持国受賕者许控诸司故反复牵延事久不境今宜遵前旨诸可无得辄爱从之中书省臣奏请以彧为右丞帝曰崔彧不爱于言惟可使任言责三十年彧言大都民食唯仰客余顷缘官括商船载递诸物致贩鬻者少米价翔踊请勿令有司括船为便从之有宝泉提举张简父子讼彧不法十余事奉旨就辩中书或书简等所告与己宜对者为牍袖之视而后对所告皆无验并系狱简瘦死三十一年成宗即位先是彧得玉玺于故臣扎拉氏之家【按裕宗后及杨桓传并作穆呼哩曾孙硕迪家扎拉即穆呼哩氏也】其文曰受命于天既寿永昌即以上之徽仁裕圣皇后至是皇后手授成宗彧以久任宪台乞迁他职不许曰卿若辞避其谁抗言哉大德元年彧又条陈台宪诸事皆见于施行于是彧居御史台久守正不阿人往往疾之遂以病力辞成宗谕之曰卿勉为朕少留二年加平章政事卒至大元年追封郑国公谥忠肃

△叶李

叶李字太白一字舜玉杭州人补京学生宋景定五年彗出于柳理宗下诏求直言是时世祖南伐驻师江上宋命贾似道领兵御之世祖班师鄂州围解似道自诡以为己功因复入相益骄肆自颛李与同舍生康棣而下八十三人伏阙上书攻似道似道大怒知书稟出于李嗾甚党临安尹刘良贵诬李僭用金饰斋扁甯漳州宋亡归隐当春山至元十四年世祖命姜卫行台江南且求遗逸以李姓名上初李攻似道书其末有前年之师适有天幸克成厥勋语世祖习闻之每拊掌称叹及是见其姓名大悦即授浙西道儒学提举二十三年征至京师召见披香殿询以治道安出李历陈古帝王成败得失之由世祖首肯命五日一入议事时罢各道儒司李因奏曰臣钦覩先帝诏书当创业时军务繁伙尚招致士类今陛下混一区宇偃武修文政须作养人才以宏治道各道儒学提举及郡教授实风化所系不宜罢请复立提举司专提调学官课诸生讲明治道而上其成才者于太学以备录用凡儒户徭役乞一切蠲免可其奏纳颜判北边诏李庭出师讨之【李庭传作从帝亲征】

而将校多用国人或其亲昵立马相乡语辄释仗不战帝患之李密启曰兵贵奇不贵众

彼既亲昵谁肯尽力臣请用汉军列前步战而联大车
断其后以示死鬪帝用其谋谕将帅师果奏捷二十四年特拜御史中丞兼商议中书省
事固辞许之因叩首谢曰臣今虽不居是职然御史台
天子耳目常行事务可以呈省至若监察御史奏疏西南两台咨禀事关军国利及生民
宜令便宜闻奏各许实封幸甚又曰宪臣以绳愆纠缪
为职苟不自检于击搏何有其有贪恹败度之人宜付法司增条科罪以惩欺罔制曰可
寻授尚书左丞赐大小车各一许乘小车入禁中仍给
扶升殿始定至元钞法 【按辍耕录载叶李入京上书言时相事献至元钞样此样在宋
时尝进呈请以代关子朝廷不能用故复献之世皇
使用铸板云】 又请立太学一日从至柳林奏曰善政不可徒行人才不可骤进必训以
德义摩以诗书使知古圣贤行事方略然后贤良辈出
膏泽下流唐虞三代咸有胄学汉唐明主数幸辟雍匪为观美也乃荐周砥等十人为祭
酒等官凡庙学规制条具以闻帝皆从之时帝欲徙江
南宋宗室及大姓于北方李乘闲言宋已归命其民安于田里今无故闻徙必将疑惧脱
有奸人乘衅而起非国之利也帝悟事遂寝帝欲伐交
趾召李入议李曰遐方远夷得之无益且山路险巘深入敌境万一蹉跌非所以威示远
人也乃止二十五年进平章政事李复力辞许之于是
僧格为尚书丞相颛国政李与之同事莫能匡正会僧格败事颇连及久之以疾得请南
还扬州儒学正李淦上书言叶李本一黥徒受皇帝简
知可为干载一遇而纔近天光即以举僧格为第一事人皆知僧格用羣小之罪而不知
叶李举僧格之罪今虽罢相权刑戮未加天下往往窃
议宜斩叶李以谢天下书闻帝矍然曰叶李廉介刚直朕所素知者宁有是耶召淦诣京
师二十九年李还至临清帝复召为平章政事上表力
辞未几卒李既卒而淦至诏以淦为江阴路教授以旌直言李前后被赐甚多而自奉甚
俭尝戒其子曰吾世业儒甘贫约唯以忠义结主知汝
曹其清慎自持勿增吾过指所赐物曰此终当还官也比卒悉表送官至正八年追封南
阳郡公谥文简

△燕公楠

燕公楠字国材南康建昌人十岁能属文居父丧庐墓三年后以连帅辟五迁至通
判赣州事至元二十二年召至上都奏对称旨世祖赐
名赛音囊嘉特命参大政辞乞补外累除江淮行尚书省事江淮在宋为边陲故多闲田
公楠请置两淮屯田劝导有方田日以垦 【按食货
志元立洪泽南北三屯设万户府以统之事在元二十三年】 二十五年除大司农领八
道劝农营田司事按行郡县劾江西营田使沙布鼎贪

横罢之二十七年拜江淮行省参知政事僧格既败蠹政未尽去民不堪命公楠赴阙极陈其弊请更张以固国本世祖悦会欲易政府大臣以问公楠又问孰可为首相对曰天下人望所属莫若安图问其次曰鄂勒哲可明日拜鄂勒哲为丞相以公楠平章政事固辞改江浙行省参知政事三十年复为大司农得藏匿公私田六万九千八百六十二顷元贞元年进河南行省右丞厘正盐法民便之二年移湖广行省右丞转运司判官唐申家沅州豪横夺民田武昌县尹刘权杀主簿诬系其妻子悉正其罪五年召还卒

△马绍

马绍字子卿济州金乡人从上党张播学丞相安图人侍世祖奏言宜得儒士讲论经史以资见闻平章张启元以绍应诏授左右司都事出知单州历同知和州路总管府事至元十九年割隆兴为东宫分地皇太子选署总管召至京为刑部尚书二十四年分立尚书省擢拜参知政事时更印至元钞前信州三务提举杜璠言其非便僧格怒曰杜璠何人敢沮吾钞法耶欲当以重罪绍从容言曰国家导人使言言可采用之不可采亦不之罪今重罪蟠岂不与诏书违戾乎乃得免俄为尚书左丞亲王戍边其士卒有过支廩米者有司以闻帝欲究问加罪绍言方边庭用兵罪之惧失将士心所支踰数者当嗣年之数可也制可海都作乱其民来归者七十余万散居云朔闲僧格议徙之内地就食绍持不可僧格怒曰马左丞爱惜汉人欲令馁死此辈耶绍徐曰南土地燠北人居之虑生疾疫若恐馁死曷若计口给羊马之资俾还本土则未归者孰不欣慕言有异同丞相何以怒为宜取圣裁乃如绍言以闻帝曰马秀才言是也僧格集诸路总管三十人导之入见欲以趣办财赋之多寡为殿最帝曰财赋办集非民力困竭必不能然朕之府库岂少此哉绍退至省追录圣训付太史书之议增盐课绍独力争山东课不可增议增赋绍曰苟不节浮费虽重敛数倍亦不足也事遂寝都城种苜蓿地分给居民权势因取为己有以一区授绍绍不取僧格欲奏请赐之绍辞曰绍以非才居政府恒忧不能塞责讵敢徼非分之福以速罪戾僧格既败叹曰使吾早信马左丞之言必不至今日后检阅赂僧格籍独无绍名帝曰马左丞忠洁可尚改中书左丞居再岁移疾还家元贞初迁右丞行江浙省事大德三年移河南省明年卒

△姚燧

姚燧字端甫翰林学士承旨枢之从子也生三岁而孤枢隐居苏门谓燧蒙暗教督之甚急燧不能堪扬旻止之曰燧令器也长自有成尔

何急为且许醮以女年十八受学许衡于时未尝为文视流辈所作惟见其不如古人心弗是也二十四始读韩退之文试习为人之谓有作者风稍于正于衡衡亦尝其辞且戒之曰文章固发闻士子之利器然先有能一世之名将何以应人之见役者哉至元七年衡以国子祭酒教胄奏召旧弟子十二人燧自太原驿致馆下初为秦王府文学未几兼提举陕西等路学校十二年以秦王命安辑甫蜀明年汉嘉新附入谕其民又奉命招王立于合州又明年抚循夔府凡三使蜀皆称职十七年除陕西汉中道提刑按察司副使录囚延安逮系诖误皆纵释之人服其明决调山南湖北道兴学振民孜孜如弗及元贞初以翰林学士总修世祖实录书成大德五年授江东廉访使移病太平至大元年仁宗居藩邸开宫师府燧年已七十遣正字吕洙如汉征四皓故事起燧炙太子宾客寻拜太子少傅武宗面谕燧燧拜辞谢曰昔臣伯父枢尝除是官尚不敢拜臣何敢受改翰林学士承旨知制诰兼修国史四年得告南归卒于家谥曰文燧先生苏门山时读通鉴纲目尝病国统散于逐年不能一览而得其离合之槩至告病江东着国统离合表年经而国纬之如史记诸表将附朱熹凡例后复取徽建二本校讎得三误焉序于表首燧之学有得于许衡由穷理致知反躬实践为世名儒为文闳肆该洽豪而不宕刚而不厉春容盛大有西汉风当时孝子顺孙欲发挥其先德必得燧文始可传信时高丽沈阳王父子连姻帝室倾赀结朝臣一日欲求燧诗文靳不与至奉旨乃与之王赠谢币帛金玉名画五十筐燧实时分散诸属官及史胥侍从留金银付翰林院为公用器人问之燧曰彼藩邦小国唯以货利为重吾能轻之使知大朝不以是为意燧颇恃才轻视赵孟俯元明善辈所著有牧庵文集五十卷行于世子三坝圻城【按辍耕录燧在中台时御史大夫谓曰天子以汝贤故擢居耳目之官今且岁余兴利除害事未有片言相及惟务举荐何耶曰某所荐百余人皆经世才并能上裨圣治则某之报效亦勤矣何屑屑兴利除害为本传不言燧为中台御史亦不详荐举事谨识】

△郭贯

郭贯字安道保定人以才行见推由中书掾调济南路经历至元二十七年拜监察御史承诏分江北沿淮草地劾淮南宣慰使昂吉尔父子专权久不迁调蠹政害民状不报大德初改金湖北道事言今四省军马以数万计征八百媳妇深入炎瘴不毛之地无益于国不听累迁河东廉访副使至大二年仁宗至五台山贯进见因问廉访使穆尔济达何以有善政左右对曰皆副使郭贯之教也厚赐之及即位除礼部尚书

帝亲书其官阶以授有司皇庆二年出为淮西廉访使建言宜置常平仓考校各路农事延佑二年召拜中书参知政事五年除太子詹事贯言皇太子受金宝已三年宜行册礼又辅导之官早宜选置从之六年加太子宾客谒告还家至治元年复起为集贤大学士至顺二年卒封蔡国公谥文宪贯博学精于篆籀当世册宝碑额多出其手云

△瓜尔佳之奇

瓜尔佳之奇字士常其先出女真瓜尔佳部少孤舅氏携之至东平因受业于康晔授济宁教授大兵南伐辟授行省左右司都事时行省官与中书权臣有隙特遣使核其财用之奇职文书亦被按张弘范率其属诣使者言瓜尔佳都事素公清若少有侵渔弘范当与连坐会御史台立擢金江南浙西道提刑按察司事至元十九年召为吏部郎中立陟降澄汰之法着为令二十一年迁左赞善大夫时裕宗为皇太子每进见必赐坐顾遇甚优有欲以均输法益国赋者虑提刑按察司挠其事请并入转运司诏集羣臣议之奇言按察司控制诸路发摘奸伏责任匪轻若使理财则心劳事冗将弥缝自救之不暇又安能绳纠他人哉并之弗便事遂寝又与谕德李谦条具时政十事上之皇太子一曰正心二曰睦亲三曰崇俭四曰几谏五曰戢兵六曰亲贤【原史脱第七条无可据补姑仍其阙】八曰尚友九曰定律十曰正名除翰林直学士改侍御史二十五年拜吏部尚书明年卒之奇虑精识审为政卓卓可称虽老于吏学者自以为不及而为文章尤简严有法多传于世

△刘赓

刘赓字熙载刑国公肃之孙也赓幼有文名至元十三年以荐者授国史院编修官累除监察御史时御史中丞崔彧好盛气待人他御史拜谒或平受之见赓则待以上客礼大德二年迁翰林直学士【按续纲目大德二年秋七月大雨河决漂归德属县田庐禾稼诏遣御史刘赓等塞之自蒲口首事凡筑九十六所止事本传不载谨附识】六年奉使宣抚陕西至大二年迁翰林学士承旨兼国子祭酒国学故事伴读生以次出补吏莫不争先一生亲老且贫同舍生有名在前者因博士以告曰我齿颇少请让之赓曰让德之恭也从其让别为书荐其人朝廷反先用之自是六馆之士皆知让之为美德也皇庆元年加集贤大学士延佑闲复入翰林为承旨泰定元年会集议上尊号赓独抗言其不可事遂已天历元年卒赓久典文翰当时大制作多出其手以耆年宿德为朝廷所推重云

△耶律有尚

耶律有尚字伯强辽东丹王十世孙也祖父在金世尝官东平因家焉有尚受业许

衡之门号称高第弟子至元八年衡徐国子祭酒以教
国人子弟乃奏门人十二人为斋长以伴读有尚其一也十年衡告归朝廷以有尚等为
助教嗣领学事居久之除秘书监丞出知蓟州为政宽
简得民情裕宗在东宫召为詹事院长史自有尚既去而国学事颇废廷议谓非有尚无
足继衡者乃除国子司业时学馆未建师弟子皆寓居
民屋有尚屡以为言二十四年朝廷大起学舍始立国子监增广弟子员迁有尚国子祭
酒儒风为之丕振二十七年以亲老辞大德改元复召
为国子祭酒寻除集贤学士兼其职八年葬父还乡里会朝廷思用老儒以安车召之累
辞不允复起为昭文馆大学士兼国子祭酒有尚前后
五居国学其立教以义理为本而省察必真切以恭敬为先而践履必端慤凡文词小技
缀缉雕刻足以破裂圣人之道者皆屏黜之其教法壹
遵衡旧而勤谨有加焉身为学者师表数十年海内宗之有尚既以年老力请还家朝廷
复颁楮币七千缗即其家赐之卒谥文正

△郝天挺

郝天挺字继先出都噜别族父哈尚巴图尔太宗宪宗时累着武功为河东五路军
民万户天挺英爽刚直有志略受业于遣山元好问以
勋臣子召见世祖嘉其容止俾执文字备宿卫东宫裕宗遇之甚厚及建省云南选官属
遂除参议云南行尚书省事累迁中书右丞与宰相论
事有不合辄面斥之成宗崩仁宗以太后命首定大难及武宗还自朔方入正大统定策
之际天挺与有力焉仁宗临御收召故老天挺与少保
闾张等十人共议大政革尚书省之弊拜御史中丞首陈纪纲之要以猎为喻曰御史职
在击奸犹鹰扬焉禽之弱者易获也其力大者必借人
力不然不惟失其前禽仍或有伤鹰之患矣帝嘉其言由是风纪大振又上疏陈七事曰
世名爵抑浮费止括田久任使减佛事奖农务本励学
养士诏中书省举行之寻出为河南省平章政事时河南王布琳济达为丞相待以师礼
政化大行皇庆二年卒追封冀国公谥文定天挺尝修
云南实录五卷又注唐人鼓吹集十卷子佑字君辅小字图鲁卜台由宿卫补官仁宗时
拜殿中侍御史以廉直著名 【按一统志天挺孙忠
恕翰林待制献所著无逸图命总裁三史书成归隐】

△张孔孙

张孔孙字梦符其先出辽之乌舍部为金所并迁隆安父之纯东平万户府参议孔
孙以文学名辟万户府议事官中统三年徐世隆奏帝
宜增设宫县及文武二舞以备大典因诏世隆为太常卿孔孙以奉礼耶为之副以董乐
师肄成献之京师廉希宪居政府辟为掾迁南京总管

府判官时方议下襄樊朝廷急用兵孔孙谓今越境私贩坐罪者动以千数宜开自新之条俾得效战赎死朝论采之厯同知保定路总管府事俄拜侍御史行御史台事至元二十二年安图复入相【按安图传复拜为尚书右丞相在至元二十一年】言于帝曰阿哈玛特颀政十年亲故迎合者往往骤进据显位独刘宣张孔孙二人恬守故常终始如一乃除宣吏部尚书孔孙礼部尚书寻擢燕南按察使亡何除大名路总管兼府尹大兴学校有献故河堤三百余里于太后者即上章谓宜悉还细民从之召拜集贤大学士丞相鄂勒哲卒孔孙与陈天祥上封事荐和尔果斯可为相会地震诏问弭灾之道孔孙条对八事其略曰蛮夷诸国不可穷兵远讨滥官放谴不可复加任用赏善罚恶不可数赐赦宥献鬻宝货不可不加禁绝供佛无益不可虚费财用上下豪侈不可不从金约宫冗吏繁不可不为裁减太庙神主不可不备祭享帝悉嘉纳之又累疏言凡七十致仕者宜加一官丁忧服阙者宜待起复宿卫之冒滥者必当革州郡之职必当遴选久任达噜噶齐宜量加迁转又宜增给官吏俸禄修建京师庙学设国子生徒给赐曲阜孔庙洒扫户相位宜参用儒臣不可专任文吏故相安图巴延和尔果斯廉希宪等各宜赠谥久之致仕大德十一年卒孔孙素以文学名且善琴工画山水竹石而骑射尤精及其立朝说言嘉论有可观者士论服之

钦定续通志卷四百八十六

●钦定续通志卷四百八十七 列传二百八十七

列传

元【四十一】

○元四十一

特尔格齐	达春	塔喇齐	塔海特穆尔	科
尔结	呼图克	布尔噶苏		
伊勒济呼济哈雅	阿都齐	明安	呼鲁苏	
实喇巴图尔	彻尔	奇尔		
台 托音纳尔	和尚	伊克台伊尔丹	托里哈雅	
特尔格齐				
达春				
塔喇齐				
塔海特穆尔				
科尔结				

呼图克
布尔噶苏
伊勒济呼济哈雅
阿都齐
明安
呼噜苏
实喇巴图尔
彻尔
奇尔台
托音纳尔
和尚
伊克台伊尔丹
托里哈雅
△特尔格齐

特尔格齐高昌人世居五城后徙京师祖达实有谋略太祖西征高昌国达实劝其主执贄称臣以安国国太祖班师诸王言于帝曰达实之子伊拉齐骁勇善战每思效顺而未有有机太祖即诏给驿马迎与俱来甚器重之己卯从太祖西征以功得兼长四环卫之笔且齐壬辰从国兵讨金战功最多特尔格齐甚长子也沈鸞有才尝有拥兵叛者特尔格齐率族人与战于鱼儿冻时军兴簿檄繁急特尔格齐一以其国书识之无遗失者至元中擢德安府达噜噶齐适土人蔡知府者以众叛特尔格齐率众先登山被数创遂平之主将怒将屠其城特尔格齐劝止之城遂得全累官至婺州路达噜噶齐所在咸着政绩大德三年【原作大德己亥考元史惟中统前以甲子纪年大德己亥乃成宗三年也今改归画一】卒赠荣国公谥简肃子三人雅尔坚雅里尝使河南适汴郑大疫雅尔坚雅里命所在村郭构室庐备药医以畜病者由是军民全活者众为湖州路达噜噶齐卒于官伊呼珠同知安陆府事巴扎同知宣政院事孙九人海寿雅尔坚雅里子也世祖朝累官杭州路达噜噶齐抚民有惠卒封范阳郡侯谥惠敏

△达春

达春保喇子也善骑射至元元年入侍世祖奏对多称旨四年给以察罕食邑赋税之半七年授山东统军使镇莒密胶沂郯邳宿即墨等城宋人不敢犯九年改金枢密院事数将兵攻下濒淮堡栅略地涟海降宋人蒋德胜十年改金淮西等处行枢密院事城正阳以扼淮海诸州

兵宋陈奕率兵挠其役达春选精锐日十数战奕遁去卒城正阳宋复造战舰于六安欲攻正阳达春率骑兵焚其舰又破宋兵于横河口十一年授淮西行省参知政事帅师攻安豊庐寿等州俘生口万余宋夏贵帅舟师十万围正阳帝遣达春往救之遇宋兵攻颍乃急徙民入城伏兵以待是夜宋人焚北阙达春率众从暗中射之宋军退至沙河大破之遂长驱直走正阳与右丞安塔哈分帅锐师渡惟至中流皆殊恐战宋军大溃遂解正阳之围十二年从丞相巴延与宋军战宋军大溃其臣贾似道奔扬州遂分兵四出克池州取太平顺流东下至建康丹徒江阴常州皆望风迎降时扬州未附谍告扬州人将夜袭丹徒达春设伏以待扬州军果夜至扼西津邀击之杀获甚众授淮东左副都元帅十三年参知政事领淮西行中书省事抚疮痍备奸宄境内帖然俄迁江西都元帅征广东所至溪峒纳款广东遂平十四年为江西宣慰使宋益王昷广王昺走保岭海复改江西宣慰使为行中书省授达春中书左丞行中书省事十五年帝命张弘范李恒总兵进讨达春留后以供军费瑞州张公明愬左丞吕师夔谋为不轨达春廉知其诬乃斩公明而后闻帝是之十七年入覲以疾卒于京师时年三十七妻默埒氏以贞节称二子长咱雅袭次宾咱雅仕至征东行省左丞妻伯雅尔泰安郡武穆王博啰罕之女亦有贤行

△塔喇齐

塔喇齐喀喇人其父伊里布太祖时以武功授帐前总校奉旨南征至洛阳遂家焉塔喇齐幼颖异好读书尤善骑射袭父职参佐戎幕调度军马动合事宜行省奏充断事官时南北民户主客良贱杂揉蒙古军牧马草地互相占据命塔喇齐至其地理之军民各得其所世祖知其能俾领蒙古军围樊襄所向摧陷从丞相巴延渡汀驻临安寻命分路追击宋二王塔喇齐领军至福建所过秋毫无犯降者如归迁福建招讨使时陈吊眼作乱陷漳州塔喇齐生擒之戮于市余党悉平继从征交趾击败黄圣许等积功进广西两江道宣慰使都元帅贺州盗起复讨平之改福建宣慰使又改淞东金疮发卒追封临安郡公子二人托克托穆尔邵武汀州新军万户府达噜噶齐万努广西宣慰使都元帅

△塔海特穆尔

塔海特穆尔塔塔尔岱人其先在太祖时从攻陕右征河西灭金皆有功曾祖特穆尔克从都元帅塔海干布征蜀死于兴元祖扎拉岱嗣扎拉岱卒父拜达勒尚幼从祖扎里远珠相继袭职扎里从征蜀破宋军于巴州达珠以西川行枢密院檄领兵救碉门大败宋军拜达勒既长以父官从行省伊苏岱尔征建都死军中塔海特穆尔袭父职初从行院呼敦围嘉定嘉

定降进围重庆败守将张珪兵至元十五年 【原传
脱至元二字今据世祖纪增】 破宋军于白水江升管军总管从征亦奚不薛又从征都
掌蛮皆为前锋杀获甚众九溪蛮散猫大盘蛮尚木的
世用等叛从行省奇尔济苏讨擒之伊苏岱尔雅尔哈率兵讨乌蒙蛮其酋长阿蒙奔麻
布蛮地塔海特穆尔追至山箐中擒之以归二十六年
又从伊苏岱尔西征不知所终

△科尔结

科尔结阿苏特氏宪宗时与父布达喇实俱直宿卫世祖时科尔结以百户从元帅
阿珠伐宋有功命充大宗王府伊克扎尔古齐领阿苏
军从征海都有功师还成宗命宣抚湖广等处至大元年武宗命充左卫阿苏亲军都指
挥使四年卒子特们德尔从征纳颜有功袭父职子实
沙事武宗仁宗直宿卫天历元年从战宜兴却敌兵一十三处以功授左阿苏卫都指挥
使

△呼图克

呼图克蒙古乌噜克台氏父巴罕事太祖备宿卫至太宗时为镇西行省领蒙古汉
军从攻河中潼关河南岁乙未授左手万户从都元帅
塔海干布出征卒军中宪宗命呼图克将其军从都元帅达勒达攻巴州又从都元帅耨
埒渡马湖江破宋叙州兵于老君山下中统元年宋将
以舟师犯成都新津呼图克击败之至元元年授蒙古汉军总管二年从都元帅伯嘉努
败宋将夏贵于怀安五年卒子扎呼岱时在宿卫弟呼
尔敦达哩袭其职呼尔敦达哩卒扎呼岱嗣为千户从行枢密院围重庆败守将张珪军
进围泸州登城与泸兵搏战死子阿都齐嗣

△布尔噶苏

布尔噶苏托克托台氏世祖时直宿卫扈驾征哈喇章还帝驻蹕高阜见河北有驾
舟来者顾左右曰是贼也柰何布尔噶苏曰臣请御之
即解衣径渡挥戈刎死舟尾二人拏其舟就岸舟中之人仓皇失措帝命左右悉擒之哈
喇章平以功论赏子塔塔古尔从征伯克有功由宿卫
升齐齐哈尔拉袞千户所达噜噶齐从征叛王纳颜额布根等擒额布根收其所管钦察
之民武宗时进元帅卒

△伊勒济呼济哈雅

伊勒济呼济哈雅辉和尔人从宪宗征钓鱼山奉命修曲药以疗师疫继从皇孙蒙
格图征云南战数胜中统三年呼图克暨达哩叛领兵
讨平之至元十二年授陇右河西道按察使乌鲁斯和尔实雅谋乱从皇子安西王 【按
原传上作太子蒙格图此作皇太子安西王考世系

表蒙格图为太宗之孙安西王为世祖第三子皆未尝立为太子今并改正】 往镇之十五年与布色岱尔图噜二十年进四川等处行中书省
参知政事寻以疾归秦州大德八年卒至顺中追封威宁郡公谥襄靖

△阿都齐

阿都齐阿苏特氏父哈噶斯宪宗时为万户阿都齐扈从宪宗南征与敌兵战于剑州以功受赏额埒布格叛从伊聂济等征之复有功世
祖中统三年从征李璫身二十余战累功授千户丞相巴延平章阿珠之平江南也阿都齐皆在行中着战功歿于陈帝怜之赐镇巢民一千五百余户命其子拜达勒袭职拜达勒从伯奇里克默色北征以功进后卫都指挥使兼右阿苏卫事将阿苏军往征巴实伯里累战累捷子乌鲁斯天历元年谕降上都军为本卫都指挥使

△明安

明安喀喇氏至元十三年世祖诏民之荡析离居及僧道漏籍诸色人不当差徭者充桂齐令明安领之克勤于事二十年授中卫亲军都
指挥使明年领桂齐军北征又明年立桂齐亲军都指挥使司命为本卫达噜噶齐寻奉旨领蒙古军北征与海都军战有功二十六年巴齐尔
叛劫取官站托克托和斯塔喇海等明安率众追击悉还之至杭爱强民库库台锡里德克台等率众作乱又击败之二十七年博索玛勒掌珊
伯奇实克绰绰班驸马乌哲台多罗台乌兰岱尔塔里雅齐等掠四集赛牛马畜牧及劫默呼太子实保齐并鄂托克本布各投下民殆尽明安
追击于昂吉实保齐之城悉还所掠以归二十九年巴实伯里哈实盗起奉诏以兵讨之明安设方略与战大败之大德二年复将兵北征与海
都战七年歿于军子曰特尔格台曰布呼齐特尔格台终平章政事子曰布延呼喇桂齐亲军都指挥使司达噜噶齐次沙卜珠初直宿卫累升
殿中卫亲军都指挥使司事天历元年从丞相雅克特穆尔御敌檀州等处又率其家人与辽军战却其军俘八十四人以归布埒齐积官太尉
子桑乌逊中卫亲军都指挥使

△呼噜苏

呼噜苏巴哩勒都氏曾祖博勒和罕扎事太祖从平诸国充巴勒喇实千户以其军与达实衮等战重伤坠马帝亲勒兵救之升万户俾直
宿卫祖苏尔台年十五以勇略称从宪宗定钦察为千户领兵下西番从世祖伐宋败宋兵于亳州父昂吉尔岱初为军器监官从世祖征额呼
布格有功俄奉使西域籍地产悉得其实帝方欲大用之而卒呼噜苏初直宿卫后以千户从征纳颜冲击敌营身被三十三创以功闻世祖命

领太府监从皇子库库楚出征还留镇军中后从成宗与海都都勒斡战有功成宗命为翰林承旨俄改万户与叛王乌鲁斯彻伯尔等战以功授司徒子雅克布琳初奉兴圣太后旨充千户俄改万户代父职寻罢归所受印符于有司仍直宿卫致和元年在上都谋迎文宗会同事者见执乃率其属奔还大都特命为通政院使天历元年同丞相雅克特穆尔败旺沁等兵于红桥又战于白浮又战于昌平东又战于石槽帝嘉其功拜知枢密院事

△实喇巴图尔

实喇巴图尔阿苏特氏父伊勒达穆宪宗时领阿苏特十人入觐充都都齐从世祖至哈喇之地战数胜后以金疮发卒实别巴图尔至元十一年【原误作二十一年今改正】从巴延南征有功仍充阿都齐二十四年管阿苏军千户纳颜叛从诸王和约尔往征之力战有功二十五年进尚乘寺少卿征吉尔丹等败之成宗嘉其功益军二千命讨叛王托克托擒之大德六年卒子诺海齐袭

△彻尔

彻尔阿苏特氏父拜哲伯在宪宗时从攻钓鱼山以功受赏彻尔事世祖充和尔齐从征海都奋勇击其前锋后从征杭爱获其牛马畜牧悉以给军食帝嘉之成宗时盗据博罗塔拉地命将兵讨之获三千余人诛其酋长至大二年授左阿苏卫佾事皇庆二年从湘宁王北征亦有功子实勒们直宿卫致和元年从知院托克托穆尔至潮河川获鄂勒哲巴图尔阿达奇等十二人复于宜兴遇实喇柰玛台等迎战奋戈击死二人天历元年从击图们岱尔杀其四人从战蓟州杀其四人又追杀十二人于檀子山以功授左卫阿苏亲军都指挥使司佾事

△奇尔台

奇尔台察克台氏至元中【按世祖纪及托克托呼传至元十四年锡里济叛二十四年纳颜叛原文统作二十四年误今改正】为钦察卫百户从托克托呼征叛王锡里济及纳颜有功升千户从征呼喇珠战于阿勒台之地元贞二年以疾卒子哈扎尔齐袭职从绰和尔与哈当阿战有功大德五年从战杭爱从武宗亲征哈喇岱复从绰和尔征巴拜布琳为前锋皇庆二年授千户明宗居潜邸延佑四年命从西征与阿穆尔特穆尔战于实别塔拉默色之地复有功天历二年授同知大都督府事卒

△托音纳尔

托音纳尔塔塔喇氏世祖时从征纳颜有功大德七年授钦察卫亲军千户所达噶噶齐八年改太仆少卿至治中累官至通政使致和元

年分院上都为都尔苏所杀文宗即位追封冀国公谥忠景子鼎通袭父职济尔噶朗积官通政院使

△和尚

和尚蒙古柰曼台氏祖海苏克实勒们千户所蒙古军百户伯父乌鲁斯布哈初充蒙古军五十户至元七年从南征以功命权百户又从攻樊城攻新城攻鄂攻处州屡立战功二十五年授后卫亲军百户卒父察尔奇袭察尔奇卒和尚袭至大三年进后卫亲军副千户延佑三年江西宁都寇起从元帅奇珠讨之生擒贼首诛之致和元年西安王以兵讨都尔苏命从丞相雅克特穆尔擒额卜德呼勒分兵备御天历元年从战通州夺红桥又战于白浮战于昌平栗园战于石槽又从击图们岱尔于檀州所向皆有功命领八卫把总金鼓都镇抚司事

△伊克台伊尔丹

伊克台伊尔丹字太初回回氏父伊斯玛音仕至大都南北两城兵马都指挥使伊克台伊尔丹幼颖悟嗜学读书过目不忘尤工其国字语初为中书掾积官至刑部员外郎四方所上狱反复披阅多所平反寻升中书右司郎中尝与同列议狱不合曰公等读律不能通变譬之医者熟于方论而不切脉于疾奚益哉识者服为名言大德八年肆赦廷议官吏受赅者不预伊克台伊尔丹曰恩如雨露万物均被赃吏固可嫉比之盗贼则有闲宥盗而不宥吏何耶邢部尝有狱事上谏失实丞相将谴右司主者伊克台伊尔丹初未尝署其案至是窃署其名于下或诘之答曰吾偶不署此案耳岂有与诸君同事而独幸免哉丞相闻而贤之同列因获免迁左司郎中时左司阙都事平章梁温都尔谓曰公当以所知举遂以王毅李迪为言一时舆论莫不称允又尝论朝士如王仁节贾元播高彦敬敬威卿李清臣辈可大用时诸公处下僚后皆如其言迁翰林侍讲学士知制诰兼修国史转集贤大学士未几除江东建康道肃政廉访使监宪一年赃吏削迹至大初立尚书省复改立中书省两拜参议省事皆以疾辞延佑元年卒

△托里哈雅

托里哈雅辉和尔氏世居巴实伯里地曾祖库克布色埒齐当太祖西征导其主伊都呼迎降帝欲官之辞以不敏祖巴喇珠始徙真定仕至帅府镇抚富而乐施人称为长者父齐哩克齐性纯正知读书托里哈雅幼嗜学警敏绝人喜从文士游由中书宣使出为宁晋主簿改隆平县达噜噶齐均赋兴学劝农平讼桥梁水防备荒之政无一不举迁监察御史时江西胡参政杀其弟讼久不决托里哈雅一讯竟伏其辜出金

燕南道肃政廉访司事务存大体不事苛察在任六年黜污吏百四十有奇召为户部郎中仁宗在东宫知其嗜学出秘府经籍及圣贤图像以
赐时人荣之母霍氏卒哀毁骨立起为吏部尚书量能叙爵以平允称改礼部尚书领会通馆事进荆湖北道宣慰使适峡人艰食发廩振之而
后闻朝议黜之至治三年迁淮东宣慰使卒于广陵追封恒山郡公弟观音努廉明材干亦仕至清显云

钦定续通志卷四百八十七

●钦定续通志卷四百八十八 列传二百八十八

列传

元 【四十二】

○元四十二

哈喇哈斯

阿实克布哈

拜珠

察罕

齐

苏

哈喇哈斯

阿实克布哈

拜珠

察罕

齐苏

△哈喇哈斯

哈喇哈斯威喇诺尔氏曾祖奇尔实勒始事王汗托果琳王汗与太祖约为兄弟及太祖得众阴忌之谋害太祖奇尔实勒潜以其谋来告太祖与二十余人遁去诸部多归之还攻灭王汗并其众擢奇尔实勒为千户赐号达尔罕从平河西西域诸国祖巴哩察太宗时从太弟睿宗攻河南取汴蔡灭金赐顺德以为分邑父囊嘉特从宪宗伐蜀卒于军哈喇哈斯善骑射工国书又雅重儒术至元九年世祖命掌宿卫袭号达尔罕自是人称达尔罕而不名【按刘敏中撰勋德碑云从世祖北巡平宗王乱率三百骑猝与敌遇整骑突出敌背连彀矢殪数人敌披靡遁帝壮之本传不载】二十二年拜大宗正用法平允审录冤滞所活数百人二十八年拜湖广行省平章政事时江湖闲多盗至则发卒悉擒诛之道途始无梗初枢密置行院于各省分兵民为二奸人植党自蔽后因入覲极陈其不便帝罢之三十年平章刘国杰将兵征交趾哈喇哈斯戒将吏无扰民军中肃然俄有旨发湖湘富民屯田广西以图交趾哈喇哈斯密遣使奏止之民皆感悦及广西元帅府请募南丹五千户屯田事上行省哈喇哈斯曰此土著之民诚为便之即命度地立为五屯统以屯长分牛种

农具与之大德二年入朝上都拜江浙行省左丞相视政七日征拜中书左丞相一以节用爱民为务有大政事必引儒臣杂议奏建庙学选名儒为学官采近臣子弟入学又集羣议建南郊为一代定制五年同列有以云南行省左丞刘深计倡议请征八百媳妇国哈喇哈斯言山峽卜夷可谕之使来不足以烦中国不听发兵二万命深将以往师次顺元蛇节举兵围之穷谷事闻遣平章刘国杰往援擒斩蛇节士卒存者纔十一二讫无成功帝始悔不用其言七年进中书右丞相精选守令定官吏赃罪十二章及丁忧婚聘盗贼等制禁献户及山泽之利每车驾幸上都必令留守京师时帝弗豫制出中宫羣邪赏附哈喇哈斯以身匡之 【按布尔鲁罕后传云成宗多疾后居中用事信任相臣哈喇哈斯与此互异】 天下晏然十年加开府仪同三司监修国史置僚属十一年成宗崩时武宗抚军北边仁宗侍太后在怀庆诸奸臣谋断北道请成后垂帘听政立安西王阿南达哈喇哈斯密遣使北迎武宗南迎仁宗悉收京城百司符印封府库称疾卧阙下文书皆不署众欲害之未敢发及仁宗至近郊众犹未知三月朔列牒请署后决以三月三日御殿听政乃立署之众大喜迎仁宗入执左丞相阿固台及安西王阿南达等就诛内难悉平武宗至自北即皇帝位拜太傅录军国重事仍总百揆以其子托欢入侍初仁宗之入也阿固台有勇力人莫敢近诸王图喇实手缚之以功封越王以庆元路为其食邑哈喇哈斯谓非祖宗之制力争之帝不听图喇因譖其兴安西王通谋由是罢相诏以太傅右丞相行和林省事至镇斩为盗者一人分遣使者赈恤降户度地置困仓积谷以待来者浚古渠溉田数千顷治屯田教部落杂耕其闲北边大治至大元年卒诏归葬昌平追封顺德王谥忠献子托欢由太子宾客拜御史中丞袭号达尔罕累官左丞相重原有父风喜读书为政不尚苛暴致和元年卒于官

△阿实克布哈

阿实克布哈喀喇国王族也初太祖拔喀喇其祖母臧密古玛尔氏新寡有二子曰库鲁克雅雅皆幼而国乱家破无所依遂越数国至京师时太祖已崩太宗立深异之命治邸舍具廩饩以居焉库鲁克无子雅雅后封康国王生六子阿实克布哈最贤年十四入侍世祖世祖赐士田给奴隶使居兴和之天成至元二十四年纳颜叛诸王诺延等皆应之帝问计对曰先抚安诸王乃行天讨则叛者势自孤矣帝曰善即使北说诺延诺延悦于是诸王之谋皆解帝乃议亲征命征兵辽阳以千户帅实保齐之众从行遂平纳颜三十年海都叛成宗以皇孙抚军于北阿

实布克哈从行踰金山战杭爱有功成宗即位会大宗正扎尔古齐都尔苏以赃污闻诏鞫问之伏罪就命代之有诉朱清张瑄阴私既抵罪帝遣兵马都指挥使呼喇珠籍其家以受贿诛更命阿实克布哈往具以实闻命兼两城兵马都指挥使事武宗时为怀宁王总军漠北问材可大用者即以母弟托克托对遂命从行后果为名臣成宗崩安西王阿南达乘闲谋继大统成后及丞相阿固台诸王穆尔特穆尔皆阴为之助时武宗犹在北边太后及仁宗亦在怀孟未至适武宗遣托克托计事京师丞相哈喇哈斯令急还报武宗而成后已密谕通政使济尔噶朗止其驿马阿实克布哈知事急与同知通政院事察纳谋作先日署文书给马去济尔噶朗闻托克托已去诘吏阅案牒乃止太后及仁宗既至京师安西王谋以三月三日伪贺仁宗千秋节因以举事阿实克布哈言于哈喇哈喇请先发制人乃前二日白仁宗诈称武宗遣使召安西王计事至即执送上都尽诛阿固台以下诸奸臣与哈喇哈斯皆居禁中仁宗以太子监国遣使北迎武宗而武宗迟回不进太后曰非阿实克布哈往不可乃往至野马川见武宗备道两宫音及陈安西王谋变始末且言太子监国所以备他变臣万死保其无他武宗悦拜中书平章政事军国大事并听裁决因奏平内难之有功者音扎噶以下十人为兵马指挥及直省舍人诏先还报两宫仁宗即日率羣臣出迎武宗入上都加阿实克布哈特进太尉依前平章政事命与丞相塔斯布哈还京师治安西王党诸连坐囊嘉特等三十余人皆释之尝有近臣蹴踘帝前帝命赐钞十五万贯阿实克布哈顿首言曰以蹴踘受上责则奇技淫巧之人日进而贤者日退矣帝容色日悴乃进曰陛下不思祖宗倚托之重天下仰望之功而惟曲檠是耽姬嫔是好是犹两斧伐孤树未有不颠仆者也陛下纵不自爱如宗社何帝大悦曰非卿孰为朕言因命进酒又顿首谢曰臣方欲陛下节饮而反劝之是臣言不信于陛下也左右皆贺帝得直臣遂进中书右丞相行御史大夫俄复平章政事录军国重事封康国公迁知枢密院事至大二年卒至正元年追封顺宁王谥忠烈子巴扎纳廉直刚敏尝为京尹有诬海商百余人为盗者狱具械送刑部巴扎纳审得其冤状白丞相释之后迁翰林侍读学士

△拜珠

拜珠安图孙心枋岁而孤母教养之稍长宏远程亮有祖风至大二年袭为宿卫长仁宗朝迁太常礼仪院使进大司徒每议大政必求合典故同官或讥之笑曰公试言之国朝何事不依典故同官不能对每退食必延儒士谘

访古今礼乐刑政治乱得失尽日不倦英宗在东宫问宿卫之臣于左右咸称拜珠贤遣便召之辞不往英宗登极拜中书平章政事宣徽使实勒们约苏穆尔妻伊埒扎巴等谋为逆帝密得其事御穆清阁召拜珠谋之对曰此辈擅权乱政谋危社稷宜速施天威以正祖宗法度帝命率卫士擒斩之其赏皆伏诛拜中书左丞相先时近侍传旨以姓名赴中书铨注者六七百员选曹为之壅滞拜珠奏阁之注授一依选格次第吏无容奸刑曹事有可务者宽恕之贪暴不法必不少容至治元年帝欲于元夕张灯设宴时居先帝丧参议张养浩上疏拜珠谓当进谏即袖其疏入奏帝悦而止从幸上都帝欲广行宫亭丽殿奏曰陛下初登大宝不求民瘼遽兴大役恐失民望从之延佑闲朔漠大风雪人民流散以子女鬻人为奴婢拜珠以兴王根本之地宜加赈恤请立宗仁卫命县官赎置卫中以遂生养至元十四年始建太庙于大都至是四十年亲享之礼未暇讲肆拜珠奏曰古云礼乐百年而后兴郊庙祭享此其时矣帝悦预敕有司以亲享太室仪注礼节一遵典故始有事于太庙二年春享始备法驾拜珠摄太尉以从致斋大次行酌献礼百年废典一日复见拜珠率百僚称贺又奏建太庙前殿议行袷禘配享等礼帝悉从之时右丞相特们德尔贪滥谄险屡杀大臣鬻狱卖官广立朋党恶平章王毅右丞高昉因在京诸仓粮储失陷欲奏诛之拜珠密言于帝俱得不死特们德尔复引参知政事张思明为左丞以助己忌拜珠方正谋中害之左右得其情以告拜珠曰大臣协和国之利也今以右相继我我求报之非特吾二人之不幸亦国家之不幸吾知尽吾心而已死生祸福天实鉴之未几奉旨往立忠宪王碑于范阳【按富珠哩翀驻蹕颂云至治元年诏曰丞相安图功在社稷其枚封臣即范阳采地碑之明年帝幸易州驻蹕碑垣之南步自帐殿坐碑右拜珠献万寿觞良久乃去史传从略附识于此】特们德尔久称疾闻拜珠行将出莅省事帝遣苏苏赐之酒且曰卿年老宜自爱待新年入朝未晚遂怏怏而还然其赏犹布列朝中以拜珠故不得大肆其奸百计倾之终不能遂拜珠每以学校政化大源主者不务尽心遂致废弛请令内外官议拯治之有言佛教可治天下者帝问之对曰清净寂灭自治可也若治天下舍仁义则纲常乱矣帝善之奏召张思明诣上都数其罪杖而逐之特们德尔继亦病卒旋进右丞相监修国史帝欲爵以三公恳辞遂不置左相独任以政首荐张珏复平章政事召用致仕老臣优其禄秩日以进贤退不肖为务三年将进仁宗实录先一日诣翰林国史院听读首卷书大德十一年不书右丞相【原文讹作左丞相今依哈喇哈斯传改正】哈喇哈斯定策

功惟书越王图喇勇决从容谓史官曰无右丞相虽百
越王何益立命书之其它未尽善者一一正之人服其识拜珠以海运粮视世祖时顿增
数倍今江南民力困极而京仓充满奏请岁减二十万
石帝遂并特们德尔所增江淮粮免之时特们德尔过恶日彰拜珠以闻帝悟夺其官仆
其碑奸党特克实等甚惧帝在上都夜寐不宁命作佛
事拜珠谏止之既而惧诛者复阴诱羣僧言国当有厄非作佛事而大赦无以禳之拜珠
叱曰尔辈欲图金帛又欲庇有罪耶奸党益惧乃生异
谋晋王伊苏特穆尔时镇北边特克实潜遣人告以逆谋约事成推王为帝王命囚之遣
使赴上都告变未至车驾南还次南坡特克实与齐勒
特穆尔等夜以所领阿苏卫兵为外应杀拜珠遂弑帝于行幄晋王即位特克实等伏诛
诏有司备仪卫百官耆宿前导与拜珠画相于海云寺
大作佛事观者无不泣下拜珠忧国忘家知无不言自入相后振立纪纲修举废坠裁不
急之务杜侥幸之门加惠兵民轻徭薄敛英宗倚之相
与励精图治天下晏然而奸臣畏之卒构祸难母奇■〈口末〉氏年二十二寡居守节
初拜珠为太常礼仪院使吏就第请署字适阅羣戏出
稍后母厉声呵曰官事不治若尔所为岂大人事耶拜珠深自克责一日侍宴醉归母戒
之曰天子试汝量故强汝饮汝当益戒无酣于酒又尝
代祀睿宗原庙归母问曰真定官府待汝若何对曰厚甚母曰彼以天子威灵汝先世勋
德故耳汝何有焉拜珠之贤母之教也后封东平王夫
人泰定初追封拜珠东平王谥忠献子都棱特穆尔

△察罕

察罕西域巴喇勒哈城人父博德纳国兵下西域举族来归事亲王实喇授河东民
赋副总管因居河中猗氏县后徙解州赠芮国公察罕
魁伟颖悟博览强记通诸国字书为行军府鄂啰千户鄂啰齐参政湖广辟为蒙古都万
户府知事鄂啰齐进平章复辟为理问政事悉委裁决
且令诸子受学至元二十四年从镇南王征安南安南世子遣其叔父诣军门自陈无罪
王命察罕数其罪使者辞屈世子举众逃去二十八年
授枢密院经略于几从鄂啰齐移治江西成宗大德四年御史台奏金湖南宪司事中书
省奏为武昌路治中丞相哈喇哈斯曰察罕廉洁固宜
居风宪然武昌大郡非斯人不可竟除武昌广西妖贼高仙道以左道惑众平民诳误者
收千计既败湖广行省命察罕与宪司杂治之鞠得其
情诛首恶数人余悉纵遣之以治最闻擢河南行省郎中成宗崩仁宗自藩邸入诛羣奸
迎武宗于边河南平章囊嘉特荐察罕即驿召至上都
武宗即位立仁宗为皇太子授察罕詹事院判仕金詹事院事至大元年阅户口江南诸

省还进太子府正加昭文馆大学士迁家令仁宗即位
拜中书参知政事总持纲维不屑细务识者谓得大臣体帝尝称其清素前后赏赉甚厚
皇庆元年进平章政事商议中书省事乞归解州立碑
先莹许之居德安白云山别墅以白云自号尝入见帝望见曰白云先生来也甚被宠遇
如此察罕尝译贞观政要以献帝大悦诏缮写徧赐左右且诏译帝范又命译托卜斋延名曰圣武开天纪及纪年纂要太宗平金始末等书俱
付史馆尝以病请告暨还朝入谢帝曰知止不辱今见
其人又语及前古赐姓命氏之事因赐察罕姓白氏察罕天性孝友田宅之在河中者悉
分与诸昆弟昆弟贫来归者复分与田宅奴婢故人多
称长者既致仕优游八年以寿终子外嘉努武冈路总管李嘉努早卒胡士克图高邮府
判官孙九人仕者二人库布哈哈克伞

△齐苏

齐苏西土人曾祖塔布台祖阿勒达尔台父济尔噶台世赠功臣追封王爵齐苏七
岁失怙恃既壮沈密静专为徽仁裕圣皇太后宫臣仁
宗幼时齐苏左右拥翼入则佐视饮食出则抱负游衍鞠躬尽力大德三年武宗总戎北
边九年谗人乱国亡宗侍皇太后之国于怀未几复之
云中连年奔走齐苏无倦色成宗崩仁宗奉太后入朝歼奸党迎武宗即皇帝位仁宗为
皇太子拜齐苏平章政事行大司农累官至太保录军
国重事集贤大学士兼大司农封应国公以疾卒于位子二人长巴图官右丞子耀珠次
拜特穆尔官大都留守兼少府监武卫亲军都指挥使
子鄂勒哲图曼济

钦定续通志卷四百八十八

●钦定续通志卷四百八十九 列传二百八十九

列传

元 【四十三】

○元四十三

张珪 李孟 张养浩 敬俨

张珪

李孟

张养浩

敬俨

△张珪

张珪字公端宏范之子也至元十六年宏范平广海宋礼部侍郎邓光荐将赴水死
宏范救而礼之命珪受学 【按虞集撰珪墓志叙此

于平诸盗之后云军中无事得宋礼部侍郎邓光荐而事与传互异】光荐尝遗一编书目曰相业语珪曰熟读后必赖其用十七年授管军万户镇建康奏曰臣年幼军事重有聂祜者从臣父祖久历行阵幸以副臣帝欢曰求老成自副常儿不知出此厚赐而遣之十九年太平宣徽盗起行省檄珪讨之士卒数为贼败卒有杀民家豕而并伤其主者珪曰此军所以败也斩其卒悉平诸盗【按虞集撰墓志云盗起芜湖宣歙报至珪投衣而起率步卒先定芜湖使言于行省行省因以讨贼属之战屡胜乃遣人抚安余民有他贼将袭珪珪夜伏兵山上明日贼走山伏起蹴堕崖死宣州平贼之寇徽者恃南垆西坑二寨为险固珪先令壮士缘鸟道登其媠背乃奋兵击贼贼出战巢背军下据其壁贼回顾惊愕遁去因追擒其渠送行省戮之徽州亦平谨识】二十九年入朝命为枢密副使太傅伊噜勒诺延言珪尚少姑试以金书果可大用请俟他日帝曰不然是家为国灭金灭宋尽死力者三世矣而可吝此耶拜江淮行枢密副使大德三年遣珪巡行川陕还擢江南行御史台侍御史迁浙西肃政廉访使劾罢郡长吏以下三十余人府史胥徒数百征赃巨万计珪得监司奸利事将发之行省不自安赂近臣妾言珪有厌胜事且沮盐法帝遣官杂治之得行省大小吏欺罔状皆伏罪拜江南行台御史中丞因上疏极言天人之际灾异之故其目有修德行广言路进君子退小人信实必罚减冗官节浮费以法祖宗成宪累数百言劾大官之不法及近侍之荧惑者不报遂谢病归武宗初召为太子詹事辞不就尚书省立中外汹汹中丞久阙仁宗时在东宫曰必欲得真中丞惟张珪可即日召拜仁宗将即位廷臣用皇太后旨行大礼于隆福宫法驾已陈珪言当御大明殿御史大夫止之曰议已定虽百奏无益珪曰未始一奏詎知无益入奏帝悟移仗大明皇庆元年拜枢密副使徽政院使实勒们请以洪城军隶兴圣宫而已领之以上旨移文枢密院众恐惧承命珪执不署事遂不行延佑二年拜中书平章政事请减烦冗还有司以清政务得专修宰相职帝从之教坊使曹耀珠拜礼部尚书珪曰伶人为宗伯何以示后世力谏止之皇太后以中书右丞相特们德尔为太师万户布色参知行省政事珪曰太师论道经邦特们德尔非其人布色无功不得为外执政车驾度居庸实勒们传太后旨召珪切责杖之创其舆归京师明日遂出国门珪子景元掌符玺备宿卫至是以父病笃告归帝惊曰来时卿父无恙景元顿首涕泣不敢言帝不恚进珪大司徒谢病家居至治二年英宗召见于易水上曰四世旧臣朕将畀卿以政珪辞归丞相问曰宰相之体何先珪曰莫先于格君心莫急于广言路是年为集

贤大学士先是特们德尔以私怨杀平章萧拜珠御史中丞杨多尔济上都留守贺巴延大小之臣不能自保会地震风烈珪抗言其冤复拜平章政事英宗遇弑逆党夜入都门坐中书堂矫制等符印珪密疏言贼党罪不可逭皆伏诛【按墓志云特克实等自上都来夜叩国门径入中书执符印众莫知其端久之闻帝暴崩时魏王齐齐克图以亲王监省珪密撼之王意动因曰大统当在晋邸我有密书非王莫敢致王恐事泄珪曰事成王之功事败我家甘蠶粉不敢以言累王于是王遣人达其书晋王即位于龙居河罪人以次就戮帝大驾至珪迎谒帝顾问曰此张平章耶密相之来良合朕意珪拜谢帝自探囊出片纸付翰林承旨库春贝曰此当书之史盖珪密书也本传从略附识于此】特们德尔子索诺木议远流珪曰于法强盗不分首从发冢伤尸者亦死索诺木从弑逆亲斫丞相拜珠臂乃欲活之耶遂伏诛盗窃仁庙神主时参知政事玛喇勒兼领太常礼仪使当迁左丞珪曰以参政迁左丞姑曰叙进而太常奉宗祏不当待罪而反迁官何以谢在天之灵命遂寝泰定元年车驾在上都帝以灾异诏百官集议珪乃与枢密院御史台翰林集贤两院官极论当世得失与左右司员外郎宋文瓚诣上都奏之所言弑逆未诗奸恶未除忠愤未雪冠枉未理政令不信赏罚不公赋役不均财用不节凡数千言辞甚切至不报珪复进曰臣闻日食修德月食修刑应天以实不以文动民以行不以言刑政失平故天象应之惟陛下矜察允臣等议乞悉行之帝终不能从未几珪病增剧诏常见免拜跪赐小车得乘至殿门下帝始开经筵令珪领之珪进翰林学士吴澄等备顾问自是辞位甚力进封蔡国公别刻印以赐二年得旨暂归明年帝遣使召珪期于必见珪至帝曰卿来时民闲如何对曰臣老少宾客不能远知真定保定河闲臣乡里也民饥甚朝廷虽振以金帛惠未及者十五六惟陛下念之帝惻然敕有司毕振拜翰林学士承旨知制诰兼修国史帝察其真病命还家四年卒遗命上蔡国公印珪尝自号曰澹庵子六人

△李孟

李孟字道复潞州上党人父唐厯仕秦蜀因徙居汉中孟生而敏悟七岁能文倜傥有大志博学强记通贯经史一时名人商挺王博文皆折行辈与交至元十四年随父入蜀行省辟为掾不赴后以事至京师中书右丞杨吉达奇之荐于裕宗得召见东宫未及擢用成宗立遣孟往陕西采访先朝圣政备史官纪述孟讨论编次以进时武宗仁宗皆未出阁徽仁裕圣皇后求名儒辅导有荐者曰布衣李孟有宰相才宜令为太子师傅大德元年武宗抚军北方仁宗留宫中孟日陈善言正道多所裨益仁宗时太

后居怀州又如官山孟常单骑以从在怀州四年诚节
如一每进言曰尧舜之道孝悌而已矣今大兄在朔方大母有居外之忧殿下当迎奉意
旨以娱乐之则孝悌之道皆得矣仁宗深纳其言孟特
善论事忠爱恳恻言之不厌而治天下之大经大法深切明白厥后仁宗入清内难敬事
武皇笃孝母后端拱以成太平之功文物典章号为极
盛实孟启之也成宗崩安西王阿南达谋继大统丞相哈喇哈斯密使来告仁宗疑而未
行孟曰支子不嗣世祖典训也今宫车晏驾大太子远
在万里宗庙社稷危疑之秋殿下当奉大母急还宫庭以折奸谋固人心不然国家安危
未可保也仁宗犹豫未决孟复进曰邪谋得成以一纸
书召还则殿下母子且不保岂暇论宗族乎仁宗懼然乃奏太后还大都时哈喇哈斯称
病坚卧仁宗遣孟往问适成后使者络绎视疾孟入长
揖而坐前引其手诊其脉众以为医乃不疑之既得知安西王谋立有曰还告曰事急矣
先发者制人不可不早图之左右皆不能决孟曰羣邪
违弃祖训党附中宫欲立庶子天命人心必皆弗与殿下入造内庭以大义责之则凡知
君臣之义者无不舍彼为殿下用克清宫禁以迎大兄
之至不亦可乎且安西既正位号纵大太子至彼安肯退就藩国必将鬪于国中生民涂
炭宗社危矣危身以及其亲非孝也遗祸难于大兄非
悌也得时弗为非智也临机不断无勇也仗义而动事必万全仁宗曰当以卜决之孟召
卜人语之曰大事待汝而决但言其吉乃入筮遇干三
五皆九立而献卦曰是谓干之睽干刚也睽外也以刚处外乃定内也君子干干行事也
飞龙在天上治也輿曳牛掣其人耐且劓内兑废也厥
宗噬肤往必济也大君外至明相丽也干而不干事乃睽也刚运善断无惑疑也孟曰筮
不违人是谓大同时不可以失仁宗喜振袖而起乃共
扶上马孟及诸臣皆步从入自延春门哈喇哈斯自东掖来就之至殿廊收首谋及同恶
者悉送狱奉御玺北迎武宗中外翕然以定仁宗监国
使孟参知政事孟损益庶务悉中利病远近悦服然特抑绝侥幸羣小多不乐事定言于
仁宗曰执政大臣当自天子亲用今銮輿在道孟未见
颜色不敢冒当重任固辞弗许遂逃去不知所之武宗即位有言于帝曰内难初定时李
孟尝劝皇弟自取帝察其诬弗听仁宗亦不敢复言孟
至大二年仁宗为皇太子尝侍帝石太后内宴饮半忽戚然改容帝顾语曰吾弟不乐何
所思耶仁宗从容起谢曰赖天地祖宗之灵神器有归
然成今日母子兄弟之欢者李道复之功为多适有所思不自知其见于色也帝感其言
命搜访之得之许昌陞山召见于玉德殿帝指谓宰臣
曰此皇祖妣命为朕宾师者宜速任之特授中书平章政事同知枢密院事仁宗嗣立真

拜平章政事孟感知遇力以国事为己任尝言人君之柄在尝与刑刑不足惩赏不足劝何以为治乃奏雪冤死者复其官荫滥冒名爵者悉夺之罢僧道官天下称快仁宗初出居怀州深见吏弊欲痛划除之孟进言曰吏亦有贤者在乎变化激励之而已帝曰卿儒者宜与此曹气类不合而曲护如此真长者言卿在朕前惟举人所长而不斥其短尤朕所深嘉也时承平日久风俗奢靡车服僭拟上下无章近臣恃恩求请无厌孟言贵贱有章所以定民志赐与有节所以劝臣下请各为之限制帝皆从之赐爵秦国公帝亲授以印章又阍其像敕词臣为赞御书秋谷二字赐之尝赐钞十万贯令将作监治第孟辞曰臣布衣际遇所望于陛下者非富贵之谓也悉辞不受皇庆元年请告归葬事讫入朝帝慰劳甚至因请谢事优诏不允请益盗乃命以平章政事议中书省事二年乞还国公印奏三上始知所请帝每与孟论用人之方孟曰人材所出固非一途然汉唐宋金科举得人为监今欲兴天下之贤能以科举取之犹胜于多门而进然必先德行经术而后文辞乃可得真材也帝深然其言决意行之延佑元年复拜平章政事二年改封韩国公未几以衰病乞归田里帝不得已许之英宗初特们德尔复相以孟前共政时不附己谗构于帝尽收前后封拜制命降授集贤侍讲学士度其必辞因中害之孟拜命欣然入院宣徽使以闻曰李孟今日供职例当赐酒帝愕然曰李道复乃肯俯就集贤耶时特们德尔子巴尔济苏侍帝侧帝顾谓曰尔辈谓彼不肯为是官今定何如由是谗不得入至治元年卒御史累章辨其诬诏复原官进封魏国公谥文忠孟三入中书民闲利害知无不言退居一室萧然如布衣凡献纳谋议常自毁其橐家无几存皇庆延佑之世每一政之谬人必以为特们德尔所为一令之善必归之于孟焉子献御史中丞同知经筵事

△张养浩

张养浩字希孟济南人以才行征为东平学正游京师献书于平章博果密大奇之荐入御史台一曰病博果密亲至其家问疾四顾壁立叹曰此真台掾也选授堂邑尹毁浮祠三十余所罢旧盗之朔望参者曰彼皆良民饥寒所迫不得已而为盗既加之以刑犹以盗目之是绝其自新之路也众感泣相戒曰毋负张公至大初拜监察御史初议立尚书省养浩言其不便既立又言变法乱政将祸天下台臣抑不以闻乃扬言曰昔僧格用事台臣不言后几不免今御史既言又不以闻台将安用时省臣得选用台臣养浩叹曰尉专捕盗纵不称职使盗自选可乎遂疏时政万余言一曰赏赐太侈二曰刑禁太疏三曰名爵太轻四曰台纲太弱五曰土木

太盛六曰号令太浮七曰幸门太多八曰风俗太靡九
曰异端太横十曰取相之术太宽言皆切直当国者不能容遂除翰林待制寻构以罪罢
之戒省台勿复用养浩恐及祸变姓名遁去尚书省罢
始召为右司都事改秘书少监延佑二年设进士科遂以礼部侍郎知贡举进士诣谒皆
不纳英宗即位命参议中书省事会元夕帝欲于内庭
张灯为鳌山即上疏于左丞相拜珠拜珠袖其疏入谏其略曰世祖临御三十余年每值
元夕闾阎之闲灯火亦禁况阙庭之严宫掖之邃尤当
戒慎伏愿以崇俭虑远为法以善奢乐近为戒帝大怒既而喜曰非张希孟不敢言即罢
之以父老弃官归养自是召皆不起天历二年关中大
旱饥民相食特拜陕西行台中丞既闻命即散其家之所有与乡里贫乏者登车就道道
经华山祷雨于岳祠泣拜不能起天忽阴翳一雨二日
及到官复祷于社坛大雨水三尺禾黍自生秦人大喜时米斗直十三缗民持钞往糴稍
昏即不用诣库换易则豪猾党蔽易十与五累日不可
得民大困乃检库中未毁昏钞文可验者得一千八十五万五千余缗悉以印记其背又
刻十贯伍贯为券给散贫乏命米商视印记出糴诣库
验数以易之于是吏弊不敢行又率富民出粟因上章请行纳粟补官之令闻民闲有杀
子以奉母者为之大恻出私钱以济之到官四月止宿
公署夜祷于天昼出赈饥未尝少怠每一念至即抚膺痛哭遂得疾卒关中人哀之如失
父母至顺二年追封滨国公谥文忠 【按李廷机大
方通鉴云养浩尝着忠告集三卷一曰庙堂忠告二曰风宪忠告三曰牧民忠告皆言居
官之道史传不载附识于此】 子强引

△敬俨

敬俨字威卿其先河东人后徙易水父元长官至大常博士俨嗜学善属文御史中
丞郭良弼荐为殿中知班着宪章若干卷选充中书省
掾朱清张瑄为海运万户豪纵不法俨适典其文牒尝致厚赂俨拒之二人伏诛权贵多
以贿连坐独俨不与大德七年拜监察御史时江浙行
省与浙西宪司交章攻讦命俨偕阿尔斯兰哈雅往治议多不合两上之朝廷卒是俨议
至大元年擢江南行御史台治书侍御史先是俨以议
立尚书省忤宰臣意适两淮盐法久滞乃左迁为转运使阴欲陷之比至首劾场官之贪
污者法既大行课复增羨至二十五万引河南行省参
政来会盐策将定羨数为常额俨以亭户凋弊已甚病人以为己非大臣体遂止仁宗践
阼召为户部尚书廷议欲革尚书省弊政俨言遽罢钱
不用恐细民失利不从皇庆二年拜江西行省参知旧俗民有争即越诉于省吏得并缘
为奸讼益繁俨令省府非有司不得侵民讼事遂简诏

设科举俨荐临川吴澄金陵杨刚中为考试官得人为多延佑四年召为侍御史湖广省臣以赃败俨一日五奏卒正其罪台臣有劾去而复职者御史复劾之章再上有旨命丞相枢密其决俨曰如是则台事去矣遂即帝前奏黜之因伏殿上叩头请代帝曰事非由汝汝其复位五年拜中书参知政事旧制诸院及寺监皆得奏除僚属岁久多冒滥富民或以赂进俨以名爵当慎惜奏请悉追夺之明年谢病归徙居淮南泰定四年征为集贤大学士商议中书省事俨令使者先返而挈家归易水輿疾入见赐食慰劳亲为差吉日使视事命朝会无下拜旋进中书平章政事天历改元朝议欲尽戮朝臣之在上京者俨抗言若辈皆循岁例从行杀之非罪众赖以免居月余伤足告归家居十余年痺不能行犹劾书不废卒封鲁国公谥文忠

钦定续通志卷四百八十九

●钦定续通志卷四百九十 列传二百九十

列传

元 【四十四】

○元四十四

梁曾	刘敏中	王约	王结	宋衙	曹伯启	李
元礼	王寿	王倚	刘正			
谢让	韩若愚	赵师鲁	刘德温	尉迟德诚	秦起宗	

梁曾

刘敏中

王约

王结

宋衙

曹伯启

李元礼

王寿

王倚

刘正

谢让

韩若愚

赵师鲁

刘德温

尉迟德诚

秦起宗

△梁曾

梁曾字贡父燕京人少好学日记数千言中统四年以翰林学士承旨王鹗荐辟中书左三部令史至元十六年累官知南阳府唐邓二属州为襄阳府所夺曾按图经稽国制以闻得复旧南阳在宋末为边鄙桑柘未成而岁赋丝民甚苦之曾请折输布民始称便十七年朝廷以安南国王【原文作安南世子按安南传至元十四年光曷辛国人立其世子日烜则是时不当称世子矣谨据改】陈日烜不就征选曾使其国进兵部尚书与礼部尚书柴椿偕行明年日烜遣其叔遗爱奉表从曾献方物二十九年有旨再使安南授吏部尚书以礼部郎中陈孚为副濒行改授淮安路总管三十年至安南其国有三门中曰阳明左曰日新右曰云会陪臣郊迎将由日新门入曾大怒曰奉诏不由中门是辱君命也即回馆卒从阳明门入又责世子日燿亲出迎诏且讲新朝尚右礼以书往复者三具布天子威亲而风其主入朝日燿大感服【按安南国传云梁曾使还日燿遣陪臣陶子奇来贡廷臣以日燿终不入朝议征之拘子奇于江陵则是日燿未尝感服也本传恐失实】遣国相陶子奇等从曾诣阙请罪曾还京入见进所与日燿往复议事书帝大悦或谗曾受安南赂者帝问曾曾对曰安南将黄金器币奇物遣臣臣不受以属陶子奇矣帝曰苟受之何不可也敕乘传之淮安任到官兴学校励风俗河南行省事有疑者皆委曾议之大德元年除杭州路总管户口复者五万二千四百户请禁暮夜鞫囚游街酷刑朝廷是之着为令九年历拜云南行省参知政事寻召还京辞以母丧未葬扶柩北归仁宗初起为集贤侍讲学士延佑元年奉诏代祀中岳还至汴以病寓居淮南至治二年卒

△刘敏中

刘敏中字端甫济南章邱人幼卓异不凡年十三语其父景石曰昔贤足于学而不求知丰于功而不自衒此后人所弗逮也父奇之尝与同侪各言其志曰自幼至老相见无愧色乃吾志也至元十一年申中书掾擢兵部主事拜监察御史僧格秉政敏中劾其奸邪不报遂辞归既而起为御史台都事时同官王约以言去敏中杜门称疾台臣请视事敏中曰使约无罪而被劾吾固不当出诚有罪耶则我既为同僚又为交友不能谏止亦不无过也久之迁翰林直学士兼国子祭酒大德七年诏遣宣抚使巡行诸道敏中出使辽东守令恃贵幸暴横者一绳以法锦州雨水为灾辄发廩赈之九年擢集贤学士商议中书省事上疏陈十事曰整朝纲省庶政进善良剔奸蠹显公道杜私门广恩泽实钞法严武

备举封赠武宗嗣位召至上京庶政多所更定加皇太子赞善仍商议中书省事历翰林
学士承旨召公卿集议弭灾之道敏中疏列七事帝嘉
纳焉以疾还乡里敏中平生义不苟进进必有所匡救援据今古雍容不迫为文理备辞
明有中庵集二十五卷延佑五年卒追封齐国公谥文
简

△王约

王约字彦博真定人至元十三年王盘荐为从事承旨和尔果斯以司徒开府奏授
翰林国史院编修官兼司徒府掾二十四年拜监察御
史时丞相僧格衔参政郭佑为中丞时奏诛右丞卢世荣等诬以他罪约上章直佑冤按
治成都盐运使王鼎不法罢其官转御史台都事三十
一年迁中书右司员外郎成宗即位言二十二年曰实京师放差税开猎禁蠲逋负账穷
独停冗役禁鹰房振风宪除宿蠹慰远方却贡献询利
病利农民励学校立义仓核税户重名爵明赏罚择守令汰官属定律令革两司又请中
书去繁文一取信于行省一责成于六部历兵礼二部
郎中请行赠谥之典以旌忠勋付时政记于史馆以备纂录立供需府以专供亿皆从之
拜翰林直学士知制诰同修国史高丽王昺年老传国
子諲有不安其政者飞逸离闲及諲朝京师潜使人赂用事者留諲不遣昺复位乃委用
小人厚敛淫刑国人羣愬于朝中书奏属约验问约至
宣诏谕之 【高丽国传作遣山东宣慰使塔齐尔刑部尚书王泰亨赉诏谕之】 曰天
地闲至亲者父子至重者君臣彼小人知自利宁肯为
汝家国地耶昺感泣谢愿奉表自雪且请子諲还国其党与悉听使者治约逮捕覆按其
罪命故臣洪子藩为相俾更弊政罢非道水驿十三东
民大喜寻除太常少卿诏谳狱京师释无罪者八十六人因议鬪殴杀人者宜减死一等
着为令特拜刑部尚书大德十一年仁宗自怀州入清
宫禁以平章赛音谔德齐安西王阿南达与左丞相阿固台谋逆命刑曹按其状约曰在
法谋逆不待撈掠当伏诛狱遂定至大二年仁宗在东
宫擢为太子詹事丞四年立左卫率府诏统侍卫军万人同列欲署军官约持不可仁宗
召问约对曰皇太子事不敢不为天子事不敢为仁宗
悟即罢其议又命取安西兵器给宿卫士约谓詹事谔勒哲曰詹事移文数千里取兵器
人必惊疑主上闻之柰何谔勒哲色惭曰实虑不及此
家令薛居敬上言陕西分地五事因被命往理之约不为署行曰太子潜龙也当勿用之
时为飞龙之事可乎遂止仁宗以詹事院诸事循轨大
喜谕羣臣曰事未经王彦博议者勿启四年仁宗正位用阴阳家言欲御东宫之光天殿
约言正名定分当御大内太保入奏遂出御大明殿 【

按张珪传载廷臣用太皇后旨行大礼于隆福宫时珪为中丞言当御大明殿入奏帝悟移仗大明此云欲御光天殿又作太保入奏未知孰是

【拜约河南行省右丞会诏更钱钞法令天下税尽数至大钞约度河南岁用钞七万锭必致上供不给乃下诸州凡至大至元钞参半用丞相布琳济达赞之遣使白中书省臣遂徧行天下皇庆改元特拜集贤大学士首奏河南行省丞相布琳济达勋阁旧臣不宜久外召入封河南王疏荐国子博士姚登孙应奉翰林文字揭傒斯成都儒士杨静请起复中山知府辅恨良前尚书参议李源左司员外郎曹元用皆除擢有差延佑二年奉使巡行燕南山东道使还拜枢密副使至治二年以年七十致仕三年仍诏起集贤大学士商议中书省事廷议罢征东省立三韩省约对曰高丽去京师四千里地瘠民贫夷俗杂尚非中原比万一梗化疲力治之非幸事也不如守祖宗旧制丞相称善议不行至顺四年卒所著有史论及潜邸稟各三十卷高丽志四卷子思诚秘书监著作郎

△王结

王结字仪伯易州定兴人幼聪颖尝从太史董朴受经深于性命道德之蕴年二十余游京师上执政书陈时政八事曰立经筵以养君德行仁政以结民心育英材以备贡举择守令以正铨衡敬贤士以励名节革冗官以正职制辨章程以定民志务农桑以厚民生其言剴切纯正宰相不能尽用之仁宗在潜邸或荐结充宿卫乃集历代君臣行事善恶可为鉴戒者日陈于前大德十一年命置东宫官属以结为典牧太监近侍以俳优进结言昔唐庄宗好此卒致祸败殿下方育德春宫视听宜谨仁宗优纳之及即位迁集贤直学士出为顺德路总管教民务农兴学孝亲弟长戢奸禁暴悉岂于书俾朝夕阅习之属邑巨鹿沙河有唐魏征宋璟墓乃祀二公于学表其言论风旨以励多士继调东昌路境有黄河故道而会通堤遏其下流夏月潦水坏民麦禾结疏为斗门以泄之民获其利至治二年召拜参议中书省事时拜珠为丞相结言为相之道当正己以正君正君以正天下除恶不可犹豫犹豫恐生他变服用不可奢僭奢僭则害及于身丞相是其言未几除吏部尚书泰定元年迁集贤侍读学士会有月食地震风烈之异结言朝廷君子小人混淆刑政不明官赏太滥故阴阳错谬咎征荐臻宜修政事以弭天变诏知经筵结援引古训证时政之失冀帝有所感悟中宫闻之亦召进讲结以故事辞天历二年拜中书参知政事以亲老辞是时迎立时宗于朔方近侍有求除拜赏赉者结曰俟天子至议之初上都之变失皇太子宝及更铸新宝近侍请视旧制宜加大结曰此宝当传储嗣不敢踰旧制也近侍

怒其异己谮诋日甚罢为集贤侍读学士元统元年召拜翰林学士知制诰同修国史与张起岩欧阳元修泰定天历两朝实录拜中书左丞中宫命僧尼于慈福殿作佛事已而殿灾结言僧尼褻渎所致当坐罪先时有罪者北人则徙广海南人则徙辽东去家万里往往道死结请更其法移乡者止千里外改过听还其乡因着为令职官坐罪者多从重科结曰古者刑不上大夫今贪墨虽多然士之廉耻不可以不养也闻者谓其得体至元二年卒四年追封太原郡公谥文忠着有易说一卷诗文十五卷

△宋衡

宋衡字宏道潞州长子人年十七避地襄阳已而北归屏居河内者十有五年赵璧经略河南闻其名礼聘之中统三年擢翰林修撰至元六年高丽权臣林衍废其国王禘而立其弟温诏遣国王特讷克暨璧将兵讨之以衡为行首员外郎特诏徙江华岛居民于平壤复命慰劳良厚十三年迁太常少卿属省官制行兼领籍田署事十六年太子以耆德召见应对详雅自是数蒙召问侍讲经幄开谕为多十九年太子以江西分地当署郡邑守令皆命衡铨举二十年初立詹事院首命衡为太子宾客二十三年卒有秬山集十卷行于世

△曹伯启

曹伯启字士开济宁砀山人弱冠从东平李谦游笃于问学至元中历任西台御史关陕自许衡倡道学教多士伯启请建祠立学以表其绩四川廉访僉事库楚以苛刻闻伯启纠黜之延佑元年升内台都事迁刑部侍郎丞相特们德尔专政一日召刑曹官属问曰西僧讼某之罪何为久弗治众莫敢对伯启从容言曰犯在赦前丞相虽甚怒莫之夺也八番帅擅杀起边衅朝廷已用帅代之矣命伯启往诘其事次沅州道由伯启恐兵往则彼惊将致乱乃遣使杨鹏单骑往喻新师备得其情止奏坐前帅擅兴罪边民以安大同宣慰使帕哈哩鼎扑运岭北粮岁数万石肆为欺罔累赃巨万朝廷遣使督征率以赂免最后伯启往其人已死喻其子曰负官钱虽死必征与其纳赂于人曷若偿之于官第条汝父所赂之数官为征之诸受赂者惧潜归赂于其子得钞五百余万缙民之逋欠而无可理者即列上与免之五年迁司农丞奉旨至江浙议盐法罢检校官置六仓于浙东西设运盐官输运有期出纳有次船户仓吏盗卖漏失有罚归报着为令寻拜南台治书侍御史因言扬清激浊责在台宪诸被枉赴愬者实则直之妄则加论可也今讼冤一切不问岂风纪定制乎俄去位英宗立召拜山北廉访使时敕建西山佛宇甚亟御史观音努等以岁饥请缓之近臣激怒上听遂诛言者伯启曰主上聪明睿断是不可

以不诤乃劾台臣緘默使昭代有杀谏臣名帝为之悚
听俄拜集贤学士御史台侍御史同修大元通制伯启言五刑者刑异五等今黥杖徒役
于千里之外百无一生还者是一人身备五刑也法当
改丞相是之泰定初引年北归优游乡社矜人贤之表所居为曹公里伯启性庄肃奉身
清约在中台所奖借多名士为侍读学士考试国子首
取吕思诚姚绂云南佥事范震言宰臣欺上罔下不报范饮恨死伯启具其事书于太史
真州知州吕世英以刚直获罪伯启白其枉进擢风宪
其好彰善率类此天历中起伯启为进东廉访使陕西诸道行御史台中丞使驿放迫伯
启喟然曰吾年且八十尚忘知止之戒乎终不起至顺
三年长子震亨卒于毗陵伯启往拊之明年卒于道追封鲁郡公谥文贞有诗文十卷号
汉泉漫藁续集三卷

△李元礼

李元礼字庭训真定人资性庄重不妄言笑历易州大都路儒学教授迁太常博士
定撰世祖及昭睿后裕宗尊谥议其请谥圜兵升祔太
室礼文多所详定元贞元年擢拜监察御史二年有旨建五台山佛寺【成宗纪作元贞
元年事】皇太后将临幸元礼上疏曰伏见五台创
建寺宇土木既兴工匠夫役不下数万附近数路州县供亿烦重男女废耕织百物踊贵
民有不聊生者矣伏闻太后亲临五台布施金币广资
福利其不可行者有五时当盛夏禾稼方茂百姓岁计全仰秋成扈从经过千乘万骑不
无蹂躏一也太后春秋已高亲劳圣体往复暑途数千
里山川险恶不避风日万一调养失宜悔将可及二也陛下即位以来遵守祖宗成法正
当兢业持盈之日凡一举动必书简册以贻万世书而
不法将焉用之三也夫财非天降皆出于民今日支持调度百倍曩时劳民伤财以奉土
木四也佛以慈悲方便为教不与物竞虽穷天下珍玩
奇宝供养不为喜虽无一物为献亦不为怒今太后欲为苍生祈福福未获而先劳圣体
致天子旷定省之礼軫思亲之怀五也伏愿中路回轅
端居深宫俭以养德静以颐神上以循先皇后之懿范次以尽圣天子之孝心下以慰元
元之望如此则不祈福而福至矣台臣不敢以闻大德
元年侍御史万僧与御史中丞崔彧不合取前章封之入奏曰崔中丞私党汉人李御史
大言谤佛帝大怒遣近臣赍其章敕右丞相谔勒哲等
鞫问博果密以国语译而读之谔勒哲曰其意正与吾同往吾尝以此谏太后曰我非喜
建此寺盖以先皇帝在时尝许为之非汝所知也博果
密抗言曰他御史惧不肯言惟一御史敢言诚可赏也遂入奏帝沈思良久曰御史言是
也乃罢万僧复元礼职【按成宗纪载大德元年佛

寺成皇太后将亲往祈祝监察御史李元礼谏止之与传所载互异】未几改国子司业卒封陇西郡侯子端仕至礼部尚书

△王寿

王寿字仁卿涿郡新城人幼颖敏嗜学长以通国字为中书掾既而用朝臣荐入侍裕宗至元十九年授兵部员外郎二十八年任吏部郎中以土转运使胥喀喇博果密柄用即自免去明年授大司农丞不赴元贞二年出为燕南河北道廉访副使大德二年博果密为中执法复弃官归俄擢御史台侍御史论事剴切六年召寿奉香江南徧祠岳镇海渚使还具奏民之利病系于官吏善恶宜选公廉材干存心爱物者专抚字刚方正大深识治体者居风宪又尝与台臣奏宰相内统百官外均四海位尊任重不可轻假非人世祖初置中书省以和尔布哈塔齐尔锡津安图巴延等为丞相史天泽刘秉忠廉希宪许衡姚枢等实左右之当时称治比唐贞观之盛迨至阿哈玛特郝禎耿仁卢世荣僧格实都等坏法黷货流毒亿兆近者阿固台巴延巴特玛琳沁阿里等专政煽惑中禁几摇神器君子小人已试之验较然如此臣愿推爱君思治之心邪正互陈成败对举庶几上悟天衷惩其既往知所进退天下之事可从而理也十年改吏部尚书至大三年迁太子宾客集贤大学士卒赠蓟国公谥文正

△王倚

王倚字辅臣其先东莱人也父永福金末避地徙燕为宛平着姓倚为人孝友乐易重然诺与人交不苟合读书务躬行不专事章司世祖选良家子入侍东宫时倚年弱冠太保刘秉忠深器重之即以充选有诏皇太子裁决天下事凡时政所急民瘼所系倚知无不言是时官职未备而汤沐分邑地广事繁乃拜倚工部尚书行本位下随路民匠都总管至元二十一年诏立东宫官属以倚为家丞【按百官志至元十九年立詹事院二十年置家令家丞本传作二十一年互异】后以疾辞职仍给太子家丞禄以优养之倚上言不事事而苟窃禄食臣心诚所未安力辞再四许之二十六年皇孙出镇怀孟帝为选老成练达旧臣护之乃以属倚陞辞帝目之良久谓侍臣曰倚修洁人也左右皇孙得人矣徃行党幕所在军政肃然未几召还二十八年授礼部尚书以疾辞明年卒追封太原郡谥忠肃

△刘正

刘正字清卿清州人初辟制国用使司令史迁户部令史至元八年罢诸路转运司立局考核逋欠大都运司负课银五百余锭逮系倪运

使等四人征之视本路岁入簿籍实无负狱久不决正察其冤徧阅吏牒所得至元五年李介甫关领课银文契七纸适合其数验其字画皆司库辛德柔所书即白尚书捕鞠之辛具服尽偿所负课银四人得释正由是知名转枢密院令史辟掾中书十四年分省上都会诸王锡里济叛至居庸关守者告前有警使始退正曰职当进而退可乎驰出关抵上都边将请黄白金符充战赏中书檄工部造给未及上请帝怒其欺罔正曰军赏贵速先造符而后禀命未见其罪也帝释之十五年擢左司都事时阿哈玛特当国与江淮行省阿里布崔斌有隙诬以盗官粮四十万命刑部尚书李子忠与正驰驿往按其事狱弗具阿哈玛特复遣北京行省参政张澍等四人杂治之竟寘二人于死 【按世祖记及阿哈玛特传并作江淮行省平章政事阿里布左丞雅克特穆尔而不及崔斌与本传互异】 正乃移疾还家阿哈玛特败逮正至坐以党正曰臣未尝阿附惟法是从耳会日暮帝起遇内俱械系于关东隙地踰数日复械系于拱卫司和尔果斯曰上尝谓刘正衣白衣行炭穴十年可谓廉洁者乃免归二十五年僧格既立尚书省擢为户部侍郎升尚书尝举核河闲盐运官亏课事几陷于罪乃移疾归二十八年僧格败谪勒哲为丞相复擢为户部尚书大德初累迁云南行省左丞时方议征缅正极言其不可不从师果无功云南岁输金银近中庆城邑户口则诡称逃亡甸寨远者则遣官领兵往征人马刍粮往返之费岁以万计征收金银之数必十加二而拆阅之数又如之其送迎馈赆亦如纳官之数所遣者又以铜杂银中纳官正首疏其弊给官秤俸士官诣官输纳其弊始革武宗即位入为中书左丞二年恳辞还家仁宗初召诸老臣入议国事正诣阙言八事曰守成宪重省台辨邪正贵名爵正官符开言路慎赏罚节财用诏集议行之累乞致仕不许拜平章政事时议经理河南淮浙江西民田增茶盐课额正极言不可弗听岁大旱台臣言燮理非人所致平章李孟引咎乞罢平章和尔多卜丹曰台臣不能明察奸邪臧否时政可还诘之正言台省一家当同心献替择善而行岂容分异耶有旨廉访司权太重故按事失实自今不许专决六品以下官平章和尔多卜丹李孟将议行之正言但掌择人法不可易也事遂寝延佑六年卒封赵国公谥忠宣子秉德历兵工二部侍郎秉仁累官工部尚书

△谢让

谢让字仲和颍昌人幼颖悟好学国兵取宋立行中书省于江西让以选为令史调河闲都转盐运司经歴擢南台御史举湖广行省平章政事哈喇哈斯达尔罕可为御史大夫山东廉访使陈天祥可为御史中丞右司员外郎

高昉可任风宪劾江浙省臣听诏不恭及不法事世祖遣使杂问既款服诏令让与俱来人皆危之让恬然若无事者台纲大振大德闲诏立陕西行御史台以让为都事凡御史封章及文移其可否一决于让迁户部员外郎时东胜云丰等州民饥乞糶邻郡宪司惧其贩鬻为利闭其糶事闻于朝议设法立禁闭糶者有罪三州之民赖以全活者甚众历湖广行省左右司郎中时广西两江岑雄黄圣许等屡相讎杀为边患让谓此曹第可怀柔不宜力竞若舍中国有用之民争炎荒不毛之地非长策也因书榜招谕以携其赏俄调河南时江淮屯戍军二十余万亲王分镇扬州皆以两淮民税给之不足则漕于湖广江西是岁会计两淮仅少三十万石让请以淮盐三十万引鬻之数其价钞以给军食不劳远运公私便之至大元年转户部侍郎京仓主计吏以仓廩多罅漏久雨米坏请覆糠粃其上因杂揉米中以给内外工人及宿卫者让察其奸以藁秸易之奸弊悉除历拜刑部尚书仁宗即位有旨六部事疑不决者须让共议而后闻刑部有案让未署字而误用印吏惧遂私效让署事觉度无损于事且怜吏以罪废遂视之曰吾署也其宽厚多类此让上言古今有天下者皆有律以辅治帝乃命中书省纂集典章以让精律学使为校正官朝廷以吏多滞事责曹按不如程者令下让曰刑狱非钱谷铨选之比宽以岁月尚虑失实岂可律以常法乎由是刑曹独得不责稽违拜陕西行省参知政事未几拜西台侍御史延佑四年卒于官追封陈留郡公谥宪穆子好古覆实司提举

△韩若愚

韩若愚字希贤保定满城人由武卫府史授通惠河道所都事开河有功历迁中书左司都事时监烧昏钞者欲取能名槩以所烧钞为伪钞使管库者诬服狱既具若愚知其冤覆之得免死者十余人迁刑部郎中改吏部仁宗即位故事凡潜邸官吏不次迁转若愚以岁月定其资品遂着为令皇庆元年迁刑部侍郎寻擢中书左司郎中时议禁民田猎犯者抵死若愚曰昔齐宣王之囿杀其麋鹿者如杀人之罪孟子非也遂轻其刑时参政曹鼎新辞职帝曰若效韩若愚廉勤足矣何用辞为继命若愚参议中书省事特们德尔为右丞相以憎爱进退百官恨若愚不附己罗织以事帝知其枉不听拜户部尚书延佑六年复拜参议中书省事特们德尔复入相以旧憾诬若愚罪欲杀之帝不从复奏夺其官除名归乡里泰定初命复其官历侍御史时左丞相都尔苏擅威福以事诬侍御额琳沁等下枢密狱无敢言其冤若愚以计奏左丞相都尔苏为右大夫事遂解三年拜河南左丞会文宗平内难若愚画策中机帝嘉之天历三年迁

淮西江北道廉访使卒追封南阳郡公谥贞肃

△赵师鲁

赵师鲁字希颜霸州文安人父趾秘书少监师鲁风采端庄在太学力学如寒士延佑初为兴文署丞后补中书省掾于朝廷典章故实律令文法无不练习临事明敏果断执政奇之及典铨选平允无私人无不服泰定中拜监察御史时大礼未举师鲁言天子亲祀郊庙所以通精诚迓福厘百王不易之典也宜鉴成宪讲求故事对越以格纯嘏帝嘉纳正元夕合出禁中命有司张灯山为乐师鲁上言燕安怠惰肇荒淫之基奇巧珍玩发奢侈之端观灯事虽微而纵耳目之欲则上累日月之明疏闻遽命罢之是时宰相都尔苏密专命令不使中外预知师鲁又上言古之人君将有言也必先虑之于心咨之于众决之于故老大臣然后断然行之涣若汗不可反未有独出柄臣之意不咨众谋者也不报都尔苏虽刚狠亦服其敢言朝士年未及致仕其子请预荫其官执政欲从之师鲁驳其非事遂止天历中迁枢密院判官持节治四川军宣布威德士卒怀其恩信久之出为河闲路转运盐使绝巡察之奸省州县厨传赠遣费灶户商人无不便之岁课遂大增率僚吏新孔子庙命吏往江右制雅乐聘工师春秋释奠士谕称之以疾笃弃官归京师至元三年卒封天水郡侯谥文清

△刘德温

刘德温字纯甫大兴人历仕内宰司丞大德中奉中旨征河南民逋粮德温辄平其价令出钞以偿民甚便之复转延福司丞奉旨代祀岳渎比还迁同知大都路都总管府事鞏穀之下供亿浩繁德温措置有法民用不扰累迁同知上都留守司事省檄和余粮民以价不时得递相观望德温令曰粮入价出吏有敢为奸者罪之于是粮不踰期而集俄授永平路总管永平当天历兵革之余野无居民德温为政一年而户口增仓廩实遂兴学校以育人材庶事毕举岁大旱祷而雨岁以不歉滦漆二水为害有司岁发民筑堤德温曰流亡始集而又役之是重困民也遂罢其役而水亦不复至有豪民武断乡里前吏莫敢治德温按得其罪论如法书其过于门后竟以不道伏诛永平古孤竹国也国初郡守请于朝谥伯夷曰清惠叔齐曰仁惠炙庙祀之而祀礼未备德温请命有司春秋具牢礼致祭从之着为式赐庙额曰圣清士论黷之至顺四年封彭城郡侯谥清惠

△尉迟德诚

尉迟德诚字信甫绛州人祖天泽仕金为库官郡王带孙拔绛州天泽被俘授霍州

御衣局人匠总管父鼐仕至潞州知州德诚历官太子
率更丞至大元年改詹事院都事二年迁家令司丞仁宗见其谨恪常令侍左右数荐士
出则未尝语人选为河东山西道宣慰司同知击奸吏
宽税敛上计京师入见帝方食赐以馐余擢陕西行台治书侍御史历拜辽东道肃政廉
访使上疏言事其略曰劳诸王以怀其心防出入以严
宫禁立谏官以远谗佞崇科举以求人材立常平以备凶荒汰僧道以宽民食举贤良以
励忠孝抑奢侈以厚风俗及拯钞法裁冗官等事未报
而卒

△秦起宗

秦起宗字符卿广平深水县人生长兵闲学书无从得纸父顺削柳为简写以授之
成诵削去更书年十七选入蒙古学学辄成辟武卫译
史御史中丞塔齐尔爱其才迁中台史仁宗即位累迁太子家令司典簿官上言东宫官
属辅导德义财赋非所治也朝廷是之迁南台御史建
康多水或实灾而有司抑之或无灾而冒免起宗微行得实人以为神明文宗初立命威
顺王征八番时蜀省囊嘉特尚拒命起宗极言武昌重
镇当备上流之师亲王不可远去力止之及王入见帝谓曰八番之行非秦元卿几为失
计其后八番师还无敢扰于道路者拜中台御史劾中
丞和尚受人妇女贱买县官屋不报起宗从台官入见踞辩久之敕令起起宗不起会日
暮出明日立太子有赦起宗又奏不罪和尚无以正国
法和尚伏辜帝曰为御史当如是矣又劾闽宪布扎尔窃父妾以逃其父愤死流之岭南
出为抚州路总管至官有司供帐甚盛问其费所从出
小吏不敢隐曰借办于民遂亟使归之几席仅给而已僚佐有宴集成礼即止曰我素农
家安俭约务清静庶使吾民化之居一岁以老去官明
年以兵部尚书致仕卒谥昭肃

钦定续通志四百九十

●钦定续通志卷四百九十一 列传二百九十一

列传

元 【四十五】

○元四十五

张思明

吴元珪 张升

陈灏 贺

胜

杨多尔济【布哈】 萧

拜珠

耶律希亮 赵世延

张思明

吴元珪

张升

陈灏

贺胜

杨多尔济

萧拜珠

耶律希亮

赵世延

△张思明

张思明字士瞻辉州人颖悟过人读书日记千言至元闲由侍仪司舍人辟尚书省掾左丞相阿哈玛特既死世祖追论其奸命尚书簿问遗槩一日召右丞相荣祖左丞马绍尽输其赃以入思明抱牍从日已昏命读之自昏达曙帝听忘疲曰读书吐音大似侍仪舍人荣祖对曰正由舍人选为掾者帝奇之曰斯人可用授湖广行省都事皇庆初历迁两浙盐运使岁课充赢僚属请上增数思明曰赢缩不常万一以增为额是我希一己之荣遗百世之害不可延佑三年拜中书参知政事时浮屠妙总统有宠敕中书官其弟五品思明执不可帝大怒召切责之对曰选法天下公器径路一开来者杂还故宁违怕获戾不忍隳祖宗之成宪使四方得窥陛下浅深也帝心然其言而业已许之曰卿可姑与之后勿为例乃授万亿库提举不与散官久之近臣疾其持法峭直日构谗闲改工部尚书帝问左右曰张思明居工部得无怏怏乎对曰勤政如初帝嘉叹之五年迁西京宣慰使岭北戍士多贫者岁凶相挺为变思明威惠并行边境乃安因疏和琳运粮不便事十一条复拜中书参知政事比召至车驾幸上都见于道慰勉良久寻升左丞英宗宅忧右丞相特们德尔用事日诛大臣不附己者中外汹汹思明谏曰山陵甫毕新君未立丞相恣行杀戮国人皆谓阴有不臣之心万一诸王驸马疑而不至将奈何特们德尔大悟曰非左丞言几误吾事帝造寿安山寺监察御史观音保索约勒哈陶默色成珪李谦亨强谏帝震怒杀观音保等二人以珪谦亨属吏思明白丞相曰言事御史职也祖宗朝未尝杀谏臣成李既属吏当论法丞相乃力言之二人得从轻典及拜珠为左丞相与特们德尔各树朋党思明惧祸及累辞不获后诬以不支蒙古子女口粮饿死四百人遂废于家杜门六年文宗天历元年起为江浙行省左丞会陕西大饥中书拨江浙盐运司岁课十万锭赈之吏白周岁所入已输京师当回咨中书思明曰陕西饥民犹鲋在涸辙往复踰月是索之枯鱼之肆也其以来年未输者如数与之有罪吾当坐朝廷黜之二年复召为

中书左丞移疾去顺帝至元三年卒赠清河郡公谥贞敏思明平日不治生产惟蓄书三万七千余卷尤明于律与谢仲和曹鼎新同称三绝云

△吴元珪

吴元珪字君璋广平人父鼎燕南提刑按察副使至元十四年世祖召元珪入见授后卫经历十七年擢枢密经历初江南既定枢密奏裁定官属京师五卫行省万户府设官有差均俸禄给医药设学校置屯田多元珪所论建二十六年参议枢密院事时缮修宫城尚书省奏役军士万人留守司主之元珪亟陈其不便乃立武卫缮理宫城以留守段天佑兼都指挥使凡有兴作必以闻于枢府大德元年除吏部尚书时选曹铨注多有私其乡里者元珪曰此风不可长川党朔党之兴宋所由衰也请谒悉皆谢绝三年迁工部尚书河朔连年水旱元珪言春秋之义以养民为本凡用民力者必书盖民力息则生养遂生养遂则教化行而风俗美宰相嘉其言土木之工稍息六年出为江浙行省参知政事初朱清张瑄以财雄江南徧结当路及伏诛录其家具籍所交诸贵人而江浙省臣为尤甚惟元珪一无所污武宗即位拜枢密副使诏议政中书条上惜民力严选举节财用定律令谨赏罚建科举课农桑汰冗员易封赠诸事皆切于世务者初诏发军万人屯田称海以实边海都之乱被俘者众至是颇有来归者饥寒不能存至鬻子以活元珪具其事以闻诏使钱赎之加平章政事仁宗初立诏议时政寻出为江浙行省左丞江淮漕臣言江南殷富盖由多匿腴田若再行检核之法当益田亩累万计元珪曰江南之平几四十年户有定籍田有定亩一有动摇其害不细固争月余不能止移疾去延佑初起为甘肃行省左丞岁余召还复为枢密副使元珪奏曰昔世祖限田四百亩以给军需余田悉供赋税今经理江淮田土第以增多为能加以有司头会箕敛民困日甚臣恐变生不测非国之福诏遵旧制至治元年英宗即位【按本纪英宗以延佑七年三月即位是岁十一月改明年元曰至治传文误】又条上军民利弊十余事大抵言诸王近侍不可干军政管军官吏不可渔取军户军官之材者当迁其职有司赋役当务均一军民不可有所偏军官袭职惟传适嗣支庶不可有所乱帝并嘉纳即降旨施行之以年老致仕三年卒泰定元年进封赵国公谥忠简

△张升

张升字伯高其先定州人后徙平州幼警敏过人既长力学工文辞至元二十九年以荐授翰林国史院编修官预修世祖实录历迁太常博士武宗即位议躬祀礼升据经引古参酌时宜以对帝嘉纳之至大初改太常寺为太

常礼仪院除升为判官久之外补知汝宁府治行为诸郡最历江西行省左右司郎中除绍兴路总管初大德至大闲越大饥且疫疠民死者殆半赋税盐课责里胥代纳吏并缘为奸害富家升为证于簿籍白行省蠲之前守有为江浙行省参政者争代者录米有隙欲内之罪移平江岁输海运粮布囊三万俾绍兴制如数民患苦之更数守谓岁例如此置弗问升言麻非越士所生海漕实吴郡事于越无与与上卒罢之泰定二年历迁辽东道廉访使属永平大水 【考五行志事在致和元年】 民多捐瘠升请发海道粮十八万石钞五万缗以赈饥民且蠲其岁赋朝廷从之民得全活者众明年召拜侍御史天历初出为山东道廉访使时方有警有司请完城以为备升曰民恃吾以生完城是弃民也由是民皆安之复迁淮西道廉访使上书乞致仕至顺二年复起为集贤侍讲学士顺帝即位首诏在廷耆艾访问治道升条上所宜先者十事寻兼经筵官明年以疾辞位至正元年卒谥文宪

△陈灏

陈灏字仲明其先居卢龙有名山者太祖时为平阳等路军民都元帅子孙徙清州遂家焉灏幼颖悟稍长游京师登翰林承旨王盘安藏之门盘熟金典章安藏通诸国语灏兼习之安藏荐灏入宿卫寻为仁宗潜邸说书仁宗奉母后出居怀庆灏从行日开陈以古圣贤居艰贞之道及即位以推戴旧勋特拜集贤大学士仍宿卫禁中政事无不与闻科举之行赞助之力尤多时伺帝燕闲辄取圣经所载大经大法有关治体者陈之每见嘉纳帝尝坐便殿羣臣入奏事望见灏喜曰陈仲明在列所奏必善事矣帝欲用灏为中书平章政事灏力辞仁宗崩辞禄家居者十年文宗即位复起为集贤大学士上疏劝帝大兴文治增国学弟子员蠲儒户徭役皆嘉纳焉灏先后居集贤署荐士牍累数百有许之者灏曰吾宁以谬举受罚蔽贤诚所不忍顺帝元统初扈蹕上都至龙虎台帝命造膝前而握其手曰卿累朝老臣更事多矣凡议政事宜极言无隐灏顿首谢不敏顺帝至元四年致政命食全俸于家明年卒追封蓟国公谥文忠灏出入禁闼数十年乐谈人善士大夫因其荐拔至显列有终身莫知所自者欧阳元为国子祭酒与灏同考试国子伴读每一卷出灏必详观之苟得其片言善即以寘选列为之色喜元欢曰陈公之心盖笃于仁而踰于厚者真可使鄂夫宽薄夫敦矣子敬伯仕至中书平章政事

△贺胜

贺胜仁杰子也字贞卿小字巴延以小字行尝从许衡学通经传大义年十六入宿卫凝重寡言世祖甚器重之大臣有密奏辄屏左右独

留胜听之出则参乘舆入则侍帷幄非休沐不得至家至元二十四年纳延叛帝亲征胜直武帐中常传旨饬诸将还侍帝侧矢交帐前立侍不动纳延既败帝还都胜常参乘一日猎回伶人蒙采毳作狮子舞以迎驾象惊奔逸不可制胜投身当象前后至者断鞞纵象乘舆乃安胜退创甚帝亲抚之又遣尚医尚食视护【按虞集撰墓志云天下初定四方以遽闻者帝亟欲赐报胜方少壮能日驰千里凡有使事即见遣六诏交广西域之属无不至计所历无虑数十里云云本传未载谨附识】拜集贤学士领太史院事二十八年僧格败罢尚书省政归中书帝问谁可相者胜对曰天下公论皆属鄂勒哲遂相鄂勒哲以胜参知政事大德九年胜父仁杰请老以胜代为上都留守兼开平府尹既至通商贾谨出纳诸权贵弟子暴横交纵者悉绳以法至大三年进左丞相行上都留守如故岁大饥辄发仓廩赈民乃自劾待罪帝亲曰祖宗以上都之民付卿父子欲安之也卿能如此朕复何忧民德之为立祠西门外帝闻复命工写其像以赐俾传示子孙未几以足疾请老不许赐小车出入禁闕初开平人张弼家富弼死其奴索钱民家殴负钱者至死治狱者教奴引弼子并下之狱丞相特们德尔受其赂六万缗终不为直胜素恶特们德尔贪暴闻其事以语御史中丞杨多尔济多尔济以语监察御史徐元素遂劾奏丞相逮治其左右得所赂事实以闻帝亦素恶特们德尔钦杀之特们德尔走匿太后宫中太后为言仅夺其印缓而罢及英宗即位谅阴中特们德尔复出据相位乃执杨多尔济及萧拜珠同日戮于市且复诬胜乘赐车迎诏大不敬并杀之泰定初诏雪其冤追封秦国公谥惠愍至正三年追封泾阳王改谥忠宣子太平自有传

△杨多尔济

杨多尔济河西宁夏人少孤即知自立事仁事于藩邸甚见倚重大德十一年从行怀孟仁宗闻朝廷有变将北还命偕李孟先入仁宗至京师多尔济讥察禁卫密致警备仁宗嘉赖焉既佐定内难仁宗退居东宫授家令丞日夕侍侧虽休沐不至家进延庆使武宗闻其贤召见之仁宗曰此人诚可任大事然刚直寡合武宗顾视之曰然仁宗始总大政执误国者将尽诛之多尔济曰为政而尚杀非帝王治也帝感其言特诛其尤者他日与李孟论元统人材孟以多尔济为第一帝然之拜礼部尚书初尚书省改作至大银钞又铸铜为至大钱至是议罢之多尔济曰法有便否不当视立法之人为废置银钞固当废铜钱与楮币相权而行古之道也国无弃宝民无失利钱未可以遽废言虽不尽用时论是之迁宣徽副使御史请迁为台官帝以宣徽膳用素不会计特之委之未之许也有言近

臣受贿者帝怒其非所当言将诛之时张珪为御史中丞叩头谏不听多尔济言于帝曰诛告者失刑违谏者失谊世无诤臣久矣张珪真中丞也帝喜竟用珪言拜多尔济为侍御史帝宴闲时羣臣侍侧者或言笑踰度帝见其正色为之改容有犯法者虽贵幸无所容贷怨者因共譖之帝知之深不得行拜御史中丞中书平章政事张闳以妻病谒告归江南夺民河渡地多尔济以失大体劾罢之江东西奉使威喇不称职权臣匿其奸冀不问复劾而杖之御史纳琳言事忤旨帝怒叵测多尔济救之一日至八九奏曰臣非爱纳琳诚不愿陛下有杀御史名帝曰为卿宥之可左迁为昌平令昌平畿内剧县欲以是困纳琳多尔济又言曰以御史宰京邑无不可者但以言事而得左迁恐后之来者用是为戒不肯复言矣帝不允后数日帝读贞观政要多尔济侍侧帝顾谓曰魏征古之遗直也朕安得用之对曰直由太宗使太宗不听征虽直将焉用之帝笑曰卿意在纳琳耶当赦之以成尔直名也有上书论朝政阙失面触宰相宰相怒将取旨杀之多尔济曰迢书云言虽不当无罪今若此何以示信天下果诛之臣亦负其职矣帝悟释之特加昭文馆大学士以奖其直言时位一品者多乘闲邀王爵赠先世或谓多尔济眷倚方重苟言之当可得也多尔济曰家世寒微幸际遇至此已惧弗称尚敢求多乎且我为之何以风励侥幸者未几迁集贤大学士为权臣特们德尔所害而死初武宗崩皇太后在兴圣宫召特们德尔为丞相踰月仁宗即位遂相之居两岁得罪斥罢【特们德尔传作以病去职】更自结微政近臣得再入相恃势贪虐凶秽愈甚中外切齿羣臣不知所为萧拜珠平章稍牵制之多尔济拜御史中丞慨然以纠正其罪为己任会上都富民张弼杀人系狱特们德尔使家奴胁留守贺胜出之不得多尔济廉得其所受弼赃巨万使御史徐元素按得实入奏御史又发其私罪二十余事帝震怒有诏逮问特们德尔逃匿兴圣宫多尔济持之急徽政近臣以太后旨召至宫门责以违旨对曰待罪御史奉行祖宗法必得罪人非敢违太后旨也帝仁孝恐诚出太后意不忍重伤但罢其相位而迁多尔济为集贤学士犹数以台事问之对曰非臣职事不敢与闻所念者特们德尔虽去君侧反得为东宫师傅在太子左右恐售其奸则祸有不可胜言者仁宗崩英宗犹在东宫特们德尔复相乃宣太后旨召萧拜珠多尔济至徽政院责以前违太后旨之罪多尔济曰职在中丞恨不即斩汝以谢天下果违太后旨汝其有今日耶特们德尔又引同时为御史者二人证成其狱多尔济顾二人唾之曰汝等尝得备风宪乃为是犬彘事耶坐者皆惭俯首即起入奏未几称旨执多尔济载诸国门外与

萧拜珠俱见杀是日风沙晦冥都人恟惧道路相视以目英宗即位诏书遂加以诬罔大臣之罪特们德尔权势既成毫发之怨无不报者太后惊悔而帝亦觉其所潜毁者皆先帝旧臣未及论治特们德尔以病死会大旱求直言集贤大学士张珪中书参议和和皆称萧杨等冤死所致闻者失色言终不得达及珪拜平章即告丞相拜珠曰赏罚不当枉抑不伸不可以为治若萧杨等冤何可不亟昭雪也丞相善之遂请于帝降诏褒赠追封夏国公谥襄愍多尔济死时权臣欲夺其妻刘氏与人刘氏翦发毁容以自誓乃免子布哈

布哈

布哈

布哈幼有才气善书后遭家难益自励节为学以荫补武备司提点转迁河东廉访使事尝出按部民有杀子以诬怨家者狱成布哈谏之曰以十岁儿受十一创且彼以斧杀怨必尽其力何创痕之浅反不入肤耶遂得其情平反出之天历初文宗入继大统除通政院判将行值陕西军拒诏守吏皆逃布哈率众出御阵溃见杀二仆亦被执曰吾主既为国死吾苟得生他日何以见吾主于地下起欲杀讎讎要斩之至顺二年赠礼部尚书以褒其忠

△萧拜珠

萧拜珠契丹舒穆鲁氏也曾祖绰诺仕金为古北口屯戍千户岁庚午国兵南下绰诺力战不克遂降官檀顺昌平万户谥忠毅祖青山世祖初袭父职从巴延平宋有功授湖北提刑按察使谥武定父哈喇特穆尔少事裕宗于东宫典宿卫仕为檀州知州谥康惠并追封顺国公拜珠尝从成宗北征特授檀州知州累迁中山知府以忧去官属仁宗过中山有谮于近侍者曰知府去官实惮迎候耳帝颔之适行田野闲见老妪问之曰府中官孰贤妪对曰有萧知府余不知也复过神祠有数老人焚香罗拜遣问之曰汝辈何所祷合辞对曰萧知府奔丧还欲速其来是以祷也帝意遂释武宗即位起为中书左司郎中历御史中丞延佑三年进中书平章政事英宗即位之十有九曰右丞相特们德尔怨拜珠在省中牵制其所为又发其奸赃专制等事遂请依皇太后旨并前御史中丞杨多尔济皆杀之并籍其家泰定初追封蓟国公谥忠愍

△耶律希亮

耶律希亮字明甫小字托果斯楚材之孙铸之子也宪宗尝遣铸核钱粮于燕铸曰臣先世皆读书儒生俱在中土愿携诸子至燕受业宪宗许之乃命希亮师事北平赵衍时方九岁已能赋诗宪宗征蜀铸扈从南伐希亮亦在

行宪宗崩希亮将辎重北归陝右世祖即位额呼布格反遣使说瑛塔噶等入朝不从挺身归朝瑛塔噶知铸去怒使人监希亮母子胁之西行既而阿勒达尔瑛塔噶为大兵所杀众推哈喇哈斯为帅哈喇布哈与铸有婚媾之好铸又尝周恤其病因释希亮缚谓曰我受恩于汝父此图报之秋也及抵沙州北川希亮与足弟徒步负任不火食者数日中统三年从定宗幼子大名王及宗王阿勒呼木兴师至布拉城与哈喇布哈战败之尽歼其众二王乃函其头遣使报捷四年至喀什噶尔城世祖遣布哈绰克至二王所以玺书召希亮赴阙乃由库克新城至哈喇和卓出伊州涉大漠而还入觐世祖于上都备陈边事及羈旅困苦状世祖怜之命为实古尔必且齐至元八年授符宝郎十二年既平宋世祖命希亮问诸降将日本可伐否众皆云可希亮奏曰宋与辽金攻战且三百年干戈甫定人得息肩俟数年后兴师未晚世祖然之十三年太府监令史卢贄言于监官各路贡布惟平阳独长以故诸集赛台争取苟截其长者与他郡等则无所争而以其截者为髹漆宫殿器皿之用甚便监官从之适左右以其事闻帝以诘监官监官仓皇莫知所以对归罪于贄帝命斩之希亮遇诸涂贄呼冤希亮命少缓具以实入奏有旨令董文用谏之竟释贄而召御史大夫塔齐尔等让之曰此事言官当言而不言向微托果斯不误诛此人耶十四年迁吏部尚书帝驻蹕齐讷格台之地希亮至奏对毕董文用问大都近事希亮曰圉圉多囚耳世祖方欹枕卧忽寤问其故希亮奏曰近奉旨汉人盗钞六文者斩以是囚多帝惊问孰传此语侍臣托尔齐曰陛下在南坡曾以语蒙古儿童帝曰前言戏耳曷尝着为令希亮曰令既出矣必明其误以安民心帝即命希亮至大都宣谕十七年希亮以跋涉西土足病痿挛乃谢事居

■ 〈彳累〉阳二十余年至大三年除翰林学士承旨知制诰兼修国史希亮因类次世祖嘉言善行以进英宗取其书置禁中泰定四年卒追封漆水郡公谥忠嘉希亮性至孝困厄遐方家赀散尽仅藏祖考画像四幅就穹庐陈列致奠朔漠人咸相聚来观叹曰此中土之礼也虽疾病不废书史或中夜起坐取烛以书所著诗文及从军纪行录三十卷名懔轩集

△赵世延

赵世延字子敬成都人阿勒楚尔之孙国宝之子也世延天资秀发喜读书弱冠世祖召见俾入枢密院御史台肄习官政至元二十六年擢监察御史与同列五人劾丞相僧格不法中丞赵国辅僧格赏也抑不以闻更以告僧格于是五人悉为其所挤而世延独免大德十年累迁安西路总管安西故京兆省台所治号称会府前官壅滞者三千牒世延至不三月剖决

殆尽至大元年改四川肃政廉访使时蒙古军士科差繁重而军士就戍往来者多害人军官或抑良为奴世延皆除其弊而正其罪又修都江堰民尤便之四年升陕西行台侍御史先是八百媳妇为边患右丞刘深往讨之兵散坐诛及是右丞阿固台当继行世延言蛮夷事在羁縻藉使尽得其地何补于国兵宜止勿用章再上事卒罢皇庆二年拜江浙行省参知政事寻召还拜侍御史延佑元年拜中书参知政事居中书二十月迁御史中丞有旨省臣自平章以下送之官其礼前所无有由是为权臣特们德尔所忌用皇太后旨出为云南行省右丞陞辞帝命仍为中丞三年劾奏特们德尔罪恶十有三事诏夺其官职五年乞补外拜四川行省平章政事即重庆路立屯田得江津巴县闲田七百八十三顷摘军千二百人垦之岁得粟万余石英宗即位特们德尔复相锐意报复属其赏何志道诱世延从弟索约尔哈什诬告世延罪逮世延置对至夔路遇赦世延以疾抵荆门留就医特们德尔遣使督追至京系之刑曹逼令自裁世延不为动囚再岁索约尔哈什自以所诉涉诬欺亡去左丞相拜珠屡言世延亡辜得出狱先是帝猎北凉亭顾谓侍臣曰赵世延先帝所尊礼而特们德尔妄入其罪数请诛之此殆报私怨耳侍臣皆叩头称万岁特们德尔在上京闻世延出狱索省牒视之怒曰此左丞相罔上所为也事闻帝语之曰此朕意耳未几特们德尔死事乃释世延出居金陵泰定四年复召为中书右丞明年有旨赵世延为权奸所诬中书宜徧移天下昭雪其非辜泰定帝崩文宗入继大统世延赞画之功居多天历二年拜中书平章政事诏以世延年高多疾许乘小车入内至顺元年与虞集等纂修经世大典世延屡以衰老乞解中书政务专意纂修帝曰老臣如卿者无几求退之言后勿复陈封鲁国公移疾于金陵之茅山至元改元仍除中书平章政事明年还成都卒谥文忠世延历事九朝■〈易文〉历省台五十余年凡军国利病生民休戚知无不言而于儒者名教尤拳拳焉为文章波澜浩瀚一根于理尝较定律令汇次风宪宏纲行于世子伯忽夔州路总管天历初囊嘉特据蜀叛死于难追封蜀郡公谥忠愍

钦定续通志卷四百九十一

●钦定续通志卷四百九十二 列传二百九十二

列传

元 【四十六】

○元四十六

元明善

虞集【盘 范梈】

揭傒斯

黄潛【柳

贯 吴莱】 张起岩 欧阳元

元明善

虞集

揭傒斯

黄潛

张起岩

欧阳元

△元明善

元明善字复初大名清河人资颖悟绝出经学皆有师法尤深于春秋弱冠游吴中浙东使者荐为安丰建康两学正时董士选任江西左丞辟为行省掾赣州贼刘贵反明善从士选将兵讨之擒贼三百人明善议宽诖误得全活者百三十人既又得贼所书赣吉民丁十万余于籍者有司欲滋蔓为利明善请火其籍以灭迹二郡遂安厯转中书左曹掾始明善在江西时张瑄为其省参政假明善马为从骑爱之致米三十斛酬其直后瑄败籍其家得金谷簿书米三十斛送元复初不言酬马直明善坐免久之有白其事者乃复掾省曹仁宗居东宫首擢为太子文学及即位改翰林待制与修成宗顺宗实录升翰林直学士诏节尚书经文译其关政要者以进每奏一篇帝必称善曰二帝三王之道非卿莫闻也奉旨出赈山东河南饥时彭城下邳诸州连数十驿民饿马毙而官无文书赈贷明善以钞万二千錠分给之曰擅命获罪所不辞也还修武宗实录预议科举服色等事延佑二年始会试天下进士明善首充考试官所取士后多为名臣改礼部尚书擢参议中书省事 【按辍耕录云明善参议中书曰朝廷遣蒙古大臣使交趾明善副之将还国主赉以金蒙古使受之明善固辞主曰彼使臣已受矣公独何为明善曰彼所以受者安小国之心我所以不受者全大国之体国主叹服本传未载谨以附识】 厯拜翰林学士修仁宗实录英宗亲裸太室礼官进祝册请署御名命明善代署者三至治二年卒泰定闲追封清河郡公谥文敏明善早以文章自豪出入秦汉闲晚益精进在江西金陵每与虞集剧论以相切劘明善言集治诸经惟朱子所定者耳自汉以来先儒所尝尽心者考之殊未博集言凡为文辞得所欲言而止必如明善云若雷霆之震惊鬼神之灵变然后可非性情之正也二人初相得甚驩至京师寢不相下董士选自中台行省江浙也二人者俱送出都门士选曰伯生以教导为职当早还复初宜更送我集还明善送至二十里外士选下马入邸舍举酒属明善曰士选以功臣子出入台省无补国家惟求得佳士

数人为朝廷用之如复初与伯生他日必皆光显然恐不免为人构闲复初中原人也仕必当道伯生南人将为复初摧折今为我饮此酒慎勿如是明善受卮酒跪而酹之起曰诚如公言无论他日今隙已开矣请再赐一卮明善终身不敢忘公言乃再饮而别真人吴全节与明善交最密尝求作文既成明善谓全节曰伯生见吾文必有讥弹吾所欲知若为我治具招伯生来观之明日集至明善出其文问何如集曰公能从集言去百有余字则可传矣明善即泚笔属集凡删百二十字而文益精明善大喜之乃驩好如初

△虞集

虞集字伯生蜀郡人宋丞相允文五世孙也曾祖刚简为利州路提刑有治绩尝与临邛魏了翁成都范仲黼李心传辈讲学蜀东门外得程朱微旨着易诗书论语说蜀人师尊之祖珣知连州亦以文学知名父汲为黄冈尉宋亡侨居临川与吴澄为友澄称其文清而醇尝再至京师赎族人被俘者十余口以归由是家益贫晚稍起家教授于诸生中得富珠哩翀欧阳元亟称许之以翰林院编修致仕集三岁即知读书至元十二年汲挈家趋岭表干戈中无书册可携母杨氏口授论语孟子左氏传欧苏文辄成诵比还长沙就外傅则已尽读诸经通其大义矣集与弟盘皆受业家庭又从吴澄游授受具有源委左丞董士选自江西除南行台中丞延集家塾大德初以荐授大都路儒学教授除国子博士监察殿上有刘生者被酒失礼集言诸监请削其籍大臣有为刘生谢者集持不可曰国学礼义之所出也此而不治何以为教仁宗在东宫传论勿竟其事集以刘生失礼状上之移詹事院竟黜刘生仁宗更以集为贤及即位除太常博士丞相拜珠为院使闲从集问礼器祭义集备言先王制作及古今因革损益之由拜珠叹服俄迁集贤修撰因会议学校集上议曰师道立则善人多学校者士之所受教以致于成德达材者也今天下学官猥以资格授强加之诸生之上而名之曰师尔有司弗之礼生徒弗之信如此而望师道之立可乎下州小邑之士无所见闻父兄所以导其子弟初无必为学问之实意师友之游从亦莫辨其邪正然则所谓贤材者非自天降地出安有望哉为今之计莫若使守令求经明行修者身师尊之至诚恳恻以求之其德化之及庶乎有所观感也其次则求操履近正而不为诡异确守先儒经义师说而不敢妄为奇论众所敬服而非乡愿之徒者廷致之日讽诵其书使学者习之入耳着心以正其本则他日亦当有所发也其次则取乡贡至京师罢归者其议论文艺犹足以耸动人非若泛泛莫知根柢者矣延佑六年除翰林侍制兼国史院编修

官英宗即位集以忧还江南时拜珠为相言于上遣使
征之比趋朝而拜珠已遇害泰定初累迁秘书少监充礼部考试官言于同列曰国家科
目之法诸经传注各有所主将以一道德同风俗非欲
使学者专门擅业如近代五经学究之固陋也圣经虽远非一人之见可尽试艺之文惟
其高者取之不必先有主意若主意先定则求贤之心
狭而误自此始矣后再为考官率持是说故所取每称得人帝幸上都命集与集贤侍读
学士王结执经以从自是岁尝在行寻拜翰林直学士
兼国子祭酒侍经筵尝因讲罢论京师恃东南海运竭民力以航不测非所以宽远人而
因地利也与同列进曰京师之东濒海数千里北极辽
海南滨青齐萑苇之场也海潮日至淤为沃壤宜用浙人之法筑堤捍水为田听富民欲
得官者合其众分授以地官定其畔以为限能以万夫
耕者授以万夫之田为万夫长千夫百夫亦如之察其惰者而易之三年视其成随地之
高下定额以次渐征焉五年有积蓄命以官就所储给
以禄十年佩之符印得以传子孙如军官法则东面兵民数万可以近卫京师外御岛夷
远宽东南海运以纾疲民遂富民得官之志而获其用
江海游食盗贼之类皆有所归矣其后海口万户之设大略宗之文宗在潜邸已知集名
既即位命集仍兼经筵除奎章阁侍书学士时关中大
饥帝问集救民策对曰承平日久人情宴安有志之士急于近效则怨讟兴焉不幸大蓄
之余正君子为治作新之机也若遣一二有仁术知民
事者稍宽其禁令使得有所为随郡县择可用之人因旧民所在定城郭修闾里治沟洫
限畝亩薄征敛招其伤残老弱渐以其力治之则远去
而来归者踵至春耕秋敛皆有所助一二岁闲勿征勿徭封域既正友望相济则三代之
民将见出于空虚之野矣帝称善因进曰幸假臣一郡
试以此法行之帝不允有旨诸兼职不过三免集国子祭酒会修经世大典命为总裁再
阅岁书成既上进以目疾乞解职不许时帝方向用文
学以集宏才博识无施不宜朝廷大典册咸出其手故重听其去而嫉之者往往摭集文
辞指为讥讪赖帝察知其故不能中伤集论荐人材必
先器识心所未善不为牢宠以沽誉评讷文章不折之于至当不止其诡于经者文虽善
不与也光人袭伯璘以才俊为马祖常所喜祖常为御
史中丞伯璘游其门祖常亟称之欲集为荐引集不可曰是子虽小有才然非远到器恐
不得令终后果如集言宁宗崩大臣将立托欢特穆尔
太子用至大故事召诸老臣赴上都议政集在召列祖常使人告之曰御史有言矣乃谢
病归临川初文宗在上都将立其子喇特纳达喇为皇
太子乃以托欢特穆尔太子乳母夫言明宗在日素谓太子非其子黜之江南驿召翰林

学士承旨额哩音等穆尔奎章阁大学士和搭拉都哩默色书其事于托卜齐延又召集使书诏播告中外时省台诸臣皆文宗素所信用御史亦不敢斥言其事意在讽集速去而已元统二年召还禁林疾作不能行屡有敕即家撰文褒锡勋旧侍臣有以旧诏为言者帝不恚曰此我家事岂由彼书生邪 【按田汝成西湖志余载顺帝立伯生在江西以旧诏事逮捕至大都语异本传】 至正八年卒封仁寿郡公谥文靖集孝友事亲承顺无违弟盘早卒教育其孤无异己子兄采以笥库输赋京师亏数千缗尽力营贷代偿之无难色抚庶弟嫁孤妹具有恩意山林之士知古学者必折节下之接后进虽少贱如敌己当权门赫奕未尝有所附丽集议中书正言说论多见容受家素贫归老后食指益众登门之士相望于道其束修羔雁之人还以为宾客费虽空乏弗恤也早岁与弟盘辟书舍二室左室书陶渊明诗于壁题曰陶庵右室书邵尧夫诗题曰邵庵故世称邵庵先生有道园学古录十卷游其门见称许者莆田陈旅国学诸生若苏天爵王守诚辈终身不事他师皆当世称名卿者其交游尤厚者日范梈

虞盘

范梈

虞盘

盘字仲常延佑五年第进士除湘乡州判官性癖古有巫至其州称神降告人曰某方火即火又告曰明曰某方火民以火告者盘皆赴救自旦至夜告者数十寝食尽废县长吏以下皆迎雁至家厚礼之又曰将有大水且兵至州大家皆尽室逃盘得劫火卒一人讯之尽得巫党所为坐捕盗司召巫至鞠之无敢施鞭捶者盘谓卒曰此将为大乱安有神乎急治之尽得党与数十人罗络内外果为变者同僚皆不敢出视俱曰君自为之盘乃断巫并其党如法一时吏民始服秩满除嘉鱼县尹盘已卒盘幼时尝读柳子厚非国语以为国语诚可非而柳子之说亦非也着非非国语诗书春秋皆有论著而春秋乃其家学教尤善兄集接方外士必扣击其说尝以为圣人之教不明为学者无所底止苟于吾道异端疑似之闲不能深知而欲窃究夫性命之原死生之故其不折而归之者寡矣盘不然闻诸僧在坐辄去其为入方正虽集亦严惮之

范梈

范梈字亨父一字德机清江人家贫早孤母熊氏教之梈天资颖异耽诗文用力精深人罕知者年三十六始游京师中丞董士选延之家塾以朝臣荐为翰林院编修官秩满御史台擢海南海北道廉访司照磨巡历遐僻不惮

风波瘴疠所至兴学教民雪理冤滞甚众迁福建闽海道知事闽俗素污文绣局取良家子为绣工无别尤甚椋作歌诗一篇述其弊廉访使取以上闻得罢遣未几移疾归故里天历三年卒椋持身廉正居官不可干以私疏食饮水泊如也吴澄以道学自任少许可尝曰若亨父可谓特立独行之士矣为文志其墓以东汉诸君子拟之 【按清江县志云椋有燕然东方海南豫章侯官江夏百丈等稿总十二卷为时所重人称文白先生本传未载谨附识】

△揭傒斯

揭傒斯字曼硕龙兴富州人父来成宋乡贡进士傒斯幼贫读书刻苦昼夜不少懈大德闲稍出游湘汉湖南帅赵淇雅号知人一见奇之曰他日翰苑名流也程巨夫卢奉先后为湖南宪长咸器重之延佑初荐授翰林国史院编修官时平章李孟监修国史读其所撰天臣列传叹曰是方可名史笔若他人直誉吏牒尔升应奉翰林文字仍兼编修朝廷之事台阁之仪靡不闲习天历初开奎章阁首擢为授经郎教勋戚大臣子孙文宗时幸阁中多所咨访恒以字呼之而不名每中书奏用儒臣必问曰其材何如揭曼硕闲出所上太平政要策以示台臣曰此朕授经郎揭曼硕所进也其见亲重如此 【按赵汭东山集云时学士虞集博士柯九思尝侍从讨论法书名画傒斯亦在列眷稍疏因潜着一书曰奎章政要以进谨附识】 预修经世大典文宗取其所撰宪典阅之顾谓近臣曰此岂非唐律乎特授艺文监丞参检校书籍事元统初累迁集贤学士奉命祀北岳济渎南镇便道西归寻除奎章阁供奉学士改翰林侍讲学士同知经筵事经筵无专官多宰执大臣兼领微辞奥义必属傒斯订定而后进其言往往寓献替之诚务以裨益治道至正三年年七十致仕去行至潞南召还撰明宗神御殿碑文既成复求去帝命丞相托克托及执政大臣慰留之对曰使揭傒斯有一得之献诸公用其言而天下蒙其利虽死于此无恨不则何益之有丞相因问方今致治何先傒斯曰储材为先养之于位望未隆之时而用之于周历庶务之后则无失材废事之患矣诏修金辽宋三史充总裁官丞相问修史以何为本曰用人为本有学问文章而不知史事者不可与有学问文章知史事而心术不正者不可与用人之道又当以心术为本且与僚属言欲求作史之法须求作史之意古人作史虽小善必录小恶必记不然何以示惩劝由是毅然以笔削自任凡政事得失人材贤否一律以是非之公至物论之不齐必反复辩论求归于至当而后止四年辽史成有旨奖谕仍督早成金宋二史傒斯留宿史馆朝夕不敢休因得寒疾卒追封豫

章郡公谥文安侯斯少处穷约事亲菽水粗具而必得其欢心暨有禄入衣食稍踰于前辄愀然曰吾亲未尝享是也故平生清俭至老不渝友于兄弟终始无闲言立朝虽居散地而急于荐士扬人之善惟恐不及而闻吏之贪墨病民者则尤不曲为之揜覆也为文叙事严整语简而当时尤清婉丽密善楷书行草朝廷大典册及元勋茂德当得铭辞者必以命焉殊方绝域咸慕其名得其文者莫不为荣云

△黄潜

黄潜字晋卿婺州义乌人母童氏娠潜二十四月而始生潜生而俊异比成童授以书诗不一月成诵迨长以文名四方【按邓元锡函史云性笃孝母歿营冢域有虎乳驯狎之异本传不载附志于此】延佑二年登进士第授台州宁海丞县地濒盐场亭户恃其不统于有司肆毒害民编户隶漕司及财赋府者横暴尤甚潜皆痛绳以法吏以利害白弗顾也至顺初入为应奉翰林文字转国子博士视弟子如朋交未始以师道自尊轻纳人拜时欲增设礼殿配位四配位合东坐西向学官或议分置于左右同列不敢争潜独面折之事乃止出为江浙等处儒学提举年六十七亟请纳禄归俄除翰林直学士兼经筵官执经进讲者三十有二升侍讲学士累辛乞休不俟报竟去帝遣使追还复为前官久之始得谢南归优游田里闲凡七年卒追封江夏郡公谥文献潜天资介特在州县唯以清白为治月俸弗给每鬻产以佐其费及升朝挺立无所附足不登巨公势人之门世称其清风高节然刚中少容触物或弦急霆震若未易涯涘一旋踵闲煦如阳春其学博极羣书而约之于至精剖经史析疑义柔古今因革制度名物之属旁引曲证多先儒所未发文辞布置谨严援据精切所著有日损斋藁二十三卷义乌志七卷笔记一卷同郡柳贯吴莱皆浦阳人

柳贯

吴莱

柳贯

贯字道传尝受性理之学于兰溪金履祥自幼至老好学不倦凡六经百氏兵刑律历数术方技靡不通究作文沈郁春容涵肆演迤人多传诵始用察举为江山教谕仕至翰林待制与潜及临川虞集豫章揭傒斯齐名人号为儒林四杰所著书有文集四十卷字系二卷近思录广辑三卷金石竹帛遗文十卷

吴莱

莱字立夫【按宋濂撰墓碑云初名曰来同郡方凤一见奇之曰此邦家材也取南

山有台诗中语更今名】集贤大学士直方之子辈

行稍后于贯溘天资绝人七岁能属文凡书一经目即成诵尝往族父家日易汉书一帙以去族父叩之莱琅然背诵不遗一字三易他编皆如之延佑七年以春秋举上礼部不利退居深褻山中益穷诸书奥旨着尚书标说六卷春秋世变图二卷春秋传授谱一卷古职方录八卷孟子弟子列传二卷楚汉正声二卷乐府类编一百卷唐律删要三十卷文集六十卷生平喜论文尝云作文如用兵兵法有正有奇正是法度要部伍分明奇是不为法度所缚千变万化坐作进退击刺一时俱起及其欲止什伍各还其队闻者服之柳贯素慎许与每称莱为绝世才黄溘晚年谓人曰莱之文崭绝雄深类秦汉闲人作吾操觚一世安敢及之其为前辈所推许如此以御史荐调长芎书院山长未上卒门人私谥曰渊颖先生

△张起岩

张起岩字梦臣济南人父范四川行省儒学副提举起岩幼从父学年弱冠以察举为福山教谕中延佑乙卯进士首选除同知登州事特旨改集贤修撰转国子监承累迁监察御史中书参政杨廷玉以墨败台臣奉旨就庙堂逮之下吏丞相都尔苏疾其推辱同列悉诬台臣罔上欲寘之重辟起岩以新除留台抗章论曰台臣按劾百官论列朝政职也今以奉职获戾风纪解体正直结舌殊非盛世事且世皇建台阁广言路维持治体陛下动法祖宗今台臣坐谴公论杜塞何谓法祖宗邪章三上不报起岩廷争愈急帝感悟事乃得释厯拜太子右赞善转礼部尚书文宗亲郊起岩充大礼使导帝陟降步武有节帝嘉之命参议中书省事宁宗崩有妄男子上变言部使者谋不轨按问无实法司谓唐律告叛者不反坐起岩奋谓同列方今嗣君未立人情危疑不亟诛此人以杜奸谋虑妨大计趣有司具狱都人肃然中书方列坐铨选起岩荐一士可用丞相不应起岩即摄衣起丞相以为忤己迁翰林侍讲学士知制诰兼修国史修三朝实录厯转燕南廉访使滹沱河水为真定害起岩请封河神为侯爵而移文责之复修其堤防澹其湮郁水患遂息寻擢翰林学士承旨知经筵事右丞相伯奇里克布哈为台臣所纠去位未几再入相讽词臣言台章非是起岩执不可闻者壮之拜御史中丞论事剴切无顾忌与上官多不合会修辽金宋三史复命入翰林为承旨充总裁官起岩熟于金源典故宋儒道学源委尤多究心史官有露才自是者每立言未当起岩据理审定深厚醇雅理致自足史成上疏乞归后四年卒谥文穆起岩美髯方颐眉目清扬望而知为雅量君子及其临政决议意所背向屹若

泰山不可回夺庙堂悼之安南修贡其陪臣致其世子
之辞必候起岩起岩性孝友少处穷约下帷教授躬致米百里外以养父母抚弟如石教
之宦学无不备至举亲族弗克葬者二十余丧且买田
以给其祭凡获俸赐必与故人宾客共之卒之日廩无余粟家无余财善篆隶所著华峯
漫藁华峯类藁金陵集各若干卷藏于家子琳琛

△欧阳元

欧阳元字原功其先家庐陵与文忠公修同所自出后迁潭州之浏阳幼岐嶷母李氏亲授孝经论语小学诸书八岁能成诵始从乡先生张贯之学即知属文部使者行县元以诸生见命赋梅花诗立成十首晚归增至百首见者异之稍长益从宋故老习为词章下帷数年人莫见其面经史百家靡不研究伊洛诸儒源委尤为淹贯【按元明善撰行状云虞集为国子助教其父汲教授潭州见元文学即手封一帙寄集曰他日当与汝齐名本传未载谨附识】登延佑二年进士授平江州同知调芜湖尹数决疑狱教化大行蝗不入境改武冈尹县控制溪洞蛮獠杂居元至踰月赤水太清两洞聚相攻击元单骑从二人径抵其地谕之獠人熟元台弃兵仗罗拜马首曰我曹非不畏法缘诉事于县县官不为直反以徭役横敛掎克之致发愤就死耳元喻以祸福归为理其讼獠人遂安召为国子博士致和元年迁翰林待制兼国史院编修官天历初军事旁午元日直仕廷凡远近调发制诏书檄以及郊庙建后立储肆赦之文皆经撰述复条时政数十事实封以闻多推行之明年初置奎章阁学士院又置艺文监隶焉皆选清望官居之文宗亲署元为艺文少监命修经世大典元统初命太常礼仪院事拜翰林直学士编修四朝实录俄兼国子祭酒重纪至元五年拜翰林学士以足疾告归帝不允免其行朝贺礼至正改元更张朝政事有不便者集议廷中元极言无隐科目之复沮者尤众元尤力争之诏修辽金宋三史充总裁官发凡举例俾论撰者有所据依史官中有悻悻露才论议不公者元不以口舌争俟其呈藁援笔窜定之至论赞表奏皆元属笔五年超拜翰林学士承旨俄除福建廉访使行次浙西疾作甚乃上休致之请作南山隐居有终焉之志复拜翰林学士承旨力辞不获奉敕定国律十四年汝颍盗起蔓延南北元献招捕之策千余言当事不能用十七年乞致仕以中原道梗欲由蜀还乡帝复不允时将大赦宣赴内府元久病不能行命肩輿至延春阁下实异数也是岁卒追封楚国公谥曰文元历官四十余年皆大制作凡宗庙朝廷雄文大册播告万方制诰多出其手金缯上尊之赐几无虚岁海内名山大川释老之宫王公贵人墓隧之碑得元文辞

以为荣片言只字流传人闲咸知宝重羽翼斯文赞卫治具与有功焉有圭斋文集传于世

钦定续通志卷四百九十二

●钦定续通志卷四百九十三 列传二百九十三

列传

元 【四十七】

○元四十七

许有壬

宋本

谢端

王守诚

王思诚

李好文

富珠哩翀

李洞

苏天爵

许有壬

宋本

谢端

王守诚

王思诚

李好文

富珠哩翀

李洞

苏天爵

△许有壬

许有壬字可用汤阴人幼颖悟尝阅衡州净居院碑文近千言一览辄背诵无遗登延佑二年进士第授同知辽州事会关中有警邻州听民出避弃孩婴满道有壬独闭城坚守卒获无虞州有追逮不许胥隶至村疃唯给信片令执里役者呼之民安而事集英宗时迁江南行台御史行部广东劾罢贪墨数人部内肃然召拜监察御史英宗遇弑贼臣特克实遣使自上京至封府库收百官印有壬知事急往告御史中丞董守庸守庸谓宫禁事非子所当问有壬即疏守庸阿附贼臣罪以俟泰定帝发上都御史大夫宁珠先还京有壬即袖疏上之及帝至复上章言特们德尔之子索诺木与闻大逆乞赐典刑其兄弟勿令出入宫禁中书平章王毅右丞高昉横罹夺爵四川行省平章赵世延受祸尤惨皆请雪冤复职又上正始十事一曰辅翼太子宜先训导二曰遴选长官宜先培养三曰通籍宫禁宜别贵贱四曰欲谨兵权宜削兼领五曰武备废弛宜加修饬六曰贼臣妻妾宜禁势官征索七曰前赦权以止变宜再诏以正名八曰特们德尔诸子宜籍没以惩恶九曰考验经费以减民赋

十曰擢节浮蠹以纾国用帝多从之泰定元年改中书左司员外郎京畿饥有壬请赈之同列让曰子言固善其如亏国何有壬曰民本也不亏民岂亏国邪卒白丞相发粮四十万斛民赖以济国学旧法每以积分次第贡出官执政用监丞张起岩议欲废之而以推择德行为务有壬曰积分虽未尽善然可得博学能文之士若推择德行其名固佳恐皆厚貌深情专意外饰或懵不识丁矣议遂寝三年升右司郎中俄转左司每遇公议必屡争得失迅扫积滞案无留牍都事宋本退语人曰此贞观开元闲议事也天历三年擢两淮都转盐运司使询究弊端立法而通融之国课遂登元统二年拜参知政事诏议尊皇太后为太皇太后有壬曰皇上于皇太后母子也若加太皇太后则为孙矣且今制封赠祖父母降于父母一等盖推恩之法近重而远轻今尊皇太后为太皇太后是推而远之乃反轻矣岂所谓尊之者邪弗听平章彻尔特穆尔挟私憾奏罢进士科有壬争之不能夺遂移疾不出【按彻尔特穆尔拜平章政事及议罢科举事彻尔特穆尔传并在顺帝至元元年】帝强起拜侍御史廷议欲行割剽法有壬争止之重纪至元初长芦韩公溥因家藏兵器遂起大狱株连台省多以赃败独有壬名由是忌者益甚有壬度不可留遂归彰德六年召入中书仍参知政事至正改元有壬极论帝当亲祀太庙母后不宜虚位徽政院当罢改元命相当合为一诏冗职当沙汰钱粮当裁节人皆韪之转中书左丞二年囊嘉特沁萨巴及博啰特穆尔献议开西山金口导浑河踰京城达通州以通漕运丞相托克托主之甚力有壬曰浑河之水湍悍易决而足以为害淤浅易塞而不可行舟况地势高下甚有不同徒劳民费财耳不听后卒如有壬言【详见河渠志】先是有壬之父熙载仕长沙日设义学训诸生既歿而诸生思之为立东冈书院朝廷赐额设官以为育才地南台监察御史茂巴尔斯缘睚眦怨言书院不当立并构浮辞诬蔑有壬并其二弟有仪有孚有壬称病归御史累章辩其诬十二年盗起河南声撼河朔闲有壬画备御之策十五条以授郡将民藉以安十三年起拜河南行省左丞朝廷遣将出师环河南境连营以百数一切刍饷皆仰给之有壬从容集事若平时十五年迁枢密副使复拜中书左丞时遣使招谕诸盗有壬力言朝廷务行姑息之政赏重罚轻故将士贪掠子女玉帛而无鬪志遂倡招降说贼将益横转集贤大学士兼太子左谕德太子颇敬礼之一日入见太子方臂鹯禽以为乐遽呼左右屏去久之老病致仕给俸终身二十四年卒谥文忠有壬厯事七朝垂五十年当权臣恣睢时稍忤意辄诛窜随之有壬绝不为巧避计事有不便明辨力争不知有死生利害君

子多之有壬善笔札工辞章欧阳元序其文谓其雄浑闳隽涌如层澜迫而求之则渊靓深实盖深许之也所著有至正集若干卷子祯

△宋本

宋本字诚夫大都人幼颖拔既成童聚经史穷日夜读之句探字索必通贯乃已尝从父祯官江陵就王奎文讲明性命义理之学造诣日深善为古文辞必已出年四十始还燕至治元年策天下士于廷本居第一授翰林修撰泰定元年改监察御史首言南陂之变逆贼虽诛其赏阿萨尔身亲弑逆仅窜岭南乞早正天讨盗窃仁庙金主本言在法民闲失盗捕之违期不获犹治罪太常失典守及在京应捕官皆当罢又言中书宰执日趋禁中固宠苟安兼旬不至中堂壅滞机务乞戒饬臣僚自非入宿卫日必诣所署治事皆不报踰月调国子监丞夏风烈地震命百官杂议弭灾之道时宿卫士自北方来者复遣归百十为羣剽劫桓州道中既逮捕丞相舒玛尔节奏释之蒙古千户使京师宿邸中见民朱甲妻女车过邸门悦之夺以入朱泣诉于中书舒玛尔节庇不问本适与议抗言特克实余党未诛仁庙神主盗未得桓州盗未治朱甲冤未伸刑政失度民愤天怨灾异迭见职此之由辞气激奋众皆耸听二年转中书左司都事舒玛尔节死左丞相都尔苏当国得君与平章政事额卜德呼勒皆西域人西域富贾以其国异石名曰瓏者来献其估巨万或未酬其直诸尝有过为司宪褫官而有出其门下者三年额卜德呼勒自禁中出至政事堂集僚佐持诏藁示本乃以皇孛地震赦天下仍命中书酬累朝所献诸物之直擢用自英庙至今为宪台夺官者本读竟白曰今天警灾异而畏献物未酬直者愤怒此有司细故形诸王言必貽笑天下司宪褫有罪者官世祖成宪也今擢用之是废成宪而反污前诏也后复有邪佞赃秽者将治之邪抑置不问邪明日宣诏毕遂称疾不出至顺初擢奎章阁供奉学士二年擢礼部尚书宁宗崩顺帝未至太后在兴圣官正旦且议循故事行礼本言宜上表兴圣宫废大明殿朝贺众是而从之元统元年兼经筵官授奎章阁承制学士二年转集贤直学士兼国子祭酒经筵如故寻卒谥正献本性高抗不屈持论坚正尤以扶植斯文自任知贡举取进士满百人为读卷官增第一甲为三人父官南中清慎自持饘粥至不给本未弱冠聚徒以养亲殆二十年历仕通显犹僦屋以居所著有至治集四十卷弟褰字显夫泰定元年进士官翰林直学士谥文靖与本齐名人称为二宋云

△谢端

谢端字敬德蜀之遂宁人宋末避兵江陵因家焉端幼颖异十岁能作赋弱冠与尚

书宋本同师明性理之学又同教授江陵城中以文学
齐名时号谢宋史杠宣慰荆南数加延礼荐之姚枢枢方以文章大名自负少所许可以
所为文视端端一读即能指摘其用意所在枢欢奖不
已延佑五年擢进士乙科同知湘阴州事岁满迁太常博士坐失太庙金主罢去端礼官
非典守不当坐亦不辩寻除翰林修撰选为国子司业
翰林直学士端善为政箠仕湘阴猾束束手不敢舞文法豪民无赖者远避去绩誉藉然
其文章严谨有法宁约近瘠无奢滋驳预修文宗明宗
宁宗三朝实录及累朝功臣列传时称其有史才文宗初建奎章阁搜罗中外才俊尝语
阿荣曰当今文学之士朕惟未识谢端耳至元六年卒

△王守诚

王守诚字君实太原阳曲人从邓文原虞集游泰定元年试礼部第一廷对赐同进
士出身授秘书郎迁太常博士续编太常集礼若干卷
以进转艺林库使与修经世大典历官礼部尚书与修辽金宋三史书成擢参议中书省
事至正五年帝遣使宣抚四方除守诚河南行省参知
政事小民田婚之讼殆百十计守诚皆辨析详献为之平反州县官多取职田者悉厘正
之因疏言仕于蜀者地僻路遥俸给之薄何以自养请
以户绝及屯田之荒者召人耕种收其入以增禄秩宜宾县尹杨济亨欲于蟠龙山建宪
宗神御殿儒学提举谢晋贤请复文翁石室为书院皆
采以上闻成之风采耸动天下论功居诸道最进河南行省左丞未上母刘氏歿于京师
闻丧丞归遂遘疾卒谥文昭

△王思诚

王思诚字致道兖州磁阳人中至治元年进士第授国子助教改翰林国史院编修
官至正二年由国子司业拜监察御史上疏言京畿去
年秋不雨冬无雪方春首月蝗生黄河水溢盖不雨者阳之亢水涌者阴之盛也尝闻一
妇衔冤三年大旱往岁巴延专擅威福讎杀不辜郟王
之狱雅克特穆尔宗党死者不可胜数非直一妇之冤而已岂不感伤和气邪宜雪其枉
敕有司行祷百神陈牲币祭河伯发卒以塞其缺庶可
召阴阳之和消水旱之变此应天以实不以文也行部至檀州首言采金铁冶提举司设
司狱掌囚之应徒配者鈇趾以舂金镰旧尝给衣粮天
历以来水坏金冶因罢其给啮草饮水死者三十余人夫罪不至死乃拘囚至于饥死不
若加杖而速死之愈也况州县俱无囚粮轻重囚不决
者多死狱中狱吏妄报以病请定瘦死多寡罪着为令又言初开海道置海仙鹤哨船四
十余艘往来警逻今弊船十数止于刘家港口以捕盗
为名实不出海以致寇贼猖獗宜即莱州洋等处分兵严守不令泊船岛屿禁镇民与梢

水为婚有能捕贼者以船舁之获贼首者赏以官仍移
江淞河南行省列戍江海诸口以诘海商还者审非寇贼始令泊船下年粮船开洋之前
遣将士乘海仙鹤于二月终旬入海庶几海道宁息朝
廷多是其议出金河南山西道肃政廉访司事行部武乡监县来迓思诚私语吏属曰此
必赃吏未几果有愬于道侧者问曰得无诉监县斂汝
马乎其人曰然监县伏罪吏属问先知之故曰衣敝衣乘骏马非访而何召修辽金宋三
史调秘书监丞会国子监诸生相率为哄复命为司业
思诚召诸生立堂黜五人罚而降斋者七十人于是更相勉励超升兵部侍郎以母丧
归甫禫起为河闲路总管磁河水频溢决铁镫干思诚
集民丁作堤昼夜督工期月而塞复筑夹堤于外亘十余里命濒河民及弓手列置草舍
于上击木以防盗决是年民获耕艺岁用大稔募民运
碎瓮治郭外行道往来者无泥涂之病南皮民父祖尝濒御河种柳输课于官名曰柳课
后河决柳俱没官犹征之四十余年其子孙益贫不能
偿思诚连请于朝除之所辖景州广川镇汉董仲舒故里也河闲尊福乡博士毛茘旧居
也皆请建书院设山长员召拜礼部尚书历迁集贤侍
讲学士兼国子祭酒应诏言七事曰置行省丞相以专方面宽内郡征输以固根本汰冗
兵以省粮运改禄秩以养官廉罢行兵马司以便诘捕
复倚郭县以正纪纲设常选以起淹滞寻出为陕西行台治书侍御史十七年红巾陷商
州夺七盘进据蓝田县距奉元一舍思诚会豫王喇等
纳实哩及省院官于安西王邸众汹惧无言思诚曰察罕特穆尔河南名将贼素畏之宜
遣使求援此上策也戍将嫉客兵轧已论久不决思诚
曰吾兵弱旦夕失守咎将安归乃移书察罕特穆尔曰河南为京师庭户陕西实内郡藩
篱两省相望互为唇齿陕西危则河南岂能独安乎察
罕特穆尔新复陕州得书大喜曰先生有为国为民之心吾宁负越境擅发之罪遂提轻
兵五千倍道来援遂破贼河南总兵官果以擅调诘问
察罕特穆尔亟请于朝宜命察罕特穆尔专守关陕仍便宜行事行枢密院掾史受赂事
觉匿豫邸御史捕之急并系其母思诚过市中见之曰
古者罪人不孥况其母乎今释之不从思诚因自劾不出诸御史谒而谢之初御史有封
事自中丞以下惟署纸尾莫敢问其由思诚曰若是则
上下之分安在凡上章必折视不可行者以台印封置架阁库诏金五省余丁为军思诚
争曰关中方用兵困于供亿民多愁怨复有是役万一
为变所系岂轻邪事遂寢复召拜国子祭酒时卧疾闻命即起至朝邑卒于旅舍谥献肃

△李好文

李好文字惟中大名东明人登至治元年进士第授浚州判入为翰林国史院编修

官泰定四年除太常博士会盗窃太庙神主好文言在礼神主当以木为之金玉祭器宜贮别室又言祖宗建国以来每遇大礼皆临时取具博士不过循故事应答而已往年有诏集礼乃令各郡县置局纂修宜其久不成也礼乐自朝廷出郡县何有哉乃白院长选僚属数人出架阁文牒以资采择三年书成凡五十一卷名太常集礼迁国子博士【按王逢梧溪集云顺帝祭太庙乘马至里桥无敢至者好文膝行阻桥曰请皇帝下马帝如其言特授礼仪院使史传失载】 历拜监察御史时复以至元纪元好文言年号袭旧于古未闻袭其名而不蹈其实未见其益因言时政不如至元者十余事录囚河东王傅萨都拉以足蹋人死众曰杀人非刃当杖之好文曰怙势杀人甚于用刃竟置之死河东为之震肃至正元年除国子监祭酒【按梧溪集云好文为祭酒从容语帝宜躬祀孔子帝敬纳之会上丁夜有中丞屏驸从入礼殿弟子员谈遏之翼旦督刑曹问所遏者一监骚然好文曰中丞弗原其误乃欲施鞭刑邪遂解印丞相以闻中丞诣谢乃已本传未载谨附识】 改陕西行台侍御史三年郊祀召为同知太常礼仪院事帝亲祀至宁宗室遣阿噜问曰兄拜弟可乎好文与博士刘闻对曰为人后者为之子帝遂拜由是每亲祀必命好文摄礼仪使四年改礼部尚书与修辽金宋史未几复除陕西行台侍御史西蜀奉使者以私憾摭廉访使拾曾文博僉事乌玛喇王武事文博死乌玛喇诬服惟武不屈以轻侮抵罪好文曰奉使伐天子行事当问民疾苦黜陟邪正今行省以下至于郡县未闻举劾一人独风宪一司无一免者此岂正大之体乎率御史力辨武等之枉并言奉使不法者十余事六年除翰林侍讲学士兼国子祭酒诏开端本堂命皇太子入学好文以翰林学士兼谕德力辞帝不允好文言欲求二帝三王之道必由于孔氏其书则孝经大学论语孟子中庸摘其要略而释以经义更居史传及先儒论说有关治体而协经旨者加以所见仿真德秀大学衍义之例为书十一卷名曰端本堂经训要义奉表以进帝命太子习焉又集历代帝王故事总百有六篇一曰圣慧如汉孝昭后汉明帝幼敏之类二曰孝友如爵文王及唐元宗右爱之类三曰恭俭如汉文帝却千里马罢露台之类四曰圣学如殷宗缉学及陈隋诸君不善学之类以为太子问安余暇之助又取古史自三皇迄金宋历代授受国祚久速治乱兴废为书曰大宝录复取前代帝王是非善恶所当法戒者为书名曰大宝龟鉴备录以进焉久之升翰林学士承旨屡引年乞致仕仍给一品禄终其身

△富珠哩翀

富珠哩翀字子翬其先隆安人金泰和闲安女真姓氏属望广平祖德从宪宗南征因家邓州之顺阳封南阳郡侯父居谦辟掾江西以家自随生翀赣江舟中稍长即勤学从新喻萧克翁游后复从京兆萧口其学益宏以肆学士姚燧以书抵口曰燧见人多矣学问文章无足与子翬比伦者于是口以女妻之【按中州志云邓人李友端者号贞隐先生有女择配见翀曰此佳士也遂妻以女其说互异】大德十一年用荐者授襄阳县儒学教谕会修世祖实录燧首以翀荐至大四年授翰林国史院编修官延佑五年拜监察御史时英皇未出阁翀言宜择正人以辅导帝嘉纳之寻劾中书参议元明善帝初怒不纳明日乃命改明善他官而传旨慰谕翀有旨往淮东核宪司官声迹淮东宪东惟尚刑多置狱具翀曰国家所以立风纪盖将肃清天下初不尚刑也取其狱具焚之时有旨凡以吏进者例降二等从七品以上不得用翀言科举未立人才多以吏进若一概屈抑恐未足尽天下持平之议自今请吏进者宜止于五品许之因着为令除右司都事丞相特们德尔专事刑戮以复私憾翀因避去顷之擢翰林修撰改左司都事拜珠为相使人劳翀翀强起会国子监隶中书俾翀兼领之拜珠闲谓翀曰尔可作宰相否对曰宰相固不敢当然所学宰相事也夫为宰相者必福德才量四者皆备乃足当耳拜珠大悦曰非公不闻此言升右司员外郎预修大元通制泰定元年迁国子监司业三年金太常礼仪院事盗窃太庙神主翀请各室增设都监官内外严置扃钥昼夜巡警永为定制从之又纂修太常集礼书成未上有旨命兼经筵官文宗之入也欲虚大位以俟明宗翀极言大兄远在朔漠神器不可久虚宜摄位以俟其至文宗纳其言尝以字呼子翬而不名及文宗亲祀天地社稷宗庙翀为礼仪使详记行礼节文于笏竣事上天历大庆诗兼章帝命藏之奎章阁会立太禧院除迁太禧宗禋院三祗承神御殿事寻迁集贤直学士兼国子祭酒诸生素已望翀至是私相欢贺翀以古者教必有业退必有舍旧制弟子员初入学以羊贖所貳之品与羊等翀曰与其饜口腹孰若为吾党燥湿寒暑之虞乎命搏节之得钱二万缗作屋四区以居学者诸生积分有六年未及释褐者翀至皆使就试而官之帝师至京有旨朝臣乘马郊迎大臣俯伏进觞帝师不为动翀举觞立进曰帝师释迦之徒大下僧人师也余孔子之徒天下儒人师也请各不必礼帝师笑而起举觞卒饮众为之栗然【按辍耕录云翀在翰林进讲罢帝问三教何者为贵对曰释如黄金道如白璧儒如五谷帝曰然则儒贱邪对曰黄金璧无亦何妨五谷于世岂可一日阙哉本传未载谨附识】宁宗即位大臣以为赦不可烦

行翀曰帝以圣子神孙入继大统当与天下维新今不颁赦是使收怨于新造之君也皇太后以为宜从翀言议乃定迁礼部尚书元统二年除江浙行省参知政事逾年以迁葬告归召为翰林侍讲学士以疾辞不赴至元四年卒追封南阳郡公谥文靖翀为学一本于性命道德而记问宏博文章简奥典雅深合古法居国学久论者谓许衡之后能以师道自任者惟耶律有尚及翀而已有文集六十卷子远字明道以荫为秘书郎转襄阳县尹须次居南阳贼起远以忠义自奋倾财募丁壮得千余人与贼拒战俄而贼大至远被害妻雷氏为贼所执欲妻之诋贼曰我参政冢妇县令嫡妻肯从汝狗彘生乎亦见杀举家皆被害

△李洞

李洞字溉之滕州人始从学即颖悟强记作为文辞如宿习者姚燧见其文深叹异之荐授翰林国史院编修官以亲老就养江南久之辟中书掾累转太常博士拜珠为相闻其名擢监修国史长史泰定初改翰林待制以亲丧未葬辞归天历初复以待制召时文宗方开奎章阁延天下知名士洞数进见奏对称旨特授奎章阁承制学士着辅治篇以进文宗嘉纳之朝廷有大议必使与焉会修经世大典洞方卧疾即强起曰此大制作也吾何可不预力疾同修书成旋谒告归遣使召之以疾不能起洞神情开朗目莹如电望之者疑为神仙中人为文奋笔挥洒纵横奇变若纷错而有条理每以李太白自拟当世亦以是许之侨居济南有湖北花竹之胜作亭曰天心水面文宗尝敕虞集制文以记之尤善书自篆隶草真皆精诣为世所珍爱有文集四十卷

△苏天爵

苏天爵字伯修真定人父志道历官岭北行省郎中和林大饥救荒有惠政天爵由国学生公试名在第一按蓟州判官泰定元年擢应奉翰林文字至顺元年预修武宗实录【按张溥名臣奏议载天爵在史局时有请修诸臣列传疏言守令之贤读隐逸之著述及奸臣贼子之事宜并登于书以垂法戒以事不果行故史传不载】二年擢江南行台御史明年虑囚湖北湖北地僻远天爵冒瘴毒徧历其地囚有言冤状者辄为之太息每事详究虽暑夜犹篝镫治文书不倦元统元年入为监察御史在官四阅月疏凡四十五上朝廷政令闾阎幽隐其关乎大体系乎得失者知无不言明年预修文宗实录迁翰林待制寻除中书右司都事兼经筵参赞官顺帝至元六年迁吏部尚书省参议中书省是时朝廷更立宰相庶务多所弛张天爵言无顾忌夙夜谋画须发尽白至正四年由陕西行台侍御史召为集贤侍讲学士兼国子祭酒天爵自以

起家诸生进为师长端已悉心以范学者明年奉使宣抚京畿究民所疾苦察吏之奸贪其兴除者七百八十三年其纠劾者九百四十九人以忤时相意竟坐不称职罢归七年天子察其诬乃复起为江浙行省参知政事九年改大都路都总管以疾归俄起为两浙都转盐运使十二年妖寇自淮右蔓延江东诏仍江浙参政总兵饶信闲克复一路六县以病卒于军中天爵为学博而知要长于纪载尝着国朝名臣事略十五卷文类七十卷其为文平易温厚成一家言诗尤得古法有诗藁七卷文藁三十卷松厅章疏五卷春风亭笔记二卷时中原前辈凋谢殆尽天爵独身任一代文献之寄讨论讲辩虽老不倦学者因其所居称为滋溪先生 【宋本有滋溪书堂集】

钦定续通志卷四百九十三

●钦定续通志卷四百九十四 列传二百九十四

列传

元 【四十八】

○元四十八

王都中

王克敬

任苏克

陈思谦

崔敬

吕思诚

汪泽民

王都中

王克敬

任苏克

陈思谦

崔敬

吕思诚

汪泽民

△王都中

王都中字符俞福宁州人父积翁仕宋为宝章阁学士福建制置使宋主纳土乃以全闽图籍来降除参知政事行省江西后以为国信使

使日本宣谕遇害 【按纪事本末云积翁取道庆元般海帝以其俗尚佛命普陀僧如智同往舟人不愿行其谋杀之时至元二十一年正月

】 都中生三岁以恩授顺昌县尹县平江田八十亩宅一区已而世祖追念其父授都中平江路总管府治中时年十七僚吏见其年少颇易之

都中遇事剖析动中肯綮皆■〈目罅〉眙不敢欺学舍久坏不治募大家合钱新之秩满除浙东道宣慰副使武宗诏更钞法行铜钱除都中

江淮泉货监凡天下为监者六惟江淮所铸钱最精迁郴路总管郴民染于蛮俗喜鬪争

都中大治学舍作筩豆簠簋笙盘琴瑟之属使其民识
先王礼乐延宿儒教学其中以义理开晓之俗为之变寻移饶州路总管年饥米价翔踊
都中出官仓米定其价为三等言于行省谓须赧以下
等价民乃可得食又于下等价减十之二使民就余行省怒其专都中曰饶去杭二千里
往还定议非半月不可人七日不食则死安能忍死以
待乎郡岁贡金而金户贫富不常都中考得其实乃更定包银之法户不过二两州县征
加十倍都中责之一以诏书为断俄以内忧去服阕除
两浙都转运盐使亭灶户三年一比附推排任事者恐敛怨久不举行都中曰为政者使
皆避谤何以集事徧历三十四场验其物力高下以损
益之役既平而课亦足迁福建道宣慰使后改浙东天历初又徙广东三易镇皆有声元
统初朝廷以两淮盐法久坏仍命都中理其事既至参
酌前所行于两浙者次第施之寿拜河南行省参政以疾归至正元年卒谥清献

△王克敬

王克敬字叔能大宁幼奇奇颖大宁习尚少文克敬独孜孜为儒者事由江浙行省
照磨累迁左右司都事延佑四年往四明监倭人互市
先是往监者惧番情叵测必严兵自卫克敬至悉屏去抚以恩信皆帖然无敢哗吴人有
从军征日本陷于倭者至是从至中国诉于克敬愿还
本乡或恐为祸阶克敬曰岂有军士怀恩来归而不之纳耶事闻朝廷遂还之鄱阳大饥
总管王都中出廩粟赈之行省欲罪其擅发克敬曰鄱
阳距此千里比待民且死彼为仁而吾属顾为不仁乎都中因得免拜监察御史用故事
监吏部选有履历当升者吏故抑之问其故吏曰有过
克敬曰法笞四十七上不升今至不是吏曰责轻罪重曰失出在刑部铨曹安知其罪
重卒升之寻迁左司都事时英宗方厉精图治丞相拜
珠请更前政不便者会议中书堂克敬首言江南包银民贫不能输者有司责之役户当
罢之两浙煎盐户牢盆之役其重者尤害民当免其它
役诏从之泰定初出为绍兴路总管行省檄克敬抽分舶货揭蕃者例籍其货商人以风
水为解有司不听克敬曰某货出某国地有远近贷有
轻重冒重险出万死舍近而趋远弃重而取轻岂人情邪众不能夺商德之擢江西道廉
访司副使转两浙盐运使调海道都漕运万户是岁当
天历之变海漕舟有后至直沽者不果输复漕而南还行省欲坐罪督运者勒其还趋直
沽克敬谓脱在当年而往返若是信可罪今蹈万死完
所漕而还登得已哉乃请令其计石数附次年所漕舟达京师擢参议中书省事有以飞
语中大臣者克敬持古八议之法谓罪状不明而轻罪
大臣何以白天下宰相传旨大长公主为皇外姑赐钱若干平云南军还赐钱若干英后

入覲赐钱若干克敬乞覆奏曰用财有道大长公主供
馈素优今贴出无名是不当也自诸军征讨以来赏格未下云南独先受赏是不均也英
后远迁徙御众多非大赉恩意不能洽今赐物鲜少是
不周也宰相以闻帝是其议除江南行台治书侍御史又迁淮东廉访使以正纲纪为已
仕声誉益着人为吏部尚书元统初授江浙行省参知
政事请罢富民承佃江淮田有松江大姓岁漕米万石献京师者其人死子孙且贫有司
岁征弗足则杂置松江田赋中令民包纳克敬曰匹夫
妄献米徼名爵以荣一身今身死家破又已夺其爵不可使一郡之人均受其害且国用
宁乏此耶奏免之视事五月请老克敬历官所至俱有
政绩可纪二年卒追封梁郡公谥文肃子时以翰林学士承旨致仕

△任苏克

任苏克渤海人幼事父母以孝称性倜傥义之所在必亟为之有古侠士风初袭父
官为右卫千户公卿以其贤荐于朝英宗召见与语大
奖赏将择重职处之未几特克实与都尔苏谋逆遂引去不得出居常扼腕或醉归恸哭
过市时人目以为狂莫知其意也泰定中都尔苏用事
天变数见苏克乃密与平章苏苏谋曰先帝之讎孤臣朝夕痛心而不能报者以未有善
策也今武宗长子周王正统所属然远居朔漠难以达
意次子怀王人望所归近在金陵易于传命若能同心推戴以图大计则先帝之讎可雪
矣苏苏深然之时雅克特穆尔金枢密院事握兵柄二
人深结纳之告以所谋雅克特穆尔闻之矍然因徐说之曰天下事性顺逆两涂以顺讨
逆何患不克况公国家世臣与国同休戚今国难不恤
他日有先我而谋者祸必及矣于是雅克特穆尔许之致和元年怀王自金陵迁江陵俄
而泰定帝崩都尔苏踰月不立君物情汹汹苏克乃与
苏苏从雅克特穆尔奉豫王令以八月四日执居守省臣发兵塞居庸诸关召文武百寮
集阙下谕以翊戴大义遣使迎怀王于江陵怀王至京
师羣臣请正大统遂即帝位是为文宗擢苏克为礼部尚书苏克辞曰臣曩备宿卫南坡
之变不能效一死以报主知今日之举皆诸将相之力
在臣未足赎罪又曷敢言功乎帝慰勉之乃拜命厯迁寿福府总管又为都水使者居官
恂恂无几微自伐意或询以翊戴往往逊谢终无所言
人以是多之

△陈思谦

陈思谦字景让浙东宣慰使佑之孙也少孤警敏好学文宗天历初为丞相高昌王
伊都呼所举授典宝监经厯改礼部主事首言教坊仪
凤二司请并入宣徽以清礼部之选其官属不当与文武臣并列朝会宜置百官之后大

乐之前诏从之而二司隶礼部如故至顺元年拜西行
台监察御史建明八事一曰正君道二曰结人心三曰崇礼让四曰正纲纪五曰审铨衡
六曰厉孝行七曰纾民力八曰修军政先是关陕大饥
民多鬻产转徙及来归皆无地可耕思谦令听民倍直赎之使富者收兼人之利贫者获
己弃之业监察御史李扩行部甘肃金州民刘海延都
其男元元自称本流民非海延都之子告父掠其财扩听之以酷法抑其思思谦劾扩逆
父子之天坏朝廷之法遂抵扩罪明年拜监察御史建
言户部赐田诸集贤支请海青狮豹肉食及局院工粮好事施舍一切泛支以至元三十
年前较之动增数十倍至顺经费阙二百三十九万余
锭宜节无益之费备军国之用又言军站消乏一有征行必括民闲之马方今西越流沙
北际大漠东及辽海地气高寒水甘草美无非牧养之
地宜设置羣牧使司统领十监专治马政并畜牛羊数年之后马大蕃息或给军以收兵
威或给站以优民力牛羊之富又足以给国用亦其一
助又以铨衡之弊入仕之门太多黜陟之法太简州郡之任太淹朝省之除太速欲设三
策以救四弊一曰至元三十年以后增设衙门冗滥不
急者从实减并其外有选法者并入中书二曰参酌古制设辟举之科令三品以下各举
所知得才则受赏失实则受罚三曰古者刺史入为三
公郎官出宰百里盖使外职识朝廷治体内官知民闲利病今后历县尹有能声善政者
授郎官御史历郡守有奇才异绩者任宪使尚书其余
各验资品通迁在内者不得三考连任京官在外者须历两任迁内职绩非出类守不败
官者则循以年劳处以常设凡朝阙官员须二十月之
上方许迁除帝命中书议行之时居忧者多夺情起复思谦言三年之丧谓之达礼自非
金革不可从权遂着于令有诏起报严寺思谦曰兵荒
之余当罢土木以纾民力帝嘉之曰此正得祖宗立台宪意未几迁右司都事历御史台
都事重纪至元元年出为淮西道廉访副使未期月引
疾归召为中书省员外郎上言强盗但伤事主者皆得死罪而故杀从而加之人与鬪殴
杀人者例杖一百七下得不死与私宰牛马之罪无异
是视人与牛马等也法应加重因奸杀夫所奸妻妾同罪律有明文今止坐所犯似失推
明遂令法曹议着为定制至正中累迁淮西廉访使卢
州盗起思谦言于宣让王特穆尔布哈曰承平日久民不知兵王以帝室懿亲镇抚淮甸
岂得坐视思谦愿与王戮力殄寇王曰此吾责也如鞍
马器械未备何思谦括官民马置兵甲与王分道并进遂平庐州既而颍寇将渡淮又言
于王亟调芍陂屯卒用之王曰非奉诏不敢思谦言非
常之变理宜从权擅中发之罪愿自坐王从之其侄立本为屯田万户召语曰汝职乃先

人力战所致今国家有难汝当身先士卒以图报劾寻

召为集贤侍讲学士十二年拜御史中丞上章乞老不允特旨进一品授荣禄大夫仍御史中丞及命下翼日卒追封鲁国公谥通敏

△崔敬

崔敬字伯恭大宁惠州人通刑名法律之学初由刑部令史擢中书掾累迁监察御史时既毁文宗庙主削文宗后皇太后之号徙置东安州皇弟雅克特古斯文宗子也亦放之高丽敬上疏曰文皇获不轨之愆已撤庙祀叔母有阶祸之罪亦削洪名尽孝正名斯亦足矣惟念雅克特古斯太子年方在幼罹此播迁天理人情有所不忍明皇当上宾之日太子在襁褓庆闲尚未有知义当矜悯盖武宗视明文二帝皆亲子也陛下与太子皆嫡孙也以武皇之心为心则皆子孙固无亲疏以陛下之心为心未免有彼此之见常人有百金之产尚置义田宗族困阨者为之教养不使失所况贵为天子富有四海今以同气之人置之度外倘生他变良可寒心望陛下遣近臣迎归太后太子以全母子之情尽骨肉之义则天意回人之心悦矣不报又疏谏天子巡幸上都宜御内殿其畧曰世祖以上都为清暑之地车驾行幸岁以为常阁有大安殿有鸿禧睿思所以保养圣躬适起居之宜存思敬之心也今实喇别尔多斯乃先皇所以备宴游非常时临御之所今国家多故天道更变愿大驾早还大内居深宫严宿卫与宰臣谋治道万几之暇命经筵谁讲究古今盛衰之由缉熙圣学乃宗社之福也时帝数以历代珍宝分赐近侍敬又上疏曰臣闻世皇时大臣有功所赐不过鞶革重惜天物为后世虑至远也今山东大饥燕南亢旱海潮为灾天文示儆地道失宁京畿南北蝗飞蔽天正当圣主恤民之曰近侍之臣不知虑此奏禀承请殆无虚日甚至以府库百年所积宝物遍赐仆御阉寺之流乳稚童孩之子帑藏或空万一国有大事人有大功又将何以为赐乎乞追回原赏以示恩不可滥庶允公论是年出金山北廉访司事按部全宁狱有李秀以坐造伪钞连数十人敬疑而献之廉知始谋者为大同王浊有司误执秀以塞责移文至大同果得浊乃出秀至正中累迁至同知大都路总管府事直沽河淤中书省委敬浚治之不三月告成除刑部侍郎迁中书左司郎中历刑部尚书广东宪府讎杀处以大逆敬曰宪府以私相攻致有是变非大逆坐一家者比议始定十五年改兵部尚书兼济宁军民屯田使朝廷给钞十万锭散于有司招至军民立营屯种岁收百万斛以给边防居岁余其法井井十七年召为大司农少卿盗据齐鲁敬与平章政事达兰参知政事温普分省陵州命便宜行事敬与温普密议曰我军强且胜

彼将败而降如得仗义之士直抵其巢穴而招安亦方面之幸也有国子生王恪等愿往敬授以官俾之行至郢城见李秉彝田丰等谕以逆顺祸福之理丰与秉彝皆悔过自新山东郡邑皆复敬以军马供给浩繁民力不继请行纳粟补官之令诏从之于是河北燕南士民踵至积粟百万石民获少苏十八年迁江浙行省左丞卒谥忠敏

△吕思诚

吕思诚字仲实平定州人先世皆仕金为望族【按一统志云父允官汉中廉访司金事】思诚登泰定元年进士第授景州蓟县尹差民户为三等均其徭役刻孔子象令社学祀事每岁春行田树畜勤者赏以农器人争趋事地无遗利印识文簿畀社长季月报县不孝弟不事生业者悉书之罚其输作天历兵兴豫贷钞于富民令下造军器事皆先集民用不扰于后得官价亟以还民天旱道士持青蛇曰卢师谷小青谓龙也祷之即雨思诚以其惑众杀蛇逐道士雨亦随至县多淫祠刑牲以祭者无虚曰思诚悉命毁之唯存江都相董仲舒祠擢翰林国史院编修官文宗在奎章阁有旨取阅国史左右舁匱以进思诚独跪阁下争曰国史记当代人君善恶自古天子无亲阅之者事遂寝擢国子司业顺帝即位拜监察御史与鄂伦图等劾中书平章政事彻尔特穆尔变乱朝政章上留中不下思诚纳印绶殿前遂出金广西廉访司事巡行郡县土官有于元帅者恃势鱼肉人恐事觉阴遣其子迓思诚于道思诚缚之悉发其阴私痛惩其罪一道震肃后移浙西达实特穆尔时为南台御史大夫与江浙省臣有隙嗾思诚劾之思诚曰吾为天子耳目不为台臣鹰犬闻行省平章左右贪墨浙民怨其即疏其罪流之海南复召为国子司业迁中书左司员外郎盗杀河南省臣以伪檄呼廉访使段辅入行自事及事败诿误者三十余人将寘于法思诚言于朝皆释之拜礼部尚书御史台奏为治书侍御史总裁辽金宋三史升侍御史会平章政事袞布巴勒不法监察御史劾之御史大夫额森特穆尔欲缓其章思诚趣入奏袞布巴勒遂罢额森特穆尔衔之思诚即谒告去朝廷知思诚无他迁河东廉访使未几召为集贤侍讲学士兼国子祭酒寻授湖北廉访使入拜中书参知政事升左丞转御史中丞劾奏清道官不尽职罢之再任左丞知经筵事提调国子监兼翰林学士承旨知制诰兼修国史又为枢密副使乃知经筵事复为中书左丞御史大夫纳琳诬参政孔思立受赇事或欲连中之纳琳曰吕左丞素有廉声难以相及遂止拜集贤学士兼国子祭酒吏部尚书偃哲笃左司郎中武祺等建言更钞法以楮币一贯文省权铜钱一千文钞为母而钱为子命廷臣集议思诚

曰中统至元自有母子上料为母下料为子岂有以故纸为母而立铜为子者乎又曰钱钞用法见为一致以虚换实也今历代钱至正钱中统钞至元钞交钞分为五项虑小民知之藏其实而弃其虚恐不利于国家俟哲笃曰至元钞多伪故更之思诚曰至元钞非伪人为伪尔交钞若出亦为伪者矣且至元钞人犹识之交钞人未之识伪将滋多况祖宗成宪岂可轻改俟哲笃曰钱钞兼行何如思诚曰钱钞兼行轻重不伦何者为母何者为子俟哲笃忿曰公有何策思诚曰我有三字策曰行不得丞相托克托见其言直颇狐疑未决御史大夫额森特穆尔曰吕祭酒之言亦有是者但不当在庙堂上大声厉色尔已而监察御史承望风旨劾思诚狂妄左迁湖广行省左丞遣太医院宣使泰初即其家迫遣初窘辱之不遗余力思诚不为动贻书参议龚伯璘曰去年许可用为河南左丞今年吕思诚为湖广左丞世事至此足下得无动心乎时武昌方为贼据思诚抵城下语诸将曰贼与诸君相持久必不知吾来出其不意可以入城遂行诸将不获已随其后贼仓卒无备尽惊走思诚遂入乃大会军民官吏告之曰贼去示吾弱也度将复来于是申号令修器械葺城郭明部伍先谋自守徐议出征苗军暴横素侵辱省宪思诚正色叱之曰若等能杀吕左丞乎自是无敢复至未几召还复为中书左丞思诚去二曰城复陷移大司农俄得疾以至正十七年三月卒谥忠肃

△汪泽民

汪泽民字叔志徽之婺源州人宋端明殿学士藻七世孙也家贫力学通诸经成延佑五年进士授同知岳州路平江州事历南安路总管府推官镇守万户多尔济持官府短长郡吏王甲殴伤属县长官诉郡同僚畏多尔济托故不视事泽民独捕甲系之狱多尔济赂巡按御史受甲家人诉欲出之泽民正色与辨御史沮恚夜竟去乃卒罪王甲湖州府判官钱珍以奸淫事杀推官梁楫事连广东廉访副使刘珍坐系者二百余人委官鞫问皆顾忌淹延弗能白复檄泽民谳之狱立具人服其明历平江路总管府推官有僧净广与他僧有憾久绝往来一日邀广饮广弟子急欲得师财潜往他僧所杀之诉于官他僧不胜拷掠遂诬服泽民视其刀上有铁工姓名召工问之乃其弟子刀也一讯吐实人惊以为神至正三年召除国子司业预修辽金宋三史书成迁集贤直学士未两月移书告老大学士和尚曰集贤翰林实养老尊贤之地愿以少留以副上意泽民曰以布衣叨荣三品志愿足矣遂以礼部尚书致仕既归田里与门生故人相往返超然若忘世者十五年蕲黄贼犯宣州泽民时居其地江东廉访使道通日就询守御计城得无虞明年长枪军索诺木巴勒等叛来

寇城或劝之去泽民曰我虽无官守顾受国厚恩临危
爱死非臣子节留宣州筹划累败贼兵既而寇益众城陷泽民为所执使之降大骂不屈
遂遇害事闻追封谯国郡公谥文节

钦定续通志卷四百九十四

●钦定续通志卷四百九十五 列传二百九十五

列传

元 【四十九】

○元四十九

韩镛

李稷

盖苗

张楨

归旸

陈祖仁

韩镛

李稷

盖苗

张楨

归旸

陈祖仁

△韩镛

韩镛字伯高济南人登延佑五年进士第授翰林国史院编修官寻迁集贤都事泰
定四年转国子博士俄拜监察御史帝欲以中书参议
傅岩起为吏部尚书镛上言吏部掌天下铨衡岩起从吏部入官乌足尽知天下贤才况
尚书秩三品岩起累官止四品于法不得升制可其奏
天历元年除金浙西廉访司事系奸暴黜贪墨特举乌程尹干文传治行为诸县最至正
初累拜侍御史以刚介为时所忌言事者诬劾其赃私
罢去五年台臣辨其枉复起参议中书省事七年会朝廷慎选守令参知政事魏中立言
于帝帝乃特署镛姓名授饶州路总管饶俗尚鬼有觉
山庙者自昔为妖以祸福人镛至即撤其祠宇沈土偶人于江凡境内淫祠不合祀典者
皆毁之人初大骇已而叹服镛知民可教俾俊秀入学
求宿儒为五经师朔望必幅巾深衣以谒先圣每月考课以示劝励由是人各致力于学
镛居官靡自奉澹泊僚属皆化之十年召拜中书参知
政事时丞相托克托在位袭伯璘辈方用事朝廷悉议更张镛有言不见听人以镛优于
治郡而执政非其所长遂出为甘肃行省参政及托克
托罢用事者悉诛而镛独免祸再迁西行台中丞歿于官

△李稷

李稷字孟翮滕州人幼颖敏从其父官袁州师夏镇 【按袁州志云夏镇字定远宜

春人以进士授茶陵州判官行谊端饬学者宗之】

又从官公山师方回孙泰定四年中进士第授淇州判官淇当要冲稷至能理其剧至正初擢监察御史劾阉宦高龙卜恃赖恩私侵挠朝政交通时相宜早正邦刑章上流之边境又言御史封事须至御前开拆以防壅蔽言事官须加优擢以开谏诤之路殿中侍御史给事中起居注须任端人承天护圣寺火有旨更作稷言频年水旱相乃公私交乏不宜妄兴大役议遂寢帝方注意守令稷言下县尹多从吏部铨选或非其才宜并归省选茶盐铁课责备长吏动受刑谴何以临民宜分委佐贰投下达噜噶齐蠹政害民不当授正官帝悉可其奏五迁至户部尚书十一年廷臣议以中原租税不实将履亩起税稷曰方今妖寇窃发民庶流亡此政一行是驱民为盗也相臣是之寻迁治书侍御史十二年从丞相托克托平除州谒告归葬厯拜中书参知政事后以山东廉访使致仕卒于京追封齐国公谥文穆

△盖苗

盖苗字耘夫大名元城人登延佑五年进士第授单州判官岁饥郡府遗苗至户部请赈户部难之苗伏中书堂下出糖饼以示曰济宁民率食此况不得此食者尤多岂可坐视不救乎于是凡被灾者咸获振焉单州税精岁输馆陶仓距单五百余里载馱担负民甚苦之是秋馆陶大熟苗先期令民余粟仓下得省民力之半累擢江南行台监察御史建言严武备以备不虞简兵卒以壮国势全功臣以隆大体惜官爵以清铨选考实行以抑奔竞明赏罚以杜奸欺计利害以孚民情去民贼以崇礼节皆切于时务公论黷之天历初部以建康潜邸为佛寺毁民居七十余家命御史大夫督其役苗言今夺农时以刼佛寺又废民居使之家破产荡岂圣人御天下之道乎昔汉高帝兴于丰沛为复两县光武中兴南阳免租三年既不务此而信重佛教何以满斯民之望台臣职专纠察表正百司乃委以修繕之役岂礼也哉书奏御史大夫果免督役【

按虞集尼翔集庆寺碑云御史中丞赵世安承稟于内行御史中丞相继率其属以莅之则是未尝免督役也与本传异】入为监察御史帝幸护国仁王寺泛舟玉泉苗进曰今频年不登边隅不靖正当恐惧修省何暇游逸以临不测之渊乎帝嘉纳之台臣拟苗金淮东廉访司事帝曰仍留盖御史朕欲闻其谗言至正二年出为山东廉访副使益都淄莱地旧称产金朝廷建一府六所综其事民岁买金以输官或忤长吏意辄谓具居有金矿掘地及泉而后止苗奏罢之四年迁刑部尚书初盗杀河南省臣延坐五百余家已有诏止诛首罪至是宰臣复欲尽诛苗坚持

不可御史趣具狱苗曰肆赦复杀在法所无御史独宜劾苗其敢累朝廷之宽仁乎乃卒如苗议七年拜中书参知政事时大臣以两京驰道狭隘奏毁民田庐广之已遣使督治苗言驰道创自至元初何今日独为隘乎力辩乃罢又欲出宿卫士为郡长官俾资养贍苗曰郡长所以牧民岂养贫之地果有不能自存赐子之可也若任郡寄必择贤才而后可以议遂寝又欲以钞万贯与角抵者苗曰诸处告饥不蒙振恤力戏何功获此重赏乎会与相议多不合每事相抗时相谓后有公务毋白参政苗叹曰猥以非才待罪执政中书之事皆当与闻今宰相言若此不退何俟有旨拜江南行台御史中丞比至除甘肃行省左丞时苗已致仕去复趣赴任苗异疾就道至镇即上言西土诸王为国藩屏赐赉虽有常制而有司牵于文法遂使恩泽不以时及非隆亲厚本之意又言甘肃每岁中粮奸弊百端请以粮钞兼给则军民咸利矣朝廷从之迁陕西行御史台中丞到官数日即疏乞还里明年卒封魏国公谥文献

△张桢

张桢字约中汴梁人登元统二年进士辟河南行省掾踰年除高邮尹县民张提领武断乡曲一日至县有所嘱桢执之尽得其罪状杖而徒之累除中政院判官至正八年拜监察御史劾太尉阿齐拉欺罔之罪并言明埒克栋阿伊哩雅伊噜布哈皆陛下不共戴天之讎巴延贼杀宗室嘉王郟王一十二口稽之古法当伏门诛而其子孙兄弟尚仕于朝宣急诛窜伯勒齐尔布哈阿附权奸亦宜远贬今灾异迭见盗贼蜂起海寇敢于要君阍帅敢于玩寇若不振举恐有唐末藩镇噬脐之祸不听及红巾贼毛贵陷山东上疏陈十祸根本之祸有六征讨之祸有四历数其弊一曰轻大臣二曰解权纲三曰事安逸四曰塞言路五曰离人心六曰滥刑狱所谓根本之祸六也伏见陛下以盛年履艰危而登大宝因循治安不预防虑今天下多事海内不宁天道可谓变常民情可谓难保矣是宜卧薪尝胆奋发悔过思祖宗创业之难与今日坠亡之易于是修实德推至诚凡上木之劳声色之好燕安鸩毒之戒皆宜痛撤勇改有不尽者亦宜防微杜渐禁于未然出宫女节浮费畏天恤人而陛下乃安焉处之如太平无事时此根本之祸也至若不慎调度不资羣策不明赏罚不择将帅所谓征讨之祸四也伏见调兵六年初无纪律之法又无激劝之宜将帅因败为功指虚为实大小相谩上下相依其性情不一而邀功求赏则同是以有覆军之将残民之将怯懦之将贪婪之将所经之处鸡犬一空货财俱尽及其面谀游说反以克复受赏今克复之地悉为荒墟河南提封三千余里郡县星罗棋布岁输钱谷数百万计

而今所存者封邱延津登封偃师三四县而已两淮之北大河之南所在萧条夫有土有人有财然后可望军旅不乏馈饷不已今寇敌已至今境固不忍言未至之处尤可寒心如此而望军旅不乏馈饷不竭使天雨粟地涌金朝夕存亡且不能保况以地方有限之费而供将帅无穷之欲哉其为自启乱阶亦已危矣陛下事佛求福饭僧消祸以天寿节禁屠宰皆虚名也今天下多杀人矣陛下泰然不理而曰吾将以是求福福何自而至哉颍上之寇始结白莲以佛法诱众而终成抗拒视其所向駸駸可畏堂堂天朝不思靖乱而反为阶乱有识者为之扼腕有志者为之痛心此征讨之祸也疏奏不省权臣恶其讦直二十一年除险山南道肃政廉访司事是时毛贵势逼京畿而博啰特穆尔驻兵大同察罕特穆尔驻兵洛阳方以争晋冀为事构兵相攻朝廷遣中书参政额森布哈枢密副使托克托穆尔治书侍御史纽纽往解之既受命不前进楨言其贪懦庸鄙苟怀自安无忧国致身之忠朝廷将使二家释憾协心诗贼此国之大计宜风驰电走而乃迂回退怯枉道延安以西绕曲数千里迟迟而行使两军日夜仇杀黎庶肝脑涂地实此三八所致宜急殛之以救时危亦不报楨慨然曰天下事不可为矣即辞去居安邑山谷结茅庐仅容膝有访之者不复言时事但对之流涕而已二十四年博啰特穆尔称兵犯阙皇太子出居冀宁奏除翰林学士不起库库特穆尔将辅皇太子入定乱遣使传东宫旨访以时政楨复书曰今大河内外长淮南北悉为邱墟关陕之区所存无几江左日思荐食上国湘汉荆楚川蜀淫名僭号利我多虞阁下国之右族三世二王得不思廉兰之于赵寇贾之于汉乎京师一残假有不逞之徒崛起草泽借名义倡其说于天下阁下将何以处之乎守京师者能聚不能散御外侮者能进不能退纷纷籍籍神分志夺国家之事能不为阁下忧乎今大要有三保君父一也扶稷二也卫生灵三也请以近似者陈其一二卫出公据国至于不父其父赵有沙邱之变其臣成兑平之不可谓无功而卒至于不君其君唐肃宗流播之中怵于邪谋遂成灵武之篡千载之下虽有智辩百出不能为雪呜呼是岂不可以鉴乎阁下览观焉谋出于万全则善矣库库特穆尔深纳其说用克有成【按库库特穆尔传库库特穆尔从太子入朝后跋扈不臣戕杀官吏及明兵入太原弃城西奔迄无成就传文殊未可信】后三年卒

△归旻

归旻字彦温汴梁人登至顺元年进士第授同知颍州事鉏奸击强人不敢以年少易之山东盐司遣奏差至颍恃势为不法旻执以下狱

时州县奉盐司甚谨臣指气使辄奔走之昉独不为屈至元五年■〈木巳〉县人范孟谋不轨诈为诏使至河南杀行省官属使昉北守黄河口昉拒不从贼怒系于狱及贼败污贼者皆获罪昉独免明年转国子博士拜监察御史已而辞官归养亲汴上至正七年除右司都事顺江酋长乐孙求内附请立宣抚司及置郡县昉曰果设郡县有事不救则孤来附之意救之则罢中书而事外夷与左丞吕思诚抗辨甚力丞相太平笑曰归都事善戇何相抗乃尔其策果将焉出昉曰其酋长可授宣抚勿责其贡赋使者昉金帛遣归足矣卒从昉言京师苦寒有丐诉丞相马前丞相索皮服子之昉曰宰相当以广济天下为心莫若录寒饥者稍振之耳丞相悟而止云南斯可伐叛诏以元帅舒噜遵道往谕之未几命平章政事音达珙将兵讨之事久无功二人上疏纷纭中书欲罪舒噜昉曰彼事未白而专罪一人岂法意乎况一谕之而一讨之彼将何所适从此非使者之罪也广海猺贼入寇诏多尔济丹将思播杨元帅军以讨之昉曰易军而将不谙教令恐不能决胜若命杨就统其众彼悦于恩命必能自效帝不从后竟无功明年迁参议枢密院事时方国珍未附诏江浙行省参知政事多尔济丹诗之师败被执将加之罪昉曰将之失利其罪固当然所部皆北方步骑不习水战是驱之死地耳宜募滨海民习水利者禽之既而国珍遣人从多尔济丹走京师请降昉曰国珍已败我王师又拘我王臣力屈而来非真降也必讨之以令四方时朝廷方事姑息卒从其请彼果屡叛如昉言迁御史台都事九年历迁礼部尚书会开端本堂皇太子就学召昉为赞善未几迁翰林直学士同修国史仍兼前职昉言师傅当与皇太子东西相向授书其属亦以次列坐虚中座以待至尊临幸否则师道不立矣时羣臣言人人殊卒从昉议昉在上都时托克托自甘州还且入相中书参议赵期颐员外郎李稷谒昉私第致托克托之命属草诏昉辞曰丞相将为伊周事业入相之诏当命词臣视草今属笔于昉恐累丞相之贤也期颐曰若帝命为之奈何昉曰事理非顺亦当固辞期颐知不可屈乃已迁四川行省参知政事除刑部尚书皆以疾辞十七年授集贤学士兼国子祭酒使者迫之昉舆疾至京师时海内多故昉上三策一曰振纪纲二曰选将材三曰审形势时不能用十一月以集贤学士资德大夫致仕给半俸终身辞不受明年乞骸骨侨居宏州徙蔚州又徙宣德皆闲关避兵寻居解之夏县皇太子出冀宁强起之居数月复还夏县二十七年卒

△陈祖仁

陈祖仁字子山汴人也父安国仕为常州晋陵尹祖仁早有文名至正元年科举复

行祖仁以春秋中河南乡贡遂魁多士赐进士及第授翰林修撰同知制诰兼国史院编修官出佾山东肃政廉访司事擢监察御史复出为山北肃政廉访副使召拜翰林直学士除参议中书省事二十年帝欲修上都宫阙工役大兴祖仁上疏曰上都宫阙创自先帝修于累朝自经兵火焚毁殆尽所不忍言此陛下所为日夜痛心亟图兴复者也然今四海未靖疮痍未瘳仓库告虚财用将竭乃欲驱疲民以供大役废其耕耨荒其田亩何异扼其吭而夺之食以速其毙乎今日所当兴复有大于此者愿陛下以生养民力为本以恢复天下为务则承平之观不日成复讵止上都宫阙已也帝嘉纳之二十三年拜治书侍御史时宦者保布哈与宣政使托欢内恃太子外结丞相吹斯戩骄恣不法监察御史傅公让劾之忤太子意左迁吐藩宣慰司经历它御史连章论谏皆外除祖仁上书于太子言御史纠劾托欢保布哈奸邪等事此非御史之私言乃天下之公论台臣审问尤悉故以上启今殿下未赐详察辄加沮抑摈斥御史诘责台臣使奸臣蠹政之情不得达于君父则亦过矣夫天下者祖宗之天下台谏者祖宗所建立以二竖之微而于天下之重台谏之言一切不恤独不念祖宗乎殿下毓德春宫而使谏臣结舌凶人肆志岂惟君父徒拥虚器而天下苍生亦将奚望太子怒令御史大夫鲁达实谕之曰台臣所言托欢等俱无是事昔裕宗为皇太子兼中书令枢密使凡军国重事合奏闻者皆许上闻非自今日始也祖仁复上书言御史所劾得于田野之闲殿下所询不出宫墙之外所以全此二人者止缘不见其奸耳且裕宗既领军国重事理宜先阅其纲至台谏封章自是御前阅拆使必皆由东宫万一君父有失谏臣有言太子将使之闻奏乎不使之闻奏乎使之闻奏则伤父心不使闻奏则陷父于恶如知此说则今日纠劾之章不宜阻矣御史不宜斥矣书再上即辞职于是太子以其事闻保布哈托欢皆辞退帝又令鲁达实谕祖仁等祖仁复上疏曰祖宗以天下传之陛下今乃坏乱不可救药刑赏不明之所致也且区区二竖犹不能除况于大者愿陛下俯从台谏之言摈斥此二人不令其以辞退为名成其奸计使海内皆知阶下信赏必罚自二人始则将士孰不效力天下可全恢复以还祖宗若犹优柔不断则臣誓不与之同朝牵连及祸以待后世正人同罪会侍御史李国凤亦上疏言此二人必常斥于是帝大怒台臣自鲁达实以下皆左迁出祖仁为甘肅行省参政时天极寒衣单甚以弱女托其友朱毅即日就道明年博罗特穆尔入中书为丞相除祖仁山北道肃政廉访使召拜国子祭酒迁枢密副使上疏言军政利害不报辞职除翰林学士遂拜中书参知政事时天下乱已甚

而祖仁性刚直遇事与时宰议不合乃还翰林为学士
寻迁太常礼仪院使二十七年明兵已取山东朝廷方疑库库特穆尔有不臣之心专立
抚军院总兵马以备之祖仁乃与翰林学士承旨王时
待制黄暉编修黄肃伏阙上书言近者南军侵陷全齐不踰月而逼畿甸朝廷虽命丞相
伊苏出师军马数少势力孤危而中原诸军左牵右掣
调度失宜京城四面茫无屏蔽宗社安危正在今日臣等以为驭天下之势当论其轻重
强弱远近先后前日南军僻在一方而库库特穆尔近
在肘腋故宜先于致讨今库库特穆尔势已穷蹙而南军突至势将不利于宗社故宜先
于救难宜审其轻重强弱改弦更张今库库特穆尔党
与离散岂能复振若止分拨一军逼袭必就擒获其余军马令其倍道东行勤王赴难与
伊苏等声势相援仍遣重臣分道宣谕催督庶几有济
如复胶于前说动以言者为库库特穆尔游说而钳天下之口天下之事去矣书上不报
祖仁又上书皇太子言近日降诏削河南军马之权不
知此项军马终为南军所忌朝廷苟善用之岂无所助况闻库库特穆尔屡上书疏明其
心典是其心未绝于朝廷当今为朝廷计不过战守迁
三事以言乎战则资其犄角之势以言乎守则望其勤王之师以言乎迁则假其藩卫之
力勉励使行犹恐迟晚岂可使数万劲旅弃置一方若
不幸一曰有唐元宗仓卒之出则是以祖宗百年之宗社朝廷委而弃之此时虽欲碎首
杀身何济于事书上亦不报二十八年明兵进压近郊
有旨命祖仁及同佥太常礼仪院事王逊志等载太庙神主从太子北行祖仁等奏曰天
子有大事出则载主以行今从太子非礼也帝然之还
守太庙以俟命俄而天子北奔祖仁守神主不果从京师破将出健德门为乱军所害祖
仁一目眇貌寝身短瘠而语音清亮议论伟然负气刚
正似不可犯者其学博而精为文简质诗清丽世多称传之

钦定续通志卷四百九十五

●钦定续通志卷四百九十六 列传二百九十六

列传

元 【五十】

○元五十

成遵

曹鉴

张翥

乌克逊良桢

贾鲁

逯鲁曾

贡师泰

周伯琦

吴当

成遵

曹鉴

张翥

乌克逊良楨

贾鲁

逯鲁曾

贡师泰

周伯琦

吴当

△成遵

成遵字谊叔南阳穰县人幼敏悟年十五丧父家贫勤苦不废学问至顺中至京师入成均时陈旅为助教数称其文于奎章阁侍讲学士虞集集见之以为公辅器元统改元中进士第授翰林国史院编修官明年预修泰定明宗文宗三朝实录升应奉翰林文字至正二年擢监察御史扈从至上京首言天子宜慎起居节嗜欲以养圣躬帝改容称善又言台察四事一差遣台臣越职问事二左迁御史杜塞言路三御史不思尽言循叙求进四体覆廉访声迹不实贤否混淆帝皆嘉纳之复上封事言时务四事一曰法祖宗二曰节财用三曰抑奔竞四曰明激劝奏入帝称善久之命中书速以行一岁中言事并举劾凡七十余事皆指讦时弊执政恶之三年出为陕西行省员外郎以母病辞八年擢命淮东肃政廉访司事改礼部郎中奉使山东淮北察守令贤否九年改刑部郎中寻迁御史台都事时官吏犯赃多有以父母之忧制免者台臣谓赃吏被案虽亲丧不许归须竟其狱遵曰赃吏固可恶然与人伦孰重国家以孝治天下宁失罪人不可使天下有无亲之吏御史大夫是其言升户部侍郎明年迁中书右司郎中有匿其奸罪而入粟得七品杂流者为怨家所告有司议输粟例无有过不与之文遵曰爵秩滥与奸邪辈将何以为治必夺其敕还其粟省臣从之除工部尚书先是河决白茅郟城济宁皆为巨浸漕运使贾鲁言必疏南河使复故道役不大兴害不能已廷议莫能决乃命遵偕大司农图噜往视自济宁曹濮汴梁大名行数千里掘井以量地之高下测岸以究水之浅深遍阅史籍博采舆论谓河之故道不可得复而丞相托克托已先人鲁言及遵与图噜至力陈不可且曰济宁曹郟连岁饥馑民不聊生若聚二十万人于此地恐后日之忧又有重于河患者托克托怒曰汝谓民将反耶辩论终日仍不能决明日执政谓遵曰修河之役丞相意已定且有人任其责公毋多言遵曰腕可断议不可易也遂出为大都河间等处都转运盐使十四年调武昌路总管武昌自沔寇残毁民死兵疫者十六七而大江上下皆剧盗

阻绝米值翔涌遵言于省臣假军储钞万锭募勇士具戈船截兵境且战且行余粟于太平中兴民赖以全活者甚众乃远斥候塞城门籍民为兵得五千余人设万夫长四配守四门贼船往来江中终不敢近岸城赖以安十五年擢江南行台治书侍御史召拜参议中书省事时河南贼数渡河而北焚掠郡县遵率僚佐持牍诣丞相曰今天下州县丧乱过半而河北之民稍安者以天堑黄河为之障所以剥肤椎髓以供军储而无深怨者民犹得保其室家故也今贼北渡河而官军不御是大河之险已不能守河北之民复何所恃河北民心一摇国势将如之何语未毕哽咽不能言宰相以下皆挥涕乃入奏帝始下诏切责守河诸将先是湖广贼倪文俊质威顺王之子而遣人请降求为湖广行省平章朝臣欲许者半遵曰平章之职亚相耳叛逆之贼挟势要求轻以与之如纲纪何柰何以王子之故废天下大计除治书侍御史俄复入中书为参知政事十七年进中书左丞时太平在相位以事忤太子太子深衔之以为遵柔参知政事赵中皆太平党欲去之用事者承望风旨嗾宝坻县尹邓守礼弟邓子初等诬遵与参政赵中参议萧庸等六人皆受赃太子命御史台大宗正府等官杂问之锻炼成狱遵等竟杖死时至正十九年也后五年御史台臣辩其枉诏复还其所授宣敕

△曹鉴

曹鉴字克明宛平人大德五年用翰林侍读学士郝彬荐为镇江淮海书院山长十一年南行台中丞廉恒辟为掾史又除兴文署命伴送安南使者归国至治二年授江浙行省员外郎天历元年调江浙财赋府副总管元统二年升同佥太常礼仪院事集议明宗皇后祔庙事援礼据经辨析详明至元二年进礼部尚书卒封谯郡侯谥文穆鉴天性纯孝亲族贫乏者周恤恐后历官三十余年僦屋以居尝自浙调湖广员外有故掾顾渊伯以辰砂一包馈鉴鉴漫置笥中半载后视之有黄金三两杂其内时渊伯已歿即呼其子归之其廉慎不欺如此

△张翥

张翥字仲举晋宁人父为杭州钞库副使因家焉翥少负才豪放不羁好蹴鞠喜音乐不以家业屑意父深以为忧翥一旦翻然曰大人勿忧今请易业矣乃谢客闭门读书昼夜不暂辍因受业李存仇远遂以诗文知名一时至元末同郡傅岩起居中书荐翥隐逸至正初授国子助教分教上都寻退居淮东会修辽金宋三史起为翰林国史院编修官史成历应奉修撰累迁翰林侍讲学士兼祭酒翥勤于诱掖绝去崖岸有质以经义者必历举众说为之折衷寻拜翰林学士承旨致仕博罗特穆尔之入京师也

命翥草诏削夺库特穆尔官爵且发兵讨之翥不从
或劝之翥曰吾臂可断笔不能操也帝知其意不可夺乃命他学士为之博罗特穆尔既
诛诏以翥为河南行省平章政事仍翰林学士承旨致
仕二十八年卒年八十二翥长于诗其近体长短句尤工

△乌克逊良桢

乌克逊良桢字干卿廉访使泽之子也资器绝人好读书至治二年以荫补江阴州
判官历陕西行台监察御史劾辽阳行省左丞相达实
特穆尔卖国不忠援汉高帝斩丁公故事以明人臣大义并劾御史中丞胡居佑奸邪皆
罢之寻迁都事以言不尽行解去元统初起为监察御
史疏言天历数年间纪纲大坏元气伤夷天佑圣明入膺大统此诚祈天永命之秋其要
在乎敬身修德而已今经筵多领以职事臣数日一进
讲不逾数刻已罢而赞御小臣恒侍左右何益于监德哉顾招延儒臣若许衡者数人寘
于禁密常以唐虞三代之道启沃宸衷日新其德实万
世无疆之福也不报御史台作新风宪复疏其所当行者以举贤才为纲而以厚风俗均
赋役重审理汰冗官选守命出奉使均公田为目指撻
割切虽触忌讳亦不顾也至正五年出为江东道肃政廉访副使上官一曰辞归八年复
召为右司员外郎十三年累迁中书左丞兼大司农卿
时中书参用非人事多异同不得一一如志会军饷不给请与右丞乌兰哈达主屯田岁
入二十万石帝在上都始册皇太子立詹事院驿召为
副詹事每直端本堂则进正心诚意之说亲君子远小人之道皇太子嘉纳焉十四年改
淮南行省左丞初泰州张士诚既降复叛太师托克托
奉诏总诸王军南征良桢洎参议龚伯璘等从之既平六合垂克高邮会诏罢托克托兵
柄遂有上变告伯璘等劝托克托勒兵北向者下其事
逮问词连良桢簿对无所验即以中书左丞分省彰德主调军食居半岁仍还中书十八
年有诬知宜兴州张复通贼之罪中书将籍其孥吏抱
案请署良桢曰手可断案不可署同列变色卒不署良桢自左曹登政府多所建白罢福
建山东食盐及浙东西长生牛租濒海被灾围田税民
皆德之赏论至正格轻重不伦吏得并缘为奸举明律者数人参酌古今重定律书书成
而罢家居辄训诸子曰吾生平无过人者惟待人以诚
人亦以诚遇我汝宜志之晚岁病瘠数谒告病益侵遂卒自号约斋有诗文奏议若干卷

△贾鲁

贾鲁字友恒河东高平人延佑至治间两以明经领乡贡泰定初授东平路教授历
除太医院都事会修辽金宋三史召为宋史局官书成
选燕南山东道奉使宣抚幕官考绩居最迁中书省检校官上言十八河仓近岁沦没官

粮百三十万斛其弊由富民兼并贫民流亡宜先正经
界然事体重大非处置尽善不可轻发书累数万言切中其弊俄拜监察御史首言御史
有封事宜专达圣聪不宜台臣先有所可否寻为工部
郎中至正四年河决白茅堤又决金堤并河郡邑民居昏垫帝甚患之督大臣访求治河
方略特立行都水监于郟城以鲁为太监鲁循河道察
地形往复数千里备得要害为图上二策其一议修筑北堤以制横溃则用工省其一议
疏塞并举挽河东行使复故道其功数倍 【按大学
衍义补云黄河故道有四一在河间府宁津县西一在大名府开州治南一在东昌府馆
陶县西一在卫辉府新乡县南谨附识】 会迁右司郎
中议未竟其在右司言时政二十一事皆见举行调都漕运使复以漕事二十事言之朝
廷取其八事一曰京畿和余二曰优恤漕司旧领漕户
三曰接运委官四曰通州总治豫定委官五曰船户困于坝夫海运坏于坝户六曰疏浚
运河七曰临清运粮万户府当隶漕司八曰宣忠船户
付本司节制事未尽行既而河水北侵安山沦入会运河延袤济南河间将隳两漕司盐
场实妨国计九年托克托复相论及河决思拯民艰以
塞诏旨乃集廷臣羣议或言当筑堤以遏水或言疏南河以杀其流遗工部尚书成遵行
视终莫决鲁倡言必塞北河使复故道役不大兴害不
能已复以前二策进丞相取其后策与鲁定义召入奏大称帝旨十一年命鲁以工部尚
书为总治河防使领河南北诸路军民发汴梁大名十
三路民丁十五万庐州等戍十八翼军二万供役一切从事大小军民官咸廩节度便宜
兴缮仍命以兵镇之自黄陵冈南达白茅放于鸿和哈
济等口又自黄陵西至阳青村合于故道凡二百八十里有奇自四月鳩工七月凿河成
乃塞决河九月舟楫通十一月诸埽诸堤成河复故道
南汇于淮又东入海帝遣使报祭河伯召鲁还朝以河平图献超授集贤大学士敕翰林
承旨欧阳元制河平碑以旌托克托劳绩具载鲁功且
宣付史馆寻拜中书左丞从托克托平徐州托克托既旋师命鲁追余党分攻濠州鲁誓
师曰吾奉旨统八卫汉军顿兵于濠七日矣尔诸将同
心协力必以今日取城池然后食急上马麾进抵城下忽头眩下马卒于军时十三年五
月也有旨护柩还高平赐交钞五百锭给葬事

△逮鲁曾

逮鲁曾字善止修武人登文宗天历二年进士第授翰林国史院编修官辟御史台
掾掌机密监察御史劾中丞史显夫简傲鲁曾开实封
于大夫前曰中丞素持重不能与人周旋御史以人情劾之非公论由是皆知其直元统
初除太常博士时武宗庙未立后主集羣臣廷议巴延

谓明宗母伊奇哩氏可配享徽政院傅太后旨以文宗母唐古氏可配享巴延问鲁曾曰先朝既以珍格皇后无子不为立主今宜立者明宗母乎文宗母乎对曰珍格皇后在武宗朝已膺宝册则为武宗皇后明宗文宗二母后固妾也今以无子故不得立主而以妾后为正宫是为臣而废先君之后为子而追封父之妾于礼不可集贤大学士陈颢素嫉鲁曾出曰唐太宗册曹王明之母为后是亦二后也奚不可鲁曾曰尧母为帝尝庶妃尧既为帝未闻册妃为后而配尝皇上为大元天子不法尧舜而汰唐太宗邪巴延黷之遂以珍格皇后配焉会巴延败鲁曾拜监察御史疏劾其赏塔斯哈雅昂吉尔等八人皆黜之除枢密院都事上言前巴延专杀大臣其赏利其妻女巧诬其罪今后官民有罪有坐其身不得籍其妻女又郟王为巴延构陷妻女流离当雪其无辜给复其子孙帝从之除刑部员外郎悉辨正横罹巴延所诬者至正十二年丞相托克托讨徐州贼以官军不习水土募濒海盐丁为军迁鲁曾淮南宣慰使领征讨事募盐丁五千人克复徐州继领所部讨淮东卒于军

△贡师泰

贡师泰字泰甫宁国宣城人父奎以文学名家延佑至治间累官集贤直学士卒谥文靖师泰早肄业国子学为诸生泰定四年释褐授太和州判官以荐擢应奉翰林文字除绍兴路总管府推官山阴白洋港有船飘近岸史甲二十人适取卤海滨见船无主因取其篙橹而船中有二尸旁人指为史所杀史佣作富民高家既诬服高亦就逮师泰密询之则里人回自海口因盗纲中鱼为渔者所杀其冤始白游徼徐裕以巡盐为名肆暴村落间一日遇诸暨商夺其所赍钱扑杀之投尸于水走告曰顷获私盐犯畏罪赴水死矣官以有伤疑之遂以疑狱释师泰覆按之具得裕杀人状其于冤狱详献之明多类此以故治行为诸郡最考满复入翰林为应奉预修后妃功臣列传累迁监察御史自世祖以后省台之职南人斥不用及是始复旧制时论以为得人至正十四年除吏部侍郎时江淮兵起京师食不足师泰奉命和籴于浙右得粮百万石以给京师迁兵部侍郎朝廷以京师上都驿户凋弊命师泰巡视整饬之至则验贫富均徭役民赖以苏十五年除礼部尚书时平江缺守廷议难其人师泰以选出为平江路总管甫视事张士诚自高邮率众渡江直抵城下攻围甚急明年守将弗能支遁去师泰领义兵出战力不能敌亦怀印缓匿海滨者久之士诚既纳降江浙行省丞相达实特穆尔命权本省参政二十年朝命改户部尚书俾分部闽中以闽盐易粮数十万石由海道转运京师朝廷赖焉二十二年召为秘书卿行至杭之海宁得病而卒 【按明

嘉靖间建安李默书玩斋集后云子在宣州诸生贡

安国者为言其先世礼部公寓海宁时自名其里为小桃源元命既革宋学士景濂尝邀之公为置酒饮夜分乃起就卧仰药而毙与传互异】

师泰既以文字知名而于政事尤长尤喜接引后进一时士誉翕然归之所著有诗文若干卷行于世

△周伯琦

周伯琦字伯温饶州人父应极仁宗为皇太子召见献皇元颂为言于武宗授翰林待制伯琦自幼从臣游京师入国学以荫授南海主簿

三转为翰林修撰至正元年改宣文阁授经郎教戚里大臣子弟每进讲辄称旨帝以其工书法命篆宣文阁宝仍题榜及摹王羲之所书兰亭

序并智永所书千文刻石阁中自是眷遇益隆帝尝呼其字而不名会御史奏风宪宜用近臣特命佾广东廉访使事八年召入为翰林待制预

修后妃功臣列传累升直学士十二年有旨南士皆得居省台遂与贡师泰同擢监察御史两人皆南一之望一时荣之先是红巾盗起丞相托

克托奏以其弟御史大夫额森特穆尔统大军南讨失律丧师陕西行台监察御史刘希曾等十人【托克托传作刘希曾等十二人】其劾

其罪伯琦丞相意奏希曾等越分干誉皆坐左迁补郡判官由是不为公论所与十三年迁崇文太监兼经筵官十四年出为江夏肃政廉访使

长枪军索诺木巴勒陷宁国伯琦与僚佐仓皇出寻遁走杭州十七年江浙行省丞相达实特穆尔承制假伯琦参知政事招谕张士诚士诚留

之平江十余年士诚既灭伯琦乃得归鄱阳寻卒【按徐贞卿翦胜野闻载张士诚面缚见明太祖伯琦遥伏于后太祖曰元君寄汝以心膂

乃资贼乱耶赐醉而杀之语异本传】伯琦博学工文章尤以篆隶真草擅名尝着六书正伪说文字原二书又有诗文藁若干卷

△吴当

吴当字伯尚澄之孙也幼承祖训精通经史百家言澄既歿四方从游者悉就当卒業至正五年以荐授国子助教会诏修辽金宋三史当

预编纂书成除翰林修撰十五年历官翰林直学士时江南兵起且五年大臣有荐当世居江西习知民俗且其才可任政事者特授江西肃政

廉访使偕兵部尚书黄昭招捕诸郡当以朝廷兵力不给既受命即募民兵由潮闽入克复建抚两郡时参政托迪总兵抚建积年无功忌当屡

捷功在己上因构为飞语谓当与黄昭皆与寇通有旨解二人兵柄寻除名先是当与昭平贼功状自广东由海道未达京师而托迪等公牒乃

先至故朝廷责当昭皆左迁及得功状始知其诬诏拜当江西行省参政昭湖广行省参

政命未下而陈友谅已陷江西当乃戴黄冠服道士服
杜门不出日以著书为事友让遣人辟之当卧床不食以死自誓乃舁床载之舟送江州
拘留一年终不屈归隐庐陵之谷坪逾年卒所著有周
礼纂言及学言藁

钦定续通志卷四百九十六

●钦定续通志卷四百九十七 列传二百九十七

列传

元 【五十一】

○元五十一

喀喇托克托 雅克特穆尔 阿尔哈雅 巴延 托克托

喀喇托克托

雅克特穆尔

阿尔哈雅

巴延

托克托

△喀喇托克托

喀喇托克托父雅雅由康国王封云中王阿实克布哈之弟也托克托姿貌魁梧少
从其兄阿都玛勒猎于燕南归献所获世祖见其沈雄
庄重叹为大用之才命入宿卫大德三年武宗以皇子抚军北鄂托克托从行五年叛王
海都犯边从武宗讨之破其众于杭爱手斫一将之首
连背脾以献武宗壮之成宗大渐丞相哈喇哈斯达尔罕称疾卧直庐中托克托适以使
事至京师即俾驰告武宗以国恤时仁宗奉兴圣太后
至自怀孟既定内难太后以两太子星命推算问所宜立术者曰重光大荒落有灾旃蒙
作噩长久重光为武宗年干旃蒙为仁宗年干于是太
后感其言遣近臣托尔谕旨谓运祚修短不容不思武宗闻之默然谓托克托曰我捍御
边陲勤劳十年又次序居长神器所归灼然何疑何可
以阴阳之言乖祖宗之托汝为我往察事机疾归报我托克托承命即行武宗亲率大军
分道进发托克托驰至大都见太后道武宗所授旨太
后愕然曰我为太子周思乃出深爱今宗王大臣议已定太子当速来时诸王图烈等待
咸曰臣下翊戴嗣司无二心者既而太后仁宗屏左右
语托克托曰太子天性孝友中外属望今闻汝所致言殆有谗间汝归速为我弥缝阙失
使骨肉无间则功为不细矣托克托顿首谢曰臣侍藩
邸历年颇见信任今当推诚竭忠以开释太子后日三宫共处靡有嫌隙斯为托克托所
报效矣先是太后以武宗迟回不至已遣阿实克布哈

往及是托克托继至贝致太后仁宗语武宗感悟遂遣阿实克布哈还报仁宗即日命驾迎于上都武宗即位尊太后为皇太后立仁宗为皇太子三宫协和托克托兄弟之力也是年用同知枢密院事进中书平章政事拜御史大夫迁江南行台御史大夫寻召拜录军国重事中书省丞相相知无不言言无不行中外翕然称为贤相至大三年迁尚书省右丞相三宝努等劝武宗立皇子为皇太子托克托方猎于柳林遣使召还共议其事托克托惊曰太弟躬定大事功在宗社位居东宫已有定命何可隳其成耶三宝努虽不以为然卒莫能夺其议是时尚书省赐子无节迁叙无法财用日耗名爵日滥托克托恳切进谏诏滥受宣敕者赴所属缴纳中台有赃罚钞五百万缗托克托请出以振孤寡老疾宗王纳古尔部人告其主为不轨托克托辩其诬抵告者罪宗王伊克图征其旧民于齐王班布尔实部中邻境诸王欲奉齐王攻伊克图齐王惧奔伊克图以避之遂告齐王反托克托簿问得实乃释齐王而徙诸王于岭南边将托和齐请以新军万人益宗王绰哈廷议俾托克托往给其资装托克托辞以时方宁谧不宜挑变生事遂遣丞相图古勒等往给之几致激变四年复为中书左丞相仁宗即位眷待弥笃拜江浙行省左丞相下车问民利病咸谓杭城故有便河通于江浒堙废已久若疏凿以通舟楫物价必平僚佐或难之托克托曰吾奉密旨许以便宜行事民以为便行之可也俄有旨禁勿兴土功托克托曰敬天莫先勤民民蒙其利则灾沴自弭土功何尤不一月而成时特们德尔为丞相欲固位取宠乃议立仁宗子英宗为皇太子封武宗子明宗为周王出镇云南又谮托克托为武宗旧臣诏逮至京师居数日两宫传谕曰初疑汝亲于所事故召汝今察无他其复还镇托克托入谢遂还江浙未几迁江西行省左丞相英宗嗣位召拜御史大夫复喉言者劾其擅离职守将徙之云南会特克实伏诛乃解家居五年泰定四年卒至正初追封和宁王谥忠献子九人其最显者二人曰特穆尔达实曰达实特穆尔各有传

△雅克特穆尔

雅克特穆尔钦察氏绰和尔第三子武宗镇朔方备宿卫十余年特爱幸之及即位拜正奉大夫同知宣徽院事皇庆元年袭左卫亲军都指挥使泰定二年加太仆卿致和元年进金书枢密院事泰定帝崩丞相都尔苏专政宗室诸王托克托旺沁附之利于立幼雅克特穆尔时总环卫自以身受武宗恩宠其子宜纂大位而一居朔漠一处南陲因与公主察球尔族党阿拉克特穆尔及腹心之士博罗齐拉拉等议执中书平章额卜德呼勒巴延彻尔露刃誓众众皆溃散遂捕奸党下狱而与安西王喇特纳实

哩入守内庭分处腹心于枢密命明埒栋阿及达尔玛
实哩乘驿迎文宗于中兴 【谨接通鉴辑览 御批武宗既传于弟其子即无统业可承而泰定帝已成其为君储嗣现存神器自有专属
乃雅克特穆尔忽逞异图谬托受武宗恩宠之言以自文远迎周怀二王入继于情理俱为不顺不过欲假援立之功以凭宠肆志遂成图卜特
穆尔篡杀之谋则雅克特穆尔实为罪首至泰定既崩都尔苏唯知专擅自利踰月不立君致乱臣乘间酿祸其罪亦与乱臣等】 且密谕河南
行省平章巴延选兵扈从于是封府库拘百司印遣兵守诸要害募死士买战马运京仓粟以饷守御士卒雅克特穆尔宿卫禁中夜则更迁无
定居坐以待旦者将一月弟萨敦子腾吉斯时留上都密遣达实特穆尔召之皆弃其妻子来归命萨敦以兵守居庸关腾吉斯屯古北口复遣
使往中兴趣大驾早发使还诏拜雅克特穆尔知枢密院事遂率百官备法驾郊迎文宗至京师入居大内上都旺沁及太尉布哈丞相达实特
穆尔平章玛鲁御史大夫宁珠等军次榆林诏雅克特穆尔御之萨敦先驱至榆林西乘其未陈薄之北军大败辽东平章图们岱尔以兵犯迁
民镇斩关以入遣萨敦往拒至蓟州东沙流河累战败之雅克特穆尔乃与诸王大臣伏阙劝进文宗固辞又固请遂即位封雅克特穆尔为太
平王以太平路为其食邑录军国重事中书左丞相监修国史知枢密院事诏将兵出蓟州拒图们岱尔师次三河旺沁等军已破居庸关进屯
三冢雅克特穆尔倍道而还抵榆河关及旺沁军战于榆河北败之追至红桥北旺沁北阿拉克特穆尔及呼图克特穆尔引兵会战雅克特穆
尔就斫之敌为气夺遂却因据红桥两军阻水而阵命善射者射之遂退师于白浮南我军分三队张两翼以角之敌军败走越日复合鏖战于
白浮之野雅克特穆尔手毙七人会日晡对垒而宿夜三鼓遣精锐百骑鼓噪射其营敌众惊扰互自相击死伤无数旺沁等窜身山谷既而复
集我师坚壁不动是夜又遣萨敦等潜军压其营吹铜角以震之敌乱自相撻击三鼓后乃西遁迟明追及昌平北斩首数千级降者万余人帝
遣使慰劳之是日敌再战再北旺沁单骑亡命伊苏岱尔额布勒萨敦追之就命伊苏岱尔及彻尔特穆尔守居庸关还至昌平南俄报古北口
不守上都军掠石槽即遣萨敦为先驱自以大军继其后至石槽乘敌军方炊直蹂之追击至牛头山擒驸马博罗特穆尔等献俘关下戮之图
们仙尔及诸王额森特穆尔陷通州将袭京师雅克特穆尔急引还遇于通州乘其初至击之敌军狼狈走渡潞河夜设疑兵而遁追之至枣林
与敌殊死战腾吉斯陷阵而入死者蔽野敌兵宵溃萨敦将轻兵要之弗及而还上都诸

王呼喇台指挥阿拉克特穆尔安图人紫荆关犯良乡
雅克特穆尔率兵循北山而西兼程至于卢沟河呼喇台望风西走是日凯旋都人罗拜
马首帝赐燕兴圣殿锡赉优厚萨敦遣报图们岱尔军
复入古北口雅克特穆尔以师赴之战于檀州南野败之降者万人余兵东溃图们岱尔
走还辽东获呼喇台阿拉克特穆尔安图多罗台塔尔
海等戮之先是齐王伊噜特穆尔东路蒙古元帅布哈特穆尔闻文宗即位乃起兵趋上
都围之时上都屡败势蹙都尔苏奉皇帝宝出齐王调
兵护送至京师文宗御兴圣殿受宝下都尔苏于狱雨都平加雅克特穆尔以达尔罕之
号使世世子孙袭之置龙翊卫命预其事天历二年立
都督府以雅克特穆尔兼统之寻升为大都督府雅克特穆尔乞解相印还宿卫帝曰卿
已为省院惟未入台省听后命寻迁御史大夫未几复
拜中书左丞相先是文宗以天下既定遣治书侍御史萨题迎明宗于漠北诏雅克特穆
尔护玺宝北上明宗嘉其功加拜太师从南还次翁果
察图之地文宗以皇太子见明宗暴崩雅克特穆尔以皇后命奉皇帝玺宝授文宗疾驱
而还 【按续资治通鉴载胡粹中之言曰故老言雅
克特穆尔奉上玺绶明宗从官有不为之礼者雅克特穆尔且怒且惧既而帝暴崩即奔
入帐取实玺扶文宗上马南驰此云奉皇后命授其说
不合岂当时忌讳有不敢明言者欤】 达上都文宗复即位以雅克特穆尔有大勋于王
室封其曾祖父巴图彻尔溧阳王曾祖妣伊噜彻尔溧
阳王夫人祖父托克托呼升王祖妣推勒塔纳升王夫人父绰和尔扬王母额森塔纳公
主察球尔并为扬王夫人至顺元年帝以屡颁宠数未
足以报大勋下诏俛独为丞相以尊异之凡号令刑名选法钱粮造作一切中书政务悉
听总裁诸王公主驸马近侍人员大小诸衙门官员敢
有隔越闻奏以违制论知枢密院事库春贝托克托穆尔等十人恶其权势欲谋害之事
泄皆伏诛二年为建第于兴圣宫之西南诏养其子塔
喇海为子四年文宗大渐遗诏立明宗子巳而文宗崩明宗次子伊埒哲伯即位四十三
日而崩文宗后临朝雅克特穆尔与羣臣议立文宗子
雅克特古斯文宗后曰吾儿幼冲难任天位明宗子托欢特穆尔居广西今年十三矣可
嗣大统于是奉太后命召还京师至良乡具卤簿迎之
雅克特穆尔与之并马而行告以遣使奉迎之故托欢特穆尔无一语酬之雅克特穆尔
疑其意不可测且明宗之崩实与逆谋恐即位之后追
举前事故宿留数月心志日以瞽乱先是雅克特穆尔自秉大权以来肆意无忌一宴或
宰十三马取泰定帝后为夫人前后尚宗室女四十人
或有交礼三日遽遣归者而后房充斥不能尽识一日宴赵世延家男女列坐名鸳鸯会

见座隅一妇色甚丽问此为谁意欲与俱归左右曰此太师家人也至是荒淫日甚体羸溺血而卒雅克特穆尔既死托欢特穆尔始即位是为顺帝乃以萨敦为左丞相腾吉斯为御史大夫元统二年命腾吉斯总管高丽女真汉军万户府达噜噶齐授萨敦录军国重事达尔罕受王太傅中书左丞相宥世世子九死追封雅克特穆尔德王谥忠武至元元年立雅克特穆尔女巴约特氏为皇后是时萨敦已死腾吉斯为中书左丞相巴延独用事腾吉斯忿其位出己上遂与萨敦弟达哩潜蓄异心交通诸王鸿和特穆尔谋危社稷郟王齐齐克图发其谋腾吉斯伏兵东郊率勇士突入宫阙巴延及鄂勒哲特穆尔鼎珠奇尔济苏等掩捕获之腾吉斯及其弟塔喇海皆伏诛其党奔达哩所达哩即以兵旋为绰斯戩和尔和哈喇诺海等所败遂奔鸿和特穆尔命博啰鸿和尔布哈追袭之执送上都戮之鸿和特穆尔自杀初腾吉斯被擒攀殿槛不肯出塔喇海走匿皇后坐下后蔽以衣左右曳出斩之血溅后衣巴延奏曰岂有兄弟为逆而皇后党之者并执后后呼帝救帝曰汝兄弟为逆岂能相救邪乃迁后出宫寻酖之于开平民舍遂簿录腾吉斯家

△阿尔哈雅

阿尔哈雅辉和尔氏集贤大学士图烈子也兄雅尔鼐事仁宗于潜邸大德九年仁宗奉兴圣太后出居怀州从者多怀去志雅尔鼐独无所畏在十一年成宗崩权臣阿附中宫不遣使告哀宗藩雅尔鼐密启仁宗曰天子晏贺天下无主宜急奉大母入定大计迎立怀宁王以正天位仁宗即白太后至京师遂诛柄臣二人遣使迎武宗武宗即位授秘书监仁宗居东宫兼太子右庶子迁侍御史崇祥院使兼将作院使仁宗即位请召文武老臣咨以朝政又请以中都苑囿还诸民拜枢密院副使进同知枢密院事延佑四年卒赠赵国公谥忠靖阿尔哈雅亦早事武宗仁宗为宿卫以清慎通敏与父兄并见信任十余年间■〈易爻〉历华近廷无间言至治初出为平章政事历镇江浙湖广河南陕西四省皆有惠政汴人尤怀思之归朝拜翰林学士承旨天历元年秋文宗入承大统阿尔哈雅南迎至汴郊见帝命复镇汴时当艰难之际阿尔哈雅高价余粟以峙粮储治戎器阅士卒括马民间以备不虞先是文宗即位之诏已播告天下而陕西官府结连靖安王等起兵东击潼关阿尔哈雅属行省参政图烈图廉访副使万嘉律犒军河南以御之令都镇抚本布巡行南阳高门武关荆子诸隘南至襄川二江口督以严备万户博啰守潼关不能军济噜海率霄旺总帅图卜特穆尔万户等兵突出潼关东掠阌乡迤迤

前进河南告急之使踵至而图烈图亦以兵寡为言阿尔哈雅集者宪官属议曰汴在南北之交使西人得至此则江南三省之道不通于畿甸军旅应接何日息乎今莫如征湖广两翼军与吾省炮弩手诸军以备虎牢裕州哈喇娄邓州孙万户两军以备武关荆子口以属郡兵及蒙古诸部丁壮以次备诸隘芍陂等屯兵本自襄邓诸军来田者还其军益以民之丁壮使守襄阳白土峡州诸隘别遣塔尔海以备蜀兵吾与诸军各奋忠义宜无不济众曰唯命即日部分行事自巴延布哈王以下凡省之属吏与有官而家居者各授以事而出廉访使董守中僉事实沙在南阳右丞图卜特穆尔廉访使巴延在虎牢分遣兵马以听调用馈饷之行千军相望阿尔哈雅亲阅实之信以期会自虎牢南至襄汉无不毕给既而西兵逼河南行院使来报曰西人北渡河中以趋怀孟磁南过武关掠邓州直趋襄阳攻破郡邑三十余横绝数千里西结囊嘉特以蜀兵至矣阿尔哈雅遣行院官塔尔海政特默格又设备于江黄作舟舰以待战师与西兵遇于巩县之石渡转战及暮两军杀伤相等而虎牢遂为敌有兵储巨万一旦悉亡行省院与诸军敛兵退汴民大恐阿尔哈雅前后遣使告于朝辄为额森纽尔留不遣不得朝廷音问已二十日阿尔哈雅乃亲抚其民修城阙立四门戒卒伍以严守卫时虽甚危急而声色不动怡然如平时众赖以安西师逼城将百里而近阿尔哈雅谓行院将帅宪司与凡在官者曰吾荷国厚恩唯有一死然敌亦乌合之众使诚知圣天子之命则众沮而散矣吾今遣使告于朝请降诏大赦胁从又以即位诏及招谕之文明示利害吾整大军西向别遣骁将率精骑数千上龙门绕出其后使之进无所投退无所归必成擒于巩洛之间矣而我军所获陕西官吏命有司羁而食之一无所戮众曰诺唯命即日与行院整兵以行会使还言齐王巴克上都奉天子宝玺来归乃置酒高会发书告属郡报诸江南三省遣拉珠賚书谕西人而朝廷亦遣都护伊噜特穆尔奉诏放散西军之在虎牢者以是西人虽未解散各已骇悟又闻行省院以兵至犹豫不敢进朝廷又使参政冯布哈亲谕之乃信服靖安王遣使与拉珠来请命逡巡而去难平阿尔哈雅乃解严报捷以功迁陕西行台御史大夫复拜中书省平章政事

△巴延

巴延默尔吉济特氏曾祖特点格尔给事宿卫祖青海从宪宗伐宋歿于王事父锦济勒总宿卫隆福太后宫巴延明达果断年十五奉成宗命侍武宗于藩邸大德三年从征海都五年从至塔奇克拉呼又至哈喇台之地战累捷功为诸将先十年乌鲁斯实巴尔等逃奔彻伯尔之

地武宗命巴延追降之锡号巴图尔武宗即位拜吏部尚书俄改尚服院使又拜御史中丞至大二年拜尚书平章政事三年加特进延佑三年仁宗命为周王常侍府常侍泰定三年迁河南行省平章政事致和元年泰定帝崩丞相雅克特穆尔遣明埒栋阿迎立武宗子怀王于江陵道过河南使以谋密告巴延巴延即集僚属明告以故于是会计乘輿供亿之须以及士马刍糒赏犒之用靡不备至征发民丁增置驿马补城櫓浚濠池修战守之具严徼逻斥堠日被坚执锐与僚佐筹其便宜即遣孟克布哈以其事驰告怀王别募勇士五千人以迎而躬勒兵以俟参政图卜台不欲夜手刀钦杀巴延巴延觉拔剑杀之夺其所部军怀王命萨里布哈拜巴延河南行省左丞相怀王至河南巴延属囊鞬擐甲胄与百官父老导入俯伏称万岁即叩头劝进扈从北行怀王即皇帝位是为文宗特加太尉录军国重事御史大夫天历二年拜太保明宗即位拜中书左丞相明宗崩文宗复位知枢密院事至顺元年文宗以巴延功大特命尚世祖库春太子女孙布延德济分赐虎士三百集赛台百默勒奇军百阿苏军百隶左右宿卫又赐黄金双龙符镌文曰广忠宣义正节振武佐运功臣组以宝带世为明券又命凡宴饮视诸宗王礼二年进封浚宁王特加授侍正府侍正追封其先三世为王又加巴延昭功宣毅万户忠翊侍卫都指挥使三年拜太傅文宗崩巴延奉太皇太后命立明宗之子伊埒哲伯是为宁宗宁宗崩顺帝至自南服入践大位嘉巴延翊戴之功拜中书左丞相上柱国监修国史元统二年进太师 【三公表在元统元年】 奎章阁大学士领威武阿苏诸卫奉复经筵加知经筵事十一月进封秦王总领蒙古钦察乌鲁斯诸卫亲军都指挥使至元元年腾吉斯及其弟塔喇海私蓄异志谋危社稷巴延奉诏诛之余党称兵又亲率师往上都击破其众诏赐巴延以达尔罕之号俾世袭之太皇太后赐第时雍坊有旨雄丽视诸王邸巴延力辞制度务从损约四年求解政柄三宫交勉留五年诏为大丞相巴延自诛腾吉斯后独秉国钧专权自恣变乱祖宗成宪虐害天下渐有奸谋帝患之初巴延欲以其侄托克托宿卫伺帝起居惧涉物议乃以枢密知院旺嘉努翰林承旨实喇卜同侍禁近巴延自领诸卫精兵以扬珠布哈为屏蔽导从之盛填溢街衢而帝侧仪卫反落落如晨星势焰熏灼天下托克托深忧之乘间自陈忘家徇国之意帝犹未信遣阿鲁沙克嘉本日以忠义与之论难益知其心无他帝始无疑是年车驾自上都还京巴延数以兵巡行红城诸处归辄在后三人谋益坚巴延不知益逞凶虐构陷郟王齐齐克图奏赐死帝未允辄传旨行刑复奏贬宣让王特穆尔布哈维顺王库

春布哈辞色烦厉不待旨而行帝益忿之巴延日益立威锻炼诸狱延及无辜六年巴延自领兵卫请帝出田托克托告帝托疾不往巴延固请太子雅克特古斯出次柳林托克托遂与沙克嘉本阿鲁其白于帝托克托悉拘门钥受密旨领军阿鲁沙克嘉本侍帝侧传命夜二鼓遣太子集赛伊彻察喇抵太子营取之入城四鼓命济尔噶台奉诏往柳林出巴延为河南行省左丞相巴延遣人问故托克托宣言有昔黜丞相一人诸从官无罪可各还本卫巴延乞陛辞不许遂行诏徙南思州阳春县安置病死于龙兴路驿舍

△托克托

托克托秦王巴延之从子也 【案托克托传元史附其父满济勒噶台传考满济勒噶台无甚事迹今改为托克托传而以满济勒噶台

附其端】 父满济勒噶台扈从武宗后侍仁宗于潜邸出入恭谨莅事敏达仁宗说之及立为皇太子以为典用太监泰定四年累迁至陕西行

台治书侍御史关陕大饥振贷有不及者尽出私财以周之所活甚众又累迁知枢密院事提调武备寺事领钦察楚彻特穆尔千户所加镇守

海口侍卫亲军屯储都指挥使司达鲁噶齐至元三年议进爵封王辞以兄巴延既封秦王兄弟不宜并王乃拜太保分枢密院往镇北边六年

巴延既罢黜召拜太师中书左丞相未几以疾辞遂以太师就第明年封为忠王至正七年伯勒齐尔布哈谗于帝诏安置甘肃以疾卒托克托

生而岐嶷及就学请于其师吴直方愿日记古人嘉言善行稍长膂力过人年十五为皇太子齐哩克昂集赛官天历元年袭授成制提举司达

鲁噶齐二年入覲文宗悦之迁内宰司丞兼前职至顺二年授忠翊侍卫亲军都指挥使元统二年累迁同知枢密院事至元元年腾吉斯阴谋

不轨事觉伏诛其党达哩及拉拉等称兵外应托克托擒之以献拜御史中丞亲军都指挥使提调左阿苏卫四年进御史大夫扈从上都还至

鸡鸣山之浑河帝将畋于保安州马蹶托克托谏曰古者帝王端居九重日与大臣宿儒讲求治道飞鹰走狗非其事也帝纳其言是时其伯父

巴延为中书左丞相既诛腾吉斯益无所忌帝积不能平托克托常忧其败私请于父欲图之质之直方直方以大义灭亲为言是时帝左右前

后皆巴延亲党独沙克嘉本阿鲁为帝腹心托克托遂与二人深相结纳而钱塘杨瑀尝事帝潜邸为奎章阁广成局副使得出入禁中帝知其

可用每三人论事使瑀参焉五年车驾留上都巴延出赴应昌托克托与沙克嘉本阿鲁谋欲御之东门外惧弗胜而止及巴延擅贬宣让威顺

二王帝不胜其忿决意逐之六年巴延请太子雅克特古斯猎于柳林托克托与沙克嘉

本阿噜合谋以所掌金及宿卫士拒巴延遂拘京城门
钥命所亲信列布城下是夜奉帝御玉德殿召近臣旺嘉努实喇卜及省院大臣先后入
见出殿门听命又召瑀及江西范汇入草诏数巴延罪
状四鼓命中书平章政事济尔噶台赍赴柳林翌日托克托坐城门上巴延遣骑士至城
下问故托克托曰有旨逐丞相巴延所领诸卫兵皆散
而巴延遂南行至正元年命托克托为中书左丞相录军国重事托克托悉更巴延旧政
复科举取士法复行太庙四时祭雪郟王齐齐克图之
冤召还宣让威顺二王使居旧藩以阿噜图正亲王之位又开经筵遴选儒臣以劝讲而
托克托实领经筵事三年诏修辽金宋三史命托克托
为都总裁官又请修至正条格颁天下皇太子阿裕实哩达喇尝保育于托克托家每有
疾饮药必尝之而进帝尝驻蹕云州遇暴风雨山水大
至托克托抱皇太子单骑登山乃免至六岁还帝慰之托克托以私财造大寿元忠国寺
为皇太子祝厘四年有疾上表辞位帝不允表十七上
始从之有旨封郑王食邑安丰赏赉巨万俱辞不受乃赐松江田为立提领所以领之七
年伯勒齐尔布哈为右丞相以宿憾潜其父满济勒噶
台诏徙甘肃托克托力请俱行满济勒噶台卒帝念托克托勋劳召还京师八年命为太
傅提调宫傅综理东宫之事九年多尔济太平皆罢相
遂诏托克托复为中书左丞相十年居母忧帝遣近臣谕使出理庶务于是托克托用乌
克逊良桢袭伯璘汝中柏等为僚属委以腹心之寄吏
部尚书偃哲笃请更造至正交钞托克托信之祭酒吕思诚言其不可托克托不悦既而
终变钞法而钞竟不行河决白茅堤又决金堤方数十
里民被其患五年不能塞托克托用贾鲁计即奏以为工部尚书总治河防使发河南北
兵民十七万筑堤使复故道凡八月功成于是帝嘉其
功赐世袭达尔罕之号仍赐淮安路为其食邑郡邑长吏听其自用已而汝颍之闲妖寇
聚众反以红巾为号襄樊唐邓皆应之十一年托克托
乃奏以弟御史大夫额森特穆尔为知枢密院事将诸卫兵讨之军中夜惊额森特穆尔
北奔汴梁朝廷诏别将代之 【顺帝纪作至正十二
年事】 陕西行台监察御史十二人劾其丧师辱国之罪托克托怒乃迁西行台御史大
夫多尔济巴勒为湖广行省平章政事而御史皆除各
府添设判官由是人皆莫敢言事十二年红巾有号芝麻李者据徐州托克托讨平之帝
遣使即军中命托克托为太师趣还朝而以枢密院同
知图沁等进师平颍亳诏改徐州为武安州而立碑以着其绩十三年托克托用左丞乌
克逊良桢右丞乌兰哈达议屯田京畿立法佃种十四
年张士诚据高邮屡招不降诏托克托总制诸王诸省军讨之连战皆捷分兵平六合贼

势大蹙俄有诏罪其老师费财以河南行省左丞相台
哈布哈中书平章政事伊彻察喇知枢密院事舒苏代将其兵削其官爵安置淮安先是
托克托之西行也伯勒齐尔布哈欲陷之死哈玛尔屡
言于帝召还近地托克托德之至是引为中书右丞而是时托克托信用汝中柏平章以
下见其议事莫敢异同惟哈玛尔不为之下汝中柏因
譖之托克托改为宣政院使哈玛尔深衔之哈玛尔尝与托克托议授皇太子册宝礼托
克托言中宫有子将寘之何所以故久不行托克托出
师哈玛尔遂譖托克托于皇太子及皇后奇氏会额森特穆尔方移疾家居监察御史袁
宝音布哈等承哈玛尔风旨上章劾之三奏乃允夺御
史台印出都门外听旨而托克托亦有淮安之命即以所部听伊彻察喇舒苏等节制俄
有旨移额齐讷路十五年台臣复列疏其兄弟之罪于
是诏流托克托于云南大理宣慰司镇西路额森特穆尔于四川碉门托克托长子哈喇
章肃州安置次子三宝努兰州安置家产簿录入官托
克托行至大理腾衡知府高惠欲以女事之托克托弗许寻遣官移置阿恰齐之地高惠
因前不受其女故首发军围之哈玛尔矫诏遣使鸩之
死托克托仪状伟器识宏远事君之际始终不失臣节惟其惑于羣小急复私讎君子
讥焉二十三年监察御史张冲等上章雪其冤诏复托
克托官爵并给复其家产召哈喇章三宝努还朝而额森特穆尔已死乃授哈喇章中章
平章政事封申国公分省大同三宝努知枢密院事二
十六年监察御史升努额森萨都实哩等复言奸邪构害大臣以致临敌易将兵机不振
使托克托不死安得有今日之乱哉乞封一字王爵定
谥及加功臣之号朝廷是其言然以国家多故未及报而国亡

钦定续通志卷四百九十七

●钦定续通志卷四百九十八 列传二百九十八

列传

元 【五十二】

○元五十二

柰曼台	多尔济	多尔济巴勒	阿噜图	孛都尔噶	伯
勒齐尔布哈	太平	特穆尔达实	达实		
特穆尔					

柰曼台

多尔济

多尔济巴勒

阿噜图

弩都尔噶
伯勒齐尔布哈
太平
特穆尔达实
达实特穆尔
△柰曼台

柰曼台穆呼哩五世孙曾祖博啰祖阿尔济苏追封莒王谥忠惠父和斯和哩嗣国王追封蓟王柰曼台摯静有威大德五年奉命征海都都勒干以功授宣徽院使七年拜岭北行省右丞旧制募民粮以饷边是岁用事者杀其数民进退失措柰曼民请于朝悉受所输为下年之战民感其德至治二年改甘肃行省平章政事甘肃岁余粮于兰州挽运隔二千余里柰曼台改从捷近岁省费六十万缗天历二年迁陕西行省平章政事关中大饥诏募民入粟子爵四方富民应命输粟积关下初河南饥告余关中南民遏其余至是关吏乃河南人修宿怨拒粟使不得入柰曼台杖关吏而入其粟京北民掠人而食则命健卒分捕其患乃已时入关粟虽多而贫民乏钞以余乃取官库未毁昏钞给民用俟官给振饥钞如数易之先时民或就食他所多毁墙屋以往柰曼台谕使勿毁明年还皆得按堵如初拜西行台御史大夫命送太宗皇帝旧铸皇兄之宝于其后嗣扬珠济达柰曼台威望素严至其境礼貌益尊至顺元年选上都留守进知岭北行枢密院事封宣宁郡王寻奉命出镇北边锡子尤重后至元三年【多尔济传作后至元四年事】诏袭国王六年拜岭北行省左丞相至正二年迁辽阳行省左丞相以年踰六十上疏辞职归八年卒于家追封鲁王谥忠穆子二长额森布哈中书左丞次鸿和尔布哈

△多尔济

多尔济穆呼哩六世孙托克托子也多尔济生一岁而孤稍长备宿卫事母至孝喜读书于古君臣行事忠君爱民之道多所究心至治二年授集贤学士时年未及冠一时耆宿皆器重之天历元年多罗台国王自上都领兵至古北口与大都兵迎敌文宗杀之二年以多尔济袭国王位顺帝至元四年多罗台弟柰曼台恃太师巴延势谓国王位乃其所当袭愬于朝巴延妻欲得多尔济大珠环多尔济无以应则慨然曰王位我祖宗所传不宜从人求买我纵不得为亦我宗族人耳于是柰曼台以赂得为国王而除多尔济辽阳行省左丞相六年迁河南行省左丞相先是河南范孟为乱连系者千百计多尔济知其冤欲直之而平章政事纳琳执不从已而纳琳还言于朝以谓多尔济心徇汉人多尔济亦

不恤也至正四年迁江浙行省左丞相杭城荐经灾毁伯勒齐尔布哈先为相庶务宽纾多尔济咸仍其旧民心翕然汀州寇窃发遣将士招捕之威信所及数月即平居二年方面晏然杭民请廷生祠如前丞相故事多尔济辞弗许七年召拜御史大史拜中书左丞相升右丞相监修国史而太平为左丞相时朝廷无事稽古礼文之事有坠必举请赐经筵讲官坐以崇圣学选清望官专典陈言以求治道核守令汰僧尼举隐逸一时称盛九年罢丞相位复为国王之国辽阳十四年诏托克托总兵南讨中书参议袭伯璘建言宜分遣宗王及异姓王俱出军吴王托尔齐厚赂伯璘获免多尔济曰吾国家世臣天下有事此正效力之秋也即领兵出淮南听托克托节制托克托遣使攻六合拔之既而诏削托克托官爵罢其兵权多尔济乃以本部兵守扬州十五年卒于军多尔济为相务存大体而一时政权颇出于太平趋附者众多尔济处之凝然不与较然太平亦能推让尽礼中外皆号为贤相云二子都哩木特穆尔翰林学士纳木喀实哩袭国王

△多尔济巴勒

多尔济巴勒字惟中穆呼哩七世孙 【按穆呼哩传穆呼哩次子苏肯彻尔生纳颜纳颜生硕迪为多尔济巴勒之祖则是五世孙也本传误】 祖硕迪父伯勒格特穆尔多尔济巴勒甫晬而孤育于从祖母拜珠从父也请于仁宗隆玺书护其家稍长好读书十四年见文宗适将幸上都亲阅御衣命录于簿左右无能书汉字者多尔济巴勒引笔书之文宗喜曰世臣之家乃能知学岂易得哉命为尚衣奉御寻授工部郎中元统元年擢监察御史首上疏请亲祀宗庙赦命不宜数又陈时政五事时日月薄蚀烈风暴作河北山东旱蝗为灾及复条陈九事上之先是教坊官位在百官后御史大夫萨题传旨传入正班多尔济巴勒执不可又西僧为佛事内廷醉酒失火多尔济巴勒劾其不守戒律延烧宫殿萨题传旨免其罪多尔济巴勒又执不可一日间传旨者八乃已丞相巴延御史大夫腾吉斯二家家奴怙势为民害多尔济巴勒捕致于法民大悦腾吉斯怒多尔济巴勒曰我知奉法而已它不知也腾吉斯从子茂穆苏为钦察亲军指挥使恣横不法多尔济巴勒劾奏之茂穆苏集无赖子欲加害会腾吉斯被诛乃罢累迁侍书学士同知经筵事是时年甫弱冠又世家子乃独以经术侍帝左右世以为盛事至正元年除翰林学士仍知经筵事时喀喇库库以翰林学士承旨亦在经筵敷陈经义多尔济巴勒为之翻译曲尽其意多所启沃俄迁大宗正府伊克扎尔古齐听讼之际引谕律令曲当事情宗王有杀其大母者多尔济巴勒必欲正其罪时相

难之出为淮东廉访使迁江南行台治书侍御史未行
又迁江西行省左丞以疾不赴北还养疾黄厓山中起为资正院使五年拜中书参知政事同知经筵事时有以善音乐得幸者有旨用为崇文
监丞多尔济巴勒曰用幸人居清选臣恐后世议陛下帝悦升右丞寻拜御史中丞监察御史劾奏伯勒齐尔布哈章甫上黜御史大夫额琳沁
巴勒为江浙行省平章政事 【伯勒齐尔布哈传作江浙左丞相】 多尔济巴勒曰若此则台纲安在乃再上章劾奏并留大夫不允台臣皆
上印绶辞职帝谕多尔济巴勒曰汝其毋辞对曰宪纲隳矣臣安得独留帝为之出涕多尔济巴勒即杜门谢宾客寻出为辽阳行省平章政事
至官询民所苦知贵室僮奴公府隶卒强买民物仅酬半直又其俗编柳为斗大小不一贾佞得以高下其手民病之即饬有司厉防禁齐称量
诸物乃毕集而价自平又存恤孤老平准钱法清铨选汰胥吏慎句稽兴废坠巨细毕举苟有罪虽勋旧不贷王邸百司闻风悚惧召为太常礼
仪院使会盗起河南帝忧之拜中书平章政事首言治国之道纲常为重前西台御史张桓仗节死义不污于寇宜旌之以劝来者又言宜守荆
襄湖广以绝后患又数论祖宗之用兵匪专于杀人盖必有其道焉其言颇迂丞相托克托意时托克托倚信左司郎中汝中柏员外郎拜特穆
尔两人因擅权用事而多尔济巴勒正色立朝无所附丽适陕州围急因出为陕西行台御史大夫至中途闻商州陷即轻骑兼程至奉元而贼
已至鸿门即就署奉命与行省平章托多便宜同讨贼遂督诸军复商州乃修筑奉元城募民为兵出库所藏银为大钱射中的者赏之由是人
皆为精兵金商义兵甚精锐列其功以闻赐敕褒奖由是国家获其用时御史大夫额森特穆尔师败于河南西台御史蒙果勒哈雅范文等其
劾奏之多尔济巴勒当署字顾左右曰吾其为平章湖广矣未几命下果然额森特穆尔托克托之弟章既上托克托怒故左迁多尔济巴勒而
御史十二人皆见黜关中人遮道泣留多尔济巴勒慰遣之不听乃从间道出至重庆闻江陵陷或以道梗请少留不从既至律诸军以法而授
纳粟者以官人心翕然汝中柏拜特穆尔言于丞相曰不杀多尔济巴勒则丞相终不安乃命专给军食时官廩所储无几即延州民有粟者谕
劝贷粟民无不服又遣官余粟河南四川之境民闻其名争输粟以助饷右丞巴延布哈方总兵承顺风旨较侵辱之多尔济巴勒不为动官军
会复武昌至蕲黄巴延布哈百计徽索无不给之犹欲言其供需失期达尔罕军师王布哈奋言曰平章国之贵臣今坐不重茵食无珍味百需
立办犹欲诬之是无人心也托克托遣国子助教谩勒哲至军风使害之谩勒哲至则反

加敬礼语人曰平章勋旧之家国之祥瑞吾苟伤之则人将不食吾余矣多尔济巴勒素有风疾军中感雾露所患日剧遂卒于黄州多尔济巴勒以扶持名教为己任荐拔人才留心经术凡伊洛诸儒之书未尝去手喜为五言诗于字画尤精其在经筵开陈大义间采前贤遗言次为书四卷一曰学本二曰君道三曰臣职四曰国政明道厚伦制行稽古游艺五者学本之目也敬天爱民知人纳谏治内五者君道之目也宰辅台察守令将帅■〈执上目下〉御五者臣职之目也兴学训农理财审刑议兵五者国政之目也帝览而善之赐名治原通训藏于宣文阁二字特古斯特穆尔都沁特穆尔

△阿鲁图

阿鲁图博尔济四世孙父穆呼哩阿鲁图由经正监袭职为集赛官掌环卫遂拜翰林学士承旨迁知枢密院事至元三年袭封广平王至正四年托克托辞相以阿鲁图荐诏拜中书右丞相监修国史而伯勒齐尔布哈为左丞相从驾行幸每同车出入一时以二相协和为喜时诏修辽金宋三史阿鲁图为总裁五年三史成以其书进帝曰朕与卿等皆当取前代善恶为勉阿鲁图顿首舞蹈而出一日与僚佐议除刑部尚书宰执有所举或以其人柔软阿鲁图曰庙堂选僧子耶不枉人不坏法即是好刑官何必求强壮人左右无以答其知大体类如此先是伯勒齐尔布哈尝与谋挤害托克托阿鲁图不从六年伯勒齐尔布哈乃讽监察御史劾奏阿鲁图不宜居相位阿鲁图即避出城其姻党皆为不平请曰丞相何不见帝自陈阿鲁图曰我岂以丞相为难得耶但帝命我不敢辞今御史劾我我宜即云尔等无复言阿鲁图既罢去明年伯勒齐尔布哈遂为右丞相不久亦去十一年阿鲁图复起为太傅【三公表作太保】出守和琳边卒

△弩都尔噶

弩都尔噶博尔济四世孙也早岁备卫累迁同知枢密院事既而废处于家顺帝至元五年奉使宣抚达勒达之地整理有司不法事三十余条由是朝廷知其才升之岭北行枢密院事至正十五年召拜中书平章政事迁知枢密院事十七年以太尉总山东诸军守镇东昌路击退田丰兵十八年田丰复陷济宁进逼东昌弩都尔噶以乏粮弃城退屯柏乡东昌遂陷还京师拜中书添设左丞相与太平同居相位弩都尔噶有识量处事平允浙西张士诚既降弩都尔噶处置江南诸事咸得其宜士诚大服兴和路富民调戏子妇系狱行赂刑官久不决弩都尔噶除邢部侍郎为兴和路达鲁噶齐俾决其事富民遂自缢凡授官惟才是选不用私人众称

其有大臣体己而遽罢相迁知枢密院事尝卧病谓所知曰太平真宰相才也我疾固不起而太平亦不能久于位此可叹也朝官至门候疾者皆谢遣之二十年卒

△伯勒齐尔布哈

伯勒齐尔布哈字大用扬珠济达氏曾祖穆齐特以千户从宪宗南征有功父阿固台事成宗为丞相被诛后赠和宁忠献王伯勒齐尔布哈早孤八岁以兴圣太后及武宗命侍明宗于藩邸寻入国子学为诸生会明宗以周王出镇云南伯勒齐尔布哈从行至大同而还仁宗召入宿卫英宗朝命袭八番宣抚司达噜噶齐宣布恩信峒民感悦有累岁不服者至是皆受约束泰定三年特授同知太常礼仪院事益从耆老文学之士雍容议论寻拜监察御史累迁吏部尚书至顺元年出为广西两江道宣慰使司都元帅寻除礼部尚书擢侍御史特命领宿卫凡宿卫士有从掌领官荐用者往往举其亲昵独伯勒齐尔布哈推择岁久者举之众论翕服至元四年拜御史大夫知经筵事寻迁中书平章至正二年拜江浙行省左丞相行至淮东间杭城大火烧官廨民庐几尽即疾驰赴镇下令录被灾者二万三千余户户给钞一锭焚死者亦如之人给月米二斗幼穉给其半又请减盐课酒课等税朝廷皆从之在镇二年召还除翰林学士承旨仍掌宿卫四年 【宰相表作至正三年十二月

】拜中书左丞相奉使周行沙漠洗冤除弊不可胜计又奏发使谕诸王仗各抚其民毋踰法制于是内外震肃明年岁大饥流民载道令有司振之欲还乡者给路粮又录在京贫民日糴以粮七年进右丞相明年御史劾奏伯勒齐尔布哈而徽政院使高龙卜在帝侧为解帝遂不允乃出御史大夫额琳沁巴勒为江浙左丞相 【按额琳沁巴勒传云出为江浙行省平章政事迁拜湖广行省左丞相本传误合一官】 中丞以下皆辞职诏复加太保于是两台各道言章交至伯勒齐尔布哈益不自安寻谪居渤海县十年卒后子达实特穆尔用于朝遂赠太师追封冀王谥忠宣达实特穆尔字原理仕至中书平章政事有学识能世其家

△太平

太平字允中初名惟一后赐姓蒙古氏名太平父胜以非罪死太平年尚幼泰定帝雪其父冤而抚恤之太平资性开朗尝授业于赵孟俯又师事云中吕弼始袭父职为虎贲亲军都指挥使寻擢陕西汉中道廉访副使文宗召为工部尚书又除上都留守同知顺帝元统初命为枢密副使寻升同知枢密院事迁御史中丞时中书有参议佛家律者儉人也御史劾其罪时宰庇之事寝不行太平辞疾家居至正二年诏起为

中书参知政事就职辽金宋三史久未克修至是太平为总裁官力赞成之四年升中书平章政事六年拜御史大夫 【按宰相表至正五年十月太平由平章政事拜御史大夫此作六年互异】 故事台端非国姓不以授太平固辞诏特赐姓而改今名七年迁中书平章政事班同列士国王多尔济为左丞相请于帝愿得太平与其事乃拜太平左丞相而以多尔济为右丞相明年诏修后妃功臣传特命太平同监修国史时天下无事凡朝廷稽古右文之典有坠必举平生好访问人材不问南北必记录于册至是多进用之初托克托既罢相出居西土会其父满济勒噶台卒太平请令托克托归葬以全孝道左右以为难太平为之固请托克托乃得还既而还朝拜太傅然不知太平之有德于己也因汝中柏谗间成隙欲中伤之是时中书参政孔思立等皆一时名人太平所拔用者悉诬以罪黜去九年罢为翰林学士承旨既又诬劾其过失而并论其子额森呼图克不宜僭娶宗室女托克托母闻之谓托克托兄弟曰太平好人也何害于汝而欲去之侍御史实默图扬言于朝曰御史欲害正人坏台纲如天下后世何故吏田复劝太平自裁太平曰吾无罪当听命于天遂还奉元杜门谢客会河南盗起十五年诏为江浙行省左丞相未行改淮南行省左丞相兼知行枢密院事总制诸军驻于济宁时诸军久出粮饷苦不继太平命有司给牛具以种麦自济宁达于海州民不扰而兵赖以济议立土兵元帅府轮番耕战十六年移镇益都未几除辽阳行省左丞相十七年召为中书左丞相时毛贵据山东明年由河间入寇官军屡败渐逼京都廷议迁都以避之太平力争以为不可起用同知枢密院事刘哈喇布哈于彰德击败贼众京城遂安会张士诚以浙西降晋冀关陕间察罕特穆尔屡以捷奏于是中外命然有中兴之望时右丞相绰斯戩家人以造伪钞事觉刑部欲连逮绰斯戩太平力为解之二皇后奇氏与皇太子谋欲内禅遣宦者资正院使保布哈谕意太平皇后又亲召至室举酒申前意太平依违而已是时皇太子欲尽逐帝近臣又令监察御史劾帝亲昵御史中丞图噜特穆尔未及奏而所劾御史迁为他官皇太子疑额森呼图克泄其事益决意去太平政柄知枢密院事弩都尔噶数于帝前左右之以故皇太子之志未及逞会弩都尔噶死皇太子遂令监察御史迈珠僧格实哩劾左丞成遵参政赵中等下狱死以二人为太平党也太平知势不可留数以疾辞位二十年拜太保俸养疾于家会阳翟王阿勒呼木特穆尔倡乱骚动北边势逼上都皇太子言于帝命太平留守上都实欲置之死地太平遂往有同知太常院事托欢者额森呼图克故将也闻扬翟王将至乃引兵缚王至

军前太平不受令生致阙下北边以宁未几诏拜太傅赐田若干顷俾归奉元帝欲以巴咱尔为丞相巴咱尔辞曰臣老不足以任宰相必以命臣非得太平同事不可于是密旨令巴咱尔留太平毋行太平至沙井闻命而止皇太子悉其既去而复留也二十三年令御史大夫布哈【顺帝纪作监察御史敏珠尔哈雅】劾太平故违上命当正其罪乃诏悉拘所授宣命及所赐物俾往陕西之西居焉绰斯戩因诬奏之安置土蕃寻遣使逼令自裁太平至东胜赋诗一篇乃自杀二十七年监察御史辩其非辜请加褒赠子额森呼图克名均字公秉少好学有俊才累迁殿中侍御翰林院侍读学士皆兼袭虎贲亲军都指挥使太平为相务广延才彦而额森呼图克又顷已下士以故名称藉然已而被劾罢从亲还奉元居六年召为兵部尚书同知枢密院事除通政院使太平再相授知枢密院事迁太子詹事十九年羣盗屯辽阳诏额森呼图克率师往讨拔懿州盗踰辽河东奔而朝廷谗构日甚罢为上都留守寻改宣政院使以丁内艰不起绰斯戩再相复强起之即日监察御史额森特穆尔李好直又劾罢之已而绰斯戩徇皇太子旨构成大狱诬鲁达实曼济阿南达实哩沙嘉实哩额森呼图克及托欢等不轨锻炼成狱鲁达实逃于大同军中曼济阿南达实哩等皆贬死额森呼图克当贬萨斯嘉之地道由图沙玛宣政院使呼济哩素受知太平因留居其地势政知其故奏额森呼图克违命杖死之有诗集十卷

△特穆尔达实

特穆尔达实字九龄国王托克托之子事明宗于潜邸文宗初由同知都护府事累迁同知枢密院事后至元六年拜中书右丞至正改元升平章政事巴延罢相庶务多所更张特穆尔达实尽心辅赞每入直帝赐坐榻前询以政道二年郊建言大祀竣事必有实惠及民乃赐民明年田租之半岭北地寒不任穡事岁募富民和余为边饷至是乃请别输京仓米百万斛储于和琳以为备日本商百余人遇风漂入高丽高丽掠其货表请没入其人以为奴特穆尔达实曰天子一视同仁岂宜乘人之险以为利宜贖甚还已而日本果上表称谢五年拜御史大夫务以静重持大体建言近岁大臣获罪重者族灭轻者籍其妻子祖宗圣训父子罪不相及请除之着为令近畿饥民争赴京城奏出贖罚钞余米万石食之所活不可胜计居岁余迁平章政事位居第一大驾时巡留镇大都七年首相去位帝命为左丞相修饬纲纪立内外通调之法朝官外补许得升辞亲授帝训郡邑贤能吏次第甄拔入补朝阙分海漕米四十万石置沿河诸仓以备凶岁孔子后袭封衍圣公阶止四品奏升为三

品岁一再诣国学进诸生奖励之中书故事用老臣预议大政久废不设特穆尔达实奏复其规起达罕张元朴等四人为议事平章从幸上京还入政事堂俄感暴疾卒追封冀宁王谥文忠特穆尔达实天性忠亮伊洛诸儒之书深所研究帝尝称王文统奇才对曰世祖有尧舜之资文统不以王道告君而乃尚霸术何足取乎初巴延议罢科举特穆尔达实时在参议府不署牒及入中书及议复之征用处士待以不次之擢或疑为太优特穆尔达实曰隐士无求于朝廷朝廷有求于隐士区区名爵奚足惜哉时修辽金宋三史特穆尔达实为总裁官多所协赞云

△达实特穆尔

达实特穆尔字九成幼与其兄特穆尔达实俱入国学为诸生以世胄补官为太尉监提点擢治书侍御史以言罢除枢密院同知累迁为湖广行省平章政事沅靖柳桂等路猺獠窃发朝廷下诏招谕之达实特穆尔谓寇情不可料请置三分省一治静江一治沅靖一治柳桂分治益戍朝廷如其言已而诸猺獠悉降召还复为大司农至正十一年台州方国珍起海上达实特穆尔奉诏与江浙行省参知政事樊执敬往招谕之明年盗起河南拜河南行省平章政事至则修城池饬备御贼不敢犯其境迁淮南行省平章政事十五年入为中书平章政事时中书庶务多为吏胥迟留至则责委提控掾史二人分督左右曹悉为剖决出为江浙行省左丞相寻兼知行枢密院事许以便宜行事【按显帝纪达实特穆尔兼知行枢密院事在至正十六年】时江淮盗势日盛南北阻隔达实特穆尔独治方面而任用非人肆通贿赂卖官鬻爵于是谤议纷然所部郡县往往沦陷十六年张士诚陷平江进逼杭州达实特穆尔即弃城遁万户普贤弩力拒之而苗军帅杨谔勒哲亦引兵至败走张士诚达实特穆尔乃还初达实特穆尔以谔勒哲为海北宣慰使都元帅寻升江浙行省参政至是遂升右丞而苗军素无纪律肆为钞掠所过荡然无遗达实特穆尔方倚谔勒哲以为重莫敢禁遏故谔勒哲矜骄日肆而不可制明年士诚寇嘉兴屡为谔勒哲所败士诚乃遣曼济哈雅以书诈降而书词多不逊谔勒哲欲纳之达实特穆尔谓其反复不可信谔勒哲固劝乃许之遂授士诚太尉其弟士德淮南行省平章政事士信同知行枢密院事其赏皆授官有差士德寻为明兵所擒复升士信淮南行省平章政事然士诚虽降而城池府库甲兵钱谷皆自据如故于是朝廷以招安张士诚为达实特穆尔功诏加太尉【按顺帝纪达实特穆尔加太尉在至正二十年与本传记年互异】是时徽州建德皆已陷谔勒哲屡出师不利士诚素欲图谔勒哲而谔勒哲时又强取平章政事庆通女

达实特穆尔虽主其婚然亦其厌之乃阴与士诚定计
 扬言使士诚出兵复建德谔勒哲不为备遂被围苗军悉溃谔勒哲与其弟巴延皆自杀
 士诚遂据机州十九年朝廷因授士信江浙行省平章
 政事士信乃大发浙西诸郡民筑抗城于是方面之权悉归张氏达实特穆尔徒虚名而
 已俄而士诚欲求王爵达实特穆尔谓左右曰我若逆
 其意目前必受害当忍耻含垢以从之乃具闻于朝不报士诚遂自立为吴王即平江治
 宫阙立官属时达实特穆尔为江浙行省右丞哲伯为
 左右司郎中二人谄事士诚数媒檄达实特穆尔短二十四年士信乃使王晟等面数达
 实特穆尔过失勒其移咨省院自陈老疾愿退又言丞
 相之任非士信不可士信即逼取其所掌符印而自为江浙行省左丞相徙达实特穆尔
 至嘉兴峻其垣墙锢其门闼防禁甚严达实特穆尔日
 对妻妾饮酒放歌自若士诚既拘达实特穆尔索行台印章布哈特穆尔封其印置诸库
 曰我头可断印不可与又迫之登舟曰我可死不可辱
 也从容沐浴更衣与妻子诀赋诗二章及授印仰药死后数日达实特穆尔闻之叹曰大
 夫且死吾不死何为遂命左右以药酒进饮之而死士
 诚乃使载其柩及妻孥北返于京师

钦定续通志卷四百九十八

●钦定续通志卷四百九十九 列传二百九十九

列传

元 【五十三】

○元五十三

马祖常

库库【和和】

策丹

阿荣

苏尔约苏哈雅

达尔玛 伊噜特穆尔

额琳沁巴勒

廉和斯哈雅

达尔玛实哩

马祖常

库库

策丹

阿荣

苏尔约苏哈雅

达尔玛

伊噜特穆尔

额琳沁巴勒

廉和斯哈雅

达尔玛实哩

△马祖常

马祖常字伯庸世为永古特部居靖州天山伊克努尔之曾孙也父润同知漳州路总管府事【按祖常自撰石田山房记载其父字浚仪赠骑都尉开封郡伯尝监光州】家于光州祖常七岁知十岁时见烛欹烧屋解衣沃水以灭火咸嗟异之既长益笃学受业于蜀儒张须讲道仪真往受业其门须甚器之延佑初乡贡会试皆中第一廷试为第二授应奉翰林文字【按元明善送祖常南归序作应奉翰林文字同知制诰兼国史院编修官】拜监察御史时仁宗在御已久犹居东宫饮酒常过度祖常抗疏陈谏英宗为皇太子又上书请慎简师傅又劾奸臣特们德尔列其十罪仁宗震怒罢特们德尔相秦州山移祖常言山不当动而动由野有当用不用之贤官有当言不言之佞故使然尔疏闻大臣皆家居待罪祖常荐贤拔滞知无不言俄改宣政院经历月余辞归起为社稷署令亡何奸臣复相左迁开平县县尹因欲中伤之遂退居光州久之奸臣既死乃除翰林待制累迁礼部尚书寻辞归天历元年召为燕王内尉仍入礼部两知贡举一为读卷官时称得人迁江南行台中丞元统元年召议新政拜御史中丞持宪务存大体不事苛细调特穆副使顷之辞职归光州复除江南行台中丞又迁陕西皆以疾不赴至元四年卒赠魏郡公谥文贞祖常立朝多所建明其为文章宏赡而精核尤精于诗有文集行于世尝预修英宗实录又泽润皇图大训承华事略又編集列后金鉴千秋记略以进受赐优渥文宗尝叹赏为中原硕儒云

△库库

库库字子山喀喇氏博果密之子也幼肄业国学博通羣书长袭宿卫始授承直郎集贤待制迁兵部郎中秘书监丞奉命往核泉舶芥视珠犀不少留目累官至翰林学士承旨知制诰兼修国史知经筵事先是文宗励精图治库库尝以圣贤格言讲诵帝侧裨益良多顺帝即位之后翦除权奸思更治化库库侍经筵日劝帝务学帝辄就之习授欲宠以师礼库库力辞不可凡四书六经所载治道悉为紬绎必使感动帝衷帝暇日欲观古名画库库即取郭忠恕比干图以进帝偶览宋徽宗画称善库库言徽宗多能惟不能为君尔或遇天变民灾必忧见于色乘间进言请帝侧身修行以回天意帝察其真诚每虚己听之大臣议罢先朝所置奎章阁学士院及艺文监诸属官库库进曰民有千金之产犹设家塾延馆客岂有堂堂天朝一学房不能容耶帝闻而深然之即改奎章阁为宣文阁艺文监为崇文监存设如初就命库库董治时科举既辍库库从容为帝言帝采其论寻复旧制一日进读司马光资治通鉴因请修辽金宋三

吏后置司纂修实录发其端又请行乡饮酒于国学使民知逊悌及请褒赠唐刘蕡宋邵雍以旌道德正直帝从其请库以重望居高位而雅爱儒士以故四方士大夫翕然宗之既而出拜江浙行省平章政事明年复以翰林学士承旨召还时中书平章阙员近臣有所荐以言觐帝意帝曰平章已有人今行半途矣近臣知帝意在库库不复荐人至京七日感热病卒至正五年也家贫无以为敛帝震悼赐赙有加库库善真行草书单牍片纸人争宝之【按辍耕录云库库尝问客云一日可写几许字客曰闻赵学士云一日可写万字库库曰余一日写三万字未尝以力剑而辍笔此工书之一证也附识之】 谥文忠

兄和和

和和

和和

和和字子渊敦默寡言嗜学能文在成宗朝宿卫擢太常院使武宗正位以藩邸旧臣出使称旨至大间累迁河南廉访使行省丞相行事多不法纳琳为郎中每格不下丞相怒欲出之和和察其贤抗章举任风宪后历三台为名臣英宗即位丞相拜珠首荐为户部尚书寻拜南台侍御史改参议中书以议定刑书如法帝嘉纳其奏泰定初奏减漕运粮数以纾东南民力迁江浙行省右丞文宗立除宣政院使上言乞沙汰僧道擢中书右丞力辞还第闻明宗崩流涕不能食自是杜门不出者数年以疾卒与弟库库皆为时之名臣库库子维山历官崇文太监

△策丹

策丹蒙古人英宗时由舒库尔齐擢监察御史录囚大兴县以冤狱上御史台台宪不听改委他御史献之竟处死后数日其冤始白人服其明泰定二年扈从至上都纠言参知政事杨庭玉赃罪不报即纳印还京师帝遣使追之俾复任即再上章劾庭玉竟如其言又劾奏平章政事图们岱尔预闻英宗被弑之谋不省转赐图们岱尔黄金系腰策丹遂辞职改工部员外郎中书省委开混河策丹往视之以为难成役乃罢会三皇后殂命工部撤行殿车帐皆新作之策丹入见帝奏曰皇后行殿车帐尚新若改作之恐劳民费财必欲舍旧更新则大明殿乃自世祖所御列圣嗣位岂皆改作乎帝悦语省臣曰用人如策丹庶不悞大事迁吏部员外郎帝欲加号太后曰太皇太后策丹谓于典礼不合议遂罢迁中书客省使俄改同金宣政院事文宗即位除中书左司郎中有诏使自江浙还言行省臣意若有不服者帝怒命遣使问不敬状将悉诛之策丹言于丞相雅克特穆尔曰皇帝新即位云南四川犹未定乃以使臣一言杀行省大

臣恐非盛德事雅克特穆尔言于帝事乃止既而升参
议中书省事雅克特穆尔议封太保巴延王爵众论附之策丹独持不可遂寝其议拜治
书侍御史初文宗在潜邸欲创天灵寺令有司起民夫
江南行台监察御史伊奇尔台谓宜出钱募夫不当役民至是文宗欲黜伊奇尔台策丹
进曰御史为陛下尽言乃忠臣也今无罪而黜之非所
以示天下乃除伊奇尔台金宪湖南文宗尝欲游西湖策丹谏止之不听遂称疾不从文
宗顾谓台臣曰策丹终不满朕此游耶台臣尝奏除目
文宗涂一人姓名而缀将作院官拉里之名策丹言拉里为人诙谐惟可任教坊司若居
风纪则台纲扫地矣文宗乃止已而出为陕西行台御
史顺帝初除福建转运盐使既而为浙西肃政廉访使时有以内驸马为江浙行省丞相
者其宦豎恃势不法策丹逮之械以令众自是丞相府
无敢为民害者寻召为同金枢密院事复为治书侍御史同知经筵事宁夏人有告玛们
等谋害太师巴延者巴延委策丹与中书枢密等官往
宁夏鞫问无其情乃以诬罔坐告者罪巴延怒乃左迁策丹同知徽政院事策丹历事四
朝衍衍刚介始终一节有古遗真风然卒以是忤权贵
不复柄用君子惜焉

△阿荣

阿荣字存初奇■〈口耒〉氏父阿勒坦中书右丞阿荣幼事武宗备宿卫累迁为
湖南道宣慰副使会列郡饥分廩禄以食饿者仍发粟
振之所活甚众广西寇起众皆汹惧阿荣镇之以静督有司治兵守其境寇不敢入迁湖
广行省左右司郎中天历二年积官至奎章阁大学士
文宗甚眷遇之阿荣自尽心国政知无不言久之忽郁郁不乐谒告南归武昌至元元年
卒初阿荣闲居以文翰自娱读书慕古忠臣孝子之行
尤深数学推事多奇中天历三年【按文宗纪天历三年实至顺元年也改元在五月而
廷试以三月故本传及选举仍并称天历二年】策
士于廷阿荣与虞集会于直卢慨然兴叹语集曰更一科后科举当辍辍两科而复复则
人材彬彬大出矣又叹曰荣不复见之矣君犹未见之
集问何以知之弗答后五年卒元统三年科举果罢至正元年始复【按顺帝纪罢行科
举在至元元年即传所云元统三年也至科举之复
则在至元六年本传作至正元年误】如其言

△苏尔约苏哈雅

苏尔约苏哈雅阿尔哈雅之孙也父楚国忠惠公名袞格根苏尔约苏哈雅遂以袞
为氏复以酸斋自号年十二三膂力绝人运槊生风观
者辟易或挽强射生上下峻阪如飞稍长折节读书为文不蹈袭故常能出人意表初袞

父官为两淮万户府达鲁噶齐镇永州御军极严行伍
肃然暇辄投壶雅歌不为形迹所拘一日呼弟呼图克哈雅语曰吾宦情素薄顾祖父之
爵不致不袭今愿以让弟即解所馆黄金虎符佩之比
从姚燧学燧见其古文峭厉有法及歌行古乐府慷慨激烈大奇之仁宗在东宫闻以爵
让谓宫臣曰将相家子弟有如是贤者耶俄选为英宗
潜邸说书秀才宿卫禁中仁宗践阼上疏条六事一曰释边戍以修文德二曰教太子以
正国本三曰设谏官以辅圣德四曰表姓氏以旌勋胄
五曰定服色以变风俗六曰举贤才以恢至道书凡万余言未报拜翰林侍读学士知制
诰同修国史会议科举事多所建明忽喟然叹曰辞尊
居卑昔贤所尚今禁林清选与所让军资孰高人将议吾后矣乃称疾辞还江南卖药于
钱唐市中诡姓名易服色人无有识之者过梁山泝见
渔父织芦花为被欲易之以紬渔父请其赋诗遂援笔立成竟持被去人间喧传芦花被
诗其依隐玩世多类此晚年为文日邃诗亦冲澹草隶
等书稍取古人所长变化自成一家士大夫得其片言尺牍如获拱璧泰定元年卒追封
京兆郡公谥文靖有文集及直解孝经一卷行于世子
二人阿尔斯兰哈雅布斯哈雅

△达尔玛

达尔玛高昌人【萨奇苏传作回鹘人】山东行省都督萨奇苏之孙也弱冠入
宿卫大德十一年授御药院达鲁噶齐迁回回药物院
寻出金湖北山南两道廉访司事召拜监察御史时丞相特们德尔专权贪肆达尔玛帅
同寅额琳沁马祖常劾其罪高昌僧恃丞相威违法娶
妇达尔玛志问之风纪大振擢河东廉访副使至治元年特们德尔复相以复讎为事达
尔玛辞去明年改燕南道廉访副使三年【原文误
作至治元年今改正】除济宁路总管兴学劝农百废具修府无停事泰定元年升福建
廉访使朝廷遣宦官巴延催督绣段横取民财宣政院
判官卓琳亦取赂于富僧达尔玛皆劾之迁浙西廉访使会文宗发江陵阿尔噶图挟谕
旨求赂不获还潜于朝召至京将处以重罪比至帝怒
解迁上都同知留守天历二年【原文误作天历元年今据文宗纪改正】明宗崩文
宗复正大统使者旁午达尔玛朝暮尽力事无缺失天
历三年【文宗纪作至顺元年】迁淮东廉访使明年召拜刑部尚书元统元年升辽
阳行省参知政事高丽国使朝京道过辽阳谒省官各
奉布四匹书一幅用征东省印封之达尔玛诘其使曰国制设印以署公牍何为封私书
况汝出国时我尚未为辽阳省官何故有书遣我使辞
出即还其书与布三年迁山东廉访使时山东盗起陈马骡及新李白昼杀掠达尔玛以

为官吏贪污所致先劾去之而后上擒贼方略朝廷嘉纳之即遣兵擒获齐鲁以安除大都留守帝尝命修七星堂达尔玛务为朴素左右皆不然及车驾自上京还入观之大喜叹曰有心哉留守也至正六年升河南行省右丞改翰林学士承旨七年迁陕西行台中丞致仕给全俸赡养终身

△伊噜特穆尔

伊噜特穆尔布朗吉尔都尔伯特氏曾祖古裕事太祖为管领齐哩克昆集赛官祖哈喇袭父职事世祖父布呼齐由宿卫为中书右司员外郎与丞相哈喇哈斯建议迎立武宗累迁至山北辽东道肃政廉访使伊噜特穆尔傲倨有大志年十二成宗命与哈喇哈斯之子托欢同入国学仁宗时入宿卫帝问知为布呼齐子因传旨令常侍禁廷毋止其人久之拜监察御史巡按上都劾奏太师右丞相特们德尔受张弼赇贷死帝怒碎太师印除伊噜特穆尔兵部郎中累迁右司郎中赐坐便殿帝顾左右曰伊噜特穆尔识量明远可大用者也他日帝语近臣曰朕闻前代皆有太上皇之号今皇太子且长可居大位朕欲与若等游观西山以终天年御史丞曼济等皆称善伊噜特穆尔独起拜曰臣闻昔日之所谓太上皇若唐玄宗宋徽宗皆当祸乱不得已而为之者也愿陛下保万世无疆之业勿慕前代虚名帝善其对仁宗崩特们德尔复入相参议青沙津以受人金带系狱特们德尔乃使清沙津愬伊噜特穆尔为御史时诬丞相受赇皇太后命丞相哈克伞推问不实事遂释特们德尔乃奏以为山东盐运司副使期月间盐课增以万计丁外艰扶丧西还擢山南江北道肃政廉访副使泰定初迁汴梁路总管致和元年河南行省平章巴延矫制起为本省参知政事共议起兵伊噜特穆尔辞曰皇子北还问参政受命何人则将何辞以对巴延怒会明埒克栋阿迓皇子过河南而伊噜特穆尔为御史时尝劾其娶娼女冒受封明埒克栋阿因说巴延收之丞相拜布哈亦与之有隙乃谪伊噜特穆尔干宁安抚司安置至顺四年移置雷州至元六年顺帝召之还至正二年入覲帝欲留之以母丧未葬辞四年乃起同知将作院事寻除大宗正府伊克札尔古齐九年拜翰林学士承旨知经筵事进读之际引援经史一本于王道帝嘉纳焉十二年江南盗贼充斥诏拜伊噜特穆尔平章政事行省江浙比至镇询守备之方招募民兵数千号令明肃统帅次建德获首贼何福斩于市遂复淳安等县俘获万余人是年次徽州以疾卒于军中

△额琳沁巴勒

额琳沁巴勒西夏人知枢密院事安巴子也性刚直动有礼法仁宗召见令入宿卫

延佑六年拜翰林侍讲学士至治二年调同知通政院
事五迁为侍御史兼唐古亲军都指挥使至顺初拜翰林学士承旨迁功德使寻复为翰
林学士承旨元统至元之间丞相巴延专权擅政嫉其
论事不阿出为江南行台御史大夫寻杀其子达尔玛而谪置海南巴延败乃召还朝至
正六年拜御史大夫尽选中外廉能之官置诸风宪一
时号称得人迁宣政院使出为甘肃行省平章政事设法弭西羌之寇民赖以安召还知
枢密院事复拜为御史大夫总经筵事兼宣忠乌噜斯
扈卫亲军指挥使尝奏言风俗人心日趋于薄请禁故吏不许弹劾所事官长太师满济
勒噶台与子丞相托克托既谪居在外时相欲倾之噤
人告变且扳台臣同上奏额琳沁巴勒不从凡遇经筵进讲必详必慎帝每嘉纳监察御
史劾时相帝不听额琳沁巴勒反复论奏不已由是忤
帝意出为江浙行省平章政事还拜湖广行省左丞相复召知枢密院事十一年颍亳盗
起官兵多失律致贼数进言于时相不见听复出为江
浙行省左丞相十二年移江西时妖寇由蕲黄陷饶州饶之属邑安仁民皆相挺为乱额
琳沁巴勒因驻兵招之来者厚加赏赉不从者纵火攻
散之余干久为盗区至是亦闻风顺服初江西行省平章政事道通以宽容为政军民懈
弛额琳沁巴勒既至风采一新威声大振所在羣盗咸
谋归款十四年卒于官所部为之丧气追封济王谥忠献子九人

△廉和斯哈雅

廉和斯哈雅字公亮博啰哈雅之孙希宪从子也父阿哩袞哈雅广德路达噜噶齐
和斯哈雅幼孤言及父辄泣下贫居养母垢衣粝食不
以为耻母丧哀毁踰礼负丧渡江而风涛作舟人以神龙忌尸为言即仰天大呼曰吾将
祔母于先莹神柰何阨我也风遂止年弱冠大臣欲俾
入宿卫辞曰吾从父 【原传讹作大父改正】 事世祖以通经号廉孟子今方设科取
士愿读书以科第进乃入国学至治元年登进士第授
同知顺州事有弓匠提举满达勒者怙势夺州人田同列畏之和斯哈雅至即穷治之在
官期年召入史馆预修英宗显宗实录 【原本作预
修英宗仁宗实录前后倒置考本纪延佑七年纂修仁宗实录其时和斯哈雅未登第也
又考泰定元年命修英宗显宗实录和斯哈雅入史馆
应在此时谨改正】 寻拜监察御史时中书省有大臣贪猥狼籍即抗章劾之既又劾奏
明呼克栋阿不当摄祭太庙迁都水监疏会通河堤滦
漆二水又修京东闸厯秘书丞会福总管府治中上疏言二月迎佛费财蠹俗时论黻之
出金淮东廉访司事递升江南行省御史台经历时山
东盐法大坏以选除都转运使未期月辄课最至正三年初行郊礼召拜侍仪使明年预

修辽金宋三史迁崇文太监自是累迁为河南行省右丞时诏发民治决河徧骚属郡亟以不便上言而时宰不用迁湖广行省右丞以武昌失守连坐既而事白迁江西行省右丞时所隶郡县多陷于贼乃与平章政事司徒道通协谋戮力定守御招捕之策就除本道廉访使未几江西省治亦陷遁往福建之久除迁江浙行枢密院事改拜福建行省右丞以兵镇延平邵武境内以宁居岁余奉诏还治省事总备御事且督赋税由海道供京师朝廷赖焉迁行宜政院使明年拜翰林学士承旨知制诰兼修国史卒

△达尔玛实哩

达尔玛实哩字遵道齐哩克台氏其先北方大放六世祖始居开平父曰阿拉克布哈江西行省参知政事追封赵国公谥襄惠达尔玛实哩幼颖敏从师授经大过目辄领解至正五年经筵选充译史累官至刑部尚书提调南北兵马司巡绰事盗逼畿甸人心大恐达尔玛实哩镇之以静民恃以安二十一年由中书参议升中书参知政事同知经筵事二十三年迁上都留守兼开平府尹分司土岭东镇三州以督转输二十四年朝廷以前中书平章政事达实特穆尔来为留守时博罗特穆尔拥兵京师皇太子出居于外达尔玛实哩与达实特穆尔皆以忠义许国相与结人心以观时变未几改授达实特穆尔为大司农达实特穆尔谓达尔玛实哩曰若至京师则制于强臣未易图也因留不行适塔奇勒以博罗特穆尔命屯兵哈里泊而以留守善安集兵于鄂济哩部落达尔玛实哩遇之有礼善安辞去博罗特穆尔复调特穆尔托噶苏克至上都以守御为名事益矛盾达尔玛实哩与之周旋略无几微见于外而密遣使通音问于汗哈勒哈行枢密知院伊埒岱尔请亟调兵南行又遣留守司照磨东恭取兵兴州访求在闲官吏之有才者约束东西手巴尔噶齐虎贲司糺集丁庄苗军火銃什伍相联一旦布列铁旛竿山下扬言四方勤王之师皆至特穆尔等骇走所将兵尽溃由是达尔玛实哩增修武备城守益严二十五年皇太子在冀宁命立上都分省达实特穆尔为平章政事达尔玛实哩为右丞便宜行事图沁特穆尔用博罗特穆尔命以兵犯上都先遣利用少监特尔格齐至上都令备粮饩远迓大军达尔玛实哩开陈大义戮之于市民情乃定已而图沁特穆尔帅马步军蔽野而至呼声动天达尔玛实哩饬实土城守申明逆顺之理以安人心巡视城壁昼夜不少息夜遣死士缒城而下焚其攻具调副留守图噜默色哈雅引兵出战败之未几博罗特穆尔伏诛图沁特穆尔奔溃上都以安拜中书右丞兼上都留守提调虎贲司仍命提调东西手巴尔噶齐明年召

为大宗正府伊克扎尔古齐又明年拜太子詹事奉诏
至军中宣明大义藩将感悦迁翰林学士承旨除知枢密院事兼大抚军院事初大抚军
院之立皇太子专以备御库特穆尔既而政权不一
事务益乖迨达尔玛实哩至事已无可为者达尔玛实哩之卒也先一夕集赛官哈喇章
梦太祖召见语之曰我以勤劳取天下以传于托欢特
穆尔而阿裕实哩达喇不克肖以废坏我家法苟不即改图天命不可保矣汝明旦亟以
吾言告而主及阿裕实哩达喇不以告吾即殛汝告之
而不改则吾有以处之达尔玛实哩其人庶几识事然知而不言将焉用之吾其先殛之
矣明旦哈喇章入见帝具以梦告帝令以告皇太子比
出则达尔玛实哩已无疾而卒矣

钦定续通志卷四百九十九

●钦定续通志卷五百 列传三百

列传

元 【五十四】

○元五十四

察罕特穆尔【库库特穆尔】 达实巴图尔 庆通

伊苏 彻尔特穆尔 纳琳

巴延特穆尔 刘哈喇布哈 舒穆噜宜孙

穆尔济苏

察罕特穆尔

达实巴图尔

庆通

伊苏

彻尔特穆尔

纳琳

巴延特穆尔

刘哈喇布哈

舒穆噜宜孙

穆尔济苏

△察罕特穆尔

察罕特穆尔字延瑞系出北庭曾祖库库台天初随大军收河南祖奈曼台父阿噜
威皆家河南为颍州沈邱人察罕特穆尔幼笃学尝应
进士举有时名居常慨然有当世志至正十一年盗发汝颖不数月江淮诸郡皆陷朝廷
征兵致讨卒无成功十二年察罕特穆尔乃奋义起兵

沈邱之子弟从者数百人与信阳之罗山人李思齐合兵同设奇计袭破罗山朝廷授察罕特穆尔汝宁府达噜噶齐于是所在义士俱将兵来会得万人自成一军屯沈邱数与贼战辄克捷十五年贼势滋蔓由汴以南陷邓许嵩洛察罕特穆尔兵日益盛转战而北遂戍虎牢以遏贼锋贼乃北渡孟津焚掠至覃怀河北震动察罕特穆尔进战歼之无遗类河北遂定朝廷奇其功除中书刑部侍郎苗军以荥阳叛察罕特穆尔夜袭之歼其众几尽乃结营屯中牟已而淮右贼众掠汴以西来捣中牟营察罕特穆尔结陈待之以死生利害谕士卒士卒贾勇决死战贼势披靡不能支弃旗鼓遁追杀十余里军声益振十六年升中书兵部尚书继而贼西陷陕州断穀函势欲趋秦晋知枢密院事达实巴图尔方节制河南军调察罕特穆尔李思齐同往攻之夜拔穀陵立栅交口险阻贼转南山粟给食以坚守攻之猝不可拔察罕特穆尔乃焚马矢如炊烟状以疑贼而夜提兵拔灵宝城守既备贼始觉不敢动即渡河陷平陆掠安邑蹂晋南鄙察罕特穆尔追袭之贼回扼下阳津赴水死者甚众相持数月贼皆遁溃以功加佾河北行枢密院事十七年贼寻出襄樊陷商州攻武关直趋长安分掠同华诸州三辅震恐陕西省台来告急察罕特穆尔即领大众入潼关与贼遇战辄胜贼党皆溃走南山入兴元朝廷嘉其功授陕西行省左丞未几贼出自巴蜀陷秦陇据巩昌遂窥凤翔察罕特穆尔即分兵守凤翔遣谍者诱贼贼果来围之察罕特穆尔自将铁骑昼夜驰二百里往赴分军张左右翼掩击之城中军亦鼓噪而出内外合击贼大溃斩首数万级余党皆遁关中悉定十八年山东贼分道犯京畿朝廷征四方兵入卫诏察罕特穆尔以兵屯涿州察罕特穆尔即留兵戍清湫义谷屯潼关塞南山口以备他盗自将锐卒往赴召 【按顺帝纪至正十八年诏察罕特穆尔屯陕西与本传异】 而曹濮贼方分道踰太行焚上党掠晋冀陷云中雁门伐郡烽火数千里察罕特穆尔先遣兵伏南山阻隘自勒重兵屯闻喜绛阳贼果走南山横击之贼皆弃輜重轻车走山谷其得南还者无几乃分兵屯泽州塞碗子城屯上党塞吾儿谷屯并州塞井陘口以杜太行诸道贼屡至守将数战却之河东悉定进陕西行省右丞兼行台御史同知河南行省枢密院事于是诏察罕特穆尔守御关陕晋冀抚镇汉沔荆襄便宜行事察罕特穆尔益务练兵训农以平定四方为己责是年安丰贼刘福通等陷汴梁造宫阙易正朔号召羣盗巴蜀荆楚江淮齐鲁辽海西至甘肃所在兵起察罕特穆尔乃北塞太行南守巩洛而自将中军军沔池会叛将周全弃覃怀入汴城合兵攻洛阳察罕特穆尔下令严守备别以奇兵出宜阳自将

精骑发新安来援贼至城下见坚壁不可犯遽引去因追至虎牢塞成皋诸险而还拜陕西行省平章政事仍兼同知行枢密院事便宜行事十九年察罕特穆尔图复汴梁以大军次虎牢先发游骑南道出汴南略归亳陈蔡北道出汴东水陆并下略曹南据黄陵渡乃大发秦兵出函关过虎牢晋兵出太行踰黄河俱会汴城下首夺其外城自将铁骑屯杏花营诸将环城而垒贼屡战辄败乃夜伏兵城南旦日遣苗军略城而东贼出追伏兵鼓噪起击败之又令弱卒立栅外城以饵贼贼出争之弱卒佯走因突铁骑纵击悉擒其众贼自是益不敢出谍知城中食尽乃与诸将议各分门而攻夜斩关而入遂拔之刘福通奉其伪主从数百骑出东门遁走获伪后及贼妻子数万伪官五千符玺印章宝货无算河南悉定以功拜河南行省平章政事兼知河南行枢密院事陕西行台御史中丞仍便宜行事先是中原乱江南海漕不复通京师屡苦饥至是河南既定江浙海漕复至察罕特穆尔乃分兵镇关陕荆襄河洛江淮而重兵屯太行营垒旌旗相望数千里乃谋大举以复山东二十一年谍知山东羣贼自相攻杀而济宁田丰降于贼察罕特穆尔乃舆疾自陕抵洛大会诸将分道并进而自率铁骑渡孟津踰覃怀鼓行而东复冠州东昌师至盐河遣其子库库特穆尔及诸将等以精卒五万捣东平与东平贼兵遇两战皆败之直抵其城下察罕特穆尔以田丰据山东久军民服之乃遗书谕以逆顺丰及王士诚皆降复东平济宁时大军犹未渡羣贼皆聚济南而出兵齐河禹城以相抗察罕特穆尔分遣奇兵取闲道出贼后南掠泰安逼益都北徇济阳章邱中循濒海郡邑乃自将大军渡河与贼将战于分齐大败之进逼济南郡而齐河禹城俱来降南道诸将亦报捷再败益都兵于好石桥东至海滨郡邑闻风送款攻围济南三月城乃下诏拜中书平章政事知河南山东行枢密院事陕西行台中丞如故遂移兵围益都百道并进贼悉力拒守复掘重堑筑长围遏南洋河以灌城二十二年山东俱平独益都孤城未下田丰王士诚阴结贼复图叛乃请察罕特穆尔行观营垒左右请以力士从不许乃从轻骑至其营遂为所刺讣闻帝震悼诏封忠襄王谥献武及葬赐赙有加改封颍川王谥忠襄封其父阿鲁威汝阳王后又进封梁王字库库特穆尔

库库特穆尔

库库特穆尔

库库特穆尔本姓王小字保保察罕特穆尔甥也自幼养为子察罕既遇害诏即军中拜库库特穆尔太尉中书平章政事知枢密院事仍总父兵库库特穆尔既领兵柄衔哀讨贼贼守益固乃穴地以入拔其城取田丰王士诚

之心祭其父分兵居宫州山东悉平博啰特穆尔自察罕特穆尔既没复数以兵争晋冀帝虽屡解谕之而雠隙日深会朝臣鲁达实图沁特穆尔得罪于皇太子奔于大同为博啰特穆尔所匿帝密令博啰特穆尔隐其迹而丞相绰斯戩宦者保布哈皆附皇太子必穷竟其事皇太子方倚重库库特穆尔库库特穆尔驻太原与博啰特穆尔构兵相持不可解二十四年诏数博啰特穆尔罪削其官职而夺其兵博啰特穆尔不受诏遂遣兵逼京师杀绰斯戩保布哈复与鲁达实图沁特穆尔兵同犯关库库特穆尔遣部将白索珠以万骑入卫与战不利遂奉皇太子奔太原博啰特穆尔入朝据相位白索珠将二万骑屯渔阳为朝廷声援二十五年库库特穆尔以太子命举兵讨博啰特穆尔由大同进薄京师帝乃杀博啰特穆尔于朝诏皇太子还京库库特穆尔亦扈从入朝拜丞相居两月请南还视师是时江淮川蜀多失陷皇太子累请出督师而帝难之乃封库库特穆尔河南王俾总天下兵而代之行库库特穆尔于是分省以自随官属之盛几与朝廷等而用孙翥赵恒等为谋主二十六年北渡居怀庆又移居彰德初李思齐与察罕特穆尔同起义师齿位相等及是库库特穆尔总其兵思齐心不能平而张良弼孔兴图鲁卜等亦皆以功自恃各怀异见莫肯统属库库特穆尔乃遣关保和尔齐以兵西攻良弼而思齐亦与良弼合兵连不能罢库库特穆尔始受命南征顾乃退居彰德又惟务用兵陕西朝廷因疑其有异志初皇太子之奔太原也欲用唐肃宗灵武故事库库特穆尔不从及还京师皇后奇氏传旨令库库特穆尔以重兵拥太子入城欲胁帝禅位库库特穆尔知其意比至京城三十里即散遣其军由是皇太子心衔之及是屡趋其出师江淮库库博啰遣弟托音特穆尔及部部将鄂勒哲摩该以兵往山东而西兵互相胜负终不解帝又下诏和解之顾乃戕杀诏使而跋扈之迹成矣二十七年帝命皇太子亲出总天下兵马分命库库特穆尔肃清江淮李思齐进取川蜀图噜与张良弼孔兴图鲁卜等取襄樊王信守山东然诏书虽下皇太子亦竟止不行而分兵之命库库特穆尔终扞拒不肯受于是摩该关保等皆叛之列其罪状闻于朝举兵共攻之皇太子用萨兰托里特哩实克巴延特穆尔李国凤等计立抚军院总制天下军马专备库库特穆尔以摩该等能倡大义赐号忠义功臣十月诏落库库特穆尔太傅中书左丞相依前河南王以汝州为食邑与弟托音特穆尔同居河南府凡库库特穆尔所总诸军在帐前者命白索珠和尔齐领之在河南者李克彝领之在山东者伊苏领之在山西者萨兰托里领之在河北者摩该等分领之库库特穆尔既受诏即退屯泽州诏又命

图鲁与李思齐张良弼孔兴图鲁卜率兵东向以正天
讨二十八年朝廷命左丞孙景益分省太原关保以兵为之守库库特穆尔即遣兵据太原而尽杀朝廷所置官 【谨按通鉴辑览 御批
库库特穆尔前与李思齐等兵连祸结尚属私怨相寻至是则竟入据太原尽杀朝廷所置官吏显然相抗直是叛矣谕者或谓库库特穆尔后
此孤军塞外犹然力战不屈使得角逐中原国事尚未可知而归其咎于太子挟嫌轻加削夺驱而为博罗特穆尔之绩坐致宗社沦亡其所以
责太子者诚当然彼时明兵已尽有山东渐将由汴入陕即使库库特穆尔奋志勤王亦未必即能恢复疆宇中兴社稷乃罔恤国家之患不御
外侮而转成内讧累世忠勤至此而隳何其整也】 皇太子乃命魏赛音布哈及关保以兵与思齐良弼诸军夹攻泽州天子又下诏削夺库库
特穆尔爵邑令诸军共诛之二月库库特穆尔退守平阳关保遂据泽潞二州与摩该合时李思齐张良弼孔兴图鲁卜与库库特穆尔相持既
久明兵时已及河南思齐良弼乃解兵大掠而归七月摩该关保进攻平阳数请战不出一日谍知摩该分军掠祁县即夜出薄其营大败其众
摩该关保皆就擒朝廷闻之遽罢抚军院而特哩实克巴延特穆尔李国凤等以误国受黜库库特穆尔因上疏自陈帝亦悔悟下诏涤其前非
时明兵已定山东河洛中原俱不守闰七月帝复命库库特穆尔仍前河南王太傅中书左丞相以兵南讨伊苏趣山东图鲁出潼关李思齐出
七盘金商以图复汴洛未几伊苏兵溃图鲁思齐兵亦未尝出而库库特穆尔又退守太原不复敢南向已而明兵迫京师帝北奔国遂以亡及
明兵至太原库库特穆尔即弃城遁西奔于甘肃

△达实巴图尔

达实巴图尔曾祖耨埒祖伊苏岱尔有传父囊嘉特以世袭万户镇守罗罗宣慰司土人作乱捕获有功举充船桥万户出征云南升大理
宣慰司都元帅至正十一年特除四川行省参知政事从平章耀珠讨贼于荆襄 【按顺帝纪达实巴图尔除陕西参政及耀珠讨荆襄事并
在至正十二年与本传异】 时耀珠既平江陵达实巴图尔请自攻襄阳十二年进攻荆门上用宋廷杰计招募义丁二万编排部伍申其约束行
至蛮河贼守要害兵不得渡即令屈万户率奇兵由闲道出其后首尾夹攻贼大败追至襄阳生擒伪将三十人斩之贼自是闭门不复出达实
巴图尔乃分别八翼包络襄城外置八营军岷山楚山以截其援乃以中军四千据虎头山以瞰城中城中民受围日久夜半二人缒城叩营门
顾为内应约以五月朔四更攻城至期民垂绳以引官军城遂破伪将王权西走遇伏兵

被擒襄阳遂平以其弟实勒们为襄阳达噜噶齐子博
啰特穆尔为云南行省理问比贼再犯荆门安陆沔阳达实巴图尔辄行兵败之十三年
定青山荆门诸寨略均房平谷城破武当山寨数十获
伪将杜将军进攻峡州破伪将赵明远寨升四川行省右丞十四年复峡州升四川行省
平章政事兼知枢密院事总荆襄诸军五月命伊苏乌
尔图华代守中兴荆门令达实巴图尔以兵赴汝宁寻诏与台哈布哈会军讨安丰复苗
军所据郑均许三州又复河阴巩县十五年命达实巴
图尔代台哈布哈管领一应诸王藩将兵马便宜行事拜河南行省平章政事进次许州
长葛与刘福通野战为其所败将士奔溃至中牟收散
卒团结屯种贼复来劫营掠其辎重刘哈喇布哈来援大破贼兵复驻汴梁东南调兵进
讨大败贼于太康遂复亳州伪宋主小明王遁十六年
朝廷差托欢知院来督兵达实巴图尔父子亲与刘福通战不利移驻陈留攻取夹河贼
寨次高柴店偃太康贼乘夜来劫以有备亟遁火而追
之比晓督阵力战缘城入其郭斩首数万擒伪将军张敏孙韩等九人杀伪丞相王罗二
人太康悉平遣博啰特穆尔告捷京师帝赐劳内殿王
其先臣二世拜河南行省左丞相仍兼知枢密院事守御汴梁升实勒们云南行省左丞
博啰特穆尔四川行省左丞十七年诏朝京师加开府
仪同三司太尉四川行省左丞相取沟城东明长垣三县诏遣知院达玛玛实哩来援为
刘福通所杀达勒达诸军皆奔溃达实巴图尔力不能
支退驻石村朝廷颇疑其玩寇失机使者促战相踵贼觐知之诈为达实巴图尔通知书
遗诸道路使者得之以进达实巴图尔觉知忧愤死子
博啰特穆尔别有传

△庆通

庆通字明德喀喇氏祖莽赉特穆尔父乌鲁斯皆封益国公庆通勋臣子孙给事内
廷遂长宿卫授大宗正府掌判三迁为上都留守又累
迁为辽阳行省平章政事以宽厚为政辽人德之至正十年迁平章行省江浙适时丞平
颇沈湎于宴乐凡遗逸之士举校官者辄摈斥不用由
是不为物论所与明年盗起汝颍蔓延江浙江东浙西郡县所在不守庆通分遣僚佐以
次克复既乃招徕流离俾安故业发官粟以振之民赖
以存活者其众十四年托克托以太师右丞相统大兵南征一切军资甲使谷粟薪藁之
属咸取具于江浙庆通规措有方陆运川输千里相属
朝廷赖之明年盗起无锡庆通谕以祸福皆投戈解甲请为良民十六年平江湖州陷义
兵元帅芳嘉弩屯杭城之北关劫掠财货白昼杀人民
以为患庆通言于丞相达实特穆尔数其罪斩首以徇民大悦继而苗军帅杨鄂勒哲守

杭城授江浙行省右丞以功自骄求娶庆通女庆通不
许时苗军势甚张达实特穆尔方倚以为重强为主婚庆通不得已以女与之明年出镇
海宁州居二年召拜翰林学士承旨改淮南行省平章
政事未行仍任江浙十八年拜江南行台御史大夫时南行台治绍兴所辖诸道皆阻绝
不通明台诸郡则制于方国珍杭苏诸郡则据于张士
诚宪台纲纪不复可振二十年召还朝由海道趋京师拜中书平章政事 【按元宰相年
表至元二十年平章政事凡七仲而不载庆通与此
传异】 有譖其子噶勒桑私通宫人者帝怒杀之庆通因鞅鞅不得志移疾家居日饮酒
以自遣二十五年诏拜陕西行省左丞相时李思齐拥
兵关中庆通御之以礼待之以和居三年关陕用宁召还京师二十八年明兵逼京城帝
与皇太子及六宫宰臣近戚皆北奔命淮王特穆尔布
哈监国庆通为中书左丞相以辅之京城破淮王与庆通出齐化门皆被杀

△伊苏

伊苏蒙古人倜傥有能名由宿卫历宣政院参议至正十四年河南贼芝麻李据徐
州伊苏从太师托克托南征徐州城坚不可猝拔用伊
苏计以巨石为炮昼夜攻之破其南关外城贼遂遁以功除同知中政院事继又领军从
父太尉伊彻察喇征淮西会贼围安丰即往援之渡淮
无舟因策马而过贼大骇撤围去进攻濠州有诏班师乃还升将作院使复从太尉征淮
东取盱眙迁淮南行枢密院副使升同知枢密院事讨
贼淮州大败之贼航海袭山东尽有其地伊苏计贼必乘胜北侵急引兵还击之复滕兖
二州及费邹曲阜宁阳泗水五县未几复泰安州及平
阴肥城莱芜新泰四县又平安水等五十三寨升知枢密院事讨蒲台贼杜黑儿擒送京
师磔之东昌贼将北寇道出陵州伊苏邀击之斩获殆
尽复阜城县诏以军屯单家桥断贼北路贼转攻长芦伊苏与战矢贯左手不顾转鬪无
前杀贼五百余人于是分兵山下寨民争来归拜中书
平章政事改行省淮南雄州蔚州贼继起伊苏悉平之知枢密院事刘哈喇布哈所部卒
掠怀来云州欲为乱伊苏击灭其首祸者悉降其众贼
陷大宁诏伊苏讨之贼大败遂拔大宁擒首贼汤通周成等三十五人磔于都市召入覲
进知枢密院事既而贼雷特穆尔布哈程思忠等陷永
平诏伊苏出师遂复滦州及迁安县时辽东郡县惟永平不被兵储粟十万乌藁山积贼
乘闲窃入坚守不可下伊苏数与战获伪帅二百余人
复昌黎抚宁二县擒雷特穆尔布哈送京师贼乃乞降于参政彻尔特穆尔请命于朝诏
许之命伊苏退师伊苏度贼必以计怠我师乃严备以
侦之程思忠果弃城遁追至瑞州杀获万计贼遂东走诏还京师拜辽阳行省左丞相知

行枢密院事抚安迤东兵农委以便宜开省于永平总兵如故金复海盖干王等贼并起伊苏分兵防于冲突贼乃转攻大宁为守将王聚所败斩其渠魁众溃皆西走伊苏虑贼窥上都即调右丞和琳台提兵护上都简锐自蹶贼后后贼果寇上都和琳台击破之贼又大溃永平大宁始平乃分命官属劳来安辑其民使什伍相保以事耕种二十四年博啰特穆尔与右丞相绰斯戩者保布哈有怨遣兵犯关执二人以去伊苏遂拜中书左丞相博啰特穆尔复犯阙京师大震皇太子统兵迎于清河命伊苏军于昌平一军皆无鬪心不战而溃皇太子奔太原博啰特穆尔遂入京城为中书右丞相二十五年皇太子与库库特穆尔谋靖内难承制调诸省诸王兵入诗博啰特穆尔博啰特穆尔乃分遣伊苏率兵南御库库特穆尔部将珠展摩该等伊苏谋于众皆谓博啰特穆尔所行狂悖遂勒兵归永平西连太原东连辽阳军声大振博啰特穆尔患之遣其将姚巴延布哈以兵往讨伊苏袭破其军擒姚巴延布哈博啰特穆尔大恐自将讨伊苏至通州大雨三日乃还事败伏诛二十七年诏以伊苏为中书右丞相分省山东二十七年明兵取山东伊苏御于莫州众溃乃尽掠莫州残民北遁

△彻尔特穆尔

彻尔特穆尔阿鲁威氏祖父累立战功为西域大族彻尔特穆尔幼沈毅有大志早备宿卫擢中书直省舍人遂拜监察御史时右丞相特们德尔用事道路侧目彻尔特穆尔抗言历诋其奸特们德尔欲中伤之会山东水盐课大损除山东转运司副使甫浹月补其亏数皆足转刑部尚书京师豪右惮之不敢犯法而以非罪丽法者多所全脱天历二年拜中书右丞寻升中书平章政事出为河南行省平章政事黄河清有司以为瑞请闻于朝彻尔特穆尔曰臣忠子孝天下治百姓安乃为瑞余何益于治岁大饥彻尔特穆尔辄发仓廩振之乃疏请专擅之罪文宗大悦至顺元云南布呼叛以知行枢密院事总兵讨之所过和毫无犯贼平赏赉甚厚悉分赐将士师旋除留守上都迁江浙行省平章政事以严厉为政部内肃然寻召拜御史中丞风纪大振至正元年拜中书平章政事首议罢科举又欲损太庙四祭为一祭监察御史吕思诚等列其罪状劾之帝不允时罢科举之诏已书而未用宝参政许有壬入争于太师巴延反复详辩巴延心然其言而议已定不可中辍乃温言慰解之翌日崇天门宣诏特令有壬为班首以辱之有壬遂移疾不出初彻尔特穆尔之在江浙也会行科举驿请考官供张甚盛心愿不平故其入中书以罢科举为第一事彻尔特穆尔尝斥武宗为那壁那壁者犹谓之彼也又尝以妻弟

阿尔和硕女为己女冒请珠袍等物于是台臣复劾其罪而巴延亦恶其忤己欲斥之诏贬彻尔特穆尔于南安卒于贬所

△纳琳

纳琳高智曜之孙睿之子也大德六年纳琳以名臣子入备宿卫延佑初累迁至监察御史以言事忤旨仁宗怒叵测中丞多尔济力救之乃解天历元年除杭州路总管锄奸去蠹吏畏民悦明年改江西廉访使南昌岁饥维琳遽出廩粟以振全活甚众平章政事巴克实呼图克贪纵不法纳琳劾罢之至正七年积官至御史大夫所荐用御史必老成更事者八年请老不许加太尉御史劾罢之退居姑苏十二年江淮盗起帝命为南台御史大夫纳琳承诏即起仍命兼太尉设僚属总制江浙江西湖广三省军马至则修筑集庆城郭会杭城失守淮南行省平章政事实勒们引兵往援纳琳止之使先救宣城乃调典瑞院使托果齐率蒙古军应之大破贼于埭下门宣州以安己而贼陷徽州广德常州宜兴溧水溧阳蔓延丹阳金坛句容略上元江宁游兵至钟山集庆甚危纳琳乃力疾治兵部署守备遣使求援于湖广行省平章政事额森特穆尔不应复遣监察御史郑郑力促其行额森特穆尔乃引步骑至台城入候纳琳疾纳琳喜即闻于朝已而额森特穆尔战屡胜 【按顺帝纪至正十二年湖广行省平章政事额森特穆尔驻军沙河军溃还京师仍为御史大夫与托克托传所载略同与此互异】 江浙行省平章政事萨木丹巴勒右丞佛嘉律亦引兵来会所在羣贼皆败州郡悉平十三年纳琳固请谢事从之命太尉如故乃退居庆元十六年诏以江南行台移至绍兴复以纳琳为御史大夫仍太尉明年移治绍兴十八年赴召由海道入朝阻风而还十九年复由海道入京山东俞宝率战舰断粮道纳琳命其子昂阿及同舟人拒之破其众于海口抵京师帝遣使劳之皇太子亦馈酒脯而纳琳感疾日亟卒于通州

△巴延特穆尔

巴延特穆尔字珍卿唐古鄂摩克氏早备宿卫厯事武宗仁宗英宗天历初由太常署丞拜监察御史累迁至江浙行省平章政事至正十二年蕲黄贼徐寿辉兵陷湖广侵江东西诏巴延特穆尔率军讨之时湖广平章政事额森特穆尔江西平章政事桑节江南行台御史中丞曼济哈雅皆以兵驻太平宿留不进巴延特穆尔至乃与俱前败贼于丁家洲遂复铜陵县擒其贼帅复池州分遣万户普贤弩屯阳陵王建中屯白面渡律尔讨无为州而自率镇抚布哈万户明安驻池口以防遏上流己而江州再陷桑节死之曼济哈雅及威顺王库春布哈军俱溃安庆

被围益急遣使求援诸将欲自守汛地巴延特穆尔曰安庆与池止隔一水今安庆自守是其节也救患之义我何可缓且上流官军虽溃然皆百战之余所乏者钱谷器具而已即大发帑藏周之溃军皆集两军之势复振安庆之围遂解十三年贼复攻池州众且十万诸县应之巴延特穆尔谋于谋将乘贼新至疲弊分番与战大败之擒其伪师俘斩无算乘贼复平遂乘胜率舟师以进两战皆捷进复江州留兵守之攻蕲州擒其伪帅邹普泰遂克其城进兵道士袱焚其栅抵兰溪口贼之巢曰黄连砦又克而歼之分兵平两巴河于是江路始通与曼济哈雅四川行省参知政事哈喇图左丞桑图实哩西宁王英实军合而湖广左丞巴延布哈等军皆会分道攻蕲水县拔其伪都获伪将相而下四百余人徐寿辉仅以身免时丞相托克托方总戎南征闻诸贼已破乃分檄诸军而以巴延特穆尔独控长江十六年复以军守池州卒巴延特穆尔持身廉介其为将所过不受礼遗宴犒民不知有兵性至孝幼养于叔父阿珠事之如亲父云

△刘哈喇布哈

刘哈喇布哈其先江西人倜傥好义不事家产居燕赵有年遂为特默齐军户至正十二年颍亳盗起朝廷以台哈布哈为河南行省平章政事总兵讨之哈喇布哈上书陈十事其七言兵机及攻守方略台哈布哈大喜即辟为掾史未几奏除左右司都事俾统前八翼军为先锋明号令信赏罚士皆乐为之用料敌成败所向无失是时达实巴图尔军溃于长葛收集散卒复屯中牟哈喇布哈军于汴梁南彭子冈有自长葛来者言总兵官以为贼所败次中牟哈喇布哈曰贼既捷兵必再至我不可不往援遂整兵而前既而有使驰报夜四鼓贼从洧川渡河未知其所向哈喇布哈曰是必袭达实巴图尔营耳我行已缓不及事不若以精锐断贼归路覆之必矣于是领军徐行天未明伏其归路贼果袭达实巴图尔营大掠辎重而回伏军四起贼大败尽俘之当是时达实巴图尔虽以平章政事总大兵而哈喇布哈功名与之相埒十八年毛贵率贼由河闲趋直沽遂犯渤海州略柳林直逼畿甸枢密副使达国珍战死京师大震哈喇布哈时为同知枢密院使奉诏以兵拒之战于柳林贵众悉溃退据济南京师乃安后迁河南行省平章政事卒初哈喇布哈与信州人倪晦同事台哈布哈为掾史晦涉书史精文墨机械警敏台哈布哈深委任之言无不从而哈喇布哈或有所论白多沮不行由是心衔之及台哈布哈事败走诣求援哈喇布哈不能曲为保全以缚其父子送京师致之死时论以是少之

△舒穆鲁宜孙

舒穆鲁宜孙字申之御史大夫额森五世孙也父继祖为沿海副万户镇台州皇庆初移镇婺处两州驭军严肃平宁都寇有战功为学本于经术兼通名法纵横天文地理术数方技释老之说见称荐绅闲宜孙嗜学问长于诗歌以荫袭父职为沿海副万户守处州及嫡弟厚孙长即让职退居台州至正十一年方国珍起海上江浙行省檄宜孙守温州宜孙即起任事闽寇犯处州复檄宜孙以兵平之以功升浙东宣慰副使时处之属县山寇并起宜孙复奉省檄往讨之至则筑处州城为御敌计十七年行省丞相达实特穆尔承制授宜孙行枢密院判官分院治于处州以刘基为其院经历苏友龙为照磨宜孙又辟郡人胡深叶琛章溢参谋军事处为郡山谷联络盗贼凭据险阻辄窃发不易治宜孙用基等谋或捣以兵或诱以计未几皆歼殄无遗类寻升同佥行枢密院事当是时天下多故所在守将各自相保浙东则宜孙在处州穆尔济苏在绍兴为称首十八年明兵取兰溪且逼婺而宜孙母实在婺城宜孙泣曰义莫重于君亲食禄而不事其事是无君也母在难而不赴是无亲也即率胡深等赴援至婺败绩而还明年明兵入处州宜孙将数十骑走福建境上欲图报复而所至人心已散事不可复为叹曰处州吾所守者今吾势已穷无所于往不如还处境死亦为处州鬼耳既还至庆元县为乱兵所害封越国公谥忠愍

△穆尔济苏

穆尔济苏宁夏人也字善卿至正十四年进士授绍兴路录事司达鲁噶齐苗军帅扬鄂勒哲在杭纵军钞掠莫敢谁何民甚苦之俄有至绍兴境中强夺人马者穆尔济苏擒斩数人苗军乃惧不敢复至其境会江南行台移治绍兴檄穆尔济苏为行台镇抚乃大募民兵为守御计处州山贼焚掠婺境与舒穆鲁宜孙夹攻其巢穴平之省臣达实特穆尔承制授行枢密院判官分院治绍兴方国珍遣兵侵据属邑穆尔济苏曰国珍本海贼今既降为大官而复来害吾民可乎欲率兵往问罪先遣部将黄中取上虞时朝廷方倚国珍资其舟运粮而御史大夫拜珠克与国珍素通贿情好甚厚愤穆尔济苏擅举兵且恐生变使人召至私第与计事至则命左右以铁锤挝死之断其头掷厕溷中黄中乃率众复讎尽杀拜珠克家人及台府官掾史独留拜珠克不杀御史珍通纠言拜珠克阴害帅臣几致激变于是诏削拜珠克官职安置湖州而穆尔济苏之冤始白

钦定续通志卷五百

●钦定续通志卷五百一 外戚传一

- 4911 -

外戚传

（臣）等谨案外戚一门唐书以前祇载后妃之父兄弟侄缘帝室之外家故谓之外戚自宋史载柴宗庆王贻永诸人兼及尚主者实始滥觞辽金元史因仍其例登载稍繁考主壻以帝室为外家于外戚之外稍紊然其人大都世臣勋旧因缘贵宠为国家肺腑之戚又多武臣右阶他无可传比类附登未为不可五代传世甚短外戚多不足纪旧史所无兹亦不能复添缀云

○唐

独孤怀恩 武士護【承嗣三思】 韦温 杨国忠

独孤怀恩

武士護

韦温

杨国忠

△独孤怀恩

独孤怀恩元贞皇后弟之子也【新书作元贞皇后弟也按下文云弟姑子悉有天下谓元贞皇后及隋文帝献皇后皆怀恩之姑也据此当从旧书作弟之子为是通鉴同旧书今据改】父整隋涿郡太守怀恩之幼隋文帝献皇后以侄养宫中长学书记而居财不訾喜交豪猾博徒为郛令以疾免高祖平京师拜长安令帝受禅擢工部尚书遣代韦义节击尧君素于蒲州怀恩性贪寡算略数战无功诏书切责而怀恩稍怨望帝尝与戏曰弟姑子悉有天下次当尔邪怀恩内喜遂怀异志居尝咤曰我家渠独女子富贵邪因与麾下元君宝解令荣静谋引王行本军与刘武周连和割河东以啖之引虞乡南山羣盗取永丰仓绝秦王柏壁饷道长驱三辅会夏人吕崇茂杀县令应武周帝敕怀恩与永安王孝基等击崇茂为金刚所掩诸将皆没君宝与开府刘让私侮怀恩曰不早举大事以及斯辱故谋寢露及秦王败武周于美良川怀恩逃归帝复命率师攻蒲州君宝闻曰王者不死果然唐俭知状【按通鉴不早举事及王者不死皆君宝语唐俭辞故云唐俭知状】会武周还刘让求罢兵因白发怀恩等奸时行本举蒲州降怀恩勒兵入城帝方济河而让至贝得反状召而缚之穷索党与缢死于狱以首徇华阴市籍其家

△武士護

武士護字守信则天皇后之父世殖贵喜交结高祖尝领屯汾晋休其家因被顾接后留守太原引为行军司铠参军及将起事以刘弘基

长孙顺德统募兵王威高君雅以弘基等皆背征三卫罪当死将劾系之士彧曰此皆唐公客若尔必有大嫌威等遂不敢发司兵参军田德平亦欲劝威劾募兵状士彧又劝止之及建大将军府拜铠曹参军从平京师为光禄大夫封义原郡公累迁工部尚书进封应国公历利荆二州都督卒赠礼部尚书谥曰定高宗永徽中以皇后故崇赠并州都督司徒周国公咸亨中加赠太尉兼太子太师太原郡主配享高祖庙庭列功臣上后监朝尊为忠孝太皇建崇先府置官属追王五世后革命更于东都立武氏七庙追册为帝诸妣皆随帝号曰皇后先天中有诏削士彧伪号仍为太原王庙遂废始士彧娶相里氏生子元庆元爽又娶杨氏生三女长妻贺兰氏早寡季妻郭氏前死士彧卒诸子事杨礼薄衔之后立封杨氏荣国夫人后姊韩国夫人于时元庆已官宗正少卿元爽少府少监兄子惟良卫尉少卿杨讽后上疏出元庆等于外以示退让由是元庆斥龙州元爽濠州惟良始州元庆死元爽流振州干封时韩国有女在宫中帝尤爱幸韩国卒女封魏国夫人 【按武后传韩国女封魏国夫人今据改】 后内忌甚欲并杀之会封泰山惟良及弟怀运以岳牧来集上食后寘堇毒死魏国归罪惟良等诛之 【按通鉴怀运兄怀亮早卒其妻善氏尤不礼于荣国坐惟良等没入掖庭荣国今后以他事束棘鞭之肉尽见骨而死】 讽有司改姓蝮氏绝属籍元爽缘坐死家属投岭外后取韩国子贺兰敏之为士彧复赐氏武袭封擢累左侍极兰台太史敏之烝于荣国挟受佻横多过恶后迭怒暴其恶流雷州表复故姓道中自经死乃還元爽之子承嗣奉士彧后宗属悉原士彧兄士棱士逸士逸字逊有战功终韶州刺史

武承嗣

武三思

武承嗣

承嗣既还擢尚辇奉御 【尚辇旧书作尚衣】 袭周国公迁秘书监则天临御擢礼部尚书俄以太常卿同中书门下三品未几辞位垂拱初以春官尚书同凤阁鸾台平章事改纳言拜文昌左相性暴轻忍祸闻左司郎中乔知之婢窈娘美且善歌夺取之知之作缘珠篇以讽婢得诗恨死承嗣怒告酷吏杀之残其家初后擅政中宗幽逐承嗣自谓传国及己武氏当有天下即讽后革命去唐家子孙诛大臣不附者倡议追王先世立宗庙又王元庆曰梁王谥宪元爽魏王谥德后从父士让楚王谥僖士逸蜀王谥节赠兄子承业陈王封元庆子三思为梁王士让孙攸宁为建昌王攸归九江王攸望会稽王士逸孙懿宗河内王嗣宗临川王仁范河闲

王仁范子载德颍川王士稜孙攸暨千乘王恨良子攸
宜建安王攸绪安平王从子攸止恒安王重规高平王承嗣子延基南阳王延秀淮阳王
三思子崇训高阳王崇烈新安王承业子延晖嗣陈王
延祚咸安王而承嗣为魏王实封千户乃密谕后党凤阁舍人张嘉福使洛州人上书请
立己为皇太子后问岑长倩格辅元皆执不可于是怨
长倩等皆以罪诛之承嗣罢为特进后决意还太子迁太子太保不得志怏怏愤死谥曰
宣子延基袭爵后嫌斥其名更曰继魏王长安初与妻
永泰郡主及邵王私语张易之兄弟事后忿争语闻后怒令自杀以弟延义代中宗复位
侍中敬暉等言诸武不当王帝柔昏不断又素畏太后
欲悦安之更言攸暨三思皆与去二张功纔降一级三思王德静郡攸暨王寿春郡 【旧
书作乐寿郡王】 懿宗耿国攸宁江国攸望邺国嗣
宗管国攸宜息国重规郟国延义魏国攸绪巢国崇训酆国延祚咸安郡皆为公载德终
湖州刺史攸归厯司属少卿至齐州刺史事母孝攸止
绛州刺史三人死太后时不及削封延秀初使突厥为默啜所执不得归神龙初默啜请
和因延秀送款还封柏国公左卫中郎将宗兄崇训尚
安乐公主数与宴昵崇训死遂私侍主后因尚焉以太常卿兼右卫将军封恒国公三思
死韦后复私延秀故延秀益自肆主府仓曹参军何凤
【旧书作符凤】 说曰今天下系心武家庶几再兴且讖曰黑衣神孙被天党神孙非公
尚谁哉因劝服阜衣惑众韦后败尚与主居禁中格
战良久同斩肃章门攸望以太府卿 【旧书作太常卿】 贬死春州诸武属坐延秀诛
徙者略尽

武三思

三思当太后时累进夏官春官尚书爵为王契丹陷营州以榆关道安抚大使屯边
还同凤阁鸾台三品检校内史罢为太子少保迁宾客
三思性兵谀善迎谐主意钩探隐微故后颇信任数幸其第赏子尤渥屈事后所幸臣为
薛怀义御马倡言昌宗为王子晋后身引公卿歌咏淫
污腆不为耻后春秋高厌居宫中三思欲因此市权即建营三阳宫于嵩山兴泰宫于万
寿山请太后岁临幸己与二张扈侍私窃威福工役巨
万万百姓愁叹中宗复位进位司空同中书门下三品固辞进开府仪同三司初桓彦范
等缓于事不加诛三尼因韦后反易国政罢逐五王悉
还所斥去者诏郡臣复循太后法三思建言大帝封泰山则天皇后建明堂封嵩山二圣
之美不可废帝韪其言遂更名五县曰干封合宫永昌
登封告成明年春旱遣祷干陵而雨帝悦遂复崇恩庙昊顺二陵皆置令丞起球场苑中
诏文武三品分朋为赌帝与皇后临观用功不訾人苦

之三思既私韦后又与上官昭容乱内忌节愍太子即与安乐公主谋废之太子惧发羽林兵围三思第并崇训斩之杀其党十余人三思奸乱窃国忌阻正人与宗楚客兄弟纪处讷崔湜甘元柬相驱煽又有冉祖雍宋之慈李俊周利用姚绍之等号三思五狗而赵履温郑愔马构崔日用李■〈丩 曳〉托其权势熏妥内外天下语曰崔冉郑乱时政以爵赏自相崇树凡构大狱污点善良破坏其宗天下为荡然始韦月将高轸上疏极言三思过恶有司杀月将逐轸恶地宋璟执奏亦见斥其权大抵如此既死帝为举哀以太子首祭三思枢睿宗立斲棺暴户夷其墓【按此下旧有懿宗攸暨三传懿宗事不足录攸暨见太平公主传今并删】

△韦温

韦温者中宗废后庶人从父兄也后父玄贞历普州参军事后为皇太子妃擢豫州刺史帝幽房陵玄贞流死钦州妻崔为蛮酋宁承所杀四子洵浩洞泚同死客州后二女弟逃迁京师帝复政诏赠玄贞上洛郡王大师雍州牧益州大都督温父玄俨鲁国公特进并州大都督遣使迎玄贞丧诏广州都督周仁轨讨宁承斩其首祭崔枢枢至帝与后登长乐宫望哭赠鄴王谥文献庙曰褒德陵曰荣先四子并赠郡王葬京师温初试史坐赃斥神龙初擢宗正卿迁礼部尚书封鲁国公弟湑曰洛州户曹参军连拜左羽林大将军曹国公后大妹嫁陵颂进国子祭酒仲妹嫁嗣虢王邕湑子捷尚成安公主温从弟濯尚定安公主并拜驸马都尉捷为右羽林将军景龙三年温以太子少保同中书门下三品遥领扬州大都督见天下事在手欲自殖以牢其权引用支党不一公卿虽畏伏然温无能不如诸武凶而炽也帝崩后专政畏有变敕温尽总内外兵守省中又以从子播捷从弟璃高嵩分领左右羽林军温与宗楚客武延秀等说后谋革命临淄王讨韦氏温坐斩分捕诸韦子弟无少长皆死仍夷玄贞及洵等坟墓【按新书此下有王仁皎传系明皇废后之父附载其子守一仁皎父子并无事迹史惟称其聚货沓墨而已今删】

△杨国忠

杨国忠贵妃从祖兄父珣母张氏即易之妹少嗜饮博数旬贷于人无行检不为姻族齿年三十从蜀军以屯优迁新都尉罢去益困蜀大豪鲜于仲通颇资给之从父玄琰死国忠护视其家因与妹通所谓虢国夫人者哀其贫至成都携菹一日费辄尽乃亡去久之调扶风尉不得志复入蜀剑南节度使章仇兼琼与宰相李林甫不平闻杨氏新有宠恩有以结之仲通因以国忠荐表为推官使部春贡之长安得蜀货百万

至京师见羣女弟致赠遣诸杨日为兼琼誉而言国忠善擢蒲玄宗引见擢金吾兵曹参军闲厩利官兼琼入为户部尚书兼御史大夫用其力也国忠稍入供奉常后出专主蒲簿计算钩画分铢不误帝以为才累迁监察御史林甫兴韦坚等狱欲危太子以国忠搏鸷可用倚使按劾乃惨文峭诋诬蔑被诛者百余族度可以危太子者先林甫意陷之皆中所欲虢国居中用事帝所好恶国忠必探知其微帝以为能擢兼度支员外郎不淹岁领十五余使擢给事中兼御史中丞专判度支时海内丰炽州县粟帛举巨万国忠请在所出滞积变轻赍内富京师又悉天下义仓及丁租地课易市帛以充天子禁藏帝诏百官观库物积如邱山赐羣臣各有差锡国忠金紫知太府卿事初杨慎矜与王錡有隙錡挟国忠其劾慎务抵不道诛由是权倾中外吉温为国忠谋夺林甫政国忠即诬奏林甫所厚京兆尹萧炅御史中丞宋浑逐之又忌錡宠因邢絳事构之诛死已代为京兆尹悉领其使即穷劾支党引林甫交私状牵连左逮数以闻帝始厌林甫疏薄之先此南诏质子阁罗凤亡去【按通鉴考异云南诏传七年蒙归义死诏合罗凤袭云南王不云尝为质子亡归九年姚州白以张虔陀侵之故反时鲜于仲通已为益州长史国忠传与南诏传互异新旧皆如此恐误】帝欲讨之国忠荐鲜于仲通为蜀郡长史率兵六万【旧书率精兵八万通鉴士卒死者六万人与新书合】讨之战泸川举军没国忠为匿其败更叙战功【新书此下有使白衣领职句按既掩败叙功岂得复白衣领职旧书通鉴无之今据删】使仲通表请已遥领剑南【按新书自请兼领剑南通鉴旧书俱作国忠使仲通表请已遥领剑南今据改】诏拜剑南节度支度营田副大使知节度事兼山南西道采访处置使开募府引窦华张渐宋昱郑昂魏仲犀等自佐而留京师俄拜御史大夫引仲通为京兆尹使司马李宓率师七万再讨南蛮为蛮所诱宓死于阵国忠又隐其败凡再举讨蛮之军征发皆中国利兵风土不便物故十八九人衔冤毒无敢言者【按再讨南蛮事新书总序在后旧书序在未相前与通鉴合今据改】自耻无功欲解于帝乃使麾下请已到屯外示忧边以合上旨实杜言路林甫亦奏遣之及辞泣诉为林甫中伤妃又为言帝益亲之豫计召日及帝在华清驿骑追还林甫死遂拜右相兼文部尚书集贤院大学士崇玄馆大学士太清紫微宫使节度采访等使判度支如故国忠已得柄则穷摘林甫奸事碎其家帝以为功封卫国公以宰相领选建罢长名榜于铨日即定留放尽废故时选格式令创为押例无贤不肖用选深者先补官牒文谬缺得再通众议翕然美之故事吏兵部尚书侍郎分

案注拟吏部铨注常三注三唱自春及夏乃讫复引过门下侍中给事按闻有不可黜之及是国忠使吏到第预定其员集百官尚书省注唱一日毕以夸神速明年大选因就第唱补召左相陈希烈隅坐给事中在旁既对注曰已过门下矣希烈不敢异侍郎韦见素张倚与本曹郎趋走堂下拜案牒鲜于仲通等讽选者立碑省户下以颂德诏仲通为颂帝为易数字以黄金识其处自是资格纷谬无复纲序帝常岁幸华清宫诸杨汤沐馆在宫东垣连蔓相照帝临幸必徧五家赏赉不訾出有赐曰钱路返有劳曰软脚远近馈遗阉侍歌儿狗马金贝踵迭其门国忠由御史至宰相凡领四十余使 【按洪迈容斋随笔云杨国忠为度支郎领十五余使至宰相凡领四十余使新旧唐书皆不详载其职按其拜相制前衔云御史大夫判度支权知太府卿事兼蜀郡长史剑南节度支度营田等副大使本道兼山南西道采访处置使两京太府出纳监仓祠祭木炭宫市长春九成宫等使关内道及宗畿采访处置使拜右相兼吏部尚书集贤殿崇元馆学士监修国史太清紫微宫使其余所领又有管当租庸铸钱等使以是观之概可见矣】 而度支吏部事尤丛伙第署一字不能尽故吏得轻重显赫公谒无所忌国忠性复疏悦捷给硃硃处决枢务自任不疑盛气骄愎百僚莫敢相可否官属悉苛督勾剥相憘又便佞专徇帝嗜欲不顾天下成败帝雅意事边身高兵食取习文簿悉吏任之须索快成其手不能省视大雨败稼帝忧之国忠择善禾以进曰雨不为灾扶风太守房管上郡灾国忠怒遣御史按之后乃无敢以水旱闻子暄举明经不中诟曰生子不富贵邪岂以一名为鼠辈所卖侍郎达奚珣大惊即致暄高第俄与珣同列犹咤官不早达遣戍泸南餉路险乏举无还者旧勋户免行以宠战功国忠今当行者先取勋家凡募法愿奋者则籍之国忠岁遣御史迫促郡县吏穷无以应乃诡设餉召贫弱者密械送之亡者以送吏代故人人思乱安禄山方有宠国忠知终不出已下暴发其反状帝不之信禄山虽逆久以帝遇之厚不忍发欲伺晏驾后称兵俄禄山授尚书右仆射帝恐国忠不悦故册拜司空国忠寡谋矜躁谓禄山跋扈不足图故幸其必反以取信于帝乃建言请以禄山为平章政事追入辅政以贾循节度范阳吕知诲节度平卢杨光翊节度河东已草诏帝使谒者辅璆琳觐禄山未还帝致诏坐侧而璆琳纳金固言不反帝谓国忠曰禄山无二心前诏焚之矣禄山还幽州觉国忠图已反谋愈急国忠令客何盈蹇昂刺求反状讽京兆尹李岷围兵第捕禄山所善李超安岱李方来王岷杀之贬其党吉温于合浦禄山上书自陈条上国忠大罪二十帝归过于岷贬零陵太守以慰禄山 【

按通鉴国忠建言以禄山为平章在天实十四载二月甫安禄山所善李超等在三月通鉴旧书皆言既杀李超等禄山惶惧遂反新书前后倒置今据移正】禄山反以诛国忠为名帝欲自将使皇太子监国国忠惧请女弟等曰太子监国吾属诛矣因聚泣入诉于贵妃妃以死邀帝遂寝及哥舒翰守潼关按兵守险国忠闻欲反己疑之乃从中督战输不得已出关遂大败降贼书闻帝召宰相计事国忠先闻难时自以身帅剑南豫置腹心梁益闲为自完计请曰幸蜀便帝然之明日迟昕帝出廷秋门羣臣不知国忠与韦见素高力士及皇太子诸王数百人护帝进次马嵬将士疲乏食右龙武大将军陈玄礼召诸将曰今天下震荡社稷不守使生人肝脑涂地岂非国忠所致欲诛之以谢天下云何众曰念之久矣会吐蕃使有请于国忠众大呼曰国忠与吐蕃谋反卫骑合国忠突出或射中其颊杀之争噉其肉且尽梟首以徇是时禄山虽据河洛其兵锋东止于梁宋南不过许邓李光弼郭子仪统师河洛若崤函固守则凶逆之势不讨自毙及哥舒翰出师凡不数日乘輿迁幸朝廷陷没兵满天下毒流四海皆国忠之贻祸也【是时禄山以下据旧书增】四子暄咄晓暄太常卿户部侍郎闻乱下马蹶弩众射杀之岳尚万春公主鸿臆卿陷贼见杀晓奔汉中为汉中王瑀掳死晞及国忠妻裴柔同奔陈仓为追兵所斩柔故蜀倡也国忠本名钊以图讖有金刀帝为改今名【按新书有李邕郑光二传事无足录今删】

钦定续通志卷五百一

●钦定续通志卷五百二 外戚传二

外戚传

宋【一】

○宋一

杜审琦【审琼 审肇 审进 惟序】

贺令图

王继

勋 刘知信 刘文裕 刘美【从广

永年】

杨景宗

符维忠

柴宗庆

张尧佐

杜审琦

贺令图

王继勋

刘知信

刘文裕

刘美

杨景宗

符维忠

柴宗庆

张尧佐

△杜审琦

杜审琦昭宪皇太后兄昆仲五人审琦最长其次审玉审琼审肇审进世居常山以积善闻审琦仕后唐为义军指挥使天成二年卒审玉前一年卒太祖开国赠审琦左神武军大将军子彦超

杜审琼

杜审肇

杜审进

杜惟序

杜审琼

审琼建隆初授检校国子祭酒历左领军卫将军改左龙武军大将军迁右卫大将军干德闲领富州刺史权判右金吾卫仗兼领步军司事四年卒赠太保宁国军节度使谥恭僖审琼性醇质在公畏慎宿卫勤谨徼巡京邑里开清肃人皆称之景德三年加赠太傅改葬陪陵又增太师中书令子彦圭

杜审肇

审肇起家授左武卫上将军检校左仆射致仕赐第京师领潍州刺史开宝中为右骑卫上将军出知澶州以未尝历郡务姚恕通判州事以左右之未几河决郛濮数郡民田罹水害太祖怒其不实时上言遣使案鞫论恕弃市审肇免归私第俄复令致仕以潍州刺史月奉优给之七年卒赠太保昭信军节度谥温肃景德三年加赠太傅子彦遵

杜审进

审进初授右神武大将军改右羽林大将军领贺州刺史知陕州就改保义军节度观察留后加节度太宗立加检校太傅太平兴国二年许昌裔刺虢州据拾使州阙失事上诉诏右拾遗李干鞫之干因上言请支郡不复隶藩镇皆得专达从之四年帝亲征河东审进愿率所部击太原帝以审进耆年不计五年契丹入边帝幸大名劳军留审进警巡都邑复归陕加检校太师故右卫上将军寻领静江节度端供元年帝亲耕籍田审进预其礼加开府仪同三司卒赠中书令谥恭惠审进镇陕二十余年劝农敦本民庶便之虽居位节制无骄矜之色人推其醇厚景德三年追封京兆郡王后赠尚书令子彦钧彦彬 【按此下原有彦珪彦钧及彦圭子守元三传均无事喷足录今删】

杜惟序

惟序字舜功，审琦曾孙。自三班奉职累迁至供备库使，为梓夔路钤辖，徙怀庆路知邠州，又权庆州。会任福败，以骑兵数千繇怀安路破三砦，斩首数百级，获牛马千计。以功领忠州刺史，为泾原钤辖，敕巡警边州，改六宅使，知雄州。时契丹勒兵燕蓟，闲遣使求割地，未至，惟序预得其草，以闻。累徙大名府路总管，改干州团练使卒。

△贺令图

贺令图，父怀浦，孝惠皇后兄，仕军中，为散指挥使，出为岳州刺史，领兵屯三交，从杨业出师，死于阵。令图少谨，愿隶太宗左右，洎即位，补供奉官，改绫锦副使，知莫州，迁崇仪使，知雄州，领平州刺史，充幽州行营壕砦使，以所部克涿州。会父死，起为六宅使，领本州岛团练使，护瀛州屯兵。初，令图在边十余年，恃旧恩，每入奏事，多言边塞利害及幽蓟可取之状。【按《续通鉴纲目》载：令图上言契丹主少母后专政宠幸用事，请乘其衅以取幽蓟。】帝信之，故有岐沟之败。令图轻而无谋，契丹将耶律休格【原作选宁查，系耶律休格之字，今据辽史改称名】号裕悦者，使谍给令图曰：我独罪本国，愿归南朝。令图不虞其诈，私遗重锦十两，既裕悦率众入侵，宋师败于君子馆。裕悦传言军中愿得见雄州贺使君，令图意其来降，即引麾下数十骑逆之。将至其帐，裕悦据床骂曰：汝常好经度边事，乃今送死来邪！麾左右缚令图去。令图与其父首谋北伐，一岁中父子皆陷焉。是役也，武州防御使高阳关部署杨重进死之。【按此下原附有杨重进传，今析入忠义】

△王继勋

王继勋，孝明皇后同母弟也。性凶率无赖，以后故为内殿供奉官，都知溪州刺史，累迁龙捷右厢都指挥使，领彭州防御使。太祖将讨蜀，令继勋戒期，将大阅。继勋素与马仁瑀不协，阴勒部下市白梃，将以相图。太祖知之，为出仁瑀密州，迁侍卫步军司事。继勋所为多不法，会新募兵千余隶雄武，多无妻室。太祖谓继勋曰：此必有愿为婚者，不须备聘财，但酒炙可也。继勋不谕旨，纵令掠子女，京城纷扰。帝闻，大惊，遣捕斩百余人。始定时，后已崩，帝追念后不之罪，后复为部曲所讼，解兵柄为彰国军留后，奉朝请。继勋自以失职，常怏怏，专以鬻割奴婢为乐。一日天雨，墙坏，羣婢突出，诉冤。帝大骇，令中使就诘之，尽得所为不法事，诏削爵归第，令甲士守之。俄又配流登州，未至，改右监门率府副率。开宝三年，命分司西京。继勋残暴愈甚，强市民家子女，备给使小不如意，即杀食之。太宗立，命知杂事雷德骧乘传往鞫之。继勋具伏，手所杀婢百余人，乃斩洛

阳市及女侏男子为强市子女者僧广惠者常与继勋同食人肉令折其胫斩之其后家寓西洛颍阳孙惟德不肖不能自立丐食以给真宗悯之授汝州司土参军

△刘知信

刘知信字至诚邢州人父迁晋凤翔帐前军使改滑州奉国军校从骁将皇甫暉御边有功蚤卒母即昭宪太后妹也干德初封京兆郡太君六年进本郡太夫人开宝三年卒追封齐国太夫人陪葬安陵赠迁太保知信三岁而孤宣祖怜其敏宪建隆初起家授供奉官转六宅副使开宝闲迁军器库使掌武德司领锦州刺史属郊祀西各为行宫使驻洛中又为西京武德皇城宫苑等使车驾出郊充大内留守太宗即位进领本州岛团练使拜武德使从征河东为行宫使太平兴国中坐市竹木矫制免算左授军器库使进为皇城使坐秦王廷美事改右卫将军出为静难军节度行军司马起为左卫将军领营州刺史雍熙初改左神武军将军檀州团练使护屯兵于镇州会大举出师为押阵都监师还诸将失道知信独整所部归俄知定州兼兵马钤辖押大阵右偏一日宴犒将士契丹骑至知信不介而出追之数十里斩获甚众就拜邕州观察使四年召入改并州路副都部署端拱中代还知杭州淳化四年又知天雄军府咸平初拜建武军节度观察留后知永平军府契丹入侵复知天雄军真宗北巡充驾前副都部署厯知河阳升州车驾幸澶渊命为东京都巡检使复知定州以疾求还京至镇州卒赠太尉天平军节度知信以戚里被亲任中外践厯最为旧故以循谨闻子承宗承渥【按此下原有承宗传附载承渥并无事迹足录今删】

△刘文裕

刘文裕字以宁祖正晋幽州营田使兼平州刺史简穆皇后兄也父审奇武牢关使从讨李重进死审奇三子长文达建隆中为供奉官与并人战万善没次即文裕起家补殿直权管云骑员僚直预讨江南中弩矢神色自若太宗在藩邸多得亲接太平兴国二年擢为内弓箭库副使出为秦陇巡检有李飞雄者太保致仕鱗之孙性凶险纵酒捕博常往来京师魏博闲与无赖游处以其父任秦州判官故尽知仓库所积及地形险易兵积多少又有妻父张季英为凤翔整屋射飞雄自京师往省之因乘季英马诈为使者夜抵厩置呼卒索马卒秉炬出迎不能辨即授以马一卒乘一马前导以巡边为名因矫诏驱巡驿殿直姚承遂陇州监军供奉官王守定吴山尉卢赞皆从行时秦州属羌为寇朝廷遣周承瑨田仁朗等及文裕领兵屯清水县飞雄至自称上南府时亲吏宣制尽缚之承瑨等

见姚承遂数辈同至不觉其诈仁朗独号泣求诏书飞
雄叱之曰我受密旨以若辈逗挠不用命令尽诛汝岂不闻封州杀李鹤邪诏书汝岂得
见先是帝即位分命亲信于诸道廉官吏善恶以闻岭
南使者言封州李鹤不泰法诬奏军吏谋反诏即诛之故飞雄引以为言将械承璠等诣
秦州戮之因据城叛文裕曰我亦尝依晋邸使者岂不
营救之乎飞雄低语谓文裕曰尔能与我同富贵否文裕觉其诈伪许之即释其缚文裕
策马前附耳语仁朗仁朗佯坠马若卒中风眩状飞雄
共前视之又释其缚仁朗奋起搏飞雄与文裕共擒之送秦州狱鞫得实与承遂守定赞
坐要斩夷飞雄家文裕后迁军器库使四年与通事舍
人王侁分兵控石岭关七年为高阳关都监契丹万余骑入与大将崔彦进击却之雍熙
初徙屯三文加领顺州团练使会李继迁率折遇也寇
边击走之及从潘美出师坐失将杨业削籍配登州俄起为右领军卫大将军领端州团
练使迁容州观察使出为镇州兵马部署端拱元年卒
于屯所赠宁远军节度弟文暱文质

△刘美

刘美字世济益州华阳人本姓龚以锻银为业明肃皇后以美为兄因改姓刘 【按
宋史明肃皇后传后幼孤鞠于外氏蜀人龚美携之
至京师入襄邸真宗即位为美人以其无宗族乃以美为兄故美改姓刘宋史因此遂以
后祖父履贯系美传殊失事实今据后传及东都事略
删改】 初事真宗藩邸以谨力被亲信即位补三班奉职再迁右侍禁咸平中为自京至
陈颖巡检石保吉在陈州大治廨舍修城壁不以闻会
有言其扰民者遣美廉其状美曰保吉世受国庀列藩阃营缮过度诚或有之自余保无
他患帝意解归朝充合门祗候大中祥符二年护屯兵
于汉州历迁供奉官徙嘉州士卒有病皆给医药视抚循之召还改内殿崇班提点在京
仓场东西八作司以举职闻迁洛苑副使八年预修大
内以劳改南作坊使同勾当皇城司天禧初迁洛苑使领勤州刺史与周怀政联职未尝
阿附怀政左右有过必痛绳之亲从卒侦逻者按籍分
番次均使焉帝屡欲委之兵柄以皇后恳让中辍数四三年授神龙卫四厢都指挥使领
昭州防御使改侍卫马军都虞候五年加武胜军节度
观察留后卒赠太尉昭德军节度子从德从广 【按从德附传但载历官恩泽别无事迹
足录今删】

刘从广

刘永年

刘从广

从广字景元少侍仁宗左右太后爱之如家人子太后崩真拜崇州团练使娶荆王元俨女为滁州防御使元昊反从广自言不能扞患坐耗县官愿上所给金使钱帝嘉纳之为羣牧都监改副使特拜宣州观察使同句当三班院请补外自效知洺州漳水溢从广穿隋故渠以杀水势洺人便之徙刑州籍乡军之罢者听引子弟自代着为令召还复领三班院出知襄州徙真定府路马步军副都总管卒赠昭庆军节度使谥良惠从广性谨饬然喜交士大夫时颇称之

刘永年

从德子永年字君锡生四岁授内殿崇班许出入两宫仁宗使赋小山诗有一柱擎天之语以为奇童常置内中年十二始听出外累迁廉州团练使陝州都监郭邈山等炙盗密遣壮士夜渡河杀凶桀二十余人众遂散迁钤辖代还召见擢干办皇城司改单州团练使永兴军路总管契丹遣使来请帝绘像选副张升报使契丹以未得志夜取巨石塞驿门众皆恐永年素有力手掷弃之契丹惊以为神出知泾州郡兵岁以香药为折支三司不时犖致振武卒素骄突入通判听事请以他物代语不逊永年数其罪斩为首二人余不敢动同提举在京诸司库务知代州契丹取西山木前守不敢遏永年遣人焚之一夕尽契丹杼橛捕纵火盗永年曰盗固有罪然发在我境何预汝事乃不复言英宗立迁沂州防御使复知代州历迁邕州观察使步军副都指挥使卒赠崇信军节度使谥庄恪 【按宋史此下有马季良传季良娶刘美女徽幸得官又有郭崇仁传孙章穆皇后弟均无事足录今删】

△杨景宗

杨景宗字正臣章惠皇太后从父弟少蒲博无赖以罪隶致远务章惠入官为美人奏补茶酒班殿侍累迁东染院副使章惠为太后进崇仪使领连州刺史扬州兵马钤辖未几授秦州刺史徙滑州钤辖历舒州团练使兵马总管章惠崩迁成州防御使改天雄军副都总管时吕夷简守魏常以礼饬戒景宗肆志不悛奏贬齐州都监徙卫州又徙郢州钤辖召还章献章懿二后升祔太庙特拜除州观察使给留后奉逾年领军头引见司出知磁州为建宁军节度观察留后知潞州领皇城司坐卫士入禁中谋乱贬徐州观察使知济州还提举万寿观复原官又坐从卒王安挟刃入皇城谪左监门卫大将军均州安置起为汝州钤辖祀明堂覃恩愿还所改官求为郡帝曰景宗性贪虐老而益甚郡不可予也乃复以为建宁军留后提举在京诸司库务卒赠安武军节度使兼太尉谥庄定景宗暴戾所至为人患复使酒任气在滑州尝殴通判王述仆

地帝深戒无饮酒景宗虽书其戒坐右顷之辄复醉其奉赐亦随费无余始宰相丁谓筑第敦教坊景宗为役卒负士第中后谓败仁宗以其弟赐景宗居三十年乃终

△符维忠

符维忠字正臣彦卿曾孙也以外祖母贤靖大长公主荫为三班奉职后擢合门通事舍人句当东排岸司三司使寇瑊绳下急漕米数不足纲吏卒率论自盗维忠争曰在法欠不满四百者不坐若以自盗论则计直八百即当坐徒矣瑊怒维忠争愈力如所议乃已迁提点开封府界县镇公事宰相王曾外孙乐诰为开封主簿维忠以无善状不肯荐既而诰果以赃败时吴奎为长垣尉维忠厚遇奎白府荐之惠民河与刁河合流岁多决溢维忠自宋楼镇碾湾横陇村置二斗门杀水势以接郑河圭河自是无复有水害陕西用兵除泾原路兵马钤辖兼知泾州三司使郑戩奏留都大管句汴河使建议以为渠有广狭若水阔而行缓则沙伏而不利于舟请即其广处束以木岸三司以为不便后卒用其议再迁西上合门使副富弼往报契丹求地使至武强县疽发背卒赠客省使眉州防御使

△柴宗庆

柴宗庆字天佑大名人祖禹锡镇宁军节度使父宗亮太子中舍宗庆尚太安女鲁国长公主升其行为禹锡子拜左卫将军驸马都尉领恩州刺史禹锡卒真拜康州防御使改复州旧制诸公主宅皆杂买务市物宗庆遣家僮自外州市炭所过免算至则尽鬻之复市于务中自是诏罢公主宅所市物从祀汾阴为行宫四面都巡检进泉州管内观察使又自言陝西市材木至京师求蠲所过税真宗以私贩夺民利不许既而河东提点刑狱幼宗庆私使人市马不输税贷不问受武胜军节度观察留后历拜彰德军节度使仁宗即位拜同中书门下平章事出判郑州以纵部曲扰民召还奉朝请岁减公用钱四百万久之卒赠中书令谥荣密主累封楚国大长公主先宗庆没宗庆历官多过失性极贪鄙积财巨万而薄于自奉无子及终愿以货产送官仁宗以其女尚幼不许 【按宗庆贪鄙委琐其传本不足录缘有占召罢公主宅杂买务市物及禁止市木蠲税夺民利事足见当时约飭戚里善政存以备考】

△张尧佐

张尧佐字希元温成皇后世父也举进士历宪州筠州推官吉州有道士与商人夜饮商人暴死道士惧而遁为逻者所获捕系百余人转运使命尧佐覆治尽得其冤改大理寺丞知犀浦县犀浦地狭民系多田讼尧佐正其疆界条众弊以晓之讼遂简知开州还判登闻鼓院时温

成方为修媛欲以门阀自表异故尧佐稍进用权开封府推官又提点府界公事未几迁三司户部判官累迁兵部郎中权知开封府加端明殿学士拜三司使明年谏官包拯陈升之吴奎言比年水冒城郭地震河溢天下皆谓尧佐主大计诸路困于诛求内帑烦于借助法制刑敝实自尧佐仁宗祀明堂改户部侍郎寻拜淮康军节度使羣牧制置使宣徽南院使景灵宫使赐二字进士出身拯等复言陛下擢用尧佐羣口窃议宜断以大义亟命追寝必不得已宣徽节度择与一焉御史中丞王举正留百官班欲廷议不许是日尧佐辞宣徽景灵使从之未几复以宣徽使判河阳举正又抗章论之至于三 【按续通鉴纲目尧佐复除宣徽使知河阳唐介独抗言之贬介春州别驾王举正言其太重与此互异】 时吴育判西京留台河阳民讼有不决者多诣育育于状尾判曲直尧佐畏恐即奉行之召还徙镇天平军卒赠太师尧佐持身谨畏颇通吏治晓法律以戚里进遽至崇显恋嫖恩宠为世所鄙子山南

钦定续通志卷五百二

●钦定续通志卷五百三 外戚传三

外戚传

宋 【二】

○宋二

王貽永

李昭亮

李用和【璋珣】

李遵勗【端懿

端愿

端悫

评】

曹佺【偕 评 诱】

高遵

裕【遵惠

士林

公纪 世则】

向传范【经

综

宗回

宗良】

张敦礼

任泽

王貽永

李昭亮

李用和

李遵勗

曹佺

高遵裕

向传范

张敦礼

任泽

△王貽永

王貽永季长溥之孙也性情清慎寡言颇通书不好声伎十余岁时舅魏咸信见而奇之咸平中尚郑国公主授右卫将军驸马都尉累迁

右监门卫大将军奖州团练使求外补得知单州徙徐州河决滑州徐大水贻永作堤城南以御之改卫州团练使进怀州防御使知澶定二州徙成德军会有告曹汭变者贻永奏治之历知郢州州自咸平中徙城而故治为通衢介梁山春夏多水患贻永相度地势为筑东西道三十余里民便之复徙定州又徙成德军擢同知枢密院事改副使加宣徽南院使进枢密院使久之拜同中书门下平章事遂加兼侍中徙节镇海以疾求罢乃罢侍中徙彰德节度使至和初复以疾辞拜尚书右仆射检校太师卒赠太师中书令谥康靖当时无外姻亲政者贻永能远权势在枢密十五年迄无过失人称其谦静子道卿

△李昭亮

李昭亮字晦之明德太后兄继隆子也补东头供奉官出入禁中累迁管司军头引见司兼三司衙司军士有逃死而冒请官廩者数百人昭亮按发之历永兴路马步军副都指挥使并伐州路副都总管安抚招讨副使徙真定路都总管保州兵叛杀官吏诏遣王果招降之叛者乘埤呼曰得李步军来我降矣于是遣昭亮昭亮至相率开城门降改淮康军节度观察留后知定州欧阳修言昭亮人保州以叛卒女口分隶诸军有私入其家者置不问拜武宁军节度使伐李用和为殿前副都指挥使昭亮本将家子习军中事既统宿卫政尚严多所建请万胜龙猛军捕博争胜负撤屋椽相击士皆惶骇昭亮捕斩之杖其主者诸军股栗帝祠南郊有骑卒亡所挟弓会赦当释去昭亮曰宿卫不谨不可贷卒配隶下军禁兵顿肃拜同中书门下平章事判大名府仁宗书李昭亮亲贤勋旧命其子惟贤持以赐徙定州数言老疾不任事改天平彰信泰宁昭德军节度使卒赠中书令谥良僖昭亮为人和易练习近事于吏治颇通敏善委任僚佐以故数更藩镇无他过子惟贤字宝臣以父荫为三班奉职累迁西上合门使寻领高州刺史知莫州州仓粟陈腐戍兵大噪弗肯受州人恐惟贤驰往谕曰边兵众则积粟多且积久能无腐乎欲尽取新则陈者何所归遂斩首恶一流十人军中帖然召还提举诸司库务领荣州团练使知冀州会迁补禁军自隶籍后犯赃污者皆绌为下军惟贤曰武士何可责以廉节且抵罪在昔今不可以新令绳之帝为更其制徙恩州后迁四方馆使卒惟贤善宣辞令习朝仪仁宗颇爱之

△李用和

李用和字审礼章懿皇太后弟也少穷困居京师凿纸钱为业刘后使兄美访求宸妃亲属得之于民闲奏为三班奉职累迁右侍禁合门只候权提点在京仓草场考城县兵马都监太后崩迁礼宾副使领八作皇仪二司迁礼

宾崇仪使贺州刺史妃追尊太后改迁陵寝领捧日天
武兵护梓宫明年春诏乘传行太后陵还授宁州刺史累迁永清军节度观察留后改真
定府定州路旧制公使钱得私入用和悉用为军费历
侍卫亲军步军马军副都指挥使拜建武军节度使殿前副都指挥使以老乞罢军职拜
宣徽北院使逾月改彰信军节度使同中书门下平章
事景灵宫使进兼侍中初未有居第诏寓馆芳林园用和固辞又假以惠宁坊之官第并
日给官舍馱钱五千卒赠太师中书令陇西郡王谥恭
僖初仁宗以太后不逮养故外家褒宠特厚用和列位将相能小心静默推远权势论者
以此称之子璋玮珣

李璋

李珣

李璋

璋字公明以恩补三班借职积官为天平军节度观察留后知澶州护塞商胡会河
涨讹言水且至璋据听事自若人心乃安河亦不溢徙

曹州观察使 【按东都事略河决澶渊坐降刑州观察使复为留后宋史不载】 迁武
胜军节度使殿前都指挥使仁宗书忠孝李璋字并秘

书赐之帝崩执政欲增京师甲士璋曰例出累代不宜辄易时禁卫相告干兴故事内给
食物中有金既而果赐食众视之无金以为言璋曰天

子未临政已优赏汝何功复云云敢誼者斩众乃定以武成军节度使知郢州京东盗白
日杀县令略人道中璋信赏罚擒捕盗为衰止岁大雨

水竞以船筏邀利多溺死者璋一切籍之约所胜载如黄河法发卒城州西关调夫修路
数十里夹道植柳人指为李公柳知邓州坐失举改节

振武军知郢州还朝道卒赠太尉谥良惠 【按此下原有李玮传惟载其选尚兗国公主
朴陋与主不协别无事迹今删】

李珣

珣字公粹以荫为合门只候累迁均州防御使知相州赐御制诗飞白字宠其行使
契丹预钓鱼会获多契丹遗以金器使还悉上之更赐

黄金及李珣忠孝字熙宁中迁宣州观察使知颍州哲宗初进泰宁军留后提举万寿观
故事正任遇覃恩止移镇唯宗室乃迁官至是珣与李

端恣皆特迁戚里一覃恩迁官自此始复知相州卒

△李遵勗

李遵勗字公武崇矩孙继昌子也少学骑射及长好为文词举进士大中祥符闲尚
万寿长公主初名勗帝益遵字升其行为崇矩子授左

龙武军驸马都尉赐第永宁里主下嫁而所居堂甃瓦甃多为鸾凤状遵勗令讷去主服

有龙饰悉屏藏之帝叹喜领澄州刺史坐私主乳母谪均州团练使徙蔡州踰年起为太子左卫率府副率复左龙武军将军领宏州团练使真拜康州团练使时继昌官刺史遵勳请班其下许之后继昌守泾州暴感风眩遵勳驰省不俟命帝遣使令乘驿赴之既还上表自劾帝慰谕之迁泽州防御使又迁宣州观察使求补郡自试出知澶州会河水溢将坏浮梁遵勳督工徒七日堤成迁昭德军节度观察留后拜宁国军节度使徙镇国军知许州水军多不练习遵勳命部校按劾拔去十七八初天圣闲章献太后屏左右问曰人有何言遵勳曰人言天子既冠太后宜以时还政太后曰我非恋此但帝少内侍多恐未能制之也尝上三说五事以论时政太后乳母晋国夫人林氏干预国事太后崩遵勳密请置之别院其补助多类此所居第园池冠京城延一时名士大夫与宴乐师杨亿为文亿卒为制服及知许州奠德墓恸哭而返又与刘筠相友善筠卒存恤其家卒赠中书令谥曰和文字端懿端愿端恚

李端懿

李端愿

李端恚

李评

李端懿

端懿字符伯性和厚喜问学颇通阴阳医术星经地理七岁授如京副使侍真宗东宫稍长出入宫禁如家人累迁济州防御使羣牧副使杜衍择外戚子弟试外官以端懿知冀州为政循法度转运使移州捕妖人李教教已死恩州王则据城叛人有言教不死在贼军中遂降单州团练使知均州改滑州兵马钤辖贼平实无李教者乃以为汝州防御使历知郢州兼京东西路安抚使大水民饥发廩以振置弓手局教以战鬪遂如精兵治汶阳堤百余里以欲水惠民便之寻除宁远军节度使不拜以留后知澶州赴任数月卒赠侍中谥良定端懿能自刻厉闻善士倾身下之甚得名誉

李端愿

端愿字公谨七岁授如京副使累迁恩州团练使仁宗以岁旱虑囚放宫女端愿上言纵释有罪小人之幸放宫女为宦者专制反失所归何以弭灾变进邢州观察使镇东军留后知襄郢二州本路转运使以献羨财被赏端愿言常赋三折其民不堪帝怒夺其赏申折变之禁移庐州富弼谓曰肥上之政何以减于襄阳端愿曰被官喜事饰厨传以千名则誉者至更事

既久知抑豪强制滑吏故毁随之弼深然其言英宗初同提举在京诸司库务求对劝上躬揽权纲以系人心不宜退托失天下望拜武康军节度使知相州归除醴泉观察神宗遣使就其家录取章奏赐迺褒之请老以太子少保致仕哲宗嗣位进太子太保元佑六年卒赠开府仪同三司子评

李端恚

端恚字守道官左藏库使累迁东上合门使干办三班院尝侍宴羣玉殿仁宗独赐珠花飞白字知邢冀卫三州至蔡州观察使元佑中以安德军留后卒赠昭德军节度使谥恭敏兄端恚在嘉佑时尝密疏言事人无知者元丰闲端恚进对袖旧藁上之神宗欢日近世贤戚也

李评

评字持正由东头供奉官八迁皇城使授西上合门使枢密都承旨出使陕西河东还言城啰兀非便乞速毁撤解一路之患又言王师征安南而取卒于西北使蛮闻之得以窥我所论事颇多然天资刻薄多布尔目采听外事自效以为忠以荣州刺史出知颍州还干当三班院副韩缜报聘契丹且分画河东地界凡三年乃决进成州团练使知蔡州卒赠冀州观察使评少涉书传尝以公主遗奏召试学士院改殿中丞意不满辞之后二年再召试复止迁一官愈不悦至上书辩论及卒人无怜者

△曹佺

曹佺字公伯【东都事略作字伯容】韩王彬之孙慈圣光献皇后弟也性和易美仪度通音律善奕射喜为讨自右班殿直累进殿前都虞候安化军留后出知澶青许郚州历建武保静保平军节度使同中书门下平章事景灵宫使加兼侍中封济阳郡王神宗每咨访以政然退朝终日语不及公事帝谓大臣曰曹王虽用近亲贵而端拱寡过善自保真纯臣也进对未尝名元丰中以疾告既愈入谢帝曰舅久不覲太皇太后宜少憩内东门朕当自启已而召入历上下儒释道五阁大椿蟠桃亭再升殿乃退【按东都事略神宗召佺至便殿同诣庆寿宫慈圣愕然遽止之曰外戚自来未有辄入禁掖者安可以我开其端帝曰聊以慰骨肉之情他人固不可也时左右已预办宴具帝亲奉觞慈圣自酌以授佺佺跪饮钧天盛奏丙夜极欢而罢宋史慈圣光献皇后传帝偕佺诣后合少焉帝先起若令佺得伸亲亲之意后遽曰此非汝所当得留趣遣出皆载此事而各有不同】以护国军节度使司徒兼中书令【按东都事略国朝以来异姓未有兼中书令者赠官则有之生除中书惟佺而已】为太一宫使慈圣丧终请郡帝曰时见舅如面庆寿宫奈何欲远朕即城

南为园池给人作兵庀役疏惠民河水灌之且将为筑
三百楹第固辞乃止哲宗即位加少保卒赠太师追封沂王从弟偕子评诱

曹偕

曹评

曹诱

曹偕

偕字光道少读书知义以节侠自喜为许州都监幕客史沆倾险不法上下畏之偕
从容置酒对客数沆十罪将系杀之沆起拜谢为之斂
迹果迁东上合门使知雄州议者欲废塘泺为田偕曰何承矩李允则营此累年所以限
契丹废之不可进华州防御使知州相徙河阳总管卒
尝从梅尧臣学诗尧臣称之为序其诗

曹评

评字公正以父任累官至引进使知审官西院积迁温州防御使元佑中提举万寿
观丐外为真定路钤辖哲宗以为总管徽宗即位迁相
州观察使历龙神卫捧日天武都指挥使殿前都虞侯马步军副都指挥使宁远军留后
平海军节度使佑神观使使契丹者四馆伴者十二在
合门十二年预修仪制多所增损性喜文史书有楷法尤善射左右手如一夜或灭烛能
中伴契丹使者射尝双破的客惊竦在戚里号为沈厚
卒赠开府仪同三司

曹诱

诱字公善以荫至左藏库副使迁合门通事舍人元佑中以东上合门使为真定府
定州路兵马钤辖迁文州刺史使契丹至其宫门馆客
者下马邀诱同八诱曰北朝使至及朝堂门两朝积好久无妄生事卒乘马入使还为枢
密副使承旨徽宗时进都承旨历庆州团练恩州防御
晋州观察使保庆军留后进安德军节度使醴泉观使与兄评同日拜立双节堂于家性
谨密习熟典故卒赠开府仪同三司谥忠定

△高遵裕

高遵裕字公绰忠武军节度使琼之孙也以荫累迁供备库副使镇戎军驻泊都监
夏人寇大顺城谅祚中矢遁会英宗晏驾遣遵裕告哀
抵宥州夏人遣王盭以吉服迎遵裕切责之遂易服语及大顺城事盭曰剽掠辈耳遵裕
曰若主扶伤而遁斯言非妄邪夏人以为辱亟遣人代
对曰王人蔑视下国弊邑虽小控弦十数万亦能躬执橐鞬与君周旋遵裕瞋目曰主上
天纵神武毋肆狂蹶以干诛夷时谅祚覩于屏闲摇手
使止神宗闻而嘉之擢知保安军横山豪欲向化帝使谕种諤图之諤遂取绥州帅怒諤

擅发兵欲正军法愕惧称得密旨于遵裕故愕被罪遵裕亦降为干州都监迁通事舍人主管西路羌部驻古渭砦分所部羌兵为三等教以军法熙宁初副王韶为秦凤路沿边安抚寻以古渭为通远军命知军事明年持附顺羌部图籍及绘青唐武胜形势入献擢引进副使带御器械俾归治师师至野人关羌人旅拒引亲兵一鼓破之进军武胜城下羌众逃去遂据其城诏建为镇洮军又命知军事寻以熙河洮岷远通为一路进西上合门使荣州刺史充总管复知通远军韶欲取河州遵裕曰古渭举事先建堡砦以渐而进故一举拔武胜今兵粮未备一旦越数舍图人之地使彼阻要害我军进退无所矣韶不听檄使守临洮韶攻河州果不克帝善其议令专管洮岷迭岩未款附者俞龙珂地有盐井遂筑盐川砦辖果且率诸羌胁青唐欲扰边诏遣张玉攻讨遵裕曰青唐无罪第为先羌所胁耳遣裨将与龙珂率众御之青唐人见龙珂泣诉辖果且知不附已溃去从韶取岷州下之令士众曰生获老幼与得级同全活者以数万捷闻加岷州刺史明年羌乘景思立之败围河岷二州道路不通者几月或请退保遵裕不许乃登西门命将纵击别选精骑繇南门噪而出合击之羌败走以功进团练使韶神卫都指挥使知熙州坐荐张穆之罢知颍州徙庆州又坐事黜知淮阳军元丰四年复知庆州诏与诸路讨夏国请济师得东兵十一将骑不足用以羣牧马益之又令节制泾原兵刘昌祚先至灵州几得城遵裕嫉之故不用其计遂以溃归贬郢州团练副使哲宗即位复右屯卫将军主管中岳庙卒赠永州团练使绍圣中加奉国军节度观察留后从弟遵惠

高遵惠

高士林

高公纪

高世则

高遵惠

遵惠字子育以荫为供奉官熙宁中试经义中选擢大理评事历三班院主簿军器丞元佑初上疏言法度之张事有当否如先帝所施設未可轻议擢太仆少卿累迁工部侍郎以集贤殿修撰知郢州河南颍昌府加宝文阁待制知成德军召为户部侍郎以龙图阁学士知庆州卒赠枢密直学士方宣仁后临朝绳检族人一以法度遵惠躬表率之人无闲言亦能远嫌自保故不罹绍圣之祸从侄士林

高士林

士林字才卿宣仁圣烈皇后之弟也累官内殿崇班殿直英宗书谨守法律四字海

之曰能此则为良吏矣喜儒学涉阅经史通大义尤有
巧智尝监扬州召伯闸税本旧用火印士林改刃其印文凿以为识尤简便傍郡皆效焉
卒赠德州刺史神宗立加赠昭德军节度使绍兴初追
封普安郡王子公纪

高公纪

公纪字君正厯合门只候通事舍人累进宁州刺史团练使永州防御使集庆留后
性俭约珍异声伎无所好奉禄多以给诸族得任子恩
均及孤远卒赠感德军节度使谥怀僖绍兴初追封新兴郡王子世则

高世则

世则字仲贻幼以恩补左班殿直至内殿崇班合门只候后除亲卫郎以通经典转
内殿承制累迁康州防御使知西上合门事宣和末金
泛使至命掌客记问该洽应对有据帝闻悦之自是掌客多命世则金人军城下又命往
使还进秩二等迁知东上合门使金人邀宰执亲王诣
军前议事康王请行遂除计议副使以从康王使河北改华州观察使充参议官当艰难
中尝在左右寝处不少离大元帅府建改元帅府参议
请布檄诸路以定人心承制转越州观察使高宗即位除保静军承宣使提举万寿观令
编类元帅府事迹付史馆召为枢密都承旨兼提举京
畿监牧再提举万寿观居温州积奉二万缗因请以裨郡费帝每念宣仁外家班秩无显
者拜为感德军节度使进开府仪同三司奉朝请赐第
临安除景灵宫使兼判温州以病丐罢绍兴十四年进少保卒赠太傅谥忠节

△向传范

向传范子仲模以荫为卫尉丞娶南阳郡王惟吉女安福县主改内殿崇班厯知相
恩邢三州入管干客省阁门皇城司知陕郢二州兼京
西路安抚使谏官杨绘言傅范领安抚使无以杜外戚侥求之源文彦博曰传范累典郡
非缘外戚神宗曰得谏官如此言甚善可以止他日妄
求者以密州观察使卒赠昭德军节度使谥惠节傅范宰相子联戚里所至有能称以橐
中贖千余万葬族人在殡者六十四丧从侄经综

向经

向综

向宗回

向宗良

向经

经字审礼以荫至虞部员外郎神宗为颍王选经女为妃改庄宅使帝即位妃为皇
后进光州团练使以潍州防御使知陈州岁中阅囚活

重辟三人西华令掠人至死吏畏莫敢言经得其情卒穷治如法岁大雪辄弛公私僦钱以宽民又斥公使钱归有司以供享劳宾客军师之用知河阳会旱蝗民乏晏先以圭田租人振救之富人争出粟多所济活徙徐州迁明州观察使召还提举景灵宫进定国军留后复出知青州未踰岁得疾还卒于淄州赠侍中谥康懿经所至勤吏治事皆自省决颇欲以才见于用故数请外补尝因太祖忌日百官班开元殿下后召经见行幄勉以尽忠朝廷经亦以善事三宫为言不及其家事子宗回宗良

向综

综字君章知歙县籍闾里恶少年有盗发用以推迹辄得通判桂常二州知随鼎漳汾密棣沂七州沂阻山多盗综请用重法绳禁岁断大辟减半兵久惰会初置提举教之急众不悦监兵夜排阇告变综就寝自若明日大阅严号令赏罚卒亦无事性宽裕善治刷于奸恶不少怨累官中散大夫卒

向宗回

宗回字子发累官相州观察使徽宗立进彰德军留后历安国保信镇南保平军节度使检校司空封永阳宁海安康汉东郡王开府仪同三司崇宁初有告其阴事者鞫实削官爵踰年尽还故官宗回少骄恣有小才尝权羣牧都监数以蕃息被赏出知蔡州擒剧贼歼其党类岁饥发廩兴力役饥者得济而官舍帑廩一新钦圣后服除起奉朝请卒赠检校少师谥荣纵

向宗良

宗良字景弼历秀州刺史利州观察使昭信军留后奉国清海镇东武宁宁海军节度使永嘉郡王开府仪同三司钦圣临朝陈瓘论其与蔡京相结【按东都事略蔡京与宗良交结钦圣还政宗良预政事故为陈瓘疏论与此异】及预政事亦能恪其自守宣和中卒赠少保

【东都事略母董氏年九十封燕国太夫人宣和元年卒明年起复宗良制曰念先后之同气惟仲舅之独存宗良固辞】

△张敦礼

张敦礼熙宁元年选尚英宗女祁国长公主授左卫将军驸马都尉迁密州观察使元佑初疏言变法易令始于王安石成于蔡确近者退确进司马光所得多矣进武胜军留后章惇为政言敦礼丑正朋邪诋毁先烈引誉罪首谓当褒崇欲其党俦尽见收用乃责授左千牛卫大将军勒止朝参徽宗立有司奏审恩赐帝与钦圣后皆以为当与惇等执前疏钦圣曰戚里何必预知朝廷事当时罚亦太重矣复和州防御使进保信军留后崇宁初拜宁远军节度使谏官王能甫言敦礼诋毁盛德罪大谪轻今复与

节钺无乃伤陛下绍述之志乃夺节仍为集庆军留后

大观初复节度宁远军徙雄武卒赠开府仪同三司

△任泽

任泽字天锡仙游夫人母弟也英宗入继大统授西头供奉官神宗时累迁皇城使
领昌州刺史护仙游枢迁祔濮园真拜嘉州刺史卒赠

崇信军节度使谥恭僖泽起田里际会恩宠能自安绳检帝欲广其居固辞当任子弗请
其笃谨如此

钦定续通志卷五百三

●钦定续通志卷五百四 外戚传四

外戚传

宋 【一】

○宋三

孟忠厚 韦渊 钱忱 邢焕 吴益【盖】 李道

郑兴裔 杨次山

孟忠厚

韦渊

钱忱

邢焕

吴益 【吴盖】

李道

郑兴裔

杨次山

△孟忠厚

孟忠厚字仁仲隆佑太后兄追封咸宁郡王彦弼子也后退居瑶华宫哲宗恩眷不
衰故忠厚得以仕进宣和中官至将作少监靖康元年

知海州召权卫尉卿金人围城后宫火出居忠厚家繇是免北迁金兵退张邦昌迎后听
政后遣忠厚持书遣康王王即位将迎后授忠厚徽猷

阁待制提举一行事务寻兼干办奉迎太庙神主事帝幸扬州除显谟阁直学士台谏交
辛论列帝以太后故难之太后闻即命易武秩遂授常

德军承宣使干办皇城司未几奉太后幸杭州苗傅乱平授宁远军节度使寻奉太后幸
南昌归至越以母忧解职顷之以太后祔庙恩起复镇

海节度使开府仪同三司及太后大祥封信安郡王充礼仪使奉神御幸温州绍兴九年
判镇江府改判明婺二州兼安抚使又判绍兴兼修奉

攒宫事加少保三梓宫归充迎护使及营佑陵秦桧当为总护使惮往乃除忠厚枢密使

以代其行桧与忠厚僚壻也然心实忌之山陵事毕忠厚欲归枢密府桧讽言路引故事论列遂判福州时海寇猖獗帝忧忠厚不能弭其患改判建康府又改判绍兴府会郊赦加恩谢表有本无时才出为世用语中丞詹大方希桧意因论其轻侮罢为醴泉观使桧死召还行在授保宁军节度使判平江迁绍兴复充万寿观使提举秘书省二十七年卒赠太保忠厚奉昭圣太后训避远权势不敢以私干朝廷明受之变太后垂帘忠厚乞裁节本家恩泽秦桧当国亲姻扳授以进忠厚独与之忤自越入见语所善王铨曰忠厚与桧虽有亲好每怀疑心今欲求一不伤时忌对札铨教之但言乞免提举学事而已然亦见废帝以太后拥佑功故眷忠厚特优既奉内祠金使至特命押班且令月过局如宰执例及卒三子皆除直秘阁

△韦渊

韦渊显仁太后季弟也靖康末官至拱卫大夫忠州防御使勾当军头引见司张邦昌遣渊持书遗康王于济南王即位迁亲卫大夫宁州观察使知东上合门事言横行五司尚未遵元丰旧制乞并引进司归客省东西上合门以省冗费从之遂命同管客省四方馆合门事性暴横不循法度帝虑其有过难于行法遂迁福建路副总管引疾丐祠许之久之落阶官除德庆军节度使召赴行在除开府仪同三司太后将入境封平乐郡王逆于境上归即令致仕又诏奉朝请迁少师渊在内不得逞乞致仕任便居住从之未几帝恐其肆横复诏还居赐第从太后朝景灵宫出言诋毁诏侍御史余尧弼鞫治表授宁远军节度副使袁州安置数年复故职累迁太保太傅卒赠太师子三人讯谦谿谦好学能诗官至建康军节度使谦子璞淳熙末仕至太府少卿高宗崩擢司农少卿为金国告哀使锡宴不肯用乐伎入见令吉服入璞又不可乃以凶服见绍熙初除授明州观察使十年不迁宁宗嘉其恬退授清远军节度使致仕卒赠太尉

△钱忱

钱忱字伯诚吴越王俶五世孙父景臻尚仁宗第十女秦鲁国大长公主生忱神宗赐名除庄宅副使骑都尉帝尝谕景臻曰主贤宜有子为择嘉配娶唐介孙女又晁迥外孙忱从二家游伯父勰在翰苑因得识一时名卿徽宗时为邕州观察使累除泸州节度使钦宗加检校少保寻纳节高宗立复拜检校少保泸州节度使中太一宫使御书忠孝之家四字赐之进开府仪同三司以秦鲁主终丧除少保封荣国公迁少师仍旧节致仕给真奉绍兴三十一年卒赠太师子端礼自有传

△邢焕

邢焕字文仲开封人高宗后父初以父任调汜水县主簿累官知开封府阳武县都大提举开德大名府堤埽历开封府七十仪曹靖康初主管亳州明道宫高宗即位擢光州观察使除枢密都承旨焕屡奉马伸言事切当宗泽忠劳可倚黄潜善汪伯彦误国其言多所裨益迁保静军承宣使苗刘之变焕自度不能争乃病免兼提举万寿观求去改江州太平观徙居忠州绍兴二年入对首陈川陕形势利害请幸荆南分兵以图恢复凡数百言帝甚嘉之复以为都承旨引疾不拜擢庆远军节度使提举洞霄宫焕涉学有文节俭自持未尝恃恩私请识者取焉是年卒赠开府仪同三司谥恭简加赠少师追封嘉国公【按此下原有潘永思传系潘贤妃之叔无事迹足录今删】

△吴益【吴葢】

吴益字叔谦葢字叔平俱宪圣皇后弟也益建炎末以恩补官累迁干办御辇院带御器械葢绍兴五年以恩补官累迁宣赞舍人帝与后皆喜翰墨故益葢兄弟师法之亦有书名后受册推恩益加威州团练使葢加文州刺史帝为置皇后宅大小学教授以王磁为之磁明经善训导益葢折节事之益娶奏桧长孙女又与王继先交相荐引故三家姻族皆躐美官益历官至保康军节度使加太尉仪同三司初以桧故授文资直秘阁累加敷文阁待制中丞汤鹏举言益以庸琐之才恃亲昵之势乞褫职名以示保全今若遽出其壻则伤恩臣僚无得更有论列自是不复迁显仁太后葬为攒宫总护使始进少保字宗嗣位进少傅又进太师封太宁郡王干道七年卒谥庄简追封卫王葢官至武宁军节度使累加太尉开府仪同三司少保封新兴郡王干道二年卒赠太傅追封郑王益子琚习吏事干道九年特授临安府通判后历尚书郎部使者换资至镇安军节度使复以才选除知明州兼沿海制置使宁宗初得祠奉朝请寻知鄂州再知庆元府位至少师判建康府兼留守卒方孝宗崩光宗以疾不能执丧大臣请太后垂帘册立宁宗琚言于后曰垂帘可暂不可久后遂以翌日彻帘尝使金人嘉其信义琚死后宋遣使议和屡不合金人言南使中惟吴琚言可信琚弟璠仕至保静军节度使葢子环亦至昭化军节度使

△李道

李道字行之相州人光宗后父初道与兄旺聚众归宗泽泽因事斩旺命道掌其军泽卒道引军依襄阳镇抚使桑仲仲以为副都统制兼知随州奏于朝授武义郎合门宣赞舍人仲为霍明所杀道与统制李横率兵缟素围明

于郢明亡去刘豫遣人持书招道道不从执其使以闻
诏嘉奖之豫怒遣将攻道道拒破之除邓随州镇抚使兼知邓州时李横已命别将守邓
道惮横不敢受遂命乃知随州枢密院以道能察军情
诏领荣州团练使胡安中守唐州势孤不能自立遂附豫道招之复来归会李成入寇道
与横俱弃镇南至江州诏道属岳飞为选锋军统制入
唐州擒伪将除唐邓郢州襄阳都统制从飞收复襄阳等郡累官武胜军承宣使御前诸
军统制武兴蛮杨再兴连岁寇掠道破其众擒再兴及
其二子迁保宁军承宣使羣盗朱持等聚桂阳诏道移军衡州经理道遣高仲等击平之
落阶官加龙神卫四厢都指挥使迁镇南军承宣使金
将渝盟道以所部戍荆南帅臣刘錡召奏事道代为御前诸军都统制金将刘士萼屯光
化境道掩击焚其舟士萼遁去寻与鄂帅不协罢踰年
起授奉日天武四厢都指挥使知荆南府隆兴初为湖北诸司所劾罢久之再为湖北副
总管及卒赠太尉庆远军节度使谥忠毅后既贵进封
楚王孙孝友孝纯皆至节度使

△郑兴裔

郑兴裔字光锡初名兴宗显肃皇后外家三世孙也曾祖绅封乐平郡王祖翼之陆
海军节度使父蕃和州防御使兴裔早孤叔父藻以子
字之藻没解官致追报之义初以后恩授成忠郎充干办祇候库圣献后葬充攒宫内外
巡检累至江东路钤辖干道初建康留守请治行宫备
巡幸兴裔奏劳人费财乞罢其役且言都统及马军帅皆非其人徙福建路兵马钤辖过
阙入见询以守令臧否兴裔条析以对帝曰卿识时务
习吏事行当用卿会复置武臣提刑就命为之加遥领高州刺史郡县积玩检验法废兴
裔劾为格目分界属县吏不得行其奸因着为令建剑
汀邵盐筴屡更漕臣请易纲运为钞法兴裔极言其不可海寇倏去忽来调兵常无及请
置澳长寇至径率民兵御之又言禁兵事艺不精多充
私役乞行禁止尉以捕盗改秩多伪当加审实帝嘉之诏加成州团练使时闻金人欲败
盟召兴裔为贺生辰使以覘之使还言无他卒如所料
累差浙东西江东提刑请祠归寻诏知合门事兼干办皇城司枢密副都承旨除均州防
御使再使金还迁潭州观察使复请祠起知庐州却邻
道互送礼移知扬州按籍见前所却者有出无归奏严其禁扬有重屯粮乏例余他境兴
裔搜括渗漏以补之食遂足民旧皆茅舍易焚兴裔贷
钱易瓦火患乃息又奏免其偿修学宫立义冢定部辖民兵升差法郡以大治楚州议改
筑城有谓韩世忠遗基不可易者命兴裔往视既至阙
地丈余增筑之绍熙 【按绍熙原作绝兴据上文叙干道以后事则字显系熙字之误今

改】元年迁保静军承宣使召领内祠充明堂大礼

都大主管大内公事宁宗即位除知明州兼沿海制置使告老授武泰军节度使卒赠太尉谥忠肃兴裔厯事四朝以材名结主知中兴外族之

贤未有其比子三人挺以横行团练使厯淮襄两道帅损登进士甲科与抗皆有位于朝

△杨次山

杨次山字仲甫恭圣仁烈皇后兄也【按宋史仁烈皇后传忘其姓氏或云会稽人有杨次山者后自谓其兄也】其先开封人曾祖全

以材武奋靖康末捍京城死事祖渐以遗泽补官仕东南家于上虞次山仪状魁伟少好学能文补右学生后受职宫中次山遂沾恩得官累至

武德郎带御器械知合门事除吉州刺史提举佑神观后受册除福州观察使岳阳军节度使后谒家庙加太尉韩侂胄诛加开封仪同三司寻

进少保封永阳郡王南郊恩加少傅充万寿观使致仕加太保授安德昭庆军节度使改封会稽郡王次山能避权势不预国事时论贤之嘉定

十二年卒赠太师追封冀王子二人谷至太傅保宁军节度使充万寿观使新安郡王【宋史本传作永宁郡王按石已封永宁郡王不应兄

弟同爵当以仁烈皇后传谷封新安郡王为是据改】石字介之干道闲入武学庆元中补承信郎差充合门祗候带御器械嘉泰四年充贺正

旦接伴使时金使骄倨自矜善射石挽弦三发三中金使气沮嘉定改元除扬州观察使知合门事进保宁节度使提举万寿观奉朝请进封信

安郡侯十五年以检校少保进封开国公宁宗崩宰相史弥远谋废立命石与谷白后理宗立授开府仪同三司充万寿观使时宝庆垂庆石乃

密疏章献慈圣宣仁所以临朝之由远及汉唐母后临朝称制得失上之后览奏即命择日撤帘进石少保封永宁郡王以三上太后册宝进至

太傅石性恬澹每拜爵命必力辞恭圣祔庙除太师兄谷疑于辞受石曰吾家非有元勋盛德徒以恭圣故致贵显若偃然受之是自速颠覆耳

矧恭圣抑远族属意虑深远言犹在耳何可遽忘乃合疏恳辞至再三不受及属疾除彰德集庆节度使进封魏郡王卒赠太师

钦定续通志卷五百四

●钦定续通志卷五百五 外戚传五

外戚传

辽

○辽

（臣）等谨按辽史外戚有表而散见于列传以萧氏势均耶律不胜载也今取皇后亲父兄弟及尚帝女者汇为一卷

萧达鲁【阿古齐】 萧哈里 萧逊 萧继先 萧巴雅尔
【恒】德 萧孝穆【孝忠 孝友 阿拉 萨
巴】 萧托云 萧托卜嘉 萧老【慈实努】 萧奉先

萧达鲁

萧哈里

萧逊

萧继先

萧巴雅尔

萧孝穆

萧托云

萧托卜嘉

萧惠【慈实努】

萧奉先

△萧达鲁

萧达鲁字达年本契丹大族赐姓其母为德祖女弟而淳钦皇后又其女兄也五世祖曰哈玛尔约尼氏时尝使唐唐留之幽州一夕折关遁归国由是世为决狱官达鲁性宽厚膂力绝人习军旅事太祖潜藩曰侍左右凡征讨必与行阵既即位达鲁与弟阿古齐皆总宿卫拜达鲁北府宰相世其官太后征奚及讨刘守光达鲁略地海滨杀获甚众埒克等乱溃而北走达鲁率轻骑追之兼昼夜行至榆河败其党获埒克以献太祖嘉之锡赉甚渥后讨西南夷功居诸将先神册三年卒达鲁有胆略闻敌所在即驰赴亲冒矢石前后战未尝少衄必胜乃止以故在太祖功臣列喻以手云弟阿古齐

阿古齐

阿古齐

阿古齐字萨巴少性卓越自放不羁及长以骁勇称善骑射临阵敢前每射中敌甲楯辄洞贯太祖为裕悦时以材勇充任使既即位与达鲁总腹心部埒克之乱也淳钦皇后军黑山阻险自固太祖方经略奚地命阿古齐统百骑往卫之逆党特尔特耶律华格素惮其勇略相戒不敢犯埒克既北走与达鲁追擒于榆河神册初元讨西南夷有功徇山西诸郡县又下之败周德威军三年以功拜北府宰相世其职天赞初与王郁略地燕赵破磁窑镇太祖西征悉委以南面边事攻渤海破扶余城独将骑兵五百败老相军三万渤海既平改东丹国已降郡县复叛盗贼蜂起阿古齐与康默记讨之所向披靡会贼游骑七千自鸭绿府来援势张甚阿古齐

帅麾下精锐直犯其锋一战克之斩馘二千余遂进军
破辉发城以病卒功臣中喻阿古齐为耳云子安图官至右皮室详袞世宗怀节皇后其
女也 【据后妃传增辑】

△萧哈里

萧哈里字伊德森其先在约民氏时为本部额尔奇木父塔喇归附后仍袭其职天
显闲为本部令公哈里貌魁伟膂力过人以材武袭父
职天禄闲娶明王安图女阿雅翁主应历初察克乱阿雅连坐继娶绰果公主 【按绰果
太宗第二女史称翁主误今据公主表改】 帝以近
戚嘉其勤笃命世预北府宰相选 【世字据穆宗纪增】 顷之总知军国事时诸王多
坐反逆哈里为人廉敬达政体每被命案狱多得其情
人无冤者繇是知名汉主刘承钧每遣使入贡必别致币物诏许受之卒年五十

△萧逊

萧逊小字伊库宰相达鲁族弟呼玛喇之子为人少通书史而多文饰太宗时为奚
图噜太尉尚燕国公主为羣牧都林牙逊在军中握馱
修边幅僚佐皆言非将帅才寻为南京留守初周人攻扬州帝遣逊蹶其后惮署不敢进
拔缘边数城而还后周师来侵围冯母镇逊请益兵帝
报曰敌来则与统军司并兵拒之敌去则务农作勿劳士马会敌入束城 【按束城史传
误作东城据五代史及穆宗本纪改】 我军退渡滹
沱而屯逊勒兵徐行周军数日不动逊与诸将议曰敌众而锐战不利则有后患不如顿
兵以老其师蹶而击之可以必胜诸将从之遂与统军
司兵会饰他说请济师周人引退逊亦还已而周复北侵与其将傅元卿李崇进 【通鉴
作李重进】 分道并进围瀛州陷益津瓦桥淤口三
关垂迫固安逊不知计所出但云车驾旦夕至麾下士奋跃请战不从已而陷易瀛莫等
州京齐人皆震骇遁入西山逊以边防失利恐朝廷罪
已表请亲征会周主病归逊退至益津伪言不知所在遇步卒二千余人来拒败之是年
闻周丧燕民始安乃班师时穆宗酒嗜杀逊以密戚
预政无所匡辅士论不与应历十九年春搜帝射熊而中逊与伊勒希巴伊勒希等进酒
上寿帝醉还宫夜为庖人锡袞所弑逊与南院枢密使
高勋飞龙使尼哩等立景宗保宁初为北院枢密使兼北府宰相仍命世预其选帝册逊
女为后加尚书令封魏王从帝猎闾山为贼所害

△萧继先

萧继先字杨隐小字瑠智格幼颖悟叔逊命为子睿智皇后尤爱之干亨初尚齐国
公主拜驸马都尉统和四年宋人来侵继先率逻骑逆
境上多所俘获帝嘉之拜北府宰相自是出师继先必将本府兵先从拔狼山石垒破宋

军应州帝南征取通利军战称捷力及亲征高丽以年老留守上京卒继先虽处富贵尚俭素所至以善治称故将兵攻战未尝失利名重戚里
△萧巴雅尔

萧巴雅尔字韩隐国舅少父房之后为人多智略娴于骑射统和初为左皮室详袞讨准布有功四年破宋将曹彬米信兵于望都凡军事有疑每预参决寻总永兴宫分纛及锡里伊喇二皮室等军与枢密使耶律色珍收复山西所陷城邑攻宋围蒲城率所部先登拔之改南京统军使尚卫国公主拜驸马都尉加同政事门下平章事十三年历北南院宣徽使条上时政得失及赋役法帝嘉纳焉十五年加政事令迁东京留守二十二年复攻宋下德清军萧达林卒专任南面事宋和议成为北府宰相圣宗征高丽将兵由北道进至开京西岭破敌军斩数千级高丽王询奔平州巴雅尔入开京大掠而还封兰陵郡王开泰二年以宰相知西南面招讨使五年进士东平为政宽裕而善断诸部畏爱民以殷富七年再伐高丽至开京俘掠而还渡茶陀二河敌夹射巴雅尔委甲仗走坐是免官太平三年为西南面招讨 【据圣宗纪增】 复王幽薨弟恒德

萧恒德

萧恒德

恒德字逊宁有胆略而善谋统和元年尚越国公主拜驸马都尉迁南面林牙从宣徽使耶律阿穆尔征高丽还改北面林牙会宋将曹彬米信侵燕耶律休格与恒德议军事多见信用为南京留守六年帝攻宋围沙堆恒德独当一面城上矢石如雨恒德意气自若督将士夺其陴城陷中流矢太后亲临视攻长城口复先登太后益多其功时高丽未附恒德受诏率兵拔其边城王惧上表请降十二年赐启圣竭力功臣从都部署和硕鼐讨乌舍未战乌舍请降恒德不许乌舍殊死战城不能拔和硕鼐议欲引退恒德曰以彼倔强吾奉诏来讨无功而还诸部谓我何若深入多获犹胜徒返遂进击东南诸部至高丽北鄙北还道远粮绝士马死伤甚众坐是削功臣号十四年为行军都部署伐博啰满达部还公主疾太后遣宫人贤释侍之恒德私焉公主恚而薨太后怒赐死后追封兰陵郡王小必塔别有传

△萧孝穆

萧孝穆小字和多沁太祖淳钦皇后次弟阿古齐之五世孙父托辉为国舅详究孝穆廉谨有礼法统和二十八年累迁西北路招讨都监开泰元年遥授建雄军节度使加检校太保是年珠拉等变孝穆击走之进军哈屯城准

布结五羣牧长扎拉图等谋中外相应孝穆悉诛之乃
严备御以待余党遂溃以功迁九水诸部安抚使寻拜北府宰相赐忠穆熙霸功臣检校
太师同政事门下平章事八年还京师太平二年知枢
密院事充汉人行宫都部署三年封燕王南京留守兵马都总管九年大延琳以东京判
孝穆为都统讨之战于蒲水中军稍却副部署萧必塔
都监萧博诺以两翼夹击贼溃追败之于手山北延琳走入城深沟自卫孝穆围之筑重
城起楼櫓使内外不相通城中撤屋以衅其将杨详世
等擒延琳以降辽东悉平改东京留守赐佐国功臣为政务宽简抚纳流徙其民安之兴
宗即位徙王秦寻复为南京留守重熙六年进封吴国
王拜北院枢密使八年表请籍天下户口以均徭役又陈诸部及锡里军利害从之政赋
稍平众悦九年徙王楚时天下无事户口蕃息帝富于
春秋每言及周取十县慨然有南伐之志羣臣多顺旨孝穆谏曰昔太祖南伐终以无功
嗣圣皇帝伐唐立晋后以重贵叛长驱入汴銜馭始旋
反来侵軼自后连兵二十余年仅得和好蒸民乐业南北相通今国家比之曩日虽曰富
强然勋臣宿将往往物故且宋人无罪陛下不宜弃先
帝盟约书奏不报以老乞骸骨不许十一年 【本纪作十二年】 复为北院枢密使更
王齐薨追赠大丞相晋国王谥曰贞孝穆钦哀皇后之
兄仁懿皇后之父也 【按后妃传增辑】 虽椒房亲位高益畏太后有赐辄辞不受妻
子无骄色所荐拔皆忠直士尝语人曰枢密选贤而用
何事不济若自亲烦碎则大事凝滞矣自萧和卓以吏才进其后转效不知大体叹曰不
能移风易俗偷安爵位臣子之道若是乎时称为国宝
臣二子阿拉萨巴弟孝先孝忠孝友 【按此下原有萧孝先传今因其与谋弑仁德皇后
又与钦哀后谋废立改入逆臣】

萧孝忠

萧孝友

阿拉

萨巴

萧孝忠

孝忠字萨巴小字特固斯幼立志慷慨及长以戚属入侍开泰中补祗候郎居尚越
国公主拜驸马都尉累迁殿前都点检太平中擢北府
宰相重熙七年为东京留守时禁渤海人击球孝忠言东京最为重镇无从禽之地若非
球马何以习武且天子以四海为家何分彼此宜弛其
禁从之十二年入朝封楚王拜北院枢密使国制以契丹汉人分北南院枢密治之孝忠
奏曰一国二枢密所以风俗不同若并为一天下幸甚

事未及行薨追封楚国王赦死囚数人为孝忠荐福赐宫户守冢子阿苏终南院枢密使
萧孝友

孝友字塔布布延小字辰瑠幼以小字称开泰初缘戚属为小将军太平元年以大册加左武卫大将军检校太保赐名孝友重熙元年累迁西北路招讨使封兰陵郡王八年进王陈先是萧惠为招讨使专以威制西羌诸夷多叛孝友厚加绥抚每入贡辄增其赐物羌人以安久之寢成姑息桀骜之风遂炽议者讥其过中十年加政事令以葬兄还京师拜南院枢密使进王赵拜中书令丁母忧起复北府宰相出知东京留守会伐夏孝友失利河南帝欲诛之太后救免复为东京留守徙王燕改上京留守更王奏清宁初加尚父顷之复留守东京明年复为北府宰相以柴册恩遥授洛京留守致仕进封豊国王坐子呼敦与重元乱伏诛

阿拉

阿拉字额哩埒以仁懿皇后之同母弟幼养宫中兴宗尤爱之重熙六年为弘义宫使累迁同知北院枢密使加同中书门下平章事出为东京留守二十一年拜西北招讨使封西北郡王尚秦晋国公主拜驸马都尉清宁元年拜北府宰相兼南院枢密使进王韩明年改北院枢密使徙王陈与萧格同掌国政格谄谀不法阿拉争之不得告归帝由此恶之除东京留守会行免克色哩礼入朝陈时政得失格以事中伤帝怒缢杀之皇太后营救不及大恸曰阿拉何罪而遽见杀帝乃优加赙赠阿拉性忠果晓世务有经济才议者以谓阿拉若在无重元伊苏之乱子额哩页列奸臣传

萨巴

萨巴字周隐七岁即以仁懿后弟推恩加左右千牛卫大将军【按圣宗纪太平四年以萧孝穆子顺为千牛卫将军百官志同考孝穆子无萧顺名而此传授官正与纪合或萨巴又名顺也】重熙初补只候郎君性廉介风姿爽朗善球马驰射帝每燕饮喜诣谑萨巴虽承宠顾常以礼自持以柴册恩加检校太傅永兴宫使总领左右护卫同知检点司事尚魏国公主拜驸马都尉为北院宣徽使仍总知朝廷礼仪重熙末出为西北路招讨使武宁郡王居官以治称与公主不谐离婚【按公主表增】清宁初卒追封齐王【按萨巴与公主离婚不应入外戚因系兴宗仁懿后弟附列于此与萧酬斡之因离婚而入列传者不同】

△萧托云

萧托云字乌延北府宰相哈里之子统和初皇太后称制以戚属推恩入侍寻出为乌尔古部都监命讨实穆噜等部有功迁乌尔古部节

度使十九年总领西北路军事后以本路兵伐甘州降其酋长伊噜勒既而伊噜勒复叛仍命讨之克肃州尽迁其民于托辉口故城师还尚公乡公主拜驸马都尉加同政事令门下平章事上言曰准布今已服化宜各分部治以节度使帝从之自后节度使往往非材部民怨而思叛开泰元年锡里太师阿勒达杀其节度使西奔鄂尔多城古所谓龙庭单于城也准布复叛围托云于哈屯城托云使诸军射却之屯于鄂尔多城明年北院枢密使耶律华格引兵来救托云遣人诱诸部降帝以托云始虽失计后得人心释之仍领诸部请益军诏让之曰叛者既服兵安用益且前日之役死伤甚众若从汝谋边事何时而息遂止会公主坐杀家婢降封郡王托云罢使相寻起为乌尔古德呼勒部详袞以老代还卒子双宽南京统军使孙乌都温尚三韩郡王赫噜之女固页公主终乌尔古德呼勒部统军使以善战名于世

△萧托卜嘉

萧托卜嘉字乌拉丹国舅郡王果济之孙性刚直咸雍中补祗候郎君太康元年为彰愍宫使尚赵国公主拜驸马都尉三年改同知汉人行宫都部署与北院宣徽使耶律托卜嘉善伊逊嫉之令人诬告谋废立事不胜撈掠诬伏帝引口昏瞶不能自陈遂见杀于统闲追封兰陵郡王绘像宜福殿

△萧惠 【慈实努】

萧惠字伯仁小字托古斯太祖淳钦皇后次弟阿古齐之五世孙道宗宣懿皇后父也以中宫亲为国舅详袞从伯父巴雅尔征高丽至努克特北岭力战破之及攻开京以军律整肃闻授契丹行宫都部署开泰二年改南京统军使未几为右伊勒希巴加同中书门下平章事朝议以辽东重地非勋戚不能镇抚乃命惠知东京留守事改西北路招讨使封魏国公太平六年讨回鹘阿尔斯萨兰部征兵诸路独准布酋长济喇后期斩以徇 【按圣宗纪是年三月准布来侵萧惠破之在进围甘州之前此谓以后期斩其酋长盖当时或战胜而后伏诛也】 进围甘州不克而还济喇之子聚兵来袭准布酋长乌巴密以告惠未之信会西准布叛袭三克军都监尼噜古托济部节度使辖哩额布勒等将兵来救遇敌于哈屯城西南辖哩额布勒战歿士卒溃散惠仓卒列阵敌出不意来攻众请乘时奋击惠以军疲未可用弗听乌巴请以夜斫营惠又不许准布归惠乃设伏兵击之前锋始交敌败走惠为招讨累年屡遭侵掠士马疾困七年内迁南京侍卫亲军马部军都指挥使复讨准布 【

据圣宗纪增】 寻迁南京统军使兴宗即位知兴中府历顺义军节度使东京留守西南

面招讨使加开府仪同三司检校太师兼侍中封郑王
重熙六年复为契丹行宫都部署加守太师徙王赵拜南院枢密使更王齐是时帝欲一
天下谋取三关集羣臣议惠曰两国强弱圣虑所悉宋
人西征有年师老民疲陛下亲率六军临之其胜必矣萧孝穆谏弗听乃遣使索宋十城
宋人增岁币请和惠以首事功进王韩十二年兼北府
宰相同知元帅府事又为北枢密使十三年帝亲征夏国元昊请降惠曰元昊忘奕世恩
萌奸计车驾亲临不尽归所掠天诱其衷使彼来迎天
与不图后悔何及帝从之诘且进军夏人列拒马于河西蔽盾以立惠击败之元昊走惠
麾先锋及右翼邀之大风忽起飞沙眯目军乱夏人乘
之蹂践死者不可胜计诏班师十七年尚帝姊奏晋国长公主拜驸马都尉明年帝复征
夏国惠自河南进战舰粮船绵亘数百里既入敌境铠
甲载于车军士不得乘马诸将请备不虞惠曰谅祚必自迎车驾何暇及我数日军未营
候者报夏师至惠方诘妄言罪谅祚军从阪而下惠与
麾下不及甲而走追者射惠几不免军士死伤尤众师还以惠子慈实努别战凉州歿于
阵诏释其罪十九年请老诏赐肩輿入朝策杖上殿辞
章再上乃许之寺魏国王诏冬夏赴行在参决疑议既归锡赉不绝清宁二年薨遗命家
人薄葬惠性宽厚自奉俭薄兴宗使惠恣取珍物惠曰
臣以戚属据要地禄足养廉奴婢千余不为阙乏陛下犹有所赐贫于臣者何以待之帝
以为然故为将虽数败衄不罪也弟实喇武定军节度
使封郑王惠有二子曰慈实努曰额固尼额固尼终北府宰相慈实努字宁隐太平初以
戚属补祗候郎君帝爱其勤慎升札萨克辖右监门卫
上将军西边有警授西北路招讨都监领保大军节度使政济恩威诸部悦附入为殿前
副点检厯乌尔古德呼勒部详袞征李谅祚为统军都
监与西北路招讨使达噜噶率番部诸军由北路趋凉州获谅祚亲属夏人扼险以拒中
流矢卒赠中书门下平章事 【按此下应列萧常格
传系天祚德妃之兄仕至北府宰相以无事迹从删】

△萧奉先

萧奉先天祚元妃之兄也外宽内忌因元妃为帝眷倚累官枢密使封兰陵郡王天
庆二年帝幸泚同江钓鱼故事生女真酋长在千里内
者皆朝行在适头鱼宴帝使诸酋次第歌舞为乐至阿古达端立直视辞以不能再三谕
不从帝密谓奉先曰阿古达跋扈若此可托以边事诛
之奉先曰彼羸人不知礼义且无大过杀之伤向化心设有异志蕞尔小国亦何能为帝
乃止四年阿古达起兵逼宁江州萧托卜嘉战失利帝
命奉先弟嗣先为都统将番汉兵往讨嗣先败绩于混同江奉先惧弟被诛乃奏东征溃

军逃罪所至劫掠若不肆赦将啸聚为患从之嗣先诣
阙待罪止免官而已由是士无鬪志遇敌辄溃郡县所失日多初奉先诬耶律伊都结驸
马萧昱谋立其甥晋王事觉杀昱伊都奔女真保大二
年伊都为女真监军引兵至帝忧甚奉先曰伊都实无亡辽心欲立晋王耳若以社稷计
不惜一子诛之可不战退遂赐晋王死中外莫不流涕
人心益解体当女真之兵未至也奉先逢迎天祚言女真虽能攻上京终不能远离巢穴
及捣云中计无所出惟请播迁夹山天祚方悟顾谓奉
先曰汝父子误我至此杀之何益汝去毋从我行恐军心忿怒祸必及我奉先父子恸哭
而去为左右执送女真兵女真兵斩其长子昂送奉先
及次子昱于其国主道遇辽兵奋归天祚并赐死

钦定续通志卷五百五

●钦定续通志卷五百六 外戚传六

外戚传

金

○金

实嘉努 费摩达 图克坦恭 唐古德温 李石 赫舍
哩志宁 布萨忠义【揆】 乌凌阿晖 富
察鼎寿 图克坦思忠 乌库哩元忠 唐古贡 图克坦公弼 图克坦铭

图克坦肆喜

实嘉努

费摩达

图克坦恭

唐古德温

李石

赫舍哩志宁

布萨忠义

乌凌阿晖

富察鼎寿

图克坦思忠

乌库哩元忠

唐古贡

图克坦公弼

图克坦铭

图克坦肆喜

△实嘉努

实嘉努富察部人祖和尔坦世祖外孙和诺克萨克达之乱昭肃皇后父母兄弟皆在敌境和尔坦以计迎还之实嘉努自幼抚养于太祖家及长以女妻之年十五从攻宁江州败辽主亲军政临潢皆有功袭穆昆后自山西护齐国王摩罗欢之丧归上京道由兴中时方攻兴中未下乃置柩于驿率所领明安兵助王师破其城从宗望讨张觉再从宗翰伐宋宗翰闻宗望军已围汴遣往计事抵平定军遇敌数万败之遂见宗望还报宗翰甚嘉之罗索讨陕西未下领所部援之既而屯戍西京会契丹达实出奔为伊都副元帅袭诸部族以还未几有疾退居乡里天眷闲授侍中驸马都尉再以都统定边部封兰陵郡王除东京留守以病致仕卒加赠郟王正隆闲夺封鲁国公

△费摩达

费摩达本名呼达博勒和部人熙宗悼平皇后父淳直孝友天辅六年从普嘉努追叛寇于铁吕川力战有功天眷二年授世袭明安以后贵拜太尉封徐国公皇统九年悼后死寻海陵弑熙宗欲邀众誉以悼后死非罪于是封呼达为王天德三年卒子呼敦为燕京留守以罪免居中都命驰驿赴之及葬使秘书监纳哈塔椿年致祭【按此下原有呼敦传只记其贪污事今已删附图克坦恭传中】

△图克坦恭

图克坦恭本名舍音海陵后父天眷二年为奉国上将军以告乌舍反事超授龙虎卫上将军为户部侍郎历济南尹会宁牧封谭国公复出为太原尹与熙宗后兄费摩呼敦皆贪污不法呼敦为行军明安历横海崇义军节度使拜富人为父死为行服以分其资选诸明安饶裕子弟为章京规取财物时号闲郎君恭亦自称尝见佛使工绘一佛像赋属县金铸佛卒不铸尽入其家百姓号为金总管朝廷命秉德廉访官吏二人皆被黜自此定禁外官任所闲杂人条约海陵立复用为会宁牧封王未几拜平章政事海陵谓宰相曰恭为相朕非私之今闻车国大事凡有恭所言卿等何一无取岂千虑无一得乎温敦思忠举数事对曰某事本当如此恭辄以为如彼皆妄生异议不达事宜累朝宰相未有如此专恣者海陵默然恭兄定格尚太祖长女乌噜死无子以季弟子扎拉为后恭谋取其家财强纳乌噜为室而不相能恭妾呼达得幸于图克坦后与乌噜不协乃谮于海陵言乌噜怨帝杀其兄宗敏有怨望语会韩王亨改广宁尹诸公主宗妇往贺其母乌噜以言慰亨母呼达亦以为指斥海陵使萧裕鞫之无左验皆不敢言遂杀乌噜恭因夺扎拉家财以乌噜有怨望语

恭不奏免官俄复为司徒拜太保再进太师封梁晋国

王贞元二年九月从猎顺州卒赐谥曰忠正隆闲改封齐国公大定闲降特进巩国公所夺家财皆追正之 【按此下原有乌库哩富勒呼传

无事实足银今删】

△唐古德温

唐古德温本名阿里上京率河人曾祖实库从太祖平拉必玛察领穆昆祖特伯烈从伐辽攻宁江泰州有功父达兰尚康宗女从宗望收

平州遇敌兵甚众战败之授行军明安厯与平临海等军节度使卒德温善射尚睿宗女楚国长公主天眷三年授宣武将军皇统元年从宗弼

南征善突战迁广威将军累迁定远大将军兵部尚书出为横海军节度使延安尹兼鄜延路兵马都总管世宗即位封道国公为殿前都点检

驸马都尉大定二年以其父祖功授安春明安所管世袭穆昆三年世宗出猎拜天于北郊语以扈从军士二千饮食刍秣恐扰百姓使严为约

束分给钱一万贯四年进太子太傅卒十八年追录前后功授其长子驸马都尉鼎世袭西北路摩哩山明安 【按此下原有乌库哩尼玛哈

传其祖和勒端常追辽主郟夏兵尼玛哈尚睿宗女冀国长公主仕终广宁尹嗜酒废政无事迹足录又有富察阿古岱传累尚海陵姊辽国邓

国长公主亦无事迹今并删】

△李石

李石字子坚辽阳人先世仕辽为宰相高祖仙寿尝脱辽主之舅于难赐辽阳及汤池地千顷父绰尔齐为辽桂州观察使其女以士族选

入睿宗邸生世宗是为贞懿皇后石敦厚寡言器识过人天会二年授世袭穆昆为行军明安睿宗为右副元帅引置军中属之宗弼八年除礼

宾副使转洛苑副使十五年 【按熙宗本纪及续通纲目皆作天会十五年废刘豫置行台尚书省于汴史传误作天眷元年今据改】 置行

台省于汴石为汴京都巡检使累官景州刺史海陵营建燕京宫室石护役皇城端门及迁都入见海陵指石曰此非葛王之舅乎葛王谓世宗

也未几除兴中少尹石知海陵忌宗室秩满托疾还乡里世宗留守东京海陵使副留守高存福伺察之知军李富色克知存福谋以告世宗石

时留东京因劝世宗先除存福然后举事世宗从之大定元年以定策功为户部尚书拜参知政事阿苏杀同知中都留守富察萨勒扎遣使奉

表东京而羣臣多劝世宗幸上京者石奏曰正隆远在江淮寇盗蠡起万姓引领东血宜因此时直趋中都据腹心以号令天下惟陛下无牵于

众惑帝意遂决即日启行初世宗纳石女后宫至是封贤妃后进封元妃三年户部尚书

梁球 【按梁球字国宝见元好问中州集史传误作

録今改正】 上言大定以前官吏士卒俸粟支帖真伪相杂请一切停罢石买革去旧帖下仓支粟仓司不敢违与以新粟事闻帝以问梁球

对不以实命尚书左丞翟永固鞫之球削官西阶石罢为御史大夫久之封道国公六年帝幸西京石与少詹事乌库哩萨哈守卫中都宫阙诏

曰京师巡御不可不严近都明安内选士二千人巡警仍给口豢刍粟七年拜司徒兼太子太师安化军节度使图克坦子温赃滥不法石劾奏

之一日帝谓石曰御史分别庶官邪正卿等惟劾有罪而未尝举善也宜令监察分路刺举善恶以闻石司宪既久年寢高御史台奏事有在制

前断定乞依新条改断者帝谓曰卿年老矣不能久居此若能举一二善士亦不负此职也十年 【按世宗本纪大定十年正月申戌以司徒

御史大夫李石为大尉尚书令此处误作九年今据改】 进拜太尉尚书令进封平原郡王以太保致仕徙王广平十六年卒谥襄简石以勋戚

久处腹心之寄内廷献替外罕得闻山东河南军民交恶争田不绝有司谓兵为国根本姑宜假借石持不可曰兵民一也孰轻孰重国家所恃

以立者纪纲耳纪纲不明故下敢轻冒惟当明其疆理示以法禁使之无争是为长久之术趣有司拯问自是军民息争北鄙岁警朝廷欲发民

穿堑以御之石与丞相良弼皆曰北俗无定居出没不常惟当以德柔之若徒深堑必当置戍塞北多风沙曾未期年堑已平矣不可疲中国有

用之力为此无益议遂寢世宗在位几三十年尚书令凡四人张浩以旧官完颜守道以功图克坦克宁以顾命石以定策他无及者明昌五年

配享世宗庙庭子献可逵可 【按李石为贞懿后弟金史旧系列传今移入外戚其子献可附传以无事迹从删】

△赫舍哩志宁

赫舍哩志宁本名萨哈连上京和坦人自五世祖太尉罕齐以来与国世为甥舅父萨巴海陵时赐名怀忠为泰州路颜河世袭穆昆转明

安累官开远军节度使志宁沉毅有大略娶梁王宗弼女永安县主皇统闲为护卫海陵以为右宣徽使累迁枢密副使开封尹契丹萨巴反以

志宁为西北面副统与都统白彦敬以北京临潢泰州三路军讨之志宁至北京闻世宗有异志阴结会宁尹完颜富色里利涉军节度使通吉

义等将图世宗而世宗已即位使完颜默音来伐众不肯战乃与彦敬俱降世宗使默音征斡罕志宁以临海节度使都统右翼军斡罕兵败西

走志宁追及于霭■〈雨上松下〉河贼已先渡毁桥梁依岸为阵志宁夹河为疑兵前万户瓜尔佳清臣图克坦和罗从下流暗渡士卒毕济

方食贼奄至志宁力战流矢中左臂战自若贼据上风纵火乘烟势驰击会雨作火乃熄遂奋击大破之于于元帅默音右监军福寿不急击贼久无功右丞布萨忠义请自讨贼而志宁击贼有功帝以忠义代默音志宁代福寿封定国公使富察通至军中宣谕之贼略懿州果陷灵山同昌惠和【按金史地理志北京路有惠和县本传讹为庆和今改】三县睥睨北京会土河水涨贼不得渡乃西趋三韩县志宁方追蹶之元帅忠义与贼遇于花道车颇失利贼见志宁踵其后遂西走是时诸将欲止军勿追志宁获贼候人知贼自选精锐与老小辎重分道期山后会集可击其辎重忠义以为然遂过伊玛岭进及泉岭西陷泉贼见左翼据南冈为阵不敢犯右翼万户乌雅扎拉击贼少却志宁与瓜尔佳清臣等击之贼大破涉木走斡罕母苏尼举营由罗和冈西去追及之尽获其辎重俘五万余人【布萨忠义传作俘生口三十万】杂畜不可胜计部族皆降斡罕走奚中至七渡河复败之贼过浑岭入奚中志宁获贼将硕和卓许以官赏纵之归约以捕斡罕自效硕和卓既去见斡罕秘不言见获事乃反闲奚人于斡罕曰陷泉失利奚人有贰志不可不察时斡罕屡败其下累心硕和卓乃与贼帅锡勒塔执斡罕诣右都统完颜思敬降志宁等追捕余党贼悉平入朝为左副元帅经略宋事大定二年志宁驻军睢阳使完颜旺祥复取蔡州完颜襄拔颍州移牒宋枢密使张浚使衣皇统以来旧式时宋得斡罕党人瓜里扎巴用其谋攻灵璧虹县都统奚托卜嘉叛入宋三年瓜里等谋曰北人恃骑射今夏月久雨胶解弓不可用故李世辅与之来攻宿州归德尹珠嘉苏色宿州防御使乌凌阿萨喇万户温特赫苏赫费摩罗索不俟大军辄出战由是军败城陷世辅得志日与瓜里扎巴置酒高会志宁以精兵万人自睢阳趋宿州世辅闻志宁军少易之五月志宁将至宿州令从军尽执旗帜驰州西为疑兵三明安兵驻州南志宁自以大军驻州东南扼其归路世辅先击东南军以步骑数万皆执盾背城为阵外捍以行马使别将兵三千出东门欲自阵后攻志宁军万户芬彻击败之右翼万户瓜尔佳清臣为前行撤毁行马短兵接战世辅军乱诸将乘势追杀至城下是夕世辅尽按败将将斩之其统制常吉惧而来奔尽得城中虚实明日世辅悉兵出战骑兵居前志宁麾诸军力战世辅复大败走者自相蹈藉争城门而入门填塞缘城而上金军自濠外射之皆堕死隍闲杀骑士万五千步卒三万余人世辅乘夜脱走明日瓜尔佳清臣张师忠追及世辅斩首四千余赴水死者不可胜计获甲三万他兵仗甚众帝以御服金线袍玉吐鹞宾铁佩刀使伊喇道就军中赐之凡有功将士明安穆昆并迁

赏诏志宁曰卿虽年少前征契丹战功居最今复破大敌朕甚嘉之宋人复议和志宁还军睢阳帝以御服玉佩刀通犀御带赐之五年志宁驻军南京五月召至京师拜平章政事左副元帅如故复还军六年二月还京师拜枢密使七年以第十四女下嫁志宁子诸神努九年拜右丞相十一年代宗叙北征既还入见封广平郡王进封金源郡王十二年卒谥武定十五年图像衍庆宫帝尝语宰相曰志宁临敌身先士卒勇敢之气自太师梁王未有如此人者也明昌五年配享世宗庙庭 【按赫舍哩志宁及布萨忠义皆世为国戚金史旧系列传今并移入外戚】

△布萨忠义

布萨忠义本名乌哲上京博勒和河人宣献皇后侄元妃之兄也高祖斡喇布曾祖璜都祖呼兰父博啰国初世袭穆昆博索路统军使忠义魁伟长髯喜谈兵有大略年十六领本穆昆兵从睿宗定陕西射中宋大将宋兵遂溃由是知名师府承制署为穆昆宗弼再取河南荐为明安攻冀州先登攻大名府以本部兵力战破其军十余万从宗弼渡淮攻寿庐等州领亲军万户超宁远大将军承其父世袭穆昆皇统四年除博州防御使公余学女真字及古算法阅月尽能通之在郡不事田猎燕游郡中翕然称治及考郡民诣阙愿留诏从之累迁西北路招讨使入为兵部尚书布萨呼图尝与海陵篡立恃势陵傲同列忠义因会饮众辱之海陵不悦出为震武军节度使火山贼李铁枪乘署来攻忠义从一骑迎击之射杀数人贼乃退改临洮尹兼熙秦路兵马都总管阅再考徙平阳尹再徙济南尹以本官为汉南路行营副统制伐宋克通化军世宗立入朝拜尚书右丞伊喇斡罕僭号兵久不决忠义请曰契丹小寇不时殄灭致烦圣虑臣愿効死力除之世宗大悦拜平章政事兼右丞元帅封荣国公诏曰军中将士有犯连职之外并以军法从事有功者依格迁赏并诏诸将士同心戮力无或弛慢忠义至军贼陷灵山同昌惠和等县结阵西行忠义追之及于花道宗亨为左翼宗叙为右翼与贼夹河阵贼渡河先攻左翼偏败右翼救之贼引去斡罕乃以精锐自随以羸兵护其母妻輜重由别道西走期于山后会集忠义追及于诺尔岭西陷泉时昏雾四塞嗒步莫覩物色忠义祷奠已昏雾廓然及战忠义右据南冈为偃月阵右迤而北大败之获其弟诺尔俘生口三十万获杂畜十余万车帐金珍以巨万计悉分诸军贼走趋奚地遣将追蹶至七渡河又败之既踰浑岭复进军袭之降者相属于路斡罕就执契丹平章京师拜尚书右丞相改封沂国公时宋孝宗立虽尝遣使来而欲用敌国礼又用扎巴计攻取泗寿等州大定二年诏忠义以丞相总戎事居南京节制诸将忠义至

南京简阅士卒分屯要害戒诸将严守备使左副元帅志宁移牒宋枢密使张浚其略曰可还侵地各守画定疆界凡事一依皇统以来旧约帅府亦当解严宋宣抚使张浚复书志宁曰疆场之一彼一此兵家之或胜或负何常之有当置勿道谨遣官寮敬造麾下议之是时已复泗寿邓州忠义使将士择善水草休息且牧马俟来岁取淮南初世宗诏诸将由泗寿唐邓三道进发宋人闻之即自方城叶县以来烧夷田野使无所刍牧忠义命唐邓道军刍牧许女闲三年忠义入奏事遂以丞相兼都元帅无何还军中忠义与宋相持日久虑夏久雨弓力易减豫选劲弓万于别库及赴阙议事宋将李世辅果掩取灵壁虹县及宿州忠义使人还汴发所贮劲弓给志宁军遂大捷竟复宿州忠义还以书责宋宋同知枢密院事洪遵计议官卢仲贤与志宁书约为叔侄国归侵地忠义驰奏请定书式诏谕之曰若宋人归疆岁币如昔可免奏表称臣许世为侄国忠义凡七贻书宋人宋人他托未从忠义移大军压淮境遣志宁率偏师渡淮取盱眙濠庐和滁等州宋人惧而世宗意天下厌苦兵革思与百姓休息诏忠义度宜以行四年正月忠义奏请俟秋凉进发诏从之宋使胡昉以右仆射汤思退书来宋称侄国不肯加世字忠义执昉留军中答其书使仗以闻诏曰行人何罪遣胡昉还国边事从宜措画及图克坦克宁取楚州世宗下诏进师于是宋知枢密院周葵同知枢密院事王之望与忠义书【按周葵王之望书据金史交聘表云系与忠义书而本传脱载今据增辑】一一如约和议始定宋遣试礼部尚书魏■〈木巳〉崇信军承宣使庸湑充通问国信使取到宋主国书式并国书副本宋世为侄国约岁币二十万两匹国书仍书名再拜不称大字五年正月魏■〈木巳〉康湑入见其书曰侄宋皇帝眷谨再拜致书于叔大金圣明仁孝皇帝阙下魏■〈木巳〉还复书叔大金皇帝不名不书谨再拜但曰致书于侄宋皇帝不用尊号不书阙下和好已定罢兵诏天下以左副都点检完颜仲为报问国信使太子詹事杨伯雄副之忠义奏官军一十七万三千三百余人留马步军一十一万六千二百屯戍帝以屯戍太多命选马一万二千选军一万五千及签军一万与旧军通留六万以宋国进到岁币悉赏诸军三月诏丞相忠义先还左副元帅志宁右监军宗叙留驻南京余官非急用者并勒还任忠义朝京师帝谕之曰宋国请和偃兵息民皆卿力也拜左丞相兼都元帅六年卒谥曰武庄忠义动由礼义谦以接下尤敬儒者善御将士能得其死力及为宰辅知无不言十一年诏曰故左丞相忠义族人及昭德皇后亲族人材可用者左副点检乌库哩元忠体察以闻二十一年帝思忠义功勒铭

墓碑泰和元年图像衍庆宫配享世宗庙庭子揆

揆

揆

揆本名临喜少以世胄选为近侍奉御大定十五年尚韩国大长公主擢器物局副使特授临潢府路哈沙阿河世袭明安厯殿前左卫将军罢职寻起为滦州刺史改蠡州入为兵部侍郎大理卿刑部尚书章宗即位出为泰定军节度使改知临洮府事以政迹闻升河南路统军使陕西提刑司举揆刚直明断狱无冤滞禁戢家人百姓莫识其面积石洮二州旧寇皆遁商旅得通于是进官一阶仍诏褒谕明昌四年坐尝私誉永蹈免死除名未几起为同知崇义军节度使事以战功迁西北路副招讨复以战功升西南路招讨使兼天德军节度使复出御边尝转战出塞七百里至齐呼勒图而还诏褒谕迁一官仍许其子安贞尚邢国长公主揆沿徼筑垒穿堑连亘九百里营栅相望烽候相应人得恣田牧北边遂宁召拜参知政事改授中都路额特赫格们世袭明安进拜尚书右丞寻出经略边事还拜平章政事封济国公泰和五年宋人渝盟以揆为河南宣抚使揆至汴搜练将士军声大振时谍者言宋增戍本虞他盗而宋三省枢密移牒又皆以镌点边臣为辞【按金史本纪载金罢宣抚是系为宋所欺本传乃云宋人服罪而罢司未得其实今据增辑】于是罢宣抚司召揆还六年宋人复数路来侵取泗州及灵壁围寿春命揆为右副元帅以讨之揆至军前分遣将士御敌复取临淮蕲县而符雕寿春之围亦解去帝再遣使持诏褒谕赐赉甚厚宋人既退帝欲进讨乃召揆赴阙宴于庆和殿特收其次子宁寿为奉御密授以成算俾还军十月【按章宗本纪泰和六年十月庚戌平章政事布萨揆总诸道军南伐考宋元通鉴及完颜纲穆延萨克萨传皆同此误作十一月今据改】揆总大军南伐分兵为九路进揆以行省兵三万出颍寿至淮宋人拒水南揆密遣人测淮水惟八迭滩可涉即遣鄂屯骧扬兵下蔡声言欲渡宋师何汝砺姚公佐悉锐师屯花靛以备揆乃遣右翼都统完颜萨布先锋都统纳喇邦烈潜渡八迭驻南岸揆麾大军直压其阵敌皆溃走遂进夺颍口下安豊军攻合肥取滁州尽获其军实帝遣使谕之曰前得卿奏我军屡捷度彼之计乞和为上如使奉表称臣岁增贡币缚送贼魁还所俘掠一如所谕亦可罢兵既而宋帅邱密果奏奏书乞和揆谕而遣之复进军围和州敌以骑万五千驻六合揆侦知之即以右翼掩击斩首八千级进屯瓦梁河以控真扬诸路乃整列军骑沿江上下毕张旗帜于是江表震恐宋真州兵数万保河桥复遣统军赫舍哩子仁往攻之分军

涉浅潜出敌后敌见之大惊不战而溃斩首二万余级
生擒其骁将刘佺常思敬萧从德莫子容遂下真州宋复遣陈璧告和揆以乞辞未诚徒
欲缓师却之宋人乃决巨胜成公雷塘渚积水以为阻
尽焚其庐舍储积过江遁去揆以方春池湿不可久留遂振旅而还次下蔡遇疾七年二
月卒谥武肃揆体刚内和与物无忤临民有惠政其为
将也军门镇静赏罚必行与士卒同甘苦人乐为用所至皆因粮于敌无馈运之劳故为
一代名将

△乌凌阿晖

乌凌阿晖本名摩啰欢明德皇后兄天眷初充护卫以捕宗盘商隼功授忠勇校尉
累除布沙堪羣牧使谨畜牧不事游宴孳产蕃息进秩
改特门羣牧使世宗即位除中都兵马都指挥使将遣使于宋以晖尝私用官钱五百贯
乃数其罪而罢之遣高忠建往迁都点检兼侍卫亲军
副都指挥使卒以第三子天锡世袭纳琳河明安亲管穆昆

△富察鼎寿

富察鼎寿本名和尚上京和硕河人钦怀皇后父沈厚有明鉴通契丹汉字长于吏
事尚熙宗女郑国公主累官器物局使大定二年加驸
马都尉出为蠡州刺史浚州防御使有惠政历泰宁横海军节度使入为左右宣徽使授
中都路温图瑋山明安和硕穆丹世袭穆昆改河闲尹
号令必行豪右屏迹有宗室居河闲侵削居民奏徙其族平州郡内大治卒于官明昌三
年赠太尉越国公鼎寿既世连姻戚女为皇后长子希
卜苏凡三尚定国景国道国公主宠遇如此未尝以富贵骄人当时以为外戚之冠

△图克坦思忠

图克坦思忠字良弼本名宁庆曾祖萨布尚景祖女从太祖伐辽战歿于临潢之浑
河父赛音尚熙宗妹为吉尔丹羣牧使斡罕扰北边与
战死之赠金吾卫上将军思忠赋性宽厚通敏有才颇通经史世宗在潜邸抚养之年十
二从在济南与姻戚公子出游有醉人腰弓矢策马突
过诸公子怒欲鞭之思忠曰醉人昏昧可足责其人行数十步忽执弓矢思忠恐欲伤人
驰夺其弓弛而还之事闻嘉有识量由是常使侍侧尚
皇第二女唐国公主世宗即位从至中都军国庶事补益良多 大定元年拜殿前左卫将
军右驸马都尉卒赠骠骑上将军仍授其子铎武功将
军世袭中都路浑图瑋穆昆 【按此下原有图克坦绎乌凌阿复二传绎尚熙宗女溍国
公主仕终宁海军节度使复尚世宗女宛国公主仕
终绛阳郡节度使并无事迹足录今删】

△乌库哩元忠

乌库哩元忠本名额哩页其先上京特卜库人父额琳尚太祖女毕国公主元忠幼秀异世宗在潜邸以长安妻之后封鲁国大长公主从海陵南伐世宗即位太保昂遣元忠朝于行在授定远大将军擢符实郎逾之曰朕初即位亲密无如汝者侍从宿卫宜戒不虞迁殿前左卫将军从世宗猎帝欲射虎元忠谏止之转左右副都点检坐家奴结揽民税免官大定十一年复旧职明年升都点检迁知大兴府事有僧犯法吏捕寘狱皇姑梁国大长公主属使释之元忠不听世宗嘉之秩满授吏部尚书以其子谊尚显宗长女薛国公主十八年【按谊传尚主在二十一年此载在十八年以前又谊传作广平郡王加封邺国长公主今谊传已删附本传之末而识其互异于此】擢御史大夫授萨巴山世袭穆昆以左丞相赫舍哩良弼荐拜平章政事封任国公进右丞相策论进士之科设元忠赞成之世宗将幸会宁元忠谏不听出知真定府寻复相位世宗欲辇上京城元忠曰此邦遭正隆军兴百姓凋敝陛下休养二十余年尚未完复况士性疏恶辇之恐难经久风雨摧坏岁岁缮完民将益困矣驾东幸久未還元忠奏曰銮輿驻此已阅岁仓储日少市买渐贵禁卫暨诸局署多逃者有司捕寘诸法恐伤陛下仁爱世宗嘉纳之寻出为北京留守移知河闲改知彰州府卒元忠素贵性粗豪而内深忌又所至不能戢奴仆世以此为警云子谊累官御史大夫至宁初以谋逆伏诛

△唐古贡

唐古贡本名达格太傅阿里子尚世宗第四女吴国公主授驸马都尉累迁兵吏礼三部尚书会大理卿阙左丞张汝弼举西京副留守杨子益法律详明帝曰子益虽明法而用心不正岂可任之以分别天下是非大理须用公正人右丞钮祜禄噶达尔举贡可任遂以命之大定二十八年拜枢密副使章宗立为御史大夫会生日宴客犯夜禁解职寻复枢密副使进枢密使封莘国公改封萧再上表乞退优诏许之泰和二年卒【按此下原有乌凌阿琳传无事实足录今删】

△图克坦公弼

图克坦公弼本名锡林河北东路算卓和明安人父富均努尚熙宗女终武定军节度使公弼尚世宗女息国公主为器物局直长转副使章宗秋山射虎虎怒突而前侍卫皆避去公弼不动虎亦随毙诏责侍卫而慰谕公弼除滨州刺史累迁知大名府事时伐宋军兴有司督逋租及牛头税甚急公弼奏军士从戎民亦疲敝可缓征以纾民从之大安初知大兴府事献武清盗疑其有冤已而果获真盗岁余拜参知政事至

宁初拜平章政事封定国公贞佑初进拜右丞相罢知河中府历定国军节度使同判大睦亲府事兴定五年卒谥恪愿

△图克坦铭

图克坦铭字国本赐名重泰祖贞别有传父特进涇国公【按图克坦贞三子多博和慎思实都尔固章宗时俱赠镇国上将军铭为贞之孙而传但载其父为特进涇国公亦系封爵未详何人之子】铭性重默寡言粗通经史事母尽孝大定末充奉御明昌中累官兵部郎中改右卫将军出为永定军节度使移河东北路按察使转运使大安三年改知大名府就升河北东西大名路安抚使大名荐饥重困铭乞大出交钞以振之崇庆初移知正定府复充河北东西大名路宣抚使至宁元年九月奉迎宣宗于彰德府拜尚书右丞出为北京留守以路阻不能赴贞佑二年卒

△图克坦肆喜

图克坦肆喜哀宗皇后弟天兴二年正月辛酉夜【按天兴二年史文误作正大九年辛酉误作丁酉下文丙寅丁卯误作壬寅癸卯按正大九年哀宗尚未幸归德何缘有迎两宫之事是年正月丙午朔以干支推之月中并无丁酉日本纪载崔立之变在戊辰日此处作癸酉之明日俱误今并据本纪改】与内侍马福惠至自归德时河朔失利京城犹未知二人被旨迎两宫入奏二相及乌克逊纳绅谏不可行肆喜作色曰我奉制旨迎两宫有敢言不行者当以别敕从事矣二相不复敢言行议遂决丙寅夜两宫骑而出至陈留见城外火起疑有兵驰还丁卯入京顿肆喜家少顷还宫明日崔立变肆喜珠喜塔克实布塔克实布之父耀珠肆喜妻完颜氏以忠孝军九十七骑夺门而出至归德帝惊问两宫何如二人奏京城军变不及入宫帝曰汝父汝妻独得出耶下狱斩于市

钦定续通志卷五百六

●钦定续通志卷五百七 外戚传七

外戚传

元

○元

（臣）等谨按元史无外戚传后妃表仅载其氏多不详所自出无可征信今考列传中如托音色辰从太祖有功约以世世生男尚公主生女为皇后故一代元后鸿吉哩氏为多他如台哈布哈布图纒勒噶和琳等皆椒房懿戚传有明文至布页赫虽非后族然子孙世为公主抑亦帝室姻娅当以类附今汇集为一卷移附类传以符郑志体例云

托音色辰 布图【纛勒噶和琳】 布页赫【奇尔 济苏】 台
哈布哈
托音色辰
布图
布页赫
台哈布哈
△托音色辰

托音色辰姓布斯格尔鸿吉哩氏世居朔漠本名托音从太祖起兵有功赐名托音色辰女布尔特格勒律太祖光献翼圣皇后【按元秘史太祖九岁时烈祖挈之同往其舅氏处求婚途遇托音色辰托音色辰以梦得吉兆遂请妻以女烈祖以从马为聘比归而烈祖卒于越九年太祖寻至其家成礼焉】子阿禅从太祖征伐凡三十二战皆有功赐号国舅阿禅诺延封河西王【按孟琪蒙古备录元初功臣以穆呼哩为首次则阿禅封尚书令传失载】有旨鸿吉哩氏生女世以为后生男世尚公主又赐所俘获军民仍授万户以领之阿禅卒追封济宁王谥忠武【公主表称阿禅为鲁忠武王】子旺泌授万户尚睿宗女伊苏布哈公主旺沁卒弟纳沁尚太祖孙女色彻肯公主【按传失载今据公主表增】袭万户奉旨伐宋攻钓鱼山从世祖南涉淮甸又率兵平山东济兖单等州中统二年与诸王北伐以其子噶海托欢额埒春等十人自从与额埒布格之党伯尔克巴尔斯等战追北至伯尔克图复战自旦及夕斩首万级及卒子额埒春袭万户尚鄂勒哲公主公主薨继尚囊嘉特辛公主至元十四年卒无子弟特穆尔袭万户二十四年纳颜叛从帝亲征以功封济宁郡王二十五年诸王哈坦多罗千叛与诸王率兵讨之歼其众帝赐名阿齐图诺延以旌其功寻卒子二人长曰多阿克巴拉次曰僧格巴拉皆幼以其弟曼济台袭万户亦尚囊嘉特章公主成宗即位封为济宁王【诸王表曼济台油济宁王进封鲁王】奉旨率本部兵讨叛王海都都勒斡行伍未定单骑突入阵中敌兵惊扰遂大捷有旨令总蒙古军民官辅武宗以镇北方囊嘉特章公主薨继尚裕宗女纳木喀巴勒公主曼济台卒大德十一年阿齐图诺延长子多阿克巴拉袭万户尚僧格喇实公主六月封大长公主多阿克巴拉加封鲁王【按诸王表作袭封鲁王此称加封鲁王互异】至大三年卒嫡子阿哩雅实哩甫八岁袭万户四年袭封为王尚多尔济巴勒公主元统元年卒僧格巴勒者阿哩雅实哩之叔也自幼奉世祖旨养于鄂克沁公主所是为布扎尔驸马后袭统其本部民四百户成宗时尚博诺公主至顺闲封

郅安王元统二年加封鲁王 【诸王表作元统元年
袭封鲁王】 卒此皆以驸马袭封王爵者也苏尔呼图克者亦阿禅之子以从征功在太
祖朝遥授左丞相为千户其子曰阿哈驸马当宪宗朝
尝率兵破除州以功袭父官有托里者亦阿禅裔孙也世祖授本藩千户令守朔土之吉
鲁尔二十四年从族父阿齐图诺延征叛王纳颜有功
赐号巴图尔托里孙满济勒噶尚博迪苏公主卒弟博罗特穆尔罗封懿德王有绰哈者
阿禅次子伯克之裔孙尚托欢巴图公主仁宗朝封安
远王以兵守莽赉有达尔罕者亦托音色辰裔孙以从军功世祖亦赐以巴图尔之号其
子曰布扎尔从征纳颜禽其赏金嘉努后有博硕者即
其孙也又阿禅之孙纳罕尚太宗苏呼肯公主和和之孙布扎尔尚鄙克沁公主又托音
色辰诸孙有名托罗海者尚布尔罕公主继尚库库楞
公主此皆尚公主为驸马者也凡其女之为后者自光献翼圣皇后以降宪宗贞节皇后
讳呼图克台及后妹约索尔皆阿禅从孙孟克沁之女
世祖昭睿顺圣皇后讳彻伯尔阿禅之女其讳特古伦者阿禅孙托里之女讳诺尔布册
继守正宫者纳沁孙僊童之女成宗贞慈静懿皇后讳
实哩达喇额埒春之女顺宗昭献元圣皇后讳塔济武宗仁宗尊为皇太后延佑七年又
加尊号太皇太后则阿禅孙呼图克特穆尔之女武宗
宣慈惠圣皇后讳珍格托里子班巴尔之女其讳苏喀实哩者阿禅从孙哈尔吉之女泰
定皇后讳巴拜哈斯阿禅孙鄂兰彻尔之女 【按后
妃表称巴拜哈斯为兖王满济勒噶之女考后妃传与此相符当是表误】 其讳巴罕讳
苏喀达喇者皆托里孙满济勒噶之女文宗皇后讳布
达实哩鲁王多阿克巴拉之女此则鸿吉哩氏之为后者也初鸿吉哩氏族居于库呼勒
温都尔肯德呼穆尔额尔古纳河之地太祖分赐阿禅
及其弟和和策等农土 【原注农土犹言经界也】 使各居之至至元七年额埒春万
户及其妃囊嘉特章公主请就所受达哩海子本藩驻
夏之地建城邑以居帝从之遂名其城为应安府二十一年改为应昌路元贞元年曼济
台复与公主请于帝以应昌路东七百里驻冬之地勑
建城邑复从之大德元年名其城为全宁路鸿吉哩之分邑得任其陪臣为达噜噶齐者
有济宁路及济兖单三州巨野郅城金乡虞城碭山丰
县肥城任城鱼台沛县单父嘉祥磁阳宁阳曲阜泗水一十六县此丙申岁之所赐也又
汀州路长汀宁化清流武平上杭连城六县此至元十
三年所赐也又永平路滦州卢龙迁安无宁昌黎石城乐亭六县此至大元年所赐也又
平江稻田一千五百顷则至大二年所赐也其应昌金
宁等路则自达噜噶齐总管以下诸官属皆得专任其陪臣而王人不与焉此外复有王

傅府自王傅六人而下其羣属有钱粮人匠鹰房军民
军站营田稻田烟粉千户总管提举等官以署计者四十余以员计者七百余其五户丝
金钞之数则丙申岁所赐济宁路之三万户至元十八
年所赐汀州路之四万户丝以斤计者岁二千二百有奇钞以锭计者岁十千六百有奇
此则所谓岁赐者也

△布图

布图伊奇喇斯氏善骑射太祖尝潜遣珠鲁卜齐岱出使至额尔古纳河布图知其
为帝所遣值日暮因留止宿杀羊享之复假以良马及
还有加礼珠鲁卜齐岱具以白帝帝大喜妻以皇妹特穆尔既而察察尔岱展楚珙托音
等以兵三万入寇布图遣博啰岱摩哩托克托来告乃
与哈喇扎拉温都尔哈纳等讨托音等掠其辎重降其民奈曼叛帝召布图以兵至大败
之皇妹薨复妻以皇女噶沁必济 【按蒙古备录太
祖有女七人今考公主表止有三人噶沁必济其一也】 而命哈喇巴图之子伊克呼喇
图为之侍哈喇巴图曰吾儿岂能为人臣仆宁死不为
也帝令布图与之敌战于安图河刺杀伊克呼喇图哈喇巴图走渡卓沁河擒之尽杀其
众从太师国王穆呼哩略地辽东西以功封冠懿二州
【按元秘史太祖戊寅岁布图以二千骑从征金传未叙及】 从征西夏病卒进封昌王
【按诸王表和琳驸马始寺昌王今传称布图始
受封而其子纛勒噶孙扎古喇沁曾孙和琳以次递袭彼此互异】 谥忠武子纛勒噶袭
爵

纛勒噶

和琳

纛勒噶

纛勒噶娶皇子库春女安图公主生女是为宪宗皇后 【按本纪及后妃表宪宗四
年不载有伊奇哈斯氏或当是未经册立】 初事太
宗与穆呼哩取嘉州遣巴图尔罕卓沁恰来献捷帝曰若父宣力国家今纛勒噶克光前
烈召至中都以疾卒子扎古喇沁从定宗出讨万努有
功太宗命亲王阿齐台以女伊逊展公主妻之袭封昌王卒谥忠靖 【公主表作谥武靖
】 扎古喇沁有子二人长伊埒台娶皇子赛音珠卜
女哈达罕公主生图占台与纳颜战有功次和琳

和琳

和琳尚宪宗女巴雅尔公主后托和特穆尔叛世祖命和琳与锡里济等讨败之帝
复令尚宪宗孙女布噶齐公主宋平封广州纳颜沙喇
哈喇叛世祖亲征色彻肯等与哈喇罕屡战帝召和琳至值色彻肯等战于沁和实袞之

地哈喇罕众甚盛【按原传上文作哈喇罕此以下俱作哈达罕盖因前传哈达罕公主而误也今悉改正】和琳以兵二百迎敌败之哈喇罕等走度獯河还其巢穴踰年帝命和琳复征之其众皆遁去余百人逃匿山谷和琳即率兵二百徒步追之色彻肯止之不听往杀其众又踰年复往征之与哈喇罕遇于乌拉河和琳夜率千人潜入其军尽杀之卒追封昌王谥忠宣子阿实克事成宗都勒斡叛于海都帝遣晋王噶玛拉并武宗帅师讨之阿实克射中其膝擒杀甚多都勒斡号哭而遁封为昌王【按阿实克封昌王表称在延佑四年此作成宗时封考成宗本纪亦无明文续通鉴纲目则仅载其射膝事而不言封爵识以阙疑】仁宗朝赐以宁昌县税入阿实克尚成宗女伊埒哈雅公主复尚宪宗曾孙女满达着公主及卒子巴喇实哩袭封昌王【按公主表巴喇实哩子萨兰多尔袭封昌王尚伊噜勒公主本传失载】和琳从弟布哈尚世祖女乌尔戡公主其弟索隆噶娶皇子莽噶拉女钮抡公主生女是为武宗仁献章圣皇后实生明宗

△布页赫

布页赫【按元史旧作阿勒古期托克塔古哩传今因其子布页赫实始尚公主附列外戚故改作布页赫传而仍以其父冠于传首】翁观部人系出沙陀鴈门之后世为部长至其父阿勒古斯托克塔古哩时有西北奈曼国王迪延汗遣使来约欲相亲附以同据朔方部众有愿从者阿勒古斯托克塔古哩弗从执其使来告太祖遂约同攻迪延河阿勒古斯托克塔古哩先期至既平奈曼从下中原复为向导南出界垣【按元秘史太祖元年封功臣授阿勒古斯托克塔古哩为千户本传未载】太祖使归镇本部为其部众昔之异议者所杀长子巴延实保并死之其妻阿里哈携布页赫与侄镇国夜遁因避地云中太祖购得之赐与甚厚乃追封阿勒古斯托克塔古哩为高唐王阿里哈为妃以布页赫尚幼先封镇国为北平王镇国卒子尼古尔岱袭爵尚睿宗女塔玛噶公主略地江淮卒于军【按尼古尔岱诸王表称其由北平王进封郾王与此小异】布页赫幼从攻西域还封北平王尚阿拉克必济公主公主明睿有知略车驾征伐西出尝使留守军国大政谕禀而后行公主之力居多布页赫未有子公主为进姬妾以广嗣续生三子曰准布哈曰阿尔布哈曰珠尔布哈视之如己出布页赫卒追封高唐王谥武毅后加封赵王子准布哈尚定宗长女伊埒默色公主【按公主表准布哈子赵忠烈王薨嘉特台尚琳沁公主囊嘉特台子赵王吗展尚僧格巴拉公主传俱失载】阿尔布哈尚世祖季女伊埒公主中统初总兵讨额呼布格

败扣布哈于阿勒坦和啰海之地三年围李坛于济南

独当一面事平又从征西北败叛王之尝色埒默子崆果啰卒子奇尔济苏摩和纳

奇尔济苏

奇尔济苏

奇尔济苏性勇毅习武事尤笃于儒术经史性理阴阳术数靡不该贯尚裕宗女呼图克台默色公主继何成宗女阿裕尔实哩公主宗王

额布根叛率精骑千余追及之大杀其众额布根以数骑遁去奇尔济苏身中三矢断其发凯还成宗即位封高唐王西北不安请往平之及行

誓曰若不平定西北吾马首不南大德元年夏遇敌于巴雅斯之地大败之擒其将卒百数以献二年秋诸王将帅共议防边咸曰敌往岁不冬

出且可休兵千境奇尔济苏独以为不然严兵以待是冬敌果大至三战三克奇尔济苏乘胜逐北深入险地后骑不继马蹶遂为所执敌诱使

降正言不屈又欲以女妻之乃毅然曰我帝婿也非帝后面命而再娶可乎敌不敢逼后竟以不屈死九年追封高唐忠宪王加封赵王子专幼

诏以弟摩和纳袭高唐王摩和纳才识英伟谨守成业境内又安教养专过于己子至大二年摩和纳加封赵王 【按公主表称赵国大长公

主阿实克图噜适阿尔布哈子郇忠襄王摩和纳诸王表称至大元年袭封郇王此云袭高唐王加封赵王而不言尚公主互异】 即以让专三

年专袭赵王尚晋王女喇特纳巴拉公主一日召王傅托欢司马阿济苏谓曰先王旅殡卜罗荒远之地吾痛心欲无生若请得归葬先莹瞑目

无憾矣二人言之枢密院以闻帝嗟悼久之曰专孝子也即命阿济苏等一十九人乘驿以往至殡所奠告启视尸体如生遂得归葬

△台哈布哈

台哈布哈鸿吉哩氏世为外戚台哈布哈初以世胄入官累迁云南行省右丞历通政使上都留守辽阳行省平章政事至正八年太平为

丞相力荐可大用召入为中书平章政事明年太平罢托克托复相台哈布哈因党于托克托谋欲害太平众由是不平之十二年盗起河南诏

拜台哈布哈河南行省平章政事加太尉将兵讨之未期月平南阳汝宁唐随又下安陆德安等路招降服叛动合事宜军声大振十四年 【

按本纪至正十四年诏台哈布哈率师讨安丰贼本传失载】 托克托以太师右丞相总大兵征高邮寻诏夺其兵柄升台哈布哈本自左丞相

与太尉伊彻察喇枢密知院舒苏代总其兵山东河北诸军悉令节制而台哈布哈颇骄傲不遵朝廷命令军士又往往剽掠为民患十五年监

察御史伊埒呼图克等劾其慢功虐民之罪于是诏夺其职顷之复拜湖广行省左丞相

节制湖广荆襄诸军招捕沔阳湖广等处水陆贼徒会
朝廷复拜太平为中书左丞相台哈布哈意不能平叹曰我不负朝廷朝廷负我矣及击
贼贼且退诸将欲乘胜渡江而台哈布哈反勒反退后
贼犯汴梁守臣请授十往反始率兵往犹按军不进时睢亳太康俱陷边警日急或谏其
进兵台哈布哈大言曰若等毋多言我自有神算也既
而纵军出掠百里之内荡然无遗继又渡师河北声取曹濮遂驻于彰德卫辉 【按本纪
至正十七年台哈有哈兵复大名路并所属州县本
传失载】 俄而曹濮之贼奔窜晋冀大同亦相继不守朝廷两遣重臣授以成算而台哈
布哈恬不为意是时其子寿通以同知枢密院事将兵
分讨山东久无功尝以事入奏语言骄慢帝恶之十八年山东贼愈充斥逼近京畿诏拜
台哈布哈中书左丞相总其兵讨山东既渡河即疏请
太平至军中供给粮饷欲因事害之时参知政事巴延特穆尔张晋等分省山东二人者
尝劾寿通不进兵台哈布哈至则以其馈运不前断遣
之又以知枢密院事鄂勒哲特穆尔为左丞日尝劾其非亦加以失悞专制之罪擅改其
官征至军欲害之事闻廷议喧然而太平以其欲害已
也遂讽监察御史茂济噜海等 【顺帝纪作御史七十等】 劾其缓师拒命之罪自于
帝前力谏之于是诏夺其官爵兵柄安置盖州以知枢
密院事乌兰哈达总其兵台哈布哈闻有诏夜驰诣刘哈喇布哈求救刘哈喇布哈者台
哈布哈故部将也以破贼有功拜淮南行省平章政事
时驻兵保定见台哈布哈求因张乐大宴举酒慷慨言曰丞相有大勋劳天子终不害丞
相我当自往见帝言之哈喇布哈即至京首见太平太
平问其来故具以实告太平曰台哈布哈大逆不道尔敢妄言祸将及尔若能致之来吾
以尔见帝功不细矣哈喇布哈许之还缚台哈布哈父
子送京师未至皆杀之于路 【按台哈布哈元史旧系列传今以其世为外戚移入类传
】

钦定续通志卷五百七

●钦定续通志卷五百八 忠义传一

忠义传

（臣）等谨案唐以后忠义大率死事者居多其有义烈彪炳万死一生虽未陨身
志轻授命者并依史例登之闲有子孙事迹无可析传
旧史所附亦仍其例辽史无忠义门兹从列传采辑金元忠义间有散在列传中者今皆
表而出之以从其类若其居官立朝名节暴着与夫出
身存亡系一代终始死事一节不足以尽之如唐之颜真卿段秀实宋之文天祥之类则
仍依旧史系之列传焉

唐【一】

○唐一

夏侯端 刘感 堂达 吕子臧【马元规】 王行敏【卢
士叟 李玄通】 罗士信 张道源【楚金
】 李育德【李公逸 张善相】 敬君宏【吕世衡】 李安静
高叟【仲舒】 安金藏 王同皎
李愷 卢奕 张介然【崔无波】

夏侯端

刘感

常达

吕子臧【马元规】

王行敏

罗士信

张道源【张楚金】

李育德【李公逸 张善相】

敬君宏【吕世衡】

李安静

高叟【高仲舒】

安金藏

王同皎

李愷

卢奕

张介然【崔无波】

△夏侯端

夏侯端寿州寿春人仕隋为大理司直大业中高祖讨贼河东表端为副端邃数术
密语高祖曰玉床摇帝坐不安晋得岁真人将兴安天
下者其在公乎但上性沈忌宜早为计帝感其言义师兴端在河东吏捕送长安帝入京
师释之引入卧内与语极欢擢秘书监李密之降端请
假节招谕关东乃拜大将军为河南道招慰使即传檄二十余州遣使顺附次谯州会亳
汴降于王世充道塞无所归麾下二千人粮尽不忍委
端去端乃杀马宴众曰我奉王命义无屈公等有妻子徒死无益吾丐若首持与贼以取
富贵众号泣不忍视端亦泣欲自刎争持之乃止行五
日饿死十四三遇贼众溃从者纔三十余人【通鉴作五十余人】遂东走邈■〈
豸豆〉豆以食端持节卧起叹曰平生不知死地乃在此

时河南地悉入世充唯杞州刺史李公逸固守勒兵迎端世充遣人以淮南郡公尚书少吏部印绶召端解所服衣以赠端曰吾天子使宁污贼官耶非持首去不可见即焚书及衣因解节旄怀之置刃于竿间道走宜阳比到其下仅有在者皆体发癯焦无复人状端入谒自谢无功不及危困状帝悯之复拜秘书监出为梓州刺史贞观元年卒

△刘感

刘感岐州凤泉人武德初以骠骑将军戍泾州为薛仁杲所围粮尽杀所乘马啖士而煮骨和木屑自食城垂陷长平王叔良救之贼乃解与叔良出战为贼执【按新旧书叔良传皆云仁杲扬言食尽遣高抚人伪降叔良遣感帅师赴之大战百里细川感为贼执是叔良未曾出战也】还围泾州令感约城中降感给诺至城下大呼曰贼大饥亡在朝暮秦王数十万众且至勉之无苦仁杲怒执感理其半土中驰射之至死詈益甚贼平高祖购得其尸祭以少牢赠瀛川刺史爵平原郡公封户二千谥忠壮诏其子嗣封爵赐田宅焉

△常达

常达陕州陕人仕隋为鹰击郎将尝从高祖征伐命为统军拜陇州刺史时薛举方强达败其子仁杲于宜禄川举遣将件士政给降达不疑士政伺隙劫之并其众归贼举指其妻谓达曰识皇后乎答曰彼瘦老姬何所道举奴张贵又曰亦识我否达瞋目曰若乃奴耳贵忿拔刀逐之赵宏安为蔽捍乃免仁杲平帝见达劳曰君忠节正可求之古人为执士政杀之赐达布帛三百段终陇西刺史

△吕子臧【马元规】

吕子臧蒲州河东人隋大业末为南阳郡丞高祖入京师遣马元规慰辑山南独子臧坚守元规遣士讽晓子臧杀之及炀帝已弑帝更使其婿薛君倩赍诏谕子臧子臧发丧讫然后送款拜邓州刺史封南阳郡公武德初朱粲新蝼子臧率兵与元规并力将击之谓元规曰贼新败上下惶阻一战可禽若迁延其众稍集致死于我不可当也不纳子臧诸以所部兵独进又不许俄而粲得众复张元规婴城子臧扼腕曰谋不见用坐公死矣贼围固会霖雨城坏或劝其降子臧曰我天子方伯且降贼乎乃率麾下赴敌死俄城陷元规亦死元规安陆人

△王行敏

王行敏并州乐平人隋末归高祖拜潞州刺史迁屯卫将军刘武周入并州寇上党取长子壶关刺史郭子武懦不支帝遣行敏驰往既至与子武不叶贼围急储待空乏会有告子武谋反遂斩之州民陈正谦出粟千石济军由

是人自奋贼乃去行敏又败实建德兵于武陟武德四年督兵徇燕赵与刘黑闥战历亭破之既而释甲不设备为黑闥所掩缚致麾下终不屈贼遂斩之时死事者又有卢士叡李玄通

卢士叡

李玄通

卢士叡

卢士叡客韩城隋乱结纳英豪高祖与之旧兵兴率数百人上谒汾阴又使兄子谕降剧贼孙华与刘宏基败隋将桑显和于饮马泉累擢右光禄大夫为瀛州刺史黑闥遣轻骑破其郛士叡拒战众见亲属累累乃溃士叡为贼禽欲使说下城堡不从见杀

李玄通

李玄通蓝田人为隋鹰扬郎将高祖入关率所部自归拜定州总管为黑闥所破爱其才欲为将不听囚之故吏有饷饮馈者遂纵饮谓守者曰吾能剑舞可借刀守士与之曲终仰天太息曰大丈夫抚方面不能保所守尚何视息耶乃溃腹死帝为流涕擢其子伏护大将军

△罗士信

罗士信齐州历城人隋大业时长白山贼王薄左才相孟让寇齐郡通守张须陀率兵击贼士信年十四请自效须陀疑其不胜甲士信怒被重甲左右鞬上马顾盼须陀许之击贼潍水上阵纔列执长矛驰入贼营刺杀数人取一级掷之承以矛戴而行贼皆眙惧无敢抗须陀乘之大破贼士信逐北每杀一贼辄劓鼻纳诸怀暨还验以代级须陀叹服遗以所乘马凡战须陀先登士信副以为常炀帝遣使图其阵法后须陀为李密所杀士信与裴仁基归李密署总管俾讨王世充身被重伤见获世充爱其才厚遇之后得密将邴元真等士信耻与伍率所部千余人来降【通鉴士信有骏马世充兄子欲之世充夺以赐士信怒会世充遣士信寇谷州士信遂降】高祖拜陕州道行军总管因谋世充师次洛阳攻千金堡堡有恶言询军士信怒夜遣百人载婴儿啼噪堡下诈言自东都来奔罗总管既而阳悟曰非也此千金堡耳因散去堡兵开门追掠士信伏入屠之无遗类贼平授绛州总管封郟国公从秦王击刘黑闥洛水上得一城遣士信据守贼悉众攻方雨雪救军不得进城陷黑闥欲用之不屈而死年二十八【旧书作年二十通鉴考异云士信始从张须陀击王薄等时年十四若死年二十八则在大业四年于时王薄未为盗年二十则在大业十二年是岁须陀死按通鉴载击王薄事在大业九年城陷被执在武德五年则死时二十三岁也年皆不合今姑

从新书而附议之】王隐悼购其尸以葬谥曰勇初士信为仁基所礼东都平葬之北邙以报德曰我死当墓其侧至是如所志

△张道源 【张楚金】

张道源并州祁人名河以字行年十四居父丧以孝称尝与客夜宿客暴死恐主人忽怖卧尸侧至曙乃告徒步护送还其家高祖兴署大将军府户曹参军使守并州京师平遣抚慰山东下燕赵累封范阳郡公守赵州为窦建德所执会建德寇河南闲遣人诣朝请乘虚捣贼心胁即诏诸将率兵引接贼平还拜大理卿时何稠得罪籍其家属赐羣臣道源曰祸福何常安可利人之亡取其子女自奉仁者不为也更资以衣食遣之拜绵州刺史 【旧书寻转太仆卿历相州都督】 卒赠工部尚书谥曰节道源虽官九卿无赀产比亡余粟二斛族孙楚金有至行与兄越石皆举进士州欲独荐楚金固辞请俱罢都督李绩叹曰士求才行者也既能让何嫌皆取乎乃并荐之累进刑部侍郎仪凤初彗见东井上疏陈得失武后时历秋官尚书爵南阳侯有清槩然尚文刻当时亦少之为酷吏所构流死岭表

△李育德 【李公逸 张善相】

李育德赵州人祖谔仕隋通州刺史世富于财家僮百人天下乱私完械甲婴武陟城自保人多从之遂为长剧贼来掠不能克隋亡与柳燮等归李密密为王世充所破以郡来降即拜陟州刺史兄厚德被贼执使招育德阳许之得不死贼帅段大师囚厚德守以兵阴得其驩乃与州人贾慈行谋逐贼慈行夜登城呼曰唐兵登矣厚德自狱拥羣囚噪而出斩长史众不敢动大师缢城走即拜殷州刺史厚德省亲留育德以守引兵拔贼河内堡三十一所世充怒悉锐士攻之城陷犹力战与三弟皆歿时死节者又有李公逸张善相公逸与族弟善行居雍邱以才雄为众所归始附王世充策其必败乃献款高祖因其地置杞州即拜总管封阳夏郡公以善行为刺史世充遣其弟将徐亳兵攻之公逸请援未报因使善行守身入朝言状至襄城为贼逻送洛阳世充曰君越郑臣唐何哉答曰我于天下惟闻有唐贼怒斩之善行亦死帝悼惜封其子襄邑县公善相襄城人大业末为里长督兵迹盗为众附赖乃据许州奉李密密败挈州以来诏授伊州总管王世充攻之屡困贼遣使三辈求救未报会粮尽众饿死善相谓僚属曰吾为唐臣当效命君等无庸死斩吾首以下贼可也众泣不肯曰与公同死愈于独生城破被执骂贼见杀高祖叹曰吾负善相善相不负吾乃封其子襄城郡公

△敬君宏 【吕世衡】

敬君宏绛州绛人累功历骠骑将军封黔昌侯以屯营兵守玄武门隐太子之死左右解散其车骑将军馮立与巢王亲将谢叔方率兵攻玄武门殊死鬪君宏挺身而出或曰事未可判当按兵待变不从与中郎将吕世衡呼而进皆战歿诏赠君宏左屯卫大将军世衡右骁卫将军【新书于本传下附载冯立谢叔方二人事实按君宏世衡以战歿入忠义立叔方既归太宗无缘并传今但载其缘起余并删】

△李安静

李安静尚书詹事纲之孙天授中为右卫将军武氏革命羣臣皆劝进安静独无所请及收系狱来俊臣问状安静曰以我为唐旧臣杀之可也若诘其状吾谁欺俊臣遂诬杀之会昌中录忠臣后乃赠安静太子少师【按安静传新书原附于其祖李纲传后今改列忠义】

△高叡【高仲舒】

高叡京兆万年人隋尚书左仆射颍孙也举明经稍迁通义令有治绩人刻石载德历赵州刺史平昌县子圣历初突厥默啜入寇叡婴城固守攻益急长史唐波若谋应贼叡觉之力不能制自经不死为虜执使降谕诸县不肯遂见杀赠冬官尚书谥曰节诏诛波若籍其家子仲舒通故训学擢明经为相王府文学王器重之开元中累官中书舍人【据旧书增辑】与同僚崔琳为宋璟苏颋所礼常语人曰古事问高仲舒时事问崔琳何复疑终太子右庶子

△安金藏

安金藏京兆长安人在太常工籍睿宗为皇嗣禁人私谒惟工优给使得进俄有诬皇嗣异谋者武后诏来俊臣问状左右畏惨楚欲引服金藏大呼曰公不信我言请剖心以明皇嗣石反也引佩刀自割腹中肠出被地眩而仆武后闻大惊輿致禁中命高医纳肠褫桑皮紮之阅夕而苏后临视叹曰吾有子不能自明不如尔之忠也即迺停狱睿宗乃安神龙初母丧葬南阙口营石坟地本印燥泉忽涌流庐侧李冬有华犬鹿相扰本道使卢怀慎上其事诏表阙于闕景云时迁右武卫中郎将玄宗追思忠节下制褒美擢右骁卫将军爵代国公诏镌其名于泰华二山卒配飨睿宗庙庭大历中赠兵部尚书谥曰忠中和中擢其远孙敬则为太子右谕德

△王同皎

王同皎相州安阳人长安中尚中宗女安定郡主拜典膳郎桓彦范等诛二张遣即东宫迎太子请曰逆竖反道显肆不轨诸将与南衙执事刻期诛之须殿下到以系众望太子曰上方不豫得无不可同皎曰将相毁家族以安社稷柰何欲内之鼎鑊乎太子尚犹豫同皎即扶上马

从至玄武门斩关入兵因奏太后诛易之等状帝复位擢右千牛将军封琅邪公主进封公主同皎驸马都尉迁光禄卿神龙二年复与张仲之祖延庆周憬李俊冉祖雍谋须武后灵驾发伏弩射杀武三思会延庆妻乃宋之憇外妹之憇子晷得其实密语三思冉祖雍亦以其谋告三思三思遣俊上急变言同皎欲拥兵阙下废皇后帝殊不晓大怒斩同皎于都亭驿籍其家同皎且死神色自如仲之延庆皆死憬遁入比干庙自到谓人曰比干古忠臣神而聪明其知我乎可悬吾头国门见三思之败也后太子重俊诛三思睿宗立诏复同皎官爵谥曰忠壮诛祖雍俊等先是许州司户参军燕钦融再上书斥韦后擅政且逆节已萌中宗召至廷扑杀之又博陵人郎岌亦表后及宗楚客乱被诛至是俱赠谏议大夫备礼改葬赐钦融一子官同皎子县尚永穆公主生子潜字宏志幼庄重不喜儿弄以帝外孙补千牛元和中擢累将作监吏有籍名北军辄骄惰不事者悉奏罢之监无公食而息钱旧皆私有至潜取以具食遂为故事迁左散骑常侍拜泾原节度使至镇缮壁垒构高屋侍粟兵利而严遂引师自原州踰硤石取蕃将一人斥烽侯筑归化潘原二垒请复城原州度支沮议故原州复陷穆宗即位封琅邪郡公更节度荆南疏吏悉榜之闾里杀尤纵者分射三等课士习之不能者罢故无冗军太和初检校尚书左仆射卒于官赠司空 【新书此下有吴保安传按忠义传所载皆死节之士保安笃友谊与忠君死事不同今改入独行传】

△李愬

李愬并州文水人父希倩神龙初右台监察御史愬少秀敏举明经高第授成安尉【旧书作咸阳尉】屡调长安尉宇文融括天下田表假监察御史历迁给事中力于治有任事称明簿最下无敢给失李林甫意出为河南少尹天宝初除清河太守举美政迁广陵长史民为立祠赛祝以捕贼负徙彭城太守封酒泉县侯连徙襄阳河东并兼采访处置使入为京兆尹杨国忠恶之改光禄卿东京留守安禄山反玄宗遣封常清募兵东京愬与留台御史中丞卢奕河南尹达奚珣缮城垒绥励士卒将遏贼西锋擢礼部尚书禄山薄城下常清兵皆白徒战不胜辄北愬收残士数百哀断弦折矢坚守人不堪鬪达奚珣降贼 【新书不载达奚珣降贼今据通鉴增】愬约奔吾曹苛国重寄虽力不敌当死官部校皆夜缒去愬坐留守府奔守台城陷禄山执愬奕及官属蒋清害之诏赠司徒谥忠懿河洛平再赠太尉愬十余子江涵泐瀛等同遇害唯源彭脱源八岁家覆俘为奴转侧民间及史朝义败故吏赎出之代宗闻授河南府参军迁司农主簿以父死贼手常悲愤不仕不娶绝酒荤

惠林佛寺者愷旧墅也源依寺居阖户日一食祠殿其先寝也每过必趋未始践阶长庆初年八十矣御史中丞李德裕表荐之穆宗下诏褒其父忠子孝以源守谏议大夫赐绯鱼袋河南尹遣使者持诏书袍笏即赐又赐绢二百疋源顿首受诏即附表谢辞吐哀恸一无受寻卒敬宗时擢愷孙为河南兵曹参军彭擢明经第天宝中选名臣子可用者自咸宁丞迁右补阙从天子入蜀后愷数年卒有孙景让景庄景温别传

△卢弈

卢弈黄门监怀慎少子也与兄奂齐名天宝初为郾令积功擢给事中拜御史中丞自怀慎奂及弈三居其官清节似之时传其美俄留台东都兼知武部选安禄山陷东都吏亡散弈前遣妻子怀印闲道走京师自朝服坐台被执将杀之即数禄山非徐顾贼徒曰为人臣者当识逆顺我不蹈失节死何恨临刑西向再拜骂贼不绝口肃宗诏赠礼部尚书【按旧书作玄宗闻而悯之赠兵部尚书】 谥曰贞烈子杞别有传杞子元辅字子望少以清行闻擢进士补崇文校书郎拜左拾遗历抗常绛三州刺史课尝最召授吏部郎中进累兵部侍郎为华州刺史卒元辅端静介正能绍其祖故历显剧而人不以杞之恶为累云

△张介然 【崔无诤】

张介然猗氏人本名六郎性慎愿长计划始为河陇支郡太守王忠嗣皇甫惟明哥舒翰踵领节度并署营田支度等使入奏称旨请得列戟故里许之翰荐为少府监历卫尉卿禄山反授河南节度采访使【按旧纪以介然为东留太守河南节度采访使新纪贼陷陈留执太守郭纳张介然死之则是纳为太守介然以节度统其事耳】 守陈留陈留据水陆居民孳伙久不知战介然到不三日贼已渡河旬有六日城陷初有诏购贼首而暴诛庆宗状禄山入陈留见诏书抚膺大哭杀陈留降者万人以逞血流成川斩介然于军门【按旧书载玄宗赠介然工部尚书】 以伪将李廷望为节度使守陈留禄山已拔陈留则鼓而前无敢抗中宿攻荥阳太守崔无诤率众乘城与官属皆死贼首以伪将武令珣戍焉无诤京兆长安人本韦后外家始娶萧至忠女至忠败被贬久乃为益州司马善杨国忠引为少府监守荥阳诏赠礼部尚书谥曰毅勇

钦定续通志卷五百八

●钦定续通志卷五百九 忠义传二

忠义传

唐【二】

○唐二

颜杲卿【袁履谦】 贾循 张巡 许远【南霁云 云万春
姚闾】 程千里【袁光廷】
庞坚【薛愿】 张兴 崔伦 蔡廷玉 符令奇 刘乃
孟华 张仵 周曾 张名振
【石演芬】 吴淑 高沐 贾直言 辛诩 黄碣 孙揆

颜杲卿【袁履谦】

贾循

张巡

许远

程千里【袁光廷】

庞坚【薛愿】

张兴

崔伦

蔡廷玉

符令奇

刘乃

孟华

张仵

周曾

张名振【石演芬】

吴淑

高沐

贾直言

辛诩

黄碣

孙揆

△颜杲卿【袁履谦】

颜杲卿字昕琅邪临沂人与真卿同五世祖以文儒世家父元孙有名垂拱闲为濠州刺史杲卿以荫调遂州司法参军性刚正莅事明济

与兄春卿弟曜卿并以书判超等吏部侍郎席豫咨嗟推伏再以最迁范阳户曹参军安禄山闻其名表为营田判官假常山太守禄山反至藁

城杲卿力不能支与长史袁履谦往迎之禄山辄赐金紫使与其将李钦凑【旧书杲卿

传钦奏姓蒋实录仍姓李与新书通鉴同】高邈

【按新书无高邈名今据旧章补入为下文遣高邈召兵范阳张本】以兵七千屯土门
杲卿指所赐衣谓履谦曰与公何为着此履谦悟乃

与真定令贾深内邱令张通幽定谋图贼阴结太原尹王承业为应使平卢节度副使贾
循取幽州谋泄禄山杀循时真卿在平原遣甥卢逖玉

常山约起兵断贼归路以缓其西入之谋杲卿大喜乃以贼命召钦奏计事钦奏夜还舍
之外邮使履谦及参军冯虔郡豪翟万德等数人饮劳

既醉斩之并杀其将潘惟慎贼党斫投尸滹沱水先是禄山遣将高邈召兵范阳未还【
旧书钦奏遣高邈往幽州未还按二将既同握重兵

镇土门岂得擅遣邈往幽州今从新书】杲卿使藁城尉崔安石图之邈至满城虔万德
皆会传舍安石给以置酒邈舍马虔叱吏缚之贼将何

千年自赵来虔亦执之送二贼杲卿乃遣子泉明及万德深通幽等传钦奏首械两贼送
京师张通幽以其兄陷贼泣请同行杲卿许之至太原

通幽欲自托于王承业乃教之更其表多自为功别遣使上之【按承业冒功由张通幽
新旧书俱不载今据通鉴补】厚遣泉明还阴令壮

士翟乔贼于路乔不平居之故乃免示宗擢承业大将军已而事显乃拜杲卿卫尉卿兼
御史中丞履谦常山太守深司马即传檄河北言王师

二十万入土门遣郭仲邕领百骑为先锋驰而南曳柴扬尘望者谓大军至日中传数百
里贼张献诚方围饶阳弃甲走于是赵巨鹿广平河闲

并斩伪刺史传首常山而乐安博陵上谷文安信都魏邺诸郡皆自固【旧传十五郡皆
为国家守通鉴凡十七郡皆归朝廷其附禄山者范

阳卢龙密云渔阳汲邺六郡而已均与此异】杲卿兄弟兵大振禄山至陕闻兵兴大惧
使史思明等率平卢兵渡河攻常山蔡希德自怀会师

不涉旬贼急攻城遗少未及为守计求救于河东承业兵不出杲卿昼夜战精竭矢尽六
日而陷【通鉴杲卿起兵纔八日新旧书史思明传

正月六日围常山九日拔之则三日也与此异】与履谦同执贼胁使降加刃少子季明
颈上曰降当活而子终不答遂并卢逖杀之送杲卿至

洛阳禄山怒曰吾擢尔太守何所负而反杲卿瞋目骂曰汝营州牧羊羯奴耳天子擢汝
为三道节度使恩幸无比何负于汝而反我世唐臣守

忠义恨不斩汝以谢上岂从尔反耶禄山不胜怒缚之天津桥柱节解以肉噉之詈不绝
贼钩断其舌乃含胡而绝年六十五履谦既断手足裔

之见者垂泣杲卿宗子近属皆被害杲卿已携诸郡复为贼守通幽潜杲卿于杨国忠故
不加赠肃宗在凤翔真卿表其枉上皇仗杀通幽李光

弼郭子仪收常山出杲卿履谦二家亲属数百人于狱厚给遣令行丧干元初赠杲卿太

子太保谥曰忠节封其妻崔清河郡夫人逊季明及宗子等皆赠五品官建中中又赠杲卿司徒初杲卿被杀徇首于衢有张湊者得其发持谒上皇是夕见梦帝寤为祭后湊归发于其妻妻疑之发若动云泉明有孝节喜振人急既为承业所遣未至而常山陷故客寿阳史思明围李光弼获泉明裹以革送幽州闲关得免思明归国真卿方为蒲州刺史令泉明到河北求宗属得己女及姑女悉钱三万赎姑女再还取贖己女复失履谦及父故将妻子奴隶等三百余人转徙不自存泉明悉力贍给扶挟渡河托真卿真卿随所归资送之殡父与履谦分柩护还长安履谦妻发视敛具与杲卿等乃号踊待泉明如父肃宗拜泉明郾令政化清明诛宿盗人情翕然成都尹举其课第一迁彭州司马家贫居官廉而孤首相从百口飡鬻不给无愠叹居母丧毁骨立其行谊当时以为难春卿倜傥美姿仪通当世务十六岁举明经拔萃高第调犀浦主簿尝送徒千人于州亡其籍口计物色无所差长史陆象先异之转蜀尉被谮系狱为椽桐赋自托长史苏颋遽出之魏征远孙贍罪抵死春卿为请玉真公主得不死时人高其节终偃师丞沈盈者亦杲卿甥有行义明黄老学解褐博野尉与杲卿同死难赐大理正官其二子遥达

△贾循

贾循京兆华原人先家常山父会有高节不答辟署里中号一龙亲亡负土城墓庐其左右蒔松栢时号关中曾子卒县人私谥广孝征君循有大畧苏颋在益州谓循今颇牧表署列将败吐蕃于西山三迁静塞军营田使张守珪北伐次滦河循揣广狭为桥以济还以功擢游击将军榆关守捉使地南负海北属长城林琅岑翳寇所蔽伏循调士斩木开道贼边去迁安东副大都护安禄山兼平卢节度表为副迁博陵太守禄山欲击奚契丹复奏循光禄卿兼副使知留后九姓叛禄山兼节度河东循亦兼鴈门副之禄山反使循守幽州故杲卿招之以倾贼巢穴循许可为向润客等发其谋贼缢之建中二年赠太尉谥曰忠从子隐林为永平兵马使朱泚之难率众扈行在德宗见隐林伟其貌问知家世引至卧内以手板画地陈攻守计即奏曰臣尝梦日坠以首承之帝曰非朕耶因令纠察行在迁检校右散骑常侍封成威郡王贼围急隐林与侯仲庄冒矢石死战已而解从臣称庆隐林流涕前曰陛下资性急不能容掩若不悛贼虽亡忧未艾也帝不以为忤拜神策统军卒帝思其质直赠尚书左仆射以实户三百封其家

△张巡

张巡邓州南阳人 【旧书作蒲州河东人】 博通淳书晓战阵法气志高迈畧细

节所交必大人长者不与庸俗合时人叵知也开元末
擢进士第与兄晓皆以名称重一时由太子通事舍人出为清河令治绩最秩满还都不
肯见杨国忠更调真源令土多豪猾诛大吏华南金赦
余党莫不改行政简约民甚宜之安禄山反贼酋张通晤陷宋曹等州谯郡太守杨万石
降贼逼巡为长史使西迎贼军巡率吏民哭元元皇帝
祠遂起兵讨贼从者千余初灵昌太守嗣吴王只受诏合河南兵拒禄山有单父尉贾贲
者阆州刺史璇之子率吏称吴王兵击宋州通晤走襄
邑为顿邱令卢諶所杀贲引军至雍邱巡与之合有众二千是时雍邱令令狐湖举县附
贼遂自将东败淮阳兵虏其众反接在廷将杀之会往
见李庭望 【旧书会贼来潮遽出鬪按潮既以城降岂更出鬪新书作暂出行部通鉴云
往见李庭望庭望贼将也干当日事情为近今据改
】 淮阳囚兵解缚起杀守者迎贲等入潮不得归巡乃屠其妻子磔城上祇闻承制拜贲
监察御史潮还攻雍邱贲趋门为众躡死巡驰骑决战
身被创不顾士乃奉巡主军闲道表诸朝腾笺祇府祇乃举兖以东委巡经畧潮以贼众
四万薄城人大恐巡出不意分千人乘城以数队出身
前驱直薄潮军军却明日贼攻城设百楼巡栅城上束刍灌膏以焚之贼不敢向巡伺隙
出击积六旬大小数百战潮遂败走以素善巡至城下
情语巡曰天下事云矣足下以羸兵守危堞欲谁为乎巡曰足下平生以忠义自许今日
之举忠义何在潮赧然去时王命不通有大将六人皆
官开府特进白巡以势不敌不如降巡阳许诺明日堂上设天子画像率军士朝人人尽
泣巡引六将至贲以大谊斩之士心益劝会粮乏潮饷
贼盐米数百艘且至巡夜壁城南潮悉军来拒巡遣勇士衔枚滨河取盐米千斛焚其余
而还城中矢尽缚藁为人千余被黑衣夜缢城下潮兵
争射之还得箭数十万其后复夜缢人贼笑不设备乃以死士五百斫潮营军大乱焚垒
幕追奔十余里贼惭益兵围之薪水竭巡给潮欲引众
走请退军二舍潮许之遂空城四出三十里撤屋发木而还潮围复合巡又给曰归马三
十匹我得马且出奔请君取城以借口潮归马巡悉以
给骁将约曰贼至人取一将明日潮来贲答曰吾欲去将士不从柰何潮怒欲战阵未成
三十骑突出禽将十四斩百余级收器械牛马潮遁还
陈留不复出七月潮率贼将瞿伯玉攻城遣伪使者四人传贼命招巡巡斩以徇余系送
祇所围凡四月贼常数万而巡众纔千余每战辄克于
是河南节度使嗣虢王巨屯彭城假巡先锋俄而鲁东平陷贼济阴太守高承义举郡叛
巨引兵东走临淮贼将杨朝宗谋趋宁陵绝巡饷路巡
外失巨依拔众保宁陵马裁三百兵三千至睢阳与太守许远城父令姚闾等合乃遣将

雷万春南霁云等领兵战宁陵北 【按通鉴至德元

载冬十二月杨朝宗将袭宁陵巡遂拔雍邱东守宁陵以待之始与睢阳太守许远相见是日巡远与贼战宁陵城北大破之至德二载春正月

丙寅许远告急于张巡巡自宁陵引兵入睢阳与远兵合据此则入睢阳在宁陵战后新书于宁陵战前即言至睢阳与通鉴不合】 斩贼将二

十杀万余人投尸于汴水为不流朝宗夜去诏拜巡主客郎中副河南节度使巡籍将士有功者请于巨巨纔授折冲果毅巡谏曰宗社尚危园

陵孤外讵可吝赏与赉巨不听至德二载禄山死庆绪遣其下尹子琦将同罗突厥奚劲兵与朝宗合凡十余万攻睢阳巡励士固守日中二十

战气不衰远自以才不及巡请禀军事而居其下巡受不辞远专治军粮战具前此远将李滔救东平遂叛入贼大将田秀荣潜与通或以告远

曰晨出战以碧帽为识视之如言尽覆其众还辄曰我诱之也请以精骑往易锦帽远以告巡巡召登城让之斩首示贼因出薄战子琦败获车

马牛羊悉分士诏拜巡御史中丞远侍御史闾吏部郎巡欲乘胜击陈留子琦间复围城巡语其下曰吾蒙上恩贼若复来止有死耳诸君虽捐

躯而赏不直勋以此痛恨闻者感慨乃椎牛大飧悉军战贼望兵少大笑巡远亲鼓之贼溃追北数十里五月贼方刈麦巡夜济师鸣鼓严队若

将出贼申警俄息鼓贼觐城上兵休乃弛备巡使南霁云等开门径抵子琦所斩将拔旗有大酋被甲引拓羯千骑麾帜乘城招巡巡阴缒勇士

数十人隍中持钩陌刀强弩约曰闻鼓声而奋酋恃众不为备城上噪伏发禽之弩注矢外向救兵不能前巡欲射子琦莫能辨因剡蒿为矢中

者喜谓巡矢尽走白子琦乃得其状使霁云射一发中左目贼还七月复围城初睢阳谷六万斛可支一岁而巨发其半饷濮阳济阴至是食尽

士日赋米一勺齧木皮鬻纸而食才千余人皆羸劣不能穀救兵不至贼知之以云冲傅堞巡出钩竿拄之使不得进篝火焚梯贼以钩车木马

进巡辑破碎之贼又以土囊积深为磴道欲登城巡潜以松明干蒿投之积十余日使人顺风持火焚之贼服其机不复改穿壕立栅以守贼将

李怀忠过城下巡问君事贼几何曰二替巡曰君祖父官乎曰然柰何从贼关弓与我角一日事平父母妻子并诛何忍为此怀忠掩涕去俄率

其赏数十人降巡前后说降贼将甚多皆得其死力御史大夫贺兰进明代巨节度屯临淮许叔冀尚衡次彭城皆观望莫肯救巡使南霁云如

叔冀请师不应遗布数千端霁云嫚骂马上请决死鬪叔冀不敢应巡复遣如临淮告急引精骑三十冒围出贼万众遮之霁云左右射皆披靡

既见进明进明曰睢阳存亡已决兵出何益霁云曰城或未下如已亡请以死谢大夫进

明初无出师意又爱霁云壮士欲留之为大飨乐作霁
云泣曰霁云来睢阳之人不食月余矣霁云虽欲独食且不下咽大夫坐拥强兵观睢阳
陷没曾无分灾救患之意岂忠臣义士之所为乎今主
将之命不达霁云置一指以示信归报中丞也因拔佩刀断指 【旧书请嚙一指留于大
夫柳宗元南府君碑自噬其指曰噉此足矣新书盖
本韩愈张中丞传后序】 一坐大惊为出涕卒不食去抽矢回射佛寺浮图矢着砖誓曰
吾破贼还必灭贺兰至真源李贲遗马百匹次宁陵得
城使廉坦兵三千夜冒围入贼觉拒之且战且行兵多死所至纔千人方大雾巡闻战声
曰此霁云等声也乃启门驱贼牛数百入将士相持泣
贼知外援绝围益急众议东奔巡远议以睢阳江淮保障也若弃之贼乘胜鼓而南江淮
必亡且帅饥众行必不达不如坚守茶纸既尽遂食马
马尽罗雀掘鼠又尽巡出爱妾杀以食士远亦杀其奴然后括城中妇人食之继以男子
老弱凡食三万口人知必死莫有叛者所余纔四百人
十月癸丑贼攻城士病不能战巡西向拜曰臣生不报陛下死为鬼以疴贼城遂陷与远
俱执子琦谓巡曰闻公督战大呼辄眦裂自面嚼齿皆
碎何至是答曰吾欲气吞逆贼顾力屈耳子琦怒以刀抉其口齿存者三四巡骂曰我为
君父死耳附贼乃犬彘也安得久子琦以刃胁降巡不
屈又降霁云未应妄呼曰南八男儿死尔不可为不义屈霁云笑曰欲将有为也公知我
者敢不死亦不肯降乃与姚闾雷万春等三十六人遇
害初子琦议生致一人庆绪所或曰用兵拒守者巡也乃送远洛阳至偃师亦不屈死 【
新书此下载巨之走临淮巡有姊嫁陆氏遮巨劝勿
行不纳赐百缣弗受为巡补缝行闲军中号陆家姑先巡被害按通鉴考异云巨在彭城
若走临淮巡姊至睢阳何以得遮云今据删】 巡长七
尺须髯每怒尽张读书不过三复终身不忘为文章不立藁守睢阳士卒居人一见问姓
其后无不识更潮及子琦大小四百战斩将三百卒十
余万其用兵未尝依古法勒大将教战各出其意或问之答曰贼人务驰突云合鸟散变
态百出故吾止使兵识将意将识士情上下相习人自
为战尔其械甲取之于敌未尝自修每战必亲临行陈有退者巡已立斯所谓曰我不去
此为我决战士感其诚皆一当百待人无所疑赏罚信
与众共甘苦寒暑虽厮养必整衣见之下争致死力始肃宗诏中书侍郎张镐代进明节
度河西率浙东李希言浙西司空袭礼淮南高适青州
邓景山四节度掎角救睢阳巡亡三百而镐至命萧昕谏之十日而广平王收东京于是
张澹李纾董南史张建封樊晃朱巨川李翰咸谓巡蔽
遮江淮沮贼势天下不亡其功也诏赠巡霁云扬州大都督远荆州大都督并宠其子孙

睢阳雍邱赐徭税三年巡子亚夫拜金吾大将军远子
玫婺州司马皆立庙睢阳岁时致祭德宗差次至德以来将相功效尤著者以颜杲卿袁
履谦卢交及巡远霁云为上又赠姚闾潞州大都督官
一子 【旧书至德二年春加检校尚书侍郎】 贞元中复官巡它子去疾远子岷赠巡
妻申国夫人赐帛百自是讫僖宗求忠臣后无不及三
人者大中时图巡远霁云像于凌烟阁睢阳至今祠享号双庙云

△许远

许远杭州盐官人右相敬宗曾孙宽厚长者明吏治初客河西章仇兼琼辟署剑南
府欲妻以女固辞兼琼怒以事劾贬高要尉更赦还禄
山反以荐拜睢阳太守贼将尹子琦攻围远与张巡婴城拒守经年外救不至兵粮俱尽
而城陷尹子琦执送洛阳囚之客省及安庆绪败渡河
北走使严庄害之远与巡同年生而长故巡呼为兄大历中巡子去疾上书言父巡与睢
阳太守远各守一面城陷贼所入自远分巡死而远独
生请追夺官爵以刷冤耻诏下尚书省使去疾与许岷及百官议皆云屠城以生致主将
为功远本守睢阳后巡死不足惑当此时去疾尚幼事
未详知且艰难以来忠烈未有先二人者事载简书若日星不可妄轻重议乃罢然议者
纷纷不齐元和时韩愈读李翰所为巡传阙远事非是
为文书其后以为二人者守死成名先后异耳于是远之事始明

南霁云

雷万春

姚闾

南霁云

南霁云者魏州顿邱人少微贱为人操舟禄山反巨野尉张沼起兵讨贼拔以为将
尚冲击汴州贼李庭望以为先锋遣至睢阳与张巡计
事退谓人曰张公开心待人真吾所事也遂留巡所巡固劝归不去衡赍金帛迎霁云谢
不受乃事巡巡厚加礼始被围筑台募万死一生者数
日无敢应俄有喑鸣而来者乃霁云也巡对泣下霁云善骑射见贼百步内乃发无不应
弦毙子承嗣历涪州刺史刘辟叛以无备谪永州

雷万春

雷万春者事巡为偏将令狐潮围雍邱万春立城上与潮语伏弩发六矢着面万春
不动潮疑刻木人谍得其实乃大惊遥谓巡曰向见雷
将军知君之令严矣潮壁雍邱北谋袭襄邑宁陵巡使万春引骑四百压潮先为贼所包
巡突其围大破贼潮遁去万春将兵方略不及霁云而
强毅用命每战巡任之与霁云钧

姚闾

姚闾者宰相崇从孙父弇楚州刺史【旧书作处州刺史】闾性豪荡好饮谑善丝竹历寿安尉素善巡及为城父令遂同守睢阳累加东平太守巡之遣霁云雷万春败贼于宁陵也别将二十有五石承平李辞陆元隗朱珪宋若虚杨振威耿庆礼马日升张惟清廉坦张重孙景趋赵连城王森乔绍俊张恭默祝忠李嘉隐翟良辅孙廷皎冯颜其后皆死巡难四人逸其姓名

△程千里【袁光廷】

程千里京兆万年人长七尺魁岸有力应募碛西累以戎勋官安西副都护兼北廷都护二镇节度使突厥首领阿布思内附赐名李献忠属幽州与安禄山有怨叛还碛外数盗边诏千里将兵讨捕千里谕葛逻禄阴令犄角献忠果以穷归葛逻禄缚之并妻子帐下数千人【新书禄山传以此为禄山事或当时与禄山并为故也】俘献勤政楼斩之擢千里右金吾卫大将军留宿卫禄山反诏募兵河东即拜节度副使云中太守迁上党长史贼来攻麇馘多累加开府仪同三司礼部尚书至德二载贼将蔡希德国上党轻骑挑战千里恃勇开府门率百骑欲直禽希德几得而救至乃退会桥坏马颠为贼执仰首敕诸骑使还曰为我报诸将可失帅不可失城军中皆为泣下增备固守贼不能下乃还囚千里至东都安庆绪伪署特进囚客省庆绪败为严庄所害时西北戍兵悉入援故河陇郡县皆陷吐蕃惟河西戍将袁光廷为伊州刺史固守历年虽游说百绪终不降诸下同心无携畔者及粮竭手杀妻子自焚死建中初赠工部尚书

△庞坚【薛愿】

庞坚京兆涇阳人四世祖玉事隋为监门直阁降高祖历官监门大将军坚历颍川太守安禄山反南阳节度使鲁炅表为长史兼防御副使以薛愿为颍川太守共守颍州时陈留荥阳已陷贼南阳被围而颍川当往来刻贼将阿史那承庆悉锐攻之傅城百里树木皆刊城中士单寡粮少而愿坚昼夜战诸郡兵无援者自至德元年正月尽十一月贼设木鹅冲车飞梯薄城矢如雨士皆雷噪夜半踰城入二人不肯降贼缚至东京将磔解之或言二人义士彼为其主杀之不祥乃缚于洛滨树上属苦寒冻死见者哭之【新书云比旦死按上文言十一月则旧书苦寒冻死之言为可信通鉴亦云冻死今据改】愿汾阴人父绛太常卿兄崇一娶惠宣太子女其女弟为太子瑛妃瑛废贬愿岭外久乃得还

△张兴

张兴束鹿人长七尺一饭至斗粟肉十觔悍馘而辩为饶阳裨将禄山攻饶阳兴嬰城弥年史思明引众傅城兴擐甲持陌刀重五十斤乘城贼将入兴一举刀辄数人死贼皆气慑然城已破为所执思明好言劝降兴曰我大郡将安能委身于汝思明语以何不上观天道今兵趋洛阳天下大定以偏师叩函谷守将面缚唐亡固矣兴曰桀纣秦隋四海为怨故商周汉唐因得代之皇帝无违德禄山非数帝贤是苟延岁月终即禽耳思明怒锯解之即死骂不绝口

△崔伦

崔伦字叙深州安平人父死远方护柩归跣足行千里道路为流涕服除第进士历吏部员外郎安禄山反陷于贼不污伪官使子弟闲表贼事贼平下迁晋州长史李齐物讼其忠授长安令封武邑县男宝应二年以右庶子使吐蕃被留再岁执至泾州逼为书约城中降伦不从更囚逻娑城阅六岁终不屈乃许还代宗见之感动具陈吐蕃情伪山川险易指画甚详迁尚书左丞以疾改太子宾客卒赠工部尚书谥曰敬【按崔伦前后陷贼留蕃具见节槩新书载于其子崔衍传今改列忠义】

△蔡廷玉

蔡廷玉幽州昌平人朱泚同里少相狎近奏署幽州幕府廷玉有沈略善与人交内外爱附与朱体微皆泚腹心多所叩咨时幽州财雄士悍日思吞并不知有上下礼法廷玉闲语泚曰古未有不臣而能推福及子孙者公南联赵魏北通沙漠兵多地险然非永安计一日赵魏反噬公乃沸鼎鱼耳不如奉天子划多难可勒勋鼎彝泚善之廷玉阴欲耗其力则讽泚出金币礼士劝归贡赋助天子经费献牛马系道储廩为单又劝入朝诸校怒缚廷玉辱之囚岁余谓曰而亦悔乎廷玉曰导公为逆即悔勉公以义何悔为复絜满岁问曰能省过不不尔且死对曰不杀我公得名杀我我得名泚不能屈待如初廷玉有建白体微辄左右之故泚愈信桀傲稍革遣廷玉入京奏涿州为永泰军蓟州静塞军瀛州清夷军莫州唐兴军置团练使以支郡隶属卢龙军稍削泚将入朝以军属弟滔廷玉体微共白泚后务至重须诚信者乃可付滔虽大弟多变不情如假以兵是嫁之祸也泚不听二人随泚到朝德宗为太子时知廷玉名及见礼眷殊渥泚统幽州行营为泾原凤翔节度使诏廷玉以大理少卿为司马体微为要籍滔已破田悦寝傲肆自用左右诬廷玉素毁滔欲四分燕滔表言二人离闲骨肉请杀之会滔叛贬廷玉柳州司户参军体微南浦尉以慰滔将行帝劳廷玉曰尔姑行为国受屈岁中当还廷玉至蓝田驿人白左巡使郑詹商于道险不可住詹迫使趋潼关滔谍

知廷玉东出曰吾且缚致麾下支解之廷玉告子少诚少良曰我为天子不血刃下幽十一城欲裂其壤使不得桀而败于将成天助逆耶今吏使我出东都此殆滔计吾不可以辱国比至灵宝自投于河帝悯廷玉忠归其柩厚赙之李晟平朱泚表乞追赠廷玉并官二子而帝方招来滔寝其奏遂已

△符令奇

符令奇沂州临沂人初为卢龙军裨将会幽州乱挈子璘奔昭义节度使薛嵩署为军副嵩卒田承嗣盗其地引令奇为右职田悦拒命马燧败之洹水令奇密语璘曰自安史干纪无噍类吾观田氏覆亡无时汝能委质朝廷为唐忠臣吾亦名扬后世矣璘泣曰悦忍人也近祸可畏答曰汝行吾死不朽不行吾亦死尸送逆地云何璘俯泣不能对会悦使璘以三百骑护送李纳兵归齐璘与父嚙臂别乃以众降燧璘之出与三子同降悦怒引令奇切让令奇骂曰尔忘义背主旦夕死吾教子以顺杀身庸何悔悦怒杀之夷其家燧署璘为军副诏拜特进封义阳郡王既闻父见害号绝泣血燧表其冤加检校左散骑常侍赠令奇户部尚书璘字符亮李怀光反诏燧讨之璘介五千兵先济河与西师合从燧入朝为辅国大将军璘之降毋匿里中独免及悦死诏迎于魏赐宴别殿璘居环卫十三年卒

△刘乃

刘乃字永夷河南伊阙人少警颖闇诵六经日数千言善文词为时推目天宝中擢进士第丧父以孝闻服终中书舍人宋昱知铨事乃方调因进书言当先政事次文学退观其治家进察其临节则彪鸿深沈之事亦可窥其门阙矣今但察言于一幅之判观行于一揖之内不足尽知人官人之责昱嘉之补剡尉大历中召拜司门员外郎德宗初草郭子仪为尚父册词义典裁擢给事中权知兵部侍郎杨炎卢杞当国五岁不迁建中四年真拜兵部侍郎帝狩奉天乃卧疾私第朱泚遣人召之固称笃复遣伪相蒋镇慰诱乃佯瘖不达炙无完肤镇再至知不可胁遂止乃闻车驾如梁州自投于床搏膺呼天不食卒赠礼部尚书谥曰贞惠子伯刍别传

△孟华

孟华史失其何所人初事李宝臣为府官属王武俊斩李惟岳遣华至京师陈事德宗问河朔利害华对称旨擢检校兵部郎中兼侍御史

【旧书以为恒冀团练副使】朱滔与武俊谋解田悦之围帝诏华还谕欲乱其谋华至让武俊曰上于大夫恩甚厚将还康中丞他州而归

我深赵大夫何苦遽自同于逆乱武俊卒进援悦华从至临清称疾还恒州阖门谢宾客

武俊僭称王授礼部侍郎不肯起呕血死

△张仵

张仵本为泽潞将守临洺田悦攻之乘城固守累月士死粮且尽救不至仵悉召部将立军门命女出徧拜因曰诸君战良苦吾无赀为赏愿以是女卖直为众士一日费士皆哭曰请死战会马燧自河东将兵击悦城下败之【按新书田悦传马燧李芑与昭义军救仵次狗明二山闲未进仵急以纸为风鸢高百余丈过悦营上射之不中及燧营噪迎之得书云三日不解临洺士且为悦食燧乃自壶关鼓而东悦遁保洹水】乘胜出战无一当百以功迁泗州刺史居州十年擢右金吾卫大将军未拜卒赠尚书右仆射军中议立其子重政母徐及兄号诉不肯从奔告淮南节度使王锬乃免诏嘉其忠起为金吾卫大将军委锬处以剧职封徐鲁国夫人

△周曾

周曾李希烈部将与王玠姚憺韦清相善号四公子希烈反曾密得其计首谋归顺以告李勉会哥舒曜拔汝州希烈遣曾往拒曾欲引军据蔡使玠为应憺清居中谋取希烈密求药毒希烈不死事泄希烈使李克诚率驽军千人劫曾杀之而收其兵并杀玠憺始约事觉毋相引清惧阳说希烈兵寡请乞师朱滔至襄邑奔刘洽德宗赠曾大尉玠司徒憺工部尚书擢清安定郡王同时死难吕贲康秀琳梁兴朝贾乐卿侯仙钦赠贲秀琳尚书左右仆射兴朝等皆秩尚书遣萧昕致祭境上命李勉哥舒曜访其家子孙虽三世有罪常降一等曾无后贞元中以兄子酆袭与其女各分封五十户奉其祀

△张名振【石演芬】

张名振事李怀光为左都将始德宗锡铁券怀光奉诏倨甚名振到军门大言曰太尉见贼不击使到不迎将反耶怀光召见谕以贼强须蓄锐俟时及引军入咸阳又曰公不反来此何耶不急攻泚收京城欲以贼谁遣怀光怒曰病狂人也使左右拉杀之又有石演芬者西域人亦事怀光至右武锋都将尤亲信畜为假子怀光军三桥将与朱泚连和演芬使客郃成义到行在言怀光无破贼意请罢其总统成义走告怀光子璠怀光召演芬骂曰尔为我子奈何欲破吾家今日负我宜即死对曰天子以公为股肱公以我为腹心公乃负天子我何不负公我无异心惟知事一人苟免贼名而死死固吾分怀光使士齑食之皆曰烈士也可令快死以刀断其颈德宗闻赠演芬兵部尚书赐其家钱三百万【旧书作三百千】斩成义于朔方

△吴淑

吴淑章敬皇后弟为盛王参军代宗立擢为太子詹事濮阳郡公开府仪同三司迁鸿臆少卿金吾将军建中初迁大将军淑循循有礼让无倨气矜乙时以为材当所位不自戚属者朱泚反卢杞白志贞皆谓泚有功不宜首难得大臣一人持节慰晓恶且悛德宗顾左右无敢行淑请往帝大悦淑退谓人曰吾知死无益而决见贼者人臣食禄死其难所也即日赍诏见泚具道帝侍以不疑者而泚业僭逆故留淑客省不遣卒被害赠太子太保谥曰忠子士矩别传

△高沐

高沐渤海人父冯事宣武李灵耀假守曹州灵耀反冯密遣人奏贼纤悉诏拜曹州刺史会李正己盗有曹濮冯不能自通朝廷遂卒沐贞元中擢进士第以家托郓李师道辟署判官师道叛沐率其僚郭昈【按新书郭昈下有郭航通鉴考异云郭航乃牙将昈所使诣李愿者非幕僚同谋者也今据删】李公度引古今成败前后说师道而李文会林英等乘闲逸诉由是疏斥沐令守濮州【旧书通鉴俱作莱州】沐上书盛夸山东煮海之饶得其地可以富国师道谋皆露后英奏事京师胁邸吏言沐以诚款结天子师道怒诛沐而囚昈濮州【旧书作莱州按下文昈书请捣登莱州及居皆罪人云云则作莱州为是】凡十年吴元济拒命师道引兵攻彭城败萧沛数县而还以助元济昈为缙书藏衣絮闲使郭航闲道走武宁军见李愿请奇兵三千浮海捣莱淄贼倚海不为备且居皆罪人无与守始昈畏事泄署师道所信吏刘谅名以遣愿白诸朝议者疑师道使为之不得报航不敢循故道闲关回远还昈所未几师道召航昈疑事露欲引决航曰事觉吾独死航卒自杀遂绝及朝廷讨师道诸节度兵四入而彭城兵下鱼台金乡李昕军取海州颇用昈策初淮西平师道势蹙内甚惧李公度与其将李英县教献三州使长子入侍师道然可俄中悔欲杀英县贾直言讽师道嬖奴曰高沐怨气在天祸且至英县复死是益其崇也乃止逐于莱州俄杀之又有崔承宠杨偕陈佑崔清皆抗节忤贼李文会指为沐党沐之死皆被囚刘悟既平师道捉昈臂歛歔辟置义成节度府亦请公度为僚属元和十四年赠沐吏部尚书航莱州人以气闻师道署右职与昈世居齐初昈举进士权德舆将败之闻其家贼中乃罢遂为贼聘二人卒能忠显

△贾直言

贾直言河朔旧族父道冲以艺待诏代宗时坐事赐鸩将死直言取鸩代饮迷而踣明日毒溃足而出复苏帝怜之减父死俱流岭南直言

由是蹙后署师道府属及师道不轨提刀负棺入谏又画缚载槛车状而妻子系累者以献师道怒囚之刘悟既入释其禁辟署义成府后徙潞亦随府迁监军刘承偕与悟不平阴与磁州刺史张汶谋缚悟送阙下【张汶新书刘悟传作张问按杜牧上李司徒书云其军大乱杀磁州刺史张汶与直言传同】以汶代节度事泄悟以兵围承偕杀小使直言遽入责曰司空纵兵胁天子使者是欲效李司空耶悟闻感悔救免承偕囚之府舍悟每有过必争故悟能以臣节显于朝穆宗召为谏议大夫悟固留德听悟死从谏不发丧召大将刘武德等矫悟遗言与邻道使共表求袭位直言入让曰父死不哭何颜面见山东义士乎从谏曰欲反耳直言仰天哭曰尔父提十二州归朝廷为功臣然以张汶故自谓不洁淋头卒羞死郎今日乃欲反耶从谏哭曰计穷而然直言曰君何忧无土地今胁朝廷正速死耳若从武德谋吾见刘氏为元济矣从谏拜曰唯大夫救之直言乃自摄留后使从谏居丧军中遂安卒赠工部尚书

△辛谠

辛谠太原尹云京孙癯短才及中人少耕于野力能止牛鬪乡人骇异屠牛饭之及长学诗书能击剑重然诺走人所急初事李峰主钱谷性廉劲遇事不拘文法皆与之合罢居扬州年五十不肯仕而慨然常有济时意庞勋反攻杜慆于泗州谠闻之拏舟趋泗口贯贼栅以入慆素闻其名握手相庆【按通鉴载谠与杜慆有旧闻乱诣泗州新书作慆素闻其名似前此未曾识面者与通鉴稍异】谠亦谓慆可共事乃还与妻子决同慆生死时贼张甚众皆南走独谠北行贼将李圆焚淮口谠与杨文播李行实戊夜踰淮坎岸登驰三十里至洪泽【洪泽旧书作洪源驿胡三省通鉴注云九域志楚州淮阴有洪泽镇】见戍将郭厚本告急厚本许出兵大将袁公异【旧书作王公异】等曰贼众我寡不可往谠拔剑瞋目呼曰泗州陷在旦夕公等被诏来乃逗遛不进欲何为大丈夫孤国恩虽生可羞且失泗则淮南为寇场君尚能独存耶即拔剑向公异厚本持之谠望泗恸哭厚本决许付兵五百【旧书作选勇士三百】谠曰足矣徧问士曰能行乎皆曰诺谠仆面于地泣以谢众既叩淮夜半斩栅由水门入慆亦出兵表里夹击贼大败人心遂固浙西杜审权遣将翟行约赴援壁莲塘慆欲遣人延劳诸吏惮不敢出谠独往犒而还围三月救兵外败城益危谠复请乞兵淮南与壮士徐珍十人持斧夜斩贼栅出见节度使令狐绹复诣浙西见审权许救合淮南兵五千盐粟具方淮路梗不得进谠引兵决战斩贼六百级乃克入城上讙叫慆与下迎泣表其功于朝授监察御史围凡十月乃解【

按通鉴旧书俱作七月新书杜悛传与此同】卒完一州【通鉴说以浙西军至楚州敕使张存诚以舟助之贼水陆布兵锁断淮流说觅敢死士数十人先以四舟乘风直进斧断其锁乃得过悛与下泣迎之乙酉城上望见舟张帆自东来其旗浙西军也说复率死士出迎之冲贼大船而过复帅众与存诚米舟九艘扬旗鼓噪而前遂得入城复引骁勇四百人迎粮于扬润至广陵舟载盐米二万石钱万三千缗还至斗门贼众万余拒之于盱眙密布战舰以塞淮流又纵火船逆之说命以长又托过自卯战至未官军不利说命车士乘小舟至贼战舰旁战棚下以枪揭火牛焚之贼溃走官军乃得入城说犯围往返凡十二及徐亳州上表言臣之功非杜悛不能成也按辛说冒围出入求救卒完一州其功大矣新书本传未及详叙今据通鉴附识】初说之求救也过家十余未尝见妻子得粮累二十万以子及兄子客广陵托悛视之以存先祀后以功第一拜亳州刺史徙曹泗二州干符末终岭南节度使【按旧书作悛迁郑滑节度说从为僚佐悛卒乃退归江东以隐居为事又谓说无子犹子山僧元老等在广陵与此俱不合】

△黄碣

黄碣闽人也初为闽小将喜学问后战安南有功高骈表其能为漳州刺史徙婺州治有绩刘汉宏遣兵攻之兵寡不可守弃州去客苏州董昌为威胜军节度使表碣自副久乃应及昌反碣谏曰大王拔田舍位将相不能尽忠王朝乃自尊大一日诛灭无种矣碣请举族先死不能见王之灭昌怒斥出之碣移书幕府李滔曰顺天建元以愚策之针可为稍耶或窃其书示昌昌令使者斩之投其首于濠中夷其家百口坎镜湖之南同瘞焉昌败有诏赠司徒求其后不能得昌已杀碣滔亦遇害乃召会稽令吴镣问策镣曰王不为真诸侯遗荣子孙乃作伪天子自取灭亡耶昌叱斩之族其家又召山阴令张逊知御史台固辞曰王自弃为天下笑且六州势不助逆王据孤州以速死谓何囚之他日谓人曰我无碣镣逊何乏事即害之

△孙揆

孙揆字圣圭邈五世从孙第进士辟户都巡官历中书舍人刑部侍郎京兆尹昭宗讨李克用以揆为兵马招讨制置宣慰副使既而更授昭义军节度使以本道兵会战克用伏兵刀黄岭执揆厚礼而将用之曰公辈当从容庙堂何为自履行阵也揆大骂不屈克用怒使以锯解之锯齿不行揆谓曰死狗奴解人当束之以板汝辈安知行刑者如其所言詈声不辍至死昭宗怜之赠左仆射

钦定续通志卷五百九

●钦定续通志卷五百十 忠义传三

忠义传

五代

○五代

（臣）等谨案欧阳修五代史死节传序谓得全节之士三人死事传序谓士不幸生其时欲全节而不二者固鲜矣然终以死人之事者得十有五人其不能立传者马彦超宋令询李遐张彦卿郑昭业五人见于本纪则其搜罗亦云博矣独以不为韩通立传贻讥而宋史因有周三臣传顾以李筠李重进附之谓洛邑顽民非殷之忠臣乎亦犹五代史死事传序所谓乐成其美而不求其备之义云尔兹合而辑之次其时事别以刘仁瞻孙晟二人归入南唐载记补为五代忠义传一卷

王彦章 张源德 裴约 夏鲁奇 姚洪 王思同

张敬达 翟进宗 沈斌 王清

史彦超 韩通 李筠 李重进

王彦章

张源德

裴约

夏鲁奇

姚洪

王思同

张敬达

翟进宗

沈斌

王清

史彦超

韩通

李筠

李重进

△王彦章

王彦章字子明 【旧五代史作字贤明寿张县人】 郓州寿昌人少为军卒事梁太祖为开封府押衙左亲从指挥使行营先锋马军使末帝即位迁濮州刺史徙澶州彦章骁勇有力能跣足履棘行百步持一铁枪 【按通鉴作每战用二铁枪一置鞍中一在手中与此小异】

骑而驰突奋疾如飞他人莫能举军中号王铁枪梁晋争天下为劲敌独彦章心轻晋王谓人曰亚次【通鉴作亚子】鬪鸡小儿耳何足惧哉梁分魏相六州为两镇惧魏军不从遣彦章入屯金波亭以虞变魏军果乱夜攻彦章彦章南走魏军降晋晋军攻破澶州虏彦章妻子归之太原间遣使招彦章彦章斩其使以自绝然晋人畏彦章在梁必欲招致之待其妻子愈厚【按通鉴作彦章斩使者晋人尽灭其家与此异】自梁失魏博与晋夹河而军彦章常为先锋迁汝郑二州防御使匡国军节度使北面行营副招讨使又徙宣义军节度使是时晋已尽有河北以铁锁断德胜口筑河南北为两城号夹寨而梁末帝昏乱小人赵岩张汉杰等用事彦章谋不见用龙德三年夏晋取郢州梁人大恐宰相敬翔顾事急以绳内靴中见末帝而泣引绳将自经末帝使人止之问所欲言翔曰非用彦章不可末帝乃召彦章为招讨使以段凝为副问破敌之期彦章对曰三日左右皆笑受命而出驰两日至滑州置酒大会阴遣人具舟于杨村命甲士六百人皆持巨斧载冶者具鞴炭乘流而下酒半佯起更衣引精兵数千■〈彳 公〉河以趋德胜舟兵举锁烧断之因以巨斧斩浮桥而彦章引兵急击南城果三日而破时庄宗在魏闻彦章为招讨使惊曰彦章骁勇吾尝避其锋守将朱守殷非其敌也即驰骑救之比至而南城已破矣庄宗撤北城为柂下杨刘与彦章俱浮于河各行一岸每舟柂相及辄战一日数十接彦章至杨刘攻之几下晋人筑垒博州东岸彦章遂不能克还击杨刘战败时段凝已有异志与赵岩张汉杰交通惧彦章刚直协力倾之其破南城也彦章与凝各为捷书以闻凝遣人告岩等匿彦章书而上已书使者至军独赐劳凝而不及彦章军士皆失色及杨刘之败也凝乃上书言彦章使酒轻敌而至于败赵岩等从中日夜毁之乃罢彦章以凝为招讨使唐兵攻兖州复召彦章使守捉东路时梁之胜兵皆属段凝京师只有保銮五百骑【按通鉴作保銮骑士及他兵合万人与此异】皆新募不可用乃以属彦章又使张汉杰监之彦章至递坊以兵少战败退保中都再败与其牙兵百余骑死战唐将夏鲁奇识其语音曰王铁枪也举稍刺之彦章伤重马踣被擒庄宗见之曰尔常以孺子待我今日服乎又曰尔善战者何不守兖州而守中都中都无壁垒何以自固彦章对曰大事已去非人力可为庄宗恻然赐药以封其创彦章武人不知书常为俚语谓人曰豹死留皮人死留名其于忠义盖天性也庄宗爱其骁勇欲全活之使人慰谕彦章谢曰臣与陛下血战十余年今兵败力穷不死何待且臣受梁恩非死不能报岂有朝事梁暮事晋生何面目见天下之人乎又遣明宗往

谕之彦章病创卧不能起仰顾明宗呼其小字曰汝非邈售烈乎我岂苟活者遂见杀【按通鉴帝发中都昇彦章自随遣中使问曰吾此行克乎对曰段凝有精兵六万虽主将非材亦未肯遽尔倒戈殆难克也帝知其终不为用遂斩之与此异】

△张源德

张源德本晋人少事晋无所称从李罕之降梁太祖时白金吾卫将军为蔡州刺史贞明三年末帝遣刘鄩将兵屯魏源德为守贝州遇魏博军叛晋王入魏袭破德州以兵五千攻源德源德坚守不下晋军堑而围之已而刘鄩大败于故元城南走黎阳晋军攻破洺州卫邢以城降磁相沧皆弃城走当此时晋已先下全燕而镇定又附于晋自河以北山以东四面千里六镇数十州之地皆归晋独贝一州围之踰年不可下贝人食且尽乃劝源德出降源德不从遂见杀贝人谋曰晋围吾久吾穷而后降惧皆不免也乃告于晋曰吾欲被甲执兵而降得赦而后释之如何晋军许诺贝人三千出降已释甲晋军四面围而尽杀之【按通鉴源德闻河北皆为晋有欲降谋于其众众以穷而后降恐不免死不从共杀源德婴城固守城中食尽乃请擐甲执兵而降此盖传闻异词且主将已死谁与固守者似于情事未合令仍欧史原文附识于此】

△裴约

裴约潞州牙将守泽州值昭义军节度使李嗣昭卒其子继韬以泽潞叛降于梁约召其州人泣而谕曰吾事故主二十余年见其分财鬻士欲报梁仇不幸早世今郎君父丧未丧违背君亲吾能死于此不能从此归梁也众皆感泣梁遣董璋率兵围之约与州人拒守求救于庄宗是时庄宗方与梁人战河上闻继韬叛颇有忧色闻约独不叛喜曰吾于继韬何薄于约何厚而约能分逆顺邪顾符存审【通鉴作李绍斌】曰吾不惜泽州与梁独爱约一州易得约难得也尔识机便为吾亟取约来存审以五千骑驰至辽州而梁兵已破泽州约见杀

△夏鲁奇

夏鲁奇字邦杰青州人唐庄宗时赐姓名曰李绍奇鲁奇初事梁为宣武军校后奔晋为护卫指挥使从周德威攻幽州刘守光将单廷珪元行钦以骁勇自负鲁奇每与二将鬪辄不能解两军皆释兵而观晋已下魏博梁将刘鄩军洹水庄宗以百骑觐敌遇伏兵围之数重几不得脱鲁奇力战手杀百余人身被二十余创与庄宗决围而出庄宗益奇之以为磁州刺史从战中都擒王彦章拜郑州防御使迁河阳节度使为政有惠爱徙镇忠武河阳人庶留不得行父老诣京师乞留明宗遣中使往谕之乃得去

唐师伐荆南以鲁奇为招讨副使无功而还徙镇武信

东川董璋反攻遂州鲁奇闭城拒之旬月救兵不至城中食尽鲁奇自刎死 【按通鉴石敬瑭引兵至剑州孟知祥梟鲁奇首以示之鲁奇二

子从敬瑭在军中泣请往取其首敬瑭曰知祥长者必葬而父岂不异于身首异处乎既而知祥果收葬之】

△姚洪

姚洪本梁小校自董璋为梁将洪尝事璋后事唐别为指挥使长兴中戍阆州董璋反遣人以书招洪洪得璋书辄投厕中后璋攻破阆州

执洪数之曰尔为健儿我遇汝厚柰何负我邪洪骂曰老贼昔为李七郎奴 【欧史董璋传为汴富人李让家僮】 扫马粪得一脔残炙感恩

不已今天子用尔为节度使何苦反耶吾能为国家死不能从人奴以生璋怒然镬于前令壮士十人割其肉而食洪至死大骂明宗闻之泣下

录其二子而厚恤其家

△王思同

王思同幽州人父敬柔母刘仁恭女思同事仁恭为银胡■〈革录〉指挥使仁恭为子守光所囚思同奔晋为飞胜指挥使累迁郑州防

御使性勇敢好礼文士初未有战功以久次为匡国军节度使徙镇雄武是时吐蕃数为寇而州无亭障思同列四十余栅以御之居五年来朝

明宗问以边事思同指画山川具陈利害于是始知其材以为右武卫上将军京兆尹西京留守石敬瑭讨董璋思同为先锋指挥使与璋战不

胜而却敬瑭兵罢思同徙镇山南西道已而复为京兆尹西京留守潞王从珂反以思同当东出之道尤欲与之相结遣推官郝诩押牙朱廷又

等相继诣长安说以利害 【欧史不详从珂遣郝诩等事下文执郝诩语不明今据通鉴增】 又遣伶奴安十十以五弦谒思同欲因其欢以

通意是时诸镇皆怀向背独思同执十十及郝诩等送京师愍帝嘉其忠即以思同为西面行营马步军都部署三月会诸镇兵围凤翔破东西

关城兴元张虔钊攻城西督战甚急士卒苦之反兵攻虔钊虔钊走羽林指挥使杨思权引军自西门入降从珂而思同未知犹督战严卫指挥

使尹晖麾其众曰城西军入城受赏矣何用战邪士卒解甲弃杖声闻数里遂皆入城降诸镇之兵皆溃思同挺身走至长安西京副留守刘遂

雍闭门不纳乃走潼关为从珂前锋所执责曰罪可逃乎思同曰非不知从王而得生恐终死不能见先帝于地下从珂媿其言乃杀之

△张敬达

张敬达字志通代州人也小字生铁 【通鉴敬达性刚时人谓之张生铁】 少以

骑射事唐庄宗为厅直军使明宗时为河东马步军都
指挥使领钦州刺史累迁彰国大同军节度使徙镇武信晋昌清泰二年契丹数入边废
帝以河东节度使石敬瑭兼大同彰国振武威塞等军
蕃汉马步军都总管屯于忻州继疑敬瑭有异志乃以敬达为北面副总管以分其兵明
年夏徙敬瑭镇天平遂以敬达为大同彰国振武威塞
等军蕃汉马步军都部署敬瑭因此遂反即以敬达为太原四面招讨使六月兵围太原
敬达设长城连栅云梯飞炮以攻之辄为大风雨水所
坏敬瑭求救于契丹九月契丹耶律德光自鴈门入旌旗相属五十余里敬达阵于西山
契丹诱以羸骑三千唐军争驰之追至汾曲伏发断唐
军为二其在北者万余人皆死敬达收军栅晋安契丹围之自晋安寨南长百余里阔五
十里内外隔绝声问不通敬达犹有兵五万人马万匹
久之食尽削木筛粪以饲其马马死者食之已而马尽副招讨使杨光远劝敬达降晋敬
达自以不忍背唐而救兵且至光远促之不已敬达曰
诸公何相迫邪胡不杀我而降光远即斩敬达降契丹耶律德光闻敬达死哀其忠遣人
收葬之

△翟进宗

翟进宗与张万迪同事晋进宗为淄州刺史万迪为登州刺史杨光远反以骑兵胁
取二刺史至清州万迪听命而进宗独不屈光远遂杀
进宗出帝赠进宗左武卫上将军及光远平曲赦青州而独不赦万迪暴其罪而斩之诏
求进宗尸加礼归葬以其子仁钦为东头供奉官

△沈斌

沈斌字安时徐州下邳人少为军卒事梁为拱宸都指挥使后事唐从魏王继岌破
蜀平康延孝以功为虢州刺史历随赵等八州刺史晋
开运元年为祁州刺史契丹入塞至于榆林过祁州斌以契丹深入晋地而归羸乏可击
即以州兵邀之杀获颇众契丹以精骑划门斌兵多死
城中无备赵延寿留兵急攻之遣人招斌降斌从城上骂延寿曰公公子自误陷于北庭
复忍以敌众残害父母之邦斌能为国死尔不效公所
为也已而城陷斌自尽其家属皆没于契丹

△王清

王清字去瑕洺州曲周人初事唐为宁卫指挥使后事晋为奉国都虞候安从进叛
襄州从高行周攻之逾年不能下清请先登遂攻破之
开运二年从杜重威战阳城清以力战功为步军之最加检校司徒是冬重威军中渡桥
南契丹军其北以相拒而以精骑并西山出晋军后南
击栾城断晋饷道清谓重威曰今去镇州五里而守死于此营孤食尽将若之何请以步

兵二千为先锋夺桥开路公率诸军继进以入镇州可以守也重威许之遣与宋彦筠俱前清与契丹战败之夺其桥是时重威已有二志犹豫不肯进彦筠亦退走清曰吾独死于此矣因力战而死

【按通鉴清谓其众曰吾辈当以死报国耳众感其言莫有退志清及士卒尽死】

△史彦超

史彦超云州人勇悍骁捷周太祖起魏时彦超为汉龙捷都指挥使【按五代会要广顺元年改侍卫马步军额马军旧称护圣改为龙捷步军旧称护国改为虎捷】以兵从太祖入立迁虎捷都指挥使戍晋州刘旻来攻州无主帅知州王万敢不能拒彦超以戍兵坚守月余太祖遣王峻救之旻兵解去以功迁龙捷右厢都指挥使领郑州防御使周与北汉战高平彦超为前锋先登陷阵以功拜感德军节度使【通鉴以为镇国节度使】周兵围太原契丹救之兵出忻代世宗遣符彦卿拒之以彦超为先锋战忻口彦超勇愤俱发左右驰击解而复合者数四遂歿于阵世宗以师久无功欲去未决闻彦超战死遽班师忧忿不食者数日赠太师优恤其家

△韩通

韩通并州太原人在晋以勇力应募补骑军队长开运末汉祖建义于太原召寘帐下从至东京累迁卫队副指挥使及开国加检校左仆射干佑初周祖为枢密使统兵伐河中知通谨厚以之自随奏为天雄军马步军都校委以心腹及入汴通预有力焉周祖亲征兖州以通为在京右厢都巡检时河溢灌河阴城命通率广锐卒渡汴口又部筑河阴城柵营壁未几拜保义军节度观察留后以郊恩正授节度并州刘崇南侵命通副河中王彦超出晋州道击之捷于高平以通为太原北面行营部署为地道攻其城会班师移镇曹州加检校太保世宗显德二年以深冀之闲有葫芦河东西横亘数百里非峻其堤塌不能扼契丹奔突命通与王彦超浚治之功未就契丹兵至通迎击退之遂城李宴口为静安军四旬而完又城束鹿及鼓城并葺祁州博野安平往来深定闲夜宿古寺画披荆棘在安平领百余骑督役契丹奄至通率麾下与战会日暮大风雨契丹解去又城百八桥镇及武强县皆旬日毕功时攻秦凤以通为西南面行营马步军都虞候入大散关分兵城固镇以断蜀饷道及拔凤州以功授侍卫马步军都虞候世宗征淮南幸寿春皆为京城内外都巡检淮南平为归德军节度奉诏河北按行河堤发徐宿宋单等州民浚汴渠数百里世宗将北伐命通与高怀德张铎先赴沧州即领兵入契丹境干宁军之南伐为陆路都部署巡北边自浮阳至淤口遂通

瀛莫初克益津关建霸州役滨棣民数千城之命通董其役师还以为检校太尉同平章事充侍卫亲军马步军副都指挥使恭帝即位宋祖奉诏北征至陈桥为诸军推戴通在殿阁闻变惶遽而归将率众备御军校王彦升遇之于路策马逐之通驰入其第未及阖门为彦升所害妻子皆死宋祖闻其死怒彦升专杀以开国之初隐忍不及罪即下诏褒通临难全节以礼收葬通性刚直言多忤物人谓之韩瞪眼其子颇有智略史忘其名见宋祖有人望常劝通早为之所通不听故及于难

△李筠

李筠并州太原人善骑射后唐清泰初应募为内殿直迁控鹤指挥使晋开运末契丹入汴京其将赵延寿闻筠骁勇召寘帐下及契丹主北归延寿至常山为永康王所縶契丹众数万据常山留耶律嘉哩众二千骑在汴与汉相杂嘉哩贪恣自奉削汉军日食众皆菜色筠乘其怨密与王尧石公霸何福进等谋以闰七月二十九日据兵库焚牙门并力击之契丹众大惊由北门出明日集众入郛力战奔败遂挈族而去是战筠功居多即送款汉祖授筠博州刺史筠以赏薄不悦周祖镇大名表为先锋指挥使北面缘边巡检及起兵入汴筠同郭崇从与慕容彦超战于留子陂彦超败走广顺初权知滑州拜义成节度改彰德军会并州人侵晋州王峻率师往拒筠亦请西征诏褒之周祖征兖还次濮州筠来朝从至澶州宴讫遣还寻改昭义军节度加检校太傅时王峻兼节制以筠及王殷何福进皆创业功臣故并加恩焉显德亲郊加同平章事世宗即位并人入侵其将张晖率先锋自团栢谷入筠遣护军穆令均以步骑二千拒之失于侦逻遇伏败还世宗亲征沁州命筠率行营兵赴太原与符彦卿拒契丹援兵以偏师达契丹后奋击走之师还加兼侍中二年筠破并军于榆社获其将安浚康超等七十余人三年筠遣行军司马范守图率兵入辽州界杀获以献四年又遣守图入河东界降二砦五年筠自将入石会关破并人六砦是年冬又破辽州长清砦擒其磁州刺史李戴兴以献六年平辽州获刺史张丕旦等以献筠在镇擅用征赋颇集亡命尝以私忿囚监军使世宗心不能堪但诏责而已宋祖建建初加兼中书令遣使谕以受周礼筠即欲拒命左右强之方下拜貌犹不恭及延使者升阶置酒张乐遽索周祖画像悬壁涕泣不已宾佐惶骇告使臣曰令公被酒失其常性幸勿为讶及太原刘钧以蜡书结筠共举兵是时筠子守节为皇城使宋祖遣归谕旨曰我未为天子时任自为之今既定位独不能臣我耶守节还白筠谋愈急遂起兵令幕府为檄书辞多不逊从事间邱仲卿献策曰公以孤军举事其势甚危虽何河

东之援亦恐不得其力大梁兵甲精锐难与争锋不如西下太行直抵怀孟塞虎牢据洛邑东向而争天下计之上也筠曰吾周朝宿将与世宗义同昆弟禁卫皆旧人闻吾来必倒戈而归遂执监军周光逊李廷玉遣判官孙孚衙校刘继忠【五代史东汉世家作刘继冲】送款刘筠以求济师及筠率兵与契丹数千众来援至太平驿筠见筠兵寡弱甚悔之筠召与语筠自言受周祖大恩敢爱其死不寤筠与周祖有世讎筠默然遂疑之命其宣徽使卢赞监筠军筠心不能平筠有马三千四辟鞠场阅习日夜谋画留其子守节守上党引众南向宋祖遣石守信高怀德将兵讨之敕勿纵筠下太行急进师扼其隘以破之又遣慕容延钊王金斌由东路会守信与监军李崇矩破筠众于长平又攻大会砦下之宋祖遂亲征山路险峻多石不可行宋祖先于马上负数石羣臣六军皆负之即日平为大道与守信怀德会破筠众数万于泽南杀监军使卢赞擒筠节度范守图筠走保泽宋兵列栅围之筠龙捷使王廷鲁汾州团练使王全德率所部自昭义来降筠益失援宋祖亲督战拔其城筠赴火死宋祖进伐上党守节以城降释其罪以为单州团练使筠性虽暴戾事母甚孝每怒将杀人母于屏风后呼之筠趋至遽命释之筠有爱妾刘氏随筠至泽时被攻城危刘谓筠曰城中健马几何孤城危蹙破在俄顷今诚得马数百与腹心溃围出保昭义求援河东犹愈于坐待死也筠然之召左右计马将以是夕出或谓筠曰今帐前计议皆云一心县门既发不可保矣僬劫公而降悔其何及筠犹豫不决明日城陷筠将赴火刘欲俱死筠以其有娠麾令去守节既购得之果生子焉后守节无子以刘氏所生之弟为嗣

△李重进

李重进其先沧州人周太祖之甥福庆长公主之子也晋天福中仕为殿直汉初从周祖征河中广顺初迁内殿直都知领泗州刺史累迁殿前都指挥使加领泗州防御使显德初领武信军节度重进年长于世宗及周祖寝疾召重进受顾命令拜世宗以定君臣之分世宗嗣位为侍卫亲军马步军都虞候从征刘崇战于高平不利大将樊爱能何徽以其众遁唯重进与白重赞勒兵不动既而宋祖先以麾下犯敌重进继领所部力战世宗躬率卫兵合势周师复振崇遂大败师还加同中书门下平章事改归德军节度兼侍卫马步军都指挥使世宗亲征淮南命重进将兵先赴正阳俄闻李谷攻寿春不克促重进兵助之吴中发兵三万又发战棹二百艘以张断桥之势兵势甚盛时周师未朝食吴师奄至重进与韩令坤合势击之一鼓而败斩首万余级追奔二十余里杀大将刘彦贞擒获

无算诏书褒谕即以重进代谷为行营招讨使改庐寿
等州招讨使会张永德屯下蔡与重进不协密遣亲信乘驿上言世宗不之信亦不介意
二将俱握重兵人情益忧恐重进遂自寿阳单骑直诣
永德帐中命酒亲酌谓永德曰吾与公皆国家肺腑相与戮力同奖王室公何疑我之深
也永德意解三军皆安李景知之密令人赍蜡书诱重
进陷以厚利重进表其事时围寿经年未下吴遣将许文績边镐 【按五代史载吴遣将
三人宋史于此传内止举二人其一遗者为朱元后
降于宋】 帅舟师数万泝淮来援文績维舟淮南据紫金山山距寿数里设十余砦连亘
相望与城中烽火相应又南筑夹道将抵寿为馈路重
进伺便出兵击之夺其二砦获器甲甚众及克寿录功加检校太傅兼侍中又改天平军
节度仍为招讨使攻濠州降其团练使郭廷谓从平楚
州会李景请画江为界诏班师留重进戍守俄乃还镇世宗北伐命将兵先趣北面及驻
蹕瓦桥关重进与诸将率师而至时关南已平议进取
幽州会世宗不豫而止恭帝嗣位加检校太尉改淮南道节度宋祖受禅加重进中书令
既而移镇青州重进与宋祖俱事周室分掌兵柄常心
惮之至是愈不自安及闻移镇阴怀异志宋祖知之遣六宅使陈思诲赍赐铁券以安其
心重进自以周室近亲恐不得全遂拘思诲治城隍缮
甲兵遣人求援李景监军安友规常为重进所忌遂与亲信数人踰城告变宋祖遣石守
信王审琦李处耘宋偓四将率兵讨之宋祖谓左右曰
朕于周室旧臣无所猜闲重进不体朕心自怀反侧今六师在野当暂往抚之遂亲征次
大仪镇石守信等遣使驰奏扬州破在旦夕愿车驾临
视宋祖径至城下即日拔之重进赴火死思诲亦为其党所害初重进謀举兵遣亲吏翟
守珣往潞阴结李筠守珣素识宋祖过京师潜因枢密
承旨李处耘求见奏重进终无归顺之意宋祖即令说重进缓其谋无令二凶并作以分
兵势守珣归乃劝重进养威持重未可轻发重进甚信
之及李筠诛重进始举兵得如宋祖之策皆守珣所致云又有张崇诘者周广顺初为枢
密承旨二年出为解州刺史显德三年改德州又改泗
州泽州重进赴淮南时道出泗上崇诘说以畜兵完城之计重进败事露诏捕之弃市籍
其家

钦定续通志卷五百十

●钦定续通志卷五百十一 忠义传四

忠义传

宋 【一】

○宋一

（臣）等谨按宋史忠义传旧为十卷内如死于金与死于元者前后错出又杂入上书言事诸臣部居未能厘然兹分凡死事【如死于辽及侂智高方腊之类】死义【如陈东欧阳澈之类】者为一卷死于金与元者各为二卷并按时地先后以类相附又有原载入忠义而其人未经死事其事迹亦不能如唐夏侯端诸人之义烈及事迹前后复见名字彼此互异实是一人者今并加删佯仍逐条加按附订以符史裁通例焉

杨重进	秦传序	康保裔	董元亨	马遂	曹
覲【赵师旦 马贵王从政】	高敏【张吉】				
景思忠【思立】	苏缄【子明 子正 广渊 直温】	王奇			
高永年	鞠嗣复	宋旅【丁仲			
修 陈华 张理辅 褒 项德】	詹良臣【江仲明 蒋煜】	杨震【居中			
执中】 朱昭	曾孝【序吁 陆有常				
张侃 丁兴宗】	薛良显	唐敏求	郭僎	孟彦卿【赵民彦 谢	
淳】	胡唐老【郑疑之】	刘晏	王侑【李		
唐俊 潘偶 韦绩 蒋夔 朱嗣孟】	陈求道	连万夫	孙知微		
赵士隆【士真 士道】	赵师檠	马俊			
谢皋	范旺	易青	郑振	王师道【王辉】	杨
震仲【郭靖】	陈霖	胡斌	高谈		
孙益【顾绪 顾绚】	王大寿	侯晷	王孝忠	陈东	
欧阳澈	马伸	吕祖俭【祖泰】			
杨宏中【林仲麟 徐范 张彻 蒋傅 周端朝】	华岳	邓若			

水

杨重进
 秦传序
 康保裔
 董元亨
 马遂
 曹覲【赵师旦 马贵 王从政】
 高敏【张吉】
 景思忠【景思立】
 苏缄【苏子明 苏子正 苏广渊 苏直温】
 王奇
 高永年

鞠嗣复

宋旅 【丁仲修 陈华 张理 辅襄 项德】

詹良臣 【江仲明 蒋煜】

杨震 【杨居中 杨执中】

朱昭

曾孝序 【曾吁 陆有常 张侃 丁兴宗】

薛良显

唐敏求

郭僎

孟彦卿 【赵民彦 谢澶】

胡唐老 【郑凝之】

刘晏

王侔 【李唐俊 潘偶 韦绩 蒋夔 朱嗣孟】

陈求道

连万夫

孙知微

赵士隆 【赵士真 赵士道】

赵师檟

马俊

谢皋

范旺

易青

郑振

王师道 【王辉】

杨震仲 【郭靖】

陈霖

胡斌

高谈

孙益 【顾绪 顾绚】

王大寿

侯畱

王孝忠

陈东

欧阳澈

马伸

吕祖俭 【吕祖泰】

杨宏中 【林仲麟 徐范 张衡 蒋傅 周端朝】

华岳

邓若水

△杨重进

杨重进太原人少有膂力周祖镇大名隶帐下广顺初补卫士宋初累迁至内殿直都虞候太平兴国初改龙卫军都校领徐州刺史从征太原出为莱州刺史随曹彬出师为右钺排阵使改武州防御使高阳关都部署会契丹兵至尹战遂没于阵 【按重进传宋史旧附于外戚贺令图传后今因其力战死事移置于此】

△秦传序

秦传序江宁人淳化五年充夔峡巡检使李顺之乱贼众薄城下传序督士率昼夜拒战危蹙日甚长吏皆奔窜传序谓士卒曰吾为监军尽死节以守城吾之职也安可苟免乎城中乏食传序出囊橐服玩尽市酒肉以犒士卒慰勉之众皆感泣力战城坏传序赴火死其家寄荆湖闲长子奭遡峡求父尸溺死奏至录次子煦为殿直以钱十万赐其家

△康保裔

康保裔河南洛阳人祖志忠后唐长兴中讨王都战没父再遇为龙捷指挥使从太祖征李筠死于兵保裔在周屡立战功及再遇阵歿诏以保裔代父职从石守信破泽州明年攻河东之广阳获千余人又从诸将破契丹于石岭关累迁高阳关副都部署真宗即位领彰国军节度出为并代都部署徙知天雄军复为高阳关都部署契丹兵大人保裔选精锐赴之契丹围之数里决战二日兵尽矢绝援不至遂没焉时车驾驻大名闻之震悼赠侍中官其子继英等四人孙一人继英手奉告命悲泣伏地不能超帝恻然顾谓左右曰保裔父祖死疆场身复战没世有忠节赠赏之典所宜加厚继英仕至左卫大将军贵州团练使严于驭军厚于抚宗族其卒也家无余财

△董元亨

董元亨深州束鹿人累官至国子博士通判贝州王则据城叛是日冬至元亨方朝谒天庆观促马驰还坐厅事贼党露刃入胁元亨索军资库钥元亨据案叱曰妖贼乃敢弄兵乎我有死耳钥不可得也贼将郝用继来索愈急元亨厉声痛骂用遂杀之携钥而去事闻赠太常少卿录其子孙三人贼平获郝用斩以祭元亨

△马遂

马遂开封人初隶龙卫军补散直改三班奉职为北京指使王则叛留守贾昌朝使遂持榜入贝州招降谕以祸福不答遂将杀则而无兵仗自随因奋起投杯抵则扼其喉殴之流血而左右卒无助之者贼党攒刃断其一臂犹詈则曰妖贼恨不斩汝万段贼缚遂厅事前支解之事闻赠宫苑使官其子五人后得杀遂者使其子剖心而祭之

△曹覲 【赵师旦 马贵 王从政】

曹覲字仲宾曹修礼子也叔修古卒无子天章阁待制杜祀为言于朝授覲建州司户参军为修古后皇佑中以太子中舍知封州依智高叛行至州州人不任战鬪又无城隍以守覲麾都监陈煜引兵迎击自率从卒决战不胜被执贼掙使拜且诱之曰从我得美官付汝兵柄以女妻汝覲不肯拜詈曰人臣惟北面拜天子我岂从尔苟生耶速杀我幸矣贼徙置舟中覲不食者两日探怀中印章授从卒曰我且死若求闲道以此上官贼知终无降意乃杀之至死诟声不绝投尸江中事闻赠太常少卿录其子四人赠修古尚书工部侍郎当智高之反乘岭南无备县吏望风窜匿独覲与孔宗旦赵师旦能以死守 【按孔宗旦以守邕州被害原附本传之后今归孔氏后裔传此从删】 赵师旦字潜叔枢密副使稹之从子用稹荫试将作监主簿累迁太子右赞喜大夫知康州贼众薄城下师旦只有兵三百开门迎战杀数十人会暮贼稍却师旦语其妻取州印佩之使负其子以匿遂与监押马贵部士卒固守州城迟明贼攻愈急矢尽与贵俱还据堂而坐智高麾兵鼓噪争入胁师旦师旦大骂曰饥獠朝廷负若何事乃敢反耶天子发一校兵汝无遗类矢智高怒并贵害之事平赠光禄少卿录其子弟并从子三人同时有王从政者以东头供奉官合门祗候与依智高战于太平场被执骂贼不已至以沸汤沃之终不屈而死赠信州刺史录其孙二人

△高敏 【张吉】

高敏登州人为泾原指使数与西夏战遭重伤范仲淹韩琦皆荐之为合门祗候厯利州路邠宁环庆都监主蕃部事羌人围大顺城声言将出鄜延敏屡白主帅李复圭曰兵家之事声东击西环庆尝破白豹金汤结衅已深不可不备已而果以兵三十万来寇总管杨遂驻兵大义以敏为先锋将夏人攻夺大顺水砦敏出通路自寅及午且战且前多所斩获次榆木援兵不至中流矢死诏赠嘉州刺史锋其三子为侍禁殿直有庆州卒张吉者为淮安镇守烽兵夏人寇东谷掠得之胁以兵使呼城中曰淮安诸砦已破宜速降吉反其辞曰努力诸砦无虞贼粮尽且

去矣贼怒杀之诏赠内殿崇班又录其子

△景思忠 【景思立】

景思忠字进之普州安岳人以父泰荫累官西京左藏库使为遂州驻泊都监夷人寇洧并钤辖张承佑出兵救之思忠部卒五百为前锋战不利死者十之六左右劝思忠引避不听奋剑疾战而死神宗悯之官思忠及同死者之子七人弟思立以荫主渭州治平砦罗阿用兵韩绛使摄保安军夏人寇顺宁思立领兵赴援诸将败一军独全以功知德顺军策应王韶取熙州遂定河州尝与敌力战斩不用命者数人军声大振韶言其忠勇累擢东上合门使河州刺史又迁四方馆使河州团练使知其州青伊特结果庄举兵袭杀伐木卒害小校七人以书抵思立词不逊思立不能忍帅兵六千攻之于踏白城钤辖韩存宝蕃将恰岳交止之不听自将中军使存宝及魏奇为先锋王存将左贾翊将右果庄众二万分三砦以抗官军战久之羌从山下围中军他将王宁李元凯歿于阵思立存宝溃圜出议曰日暮兵疲宜移屯东冈以自固思立以魏奇创重独徙其军方遣之而殿后兵乱前者望见亦皆溃思立阙且退曰我适以百骑先羌数千人无助我者今败矣当自刳以谢朝廷众止之再战遂死时已除忠州防御使会其死不及拜帝以其轻敌致败不复赠官

△苏缄 【苏子明 苏子正 苏广渊 苏直温】

苏缄字宣甫泉州晋江人举进士累官秘书丞知英州依智高围广缄募士数千人夜行赴难广人黄师宓陷贼中为之谋主缄擒斩其父羣不逞并缘为盗复捕杀六十余人招其诖误者六千八百人使复业贼势沮将解去缄分兵先扼其归路布槎木亘四十里贼至不得前乃遶出数舍渡江由连贺而西缄与贼战摧伤甚众尽得其所掠物仁宗喜换为供备库副使广东诸监管押两路兵甲袭贼至邕大将陈曙以失律诛缄亦贬房州司马十余年始还副使知廉州坐事谪潭州都监熙宁初进如京使广东钤辖四年交趾谋入寇以缄为皇城使知邕州八年蛮兵入寇破邕四砦缄阅州兵得二千八百使分地自守民震惊四出缄悉出官帑及私藏示之曰吾兵械既具蓄众不乏今贼已薄城宜固守以迟外援敢越佚则孥戮汝有大校翟绩潜出斩以徇由是上下胁息缄子子元为桂州司户因公事携妻子来省欲还而寇至缄念人不可户晓必以为郡守家出城乃独遣子元留其妻子选勇士拏舟力战斩其二酋邕既受围缄昼夜行劳士卒发神臂弓射贼所殪甚众蛮百计攻城为云梯又为攻濠洞蒙以华布缄悉焚之计穷将引去或教贼囊土傅城顷刻高数丈蚁附而登城遂陷缄犹领伤卒驰战愈厉而力不敌乃曰吾

义不死贼手亟还州治杀其家三十六人藏于坎纵火自焚蛮至屠郡民五万余人邕被围四十二日粮尽泉涸人吸沔麻水以济渴多病下痢相枕籍以死然讫无一叛者神宗闻殲死嗟悼赠奉国军节度使谥曰忠勇以子元为西头供奉官合门祗候召对谓曰邕管赖卿公守御佻如钦廉即破则贼乘胜奔突桂象皆不得保矣昔张巡许远以睢阳葑遮江淮较之卿父不能过也改授殿中丞通判邕州余子子明子正孙广渊直温与殲同死皆褒赠焉

△王奇

王奇汾州人武举中第章惇经营湖北溪洞以为将领降其酋舒光贵缚元猛平懿洽等州累迁如京副使为湖南都监徙广西宜州蛮寇边奇领兵至天河县数日蛮万人骤集奇兵遂败麾下数百人劝奇策马逃去奇骂曰大丈夫当尽节以报国何走为战而死诏赠皇城使忠州防御使官其家六人

△高永年

高永年河东蕃官也为麟州都巡检王瞻取青唐永年总蕃兵为先锋屡有战功羌酋隆赞自干沟逼鄯州永年佐瞻拒守及姚雄弃湟鄯皆以永年殿归师崇宁初知岷州蔡京议复两州王厚使永年帅兵二万克安川堡遂至湟即知州事自皇城副使进四方馆使利州刺史为熙秦两路兵都统制平鄯州迁贺州团练使知其州奇彻罗萨合夏国四监军之众逼宣威城永年出御之为多罗巴所杀

△鞠嗣复

鞠嗣复不知何许人宣和初知歙州休宁县方腊党破县欲逼使降面斩二士以怖之嗣复怒骂不少慑屡言何不速杀我贼曰明府宰邑有善政乃委之而去朝廷知之擢知睦州尝为贼所伤自力渡江乞师于宣抚使未及行而卒【按鞠嗣复为贼所伤犹欲自力济师未行而卒可谓忠于王事始终不渝兹仍史例存之谨识】

△宋旅【丁仲修 陈华 张理 辅袞 项德】

宋旅字庭实莆田人第进士累官奉义郎知剡县方腊既陷歙睦杭衢婺五州且犯越旅遣妻子浮海归闽独与民据守俄而盗众大至躬冒矢石力不敌而死诏赠朝散郎录其四子丁仲修字敏之温州人方腊党俞道安陷乐清将渡江巡检陈华往捕死之先锋将张理同李振出南门迎敌渡八接桥桥断马蹶溺死贼至帆游夏祥遣辅袞迎战袞死之仲修率乡兵御诸乐湾力屈乃死项德婺州武义人郡之禁卒也宣和闲盗发帮源明年陷婺而武义随没德率败亡百人破贼因据邑之城隍祠自二月至五

月大小百余战俘馘不可胜计方谋复永康诸县贼尽
锐邀之黄姑岭下德战死

△詹良臣 【江仲明 蒋煜】

詹良臣字符公睦州分水人以恩得官调缙云县尉方腊起有他盗霍成富用腊年
号剽掠缙云良臣率弓兵数十人出御之为所执成富
诱使降良臣曰汝辈不知求生顾欲降我邪旦暮官军至汝肉饷狗鼠矣贼怒齧其肉使
自啖之良臣吐且骂至死不绝声事闻赠通直郎录其
子孙二人时有江仲明者台州人乡里遭乱载老母逃山涧中猝遇贼逼使就降仲明义
不辱奋起大骂卒死之又有蒋煜者州之仙居人有文
学贼欲妻以女煜拒之胁之拜亦不从贼曰吾戮汝矣煜伸颈就刃詈声不绝而死

△杨震 【杨居中 杨执中】

杨震字子发代州崞人以弓马绝伦为安边巡检有战功从折可存征方腊自浙东
追袭至黄岩贼师吕师囊扼断头之险不得进可存问
计震请以轻兵缘山背上凭高鼓噪发矢石贼惊走已复纵火自卫震身被重铠与麾下
履火突入生得师囊及杀首领三十人进秩五等还知
麟州建宁砦初契丹将小奇噜攻麟府诸城郭震父宗闵领本道兵马屡摧败之靖康元
年十月太原陷奇噜驱叛卒与夏人奚人围建宁扣壁
语震曰汝父夺我居破我兵掩我骨肉我忍死到今若急举城降当全汝躯命时城中守
兵不满百震与战士约斩一级赏若干官帑竭继以家
人服珥吏士感激自奋越旬矢尽力乏城不守与子居中执中力战俱没惟长子存中从
征河北独免明年宗闵亦死事于长安建炎二年诏赠
震武经郎存中贵请于朝谥曰恭毅

△朱昭

朱昭字彦明府谷人以效用进累官震武城兵马监押摄知城事金兵内侵夏人乘
虚尽取河外诸城遂攻震武昭募骁锐兵卒千余人夜
缒兵出薄其营营中惊乱城上鼓噪乘之杀获甚众夏人昼夜进攻不止是时诸城降者
多昭故人语昭曰天下事已矣忠安所施昭叱曰汝辈
背义偷安不异犬彘尚敢以言诱我乎我惟有死耳凡被围四日不可复支昭召诸校谓
曰城且破妻子不可为贼污幸先戕我家而背城死战
众未应昭幼子戏阶下遽起手刃之长子惊视又杀之径领数卒屠其家人舁尸纳井中
将士有妻孥者皆尽杀之昭谓众曰我与汝曹俱无累
矣部落子有阴与贼通者告之曰朱昭与其徒各杀其家人将出战人虽少皆死士也贼
大惧以利啖守兵得登城昭勒众于通衢接战自暮达
且尸填街不可行昭马蹶坠堑贼驩曰得朱将军矣欲生致之昭瞑目仗剑无敢前者旋

中矢而死

△曾孝序 【曾吁 陆有常 张侃 丁兴宗】

曾孝序字逢原泉州晋江人以荫补将作监主簿监泰州海安盐仓因家泰州累官至环庆路经略安抚使时蔡京方行结余俵余之法尽括民财孝序上疏言其非是京怒遣御史宋圣宠劾其私事锻炼无所得削籍窜岭表遇赦量移永州京罢相授显谟阁待制知潭州复以论猺事与吴居厚不合落职知袁州寻复职再知潭州道州猺人叛讨平之进显谟阁直学士改龙图阁徙知青州高宗即位迁徽猷阁学士升延康殿学士召赴行在既而青州民诣南都借留许之先是临朐士兵赵晟聚众为乱将官王定失利而归孝序责以力战自赎定乃以言撼败卒夺门斩关入孝序出据厅事瞋目骂之遂与其子宣教郎吁皆遇害城无主遂陷知临淄县陆有常率民兵拒守死于阵知益都县张侃千乘县丞丁兴宗亦死之后赠孝序五官为光禄大夫谥威愍子吁承议郎有常朝散郎录其家一人侃兴宗各赠二官官二子

△薛良显

薛良显字贵勤温之瑞安人登崇宁二年进士第累官大宗正丞出为江东转运使江宁军校周德作乱良显闻变率众与战死之

△唐敏求

唐敏求字好古太常当涂人宣和六年进士调德化主簿盗起敏求挺身率众捍贼遇害事闻加赠朝官补其子楠将仕郎

△郭僎

郭僎字同升开封祥符人权咸平县丞靖康初勤王兵有剽掠邑界者撰率民兵击之得犯者斩以徇寻知宣城县苗傅刘正彦之变说郡守刘珣募勇士倍道赴难人皆黠之通判金州权饶州浮梁宰未行时有贼张顶花者已逼县境众止之僎曰安逸则就艰危则辞非我所学径就道至县约束吏士誓以死战贼闻言伪降入邑为变邑官窜伏僎曰吾为宰义不可去端坐公署大骂不绝口遂遇害诏赠承议郎录其后二人 【按宋史原以郭赞王进吴从龙三人附传考赞等俱死于金今析入别卷】

△孟彦卿 【赵民彦 谢澹】

孟彦卿忠厚从父也通判潭州建炎三年潭城中叛卒焚掠彦卿招安其众未几溃兵杜彦自袁州入浏阳遂犯善化长沙二县彦卿率民兵拒之贼退还浏阳彦卿追与之战俄而民兵有自溃者贼遂乘之杀彦卿持其首以告所掠民兵曰此善战孟通判首也因支解以徇添差通判赵民彦率民兵赴之鏖战浏阳城南杀伤甚众为闲者折其阵中认旗众惊溃民彦为

贼所得邑士谢澹以才勇众推为前锋助民彦战淳手

杀数十人力屈亦被执贼并杀之事闻彦卿民彦并赠直龙图阁官其家各三人淳字景祥赠成忠郎官其子晞古

△胡唐老 【郑凝之】

胡唐老字俊明枢密副使宿之曾孙也崇宁闲登进士第历南京国子博士知江陵县召为秘书省校书郎靖康元年擢殿中侍御史金人再攻京师以唐老请拜康王河北兵马大元帅京城破搜括金银分命朝臣董之以台臣纠察唐老预焉寻出知无为军建炎三年迁知衢州苗傅败走引乱兵犯城唐老拒之以功擢秘阁修撰未几进徽猷阁待制充两浙宣抚司参谋官知镇江府兼浙西安抚使杜充降于金建康失守溃卒戚方等趣镇江城壁颓圯兵不满千唐老度力不敌因抚之无何方欲犯临安妄言赴行在请唐老部众以行不从方众环胁之唐老怒骂不已遂遇害诏赠徽猷阁直学士谥定愍时安抚司机宜郑凝之亦以兵死诏官其家一人疑之戡孙也

△刘晏

刘晏字平甫严州人入辽举进士为尚书郎宣和四年帅众来归授通直郎金人逼京师以晏总辽东兵号赤心队建炎初从刘正彦击降淮西贼丁进迁朝散郎正彦反晏归韩世忠世忠追正彦及苗傅于浦城晏以所部力战正彦既擒世忠上其功迁一官羣寇犯常州郡守请晏为援晏以精锐七千人出奇破之进直尼图阁保马迹山以捍寇宝再至晏遣舟师迎战降其众会戚方围宣城急命晏往援晏至城下未立营垒出不意直捣方帐下方大惊却走晏欲生致方单骑追之方率其众还战晏不能敌犹手杀数十人为贼所害事闻赠龙图阁待制官其子四人

△王侑 【李唐俊 潘偁 韦绩 蒋夔 朱嗣孟】

王侑以通判恮州权广德军建炎末盗戚方引兵过广德侑与权判官李唐俊权法司潘偁权知广德县韦绩权丞蒋夔皆死后赠侑二官唐俊等皆京秩录其家各一人朱嗣孟饶州乐平人宣和闲进士为广德司户兼司理当戚方犯广德守遣嗣孟招安之嗣孟直诣贼垒为陈顺逆祸福方以连己杀之事闻赠宣教郎官其子

△陈求道

陈求道字得之咸宁人登进士第靖康闲判都水监朝议二帝出郊请和求道力争不听金人立张邦昌下令在京官不朝者死求道称疾不往呕血累日以二帝蒙尘屡欲自杀因救得免宗泽尹开封使求道治陈留决河七日

尽复故道建炎四年命为襄邓随郢镇抚以奏兵食不
给待命未行自咸宁挈家就食嘉鱼值乱兵起招抚刘忠叛一夕数千人驱求道与其家
至茗山逆旅具酒食欲奉为主将南走湖湘求道正色
峻辞贼怒杀甚妻蔡及二子符佺必欲从已求道骂愈厉贼斫其口拔舌断之遂死独符
子凯窜山谷得免

△连万夫

连万夫德安人或曰南夫弟也补将士郎建炎四年羣贼犯应山万夫率邑人保山
砦贼不能犯寇浪子者以兵至围之三日卒破之贼知
万夫勇敢有谋欲留为用万夫怒厉声骂贼为所害赠右承务郎官其家一人

△孙知微

孙知微者以朝请大夫通判舒州绍兴元年贼刘忠入其境执知微不屈忠怒齧而
食之 【按知微传原附于郑振之后以守土之臣不
应列于保捍乡里者后虽同属死事而异时异地牵合不伦今为析出另编于此】

△赵士隆 【赵士真 赵士道】

赵士隆字景瞻太宗之后生五岁补右班殿直既长不事科举去为郡县吏累迁至
淮南西路兵马钤辖驻寿春剧贼丁一箭众号十万来
攻城郡守悉以备御委士隆贼三旬不退士隆募敢死士与之谋有张宣者应募独持槊
縋城下击杀数十人贼众披靡乃选壮士数百人夜开
城门出其不意击走之以功迁三官秩满授江东路钤辖李成叛据江淮遣其党马进围
九江士隆竭力捍守绍兴元年正月诏张俊为江淮招
讨使责以讨贼未至而城已陷时城中罢卒仅数千搘拄百余日食尽城破众号呼曰无
杀我赵钤辖成素服士隆之义欲以为伪安抚使士隆
怒骂曰贼欲屈我耶阴裂帛书示诸子曰贼不杀我我义不苟活汝辈得出当为我雪耻
遂仰药而卒贼怒并害其家数十口事闻帝嘉悼赠武
功大夫士隆六子不愆不■〈义上心下〉不愆不愆不愆不愆是役也不■〈义上心
下〉不愆不愆死焉 【按原传此下附有赵士医士
跋叔皎叔凭训之垒之聿之陈自仁刘玠各传训之自仁死于永丰叛军士医等皆死于
金与士隆等死于寇者不同今并析出另传】 时宗子
有士真士道者皆以死事闻士真权知阳信军寇刘满至士真拒之兵溃遇害后赠右朝
泰大夫官其一子士道以武翼大夫守江州绍兴五年
马进寇州士道遇害赠武德大夫官其家二人

△赵师檠

赵师檠以罪拘管西外宗正司会寇逼尤溪福建提刑王梦龙令师檠统卒数百往
戍寇至迎敌于林岭身为先锋战十余合贼至益众师

檣所乘马适陷贼断其左臂师檣以右手拔背刀斩七级力尽而死赠武节郎与一子恩泽

△马俊

马俊或曰进太平州慈湖砦兵也绍兴二年砦军周青等据州叛俊阴结其徒十人杀贼至南门伺青出上马斫中颊九人惧不敢前俊与妻子皆遇害三年赠修武郎

△谢皋

谢皋开封人为镇抚使统制官李成陷虢州欲降之皋指腹示贼曰此吾亦心也自剖其心以死

△范旺

范旺南剑州顺昌县巡检司军校也顺昌盗俞胜等作乱官吏皆散士军陈望与射士张袞谋举砦应之旺叱之曰吾等父母妻子皆受国家廩食以活今反助贼为虐是无天地也凶党忿剔其目而杀之一子曰佛胜年二十以勇问贼诈以父命召之至则俱死妻马氏贼胁污之不从节解之绍兴六年诏赠承信郎

△易青

易青为都督行府摧锋军效用广东贼曾袞叛绍兴六年经略使连南夫与摧录军统制韩京督兵讨之募敢死士夜劫袞营青在行中为所执贼驱至后军赵续砦外谓续曰汝大军为我擒者甚众青大呼曰勿信所擒者我尔贼又言吾不汝杀第令经略持黄榜来招安青又呼曰勿听任贼杀我我惟以一死报国贼怒焚之事闻特赠保义郎合门祗候

△郑振

郑振字亨叔兴化军仙游人建炎中盗杨勍起振纠集民兵御之贼遁去自是屡破羣盗郡县知名绍兴十六年盗詹铁又入振井里振师众拒之杀数十人仓猝遇害

△王师道 【王辉】

王师道字居中兖州人任吉州栗传砦巡检绍兴中与盗战于吴村每射辄毙追击数里遇伏力战死事闻官其二子又有王辉者青州人亦尝为栗传砦巡检靖康初诏起义兵辉应募立奇功官至正使寓吉州淳熙二年茶寇犯郡以辉骁勇檄之使行至胜乡地险辉勇于进士卒不继为贼所得辉含血大骂遂死赠忠州刺史

△杨震仲 【郭靖】

杨震仲字革父成都府人登淳熙二年进士第知闻州新井县辟兴元府通判权大安军吴曦叛檄招之震仲辞疾不行时军教授史次秦

亦被檄谋于震仲震仲曰大安为西蜀第一州若首从其招则诸郡风靡矣顾力不能拒
义死之教授非城郭臣且有母在脱去为宜因属次秦
曰吾死以匹绢缠身敛以小棺足矣曦遣兴州都统司机宜郭鹏飞代震仲趣行益急遂
饮药死次秦如其言敛而寘于萧寺鹏飞迫次秦行次
秦自涂其目其母闻之命家人以讣闻乃还明年曦伏诛诏赠震仲朝奉大夫直宝谟阁
谥节毅官其二子次秦改秩为利路主管文字有郭靖
者高桥土豪巡检也曦之叛阶成和凤四州之民避兵者顺嘉陵而下过大安军杨震仲
计口给粟抚之境内无一馁者及震仲死曦尽驱之使
还靖在其中行至白崖关告其弟端曰吾家世为王民自金人来侵避难入关今为曦所
逐愿死于此为赵氏鬼遂赴江而死

△陈霖

陈霖字傅容泉州人嘉定十三年进士为瑞金尉盗起江闽霖力战被执不屈遇害

△胡斌

胡斌为殿前司将官戍邵武绍定三年江闽寇作斌将弱卒数百奋身迎战格杀甚
众贼益生兵官军仅存数十人或告以众寡不敌盍避
之斌曰郡民死以万计其生者数千人由东门出我不缀其势使得脱走则贼蹶其后无
噍类矣遂大呼曰我死救百姓兵尽矢穷遂遇害其尸
僵立移时始仆事闻赠武节大夫录其后一人

△高谈

高谈字景遂邵武光泽人绍定二年旁郡盗作诸子请避之谈不听明年盗入境诸
子又请谈曰有庙祐在将焉之盗至谈出诘之盗怒执
诸庭其家赎以牛酒金帛皆不释谈曰然则将何为盗曰我欲东破武阳若得耆老如尔
者率是乡子弟吾其济乎谈曰斯言奚为至我唾贼大
骂遂遇害里人赖以免

△孙益 【顾绪 顾绚】

孙益扬州泰兴人绍定中李全犯扬州游骑薄泰兴城下县令王爚募人守御益起
从之俄贼兵大至益率众拒战厉声呼曰王令君募我
辈来将以守护城邑也今贼至城下不为一死何面目见令君乎遂身先赴敌死之同时
顾绪顾绚俱战死事闻赠益保义郎绪绚承节郎各官
其子一人

△王大寿

王大寿泉州人为左翼队将绍定五年海寇王子清犯围头郡守真德秀遣大寿领
卒百人出防猝与贼遇控弦毙贼十余人后无援者遂
没从死者五人贼就俘剖心祭之事闻赠官恤其家

△侯晷

侯晷字道子温州乐清人以武举授合浦尉历柳城令步军司干办公事侍卫马军行司计议官宝佑五年制置使贾似道辟通判海州兼河南府计议官李松寿据山东突出涟泗晷鏖战城下死之阖室遇害谥节毅

△王孝忠

王孝忠为镇江前军统制兼淮东路分戍淮阴杨贵叛孝忠率众迎战俄水军统制朱信降贼孝忠孤军不敌死焉

△陈东

陈东字少阳镇江丹阳人以贡入太学钦宗即位伏阙上书请诛蔡京梁师成李邦彦朱勔王黼童贯六人以谢天下言极愤切明年金人逼京师东又请诛六贼时梁师成尚留禁中东发其前后奸谋乃谪死李邦彦议与金和李纲及种师道主战邦彦因小失利罢纲且割三镇东率诸生伏宣德门下上书请用纲而斥邦彦等军民从者数万舁登闻鼓挝坏之喧呼震地于是亟诏纲入复领行营金人既解去学官观望时宰议屏伏阙之士先自东始京尹王时雍欲尽致诸生于狱人人惶恐朝廷用杨时为祭酒复东职然后定吴敏欲弭谤议奏补东官赐第除太学录东力辞以归高宗即位五日相李纲又五日召东至未得对会纲去乃上书乞留纲而罢黄潜善汪伯彦不报请亲征以还二圣车驾勿幸金陵又不报会布衣欧阳澈亦上书言事潜善遽以语激怒高宗言不亟诛将复鼓众伏阙书独下潜善所府尹孟庾召东议事东请食而行手书区处家事授其从者曰我死尔归致此于吾亲食已如厕吏有难色东笑曰我陈东也畏死即不敢言已言肯逃死乎吏曰吾亦知公安敢相迫顷之东具冠带出别同邸乃与澈同斩于市东初未识纲特以国故至为之死越三年高宗感悟追赠东澈承事郎绍兴四年并加朝奉郎秘阁修撰官其后二人【按陈东以下诸人俱以言事死义仍宋史旧例附于凡死事者之后】

△欧阳澈

欧阳澈字德明抚州崇仁人靖康初应制条敝政陈安边御敌十策州未许发退而复采朝廷之关失政令之乘违可以为保邦御俗之方去蠹国残民之贼者十事复为书上闻已而又论列十事并言臣所进三书实为切要会金人南下汴京城破乃徒步走行在高宗初即位澈伏阙上封事极诋用事大臣与陈东俱见杀

△马伸

马伸字时中东平人绍圣四年进士为成都郫县丞崇宁初范致虚攻程颐为邪说

下河南府尽逐学徒是时伸注西京法曹欲依颀门以学颀固辞之卒受中庸以归靖康初以孙傅荐君赴京师御史中丞秦桧迎辟之擢监察御史及汴京陷金人立张邦昌胁百官推戴众唯唯伸独奋曰吾职谏争忍坐视乎乃与御史吴玠约秦桧共为议状乞存赵氏复嗣君位邦昌既僭位伸首具书请速迎奉元帅康王银台司视书不解臣辞不受伸叱曰吾今日不爱一死尔欲吾称臣耶即缴申尚书省以示邦昌邦昌得书气沮明日议迎哲宗后孟氏垂帘追还伪赦乃遣冯澥李回等迎康王高宗即位伸拜章以城陷不能救主迁不能死当就窜削帝知其忠擢殿中侍御史抚谕荆湖广南复请诛邦昌并其党王时雍等及所过州县察吏贤否与民利疚以次列上于朝伸至湖广朝廷方召孙覲谢克家乃奏覲克家趋操不正在靖康闲与王时雍王及之等七人结为死党附耿南仲倡言不主和议者则执送金人覲受金人女乐章表媚之乃负国之贼宜速远窜不报伸又进疏历数黄潜善汪伯彦罪状望速罢政柄别选贤者共图大事疏入留中明日改卫尉少卿伸以论事不行辞不拜录其疏申御史台且言臣言可采即乞施行若非是合坐诬罔之罪于是诏伸言事不实责濮州监酒税时用事者恚甚必欲杀之以濮迫寇境故有是命伸怡然幙被而行死道中明年金人陷广陵潜善伯彦以误国窜殛台臣奏伸尝论潜善等罪复以卫尉少卿召实未知其存亡也绍兴初诏赠谏议大夫

△吕祖俭 【吕祖泰】

吕祖俭字子约祖谦之弟也受业祖谦如诸生始仕监明州仓将上会祖谦卒部法半年不上者为违年祖俭固请终期丧朝议黷之诏违年者以一年为限自祖俭始服除更赴铨丞相周必大语尚书尤袤招之祖俭已调衢州法曹而后往见寻以荐召除籍田令历司农簿乞补外通判台州宁宗初险太府丞时韩侂胄寢用事假正言李沐论罢右相赵汝愚祖俭奏汝愚即不能无过然未至如言者所云侂胄怒曰吕寺丞乃预我事耶会祭酒李祥博士杨简皆以讼汝愚劾罢祖俭乃上封事极言其非疏既上有旨安置韶州会楼钥进读吕公着元佑初所上十事因言如公着社稷臣犹将十世宥之前日太府寺丞吕祖俭以言事得罪者其孙也今投之岭外有辜圣朝恩礼臣窃为陛下惜之帝问祖俭所言何事然后知前旨不由中出适有为侂胄计者谓自赵丞相去天下已切齿今又投祖俭瘴乡必致于死则怨益重曷若少徙内地侂胄悟得改吉州遇赦量移高安二年卒诏许归葬方祖俭之谪也其从弟祖泰字泰然徒步往省之留月余语其友王深厚曰我虽无位义必以言报国

当少须之今未敢以累吾兄也及祖俭没贬所嘉泰元年值周必大降少保致仕祖泰愤之乃诣登闻鼓院上书论侂胄有无君之心请诛之以防祸乱其略曰丞相赵汝愚今之有大勋劳者也侂胄首逐之侍从彭龟年陛下旧学之臣也侂胄亟去之若其徒苏师旦特平江之吏胥假潜邸而得节钺周均韩氏之厮役以皇后亲属得大官不识陛下在潜邸时果识师旦乎椒房之亲果有均乎凡侂胄之徒自尊大而卑朝廷一至于此愿亟诛侂胄而罢遂其徒独有用必大可用宜以代之不然事将不测书出中外大骇有旨杖之百配钦州牢城收管祖泰自顾必死冀以身悟朝廷无惧色既贬道出潭州钱文子为醴陵令私赈其行乃匿襄郢闲及侂胄诛朝廷访得祖泰所在诏雪其冤特补上州文学改授迪功郎监南岳庙丧母无以葬至都谋于旧识得寒疾不愈索纸书曰吾与兄共攻权臣今权臣诛吾死不憾独吾生还无以报国且未能葬母为可憾耳乃卒京尹王柟为成敛归葬焉

△杨宏中 【林仲麟 徐范 张衡 蒋傅 周端朝】

杨宏中字充甫福州人弱冠补国子生当右丞相赵汝愚之罢国子祭酒李祥博士杨简连疏争救得被斥逐宏中曰师儒能办大臣之冤而诸生不能留师儒之去于谊安乎众莫应独林仲麟徐范张衡蒋傅周端朝五人愿预其议遂上书曰自古国家祸福之由初非一道惟小人中伤君子其祸尤惨君子登庸杜绝邪枉其心实在于爱君忧国小人得志仇视正人必欲空其朋类然后可以肆行而无忌于是人主孤立而社稷危矣臣窃见近者李沐论前宰相赵汝愚数谈梦兆擅权值党将为不利以此加诬蒙蔽天听中外咨愤章颖力辨其非首遭斥逐闻者已骇祭酒李祥博士杨简相继抗论毅然求去同日报罢六馆之士为之愤惋涕泣今李沐自知邪正之不两立而公议之不直已也乃欲尽去正人以便其私于是指托朋党以罔陛下臣恐君子小人消长之机于此一判则靖康已然之监岂堪复见于今日耶愿陛下特奋睿断明示好恶窜李沐以谢天下还祥简以收士心臣虽身膏鼎镬实所不辞书奏六人皆编置以宏中为首天下号为六君子嘉泰三年宁宗幸学特旨放还开禧元年宏中登进士第教授南剑州及侂胄诛先以言得罪者悉加褒录特迁宏中一秩寻以荐授户部架阁历太学正改武学博士时谏官应武论一学官宏中季试策士及其故武衙之会秋戌祀武成王故事祭酒行事博士摄亚献至是不命宏中宏中争之于是武劾宏中与同列竟且谓其激矫不自爱遂通判潭州以亲老调祠差知武冈军未受卒端朝字子静嘉定三年试礼部第一终刑部侍郎兼侍讲衡字用叟以父

任补官仲麟字景仲傅字象夫久居学校忠鯁有闻咸以不偶死范自有传

△华岳

华岳字子西贵池人为武学生上书忤韩侂胄下大理贬建宁圜土中郡守傅伯成怜之命狱卒使出入毋系伯成去又迁守李大异复寘狱侂胄诛放还复入学登嘉定武科第一【按岳为贵池人及登嘉定武科学一宋史不详今据岳所著翠微南征录增入】为殿前司官属谋去丞相史弥远事觉下临安狱狱具坐议大臣当死宁宗知岳名欲生之弥远曰是欲杀臣者竟杖死于东市

△邓若水

邓若水字平仲隆州井研人吴曦叛州县莫敢抗若水方为布衣时吴曦杀县令起兵讨之不果乃仗剑徒步如武兴欲手刃曦中道闻曦死乃还登嘉定十三年进士第时史弥远柄国久若水对策极论其奸考官寘之末甲策语播行都士争诵之理宗即位应诏上封事谓行大义然后可以弭大谤收大权然后可以固大位除大奸然后可以息大难反复数百言制置司不敢为附驿却还之以格当改官奏上弥远取笔横抹之而罢嘉熙闲召为太学博士当对复草奏数千言大略谓先帝不得正其终陛下不得正其始臣请发史弥远家斲棺取其尸斩之以谢在天之灵将对前一日假笔吏于所亲潘允恭允恭谕笔吏窃录之惧并及祸走告丞相乔行简亦大骇翼日早朝奏出若水通判宁国府退朝召合门舍人问曰今日有轮对官乎舍人以若水对行简曰已得旨补外矣可格班若水袖其书待庑下舍人谕使去若水怏怏而退到官数月竟以言罢遂不复仕贾似道在京湖闻其名辟参军事若水雅思其乡乃起从其招因西归蜀居山中有盗夜劫之若水危坐不动盗击其首流血被面亦不动乃舍去有一子膂力绝人筑山砦以兵捍卫乡井砦破举家遇害

钦定续通志卷五百十一

●钦定续通志卷五百十二 忠义传五

忠义传

宋【二】

○宋二

傅察 李翼【李耸 王唐臣 刘子英 阎城 折可与】 张忠辅

孙益【孙谷】 史抗稽古 稽哲

蒋兴祖 张确 李震 李涓 黄友 王士言

祝公明 刘士英【王稟 方笈】

李邈【刘翊】 张克戩 阮骏 姜绶 陈遘【适】

霍安国【林渊 张彭年 赵士訥 张谌 于潜
沈敦张行中】 欧阳珣 刘翰 徐揆 李若水 吴
革 滕茂实 赵士跋

傅察

李翼【李耸 王唐臣 刘子英 阎城 折可与】

张忠辅

孙益【孙谷】

史抗【史稽古 史稽哲】

蒋兴祖

张确

李震

李涓

黄友

王士言

祝公明

刘士英【王稟 方笈】

李邈【刘翊】

张克戩

阮骏

姜绶

陈遘【陈适】

霍安国【林渊 张彭年 赵士訥 张谌 于潜 沈敦 张行中】

欧阳珣

刘翰

徐揆

李若水

吴革

滕茂实

赵士跋

△傅察

傅察字公晦孟州济源人中书侍郎尧俞从孙也年十八登进士第蔡京在相位欲妻以女拒弗答累官吏部员外郎宣和七年接伴金国贺正旦使将及燕闻金人来侵或劝母遽行察曰受使以出闻难而止若君命何遂行抵境上金人拥之东北去遇斡里雅布领兵至驿导使拜

察曰吾奉使大国见国主当致敬今来迎客而胁我至此又止见太子太子虽贵亦人臣也当以宾礼见何用拜为斡里雅布怒曰吾兴师南向何使之称凡尔国得失为我道之否则死察曰主上仁圣与大国讲好信使往来项背相望未有失德太子千盟而动意欲何为还朝当具奏斡里雅布曰尔尚欲还朝耶左右促使拜白刃如林或摔之伏地衣袂颠倒愈植立不顾反复论辨斡里雅布曰尔今不拜后日虽欲拜可得耶麾令去察知不免谓官属侯彦等曰我死必矣尔等若万一得脱幸记吾言告吾亲使知我死国少纾其无穷之悲也众皆泣既次燕山强之不屈遂见杀副使蒋噩及彦辈归道察不屈状赠徽猷阁待制后谥忠肃

△李翼 【李耸 王唐臣 刘子英 阎城 折可与】

李翼麟州新秦人宣和末为代州西路都巡检使屯崞县金人取代遣来谕降翼射却之帅士卒守城义胜军统领崔忠杀都监张洪辅夜引金兵入城翼挺身搏战达旦被执尼堪欲臣之骂不屈与县令李耸丞王唐臣尉刘子英监酒阎城将官折可与同死之

△张忠辅

张忠辅宣和末为将同崔中 【按崔忠杀张洪辅事见李翼传考徐梦莘三朝北盟会编及李翼行状所载并同本传讹洪作忠讹忠作中均误】 折可与守崞县金人来攻中有二心忠辅宣言于众曰必欲降请先杀我中设伏给与议事斩忠辅首掷陴外建炎中官可与子五人而忠辅不与士论惜之

△孙益 【孙谷】

孙益不知其所以进宣和末以福州观察使知朔宁府被命救太原时敌势张甚或言不若引兵北捣云中彼之将士室家在焉所谓攻其所必救也益曰此策固善奈违君命因跃马冒围至城下张孝纯不肯启门遂死之 【按封有功编年载孙翊为金人所杀事与传同张汇金国节要载孙翊为麾下所害事与传异而皆作孙翊本传作益恐误】 初益在朔宁察郡人孙谷可用奏为掾属益出师属以后事益死敌骑来攻众议欲开关迎之谷争弗得叹曰吾身已许国且不忍负孙公之托也或举刃胁之无慑容遂见杀

△史抗 【史稽古 史稽哲】

史抗济源人宣和末为代州沿边安抚副使金人围代急抗夜呼其二子稽古稽哲谓曰吾昔语用事者择帅增戍雁门以谋未形之患言不吾省今重围既固外援不至吾用六壬术占之明日城必陷吾将死事汝辈能听吾言当令家属自裁然后同赴义二子泣曰唯父命明日城

果破父子三人突围力战死于城隅

△蒋兴祖

蒋兴祖常州宜兴人之奇之孙也以荫累调饶州司录迁知开封府武阳县治为畿邑最靖康初金兵逼京师道过县或勤使走避兴祖曰吾当死于是与妻子留不去监兵与贼通斩以徇金数百骑来攻不克明日师益至死焉妻及长子相继死诏赠朝散大夫

△张确

张确字子固邠州宜禄人元佑中擢进士第徽宗即位应诏上书列上籍宣和二年召至京师青溪盗起确言此皆王民但庸人援之耳愿下哀痛之诏省不急之务敢以花石淫巧供上者死抚绥胁附毋以多杀为功浹旬之闲可以殄灭忤王黼意通判杭州摄睦州事以方略告诸将用其言盗平徙知坊汾解三州七年又徙隆德府金兵围太原确表言河东天下根本安危所系若得秦兵十万人犹足以抗敌不然惟有一死报陛下耳书累上不报明年二月金兵至确乘城拒守或献谋自东城溃围出确怒叱曰确守士臣头可断步不可移也乃战而死事闻赠述古殿直学士

△李震

李震汴人也靖康初金人逼京师震时为小校率所部三百人出战杀人马七百余已而被执金人曰南朝皇帝安在震曰我官家非汝所当问金人怒而脔割之肤肉垂尽犹骂不绝口

△李涓

李涓字浩然驸马都尉遵勳曾孙也以荫为殿直召试中书易文阶至通直郎知鄂州崇阳县靖康元年京城被围羽檄召天下兵涓以所募六百锐士请行而募士多市人不能军涓出家钱买牛酒激犒之即日引而东比过淮蒲圻嘉鱼二县之兵始至合而前至蔡敌游骑已集涓驰马先犯其锋步卒蒙盾径进颇杀其骑且走涓乘胜追北十余里与敌遇飞矢猬集二县兵亟舍去涓创甚犹血战大呼叱左右负已遂死焉朝廷录其忠赠朝奉郎官其三子

△黄友

黄友字龙友温州平阳人登进士第调永嘉瑞安二县主簿方腊窃发友同诸将所至数复婺寇复作守留友摄兵曹为殄灭计友请往谕之既次浦江贼望风解去复单骑次武义贼众持钉一楹置其前友正色叱之曰汝等何速死耶贼首李德壮之亟麾退一境贴然通判澶州金人败盟郭药师以常胜军叛燕山响应友独出战躬犯矢石裂唇落齿钦宗初制置使詹

度言友久服武事筹略过人丞相何口更荐之召对问
视友唇齿破裂状为之称叹赍予甚渥进直徽猷阁制置司参谋官同种师中解太原围
友遣兵三千夺榆次得精万余斛明日大军进榆次十
里而止友亟白师中此地三面受敌不利军不听友仰天叹曰事去矣迨晓兵果四合益
以铁骑士卒奔溃敌执友谓曰降乎友厉声曰男儿死
耳遂遇害帝书忠节传家四字旌其间官其后八人

△王士言

王士言武举进士累立战功宣和初擢河东廉访使方腊为寇冯熙载荐为东南第
三将首解嘉兴之围端康元年诏以浙西兵往河东防
秋金人攻泽州毕力扞御他将守城西南隅者陷士言巷战而死赠拱卫大夫忠州团练
使官其后五人

△祝公明

祝公明处州丽水人太原府孟县主簿靖康闲金人逼河东令弃官去公明摄县事
围守踰年城陷不屈子陶为唐州司户中原失守陶亦
死官所建炎中赠公明承事郎

△刘士英 【王稟 方笈】

刘士英宣和闲为温州教授方腊陷处州州人争具舟欵遁士英独奋身任责推州
诸生石砺为谋主分其地为八隅以钟为约令民闻钟
声则趋所守堞未几贼来攻拒守凡四十余日官军既至贼溃去靖康初通判太原府金
人入境帅臣张孝纯欲避之士英率通判方笈将官王
稟力止孝纯及城陷稟赴火死士英持短兵接战死之笈在金因谐和使附书言二人死
节 【按钦宗纪载金人克太原副总管王稟通判方
笈皆死之是笈乃与稟同时死节与本传所载互异】 后刻石于温衢二州

△李邈 【刘翊】

李邈字彦思临江军清江人以父荫为太庙斋郎初调安州司理用荐改京官擢通
判河闲府以迁蔡京童贯换右列由承议郎换庄宅副
使知霸州为辽国贺正副使还贯将连金人夹攻契丹呼邈至私第使附已邈不从上书
言契丹不可灭都转运使沈积中摺邈罪五十有三条
鞠治一无所得乃以建神霄宫不如诏免官贯收复燕山奏邈知涿州改易州皆辞不赴
叹曰国家祸乱自兹始矣金人逼京师诏趣入见邈慨
然就道既至会姚平仲战不利京师震动帝问御敌奈何邈言胜负兵家之常第古未有
和战不定而能成功者请以诸道兵畀种师道视敌为
进退时耿南仲方主和议不合金人犹驻毛驼冈乃以邈为京城西壁守御使邈言姚平
仲败绩而敌犹不敢留是畏我也不以种师道再战已

失机会尚可尾其行及河半渡击之议复格三上章致仕不允及金兵再至猝令守真定
邈谕民出财共为死守又募民为勇敢数千人而新集
之兵皆无鬪志闲道走蜡书上闻不报被围四旬城破邈巷战不克将赴井左右持之不得入执见斡里雅布胁之拜不拜以火燎其须眉及两
髀亦不顾乃拘于燕山府久之欲以邈知沧州笑而不答且说之曰天下强弱之势何常
汝不以此时归二帝及两河地岁取重币如契丹以为
长利强尚可恃乎金人韪其言复命之降终不屈愤诋甚力至捃其口犹吮血嘤之遂遇
害高宗时赠招人军节度使谥忠壮当邈之守真定也
府路都钤辖刘翊 【三朝北盟会编作刘翊】 率众昼夜同心力拒城陷犹集左右巷
战已而其下稍亡去翊挺身溃围不得出乃之孙氏山
亭中自缢死

△张克戩

张克戩字德祥侍中耆曾孙也第进士累官卫尉丞初克戩从弟克公为御史劾蔡
京京再辅政修怨于张氏以微事黜克戩踰年起知祥
符县宣和七年八月知汾州十二月金兵逼河东围太原太原距汾二百里遣将宁珠贝
勒来攻纵兵四京克戩毕力扞御数选劲卒挠敌营出
不意焚其栅敌遂引去论功加直秘阁靖康元年进直龙图阁右文殿修撰太原不守克
戩下令兵民曰太原既陷吾固知亡矣愿与此城终始
以明吾节诸君其自为谋皆泣不能仰视同辞而对曰公父母也愿尽死听命乃益厉兵
儆守身帅将士擐甲登陴虽屡却敌而援师迄不至十
月朔金益万骑来攻愈急克戩度不得免手草遗表及与妻子遗书绁州兵持抵京师明
日金兵从西北隅入杀都监贾亶克戩犹帅众巷战不
利归索朝服南向再拜自引决一家死者八人事闻诏赠廷康殿学士绍兴中谥忠确

△阮骏

阮骏兴化军人绍圣元年进士为河南府少尹金人入京师率所隶兵拥护神御殿
抱神御死特赠朝议大夫

△姜绶

姜绶处州丽水人金人再围京师朝廷募忠勇士赍蜡书往南京总管司调兵赴援
绶以忠翊郎应募刲股藏书绁下南壁为逻骑所获厉
声叱骂遂被害建炎中官其子特立承信郎

△陈遘 【陈适】

陈遘字亨伯其先自江宁徙永州遘登进士第累官广西转运判官忤蔡京罢归起
知商州兴元府入为驾部金部员外郎累迁给事中请
外以直秘阁为河北转运使加直龙图阁徙淮南帝将易置发运使命选诸道计臣有阙

阅者执政以遘言蔡京曰职卑不可帝曰可除集英殿
修撰使往京乃不敢言遂为副使未几升为使时运渠壅涩遘使决吕城陈公两塘达于
渠漕路甫通而朱勔花石纲塞道遘捕系其人而上章
自劾帝为黥勔人进遘徽猷阁待制宣和二年冬方腊乱诏以属遘加龙图阁直学士经
制七路治于杭时县官用度百出遘创议度公私出纳
量增其赢号经制钱其后总制使翁彦国仿其式号总制钱于是天下有经总制钱名自
两人始也又言妖贼陵暴州县搜求官吏备极惨毒盖
贪污嗜利之人倚法侵牟骚动不知艺极不平之气结于民心一旦乘势如此臣愿采摭
官吏奸赃尚仍旧习者按治以闻乞重寘于理许之杭
经巨寇后河渠堙窒水潦为病遘以冬月治河不两月毕杭人利焉徙河北都转运使进
延康殿学士历知中山真定河闲府钦宗立加资政殿
学士积官至光禄大夫复徙中山金人再至遘冒围入城坚壁拒守诏康王领天下大元
帅命遘为兵马元帅受围半年外无援师京都既陷割
两河求和遘弟光禄卿适至中山临城谕旨遘遥语之曰主辱臣死吾兄弟平居以名义
自处宁当卖国家为囚孥乎适泣曰兄但尽力勿以弟
为念遘呼总管使尽括城中兵出战总管辞遂斩以徇又呼步将沙振往振素有勇名亦
辞遘固遣之振怒且惧衷刃入府害遘于堂及其子锡
并仆妾十七人长子巨以官淮南获免振出帐下卒噪而前曰大敌临城汝安得杀吾父
执而摔裂之身首无余城中无主将乃开门出降金人
入见其尸曰南朝忠臣也敛而葬诸铁柱寺建炎初赠特进适由开封少尹卫尉少卿至
光禄卿是役也金人执之以北后十年死于云中

△霍安国 【林渊 张彭年 赵士諲 张湛 于潜 沈敦 张行中】

霍安国不详其家世靖康元年以右文集英殿修撰知怀州金骑再至被围安国与
鼎澧兵共守扞御不遗力拜徽猷阁待制城陷将官王
美投濠死尼堪引安国以下分为四行问不降者为谁安国曰守臣安国也问余人通判
州事直徽猷阁林渊兵马钤辖济州防御使张彭年都
监赵士諲 【范仲熊北记作士谔】 张湛于潜鼎澧将沈敦张行中及队将五人同辞
对曰渊等与知州一体皆不肯降乃解衣面缚杀十三
人而释其余安国一门无噍类明年赠延康殿学士

△欧阳珣

欧阳珣字全美吉州庐陵人崇宁五年进士累官将作监丞金人逼京师朝议割河
北絳磁深三镇地讲和珣率其友九人上书极言不可
及事急会议珣复抗论当力战战败而失地他日取之直不战而割地他日取之曲时宰
怒欲杀珣乃遣珣奉使割深州珣至深州城下恸哭谓

城上人曰朝廷为奸人所误至此吾已办一死来矣汝等宜勉为忠义报国金人怒执送燕焚死之

△刘韜

刘韜字仲偃建州崇安人第进士累官陕西转运使刘法死夏人攻震武韜摄帅郾延出奇兵捣之解其围夏人来言顾纳款谢罪皆以为诈韜曰兵兴累年中国尚不支况小邦乎此情实也密疏以闻诏许之西边自是遂安韜求东归拜徽猷阁待制提举崇福宫起知越州方腊陷衢婺越大震官吏悉遁或具舟请行韜曰吾为郡守当与城存亡不为动益厉战守备寇至城下击败之拜述古殿直学士召为河北河东宣抚参谋官时边臣言燕民思内附童贯蔡攸方出师而种师道之军溃韜意边报不实即驰白贯攸请班师又论燕蓟不可得正使得之屯兵遣饷经费无艺必重困中国还次莫州会郭药师以涿州降戎车再驾以韜议异徙知真定府药师入朝韜密奏乞留之不报徙知建州改福州加延康殿学士或言其过阙时见御史中丞有所请遂罢起知荆南河北盗起复以守真定韜单骑赴镇招贼首夏宏服罪奏以官纵其党归田里一路遂平金人谋南牧韜阴治城守以待变是冬金兵长驱内向及还治梯冲设围示欲攻击韜发强弩射之金人乃退自金兵之来诸郡皆塞门民坐困韜独从樵牧如平日以时启开钦宗善之拜资政殿学士时诸将救太原种师中姚古败以韜为宣抚副使太原陷以韜为宣抚使 【按东都事略云拜韜河北河东宣抚副使又云太原陷以韜为宣抚使盖韜始为宣抚副使后又为宣抚使也宋史脱去为宣抚使事今补入】召入覲为京城四壁守御使宰相沮罢之京城不守始遣使金营金人命仆射韩正馆之僧舍正曰国相知君今用君矣韜曰偷生以事二姓有死不为也正曰军中议立异姓欲以君为正代得以家属行与其徒死不若北去取富贵韜仰天大呼曰有是理乎书片纸使亲信持归报诸子沐浴更衣酌卮酒而缢建炎元年赠资政殿大学士后谥忠显

△徐揆

徐揆衢州人靖康元年以太学生试开封府进士为举首未及大比而遭国难钦宗诣金营不归揆帅诸生扣南熏门以书白守门者乞达二帅请车驾还阙二帅见书使以马载揆至军诘难揆厉声抗论为所杀建炎二年追录死节赠宣教郎而官其后

△李若水

李若水字清卿洺州曲周人元名若冰上舍登第靖康元年累官太常博士 【按东都事略云靖康初为太常博士宋史误作靖康元年

为太学博士今改正】 钦宗将遣使至金国议以赋入赎三镇召若水赐今名迁著作佐郎为使见尼堪于云中纔归兵已南下复假徽猷阁学士副冯澥以往甫次中牟守河兵相惊以金兵至左右谋取闲道去澥问何如若水曰戍卒畏敌而溃奈何效之今止有死耳令敢言退者斩众乃定既行迭具奏言和议必不可谐宜申饬守备至怀州遇馆伴萧庆挟与俱还及都门拘之于冲虚观独庆与澥入既所议多不从尼堪急攻城乃使若水入见帝帝幸金营成议而归擢若水礼部尚书固辞改吏部侍郎金人再邀帝出郊若水扈从以行金人计中变逼帝易服若水抱持而哭愤诋金人金人曳出击之败面气结仆地众皆散留铁骑数十守视若水绝不食或勉之曰事无可为者公昨虽言国相无怒心今日顺从明日富贵矣若水叹曰天无二日若水宁有二主哉后旬日尼堪召计事且问不肯立异姓状若水曰上皇为生灵计罪己内禅主上仁孝慈俭未有过行岂宜轻议废立尼堪指宋朝失信若水曰若以失信为过汝其尤也尼堪令拥去反顾骂不绝口监军者挝破其唇嚙血骂愈甚至以刃裂颈断舌而死高宗即位特赠观文殿学士谥忠愍

△吴革

吴革字义夫华州华阳人国初勋臣廷祚七世孙也少好学喜谈兵再试礼部不中乃从泾原军以秉义郎干办经略司公事金人南牧使尼堪军庭揖不拜责其食利败约词直气劲尼堪少屈为追回威胜诸屯兵授书使归钦宗问割地与否利害对曰金人有吞噬之意愿悉起关河中士马赴都为备诏以为武功大夫合门宣赞舍人持节谕陕西行至朱僊闻金人围京师复还与张叔夜同入城请于帝乞幸秦州又乞出城劫之使不敢近又乞诸门同出兵牵制衡突尾袭应援可一战而胜时众言已入皆不果车驾幸金营革以为堕其计往请叔夜欲身见其大师计事又不果行上皇妃后太子出郊革白孙傅乞留之不得乃与傅谋于启圣僧院置赈济局募士民就食阴以军法部勒所合已至数万多两河骁悍之士既而有立张邦昌之议革谋先诛范琼辈以三月八日起兵 【按续通鉴时同谋者马伸张所吴伦等又有内亲事官数百人皆杀妻孥焚所居共谋举义传未详载附识于此】 谋既定前期二日有班直甲士排闥入言邦昌以七日受册请急起事革乃披甲上马至咸丰门四面皆琼党给革入帐被执革骂之极口引颈受害颜色不变其麾下百人皆死

△滕茂实

滕茂实字秀颖杭州临安人政和八年进士靖康元年以工部员外郎假工部侍郎副路允迪出使为金人所留钦宗自离都城旧臣无敢

候问起居者茂实闻钦宗将至即自为哀词且篆宋工部侍郎滕茂实墓九字以授其友人钦宗及郊茂实具冠帻迎谒拜伏号泣金人迫令易服茂实力拒请从旧主俱行金人不许忧愤成疾卒云中绍兴二年赠龙图阁直学士官其家三人

△赵士跋

赵士跋濮王曾孙也靖康末为右监门卫大将军吉州团练使金人驱宗室北行士跋闲道遁之邢州结土豪将举事有告者金人执而杀之事闻赠保宁军节度使谥忠果【按士跋原附赵士隆传后今考系死于金析出另传】

钦定续通志卷五百十二

●钦定续通志卷五百十三 忠义传六

忠义传

宋【三】

○宋三

郝仲连【致厚】 郑骧 刘汲 唐重【郭忠孝 程迪】
孙昭远 吕由诚【偈 仍赵令佳】
赵伯振 韩浩【朱庭杰 王允功 王荐 周中 周辛】 郭赞
向子韶【新 子褒 子家】 宋昌祚【郑立
胡广 唐璟 蹇誉 徐炆 邵元通】 杨粹中【杜绩】
裘楫【蒋子春】 李政 郭汭【
朱友恭】 屈坚 赵叔凭 魏彦明 赵不试【叔皎】 郭
永 魏行可【郭元迈】 王复【郑褒
杨彭年】 孙晖 徐徽言【适 孙昂】 杨照【丁元】
崔纵【吴安国】 林冲之【郁
震 霆】 阎进【朱绩】 赵令■〈山上成下〉【王远 吴源 刘卓
】 陈淬【仲刚 仲敏】 赵训之【垒
之 聿之 陈自仁 刘玠】 杨邦又 朱躄【朱良 方允武】
唐琦 曾志悟 李彦仙【邵云 吕圆登
宋炎 贾何 阎平 赵成】 郑覃 薛庆 赵立 王琦
赵士医 刘惟辅【高子孺 韩青
】 刘泰 翟兴【进 亮】 牛皓【高万 任安 秦元 薛琪 张
亨】 王忠植 刘长孺
李嘉 李靓 姚兴 韦永寿【世坚】 张玘【世雄】
陈亨祖 王拱【朱赞】 强霓【

震 康杰 李伸】李诚之【士允 泰巨 泰浚 秦濯 阮希甫 赵汝标 宁时
凤 杜谔 严刚中孙中 江士旺 陈兴 曹全
邱卞 李斌】 王进【吴从龙】 刘宣 李亘【孙安道】 凌
唐佐 僧真宝

郝仲连 【郝致厚】

郑骧

刘汲

唐重 【郭忠孝 程迪】

孙昭远

吕由诚 【吕楔 吕仍 赵令佳】

赵伯振

韩浩 【朱庭杰 王允功 王荐 周中 周辛】

郭赞

向子韶 【向新 向子褒 向子家】

宋昌祚 【郑立 胡广 唐璟 蹇誉 徐旻 邵元通】

杨粹中 【杜绩】

龚楫 【蒋子春】

李政

郭汧 【朱友恭】

屈坚

赵叔凭

魏彦明

赵不试 【赵叔皎】

郭永

魏行可 【郭元迈】

王复 【郑褒 杨彭年】

孙晖

徐徽言 【徐适 孙昂】

杨照 【丁元】

崔纵 【吴安国】

林冲之 【林郁 林震 林霆】

阎进 【朱绩】

赵令■ 〈山上成下〉 【王远 吴源 刘卓】

陈淬 【陈仲刚 陈仲敏】

赵训之 【赵垒之 赵聿之 陈自仁 刘玠】

杨邦乂

朱躄 【朱良 方允武】

唐琦

曾忘 【曾悟】

李彦仙 【邵云 吕圆登 宋炎 贾何 阎平 赵成】

郑覃

薛庆

赵立

王琦

赵士医

刘惟辅 【高子孺 韩青】

刘泰

翟兴 【翟进 翟亮】

牛皓 【高万 任安 秦元 薛琪 张亨】

王忠植

刘长孺

李嘉

李靓

姚兴

韦永寿 【韦世坚】

张玘 【张世雄】

陈亨祖

王拱 【朱赞】

强霓 【强震 康杰 李伸】

李诚之 【李士允 秦巨 秦浚 秦灏 阮希甫 赵汝标 宁时凤 杜谔

严刚中 孙中 江士旺 陈兴 曹全 邱卞

李斌】

王进 【吴从龙】

刘宣

李亘 【孙安道】

凌唐佐

僧真宝

△郝仲连 【郝致厚】

郝仲连昌元人建炎元年金人略河中仲连时为贵州防御使宣抚范致虚遣节制河东军马屯河中就权府事金将罗索以重兵压城仲连力战度不能守先自杀其家人城陷不屈其子致厚【二字据通鉴增】亦遇害后赠中侍大夫明州观察使

△郑骧

郑骧字潜翁信之玉山人登元符三年进士第知溧阳县岁饥民亡漕司按籍督逋赋骧尽去其籍使者欲绳以法骧曰着令约二税为定数今不除则逋愈多民愈贫赋愈不办使者不能屈累官京兆府等路提举常平高宗初以直秘阁知同州兼沿河安抚使时谋巡近甸金陵南阳长安为驻蹕计骧言南阳金陵偏方非兴王地长安四塞天府之国可以驻蹕会帝东幸扬州复请自楚泗汴洛以迄陕华各募精兵首尾相应庶敌势不得冲决不报金将罗索薄同州及韩城骧遣兵拒险击之失利金人乘胜径至城下通判以下皆遁去骧曰所谓太守者守死而已翼日城陷赴井死赠通议大夫枢密直学士谥威愍

△刘汲

刘汲字直夫眉州丹陵人绍圣四年进士累官开封府推官宰相王黼初领应奉司汲对客辄诋之黼闻奏谪监蓬州税钦宗召赴阙时置京西转运司于邓州以汲添差副使建炎元年金人再逼京师诸道不知朝廷动息者三月及冯延绪传诏抚谕谓车驾出郊定和议令诸道罢兵汲谓副总管高公纯曰此必金人胁朝廷以款勤王之师尔可速进兵公纯与俱至南阳不进汲独驰数十骑赴都城二帝已北行汲素服恸哭寻代公纯摄帅事捐金帛飧士为战守计诏邓州备巡幸汲广城池饰城阙以待加直龙图阁知邓州兼京西路安抚使汲奏欲复两河当先河东欲复河东当用陕兵于是金人复渡河谍知邓州将为行在所命其将宁珠急攻京西汲遣副总管侯成林守南阳金人奄至杀成林汲集将吏谓曰吾受国恩金人来必死有能与吾俱死者乎皆流涕曰惟命乃下令曰城中有材武愿从军者听留余从便得敢死士四百人及南阳陷命将戚鼎将兵三千逆战又命靳仪与赵宗印分出西南门掩之汲自以牙兵登陴望见宗印从闲道遁即自至鼎军中麾其众阵以待敌俄而仪败敌大至汲死之事闻赠大中大夫谥忠介

△唐重【郭忠孝 程迪】

唐重字圣任眉州彭山人大观三年进士由蜀州司理参军知怀安军金堂县以荐授吏部员外郎历左司郎官起居舍人金人入京师重言开边之祸起于童贯若斩贯首尚可缓兵或献议远避重闻卫士语以告于朝始定守

城之计擢右谏议大夫累疏乞斩蔡京父子以谢天下
迁中书舍人未几落职知同州金人已陷晋绛将及同重度不能守乃开门纵州人使出
自以残兵数百守城示必死金人疑有备不复渡河而
返二帝既北行重即移檄川秦十路帅臣各备礼物往军前迎奉未及行而高宗即位长
安谋帅乃以天章阁直学士知京兆府寻兼府路经略
制置使重前在同州凡三疏上大元帅府乞蚤临关中以符众望暨至永兴又六上疏皆
以车驾幸关中为请并条奏关中防河事宜皆不报金
将罗索渡河陷韩城县时京兆余兵悉调赴行在重遗书转运使李唐孺曰重平生自矢
忠义不敢辞难始意迎车驾入关居建瓴之势以临东
方今南幸矣关陕又无重兵惟一死报国耳金兵围城城中兵不满千固守踰旬而经制
副使傅亮以精锐数百夺门出降城陷重以亲兵百人
血战诸将扶重去重曰死吾职也战不已众溃中流矢死唐孺以其事闻诏赠资政殿学
士后谥恭愍郭忠孝字立之河南人签书枢密院事逵
之子以父任补右班殿直登进士第换文资授将作监主簿年踰三十不忍去亲侧多仕
于河南筦库闲宣和中为河东路提举坐废格盐法免
靖康初召为军器少监入对以和议为非是力陈追击之策帝命与宰相吴敏枢密李纲
议忠孝复条十余事上之主和者众卒不用其策改永
兴军路提点刑狱忠孝亟走关陕得胜兵三万分隶十将择一将统之继遣兵趋泽潞听
宣抚司节制金人再逼京师永兴帅范致虚率诸军繇
淆澠入援忠孝曰金人深入而河东无守备愿分兵走太行扼其归路彼必求战城下之
围可缓致虚以为然檄河中守席益冯翊守唐重与忠
孝同出河东为牵制之举大军尽出函谷忠孝独以蒲解军三千至猗氏遇金人破之踰
绛州破太平砦攻平阳入其郭会大军失利淆澠闲乃
引还及金人逼永兴忠孝与经略唐重分城而守金人陈城下忠孝募人以神臂弓射之
敌不得前已而攻陷城东南隅忠孝与重及副总管杨
宗闵转运副使桑景询判官曾谓经略主管机宜文字王尚提举军马武功大夫程迪俱
死之诏赠忠孝大中大夫子雍别有传程迪字惠老开
封人父博古部郟延兵战死永乐迪以门荫得官宣和中从杨惟中征方腊有功加武功
大夫荣州团练使时诸使臣合荐迪忠义谋略可任将
帅召赴行在经略制置使唐重留迪为备金人已自同州渡河或劝迪还蜀不从乃诣种
氏诸豪谋率众保险俟其势稍衰出奇击之会前河东
经制使傅亮建议当守不当避重从之以亮为制置副使既而金兵益迫重乃以迪提举
永兴路军马措置民兵金人近城迪又欲选民迎战使
老稚得趣险以活亮执议城守金人四面急攻迪率诸司及统制偏裨以下东乡会盟誓

不与敌俱生慷慨呜咽同盟皆感泣及城破乃自亮所
分地始亮先出降众溃迪率其徒徇于众曰敌讎我矣降死战亦死努力与鬪愤怒大呼
口流血士皆感奋多所斩杀迪冒飞矢持短兵接战数
十合身被创几徧绝而复苏犹厉声叱战不已遂死之诏赠明州观察使谥恭愍子昌諤
△孙昭远

孙昭远字显叔其先眉州眉山人元佑闲进士调长沙尉辟河东经略司干当公事
历凤翔天兴县河北山东抚谕盗贼干当公事寻擢河
北燕山府路转运使靖康元年召为水部员外郎洛阳陷西京留守王襄徙治襄汉授昭
远西道总管收溃卒且檄诸道使出师得兵十万命马
佑昌统之佑昌与金人战败京师陷遣使至大元帅府建炎元年迁河南尹西京留守西
道都总管至洛抚集散亡得义兵万余人栅伊阳使民
入保其冬金人来攻昭远遣将姚庆拒战军败庆死金兵益炽昭远战不利其下叛兵反
击昭远遂遇害官属无免者四年追赠徽猷阁待制

△吕由诚 【吕僖 吕仍 赵令佳】

吕由诚字子明御史中丞海之季子以父恩补官调邓州酒税历知合水乘氏二县
通判成都府知雅嘉温绵四州皆有治绩靖康元年宰
相唐恪荐由诚刚正有家法宜任台臣召至京师与恪议不合力辞求退差知袭庆府金
人再入京师康王移军济阳由诚竭力馈饷遣官属王
允恭奉表劝进时京东诸郡兵骄多内讧独由诚拊循有方士乐为用前后数被攻围屹
然自立救援皆绝孔彦舟以郓兵判攻郡累旬不能下
始引去胡选者众尤残暴攻由诚示必取由诚夜焚其攻具直入帐下选众骇散亦解云
一旦金兵四集由诚严立赏罚厉以忠义守兵争奋金
人百道攻城人无叛志判官赵令佳同心誓守城陷俱被执金人欲生降之不屈乃杀其
子仍于前由诚不顾与令佳同遇害子僖与其家四十
口无生还者其孙绍清留蜀后自蜀走江浙访由诚死节愬于朝诏赠由诚三官为通奉
大夫与二子恩泽

△赵伯振

赵伯振太祖八世孙宣和六年进士靖康末为郑州司录捍御有功迁直秘阁通判
州事建炎二年金人攻郑州城陷伯振率兵巷戢中流
矢坠马遇害赠朝请大夫官其二子

△韩浩 【朱庭杰 王允功 王荐 周中 周辛】

韩浩丞相琦孙以奉直大夫守潍州建炎二年金人攻城浩率众拒守城陷力战死
通判朱庭杰身被数箭亦死权北海县丞王允功司理
参军王荐皆全家陷没浩赠三官官其家三人庭杰允功荐各官其家一人朝议大夫周

中世居潍州率家人乘城助守中弟辛家最富尽散其
财以享战士城陷中阖门百口皆死绍兴六年以周聿请赠官

△郭赞

郭赞汝阳县丞也【续通鉴作知汝阳县与此异】建炎二年金人陷蔡州赞朝
服诟叱不肯降遂见杀

△向子韶【向新 向子褒 向子家】

向子韶字和卿开封人神宗后再从侄也登元符三年进士第特恩改承事郎授荆
南府节度判官累官至京东转运副使知淮宁府建炎
二年金人攻淮宁子韶率诸弟城守谕士民曰汝等坟墓之国吾与汝当死守金人昼夜
攻城子韶亲擐甲胄冒矢石遣其弟子率赴宗泽乞援
未至城破子韶犹巷战力屈为所执金人欲降之不可遂杀之其弟新知唐州子褒朝请
郎子家等与阖门皆遇害惟一子鸿六岁得存事闻赠
通义大夫官其家六人后谥忠毅

△宋昌祚【郑立 胡广 唐璟 蹇誉 徐兢 邵元通】

宋昌祚和州钤辖也建炎二年乌珠围和州州人推昌祚权领军事禁军左指挥使
郑立亦拳勇忠愤共激士卒昼夜守备阅数日军士胡
广发弩中乌珠左臂乌珠大怒飞炮雨集径登弩发之地城立破入屠其城昌祚与权倖
唐璟历阳令蹇誉司户徐兢县尉邵元通及立广皆死
譙楼上军士无降者事闻昌祚璟誉兢元通各赠官录其子弟

△杨粹中【杜绩】

杨粹中真定府人建炎二年知濮州金兵南下经其地尼堪以濮小郡易之将官姚
端乘其不意夜捣中军尼堪跌足走仅以身免遂急攻
城凡三十三日而陷端率死士突出尼堪入城以粹中归不屈而死守御官杜绩亦死之
赠粹中徽猷阁待制

△龚楫【蒋子春】

龚楫字济道兵部侍郎原之孙以业儒居乡里建炎初闻金人陷郡县辄忿恚不食
乌珠据和州筑堡新塘楫率家僮袭之俘获甚众遇金
兵大至取道圩上将归于滁和镇抚司金骑兵扼其冲不得前众多赴水死楫麾其众曰
今日鬪死亦足称义士矣战败为金人所获犹挺剑刺
其一将骂不绝口金人脔割之金兵初至新塘有蒋子春者教授里中金人见其挟书又
人物秀整喜之欲授以官子春怒骂乃杀之

△李政

李政为云骑第六指挥在京东立战功补官授河北将官冀州驻扎靖康二年【按
高宗纪及北盟会编应作建炎二年】知州权邦彦

以兵赴元帅府勤王金兵来攻城政守御有法纪律严明赏罚必信人皆用命俄而攻急有登城者焚其樵楼政为所隔不得奔救大呼曰事急矣有能跃火而过者赏于是军士十数人皆以湿既裹身持仗跃火而过大呼力战金人惊骇辄坠立厚赏之未几政因伤而死城陷权知州事单某者不降自经死

△郭汭 【朱友恭】

郭汭德顺中安堡人从军积官至武经郎为泾原第八副将金人逼陕西渭帅以下叛降独汭不肯帅忌之傅致以罪下之狱胁使具降汭奋而呼曰大丈夫今得死所矣终不能身受污吾虽死誓不尔贷众丑其语即杀之建炎三年赠武翼大夫忠州刺史同死者朱友恭西安人以忠翊郎为泾原第一副将部兵扞金人于华亭数有功会金兵大集友恭赴敌力战为所得渭帅既降诱以甘言友恭更诋辱之帅不胜忿断其脰以徇经日及斩之后赠敦武郎

△屈坚

屈坚为右武大夫忠州防御使建炎二年金人围陕府坚引所部救之围解而战败为金所执坚呼曰吾所以来为解围也城苟全吾死何憾金人杀之后赠三官录其家五人

△赵叔凭

赵叔凭建炎闲任陕州都监累官武翼大夫就迁通守金人围陕州既久援兵不至城危时叔凭子官卢氏遗以蜡丸书曰人臣当死国难况吾近属可辱命耶遂死之时通判王洙职官刘劬陈思道冯经李岳杜开县令张玘将佐卢亭等五十一人俱死 【按叔凭原附赵士隆传令考系死于金析出另传】

△魏彦明

魏彦明开封人通判延安府建炎二年金兵围城彦明与权府事刘选分地而守彦明当东壁空家赀以赏战士金人昼夜攻城阅十有三日而陷彦明坐于城楼上金人执之使速降不屈杀之诏赠中大夫官一子

△赵不试 【赵叔皎】

赵不试太宗六世孙宣和末通判相州建炎元年知州事初汪伯彦既去相金人执其子似遣来割地似至相不试固守不下明年金人大入州久被围军民无固志不试谓之曰我宗子也义不降计将安出众不应不试登城与金人约物杀百姓许之既启门尽纳其家井中然后以身赴井嘱提辖官实以土州人皆免于死叔皎秦悼王四世孙元丰中为右班殿直累迁至德州兵马都监建炎二年金人围城叔皎率兵前后

六战围急有江喆者谋以城降斩以徇金人登城叔皎犹力战势穷被执怒骂不屈遂遇害【按叔皎原附赵士隆传后今考系死于金析出另传】

△郭永

郭永大名府元城人以祖任为丹州司法参军累官通判郑州燕山兵起以永为其路转运判官郭药师屯边怙恩暴甚与民市不偿其直复殴之至坏目折支乃已安抚使王安中莫敢问永见药师曰前日将军杖策归朝廷礼遇无所不至将军未有以报乃纵部曲戕民乎药师虽谢无愧容永谓安中曰他日乱边者必此人也已而安中罢永亦辞去移河北西路提举常平会金人趋京师所过城邑欲立取之是时天寒城池皆冻金率藉冰梯城不攻而入永适在大名闻之先弛濠渔之禁人争出渔冰不能合金人至睥睨久之而去迁河东提点刑狱时高宗在扬州命宗泽守京师泽将复两河以大名当冲要檄永与师杜充漕张益谦相犄角永朝夕谋战守具因结东平权邦彦为援不数日声振河朔已没州县皆复应官军居亡何泽卒充守京师以张益谦代帅而裴亿为转运使益谦亿齷齪小人会范琼胁邦彦南去刘豫自济南来寇大名孤城无援永募士赍帛书夜缒城出告急朝廷乞先为备攻围益急以东平济南俘大呼城下曰二郡已降益谦辈相顾色动永大言曰今日正吾侪报国之时又行城抚将士曰王师至矣吾城坚完可守汝曹努力也众感泣城陷益谦亿率众迎降金人曰城破始降耶众以永不从为辞金人遣骑召永永正衣冠南面再拜乞易幅巾而入尼堪曰沮降者谁永熟视曰不降者我金人素闻永名且奇其状貌欲啖以富贵永瞋目唾曰限不杀身以成仁何富贵之云尼堪麾使去则曰顾速死亟驱厉鬼以报金人怒遂杀之一家皆遇害绍兴初赠中大夫资政殿学士谥勇节官其族数人

△魏行可【郭元迈】

魏行可建州建安人建炎二年以太学生应募奉使补右奉议郎假朝奉大夫尚书礼部侍郎充河北金人军前通问使仍命兼河北京畿抚谕使行可渡河见金人于澶渊因留不遣行可尝贻书金人警以不戢自焚之祸若亟以中原还赵氏贤于奉刘氏万万也绍兴六年卒十三年张邵来归言于朝赠朝奉郎秘阁修撰官其子孙行可之使也吴人郭元迈以上舍应募补右武大夫和州团练使为之副亦卒于北焉

△王复【郑褒 杨彭年】

王复以龙图阁待制知徐州建炎三年金人来攻复与男倚同守城率军民力战外

援不至城陷复坚坐听事尼堪欲降之复嫚骂求死合

门百口皆被害教授郑褒巡检杨彭年亦死焉事闻赠复资政殿学士谥壮节官其家五人

△孙晖

孙晖为泗州招信县尉建炎三年正月金人陷泗州由招信将渡淮晖将兵御之沈其舟城破死于敕书楼

△徐徽言 【徐适 孙昂】

徐徽言字彦猷衢之西安人少为诸生负气有志力大观二年诏求材武士韩忠彦范纯粹刘仲武以徽言荐赐武举绝伦及第历保德军

监押以边功加合门祗候平阳府军马钤辖权知保德军改总领西河军马以讨西夏功累迁秉议郎改知火山军兼统制河西军马徙赴石州

靖康初迁武翼郎合门宣赞舍人金人围太原徽言以三十人渡河一战破之迁武经郎知晋宁军兼岚石路沿边安抚使金人再逼京师陕西

制置使范致虚檄徽言守河西时割两河以讲和同知枢密院事聂员出河东为金人所劫以便宜割河西三州隶西夏晋宁军民大恐徽言曰

此使人矫诏耳三郡在河西设有诏犹当执奏况无之耶遂率兵复取三州又并取岚石第州金遣守领为九州岛都统与晋宁对垒徽言出奇兵

袭逐之阴结汾晋土豪数十万约复故地则奏官为守长听世袭且曰定全晋则形胜为我有中原当指期克复金人忌徽言欲速拔晋宁以徐

患建炎二年冬自蒲津涉河围之徽言出兵纵击斩罗索贝勒之子当是时环河东皆已陷独晋宁屹然孤墉横当强敌徽言抚摩疲伤与金人

鏖河上大小数十战所俘杀过当与诸将画隅分守自致死力金人进攻数败围之益急徽言自度不支遣人闲道驰书其兄昌言曰徽言死矣

兄其勉事君一夕裨校李位石斌系帛书飞笥上阴约罗索启外郭纳之徽言与太原路兵马都监孙昂决战斗中退婴牙城以守置妻子室中

积薪焚之仗剑慷慨语将士我天子守土臣义不见辱乃自裁左右号救持之急金兵猝至挟徽言以去罗索诱之降不从举戟向之披衽迎刃

意气自若金人知其终不可屈遂射杀之初徽言与刘光世束发雅故光世被命援太原次吴堡津顿兵不进徽言移书趣行谕以太原危不守

旦暮望救光世犹前却徽言即露章劾其逗挠封副与之光世惶遽引道宣抚使张浚与诸使者相继以徽言死节事闻诏赠晋州观察使谥忠

壮再赠彰化军节度孙昂亦不屈死赠成忠郎团练使徽言子冈既同死事而从孙适亦以守安丰死昂即孙益之子各世着忠义云

△杨照 【丁元】

杨照者濠州将官也金人围城蚁附而登照跃上角楼刺贼之执黑旗者死照俄中流矢卒有统领丁元者遇金人十八里洲被围元大呼曰毋负国一舟二百人皆鬪死诏赠承信郎录其后

△崔纵 【吴安国】

崔纵字符矩抚州临川人登政和五年进士第累迁承议郎干辨审计司建炎三年高宗将遣使通问二帝廷臣以前使者相继受系莫肯往纵毅然请行乃授朝请大夫右文殿修撰试工部尚书以往比至首以大义责金人请还二帝又三遗之书金人怒徙之穷荒久之金人许南使自陈听还纵以王事未毕不忍言竟握节以死洪皓张邵还始归纵骨诏以兄子延年为后有吴安国者以太常少卿使金金人拘留胁服之安国毅然曰我首可断我节不可夺金不敢犯乃遣还

△林冲之 【林郁 林震 林霆】

林冲之字和叔兴化军莆田人元符三年进士历都官金部郎出守临江南康靖康初召为主客郎中金兵再至诏副中书侍郎陈过庭使金同被拘执冲之奋厉见于词色金人怒徙之奉圣州既二年金人逼冲之仕伪齐不屈徙上京又不屈置显州极北沍寒之地幽佛寺十余年病亟语同难者曰某年七十二持忠入地无恨恨国讎未复耳南向一恸而绝洪皓还朝以闻诏与二子官子郁从子震霆郁字袭休宣和三年进士再调福建茶司干官建州勤王卒还以不得卸甲钱为乱郁闻变出谕之遇害震字时莛登进士第仕至秘书少监以不附二蔡有声崇宁大观闲霆字时隐登进士博学深象数与郑樵为石交 【据郑樵传后移入】 为敕令所删定官力诋绍兴和议挂冠出都门权臣大恚怒放废以死莆田人称为忠义林氏

△阎进 【朱绩】

阎进隶宣武为军官建炎初遣使通问进从行既至云中府金人拘留使者散处之进亡去追还留守高庆裔问何为亡进曰思大宋尔又问郎主待汝有恩汝亡何故进曰锦衣玉食亦不恋也庆裔义而释之凡三亡乃见杀临刑南向受刃曰我皇帝行在也行刑者曳其臂令面北进踊身直起盘旋数四卒南向就死进武校尉朱绩亦以从使被留不半月亡去追还杖死挺下

△赵令■〈山上成下〉 【王远 吴源 刘卓】

赵令■〈山上成下〉燕懿王元孙安定郡王令衿兄也初名令禕建炎初以鄂州通守领兵戍武昌渡江存抚黄人李纲言于帝擢直龙图阁知黄州赐今名贼张遇过城下招令■〈山上成下〉度不能拒出城见之遇饮以

酒一举而尽曰固知饮此必死愿勿杀军民遇惊曰先
以此试公耳更取毒酒沃地地裂有声引军去未几丁进李成兵迭至俱击却之叛将孔
彦舟引兵围城令■〈山上成下〉率民兵守六日乃
解三年金人闻孟太后在南昌欲邀之径犯黄州力攻城陷执令■〈山上成下〉欲降
之大骂不屈而死事闻赠徽猷阁待制谥愍忠其从官
都监王远判官吴源巡检刘卓皆以不屈死焉

△陈淬 【陈仲刚 陈仲敏】

陈淬字君锐兴化军莆田人绍圣初下第挟策西游时吕惠卿帅鄜延淬戎服往见
惠卿器之补三班奉职与西人接战于乌原手杀十余
人擒其砮主奏为左班殿直鄜延路兵马都监累迁武经郎宣和四年授真定路分都监
兼知此砮河北第一将寻拜忠州团练使真定府路马
步副总管七年金人入真定淬以孤军御之妻子皆死建炎元年辟诸军统制宗泽命击
金人于南华败之兼大名府路都总管兵马钤辖擢知
恩州金王善拥兵袭恩淬与长子仲刚拒战败飞刃及淬仲刚以身蔽刃死之明年善复
围陈州淬大败善兵拜宿州安抚使李成叛诏以淬为
御营使六军都统淮南招抚使讨之三战三捷未几金人薄采石又檄淬回援建康淬白
杜充欲伏兵掩获之充不从金兵遂薄板桥诸军皆溃
淬独与战势穷力尽据绳床大骂刃交于胸而色不动与其从子仲敏俱死诏赠拱卫大
夫明州观察使官其子壻

△赵训之 【赵垒之 赵聿之 陈自仁 刘玠】

赵训之字海道秦悼王五世孙登政和二年进士调东平仪曹知平江府吴县忤朱
勔移疾去未几金人陷京师训之居扬州率大姓募士
勤王建炎三年知吉州永丰县孟太后避地虔州护卫统制杜彦与其麾下叛后军杨世
雄应之将犯永丰训之与尉陈自仁简兵分为二一取
闲道绕贼后一据地利匿其精兵以诱贼贼至伏发歼其众会贼别校仓卒继至训之率
数十辈拒战与自仁俱被害事闻诏赠训之朝散郎直
秘阁谥忠果自仁通直郎太后之发吉州也至太和众溃从事郎三省枢密院干办官刘
德老为金骑所杀金人过江上元丞赵垒之帅乡兵迎
敌死之赠奉议郎聿之安定郡王叔东子也建炎中为成忠郎金人围潭州聿之隶东壁
守帅臣向子諲循城顾聿之曰君宗室不可效他人苟
简聿之感慨流涕金兵登城纵火子諲率官吏突门遁去城陷聿之巷战大骂而死将官
武经郎刘玠亦死之事闻赠聿之左监门卫大将军玠
武经大夫皆官其家 【按训之等诸人原附赵士隆传后今考训之等从孟太后死于叛
卒垒之等死于金析出另传】

△杨邦义

杨邦义字晞稷吉州吉水人以舍选登进士第历婺源尉晋知漂阳县会叛卒周德据府城杀官吏邦义立县狱死囚赵明于庭谕之曰尔悉里中豪杰诚能集尔徒诛贼不惟宥罪当上功畀尔爵明即请行邦义饮之酒使去越翼日贼平建炎三年金人薄建康城时李昫以户部尚书董军饷陈邦光以显谟阁直学士守建康贝降状逆之十里亭金帅完颜宗弼既入城昫邦光率官属迎拜惟邦义不屈膝翼日宗弼等与昫邦光宴堂土立邦父子庭邦义叱昫邦光曰天子以若扞城敌至不能抗更与共宴乐尚有面目见我乎寻遇害事闻赠直秘阁谥忠襄官其四子绍兴七年加赠徽猷阁待制

△朱躄 【朱良 方允武】

朱躄湖州安吉人知钱塘县建炎三年金人逼杭州躄率弓手土军前路拒敌两中流矢左右掖至天竺山犹率乡兵力战后数日遇害朱良者字良伯吴郡人建炎中为海盐县尉金兵入境良披甲执戈集所部百余人奋击金兵众为披靡力不敌而死事闻官其子思后守汉阳方允武者衢州人为常州宜兴巡来建炎三年金人入县之金泉乡允武率士军乡民迎敌遇金兵梅岭村力战而死诏赠两官官其家二人

△唐琦

唐琦本卫士建炎闲高宗航海琦病留越州李邺以城降金帅巴拜据之琦袖石伏道傍伺其出击之不中被执巴拜诘之琦曰欲碎尔首死为赵氏鬼耳巴拜曰使人人如此赵氏岂至是哉又问曰李邺为帅尚降汝何人敢尔琦曰邺为臣不忠吾恨不得手刃之乃顾邺曰我月给纚石五斗米不肯背主尔乃若此岂复齿人类哉诟厉不少屈巴拜趣杀之至死不绝口

△曾志 【曾悟】

曾志字仲常中书舍人巩之孙补太学内舍生累官司农丞通判温州须次子越建炎三年金人陷越以巴拜为帅约诘旦城中文武官并诣府不至者死志独不往为邻人纠察捕见巴拜辞气不屈与家属四十口同日遇害事闻予三资官其弟愆子密兄子■〈宀居〉皆将仕郎方被难时密甫四岁与乳母张俱死夜值小雨张得苏顾见密亦苏尚吮其乳郡卒陈海匿以归后仕至知南安军志从弟悟字蒙伯翰林学士肇之孙也宣和二年进士靖康闲为亳州士曹金人破亳州悟被执慢骂众刃剮之尸体无存者妻孥同日被害

△李彦仙 【邵云 吕圆登 宋炎 贾何 阎平 赵成】

李彦仙字少严初名孝忠宁州彭原人徙巩州尝为种师中部曲入云中获首级补

校尉靖康元年金人围汴郡县募兵勤王遂率士应募
补承节郎因言事亡去易名彦仙以效用从河东军谍金人还复补校尉河东陷彦仙至
陕以兵事见守臣李弥大弥大壮其材留为裨将金人
再入汴彦仙为石壕尉坚守三黻民争依之金人攻三黻彦仙战佯北金人追之伏发掩
杀约千计分兵四出下五十余壁初金人得陕用降者
守之使招集散亡彦仙阴遣士厕其闲金人不觉乃引兵攻其南郭夜潜师薄东北隅所
纳士内应噪而入复陕州乘胜渡河列栅中条诸山旁
郡邑皆响附事闻即命知陕州兼安抚使迁武节郎合门宣赞舍人彦仙搜军宝增陴浚
湟尽取家属以来曰吾以家徇国与城俱存亡闻者感
服郡兴在神稷山以其众来愿受节制彦仙辟兴统领河北忠义军马屯三门后赖其力
复虢州屡败金兵诏授彦仙右武大夫宁州观察使兼
同虢州制置罗索率叛将折可求众号十万来攻分其军为十以正月旦为始日轮一军
攻城复聚十万军并攻期以三旬必拔彦仙意气如平
常登雉楼大作技乐潜使人缒而出焚其攻具食尽煮豆以啖士卒而取汁自饮至是亦
尽告急于宣抚使张浚浚檄都统制曲端将泾原兵来
扰端素疾彦仙出己上无出兵意浚幕官谢升言于浚曰金旦暮下陕则全据大河且窥
蜀矣浚乃出师至长安道阻不得进彦仙日与金人战
将士未尝解甲罗索雅奇彦仙才尝啖以河南兵马元帅彦仙斩其使至是使人呼曰即
降界前秩彦仙曰吾宁为宋鬼安用汝富贵为发弩毙
之金益兵急攻城陷彦仙率众巷战矢集身如猬左臂中刃不断战愈力金人惜其才以
重赏募生致之彦仙易敝衣走渡河曰吾不可以身受
敌人之刃既而闻金人纵兵屠掠曰金人所以甘心此城者以我坚守故也我何面目复
生乎遂投河死裨将邵云吕圆登宋炎贾何阎平赵成
皆死浚承制赠彦仙彰武军节度使官其子后谥忠威郡云龙门人金人陷蒲城云聚少
年数百壁山谷时出挠之会郡隆起兵云往约为兄弟
彦仙在陕遣客说以义遂来归累有功官至武翼郎合门宣赞舍人城破被执云大骂不
屈罗索怒钉云五日而磔之吕圆登夏县人尝为僧后
应募捍金人淆澠闲彦仙保三黻圆登归之功最多为爱将城垂破以兵来援身重创方
卧闻城陷遽起战死宋炎陕县人以善射补秉义郎金
人围城炎以劲弩数百发毒矢杀千余人城陷力战死并赠官录其家

△郑覃

郑覃字季厚明州人靖康二年贡于乡建炎四年春金人陷明州覃挈族避难山谷
闲金人追及与兄章俱被执胁以刃曰与吾金贯汝覃
号泣指所瘞金贯与之遂见释而金兵相属覃拏小舟与其妻董同载去顾谓章曰万一

不得脱覃岂北面异国者兄勉承祭祀既复为兵所劫
迫之降覃厉骂不屈跃入水中董哭曰夫亡矣亦自沈

△薛庆

薛庆起羣盗据高邮张浚亲往招之庆感服因使守高邮寻迁拱卫大夫福州观察
使承州天长保宁镇抚使金人还自浙屯天长六合闲
将由运河引舟北归而赵立在楚庆在承扼不得进乌珠欲会兵攻楚州真扬镇抚郭仲
威闻之约庆俱往迎敌庆至扬州仲威置酒高会庆怒
曰此岂纵酒时耶我为先锋汝当继后上马疾驰去平旦出扬州西门从骑不满百转战
十余里亡骑三人仲威迄不至庆与其下奔扬州仲威
闭门拒之庆仓皇坠马为金追骑所获金人杀庆承州陷讣闻赠保宁军承宣使官其家
十人

△赵立

赵立徐州张益村人以勇敢隶兵籍靖康初金人大入立数有战功为武卫都虞候
建炎三年金人攻徐知州事王复拒守命立督战中六
矢战益厉城陷复死立巷战夺门以出金人击之死夜半得微雨而苏乃杀守者入城求
复尸恸哭手瘞之阴结乡民为收复计金人北还立率
残兵邀击断其归路夺舟船金帛以千计军声复振遂复徐州诏授思翊郎权知州事累
迁右武大夫忠州刺史会金左将军昌围楚州急宣抚
使杜充命立将所部兵往赴之且战且行连七战胜而后达楚两颊中流矢不能言以手
指麾既入城休士而后拔镞诏以立守楚州明年正月
金人攻城立命撤废屋城下然火派壮士持长矛以待金人登城钩取投火中金人选死
士突入又搏杀之乃稍引退五月乌珠北归以辎重假
道于楚立斩其使乌珠怒乃设南北两屯绍楚饷道立出战大破之会朝廷分镇以立为
徐州观察使泗州涟水军镇抚使兼知楚州立一日拥
六骑出城呼曰我镇抚也可来接战有两骑将袭其背立奋二矛刺之俱坠地夺两马而
还众数十追其后立瞋目大呼人马辟易明日金人列
三队邀战立为三阵应之金人以铁骑数百横分其阵而围之立奋身突围持梃左右击
大呼溃而出城始受围菽麦野生泽有鳧茨可采后皆
尽至屑榆皮食之金人围益急九月攻东城立募壮士焚其梯火辄反向立叹曰天乎风
转焚一梯立喜登磴道以观飞炮中其首而绝金人疑
立诈死不敢动越旬余城始陷事闻赠奉国节度使开府仪同三司官其子孙十人溢忠
烈

△王琦

王琦为弓门砦巡检建炎四年金人还自熙河琦御之金人立招降旗榜众皆拜琦

独不屈金人杀之

△赵士医

赵士医宗室子任秀州兵马都监建炎四年乌珠入州士医乘城拒战城陷死之后
赠武翼大夫官其二子 【按士医原附赵士隆传今
考系死金析出另传】

△刘惟辅 【高子孺 韩青】

刘惟辅涇州人以同州观察使为熙河马步军副总管金人既得秦州经略使张深
遣惟辅将三千骑御之金前军踰巩州惟辅留军熟羊
城以千八百骑夜趋新店黎明军进惟辅舞稍刺其先锋将贝勒和斐彦洞胷堕马死敌
为夺气退去深檄陇右都护张严往追之惟辅不欲听
严节制自别道由吾山出宝鸡严追及金人于五里坡遇伏死之惟辅自石鼻砦遁归金
人略熙河追及所部皆走其亲信军诣金人降金人执
惟辅诱之不言金人怒摔以出惟辅奋首曰斩即斩吾头岂汝摔也即闭口不复言而死
张浚闻之承制赠昭化军节度使官子孙十二人时有
高子孺者狄道人知兰州龛谷砦闻惟辅尚存固守以待及城陷先刃其家而后死韩青
为熙河马步军第六将闲行从惟辅为金人所擒亦骂
不绝口而死

△刘泰

刘泰枢密院忠义前军正将也以私财募兵三百粮储器械一切不资于官金人逼
寿春泰率所部赴援转战累日身被数十创死诏赠武
翼郎官其家三人

△翟兴 【翟进 翟亮】

翟兴字公祥河南伊阳人剧贼王伸起兴与弟进应募击贼金人入京师以保辅陵
寝功补承信郎辟京西北路兵马副钤辖为陕西宣抚
司前军统制会进为叛将杨进所害贼乘势击败官军兴率余众拒贼保伊川明年愬进
死事于朝以兴代进为京西北路安抚制置使兼京西
北路招讨使兼知河南府杨进屯鸣皋山北兴与子■〈山宗〉帅乡兵时出扰之进弃
辎重南走兴邀击于鲁山县进中流矢死众溃西京平
贼王俊据汝州兴引兵攻之俊弃城保伞盖山兴进攻免胄大呼曰贼识我乎我翟总管
也众皆披靡遂破之金人逼河阳巩县永安军兴遣子
■〈山宗〉与搏战屡捷诏授河南孟汝唐州镇抚使兼知河南府转武略大夫兼合门
宣赞舍人寓治伊阳时河东北虽陷土豪聚众保险兴
遗蜡书结约之皆愿受节制高宗嘉之授河东北路军马使金人入陕右兴遣子■〈山
宗〉生擒金河东都统巴古遂复阳城县乘胜取絳之

垣曲进至米粮州绍兴元年春金重兵侵河南时兴军乏粮人情震恐兴授将彭玘方略设伏于井首金将就擒进武功大夫忠州团练使刘豫将迁汴以兴屯伊阳惮之遣蒋颐持书诱兴以王爵兴斩颐焚其书豫计不行乃阴遣人啖裨将杨伟以利伟杀兴携其首奔豫事闻赠保信军节度使子■〈山宗〉继兴为镇抚使琳合门祗候弟进字先之以捕盗劳补下班殿侍累功充京西第一将时与金人约收燕山故地改河北第四将往至遂城会契丹兵奄至都统制刘延庆以进为先锋战幽州石料冈卢沟河皆捷金人逼京师西道总管王襄欲引兵而南进谏止之因遣进分军而西时经略使范致虚已合五路军马次潼关以进统河南民兵收复西京进至福昌遣兵袭金营擒其游骑金人逼灵山砦进父子兄弟与之战溃围至高都集卿兵七百人夜行画伏五日至洛城夜半破关入擒高世由再捷于伊阳白草坞都总管孙昭远至洛阳以进戍澠池界授武义大夫合门宣赞舍人未几洛阳再陷进在伊阳哀散亡纔千人战于驴道堰生擒金将翟海追至海花谷羣盗冀德韩清啸聚南阳进闲道击之德降继斩清于艾蒿平勒兵抵龙门屡与金人在夹河战乘胜入洛阳金人聚怀卫蒲孟数州之众薄城下斧诸门入进率士卒巷战次子亮死之【按高宗纪建炎二年四月进以兵袭乌珠于河南兵败其子亮死之与此互异】迁武功大夫合门宣赞舍人充京西北路兵马都钤辖寻授马步军副总管升本路制置使兼知河南府会巨寇杨进拥兵数万残害汝洛闲进谓其兄兴欲力除之杨进置数百骑绝水犯进营进乘半渡击之破贼四砦马惊坠堑为贼所害赠左武大夫中州刺史官其后五人

△牛皓【高万 任安 秦元 薛琪 张亨】

牛皓福津人为武功大夫川陕宣抚后军中部将绍兴五年金右都监萨里罕与其熙河经略使慕洵欲下秦川宣抚副使吴玠遣诸校分道伺之皓至瓦吾谷与金将华善遇力战死有承信郎高万且骂且战与熙河路部将任安宣抚司队官秦元薛琪张亨皆死于阵后皓安皆赠翊卫大夫官其家五人万等赠三官录其子

△王忠植

王忠植太行义士也绍兴九年取石州等十一郡授武功大夫知代州累官河东经略安抚使金人围庆阳急忠植以所部赴陕西行次延安叛将赵惟清执忠植械送右副元帅萨里罕不屈使甲士引诣庆阳城下诱降忠植呼曰我河东步佛山忠义人也为金所执使来招降愿将士勿负朝廷坚守城壁萨里罕怒诘之忠植披襟大呼曰当速杀我遂遇害事闻赠奉国

军节度使开府仪同三司官其家十人

△刘长孺

刘长孺耀州人签书博州判官厅公事与刘豫书备陈祖宗德泽劝以转祸为福豫怒囚之百日终不屈复官之不从绍兴九年宣谕使周聿上之朝诏赴行在以老病转两官奉祠其后金复渝盟长孺知华阴县不屈而死

△李嘉

李嘉开封人宣和六年进士建炎中知彭阳县金兵至与民移治境上或执之以献金人欲官之凡三辞其后金人以为归附命为儒林郎嘉言于所司曰昔为俘获不敢受归附之赏还其牒刘麟闻其贤命张中孚以礼招致嘉力拒之绍兴九年死原州事闻赠奉议郎官其家一人

【按刘长孺李嘉二传附刘化源传后今化源移入独行析出另传】

△李靚

李靚字彦和吉州龙泉人进淮南以策干都督张浚浚奇之使隶淮西总督孙晖麾下累功授承信郎绍兴十年金遣其将翟将军犯境靚与部曲当其锋转战俘翟将军乘胜逐北会兵大至遂死之

△姚兴

姚兴相州人靖康人以州校劫杀金人有功借补承信郎建炎初张琪聚兵归东京留守宗泽兴往从之又从琪依刘洪道于池州绍兴元年琪叛执总管巨师古将杀之兴密谕所部挟而驰夜归吕颐浩颐浩义之请于朝授武义郎隶张俊军中复从刘锜守顺昌迁武略大夫战淮堦有功授右武大夫累迁建康府驻扎御前破敌军统制充荆湖南路兵马副都监绍兴三十一年兴隶都统王权麾下初金主亮在寿春江淮制置副使刘锜命权将兵迎敌督战甚急权怯懦不进不得已守庐州及金兵渡淮权遣兴拒之遇于尉子桥金人以铁骑进兴麾兵力战手杀数百人权奔仙宗山严兵卫兴告急数不应有李二者尝有私恩于权因得出入军中往来两界贸易闲窃权旗帜遗金人至是金人立权旗帜以误兴兴往奔之父子俱死事闻诏赠容州观察使开禧元年赐谥忠毅

△韦永寿 【韦世坚】

韦永寿者绍兴三十二年以统制官与金人战和州子承节郎世坚救之同死赠中卫大夫融州观察使世坚赠三官

△张玘 【张世雄】

张玘字伯玉世居河南澠池建炎中以家财募兵千人翟兴制置京西玘以众属焉积功补武翼大夫成州刺史董先为制置司前军统制玘佐之绍兴元年金将高琼率众取商州董先御之玘乘锐奔击九战九捷明年春偕先

繇蓝田渡渭规取长安玘陈兵华严川时刘豫据京师
先军乏食伪降密书报玘述必还意王倚摄虢州从伪意坚与别将董震谋害玘震阴以
告玘翼日倚诣玘议事玘责以大义斩之先是豫遣人
招玘为商虢顺州路兵马都监同统制军马玘囚其使至升并戮之于是伪齐河南安抚
孟邦雄总管樊彦直据洛阳兵抵长水玘遣将设伏与
战而胜率精骑三千一日夜驰三百里黎明至河南邦雄就擒彦直遁去便宜升霸州防
御使三年春先自伪齐归玘还兵柄退就位时人义之
翟琮言于朝真授玘武翼大夫果州团练使河南府孟汝唐州马步军副总管未几诏先
一行并听神武后军统制玘从岳飞复京西六州累功
进拱卫大夫入侍卫三十二年领御营宿卫前军都统屯泗州时金人攻海州急玘赴救
战于州北三里杀获万计海州围解玘中流矢卒赠正
任观察使官其后九人孝宗即位加赠清远军承宣使子世雄歿于符离之战赠武节大
夫

△陈亨祖

陈亨祖者淮宁大豪也绍兴末官军复蔡州亨祖领民兵据淮宁执金知州完颜页
噜以其城来归命为武翼大夫忠州刺史知淮宁府金
兵攻城亨祖力战死之举家五十余人皆歿赠容州观察使

△王拱 【朱赞】

王拱建康府前军统制从都统邵宏渊收复虹县进取宿州屡有功隆兴元年五月
与金人接战深入营中自辰至申力战死诏赠正任观
察使官其家八人是役也中亮大夫朱赞亦死之赠承宣使

△强霓 【强震 康杰 李伸】

强霓自金归宋为武功大人合门宣赞舍人知环州环庆路统制军马兼沿边安抚
使隆兴闲金兵围环州与其弟武经大夫环庆路统领
沿边忠义军马名震者坚守孤城招诱使降不屈城陷死焉并赠观察使康杰者权知扶
风县与金将冯宣战宣欲招之杰奋曰吾当死于阵不
能降敌宣杀之李伸者知天兴县坚守不下城陷自杀

△李诚之 【李士允 秦巨 秦浚 秦濯 阮希甫 赵汝标 宁时凤 杜谔
严刚中 孙中 江士旺 陈兴 曹全 邱卞
李斌】

李诚之字茂钦婺州东阳人庆元初释褐为饶州教授擢国子学录以言罢起为江
西转运使干办改通判常州知郢州移知蕲州益城壁
备楼橹筑军马墙教阅厢禁民兵激之以赏积粟四万嘉定十四年二月金人攻淮南试
之喟然谓其僚曰吾以书生再任边垒行年七十独欠

一死尔乃募死士迎击遇于横槎桥大破之居数日金人临沙河欲渡又破之明日金兵大至决湟水焚战楼又拒退之明日金移兵为必渡计
蕲兵直前奋击杀其帅未几金兵傅城遂燔木栅诚之出御之又杀其将卒数十人夺所佩印三月朔金人攻西门射却之俄造望楼以窥城诚之为疑兵以示之又使持书来胁降诚之戮之而还其书越二日金人以攻具进诚之设械御之夜出捣其营会黄州失守金并兵为一凡十余万援兵不至诚之激厉将士勉以忠义城陷子士允力战死诚之引剑将自刭呼其孥曰城已破汝等无辱妻许氏及妇若孙皆赴水死事闻赠朝散大夫秘阁候撰封正节侯士允通直郎从诚之死者通判州事秦巨字子野丞相桧曾孙城破巨与诚之各以自随之兵巷战死伤略尽巨还署今火诸仓库乃赴一室自焚死次子浚与弟濯从父俱死特赠巨五官秘阁修撰封义烈侯赠浚濯通直郎州学教授阮希甫赠通直郎防御判官赵汝标蕲春主簿宁时凤录事参军兼司户杜谔俱赠承务郎兼蕲州都大监辖蕲口镇仓库严刚中赠承事郎时统制官孙中小将江士旺陈兴曹全邱卞军士李斌等皆鬪死司理参军赵与裕先率民兵百余人奋关出外求援仅以身死而全家十六人皆歿淳佑十二年特封巨义烈显节侯黄州之陷守臣何大节亦投江死焉

△王进 【吴从龙】

王进字纯父饶州乐平人乡举思免为固始簿摄邑绍定中金兵逼淮守令望风遁进怀印自投于井死吴从龙字子云官至武功郎建康府统制绍定兵难为先锋被擒使至泰州城下诱降不屈死之官其弟从虎至武经大夫

△刘宣

刘宣为秦凤路兵马都监金人入关陕宣遗蜡书密与吴玠相结且率金将任拱等归朝约日已定有告之者金人取宣缕擘之

△李亘 【孙安道】

李亘字可大兖州干封人大观二年进士建炎末金人克淮南亘不及避刘豫使守大名与凌唐佐谋密陈豫可取状事泄亘坐死又有孙安道者为应天府兵马钤辖城陷不得归谋挺身还朝为人所害而死

△凌唐佐

凌唐佐字公弼徽州休宁人元符三年进士建炎闲知南京城陷刘豫因使为守与宋汝为密疏其虚实遣人告于朝事泄豫捕唐佐斩之

境上 【按刘宣以下四人并因反正被害今次其行事附于忠义之末】

△僧真宝

僧真宝代州人为五台山僧靖康之扰与其徒习武事于山中钦宗召对便殿眷赉

甚厚真宝还山益聚兵战守敌众大至昼夜拒之力不
支寺舍尽焚被执不屈郡守刘騊诱劝百方真宝曰吾法中有口回之罪吾许宋皇帝以
死岂当妄言也怡然受戮闻见者叹异焉

钦定续通志卷五百十三

●钦定续通志卷五百十四 忠义传七

忠义传

宋【四】

○宋四

陈寅【贾子坤 贾纯孝】 高稼 曹友闻【万】 蹇彝【
维之 永叔】 刘锐【赵汝向】
丁黼 王翊【蒲东卯 刘当可 邵复 罗由 崇启 罗君文 冯仲煜
李大全赵晨 赵朋 胡天启 杨礼 周德荣 王
佐 赵广 施择善 段元鉴】 陈隆之【史季俭】 何充 陈
元桂 许彪【孙张桂 金文德 曹贛 胡世
全 庞彦海 李丁孙 唐奎瑞 江彦清】 张顺【张贵】 牛富【王
福】范天顺 吕文信【张兴宗】 赵文
义【武义 杨寿孙 何庚 安惟臣 田广泽】 边居谊 赵卯发
唐震【椿 冯骥 何新之】 司马梦求 耿
世安 李成大【潘大同 潘大本】 赵孟锦【苗再成】 陶居仁
尹玉 陈照【姚峇】 王安节
黄介【陈力】 密佑 米立 李芾【于兴 沈忠顾应森
陈亿孙】 尹谷 杨霆 赵良淳

徐道隆【戴孙】

陈寅【贾子坤 贾纯孝】

高稼

曹友闻【曹万】

蹇彝【蹇维之 蹇永叔】

刘锐【赵汝向】

丁黼

王翊【蒲东卯 刘当可 邵复 罗由 赵崇启 罗君文 冯仲煜 李大全

赵晨 赵朋 胡天启 杨礼 周德荣 王佐

赵广 施择善 段元鉴】

陈隆之【史季俭】

何充

陈元桂
许彪孙 【张桂 金文德 曹贛 胡世全 庞彦海 李丁孙 唐奎瑞 江彦清】

张顺 【张贵】

牛富 【王福】

范天顺

吕文信 【张兴宗】

赵文义 【赵武义 杨寿孙 何庚 安惟臣 田广泽】

边居谊

赵卯发

唐震 【唐椿 冯骥 何新之】

司马梦求

耿世安

李成大 【潘大同 潘大本】

赵孟锦 【苗再成】

陶居仁

尹玉

陈照 【姚豈】

王安节

黄介 【陈力】

密佑

米立

李芾 【于兴 沈忠 顾应焱 陈亿孙】

尹谷

杨霆

赵良淳

徐道隆 【徐载孙】

△陈寅 【贾子坤 贾纯孝】

陈寅宝谟阁待制咸之子漕司两贡进士以父恩补职历官州县绍定初知西和州元兵入境寅誓与民共守留家城中散资财以结忠义元兵十万攻城东南门寅自执旗鼓激励将士迎敌力战屡退之元兵伐木为攻俱增兵至数十万围州城甚急寅率民兵苦战援兵不至城遂陷寅顾其妻杜氏曰若速自为计杜厉声曰安有生同君禄死不共王事者即登高堡饮药自杀二子及妇俱死母旁寅斂而杰之乃朝服登战

楼望阙焚香号泣再拜伏剑而死宾客同死者二十有八人一子后至将自裁军士抱持之与俱缢城亦折足死事闻诏赠朝议大夫右文殿修撰久之加赠华文阁待制谥襄节贾子坤字伯厚潼川怀安军人嘉定十三年进士为西和推官摄通判与寅誓死守城城陷子坤朝服与其家十二口死之追赠承议郎官其子仲武宣教郎仲武子纯孝登感淳七年进士第丞相文天祥辟佐其幕寻授秘书丞擢吏部郎中朝散郎厓山师败纯孝抱二女偕妻牟同蹈海死

△高稼

高稼字南叔邛州蒲江人嘉定七年进士制置使崔与之辟本司干办公事未几改知绵谷县宝庆三年蜀帅桂如渊辟通判沔州寻檄兼幕职元兵由东道至如渊忧之辟稼知洋州稼以洋居平地无一卒以守讥移金州帅司军千人驻洋州而自任其饷给李心传为言诸朝不报及凤州破制置司始从稼请调金州兵赴之而兵不时至汉中陷梁洋之民数十万尽趋安康稼乃移屯黄金渡数散卒招忠义以州事付通判而自假节制军马督诸将继进沔州破元兵迫大安益昌大震稼亟命趋沔自至西县援之如渊以便宜金稼利路提刑司兼权兴元府制置司檄守米仓稼移书请以与沔利三戎司分驻凤州如渊迟疑不决逮天水同庆被屠西和围益急始会军民之众万人援之道梗不得前而城已破矣如渊既罢李■〈直上土下〉代之以稼久劳请改界内郡差知荣州殿中侍御史汪刚中如渊党也欲使稼分其罪乃谓蜀之败实由稼遽罢之又削二官制置使赵彥呐以参议官辟之制置司近汉中稼言汉中荡无藩篱宜经理仙人原以为缓急视师之地彥呐以委稼会召还彥呐密奏留稼以直秘阁知沔州利州提点刑狱兼参议官至则葺理创残招集流散民皆襁负来归元兵入西和薄阶州稼赞彥呐登原督战进稼三官为朝请大夫兼关外四州安抚司公事措置西路屯田元兵自凤州入捣河池至西池谷距沔九十里吏民率逃议欲退保大安稼白彥呐曰今日之事有进无退彥呐曰吾志也已而竟行留稼守沔元兵自白水关入六股株距沔六十里沔无城依山为阻稼升高鼓噪盛旗鼓为疑兵彥呐至置口辍帐前总管和彥咸以军还沔召小将杨俊何璘悉以兵会又调总管王宣精兵千人益之璘军无纪律稼捕其纵火者三人诛之未几元兵大至璘遁其众皆溃遂失沔州先二日子斯得待以时危任重为忧稼语之曰吾得死所何憾城既陷众拥稼出户兵骑四集围之遂死骂诏进稼七官为正义大夫龙图阁直学士谥曰忠后以子斯得执政累赠太师斯得自有传

△曹友闻 【曹万】

曹友闻字允叔同庆栗亭人武老王彬十二世孙也登宝庆二年进士授绵竹尉改辟天水军教授元兵至友闻罄家财招集忠义得健士五千人制置使李■〈直上土下〉檄管忠义领所部守仙人关友闻令诸军乘高据险身冒矢石为士卒先兵退制置使檄扞七方关元兵破七方遂入沔州金牛至大安又分兵自嘉陵江木皮口突出长驱入剑门友闻与弟万各率所部取间道战于白水江中流兵退制置使檄驻闻州又檄知天水军元兵入凤州路河池抵同庆城下友闻部分诸将各守一门命统制王汉臣等取间道出战自提重兵尾敌后大战有功特授承务郎权发遣天水军元兵又自西和至阶州友闻往来督战有功制置使赵彥呐俾节制利帅司军马任责措置边面换武翼大夫合门宣赞舍人差权利州驻扎御前诸军都统制驻扎石门控扼七方关明年元兵破武休关入沔阳利路提刑高稼死之制置使进屯青野原被围友闻遣万领民自冷水口度嘉陵江至六股株屡战有功夜衔枚由间道直趋青野原友闻引精兵亦趋至原下夜半截战围遂得解特授武德大夫左骁骑大将军依旧利州驻扎御前诸军统制元兵破沔州捣大安突至阳平关友闻遣将出战又亲帅帐兵及背嵬军突出陈前左右驰射且料敌必旋兵攻鸡冠隘急遣将援之兵乃解去特授眉州防御使依旧左骁骑大将军利州驻扎御前诸军统制兼沔州驻扎兼管关外四州安抚权知沔州节制本府屯戍军马弟万差知同庆府四州制置司帐前总管仍旧总管忠义军马节制屯戍军马董仙驻扎专与沔利两司同共任责措置边面明年友闻引兵扼仙人关元兵合诸军五十余万大至先攻武休关败都统李显忠军遂入兴元欲冲大安制置使赵彥呐檄友闻控制大安以保蜀口友闻驰书彥呐曰沔阳蜀之险要吾重兵在此敌有后顾之忧必不能越沔阳而入蜀大安地势平旷无险可守正敌骑所长步兵所短况众寡不敌岂可于平地控御彥呐不从一日持小红牌来速者七友闻议为以寡击众非乘夜出奇内外夹击不可乃遣万及弟友谅引兵上鸡冠隘多张旗帜示敌坚守友闻选精锐万人夜渡江密往流溪设伏约曰敌至内以鸣鼓举火为应外呼杀声元兵果至万出逆战敌将巴图尔达罕帅万余人往来搏战矢石如雨万身被数鎗令诸军举烽友闻分所部为三以御敌亲帅精兵三千人疾驰至隘下先遣保捷军统领刘虎帅敢死士五百人冲前军前军不动大兵伏三百骑道旁虎众衔枚突战【按宋元通鉴作友闻乃伏骑三百道旁而令虎众衔枚突战未详孰是】友闻入龙尾头万开之五鼓出隘口与友闻会内外两军皆殊

死战血流二十里黎明元兵益增乃以铁骑四面围绕
友闻杀所乘马以示必死血战愈厉与弟万俱死军尽没事闻赠龙图阁学士大中大夫
谥毅节官二子承务郎壻迪功郎万赠武翼大夫二子
成忠郎

△蹇彝 【蹇维之 蹇永叔】

蹇彝潼川通泉人嘉定二年进士累官通判金州端平三年元兵攻蜀彝坚守被擒
不屈而死其子永叔复力战城破举家死焉弟维之绍
定五年进士利州都统王宣辟行参军事亦迎敌力战死特官其子

△刘锐 【赵汝向】

刘锐知文州嘉熙元年元兵来攻锐与通判赵汝向 【昭忠录作汝芑】 率军民
七千余人拒守两月余援兵不至城中无水取汲于江
敌增兵攻城一夕移江流于数里外锐度不免集其家人尽饮以药皆死聚其尸焚之家
素有礼法幼子同哥才六岁饮以药犹下拜受饮左右
为之感泣汝向宣城人善射城破犹提双刀入阵中十六矢被执先断其两臂而后裔杀
之锐及其二子登文王台自刎死 【按刘锐赵汝向
宋史既立合传又附载二人事于王翊等传内前后种出今节取并载于此】

△丁黼

丁黼成都制置使也嘉熙三年元兵自新井入诈竖宋将李显忠之旗直趋成都黼
审知其非领兵夜出城南迎战至石笋街兵散黼力战
死之

△王翊 【蒲东卯 刘当可 邵复 罗由 赵崇启 罗君文 冯仲煜 李大
全 赵晨 赵朋 胡天启 杨礼 周德荣 王
佐 赵广 施择善 段元鉴】

王翊字公辅郫县人宝庆元年进士吴曦招之入幕曦以蜀叛翊为陈大义曦怒囚
之及曦诛而免嘉熙元年制置使丁黼辟为参议官元
兵至黼仓卒迎敌败死翊募兵拒守城破朝服赴井死转运副使蒲东卯 【昭忠录作东
印】 亦死之兵屠汉州权州事刘当可判官邵复录
事参军罗由司户参军赵崇启知雒县罗君文皆不屈死复雍六世孙也入眉州知丹陵
县冯仲煜死之取简州简守李大全死之邛守赵晨亲
率雅州裨手出战力尽而死师至遂宁民兵赵朋拒战左臂已断而战不休卒死之至重
庆进士胡天启负母逃兵杀其母天启与其妻呼天大
骂遂同死事闻皆哀恤有差宝佑六年元兵拔吉平隘守将杨礼周德荣死之拔长宁守
将王佐父子俱死至阆州推官赵广死之至蓬州转运
使施择善死之至顺庆帅司段元鉴城守麾下刘渊杀之以降

△陈隆之 【史季俭】

陈隆之为四川制置使淳佑元年十一月成都被围隆之固守弥旬弗下部将田世显乘夜开门元兵突入隆之举家皆死槛送隆之至汉州命谕守臣王夔降隆之呼夔语曰大丈夫死尔毋降也遂见杀后赠徽猷阁待制特与两子恩泽赐谥又有史季敛者威州棋城主簿也成都之陷子良震与壻杨城夫争相为死各特赠两官与一子下州文学

△何充

何充汉州德阳人秘书监耕之孙通判黎州摄州事城破充自刺不死元军帅呼之语使署招民榜充曰吾监州也一家死耳榜不可署自是水饮绝不入口敌知其不可强斩之初充见呼其妻陈以一家随往师曰不呼汝也陈曰吾求死耳及充死东望再拜曰吾夫妇对赵氏无愧矣众以石击杀之同死者四十余人

△陈元桂

陈元桂抚州人淳佑四年进士累官知临江军开庆元年春元兵至临江市制置使徐敏子在隆兴顿兵不进元桂登城坐北门亭上督战矢石如雨吏卒劝之避去不从有以门廊鼓翼蔽之者麾之使去有欲抱而走者元桂曰死不可去此左右走遁师至元桂瞠目叱骂遂死之事闻赠宝章阁待制官其二子谥曰正节

△许彪孙 【张桂 金文德 曹贛 胡世全 庞彦海 李丁孙 唐奎瑞 江彦清】

许彪孙显谟阁学士奕之子也为四川制置司参谋官景定二年刘整叛召彪孙草降文彪孙辞使者曰此腕可断此笔不可书也即闭门与家人仰药死整既降遂引兵袭都统张桂营桂及统制金文德战死纳溪曹贛阖门死之景定四年沔州都统胡世全护粮运至虎象山遇敌兵战败死咸淳二年元兵取开州守将庞彦海死之德佑元年泸守梅应春杀判官李丁孙推官唐奎瑞以城降珍州守将江彦清巷战死之

△张顺 【张贵】

张顺民兵部将也襄阳受围五年诏李庭芝侈屯郢州援之 【据李庭芝传及宋元通鉴增】 侦知襄阳西北一水曰清泥河源于均房即其地造轻舟百艘以三舟联为一舫中一舟装载左右舟则虚其底而掩覆之出重赏募敢死者三千人求将得顺与张贵以为都统军中呼贵曰矮张顺曰竹园张智勇并出诸将上出令曰此行有死而已不能死者去毋败吾事人人感奋是时五月汉水方生发舟进团山下越二日进高头港口结方陈各舟置火枪火炮炽炭巨斧劲弩夜漏下三刻起碇出江以红灯为

识贵先登顺殿之乘风破浪径犯重围至磨洪滩以上
望见元舟师布满江面无隙可入众乘锐断铁絙攒杙数百 【按昭忠录云元兵迎敌近南船跃入溺死万计与前无底舟可互证谨附录】

转战百二十里黎明抵襄阳城下城中久绝援闻救至踊跃气百倍及收军独失顺越数日有浮尸遡流而上被甲胄执弓矢直抵浮梁视之顺也身中四枪六箭怒气勃勃如生军中惊以为神结冢敛葬张贵既抵襄襄帅吕文焕留共守城贵恃其骁勇欲还郢乃募二士能伏水中数日不食者使持蜡书赴郢求援于时元兵增守益密水路连锁数十里列撒星桩虽鱼虾不得度二人遇椿以锯断之竟达郢还报许发兵五千驻龙尾洲以助夹击刻日既定以七月七日 【原传不载月日今据昭忠录补】 别文焕东下点视所部泊登舟帐前一人亡去乃有过被捩者贵惊曰吾事泄矣亟行彼或未及知即举炮发舟乘夜顺流断絙破围所过辟易既出险夜半薄小新城元兵邀击死战沿岸束荻烈炬火光烛天至勾林滩渐近龙尾洲遥望军船旗帜纷披贵军喜跃举流星火示之军船见火即前迎及势近欲合则来舟皆元兵也盖郢兵前二日以风水惊疑退屯三十里而元兵得逃卒之报据龙尾洲以逸待劳贵战已困出于不意杀伤殆尽身被数十枪见执不屈死之元军命降卒四人舁尸至城下曰识矮张乎此是也守陴者皆哭城中丧气文焕斩四卒以贵附葬顺冢

△牛富 【王福】

牛富霍邱人为侍卫马军司统制戍襄阳五年移守樊城累战不为衄且数射书襄城中遗吕文焕相与固守南城为唇齿凡六年城破富率死士巷战渴饮血水转鬪欲前遇民居烧绝街道身被重伤以头触焦柱赴火死赠静江军节度使谥忠烈裨将王福亦赴火死

△范天顺

范天顺荆湖都统也襄阳受围天顺日夕守战尤力及吕文焕出降天顺仰天叹曰生为宋臣死当为宋鬼遂缢死 【按宋元通鉴载范天顺之死在咸淳九年正月吕文焕出降在是年二月与传互异】 赠定江军承宣使官其二子

△吕文信 【张兴宗】

吕文信文德之弟也仕至武功大夫沿江副司咨议官德佑初帅舟师次南康斛林夹白鹿矶与元兵遇战死特赠定远军承宣使河湖砦巡检张兴宗亦死之赠武翼郎皆官其子

△赵文义 【赵武义 杨寿孙 何庚 安惟臣 田广泽】

赵文义郢州都统制更戍归与元兵遇力战死之先是开州之役文义兄武义亦死

焉又有杨寿孙者为云安军主簿兼教参佐忠胜军端
平中元兵至中江县与将官何庚安惟臣田广泽等数人连战二日俱死之寿孙赠通直
郎庚等各赠承节郎官其子

△边居谊

边居谊【本纪作居义】随人也初事李庭芝积战功至都统制咸淳十年以京
湖制置帐前都统守新城居谊善御下治战守之具有
法时元兵破沙阳【元史作沙洋】执首将王大用吕文焕曰新城小垒可不攻破也
居谊率舟师拒之文焕列沙阳所斩首招降不从明日
缚大用至壁下使呼曰边都统急降不然祸即至矣居谊答曰吾欲与吕参政语文焕以
为降已也驰马至伏弩乱发马仆几钩得之众挟文焕
易马奔越二日总制黄顺出东门降明日使顺来招之又呼其部曲部曲欲缢城出居谊
悉驱斩之文焕乃麾兵攻城蚁附而上居谊悉取金散
将士往来督战会暮破侵汉楼楼火延民居居谊走还第拔剑自杀不殊赴火死事闻赠
利州观察使【按元史巴延转载居谊自焚死后遂
并诛沙阳守将王虎臣王大用等四人传未详载谨附识】

△赵卯发

赵卯发【元史巴延传作昂发】字汉卿昌化人淳佑十年登第为遂宁州司户
潼川签判寻罢咸淳七年起为彭泽令十年权通判池
州元兵渡江池守王起宗弃官去卯发摄州事缮壁聚粮为守御计明年正月元兵至李
王河都统张林屡讽之降卯发怒气填膺瞠目视林不
能出言越日林以兵出巡江阴降敌归而阳助卯发为守守兵仅五百人卯发知不可为
乃置酒与亲友饮诀谓其妻雍氏曰城将破吾守臣不
当去汝先出走雍氏曰君为忠臣我独不能为忠臣妇乎卯发哂之雍氏曰吾请先君死
卯发笑止之乃尽散其家资与其弟侄仆婢悉遣之出
二月兵薄池卯发晨起书几上曰君不可叛城不可降夫妻同死节义成双与雍盛服同
缢从容堂事闻赠华文阁待制谥文节雍氏赠顺义夫
人录二子为京官

△唐震【唐椿 冯骥 何新之】

唐震字景实会稽人既登第为小官权贵有以牒荐之者震内牒篋中既而还之封
题未启咸淳中由大理司直通判临安府六年知信州
擢浙西提刑忤贾似道去十年起知饶州时兴国南康江州诸郡并降元元兵略饶饶兵
止千八百人震发州民守城上书求援不报元使人入
驍取降款通判万道同阴敛白金牛酒备降礼风震降震叱之曰我忍偷生负国邪城中
少年感震言杀使者明年二月兵大至都大提举邓益

遁去震尽出府中金钱书官资揭于城募有能出战者赏之众惧不能战元兵登陴众遂溃震入府中玉芝堂其仆前进曰番江门兵未合出犹可免震骂曰城中民命系于我民死我何面目独生邪有顷兵入执燂铺案上使震署降震掷笔于地遂死之兄椿与家人俱死赠华文阁待制谥忠介官其二子震客冯骥后守独松阅何新之守闽之新垒皆战死

△司马梦求

司马梦求叙州人温国公光之后也母程归及门夫死誓不他适梦求其族子取以为后景定三年举进士咸淳末调江陵少市监镇沙市地势险固恃水为防德佑元年湖水忽涸元兵横遏中道乘南风纵火都统程文亮降梦求朝服望阙再拜自经死

△耿世安

耿世安为武翼大夫淮东副总管两淮都拨发官谍报元兵至制置使贾似道调世安提兵往涟水军增戍众方犹豫世安径至渔沟以三百骑入陈鏖击身被七创犹能追杀既还兵而没事闻赠五官

△李成大 【潘大同 潘大本】

李成大字实夫南康军建昌人文公定迪从子也宝佑四年进士德佑初知金坛县元兵至与寄居官潘大同大本率民兵巷战不胜大同兄弟死之吏民挟成大降乃潜与胡用存谋复金坛事泄系狱榜掠不屈杀其二子以惧之亦不屈卒杀之事闻赠朝散大夫直秘阁谥忠节

△赵孟锦 【苗再成】

赵孟锦少不羈游淮以军功为将佐元兵攻真州每战辄先士卒元重舰驻江上孟锦乘大雾袭之俄雾解日已高元兵见其兵少逐之登舟失足身荷重铠死焉元兵入真州守将苗再成死之 【按孟锦旧附赵与櫟传今以其死于江左与从二王死者不同时谨移置于此】

△陶居仁

陶居仁太平芜湖人仕为镇江录事参军元兵破镇江居仁见执抑使降居仁曰吾固知世运穷矣詎求苟生以失忠义邪遂见杀

△尹玉

尹玉宁都人以捕盗功为贛州二砦巡检从文天祥勤王及天祥至平江调玉同淮广二军拒元兵战于伍牧军败诸将皆遁惟玉残兵五百殊死战玉手杀数十人箭集于胄如猬毛竟被执元军横四枪于其项以挺系之死余兵犹夜战杀人马蔽田间无一降者后赠濠州团练使官其二子

△陈照 【姚峇】

陈照字光伯常州人登第为丹徒县尉两淮制置司参议官改知胸山县仍兼主管机宜文字丁母忧归元兵至常守臣赵与鉴走匿郡人钱豈以城降会淮民王通居常州谋复之阴以书约刘师勇许为内应师勇遂复常州走钱豈于是朝议以姚布得子豈知常州豈故知照辟为通判或谓照曰今辟难有辞矣照曰卿邦沦没何敢偷生墨衰而出豈入常甫十余日元军再至照等率义兵战御数月不能下以功加带行提辖文思院适常将张彦降敌尽言常城中虚实遂急攻之照与豈固守再加豈太府寺丞照干辨诸军粮料院常将士皆转五官攻益急常兵阻壕水为陈矢尽城破豈死之照犹敛兵巷战不敌死豈事上追赠豈龙图阁待制希得赠太师照直宝章阁并官其子

△王安节

王安节节度使坚之子也少从其父守合州有功咸淳末为东南第七副将德佑初贾似道溃师芜湖列城皆降时安节驻兵江陵即走临安上疏乞募兵为捍御计授合门祗候浙西添差兵马副都监收兵入平江合张世杰兵战凤凰港有功转三官刘师勇复常州击走王良臣以安节守常已而良臣导元兵攻常常城圯悉安节筑栅相拒两月丞相巴延自将攻之屡招降不下巴延怒麾兵破其南门安节挥双刀率死士巷战臂伤被执有求其姓名者安节呼曰我王坚子安节也降之不可乃杀之

△黄介 【陈力】

黄介字刚中隆兴分宁人喜兵法夏贵辟充广济簿尉后家居乡民登龙安山为保聚计德佑元年元兵至砦众奔溃介坚守不出顾谓家僮陈力曰尔尽力勿走力曰主在生死同之介身被镞如猬面颈中十三矢倚栅而死力亦死妻刘被京子用中逃得不死及壮求母四方逾十年得于京师以归州里称为黄孝子云

△密佑

密佑其先密州人后渡淮居庐州累官至庐州驻扎御前游击中军统领改权江西路副总管咸淳十年以合门宣赞舍人为江西都统明年二月朱禔孙遣高世杰复鄂州阿尔哈雅以兵逆击执世杰余兵溃入江西江西制置黄万石招集之且募宁都广昌南剑义兵千余人尽以属佑十一月元兵至隆兴刘盘兵败婴城自守万石时移治抚州将遁惧佑不从乃调佑兵援盘未至隆兴盘已降而元帅张荣实吕师夔拥兵逼抚州佑率众逆之进贤坪兵来呼曰降者乎鬪者乎佑曰鬪者也麾其兵突战进至龙马坪元兵围之数重佑告其部曰今日死日也若力战或有生理众咸愤厉自辰战至日昃佑面中矢拔之复战身被四矢三枪余骑仅数十人

佑舞双刀斫围南走前渡桥马踏桥板断遂被执众戒勿杀輿归隆兴元帅宋都木达曰壮士也欲降之系之月余命刘盘吕师夔坐城楼引佑楼下以金符遗之许以官佑不受语侵盘师夔又令其子说之曰父死子安之佑斥曰汝行乞于市第云密都统子谁不怜汝怡然解其衣请刑遂死

△米立

米立淮人三世为将从陈奕守黄州奕降立溃围出江西制置使黄万石署为帐前都统制元兵略江西立迎战于江坊被执不降行省遣万石谕之立曰侍郎为国大臣立一小卒耳但三世食赵家禄赵亡何以生为遂遇害

△李芾 【于兴 沈忠 顾应焱 陈亿孙】

李芾字叔章其先广平人徙居汴高祖升起进士靖康中金人破卞以刃迫其父升前捍之与父俱死曾祖椿徙家衡州芾初以荫补南安司户改祁阳尉摄县辟湖南安抚司幕官时盗起永州招之岁余不下芾与参议邓垹提千三百人破其巢禽贼魁蒋时选父子以归余党遂平累官浙东提刑知温州咸淳元年入知临安府时贾似道当国前尹事无巨细先关白始行芾独无所闻尝出阅火具民有不为具者问之曰似道家人也立杖之似道大怒使台臣黄万石诬以赃罪罢之元军取鄂州始起为湖南提刑时郡县盗扰民多奔窜芾令所部发民兵自卫县与一皂帜令曰作乱者斩帜下民始帖然乃发兵择壮士三千人遣将勤王别召民兵集衡为守备未几似道兵溃芜湖复芾官知潭州兼湖南安抚使时湖北州郡皆已降元其友劝芾勿行芾泣曰我以家许国矣时值所爱女死一恸而行德佑元年七月至潭潭兵调且尽乃结溪峒蛮为声援栅江修壁命刘孝忠统诸军吴继明自湖北至陈义陈元自戍蜀归芾奏请留之戍潭推诚任之皆得其死力元右丞阿尔哈雅既下江陵分军戍常德遏诸蛮而以大兵入潭芾遣其将于兴御之于湘阴兴战死九月元兵遂围城芾慷慨登陴与诸将分地而守民老弱皆出不令而集十月兵攻西壁孝忠辈奋战芾亲冒矢石以督之城中矢尽有故矢皆羽败芾令括民间羽扇羽立具又苦食无盐芾取库中积盐席焚败盐给之死伤相籍人犹饮血乘城殊死战有来招降者芾杀之以徇十二月城围益急孝忠中炮风不能起诸将泣请曰事急矣吾属为国死可也如民何芾骂曰国家平时所以厚养汝者为今日也汝第死守有后言者吾先戮汝除夕元兵登城衡守尹谷及其家人自焚芾命酒酹之参议杨霆赴园池死芾坐雄湘阁召帐下沈忠遗之金曰吾分当死吾家人亦不可辱汝尽杀之而后救我忠伏地叩头辞芾固命之忠泣而诺取酒

饮其家人尽醉乃徧刃之芾亦引头受刃忠取火焚其居还家杀其妻子复至火所大恸乃自刎幕属茶陵顾应焱安仁陈亿孙皆死潭民闻之多举家自尽城无虚井缢林木者累累相比继明等以城降【按元史阿尔哈雅傅是时同芾死者尚有转运使锺蜚英谨识】陈义溃围将奔闽中道战死事闻赠端明殿大学士谥忠节

△尹谷

尹谷字耕叟潭州长沙人登进士第调常德推官知崇阳县用荐擢知衡州需次于家潭城受兵帅臣李芾礼以为参谋共画备御策时城中壮士皆入卫临安所余军仅四百五十人老弱大半芾纠励民丁以义固守三月城不下元军断绝险要谷知城危与妻子诀曰吾以寒儒受国恩不可屈若辈从吾死耳召弟岳秀使出以存尹氏祀岳秀泣而许之已乃积薪扃户朝服望阙拜已即纵火自焚阖门少长皆死

△杨霆

杨霆字震仲以父大异恩奏补将仕郎铨试第一授修职郎桂岭主簿五中漕举改鄂州教授累官通判江陵府丁内艰德佑初起复奉议郎湖南安抚司参议与安抚使李芾协力战守霆有心计善出奇应变帅府机务芾一以委之城初被围日夜守御数日西北隅破霆麾兵巷战暮筑月城比旦城复完以死守之城既破霆赴水死妻妾奔救不及皆死

△赵良淳

赵良淳字景程居饶之余干丞相汝愚曾孙也以荫为泰宁主簿三迁至淮西运辖改知分宁县秩满特差权江西安抚司机宜文字升大理司直咸淳末知安吉州寻以徐道隆为浙西提刑以辅良淳加良淳直秘阁范文虎遣使招降良淳斩其使元兵迫独松关有旨趣道隆入卫道隆去而元兵已军东西门矣良淳率众城守夜就菱舍陴上先是朝廷遣将吴国定援宜兴国定不敢入宜兴而之安吉见良淳愿留备守御良淳信之为请于朝留戍安吉已而国定开南门纳外兵兵入城呼曰众散元帅不杀汝于是众号泣散去良淳命车归府闭阁自经有入解救之者复苏因泣劝曰侍郎何自苦良淳叱出之复投缳而死

△徐道隆【徐载孙】

徐道隆字伯谦婺州武义人父焕知南雄道隆以任补职累官潭州判官权知全州荆湖制置使注立信奏辟为参议官及立信内迁赵孟傅为制置使以道隆参其军事遂为提点刑狱寻有旨命道隆措置安吉溃卒范文虎程鹏飞管景模俱遣书诱降道隆焚书斩使元兵至临平皋亭山间道入援时道绝不通议由太湖经武康临安县境勤王即日乘舟出临湖门泊

宋村德佑二年正月朔旦元兵追及道隆以江陵亲从
军三百人殊死战矢尽枪槊折一军尽没道隆见执乘守者少怠赴水死长子载孙亦赴
水死余兵有脱归者言于朝命赠官赐谥官其子孙

钦定续通志卷五百十四

●钦定续通志卷五百十五 忠义传八

忠义传

宋【五】

○宋五

高应松 徐应鑣 姜才【洪福】 赵淮 宋应龙【褚一
正 胡拱辰】 赵与櫟【方洪】 赵孟垒
赵孟采 锤季玉【潘方】 马璩【屡钤辖】 邓得遇
刘子荐【黄文政】 陈文龙【瓚】 林
空斋 陈牵年 吴楚材 萧雷龙 刘士昭【王士敏】 赵时赏
赵希洎【必向】 邹■〈彳 凤〉【刘子俊
刘沐 孙□彭震龙 萧焘夫 陈继周 陈龙复 张镗 张云 张汴 吕武
巩信 萧明哲 杜浒林琦 萧资 徐臻 金应张
珏上官夔 王世昌 马堃 包申 赵立 赵酉泰】 王仙 曹琦
陆秀夫【刘鼎孙】 张世杰【刘师勇】
莫谦之 徐道明
高应松
徐应鑣
姜才【洪福】
赵淮
宋应龙【褚一正 胡拱辰】
赵与櫟【方洪】
赵孟垒
赵孟采
锤季玉【潘方】
马璩【屡钤辖】
邓得遇
刘子荐【黄文政】
陈文龙【陈瓚】
林空斋
陈牵【陈年】

吴楚材

萧雷龙

刘士昭 【王士敏】

赵时赏

赵希泊 【赵必向】

邹■ 〈汙 凤〉 【刘子俊 刘沐 孙□ 彭震龙 萧焘夫 陈继周 陈龙复

张镗 张云 张汴 吕武 巩信 萧明哲

杜浒 林琦 萧资 徐臻 金应】

张珏 【上官夔 王世昌 马堃 包申 赵立 赵酉泰】

王仙

曹琦

陆秀夫 【刘鼎孙】

张世杰 【刘师勇】

莫谦之

徐道明

△高应松

高应松开庆元年进士繇衡州教授通判广德军召为国子监丞权礼部员外郎翰林权直元兵自涌金门入举朝奔窜从官留者九人应松其一也进端明殿学士签书枢密院事从瀛国公至燕绝粒七日卒 【按此传后宋史旧附张山翁黄申两传虽属秉节不屈以其隐居终老兹俱移入独行传】

△徐应鑣

徐应鑣字巨翁衢之江山人咸淳末试补太学生德佑二年瀛国公入燕三学生百余人皆从行应鑣不欲从乃与其子琦崧女元娘誓共焚死子女皆喜从之太学故岳飞第有飞祠应鑣具酒肉祀飞曰天不佑宋社稷为墟应鑣誓死合家与俱死将魂魄累王作配仰王英灵永永罔艾琦亦赋诗自誓祭毕以酒肉醉诸仆应鑣乃与其子女入梯云楼积诸房书籍四周纵火自焚一小仆闻火声寤起至楼下穴牖窥之应鑣父子俨然坐立如庙中塑像走报诸仆坏壁入扑灭火应鑣不克死与其子女怏怏出户莫知所之翌日得其尸祠前井中皆僵立瞠目如生人诸仆为具棺敛殡之西湖金牛僧舍益王立福州褒其节赠朝奉郎秘阁修撰后十年其同舍生刘汝钧收葬之方家峪

△姜才 【洪福】

姜才濠州人貌短悍隶淮南兵中以善战名为通州副都统临阵军律凛凛其子当

战回白事才望见以为败也拔剑驰逐几杀之贾似道
出师才以兵属孙虎臣及虎臣军溃才收兵入扬州元兵乘胜攻扬州才为三迭阵逆之
三里沟战有功又与元帅战扬子桥日暮兵乱流矢贯
才肩才拔矢挥刀而前所向辟易已而元军筑长围自扬子桥竟瓜洲东北跨湾头至黄
塘西北至丁村务欲以久困之时德佑元年明年正月
宋亡五奉使持谢太后诏来谕才射却之复以兵击败于召伯堡未几瀛国公至瓜洲才
与李庭芝涕泣誓将士出夺之以四万人夜捣瓜洲战
三时众拥瀛国公避去才进战至浦子市夜犹不退阿珠使人招之才曰吾宁死岂作降
将军耶四月才以兵攻湾头栅五月复攻之骑旋泞而
止乃舍骑步战至四鼓全师以归扬食尽才时出运米真州高邮以给兵元万户史弼将
兵至马家渡伺夺之才与战达旦弼几殆阿珠驰兵来
援乃得免庭芝以在围久召才屏左右语久之第闻才厉声云相公不过忍片时痛尔左
右闻之俱汗下才自是以兵护庭芝第期与俱死七月
益王在福州以龙神四厢都指挥使保康军承宣使召才与庭芝东至泰州将入海阿珠
以兵追及围泰州使使者招之降才不听阿珠驱扬兵
士妻子至城下会才疽发背不能战诸将遂开门降都统曹安国入才卧内执之以献阿
球爱其勇欲降而用之才辄谩骂阿珠责庭芝不降才
曰不降者才也益愤诋不已文焕怒弼之扬州才临刑夏贵出其旁才切齿曰若见我宁
不媿死耶有洪福者夏贵家僮也从贵积劳为镇巢雄
江左军统制镇江北贵出降元福与子太渊大源下班祇候彭元亮统贵军拒之加右武
大夫知镇巢贵招福不听使其从子往福斩之元兵攻
城久不拔遣贵至城下好语语福请单骑入城福信之门发而伏兵起执福父子屠城中
贵莅杀大渊大源諄曰法止诛首谋何至举家为戮福
叱曰以一命报宋朝何至向人求活耶次及福福大骂数贵不忠请身向南死以明不背
国也

△赵淮

赵淮丞相葵之从子也累官至淮东转运使福佑中戍银树坝兵败与甚妾俱被执
至瓜洲元帅阿珠使淮招李庭芝许以大官淮至城下
大呼曰李庭芝男子死耳毋降也阿珠怒杀之弃尸江滨

△宋应龙 【褚一正 胡拱辰】

宋应龙者儒生通兵出入行幕三十年为咨议官寓泰州德佑二年元兵至泰州城
降应龙与其妻自缢于圃中是时提刑咨议褚一正督
战高沙被创没于水知兴化县胡拱辰县破亦死之一正字粹翁庐州人

△赵与櫟 【方洪】

赵与櫟 【本纪作与罍】 为嗣秀王德佑二年为浙闽广察访使益王之立舅杨亮节居中秉权与櫟多所谏止诸将俱惮之未几元兵逼浙东乃命与櫟出瑞安与守臣方洪共任备御瑞安受围与洪誓以死守小校李雄夜开门纳外兵举櫟洪率众巷战兵败被縶莲文炳问之曰汝为秀王邪能降乎与櫟厉声曰我国家近亲力屈而死何问为遂死之洪亦仗节而死

△赵孟垒

赵孟垒合州人登开庆元年第为金华尉临安降怀太皇太后帛书诣益王擢宗正寺簿监军复明州战败见获不屈磔死

△赵孟余

赵孟余福主与芮从子也元兵驻绍兴孟余谋举兵被执至临安范文虎诘其谋逆孟余诟曰贼臣负国共危社稷我帝室之胄欲之刷宗庙之耻乃以为逆乎文虎怒驱出斩之 【按赵孟垒孟余旧俱附刘士昭传后今并析为专传】

△锤季玉 【潘方】

锤季玉饶州乐平人淳佑七年举进士调为都大坑冶属改知万载县淮东制置使李庭芝荐之迁审计院改宗正寺簿又迁枢密院编修出知建昌军后以江西转运判官召为秘书丞改都大提点坑冶元兵渡江季玉徙寓建阳兵至不屈死之有潘方者温州平阳人宝佑四年进士调监庆元府市舶庆元降附方不屈赴水死

△马璩 【屡钤辖】

马璩宕昌人一家父叔兄弟皆以忠勇为名将而璩与兄塋特显咸淳中璩知钦州又徙知邕邕地接六诏安南傍通诸溪峒镇抚诸蛮边邨晏然广西经略李兴上其功加合门宣赞舍人未几以左武卫将军征入朝已而宋亡璩因留兵静江总屯戍诸军护经略司印守城德佑二年元平章阿尔哈雅攻广西璩发所部及诸峒兵守静江而自将三千人守严关凿马坑断岭道元兵攻三关不克乃以偏师入平乐过临桂夹攻璩璩兵败退保静江元使人招降璩发弩射之攻三月璩前后百余战城中死伤相藉讫无降意城东隅稍卑元军阳攻西门以精兵夜决水闸从东破其外城璩闭内城内城破率死士巷战被执杀之断其首犹握拳奋起立逾时始仆时邕守以城降独璩部将屡钤辖以二百五十人守月城不下阿尔哈雅笑曰是何足攻围之十余日屡从壁上呼曰吾属饥不能出降苟赐之食当听命乃遗牛数头米数斛一部将开门取归复闭壁元军乘高望之兵皆分米炊未熟生齧牛啖立尽鸦角伐鼓诸将以为出战也甲

以待萎乃令所部拥一火炮然之声如雷霆震城城崩
烟气涨天外兵多惊死者火息入视之灰尽无遗矣

△邓得遇

邓得遇字达夫邛州人淳佑十年进士调宁远主簿改知南昌迁通判隆兴府监行
在藏库出知昭州迁广西提点刑狱逾年摄经略事兼
知静江府德佑二年静江破得遇朝服南望拜辞投南流江而死

△刘子荐 【黄文政】

刘子荐字贡伯吉州安福人父梦骥以进士历官知澧州没于王事子荐以父任为
湘乡尉调抚州司录改知贛县监行在左藏库通判常
德府知融州以廉静着闻主管仙都观广西经略司檄为参议官德佑二年十一月元兵
至静江权经略使马璩遣子荐提獠兵药弩手守城东
门势不支时瀛国公已入燕子荐登城北望再拜取所衣袍瘞之以誓死守或讽其遁去
子荐曰死事义也何以遁为竟死之有黄文政者淮人
戍蜀军溃间道走静江马璩邀与同守城破文政被执太诟不屈元兵断其舌以次剗
之文政比死叱咄不绝声

△陈文龙 【陈瓚】

陈文龙字君贵福州兴化人丞相俊卿之后也初名子龙咸淳五年廷对第一度宗
易其名由镇东军节度判官历崇政殿说书数年拜监
察御史襄阳被围久贾似道日纵淫乐不少加意文龙上疏极言其失范文虎总师无功
似道庇之以知安庆又除赵溍知建康黄万石知临安
文尼言文虎失襄阳今反见擢用是当罚而赏也溍乳臭小子何以任大阍之寄万石政
事怠荒以为京尹何以能治请皆罢之似道大怒黜知
抚州旋使台臣李可劾罢之未几吕文焕导元军东下范文虎首迎降与文焕俱东似道
兵溃鲁港溍最先遁以故列城从之皆遁始悔不用文
龙之言起为左司谏寻迁侍御史时边事甚急王爚与陈宜中不能画一策而日坐朝堂
争私意文龙上疏请刀大臣同心图治无滋虚议其后
宜中与爚终不相能而去事已不可为矣未几议降乃上章乞归益王称制于福州以文
龙参知政事漳州叛以文龙为闽广宣抚使讨之文龙
以黄恮前守漳有恩信辟为参谋官按兵泉州使恮招抚之及恮至民皆顿首谢罪兴化
有石手军者能掷石中人议者以其不足用罢之石手
军亦叛复令文龙为知军平之已而降将王世强导元军入广建宁泉福皆陷知福州王
刚中遣使徇兴化文龙斩之而纵其副以还使持书责
世强刚中负国遂发民兵自守城中兵不满千元军来攻使其姻家持书招降之文龙斩
其使日诸降者特畏死耳未知此生能不死乎遣其将

林华侦伺境上华即降且导兵至城下通判曹澄孙开门降执文龙与其家人至军中左右凌挫之卒不屈乃械系送杭州文龙去兴化即不食至杭饿死其母系福州尼寺中病甚无医药左右视之泣下母曰吾与吾见同死又何恨哉亦死元兵既归文龙之侄瓚复举兵杀林华据兴化未几城又破瓚死之

△林空斋

林空斋永福人失其名【按昭忠录云名同字子真号空斋处士】举进士历知县解官家居益王立张世杰围泉州乃率乡人即其家开忠义局起义兵复永福县时王积翁密约元兵至屠永福空斋盛服坐堂上见执不屈而死

△陈牵【陈年】

陈牵字肇芳一字伟节饶州安仁人咸淳元年进士调滁州司户参军改荆阩粮料院调胸山主簿德佑元年秋牵由海道归杭授南安军教授不就还家会谢枋得起兵安仁首拔入幕执安仁令李景景牵里人也请以家货赎罪牵曰家财独非朝廷钱耶声其罪斩之景子率乡民五千报怨牵度不敌引兵趋信州会守吏遁就摄郡事益王即位牵入覲迁宗正寺簿太符寺丞领江东安抚使出上饶接应郡县所部才千余人战溃被执得间遁去后三年复起兵又败入积烟山中自刭死弟年同时被执死焉

△吴楚材

吴楚材名炎以字行建昌南城人德佑元年建昌降明年春楚材还其乡领村纠集民兵时江西制置使万万石授楚材迪功郎权制置使计议官且戒勿兴兵楚材不听自领村率众将攻城元兵三道蹴之夺其长梯铁钩因进攻领村拒以木栅不得入事闻益王元帅府承制迁楚材宣议郎带行大社令知建昌军俾聚军图再举万万石匿其命楚材既失利且乏援元兵诱降其众多解去楚材走光泽为人所执及其子应登以献不屈恐焉益王立于福州赠官朝奉郎

△萧雷龙

萧雷龙字显辰建昌新城人景定三年进士调临安府学教授通判衢州州守弃城遁朝命雷龙权知府事元兵薄城下不降脱去还建昌建昌已降雷龙与同里人黄巡检起兵为同安武人徐浚冲获以送县权县尹刘圣仲杀之

△刘士昭【王士敏】

刘士昭【昭忠录作刘世超】太和人与乡人同谋复太和县兵败自缢死其党入狱多乞怜苟免有王士敏者慷慨不挠临刑叹曰恨

吾病失声不能大骂耳

△赵时赏

赵时赏字宗白和州宗室也居太平州咸淳元年擢进士第累官知宣州旌德县升直宝章阁军器大监从二王入闽中益王即位擢知邵武军未几罢之文天祥开都督府于南剑奏辟参议军事江西招讨副使与宗室孟滌提兵趣贛州取道石城复宁都县空坑之役兵败走吴溪为追兵所执不屈死之

△赵希洎 【赵必向】

赵希洎宗室子居宜春历官户部尚书迁贾似道出领广东转运使德佑元年率溃卒勤王道经庐陵邵守邀其军遂与从子必向避地贛州乱定归里有内姻聂嵩孙为袁守勉之内款不屈文天祥兵败与必向俱被囚不食而死

△邹■〈彳 夙〉 【刘子俊 刘沐 孙□ 彭震龙 萧焘夫 陈继周 陈龙复 张鎧 张云 张汴 吕武 巩信 萧明哲 杜洎 林琦 萧资 徐臻 金应】

邹■〈彳 夙〉字夙叔吉水人后徙永丰从文天祥勤王补武资至将军益王立改寺丞领江西招谕副使聚兵宁都寻授江西安抚副使复兴国永丰二县进兵部侍郎兼江东西处置副使永丰之败从天祥间关岭道未几复开督府■〈彳 夙〉分司永丰兴国境上与元兵屡战及天祥被执■〈彳 夙〉自杀当是时从天祥勤王死事者■〈彳 夙〉与刘子俊等凡十有九人因次第其名附传焉刘子俊字民章庐陵人与文天祥同里开天祥开督府兴国召与计事补宣教郎带行军器监簿兼督府机宜空坑兵败子俊收兵保洞源接应郡县寻入广与元兵遇战溃复招只散亡与乌■〈彳 夙〉同趋潮州天祥兵败子俊被执自诡为天祥意元兵不穷追天祥可间走也未几别队执天祥至各争真贋至大将前始得其实乃烹子俊刘沐 【文天祥传作刘洎】 字渊伯庐陵人天祥起兵辟补宣教郎督府机宜天祥开府南剑沐收部曲来会改授太府寺簿空坑兵败被执父子同日死焉其季子复从天祥死岭南孙□字实甫吉州龙泉人献简公汴之后天祥长妹壻也天祥起兵檄补宣教郎带行监官告院知吉州龙泉县为叛者所陷被杀彭震龙字雷可永新人亦天祥妹壻天祥起兵补宣教郎带行太社令知永新县天祥出使被执震龙遁归结峒獠起兵天祥出岭震龙接应复永新为亲党所执至帅府腰斩之萧焘夫永新人天祥起兵补从仕郎以赞震龙谋复永新与兄敬夫俱死陈继周字硕乡宁都人淳佑三年贡于乡以捕盗功授廉州司法

累迁知吉州永丰县改知高安县历广东经略司准备
差遣会文天祥守赣州举兵勤王留继周幕中授江西安抚司准备差遣率赣士以从诏
改继昞合入官带行监文思院差充江浙制置司主管
机宜以所部夜袭元兵于南栅门质明犹战渴赴水死 【按宋史目录于陈继周之下列
陈龙复张镗张云三人姓名而此处不为立传亦无
所附见今仍其阙】 张汴字朝宗一字次山蜀人天祥起兵辟为秘阁修撰领广东提举
督府参谋空坑兵败为乱兵所杀吕武太平州步卒也
文天祥出使武应募从行偕脱镇江之难天祥开府南剑武以功补官遣之结约州县起
兵崎岖数千里会天祥于汀梅以环卫官将数千人出
江西以遇士大夫无礼死于横逆一军挥涕而葬之巩信安丰军人为荆湖都统天祥开
督府信官至团练使同督府都统制江西招讨使初至
都府招淮士数千自随常怏怏曰如有将无兵何天祥自兴国趋永丰元兵追其后信战
于方石岭中数矢伤重自投崖石死赠清远军承宣使
萧明哲字符甫太和人少举进士天祥开府汀州辟充督干架阁监军师出岭明哲以赣
县义民复万安连结诸砦拒守兵败被执死于隆兴杜
洙字贵卿丞相范从子也德佑元年有诏勤王洙时宰县纠集民兵及天祥开阡平江往
附焉从之北行至京口以计脱天祥偕走淮甸繇海道
达永嘉益王即位授司农卿广东提举招讨副使督府参谋福安陷与天祥相失遂趋行
朝久之奉命复入天祥幕及空坑兵败又与跋涉患难
以出天祥使护海舟至官富场洙径趋厓山兵溃被执以忧愤卒林琦闽人也德佑二年
元兵逼临安琦于赭山结集忠义捍御海道以功补宣
教郎督府主管机宜文字兼充检院天祥开府南剑琦佐其幕及潮州移屯琦被执赴水
不死至建康以忧愤卒萧资天祥幕下书吏也空坑兵
败以全督府印功升合门路钤辖潮阳移屯与元兵遇死之徐臻温州人德佑元年天祥
勤王臻往依之以典笔札天祥被执臻脱难复来愿从
天祥北行至隆兴病卒金应者为天祥职书司入京补承信郎天祥奉使被执至淮东以
愤忧死 【按宋史此下旧有何时传附载陈子敬时
变姓名削发为僧子敬不知所终兹并移入独行传】

△张珏 【上官夔 王世昌 马堃 包申 赵立 赵酉泰】

张珏字君玉陇西凤州人年十八从军钓鱼山以战功累官中军都统制宝佑末元
兵攻蜀顺庆广安诸郡破竹而下明年会诸道兵围合
州珏与合守王坚协力战守攻之九月不能下景定初坚征入朝以马千代之四年以珏
代千咸淳三年四月元平章赛音谔德齐提兵入坏重
庆夹道出合城下珏碇舟断江中为水城元兵数万攻之不克遂引去合州自余玠徙治

钓鱼山城壁甚固珽外以兵护耕内教民垦田积粟再期公私兼足九年叛将刘整献计统军实喇欲筑马鬣虎顶山扼三江口以图合珽闻实喇至乃张疑兵于嘉渠口潜师渡平阳滩攻芜菁平母德彰二城火其资粮器械统制周虎战死马鬣城卒不就十年加宁江东承宣使德佑元年升四川制置副使知重庆府五月加检校少保征其兵入卫蜀道断不得达六月咎万寿以嘉定及三龟九顶降守将侯都统战死已而泸叙长宁富顺开达巴渠诸郡不一月皆下元兵围重庆作浮梁三江中断援兵二年二月珽遣张万以巨舰载精兵断内水桥入重庆四月约重庆兵出攻凤顶诸砦珽结泸士刘霖先坤朋为内应六月遣赵安破神臂门执梅应春杀之复泸州重庆兵渐解去围泸州十二月赵定应迎珽入重庆为制置时杨立以涪州降珽遣张万攻走立立复合兵来决战史进张世杰战死珽闻二王立广中遣兵数百人求王所谓史训忠赵安等援泸州明年十月万州破守将上官夔死之十一月泸州食尽人相食城遂破安抚王世昌自经死元兵会重庆驻佛图关以一军屯南城一军屯朱邨坪一军屯江上十二月达州降将鲜汝忠破咸淳皇华城执守将马堃军使包申巷战死景炎三年二月元兵破绍庆府执守将鲜龙湖北提刑赵立与幕官赵西泰皆自杀珽率众出熏风门与大将伊苏岱尔战扶桑坝诸将从其后合击之珽兵大溃赵安以书说珽降不听安乃与帐下夜开镇西门降珽率兵巷战不支归索鸩饮不得乃以小舟戴妻子东走涪明日万户特穆尔追及于涪执之重庆降三月合州亦破珽被执至安西赵老庵其友谓之曰公尽忠一世以报所事今至此纵得不死亦何以哉珽乃解弓弦自经赵立者字德修重庆第进士以上书忤贾似道被谪德佑初起为太社令湖北提刑使蜀趣诸将入卫至重庆则咎万寿已降立无以复命还至涪沈水死

△王仙

王仙蜀都统也守涪州势孤援绝宋亡之二年元兵破城仙自刎断其吭不殊以两手自摘其首坠乃死

△曹琦

曹琦蜀进士也知南平军被执脱身南归制置辟主管机宜迭字闻都统赵安以城降就守御地自经死

△陆秀夫 【刘鼎孙】

陆秀夫字君实楚州盐城人徙家镇江景定元年登进士第李庭芝镇淮南闻其名辟至幕中时天下称得士多者以淮南为第一号小朝廷三迁至主管机宜文字咸淳十年庭芝制置淮东擢参议官德佑元年边事急诸僚属

多亡者惟秀夫不去庭芝上其名除司农寺丞累擢至宗正少卿兼权起居舍人明年二王走温州秀夫与苏刘义追从之使人召陈宜中张世杰等皆至遂相与立益王于福州进端明殿学士签书枢密院事宜中以秀夫久在兵间知军务每事谘访始行秀夫亦悉心赞画旋与宜中议不合宜中使言者劾罢之张世杰让宜中曰此如何时动以台谏论人宜中惶恐亟召秀夫还时君臣播越海滨庶事疏略杨太妃垂帘与羣臣语犹自称奴独秀夫俨然正笏如立治朝或时在行中凄然泣下以朝衣拭泪衣尽浥左右无不悲动者属并澳风王以惊疾殂羣臣皆欲散去秀夫曰度宗皇帝一子尚在将焉置之古人有以一旅一成中兴者今百官有司皆具士卒数万天未绝宋此岂不可为国耶乃与众其立卫王时陈宜中往占城与世杰不协屡召不至乃以秀夫为左丞相与世杰共秉政时世杰驻兵厓山秀夫外筹军旅内调工役凡有所述作尽出其手虽匆遽流离犹日书大学章句以劝讲祥兴二年二月厓山破秀夫走卫王舟而世杰刘义各断维去秀夫度不可脱乃仗剑驱妻子入海即负王赴海死翰林学士刘鼎孙亦驱家属入海不死被执擄掠无完肤一名得脱卒蹈海鼎孙字伯镇江陵进士也

△张世杰 【刘师勇】

张世杰范阳人少从张柔成■（木巳）有罪奔宋隶淮兵中阮思聪见而奇之言之吕文德文德召为小校累功至黄州武定诸军都统制有功转十官历知高邮军安东州咸淳四年元军筑鹿门堡吕文德请益兵调世杰与夏贵赴之及吕文焕以襄阳降命世杰将五千人守鄂州世杰以铁絙锁两城 【按鄂州即郢州元史巴延传云郢在汉水北以石为城宋人又于汉水南筑新郢横铁绳锁战舰即本传所云两传是也】 夹以炮弩其要津皆施杙设攻具元军破新城长驱而下世杰刀战元兵不得前遣人招之不听丞相巴延阳攻严山隘潜舟自唐港荡舟入汉东攻鄂鄂降世杰提所部兵入卫道复饶州乃入朝时方征诸将勤王多不至独世杰来上下叹与不数月累官至保康军承宣使总都督府兵遣将四出取浙西诸郡复平江安吉广德溧阳诸城兵势颇振七月与刘师勇诸将出师焦山世杰兵乱大败奔图山寻擢龙神卫四厢都指挥使十月进沿江招讨使改制置副使兼知江阴军已而元军至独松关召文天祥入卫以世杰为保康军节度使知平江寻亦召入卫加检校少保德佑二年正月元军逼临安世杰请移三宫入海而与天祥合兵背城一战丞相陈宜中以方遣人请和止之未几和议亦沮元军至皋亭山世杰乃戾兵入定海石国英遣都统卞彪说之使降世杰以为彪来从已俱南也

椎牛享之酒半彪从容为言世杰大怒断其舌磔之巾
子山四月从二王入福州五月与宜中奉是为主拜签书枢密院事王世强导元兵攻之
世杰乃奉益王入海其冬元招讨刘深攻浅湾世杰兵
败移王居井澳深复来攻世杰战却之遂徙碙州景炎三年四月益王殂卫王昺立拜世
杰少傅枢密副使战辄不利世杰以碙州不可居徙王
新会之厓山八月封越国公明年元张宏范等兵至厓山或谓世杰曰北兵以舟师塞海
口则我不能进退盍先据海口幸而胜国之福也不胜
犹可西走世杰恐久在海上人有离心乃曰频年航海何时已乎今须与决胜负悉焚行
朝草市结大船千余作木砮为死守记已而宏范兵至
据海口樵汲道绝兵茹干粮十余日渴甚下掬海水饮之海水咸饮即呕泄兵大困世杰
率苏刘义方兴日大战宏范得世杰甥韩命以官使三
至招之世杰历数古忠臣曰吾知降生且富贵但为主死不移尔二月癸未宏范等攻厓
山世杰败走卫王舟元军薄中军世杰乃断维以十余
舰夺港去后还收兵厓山刘自立击败之降其将方遇龙叶秀荣章文秀等四十余人世
杰复欲奉杨太妃求赵氏后立之俄颶风坏舟溺死平
章山下刘师勇者庐州人以战功历环卫官姚嵩复常州师勇亦以淮兵取吕城朝廷加
师勇和州防御使助嵩守常州以张彦守吕城合兵拒
元军会彦见执吕城失守常州势益孤元军寘彦城下招降师勇以大义斥之去又遣范
文虎来谕师勇伏弩射走之常受围数月援绝城陷师
勇拔栅战且行其弟马堕堑跃不能出师勇举手与诀而去淮军数千人皆鬪死师勇从
二王至海上见时事不可为忧愤卒葬于鼓山

△莫谦之

莫谦之常州宜兴僧也德佑元年纠合义士捍御乡闾诏为溧阳尉是冬没于战赠
武功大夫时万安僧亦起兵举旗曰时危聊作将事定
复为僧旋亦败死

△徐道明

徐道明常州天庆观道士也为管辖赐紫德佑元年元兵围城道明入谒郡守姚嵩
退而慨然告其徒曰姚公誓与城俱亡吾属亦不失为
义士及兵屠城道明危坐炳香读老子书其声琅然兵以刃胁之不为动遂死焉

钦定续通志卷五百十五

●钦定续通志卷五百十六 忠义传九

忠义传

辽

○辽

（臣）等谨按辽史忠义之臣散见列传今采其事迹尤著者补为一卷用符郑志体例而仍以捐生效死为重焉

萧岩寿 耶律萨喇 萧苏色 耶律托卜嘉 萧和克

萧岩寿

耶律萨喇

萧苏色

耶律托卜嘉

萧和克

△萧岩寿

萧岩寿伊实部人性刚直尚气仕重熙末道宗即位皇太后屡称其贤由是进用帝出猎较岩寿典其事未尝高下于心帝益重之历文班

太保同知枢密院事咸雍四年从耶律仁先伐准布破之有诏留屯亡归者众由是镌尔官十年讨德呼勒部有功为其部节度使太康元年同

知南院宣徽使事迁北面林牙密奏伊逊以皇太子知国政心不自安与张孝杰数相过从恐有阴谋动摇太子帝悟出伊逊为中京留守 【

按中京原讹上京今据本纪及伊逊萨喇等传改】 会伊逊生日帝遣近臣耶律拜萨巴赐物为寿伊逊欲诬岩寿因私属白帝臣见奸人在朝

陛下孤危身虽在外窃用寒心拜萨巴还以闻帝遣人赐伊逊车谕曰无虑弗用行将召矣由是反疑岩寿出为顺义军节度使伊逊复入为枢

密院流岩寿于威路终身拘作岩寿虽窜逐恒以社稷为忧时人为之语曰以狼牧羊何能久长三年伊逊诬岩寿与谋废立事执还杀之干统

间赠同中书门下平章事绘象宜福殿岩寿廉直面折廷诤多与伊逊忤故及于难

△耶律萨喇

耶律萨喇字董隐南院大王穆尔古之孙为人忠直沈厚始仕清宁初累迁西南面招讨使以治称咸雍九年改北院大王未几为契丹行

官都部署太康二年耶律伊逊为中京留守诏百官廷议欲复召之羣臣无敢正言萨喇独奏曰萧岩寿言伊逊有罪不可为枢臣故陛下出之

今复召恐天下生疑三谏不纳左右为之震悚伊逊复为枢密使见萨喇让曰与君无憾何独异议萨喇曰此社稷计何憾之有伊逊诬萨喇与

苏色同谋废立诏按无迹出为始平军节度使及萧额图珣诬首遣使杀之干统间追封漆水郡王绘象宜福殿仍追赠三子官爵

△萧苏色

萧苏色字图勒锦图鲁卜部人赋性沈毅始仕重熙间累迁右护卫太保富珠哩叛从耶律义先往讨执首乱托多罗以归清宁中历北面

林牙彰国军节度使入为北院枢密副使咸雍十年经略西南边撤宋堡障戍以皮室军帝嘉之太康二年知北院枢密院耶律伊逊权宠方盛

附丽者多至通显苏色未尝造门伊逊衔之诬构苏色首谋废立按之无验出为上京留守伊逊复令萧额图瑋以前事诬告帝怒不复加讯遣

使杀之时方盛暑尸诸原野容色不变乌鹄不敢近干统闻追封兰陵郡王绘像宜福殿
△耶律托卜嘉

耶律托卜嘉字萨巴系出季父房父果嘉仕至林牙重熙间破夏人于金肃军有功焉托卜嘉清宁中补牌印郎君累迁中兴宫使九年平

重元之乱以功知点检司事赐平乱功臣为怀德军节度使咸雍五年迁约尼克太康三年授北院宣徽使耶律伊逊谋害太子托卜嘉知其奸

欲杀伊逊及萧德勒岱萧实沙等伊逊知之令其党诬构托卜嘉与废立事杀之干统间追封漆水郡王绘像宜福殿

△萧和克

萧和克字阿尔斯兰为人秉性忠直趨捷有力甫冠补禁军咸雍初从招讨使耶律卓克算讨番部之违命者及请降来介有能跃駝峰而

上者以僇捷相诧卓克算问左右谁能此和克被重铠而出手不及峰一跃而上使者大骇卓克算以女妻之帝闻召为护卫时耶律伊逊以狡

佞得幸肆行凶暴和克伏于桥下伺其过欲杀之俄以暴雨坏桥不果后又欲杀于猎所为亲友所阻太康三年复欲杀伊逊及萧德勒岱等伊

逊知而械系之考劾不服流于边及太子废徙于上京昭和克至杀之干统初追赠龙虎卫上将军

钦定续通志卷五百十六

●钦定续通志卷五百十七 忠义传十

忠义传

金 【一】

○金一

华沙布【萨巴】 特库 布古德【绰哈】

钮佑禄罕努 温特赫布敦【图克坦色哩 持嘉

和硕台 鹤寿 完颜珠勒呼 完颜希卜苏 持嘉和色里 瓜尔佳遇珠 完颜苏玛喀 高彭祖曹珪】 额哩页【闰孙 史大

博德】 温特赫伊苏玛勒 富珠哩定方 瓜尔佳呼喇 纳喇绰齐 魏全【在埒库】

瓜尔佳守中 舒穆噜元毅 伯特梅和尚【博克托】 珊延 【实古纳】 乌克孙温屯 高守约

哈萨喇安礼 王维翰 伊喇古尼 宋宸 乌库哩荣
 祖 乌库哩仲温 玖珠【唐古布格苏
 】 李演 刘德基 王毅
 王晦【牛】斗 齐鹰扬【
 杨敏中 张奇尔】 珠嘉【法心温特赫伊扎尔 富察吉逊 温特赫十方努】
 高锡 吴僧格 张顺
 马骧 鄂抔丑和尚 乌库哩德升 苏尔坦郭用
 李革 富珠哩福寿 马庆祥【胥谦
 嗣亨 布萨和硕】
 华沙布【萨巴】
 特库
 布古德【绰哈】
 钮祜禄罕努
 温特赫布敦【图克坦色哩 持嘉和硕台 鹤寿 完颜珠勒呼 完颜希卜苏
 持嘉和色里 瓜尔佳遇珠 完颜苏玛喀 高
 彭祖】
 曹珪
 额哩页【闰孙 史大 博德】
 温特赫伊苏玛勒
 富珠哩定方
 瓜尔佳呼喇
 纳喇绰齐
 魏全【布埒库】
 瓜尔佳守中
 舒穆噜元毅
 伯特梅和尚【博克托】
 珊延【实古纳】
 乌克逊温屯
 高守约
 哈萨喇安礼
 王维翰
 伊喇古尼
 宋宸
 乌库哩荣祖

乌库哩仲温

玖珠 【唐古布格苏】

李演

刘德基

王毅

王晦 【牛斗】

齐鹰扬 【杨敏中 张奇尔】

珠嘉法心 【温特赫伊扎尔 富察吉逊 温特赫十方努】

高锡

吴僧格

张顺

马骧

鄂转丑和尚

乌库哩德升

苏尔坦 【郭用】

李革

富珠哩福寿

马庆祥 【胥谦 嗣亨 布萨和硕】

△华沙布 【萨巴】

华沙布完颜部人年三十五从军勇敢有材略颇见任用太祖使富卦喇往辽请阿苏实观其形势富卦喇还言辽兵多不知数太祖疑之使华沙布往还报辽方调兵尚未大集太祖喜曰果如吾言 【据本纪增】 华沙布因劝举大事不可后时若俟河冻则盛集来攻矣太祖深然之从破宁江州战于达噜噶城皆有功高永昌请和华沙布往招之取呼图克以归永昌诈降干鲁使华沙布萨巴往报会高祜降言永昌非真降者干鲁乃进兵永昌怒遂杀二人皆支解之华沙布就执神色自若骂永昌汝叛君逆天今日杀我明日及汝矣骂不绝口死天会中与萨巴俱赠遥镇节度使

△特库

特库音德尔水人敢战鬪达噜噶城之役和尼陷敌特库救出之攻兆苏城先登败辽兵三千攻鲁库营玛奇堕马特库独杀辽兵数辈掖出之后从太祖自临潢班师至辽河伊都来袭罗索已引去特库独殿马惫步鬪没于阵皇统间赠明威将军

△布古德 【绰哈】

布古德宗室子初事国相萨哈伐萧哈里有功与绰哈俱招降矩威水部族绰哈为穆昆布古德领行军千户从破黄龙府战于达噜噶城皆有功宁江州渤海伊色布叛布古德追复之天辅五年【按太祖纪绰哈籍军马在天辅四年斡鲁伐锡勒哈塔在天辅五年此作五年六年互异】九月绰哈布古德往拜格河籍军马矩威水部锡勒哈塔等杀之投其尸水中太祖悼惜遣使吊赙加等六年正月斡鲁伐锡勒哈塔于希尔哈河追及于哈达立山杀四人抚定余众诏求二人尸以葬天眷中赠绰哈奉国上将军布古德昭义大将军绰哈亦宗室子年十五隶军从太祖伐辽率屯路兵招抚萨木坦锡里肯巴噶三水拜格城邑皆降之败室韦五百于阿尔噶城获其民众至是死焉

△钮祜禄罕努

钮祜禄罕努以护卫从宗弼征伐赐铠甲弓矢战马初太祖入居庸关辽林牙耶律达实自古北口亡去以其众来袭奉圣州罗索往取之获达实并降其众宗望袭辽主辎重于青冢以达实为乡导既而亡去不知所往皇统四年回纥遣使乞贡言达实与其国相邻诏遣罕努与俱往奉使达实【按本纪皇统四年回鹘使来贺以钮祜禄罕努报之六年遣钮祜禄罕努招耶律达实被害据此似非一时事与本传小异】去后不复闻问大定中回纥展盘君长萨里罕托色率喀喇部长贝欢及户三万余求丙附乞纳前达实所降牌印受朝廷牌印诏西南招讨司遣通事图哩伊都及阿噜岱至其图见萨里罕得其归顺实意因言往年大国尝遣钮祜禄罕努自和州往使达实既入其境达实方适野与遇问何人敢不下马罕努曰我上国使奉天子命来招汝降当下马听诏达实曰汝单使来欲事口舌邪使人摔下使跪罕努骂曰反贼天子不忍于尔加兵遣招尔纵不能面缚请罪阙下亦当尽敬天子使乃敢反加辱乎达实怒乃杀之此时达实林牙已死子孙相继西方诸部仍以达实呼之伊都阿噜岱还奏世宗嘉奉其使万里不辱君命能尽臣节赠昭毅大将军迁其子永和县商酒都监尚和为尚辇局直长加武义将军汝州巡检罗索为武器署直长

△温特赫布敦【图克坦色哩 持嘉和硕台 鹤寿 完颜珠勒呼 完颜希卜 苏 持嘉和色里 瓜尔佳遇珠 完颜苏玛喀 高彭祖】

温特赫布敦为乌哲羣牧使西北路契丹萨巴等反诸羣牧皆应之布敦闻乱选家奴材勇者给以兵仗阴为备贼不得发乃佯为降伏给诸奴曰官阅兵器愿借以应阅诸奴以为实然遂借与之明旦贼至无以御贼执布敦问

富珠哩定方本名阿哈宁嘉河人材勇绝伦天德初召授武义将军充护卫迁宿直将军寻为殿前右卫将军累擢殿前左右副点检世袭明安出为河南尹彰德军节度使海陵南伐定方为神勇军都总管大定二年宋人陷汝州河南统军使宗尹遣定方将兵四千往取之汝州东南北三面皆阻山林不可以骑军战时宋兵由鸦路出没定方至襄城得敌虚实遂牒谕汝州属县曰我率许州戍兵十二万径取汝州尔等可备粮草二十万使人扬言欲据要路绝宋兵往来既而定方引兵趋鸦路宋人闻之果弃城遁去定方至鲁山境知宋兵已去追轻骑二百追至市袴又击败之遂复汝州授凤翔尹宋李世辅陷宿州定方从左副元帅志宁战于城下时天大暑定方督战驰突敌阵中出入数四渴甚因出阵下马取水为人所害帝闻而闵之诏有司致祭赙赠加礼赠金紫光禄大夫 【按定方及呼喇皆没于战陈今并由列传移入忠义】

△瓜尔佳呼喇

瓜尔佳呼喇上京桑阿屯明安人初在左副元帅达兰帐下有战功授武德将军袭其父穆昆正隆末山东盗起呼喇为行军明安败贼千五百人于徐州南山东路统军司选诸军八百人作十穆昆呼喇将之与骁骑军皆隶点检司行至淮南海陵遣以骑兵三百一十往扬州败宋兵千五百人于宣化镇市萨忠义伐宋呼喇领万户由泗州进战遇敌于宿州歿于阵赠镇国上将军

△纳喇绰齐

纳喇绰齐咸平路雅哈河明安人契丹瓜里使人招之不从从且至绰齐遂团结旁近村寨为兵出家马百余匹给之教以战阵击刺之法拒瓜里于改渡口贼众月余不得进既而兵大至拒战不敌遂见执裔杀之诏赠官两阶二子皆得荫

△魏全 【布埒库】

魏全寿州人泰和六年宋李爽 【原讹季爽今据本纪改】 围寿州刺史图克坦羲尽籍城中兵民及部曲厮役得三千余人随机拒守羲善抚御得众情妇人皆乐为用同知布埒库中流矢卒羲益励不衰募人往斫爽营全在选中为所执爽谓全曰若为我骂金主免若死全至城下反骂宋主爽乃杀之布萨揆遣河南统军判官奇珠及迈格等以骑二千人救寿州与爽兵遇奇珠分两翼夹击大破之至城下羲出兵应之爽兵复大溃爽仅脱去诏迁羲防御使奇珠同知武昌军节度使迈格河南路统军判官赠布埒库昭勇大将军官其子图喇赠全武昌将军蒙城县令赐在州官舍俟其子年十五岁收充八贯石正班局以全死节由录送史馆

板颁谕天下

△瓜尔佳守中

瓜尔佳守中咸平人本名阿多古大定二十二年进士累官同知海兰路兵马都总管府事坐事谪寻复同知平凉州事大安二年迁通远军节度使至宁末移彰德军未行夏兵数万入巩州守中乘城备守兵少不能支城陷官吏尽降守中独不屈夏人壮之诱胁至平凉要以招降府人守中佯许至城下即大呼曰外兵矢尽且遁矣慎勿降夏人交刃杀之兴定元年监察御史郭着以闻诏赠资善大夫东京留守仍收其子鄂摩为笔砚承奉

△舒穆噜元毅

舒穆噜元毅本名舒苏咸平府路珠彻埒明安沙瑋噶珊穆昆人为宁津令有剧盗白昼恣劫元毅以术防捍贼散去入为大理知法除同知亳州防御事省檄使录陕西五路刑狱无冤人复委受宋岁币却故事私遗物明昌初驿召为大名等路提刑判官以最迁汾阳军节度副使命捕石岚间贼党贼畏遁追袭尽殪之二境以安迁同知武胜军节度使事别郡有杀人者讯不数语即具服河东北路田多山坂硗瘠旧定为上赋民力久困朝廷命相地更赋元毅以三环法平之民赖其利寻以边警授抚州刺史会边将失守刍精马牛焚剽殆尽元毅率吏卒三十余人出州经画军饷卒遇敌倅吏坚请還元毅曰我辈责任边守遇敌而奔其如百姓何遂执弓矢先驱力战众争效死敌去而复合元毅气愈励鏖战久之众寡不敌遂遇害事闻赠信武将军召用其子世绩侍仪司承应后登进士第

△伯特梅和尚 【博克托】

伯特梅和尚泰州人性鲠直尚气节正隆间收充护卫累官武胜军节度使明昌六年左丞相瓜尔佳清臣行省临潢檄为副统会敌入偕护卫博克托等领军逆击直捣其阵杀伤甚众敌知孤军无继聚兵围之度不能免乃下马相背射复杀百余人矢尽犹以弓提击为流矢所中死博克托等皆没帝闻之震悼诏赠虎卫上将军以其子都努为军前明安承安五年帝谕梅和尚死王事其子都努从军久有功乃命为典署丞

△珊延 【实古纳】

珊延宗室子为符宝祗候完颜实古纳为护卫十人长至宁元年八月赫舍哩执中作乱入自通元门变起仓猝中外不知所为珊延实古纳往天主寺召大汉军五百人赴难与执中战东华门外不胜死杀五百人殆尽执中死诏赠实古纳镇国上将军顺州刺史珊延宣武将军顺

天军节度副使尝从拒战明安穆昆佛宁散军迁赏有差实古纳子给八贯石俸俟年十五以闻

△乌克逊温屯

乌克逊温屯上京路人大定末袭明安累官唐州刺史泰和六年四月宋皇甫斌步骑万人侵唐州温屯兵少遣泌阳尉博硕布巡检蒲闲各以五十人乘城拒守温屯见宋兵在城东北者可破令判官萨克达以精兵百人绕出宋兵营后掩击之宋兵大乱夜遁去五月皇甫斌复出兵数万来攻行省遣泌阳副巡检纳哈塔军胜救唐州温屯出兵与军胜合设伏以待分骑分为三一出一入以致宋兵陷于淖伏发中冲为二遂大溃宋别将以兵三千来袭殪之竹林寺纳哈塔军胜手杀宋将取其金带印章以献诏迁温屯河南府同知军胜梁县令右副元帅完颜匡取棘阳温屯为右翼都统袭神马坡宋兵五万人夹水阵以强弩拒岸温屯督兵夺其三桥自辰至午连拔十三栅遂取神马坡从攻襄至汉口温屯乱流径度宋人请和迁河南副统军大安三年将兵二万入卫中都迁元帅左都监兼北京留守有功迁元帅左监军贞佑元年闰九月以兵入卫中都诏以兵万六千人守定兴军败战没

△高守约

高守约字从简辽阳人大定二十八年进士累官观州刺史贞佑元年冬十一月元兵徇地河朔郭邦献归顺从至城下再三呼曰从简当计全家室守约厉声曰吾不汝识也城破被执使之跪不屈遂死诏赠崇义军节度使谥忠敬

△哈萨喇安礼

哈萨喇安礼字子敬本名酌大名路人大定二十八年进士为泰安州刺史贞佑初山东被兵郡县望风遁或劝安礼去安礼曰我去城谁与守忍避难负国恩乎乃团练缮完为御守计已而元兵至战旬日不能下谓之曰此孤城耳内无粮储外无兵援不降无遗类矣安礼不听城破被执初不识为谁或妄以酒监对安礼曰我刺史也何讳为使之跪不屈以戈撞其胷杀之诏赠泰定军节度使谥坚贞

△王维翰

王维翰字之翰利州龙山人大定二十八年进士为永霸令县豪欲尝试维翰设事陈诉穷伏其诈杖杀之健讼衰息佐胥持国治河决有劳累迁保静军节度同知检括户籍一郡称平属县有奴杀主反诬其弟维翰微行得其状奴遂引服历侍御史改右司郎中从布萨揆伐宋宋人受盟帝问宋人请和复能背盟否对曰宋不足忧唯北方当劳圣虑耳大安初迁工刑

二部尚书拜参知政事贞佑初罢为定海军节度使至镇无兵备邻郡皆望风奔溃乃纵百姓避难率吏民愿从者奔东北山结营堡自守力穷被执与妻姚氏皆不屈死赠中奉大夫妻芮国夫人谥贞洁

△伊喇古尼

伊喇古尼安化军节度使贞佑初元兵取密州古尼率兵力战流矢连中其颈拔去复中颊死焉三年赠安远大将军知益都府事

△宋宸

宋宸中都宛平人正隆五年进士累官武定军节度副使中都右警巡使固安县丞刘昭与部民裴厚争买邻田房用昭属抑原使母争御史台劾奏解职降广宁府推官累迁北京临潢等路按察使改河东南路转运使御史劾其前任按察侵民舍不称职降沂州防御使复迁定海军节度使贞佑二年改沁南军元兵至怀州城破死焉

△乌库哩荣祖

乌库哩荣祖本名福兴河间人明昌二年进士累官户部员外郎宁海州刺史贞佑二年城破力战死之赠安武军节度使赐谥毅勇

△乌库哩仲温

乌库哩仲温本名呼喇盖州安春明安人大定二十五年进士累官镇西军节度使时中都被围移书安抚使贾益谦约以乡兵赴救同会于绛抵平阳不能进仲温尝治平阳吏民争留之仲温曰平阳巨镇易为守御于私计得矣如岚州何遂还镇已而元兵大至城破不屈死赠资德大夫博索路兵马都总管谥忠毅

△玖珠 【唐古布格苏】

玖珠宗室子为武州刺史唐古布格苏为军事判官贞佑二年十一月元兵取玖珠子侄抵城下谓曰山东河北皆降汝家属我已得不速降且杀之玖珠曰当以死报国遑恤家为无何城破力战死布格苏亦不屈死赠玖珠临海军节度使加骠骑卫上将军布格苏建州刺史加镇国上将军

△李演

李演字巨川任城人泰和六年进士第一除应奉翰林文字丁忧居乡里贞佑初任城被兵演墨衰为济州刺史画守御策召集州人为兵搏战三日众皆市人不能战逃散演被执元将问曰汝非李应奉乎答曰是也使之跪不屈许以官禄演曰我书生也本朝何负于我而利人之官禄哉元将怒曳出杀之赠济州刺史

△刘德基

刘德基大兴人贞佑元年特赐同进士出身守官边邑夏兵攻城德基坐厅事积薪其旁谓家人曰城破即焚我及城破家人不忍纵火遂被执胁使跪降德基不屈同僚故人给夏人曰此人素病狂德基曰为臣子当如此吾岂狂邪夏人壮其义系诸狱已而召问德基大骂终不能从曰吾岂苟生者哉遂害之赠朝列大夫同知通远军节度使事

△王毅

王毅大兴人经义进士累官东明令贞佑二年东明围急毅率民兵拒守城破犹率众抗战力穷被执与县人王八等四人同驱之郭外先杀二人王八即前跪将降毅以足踏之厉声曰忠臣不佐二主汝乃降乎驱毅者以刃斫其胫不屈死赠曹州刺史

△王晦 【牛斗】

王晦字子明泽州高平人少负气自熹慕张咏之为人友妻与人有私晦手刃杀之中明昌二年进士调长葛主簿有能声累迁户部郎中贞佑初中都戒严或举晦有将帅才俾募人自将是死士万余统之卫送通州粟入中都有功寻守顺州通州围急晦攻牛栏山以解迁翰林侍读学士九月顺州受兵晦有别部在沧景遣人突围召之众皆踊跃思奋而主者不肯发故部曲王臻免胄出见且拜曰事急矣自苦何为晦曰朝廷何负汝邪臻曰臻虽负国不忍负公因泣下晦叱曰吾年六十致位三品死则吾分讷从汝邪将射之臻掩泣去无何将士缒城出降晦被执不屈死爱将牛斗亦死赠荣禄大夫枢密副使录其子女霖为笔砚承奉

△齐鹰扬 【杨敏中 张奇尔】

齐鹰扬淄州军事判官杨敏中屯留县尉致仕张奇尔淄州民贞佑初元兵取淄州鹰扬等募兵备御城破率众巷战创甚被执欲降之鹰扬何守者称怠即起夺槊杀数人死敏中奇尔皆不屈死赠鹰扬嘉议大夫淄州刺史敏中昭勇大将军同知横海军节度使事奇尔宣武将军同知淄州军州事

△珠嘉法心 【温特赫伊扎尔 富察吉逊 温特赫十方努】

珠嘉法心蓟州明安人官至北京副留守贞佑二年为提控与顺州军事同知温特赫伊扎尔俱守密云县家属留蓟州元兵得之以示法心曰若速降当以付汝否则杀之法心曰吾事本朝受厚恩岂以家人死生为计邪城破死于阵伊扎尔被执亦不屈死盘安军节度判官富察吉逊与鸡泽县令温特赫十方努同守蓟州众溃而出二人死之诏赠法心开府仪同三司枢密副使封宿国公伊扎尔镇国上将军顺州刺史

吉逊金紫光禄大夫蓟州刺史十方努镇国上将军蓟州刺史

△高锡

高锡字永之德基子以荫补官积劳调淄州酒使课最迁萍乡令察廉迁辽东路转运度支判官贞佑初累官河北东路按察转运使城破自投城下死

△吴僧格

吴僧格西南路唐古伊喇纛珊舍音部落人拳勇善骑射贞佑初为万户朔州失守僧格复取之授同知顺义军节度使事弟达喇副使燕绰尔判官众苦乏食僧格乞赐粮十五万斛朝议以应州已破朔孤城势不可守迁军民九万余口分屯岚石隰吉绛解之间未行元兵至战七昼夜有功遥授同知太原府事达喇石州刺史绰尔同知岢岚州防御使事四年始迁其民且战且行力惫马蹶死诏赠镇国上将军顺义军节度使

△张顺

张顺淄州士伍淄州被围行省侯摯遣王庭玉将兵救之募顺等三十人往覘兵势且欲令城中知援兵至顺乘夜至城下为敌所执使宣言行省军败绩庭玉亦死宜速降顺阳许诺既乃呼谓城中曰外兵无多王提控军且至坚守毋降兵刃交下顺曰得为忠孝鬼足矣遂死淄人以死守城赖以完后赠宣武将军同知棣州防御使事诏有司给养其亲且访其子孙优加任用

△马骧

马骧禹城人登进士历官有声贞佑三年为曹州济阴令元兵克曹州骧被执军卒掳掠求金曰吾书生何从得又使跪曰吾膝不能屈欲杀即杀得死为大金鬼足矣遂死赠朝列大夫泰定军节度副使子惟贤收补八贯石局分

△鄂转丑和尚

鄂转丑和尚为代州经略使贞佑四年八月元兵攻代州御战败绩身被数创被执欲降之不屈死

△乌库哩德升

乌库哩德升本名禄锦益都路明安人明昌二年进士累官侍御史论赫舍哩执中奸恶卫绍王不听迁肇州防御使宣宗迁汴召赴阙进翰林侍读学士权参知政事与平章穆延尽忠论近侍局预政帝怒出为集庆军节度使改知太原府事兴定元年元兵急攻太原粮道绝德升屡出兵战粮道复通上言皇太子聪明仁孝保训之官宜备更宜选德望素着之士朝夕

左右此社稷之淇休生民之大庆也帝嘉纳之二年授

左监军元兵复围太原环之数匝已破濠垣植栅为拒出其家币马赏战士元军环城西北隅以入复联车塞之三却三登矢石如雨守陴者不能立城破德升至府署谓其姑及妻曰吾守此数年不幸力穷乃自缢死姑及妻皆自杀诏赠翰林学士承旨子乌兰威尚幼以奉御俸养之

△苏尔坦 【郭用】

苏尔坦宗室子贞佑二年充宣差都提控安抚山西军民应援中都上书言九事一绛解二州仅能城守连岁不登人多艰食皆恃盐布易米愿罢大阳等渡禁许粟麦过河官税十三则公私皆济二绛解河中必争之地令宝昌军节度使从宜规画盐地之利以实之则民受其利兵可以强三中条之南垣曲平陆芮城虞乡乃河东形势陕洛襟喉可分陕州步骑万二千人彘一提控四都统分戍四县四平陆产银铁若以盐易米募工冶炼可以广财用备戎器小民佣食可以息盗五河北贫民渡河逐食复还当抑止暴吏诛求之弊六河南陕西调度未急择骑军牡马羣牧不二三年可增数万骑军势自振七诸路印造宝券久而益多必将积滞止于南京印造给降庶可久行八河北职仕途授不次人皆不愿盖以物价十倍河南禄禀不给饥寒且至若给实俸之半少足养廉则可责其效力九河北之官朝廷减资迁秩躐等以答其劳闻河南官吏以贬逐目之乞行禁止书奏下尚书省议略行之四年行枢密院任河南府止书用兵累年出辄无功者兵不素励也士庶且充行伍况于皇族与国同休戚皆当从军亲冒矢石为士卒先族人道路实同此心愿隶臣麾下帝嘉其忠许之兴定元年改辉州刺史时诸路兵皆入城自守百姓耕稼失所苏尔坦言养兵所以卫民方今河朔惟真定河间之众可留捍城其余府州皆当散屯于外以为民防俟稼穡毕功然后移于屯守之地从之加遥授同知东平府事权元帅左监军与参政李革俱守平阳元兵破太原河东郡县皆不守上言平阳河东之根本河南之藩篱也今行省兵不满六千乞并怀孟卫州之兵以实潞州调泽州沁水端氏高平诸兵并山为营以为声援未报元兵至平阳提控郭用战于城北濠垣被执不屈死城破苏尔坦自杀赠昌武军节度使

△李革

李革字君美河津人大定二十五年进士调真定主簿察廉迁韩城令同知州事纳富商赂以岁课军须配属县革独不听提刑司以为能累迁太原推官除大兴县令历同知昭义军节度事改签南京按察事泰和六年革与签陕西高霖签山东孟子元俱被诏体访三路官员能否

赴阙奏事改刑部员外郎历大兴府治中知府图克坦南平贵幸用事势倾中外遣所亲以进取诱革革拒之贞佑三年迁户部侍郎宣宗迁汴行河北西路六部事累迁户部吏部尚书陕西行省参议官四年拜参知政事革奏请凡断例敕条特旨奏断不为永格者不许引用皆以律为正诏从之是岁元兵破潼关革自以执政失备御之策上表请罢不许寻为绛阳军节度使兴定元年胥鼎自平阳移镇陕西革代鼎为河东行省兼知平阳府是时兴兵伐宋革上书曰今之计当休兵息民养锐待敌宋虽造衅止可自备若不忍小忿以勤远略恐或乘之不能支也不纳太原兵阙食革移粟七万石以济之二年宣差钮祜禄苏卜至河东牒行省清野时晚禾未熟革奏今岁雨泽及时秋成可待如令耕毁民将不堪诏从之十月平阳被围城中军不满六千屡出战旬日间伤者过半征兵吉曩霍三州不时至裨将李怀德縋城出降兵自城东南入左右请革上马突围出革叹曰吾不能保此城何面目见天子汝辈可去矣乃自杀赠尚书右丞【按李革以孤城抗敌教授不至完节而死今由列传移入忠义】

△富珠哩福寿

富珠哩福寿为唐邑主簿元兵攻唐邑福寿与战死之赠官三阶

△马庆祥 【胥谦 嗣亨 布萨和硕】

马庆祥字瑞宁本名苏尔济苏先世自西域入居临洮狄道以马为氏后徙净州天山泰和中试补译史庆祥通六国语大安初卫王选为副使通问于元还授开封府判官未几元兵出陕右命副完颜仲元为凤翔府路兵马判官元光元年冬十一月元将蒙古布哈将攻凤翔行省檄庆祥与治中胥谦分道清野遇先锋于涇水且行且战将及城元兵邀归路不能脱令其骑曰吾属荷国厚恩竭力效死乃其职皆应曰诺人殊死战良久矢尽与谦及其子嗣亨皆不屈死事闻与谦俱赠辅国上将军庆祥恒州刺史谥忠愍谦彰化军节度使嗣亨咸远将军凤翔府判官栎州金胜堡提控布萨和硕亦死赠银青荣禄大夫正大二年立褒忠庙与王清田荣李贵王斌冯万努张德威高行中程济姬玘张山等十有三人皆从祀仍录其孤

钦定续通志卷五百十七

●钦定续通志卷五百十八 忠义传十一

忠义传

金 【二】

○金二

图克坦航 洪果珍珠 乌凌阿奇珠 图们色埒默 尼
玛哈富勒呼 吴邦杰 纳哈塔富拉塔
钮祜禄恩楚【王谨】 时茂先 温特赫老尔 梁持胜【费摩
萨布韩公恕】 乌雅威赫 乌雅恩
彻亨 钮祜禄贞 伯特乌格 贾邦宪 伊喇阿里哈【孔祖
汤】 完颜禄锦 赫舍哩鹤寿
富察罗索 钮祜禄资禄 赵益 侯小叔 王佐 图们
呼图克们 爱新【马肩龙】 禹显【张邦
宪 刘全】 冀禹锡【完颜呼喇勒】 完颜彝
杨沃衍【刘兴哥】 瓜尔佳实伦【苏椿】
乌库哩黑汉 姬汝作

图克坦航
洪果珍珠
乌凌阿奇珠
图们色埒默
尼玛哈富勒呼
吴邦杰
纳哈塔富拉塔
钮祜禄恩楚【王谨】
时茂先
温特赫老尔
梁持胜【费摩萨布 韩公恕】
乌雅威赫
乌雅恩彻亨
钮祜禄贞
伯特乌格
贾邦宪
伊喇阿里哈【孔祖汤】
完颜禄锦
赫舍哩鹤寿
富察罗索
钮祜禄资禄
赵益
侯小叔

王佐

图们呼图克们

爱新 【马肩龙】

禹显 【张邦宪 刘全】

冀禹锡 【完颜呼喇勒】

完颜彝

杨沃衍 【刘兴哥】

瓜尔佳实伦 【苏椿】

乌库哩黑汉

姬汝作

△图克坦航

图克坦航一名扎克伞父号九驸马卫王有事北边授都元帅不允人望航海时为吏部侍郎力劝辞帅职至宁元年呼沙呼弑逆降航为安州刺史会元兵大至城下声言都城已失守汝可速降航谓其民曰城守虽严万一攻破汝辈无子遗矣我家两世驸马受国厚恩决不可降乃尽出家财犒军民皆尽力备御又五日城危航度不可支乃先缢其妻孥谓家人曰我死即撤屋焚之遂自缢死城破人犹力战曰太守既死我辈不可独降死者甚众

△洪果玖珠

洪果玖珠临潢人累官河东北路按察转运使改知彰德府事战歿赠荣禄大夫南京留守仍录用其子孙

△乌凌阿奇珠

乌凌阿奇珠大名路明安人大定二十八年进士累官扶余路节度使未几以罪夺三官降德昌军节度副使崇庆初戍边有功再迁归德兴平二军节度使充东面经略使改元帅右都监赴援中都战歿赠荣禄大夫参知政事以半俸给其家

△图们色埒默

图们色埒默咸平路明安人袭父明安明昌中以所部兵充押军万户戍边承安中讨契丹有功除陈州防御使迁知平凉府事徙知彰德贞佑四年元兵复取彰德死焉

△尼玛哈富勒呼

尼玛哈富勒呼中都路明安人明昌五年进士累官补尚书省令史从平章布萨揆伐宋兵罢除同知崇义军节度使事擢知河南府事贞佑四年急备京西为陕州宣抚副使元兵取潼关御战兵败死焉

△吴邦杰

吴邦杰登州军事判官寓居日照之村墅为先兵所得驱令攻城邦杰曰吾荷吾国恩讵忍攻吾君之城与之酒食不顾乃杀之诏赠朝列大夫定海军节度副使

△纳哈塔富拉塔

纳哈塔富拉塔大名路明安人承安二年进士累官河州防御使贞佑三年夏人围定羌击走之四年升河州为平西军就以为节度使上言古者一人从军七家奉之今籍诸道民为兵者十之七八奉之者纔二三民安得不困夫兵贵精不在众择勇敢谋略者为兵脆懦之徒使归农田是亦舒民之一端也不报入为户部尚书时伐宋大捷富拉塔秦宋人屡败其气必沮可乘此遣人谕说以寻旧盟若不从然后伐之疾讎怒顽易以成功朝廷不能用又言诸军当汰去老弱妙选精锐陕西弓箭手不习骑射可选善骑者代之延安屯兵甚众分徙万人驻平凉关中元帅猥多除京兆重镇其余皆可罢巩县以北黄河南岸及金钩引桥虎牢关虢州崤岭凡斜径僻路俱当置兵防守诏下尚书省枢密院议竟不施行未几改昭义军节度使兴定二年潞州破力战而死赠御史大夫

△钮祜禄恩楚 【王谨】

钮祜禄恩楚仕至栎州刺史被行省牒徙州人于金胜堡元兵至恩楚拒战中流矢病创卧死帽军张提控言兵势不可当宜速降恩楚曰吾曹坐食官禄可忘国家恩乎汝不闻赵坊州以金帛子女与敌人终亦不免我辈但当力战死耳至夜张自变量人持兵杖入胁使出降恩楚曰听汝所为吾终不屈遂杀之执其妻子出降初栎州人迁金胜堡多不能至判官王谨收遗散之众别屯周安堡素无楼堞守备谨拒战十余日内溃被执不屈死诏赠官六降升职三等

△时茂先

时茂先日照县沙沟酒监寓居诸城红袄贼郭方三据密州 【按郭方三本传讹方郭三今据布萨安贞传改】 自称元帅过其村居民相率迎之茂先独不肯方三怒执之断其腕大骂不屈复剔其目乱勿剉之至死骂不绝诏赠武节将军同知沂州防御使事

△温特赫老尔

温特赫老尔为同知上京留守布什万努攻上京子特尔格生获老尔胁之使招余人不从怒斫而死赠龙虎卫上将军博索兵马都总管以其侄默色为后特授四官

△梁持胜 【费摩萨布 韩公恕】

梁持胜字径甫本名询谊避宣宗嫌名改保大军节度使襄之子多力善射泰和六年登进士宏词二科累官咸平路宣抚司经历兴定初宣抚使布什万努有异志欲弃咸平徙海兰路持胜力止之万努怒杖之八十持胜走上京告行省太平时太平已与万努通谋口称其忠而心实不然署大右司员外郎既而太平受万努命焚毁上京宗庙执元帅承充夺其军持胜密约治中费摩萨布万户韩公恕杀太平复推承充行省事共伐万努事泄俱被害【按大金国志载持胜为咸平治中宗室承裕辟为僚佐承裕死太平谋不执以兵胁持胜不从大骂遂遇害与此互异】诏赠持胜中顺大夫韩州刺史萨布镇国上将军显德军节度使公恕明威将军信州刺史

△乌雅威赫

乌雅威赫隆安路明安人补亲军充护卫累官安化军节度使土贼据九仙山为巢穴拥众不击贼愈炽东平行省蒙古纲劾奏威赫不任将帅朝廷不问改镇西军权经略副使兴定四年改泰定军五月兖州破死焉

△乌雅恩彻亨

乌雅恩彻亨隆安府明安人大定二十八年进士累官秦州防御使母忧起复迁武宁军节度使徙河平军坐前在武宁奏军功不实降沂州防御使迁汾阳军节度使兴定二年九月城破死焉

△钮祜禄贞

钮祜禄贞本名绰哈西南路招讨司人大定二十八年进士累官泰定军节度副使父忧服阕除宣德州刺史贞佑元年十二月以礼部郎中与恩州刺史钮祜禄哈达等出议和事和议成改户部侍郎历沁南河平镇南集庆汾阳昭义军节度使兴定二年初元帅左都监守晋安府三年十一月城破与府官十余人皆死之

△伯特乌格

伯特乌格西南路茂纛奚人壮健沈勇贞佑五年元兵破东胜州乌格与裕尔雅勒呼裕尔雅尔招集义军披荆棘复立州事帅府承制皆授武义将军乌格宁远军节度副使雅勒呼节度判官雅尔观察判官兴定元年各迁两阶遥授乌格武州刺史权节度使雅勒呼权同知雅尔权副使三年真授乌格东胜军节度使东胜被围粮尽援绝率众溃围走保长宁塞九月复被围乌格死之

△贾邦宪

贾邦宪霍州霍邑县陈村人举进士质直有勇略元攻河东集居民为守御计兵至居民悉降邦宪弃其家独与子懿保松平寨时权知州

事刘珍在寨与共守竟能成功珍每欲辟之邦宪辄以衰老为辞兴定四年十月兵复大至病不能避与懿俱被报欲以为镇西元帅刃胁之不屈密遣懿归松平遂自刭赠奉直大夫本县令

△伊喇阿里哈 【孔祖汤】

伊喇阿里哈辽人兴定闲累迁霍州刺史四年移治好义堡元兵至力战不能敌兵败被执诱使降曰吾有死无二叱使跪但向阙而立从矢射杀之宝昌军节度副使孔祖汤同时被获亦不屈死诏赠阿里哈龙虎卫上将军恭定军节度使祖汤资善大夫同知平阳府事祖汤泰和三年进士

△完颜禄锦

完颜禄锦中都路额特赫格们明安人以荫补官累迁通州刺史元帅右都监富察齐锦执令北去寻挈家脱归除同知临洮府事迁保大军节度使兴定五年鄜州破自投崖下死赠特进知延安府事

△赫舍哩鹤寿

赫舍哩鹤寿河北西路珊沁明安人中泰和三年武举调襄信县副巡检六年宋人围蔡州鹤寿请于防御使与勇士五十人夜斫宋营使诸军噪城上斩三百余级迟明解去追袭至陈寨复取所据新蔡新息襄信三县从大军出寿春败宋人于涡口攻下真滁二州及盱眙军还迁同知息州军事大安三年夏人五万围东胜鹤寿救之突围入城夏兵解兴定元年遥授睢州刺史二年攻枣阳三败宋兵三年夺宋石渠寨决去枣阳濠水加宣差邓州路军马从宜遥授汝州防御使四年宋扈太尉步骑十万围邓州鹤寿出金帛赏士许以迁官加爵日出搏战宋兵焚营去鹤寿被创遣招抚副使珠格伊埒图追及之夺所俘而还诏所散金帛勿问将士优迁官爵鹤寿迁金紫光禄大夫遥授武胜军节度使母忧起复行元帅府于鄜州五年闰十二月鄜州破 【原作十月按本纪是年十月鹤寿始以许州元帅将戍卒分屯潼关至闰十二月死于鄜州祜禄资禄传所载亦同今据改】 与数骑突出城追兵及之鹤寿据土山力战死溢果勇

△富察罗索

富察罗索东北路安春噶尔罕明安人泰和三年进士累官监察御史母忧服阙充元帅参议官兴定二年与元帅承裔攻下西和州博索由秦州进兵抵栈道宋人悉锐师来拒罗索乘高立帜策马旋走扬尘为疑兵别遣精骑掩出其后宋人大溃乘势遂拔兴元权元帅右都监河东路安抚使复取平阳晋安遥授孟州防御使将兵救鄜州转战而至城破死之赠资德

大夫定国军节度使谥襄勇

△钮祜禄资禄

钮祜禄资禄本姓张氏咸平府人泰和闲伐宋从军有功累官西宁州刺史赐今姓
兴定二年遥授同知临洮府事兼定西州刺史从元帅
右都监完颜阿林破宋兵于梢子岭三年攻破武休关 【按武休金史讹武林考本纪兴
定三年取宋武休关又杨沃衍传亦载三年武休关
之捷今据改】 功最遥授通达军节度使五年改陇安军节度使又改金安将兵救鄜州
闰十二月鄜州破被执不肯降遂死赠银青荣禄大夫
中京留守录其二子烈山林泉升职一等陕西行省军中用之

△赵益

赵益太原人读书肄业元兵入境鸠合土豪保聚山陕屡战有功郭文振署为寿阳
令驻兵榆次重原寨遂率众收复太原夜登城斩馘甚
众获马杖不可计护老幼二万余口以出擢同知太原府事兼招抚使元光元年八月元
兵大至攻城益急知不可支乃自焚府库杀妻子沈符
印于井遂自杀帝闻嘉叹赠银青荣禄大夫河东北路宣抚使

△侯小叔

侯小叔河东县人本河津水手贞佑初籍充镇威军以劳补官元光元年元兵围河
中迁府判官权河东南路安抚副使尽护农民入城以
家财赏战士围解迁治中枢密院奏乞假符节十二月诏权元帅左都监便宜从事提控
吴德说小叔出降叱出斩之表兄张先复从容言使降
以保妻子小叔怒谓先曰我舟人子致身至此何云出降缚于柱杀之二年正月 【四字
史传原讹在下文元军十万围城之上今据本纪移
此】 枢密院遣都监额琳来议兵事因出城与额琳会元石天应乘之取河中府作浮桥
通陕西小叔驻乐李山寨众兵毕会夜半坎城以登焚
楼橹火照城中天应大惊尽弃辎重牌印马牛杂畜死于双市门小叔烧绝浮桥抚定其
众迁昭毅大将军遥授孟州防御使同知府事未几元
兵十万围城总帅额尔克遣提控孙昌枢密完颜萨布遣李仁智各率兵来援约夜中鸣
钲内外相应及期小叔出兵昌仁智不敢动小叔敛众
入城围益急密遣经历官张思祖溃围出奔告于汴明日城破小叔死下诏褒赠切责额
尔克等不救河中之罪

△王佐

王佐字辅之霍州农家子轻财好施善骑射兴定中聚兵数千权领霍州事平阳胡
天作承制加忠勇校尉累迁宣武将军遥授宝昌军节
度副使元兵取青龙堡佐被获署霍州守将隶元帅崔环质其妻子佐因招抚使成天佑

与环有隙约谋杀环天佑曰君妻子为质奈何佐曰佐
岂顾家者耶因环出猎杀之率军民数万请命加元帅右监军兼知平阳县佐与平阳县公
史咏素不协请徙沁州玉女寨诏从之仍听上党公完
颜开节制元光二年七月救襄垣中流矢卒赠金吾卫上将军以其子为符宝典书

△图们呼图克们

图们呼图克们字子秀策论进士累官临洮知府贞佑三年冬叛贼兰州极陈僧等
诱夏兵八万围临洮城中兵数千粟不支众皆危之呼
图克们谕以逆顺祸福皆自奋捕其党欲为内应者斩之擢首城外贼四面来攻夜袭其
垒夏兵大乱遂遁去四年知河中府兴定二年为绛阳
军节度使行元帅府事兼知晋安修城缮兵以备战守民以为扰行省胥鼎闻之遗书曰
去岁平阳不守河东保完者惟绛由公威德素着不动
声色以能无虞迺闻治政太刚科征太重小人易动不可不虑愿谦虚待下忠孝结人明
赏罚平赋税为河东长城之托呼图克们得书上言臣
方治隍陴积刍粮为捍御计而小民颇有怨言貽行省忧自闻训谕内自悛海外加宽抚
庶几少慰众心而近以朝命分军过河又讷言帅臣不
益兵保守反助河南将弃我人心如此恐生他变敢以鼎书上闻惟朝廷图之朝廷以鼎
言遣吏部尚书完颜闾山代之或曰呼图克们欲以计
去晋安故务为急政失民心未几晋安失守死者百万遂失河东正大三年复为临洮府
总管四年五月城破被执诱降不应以刀乱斫其膝胫
终不能屈遂杀之诏赠中京留守立像褒忠庙录其子孙其妻乌库哩氏亦死节有传

△爱新 【马肩龙】

爱新一名莽格本虢县镇防军累功迁总领李文秀据秦州诏凤翔军讨之爱新在
军中有罪当死枢帅有知者奏将帅材忠实可倚命驰
赦以为德顺节度使正大四年春元兵西来拟以德顺为坐夏之所人甚危之爱新识凤
翔马肩龙招与谋事凤翔总管萨哈喇国鉴以德顺决
不可守劝肩龙勿往肩龙曰爱新平生未识我一见许为知己我知往则必死然不得不
为知己死乃冒险至不数日受围城中惟义兵乡军八
九千人元兵举天下之势攻之爱新假肩龙凤翔府判官与共守御凡二十昼夜力尽乃
死肩龙自到诏各赠官配食褒忠庙肩龙字舜卿宛平
人先世辽大族有知兴中府者号兴中马氏祖大金锦两州节度父成谊京兆府路统
军司判官肩龙在太学有声宗室苏尔坦被诬将置死
人不敢言其冤肩龙上书苏尔坦有将帅材少出其右臣书生无用于世愿代死留为天子
将兵帝问汝与苏尔坦交厚对曰臣知苏尔坦苏尔
坦未尝识臣啻悟赦苏尔坦授肩龙东平录事委行省试验侯摯与语不契罢归渡河疑

为奸细系归德狱适苏尔坦至立救出之至是与爱新同死难

△禹显 【张邦宪 刘全】

禹显鴈门人贞佑初隶上党公张开累功授义胜军节度使元光二年四月元帅德勒台阿勒达尔攻河东开遣显扼龙猪谷夹攻败之擒其帅韩光国悉复所历州县将军二百人守襄垣八年不迁元帅尝集河朔步骑数千攻之数四不能拔既而战于玉女寨大获开言于朝权元帅府都监正大六年冬四内变城破被擒帅义之不欲加害钤以铁绳密遁去闻开军复振将往从之元兵四向来追被执不屈死秦州人张邦宪字正叔正大进士为永固令天兴二年避兵徐州卓翼率兵至城邦宪被执将驱之北骂曰我进士也为邑长可从汝曹反耶遂遇害刘全彭城民率乡邻数百避兵沫沟推为砮主元兵至徐质其父招全全缚其人送州因窃父以归徐帅伊都嘉其忠承制授昭信校尉后遇国用安以不附已见杀

△冀禹锡 【完颜呼喇勒】

冀禹锡字京用龙山人至宁元年仕历州郡有能声归德受兵禹锡为行院都事经画守御一府倚重闻富察官努之变或劝以微服免不从与郎中完颜呼喇勒同赴水死 【按冀禹锡金史原附富察官努传今改入忠义考富察官努传前谓其赴水死后又云或劝以微服免不从见害未免矛盾今据前文改辑并以完颜呼喇勒附见焉】

△完颜彝

完颜彝字良佐世以小名称之曰陈和尚丰州人系出萧王诸孙父奇格泰和闲南征以功授阶州同知军事宋复阶州战歿于嘉陵江从兄鼎字国器亦以小名色埒默行世袭明安以善战知名自寿泗元帅转安平都尉镇商州威望甚重敬贤下士有古贤将风尝搜伏得欧阳修子孙并其族属皆纵遣之 【按鼎事见彝传中本无庸分金史别为鼎附传于后既非死事殊属枝赘今从宏简录改作合传】 贞佑中彝为元兵所掠帅甚爱之置帐下彝母留丰州鼎事之甚谨彝在北岁余托以省母乞还帅以卒监之至丰与鼎劫杀监卒夺马奉其母南奔元兵追之由他路得免兄弟共挽鹿车载母渡河宣宗奇之授鼎都统彝补护卫从鼎寿泗帅府鼎辟太原王渥为经历渥授彝以孝经小学论语春秋左氏传正大二年鼎落帅职为总领屯方城彝随往凡军中事皆预知鼎时在病镇防军葛宜翁素凶悍与李太和相殴诉于彝不直量笞之宜翁耻受杖竟死其妻讼彝故杀议当大辟彝聚书狱中读之明年鼎病愈诏提兵而西入

朝哀宗怪其瘦甚未几卒帝闻驰赦彝曰汝兄死失吾
一名将今故曲法赦汝他日汝奋发立功国家得汝力始以我为不妄赦矣彝泣且拜退
以白衣领紫微军都统踰年转忠孝军提控六年元兵
入大昌原伊喇布哈命为前锋【按本纪正大六年二月召平章哈达还朝伊喇布哈率
陈和尚忠孝军一千驻邠州三月陈和尚有战功授
定远大将军平凉府判官世袭穆昆布哈传亦同此时哈达并未为帅金史作五年为哈
达前锋误今据本纪及伊喇布哈传改】先已沐浴易
衣若将就木者擐甲上马不反顾是日以四百骑破八千众自军兴二十年始有此捷奏
功第一手诏褒谕授定远大将军平凉府判官世袭穆
昆一日名动天下忠孝军皆回纥羌浑及中原被俘避罪来归者鸷狠凌突号难制彝善
御之坐作进退皆中程序所过州邑给常料外秋毫无
犯街曲不复喧杂每战则先登陷阵疾若风雨诸军倚以为重七月有卫州之胜【按本
纪正大七年哈达布哈引兵救卫州围解哈达传亦
同此时哈达始与布哈同将兵亦以忠孝军胜本传误作六年今据改】八年有倒回谷
之胜彝尝私谓同列曰布哈无持重略今日得生口三
百明日得牛羊一二千士卒喘死则不复计国家积年兵力必为是人破除尽矣布哈闻
之置酒会诸将语以曾短长我否徐应曰有布哈见其
无惧容漫为好语云有过当面论无后言也九年正月三峯山之败走钧州城破纵军巷
战自言我金国大将欲见白事兵士以数骑夹之诣行
帐前问其姓名曰我忠孝军总领陈和尚也若死乱军人将谓我负国家今日明白死
天下必有知我者敌欲降之斫足胫折不为屈割口吻
至耳嚙血而呼至死不绝元将义之酌以马湏祝曰好男子他日再生当令我得之诏赠
镇南军节度使塑像褒忠庙勒石纪其忠烈

△杨沃衍【刘兴哥】

杨沃衍一名沃哩朔州静边官庄人本属唐古达喇部族少为屯田小吏元兵入境
率本族入保朔州南山茶■〈木巳〉沟众数千推为
招抚使转走宁隩武朔宁边诸州朝廷遣人招之率众来归授武州刺史武州屡经残毁
元兵来攻死战二十七昼夜不能拔乃退时贞佑二年
二月也既而朝廷以武州终不可守令迁其军民驻岢岚州升为节镇即以为节度使诏
谕以益励忠勤与宣抚司辑睦保安军民沃衍既奉诏
以身许国曰大丈夫必死王事不死于家三年奉旨屯涇邠陇三州分其军九千人为十
翼五都统破夏兵四万解定西州之围兴定元年赐姓
乌凌阿将兵五千从博索伐宋出巩州盐井遇夏兵屡击走之武休关之捷功又居多元
光元年遥授中京留守拜元帅右监军世袭努呼哈尔

呼必喇穆昆二年春元兵数百掠延安而南约图们呼图克们以步军会战呼图克们宿将常轻沃衍遂失典沃衍独率兵追之获四人而还还会诸将欲杀呼图克们诸将哀请乃释之俄而兵大至驻德安寨复击走之未几元兵攻凤翔还道出保安遣提控完颜扎拉破于石楼台时元兵声势益振陕西行省檄令清野不从曰我若清野明年民何所得食遂隔大涧持势使民毕麦事正大八年冬哈达布哈由邓州而西沃衍自豊阳川遇于五朵山下闻禹山战败愤云平章参政蒙国厚恩握兵柄失事机纵兵深入尚何言耶后三峯山败沃衍走钩州其部曲白溜努阿拉善降元请招沃衍阿拉善入见道帅意当授大官沃衍拔剑斫之曰我起身细微蒙国大恩汝欲污我耶遂遗语部曲后事望汴京拜且哭曰无面目见朝廷惟有一死耳即自缢部曲举火焚之从死者十余人初元兵破西夏长驱入关所至望风降独沃衍与其部将刘兴哥往来邠陇闲屡战屡胜故猝不能东兴哥凤翔虢县人起羣盗人呼热刘后于清化战死元兵至酹酒以吊西州耆老语之至为泣下

△瓜尔佳实伦 【苏椿】

瓜尔佳实伦隆安人以武举登第贞佑二年累迁副提控太原府判官与完颜富拉塔议拒守不合措置乖方敌因大入几不可御既乃交章论列帝恶其不和诏分统其兵未几迁同知太原府事奏请招集义军设置长校各立等差制可四年迁河东宣抚副使上章言宣抚使乌库哩礼不肯分兵御敌且所行多不法诏礼罢职 【按本纪贞佑四年十二月元兵攻太原府宣抚使乌库哩礼遣人间道赍硃书至京师告急又考乌库哩礼传贞佑二年兼河东北路安抚使三年充本路宣抚使四年太原被围未几围解进官二阶未见有诏礼罢职事当属误载】 实伦迁绛阳军枢密院节度使权经略使寻知延安府事兼鄜延路兵马都总管元兵围忻州实伦率民往援护其民入太原所保甚众兴定元年改河平军节度兼卫州管内观察使诏谕曰朕初谓汝勇果故倚以济事寻闻汝嗜酒不法太原知府乌库哩德升亦屡尝为朕言之然皆琐屑乃若不救汾州岂细事哉今当戮力以掩前过寻迁镇西军节度使兼岚州管内观察使行元帅府事二年实伦言去岁元兵破太原时岚州官民将士悉力捍御卒能保守无虞乞朝廷量加旌赏务令益尽心力易以镇守诏有功者各迁官一级仍给降空名宣敕令枢密院遣授之三年实伦奏枢密檄臣会汾州权元帅穆延呼喇复太原臣已遣提控实嘉乌尔钦等领军以往但敌势颇重而往者皆新集白徒绝无精锐恐不能胜乞于河南陕西量分精兵以增臣力仍令陕西州郡近河东者给之资粮更令南路诸

军缀敌之南以分其势庶几太原可复诏陕西河东行省分粮与之请兵之事以方伐宋不从实伦复上言军士有功者宜速赏之诏从其请实伦复言所统官属富察和克端裕尔雅勒呼纳哈塔旺结郭宪等并不禀从乞朝廷严为惩诫庶人知职分易以责办宰臣恶之乃奏曰和克端雅勒呼已经奏改无复可议实伦身兼刑部不自规画而使旺结往来应给石州无人恐亦有失武州边郡正当兵冲使宪率军离城敌或乘之孰与守御旺结等不从未为过也帝以为然因遣谕实伦姑为容忍实伦驻兵太原之西俟诸道兵至进战闻胁从人颇有革心上言于朝乞降空名宣敕金银符许便宜迁注以招诱之帝从其请并给付之保德州振威军万户王章弩军万户齐镇杀刺史富珠哩尼楚赫灭其家胁官吏军民同状白帅府诬以不轨实伦密令同知把富拉塔设计诛之朝廷命行省胥鼎量宜迁赏乃迁实伦金安军节度使行帅府事于葭州时鄜州元帅内族承立虑夏人入寇遣纳哈塔迈珠以兵驻葭州实伦辄分留其兵千八百人令以余军屯绥德而后奏之有司论罪当绞遇赦乃止除名元光元年元兵围青龙堡诏以实伦权左都监将兵会上赏公晋阳公往援敌兵梗道不得进会青龙堡破召还既而复以罪免正大八年【按哀宗本纪以实伦权昌武军节度在正大九年正月其时已改元开兴至四月复改元天兴与此互异】元兵入河南朝议以权昌武军节度使钮祜禄全周不知兵起实伦代之实伦初赴昌武诏谕曰卿先朝宿将甚有威望故起拜是职元帅苏椿武监军皆晓兵事今在昌武宜与同议勿复不睦失计也实伦赴镇遣归顺军提控岚州人高珪往斥候珪奔元军告以城池深浅俄元兵至城下使韩寿孙持檄招降实伦苏椿斩之既而偏裨何魏内族安春瓜尔佳太守等开门纳元军入城擒苏椿大将怒其不屈即杀之实伦投井而死全周自缢【按实伦屡经兵事卒完臣节由列传移入忠义苏椿原以同死时按本纪书为乱兵所害盖属传闻异词耳】

△乌库哩黑汉

乌库哩黑汉初以亲军入仕为唐邓元帅府把军官天兴二年唐州刺史内族吉噜病卒邓州总帅府以富察都尉权州事宋军围唐州粮多为邓取乏食镇防军冯总领甄改住为变杀富察都尉帅府承制以黑汉权刺史既而镇防军谋归宋裕州大成山聂都统一军独与为敌镇防不能胜奔枣阳宋人以故知唐虚实会邓帅伊喇瑗叛归宋遗书招黑汉黑汉杀其使者不报宋王安抚率兵攻唐鄂司王太尉继至攻益急城中粮尽人相食黑汉杀其爱妾啖士士感其义争杀妻子官属聚议欲降黑汉与聂都

统执益坚总领赵绰尔与冯总领私约王安抚入城聂
都统请冯议事即坐中斩之绰尔乘夜开西门纳宋军黑汉率大成山军巷战自辰至午
宋军大败绰尔约并力杀大成山军大成军败获黑汉
胁使降不屈为所杀

△姬汝作

姬汝作字钦之汝阳人全州节度副使端修多侄孙也汝作以才量称正大末避兵
崧上保乡邻后徙居交牙山砦授北山招抚使迁入汝
州时汝州残破防御使张楷自揣不能服众以州事托青阳总帅呼延实元兵屡破仅存
空城汝作至招集散亡复立市井元兵复来攻以死拒
之兵退闲道纳奏授同知汝州防御使呼延实忌其功州事动为所制实欲迁州入山汝
作以为仓中粮尚多四面溃军日至激之皆可用朝廷
倚我守此州总帅欲弃之何心哉谗闲既行有相图隙详议官杨鹏释之实乃还山会战
襄邾得马百余士气颇振遂以汝作为总帅天兴二年
哀宗在蔡征入援州粮垂尽中京破部曲私议以城降惧汝作不敢言白欲迁州入山汝
作怒曰吾父祖食禄百年今又居帅职吾生为金民死
为金鬼汝辈言避于山非欲降乎有再言迁者斩元塔察将兵攻蔡经汝州州人梁皋作
乱杀汝作宣使石珪以皋权防御使脱走入蔡以事闻
帝甚嗟惜赠汝作昌武军节度使子孙世袭穆昆仍诏呼延实范真讨皋不获皋后为元
兵所杀

钦定续通志卷五百十八

●钦定续通志卷五百十九 忠义传十二

忠义传

金三

○金三

商衡

珠嘉托罗海 杨达夫

强伸

冯延登

乌克逊仲端 乌

克逊纳绅【费摩阿古岱完颜珠赫完颜莽格乌克逊端费摩德辉完颜阿萨尔玛延】

富察琦

穆噜世绩 完

颜仲德【富珠哩罗索乌凌阿呼像素志王巴尔赫舍哩柏寿乌库哩和勒端】 蔡
巴尔 毛佺【阎忠 郝乙】

温都察逊【纳塔和硕台】 完颜经实【完颜色埒默焦春和宋珪巴良弼珠勒
根文卿】 毕资伦 郭哈玛

尔【罗丹】

商衡

珠嘉托罗海

杨达夫

强伸

冯延登

乌克逊仲端

乌克逊纳绅 【费摩阿古岱完颜珠赫完颜莽格乌克逊端费摩德辉完颜阿萨尔玛延】

富察琦

舒穆鲁世绩

完颜仲德 【富珠哩罗索乌凌阿呼像素志王巴尔赫舍哩柏寿乌库哩和勒端】

蔡巴尔

毛佺 【阎忠 郝乙】

温都察逊 【纳塔和硕台】

完颜经实 【完颜色埒默焦春和宋珪巴良弼珠勒根文卿】

毕资伦

郭哈玛尔 【罗丹】

△商衡

商衡字平叔曹州人至宁元年特恩第一为威戎令岁饥白行省开仓赈贷全活甚众地灵城圯夏人乘衅入侵守御无虞县人为立生祠

累拜监察御史上章极言邠国夫人不时出入宫闱干预政事声迹甚恶自是非被召不敢进见又言户部侍郎曹温女在掖庭亲旧干预权利

家人填委诸司贪墨之罪诏罢温户部改太后府卫尉再上章言温果有罪当贬逐无罪则臣为妄言岂有两可理帝动容乃出温为汝州防御

使未几改衡枢密院经历母丧起复为泰蓝总帅府经历官天兴元年二月图克坦乌登等败于铁岭衡未知存歿招集溃军以须遂为元军所

得诱使招降洛阳不可欲掖其中衡瞋目大呼终不肯降望阙瞻拜遂引佩刀自刭

△珠嘉托罗海

珠嘉托罗海上京人其先有开国功授北京路苏克栋阿明安托罗海自幼袭爵宣宗迁汴率本部兵赴中都扈从授御前马步军都总领

宋人略南鄙与时全将军南伐屡摧宋兵破城寨以功遥授武昌军节度使行蔡息等路元帅府事逻卒擒宋人畜牧越境省法当械送虑生边

衅释之哀宗即位授镇南军节度使蔡州管内观察使元兵入陕西上言宋人与我为雠顷以力屈自保今陕西陂兵河南转战连年国力已竭

寿泗南接盱楚若宋人与李全乘虚而入腹背受敌非计之得宜敕寿泗帅臣谨斥候严

烽燧常若敌至帝是而行之正大二年秋传言宋人将
入侵农司令民先期刈禾托罗海遣军巡逻听民待熟宋人卒不入得谍报光州汪太尉
将取真阳议者请籍丁男以备托罗海曰汪太尉恇怯
人宁敢为此已而果然叛人焦凤子授提控谋率众入宋托罗海伏兵鄱阳道殪之七年
元兵攻蓝关至八渡仓退举朝皆贺以为无事托罗海
独言潼关险隘精兵足用然商洛以南濒宋境大山重复宋人不知守国家亦不能逾境
屯戍元兵若由散关入兴元下金房绕出襄汉北入邓
鄱则大事去矣宜与宋人释怨据险要以备不然必败是秋改授小关于元帅屯商州大
吉口九年春从行省参政图克坦乌登将潼关兵入援
至商山遇雪元兵邀击之士卒饥冻不能战而溃托罗海被执不屈自杀

△杨达夫

杨达夫字晋卿耀州三原人泰和三年进士尝主鄂县簿事吏民乐之达夫亦爱其
山水之胜家焉日以诗酒自娱会诏徙民东入关达夫
与众行及韶避兵州北之横岭为游骑所执将褫衣害之挺然直立大言曰我金国臣子
不过一死忍裸袒以黷天日耶遂见杀两山潜伏之民
皆相告曰若此好官异日当祠之作我横岭之神

△强伸

强伸本河中射粮军子弟貌极寝陋而膂力过人兴定初从华州副都统安宁复潼
关以劳任使后选充官军戍陕铁岭军溃被执从都尉
乌凌阿呼图窜归中京时中京破留守萨哈连死之元帅任守真复立府专以便宜署伸
警巡使后守真率部曲从行省色埒入援郑州之败守
真死天兴元年中京人推伸为府签事领所有军二千五百人伤残老幼半之甫三日元
兵围之东西北三面多树大炮伸括衣帛为帜立城上
率士卒赤身而战募壮士得五千人往来救应大叫以憨子军为号其声势与万众无异
兵器已尽镞铁为镞得元兵一箭截为四以简鞭发之
又创遏敌炮能发大石于百步外击无不中伸奔走四应所至必捷得二驄及所乘马皆
杀之以犒军士人不过一啖而得者如百金之赐元兵
退百里外益兵数倍复攻又不能拔事闻哀宗降诏褒谕以伸为中京留守元帅左都监
内族色埒领军民十余万入洛行省事二年元兵自汴
驱色埒之子于东门下诱色埒降色埒即命左右射之既而知崔立之变病不能语而死
总帅乌凌阿呼图代行省事伸行总帅府事月余粮尽
军民稍稍散去元兵复来阵于洛南伸阵水北有韩帅者匹马立水滨招伸降伸谓帅曰
君独非我家臣子耶我本一军卒今贵为留守誓以死
报国耳遂跃而射之帅奔阵率步卒数百夺桥伸军中一旗手独出拒之杀数人伸即手

解都统银符佩之士气复振初筑战垒于城外四隅至五门内外皆有屏谓之迷魂墙元兵以五百骑迫之伸率卒二百鼓噪而出元兵退行省呼图走南山鹰扬都尉献西门以降伸知城不能守率死士数十人突东门出转战至偃师力尽就执载以一马拥迫而行伸宛转不肯进强掖之将见大帅塔察及中京七里河伸语不逊兵卒相谓曰此人乖角如此若见大帅其能降乎不若杀之因好语诱曰汝能北面一屈膝吾贷汝命伸不从左右力持使北面伸拗头南向遂杀之 【按强伸力守中京城破不屈今由列传移入忠义】

△冯延登

冯延登字子俊吉州吉乡人承安二年词赋进士为宁边令雹害稼发粟赈贷全活甚众累迁太常博士正大七年迁国子祭酒假翰林学士承旨充国信使以八年春奉国书朝见元主于虢县御营问汝识凤翔帅否对曰识之又问汝能招降即贲汝死不则杀汝矣曰臣奉书请和招降岂使职乎招降亦死还朝亦死不若即死为愈明日复问对如前问至再三执义不回乃谕之云汝罪应死但古无杀使者理汝爱汝须髯犹汝命也叱左右以刀截去之延登岸然不动监之丰州二年后放还哀宗抚慰久之复官祭酒历礼吏二部侍郎明年元兵围汴京仓猝逃难为骑兵所得欲拥北行延登辞情慷慨义不受辱遂跃城旁井中死 【按大金国志元兵围汴京城破自投井死与此小异考延登使元诱胁囚禁始终不屈当无围城未破食皇遁逃之事今仍史文而附之】

△乌克逊仲端

乌克逊仲端本名卜吉字子正承安二年策论进士宣宗时累官礼部侍郎与翰林待制安廷珍 【原讹延珍下同今据本纪改】 奉使乞和谒见元太师穆呼哩留止廷珍仲端独往并大夏涉流沙踰葱岭至西域见元太祖致使事乃迁权参知政事奏知开封府完颜莽伊苏吏部郎杨居仁奉使不职辱君命宜诛诏免死除名会议降及诤太后奉佛帝怒贬同州节度使哀宗将迁归德召为翰林学士承旨留守汴京元兵围汴日久食尽诸将不相统自度不测一日与同年费摩思忠小饮送出门曰此别终天矣即自缢妻从死子爱实尝为护尉奉御以诛官努功授节度世袭千户

△乌克逊纳绅 【费摩阿古岱完颜珠赫完颜莽格乌克逊端费摩德辉完颜阿萨尔玛延】

乌克逊纳绅字道远由译史人官性伉特敢为有直气尝为监察御史时中丞完颜伯嘉以酷烈闻纳绅纠罢之朝士耸然哀宗东迁留汴

京居守崔立变之明日与御史大夫费摩阿古岱户部尚书完颜珠赫皆自缢阿古岱字仲宁珠赫字仲平皆如真进士时不辱而死者奉御完颜莽格大睦亲府事乌克逊端大理费摩德辉右副点检完颜阿萨尔参政完颜纳绅之子玛延

△富察琦

富察琦本名阿林字仁卿棣州阳信人补刑部掾兄世袭穆昆兄死琦承袭正大六年为安平都尉钮祜禄哈坦都统兼知事小关故事势已迫琦常在左右哈坦令避矢石琦不去曰业已从公死生共之尚安所避哀宗迁归德汴京立讲议所琦与焉与同事元好问善崔立变后令改易巾髻琦谓好问曰在京人皆可独琦不可今以一死付公因泣涕而别母完颜氏以孝谨闻梦人伏梁闲惊寤琦跪曰儿意在悬梁阿母梦先见耳家人辈泣劝母止之曰勿劝儿所处是矣即自缢

△舒穆鲁世绩

舒穆鲁世绩字景略父元毅死王事承安五年世绩登词赋经义南科进士第贞佑三年累官太常丞时徙河北军户河南议给以田世绩上言荒田牧地耕垦费力倍岁不能熟若夺民素莳者与之则民将失所况军户率无耕牛彼既南来田宅为人所有一旦北归能无争夺切谓宜令分人归守本业收晚禾至春复还为固守计会侍御史刘元规亦言给田不便帝大悟乃罢之正大中累迁礼部尚书天兴元年哀宗将北渡世绩与刘肃等二十人皆言不便帝曰我不出军分为二一军守一军出战我出则合为一世绩曰陛下出则军分为三一守一战一中军护从不若不出为愈也帝曰卿等不知若得完颜仲德恒山公武仙付之兵事何劳我出今欲不自将得乎又指御榻曰我此行岂有还期但恨无罪亡国耳我未尝奢侈未尝信任小人世绩应声曰陛下用小人则亦有之帝曰小人谓谁世绩累数曰伊喇宁古温都察逊乌色完颜长乐复言良久君臣涕泣世绩从行至归德明年走蔡州次新蔡县之姜寨子嵩时为县令拜于马前帝嘉之蔡城破父子俱死嵩字企隆兴定二年经义进士 【按世绩父子三世俱死王事今由列传移入忠义】

△完颜仲德 【富珠哩罗索乌凌阿呼像素志王巴尔赫舍哩柏寿乌库哩和勒端】

完颜仲德本名呼沙呼海兰路人泰和三年进士贞佑闲用兵辟充军职尝为元兵所俘不踰年尽解其语率降人万余来归宣宗召见授邳州刺史增筑城壁汇水环之州由是可守哀宗即位授同签枢密院节度使事行院徐州徐州城东西北三面皆黄河而南独平陆仲德垒石

增城之半复浚隍引水为固民赖以安正大五年诏关陕以南行元帅府事以备小关元兵叩关仲德适与前帅鄂屯阿里布酌酒更代而兵猝至遂驱而东有司劾阿里布素无守御策罪当死仲德上书谓元兵越关时符印已交安得归罪前帅臣请爱戮帝义之杖阿里布而贯其死六年移知巩昌府招集散亡依山为栅屯田积谷人多归之天兴元年参知政事行省陕州时乌登新败陕州残破仲德复立山寨安抚军民会蜡书征兵入援行省帅府往往观望不进或中道辄溃惟仲德提孤军千人历秦蓝商邓擷果菜为食闲关百死至汴适帝东迁妻子在京师五年矣仲德不入其家趋见帝宋门知欲北渡力谏云北兵在河南而陛下远徇河北万一无功得完归乎不若西幸秦巩山岩深固粮食丰贍安居守险命帅臣分道出战然后进取兴元经略巴蜀此万全策也帝已与博索议定不从然素重仲德且嘉其赴难进拜尚书省右丞兼枢密副使二年驾至归德以仲德行省徐州鱼山总领张璘作乱杀元帅完颜呼图降元仲德累议讨之徐守王德全不从仲德径往而从宜严禄已诛璘反正仲德抚慰军民而还有曹总领者盗御马东行仲德既杀之德全欲功出已复杀其党四十八人仲德以计执德全并其子杀之余一无所问阖郡称快官努之变诏仲德赴行在官属惧为所给劝勿往仲德曰君父之命死亦当行官努诛诏议迁蔡仲德欲奉帝西幸因赞成之至蔡领省院事无巨细率亲为之选士缮兵未尝一日无西志近侍左右久困睢阳幸即汝阳之安皆娶妻营业不愿迁徙日夕言西行不便未几元兵梗路竟不果行仲德每深居燕坐瞑目太息以不得西迁为恨元兵攻破蔡西城城中预为备虽克之不能入仲德摘三面精锐日夕战御终不能拔三年元兵凿西城为五门整军入督军鏖战及暮乃退明日复集仲德率精兵巷战自卯及巳俄见子城火起闻帝自缢谓将士曰吾君已崩吾何以战为吾赴汝水从吾君矣言讫赴水死将士皆曰相公能死吾辈独不能耶于是参政富珠哩罗索乌凌阿呼图总帅元志元帅王巴尔赫舍哩柏乌寿库哩和勒端及军士五百余人皆从死焉仲德状貌不踰常人喜怒未尝妄发闻人过常护讳之虽在军旅手不释卷家贫敝衣粝食终其身晏如也雅好宾客荐举人材其掌军务赏罚明信军民乐为用至危急死生之际无一士有异志者南渡后将相文武忠亮始终无瑕仲德一人而已【按仲德闲关赴难尽力守御城破尽节并能激励诸将军士从死者至五百余人今由列传移入忠义】

△蔡巴尔

蔡巴尔不知其所始趨捷有勇性纯质可任为忠孝军元帅天兴二年自息州入援

会元将布展遣数百骑驻城东大呼曰城中速降当免
杀戮不然无噍类矣帝遗巴尔率挽强兵百余潜出暗门渡汝水左右交射之自是兵不
复薄城筑长垒为久困计帝令分军防守西城以殿前
都点检乌凌阿呼图守西面巴尔副之已而哀宗传位承麟羣臣入贺班定巴尔不拜谓
所亲曰事至于此有死而已遂战死

△毛佺 【阎忠 郝乙】

毛佺恩州人初为盗宣宗南渡率众归国署义军招抚哀宗迁蔡以为都尉围城之
战佺力居多城破自缢其子先佺战歿时死事者阎忠
滑州人初卫王时开州刺史赛格叛忠单骑入城缚以出由是渐被擢用郝乙磁州人同
日战死哀宗赠官

△温都察逊 【纳塔和硕台】

温都察逊皇太后侄卫尉七十五之子短子精悍性岂弟累迁诸局分官帝幸蔡授
殿前左副点检围城中数引军潜出巡逻时尚食须鱼
城西有练江鲁大且多往捕必以军卫察逊常领兵往所得勋千余斤分赐将士后知其
出左右设伏伺而邀之力战死蔡城破前御史监察纳
塔和硕台闻之恸哭投水死

△完颜经实 【完颜色埒默焦春和宋珪巴良弼珠勒根文卿】

完颜经实哀宗奉御系出始祖天兴三年正月己酉蔡城破哀宗传位承麟即自缢
于幽兰轩权点检内族色埒默矫制召承御实嘉氏近
侍局大使焦春和内侍局殿头宋珪赴帝前晓以大义及侍从官巴良弼珠勒根文卿皆
从死色埒默将死遗言经实使焚幽兰轩火方炽子城
破元兵突入近侍左右皆走避独经实留不去为兵所执问为谁曰吾奉御经实也吾君
终于是吾候火灭灰寒收瘞其骨耳兵笑曰汝命且不
能保能瘞而君耶经实曰人各事其君吾君有天下十余年身死社稷忍使暴露遗骸与
士卒等耶吾逆知君辈必不遗吾果瘞吾君虽寸斩不
恨矣兵以告其帅布展曰此奇勇子也许之经实乃掇其余烬裹以敝衾瘞于汝水之旁
再拜号哭将赴汝水死军士救之得免后不知所终 【

按经实忠于故君虽未捐躯实彰义烈且其传内附见从死诸人兹仍史例存之】

△毕资伦

毕资伦缙山人泰和闲南征以佣雇从军授进义副尉崇庆初珠格高琪选为镇州
防城军千户至宁元年元兵至镇州高琪弃城遁资伦
行及昌平收避迁民兵转战有功擢授都统积功至都总领布萨阿哈南征军次默林关
不得过问诸将谁能取此关者资伦出应命问须军士
几何曰止用所统足矣明日迟明出不意薄宋军破之遂取默林阿哈军南行留提控王

禄万人守关不数日复为宋兵夺据归途阻塞阿哈复
问谁能取者赏帅职资伦复出应命以本军再夺默林军还论功第一授宣差总领都捉
控既而以本军屯泗州兴定五年叛将时青袭破西城
资伦堕南城求死为未军所执青说之曰我知尔好男子宜相时达变金国势已衰肯降
我宋不负尔资伦极口骂曰我出身至贫贱结柳器为
生今职居三品不幸失城一死尚不能报肯从汝反贼求生耶青知无降意下盱眙狱从
宜伊喇杨格以死节闻收其子努尔充皇后奉合舍人
宋人亦赏资伦忠愤不挠欲全活之转囚镇江府土狱十四年及盱眙将士降宋宋使纳
哈塔迈珠已下北望哭拜谓之辞故主驱资伦在旁观
之资伦骂曰国家未尝负汝何所求死不可乃作如此嘴鼻即迈珠等不敢仰视闻哀宗
死叹曰吾无所望矣容我一祭吾君乃降耳宋人信之
设祭镇江南岸祭毕伏地大哭乘其不防投江死宋人义之

△郭哈玛尔 【罗丹】

郭哈玛尔会州人与兄罗丹世为保甲射生手平时发矢伺腋下甲不掩处射无不
中兴定初罗丹以功遥授同知平凉府事兼会州刺史
赐姓延扎夏人攻会州罗丹遥见其主兵者人马皆衣金一发中其吭又射一人矢贯两
手于树敌大骇城破罗丹哈玛尔俱被擒夏人怜其技
囚之誓死不屈后兄弟谋奔事觉罗丹被杀哈玛尔独拔归帝思罗丹忠遥授其子博纽
会州军事判官哈玛尔授同知兰州军事兴定五年以
破夏人功迁同知临洮府事元光二年夏骑数十万攻凤翔甚急元帅持嘉喀齐喀以哈
玛尔总领军事从巡城濠外一人坐床若蔑视城守者
哈玛尔持弓矢伺其举肘一发毙之兵退升遥授静难军节度使寻改通远军授山东西
路干罕必喇穆昆与巩州元帅田瑞攻取会州率骑兵
五百被赭衲蔽州南山而下夏人猝望以为神城上有举手于悬风版者射之手版俱贯
夏人震恐乃出降州为夏人所据近十年至是复焉正
大初田瑞据巩叛从陕西行省讨之率众先登迁元帅左都监兼行兰会洮河元帅府事
天兴二年哀宗拟迁巩昌以钮祜禄乌展为行省三年
春乌展闻蔡已破遣人称使者至自蔡有旨宣谕以安众心绥德州帅汪世显嫉乌展制
已欲发矫诏事因以兵图之惧哈玛尔威望约哈玛尔
并力使至哈玛尔谓之曰钮祜禄公奉诏为行省号令孰敢不从今主上受围于蔡拟迁
巩昌我辈不能致死赴援又不能叶众奉迎乃欲攻钮
祜禄公先废迁幸之地帝至何所归乎汝帅若欲背国家任自为之何及于我世显即攻
破巩昌杀乌展遂款于元遣使二十余辈谕哈玛尔以
祸福不从甲午春金国已亡西州无不归顺独哈玛尔坚守孤城丙甲冬十月元兵并力

攻之日与血战集州中金银钢铁杂铸为炮以击攻者
元兵猝不能拔乃势急乃积薪州廡呼集家人及城中将校妻女闭诸一室自焚之哈玛
尔之妾欲有所诉立斩以徇城破犹鏖战独上大草积
以门扉自蔽发二三百矢无不中者矢尽投弓剑自焚城中无一人降者

钦定续通志卷五百十九

●钦定续通志卷五百二十 忠义传十三

忠义传

元【一】

○元一

李伯温【伯通 守正 守忠】 石珪 攸哈喇巴图尔

任志【存】 耶律特默 张万

嘉努【保通】 郑义【德温 江】 赵恰尔 董士元【哈喇图】

樊楫 班巴尔【巴拉 布呼齐】

绰尔【绰海 伯特】 伊埒默色【呼都克哈斯 唐庆】

哈喇布哈 刘天孚 萧景

茂 张桓 李黼【冕 秉昭】 李齐 褚

布哈【伴格】 郭嘉 喜同【

塔布岱】 韩因 卞琛【小十 李仲亨】 乔彝【张崑起

王佐 吴德新】 颜瑜【曹彦

可】 王士元【致微】 杨朴

李伯温【李伯通 李守正 李守忠】

石珪

攸哈喇巴图尔

任志【任存】

耶律特默

张万嘉努【保通】

郑义【郑德温 郑江】

赵恰尔

董士元【哈喇图】

樊楫

班巴尔【巴拉 布呼齐】

绰尔【绰海 伯特】

伊埒默色【呼都克哈斯 唐庆】

哈喇布哈

刘天孚

萧景茂

张桓

李黼 【李冕 李秉昭】

李齐

褚布哈 【褚伴格】

郭嘉

喜同 【塔布岱】

韩因

卞琛 【卞小十 李仲亨】

乔彝 【张崑起 王佐 吴德新】

颜瑜 【曹彦可】

王士元 【王致微】

杨朴

△李伯温 【李伯通 李守正 李守忠】

李伯温守贤之从兄也长兄惟则服官平阳征行万户次伯通岁甲戌锦州张致叛穆呼哩命伯通击之战死伯温行平阳元帅府事镇青龙堡专任东征闻平阳已陷弟守忠被执选骁勇拒守久之金人尽锐来攻守卒多夜遁李成开水门导敌入伯温登堞楼谓左右曰吾兄弟使节拥麾受方面之寄今不幸失利当以死报国吾弟已被执我不可再辱汝等宜自逃生即拔剑杀家属投井中自引刃植柱刺心而死金人登楼见其抱柱如生无不嗟叹弟守正幼尝质于穆呼哩后为平阳守活俘囚甚众以功授河东南路兵马都元帅岁庚寅上尝晋阳合兵攻汾州将陷守正以义赴援众寡不敌别遣老弱百人曳薪扬尘多张旗帜敌惧遂解去汾人持牛酒迎犒曰幸公元是州德甚大愿奉是州以从隰州叛守正往击之中矢伤足及归创甚会金将完颜哈达攻平阳守正裹创战歿大帅以其兄守忠代之金将赫舍哩真袭击平阳行营守忠出援次高粱师溃入城副帅瓜尔佳常德潜献东门纳金兵城遂陷金人执守忠至汴诱使降守忠骂之金人怒置铁笼中火炙死 【按元史李守贤传金大安初守贤暨兄庭植弟守正守忠从兄伯通伯温归款于穆呼哩太祖即命庭植为崇义军节度使守贤为锦州观察使守忠为都元帅守河东是伯温与守贤守正皆兄弟而本传云伯温为守贤之孙穀之子又以守正为伯温之子舛误殊甚以时与事考之有不待辨而自明者今据改】

△石珪

石珪泰安新泰人宋祖徠先生守道之裔孙也世以耕读为业体貌魁伟倜傥不羈金贞佑南渡兵戈四起珪率少壮负险自保与滕阳陈敬宗结义山东宋将郑元龙以兵来攻珪败之于亳阳乘胜入盱眙会宋贾涉诱杀涟水军统辖季先人情不安众迎珪为帅称太尉太祖遣使与宋议和珪令麾下刘顺直抵塔实干城入覲太祖慰劳顺且敕珪曰如宋和议不成吾与尔永结一家之好顺还告珪心感服日夜思降未几宋果渝盟珪弃其妻孔氏子金山仗剑渡淮宋将追之曰太尉回当完汝妻子珪不顾宋将沈其妻子于淮珪遂率顺来归穆呼哩穆呼哩承制授珪济兗单三州总督后金弃东平珪与严实分守之收辑济兗沂滕单诸州加山东诸路都元帅领兵破曹州与金将郑从宜连战数昼夜粮绝援兵不至军无叛意珪临阵马仆被擒囚至汴金主壮其人诱以名爵欲使揖珪愤然曰吾身事大朝官至光禄复能受他国封耶假我一朝当缚尔以献金主怒蒸杀于市其麾下立社兗州祀焉

△攸哈喇巴图尔

攸哈喇巴图尔渤海人初名兴格世农家金末避地大宁会蒙古兵至出保高州富庶寨射猎为食穆呼哩率兵攻寨寨破奔高州及兵围城下令曰能斩攸兴格首以降民皆获生守者召谓曰汝奇男子吾宁忍断汝首汝其往降乎不则不城生灵无噍类矣兴格乃折矢出降诸将怒欲杀之穆呼哩曰壮士也留之为吾用俾隶麾下从攻通州一夕造炮三十云梯数十附城州将惧乞降穆呼哩以其功闻太祖赐名哈喇巴图尔从穆呼哩略地燕南为先锋至大名金将登城督战哈喇巴图尔射之中左目其部将开门南奔追杀殆尽授河东北路兵马都元帅镇太原时太原新破至则下令军中凡俘获人口有亲者听赎无贖者官为赎之民得完聚者众辛巳金兵攻寿阳县王胡庄垂破时左右裨将各分兵守险城中见卒不满百哈喇巴图尔夜半引甲骑十余人救之大战天将明金兵遁去乘虚捣太原西门俘获其家属哈喇巴图尔闻之径趋西山复夺以还时太原诸邑皆平唯石家昂及孟州陵井寨忻州清泉寨为唇齿未下甲申将兵至陵井遣卒叩寨门诈曰纳粮守者弗悟门启径入众惊溃遂平其寨清泉寨石家昂皆降会奸人夜献太原东门于武仙仙引兵入诸将自城外呼曰攸哈喇巴图尔汝当出对曰真定史天倪平阳李守忠隰州田雄皆失守矣我又弃太原将何面目见主上乎家属任公等所俘吾誓与城同存亡遂歿于阵

△任志 【任存】

任志潞州人穆呼哩略地至潞州志首迎降俾充元帅收辑山寨数与金兵战辄胜金擒其长子如山以招之曰降则尔子得生不则死志曰我为大朝之帅岂爱一子亲射其子殪之穆呼哩尝召诸将议事志亦预征道经武安其县已反志死之其子存袭元帅职金将武仙攻潞州存亦战死诏有司廩给其妻孥仍赐第居之存子立后授潞州长官

△耶律特默

耶律特默契丹人父酬格仕辽为都统辽亡不屈节夫妇俱死金主悯其忠授特默为都统岁甲戌金主徙汴特默及其子天佑率众三万来归授帅府监军从元帅史天倪略赵州平棘栾城元氏柏乡赞皇临城等县又从太师穆呼哩收邢洺磁相怀孟诸州有功承制授洺州元帅进兵临泽潞降其民六千余户迁河北西路安抚使致仕居真定天佑袭职金降将武仙据真定叛杀天倪特默父子夜踰城出会天倪弟天泽还自北京遇诸满城合诸军南与贼战遂复真定朝命以天泽袭兄爵而以天佑镇赵州仙复犯真定天泽潜师出藁城特默与其妻舒穆鲁氏及家孥之在真定者皆陷仙遣其仆持书诱天佑曰汝能诛赵州官妻以降当活汝父母仍授汝元帅不尔尽烹之特默密令其仆语天佑曰仙贼狡猾汝所知也毋以我故堕其机穿以亏忠节且忠孝难两全汝能固守不失国家大计我视刀锯甘如饴矣天佑恸哭驰至藁城以贼书示天泽并述父言天泽曰王陵之事照耀史册汝能遵父命忠诚许国功不在王陵下天佑乃趋还赵壁率众殊死战仙怒尽杀其家一十八人及战仙兵屡挫监军张林密构仙党启关纳贼天佑仓皇巷战身被十余创斩关出会天泽兵夹击杀林加赵州安抚使以伤惫解官卒

△张万嘉努 【保通】

张万嘉努父札呼岱为船桥总管万户从西征歿于军中统二年万嘉努从都元帅耨埒入朝授以父官宋兵入城都从行院阿托击破之至元四年从攻泸州大败宋军杀伤过半七年从攻重庆破朝阳寨围嘉定栅平康太和怀远诸寨分余戍守时诸将攻泸州往往失利乃诣阙请自任以攻取之效许之遂率舟师百五十艘自桃竹滩至折鱼滩分守江面谨风火严号令克日进攻先据神臂门为梯冲登城遂拔之大军围重庆将其众断马湖江分兵水陆往来为游徼复以所部转饷成都及下流诸屯寻迁招讨使与都元帅伊勒哈讨亦奚不薛蛮平之进副都元帅诏其子孝忠为船桥万户以万嘉努将四川湖南兵征哈喇章时云南悉昌多兴罗罗诸蛮皆叛杀掠人民州郡莫能制遂移兵讨之歼其众二十年从征緬战死云南王命其子保通将父军再征緬入太公城有功袭副都元帅

后从征至甘州仙丹亦战死孝忠少从父军中习攻战
至元十九年从讨亦奚不薛蛮遇其众于会灵关追玉沙溪败之进攻龙家寨阿那关克
之遂攻亦奚不薛营大破之又以八百人败阿永蛮于
鹿札河乘胜至打鼓寨连破之诸蛮平还军成都二十二年从讨乌蒙蛮复支降大坝都
掌蚊子诸蛮二十七年诏从西征至沙瓜诸州还以本
军万户钺成都卒 【按张万嘉努郑义赵恰尔董士元樊楫五传元史俱系列传今据时
事移入忠义】

△郑义 【郑德温 郑江】

郑义河闲人初事太宗为山东路都元帅兼景州军民人匠长官从伐金岁壬辰与
敌战于归德死之弟德温袭从攻徐州陷阵死子泽袭
从万户史天泽出征多立战功年老弟江代其职世祖北征授侍卫亲军副都指挥使中
统三年李璫叛据济南世祖令各州县长官子弟充千
户于是以江子郇为千户领景州新签军败贼众于王马桥璫平郇以例罢江升为武卫
亲军都指挥使至元八年从攻襄阳歿于阵郇袭

△赵恰尔

赵恰尔未详何处人始以父任为千户中统三年守东川从元帅奇彻数败宋军又
从攻大良坪宋咎万寿运粮至渠江之鹅滩恰尔邀夺
之斩首五十余级恰尔亦被三创矢镞中左肩不出奇彻惜其骁勇敢死囚二人刳其肩
视骨节浅深知可出即为凿其创拔镞出之恰尔神色
不为动至元初为东川路先锋使寻兼京兆延安两路新军戍东安虎啸山两城宋阳立
以兵护粮至恰尔率所部兵战于三重山立败走弃其
粮因尽获其甲仗旗帜而还屡从行政攻钓鱼山又击败宋将张瑄兵于武胜军十二年
进围重庆宋将赵安勒兵出恰尔与战至二鼓敌众大
溃行院上其功未报而疾作乃遣往泸州治疾至之夕泸州复叛恰尔舆疾出战与从者
二十人皆死之子世显

△董士元 【哈喇图】

董士元一名布哈字长卿文炳长子也善骑射中统初袭叔父文蔚为千夫长出师
南征襄汉戍淮西有功从大帅博尔欢攻扬州驻师湾
头堡时方大暑溥尔欢病还京师以行省阿里代领诸军扬州守将姜才乘隙来攻阿里
素不习兵率轻骑数百出堡士元与别将哈喇图以百
骑从之日暮宋兵至者万余 【按续通鉴纲目姜才闻米运将至出步骑五千战于丁村
自夜达旦元兵多败董士元战死与本传所戴略异
】 士元谓左右曰大丈夫报国正在今日勿惧也方整阵欲战阿里趣令左旋已乃遁去
士元与哈喇图以部兵赴敌死战鼓噪震地泥淖马不

能驰乃弃马步战至四更敌众始退及旦阿里来视战地见士元卧泥中身被十七枪甲裳尽赤肩舁至营而绝哈喇图亦战死江淮既平巴延入朝言于帝曰淮海之役所损者二将而已帝问其人以士元与哈喇图对帝曰布哈健捷过人昼战必能制敌夜战而死可惜也追封赵郡公谥忠愍

△樊楫

樊楫冠州人初为军吏从参政阿尔哈雅下鄂江陵有功授都事宋平从入朝改员外郎从定广西攻厓山累擢金荆湖占城行中书省事从征交趾无功而还至元二十四年复征交趾进行者参知政事时三道进兵皇子镇南王托欢与右丞程鹏飞分二道一入永平一入女儿关楫与参政乌玛喇将舟师入海与贼舟遇安邦口楫击之斩首四千级获船百余艘兵杖无算遂至万劫江合镇南王兵进攻交趾陈日烜弃城走敢喃堡二十五年王攻敢喃堡破之日烜走入海中交人皆匿其粟而逃张文虎馈饷不至天暑食且尽于是王命班师楫与乌玛喇将舟师还为贼邀遮白藤江潮下楫舟胶贼舟大集矢下如雨刀战自卯至酉楫被创投水中贼钩执毒杀之至顺元年赠上党郡公谥忠定

△班巴尔 【巴拉 布呼齐】

班巴尔哈坦氏祖莽赉阿楚克父托伦色勒必从太祖征伐皆有功世祖即位以班巴尔旧臣子孙擢万户命领诸部军马屯守欠欠州至元十二年亲王锡里济图下特穆尔叛奔海都班巴尔以闻且愿提兵往讨未得命为彼所袭死焉图卜特穆尔取其二子巴拉布呼齐分置左右居岁余巴拉阴结其近侍图复仇谍泄南奔追执之诘曰我遇汝厚甚反为此耶巴拉曰汝背叛君上害我父掠我亲属我誓欲杀汝以报君父仇今力穷被执从汝所为逼令跪不屈与弟布呼齐同被害

△绰尔 【绰海 伯特】

绰尔博苏氏世居汴梁阳武县从太祖收附诸国有功从征金歿于阵子绰海从征河南山东复歿于阵子伯特将其父军从攻鄂州继从太子和克齐西征大理国复歿于阵子阿尔察至元五年授蒙古千户从围襄樊复渡江夺阳罗堡岸口以功进蒙古军总管管领左右翼两万户军既下广德从平章阿尔哈雅征海外国率死士鼓战船进夺岸口擒勇士赵安等十六年命管领蒙古侍卫军以疾卒于军 【按绰尔三世皆以身殉国元史旧系列传令移入忠义】

△伊埒默色 【呼都克哈斯 唐庆】

伊埒默色奈曼氏岁丁丑太宗为皇子命与断事官呼都拉同署戊戌又同阿穆鲁

巴图尔充达噜噶齐破南宿州辛丑使宋议和从行者七十余人伊埒默色语之曰吾与汝等奉命南下楚人多诈倘遇变当死焉母辱君命已而驰抵淮上宋将以兵胁之降伊埒默色曰吾持节南来以通国好反诱我以不义有死而已辞气慷慨不少屈宋将知其不可逼乃囚之长沙飞虎寨三十六年而逝世祖深悼之诏复其家以子呼都克哈斯为达尔罕日给粮食其家人呼都克哈斯自陈于帝愿为国效死为父雪耻帝嘉纳之授以土均州监战万户至元十八年以招讨使将兵征日本死于敌【按伊埒默色使宋誓死不屈拘囚之岁倍于郝经子呼都克哈斯复死于征日本兹由列传移入忠义而以唐庆附焉】唐庆不知何许人事太祖为管军万户岁丁亥使金壬辰太宗复以庆为国信使取金质子督岁币以金曹王额尔克【据金史增】来见帝于官山再使庆往令金主黜帝号称臣金主不听庆辄以语侵之金君臣遂谋害庆夜半令兵入馆舍杀之及其弟山禄兴禄并从行省十七人既灭金购求庆尸不得厚恤其家诏官其子仍计其家人口给粮以养焉【按金哀帝纪飞虎军事申福蔡元擅杀北使唐庆等三十余人与此互异】

△哈喇布哈

哈喇布哈伊楞特穆尔子也幼侍母鄂通氏居益都尝叹曰幼而不学有不堕吾宗者乎父时以断事官建牙保定哈喇布哈往白其志父奇之俾习辉和尔书及经史记通精敏世祖中统三年李璫叛其母携季子图烈布哈避地登莱闲音问隔绝号泣彻昼夜继从从叔父萨奇苏平贼山东卒奉其母以归萨奇苏深器之言于世祖召给宿卫尝以事至益都于四脚山下置广兴商山二治以劳授商山铁冶都提举未及代以职让其弟时大兵南伐馈运繁兴被选为行都漕运使江南平上蔬言亲宗室礼大臣以存国家之体兴学校奖名节以励天下之士正名分严考课以定百官之法通泉币却贡献以厚生民之本又言江南新附宜招旧族力穡通商弛征薄入以抚驯其民不然恐上烦宵旰之虑帝多采用其言时阿哈玛特专政以漕粮漂溺亏耗责偿舟人哈喇布哈伏阙抗言量之踦赢出于原降而水道之虞非人力所及且彼虽罄其家不足以偿苟朝廷必不任亏损臣请独当其辜诏勿治阿哈玛特衔之出为宁海路达噜噶齐历改广东都转盐使讨平陈良臣之乱条盐法之不便者悉除之剧贼欧南喜僭王号聚众至十万与都元帅图鲁卜哈雅等分兵搃之未几右丞索多督兵征占城交趾属护饷道北至东莞博罗界遇贼欧锤等横绝石湾锋锐甚哈喇布哈且战且行矢竭马创徒步格鬪为所执贼欲

奉之为主不屈遂遇害赠户部尚书谥忠愍其后子孙
相继登第人以为忠义之报云

△刘天孚

刘天孚字裕民大名人由中书译史历知许州属襄城与叶县接壤南为湛河襄城
民食沧盐叶民食解盐刻石河南岸为界叶令有贪者
阴徙石于北二里诬其民食私盐逮治百余家两县鬪不已天孚为考其原界移石故处
而叶令被罪去岁旱蝗天孚令民出捕俄羣鸟来啄蝗
为尽明年麦熟时有青虫如蝻食麦忽生大花虫尽嚼之许人立碑颂其事仁宗延佑中
迁知河中府视事甫两月会周王和实拉出镇云南道
经陕西行省丞相阿斯罕意不平谋举兵向阙先入河中方坐府治号令诸军天孚佩刀
直前众遏之不得进退谓幕僚王从善等曰吾家本微
贱荷朝命至此今不幸遭大变何忍从逆而负上恩哉且与其辱于逆贼之手吾宁蹈河
以死遂拂衣出时天寒河冰方坚天孚拔所佩刀斫冰
开北望再拜已脱衣帽岸浒投水中死赠彭城邵侯谥毅

△萧景茂

萧景茂漳州龙溪人性孝友家贫力农顺帝至元四年南胜县民李智甫作乱掠龙
溪景茂与兄佑集乡丁拒之据观音山桥险与贼战败
被执贼胁使从己景茂曰我生为大元民死作隔洲鬼岂从汝为逆耶隔洲其所居里也
贼怒缚景茂于树脔其肉使自啖景茂益愤骂贼遂以
刃决其口至耳旁骂不绝声而死朝命褒之仍给钱以葬

△张桓

张桓字彦威真定藁城人父木知汝宁府因家焉桓以国子生释褐累官陕西行台
监察御史以言事不合去刘福通陷汝宁桓避居确山
贼知其名袭获之罗拜请为帅弗听囚六日拥至渠魁前桓据榻坐与之抗论顺逆其徒
摔桓起跪桓詈叱弥厉屡唾贼面贼谓曰汝但一揖亦
怒汝死桓瞋目曰吾恨不能斩逆首肯听汝诱胁而折腰哉贼知不可屈遂刺之后语人
曰张御史真铁汉害之可惜事闻赠礼部尚书谥忠洁

【察辍耕录云桓谢职居确山县而陷贼贼魁素闻桓有治绩置上座胁之受伪官桓唾
之遂缚桓妻孥九人至先杀妾次杀子女以及妻每杀
人一则谓桓曰御史若降余可免桓弗为动此至正辛卯八月事所载较详】

△李黼 【李冕 李秉昭】

李黼字子威颍州人父工部尚书守中性卞急遇诸子极严每一饮酒辄半月醉不
解黼百计承顺求宁亲心不可得尝跪而自讼无几微
厌怠意初补国学生泰定四年遂以明经魁多士授翰林修撰历监察御史首言禴祠烝

尝古今大祭今太庙唯二祭而日享佛祠神非礼也宜
据经行之成均教化之基不当隶集贤宜属省臣兼领诸侯王岁赐有定额分封易代之
际世系戚疏无成书可考宜仿先代修正玉牒皆不报
迁宣文阁监书博士兼经筵官每以圣贤心法为帝言之命巡视河渠黼上言曰蔡河源
出京西宋以转输之故平地作堤今河底填淤高出地
面秋霖一至横溃为灾宜按故迹修浚他日东河或有不测之阻江淮运物当由此分道
达京万世之利也亦不报出为江州路总管至正十一
年盗起北据徐蔡南陷蕲黄焚掠数千里九江居下流为江东西襟喉地黼治城壕修器
械募丁壮分守要害宜上攻守之策于行省请兵屯江
北以扼贼冲不报黼叹曰吾不知死所矣十二年徐寿辉兵渡江陷武昌威顺王及省臣
相继遁舳舻蔽江而下江西大震贼乘胜破瑞昌右丞
博罗特穆尔方治军江上闻之亦遁黼孤立辞气愈奋厉时黄梅主簿伊逊特穆尔愿出
击贼黼大喜向天沥酒与之誓贼游兵已至境急檄诸
乡落聚木石于险塞处遏其归路仓卒无号乃墨士卒面统之出战黼身先士卒大呼陷
阵伊逊特穆尔继进贼大败逐北六十里还谓左右曰
贼不利于陆必由水道以舟薄我苟失备御吾属无噍类矣乃以长木数千冒铁椎于杪
暗植沿岸水中逆刺贼舟谓之七星椿会西南风急贼
舟数千果扬帆顺流鼓噪而至舟遇椿不得动黼帅将士奋击发火翎箭射之焚溺死者
无算行省上其功拜江西行省参政行江州南康等路
军民都总管便宜行事命未下而贼势更炽荆湖淮甸守臣往往弃城遁黼提孱旅中外
援绝贼薄城黼引兵登陴布战具贼已入与之巷战知
力不敌挥剑叱贼曰杀我毋杀百姓贼自项背来刺黼堕马与从子秉昭俱骂贼而死郡
民相率具棺葬于东门外黼兄冕居颖上亦死于贼秉
昭冕季子也事闻封黼陇西郡公谥忠文诏立庙江州赐额曰崇烈官其子秉方集贤待
制【案辍耕录云初武昌陷时黼谓子秉方曰我国
之守臣当死此士汝可奉母往下江依伯父以存吾后秉方曰父死国子死父有何不可
黼怒曰汝不遵命是不孝也秉昭亦劝其兄曰若不去
则叔父无后不孝莫大于是某当与叔父同生死矣秉方不获已买舟奉母行去半月
黼死云云李氏一门忠孝史传未及详载】

△李齐

李齐字公平广平人家贫客于江南工辞章元统元年赐进士第一历签河南淮西
廉访司事移知高邮府至正十三年泰州白驹场亭民
张士诚为乱破本州岛淮南行省【淮南史传讹河南据续宏简录改】遣齐往招降
被拘久之其党自相攻杀始纵齐归士诚佯请降行省授

以民官未几复鼓变杀参政赵珽掠官库走入得胜湖俄陷兴化时左丞奇彻图方镇高邮使齐守甓社湖齐既出高邮遂陷贼蔓延入宝应会有诏赦叛者使至高邮不得入贼给曰必李知府来乃受诏行省强齐往至则下齐狱中齐益声言士诚本无降意特遣延为缮饬计耳官军谋知之进攻城士诚呼齐出使跪齐叱曰吾膝如铁岂肯为贼屈士诚怒扼之跪齐立而诟乃曳倒搥碎其膝而刖之论者谓大科三魁若台哈布哈没海上李黼隕九江泊齐之死皆不负所学云

△褚布哈 【褚伴格】

褚布哈字君实隰州石楼人泰定初补中瑞司译史历签河西道廉访司事未几移淮东红巾贼蔓延两淮势张甚布哈行郡至淮安极力为守御计贼至多所斩获且请知枢密院娄章以判官刘甲守韩信城相犄角为声援复上章劾总师逗挠状朝廷录其功升廉访使甲有智勇与贼战辄胜贼惮之布哈颇赖焉总兵者嫉其劾已檄甲别将兵击贼冀以困布哈甲去韩信城陷贼乃掘堑相衔捷水寨以围淮安布哈知事危退入城时城三面皆贼惟北门通沐阳倚其刍饷而赤鲤湖为贼据沐阳之路又绝食且尽攻围日急总兵者屯下邳按兵不出遣使十余辈告急皆不应凡草木螺蛤鱼蛙燕鸟及鞞皮革箱弓之筋皆尽而后人相食撤屋为薪民多露处力穷城陷布哈犹据西门力鬪中伤见执为贼所禽次子伴格冒刃护之亦见杀时至正十六年十月乙丑也布哈守淮安五年身经数百战精忠大节人比之张巡云朝廷闻之追封卫国公谥忠肃

△郭嘉

郭嘉字符礼濮阳人祖昂父惠俱以战功显嘉慷慨有大志登泰定三年进士第累官广宁路总管属盗起诏团结义兵嘉招集民数千教以坐作进退号令齐一赏罚明信东方甲兵之精称嘉为最至正十八年刘福通党由大同焚掠上京嘉躬率义兵出御既而辽阳陷孤城无援嘉叹曰自我祖父有勋王室今之尽忠吾分内事也况身守此土当生死以之余不足恤顷之贼至围城亘数十里有大呼者曰辽阳我得矣何不出降嘉挽弓射呼者中其左颊堕马死贼稍引退嘉开西门逐之贼大至力战以死事闻封太原郡公谥忠烈

△喜同 【塔布岱】

韩因字可宗汴梁人少习举子业负气不羣刘福通据汝宁官军讨之久不下会朝廷诏赦叛逆募可持诏入贼者因应命假以唐州判官使焉贼渠恐其党心摇止因于外纳诏不读旋纵因归报因出乘马周贼屯大呼曰汝辈

好百姓何不出降归田里而甘从逆贼驱使耶众愕贻
相顾贼渠追因责其所言因极口肆骂贼怒寸割之

△韩因

韩因字可宗汴梁人少习举子业负气不羣刘福通据汝宁官军讨之久不下会朝廷诏赦叛逆募可持诏入贼者因应命假以唐州判官使焉贼渠恐其党心摇止因于外纳诏不读旋纵因归报因出乘马周贼屯大呼曰汝辈好百姓何不出降归田里而甘从逆贼驱使耶众愕贻相顾贼渠追因责其所言因极口肆骂贼怒寸割之

△卞琛 【卞小十 李仲亨】

卞琛大名人家世力农早游学京师补国子生既而丁母忧仍服农于家至正十二年邻郡盗起剽掠至其境琛与从子小十府史李仲亨等协谋统丁壮数百人出击民兵无弓矢直以钩鉏白梃当贼贼矢雨集琛众溃散被擒仲亨小十皆死贼素知琛名谓曰从我解汝缚不从杀汝琛唾曰我国子生也视汝辈真狗彘耳吾宁义死不从贼生遂见杀

△乔彝 【张崑起 王佐 吴德新】

乔彝字仲常晋宁人性高介有守至正十八年叛将王士诚袭晋宁城陷城中死者十二三彝家有大井乃令妻子婢辈循次投井中而已随赴之士诚素知彝名使人即其家邀致之至则已死矣贼平赐谥纯洁有张崑起字傅霖汾州人尝为国子助教免归盗自晋宁陷汾州崑起与妻赴井死王佐字符辅晋宁人贼至为所获诟贼不辍因见害又有吴德新者字止善建昌人工医留京师偶往晋宁会盗至见执胁使降不从贼加白刃颈上德新骂不已乃曳之井上阳欲挤之德新即自投井中仰骂贼贼下射矢贯其顶骂益力贼怒以长枪刺之复怜其死以土埋井而去

△颜瑜 【曹彦可】

颜瑜字德润曲阜人兗国复圣公五十七代孙也以行谊举为邹及阳曲两县教谕至正十八年义兵万户田丰叛陷东平瑜携家走郛城道遇贼曰尔何人瑜曰我东鲁书生也贼曰尔书生可从我见主师瑜骂曰尔贼何主师耶贼怒欲杀之瑜无惧色复使之写旗瑜大诟曰尔本大元百姓会天下乱募尔为兵而反为叛逆我腕可断岂能为尔写旗从逆乎贼以枪则杀之妻子皆被害有曹彦可耆亳州人当妖寇起里中多无赖子不知书既破亳揭帛于竿羣趋彦可家劫之使写旗彦可辞乃迫以刃彦可唾曰我儒者知有君父岂为汝写旗者贼怒遂见害年七十矣事闻赐节愍

△王士元 【王致微】

王士元字尧佐恩州人泰定四年进士由棣州判官累迁知磁州直军兴馈饷日繁士元惟惜民力虽被将士诃责弗顾也改知浚州州滨黄河尝经盗贼雉堞不完至正十七年贼复迫城守兵溃散士元坐堂上顾其子致微使避曰吾守臣居此职也若可逃生子侍立不忍去贼前问曰尔为谁士元叱曰我王知州也强贼识我否则欲缚之士元奋拳殴贼贼怒并其子杀之

△杨朴

杨朴字文素河南人早以文学推择为吏任滁州全椒县尹行省参政额森总兵于滁纵饮不理军事至募城门不钥寇入纵火犹张烛挥杯急踰城走朴度必死尽杀其妻女朝服坐堂上盗欲降之朴指妻女示曰我已戕我属正欲死官守耳尚何云哉连唾之贼絜朴倒悬树上割其肉至尽犹大骂弗绝

钦定续通志卷五百二十

●钦定续通志卷五百二十一 忠义传十四

忠义传

元 【二】

○元二

赵琬【琬】 孙撝 石普 盛昭 杨乘

尼雅斯拉鼎【宝通 海榴丹 锡卜沙鲁】

伊嚕布哈【罗阿 伯嘉努】 台哈布哈【李辅德 彻辰 张君璧】

巴延布哈德济【大胜努 该里丹 蔡诚 蒋

广 陈受】 樊执敬 全布延萨里【噶海齐】 桑节【拜布哈】

道通 余阙【李宗可纪守仁陈彬金

承宗特穆尔布哈段桂芳和斯布哈锡里卢廷玉葛延龄邱登许元琰谔都玛勒黄寅孙

黄多伦岱杨恒余中陈巨济】 周镗【谢一鲁】

聂炳【达尔】 刘耕孙【焘孙硕】 俞述祖 桂

鄂勒哲【金德】 绰罗【冯三】 博罗

特穆尔【玛哈实哩】 彭庭坚 王巴延【相】 托里布【哈达兰

布哈哈奇尔吴布延阿拉克布哈迪延布哈】 刘

浚 伊苏台 陈君用 布琳尼敦【上都】 绰哈【黄

绍 胡斗元 黄云 民安图】 魏中

立【于大本】

赵琬【赵琬】

孙馮

石普

盛昭

杨乘

尼雅斯拉鼎 【宝通 海瑠丹 锡卜沙鲁】

伊嚕布哈 【罗阿 伯嘉努】

台哈布哈 【李辅德 彻辰 张君璧】

巴延布哈德济 【大胜努 该里丹 蔡诚 蒋广 陈受】

樊执敬

全布延萨里 【噶海齐】

桑节 【拜布哈】

道通

余阙 【李宗可 纪守仁 陈彬 金承宗 特穆尔布哈 段桂芳 和斯布哈 锡里卢 廷玉 葛延龄 邱登 许元 琰 谔都玛勒 黄寅 孙黄 多伦 岱 杨恒 余中 陈巨济】

周镗 【谢一鲁】

聂炳 【达尔】

刘耕孙 【刘焘孙 刘硕】

俞述祖

桂鄂勒哲 【金德】

绰罗 【冯三】

博啰特穆尔 【玛哈实哩】

彭庭坚

王巴延 【王相】

托里布哈 【达兰布哈哈 奇尔 吴布延 阿拉克 布哈 迪延布哈】

刘浚

伊苏台

陈君用

布琳尼敦 【上都】

绰哈 【黄绍 胡斗元 黄云 民安图】

魏中立 【于大本】

△赵璉 【赵琬】

赵璉字伯器 宏伟之孙也 至元年登进士第 历官抗州路总管 浙右病徭役民充坊里正者 皆破家 璉议以属县坊正为雇役里正 用田赋

以均之民咸以为便至正中河南盗起湖广荆襄皆陷两淮骚动朝廷析河南地立淮南江北行省于扬州以璉参知政事分镇真州璉方病即與疾行会张士诚起海滨陷泰州兴化高邮知府李齐往招之士诚伪请降且乞从征自效乃移璉镇泰州璉趣士诚治戈船趋濠泗士诚疑憚不肯发既又觐知璉无备遂复反夜四鼓纵火登城璉力疾扞佩刀上马与贼鬪市衢诘之曰汝辈罪在不赦今既宥尔诛戮又锡以名爵朝廷何负于汝乃复反耶即驰骑奋击贼以槊撞璉坠地璉瞋目大骂死之其仆杨儿以身蔽璉亦见杀事闻赙钞三百錠仍官其子錡弟琬字仲德仕至台州路总管至正二十七年方国瑛以舟挟琬至黄岩琬潜登白龙奥止民舍绝粒七日人劝之食辄瞑目却之而死

△孙撝

孙撝字自谦曹州人至正二年进士原官济宁路录事张士诚据高邮或谓其有降意朝廷遣翰林待制乌玛尔为使前往招之而用撝为辅行撝家居不知也中书加撝集贤待制给驿就其家强起之抵高邮士诚不迓诏撝等既入城反复开谕士诚等佯竦听已而拘之他室或日一馈食欲胁之降撝唯诟斥乃令其党捶撝肆其陵辱撝不为动及士诚据平江撝与其部将张茂先谋持撝所授站马札子遣壮士赴镇南王府约日进兵谋泄为所害后贼中见失节者辄自相嗤曰此岂孙待制耶事闻追封曹南郡公谥忠烈

△石普

石普字符周徐州人至正五年进士授国史院编修官改经正监经历淮东西盗起枢密院董钥荐普材于朝会丞相托克托讨徐州命从行徐平历升枢密院都事从守淮安时张士诚据高邮普陈破贼之策曰高邮负重湖之险地皆沮洳骑兵卒莫能前顾假步兵三万保取之高邮既平则濠泗易破普请先驱为天下忠义倡托克托壮之命权山东义兵万户府事招义民万人以行而汝中柏者方用事阴沮之减其军半初令普便宜行事及行又使听淮南行省节制普行次范水砦日未夕普令军中具食夜漏下三刻衔枚趋宝应即登城树帜城上贼大惊溃乃水陆进兵乘胜拔十余砦直抵高邮纵火烧关门贼惧将弃城走总兵者遣军千骑突出普军前欲收先入功贼以死扞城总兵军即驰回普止之不可遂为贼所蹂践率坠水中普军亦乱贼乘之普血战良久直入贼阵援兵忌普成功按不进从者仅三十人搏战至日西被创堕马复步战数合贼益至指曰此必头目须生致之普叱曰我即石都事何云头目左肋为贼枪所中犹手握其枪刺贼贼众攒枪来刺普与从者力尽俱

死

△盛昭

盛昭字克明归德人由儒学官累迁淮南行省照磨会使往高邮谕张士诚不得达遽还诡称贼已迎降拜但乞名爵行省不虞其欺再遣昭入高邮授以万户告身【按元史本传作授所与士诚官今据明史张士诚传改】士诚拒不纳拘诸舟中昭语所从吏曰吾之至此有死而已既而官军逼高邮士诚授招以兵使出拒昭叱曰吾奉命招谕汝汝拘留诏使罪不容诛反欲吾从汝为贼耶贼怒先割其臂肉而后磔之

△杨乘

杨乘字文载滨州渤海人至正初为介休县尹民饥散为盗乘立法招之使自新皆弃兵愿为良民后累官江浙行省员外郎坐海寇掠漕舟免官寓居松江张士诚入平江其徒郭良弼董绶极称乘才士诚遣张经招之乘曰良弼等皆名臣今已失节顾欲引我济恶耶且让经平日读书所学何事经俛首不能对乘与客痛饮竟日不言客问盍行乎曰乘以一小吏致身显官有死无贰何行之有经促其行愈急乘乃整衣冠自经死【按辍耕录云乘早为天官小史辟中书参议掾历官谷城介休二县尹拜监察御史擢江浙行省员外郎是年杭州陷乘坐黜退居松江青龙镇后御史言乘职在赞理不当罪宜复其官事遂白十六年张士诚陷平江遣所署官吴县丞张经赍礼币造请乘遣人告曰吾废处田里久矣不足以辱使者吾当择日受命请以币置门外经如其言乘命子道卓具牲醴告祖祢既竣事复命酒饮坐至夜分二子尚立侍命曰若且休吾将就寝诘旦道等怪寝门未启发视之则已自经得手书大约言死生昼夜之理且以得全晚节为快所载与史传互有异同】

△尼雅斯拉鼎【宝通 海瑠丹 锡卜沙鲁】

尼雅斯拉鼎字士瞻其父玛哈穆特从征襄阳以劳擢浚州达噜噶齐因家大名尼雅斯拉鼎起身乡贡进士淮东宣慰司辟为掾至正十年泰州贼起尼雅斯拉鼎建议筑四城立外寨捷堤穿河募兵与贼抗行省檄其提战舰巡江驻兵龙潭口贼不得渡屡有战功留守芜湖江口泰州李二作乱移捍高邮得胜湖贼船乘风来攻击败之其党张士城复杀李二为乱袭高邮屯军东门尼雅斯拉鼎以舟师会真滁诸军讨之距三垛镇贼众猝至麾兵挫其锋后贼鼓噪进更发火镞射之死者蔽流而下贼繚船于背尽锐来攻诸官军皆遁尼雅斯拉鼎以死自誓谓其三子宝通海瑠丹锡卜沙鲁曰汝辈可脱走三子不肯去皆死之事闻追赠元帅府经历

△伊噜布哈【罗阿 伯嘉努】

伊噜布哈字彦明蒙古苏达苏氏容貌魁伟未冠父图卜特穆尔以千户戍越因受业于韩姓粲然成章就试江浙乡闾中第一元统元年登进士第授台州路录事司达噜噶齐县未有学乃建孔子庙又延儒士为师以教后进丁外艰至正元年起为都水监经厯递迁吏部员外郎两奉命余粟江浙民不扰而事集既而丁母忧中书起之不应会太师右丞相托克托南征【按托克托传至正十四年张士诚据高邮久不下诏托克托总诸王诸省军讨之】辟从军事督馈饷用舒升吏部郎中寻拜监察御史上疏言天子宜躬祀南郊殷祭太室又言当简老成重臣辅导太子帝皆嘉纳升吏部侍郎铨选公允适廷议欲于河闲长芦置局造海船三百艘伊噜布哈具言其非便忤议者意迁工部侍郎复徐保定路达噜噶齐保定岁输粮于新乡苦弗便伊噜布哈请输京仓以便之除吏部尚书保定父老百数诣阙乞留遂以尚书仍知郡事会贼北渡河口修城浚濠为战守具寻兼统黑军数千及团结西山八十二寨义军势大张贼再侵境皆不利遁去召还为详定使保定民不忍其去绘像祀之去保定一月而城陷朝廷以其夙负民望令入城招谕抵城贼壁壁不出民多窃出谒拜者改十都路达噜噶齐转吏部尚书会剧贼程思忠据永平诏往招抚之众难其行伊噜布哈毅然曰臣死君命分也竟入城谕贼贼皆感泣拜降还迁翰林侍讲学士俄复为大都路达噜噶齐入见帝帝谕以毋峻威母弛法或挟权以干汝即以闻寻有权臣以免役事来谒伊噜布哈斥曰圣训在耳不敢违拜江南行台御史中丞乃由海道趋绍兴为政宽猛不颇既而除浙西廉访使会张士诚据浙西僭王号度弗可与处乃令侄同寿具舟载妻子而匿身木柜中蔽以藁秸脱走至庆元士诚部下知之追至曹娥江不及而返俄改山南道廉访使浮海而往抵铁山遇倭贼船乃率同舟人力战拒之贼登舟攫伊噜布哈令拜不屈遂遇害当遇害时摩家奴诺海刺杀首贼次子枢密院判官罗阿侄伯嘉努扞敌亦死之同舟死事者八十余人事闻溢忠肃【按伊噜布哈闲关王事率以身殉元史旧系列传今移入忠义】

△台哈布哈【李辅德 彻辰 张君璧】

台哈布哈字兼善巴约特氏初名塔斯布哈文宗赐以令名世居白野山父塔布台入直宿卫厯仕台州录事判官遂居于台家贫好读书能记问集贤待制周仁荣养而教之年十七江浙乡试第一对策大廷以进士及第授只贤修撰转秘书监著作郎拜江南行台监察御史时御史大夫托欢怙势贪暴台哈布哈劾罢之文宗建奎章阁学士院擢为典签拜中台监察御史顺帝即位加文宗后太皇太后之号【按顺帝

本纪文宗崩雅克特穆尔请立太子为帝文宗后不从曰吾子尚幼明宗之长子宜立乃迎顺帝而立之故至是加后以尊号也】 大臣雅克特穆尔巴延皆裂地封王台哈布哈率同列上章言嫡母不宜加征称相臣不当受王爵太后怒欲杀言者台哈布哈语众曰此事自我发之甘受诛戮决不累诸公也已而太后怒解出签河南廉访司事俄移淮西递转江浙行省左右司郎中浙西大水会台哈布哈入朝言于中书免其租擢秘书监改礼部侍郎至正元年除绍兴路总管革吏弊除没官牛租令民自实田以均赋役行乡饮酒礼教民兴让越俗大化召入史馆与修辽宋金三史书成授秘书卿升礼部尚书兼会同馆事八年台州黄岩民方国珍为乱诏江浙参政多尔济巴勒总舟师捕之追至福州五虎门官军自溃多尔济巴勒遂被执或珍迫其上招降之状朝廷从之国珍兄弟皆授官国珍不肯赴势益暴横九年诏台哈布哈察实以闻既得其状遂上招捕之策不听寻除江东廉访使改翰林侍读学士知制诰同修国史已而出为都水庸田使十年国珍复入海烧掠沿海州郡十一年迺博罗特穆尔为江浙行省左丞总兵至庆元以台哈布哈知贼情迁浙东道宣慰使都元帅分兵于温州使夹攻之未几国珍寇温 【按方国珍寇温续通鉴纲目载于至正十年十二月此叙于十一年之下互异】 台哈布哈纵火筏焚之一夕遁去既而博罗特穆尔率兵进讨至大间洋国珍夜纵火鼓噪官军溃博罗特穆尔被执朝廷复遣大司农达实特穆尔等至黄岩招之国珍兄弟皆登岸罗拜退止民闲小楼台哈布哈欲命壮士袭杀之达实特穆尔不可乃止檄台哈布哈亲至海滨散其徒众拘其海舟兵器国珍兄弟复授官有差既而迁台哈布哈台州路达噜噶齐十二年朝廷征徐州命江浙省臣募舟师守大江国珍怀疑复入海叛台哈布哈发兵扼澄江遣义士王大用约使来归国珍益疑拘王大用不遣以小舸二百犯马鞍诸山台哈布哈誓众前往击之时国珍戚党陈仲达往来计议陈其可降状台哈布哈率部众张受降旗乘潮而前船触沙不能行垂与国珍还呼仲达申前议仲达目动气索台哈布哈觉其心异手斩之即前搏贼船射死五人贼跃入船复砍死二人贼羣至攒槊刺之中颈死犹植立不仆投尸海中时十二年也僮名抱琴及临海尉李辅德千户彻辰义士张君璧皆死之台哈布哈既没除江浙行自参知政事不及闻命后三年追封魏国公谥忠介立庙台州赐额崇节台哈布哈尚气节不随俗浮沈虽为时相摈斥人莫不韪之善篆隶尝重类复古编十卷考正讹字于经史多有据云 【按台哈布哈始于言事终于死节不愧名臣元史旧系列传今移入忠义】

△巴延布哈德济 【大胜努 该里丹 蔡诚 蒋广 陈受】

巴延布哈德济字苍崖辉和尔氏驸马都尉高昌王舒苏德济之孙多喇德济子也【高昌王世勋碑作特穆尔布哈子】 倜傥好学晓音律初用父荫同知信州路事历迁浙东都元帅守衢州寻擢江东道廉访副使至正十八年陈友谅遣贼党王奉国等寇信州明年正月巴延布哈德济自衢引兵授信破走之时镇南王子大胜努屯兵城中闻援师至开门出迎罗拜马前巴延布哈德济登城四顾誓以破贼自许乃大飨士卒分命大都闻高义为左右翼己为中军奋击入贼营斩首数千级后数日友让弟友德列营城东攻益急遣使来说降高义潜与贼通往见奉国明日奉国令义以计来诱巴延布哈德济坐城上见义军骑至谓曰汝欲作说客耶我头可断足不可移乃数其罪斩之由是日夜鏖战粮竭矢尽而气不少衰夏四月有大呼城下者曰有诏参谋该里丹临城问之曰何来曰江南来该里丹曰如此乃贼耳吾元朝臣子可受尔伪诏乎呼者曰我主闻信州久不下知尔忠义故来诏尔徒守空城何为该里丹曰汝闻张睢阳事乎伪使者不答而去巴延布哈德济笑曰贼欲我降耶城存与存城亡与亡吾计之熟矣时军民唯食草苗茶纸既尽括靴底煮食之又尽掘鼠罗雀及杀老弱以食五月大破贼兵六月奉国亲来攻城昼夜不息者踰旬贼穴地百余所鱼贯梯城而上士卒力疲不能战城遂陷大胜努该里丹皆死之巴延布哈德济力战不胜遂自刎其部将蔡诚尽杀妻子与蒋广奋力巷战诚遇害广为奉国所执爱其勇使之降广曰我宁为忠死不为降生贼怒磔广于竿大骂而绝有陈受者信州小民也巴延布哈德济知受有膂力募为义兵战败被获痛骂不屈贼焚杀之先是巴延布哈德济之援信州也尝南望泣曰我为天子司宪视彼城之危急忍坐视乎吾知上报天子下拯生民余皆无可恤所念者太夫人耳即入拜其母鲜于氏曰儿今不得事母矣母曰尔为忠臣吾即死复何憾鲜于氏太常典簿枢之女也巴延布哈德济因命子额森布哈奉其母闲道入闽中及死谥桓敏

△樊执敬

樊执敬字时中济宁郟城人性警敏好学由国子生擢授经郎尝见帝师不拜曰吾孔氏之徒知尊孔氏而已何拜异教为历官江浙行省参政至正十二年督海运于平江卜日将发官大宴犒于海口俄有客船自外至验其券信令入而不虞其为寇也既入港即纵火鼓噪时变起仓猝军民扰乱贼竟焚舟劫粮以去执敬自咎失防心郁郁不解及还省会徐寿辉遣伪将项普略自饶信入昱岭关犯杭州时执敬已被命讨

贼海上至是事急不得去掾史苏友龙进曰城内空虚无备柰何执敬曰吾淬砺戈矛当歼贼以报国不济则以死继之何畏哉俄报贼奄至遽

上马帅众出中途与贼遇射死数人贼来转盛且纵火众皆溃贼知其无援呼执敬降执敬叱曰逆贼守关吏不谨汝得至此恨不碎汝万段何

谓降耶乃奋刀斫贼因中枪而堕从仆田额森驰救亦中枪死事闻追封鲁国公

△全布延萨里 【噶海齐】

全布延萨里字子仁高昌人初为中书省检校时太师江嘉努擅权台谏无敢言者布延萨里独于众中屡数其过谔谔无惧色及拜监察

御史即首劾汪嘉努十罪乃见黜然气节益振不以摧折稍阻历授赣州路达噜噶齐发奸摘伏一郡肃然至正十一年颍州盗起即修筑城垒

发公帑募勇士得三千人练习皆可用属邑有被陷者遣兵克复之境内悉安十六年以功拜江西参政分省赣州时江西下流诸郡皆为陈友

谅所据乃与总管噶海齐戮力同守友谅遣其将幸文才率兵围赣使人诱降布延萨里斩其使日擐甲登城拒战凡四阅月兵少食尽义兵万

户玛哈玛迪沙欲举城降布延萨里不从遂自刭事闻赠谥愍哀噶海齐守赣尤久城陷贼将胁之降噶海齐曰与汝战者我也尔贼毋杀赣民

当速杀我遂见杀

△桑节 【拜布哈】

桑节字吉甫河西人曾祖多尔济祖绰斯戩多尔济父绰斯戩世事太祖宪宗世祖为克埒穆尔齐桑节少给事仁宗潜邸以精敏称至治

朝累迁为宣政院使出为江南行台御史大夫时承平日久内外方以观望为政桑节独持风裁御史行台必敕厉而遣之湖东签事三宝珠性

廉介所至搏贪猾无所贷御史有以私请者拒不纳则诬以事劾之章至桑节怒曰若人之廉孰不知之乃为是言耶即奏杖御史而白其诬执

政者恶之移湖广行省平章政事湖广地连江北威顺王 【按威顺王名库春布哈时统军镇湖广详见顺帝本纪】 岁尝出猎民病之又起

广乐园多萃名倡巨贾以网利有司莫敢忤桑节至谒王面责之王急握手谢为悉罢其所为有胡僧小住持者服三品命特宠横甚数以事浚

辄官府桑节命掩捕之得妻妾女乐妇女十有八人狱具籍之由是贫弱称快至正十一年汝颖妖贼起会僚属议或言郑万户老将也 【郑

万户史传阙名】 宜起用之桑节乃募士兵完城池修器械严巡警悉以其事属郑贼伪遣其党二千来降桑节与郑谋审得其诈歼之械其渠

魁数十人以俟命适有旨召为大司农同僚受贼赂且嫉其功乃诬郑罪释其所械者明日贼大至内外响应试昌遂陷桑节入见具陈贼本末

帝大喜命赐食时宰不悦奏为江西行省平章政事桑节至江东诏令守江州时江州已陷贼据池阳太平官军止三百人贼号百万众皆欲走桑节曰畏贼而逃非勇也坐而待攻非智也乃贷富人钱募得三千人具舟楫直趋铜陵克之又破贼于白马湾分兵蹙之抵白湄贼穷急回拒官军乘胜奋击贼尽殪擒其渠魁周驴军声大振遂复池州【按布延特穆尔传至正十二桑节与额森特穆尔曼济哈雅布延特穆尔会兵败贼于丁家洲遂复铜陵及池州此传专言桑节以三千人克捷而不及他将互异】乃命诸将分道讨贼复石埭诸县进据清水湾伺者告贼舰至自上流顺风举帆众且数十倍诸将失色桑节命伏兵横港中偃以待风怒水驶贼奄忽而过乃举旗张帆鼓噪薄之贼又大败时贼久围安庆捷闻遽烧营走进复湖口县克江州留兵守之命王惟恭栅小孤山而桑节自据番阳口缀江湖要冲以图恢复时湖广已陷江西被围淮浙亦多故无继援以者日久粮益乏士卒咸困或言东南完实盍因粮以图再举桑节曰吾受命守江西必死于此众莫敢复言有顷贼乘大船四集官军力战众死且尽桑节之从子拜布哈死之桑节坚坐不动贼发矢射乃昏仆贼素闻其名不忍害舁置密室中至旦乃苏贼罗拜争馈以食桑节斥之遂不复食凡七日乃自力而起北面再拜曰臣力竭矣遂绝桑节为人公廉明决及在军中能与将士同甘苦以忠义激人心故能以少击众得人死力云【按桑节道通余阙三人皆死于陈友谅忠节表着元史旧系例传今并移入忠义】

△道通

道通高昌人自号石岩性深沈寡言以世胄入官授直省舍人历官清显素负能名调信州路总管移平江皆以善政称至正元年迁大都路达噜噶齐递迁为江浙行省平章政事十一年仍以平章政事行省江西是年贼起蕲黄平章政事塔奇勒布哈将兵捍江州既而土寇蠡起道通素不知兵仓皇无所措用左右司郎中布延布哈荐以致仕左丞章巴延署本省左丞事专任调遣军旅巴延欣然至与布延布哈设御敌计甚悉明年湖广陷塔奇勒布哈由江州遁还布延布哈将兵往江州至石头渡遇贼战败道通大恐即怀印遁布延布哈还与巴延定为守城之计后数日道通自南昌民家来归遂议分门各守以备敌既而贼来围城城中昼夜坚守而道通素恤民能任人故众乐为之用围两月民无离志道通密召死士数千人而涂以青额抹黄布衣黄衣为前锋又选精锐数千为中军命万户章托音布尔噶岱领之夜半开门伏兵栅下黎明钲鼓大震因奋击贼贼惊为神败走乘胜捣其营复分兵扫其余党时章巴延布延布

哈之功居多巴延寻以病卒朝廷以道通捍城有功加大司徒开府复命额琳沁巴勒为江西行省左丞相以和尼齐为左丞同将兵来江西未几额琳沁巴勒卒道通属利尼齐平富端二州分镇其地适岁大旱公私匱乏道通乃移咨江浙行省借米数十万石盐数十万引分给军民由是按堵如故而贼亦不敢犯其境十八年陈友谅复攻江西城时和尼齐已升平章政事加营国公行便宜事任专兵柄而素与道通不相能且贪忍不得将士心见城旦陷遂夜遁道通亦弃城退保抚州路欲集诸县义兵以图克复而势已不可为因叹曰我为元朝大臣城陷不守尚何面目见人适贼追者至道通欲迎敌渡未登岸为贼所害事闻赐谥忠烈

△余阙 【李宗可纪守仁陈彬金承宗特穆尔布哈段桂芳和斯布哈锡里卢廷玉葛延龄邱登许元琰谔都玛勒黄寅孙黄多伦岱杨恒余中陈巨济】

余阙字廷心一字天心唐古氏世家河西武威父实喇藏布官庐州遂为庐州人少丧父授徒以养母元统元年赐进士及第授同知泗州事俄召入应奉翰林文字转中书刑部主事以不阿权贵弃官归寻以修辽金宋三史复召入翰林为修撰拜监察御史改中书礼部员外郎出为湖广行省左右司郎中会莫徭蛮反右丞实保当帅师坚不往阙促之辞以刍饷不足阙曰此不难致下令趋之三日皆集实保乃行复以集贤经厯召入迁翰林待制出签浙东道廉访司事丁母忧归庐州盗起河南至正十三年起阙副使签淮西都元帅府事分兵守安庆抵官甫十日寇至拒却之乃与诸将议以湾山八社土壤沃饶悉为屯田明年大饥乃捐俸为粥以食民失业者咸安集之升同知副元帅又明年大旱为文祈湾山神三日雨岁以不饥盗方据石荡湖出兵平之十五年秋稼登得粮三万斛阙乃浚隍增障环以深堑植才为栅城上起飞楼表裹完固俄升都元帅时羣盗环布四外阙居其中左提右挈屹为江淮保障论功拜江淮行省参知政事仍守安庆通道于江右商旅四集池州赵普胜帅众攻城连战三日败去未几又至相拒二旬始退十七年赵普胜同青军两道来攻拒战一月余竟败走拜淮南行省右丞沔阳陈友谅自上游直捣小孤山义兵元帅胡巴延与战不胜遂薄城下阙遣兵扼于观音桥俄饶州祝寇攻西门关战却之 【按战却之传文原作斩却之是时祝寇仅敛兵稍退固未尝获而诛之不得云斩今改】 既而贼乘东门红旗登城阙简死士力击败复败去俄并军攻东门二门又却之贼恚甚攻益急普胜军东门友谅军西门祝寇军南门羣盗四面蚁集外无一甲之援阙徒

步提戈为士卒先士卒哭止之挥戈愈力斩首无算阙亦被十余创日中城陷阙引刀自刭堕清水塘中阙妻伊伯氏及子德生女福童皆赴并死【按续通鉴纲目作阙妻蒋氏妾伊伯耶律氏子德臣女安安甥福童皆赴井死视此较详且有异同】时守臣韩建一家被害建方卧疾骂贼不屈贼执之以去不知所终城中民相率登城楼自焚死者以千计其知名者万户李宗可纪守仁陈彬金承宗元帅府都事特穆尔布哈万户府经历段桂芳千户和斯布哈锡里卢廷玉葛延龄印登许元琰奏差谔都玛勒百户黄寅孙安庆推官黄多伦岱经历杨恒知事余中怀宁分陈巨济等凡十八人计城陷之日则至正十八年正月也阙号令严信与下同甘苦然稍然违令即斩以徇一时将士乐为致命军旅之暇即注周易帅诸生谒郡学会讲立军士门外以听使知尊君亲上之义有古良将风烈追封幽国公谥忠宣阙留意经术五经皆有传注工诗文及篆隶既死贼义之求尸塘中具棺敛葬于西门外

△周镗【谢一鲁】

周镗字以声浏阳州人笃学通春秋登泰定四年进士第官大冶县尹镗状若尫懦而毅然有威不可犯抑豪强惠穷民治行为诸县最会修功臣列传擢翰林国史院编修官出为四川行省儒学提举便道还家至正十一年红巾盗起湖南北郡县皆陷浏阳无城守盗至民皆惊窜镗告其兄弟使还引自谓我受国恩脱不幸必死毋相累也贼至得镗欲推为主镗厉声大骂贼知不可屈乃杀之同时有谢一鲁字至道亦浏阳人至元乙亥乡贡进士尝为石林书院山长贼陷潭州一鲁奉亲匿岩谷中官兵复郡邑亡者稍归乃还理故业俄而贼复至生缚之一鲁骂贼甚厉举家咸还害

△聂炳【达尔】

聂炳字韞夫江夏人元统元年进士授同知平昌州事至正十二年迁知荆门州纔半岁红巾贼至荆门不守炳出募士兵得众七万复其城又与四川行自平章耀珠复江陵县既而贼势复振伪将俞君正合兵来攻炳率孤军昼夜血战援绝城陷为贼所执极口骂不绝贼以刀抉其齿尽乃支解之时有明安达尔字士元唐古氏炳同年进士也为潜江县达噜噶齐贼至率勇敢出击擒其伪将刘万户进营芦洲比城陷鬪死举家歼焉

△刘耕孙【刘焘孙 刘硕】

刘耕孙字存吾茶陵州人至顺元年进士授临武县尹县近蛮獠耕孙至为建学校求民闲俊秀教之设俎豆习礼让三年文化大兴厯建

德徽州瑞州三路推官所至详谏疑狱俱有政绩至正十二年蕲黄贼破湖南耕孙倾家
赀募义丁以援乡里贼至辄却故茶陵久不失守十五年转宁国路推官岁饥劝富民出粟
賑之活者万计会长枪军索诺木巴勒等攻宁国耕孙分守城西南日署府事夜率兵乘城固守
贼引众缘堞而上城陷力战遇害弟焘孙以国学下第授常宁州学正湖南陷常宁长吏弃城走民
奉印请焘孙为城守城赖以完者一年外援既绝死之长子硕为江夏鲁湖大使起义兵援茶陵亦死之
【按同时死节者尚有刘与孙系焘孙弟官南丰州同知值寇乱仗节死于台城详见楚纪】

△俞述祖

俞述祖字绝芳庆元象山人由翰林书写授国史院编修出为沔阳府推官至正十二年蕲黄贼丁普郎陷武昌进攻沔述祖领民兵守绿水洪并力捍御兵力不支城陷为贼所执械至徐寿辉所诱之使降述祖骂不辍寿辉怒支解之有子方五岁亦死追赠象山县男

△桂鄂勒哲 【金德】

桂鄂勒哲永嘉人【名贤录及温州志俱作季姓字坦之】尝为平江路管军镇抚为仇家所诉免官会贼攻昱岭关行省遂假前官令从征鄂勒哲勇于讨贼凡再战关下皆胜寻又与贼鬪为所执其妻弟金德亦被擒皆反缚于树临以白刃胁之降金德意未决鄂勒哲呼曰大丈夫死即死耳不可为不义德曰此言是因大骂贼怒剖二人腹而死

△绰罗 【冯三】

绰罗字时中蒙古氏登元统元年进士第累官京畿漕运副使出知安陆府至正十二年徐寿辉伪将鲁法兴犯安陆时绰罗募兵得数百人帅以拒战败其前队乘胜追之贼自他门入亟还兵城中火起军民溃乱计不可遏乃归服朝服坐公堂贼至排之下使拜不屈且怒骂贼不忍害拘之明日又逼其从乱绰罗叱曰吾守土臣宁从汝贼乎贼怒以刀斫其左肋断而死复取布囊盛其尸舁置其家妻侯氏出大哭且列酒肉满前渴者令饮饥者令食以给贼使不防已至夜自经事闻赠绰罗河南行省参政侯氏宁夏郡夫人表其门曰双节有冯三者湖广省役卒也素不知书省署为寇陷阜隶辈悉起剽杀为盗拉三同行辞曰贼名怨我等岂可为众强之终弗听怒将杀之三遂唾骂贼乃缚诸木舁以行而刳其肉三益骂不止抵江上断其喉委去其妻随三号泣俯拾刳肉纳布裙中伺贼远收其血骸脱衣裹之投江而死

△博罗特穆尔 【玛哈实哩】

博啰特穆尔字国宾高昌人由宿卫补官累迁为襄阳路达噜噶齐至正十一年汝颖盗起郟县人田端子等亦聚众杀官吏博啰特穆尔将民兵捕斩之未几行省廉访司同檄讨贼贼始退而谷城光化以急告即帅兵趋谷城而分遣樊城主簿托音等趋光化屡遣使求粮于襄阳不应明年襄阳失守博啰领义兵二百人且战且引至监利县遇沔阳府达噜噶齐耀珠同知沙善安陆府同知扬珠布哈荆襄提举僧格实哩之师时滨江有船千余乃纠合诸义兵丁壮水工五千余人乃趣还襄阳贼方驻杨湖港乘其不虞击之获船二十七艘进次潜江又斩贼数百级获三十余船梟贼将刘万户许堂主等是日甫止兵未食而贼大至与战抵暮被重创麾兄子玛哈实哩使去曰吾以死报国汝无留此玛哈实哩泣曰愿以死从既而博啰被执骂贼遇害玛哈实哩帅家奴求其尸复与贼战没于阵举家死者凡二十六人

△彭庭坚

彭庭坚字允诚温州瑞安人至正四年进士授同知沂州事毁牛皇神祠驱邻郡上马贼免民横急征敛州人甚德之俄以平反狱囚忤上官意遂解归十一年诏选守令起崇安县尹屡平闽境贼迁同知建宁路事江西寇炽庭坚率民兵克复建阳又进兵平浦城十二年摄签都元帅府事与邵武路总管吴阿勒坦布哈夹攻邵武庭坚设云梯火炮昼夜攻击寇遁追斩渠司副都元铁和尚童昌邵武悉平升同知福建道宣慰司副都元帅镇邵武寇陷建宁庭坚统民兵降其将复之十四年盗侵政和松溪南台中丞吴铎督军建宁檄庭坚至时镇抚万户兵焕隶麾下焕素悍纵卒为暴庭坚欲绳以法焕惧使部卒乘其不备诈为贼兵突入铎既交众皆走散庭坚独留不去遂遇害南台御史余观行部至获贼斩之为上其事追封忠愍侯

△王巴延 【王相】

王巴延 【闽志作王简】 字伯敬滨州沾化人由湖广省宣使历永州祁阳湖州乌程县尹至正九年迁知福宁州红巾贼自邵武闲道徇福宁巴延与监州额森都呼募壮兵五万分扼险阻贼至杨梅岭立栅巴延与子相驰破之贼帅王善俄拥众直压州西门胥隶皆解散麾下唯白挺市儿数百人巴延射贼被执善谓曰闻公有惠政此州那司无尹公为我尹可乎巴延呵之曰我天子命官不幸失守义当死肯从汝乎善怒叱左右搯以跪弗屈遂殴之巴延啮舌以血噀善曰杀即杀何以殴为大丞相亲讨叛逆百万之师雷击电扫汝辈小丑将无遗类顾敢尔耶贼又执额森都呼至善责其拒鬪噤不能对巴延复唾善曰我杀贼何言拒耶我死当

为神以杀汝言讫挺颈受刃颈断涌白液如乳暴尸数
日色不变贼并杀额森都呼欲释相官之相詈曰吾与汝不共戴天恨不寸斩汝宁受汝
官耶贼杀之相妻潘氏挈二女为贼所获亦骂贼母子
同死巴延既死贼时睹其引兵出入有州僧林德诚起兵讨贼望空嘯曰王州尹宜率阴
兵助我时贼方祠神覩红衣军来以为伪帅康将军亟
往迎之则四面皆青衣官军贼大败斩其酋江二蛮福宁遂平事闻追封太原郡侯 【按
名贤录云长子楨往收得父母尸藁葬乌程朝命以
楨袭父爵除绍兴总管张士诚陷城楨亦不屈死又闽志云陈阳盈字子谦为泉州府税
课使贼攻福宁州知州王简檄阳盈率民兵拒贼贼执
之胁使降阳盈抗义詈贼同见杀】

△托里布哈 【达兰布哈哈奇尔吴布延阿拉克布哈迪延布哈】

托里布哈字端甫蒙古人由宿卫累官辽阳行省平章陈友谅陷江西诏移江西行
省遂泛海南下趋广东驻师揭阳降土寇金元佑克复
循梅惠三州自是英肇钦连诸郡皆附且治兵由梅岭将赴江西而元佑有异志遮道固
留阴令其子荣率外贼突入夺符信杀官吏变起仓卒
众莫能支托里布哈为枪所中子达兰布哈率麾下力与抗死之托里布哈被执拥至太
平桥骂不绝口为贼所杀其妻布延氏妾高丽氏在侧
不去皆大骂曰我平章遇尔父子厚尔何横逆至此亦皆遇害其部将哈奇尔吴布延阿
拉克布哈迪延布哈等俱战死

△刘浚

刘浚字济川其先兴州人曾祖海金进士第一仕至河南府尹死国难子孙遂家河
南浚由廉访司书吏授连江县宁善乡巡检至正十三
年蕲州贼师王善寇闽官军守罗源县拒之罗源与连江接壤势将迫浚妻真定史氏故
相家女也有才识谓浚曰事急矣可聚兵以捍一方于
是尽出奁中物募壮士百余人命仲子健将之浚旬闲众至数万贼寻破罗源分道攻福
州浚巨之辰山三战三捷俄闻福州陷众多溃去浚独
帅健兵进遇贼于中麻突其阵斩前锋五人贼大至浚中箭堕马健下马掖之俱被获浚
忿戟手大骂贼缚之阶下先斫一指骂益厉再斫一指
亦如之指且尽斫两腕次及两足浚色不少变遂割其喉舌而死健亦以死拒贼善义之
使敛父尸瘞焉健归请兵于帅府以复父讎弗听乃散
家赀结死士百人诈为工商流丐入贼中夜半发火大噪贼惊扰自相屠戮健手斩杀其
父者并擒善献帅府磔之事闻授健古田县尹

△伊苏台

伊苏台永古特部人中书右丞赵世延子也由西行台御史转黄州路总管湖广陷

朝廷察其材擢四川行省参政命与平章耀珠同讨贼
耀珠军五千人乃分锐卒八百使将之为前驱攻克巴东时归峡等州皆为贼守尹苏台
破贼江上斩溺无算已而归峡平进拔枝江松滋两县
乘胜趋江陵贼出阵清水门鏖战至夕贼方退乃据其门竣耀珠军至黎明贼出战三时
顷耀珠军止百步外不救贼飞枪刺之死事闻追封凉
国公谥忠壮

△陈君用

陈君用字子材延平人少负气勇猛过人红巾贼入闽闽阉授君用南平县尹给钱
五万缗俾募兵君用散家财继之导官军复建阳浦城
等县以功授同知建宁路事亡何贼围福州君用率兵往援大败贼众遂引兵踰北岭至
连江阻水而阵君用曰今日不尽杀贼吾不复生还矣
乃率壮士六千人徒步斩杀贼稍溃既而复合君用大呼陷阵中枪死事闻追封颍川郡
侯谥忠毅

△布琳尼敦 【上都】

布琳尼敦北庭人官山南道廉访使治中兴每按临所部威惠翕然至正十二年蕲
贼犯中兴布琳尼敦以兵与抗射贼多死贼稍却明日
复拥众袭东门力战被执不屈死又明日贼且奄至前中兴判官上都统兵出击之既而
东门失守仓皇反鬪力屈亦被执诱使降上都大骂贼
怒刳其腹剖其肉而死

△绰哈 【黄绍 胡斗元 黄云 民安图】

绰哈扎拉台氏由国子生为靖安县达噜噶齐至正十二年蕲黄贼起与县尹黄绍
同集义兵为守御计未几贼兵数万由武宁来攻绍赴
行省求援道梗不得达绰哈独帅众与贼战于象湖大破之乃起进士胡斗元等共谋画
而以勇士黄云为前锋自二月至于八月战屡捷贼党
益盛云战死绰哈被围寻为贼所执杀于富州子民安图袭父职屡率众败贼复县治踰
年贼兵复至迎战力竭贼执而刳之绍字仲先临川人
至正八年进士以来援出遇官军护之入龙兴时龙兴亦被围及围解乃还与民安图招
谕叛境过建昌之高坪遇贼绍与战不胜正衣冠怒骂
遂为所害斗元字符浩靖安人至正十年领乡荐第一署鳌溪书院山长贼至斗元以乡
兵击败之入县治与绰哈共图战守及绰哈被执贼胁
之使降斗元骂不屈乃以土埋其腰不死又缚置暗室中斗元仆墙以出逃入深山狂病
而卒黄云抚州人寓靖安素勇敢每接战独以身当敌
尝为数十人所围能奋身跃出至是身中数十枪喷血骂贼而死

△魏中立 【于大本】

魏中立字伯时济南人由国子伴读历官陕西行台御史中丞迁守饶州红巾贼倪文俊既陷湖广分攻州郡所在无赖子多乘闲窃发不旬日众辄数万皆短衣草屨齿木为杷削竹为枪截緋帛为巾襦弥野皆赤中立闻警即率丁壮分塞险要贼至以义兵击却之已而贼复令遂为所执以红衣披其身中立叱之须髯尽张贼执归蕲水欲屈其从己中立大骂不已遂见杀贼自饶趋信州总管于大本以土兵御之贼破东门入执大本至蕲水为俘献文俊释其缚畀伪印一纽大本投印于地骂贼遇害大本字德中密州人

钦定续通志卷五百二十一

●钦定续通志卷五百二十二 忠义传十五

忠义传

元 【三】

○元三

董抟霄【昂霄】 王英 福寿【伯嘉努 贺方 达年达萨

】 郑玉 黄昇

拜特穆尔 德呼默色【和尔多卜丹 吕复等】 布延布哈【申荣】 闵

本【拜珠】 赵宏毅【恭】

王逊志 保赛音布哈【张庸 段祯】 丁好礼【郭庸】陈友

定【海 尹克仁 多尔玛 拜王翰 巴延子中

靳义 段武 定定 张文贵吴讷 杨惠 僧住 马浩 伊纳克实章 僧格实哩

王可 阿实克布哈 朱春 邓祖胜 布延特穆

尔 张翱 赵元隆 陈瑜 刘永锡 特穆尔布哈 元图们 董丑 赵世杰杨椿

】巴匝尔斡尔密【托迪 律尔】

董抟霄【董昂霄】

王英

福寿【伯嘉努 贺方 达年达萨】

郑玉

黄昇

拜特穆尔

德呼默色【和尔多卜丹 吕复等】

布延布哈【申荣】

闵本【拜珠】

赵宏毅【赵恭】

王逊志

保赛音布哈 【张庸 段祯】

丁好礼 【郭庸】

陈友定 【陈海 尹克仁 多尔玛 拜王翰 巴延子中 靳义 段武 定定

张文贵 吴讷 杨惠 僧住 马浩 伊纳克

实章 僧格实哩 王可 阿实克布哈 朱春 邓祖胜 布延特穆尔 张翱 赵

元隆 陈瑜 刘永锡 特穆尔布哈 元图们 董

丑 赵世杰 杨椿】

巴匝尔斡尔密 【托迪 律尔】

△董抟霄 【董昂霄】

董抟霄字孟起磁州人由国子生辟陕西行台掾历迁浙东宣慰副使所至皆有声至正十一年除济宁路总管从江浙平章嘉珪讨徐寿

辉进兵安丰屡败贼众复其城十二年命移军授江南至湖州之德清时徐寿辉将项普略引兵自徽饶陷杭州嘉珪问计抟霄曰贼见杭城子

女玉帛必纵欲不暇为备宜急攻之若退保湖州伺贼乘锐直趋京口则江南不可为矣嘉珪犹豫未决诸将亦难其行抟霄正色曰江浙相君

方面既陷于贼今可取而不取谁任其咎复拔剑顾诸将曰诸君荷国厚恩而临难苟免今相君在是敢有慢令者斩遂进兵薄杭城贼迎敌至

盐桥抟霄麾壮士突前诸军相继夹击之凡七战追杀至清河坊贼奔接待寺塞其门而焚之贼皆死遂复杭州已而余杭武康德清次第平抟

霄亦受代去徽饶贼复自昱岭关寇于潜行省乃假抟霄为参知政事俾提兵讨之即日引兵至临安新溪分守各隘兵至叫口及虎槛遇贼皆

大破之复于潜既又克复昌化县及昱岭关降贼将潘大齋等二千人贼攻独松百丈幽岭三关抟霄先以兵守多溪多溪三关要路也既又分

军为三各出一关会捣贼巢遂乘胜复安吉贼复来窥独松抟霄更以兵守苦岭及黄沙岭贼帅多来降复进兵广德克之蕲饶诸贼犯徽州有

道士能作十二里雾抟霄以兵击之已而妖雾开豁诸伏兵皆起袭贼兵后贼大溃乱斩首数万级擒千余人获道士焚其妖书斩之遂平徽州

【按辍耕录云抟霄号令严肃凡克复诸郡不杀伤不抄掠四方之士归之礼遇勤至得尊酒在前起立捧觞取其所长而任之得待士之体】

十四年迁枢密院判官从丞相托克托征高邮分戍盐城兴化贼巢在大纵德胜两湖闲凡十有二悉剿平之即其地筑芙蓉砦贼入辄迷故道

自是不复敢犯贼恃习水渡淮北据安东州抟霄招善水者五百人与战于安东之太湖大败之遂复安东十六年剿平北沙庙湾沙浦等砦寻

进兵泗州不利贼乘胜东下断粮道乃回军屯北沙粮且绝与贼死战七昼夜贼败走夺

船七十余始得渡淮保泗州时方暑两湖水溢诸营皆
避去转霄独守孤城贼环绕数十里攻之转霄坐城上遣偏将以骑士由西门突出贼后
约曰旗一麾即还既而旗动骑士还步卒自城中出夹
击之贼大衄乃结阵西行转战数十合始至海宁升同签淮南行枢密院事转霄建议于
朝曰淮安为南北襟喉其地一失两淮皆未易保为今
日计莫若于黄河上下并濒淮海之地及南自沐阳北抵沂莒赣榆诸州县布连珠营每
三十里设一总砦就三十里中又设一小砦使斥堠烽
燧相望而巡逻往来遇贼则并力野战无事则屯种而食然后进有援退有守又海宁一
境不通舟楫军粮惟可陆运而凡濒淮海之地人民屡
经盗贼宜加存抚权令军人搬运其陆运之方每人行十步三十六人可行一里三千六
百人可行百里每人负米四斗以夹布囊盛之用印封
识人不息肩米不着地排列成行日行五百回计路二十八里轻行一十四里重行一十
四里日可运米二百石每运给米一升可供二万人此
百里一日运粮之术也又江淮南北之民壮者既为军老弱无所依归者宜置军民防御
司择军官材堪牧守者居之而籍其民以屯故地于以
练兵积谷且耕且战内全山东完固之邦外御淮海出没之寇而后恢复可图也十七年
妖寇刘福通遣伪将毛贵陷益都般阳等路有旨命转
霄从知枢密院事布呼齐讨之而济南适告急转霄乃提兵援济南贼众自南山来攻望
之两山皆赤转霄按兵城中先以数十骑挑之贼众悉
来鬪骑兵少却至礮上伏兵起遂合战城中兵亦出大破之般阳贼复约泰安之党踰南
山来袭济南转霄列兵城上弗为动贼夜攻南门以矢
石御之黎明乃默开东门放兵出贼后既且城上兵皆下大开南门合击之贼败走济南
始宁改淮南行枢密院副使兼山东宣慰使都元帅有
疾其功者潜于总兵太尉努都尔噶令转霄依前诏从布呼齐征益都转霄即出济南城
属老且病请以弟昂霄代领其众朝廷从之授昂霄淮
南行枢密院判官未几命转霄守河闲之长芦十八年转霄以兵北行且曰我去济南必
不可保既而果陷转霄方驻兵南皮适有旨擢河南右
丞甫拜命毛贵兵至营垒犹未完诸将请曰贼至当如何转霄曰我受命至此当以死报
国耳因拔剑督战贼众突至猝转霄刺杀之是日昂霄
亦战死事闻封魏国公谥忠定昂霄陇西郡侯谥忠毅转霄早以儒生起家辄为能吏会
天下大乱乃复以武功自奋其才略有大过人者用不
能尽其才君子惜之 【按董转霄王英福寿三人皆忠节表着元史旧系列传今并移入
忠义】

△王英

王英字邦杰益都人性刚果有大节膂力绝人袭父职为莒州翼千户父子皆善用双刀号刀王至元二十九年江西行院全往南雄讨贼邱太老等杀其渠帅元贞初从左丞董士选讨大山贼刘贵擒之二年讨永新安福二州贼余党皆息延佑二年宁都贼起行省命英讨之屡战皆胜斩获不可胜数行省平章李世安遣英迓江浙平章张闰所领军于闽境至木麻坑擒贼蔡五九又追贼至上虎嶂遇贼三千余人尽歼之
历官同知海北海南道宣慰司事顺帝至元三年漳州李志甫潮州刘虎仔并起为乱时英已致仕平章巴咱尔谓僚佐曰是非刀王不可其人虽投老可以义激遣使迎致之英曰国家有事吾虽老其可坐视乎据鞍横槊精神飞动驰赴焉及贼平英功居多至正中毛贵陷益都英时年九十六谓其子宏曰我世受国恩美官厚禄备尝享之今老矣纵不能事戎马以报天子尚忍食异姓之粟以求生乎水浆不入口者数日遂卒毛贵闻之使具棺食以葬将敛举其尸不动焚香祝曰公子宏请公归葬先莹祝毕尸遂起山东宣慰使布延布哈及宪司请恤典于朝有曰不食寇粟饿死芹泉有夷齐之风为臣之清者也芹泉谷名英所居也

△福寿 【伯嘉努 贺方 达年达萨】

福寿唐古人幼俊茂知读书尤善应对既长入备环卫用年劳授长宁寺少卿改引进使累迁为同知枢密院事至正十一年颍州以贼反告时车驾在上都朝臣欲驿奏以待命福寿独决议调兵讨之而后以闻顺帝善其处事得宜明年改伊克扎尔古齐未几出为淮南行省平章政事时濠泗俱陷师久无功福寿至督战甚急而上游贼势甚汹涌乃筑石头断江面众恃以为固十五年迁江南行台御史大夫先是集庆尝有警鄂尔和以湖广平章政事将苗军来援驻军扬州俄而苗军杀鄂尔和以叛集庆之援遂绝及高邮庐和等州相继沦陷集庆势益孤福寿因下令劝富民出资以助粮饷激励士众为完守计朝廷知其劳数赏赉焉十六年明兵围集庆福寿数督出兵战已而势不能支城遂破百司皆奔溃福寿独据床坐凤凰台下或劝之去叱曰吾为国家重臣城破则死尚安往俄乱兵四集遂遇害同时死者参政伯嘉努 【据明史陈友定传补入】 治书侍御史贺方达嚕噶齐达年达萨事闻追封福寿卫国公谥忠肃

△郑玉

郑玉字子美徽州歙县人幼敏悟嗜学既长覃思六经尤邃于春秋绝意仕进门人受业者众所居至不能容相与即其地构师出书院处院处焉至正十四年除翰林待制朝廷遣使以御酒名币浮海征之玉辞曰名爵者祖宗所遣使与天下贤者共之待制之职臣非其才不敢受

酒与币臣不敢辞也家居日以著书为乐十七年明兵入徽州守将将要致之玉曰吾岂事二姓者耶被拘久之亲朋每携具至从容尽欢且告以必死状妻程氏闻之使语曰君苟死吾其相从地下矣玉使谓曰若果从吾复何憾明日具衣冠北向再拜自缢死【按新安志云歙人郑千龄妻洪氏年二十六而寡始终贞曰子二长曰玉次曰璇玉死节妻程亦死之妾何矢志抚其孤璇早卒妻王亦不二志至今称郑门四节】

△黄昇

黄昇字殷士抚州金溪人博学明经善属文尤长于诗至正十七年丞相太平荐授淮南行省照磨历官国子监丞改翰林待制兼国史院编修官二十八年京城既破昇叹曰我以儒致身累蒙国恩为胄子师代言禁林今纵不我戮何面目见天下士乎遂赴井死

△拜特穆尔

拜特穆尔字君焘蒙古人至正中累迁福建行省郎中治福州以廉能着声二十七年明舟师由海道趣闽奄至城下拜特穆尔知城不可守引妻妾坐楼上慷慨谓曰丈夫死国妇人死夫义也今城且陷吾必死于是若等能吾从乎皆泣曰无他志缢而死者六人有十岁女度其不能自死因给之曰汝稽顙拜佛庶保我无恙甫拜即挈米囊压死之乳媪抱其幼子旁立以泣拜特穆尔熟视之叹曰父死国母死夫妾与女从父者也皆当死汝三岁儿于义何所从乎为宗祀计可耳乃命媪抱匿旁近民舍而敛金珠畀之曰脱有急可以此贖儿命有顷兵入城即举灯燃四围窗火大发遂自焚死

△德呼默色【和尔多卜丹 吕复等】

德呼默色字子初回回人性刚介事母至孝年四十犹不仕或问之曰吾不忍舍母去以宿卫年劳授行宣政院崇教三迁为漳州路达噜噶齐明兵既取福州兴化泉州相继纳款德呼默色仰天叹曰吾不材位三品国恩厚矣报国者惟有死耳亡何吏走白招谕使者至请出城诃之答曰尔第往吾行出矣乃诣厅事具公服北面再拜毕引斧斫其印大书手版曰大元臣子即入位拔所佩刀割喉既死犹手执刀按膝坐俨然如生郡名敛其尸葬东门外时有和尔多卜丹者亦回回人官广东廉访签事有吕复者为江西行省都事皆寓福州而复以行省命摄长乐县事福州既下和尔多卜丹曰吾兄弟三人皆忝进士受国恩四十年今虽无官守然大节所在其可辱乎以石自系其腰投井死复亦曰吾世食君禄今虽摄官若不以死报国则无以见先人于地下乃引绳自经和尔多卜丹兄曰穆垒丹者官建康曰该里丹者官信州先是亦皆死国

难云

△布延布哈 【申荣】

布延布哈字希古蒙古人倜傥有大志由国子生登至正五年右榜进士第一授翰林修撰选江西行省郎中徐寿辉寇江西布延布哈战守之功为多语在道通传累转中书参知政事十八年诏与治书侍御史李国凤同经略江南至建宁陈友谅遣贼邓克明来寇时国凤分镇延平城陷遁去布延布哈曰我承制来此去将何之誓与此城同存亡耳前后拒战六十四日既而大败贼众明年召还授山东宣慰使再转知枢密院事平章山东行省守御益都明兵压境捍城力战城陷布延布哈还告其母曰儿忠孝不能两全有二弟当为终养拜母趋官舍坐堂上主帅素闻其贤召之再三不往既而面缚之布延布哈曰我元朝进士官至极品臣各为其主何以生为竟不屈死先是其妻阿尔展呼家人告曰我受国恩封齐国夫人今事至此唯有死耳已而布延布哈二弟之妻各抱幼子及婢妾溺舍南井死比阿尔展欲下井填塞不可容遂抱子投舍北井其女及妾女孙女皆随溺焉是时有申荣者官山东行省平章守东昌见列郡皆降告其父曰人生世闲不能全忠孝者儿也城中兵少不敌战则万人之命由儿而废但有一死报国耳遂自经

△闵本 【拜珠】

闵本字宗先河内人性刚正早岁刻志于学推择为礼部令史由御史台掾五转为吏部尚书移刑户二部皆以能见称本素有目眚尝上章乞谢事不允诏授集贤侍讲学士明兵薄京城本谓其妻程氏曰国事至此吾知之久矣愧不能立功补报敢爱六尺躯苟活哉程曰君能死忠妾岂贪生独不能以身相殉乎本乃朝服与程氏北向再拜大书其官职姓名于屋壁遂各缢焉二女长真真次女女亦号泣自缢于其侧有拜珠者字闻善喀喇人也由国学生以材累官翰林国史院都事为太子司经明兵至拜珠谓家人曰吾始祖哈里巴封河东郡公者与太祖同事克呼部汗太祖灭克呼吾祖不忍改所事避于远地以没今吾读书国学可不知大义乎况吾累世受国厚恩今国破安忍见之遂赴井死 【按粤志载有高要千户亦名拜珠岭南寇至挺身出战为乱枪所攒瞋目而死史传未载】

△赵宏毅 【赵恭】

赵宏毅字仁卿真定晋州人少好学家贫无书佣于巨室昼则为役夜则借书读之始辟为翰林书写再转为国史院编修官调大乐署令明兵入京城宏毅叹曰忠臣不二君烈女不二夫古语也我今力不能救社稷但有一死

报国耳乃与妻解氏皆自缢其子恭为中书管勾与妻子诀曰今乘輿北奔我父子世食禄不能效尺寸况吾父母已死尚何敢爱死乎或止之曰我曹官卑何自苦如此恭叱曰尔非吾徒也古者忠义各尽自心岂问职之崇卑乎遂北向再拜缢死其女官奴年十七见恭死方大泣适邻姬数辈来相率出避曰我未适人选将何之潜入中堂解衣带自经

△王逊志

王逊志字文敏恂之曾孙也以荫授侍仪司通事舍人历签汉中河西山北三道廉访司事入拜监察御史劾詹事布呼齐平章伊敦皆逆臣子孙当屏诸遐裔出为江西廉访副使召签太常礼仪院事京城不守公卿争出降逊志独家居衣冠而坐其友中政院判官王翼来告曰【元一统志作王习】新朝宽大盍出诣官自言状逊志斥之曰君既自不忠又诱人为不义耶因戒其子曰汝谨继吾宗即自投井中死【按王逊志从容就义不亏臣节元史旧系列传今移入忠义】

△保赛音布哈【张庸 段祯】

保赛音布哈字德中索隆噶台人有膂力善骑射由舒库尔齐授利器库提点累迁翰林学士承旨兼巡军合浦全罗等处军民万户都元帅除大司农出为岭北行省右丞升平章政事至正中皇太子抚军冀宁承制拜中书平章明兵逼京师诏守顺承门所领兵仅数百羸卒叹息谓左右曰国事至此吾但知与此门同存亡耳城陷被执不屈死是时有张庸者字存中温州人精太乙数遭世乱以策千经略使李国凤承制授福建行省员外郎治兵杉关顷之计事赴京师进太乙数图历官刑部尚书领团练守骆驼谷会诸寨皆降遣从事段祯求援于库特穆尔不报寨民李世杰执庸出见主将庸不屈与祯同被杀

△丁好礼【郭庸】

丁好礼字敬可真定蠡州人精律算初试吏于户部辟中书掾授户部主事擢江西行台御史复入户部累迁至侍郎除京畿漕运使建议置司于通州讲究漕运利病着为成法人皆便之至正二十年拜中书参知政事时京师大饥天寿节庙堂欲用故事大燕会好礼言今民父子有相食者君臣当修省以弭大患燕会宜灭常度不听乞谢事乃以集贤大学士致仕给全俸家居二十七年复起为中书平章政事寻以论议不合谢政去特封赵国公明兵入京城或劝其往谒主师好礼叱曰我以小吏致位极品爵上公今老矣限无以报国所欠惟一死耳后数日主师来召不肯行舁至济化门抗辞不屈死是日中书参知政事郭庸亦舁至齐化门众叱

之拜庸曰臣各为其主死自吾分何拜之有亦不屈死

庸字允中蒙古人由国学生释褐累迁陕西行台御史尝与同列劾知枢密院事额森特穆尔丧师左迁中兴总管府判官其后额森特穆尔以罪黜召拜监察御史累转参政中书其节义与好礼并云

△陈友定 【陈海 尹克仁 多尔玛 拜王翰 巴延子中 靳义 段武 定 张文贵 吴讷 杨惠 僧住 马浩 伊纳 克实章 僧格实哩 王可 阿实克布哈 朱春 邓祖胜 布延特穆尔 张翱 赵元隆 陈瑜 刘永锡 特穆尔布哈 元图们 董丑 赵世杰 杨椿】

陈友定一名有定字安国福清人徙居汀之清流世业农为人沈勇喜游侠乡里皆畏服至正中汀州府判蔡公安至清流募民兵讨贼友定应募公安与语奇之使掌所募兵署为黄土砦巡检以讨平诸山寨功迁知清流县令陈友谅遣其将邓克明等陷汀邵略杉关行省授友定汀州路总管御之战于黄土砦大捷走克明踰年克明复取汀州急攻建宁守将鄂鄂哲特穆尔檄友定入援连破贼悉复所失郡县行省上其功第一进参知政事已置分省于延平以友定为平章于是友定尽有福建八郡之地友定以农家子起佣伍目不知书及据八郡数招致文学知名士留置幕下麤涉文史然颇任威福所属违令者辄承制诛窜不绝于是威震八闽然事元未尝失臣节岁输粟数十万石海道辽远至者常十三四顺帝嘉之下诏褒美明太祖既平方国珍即发兵伐之将军何文辉胡廷美由江西趋杉关汤和廖永忠由明州海道取福州李文忠由浦城取建宁而别遣使至延平招谕友定友定置酒大会诸将及宾客杀明使者沥其血酒瓮中与众酌饮之酒酣誓于众曰吾曹并受元厚恩有不以死拒者身磔妻子戮遂往视福州环城作垒距垒五十步辄筑一台严兵为拒守计已而闻杉关破急分军为二以一军守福而自帅一军守延平以相犄角及汤和舟师抵福之五虎门平章库春引兵逆战败明兵缘南台蚁附登城守将遁去参政尹克仁宣政使多尔玛不屈死金院拜特穆尔积薪楼下举家自焚死廷美克建宁汤和进攻延平友定欲以持久困之诸将请出战不许数请不已友定疑所部将叛杀萧院判军士多出降者会军器局灾城中炮声震地明师知有变急攻城友定呼其属诀曰大事已去吾一死报国诸君努力因退入省堂衣冠北面再拜仰药死所部争开城门纳明师师入乃趋视之犹未绝也舁出东门适天大雷雨复苏械送京师明帝诘之友定厉声曰国破家亡死耳尚何言遂并其子海杀之海一名宗海工骑射亦喜礼文士友定既被执自将乐归于军

门至是从死元未所在盗起民闲起义兵保障乡里称
元帅者不可胜数朝廷辄因而官之其后或去为盗或事元不终惟友定父子称完节焉
友定既死兴化泉州皆望风纳款独漳州路达噜噶齐
德呼默色刺喉而死时云闽有三忠谓友定拜特穆尔德呼默色也 【按陈友定巴匝尔
干尔密二传元史不载今因其皆为元守土死节且
附见多人从明史列传采入次于元忠义之末云】 王翰者字用文仕元为潮州路总管
友定败为黄冠妻永泰山中者十载太祖闻其贤强起
之自刎死有子偁知名为友定所辟者又有巴延子中其先西域人后仕江西因定焉明
春秋行省辟授建昌教授慷慨喜谈兵江西盗起授分
省都事使守赣州而陈友谅兵已破赣子中仓卒募民与鬪城下不胜脱身闲道入闽陈
友定素知之辟授行省员外郎出奇计以友定复建昌
浮海如元都献捷累迁吏部侍郎持节发广东何真兵救闽至则真已降于廖永中子中
跳堕马折一足致军前永中欲胁降之不屈永中义而
舍之乃变姓名冠黄冠游行江湖闲明太祖求之不得簿录其妻子子中竟不出常赍鸩
自随久之事寢解乃还乡里洪武十二年诏郡县举元
遗民布政使沈立中密言子中于朝以币聘使者至子中太息曰死晚矣为歌七章哭其
祖父师友饮鸩死当元亡时守土臣仗节死者其众明
兵克太平总管靳义赴水死克镇江守将段武平章定定战死克宁国百户张文贵杀妻
妾自刎死克徽州万户吴讷战败自杀克婺州浙东廉
访使杨惠婺州达噜噶齐僧住战死克衢州总管马浩赴水死克大都真定路达噜噶齐
伊纳克实章闻难朝服登城西崖北面再拜投崖死克
奉元西台御史僧格实哩与妻子俱投崖死郎中王可仰药死检校阿实克布哈自经死
三原县令朱春与其妻投缢死攻永州右丞邓祖胜固
守食尽力穷仰药死克梧州吏部尚书布延特穆尔战死张翱赴水死克靖江都事赵元
隆陈瑜刘永锡廉访使签事特穆尔布哈元帅元图们
万户董丑汉府判赵世杰皆自杀又张士诚破平江时参军杨椿挺身战刃交于胸瞋目
怒骂死妻亦自经

△巴匝尔翰尔密 【托迪 律尔】

巴匝尔翰尔密元世祖第五子云南王和克齐之裔也封梁玉仍镇云南顺帝之世
天下多故云南僻远王抚治有威惠至正二十九年明
玉珍僭号于蜀遣兵三道来攻王走保金马山明年以大理兵迎战玉珍兵败退久之顺
帝北去大都不守中国无元尺寸地而王守云南自若
岁遣使自塞外达行在执臣节如故未几明师平四川天下大定明太祖以云南险僻不
欲用兵明年北平守将以所得王遣往漠北使者苏成

来献明太祖乃命待制王祎赍诏偕成往招谕王待祎以礼会元嗣君遣使托克托来征
 饷托克托疑王有他意因胁以危语王遂杀祎而以礼
 敛之踰三年明太祖复遣湖广参政吴云偕所获云南使臣铁知院等往知院以己奉使
 被执诱云改制书给王云不从被杀王闻云死收其骨
 送蜀给孤寺明太祖知王终不可谕降乃命傅友德为征南将军蓝玉沐英为副帅师征
 之洪武十四年十二月下普定王遣司徒平章达尔玛
 率兵驻曲靖沐英引军疾趋乘雾抵白石江雾解达尔玛望见大惊友德等率兵进击达
 尔玛兵溃被擒先是王以女妻大理酋段得功尝倚其
 兵力后以疑杀之遂失大理援至是达尔玛败失精甲十余万王知事不可为走普宁州
 之忽纳砮焚其龙衣驱妻子赴滇池死遂与左丞托迪
 右丞律尔夜入草舍俱自经明太祖迁其家属于耽罗

钦定续通志卷五百二十二

●钦定续通志卷五百二十三 孝友传一

孝友传

（臣）等谨按孝友立传始自晋书宋齐周隋曰孝义梁陈曰孝行后魏曰孝感通
 志统名孝友考唐以后五代史曰一行宋史曰孝义今
 依通志之例统曰孝友辽史旧无此传亦乃其阙焉

唐

五代

○唐

李知	【本知隐】	张志宽	刘君良	宋兴贵	张公艺
杜楚客	王少元	任敬臣	支叔才		
【王遇	王遐】	程袁师	武宏度	宋思礼	郑潜曜
	裴敬彝	梁文贞	沈季詮		元让
许伯会	陈集原	陆南金	【赵璧】	张琇	【瑄
同蹄	智寿	智爽	徐元庆	余常安	梁悦
得】	侯知道	【程俱罗	何澄粹	李兴】	
衍	林攢	丁公着	陈饶奴		许法慎
王博武	万敬儒	章全益	张士岩	焦怀肃	张进昭
李知本	【李知隐】				
张志宽					
刘君良					
宋兴贵					
张公艺					

杜楚客

王少元

任敬臣

支叔才 【王遇 王遐】

程袁师

武宏度

宋思礼

郑潜曜

元让

裴敬彝

梁文贞

沈季诠

许伯会

陈集原

陆南金 【赵璧】

张琇 【张瑄 王君操 赵师举 同蹄智寿 智爽 徐元庆 余常安 梁悦
唐买得】

侯知道 【程俱罗 何澄粹 李兴】

许法慎

崔衍

林攒

丁公着

陈饶奴

王博武

万敬儒

章全益

张士岩

焦怀肃

张进昭

△李知本 【李知隐】

李知本赵州元氏人元魏洛州刺史灵六世孙父孝端隋获嘉丞与族弟太冲俱有
世阀而太冲官婚最高孝端方之为劣 【据旧书增

】 乡人语曰太冲无兄孝端无弟知本涉经术事亲笃至与弟知隐雍顺子孙百余至贵
用僮仆无闲也大业末盗贼过闾不入相戒曰无犯义

门往依者五百余室皆赖以免贞观初知本为夏津令知隐伊阙丞开元中知本孙瑱为给事中扬州长史知隐孙颢有文辞至太常少卿从祖兄弟位给事者凡四人

△张志宽

张志宽蒲州安邑人居父丧哀毁州里称之王君廓兵略地不暴其闾倚以全者百计姓后为里正忽诣县称母疾求归令问状对曰母有疾志宽辄病是以知之令谓其妄系于狱驰验如言乃尉遣之母终负土城坟手时松柏高祖遣使者就吊拜员外散骑常侍赐帛四十段表其闾

△刘君良

刘君良瀛州饶阳人四世同居斗粟尺帛无所私隋大业末荒瑾妻欲劝其异居因易置庭树鸟雏令鬪且鸣家人怪之妻曰天下乱禽鸟不相容况人耶君良即与兄弟别处月余密知其计因斥去妻曰尔破吾家召兄弟流涕以告更复同居天下乱乡人共依之众筑为堡因号义成堡武德中深州别驾杨宏业至其居凡六院其一庖子弟皆有礼节叹悒而去贞观六年表异门闾

△宋兴贵

宋兴贵雍州万年人累世同居躬耕致养至兴贵已四从矣武德三年诏表其门闾蠲免课役

△张公艺

张公艺郓州寿张人九代同居贞观中敕加旌表高宗有事泰山亲幸其宅问其义由请纸笔但书百余忍字帝为之流涕赐以缣帛 【案宋兴贵张公艺旧书均附刘君良传后新书无传今据补入】

△杜楚客

杜楚客仆射如晦从弟少尚气节与叔父淹皆陷于王世充淹与如晦有隙谮其亲兄杀之并囚楚客濒死世充平淹当诛楚客请于如晦不许楚客曰叔残兄今兄又弃叔门内几尽岂不痛哉如晦感悟请之高祖得释方建成难作楚客遁舍嵩山贞观四年召为给事中累迁蒲州刺史攻有能名徙瀛州后为魏王府长史迁工部尚书摄府事及王贬爵以如晦功免死废于家终虔化令 【案杜楚客新旧书俱附见杜如晦传后今改入孝友】

△王少元

王少元博州聊城人父隋末死乱兵遗腹生少元甫十岁问父所在母以告即哀泣求尸时野中白骨覆压或曰以子血渍而渗者父髑也

少元饑肤閔旬而获遂以葬创甚弥年乃兴贞观中州言状拜徐王府参军

△任敬臣

任敬臣字希古棣州人五岁丧母哀毁天至七岁问父英曰若何可以报母英曰扬名显亲可也乃刻志从学汝南任处权见其文惊曰孔子称颜回之贤以为弗如也吾非古人然见此儿信不可及十六刺史崔枢欲举秀才自以学未广遽去又三年卒業举孝廉授著作局正字父亡数殒绝继母曰儿不胜丧谓孝可乎敬臣始进饘粥服除迁秘书郎休沐阖门诵书监虞世南器其人岁终书上考固辞召为弘文馆学士俄授越王府西阁祭酒当代王再表留进朝请郎举制科擢许王文学复为弘文馆学士终太子舍人

△支叔才 【王遇 王遐】

支叔才定州人随末荒饑夜丐食野中还进母为贼执欲杀之告以情贼悯其孝为解缚母病痲叔才吮疮注药及亡庐墓有白鹊止墓傍高宗时表异其家至德闲有常州人王遇弟遐俱为贼执将释一人兄弟相让死贼感其义尽纵之

△程袁师

程袁师宋州人母病十旬不褫带药不尝不进代弟戍洛州母终闻讣日走二百里因负土筑坟号癯人不复识改葬曾门以来阅二十年乃毕常有白狼黄蛇驯墓左每哭羣鸟鸣翔永徽中刺史状诸朝诏吏敦驾既至不愿仕授儒林郎还之

△武宏度

武宏度士護兄之子补相州司兵参军永徽中父卒自徐州被发徒跣趋丧所负土筑莹晨夕号日一溢米素芝产庐前狸扰其旁高宗下诏褒美旌其门

△宋思礼

宋思礼字过庭事继母徐以孝闻补萧县主簿会大旱井池涸母羸疾非泉水不适口思礼忧惧且祷忽有泉出诸庭味甘寒日不乏汲县人异之尉柳冕为刻石颂其孝感

△郑潜曜

郑潜曜父万钧驸马都尉荥阳郡公母代国长公主开元中主寢疾潜曜侍左右造次不去累三月不饋面主疾剧刺血为书请诸神丐以身代火书而神许二字独不化翌日主愈戒左右无敢言后尚临晋长公主厯太仆光祿卿

△元让

元让雍州武功人擢明经以母病不肯调侍膳不出闾数十年母终庐墓次废栉沐饭菜饮水咸亨中太子监国下令表其门闾永淳初巡察使表让孝弟卓越擢太子右内率府长史岁满还乡里人有所讼皆诣让判中宗在东宫召拜司议郎入谒武后望谓曰卿孝于家必能忠于国宜以治道辅吾子寻卒

△裴敬彝

裴敬彝绛州闻喜人曾祖子通隋开皇中以太中大夫居母丧哭丧明有白乌巢冢樾兄弟八人皆以孝闻诏表其门世谓义门裴氏敬彝七岁能文章性谨敏宗族重之号甘灵顶父智周补内黄令为下所讼敬彝年十四诣巡察使唐临直枉临奇之试命作赋赋工父罪得释表敬彝于朝补陈王府典签一日忽泣涕谓左右曰大人病痛吾辄不安今心悸而痛事叵测乃请急倍道归而父已卒羸毁踰礼干封初累迁监察御史母病医许仁则者蹙不能乘敬彝自肩輿往迎既居丧诏赠缣帛官为作灵輿终服以著作郎兼修国史历中书舍人太子左庶子武后时为酷吏所陷死岭南

△梁文贞

梁文贞虢州閿乡人少从军守边逮还亲已亡自伤不得养即穿圻为门晨夕泛扫庐墓左暗默三十年家人有所问画字以对会官改新道出文贞庐前行旅见之皆为流涕有甘灵降莹木白兔驯扰县令刊石纪之开元中刺史许景先表文贞孝绝伦类诏付史官

△沈季诠

沈季诠字子平洪州豫章人少孤事母孝未尝与人争皆以为怯季诠曰吾怯乎为人子者可遗忧于亲乎哉贞观中侍母渡江遇暴风母溺死季诠号泣投江中少选持母臂浮出水上都督谢叔方具礼祭而葬之

△许伯会

许伯会越州萧山人举孝廉上元中为衡阳博士母丧负土成坟不御絮帛尝滋味野火将逮莹树悲号于天俄而雨火灭岁旱泉涌庐前灵芝生

△陈集原

陈集原泷州开阳人世为首长父龙树钦州刺史有疾集原辄不食及亡呕血数升即荣作庐尽以田贖让兄弟里人高之武后时历右【旧书作左】豹韬卫大将军

△陆南金 【赵璧】

陆南金苏州吴人祖士季从同郡顾野王学左氏春秋司马史班氏汉书仕隋为越

王侗记室兼侍读侗称制擢著作郎时王世充将篡逆
士季欲因其启事杀之谋泄停侍读乃不克贞观初终太学博士兼弘文馆学士南金仕
为太常奉礼郎开元初少卿卢崇道抵罪徙岭南逃还
东都南金居母丧崇道伪称吊客入而道其情南金匿之俄为讎人迹告诏侍御史王旭
捕按南金当重法弟赵璧诣旭自言匿崇道者我也请
死南金固言弟自诬不情旭怪之赵璧曰母未葬妹未归兄能办之我生无益不如死旭
惊上状帝皆宥之南金知书吏履操谨完张说陆象先
皆贤之由库部员外以疾改太子洗马卒

△张琇【张瑄 王君操 赵师举 同蹄智寿 智爽 徐元庆 余常安 梁悦 唐买得】

张琇河中解人父审素为嵩州都督有陈纂仁者诬其冒战级私甫兵元宗疑之诏
监察御史杨汪即按纂仁复告审素与总管董堂礼【
按通鉴作董元礼与此异】 谋反于是汪收审素系雅州狱驰至嵩州按反状堂礼不胜
忿杀纂仁以兵七百围汪胁使露章云审素罪既而吏
共斩堂礼汪得出遂当审素实反斩之没其家琇与兄瑄尚幼徙岭南久之逃还汪更名
万顷瑄时年十三琇少二岁夜狙万顷于魏王池瑄斫
其马万顷惊不及鬪为琇所杀【按旧书云瑄虽年长其发谋及手刃皆琇为之】 条
所以杀万顷状系于斧奔江南将杀构父罪者然后诣
有司道泛水吏捕以闻中书令张九龄等皆称其孝烈宜贷死侍中裴耀卿等陈不可帝
亦谓然谓九龄曰孝子者义不顾命杀之可成其志赦
之则亏律凡为子孰不愿孝转相讎杀遂无已时卒用耀卿议议者以为冤帝下诏申谕
乃杀之临刑赐食瑄不能进琇色自如曰下见先人复
何恨人莫不悯之为谏揭于道敛钱为葬北邙尚恐仇人发之作疑冢使不知其处太宗
时有即墨人王君操夬隋末为乡人李君则所杀亡命
去时君操尚幼至贞观时朝世更易而君操寡孤仇家无所惮诣州自言君操密挟刃杀
之剔其心肝噉立尽趋告刺史曰父死凶手历二十年
不克报乃今刷愤愿归死有司州上状帝为贷死高宗时绛州人赵师举父为人杀师举
幼母改嫁仇家不疑师举长为人佣夜读书久之手杀
讎人诣官自陈帝原之永徽初同官人同蹄智寿【旧书作周智寿】 父为族人所害
智寿与弟智爽候诸涂击杀之相率归有司争为首有
司不能决者三年或言弟始谋乃论死临刑曰讎已报死不恨智寿自投地委顿身无完
肤舐智爽血尽乃已见者伤之武后时下邳人徐元庆
父爽为县尉赵师韞所杀元庆变姓名为驿家保久之师韞以御史舍亭丁元庆手杀之
自囚诣官后欲赦死左拾遗陈子昂议谓宜正国之典

寘之以刑然后旌闾墓可也后礼部员外郎柳宗元驳曰礼之大本以防乱也若曰无为贼虐凡为子者杀无赦刑之大本亦以防乱也若曰无为贼虐凡为治者杀无赦其本则合其用则异旌与诛不得并也诛其可旌兹谓滥黜刑甚矣旌其可诛兹谓僭坏礼甚矣若师韞独以私怨奋吏气虐非辜州牧不知罪刑官不知问上下蒙冒吁号不闻而元庆能处心积虑以冲讎人之胸介然自克即死无憾是守礼而行义也执事者宜有惭色将谢久不暇而又何诛焉其或父不免于罪师韞之诛不愆于法是非死于吏也是死于法也法其可讎乎讎天子之法而戕奉法之吏是悖鹜而凌上也执而诛之所以正邦典而又何旌焉礼之所谓讎者冤抑沈痛而号无告也非谓抵罪触法陷于大戮而曰彼杀之我乃杀之不议曲直暴寡胁弱而已春秋传曰父不受诛子复讎可也父受诛子复讎此推刃之道复讎不除害今若取此以断两下相杀则合于礼矣且夫不忘讎孝也不爱死义也元庆能不越于礼服孝死义是必达理而闻道者也夫达理闻道之人岂其以王法为敌讎者哉议者反以为黜黜刑坏礼其不可以为典明矣请下臣议附于令有断斯狱者不宜以前议从事宪宗时衢州人余常安父叔皆为里人谢全所杀常安八岁已能谋复讎十有七年卒杀全刺史元锡奏轻比刑部尚书李墉执不可卒抵死又富平人梁悦父为秦果所杀悦杀讎诣县请罪诏曰在礼父讎不同天而法杀人必死礼法王教大端也二说异焉下尚书省议职方员外郎韩愈曰子复父讎见于春秋与礼记周官若子史不胜数未有非而罪者最宜详于律而律无条非阙文也盖以为不许复讎则伤孝子之心许复讎则人将倚法颛杀无以禁止夫律虽本于圣人然执而行之者有司也经之所明者制有司者也丁宁其义于经而深没其文于律者将使法吏一断于法而经术之士得引经以议也周官曰凡杀人而义者令勿讎讎之则死义者宜也明杀人而不得其宜者子得复讎也此百姓之相讎者也公羊子曰父不受诛子复讎可也不受诛者罪不当诛也诛者上施下之辞非百姓相杀也周官曰凡报仇讎者书于士杀之无罪言将复讎必先言于官则无罪也复讎之名虽同而其事各异或百姓相讎如周官所称可议于今者或为官吏所诛如公羊所称不可行于今者周官所称将复讎先告于士若孤稚羸弱抱微志而伺敌人之便恐不能自言未可以为断于今也然则杀之与赦不可一宜定其制曰有复父讎者事发具其事下尚书省集议以闻酌处之则经无失指矣有诏以悦申冤请罪诣公门流循州穆宗世京兆人康买得年十四父宪责钱于云阳张莅莅醉拉宪危死买得以莅趨悍度救不足解则举锤击

其首三日莅死刑部侍郎孙革建言买得救父难不为暴度不解而击不为凶先王制刑必先父子之亲春秋原心定罪周书诸罚有权买得孝性天至宜赐矜宥有诏减死

△侯知道 【程俱罗 何澄粹 李兴】

侯知道程俱罗者灵州灵武人居亲丧穿圻作冢皆身执其劳乡人助者即哭而却之庐坟次哭泣无节知道七年俱罗三年不止知道圻尘积首率夜半傅坟踊而哭鸟兽为悲号李华作二孝赞表其行 【案唐文粹载二孝赞序云华奉使朔陲欲亲往引属河凌绝愿言不果凭轼隔川寄声二孝同为赞一章以附敦史云】 又有何澄粹者池州人亲病日辄俗尚鬼病者不进药澄粹剔股仕进亲疾为瘳后亲没伏于墓哭踊无数以毁卒当时号青阳孝子士为作诔甚众寿州安丰李兴父被恶疾兴割股肉以献父不能啖宿而死兴号呼垂血捧土城坟庐于墓左昼夜哭庐上产紫芝白芝庐中醴泉涌寿州刺史上其事诏表其闾刻石柳宗元为作孝门铭

△许法慎

许法慎沧州清池人甫三岁已有知时母病不饮乳惨惨有忧色或以珍饵诡悦之辄不食还以进母后亲丧常庐于幕有甘露嘉禾灵芝木连理白兔之祥天宝中表异其闾

△崔衍

崔衍字着深州安平人天宝末以明经授富平尉父伦使吐蕃被留衍以月俸钱送继母李氏李不慈伦归李敝衣以见问故曰衍不吾给伦怒召衍将袒而鞭之衍涕泣无所陈伦弟殷趋白之伦悟由是潜不得入旋调清源令劝民力田怀附流亡观察使马燧表其能徙美原父卒事李益谨李所生子合多取子母钱衍岁为偿负不胜计官江州刺史妻子仅免饥寒历苏虢二州虢居陕华闲多山田又邮传剧道而赋数倍入属岁无秋民举流亡衍亟疏奏之德宗为诏度支减赋迁宣歙池观察使简静为百姓所怀卒赠工部尚书衍签约畏法室无妾媵禄稍周于亲族葬埋嫁娶倚以济者数十家及卒不能藏丧表诸朝赐赙帛三段米粟称之元和元年以衍有惠在民诏书褒美赐一子官谥曰懿 【案崔衍旧书原载于孝友新书移入列传今从旧书】

△林攒

林攒泉州莆田人贞元初仕为福唐尉母羸老未及迎而病攒弭弃官还及母亡水浆不入口五日自挺臂作冢庐其右有白鸟来甘灵降诏作二阙于母墓前又表其闾蠲徭役时号阙下林家

△丁公着

丁公着字平子苏州吴人三岁丧母甫七岁见邻媪抱子哀感不肯食请于父绪愿绝粒学老子道父听之稍长父勉敕就学举明经高第授集贤校书郎不满秩辄去侍养于家父丧负土作冢貌力瘠憊见者忧其死孝观察使薛苹表上至行诏赐粟帛旌其闾淮南节度使李吉甫表授太子文学兼集贤校理迁直学士充皇太子诸王侍读穆宗立未听政召居禁中条询治理且许以相公着陈让坚切乃擢给事中迁工部侍郎知吏部迁事公着内知帝意向用故辞疾求外授浙江观察使徙河南尹治以清静闻四迁礼部尚书翰林侍讲学士太和中以病丐还乡里未至而卒公着清约守道每进一官辄忧见于颜色四十丧妻终身不畜妾及卒天下惜之 【按丁公着旧书原载于孝友新书移入列传今从旧书】

△陈饶奴

陈饶奴饶州人年十二亲并亡寡弱居丧又岁饥或教其分弟妹可全性命饶奴流涕身丐诉相全养刺史李复异之给资储署其门曰孝友童子

△王博武

王博武许州人会昌中侍母至广州及沙涌口暴风母溺死博武自投于水岭南节度使卢贞俾吏沈畧获二尸焉乃葬之表其墓曰孝子墓诏为刻石

△万敬儒

万敬儒庐州人三世同居丧亲庐墓刺血写浮屠书断手二指辄复生州改所居曰成孝乡广孝聚大中时表其家

△章全益

章全益梓州涪城人少孤炙兄全启所鞠母病全启刲股膳母而愈及全启亡全益服斩衰断手一指以报不畜妻僮仆处一室卖药自业世传能作黄金居城都四十年号章孝子卒

△张士岩

张士岩父病药须鲤鱼冬月冰合有獭衔鱼至前得以供父父遂愈母病痲士岩吮血父亡庐墓有虎狼依之

△焦怀肃

焦怀肃母病每尝其唾若味异辄悲号几绝母终水浆不入口五日负土成坟庐守日一食杖然后起继母没亦如之

△张进昭

张进昭母患狐刺左手堕而终及殡进昭截左腕庐于墓 【按张士岩以下三人见唐书孝友传序不详里居年月今摘附于本卷之后

】

○五代

（臣）等谨案欧阳修五代史不立孝友传今于一行传中移栽李自伦一人以符郑志体例

李自伦

△李自伦

李自伦深州人为本州岛司功参军天福四年尚书户部奏自伦高祖训训生粲粲生则则生忠忠生自伦自伦生光厚六世同居敕以所居

飞鳧乡为孝义乡匡圣里为仁和里旌表门闾使高其外门门安绰楔左右建台高一丈二尺广狭方正称之坊以白而赤其四角使不孝不义

者见之可以悛心而易行焉

钦定续通志卷五百二十三

●钦定续通志卷五百二十四 孝友传二

孝友传

宋

○宋

李璘【甄婆儿】 徐承珪 刘孝忠【吕升 王翰】 罗居通
【黄德輿】 齐得一 李罕澄 邢神
留【沈正】 许祚【李琳 田祚 惠从顺 赵广 郑彦圭 俞隼 张文裕
张巨源 刘芳 瞿景鸿 陈偁 褚彦逢 彭程
胡仲尧仲容】 陈兢 洪文抚 易延庆 董道明 郭琮
【毕赞】陈思道 方纲 庞天佑
顾忻【李琼】 朱泰 成象 刘斌 樊景温【荣恕旻】
祁暉 何保之 李玘 侯义
王光济【李祚 周善敏】 江白 裘承询【孙浦 常元绍
王美 董孝章 高珪 朱仁贵邢浚 赵祚 杨
荣 赵友 李居正 张可象 张珪 崔谅 王觉 曹遵 童升 樊可行元守全
段德 张仁遇 王子上 瞿肃 王世及 李宗
佑 刘闰 汪政 李耕东野宜 宝益 张化基 阎用和 杨忠义】

常真【晏 守规 王淦 李继成 胡元兴】 杜谊【揆】 姚宗明

邓中和 毛安輿 李访 朱

寿昌 侯可 申积中【陈芳 王襄】 郝戴 支渐【邓宗古 沈宣
】 苏庆【文台亨】 仰忻 赵伯
深【彭瑜】 毛洵【李筹 杨芾】 杨庆 陈宗 郭义
申世宁 苟与龄 王珠 颜诩
张伯威 蔡定 郑德珪【德璋】 鲍宗岩
李璘【甄婆儿】
徐承珪
刘孝忠【吕升 王翰】
罗居通【黄德舆】
齐得一
李罕澄
邢神留【沈正】
许祚【李琳 田祚 惠从顺 赵广 郑彦圭 俞隽 张文裕 张巨源 刘
芳 瞿景鸿 陈侃 褚彦逢 彭程】
胡仲尧【胡仲容】
陈兢
洪文抚
易延庆
董道明
郭琮【毕赞】
陈思道
方纲
庞天佑
顾忻【李琼】
朱泰
成象
刘斌
樊景温【荣恕旻】
祁暉
何保之
李玘
侯义
王光济【李祚 周善敏】
江白

裘承询 【孙浦 常元绍 王美 董孝章 高珪 朱仁贵 邢浚 赵祚 杨
荣 赵友 李居正 张可象 张珪 崔谅 王
觉 曹遵 童升 樊可行 元守全 段德 张仁遇 王子上 瞿肃 王世及
李宗佑 刘闰 汪政 李耕 东野宜 竇益 张
化基 阎用和 杨忠义】

常真 【常晏 常守规 王淦 李继成 胡元兴】

杜谊 【杜揆】

姚宗明

邓中和

毛安輿

李访

朱寿昌

侯可

申积中 【陈芳 王襄】

郝戴

支渐 【邓宗古 沈宣】

苏庆文 【台亨】

仰忻

赵伯深 【彭瑜】

毛洵 【李筹 杨芾】

杨庆

陈宗

郭义

申世宁

苟与龄

王珠

颜诩

张伯威

蔡定

郑德珪 【郑德璋 鲍宗岩】

△李璘 【甄婆儿】

李璘瀛州河闲人晋开连末契丹侵边有陈友者乘乱杀璘父及家属三人干德初
琳隶殿前散只侯友为军小校相遇于京师宝积坊北

璘手刃杀友自言复父讎鞫实太祖壮而释之雍熙中又有京兆鄠县民甄婆儿母刘为

同里董知政击杀婆儿始十岁后数年稍长泣谓兄课
儿曰大讎不报何用生为时方寒餐具酒馔诣母坟痛哭归取条桑斧置袖中往见知政
知政方与小儿戏婆儿出其后以斧斫其脑杀之事闻
太宗嘉其能复母讎特贷焉

△徐承珪

徐承珪莱州掖人幼失父母与兄弟三人及其族三十口同甘藜藿衣服相让历四
十年不改其操所居崇善乡缉俗里木连理瓜瓠异蔓
同实州以闻干德元年诏改乡名义感里名和顺承珪尝为赞皇令

△刘孝忠 【吕升 王翰】

刘孝忠并州太原人母病三年孝忠割股肉断左乳以食母母病心痛剧孝忠燃火
掌中代母受痛母寻愈后数岁母死孝忠佣为富家奴
得钱以葬富家知其孝行养为己子后养父两目失明孝忠为舐之七日复能视刘钧闻
而召见署宣陵副使开宝二年太祖亲征太原召见慰
谕又莱州人吕升父权失明剖腹采肝以救父疾父复能视而升不死冀州南宫人王翰
母丧明翰自抉右目睛补之母目明如故淳化中并下
诏赐粟帛

△罗居通 【黄德輿】

罗居通益州成都人母死庐墓三年有甘灵降坟树芝草生其旁开宝四年长吏以
闻诏以居通为延长主簿大中祥符初资州人黄德輿
葬父母负土成坟甘泉涌其侧降诏旌表

△齐得一

齐得一密州诸城人晋末皇甫暉为密州防御使得一父为客将及暉叛归淮南屡
率众剽劫于故乡得一家被掠殆尽后王万敢为防御
使性贪暴执乡民十八家责其尝以牛酒馈贼尽杀之而取其资产得一亲属死者十余
人惟得一与兄脱身获免明年诣阙上诉朝廷遣使按
鞫之得实万敢削官判官胡辄坐死开宝中诏郡国举廉退孝悌之士本郡即以得一
应诏至阙策试中选授章邱主簿

△李罕澄

李罕澄冀州阜城人七世同居汉干佑三年诏改乡里名及旌其门闾太平兴国六
年长史以汉所赐诏书来上复旌表之

△邢神留 【沈正】

邢神留深州陵泽人父超逋官租里胥督租与鬪殴里胥死神留年十六诣吏求代
父死州以闻特诏减死端拱初泰州海陵人沈正父为
屯田院衙官凶暴无赖使酒殴平人死正中涂见父恐惧述其故正即号呼褫衣就殴其

尸巡警者捕送官狱具怡然就刑闻者悲之

△许祚 【李琳 田祚 惠从顺 赵广 郑彦圭 俞隼 张文裕 张巨源
刘芳 瞿景鸿 陈侃 褚彦逢 彭程】

许祚江州德化人八世周居长幼七百八十一口太平兴国七年旌其门闾淳化二年本州岛言祚家春夏常乏食诏岁贷米于斛又有信州

李琳十五世同居具州田祚京兆惠从顺十世同居庐州赵广顺安军郑彦圭信州俞隼八世同居陕州张文裕六世同居襄州张巨源刘芳潭

州瞿景鸿温州陈侃江陵褚彦逢五世同居条州彭程四世同居皆赐诏旌表门闾巨源素习法律太平兴国五年赐明法及第芳淳化四年来

贺寿宁节赐进士出身侃事母至孝赐其母粟帛彦逢兄弟五人皆年七十余至道元年转运使表其事诏补彦逢教练使

△胡仲尧 【胡仲容】

胡仲尧洪州奉新人累世聚居至数百口构学舍于华林山别墅聚书尔卷大设厨廩以延四方游学之士南唐时尝授寺丞雍熙二年诏

旌其门闾淳化中州境旱叹仲尧发廩减市直以赈饥民又以私财造南津桥太宗嘉之除本州岛助教许每岁以香稻时果贡于内东门五年遣

弟仲容来贺寿宁节特授试校书郎仲尧稍迁国子监主簿致仕卒仲容字咸和咸平三年复至阙贡土物改大理评事建本县孔子庙后迁光

禄丞致仕卒

△陈兢

陈兢江州德安人陈宜都王叔明之后叔明五世孙兼唐右补阙兼生京秘书少监集贤院学士无子以从子褒为嗣褒至盐官令褒生灌

高安丞灌孙伯宜居德安以著作佐郎召不起伯宣子崇为江州长史益置田园为家法戒子孙择羣从掌其事建书堂教诲之僖宗时尝诏旌

其门南唐又为立义门免其徭役崇子袞江州司户袞子昉试奉礼郎昉家十三世同居长幼七百口不畜仆妾上下姻睦人无闲言每食必羣

坐广堂未成人者别为一席有犬百余亦置一槽共食一犬不至羣犬亦怕不食建书楼于别墅延四方士肄业者多依焉开宝初平江南知州

张齐上疏请仍旧免其徭役从之昉弟子鸿太平兴国七年江南转运使张齐贤又奏免杂科兢即鸿之弟淳化元年知州康戡又上言兢家常

苦食不足诏本州岛每岁贷粟二千石后兢死其从父弟旭每岁止受贷粟之半云省嗇而食可以及秋成属岁歉谷贵或劝其全受而粟之可邀

善价旭曰朝廷以旭家千口軫其乏食贷以公粟岂可见利忘义为罔上事乎大中祥符四年为江州助教卒弟蕴主家事天圣元年继为助教

卒弟泰主之泰弟度太子中舍致仕从子延赏可并举进士延赏职方员外郎

△洪文抚

洪文抚南康建昌人曾祖谔唐虔州司仓参军子孙众多以孝弟著称六世义居室无异衅就所居雷湖北创书舍招来学者至道中本军以闻遣内侍裴愈赍御书百轴赐其家文抚遣弟文举诣阙贡土物为谢太宗飞白一轴曰义居人以赐之命文举为江州助教三年又诏表其门闾自是每岁遣子弟入贡必厚赐答之文抚兄子待用登咸平二年进士第至都官员外郎

△易延庆

易延庆字余庆筠州上高人父赞以勇力仕南唐至雄州刺史延庆以父荫为奉礼郎显德四年周师克淮南赞归朝授道州刺史延庆亦授大名府兵曹参军后为大理评事知临淮县干德末赞卒葬临淮延庆居丧摧毁庐墓侧手植松柏数百本旦出守墓夕归侍母墓侧生紫芝玉芝服阙以母老称疾不就官母卒从藁殡数年出为大理寺丞尝司建安市征以私归葬其母为知军扈继升所劾坐免复庐墓侧数年母平生嗜粟延庆树二粟于墓侧二树连理后知端州卒子纶大中祥符元年进士及第

△董道明

董道明蔡州袁信人母死出葬道明潜匿墓中人瘞之经三日家人发冢取之道明无恙终身庐于墓侧

△郭琮 【毕赞】

郭琮台州黄岩人幼丧父事母极恭顺娶妻有子移居母室凡母之所欲必亲奉之居常不过中食绝饮酒茹葷三十年以祈母寿母年百岁耳目不衰饮食不减乡里异之至道三年转运使以闻诏表门闾除其徭役明年母无疾而终琮哀号几绝乡里率金帛助葬又有越州应天寺僧者幼贫无以养母剃发乞食以给晨夕母年一百五岁而终潭州长沙人毕赞仕郡为引赞吏性至孝父母皆年八十余转运使表其事诏赞解职终养

△陈思道

陈思道江阴人丧父事母兄以孝悌闻鬻酰市侧以给晨夕母病思道衣不解带者数月双目疮烂饮食随母多少泊母丧水浆不入口七日既葬哀鬻酰之利得钱十万奉其兄结庐墓侧日夜悲恸其妻时携儿女诣之拒不见白兔驯狎虎豹环庐而卧咸平元年知军上其事诏赐束帛旌其门

△方纲

方纲池州青阳人八世同衅家属七百口居室六百区每旦鸣鼓会食常出稻五千
■ 〈竹易〉 賑贷贫民景德二年转运使以闻诏旌其
门天禧中安抚使还言纲家税籍钱四百余千米二千五百斛同居四百年而本县科率
一无宽假望蠲其户杂科诏从之

△庞天佑

庞天佑江陵人以经籍教授里中父疾天佑割股肉食之疾愈又病目丧明天佑号
泣祈天舐之父年八十余卒天佑负土封坟结庐其侧
昼夜号不绝声知府陈尧咨亲往致奠上其事诏旌表门闾

△顾忻 【李琼】

顾忻泰州泰兴人十岁丧父以母病葷辛不入口者十载鸡初鸣具冠带率妻子诣
母室问所欲如此五十年未尝离左右母老目不能覩
物忻日夜号泣祈天母目忽明烛下能缝衽九十余无疾而终又有杭州仁和人李琼以
鬻缿为业事母孝夜常十余起省母母喜食时新琼百
方求市得之

△朱泰

朱泰湖州武康人家贫鬻薪养母常适数十里外易甘旨以养母泰服食粗粝戒妻
子常候母色一日鸡初鸣入山遇虎搏攫负之而去泰
已瞑眩行百余步忽稍醒厉声曰虎为暴食我所恨母无托尔虎忽弃泰于地泰匍匐而
归乡里闻其孝感率金帛遗之目为朱虎残

△成象

成象渠州流江人以诗书训授里中母病割股肉食之淳化中李顺盗据郡县象父
母惊悸死烬骨寄浮屠舍象号泣营葬庐墓侧以衰服
襟袂筛土于坟上日三斗虎豹环庐而卧象无畏色燕百余集庐中禾生墓侧吐九穗服
终犹未还家知礼者为书以谕之乃归教授远近目为
成孝子

△刘斌

刘斌定州人父加友端拱中为从弟志元所杀斌兄弟皆幼随母改适人母尝戒之
曰尔等长必复父仇景德中斌兄弟挟刀伺志元于道
刺之不殊即诣吏自陈吏具狱上请诏志元黥面配隶汝州释斌等罪

△樊景温 【荣恕旻】

樊景温陕州芮城人荣恕旻雄州归信人兄弟异居积年大中祥符中景温樗树五
枝并为一恕旻家榆树两本自合两家感其累复义聚
乡人称雍睦

△祁暉

祁暉字坦之萊州膠水人淳化三年進士歷度支員外郎直集賢院天禧中出知濰州母卒葬于州城南暉既解官就墳側構小室號泣守護蔬食經六冬墮足二指有白鳥兔馴擾墳側州人異之以狀聞詔賜粟帛令長吏每月存問

△何保之

何保之梓州通泉人母卒負土成墳廬于其側日有羣鳥飛集墳上哀鳴不去又常有兔馴于坐隅人稱異焉大中祥符閑降詔旌恤

△李玘

李玘大名宗城人性篤孝力耕事母母卒讓田與弟堅廬于墓所晝夜號泣負土筑墳又以二代及諸族父母藁葬者盡禮筑之凡三年成六墳留守三年天禧中知府張知白以狀聞詔賜粟帛令府縣安存之里中有母在而析產者聞玘被旌兄弟慚懼復相率同居

△侯義

侯義應天府楚邱人貧無產佣田事母母卒義力自辦葬不掩墳壙晝則負土筑墳夜則慟哭柩側妻子困匱不給田主哀憐之資以糶糧踰年墳閑瓜異蒂木連理嘗還盜劫其衣服既而知是義物悉還之

△王光濟 【李祚 周善敏】

王光濟廬州人喪母因刻像日夕奉事如平生孝道純篤咸平二年本州島以孝聞有詔旌之時又有除州豐人李祚親喪廬墓側二十七年益州雙流人周善敏喪父廬墓側母病又割股肉以進遂愈大中祥符九年特詔旌表祚賜善敏粟帛存慰之

△江白

江白建昌人景德二年進士父禹錫卒白自鄞尉罷還負土營葬廬墓側藜羹芒屨晝夜號泣將終制猶然轉運使以狀聞詔賜粟麥酒帛

△裘承詢 【孫浦 常元紹 王美 董孝章 高珪 朱仁貴 邢浚 趙祚 楊榮 趙友 李居正 張可象 張珪 崔諒 王覺 曹遵 童升 樊可行 元守全 段德 張仁遇 王子上 瞿肅 王世及 李宗佑 劉閏 汪政 李耕 東野宜 竇益 張化基 閻用和 楊忠義】

裘承詢越州會稽人居雲門山前十九世無異舛子弟習弦誦鄉里稱其敦睦州以聞詔旌其門閭咸平後又有保定軍孫浦襄州常元紹蔡州王美解州董孝章并十世同居莫州高珪永定軍朱仁貴潞州邢浚相州趙祚八世同居麟州楊榮隰州趙友開封李居正潁州張可象衛州張珪滄州崔諒七世同居邢州王覺趙州曹遵六世同居衮州童升陳州樊可行京兆

元守全平定军段德五世同居开封张仁遇亳州王子
上建昌军瞿肃四世同居又河阴王世及大名李宗佑陈州刘闰宣州汪政潭州李耕或
聚居至七百口累数十百年并所在请加旌表诏从之
仍蠲其课调中大祥符初东封泰山判袞州王钦若言曲阜东野宜干封竇益合居五六
世有节行四年祀汾阴考制度使马起言陕州张化基
阁用和杨忠义聚族累世孝悌可称并即行在所降诏褒美各优赐粟帛

△常真 【常晏 常守规 王淦 李继成 胡元兴】

常真陈州项城人父母死庐墓终丧负土成坟不茹荤自周广顺中诏旌其门闾开
宝七年本州岛以闻诏再加旌表真妻病子晏割股肉养
母及死次子守规徒跣日一食庐墓三年太平兴国八年诏旌表之又有齐州王淦河南
李继成沧州胡元兴并母死负土成坟昼夜哭不绝声
州郡继以闻皆降诏旌其门闾赐以粟帛

△杜谊 【杜揆】

杜谊字汉臣台州黄岩人丧父母号恸昼夜不绝勺水不入口者累日卜葬徒跣负
土为坟往来十余里日渡塘涧泥水没胫虽大雨雪不
少止手足皴裂血流以漆涂之每覆一畚必三遶坟号而后去既葬芟舍墓旁负土终丧
邑大水民居庐墓漂坏甚众独不及谊邑人状其事以
闻诏书嘉奖后以祖垂象荫入官至赞善大夫尝知永城县岁捐俸钱三十万以收瘞汴
渠之溺死者又出俸钱率其下新文宣王庙两旁为学
舍数十区旦夕讲学于其堂以通判梓州卒子揆纔十六岁哭谊墓旁卒

△姚宗明

姚宗明河中永乐人十世祖栖云当唐贞元中调卒戍边栖云之父语其兄曰兄嗣
未立可无往某幸有子请代兄行遂战没塞上时栖云
方三岁其母再嫁栖云养于伯母既长事伯母如母伯母亡葬之又招魂葬其父乃庐于
父墓终身哀慕不衰河中尹浑瑊上其事诏表其门名
其乡曰孝悌社曰节义里曰敬爱栖云生岳岳生君儒君儒生师正自岳至师正四世庐
墓五世孙厚六世雅七世文八世敬真九世直十世宗
明当庆历初有司以姚氏十世同居闻于朝仁宗诏复其家十一世孙用和十二世孙士
明十三世孙德自宗明至德又三世自庆历以后又五
十余年而其家孝睦不替姚氏世为农无为学者家不甚富有田数十顷聚族百余人子
孙躬事农桑仅给衣食历三百余年无异辞者经唐末
五代兵戈乱离而子孙保守坟墓骨肉不相离散求之天下未或有焉

△邓中和

邓中和字祖德开封长垣人举三礼景佑庆历闲丧亲负土成坟庐墓终丧定省往

来如事生者二十年

△毛安輿

毛安輿嘉州洪雅人九岁父死负土为坟庐于其侧三年知益州张方平闻之遗以酒饩状其事以闻

△李访

李访韶州人业进士庐父母墓有虎暴伤旁人而不近访又有白鸟集坟上

△朱寿昌

朱寿昌字康叔扬州天长人以父巽荫累官权知岳州州滨湖多盗寿昌籍民船刻著名氏使相伺察盗发验船所向穷讨之盗少弭旁郡

取以为法富弼韩琦为相择寿昌使湖南或言邵州可置冶采金者有诏兴作寿昌言州近蛮金冶若大发蛮必争自此边境恐多事且废良田

数百顷非敦本仰末之道也诏亟罢之知阆州大姓雍子良杀人赂其里民出就吏狱具寿昌觉其奸引囚诘之曰吾闻子良与汝钱十万许纳

汝女为妇且壻汝子故汝代其命有之乎囚色动又撻之曰汝且死书券抑汝女为婢指钱为顾直又不壻汝子将柰何囚悟泣涕覆面曰几悞

死以实对立取子良正诸法郡称为神知广德军寿昌母刘氏巽妾也巽守京兆刘氏方娠而出寿昌生数岁始归父家 【按东都事略作寿

昌生七岁父守长安出其母刘氏嫁民闲与此互异】 母子不相闻五十年行四方求之不置饮食罕御酒肉言辄流涕用浮屠法灼背烧顶刺

血书佛经力所可致无不为之熙宁初与家人辞诀弃官入秦曰不见母吾不返矣遂得之于同州刘时年七十余矣嫁党氏有数子悉迎以归

京兆钱明逸以其事闻诏还就官寿昌以养母故求通判河中府数岁母卒寿昌居丧几丧明既葬有白鸟集墓上拊同母弟妹益笃又知鄂州

提举崇禧 【东都事略作崇福】 观累官司农少卿易朝议大夫迁中散大夫卒寿昌勇于义周人之急无所爱嫁兄弟两孤女葬其不能葬

者十余丧天性如此

△侯可

侯可字无可华州华阴人少倜傥不羁既壮笃志为学随计入京里中醵金赈行比还悉散其余与同举者曰此金乡里所以资应诏者也

不可以为他利且行闻乡人病念曰吾归则彼死矣遂留不去病者愈辍己马载之徒步而归孙沔征侬獠请参军事奏功得官知巴州化城县

巴俗尚鬼而废医唯巫言是用娶妇必责财贫人女至老不得嫁可为约束立制度变其习再调华原主簿郡吏赵至诚贪横可暴其罪言于大

府诛之签书仪州判官西夏寇边使者使可按视即以十数骑涉夏境猝与遇亟分其骑

为三四令之曰建尔旗帜旋山徐行夏人疑为诱骑不敢击韩琦镇长安荐知泾阳县说渭源羌酋输地八千顷因城熟羊以抚之又议复郑白渠得召对旋以微罪罢官至殿中丞卒于家可轻财乐义与田颜为友颜病重千里求医未归而颜死目不瞑人曰其侍侯君乎且敛而可至拊之乃瞑颜无子不克葬可辛勤百营鬻衣相役卒葬之方天寒单衣以居有馈白金者顾颜之妹处室举以佐其奁具一日自远归家以饔告适友人郭行扣门曰吾父病医邀钱百千卖吾庐而不售可惻然计橐中装略当其数尽与之关中称其贤 【按宋原作孝义故侯可以恤乡人病笃友谊亦得附传于推广锡类之义无害今并存之】

△申积中 【陈芳 王襄】

申积中成都人在襁褓中杨绘从其父起求之为承及长知非杨氏而绝口不言年十九登进士第事所养父母尽孝终身有二弟一妹为毕婚娶始归本族复为申氏蜀人以纯孝归之政和六年以奉议郎通判德顺军翰林学士许光凝尝守成都得其事荐诸朝召赴京师擢提举永兴军学事道卒初光凝所同荐者三人其一河阳故十理丞陈芳一门十四世同居三百年一邓州王襄经术登科事孀嫂如母养孤甥如子教诲后进矜恤乡里贫民以学行称乞加奖异诏表芳门闾赐襄号处士

△郝戴

郝戴字伯牙石州定胡人家贫竭力营养或怜伤之贷以钱数百万使取息自贍戴重谢留钱五六年不用复返之举进士调宛邱尉舞阳主簿通山令时年未五十以父樵老不第上书请致仕为父求官执政谕使赴官而后请曰如是则可升朝籍遇恩及亲矣于是留妻子于家独奉父行踰岁竟谢事上官以其治县有绩惜其去固留之耆老拜庭遮道皆不能止得太子中允以归未至乡里而樵卒自畚土造冢服除州以状闻诏赐粟帛治平末以吕公着荐起为奉宁军推官泾原经略使亦奏辟幕府戴曰向所以未老致仕欲官及亲也既不能及尚庶几以恩得赠今则无及矣姻族语其妻聂氏使劝戴聂曰吾不德无以助君子矧敢强其所不欲以累其高哉聂事舅姑亦以孝义着戴笃行苦节以终

△支渐 【邓宗古 沈宣】

支渐资州资阳人年七十持母丧既葬庐墓侧负土成坟蓬首垢面三时号泣哀毁瘠甚乡人句文鼎自娶妇即与父母离居覩渐至行深自悔责号恸而归孝养尽志乡闾观感而化者甚众邓宗古简州阳安人父死自培土为坟庐其侧晨夕号恸甘露降于墓木里中号为邓孝子

沈宣汝州梁人母亡既葬不塞墓门三十有六月昼负土夜拊棺而卧妻高氏亦有孝行渐以下三人元丰中皆褒赐粟帛

△苏庆文 【台亨】

苏庆文台亨皆夏县人庆文事父母以孝闻母少寡庆文惧其妻不能敬事每戒之曰汝事吾母少不谨必逐汝妻奉教母得安其室终身亨工画元丰中朝廷修景露宫调天下画工诣京师选试其优者待诏翰林畀以官禄亨名第一以父老固辞归养闾里贤之

△仰忻

仰忻字天颺温州永嘉人力学以笃行称年五十余执母丧尽孝礼躬自负土庐墓侧有慈鸟白行之瑞绍圣中郡守杨蟠表其里孝廉坊大观二年以行取士郡以忻应诏未几卒特赠将仕郎

△赵伯深 【彭瑜】

赵伯深字逢原父子偕宣各闲为棣州兵官属会兵动燕云子偕被檄往塞上伯深时尚幼与其母张留居棣州既而金人渡河伯深母子相失子偕亦隔绝建炎二年始得南归子偕卒伯深访寻其母三十余年一旦闻在泸南伯深徒步入蜀闲关累年绍兴二十一年乃得其母又彭瑜字君玉吉之安福人熙宁闲失其母瑜朝夕焚香祈天愿知母所在如是十余年俄有人言母为泰和倪氏妇瑜竟迎以归

△毛洵 【李筹 杨芾】

毛洵字子仁吉州吉水人天圣二年进士又中拔萃科性至孝凡守四官再以亲疾解任执药调膳尝而后进三月不之寢室父母继卒持锒荷土以为坟手胝面黔亲友不能识庐于墓凡二十一月朝夕哭踊食裁脱粟诸生请问经义对之流涕未尝言文抱疾归数日而卒郡以孝闻赐其家米帛兄溥字文祖亦以哀毁卒于舟中李筹者洵同县人字彦良与弟衡字平国生同乳二岁丧母十岁丧父兄弟每以不逮事亲为恨政和中改葬其母于杨山负土成坟庐于墓左产木一本两干高丈许复合于一至末乃分两干五枝乡人以为瑞杨芾者亦同县人字文卿性至孝归必市酒肉以奉二亲未尝及妻子绍兴五年大饥为亲负米百里外遇盗夺之不与盗欲兵之芾恸哭曰吾为亲负米不食三日矣幸哀我盗义而释之

△杨庆

杨庆鄞人父病贫不能召医乃割股肉啖之良已其后母病不能食庆取右乳焚之以灰和药进焉入口遂差久之乳复生绍兴十二年诏表其门

△陈宗

陈宗永嘉人年十六母蔡病笃刲股为饵病愈已而复病不救宗一恸而绝

△郭义

郭义兴化军人早游太学以操尚称年四十余客钱塘闻母丧徒跣奔丧母一恸辄呕血家贫甚故人有所馈不受聚土为坟手蒔松竹而庐于其旁甘露降于墓上乌鹄驯集郡上其事诏表其闾

△申世宁

申世宁信州锐山人绍兴六年潘达兵袭锐山父俞年七十未及出户遇贼贼意其有藏金欲杀之世宁年未冠亟引颈愿代父死贼感其孝两全之

△苟与龄

苟与龄字寿隆滁州来安人志尚高洁事其亲生养死葬力竭而礼尽乡党称之母歿庐墓侧有芝十九茎生于墓亭郡县以事闻旌其门

△王珠

王珠字仲渊吉州龙泉人以孝谨闻建炎闲居父忧芝数本生墓侧倒植竹以为
■〈木戈〉复生柯叶绍兴闲再罹母丧复有双竹灵芝之祥

△颜诩

颜诩唐太师真卿之后真卿尝谪庐陵故诩为吉州永新人诩少孤兄弟数人事继母以孝闻一门千指家法严肃男女异序少长辑睦匪架无主厨饌不异义居数十年终日怡愉家人不见其喜愠年七十余卒

△张伯威

张伯威大安军人绍熙元年武举进士调神泉尉祖母黄年九十八不忍之官黄得血痢疾濒殆伯威剔左臂肉食之遂愈继母杨因姑病笃惊而成疾伯威复剔臂肉作粥以进其疾亦愈伯威妹嫁崔匀其姑王疾妹亦剔左臂肉作粥以进达旦即愈知大安军罗植即伯威所居立纯孝坊崔均所居立孝妇坊事闻诏伯威与升擢倍赐其妹东帛

△蔡定

蔡定字符应越州会稽人父革依郡狱吏佣书以生资定使学游乡校稍稍有称郡狱吏一日坐舞文法被系革以注误年七十余矣法当免系鞫胥任泽削其籍年而入之罪且与狱吏等案具府奏上之方待命于朝故俱久囚而革不得独决定数诣府号愬请代坐狱弗许请效命干戎行弗许请隶伍符为兵又弗许定知父终不可赎乃谋死以感动有司于是预为志铭其墓又为状若诣府者结置袂闲皆叙陈致死之由

冀其父之必免建炎元年十二月甲申自赴河死府帅闻之立命出革厚为定具棺敛事而抚周其家

△郑德珪 【郑德璋 鲍宗岩】

郑德珪婺州浦江人四世祖绮善读书通春秋谷梁学以肃睦治家九世不异爨德珪与弟德璋孝友天至昼则联几案夜则同衾寝德璋

素刚直与物多连宋亡仇家陷以死罪会当逮扬州德琳哀弟之见诬乃阳谓曰彼欲害吾也何预尔事我往则奸状白尔去得不死乎即治行

德璋追至诸暨道中兄弟相持顿足哭争欲就死德珪默计沮其行遂给以无往夜将半从闲道逸去德璋复追至广陵德璋已毙于狱德璋闻

之恸绝者数四负骨归葬庐墓再期德珪之子文嗣幼病倭德璋鞠之如己子 【按本传宋史原目作郑绮今因其叙德珪兄弟事为多改作

郑德珪传附载德璋谨识】 有鲍宗岩者字傅叔徽州歙人子寿孙字子寿宋末盗起里中宗岩避地山谷闲为贼所得缚宗岩树上将杀之寿

孙拜前愿代父死宗岩曰吾老矣仅一子奉先祀岂可杀之吾愿自死盗两释之

钦定续通志卷五百二十四

●钦定续通志卷五百二十五 孝友传三

孝友传

金

○金

温特赫鄂勒博

陈颜

耶律安礼

刘瑜

孟兴

王震

刘政

温特赫鄂勒博

陈颜

耶律安礼

刘瑜

孟兴

王震

刘政

△温特赫鄂勒博

温特赫鄂勒博西北路松科硕硕欢明安人年十五居父丧不饮酒食肉庐于墓侧母疾刲股肉疗之疾愈诏以为护卫

△陈颜

陈颜卫州汲县人世业农父光宋季擢武举第调寿阳尉未赴值金兵取汴光病围城中颜闲关渡河往省因扶疾北归及为家奴玛哩布

哈诬与贼通系狱擄掠不胜因自诬服颜诣郡请代父死太守徐某哀之不敢决适帅臣至郡以其状白帅曰此真孝子也遂并释之天会七年诏旌表门闾

△耶律安礼

耶律安礼本名纳罕系出约尼氏幼孤事母以孝闻辽季闲关避难未尝一日怠温清入朝当路者重其行义使主师府文字授左班殿直天眷初从元帅于山西母丧不克归葬主帅怜之赙礼甚厚安礼冒大暑挽柩行千余里哀毁骨立行路嗟叹服除由行台吏礼部主事累迁工部侍郎改左司郎中天德闲罢行台尚书省入为工部侍郎累迁本部尚书贞元二年四月为宋国生日使【按交聘表载耶律安礼使宋在贞元二年四月非天德之冬也其奉使为贺生日亦非岁元考宋史高宗纪亦云贺天中节与表相符本传作天德明年冬为宋国岁元使应系讹误谨改正】被诏治鞫韩王亨狱于广宁亨无反状安礼还奏海陵怒疑安礼为宗弼故吏乃遣再往与李老僧鞫之老僧由是杀亨于狱改吏部尚书护大房山诸陵工作拜枢密副使封谭国公迁尚书右丞进封郟国公转左丞密谏伐江南忤海陵意罢为南京留守封温国公安礼长于吏事廉谨自将从帅府再伐宋宝货人口一无所取贵为执政奴婢止数人怕有契券时议贤之【按耶律安礼闲关奉母千里挽柩孝行笃至金史旧系列传今改录于此】

△刘瑜

刘瑜棣州人家贫母丧不能具葬乃质其子以给丧事明昌三年诏赐粟帛复其终身

△孟兴

孟兴蚤丧父事母孝谨母歿丧葬尽礼事兄如事其父明昌三年诏赐粟帛

△王震

王震宁海州文登人为进士学母患风疾刲股肉杂饮食中疾遂愈母歿哀泣过礼目生翳服除不疗而愈皆以为孝感所致特赐同进士出身诏尚书省拟注职任

△刘政

刘政洺州人性笃孝母老丧明政以舌舐母目逾旬忽能视母疾昼夜侍侧衣不解带刲股肉啖之者再三母死负土起坟乡邻欲佐其劳政谢之庐墓三年防御使以闻除太子掌饮丞

钦定续通志卷五百二十五

●钦定续通志卷五百二十六 孝友传四

孝友传

元

○元

王闰 郭道卿【佐卿 廷炜】 萧道寿 郭格格 张闰
【芮世通 向存义 丁煦】 田改住【王珠尔
】 宁珠赫【李嘉努 管如林 朱天祥】 布延苏达勒【尹梦龙 】【
樊渊【赖禄孙】 刘德泉【朱显
吴思达 朱汝谐】 郭回 孔全【张子夔 陈乞儿 赵国安
张琛 李庭瑞 伊喇巴延 齐哩克岱】 杨
一【张本 张庆 元善】 赵毓 胡光远【庞遵】 陈
韶孙 李忠【吴国宝】 李茂 羊
仁【黄觉经 章卿孙 俞全 李鹏飞】 赵一德 王思聪 彻辰台
王初应【施合德 发仔】 郑文嗣【大
和】 王荐 郭全【刘德 玛雅哈 刘居敬 】【 杨
皞 丁文忠【文孝】 邵敬祖【李彦忠
谭景星 郭成】 扈铎 孙秀实【贾进 李子敬】 宗杞
赵荣 吴好直【柴郁 陈舜咨】 余
丙 徐钰 尹莘【孙希贤 卜胜荣】 刘廷让 刘通【黄镒
丁祥一】 张旺舅 张思孝 杜
佑 长寿【梁威逊 齐哩克 高中 武进】 孙瑾【吴希曾】
张恭 訾汝道 王庸 黄赞
石明三 刘琦 刘源 祝公荣 陆思孝 姜兼
胡伴侣 王士宏 何从义 阿
都齐 高必达 曾德 靳曷 黄道贤 史彦斌 张绍
祖 李明德 张缉 魏敬益 杨
霖 孙抑 石永 王克己 刘思敬 吕佑 周乐

王闰

郭道卿【郭佐卿 郭廷炜】

萧道寿

郭格格

张闰【芮世通 向存义 丁煦】

田改住【王珠尔】

宁珠赫【李嘉努 管如林 朱天祥】

布延苏达勒 【尹梦龙】

樊渊 【赖禄孙】

刘德泉 【朱显 吴思达 朱汝谐】

郭回

孔全 【张子夔 陈乞儿 赵国安 张琛 李庭瑞 伊喇巴延 齐哩克岱】

杨一 【张本 张庆 元善】

赵毓

胡光远 【庞遵】

陈韶孙

李忠 【吴国宝】

李茂

羊仁 【黄觉经 章卿孙 俞全 李鹏飞】

赵一德

王思聪

彻辰台

王初应 【施合德 发仔】

郑文嗣 【郑大和】

王荐

郭全 【刘德 玛雅哈 刘居敬】

杨皞

丁文忠 【丁文孝】

邵敬祖 【李彦忠 谭景星 郭成】

扈铎

孙秀实 【贾进 李子敬】

宗杞

赵荣

吴好直 【柴郁 陈舜咨】

余丙

徐钰

尹莘 【孙希贤 卜胜荣】

刘廷让

刘通 【黄镒 丁祥一】

张旺舅

张思孝

杜佑
长寿 【梁威逊 齐哩克 高中 武进】
孙瑾 【吴希曾】
张恭
訾汝道
王庸
黄赞
石明三
刘琦
刘源
祝公荣
陆思孝
姜兼
胡伴侣
王士宏
何从义
阿都齐
高必达
曾德
靳昺
黄道贤
史彦斌
张绍祖
李明德
张缉
魏敬益
汤霖
孙抑
石永
王克己
刘思敬
吕佑
周乐
△王闰

王闰东平须城人父弃饶于财垂老费且尽不甘淡薄闰朝夕勤苦入市营奉无阙父性愎多戾闰左右承顺甚得其欢心及父疾夜燃长明灯室中火延篱壁闲闰惊起驰救火已炽烟焰蔽寝户闰突入火中解衣蒙父抱而出肌体灼烂而父无少伤一女不能救遂焚死中统二年复其役

△郭道卿 【郭佐卿 郭廷炜】

郭道卿兴化莆田人四世祖义重至孝宋绍兴闲诏旌之乡里为立孝子祠至元初闽盗起居人窜匿道卿与弟佐卿独守孝子祠不去俱被执盗将杀其弟道卿泣曰吾有儿已长弟弱子幼请代弟死佐卿亦泣曰吾家事赖兄以理请杀我道卿固引颈受刃盗相顾曰汝孝门兄弟若此吾何忍害两释之道卿年八十子廷炜为建宁路平准库使辞归侍养道卿尝病危甚廷炜忧瘁扶护一夕发尽白 【按元典章载至大元年诏旌其门曰世守孝义】 有司言状旌之

△萧道寿

萧道寿京兆兴平人家贫焉针以自给母年八十余道寿事养尽礼每旦俟母起夫妇亲侍盥栉日三饭必待母食然后退就食至夕必待母寝然后退就寝出外必以告母许乃敢出母怒欲挞之即自进杖伏地以受杖足母命起乃起起复再拜谢违教拱立左右俟色喜乃退母尝有疾医累岁不能疗道寿割股肉啖之而愈至元八年表其门

△郭格格

郭格格平阳翼城人父宁为钦察先锋使首领官戍大良平宋耐史太尉来攻陷之宁全家被俘史将杀宁格格年五岁告史曰勿杀吾父当杀我史惊曰五岁儿能为是言吾当金汝家即以骑送宁等往合州遇蒙古兵骑惊散宁家俱得还御史以事闻命旌之

△张闰 【芮世通 向存义 丁煦】

张闰延安延长县人隶军籍八世不异爨家人百余口无闲言日使诸女诸妇各聚一室为女红工卅敛贮一库室无私藏幼稚啼泣诸母见者即抱哺一妇归宁留其子众妇共乳不问孰为己儿儿亦不知孰为己母也闰兄显卒即以家事付侄聚聚辞曰叔父行也叔宜主之闰曰侄宗子也侄宜主之卒以付聚至元二十八年与芜湖芮世通十世同居峡州向存义汴梁丁煦八世同居并加旌焉

△田改住 【王珠尔】

田改住汶上人父病不能愈祷于天去衣卧水上一月同县王珠尔母病卧冰上半月

△宁珠赫 【李嘉努 管如林 朱天祥】

宁珠赫山丹州人母年七十余患风疾药餌不效珠赫割股肉进啖遂愈岁余复作不能行珠赫手涤溷秽护视甚周造板輿载父母舁行园田以娱之潭州万户伊喇琼子李嘉努九岁母病医言不可治李嘉努割股肉煮糜以进病乃痊抚州路总管道如林浑州民朱天祥并以母疾割股旌其家

△布延苏达勒 【尹梦龙】

布延苏达勒默呼氏家秦州父丧庐墓次昼夜悲号有飞鸟翔集坟土涌起又有尹梦龙中兴人母丧负土为坟结庐居其侧手书孝经千余卷散乡人读之有羣鸟巢其冢树

△樊渊 【赖禄孙】

樊渊建康句容人幼失父事母笃孝至元十二年奉母避兵茅山兵至欲杀其母渊抱母号泣请以身代兵两绎之江东廉访使者辟为吏母亡奔丧哀感行路服阕奉神主事之起居饮食十年如平生台宪交荐渊不忍去坟墓终不起延佑闲汀州宁化人赖禄孙母病值蔡五九作乱负母从邑人避南山盗至众散走禄孙守母不去盗将刃其母禄孙以身翼蔽曰宁杀我勿伤吾母盗义而舍之有掠其妻者众责之曰奈何辱孝子妇使归之事闻并赐褒表

△刘德泉 【朱显 吴思达 朱汝谐】

刘德泉汴梁杞县人早丧母父荣再娶王氏生二子居敬居元俱幼德泉力抚之及继母病卒益相友爱至元末岁饥父欲使析居德泉泣止不能得乃各受其业以去久之父卒兄弟相约同爨和好如初真定朱显自至元闲其祖父已分析至显念侄等幼无恃谓弟耀曰父子兄弟本同一气可异处乎乃会拜祖墓下取分券焚之复与同居蔚州吴思达兄弟六人尝以父命析居思达为开平县主簿父卒还家治葬毕会宗族泣告其母曰吾兄弟别居十余年矣今多破产以一父之子忍使苦乐不均耶即以家财代偿其逋更复共居母卒哀毁甚宅后柳连理人以为友义所感又有朱汝谐濮州人父子明尝命与兄汝弼别产父卒汝弼家尽废汝谐泣请共居仲父子昭子玉贫病汝谐迎至家奉汤药甘旨甚谨后卒丧葬尽礼州县各以名闻表其间

△郭回

郭回邵武人素贫年六十无妻奉母寄宿神祠中营养甚艰母年九十八卒回佣身得钱葬之每旦诣坟哭祭十四年不辍州上状命给衣粮贍济仍表异之

△孔全 【张子夔 陈乞儿 赵国安 张琛 李庭瑞 伊喇巴延 齐哩克岱

】

孔全亳州鹿邑人父成病刲股肉啖之愈后卒庐墓左负土为坟日六十肩三年起坟广一亩高三丈余张子夔安西人父丧每夜半以背负土肘膝行地匍匐至葬所筛土为坟陈乞儿归德夏邑人年九岁母丧哀毁亲负土为坟高一丈广十六步又有峨眉赵国安解州张琛南阳李庭瑞息州伊喇巴延南阳齐哩克岱皆居丧有至行庐墓次负土为坟并以有司所请表异之

△杨一 【张本 张庆 元善】

杨一怀孟人怜其叔家贫密以分契诣神祠焚之同居三十年无闲言张本荏平人笃孝事伯父叔父皆甚谨伯父尝病本昼夜不去侧张庆真定人善事继母伯父泰异居河南庆闻其贫迎归养之供膳丰备过于所生元善大名人父有昆弟五人因贫流散江淮久之客死至大四年善往寻其骸骨并迎弟侄第一十五丧而归改葬祖父母以诸丧序列祔于莹次州县以闻其旌其家

△赵毓

赵毓唐州人父福迁郑之管城其先三世同居毓官福州司狱满归以母老不复仕一日会诸弟泣申遗训愿世世无异处自是大小百口同力合作家道日殷长兄瑞早卒嫂刘氏守志毓率家人事之甚恭次兄选继没嫂王氏毓母以其少许归改嫁王氏曰妇无再嫁之义愿终事姑孝友节义萃毓一家元贞初旌之

△胡光远 【庞遵】

胡光远太平人母丧庐墓一夕梦母欲食鱼晨起号天将求鱼以祭见生鱼五尾列墓前俱有嚙痕邻里惊异方聚观有獭出草中浮水去知为獭所献以状闻于官表其闾至顺闲有永平庞遵者母病肿三年不能起忽思食鱼遵求之市不得归途叹恨忽有鲤跃入其舟作羹以献母悦病瘥

△陈韶孙

陈韶孙广州番禺人父浏以罪流肇州韶孙年十岁朝夕号泣愿从父不能夺遂与俱往跋涉万里过辽阳平章达春见而悯之曰边地苦寒非汝所堪吾当返汝故乡韶孙曰既不能以身代父当死生以之归非所愿也大德六年浏死韶孙哀恸见者皆为泣下肇州万户府以闻命还乡里仍旌异之

△李忠 【吴国宝】

李忠晋宁人幼孤事母至孝大德七年地大震郁保山移所过居民庐舍皆摧压倾圮将近忠家分为二行五十余步复合忠家独完吴国

宝雷州人姓孝友父丧庐墓大德八年境内蝗害稼惟国宝田无损人皆以为孝感所致
△李茂

李茂大名人徙家扬州父兴寿临卒语茂曰吾病且死尔善事母茂泣受命奉母益谨母尝病目失明茂祷于泰安山三年复明又愿母寿每夕祝天乞损己年益母算果享年八十四大德九年扬州再火延烧千余家火及茂庐皆风返而灭事闻旌之

△羊仁 【黄觉经 章卿孙 俞全 李鹏飞】

羊仁庐州庐江人至元初阿珠兵南下仁父被杀母及兄弟皆掠去时仁方七岁卖为汴人李子安家奴力作二十余年子安怜之纵为良

仁遂遍访得母于颍州兄于睢州弟于邯郸皆幸无恙乃遍恳亲故贷得钞百锭历诣诸家求赎之经营百计更六年大小二十余口复得完聚

又有黄觉经建昌人五岁遭乱失母稍长誓天愿求母所在乃渡江涉淮行乞而往至汝州梁县春店得其母以归章卿孙蜀人本刘氏幼为章

提刑养子与母相失三十八年遍访于江西诸郡迎归养之俞全杭州人幼被掠卖为刘饒家奴后获为良白汴步归杭寻其母及妹得之事母

以孝闻李鹏飞池州人生母姚氏为嫡母不容改嫁于朱氏鹏飞幼不知也年十九思慕哀痛愿早见母行求三岁至蕲州罗田县得焉迎还奉

养久之复归朱氏时渡江省觐既卒岁时携子孙往祭奠终其身并以有司所请旌其间
△赵一德

赵一德隆兴新建人初元兵南伐被俘至燕为郑留守家奴历事三世号忠干一日拜诣于其主郑阿尔斯兰及其母泽国太夫人曰一德

自去父母依门下者三十余年矣故乡万里未获归省虽思慕刻骨未尝敢言今父母已老脱有不幸则永为天地闲罪人矣因伏地涕泣不能

起郑母子皆感动许之归期一岁而返比至父兄已没惟母在年八十余一德卜地葬二枢毕欲少留事母惧得罪如期还燕郑母子叹其孝即

裂券纵为良将辞归会阿尔斯兰以冤被诛诏簿录其家众各亡散一德独奋然留不去与张锦童诣中书诉枉状得还所籍郑母劳之曰当吏

籍吾家时亲戚不相顾汝独冒险以白吾枉疾风劲草岂易见者因分美田庐遗之谢曰一德虽鄙人非有利于是也重哀吾主无罪而受戮故

留此以报主今老母八十余得归侍养主之赐已厚矣遂不受而去皇庆元年旌其间

△王思聪

王思聪延安安塞人素力田农隙则教诸生得束修以养亲母丧尽哀事继母如所

生以家多幼稚侵父食别筑室曰养老堂奉之朝夕定省无闲父尝病剧思聪拜祈于天得神泉饮之愈后复失明思聪舐之即能视县上状命表异之

△彻辰台

彻辰台奎苏氏幼丧父事母笃孝母歿水浆不入口者三日每节序祭祀哭泣常如袒括时年四十余每见人父母辄呜咽流涕问其故曰人皆有父母我独无是以悲耳至大三年褒异

△王初应 【施合德 发仔】

王初应漳州长泰人至大四年从父义士樵刘岭山有虎出丛棘中搏其父伤右肩初应奋救抽鎌刀刺虎鼻杀之义士得生泰定二年同县施合德父真佑尝出耘为虎扼于田合德与从弟发仔持斧前杀虎父获苏并旌其门

△郑文嗣 【郑大和】

郑文嗣婺州浦江人其家十世同居凡二百四十余年一钱尺帛无敢私至大闲表其门文嗣歿从弟大和继主家事益严而有恩家庭中凛如公府子弟有过颁白者犹鞭之每遇岁时大和坐堂上羣子弟皆盛衣冠雁行立左序下以次进拜跪奉觞上寿毕皆肃容拱手自右趋出足武相衔无敢参差者部使者余阙为书东浙第一家以褒之大和方正不奉浮屠老子教冠婚丧祭必稽朱熹家礼而行执亲丧三年不御酒肉子孙从化皆孝谨虽仕宦不敢一毫有违家法诸妇唯事女工不使预家政家畜两马一出则一为之不食人以为孝义所感有家范三卷传于世 【按宋濂文集云浦江义门郑深字仲几素读书负气闻太师托克托喜士即走见之与语大悦使其子哈喇章师事焉一旦皇太子至深以孝经进赐锦衣一袭至正八年授长史当托克托之被谪西宁也门下客尽散独架阁王梅时过之深数道其贤托克托曰梅屡短君而君反贤之何也深曰贤之者以其知义耳若深所短梅正当言能言所以为益贤也托克托曰当今安得有此长者之言十年迁宣文阁授经郎召见明仁殿问深家同居事屡叹以为嘉瑞顾皇子书麟凤二字以美之并赐新刻智永千文一卷时从弟涛方为经筵检讨每进讲殿中兄弟连翩而入时人以为荣元史本传不载】

△王荐

王荐福宁人父疾夜祷于天愿减己年益父寿父绝而复苏告其友曰适有神人黄衣红帕首恍惚语我曰汝子孝上帝命锡汝十二龄疾遂愈后果十二年而卒母沈氏病渴思食瓜时冬月求于乡不得行至深奥岭值大雪荐避雪树下仰天而哭忽见岩石闲青蔓离披有二瓜因

摘归奉母母食之渴顿止兄孟翰早世嫂林氏更适刘仲山仲山尝以田鬻于荐及死不能葬且无子族以其贫莫肯为之后荐即以田还之使置后且治葬具州柰民死不葬者贫民畏令乘焚柩弃骨野中荐置地为义阡收瘞焉有死不能敛者复买棺以赠至大四年其乡旱民艰余荐尽出储粟赈之有施福等十一家饥欲死荐家粟已竭即以己田易谷百石以济福建宣慰司上状旌之

△郭全 【刘德 玛雅哈 刘居敬】

郭全辽阳人幼丧母哀戚如成人及壮父庭王卒居庐三载继母唐古氏生四子皆幼全躬耕以养既长娶妇各求分财异居全不能止凡田庐器物悉自取朽敝者唐古氏卒全年六十余哀痛毁瘠庐其墓终丧又有刘德奉元人事继母如所生家贫佣工取值寸钱尺帛皆上之四弟并继母出德抚爱尤笃年五十未娶称贷得钱先为弟求妇诸弟亦化其德一门蔼然乡里称为刘佛子玛雅哈伊噜勒昆氏素贫事继母张氏庶母吕氏克尽子职刘居敬大都人年十岁继母郝氏病居敬忧之悬天以求代状闻并褒美之

△杨皞

杨皞扶风人父清母牛氏牛氏尝病剧皞叩天求代遂痊如是者再后牛氏失明皞登太白山取神泉洗之复如故牛氏歿哀毁特甚葬之日大雨独皞墓前后数里密云蔽之雨不沾土葬毕令妻卫氏家居养清皞独庐墓上负土为坟蔬食饮水终其丧清卒亦如之

△丁文忠 【丁文孝】

丁文忠许州偃城人业鼓冶母和氏疾与弟文孝竭力调侍母卒文忠庐墓侧不与妻面者三年父贵又疾医不能疗文忠造车一辆兄弟共御之载父祷于嵩山五台泰安河渚诸祠途遇异僧遗药而愈延佑七年旌之

△邵敬祖 【李彦忠 谭景星 郭成】

邵敬祖宛邱人父丧庐墓母继歿河决不克葬殡于城西敬祖露宿依其侧风雨不去友人哀之为缚草舍庇焉前后居庐六年两髀俱成湿疾至治三年旌其家又有永平孚彦忠父丧庐墓八年不至家茶陵谭景星幼失父追念之庐其墓十年亳州郭成年七十一母丧食粥庐墓一年朝夕哭临人哀其老而能孝

△扈铎

扈铎汴梁兰阳人蚤孤育于伯父及长事之如所生伯父老无子铎为买妾岁余产一女其妾熟寐压女死久之伯父死遗腹生一男铎愆前失告其母及妻妹护视之已复庐户外不敢安寝弟能食常自抱哺与同卧起十年不

少息弟有疾铎夜稽颡星斗哀祷曰天若伐余家铎父子闲可去一人勿丧吾弟使伯父无后也明旦弟愈母卒庐于墓侧宗族劝之归铎曰今岁凶多盗吾家虽贫安知墓中无可欲乎倘惊吾亲之灵虽生何为卒守庐不去

△孙秀实 【贾进 李子敬】

孙秀实大宁人性喜周急里人王仲和尝托秀实贷富人钞三千锭贫不能偿弃其亲逃去数年不归其亲思之疾秀实日馈薪米存问终不乐秀实哀之悉为代偿取券还其亲复命奴赍金访仲和使归父子欢聚又有贾进大同人大德九年地震民居多伤且乏食进给酒药炭米济之每岁冬制木棉裘数百袭衣寒者买地为义阡使无墓者葬焉李子敬陕西三原人嫁不能嫁者五十余人葬不能葬者五十余丧焚逋券四万余贯有司以名闻并旌之 【按元史本门曰孝友而秀实等三人皆以义行附传亦推广孝行锡类之意今仍存之】

△宗杞

宗■〈木巳〉大都人年十九父卒擗踊号泣绝而复苏水浆不入口者三日遂成疾伏卧床榻犹哭不止泪尽继之以血既葬疾转甚■

〈木巳〉有继母作遗书嘱其妻杨氏曰汝善守志以事吾母遂卒杨氏遗腹生一男人以为孝感天不绝其嗣云泰定三年旌其门

△赵荣

赵荣扶风人母强氏有疾割股肉啖之者三复负母登太白山祷于神得圣水饮之乃痊后年七十五卒荣号痛不食者七日葬之日白云庇其墓前后十五里负土成坟庐其侧终丧

△吴好直 【柴郁 陈舜咨】

吴好直华州蒲城人父歿事继母尽孝兄弟尝求分财好直劝谕不能止即以己所得悉推与之又有甄城柴郁陈舜咨皆能孝友以己产分让兄弟县令言状其表异之

△余丙

余丙建德遂安人幼丧母泣血成疾父亡不忍葬结庐古山下殡其中日闭户守视有牧童遗火延殡庐丙与子慈亟扑不止欲投身火中与柩俱焚俄暴雨火灭

△徐钰

徐钰镇江人弱冠侍父镇之婺源过丹阳小溪父乘桥失足堕水中钰投溪拥父出得挽行舟以升钰力惫且势湍急遂溺死江浙行省言状表异之

△尹莘 【孙希贤 卜胜荣】

尹莘 【按一统志作尹莘通考作尹华】 汴梁洧川人至治初游学京师梦母疾即驰归母已亡居庐蔬食哀毁骨立父辅臣尝病疫莘尝其粪以验差剧夜祷于天曰母亡不能见父病不能治为人子若此何以自立于世愿死以代父命数日而愈又有高唐孙希贤母病痢希贤阅方书有曰血温身热者死血冷身凉者生希贤尝之其血温乃号泣祈天求身代之母遂愈高邮卜胜荣母痢不能药日尝痢以求愈兄疾礼北辰乞减己年延之并痊

△刘廷让

刘廷让大宁武平人至顺初上都兵起廷让挈家避山中有幼弟方乳母王氏置于怀兵至廷让乃弃己子一手抱弟一手扶母疾驱得免事闻旌之

△刘通 【黄镒 丁祥一】

刘通亳州谯县人母卜氏目失明通誓断酒肉祷之三十年不懈卜氏年八十五忽复明至大闲鄱阳黄镒皇庆闲诸暨丁祥一皆以亲丧明以吞舐之复能视并命褒表

△张旺舅

张旺舅安丰霍邱人幼失父母陈氏居贫守志旺舅九岁卖锡以养及长母病伏枕数月日夜痛哭礼天求代未几遂愈又自以生业微不能多给竟不娶以终母年县令言于朝旌之

△张思孝

张思孝华州人母丧以孝闻父疾不愈洁斋致祷乞以身代未几遂痊至顺三年表其门

△杜佑

杜佑邳州人为河南水马站提领父成病于家佑忽心惊举体沾汗即弃职归祷神求代且尝粪以验疾父卒庐墓尽哀有驯兔之瑞

△长寿 【梁威逊 齐哩克 高中 武进】

长寿父特珠官平章政事生五子长山寿早世次即长寿次永寿福寿蒙古哈雅元统闲特珠歿长寿哀毁尽礼服阙当荫叙与弟罗拜母前曰吾父廉贫诸弟未有所立愿以职让永寿永寿让福寿福寿曰二兄能让福寿独不能耶以让蒙古哈雅母从之蒙古哈雅遂告荫为太禧宗禋院神御殿侍礼佐郎兄弟奉母尤笃至大闲河中梁威逊亲丧庐墓兄诺海为鄂啰官自以远仕不得养其亲即弃职举威逊代之人称威逊能孝诺海能义又有辉和尔氏齐哩克及濠州高中嘉定武进皆以侍亲不愿仕以祖

父荫让叔父昆弟

△孙瑾 【吴希曾】

孙瑾镇江丹徒人父丧停柩四载衣不解带及葬载柩渡江潮波方涌俄顺风翼帆如履平地事继母唐氏尤孝尝患痢瑾亲吮之又丧目舐之复明唐氏卒卜日将葬时春苦雨瑾夜号天乞霁至且云日开朗甫掩圻阴气复合雨注数日不止又有吴希曾睢宁人葬父日大雨希会跪柩前炷艾燃腕火炽雨止既葬庐于墓左县上状并旌之

△张恭

张恭河南偃帅人以兵部符署鹰房府案牒亲老辞归侍养父丧过哀侍母冯氏尤谨岁凶恭夫妇采野菜为食而营奉甘旨无乏母有疾恭手除溷秽喂哺饮食且尝粪以验疾势天厯被西兵至河南恭守视母病项中一剑不去母惊悸而歿居丧尽礼有诏旌其闾

△訾汝道

訾汝道德州齐河人父兴卒居丧以孝闻母高氏治家严汝道承顺恭恭母尝寝疾昼夜不去侧母卒哀毁终丧不御酒肉性尤友爱二弟将析居悉以美田庐让之二弟早世抚诸孤如己子里中尝大疫有食瓜得汗而愈者汝道即多市瓜柔携米厯户馈之死者复赠以构榘尝出麦粟贷人至秋蝗食稼人无以偿汝道取其券焚之县令李让为请旌其家

△王庸

王庸字伯常雄州归信人事母李氏以孝闻母有疾夜祷北辰至叩头出血遂愈及母卒哀毁几绝露处墓前且夕悲号一夕雷雨暴至邻人持寝席往蔽之见庸坐卧地独不沾湿咸叹异而去

△黄赞

黄赞字止敬临江人父君道延佑闲求官京师留赞江南时赞年尚幼及长闻父娶后妻居永平往省之父歿已三年矣后母闻赞来尽挾其赀更嫁拒不见赞赞号哭语人曰吾之来为省父也今不幸父歿思奉其柩归而窆之莫知其墓苟见母示以葬所死不恨矣尚忍利遗财耶久之闻母居海滨亟裹粮往复拒不纳母之弟怜之与偕至永平求其父墓又弗得赞哭祷于神一夕梦老父以杖指葬处曰见片砖即可得明日就其地求得父骨以归

△石明三

石明三与母居余姚山中一日自外归觅母不见卧内有三虎子知母为虎所害乃尽杀虎子砺巨斧立壁侧伺母虎至斫其脑裂而死复往倚岩石旁执斧伺候斫杀牡虎明三亦立死不仆张目如生

△刘琦

刘琦【通鉴作张琦】岳州临湘人生二岁遭乱母刘氏陷于兵琦独事其父稍长思母不置尝叹曰人皆有母我独无辄献欷泣下及冠请于父往求其母得于池州之贵池迎以归养后父母歿终葬犹蔬食有司上其事旌表其门曰孝义

△刘源

刘源归德中牟人母吴氏年七十余衰病不能行适火起源尹不能救呼天号泣趋入抱母为火所焚而死

△祝公荣

祝公荣字大昌虎州丽水人隐居养亲事母甚孝母歿居丧尽礼灶突失火公荣力不能救乃伏棺悲哭其火自灭

△陆思孝

陆思孝绍兴山阴樵者母老病痢方欲割股肉为糜以进忽梦寐闲有神人授以药剂得而异之即以奉母其疾遂愈

△姜兼

姜兼严州淳安人七岁而孤养母至孝母死哀慕几绝既葬独居墓下朝夕哭奠蔬食饮水一衰麻寒暑不易同里陈氏戴氏子不能事其父母闻兼之行皆感悔迎养

△胡伴侣

胡伴侣钧州密县人父实尝患心疾更数医莫能疗伴侣乃斋沐焚香泣告于天于右肋旁割脂一片和药以进父疾遂瘳其伤亦旋愈诏旌其门

△王士宏

王士宏延安中部人父搏有疾士宏倾家赀求医见医即拜遍祷诸神扣额成疮父歿哀毁尽礼庐墓三年足未尝至家墓庐上有奇鹊来巢终丧复建祠于莹前朔望必往奠祭虽风雨不废有司上其事于朝旌表之

△何从义

何从义延安洛川人祖良祖母李氏偕亡从义庐于墓侧旦夕哀慕不脱衰经惟啖蔬食事父世荣母王氏孝养尤至伯叔祖母及叔父母皆无子比其亡也咸为治葬筑高坟祭奠以礼

△阿都齐

阿都齐大都固安人母尝有疾医治不痊■〈金厉〉其所佩小刀拜天泣曰慈母生我劬劳今当捐身报之遂割开左肋取肉一片作羹进母数日而愈

△高必达

高必达建昌人五岁时父明大弃家远游莫知所适既长昼夜哀慕乃娶妻以养母
历往四方求之十余年不得见心愈悲忽相传黄州全真道院中有虚明子者学道三十年矣本姓高氏建昌人也必达询知为父既往拜之具
言家世及已之所生岁月哀号叩头不已虚明瞑坐不
顾久之斥曰我非汝父不去何为必达留侍左右不少懈辞气哀恻其徒请曰师有子如
此忍弗归乎虚明不得已乃还家

△曾德

曾德渔阳人宗圣公五十七代孙母早亡父仲祥继娶左氏游襄阳乐其土俗因携
左氏家焉会兵乱遂失左氏德遍求五年得于广海闲
奉迎以归孝养备至有司以闻诏旌复其家

△靳昺

靳昺字克昌绛州曲沃人兄荣为奎章阁学士奉母王氏居京师母歿昺与兄护丧
还家至平定大雨水骤至昺伏柩上遂没于水诏赐孝
子靳昺碑

△黄道贤

黄道贤泉州人嫡母唐氏无子道贤在襁褓而生母苏氏以疾去既长思慕生母屡
请于父召之归养二母得其欢心父病笃昼夜奉汤药
遍求良医莫效乃夜祷于天愿灭己年一纪以益父寿疾遂愈元统二年乃歿果符其数
道贤居丧尽礼负土筑坟庐于墓侧蔬食终制有司上
其事旌其门

△史彦斌

史彦斌邳州人嗜学有至性至正十四年河溢金乡鱼台坟墓多坏适彦斌母卒为
厚棺刻铭其上仍钉以四铁环然后葬明年墓为水所
漂彦斌缚草为人置水中仰天呼曰母棺被水不知其处愿天矜怜假此刍灵指示母棺
即乘舟堕草人所之行十余日草人止桑林中视之母
柩在焉载归复葬之

△张绍祖

张绍祖字子让颍州人读书力学以孝行闻于朝特授河南路儒学教授至正十五
年奉父避兵山闲贼至执其父将杀之绍祖乞请杀己
以代父且曰若等非父母所生乎何忍害人父也贼怒以戈击之戈应手挫折因感而相
谓曰此真孝子不可害乃释之去

△李明德

李明德瑞州路上高县人读书有志操至正十四年乱兵执其父欲杀之明德泣告

曰子岂不能代父乎愿忽害吾父也兵遂杀明德而免其父

△张缉

张缉字士明益都胶州人性孝友能诗文至正七年与兄绅弟经同领乡荐由泽州儒学正转泰州幕职弃归养亲居扬州十五年扬州乱缉母姬氏方卧病贼突入卧内举鎗欲刺缉以身蔽母鎗中缉胁三日而死

△魏敬益

魏敬益字士友雄州容城人性至孝居母丧哀毁骨立素好施与有田十六顷语其子曰自吾买四庄村之田十顷其村民皆不能自给今将以其田归其人汝谨守余田可无馁也乃呼村民归之众皆愕眙不敢受卒与之有司以闻加旌表

△汤霖

汤霖字伯雨隆兴新建人早丧父事母至孝母尝病热不肯服药曰惟得冰我疾乃可愈时天甚燠霖累日号哭于池上忽闻池中戛戛有声拭泪视之乃冰澌也亟取以奉母其疾果愈

△孙抑

孙抑字希武晋宁洪洞洞人登进士第历官刑部郎中关保之变挈父母妻子避兵平阳之柏村有乱兵拔曰刃吓其母求财不得举刃欲斫之抑急以身蔽请代受斫母乃得释而父被掠不知所之或语之曰汝父被驱而东矣东军得所掠民皆杀之无往就死也抑曰可畏死而弃其父乎遂往出入死地屡濒危殆卒得父以归

△石永

石永绍兴新昌人乱兵掠乡里永父谦孙年八十老不能行乃负父匿山谷中乱兵执其父欲杀之永亟前抱父请代兵遂杀永其父获免

△王克己

王克己延安中部人父伯通歿负土筑坟庐于墓侧摩该纵兵暴掠守墓不去俄兵至见其身衣衰经形容憔悴曰此孝子也遂不忍害终丧而归

△刘思敬

刘思敬延安宜君人事继母沙氏杜氏如所生父年八十两目丧明会兵乱负父避岩穴中兵至欲杀之思敬泣曰我父老矣又无目我死不足惜使我父何依乎兵怜其孝皆舍之

△吕佑

吕佑字伯通晋安人至正二十六年郡城陷有卒入室拔白刃胁其母林氏索财宝

不得挥刃欲斫之佑急以身蔽之夺其刃手指尽落被
伤仆地良久而苏开目视母曰母幸无恙我死无憾矣遂瞑目死

△周乐

周乐温州瑞安人宋状元坦之后海贼据温州拘其父日成置海舟上乐遂往贼酋
遣人沈日成于水乐泣请曰我有祖母幸留父侍养请
以己代不听遂抱父同死焉

钦定续通志卷五百二十六

●钦定续通志卷五百二十七 独行传一

独行传

（臣）等谨按独行传唐书宋史俱作卓行五代史作一行今依郑志改称独行其
有自他类移八诸人亦取其立志孤行而名实相副者
金元两史则仍其阙云

唐

五代

○唐

元德秀【李■〈山上罅下〉等】 权皋 甄济【逢】 吴保
安【郭仲翔】 阳城【何蕃】 司空
图

元德秀 【李■〈山上罅下〉等】

权皋

甄济 【甄逢】

吴保安 【郭仲翔】

阳城 【何蕃】

司空图

△元德秀 【李■〈山上罅下〉等】

元德秀字紫芝河南人质厚少缘饰少孤事母孝举进士不忍去左右自负母入京
师既擢第母亡庐墓侧食不盐酪藉无茵席 【旧唐
书于此下载有刺血画像写佛经等事李华所撰元鲁山墓碣亦同谨附识】 服除以窆
困调南和尉有惠政擢补龙武军录事参军德秀不及
亲在而娶不肯婚人以为不可绝嗣答曰兄有子先人得祀吾何娶为初兄子襁褓丧母
无资得乳媪德秀自乳之数目湏流能食乃止既长将
为娶家苦贫乃求为鲁山令前此堕车足伤不能趋拜太守待以客礼有盗系狱会虎为
暴盗请格虎自赎许之明日盗尸虎还举县嗟叹元宗
在东都酺五凤楼下命三百里县令刺史各以声乐只河内太守辇优伎数百被锦绣或

作犀象瓌譎光丽德秀惟乐工数十人【通鉴作数
人】联袂歌于蕞于【按通鉴考异引明皇杂录作于蕞未详其义今考权德舆诗云
且读鲁山于蕞于可为传文之证】于蕞于者德秀
所为歌也帝闻异之叹曰贤人之言哉谓宰相曰河内人其涂炭乎乃黜太守德秀益知
名所得俸禄悉衣食人之孤遗者岁满笥余一缣驾柴
车去爱陆浑佳山水乃定居不为墙垣扃钥家无仆妾岁饥日或不爨嗜酒陶然弹琴以
自娱人以酒肴从之不问贤鄙为酣饫是时程休邢宇
字弟宙张茂之李■〈山上罅下〉■〈山上罅下〉族子丹叔惟岳乔潭杨拯房垂柳
识皆号门弟子德秀善文辞作蹇士贼以自况房管见
而叹曰见紫芝眉宇使人名利之心都尽苏源明曰吾不幸生衰俗所不耻者识元紫芝
也天宝十三载卒家惟枕履箪瓢而已潭时为陆浑尉
庀其葬族弟结哭之恸或曰子哭过哀礼欤结曰若知礼之过而不知情之至大夫弱无
固性无专老无在死无余人情所耽溺喜爱可恶者大
夫无之生六十年未尝识女色视锦绣未尝求足无苟辞俄色未尝有十亩之地十尺之
舍十岁之僮未尝完布帛而衣具五味之餐吾哀之以
戒荒淫贪佞绮执膏粱之徒耳李华兄事德秀及卒华谥之曰文行先生【旧书作门人
谥新书作华谥案李华兄事德秀则非门人也】天
下高其行不名谓之元鲁山休字士美广平人宇字绍宗宙字次宗河闲人茂之字季丰
南阳人■〈山上罅下〉字伯高丹叔字南惟诚岳字
谟道赵人潭字子源梁人垂字翼明清河人拯字齐物隋观王雄之后举进士终右骁卫
骑曹参军■〈山上罅下〉擢制科迁南华令大水他
县饥人至相属■〈山上罅下〉为具■〈衍上食下〉鬻及去糗粮送之吏为立碑安
禄山乱■〈山上罅下〉客清河为乞师平原太守颜
真卿一郡获全厯庐州刺史拯与■〈山上罅下〉名最着潭识以文传后

△权皋

权皋字士繇秦州略阳人徙润州丹徒晋安邱公翼十二世孙父倕与席豫苏源明
以艺文相友终羽林军参军皋擢进士第为临清尉安
禄山籍其名表为蓟尉署幕府皋度禄山且叛欲行虑祸及亲天宝十四载使献俘京师
还密与妹婿昌尉仲蕃约以疾召之蕃来皋阳暗直视
蕃而瞑蕃为尽哀自舍敛之皋逸去人无知者吏以诏书还皋母母谓实死恸哭感行路
故禄山不之虞归其母皋潜候于淇门奉侍昼夜南奔
客临淮为驿亭保以诮北方既渡江而禄山反天下闻其名争取以为属高适表试大理
评事淮南采访判官永王举兵胁士大夫皋诡姓名以
免元宗在蜀闻之拜监察御史会母丧得风痺疾客洪州南北梗否踰年诏命不至有中

人过州颇求取无厌南昌今王遘欲按之谋于皋皋良
久不答泣曰今何由致天子使而遽欲治之遘悟厚谢浙西节度使颜真卿表为行军司
马召拜起居舍人固辞尝曰吾洁身乱世以全吾志欲
持是受名邪李季卿为江淮黜陟使列其高行以著作郎召亦不就自中原乱士人率渡
江李华柳识韩洄王定皆仰皋节与友善洄定常评皋
可为宰辅师保华亦以为分天下善恶一人而已卒洄等制服行哭诏赠秘书少监元和
中谥为贞孝子德輿至宰相别传

△甄济 【甄逢】

甄济字孟成定州无极人叔父为幽凉二州都督家卫州宗属以伉侠相矜济少孤
独好学以文雅称居青岩山十余年远近服其仁环山
不敢畋渔采访使苗晋卿表之诸府五辟诏十至坚卧不起天宝十载以左拾遗召未至
而安禄山入朝求济于元宗授大理评事范阳掌书记
济不得已为起居府中论议正直久之察禄山有反谋不可谏济素善卫令齐玘因谒归
具告以诚伪作欧血不支舁归旧庐禄山反使蔡希德
封刀召之曰即不起断其头见我济色不动左手书曰不可以行使者持刀趋前济引颈
待之希德嗟叹以实病告后庆绪复使弥輿至东都安
国观会广平王平东都济诣军门上谒泣涕王为感动肃宗诏馆之三司署使污贼官罗
拜以媿其心授秘书郎更拜太子舍人来瑱辟为陕西
襄阳参谋拜礼部员外郎 【旧书宝应初拜刑部员外郎】 大历初江西节度使魏少
游表为著作郎兼侍御史卒子逢幼孤及长耕宜城野
自力读书不谒州县岁饥节用以给亲里大穰则振其余于乡党贫狭者朋友有缓急辄
出家货周贍以义闻逢常以父名不得在国史欲诣京
师自言元和中袁滋表济节行与权皋同科宜载国史有诏赠济秘书少监逢友人元稹
与史馆修撰韩愈并称济之忠与逢之行由是父子俱
显名

△吴保安 【郭仲翔】

吴保安字永固魏州人气挺特不俗睿宗时姚嵩蛮叛拜李蒙为姚州都督宰相郭
元振托以弟之子之子仲翔蒙表为判官时保安罢义
安尉未得调与仲翔同里仲翔力荐之蒙表掌书记保安后往蒙已深入与蛮战没仲翔
被执蛮厚责千缗以赎会元振物故保安留嵩州营赎
仲翔十年得缗七百妻子客遂州闲关求保安所在困姚州不能进都督杨安居知状贷
以官货始满千得仲翔以归始仲翔为蛮所奴三逃三
获乃转鬻远酋严遇之昼役夜囚役凡十五年乃还安居嘉保安之谊厚礼仲翔檄领近
县尉迁代州户曹母丧服除喟曰吾赖吴公生吾死今

亲歿可行其志乃求保安时保安以彭山丞客死其妻亦没丧不克归仲翔为服纓经囊其骨徒跣负之归葬魏州庐墓三年乃去后为岚州长史迎保安子为娶而让以官【案吴保安弃家拯友诚为卓行郭仲翔亦能报德新书列之忠义今改正】

△阳城【何蕃】

阳城字亢定定州北平人徙陕州夏县好学贫不能得书求为集贤院吏窃书读之六年无所不通及进士第乃去隐中条山兴弟阶城常易衣出年长不肯娶谓弟曰吾与若孤惻相育既娶则闲外姓虽共处而益疏我不忍弟义之亦不娶遂终身城谦恭简素遇人长幼如一远近募其行来学者迹接于道闾里有争讼诣城决之有盗其树者城遇之虑其耻退自匿寡妹依城居其子年四十余痴不知人城常负以出入始妹之夫客死远方城与弟行千里负其柩归葬岁饥屏迹不过邻里屑榆为粥讲论不辍山东节度府闻城义者发使遗五百缗城固辞使者委而去城置之未尝发会里人郑俶欲葬亲贷于人无得城知其然举缗与之俶愿为奴以偿德城教以书俶不能业惭缢而死城惊哭自咎为服縗麻瘞之陕虢观察使李泌数礼饷城欲辟致之府不起乃荐诸朝以著作佐郎召城固辞泌不敢强及为宰相又言之德宗拜右谏议大夫【按旧书作观察使李泌闻其名诣访之及为相荐为著作郎遣杨宁束帛召赴京持章服衣之迁谏议大夫与新书稍异】初城未起搢绅想见风采及受命它谏官论事纷纷而城犹未肯言韩愈作争臣论讥切之城不屑意方与二弟及客日夜剧饮客欲谏止者城既强饮之或醉仆席上城或先醉卧客怀中不能听客语无得关言常以木枕布衾质钱人重其贤争售之每约二弟吾所俸八而可度月米几何薪菜盐几钱先具之余送酒家无留也服用无赢副客或称其佳可爱辄举授之居位八年人不能窥其际及裴延龄诬逐陆贽张滂李充等帝怒甚无敢言城闻曰吾谏官不可令天子杀无罪大臣乃约拾遗王仲舒归登右补阙熊执易崔邠守延英合上疏极论延龄罪申直贽等累日不止帝大怒召宰相抵城罪顺宗方为皇太子为开救良久得免然帝意不已欲遂相延龄城显语曰延龄为相吾当取白麻坏之哭于廷【按通鉴城尽疏延龄过罪欲密论之与李泌之子繁使之缮写繁径以造延龄延龄先一一自疏上以为妄言之罪】帝不相延龄城力也坐是下迁国子司业引诸生告之曰凡学者所以学为忠与孝也诸生有久不省亲者乎明日谒城还养者二十辈有三年不归侍者斥之简孝秀德行升堂上沈酗不率教者皆罢躬讲经籍生徒斤斤皆有法度薛约者狂而直言事得罪谪连州吏捕迹得

之城家城坐吏于门引约饮食讫步至都外与别帝恶
城党有罪出为道州刺史太学诸生何蕃李偿王鲁卿李说等二百人 【按柳宗元阳公
遗爱碣作百六十人韩愈顺宗实录作二百七十人
互异】 顿首阙下请留城柳宗元遗蕃等书怱怱之蕃等守阙下数日为吏遮抑不得上
【按柳宗元阳城遗爱碣云翌日会徒北向如初行
至延禧门公使追夺其章遮道愿罢遂不果献盖饰辞耳】 既行皆泣涕立石纪德至道
州治民如治家不以簿书介意月俸取足则已官收其
余州产侏儒岁贡诸朝城奏曰州民尽短若以贡不知何者可供自是罢州人感之以阳
名子前刺史坐罪下狱吏有幸于刺史者拾不法事告
城欲自脱城辄榜杀之赋税不时观察使数诘责城自署其考曰抚字心劳追科政拙考
下下观察府遣判官督赋至州城先自囚于狱判官惊
驰入谒城不敢归判官遽辞去府复遣他判官来按判官载妻子中道逃去顺宗立召还
城而城已卒赠左散骑常侍赐其家钱二十万官护丧
归葬蕃和州人事父母孝学太学岁一归父母不许凡五岁慨然以亲且老不自安揖诸
生去乃共闭蕃空舍中众其状蕃义行白城请留会城
罢亦止初朱泚反诸生将从乱蕃正色叱不听故六馆之士无受污者蕃居太学二十年
有死丧无归者皆身为治丧偿鲁人鲁卿第进士有名

△司空图

司空图字表圣河中虞乡人 【旧书作本临淄人】 父舆有风干当大中时为安
邑两池榷盐使立条约众以为宜以劳再迁户部郎中
图咸通末擢进士礼部侍郎王凝特所奖待凝坐法贬商州图感知已往从之凝起拜宣
歙观察使乃辟置幕府召炙殿中侍御史不忍去凝府
台劾左迁光禄寺主簿分司东都卢携以故宰相居洛嘉图节常与游携还属于陕虢观
察使卢渥即表为僚佐会携复执政召拜礼部员外郎
寻迁郎中黄巢陷长安将奔不得前图弟有奴段章者陷贼执图手曰我所主张将军喜
下士可往见之图不肯往遂奔咸阳闲关至河中 【
按旧书本传故相王徽与图厚数年徽受诏镇潞表图为副使以徽不赴镇而止新传未
载】 僖宗次凤翔即行在拜知制诰迁中书舍人后狩
宝鸡不获从又还河中龙纪初复拜旧官以疾解景福中拜谏议大夫不赴后再以户部
侍郎召身谢阙下数日即引去昭宗在华召拜兵部侍
郎以足疾固自乞会迁洛阳柳璨希贼臣意诛天下才望诏图入朝图佯堕笏趣意野耄
乃听还图本居中条山王官谷有先人田遂隐不出作
亭观素室悉图唐兴节士文人名亭曰休休作文以见志曰休美也既休而美具故量才
一宜休揣分二宜休耄而瞶三宜休又少也惰长也率

老也迂三者非济时用则又宜休因自目为知非子耐辱居士其言诡激不常以免当时
祸灾云豫为冢棺遇胜日引客坐圻中赋诗酌酒裴回
每岁时祠祷鼓舞图与闾里耆老相乐王重荣父子雅重之数馈遗弗受尝为作碑赠绢
数千图置虞乡市人得取之一日尽时寇盗所过残暴
独不入王官谷士人依以避难未全忠己篡召为礼部尚书不起哀帝弑图闻不食而卒
图无子以甥为嗣尝为御史所劾昭宗不责也

○五代

石昂 程福赞

石昂

程福赞

△石昂

石昂青州临淄人家有书数千卷喜延四方之士士无远近多就昂学问食其门下
者或累岁昂未尝有怠色而昂不求仕进节度使符习
高其行召为临淄令习入朝京师监军杨彦朗知留后事昂以公事至府上谒赞者以彦
朗讳石更其姓曰右昂趋于庭仰责彦朗曰内侍奈何
以私害公昂姓石非右也彦朗大怒拂衣去昂即趋出解官还家语其子曰吾本不欲
仕乱世果为刑人所辱子孙其以我为戒昂父亦好学
平生不喜佛说父死昂于柩前诵尚书曰此吾先人所欲闻也禁其家不可以佛事污吾
先人晋高祖时诏天下求孝悌之士户部尚书王权等
相与上昂行义诏昂至京师召见便殿以为宗正丞迁少卿出帝即位晋政日坏昂数上
疏极谏不听乃称疾东归终于家

△程福赞

程福赞者不知其世家为人沈厚寡言而有勇少为军卒以战功累迁洺州团练使
晋出帝时为奉国右厢都指挥使开运中契丹入侵出
帝北巡奉国军士乘闲夜纵火焚营欲因以为乱福赞身自救火被伤火灭而乱者不得
发福赞以为契丹且大至而天子在军京师虚空不宜
以小故动摇人听因匿其事不以闻军将李殷位次福赞下利其去而代之因诬福赞与
乱者同谋不然何以不奏出帝下福赞狱人皆以为冤
福赞终不自辨以见杀

钦定续通志卷五百二十七

●钦定续通志卷五百二十八 独行传二

独行传

宋

○宋

刘庭式 巢谷 徐积 曾叔卿 刘永一 孙逢【喻汝砺】
】 赵俊 刘化源【米璞 阴焯 姚邦
基】 张山翁 黄申 何时【陈子敬】

刘庭式

巢谷

徐积

曾叔卿

刘永一

孙逢【喻汝砺】

赵俊

刘化源【米璞 阴焯 姚邦基】

张山翁

黄申

何时【陈子敬】

△刘庭式

刘庭式字得之齐州人举进士苏轼守密州庭式为通判初庭式议娶乡人女既约未纳币庭式及第女以病丧明不敢复言或劝纳其幼女庭式笑曰吾已心许之矣岂可负吾初心哉卒娶之生数子后死庭式丧之逾年不肯复娶轼问之曰哀生于爱爱生于色今君爱何从生哀何从出乎庭式曰吾知丧吾妻而已若缘色生爱缘爱生哀色衰爱弛吾哀亦忘则凡扬袂倚市目挑而心招者皆可以为妻也耶轼深感其言庭式后监太平观老于芦山绝粒不食目奕奕有紫光步上下峻坂如飞以高寿终

△巢谷

巢谷初名谷【按苏辙巢谷传云至循州改名谷】字符修眉州眉山人幼传其父中世学举进士京师谷素多力见举武艺者心好之遂弃其旧学蓄弓箭习骑射入之业成而不中第西去游秦凤泾原闲所至友其秀杰与韩存宝尤善教之兵书熙宁中存宝为河中将有功会泸州蛮乞弟扰边命存宝出兵讨之存宝不习蛮事邀谷至军中问焉及存宝得罪将就逮自度必死谓谷曰我死非所惜顾妻子不免寒饿橐中有银数百两非君莫可使遣之者谷许诺即变姓名怀银步往授其子人无知者存宝死谷逃避江淮闲会赦乃出苏轼谪黄州与合同乡幼而识之因与之游及轼与弟辙在朝谷浮沉里中未尝一见绍圣初轼辙谪岭海平生亲旧无复相闻者谷独慨然自眉山诵言欲徒步访两苏闻者笑其狂谷竟往至梅州遗辙书曰我万里步行见公不意自全今至梅矣不旬日必

见死无恨矣辙惊喜曰此非今世人古之人也既见握手相泣已而道平生逾月不厌时谷年七十三将复见轼于海南辙愍其老且病止之曰君意则善然循至儋数千里当复渡海非老人事也谷曰我自视未即死也公无止我留之不可则资之行会有蛮隶窃其橐装以逃获于新州谷从之至新遂病死【按苏辙巢谷传云有子蒙在泾原军中故为作传异日以授之】

△徐积

徐积字仲车楚州山阳人有孝行三岁父死旦旦求之甚哀母使读孝经辄泪落不能止事母至孝朝夕冠带定省【按宋名臣言行录载尝具公裳见贵官忽自思云见贵官尚如此岂有见母而不具公裳者乎遂晨夕具公裳揖其母年过壮未娶或勉之答曰娶非其人必为母病子非敢忘嗣固有待也】从胡瑗学所居一室寒一衲裘啜菽饮水瑗馈以食弗受应举入都不忍舍其亲徒载面西登进士第举首许安国率同年生入拜且致百金为寿谢却之以父名石终身不用石器行遇石则避而不践或问之积曰吾遇之则怵然伤吾心思吾亲故不忍加足其上尔母亡水浆不入口者七日悲恸呕血庐墓三年雪夜伏墓侧哭不绝音翰林学士吕湊过其庐适闻之为泣下曰使鬼神有知亦垂涕也甘露岁降兆域杏两枝合为干既终丧不彻筵几起居馈献如平生中年有瞶疾屏处穷里而四方事无不知客从南越来积兴论岭表山川险易镇戍疏密口诵手昼若数一二自少及老日作一诗为文率用腹藁口占授其子【按宋名臣言行录云晚乃著书未成而病尝曰吾之书大要以正治心以直养气而已或问立朝之要曰以正辅君或问修身之要曰以正修身】尝借人书篋经宿还之借者给言中有金叶积谢而不辨卖衣偿之乡人有争讼多就取决州以行闻诏赐粟帛元佑初朝廷诏举中外学官近臣合荐之乃以扬州司户参军为楚州教授每升堂训诸生闻者敛衽敬听居数岁使者又交荐之转和州防御推官改宣德郎监中岳庙卒政和六年赐谥节孝处士官其一子

△曾叔卿

曾叔卿巩族兄也家苦贫即存心不欺尝买西江陶器欲贸易于北方既而不果行有从之转售者既受直矣问将何之其人曰欲效君前策耳叔卿曰不可吾闻北方新有灾谨此物必不时泄故不以行余岂宜不告以误子其人即取钱去居乡介洁一介不取妻子困于饥寒而拊庇孤惸唯恐失其意起家进士至著作佐郎熙宁中卒

△刘永一

刘永一陕州夏县人孝友廉谨熙宁初巫咸水溢入县城民多溺死永一持竿立门前见他人物流入者辄撻出之有僧寓钱数万于其室无何僧死永一诣县自言请以钱归其弟子乡人负债不肯偿立焚其券行事类此兄大为医助教居亲丧不饮酒食肉终三年司马光传之以为今士大夫所难

△孙逢 【喻汝砺】

孙逢眉山人大观四年进士累官至太学博士张邦昌僭立有司趣百僚入贺逢独坚卧不起时祠部员外郎喻汝砺闻变扞其膝曰不能为贼臣屈遂挂冠去事毕有司举不至者欲以逢与汝砺复于金人邦昌以毕至告乃免逢闻之曰是必将肆赦遇官以浼我我其可竣遂发疾而卒 【按本传以下诸人宋史原入忠义今因其未经殉难与慷慨授命者不同而志行卓然入之独行洵为无媿今移载于此】

△赵俊

赵俊字德进南京宋城人绍圣四年进士官至朝奉郎隐居杜门虽乡里不妄父刘安世无恙时居河南暇则独一过之徐处仁与俊厚善及为丞相乡人多见用俊未尝往求处仁亦忘之独不得官建炎末士大夫皆避地俊独不肯曰但固吾所守尔死生命也避将安之衣冠奔蹈于道者相继俊晏然不动刘豫以俊为虞部员外郎辞疾不受以告畀其家卒却之如是者三豫亦不复疆凡家书文字一不用豫僭号但书甲子后三年卒赠承直郎

△刘化源 【米璞 阴焯 姚邦基】

刘化源米璞皆耀州人化源绍圣元年进士建炎初金人入关陕守令以城降者金人因而命之化源时知陇州不肯降城陷被执金人使之守之不得死遂驱入河北鬻蔬果隐氏闲者十年终不居辱璞登政和二年进士第时通判原州刘豫欲官之杜门谢病卒不污伪命时有凤翔教授阴焯亦守节不仕又尉氏知县姚邦基蜀人也秩满不复仕屏居村落授徒自给以终时宗室不及南渡者尚散居民闲豫募人索之承务郎阎琦匿不以闻为人所告豫杖之死

△张山翁

张山翁字君达普州人景定三年进士德佑元年为荆湖宣抚使干官鄂守张晏然议纳疑山翁以书谯让之晏然既降山翁被执军前谕曰若降不失作显官山翁酬对不屈行省官贾思贞义之贷不杀后居黄鹄山聚徒教授而终

△黄申

黄申字酉乡井研人开庆元年进士历官乐安丞为政廉谨有治声元兵徇抚州下诸县索降状乐安令率其僚联署以上申独抗不往令遣吏民数百人强舆致之申颠踣于地若中风然令无如之何至暮众舁之寘中堂翼日或食以粥得免遂去隐巴山中以终

△何时 【陈子敬】

何时字了翁抚州乐安人文天祥同年进士也调庐陵尉历知兴国县天祥起兵辟署帅府机宜带行监文思院天祥入卫时任留司分司吉州饷运元兵下吉州时脱身归乡里益王立天祥开府南剑时起兵趋兴国复崇仁县未几元兵奄至兵败削发为僧卖卜自给变姓名目号坚白道人又有陈子敬者赣州人尝从天祥游天祥开阆汀州子敬募集民兵屯阜口及天祥攻赣子敬与合谋忠效甚着空坑兵败复聚兵屯黄塘砦砦溃子敬不知所终

钦定续通志卷五百二十八

●钦定续通志卷五百二十九 独行传三

独行传

辽

○辽

萧扎拉 耶律官努 【萧斡】 萧都勒斡 萧普尔普

萧扎拉

耶律官努 【萧斡】

萧都勒斡

萧普尔普

△萧扎拉

萧扎拉字实讷北府宰相巴雅尔之弟性介特不事生业保宁闲以戚属进累迁宁远军节度使秩满里居淡泊自适统和末召为南京马步军节度使以疾求退不听适伊勒希巴又以疾辞许之遂入颀山杜门不出帝嘉其志不复征扎拉自是家于颀山亲友或过之终日言不及世务凡宴游相邀亦不拒一岁山居过半与世俗不偶耶律资忠重之目曰颀山老人卒

△耶律官努 【萧斡】

耶律官努字奚隐林牙斡鲁之孙沉厚多学详于世系嗜酒好佚初征为宿直将军重熙九年以疾去官帝以官努属尊欲成其志乃许其择一路节度使官努辞曰臣愚钝不任官使加归义军节度使辄请致政官努与乌哩特部人萧斡友善斡谓官努曰仕不能致主泽民成大功

烈何屑屑为也吾与君居林下以枕簟自随觴咏自乐虽不官无嫌焉官努然之时称二逸干统闲官努卒

△萧都勒幹

萧都勒幹字萨巴皮室详袞页嚕之弟幼警悟异常儿三岁失母哭尽哀见者伤之及长魁伟沈毅好学善属文有才干年三十始仕为朝野推重给事北院知圣旨事太康二年伊苏再入枢府都勒幹素与萧岩寿善诬以罪谪戍西北部坐皇太子事特恩减死仍锢终身在戍十余年太子事稍直始归乡里屏居谢人事一日临流闻雉鸣三复孔子时哉语作古诗三章见志当时名士称其高情雅韵不减古人寿隆六年卒干统初赠彭义军节度使【按辽史载独行三人谓不淫于富贵不诎于声利今于列传中采其志节相同者复得萧都勒幹一人乃按时代次之谨识】

△萧普尔普

萧普尔普字托罗魏国王惠四世孙父母蚤丧鞠于祖父乌尔古纳性孝悌年十三乌尔古纳卒自以早失怙恃复遭祖丧哀毁踰礼族里嘉叹尝谓人曰我于亲不得终养今谁为训者苟不自勉何以报鞠育恩自是力学于文艺无不精干统闲以乌尔古纳之故召之不应尝与亲识游猎山水奉养无长物仆隶欣欣如也或曰公胡不念嗣先世功名答曰自度不足以继先业年踰强仕安能益主庇民累征皆以疾辞晚年谢绝人事卜居玛古山屏远葺茹潜心佛书延有道者谈论弥日人问所得何如但曰有深乐惟觉六凿不相攘余无知者一日易服无疾而逝

钦定续通志卷五百二十九

●钦定续通志卷五百三十 循吏传一

循吏传

（臣）等谨按循吏之名例沿史汉义居悃悞无华奉职循理兴教化劝农桑弭盗贼而已是以前汉止取文翁等六人而若赵张三王之能于其职尹翁归之击断鲍宣之不畏强御不与焉至如韩延寿之闭合自责兴起礼让亦不与焉去取之闲例纂严己旧唐书之良吏传新唐书删去二十余人盖有见乎此辽史名能吏传故若杨遵勳之剖决如流王荣之练达朝政亦皆采入揆诸循良之名稍为不协今概从淘汰一以循吏为名以符郑志之例焉

唐

○唐

韦仁寿

陈君宾

张允济

李桐客

李素立【至远等】

萧大鼎 贾敦颐【敦实】 田仁会【
归道】 裴怀古 韦景骏【杨茂谦】 李惠登 罗珣【让】
萧定 韦丹【宙】 卢宏宣
薛元赏 何易于

韦仁寿

陈君宾

张允济

李桐客

李素立【李至远等】

薛大鼎

贾敦颐【贾敦实】

田仁会【田归道】

裴怀古

韦景骏【杨茂谦】

李惠登

罗珣【罗让】

萧定

韦丹【韦宙】

卢宏宣

薛元赏

何易于

△韦仁寿

韦仁寿京兆万年人隋大业末为蜀郡司法书佐断狱平得罪者皆自以不冤高祖入关遣使者徇定巴蜀承制擢仁寿嵩州都督府长史

南宁州纳款朝廷岁遣使安抚至率贪黩边人苦之多叛去高祖素闻仁寿治理诏检校南宁州都督寄治越嵩岁一按行慰抚之仁寿将兵五

百人循西洱河开地数千里承诏置七州十五县【旧书作八州十七县】即授其酋豪为牧宰威令简严人皆安悦将还酋长泣曰天子藉

公镇抚奈何欲去我仁寿以池壁未立为解诸酋即相率筑城起廨舍旬日而就仁寿乃告以实曰吾奉诏抚循庸政擅留父老悲啼祖行遣子

弟随贡方物天子大悦仁寿请徙治南宁假兵镇抚诏可敕益州给兵护送刺史实轨疾其功詠言蜀中山獠方叛未遑远略不时遣岁余病卒

△陈君宾

陈君宾陈鄱阳王伯山子也仕隋为襄国太守武德初挈郡听命封东阳郡公迁邢

州刺史贞观初徙邓州州承丧乱后百姓流离君宾加
意劳徠不替月皆还复业明年四方霜潦独君宾所治有年储食充羨蒲虞等州民就食
其境太宗下诏劳之曰去年关内六州谷不登粮储既
少令民析房逐食比闻刺史与百姓识朕此怀务相贍养还时各有赢粮并出布帛赠行
者如此用意嘉叹良深一则水旱常数更相拯贍不虑
凶年二则礼让兴行海内皆为兄弟变浇薄之风朕顾可忧已命有司录刺史以下功最
百姓养户免今年调物是岁入为太府少卿转少府少
监坐事免起为虔州刺史卒

△张允济

张允济青州北海人仕隋为武阳令以德教训民多异政元武民有以犝牛依妇家
者久之孳十余犝将归而妇家不与民诉县县不能决
乃诣武阳允济曰若自有令吾何与民泣诉其抑允济因令左右缚民蒙其首过妇家村
中云捕盗牛者命尽出民家牛诘所从来妇家不知遽
曰此婿家牛我无预即遣左右撤蒙曰可以此牛还婿妇家叩头服罪元武吏大惭允济
尝道逢老母蒔葱结庐守之因教曰第还舍脱有盗当
告令媪如其言俄大亡葱允济悉召十里内男女验问果得盗者有行人夜发遗袍道中
行十余里乃寤或谓曰吾境内不拾遗可还取之如言
果得袍迁高阳郡丞郡缺太守独统郡事吏下畏悦贼帅王须拔攻郡于是粮屈吏食槐
叶藁节无叛者贞观初累迁刑部侍郎封武城县男出
为幽州刺史卒

△李桐客

李桐客冀州衡水人仕隋为门下录事炀帝在江都以四方日乱谋徙都丹阳召羣
臣议左右希意以为江左且望幸若巡狩勒石纪功复
禹旧迹此其时也桐客独曰吴会卑湿而狭不足奉万乘给三军且踰越险阻非社稷福
御史劾以谤毁几得罪而免后隋灭为宇文化及胁至
黎阳转陷宝建德贼平太宗召授秦府法曹参军贞观初累为通巴二州刺史治尚清平
民呼为慈父后卒于家

△李素立 【李至远等】

李素立赵州高邑人曾祖义深仕北齐为梁州刺史父政期 【按新书宰相世系表
水部郎中政期系素立之父而政萧则为宜州长史
乃其伯也本传记为父政藻今据改】 为隋水部郎使淮南为盗所杀素立武德初擢监
察御史民有犯法不及死者高祖欲杀之素立谏曰三
尼法天下所共一动摇则人无以措手足方大业经始奈何辇毂下先弃刑书帝嘉纳由
是恩顾特异以亲丧解官起授侍御史贞观中转扬州

大都督府司马初突厥铁勒部内附即其地为瀚海都护府诏素立领之时阙疑孰【旧书作阙泥孰】别部数梗边素立遣使谕降夷人感其惠率马牛以献素立止受酒一桮归其余乃开屯田立廨署厯太仆鸿臆卿累封高邑县侯出为绵州刺史永徽初徙蒲州将行付所余粮储并什器于州唯贳书籍就道会卒高宗特废朝一日谥曰平其孙至远始名鹏素立方奉使谓家人曰古人待事名子吾此役可命子孙矣遂以名之少秀悟治尚书左氏春秋令狐德葬以良史许之始调蒲州参军累擢监察御史襄行忤贵幸外迁久乃厯司勋吏部员外郎中迁天官侍郎知选事疾令史受贿多所絀易吏肃然敛手其知选以内史李昭德荐或劝其往谢答曰李公以公用我奈何欲谢以私卒不诣故昭德衔之出为壁州刺史卒至远父休烈亦有文终郟令至远友兄弟事寡姊有礼世称其德弟从远清密有学神龙初厯中书令太府卿累封赵郡公谥曰懿兄弟皆德望相埒至远子畬字玉田少聪警初厯泛水主簿遇事敏速虽厮竖一阅辄记姓名以路敬潜荐擢右台监察御史里行累转国子司业事母谨累世同居长幼有礼畬妻卒时母先病恐母悲伤约家人无以哭声闻母所朝夕省侍不见忧色母终哀毁而卒从远子岩年十余岁会中宗祀明堂以近臣子弟执笏豆岩进士中礼授右宗卫兵曹参军厯洛阳尉累迁兵部郎中发扶风兵应姚嵩称旨迁谏议大夫封赞皇县伯终兵部侍郎岩善草隶为参军时制一裘服之终身

△薛大鼎

薛大鼎字重臣蒲州汾阴人父粹为隋介州长史汉王谅反授绛州刺史谅败坐诛大鼎以幼免死配流辰州用战功得还高祖兵兴谒见龙门因说帝直渡龙门就食永丰仓传檄远近据天府为拊背扼喉计帝奇之时诸将已决策先攻河东其议遂寢授大将军府察非掾出为山南道副大使开屯田以实仓廩赵郡王孝恭讨辅公祐授大鼎饶州道军师以功迁浩州刺史累徙沧州界有无棣河久塞大鼎浚治引鱼盐于海民歌曰新沟得通舟楫利直达沧海鱼盐至昔日徒行今骋驱美哉薛公德滂被又疏长芦漳衡三渠泄污潦水不为害时郑德本在曹州贾敦颐为瀛州【按旧书作瀛州刺史贾敦颐曹州刺史郑德本据敦颐传亦称刺瀛州新书本传讹为德本在瀛州敦颐为冀州今据旧书改】皆有治名故河北称铛脚刺史永徽中迁银青光禄大夫行荆州大都督长史卒谥曰恭子克构克勤克构有器识天授中官至麟台监克勤厯司农少卿为来俊臣所陷被杀克构坐窜死岭南

△贾敦颐【贾敦实】

贾敦颐曹州冤句人贞观时数历州刺史在职廉洁入朝常尽室行乘一敝车羸马绳羈见者不知其刺史也久之为洛州司马以公累下狱太宗贯之徙瀛州刺史州濒滹沱河及滹水岁泛溢坏室庐敦颐为立提堰自是州无水患其弟敦实时为饶阳令旧制大功嫌不连官朝廷嘉其兄弟治行故不徙以示宠永徽中迁洛州洛豪右占田多踰制敦颐括三千余顷以赋贫民发奸摘伏下无能欺卒于官弟敦实贞观中为饶阳令政化清静民怀之咸亨初迁洛州长史甚有惠政洛阳令杨德干酷烈杖杀人以立威敦实常喻止曰政在养人伤生过多虽能不足贵也德干为衰减始洛阳人为敦颐刻碑大市及敦实入为太子右庶子人复为立碑其侧号常棣碑历怀州刺史有美迹永淳初致仕卒年九十余子膺福天授中历左散骑常侍昭文馆学士以窦怀贞党坐诛

△田仁会 【田归道】

田仁会雍州长州人祖轨隋幽州刺史封信都郡公父宏袭封至陵州刺史仁会武德初擢制举累迁左武侯中郎将太宗征辽薛延陀以数万骑掩河内诏仁会与执失思力率兵击败之尾逐数百里帝降玺书嘉慰永徽中为平州刺史务农劝学政称善徙郢州 【按新书误以自暴祈雨系之平州下今据旧书移正】 岁旱自暴以祈而雨大至谷遂登郡人歌之五迁胜州都督境有夙贼依山剽行人仁会发骑尽捕杀之自是道无寇迹入为太府少卿迁右金吾将军所得禄估有羸辄入之官人以为尚名然资强摯疾恶昼夜循行有丝毫奸必发廷中谪罚日数百京师无贵贱举惮之有女巫传鬼道惑众自言能活死人市里以为神仁会劾徙于边转右卫将军以老致仕卒谥曰威子归道明经及第累擢通事舍人内供奉转左卫郎将突厥默啜请和武后诏将军阎知微持节往册可汗默啜又遣使谢知微遇诸道即与绯袍银带因表请使到日备礼廷赐归道谏曰突厥皆惠积年今悔过入朝宜待天旨而知微擅赐袍带朝廷何以加之望敕反初服以须朝命且小国使者不劳备礼迺之后从焉默啜将至单于都护府诏归道摄司宾卿往劳默啜请六胡州及都护府地不得大怨望执归道将害之归道色不挠且让之为陈祸福默啜亦悔会有诏赐默啜粟三万石彩五万段农器三千且许结婚于是归道得还遂具陈默啜不臣伏请备边已而果反乃擢归道夏官侍郎益亲信迁左金吾将军司膳卿押千骑除殿中监宿卫元武门桓彦范等诛二张归道不豫闻及索骑士拒不应事平彦范欲诛之以辞直免还私第中宗壮其守召拜太仆少卿迁殿中少监右金吾将军卒赠辅国大将军追封原国公谥曰然

△裴怀古

裴怀古寿州寿春人仪凤中诣阙上书补下邳主簿频迁监察御史姚嵩蛮叛诏怀古驰驿往无之申明诛尝归者日千计俄缚首恶遂定南方蛮夏立石着功恒州僧净满为其徒诬告祝诅不道武后命按诛之怀古得其枉为之申诉后怒怀古奏曰陛下法当与天下画一岂使臣杀无辜以希旨哉使净满有不臣状臣何能宽之后意乃解阁知微使突厥怀古监其军默啜胁知微称可汗又欲官怀古怀古不从将杀之抗辞曰宁守忠而死不毁节以生请就斩乃囚之军中因得亡去宛转山谷以归迁祠部员外郎姚嵩酋等叩阙愿得怀古为牧守遂拜姚州都督以疾辞转司封郎中时始安贼欧阳倩众数万剽没州县以怀古为桂州都督招慰讨击使未踰岭先飞书谕以祸福贼迎降自陈为吏侵而反怀古知其诚乃轻骑赴之或曰獠夷难亲未可信答曰忠信可通神明况人耶至其壁抚谕倩等大喜悉归所掠诸洞素翻覆者皆牵连歛附岭外悉平徙相州刺史并州大都督长史所至吏民怀爱神龙中以左羽林大将军召未至官复授并州郡人携扶老稚出迎崔宣道始代为长史亦野次怀古不欲厚愧宣道使人驱迎者还而来者愈众得人心类如此俄转幽州都督召为左威卫大将军卒于官

△韦景骏 【杨茂谦】

韦景骏雍州万年人司农少卿宏机曾孙 【按旧书韦宏机传载宏机子余庆余庆子岳岳子景骏则景骏系宏机曾孙矣新书本传误为孙今改正】 中明经神龙中历肥乡令县北濒漳连年泛滥旧防迫漕渠虽修筑随即坏决景骏相地势益南千步因高筑堤水不为患而堤北遂为腴田漳水旧有架柱长桥景骏改为浮梁功少费约后遂为法河北饥身巡闾里劝通有无赡恤贫弱县民独免流离及去人立石着其功开元中为贵乡令有母子相讼者景骏曰令少孤常自痛尔幸有亲何得如此教之不孚令之罪也因呜咽流涕付授孝经使习大义于是母子感悟请自新遂称慈孝当时治有名者景骏与清漳令冯元淑临洺令杨茂谦三人景骏后为赵州长史道出肥乡民争奉酒食迎犒有小儿数辈与焉景骏曰吾去时儿曹未生非有旧恩何故来咸对曰耆老为我言学庐馆舍桥鄣皆公所治意公为古人今幸亲见所以来景骏为留终日后迁房州刺史州带山谷俗参蛮夷无学校而好淫祀景骏为诸生贡举通隘道作传舍罢祠房无名者民甚便之转奉天令未行卒茂谦

【按新书韦景骏传后附载杨茂谦事迹而卷目失载今补注】 清河人擢制举授左拾遗出为临洺令为吏介而勤擢秘书郎始□怀贞雅

重其材及执政荐为大理正左台御史中丞开元初出为魏州刺史河北道按察使与司马张怀玉同乡初相善泊晚有隙遂相讦短长左迁桂州都督徙广州卒景骏子述自有传

△李惠登

李惠登营州柳州人【旧书作平卢人】少为平卢军裨将安禄山乱从董泰泛海略定沧棣等州轻兵远鬪贼战辄北史思明反惠登陷贼以计脱走山南依来瑱表试金吾卫将军李希烈反授兵二千使屯随州惠登挈州以归即拜刺史州数被乱野荒不治惠登虽朴素无学术而视人所利行之所害去之率心所安暗与古舍居二十年田亩辟户口日增人歌颂之于是节度使于頔状其绩诏加御史大夫升随为上州俄检校国子祭酒卒赠洪州都督

△罗珣【罗让】

罗珣越州会稽人宝应初诣阙上书为太守寺太祝曹王皋领江西荆襄节度署置幕府累迁副使皋卒军乱劫府库珣取首恶十余人斩以徇而贯其余党召为奉天令时中官出入相系于道吏缘以犯禁珣痛笞之自是屏息擢庐州刺史民闲病者舍医药禱淫祀珣下令止之修学宫政教简易淮南节度使杜佑上其治状赐金紫服再迁京兆尹请灭平余半以常赋充之人赖其利以老病求解徙太子宾客累封襄阳县男卒谥曰夷子让字景宣以文学着举进士宏辞贤良方正皆高第为咸阳尉父丧几毁灭服除布衣粝饭不应辟署十余年淮南节度使李墉即所居敦请置幕府除监察御史累迁御史中丞有仁老名或以婢遗让问所从答曰女兄九人皆为官所卖留者独年老耳让惨然为焚券召其母归之入为散骑常侍拜江西观察使卒赠礼部尚书

△萧定

萧定字梅臣宋国公瑀之曾孙以荫授陕州参军金城丞莅事清干黜陟使裴遵庆表为判官调万年主簿厯左右司郎中为元载所恶外迁为袁润等六州刺史所至有政声大厯中有司差天下刺史治绩定与常州萧复豪州张镒为第一而劝农桑均赋税招辑流亡定又在镒复右迁户部侍郎太常卿朱泚反变姓名为张诞匿里中与蒋沆俱不浼于贼事平擢太子少师卒赠太子太师【按萧定旧书列为循史新书则附在萧瑀传后今仍改为循史】

△韦丹【韦宙】

韦丹字文明京兆万年人周大司空孝宽六世孙高祖琨以洗马事太子承干谏不听太宗才之擢给事中后封武阳县侯卒谥曰贞丹蚤

孤从外祖颜真卿学擢明经调安远令以让其兄复举五经高第历咸阳尉新罗国君死诏拜丹司封郎中往吊故事使外国赐州县十官卖以取贖丹曰使外国不足于资宜上请安有贸官受钱即具奏帝命有司与之着为令未行而新罗立君死还为容州刺史教民耕织止惰游兴学校民贫自鬻者赎归之禁吏不得掠为隶始城州周十三里屯田二十四所教种茶麦仁化大行迁河南少尹未至徙义成军司马召为谏议大夫有直名刘辟反议者欲释不诛丹上疏以为孝文世法废人慢当济以威请诛辟宪宗褒美会辟围梓州乃授丹剑南东川节度使代李康至汉中上言康守方尽力不可易召还拜晋慈隰州观察使封咸阳郡公阅岁奏所治三州非要害地不足张职为国家费请属之河东帝从之徙为江南西道观察使丹计口受俸委余于官罢八州冗食者始氏不知为瓦屋草茨竹椽久燥则焚丹召工教为陶聚材于场人能为屋者受材瓦于官免半赋徐取其偿逃未复者官为之贫不能者畀以财身往劝督置南北市为营以舍军岁中旱募人就功厚与直给其食为衢南北夹两营东西七里即废仓为新厩以息马筑堤扞江长十二里凡为陂塘五百九十八所灌田万二千顷有吏主仓十年丹覆其粮亡三千斛籍其家尽得文记乃权吏所夺丹召诸吏曰若恃权取于仓罪也与若期一月还之皆顿首谢及期无敢违有卒违令当死释不诛者而上书告丹不法诏丹解官待辨会卒验卒所告皆不实丹在江西德被八州歿四十年民思之不忘太和中裴谊观察江西上言为立立祠刻石纪功不报宣宗时周墀复言之乃诏刻功于石子宙推荫累调河南府司录参军宣宗录丹后拜由侍御史三迁度支郎中卢钧节度太原表宙为副时回鹘入塞下剽杀吏民钧欲得信重吏视边宙请往自定襄雁门五原绝武州塞略云中踰句注徧见酋豪抚谕之视亭障守卒增其稟约吏不得擅以兵侵诸戎犯者死于是三部六蕃诸种皆信悦召拜吏部郎中出为永州刺史俗不知法为书制律户晓之岁歉斥官供刺史什用得九十余万钱为市粮饷州负岭转输艰险每饥人辄莩死宙始筑当平仓收羨余以待乏罢冗役九百九十四员县旧置吏督赋宙俾民自输家十相保常先期湘源岁供零陵香人苦之宙为奏罢民贫无牛宙为置社二十家月会钱若干探名得者先市牛以是为准久之牛不乏立学官取仕家子弟十五人充之初里民婚娶集宾客会令多至数百人力不足则不迎或至淫奔宙条约使略如礼其敝俗一切禁绝还为大理少卿久之拜江西观察使迁岭南节度使南诏陷交趾抚兵积备以干闻加检校尚书左仆射同中书门下平章事咸通中卒弟岫字伯起仕至福建观察使

亦有名

△卢宏宣

卢宏宣字子章元和中擢进士第郑权帅襄阳辟署幕府李愬代权二人交憾宏宣谒愬愬敕左右谨卫既与语见其冲远不觉洗然裴度留守东都表为判官累迁给事中驸马都尉韦处仁拜虢州刺史宏宣谓非所任还诏不下开成中山南江西大水诏宏宣与吏部郎中崔璿分道赈济还迁京兆尹刑部侍郎拜剑南东川节度使时岁饥剧盗为乱伪置官吏发敖屠招亡命联蓬泸嘉茱诸州根株盘炽宏宣檄谕贼党稍降其黠者署军中孱无能者还之农魁长逃八峡中悉捕诛之徙义武节度使宏宣性宽厚悉除苛法人便之然犯者亦不贷初诏赐其军粟三十万斛贮飞狐宏宣计挽费不能满直敕吏守之明年春大旱教民随力往取时幽魏饥甚独易定自如至秋悉收所贷军食以饶历工部尚书秘书监以太子少傅致仕卒赠尚书右仆射宏宣患士庶家祭无定仪乃合十二家法损益之次以为书云

△薛元赏

薛元赏失其里系太和初自司农少卿出为汉州刺史时李德裕为剑南西川节度使会维州降德裕受之以闻牛僧孺沮其议元赏上书极言可因抚之以溃其膺腹不省段文昌代德裕状元赏治当最累迁司农卿京兆尹出为武宁节度使罢泗口猥税人以为便俄徙邠宁会昌中德裕当国复拜京兆尹都市多侠少年剽斂坊间元赏到府三日收恶少杖死三十余辈陈诸市余悉斂迹元赏长吏事尝条时弊上之禁屯怙势扰府县元赏数与争由是军士折戢百姓赖安就加检校吏部尚书阅岁进工部尚书领诸道盐铁转运使弟元龟以德裕荐为京兆少尹宣宗立罢德裕而元龟坐贬元赏亦下除袁王傅久之复拜昭义节度使卒

△何易于

何易于不详何所人为益昌令县距州四十里刺史崔朴常乘春与宾属泛舟出益昌旁索民挽絙易于身引舟朴惊问状易于曰方春百姓耕且蚕惟令不事可任其劳朴愧而去盐铁官榷取茶利诏下所在毋敢隐易于视诏书曰益昌人不征茶且不可活矧厚赋毒之乎命吏阁诏吏曰天子诏何敢拒对曰吾敢爱一身移暴于民乎亦不使罪尔曹即自焚之观察使素贤之不劾也民有死丧不能具葬者以俸敕吏为办召高年坐以问政得失凡鬪民在廷易于丁宁指谕杖遣之不以付吏狱三年无囚督赋役不忍迫下户或以俸代输馈给往来传符外一无所进故无异称以中上孝迁罗江令刺史裴休尝至其邑导侍不过三人廉约盖资性云

钦定续通志卷五百三十

●钦定续通志卷五百三十一 循吏传二

循吏传

宋

○宋

陈靖

张纶

邵晔

崔立

鲁有开

张逸

吴遵路

赵尚宽

高赋

程师孟

韩晋卿

叶康直

陈靖

张纶

邵晔

崔立

鲁有开

张逸

吴遵路

赵尚宽

高赋

程师孟

韩晋卿

叶康直

△陈靖

陈靖字道卿莆田人父仁璧丘陈洪进为泉州别驾洪进称臣豪猾有负险为乱者靖徒步谒转运使杨克巽陈讨贼策授阳翟县主簿契丹侵边宋师数不利靖上五策曰明赏罚抚士众持重示弱待利而举帅府许自辟士而将帅得专制境外太宗异之改将作监丞未几为御史台推勘官父丧起复秘书丞累遣太常博士太宗务兴农事诏有司议均田法靖议曰法未易行也宜先命大臣为租庸使或兼屯田制置乃择三司判官通知民事者二人为之贰两京东西千里检荒地及逃民产募人耕作赐以室庐牛犁种食不足则给以库钱别其课为十分贵州县劝课给印纸书之分殿最为三等凡县管垦田三岁得课九分为下最三岁十分为中最未及三岁盈十分为上最其最者令佐免选或超资殿者即增选降资每州通以诸县田为十分视殿最行赏罚候数岁尽罢官屯田悉用赋足然后量入授田度地均税约井田之制为定以法颁行四方不过如此矣议上与帝意合于是诏盐铁使陈恕等各选判官二人与靖议以靖为

京西劝农使命大理寺丞皇甫选光禄寺丞何亮副之
选等言其功难成帝犹谓不然既而靖欲假缗钱二万试行之陈恕等言钱一出后不能
偿则民受害矣帝以羣议不同始罢之出靖知婺州再
迁尚书刑部员外郎真宗即位复列前论且言国家御敌西北仰食东南东南食不足则
误国大计请自京东西及河北诸州大行劝农之法以
殿最州县官吏岁可省江淮漕百余万复诏条士请刺史行春县令劝耕孝悌力田者赐
爵置五保以检察奸盗籍游惰之民以供役作下三司
议皆不果行厯度支判官为京畿均田使出为淮南转运副使兼发运司公事徙河南转
运使极谏前李氏横赋于民凡十七事诏为罢其尤甚
者徙知潭州厯度支盐铁判官累迁左谏议大夫初靖与丁谓善谓贬赏人皆逐去侍御
史王耿言靖老疾于是以秘书监致仕卒靖平生多建
画而于农事尤详尝取淳化咸平以来所陈表章目曰劝农奏议录上之然其说泥古多
不可行

△张纶

张纶字公信颍州汝阴人少倜傥任气举进士不中补三班奉职迁右班殿直从雷
有终讨王均有蜀有降寇数百据险叛使纶击之纶驰
报曰此穷寇急之则生患不如谕以向背有终从之贼果弃兵来降以功迁右侍禁厯益
彰简等州都巡检使所部卒纵酒掠居民纶斩首恶数
人众乃定溪峒彭氏蛮内寇以纶知辰州纶至筑蓬山驿路贼不得通乃遁去徙知渭州
改内殿崇班知镇戎军蛮复入寇为辰州澧鼎等州缘
边五溪十峒巡检安抚使谕蛮酋祸福购还所掠民遣官与盟刻石境上久之除江淮制
置发运副使时盐课大亏纶奏除通泰楚三州盐户宿
负官助其器用盐入优与之直岁增课数十万石复置盐场于杭秀海三州岁入课又百
五十万居二岁增上供米八十万疏五渠道太湖入于
海复租米六十万开长芦西河以避覆舟之患又筑漕河堤二百里于高邮北旁镗巨石
为十■〈石达〉以泄横流泰州有捍海堰延袤百五
十里久废不治岁患海涛冒民田纶议修复论者以涛患息而潦患兴难之纶曰涛患十
九而潦患十一获多而亡少岂不可邪表三请愿身自
临役命兼权知泰州堰成复逋户二千六百民利之为立生祠居淮南六年累迁东上合
门使真拜干州刺史徙知颍川卒纶有材略所至兴利
除害性宽恕喜施子在江淮见漕卒冻馁道死因推奉钱市絮襦千数衣不能自存者

△邵晔

邵晔字日华其先京兆人唐末曾祖岳挈族之荆南谒高季兴不见礼遂之湖南彭
玕刺全州辟为判官遂家桂阳祖崇德道州录事参军

父简连山令晔幼嗜学太平兴国八年擢进士第授邵阳主簿改大理评事知蓬州录事参军时知州杨全性悍诬部民张道丰等三人为盗悉置于死狱已具晔察其枉不署牒白全当核其实全不听既而捕获正盗道丰等释全坐削籍为民晔代还引对太宗嘉之授光禄寺丞使广南采访刑狱历监察御史以母老乞就养得知朗州累迁淮南转运使景德中假光禄卿充交址安抚国信使会黎桓死其子龙钺龙全龙廷明护等互相攻杀晔驻岭表以事上闻改命为缘海安抚使许以便宜晔贻书安南谕朝廷威德俾速定位明护等实时听命奉龙廷主军事初诏晔俟其事定即以黎桓礼物改赐新帅晔上言怀抚外夷当示诚信不若俟龙廷贡奉别加封爵而宠赐之帝甚嘉纳使还改兵部员外郎赐金紫尝上邕州至交州水陆路及宜州山川等四图颇详控制之要俄判三司三勾院坐所举季随犯赃当削一官帝以其远使之勤止令停任大中祥符初起知兖州表请东封就命为京东转运使封禅礼毕起拜刑部郎中复判三勾院出为淮南江浙荆湖制置发运使四年改右谏议大夫知广州州城濒海每蕃舶至岸常苦飓风晔凿内濠通舟颶不能害俄遘疾卒

△崔立

崔立字本之开封鄆陵人【东都事略作许州长葛人】祖周度仕周为泰宁军节度判官慕容彦超叛周度责以大义遂见杀立中进士第为果州团练推官役兵犂官物道险率众钱佣舟载归知州姜从革论如率敛法当斩三人立曰此非私己罪杖尔从革不听卒论奏诏如立议真宗记之特改大理寺丞知安丰县大水坏期斯塘立躬督缮治踰月而成进殿中丞历通判广州许州会滑州塞决河调民出刍楗命立提举受纳立计其用有余而下户未输者尚二百万悉奏弛之知江阴军属县有利港久废立教民浚治既成溉田数千顷及开横河六十里通漕运累迁太常少卿历知棣汉相潞兖郓泾七州兖州岁大饥募富人出谷十余万石赈之全活甚众立性淳谨尤喜论事大中祥符闲帝既封禅士大夫争上待瑞立独言水发徐州旱连江淮无为烈风金陵火天所以警骄惰戒淫泆也前后上四十余事以右谏议大夫知耀州改知濠州迁给事中进尚书工部侍郎致仕卒识韩琦于布衣以女妻之人服其鉴云

△鲁有开

鲁有开字符翰参知政事宗道从子也【按宋史鲁宗道传不载其子而宏简录则称有开为宗道子与此异】事亲以孝闻好礼通左氏春秋用宗道荫知韦城县曹濮剧盗某行闻有开名相戒遁去知确山县大姓把持官政有开治其最甚者兴废陂溉民田数千顷飞蝗不入

境富弼守蔡荐之以为有古循吏风知金州有蛊狱当死者数十人有开曰欲杀人衷谋之足矣安得若是众邪讯之果诬天方旱狱白而雨知南康军代还以言新法行患在异日出通判杭州知卫州水灾人乏食擅贷常平钱粟与之且奏乞蠲益息徙冀州增堤或谓郡无水灾何以役为有开曰豫备不虞古之善计也卒成之明年河决水至堤而止朝廷遣使河北民遮诵有开功状召为膳部郎中元佑中厯知信阳军洺滑冀等州官至中大夫卒

△张逸

张逸字大隐郑州荥阳人进士及第为校书郎知邓城县有能名知州谢泌荐之引对真宗问所欲何官逸对曰母老愿得近乡幕职归奉甘旨授澶州观察推官数日以母丧去服除特改大理寺丞知长水县徙青神贫不自给西京留守王嗣宗雅重之假奉半年使办装既至兴学校教生徒后邑人陈希亮杨异相继登科县东南有松柏滩夏秋暴涨多覆舟逸祷江神不踰月滩为徙五里时人异之再迁太常博士知尉氏县擢监察御史提点益州路刑狱累迁尚书兵部郎中知开封府有僧求内降免田税逸固执不许又言顷禁命妇干禁中恩比来稍通女谒愿令官司纠劾从之以枢密直学士知益州逸凡四至蜀谕其民风华阳驺长杀人诬道旁行者县吏受财狱既具乃使杀人者守囚逸曰囚色冤守者气不直岂守者杀人乎囚始敢言而守者果服立诛之蜀人以为神岁旱逸使作堰壅江水溉民田自出公租减价以振民初民饥多杀耕牛食之犯者皆配关中逸奏民杀牛以活将死之命与盗杀者异请一切放还复其业报可未几卒于官

△吴遵路

吴遵路字安道父淑见文苑传遵路性敏博学善笔札第进士累官秘阁校理章献太后称制条奏十余事语皆切直忤太后意出知常州预市米吴中以备岁俭己而果大乏民赖以济自他州流至者亦全十八九厯为淮南转运副使兼江淮发运司事尝于真楚泰州高邮军置斗门十九以备蓄泄又广属郡常平仓储蓄至二百万以待凶岁凡所规画后皆便之迁工部郎中坐失按蕲州王蒙正故入部吏死罪降知洪州召修起居注元昊反建议复民兵受诏料拣河东乡民可为兵者诸路视以为法进兵部郎中权知开封府驭吏严肃属县无追逮雅与宋庠郑戡叶清臣善宰相吕夷简不悦出知宣州上御边要略边防杂事二十篇徙陕西都转运使迁龙图阁直学士知永兴军被病犹决事不辍手自作奏及卒仁宗悼之诏遣官护丧还京师遵路夷雅慎默知大体母丧庐墓蔬食三年为

政简易不为声威立朝敢言无所阿平居廉俭既没室
无长物其友范仲淹分奉赙其家

△赵尚宽

赵尚宽字济之御史中丞安仁子也知平阳县邻邑有大囚十数破械夜逸杀居民
将犯境尚宽曰盗谓我不能来方怠易取也趣尉亟往
捕又遣徼巡兵蹑其后悉获之知忠州俗盖蛊杀人尚宽揭方书市中教人服药索为蛊
者置于理其俗大化转运使持盐数十万斤课民易白
金期会甚促尚宽发官帑副其须徐与民为市不扰而集嘉佑中以考课第一知唐州唐
素沃壤经五代乱田不耕士旷民稀赋不足以充役议
者欲废为邑尚宽曰土可垦辟民可招徕奈何废之乃按视图记得汉召信臣陂渠故迹
发卒疏三陂一渠溉田万余顷又教民自为支渠数十
转相浸灌四方来者云布复请计日授田及贷民官钱买耕牛比三年榛莽复为膏腴增
户积万余尚宽勤于农政治效异等三司使包拯与部
使者交上其事仁宗下诏褒奖仍进秩赐金留于唐凡五年民为画像以祀而王安石苏
轼作新田新渠讨以美之徙同宿二州河中府神勇卒
苦大校贪虐刑匿名书告变尚宽命焚之曰妄言耳众乃安已而奏黜校分士卒隶他营
尚宽去唐数岁田日加辟户日益众朝廷推功自少府
监以直龙图阁知梓州积官至司农卿卒

△高赋

高赋字正臣中山人父尹右卫将军 【据东都事略增辑】 赋以父任为右班殿
直复举进士改奉礼郎四选太常博士历知衢州民毛
氏柴氏二十余家世蓄蛊毒值闰岁害人尤多与人忿争辄毒之贼悉擒治伏辜蛊患遂
绝徙唐州州田经前守赵尚宽菑垦而榛莽者尚多赋
继其后募两河流民计日给田筑陂堰四十四处再满再留比去田增辟三万一千三百
余顷户增万一千三百八十岁益税二万二千二百五
十七玺书褒谕宣布治状以劝天下衢唐两郡为立生祠擢提点河东刑狱加直龙图阁
知沧州程昉欲于境内开西流河绕州城而北注三塘
泊赋曰沧城近河岁增堤防犹惧奔溢矧妄有开凿乎昉执不从后竟不成历蔡潞二州
入同判太常寺进集贤院学士请诸道提点刑狱司置
检法官庶专平讞使民不冤言多施行以通议大夫致仕退居襄阳卒

△程师孟

程师孟字公辟吴人进士甲科累知南康军楚州提点夔路刑狱泸戎数犯渝州边
使者治所远在万州有警浹日乃至师孟奏徙于渝夔
部无常平粟建请置仓适凶岁振民不足即矫发他储不俟报吏惧白不可师孟曰必俟

报饥者尽死矣意发之徙河东路晋地多土山旁接川
谷春夏大雨水浊如黄河可溉灌师孟劝民出钱开渠筑堰溉良田万八千顷裒其事为
水利图经颁之州县为度支判官知洪州积石为江堤
浚章沟揭北闸以节水升降后无水患判三司都磨勘司接伴契丹使萧惟辅曰白沟之
地当两属今南朝植柳数日而以北人海界河为罪何
理也师孟曰两朝当守誓约涿郡有案牒可覆视君舍文书滕口说讵欲生事耶惟辅愧
谢出为江西转运使盗发袁州州吏为耳目久不获师
孟械吏数辈送狱盗即成擒加直招文馆知福州筑子城建学舍治行称最徙广州州城
为侂寇所毁方伯踵至皆言土疏恶不可筑师孟在广
六年作西城及交址陷邕管闻广守备固不敢东时师孟已召还朝廷念前功以为给事
中集贤殿修撰判都水监贺契丹生辰至涿州契丹命
席迎者正南向涿州官西向宋使价东向师孟曰是卑我也不就列自日昃争至暮从者
失色师孟辞气益厉叱候者易之于是更与迎者东西
向明日涿人餞于郊疾驰过不顾涿人移雄州以为言坐罢归班复起知越州青州遂致
仕以光禄大夫卒师孟为政简而严罪非死者不以属
吏发隐摛伏如神得豪恶必痛惩艾之所部肃然洪福广越为立生祠 【按宋史程师孟
传两见一载列传第九十一载循吏传中考师孟居
官所至皆有惠政治行称最以为循吏固无愧也今删彼存此】

△韩晋卿

韩晋卿字伯修密州安邱人幼诵书日数千言长以五经中第历肥乡嘉兴主簿通
判应天府知同州寿州奏课第一擢刑部郎中初开封
民争鹬杀人王安石以为盗拒捕杀之无罪晋卿争之曰是鬪杀也登州妇人谋杀夫郡
守许遵执为按问即承当减等论安石复主之晋卿以
谋杀罪当死终持之不肯变用是知名元丰置大理狱多内庭所付晋卿持平考核无所
上下神宗称其才尝被诏按治宁州狱故事当入封晋
卿曰奉使有指三尺法具在岂应伺候主意轻重其心乎受命即行诸州请谳大辟执政
恶其多将劾不应谳者晋卿曰疑狱上请求所以生之
也苟请谳而获谴后不来矣议者又引唐日覆奏欲令天下庶狱悉奏决晋卿言祖宗之
制可疑可矜者乃许上请若四方庶狱俱系以听命恐
自今瘐死多于伏辜者矣朝廷皆行其说故士大夫闲推其忠厚不可以法家名之元佑
初为两浙转运使时差役法复行诸道处画多失叙晋
卿独视民所宜而不戾法指 【按元佑复差役法炙哲宗朝事宋史本传误载于元丰之
前今更正】 入为大理卿卒于官

△叶康直

叶康直字景温建州人擢进士第知光化县县多竹民编为屋康直教用陶瓦以宁火患凡政皆务利民时丰稷为谷城令亦以治绩显人歌之曰叶光化丰谷城清如水平如衡会布行新法以为司农属历陕西转运副使五路兵西征康直领泾原粮道承受内侍梁同以饷恶妄奏神宗怒械康直将诛之王安礼力救得归故官元佑初加直龙图阁知秦州中书舍人曾肇苏辙劾康直谄事李宪免官究实无状改知河中府徙秦州夏人侵甘谷康直戒诸将设伏以待歼其二酋自是不敢犯境进宝文阁待制陕西都运使以疾请知亳州通浚积潦民获田数十万亩召为兵部侍郎卒

钦定续通志卷五百三十一

●钦定续通志卷五百三十二 循吏传三

循吏传

辽

○辽

大公鼎 萧文 马人望 耶律都勒斡

大公鼎

萧文

马人望

耶律都勒斡

△大公鼎

大公鼎渤海人先世籍辽阳率宾县统和闲以豪右实中京因徙大定曾祖忠礼宾使父信兴中主簿公鼎幼庄愿长而好学咸雍十年登进士第调浑州观察判官时辽东雨水伤稼北枢密院大发濒河丁壮以完堤防有司承令峻急公鼎独曰边阵甫宁大兴役事非利国便农之道疏奏其事朝廷从之罢役水亦不为灾改良乡令省徭役务农桑建孔子庙学部民服化累迁兴国军节度副使时有隶鹰坊者以罗毕为名扰害田里岁久民不堪公鼎言于上即命禁戢会公鼎造朝大臣谕帝嘉纳之意公鼎曰一郡获安诚为大幸他郡如此者众愿均其赐于天下从之徙长春州钱帛都提点车驾如春木贵主例为假贷公鼎曰岂可辍官用徇人情拒之颇闻怨詈语曰此吾职不敢废也俄拜大理卿多所平反天祚即位历长宁军节度使南京副留守改东京户部使盗杀留守萧保先因而倡乱公鼎单骑行郡陈以祸福众皆投兵而拜曰是不欺我皆听命安辑如故拜中京留守赐贞亮功臣乘传赴官时盗贼充斥有遇于路者即叩马乞自新公鼎给以符约俾还业闻者接踵而至不旬

日境内清肃天祚闻之加赐保节功臣时人心反侧公鼎虑生变请布恩惠以安之为之肆赦公鼎累表乞归不许会奴贼张萨巴率无赖啸聚公鼎欲击而势有不能叹曰吾欲谢事久矣为世故所牵不幸至此岂命也夫因忧愤成疾保大元年卒子昌龄左承制昌嗣洺州刺史昌朝镇宁军节度

△萧文

萧文字国华外戚贤者也父直善安州防御使文笃志力学喜愠不形太康初掌秦越国王中丞司事以才干称寻知北面帖黄王邦彦子争荫数岁不能定命文诘之立决承诏阅习仪卫执事林林指顾如一迁同知奉国军节度使历国舅都监寿隆未知易州兼西南面安抚使高阳士沃民富吏其邑者每黷于货民甚苦之文始至悉去旧弊务农桑崇礼杀民皆化之时大旱百姓忧甚文祷之辄雨属县又蝗议捕除之文曰蝗天灾捕之何益但反躬自责蝗尽飞去遗者亦不食苗散在草莽为鸟鹊所食会霪雨不止文复随祷而霁是岁大熟迁唐古部节度使高阳勒石颂之后不知所终

△马人望

马人望字俨叔高祖胤卿为石晋青州刺史太祖兵至坚守不降城破被执太祖义而释之徙其族于医巫闾山因家焉曾祖廷煦南京留守祖渊中京副留守父途中京文思使人望颖悟幼孤长以才学称咸雍中第进士为松山县令岁运泽州官炭独役松山人望请于中京留守萧托欢均役他邑托欢怒下吏系几百日复引诘之人望不屈萧喜曰君为民如此后必大用以事闻于朝悉从所请徙知涿州新城县县与宋接境驿道所从出治不扰吏民畏爱擢中京度支司盐铁判官转南京三司度支判官公私兼裕迁警巡使京城狱讼填委处决无冤者会检括户口未雨旬而毕同知留守萧保先怪而问之人望曰民产若括之无遗他日必长厚敛之弊大率十得六七足矣保先谢曰公虑远吾不及也天祚嗣位诏与萧报恩究伊逊害太子事平心以处所活甚众改上京副留守会剧贼赵鍾格犯阙劫宫女御物人望率众捕之右臂中矢炷以艾力疾驰逐贼弃所掠而遁人望令关津讥察行旅悉获其盗寻擢枢密院承旨宰相耶律俨恶与己异迁南京诸宫提辖制置岁中为保静军节度使有二吏凶暴民畏如虎人望发其事黥配之是岁诸处饥乏惟人望所治粒食不阙路不鸣桴遥授彰义军节度使迁中京度支使始至府廩皆空视事半岁积粟十五万斛钱二十万襁徙左散骑常侍累迁枢密直学士未几拜参知政事判南京三司使事钱粟出纳之弊惟燕为

甚人望以缣帛为通历凡库物出入皆使别籍名曰临库奸人黠吏莫得轩轻乃以年老扬言道路朝论不察改南院宣徽使以示优老踰年天祚手书召之既至拜南院枢密院人不敢干以私当时民所甚患者驿递马牛旗鼓乡正厅隶仓司之役至破产不能给人望使民出钱官自募役时以为便久之请老以守司徒兼侍中致仕卒谥文献人望有操守喜怒不形未尝附丽求进初除执政家人贺之人望愀然曰得勿喜失勿忧抗之甚高挠之必酷其畏慎如此

△耶律都勒斡

耶律都勒斡字伊实音季父房之后廉约重义重熙末给事诰敕院咸雍中累迁同知南京留守事被召部民垦留赐诏褒奖太康初改西南面招讨使为北面林牙迁左伊勒希巴大安五年拜南府宰相寿隆初致仕卒都勒斡所至有声吏民畏爱及退居乡里子布库为乌尔古部节度使遣人来迎既至见积委甚富谓布库曰辞亲八仕当以裕国安民为事枉道欺君以苟货利非吾志也命驾而归布库后为盗所杀 【按此下原有杨遵勳王棠二传一取其决事如流一取其练达朝政于循吏名实不协今改入列传】

钦定续通志卷五百三十二

●钦定续通志卷五百三十三 循吏传四

循吏传

金

○金

卢克忠

朱德昌

范承吉

王政

张奕

李瞻

刘敏行

傅慎微

伊喇温

刘燠

高昌福

孙德渊

赵鉴

富察郑留

钮祜禄守愚

舒

穆噜元

张毅

赵重福

武都

赫舍哩德

张特立

王浩

卢克忠

牛德昌

范承吉

王政

张奕

李瞻

刘敏行

傅慎微

伊喇温
刘焕
高昌福
孙德渊
赵鉴
富察郑留
钮祜禄守愚
舒穆鲁元
张毅
赵重福
武都
赫舍哩德
张特立
王浩
△卢克忠

卢克忠贵德州凤集人高永昌据辽阳走诣斡鲁营降遂与渤海人托卜嘉追获永昌收国二年授世袭穆昆后定燕伐宋皆与有功历除登瀛二州刺史天德闲迁同知保大军节度使有军卒自绥德州过鄜城宿民家至夜主人被劫有司执假宿卒系狱榜掠诬服克忠察其冤独不肯署未几果得真贼释之大定二年除北京副留守会民艰食下令凡有蓄积者计留一岁悉出平糴赖无捐瘠患转陈州防御使至静难军节度使致仕卒

△牛德昌

牛德昌字彦钦蔚州定安人父铎辽将作大监德昌少孤母教之学有劝就荫者母以遗命不从皇统二年登进士调矾山簿迁万泉令属蒲陕荐饥羣盗充斥城门书闭德昌到官即纵百姓出入榜曰民苦饥寒剽掠乡聚以偷旦夕之命甚可怜也能自新者一不问贼皆感激解散县境以安府尹王伯龙嘉之礼待甚厚累官刑吏二部侍郎广宁太原尹卒赠中奉大夫

△范承吉

范承吉字宠之好问学辽季盗起虽避地未尝废书天庆八年登进士归朝为殿中少监从攻太原迁少府监宗翰克宋所得金珠承吉司其出入无毫发欺及还犍车载书史而已寻迁昭文馆直学士知绛州使吏遍谕有因军兴为将士掠而逃归者皆自实白元帅府凡数千悉赎为良贫无费者以公厨代输改河东北路转运使时承宋弊民赋繁重乃为经画立法简

便官既足而民有余历迁顺天军节度使属地地震坏民庐舍匠以争先营葺过取其直命官属董之先后以次贫富皆省费历镇西泰宁二军节度使复镇顺天奚辛散居境内为盗一绳以法不少贷惧不敢犯贞元二年以光禄大夫致仕卒

△王政

王政辰州熊岳人高永昌据辽东知政材略欲用之辞不就永昌败渤海人争缚以为功政独引退哭王栋摩异之言于太祖授卢州渤海军穆昆从破白霫下燕云及伐宋滑州降留为安抚使前此数州既降复杀守将反为宋守及是人以为政忧政曰苟利国家虽死何避后数骑入州释饥民为盗坐系者发仓廩以赈民皆悦不复叛旁郡闻之多归降除同知金胜军节度使事改权侍卫亲军都指挥使兼掌军资明会计严扃鏹金帛山积而出纳无锱铢失栋摩戏之曰汝为官久而贫不加富何对曰政以杨震四知自守安得不贫天眷元年迁保静军节度使致仕卒政本名诺色尔尝使高丽因改名字遵古有传

△张奕

张奕字彦微泽州高平人仕齐为归德府通判齐国废侦知兵二万诛为乱约夜半举燎相应选市丁结阵要巷乱不得作比明亡匿略尽擒诛首恶都统完颜伦布军至欲根株余党奕以阖门保之遂止行台承制除同知归德尹历陈秦州防御使同知太原尹晋宁军报夏人侵界诏往征至境按籍各归所侵土还奏折氏世守麟府以抗夏人本朝有其地遂以与夏夏人夷其境垄折氏怨入骨髓不得报今复使守晋宁故激怒夏人欲开边衅以雪私讎耳可徙之他郡则夏人自安从之移折氏守青州大定二年为户部尚书卒

△李瞻

李瞻苏州玉田人辽天庆二年进士为平州望云令张觉据州叛以瞻从事宗望复平州觉亡去城中复叛瞻踰城出降其子为贼所害宗望承制以为兴平府判官累迁德州防御使为政宽平民怀其惠诣京师请留者数千人迁忠顺军节度使正隆末盗贼蠡起增筑城垒为备蔚人以安大定初卒于官

△刘敏行

刘敏行平州人天会三年进士累迁肥乡令岁大饥盗贼掠人为食民入保郡城农事荒废敏行白州借军士三十护民出耕多张旗帜为疑兵敏行率军巡逻日暮则阅民入城由是盗不敢犯而耕稼滋殖转高平令城圯久不修大盗横恣县镇不能御敏行率僚吏出俸钱雇役缮

治百姓欣然从之版筑遂完贼至不能犯累迁河北东路转运使致仕卒

△傅慎微

傅慎微字几先其先秦州沙溪人后徙建昌慎微迁居长安宋末登进士累官河东路经制使罗索定陕西率众迎戢兵败被获宗翰爱其才弗杀羈置归化州宗弼复取河南用为陕西经略使寻权同州节度使事明年大旱擢京兆鄜延环庆三路经济使许以便宜慎微募民入粟立养济院全活甚众改同知京兆尹权陕西诸路转运使修三白龙首等渠溉田募民屯种贷牛种民赖其利累迁太常卿除定武军节度使移静难军忤用事者苏保衡救之得免大定初迁礼部尚书兼修国史卒于官慎微博学喜著书尝奏兴亡金镜录一百卷

△伊喇温

伊喇温本名阿萨尔辽横帐人工契丹小字睿宗为左副元帅伐宋温从大■〈白上大下〉渡江辟江宁府都巡检江宁太平初下宋遣谍人扇构百姓应者数万人温擒其谍者遂不敢窃发宗弼嘉之每出征伐尝在行闲除同知河北西路转运使事会宗弼巡警温从军不之官宗弼入朝熙宗宴羣臣宗弼欲有奏请已被酒失次温掖而出宫明日熙宗谓宗弼曰阿萨尔事叔甚谨不可去左右由是宗弼益亲信之尝谓女婿赫舍哩志宁曰汝可效阿萨尔之为人也可以几古人矣未几除同知中京路都转运使事累迁左谏议大夫兼修起居注正隆时从伐宋以本官为济州路行军万户军还除同知宣徽院事世宗御馔不适口召温尝之奏曰味非不美也盖南北边事未息圣虑有所在耳帝意遂释厯永定震武崇义节度使移临海军州治近水秋雨水潦暴至城下城决百姓惶骇不知所为温躬督役夫缮完之虽临不测无所避僚属或止温温曰为政疵疠水泛溢为灾守臣之罪当以此身为百姓谢虽死不恨移镇武定岁旱且蝗温割指以血沥酒中祷而酬之既而雨沾足有羣鸦啄蝗且尽由是岁熟人以为至诚之感云以老致仕卒 【按伊喇温虽属武臣而治有异政金史原系列传今移入循吏】

△刘焕

刘焕字德文中山人宋末兵起城人乏食焕尚幼煮糠核自饮其清者以醲厚供母乡里异之长就学寒拥粪火读书不怠登天德元年进士调任邱尉县令贪污规正之秩满令谢曰尉廉慎使我获考调中都市令枢密使布萨呼图家有仆结工牟利于市不肯从市役焕系之呼图召焕不往暴工罪笞之以廉升京兆推官再迁北京警巡使捕二恶少杖于庭众惮毋敢犯召为监察御史父老数百人或卧车下或挽其靴鞚

欲留不得摄户部员外郎朝廷患代州钱恶民多盗铸抵罪下尚书省议焕奏钱宝纯用黄铜自代州取青四六杂糅务省铜而功易就由是民闲盗铸陷罪者众非朝廷意也必欲为天下利宜统用黄铜得数少而利远其新钱已流行者验数输纳准换从之再迁管州刺史耆老复疏其着迹十一事诣节镇请留升郑州防御使转同知北京留守事世宗幸上京所过州郡大发民夫治桥梁驰道以希恩赏焕所部惟平治端好而已帝嘉其意迁辽东路转运使卒

△高昌福

高昌福中都宛平人父履辽御史中丞致仕太宗闻其名召见未及而卒昌福登天会十年进士辟元帅府令史皇统初宗弼治汴获人有疑似者辄目为宋谋杀之昌福谏得实释去甚众许州都统韩常严酷好杀遣吏送囚于汴或道亡吏自度得罪欲尽杀诸囚以灭口昌福穷竟其状免死者十七八诸吏遂怨欲构害之会帅府选人侦宋兵动静即遣以行昌福不辞尽得虚实还报师还除震武军节度副使天德闲改絳阳军节度副使入为兵部员外郎改河闲少尹世宗即位上书陈便宜事帝披阅再三因谓侍臣曰此可以知内外人材优劣三除同知东京留守事治最迁山东西路转运使工部尚书改彰德军节度使累迁河中尹致仕卒

△孙德渊

孙德渊字资深兴中州人大定十六年进士为沙河令有盗秋桑者主逐捕之盗自刺其足面曰秋桑例不禁采汝何得刺我主惧赂求免盗不从诉之悬德渊曰若逐捕而伤疮必在后今在前乃自刺也遂引服父忧去民刻石祠之累迁昭义军节度使潞州破被执有拜于前者皆沙河旧民也密护得脱贞佑二年拜工部尚书摄御史中丞时山东乏兵食有司请鬻恩例举人居丧者许纳钱就试德渊奏此大伤名教事遂寝寻致仕监察御史许古谕德渊忠亮明敏可大用顾朝廷起复必能建明以利国家宣宗嘉纳未及用而卒

△赵鉴

赵鉴字择善济南章邱人宋建炎二年进士调庐州司理参军以江淮方用兵弃官还乡里齐国建除厯城丞转长清令皆剧邑治政甚着迁直秘阁提举泾原路弓箭手兼提点本路刑狱原州守将武悍自用以鉴年少易之鉴发其奸坐免郡县闻风无敢犯齐废改山东东路转运副使摄行台左司郎中宰相欲以故宋宦者权都水监鉴曰误国阉竖汴人视为寇讎付以美官将失人望遂不用大定初知宁海军和禾方熟虫生鉴出城行视虫乃自死再迁河北西路转运使致仕卒

△富察郑留

富察郑留字文叔东京路威泰必喇明安人大定二十二年进士累官顺义军节度使西京人李安兄弟争财府县不能决按察司移郑留平理月余不问会释奠孔子庙乃引安兄弟与诸生齿坐会酒陈遯古友悌数事兄弟感悟谢曰节使父母也相让而归朔州多盗郑留禁游食蓄兵器因行春抚谕之盗息狱空改利涉军节度使诏括马郑留使百姓饲养以须御史劾之既而伐宋诸路括马皆瘦惟隆州马肥乃释大安三年知庆阳府事击走夏兵至宁元年改知平凉府时平凉新被兵夏人复来攻招溃卒御守夏兵退迁官四阶贞佑二年改东京留守致仕卒郑留厚重寡言笑人不见其喜愠临终取奏藁尽焚之

△钮祜禄守愚

钮祜禄守愚字仲晦本名和伦克们真定府路乌济赫明安人六岁知书性至孝父没时年十五营葬如礼治家有法乡人称之登明昌二年进士为临沂令有不逞辈五百人结党大扰境内守愚下车皆散去蝗起莒密闲独不入临沂境先是朝廷括河朔山东地隐匿者没入官告者给赏莒州刺史教其奴告临沂人冒地先给赏官镪后征于民积三百万守愚列其冤状白州州不为理即闻于户部而征还之流民归业勒其事于石改秘书郎母丧勺饮不入口三日终丧未尝至内寝贞佑中累迁翰林学士参议陕西路安抚司事安抚完颜弼重其为人每事咨而后行未几有疾三年卒

△舒穆噜元

舒穆噜元字希明懿州路呼图克明安人七岁丧父号泣不食者数日十三居母丧如成人补译史累监察御史同知淄州军州事剧盗刘奇久为民患捕获方讯鞫闻赦将至亟命杖杀之阖郡称快累迁山东西路按察转运使贞佑初征兵东平洪果乌登拥众不进大括民财众皆忿怨副统布萨素赫杀乌登佩其符纵恣尤甚元密疏劾之素赫坐诛移知济南府到官六月卒元生平寡言笑尚节俭居官自守不交权要人以是称之

△张穀

张穀字伯英许州临颖人大定二十八年进士为同州观察判官时出兵备边州征箭十万限以鷗雁羽价翔跃不可得穀曰矢去物也何羽不可节度使曰当须省报穀曰州距京师二千里如民急何万一有责穀任其咎一日闲价减数倍尚书省竟如所请累迁河东南路转运使权行六部尚书安抚使兴定元年卒穀天性孝友任子悉先诸弟俸入亦委弟掌之未尝

问有无云

△赵重福

赵重福字履祥丰州人通女真大小字试补女真诰院令史累迁同知陈州防御事宋谍人苏泉入河南重福迹之至鱼台将渡河见前舟且渡令从者大呼泉姓名泉惶惶失措遂执之改沧州盐副使岁饥民煮卤为盐卖以给食官往往杖杀之重福曰宁使课殿不忍杀人岁满当降尚书右丞完颜匡三司使安春知其事乃以岁荒薄其罚除织染署令大安三年佐户部尚书张炜调兵食于古北口迁都水少监行西北路六部郎中治密云县贞佑二年以守密云功迁同知河闲府事三年河闲被围有刘中者尝在密云与联事劝出降不听时兵少多羸疾重福劝父老率其子弟强者战弱者守会久雨围乃解去迁河东北路转运使致仕元光二年卒

△武都

武都字文伯东胜州人大定二十二年进士调商水令县素多盗凡纵火行劫椎埋发冢者都皆廉得姓名榜通衢悉奔他境累迁涿州刺史入为户部郎中权右司郎中奏事称旨被诏由海道漕辽东粟赈山东高其价直募致海贾船三迁中都西京按察副使迁按察使行西南路六部尚书佐元帅穆延尽忠备御西京有劳中都戒严知大兴府佩虎符便宜行事坐被酒以褻衣见诏使解职起为刑部尚书中都解围为河东路宣抚使兴定元年卒

△赫舍哩德

赫舍哩德字广之真定路珊沁明安人明昌二年进士累官肇州防御使肇州升武兴军德为节度使宣抚司肇州围急食且尽有粮三百船在鸭子河去州五里不能至乃浚濠增障筑甬道导濠水属之河凿陷马窋伏甲其旁拒守一日兵数接士殊死战渠成船至兵食足围乃解改辽东路转运使军民遮道挽留乘夜乃得去布什万努逼上京与部将刘子元战却之迁东京留守厯保静武胜军节度使兴定三年以节度权元帅右都监与完颜仲元俱行元帅府于宿州宿工部尚书五年召还中都卒

△张特立

张特立字文举曹州东明人【按元史隐逸传称特立初名永以避讳改今名曾为偃史主簿本传未详】泰和三年进士调宣德州司候郡多皇族巨室一律以法阖境肃然调莱州节度判官不赴躬耕■〈木巳〉之韦城以经学自乐正大初因侯擎师安石荐授洛阳令寻拜监察御史上言镐厉二宅久加禁锢近降赦恩谋反大逆皆蒙湔雪彼独何罪幽囚若是世宗神灵在天得无伤其心乎圣嗣未立未必不由此

也又言方今三面受敌百姓凋敝宰执非才恐中兴难期尚书右丞延札舒噜遣奴与小民争田失大臣体参政图克坦乌登谄事近习得位皆宜罢当路者忌其直阴思挤之会劾省掾高楨辈受请托饮娼家时平章博索犒军陕西归楨等泣诉于道以不劾同席省掾王宾为私且不实左迁邳州军士判官杖五十士论皆惜其去后卒 【安元佑复逸传载元世祖以特立养素邱围易代如一赐号中庸先生屡降玺书褒异今以通例无庸复出删彼存此而附识之】

△王浩

王浩由吏起身初辟涇阳令廉能为关辅第一时西台檄州县增植枣果督责严急民甚扰浩独无所问主司将坐之浩曰县植已满数若欲增必盗他人所有取彼置此未见其利其爱民多此类所在有善政民丝毫无犯秦人为立生祠南迁后为扶沟令开兴元年民钱大亨等执县官送款于元以浩有恩于民不忍加刃且遣所知劝之降终不听杀之无血主簿刘坦尉宋乙并见害弃尸道路自奉祖夏独浩尸俨然如生目且不瞑乌犬莫敢近殆若有神护者初辟举法行县官甚多得人如咸宁令张天纲长安令李献甫洛阳令张特立三人有传余如兴平师夔临潼武天祜泛水党君玉偃师王登庸高陵宋九嘉登封薛居中长社李天翼河津孙鼎臣郟城李无赏荥阳李过庭尉氏张瑜长葛张子玉猗氏安德璋三原肖邦杰蓝田张德直叶县刘从益皆清慎才敏极一时之选 【按金史循吏自卢克忠以下二十一人又附载师夔以下十六人然如熙宗朝杜遵晦世宗朝史肃察廉哀然举首且不与亦未见于他传则其遗失者多矣又附载中刘从益宋九嘉金史已入文艺传而止云张天纲李献甫张特立三人有传非也今识于此】

钦定续通志卷五百三十三

●钦定续通志卷五百三十四 循吏传五

循吏传

元

○元

谭澄

臧梦解【陆厘】

许维楨

许楫

田滋

卜天章

耶律伯坚

段直

温都尔

杨景行

干文传

林兴祖

观音努

周自强

白景亮

王良

卢琦

刍伯颜

刘秉

直 许义夫

谭澄

臧梦解 【陆厘】

许维祯

许楫

田滋

卜天璋

耶律伯坚

段直

温都尔

杨景行

干文传

林兴祖

观音努

周自强

白景亮

王良

卢琦

邹伯颜

刘秉直

许义夫

△谭澄

谭澄字彦清德兴怀来人父资荣金末为交城令元兵下河朔以县来附从攻汴有功年四十移病举弟资用自代资用卒澄袭为令时年甫十九有文谷水分溉交城田文阳郭帅专其利而堰之讼累岁不能直澄折以理令决堰均其利豪民有持吏短长者察得其主名皆治以法岁乙未籍民户有司多以浮客占籍及征赋逃窜殆尽官为称贷积息数倍民无以偿澄入覲因中书耶律楚材面陈其害太宗恻然为免其逋亡民能归者复三年诏下公私便之壬子复大籍民澄尽削交城之本土著者赋以时集世祖还自大理澄进见留藩府凡遣使必命澄偕而以澄弟山伐为交城令中统元年擢怀孟路总管会岁旱令民凿唐温渠引沁水溉田民用不饥教之种植地无遗利至元中累官陕西四川道按察使建言不孝有三无后为大民年四十无子宜听取妾为宗祀计从之着为令四川签省严忠范守成都为宋将咎万寿所败退保子城世祖令澄代之至则葬暴骸修焚室赈饥贫集逋亡民心稍安及西南夷罗罗斯内附遂以澄为副都元帅同知宣尉使司事比至以疾卒世祖赏与

太保刘秉忠论一时牧守秉忠曰若邢之张耕怀之谭澄何忧不治哉游显宣抚大名尝为诸路总管求虎符宣麻澄至中书辞曰皇上不识谭澄耶乃为显所举中书特去之其耿介如此

△臧梦解 【陆垕】

臧梦解庆元人宋末进士未官而国亡至元十三年从其乡郡守将内附授海宁知州淮东按察副使王庆之按行至其州见其门无私谒官署肃然凡有差役皆当其贫富而吏无所预户口增田畴辟桑柘榆柳交荫境内攻平讼简为诸州县最乃举梦解才德兼备宜擢清要属江阴饥江浙行省委梦解賑之皆躬至其地人给以米所活四万五千余人江南行台御史苟宗道举其名上闻除同知桂阳路总管府事寻擢广西廉访副使故事烟瘴之地行部者多不躬至而梦解遍历焉遂按问宾州藤州两路官吏置于法者无虑八十余人又平反邕州黄震赃罪及藤州唐氏杀夫罪两大冤狱大德中累迁广东廉访使以老病退居杭州后至元元年卒梦解博学洽闻为时名儒所著书有周官考三卷春秋微一卷尝自号鲁山学者称为鲁山先生同时有陆垕者与梦解齐名监察御史郑鹏南尝以二人并荐于朝垕字仁重江阴人也至元闲巴延举兵南下垕时年未冠而志强气锐率其乡人见之论议有合兵遂不涉其境巴延奏授为同知徽州路总管府事以廉能擢至台宪累迁浙西廉访使所至以黜赃吏洗冤狱为己任尝上章奏免儒役及举行浙西助役法卒谥庄简【按梦解与陆垕为政劝课有方黜赃吏雪冤狱元史旧入列传今移置循吏】

△许维禎

许维禎字周卿遂州人至元十五年为淮安总管府判官属县盐城及丁溪场有二虎为害维禎禱于神祠一虎去一虎死祠前境内旱蝗维禎禱而雨蝗亦息是冬无雪父老言于维禎曰冬无雪民多疾柰何维禎曰石当再禱已而雪深三尺朝廷闻其事欲召用未及而卒

△许楫

许楫字公度太原忻州人年十五以儒生中词赋选又举贤良方正孝廉至京师平章王文统命为中书省掾以不任簿书辞改知印一日从省臣立殿下世祖见其美髯魁伟问曰汝秀才耶楫顿首曰臣学秀才耳未敢自谓秀才也帝善其对授中书架阁库管勾兼承发司事未几擢劝农副使时商挺为安西王相遇于途楫言京兆之西荒野数千顷宋金皆尝置屯如募民立屯田岁可得谷以贍王府用挺如其言奏行之三年屯成果获其利平章廉希宪行省荆南以楫为左右司员外郎荆南父老與金帛求

谒楫曰汝等已为大元民今置吏来抚汝奚用金帛求
见为寻除江西道提刑按察副使时招讨使郭昂讨叛贼董旗纵兵俘掠甚众楫询得良
民六百口遣还乡里改徽州路总管户部尚书王巨济
倚僧格势刻剥加征民钞已输二千锭怒其少欲益千锭楫曰公欲百姓死耶如欲其死
虽万锭可征也巨济怒解及考满去徽属绩溪歙县民
柯三八汪千十等因岁饥阻险为寇行省以兵捕之相拒七月更使人招之三八等曰得
得许总管来我等皆降矣行省召楫至楫单骑趋贼垒
众见皆拜曰我公既来请署榜以付我楫白行省请退军一舍俟其归命参政高兴如其
计贼果降以东平路总管致仕至元二十六年卒

△田滋

田滋字荣甫开封人世祖至元二年由汴梁路总管府知事入为御史台掾十二年
拜监察御史会宋亡滋建言江南新附民情未安加以
官吏侵渔宜立行御史台镇之诏从其请超拜行台侍御史大德二年累迁浙西廉访使
有县尹张彧者被诬以赃狱成问之但俛首泣不语滋
大疑明日斋戒诣城隍祠祷曰张彧坐事有冤状愿神相滋明其诬守庙道士进曰曩有
王成等五人同持警状到祠焚祷火未尽而去烬中得
其遗稿今藏壁闲岂其人耶视之果然明日诣宪司诘成等不服出火中誓状示之皆惊
愕伏辜彧遂得释十年改陕西行省参知政事时亢旱
久道过西岳因祷曰滋奉命来参省事安西不雨者三年矣民饥死滋将何归愿神降甘
泽以福黎庶到官果大雨滋即以仓麦给小民之无种
者俾来岁收成以偿官民大悦未几卒赠开封郡公谥庄肃

△卜天璋

卜天璋字君璋洛阳人父世昌仕金为河南孔目官宪宗南征率众款附授真定路
管民万户籍河北民徙河南者三千余人俾专领之遂
家汴天璋少负气至元中为南京府史时河北饥民数万人集河上欲南徙诏勿许众汹
汹不肯还天璋虑其生变劝总管张国宝听其渡国宝
从之遂无事河南按察副使程思廉察其贤辟为宪史后为中台掾有侍御史倚势贪冒
御史发其赃天璋主文牒未及奏顾为所譖同被逮御
史对食悲哽天璋曰死职义也柰何为儿女子泣耶御史惭谢俄见原免丞相顺德王当
国擢掾中书为提控事有可否必力辨他相怒天璋言
不置王竟从其议大德四年为工部主事蔚州有刘帅者豪夺民产吏不敢决省檄天璋
往询之帅服田竟归民武宗时累迁刑部郎中适盗贼
充斥时议犯者并家属咸服青衣巾以别民伍天璋曰赭衣塞路秦弊也尚足法邪议乃
止仁宗召入见时兴圣太后在座帝指曰此不贪贿卜

天璋也因问今何官对曰臣待罪刑部郎中复问谁荐者对曰臣不才误蒙擢用帝曰先朝以谢仲和为尚书卿为郎中皆朕亲荐也皇庆初出为归德知府劝农兴学复河渠民始免河患羣盗据要津商旅不通天璋擒百余人磔以徇盗遂息擢浙西道廉访副使以更田制改饶州路总管既至听民自实事实无苛扰版籍以清县以饥告天璋即发廩赈之僚佐持不可天璋曰得请而赈民且死矣失申之责吾任其咎民赖全活火延饶之东门天璋具衣冠向火拜势遂熄鸣山有虎为暴移文山神立捕获之以治行第一擢广东廉访使先是豪民濒海筑堰专商舶射利有司以赂置不问天璋至发卒决去之岭南地常燠至是浆冰人谓政化所致云寻乞致仕天历二年蜀兵起荆楚大震复拜山南道廉访使或疑其老不果行天璋曰国步方艰吾年八十恒惧弗获死所敢避难乎遂行时谷价翔涌乃下令勿损价听民自便于是舟车争集米价顿减复止宪司赃罚库缗钱不输于台用赈饥者会诏三品官言政因列上二十事凡万余言目之曰中兴济安策皆中时病以老引去既归汴以余禄施其族党家无甑储处之晏如也至顺二年卒赠河南郡侯谥正献

△耶律伯坚

耶律伯坚字寿之桓州人气豪侠喜与名士游用荐举入官为工部主事世祖至元九年转清苑县尹初安肃州苦徐水为患诉于大司农欲夺水故道导之使东入清苑境伯坚陈其形势图其利害谓果导则清苑徒被淹没而水必反故道为灾请大司农司官及郡守行视可否事遂已县西有塘水溉田甚广势家据以为碯民以失利来诉伯坚命毁碯决其水注之田许以溉田之余月仍得堰水置碯为定制县居南北之冲岁为亲王大官供张于县西限以十月成至次年复撤而新之吏得其缘侵渔伯坚命筑公馆以代其弊遂绝凡郡守赋役于县有重于他县者辄曰宁得罪于上不可得罪于下必诣府力争之在清苑四年民亲之如父母比去立石颂其德焉擢为恩州同知

△段直

段直字正卿泽州晋城人至元十一年河北河东山东盗贼充斥直聚党族结垒自保世祖命将略地晋城直以其众归之幕府承制置直潞州元帅府右监军其后论功行赏分土世守命为泽州长官泽民多避兵未还者直命籍其田庐于亲邻人户且约曰俟业主至当析之以归逃民闻之多来还者命归其田庐如约素无产者出粟赈之为他郡所俘掠者出财构之以兵死而暴露者收而瘞之未几泽为乐土大修孔子庙割田千亩置书万卷迎儒士李俊民为师以招延四方来学之士不数年士子以通经

被选者百二十有二人在官二十年多有惠政朝廷特命提举本州岛学校事未拜而卒

△温都尔

温都尔字瑞芝喀喇氏祖阿尔斯兰尝从阿珠伐宋仕至冀宁路达噜噶齐子孙因其名以兰为氏温都尔通经史兼习诸国语成宗时为翰林院札尔里克齐职书制诰会有旨命书藩王添力之旨温都尔曰此旨非惟有亏国体行且为民殃矣帝闻之曰小吏如此真难得也事乃止除辽州达噜噶齐以政闻至顺初迁襄阳路达噜噶齐山西大饥河南行省恐流民入境为变檄守武关温都尔验其良民辄听其度关吏曰得无违上命乎温都尔曰吾防奸耳非仇良民也可不开其生路邪既又煮粥食之所活数万人城临汉江岁被淹没为筑堤城外水患遂息元统二年除益都路总管俗颇悍黠温都尔务兴学校以平易治之有上马贼白画劫人久不能捕温都尔生擒之其党赂宣慰使诬以枉勘纵之去已而贼劫河闲复被获乃尽输其情诬始白俾再任一考亲王迈努镇益都其府属多病民温都尔裁抑之民以无扰至正六年卒 【按武夷志云温都尔行省左丞实都子也尝为福建道宣慰副使建戚泉亭于御茶园本传未载】

△杨景行

杨景行字贤可吉安太和州人登延佑二年进士第授会昌州判官民素不知井汲河流每多疾厉且不知陶瓦止以茅覆屋所在多火灾景行教民穿井以饮陶瓦以代茅茨民始免患豪民十人号十虎害民悉捕寘之法更创学舍礼师儒劝民出腴田饷士弦诵之声顿盛转宜黄县尹升抚州路总管府推官以法绳豪民陶甲徙五百里外豪僧云住发人冢墓取财物景行急按之僧赂当道者以危语撼之一不顾卒治如法厯归安县尹所至皆有老政以翰林待制致仕卒

△干文传

干文传字寿道平江人少嗜学有声用举者为吴及金坛两县学教谕登延佑二年进士授同知昌国州事累迁长洲乌程知县婺源吴江知州文传所至俱有善政始至昌国即能柔之以恩信顽犷之民为变俗盐场官倚转运司势虐使州民家业破荡文传语同列亟为陈理上官莫能夺民赖以安长洲为文传乡邑文传徙榻公署无事未尝辄出而亲旧莫敢通私谒会创行助役法凡民田百亩令以三亩入官为受役者之助文传即专任其县事而行省又以无锡州及华亭上海之事委焉文传谕豪家大姓以腴田来归中人之家自是不病于役在乌程白发富

民张甲之妻王逐妾杀儿狱浙西廉访司俾文传鞫丹徒县民杀姊狱并伏其辜婺源之俗男女婚聘后富则渝其约有育其女至老死不嫁者亲丧贫则不举有停其柩累数也不葬者文传下车即召耆老使以礼训告之阅三月而婚葬俱毕宋大儒朱熹故业为豪民所占文传谕其民以理为悉归之即其故宅基建祠俾朱氏世守焉至正二年召赴阙预修宋史擢集贤待制旋以嘉议大夫礼部尚书致仕卒 【按文传所至有善政更能以礼美民婚葬崇儒励俗不媿循良元史旧入列传今移置循吏】

△林兴祖

林兴祖字宗起福州罗源人至治二年进士授同知黄岩州事三迁知铅山州铅山素多造伪钞者豪民吴友文为魁远至江淮燕蓟莫不行使奸黠悍鸷藉以致富更分党数十为吏于有司伺有欲告者辄先诬以事前后戕人甚众民衔冤不敢诉兴祖至曰此害不除何以牧民即张榜禁伪造者且立赏募民首告俄有告者至佯以不实斥去又有告获伪造二人并赃者鞫之款服友文自至官营救兴祖命并执之须臾来诉友文者百余人择其重罪一二事鞫之狱立具逮捕其党悉寘之法政声籍甚至正八年擢道州路总管行至城外獐贼将迫城时湖南副使哈喇特穆尔屯兵城下闻贼至以乏军需欲退兵兴祖夜诣说留之哈喇特穆尔曰明日得钞五千锭桐盾五百乃可破贼兴祖许之明日入视事即劝谕盐商贷钞且取郡楼旧桐板为盾日中皆备哈喇特穆尔喜遂留为防御计贼闻新总管甫抵任一日具五百盾疑大军且至中夕遁去永明县洞獠屡窃发兴祖以手榜谕之皆曰林刺史廉而爱民不可犯也三年不入境春旱虫食麦苗兴祖为文祷于天大雨三日虫死而麦稔已而罢兴作賑贫乏轻徭薄敛郡中大治以年老致仕终于家

△观音努

观音努字志能唐古氏世居新州登泰定四年进士第由户部主事再转知归德府廉明刚断发摘如神民有衔冤不宜者虽数十年前事皆千里奔走来诉立为剖决彰德富商任某抵睢阳驴毙令郗某剖之任以怒毆郗经宿死郗有妻王氏妾孙氏孙诉于官官吏纳任贿谓郗非伤死反抵孙罪王来诉冤观音努即破械出孙于狱呼府胥语之曰吾为文具香币若为吾以郗事祷诸城隍神令神显告有睢阳小吏畏其严明且惧神显赫乃以任所赂钞陈首于是任始伏罪又宁陵豪民杨某夙覬王某田不能得直岁饥王携妻就食淮南得疾死其妻还则田已为杨据诉之官杨伪作文券曰王在时已售观音努令王妻挽杨同就崔府君神祠质之杨惧先期以羊酒浼巫祝神勿泄及诣祠相质果无验观

音努疑之召巫诘问巫吐实因讯得其情坐杨罪归其田王氏责神而撤其祠官至都水监

△周自强

周自强字刚善新喻州人好学能文练于吏事以文法推择为吏泰定闲广西洞獠反自强往见獠酋说以祸福立为罢兵贡方物纳款归命事闻超授广西两江道宣慰司都事迁婺州路义乌县尹周知民情而性度宽厚不为刻深民以争讼诉者一见即知其曲直然未遽加以刑责必反复闲譬之若能悔悟即原其罪迷谬不悛然后绳之以法民畏且爱狱讼顿息民闲田税之籍多失实以故差徭不平自强出令履亩核之民不能欺赋役均平贫富乐业部使者数以廉能誉于朝选授金溪县尹以江州路总管致仕

△白景亮

白景亮字明甫南阳人明法律普书算田征东行省译史累擢衢州路总管先是为郡者于民闲徭役不尽校田亩为则吏得高下其手贫弱不能胜者多破产失业景亮知其弊始核验田亩役之轻重一视田之多寡民不劳而事集他郡邑皆取以为法郡学从祀诸贤无塑像诸生无廩给祭服乐器有缺景亮皆为备之儒风大振性廉介自奉甚薄妻尤俭约惟以脱粟共饭部使者上其事持诏褒美改台州路总管卒于官

△王艮

王艮字止善绍兴诸暨人尚气节务明理以致用不苟事言说累迁江浙行省掾史会复立诸市舶司艮从省官至泉州建言买旧有之船付舶商则费省而工易集且可绝官吏掙克弊中书省如其言凡为船六■〈舟宗〉省官钱五十余万缗历建德县尹除两浙都转运盐使司经略绍兴路总管王克敬以计口食盐不便尝言于行省未报及克敬为转运使集议欲稍损其额以纾民力众谓成籍不可改艮毅然曰民实寡而强赋多民之钱今死徙已众矣顾重改民籍而轻弃民命乎且浙右诸郡商贾辐辏未尝以口计也始定议岁减绍兴食盐五千六百引迁海道漕运都万户府经略绍兴官粮入海运者十万石城距海十八里岁拘民船备短送至海次主运者又不即受多致耗缺艮曰运户既有官赋之直何复为是纷纷也乃责运户自载粮入运船船为风所败者当核实际除其数移文往返连数岁不绝艮取吏牒披阅即除积粮五万二千八百石钞二百五十万缗迁江浙行省检校官有诣中书诉松江富民包隐田土沙荡为粮一百七十余万石钞五百余万缗宜设官追取中书移行省议遣官验视而松江独当十九艮至松反复破其诬谓言者不过欲竦朝廷之听

而报宿怨且冀创立衙门为徽名爵计耳万一民心动
摇患生不测岂国家培养根本之策事遂寝除江西行省左右司员外郎安福有小吏诬
民包隐田租九千余石前后株连至千家数遣官按问
无实有司喜事复勒民报合征粮六百余石良言是州之粮比原额已增岂复有欺隐诡
寄者行省用其言悉蠲之在任岁余以淮东道宣慰副
使致仕卒

△卢琦

卢琦字希韩惠安人登至正二年进士第迁永春县尹始至赈饥谨止横敛均赋役
减口盐一百余引蠲包银榷钱之无征者已而讼息民
安复新学宫延师儒以课子弟月书季考文风翕然邻邑仙游盗发琦适在邑境盗遥见
之迎拜曰此永春大夫也为大夫百姓者何幸乎吾邑
长以暴毒驱我故至此耳琦因立马开喻众皆投刃槊请缚其酋以自新琦许之酋至琦
械送帅府自是威行境外泉郡饥民多就食永春琦命
分诸浮屠及大家使食之存活不可胜计安溪寇数万人来袭永春琦召邑民谕之曰汝
等能战则与之战不能则我当独死众皆感愤争奋琦
率以攻贼大败之贼复倾巢而至大小三十余战贼大衄遁去时兵革四起列郡汹汹不
宁独永春晏然无异承平日寻调宁德县尹遂去官

△邹伯颜

邹伯颜字从吉高唐人初为崇安县尹崇安田分五十都额粮六千石大家田跨数
都以五十余家而兼五千石细民粮仅升合以四百余
家而合一千石有司常以四百之细民配五十大家之役贫者受役家立破伯颜取粮籍
分计悉以粮之多少受役贫民始得休息邑有宋赵抃
所凿沟溉田数千亩岁久沟湿而田废伯颜修长沟十里绕枫树陂悉复故迹而田得常
稔安庆路得造伪钞者遣卒械囚至求其党囚与卒结
谋将肆虐良民家伯颜捕讯得其状即执而归诸安庆自是伪钞之连逮无滥及者行省
帅府御史宪府咸举其能调漳州路判官

△刘秉直

刘秉直字清臣大都武清人至正八年为卫辉路总管多异政贼劫汲县民张聚钞
并杀之日久不获秉直具词致祷城隍祠而使人伺于
死所忽有村民战怖仆地具言贼姓名及所在命尉袭之果得贼于汴遂正其罪七月虫
螟生复祷于八蜡祠虫皆自死天不雨禾且稿又诣城
北苍峪神祠祈祝有青蛇蜿蜒而出观者异之行方数里雷雨大至秩满以亲老去

△许义夫

许义夫碭山人人为夏邑县尹每亲诣乡社教民力穡见民勤者出已俸赏之惰者示

以罚三年之闲境内饶足后调封邱尹至正四年大饥

盗贼羣起抄掠州县义夫闻贼至近境即单马出迎之语曰封邱邑小而贫民已惊窜幸无入吾境言辞恳款贼遂他往县赖以安

钦定续通志卷五百三十四

●钦定续通志卷五百三十五 酷吏传

酷吏传

（臣）等谨按酷吏传祇唐相金史有之五代宋辽元诸史中并无其传或亦善善从长恶恶从短之意兹仍其阙

唐

金

○唐

索元礼 来俊臣【来子珣 周兴 邱神绩】 侯思止 王宏义

郭宏霸 姚绍之 周利贞 王

旭 吉温【罗希奭】 崔器 毛若虚 敬羽

索元礼

来俊臣 【来子珣 周兴 邱神绩】

侯思止

王宏义

郭宏霸

姚绍之

周利贞

王旭

吉温 【罗希奭】

崔器

毛若虚

敬羽

△索元礼

索元礼为人天性残忍初徐敬业起兵武后患人心异已欲大诛杀以威之乃盛开告密之门元礼揣旨因告密召对擢游击将军令即洛

州牧院推案制狱遂作讯囚酷法或以铁笼毂囚首【按通鉴作以铁圈毂其首胡三省注云毂急束也曹书亦作毂新传讹作■今改】加

以楔至脑裂死或横木关手足转之号凤凰晒翅或倒悬缢石于头推一人辄牵联至数百未能讫衣冠震惧后复数召见赏赐以张其威凡论

杀数千人于是来俊臣周兴踵起天下谓之来索薛怀义始贵元礼养为假子故为后所

信后以苛猛复受赇后欲压众望乃收下吏不服吏曰

取公铁笼来元礼服罪死狱中

△来俊臣 【来子珣 周兴 邱神绩】

来俊臣京兆万年人父操博徒也与里人蔡本善本负博数十万不能偿操因纳其妻先已娠而生俊臣冒其姓天资残忍喜反复不事生

产客和州为奸盗捕送狱即于狱中上变刺史东平王续按讯无状杖之百天授中续以罪诛俊臣上书得召见自陈前上琅琊王冲反状为续

所抑武后以为忠累迁侍御史数按诏狱称旨后阴纵其惨胁制羣臣前后夷千余家生平有纤介皆入于死拜左台御史中丞中外以目俊臣

乃引侯思止至宏义郭宏霸李仁敬康暉卫遂忠等阴集无赖百辈使飞语诬蔑公卿每摘一事千里同时辄发契验不差皆着献曰请付来俊

臣推勘必得后信之诏于丽景门别置推事院敕俊臣等颞按百不一贷俊臣与其属朱南山万国俊作罗织经一篇具为支赈纲由按以从事

俊臣鞫囚不问轻重多注酰于鼻禁地牢中或寢之糞秽并纪其粮囚至啮衣絮以食非死不得出每赦令下必先杀重囚乃宣诏又作大枷有

定百脈喘不得突地吼着即承失魂胆实同反反是实死猪愁求即死求破家等名后又以铁为冒头被枷者宛转地上少顷而绝凡囚至先布

械于前示之莫不震惧皆自诬服如意元年大臣狄仁杰任令暉李游道袁智宏崔神基卢献等 【按旧书所载与仁杰同被罗告者六人与

此皆同而通鉴则载俊臣罗肯任知古狄仁杰斐行本崔宣礼卢献魏元志李嗣真七族谋反】 皆被诬下狱俊臣既以夷诛大臣为功乃奏因

降制一问而服者同首法得减死及胁仁杰等反仁杰即承反是实乃稍宽之仁杰因得遣子光远持帛书称枉后见愕然遣通事舍人周繝往

视繝惧俊臣不敢以闻俊臣又诈为仁杰等谢死表使繝奏之先是宰相乐思晦为俊臣夷其家有子九岁没入司农上变得召见言俊臣凶惨

罔上不道若陛下择朝请中素所信者假条反状以付俊臣亦无不承反矣臣父死族夷不求生但惜陛下法为俊臣所弄居后意解由是仁杰

六族皆免又按大将军张虔勳内侍范云仙虔勳不堪枉讼于大理徐有俊臣使卫士乱斫之云仙自陈冤苦命截其舌皆即死 【按通鉴张

虔勳以天授二年被杀范云仙以长寿二年坐私谒皇嗣腰斩新书本传汇作一时事又以云仙被俊臣截舌而死所载互异】 人人胁息久之

俊臣纳贾人金为御史 【旧书作卫吏】 纪履忠所劾下狱当死后忠其上变得不诛免为民长寿中还授殿中丞又坐赃贬因州参军暴纵

自如夺同僚妻又辱其母俄召为合宫尉擢洛阳令进司农少卿闻吐蕃酋阿史那斛瑟

罗有婢善歌舞令其党告以谋反而求其婢诸蕃长数十人割耳斫面讼冤仅得解綦连耀等有异谋吉顼以白俊臣杀数十族欲擅其功即中顼以法顼惧求见后自直乃免又诬司刑史樊戡以谋反诛其子诉阙下有司无敢治因自刳腹秋官侍郎刘如璇为流涕俊臣奏与同恶如璃自许年老而涕吏论以绞后为宥死流汉州初王庆洗女适段简而美俊臣夺之可东卫遂忠有词辩与俊臣有旧它日诣之俊臣方与妻族宴集闾者不肯通遂忠直入嫚骂俊臣耻妻族见辱命殴遂忠自此有隙俊臣以羣臣不敢斥已乃有异图常自比石勒欲告皇嗣及卢陵王与南北衙谋反遂忠发其谋始俊臣屡撻诸武二张太平公主等过皆恐惧至是共证其罪有诏斩于西市人皆相庆竞剝其肉须臾而尽籍没其家时有来子珣周兴者皆万年人永昌初子珣上书擢左台监察御史无学术语言蚩恶后倚以按狱多希旨故赐姓武字家臣既诬雅州刺史刘行实弟兄谋反已诛又掘其先墓得迁游击将军常衣锦半臂自异俄流死爱州兴少习法律自尚书史积迁秋官侍郎屡决制狱妄杀数千人武后夺政拜尚书左丞上疏请去唐宗正属籍寺左史江融有美名兴诬融与徐敬业同谋斩于市天授中人告子珣兴与邱神绩谋反诏来俊臣鞫状兴未知被告方对俊臣食俊臣曰囚多不服柰何兴曰易耳内之大瓮炽炭周之何事不承俊臣曰善命取瓮且炽火徐谓兴曰有诏按君请尝之兴骇汗叩头服罪诏诛神绩而流兴岭表在道为鹺人所杀神绩者行恭子为左水吾卫将军高宗崩后使害章怀太子于巴州归罪神绩下迁垒州刺史俄复故官佐俊臣等为惨狱遂见倚爱博州刺史琅琊王冲起兵拜神绩清平道大总管讨之州人杀王素服出迎神绩尽杀之凡千余族即拜大将军天授二年以罪伏诛

△侯思止

侯思止雍州醴泉人贫穷不治生业为渤海高元礼奴诡譎无赖恒州刺史裴贞笈吏吏怨教思止告贞与舒王元名谋反周兴鞫之皆夷宗拜思止游击将军元礼惧引与同坐密教曰上不次用人如问君不识字宜对獬豸不学而能触邪陛下用人安事识字无何后果问思止以对后大悦天授中迁左台侍御史元礼又教以君无宅上必赐所没逆人第宜辞曰臣疾逆臣不愿居其地既而果假之以其教对后益喜恩赏良渥思止本人奴言语俚下尝按魏元忠曰亟承白司马不尔即吃孟青攀盖洛阳有白司马坂将军有孟青棒即杀琅琊王冲者元忠不承思止怒曳之元忠亦怒骂曰侯思止欲得我头当锯截之无抑我承反汝位御史当晓礼义而曰白司马孟寄是何物语非我孰教尔思止惊汗起

谢曰幸蒙公教狱稍缓思止音吐鄙而讹人效以为笑侍御史霍献可数嘲之思止怒以闻后责献可献可具奏其鄙语后亦大笑思止奏请娶赵郡李自挹女事下宰相李昭德执不可曰思止往劫王庆洗女已辱国此奴复尔邪榜杀之

△王宏义

王宏义冀州衡水人素无行游赵贝见闾里耆老作邑斋遂以反告杀二百余人【据通鉴增辑】遂擢游击将军再迁左台侍御史与来俊臣竞惨刻暑月系囚别为狭室积蒿施熵其上俄顷辄死自诬乃舍之它狱每移檄州县所至震慑辄自矜曰我文檄如狼毒野葛矣始贱时从邻舍求瓜不与乃状言园有白兔县为集众捕逐畦蔬无遗内史李昭德曰昔闻苍鹰狱吏今见白兔御史延载初俊臣贬宏义亦流琼州自矫诏追还事觉会侍御史胡元礼使岭南次襄州按之宏义归穷曰与公气类持我何急元礼怒曰吾尉洛阳而子御史我今御史子乃囚何气类为杖杀之

△郭宏霸

郭宏霸舒州同安人【旧书作庐江人】为宁陵丞天授中应革命举得召见自陈往讨徐敬业臣誓抽其筋食其肉饮其血绝其髓武后大悦授左台监察御史时号四其御史再迁左台侍御史魏元忠病僚属省候宏霸后入忧见颜色请视便液验疾轻重即染指尝之贺曰甘者病不瘳今味苦当愈元忠恶其媚暴语于朝尝按芳州刺史李思征不胜楚毒而死后屡见思征为厉命家人禳之俄见思征从数十骑至曰汝枉陷我今取汝宏霸惶怖援刀自刳腹死顷而蛆腐是时大旱宏霸死而雨又洛阳桥久坏至是成后问羣臣比在外有何佳事司勋郎中张元一对曰比有三庆旱而雨洛桥成宏霸死

△姚绍之

姚绍之湖州武康人初以鸾台典仪累迁监察御史中宗时武三思僭乱王同皎张仲之祖延庆等谋杀之事觉捕送新开狱绍之与左台大夫李承嘉按治初欲直其事会敕宰相李峤等同讯诸相畏三思佯不问又数附承嘉耳语绍之遂翻然曳囚送狱中卒诬以谋反皆论族囚等已诛绍之益傲岸朝野侧目擢左台侍御史奉使江左过汴州廷辱录事参军魏传弓久之传弓为监察御史而绍之坐赃诏传弓按之狱具得赃五百万法当死韦后女弟救请减死贬琼山尉俄逃还京万年尉捕之击折其足更授南陵令员外置开元中为括州长史同正不得与州事死

△周利贞

周利贞者亡某系武后时调钱塘尉神龙初累擢侍御史附权要五王等疾之出为嘉州司马武三思乱禁中五王谋诛之私语崔湜湜反告三思五王贬湜劝速杀之以绝人望问谁可使以利贞对利贞湜内兄也表摄右台侍御史驰岭外矫杀敬晖桓彦范袁恕已还拜左台御史中丞数万仇人狙报几不免失天初为广州都督湜陷刘幽求谪之岭表讽利贞杀之赖桂州都督王峻护之获免利贞颛事剥割夷獠苦其残虐皆起为寇诏监察御史李全交按问得赃状贬涪州刺史开元初诏利贞及滑州刺史裴谈饶州刺史裴栖贞大理评事张思敬王承本华原令康暉侍御史封询行判官张胜之刘暉杨允卫遂忠公孙琰廉州司马锺思廉皆酷吏宜终身勿齿寻复授珍州司马明年授夷州刺史黄门侍郎张廷珪执奏命遂寝未几复授黔州都督加朝散大夫廷珪又表还制书曰利贞险薄小人附会三思倾危朝廷杀害功臣人神愤惋当加重贬今反擢典要藩繇六品迁三品何尝罚之紊玄宗乃止会廷珪罢起为辰州长史朝集京师与魏州长史敬让皆奏事让越次而奏讼父暉冤乃诏贬利贞邕州长史未几赐死梧州

△王旭

王旭侍中珪孙 【旧书作曾祖珪】 神龙初为兖州兵曹参军时张易之诛而兄昌仪先贬干封尉旭斩其首送东都迁并州录事参军长史周仁轨韦后党也玄宗平内难有诏诛之旭不待覆斩首赍还京师累迁左台侍御史崔湜败其妇翁卢崇道贬岭外逃归东都为讎家所发诏旭讯覆旭捕其亲党穷极惨楚当以重辟崇道及三子皆死门生故人并海内名士皆絀染流徙天下冤之旭与御史大夫李杰不平更相倾许杰坐斥衢州刺史旭益横残毒以逞官数迁常兼御史人莫敢与忤制狱械率残酷胁囚无不承时监察御史李嵩李全交皆以武健取名与旭埒京师号三豹宋王宪府掾纪希虬兄为剑南令坐赃旭奉使临讯见其妻美逼乱之因杀其夫而纳赃数百万希虬使奴为台佣事旭旭不知颇爱任之奴尽数旭请求积数千以示希虬希虬泣诉于王王为上闻诏劾治获奸赃不贖贬龙川尉恚而死

△吉温 【罗希奭】

吉温宰相頊弟琚之槃子也性阴诡谄附贵宦天宝初为新丰丞时太子文学薛巖得幸引温入见玄宗目之曰是丞不良罢之萧灵为河南尹御史遣温到府有所讯诘乃并治灵右相李林甫善灵乃得免灵入守京兆尹而温方调万年尉时高力士闲出就第灵多私谒温乃先往

与力士语执手欢甚将出灵通谒见之叹伏它日谒灵辞曰国家法不敢隳今而后洗心事公灵复与尽欢林甫与李适之张洎有隙适之领兵部而洎兄均为侍郎林甫密遣吏摘其铨史伪选六十余人帝命京兆与御史杂治累日情不得灵使温佐讯温分囚于廷左右中取二重囚讯之后舍楚械擄掠皆呻呼不胜曰公幸留死请如牒乃挺出诸史慑其酷及引前不讯皆服日中狱具林甫以为能林甫久当国阴构大狱除不附己者引温居门下与钱塘罗希奭锻炼诏狱希奭文深其舅鸿臆少卿张博济林甫壻也以姻家故自御史台主簿再迁殿中侍御史初温因中官纳其甥武敬一女为盛王妃擢京兆士曹参军林甫欲摇东宫左骁卫参军柳绩影会发杜良娣家阴事温按状绩以诬诛因引绩所善王曾王修己卢宁徐征悉逮缚论死中书舍人梁涉道遇温低帽障面温怒乃讽绩引涉及嗣虢王巨皆斥逐林甫恶杨慎矜中丞王錡亦嫉之因构慎矜私蓄图讖林甫委温以狱温驰至东都捕杨氏并捕慎矜客史敬忠于汝州胁之为证慎矜以左证具欲自诬而讖不得御史卢铉索其家挟讖以入于是慎矜兄弟皆赐死株连数十族是时温与希奭相勗以虐号罗钳吉网公卿见者莫敢耦语林甫倚为爪牙擢温户部郎中兼侍御史杨国忠安禄山方尊宠高力士居中用事温皆媚附之兄事禄山尝密谗曰李右相虽厚待公然不引公共政公若荐我为相我处公要任则右相可挤矣禄山大悦亟称温才天子亦忘前语于是禄山领河东节度表温自副并和节度营田管内采访总留事兼鴈门太守知安边铸钱事以母丧解禄山奏复本官又表为魏郡太守杨国忠当国引拜御史中丞兼京几关内采访处置使温辞禄山禄山令累路馆驿设白紬帐以候之又令廉绪出饯温衔其德故朝廷动静辄报天宝十三载禄山入朝领闲厩使荐温武部侍郎以为副国忠与禄山争宠而温昵禄山甚国忠不善也会河东太守韦陟失职因温以交禄山国忠遣人发其状斥温澧阳长史明年温又坐受赍及夺民马贬端溪尉始林甫死希奭出为始安太守温既谪又依希奭逗遛始安国忠奏遣蒋沆临按希奭擅稽罪人贬海康员外尉俄遣使者杀温等

△崔器

崔器深州安平人曾祖恭礼尚馆陶公主器有吏干而阴刻乐祸天宝中举明经为万年尉踰月擢监察御史中丞宋浑为东畿采访使引为判官浑坐赃败器亦废后为奉先令安禄山陷京师器受赃署守奉先渭上义兵起器大惧乃毁伪符敕募众应之渭上军败遂走灵武素善吕谭得为御史中丞户部侍郎肃宗至凤翔兼礼仪使二京平为三司使器草定仪典令

王官陷贼者悉入舍元廷露首请罪器既残忍希帝旨
欲深文绳下乃建议陈希烈达奚珣等数百人皆抵死李岷执奏乃以六等定罪多所原
贷后萧华自贼中来言王官为安庆绪驱胁至相州闻
广平王宣诏释希烈等皆相顾愧悔及闻崔器议刑众心复摇帝曰朕几为器所误后为
吏部侍郎御史大夫上元元年病亟叩头若谢皇状家
人问之曰达奚珣诉于我三日卒

△毛若虚

毛若虚绛州太平人眉长覆目性残鸷天宝末为武功丞年已六十余肃宗还京师
擢监察御史以国用竭数请陪天下财渐见任用每覆
囚先收家货以定赃并推索保伍姻戚人惧其威无敢不如约干元中凤翔七坊士数剽
劫杀人县尉谢夷甫不胜怒撈杀之士妻诉李辅国辅
国请御史孙莹穷治狱久不具诏中丞崔伯阳与三司参讯未决乃使若虚按之即归罪
夷甫伯阳争甚力若虚慢拒伯阳怒若虚驰白帝诏姑
出若虚曰臣出即死因蔽若卢殿中而召伯阳伯阳至具劾若虚罔上帝主先语叱出之
遂贬伯阳并官属岭外李岷亦以左右莹等罢相于是
若虚威震朝烈矣寻擢御史中丞上元元年以罪贬宾化尉死

△敬羽

敬羽河中宝鼎人貌寝甚便辟善候人意补匡城尉朔方节度安思顺表为府属肃
宗初擢监察御史以言利幸京师平任遇寢显作巨枷
号■〈媿力，去女〉尾榆囚人多死又仆囚于地以门牡轹腹号肉傅饬掘地实棘蒙
以席濒坎鞫囚不服则挤之人多滥死累迁御史中丞
宗正卿郑国公李遵坐贿诏羽按之遵肥而羽瘠则引遵危坐小床瘳且仆遵欲伸足羽
曰公乃囚我延公坐何可慢遵仆三四除受所言得赃
至数百万嗣岐王珍谋反诏羽穷劾乃悉召支党环以撈具囚惶怖一夕狱成珍赐死左
卫将军窦如玢等九人皆斩太子洗马赵非熊等六七
人毙杖下闻者毛竖先是胡人康谦以贾富杨国忠纳其金授安南都护领山南东路驿
吏疾之诬其通史朝义羽鞫之谦须长三尺明日脱尽
膝腓皆碎遂杀之没入其货羽与毛若虚裴升毕曜同时为御史皆暴忍时称毛敬裴毕
未几升曜流黔中宝应初羽斥道州刺史诏杀之羽闻
使者至縗服而逃吏械之临死神中出牒数番乃吏相告讐状曰恨不及推究其事治州
者无宜寝也

○金

高闾山

富察和卓

高闾山

富察和卓

△高闾山

高闾山澄州析木人选充护卫累迁汝单二州刺史制禁不依法用杖决人者闾山笑曰此亦难行特用大杖杖死部民杨仙削官解职降凤翔治中历原济泗三州刺史改郑州防御使迁扶余路节度使移临海盘安军贞佑二年城破死之

△富察和卓

富察和卓以吏起身久为宣宗所信声势烜赫性复残刻人知其蠹国而莫敢言其子充护卫先逐出之继而和卓为恒州刺史需次近县元兵入陕西关中震动或言和卓赴恒州为北走计朝廷命羁其亲属和卓出怨言曰杀却我即太平矣寻为御史所劾斩于开封府门当时有宣朝三贼之目谓至阿里察察耀珠及和卓兴定中布萨阿哈之狱京师宣勘七十余所阿里辈乘时肆毒朝士惴惴莫克自保耀珠正大初致仕居睢阳溃军变与其家皆被杀初宣宗喜刑罚朝士往往被笞楚至用刀杖决杀言者高琪用事威刑自恣南渡后习以成风如图克坦思忠好用麻椎击人号麻椎相公李特立号半截剑冯璧号冯剑雷渊为御史至蔡州杖杀五百人号雷半千又有完颜莽伊苏皆以酷闻而和卓王阿里李涣之徒胥吏中尤狡刻者也

钦定续通志卷五百三十五

●钦定续通志卷五百三十六 孔氏后裔传一

孔氏后裔传

（臣）等谨按郑樵通志沿前史之旧其于至圣后裔若孔安国诸人散见累代列传中我朝重道尊师迈越前古既于明史特立衍圣公传今以续纂通志奉命辑孔子后裔传用表章圣人之后炳炳麟麟累代史中皆有达人传诸弗替甚盛典也臣等伏考至圣冢嗣其在宋以前者详具于宋史孔宣传中自宜而下史传所未详者则有阙里文献考等书可资考证唐以来若孔颖达诸人或以儒学者或以忠义显皆卓卓能自表见俱应按次编载兹汇辑自唐迄元诸史中之传参以阙里文献考等书分嫡嗣支属为二卷各按时代编次如左

嫡嗣

○嫡嗣

唐

五代

宋

金

元

△唐

孔德伦【孔崇基 孔璿之 孔萱 孔齐卿 孔惟晬 孔策 孔振 孔昭俭
孔光嗣】

孔德伦

孔德伦

孔德伦兖州曲阜人孔子三十三代孙孔子生鲤字伯鱼鲤生伋字子思伋生白字子上白生求【按宋史作永今据东都事略及阙里文献考改正】字子家求生箕字子京为魏相箕生穿字子高穿生谦【史记作慎】字子顺谦生长子鮒字子鱼秦始皇时藏家语论语尚书孝经于祖堂旧壁中自隐嵩山【按阙里文献考鮒生随字子元随之子及孙曾皆失考其五世孙名吉汉成帝时封为殷绍嘉侯寻进爵为公平帝时更封为宋公子何齐嗣封何齐子安光武时封为殷绍嘉公寻复封为宋公后无嗣罢封谨附识】次子腾字子襄汉高帝十二年过鲁以太牢祀孔子封腾为奉祠君惠帝时征为博士迁长沙太傅腾生忠字子贞【按宋史作腾生正字季忠今据东都事略及阙里文献考改正谨议】文帝时征为博士忠生武及安国【按宋史作武生延年及安国以安国为武之次子也今据阙里文献考订正】武字子威为文帝博士武生延年武帝时为博士转太傅迁大将军延年生霸字次孺从夏侯胜治尚书昭帝时为博士宣帝时以大中大夫授太子经迁詹事出为高密相元帝即位拜太师赐爵关内侯食邑八百户号褒成君上书求奉先圣祀诏以所食邑祀孔子霸为人谦退卒赠列侯谥曰烈霸生福成帝时袭封关内侯福生房哀帝时袭封关内侯房生均字长平好学有才袭封关内侯征尚尚书郎平帝元始元年晋封褒成侯食邑二千户奉孔子祀追谥孔子为褒成宣尼公主莽以均为太尉三上书辞疾得还遂失爵后汉世祖建武十四年复封均子志为褒成侯食邑如故卒赠元成志生损袭爵和帝永元四年徙封损为褒亭侯邑千户损生曜字君曜嗣侯曜卒子完嗣邑百白完卒无子以弟赞之子羨袭爵羨字子余仕魏为议郎黄初二年封宗圣侯邑百户羨生震字伯起晋武帝泰始三年改封奉圣亭侯邑二百户拜太常节黄门侍郎震生嶷字成功袭封奉圣亭侯嶷生抚举孝廉辟太尉掾为豫章太守袭封奉圣亭侯抚生懿袭封奉圣亭侯兼从事中郎懿生鲜字鲜之有度量好学宋文帝元嘉十九年袭封奉圣亭侯改封崇圣侯鲜生乘字敬山博学有才艺后魏孝文

帝延兴初举孝廉三年封乘为崇圣大夫复十户以供
洒埽乘生灵珍仕魏为秘书郎孝文帝太和十九年诏封灵珍崇圣侯邑百户灵珍卒子
文泰袭文泰卒子渠袭渠卒子长孙袭北齐文宣帝天
保元年改封恭圣侯邑百户后周宣帝大象二年诏追封孔子为邹国公遂诏长孙承袭
邹国公长孙子嗣愬隋文帝时应制登科授泾州司兵
参军迁太子通事舍人炀帝大业四年诏封嗣愬绍圣侯邑百户嗣愬生德伦高祖武德
九年诏封为褒圣侯太宗贞观十一年诏褒圣侯朝会
位同三品食邑百户中宗嗣圣七年赐敕书及时服卒子二崇基子叹

孔崇基

孔璿之

孔萱

孔齐卿

孔惟暄

孔策

孔振

孔昭俭

孔光嗣

孔崇基

崇基中宗嗣圣十二年袭封褒圣侯神龙元年授朝散大夫陪祭朝会卒子璿之

孔璿之

璿之字藏晖元宗开元五年袭封褒圣侯授国子四门博士邠王府文学蔡州长史
二十七年诏谥孔子曰文宣王进封璿之为文宣公兼

兖州长史寻迁都水使者天宝之乱寄居宁陵卒遂葬于宁陵子孙家焉子萱

孔萱

萱袭封文宣公兼兖州泗水令卒子齐卿

孔齐卿

齐卿德宗建中三年袭封文宣公兼兖州功曹转青州司兵参军时遭叛乱陷于东
平子三惟暄惟昉惟时

孔惟暄

惟暄初居宁陵后兵解归鲁留幼弟惟时居宁陵守先人墓宪宗元和十三年袭封
文宣公授兖州参军卒子策

孔策

策明经及第授曲阜县尉武宗会昌元年累迁尚书博士二年袭封文宣公宣宗大
中元年宰相白敏中奏岁给封户绢百匹春秋充享祀

卒子三振拯郁

孔振

振字国文懿宗咸通四年进士第一人及第除秘书省校书郎累迁左补阙水部员外郎袭封文宣公卒子昭俭

孔昭俭

昭俭任南陵尉授广文赐博士兖州司马赐绯除秘书郎袭封文宣公兼曲阜令卒子光嗣

孔光嗣

光嗣昭宗天佑二年授泗水主簿遭世叛乱遂失封爵初宋元嘉闲蠲鲁郡氏孔景等五户拱孔子庙洒埽役其裔孙未见孔子子孙单承

门祚衰弱又多流寓他所者乘时不纲谋冒圣裔窃世爵遂计害光嗣时梁末帝干化三年也子仁玉 【按德伦至光嗣新旧唐书俱无传今

据宋史孔宜传参阙里文献考补辑】

△五代

孔仁玉

孔仁玉

孔仁玉

仁玉字温如当孔末之乱仁玉生甫九月母张抱匿于外家九岁通春秋既长姿貌雄伟为人严整临事有果断后唐明宗长兴元年鲁人

愬于官曰曲阜令末非圣人后光嗣有子仁玉育于张氏今十九岁矣事闻于朝乃诛末以仁玉主孔子祀授曲阜主簿三年迁龚邱令封文宣

公晋高祖天福五年改曲阜令后周太祖广顺二年帝幸曲阜谒林庙召对赐五品服及银器杂彩诏以曲阜令兼监察御史卒赠兵部尚书后

人以孔氏几绝复兴实赖张氏之力岁时祭其外祖张温之墓为置祭田立奉祀生请蠲其徭役以报之子四宜宪冕勛 【按五代史无仁玉

传今据宋史孔宜传及阙里文献考补辑】

△宋

孔宜【孔延世 孔圣佑 孔宗愿 孔若蒙 孔若虚 孔端友 孔珍 孔搢 孔文远 孔万春 孔洙】

孔宜

孔宜

宜字不疑幼颖悟十岁能属文以孝闻举进士不第宋太祖干德四年诣阙上书述其家世诏以为曲阜主簿历黄州军事推官太宗即位

召见迁司农寺丞掌星子镇市征宜上言星子当江湖之会商贾所集请建为军诏以为

县就命宜知县事后以为南康军代还献所著文赋数十篇太宗嘉之召见问以孔子世嗣因下诏曰素王之道百代所崇传祚袭封抑存典制文宣王四十四代孙司农寺丞宜服勤素业砥砺廉隅亟历官联洽闻政绩圣人之后世德不衰俾登朝伦以光儒胄可擢太子右赞善大夫袭封文宣公复其家未几通判密州太平兴国八年诏修曲阜孔子庙宜贡方物为谢诏褒之迁殿中丞雍熙三年用兵契丹受诏督军粮溺拒马河卒子三延世延泽延渥宜弟宪太平兴国二年进士及第官至工部员外郎知浚仪县冕应城主簿 【按阙里文献考作兖州参军】 勳详子道辅传中

孔延世

孔圣佑

孔宗愿

孔若蒙

孔若虚

孔端友

孔玠

孔搢

孔文远

孔万春

孔洙

孔延世

延世字茂先以父死事赐学究出身为曲阜主簿历问长葛二令真宗至道三年召赴阙以为曲阜令袭封文宣公赐帛五十匹银器五十

两及太宗御书并九经咸平三年诏本道转运使本州岛长吏待以宾礼卒于官子圣佑

孔圣佑

圣佑年九岁赐同学究出身大中祥符元年真宗东封泰山圣佑时年十一赐衣绿陪位缀京官班后及还至兖州幸曲阜谒孔子庙行酌

献礼孔氏宗属并令陪位又谒孔林御北亭召从臣观古碑加谥孔子为元圣文宣王追封孔子父叔梁纥齐国公母颜氏鲁国太夫人擢圣佑

为太常寺奉礼部又录其近属进士谓同三传出身习进士延佑习学究延渥延鲁延龄并同学究出身改曲阜为仙源县圣佑后改大理评事

天禧五年授光禄寺丞袭封文宣公知仙源县事后改名佑 【按圣佑东都事略及阙里文献考俱作圣佑宋大所谓后改名佑者当是改名

圣佑也】 迁太子中舍卒无嗣以从弟宗愿袭爵

孔宗愿

宗愿字子庄父延泽赠谏议大夫仁宗天圣中以从父道辅荫补太庙斋郎宝元二年授国子监主簿袭封文宣公知仙源县事至和二年

改封衍圣公迁尚书比部员外郎通判潍州卒于官子四若蒙若虚若愚若拙

孔若蒙

若蒙字公明神宗熙宁元年袭封衍圣公为仙源县主簿哲宗元佑元年授承奉郎改封奉圣公专主祀事不预他职遇郊祀大礼赴阙陪

位符元年坐事废以弟若虚袭子二端友端操

孔若虚

若虚字公实袭封奉圣公徽宗崇宁中卒复改奉圣公为衍圣公仍以若蒙之子端友绍封

孔端友

端友字子交徽宗崇宁二年袭封衍圣公宣和三年转通直郎除直秘阁赐緋高宗建炎二年赴扬州陪位不克归遂寓于三衢终郴州知

州卒无子以弟端操之幼子玠嗣

孔玠

玠字锡老高宗绍兴二年袭封衍圣公卒子搢嗣

孔搢

搢字季绅高宗绍兴二十四年授右承奉郎袭封衍圣公卒子文远嗣

孔文远

文远字绍先光宗绍熙四年授承奉郎袭封衍圣公卒子万春嗣

孔万春

万春字耆年理宗宝庆二年袭封衍圣公卒子洙嗣

孔洙

洙字景清理宗绍定四年袭封衍圣公通判吉州宋亡归元元世祖命议孔氏子孙当立者或言孔氏子孙寓衢者乃其宗子至元十九年

冬召至阙劳问洙逊于居曲阜者帝嘉之曰宁违荣而不违亲真圣人后也遂命为国子祭酒承务郎兼提举浙东学校事与护持林庙玺书秩

满再授奉训大夫儒学提举卒无嗣自端友至洙袭封于衢者盖六世云 【按宜至圣佑俱见宋史孔宜传宗愿见东都事略若蒙以下并据

阙里文献考补辑】

△金

孔璠【孔拯 孔摠 孔元措】

孔璠

孔璠

孔璠字文老孔子四十九代孙宋朝奉郎袭封衍圣公端友弟端操之子刘豫授为迪功郎袭封衍圣公主管祀事天会十五年刘豫废熙宗即位兴制度礼乐立孔子庙于上京天眷三年诏求孔子后加璠承奉郎袭封衍圣公奉祀事是时熙宗雅爱读论语尚书春秋左氏传及诸史通历唐律乙夜乃罢皇统元年三月帝谒奠孔子庙北面再拜顾谓侍臣曰朕幼年游侠不知志学岁月逾迈深以为悔大凡为善不可不勉孔子虽无位其道可遵万世高仰如此皇统三年璠卒赠荣禄大夫子拯袭封

孔拯

孔总

孔元措

孔拯

拯字符济熙宗皇统二年授文林郎袭封衍圣公海陵天德二年定衍圣公俸格加于常品是岁立国子监久之加拯承直郎世宗大定元年卒弟总袭封

孔总

总字符会大定三年授文林郎袭封衍圣公二十年召至京师欲与之官尚书省奏总主先圣祀事若加任使守奉有阙乃授曲阜县令进奉直大夫章宗明昌元年卒赠光禄大夫子元措元统

孔元措

元措字梦得初父总年已四十生数子皆不育及宰曲阜收葬枯骨夜梦众人来谢一人稍前曰差哉暮云之弗及既寤又搜得十余骸并葬之已复梦其人来谢曰今子非尔子后丑年庚月丁日所生真尔子矣当名元措已果得子因即以名之而字梦得 【据阙里文献考增】

明昌二年袭封衍圣公诏曰衍圣公视四品阶止八品不称可超迁中议大夫永着于令四年八月章宗行释奠礼北面再拜亲王百官六学生员陪位承安二年诏元措兼曲阜县令仍世袭元措历事宣宗哀宗累迁光禄大夫太常卿 【据阙里文献考增】 后归元太宗仍袭封衍圣公卒无子以弟元统之孙洵嗣爵

△元

孔洵【孔治 孔思诚 孔思晦 孔克坚】

孔洵

孔洵

洵字昭度祖元统敦厚慎默仕金至安远大将军武昌节度判官父之固洵于元宪

宗元年袭封衍圣公喜较猎二年曲阜管民长官孔治
率族人以不事儒雅攻之遂夺爵后知潍州无子世爵在北者中绝绝四十三年至成宗
即位以治绍封

孔治

孔思诚

孔思晦

孔克坚

孔治

治字世安六世祖若愚字公直四十六代衍圣公宗愿第三子也五世祖端立字子
植金时权主祀事高祖琥字西老曾祖拂字文通并授
进义校尉祖元用字俊卿金宣宗时衍圣公元措赴汴以元用代摄祀事元师攻益都以
元用有将略授以兵使随征寻卒于军父之全字工叔
以迪功郎为曲阜县尹治于世祖中统元年袭县尹四年权主祀事至元十三年授承事
郎宰曲阜二十余年以才干闻二十二年授奉训大夫
单州防御使以其子思诚代为曲阜尹将行戒其子曰母妄怒轻笞楚人邑中长者视之
如父兄幼者抚之如子弟以无负乃父训及至单州兴
学校正风俗听讼平允人自不冤二十九年迁奉直大夫知密州成宗元贞元年赴阙大
臣言治孔子裔孙其祖元用有军功没于王事治权奉
祀事三十余年袭封爵莫宜治诏从之授中议大夫袭封衍圣公卒子思诚嗣

孔思诚

思诚以世袭县尹袭公爵寻以非嫡罢封止世袭县尹迁国子监丞安庆路推官升
知恩州丁内难不赴寻拜江南湖北道肃政廉访司佾
事皆不赴以朝列大夫知濮州致仕清勤奉职所至皆有名子克钦世袭曲阜尹 【按洙
及治思诚元史俱无传今据阙里文献考补辑】

孔思晦

思晦字明道孔子五十四代孙进义校尉拂之五世孙也曾祖元孝祖之厚赠亚中
大夫济宁路总管轻车都尉鲁郡侯父浣字日新赠通
议大夫礼部尚书轻车都尉鲁郡侯思晦资质端重性简默章童卯时读书已识大义及
长受业导江张■〈頔，立代此〉讲求义理于词章
之习薄而弗为家贫躬耕以为养虽剧寒暑为学未尝懈大德中游京师祭酒耶律有尚
欲荐之以母老辞归母卧病躬进药饵衣不解带居丧
勺水不入口者五日至大中举茂才为范阳儒学教谕延佑初调宁阳学先是两县教官
率以廩薄不能守职而思晦以俭约自将教养以法比
代去学者皆不忍舍之当是时衍圣公思诚以支庶袭爵族人不服相与议思晦适长且

贤宜袭封爵奉祀事状上政府事未决仁宗一日问孔子之裔之几世袭爵为谁廷臣具对曰未定帝取孔氏谱牒按之曰以嫡应袭封者思晦也复奚疑特授中议大夫袭封衍圣公月俸五百缗赐四品印泰定三年山东廉访副使王鹏南言袭爵上公而阶止四品于格弗称且失尊崇意明年阶嘉议大夫至顺二年改赐三品印思晦每遇祭祀必敬必慎初庙毁于兵后虽敬治而角楼围墙未备思晦竭力营度以复其旧金丝堂坏又一新之祭器礼服悉加整饬又以尼山乃毓圣之地故有庙已毁民冒耕祭田且百年思晦复其田里请置尼山书院以列于学官朝廷从之三氏学旧有田三千亩占于豪民子思书院旧有营运钱万缗贷于民取子钱以供祭祀久之民不输子钱并负其本思晦皆理而复之圣父旧封齐国公思晦言于朝曰宣圣封王而父爵犹公愿加褒崇乃诏加封圣父启圣王圣母王夫人五季时孔末之后方盛欲以伪灭真害宣圣子孙几尽至是其裔复欲冒称宣圣后思晦以为不早辨则真伪久益不可明彼与我不共载天乃列千族与其拜殿廷可乎遂会族人稽典故斥之既又重刻宗谱于石而孔氏族裔益明矣元统元年卒有鹤百余翔其屋上又有神光自东南落其舍北至正中朝廷加赠其官赐谥文肃子克坚

孔克坚

克坚字璟夫袭封衍圣公阶嘉议大夫既而进通奉大夫至正十五年召为同知太常礼仪院事拜陕西行台侍御史国子祭酒擢山东肃政廉访使不赴迁子希学袭封衍圣公 【按希学以下俱详明史衍圣公传】

钦定续通志卷五百三十六

●钦定续通志卷五百三十七 孔氏后裔传二

孔氏后裔传

支属

○支属

唐

宋

金

△唐

孔颖达 孔若思【从父桢 桢子季诩 子至】 孔巢父【从子戡戡

戡 戡孙纬 戡子温业】 孔

述睿【敏行】

孔颖达

孔若思 【孔楨 孔季詡 孔至】

孔巢父

孔述睿 【孔敏行】

孔颖达

孔颖达字仲达冀州衡水人孔子三十二世孙幼就学诵记日千余言闇记三礼义宗及长明服氏春秋传郑氏尚书诗礼记王氏易善属文通步历隋大业初举明经高第授河内郡博士炀帝召天下儒官集东都诏国子秘书学士与论议颖达为冠又年最少有耻出其下者阴遣客刺之匿杨玄感家得免补太学助教隋乱避地虎牢太宗平洛授文学馆学士迁国子博士贞观初封曲阜县男转给事中时帝新即位颖达数以忠言进帝问孔子称以能问于不能以多问于寡有若无实若虚何谓也对曰此圣人教人谦耳已虽能仍就不能之人以资所未能已虽多仍就寡少之人更资其多内有道外若无中虽实容若虚非特匹夫君德亦然故易称蒙以养正明夷以莅众帝称善除国子司业岁余以太子右庶子兼司业与诸儒议历及明堂事多从其说以论譔劳加散骑常侍进子爵皇太子令颖达譔孝经章句因文以尽箴讽帝知数争太子失赐黄金一斤绢百匹久之拜祭酒仍侍讲东宫帝幸太学观释菜命颖达讲经毕上释奠颂诏褒美后太子稍不法颖达争不已乳母遂安夫人曰太子既长不宜而折对曰蒙国厚恩虽死不恨剗切愈至后致仕二十二年卒陪葬昭陵赠太常卿谥曰宪初颖达与颜师古司马才章王恭王琰等受诏譔五经义训凡百余篇号义赞诏改为正义云虽包贯诸家然不能无谬冗博士马嘉运驳正其失有诏更令裁定功未就永徽二年诏中书门下与国子三馆博士弘文馆学士考正之于是尚书左仆射于志宁右仆射张行成侍中高季辅就加增损书始布下颖达子志终司业志子惠元力学寡言又为司业累擢太子谕德三世司业时人美之 【按颖达传新书列于儒学今据阙里文献考改入】

孔若思 【孔楨 孔季詡 孔至】

孔若思越州山阴人孔子三十六世孙陈吏部尚书奂四世孙也祖绍安与兄绍新早知名陈亡客居鄞励志于学外兄虞世南曰本朝沦覆吾分湮灭有弟若此知不亡矣绍安与孙万寿皆以文辞称时谓孙孔隋大业末为监察御史高祖讨贼河东绍安与夏侯端同监军礼遇尤密帝即位端先归已而绍安闲道走长安帝悦擢内史舍人若思早孤其母躬训教长以博学闻有遗以褚遂良书者纳一卷焉其人曰是书贵千金何取之廉答曰审尔此为多矣更还其半擢明经历库部郎中常曰仕宦至郎中足

矣座右置止水一石明自足意中宗初敬晖桓彦范当
国以若思多识古今凡大政事必咨质后行三迁礼部侍郎出为卫州刺史故事以宗室
为州别驾见刺史骛放不肯致恭若思劾奏别驾李道
钦请讯状有诏别驾见刺史致恭自若思始以清白擢银青光禄大夫赐绢百匹累封梁
郡公开元七年卒谥曰惠从父祜 【按阙里文献考
作祜】 第进士历监察御史门无宾谒时称其介高宗时再迁絳州刺史封武昌县子谥
曰温祜子季翊 【案阙里文献考作季翊】 永昌
初擢制科授秘书郎陈子昂尝称其神清韵遣可比卫玠终左补阙若思子至字惟微历
著作郎明氏族学与韦述萧颖士柳冲齐名撰百家类
例以张说等为近世新族剝去之说子均方有宠怒曰天下族姓何豫若事而妄纷纷耶
均弟素善至以实告初书成示韦述述谓可传及闻均
语惧欲更增损述曰止丈夫奋笔成一家书奈何因人动摇有死不可改遂罢时述及颖
士冲皆撰类例而至书称工 【案若思传新书列于
儒学今据阙里文献考改入】

孔巢父

孔巢父字弱翁居冀州 【按旧书作冀州人巢父为孔氏后裔不应称冀州人今改
正】 孔子三十七代孙少力学隐徕山永王璘称
兵江淮辟署幕府不应侧身潜遁由是知名广德中李季卿宣抚江淮荐为左卫兵曹参
军三迁库部员外郎出为泾原行军司马累拜湖南观
察使未行会普王为荆襄副元帅署行军司马俄而德宗狩奉天擢给事中为河中陕华
等州招讨使累上破贼方略帝嘉纳未几兼御史大夫
为魏博宣慰使巢父辩而才及见田悦与言君臣大义利害逆顺开晓其众是时悦久不
臣下皆厌乱杂然喜曰不图今日还为王人酒中悦起
自夸工骑射曰陛下见用何敌不摧巢父曰若尔不早自归乃一剧贼耳悦曰能为剧贼
岂不能为功臣乎巢父曰国方多虞待子而息悦谢焉
数日田绪杀悦与大将邢曹俊等听命巢父即以绪权知军务纾其难李怀光据河中帝
复令巢父宣慰罢其兵以太子太保授之怀光素服待
命巢父弗止之众忿曰太尉无官矣方宣诏乃噪而合害巢父并杀中人啖守盈初巢父
至怀光以其使魏博而田悦死疑谋出巢父故军乱不
肯救帝闻震悼赠尚书左仆射谥曰忠诏具礼收葬赐其家粟帛存恤之从子戡戡戡 【
按巢父以下至温业各传新书列于列传今据阙里
文献考改入】

孔戡

孔戡

孔纬

孔戡

孔温业

孔戡

戡字胜始 【按旧书云巢父兄岑父之子】 进士及第补修武尉以大理评事佐昭义李长荣节度府长荣死卢从史自别将代之留署掌书记从史稍得志益骄与王承宗田绪阴相结欲久连兵以固其位戡始阴争不从则于会扬言以折之从史始若受其言后偃蹇不轨戡遂以疾归洛阳未几李吉甫镇扬州表置幕府戡未应从史日是欲舍我而从人邪即诬以事奏三上诏以卫尉丞分司东都自贞元后帅镇劾奏僚佐不验辄斥至是给事中吕元膺执不可宪宗遣使论曰朕非不知戡行用之矣未几卒从史败追赠司勋员外郎

孔戣

戣字君严 【按旧书孔纬传云曾祖岑父位终秘书省著作佐郎纬为戣之孙则戣乃岑父之子也】 擢进士第郑滑卢羣辟为判官羣卒摄总留务监军杨志谦颇自肆戣邀志谦至府与对榻卧起示不疑志谦严惮不敢动入为侍御史累擢谏议大夫条上四事一多冗官二吏不奉法三百姓田不尽垦四山泽榷酤为州县弊宪宗嘉纳之中人刘布光受赇二十万缗抵死吐突承璀坐厚善责授淮南监军太子舍人李涉知帝意投匭上言承璀有功不可弃戣得副章不肯受面质让之涉更因左右以闻戣劾奏涉结近幸罔上听诏斥涉峡州司马 【旧书作陕州司仓】 宦宠侧目人为危之戣自以适所志轩轩甚得俄兼太子侍读改给事中江西观察使李少和坐赃狱寝不下博陵崔易简杀从父兄鞠状具京兆尹左右之翻其情戣慷慨论正贬少和杀易简夺尹三月俸再迁尚书左丞信州刺史李位好黄老数祠祷部将韦岳告位集方士图不轨监军高重谦上急变捕位劾禁中戣奏刺史有罪不容系仗内请付有司诏送御史台戣与三司杂治无反状岳坐诬罔诛贬位建州司马中人愈怒出为华州刺史明州岁贡淡菜蚶蛤之属戣以为自海抵京师递役凡四十三万人奏罢之厯大理卿国子祭酒会岭南节度使崔咏死帝谓裴度曰尝论罢蚶菜者谁欤今安在是可往为朕求之度以戣对即拜岭南节度使既至免属州逋负十八万缗米八万斛黄金税岁八百两先是属刺史俸率三万又不时给皆取部中自衣食戣乃倍其俸约不得为贪暴稍以法绳之南方鬻口炙货掠人为奴婢戣峻为之禁士之斥南不能北归与有罪之后百余族才可用者用之其穷而无告者为嫁遣其女

子藩舶泊步有下碇税始至有阙货宴所饷犀琲下及
仆隶戮禁绝无所求索旧制海商死者官籍其货满三月无妻子诣府则没入戮以海道
岁一往复苟有验者不为限悉推与 【按旧书云先
是准诏祷南海神多令从事代祠戮每受诏自犯风波而往韩愈在潮州作诗以美之】
自贞元中黄洞诸蛮叛久不平容桂二管利虏掠幸有
功乃请合兵讨之戮固言不可帝不听大发江湖兵会二管入讨士被瘴毒死者不胜计
安南乘之杀都护李象古而桂管裴行立容管阳旻皆
无功忧死独戮不务邀功交广宴然大治穆宗立以吏部侍郎召 【按旧书作敬宗即位
召为吏部侍郎又称长庆中改右散骑常侍卒于长
庆四年长庆系穆宗年号则是戮未逮事敬宗今从新书纂辑】 改右散骑常侍还为左
丞以老自乞雅善韩愈愈谓曰公尚壮士三留何去之
果戮曰吾岂要君者吾年一宜去吾为左丞不能进退郎官二宜去愈曰公无留资何恃
而归曰吾负二宜去尚奚顾愈嗟叹即上疏言臣与戮
同在南省数与戮相见其为人守节清苦论议正平年七十筋力耳目未衰忧国忘家用
意至到如戮辈在朝不过三数人陛下不宜苟顺其求
不留自助也礼大夫七十致仕若不得谢则赐之几杖安车不必七十尽许致仕今戮据
礼求退陛下若不听许亦无伤义而有留贤之美不报
以礼部尚书致仕岁致羊酒如汉征士礼长庆四年卒赠兵部尚书谥曰贞子遵儒温裕
皆登进士第大中以后迭居显职温裕位京兆尹天平
军节度使 【按旧书增辑】 遵儒子纬

孔纬

纬字化文少孤依诸父多与有名者游才誉早成擢进士第东州崔慎由表置幕府
从崔铉淮南复从慎由守河中再迁观察判官宰相杨
收荐以长安尉直弘文馆迁监察御史进礼部员外郎兼集贤院直学士母丧解还为右
司员外郎赵隐言其才拜翰林学士俄知制诰频迁户
部侍郎擢御史中丞纬方雅疾恶若讎中外闻风未绳辄肃三迁吏部侍郎权要私谒书
牒至盈几一不省当路不悦改太常卿从僖宗至蜀以
刑部尚书判户部萧遘雅不喜坐调度不给改太子少保及帝避朱玫次陈仓惟黄门卫
士数百扈乘舆诏拜纬御史大夫令趣百官至行在时
羣臣露次整屋为盗剽胁衣囊略尽纬谒宰相欲有所论遘与裴彻怨田令孜在帝左右
不欲行辞不见纬召御史曰吾等身被国恩谊不辞难
令诏羣臣皆不至夫与人布衣游犹缓急相恤况于君乎且泣下御史亦辞方寇斂丐衣
食请办一日费而行纬曰吾妻疾旦暮尽丈夫岂以家
事后国事乎公善自谋吾行决矣往见李昌符曰诏书再至而羣臣顾未行仆大夫也不

敢后顾假兵护送天子所昌符具资装送之既及行在
纬策攻必反建言关邑阨狭不足驻六师请幸梁州即日去陈仓而攻兵至微纬言几不
脱进拜兵部侍郎同中书门下平章事攻平从帝还领
诸道盐铁转运使累迁尚书左仆射赐号持危启运保又功臣铁券恕十死又赐天兴良
田善和里第各一区兼京畿营田使昭宗即位进司空
以太学焚残命兼国子祭酒完治之加司徒封鲁国公进兼太保时天武都头李顺节疏
暴人也以浙西节度使兼平章事台史自己谢当班见
百官纬判止之明日顺节盛服至则无班怏怏去他日见纬以为言纬曰固疑公见望也
且百辟卿士天子廷臣班见宰相以宰相为之长公提
天武健儿据堂受礼安乎必欲用之去都头乃可顺节惭缩不敢言张浚将伐太原帝不
决以问纬纬助浚请既浚败坐傅会出为华南节度使
又贬均州刺史寻有诏听所使乃屏居华阴李茂贞入杀韦昭度帝恶大臣朋比与藩臣
交持召纬入朝擢吏部尚书以司空门下侍郎复辅政
使者敦劝力疾到京师见帝呜咽流涕自陈衰疾不任事乞归田里帝动容诏使者送纬
至堂视事会天子出次石门从至莎城以疾还都家人
召医视纬曰天下方乱何久求生不肯服药卒赠太尉子崇弼亦登进士仕至散骑常侍
孔戢

戢字方举戢母弟也以季父巢父死难德宗嘉其忠诏与一子正员官授戢修武尉
不受以让其兄戡擢明经书判入高等授校书郎阳翟
尉累迁殿中侍御史分司东都昭义判官徐玫故尝助卢从史为跋扈者从史败孟元阳
代欲复用之戢遂牒泽潞数玫以俟命然后列状上闻
诏流玫播州转侍御史库部员外郎初泾师之乱朱泚以彭偃为中书舍人至是偃子充
符为鄜坊从事或荐其能召还京师戢谓京兆裴武曰
泚所下伪诏皆偃为之逆臣子不鸟兽窜伏乃于誉求进乎子盍效季孙行父逐莒仆以
勉事君者武即逐出充符拜京兆少尹再迁为湖南观
察使召授右散骑常侍京兆尹岁旱文宗忧甚戢躬祠曲江池一夕大澍帝悦诏兼御史
大夫太和三年卒赠工部尚书子温业

孔温业

温业字逊志擢进士第大中时为吏部侍郎求外迁宰相白敏中顾同列曰吾等可
少警孔吏部不乐居朝矣后为太子宾客子晦

孔述睿 【孔敏行】

孔述睿越州山阴人孔子三十八代孙梁侍中休源八世孙也曾祖昌寓字广成贞
观中对策高第历魏州司马有治状帝为不置刺史为
政三年玺书褒美进膳部郎中祖祖舜字奉先为监察御史以累下除成武令雉驯于廷

述睿少与兄充符弟克让笃孝既孤偕隐嵩山而述睿
资嗜学大历中刘晏荐于代宗以太常寺协律郎召累擢司勋员外郎史馆修撰述睿每
一迁即至朝谢俄而辞疾归以为常德宗立拜谏议大
夫命河南尹赵惠伯赍诏书束帛敦遣既至对别殿赐第宅给厩马皇太子侍读固辞弗
许久乃改秘书少监兼右庶子复为史馆修撰述睿重
次地理志本末最详性退让未始忤物虽亲朋燕集严默终日与令狐峘同职峘数抵侮
然卒不校也时称长者贞元四年帝念平凉之难以述
睿恇诚遣持祠具称诏临祭九年又以疾乞解人乃许以太子宾客还乡故事致仕不给
公驿帝特命给焉卒赠工部尚书子敏行字至之元和
初擢进士第岳鄂吕元膺表在节度府元膺徙东都河中辄随府迁入拜右拾遗四迁司
勋郎中集贤殿学士谏议大夫李绛遇害事本监军杨
叔元时无敢言敏行上书极论之叔元乃得罪敏行少修洁及仕宦能交当时豪俊有名
一时太和九年卒赠工部侍郎 【按孔述睿传新书
列于隐逸今据阙里文献考改入】

△宋

孔承恭 孔道辅【宗翰】 孔宣旦 孔旼 孔文仲【武
仲 平仲】
孔承恭
孔道辅
孔宗旦
孔旼
孔文仲
孔承恭

孔承恭字光祖孔子四十三代孙本京兆万年人唐昭宗东迁举族随之遂占籍河
南五世祖戡自有传戡孙迴莱州刺史迴子昌庶虞部
郎中昌庶子庄仕晋为右谏议大夫由戡至庄皆登进士第承恭庄之子也以门荫授秘
书省正字历温安丰二县主簿时王审琦节度寿春以
承恭名家子奏摄节度推官府罢调补郑州录事参军入为大理寺丞献宫词托意求进
太祖怒其引喻非宜免所居官放归田里太宗即位以
赦复授旧官时初榷酒以承恭监西京酒曲岁增课六千万迁大理正议狱平允擢库部
员外郎判大理少卿事历屯田兵部郎中同考校京朝
官课第端拱三年下诏曰九寺三监国之羽仪制度声名往往而在各有副贰率其司存
品秩素高职任尤重郎吏迁授斯为旧章比闻搢绅之
流颇以台阁自许目为散地甚无谓焉朕将振之自我而始其以兵部郎中孔承恭为太

常少卿魏羽为秘书少卿户部郎中柴成务为光禄少卿魏庠为卫尉少卿张洎为太仆少卿吕端为大理少卿臧丙为司农少卿袁廓为鸿臆少卿工部郎中张雍为太府少卿又以屯田郎中雷有终为少府少卿虞部郎中索湘为将作少监时裴祚慎从吉宋雍先为少卿皆改授东宫官又诏承恭与左散骑常侍徐铉刊正道书俄以疾求解官且言早游嵩少闲乐其风土愿卜居焉帝召见悯其羸瘠授将作监致仕以其子玠同学究出身为登封县尉俸就禄养未果行而卒承恭少疏纵及长能折节自励尝上疏请令州县长吏询访耆老求知民闲疾苦吏治得失及举令文贱避贵少避长轻避重去避来请诏京兆并诸州于要害处设木牌刻其字违者论如律帝皆为行之 【按承恭传宋大列于列传今据阙里文献考改入】

孔道辅

孔道辅字原鲁初名延鲁孔子四十五代孙也父勛进士及第为太平州推官以殿中丞通判广州会真宗东封躬诣孔子祠帝问宰相孔氏令孰为名者或言勛有治行即召对以为太常博士知曲阜县初勛在广州以清洁闻及被召蕃酋争持宝货以献皆慰遣之后为御史台推直官累迁秘书监分司南京管勾祖庙以尚书工部侍郎致仕后道辅卒年八十九道辅幼端重大中祥符五年进士及第为宁州军事推官数与州将争事有蛇出天庆观真武殿中一郡以为神州将帅官属往奠拜之欲上其事道辅径前以笏击蛇碎其首观者初惊后莫不叹服迁大理寺丞知仙源县主孔子祠事上言庙制卑陋请加修崇诏可再迁太常博士庄献太后临朝召为左正言受命日论奏枢密使曹利用尚御药罗崇勋窃弄威柄宜早斥去以清朝廷 【按东都事略云道辅请太后归政天子宋史本传不载】 太后可其言乃退未几为直史馆判三司理欠凭由司使辽道除右司谏尼图阁待制辽宴使者优人以文宣王为戏道辅艷然径出辽使主客者邀道辅还坐且令谢之道辅正色曰我国与北朝通好以礼文相接今俳优之徒慢侮先圣而不之禁北朝之过也道辅何谢辽君臣默然又酌大卮谓曰方天寒饮此可以致和气道辅曰不和固无害既还言者以为生事仁宗问其故对曰平时使者至辽为所侮若不较恐益慢我朝帝然之厯判吏部流内铨纠察在京刑狱坐纠事不当出知郓州徙青州还判流内铨迁尚书兵部员外郎复出知徐许二州徙应天府明道二年召为右谏议大夫权御史中丞以谏废郭后出知泰州徙徐州又徙兖州进龙图阁直学士迁给事在兖三年复入为御史中丞道辅性鲠挺遇事弹劾无所避及再执宪权贵益忌

之初道辅与父僦郭贲旧宅居之有言于帝者曰道辅家近太庙出入传呼非所以尊神明即诏道辅他徙集贤校理张宗古上言汉内史府在太庙堦垣中国朝以来庙垣下皆有官私地舍谓不须避帝出宗古通判莱州道辅叹曰儉人之言入矣会受诏鞫冯士元狱事连参知政事程琳宰相张士逊素恶琳而疾道辅不附己将逐之察帝有不悦琳意即谓道辅上顾程公厚今为小人所诬见上为辨之道辅入对言琳罪薄不足深治帝果怒以道辅朋党大臣出知郟州已而道辅知为士逊所卖颇愤惋时大寒上道行至韦城病卒皇佑三年王素因对语及道辅仁宗思其忠特赠尚书工部侍郎子宗翰

孔宗翰

孔宗翰

宗翰字周翰登进士第知仙源县为治有条理遇族人有恩不以私故馭法王珪司马光皆上章谕荐由通判陵州为夔峡转运判官提点京东刑狱知虔州城滨章贡两江岁为水啮宗翰伐石为址冶铁镗之由是屹然历陕扬洪兖州皆以治闻哲宗初立求言吏民上书以千数诏司马光采阅其可用者十五人独称奖其二乃宗翰与王巩也元佑初召为司农少卿迁鸿臆卿言孔子之后自汉以来有褒成奉圣之号皆赐实封或缣帛以奉先祀国朝益加崇礼真定赐世袭然兼领他官不在故郡请自今袭封者终身在乡里诏改为奉圣公不领他职【按东都事略云仁宗封孔子后为衍圣公哲宗时改为奉圣公徽宗时复为衍圣公】给庙学田万亩赐国子监书立学官以诲其子弟进刑部侍郎属疾求去以宝文阁待制知除州未拜而卒【按道辅传宋史列于列传今据阙里文献考改入】

孔宗旦

孔宗旦鲁人孔子四十六代孙祖冕父延龄宗旦为邕州司户参军依智高未反时邕州有白气起郡庭旁江水暴溢宗旦以为兵象度智高必反以书告知州陈珙珙不听后智高破横州即载其亲往桂州曰吾有官守不得去无为俱死也既而州破被执贼欲任以事宗旦叱贼且大骂遂被害知袁州祖无择以其事闻赠太子中允【按宗旦传宋史列于忠义今据阙里文献考改入】

孔旼

孔旼字宁极孔子四十六代孙隐居汝州龙兴县龙山之滢阳城性孤洁喜读书有田数百亩赋税常为乡里先遇岁饥分所余赙不足者闻人之善若出于己动止必依礼法环所居百余里人皆受慕之见旼于路辄敛衽以避

葬其父庐墓三年日食米一溢壁闲生柴芝数十本州岛
以行义闻赐粟帛给复其家近臣列荐授秘书省校书郎致仕居数年召为国子监直讲
辞不赴即迁光禄寺丞顷之起知龙兴县复辞卒赠太
常丞盗尝入眈家发其廩粟眈避之纵其所取尝逢羸弱者为盗掠夺其赀眈追盗与语
责之以义解金畀之使归所掠居山未尝逢毒蛇虎豹
或谓之曰子毋夜行此亦可畏眈曰无心则无所畏晚年惟玩周易老子他书亦不复读
为太玄图张壁上外列方州部家而规其中心空之曰
易所谓寂然不动者与此无异也 【按孔眈传宋史列于隐逸今据阙里文献考改入】

孔文仲

孔文仲字经父居临江新喻孔子四十七代孙举进士第一调余杭尉恬介自守不
事请谒转台州推官熙宁初翰林学士泛镇以制举荐
对策九千余言力论王安石所建理财训兵之法为非是宋敏求第为异等安石怒奏神
宗罢归故官吴充为相欲置之馆阁有忌之者仅得国
子直讲学者方用王氏经义进取文仲不习其书换为三班主簿出通判保德军时征西
夏众数十万皆道境上久不解边人苦之文仲陈三不
便元佑初召为秘书省校书郎进礼部员外郎有言皇族唯扬荆二王得称皇叔余宜各
系其祖若唐人称诸王孙之比文仲曰上新即位宜广
敦睦之义不应疏闲骨肉议遂寝迁起居舍人擢左谏议大夫日食七月朔上疏陈五事
又论青苗免役首困天下保甲保马茶盐之法为遗螫
留蠹改中书舍人三年同知贡举文仲先有寒疾及是昼夜不废职同院以其形瘵劝之
出或居别寝谢曰居官则任其责敢以疾自便乎于是
疾益甚还家而卒初文仲与弟武仲平仲皆以文声起江西时号三孔后追贬梅州别驾
元符末复其官有文集五十卷 【据文仲传及武仲
平仲二传宋史列于列传今据阙里文献考改入】

孔武仲

孔平仲

孔武仲

武仲字常父举进士甲科调谷城主簿元佑初为秘书省正字稍迁国子司业尝论
科举之弊诋王氏三经新义请复诗赋取士进起居郎
兼侍讲遯英殿除起居舍人数月拜中书舍人直学士院时议祠北郊久不决武仲建用
纯阴之月亲祠如神州地只擢给事中迁礼部侍郎以
宝文阁侍制知洪州请从臣为州者仗以下公坐止劾官属俟狱成听大理约法庶几刑
不逮贵近又全朝廷体貌之意遂着为令徙宣州坐元
佑党夺职居池州卒元符末追复之所著诗书论语金华讲义内外制杂文共百余卷

孔平仲

平仲字义甫登进士第又应制科以吕公着荐为秘书丞集贤校理历京西路提点刑狱绍圣中言者诋其元佑时附会当路讥毁先烈削校理知衡州提举董必劾其不推行常平法陷失官米之直六十万置狱潭州平仲疏言米贮仓五年半陈不堪食若非乘民阙食随宜泄之将成弃物矣倘以为非臣不敢逃罪乃徙韶州又以前上书故责惠州别驾安置英州改单州团练副使饶州居住【按东都事略平仲自安置英州后又改单州团练副使饶州居住徽宗即位乃自饶州召还宋史失载今据补】徽宗即位召为户部郎中历帅鄜延环庆党论再起罢主管兖州景灵官卒所著续世说绎解稗诗戏诸书传于世

△金

孔端甫

孔端甫

孔端甫

孔端甫孔子四十八代孙明昌初学士党怀英荐其年德俱高读书乐道该通古学召至京师特赐王泽榜及第除将仕郎小学教授以主簿奉祀致佳【按端甫见金史孔璠附传璠传已入嫡嗣兹摘出另编】

钦定续通志卷五百三十七

●钦定续通志卷五百三十八 儒林传一

儒林传

（臣）等谨按司马迁史记立儒林传历代因之唐以后诸史若新旧唐书及元史皆称儒学宋史则于儒林之外别立道学一门意在推崇周程张邵朱数大儒然于体例未当昔人已多讥之者且亦第可施之于宋通史固不能援以为例也今依郑氏列袞辑诸传自唐迄元统曰儒林闲有重加删节改入别类者以其为士流趋向所系持择宜严不敢沿讹袭谬云

唐【一】

○唐一

曹宪【魏模公孙 罗许淹】 王恭 马嘉运 贾公彦【大隐 李玄植】 张后胤 盖文达【文懿】 谷那律【从政】 许叔牙 敬播【刘伯庄 秦景通】 罗道琮 郎余令 徐齐聃【坚 峤】 沈伯仪 路敬淳【敬潜】 王元感 彭景直 卢粲 尹知章 张齐贤 柳冲 马怀素 殷践猷【寅 亮】

曹宪 【魏模公孙 罗许淹】

王恭

马嘉运

贾公彦 【贾大隐 李玄植】

张后胤

盖文达 【盖文懿】

谷那律 【谷从政】

许叔牙

敬播 【刘伯庄 泰景通】

罗道琮

郎余令

徐齐聃

沈伯仪

路敬淳 【路敬潜】

王元感

彭景直

卢粲

尹知章

张齐贤

柳冲

马怀素

殷践猷 【殷寅 殷亮】

△曹宪 【魏模公孙 罗许淹】

曹宪扬州江都人仕隋为秘书学士聚徒教授凡数百人公卿多从之游于小学家尤邃自汉杜林卫宏以后古文亡绝至宪复兴炀帝令

与诸儒譔桂苑珠丛规正文字又注广雅学者推其该洽藏于秘书贞观中扬州长史李袭誉荐之以弘文馆学士召不至即家拜朝政大夫当

世荣之太宗尝读书有奇难字辄遣使者问宪宪具为音注援证详明帝咨赏之卒年百余岁宪始以梁昭明太子文选授诸生而同郡魏模公

孙罗江夏李善相继传授于是其学大兴句容许淹者自浮屠还为儒多识广闻精故训与罗等并名家罗官沛王府参军事无锡丞模武后时

为左拾遗子景倩亦世其学善见子邕传

△王恭

王恭滑州白马人少笃学教授乡闾弟子数百人贞观初召拜太学博士请三礼别

为义证甚精博盖文懿文达皆当时大儒每讲三礼皆
徧举先儒义而必畅恭所说 【王恭马嘉运原附孔颖达传后今颖达移入圣裔特析为
专传】

△马嘉运

马嘉运魏州繁水人少为沙门还治儒学长论议贞观初累除越王东阁祭酒退隐
白鹿山诸方来授业至千人十一年召拜太学博士弘
文馆学士以孔颖达正义繁冗掎摭其疵诸儒咸服其精高宗为太子引为崇贤馆学士
数与洗马秦曄侍讲宫中终国子博士 【按唐书原
有徐旷陆元朗欧阳询朱子奢张士衡诸传俱以经仕隋朝并移入文苑】

△贾公彦 【贾大隐 李玄植】

贾公彦洺州永年人永徽中官至太学博士撰次章句甚多子大隐仪凤中为太常
博士累迁中书舍人垂拱中博士周憬请武氏庙为七
室唐庙为五下比诸侯大隐奏秦汉母后称制未有戾古越礼者憬损国庙数悖大义不
可以训武后不获已伪听之时皆服其持正终礼部侍
郎公彦传业于赵州李玄植玄植又受左氏春秋于王德韶受诗于齐威该览子史百家
贞观闲为弘文馆直学士高宗时数召见与方士浮屠
讲说玄植以帝阉弱颇申规讽帝礼之后坐事迁巴令 【旧书作泛水令按贾公彦传新
书附张士衡传后今依旧书】

△张后胤

张后胤字嗣宗苏州崑山人祖僧绍梁零陵太守父冲 【旧书作中】 陈国子博
士入隋为汉王谅并州博士后胤甫冠以举行称高祖
镇太原引为客以经授秦王义宁初为齐王文学封新野县公武德中擢员外散骑侍郎
太宗即位进燕王咨议从王入朝召见初帝在太原尝
问隋运将终得天下者何姓答曰公家德业天下系心若顺天而动自河以北指挥可定
然后长驱关右帝业可成至是自陈所言帝曰是事未
始忘之乃赐宴月池帝令羣臣以春秋酬难曰朕昔受大谊于君今尚记之后胤顿首谢
曰陛下乃生知臣叨天功为已力罪也帝大悦迁燕王
府司马出为睦州刺史乞骸骨帝见其强力问欲何官因陈谢不敢帝曰朕从卿受经卿
从朕求官何所疑后胤顿首愿得国子祭酒授之寻迁
散骑常侍永徽中致仕加金紫光禄大夫朝朔望禄赐防合如旧卒赠礼部尚书 【旧书
作礼部侍郎】 谥曰康陪葬昭陵

△盖文达 【盖文懿】

盖文达冀州信都人博涉前载光明春秋三家刺史窦抗集诸生讲论时耆儒刘焯
刘轨思孔颖达咸在坐而文达依经辩举皆诸儒意所

未叩一坐厌叹抗奇之问安所从学焯曰若人岐嶷出自天然以多问寡则焯为之师抗曰冰生于水而寒于水其谓此邪武德中授国子助教为秦王文学馆直学士贞观初【旧书作贞观十年】擢谏议大夫兼弘文馆学士为蜀王师以王有罪坐免后除崇贤馆学士卒其宗人文懿亦以儒学称【旧书云文懿贝州宋城人】当时号二盖高祖于秘书省置学以致王公子文懿为国子助教既升席公卿更相质问文懿譬晓密微远近宗仰终国子博士

△谷那律【谷从政】

谷那律魏州昌乐人贞观中累迁国子博士淹识羣书褚遂良尝称为九经库迁谏议大夫兼弘文馆学士从太宗出猎遇雨沾渍因问曰油衣若为而无漏邪那律曰以耳为之当不漏帝悦其直赐帛二百段永徽初卒官孙倚束仕为秘书省正字讎覆图书多所刊定倚相子崇义天宝末为幽州大将以雄敢闻历左金吾卫大将军遂客蓟州崇义子从攻略涉儒学有风操事李宝臣历定州刺史封清江郡王宝臣及张孝忠妻其女兄弟也宝臣初倚任晚稍疏忌从政乃阖门谢交游及宝臣子惟岳知节度与田悦谋拒天子命从政谏曰上神断绝诸侯欲致太平尔考与燕有切骨恨天子致讨命帅莫先于燕诛怨复讎必尽力后已前曰尔考诛大将百余子弟存者常不平乘危相覆谁不能尔昔魏有洺相之围王师四集身投零陵仰天垂泣不知所出莱尔考保佑顿兵不进而先帝宽厚仅获赦贷不然田氏尚有种乎今悦凶豢孰与承嗣尔又幼富贵不出户庭便欲旅拒且人心难知天道难欺军中诸将乘危投隙自古岂少哉今图久安计莫若令而兄惟诚摄留后尔速入宿卫则福祿可保矣不纳从政移疾不出惟岳所信王他奴等疑其怨望日伺之从政惧乃吐血即仰药死曰吾不恨死痛渠覆宗矣后惟岳被杀于王武俊如其揣云

△许叔牙

许叔牙字延基润州句容人贞观时迁晋王府参军事弘文馆直学士【按旧书作累授晋王文学兼侍读迁太子洗马兼崇贤馆学士与新书异】于诗礼尤邃献诗纂义十篇太子令写本付司经局御史大夫高智周见之曰欲明诗者宜先读此二十三年卒【按叔牙原附萧德言传后今传言移入文苑故析为专传】

△敬播【刘伯庄 泰景通】

敬播蒲州河东人贞观初擢进士第时颜师古孔颖达譔次隋史诏播诣秘书内省参纂再迁著作佐郎兼修国史从太宗入高丽帝名所

战山为驻蹕播谓人曰釜舆不复东矣山所以名盖天意也其后果然迁太子司议郎时初置是官尤清近中书令马周叹曰恨资品妄高不得
历此职又与令狐德棻等撰晋书凡例皆播所发也有司建言谋反大逆惟父子坐死不及兄弟请更议诏羣臣议播曰兄弟虽孔怀之重然比于父子则轻故生有异室死有别宗今高官重爵本荫唯逮子孙而不及昆季乌有荣隔其荫而罪均其罚诏从播议永徽后仕益贵历谏议大夫给事中始播与许敬宗撰高祖实录纪其创业尽贞观十四年至是又撰太宗实录迄二十三年坐事出为越州长史徙安州龙朔三年卒房玄龄尝患颜师古注汉书文繁令掇其要为四十卷是时汉书学大兴其章章者若刘伯庄泰景通兄弟刘讷言皆名家伯庄者彭城人为弘文馆学士迁国子博士与许敬宗等论撰其多终崇贤馆学士自所著书亦百余篇子之宏世其学武后时以著作郎兼修国史终相王府司马睿宗立赠秘书监景通晋陵人与弟暉俱有名皆精汉书号大秦君小秦君当时治汉书非其授者以为无法云景通仕至太子洗马兼崇贤馆学士暉后复践其官及职 【按唐书此下附刘讷言传传称讷言为太子洗马尝集俳谐十五篇为太子欢太子废讷言坐除名】

△罗道琮

罗道琮蒲州虞乡人慷慨尚节义贞观末上书忤旨徙岭表有同斥者死荆襄简临终泣曰人生有死独委骨异壤邪道琮曰吾若还终不使君独留此瘞路左去岁余遇赦归会霖潦积水失其殡处道琮恸诸野波中忽若湓沸者道琮曰若尸在可再沸祝已水复涌乃得尸负之还乡寻擢明经仕至太学博士为时名儒

△郎余令

郎余令定州新乐人祖颖字楚之与兄蔚之俱有名隋大业中为尚书民曹郎蔚之位左丞炀帝语称二郎武德时颖以大理卿封常山郡公与李纲陈叔达定律令持节谕山东为窦建德所获胁以白刃终不屈贼平以老乞身贞观初卒谥曰平父知运贝州刺史余令博于学擢进士第授霍王元轨府参军事从父知年亦为王友元轨每曰郎家二贤皆入府不意培塿而松柏为林也徙幽州录事参军有为浮屠者积薪自焚长史裴斐率官属将观焉余令曰人好生恶死情也彼违蔑教义反其所欲公当察之毋轻往斐试廉按果得其奸孝敬在东宫余令以染元帝有孝德传更撰后传数十篇献太子太子嗟重改著作佐郎卒 【按唐书此下有余令兄余庆附传今删】

△徐齐聃

徐齐聃字将道湖州长城人世客冯翊梁慈源侯整四世孙八岁能文太宗召试赐所佩金削刀举弘文生调曹王府参军高宗时为潞王府文学崇文馆学士侍皇太子讲修书于芳林门时姑为帝婕妤好嫌以恩进求出为桃林令召为沛王侍读再迁司议郎皆不就累进西台舍人长孙无忌以谗死家庙毁顿齐聃言于帝曰齐戏公陛下外祖虽后嗣有罪不宜毁及先庙今周忠孝公庙反崇饰踰制恐非所以示海内帝悟有诏复献公官以无忌孙延主其祀齐聃善文诰帝爱之令侍皇太子及诸王属文以职枢剧许闲日一至坐漏禁中事贬蕲州长马 【旧书作苏州司马】 又流钦州卒睿宗时赠礼部尚书子坚

徐坚 【徐峤】

徐坚 【徐峤】

坚字符固幼有敏性沛王闻其名召见授纸为赋异之举秀才及第为汾州参军事迁万年主簿天授三年上言书有五听令有三覆虑失情也比犯大逆诏使者勘当得实辄决人命至重万有一不实欲诉无由以就赤族岂不痛哉此不足检下之奸乱适长使人威福耳臣请如令覆奏则死者无恨又古者罚不逮嗣故欲芮乱国而缺升诸朝嵇康蒙戮而绍死于难则于它亲不复致疑今选部广责逆人亲属至无服者尚数十条且诏书与逆同堂亲不任京畿总麻亲不得侍卫臣请如诏书外一切不禁以申旷荡圣历中东郡留守杨再思王方庆共引为判官方庆善礼乐尝就质疑晦坚为申释常得所未闻属文典厚再思每目为凤阁舍人样与徐彦伯刘知几张说与修三教珠英时张昌宗李峤总领弥年不下笔坚与说专意譔综条汇粗立诸儒因之乃成书累迁给事中封慈源县子中宗怒韦月将欲即斩之坚奏盛夏生长请须秋乃决时申救者亦众得以擢死俄以礼部侍郎为修文馆学士睿宗即位授太子左庶子兼崇文馆学士修史进东海郡公迁黄门侍郎 【按旧书载自刑部侍郎加银青光禄大夫拜左散骑常侍转黄门侍郎又叙封东海郡公于玄宗朝与此互异】 时监察御史李知古兵击姚州洱河蛮降之又请筑城使输赋徭坚议蛮方羈縻以属不宜与中国同法恐劳师远伐益不偿捐不听诏知古发剑南兵筑城堡列州县知古因是欲诛其豪酋入子女为奴婢蛮惧杀知古相率溃叛姚嵩路闭不通者数年初太平公主用事武攸暨屡邀请坚坚不许又以妻岑羲女弟固辞机密转太子詹事曰吾非求高逃祸耳羲败不染于恶出为绛州刺史数外徙久乃迁秘书监左散骑常侍玄宗改丽正书院为集贤院以坚充学士副张说知院事帝大酺集贤幔舍在百司上说令揭大榜以侈其宠坚见遽命撤之曰君子

乌取多尚人从上泰山以参定仪典加光禄大夫坚宽
厚长者于典故多所谙识凡七当譔次高选卒帝悼惜遣使就吊赠太子少保谥曰文齐
聃姑长为太宗充容仲为高宗婕好皆明图史议者以
坚父子如汉班氏坚子峤字巨山开元中为驾部员外郎集贤院直学士迁中书舍人内
供奉河南尹封慈源县公父子相次为学士自祖及孙
三世为中书舍人

△沈伯仪

沈伯仪湖州吴兴人武后时为太子右谕德初太常少卿韦万石议明堂大享事言
芄玄说祝五天帝王肃谓祀五行帝贞观礼从郑至显
庆礼祀昊天上帝干封诏书祀五天帝兼祀昊天上帝诏书从贞观礼仪凤初诏祀事一
用周制今应何乐高宗乃诏尚书省集诸儒议未能定
于是大享参用贞观显庆二礼垂拱元年成均助教孔玄义奏严父莫大于配天天于万
物为最大推父偶天孝之大尊之极也易称先王作乐
崇德殷荐之上帝以配祖考上帝天也昊天之祭宜祖考并配请以太宗高宗配上帝于
圜丘神尧皇帝配感帝于南郊祭法祖文王宗武王祖
始也宗尊也一名而有二义经称宗祀文王文王当祖而云宗包武王以言也知明堂以
祖考配与二经合伯仪曰有虞氏禘黄帝而郊啻祖顓
琐而宗尧夏后氏禘黄帝而郊鯀祖顓琐而宗禹殷人禘啻而郊冥祖契而宗汤周人禘
啻而郊稷祖文王而宗武王郑玄曰禘郊祖宗皆配食
也祭昊天圜丘曰禘祭上帝南郊曰郊祭五帝五神明堂曰祖宗此为最详虞夏退顓琐
郊啻殷舍契郊冥去取违舛惟周得礼之序至明堂始
两配焉文王上配五帝武王下配五神别父子也经曰严父莫大于配天又曰宗祀文王
于明堂以配上帝下言严武王以配夫则武王虽在明
堂未齐于配虽同祭而终为一主也纬曰后稷为天地主文王为五帝宗若一神而两祭
之则荐献数渎此神无二主也贞观永徽礼实专配由
显庆后始兼尊焉今请以高祖配圜丘方泽太宗配南北郊高宗配五天帝凤阁舍人元
万顷范履冰等议今礼昊天上帝等五祀咸奉高祖太
宗兼配以申孝也诗昊天卓二后受之易荐上帝配祖考有兼配义高祖太宗既先配五
祀当如旧请奉高祖厯配焉自是郊丘三帝并配云伯
仪厯国子祭酒修文馆学士卒

△路敬淳 【路敬潜】

路敬淳贝州临清人父文逸遇隋季大乱阖门死于盗文逸遁免流离辛苦自伤家
多难闭口不食行者哀其穷强饮食之更负以行乃得
脱贞观末官申州司马敬淳少力学足不履门居亲丧倚庐不出者三年服除号忤入门

形容癯毀妻不之识后擢进士第天授中再迁太子司
议郎兼修国史崇贤馆学士数受诏纂辑庆恤仪典武后称之尤明姓系自魏晋以降推
本其来皆有条序着姓略衣冠系录等百余篇后坐与
綦连耀父通下狱死神龙初赠秘书少监弟敬潜少与敬淳齐名位至中书舍人唐初姓
谱学惟敬淳名家其后柳冲韦述萧颖士孔至各有譔
次然皆本之路氏

△王元感

王元感濮州鄆城人擢明经高第补博城丞纪王慎为兖州都督厚加礼敕其子东
平王续往受业天授中稍迁左卫率府录事兼直弘文
馆武后时已郊遂享明堂封嵩山诏与韦叔夏等章仪注众推其练洽转四门博士仍直
弘文馆年虽老读书不废夜表上所譔书纠缪春秋振
滞礼绳愆等凡数十百篇丐官笔楮写藏秘书有诏弘文崇贤两馆学士成均博士议可
否祝钦明郭山恠李宪等本章句家见元感诋先儒同
异不怪数沮诘其言元感缘罅甲释竟不讫魏知古见其书叹曰五经指南也而徐坚刘
知几张思敬等惜其异闻每为助理联疏荐之遂下诏
褒美以为儒宗拜太子司议郎兼崇贤馆学士中宗以东宫旧僚加朝散大夫卒 【按唐
书此下有王绍宗传以行无可录今删】

△彭景直

彭景直瀛州河闲人中宗景龙末为太常博士时献昭于三陵皆日祭景直上言在
礼陵不日祭宗庙有月祭故王者设庙祧坛墀为亲疏
多少之杀立七庙一坛一墀曰考庙曰王考庙曰皇考庙曰显考庙皆月祭达庙为祧享
尝乃止去祧为坛去坛为墀有禱祭之无禱乃止谯周
曰天子始祖高祖曾祖祖考之庙皆朔加荐以象生时朔食号月祭二祧庙不月祭则古
无日祭者今诸陵朔望进食近古之殷事诸节进食近
古之荐新郑玄曰殷事月之朔半荐新奠也于仪礼朔半日犹常日朝夕也既大祥即四
时焉此其祭皆在庙云近世始以朔望诸节祭陵寝唯
四时及腊五享于庙寻经质礼无日祭于陵之文汉时京师自高祖下至宣帝与太上皇
悼皇考陵旁立庙园各有寝便殿故日祭诸寝月祭诸
便殿贡禹以礼节烦数白元帝愿罢郡国庙丞相韦玄成等后因议七庙外寝园皆无复
修议者亦以祭不欲数宜复古四时祭于庙刘歆引春
秋外传曰祖祢日祭曾高月祀二祧时享坛墀岁贡魏晋以降不祭墓臣谓宜罢诸陵日
祭如礼便帝不从因下诏有司言诸陵不当日进食夫
礼以人情为之沿革何专古而泥所闻于陵宜朝晡进奠昭献陵日一进或所司乏于费
可减朕常膳为之中宗崩葬定陵有司议以和思皇后

祔葬后为武后所杀不得其丧所将招魂合诸梓宫景直曰招魂古无传不可请如桥山藏衣冠故事纳后衾衣复寝宫举衣魂辂告以太牢内之方中奉帝梓棺右覆以夷衾众当其言制曰可景直后历礼部郎中卒

△卢粲

卢粲幽州范阳人后魏侍中阳乌五世孙祖彦卿亦善著书【按旧书云彦卿撰后魏纪二十卷行于时官至合肥令】粲始冠擢进士第神龙中【旧书作景龙二年】累迁给事中时节愍太子立韦后疾之讽中宗以卫府封物给东宫粲驳奏太子匕鬯主岁时服用宜取于百司周礼诸用财器岁终则会唯王及太子不会今乃与诸王齐衡非所谓宪章古昔者诏可武崇训死诏墓视陵制粲曰凡王公主墓无称陵者唯永泰公主事出特制非后人所援比崇训莹兆请视诸王诏曰安乐公主与永泰不异崇训于主当周穴为陵不疑粲执奏曰陵之称本施尊极崇训之亲不及雍王雍墓不称陵崇训安得缘主而假是名诏可主大怒出粲陈州刺史粲曰苟所论得行虽远何惮开元初为秘书少监其从父行嘉仕为雍王记室亦以学闻粲累封固安县侯终邠王傅卒谥曰景

△尹知章

尹知章绛州翼城人少勤学梦人持巨凿破其心以药纳之自是日益开朗尽通诸经精义长安中擢定王府文学迁太常博士中宗时议者欲以凉武昭王为始祖以备七庙之数知章议武昭远世非王业所因乃止出为陆浑令坐事辄弃官去时散骑常侍解琬亦罢归与知章覃思经术举欣欣然睿宗即位张说表诸朝擢礼部员外郎转国子博士马怀素绪定秘书奏知章是正文字每休沐讲授不辍于易老庄书尤悬解弟子贫者调给之性和厚人不见有喜愠未尝问产业其子欲广市樵米为岁中计知章曰如而计则贫人何以取资且吾尚应夺民利邪开元六年卒官所注传颇多行于时门人孙季良等颂其德刻着东都国子监门外季良河南偃师人一名翌仕历左拾遗集贤院直学士

△张齐贤

张齐贤陕州人圣历初为太常奉礼部武后诏百官议告朔于明堂读时令布政事京官九品以上四方朝集使皆列于廷太常博士辟闾仁谓曰经无天子月告朔唯玉藻天子听朔南门之外周礼太宰以正月之吉布政于邦国都鄙干宝曰建子月告朔日也此玉藻听朔同义今元日读时令合古听朔事独郑玄以秦制月令有五帝五官因言听朔必以特牲告时帝及神以文王武王配其言非是月令曰其帝太昊其神勾芒谓宣令告人使奉时务业月皆有令故云非天子月朔以配帝祭也告朔者诸侯礼

也春秋既视朔遂登台玄又说人君月告朔于庙其祭
为朝享鲁自文公始不视朔明非天子所行玄谓告帝即人帝神即重黎五官不言天子
拜祭臣请罢告朔月祭以应古礼齐贤不韪其说质曰
谷梁氏称闰月天子不告朔它月故告朔矣左氏言鲁不告闰朔为弃时政则诸侯虽闰
告朔矣周太史颁朔于邦搢玉藻闰月王居门是天子
虽闰亦告朔二家去圣不远所载当弗缪今议者乃以太宰正月之吉布治邦国而言天
子元日一告朔殊失其旨一岁之元六官自布所职之
典千宝谓吉为朔故世人谬吉为告据缪失经不得为法议者又引左氏说专在诸侯不
知玉藻与左说正同而独于天子言岁有一告何去取
之恣也又谓时帝五人帝也玄于时帝包天人故以文武作配是并告两五帝为不疑诸
侯受朔天子藏于庙天子受朔于天宜在明堂故告时
帝配祖考议者曰天子月告祭颁朔则诸侯安得藏之故太宰岁首布一岁事太史颁之
也是不然周太史颁朔邦国是总颁十二朔于诸侯天
子犹月告者颁官府都鄙也内外异言之也礼不可罢凤阁侍郎王方庆又推言明堂布
政之宫所以明天气统万物也汉儒以明堂太庙为一
宗祀其祖而配上帝取宗祀曰清庙正室为太室向阳为明堂建学为太学圜水为辟雍
异名同事古之制也天子以正月上辛总受十二月政
于南郊还藏于祖庙月取一政班之明堂诸侯则受于天子藏之祖庙月取一政行之于
国王者以其礼告庙谓之告朔视月之政谓之视朔玉
藻玄冕而朝日东门之外听朔南门之外郑玄说明堂在国阳就其时之堂而听朔焉卒
事宿路寝今元曰通天宫受朝有司遂读时令布政事
古之礼也旧说天子岁入明堂者十八大享一月告朔十二四时迎气四巡狩之岁一今
议者唯许岁首一入不亦隘乎陛下幸建明堂遵用告
朔事若月一听则近于烦每孟月视朔惟制定其礼臣下不敢专成均博士吴扬石等共
言秦灭学告朔废今用四孟月季夏至明堂告五时帝
堂上请兼如齐贤方庆议不数岁礼亦废久之齐贤迁博士时东都置太社礼部尚书祝
钦明问礼官博士周家田主用所宜木今社主石奈何
齐贤与太常少卿韦叔夏国子司业郭出恇尹知章等议春秋君以军行祓社衅鼓祝奉
以从故曰不用命戮于社社稷主用司以可奉而行也
崔灵庀曰社主用石以地产最实软吕氏春秋言殷人社用石后魏天平中迁太祖石主
其来尚矣周之田主用所宜木其民闲之社软非大社
也于是旧主长丈有六尺方尺七寸问博士云何齐贤等议社主之制礼无传天子亲征
载以行则非过重礼社祭上主阴气韩诗外传天子大
社方五丈诸侯半之五士数社主宜长五尺以准数五方二尺以准阴偶剡其上以象物

生方其下以象地体埋半土中本末均也请度以古尺
云又问社稷坛随四方用色而中不数尺冒黄土谓何齐贤等曰天子大社度广五丈分
四方上冒黄土象王者覆被四方然则当以黄土覆坛
上旧坛上不数尺覆被之狭乖于古于是以方色饰坛四面及陛而黄土全覆上焉祭牲
皆太牢其后改先农曰帝社又立帝稷皆齐贤等参定
中宗即位因武后东都庙改为唐庙议满七室以凉武昭王为始祖齐贤上议礼天子七
庙尊始封君曰太祖百代不迁始祖无闻焉殷自玄王
至汤周后稷至武王皆出太祖后合食有序景皇帝始封唐实为太祖以世数近故尚在
昭穆今乃上引武昭王为始祖异乎殷周之本高稷也
昭王国不世传后嗣失守景帝实始封唐子孙是承若近舍唐远引凉不见其司且魏不
祖曹参晋不祖司马印宋不祖楚元王齐梁不祖萧何
陈隋不祖胡公杨震今谓昭王为祖可乎汉以周郊后稷议欲郊尧杜林以为周兴自后
稷汉业特起功不缘尧卒不果郊武德初定去昭王尤
近不托祖者不可故也今而立之非祖宗意博士刘承庆尹知章又言受命之君王迹有
浅深代系有远迩祖以功昭穆以亲有功者不迁亲尽
者毁今不宜以庙数未备引当迁之主于昭穆上苟允七室也景皇帝既号太祖以世浅
犹在六室位则室未当有七非天子庙不当七也大帝
神主既祔宣皇帝当迁宣非始祖又无宗号亲尽而迁不可复立请仍为六室诏宰相详
裁于是祝钦明等上言博士等三百人为两说齐贤等
不祖武昭王刘承庆等请迁宣皇帝臣等欲皆可其奏诏可俄以孝敬皇帝为义宗列于
庙为七室西京太庙亦如之齐贤思迁谏议大夫卒

△柳冲

柳冲蒲州虞乡人隋饶州刺史庄曾孙父楚贤大业中为河北县长高祖兵兴尧君
素据郡固守楚贤说曰隋之亡天下共知唐公名在图
策动以诚信豪英景赴天所赞也君子见几而作俟终日邪君素不从楚贤潜行自归授
侍御史贞观中持节册拜突厥辞其遗不爱历交桂二
州都督杭州刺史皆有名冲好学多所研总天授初为司府寺主簿诏遣安抚淮南使还
封河东县男中宗景龙中迁左散骑常侍修国史初太
宗命诸儒撰氏族志甄差羣姓其后门胄兴替不常冲请改修其书帝诏魏元忠张锡萧
至忠岑羲崔湜徐坚刘宪吴兢及冲共取德功时望国
籍之家等而次之番部酋长袭冠带着析着别品会元忠等继物故至失天时复诏冲及
坚兢魏知古陆象先刘子元等讨缀书乃成号氏族系
录历太子宾客宋王傅昭文馆学士以老致仕开元二年诏冲与薛南金复加刊定奏上
五年卒

△马怀素

马怀素字惟白润州丹徒人客江都师事李善贫无资书樵夜辄然以读书遂博通经史擢进士第又中文学优赡科补郾尉积劳迁左台监察御史魏元忠为张易之构谪岭表太仆崔贞慎东宫率独孤祹之祖道易之怒使人上急变告贞慎等与元忠谋反武后诏怀素按之使者促迫怀素执不从曰贞慎饯流人当得罪以为谋斥则非昔彭越以逆诛栾布奏事尸下汉不坐罪今元忠罪非越比不宜坐饯别之人且陛下操生杀柄欲加之罪自当断自圣心既付臣按状惟知守陛下法耳后意解贞慎等乃免宰相李迥秀藉勿之势敛赋诿法怀素劾罢之转礼部员外郎以十道使黜陟江西处决平恕迁考功核取实才权贵谒请不能阿挠擢中书舍人内供奉为修文馆直学士开元初为户部侍郎封常山县公进兼昭文馆学士笃学手未尝废卷谦恭慎畏人推为长者玄宗诏与褚无量同为侍读更日番入既叩合肩舆以进或行在远听乘马宫中每晏见帝自送迎以师臣礼有诏句校秘书是时文籍盈漫皆奂朽蟫断签胜纷舛怀素建白愿下紫微黄门召宿学巨儒就校繆阙又言自齐以前旧籍王俭七志已详请采近书篇监乃诏国子博士尹知章等分部譔次怀素奏秘书少监卢僔崔沔为修图书副使秘书郎田可封康子元为判官然怀素不善著述未能有所绪别会卒赠润州刺史谥曰文

△殷践猷 【殷寅 殷亮】

殷践猷字伯起陈给事中不害五世从孙博学尤通氏族历数医方与贺知章陆象先韦述最善知章尝号为五总龟谓龟千年五聚问无不知也初为杭州参军举文儒异等科授秘书省学士用曹州司法参军兼丽正殿学士以叔父丧哀恸而卒少子寅举宏辞为太子校书出为永宁尉吏侮谩甚寅怒杀之贬澄城丞病且死以母萧老不忍决及敛其子亮断指翦发置棺中自誓事祖母如寅在其后侍萧疾不脱衣者数年有白燕巢其眉亮后终给事中杭州刺史 【嬰此下有孔若思传今改人圣裔】

钦定续通志卷五百三十八

●钦定续通志卷五百三十九 儒林传二

儒林传

唐 【二】

○唐二

褚无量 元行冲 陈贞节 施敬本 卢履冰 王仲邱

康子元 【侯行果】 赵冬曦 【陆坚 郑

钦说】 啖助 【赵匡 施士句 仲子陵】 韦彤 陈京

畅当 韦公肃 许康佐

褚无量

元行冲

陈贞节

施敬本

卢履冰

王仲邱

康子元 【侯行果】

赵冬曦

啖助 【赵匡 施士句 仲子陵】

韦彤

陈京

畅当

韦公肃

许康佐

△褚无量

褚无量字弘度杭州盐官人刻意坟典家滨临平湖有龙出人皆走观无量尚幼读书若不问众异之尤精礼与史记擢明经第累除国子博士迁司业兼修文馆学士中宗将南郊诏定仪典时祝钦明郭山恽建言皇后为亚献无量与太常博士唐绍戡钦绪固争以为郊祀国之大事其折中莫如周礼周礼冬至祭天圜兵不以地配唯始祖为主亦不以妣配故后不得与又太宗伯凡大祭祀王后不与则摄而荐豆笾彻是言不应助祭又内宰职大祭祀后裸献则赞瑶爵祭天无裸知此乃宗庙祭耳巾车内司服掌后六服与五路无后祭天之服与路是后不助祭天也惟汉有天地合祭皇后参享专末代黷神事不经见不可为法时左仆射韦臣源佐钦明故无量议格以母老解官玄宗为太子复召拜国子司业兼侍读撰翼善记以进厚被礼答太子释奠国学令讲经随端树义博敏而辩进银青光禄大夫锡子蕃渥及即位迁左散骑常侍兼国子祭酒封舒或公母丧庐墓左鹿犯所植松柏无量号诉曰出林不乏忍犯吾莹树耶自是羣鹿驯扰不复柎触无量为终身不御其肉丧除召复故官以耆老随仗听徐行又为设腰举许乘入殿中频上书陈得失开元五年帝将幸东都而太庙坏姚崇建言庙本符坚故殿不宜罢行无量鄂其言以为不足听乃上疏曰王者阴盛阳微则先祖见变今后宫非御幸者宜悉出之以应变异举骏良擢奢靡轻赋慎刑纳谏净察谄谀

继绝世则天人和会灾异讫息帝是崇语车驾遂东无量又上言昔虞舜之狩秩山川徧羣神汉孝景祀黄帝桥山孝武祠舜九疑高祖过魏祭信陵君墓过赵封乐毅后孝章祠桓谭冢愿陛下所过名山大川邱陵坟衍古帝王贤臣在祀典者并诏致祭自古受命之君必兴灭继绝崇德报功故存人之国大于救人之灾立人之后重于封人之墓愿到东都收叙唐初逮今功臣世绝者虽在古庶咸得承袭帝纳其言即诏无量词尧平阳宋璟祠舜蒲阪苏颋祠禹安邑在所刺史参献又求武德以来勋臣苗裔绍续其封初内府旧书自高宗时藏官中甲乙丛倒无量建请缮录补第以广秘籍天子诏于东都干元殿东厢部汇整比无量为之使因表闻喜尉卢僎江夏尉陆去泰左监门率府胄曹参军王择从武陟尉徐楚璧分部讎定卫尉设次光禄给食又诏秘书省司经局昭文崇文二馆更相检讎采天下遗书以益关文不数年四库完治帝诏羣臣观书无量又言贞观御书皆宰相署尾臣位卑不足以辱请与宰相联名跋尾不从帝西迁徙书丽正殿更以修书学士为丽正殿直学士比京官预朝会复诏无量就丽正纂续前功皇太子及四王未就学无量以孝经论语五通献帝帝曰朕知之矣乃选郗常亨郭谦光潘元祚等为太子诸王侍读七年太子齿胄于学诏无量升座讲劝百官观礼厚赉赐病因语人以丽正书未毕为恨卒帝闻悼痛诏宰相曰无量朕师宜用优典于是赠礼部尚书谥曰文所撰述百余篇没后有于书殿得讲史记至言十二篇上之帝叹息以绢五百匹赐其家 【按唐书此下附徐安贞传无迹足录今删】

△元行冲

元澹字行冲以字显后魏常山王素莲之后博学尤通故训及进士第累迁通事舍人狄仁杰器之尝谓仁杰曰下之事上譬富家储积以自资也脯腊膾腴以供滋膳参朮芝桂以防疾疢门下充旨味者多矣愿备一药石可乎仁杰笑曰君正吾药笼中物不可一日无也景云中授太常少卿行冲以系出拓跋恨史无编年乃撰魏典三十篇事详文约学者尚之初魏明帝时河西柳谷出石有牛继马之象魏收以晋元帝乃牛氏子冒司马姓以着石符行冲谓昭成皇帝名犍继晋受命独此可以当之有人破古冢得铜器似琵琶身正圆人莫能辨行冲曰此阮咸所作器也命易以木弦之其声亮雅乐家遂谓之阮咸开元初罢太子詹事出为岐州刺史兼关内按察使自以书生非弹治才固辞入为右散骑常侍东都副留守嗣彭王子志谦坐讎人告变考讯自诬株蔓四十人行冲察其枉列奏见愿四迁大理卿不乐法家固谢所居官改左散骑常

侍封常山县公充使检校集贤再迁太子宾客弘文馆学士先是马怀素撰书志褚无量校丽正四部书业未卒相次物故诏行冲并代之玄宗
自注孝经诏行冲为疏立于学官以老罢丽正校书事初魏光乘请用魏征类礼列于经帝命行冲与诸儒集议作疏将立之学乃引国子博士
范行恭四门助教施敬本采获刊缀为五十篇上于官于是右丞相张说建言戴圣所录向已千载与经并立不可罢魏孙炎始因旧书撙类相
比有如钞缀诸儒共非之至征更加整次乃为训注恐不可用帝然之书留中不出行冲意诸儒闲已因着谕自辨名曰释疑曰客问主人小载
之学康成之注魏氏乃有刊易二经孰优主人曰小载礼行于汉末马融为传卢植合二十九篇而为之解世所不传钩党狱起康成于窜伏之
中理纷拏之典虽存探究咨谋靡所具郑志者百有余科章句之徒曾不是省王肃因之或多攻诋而郑学有孙炎虽扶郑义条例支分箴石闲
起马佃增革尚逾百篇叶遵删修仅全十二魏氏病羣音之丛脞采众说之精简刊正芟
砮书毕以闻太宗嘉赏录赐储贰陛下纂业宜所循袭
乃诏诸儒甄分旧义岂悟章句之士坚持昔言摈压不申疑于知新果于仍故客曰当局称迷傍观必审何所为疑而不申列答曰改易章句是
有五难汉孔安国注古文尚书族兄臧与书曰相如常忿俗儒淫词冒义欲拨乱反正而未能也浮学守株众非难正自古而然恐此道未信而
独智为遣一也昔孔季产专古学有孔扶者与俗浮沈每诚产曰今朝廷率章句内学君独修古义危身之道也独善不容于世君其殆哉二也
刘歆好左氏欲建学官哀帝纳之诸儒迁延不肯置对歆移书请让诸博士皆忿恨袭胜时为光禄大夫见歆议乃乞骸骨司空师丹因大发怒
诋歆改乱前志非毁先帝所立歆惧出为五原太守以君宾之学公仲之博犹迫同门朋党之议卒令子骏负谤三也王肃规郑玄数十百条郑
学马昭诋劾肃短诏遣博士张融按经问诘融推处是非而肃酬对疲于岁时四也王粲曰世称伊雒以东淮汉以北康成一人而已咸言先儒
多阙郑氏道备粲窃嗟怪因求所学得尚书注退思其意意皆尽矣所疑犹未谕也凡有二篇王邵曰魏晋浮华古道湮替厯载三百士大夫耻
为章句唯草野生专经自许不能博究择从其善徒欲父康成兄子慎宁道孔圣误讳言郑服非然则郑服之外皆雠矣五也夫物极则变比及
百年当有明哲君子恨不与吾同世者道之行废必有其时何遽速近名之嫌邪俄旬致仕十七年卒赠礼部尚书谥曰献

△陈贞节

陈贞节颍川人开元初为右拾遗初隐章怀懿德节愍四太子并建陵庙分八署置

官列吏卒四时祠官进飧贞节以为非是上言王者制祀以功德者犹亲尽而毁四太子庙皆别祖无功于人而圜祠时荐有司守卫与列帝侔金奏登歌所以颂功德诗曰钟鼓既设一朝飧之使无功而颂不曰舞咏非度邪请罢卒吏诏祠官无领属以应礼典古者别子为祖故有大小宗若谓祀未可绝宜许所后子孙奉之诏有司博议驾部员外郎裴子余曰四太子皆先帝冢嗣列圣念懿属而为之享春秋书晋世子曰将以晋畀奏奏将祀子此不祀也又言神不歆非类君祀无乃戾乎此有庙也鲁定公元年立炀宫炀伯禽子季氏远祖尚不为限况天子笃亲亲以及旁替谁不曰然太常博士段同曰四陵庙皆天子睦亲继绝也逝者锡莘繁犹生者之开茅土古封建子弟诂皆有功生无所讥死乃授礼停祠人其谓何隐于上伯祖也服緦章怀伯父也服替懿德节愍堂昆弟也服大功亲未尽庙不可废礼部尚书郑惟忠等二十七人亦附其言于是四陵庙惟减吏卒半它如旧迁太常博士玄宗奉昭成皇后祔睿宗室又欲肃明皇后并升焉贞节奏曰庙必有配一帝一后礼之正也昭成皇后有太姒之德宜升配睿宗肃明皇后既非子贵宜在别庙周人奏夷则歌小吕以享先妣先妣姜嫄也以生后稷故特立庙曰闕宫晋简文帝郑宣皇后不配食筑宫于外以岁时致享肃明请准周姜嫄晋皇后纳主别庙时享如仪于是留主仪坤庙诏隶太庙毋置官属贞节又与博士苏献上言睿宗于孝和弟也按贺循说兄弟不相为后故殷盘庚不序阳甲而上继先君汉光武不嗣孝成而上承元帝晋怀帝继世祖不继惠帝故阳甲孝成出为别庙又言兄弟共世昭穆位同则毁二庙有天下者从祢而上事七庙尊者所统广故及远祖若容兄弟则上毁祖考天子不得全事七世矣请以中宗为别庙大裕则合食太祖奉睿宗继高宗则裸献永序诏可及奉中宗别庙升睿宗为第七室五年太庙坏天子舍神主太极殿营新庙素服避正寝三日不朝犹幸东都伊阙男子孙平子上书曰乃者正月太庙毁此跻二帝之验也鲁文公之二年跻僖于闵上后太室坏春秋书其灾说曰僖虽闵兄尝为之臣臣居君上是为失礼故太室坏且兄臣于弟犹不可跻弟尝臣兄乃可跻乎陛下未祭孝和先祭太上皇先臣后君昔跻兄弟上今弟先君祭昔太室坏今太庙毁与春秋正同不可不察武后篡国孝和中兴有功令内主别祠不得立于世亦已薄矣夫功不可弃君不可下长不可轻且臣继君犹子继父故禹不先鯀周不先不窋宋郑不以帝乙厉王不肖犹尊之也况中兴邪晋太康中宣帝庙地陷梁折又三年太庙殿陷而及泉更营之梁又折天之所谴非必朽而坏也晋不承天故及于乱臣谓宜迁孝和还庙何必

违礼下同鲁晋哉帝异其言诏有司复议贞节献与博士冯宗质之曰天子七庙三昭三穆与太祖而七父昭子穆兄弟不与焉殷自成汤至帝乙十二君其父子世六易干凿度曰殷之帝乙六世壬则兄弟不为世矣殷人六庙寝庙四并汤而六殷兄弟四君若以为世方上毁四室乃无祖祢是必不然古者繇祢极祖虽迭毁迭迁而三昭穆未尝阙也礼大宗无子则立支子又曰为人后者为之子无兄弟相为后者故舍至亲取远属父子曰继兄弟曰及兄弟不相入庙尚矣借有兄弟承统告享不得称嗣子嗣孙乃言伯考伯祖何统绪乎殷十二君惟三祖三宗明兄弟自为别庙汉世祖列七庙而惠帝不与子孙昌衍晋景帝亦文帝兄景绝世不列于庙今谓晋武帝越崇其父而庙毁及亡何汉出惠帝而享世长久乎七庙五庙明天子诸侯也父子相继一统也昭穆列序重继也礼兄弟相继不得称嗣子明睿宗不父孝和必上继高宗者偶室于庙则为二穆于礼可乎礼所不可而使天子旁绍伯考弃己亲正统哉孝和中兴别建圜寝百世不毁尚何议哉平子猥引僖公遂祀为比殊不知孝和升新寝圣真方祔庙则未尝一日居上也帝语宰相召平子与博士详论博士护前言合轹平子平子援经辩数分明献等不能屈苏颺右博士故平子坐贬都城尉然诸儒以平子孤挺见连于礼官不平帝亦知其直久不决然卒不复中宗于庙明年帝将大享明堂贞节恶武后所营非古所谓木不镂土不文之制乃与冯宗上言明堂必直丙己以宪房心布政太微上帝之所武后始以干元正寝占阳午地先帝所以听政故毁殿作堂撤之日有音如雷庶民哗讪以为神灵不悦堂成灾火从之后不修德俄复营构殫用极侈诡襍厥变又欲严配上帝神安肯临且密迩掖庭人神杂扰是谓不可放物者也二京上都四方是则天子听政乃居便坐无以尊示羣臣愿以明堂复为干元殿使人识其旧不亦愈乎诏所司详议刑部尚书王志愔等签谓明堂瓌怪非法天炆之余不容大享请因旧循制还署干元正寝正至天子御以朝会若大享复寓圜丘制曰可贞节以寿卒

△施敬本

施敬本润州丹阳人开元中为四门助教玄宗将封禅诏有司讲求典仪旧制盥手洗爵皆侍中主之诏祀天神太祝主之敬本上言曰周制大宗伯郁人下士二掌裸事汉无郁人用近臣汉世侍中微甚籍孺闾孺等幸臣为之后汉郡闾自侍中迁步兵校尉秩千石其职省起居执虎子盖褻臣也今侍中为宰相非郁人比祝者荐主人意于神非贱职也古二君相见卿为上宾况天人际哉周太祝下大夫二上士四下大夫

今郎中太常丞之比下士员外郎博士之比汉太祝令秩六百石今太祝乃下士以下士接天以大臣奉天子轻重不伦非礼也旧制谒者引太尉升坛谒者位下升坛礼重汉尚书御史属有谒者仆射一秩六百石铜印青绶谒者三十五以郎中满岁称给事中未岁称谒者光禄勋属有谒者掌宾赞员七十秩比六百石则古谒者名秩差异等今谒者班微循空名忘实事非所以事天也帝诏中书令张说引敬本熟悉其议故侍中祝谒者视礼轻重以它官摄领敬本以太常博士为集贤院修撰踰年迁右补阙秘书郎卒

△卢履冰

卢履冰幽州范阳人元魏都官尚书义僖五世孙开元五年仕历右补阙建言古者父在为母期彻灵而心丧武后始请同父三年非是请如礼便玄宗疑之又以舅甥嫂叔服未安并下百官议邢部郎中田再思曰会礼之家心聚讼循古不必是而行今未必非父在为母三年高宗实行之着令已久何必乖先帝之旨阋人子之情爱一期服于其亲使与伯叔母姑姊妹同嫂叔舅甥服太宗制之阅百年无异论不可改履冰因言上元中父在为母三年后虽请未用也逮垂拱始行之至有祖父母在而子孙妇歿行服再替不可谓宜礼女子无专道故曰家无二尊父在为母服替统一尊也今不正其失恐后世复有妇夺夫之败不可不察书留未下履冰即极陈父在为母立几筵者一替心丧者再替父必三年而后娶以达子之志夫圣人岂蔑情于所生固有意于天下昔武后阴储篡谋豫自光崇升替齐抗斩袁俄而乘陵唐家以启衅阶孝和仅得反正韦氏复出几亡宗社故臣将以正夫妇之纲非特母子闲也议者或言降母服非诗所谓罔极者而又与伯叔母姑姊妹等且齐斩已有升降则岁月不容异也此迂生鄙儒未习先王之旨安足议夫礼哉罔极者春秋祭祀之时思之之谓君子有终身之忧何限一替二替服哉圣人之于礼必建中制使贤不肖共成文理而后释彼伯叔姑姊乌有筵杖之制三年心丧乎为母服齐衰为父服斩衰不易之道也左散骑常侍元行冲议曰古缘情制服故子天父妻天夫斩衰三年情礼俱尽者因心立极也妻丧林替情礼杀者远嫌疑尊干道也为嫡子三年斩衰而不去官尊祖重嫡崇其礼杀其情也孝莫大于严父故父在为母免官齐而替心丧三年情已申而礼杀也自尧舜周公孔子所同而今舍尊厌之重亏严父之义谓之礼可乎姨兼从母之名以母之女党加以舅服不为无礼嫂叔不服则远嫌也请据古为适帝弗报是时言丧服各以所见奋交口纷腾七年乃下诏服纪一用古制自是父在者为母服或替而禫禫而释心丧三年

或暮而禫终三年或齐衰三年后履冰以官卒

△王仲邱

王仲邱沂州琅琊人祖师顺仕高宗议漕输事有名当时终司门郎中仲邱开元中
历左补阙内供奉集贤修撰起居舍人时典章差驳仲
邱欲合贞观显庆二礼据有其举之莫可废之之义即上言贞观礼正月上辛祀感帝于
南郊显庆礼祀昊天上帝于圆丘以祈谷臣谓诗春夏
祈谷于上帝礼上辛祈谷于上帝则上帝当昊天矣郑玄曰天之五帝递王王者必感一
以兴故夏正月祭所生于郊以其祖配之因以祈谷感
帝之祀贞观用之矣请因祈谷之坛徧祭五方帝五帝者五行之精九谷之宗也请二礼
皆用贞观礼雩祀五方上帝五人帝五官于南郊显庆
礼祀昊天上帝于圆丘臣谓雩上帝为百谷祈甘雨故月令大雩帝用盛乐郑玄说帝上
帝也祀于圆丘尊天位也显庆祀昊天与月令合而贞
观尝祀五帝矣请二礼皆用贞观礼季秋祀五方帝五官于明堂显庆礼祀昊天上帝于
明堂臣谓用郊祀后稷以配天宗祀文王于明堂以配
上帝先儒以天为感帝引太微五帝着之上帝则属之昊天郑玄称用官旅上帝祀五帝
各文而异礼不容并而为一故于孝经天上帝申之曰
上帝亦天也神无二主但异其处以避后稷今显庆享上帝合于经然贞观尝祀五方帝
矣请二礼皆用诏可迁礼部员外郎卒赠秘书少监

△康子元 【侯行果】

康子元越州会稽人仕历献陵令开元初诏中书令张说举能治易老庄者集贤直
学士侯行果荐子元及平阳敬会真于说说以闻其得
侍读子元累擢秘书少监会真四门博士俄皆兼集贤侍读学士玄宗将东之泰山说引
子元行果徐坚韦绛商裁封禅仪初高宗之封中书令
许敬宗议周人尚臭故前祭而燔柴说坚子元奏周官乐六变天神降是降神以乐非缘
燔也宋齐以来皆先啜福酒乃燎请先祭后燔如贞观
礼便行果与赵冬曦议以为先燎降神尚矣若祭已而燔神无由降子元执议如前说曰
康子独出蒙输以当一队邪议未判说请决于帝帝诏
后燔乘輿自岱还减从官先次东都唯子元母奘韦述以学士从久乃徙宗正少卿以疾
授秘书监致仕卒赠汴州刺史行果者上谷人历国子
司业侍皇太子读卒赠庆玉傅始行果会真及长乐冯朝隐同进讲朝隐能推索老庄秘
义会真亦喜老子每启篇先熏盥乃读帝曰我欲更求
善易者然无贤于行果云

△赵冬曦

赵冬曦定州彭城人进士擢第历左拾遗神龙初上书曰古律条目千余隋时奸臣

侮法着律曰律无正条者出罪举重以明轻入罪举轻以明重一辞而废条目数百自是轻重沿爱憎被罚者不知其然使贾谊见之恸哭必矣夫法易知则下不敢犯而远机穿文义深则吏乘便而朋附盛律令格式谓宜刊定科条直书其事以准加减比附量情及举轻以明重不应为之类皆勿用使愚夫愚妇相率而远罪犯者虽贵必坐律明则人信法一则主尊当时称是开元初迁监察御史坐事流岳州召还复官与秘书少监贺知章校书郎孙季良大理评事咸廩业人集贤院修撰未几知吏官事迁考功员外郎踰年除直学士俄迁中书舍人内供奉以国子祭酒卒冬曦性放达不屑世事兄夏日弟和璧安贞居贞颐贞汇贞皆擢进士第开元时任集贤学士者又有尹愔陆坚郑钦说卢僎名稍着 【按唐书此下附尹愔以行无可录今删】

陆坚

郑钦说

陆坚

陆坚河南洛阳人初为汝州参军以友壻李慈伏诛贬涪州参军再迁通事舍人有诏起复遣中官敦谕不就以给事中兼学士善书初名友悌玄宗嘉其刚正更赐名从封泰山封建安男帝待之甚厚图形禁中亲制赞以秘书监卒赠吏部尚书谥曰懿

郑钦说

郑钦说后魏濮阳太守敬叔八世孙开元初繇新津丞请试五经擢第授巩县尉集贤院校理历右补阙内供奉通历术博物初梁太常任昉大同四年七月于钟山圻中得铭曰龟言土蓍言水甸服黄钟启灵址瘞在三上庚墮遇七中己六千三百浹辰文二九重三四百圻当时莫能辨者因藏之戒诸子曰世世以铭访通人昉五世孙升之隐居商洛写以授钦说钦说出使得之于长乐驿至敷水三十里而悟曰卜宅者瘞葬之岁月而先识墓圻日辰甸服五百也黄钟十一也繇大同四年却求汉建武四年凡五百一十一年葬以三月十日庚寅三上庚也圻以七月十二日己巳七中己也浹辰十二也建武四年三月至大同四年七月六千三百一十二月月一交故曰六千三百浹辰交二九十八也重三六也建武四年三月十日距大同四年七月十二日十八万六千四百日故曰二九重三四百圻升之惊服其智钦说雅为李林甫所恶韦坚死欲说时位殿中侍御史以常为坚判官贬夜郎尉卒子克钧为都官郎中吐蕃围灵州军饷匱竭德宗以克钧为灵夏二州运粮使转米峙塞下守者遂安 【按唐书此下附卢供无迹可录今删】

△啖助 【赵匡 施士句 仲子陵】

啖助字叔佐赵州人后徙关中淹该经术天宝末调临海尉丹阳主簿秩满屏居善为春秋考三家短长缝绽漏阙号集传凡十年乃成复撮其纲条为例统其言孔之修春秋意以为夏政忠忠之敝野商人承之以敬敬之敝鬼周人承之以文文之敝僮救僮莫若忠夫文者忠之末也设教于本其敝且末设教于末敝将奈何武王周公承商之敝不得已用之周公歿莫知所以改故其敝甚于二代孔子伤之曰虞夏之道寡怨于民商周之道不胜其敝故曰后代虽有作者虞帝不可及已盖言唐虞之化难行于季世而夏之忠当变而致焉故春秋以权辅用以诚断礼而以忠道原情不拘空名不尚狷介从宜揅乱因时黜陟古语曰商变夏周变商春秋变周而公羊子亦言乐道尧舜之道以拟后圣是知春秋用二帝三王法以夏为本不壹守周典明矣又言幽厉虽衰雅未为风逮平王之东人习余化苟有善恶当以周法正之故断自平王之季以隐公为始所以拯薄勉善揅周之敝革礼之失也助爱公谷二家以左氏解义多谬其书乃出于孔子门人且论语孔子所引率前世人老彭伯夷类非同时而言左丘明耻之丘亦耻之丘明盖如史佚迟任者又左氏传国语属缀不伦叙事乖刺史非一人所为盖左氏集诸国史以释春秋后人谓左氏便传着丘明非也助之凿意多此类赵匡陆质其高弟也助卒质与其子异哀录助所为春秋集注总例请匡损益质纂会之号纂例匡字伯循河东人历洋州刺史质所称为赵夫子者大历时助匡质以春秋施士句以诗仲子陵袁彝韦彤韦莹以礼祭广成以易强蒙以论语皆自名其学而士句子陵最卓异士句吴人兼善左氏春秋以二经教授繇四门助教为博士秩满当去诸生封疏乞留凡十九年卒于官弟子共葬之士句譔春秋传未甚传后文宗喜经术宰相李石因言士句春秋可读帝曰朕见之矣穿凿之学徒为异同但学者如浚井得美水而已何必劳苦旁求然后为得邪子陵蜀人好古学举贤良方正擢太常博士通后养大小戴礼有司请正太祖东向位而迁献懿二主子陵议藏主德明兴圣庙其言典正后异论纷沓复为通难示诸儒诸儒不能诘久之典黔中选补乘传过家四人以为荣终司门员外郎子陵以文义自怡及亡其家所存惟图书及酒数斛而已

△韦彤

韦彤京兆人治礼德宗时为太常博士先此天宝中诏尚食朔望进食太庙天子使人侍祠有司不与也贞元十二年帝始诏朔望食俾宗正太常合供于是彤与博士裴堪议曰礼宗庙朔望不祭围寝则有之贞观开元闲在

礼若令不敢变古天宝中始有进食事殆王琦缘生事
亡用燕具褻饌参渎礼荐不可示远传曰祭非外至生于心者也是故圣人等牲牢布筮
豆昆虫草木可荐者莫不咸在所以享宗庙交神明全
孝敬也洁膳羞八珍百品可嗜之饌美臠甘旨谓之褻味所以燕宾客接人情示慈惠也
是则荐与宴圣人判为二物不可乱也今若熟饗而享
非以异为敬之意且祭不欲数亦不欲疏感时致享以制中也今围寝月二祭不为疏庙
岁五享不为数若又加监饌于朔望是失礼之中王者
稽古弗敢以孝思之极而溢礼弗敢以肴品之多而剩味愿罢天宝所增奉围寝以珍奉
宗庙以礼两得所宜帝曰是礼先帝裁定遽更之其谓
朕何徐议其可而朔望食卒不废会昭陵寝宫为原火延燔而客祭瑶台佛寺又故宫在
山上乏水泉作者惮劳欲即行宫作寝诏宰相百官议
彤议曰先王建都立邑不利赐为之迁况有故邪今文寝灾徙而宫之非无故也神安于
徙因而建寝于礼至顺又他陵皆在柏城随便营作不
越封兆力省易从帝重改先帝制还宫山颠彤卒后武宗会昌五年诏京城不许羣臣作
私庙宰相李德裕等引彤所议古制庙必中门之外吉
凶皆告以亲而尊之不自专也今俾立庙京外不能得其意于礼宫之南九坊三坊曰围
外地荒左立庙无嫌余六坊司禁诏不许听准古即居
所立庙

△陈京

陈京字庆复陈宜都王叔明五世孙父兼为右补阙翰林学士京善文辞常袞称之
妻以兄子擢进士第累迁太常博士德宗在奉天闻段
秀实为贼所害七日不朝宰相以为方多难时不宜壅万几天下其谓何京曰丞相之言
非也夫褻大节恤贤臣天下所以安况卓卓特异者乎
帝曰善还京师擢左补阙帝以卢■〈木巳〉为饶州刺史京与赵需裴售宇文炫卢景
亮张荐共劾■〈木巳〉辅政大臣踰时月不得对百
官懍懍常若兵在颈陛下复为之奸贼唾掌复兴帝不听京等争尤确帝大怒左右辟易
谏者稍引却京正色曰需等毋遽退极道不可以死请
■〈木巳〉遂废帝之立迎访太后久不得意且怠京密白第遣使物色以求帝大悟终
代不敢置初玄宗肃宗既祔室迁献懿二祖于西夹室
引太祖位东向礼仪使于休烈议献懿属尊于太祖若合食则太祖位不得正请藏二祖
神主以太宗中宗睿宗肃宗从世祖南向高宗玄宗从
高祖北向禘祫不及二祖凡十八年建中初当大祫京以太常博士上言春秋之义毁庙
之主陈于太祖未毁庙之主合食于祖无毁庙迁主不
享之言唐家祀制与周异周以后稷为始封祖而毁主皆在后稷下故太祖东向常统其

尊司马晋以高皇太皇征西等四府君为别庙大禘祫
则正太祖位无所屈别庙祭高太以降所以叙亲也唐家宜别为献懿二祖立庙禘祫则
祭太祖遂正东向位德明兴圣二帝向已有庙则藏祫
二祖为宣诏百官普议礼仪使太子少师颜真卿曰今议者有三一谓献懿亲远而迁不
当祫宜藏主西堂二谓二祖宜祫食与太祖并昭穆阙
东向位三谓引二祖祫禘即太祖永不得全其始宜以二主祫德明庙虽然于人神未厌
也景帝既受命始封矣百代不迁矣而又配天尊无与
上至禘祫时颛屈昭穆以申孝尊先实明神之意所以教天下之孝也况晋蔡谟等有成
议不为无据请大祫享奉献主东向懿主居昭景主居
穆重本尚顺为万代法夫祫合也有如别享德明是乃分食非合食也时议者举然于是
还献懿主祫于庙如真卿议贞元七年京为考功员外
郎又言兴圣皇帝则献之曾祖懿之高祖以曾孙之主而祫曾高之庙人情大顺也帝诏
尚书省会百官国子儒官明定可否议未决十九年将
禘祭京复奏禘祭大合祖宗必尊太祖位正昭穆请诏百官议尚书左仆射姚南仲等请
奉献懿主祫德明兴圣庙鸿臆卿王权申衍之曰周人
祖文王宗武王故诗清庙章曰祀文王也故不言太王王季则太王王季而上皆祫后稷
故清甫得祀文王也太王王季之尊私礼也祫后稷庙
不敢以私夺公也古者先王迁庙主以昭穆合藏于祖庙献懿主宜附兴圣庙则太祖东
向得其尊献懿主归得其所是时言祫兴圣庙什七八
帝泮然于是定迁二祖于兴圣庙凡禘祫一享景皇帝遂东向京自博士献议弥二十年
乃决诸儒无后言帝赐京绯衣银鱼昭陵寝占山上宦
侍惮挽汲乏请更其所宰相未能抗京曰此太宗之志其俭足以为后世法不可改议者
多附宦人帝曰京议善卒不徙帝器京谓有宰相才欲
用之会病狂易自刺弗殊又言中书舍人崔邠御史中丞李文讷已帝使诘辨无状然犹
自考功员外再迁给事中皆兼集贤殿学士帝疑京为
忌者中伤中人问赉相继后对延英帝谕遣京沮骇走出罢为秘书少监卒无子以从子
褒嗣

△畅当

畅当河东人父瓘左散骑常侍代宗时待制集贤院终户部尚书当进士擢第贞元
初为太常博士昭德皇后崩中外服除皇太子诸王将
服三年诏太常议太子服当与博士张荐柳冕李吉甫曰子为母齐衰三年盖通丧也太
子为皇后服古无文晋元皇后崩亦疑太子服杜预议
古天子三年丧既葬除服魏亦以既葬为节皇太子与国为体若不变除则东宫臣仆亦
以衰麻出入殿省太子遂以卒哭除服贞观十年六月

文德皇后崩十一月而葬太子丧服之节国史不书至明年正月以晋王为并州都督既命官当已除矣今皇太子宜如魏晋制既葬而虞虞而卒哭卒哭而除心丧三年宰相刘滋齐映召问当等小食于有丧者之侧未尝饱也今太子以衰服侍膳至葬可乎令羣臣齐衰三十日公除宜约以为服限乃请如宋齐皇后为其父母服三十日除入谒则服墨繆还宫衰麻右补阙穆质上疏言父在为母替古礼也臣谓三年则太重唯行古为得礼德宗遣内常侍马钦叙谓质曰太子有抚军监国问安侍膳之事有司请三十日除既葬释服以墨衰终是何疑耶质又言公除非古也入公门变服今替丧以下繆制是也太子晨昏侍非公除比墨衰夺情事缘金革今不监国抚军何抑夺邪子之于父母礼异而情均太子奉君父之日达报母之日少忍使失令名哉乃诏宰臣与有司更议当等曰礼有公门脱齐衰开元礼皇后父母服十二月从朝旨则十三日而除皇太子外祖父母服五月从朝旨则五日而除恐丧服入侍伤至尊之意非特以金革夺也太子公除以墨繆奉朝归宫衰麻酌变为制可也宰相乃令太常卿郑叔则草奏既葬卒哭十一月小祥十三月大祥十五月禫内谒即墨服从之及董晋代叔则为太常卿帝曰皇太子服期繇谏官初非朕意畅当等请循魏晋故事至论也当以果州刺史卒 【按唐书此下有林蕴传今移附韦泉传后】

△韦公肃

韦公肃隋仪同观城公约七世孙元和初为太常博士兼修撰宪宗将耕藉诏公肃草具仪典宪宗善之太子少傅判太常卿事郑余庆庙有二祖妣疑于祔祭请诸有司公肃议古诸侯一娶九女故庙无二嫡自秦以来有再娶前娶后继皆嫡也两祔无嫌晋骠骑大将军温峤继室三疑并为夫人以问太学博士陈舒舒曰妻虽先没荣辱并从夫礼祔于祖姑祖姑有三则各推舅之所生是皆夫人也生皆正礼歿不可贬于是遂用舒议且嫡继于古有殊制于今无异等祔配之典安得不同卿士之寝祭二妻庙亨可异乎古继以媵妾今以嫡妻不宜援一娶为比使子孙荣享不逮也或曰春秋鲁惠公元妃孟子卒继室以声子声子孟侄娣也不入惠庙宋武公生仲子归于鲁生桓公而老薨立宫而奉之不合于惠公而别宫者何追父志也然其比奈何曰晋南昌府君庙有荀辞两氏景帝庙有夏侯羊两氏唐家睿宗室则昭成肃明二后故太师颜真卿祖室有殷柳两氏二夫人并祔故事则然诸儒不能异初睿宗祥月太常奏朔望弛朝尚食进蔬具止乐余日御便殿具供奉仗中书门下官得侍它非奏事毋谒前忌与晦三日后三日皆不听事忌晦之明日百官叩侧门通慰

后遂为常及是公肃上言礼忌日不乐而无忌月唯晋穆帝将纳后疑康帝忌月下其议有司于是荀纳王洽等引忌时忌岁讥破其言今有司仍前所禁在二十五月限有弛朝彻乐事丧除则礼革王者不以私怀踰礼节故禫礼后月乐渐去其情也不容追达而立礼反重今兹太常虽郊庙乐且停习是谓反重以慢神也有司悉禁中外作乐是谓无故而彻也愿依经谊裁正其违有诏中书门下召礼官学官议咸曰宜如公肃所请制可以寿卒

△许康佐

许康佐贞元中举进士又中宏辞科家苦贫母老求为知院官人讥其不择禄及母丧已除凡辟命皆不就人乃知其为亲屈由是有名迁侍御史以中书舍人为侍讲学士与王起皆为文宗宠礼帝读春秋至阍弑吴子余祭问阍何人邪康佐以中官方强不敢对帝嘻笑罢后观书蓬莱殿召李训问之对曰古阍寺今宦人也君不近刑臣以为轻死之道孔子书之以为戒帝曰朕迩刑臣多矣得不虞哉于是内谋翦除矣康佐知帝指因辞疾罢为兵部侍郎迁礼部尚书卒赠吏部尚书谥曰懿 【按旧唐书载康佐撰九鼎记四卷】

钦定续通志卷五百三十九

●钦定续通志卷五百四十 儒林传三

儒林传

宋 【一】

○宋一

孙奭 王昭素 孔维 李觉 崔颐正 【偃佺】 李之

才

孙奭

王昭素

孔维

李觉

崔颐正 【崔偃佺】

李之才

△孙奭

孙奭字宗古博州博平人幼好学徙居须城九经及第为莒县主簿上书愿试讲说迁大理评事为国子监直讲太宗幸国子监召讲尚书说命称旨赐五品服真宗即位以为诸王府侍读 【按东都事略云为诸王府直讲校正六经正义】 会诏百官转对奭上十事累迁工部郎

中擢龙图阁待制爽以经术进守道自处即有所言未尝阿附取悦大中祥符初得天书于左承天门帝将奉迎召宰相对王旦等曰天赐符命实盛德之应皆再拜称万岁召问爽爽对曰臣愚所闻天何言哉岂有书也四年帝将祝汾阴时大旱京师近郡谷踊贵爽上疏谏曰先王卜征五年岁习其祥祥习则行不习则增修德而改卜陛下始毕东封更议西幸殆非先王慎重之意其不可一也夫汾阴后土事不经见昔汉武帝将封禅故先封中岳祠汾阴始巡幸郡县遂有事于友山今陛下既已登封复欲幸汾阴其不可二也古者圜兵方泽所以郊祀天地今南北郊是也汉初承秦唯立五畤以祀天而后土无祀故武帝立祠于汾阴自元成以来从公卿之议遂徙汾阴后土于北郊后之王者多不祀汾阴今陛下已建北郊乃舍之而远祀其不可三也西汉都雍去汾阴至近今陛下经越险阻轻弃京师根本而慕西汉之虚名其不可四也唐以河东为王业所起之地故明皇间幸河东因祠后土本朝之兴事与唐异而陛下无故欲祀汾阴其不可五也比年以来水旱相继陛下宜侧身修德以答天谴岂宜下徇奸回远劳民庶忘社稷之大计其不可六也夫雷以二月启蛰八月收声失时则为异今震雷在冬为异尤甚而陛下未悟殆失天意其不可七也夫民神之主也是以圣王先成民后致力于神今水旱作沴饥馑洊臻乃欲劳民事神神其享之乎其不可八也陛下必欲为此者不过效汉武帝唐明皇刻石颂功而已陛下天资圣明当慕二帝三王何为下袭汉唐之虚名其不可九也唐明皇狃于承平肆行非义稔致祸败今议者引开元故事以为盛烈乃欲导陛下为之臣窃为陛下不敢此其不可十也臣言不逮意愿少赐清问以毕臣说帝遣内侍皇甫继明就问又上疏曰陛下将幸汾阴而京师民心弗宁江淮之众困于调发且土木之功未息而夺攘之盗公行敌国治兵不远边境使者虽至宁可保其心乎春秋传曰国之将兴听于民将亡听于神愚臣非敢妄议惟陛下终赐裁择是时羣臣争言祥瑞爽又言五载巡狩虞书常典观民设教羲易明文何须紫气黄云始能封岳嘉禾异草然后省方今乃野鷗山鹿并形奏简秋旱冬雷率皆称贺孰谓上天为可罔下民为可愚后世为可欺乎六年帝将幸亳州祠太清宫又上疏言陛下多效明皇所为臣愿陛下抑损虚华斥远邪佞罢兴土木不袭危乱之迹帝以为封泰山祠汾阴上陵祀老子非始于明皇开元礼今世所循用不可以天宝之乱举谓为非也泰为无道甚矣今官名诏令郡县犹袭秦旧岂以人而废官乎作解疑论以示羣臣然知爽朴忠虽其言切直容之而弗斥久之以父老请归田里不许命知密州居二年迁左谏议大夫还朝

察在京刑狱是时初置天庆天祺天颺先天降圣节天下设斋醮爽又请裁省浮用不报
复出知河阳又求解官就养迁给事中徙兖州天禧中
朱能献干佑天书复上疏曰朱能者奸憝小人妄言祥瑞而陛下崇信之屈至尊以迎拜
归秘殿以奉安上自朝廷下及闾巷靡不痛心疾首反
唇腹非而无敢言者昔汉文成将军以帛书饭牛既而言牛腹中有奇书杀视得书天子
识其手迹又有五利将军妄言方多不售二人皆坐诛
先帝时有侯莫陈利用者以方术暴得宠用一旦发其奸诛于郑州汉武可谓雄材先帝
可谓英断唐明皇得灵宝符上清护国经宝券等皆王
鉞田同秀等所为明皇不能显戮怵于邪说自谓德实动天神必神我心玩居常之安居
熟导谏之说内惑宠嬖外任奸回曲奉鬼神过崇妖妄
今日见老君于阁上明日见老君于山中大臣尸禄以将迎端士畏威而缄默既惑左道
即紊政经民心用离变起仓卒当是之时老君宁肯御
兵宝符安能排难邪今朱能所为颇类王鉞等愿陛下思汉武之雄材发先帝之英断鉴
明皇之召祸庶几灾害不生祸乱不作未几能果败爽
又尝请减修寺度僧帝虽未用其言尝令向敏中谕令陈时政得失爽以纳谏恕直轻徭
薄敛四事为言颇施行焉仁宗即位宰相请择名儒以
经术侍讲读乃召为翰林侍读学士知审官院判国子监修真宗实录兼判太常寺及礼
院三迁兵部侍郎龙图阁学士每讲论至前世乱君亡
国必反复规讽尝画无逸图上之帝施于讲读阁时庄献明肃皇后每五日一御殿与帝
同听政爽言古帝王朝朝暮夕未有旷日不朝陛下宜
每日御殿以览万几奏留中不报然帝与皇太后雅重之每进见未尝不加礼三请致仕
召对承明殿敦谕之求近郡优拜工部尚书复知兖州
诏须宴而后行又留数月特宴太清楼近臣皆预帝作飞白大字以赐二府而小字赐诸
学生独爽与晁迥兼赐大小字诏羣臣即席赋诗及行
赐宴瑞圣园又赐诗诏近臣皆赋改礼部尚书既而累表乞归以太子少傅致仕卒帝为
罢朝一日赠左仆射谥曰宣爽性方重事亲笃孝父亡
舐其面以代类常掇五经切于治道者为经典徽言又撰崇祀录乐记图五经节解五服
制度尝奉诏与邢昺杜镐校定诸经正义庄子尔雅谬
误及律音义初圜兵无外墼五郊从祀不设席尊不施罍七祠时飨饮福用一尊不设三
登升歌不以雍彻冬至摄祀昊天上帝外级止十七位

【按东都事畧作十位与宋史异谨识】 而不以星辰从飨先农在祈谷之前上丁释奠
无三献宗庙不备二舞爽皆援古奏正遂着于礼又
请冬至罢祀五帝大雩设五帝而罢祠昊天上帝事下有司议不合而止子瑜 【按宋史
孙爽传前旧列聂崇义邢昺二传今移入文苑】

△王昭素

王昭素开封酸棘人少笃学有志行李穆与弟肃及李恇皆常师事焉昭素博通九经尤精诗易以为王韩注易及孔马疏义或未尽是乃着易论二十三篇【按东都事略作三十三篇谨识】开宝中李穆荐之朝召见便殿时年七十七精神不衰太祖问曰何以不求仕进致相见晚对曰臣草野蠢愚无以裨圣化赐坐令讲易干卦因访以民间事昭素所言诚实无隐帝嘉之【按东都事略云帝又问治世养身之术昭素对曰治世莫若爱民养身莫若寡欲帝重其言书于屏风间宋史不载谨附识】以衰老求归乡里拜国子博士致仕卒于家昭素颇有人伦鉴常谓李穆兄弟皆令器穆尤沈厚他日必至廊庙后果参知政事昭素每市物随所言而还直未尝论高下县人相告曰王先生市物无得高取其价也治所居室有椽木积门中夜有盗者执门将入昭素觉之即自门中潜掷椽于外盗者惭而去由是里中无盗家有一驴人多来假将出先问僮奴曰外无假驴者乎对云无然后出其纯质若此子仁着亦有隐德

△孔维

孔维字为则开封雍邱人干德四年九经及第解褐东明鄆陵二主簿开宝中礼部再奏为考试官调滁州军事推官太宗即位擢授太子左赞善大夫知河南县通判滑梓二州太平兴国中就拜国子周易博士代还迁礼记博士七年使高丽王治问礼于维维对以君父臣子之道升降等威之序治悦服九年判国学事雍熙初迁主客员外郎三年擢国子司业会将有事于藉手维起周礼至唐书凡沿革制度并录以献观者称其博又上书请禁原蚕以利国马直史馆乐史驳之曰吴都赋曰国赋再熟之稻乡贡八蚕之绵则蚕之有原其来旧矣今孔维请禁原蚕以利国马徒引前经物类同气之文不究时事确实之理夫所市国马来自外方涉远驰驱亏其秣饲失于善视遂多毙者今乃欲禁蚕事甚无谓也况近降明诏来年春有事于藉田劝农之典方行而禁蚕之制又下事相戾矣臣尝历职州县粗知利病编民之内贫窶者多春蚕所成止充赋调之备晚蚕薄利始及卒岁之资今若禁其后图必有因缘为弊滋彰挠乱民岂遑宁所宜重慎遂寝晚蚕之禁维复抗疏曰按周礼夏官司马职禁原蚕者为伤马也原再也天文辰为马蚕书蚕为龙精月直大火则浴其种是蚕与马同气物莫能两大故禁再蚕以益马也又郭璞云重蚕为原今晚蚕也臣少亲耕桑之务长历州县之职物之利害尽知之矣蚩蚩之氓知其利而不知其害故有早蚕之后重养晚蚕出丝甚少再采之叶来岁不茂岂止伤及于马而桑亦损矣按本草注以僵蚕涂马齿则不能食

草物类相感如此月令仲春祭马祖李春享先蚕皆为
天驷房星是蚕马同类蚕重则马损气感之而然也臣谓依周礼禁原蚕为当帝虽不用
维言而嘉其援引经据以章付史馆藉田毕拜国子祭
酒淳化初兼工部侍郎二年卒维通经术旧制举九经一上不中第即改科开宝中维论
其事非便诏礼部自今九经同诸科许再赴举尝受诏
与学官校定五经疏义刻板行用功未及毕被病帝遣太医诊视使者抚问将终召其婿
郑革口授遗表以五经疏未毕为恨景德四年录其孙
禹圭同学究出身【按宋史此下有孔宣传今改入圣裔崔頔尹拙田敏辛文悦四传传
考三人厯仕五季今并移入文苑】

△李觉

李觉字仲明青州益都人父成性旷荡喜为诗善琴奕画山水尤工人多传秘其迹
觉于太平兴国五年举九经起家将作监丞通判建州
秩将满州人借留有诏褒之就迁左赞善大夫知泗州转秘书丞太宗以孔颖达五经正
义刊板诏孔维与觉等校定会用兵燕蓟命觉部京东
诸州刍粮赴幽州维荐觉有学迁礼记博士雍熙三年与右补阙李若拙同使交州黎桓
谓曰此土山川之险中朝人乍厯之岂不倦乎觉曰国
家提封万里列郡四百地有平易亦有险固此一方何足云哉桓默然色沮使还迁国子
博士端拱元年初令学官讲说觉首领焉太宗幸国子
监谒文宣王毕升辇将出西门顾见讲坐觉方聚徒讲书即召对御讲觉曰陛下六龙在
御臣何敢辄升高坐帝因降辇令有司张帝幕设别坐
诏觉讲泰卦从臣皆列坐觉因述天地感通君臣相应之旨俄献时务策帝颇嘉奖以本
官直史馆右正言王禹偁上言觉但能通经不当辄居
史职觉仿韩愈毛颖传作竹颖传以献太宗嘉之故寝禹偁之奏淳化二年详校春秋正
义成改水部员外郎判国子监四年迁司门员外郎卒
觉累上书言时务述养马漕运屯田三事太宗嘉其详备令送吏馆觉性强毅而听敏尝
与秘阁校理吴淑等同考试开封府秋赋举人语及算
雉兔首足法觉曰此颇繁吾能易之及成果精简淑意其宿制即试以别法皆能立就坐
中皆叹服子宥

△崔頔正【崔偃佺】

崔頔正开封封邱人与弟偃佺并举进士明经术頔正雍熙中为高密尉国子祭酒
孔维荐之以为国学直讲迁殿中丞又以判监李至荐
命与杜镐孙奭刊正诸经音疏咸平初真宗以诸经版本多误命择官详正因访达经义
者至方参知政事以頔正对翌日召于苑中说尚书大
禹谟自是日令赴御书院侍对说尚书至十卷頔正年老求致仕帝命坐问恤甚至听以

本官致仕仍充直讲改国子博士三年卒偃佺淳化中
历福州连江尉判国子监李至奏为直讲引对便坐太宗顾谓曰李觉尝奏朕云四皓中
一先生或言姓用字加撇或云加点尔知否偃佺曰昔
秦时程邈撰隶书训如仆隶之易使也今字与古或异臣闻刀用为角 【音榷】 两点
为角 【音鹿】 用上一撇一点俱不成字咸平二
年真宗幸国学召说尚书景德后令讲道德经曰于崇文院候对终篇三年卒尝撰帝王
手鉴十卷其子世安上之特赐出身

△李之才

李之才字挺之青社人也天圣八年同进士出身为人朴且率无少矫厉师河南穆
修修性庄严寡合虽之才亦频在诤怒中之才事之谨
卒能受易时苏舜钦辈亦从修学易其专授受者惟之才尔修之易受之种放放受之陈
抟 【按东都事略云初华山陈抟读易以数学授穆
修修授之才之才授邵雍以象授种放放授许坚坚授范谔昌据此则修之易实受之陈
抟非得于种放也与宋史所载异】 源流最远其图书
象数变通之妙自秦汉以来鲜有知者之才初摄共城令时邵雍居苏门山布裘蔬食躬
爨以养父之才造其庐劳之曰好学笃志果何如雍曰
简策之外未有适也之才曰君非迹简策者其如物理之学何他日又曰物理之学学矣
不有性命之学乎雍再拜愿受业于是先示之以陆淳
春秋意欲以春秋表仪五经既可语五经大旨则授易而终焉其后雍卒以易名世之才
器大难乎识者栖迟久不调或惜之则曰宜少贬以图
荣进石延年独曰时不足以容君盍不弃之隐去再调孟州司法参军时范雍守孟亦莫
之知也雍初自洛建节守延安送者皆出境外之才独
别近郊或病之谢曰故事也顷之雍谪安陆之才沿檄见之洛阳前日远送之人无一来
者雍始恨知之晚友人尹洙以书荐于中书舍人叶道
卿因石延年致之延年素不喜谒贵仕凡四五至道卿门通其书乃已道卿荐之遂得改
大理寺丞为缙氏令未行会延年与龙图阁直学士吴
遵路调兵河东辟之才泽州签署判官泽人刘羲叟从受历法世称羲叟历法远出古人
有扬雄张衡所未喻者实之才受之在泽转殿中丞宝
历五年卒邵雍表其墓有曰求于天下得闻道之君子李公以师焉

钦定续通志卷五百四十

●钦定续通志卷五百四十一 儒林传四

儒林传

宋 【二】

○宋二

贾同 刘颜 高弁 孙复 石介 胡瑗
刘羲叟 林槩 李覯 何涉
王回【向同】 周尧卿

贾同

刘颜

高弁

孙复

石介

胡瑗

刘羲叟

林槩

李覯

何涉

王回【王向 王同】

周尧卿

△贾同

贾同字希得青州临淄人五代时杨光远反同祖崇率乡里四百余家保愚谷山全活者二千人同初名罔字公疏笃学好古有时名年四十余同进士出身真宗命改今名王钦若方贵盛欲致之固谢不往居八九年始补厯城主簿张知白荐为大理评事通判兖州天圣初上书言自祥符以来谏诤路塞丁谓乘闲造符端以欺先帝今谓奸既曰宜明告天下正符端之谬罢宫观崇奏归不急之卫兵数无名之实费使先帝免后世之议国家无因循之失又言寇准忠规亮节疾恶摈邪自其贬黜天下之人弗见其罪宜还之内地以明忠邪善恶之分时庄献太后临朝而同言如此人以为难再迁殿中丞知棣州卒刘颜等及其门人谥同曰存道先生【按宋史本传传前有胡旦传今改入文苑】

△刘颜

刘颜字字望彭城人好古学不专章句师事高弁举进士第以试秘书省校书郎知兴兴县坐法免久之授徐州文学居乡里教授数十百人采汉唐奏议为辅弼名对冯元刘筠钱易滕涉蔡齐上其书除任城主簿岁饥发大姓所积粟活数千人李迪知兖州青州皆辟为从事卒者儒术通要经济枢言复数十篇石介见其书叹曰恨不在弟子之列子庠自有传

△高弁

高弁字公仪濮州雷泽人弱冠徒步从种放学于终南山又学古文于柳开与张景

齐名至道中以文谒王禹偁禹偁奇之举进士累官侍御史谏修玉清昭应官降知广济军寻以户部判官试开封府进士私发糊名夺二官稍复知单州邢州盐铁判官河决澶州请弛堤防纵水所之可省民力且以扼契丹南向议寝知陕州卒弃性孝友所为文章多祖六经及孟子喜言仁义有帝则三篇为世所传与李迪贾同陆参朱頔伊淳相友善石延年刘潜皆其门人也

△孙复

孙复字明复晋州平阳人举进士不第退居泰山学春秋着尊王发微十二篇大约本于陆淳而增新意自石介而下皆以先生事之年四十不娶李迪知其贤以其弟之子妻之复初犹豫石介与诸弟子请曰公卿不下士久矣今丞相不以先生贫贱欲托以子宜因以成丞相之贤名复乃听孔道辅闻复之贤就见之介执杖履立侍复左右升降拜则扶之其往谢亦然介既为学官语人曰孙先生非隐者也于是范仲淹富弼皆言复有经术宜在朝廷除秘书省校书郎国子监直讲 【按朱子名臣言行录云范仲淹在睢阳掌学有孙秀才者索游上谒仲淹赠钱一千明年孙生复道睢阳谒仲淹又赠一千因问何为汲汲于道路孙生戚然动色曰母老无以养若日得百钱则甘旨足矣仲淹曰吾观子辞气非乞客也二年仆仆所得几何而废学多矣吾今补子学职月可得三千以供养子能安于学乎孙生大喜于是授以春秋而孙生笃学不舍昼夜明年仲淹去睢阳孙亦辞归后十年闻泰山下有孙明复先生以春秋教授学者道德高迈朝廷召至乃昔日索游孙秀才也宋史不载附识于此】 徐州人孔直温以狂谋捕治得所遗复诗坐贬虔州监税徙泗州又知长水县签书应天府判官事通判陵州未行翰林学士赵槩等十余人言复行为世法经为人师不宜使佐州县留为直讲稍迁殿中丞卒复与胡瑗不合在太学常相避瑗治经不如复而教养诸生过之复既病韩琦言于仁宗命其门人祖无择就复家得书十五万言录藏秘阁特官其一子

△石介

石介字守道兖州奉符人进士及第 【按朱子名臣言行录云介为举子时寓学南都其固穷苦学世无比者王洙以盘飧遗之石谢曰甘脆亦介之愿但朝餐膏粱暮厌粗粝人之常情也介所以不敢当赐王咨重之宋史不载谨识】 历郢州南京推官笃学有志尚乐善疾恶喜声名遇事奋然敢为御史台辟为主簿未至以论赦书不当求五代及诸伪国后罢为镇南掌书记代父丙远官为嘉州军事判官丁忧耕徂徕山下葬五世之未葬者七十丧以易教授于家鲁人号徂徕先生入为国子监直讲学者

从之甚众太学益盛介为文有气尝着唐鉴以戒奸臣
宦官宫女指切当时无所讳忌杜衍韩琦荐擢太子中允直集贤院会吕夷简罢相夏竦
既除枢密使复夺之以衍代章得象晏殊贾昌朝范仲
淹富弼及琦同时执政欧阳修余靖王素蔡襄并为谏官介喜曰此盛事也歌颂吾职其
可已乎作庆历圣德诗颂扬帝之英明盛述诸正人辅
弼谏诤之美中有云众贤之进如茂斯拔大奸之去如距斯脱大奸盖斥竦也孙复曰子
祸始于此矣介出入大臣之门颇招宾客预政事人多
指目不自安求出通判濮州未赴卒会徐州狂人孔直温谋反搜其书得介书夏竦衔介
甚且欲中伤杜衍等因言介诈死北走契丹请发棺以
验诏下京东访其存亡衍时在兖州以验介事语官属众不敢答掌书记龚鼎臣愿以阖
族保介必死衍探怀出奏藁示之曰老夫已保介矣君
年少见义必为岂可量哉提点刑狱吕居简亦曰发棺空介果走北孥戮非酷不然是国
家无故剖人冢墓何以示后世且介死必有亲族门生
会葬及棺敛之人苟召问无异即令具军令状保之亦足应诏于是众数百保介已死乃
免斲棺 【按朱子名臣言行录载此作吕夷简为京
东转运使时事与宋史异】 子弟羁管他州久之得还介家故贫妻子几冻馁富弼韩琦
共分奉买田以赡养之有徂徕集行于世

△胡瑗

胡瑗字翼之泰州安陵人以经术教授吴中年四十余景佑初更定雅乐诏求知音
者范仲淹荐瑗白衣对崇政殿与镇东军节度推官阮
逸同较钟律分造钟磬各一虚以一黍之广为分以制尺律径三分四厘六毫四丝围十
分三厘九毫三丝又以大黍累尺小黍实龠丁度等以
为非古制罢之授瑗试秘书省校书郎范仲淹经略陕西辟丹州推官以保宁节度推官
教授湖州瑗教人有法科修纤悉备具以身先之虽盛
暑必公服坐堂上严师弟子之礼视诸生如子弟诸生亦信爱如父兄从游者数百人庆
历中兴太学下湖州取其法着为令 【按朱子名臣
言行录云时方尚词赋独湖学以经义及时务学中故有经义治事二斋经义斋者择疏
通有器局者居之治事斋者人各治一事如边防水利
之类故天下谓湖学多秀异由讲习有素也本传失载谨附识】 召为诸生宫教授辞疾
不行为太子中舍以殿中丞致仕皇佑中更铸太常钟
磬驿召瑗逸与近臣太常官议于秘阁遂典作乐事复以大理评事兼太常寺主簿辞不
就岁余授光禄寺丞国子监直讲乐成迁大理寺丞瑗
既居太学其徒益众太学至不能容取旁官舍处之礼部所得士瑗弟子十常居四五嘉
佑初擢太子中允天章阁侍讲仍治太学 【按朱子

名臣言行录云仁宗朝瑗尝上书请兴武学其略曰顷岁吴育已建议兴武学但官非其人不久而废今国子监直讲内梅尧臣曾注孙子大明深义孙复而下皆明经旨臣曾任边陲丹州推官颇知武事若使武臣等兼莅武学每日讲论语使知忠孝仁义之道讲孙吴使知制胜御敌之术于武臣子孙中选有智略者二三百人教习之则一二十年之间必有成效臣已撰成武学规矩进呈时议难之宋史不载谨附识】 既而疾不能朝以太常博士致仕诸生与朝士祖饯东门外时以为荣既卒诏赙其家

△刘羲叟

刘羲叟字仲更泽州晋城人欧阳修使河东荐其学术试大理评事权赵州军事判官精算术兼通大衍诸历及修唐史令专修律历天文五行志寻为编修官改秘书省著作佐郎书成擢崇文院检讨未入谢卒羲叟强记多识尤长于星历术数皇佑五年日食心时胡瑗铸钟舛而直声郁不发又陕西铸大钱羲叟曰此所谓害金再兴与周景王同占上将感心腹之疾其后仁宗果不豫又月入太微曰后宫当有丧已而张贵妃薨羲叟未病尝曰吾及秋必死自择地于父冢旁占庚穴以语其妻如其言葬之着十三代史志刘氏辑历春秋灾异诸书

△林槩

林槩字端父福州福清人父高太常博士有治行槩幼警悟举进士以秘书省校书郎知长兴县岁大饥富人闭余槩出奉粟庭下诱土豪输数千石以饲饥者知连州康定初上封事曰古者民为兵而今兵食居古马寓于民而今不习马此兵与马之大患也请仿唐用兵之法四敛一民部以为军闲耕田里被甲皆兵因命其家咸得畜马私乘休暇官为调习为人便千戈马识行列又行阵无法而出于临时将无素备而取于仓卒军不予权而监以宦侍若是者虽得古之材使循今之法亦必屡战屡败又请备蛮籍土民为兵栅要冲购獠人使守御官至太常博士集贤校理卒着史论辨国语子希自有传

△李覲

李覲字泰伯建昌军南城人俊辨能文举茂才异等不中亲老以教授自资学者常数十百人皇佑初范仲淹荐为试太学助教士明堂定制图序曰考工记周人明堂度九尺之筵是言堂基修广非谓立室之数东西九筵南北七筵堂崇一筵是言堂上非谓室中东西之堂各深四筵半南北之堂各深三筵半五室凡室三筵是言四堂中央有方十筵之地自东至西可营五室自南至北可营五室十筵中央方二筵之地既为太室连作余室则不能令十二位各直其辰当于东南西北四面及四角缺处各虚方

二筵之地周而通之以为太庙太室正居中月令所谓中央土居太庙太室者言此太庙之中有太室也太庙之外堂子午卯酉四位上各画方二筵地二与太庙相通为青阳明堂总章元堂四太庙当寅申巳亥辰戌丑未八位上各画方二筵地以为左个右个也大戴礼盛德记明堂凡九室室四户八牖共三十六户七十二牖八个之室并太室而九室四面各有户户旁夹两牖也白虎通明堂上圆下方八窗四闑九室十二坐四太庙前各为一门出于堂上门旁夹两窗也左右之个其实皆室但以分处左右形如夹户故有个名太庙之内以及太室其实祀文王配上帝之位谓之甫者义当然矣土者分王四时于五行最尊故天子当其时居太室用祭天地之位以尊严之地四仲之月各得一时之中与余月有异故复于子午卯酉之方取二筵地假太庙之名以听朔也周礼言基而不及室大戴言室而不及庙稽之月令则备矣然非白虎通亦无以知窗闑之制也聂崇义所谓秦人明堂图者其制有十二阶古之遗法当亦取之礼记外传曰明堂四面各五门今按明堂位四夷之国南门之外九采之国应门之外时天子负斧宸南向而立南门之外者北面东上应门之外者亦北面东上是南门之外有应门也既有应门则不得不有皋库雉门明堂者四时所居四面如一南面既有五门则余三面皆各有五门郑注明堂位则云正门谓之应门其意当谓变南门之文以为应门又见王宫有路门其次乃有应门今明堂无路门之名而但有应门便谓更无重门而南门即是应门且路寝之前则名路门其次有应门明堂非路寝乃变其内门之名为东门南门而次有应门何害于义四夷之君既在四门之外而外无重门则是列于郊野道路之闲岂朝会之仪乎王公常居犹设五门以限中外明堂者效天法地尊祖配帝而止一门以表之岂为称哉若其建置之所则淳于登曰在国之阳三里之外七里之内丙己之地玉藻听朔于南门之外康成之注亦与是合夫称明也宜在国之阳事天神也宜在城门之外今图以九分当九尺之筵东西之堂共九筵南北之堂共七筵中央之地自东至西凡五室自南至北凡五室每室二筵取于考工记也一太室八左右个共九室室有四户八牖共三十六户七十二牖协于戴德记也九室四庙共十三位本于月令也四庙之面各为一门门夹两窗是为八窗四闑稽于白虎通也十二阶采于三礼图也四面各五门酌于明堂位礼记外传也嘉佑中用国子监奏召为海门主簿太学说书而卒观尝着周礼致太平论平土书礼论门人邓润甫熙宁中上其退居类藁皇佑续藁并后集请官其子参鲁诏以为郊社斋郎

△何涉

何涉字济川南充人涉始读书昼夜刻苦泛览博古上自六经诸子百家旁及山经地志医卜之术无所不学一过目终身不忘人问书传中事必指卷第册页所在验之果然登进士第为中部令范仲淹奇之辟彭武军节度推官用庞籍奏迁著作佐郎管勾鄜延等路经略安抚招讨司机宜文字时元昊扰边军中经画涉预有力元昊纳款籍奉召为枢密使欲与之俱涉请得归养特改秘书丞通判眉州徙嘉州用文彦博庞籍荐召还除集贤校理既又求归蜀遂得知汉州移合州累官尚书司封员外郎辛诏恤其家并官其一子涉长厚有操行事亲至孝平居未尝谈人过所至多建学馆劝诲诸生从之游者甚众虽在军中亦尝为诸将讲左氏春秋狄青之徒皆横经以听所著有治道中术春秋本旨庐江集

△王回 【王向 王同】

王回字深父福州侯官人敦行孝友质直平恕造次必稽古人所为举进士第为卫真簿有所不合称病自免作告友曰古之言天下达道者君臣也父子也夫妇也兄弟也月友也五者各以其义行而人伦立其义废则人伦亦从而亡矣然而父子兄弟之亲天性之自然者也夫妇之合以人情而然者也君臣之从以众心而然者也是虽欲自废而理势持之何能断也惟朋友者举天下之人莫不可同亦举天下之人莫不可异同异在我则义安所卒归乎是其渐废之所繇也君之于臣也父之于子也夫之于妇也兄之于弟也过且恶必乱败其国家国家败而皆受其难被其名而终身不可辞也故其为上者不敢不诲为下者不敢不谏世治道行则人能循义而自得世衰道微则人犹顾义而自全间有不若则亦无害于众焉耳此所谓理势持之虽百代可知也亲非天性也合非人情也从非众心也羣而同别而异有善不足与荣有恶不足与辱大道之行公与义者可至焉下斯而言其能及者鲜矣是以圣人崇之以列于君臣父子夫妇兄弟而壹为达道也圣人既没而其义益废于今则亡矣人伦缺焉何以为世呜呼处今之时而望古之道难矣姑求其肯告吾过而乐闻其过者与之友乎退居颍川久之不肯仕在廷多荐者治平中以为忠武军节度推官知南顿县命下而卒回在颍川与处士常秩友善熙宁中秩上其文集补回子汾为郊社斋郎弟向字子直为文长于序事同字容季性纯笃亦善序事仕止于县主簿皆蚤卒

△周尧卿

周尧卿字子俞道州永明人警悟强记以学行知夕天圣二年举进士历连衡二州

司理参军桂州司录知高安宁化二县提点刑狱杨紘
入境有被刑而耘苗者紘就询其故对曰贫以利故为人直其枉令不我欺而我欺之我
又何怨紘至县以所间荐之后通判饶州积官至太常
博士范仲淹荐经行可为师表未及用庆历五年卒始尧卿年十二丧父忧戚如成人见
母则抑情忍哀不欲伤其意母知而异之谓族人曰是
儿爱我如此多知孝养矣卒能如母之言及母丧倚庐三年席薪枕块虽疾病不饮酒食
肉既葬慈乌百数衔土集陇上人以为孝感所致其于
昆弟尤友爱又为人简重不校有慢己者必厚为礼以愧之居官禄虽薄必以周宗族朋
友为学不专于传注问辨思索以通为期长于毛郑诗
及左氏春秋其学诗以孔子所谓诗三百一言以蔽之曰思无邪孟子所谓说诗者以意
逆志是为得之考经指归而见毛郑之得失曰毛之传
欲简或寡于义理非一言以蔽之也郑之笺欲详或远于性情非以意逆志也是可以无
去取乎其学春秋由左氏记之详得经之所以书者至
三传之异同均有所不取曰圣人之意岂二致耶读庄周孟子之书曰周善言理未至于
穷理穷理则好恶不缪于圣人孟轲是已孟善言性未
至于尽性尽己性则能尽物性而可与天地参其唯圣人乎天何言哉性与天道子贡所
以不可得而闻也昔宰我子贡善为说辞冉牛闵子颜
渊善言德行孔子曰我于辞命则不能也惟不言故曰不能而已盖言生于不足者也其
讲解议论皆若是有诗春秋说各三十卷文集二十卷
七子论鼎州司理参军浼湖州归安主簿谥讽諲说谊

钦定续通志卷五百四十一

●钦定续通志卷五百四十二 儒林传五

儒林传

宋 【三】

○宋三

周敦颐 程颢 程颐 张载【戩】 邵雍【伯温】

周敦颐

程颢

程颐

张载

邵雍

△周敦颐

周敦颐字茂叔道州营道人元名敦实避英宗旧讳改焉以舅龙图阁学士郑向任
为分宁主簿有狱久不决敦颐至一讯立辨邑人惊曰

老吏不如也部使者荐之调南安军司理参军有囚法不当死转运使王逵酷悍吏也欲深治之众莫敢争敦颐独与之辨不听乃委手版归将弃官去曰如此尚可仕乎杀人以媚人吾不为也逵悟囚得免移桂阳令治绩尤着徙知南昌南昌人皆曰是能辨分宁狱者吾属得所诉矣富家大姓酷吏恶少惴惴焉以污秽善政为耻厯合州判官事不经手吏不敢决虽下之民不肯从部使者赵抃惑于谮口临之甚威敦颐处之超然通判虔州抃守虔熟视其所为乃大悟执其手曰吾几失君矣今而后知而茂叔也熙宁初知郴州用抃及吕公着荐为广东转运判官提点刑狱以洗冤泽物为己任行部不惮劳苦虽瘴厉险远亦缓视徐按以疾求知南康军【按名臣言行录云闻水啮其母坟求南康军以归上其印分司南京】因家庐山莲花峯下前有溪合于湓江取营道所居濂溪以名之抃再镇蜀将奏用之未及而卒黄庭坚称其人品甚高胸怀洒落如光风霁月廉于取名而锐于求志薄于徼福而厚于德民菲于奉身而燕及菡萏陋于希世而尚友千古博学力行着太极图说及通书序者谓其言约而道大文质而义精得孔孟之本源大有功于学者也掾南安时程珣通判军事视其气貌非常人与语知其为学知道因与为友使二子颢颐往受业焉敦颐每令寻孔颜乐处所乐何事二程之学源流乎此故颢之言曰自再见周茂叔后吟风弄月以归有吾与点也之意侯师圣学于程颐未悟访敦颐敦颐曰吾老矣说不可不详留对榻夜谈越三日乃还颐惊异之曰非从周茂叔来耶其善开发人类此嘉定十三年赐谥曰元淳佑元年封汝南伯从祀孔子庙庭二子寿焘焘官至宝文阁待制

△程颢

程颢字伯淳世居中山后从开封徙河南高祖羽太宗朝三司使父珣仁宗录旧臣后以为黄陂尉久之知襄州时宜獠区希范既诛乡人忽传其神降言当为我南海立祠于是迎其神以往至襄珣使诘之曰比过浔浔守以为妖投祠具江中逆流而上守惧乃更致礼珣使复投之顺流去甚妄乃息徙知磁州又徙汉州尝宴客开元僧舍酒方行人哗言佛光见观者相腾践不可禁珣安坐不动顷之遂定熙宁法行守令奉命唯恐后珣独抗议指其未便使者李元瑜怒即移病归旋致仕累转大中大夫元佑五年卒珣慈恕而刚断平居与幼贱处惟恐有伤其意至于犯义理则不假也前后五得任子以均诸父之子孙嫁遣孤女必尽其力所得禄分贍亲戚贫者伯母宾居奉养甚至从兄女寡珣迎归教养其子如子侄文彦博苏颂等九人表其清节诏赐帛官给葬颢举进士调鄆上元主簿鄆民有借兄宅居者发地得瘞钱兄之子诉曰父所藏颢

问几何年曰四十年彼借居几时曰二十年矣遣吏取十千视之谓诉者曰今官所铸钱不五六年即遍天下此皆未藏前数十年所铸何也其人不能答【按名臣言行录云鄆县有税官以贿播闻然怙力文身自号能杀人众皆惮之颢至其人不自安辄曰外人谓某自盗官钱新主簿将发之某势穷必杀人言未讫颢笑曰起下食君之禄讵肯为盗万一有之将救死不暇安能杀人其人嘿不敢言后亦私偿其所盗卒以善去宋史不载谨附识】茅山有池产龙如蜥蜴而五色民俗严奉颢捕而脯之【按名臣言行录云颢主上元簿为令画法均田税摄邑盛夏塘堤决法当言之府府廩于漕然后记功调役非月余不能兴作颢曰如此苗槁矣民将何食救民获罪所不辞也遂发民塞之岁则大熟又云江宁当水陆之冲舟卒病者留之为营以处曰小营子岁不下数百人至者辄死先生察其由盖既留然后请于府给券乃得食比有司文移具则困于饥已数日矣颢白漕司给米贮营中至者与之食自是生全者大半常云一命之士苟心于爱物于人必有所济二事宋史俱不载谨附识】为晋城令富人张氏父死旦有老叟踵门曰我汝父也张惊疑相与诣县叟探怀取策以进记曰某年月日抱儿与张三翁家颢问张是时纔四十安得有翁称叟骇谢氏税粟多移近边载往则道远就余则价高颢择富而可任者预使贮粟以待费大省民以事至县者心告以孝弟忠信入所以事父兄出所以事长上度乡村远近为伍保使之力役相助患难相恤而奸伪无所容凡孤茆残废者责之亲戚乡党使无失所行旅出于其途者疾病皆有所养乡必有校暇时亲至召父老与语儿童所读书亲为正句读教者不善则为易置择子弟之秀者聚而教之乡民为社会为立科条旌别善恶使有劝有耻在县三岁民爱之如父母【按名臣言行录云晋城邑几万室二年间无强盗及鬪死者秩满代者且至吏夜叩门称有杀人者颢曰吾邑安有此诚有之必某村某人也问之果然家人惊异问其故曰吾尝疑此人恶少之弗革者也又云先时民惮征役役及则相诉为讎颢尽知民产厚薄第其先后按籍而命之无有辞者河东义勇农隙则教以武事然应文备数而已颢至晋城其民遂为精兵宋史俱不载谨附识】熙宁初用吕公着荐为太子中允监察御史里行神宗素知其名数召见每退必曰频来对欲常常见卿一日从容咨访报正午始趋出庭中人曰御史不知上未食乎前后进说甚多大要以正心室欲求贤育材为言务以诚意感悟人主尝劝帝防未萌之欲及勿轻天下士帝曰当为卿戒之王安石执政议更法令中外皆不以为便言者攻之甚力颢被旨赴中书议事安石方怒言者厉色待之

颢徐曰天下事非一家私议愿平气以听安石为之愧屈自安石用事颢未尝一语及于功利居职八九月数论时政最后言曰智者若禹之行水行其所无事也舍而之险阻不足以言智自古兴治立事未有中外人情交谓不可而能有成者况于排斥忠良沮废公议用贱陵贵以邪干正者乎正使徼幸有小成而兴利之臣日进尚德之风浸衰尤非朝廷之福遂乞去言职安石本与之善及是虽不合犹敬其忠信不深怒但出提点京西刑狱颢固辞改签书镇宁军判官司马光在长安上疏求退称颢公直以为己所不如程昉治河取澶卒八百虐用之众逃归羣僚畏昉欲勿纳颢曰彼逃死自归弗纳必乱若昉怒吾自任之即亲往启门拊劳约少休三日复役众驩踊而入具以事上得不遣昉后过州扬言曰澶卒之败盖程中允诱之吾且诉于上颢闻之曰彼方惮我何能为果不敢言曹村扫决颢谓郡守刘涣曰曹村决京师可虞臣子之分身可塞亦所当为盍尽遣厢卒见付涣以镇印付颢立走决所激谕士卒命善泅者度决口引巨素济众两岸并进数日而合以郊祀恩得监洛河竹木务荐者言其未尝叙年劳特迁太常丞帝又欲使修三经义执政不可命知扶沟县广济蔡河在县境濒河恶子无生计颢胁取行舟财货岁必焚舟十数以立威颢捕得一人使引其类贯宿恶分地处之令以挽絙为业且察为奸者自是境无焚剽忠内侍王中正按阅保甲权焰章震诸邑竞侈供帐悦之主吏来请颢曰吾吧贫安能效他邑取于民法所禁也独有令故青帐可用尔除判武学李定劾其新法之初首为异论罢归故官又坐狱逸囚责监汝州盐税哲宗立召为宗正丞未行而卒颢资性过人充养有道和粹之气盎于面背门人交友从之数十年未尝见其忿厉之容遇事优为虽仓卒不动声色自十五六时与弟颐闻汝南周敦颐论学遂厌科举习慨然有求道之志泛滥于诸家出入于老释者几十年返求诸六经而后得之教人自致知至于知止诚意至于平天下洒扫应对至于穷理尽性循循有序病学者厌卑近而骛高远卒无成焉故其言曰道之不明异端害之也昔之害近而易知今之害深而难辨昔之惑人也乘其迷暗今之惑人也因其高明自谓之穷神知化而不足以开物成务言为无不周遍实则外于伦理穷深极微而不可以入尧舜之道天下之学非浅陋固滞则必入于此自道之不明也邪诞妖妄之说竞起虽高才明智胶于见闻不自觉也是皆正路之榛芜圣门之蔽塞辟之而后可以入道 【按东都事略云神宗尝问颢曰王安石何如人也颢曰安石博学多闻则有之守约则未必又问此圣人否颢曰诗称周公公孙硕肤赤舄几几圣人盖如此安石刚褊自任圣人岂然哉此

事宋史不载谨附识】 颢之歿士大夫识与不识莫不哀伤焉文彦博采众论题其墓曰明道先生嘉定十三年赐谥曰纯淳佑元年封河南伯从祀孔子庙庭

△程颐

程颐字正叔年十八上书阙下欲天子黜世俗之论以王道为心游太学见胡瑗问诸生以颜子所好何学颐论成瑗大惊异之即延见处以学职吕希哲首以师礼事颐治平元丰间大臣屡荐皆不起哲宗初司马光吕公着共荐其力学好古安贫守节言必忠信动遵礼法望擢以不次使士类有所矜式诏以为西京国子监教授力辞寻召为秘书省校书郎既入见擢崇政殿说书即上疏言习与智长化与心成凡民善教其子弟者亦必延明德之士使与之处以熏陶成性况陛下春秋之富虽睿圣得于天资而辅养之道不可不至大率一日之中接贤士大夫之时多亲寺人宫女之时少则气质变化自然而成愿选名儒入侍劝讲讲罢留之分直以备访问或有小失随事献规岁月积久必能养成圣德颐每进讲色甚庄继以讽谏闻帝在宫中盥而避蚁问有是乎曰然诚恐伤之尔颐曰推此心以及四海帝王之要道也神宗丧未除冬至百官表贺颐曰节序变迁时思方切乞改贺为慰既除丧有司请开乐置宴颐又言除丧而用吉礼尚当因事长乐今特设宴是喜之也皆从之帝尝以疮疹不御迩英累日颐诣宰相问安否且曰上不御殿太后不当独坐且人主有疾大臣可不知乎翌日宰相以下始奏问疾苏轼不悦颐颐门人贾易朱光庭不能平合攻轼胡宗愈颐临诋颐不宜用孔文仲极论之遂出管勾西京国子监久之加直秘阁再上表辞董敦逸复摭其有怨望语去官绍圣中削籍窜涪州李清臣尹洛即日迫遣之欲入别叔母亦不许徽宗即位徙峡州俄复官又夺于崇宁再复宣教郎致仕大观初卒颐于书无所不读其学本于诚以大学语孟中庸为标指而达于六经动止语默一以圣人为师张载称其兄弟从十四五时便脱然欲学圣人故卒得孔孟不传之学以为诸儒倡其言若布帛菽粟然知德者尤尊崇之 【按名臣言行录云陕右钱以钱旧矣有议更以铜者已而会所铸子不踰母谓无利也遂止颐闻之曰此乃国家之大利也利多费省私铸者众费多利少盗铸者息民不敢盗铸则权归公上非国家之大利乎又有议增解盐之直者颐曰价平则盐易泄人人得食无积而不售者岁入必倍矣价增则反是已而果然司马光既相大改熙丰复祖宗之旧颐曰役法当讨论未可轻改也光不然之既而数年纷纷不能定数事宋史不载谨附识】 尝言今农夫祈寒暑雨深耕易耨播种五谷

吾得而食之百工技艺作为器物吾得而用之介冑之士被坚执锐以守土宇吾得而安之无功泽及人而浪度岁月晏然为天地间一蠹惟缀
缉圣人遗书庶几有补尔于是着易春秋传以传于世平生诲人不倦故学者出其门最多渊源所渐皆为名士涪人祠颐于北岩世称为伊川
先生嘉定十三年赐谥曰正淳佑元年封伊阳伯从祀孔子庙庭

△张载

张载字子厚长安人少喜谈兵至欲结客取洮西之地年二十一以书谒范仲淹一见知其远器乃惊之曰儒者自有名教可乐何事于兵
因劝读中庸载读其书犹以为未足又访诸释老累年究极其说知无所得反而求之六经尝坐虎皮讲易京师听从者甚众一夕二程至与论
易次日语人曰比见二程深明易道吾所弗及汝辈可师之撤坐辍讲与二程语道学之要涣然自信曰吾道自足何事旁求于是尽弃异学淳
如也举进士为祁州司法参军迁云岩令政事以敦本善俗为先每月吉具酒食召高年者会县庭亲为劝酬使人知养老事长之义固问民疾
苦及告所以训戒子弟之意熙宁初吕公着言其有古学神宗方一新百度思得才哲士谋之召见问治道对曰为政不法三代者终苟道也帝
悦以为崇文院校书他日见王安石安石问以新政载曰公与人为善则人以善归公如教玉人琢玉则宜有不受命者矣明州苗振狱起往治
之未减其罪还朝即移疾屏居南山下终日危坐一室左右简编俯而读仰而思有得则识之或中夜起坐取烛以书其志道精思未始须臾息
敝衣蔬食与诸生讲学每告以知礼成性变化气质之道学必如圣人而后已以为知人而不知天求为贤人而不求为圣人此秦汉以来学者
大蔽也故其学尊礼贵德乐天安命以易为宗以中庸为体以孔孟为法黜怪妄辨鬼神其家昏丧葬祭率用先王之意而傅以今礼又论定井
田宅里发敛学校之法皆欲修理成书使可举而措诸事业吕大防荐之诏知太常礼院与有司议礼不合复以疾归中道疾甚沐浴更衣而寝
旦而卒贫无以敛门人共买棺奉其丧还翰林学士许将等言其恬于进取乞加赠恤诏赐馆职半赙载学古力行为关中士人宗师世称为横
渠先生著书号正蒙又作东西二铭程颐尝言西铭明理一而分殊扩前圣所未发与孟子性善养气之论同功嘉定十三年赐谥曰明淳佑元
年封郟伯从祀孔子庙庭弟戡

张戡

张戡

戡字天祺起进士调闾乡主簿知金堂县诚心爱人养老恤穷间召父老使教督子

弟民有小善皆籍记之以奉钱为酒食月吉召老者饮
劳使其子孙侍劝以孝弟民化其德所至狱讼日少熙宁初为监察御史里行累章论王安石乱法乞罢条例司及追还常平使者劾曾公亮陈升之赵抃依违不能救正韩绛左右徇纵与为死党李定以邪谄窃台谏且安石擅国辅以绛之诡随台臣又用定辈芽蘖渐盛吕惠卿刻薄辨给假经术以文奸言岂宜劝讲君侧书数十上又诣中书争之安石举扇掩面而笑戩曰戩之狂直宜为公笑然天下之笑公者不少矣赵抃从旁解之戩曰公亦不得为无罪抃有愧色遂称病待罪出知公安县徙监司竹监至举家不食笋常爱用一卒及将代自见其盗笋箴治之无少贷罪已正待之复如初略不介意其德量如此卒于官

△邵雍

邵雍字尧夫其先范阳人父古徙衡漳又徙共城雍年三十游河南葬其亲伊水上遂为河南人雍少时自雄其才慷慨欲树功名于书无所不读始为学即坚苦刻厉寒不炉暑不扇夜不就席者数年已而叹曰昔人尚友于古而吾独未及四方于是踰河汾涉淮汉周流齐鲁宋郑之墟久之幡然来归曰道在是矣遂不复出北海李之才摄共城令闻雍好学尝造其庐语以物理性命之学遂从之才受河图洛书宓羲八卦六十四卦图探赜索隐妙悟神契洞彻蕴奥汪洋浩博德其所自得者及其学益老德益邵玩心高明以观夫天地之运化阴阳之消长远而古今世变微而走飞草木之性情深造曲畅遂衍宓羲先天之旨著书十余万言行于世初至洛蓬荜环堵不庇风雨躬樵爨以事父母虽平居屡空而怡然有所甚乐人莫能窥也及执亲丧哀毁尽礼富弼司马光吕公着诸贤退居洛中雅敬雍恒相从游为市园宅雍岁时耕稼仅给衣食名其居曰安乐窝因自号曰安乐先生兴至辄哦诗自咏春秋时出游城中乘小车一人挽之惟意所适士大夫家识其车音争相迎候童孺厮隶皆欢相谓曰吾家先生至也不复称其姓字或留信宿乃去好事者别作屋如雍所居以候其至名曰行窝司马光兄事雍而二人纯德尤乡里所向慕每相饬曰毋为不善恐司马端明邵先生知士之道洛者有不之公府必之雍雍德气粹然望之知其贤然不事表暴不设防畛与人言乐道其善而隐其恶有就问学则答之未尝强以语人人无贵贱少长一接以诚故贤者悦其德不贤者服其化一时洛中人才特盛而忠厚之风闻天下熙宁行新法吏牵迫不可为或投劾去雍门生故友居州县者贻书访雍雍曰此贤者所当尽力之时新法固严能宽一分则民受一分赐矣投劾何益耶先是嘉佑间诏求遗逸留守王拱辰以雍应诏授将作监主簿复

举逸士补颍州团练推官皆固辞乃受命竟称疾不之
官熙宁十年卒赠秘书著作郎元佑中赐谥康节雍高明英迈而浑厚不见圭角是以清
而不激和而不流人与交久益尊信之河南程颢初侍
其父识雍论议终日退而叹曰尧夫内圣外王之学也雍知虑绝人遇事能前知程颐尝
曰其心虚明自能知之当时学者因雍之前知谓雍于
凡物声气之所感触辄以其动而推其变焉于是摭世事之已然者皆以雍言先之雍盖
未必然也雍疾病司燹光张载程颢程颐晨夕候之将
终其议丧葬事外庭雍皆能闻众人所言召子伯温谓曰诸君欲葬我近城地当从先莹
尔既葬颢为铭墓称雍之道约一不杂就其所至可谓
安且成矣所著书曰皇极经世观物内外篇渔樵问对诗曰伊川击壤集子伯温

邵伯温

邵伯温

伯温字子文司马光等屈名位辈行与伯温为再世交故所闻日博而尤熟当世之
务光入相尝欲荐伯温宋果而卒后以河南尹与部使
者荐特授大名府助教调潞州长子县尉初蔡确之相也哲宗新立邢恕自襄州移河阳
诟确谋造定策事及司马光子康诣阙恕召康诣河阳
伯温谓康曰公休除丧未见君不宜枉道先见朋友康曰已诺之伯温曰恕倾巧或以事
要公休若从之必为异日悔康竟往恕果劝康作书称
确以为他日全身保家计康恕同年登科第康遂作书如恕言恕盖以康为光子言确有
定策功世必见信既而梁焘以谏议召恕亦要焘至河
阳连日夜论确功不休且以康书为证焘不悦会吴处厚奏确诗谤朝政焘与刘安世共
请诛确且论恕罪亦命康分析康始悔之康卒子植幼
宣仁后悯之吕大防谓康素以伯温可托请以伯温为西京教授以教植伯温既至官则
诲植曰温公之孙大谏之子贤愚在天下可畏也植闻
之力学不懈卒有立绍圣初章惇为相惇尝事康节欲用伯温伯温不往会法当赴吏部
铨程颐谓伯温曰石危子之行也伯温曰岂不欲见先
公于地下耶至则先就部拟官而后见宰相惇论及康节之学曰嗟乎吾于先生不能卒
业也伯温曰先君先天之学论天地万物未有不尽者
其信也则人之仇怨反复者可忘矣时惇方兴党狱故以是动之惇悚然犹荐之于朝而
伯温愿补郡县吏惇不悦遂得监永兴军铸钱监寺元
佑诸贤方南迁士鲜访之者伯温见范祖禹于咸平见范纯仁于颍昌或为之恐不顾也
会西边用兵复夏人故地从军者得累数阶伯温当行
辄推同列秩满惇犹在相位伯温义不至京师从外台辟环庆路帅幕实避惇也徽宗即
位以日食求言伯温上书累数千言大要欲复祖宗制

度辨宣仁诬谤解元佑党锢分君子小人戒劳民用兵语极恳至宣仁太后之谤伯温既辨之又著书名辨诬后宗宁大观间以元符上书人分邪正等伯温在邪等中以此书也出监华州西岳庙久之知灵宝县徙芮城县主管永兴军辉州三白渠公事童贯为宣抚使士大夫争出其门伯温闻其来出他州避之除知果州请罢岁输泸南诸州绫绢丝缙数十万以宽民力除知兴元府遂宁府邠州皆不赴擢提点成都路刑狱贼史斌入汉利窥剑门伯温与成都帅臣卢法原合谋守剑门贼竟不能入蜀人德之除利路转运副使提举太平观绍兴四年卒初雍尝曰世行乱蜀安可避居及宣和末伯温载家使蜀故免于难伯温尝论元佑绍圣之政曰公卿大夫当知国体以蔡确奸邪投之死地何足惜然尝为宰相相当以宰相待之范忠宣有文正余风知国体者也故欲薄确之罪言既不用退而行确词命然后求去君子用心也刘挚梁焘王岩叟刘安世忠直有余然后恶已甚不知国体以貽后曰搢绅之祸不能无过也赵鼎少从伯温游及当相乞行追录始赠秘阁修撰尝表伯温墓曰以学行起元佑以名节居绍圣以言废于崇宁世以此三语尽伯温出处云著书有河南集闻见录皇极系述辨诬辨惑皇极经世序观物内外篇解三子溥博傅

钦定续通志卷五百四十二

●钦定续通志卷五百四十三 儒林传六

儒林传

宋【四】

○宋四

刘绚	李吁	谢良佐	游酢	张绎	苏昞
尹焞	杨时	罗从彦	李侗		
刘绚					
李吁					
谢良佐					
游酢					
张绎					
苏昞					
尹焞					
杨时					
罗从彦					
李侗					

△刘绚

刘绚字质夫常山人以祖荫为寿安主簿迁长子令督公家逋赋不假鞭朴而集岁大旱府遣吏视伤所蠲纆什仁绚力争不得封还其揭请易之富弼叹曰真县令也元佑初韩维荐其经明行修为京兆府教授王岩叟朱光庭又荐为太学博士卒于官绚力学不倦最明于春秋程颢每为人言他人之学敏则有矣未易保也若绚者吾无疑焉 【按名臣言行录云绚自髫髻时即从二程受学天性孝弟乐善不为异端所惑谨附识】

△李吁

李吁字端伯洛阳人登进士第元佑中为秘书省校书郎卒程颐谓其才器可以大安及亡也祭之以文曰自子兄弟倡明道学能使学者视效而信从者吁与刘绚有焉

△谢良佐

谢良佐字显道寿春上蔡人与游酢吕大临杨时在程门号四先生登进士第 【按名臣言行录云授秦川教又尝为澠池令】 建中靖国初官京师召对忤旨去监西京竹木场以飞语坐系诏狱废为民良佐记问该赡对人称引前史至不差一字事有未彻则颢有泚与程颐别一年复往见问其所进曰但去得一矜字尔颐喜谓朱光庭曰是子力学切问而近思者也 【按名臣言行录云良佐平生未尝千人在书局亦不谒执政或劝之对曰彼安能陶铸我自有命在宋史不载谨附识】 所著论语说行于世

△游酢

游酢字定夫建州建阳人与兄醇以文行知名程颐见之京师谓其资可以进道程颢兴扶沟学招使肄业尽弃其学而学焉第进士调萧山尉 【按朱子撰祠堂记称酢筮仕之初县有疑狱十年不决酢摄邑一问得其情而释之精练如素宦者人服其明宋史不载谨附识】 近臣荐其贤召为太学录迁博士以奉亲不便求知河阳县范纯仁守颍昌府辟府教授纯仁入相复为博士签书齐州泉州判官晚得监察御史历知汉阳军和舒濠三州卒 【按东都事略云酢所著有中庸义易说二南义语孟新解各一卷文集一卷】

△张绎

张绎字思叔河南寿安人家甚微年长未知学佣力于市出闻县官传呼声心慕之问人曰何以得此人曰此读书所致尔即发愤力学遂以文名预乡里计偕调科举之习不足为尝游僧舍见僧道楷将祝发从之时周行己官

河南警之曰何为舍圣人之学而学佛异日程先生归可师也会程颐还自涪乃往受业颐赏其颖悟读孟子志士不忘在沟壑勇士不忘丧其元慨然若有得未及仕而卒颐尝言吾晚得二士谓绎与尹焞也

△苏昞

苏昞字季明武功人始学于张载而事二程卒業元佑末吕大忠荐之起布衣为太常博士坐元符上书入邪籍编管饶州卒

△尹焞

尹焞字彦明一字德充世为洛人曾祖仲宣七子二子有名长子源次子洙源生林官至虞部员外郎林生焞少师事程颐尝应举发策有洙元佑诸臣议焞曰噫尚可以千禄乎哉不对而出告颐曰焞不复应进士举矣颐曰子有母在焞归告其母陈母曰吾知汝以善养不知汝以禄养颐闻之曰贤哉母也焞于是终身不就举焞之从师与河南张绎同时绎以高识焞以笃行颐既歿焞聚徒洛中非弗丧问疾不出户士大夫宗仰之靖康初种师道荐焞德行可备劝讲召至京师不欲留赐号和靖处士梅执礼吕好问邵溥胡安国同荐之不报次年金人陷洛焞阖门被害噶死复苏门人舁置山谷中而免刘豫命伪帅赵斌以礼聘焞不从则以兵恐之焞自商州奔蜀至阆得程颐易传十卦于其门入吕稽中又得全本于其壻邢纯拜而受之绍兴四年止于涪涪颐读易地也辟三畏斋以居邦人不识其面侍读范冲举焞自代授左宣教郎充崇政殿说书以疾辞范冲奏给行资遣漕臣奉诏至涪亲遣六年始就道作文祭颐而后行先是崇宁以来禁锢元佑学术高宗渡江始召杨时寘从班召胡安国居给舍范仲朱震俱在讲席荐焞甚力既召而左司谏陈上辅上疏攻程氏之学乞加屏绝焞至九江上奏曰臣僚上言程颐之学惑乱天下焞实师颐垂二十年学之既专自信甚笃使焞滥列经筵其所敷绎不过闻于师者舍其所学则欺君父加以疾病衰耗不能支持遂留不进胡安国奉祠居衡阳上书言欲使学者蹈中庸师孔孟而禁不从程颐之学是入室而不由户朱震引疾告去时赵鼎去位张浚独相于是召安国俾以内祠兼侍读而上章荐焞言其拒刘豫之节且谓其所学所养有大过人者乞令江州守臣疾速津送至国门复以疾辞帝曰焞可谓恬退矣诏以秘书郎兼说书趣起之焞始就职八年除秘书少监未几力辞求去帝语参知政事刘大中曰焞未论所学渊源足为后进矜式班列得老成人亦是朝廷气象乃以焞直徽猷阁主管万寿观留侍经筵除太常少卿仍兼说书未几称疾在告除权礼部侍郎兼侍讲时金

人遣张通古萧哲来议和焯上疏切谏又移书秦桧言若和议一成彼日益强我日益怠今之上策莫如自治自治之要内则进君子而远小人外则赏当功而罚当罪使主上孝弟通于神明道德成于勉强勿以小智子义而图大功不胜幸甚疏及书皆不报于是焯固辞新命九年以徽猷阁待制提举万寿观兼侍讲又辞且奏言臣职在劝讲蔑有发明期月之间病告相继坐窃厚禄无补圣聪先圣有言陈力就列不能者止此当去一也臣起自草茅误膺召用守道之语形于训词而臣贪恋宠荣遂移素守使朝廷非常不次之举获怀利苟得之人此当去者二也比尝不量分守言及国事识见迂陋已验于今迹其庸愚岂堪时用此当去者三也臣自擢春官未尝供职以疾乞去更获超迁有何功劳得以祇受此当去者四也国朝典法揆之礼经年至七十皆当致仕今臣年齿已及加以疾病血气既衰戒之在得此当去者五也臣有五当去之义无一可留之理乞放归田里疏上以焯提举江州太平观引年告老转一官致仕焯自入经筵即乞休致朝廷以礼留之浚鼎既去秦桧当国见焯议和疏及与桧书已不乐至是遂不复留十二年卒焯学于程颐质直弘毅实体力行颐尝以鲁许之且曰我死而不失其正者尹氏子也有论语解及门人问答传于世

△杨时

杨时字中立南剑将乐人幼颖异能属文稍长潜心经史熙宁九年中进士第调官不赴以师礼见程颢于颍昌相得甚欢其归也颢日送之曰吾道南矣四年而颢歿又见程颐于洛时年盖四十矣一日见颐颐偶瞑坐时与游酢侍立不去颐既觉则门外雪深一尺矣关西张载尝着西铭二程深推服之时疑其近于兼爱与其师颐辩论往复闻理一分殊之说豁然无疑杜门不仕者十年久之历知浏阳余杭萧山三县皆有惠政张舜民在谏垣荐之得荆州教授时安于州县未尝未闻达而德望日重四方之士不远千里从之游号曰龟山先生时天下多故有言于蔡京者以为事至此必败宜引旧德老成署诸左右庶几犹可及京是之会有使高丽者国主问龟山安在使还以闻名为秘书郎迁著作郎及面对奏曰尧舜曰允执厥中孟子曰汤执中洪范曰皇建其有极历世圣人由斯道也熙宁之初大臣文六艺之言以行其私祖宗之法纷更殆尽元佑继之尽复祖宗之旧熙宁之法一切废革至绍圣崇宁抑又甚焉凡元佑之政事着在令甲皆焚之以灭其迹自是分为二党搢绅之祸至今未殄臣愿明诏有司条具祖宗之法着为纲目有宜于今者举而行之当损益者损益之元佑熙丰姑置而勿论一趋于中而已朝廷方

图燕云虚内事外时遂陈时政之弊且谓燕云之师宜退守内地以省转输之劳募边民为弓弩手以杀常胜军之势又言都城隍四达之衢无高山巨浸以为阻卫士人怀异心缓急不可倚仗执政不能用登对力陈君臣警戒正在无虞之时乞为宣和会计录以周知天下财物出入之数徽宗首肯之除迺英殿说书闻金人入攻谓执政曰今日事势如积薪已然当自奋励以竦动观听若示以怯懦之形委靡不振则事去矣要害之地当严为守备比至都城尚何及哉近边州军宜坚壁清野勿与之战使之自困若攻城略地当遣援兵追袭使之腹背受敌则可以制胜矣且今日之事当以收人心为先人心不附虽有高城深池坚甲利兵不足恃也免夫之役毒被海内京城聚敛东南花石其害尤甚前止盖尝罢之诏墨未干而花石供奉之舟已衔尾矣今虽复申前令而祸根不除人谁信之欲致人和去此三者正今日之先务也金人围京城勤王之兵四集而莫相统一时言唐九节度之师不立统帅虽李郭之善用兵犹不免败衄今诸路乌合之众臣谓当立统帅一号令示纪律而后士卒始用命又言童贯为三路大帅敌人侵疆弃军而归拏戮之有余罪朝廷置之不问故梁方平何灌皆相继而遁当正典刑以为臣子不忠之戒童贯握兵二十余年覆军杀将驯至今日比闻防城仍用阉人覆车之辙不可复蹈疏上除右谏议大夫兼侍讲敌兵初退议者欲割三镇以讲和时极言其不可曰河朔为朝廷重地而三镇又河朔之要藩也一旦弃之北庭使敌骑疾驱贯吾腹心不数日可至京城今闻三镇之民以死拒之三镇拒其前吾以重兵蹶其后尚可为也若种师道刘光世皆一时名将始至而未用乞召问方略疏上钦宗诏出师而议者多持两端时抗疏曰闻金人驻磁相破大名劫夺驱掠无有纪极誓墨未干而背不旋踵吾虽欲专守和议不可得也夫越数千里之远侵人国都危道也彼见勤王之师四面而集亦惧而归非爱我而不攻朝廷割三镇三十州之地与之是欲助敌而自攻也闻肃王初与之约及河而返今挟之以往此败盟之大者臣窃谓朝廷宜以肃王为问责其败盟必得肃王而后已时太原围闭数月而姚古逗遛不进时上疏乞诛古以肃军政拔偏裨之可将者代之不报李纲之罢太学士伏阙上书乞留纲与种师道军民集者数十万朝廷欲防禁之吴敏乞用时以靖太学时得召对言诸生忠于朝廷非有他意但择老成有行谊者为之长贰则将自定钦宗曰无逾于卿遂以时兼国子祭酒首言三省政事所出六曹分治各有攸司令乃别真官属新进少年未必贤于六曹长贰又言蔡京用事二十余年以继述神宗为名实挟王安石以图身利故推尊安石加以王爵配飨

孔子庙庭今日之祸实安石有以启之谨按安石挟管商之术借六艺以文奸言变乱祖宗法度当时司马光已言其为害当见于数十年之后今日之事若合符契其邪说不可缕数姑即一二事明之昔神宗尝称美汉文惜百金以罢露台安石乃言陛下若能以尧舜之道治天下虽竭天下以自奉不为过守财之言非正理曾不知尧舜茅茨土阶禹曰克俭于家则竭天下以自奉者必非尧舜之道其后王黼以三公领应奉司号为享上实安石有以倡之也其释鳧鹭之末章则谓以道守成者役使羣众泰而不为骄宰制万物费而不为侈此章正谓能持盈则神只祖考安乐之而无后艰尔安石独为此说以启人主之侈心后蔡京辈轻费妄用以侈靡为事实安石有以倡之也乞正其学术之谬迫夺王爵明诏中外毁去配享之像疏上安石遂降从祀之列谏官冯澲力主王氏上疏诋时会学官中有分争者有旨学官并罢时亦罢祭酒【按胡安国撰杨时墓志云时又言绍圣初章惇蔡卞用事欲报复私怨遂上诬宣仁后而以大逆之名加王珪以定策之功归蔡确已亦与焉此非私于确其实自为因以中伤元佑之人耳今乞陛下索绍圣中所修元佑时政记一观庶以究竟昭雪王珪为臣不忠之名追夺蔡确冒受封赠之典滥恩所被悉行改正以释天下慎郁之气帝乃诏改宣仁圣烈后谤史宋史本传末载谨附识】时又言元佑赏籍中惟司马光一人独褻显而未及吕公着韩维范纯仁吕大防安焘辈建中初言官陈瓘已褻赠而未及邹浩于是元佑诸臣皆次第牵复寻四上章乞罢谏省陈给事中辞乞致仕除徽猷阁直学士提举嵩山嵩福宫时力辞直学士之命改除徽猷阁待制陛辞犹上书乞选将练兵为战守之备高宗即位除工部侍郎陛对言自古圣贤之君未有不以典学为务除兼侍读请修建炎会计录乞恤勤王之兵宽假言者连章丐外以龙图阁直学士提举杭州洞霄宫已而告老以本官致仕里居以著书讲学为事卒谥文靖时所交皆天下士先达陈瓘邹浩皆以师礼事时暨渡江东南学者推时为程氏正宗与胡安国往来讲论尤多时浮沈州县四十有七年晚居谏省仅九十日凡所论列皆切于世道而其大者则辟王氏经学排靖康和议凡绍兴初崇尚元佑学术而朱熹张栻之学得程氏之正其源委脉络皆出于时子迪力学通经亦尝师程颐云

△罗从彦

罗从彦字仲素南剑人以累举恩为惠州博罗县主簿闻同郡杨时得河南程氏学慨然慕之及时为萧山令遂徒步往学焉时熟察之喜曰惟从彦可与言道于是日益亲时弟子千余人无及从彦者从彦尝与时讲易至干九

四爻云伊川说甚善从彦即鬻田走洛见颐问之颐反覆以告从彦谢曰闻之龟山具是矣乃归卒業沙县陈渊杨时之壻也尝诣从彦也竟日乃返谓人曰自吾交仲素日闻所未闻奥学清节直南州之冠冕既而筑室山中绝意仕进尝采祖宗故事为遵尧录靖康中拟献阙下会国难不果尝与学者论治曰祖宗法度不可废德泽不可恃废法度则变乱之事起恃德泽则骄俄之心生自古德泽最厚莫若尧舜向使子孙可恃则尧舜必传其子法度之明莫如周向使子孙世守文武成康之遗绪虽至今存可也又曰君子在朝则天下必治盖君子进则常有乱世之言使人主多忧而善心生故治小人在朝则天下乱盖小人进则常有治世之言使人主多乐而怠心生故乱又曰天下之变不起于四方而起于朝廷譬如人之伤气则寒暑易侵木之伤心则风雨易折故内有林甫之奸则外必有禄山之乱内有卢杞之奸则外必有朱泚之叛其论士行曰周孔之心使人明道学者果能明道则周孔之心深自得之又曰士之立朝要以正直忠厚为本正直则朝廷无过失忠厚则天下无嗟怨一于正直而不忠厚则渐入于刻一于忠厚而不正直则流入于懦其议论醇正类此朱熹谓龟山倡道东南士之游其门者甚众然潜思力行任重诣极如仲素一人而已绍兴中卒学者称之曰豫章先生淳佑间谥文质

△李侗

李侗字愿中南剑州剑浦人年二十四闻郡人罗从彦得河洛之学遂以书谒之言愿得受经门下以质所疑从之累年授春秋中庸语孟之说从彦好静坐令侗静中看喜怒哀乐未发前气象而求所谓中者久之于天下之理该摄洞贯以次融释各有条序从彦亟称许焉既而退居山田谢绝世故余四十年饮食或不充而怡然自适事亲孝谨仲兄性刚多忤侗事之得其欢心闺门内外怡愉肃穆若无人声而众事自理亲戚有贫不能婚嫁者则为经理振助之与乡人处饮食言笑终日油油如也其接后学答问不倦虽随人浅深施教而必自反身自得始故其言曰学问之道不在多言但默坐澄心体认天理若是虽一毫私欲之发亦退听矣又曰学者之病在于未有洒然冰解冻释处如孔门诸子羣居终日交相切磨又得夫子为依归日用之间观感而化者多矣恐于融绎而不脱落处非言说所及也又曰读书者知其所言莫非吾事而即吾身以求之则凡圣贤所至而吾所未至者皆可勉而进矣若直求之文字以资诵说其不为玩物丧志者几希其语中庸曰圣门之传是书其所以开悟后学无遗策矣然所谓喜怒哀乐未发谓之中者又一篇之指要也若徒记诵

而已则亦奚以为哉必也体之于身实见是理若颜子之叹卓然若有所见而不违乎心目之间然后扩充而往无所不通庶乎可以言中庸矣其语春秋曰春秋一事各是发明一例如观山水徒步而形势不同不可拘以一法然所以难言者盖以常人之心推测圣人未到圣人洒然处岂能无失耶侗既闲居若无意当世而伤时忧国论事感激动人尝曰今日三纲不振义利不分三纲不振故人心邪僻不堪任用致上下之气间隔而国以日衰义利不分故自王安石用事陷溺人心至今不自知觉人趋利而不知义则主势日孤人主当于此留意不然则是所谓虽有粟吾得而食诸也是时吏部员外郎朱松与侗为同门友雅重侗遣子熹从学熹卒得其传沙县邓迪尝谓松曰愿中如冰壶秋月莹彻无瑕非吾曹所及松以为知言熹亦称侗姿稟劲特气节豪迈而充养完粹无复圭角精纯之气达于面目色温言厉神定气和语默动静端详闲泰自然之中若有成法平日恂恂于事若无甚可否及其酬酢事变断以义理则有截然不可犯者又谓自从侗学辞去复来则所闻益超绝其上达不已如此侗子友直信甫皆举进士试吏旁郡更请迎养归道武夷会闽帅汪应辰以书币来迎侗往见之至之日疾作遂卒 【按名臣言行录云谥文靖】 信甫仕至监察御史出知衢州擢广东江东宪以特立不容于朝云

钦定续通志卷五百四十三

●钦定续通志卷五百四十四 儒林传七

儒林传

宋 【五】

○宋五

王当 胡安国【寅 宏宁】 范冲 陈旸【祥道】 朱震

王当

胡安国

范冲

陈旸 【陈祥道】

朱震

△王当

王当字子思眉州眉山人幼好学博览古今所取惟王佐大畧尝谓三公论道经邦燮理阴阳镇抚四方亲附百姓皆出于一道其言之虽大其行之甚易尝举进士不中退居田野叹曰士之居世苟不见其用必见其言遂着春秋列国名臣传五十卷人竞传之元佑中苏辙以贤良

方正荐廷对慷慨不避权贵策入四等调龙游县尉蔡京知成都举为学官当不就其后京相当遂不复仕卒当于经学尤邃易与春秋皆为之
传得圣人之旨居多又有经旨三卷史论十二卷兵书十二卷

△胡安国

胡安国字康侯建宁崇安人入太学以程颐之友朱长文及颍川革裁之为师裁之与论经史大义深重奇之中绍圣四年进士第初廷试
考官定其策第一宰职以无诋元佑语遂以何昌言冠方天若次之又欲以宰相章惇子次天若时发策大要崇复熙宁元丰之制安国推明大学以渐复三代为对哲宗称善亲擢第三为太学博士足不摄权门提举湖南学事有诏举遣逸安国以永州布衣正绘邓璋应诏二人老不行
安国请命之官以劝为学者零陵簿称二人党人范纯仁客而流人邹浩所请托也蔡京素恶安国与己异得簿言大喜命湖南提刑置狱推治
又移湖北再鞫卒无验安国竟除名未几簿以他罪抵法台臣直前事复安国官致和元年张商英相除提举成都学事移江东父歿终丧谓子
弟曰吾昔为亲而仕今虽有禄万锺将何所施遂称疾不仕宣和末李弥大吴敏谭世绩合荐除屯田郎辞靖康元年除太常博士辞除起居郎
又辞朝旨趣行至京以疾在告一日钦宗召见安国奏曰明君以务学为急圣学以正心为要心者万事之宗正心者揆事宰物之权愿擢名儒
明于治国平天下之本者虚怀访问阐发独智又言为天下国家必有一定不可易之计谋议既定君臣固守故有志必成治功可立今南向视
朝半年矣而纪纲尚紊风俗益衰措置乖方举动烦扰大臣争竞而朋党之患萌百执窥觊而浸润之奸作用人失当而名器愈轻出令数更而
士民不信若不扫除旧迹乘势更张窃恐大势一倾不可复正乞访大臣各令展尽底蕴画一具进先宣示台谏使随事疏驳若大臣议绌则参
用台谏之言若疏驳不当则专守大臣之策仍集议于朝断自宸衷按为国论以次施行庶几新政有经中兴可冀钦宗曰比留词掖相待已命
召卿试矣时门下侍郎耿南仲倚攀附恩凡与己不合者即指为朋党见安国论奏愠甚乃言安国意窥经筵不宜召试钦宗不答安国屡辞南
仲又言安国不臣往不事上皇今又不事陛下钦宗曰渠自以病辞初非有向背也每臣僚登对钦宗即问识胡安国否中丞许翰曰自蔡京得
政士大夫无不受其笼络超然远迹不为所污如安国者实鲜钦宗叹息遣晁说之宣旨令勉受命且曰他日欲去即不强留即试除中书舍人
赐三品服南仲讽台谏论其稽命不恭宜从黜削疏奏不下安国乃就职南仲既倾宰相吴敏枢密使李纲又谓许景衡晁说之视大臣为去就

怀奸徇私并黜之安国言二人为去就必有陈论怀奸徇私必有实迹乞降付本省载诸词命不报叶梦得知应天府坐为蔡京所知落职奉祠

安国言京罪己正子孙编置家财没入己无蔡氏矣则向为京所引者今皆朝廷之人若更指为京党则人才见弃者众党论何时而弭乃除梦

得小郡中书侍郎何■〈卤上木下，欠代义〉建议分天下为四道置四都总管各付一面以卫王室捍强敌安国言内外之势适平则安偏重则危今州郡太轻理宜通变一旦以二十三路之广分为四道事得专决财得专用官得辟置兵得诛赏权恐太重万一抗衡跋扈何以待之

乞据见今二十三路帅府迁择重臣付以都总管之权专治军旅或有警急即各率所属守将应援则一举两得矣寻以赵野总北道安国言魏都地重野必误委寄是冬金人大入野遁为羣盗所杀西道王襄拥众不复北顾具如安国言李纲罢中书舍人刘珣行词谓纲勇于报国数至败衄吏部侍郎冯澥言珣为纲游说珣坐贬安国封还词头以为侍从虽当献纳至于弹击官邪必归风宪今台谏未有缄默不言之咎而澥越职此路若开臣恐各以好恶胁持倾陷非所以靖朝着南仲大恐何■〈卤上木下，欠代义〉从而挤之诏与郡■〈卤上木下，欠代义〉

以安国素苦足疾而海门地卑湿乃除安国右文殿修撰知通州安国在省多在告之日及出必有所论列或曰事之小者盍姑置之安国曰事之大者无不起于细微今以小事为不必言至于大事又不敢言是无时可言也安国去逾旬金人薄都城子寅方为郎客或忧之安国愀然曰主上在重围中号令不出卿大夫恨效忠无路敢念子乎敌围益急钦宗亟召安国及许景衡诏竟不达高宗即位以给事中召黄潜善讽给事中康执权论其托疾罢之建炎三年权枢密张浚荐安国可大用再除给事中赐其子寅手札令以帝意催促既次池州闻驾幸吴越引疾还绍兴元年除中书舍人兼侍讲遣使趣召安国以时政论二十一篇先献之论入复除给事中二年七月入对乞以所进二十一篇施行其论之目曰定计建都设险制国恤民立政核实尚志正心养气宏度宽隐论定计畧曰陛下履极六年以建都则未有必守不移之居以讨贼则未有必操不变之术以立政则未有必行不反之令以任官则未有必信不疑之臣舍今不图后悔何及论建都谓宜定都建康以比关中河内为兴复之基论设险谓欲固上流必保汉沔欲固下流必守泗淮欲固中流必以重兵镇安陆论立志谓当必志于恢复中原只奉陵寝必志于扫平讎敌迎复两宫论正心谓戡定祸乱虽急于戎务而裁决戎务必本于方寸愿选正臣多闻识有志虑敢直言者置诸左右日夕讨论以宅厥心论

养气谓用兵之胜负军旅之强弱将帅之勇怯系人君所养之气曲直何如愿强于为善益新厥德则至则可以塞两间一怒可以安天下矣居旬日再见以疾恳求去高宗曰闻卿深于春秋方欲讲论遂以左氏传付安国点句正音安国奏春秋经世大典见诸行事非空言比今方思济艰难左氏繁碎莫若潜心圣经高宗称善寻除安国兼侍读专讲春秋会除故相朱胜非同都督江淮荆浙诸军事安国奏胜非与黄潜善汪伯彦同在政府缄默附会驯致渡江尊用张邦昌结好金国沦灭三纲天下愤郁及正位冢司苗刘建逆贪位苟容辱逮君父今强敌凭陵叛臣不忌用人得失系安国危深恐胜非上误大计胜非改除侍读安国持录黄不下左相吕颐浩特令校正黄龟年书行安国言有官守者不得其职则去臣今待罪无补既失其职当去甚明况胜非系臣论列之人今朝廷乃称胜非处苗刘之变能调护圣躬昔公羊氏言祭仲废君为行权先儒力排其说盖权宜废置非所施于君父春秋大法尤谨于此建炎之失节者今虽特释而不问又加选擢习俗既成大非君父之利臣以春秋入直而与胜非为列有违经训遂不出初颐浩都督江上还朝欲去异己者未得其策或教之指为朋党且曰党魁在琐闼当先去之颐浩大喜即引胜非为助而降言曰胡安国屡召偃蹇不至今始造朝又数有请初言胜非不可同都督及改命经筵又以为非岂不以时艰不肯尽瘁乃欲求微罪而去其自谋则善如国计何落职提举僊都观是夕彗出东南右相秦桧三上章乞留之不报即解相印去 【按名臣言行录云秦桧尝为密州教授翟公巽知密州荐试宏词游酢过密与之同饭于翟奇之后安国问人才于酢首以桧对云其人类荀文若又云无事不会既而京城破金欲立张邦昌桧抗论以为不可安国益义其所为力言于张浚诸人之前后桧自金归与闻国政安国有词掖讲筵之召则桧之荐也与史传所载较异】 侍御史江躋上疏极言胜非不可用安国不当责右司谏吴表臣亦言安国扶病见君欲行所学今无故罪去恐非所以示天下不报颐浩即黜给事中程瑀起居舍人张焘及躋等二十余人云应天变除旧布新之象台省一空胜非遂相安国竟归五年除徽猷阁待制知永州辞诏以经筵旧臣重闵劳之特从其请提举江州太平观令纂修所著春秋传书成高宗谓深得圣人之旨除提举万寿观兼侍读未行谏官陈公辅上疏诋假托程颐之学者安国奏曰孔孟之道不传久矣自颐兄弟始发明之然后知其可学而至今使学者师孔孟而禁不得从颐学是入室而不由户也本朝自嘉佑以来西都有邵雍程颢及其弟颐关中有张载皆道德名世会王安石蔡京等曲加排抑故其道不

行望下礼官讨论故事加之封爵载在祀典仍诏馆阁哀其遗书校正颁行使邪说不得作奏入公辅与中丞周秘侍御史石公揆承望宰相风旨交章论安国学术颇僻除知永州辞复提举太平观进宝文阁直学士卒诏赠四官又加赙赐田十顷恤其孤谥曰文定盖非常格也安国强学力行以圣人为标准志于康齐时艰虽数以罪去其爱君忧国之心远而弥笃每有君命即置家事不问然风度凝远萧然尘表视天下万物无一足以婴其心朱震被召问出处之宜安国曰子发学易二十年此事当素定矣世间惟讲学论政不可不切切询究至于行己大致去就语默之几如人饮食其饥饱寒温心自斟酌不可决诸人亦非人所能决也渡江以来儒者进退合义以安国尹焞为称首安国所与游者游酢谢良佐杨时皆程门高弟其使湖北也时方为府教授良佐为应城宰安国质疑访道礼之甚恭每来谒而去必端笏正立目送之自王安石废春秋不列学官安国为先圣手所笔削之书乃使人主不得闻讲说学士不得相传习乱伦灭理殆由乎此故潜心是书二十余年以为天下事物无不备于此每叹曰此传心要典也安国少欲以文章名世既学道乃不复措意有文集十五卷资治通鉴举要补遗一百卷三子寅宏宁

胡寅

胡宏

胡宁

胡寅

寅字明仲安国弟之子也寅将生弟妇以多男欲不举安国妻梦大鱼跃盆水中急往取而子之少桀黜难制父闭之空阁其上有杂木寅尽刻为人形安国曰当有以移其心别置书数千卷于其上年余寅悉成诵游辟雍中宣和进士甲科靖康初以御史中丞何■（卤上木下，欠代义）荐召除秘书省校书郎杨时为祭酒寅从之受学迁司门员外郎金人陷京师议立异姓寅与张浚赵鼎逃太学中不书议状张邦昌伪立寅弃官归言者劾其离次降一官建炎二年高宗幸金陵枢密使张浚荐为驾部郎官寻擢起居郎金人南侵诏议移蹕之所寅上书曰陛下以亲王介弟出师河北二圣既迁则当纠合义师北向迎请而遽膺翊戴亟居尊位斩戮直臣以杜言路南巡淮海偷安岁月敌入关陕漫不捍御盗贼横溃莫敢谁何元元无辜百万涂地且制造文物讲行郊报自谓中兴金人乘虚直捣行在匹马南渡淮甸流血迨及返正宝位移蹕建康不为久图一向畏缩远避此皆失人心之大者也自古中兴之主所以能克复旧物者莫不本于愤耻恨怒不报怨不已未有乘衰微

阙绝之后固陋以为荣苟且以为安而能久长无祸者也黄潜善与汪伯彦方以乳妪护赤子之术待陛下曰上皇之子三十人今所存惟圣体不可不自重爱曾不思宗庙则草莽湮之陵阙则畚鍤惊之潜善伯彦所以误陛下蹙士字丧生灵者可胜罪乎本初嗣服既不为迎二圣之策因循远狩又不为守中国之谋以致德义不孚号令不行刑罚不威爵赏不劝若不更辙以救垂亡则陛下永负孝悌之愆常有父兄之责人心一去天命难恃虽欲羁栖山海恐非自全之计愿下诏罪己以耸动人心决意讲武按行淮襄收其豪英誓以战伐天下忠义武勇必云合响应陛下凡所欲为孰不如志其与退保吴越岂可同年语哉今日图复中兴之策莫大于罢绝和议以使命之币为养兵之资不然则僻处东南万事不竞纳赂则孰富于京室纳质则孰重于二圣反复计之所谓乞和决无可成之理夫大乱之后风俗靡然欲丕变之在于务实效去虚文治兵择将誓复故疆者孝弟之实也遣使乞和冀幸万一者虚文也屈己求贤信用羣策者求贤之实也外示礼貌不用其言者虚文也苟利于国即日行之者纳谏之实也和颜泛受内恶切直者虚文也擢智勇忠直之人待御以恩威结约以诚信者任将之实也亲厚庸臣等威不立者虚文也汰疲弱择壮勇足其衣食申明阶级以变其骄悍之习者治军之实也教习见戏纪律荡然者虚文也遴选守刺久于其官痛刈奸赃广行宽恤者爱民之实也军须戎具征求取办蠲租赦令苟以欺之者虚文也若夫保宗庙陵寝土地人民以此六实者行乎其间则为中兴之实政也陵庙荒圯土宇日蹙衣冠黔首为血为肉以此六虚者行乎其间则为今日虚文君子小人势不两立仁宗皇帝任位得君子最多小人亦时见用然罪着则斥君子亦或见废然忠显则收故其成当世之功贻后人之辅者皆君子也至王安石则不然斥绝君子一去而不还崇信小人一任而不改故其败当世之政为后世之害者皆小人也仁宗皇帝所养之君子既日远而销亡矣安石所致之小人方蕃息而未艾也所以误国破家至毒至烈仗节死难者不过一二人此浮华轻薄之害明主之所畏而深戒者也古之称中兴者曰拨乱世反之正今之乱亦云甚矣其反正而兴之在陛下其遂陵替不振亦在陛下昔宗泽一老从官耳犹能推诚感动诸军北连怀卫同迎二圣克期密应者无虑数十万人何况陛下身为子弟欲北向而有为将见举四海为陛下用期以十年必能远迓父兄称宋中兴其与惕息遁藏跪危负耻如今日岂不天地相绝哉疏入宰相吕颐浩恶其切直除直龙图阁主管江州太平观三年诏内外官各言省费裕国强兵息民之策寅以十事应诏曰修政事备边陲治

军旅用人才除盗贼信赏罚理财用核名实屏谗佞去奸慝不报寻命知永州绍兴四年复召为起居郎迁中书舍人赐三品服时议遣使人云中寅上疏言顷者误国之臣遣使求和以苟岁月九月于兹其效如何幸陛下灼见邪言渐图恢复忠臣义士各思见效今无故蹈庸臣之辙忘复讎之义陈自辱之辞臣窃为陛下不取也若谓不少贬屈如二圣何则自丁未以至甲寅所以卑辞厚礼以问安迎请为名而遣使者不知几人矣知二圣之所在者谁欤闻二圣之声音者唯欤得金人之要领而息兵者谁欤臣但见通和之使归未息肩而黄河长淮大江相继失险矣夫金知我国所重在二圣所惧在劫质所畏在用兵而我国坐受此饵既久而不悟也天下谓自是必改图矣何为复出此谬计耶高宗嘉之降诏奖论既而右仆射张浚自江上还奏遣使为兵家机权竟反前旨寅复奏疏言今日大计只合用贤修德息兵训民以图北向倘或未可则坚守待时若夫二三其德无一定之论必不能有所立寅既与浚异遂乞便郡就养姑寅上言近年书命多出词臣好恶之私使人主命德讨罪之词未免玩人丧德之失乞命词臣以饰情相悦含怒相訾为戒故寅所撰词多诘诫于是妒忌者众朝廷辨宣仁圣烈之诬行遣章惇蔡卞皆宰臣面授上旨令寅撰进除徽猷阁待制知邵州辞改集英殿修撰复以待制改知严州又改知永州徽宗皇帝宁德皇后讣至朝廷用故事以日易月寅上疏言礼讎不复则服不除愿降诏旨服丧三年衣墨临戎以化天下寻除礼部侍郎兼侍讲直学士院丁父忧免丧时秦桧当国除徽猷阁直学士提举江州太平观俄乞致仕遂归衡州桧既忌寅虽告老犹愤之右正言章复劾寅不持本生母服不孝谏诵邻好不忠责授果州团练副使新州安置桧死诏自便寻复其官二十二年卒寅志节豪迈初擢第中书侍郎张邦昌欲以女妻之不许始安国颇重秦桧之大节及桧擅国寅遂与之绝新州谪命下即日就道任谪所著读史着见论语详说行于世其为文根着义理有斐然集三十卷

胡宏

宏字仁仲幼事杨时侯仲良而卒传其父之学优游衡山下余二十年张栻师事之绍兴间上书其畧曰治天下有本仁也何谓仁心也心官茫茫莫知其乡若以为知其体乎有所不察则不知矣有所顾虑有所畏惧则虽有能知能察之良心亦浸消亡而不自知此臣之所大忧也陛下试于静时思之方今之世当陛下之身事孰为大乎孰为急乎必有欺然而馁惻然而痛坐起彷徨不能自安者则良心可察矣昔舜以匹夫为天子瞽叟以匹夫为天子父受天下之养岂不足于穷约哉而瞽叟犹不悦自常情

观之舜可以免矣而舜蹙然有忧之举天下之大无足以解忧者二圣远适穷荒辛苦垫隘其愿陛下加兵敌国心自睽睽庶几一得生还父子兄弟相持而泣欢若平生引领东望九年于此矣夫以疏贱念此痛心思欲有为况陛下当其任乎而在廷之臣不能对扬天心充陛下仁孝之志反以天子之尊北面于敌陛下自念以此事亲于舜何如也且羣臣智谋浅短自度不足以任大事故欲偷安江左贪图宠荣皆为身谋尔陛下乃信之以为必持是可以进抚中原展省陵庙来还两宫亦何误耶陛下即位以来中正邪佞更进更退无坚定不易之识然陈东以直谏死于前马伸以正论死于后未闻诛一奸邪黜一谀佞何摧中正之勿而去奸邪之难也以天子之威握亿兆之命乃不能保全二三腹心耳目之臣以自辅助而令奸邪得而杀之于谁责乎臣窃伤陛下威权之不在己也高闾为国子司业请幸太学宏见其表作书责之曰太学明人伦之所在也太上皇帝劫制于强敌生往死归此臣子痛心切骨卧薪尝胆宜思所以必报也而柄臣乃敢欺天罔人以大讎为大恩乎太母天下之母其纵释乃在金人臣子所不忍言也而柄臣乃敢欺天罔人以大辱为大恩乎合下目覩忘讎灭理北面敌国以苟宴安人事犹偃然为天下师儒之首既不能建大论明天人之理以正君心乃阿谀柄臣希合风旨求牛太平之典欺天罔人孰甚焉宏初以荫补右承务郎不调秦桧当国贻书其兄寅问二弟何不通书意欲用之宏作书止叙契好而已书辞甚厉人问之宏曰正恐其召故示之以不可召之端桧死宏被召竟以疾辞卒著书曰知言张栻谓其言约义精道学之枢要制治之著龟也学者称五峯先生有诗文五卷皇王大纪八十卷

胡宁

宁字和仲以荫补官秦桧当国召试馆职除敕令所删定官奏熺知枢密院事桧问宁曰熺近除外议云何宁曰外议谓相公必不为蔡京所为也迁太常丞祠部郎官初宁以父兄故召用及寅与桧忤乃出宁为夔路安抚司参议官除知澧州不赴主管台州崇道观卒安国之传春秋也修纂检讨尽出宁手宁又着春秋通旨以羽翼其书云

△范冲

范冲字符长登绍圣进士第高宗即位召为虞部员外郎俄出为两淮转运副使绍兴中降佑皇后诞日帝置酒宫中从容语及前朝事后曰吾逮事宣仁圣烈皇后聪明母仪古今未有见其比曩因奸臣诬谤建炎初虽下诏辨明而史录未经删定无以传信后世而慰在天之灵帝悚然亟诏重修神哲两朝实录召冲为宗正少卿兼直史馆冲父祖禹元佑中尝修神宗

实录尽书王安石之过以明神宗之圣其后安石壻蔡
卞恶之祖禹坐谪死岭表至是复以命冲冲因论熙宁创置元佑复古绍圣以降弛张不
一本末先后各有所因又极言王安石变法度之非蔡
京误或之罪帝嘉纳之迁起居郎俄开讲筵升兼侍读帝雅好左氏春秋命冲与朱震专
讲冲敷衍经旨因以规讽帝未尝不称善会皇子建国
公瑗出就傅首命冲以徽猷阁待制提举建隆观为资善堂翊善而朱震兼赞读时张浚
在长沙亦荐冲震可备训导冲震皆一时名德老成帝
命建国公凡见翊善赞读皆纳拜俄迁翰林学士兼侍读冲力辞改翰林侍读学士用其
父故事也寻以龙图阁直学士奉祠卒冲之修神宗实
录也为考异一书明示去取旧文以墨书其所删去者以黄书新修者以朱书世号朱墨
史及修哲宗实录别为一书名辨诬录冲性好义乐善
司马光家属皆依冲所冲抚育之为光编类记闻十卷奏御请以光之族曾孙宗召主光
祀又尝荐尹焞自代云

△陈旸【陈祥道】

陈旸字晋之福州人中绍圣制科授顺昌军节度推官徽宗初进迓衡集以劝导绍
述得太学博士秘书省正字礼部侍郎赵挺之言旸所
着乐书二十卷贯穿明备乞援其兄祥道进礼书故事给札既上迁太常丞进驾部员外
郎为讲议司参详礼乐官魏汉津议乐用京房二变四
清旸曰五声十二律乐之正也二变四清乐之蠹也二变以变宫为君四清以黄钟清为
君事以时作固可变也而君不可变太簇大吕夹钟或
可分也而黄钟不可分岂古人所谓尊无二上之旨哉时论方右汉津绌旸议进礼部侍
郎以显谟阁待制提举醴泉观尝坐事夺己而复之卒
祥道字用之元佑中为太常博士终秘书省正字所著礼书一百五十卷与旸乐书并行
于世

△朱震

朱震字子发荆门军人登政和进士第仕州县以廉称胡安国一见大器之荐于高
宗召为召勋员外郎称疾不至会赵鼎人为参知政事
荐震学术深博廉正守道便任讲读必有益于陛下乃召之既至帝问以易春秋之旨震
具以所学对帝说擢为祠部员外郎兼川陕荆襄都督
府详议官震因言荆襄之间沿汉上下腴田七百余里若选良将领部曲镇之招集流亡
务农种谷敌来则御敌去则耕不过三年兵食自足又
给茶盐钞于军中募人中余可以下江西之舟通湘中之粟观衅而动席卷河南此以逸
待劳万全计也迁秘书少监兼侍经筵转起居郎建国
公出就傅以震为赞读迁中书舍人兼翊善时郭千里除将作监丞震言千里侵夺民田

曾经按治愿寝新命从之转给事中兼直学士院迁翰林学士是时虔州民为盗天子选良太守往抚之将行震曰使居官者廉而不援则百姓自安虽诱之为盗亦不为矣愿诏新太守到官日条具本郡及属县官吏有贪墨无状者一切罢去听其自择慈惠之人有治效者优加奖劝帝从其言故事当丧无享庙礼时徽宗未祔庙太常少卿吴表臣奏行明堂之祭震因言王制丧三年不祭惟天地社稷为越紼而行事春秋书夏五月乙酉吉禘于庄公公羊传曰讥始不三年也真宗景德二年居明德皇后丧既易月而除服明年遂享太庙合祀天地于圜兵当时未行三年之丧专行以日易月之制可也在今日行之则非也诏侍从台谏礼官参议卒用御史赵涣礼部侍郎陈公辅言大享明堂绍兴七年震谢病丐祠旋知礼部贡举会卒震经学深醇有汉上易解以程颐易传为宗和会邵雍张载之论上采汉魏吴晋下逮有唐及宋包括异同盖其意以王弼尽去旧说杂以庄老专尚文辞为非故于象数加详焉

钦定续通志卷五百四十四

●钦定续通志卷五百四十五 儒林传八

儒林传

宋 【六】

○宋六

奇	刘子翬	洪兴祖	喻樗	高闾	程大昌	林之奇
	林光朝	杨万里				
	刘子翬					
	洪兴祖					
	喻樗					
	高闾					
	程大昌					
	林之奇					
	林光朝					
	杨万里					
	△刘子翬					

刘子翬字彦冲赠太师鞏之仲子以父任授承务郎辟真定府幕属鞏歿于靖康之难子翬痛愤不欲生庐墓三年服除通判兴化军寇杨就犯闽境子翬与郡将张当世画计备御贼不敢犯事闻诏因任子翬始以执丧致羸疾至是以不堪吏责辞归武夷山不出者凡十七年闲走

其父墓下瞻望徘徊涕泗呜咽或累日而返妻死不再娶事继母吕氏及兄子羽尽孝友子羽子珙幼嗜学子翬教之不懈珙卒有立与籍溪胡宪白水刘勉之交相得每见讲学外无杂言他所与游者海内知名士而期以任重致远者惟新安朱熹而已初熹父松以熹托子翬及熹请益子翬告以易之不远复三言俾佩之终身子翬少喜佛氏说归而读易即涣然有得其说以为学易当先复故以是告熹焉一日感微疾即谒家庙泣别母与亲朋诀付珙家事指葬处处亲戚孤弱之无业者训学者修身求道数百言后二日卒学者解屏山先生 【按名臣言行录云子翬论经制之道曰今主计之官无出入之制随田取足不量民力兵以卫民食于民官以治民食于民苟出不临戎居不司事勿食可也郡县已并旋复员缺可灭复增或虑裁抑之行众将咨怨殊不思费用之广一取于民耳此经制之道有未尽也宋史不载今附识】 珙别有传

△洪兴祖

洪兴祖字庆善镇江丹阳人少读礼至中庸顿悟性命之理绩文日进登政和上舍第为湖州士曹改宣教郎高宗时在扬州庶事草创选人改秩军头司引见自兴祖始召试授秘书省正字后为太常博士上疏乞收人心纳谋策安民情壮国威又论国家再造一宜以艺祖为法绍兴四年苏湖地震兴祖时为驾部郎官厅诏上疏具言朝廷纪纲之失为时宰所恶主管太平观起知广德军视水原为陂塘六百余所民无旱忧新学舍定从祀自十哲曾子而下七十有一人又列先儒左邱明而下二十有六人擢提点江东刑狱知真州州当兵冲疮痍未瘳兴祖始至请复一年租从之明年再请又从之自是流民复业垦辟荒田至七万余亩徙知饶州先梦持六刀觉曰三刀为益今倍之其饥乎已而果然时秦桧当国谏官多桧门下争弹劾以媚桧坐作故龙图合学士程瑀论语解序语涉怨望编管绍州卒明年诏复其官直敷文阁兴祖好古博学自少至老未尝一日去书着老庄本旨周易通义系辞要旨古文孝经序赞离骚楚词考异行于世

△喻樗

喻樗字子才其先南昌人初愈药仕梁位至安州刺史武帝赐姓喻后徙严樗其十六世孙也质直好议论少幕伊洛之学中建炎三年进士第赵鼎去枢筦居常山樗往谒因讽之曰公之事上当使启沃多而施行少启沃之际当使诚意多而语言少鼎奇之引为上客及都督川陕荆襄辟为属绍兴初高宗亲征樗见鼎曰公自度此举果出万全乎或姑试一擲也鼎曰累年退避不振敌情益骄义不可更屈故赞上行耳若

事之济否则非鼎所知也樗曰然则当思归路毋以敌遗君父忧鼎曰策安出樗曰张德远有重望居闽今莫若使为江淮荆浙福建等路宣抚使俾以诸道兵赴阙命下之日府库军旅钱谷皆得专之宣抚来路即朝廷归路也鼎于是入奏曰今沿江经画大计畧定非得大臣相应援不可如张浚人才陛下终弃之乎帝遂起浚知枢密院事樗往来鼎浚间多所裨益以鼎荐授秘书省正字兼史馆校勘初金既退师鼎浚相得欢甚人知其将并相樗独言二人宜且同在枢府他日赵退则张继之立事任人未甚相远则气脉长若同处相位万有一不合或当去位则必更张是贤者自相背戾矣后如其言又尝曰推车者遇艰险则相诟病及车之止也则欣然如初士之于国家亦若是而已先是樗与张九成皆言和议非便秦桧既主和言者希旨劾樗与九成谤讪樗出知舒州怀宁县通判衡州寻致仕桧死复起为大宗正丞转工部员外郎出知蕲州孝宗即位用为提举浙东常平以治绩闻淳熙七年卒樗善鉴识宣和间谓其友人沈晦试进士当第一建炎初又谓今岁进士张九成当第一凌景夏次之会风折大槐樗以作二简遗之后果然赵鼎尝以樊光远免举事访樗樗曰今年省试不可无此人于是光远亦第一初樗二女方择配富人交请婚不许及见汪洋张孝祥乃曰佳壻也遂妻之

△高阅

高阅字抑崇明州鄞县人绍兴元年以上舍选赐进士第执政荐之召为秘书省正字时将赐新进士儒行中庸篇阅奏儒行诏说不醇请止赐中庸庶学者知圣学渊源而不惑于他说从之权礼部员外郎兼史馆校勘面对言春秋之法莫大于正名今枢密院号本兵柄而诸路军马尽属都督是朝廷兵柄自分为二又周六卿大事则从其长小事官属犹得专达今一切拘以文法虽利害灼然可见官长且不敢自决必请于朝故庙堂之事益繁而省曹官属乃与胥吏无异又政事之行给舍得缴驳台谏得论列若给舍以为然台谏以为不然则不容不改祖宗时有缴驳台谏章疏不以为嫌者恐其得于风间致朝廷有过举也然此风不见久矣臣恐朝廷之权反在台谏且祖宗时监察御史许言事靖康中尝行之今则名为台官实无言责此皆名之未正也寻迁著作佐郎被论罢主管崇道观召为国子司业时兴太学阅奏宜先经术国初循唐制用诗赋神宗始以经术造士遂罢诗赋又虑不足以尽人才乃设词学一科今宜以经义为主而加诗赋帝然之阅于是条具以闻其法以六经论语孟子为一场诗赋次之子史又次之时务策又次之太学课试及郡国科举尽以此为法且立郡国士补国学监生之制中兴以后学制

多闻所建明闻又言建学之始宜得老成以诱掖后进乃荐全州文学师维藩诏除国子录维藩眉山人精春秋学及新学成闻奏补试者六千人且乞临雍继率诸生上表以请于是帝幸太学秦熺执经闻讲易泰卦赐三品服闻少宗程颐学宣和末杨时为祭酒闻为诸生胡安国至京师访士于时以闻为首称由是知名闻除礼部侍郎帝因问闻张九成安否明日复以问秦桧桧疑闻荐中丞李文会承桧指劾闻出知筠州不赴卒初秦棣尝使姚孚请婚闻辞之其著述有春秋集传行于世

△程大昌

程大昌字泰之徽州休宁人十岁能属文登绍兴二十一年进士第主吴县簿未上丁父忧服除着十论言当世事献于朝宰相汤思退奇之擢太平州教授明年召为太学正试馆职为秘书省正字孝宗即位迁著作佐郎时帝锐意事功命令四出贵近或预密议会诏百官言事大昌奏曰汉石显知元帝信己先请夜开宫门之诏他日故夜还称诏启关或言矫制帝笑以前诏示之自是显真矫制人不复言国朝命令必由三省防此弊也请自今被御前直降文书皆申省审奏乃得行以合祖制以杜奸萌又言去岁金师入侵无一士死守而兵将至今策勋未已惟李宝捷胶西虞允文战采石宝有功焉今宝罢兵允文守夔此公论所为不平也帝称善选为恭王府赞读迁国子司业兼权礼部侍郎直学士院帝问大昌曰朕治道不进柰何对曰陛下勤俭过古帝王金国通和不可谓无效但当求贤纳谏修政事则大有为之业在其中不必他求奇策以幸速成又言淮上筑城太多缓急何人可守设险莫如练卒练卒莫如择将帝称善除浙东提点刑狱会岁丰酒税踰额有挟朝命请增额者大昌力拒之曰大昌宁罪去不可增也徙江西转运副使会岁歉出钱十余万缗代输吉赣临江南安夏税折帛清江县旧有破坑桐二堰以捍江护田及民居地几二千顷后堰坏岁罹水患大昌力复其旧进秘阁修撰召为秘书少监兼中书舍人六和塔寺僧以镇湖为功求内降赐所置田产仍免科徭大昌奏僧寺既违法置田又移科徭于民柰何许之况自修塔后潮果不啮岸乎寝其命权刑部侍郎升侍讲兼国子祭酒大昌言辟以止辟未闻纵有罪为仁也今四方讞狱例拟贷死臣谓有司当守法人主察其可贷则贷之则法伸乎下仁归乎上矣帝以为然兼给事中江陵都统制率逢原纵部曲殴百姓守帅辛弃疾言状徙帅江西大昌极论自此屯戍州郡不可为矣逢原由是坐削两官降本军副将累迁权吏部尚书言今日诸军西北旧人日少其子孙伉健者当教之战阵不宜轻听离军且禁卫之士祖宗非独以备宿卫而已南征北伐

是尝为先锋今率三年补外用违其长即有征行无人在选柰何始以材武择之而终以庸常弃之乎愿留三衙勿遣会行中外更迭之制力请郡遂出知泉州汀州贼沈师作乱戍将萧统领与战死闽部大震漕檄统制裴师武讨之师武以未得帅符不行大昌手书趋之曰事急矣如帅页君可持吾书自解时贼谋攻城先使谍者衷甲纵火为内应会师武军至获谍者贼遂散去迁知建宁府光宗嗣位徙知明州寻奉祠绍熙五年请老以龙图阁学士致仕庆元元年卒谥文简大昌笃学于古今事靡不考究有禹贡论易原雍录易老通言考古编演繁露北边备对行于世

△林之奇

林之奇字少颖福州侯官人中书舍人吕本中入闽之奇甫冠从学时将试礼部行次衢州以不得事亲反学益力中绍兴二十一年进士第调莆田簿改尉长汀召为秘书省正字转校书郎会朝廷欲令学者参用王安石经义之奇上言王氏三经率为新法地晋人以王何清谈之罪深于桀纣本朝靖康祸乱考其端倪王氏实负王何之责在孔孟书正所谓邪说讹行淫辞之不可训者或传金人欲南侵之奇作书抵当路以为久和畏战人情之常金知吾重于和故常以虚声喝我示我以欲战意非果欲战直以坚吾和耳欲与之和宜无惮战则其权在我又言战之所须不一而人才为先必求可与共患难者非得如庞士元所谓俊杰者不可也以痹疾乞外由宗正丞提举闽舶参帅议遂以祠禄官居自称拙斋吕祖谦尝受学焉淳熙三年卒有书春秋周礼说论孟扬子讲义道山记闻等书行于世

△林光朝

林光朝字谦之兴化军莆田人再试礼部不第闻吴中陆子正尝从尹焞学因往从游自是专心圣贤践履之学贯通六经百氏言动必以礼来学者数百人南渡后以伊洛之学倡东南者自光朝始然未尝著书惟口授学者使之心通理解尝曰道之本体全乎太虚六经既发明之后世批注固已支离若复增加道愈远矣隆兴元年年五十以进士及第调袁州司户参军干道三年龙大渊曾觐因潜邱恩幸进光朝以名儒荐对颇及二人罪由是改左承奉郎知永福县大臣论荐不已召试馆职为秘书省正字兼国史编修实录检讨官愿著作佐郎兼礼部郎官八年进国子监司业兼太子侍读史职如故是时张说再除签书枢密院事光朝不往贺遂出为广西提点刑狱移广东茶寇自荆湖剽江西薄岭南光朝自将郡兵檄摧锋统制路海本路钤辖黄进各以军分控要害会诏徙转运副使

光朝谓贼势方张留屯不去督二将遮击连败之贼惊惧宵遁帝闻之喜曰林光朝儒生乃知兵耶加直宝谟阁召拜国子祭酒兼太子左谕德淳熙四年帝幸国子监命讲中庸帝大称善不数日除中书舍人是时吏部郎谢廓然由曾觌荐赐出身除殿中侍御史命从中出光朝愕曰是轻台谏羞科目也立封还诏头帝度光朝决不奉诏改授工部侍郎不拜遂以集英殿修撰出知婺州因引疾提举兴国宫卒

△杨万里

杨万里字廷秀吉州吉水人中绍兴二十四年进士第为赣州司户调永州零陵丞时张浚谪永杜门谢客万里三往不见以书力请始见之浚勉以正心诚意之学万里服其教终身乃名书室曰诚斋浚入相荐之朝除临安府教授改知奉新县民逋赋者揭其名帝中民讙趋之赋不援而足县大治会陈浚卿虞允文为相交荐之召为国子博士侍讲张栻以论张说出守袁万里抗疏留栻又遗允文书以和同之说规之栻虽不果留公论伟之累迁将作少监出知漳州改常州寻提举广东常平茶盐盗沈师犯南粤帅师往平之孝宗称之曰仁者之勇遂有大用意就除提点刑狱请于潮惠二州筑外砦潮以镇贼之巢惠以扼贼之路俄以忧去服除召为尚左郎官淳熙十二年五月以地震应诏上书曰臣闻言有事于无事之时不害其为忠言无事于有事之时其为奸也夫矣南北和好踰二十年一旦绝使敌情不测相传缮汴京城池开海州漕渠又于河南北签民居增驿骑制马枋籍并泉而吾之间谍不得入此何为者耶臣所谓言有事于无事之时者一也或谓金主北归可谓中国之贺臣以中国之忧正在乎此盖惩创于海陵之空国而南侵也将欲南之必故北之或者以身镇抚其北而以其子与壻经营其南也臣所谓言有事于无事之时者二也臣窃闻论者或谓缓急淮不可守则弃淮守江是大不然昔者吴与魏力争而得合肥然后吴始安李煜失滁扬二州南唐始蹙今曰弃淮而保江既无淮矣江可得而保乎臣所谓言有事于无事之时者三也今淮东西凡十五郡所谓守帅不知陛下使宰相择之乎使枢廷择之乎使宰相择之宰相未必为枢廷虑也使枢廷择之则除授不自己出也一则为之虑一则不自己出缓急败事则皆曰非我也陛下将责之谁乎臣所谓言有事于无事之时者四也且南北各有长技若骑若射北之长技也若舟若步南之长技也今为北计者日缮治其海舟而南之海舟则不闻缮治焉或曰吾舟素具也或曰舟虽未具而惮于扰也绍兴辛巳之战山东采石之功不以骑也不以射也不以步也舟焉而已当时之舟今可复用乎夫斯民一日之扰与社稷百世之安危孰轻孰

重事固有大于扰者也臣所谓言有事于无事之时者五也陛下以今为何等时耶金人日逼强场日扰未闻防守之策但闻某日修某礼文也某日进某书史也是以乡饮理军以千羽解围也臣所谓言有事于无事之时者六也臣闻古者人君人不能悟之则天地能悟之今敌情不测如此而君臣上下处之如太平无事时是人不能悟之矣故上天见灾异异时荧惑犯南斗镇星犯端门荧惑守羽林臣书生不晓天文未敢以为必然也至于春正月日青无光若有两日相摩者兹不曰大异乎然天犹恐陛下不信也至于春日载阳复有雨雪杀物兹不曰大异乎然天犹恐陛下又不信也五月庚寅又有地震兹又不大异乎且夫天变在远臣子不敢奏也不信可也地震在外州郡不敢闻也不信可也今也天变频仍地震辇毂而君臣不闻警惧朝廷不闻咨访人不能悟之则天地能悟之臣不知陛下于此悟乎否乎臣所谓言有事于无事之时者七也频年以来两浙江淮湖广以次旱流徙者相续道殣相枕而常平之積名存实亡入粟之令上行下慢静而无事未知所以振救之动而有事将何所仰以为资耶臣所谓言有事于无事之时者八也古者足国裕民惟食与贷今之所谓钱者富商巨贾阉宦权贵皆盈室以藏之至于百姓三军之用惟破楮券尔万一如唐泾原之师因怒粝食蹴而覆之出不逊语遂起朱泚之乱不可为寒心哉臣所谓言有事于无事之时者九也古者立国必有可畏非畏其国也畏其人也故苻坚欲图晋王犹以为不可谓谢安桓冲江左之望是存晋者二人而已异时名相如赵鼎张浚名将如岳飞韩世忠此金人所惮也近时刘琦可用则早死张栻可用则沮死万一有缓急不知可以督诸军者何人可以当一面者何人而金人之所素惮者又何人而或者谓人之有才用而后见臣闻记曰苟有车必见其式苟有言必闻其声今曰有其人而未闻其可将可相是有车而无式有言而无声也且夫用而后见非临之以大安危试之以大胜负则莫见其用也平居无以知其人必待大安危大胜负而后见焉成事幸矣万一败事悔何及耶昔者谢玄之御苻坚而郗超知其必胜桓温西伐李势而刘惔知其必取盖玄于履屐之间无不当其任温于蒲博不必得则不为二子于平居无事之日必有以察其小而后信其大也岂必大用而后见哉臣所谓言有事于无事之时者十也愿陛下超然远览昭然远寤勿矜圣德之崇高而增其所未能勿恃中国之生聚而严其所未备勿以天地之变异为适然而法宣王之惧灾勿以臣下之苦言为逆耳而体太宗之导谏勿以女谒近习之害政为细故而监汉唐李世致乱之由勿以仇讎之包藏为无他而惩宣政晚年受祸之酷责大臣

以通知边事军务如富弼之请勿以东西二府异其心
委大臣以荐进谋臣良将如萧何所寄勿以文武两途而殊其辙勿使赂宦者而得旄节
如唐大历之弊勿使货近幸而得招讨如梁段凝之败
以重蜀之心重荆襄使东西形势之相接以保江之心保两淮使表里唇齿之相依勿以
海道为无虞勿以大江为可恃增屯聚粮治舰扼险姑
置不急之务精专备敌之策庶几上可消于天变下不堕于敌谋东宫讲官阙帝亲擢万
里为侍读他日读陆宣公奏议等书皆随事规警太子
深敬之王淮为相一日问曰宰相先务者何事曰人才又问孰为才即疏朱熹袁枢以下
六十人以献淮次第擢用之厯枢密院检详守右司郎
中迁左司郎中十四年夏旱复应诏言上泽不下流下情不上达故天地之气隔绝而不
通因疏四事以献言皆恳切迁秘书少监会高宗崩孝
宗欲行三年丧创议事堂命皇太子参决庶务万里上疏力谏且上太子书言天无二日
民无二王一履危机悔之何及愿三辞五辞而必不居
也太子悚然高宗未葬翰林学士洪迈不俟集议配飨独以吕颐浩等姓名上万里疏言
张浚当预且诋迈无异指鹿为马孝宗不悦曰万里以
朕为何如主由是以直秘阁出知筠州光宗即位召为秘书监入对言天下有无形之祸
其惟朋党之论乎盖欲激人主之怒莫如朋党空天下
人才莫如朋党党论一兴其端发于士大夫其祸及于天下前事已然愿陛下建皇极于
圣心公听并观曰君子从而用之曰小人从而废之皆
勿问其某党某党也又论古之帝王固有以知一己揽其权不知臣下窃其权大臣窃之
则权在大臣大将窃之则权在大将外戚窃之则权在
外戚近习窃之则权在近习窃权之最难防者其惟近习乎非敢公窃也私窃之也始于
私窃终必至于公窃而后已可不惧哉绍熙元年借焕
章阁学士为接伴金国贺正旦使兼实录院检讨官会孝宗日厯成参知政事王蔺以故
事俾万里序之而宰臣属之礼部郎官傅伯寿万里以
失职力丐去帝宣谕勉留会进李宗圣政万里当奉进孝宗犹不悦遂出为江东转运副
使权总领淮西江东军马钱粮朝议欲行铁钱于江南
诸郡万里疏其不便不奉诏忤宰相意改知赣州不赴乞祠除秘阁修撰提举万寿宫宁
宗嗣位召赴行在辞升焕章阁待制提举兴国宫乞休
致进宝文阁待制致仕嘉泰三年诏进宝谟阁直学士开禧元年召复辞明年升宝谟阁
学士卒赠光禄大夫万里为人刚而褊孝宗始爱其才
以问周必大必大无善语由此不见用韩侂胄用事欲网罗四方知名士尝属万里为南
国记许以掖垣万里曰官可弃记不可作侂胄恚改命
他人卧家十五年皆其柄国之日也侂胄专僭日益甚万里忧愤怏怏成疾家人知其忧

国也凡邸报不告忽族子自外至遽言侂胄用兵事万里恸哭失声亟呼纸书曰韩侂胄奸臣专权无上动兵残民谋危社稷吾顾头颅如许报国无路惟有孤愤又书十四言别妻子笔落而逝着易传行于世光宗尝为书诚斋二字学者称诚斋先生赐谥文节子长孺

钦定续通志卷五百四十五

●钦定续通志卷五百四十六 儒林传九

儒林传

宋 【七】

○宋七

朱熹 张栻

朱熹

张栻

△朱熹

朱熹字符晦一字仲晦徽州婺源人父松字乔年中进士第 【按名臣言行录云政和八年同上舍出身历政和尤溪尉监泉州石井镇御史胡世将抚谕东南松谒而说之曰尝闻不取关中中原不可复不取荆淮东南不可保今既进不能以六师之重通道荆襄循汉沔以赴兴元控引东路东向以图克复退又不能移蹕建唐治兵训武北争荆淮以为固守之计而但蹙处一方费日月于道途未知漂漂者竟何如耶宋史作中进士第又不载谒胡世将事谨识】 胡世将谢克家荐之除秘书省正字赵鼎都督川陕荆襄军马招松为属辞鼎再相除校书郎迁著作郎以御史中丞常同荐除度支员外郎史馆校勘历司勋吏部郎 【按名臣言行录云松在史院数言宜复武举责实用必其洞晓韬铃长于绥御者以储将帅之才下州郡选骁勇悉送行在以补周卫之缺精择帅守使搜卒乘以壮藩维之势又请建大学明人伦以倡节义之风而励苟偷之习宋史不载谨附识】 秦桧决策议和松与同列上章极言其不可桧怒风御史论松怀异自贤出知饶州未上卒松性孝友与人交重然诺接引后进教诱不怠闻人之善推借如不及至于邪佞嵬琐简贤附势之流与己异趣则鄙而远之施于吏治亦皆果决明辨抑邪扶正无所顾避 【据名臣言行录增】 熹幼颖悟甫能言指日问于父曰日何所附曰附于天又问天何所附松奇之就传授以孝经一阅题其上曰若不如此便不成人尝就羣儿嬉游独以沙列八卦象详观侧玩年十八贡于乡绍兴十八年进士第圭泉州同安簿选邑秀民充弟子员日与讲说圣贤修己治人之道禁妇女为僧道者罢归请祠监潭州南岳庙明年以陈康伯

荐召力辞孝宗即位诏求直言熹上封事言圣躬虽未
有过失而帝王之学不可以不熟讲朝政虽未有阙遗而修御之计不可以不早定利害
休戚虽不徧举而本原之地不可以不加意帝王之学
必先格物致知以极夫事物之变使义理所存纤悉毕照则自然意诚心正而可以应天
下之务修御之计不时定者讲和之说误之也愿断以
义理之公闭关绝约任贤使能立纪纲励风俗数年之后国富兵强视吾力之强弱观彼
衅之浅深徐起而图之四海利病系斯民之休戚斯民
休戚系守令之贤否监司者守令之纲朝廷者监司之本也欲斯民之得其所本原之地
亦在朝廷而已今之监司奸赃狼籍肆虐于民者莫非
宰执台谏之亲旧宾客其已失势者既按见其交私之状而斥去之尚在势者岂无其人
顾陛下无自而知之耳隆兴元年复召入对其一言大
学之道在乎格物以致其知陛下虽有生知之性高世之行而未尝随事以观理即理以
应事是以举措之间动涉疑贰听纳之际未免蔽欺平
治之效所以未着其二言君父之讎不与共戴天今日所当为者非战无以复讎非守无
以制胜其三言古圣王制御之道其本不在乎威强而
在乎德业其备不在乎边境而在乎朝廷其具不在乎兵食而乎在纪纲今日谏争尚雍
佞幸方张爵赏易致威罚不行民力已殫国用未节时
王之望使金未还汤思退力主和近臣曾觐龙大渊招权故奏及之除武学博士待次干
道元年促就职既至而洪适为相复主和论不合归三
年陈俊卿刘珙荐为枢密院编修官待次五年丁内艰六年工部侍郎胡侗以诗人荐与
王庭珪同召以未终丧辞七年复召以禄不及养辞九
年梁克家相申前命又辞克家奏熹屡召不起宜褒录执政俱称之帝曰熹安贫守道廉
退可嘉特改令入官主管台州崇道观熹以求退得进
于义未安再辞淳熙元年始拜命二年帝欲奖用廉退以励风俗袭茂良行丞相以熹名
进除秘书郎力辞且以手书遗茂良言一时权幸羣小
乘闲谗毁乃因熹再辞即从其请主管武夷山冲佑观五年史浩再相除知南康军命便
道之官熹再辞不许至郡兴利除害值岁旱遽求荒政
多所全活乞事奏乞依格推赏纳粟人间诣郡学与士子讲论奏复白鹿洞书院为学规
俾守之明年夏大旱诏监司郡守条具民间利病遂上
疏天下之务莫大于恤民而恤民之本在人君正心术以立纪纲盖天下之纪纲不能以
自立必人主之心术公平正大无偏赏反侧之私然后
有所系而立君心不能以自正必亲贤臣远小人讲明义理之归闭塞私邪之路然后乃
可得而正今宰相台省师傅宾友谏诤之臣皆失其职
而陛下所与亲密谋议者不过一二近习之臣上以蛊惑陛下之心志使陛下不信先王

之大道而悦于功利之卑说不乐庄士之诳言而安于私贖之鄙态下则招集天下士大夫之嗜利无耻者文武汇分各入其门所喜则阴为引援擢真清显所恶则密行訾毁公肆挤排交通货赂所盗者皆陛下之财命卿置将所窃者皆陛下之柄陛下所谓宰相师傅宾友谏诤之臣或反出其门墙承望其风旨其幸能自立者亦不过齷齪自守而未尝敢一言以斥之其甚畏公论者乃能畧警逐其徒党之一二既不能深有所伤而终亦不敢正言以捣其囊橐窟穴之所在势成威立中外靡然尚之使陛下之号令黜陟不复出于朝廷而出于一二人之门名为陛下独断而实出一二人者阴执其柄且云莫大之祸必至之忧近在朝夕而陛下独未之知帝读之大怒曰是以我为亡也熹以疾请祠不报陈俊卿以旧相守金陵过阙入见荐熹甚力宰相赵雄言于帝曰士之好名陛下疾之愈甚则人之誉之愈众无乃适所以高之不若因其长用之彼渐当事任能否自见矣乃除熹提举江西常平茶盐公事旋录救荒劳除直秘阁以前所奏纳粟人未推赏辞会浙东大饥宰相王淮奏改熹提举浙东常平茶盐公事即日单车就道入对首陈灾异之由与修德任人之说次言陛下即政之初尝选建英豪任以政事不能尽得其人是以不复求贤哲而姑取软熟易制之人以充其位于是左右私褻使令之贱始得以奉燕闲备驱使而宰相之权日轻又虑其势有所偏而因重以雍己也则时听外臣之论将以阴察此辈之负犯而操切之陛下既未能循天理公圣心以正朝廷之大体则固已失其本矣而又欲兼听士大夫之言以为驾馭之术则士大夫之进见有时而近习之从容无闲士大夫之礼貌既庄而难亲其议论又苦而难入近习便嬖侧媚之态既足以蛊心志胥吏狡猾之术又足以眩聪明是以虽欲微抑此辈而此辈之势日重虽欲兼采公论而士大夫之势日轻重者既挟其重以窃陛下之权轻者又借力于所重以为窃位固宠之计日往月来浸淫耗蚀使陛下之德业日隳纲纪日坏邪佞充塞货赂公行兵愁民怨盗贼间作灾异数见饥馑荐臻羣小相挺人人皆得满其所欲惟有陛下了无所得而顾乃独受其弊帝为动容因条救荒七事以献熹始拜命即移书他郡募米商蠲其征及至则客舟之米已辐辏熹日钩访民隐按行境内单车屏徒从所至人不及知郡县官吏惮其风采至自引去所部肃然凡丁钱和买役法榷酤之政有不便于民者悉厘革之于救荒之余随事处画必为经久计有短熹者谓其疏于为政帝谓王淮曰朱熹政事却有可观熹以前后奏请多所见抑幸而从者率稽缓后寺蝗旱相仍不胜忧愤复奏言为今之计独有断自圣心沛然发号责躬求言然后君臣相戒痛

自省改其次惟有尽出内库之钱以供大礼之费为收
余之本诏户部免征旧负漕臣依条检放租税宰臣沙汰被灾路分州军监司守臣之无
状者遴选贤能责以荒政庶几下结人心消其乘时作
乱之意不然臣恐所忧者不止于饥殍而将在于盗贼蒙其害者不止于官吏而上及于
国家也知台州唐仲友与王淮同里为姻家吏部尚书
郑丙侍御史张大经交荐之迁江西提刑未行熹行部至台讼仲友者纷然按得其实章
三上淮匿不以闻熹论愈力仲友亦自辩淮乃以熹章
进呈帝令宰属看详都司陈庸等乞令浙西提刑委清强官究实仍令熹速往旱伤州郡
相视熹时留台未行既奉诏益上章论前后六上淮不
得已夺仲友江西新命以授熹辞不拜遂归且乞奉祠时郑丙上疏诋程氏学且以沮熹
淮又擢太府寺丞陈贾为监察御史贾面对首论近日
搢绅有所谓道学者大率假名以济伪愿考察其人摈弃勿用盖指熹也十年诏以熹累
乞奉祠可差主管台州崇道观既而连奉云台鸿庆之
祠者五年十四年周必大相除熹提点江西刑狱公事以疾辞不许遂行明年淮罢相遂
入奏首言近年刑狱失当狱官当择其人次言经总制
钱之病民及江西诸州科罚之弊末言陛下即位二十七年因循荏苒无尺寸之效可以
仰酬圣志尝反复思之无乃燕闻螻蠖之中虚明应物
之地天理有所未绝人欲有所未尽是以为善不能充其量除恶不能去其根一念之顷
公私邪正是非得失之机交战于其中故礼貌大臣非
不厚而便嬖侧媚得以深被腹心之寄寤寐英豪非不切而柔邪庸谬得以久窃廊庙之
权非不乐闻公议正论而有时不容非不壅谗说殄行
而未免误听非不欲报复陵庙讎耻而未免畏怯苟安非不爱养生灵财力而未免叹息
愁怨愿陛下自今以往一念之顷必谨而察之此为天
理耶人欲耶果天理也则敬以充之而不使其少有雍闾果人欲也则敬以克之而不使
其少有凝滞推而至千言语动作之间用人处事之际
无不以是裁之则圣心洞然中外融彻无一毫之私欲得以介乎其间而天下之事将惟
陛下所欲为无不如志矣是行也有要之于路以为正
心诚意之论上所厌闻戒以勿言者熹曰吾平生所学惟此四字岂可回互以欺吾君乎
及奏帝曰久不见卿浙东之事朕自知之今当处卿清
要地不复以州县为也时曾觐已死王抃已逐独内侍甘昇尚在熹力以为言帝曰升乃
德寿所畀为其有才耳熹曰小人无才安能动人主翌
日除兵部郎官以足疾丐祠本部侍郎林栗尝与熹论易西铭不合劾熹本无学术徒窃
张载程颐绪余谓之道学所至辄携门生数十人妄布
孔孟历聘之风邀索高价不肯供职其伪不可掩帝曰林栗言似过周必大言熹上殿之

日足疾未瘳勉强登对帝曰朕亦见其跛曳左补阙薛叔似亦奏援熹乃令依旧职江西提刑太常博士叶适上疏与栗辨谓其言无一实者谓之道学一语无实尤甚往日王淮表里台谏阴废正人盖用此术诏熹昨入对所论皆新任职事朕亦谅其诚复从所讲司疾速之任会胡晋臣除侍御史首论栗执拗不通喜同恶异无事而指学者为党乃黜栗知泉州熹再辞免除直宝文阁主管西京嵩山崇福宫未踰月再召熹又辞始熹尝以为口陈之说有所未尽乞具封事以闻至是投匭进封事曰今天下大势如人有重病内自心腹外达四支无一毛一发不受病者且以天下之大本与今日之急务为陛下言之大本者陛下之心急务则辅翼太子选任大臣振举纲纪变化风俗爱养民力修明军攻六者是也古先圣王兢兢业业持守此心是以建师保之官列谏诤之职凡饮食酒浆衣服次舍器用财贿与夫宦官宫妾之政无一不领于冢宰使其左右前后一动一静无不制以有司之法而无纤芥之隙瞬息之顷得以隐其毫发之私陛下所以精一克复而持守其心果有如此之功乎所以修身齐家而正其左右果有如此之效乎宫省事禁臣固不得而知然爵赏之滥货赂之流闾巷窃言久已不胜其籍籍则陛下所以修之家者恐未有以及古之圣王也至于左右便嬖之私恩遇过当往者渊靓说抃之徒势焰熏灼倾动一时今已无可言矣独有前曰臣所面陈者虽蒙圣慈委曲开譬然臣之愚窃以为此辈但当使之守门传命供埽除之役不当假借崇长使得逞邪媚作淫巧于内以荡上心立门庭招权势于外以累圣政臣闻之道路自王抃既逐之后诸将差除多出此人之手陛下竭生灵膏血以奉军旅顾乃未尝得一温饱是皆将帅巧为名色夺取其粮肆行货赂于近习以图进用出入禁闼腹心之臣外交将帅共为欺蔽以至于此而陛下不悟反宠昵之以是为我之私人至使宰相不得议其制置之得失给谏不得论其除授之是非则陛下所以正其左右者未能及古之圣王又明矣至于辅翼太子则自王十朋陈良翰之后宫僚之选号为得人而能称其职者盖已鲜矣而又时使邪佞儇薄闾冗庸妄之辈或得参错于其间所谓讲读亦始以应文备数而未闻其有箴规之效至于从容朝夕陪侍游燕者又不过使臣宦者数辈而已师傅宾客既不复置而詹事庶子有名无实其左右春坊遂直以使臣掌之既无以发其隆师亲友尊德乐义之心又无以防其戏慢媠狎奇口杂进之害宜讨论前典置师傅宾客之官罢去春坊使臣而使詹事庶子各复其职至于选任大臣则以陛下之聪明岂不知天下之事必得刚明公正之人而后可以任哉其所以常不得如此之人而反容鄙夫之窃位

者直以一念之间未能彻其私邪之蔽而燕私之好便嬖之流不能尽由于法度若用刚明公正之人以为辅相则恐其有以妨吾之事害吾之人而不得肆是以选择之际常先排摈此等而后取凡疲懦软熟平日不敢直言正色之人而揣摩之又于其中得其至庸极陋决可保其不至于有所妨者然后举而加之于位是以除书未出而物色先定姓名未显而中外已逆知其决非天下第一流矣至于振肃纪纲变化风俗则今日宫省之间禁密之地而天下不公不正之人顾乃得以窟穴盘据于其间而陛下目见耳闻无非不公不正之事则其所以熏蒸销铄使陛下好善之心不着疾恶之意不深其害已有不可胜言者矣及其作奸犯法陛下又未能深割私爱而付诸外廷之议论以有司之法是以纪纲不正于上风俗颓弊于下其为患之日久矣而浙中为尤甚大率习为软美之态依阿之言以不分是非不辨曲直为得计甚者以金珠为脯醢以契券为诗文宰相可啖则啖宰相近习可通则通近习惟得之求无复廉耻一有刚毅正直守道循理之士出乎其间则羣议罪排指为道学而加以矫激之罪戾十数年来以此二字禁锢天下之贤人君子复如昔时所谓元佑学术者排摈诋辱必使无所容其身而后已此岂治世之事哉至于爱养民力修明军政则自虞允文之为相也尽取版曹岁入窠名之必可指拟者号为岁终羨余之数而输之内帑顾以其有名无实积累挂入空载簿籍不可催理者拨还版曹以内帑之积将以备他日月兵进取不时之须然自是以来二十余年内帑岁入不知几何而认为私贮典以私人宰相不得以式贡均节其出入版曹不得以簿书勾考其在亡日销月耗以奉燕私之费者盖不知几何矣而曷尝闻其能用此钱以易敌人之首如太祖之言哉徒使版曹经费阙乏日甚督促日峻至废去祖宗以来破分良法而必以十分登足为限以为未足则又造为比较监司郡守殿最之法以诱胁之于是中外承风竞为苛急此民力之所以重困也诸将之求进也必先掙克士卒以殖私利然后以此自结于陛下之私人而薪以姓名达于陛下之贵将贵将提其姓名即以付之军中使自什伍以上节次保明称其材武堪任将帅然后具奏牒而言之陛下之前陛下但见等级推先案牒具备则诚为以公荐而可以得人矣而岂知其论价输钱已若晚唐之债帅哉夫将者三军之司命而其选置之方乖刺如此则彼智勇材略之人孰肯抑心下首于宦官宫妾之门而陛下之所得以为将帅者皆庸夫走卒而犹望其修明军政激励士卒以强国势岂不误哉凡此六事皆不可缓而本在于陛下之一心一心正则六事无有不正一有人心私欲以介乎其间则虽欲惫精劳力以

求正夫六事者亦将徒为文具而天下之事愈至于不可为矣疏入夜漏下七刻帝已就寝亟起秉烛读之明日除主管太一宫兼崇政殿说书熹力辞除秘阁修撰奉外祠光宗即位再辞职仍直宝文阁降诏奖谕居数月除江东转运副使以疾辞改知漳州奏除属县无名之赋七百万减经总制钱四百万以习俗未知礼采古丧葬嫁娶之仪揭以示之命父老解说以教子弟士俗崇信释氏男女聚僧庐为传经会女不嫁者为庵舍以居熹悉禁之常病经界不行之害会朝论欲行泉汀漳三州经界熹乃访事宜择人物及方量之法上之而土居豪右侵渔贫弱者以为不便沮之宰相留正泉人也其里党亦多以为不可行布衣吴禹珪上书讼其扰人诏且需寻令先行漳州经界明年以史浩请数天下人望乃除熹秘阁修撰主管南京鸿庆宫再辞诏论撰之职以宠名儒乃拜命除荆湖南路转运副使辞漳州经界竟报罢以言不用自劾除知静江府辞主管南京鸿庆宫未几差知潭州力辞黄裳为嘉王府翊善自以学不及熹乞召为宫僚王府直讲彭龟年亦为大臣言之留正曰正非不知熹但其性刚恐到此不合反为累耳熹方再辞有旨长沙巨屏得贤为重遂拜命会洞獠扰属郡熹遣人谕以祸福皆降之申敕令严武备戢奸吏抑豪民所至兴学校明教化四方学者毕至宁宗即位赵汝愚首荐熹及陈傅良有旨赴行在奏事熹行且辞除焕章阁待制侍讲辞不许入对首言乃者太皇太后躬定大策陛下寅绍丕图可谓处之以权而庶几不失其正自顷至今三月矣或反不能无疑于逆顺名实之际窃谓陛下忧之犹有可诱者亦曰陛下之心前日未尝有求位之计今日未尝忘思亲之怀此其所以行权而不失其正之根本也充未尝求位之心以尽负罪引慝之诚充未尝忘亲之心以致温清定省之礼而大伦正大本立矣复面辞待制侍讲帝手札卿经术渊源正资劝讲次对之职勿复劳辞以副朕崇儒重道之意遂拜命会赵彦逾按视孝宗山陵以为土肉浅薄下有水石孙逢吉覆按乞别求吉兆有旨集议台史惮之议中辍熹竟上议状言寿皇圣德衣冠之藏当博访名山不宜偏信台史委之水泉沙砾之中不报时论者以为帝未还大内则名体不正而疑议生金使日来或有窥伺有旨修葺旧东宫为屋至数百间欲徙居之熹奏疏言此必左右近习倡为此说以误陛下而欲因以遂其奸心臣恐不惟灾异数出正当恐惧修省之时不当兴此大役以拂上天谴告之意亦恐畿甸百姓饥饿流离阡于死亡之际或致怨望忿切以生他变不惟无以感格太上皇帝之心以致未有进见之期亦恐寿皇在殡凡筵之奉不容少弛太皇太后皇太后皆以尊老之年莹然在忧苦之中晨昏之养尤

不可阙而四方之人但见陛下亟欲大治宫室速得成
就一旦翩然委而去之以就安便六军万民之心将有扼腕不平者矣前鉴未远甚可惧也又闻太上皇后惧忤太上皇帝圣意不欲其闻太上之称又不欲其闻内禅之说此又虑之过者殊不知若但如此而不为宛转方便则父子之间上怨怒而下忧恐将何时而已父子大伦三纲所系久而不图亦将有借其名以造谤笞事者此又臣之所大惧也愿陛下明诏大臣首罢修葺东宫之役而以其工料回就慈福重华之间草创寝殿一二十间使粗可居若夫过宫之计则臣又愿陛下下诏自青减省兴卫入宫之后暂变服色如唐肃宗之改服紫袍执控马前者以伸负罪引慝之诚则太上皇帝虽有忿怒之情亦且霍然消然而欢意浹洽矣至若朝廷之纪纲则臣又愿陛下深诏左右勿预朝政其实有勋庸而所得褒赏未愜众论者亦诏大臣公议其事稽考令典厚报其劳而凡号令之弛张人才之进退则一委之二三大臣使之反复较量勿徇己见酌取公论奏而行之有不当者缴驳论难择其善者称制临决则不惟近习不得干预朝权大臣不得专任己私而陛下亦得以益明习天下之事而无所疑于得失之算矣若夫山陵之卜则愿黜台史之说别求草泽以营新宫使寿星之遗体得安于内而宗社生灵皆蒙福于外矣疏入不报然帝亦未有怒熹意也每以所讲编次成帙以进帝亦开怀容纳熹又奏曰愿陛下日用之间以求放心为之本而于玩经观史亲近儒学益用力焉数召大臣切劘治道羣臣进对亦赐温颜反复诣访以求政事之得失民情之休戚而又因以察其人才之邪正短长庶于天下之事各得其理又言礼经敕令子为父嫡孙承重为祖父皆斩衰三年嫡子当为其父后不能袭位执丧则嫡孙继统而代之执丧自汉文短丧历代因之天子遂无三年之丧为父且然则嫡孙承重可知人纪废坏三纲不明千有余年莫能厘正寿皇圣帝至性自天易月之外犹执通丧所宜着在方册为万世法程间者遗诏初颁太上皇帝偶违康豫不能躬就丧次陛下以世嫡承大统则承重之服着在礼律所宜遵寿皇已行之法一时仓卒不及详议遂用漆纱浅黄之服不惟上违礼律且使寿皇已行之礼举而复坠臣窃痛之然既往之失不及追改将来启殡发引礼当复用初丧之服会孝宗祔庙议宗庙迭毁之制孙逢吉曾三复首请并祧僖宣二祖奉太祖居第一室祫祭则正东面之位有旨集议僖顺翼宣四祖祧主宜有所归自太祖皇帝首尊四祖之庙治平间议者以世数寢远请迁僖祖于夹室后王安石等奏僖祖有庙与稷契无异请复其旧时相赵汝愚雅不以复祀僖祖为然侍从多从其说吏部尚书郑侨欲且祧宣祖而祔孝

宗熹以为藏之夹室则是以祖宗之主下藏于子孙之夹室神宗复奉以始祖己为得礼之正而合于人心所谓有举之而莫敢废者又拟为庙制以辨以为物岂有无本而生者庙堂不以闻即毁撤僖宣庙室更创别庙以奉四祖始宁宗之立韩侂胄自谓有定策功居中用事熹忧其害政数以为言且约吏部侍郎彭龟年共论之会龟年出护使客熹乃上疏斥言左右窃柄之失在讲筵复申言之御批云悯卿耆艾恐难立讲已除卿宫观汝愚袖御笔还帝且谏且拜内侍王德谦以御笔付熹台谏争留不可楼钥陈傅良旋封还录黄修注官刘光祖邓驷封章交上熹行被命除宝文阁待制与州郡差遣辞寻除江陵府辞仍乞遣还新旧职名诏仍焕章阁待制提举两京鸿庆宫初赵汝愚既相收召四方知名之士中外引领望治熹独惕然以侂胄用事为虑既屡为帝言又数以手书启汝愚当用厚赏酬其劳勿使得预朝政有防微杜渐谨不可忽之语汝愚方谓其易制不以为意庆元元年汝愚亦以诬逐而朝廷大权悉归侂胄矣熹始以庙议自劾不许以疾再乞休致诏辞职谢事非朕优贤之意依旧秘阁修撰二年沈继祖为监察御史诬熹十罪诏落职子祠门人蔡元定亦送道州编管四年熹以年近七十申乞致仕五年依所请明年卒疾且革手书属其子在及门人范忞德黄干拳拳以勉学及修正遗书为言登日正坐整衣冠就枕而逝熹登第五十年仕于外者仅九年立朝纔四十日家故贫少依父友刘子羽寓建之崇安后徙建阳之考亭【按叶绍翁四朝闻见录云亭本陈氏所筑以祀其父者故曰考亭其后亭归于朱子以亭名于己无所预遂因陈姓易名曰聚星参取汉史世说陈元方事事为一段段为一图揭之于亭而门人称考亭之号已久不能遽易云】簞瓢屡空晏如也诸生自远至者豆饭藜羹率与之共往往称贷于人以给用而非其道义则一介不取也自熹去国侂胄势益张可澹为中司首论专门之学文诈沽名乞辨真伪刘德秀仕长沙不为张栻之徒所礼及为谏官首论留正引伪学之罪伪学之称盖自此始太常少卿胡紘言比年伪学猖獗图为不轨望宣谕大臣权住进拟遂召陈贾为兵部侍郎未几熹有夺职之命刘三杰以前御史论熹汝愚刘光祖徐谊之徒前日之伪党至此又变而为逆党即日除三杰右正言右谏议大夫姚愈论道学权臣结为私党窥伺神器乃命直学士院高文虎草诏谕天下于是攻伪学日急选人余嘉至上书乞斩熹方是时士之绳趋尺步稍以儒名者无所容其身从游之士特立不顾者屏伏邱壑依阿巽懦者更名他师过门不入甚至变易衣冠狎游市肆以自别其非党而熹日与诸生讲学不休或劝其谢遣生徒者笑而不答有籍

田令陈景思者故相康伯孙也与侂胄有姻连劝侂胄
勿为己甚侂胄意亦渐悔熹既没将葬言者谓四方伪徒期会送侂师之葬会聚之间非
妄谈时人短长则谬议时政得失望令守臣约束从之
嘉泰初学禁稍弛二年诏熹以致仕除华文阁待制与致仕恩泽侂胄死诏赐熹遗表恩
泽溢曰文寻赠中大夫特赠宝谟阁直学士理宗宝庆
三年赠太师追封信国公改徽国始熹少时慨然有求道之志父松病亟尝属熹曰籍溪
胡原仲白水刘致中屏山刘彦冲三人学有渊源吾所
敬畏吾即死汝往事之惟其言之听三人谓胡宪刘勉之刘子翬也故熹之学既博求之
经传后徧交当世有识之士延平李侗老矣熹归自同
安不远数百里徒步往从之甚为学大抵穷理以致其知反躬以践其实而以居敬为主
尝谓圣贤道统之傳散在方册圣经之旨不明而道统
之传始晦于是竭其精力以研穷圣贤之经训所著书有易本义启蒙蕃卦考误诗集传
大学中庸章句或问论语孟子集注太极图通书西铭
解楚辞集注办证韩文考异所编次有论孟集议孟子指要中庸辑略孝经刊误小学书
通鉴纲目宋名臣言行录家礼近思录河南程氏遗书
伊洛渊源录皆行于世熹歿朝廷以其大学语孟中庸训说立于学宫又有仪礼经传通
解未脱藁亦在学宫平生为文凡一百卷生徒问答凡
八十卷别录十卷绍定末秘书郎李心传乞以司马光周敦颐邵雍张载程颢程颐朱熹
七人列于从祀不报淳佑元年正月帝视学手诏以张
周二程及熹从祀孔子庙黄干曰道之正统待人而后传由孔子而后曾子子思继其微
至孟子而始着由孟子而后周程张子继其绝至熹而
始着识者以为知言熹子在绍定中为吏部侍郎

△张栻

张栻字敬夫丞相浚子也颖悟夙成浚爱之自幼学所教莫非仁义忠孝之实长师
胡宏宏以孔门论仁亲切之旨告之栻退而思若有得
焉宏称之曰圣门有人矣栻益自奋厉以古圣贤自期作希颜录以荫补官辟宣抚司都
督府书写机宜文字除直秘阁时孝宗新即位浚起谪
籍开府治戎参佐皆极一时之选栻以少年内赞密谋外参庶务其所综画幕府诸人皆
自以为不及也间以军事入奏因进言曰陛下上念宗
社下闵民艰惕然于中而思有以振之臣谓此心之发即天理之所存也愿益加省察而
稽古亲贤以自辅无使其或少息则今日之功必成而
因循之弊可革矣孝宗异其言浚去位汤思退用事遂罢兵讲和金人乘间纵兵入淮甸
中外大震庙堂犹主和议至敕诸将无得辄称兵时浚
已没栻营葬甫毕即拜疏言今虽重为羣邪所误以戚国而召敌然亦安知非天欲以是

开圣心哉宜深察此理使吾胸中了然无纤介之惑然
后明诏中外公行赏罚以快军民之愤则人心悦士气充而敌不难却矣继令以往益坚
此志誓不言和专务自强虽折不挠使此心纯一贯彻
上下则迟以岁月亦何功之不济哉疏入不报以刘珙荐除知抚州未上改严州时宰相
虞允文以恢复自任然所以求者类非其道意棧素论
当与己合数遣人致殷勤棧不答入奏首言先王所以建事立功无不如志者以其胸中
之诚有以感格天人之心而与之无间也今规画虽劳
而事功不立陛下诚深察之日用之间念卢云为之际亦有私意之发以害吾之诚者乎
有则克而去之使吾中扃洞然无所间杂则见义必精
守义必固而天人之应将不待求而得矣人欲复中原之地必先得中原之心欲得中原
之心必先得吾民之心求所以得吾民之心者岂有他
哉不尽其力不伤其财而已矣今日之事固当以明大义正人心为本然其所施有先后
则其缓急不可以不详所务有名实则其取舍不可以
不审此又明主所宜深察也明年召为吏部侍郎兼权起居郎侍立官时宰方谓敌势衰
弱可图建议遣泛使往责陵寝之故士大夫有忧其无
备而召兵者辄斥去之棧见帝帝曰卿知敌国事乎棧曰不知也帝曰金国饥馑连年盗
贼四起棧曰金人之事臣虽不知境中之事则知之矣
帝曰何也棧曰臣窃见比年诸道多水旱民贫日甚而国家兵弱财匱官吏诞漫不足倚
赖正使彼实可图臣惧我之未足以图彼也帝默然棧
因出所奏疏读之曰臣窃谓陵寝隔绝诚臣子不忍言之至痛然今未能奉辞以讨之又
不能正名以绝之乃欲卑辞厚礼以求于彼则于大义
己为未尽而异论者犹以为忧则其浅陋畏怯固益甚矣然臣窃揆其心志或者亦有以
见我未有必胜之形而不能不忧也盖必胜之形当在
于早正素定之时而不在于两阵决机之日今日但当下哀痛之诏明复讎之义显绝金
人不与通使然后修德立政用贤养民选将帅练甲兵
通内修外御进战退守以为一事且必治其实而不为虚文则必胜之形隐然可见虽有
浅陋畏怯之人亦且奋跃而争先矣帝叹息褒谕以为
前始未闻此论也其后因赐对反复前说帝益嘉叹面谕当以卿为讲官冀时得晤语也
会史正志为发运使名为均输实尽夺州县财赋远近
骚然士大夫争言其害棧亦以为言帝曰正志谓但取之诸郡非取之民也棧曰今日州
郡财赋大抵无余若取之不己而经用有阙不过巧为
名色以取之民耳帝矍然曰如卿言是朕假手于发运使以病吾民也旋阅其实果如棧
言即诏罢之兼侍讲除左司员外郎讲诗葛覃进说治
生于敬畏乱起于骄淫使为国者每念稼穡之劳而其后妃不忘织纴之事则心不存者

寡矣因上陈祖宗自家刑国之懿下斥今日兴利扰民之害帝叹曰此王安石所谓人言不足恤者所以为误国也知合门事张说除签书枢密院事栻夜草疏极谏其不可旦诣朝堂质责宰相虞允文曰宦官执政自京黼始近习执政自相公始允文渐愤栻复奏文武诚不可偏然今欲右武以均二柄而所用乃得如此之人非惟不足以服文吏之心正恐反激武臣之怒孝宗感悟命得中寝然宰相实阴附说明年出栻知袁州申说前命中外諠哗说竟以谪死栻在朝未期岁而召对至六七所言大抵皆修身务学畏天恤民抑侥幸屏谗谀于是宰相益惮之而近习尤不悦退而家居累年孝宗念之诏除旧职知静江府 【按朱子所撰南轩神道碑载栻请以广西漕司盐息什三子诸郡以拯公私之病又因掇漕出司所积钱以为盐本运费立法以禁抑卖等事传未叙及谨附识】 经略安抚广南西路所部荒残多盗栻至简州兵汰冗补阙籍诸州黥卒伉健者为效用合亲兵摧锋等军日习月按申严保伍法谕溪峒酋豪弭怨睦邻毋相杀掠于是羣蛮帖服朝廷买马横山岁久弊滋边氓告病而马不时至栻究其利病六十余条奏革之诸蛮感悦争以善马至孝宗闻栻治行诏特进秩直宝文阁因任寻除秘阁修撰荆湖北路转运副使改知江陵府安抚本路一日去贪吏十四人湖北多盗府县往往纵绎以病良民栻首劾大吏之纵贼者捕斩奸民之舍贼者令其赏得告捕除罪羣盗皆遁去郡频边屯主将与帅守每不相下栻以礼遇诸将得其驩心又加恤士伍勉以忠义队长有功辄补官士咸感奋并淮奸民出塞为盗者捕得数人有北方逃卒亦在盗中栻曰无使疆场之事曲在我命斩之以徇于境而缚其逃卒归之信阳守刘大辨怙势希赏广招流民而夺见户熟田以与之栻劾大辨诈诱所招流民不满百而虚增数十倍请论其罪不报章累上大辨易他郡栻自以不得其职求去谕以右文殿修撰提举武夷山冲佑观卒 【按名臣言行录云嘉泰八年赐谥曰宣】 栻有公辅之望病革犹手疏劝帝亲君子远小人信任防一己之偏好恶公天下之理天下传诵之

钦定续通志卷五百四十六

●钦定续通志卷五百四十七 儒林传十

儒林传

宋 【八】

○宋八

吕祖谦

蔡元定【沈】

陆九龄【九韶】

陆九渊

薛季

宣

陈傅良

叶适

戴溪

- 5314 -

蔡幼学

吕祖谦

蔡元定 【蔡沈】

陆九龄

陆九渊

薛季宣

陈傅良

叶适

戴溪

蔡幼学

△吕祖谦

吕祖谦字伯恭尚书右丞好问之孙也自其祖始居婺州祖谦之学本之家庭有中原文献之傅长从林之奇王应辰胡宪游既又友张栻朱熹讲索益精切以荫入官后举进士复中博学宏词科调南外宗敦丁内艰居明招山四方之士争趋之除太学博士时中都官待次者例补外添差教授严州寻复召为博士兼国史院编修官实录院检讨官输对勉孝宗留意圣学且言恢复大事也规模当定方略当审陛下方广揽豪杰其集事功臣愿精加考察使之确指经画之实孰为先后俾尝试侥幸之说不敢陈于前然后与一二大臣定成算而次第行之则大业可复矣召试馆职先是召试者率前明从学士院求问目独祖谦不然而其文特典美尝读陆九渊文喜之而未识其人考试礼部得一卷曰此必江西小陆文也揭示果九渊人服其精鉴主管台州崇道观越三年除秘书郎国史院编修官实录院检讨官以修撰李焘荐重修徽宗实录书成进秩面对言曰夫治体必上下内外不相侵夺而后安乡者陛下以大臣不胜任而兼行其事大臣亦皆亲细务而行有司之事外至监司守令职任率为其上所侵而不能令其下故豪猾玩官府郡县忽省部掾属凌长吏贱人轻柄臣平居未见其患一旦有急谁与指麾而伸缩之邪如曰臣下权任太重惧其不能无私则有给舍以出纳焉有台谏以救正焉有侍从以询访焉傥得端方不倚之人分处之自无专恣之虑何必屈至尊以代其劳哉陛下于左右虽不劳操制苟玩而弗虑则声势浸长趋附浸多过咎浸积内则惧为陛下所遣而益思壅蔽外则惧为公议所疾而益肆诋排愿陛下虚心以求天下之士执要以总万事之机勿以图任或误而谓人多可疑勿以聪明独高而谓智足徧察勿详于小而忘远大之计勿忽于近而忘壅蔽之萌又言国朝治体有远过前代者有视前代为未备

者夫以宽大忠厚建立规模以礼逊节义成就风俗此所谓远过前代者也然文治可观而武绩未振名胜相望而干略未优故虽昌炽盛大之时此病已见是以元昊之难范韩皆极一时之选而莫能平殄则事功之不竞从可知矣臣谓今日治体视前代未备者固当激厉而振起远过前代者允当爱护而扶持先是书肆有书曰圣宋文海孝宗命临安府校正刊行学士周必大言文海去取差谬恐难传后盍委馆职铨择以成一代之书孝宗以命祖谦遂断自中兴以前崇雅黜浮类为百五十卷上之赐名皇朝文鉴诏除直秘阁时方重职名非有功不除中书舍人陈騏【按宋史误作陈揆今据叶绍翁四朝闻见录改正】驳之孝宗批旨云馆阁之职文史为先祖谦所进采取精详有益治道故以宠之可即命词騏不得已草制寻主管冲佑观明年除著作郎兼国史院编修官以病请祠归卒谥曰成祖谦学以关洛为宗而旁稽载籍不见涯涘心平气和不立崖异一时英伟卓犖之士皆归心焉少卞急一日诵孔子言躬自厚而薄责于人忽觉平时忿懣涣然冰释朱熹尝言学如伯恭方是能变化气质其所讲画将以开物成务既卧病而任重道远之意不衰修读诗记大事记皆未成书考定古周易书说阐范官箴辨志录欧阳公本末皆行于世子延平

△蔡元定【蔡沈】

蔡元定字季通建州建阳人生而颖悟八岁能诗日记数千言父发博览羣书号牧堂老人以程氏语录邵氏经世张氏正蒙授元定曰此孔孟正脉也元定深涵其义既长辨析益精闻朱熹名往师之熹叩其学大惊曰此吾老友也不当在弟子列遂与对榻讲论诸经奥义每至夜分四方来学者熹必俾先从元定质正焉太常少卿尤袤秘书少监杨万里联疏荐于朝召之以疾辞时韩侂胄擅政设伪学之禁以空善类喜谏承风专肆排击然犹未敢诵言攻朱熹至沈继祖刘三杰为言官始连疏诋熹并及元定未几谪道州州县捕元定甚急元定闻命不辞家即就道熹与从游者数百人饥别萧寺中坐客兴叹有泣下者熹微视元定不异平时因喟然曰友朋相爱之情季通不挫之意可谓两得矣元定赋诗曰执手笑相别无为儿女悲众谓宜缓行元定曰获罪于天天可逃乎同其子沈行三千里脚为流血无几微见言面至春陵远近来学者曰众有名士挟才简傲非笑前修者亦心服谒拜执弟子礼甚恭人为语曰初不敬今纳命爱元定者谓宜谢生徒元定曰彼以学来何忍拒之若有祸患亦非闭门塞窦所能避也贻书训诸子曰独行不愧影独寝不愧衾勿以吾得罪故遂懈其志一日谓沈曰可谢客吾欲安静以还造

化旧物阅三日卒侂胄既诛赠迪功郎赐谥文节元定于书无所不读于事无所不究义理洞见大原下至图书礼乐制度无不精妙古书奇辞奥义人所不能晓者一过目辄解熹尝曰人读易书难季通读难书易熹疏释四书及为易诗传通鉴纲目皆与元定往复参订启蒙一书则属元定起藁学者尊之曰西山先生所著书有大衍详说律吕新书燕乐原辩皇极经世太玄潜虚指要洪范解八阵图说熹为之序子渊沈皆躬耕不仕渊有周易训解沈字仲默少从朱熹游熹晚欲著书传未乃为遂以属沈洪范之数学者久失其传元定独心得之然未及论者曰成吾道者沈也沈受父师之托沈潜反复者数十年然后成书发明先儒之所未及其于洪范数谓体天地之撰者易之象纪天地之撰者范之数数始于一奇象成于二偶奇者数之所以立偶者数之所以行故二四而八八卦之象也三三而九九畴之数也由是八八而又八八之为四千九十六而象备矣九九而又九九之为六千五百六十一而数周矣易更四圣而象已着范锡神禹而数不传后之作者昧象数之原窒变通之妙或即象而为数或反数而拟象牵合傅会自然之数益晦焉始从元定谪道州跋涉数千里道楚粤穷僻处父子相对帝以理义自怡悦元定歿徒步护丧以还有遗之金而义不受者辄谢却之曰吾不忍累先人也年仅三十屏去举子业一以圣贤为师隐居九峰当世名卿将荐用之沈不就次子抗别有传

△陆九龄

陆九龄字子寿抚州金溪人父贺以举行为里人所宗尝采司马氏冠昏丧祭仪行于家九龄幼颖悟端重十岁丧母哀毁如成人稍长补郡学弟子员时秦桧当国无道程氏学者九龄独尊其说久之闻新博士学黄老不事礼法慨叹曰此非吾所愿学也遂归家从父兄讲学益力时吏部员外郎许忻有名中朝退居临川少所宾接一见九龄与语大说尽以当代文献告之自是九龄益大肆力于学悉通阴阳星历五行卜筮之说性周谨不肯苟简涉猎入太学司业汪应辰举为学录登干道五年进士第调桂阳军教授以亲老改兴国军未上会湖南茶寇剽庐陵声摇旁郡旧有义社以备寇郡从众请以九龄主之门人多不悦九龄曰文事武备一也古者有征讨公卿即为将帅比闾之长则五两之率也士而耻此豪侠武断者专之矣遂领其事调度屯御皆有法寇虽不至而郡县倚以为重暇则与乡之子弟习射曰是固男子之事也及至兴国地滨大江俗俭嗇而鲜知学九龄不以职闲自佚劝绥羽翼士类兴起不满岁以继母忧去服除调全州教授未上得疾卒宝庆二年特赠朝奉

郎直秘阁赐谥文达九龄尝继其父志益修礼学治家有法闺门之内严若朝廷而忠敬
乐易乡人化之皆逊弟焉与弟九渊相为师友和而不
同学者号二陆广汉张栻与九龄不相识晚岁以书讲学期以世道之重吕祖谦常称之
曰所志者大所据者实有肯綮之阻虽积九仞之功不
敢遂有毫厘之偏虽立万夫之表不敢安公听并观却立四顾弗造于至平至粹之地弗
措也弟九韶

陆九韶

陆九韶

九韶字子美其学渊粹隐居山中昼之言行夜必书之其家累世义古一人最长者
为家长一家之事听命焉岁迁子弟分任家事凡田畴
租税出纳庖爨宾客之事各有主者九韶以训戒之辞为韵语晨兴家长率众子弟谒元
祠毕击鼓诵其辞使列听之子弟有过家长会众子弟
责而训之不改则撻之终不改度不可容则言之官府屏之远方焉九韶所著有梭山文
集家制州郡图

△陆九渊

陆九渊字子静生三四岁问其父天地何所穷际父笑而不答遂深思至忘寝食及
总角举止异凡儿见者敬之尝读书至宇宙二字解者
曰四方上下曰宇来往古今曰宙忽大省曰宇宙内事乃已分内事已分内事乃宇宙内
事登干道八年进士第至行在士争从之游教人不用
学规有小过言中其情或至流汗有怀于中而不能自晓者为之条析其故悉如其心初
调隆兴靖安县主簿改建宁崇安县以少师史浩荐召
审察不赴侍从复荐除国子正教诸生无异在家时除敕令所删定官九渊少闻靖康闲
事慨然有感于复讎之义至是访知勇士与议恢复大
略因轮对遂陈五论一论讎耻未复愿博求天下俊杰相与举论道经邦之职二论愿致
尊德乐道之诚三论知人之难四论事当驯致而不可
骤五论人主不当亲细事帝称善未几除将作监丞为给事中王信所驳诏主管台州崇
道观还乡学者辐凑称为象山先生尝谓学者曰汝耳
自聪目自明事父自能孝事兄自能弟本无欠阙不必他求在乎自立而已又曰此道与
溺于利欲之人言犹易与溺于意见之人言却难或劝
九渊著书曰学苟知道六经皆我脚注光宗即位差知荆门军民有诉者无早暮皆得造
于庭复令其自持状以追为立期皆如约而至即为酌
情决之多所劝释其有涉人伦者使自毁其状以厚风俗唯不可训者始寘之法其境内
官吏之贪廉民俗之习向善恶皆素知之有诉人杀其
子者九渊曰不至于及追究其子果无恙有诉窃取而不知其人九渊出二人姓名使捕

至讯之伏辜尽得所窃物且宥其罪使自新因语吏以某所某人为暴翌日有诉遇夺掠者即其人也乃加追治吏大惊郡以为神申严保伍法盗贼或发擒之不逸一人羣盗屏息荆门为次边而无城九渊以为郡民江汉之闲为四集之地南捍江陵北援襄阳东护随郢之胁西当光化夷陵之冲荆门固则四邻有所恃否则有背胁腹心之虞乃请于朝而城之自是民无边忧罢关市吏讥察而减民税商贾毕集税入日增旧用铜钱以近边改为铁钱禁用铜复令贴纳九渊曰既禁之矣又使之输邪尽蠲之平时教军伍射郡民得与中者均赏荐其属不限流品尝曰古者无流品之令而贤不肖之辨严后世有流品之分而贤不肖之辨略每旱祷即雨政行令修民俗为变诸司交荐丞相周必大尝称荆门之政以为躬行之效一日语所亲曰先教授兄有志天下竟不得施以歿又语僚属及家人以将终会祷雪明日雪乃沐浴更衣端坐后二日卒谥文安初九渊尝与朱熹会鹅湖论辨所学多不合及熹守南康九渊访之熹与至白鹿洞九渊为讲君子小人喻义利一章听者至有泣下熹以为切中学者隐微深痼之病至于无极而太极之辨则贻书往来论难不置焉门人杨简袁燮舒璘沈焕能传其学云

△薛季宣

薛季宣字士龙永嘉人起居舍人徽言子也徽言卒时季宣始六岁伯父敷文阁待制弼收鞠之从弼宦游及见渡江诸老闻中兴经理大略喜从老校退卒语得岳韩诸将兵闲事甚悉年十七从荆南帅辟书写机宜文字获事袁溉溉尝从程颐学尽以授之季宣既得溉学于古封建井田乡遂司马法之制靡不研究金兵之未至也季宣为武昌令时刘锜镇鄂渚季宣白锜以武昌形势直淮蔡而兵寡势弱宜早为备锜不听及兵交稍稍资季宣计划未几汪澈宣谕荆襄而金兵趋江上诏成闵还师入援季宣又说澈以闵既得蔡有被竹之势宜守便宜勿遣而令其乘胜下颍昌道陈汝趋汴都金内顾且惊溃可不战而屈其兵矣澈不听时江淮仕者闻金兵且至皆预遣其孥而系马于庭以待季宣独留家与民期曰吾家即汝家即有急吾与汝偕死民亦自奋县多盗季宣患之会有伍民之令乃行保伍法五家为保二保为甲六甲为队因地形便合为总不以乡为限总首副总首领之官族士族富族皆附保蠲其身俾输财供总之小用诸总必有圃以习射禁菹博杂戏而许以武事角胜负五日更至庭阅之而赏其尤者乡置楼盗发伐鼓举烽瞬息徧百里县治白鹿矶安乐口皆置戍复请于宣谕司得战舰十甲三甲罗落之守计定讫兵退人心不摇枢密使王炎荐于朝为大理寺主簿未至为书谢炎曰为今之

计莫若以仁义纪纲为本至于用兵请俟十年之后可也时江湖大旱流民北渡江边吏复奏淮北民多款塞者宰相虞允文白遣季宣行淮西收以实边季宣为表废田相原隰复合肥三十六圩立二十二庄于黄州故治东北以户授屋以丁授田颁牛及田器谷种各有差廩其家至秋乃止几为户六百八十有五分处合肥黄州闲并边归正者振业之季宣谓人曰吾非为今日利也合肥之圩边有惊因以断栅江保巢湖黄州地直蔡衡诸庄辑则西道有屏蔽矣光州守宋端友招集北归者止五户而杂旧户为一百七十奏以幸赏季宣按得其实劾之时端友为环列附托难撼季宣奏上孝宗怒属大理治端友以忧死季宣还言于孝宗曰左右之人进言者其情不可不察也托正以行邪伪直以售佞荐进人物曾非诵言游扬中伤乃自不意一旦号令虽自中出而其权已归私门矣故齐威之霸不在阿即墨之诛赏而在毁誉者之刑臣观近政非无阿即墨之诛赏奈何毁誉之人自若乎又言曰城淮郡以臣所见合肥板干方立中使督视仓卒成之臣行过郡一夕风雨堕楼五堵溧阳南壁阙而居巢庠陋如故乃闻有靡钱巨万而成城四十余丈者陛下安取此然外事无足道咎根未除臣所深忧左右近侍阴挤正士而阳称道之陛下傥因貌言而听之臣恐石显王凤郑注之智中也又言近或以好名弃士大夫夫好名特为臣子学问之累人主为社稷计唯恐士不好名诚人人好名畏义何向不立帝称善恨得季宣晚遂进两官除大理正自是凡奏请论荐皆报可以虞允文讳阙失不乐之居七日出知湖州会户部以厯付场务锱铢皆分隶经总制诸郡束手无策季宣言于朝曰自经总制立额州县凿空以取赢虽有奉法吏思宽弛而不得聘若复额外征其强半郡调度顾安所出殆复巧取之民民何以胜户部譙责愈争季宣争之愈强台谏交疏助之乃收前令改知常州未上卒季宣于诗书春秋中庸大学论语皆有训义藏于家其杂着曰浪语集

△陈傅良

陈傅良守君举温州瑞安人初患科举程文之弊思出其说为文章自成一家人争传诵从者云合是时永嘉郑伯熊薛季宣皆以学行闻伯熊于古人经制治法讨论尤精傅良皆师事之而得季宣之学为多及入太学与张栻吕祖谦友善祖谦为言本朝文献相承条序而主敬集义之功得于栻为多自是四方受业者愈众登进士甲科教授泰州参知政事袭茂良荐于朝改太学录出通判福州丞相梁克家领帅事委成于傅良傅良平一府曲直壹以义强御者不得售其私阴结言官论罢之后五年起知桂

阳军光立宗稍迁提举常平茶盐转运判官湖湘民无
后以异姓嗣者官利其赀辄没入之傅良曰绝人嗣非政也复之几二千家转浙西提点
刑狱除吏部员外郎傅良为学自三代秦汉以下靡不
研究一事一物必稽于极而后已而于太祖开创本原尤为潜心及是因轮对言曰太祖
皇帝垂裕后人以爱惜民力为本熙宁以来用事者始
取太祖约束一切纷更之诸路上供岁额增于祥符一倍崇宁重修上供格颁之率增至
十数倍其它杂敛则熙宁以常平宽剩禁军阙额之类
别琐封椿而无额上供起于元丰经制起于宣和总制月椿起于绍兴皆迄今为额折帛
和买之类又不与焉茶引尽归于都茶场盐钞尽归于
榷货务秋苗斗斛十八九归于纲运皆不在州县州县无以供则豪夺于民于是取之斛
面折变科敷抑配赃罚而民困极矣天命之永不永在
民力之宽不宽岂不甚可畏哉陛下宜以救民穷为己任推行太祖未泯之泽以为万世
无疆之休且言今天下之力竭于养兵而莫甚于江上
之军都统司谓之御前军马虽朝廷不得知总领所谓之大军钱粮虽版曹不得与于是
中外之势分而事权不一施行不专虽欲宽民其道无
繇诚使都统司之兵与向在制置司时无异总领所之财与向在转运司无异则内外为
一体内外一体则宽民力可得而议矣帝从容嘉纳且
劳之索所著书退以周礼说十三篇上之迁秘书少监兼实录院检讨官嘉王府赞读绍
熙二年除起居舍人明年兼权中书舍人初光宗妃黄
氏有宠李后妬而杀之光宗既闻之复因禘祀大风雨遂震惧得心疾自是视章疏不时
傅良奏曰一国之势犹身也壅底则致疾今日迁延某
事明日阻节某人即有奸险乘时为利则内外之事不接威福之柄下移其极至于天变
不告边警不闻祸且不测矣帝悟会疾亦稍平过重华
宫而明年重明节复以疾不往丞相以下至于太学诸生皆力谏不听时方召内侍陈源
为内侍省押班傅良不草词且上疏曰陛下之不过宫
者特误有所疑而积忧成病以至此尔臣尝即陛下之心反复论之窃自谓深切陛下亦
既许之矣未几中变以误为实而开无端之衅以疑为
真而成不疗之疾是陛下自贻祸也书奏帝将从之百官班立以俟帝出御屏皇后挽帝
回傅良趋引裾后叱之傅良哭于庭后益怒傅良下殿
径行诏改秘阁修撰乃兼赞读不受宁宗即位召为中书舍人兼侍读直学士院同实录
院修撰会诏朱熹与在外宫观傅良言熹难进易退内
批之下举朝惊愕臣不敢书行熹于是进宝文阁待制与郡御史中丞谢深甫论傅良言
不顾行出提举兴国宫明年察官交疏削秩罢嘉泰二
年复官起知泉州辞授集英殿修撰进宝谟阁待制卒于定谥文节有诗解诂周礼说春

秋后传左氏章指行于世

△叶适

叶适字正则温州永嘉人为文藻思英发擢淳熙五年进士第二人授平江节度推官改武昌军节度判官少保史浩荐于朝召之不至改浙西提刑司干办公事士多从之游参知政事裘茂良复荐之召为太学正迁博士因轮对奏曰二陵之讎未报故疆之半未复而言者以为当乘其机当待其时然机自我发何彼之乘时自我为何彼之待非真难真不可也正以我自为难自为不可耳盖其难有四其不可有五置不共戴天之讎而广兼爱之义自为虚弱此国是之难一也士大夫之为奇谋秘画者止于乘机待时忠义决策者止于亲征迁都深沈虑远者止于固本自治此议论之难二也环视诸臣迭进迭退其知此事本而可以反复论议者谁乎抱此志意而可以策励期望者谁乎此人才之难三也论者徒鉴五代之致乱而不思靖康之得祸今循守旧模而欲驱一世之人以报君讎则形势乖阻诚无展足之地若顺时增损则其所更张动摇关系至重此法度之难四也又有甚不可者兵以多而至于弱财以多而至于乏不信官而信吏不任人而任法不用贤能而用资格此五者举天下以为不可动岂非今之实患耶讲利害明虚实断是非决废置在陛下所为耳帝蹙额曰朕比苦目疾此志已泯谁克任此惟与卿言之耳除太常博士兼实录院检讨官尝荐陈傅良等三十四人于丞相后皆召用时称得人会朱熹除兵部郎官未就职为侍郎林栗所劾适上疏争曰栗劾熹罪无一实者特发其私意而遂忘其欺矣至于其中谓之道学一语利害所系不独熹盖自昔小人残害忠良率有指名或以为好名或以为立异或以为植党近创为道学之目郑丙倡之陈贾和之居要津者密相付授见士大夫有稍慕洁修者辄以道学之名归之以为善为玷阙以好学为愆尤相与指目使不得进于是贤士惴栗中材解体销声灭影秽德垢行以避此名栗为侍从无以达陛下之德意志虑而更袭用郑丙陈贾密相付授之说以道学为大罪文致语言逐去一熹自此善良受祸何所不有伏望摧折暴横以扶善类疏入不报光宗嗣位由秘书郎出知蕲州入为尚书左选郎官是时帝以疾不朝重华宫者七月事无巨细皆废不行适见帝力言父子亲爱出于自然浮疑私畏岂有事实若因是而定省废于上号令愆于下人情离阻其能久乎既而帝两诣重华宫都人欢悦适复奏自今宜于过宫之曰令宰执侍从先诣起居异时两宫圣意有难言者自可因此传致则责任有归不可复使近习小人增损语言以生疑惑不报及孝宗不豫羣臣至号泣攀裾以请帝

竟不往适责宰相留正曰上有疾明甚父子相见当俟疾瘳公不播告使臣下轻议君父可乎未几孝宗崩光宗不能执丧将士籍籍有语变且不测适又告正曰上疾而不执丧将何辞以谢天下今嘉王长若预建参决则疑谤释矣宰执用其言同入奏立嘉王为皇太子帝许之俄得御批有愿事岁久念欲退闲之语正惧而去人心愈摇知枢密院赵汝愚定议得请于太皇太后嘉王即皇帝位亲行祭礼百官班贺中外晏然凡表奏皆汝愚与适裁定临期取以授仪曹郎人始知其预仪焉迁国子司业汝愚既相赏功将及适适曰国危效忠职也适何功之有而侂胄恃功以迁秩不满望怨汝愚适以告汝愚曰侂胄所望不过节钺宜与之汝愚不从适叹曰祸自此始矣遂力求补外除太府卿总领淮东车马钱粮及汝愚贬衡阳而适亦为御史胡纆所劾降两官罢主管冲佑观差知衢州辞起为湖南转运判官迁知泉州召人对曰治国以和为体处事以平为极巨欲人臣忘己体国息心既往图报方来可也帝嘉纳之初韩侂胄用事患人不附一时小人在言路者创为伪学之名举海内知名士贬窜殆尽其后侂胄亦悔故适奏及之且荐楼钥邱密黄度三人悉与郡自是禁网渐解矣除权兵部侍郎以父忧去服除召至时有劝侂胄立盖世功以固位者侂胄然之将启兵端适因奏曰甘弱而幸安者衰改弱而就强者兴陛下申命大臣先卢预算思报积耻规恢祖业盖欲改弱以就强矣窃谓必先审知强弱之势而定其论修实政行实德弱可变而为强非有难也今或谓金已衰弱姑开先衅不惧后养求宣和之所不能为绍兴之所不敢此至险至危事也所谓实政者当经营濒淮沿汉诸郡各为处所牢实自守敌兵至则阻于坚城彼此策应而后进取之计可言至于四处御前大军练之吏足以制敌小大之臣试之使足以立事皆实政也所谓实德者当今赋税虽重而国愈贫如和买折帛之类民闲至有用田租一半以上输纳者况欲规恢宜有恩泽乞诏有司审度何名之赋害民最甚何等横费裁节宜先减所入之额定所出之费既修实政于上又行实德于下庶能战而不屈必胜而无败矣除棹工部侍郎侂胄欲藉其草诏以动中外改权吏部侍郎兼直学士院以疾力辞兼职会诏诸将四路出师适又告侂胄宜先防江不听未几诸军皆败侂胄惧以邱密为江淮宣抚使除适宝谟阁待制知建康府兼沿江制置使适谓三国孙氏尝以江北守江乃请于朝乞节制江北诸州及金兵大入一日有二骑举旗若将渡者淮民仓皇争斫舟缆覆溺者众建康震动适谓人心一摇不可复制惟劫砦南人所长乃募市井悍少并帐下愿行者得二百人使采石将徐纬统以往夜过半遇金人蔽茅苇中射之

应弦而倒矢尽挥刀以前金人皆错愕不进黎明知我军寡来追则已在舟中矣复命石跋定山之人劫敌营得其俘馘以归金解和州围退屯瓜步城中始安又遣石斌贤渡宣化夏侯成等分道而往所向皆捷时羽檄旁午而适治事如平时军须皆从官给民以不扰淮民渡江有舟次止有寺给钱饷米其来如归兵退进宝文阁待制兼江淮置制使措置屯田遂上堡坞之议初淮民初兵惊散日不自保适遂于墟落数十里内依山水险要为堡坞使复业以守春夏散耕秋冬入堡凡四十七处又度沿江地创三大堡石跋则屏蔽采石定山则屏蔽靖安瓜步则屏蔽东阳下蜀西护溧阳木连仪真缓急应援首尾联络东西三百里南北三四十里每堡以二千家为率教之习射无事则戍以五百人一将有警则增募新兵及抽摘诸州禁军二千人并堡坞内居民通为四千五百人共相守戍而制司于每岁防秋别募死士千人以为劫砦焚粮之用因言堡坞之成有四利大要谓敌在北岸共长江之险因我有堡坞以为声援则敌不敢窥江而士气自倍战舰亦可以策勋和滁真六合等城或有退遁我以堡坞全力助其袭逐或邀其前或尾其后制胜必矣此所谓用力寡而收功博也三堡就流民渐归而侂胄适诛中丞雷孝友劾适附侂胄用兵遂夺职奉祠累进宝文阁学士通议大夫嘉定十六年卒赠光禄大夫谥忠定适志意慷慨雅以经济自负方侂胄之欲开兵端也以适每有大讎未复之言重之然适自召还每奏疏必言当审而后发且力辞草诏云

△戴溪

戴溪字肖望永嘉人少有文名淳熙五年为别头省试第一监潭州南岳庙绍熙初主管吏部架阁文字除太学录兼实录院检讨官正录兼史职自溪始升博士奏两淮当立农官若汉稻田使者括闲田谕民主出财客出力主客均利以为救农之策除庆元府通判未行改宗正簿为兵部郎官开禧时师溃于符离溪因奏沿边忠义人湖南北盐商皆当区画以销后患会和议成知枢密院事张岩督师京口除授参议军事召为资善堂说书累迁太子詹事兼秘书监景献太子命溪讲中庸大学溪辞以讲读非詹事职惧侵官太子曰讲退便服说书非公礼毋嫌也复命类易诗书春秋论语孟子资治通鉴各为说以进权工部尚书除华文阁学士嘉定八年以宣奉大夫龙图阁学士致仕卒赠特进端明殿学士绍定闲赐谥文端溪久于宫僚以徽婉受知立朝建明多务秘密云

△蔡幼学

蔡幼学字行知温州瑞安人年十八试礼部第一是时陈傅良有文名于太学幼学从之游月书上祭酒芮华及吕祖谦连撰拔辄出傅良

右皆谓幼学之文过其师孝宗闻之因策士将真首列而是时外戚张说用事宰相虞允文梁克家皆阴附之幼学对策其略曰陛下资虽聪明而所存未大志虽高远而所趋未正治虽精勤而大原不立即位之始冀太平旦暮至柰何今十年风俗日坏将难扶持纪纲日乱将难整齐人心益摇将难收拾吏慢兵骄财匮民困将难正揀又曰陛下居名相之不正更制近古二相并进以为美谈然或以虚誉惑听自许立功或以缄默容身不能持正盖指虞允文梁克家也又曰汉武帝用兵以来大司马大将军之权重而丞相轻卫青用事公孙弘为相苟合取容相业无有宣元用许史成帝用王氏哀帝用丁傅率为始元之祸令陛下使嬖子预兵柄其人无一才可取宰相忍与同列曾不羞耻按其罪名宜在公孙弘上盖指张说也帝览之不怩虞允文尤恶之遂得下第教授广德军再调潭州执政荐于朝帝许之且问年几何矣何以名幼学参政施师点举孟子幼学壮行之语以对帝仁思慨然曰今壮矣可行也除敕令所删定官首言大耻未雪境土未复陛下睿知神武可以有为而苟且之议委靡之习顾得以缓陛下欲为之心孝宗喜曰卿意欲令朕立规模尔光宗立累迁校书郎时光宗以疾不朝重华宫幼学上封事略曰陛下身体发肤寿星所与宗社人民寿皇所命则畴昔慈爱有感乎心可不独出圣断复父子之欢弭宗社之祸疏入不报宁宗即位诏求直言幼学又奏为君之道其要有三事亲任贤宽民而其本莫先于讲学比年小人谋倾君子为安靖和平之说以排之故大臣当兴治而以生事自疑近臣当效忠而以忤旨摈弃自非圣学日新求贤如不及何以作天下之才自熙宁元丰而始有免役钱有常平积剩钱有无额上供钱自大观宣和而始有大礼进奉银绢有赡学余本钱有经制钱自绍兴而始有和买折帛钱有总制钱有月椿大军钱至于茶盐酒榷税契头子之属积累增多较之祖宗无虑数十倍民困极矣幼学既论列时政其极归之圣学帝称善将用之时韩侂胄方用事指正人为伪学异论者立黜幼学遂力求外补特除提举福建常平陛辞言今除授命令径从中出而大臣之责始轻谏省经筵无故罢黜而多士之心始惑或者有以误陛下至此耶侂胄闻之不悦既至官日讲荒政时朱熹居建阳幼学每事咨访遂为御史刘德秀劾罢奉祠起知黄州有劝侂胄以收召海内名士者乃召为吏部员外郎入见言高宗建炎闲减婺州和买绢折罗事因谕辅臣曰一日行得如此一事一年不过三百六十事而已陛下除两浙丁钱视高宗无闲然而兵事既开诸路罹锋镝转饷之艰江湖以南有调募科需之扰惟陛下以爱惜邦本为念迁国子司业宗正少卿皆兼权中书舍人

侂胄余诛余党尚塞正路幼学次第弹缴窜黜尤众号称职迁中书舍人兼侍讲故事合
门宣赞而下供职十年始得路都监若钤辖侂胄坏成
法率五六年七八年即越等除授有已授外职犹通籍禁闕者初学一切厘正嘉定初同
楼钥知贡举时正学久锢士专于声律度数其学支离
幼学始取义理之文士习渐复于正兼直学士院内外制皆温醇雅厚人多称之除刑部
侍郎改吏部仍兼职赵师■〈罽上卅下〉除知临安
府师■〈罽上卅下〉辞故事当有不允诏幼学言师■〈罽上卅下〉以媚权臣进官
三尹京兆狼籍无善状诏必出褒语臣何辞以革命遂
寝改兼侍读师■〈罽上卅下〉命乃下除龙图阁待制知泉州徙建康府福州进福建
路安抚使政主宽大惟恐伤民福建下州例抑民买盐
以户产高下均卖者日产盐以交易契纸钱科敷者曰浮盐皆出常赋外久之遂为定赋
幼学力请蠲之不报提举司令民以田高下藏新会子
不如令者籍其费幼学曰罔民而可为乎因言钱币未均称提无术力求罢去遂升宝谟
阁直学士提举万寿宫召权兵部尚书兼修玉牒官寻
兼太子詹事先是朝廷既遣岁币入金境适值其有难不果纳则遽以兵叩边索之中外
汹汹皆言当亟与幼学请对言玉帛之使未还而侵轶
之师奄至可不伸大义以伐其谋乎于是朝论奋然始诏与金绝幼学因请固本根以弭
外虞示意向以定众志公汲引以合材谋审怀附以一
南北帝称善寻卒幼学早以文鸣于时而中年述作益穷根本器质凝重莫窥其隙终日
危坐一语不妄发及辩论义理纵横阖辟沛然如决江
河虽辩士不及也尝绩司马光公卿百官表年历大事记备忘辨疑编年政要列传举要
凡百余篇传于世

钦定续通志卷五百四十七

●钦定续通志卷五百四十八 儒林传十一

儒林传

宋【九】

○宋九

陈亮

郑樵

程迥

刘清之

陈亮

郑樵

程迥

刘清之

△陈亮

陈亮字同父婺州永康人才气超迈喜谈兵论议风生下笔数千言立就尝考古今用兵成败之迹着酌古论郡守周葵奇之请为上客及葵为执政朝士白事必指令揖亮因得交一时豪俊尽其议论授以中庸大学曰读此可精性命之说遂受而尽心焉隆兴初与金人约和天下忻然幸得苏息独亮持不可婺州方以解头荐因上中兴五论不报退修于家学者多归之益力学著书先是亮尝圜视钱塘喟然叹曰城可灌尔盖以地下于西湖也至是当淳熙五年孝宗即位盖十七年矣亮更名同诣阙上书略曰南师之不出于今几年矣岂无一豪杰之能自奋哉其势必有时而发泄矣苟国家不能起而承之必将有承之者矣不可恃衣冠礼乐之旧祖宗积累之深以为天命人心可以安坐而久系也皇天无亲惟德是辅民心无常惟惠是怀自三代圣人皆知其为甚可畏也今金源之植概既久不可以一举而遂灭国家之大势未张不可以一朝而大举而人情皆便于通和者劝陛下积财养兵以待时也臣以为通和者所以成上下之苟安而为妄庸两售之地宜其为人情之所甚便也自和好之成十有余年凡今日之指画方略者他日将用之以坐筹也今日之击球射鹄者他日将用之以决胜也府库充满无非财也介冑鲜明无非兵也使兵端一开则其迹败矣何者人才以用而见其能否安坐而能者不足恃也兵食以用而见其盈虚安坐而盈者不足恃也而朝廷方幸一旦之无事庸愚齷齪之人皆得以守格令行文书以奉陛下之使令而陛下亦幸其易制而无他也徒使度外之士摈弃而不得骋日月蹉跎而老将至矣臣故曰通和者所以成上下之苟安而为妄庸两售之地也今和好一不通朝野之论常如敌兵之在境惟恐其不得和也虽陛下亦不得而不和矣然使朝野常如敌兵之在境乃国家之福而英雄所用以争天下之机也执事者胡为速和以惰其心乎晋楚之战于郟也栾书以为楚自克庸以来其君无日不讨国人而训之于民生之不易祸至之无目戒惧之不可以怠在军无日不讨军实而申儆之于胜之不可保纣之百克而卒无后晋楚之弭兵于宋也子罕以为兵所以威不轨而昭文德也圣人以兴乱人以废废兴存亡昏明之术皆兵之由也而求去之是以诬道蔽诸侯也夫人心之不可惰兵威之不可废故虽成康太平犹有所谓四征不庭张皇六师者此李沆所以深不愿真宗皇帝之与辽和亲也况南北角立之时而废兵以情人心使安于忘君父之大讎而置疆土于度外徒以便妄庸之人则执事者之失策亦甚矣陛下何不明大义而慨然与金绝也贬损乘輿欲御正殿痛自克责誓必复讎以励羣臣以振天下之气虽未出兵而人心不敢惰矣东西驰

聘而人才出矣盈虚相补而兵食见矣狂妄之辞不敢而自息懦弱之夫不欲而自退缩矣当有度外之士起而惟陛下之所欲用矣是云合响应之势而非可安坐所致也臣请为陛下陈国家立国之本末而开今日大有为之略论天下形势之消长而决今日大有为之机唐自肃代以后上失其柄藩镇自相雄长擅其土地人民用其甲兵财赋官爵惟其所命而人才亦各尽心于其所事卒以成君弱臣强正统数易之祸艺祖皇帝兴四方次第平定藩镇拱手以趋约束使列郡各得自达于京师以京官权知三年一易财归于漕司而兵各归于郡朝廷以一纸下郡国如臂之使指无有留难自筦库微职必命于朝廷而天下之势一矣故京师尝宿重兵以为固而郡国亦各有禁军无非天子所以自守其地也纪纲总摄法令明备郡县不得以一事自专也士以尺度而取官以资格而进不求度外之奇才不慕绝世之隼功天子蚤夜忧勤于上以义理廉耻婴士大夫之心以仁义公恕厚斯民之生举天下皆由于规矩准绳之中而二百年太平之基从此而立然契丹遂得与俄国抗衡俨然为南北两朝微澶渊一战则我国之势浸微根本虽厚而不可立矣故庆历增币之事富弼以为朝廷之大耻而终身不敢自论其劳盖契丹征令是主上之操也天子供贡是臣下之礼也契丹之所以卒胜我国者其积有渐也立国之初其势固必至此故我祖宗常严庙堂而尊大臣宽郡县而重守令于文法之内未尝折困天下之富商巨室于格律之外有以容奖天下之英伟奇杰皆所以助立国之势而为不虞之备也庆历诸臣亦尝愤中国之势不振矣而其大要则使羣臣争进其说更法易令而庙堂轻矣严按察之权邀功生事而郡县又轻矣岂惟于立国之势无所助又从而腴削之虽徽章得象陈执中以排沮其事亦安得而不自沮哉独其破去旧例以不次用人而劝农桑务宽大为有合于困革之宜而其大要已非矣此所以不能洗契丹平视南朝之耻而卒发神宗皇帝之大愤也王安石以正法度之说首合圣意而其实则欲籍天下之兵尽归于朝廷别行教阅以为强也括郡县之利尽入于朝廷别行封椿以为富也青苗之政惟恐富民之不困也均输之法惟恐商贾之不折也罪无大小动辄兴狱而士大夫缄口畏罪矣西北两边致使内臣经画而豪杰耻于为役矣徒使神宗皇帝见兵财之数既多锐然南征北伐卒乖圣意而天下之势实未尝振也彼盖不知朝廷立国之势正患文为之太密事权之太分郡县太轻于下而委琐不足恃兵财太关于上而重迟不易举祖宗惟用前四者以助其势而安石竭之不遗余力不知立国之本末者真不足以谋国也元佑绍圣一反一覆而卒为金人侵侮之

资尚何望其振纪纲以威海内哉南渡以来大抵遵祖宗之旧虽微有因革增损不足为轻重有无如赵鼎诸臣固已不究变通之理况秦桧尽取而沮毁之忍耻事讎饰太平于一隅以为欺其罪可胜诛台陛下愤王业之屈于一隅励志复讎不免籍天下之兵以为强括郡县之利以为富加惠百姓而富人无五年之积不重征税而大商无巨万之藏国势日以困竭臣恐尺籍之兵府库之财不足以支一旦之用也陛下蚤朝宴罢冀中兴日月之功而以绳墨取人以文法莅事圣断裁制中外而大臣充位胥吏坐行条令而百司逃责人才日以闾茸臣恐程文之士资格之官不足当度外之用也艺祖经画天下之大略太宗已不能尽用今其遗意岂无望于陛下也陛下苟推原其意而行之可以开社稷数百年之基而况于复故物乎不然维持之具既穷臣恐祖宗之积累亦不足恃也夫吴蜀天地之偏气钱塘又吴之一隅当唐之衰钱镠以闾巷之雄起王其地自以不能独立常朝事中国以为重及我宋受命俶以其家入京师而自献其士故钱塘终始五代被兵最少而二百年之闲人物日以繁盛遂甲于东南及建炎绍兴之闲秦桧又从而备百司庶府以讲礼乐于其中其风俗固已华靡士大夫又从而治园囿台榭以乐其生于干戈之余上下晏安而钱塘为乐国矣一隙之地本不足以容万乘而镇压且五十年山川之气盖亦发泄而无余矣故谷粟桑麻丝枲之利岁耗于一岁禽兽鱼鳖草木之生日微于一日而上下不以为异也公卿将相大抵多江浙闽蜀之人而人才亦日以凡下场屋之士以十万数而文墨小异已足以称雄于其闲矣陛下据钱塘已耗之气用闽浙日衰之士而欲鼓东南习安脆弱之众北向以争中原臣是以知其难也荆襄之地虽为偏方然未有偏方之气五六百年而不发泄者况其东通吴会西连巴蜀南极湖襄北控关洛左右伸缩皆足以为进取之机今诚能开垦其地洗濯其人以发泄其气而用之使足以接关洛之气则可以争衡于中国矣是亦形势消长之常数也陛下慨然移都建业百司庶府皆从草创军国之仪皆从简略又作行宫于武日以示不敢宁居之意常以江淮之师为金人侵轶之备而精择一人之沈鸷有谋开豁无他者委以荆襄之任宽其文法听其废置抚摩振厉于三四年之闲则国家之势成矣此诚今日大有为之机不可苟安以玩岁月也臣不佞自少有驱驰四方之志尝数至行都人物如林其论皆不足以起人意臣是以知陛下大有为之志孤矣今世之儒士自以为得正心诚意之学者皆风痹不知痛痒之人也举一世安于君父之讎而方低头拱手以谈性命不知何者谓之性命乎陛下接之而不任以事臣于是服陛下之仁今世

之才臣自以为得富国强兵之术者皆狂惑以肆叫呼之人也不以暇时谋究立国之本末而方扬眉伸气以论富强不知何者谓之富强乎陛下察之而不敢尽用臣于是服陛下之明陛下厉志复讎足以对天命笃于仁爱足以结民心而又明足以照临羣臣一偏之论此百代之英主也今乃委任庸人笼络小孺以迁延大有为之岁月臣不胜愤悻是以忘其贱而献其愚陛下诚令臣毕陈于前岂惟臣区区之愿将天地祖宗之灵实与闻之书奏孝宗咨叹欲榜朝堂以励羣臣用种放故事召令上殿将擢用之左右大臣莫知所为惟曾觐知之将见亮亮耻之踰垣而逃觐不悦大臣尤恶其直言无讳交沮之乃有都堂审察之命宰相问所欲言皆落落不少贬又不合待命十日再诣关上书曰臣妾意国家维持之具至今日而穷而艺祖皇帝经画天下之大指犹可恃以长久苟推原其意而变通之则恢复不足为犬然而变通之道有三有可以迁延数十年之策有可以为百五十六年之计有可以复开数百年之基事势昭然而效见殊绝非陛下聪明度越百代决不能一一听之臣不敢泄之大臣之前而大臣拱手称旨以问臣亦姑取其大体之可言者三事以答之其一曰二圣北狩之痛盖国家之大耻而天下之公愤也正在主上与二三大臣振作其气以泄其愤使人人如报私讎其二曰国家之规模使天下奉规矩准绳以从事羣臣救过之不给而何暇展布四体以求济度外之功哉其三曰艺祖皇帝用天下之士人以易武臣之任事者故本朝以儒立国而儒道之振独优于前代今天下之士熟烂委靡诚可厌恶正在主上与二三大臣反其道以教之作其气而养之使临事不至乏才随才皆足有用则立国之规模不至戾艺祖之本旨而东西驰骋以定祸乱不必专在武臣也臣所以为大臣论者其略如此书既上帝欲官之亮笑曰吾欲为社稷开数百年之基宁用以博一官乎亟渡江而归日落魄醉酒与邑之狂士饮醉中戏为大言言涉犯上一士欲中亮以其事首刑部侍郎何澹尝为考试官黜亮亮不平语数侵澹澹闻而嫌之即缴状以闻事下大理答掠亮无完肤诬服为不轨事闻孝宗知为亮尝阴遣左右廉知其事及奏入取旨帝曰秀才醉后妄言何罪之有划其牍于地亮遂得免居无何亮家僮杀人于境适被杀者尝辱亮父次尹其家疑事由亮闻于官答榜僮死而复苏者数不服又囚亮父于州狱而属台官论亮情重下大理时丞相王淮知帝欲生亮而辛弃疾罗点素亮亮才援之尤力复得不死亮自以屡遭大狱归家益厉志读书所学益博其学自孟子后惟推王通尝曰研穷义理之精微辨析古今之同异原心于杪忽较礼于分寸以积累为工以涵养为正晬面盎背则于

诸儒诚有愧焉至于堂堂之陈正正之旗风雨云雷交发而并至龙蛇虎豹变现而出没推倒一世之智勇开拓万古之心胷自谓差有一日之长亮意盖指朱熹吕祖谦等云高宗崩金遣使来吊简慢而光宗由潜邸判临安府亮感孝宗之知至金陵视形势复上疏曰有非常之人然后可以建非常之功求非常之功而用常才出常计举常事以应之者不待知者而后知其不济也秦桧以和误国二十余年而天下之气索然无余矣陛下慨然有削平宇内之志又二十余年天下之志始知所向其有功于宗庙社稷者非臣区区所能诵说其万一也高宗皇帝春秋既高陛下不欲大举惊动慈颜抑心俯首以致色养圣孝之盛书册之所未有也今者高宗既已祔庙天下之英雄豪杰皆仰首以观陛下之举动陛下其忍使二十年闲所以作天下之气者一旦而复索然乎东宫居曰监国行曰抚军陛下何以不于此时而命东宫为抚军大将军岁巡建业使之兼统诸司尽护诸将置长史司马以专其劳而陛下于宅忧之余运用人才均调天下以应无穷之变此肃宗所以命广平王之故事也陛下儆以大义为当正抚军之言为可行则当先经理建业而后使临之纵今岁未为北举之谋而为经理建康之计以振动天下而与金绝陛下之初志亦庶几于少伸矣大略欲激孝宗恢复而是时孝宗将内禅不报由是在廷交怒以为狂怪【按名臣言行录云孝宗朝垂拱殿成亮进赋以颂德又进郊祀庆成赋皆不报光宗即位伏阙上鉴成箴又不报宋史不载谨附识】先是乡人会宴末胡椒特置亮羹馘中盖村俚敬待异礼也同坐者归而暴死疑食异味有毒已入大理会吕兴何念四殴吕天济且死恨曰陈上舍使杀我县令王恬实其事台官谕监司选酷吏讯问无所得取入大理众意必死少卿郑汝谐阅其单辞大异曰此天下奇材也国家若无罪而杀士上干天和下伤国脉矣力言于光宗遂得免未几光宗策进士问以礼乐刑政之要亮以君道师道对且曰臣窃叹陛下之于寿星莅政二十有八年之闲宁有一政一事之不在圣怀而问安视寝之余所以察辞而观色因此而得彼者其端甚众亦既得其机要而见诸施行矣岂徒一月四朝而以为京邑之美观也哉时光宗不朝重华宫羣臣更进迭谏皆不听得亮策乃大喜以为善处父子之闲奏名第三御笔擢第一既知为亮则大喜曰朕擢果不谬孝宗在南内宁宗在东宫闻之皆喜故赐第诰词曰尔蚤以艺文首贤能之书旋以论奏动慈宸之听亲阅大对嘉其渊源擢置举首殆天留以遗朕也授佾书建康府判官厅公事未至官一夕卒亮志存经济重许可人人见其肺肝与人言必本于君臣父子之义虽为布衣荐士恐弗及家仅中产畸

人寒士衣食之久不衰卒之后吏部侍郎叶适请于朝命补一子官非典故也端平初谥文毅更与一子官

△郑樵

郑樵字渔仲兴化军莆田人好著书不为文章自负不下刘向扬雄居夹漈山谢绝人事久之乃游名山大川搜奇访古遇藏书家必借留读尽乃去赵鼎张浚而下皆器之初为经旨礼乐文字天文地理虫鱼草木方书之学皆有论辨绍兴十九年上之诏藏秘府樵归益励所学从者二百余人以侍讲王纶贺允中荐得召对因言班固以来历代为史之非帝曰闻卿名久矣敷陈古学自成一家何相见之晚邪授右迪功郎礼兵部架阁以御史叶义问劾之改监潭州南岳庙给札归钞所著通志书成入为枢密院编修官寻兼摄检详诸房文字请修金正隆官制因求入秘书省翻阅书籍未几又坐言者寝其事金人之侵边也樵言岁生分在宋金主将自殂后果然高宗幸建康命以通志进会病卒学者称来溱先生樵好为考证伦类之学成书虽多大抵博学而宾要平生甘枯淡乐施与独切切于仕进识者以是少之【按宋史此下附林霆传今改附忠义林冲之传后】

△程迥

程迥字可久应天府宁陵人家于沙随靖康之乱徙绍兴之余姚年十五丁内外艰孤贫飘泊无以自振二十余始知读书时乱甫定西北士大夫多在钱塘迥得以考德问业焉登隆兴元年进士第历扬州泰兴尉训武郎扬大烈有田十顷死而妻女存俄有讼其妻非正室者官没其贖且追十年所入租部使者以诱迥迥曰大烈死贖产当归其女女死当归所生母可也调饶州德兴丞盗入县民齐翦家平素所不快者皆冒絀逮狱州属迥决禁囚辨其冤者纵遣之翦讼不已会获盗宁国翦犹讼还所纵之人迥曰盗既获矣再令追捕或死于道路使其骨肉何依岂审冤之道哉唐肃宗时县有程氏女其父兄为盗所杀因掠女去隐忍十余年手刃尽诛其党刳其肝心以祭其父兄迥取春秋复雠之义颂之曰大而得其正者也表之曰英孝程烈女改知隆兴府进贤县省符不知平江府王佐决陈长年辄私卖田其从子愬有司十有八年母鱼氏年七十坐狱廷辨按法追正令候母死服阙日理为己分令天下郡县视此为法迥为议曰天下之人孰无慈母子若孙宜定省温清不宜有私财也在律别籍者有禁异财者有禁当报牒之初县令杖而遣之使听命于其母可矣何稽迟徧愬有司而达于登闻院乎春秋谷梁传注曰臣无讼君之道为卫侯郑与元咺发论也夫诸侯之于命大夫犹若此子孙之于母乃使坐

狱以对吏乎按令文分财产谓祖父母父母服阙以前所有者然则母在子孙不得有私财借使其母一朝尽费其子孙亦不得违教令也既使归于其母其日前所费乃卑幼辄用尊长物法须五年尊长告乃为理何至豫期母死又开他日争讼之端也抑亦安知不合之子孙不死于母之前乎守令者民之师帅政教之所由出诚宜正守令不职之愆与子孙不孝之罪以儆天下民饥府檄有愬闭余及巢与商贾者迴即论报之曰力田之人细米每斗才九十五文逼于税赋是以出余非上户也县境不出资宝苟不与外人交易输官之钱何由而得今强者羣聚胁持取钱殴伤人者甚众吾民不敢入市坐致缺食申论再三见从乃已县大水无稻麦郡蠲租税至薄回白于府曰是驱民流徙耳赋不可得徒存欠籍乃悉蠲之郡僚犹曰渡江以来未尝全放恐户部不从迴力论之曰康人损七则租康调俱免今损十矣夏税役钱不免是犹用其二也不可谓宽议乃息境内有妇人佣身绩纺春簸以养其姑其子为人牧牛亦干饭以饷祖母迴廉得之白于郡郡给以钱粟调信州上饶县岁纳租数万石旧法加倍又取斛面米迴力止绝之尝曰令与吏服食者皆此邦之民膏血也曾不是思而横敛虐民鬼神其无知乎州郡督索经总钱甚急迴曰斯钱古之除陌之类今其类乃三倍正赋民何以堪反复言之当路奉祠寓居番阳之萧寺程祥者从伯父待制昌禹来居番阳昌禹死遂失所依祥继亡祥妻度氏犹质卖奩具以抚养孤子久之罄竭濒死邻家皆莫识其面有欲醮之者度曰吾儿幼若事他人使母不得抚其子岂不负良人乎终辞焉或为迴言其事迴走告郡守月给钱粟迴居官临之以庄政宽而明令简而信绥强抚弱达以恩义积年讎讼一语解去猾吏奸民皆悛悔欺诈以革暇则宾礼贤士从容尽欢进其子弟之秀者与之均礼为之陈说诗书执问疑难者不问蚤暮势位不得以交私祠庙非典祀不谒表隐德潜善以励风俗或周其穷阨俾全节行听讼期于明允凡上官所未悉者必再三抗辨不为苟止贵溪民伪作吴渐名诬愬县令石邦彦迴言匿名书不当受转运使不谓然遂兴大狱瘐死者十有四人及闻省寺讫报如迴言迴尝授经学于昆山王葆嘉禾闻人茂德严陵喻樗所著有古易考古易章句古占法易传外编春秋传显微例目论语传孟子章句文史评经史说诸论辨太元补赞户口田制贡赋书干道振济录医经正本书条具干道新书度量权三器图义四声韵淳熙杂志南斋小集卒官朝奉郎朱熹与迴子绚书称其博闻至行追配古人当世之务又所通该非独章句之儒而已绚以致仕恩调巴陵尉摄邑事能理冤狱孙仲熊亦有名

△刘清之

刘清之字子澄临江人受业于兄靖之甘贫力学博极书传登绍兴二十七年进士第调袁州宜春县主簿改建德请于州俾民自实其户由是赋役平争讼息调高安县丞【按宋史误作万安考名臣言行录调瑞州高安丞今据改】时江右大祲郡檄视旱徒步阡陌亲与民接凡所蠲除具得其实州议减常平米直清之曰此惠不过三十里内耳外乡远民势岂能来老幼疾患之人必有馁死者今有粟之家闭不肯粜实窥伺攘夺者众也在我有政则大家得钱细民得米两适其便乃请均境内之地为八俾有粟者分振其乡官为主之规画防闲民甚赖之帅龚茂良荐于朝发运使史正志按部至筠俾清之拘集州县畸零之赋清之不可清之有同年生在幕中谓曰侍郎因子言谓子爱民特立将荐子矣甚以阅阅来清之贻以书曰所谓赢资者皆州县侵刻于民法所当禁纵有赢资是所谓羨余也献之自下而诏止之今则止而求之乃自上焉不夺不履其弊有不可胜言者愿侍郎自请于朝姑归贰卿之班主大农经费以佐国家如此则士孰不愿出侍郎之门下哉某诚不敢玷侍郎知人之鉴以荐者两有审察之命清之竟不见丞相诣吏部铨得知宜黄县茂良入为参知政事与丞相周必大荐之孝宗召入对首论民困兵骄大臣退托小臣苟偷愿陛下广览兼听提要挈纲而力行之古今未有俗不可变弊不可革者变而通之亦在陛下方寸之闲耳又言用人四事一曰辨贤否谓道义之臣大者可当经纶小者可为仪刑功名之士大者可使临政小者可使立事至于专谋富贵利达而已者下也二者正名实今有司职守不明非旷其官则失之侵偪愿诏史官考究设官之本意各指其合主何事制旨亲定载之命书依开宝中差诸州通判故事使人人晓然知之而行赏罚焉三曰使材能谓军旅必武臣钱谷必能吏必临之以忠信不欺之士使两人者皆得以效其所长四曰听换授谓武臣之官不可用违其才然不当许之宜列宜令文武臣四品以上各以性行材略及文武艺每岁互举堪充左右选者一人于合入资格外稍与优奖故太常寺主簿通判鄂州鄂大军所驻兵籍多伪清之白郡及诸司请自遇判厅始俾伪者以实自言而止之州有民妻张以节死嘉佑中诏封旌德县君表其墓曰烈火中更兵火至是无知其墓者清之与郡守罗顾访而祠之鄂俗计利而尚鬼家贫子壮则出赘习为当然而尤谨奉大洪山祠病者不乐而听于巫死则不葬而畀诸火清之皆谕止之差权发遣常州改衡州衡自建炎军兴有所谓大军月椿过湖公者岁送漕司无虑七八万缗以四邑所入曲引钱及郡计畸零苗米折纳充之旧法民有

吉凶聚会许买引为酒曲谓之曲引钱其后直以等第
敷纳衡有五邑独敷其四取民之辞不正良民徧受其害而黠民往往侮易其上乃并与
常赋不输虽得曲引钱四五万缗而常赋之失不啻数
万缗矣清之请于朝愿与总领所酌损补移渐图蠲减不报遂戒诸邑董常赋缓杂征阁
旧逋戒预折新簿籍谨推收费用有节补置有渐先是
郡饰厨传以事常平刑狱二使者月一会集互致折馈清之叹曰此何时也与其取诸民
孰若裁诸公吾之所以事上官者惟究心于所职无负
于吾民足矣岂以酒食货财为勤哉清之自常禄外悉归之公帑以佐经用至之日兵无
粮官无奉上供送使无可备已而郡计渐裕民力稍苏
或有报白手自书之吏不与焉尝作谕民书一编首言畏天积善勤力务本农工商贾莫
不有劝词意质直简而易从念士风未振每因月讲复
具酒肴以燕诸生相与论学设为疑问以观其所向然后从容示以先后本末之序来者
日众则增筑临蒸精舍居之其所讲先正经次训诂音
释次疏先儒议论次述今所紬绎之说然后各指其所宜用为阅武场凡禁军役于他所
隐于百工者悉按军籍俾诣训关作朱陵道院祠张九
龄韩愈寇准周敦颐胡安国于左祠晋死节太守刘翼宋死节内史王应之于右刘孝昌
者摯之孙也贫不自立清之买田以给之部使者以清
之不能媚己恶者贻书所厚台臣诬以劳民用财论罢主管云台观归筑槐阴精舍以处
来学者胡晋臣郑侨尤袤罗点皆力荐清之光宗即位
起知袁州而清之疾作犹遗书执政论国事病且革为书以别向浯彭龟年赋二诗以别
朱熹杨万里周必大视疾谓曰子澄其澄虑清之气息
已微云无虑可澄遂卒初清之既举进士欲应博学宏词科及见朱熹尽取所习焚之慨
然志于义理之学吕伯恭张栻皆神交心契汪应辰李
焘亦敬慕之母不逮养每展阅手泽涕泗交颐从兄肃流落新吴族父喆寓丹阳艾寓临
川皆迎养之从祖子侨为邵州录事参军死吴锡之乱
清之遣其孙晋之致书邵守得其遗骨归葬焉族人自远来馆留之不使遽去尝序范仲
淹义庄规矩劝大家族众者随力行之本之家法参取
先儒礼书定为祭礼行之高安李好古以族人讼财见清之豫章清之为说讼家人二卦
好古惕然遽舍所讼市程氏易以归卒为善士所著有
曾子内外杂篇训蒙新书外书戒子通录墨庄总录祭仪时令书续说苑文集农书

钦定续通志卷五百四十八

●钦定续通志卷五百四十九 儒林传十二

儒林传

宋 【十】

○宋十

真德秀

魏了翁

李心传【道传】

杨泰之

真德秀

魏了翁

李心传

杨泰之

△ 真德秀

真德秀字景元后更为希元【按宋史误作景希考四朝闻见录云真德秀初字景元楼钥叩以字义真德以慕元德秀之为人钥取诗

注景行行止处示之则景之义为明谓高山仰止对明行行止也真遽易为希元今据改

】建之浦城人四岁受书过目成诵十五而孤母吴氏

力贫教之同郡杨圭见而异之使归共诸子学卒妻以女登庆元五年进士第授南剑州判官继试中博学宏词科入闽帅募召为太学正嘉定

元年迁博士时韩侂胄已诛入对首言权臣开边南北涂炭今兹继好岂非天下之福然日者以行人之遣金人欲多岁币之数而吾亦曰可增

金人欲得奸臣之首而吾亦曰可与往来之称谓犒军之金帛根括来归流徙之民皆承之唯谨得无滋慢我乎抑善谋国者不观敌情观吾政

事今号为更纪而无以使敌情之畏服正恐彼资吾岁赂以厚其力乘吾不备以长其谋一旦挑争端而吾无以应此有识所为寒心又言侂胄

自知不为清议所贷至诚忧国之士则名以好异于是忠良之士斥而正论不闻正心诚意之学则诬以好名于是伪学之论兴而正道不行今

当褒崇名节明示好尚召试学士院改秘书省正字进秘书郎又言暴风雨雹荧惑蝻蝗之变皆赃吏所致寻兼沂王府教授学士院权直入对

乞开公道室旁蹊以抑小人道长之渐选良牧励战士以扼羣盗方张之锐四年迁著作佐郎同列相忌谗之德秀恬不与较宰相将用德秀会

言官抵之德秀力辞兼礼部郎上疏言金有必亡之势亦可为我国忧盖金亡则上恬下嬉忧不在敌而在我国多事之端恐自此始五年迁军器

少监升权直六年迁起居舍人奏权奸擅政十有四年朱熹彭龟年以抗论逐吕祖俭周端朝以上书斥当时近臣犹有争之者其后吕祖泰之

贬非惟近臣莫敢言而台谏且出力以挤之则嘉泰之失已深于庆元矣更化之初羣贤皆得自奋未几傅伯成以谏官论事去蔡幼学以词臣

论事去邹应龙许奕又继以封驳论事去是数人者非能大有所矫拂已皆不用于朝故人务自全一辞不措设有大安危大利害羣臣喑嘿如

此岂不殆哉今欲与陛下言勤访问广谋议明黜陟三者而已时钞发楮令行告讐繁兴

抵罪者众莫敢以闻德秀奏或一夫坐罪而并籍昆弟之财或亏陌四钱而没入百万之资至于科富室之钱拘盐商之舟视产高下配民藏楮鬻田宅以收券者虽大家不能免尚得名便民之策乎自此所籍民产以渐给还兼太常少卿又言金人必亡君臣上下皆当以祈天永命为心充金国贺登位使及盱眙闻金人内变而返言于帝曰臣自扬之楚自楚之盱眙沃壤无际陂湖相运民皆强悍强忍此天赐吾国以屏障大江使强兵足食为进取资顾田畴不开沟洫不治险要不扼丁壮不练豪杰武勇不收拾一旦有警则徒以长江为恃岂如及今大修垦田之政专为一司以领之数年之后积贮充实边民父子争欲自保因其什伍勒以兵法不待粮饷皆为精兵矣又言边防要事时史弥远方以爵禄糜天下士德秀慨然谓刘燾曰吾徒须急引去使庙堂知世亦有不肯为从官之人遂力请去以秘阁修撰为江东转运副使山东盗起朝廷犹与金通聘德秀朝辞奏国耻不可忘邻盗不可轻幸安之谋不可恃导谏之言不可听至公之论不可忽宁宗曰卿力有余到江东日为朕撙节财计以助边用江东旱蝗广德太平为甚德秀遂与留守宪司分所部九郡大讲荒政而自领广德太平亲至广德与太守魏峴同以便宜发廩使教授林庠振给竣事而还索毁太平州私创之大斛新徽州守林琰无廉声宁国守张忠恕私匿赈济米皆劾之而以李道传摄徽先是都司胡槻薛拯每诮德秀迂儒试以事必败至是政誉日闻因倡言早伤本细监司好名赈贍太过使峴劾庠以撼德秀德秀上章自明朝廷悟与峴祠授庠干官而道传寻亦召还德秀以右文殿修撰知泉州番舶畏苛政至者岁不三四德秀首宽之骤增三十六艘输租令民自概听讼推揭示姓名人自诣州泉多大家为閭里患痛绳之海贼作乱将逼城官军败衄德秀祭兵死者乃亲授方略禽之复徧行海滨审视形势增屯要害处以备不虞十二年以集英殿修撰知隆兴府承宽弛之后乃稍济以严尤留意军政欲分鄂州军屯武昌及通广盐于赣与南安以弭汀赣盐寇未及行之母丧归明年蕲黄失守盗起南安数载始平人服德秀先见十五年以宝谟阁待制湖南安抚使知潭州以廉仁功勤四字励僚属以周惇颐胡安国朱熹张栻学术源流勉其士罢榷酤除斛面米申免和籴民养食既竭力赈贍之复立惠民仓五万石使岁出籴又易谷九万五千石分十二县置社仓以徧及乡落别立慈幼仓设义阡惠攻毕举月试诸军射捐其回易之利及官田租凡营中病者死未葬者盈者嫁娶者贍给有差朝廷从寿昌朱橐请以飞虎军戍寿昌并致其家口力争止之江华县贼苏师入境杀劫檄广西共讨平之司马遵守武冈激军变劾遵

而诛其乱者理宗即位召为中书舍人寻擢礼部侍郎直学士院入见奏三纲五常扶持宇宙之栋干奠安民生之柱石雪川之变非济王本志前有避匿之迹后闻讨捕之谋情状本末灼然可考愿讨论雍颐追封秦王舍罪恤孤故事济王未有子息亦惟陛下兴灭绝绝帝曰朝廷待济王亦至矣德秀曰若谓此事处置尽善臣未敢以为然观舜所以处象则陛下不及舜明甚人主但当以二帝三皇为师帝曰一时仓猝耳德秀曰此已往之咎惟愿陛下知有此失而益讲学进德次言干道淳熙闲有位于朝者以馈及门为耻受任于外者以苞苴入都为羞今馈赂公然熏染成风恬不知怪又疏言朝廷之上敏锐之士多于老成虽尝以耆艾褒傅伯成杨简以儒学褒柴中行以恬退用赵蕃刘宰至忠亮敢言如陈宓徐侨皆未蒙录用帝问廉吏德秀以知袁州赵■
〈竹政〉夫对遂擢■〈竹政〉夫直秘阁为监司德秀入谢因言崔与之帅蜀杨长儒帅闽皆有廉声乞广加咨访帝初御清暑殿德秀因经筵侍奏曰此高孝二祖储神燕闲之地仰瞻楹桷当如二祖实临其上陛下宫合之仪浸备以一心而受众攻未有不浸淫而蠹蚀者惟学可以明此心惟敬可以存此心惟亲君子可以维持此心因极陈二祖中兴之法与先帝视朝之勤德秀屡进鲠言帝皆虚心开纳而弥远益严惮之乃谋所以相撼畏公议未敢发给事中王暨盛章始驳德秀所主济王赠典继而殿中侍御史莫泽劾之遂以焕章阁待制提举玉隆宫谏议大夫朱端常又劾之落职罢祠监察御史梁成大又劾之请加窜殛理宗谕以仲尼不为已甚乃止既归修读书记语门人曰此人君为治之门如有用我者执此以往汀宝起德秀荐陈韡有文武才于常平使者史弥忠言于朝遂起韡讨平之绍定四年改职与祠五年进徽猷阁知泉州迎者塞路深村百岁老人亦扶杖而出诸邑二税尝预借至六七年德秀入境首禁预借诸邑有累月不解一钱者郡计赤立不可为或咎宽恤太骤德秀为民困如此宁身代其苦决讨自卯至申未已或劝啬养精神德秀谓郡弊无力惠民仅有政平讼理事当勉建炎初置南外宗政可于泉公族仅三百人漕司与本州岛给之而朝廷岁助度牒已而不复给增至二千三百余人郡坐是愈不可为德秀请于朝诏给度牒百道弥远死理宗亲政以显谟阁待制知福州戒所部无滥刑横敛无徇私黷货罢市令司曰物同则价同宁有公私之异闽县里正苦督赋革之属县苦贵余便宜发常平赈之海寇纵横次第禽殄之未几闻金灭荆湖帅奉露布图上八陵而江淮又有进取潼关黄河之议德秀以为忧上封事曰移江淮甲兵以守无用之空城运江淮金谷以治不耕之废壤富庶之效未期根本之弊立

见惟陛下审之重之召为户部尚书入见乃以大学衍
义进复陈祈天永命之说谓敬者德之聚仪狄之酒南威之色盘游戈射之娱禽兽狗马
之玩有一于此皆足害敬帝欣然嘉纳改翰林学士知
制诰时政多所论建踰年知贡举已得矢拜参知政事同编修敕令经武要略三乞祠禄
进资政殿学士提举万寿观兼侍读辞以疾卒帝震悼
辍视朝赠银青光禄大夫谥文忠德秀立朝不满十年奏疏数十万言皆切当世要务直
声震朝廷四方人士诵其文想见其风采及宦游所至
惠政深洽不愧其言由是中外交颂时相益以此忌之辄摈不用而声愈彰及归朝适郑
清之挑敌兵民死者数十万中外大耗尤世道升降治
乱之机而德秀则既衰矣杜范方攻清之误国且谓其贪黷更甚千前而德秀乃奏言此
皆前权臣玩愒之罪今日措置之失譬如和扁继庸医
之后一药之误代为庸医受责其议论与范不同如此然自侂胄立伪学之名以锢善类
凡近世大儒之书皆显禁以绝之德秀晚出独慨然以
斯文自任讲习而服行之党禁既开而正学遂明于天下后世多其力也所著有西山甲
乙藁对越甲乙集经筵讲义端平庙议大学衍义翰林
词草四六献忠集江东采荒录清源杂志星沙集志

△ 魏了翁

魏了翁字华父邛州蒲江人年数岁从诸兄入学俨如成人少长英悟绝出日诵千
余言过目不再览乡里称为神童年十五着韩愈论抑
扬顿挫有作者风庆元五年登进士第时方讳言道学了翁策及之授签书剑南西川节
度判官尽心职业嘉泰二年召为国子正明年改武学
博士开禧元年召试学士院韩侂胄用事谋开边以自固徧国中忧骇而不敢言了翁乃
言国家纪纲不立国事不定风俗苟偷边备废弛财用
凋耗人才衰弱而道路籍籍皆谓有北伐之举金地广势强未可卒图求其在我未见可
以胜人之实盍亦急于内修始道外御不然举天下而
试于一掷宗社存亡系焉不可忽也策出众大惊改秘书省正字御史徐枋劾了翁对
策狂妄独侂胄持不可而止明年迁校书郎以亲老乞
补外乃知嘉定府行次江陵蜀大将吴曦以四川叛了翁策其必败又明年曦诛蜀平了
翁奉亲还里侂胄亦以误国诛朝廷收召诸贤了翁预
焉会史弥远入相专国事了翁力辞召命丁生父忧解官筑室白鹤山下以所闻于辅广
李燾者开门授徒士争负笈从之由是蜀人尽知义理
之学差知汉州汉号为繁剧了翁以善俗为治首蠲积逋二十余万除科抑卖酒之弊严
户婚交讦之禁复为文谕以厚伦止讼其民敬奉条教
不敢犯会境内桥壤民有压死者部使者以闻诏降官一秩主管建宁府武夷山冲佑观

寻复原官知眉州眉虽为文物之邦然其俗习法令持
吏短长故号难治了翁乃尊礼耆耆简拔俊秀朔望诣学宫亲为讲说诱掖指授行乡饮
酒礼以示教化增贡士员以振文风复蟆颐堰筑江卿
馆利民之事知无不为之变嘉定四年擢潼川路提点刑狱八年兼提举
常平迁转运判官戢吏奸询民瘼举刺不避权右上疏
乞与周敦颐张载程颢程颐爵谥示学者趣向从之遂宁阙守了翁行郡事即具奏乞修
城郭备不虞廷议靳其费了翁增埤浚隍如待敌至者
后一年溃卒攻掠郡县知其有备不敢逞人始服之十年迁直秘阁知泸州主管潼川路
安抚司公事丁母忧免丧差知潼川府约己裕民绩大
着游似永泳牟子才皆蜀名士造门受业十五年被召入对疏二千余言首论人与天地
一本必与天地相似而后可以无旷天位并及人才风
俗五事明白切畅又论郡邑强干弱枝之弊所宜变通帝嘉纳其言进兵部郎中俄改司
封郎中兼国史院编修官转对论江淮襄蜀当分为四
重镇择人以任虚心以听假以事权资以才用为联络守御之计次论蜀边垦田及实录
阙文等事皆下其章中书累迁秘书监起居舍人入奏
极言事变倚伏人心向背疆场安危邻境动静其几有五谓宜察时几而恭天命尊道揆
而严法守集思广益汲汲图之又论士大夫风俗之弊
谓君臣上下同心一德而后平居有所补益缓急有所倚仗如人自谓谋则天下之患有
不可穷者今则面从而腹诽习谀而踵陋臣实惧焉
愿开抬规模收拾人物庶几临事无乏人之叹其言剴切时相始不乐宁宗崩理宗自宗
室入即位时事忽异了翁三疏求闲不得请迁起居郎
宝庆元年雷发非时帝有朕心不安之语了翁入对即论人主之心义理所安是之谓天
非此心之外别有所谓天地神明也陛下盍即不安而
求之对天地事父母见羣臣亲讲读皆随事反求则大本立而无事不可为矣又论讲学
不明风俗浮浅立朝无犯颜敢谏之忠临难无仗节死
义之勇愿敷求硕儒丕阐正学图为久安长治之计又请申命大臣于除授之际公听并
观然后实章所孚善类皆出属济王黜削以死有司顾
望治葬弗虔了翁每见帝请厚伦纪以弭人言应诏言事者十余人朝士惟了翁与洪咨
夔胡梦昱张忠恕所言最为切至而了翁亦以疾求去
右正言李知孝劾梦昱窜岭南了翁出关钱别遂指了翁首倡异论将击之弥远犹外示
优容俄权尚书工部侍郎了翁力以疾辞乃以集英殿
修撰知常德府谏议大夫朱端常复劾了翁欺世盗名朋邪谤国诏降三官靖州居住初
了翁再入朝弥远欲引以自助了翁正色不挠未尝私
谒故三年之闲循格序迁未尝处以要地了翁至靖湖湘江浙之士不远千里负书从学

乃着九经要义百卷订定精密绍定四年复职主管建
宁府武夷山冲佑观五年改差提举江州太平兴国宫寻知遂宁府辞不拜进宝章阁待
制潼川路安抚使知泸州泸大藩控制边田二千里而
武备不修城郭不治了翁乃奏葺其城增置器械教习牌手申严军律兴学校蠲宿负复
社仓勸义冢建养济院居数月百废具举弥远死理宗
亲政进文华殿待制因其任了翁念国家纲常沦斲法度堕弛遂应诏上章论十弊乞复
旧典以彰新化一曰复三省之典以重六卿二曰复二
府之典以集众议三曰复都室之典以重省府四曰复侍从之典以来忠告五曰复经筵
之典以熙圣学六曰复台谏之典以公黜陟七曰复制
诰之典以谨命令八曰复听言之典以通下情九曰复三衙之典以强主威十曰复制
阉之典以黜私意分别利害粲若白黑帝读之感动其后
旧典皆复其初臣庶封章多乞召还了翁及真德秀帝因民望并召之用了翁权礼部尚
书并直学士院入对首乞明君子小人之辨以为进退
人物之本杜奸邪窥视之端次论故相十失犹存又及修身齐家选宗贤建内小学等他
如和议不可信北军不可保军实财用不可恃凡十余
端复口奏利害昼漏下四十刻而退兼侍读同修国史俄兼吏部尚书复条十事以献皆
人所难言帝悉嘉纳且手诏奖谕又奏乞收还保全弥
远家御笔定赵汝愚配享宁庙趣崔与之参预政事定履亩之命以宽民力诏从臣集议
以掇积弊储阍才以备缓急又因进故事如储人才凝
国论力图自治之策下罪己之诏分别襄黄二帅是非究见黄陂叛卒利害分任诸帅区
处降附前后二十余奏皆当时急务帝将引以共政而
忌者相与合谋排摈之执政遂谓近臣惟了翁知兵体国乃以端明殿学士同签书枢密
院事督视荆湖军马兼江淮督府事朝论大骇以为不
可三学亦上书争之适边惊沓至帝心焦劳了翁嫌于避事遂受命寻兼提举编修武经
要略思数同执政进封临邛郡开国侯又赐便宜诏书
如张浚故事朝辞而赐御书唐人严武诗及鹤山书院四大字仍赐金带鞍马诏宰臣饮
钱于关外乃酌上下流之中开幕府江州申倣将帅调
遣援师褒死事之臣黜退懦之将奏边防十事甫二旬召为签书枢密院事赴阙奏事时
以疾力辞不拜盖在朝诸人始谦假此命以出了翁既
出则复以建督为非故遽召还前后皆非帝意也寻改资政殿学七湖南安抚使知潭州
复力辞诏提举临安府洞霄宫未几改知绍兴府浙东
安抚使嘉熙元年改知福州福建安抚使累章乞骸骨不允以疾卒后十日诏以资政殿
大学士通奉大夫致仕遗表闻帝震悼辍视朝有用才
不尽之叹诏赠太师谥文靖累赠秦国公所著有鹤山集九经要义周易集义易举隅周

礼井田图说古今考经史杂钞师友雅言

△ 李心传

李心传字微之隆州井研人宗正寺簿舜臣之子也庆元元年荐于乡既下第绝意不复应举闭户著书晚因崔与之许奕魏了翁等荐自制置司敦遣至阙下为史馆校勘赐进士出身专修中兴四朝帝纪甫成其三因言者罢添差通判成都府寻迁著作佐郎兼四川制置司参议官诏无入议幕许辟官置局踵修十三朝会要端平三年成书召赴阙为工部侍郎言臣闻大兵之后必有凶年盖其杀戮多赋敛重使斯民怨怒之气上千阴阳之和至于此极也陛下宜与诸大臣扫除乱政与民更始而法繁未尝更张民劳不加振德既无能改于其旧而殆有甚焉故廉平之吏所在鲜见而贪利无耻敢干为恶之人挟敌兴兵求逞其所欲如此而望五福来备百谷用成是缘木而求鱼也臣考致旱之由曰和余增多而民怨曰流散无所归而民怨曰检税不尽实而民怨曰籍费不以罪而民怨凡此皆起于大兵之后而势未有以消之故愈积而愈极也成汤圣主也而桑林之祷犹以六事自责愿陛下亟降罪己之诏修六事以回天心羣臣之中有献聚敛剽窃之论以求进者必重黜之俾不得以上诬圣德则旱虽烈犹烈弭也帝从之未几复以言去奉祠居潮州淳佑元年罢祠三年致仕卒心传有史才通故实所著有高宗系年录学易编诵诗训春秋考礼辨读史考旧闻证误朝野杂记道命录西陲泰定录辨南迁录及诗文集弟道传

李道传

李道传

道传字贯之少庄重稍长读河南程氏书玩索义理至忘寝食虽处暗室整襟危坐肃如也擢庆元二年进士第调利州司户参军徙蓬州教授开禧用兵金人窥散关急道传以诸司檄计事道闻吴曦反遣其客闲道持书遗安抚使杨辅论曦必败曰彼素非雄才犯顺首乱人心离怨因人心而用之可坐而缚也诚决此举不惟内变可定抑使金知我国有人稍息窥覬曦党以曦意胁道传道传以义析之竟弃官归曦平诏以道传抗节不挠进官二等嘉定初召为太学博士兼沂王府小学教授会沂府有母丧遗表官吏例进秩道传曰有襄事之劳者推恩可也吾属何与于是皆辞不受迁秘书郎著作佐郎见帝首言今民力未裕民心未固财用未阜储蓄未丰边备未修将帅未择风俗未能知义人才未能汇进而八者之中复以人才为要至于人才盛衰系学术之明晦今学禁虽除而未尝明示天下以除之之意愿下明诏崇尚正学取朱熹论

语孟子集注中庸大学章句或问四书颁之太学仍请以周惇颐邵雍程颢程颐张载五人从祀孔子庙时执政有不乐道学者以语侵道傅道
传不为动兼权考功郎官迁著作郎时薛拯胡榘等皆以新进用事贿赂成风道传言今名优儒臣实取材吏刻剥残忍诞谩倾危之人进矣遂
求补郡于是出知真州城圯弗治道传甃之筑两石坝以护并江居民益浚二濠又堤陈公塘有警则决之以为阻人心始固除提举江东路常
平茶盐公事初至即按部劾吏之贪纵者十余人胥吏为民害者大黥小逐释滥狱弛负钱夏大旱道传应诏言楮币之换官民如鹬钞法之行
商贾疑怨赋敛增加军将推剥皆切中时病遂条上荒政朝廷多从之与漕臣真德秀振饥道传分池宣徽三州穷冬行风雪中虽深村穷谷必
至赖以全活者甚众摄宣州守行朱熹社仓法上饥新安南康诸郡翕然应命人蒙其利广德守魏岷劾教官林庠委常试而任荒政挟漕臣以
凌郡守且言真德秀轻视朝廷自专掠美乞远之道传上疏力辨岷坐免会胡榘为吏部侍郎荐道传自代引疾乞去不许召令奏事再辞又不
许遂入对上官掖次及朝廷以至侍从台谏阙失尽言无所讳帝不以为忤除兵部郎官未就监察御史李柟觐当路指意乞授以节镇遂出
知果州至九江得疾卒诏特转一官致仕谥文节道传自蜀来东南虽不及登朱子之门而访所尝从学者与讲习尽得遗书读之笃于践履气
节卓然居官以惠利为本振荒遗爱江东人久而思焉三子达可当可猷可猷可为心传后

△ 杨泰之

杨泰之字叔正眉州青神人少立志于学卧不设榻几十岁庆元元年类试调泸州尉再调绵州学教授罗江丞制置司檄置幕府吴猎谕
蜀泰之贻书曰使吴曦为乱而士大夫不从必不敢为既乱而士大夫能抗曦犹有所惮夫乱曦之为也乱所以成士大夫之为也改知严道县
摄通判嘉定白崖砦将王坝引蛮寇利店刑狱使者寘坝于法又冒絺余人当坐死泰之访知夷都实迩利店夷都蛮称乱不需引导固请释之
不听乃去官宣抚使安丙荐之曰蜀中名儒杨虞仲之子当逆臣之变勉有位者毋动言不用拂衣而去使得尺寸之柄必能见危致命召泰之
赴都堂审察以亲老辞差知广安军未上丁父忧服除知富顺监去官以禄廩数千缗子邻里以千缗为义庄知晋州以安居安岳二县受祸尤
惨力白丙尽蠲其赋丙其荐于朝召赴行在固辞知果州踦零钱病民泰之以一年经费储其赢为诸邑对减上尚书省按为定式民歌之曰前
张后杨惠我无疆张谓张义实自发其端而泰之踵行之理宗即位趣入对言宜法天行

健奋发英断总揽威权无牵于私无夺于邪说以救蛊
蔽以新治功陛下以直言求人而以直言罪之使天下以言为戒臣恐言路既梗士气益
消循循默默浸成衰世之风帝奇其对以为工部郎中
其后言事者相继无所避忌自泰之发之迁军器少监大理少卿绍定元年入对谓风雨
为暴雨潦溃溢此阴盛阳微之证又言巴陵追降之命
重于违羣臣轻于绝友爱陛下居天位之至逸则思天伦之大痛秦邸歿于房陵既行对
谥又录用其子今仍曰不当为之后以贻他日忧何示
人不广乎诏直宝谟阁知重庆府为书以别丞相曰宰相职事无大于用人去自私之心
恢容人之度审取舍之理而已至官俗用大变主管千
秋鸿禧观卒所著克斋文集论语解老子辞春秋别国事自公羊谷梁类诗类诗名物编
论孟类东汉三国志南北史唐五代史类历代通鉴本
朝长编类东汉名物编诗事类大易要言杂着凡二百九十七卷

钦定续通志卷五百四十九

●钦定续通志卷五百五十 儒林传十三

儒林传

宋 【十一】

○宋十一

黄干 李燔 张洽 陈淳 李方子 黄灏 叶味道

廖德明

黄干

李燔

张洽

陈淳

李方子

黄灏

叶味道

廖德明

△黄干

黄干字直卿福州闽县人父■〈王禹〉高宗时为监察御史以笃行直道着闻瑀
歿干往见清江刘清之清之奇之曰子乃远器时学非
所以处子也因命受业朱熹干白母即日行时大雪既至而熹他出干因留客邸二月而
熹始归干见熹夜不设榻不解带少倦则微坐一倚或
至达曙熹语人曰直卿志坚思苦与之处甚有益尝诣吕祖谦以所闻于熹者相质正及
张栻亡熹与干书曰吾道益孤矣所望于贤者不轻后

遂以其子妻于宁宗即位熹命干奉丧补将仕郎铨中授迪功郎监台川酒务丁母忧学者从之讲学于墓庐甚众熹编礼书独以丧祭二编属干藁成熹见而喜曰所立规模次第缜密有条理他日当取所编家乡邦国王朝礼悉仿此更定之熹歿干持心丧三年调监嘉兴府石门酒库时韩侂胄方谋用兵吴猎帅湖北将赴镇访以兵事干曰闻议者谓今欲为大举深入之谋果尔必败此何时而可进取哉猎雅敬干名德辟为荆湖北路安抚司激赏酒库兼准备差遣事有未当必输忠款力争江西提举常平赵希恠知抚州高商老辟为临川令岁旱劝糴捕蝗极其力改知新淦县吏民习知临川之政不令而行以荐差通判安丰军淮西师司檄干鞫和州狱狱故以疑未决干委曲审问无所得一夜梦井中有入明日呼囚诘之曰汝杀人投于井我悉知之矣何得欺我因遂惊服果于废井得尸寻知汉阳军值岁饥余客米发常平以赈制置司下令欲移本军之粟而禁其余干报以乞候干罢然后施行及援鄂州例十之一告余于制司荒政具举旁郡饥民辐凑惠抚均一春暖愿归者给之粮不愿者给庐居之民大感悦所至以重庠序先教养其在汉阳即郡治后凤栖山为屋馆四方士立周程游朱四先生祠以病乞祠主管武夷冲佑观寻起知安庆府至则金人已破光山沿边多惊安庆去光山不远民情震恐乃请于朝城安庆以备战守不俟报即日兴工城分十二料先自筑一料计其工费若干然后委官吏寓公士人分料主之役民兵五千人人役九十日而计入户产钱起丁夫通役二万夫人十日而罢役者更番暑月月休六日日午休一时至秋渐杀其半干日以五鼓坐于堂濠砦官入听命以一日成算授之役某乡民兵若干某乡人夫若干分布于某人料分或搬运某处土木应副某料使用某料兵民人夫合当更代合散几日钱米俱受命毕乃理民讼阅士卒会僚佐讲究边防利病次则巡城视役晚入书院讲论经史筑城之作用钱监未铸之铁事毕还之城成会岁大旱干祈辄雨或未出晨邓郡阁望灞山再拜雨即至后二年金人破黄州沙窝诸阙淮东西皆震独安庆安堵如故继而霖潦余月巨浸暴至城屹然无虞舒人德之制置使李珣辟为参议官再辞不受既而朝命与徐侨两易和州且令先赴制府稟议干即日解印趋制府先是干移书珣曰丞相诛韩之后惩意外之变专用左右亲信之人至于军政不修边备废弛皆止曹为之若今大敌在境更不改图大事去矣又曰今莫若用两淮之人食两淮之粟守两淮之地然其策当先明保伍保伍既明则为之立堡砦蓄马制军器以资其用不过累月军政可成且淮民遭丙寅之厄今闻金人迁汴莫不狼顾胁息有弃田庐挈妻子渡

江之意其闲勇悍者且将伺变窃发向日湖海张军之变为害甚于金若不早为之图则两淮日见荒墟卒有警急壤臂而起矣珏皆不能用及是珏往维扬视师与偕行干言敌既退当思所以赏功罚罪者崔维扬能于清平山豫立义砦断金人右臂方仪真能措置捍御不使军民仓皇奔轶此二人者当荐之泗上之败刘倬可斩也某州官吏三人携家奔窜追问治之然后具奏可也其时幕府书馆皆轻儇浮靡之士僚吏士民有献谋画多为毁抹疏驳人心不附所向无功流移满道而诸司长吏张宴无虚日干知不足与共事归自维扬再辞和州之命仍乞祠乃复告珏曰浮光敌退已两月安丰已一月盱眙亦将两旬不知吾所措置者何事所施行者何策边备之弛甚于前恐其祸又不止今春矣向者轻信人言为泗上之役丧师万人良将劲卒精兵利器不战而沦于泗水黄团老幼俘虏杀戮五六千人盱眙东西数百里莽为邱墟安丰浮光之事大率类此窃意千乘言旋必痛自咎责出宿于外大戒于国曰此吾之罪也有能箴吾夫者疾入谏日与僚属及四方贤士讨论条画以为后图今归已五日矣但闻请总领运使至玉麟堂赏牡丹用妓乐又闻总领运使请晏赏亦然又闻宴僚属亦然诸军闻之岂不痛愤且敌国深侵宇内骚动主上食不甘味听朝不怡大臣忧惧不知所出尚书岂得不朝夕忧惧而乃如是之迂缓暇逸耶今浮光之报又至矣金欲以十六县之众四月攻浮光侵五关且以一县五千人为率则当有八万人攻浮光以万人刈吾麦以五万人攻吾关吾之守关不过五六百人岂能当万人之众哉则关之不可守决矣五关失守则蕲黄决不可保蕲黄不保则江南危尚书闻此亦已数日乃不闻有所施行何耶其它言皆激切同慕忌之尤甚共诋排之厥后光黄蕲继失果如其言遂力辞去请祠俄再命知安庆不就入庐山访其友李燔陈宓相与盘旋玉渊三峡闲讲乾坤二卦于白鹿书院居山南北之士皆来集未几召赴行在所奏事除大理丞不拜为御史李楠所劾在位者羣起挤之遂归里弟子日监俄命知潮州辞不行差主管亳州明道宫踰月乞致仕诏许之特授承议郎卒后数人以门人请谥又特赠朝奉郎与一子下州文学谥文肃有经解文集行于世

△李燔

李燔字敬于南康建昌人中间熙元年进上第授岳州教授未上往建阳从朱熹学熹告以曾子弘毅之语且曰玫远固以毅而任重贵乎弘也燔退以弘名其斋而自傲焉至岳州教士以古文六艺不因时好且曰古之人皆通材用财文武兼焉即武学诸生文振而识高者拔之辟

射圃令其习射廩老将之长于艺者以率偷惰改襄阳府教授复往见熹嘉嘉之凡诸生未达者先令访燔俟有所发乃从熹折衷诸生畏服熹谓人曰燔交友有益而进学可畏且直谅朴实处事不苟他日任斯道者必燔也熹歿学禁严燔率同门往会葬视封窆不少怵及诏访遗逸九江守以燔荐召赴都堂审察辞再召再辞郡守请为白庆书院堂长学者云集除大理司直辞寻添差江西运司干办公事江西帅李珣漕使王补之交荐之会洞寇作乱帅漕议平之而各持其说燔曰寇非吾民耶岂必皆恶诚以有司贪刻者激之将校之邀功者逼成之耳反是行之则皆民矣帅漕是其言燔乃请自往驻兵万安会近洞诸巡尉察隅保之尤无良者易置之分兵守险驰辩士谕以祸福寇皆帖服洪州地下异时赣江涨而堤壤久雨辄涝燔白于漕师修之自是田皆沃壤漕司以十四界会子新行价日损乃视民税产物力各藏会子若干官为封识不时点阅人爱重之则价可增慢令者黥籍而民读张持空券益不售燔与国子学录李诚之力争不能止燔又人札争之曰钱荒楮壅子母不足以相权不能行楮者由钱不能权之也楮不行而抑民藏之是弃物也诚能节用先谷粟之实务而不取必于楮币则楮币为实用矣札入漕司即弛禁燔又念社仓之置仅贷有田之家而力田之农不得沾惠遂倡议袁谷创社仓以贷佃人诏改官通判潭州辞不许真德秀为长沙帅一府之事咸谘燔不数月辞归时史弥远当国废皇子竑燔以三纲所关自是不复出矣真德秀及右史魏了翁荐之差权通判隆兴府江西帅魏大有辟充参议官皆辞乃以直秘阁主管庆元至道宫燔自谓居闲无以报国乃荐崔与之魏了翁真德秀陈宓郑寅杨长孺丁黼叶宰龚维藩徐侨刘宰洪咨夔于朝绍定于年帝论及当时高士累召不起者史臣李心传以燔对且曰燔乃朱熹高弟经术行义亚黄干先帝以大理司直召不起比乞致仕陛下诚能强起之以真讲筵其裨圣学岂浅浅哉帝然之终不召也九江蔡念成称燔心事有如秋月燔卒赠直华文阁 【原误作文华阁今据职官志改正】 谥文定补其子举下州文学燔尝曰凡人不必待仕宦有职事方为功业但随力到处有以及物即功业矣又尝曰仕宦至卿相不可失寒素体夫子无入不自得者正以磨挫骄奢不至居移气养移体故燔处贫贱患难若平素不为动被服布素虽贵不易入仕凡四十二年而厯官不过七考居家讲道学者宗之与黄干并称曰黄李孙鑣登进士第

△张洽

张洽字符德临江之清江人父缓第进士洽少颖异从朱熹学自六经传注而下皆

究其指归至于诸史百家山经地志老子浮屠之说无所不读尝取管子所谓思之思之又重思之思之不通鬼神将通之之语以为穷理之要熹嘉其笃志时行社仓法洽请于县贷常平米二百石建仓里中六年而归其本于官乡人利之嘉定元年中第授松滋尉湖右经界不正弊日甚洽请行推排法令以委洽洽令民自实其地土疆界产业之数投于匱乃筹核而次第之吏奸无所匿改袁州司理参军有盗黠甚辞不能折会狱有兄弟争财者洽谕之曰讼于官祇为胥吏之地且冒法以求胜孰与各守分以全手足之爱乎辞气恳切讼者感悟盗闻之自伏民有杀人贿其子焚之居数年事败洽治其狱无状忧之且白郡委官体访俄梦有人拜于庭示以伤痕在胁翌日委官上其事果然郡守以仓廩虚籍仓吏二十余家命洽鞠之洽廉之为都吏所卖都吏者州之巨蠹也尝于于仓不获故以此中之洽度守意锐未可婴姑系之而密令计仓庾所入以白守曰君之籍二十余家者以胥吏也今校数岁之中所入已丰于昔由是观之胥吏妄矣守悟为罢都吏而免所籍之家知永新县一日谒告闻狱中榜笞声盖狱吏受财乘闲讯囚使诬服也洽大怒亟执付狱明日上于郡黥之湖南■〈雋卩〉寇作乱与县接壤民大恐洽单车以往邑佐寓士交谏弗听至则寇未尝至因行安福境上结约土豪得其欢心未几南安舒寇将犯境闻有备乃去以江东提举常平荐通判池州狱有张德修者误蹴人以死狱吏诬以故杀洽讯而疑之请再鞠守不听会提点常平袁甫至时方大旱祷不应洽言于甫曰汉晋以来滥刑而致旱伸冤而得雨载于方册可考也今天大旱焉知非由德修事乎甫为阅款状于狱德修遂从徒罪复白郡请蠲征税宽催科以召和气守为宽税三日果大雨洽数以病请祠至是主管建昌仙都观时袁甫提点江东刑狱白鹿书院废弛招洽为长洽至则选好学之士日与讲说而汰其不率教者凡养士之田干没于豪右者复之学兴即谢病去端平初大臣多荐洽召赴都堂审察洽以疾不赴乃除秘书郎寻迁著作佐郎度正叶味道在经幄帝数问张洽何时可到将以说书侍洽洽固辞遂除直秘阁主管建康崇禧观嘉熙元年以疾乞致仕卒洽自少用力于敬故以主一名斋平居不异常人至义所当为则勇不可夺所交皆名士如吕祖俭黄干辈皆敬慕之卒后一日有旨除直宝章阁所著书有春秋集注春秋集传左氏蒙求续通鉴长编事略历代郡县地理沿革表文集子■〈木路〉怪赐同进士出身

△陈淳

陈淳字安卿漳州龙溪人少习举子业林宗臣见而奇之且曰此非圣贤事业也因

授以近思录淳退而读之遂尽弃其业焉及朱熹来守其乡淳请受教熹曰凡阅义理必穷其原如为人父何故止于慈为人子何故止于孝其它可类推也淳闻而为学益力日求其所未至后十年复往见熹陈其所得时熹已寝疾语之曰如今所学已见本原所阙者下学之功尔自是所闻皆要切语凡三月而熹卒淳追思师训痛自裁抑日积月累义理贯通洞见条绪故其言太极曰太极只是理理本圆故太极之体浑沦圣人一心浑沦太极之全体而酬酢万变无非太极流行之用其言仁曰仁只是天理生生之全体无表里动静隐显精粗之闲惟此心纯是天理之公而绝无一毫人欲之私乃可以当其名若一处有病痛一事有欠缺一念有闲断则私意行而生理息即顽痹不仁矣其语学者曰道理只在日用人事闲但循序用功便自有见所谓下学上达者须下学工夫到乃可从事上达然不可以此而安于小成也须万里明彻于胸中将此心放在天地闲一例看然后可以语孔孟之乐须明三代法度通之于当今而无不宜然后为全儒而可以语王佐事业须运用酬酢如探诸囊中而不匮然后为资之深取之左右逢其原而真为己物矣淳性孝母疾亟号泣于天乞以身代弟妹未有室家者皆婚嫁之葬宗族之丧无归者居乡不沽名徇俗恬然退守若无闻焉然名播天下郡守以下皆礼重之时造其庐而请焉嘉定九年待试中都归遇严陵郡守郑之悌率僚属延讲郡庠淳遂发明吾道之体统师友之渊源用功之节目读书之次序为四章以示学者明年以特奏恩授迪功郎泉州安溪主簿未上而卒其所著有语孟大学中庸口义字义详讲礼诗女学等书

△李方子

李方子字公晦邵武人少博学能文为人端谨纯笃初见朱熹诗曰观公为人自是寡过但宽大中要规矩和缓中要果决遂以果名斋长游太学学官李道传折官位辈行具刺就谒嘉定七年廷对擢第三调泉州观察推官适真德秀来为守以师友礼之郡政大小咸资焉暇则辩论经训至夜分不倦故事秩满必先通书庙堂乃除方子曰以书通是求也丞相史弥远闻之怒踰年始除国子录无何将选入官僚而方子不少贬以求合或告弥远曰此真德秀党也使台臣劾罢之方子既归学者毕集危坐竟日未始倾侧对宾客一语不妄发虽奴隶亦不加诟骂然常严惮之尝语人曰吾于问学虽未能周尽然幸于大本有见处此心常觉泰然不为物欲所渍尔其亡也天子悯之与一子恩泽

△黄灏

黄灏字商伯南康都昌人幼敏悟强记入太学擢进士第教授隆兴府知德化县以兴学校崇政化为本岁谨行振给有方王藺刘颖荐于朝除判登闻鼓院光宗即位迁太常寺簿论今礼教废阙请敕有司取政和冠昏丧葬仪及司马光高闰等书参订行之除太府寺丞出知常州提举本路常平秀州海盐民伐桑柘毁庐屋莩殍盈野或食其子而州县方督促逋欠灏见之蹙然时有旨倚阁夏税遂奏乞并阁秋苗不俟报行之言者罪其专移居筠州已而寝谪命止削两秩而从其鬻鬲之请灏既归里幅巾深衣骑驴匡山闲若素隐者起知信州改广西转运判官移广东提点刑狱告老不赴卒灏性行端饬以孝友称朱熹守南康灏执弟子礼质疑问难熹之歿党禁方厉灏单车往赴徘徊不忍去者久之

△叶味道

叶味道初名贺孙【原作初讳贺孙按史传体裁无称□之例当由误袭志表等旧文今改正】以字行更字知道温州人少刻志好古学师事朱熹试礼部第一时伪学禁行味道对学制策率太程颐无所避知举胡纮见而黜之曰此必伪徒也既下第复从熹于武夷山中学禁开登嘉定十三年进士第调鄂州教授理宗访问熹之徒及所著书部使者以味道行谊闻差主管三省架阁文字迁宗学谕轮对言人主之务学天下之福也必坚志气以守所学谨几微以验所学正纲常以励所学用忠言以充所学又述帝王传心之要与四代作歌作铭之旨其末有曰言宣则力减文胜则意虚从臣荐味道可为讲官乃授太学博士兼崇政殿说书故事说书止于通鉴而不及经味道请先说论语诏从之帝忽问鬼神之理疑伯有之事涉于诞味道曰阴阳二气之散聚虽天地不能易故圣人设为宗祧以别亲疏远迩正所以教民亲爱参赞化育伯有得罪而死其气不散为妖为厉使国人上下为之不宁于是为之立子泄以奉其后则庶乎鬼有所知而神莫不宁矣盖讽皇子竝事也三京用师廷臣边阃交进机会之说味道进议状以为开边浸阔应援倍难料配日繁馈餉日迫民一不堪命庞勋黄巢之祸立见是先摇其本无益于外也经筵奏事无日不申言之而洛师寻以败闻于是人谓味道见微虑远味道所奏陈无一非切于君治身道者迁秘书著作佐郎而卒讣闻帝震悼升一官以任其后故事所未有也所著四书说大学讲义祭法庙享郊社外传经筵口奏故事讲义

△廖德明

廖德明字子晦南剑人少学释氏及得杨时书读之大悟遂受业朱熹登干道中进士第知莆田县民有奉淫祠者罪之沉像于江会有显

者欲取邑地广其居德明不可守会僚属论之德明曰太守天子守土之臣未闻以土地与人者守惭服累官知浚州有声诸司且交荐之德明曰今老矣况以道徇人乎固辞不受选广东提举刑狱弹劾不避权要岁当荐士朝贵多以书托之德明曰此国家公器也悉不启封还之有乡人为主簿德明闻其能荐之会德明行县簿感其佑已置酒延之悉假富人觞豆甚盛德明怒曰一主簿乃若是侈耶必贪也于是追还荐章其公严类此时盗陷桂阳迫韶韶人惧德明燕笑自如遣将驰击而亲持小麾督战大败之乃分戍守远斥堠明审赏罚宣布威信韶晏然如平时徙知广州迁吏部左选郎官奉祠卒德明初为浚州教授为学者讲明圣贤心学之要手植三柏于学浚士爱敬之如甘棠在南粤时立师悟堂刻朱熹家礼及程氏诸书公余延僚属及诸生亲为讲说远近化之尝语人以仕学之要曰德明自始仕以至为郡惟用三代直道而行一句而已有槎溪集行于世

钦定续通志卷五百五十

●钦定续通志卷五百五十一 儒林传十四

儒林传

宋 【十二】

○宋十二

汤汉 何基 王柏 徐梦莘【得之 天麟】 王应德

黄震

汤汉

何基

王柏

徐梦莘【徐天麟 徐得之】

王应麟

黄震

△汤汉

汤汉字伯纪饶州安仁人与其兄千巾中皆知名当时柴中行见而奇之真德秀在潭致为宾客尝造赵汝谈汝谈曰第一流也江东提刑赵汝腾荐于朝诏免解差充象山书院堂长赴礼部别院试正奏名受上饶县主簿以江东转运使赵希暨荐诏循两资差信州教授兼象山书院院长淳佑十二年充史馆校勘改国史实录院校勘会大水上封事曰君心敬肆之分实上天喜怒之由一念之敬上帝临汝祥风庆云所从出也一念之肆上帝震怒妖祲阴疹所从生也火灾应诏上封事曰臣闻任天下之大立心

不可不公守天下之重持心不可不敬陛下于皇天祖宗之德弗深念而报答私恩于羣黎百姓之疾苦弗深恤而富贵私亲公卿在廷其信任不若近习之笃中书造命其除行不若内批之专则陛下之立心未公矣往者陛下上畏天戒下恤人言内则拘制于权臣外则恐惧于强敌敬心既不敢尽弛则私意亦未得尽行比年来天戒人言既已玩熟而贪浊柄国黷货无厌彼将恣行其私则不得不唯阿以容悦于是前日之敬畏尽忘而一念之私始四出而不可御矣是以定策之碑忽从串出贵戚子弟参错中外土木之祸展转流毒讼牒细故胥吏贱人皆得籍羣瑁之势彻清都之邃御笔之出上则废朝令下则侵有司凡此皆始于立心之未公成于持心之不敬所以感动天地而水火之灾捷出于数月之内也陛下得不亟为治乱持危之计而可复以常日玩易之心处之乎授太学专士转对请正纪纲强根本固藩篱词甚切直召试馆职迁秘书省校书郎皇太子冠差充太常博士进冠箴诏令太子拜谢升秘书郎轮对极言边事以为今日扶危救乱无复他策在乎人主清心无欲尽用天下之财力以治兵大臣公心无我尽用天下之人才以强本庶几尚有以亡为存之理耳提举福建常平劾福州守史嵩之泉州守谢堃召为礼部郎官兼太子侍读直华文阁历福建江东运判提举江西常平知宁国隆兴二府入为尚左郎官兼太子侍读玉牒所检讨官入奏愿陛下端本澄源虚己尽下恢大公之道开不讳之门使朝廷之上光明洞达而无邪彘之根以挠其正四海之内欢欣交通而无怨戾之气以奸其和臣之忠爱莫切于此迁太府少卿升兼太子谕德改秘书少监疏论比年董宋巨声焰熏灼其力能去台谏排大臣结连凶渠以致兵戈相寻之祸陛下灼见其故斥而远之臣意其影灭而迹绝矣岂可复使之出入壶奥之中给事宗庙之内上下惶惑大小切齿而陛下方为之辨明大臣方与之和解臣窃重伤此过计也自古小人复出其害必惨逞其愤怒颠倒宇宙陛下之威神有时而不得以自行甚可畏也乞休致擢太常少卿太子以书勉留求补外以秘阁修撰知福建福建安抚使改知隆兴府度宗即位召奏事授太常少卿兼国史院编修官实录院检讨官迁起居郎兼侍读入奏言愿陛下持一敬心以正百度则追养继孝所以报先帝者必益致甚隆先意承志所以事太母者必益致其谨其爱身也必不以物欲挠其和平其正家也必不以私昵堕其法度政事必出于朝廷而预防夫多门人才必由于明扬而深杜夫邪径累迁权工部尚书兼侍读以显文阁直学士提举玉隆宫进华文阁学士以端明殿学士致仕卒特赠正奉大夫谥文清汉介洁有守恬于进取有文集六十卷

△何基

何基字子恭婺州金华人父伯燮为临川县丞黄干适知其县事伯燮见二子而师事焉干告以必有真实心地刻苦工夫而后可基悚惕受命于是随事诱掖得闻渊源微辞奥义必研精覃思以俟其通凡所读无不加标点义显意明有不待论说而自见者朱熹门人杨与立一见推服来学者众尝谓为学立志贵坚规模贵大克践服行死而后已又言以洪范参之大学中庸有不约而符者王柏既执鸞为弟子基谦抑不以师道自尊柏高明绝识序正诸经其质疑问难或一事至十往返其终不变以待其定尝曰治经当谨守情玩不必多起疑论有欲为后学者谨之又谨可也基淳固笃实绝类汉儒虽一本于熹然就其言发明则精义新意愈出不穷文集三十卷与柏问辨者十八卷郡守赵汝腾守婺延聘请讲辞不就复首荐于朝又率名从官列荐通判郑士懿守蔡抗杨栋相继以请皆辞景定五年诏举贤基与建人徐几石被荐添差婺州学教授兼丽泽书院山长力辞咸淳初授史馆校勘兼崇政殿说书屡辞改承务郎主管西岳庙终亦不受也卒国子祭酒杨文仲请于朝谥文定所著有大学发挥中庸发挥大传发挥易启蒙发挥通书发挥近思录发挥

△王柏

王柏字会之婺州金华人大父崇政殿说书师愈从杨时受易论语既又从朱熹张栻吕祖谦游父瀚朝奉郎主管建昌军仙都观兄弟皆及熹祖谦之门柏少慕诸葛亮为人自号长啸年踰三十始知家学之原勇于求道与其友汪开之着论语通旨至居处恭执事敬惕然叹曰长啸非圣门持敬之道更以鲁斋从熹门人游或语以何基尝从黄干得熹之传即往从焉基授以立志居敬之旨且作鲁斋箴勉之质实坚苦有疑必质诸基于论语大学中庸孟子通鉴纲目标注点校尤为精密作敬斋箴图治家严飭当暑闭合挣坐子弟白事非衣冠不见也少孤事其伯兄甚恭孝弟蚤丧抚其孤又割田予之收合宗族周恤扶持之开之歿家贫为之敛且葬焉来学者众其教必先之以大学蔡抗杨栋相继守婺赵景纬守台聘为丽泽上蔡两书院师乡之耆德皆执弟子礼柏之言曰伏羲则河图以画八卦文王推八卦以合河图者先天后天之宗祖也河图是逐位奇偶之交后天是统体奇偶之交惟四生数不动以四成数而下上之上偶下奇莫匪自然又曰洪范者经传之宗祖乎初一日五行以下六十五字为洪范五皇极以下六十四字为皇极经此帝王相传之大训非箕子之言也又曰今诗三百五篇岂尽定于夫子之手所删之诗容或有存于闾巷浮薄之口汉儒取于补亡乃定二南各十有一篇两两相配退

何彼秣矣甘棠归之王风削去野有死麕黜郑卫淫奔
之诗又作春秋发挥又曰大学致知格物章未尝亡还知止章于听讼之上谓中庸古有
二篇诚明可为纲不可为目定中庸诚明各十一章其
独见多此类也卒国子祭酒杨文仲请于朝谥文宪所著有读易记涵古易说大象衍义
涵古图书读书记书疑诗辨说读春秋记论语衍义太
极衍义伊洛精义研几图鲁经章句论语通旨孟子通旨书附传左氏正传续国语闾学
之书文章复古文章续古濂洛文统拟道志朱子指要
诗可言天文考地理考墨林考大尔雅六义字原正始之音帝王厯数江右渊源伊洛精
义杂志周子发遣三昧文章指南朝华集紫阳诗类家
乘文集

△徐梦莘 【徐天麟 徐得之】

徐梦莘字商老临江人幼慧耽嗜经史下至稗官小说寓目成诵绍兴二十四年举
进士厯官南安军教授改知湘阴县会湖南帅括田号
增耕税他邑奉令惟谨梦莘独谓邑无新田租税无从出帅恚其私于民欲从簿书闲摭
摭其过终莫能得由是反器重之寻主管广西转运司
文字时朝廷议易二广盐法遣广西安抚司干官胡廷直与东西漕臣集议梦莘从行谓
广西阻山止当仍官般法则害不及民广东诸郡并江
或可容客贩未宜遽以二广槩行议与廷直不合廷直竟以客贩变法得为转运使梦莘
既知宾州犹以前议为梗法罢去不三年二广商贾毁
业民苦无盐复从官般法矣梦莘恬于荣进每念生于靖康之乱四岁而江西阻江母襁
负亡去得免恩究见颠末乃网罗旧闻会粹同异为三
朝北盟会编三百五十卷自政和七年海上之盟讫绍兴三十一年海陵之弑上下四十
五年凡制敕诰诏国书书疏奏议记序碑志登载靡遗
帝闻而嘉之擢直秘阁梦莘平生多所著有集补会录读书记志集医录集仙录昔以儒
学冠之嗜学博文孜孜不已开禧元年卒梦莘弟得之
从子天麟得之字思叔淳熙十年举进士部使者以廉吏荐以通直郎致仕安贫乐分不
贪不躁着左氏国纪史记年纪笔略鼓吹词郴江志天
麟字仲祥开禧元年进士调抚州教授厯武学博士轮对言人主当持心以敬奉祠仙都
观通判惠潭二州权英德府权发遣广西转运判官所
至兴学明教有惠政着西汉会要东汉会要汉兵本末西汉地理疏山经既谢官作亭萧
滩之上画严子陵像而事之

△王应麟

王应麟字伯厚庆元府人淳佑元年举进士调西安主簿民以年少易视之输赋后
时应麟曰郡守绳以法遂立办诸校欲为乱知县事翁

甫仓皇计不知所出应麟以礼论服之累调扬州教授初应麟登第言今之事举子业者沽名誉得则一切委弃制度典故漫不省非国家所望于通儒于是闭门发愤誓以博学宏辞科自见假馆阁书读之宝佑四年中是科应麟与弟应凤同日生开庆元年亦中是科诏褒论之添差浙西安抚司干办公事帝御集英殿策士召应麟覆考考策即上帝欲易第七卷寘其首应麟读之乃顿首曰是卷古谊若龟镜忠肝如铁石臣敢为得士贺遂以第七卷为首选及唱名乃文天祥也累迁武学博士疏言陛下阅理多愿治久当事势之艰輿图蹙于外患人才之而民力殫宜强为善无自沮怠恢弘士气毕达下情操纲纪而明委任谨左右而防壅蔽求哲人以辅后嗣迁太常寺主簿面对言淮戍方警蜀道孔艰海表上流皆有藩篱唇齿之忧军功未集而吝赏民力既困而重敛非修御计也陛下勿以宴安自逸勿以容悦之言自宽时丁大全欲致应麟不可得且讳言边事于是应麟罢未几大全败起应麟通判台州召为太常博士擢秘书郎俄兼沂靖惠王府教授彗星见应诏极论执政侍从台谏之罪积私财行公田之害又言应天变莫先回人心回人心莫先受直言箝天下之口沮直臣之气如应天何时直言者多连权臣意故应麟及之迁著作佐郎度宗即位摄礼部郎官草百官表旧制请听政四表已上一夕入临宰臣谕旨增撰三表应麟操笔立就丞相总护还辞位表三道使者立以俟应麟从容授之丞相荐服授兼礼部郎官直学士院俄兼崇政殿说书迁著作郎守军器少监经筵值人曰雪帝问有何故事应麟以唐李峤李又等应制诗对因奏春雪过多民生饥寒方寸仁爱宜谨感召迁将作监帝视朝谓应麟曰为学要灼见古人之心应麟对曰严恭寅畏不敢怠荒克勤克俭无自纵逸此古人之心然操舍易忽于眇绵兢业每忘于游衍帝嘉纳之既而转对言人君防未萌之欲存不已之诚擢兼侍立修注官迁秘书少监兼侍讲上疏论市舶不报会贾似道拜平章事叶梦鼎江万里各求去似道亦求去应麟奏考宗朝阙相者亦逾年帝亟取以谕之似道闻应麟言大恶之语包恢曰我去朝士若王伯厚者多矣但此人素着文学名不欲使天下谓我弃士彼盍思少自贬恢以告应麟笑曰连相之患小负君之罪大迁起居舍人兼权中书舍人冬雷应麟言十月之雷惟东汉数见命令不专奸衰并进卑踰尊外陵内之象当清天君谨天命体天德以回天心守成必法祖宗御治必总威福似道闻之斥逐之意始决矣应麟牒合门直前奏对谓用人莫先察君子小人方袖疏待班台臣亟蔬驳之由是二史直前之制遂废以秘阁修撰主管崇禧观久之起知徽州其父撝尝守是郡父老皆曰此清白

太守子也摧豪右省租赋民大悦召为秘书监权中书舍人力辞不许兼国史编修实录检讨侍讲迁起居郎兼权吏部侍郎指陈成败逆顺之说且曰国家所恃者大江襄樊其喉舌议不容缓朝廷方从容如常时事几一失岂能自安朝臣无以边事言者帝不怪似道复谋斥逐适应麟以母忧去及似道溃师江上授中书舍人兼直学士院即引疏陈十事急征讨明政刑厉廉耻通下情求将材练军实备粮饷举实材择牧守防海道且言图大患者必略细故求实效者必去虚文因请集诸路勤王之师有能率先而至者宜厚赏以作勇敢之气并力进战惟能战斯可守进兼同修国史实录院同修撰侍读迁礼部侍郎兼中书舍人日食应诏论答天戒五事陈备御十策皆不及用寻转尚书兼给事中左丞相留梦炎用徐囊为御史擢江西制置使黄万石等应麟缴奏曰囊与梦炎同乡有私人之嫌万石麤戾无学南昌失守误国罪大今欲引以自助善类为所搏噬者必携持而去吴浚贪墨轻躁岂宜用之况梦炎舛令慢谏说言弗敢告今之实降者多其任用之士疏再上不报出阙俟命再奏曰因危急而奸纪纲以偏见而拂公议臣封驳不行与大臣异论势不当留疏入又不报遂东归诏以翰林学士召议者以为夺其要路宠以清秩非所以待贤者应麟亦力辞后二十年卒所著有深宁集玉堂类藁掖垣类藁诗考诗地理考汉艺文志考证通鉴地理考通鉴地理通释通鉴答问困学纪闻蒙训集解践阼篇补注急就篇补注王会篇小学紺珠玉海词学指南词学题苑笔海姓氏急就篇汉制考六经天文编小学讽咏

△黄震

黄震字东发庆元府慈溪人宝佑四年登进士第调吴县尉吴多豪势家告私债则以属尉民多死尉卒手震至不受贵家告府檄摄其县及摄长洲华亭皆有声浙东提举常平王华甫辟主管帐司文字时钱唐孙守常朱熠守平江吴君擢守嘉兴皆倚嬖幸厉民华甫病革强起劾罢三人震赞之也擢史馆检阅与修宁宗理宗两朝国史实录轮对言当时之大弊曰民穷曰兵弱曰财匮曰士大夫无耻罢给度僧人道士牒使其徒老死即收其田可以富军国纾民力时宫中建内道场故首及此帝怒批降三秩即出国门用谏官言得通判广德军初孝宗颁朱熹社仓法于天下而广德则官置此仓民困于纳息至以息为本而息皆横取民穷至自经人以为熹之法不敢议震曰法出于尧舜三代圣人犹有变通安有先儒为法不思掇其弊耶况熹法社仓归于民而官不得与官虽不与而终有纳息之患震为别买田六百亩以其租代社仓息约非

凶年不贷而贷者不取息郡有山庙岁合江淮之民祷祈者数十万其牲皆用牛郡恶少挟兵刃舞牲迎神为常鬪争致犯法其俗又有自婴桎梏自拷掠以徼福者震见问之乃兵卒责自状其罪卒曰本无罪震曰尔罪多不敢对人言特告神以免罪耳杖之示众又其俗有所谓埋藏会者为坎于庭深广皆五尺以所祭牛及器皿数百纳其中覆以牛革封鐻一夕明发视之失所在震以为妖而杀牛淫祀非法言之诸司即禁绝之郡守贾蕃世以权相从子骄纵不法震数与争论是非蕃世积不堪疏震挠政坐解官寻通判绍兴府获海寇僂之抚州饥起震知其州单车疾驰中道约富人耆老集城中毋过某日至则大书闭棗者籍强余者斩揭于市坐驿舍者文书不入州治不邇米价日损亲煮粥食饿者请于朝给爵赏旌劳者而后入视州事转运司下州余米七万石震曰民生蹶矣岂宜重困之以没官田三庄所入应之补刻六经仪礼修复朱熹祠树宴殊里门曰旧学坊置祭社稷器复风雷祀劝民种麦禁竞渡船焚一千三百余艘用其丁铁耒军器五百间升提举常平仓司旧有结关拒逮捕事系郡狱二十八年存者十无三四以事关尚书省无敢决其狱者震谓结关犹他郡之结甲也非作乱比况已经数赦于是皆释之新城与光泽地犬牙相入民夹溪而处岁常忿鬪争渔会知县事蹇雄为政扰民因相结焚掠震乃劾罢雄谕其民散去初常平有慈幼局为贫而弃子者设久而名存实亡震谓收哺于既弃之后不若先其未弃保全之乃损益旧法凡当娩而贫者里胥请于官贍之弃者许人收养官出粟给所收家成活者众震论役法先令县核民产业不使下户受抑于上户大兴水利废陂坏堰及为豪右所占者复之改提点刑狱有贵家害民震按之贵家怨又强发富人粟与民富人亦怨御史中丞陈坚信谗者劾震去遂奉云台祠贾似道罢相以宗正寺簿召将与俞浙并为监察御史有内威畏震直止之而浙亦以直言去移浙东提举常平时皇叔大父福王与芮判绍兴府遂兼王府长史震奏曰朝廷之制尊卑不同而纪纲不可紊外虽藩王监司得言之今为其属岂敢察其非奈何自臣复坏其法固辞长史累进宗正少卿皆不拜尝告人曰非圣人之书不可观无益之诗文不作可也居官恒黎明视事事至立断自奉俭人有急难周之不少吝所著日抄一百卷卒门人私谥曰文洁先生

钦定续通志卷五百五十一

●钦定续通志卷五百五十二 儒林传十五

儒林传

元 【一】

○元一

（臣）等谨案元史旧传统名儒学虽云文以载道异流同源然词章之士究与儒行殊科今析其传正学通经义者为儒林此外则仍入文苑云

赵复 张■〈頔，立代此〉 金履祥 许谦【朱震亨】
陈栎 胡一桂【胡炳文】 黄泽
萧■〈奭斗〉【韩择 侯均】 同恕【第五居仁】 熙

赵复

张■〈頔，立代此〉

金履祥

许谦 【朱震亨】

陈栎

胡一桂 【胡炳文】

黄泽

萧■〈奭斗〉 【韩择 侯均】

同恕 【第五居仁】

熙

△赵复

赵复字仁甫德安人太宗乙未岁命太子库春伐宋德安尝拒战其民数十万皆俘戮无遗时杨惟中行省军前姚枢奉诏即军中求儒道释医卜士凡儒生挂俘籍者辄脱之归复在其中枢与之言奇之以九族俱残不欲生因与枢诀枢恐其自裁留帐中共宿既觉失复所在遽驰马周号积尸闲行及水陆见复被发徒跣欲自沈力劝以徒死无益身存则宗祀可延复乃止先是南北道梗载籍不相通复至燕以所记程朱诸经传注尽录付枢学徒从游者常百余人世祖在潜邸召见问曰我欲取宋卿可导之乎对曰宋父母国也未有引他人以伐父母者世祖悦因不强之仕惟中闻复论议始嗜学乃与枢谋建太极书院立周子祠以二程张杨游朱六君子配食购遗书八千余卷请复讲授其中复以周程而后其书广博学者未能贯通乃原羲农尧舜所以继天立极孔子颜孟所以垂世立教周程张朱氏所以发明绍续者作传道图而以书目条列于后别着伊洛发挥标其宗旨又以朱子门人见诸传记与得诸传闻者共五十三人作师友图以寓私淑意又取伊尹颜渊言行作希贤录由是许衡郝经刘因辈皆得其书尊信之北方知有程朱学自复始复为人乐易而耿介虽居燕不忘故土与人交尤笃分谊元好问文名擅

一时其南归也复赠之言以博溺心未丧本为戒以自修读易求文王孔子之用心为勉
后家江汉上学者称江汉先生

△张■〈顼，立代此〉

张■〈顼，立代此〉字达善其先蜀之导江人蜀亡侨寓江左【按吴澄作墓碣
云父瀛为彭泽主簿蜀有兵难瀛从其外舅寓浙■

〈顼，立代此〉生始四岁瀛携见真德秀目为奇童年十六而孤奉母居海滨所载较
详谨识】金华王柏得朱熹三传之学讲道于台之上

蔡书院■〈顼，立代此〉从而受业焉自六经语孟传注以及周程张氏之微言朱子
所尝论定者靡不潜心玩索究极根柢久而不懈所学

益弘深微密南北士鲜能及之世祖至元中行台中丞吴曼庆闻其名延致江宁学宫中
州士大夫皆遣子弟从游或辟私塾迎之其在真州来

学者甚众远近翕然尊之称曰导江先生大臣荐诸朝特命为孔颜孟三氏教授【碣云
为制边豆更定礼仪请正颜孟配位南向之失升曾

子子思配飨以周程张邵司马朱张吕氏从祀秩满鄞城士大夫具书币迎致以淑其郡
人留四年学徒日富以荐授东平路教授引疾不赴归

仪真】■〈顼，立代此〉气宇端重音吐洪亮讲说特精详子弟从之者洗洗如也其
弟子知名者甚多瓜尔佳之奇杨刚中尤显卒无子有

经说及文集行世【按墓碣有四继归极孝经口义引穀训蒙经史入门阙里通载淮扬
课稿等书】吴澄序其书以为议论正援据博贯穿

纵横俨然新安朱氏之尸祝云

△金履祥

金履祥字吉父婺之兰溪人其先本刘氏后避吴越钱武肃王嫌名更金氏履祥幼
敏睿比长益自策励知向濂洛之学事同郡王柏从登

何基之门自是造诣益邃当宋末绝意进取会襄樊师急宋人坐视不敢救履祥进牵制
捣虚之策请以重兵由海道直趋燕蓟则襄樊之围自

解且备叙海舶所经凡州郡县邑下至巨洋别岛难易远近历历如指宋终莫能用德佑
初起为史馆编校辞弗就屏居金华山中平居独处终

日俨然至与物接则盎然和恻训迪后学淳切无倦而尤笃于分义有故人子坐事母子
分配为隶不相闻问者十年履祥倾貲营赎之其子后

贵履祥终不自言相见劳问辛苦而已何基王柏之丧履祥牵同门士以义制服观者始
知师弟之系于伦常也尝谓司马光作资治通鉴秘书

丞刘恕为外纪以纪前事不本于经而信百家之说是非谬于圣人不足传信乃用邵氏
皇极经世历胡氏皇王大纪例损益折衷一以尚书为

主下及诗礼春秋旁采旧史诸子表年系事断自唐尧以下接于通鉴之前勒为书二十

卷名曰通鉴前编既成授门人许谦曰二帝三王之盛其微言懿行宜后王所当法战国申商之术其苛法乱政亦后王所当戒则是编不可以不着也他所著书曰大学章句疏二卷论语孟子集注考证十七卷书表注四卷谦为校定皆传于学者履祥居仁山下学者称为仁山先生大德中卒后谥文安

△许谦 【朱震亨】

许谦字益之其先京兆人后由平江徙婺之金华父觥宋淳佑进士 【名贤录云觥无子以仲兄宣之子为嗣即谦也】 谦生数岁而孤甫能言世母陶氏口授孝经论语入耳辄不忘稍长肆力于学立程自课既乃受业金履祥之门履祥语之曰士之为学若五味之在和酰酱既加则酸醎顿异子来见我己三日而犹夫人也岂吾之学无以感发子耶谦问之惕然居数年尽得其所传之奥读四书章句集注有丛说二十卷谓学者曰学以圣人为准的然必得圣人之心而后学圣人之事圣贤之心具在四书而四书之义备于朱子顾其辞约意广读者安可以易心求之读诗集传有名物钞八卷正其音释考其名物度数以补先儒之未备乃存其逸义旁采远引而以己意终之读书集传有丛说六卷

【名贤录云春秋有温故管窥】 其观史有治忽几微仿史家年经国纬之法起太皞氏迄宋元佑元年秋九月司马光卒备其世数总其年

岁原其兴亡着其善恶盖以为光卒则宋室不可复兴诚理乱之几也故附于续经而书孔子卒之义以致其意焉又有自省编昼之所为夜必

书之其不可书者则不为也尝句读九经仪礼于其宏纲要领错简衍文悉别以铅黄朱墨意有所明则表而见之其后吴师道购得吕祖谦点

校仪礼视谦所定不同者十三条而已延佑初隐居东阳人华山学者翕然从之寻开门讲学四方人士皆不惮百舍来受业焉其教人也至诚

淳悉内外殫尽及门之士著录者千余人随其材分咸有所得独不以科举之文授人曰此义利所由分也谦笃于孝友有绝人之行其处世不

胶于古不流于俗不出里闾者四十年缙绅先生过者必即其家存问焉或访以典礼政事谦观其会通而为之折衷闻者无不厌服廉访使刘

庭直副使赵宏伟荐于朝郡复以遗逸应诏皆莫能致后至元三年卒世称白云先生赐谥文懿先是何基王柏及金履祥歿其学犹未大显至

谦道益着故学者推原统绪以为朱熹之世适同郡朱震亨字彦修谦之高第弟子也其清修苦节绝类古笃行之士所至人多化之

△陈栎

陈栎字寿翁徽州休宁人三岁祖母吴氏口授孝经论语辄成诵五岁入小学即涉

猎经史七岁通举子业十五乡人皆师之宋亡科举废
栝慨然发愤致力于圣贤之学尝谓有功圣门者莫若朱熹氏熹歿未久而诸家之说往往乱其本真乃着四书发明书传纂疏礼记集义等书
亡虑数十万言凡诸说之有畔于朱氏者刊去之其微辞隐义则引而伸之有未备者复为说以补其阙由是朱熹之说大明于世延佑设科有
司强之试乡闈中选遂不复赴礼部教授于家不出门户者数十年临川吴澄尝称栝有功于朱氏凡江东人士就学于澄者尽遣归栝栝所居
堂曰定宇学者因称定宇先生元统二年卒

△胡一桂 【胡炳文】

胡一桂字庭芳徽州婺源人父方平素精于易董梦程受朱熹之易于黄干饶州德兴沈贵宝受之方平皆从之学着易学启蒙通释一柱
之学出于父得朱氏源委之正宋景定五年年十八领卿荐试礼部不第退而讲学远近师之号双湖先生仁宗皇庆中着周易本义附录纂疏
本义启蒙翼传朱子诗传附录纂疏十七史纂并行于世 【按一统志云入元隐居著书以闾为文公讲学地过其卿访求绪论复从建安熊
禾游与之上讲议者十余年归则哀集诸家之说以疏朱子之言与史传互有详略谨附识】 其同郡胡炳文字仲虎亦以易名家作易本义
通释而于朱熹所注四书用力尤深余干饶鲁之学本出于朱熹而其为说多与熹抵牾炳文深正其非作四书通 【按一统志载一桂所著
尚有人伦事鉴历代编年二书传未载谨识】 往往发其未尽之蕴学者称云峰先生尝以荐署明经书院山长再调兰溪州学正

△黄泽

黄泽字楚望其先资州内江人父仪可累举不第随兄骥子官九江蜀乱不能归因家焉泽生有异质慨然以明经学道为志好苦思屡致
成疾疾止复思久之如有所见作颜渊仰高钻坚论蜀人治经必先古注疏泽于名物度数考核精审而义理一宗程朱作易春秋二经解三礼
祭祀述略大德中江西省城闻其名授江州景星书院山长已移洪州东湖书院秩满即归闭门授徒以养亲不复仕尝谓去圣久远经籍残阙
传注家率多传会近世儒者又各以才识求之故讲论虽多而经旨愈晦必积诚研精有所悟入然后可窥见圣人之本乃揭六经中疑义千有
余条以示学者既乃尽悟失传之旨自言每于幽闲寂寞疾病无聊之际得之及其久也豁然无不贯通于是易春秋传注之失诗书未决之疑
周礼非圣人书之谤凡数十年苦思而未通者皆涣然冰释各就修理谓易主明象因孔子之言以上求文王周公之意而其机尽在十翼作十

翼举要忘象辨象略辩同论春秋主明书法大要在考核三传以求圣志之精而脉络尽在左传作三传义例考笔削本旨又作元年春王正月
辩诸侯娶女立子通考鲁隐公不书即位义殷周诸侯禘祫考周庙太庙单祭合食说作邱甲辩尝言学者必悟经旨废失之由然后圣人本意
可见若易象与春秋书法废朱大略相似苟通其一则可迎机而悟矣又惧学者得于创闻不复致思故所著多引而不发乃作易学滥觞春秋
指要示人以求端用力之方其于礼谓郑氏深而未完王肃明而实浅作礼经复古正言如王肃混郊邱废五天帝并昆仑神州为一赵伯循言
王者禘其始祖之所自出以始祖配之而不及羣庙之主胡宏家学不信周礼以社为祭地之类皆引经以证其非其辩释诸经要旨有六经补
注诋排百家异义则取杜牧不当言而言之义作翼经罪言近代覃思之学推为第一吴澄尝观其书以为平生所见明经士未有能及之者然
泽雅自慎重未尝轻与人言学士李洞奉使过九江愿执弟子礼受一经泽谢曰以君之才何经不可明若余则于艰苦之余乃能有见吾非邵
子不敢以二十年林下期君也洞叹息而去后家贫且老不复能教授岁大禘家人采木实草根以疗饥泽晏然曾不动其意惟以圣人之心不
明而经学失传若己有罪为大戚至正六年卒其书存者仅十二三门人惟新安赵汭为高第得其春秋之为学为多 【理学宗传云新安赵
汭尝见泽问治经之要泽曰在致思问致思之要泽曰当以一事为例而思徐久自有得即少得益完养而慎思无轻发可也】

△萧■〈奭斗〉 【韩择 侯均】

萧■〈奭斗〉字惟斗陕西奉元人自为儿时性至孝初出为府吏上官语不合即引退 【辍耕录元■〈奭斗〉蚤岁吏于府一日呈牒尹前尹偶坠笔目■〈奭斗〉拾之■〈奭斗〉阳为不解而止白所议公事如此者三■〈奭斗〉曰某所言者王事也拾笔非吏所任即辞退】 读书南山者三十年制一革衣由身半以下及卧辄倚榻玩诵不少置于是博极羣书侯均谓元有天下百年惟萧惟斗为识字人学者及其门受业者甚众尝出遇一妇失金钗道旁疑■〈奭斗〉拾之谓曰殊无他人独翁居后耳■〈奭斗〉令随至门取家钗以偿其妇后得所遗钗愧谢还之乡人有暮行遇寇者诡曰我萧先生也寇惊愕释去祖分藩在秦辟■〈奭斗〉与杨恭懿韩择侍秦邸■〈奭斗〉以疾辞授陕西儒学提举不赴后累授集贤直学士国子司业改集贤侍读学士皆不赴大德十一年拜太子右谕德扶病至京入觐东宫书酒诰为献以朝廷时尚酒也寻解去或问其故曰礼东宫东面师傅西面此礼今可行乎俄除集

贤学士国子祭酒疾作固辞归卒赐谥贞敏■〈奭斗〉制行甚高真履实践其教人必自小学始为文辞立意精深言近指远一以洙泗为本濂洛考亭为宗所著有三礼说小学标题驳论九州岛志及勤斋文集行世同邑韩择字从善天资超异信道不惑其教人虽中岁后亦必使自小学始尤邃礼学有质问者口讲指画无倦容士大夫游宦过秦中必往见择莫不虚往而实归焉世祖尝召之赴京疾不果行其卒也门人服缞麻者百余人侯均字伯仁少孤独与继母居卖薪以给奉养积学四十年羣经百氏无不淹贯每读书必熟诵乃已尝言人读书不至千遍终于已无益故其答诸生所问穷索极探如取诸篋笥由是名震关中用荐起太常博士后以上疏忤时相意不待报归均貌魁梧而气刚正人多严惮之及应接之际和易款洽虽方言古语世所未晓者莫不随问而答世咸服其博闻

△同恕【第五居仁】

同恕字宽甫陕西奉元人祖升父继先博学能文廉希宪宣抚陕右辟掌库钥家世业儒同居二百口无问言恕年十三以书经魁乡校至元闲朝廷始分六部选名士为吏属关陕以恕贡礼曹辞不行仁宗践阼即其家拜国子司业使三召不起陕西行台侍御史赵世延请即奉元置鲁斋书院以恕领教事先后学者殆千数延佑设科再主乡试人服其公六年召为左赞善入见东宫献书陈古谊明年移疾归致和元年拜集贤侍读学士以老辞恕之学由程朱上溯孔孟务贯浹事理以利于行教人委曲开导使得趋向之正性整洁平居虽大暑不去冠带母张卒事继母如所生父丧哀毁致目疾时祀斋肃详至尝曰养生有不备事犹可复追远有不诚是诬神也可道罪乎与人交虽外无适莫而中有绳尺时萧■〈奭斗〉居南山下道高当世入城府必主恕家士论称之曰萧同至顺二年卒封京兆郡侯谥文贞所著架庵集二十卷恕弟子第五居仁字士安幼师萧■〈奭斗〉弱冠从恕受学博通经史躬率子弟力农学徒满门尝行田闲遇有窃其桑者居仁辄避之乡里高其行谊率多化服游其门者皆学明行修卒之日门人私谥静安先生

△安熙

安熙字敬仲真定藁城人祖滔父松皆以举行淑其乡熙既承家训及闻保定刘因之学心益向慕因亦深许与熙熙将造其门而因已歿乃从因门人乌叔备问其绪说盖自因得宋儒朱熹之书即尊信力行之因之为人高明坚勇其进莫遏熙前简靓和易务为下学之功其告先圣文有曰追忆旧闻卒究前业洒扫应对谨行信言余力学文穷理尽性循循有序发轫

圣途以存诸心以行诸已以及于物以化于乡其用功

切实可谓善学朱子者生平不屑仕进家居教授垂数十年四方来学者多所成就云

钦定续通志卷五百五十二

●钦定续通志卷五百五十三

儒林传

元【二】

○元二

董朴

韩性【程端礼 端学】

周仁荣【仔肩 孟梦恂】

宇文公谅

巴延

舒苏

董朴

韩性【程端礼 程端学】

周仁荣【周仔肩 孟梦恂】

宇文公谅

巴延

舒苏

△董朴

董朴字太初顺德人自幼强记比冠师事乐舜咨刘道济幡然有求道之志至元十六年以荐起家为陕西知法官未几以亲老归养寻召

为太史院主事辞不赴皇庆初年踰八十以翰林修撰致仕延佑三年卒其为学自六经及孔孟微言与凡先儒所以开端阐幽者莫不研极其

旨故心所自得往往有融贯之妙其事亲孝与人交智愚贵贱一待以诚或有犯之者夷然不与校中山王结曰朴之学诘诣既深充养交至清

而通和而介君子人也家近龙冈学者因称龙冈先生

△韩性【程端礼 程端学】

韩性字明善绍兴人高祖左司郎中膺胄扈从南渡因家于越性天资警敏九岁通小载礼作大义操笔立就及长博综羣籍自经史至诸

子百氏靡不究其根柢而于性理之说尤深为文博达僿伟变化不测自成一家言四方学者受业其门户外之履常满延佑设科学者多以文

法为请性曰今之贡举悉本朱熹私议为贡举之文不知朱氏学可乎四书六经千载不传之学自程朱二氏发明无余蕴矣顾力行何如耳有

德者必有言施之场屋直其末事岂有他法哉凡经其口授指画不为甚高论而义理自胜不期文之工而不能不工以应有司求未有不合绳

尺者士有一善必延誉不已及辨析是非则毅然有不可犯之色宪府尝举为教官辞暮年愈自韬晦然未尝忘情斯世郡守于政事有所咨访

辄从容开导洞中肯綮门人李齐为南台御史力举其行谊而性已卒后谥庄节先生着礼记说四卷诗音释书辨疑各一卷郡志八卷文集十二卷当性时庆元有程端礼端学兄弟者端礼字敬叔年十五能记通六经晓析大义庆元自宋季皆尊尚陆九渊氏之学端礼独从史蒙卿游以传朱氏明体达用之旨所著有读书工程【山堂肆考作读书日程】国子监以颁示郡邑校官为学者式仕为衢州路儒学教授卒端学字时叔登至治辛酉进士第授僊居县丞寻改国子助教动有师法学者以其刚严方正咸严惮之迁太常博士命未下而卒着春秋本义三十卷三傳辨疑二十卷春秋或问十卷

△周仁荣【周仔肩 孟梦恂】

周仁荣字本心台州临海人父敬孙宋太学生与同郡杨珏陈天瑞车若水黄超然朱致中薛松年师事金华王柏受性理之旨尝着易象占尚书补遗春秋类例仁荣承家学治易礼春秋而工为文章用荐者署美化书院山长美化在处州万山中人鲜知学仁荣举行乡饮酒礼士俗为之一变泰定初由国子博士累迁集贤侍制奉使代祀岳渎至会稽以疾卒其所教弟子多人而台哈布哈为进士第一【书史会要云仁荣楷书宗欧阳率更为时所重】仁荣弟仔肩字本道以春秋登延佑五年进士第终惠州路判官与其兄俱以文学名同郡孟梦恂字长文黄岩人与仁荣同师事杨珏陈天瑞梦恂讲解经旨体认精切部使者荐其行义署本郡学录至正中以设策御寇掾乡郡有功授宜兴县判官末受命卒赠谥康靖先生着性理本旨四书辨疑汉唐会要七政疑解及笔海杂录五十卷

△宇文公谅

宇文公谅字子贞其先成都人后徙吴兴幼有操行通经史百氏言弱冠馆富民家夜半闻叩门声问之妇人也公谅厉声叱去翌日即以他事辞归终不言其故至顺四年登进士第授同知婺源州事后改余姚州夏不雨公谅出祷辄应岁以有年民颂之为别驾雨省檄察实松江海涂田公谅以潮汐不常后必貽患请一概免科省臣从之迁国子助教日与诸生辨析诸经六馆之士资其陶甄者往往出为名臣调国史院编修官出金岭南廉访司事以疾请老平居虽暗至必正衣冠端坐尝挟手记一册识其编首曰昼有所为暮则书之其不可书者即不敢为也所著有折桂集观光集璧水集以斋诗藁玉堂漫藁越中行藁门人私谥纯节先生

△巴延

巴延一名师圣字宗道哈尔努特氏世居开州濮阳县生三岁常以指画地或三或

六若为卦者六岁从里师授孝经论语即成诵蚤丧父其兄库春购经传等书资之日夜诵不辍稍长受业建安黄坦坦曰此子颖悟过人非诸生可比因命为巴延氏且名而字之久之坦辞曰余不能为尔师羣经有朱子说具在归而求之可也巴延即以斯文为已任学者来相质难随问辨咸解其惑而去于是从游日众至正四年以隐士征至京授翰林待制预修金史既毕辞归已复起为江西廉访金事数月以病免及还四方来学者至千余人其为学务真知力践不屑事举子询章士出其门不问而知为巴延学者十八年红巾贼蔓延河北巴延言于省臣将结乡民为什伍以自保而贼兵大至巴延渡漳北行邦人从之者数十万家至磁州与贼遇贼知其名生劫之不屈引领受刃与妻子俱遇害既死贼剖其腹见心有数孔曰古称圣人心中有七窍此非贤士乎乃纳心于腹中覆墙揜之诏谥文节平生修辑六经著述甚富皆毁于兵

△舒苏

舒苏字得之其先西域大食国人既内附大父鲁库乃东迁丰州太宗时授真定济南等路课税使因家焉父乌哲始从儒先问学不干仕进舒苏先九岁日记古经传千言比弱冠博极羣籍汪洋茂衍见诸践履皆笃实之学延佑设科有劝其就试者舒苏不应泰定三年以遗逸征至上都见帝于龙虎台时都尔苏柄国西域人多附焉舒苏独不往屡使人招致之以养亲辞归天历三年召为应奉翰林文学赐对奎章阁进所著帝王心法文宗称善预修经世大典以议论不合求去帝命虞集论留之舒苏坚以母老辞遂赐币遣还复命集传旨曰卿且暂归行召卿矣至顺四年除国子博士以内艰不赴后至元二年拜陕西行台御史即上封事十条曰法祖宗揽干纲敦宗室礼勋旧惜名器开言路复科举罢数军一刑章宽禁网时奸臣变乱成宪帝方虚己以听舒苏所言皆一时所不敢言者侍御史赵承庆见之叹曰御史言及此天下福也襄汉流民聚居宋之绍熙府故也至数千户私开盐井自相部署往往劫囚徒杀巡卒舒苏擒其魁而释其党复上言绍熙土饶利厚流户日增若以其人散还本籍恐为边患宜设官府以抚定之诏即其地置绍熙宣抚司三年除金浙西廉访司事浙右诸僧寺私蔽猾民有所谓道人道民行童者类皆渎常伦隐徭役舒苏请勒归本族俾供王赋朝廷是之寻以病免舒苏历官台宪所至以理冤泽物为己任平反大辟之狱先后其众然未尝故出人罪以市恩尝决狱咸宁有妇宋娥者与邻人通邻杀其夫五府官以为非共杀且既经赦宜释之舒苏持不可枢密判官曰平反活人阴德也御史勿执常法舒苏曰是谓故出人罪非平反也且公欲种阴德于生者奈

死者何卒正娥罪至正十一年卒追封恒山郡侯谥文
孝生平邃于易家贫饘粥或不继其考订经传帝自乐也所著有四书阙疑五经思问奇
偶阴阳消息图老庄精诣镇阳风土记续东阳志重订
河防通议西国图经西域异人传金哀宗记正大诸臣列传审听要诀及文集三十卷 【
按元史成书迫遽脱漏极多儒林一门据元史所载
止有十数人余皆佚之兹并附于后 熊禾字去非建阳人宋咸淳间进士授宁武州司
户参军入元隐居不仕教授生徒先是学宫祀典以颜
曾思孟为四配与十哲并祀堂上而伯鱼颜路曾点并从两庑子居父上时人以为非礼
禾建议宜别设一室以齐国公叔梁纥居中南面而以
颜路曾点伯鱼西向侑食又谓礼有祀先贤于东序及祭乡先生于社之文宜诏郡国各
采其先贤之尤著者列之羣祀又谓两庑从祀理宜损
益开元祀典七十二贤下有诸儒二十二人后代因之不改内如荀况以性为恶以礼为
伪杨雄剧秦美新马融为窦宪作奏草诬陷忠良杜预
建短丧之议王弼尚老庄之说皆显背经训行不称文董仲舒学行最醇顾不得在从祀
皆有可议其后庙堂定义郡县学立启圣祠乡贤祠又
更正从祀黜荀扬等五人增入董仲舒皆自禾议发之禾晚年勸鳌峰书院于里中四方
学者从之甚众元以后闽中讲学者以禾为宗所著有
易讲议书说四书小学集疏大学广义标题诸书 胡三省字身之天台人宋宝佑四年
进士入元隐居不仕着资治通鉴音注及释文辨误百
余卷先是通鉴释文有蜀史照及司马康二本康乃光之子其书刊自海陵三省辨其非
并考温公歿时康以毁卒在史照前数十年而书多剽
窃照说又预讳桓字证明其为伪托人咸服其精核云 马端临字贵与乐平人宋丞相
廷鸾子以荫补承事郎宋亡不仕着文献通考二百四
十八卷以补杜佑通典之阙二十余年乃成先是留梦炎为吏部尚书召致廷鸾欲用
之以亲老辞后为慈湖柯山二书院山长教授台州路
旋引年归卒于家仁宗延佑四年遣使寻访有道之士至饶州路录其书上进诏官为镂
板以广其传 李简字蒙斋信都人宪宗时官泰安州
通判着学易记九卷俞琰字玉吾吴郡人着周易集说及易图纂要易外别传 熊良辅
字任重南昌人举延佑闲乡贡着周易本义集成附录
一依朱子所订古本十二卷之旧采自唐迄元诸家之说凡八十四卷 董真卿字季真
鄱阳人父鼎尝私淑黄干着尚书辑录纂注六卷真卿
承家学又从胡一往熊禾学易得其传着周易会通十四卷其书斟酌古本今本之闲每
卦先例象词爻词次大象次彖传次小传于四圣之易
初不相杂而自相统凡象象之有声韵者亦不闲隔其集解先程朱传义并采程朱语录

诸书益其未备曰附录又集诸家之说附以己见曰纂
注采掇订正于义理象数之学交有所发明焉 张理字仲纯清江人曾仕泰宁教谕终
福建儒学副提举着易象图说三卷大易象数钩深图
三卷 王天与字大立吉安人着尚书纂传四十六卷先引汉唐传疏及诸书注而以朱
子真德秀为归文集语录皆荟萃考证经十五年而后
成其书颇以蔡氏集傅为未慊而不攻其非大德三年臧梦解上其书于朝诏授临江路
儒学教授 陈师凯字道勇南康人隐居庐山撰尚书
蔡传旁通六卷 王充耘字耕野江西人元统初进士授同知永新州事弃家养母潜心
尚书着读书管见书义主意书义矜式各书 黄镇成
字符镇郡武人延佑初再试有司不合即筑室城南曰南田耕舍闭户著书有尚书详考
十卷于凡名物度数各系以图汇集诸说而折中之又
有周易通义中庸章句性理发蒙各书天历三年执政者荐为江西路儒学提举禄不及
而卒 朱公迂字克升鄱阳人勤于著述剖析经传从
之学者甚众至正七年以遗逸征至京授翰林直学士因上言不合出为金华郡学正所
著有朱子诗传疏义四书说约四书通旨各书 赵沔
字子常休宁人尝受业于九江黄泽究心春秋殫思二十年作春秋集传及属辞各十五
卷左氏补注十卷师说三卷其集传谓春秋策书之例
十有五笔削之义有八学者必明其义例则凡以虚词说经者其刻深辨急之说皆不攻
自破矣沔晚年屏居东山著述不倦学者称东山先生
李廉安福人元末进士为隆兴路录事日趋公署夜课诸生着春秋诸传会通后为信
丰知县寇至集乡兵守城城陷与其子敬同死之邑人
为集节祠祀焉 敖继公字君善长乐人后寓家湖州筑一小楼坐卧其中冬不炉夏不
扇日事经史第进士对策忤时相遂不仕尝以仪礼高
堂生传既不存王肃诸家注亦绝传独郑康成注庇多醇少因删定贾疏及先儒之说补
其缺间附以己意为仪礼集说十三卷大德中荐为信
州教授未任卒继公弟子倪渊字仲深乌程人得礼易之传平居动必以礼着易说图说
序例各书官湖州教授 陈澔字云柱都昌人父大猷
宋黄州军事邻官著书传会通十一卷澔承家学着礼记集说 邱葵字吉甫同安人宋
亡避居海屿刻志为学着易解义书直解诗口义春秋
通义周礼补亡各书其补亡谓冬官未尝缺杂出于五官之属汉儒以考工记补之为谬
盖本宋临江俞廷椿复古周官篇及永嘉王次点周官
补遗二书而加之参订云葵弟子晋江吕椿字芝寿着春秋精义 倪士毅字仲宏祁门
人与赵沔汪克宽朝夕讲学时称新安三君子士毅着
四书辑释三十六卷 王克宽字德辅新安人举泰定三年乡试着春秋经传附录纂疏

礼经补逸二书】

钦定续通志卷五百五十三

●钦定续通志卷五百五十四 文苑传一

文苑传

（臣）等谨案迂固二史皆有儒林而无文苑文苑传之作自范氏后汉书始唐书及金史曰文艺宋史曰文苑遗史曰文学其致一也元史若赵孟俯虞集揭傒斯苏天爵之伦皆入列传中而类传则儒学之后不复立文苑一门盖仿马斑之例今依郑志续辑唐以后文苑传若干篇间有自他类改归者按次编入亦务求其当焉

唐【一】

○唐一

徐旷 陆元朗 颜师古【相时 游秦】 袁朗【承序 利贞】
贺德仁【庾抱】 欧阳询 朱子奢 张士衡 萧德言 蔡允恭 谢偃【张蕴古】 崔信明【郑世翼】 刘胤之【延佑 藏器 知柔】
张昌龄【昌宗】 崔行功 杜审言【易简甫】
王勃【勳助】 杨炯 卢照邻 骆宾王 元万顷【范履冰 苗神客 周思茂 胡楚宾 正义方 季】
徐旷
陆元朗
颜师古【颜相时 颜游秦】
袁朗【袁承序 袁利贞】
贺德仁【庾抱】
欧阳询
朱子奢
张士衡
萧德言
蔡允恭
谢偃【张蕴古】
崔信明【郑世翼】
刘胤之【刘延佑 刘藏器 刘知柔】
张昌龄【张昌宗】
崔行功
杜审言【杜易简】

王勃 【王勳 王助】

杨炯

卢照邻

骆宾王

元万顷 【范履冰 苗神客 周思茂 胡楚宾 元正 元义方 元季】

△徐旷

徐旷字文远以字行南齐司空孝嗣五世孙父彻梁秘书郎尚元帝女安昌公主江陵陷俘以西客偃师贫不能自给兄文林鬻书于肆文远日阅之博通五经明左氏春秋性方正举动纯重窦威杨玄感李密王世充皆从受学隋开皇中累迁太学博士诏授汉王谅经会谅反除名为民大业初礼部侍郎许善心荐文远及包恺褚徽陆德明鲁达为学官擢国子博士恺等为太学博士世称左氏有文远礼有褚徽诗有鲁达易有陆德明皆一时冠云文远说经徧举先儒异论分别是非乃出新意以折衷听者忘倦越王侗署为国子祭酒时洛阳饥文远自出城樵拾为李密军所执密使文远南向坐备弟子礼拜之文远谢曰将军若欲为伊霍继绝扶倾吾虽老犹愿尽力如为莽卓乘危迫险则仆耄矣无能也密顿首曰幸得位上公思所以竭力先征化及刷国耻然后入见天子谢罪于有司惟先生教之答曰将军名臣子累世尽节前陷玄感党迷未远而复今若终之以忠是天下之人所望于将军者密顿首曰敬闻命俄而世充专制密又问焉对曰彼残忍而意褊促必速于乱将军非破之不可以朝密曰常谓先生儒者不学军旅至筹大计乃明略过人密败复入东都世充给稍异等而文远见辄先拜或问君踞见李密而下王公何邪答曰密君子能受邴生之揖世充小人无容故人义相时而动可也世充僭号以为国子博士子士会奔长安世充怒绝其廩文远困甚几死数矣身出樵为罗士信所获送京师仍为国子博士高祖幸国学观释奠 【按旧书载高祖幸国学事在武德六年】 文远发春秋题论难锋生随方占对莫能屈帝异之封东莞县男卒孙有自有传

△陆元朗

陆元朗字德明以字行苏州吴人善名理言朋学于周弘正陈大建中后主为太子集名儒入讲承光殿德明始冠与下坐国子祭酒徐孝克敷经倚贵纵辨众多下之独德明申答屡夺其说举坐咨赏解褐始兴国左常侍陈亡归乡闾隋炀帝擢秘书学士大业闲广召经明之士四方踵至于是德明与鲁达孔褒会门下省相酬难莫能屈迁国子助教越王侗署为司业入殿中授经王世充僭号封子为汉王以德明为帅即

其庐行束修礼德明耻之服巴豆剂僵偃东壁下世充子入拜床垂德明对之遗痢竟不与语遂移病成皋世充平秦王辟为文学馆学士以经授中山王承干补太学博士高祖释奠召博士徐文远讲孝经浮屠慧乘讲波若经道士刘进喜讲老子德明随方立义徧析其要帝大喜曰三人者诚辩然德明一举辄蔽可谓贤矣迁国子博士封吴县男卒论譔甚多传于世后太宗阅其所著经典释文嘉德明博辩以布帛二百段赐其家子敦信麟德中繇左侍极检校右相累封嘉兴县子以老疾致仕终大司成

△颜师古 【颜相时 颜游秦】

颜师古字籀 【旧唐书作颜籀字师古】 其先琅邪临沂人祖之推自高齐入周终隋黄门郎遂居关中为京兆万年人父思鲁以儒学显武德初为秦王府记室参军师古少博览精故训学善属文仁寿中李纲荐之授赡养尉尚书左仆射杨素见其年弱谓曰赡养剧县于何以治之师古曰割鸡未用牛刀素惊其言大后果以干治闻时薛道衡为襄州总管与之推有旧佳其才每作文章令指摘疵短俄失职归长安资教授为生高祖入阙谒见长春宫授朝散大夫拜炖煌公府文学累迁中书舍人专典机密师古性敏给明练治体方军国务多诏令一出其手册奏之工当时未有及者太宗即位拜中书侍郎封琅邪县男坐公事免帝尝叹五经去圣远传习寢讹诏师古于秘书省考定多所厘正既成悉诏诸儒议于是各执所习共非诘师古师古辄引晋宋旧文随方晓答授据该明人人叹服寻加通直郎散骑常侍帝因颁所定书于天下学者赖之俄拜秘书少监专刊正事古篇奇字世所惑者讨析申熟必畅本源然多引后生与雠校抑素流先贵势虽商贾富室子亦甯选中由是素议薄之斥为郴州刺史未行帝措其才让曰卿之学信可称者而事亲居官朕无闻焉今日之行是谁取之念卿曩经任使朕不忍弃后宜自戒师古谢罪复留为故官师古性简峭傲视辈行罕所推接早见驱策意望甚高及是类被谴罔然丧沮乃阖门谢宾客巾褐裙帔放情萧散为林墟之适多藏古图画器物书帖亦性所笃爱与譔五礼成进爵为子又为太子承干注班固汉书上之贞观十五年帝将有事泰山诏公卿博士杂定其仪师古奏臣譔定封禅仪注书在十一年于时诸儒谓为适中乃以付有司多从其说迁秘书监弘文馆学士十九年从征辽道病卒谥曰戴其所注汉书急就章大显于时永徽三年子扬廷为符玺郎表上师古所譔匡谬正俗八篇初思鲁与妻不相宜师古苦谏父不听情有隔故帝及之师古弟相时字睿亦以学闻为天策府参军事贞观中累迁谏议大夫有争臣风转礼部侍郎羸瘠多病师古歿不胜哀而卒师

古叔游秦武德初累迁廉州刺史封临沂县男时刘黑闼初平人多强暴比游秦至礼让
大行邑里歌之高祖下玺书奖劳终郢州刺史所撰汉
书决疑师古多资取其义

△袁朗 【袁承序 袁利贞】

袁朗其先雍州长安人父枢仕陈为尚书左仆射朗在陈为秘书郎江总尤器之后
主闻其才诏为月赋一篇洒然无留思后主曰谢庄不
得独美于前矣复诏为芝草嘉莲二颂叹赏尤厚累迁太子洗马德教殿学士陈亡入隋
历尚书仪曹郎武德初隐太子与秦王齐王相倾争致
名臣以自助朗为齐王文学封汝南县男再转给事中贞观初卒太宗为废朝一日谓高
士廉曰朗任浅而性谨厚使人悼惜诏给丧费存问其
家朗远祖滂为汉司徒自滂至朗凡十二世其间位司徒司空者四世淑顓察皆死宋难
昂着节齐梁时朗自以中外人物为海内冠虽琅邪王
氏踵为公卿特以累朝佐命有功鄙不为伍 【按唐书此下附朗孙谊传今删】 朗从
父弟承序陈尚书仆射宪之子为齐王元吉府学士府
废补建昌令治尚慈简吏民怀德高宗之为晋王也太宗崇避僚属问梁陈名臣子弟谁
可者岑文本曰昔陈亡百司奔散有袁宪者朝服立后
主旁曰刃不避也王世充篡隋羣僚奉表劝进而宪子给事中承家称疾不肯署今其少
子承序风操清亮无愧先烈帝乃召拜晋王友兼侍读
加弘文馆学士卒朗从祖弟利贞陈中书令敬之孙高宗时为太常博士周王侍读及王
立为太子百官上礼帝欲大会羣臣命妇宴宣政殿设
九部伎及散乐利贞上疏谏以为前殿路门非命妇宴会倡优进御之所请徙命妇别殿
九部伎从左右门入罢散乐不进帝纳之即移于麟德
殿既会帝传诏利贞曰卿弈叶忠鯁能抗疏规朕之失不厚赐无以劝能者乃赐物百段
擢祠部员外郎卒中宗立以旧恩追赠秘书少监

△贺德仁 【庾抱】

贺德仁越州山阴人父朗陈散骑常侍读仁与从兄德基师事周弘正以文辞称人
为语曰学行可师贺德基文质彬彬贺德仁兄弟八人
时比汉荀氏太守鄱阳王伯山改所居甘滂里为高阳云始德仁在陈为吴兴王友入隋
杨素荐其才授豫章王记室王遇之厚徙封齐复为府
属王废官吏抵罪而德仁以忠谨获贯补河东司法参军素与隐太子善高祖起兵太子
封陇西公以德仁为友庾抱为记室俄并迁太子舍人
以年书不更吏职徙洗马与萧德言陈子良皆为东宫学士贞观初迁赵王友卒从子纪
敦亦博学高宗时纪为太子洗马预修五礼敦率更令
兼太子侍读皆为崇贤馆学士庾抱者润州江宁人陈御史中丞众孙隋开皇中为延州

参军入调吏部尚书牛弘给笔札令自序援笔而成甚奇之后为元德太子学士会嫡皇孙生大按抱于坐中献颂太子嗟赏义宁中隐太子引为陇西公府记室文檄皆出其手转太子舍人 【据旧书唐增】 未几卒

△欧阳询

欧阳询字信本潭州临湘人父纆陈广州刺史以谋反诛询当从坐匿而免江总以故人子私养之貌寝悦敏悟绝人总教以书记每读辄尽遂博贯经史仕隋为太常博士高祖微时数与游既即位累擢给事中询初仿王羲之书后险劲过之因自名其体尺牍所传人以为法高丽尝遣使求之帝叹曰彼观其书固谓形貌魁梧耶尝行见索靖所书碑观之去数步复返及疲乃布坐至宿其傍三日乃去其所嗜类此贞观初历太子率更令弘文馆学士封渤海县男卒子通仪凤中累迁中书舍人居母丧诏夺哀每入朝徒跣及门夜直籍藁以寝非公事不语还家辄号恸年饥未克葬居庐四年不释服冬月家人以既絮潜置度下通觉即彻去累迁殿中监封渤海子天授初转司理卿判纳言事辅政月余会凤阁舍人张嘉福请以武承嗣为太子通与岑长倩固执忤诸武意及长倩下狱坐大逆死来俊臣并引通同谋通虽被惨毒无异词俊臣代占诛之神龙初追复官爵通蚤孤母徐教以父书惧其惰尝遗钱使市父遗迹通乃刻意临仿以求售 【按旧书通母每遗通钱给云质汝父书迹之直通慕名其锐日夜精力无倦所载与新书小异】 数年书亚于询父子齐名号大小欧阳体询书不择纸笔皆得如志通晚自矜重以狸毛为笔覆以免毫管皆象犀非是未尝书

△朱子奢

朱子奢苏州吴人从乡人顾彪受左氏春秋善文辞隋大业中为直秘书学士天下乱辞疾还乡里后从杜伏威入朝授国子助教太宗贞观初高丽百济同伐新罗连年兵不解新罗告急帝假子奢员外散骑侍郎持节论旨二国上表谢恩赠遗甚厚初子奢行帝戒曰海邦重学卿为讲大义然勿入其币 【按旧书作卿为大国使必勿藉其束修为之讲说则是并戒其讲说也与新书所戴异】 还当以中书舍人处卿子奢唯唯至其国为发春秋题纳其美女帝责违旨而犹爱其才以散官直国子学累转谏议大夫弘文馆学士始武德时太庙享止四室太宗将祔高祖主于庙诏有司详议子奢建言汉丞相韦玄成奏立五庙刘歆议当七郑立本玄成王肃宗歆于是历代庙议不能一旦天子七庙诸侯五降杀以两礼之正也若天子与子男同则闲无容等非德厚游广德薄游狭之义臣请

依古为七庙若亲尽则以王业所基为太祖虚太祖室
以俟无强迭迁乃处之于是尚书共奏自春秋以来言天子七庙诸侯五大夫三士二为
不可易之法请建亲庙六诏可池阳令崔文康坐事栢
阳尉魏礼臣劾治狱成御史言其枉礼臣诉御史阿党乞下有司噪声不如所言请死鞠
报礼臣不实诏如请子奢曰在律上书不实有定罪今
抵以死死不可复生虽欲自新弗可得且天下惟知上书获罪欲自言者皆惧而不敢
申矣从之子奢为人乐易能剧谈以经义缘饰每侍宴
帝令论难羣臣恩礼甚笃十五年卒于官

△张士衡

张士衡瀛州乐寿人父文庆北齐国子助教士衡九岁居母丧哀慕过礼博士刘轨
思见之奇其操谓文庆曰古不亲教子吾为君成就之
乃授以诗周礼又从熊安生刘焯等受经贯知大义仕隋为余杭令以老还家贞观中幽
州都督燕王灵夔以礼邀聘北面事之太子承干慕风
迎致谒太宗洛阳宫擢朝散大夫崇贤馆学士太子以士衡齐人也问高氏何以亡士衡
曰高阳那瓌之凶险骆提婆之佞韩长鸾之虐皆信用
之忠良外诛骨肉内离剥丧黎元故周师临郊人莫为用以至覆亡复问事佛营福何应
对曰事佛在清静仁恕如贪恹骄虐虽倾财事之无救
于祸且善恶必报若影赴形圣人言之备矣为君仁为臣忠为子孝则福祚永反是则殃
祸至矣时太子以过失闻士衡因是规之然不能用也
太子废给传罢归十九年卒士衡以礼教诸生当时显者永年贾公彦为最 【按永年原
讹作永平据唐书地理志及旧书贾公彦传改正】

公彦自有传

△萧德言

萧德言字文行陈吏部侍郎引子也系出兰陵明左氏春秋甫冠以国子生为岳阳
王宾客陈亡徙关中诡浮屠服亡归江南州县部送京
师隋仁寿中授校书郎太宗贞观时历著作郎弘文馆学士太宗欲知前世得失诏魏征
虞世南褚亮及德言哀次经史百氏帝王所以兴衰者
上之帝爱其书博而要曰使我稽古临事不惑者公等力也赉赐尤渥德言晚节学愈苦
每开经辄被濯束带危坐妻子请曰老人何终日自苦
答曰对先圣之言何敢惮劳诏以经授晋王时许叔牙为侍读同劝讲王为太子德言又
兼侍读而叔牙亦兼弘文馆学士德言请致仕太宗不
许下诏敦勉封武阳县侯进秘书少监久乃得谢高宗立拜银青光禄大夫全给其禄遣
通事舍人即家致问乘輿至肃章门引见礼遇隆重由
是晋府及东宫旧臣子孙并增秩赐永徽五年卒赠太常谥谥曰博曾孙至忠自有传

△蔡允恭

蔡允恭荆州江陵人后梁左民尚书大业子美容工为诗仕随历起居舍人炀帝有所赋必令讽诵遣教宫人允恭耻之数称疾授内史舍人俾入宫固辞由是疏斥帝遇弑经事宇文化及宝建德归国为秦王府参军文学馆学士贞观初除太子洗马卒所著有后梁春秋十卷

△谢偃 【张蕴古】

谢偃卫州卫人本姓直勒氏祖孝政北齐散骑常侍改姓谢偃在隋为散从正员郎贞观初应诏对策高第历高陵主簿太宗幸东都谷洛泛溢坏洛阳宫诏求直言偃上书陈得失帝称善引为弘文馆直学士迁魏王府功曹尝为尘影二赋帝美其文召见欲偃作赋先为序一篇颇言天下又安功德茂盛意授偃使赋偃缘帝指名篇曰述圣帝悦赐帛数十匹初帝即位直中书省张蕴古上大宝箴讽帝以民畏而未怀其辞挺切擢大理丞偃又献惟皇诚德赋其序大略言治忘乱安忘危逸忘劳得忘失四者人主莫不然是以圣人处宫室则思前王所以亡朝万国则思已所以尊巡府库则思今所以得视功臣则思其转佐之始见名将则思其用力之初如此则人无易心天下何患乎不化哉且行之尧舜墓失之桀纣岂异人哉其意盖规帝成功而自处至难云又譔至牒真纪以劝封禅时李百药工诗而偃善赋时人称李诗谢赋府废终湘潭令蕴古洹水人敏书传晓世务文擅当时后坐事诛

△崔信明 【郑世翼】

崔信明青州益都人高祖光伯仕后魏为七兵尚书 【按旧唐书以信明为光伯曾孙与新书异】 信明之生五月五日日方中有异雀鸣庭树太史令史良为占曰五月为火火主离离为文日中文之盛也雀五色而鸣此儿将以文显然崔类微位殆不高邪及长强记美文章隋大业中为尧城令窦建德僭号而信明族弟敬素皆为伪鸿臆卿自谓得意语信明曰夏王英武有举天下心士女襁负而至不可胜数兄不以此时立功立事岂所谓见几不俟终日乎答曰昔申胥海隅钓师能固其节尔欲吾屈身贼中求斗筲邪遂踰城去隐太行山贞观六年有诏即家拜兴势丞 【旧书作兴势世】 迁泰州令卒子冬日武后时为黄门侍郎为酷吏诬死信明蹇亢以门望自负尝矜其文谓过李百药议者不许扬州录事参军郑世翼者亦鹜倨数忼轻忤物遇信明江中谓曰闻公有枫落吴江冷句愿见其余信明欣然出众篇世翼览未终曰所见不逮所闻投诸水引舟去世翼郑州荥阳人周仪同大将军敬德孙贞观时坐怨谤流死嶠州譔交游传行于世

△刘胤之 【刘延佑 刘藏器 刘知柔】

刘胤之徐州彭城人少志学与孙万寿李百药相友善武德中杜淹荐为信都令有惠政永徽初以著作郎弘文馆学士与令狐德棻杨仁卿等撰次国史并实录以劳封阳城县男终楚州刺史 【按刘胤之撰次国史实录有文名故旧书列之文苑传而以延佑藏器诸人附焉新书改作延佑传考延佑事迹与文苑无涉似非本旨今从旧书】 弟子延佑弱冠擢进士补渭南尉有吏能治第一李绩戒之曰子春秋少而有美名宜稍自抑无为出人上延佑钦纳后检校司宾少卿封薛县男徐敬业败诏延佑持节到军时吏议敬业所署五品官殊死六品流延佑谓诬胁可察以情乃论受五品官当流六品以下除名全宥甚众拜箕州刺史转安南都护旧俚户岁半租延佑责全入众始谋乱延佑诛其渠李嗣仙而余党丁建等遂叛合众围安南府城中兵少不支婴垒待援广州大族冯子猷幸立功按兵不出延佑遇害其后桂州司马曹玄静进兵讨建斩之延佑从弟藏器高宗时为侍御史卫尉卿尉迟宝琳胁人为妾藏器劾还之宝琳私请帝止其还凡再劾再止藏器曰法为天下县衡万民所共陛下用舍繇情法何所施今宝琳私请陛下从之臣公劾陛下亦从之今日从明日改下何所遵彼匹夫匹妇犹惮失信况天子乎帝乃诏可然内衔之不悦也稍迁比部员外郎监察御史魏元忠称其贤帝欲擢任为吏部侍郎魏玄洞沮曰彼守道不笃者安用之遂出为宋州司马卒子知柔性简静美风仪居亲丧庐墓侧诏筑阙表之厯国子司业累迁工部尚书开元六年河南大水知柔驰驿察民疾苦及吏善恶所表陈州刺史韦嗣立汝州刺史崔日用兖州刺史韦元珪符离令綦母顼等止二十七人有治状久之迁太子宾客封彭城县侯致仕给全禄终身卒赠太子少保谥曰文弟知几别有传

△张昌龄 【张昌宗】

张昌龄冀州南宫人与兄昌宗皆以文名州欲举秀才昌龄以科废久固让更举进士与王公治齐名皆为考功员外郎王师旦所绌太宗问其故答曰昌龄等华而少实其文浮靡非令器也取之则后生观慕乱陛下风雅帝然之贞观末翠微宫成献颂阙下召见试息兵诏少选成文帝大悦戒之曰昔祢衡藩岳矜己傲物不得令终卿才不减二人宜鉴于前副朕所求乃敕于通事舍人里供奉俄为昆山道记室平龟兹露布为士所称贺兰敏之奏预北门修撰干封元年卒昌宗官至太子舍人修文馆学士撰古文纪年新传数十篇

△崔行功

崔行功恒州井陘人祖谦之仕北齐终巨鹿太守【旧唐书作北齐巨鹿太守伯襄曾孙】徙古鹿泉行功少好学唐俭爱其才妻以女因倩作文表高宗时累转吏部郎中以善敷奏常兼通事舍人内供奉坐事贬游安令又召为司文郎中与兰台侍郎李怀俨并主朝廷大典册初太宗命秘书盛魏征写四部羣书将藏内府置讎正三十员书工百员征徙职又诏虞世南颜师古踵领功不就显庆中罢讎正员听书工写于家送官取直使散官随番刊正至是诏东台侍郎赵仁本舍人张文瓘及行功怀俨相次充使检校置详正学士代散官以劳迁兰台侍郎【按旧唐书云咸亨中官名复旧改为秘书少监】上元元年卒孙铕尚安定公主为太府卿行功兄子玄暉别有传

△杜审言【杜易简】

杜审言字必简襄州襄阳人晋征南将军预达裔擢进士为隰城尉恃才傲世苏味道为天官侍郎审言与选试判出谓人曰味道必死人惊问故答曰彼见吾判且羞死又尝语人曰吾文章当得屈宋作衙官吾笔当得王羲之北面其矜诞类此累迁洛阳丞坐事贬吉州司户参军司马周季重司户郭若讷构其罪系狱将杀之季重等酒酣审言子并年十三袖刃刺季重于坐左右杀并审言免官还东都苏颋伤并孝烈志其墓后武后召审言将用之问曰卿善否审言蹈舞谢后今赋欢喜诗叹重其文授著作佐郎迁膳部员外郎神龙初坐交通张易之流峰州入为国子监主簿修文馆直学士卒大学士李峤等奏请加赠诏赠著作郎初审言病甚宋之问武平一等省候何如答曰甚为造化小儿相苦然吾在久压公等今且死固大慰但恨不见替人耳审言少与李峤崔融苏味道为文章四友世号崔李苏杜融之亡审言为服纓云审言从祖兄易简九岁能属文长专学为岑文本所器擢进士补渭南尉咸亨初历殿中侍御史尝道遇吏部尚书【旧唐书作侍郎】李敬玄不避敬玄恨召为考功员外郎以屈之而侍郎裴行俭与敬玄不平故易简上书言敬玄罪敬玄曰襄阳儿轻薄乃尔因奏易简险躁高宗怒贬开州司马有御史台杂注文集行世审言次子闲【旧唐书云闲终奉天令】闲子甫

杜甫

杜甫

甫字子美少贫不自振客吴越齐赵闲李邕奇其材先往见之举进士不中第困长安天宝十三载玄宗朝献太清宫飨庙及郊甫奏赋三篇帝奇之使待制集贤院令宰相试文章擢河西尉不拜改右卫率府胄曹参军【旧唐书云作京兆府兵曹参军】数上赋颂因高自称道

且言先臣恕预以来承儒守官十一世迨审言以文章显中宗时臣赖绪业自七岁属辞且四十年然衣不盖体常寄食于人窃恐转死沟壑伏惟天子哀怜之若令执先臣故事拔泥涂之久辱则臣之述作虽不足鼓吹六经至沈郁顿挫随时敏给扬雄枚皋可企及也有臣如此陛下其忍弃之会禄山乱天子入蜀甫避走三川肃宗立自鄜州羸服欲奔行在为贼所得至德二年亡走凤翔上谒拜右拾遗甫始与房管为布衣交管时败陈涛斜又以客董廷兰罢宰相甫上疏言罪细不宜免大臣帝怒诏三司杂问宰相张镐曰甫若抵罪绝言者路帝乃解然帝自是不甚省录时所在寇夺甫家寓鄜弥年■〈革喜〉窶孺弱几至饿死因许甫自往省视从还京师出为华州司功参军关辅饥辄弃官去客秦州贞薪采橡栗自给流落剑南结庐成都西郭召补京兆功曹参军不至会严武节度剑南东西川往依焉武再帅剑南表为参谋检校工部员外郎武以世旧待甫甚善亲至其家甫见之或时不巾而性偏躁傲诞尝醉登武床瞪视曰严挺之乃有此儿武亦暴猛外若不为忤中衔之一日欲杀甫及梓州刺史张彝集吏于门武将出冠钩于帘者三左右自其母奔救得止独杀彝【按旧唐云武虽急暴不以为意与新书异】武卒崔旰等乱甫往来梓夔闲大历中出瞿唐下江陵泝沅湘以登衡山因客耒阳游岳祠大水遽至涉旬不得食县令具舟迎之乃得还令尝馈牛炙白酒大醉一名而卒甫旷放不自检好论天下大事少与李白齐名时号李杜尝从白及高适过汴州酒酣登吹台慷慨怀古人莫测也数尝寇乱挺节无所污为歌诗伤时挠弱情不忘君人怜其忠云

△王勃 【王勳 王助】

王勃字子安绛州龙门人六岁善文辞九岁得颜师古注汉书读之作指瑕以摘其失麟德初刘祥道巡行关内勃上书自陈祥道表于朝对策高第年未冠授朝散郎数献颂阙下沛王闻其名召署府修撰论次平台秘略书成王爱重之是时诸王鬪鸡勃戏为文檄英王鸡高宗怒曰是且交构斥出府勃既废客剑南闻虢州多药草求补参军倚才凌藉为僚吏其嫉官奴曹达抵罪匿勃所惧事泄辄杀之事觉当诛会赦除名父福畴繇雍州司功参军坐勃故左迁交址令上元二年勃在省渡海溺水瘁而卒初道出鍾陵九月九日都督大宴滕王阁宿令其婿作序以夸客因出纸笔徧请客莫敢当至勃不辞都督怒起更衣遣吏伺其文辄报一再报语益奇乃矍然曰天才也请遂成之极欢而罢勃属文初不精思先磨墨数升则酣饮引被覆面卧及寤援笔成篇不易一字时人谓勃为腹稿尤善著书初勃祖通隋末居白牛溪教授门人甚众当起

汉魏尽晋作书百二十篇以续古尚书后亡其序有录无书者十篇勃补完缺逸定着二十五篇尝谓人子不可不知医时长安曹元有秘术勃从之游尽得其传尝读易夜梦若有告者曰易有太极子勉思之寤而作易发挥数篇至晋卦会病止勃兄勳弟助皆第进士勳长寿中为凤阁舍人寿春等五王出阁有司具仪忘载册文羣臣已在乃寤其阙宰相失色勳召五吏执笔口占分写其辞粲然人人嗟服寻加弘文馆学士兼知天官侍郎始裴行俭典选见勳与苏味道曰二子皆铨衡才至是语验勳素善刘思礼用为箕州刺史与綦连耀谋反勳与兄涇州刺史勔及助皆坐 【按旧书载勳坐与耀善并弟勔俱伏诛以勔为勳之弟且不及助与新书异】神龙初诏复官助字子功七岁丧母哀号邻里为泣居父忧哀毁骨立服除为监察御史里行初勳勳勃皆着才名故杜易简称三珠树其后助与弟劼又以文显劼早卒福畴少子劝亦有文福畴尝诧韩思彦思彦戏曰武子有马癖君有誉儿癖使助出其文思彦曰生子若是可夸也勃与杨炯卢照邻骆宾王皆以文齐名天下称王杨卢骆四杰炯尝曰吾媿在卢前耻居王后议者谓然

△杨炯

杨炯华阴人举神童授校书郎永隆二年王太子已释奠表豪俊充崇文馆学士中书侍郎薛元超荐炯及郑祖玄郑玄挺崔融等诏可迁詹事司直俄坐从父弟神让与徐敬业乱出为梓州司法参军迁盈川令张说以箴赠行戒其苛至官果以严酷称吏稍忤意擄杀之不为人所多卒于官中宗时赠旧者郎

△卢照邻

卢照邻字升之苑阳人博学善属文初授邓王府典签王受重谓人曰此吾之相如调新都尉以病去官居太白山得方士玄明膏饵之会父丧号呕丹辄出由是疾益甚客东龙门山布衣藜羹裴瑾之韦方质范履冰等时时供医药疾甚足挛一手又废乃去具茨山下买园数十亩疏颍水周舍复豫为墓偃卧其中照邻自以当高宗时尚吏己独儒武后尚法己独黄老后封嵩山屡聘贤士己己废着五悲文以自明疾既久与亲属诀自沉颍水

△骆宾王

骆宾王义乌人七岁能赋诗初为道王府属尝使自言所能宾王不答历武功主簿裴行俭为洮州总管表掌书奏不应调长安主簿武后时数上疏言事除临海丞鞅鞅不得志弃官去徐敬业起兵署宾王为府属为敬业传檄天下斥武后罪后读但嘻笑至一杯之士未干六尺之

孤安在矍然曰谁为之或以宾王对后曰宰相安得失此人敬业败宾王亡命不知所之
【按旧书作敬业败伏诛与新书异】 中宗时诏求
其文得数百篇

△元万顷 【范履冰 苗神客 周思茂 胡楚宾 元正 元义方 元季】

元万顷后魏京兆王子持裔祖白泽武德中仕至梁利十一州都督封新安公万顷起家通事舍人初从李绩征高丽管书记绩命别将郭待封以舟师赴平壤冯师本载粮继之 【按冯师本旧书作别帅冯本】 不及期欲报绩而恐为谍所得万顷为作离合诗遗绩绩不达其意怒曰军机切遽何用诗为欲斩待封万顷言状乃免又使万顷草檄让高丽而讥其不知守鸭绿之险莫离支答曰谨闻命徙兵固守军不得入高宗闻之流万顷岭外会赦还为著作郎武后讽帝召诸儒论譔禁中万顷与周王府户曹参军范履冰苗神客太子舍人周思茂右史胡楚宾与选凡譔列女传臣轨百僚新戒乐书等九千余篇至朝廷疑议表疏皆密使参处以分宰相权故时谓北门学士万顷敏文辞然放达不治细检无儒者风武后时累迁凤阁侍郎坐诛履冰者河内人垂拱中厯鸾台天官二侍郎春官尚书同凤阁鸾台平章事兼修国史后坐举逆人被杀神客东光人终著作郎思茂漳南人与弟思钧早知名累迁麟台少监崇文馆学士垂拱中下狱死胡楚宾秋浦人属文敏甚必酒中然后下笔高宗命作文常以金银栝■〈奭斗〉酒饮之文成辄赐焉家居率沈饮出入待诏性重慎未尝语禁中事人及其醉问之亦熟视不答自殷王文学拜右史兼崇贤直学士而卒

正万顷孙修名节擢明经高第授监门卫兵曹参军舅孙逊与谭物理叹己不逮肃宗初吏部尚书崔瑀典选正以书判第一召诣京师以父询倩老辞疾免河南节度使崔光远表置其府史思明陷河洛鞏父匿山中贼以名购正度事急谓弟曰贼禄不可养亲彼利吾名难免矣然不污身而死吾犹生也贼既得诱以高位瞋目固拒兄弟皆遇害父闻仰药死事平诏录仗节十一姓而正为冠赠秘书少监以其子义方为华州参军义方厯京兆府司录韦夏卿李实继为尹事必咨之厯虢商二州刺史福建观察使中官吐突承璀闽人也义方用其亲属为右职李吉甫再当国阴欲承璀奥助即召义方为京兆尹李绛恶其党出为鄜坊观察使一切辨治然苛刻人多怨之卒赠左散骑常侍弟季方举明经调楚邱尉厯殿中侍御史兵部尚书王绍表为度支员外郎迁金膳二部郎中号能职王叔文用事惮季方不为用以兵部郎中使新罗新罗闻中国丧不时遣供馈乏季方正色责之闭户绝食待死新罗人悔谢结欢乃还卒赠同州刺

史

钦定续通志卷五百五十四

●钦定续通志卷五百五十五 文苑传二

文苑传

唐【二】

○唐二

李适【韦元旦 刘允济 沈佺期 宋之问 阎朝隐】 尹元恺【富嘉谟

吴少微】 刘宪【王适 司马锽 梁载言

】 李邕 吕向 王翰 孙逖【成简】 李白【张旭】

王维 郑虔 萧颖士【存 陆

据 柳并 皇甫冉】 苏源明【梁肃】

李适

尹元恺【富嘉谟 吴少微】

刘宪【王适 司马锽 梁载言】

李邕

吕向

王翰

孙逖

李白【张旭】

王维

郑虔

萧颖士【萧存】

苏源明【梁肃】

△李适

李适字子至京兆万年人举进士再调猗氏尉武后修三教珠英以李峤张昌宗为
使取文学士缀集于是适与王无竞尹元凯富嘉谟宋

之问沈佺期阎朝隐刘允济在选书成迁户部员外郎俄兼修书学士景龙初又擢修文
馆学士睿宗时待诏宣光阁再迁工部侍郎卒赠贝州

刺史尝梦与人论大衍数寤而曰吾寿尽此乎敕其子曰霸陵原西视京师吾乐之可营
墓树十松焉及未病时衣冠往寝石榻上置所撰九经

要句及素琴于前士贵其达子季卿亦能文举明经博学宏辞调鄂尉肃宗时为中书舍
人以累贬通州别驾代宗立选为京兆少尹复授舍人

进吏部侍郎河南江淮宣慰使振拔幽滞号振职大历中终右散骑常侍赠礼部尚书季
卿在朝荐进才髦与人交有始终恢博君子也初中宗

景龙二年始于修文馆置大学士四员学士八员直学士十二员象四时八节十二月于是李峤宗楚客赵彦昭韦嗣立为大学士适刘宪崔湜郑愔卢藏用李又岑羲刘子元为学士薛稷马怀素宋之问武平一杜审言沈佺期阎朝隐为直学士又召徐坚韦元旦徐彦伯刘允济等备员其后被迁者不一凡天子飨会游豫唯宰相及学士得从春幸黎园并渭水祓除则赐细柳圈辟痲夏宴蒲萄园赐朱樱秋登慈恩浮图献菊花酒称寿冬幸新丰厯白鹿观上骊山赐浴汤池给香粉兰泽从行给翔麟马品官黄衣各一帝赋诗孚士皆属和当时人所歆慕然皆狎猥佻佻忘君臣礼法惟以文华取幸若韦元旦刘允济沈佺期宋之问阎朝隐等无他称附篇左云

韦元旦

刘允济

沈佺期

宋之问

阎朝隐

韦元旦

韦元旦京兆万年人祖澄越王府记室撰女诫传于时元旦擢进士第补东阿尉迁左台监察御史与张易之有姻属易之败贬感义尉俄召为主客员外郎迁中书舍人舅陆颂妻韦后弟也故元旦凭以复进云

刘允济

刘允济河南巩人其先出沛国齐彭城郡丞瓛六世孙少孤事母尤孝工文辞与王勃齐名举进士补下邳尉屡迁著作佐郎采鲁哀公后十二世接战国为鲁后春秋献之迁左史兼直弘文馆武后明堂成瘿赋述功德手迢褒美除著作郎为来俊臣飞构当死以母老丐余年系狱会赦免贬大庾尉复为著作佐郎修国史常曰史官善恶必书使骄主贼臣惧此权顾轻哉而班生受金陈寿求米仆乃视如浮云耳迁凤阁舍人坐二张昵狎除青州长史有清白称巡察使路敬潜言状召为修文馆学士既久斥喜甚与家人乐饮数日卒

沈佺期

沈佺期字云卿相州内黄人及进士第由协律郎屡除给事中转考功员外郎受昧劾未究会张易之败遂长流驩州稍迁台州录事参军事入计得召见拜起居郎兼修文馆直学士既侍宴帝诏学士等舞回波佺期为弄辞帝悦厯中书舍人太子少詹事 【旧唐书作太子詹事】

【开元初卒弟全交全宇皆有才章而不逮佺期

宋之问

宋之问字延清一名少连汾州人【旧唐书作虢州宏农人】父令文高宗时为东台详正学士之问伟仪貌雄于辩甫冠武后召与杨炯分直习艺馆屡转尚方监丞左奉宸内供奉武后游洛南龙门诏从臣赋诗左史东方虬诗先成后赐锦袍之问俄顷献后览之嗟赏更夺袍以赐于时张易之等宝贵之问与阎朝隐沈佺期刘允济倾心媚附易之所赋诸篇尽之问朝隐所为至为易之奉溺器及败贬陇州朝隐崖州并参军事之问逃归洛阳匿张仲之家会武三思复用事仲之与王同皎谋杀二思安王室之问得其实令兄子昙与冉祖雍上急变因丐赎罪由是擢鸿臆主簿天下丑其行景龙中迁考功员外郎谄事太平公主故见用及安乐公主权盛复往谐结太平深疾之中宗将用为中书舍人太平发其知贡举时赍饷狼藉下迁汴州长史未行改越州长史颇自力为政睿宗立以谗险盈恶诏流钦州祖雍历中书舍人刑部侍郎倡饮省中为御史劾奏贬蕲州刺史至是亦流岭南并赐死桂州魏建安后迄江左诗律屡变至沈约庾信以音韵相婉附属对精密及之问沈佺期又加靡丽回忌声病约句准篇如锦绣成文学者宗之号为沈宋语曰苏李居前沈宋比肩谓苏武李陵也初之问父令文富文辞且工书有力绝人世称三绝都下有牛善触人莫敢婴令文直往拔取角折其颈杀之既之问以文章起其弟之悌以躄勇闻之悉精草隶世谓皆得父一绝之悌长八尺开元中历剑南节度使太原尹尝坐事流朱鸢会蛮陷驩州授总管击之募壮士八人被重甲大呼薄贼曰獠动即死贼七百人皆伏不能兴遂平

阎朝隐

阎朝隐字友倩赵州栾城人少与兄镜几弟仙舟皆著名连中进士孝弟廉让科补阳武尉中宗为太子朝隐以舍人幸性滑稽属辞奇诡为武后所赏屡迁给事中仗内供奉后有疾令往祷少室山乃沐浴伏身俎盘为牺请代后疾还奏会后亦愈大见褒赐其佞谄如此景龙初自崖州遇赦还屡迁著作郎先天中为秘书少监坐事贬通州别驾卒

△尹元愷【富嘉谟 吴少微】

尹元愷瀛州乐寿人由磁州司仓参军坐事免栖迟不出者三十年与张说卢藏用厚诏起为右补阙历并州司马卒时又有富嘉谟吴少微皆知名嘉谟武功人举进士长安中累转晋阳尉少微新安人亦尉晋阳尤相友善有魏郡谷倚者为太原主簿并负文辞时称北京三杰嘉谟与少微属词皆本经术雅厚雄迈人争慕之号吴富体预修三教珠英韦嗣立荐嘉谟

少微并为左台监察御史 【旧唐书少微为右台监察御史】 已而嘉谟死少微方病闻之为恸亦卒

△刘宪 【王适 司马隍 梁载言】

刘宪字符度宋州宁陵人父思立高宗时为名御史于时河南北大旱诏遣御史中丞崔谧等分道振赡思立建言蚕务未毕而遣使抚巡所至不能无劳钱又振给须立簿最稽出入往返停滞妨废且广若无驿处马须预集以一马劳数家今农事待雨兴作辍日役破岁计本欲安存更烦扰之望且贵州县给贷须秋遣使便诏听罢谧等行迁考功员外郎始议加明经帖进士杂文卒官宪擢进士调河南尉累进左台监察御史天授中奉诏按来俊臣罪宪疾其酷欲痛绳之反为所构贬潞水令俊臣死召为给事中转中书舍人坐善张易之出为渝州刺史除太仆寺少卿修国史兼修文馆学士迁太子詹事时玄宗在东宫雅意坟史宪启曰陛下位副君有绝人之才非以寻摘章句要通大意而已侍读褚无量经明行修耆年宿望宜数召问以察其言太子嘉纳会卒赠兖州都督初武后时敕吏部糊名考判求高才惟宪与王适司马隍梁载言入第二等适幽州人终雍州司功参军隍河南人神龙初以中书侍郎卒事继母孝奉禄不入私舍与弟佺伯父希象皆历殿中侍御史希象刚直不谄终主爵员外郎载言聊城人历凤阁舍人专知制诰终怀州刺史

△李邕

李邕字泰和扬州江都人父善有雅行淹贯古今不能属辞人号书麓显庆中累擢崇贤馆直学士兼沛王侍读为文选注敷析渊洽表上之赐赉颇渥除潞王府记室参军为涇城令坐与贺兰敏之善流姚州遇赦还居汴郑闲讲授诸生四远至传其业号文选学邕少知名始善注文选释事而忘意书成以问邕邕不敢对善诘之邕意欲有所更善曰试为我补益之邕附事见义其后两书并行既冠见特准李峤自言读书未徧愿一见秘书峤曰秘阁万卷岂时日能习邪邕固请乃假直秘书未几辞去峤惊异试问奥篇隐帙了辩如响峤叹曰子且名家峤为内史与监察御史张廷珪荐邕文高气直才任谏诤乃召拜左拾遗御史中丞宋璟劾张昌宗等反状武后不应邕立阶下大言曰璟所陈社稷大计陛下当听后色解即可璟奏中宗立郑普思以方技幸擢秘书监邕谏曰陛下躬政日浅有九重之严未闻道路横议今籍籍皆言普思凭诡惑说妖祥陛下不知猥见驱使孔子曰诗三百一言以蔽之曰思无邪自古尧舜称圣者所行皆在人事敦睦九族平章百姓不闻以鬼神道治天下惟陛下省察不纳五王被杀坐善张柬之出为南和令贬富州司户参军事韦氏平召

拜左台殿中侍御史弹劾任职人颇惮之 谯王重福谋反 邕与洛州司马崔曰知捕支党迁户部员外郎 玄宗在东宫邕及崔隐甫倪若水同被礼遇岑羲等忌之贬邕舍城丞 玄宗即位召为户部郎中 时张廷珪为黄门侍郎姜皎方幸共援邕为御史中丞 姚崇疾邕躁进左迁括州司马起为陈州刺史 帝封泰山还邕见帝汴州诏献辞赋帝悦然矜肆自谓且宰相邕素轻张说与相恶会仇人告邕赃贷枉法下狱富死 许昌男子孔璋上书救之请代邕死言邕刚毅忠烈难不苟免 往者折二张之角挫韦氏之锋虽身受谪屈而奸谋沮解即其有功于国且邕所能者拯孤恤穷救乏调惠家无私聚今闻坐赃下吏死在旦夕臣闻生无益于国者不若杀身以明贤臣与邕生平不款曲臣知有邕邕不知有臣臣不逮邕明矣夫士为知己者死臣不为邕所知而甘于死者非特惜邕贤亦以成陛下矜能之慈疏奏邕得减死贬遵化尉 璋流岭南邕妻温复为邕请戍边自赎表入不省邕后从中人杨思勳讨岭南贼有功徙澧州司马 开元二十三年起为括州刺史喜兴利除害复坐诬枉且得罪天子识其名诏勿劾后 历淄滑二州刺史上计京师中人临问索所为文章且进上以谗媚不得留出为汲郡北海太守 天宝中左骁卫兵曹参军柳绩有罪下狱邕尝遗绩马吉温使引邕尝议及休咎厚相赂遗宰相李林甫素忌邕因傅以罪诏刑部员外郎祁顺之监察御史罗希奭就郡杖杀之 代宗时赠秘书监邕之文长于碑颂时称李北海 卢藏用尝谓邕如干将莫邪难与争锋但虞伤袂■〈垂夬〉耳后卒如言 杜甫知邕负谤死作八哀诗读者伤之邕资豪放不能治细行所在畋游自肆终以败云

△吕向

吕向字子回亡其世贯或曰涇州人 隐陆浑山工草隶能一笔环写百字若萦发然世号连锦书 强志于学每卖药即市开书遂通古今 玄宗开元十年召入翰林兼集贤院校理侍太子及诸王为文章时帝岁遣使采择天下妹好内之后宫号花鸟使向因奏美人赋以讽帝善之擢左拾遗帝数校猎渭川向又献诗规讽进左补阙帝自为文勒石西岳诏向为镌勒使以起居舍人从帝东巡帝引颡利发及蕃部酋长入仗内赐弓矢射禽向力谏帝纳其言久之迁主客郎中专侍皇太子眷赉良异始向之生父岌客远方不还少丧母失墓所在将葬巫者求得之不知父存亡招魂合诸墓后有传父犹在者访索累年不获他日自朝还道见一老人问之果父也下马抱父足号恸行人为流涕帝闻咨叹官岌朝散大夫卒赠东平太守向再迁中书舍人改工部侍郎卒赠华阴太守尝以李善释文选

为繁酿与吕延济刘良张铕李周翰等更为诂解时号

五臣注

△王翰

王翰【旧唐书作王瀚】字子羽并州晋阳人少豪健恃才及进士第喜菔酒张嘉贞为本州岛长史伟其人厚遇之张说镇并州礼益加复举直言极谏调昌乐尉又举超拔羣类方说辅政故召为秘书正字擢通事舍人驾部员外郎说罢相翰出为汝州长史徙仙州别驾日与才士豪侠饮乐游畋伐鼓穷欢坐贬道州司马卒

△孙逖

孙逖博州武水人【旧唐书作潞州涉县人】后魏光禄大夫惠蔚其先也祖希庄为韩王府典签父嘉之第进士终襄邑令逖幼有文属思警敏年十五见雍州长史崔日用令赋土火炉援笔成篇理趣不凡日用骇叹遂与定交举手笔俊拔哲人奇士隐沦屠钓及文藻宏丽等科开元十年又举贤良方正玄宗御洛城门引见命户部郎中苏晋等第其文异等擢左拾遗李暹镇太原表置幕府以起居舍人入为集贤院修撰时海内少事帝赐羣臣十日一燕宰相萧嵩会百官赋天成玄泽维南有山杨之华三月英英有兰和风嘉木等诗八篇继雅颂体使逖为之序改考功员外郎取颜真卿李华萧颖士赵骅等皆海内有名士俄迁中书舍人是时嘉之且八十犹为令逖亦降外官增父秩帝嘉之拜嘉之宋州司马听致仕时苏颋齐澣苏晋贾曾韩休许景先及逖典诏诰为代言最而逖尤精密张九龄视其草欲易一字卒不能也居职八年判刑部侍郎以病风乞解徙太子左庶子遂绵废累年徙少詹事上元中卒赠尚书左仆射谥曰文字宿绛成成最知名

孙成【孙简】

孙成【孙简】

成字思退以荫仕累洛阳长安令兄宿为华州刺史因悸病瘖成请告往视不待报辄行代宗嘉其悌不责也稍迁仓部郎中京兆少尹为信州刺史岁大旱发仓以贱值售民故饥而不亡再替增户五千诏书褒美徙苏州改桂管观察使贞元五年卒成通经术奏议据正尝有替丧吊者至成不易纓而见客疑之请故荅曰纓者古居丧常服去之则废丧也子公器亦至邕管经略使公器子简字枢中元和初登进士第辟镇国荆南幕府累迁左司吏部二郎中繇谏议大夫知制诰进中书舍人初逖掌诰至代宗时宿又居职逮简凡三世会昌初迁尚书左丞建言班位以品秩为等差今官兼台省位置迁误不可为法元和元年御史台白奏常参官兼大

夫中丞者视检校官居本品同类官上其后侍郎兼大夫者皆在左右丞上当时侍郎兼大夫少唯京兆尹兼之京兆尹从三品今位乃在本品同类官从三品卿监上太常宗正卿正三品下左丞乃正四品上户部侍郎正四品下令户部侍郎兼大夫当在本品同类正四品下诸曹侍郎上不宜居正四品丞郎上又右丞正四品下吏部侍郎正四品上今吏部侍郎位右丞之下盖以丞有绳辖之重虽吏部品高犹居其下然则户部侍郎虽兼大夫安得居其上哉今散官自将仕郎至开府特进每品正从有上中下各级各异则正从上下不得谓之同品京兆河南司录及诸府州录事参军事皆操纪律正诸曹与尚书省左右丞纪纲六曹略等假使诸曹掾因功劳加喜省官安得位在司录录事参军上且左丞纠射八坐主省内禁令宗庙祠祭事御史不当得弹奏之良以台官所奏拘牵成例不揣事之轻重使理可循虽无往比自宜行之否者虽曰旧章正可改也武宗诏两省官详议皆从简请历河中兴元宣武节使检校尚书右仆射东都留守而弟范亦举进士为淄青节度使世推显家

△李白【张旭】

李白字太白兴圣皇帝九世孙其先隋末以罪徙西域神龙初遁还客巴西白之生母梦长庚星因以命之十岁通诗书既长隐岷山州举有道不应苏颙为益州长史见白异之曰子天才奇特少益以学可比相如然喜纵横术击剑为任侠轻财重施更客任城【按旧书云白父为任城尉因家焉与新书小异】与孔巢父韩准裴政张叔明陶沔居徂徕山日沈饮号竹溪六逸天宝初南入会稽与吴筠善筠被召故白亦至长安往见贺知章知章见其文叹曰子谪仙人也言于玄宗召见金銮殿论当世事奏颂一篇帝赐食亲为调羹有诏供奉翰林白犹与饮徒醉于市帝坐沉香亭子意有所感欲得白为乐章召入而自己醉左右以水颰面稍解援笔成文婉丽精切无留思帝爱其才数宴见白尝侍帝醉使高力士脱鞵力士素贵耻之摘其诗以激杨贵妃帝欲官白妃辄沮止白自知不为亲近所容益惊放沈饮与知章李适之汝阳王璡崔宗之苏晋张旭焦遂为八仙人恳求还山帝赐金放还曰浮游四方尝乘舟与崔宗之自采石至金陵着宫锦袍坐舟中旁若无人安禄山反转侧宿松匡庐闲永王璘辟为府僚佐璘起兵逃还彭泽璘败当诛初白游并州见郭子仪奇之子仪尝犯法白为救免至是子仪请解官以赎有诏长流夜郎会赦还寻阳坐事下狱时宋若思将吴兵三千赴河南道寻阳释囚辟为参谋未几辞职李阳冰为当涂令白依之代宗立以左拾遗召而自己卒白晚好黄老度牛渚矶至姑孰悦谢家青山欲终焉及卒葬东麓元和末宣

歛观察使范传正祭其冢禁樵采访后裔惟二孙女嫁
为民妻进止仍有风范因泣曰先祖志在青山顷葬东麓非本意传正为改葬立二碑焉
告二女将改妻士族辞以孤穷失身命也不愿更嫁传
正嘉叹复其夫徭役文宗时诏以白歌诗裴旻剑舞张旭草书为三绝旭苏州吴人嗜酒
每大醉呼叫狂走乃下笔或以头濡墨而书既醒自视
以为神不可复得也世呼张颠初仕为常熟尉有老人陈牒求判宿昔又来旭怒其烦责
之老人曰观公笔奇妙欲以藏家尔旭因问所藏尽出
其父书旭视之天下奇笔也自是尽其法旭自言始见公主担夫争道又闻鼓吹而得笔
法意观倡公孙舞剑器得其神后人论书欧虞褚陆皆
有异论至旭无短之者传其法惟崔邈颜真卿云旻尝与幽州都督孙佺北伐为奚所围
旻舞刀立马上矢四集皆迎刀而断奚大惊引去后以
龙华军使守北平北平多虎旻善射一日得虎三十一休山下有老父曰此彪也稍北有
真虎使将军遇之且败旻不信趋之有虎出丛薄中小
而猛据地大吼旻马辟易弓矢皆坠自是不复射

△王维

王维字摩诘河东人九岁知属辞与弟缙齐名资孝友开元初擢进士 【按旧书云
开元九年进士擢第】 调大乐丞坐累为济州司仓
参军张九龄执政擢右拾遗历监察御史母丧毁几不生服除累迁给事中安禄山反玄
宗西狩维为贼得以药下利阳瘡禄山素知其才迎置
洛阳迫为给事中禄山大宴凝碧池悉召黎园诸工合乐诸工皆泣维闻悲甚赋诗悼痛
贼平皆下狱或以诗闻行在时缙位已显请削官赎维
罪肃宗亦自怜之下迁太子中允久之迁中庶子三迁尚书左丞缙为蜀州刺史未还维
自表已有五短缙五长臣在省户缙远方愿归所任官
放田里使缙得还京师议者不之罪久乃召缙为左散骑常侍上元初卒疾甚缙在凤翔
作书与别又遗亲故书数幅停笔而化赠秘书监维工
草隶善画名盛于开元天宝闲画思入神至山水平远云势石色绘工以为天机所到学
者不及也客有以按乐图示者无题识维徐云此霓裳
第三迭最初拍也客未然引工按曲乃信兄弟皆笃志奉佛食不荤衣不文采别墅在辋
川地奇胜与裴迪游其中赋诗相酬为乐丧妻不聚孤
居三十年母亡表辋川第为寺终葬其西宝应中代宗语缙曰朕尝于诸王座闻维乐章
今传媿何遣中人王承华往取缙哀集数十百篇上之

△郑虔

郑虔郑州荥阳人天宝初为协律郎集缀当世事著书八十余篇有窥其藁者上书
告虔私撰国史虔苍黄焚之坐谪十年还京师玄宗爱

其才欲置左右以不事事更为置广文馆以虔为博士虔闻命不知广文曹司何在诉宰相宰相曰上增国学置广文馆以居贤者令后世言广文博士自君始不亦美乎虞乃就职久之雨坏庀舍有司不复修完寓治国子馆自是遂废初虔追紬故书可志者得四十余篇国子司业苏源明名其书为会粹虔善图山水好书常苦无纸于是慈恩寺贮柿叶数屋遂往日取叶肄书岁久殆遍尝自写其诗并画以献帝大署其尾曰郑虔三绝迁著作郎安禄山反劫百官置东都伪授虔水部郎中因称风缓求摄市令潜以密章达灵武贼平与张通王维并囚宣阳里三人者皆善画崔圆使绘斋壁虔等方悸死即极思祈解于圆卒免死贬台州司户参军事后数年卒虔学长于地理山川险易方隅物产兵戍众寡无不详尝为天宝军防录言典事该诸儒服其善时号郑广文在官贫约甚澹如也有郑相如者自沧州来师事虞虔未之礼闲问何所业相如曰闻孔子称继周者百世可知仆亦能知之虔骇然即曰开元尽三十年当改元尽十五年天下乱贼臣僭位公当污伪官愿守节可以免虔又问自谓云何答曰相如有官三年死衢州是年及进士第调信安尉既三年虔询吏部则相如果死故虔念其言终不附贼

△萧颖士 【萧存】

萧颖士字茂挺梁鄱阳王恢七世孙祖晶贤而有谋任雅相伐高丽表为记室越王贞举兵杖策诣之陈三策王不用晶度必败乃亡去客死广陵颖士四岁属文十岁补太学生通百家谱系书籀学开元二十三年举进士对策第一父旻以莒丞抵罪颖士往诉于府佐张惟一惟一曰旻有佳儿吾以旻获谴不憾乃平宥之天宝初颖士补秘书正字于时斐耀卿席豫张均宋遥韦述皆先进器其材与钧礼由是名播天下奉使括遗书赵卫闲淹久不报为有司劾免留客濮阳于是尹征王恒卢异卢士式贾邕赵匡阎士和柳并等皆执弟子礼以次授业号萧夫子召为集贤校理宰相李林甫欲见之颖土方父丧不诣林甫尝至故人舍邀颖士颖士前往哭门内以待林甫不得已前吊乃去 【按旧书云李林甫采其名欲拔用之乃召见时颖士寓居广陵母丧即缞麻诣京师径谒林甫于政事省林甫素不识遽见缞麻大恶之即令斥去与新书异】 怒其不下已调广陵参军事颖士急中不能堪作伐樱桃树赋曰擢无庸之琐质蒙本枝以自庇虽先寝而或荐非和羹之正味以讥林甫云会母丧免流播吴越尝谓仲尼作春秋为百王不易法而司马迁作本纪书表世家列传叙事依违失褒贬礼不足以训乃起汉元年讫隋义宁编年依春秋义类为传百篇在魏书高贵崩曰司马昭弑帝于南阙在梁书陈受禅曰陈

霸先反又自以梁枝孙而宣帝逆取顺守故武帝得血
食三纪昔曲沃篡晋而文公为五伯仲尼弗贬也乃黜陈闰隋以唐土德承梁火德皆自
断诸儒不与论也史官韦述荐颖士自代召诣史馆待
制颖士乘传诣京师而林甫方威福自擅颖士不屈愈见疾俄免官往来鄂杜闲林甫死
更调河南府参军事倭国遣使入朝自陈国人愿得萧
夫子为师者中书舍人张渐等谏不可而止安禄山宠恣颖士阴语柳并曰武人负宠而
骄乱不久矣东京其先陷乎即托疾游太室山已而禄
山反颖士往见河南采访使郭纳言御守计纳不用叹曰肉食者以儿戏御剧贼难矣哉
闻封常清陈兵东京往观之不宿而还因藏家书于箕
颖闲身走山南节度使源有辟掌书记贼别校攻南阳洧惧欲退保江陵颖士说曰官兵
守潼关财用急必待江淮转饷乃足饷道由汉沔则襄
阳乃今天下喉襟一日不守大事去矣且烈郡数十人百万训兵攘寇社稷之功也贼方
专崤陕公何遽轻土地欲取笑天下乎洧乃按甲不出
会禄山死贼解去洧卒往客金陵永王璘召之不见时盛王为淮南节度大使留蜀不遣
副大使李承式玩兵不振颖士与宰相崔圆书以为今
兵食所资在东南但楚越重山复江自古中原扰则盗先起宜时遣使以扞镇江淮俄而
刘展果反贼围雍邱胁泗上军承式遣兵往救大宴宾
客陈女乐颖士曰天子暴露岂臣下尽欢时邪夫投兵不测乃使观听华丽一旦思归谁
致其死哉弗纳崔圆闻之即授扬州功曹参军至官信
宿去后客死汝南逆旅门人共谥曰文元先生颖士乐闻人善以推引后进为己任如李
阳李幼卿皇甫冉陆渭等数十人由奖目皆为名士天
下推知人称萧功曹尝兄事元德秀而友殷寅颜真卿柳芳陆据李华邵轸赵骅时人语
曰殷颜柳陆李萧邵赵以能全其父也华与颖士齐名
世号萧李有奴事颖士十年笞楚严惨或劝其去答曰非不能爱其才耳颖士所许可当
世者陈子昂富嘉谟卢藏用之文辞董南事孔述睿之
博学而已子存字伯诚亮直有父风能文辞与韩会等善浙西观察使李栖筠表为常熟
主簿颜真卿在湖州与存及陆鸿渐等讨摭古今韵字
所原作书数百篇建中初由殿人侍御史四迁北部郎中张滂主财赋辟存留务京师裴
延龄与滂不协存疾其奸去官风痺卒韩愈少为存所
知自袁州还过存庐山故居而诸子前死唯一女在为经贍其家

陆据

柳并

皇甫冉

陆据

陆据河南人字德邻后周上庸公腾六世孙神寓警适善物理年三十始游京师举进士【据旧唐书增】公卿爱其文交誉之天宝十三载终司勋员外郎

柳并

柳并者字伯存大历中辟河东府掌书记迁殿中侍御史丧明终于家初并与刘太真尹征阎士和受业于颖士而并好黄老颖士常曰太真吾入室者也斯文不坠寄是子云征博闻强识士和钩深致远吾弗逮已并不受命而尚黄老子亦何诛并弟谈字中庸颖士爱其才以女妻之

皇甫冉

皇甫冉字茂政十岁能属文张九龄叹异之与弟曾皆善诗天宝中踵登进士授无锡尉王缙为河南元帅表掌书记累迁右补阙卒曾字孝常历监察御史其名与冉相上下当时比张氏景阳孟阳云

△苏源明【梁肃】

苏源明京兆武功人初名预字弱夫工文辞有名天宝闲及进士第更试集贤院累迁国子司业安禄山陷京师源明以病不受伪署肃宗复两京擢考功郎中知制造是时承大盗之余国用匱屈宰相王玙以祈禳进禁中禘祀穷日夜中官用事给养繁靡羣臣莫敢切诤昭应令梁镇上书劝帝罢淫祀其它不暇及也源明数陈政治得失及史思明陷洛阳有诏幸东京将亲征源明因上疏极谏曰淫雨积时道路方梗甚不可一也自春大旱秋苗耗半敛获未毕先之以清道之役申之以供顿之苦甚不可二也每立殿廊见旌旗之下俄夫执殳仆于行闲日见二三市井馁■〈食孚〉求食死于路旁日见四五甚不可三也奸人盗儿连墙接栋磨砺以须陛下之出御史大夫必不能澄清禁止甚不可四也圣皇巡蜀之初都内财货吏民资产糜散于道路之手至有乘马驱驴入宣政紫宸者况陛下初有四海威制不及曩时远矣今兹东行殆贼臣诱掖陛下而已诗曰三星在罍谓危亡在于须臾臣为陛下痛也愿速罢幸不然穷眡乐祸已扼腕于下甚不可五也方今河洛驿骚江湖判涣诗曰中原有菽庶民采之彼思明楚元皆采菽之人也陛下何遽轻万乘而速成之邪甚不可六也大河南北举为寇盗三公以下廩稍匱绝将士粮赐仅支日月而中官尤食不减往年黎园杂伎愈盛陛下未得穆然高枕殆繇此也自非中书指使太常正乐外愿一切放归给长牒勿事须五六年后随事蠲省今聚而仰给甚不可七也李光弼拔河阳王思礼下晋原卫伯玉拂焉耆过析支不日可至御史大夫王玄志压巫闾临

幽都汝州刺史田南金踰阙口遏二室邓景山凌淮泗汽然而西狂贼失势蹙于缙山之下北不敢逾孟津东不敢过罍子计日反接而至矣陛下不坐而受之乃欲亲征徇一朝之怒甚不可八也王者之于天地神只享之以牲币而已记曰不祈方士彼淫巫愚祝妄有关说甚不可九也天子顺动人皆幸之之谓幸人皆病之之谓不幸臣等屡佛视听联伏赤墀之下顿颡流涕而出虽陛下优容贷罪凡百之臣必昌言于朝万口谤于外甚不可十也臣闻子不诤于父不孝也臣不诤于君不忠也不孝不忠为苟荣冒禄圈牢之物不若也臣虽至贱不能委身圈牢之中将使樵夫指而笑之帝嘉其切直遂罢东幸后以秘书少监卒源明雅善杜甫郑虔其最称者元结梁肃肃字敬之一字宽中隋刑部尚书毗五世孙世居陆浑建中初中文辞清丽科擢太子校书郎萧复荐其材授右拾遗修史以母羸老不赴杜佑辟淮南掌书记召为监察御史转右补阙翰林学士皇太子诸王侍读卒赠礼部郎中

钦定续通志卷五百五十五

●钦定续通志卷五百五十六 文苑传三

文苑传

唐 【三】

○唐三

李华【翰 观】 孟浩然王【昌龄 崔颢】 刘太真 邵说

子邵 唐次【扶 持 彦谦】

崔元翰 于公异 李益 卢纶吉【中孚 韩翃 钱起 司空曙 苗

发 崔峒 耿漳 夏侯审 李端】 欧阳詹【

柅】 李贺 吴武陵 高重 李商隐 温庭筠【庭皓

】 薛逢 李频 吴融

李华 【李翰 李观】

孟浩然 【王昌龄 崔颢】

刘太真

邵说

于邵

唐次 【唐扶 唐持 唐彦谦】

崔元翰

于公异

李益

卢纶 【吉中孚 韩翃 钱起 司空曙 苗发 崔峒 耿漳 夏侯审 李端

】

欧阳詹 【欧阳柅】

李贺

吴武陵

高重

李商隐

温庭筠 【温庭皓】

薛逢

李频

吴融

△李华 【李翰 李观】

李华字遐叔赵州赞皇人少旷达外若坦荡内谨重尚然许每慕汲黯为人累中进士宏辞科天宝十一载迁监察御史宰相杨国忠支姬所在横猾华出使劾按不挠州县肃然为权幸见疾徙右补阙安禄山反上诛守之策皆留不报玄宗入蜀百官解窜华母在邺欲间行辇母以逃为盗所得伪署凤阁舍人贼平贬杭州司户参军华自伤践危乱不能完节又不能安亲欲终养而母亡遂屏居江南上元中以左补阙司封员外郎召之华喟然曰乌有隳节危亲欲荷天下宠乎称疾不拜李岷领选江南表置幕府擢检校吏部员外郎以风痺去官客隐山阳勒子弟力农安于穷槁晚事浮图法不甚著书惟天下士大夫家传墓版及州县碑颂时时赍金帛往请乃强为应大历初卒初华作舍元殿赋成以示萧颖士颖士曰景福之上灵光之下华文辞绵丽少宏杰气颖士健爽自肆时谓华不及颖士而华自疑过之因作吊古战场文极思研推已成污为故书杂置梵书之度它日与颖士读之称工华问今谁可及颖士曰君加精思便能至矣华愕然而服华爱奖士类名随以重若独孤及韩云卿韩会李纾柳识崔佑甫皇甫冉谢良弼朱巨川后至执政显官华触祸衔悔及为元德秀权皋铭四皓赞称道深婉读者怜其志宗子翰从子观皆有名翰擢进士第调卫尉天宝末房管韦陟俱荐为史官宰相不肯拟翰所善张巡死节睢阳人媚其功以为降贼肃宗未及知翰传巡功状表上之肃宗由是感悟而巡大节白于世义士多之翰累迁左补阙翰林学士大历中病免卒翰为文精密而思迟常从阳翟令皇甫曾求音乐思涸则奏之神逸乃属文观字符宾贞元中连中进士宏辞科终太子校书郎观属文不袭沿前人时谓与韩愈相上下及观少夭而愈后文益工议者以观文未极愈老不休故卒擅名陆希声以为观尚辞故辞胜理愈尚质故

理胜辞虽愈穷老终不能加观之辞观后愈死亦不能
逮愈之质云

△孟浩然 【王昌龄 崔颢】

孟浩然字浩然襄州襄阳人少好节义喜振人患难隐鹿门山年四十乃游京师尝
于太学赋诗一座嗟伏张九龄王维雅称道之维私邀
入内署俄而玄宗至浩然匿床下维以实对帝喜曰朕闻其人而未见也何惧而匿诏浩
然出帝问其诗浩然再拜自诵所为玉不才明主弃之
句帝曰卿不求仕而朕未尝弃卿柰何诬我因放还采访使韩朝宗约浩然偕至京师欲
荐诸朝适有故人至剧饮欢甚或曰君与韩公有期浩
然叱曰业已饮遑恤他卒不赴朝宗怒辞行浩然不悔也张九龄为荆州辟置于府府罢
开元末病疽背卒后樊泽为节度使时浩然墓瘠坏泽
为刻碑凤林山南封宠其墓初王维过郢州书浩然像于刺史亭因曰浩然亭咸通中刺
史郑誠谓贤者名不可斥更署曰孟亭开元天宝闲同
知名者王昌龄崔颢皆位不显昌龄字少伯江宁人第进士补秘书郎又中宏辞迁汜水
尉不护细行贬龙标尉以世乱还乡里为刺史闾邱晓
所杀张镐按军河南兵大集晓最后期将戮之辞曰有亲乞贷余命镐曰王昌龄之亲欲
与谁养晓默然昌龄工诗绪密而思清时谓王江宁云
崔颢者亦擢进士第有文无行好蒲博嗜酒娶妻惟择美者俄又弃之凡四五娶终司动
员外郎初李邕闻其名虚舍邀之颢至献诗首章曰十
五嫁王昌邕叱曰小儿无礼不与接而去

△刘太真

刘太真宣州人善属文师兰陵萧颖士举高第进士淮南陈少游表为掌书记尝以
少潦拟桓文为义士所訾兴元初为河东宣慰振给使
累迁刑部侍郎德宗以天下平贞元四年诏羣臣宴曲江自为诗敕宰相择文人賡和李
泌等请羣臣皆和帝自第之以太真李纾等为上鲍防
于邵等次之张蒙等为下与择者四十一人惟泌李晟马燧三宰相无所差次迁礼部掌
贡士多取大臣贵近子弟坐贬信州刺史卒

△邵说

邵说相州安阳人已擢进士第未调陷史思明逮朝义败归郭子仪子仪爱其才留
幕府累迁长安令秘书少监大历末上言禄山思明之
难出入二纪多难渐平向之乱今将变而之治宜建徽号承天意而方谒郊庙大赦各一
诚恐云雨之施未普郁结之气未除愿因此时修享献
款郊庙褒有德录贤人与天下更始振灾益寿之术也不听德宗立擢吏部侍郎在职以
才显或言且执政金吾将军裴傲谓柳载曰说事贼为

剧官掌其兵大小百战掠名家子为奴婢不可计得宥死而无厚颜乃崇第产附贵幸欲以相邦其能久乎建中三年逐严郢说与郢善微讽朱泚讼其冤为草奏贬归州刺史卒

△于邵

于邵字相门京兆万年人天宝末第进士以书判超绝补崇文校书郎繇比部郎中为道州刺史未行徙巴州会岁饥部獠乱薄城下邵励兵拒战且遣使口晓獠丐降邵儒服出贼见皆拜即引去节度使李抱玉以闻迁梓州辞疾不拜授兵部郎中崔宁帅蜀表为度支副使俄以谏议大夫知制诰进礼部侍郎朝有大典册必出其手为三司使治薛邕狱失德宗旨贬桂州长史复为太子宾客与宰相陆贽不协出为杭州刺史久病求告贬衢州别驾徙江州卒邵李悌有行晚涂益修洁樊泽始举贤良邵望见曰将相材也崔元翰举进士年五十矣邵以其文擢异等曰后当司诏令已而皆然独孤授举博学宏辞吏部考当乞邵覆之置甲科人咨其公

△唐次【唐扶 唐持 唐彦谦】

唐次字文编并州晋阳人金紫光禄大夫宪之裔孙建中初及进士第历侍御史竦参数荐之改礼部员外郎参贬出为开州刺史积十年不迁韦皋镇蜀表为副使德宗谕皋罢之次久斥远郡抑不得伸因采古忠臣贤士之罹谗毁者次其事为辨谤略三篇上之帝益怒改夔州刺史宪宗立召还授礼部郎中知制诰于中书舍人宪宗雅恶朋比兵陷者尝览辨谤略善之谓学士沈传师曰凡君人者宜所观省然次编录未尽卿可广其书传师乃与令狐楚杜元颖论次起周讫隋增为十篇更号元和辨谤略子扶持扶字云翔登进士第历仕屯田郎中太和五年为山南宣抚使内乡仓督邓琬负度支漕米吏责偿之系其父子及孙凡二十八年九人死于狱扶申奏释之诏切责盐铁度支二使天下监院偿逋系三年以上者皆原进中书舍人出为福州观察使滥杀人风绩不立会卒奴婢争财有司按其贓至十余万时议蚩薄之持字德守中进士第太和中为渭南尉试京兆府进士时尹杜惊欲以亲故托之持辄趋降阶伏惊语塞乃止累迁给事中历朔方昭义节度使卒子彦谦字茂业多通技艺尤工为诗负才无所屈干符末避乱汉南一重荣镇河中辟幕府累表为副使历晋绛二州刺史重荣军乱彦谦贬兴元参军事节度使杨守亮表为判官迁副使终阆壁二州刺史【按唐次传新书附唐俭传后考旧书列入文苑今别之】

△崔元翰

崔元翰名鹏以字行父良佐与齐国公日用从昆弟也擢明经甲科补湖城主簿以

母丧遂不仕治诗易书春秋撰演范忘象浑天等论数十篇隐白鹿山之阳卒门人共谥曰贞文孝父元翰举进士博学宏辞贤良方正皆异等义成李勉表在幕府马燧更表为太原掌书记召拜礼部员外郎窦参秉政引知制诰其训辞温厚有典诰风然性刚褊不能取容于时孤特自恃掌诰凡再替不迁罢为比部郎中卒其好学老不倦用思精致驰骋班固蔡邕闲以自名家怨陆贽李充乃附裴延龄延龄表钩校京兆妄费持吏甚急而充等自无过讫不能傅致以罪云

△于公异

于公异苏州吴人进士第李晟表为招讨府掌书记朱泚平露布于德宗曰臣既肃清宫禁只奉寝园钟口不移庙貌如故帝览泣下曰谁为之辞或以公异对帝咨叹一再始公异与陆贽故有隙世多言公异不能事后母既仕不归省及贽当政乃奏其状诏赐孝经罢归田里卒

△李益

李益故宰相揆族子于诗尤所长贞元末名与宗人贺相埒每一篇成乐工争以赂求取之被声歌供奉天子至征人早行等篇天下皆施之图绘少痴而忌刻防闲妻妾苛严世谓妒为李益疾同辈行稍稍进显益独不调郁郁去游燕刘济辟置幕府进为营田副使尝与济诗语怨望宪宗雅知名召为秘书少监集贤殿学士负才凌藉士众不能堪谏官因暴幽州时怨望语诏降秩俄复旧官累迁右散骑常侍太和初以礼部尚书致仕卒时又有太子庶子李益同在朝故世言文章李益以辨云

△卢纶 【吉中孚 韩翃 钱起 司空曙 苗发 崔峒 耿漳 夏侯审 李端】

卢纶字允中河南蒲人避天宝乱客鄱阳大历初数举仕士不入第元载取纶文以进补阌乡尉累迁监察御史辄称疾去坐与王缙善久不调浑瑊镇河中辟元帅判官累迁检校户部郎中尝朝京师时舅韦渠牟得幸德宗表其才召见禁中帝有所作辄使赓和异日问渠牟卢纶李益何在答曰纶从浑瑊在河中驿召之会卒纶与吉中孚韩翃钱起司空曙苗发崔峒耿漳夏侯审李端皆能诗号大历十才子宪宗诏中书舍人张仲素访集遗文文宗尤爱其诗问宰相纶文章几何亦有子否李德裕对纶四子简能简辞弘正简求皆擢进士第在台阁帝遣中人悉索家笥得诗五百篇以闻中孚鄱阳人官户部侍郎翃字君平南阳人侯希逸表佐淄青幕府府罢十年不出李勉在宣武复辟之俄以驾部郎中知制诰时有两韩翃其一为刺史宰相请孰与德宗曰与诗人韩翃终中书舍人起吴兴人天宝中举进士与郎士元齐名时语曰前有沈宋

后有钱郎终考功郎中曙字文初广平人从韦皋于剑南终虞部郎中发晋卿子终都官员外郎峒终右补阙漳右拾遗审侍御史端赵州人始郭暖尚升平公主主贤明有才思尤招纳士故端等多从暖游暖尝大集客端赋诗最工钱起曰素为之请赋起姓端立献一章又工于前客乃服主赐帛百后移疾江南终杭州司马

△欧阳詹 【欧阳秬】

欧阳詹字行周泉州晋江人其先皆为本州岛州佐县令闽越地肥衍有山泉禽鱼虽能通文书吏事不肯北宦及常袞罢宰相为观察使始择县乡秀民能文辞者与为宾主钧礼观游飨集必与里人矜耀故其俗稍相劝仕初詹与罗山甫同隐潘湖往见袞袞奇之及举进士与韩愈李观李绛崔羣王涯冯宿庾承宣联第皆天下选时称龙虎榜闽人第进士自詹始詹事父母孝与朋友信义其文章切深回复明辨与愈友善詹先为国子监四门助教率其徒伏阙下举愈博士卒崔羣哭之甚愈为詹哀辞自书以遗羣初徐晦举进士不中詹数称之明年高第仕为福建观察使语及詹必流涕从子秬字降之亦工为文开成中擢进士第里人萧本妄言与贞献太后近属恩宠赫然秬耻之会泽潞刘从谏奏秬在幕府秬为辨质本之伪本终得罪从谏子稹拒命秬方休假还家稹表斥损时政或言秬为之诏流崖州赐死临刑色不挠为书徧谢故人自志墓人皆怜之

△李贺

李贺字长吉系出郑王后七岁能辞章韩愈皇甫湜始闲未信过其家使贺赋诗援笔辄就如素构自目曰高轩过二人大惊自是有名为人纤瘦通眉长扣爪能疾书每旦日出骑弱马从小奚奴背古锦囊遇所得书投囊中未始先立题然后为诗如它人牵合程课者及暮归足成之过亦不甚省母使婢探囊中见所书多即怒曰是儿要嘔出心乃已耳以父名晋肃不肯举进士愈为作讳辨然卒亦不就举辞尚奇诡所得皆惊迈绝去翰墨畦径当时无能效者乐府数十篇云韶诸工皆合之弦管为协律郎卒与游者权璩杨敬之王恭元每譔着时为所取去贺亦早世故其诗歌世传者鲜焉

△吴武陵

吴武陵信州人元和初擢进士第淮西吴少阳闻其才遣客郑平邀之将待以宾友武陵不答俄而少阳子元济叛武陵遗以书自称东吴王孙曰夫势有不必得事有不必疑徒取暴逆之名而殄物败俗不可谓智一日亡破平生亲爱连头就戮不可谓仁支属繁衍因缘磨灭先魂

伤馁不可谓孝数百里之内拘若槛穿常疑死于左右手低回姑息不可谓明且三皇以来数千万载何有悖理乱常而能自毕者哉贞元时德宗以涵容御天下河北诸镇专地不臣朝廷资以爵号桀黠者自谓得计以反为利于是杨惠琳刘辟李錡卢从史等又乱皇帝即位赫然命偏师讨之尽伏其辜所谓时也日者张太尉厌垣捍之勤谢易定为国老田尚书知虑绝俗又以魏博来归幽檀沧景皆为信臣然而与足下者独齐赵耳夫齐安司徒徐压其首梁薄其翼魏斲其胫滑针其腹淮南承其冲分兵不足相救全举则曹鲁东平非其有也彼何苦而自弃哉若赵则固竖子耳前日主上以泽潞为之导既斥从史姑赦罪复爵禄之天下之人欲讨者十八无何残丞相御史朝廷以足下故未加斧钺也然则中山搏藁城之险太原乘井陘之隘燕徇乐寿邢扼临城清河绝其南弓高断其北孤雏腐鼠求责不暇又曷以救人哉二镇不敢动亦明矣足下何恃而穷处邪今天子英武任贤同符太宗宽仁厚物有玄宗之度罚无贷罪赏无遗功诸侯拳齐赵以稔其衅羣帅筑室砺兵进窥房蔡屯田继漕前锋扼喉后阵抚背左排右掖其几何而不踣邪足下勿谓部曲勿我欺人心与足下一也足下反天子人亦欲反足下易地而然则婴凶横之命不若奉大君官守矣枕戈持矛死不得地不若坐兼爵命而保后嗣矣足下苟能挺知几之烈莫若发一介籍士马土疆归之有司上以覆载之仁必足纳足下涤垢洗瑕以倡四海将校官属不失宠且贵何哉为国者不以纤恶盖大善也且三州至狭也万国至广也力不相侔判然可知假使官军百败而行阵未尝乏足下一败则成禽矣夫一壮士不能当十夫者以其左右前后威敌也矧以一卒欲当百人哉昏迷不返诸侯之师集城下环垒剝堑灌以流潦主将怨携士卒崩离田儋吕兴发于肘腋尸不得里宗不得祀臣仆以为诫子孙所不祖生为暗愎之人没为幽忧之鬼何其痛哉元济得书不悟会裴度东讨而韩愈为司马武陵劝愈为度谋取中官常所不快者为监军归素所快者于内为吾地以倾诸侯出帛百万以给士大夫则孰不为丞相之人然后分三大将环贼而屯明斥候牛酒高会潜以实期授濒蔡诸将而以三期给贼令辨士持尺书劫元济及将士约降彼无所窜谋矣时度部分已定故不见用元济未破数月武陵自硤石望东南气如旗鼓矛楯皆颠倒横斜少选黄白气出西北盘蜿相交武陵告愈曰今西北王师所在气黄白喜象也败气为贼日直木举其盈数不阅六十日贼必亡夫天见其祥宣修事应之且洄曲守将急缓不可使吴城贼将诈而轻若以兵诱之伏以待一举可夺其城则右臂断矣武陵之奇谲类如此长庆初竇易直以户

部侍郎判度支表武陵主盐北边易直以不职薄其遇会表置和余贮备使择郎中为之
武陵谏曰今缘边膏壤鞠为榛杞父母妻子不相活前
在朔方度支米价四十而无踰月积皆先取商人而后求牒还都受钱脱有寇薄城不三
旬便当饿死何所取财而云和余哉天下不治病权不
归有司也盐铁度支一户部郎事今三分其务吏万员赋日蹙西北边院官皆御史员外
郎为之始命若责令信今又加使权其务是御史员外
久于事反不可信也况一使之建胥徒走卒殆百辈督责呼腾数千里为不宁诚欲边隅
完实独募浮民徙罪人发沃土何必加使而增吏也易
直不纳久之入为太学专士太和初礼部侍郎崔郾试进士东都公卿咸祖道长乐武陵
最后至谓郾曰君方为天子求奇材敢献所益因出袖
中书摺笏示郾读之乃杜牧所赋阿房宫辞既警拔而武陵音吐鸿畅坐客大惊武陵请
曰牧方试有司请以第一人处之郾谢已得其人至第
五郾未对武陵勃然曰不尔宜以赋见还郾曰如教牧果异等后出为韶州刺史以赃贬
潘州司户参军卒初柳宗元谪永州而武陵亦坐事流
永州宗元贤其人及为柳州刺史武陵北还大为裴度器遇每言宗元无子说度曰西原
蛮未平柳州与贼犬互宜用武人以代宗元使得优游
江湖又遣工部侍郎孟简书曰古称一世三十年子厚之斥十二年始半世矣霆砰电射
天怒也不能终朝圣人在上安有毕世而怒人臣邪且
程刘二韩皆已拔拭或处大州剧职独子厚与猿鸟为伍诚恐雾露所婴则柳氏无后矣
度未及用而宗元死始李愬节度唐邓武陵荐李景俭
王湘健智沈敏可表以自副时号知人

△高重

高重字文明尚书右仆射俭之五世孙以明经中第李巽表为盐铁转运巡官以善
职称累进司门郎中敬宗慎选侍讲学士重以简厚淳
正与崔郾同授再擢国子祭酒文宗好左氏春秋命分列国各为书成四十篇又与郑覃
刊定九经于石出为鄂岳观察使以美政被褒久之拜
太子宾客分司东都卒赠太子少保 【按高重传新书附高俭传后今改入文苑】

△李商隐

李商隐字义山怀州河内人或言英国公世绩之裔孙年弱冠令狐楚帅河阳奇具
文使与诸子游楚徙天平宣武皆表署巡官岁具资装
使随计开成二年高锴知贡举令狐绹雅善锴奖誉甚力故擢进士第调弘农尉以活狱
忤观察使孙简将罢去会姚合代简谕使还官又试拔
萃中选王茂元镇河阳爱其才表当书记以子妻之得侍御史茂元善李德裕而牛李党
人蚩谪商隐以为诡薄无行共排笮之茂元死来游京

师久不调更依桂管观察使鞫亚府为判官亚谪循州商隐从之凡三年乃归亚亦德裕所善絢以为忘家恩放利偷合谢不通后复于絢乃补太学博士柳仲郢节度剑南东川辟判官检校工部员外 【旧书作郎中】 府罢客荣阳卒商隐初为文瑰迈奇古及在令狐楚府楚本工章奏因授其学商隐俚偶长短而繁縟过之时温庭筠段成式俱用是相夸号三十六体

△温庭筠 【温庭皓】

温庭筠本名岐字飞卿尚书右仆射彦博裔孙少颖悟工为词章与李商隐齐名然薄于行无检幅又多作侧辞艳曲与贵胄裴誠令狐滈等痛饮狎昵数举进士不中第属思敏捷多为人作文大中末试有司廉视尤谨庭筠不乐上书千余言然私占校者已八人执政鄙其为授方山尉徐商镇襄阳署巡官不得志归江东令狐絢方镇淮南庭筠怨居中时不为助力过府不肯谒丐钱杨子院夜醉为逻卒击折其齿絢为劾吏吏具道其污行絢两置之事闻京师庭筠徧见公卿言为吏诬染俄而徐商执政颇右之欲奏用会商罢杨收疾之遂废卒弟庭皓咸通中署徐州观察使崔彦曾幕府庞勋反以刃胁庭皓使为表求节度使庭皓给曰当为公信宿思之勋喜归与妻子诀明日复见勋索表僻答曰我岂以笔砚事汝邪其速杀我勋熟视笑曰儒生有胆邪吾动众百万无一人草檄乎囚之更使周重为表彦曾遇害庭皓亦死诏赠兵部郎中 【按温庭筠及弟庭皓新书附于温大雅传后今依旧书列入文苑】

△薛逢

薛逢字陶臣蒲州河东人会昌初擢进士第崔铉镇河中表在幕府铉复宰相引为万年尉直弘文馆历侍御史尚书郎持论鲠切以谋略高自标显初与彭城刘瑒交瑒文辞出逢下常易之瑒稍亲近逢不得意遂相忿恨会瑒当国有荐逢知制诰者瑒猥言先朝以两省官给事舍人先治州县乃得除逢未试州执不可乃出为巴州刺史而杨收王铎同牒署第收辅政逢有诗微辞讥讪收衔之复斥蓬绵二州刺史收罢以太平少卿召还历给事中铎为宰相逢又以诗訾铎铎怒中外亦鄙逢褊傲故不见齿迁秘书监卒子廷珪进士及第大顺初以司勋员外郎知制诰迁中书舍人从昭宗次华州引拜左散骑常侍称疾免光化中复为舍人累尚书左丞朱全忠兼四镇廷珪以官告使至汴客将先见讽其拜廷珪佯不晓曰吾何德敢受令公拜乎及见卒不肯加礼

△李频

李频字德新睦州寿昌人少颖悟逮长庐西山多所记览其属辞于时尤长与里人方千善给事中姚合工诗士多归重频走千里丐其品

合大加奖挹以女妻之大中八年擢进士第调秘书郎为南陵主簿判入等再迁武功令
于是畿民多籍神策军吏以其横类假借不敢绳以法
频至有神策士尚君庆逋赋六年不送频密撻比伍与竞君庆叩县廷质频即械送狱尽
条宿恶请于君杀之督所负无少贷豪猾屏息县大治
有六门堰者廡废百五十年方岁饥频发官廩佣民浚渠按故道厮水溉田谷以大稔懿
宗嘉之擢侍御史守法不阿累迁都官员外郎表丐建
州刺史既至以礼法治下更布条教时朝政乱盗兴而建赖频以安卒官丧归父老相与
扶柩葬永乐州为立庙黎山岁祠之

△吴融

吴融字子华越州山阴人祖翥有名大中时观察府召以署吏不应帅高其槩言诸
朝赐号文简先生融力学富辞调龙纪初及进士第韦
昭度诗蜀表当书记累迁侍御史坐累去官流浪荆南依成汭久之召为左补阙以礼部
郎中为翰林学士拜中书舍人昭宗反正御南阙羣臣
称贺融最先至帝有指授迭十许藁融跪作诏少选成语当意详帝咨赏良厚进户部侍
郎凤翔劫迁融不克从去客阆乡俄召还翰林迁承旨
卒官

钦定续通志卷五百五十六

●钦定续通志卷五百五十七 文苑传四

文苑传

宋【一】

○宋一

宋白 聂崇义 邢昺 崔颂【臚】 尹拙 田敏

辛文悦 梁周翰 胡旦 郭忠恕

朱昂 赵邻几【何承裕】 郑起【郭昱 马应】 和峴【

■〈山蒙〉】 冯吉

宋白

聂崇义

邢昺

崔颂【崔臚】

尹拙

田敏

辛文悦

梁周翰

胡旦

郭忠恕

朱昂

赵邻几 【何承裕】

郑起 【郭昱 马应】

和峴

冯吉

△宋白

宋白字太素 【东都事略作素臣】 大名人善属文豪俊尚气节在词场名称甚着建隆二年窦仪典贡部擢进士甲科干德初献文白轴试拔萃高等授著作佐郎蜀平授玉津县令开宝中阎丕王洞交荐其才宜预朝列白以亲老祈外任连知蒲城卫南二县太宗潜藩时白尝赞文有袞衣之赐及即位擢为左拾遗权知兖州岁余召还泰山有唐玄宗刻铭白摹本以献且述承平东人望幸之意预修太祖实录俄直史馆判吏部南曹从征太原判行在御史台刘继元降翼日奏平晋颂太宗夜召至行宫褒慰且曰俟还京师当以玺书授职寻拜中书舍人太平兴国五年与程羽同知贡举俄充史馆修撰判馆事八年复典贡部改集贤殿直学士判院事未几召入翰林为学士雍熙中召白与李昉集诸文士纂文苑英华一千卷端拱初加礼部侍郎又知贡举白凡三掌贡士颇致讥议然所得士如苏易简王禹偁胡宿李宗谔辈皆其人也是时命复旧制专委有司白所取二十八人罢退既众羣议嚣然太宗遽召已黜者临轩覆试连放马国祥叶齐为八百余人焉白尝过何承矩家饮宴有进士赵庆者素无行检游承矩之门因潜出拜白求为荐名及掌贡部庆遂获荐人多指以为辞又女弟适王沔淳化二年沔罢参知政事时寇准方诋讦求进故沔被出复言白家用黄金器盖举人所赂其实白尝奉诏撰钱惟浚碑得涂金器尔张去华者白同年生也坐尼安道事贬白素与厚善遂出为保大军节度行军司马踰年抗疏自陈有来日苦少去日苦多之语太宗悯之召还为卫尉卿俄复拜礼部侍郎修国史至道初为翰林学士承旨二年迁户部侍郎俄兼秘书监真宗即位改吏部侍郎判昭文馆先是白献拟陆贽膀子集帝察其意欲求任用遂命知开封府以试之既而白倦于听断求罢任咸平四年拜礼部尚书白学问博洽为文敏贍然辞意放荡少法度在内署久颇厌番直草辞疏略多不愜旨景德二年罢拜刑部尚书集贤院学士判院事旧三馆学士止五日内殿起居会钱易上言悉令赴外朝白羸老就拜班足跌未几抗表引年帝眷旧臣未允再表辞乃以兵部尚书致仕时白继母尚无恙帝东封白肩舆辞

于北苑进吏部尚书赐帛五十匹大中祥符五年卒赠左仆射录其孙懿孙为将作监主簿孝孙试秘书省校书郎从子唐臣试正字白善谈谑不拘小节能赡亲族恤幼孤聚书数万卷图画亦多奇古者尝类故事千余门号建章集唐贤編集遗落者白多缀缀之好奖许后进胡旦田锡皆出其门下阵彭年举进士轻俊喜嘲谤白恶其为人黜落之彭年憾焉后居近侍为贡举条制多所关防盖为白设也会有司谥白为文宪内出密奏言白素无检操遂改文安有集百卷子宪臣得臣良臣忠臣

△聂崇义

聂崇义河南洛阳人少学三礼汉干佑中累官国子礼记博士校定公羊春秋刊于国学周显德中累迁国子司业兼太常博士先是世宗以郊庙祭器止由有司相承制造年代寢久无所规式令崇义检讨摹画以闻四年上之乃命有司别造焉五年将禘于太庙言事者以宗庙无祧室不当行禘祫之礼崇义援引故事上言其略曰魏明帝以景初三年正月上仙至五年二月祫祭明年又禘自兹后以五年为禘且魏以武帝为太祖至明帝始三帝未有毁主而行禘祫其证一也宋文帝元嘉六年祠部定十月三日大祠其太庙博士议云案禘祫之礼三年一五年再宋高祖至文帝裁亦三帝未有毁主而行禘祫其证二也梁武帝用谢广议三年一禘五年一祫谓之大祭禘祭以夏祫祭以冬且梁武乃受命之君裁追尊四朝而行禘祫则知祭者是追养之道以时移节变孝子感而思亲故荐以首时祭以仲月闲以禘祫序以昭穆乃礼之经非关宗庙备与未备其证三也世宗从其议又诏参定郊庙器玉崇义因取三礼图再加考正太祖建隆三年表上之帝下诏褒谕乃命太子詹事尹拙集儒学三五人更同参议拙多所驳正崇义复引经释之悉下工部尚书窦仪裁定仪奏尹拙驳议及聂崇义答义各四卷臣再加详阅随而裁置率用增损列于注释共分为十五卷以闻诏颁行之未几卒三礼图遂行于世并画于国子监讲堂之壁崇义为学官兼掌礼仪二十年世推其该博云

△邢昺

邢昺字叔明曹州济阴人太平兴国初举五经廷试日召升殿讲师比二卦问以羣经发题太宗嘉其精博擢九经及第授大理评事知泰州盐城监昺以是监处楚秦闲泰僻左而楚会要盐食为急请改隶楚州从之召为国子监丞专讲学之任迁尚书专士出知仪州就转国子博士代还选为诸王府侍讲累迁国子祭酒咸平二年始置翰林侍讲学士以昺为之受诏

与杜镐等校定周礼仪礼公羊谷梁春秋传孝经论语
尔雅义疏及成并加阶勋俄为淮南两浙巡抚使还时初置讲读之职即于便坐令曷讲
左氏春秋五年讲毕赐晏迁工部侍郎兼国子祭酒学
士如故代陈恕权知审官院帝方兴起道术又令曷与张雍杜镐孙奭举经术该博德行
端良者以广学员景德三年加刑部侍郎曷居近职常
多召对四年以羸老养步自陈曹州故乡愿给假一年归视田里俟明年郊祀还朝帝命
坐慰劳之因谓曰便可权本州岛何须假邪即超拜工部
尚书知曹州职如故入辞日特开龙图阁召近臣宴崇知殿帝作五七言诗二首赐之预
宴者皆赋曷视壁闲尚书礼部图指中庸篇曰凡为天
下国家有九经因陈其大义帝嘉纳之及行令近臣祖送设会于宜春苑大中祥符初帝
东封泰山曷表曹州民请车驾经由本州岛仍令济阴令
王管部送父老诣阙优诏答之俄召还车驾进发命判留司御史台礼毕进位礼部尚书
帝勤政悯农每雨雪不时忧形于色以曷素习田事多
访之初田家察阴晴丰凶皆有状候老农之相传者率有验曷多采其说为对又言民之
灾患大者有四一曰疫二曰旱三曰水四曰牛瘡岁必
有其一但或轻或重耳四事之害早曷为甚真宗然之三年被病请告帝亲临问疾赐名
药一奩白金器千两缿采千匹故事非宗戚将相无省
疾临丧之礼特有加于曷与郭贄者以恩旧故也未几召其子太常博士知东明县仲宝
国子博士知信阳军若思还侍疾卒赠左仆射三子并
进秩初雍熙中曷撰礼选二十卷献之太宗探其帙得文王世子篇观之甚悦因问卫绍
钦曰曷为诸王讲说曾及此乎绍钦曰诸王常时访曷
经义曷每至发明君臣父子之道必重复陈之太宗益喜常作礼选赞赐之曷在东宫及
侍帝讲孝经礼记论语书易诗左氏传据传疏敷引之
外多引时事为喻帝尝问管仲召忽皆事公子纠小白之入召忽死之管仲乃归齐相桓
公岂非召忽以忠死而管仲不能固其节为臣之道当
若是邪又郑注礼记世子篇云文王以勤忧损寿武王以安乐延年朕以为经旨必不然
也且夏禹焦劳有玄圭之赐而享国永年若文王能忧
人之忧不自暇逸纵无感应岂至亏损寿命邪曷各随其事理以对先是咸平中王钦若
知贡举有告其受举人贿赂者下御史台鞫得状钦若
自诉诏曷与边肃母宾古阎承翰就太常寺覆推曷力辨钦若而洪湛抵罪钦若以是德
之曷之厚被宠顾钦若与有功焉仲宝后至祠部郎中
坐赃黜官若思终于驾部郎中

△崔颂 【崔曷】

崔颂字敦美河南偃师人父协后唐门下侍郎平章事颂以荫补河南府巡官历开

封主簿邓州录事参军以疾去官未几诣阙上书宰相桑维翰奇之擢为左拾遗迁右补阙汉初加朝散阶副右散骑常侍张煦册钱俶为吴越王周世宗镇澶渊择僚佐颂与王朴王敏中皆中其选以颂为观察判官世宗尹京拜司封员外郎充判官以断狱误失罢职守本官即位拜驾部郎中迁吏部复副尹日就使两浙世宗读唐元稹均田疏命写为图赐近臣遣使均诸道租赋颂吏兖州颇增旧额恭帝嗣位改左谏议大夫宋初判国子监建隆三年始会生徒讲说太祖每临国学召颂与语因及经义颂应答无滞及郊祀以颂摄太仆升车执绥帝问以一时典礼颂占对闲雅帝甚重之坐为所亲求便官出为保大军行军司马干德六年卒颂善笔札受命书世宗谥册文当时称其遒丽子晓至太子右赞善大夫曷字文炳雍熙二年进士淹雅有士行为屯田员外郎开封三司户部判官景德中以纯谨代戚维为曲国公元俨府翊善迁部官员外郎充记室参军进兵部郎中出知河中府转太常少卿将作监卒

△尹拙

尹拙颍州汝阴人梁贞明五年举三史调补下邑主簿摄本镇馆驿巡官仕后唐至检校虞部郎中忠武军掌书记晋天福时诏与张昭等同修唐史累迁左司员外郎汉初为司马郎中弘文馆直学士周显德初拜检校右散骑常侍国子祭酒通判太常礼院事与张昭同修唐应顺清泰及周祖实录又与昭及田敏同详定经典释文宋初改检校工部尚书太子詹事判太府寺迁秘书监判大理寺干德六年告老以本官致仕拙性纯谨博通经史周世宗北征命翰林学士为文祭白马祠学士不知所出遂访于拙拙历举郡国祠白马者以十数当时服其该博开宝四年卒子季通

△田敏

田敏淄州邹平人少通春秋学梁贞明中登科为国子四门博士后唐天成初改尚书博士满岁为国子博士上言请四郊置斋宫不报转屯田员外郎以详明典礼兼太常博士建议请依春秋每岁藏冰荐宗庙颂公卿诏与太常卿刘岳等删定唐郑余庆书仪又诏与马镐等同校九经改户部员外郎清泰初迁国子司业晋天福四年授祭酒仍检校工部尚书俄兼户部侍郎开运初迁兵部侍郎充弘文馆学士判馆事议者以敏止可任学官宰相桑维翰闻之即改授检校右仆射复为祭酒汉干佑中拜尚书右丞判国子监周广顺初改左丞使契丹周祖将亲郊命权判太常卿事世宗即位真拜太常卿检校左仆射加司空显德五年请老不允迁工

部尚书再上表乞归改太子少保致仕恭帝即位加少
傅开宝四年卒敏解官归乡体强少疾徒步往来闾巷闲每日亲授诸子经尝使湖南路
出荆渚以印本经书遗高从诲从诲谢曰祭酒所遗经
书仆但能识孝经耳敏曰读书不在多十八章足矣如诸侯章云在上不骄高而不危制
节谨度满而不溢皆至要之言也时从诲兵败于郢故
敏以此讽之从诲大惭子章玉殿中丞

△辛文悦

辛文悦不知何许人以五经教授太祖幼时从其肆业周显德中太祖厯禁卫为殿
前都点检节制方面文悦久不获接见一日梦邀车驾
请见既拜乃太祖也太祖亦梦其来谒因令左右寻访文悦果自至太祖异之及登位召
见授太子中允判太府事开宝三年出知房州时周郑
王出居是州帝以文悦长者故命焉文悦后累迁至员外郎

△梁周翰

梁周翰字符褒郑州管城人父彦温官马步军都校周翰幼好学十岁能属词周广
顺二年举进士授虞城主簿辞疾不赴宰相范质王溥
以其闻人不当佐外邑改开封府户曹参军宋初质溥仍为相引为秘书郎直史馆时左
拾遗知制诰高锡上封议武成王庙配享七十二贤内
王僧辨不令终恐非全德寻诏吏部尚书张昭工部尚书窦仪与锡复位功业终始无瑕
者方得预焉周翰言自乐毅以降苟欲指瑕谁当无累
一旦槟出祠庭臣窃惑焉谓宜罢新议仍旧典为便不报干德中献拟制二十篇擢为右
拾遗会修大内上五凤楼赋人多传诵之五代以来文
体卑弱周翰与高锡柳开范杲尚淳古相友善时有高粱柳范之称初太祖尝识彦温于
军中石守信亦与彦温旧故一日太祖语守信将用周
翰掌诰守信微露其言周翰遽上表谢太祖怒遂寢其命厯通判绵眉二州坐使人至死
夺二官起授太子左赞善大夫开宝三年迁右拾遗监
绫锦院改左补阙兼知大理正事会将郊祀因上疏曰陛下再郊上帝必覃赦宥方今赋
税所入至多加以科变之物名品非一调发供输不无
重困且西蜀淮南荆潭广桂之地皆已为王土陛下诚能以三方所得之利减诸道租赋
之入则庶乎均德泽而宽民力矣俄坐杖锦工过差为
其所诉太祖责之曰尔岂不知人之肤血与己无异何乃遽为酷罚将杖之周翰自言臣
负天下才名不当如是太祖乃解左迁左司农寺丞逾
年为太子中允太平兴国中知苏州周翰善音律喜菡博惟以饮戏为务郡事不治以本
官分司西京踰月授左赞善大夫仍分司俄除楚州团
练副使雍熙中宰相李昉以其名闻召为右补阙赐绯鱼使江淮提点茶盐周翰以辞学

为流辈所许频历外任不乐吏事会翰林学士宋白等
列奏其有史才遂命兼史馆修撰会太宗试贡士周翰为考官面赐金紫因语宰相称其
有文寻迁起居舍人淳化五年张佖建议复置左右史
之职乃命周翰与李宗谔分领之周翰兼起居郎因上言自今崇德长春殿皇帝宣谕之
言侍臣论列之事望依旧中书修为时政记其枢密院
事涉机密亦令本院编纂每至月终送史馆自余百司凡于对拜除改沿革制置之事悉
条报本院以备编录仍令郎与舍人分直崇政殿以记
言动别为起居注每月先进御后降付史馆从之起居注进御自周翰等始也会考课京
朝官有敢隐前犯者皆除名为民周翰被谴尤多所上
有司偶遗一事当免判馆杨徽之率三馆学士诣相府以为周翰非故有规避其实所犯
频繁不能悉记于是止罚金先是赵安易建议于西川
铸大铁钱以一当十周翰上言古者货币钱三者兼用若钱少于货币即铸大钱或当百
或当五十盖钦广其钱而足用尔今不若使蜀民贸易
者凡铁钱一止作一钱用官中市物即以两钱当一又西川患在少盐请于益州置榷院
入物交易则公私通济矣至道中迁工部郎中真宗在
储官知其名征之令取所为文章周翰悉纂以献因答以书及即位未行庆首擢为驾部
郎中知制造俄判史馆昭文馆咸平三年召入翰林为
学士受诏与赵安易同修属籍唐末丧乱籍谱罕存无所取则周翰创意为之颇有伦贯
车驾幸澶渊命判留司御史台周翰恳求扈从许之明
年授给事中与宋白俱罢学士大中祥符元年迁工部侍郎踰年卒帝悯之录其子忠宝
为大理评事周翰性疏隽卞急临事过于严暴故多旷
败晚年才思稍减书诏多不称旨有集五十卷及续因话录

△胡旦

胡旦字周父滨州渤海人少有隽才博学能文辞举进士第一为将作监丞通判升
州时江南初平汰李氏时所度僧十减六七旦曰彼无
田庐可归将聚而为盗悉黥为兵寻迁左拾遗直史馆数上书言时政利病出为淮南东
路转运副使知海州踰年召归先是卢多逊贬赵普罢
相其夏河决韩村寻复塞旦献河平颂有逆逊奸普之语太宗召宰相谓曰胡旦献颂词
意悖戾朕自擢于甲科历试外任所至无善状知海州
日为部下所讼狱已具适会大赦朕录其才而舍其过尚令在近列又领史职乃敢恣胸
臆狂躁如此其亟逐之即贬殿中丞商州团练副使上
平燕议曰今幽州在北门之外东封非国家所急愿移其资以事北方且天时地利人事
皆可用兵岁之所临其地受福今年春末至来年岁在
宋分从今年为备至来春兴师北兵遇春夏则既裘皮履羊弓塞马不为用而中原士卒

素不能寒往北逢暄筋力勇健成功立事在于此矣长
淮以北太行以东河水罢灾土地甚沃因其丰实取其谷帛减价以折纳见钱以贵余官
府多积兵役无虞用兵丰财可济大事太原克复以来
于今七载兵甲甚利士卒甚雄若以促装之赐发军而用之恩赏之贖成功而赉之可以
齐心平敌恢拓旧境幽州平土而负敌为势必择四人
分之方面以刚断勇毅者主之选和平恭慎者一人部之幽州之北皆是山谷通人马者
不过十处领将士者亦择十人同行则共议兵机分出
则各司军事敌来则同战以驱逐敌归则画疆以扞蔽苟塞断山路余敌在燕与大军相
持则迁延其时以度春夏敌不能热有退无前使士之
刚勇与才力者各为一将多则分部扞敌攻城两尽其力定其军名实其军数我寡彼多
则力不胜我实彼虚则胜有余力均则较其地形地均
则争其谋略分明勇怯各致其用以茶盐香药之价十分减二从新者先卖于边城要路
车马屯所以刍粟钱帛之价十分增二纳货出券者诣
本场以交货得货者缘逐路以纳税出往来四方之饶为两地费用之耗自然商得其利
则买之于人人得之资剗勤之于穡故必民效兼倍之
力国贮九年之积科拨不假于度支转般何劳于漕挽如此则敌不足平也起为左补阙
复直史馆迁修撰预修国史以尚书户部员外郎知制
诰迁司封员外郎有佣相人翟颖者旦尝与之善因为改姓名马周以为唐马周复出上
书诋时政且自荐可为大臣又举材任公辅者十人其
辞颇壮当时皆谓旦所为马周坐流海岛旦亦贬坊州团练副使坐擅敌所部谒宋白于
鄜州被劾特释之徙绛州稍复工部员外郎直集贤院
迁本曹郎中知制诰史馆修撰素善中官王继恩为草制辞过美继恩败贬安远军行军
司马又削籍流浚州咸平初移通州团练副使徙徐州
后累除祠部郎中通判襄州服母丧既除乃言父卒时尝诏夺哀从事请追行服三年已
而失明以秘书省少监致仕再迁秘书监卒旦喜读书
着汉春秋五代史略将帅要略演圣通论唐乘家传三百余卷晚尤黻货干扰州县持吏
短长为时论所薄

△郭忠恕

郭忠恕字恕先河南洛阳人七岁能诵书属文举童子及第尤工篆籀汉湘阴公召
之辞去周广顺中召为宗正丞兼国子书学博士改周
易博士太祖建隆初忠恕被酒与监察御史符昭文竞于朝堂御史弹奏忠恕叱台吏夺
其奏毁之坐贬为干州召户参军乘醉殴从事范滌擅
离贬所削籍配隶灵武其后流落不复求仕进多游岐雍京洛闲有佳山水即淹留浹旬
不能去或踰月不食盛暑暴露日中体不沾汗穷冬凿

河冰而浴其旁凌澌稍释人皆异之尤善画所图屋室重复之状颇极精妙多游王侯公卿家或待以美酝预张纨素倚于壁乘兴即画之苟意不欲而固请之必怒而去太宗即位闻其名召赴阙授国子监主簿令刊定历代字书忠恕性无检局帝怜其才每优容之益使酒肆言时擅鬻官物取其直诏减死决杖流邕州太平兴国二年已行至齐州临邑谓部送吏曰我今逝矣因掘地为穴度可容其面俯窥焉而卒藁葬道侧后数月故人将改葬之举其体甚轻若蝉蜕焉所定古今尚书并释文并行于世

△朱昂

朱昂字举之其先京兆人父葆光寓潭州遂家于衡山昂少笃学有朱遵度者时谓为朱万卷目昂曰小万卷尝游庐陵有术者谓昂曰中原当有真主矣子仕至四品遂北游江淮时周世宗南征韩令坤统兵至扬州昂谒见陈治乱方略令坤奇之署权知扬州扬子县【按东都事略作摄永正县谨识】适兵革之际逃亡过半昂便宜绥辑复逋亡者七千余家令坤即表授本县令宋初为衡州录事参军李昉知州事深赏其文历宜城令开宝中拜太子洗马知蓬州徙广安军会渠州妖贼李仙众万人劫掠军界昂设策禽之宰相薛居正称其能迁殿中丞知泗州聚淮水流户为冢瘞之有戍卒谋乱昂诛其首恶凡支党悉贯之累迁库部员外郎峡路转运使端拱二年以本官直秘阁久之出知复州召还再直秘阁真宗即位迁司封郎中知制诰判史馆受诏编次三馆秘阁书籍咸平二年入翰林为学士请老以工部侍郎致仕命其子正辞知公安县以便侍养旧制致仕官止谢殿门外昂特延见命坐恩礼甚厚遣中使赐宴玉津园两制三馆皆预仍诏赋诗饯行昂前后所得奉赐以三之一购奇书讽诵为乐及是自称退叟着资理论三卷上之诏付史馆弟协以纯谨称仕至主客郎中雍王府翊善昂以书招之亦告老归兄弟皆口寿时以比汉二疏昂于所居建二亭曰知止曰幽栖颇好释氏书景德四年卒门人谥曰正裕先生诏加赠录其孙适出身昂纯厚有清节澹荣利为洗马十五年不以屑意居内署非公事不至两府在王邸时真宗居储宫知其素守故每加褒进然昂未尝有所私请进退存礼士类多之有集三十卷子正彝正辞正基

△赵邻几【何承裕】

赵邻几字亚之郢州须城人少好学能属文尝作禹别九州岛赋凡万余言人多传诵周显德二年举进士解褐秘书省校书郎历许州朱州从事太平兴国初召为左赞善大夫直史馆改宗正丞四年郭贽宋白交荐之会邻几献颂帝览而嘉之迁左补阙知制诰数月卒邻几为文慕

徐庾及王杨卢骆体属对精切及掌诰命颇不达体要常欲追补唐武宗以来实录孜孜访求遗事会疾革以书未成为恨子东之以荫补郎山主簿部送军粮诣北没焉淳化中以参知政事苏易简言太宗遣直史馆钱熙往取其著书得会昌以来日历二十六卷及文集三十四卷鰈子一卷六帝年略一卷史氏懋官志五卷来上诏恤其家时又有何承裕者晋天福末擢进士第有清才好为歌诗而嗜酒狂逸初为中都主簿桑维翰镇兖州知其真率不责以吏事累官至著作佐郎直史馆出为整屋咸阳二县令为治清而不烦每览牒诉必戏判以喻曲直诉者多心服引去开宝三年自泾阳令入为监察御史后历侍御史累知忠万商三州太平兴国中卒

△郑起 【郭昱 马应】

郑起字孟隆不知何许人善属文歌诗尤清丽举进士周广顺初调尉氏主簿宰相范质荐为右拾遗直史馆恭帝初迁殿中侍御史太祖干德初出掌泗州市征刺史张延范密奏起嗜酒废职初显德末起见太祖握禁兵有人望乃上书范质极言其事又尝遇太祖于路横绝前导而过太祖亦弗之怒及延范奏至出为河西令会蜀平当徙远官起不欲往乃炙烙其足因是成疾卒起负才倨傲多所诋讦数为羣小窘辱终亦不改时有郭昱者好为古文狭中诡僻周显德中登进士第耻赴常选献书于宰相赵普自比巢由朝议恶其矫激久不调后复何普望尘自陈普笑谓人曰今日甚荣得巢由拜于马首开宝末普出镇河阳昱诣薛居正上书极言谪普居正奏之诏署襄州观察推官潘美镇襄阳讨金陵以昱随军昱中夜被酒号叫军中皆惊美遣还后坐盗用官钱除名雍熙中卒又有马应者薄有文艺开宝初效元结中兴颂作勃兴颂以述太祖下荆湖之功欲刊石于永州结颂之侧县令恶其夸诞不以闻太平兴国初登第授大理评事坐事除名淳化中以诗千同年殿中丞牛景景因奏上太宗嘉之复授大理评事未几卒又有颖贄董淳刘从义善为文章张翼谭用之善为诗张之翰善笈启贄拔萃登科至太子中允淳为工部员外郎直史馆诏撰孟昶纪事从义多藏书尝纂长安碑文为遗风集二十卷余皆官不达

△和峴

和峴字晦仁开封浚仪人晋宰相凝之子七岁以门荫为左千年备身选著作佐郎汉干佑初如朝散阶十六登朝为著作郎拜太常丞太祖建隆初授太常博士从祀南郊太祖谓近侍曰此谁氏之子熟于赞导左右以峴门阀对俄拜刑部员外郎兼博士仍判太常寺干德元年十

一月有事于南郊冬至有司复请祀昊天上帝诏岷议其礼岷以祭义戒烦数请罢之二
年议孝明孝惠二后祔别庙岷以旧礼有二后同庙之
文无各殿异室之说今二后同祔别庙亦宜共殿别室孝明皇后尝母仪天下宜居上室
孝惠皇后止以追尊当居次室从之三年春初克夔州
以岷通判州事代还是岁十二月十四日戊戌腊有司以七日辛卯蜡百神岷献议正之
四年南郊岷建议望燎位置燿火又尝言依旧典宗庙
殿廷设宫悬三十六架加鼓吹熊罴十二案朝会登歌用五瑞郊庙奠献用四瑞回仗至
楼前奏采茨之曲御楼奏隆安之曲各用乐章复举唐
故事宗庙祭科外别设珍膳用申孝享之意又谓八佾之舞以象文德武功请用玄德升
闻天下大定二舞并从其议先是王朴竇俨洞晓音乐
前代不协律吕者多所考正后未有继其职者会太祖以雅乐声高诏岷讲求其理以均
节之自是八音和畅帝甚嘉之乐器有义手笛者帝意
欲增入雅乐岷即令乐工调品以谐律吕其执持之状如拱揖然请目曰拱辰管诏备于
乐府开宝初迁司勋员外郎权知泗州判吏部南曹历
夔晋二州通判九年江南平受诏采访太宗即位迁主客郎中太平兴国二年知兖州改
京东转运使岷性苛刻鄙吝好殖财复轻侮人尝以官
船载私货贩易规利初为判官郑同度论奏既而彰信军节度使刘遇亦上言按得实坐
削籍配隶汝州六年起为太常丞分司西京复阶勋章
服端拱初帝躬耕藉田岷奉留司贺表至阙下因以其所著奉常集秘阁集注释武成王
庙赞奏御帝甚嘉之复授主客郎中判太常寺兼礼仪

院事寻卒弟■〈山蒙〉

和■〈山蒙〉

和■〈山蒙〉

■〈山蒙〉字显仁凝第四子也生五六岁凝教之诵古诗赋一览辄不忘试令为
咏物诗颇有思致凝叹赏之太平兴国八年擢进士第
释褐霍邱主簿雍熙初知崇仁县就拜大理评事江南转运使杨緘以其材干奏移知南
昌县代还为刑部详覆官迁光禄寺丞先是凝尝取古
今史传辨雪冤枉等事着为疑狱集■〈山蒙〉因增益事类分为三卷表上之又献所
著文赋五十轴召试中书擢为太子中允先是冯起撰
御前登第三榜碑以献帝甚称奖命直史馆淳化初■〈山蒙〉又撰七榜题名记并补
注凝所撰古今孝弟集成十卷以献遂以本官直集贤
院三年春献观鐙赋诏付史馆迁右正言太宗亲试贡士■〈山蒙〉预考校作歌以献
帝对宰相称赏之时摹印儒行篇以赐新及第人及三
馆台省官皆上表谢■〈山蒙〉与宰相尤称旨遂以本官知制诰加水部员外郎知理

检院至道元年与王旦同判吏部铨寻卒帝闻之惊叹
赠赙加等长子珙纔十岁即授大理评事次子璪补太庙斋郎■〈山蒙〉每草制必精
思讨索而后成拘于引类偶对颇失典诘体帝以其贵
家子能业文甚宠待之欲召入翰林谓近臣曰■〈山蒙〉眸子眊眊然胸中必不正不
可以居近侍也其命遂寝■〈山蒙〉弟■〈山皋〉
始为三班奉职淳化中献文求试帝以故相之后改授大理评事

△冯吉

冯吉字惟一河南洛阳人道之子也晋天福初以父任校书郎累迁司勋郎中周显
德中迁太常少卿嗜学善属文工草隶然性滑稽无操
行雅好琵琶尤臻甚妙父常戒令勿习吉性所好亦不能改道欲辱之因家宴令吉奏琵
琶为寿吉了无怍色及为少卿颇不得意以酒自娱每
朝士宴集虽不召亦常自至酒酣即弹琵琶弹罢赋诗诗成起舞宋初受诏撰明宪皇太
后谥议见称于时建隆四年卒

钦定续通志卷五百五十七

●钦定续通志卷五百五十八 文苑传五

文苑传

宋【二】

○宋二

高頔	李度	韩溥	鞠常	宋准	柳开
夏侯嘉正	罗处约	安德裕	钱熙		

高頔

李度

韩溥

鞠常

宋准

柳开

夏侯嘉正

罗处约

安德裕

钱熙

△高頔

高頔字子奇开封雍邱人后唐清泰中登进士乙科四迁魏博观察支使周显德中
符彦卿奏署掌书记时太宗亲迎懿德皇后于大名彦
卿遣頔迎候日夕陪接尤伸款好后随彦卿镇凤翔会诏留彦卿洛阳彦卿复为天雄军

掌书记后以病免居于魏太宗雍熙二年亲试贡士頔
子南金举学究自陈父年八十四尝佐使幕久罢职家贫无以存养愿赐一第庶获寸禄
以及老父帝问左右其父何人宰相宋琪以頔对帝曰
此高頔子耶頔在大名幕中尝与朕游处晨暮对案饮食尝拱手危坐未曾少懈其恭谨
盖天性也即擢南金第拜頔左补阙致仕后卒于家頔
有清节力学强记手写书千余卷彦卿待之甚厚或过致优给頔计口受费余皆不纳彦
卿左右多肆贪虐民不能堪及罢镇其故时将吏宾客
皆心愧无敢复游魏者惟頔清苦守法魏人受之在魏三十年无一人言其非者次子鼎
举进士至殿中丞

△李度

李度河南洛阳人周显德中举进士度工诗有醉轻浮世事老重故乡人之句时翰
林学士申文炳知贡举枢密使王朴移书录其句以荐
之文炳即擢度为第三人释褐永宁县主簿累迁殿中丞知歙州坐事左迁绛州团练使
十年不调度在歙州尝以所著诗刻于石有中黄门得
其石本传入禁中太宗见之谓宰相曰度今安在即召对擢为虞部员外郎直史馆端拱
初藉田毕交州黎桓加恩命度借太常少卿充官告国
信副使赐诗宠行未至卒度之南使每至州府即借图经观其胜迹皆形篇诗以帝所赐
诗有奉使南游多好景之句遂题为奉使南游集弟康
亦善诗太平兴国二年登进士第官至太子右赞善大夫

△韩溥

韩溥京兆长安人唐宰相休之后少俊敏善属文周显德初举进士累历幕府太祖
开宝三年自静难军掌书诏召为监察御史三迁至库
部员外郎知华州同判灵州再转司门郎中卒溥博学善持论详练台阁故事多知唐朝
氏族与人谈亶亶可听号为近世肉谱搢绅颇推重之
尤善笔札弟洎亦进士及第

△鞠常

鞠常字可久密州高密人父庆孙申州团练判官有诗名常少好学善属文汉干佑
二年擢进士第裁二十一释褐秘书省校书郎周广顺
中宰相范质奏充集贤校理出为郓州观察支使历伊阳令显德四年诣阙进策召试复
授猗氏令迁蔡州防御判官复宰介休魏县太祖开宝
中赵普为相擢为著作佐郎时任此官惟常与杨徽之李若拙赵邻几四人皆有名于时
常应举时着四时成岁赋万余言又为春兰赋颇存兴
托后为清河令七年卒子仲谋字有开雍熙中进士有材干官至兵部员外郎尝集其父
所为文成二十卷常弟瑜周广顺中进士与常齐名

△宋准

宋准字子平开封雍邱人开宝中举进士第一时翰林学士李昉知贡举会贡士诉昉取舍非公太祖召准覆试复冠多士即授秘书省秘书郎 【东都事畧作校书郎】 直史馆太平兴国中累迁左拾遗八年同知贡举出为河北转运使岁余以本官知制诰雍熙中加主客员外郎复预知贡举俄判大理寺四年被病迁金部郎中端拱二年卒准美风仪善谈论辞采清丽所至皆有治声卢多逊之南流也李穆坐同年生黜免左右无敢言者准因奏事盛言穆长者有检操常恶多逊专恣非其党也帝悟尽复穆旧官时论多之天禧三年录其子大年试秘书省校书郎

△柳开

柳开字仲涂大名人父承翰干德初监察御史开幼颖异有胆勇周显德末从父任南乐夜有盗入室众恐不敢动开年裁十三亟取剑逐之盗踰垣出开挥刃断其足指既就学喜讨论经义五代文格浅弱慕韩愈柳宗元为文因名肖愈字绍元既而改名字以为能开圣道之涂也

【按东都事畧云有赵生者得韩文数十篇未达以示开开一见遂知为文之趣自属文必法韩愈宋史不载谨附识】 尚气自任不顾小节

所交皆一时豪隽范杲好古学甚重开文世称为柳范开宝六年举进士补宋州司寇参军以治狱称职迁录事参军太平兴国中擢右赞善大夫会征太原督楚泗八州运粮选知常州迁殿中丞徙润州拜监察御史召还知贝州转殿中侍御史雍熙二年坐与监军忿争贬上蔡令会北

方用师开部送军粮将至涿州遇契丹将与米信战久不解俄遣使求和开谓信曰兵法云无约而请和谋也急攻之必胜信迟疑不决踰二日

复引兵来挑战后侦知果以矢尽俟取于幽州也师还诣阙上书愿从边军效死太宗怜之复授殿中侍御史使河北因抗疏曰臣受非常恩未

有以报愿陛下赐臣步骑数千任以河北用兵之地必能为陛下复幽蓟帝方择文臣有武畧者用之即授开崇仪使知宁边军 【东都事畧

作宁远军】 徙全州州之西有溪洞粟氏久为边患朝廷设峡口香烟等七砦不能御开选勇辩吏往说之不踰月携老幼至开赋其居业作时

鉴一篇刻石戒之遣其酋入朝授本州岛上佐淳化初移知桂州初开在全州有卒讼开开即杖背黥面送阙下有司言卒罪不及徒坐削二官黜

为复州团练副使移滁州上书自陈复旧官知环州三年移邠州时调民犂送趋环庆已再运民皆荡析产业转运使复督后运民数千人入州

署号诉开贻书转运使罢之又知曹邢二州真宗即位加如京使徙代州上言益州稍静

望选贤能以镇之必须望重有威即羣小畏服又西鄙
今虽归顺他日未可必保望常预备之以良将守其要害以厚赐足其贪婪以抚慰来其
情以宽假息其念多使人入甘凉厚结其心为我声援
如有动静使其掩袭令彼有后顾之忧乃可制其轻动今甲兵虽众不及太祖之时人人
练习谋臣猛将则又悬殊是以比年边界屡遭侵扰愿
训练禁戢使如往日行伍必求于勇敢指顾无纵于先后失律者悉诛获功者必赏偏裨
主将不威严者去之又宰相枢密朝廷大臣委之必无
疑用之必至当今京朝官则别置审官供奉殿直则别立三班刑部不令详断别立审刑
宣徽二司全同散地大臣不获亲信小臣乃谓至公至
如银台一司旧属枢密近年改制职掌其多加倍置人事则依旧欲望停审官三班复委
中书枢密宣徽院银台司复归枢密审刑院复归刑部
去其繁细省其头目又天下州县官吏不均欲望县四千户以上选朝官知三千户以上
选京官知省去主簿令县尉兼领其事自余通判监军
巡检监临使臣并酌量省减免虚费于利禄仍均济于职官又人情贪竞时态轻浮虽骨
肉之至亲临势利而多变仁义之风荡然不复欲望明
颁告谕各使改更庶厚化原永敦政本开至州葺城垒战具诸将多沮议即求换郡徙忻
州刺史及契丹侵边开上书请车驾观兵河朔咸平四
年徙沧州未至卒录其子涉为三班奉职开善射喜奕棊有集十五卷作家戒千余言刻
石以训诸子性倜傥重义在大名尝过酒肆饮有土人
在旁辞貌稍异开询之则至自京师以贫不克葬其亲闻不祐笃义将丐之问所费曰二
十万足矣开即罄所有遗之开兄肩吾至御史

△夏侯嘉正

夏侯嘉正字会之江陵人少有俊才太平兴国中举进士历官至著作佐郎尝使巴
陵作洞庭赋徐铉见奇之端拱初太宗知其名召试辞
赋擢为右正言直史馆兼直秘阁元夕帝御干元门观灯嘉正献五言十韵诗其末句云
两制诚堪羨青云侍玉舆帝依韵和以赐之有狭劣终
难举通才列上居之句议者以为诚嘉正之好进也未几卒子纾

△罗处约

罗处约字思纯益州华阳人父济仕蜀为升朝官归朝为开封府司录太宗尹京颇
嘉其强干终太常丞处约登进士第为临涣主簿再迁
大理评事知吴县时王禹偁知长洲与为唱酬人多传诵后并召赴阙太宗自定题以试
之以禹偁为右拾遗处约著作郎皆直史馆会下诏求
讷言处约奏顷闻以三司为邦计所属簿书既广网条实繁欲置十二员判官兼领其职
臣以为三司之制非古莫若复尚书都省故事其尚书

丞郎正郎员外郎主事令史之属请依六典旧仪以今三司钱刀粟帛筦榷支度之事均在二十四司如此则各有司存可以责其集事矣受诏荆湖路巡抚欲以苛察立名所奏劾甚众官吏多被黜责淳化三年卒处约有词采而急于进用时论以此薄之有文集十卷曰东观集王禹偁为之序苏易简表上之诏付史馆蜀士又有严储者太平兴国中进士后直史馆使河北督军粮陷于契丹

△安德裕

安德裕字益之一字师皋河南人父重荣晋成德军节度使德裕生于真定未朞重荣举兵败乳母抱逃水窦中为守兵所得执以见军校秦习习与重荣有旧匿之因姓秦氏既长博贯文中精于礼传习卒德裕行三年服然后还本姓习家尽以橐装与之德裕欲之曰斯秦氏之蓄于我何有丈夫当自树功名以取富贵岂屑于他人所有耶开宝二年擢进士甲科归州军事推官历大理寺丞著作佐郎太平兴国中累迁秘书丞知广济军时军城新建德裕作军记及图经三卷俄改太常博士八年通判秦州就知州事雍熙初迁主客员外郎宰相李昉言其有史才即以本官直史馆端拱初改金部员外郎淳化初知开封县会备三馆职改直昭文馆三年春廷试贡士德裕与史馆修撰梁周翰并为考官帝顾宰相曰此皆有闻之士而老于郎署周翰狭中德裕嗜酒朕闻其能改矣遂并赐金紫迁司勋员外郎至道三年转金部郎中出知睦州还判太府寺咸平五年卒德裕性介洁以风鉴自负王禹偁孙何初游词场德裕力为延誉及领考试何又其首选有集四十卷

△钱熙

钱熙字大雅泉州南安人父居襄陈洪进署清溪令熙幼颖悟及长博贯羣籍善属文洪进嘉其才以弟之子妻之将署熙府职辞不就着楚雁赋以见志寻辟为巡官专掌笺奏洪进归朝熙不叙旧职以进士甲科补度州观察推官代还寇准掌吏部选上封荐钱若水陈充王扶洎熙皆有文得试中书迁殿中丞直史馆熙尝与杨徽之言及张洎钱若水将被进用熙与刘昌言同乡里相亲善又语及其事昌言因以语洎洎疑熙交构诉之熙坐削职通判郎州徙衡州就改太常博士真宗即位迁右司谏通判杭州政多专达为转运使所奏徙越州熙负气好学精笔札狷躁务进自罢职因愤恚成疾咸平三年卒尝拟古乐府着杂言十数篇及措刑论为识者所许有集十卷子蒙吉亦进士及第

钦定续通志卷五百五十八

●钦定续通志卷五百五十九 文苑传六

- 5416 -

文苑传

宋【三】

○宋三

陈充 吴淑【舒雅】 黄夷简【卢稹谢炎 许洞】 句中
正【孙逢吉 林罕】 曾致尧 刁衍
姚铉 李建中 洪湛 路振 崔遵度 陈越

陈充

吴淑

黄夷简

句中正【孙逢吉 林罕】

曾致尧

刁衍

姚铉

李建中

洪湛

路振

崔遵度

陈越

△陈充

陈充字若虚益州成都人雍熙中天府礼部奏名皆为进士之冠廷试擢甲科释褐孟州观察推官就改掌书记会寇准荐其文学得召试授殿中丞出知明州入为太常博士直昭文馆累迁兵部员外郎景德中与赵安仁同知贡举历工部刑部郎中大中祥符六年以足疾不任朝谒出权西京留守御史台旋以本官分司卒充词学典赡性旷达澹于荣利自号中庸子弟颇熟其名以疾故不登词职有集二十卷

△吴淑

吴淑字正仪润州丹阳人父文正仕吴至太子中允淑幼俊爽属文敏速韩熙载潘佑深器重之在江南举进士擢高第补丹阳尉久之以校书郎直内史【按淑举南唐进士史传不载今据东都事畧辑】从李煜归朝久不得调俄以近臣荐试学士院授大理评事预修太平御览太平广记文苑英华历太府寺丞著作佐郎始置秘阁以本官充校理尝作事类赋百篇以献诏令注释淑分注成三十卷止之迁水部员外郎至道二年兼掌起居舍人事预修太宗实录再迁职方员外郎时诸路所上闰年图皆仪鸾司掌之淑上言曰天下山川险要皆王室之秘奥

国家之急务故周礼职方氏掌天下图籍汉祖入关萧何数秦籍由是周知险要请以今
闰年所纳图上职方又州郡地理犬牙相入向者独画
一州地形则何以傅合他郡望令诸路转运使每十年各画本路图一上职方从之咸平
五年卒淑性纯静好古词学典雅初曹彬围建业城中
乏食里闰有与淑同宗者举家皆歿惟存二女孩淑即收养如所生及长嫁之时论多其
义善笔札好篆籀取说文有字义者千八百余条撰说
文互义三卷又着江淮异人录三卷秘阁闲谈五卷及卷十卷子安节让夷遵路皆进士
及第遵路见循吏传

舒雅

舒雅

舒雅字子正久仕李氏江左平为将作监丞后充秘阁校理好学善属文与吴淑齐
名累迁职方员外郎求出得知舒州仍赐金紫恬于荣
宦州之潜山灵仙观有神仙胜迹邵秩满即请掌观事东封就加主客郎中改直昭文馆
转刑部在观累年优游山水吟咏自乐时人美之卒弟
雄端拱二年进士

△黄夷简

黄夷简字明举福州人少好学有名江东仕吴越为明州判官太平兴国初随钱俶
来朝授检校秘书少监元帅府掌书记八年俶辞元帅
改授夷简淮海国王府判官雍熙四年俶改封许王出镇南阳加夷简仓部员外郎充许
王府判官俶薨归朝为考功员外郎累迁都官郎中掌
名表人颇称其得体屋道二年直秘阁判吏部南曹咸平中召试翰林迁光禄少卿景德
中夷简被病告满二百日御史台言当除籍真宗以其
吴越旧僚有词学且年老母在特命绩其月廩大中祥符初迁秘书少监三年丁内艰归
帝欲不绝其奉给特授检校秘书监平江军节度副使
踰年卒夷简喜谈论善属文尤工诗咏老而不辍时又有卢稹谢炎许洞皆以文名

卢稹

谢炎

许洞

卢稹

卢稹字淑微杭州人幼颖悟七岁能诗及长晓五经大义尤嗜周易孟子端拱初游
京师时徐铉以宿儒为士子所宗览稹交甚奇之是年
登进士第调补真定束鹿主簿至府值契丹围城未及赴官卒尝着五帝皇极志孺子问
翼圣书数十篇

谢炎

谢炎字化南苏州嘉兴人慕韩柳为文与卢稹齐名时称卢谢稹■〈卜 巽〉懦炎
劲急殊相厚善端拱初举进士调补昭应主簿徙伊阙
连知华容公安二县卒集二十卷

许洞

许洞字洞天苏州吴县人洞性疏隽幼习弓矢击刺之伎及长折节功学尤精左氏
传咸平三年进士解褐雄武军推官尝诣府白事有卒
踞坐不起即杖之时马知节知州洞又移书责知节知节怒其不逊会洞辄用公钱奏除
名归吴中数年日以酣饮为事景德二年献所撰虎铃
经二十卷应洞识韬畧运筹决胜科以负谴报罢就除均州参军大中祥符四年祀汾阴
献三盛礼赋召试中书改乌江县主簿卒有集一百卷
又着春秋释幽五卷演玄十卷 【按宋史此下附徐铉及弟锴传今改附载记此处从删
】

△句中正 【孙逢吉 林罕】

句中正字坦然益州华阳人孟昶时馆于其相毋昭裔之第昭裔奏授崇文馆校书
郎复举进士及第累为昭裔从事归朝补曹州录事参
军汜水令又为潞州录事参军中正精于字学古文篆隶行草无不工太平兴国二年献
八体书太宗素闻其名召为著作佐郎直史馆被诏详
定篇韵四年命副张洎为高丽加恩使还迁左赞善大夫改著作郎与徐铉重校定说文
太宗嘉赏因问中正凡有声无字有几何中正退条为
一卷以献帝曰朕亦得二十一字可并录之时又命与著作佐郎吴铉大理寺丞杨文举
同撰定雍熙广韵中正先以门类上进面赐绯鱼俄加
太常博士广韵成拜虞部员外郎淳化元年改直昭文馆三迁屯田郎中尝以大小篆八
分三体书孝经摹石咸平三年表上之赐金紫命藏于
秘阁时干州献古铜鼎状方而四足上有古文二十一字人莫能晓命中正与杜镐详验
以闻援据甚悉五年卒中正喜藏书家无余财子希古
希仲并进士及第蜀人又有孙逢吉林罕逢吉尝为蜀国子毛诗博士检校刊刻石经罕
亦善文字学尝着说文二十篇目曰林氏小说刻石蜀
中

△曾致尧

曾致尧字正臣抚州南丰人太平兴国八年进士解褐符离主簿梁州录事参军三
迁著作佐郎直史馆改秘书丞出为两浙转运使尝上
言去岁所部秋租惟湖州一郡督纳及期而苏常润三州悉有逋负请各按赏罚太宗以
江淮频年水灾苏常特甚所言刻薄不可行诏戒致尧
毋扰俄徙知寿州转太常博士致尧性刚率好言事前后屡上章奏辞多激讦真宗即位

迁主客员外郎判盐铁句院张齐贤荐其材任词职命
翰林试制诰既以舆议未允而罢李继迁扰西鄙灵武危急命张齐贤为泾原邠宁环庆
等州经畧使选致尧为判官仍迁户部员外郎既受命
因抗疏自陈愿不受章绂之赐词旨狂躁诏鞫其罪黜为黄州副使未几复旧官改吏部
员外郎历知泰泉苏扬鄂五州大中祥符初迁礼部郎
中坐知扬州日冒请一月奉降掌升州榷酤转户部郎中五年卒致尧颇好纂录所著有
仙鳧羽翼广中台志清边前要西陲要纪为臣要纪子
易从易占皆登进士第

△刁衍

刁衍字符宾升州人父彦能仕南唐为召武军节度使衍用荫为秘书郎集贤校理
赐五品服以文翰入侍李煜令直清辉殿阅中外章奏
金陵平从煜归宋太祖赐绯鱼授太常寺太祝称疾假满屏居犇下者数岁太平兴国初
李昉扈蒙在翰林勉其出仕因撰圣德颂辞之诏复本
官出知桐庐县会诏羣臣言事衍上书言古者投奸凶于四裔今远方囚人尽归京阙以
配务役最非其宜且神皋胜地天子所居丰使流囚于
此聚役自今外处罪人望勿许解送上京亦不留于诸务充役再迁大理寺丞献文四十
篇召试授殿中丞通判湖州上疏请定天下酒税额修
郡县城隍条约牧宰除两浙丁身钱禁汙水流尸凡五事俄知婺州迁国子博士会考校
百官殿最衍以无过得知光州就改虞部员外郎转运
使状其政绩徙知庐州真宗即位迁比部员外郎尝上疏曰陛下纘图兹始布政惟新所
宜上顺天心下从人欲进善以去恶避毁而求誉私尝
无及于小人私罚无施于君子任贤勿贰去邪勿疑开谏诤之门塞谗佞之口爱而知其
恶憎而知其善无以春秋鼎盛而耽于逸游无以血气
方刚而惑于声色若太祖之勤俭若太宗之惠慈答天地敷锡之意保祖宗艰难之业则
周成汉文三宗之美不可同年而拟议也代还献所著
本说十卷得以本官充秘阁校理出知颍州入为比部员外郎改直秘阁判三司开拆司
预修册府元龟加主客郎中求领外任得知湖州转刑
部郎中岁满复预编修大中祥符六年书成授兵部郎中卒衍恬于禄位善谈笑交道敦
笃士大夫多推重之子湛湜渭皆登进士第湛子绎约
天圣中并进士及第

△姚铉

姚铉字宝之庐州合肥人太平兴国八年进士甲科解褐大理评事知潭州湘乡县
三迁殿中丞通判简宣升三州淳化五年直史馆侍宴
内苑应制赋赏花钓鱼诗特被嘉赏至道初迁太常丞充京西转运使历右正言右司谏

河东转运使上言曰伏见诸路官吏或强明莅事老爱及民者则必立条教除其烦扰然狡胥之辈非其所便候其罢官悉藏记籍害公蠹政莫甚于此欲望所在官吏有经画利济事可长久者岁终书历受代日录付新官俾之遵守若事有灼然匪便听上闻俟报改正诏从之咸平三年河决郢州王陵埽以铉知州事徙州于汶阳乡之高原委以营度许便宜从事工毕加起居舍人京东转运使徙两浙路铉隼爽尚气薛映知杭州与之不协事多矛盾映摭铉罪状密以闻诏使劾之当夺一官特除名贬连州文学大中祥符五年会赦移兵州又移舒州俄授本州岛团练副使天禧四年卒铉文词敏丽善聿札藏书至多颇有异本两浙课吏写书亦薛映所掎之一事虽被窜斥犹佣夫荷担以自随有集二十卷又采唐人文章纂为百卷目曰文粹卒后子嗣复以其书献诏藏内府授嗣复永城主簿幼子称俊颖善属辞裁十岁卒铉纪其事为聪悟录人多传之

△李建中

李建中字得中其先京兆人建中幼好学十四丁外艰会蜀平侍母居洛阳聚学以自给携文游京师为王佑所延誉太平兴国八年进士甲科解褐大理评事为岳州录事参军转运使李惟清荐其能再迁著作佐郎监潭州茶场改殿中丞历通判道郢二州柴成务领漕运再表称荐转太常博士时言事者多以权利进建中表陈时政利害序王霸之畧太宗嘉赏引对便殿赐以绯鱼会考课京朝官建中旧坐公累罚金漏其事坐降授监中丞监在京榷易务苏易简于太宗前论蜀中文士因及建中太宗亦素知之命直集贤院出为两浙转运副使历通判河南府知曹解颖蔡四州景德中进金部员外郎建中性简静恬于荣利前后三求掌西京留司御史台爱洛中风土遂居之加司封员外郎工部郎中素善修养术会命官校定道藏建中预焉又判太府寺 【按东都事畧作太常寺谨识】大中祥符六年卒建中善书札行笔尤工多构新体草隶篆籀八分俱妙尝手写郭忠恕汗简集以献皆科斗文字有诏嘉奖好古勤学多藏古器名画有集三十卷子周道周士周民周道周士并进士及第

△洪湛

洪湛字惟清升州上元人幼好学五岁能为诗未冠录所著十卷为韶年集举进士有声雍熙二年廷试已落复试擢真高等解褐归德军节度推官召还授右拾遗直史馆端拱初通判寿许二州还朝与左正言尹黄裳冯拯右正言王世则宋沆伏合请立许王元僖为储贰词意狂

率太宗怒坐削职出知容州容之戍卒有谋窃发者湛侦知亟斩之再迁比部员外郎知
郴舒二州咸平二年召还命试舍人院复直史馆是秋
命与合门只候韩绍辉使荆湖按视民事条奏利病甚众还判三司都磨勘司又与王钦
若同知贡举未几同修起居注时议城绥州与合门只
候程顺奇同往按视湛言城之利有七而害有二遂诏营葺终以劳人罢之湛俊辨有材
干凡五使西北议边要真宗有意擢任顾遇甚厚曲宴
苑中赋赏花钓鱼诗不移晷以献深被褒赏五年春有河阴民常德方讼临津尉任懿纳
贿登第事下御史台鞫得懿歛云因僧仁雅惠泰赂主
司王钦若钦若方被宠顾乃诏翰林侍读学士邢昺内侍副都知阎承翰等就太常寺别
鞫懿易歛云有妻兄张驾举进士识湛懿亦与驾同造
湛门尝以石榴二百枚木炭百秤馈之懿之输银但凭二僧达一主司实不知谁何乃以
为湛纳其银湛适使陕西中途召还时张驾已死无与
左证遂以湛受银法当死特诏削籍流儋州初王旦与钦若知举出拜枢密副使以湛代
领其事湛之入贡院懿已试第三场毕及官收湛赃家
实无物湛素与梁颙善或假颙白金器乃取以输官六年会赦移惠州至化州调马驿卒
湛时一子偕行甚幼州以闻特诏赐钱二万官为护丧
还扬州因诏命官配流岭外而没者悉给缗钱听其归葬如亲属幼穉者所在遣牙校部
送之湛有集十卷子鼎大中祥符四年进士

△路振

路振字子发永州祁阳人唐相岩之四世孙岩贬死岭外其子琛避地湖湘闲遂居
焉振幼颖悟十二岁而孤母虑其废业日加诲激虽隆
冬盛暑未始有懈淳化中举进士试卮言日出赋独振知所由赋亦典贍太宗甚嘉之擢
寘甲科释褐大理寺评事通判邠州徙徐州召还直史
馆迁太子中允知滨州一日契丹骑至城下兵少民相恐众谓振文吏无战御方畧环聚
而泣振乃亲加抚谕且以敌盛不可与争锋宜坚壁自
守数日契丹引去入判大理寺改太常丞知河中府徙知邓州代还判吏部南曹三司催
欠凭由司景德中使福建巡抚俄判登闻院为国史编
修官大中祥符初使契丹撰乘轺录以献迁左司谏知制诰振文词温丽屡奏赋颂为名
辈所称尤长诗咏从祀醮亳时独直行在专典纶翰笺
奏填委应用无滞七年同修起居注以疾卒录其子纶为太常寺奉礼郎振纯厚无城府
恂恂如也有集二十卷又尝采五代末九国君臣行事
作世家列传书未成而卒

△崔遵度

崔遵度字坚白本江陵人后徙淄州之淄川纯介好学太平兴国八年举进士解褐

和州主簿改临汾馈刍粮三抵绥州转运副使夏侯涛
上其勤状召对因献文时新建秘阁命中书试颂一首擢著作佐郎淳化中吏部侍郎李
至荐之迁殿中丞出知忠州李顺之乱贼遣其党张余
来攻遵度领甲士百余背城而战贼踰堞以入遵度投江中赖州兵援之得免坐失城池
贬崇阳令移鹿邑咸平初复为太子中允景德初内出
遵度名引对崇政殿诏索所著文召武舍人院改太常丞直史馆与路振并为国史编修
官大中祥符元年命同修起居注东封进博士祀汾阴
命为左司谏遵度与物无竞口不言是非淳澹清素于势利泊如也善鼓琴尝着琴箏世
以为知言九年仁宗为寿春郡王命遵度与张士逊并
为王友改户部员外郎赐金紫国史成拜吏部员外郎升邸进封改礼部郎中充咨议参
军储宫建又加吏部兼左谏德未几判司农寺遵度性
寡合喜读易天禧四年卒其子拜官者二人仁宗即位特诏赠工部侍郎又授其二孙官
有集二十卷

△陈越

陈越字损之开封尉氏人少好学尤精历代史善属文辞气俊拔咸平中诏举贤良
荆部侍郎郭贽荐之策入第四等解褐将作监丞通判
舒州徙端州袁州未几召还迁著作佐郎直史馆预修册府元龟与陈从易刘筠尤为勤
职车驾朝陵掌留司名表时称为工自是两府笺奏多
命草之祀汾阴擢为左正言越耿槩任气喜箴切朋友放旷杯酒闲家徒壁立不以屑意
然嗜酒过差每食必先自变量升用是遘疾大中祥符五
年卒故事中书章奏皆舍人为之东封后朝廷多庆礼舍人或以他务所婴乃择馆阁官
得盛度路振刘筠夏竦宋绶洎越分撰表奏宰相尝以
名闻其后皆相次掌外制唯越不及登擢时论惜之

钦定续通志卷五百五十九

●钦定续通志卷五百六十 文苑传七

文苑传

宋 【四】

○宋四

穆修	石延年【刘潜	李冠】	萧贯	苏舜钦	尹源
黄亢	黄鉴	杨蟠	颜太初		
穆修					
石延年					
萧贯					
苏舜钦					

尹源

黄亢

黄鉴

杨蟠

颜太初

△穆修

穆修字伯长郢州人幼嗜学不事章句【按东都事畧云修师事陈搏而传其易史传不载谨附识】真宗东封诏举齐鲁经行之士修

预选赐进士出身调泰州司理参军负才与众齟齬通判忌之使人诬告其罪贬池州中道亡至京师叩登闻鼓诉冤不报取贬所岁余遇赦得

释迎母居京师久之补颍州文学参军徙蔡州明道中卒修性刚介好论斥时病诋诮权贵人欲与交结往往拒之张知白守亳亳有豪士作佛

庙成知白使人召修作记记成不书士名士以白金五百遗修为寿且求载名于记修投金庭下趣装去郡士谢之终不受且曰吾宁餬口为旅

人终不以匪人污吾文也宰相欲识修且将用为学官修终不往见【按东都事畧云初丁谓与修有布衣旧修每轻之谓既显而修尚未仕

相遇于汉上一揖而去谓衔之真宗尝问侍臣穆修有文公卿何以不荐谓对云修行不逮文乃已史传不载谨附识】母卒自负槨以葬自五

代文敝宋初柳开始为古文其后杨亿刘筠尚声偶之辞学者靡然从之修于是时独以古文称苏舜钦兄弟多从之游修虽穷死然一时士大

夫称能文者必曰穆参军庆历中祖无择访得所著诗书序记志等数十首集为三卷

△石延年

石延年字曼卿先世幽州人晋以幽州遗契丹其祖举族南走家于宋城延年为入跌宕任气节读书通大畧为文劲健于诗最工而善书

累举进士不中真宗录二举进士以为三班奉职延年耻不就张知白素奇之谓曰母老乃择禄耶延年不得已就命后以右班殿直改太常寺

太祝知金乡县有治名以荐通判干宁军徙永静军还为大理评事馆阁校勘历光禄大理寺丞上书章献太后请还政天子太后崩范讽欲引

延年延年力止之后讽败延年坐与讽善落职通判海州久之为秘阁校理迁太子中允同判登闻鼓院尝上言天下不识战三十余年请为二

边之备不报及元昊反始思其言召见稍用其说命往河东籍乡兵得十数万时边将遂欲以扞敌延年笑曰此得吾粗也夫不教之兵勇怯相

杂若怯者见敌而动则勇者亦牵而溃矣今既不暇教宜募其敢行者则人人皆胜兵也又尝请募人使唃廝囉及回鹘举兵攻元昊帝嘉纳之

延年喜剧饮尝与刘潜造王氏酒楼对饮终日不交一言至夕无酒色相揖而去明日都下传王氏酒楼有二仙来饮已乃知刘石也延年虽酣放然与人论天下事是非无不当初与天章阁待制吴遵路同使河东及卒遵路言于朝官其一子

刘潜 【李冠】

刘潜 【李冠】

刘潜字仲方曹州定陶人少卓逸有大志好为古文以进士起家为淄州军事推官尝知蓬莱县代还过郓州闻母暴疾亟归母卒潜一恸遂绝其妻复抚潜大号而死时人伤之曰子死于孝妻死于义同寺以文学称京东者齐州历城有李冠举进士不第得同三礼出身调干宁主簿卒有东皋集二十卷

△萧贯

萧贯字贯之临江军新喻人俊迈能文尚气槩举进士甲科为大理评事通判安宿二州迁太子中允直史馆仁宗即位进太常丞同判礼部历京东转运使时提举捉贼刘舜卿善捕盗号刘铁弹恃功为不法前后畏其凶悍莫敢治贯至发之废为民徙江东改知洪州累迁尚书刑部员外郎坐前使江东失察所部吏受赇降知饶州有抚州司法参军孙齐者初以明法得官以其妻杜氏留里中而给娶周氏入蜀后周欲诉于官齐断发誓出杜氏久之又纳倡陈氏挈周所生子之抚州未踰月周氏至齐摔置庶下出伪券曰若佣婢也敢尔邪乃杀其所生子周诉于州及转运使皆不受人或告之曰得知饶州萧使君者诉之事当白矣周氏以布衣书姓名乞食道士奔告贯抚非所部而贯特为治之更赦犹编管齐濠州迁兵部员外郎召还将试知制诰未及而卒贯临事敢为不苟合于时初感疾梦绿衣中人召至帝所赋禁中晓寒歌词语清丽人以比唐李贺

△苏舜钦

苏舜钦字子美参知政事易简之孙父耆有才名尝为工部郎中直集贤院舜钦少慷慨有大志天圣中学者为文多务对偶独舜钦与穆修好为古文歌诗初以父任补太庙斋郎调茱阳县尉玉清昭应宫灾舜钦时年二十一诣登闻鼓院上疏曰臣观今岁自春徂夏霖雨阴晦未尝少止农田被菑者几于十九臣以为任用失人政令多过赏罚弗中之所召也天之降灾欲悟陛下而大臣归咎于刑狱之滥陛下听之故肆赦天下以为禳救如此则是杀人者不死伤人者不抵罪而欲以合天意也古者断决滞讼以平水旱不闻用赦故赦下之后阴雨及今前志曰

积阴生阳阳生火灾见焉乘夏之气发泄于玉清宫震雨杂下烈焰四起楼观万迭数刻而尽非慢于火备乃天之垂戒也陛下掌降服减膳避正寝责躬罪己罢非业之作拯失职之民察辅弼及左右无裨国体者罢之窃弄权威者去之庶几变灾为祐浹日之闲未闻为此而将计工役以图修复都下之人闻者骇惑聚首横议咸谓非宜今为陛下计莫若求吉士去佞人修德以勤至治使百姓足给而征税宽减则可以谢天意而安民情矣臣又按五行志贤佞分别官人有叙率由旧章礼重功勋则火得其性若信道不笃或耀虚伪逸夫昌邪胜正则火失其性愿陛下拱默内省而追革之罢再造之劳述前世之法天下之幸也又上书曰臣覩乙亥诏书戒越职言事播告四方无不惊惑往往窃议恐非出陛下之意盖陛下即位以来屡诏羣下勤求直言使百僚转对置匭函设直言极谏科今诏书顿异前事岂非大臣壅蔽陛下聪明杜塞忠良之口不惟亏损朝政实亦自取覆亡之道夫纳善进贤宰相之事蔽君自任未或不亡今谏官御史悉出其门但希旨意即获美官多士盈庭噤不得语陛下拱默何由尽闻天下之事乎前孔道辅范仲淹刚直不挠正位台谏后虽改他官不忘献纳二臣者非不知缄口数年坐得卿辅盖不敢负陛下委任之意而皆罹中伤窜谪而去使正臣夺气鲠士咋舌昔晋侯问叔向曰国家之患孰为大对曰大臣持禄而不极谏小臣畏罪而不敢言下情不能上通此患之大者国家班设爵位列陈豪英固当责其公忠安可教之循默望陛下发德音寝前诏勤于采纳下及刍蕘可以常守隆平保全近辅寻举进士改光禄寺主簿知长垣县迁大理评事监在京店宅务康定中河东地震舜钦诣匭上疏曰臣闻河东地大震裂涌水坏屋庐城堞损民物几十万历旬不止窃思妖祥之兴神实尸之各以类告未尝妄也岂王者安于逸豫信任近臣而不省政事乎庙堂之上有非才苟禄窃弄威福而侵上事者乎又岂设施之政有不便民者乎深宫之中有阴教不谨以媚道进者乎臣从远方来不知近事心疑而口不敢道也孟春之初雷震暴作陛下发明诏许羣臣皆得献言旬月闲颇有言事者其闲岂无切中时病而未闻朝廷举而行之是亦收虚言而不根实效也臣闻唯诚可以应天唯实可以安民今应天不以诚安民不以实徒布空文增人太息耳将何以谢神灵而救弊乱也臣窃见纪纲隳败政化阙失其事其众不可槩举谨条大者二事以开一曰正心夫治国如治家治家者先修己修己者先正心心正则神明集而万务理今民闲传陛下比年燕乐踰节赐子过度燕乐踰节则荡赐子过度则侈荡则政事不亲侈则用度不足臣窃观国史见祖宗日视朝旰昃方罢犹坐

于后苑门有白事者立得召对委曲询访小善必纳今陛下隔日御殿此政事不亲也又
府库匱竭民鲜盖藏诛敛科率殆无虚日计度经费二十倍于祖宗时此用度不足也政事不亲用度不足诚国大忧臣望陛下修己以御人洗
心以鉴物勤听断舍燕安放弃优谐近习之纤人亲近
刚明鲠直之良士因此灾变以思永图则天下幸甚其二曰择贤夫明主劳于求实而逸
于任使然盈庭之士不须尽择在择一二辅臣及御史
谏官而已陛下用人尚未慎择昨王随自吏部侍郎迁门下侍郎平章事超越十资复为
上相此乃非常之恩必待非常之才而随虚庸邪谄非
辅相之器降麻之后物论沸腾石中立顷在朝行以诙谐自任士人或有晏集必置席闲
听其语言以资笑噱今处之近辅不闻嘉谋物望甚轻
人情所忽盖近臣多非才者陛下左右尚如此天下官吏可知也实恐远人轻笑中国宜
即行罢免别选贤才又张观为御史中丞高若讷为司
谏二人者皆登高第颇以文词进而温和软懦无刚鲠敢言之气斯皆执政引拔欲其慎
默不敢举扬其私时有所言则必暗相关说旁人窥之
甚可笑也故御史谏官之任臣欲陛下亲择之不令出执政门下台谏官既得其人则近
臣不敢为过乃馭下之策也陛下身既勤俭辅弼台谏
又皆得人则天下何忧不治灾异何由而生惟陛下少留意焉范仲淹荐其才召试为集
贤校理监进奏院舜钦取宰相杜衍女衍与仲淹富弼
在政府多引用一时闻人欲更张庶事御史中丞王拱辰等不便其所为会进奏院祠神
舜钦与右班殿直刘巽辄用鬻故纸公钱召妓乐会宾
客拱辰廉得之讽其属鱼周询等劾奏因欲摇动衍事下开封府劾治于是舜钦与巽俱
坐自盗除名同时会者皆知名士因缘得罪逐出四方
者十余人世以为过薄而拱辰等方自喜曰吾一举网尽矣舜钦既放废寓于吴中买水
石作沧浪亭益读书以歌诗自适善草书每酒酣落笔
争为人所传后二年得湖州长史卒妻杜氏有贤行兄舜元字子翁 【东都事畧作才翁】
为人精悍任气节为歌诗亦豪健尤善草书舜钦
不能及官至尚书度支员外郎三司度支判官 【东都事畧云仕至转运使】

△尹源

尹源字子渐洙之兄也少博学强记与洙皆以文学知名洙议论明辨果于有为源
自晦不矜饰有所发即过人初以祖荫补三班借职稍
迁殿直举进士为奉礼郎累迁太常博士通判泾州时知沧州刘涣坐专斩部卒降知密
州源上书言涣为主将部卒有罪不伏笞辄呼万岁涣
斩之不为过以此谿涣臣恐边兵愈骄轻视主将所系非轻也涣遂获免尝作唐说及叙
兵十篇上之赵元昊寇定川堡葛怀敏发泾原兵救之

源是时通判庆州遗怀敏书曰贼举国而来其利不在城堡而兵法有不得而救者宜驻兵瓦亭择利而后动怀敏不听以败范仲淹韩琦荐其才召试学士院源素不喜赋请以论易赋主赋者方以赋进不悦其言第其文下除知怀州卒

△黄亢

黄亢字清臣建州浦城人母梦星陨于怀掬而吞之遂有娠少奇颖过人年十五以文谒翰林学士章得象得象奇之游钱塘以诗赠处士林逋逋尤激赏时王随知杭州秦禁西湖为放生池亢作诗数百言以奉士人争传之亢为人野率如不能言然嗜学强记文词奇伟卒乡人类其文为十二卷号东溪集

△黄鉴

黄鉴字唐卿与亢同乡里少敏慧过人举进士补桂阳监判官为国子监直讲同郡阳亿善其文词延置门下由是知名累迁太常博士为国史院编修官尝诏馆阁官后苑赏花而鉴特预召国史成擢直集贤院以母老出通判苏州卒

△杨蟠

杨蟠字公济章安人也举进士为密和二州推官欧阳修称其诗苏轼知杭州蟠通判州事与轼倡酬居多平生为诗数千篇后知寿州卒

△颜太初

颜太初字醇之徐州彭城人颜子四十七世孙少博学有隼才慷慨好义喜为诗文宣公孔圣佑卒无子除袭封且十年是时有医许希以针愈仁宗疾拜赐巴西向拜扁鹊曰不敢忘师也帝为封扁鹊神应侯立祠城西太初作许希诗指圣佑事以讽在位又致书参知政事蔡齐齐为言于帝遂以圣佑弟袭封山东人范讽石延年刘潜之徒喜豪放剧饮后生多慕之太初作东州逸赏诗孔道辅深器之太初中进士后为莒县尉因事忤转运投劾去久之补闾中主簿时范讽以罪贬同党皆坐斥齐与道辅荐太初上其尝所为诗召武中书言者以为此嘲讥之词遂改临晋主簿前此有太常博士宋武通判同州与守争事恚死守憾之摺构其子以罪发狂亦死父子寓骨僧舍时守方贵显无敢为直冤太初因事至同州葬武父子苏舜钦表其事于墓左后移应天府户曹参军南京国子监说书卒著书号洙南子所居在鳧绎两山闲号鳧绎处士有集十卷淳耀联英二十卷子复元佑中为中书舍人兼国子祭酒自有传

钦定续通志卷五百六十

●钦定续通志卷五百六十一 文苑传八

- 5428 -

文苑传

宋【五】

○宋五

梅尧臣

江休复

苏洵

章望之

王逢

孙唐卿

黄庠

杨寘

唐庚【伯虎】

文同

杨杰

贺铸

刘涇

鲍由

黄伯思

梅尧臣

江休复

苏洵

章望之

王逢

孙唐卿

黄庠

杨寘

唐庚【唐伯虎】

文同

杨杰

贺铸

刘涇

鲍由

黄伯思

△梅尧臣

梅尧臣字圣俞宣州宣城人侍读学士洵从子也工为诗深远古淡闲出奇巧初未为人所知用洵荫为河南主簿【东都事畧作以荫补斋郎】钱惟演留守西京特嗟赏之为忘年交引与酬唱一府尽倾欧阳修自谓不及尧臣益刻励精思苦学繇是知名尝语人曰凡诗必能状难写之景如在目前含不尽之意见于言外然后为至也世以为知言厯知建德襄城县令书忠武镇安判官大臣屡荐宜在馆阁召试赐进士出身为国子监直讲累迁尚书都官员外郎预修唐书成未奏而卒录其子一人宝元嘉佑中仁宗有事郊庙尧臣预祭辄献歌诗又尝上书言兵法撰唐载记毛诗小传孙子注宛陵集尧臣喜饮酒与物无忤贤士大夫多从之游其诗晚益工有人得西南夷布弓衣其织文乃尧臣诗云

△江休复

江休复字邻几开封陈留人少强学博览为文淳雅尤长于诗善隶书喜琴奕饮酒不以声利为意进士起家为桂阳监蓝山尉 【东都事畧作蓝田尉】 骑驴之官每据鞍读书至迷失道举书刊拔萃改大理寺丞迁殿中丞献其所著书召试为集贤校理判尚书刑部与苏舜钦游坐预进奏院祠神会落职监蔡州商税久之知奉府县通判睦州徙庐州复集贤校理累迁尚书刑部郎中卒休复外简旷而内行甚饬事孀姑如母所与游皆一时豪俊为政简易尝言昭宪太后子孙多流落民闲宜甄录之着唐宣鉴春秋世论及文集

△苏洵

苏洵字明允眉州眉山人年二十七始发愤为学岁余举进士又举茂才异等皆不中悉焚常所为文闭户益读书遂通六经百家之说下笔顷刻数千言至和嘉佑闲与其二子轼辙皆至京师翰林学士欧阳修上其所著书二十二篇既出土大夫争传之一时学者竞效苏氏为文章所著权书衡论机策宰相韩琦见而善之奏于朝召试舍人院辞疾不至遂除秘书省校书郎是时王安石名始盛欧阳修劝洵与之游而安石亦愿交洵曰吾知其人矣是不近人情者鲜不为天下患乃作辨奸论后十年而安石用事其言乃信 【是时王安石名始盛以下据东都事畧增】 洵既除官会太常修纂建隆以来礼书乃以为霸州文安县主簿与陈州项城令姚辟同修礼书为太常因革礼一百卷洵晚而好易曰易之道深矣泊而不明者诸儒附会之说乱之也作易传书未成而卒 【洵晚而好易至此据东都事畧增】 有文集二十卷溢法三卷子轼辙自有传

△章望之

章望之字长民建州浦城人少孤喜问学为文辩博长于议论初由伯父得象荫为秘书省校书郎监杭州茶库逾年辞疾去求举贤良方正得象在相位以嫌扼之乃上书论时政凡万余言不报丁母忧毁瘠过制服除浮游江淮闲以营衣食人劝之仕不应也兄拱之知晋江县忤其守守诬以赃坐贬望之诉于朝久不得直章十余上朝廷为再劾卒服拱之冤复官如初望之遂不复仕翰林学士欧阳修韩绛知制诰吴奎刘敞范镇同荐其才除佾书建康军节度判官不赴又除知乌程县趣令受命固辞遂以光禄寺丞致仕卒望之喜议论宗孟子言性善排荀卿扬雄韩愈李翱之说救性七篇欧阳修论魏梁为正统望之以为非着明统三篇江南人李覯着礼论谓仁义智信乐刑政皆出于礼望之订其说着礼论尝北游齐赵南汎湖湘西至汧陇东极吴会山水胜处无所不历有歌诗杂

文数百篇集为三十卷

△王逢

王逢字会之太平州当涂人其四世祖居岩仕唐为骁卫长史遭乱弃官归居青山杨行密据淮南使人以兵迫起之居岩散遣其家人而
以一身归行密授以湖州别驾不遣一日行密大会失居岩亟使人掩其家无一人在者
后有人于嵩山见空石室询其旁或云有道人王居岩
居此去而莫知其所终逢博学能属文尤长于讲说少举进士不中教授苏州学者尝数
百人晚始登第补南雄州军事判官归为国子监直讲
兼陇西郡王宅教授李玮从学事之甚谨岐国公主既降玮为逢求迁官且有命逢辞不
受久之以太常博士通判徐州卒逢为人乐易笃于朋
友与胡瑗最善喜著书有易传十卷干德指说一卷复书七卷妻陈氏亦有贤行无子

△孙唐卿

孙唐卿字希元青州人少有学行年十七以书谒韩琦琦甚器之中进士第通判陕
州于吏事若素习民有母再适人而死及葬其父痛母
之不得祔盗母之丧而同葬之有司谕以法唐卿时权府事乃曰是知有孝而不知有法
尔释之以闻未几丁父忧毁瘠呕血而卒诏赙其家

△黄庠

黄庠字长善洪州分宁人博学强记超敏过人初至京师就举国子监开封府礼部
皆为第一比引试崇政殿以疾不得入天子遣内侍即
邸舍抚问赐以药剂是时庠名声动京师所作程文传诵天下归江南五年以疾卒

△杨寘

杨寘字审贤察之弟少有隼才庆历二年举进士试国子监礼部皆第一既试崇政
殿帝临轩启封见名喜动于色谓辅臣曰杨寘也遂擢
第一公卿称贺为得人授将作监丞通判颍州未至官持母丧病羸卒特诏赙恤其家先
是其友梦寘作龙首山人寘自谓龙首我四冠多士山
人无禄位之称我其终是乎己而果然

△唐庚 【唐伯虎】

唐庚字子西眉州丹棱人善属文举进士为宗子博士张商英荐其才除提举京畿
常平商英罢相庚亦坐贬安置惠州会赦复官承议郎
提举上清太平宫归蜀道卒庚为文精密通于世务作名治察言闵俗存旧等篇时人称
之有文集二十卷子文若庚兄弟五人长兄瞻字望之
后名伯虎字长孺通易春秋元佑三年其父游泸南伯虎兄弟居母丧于丹山伯虎夜半
蹴庚曰吾梦得父书发之但亟来二字吾父得无他乎
汝奉母奠朝夕吾趋泸南黎明即行至泸南父果病甚见伯虎大惊问其故具告之父叹

曰吾告汝也疾为少闲伯虎侍归居数日疾复作遂卒
元符二年庚以贡举事系狱临印语连入虎并械之对吏逾年掠治无完肤其词确然一
不及庚以故狱久不具卒会赦除之伯虎性真率无威

仪人多易之至是皆大服以为不可及宦游四方每数年一归不过旬日复去后卒于家
△文同

文同字与可梓州梓潼人汉文翁之后蜀人犹以石室名其家同操韵高洁善诗文
篆隶行草飞白文彦博守成都奇之谓如晴云秋月尘
埃不到司马光苏轼尤敬重之轼同之从表弟也同又善画竹初不自贵重四方之人持
缣素请者足相蹶于门同厌之投缣于地骂曰吾将以
为鞿好事者传为口实举进士稍迁太常博士集贤校理知陵州又知洋州元丰初知湖
州明年至陈州宛邱驿忽留不行沐浴衣冠正坐而卒
有丹渊集四十卷行于世

△杨杰

杨杰字次公无为人少有名于时举进士元丰中官太常者数任一时礼乐之事皆
预讨论尝议僖祖为始祖宜以配感生帝又请孝惠贺
后淑德尹后庄怀潘后皆祖宗首纳之后孝庄宋后尝母仪天下宜因慈圣光献崇配之
日升四后神主祔于祖宗庙室由是四后始得升祔神
宗诏秘书监刘几礼部侍郎范镇议乐几请命杰同议杰言大乐七失并图上之神宗下
几镇参定镇不用杰议哲宗即位议乐又用镇说杰复
破镇乐章曲名宫架加磬十六钟磬之非又论镇以黑麦用秬制律铜量叩之不合黄钟
以世无真黍用太府尺为乐尺下旧乐三律镇之乐律
卒不用元佑中为礼部员外郎出知润州除两浙提点刑狱卒有文集二十余卷乐记五
卷

△贺铸

贺铸字方回卫州人孝惠皇后之族孙喜谈当世事可否不少假借虽贵要权倾一
时少不中意极口诋之博学强记尤长于度曲初娶宗
女隶籍右选监太原工作有贵人子同事骄倨不相下铸廉得盗工作物屏侍吏闭之密
室以杖数曰若某时盗某物为某用某时盗某物入于
家然乎贵人子骇伏铸即自杖之自是诸挟势颀颀者皆侧目元佑中李清臣执政奏换
通直郎通判泗州又倅太平州竟以尚气使酒不得美
官悒悒不得志食宫祠禄退居吴下藏书万余卷手自校讎无一字误建中靖国时黄庭
坚自黔中还得其江南梅子之句以为似谢朓其所与
交终始厚者惟信安程俱铸自哀歌词名东山乐府俱为序之尝自言唐谏议大夫知章
之后且推本其初出王子庆忌以庆为姓居越所谓镜

湖者本庆湖也避汉安帝父清河王讳改为贺氏庆湖亦转为镜当时不知何所据铸自号庆湖遗老有庆湖遗老集二十卷

△刘涇

刘涇字巨济简州阳安人举进士王安石荐其才召见除经义所检讨久之为太学博士罢知咸阳县通判莫州成都府除国子监丞历知处虢真坊四州元符末上书召对除职方郎中卒涇为文务奇怪语好进取多为人排斥屡蹶不伸同时有郑少微者字明举成都人与涇俱以文知名而仕不偶

△鲍由

鲍由字钦止 【东都事畧作钦正】 处州龙泉人举进士尝从王安石学又亲炙苏轼故其文汪洋阔肆诗尤高妙徽宗召对除工部员外郎居无何以不合去责监泗州转般仓历河东福建路常平广西淮南转运判官复召为郎以言者罢提点元封观起知明州又知海州复奉祠卒尝注杜甫诗有文集五十卷

△黄伯思

黄伯思字长睿闽之邵武人祖履资政殿大学士父应求饶州司录伯思幼警敏日诵书千余言每听履讲经史退与他儿言无遗误者尝梦孔雀于庭觉而赋以词采甚丽以履任为假承务郎甫冠入太学履将以恩例奏增秩伯恩固辞履奇之元符三年进士高等磁州司法参军历河南府户曹参军治剧不劳而辨秩满留守邓洵武辟知右军巡院伯恩好古文奇字商周秦汉彝器欵识悉能辨正是非道其本末凡字书讨论备尽初淳化中博求古法书命待诏王着续正法帖伯恩病其乖伪庞杂考引载籍咸有依据作刊误二卷由是篆隶正行草章草飞白皆至妙绝又二年除详定九域图志所编修官兼六典检阅文字改京秩以修书恩擢秘书省校书郎迁秘书郎纵观册府藏书自六经及历代史书诸子百家天官地理律历卜筮之说无不精诣凡诏讲明前世典章文物集古器考定真贋以素学与闻议论发明居多踰再考丁外艰宿抱羸瘵因丧尤甚服除复旧职伯恩颇好道家自号云林子别字霄宾及至京梦人告曰子非久人闲上帝有命典司文翰觉而书之不踰月以政和八年卒伯思学问募扬雄诗慕李白文慕柳宗元有文集五十卷翼骚一卷东观余论三卷子诏诒

钦定续通志卷五百六十一

●钦定续通志卷五百六十二 文苑传九

文苑传

宋【六】

○宋六

黄庭坚	晁补之【咏之】	秦观	张耒	陈师道
李廌	刘恕	王无咎	蔡肇	李
格非	吕南公	郭祥正	米芾【友仁】	刘洗
李公麟	周邦彦	朱长文	刘弇	倪涛

黄庭坚

晁补之

秦观

张耒

陈师道

李廌

刘恕

王无咎

蔡肇

李格非

吕南公

郭祥正

米芾【米友仁】

刘洗

倪涛

李公麟

周邦彦

朱长文

刘弇

△黄庭坚

黄庭坚字鲁直洪州分宁人幼警悟读书数过辄成诵舅李常过其家取架上书问之无不通常惊以为一日千里举进士调叶县尉熙宁初举四京学官第文为优教授北京国子监留守文彦博才之留再任苏轼尝见其诗文以为超轶绝尘独立万物之表由是声名始震知太和县以平易治时课颁盐筴诸县争占多数太和独否吏不悦而民安之哲宗立召为校书郎神宗实录检讨官踰年迁著作佐郎【东都事畧著作郎】加集贤校理实录成擢起居舍人丁母艰庭坚性笃孝母病弥年衣不解带及亡庐墓下哀毁得疾几殆除服为秘书丞提点明道

官兼国史编修官绍圣初出知宣州改鄂州章惇蔡卞与其党论实录多诬俾前史官分居畿邑以待问摘千余条示之谓为无验证既而院吏
考阅悉有依据所余才三十二事庭坚书用铁龙爪治河有同儿戏至是首问焉对曰庭坚时官北都尝亲见之直儿戏耳凡有问皆直辞以对
闻者壮之贬涪州别驾黔州安置言者犹以处善地为骖法以亲嫌遂移戎州庭坚泊然不以迁谪介意蜀士从之游讲学不倦徽宗即位起监
鄂州税金书宁国军判官知舒州以吏部员外郎召辞不行丐郡得知太平州罢主管玉
裘观庭坚在河北与赵挺之有微隙挺之执政转运判
官陈举承风旨上其所作荆南承天院记指为幸灾复除名羁管宜州三年徙永州未闻
命而卒庭坚善行草书楷法亦自成一家与张耒晁补
之秦观俱游苏轼门天下称为四学士而庭坚于文章尤长于诗蜀江西之学者以庭坚
配轼故称苏黄轼为侍从时举坚自代其词有瓌玮之
文妙绝当世孝友之行追配古人之语甚重之也初游灞皖山谷寺石牛洞乐其林泉之
胜因自号山谷道人云

△晁补之

晁补之字无咎济州巨野人太子少傅迥五世孙宗悫之曾孙也父端有工诗补之
聪敏强记七岁能属文王安国一见奇之年十七从父
任杭州倅钱塘山川风物之丽着七述以谒通判苏轼轼先欲有所赋读之叹曰吾可以
阁笔矣称其文博辩隽伟必显于世由是知名举进士
试开封及礼部别院皆第一神宗阅其文曰是深于经术者可革浮薄调澧州司户参军
北京国子监教授元佑初以太学正李清臣荐堪馆合
召试除秘书省正字迁校书郎以秘阁校理通判扬州召还为著作佐郎章惇当国出知
齐州羣盗昼掠涂巷补之默得其姓名一日宴客召属
吏以方略授之酒行未竟悉擒以来一府为彻警坐修神宗实录失实降通判应天府毫
州又贬监处信二州酒税徽宗立复以著作郎召迁礼
部郎中 【东都事畧作吏部郎中】 兼国史院编修实录检讨官党论起为谏官管师
仁所论出知河中府修河桥以便民民画像祠之徙知
湖密果州主管鸿庆宫大观末出党籍起知达州改泗州卒补之才气飘逸嗜学不知倦
文章温润典缛尤精楚词论集屈宋以来赋咏为变离
骚等三书安南用兵着罪言一篇大意欲择仁厚勇略吏为五管郡守及修海上诸郡武
备 【按东都事略云补之有鸡肋集一百卷宋史不
载谨附识】 从弟咏之

晁咏之

晁咏之

咏之字之道少有异才以荫入官调扬州司法参军未上时苏轼守扬州补之倅州事以其诗文献轼轼曰有才如此独不令我一识面邪乃具参军礼入谒轼下堂挽而上顾坐客曰奇才也复举进士又举宏词一时传诵其文为河中教授元符末应诏上书论事罢官久之为京兆府司录事秩满提点崇福宫卒有文集五十卷

△秦观

秦观字少游一字太虚扬州高邮人少豪隽慷慨见苏轼于徐为赋黄楼轼以为有屈宋才又介其诗于王安石安石亦谓清新似鲍谢轼勉以应举为亲养登进士第调定海主簿蔡州教授元佑初轼以贤良方正荐于朝除太学博士校正秘书省书籍迁正字兼国史院编修官绍圣初坐党籍出通判杭州以御史刘拯论其增损实录贬监处州酒税使者承风望指候伺过失既而无所得则以谒告写佛书为罪削秩徙郴州继编管横州又徙雷州徽宗立复宣德郎放还至藤州卒有文集四十卷观长于议论文丽而思深弟覲字少章覲字少仪皆能文

△张耒

张耒字文潜楚州淮阴人幼颖异能为文年十七年函关贼已传人口游学于陈学官苏辙爱之因得从轼游轼称其文汪洋冲淡有一唱三叹之声弱冠第进士历临淮主簿寿安尉咸平县丞入为太学录范纯仁以馆阁荐试秘书省正字累迁著作郎史馆检讨擢起居舍人绍圣初请郡以直龙图阁知润州坐尝籍徙宣州谪监黄州酒税徙复州徽宗立起通判黄州知兖州召为太常少卿甫数月出知颍州徙汝州崇宁初复坐党籍落职主管明道宫初耒在颍闻苏轼讣为举哀行服言者以为言遂贬房州别驾安置于黄五年得自便居陈州耒于骚词尤长时二苏及黄庭坚晁补之辈相继歿耒独存士人就学者众其诲人作文以理为主尝着论云自六经以下至于诸子百氏骚人辩士论述大抵皆将以为寓理之具也故学文之端急于明理如知文而不务理求文之工世未尝有也夫决水于江河淮海也顺道而行滔滔汨汨日夜不止冲砥柱绝吕梁放于江湖而纳之海其舒为沧漣鼓为波涛激之为风飙怒之为雷霆蛟龙鱼鳖喷薄出没是水之奇变也水之初岂若是哉顺道而决之因其所遇而变生焉沟渎东决而西谒下满而上虚日夜激之欲见其奇彼其所至者蛙蛭之玩耳江河淮海之水理达之文也不求奇而奇至矣激沟渎而求水之奇此无见于理而欲以言语句读为奇反复咀嚼卒亦无有文之陋也学者以为至言晚岁诗亦务平淡效白居易体而乐府效张籍久于投闲家益贫郡守翟汝文欲为买公田谢不取监南岳庙主管崇

福宫卒建炎初赠集英殿修撰

△陈师道

陈师道字履常一字无己徐州彭城人少而好学苦志年十六以文谒曾巩一见奇之许其以文着留受着熙宁中王氏经学盛行师道心非其说遂绝意进取巩典五朝史事得自择其属朝廷以白衣难之元佑初苏轼傅尧俞孙觉荐其文行用为徐州教授又以梁焘荐除太学博士言者谓尝私至南京见轼改教授颍州又论其进非科第罢归调彭泽令不赴家素贫或终日不炊妻子愠见弗恤也久之召为秘书省正字卒师道高介有节安贫乐道于诸经尤邃诗礼为文精深雅奥喜作诗白云学黄庭坚或谓过之然小不中意辄焚去存者纔十一尝铭黄楼曾巩谓如秦石初游京师踰年未尝一至贵人之门傅尧俞欲识之先以问秦观曰是人非持刺字俛颜色伺候乎公卿之门者殆难致也尧俞曰非所望也吾将见之惧其不吾见也子能介于陈君乎知其贫怀金欲为馈比往见听其论议益敬畏不敢出章惇在枢府将荐于朝亦属观延至师道不可及惇为相又致意焉终不往官颍时苏轼知州事待之绝席欲参诸门弟子闲而师道赋诗有向来一瓣香敬为曾南丰之语其自守如是与赵挺之友壻素恶之适预郊祀行礼寒甚衣无绵妻假于挺之家不肯服遂以寒疾卒

△李廌

李廌字方叔其先自郢徙华廌六岁而孤能自奋立少长以学问称乡里谒苏轼于黄州贄文求知轼谓其笔墨澜翻有飞沙定石之势拊其背曰子之才万人敌也抗之以高节莫之能御矣廌再拜受教而家素贫三世未葬一夕抚枕流涕曰吾忠孝是学而亲未葬何以学为旦而别轼将客游四方以藏其事轼解衣为助又件诗以劝风义者于是不数年尽葬之益闭门读书又数年再见轼轼阅其所著叹曰张耒秦观之流也乡举试礼部轼典贡举遗之赋诗以自责吕大防叹曰有司试艺乃失此奇才耶轼与范祖禹谋曰弃奇宝于路隅昔人所叹我曹得无意哉将同荐诸朝末几相继去国不果轼亡廌哭之恸曰吾愧不能死知己至于事师之勤讵敢以生死为闲既走许汝闲相地卜兆授其子作文祭之曰皇天后土鉴一生忠义之心名山大川还万古英灵之气词语奇壮读者为悚中年绝进取意谓颖为人物渊薮始定居长社县令李佐及里人买宅处之卒廌喜论古今治乱条畅曲折辩而中理当喧溷仓卒闲如不经意睥睨而起落笔如飞元佑求言上忠谏书忠厚谕并献兵鉴二万言论西事朝廷擒羌酋果庄将致法廌深论利害以为杀之无益愿加宽大当时

黷其言

△刘恕

刘恕字道源筠州人父涣字凝之为颍上令以刚直不能事上官弃去家于庐山之阳欧阳修与涣同年进士高其节作庐山高诗以美之
涣居庐山三十余年环堵萧然饘粥以为食而超然无戚戚意以寿终恕少颖悟书过目即成诵年十三欲应制科从人假汉唐书阅月皆归之
诣丞相晏殊问以事反复诘难殊不能对未冠举进士时有诏能讲经义者别奏名应召者才数十人恕以春秋礼记对先列注疏次引先儒异说末乃断以己意凡二十问所对皆然主司异之擢为第一他文亦入高等而廷试不中格更下国子试讲经复第一遂赐第调巨鹿主簿和川令发强摘伏一时能吏自以为不及恕为人重气谊急然诺郡守得罪被劾属吏皆连坐下狱恕独恤其妻子如己骨肉笃好史学自太史公所记下至周显德未上下数千载巨微之事如指诸掌司马光编次资治通鉴英宗命自择馆阁英才共修之光对曰馆阁文学之士诚多至于专精史学臣得而知者唯刘恕耳即召为局僚遇史事纷错难治者辄以委恕恕于魏晋以后事考证差谬最为精详王安石与之有旧欲引真三司条例恕以不习金谷为辞因言天子方属公大政宜恢张尧舜之道以佐明主不应以利为先又条陈所更法令不合众心者劝使复旧至面刺其过安石怒变色恕不少屈或稠人广坐抗言其失无所避遂与之绝光出知永兴军恕亦以亲老求监南康军酒许即官修书光判西京御史台恕请诣光留数月而归道得风挛疾右手足废犹苦学如故少闲辄修书官至秘书丞卒恕为学自厯数地理官职族姓至前代公府案牘皆取以审证求书不远数百里身就之读且钞殆忘寝食偕司马光游万安山道旁有五代诸将碑人所不知名者恕能言其行事始终归验旧史信然着五代十国纪年以拟十六国春秋又采太古以来至周威烈王时事史记左氏传所不载者为通鉴外纪家素贫一毫不妄取于人自洛南归时方冬无寒具司马光遗以衣袜及故茵褥辞不获强受而别行及颍悉封还之好攻人之恶每自讼平生有二十失十八蔽作文以自警亦终不能改也卒后七年通鉴成追录其劳官其子义仲为郊社斋郎次子和仲有超轶材作诗清奥刻厉为文慕石介有侠气早卒

△王无咎

王无咎字补之建昌南城人第进士为江都仪真主簿天台令弃而从王安石学久之复调南康主簿已又弃去好书力学寒暑行役不暂释所在学者归之王安石为政无咎至京师士大夫多从之游然与人寡合常闭门治书

惟安石言论莫逆也安石上章荐其守道安贫文行该
备诏以为国子直讲命未下而卒

△蔡肇

蔡肇字天启润州丹阳人能为文最长歌诗初事王安石见器重又从苏轼游声誉
益显第进士历明州司户参军江陵推官元佑中为太
学正通判常州召为卫尉寺丞提举永兴路常平徽宗初入为户部员外郎兼编修国史
言者论其学术反复出提举两浙刑狱张商英当国引
为礼部员外郎进起居郎拜中书舍人以草御史辛义责词不称旨罢为显谟阁待制知
明州言者又论其非议辟雍以为不当立夺职提举洞
霄宫会赦复待制致仕卒 【按东都事畧云有文集三十卷史传不载谨识】

△李格非

李格非字文叔济南人幼俊警有司方以诗赋取士格非独用意经学着礼记说数
十万言登进士第调冀州司户参军试学官为郓州教
授郡守以其贫欲使兼他官谢不可入补太学录再转博士以文章受知于苏轼常着洛
阳名园记谓洛阳之盛衰天下治乱之候也公卿大夫
高进于朝放乎以一己之私自为而忘天下之治忽欲退享此得乎唐之末路是也其后
洛阳陷于金人以为知言绍圣立局编元佑章奏以为
检讨不就戾执政意通判广信军召为校书郎迁著作佐郎礼部员外郎提点京东刑狱
以党籍罢卒格非为文陵轹直前笔力不少滞尝言文
不可以苟作诚不着则不能工晋人能文者多矣至刘伯伦酒德颂陶渊明归去来辞字
字如肺腑出遂高步晋人之上其诚着也妻王氏拱辰
孙女亦善文女清照诗文尤有称于时嫁赵挺之之子明诚

△吕南公

吕南公字次儒建昌南城人于书无所不读为文不肯缀缉陈言熙宁中士方推崇
马融王肃许慎之业剽掠补拆临幕之艺大行南公度
不能逐时好一试礼闈不偶退筑室灌园不复以进取为意益著书且借史笔以褒善贬
恶遂以袞斧名所居斋尝谓士必不得已于言则文不
可以不工盖意有余而文不足则如吃人之辩讼心未始不虚理未始不直然而或屈者
无助于辞而已观书契以来特立之士未有不善于文
者士无志于立则己必有志焉则文何可以卑贱而为之故毅然尽心思欲与古人并元
佑初立十科荐士中书舍人曾肇称其读书为文不事
俗学安贫守道志希古人堪充师表科一时廷臣亦多称之议欲命以官未及而卒所著
有灌园先生集传于世

△郭祥正

郭祥正字功父太平州当涂人母梦李白而生少有诗声梅尧臣见而叹曰天才如此真太白后身也举进士熙宁中知武冈县金书保信军节度判官时王安石用事祥正奏乞天下大计专听安石处画有异议者虽大臣亦当屏黜神宗览而异之一日问安石曰卿识郭祥正乎其才似可用出其章以示安石安石耻为小臣所荐乃言祥正无行不可用祥正闻之遂以殿中丞致仕寻起为通判汀州知端州又弃去隐于县之青山卒

△米芾 【米友仁】

米芾字符章吴人也以母侍宣仁后藩邸旧恩补浚光尉 【东都事略云补校书郎】 历知雍邱县涟水军入为太常博士知无为军复召为书画学博士赐对便殿上其子友仁所作楚山清晓图擢礼部员外郎出知淮阳军卒芾为文奇险不蹈袭前人轨辙特善翰墨沉着飞翥画山水人物自名一家尤工临仿至乱真不可辨精于鉴裁遇古器物书画则极力求取必得乃己王安石尝摘其诗句书扇上苏轼亦喜誉之好洁成癖至不与人同巾器所为多譎异无为州治有巨石状奇丑芾见大喜曰此足以当吾拜具衣冠拜之呼之为兄又不能与世俯仰故从仕数困尝奉诏仿黄庭小楷作周兴嗣千字韵语子友仁字符晖力学嗜古亦善书画世号小米仕至兵部侍郎敷文阁直学士

△刘洗

刘洗字应伯福州福清人中进士等历莆田主簿知庐江县崇宁中为讲议司检讨官进大理丞大晟府典乐洗通音律尝上历代雅乐因革及宋制作之音又言周官大司乐禁淫声漫声盖孔子所谓放郑声耆今燕乐之音失于高急曲调之词至于鄙俚恐不足以召和气宋火德也音尚征征调不可阙臣按古制得正征一调惟陛下裁取徽宗然其言他日禁中出古钟二诏执政召洗按于都堂洗曰此与今太簇大吕声协命取大晟钟扣之果应又曰钟击之无余韵不如石声诗所云依我磬声者言其清而定也复取以合之声益谐历宗正鸿臆卫尉太常寺少卿纂续因革卒洗居母丧尽礼有双芝生墓侧人以为孝感

△倪涛

倪涛字巨济广德军人卯角能属文博学强记年十五试太学第一遂擢进士调庐陵尉信阳教授入为太学正累迁左司员外郎朝廷议有事燕云大臣心知不可无敢一出口涛独言其非且曰景德以来辽守约不侵边盟誓固在不可渝也天下久平士不习战事储又阙母轻议以貽后患王黼怒曰君敢沮军事耶于是言者论其鼓唱撰造贬监朝城县酒税再徙茶

陵船场卒明年金师大入朝廷忆涛言官其一子有云

阳集 【东都事略作云陵集】 传于世

△李公麟

李公麟字伯时舒州人第进士历南康长垣尉泗州录事参军用陆佃荐为中书门下后省删定官又用荐为御史检法官博学好古长于诗多识奇字自夏商以来钟鼎尊彝皆能考定世次辨测欵识绍圣末朝廷得玉玺下礼官诸儒议言人人殊公麟曰秦玺用蓝田玉今玉色正青以龙虬鸟鱼为文着帝王受命之符玉质坚甚非昆吾力蟾肪不可治真秦李斯所为也议由是定元符三年致仕既归老肆意于岩壑闲雅善画自作龙眠山庄图为世所宝写人物尤工襟度超轶黄庭坚谓其风流不减古人云

△周邦彦

周邦彦字美成钱塘人疏隽不羁博涉书史元丰初游京师献汴都赋万余言神宗异之命侍臣读于迓英阁召赴政事堂自诸生命为太学正居五岁不迁益尽力于辞章出教授庐州知溧水县还为国子主簿哲宗召对使诵前赋除秘书省正字累迁宗正少卿兼议礼局检讨以直龙图阁知河中府徽宗欲使毕礼书复留之踰年知龙德府徙明州入拜秘书监进徽猷阁待制提举大晟府未几知顺昌府徙处州卒赠宣奉大夫邦彦好音乐能自度曲制乐府长短句词韵清蔚传于世

△朱长文

朱长文字伯原苏州吴县人年未冠举进士乙科以病足不肯试吏筑室乐圃坊著书阅古吴人化其贤长吏至莫不先造请谋政所急公卿荐以自代者众元佑中起教授于乡召为太学博士迁秘书省正字符符初卒哲宗知其清贖绢百有文三百卷六经皆为辩说又着琴史

△刘弇

刘弇字伟明吉州安福人幼警颖日诵万余言注销丰二年进士第继中博学宏词科知嘉州峨眉县改太学博士元符中有事于南郊弇进南郊大礼赋哲宗览之以为相如子云复出除秘书省正字徽宗即位改著作佐郎实录检讨官以疾卒弇性嗜酒不事拘检为文辞铲剔瑕类卓犖不凡有龙云集三十卷周必大序其文谓可继欧阳修云

钦定续通志卷五百六十二

●钦定续通志卷五百六十三 文苑传十

文苑传

宋 【七】

○宋七

陈与义	汪藻	叶梦得	程俱	张嶠	韩驹
朱敦儒	葛胜仲	熊克	张即之		
赵蕃					
陈与义					
汪藻					
叶梦得					
程俱					
张嶠					
韩驹					
朱敦儒					
葛胜仲					
熊克					
张即之					
赵蕃					
△陈与义					

陈与义字去非洛人天资卓犖幼能文登政和三年上舍甲科授开德府教授累迁太学博士擢符宝郎寻谪监陈留酒税金人入汴高宗南迁遂避乱襄汉转湖湘踰岭峽久之召为兵部员外郎绍兴元年至行在迁中书舍人兼掌内制拜吏部侍郎寻以显谟阁直学士知湖州召为给事中驳议详雅又以徽猷阁直学士提举江州太平观被召会宰相有不乐与义者复用为中书舍人直学士院六年拜翰林学士知制诰七年参知政事唯师用道德以辅朝廷务尊主威振国纪时丞相赵鼎言人多谓中原有可图之势宜便进兵帝曰今梓宫与太后渊圣者未还不与金议和则无可还之理与义曰若和议成岂不贤于用兵万一无成则用兵必不免帝曰然三月从帝如建康明年扈蹕还临安以病请复以资政殿学士知湖州请闲提举临安洞霄宫卒与义容状伉恪不妄言笑平居虽谦以接物然内刚不可犯荐士于朝退未尝以语人士以是多之尤长于诗体物寓兴清邃纡余尝赋墨梅徽宗嘉赏之以是受知于帝云

△汪藻

汪藻字彦章饶州德兴人幼颖异入太学中进士第调婺州观察推官改宣州教授稍迁江西提举学事司干当公事徽宗亲制君臣庆会阁诗羣臣皆赓进惟藻和篇众莫能及时胡伸亦以文名人之为语曰江左二宝胡伸汪藻寻除九域图志所编修官再迁著作佐郎时王黼与藻同舍素不咸出通判宣州提点江州太平观终黼之世不得用钦宗即位召为屯田员

外郎再迁太常少卿起居舍人高宗践阼召试中书舍人时次扬州藻多论奏宰相黄潜善恶之遂假他事免为集英殿修撰提举太平观明年复召为中书舍人兼直学士院累迁翰林院学士帝以所御白团扇亲书紫诰仍兼馆黄麻似六经十字以赐属时多事诏令类出其手尝论诸大将拥重兵寢成外重之势且陈所以待将帅者三事后十年卒如其策又言崇宁以来赏结权幸奴事阙宦与开边误国自观文殿大学士而下至银青光禄大夫者近稍镌褫其职而迁延恩宥又当甄复盍依国初法止中大夫绍兴二年除龙图阁直学士知湖州以颜真卿尽忠唐室尝守是邦乞表章之诏赐庙忠烈又言古者有国必有史故书榻前议论之辞则有时政记录柱下见闻之实则有起居注类而次之谓之日历修而成之谓之实录今踰二十年无复日历何以示后乞即臣所领州许臣访寻故家文书纂集元符庚辰以来诏旨为日历之备制可以郡人颜经投匭愬其敷余军食贬秩停官起知抚州御史张致远又论之子祠六年修撰范冲请令藻复卒前业诏赐史馆修撰餐钱听辟属编类八年上所修书自元符庚辰至宣和乙巳诏旨凡六百六十五卷升显谟阁学士寻知徽州逾年徙宣州言者论其尝为蔡京王黼之客夺职居永州累赦不宥二十四年卒秦桧死复职官二子二十八年徽宗实录成右仆射汤思退言藻尝纂集诏旨比修实录所取十盖七八诏赠端明殿学士藻通显三十年无屋庐以居博极羣书老不释卷尤喜读春秋左氏传及西汉书工俚语多著述所为制词人多传诵子六人恬恪愴悷懔懔

△叶梦得

叶梦得字少蕴苏州吴县人嗜学早成多识前言往行绍圣四年登进士第调丹徒尉徽宗朝自婺州教授召为议礼武选编修官用蔡京荐召对言自古帝王为治必自先治其心始今国势有安危法度有利害人材有邪正民情有休戚四者治之大也若不先治其心或诱之以货利或陷之以声色则所谓安危利害邪正休戚者未尝不颠倒易位而况求其功乎帝是其言特迁祠部郎官大观初京再相向所立法度已罢者复行梦得言周官太宰以八柄诏王驭羣臣所谓废置赏罚者王之事也太宰得以诏王而不得自专夫事不过可不可二者而已以为可前日不应废以为不可今日不当复今徒以大臣进退为可否无乃陛下有未了然于中者乎帝喜曰迩来士多朋比媒进卿言独无观望遂除起居郎时用事者喜小有才梦得言自古用人必先辨贤能贤者有德之称能者有才之称故先王常使德胜才不使才胜德崇宁以来在内惟取

议论与朝廷同者为纯正在外惟取推行法令速成者为干敏未闻器业任重识度经远者特有表异恐用才太胜愿继今用人以有德为先二年累迁翰林学士极论士大夫朋党之弊专于重内轻外且乞身先众人补郡察京初欲以童贯宣抚陕西取青唐梦得见京问曰祖宗时宣抚使皆是见任执政文彦博韩絳因此即军中拜相未有以中人为之元丰末神宗欲命李宪虽王珪亦能力争此相公所见也昨除贯节度使天下皆知非祖宗法此已不可救今又付以执政之任使得青唐何以处之京有渐色然卒用贯取青唐三年以龙图阁直学士知汝州寻落职提举洞霄宫政和五年起知蔡州复龙图阁直学士移帅颍昌府发常平粟振民常平使者刘寄恶之宦官杨戩用事寄括部内得常平钱五十万缗请余粳米输后苑以媚戩戩委其属持御笔来责米样应如苏州梦得上疏极论颍昌地力与东南异愿随品色不报时旁郡纠民输镪就余京师怨声载道独颖日赖梦得得免李彦括公田以黠吏告讦籍郟城舞阳隐田数千顷民请府诉者八百户梦得上其事捕吏按治之郡人大悦戩彦交怒寻提举南京鸿庆宫高宗驻蹕扬州除翰林学士兼侍读迁户部尚书陈待敌之计有三曰形曰势曰气形以地理山川为本势以城池刍粟器械为重气以将帅士卒为急形固则可恃以守势强则可资以立气振则可作为以用因请帝南巡阻江为险以备不虞又请命重臣为宣总使一居泗上总两淮及东方之师以待敌一居金陵总江浙之路以备退保疏入不报既而帝驻蹕杭州迁尚书左丞奏监司州县擅立军期司掊敛民财者宜罢门下侍郎颜岐知杭州康允之皆嫉梦得又与宰相朱胜非议论不协会州民有上书讼梦得过失者帝以梦得深晓财赋乃除资政殿学士提举中太一宫专一提领户部财用充车驾巡幸顿递使辞不拜归湖州绍兴初起为江东安抚大使知建康府兼寿春等六州宣抚使时建康兵不满三千梦得奏移统制官韩世清军屯建康崔增屯采石阎皋分守要害会王才降刘豫引兵入寇梦得遣使臣张伟谕才降之以其众分隶诸军濠寿叛将寇宏陈下虽阳受朝命阴与刘豫通梦得谕以祸福皆听命及豫入寇卞击败之八年除江东安抚制置大使兼知建康府行宫留守又奏防江措画八事一申饬边备二分布地分三巴截要害四约束舟船五团结乡社六明审斥堠七措置积聚八责官吏死守又言建康太平池州紧要隘口江北可济渡去处共十有九愿聚集民兵把截要害命诸将审度敌形并力进讨金师逼历阳张俊诸军迁延未发梦得见俊请速出军曰敌已过含山县万一金人得和州长江不可保矣俊趣诸军进发声势大振金兵退屯昭关明年金复

入侵至拓皋梦得团结沿江民兵数万分据江冲遣子模将千人守马家渡金兵不得渡而去初建康屯兵岁费钱八百万缗米八十万斛榷货务所入不足以支至是禁旅与诸道兵咸集梦得兼总四路漕计以给馈饷军用不乏故诸将得悉力以战诏加观文殿学士移知福州兼福建安抚使海寇朱明猖獗诏便道之镇或招或捕或诱之相戕遂平然颇与监司异议上章请老特迁一官提举临安府洞霄宫寻拜崇信军节度使致仕十八年卒于湖州赠检校少保

△程俱

程俱字致道衢州开化人以外祖尚书左丞邓润甫恩补苏州吴江主簿监舒州太湖茶场坐上书论事罢归起知临淮县累迁将作监丞近臣以譔述荐迁著作佐郎宣和二年进颂赐上舍出身除礼部郎以病告老不俟报而归建炎中为太常少卿知秀州金兵据临安遣兵破崇德海盐驰檄谕降俱率官属弃城保华亭留兵马都监守城朝廷命俱部金帛赴行在既至以病乞归绍兴初始置秘书省召俱为少监奏修日历秘书长贰得预修纂自俱始时庶事草创百司文书例从省记俱摭三馆旧闻比次为书名曰麟台故事上之擢中书舍人兼侍讲俱论国家之患在于论事者不敢尽情当事者不敢任责言有用否事有成败理固不齐今言不合则见排于当时事不谐则追咎于始议故虽有智如陈平不敢请金以行闲勇如相如不攻全璧以抗秦通财如刘晏不敢言理财以贍军食使人人不敢当事不敢尽谋则艰危之时谁与图回而恢复乎武功大夫苏易转横行俱论祖宗法文臣自将作监主簿至尚书左仆射武臣自三班奉职至节度使此以次迁转之官也武臣自合门副使至内客省使为横行不系磨勘迁转之列其除授皆颁特旨故元丰之制以承务郎至特进为寄禄官易监主簿至仆射之名武臣独不以寄禄官易之者盖有深意也政和闲改武臣官称为郎大夫遂并横行易之为转官等级盖当时有司不习典故以开侥幸之门自改使为大夫以来常调之官下至皂隶转为横行者不可胜数且文臣所谓庶官者转不得过中大夫而武臣乃得过皇城使此何理也夫官职轻重在朝廷朝廷爱重官职不妄与人则官职重反是则轻轻则得者不以为恩未得者常怀缺望此安危治乱之所关也俄以徐俯为谏议大夫俱缴还以为俯虽才俊气豪所历尚浅以前任省郎遽除谏议自元丰更制以来未之有也陛下诚知俯姑以所应得者命之不报后二日言者论俱前弃秀州城罢为提举江州太平观久之除徽猷阁待制俱晚病风痺秦桧荐领史事除提举万寿观实录院修撰使免朝参俱力辞不至卒俱在掖垣

命令有不安于心者必反复言之不少畏避其为文典雅闳奥为世所称

△张嶠

张嶠字巨山襄阳人宣和三年上舍中第调唐州方城尉改房州司刑曹刘子羽荐于川峡宣抚使张浚辟利州路安抚司干办公事以母病去官绍兴五年召对嶠上疏言为今日计当筑坞堡以守淮南之地兴屯田以为久戍之资备舟楫以阻长江之险以我之常待彼之变又荆襄寿春皆古重镇愿速择良将劲兵戍守其地以重上流之势召试除秘书省正字六年地震嶠奏比年以来赋敛繁重征求百出流移者挤沟壑土著者失常业地震之异殆或为此愿深思变异之由修政之阙七年迁校书郎兼史馆校勘再迁著作郎嶠因对言吴蜀唇齿之势也蜀去朝廷远今无元帅一年矣蜀之利害臣粗知之忠勇之人使之捍外侮则可至于抚循斯民则非所能办也宜于前宰执中择其可以任川事者委任之又言自驻蹕吴会以来似未尝以襄阳荆南为意今宜亟选儒臣有牧御之才者为二路帅使之招集流散兴农桑治城壁以为保固之资既而何抡以刊改神宗实录得罪语连嶠出为福建路转运判官上疏畧曰古之人君其患有二不在于拒谏在纳谏而不能用在不知天下之利害在知而不以为意陛下渡江十年矣外有勍敌之国内有骄悍之兵下有穷困无聊之民进言者多矣今皆以为陈腐而别取新奇之说任事者众矣今皆习是以为当然而更为迂阔之事此近于纳谏而不知用知利害而不知恤也为今之计朝斯夕斯非是二者不务数年之后庶其有济有国之所恶者莫大于朋党今一宰相用凡其所与者不择贤否而尽用之一宰相去凡其所与者不择贤否而尽逐之宜其朋党之寢成也九年除司勋员外郎兼实录院检讨官十年擢中书舍人升实录院同修撰论王德收复宿亳两郡乃擅退军使岳飞势孤今授承宣防御使何应罚而反赏封还词头未几右正言万俟卨论嶠为侍从日荐引非才以酬私恩边报始至托疾家居由是罢去顷之起知衢州除敷文阁待制为政颇尚严酷岁满得请提举江州太平兴国宫时方修好息兵朝廷讲稽古礼文之事嶠作中兴复古诗以进帝将召用会卒子昌时

△韩驹

韩驹字子苍仙井监人少有文称政和初以献颂补假将仕郎召试舍人院赐进士出身除秘书省正字寻坐为苏氏学谪监华州蒲城县市易务知分宁县召为著作郎校正御前文籍驹言国家祠事岁一百十有八用乐者六十有二旧撰乐章辞多抵牾于是召三馆士分撰视祠

明堂圆坛方泽等乐曲五十余章多驹所作宣和五年除秘书少监六年迁中书舍人兼修国史寻兼权直学士院制词简重为时所推未几复坐乡党曲学以集英殿修撰提举江州太平观高宗即位知江州绍兴五年卒赠中奉大夫与遣泽三人驹尝在许下从苏辙学辙评其诗似储光羲其后由宦者进用颇为识者所薄云子逊游

△朱敦儒

朱敦儒字希真河南人素工诗及乐府婉丽清畅志行高洁虽在布衣而有朝野之望靖康中召至京将处以学职固辞而还高宗诏举草泽之士部使者言其有文武才复召又辞避乱南雄张浚奏赴军前计议弗起绍兴二年宣谕明橐又荐敦儒有经世才廷臣亦多称其恬退诏以为迪功郎下肇庆府敦遣复不肯受其故人力劝之于是幡然而起既至命对便殿议论明畅赐进士出身为秘书正字俄迁兵部郎官时秦桧当国喜奖用骚人墨客文饰太平用其子为删定官除敦儒鸿胪少卿谈者谓其节不终云

△葛胜仲

葛胜仲字鲁卿丹阳人登绍圣四年进士第调杭州司理参军林希荐试学官及词科俱第一除兖州教授入为太学正帝幸学多献颂者胜仲独献赋帝命中书第其优劣胜仲为首差提举议历所检讨官兼宗正丞稍迁礼部员外郎会御史中丞石公弼言僖宗原庙增置殿室违元丰之旧诏礼官议胜仲建言予而复夺在常人犹难之况在天之灵乎议者非之责知休宁县复召为礼部员外郎权国子司业时朝廷命诸生习雅乐乐成进一官迁太常卿宋自建隆至治平所以典礼欧阳修尝哀集为书凡百篇号太常因革礼诏胜仲续之增为三百卷诏藏太常及建春宫以胜仲兼谕德胜仲为仁孝学三论献之太子复采春秋战国以来历代太子善恶成败之迹日进数事诏嘉之除国子祭酒寻知汝州李彦括田破产者众胜仲请蠲不当括者彦怒劾胜仲帝寝其奏改湖州寻徙邓州朱勔先求白雀之属胜仲不与至是媒蘖其短罢归建炎中范宗尹为相凡前日以朋附被罪远贬者咸赦还复知湖州时羣盗纵横声摇诸郡胜仲修城郭作战舰阅士卒盗知有备引去岁大饥发官廩振之民赖以济绍兴元年丐祠归十四年卒谥文康子立方官至侍从孙邨为右相自有传

△熊克

熊克字子复建宁建阳人将生有翠羽雀翔卧内克幼而翘秀既长好学善属文郡博士胡宪器之曰子学老于年他日当以文章显绍兴

中登进士第知诸暨县越帅课赋颇急诸邑率督趣以应克曰宁吾获罪不忍困吾民他日府遣幕僚阅视有无时方不雨克曰此催租时耶部使者芮燁至其境谓克曰景知子文墨而已今乃见古循吏为表荐之入为提辖文思院尝献文于曾觌以奏孝宗喜之内出御笔除直学士院宰相赵雄奏克不由论荐得清选无以服众请自朝廷召试然后用之帝曰善乃以为校书郎累迁学士院权直帝御选德殿召谕曰卿制诰甚工且有体自此燕闲可论治道克自以见知于帝数有论奏尝言金人虽讲和而不能保于他日今宜以和为守以守为政当和好之时为备守之计守则莫重于淮东金侵淮西负粮自随其势必难若侵淮东清河粮船直下易耳守淮之策以垦田修堰教民兵为先授淮东之策莫若即江阴建水军缓急可相应然骤立一军虑敌生疑当托以海道商贾之冲多斂掠置一巡检警督之自此岁增兵不出十年隐然一军矣中兴之际不患兵不可用而患将权难收今日之弊不患将不可驭而患军情易动往时诸大将拊士卒如家人自罢诸将兵权御前主帅更徙不常凡军中筦榷之利所以养士卒者今皆轶而为包苴又媵其余以佐之得无怨乎宜严戒将帅毋纵掎削帝嘉其有志召草明堂赦书克言二浙荐饥蝗且起赦文不宜饰词帝嘉其识体除起居郎兼直学士院以言者出知台州奉祠卒克博闻强记自少至老著述外无他嗜尤淹习宋朝典故有问者酬对如响家素俭约虽贵不改旧以清介称

△张即之

张即之字温夫参知政事孝伯之子以父恩授承务郎铨中两浙转运司进士举历监平江府粮料院临安府楼店务累迁司农寺丞知嘉与府未赴以言者罢主管云台观告老特授直秘阁致仕宝佑四年制置使余晦入蜀以谗劾闻州守王惟忠锻炼诬伏坐弃市惟忠临刑谓其友陈大方曰吾死当上愬于天七挥刃不殊血逆流即之虽闲居移书言于淮东制置使贾似道恤其遗孤又使从孙士倩娶惟忠孤女未几似道入相中书舍人常挺亦以为言景定元年以礼改葬惟忠复其田人皆称即之能倡义云即之以能书闻天下惟忠字省尊庆元之鄞人嘉定十三年进士

△赵蕃

赵蕃字昌父其先郑州人祖暘建炎初以秘书少监出提点坑冶寓信州之玉山蕃以暘致仕恩补州文学为太和主簿受知于杨万里调辰州司理参军与郡守争狱罢人以蕃为直始蕃受学于刘清之清之守衡州乃求监安仁赡军酒库因以卒业至衡而清之罢蕃即勺祠从清

之归理宗即位以太祖令与刘宰同召不拜特改奉议郎直秘阁又辞奉祠转承议郎依前直秘阁卒蕃年五十犹问学于朱熹既耄犹患末路之难命所居曰难斋赋性宽平与人乐易而刚介不可夺丞相周必大与蕃契屡加引荐蕃竟不受刘辛尝曰文献之家典刑之彦岩然独存犹有以系学者之望者蕃一人而已信州守吴旗乞录其后诏其子遂补上州文学遂亦力辞又诏以承务郎致仕与一子恩泽景定三年秘阁修撰郑协等为蕃请谥乃谥文节

钦定续通志卷五百六十三

●钦定续通志卷五百六十四 文苑传十一

文苑传

辽

○辽

李澣

萧罕嘉努

耶律昭

耶律古裕

耶律良

王鼎

刘辉

耶律孟简

李澣

萧罕嘉努

耶律昭

耶律古裕

耶律良

王鼎

刘辉

耶律孟简

△李澣

李澣字日新唐敬宗子郇王玮十一世孙自幼聪敏摹唐四杰为文时辈称之历仕唐晋太宗入汴来降【据宋史李涛传增辑】会太宗崩世宗立恟恟不定澣与高勋等十余人羁留南京久之从归上京授翰林学士穆宗即位累迁工部侍郎时澣兄涛在宋为翰林学士密遣人召澣澣托求医南京易服夜遁至涿为徼巡者所得送之南京下吏自经不死防之愈严械赴上京自投潢河中流为铁索牵掣又不死帝欲杀之枢密使高勋救止之屡言于帝曰澣非负恩以母年八十急于省覲致罪且澣富于文学方今少有伦比留掌词命可以增光国体帝怒少解仍令禁锢于奉国寺凡六年艰苦万状会欲建太宗功德碑高勋奏曰非李澣无可秉笔者诏从之文成以进帝悦释囚寻加礼部尚书宣政殿学士卒涛收其遗文为丁年集【据宋史增辑】

△萧罕嘉努

萧罕嘉努 【按此与外戚传之萧罕嘉努二人谨识】 字纠坚纳喇部人中书令安图之孙少好学弱冠入南山读书博览经史通辽汉文字统和十四年始仕家有一牛不任驱策其奴得善价鬻之罕嘉努曰利己误人非吾所欲乃归直取牛二十八年为右通进典南京栗园重熙初同知三司使事四年迁天成军节度使徙彰愍宫使帝与语才之命为诗友尝从容问曰卿居外有异闻乎罕嘉努对曰臣惟知炒粟小者熟则大者必生大者熟则小者必焦使大小均熟始为尽美不知其它盖尝掌栗园故托粟以讽谏帝大笑诏作四时逸乐赋帝称善时诏天下言治道之要罕嘉努对曰臣伏见比年以来高丽未宾准布犹强战守之备诚不容已乃者选富民防边自备粮糗道路修阻动淹岁月比至屯所费已过半只牛单穀鲜有还者其无丁之家倍直佣僦人惮其劳半途亡窜故戍卒之食多不能给求假于人则十倍其息至有鬻子割田不能偿者或逋役不归在军物故则复补以少壮其鸭绿江之东戍役大率如此况渤海女真高丽合从连衡不时征讨富者从军贫者侦侯右之水旱菽粟不登民以日困盖势使之然也方今最重之役无过西戍若能徙西戍稍近则往来不劳民无深患议者谓徙之非便一则损威名二则召侵侮三则弃耕牧之地臣谓准布诸部自来有之昔时北至胪胸河南至边境人多散居无所统壹惟往来抄掠及太祖西征至于流沙准布望风悉降西域诸国皆愿入贡因迁种落内置三部以益吾国不营城邑不置戍兵准布累世不敢为寇统和闲皇太妃出师西域拓土既远降附亦众自后一部或判邻部讨之使同力相制正得驭远人之道及城哈屯开境数千里西北之民徭役日增生业日殫惊急既不能救叛服亦复不恒空有广地之名而无得地之实国家大敌惟在南方今虽连和难保他日若南方有变屯戍辽邈卒难赴援我进则敌退我还则敌来不可不虑也方今太平已久正可恩结诸部释罪而归地内徙戍兵以增堡障外明约束以正疆界每部各置酋长岁修职贡叛则讨之服则抚之诸部既安必不生衅如是则臣虽不能保其久而无变知其必不深入侵掠也或云弃地则损威殊不知殫费竭财以贪无用之地使彼小部抗衡大国万一有败损威岂浅或又云沃壤不可遽弃臣以为土虽沃民不能久居一旦敌来则不免内徙岂可指为吾土而惜之夫帑廩虽随部而有此特周急部民一偏之惠不能均济天下如欲均济天下则当知民困之由而窒其隙节盘游简驿传薄赋敛戒奢侈期以数年则困者可苏贫者可富矣盖民者国之本兵者国之卫兵不调则旷军役调之则损国本且诸部

皆有补役之法昔补役始行居者行者类皆富贵故累世从戎易为更代近岁边虞数起民多匮乏既不任役事随补随缺苟无上户则中户当之旷日弥年其穷益甚所以取代为艰也臣又闻自昔有国家者不能无盗今欲芟夷根本愿陛下轻徭省役使民务农衣食既足安习教化而重犯法则民趋礼义刑罚罕用矣宜徙哈屯城于近地与西南副都部署乌尔克德呼勒威乌尔古等部声援相接罢黑岭二军并开保州皆隶东京益东北戍军及南京总管兵增修壁垒候尉相望缮完楼橹浚治城隍以为边防此方今之急务也愿陛下裁之擢翰林都林牙兼修国史自是日见亲信每入侍赐坐遇胜日帝与饮酒赋诗以相酬酢罕嘉努知无不言虽谐谑不忘规讽六年为都部署【据本纪增辑】十三年上疏曰臣闻先世约尼温汗之后国祚中绝自额尔奇木雅里立苏尔威大位始定然上世俗朴未有尊称我太祖代约尼即位乃制文字修礼法建天皇帝名号混一海内厥后累圣相承犹以名呼臣以为宜依唐典追崇四祖为皇帝则陛下大业有光坠典复举矣帝纳之始行追册玄德二祖之礼罕嘉努每见帝猎未尝不谏会有司奏猎秋山熊虎伤死数十人罕嘉努书于册帝见命去之既出复书他日帝见之曰史笔当如是帝问我国家创业以来孰为贤主罕嘉努以穆宗对帝怪之曰穆宗嗜酒喜怒不常视人犹草芥卿何谓贤罕嘉努对曰穆宗虽暴虐省徭轻赋人乐其生终穆之世无罪被戮未有过今日秋山伤死者臣故以为贤帝默然诏与耶律庶成录约尼汗至重熙以来事迹集为二十卷进之十五年复诏与庶成制礼典事或有疑与北南院同议罕嘉努既被诏博考经籍自天子达于庶人情文制度可行于世不缪于古者撰成三卷进之又诏译诸书罕嘉努欲帝知古今成败译通历贞观政要五代史时帝以其老不任朝谒拜归德军节度使以善治闻帝遣使问劳召修国史卒有六义集十二卷行于世

△耶律昭

耶律昭字述宁博学善属文统和中坐兄国留事流西北部会萧达兰为西北路招讨使奏免其役礼致门下欲召用以疾辞达兰问曰今军旅甫罢三边晏然惟准布伺隙而动不能终保无变计将安出昭以书答曰西北诸部每当农时一夫为侦候一夫治公田二夫给乱官之役大率四丁无一室处刍牧之事仰给妻孥一遭寇掠贫穷立至春夏赈恤吏多杂以糠粃重以掊克不过数月又复告困且畜牧者富国之本有司防其隐没聚之一所不得各就水草便地兼以逋亡戍卒随时补调不习风土故日瘠月损驯至耗竭为今之计莫若振穷薄赋给以牛种使

遂耕获置游兵以防盗掠颁俘获以助伏腊散畜牧以就便地期以数年富强可望然后练简精兵以备行伍何守之不固何动而不克哉然必去其难制者则余种自畏若舍大而谋小避强而攻弱非徒虚费财力亦不足以威服其心此二者利害之机不可不察合下膺非常之遇专方面之寄宜远师古人以就勋业上观干象下尽人谋察地形之险易料敌势之虚实虑无遗策利施后世矣远兰然之开泰中猎于巴尔图山为羯羊所触卒

△耶律古裕

耶律古裕字纠坚六院部人父阿古齐官至节度使古裕冲澹有礼法工文章统和中为本部太保开泰中稍迁塔布城节度使鞞霸州疑狱称旨授启圣军节度使太平中复为本部太保谢病归俄擢南院大王请老不许兴宗命为诗友数问治要多所匡建奏诏与林牙耶律庶成萧罕嘉努编辽国上世事迹及诸帝实录未成而卒

△耶律良

耶律良字锡纳小字苏着帐郎君之后生于干州读书医巫闾山学既博将入南山肄业友人止之曰尔无仆御驱驰千里纵闻见过人年亦垂暮今若即仕已有余地良曰穷通命也非尔所知不听留数年而归重熙中补寝殿实达尔寻为燕赵国王近侍以家贫诏乘厩马迁修起居注会猎秋山良进秋游赋帝嘉之青宁中帝幸鸭子河作捕鱼赋由是宠遇稍隆迁知制诰兼知部署司事奏请编御制诗文目曰清宁集帝命良诗为庆会集亲制序顷之为敦睦宫使兼权知皇太后宫诸局事良闻重元与子尼噜古谋乱以帝笃于亲爱不敢遽奏密言于皇太后太后托病召帝曰其事帝谓长曰汝欲闲我骨肉邪良泰曰臣若妄言甘伏斧钺陛下不早备恐堕贼计如召尼噜古不求可卜其事帝从其言使者及门尼噜古意欲害之羈于帐下使者以佩刃断帘而出驰至行宫以状闻帝始信乱平以功迁汉人行宫都部署咸雍初同知南院枢密院使事为特哩袞出知中京留守事未几卒追封辽西郡王谥忠成

△王鼎

王鼎字虚中涿州人幼好学居太宁山数年博通经史时马唐俊有文名燕蓟闲适上已与同志袂褰水滨酌酒赋诗鼎偶造席唐俊见鼎朴野置下坐欲以诗困之先出所作索赋鼎援笔立成惊其敏妙因与定交清宁五年【本纪作八年】擢进士第调易州观察判官改漆水县令累迁翰林学士当代典章多出其手上书言治道十事帝以鼎达政体事多咨访鼎正直不阿人有过必面诋之寿隆初升观书殿学士一

日宴主第醉与客忤怨帝不知已坐是下吏状闻帝大怒仗黥夺官流镇州居数岁有赦
独不免会守臣召鼎为贺表因以诗贻使者有谁知天
雨露独不到孤寒之句帝闻而怜之召还复职干统六年卒

△刘辉

刘辉好学善属文疏简有远略太康五年第进士大安末为太子洗马上书言西边
诸蕃为患士卒远戍中国之民疲于飞挽非长久之策
为今之计莫若城于盐渌实以汉户使耕田聚粮以为西北之费言虽不行识者韪之寿
隆二年复上书曰宋欧阳修编五代史附我朝于外裔
妄加贬訾且宋人赖我朝宽大许通和好得尽兄弟之礼今反令臣下妄意作史恬不经
意臣请以赵氏初起事迹详附国史帝嘉其言迁礼部
郎中诏以贤良对策辉言多中时病擢史馆修撰卒

△耶律孟简

耶律孟简字复易裕悦乌珍之五世孙父瑠嘉努官至节度使孟简性颖悟六岁父
晨出猎俾赋晓天星月诗孟简应声而成既长善属文
太康初枢密使耶律伊逊以奸险窃柄出为中京留守孟简与耶律庶箴表贺未几伊逊
复旧职衔之谪巡磁窑关时虽以谗见逐不形辞色遇
林泉胜地终日忘归明年流保州及闻皇太子被害以诗伤之作放怀诗二十首自序云
禽兽有哀乐之声蝼蚁有动静之形在物犹然况于人
乎然贤达哀乐不在穷通祸福之闲易曰乐天知命故不忧予虽流放以道自安又何疑
邪后得归乡里诣阙上表曰本朝之兴几二百年宜有
国史以乖后世乃编耶律赫噜乌珍休格三人行事以进帝命置局编修孟简谓余官曰
史笔天下之大信一言当否百世从之苟无明识好恶
徇情则祸且不测故司马班范俱罹殃祸可不慎欤干统中迁六院部太保处事不拘文
法时多笑其迂孟简闻之曰上古之时无簿书法令而
天下治盖簿书法令适足以滋奸幸非圣人致治之本改高州观察使修学校招生徒迁
昭德军节度使以中京饥诏与学士刘嗣昌减价糶粟
事未毕卒

钦定续通志卷五百六十四

●钦定续通志卷五百六十五 文苑传十二

文苑传

金【一】

○金一

韩昉

蔡松年【珪】

吴激

马定国

任询

赵

可 郭长倩

萧永祺

胡砺 王竞

- 5453 -

杨伯仁 郑子聃 党怀英

韩昉

蔡松年 【蔡珪】

吴激

马定国

任询

赵可

郭长倩

萧永祺

胡砺

王竞

杨伯仁

郑子聃

党怀英

△韩昉

韩昉字公美燕京人仕辽累世通显昉五岁丧父哭泣尽哀天庆二年进士第一入金累官干文阁待制知制诰充高丽国信使自天会四年高丽称藩不进誓表累使皆不得要领昉至其国中征读书知古今者商榷辞旨涉旬始置对谓昉曰小国事辽宋无誓表未尝失藩臣礼今事上国当与同礼昉曰贵国必欲用古礼唐虞三代天子巡狩羣后四朝今天子方西狩【按金史地理志高丽在上京东南二千余里金主东巡高丽始在朝会之列西字疑误】 贵国当从朝会其人无以对乃进誓表如约而还帝闻大悦 【按金史原作宗干大悦今据宏简录改】 曰非卿谁能办此累迁礼部尚书又迁翰林学士兼太常卿修国史朝廷议礼制度因革咸出其手除济南尹拜参知政事封郟国公俄以仪同三司致仕天德初加开府卒昉善属文长于诏册作太祖睿德神功碑当世称之后高丽使者至必问昉安否

△蔡松年 【蔡珪】

蔡松年字伯坚宋宣和末从父靖守燕山军败靖降元帅府辟松年令史累除真定府判官真定西山羣盗初平辨居民为贼污者千余家得不坐宗弼代宋松年总管军中六部事宋称臣宗弼入相荐为刑部员外郎皇统时宗弼当国用■〈穀，去一〉性方正为宰相韩企先所重松年与许霖等欲与■〈穀，去一〉相结■〈穀，去一〉拒之松年等构以党事诛■〈穀，去一〉海陵前在宗弼军与松年厚善及

即位擢吏部侍郎俄迁户部尚书海陵迁中都徙榷货务复钞引法皆松年启之海陵谋伐宋以松年家世仕宋累擢显位以耸南人观听改吏部尚书寻拜参知政事迁尚书友丞未几为左丞封郕国公正隆二年进拜右丞相加仪同三司封卫国公四年卒海陵悼惜之加封吴国公谥文简松年事继母以孝闻喜周恤亲党性豪侈文词清丽尤工乐府与吴激齐名时号吴蔡体子珪字正甫中进士第累官户部员外郎兼太常丞尝作两燕王墓辩据葬制名物款刻甚详号为博辨安国军节度判官高元鼎坐监临奸事求援于太常博士田居实大理司直吴长行吏部主事高震亨等以属鞫问官御史台典事李仲柔仲柔发之辞连及珪笞四十久之除河东北路转运副使入为礼部郎中得风疾失音除淮州刺史同辈已奏谢珪独不能入见乃致仕寻卒珪之文有补正水经五篇南北史志三十卷续金石遗文跋尾十卷晋阳志十二卷文集五十五卷

△吴激

吴激字彦高建州人父拭宋进士终朝奉郎知苏州激米芾婿工诗能文字画俊逸得芾笔意尤精乐府将宋命至金以知名留不遗命为翰林待制皇统二年出知深州到官三日卒自号东山有东山集十卷行世

△马定国

马定国字子卿茌平人自少志趣不羣宣和末题诗酒家坐讥讪得罪因以知名刘豫立游历下以诗献豫豫大悦授监察御史仕至翰林学士尝作石鼓辩云是宇文周时所造出入传记引据甚明学者以心蔡珪燕王墓辩初学诗未有入处梦其父与方寸白笔从是文章大进有集传于世

△任询

任询字君谟易州军市人父贵有才干善画喜谈兵政宣简游江浙询生于虔州为人慷慨多大节书为当时第一画亦入妙品王庭筠独以才具许之登正隆二年进士历益都都句判官北京盐使致仕优游乡里家藏法书名画数百轴后卒

△赵可

赵可字献之高平人贞元二年进士仕至翰林直学士博学高才卓然不羣一时诏诰多出其手流辈服其典雅其歌诗乐府尤工号玉峯散人集

△郭长倩

郭长倩字曼卿文登人登皇统六年经义乙科仕至秘书少监兼礼部郎中修起居

注与施朋望王无竞刘崑老刘无党相友善所撰石决
明传为时辈所称有昆仑集行世

△萧永祺

萧永祺字景纯辽阳人【从弘简录增】本名富里少好学通契丹大小字广宁尹耶律固奉诏译书辟置门下因尽传其业固卒永祺率门弟子服齐衰丧固作辽史未成永祺继作上之除太常丞海陵为中京留守特见亲礼累迁翰林学士承旨尚书左丞耶律安礼出守南京海陵欲以永祺代永祺固辞或问曰公遇知人主以道佐时何多让也永祺曰执政系天下休戚纵欲贪冒荣宠如苍生何海陵尝选廷臣十人备谘访独永祺议论宽厚时称长者后卒

△胡砺

胡砺字符化磁州武安人少嗜学金人下河北为军士所掠至燕亡匿香山寺与佣保杂处韩昉一见异之使赋诗见志操笔立成昉馆置门下使与其子同处教育之尝谓人曰胡生才器一日千里他日必名世天会中举进士第一累官定州观察判官督教不倦士子聚居尝百数为河朔学校之冠改同知深州军州事郡守暴戾蔑视僚属砺折之以礼守愧服郡事一委之州管五县例置弓手皆市井无赖名为迹盗所至扰民砺知其敝悉罢去岁省民钱五千余万迁礼部郎中典礼多所裁定海陵初拜平章百官贺于朝堂砺独不跪海陵问故对曰朝服而跪见君父礼也海陵深器重之及即位累迁翰林学士改刑尚书扈从至汴得疾卒

△王竞

王竞字无竞彰德人宋宣和中太学两试合格调屯留主簿入金除大宁令历实胜盐官转河内令岁饥盗起设方略以购尽得之沁水泛溢发民筑堤豪猾吏为奸者核实之减费几半竞与前令韩希甫皆有干能而正平令张元治绩差不及民为之谚曰西山至河岸县官两人半皇统初因韩昉荐召权应奉翰林文字二年试馆阁竞文居最遂真授之迁礼部员外郎海陵当国欲令百官避堂讳竞言人臣无公讳遂止萧仲恭封王欲援辽故事用岁罗伞竞与郎中翟永固言其非竞不行海陵由是重之天德中累迁礼部侍郎翰林侍讲学士改太常卿同修国史擢礼部尚书大定二年奉迁睿宗山陵仪注不应典礼削两阶诏改创五龙车兼翰林学士承旨修国史四年卒竞博学能文善草隶工大字两都宫殿榜题皆其所书士林推第一云

△杨伯仁

杨伯仁字安道伯雄弟天性孝友读书一过成诵登皇统九年进士以事亲不求调

天德二年除应奉翰林文字尝夜召赋诗未二鼓奏十咏海陵喜又因射鸟献诗以讽改左拾遗进士吕忠翰延试已在第一海陵以程文示伯仁问优劣对曰当在优等海陵曰此今试状元也伯仁遂宿谏省俟唱名乃出海陵嘉其慎密世宗时伯仁又称孟宗献发解程文当成大名是岁宗献府省廷试皆第一号孟四元时论以为知文为大名少尹郡中豪民横恣穷竟渠党四境帖然献馆陶大辟得其冤状人为立祠召入为翰林待制擢礼部侍郎翰林直学士改吏部侍郎兼侍讲伯仁久在翰林文词典丽帝深嘉之俄兼太常从幸上京素多病至临潢感疾还中都明年卒

△郑子聃

郑子聃字景纯大定府人父宏辽金源令二子子京子聃杨邱行尝曰金源二子凤毛也小者尤特达后必名世天德二年邱行为太子左卫率府率廷试海陵以子聃文示邱行对曰可入甲乙及拆卷果中甲榜第三调翼城丞迁赞皇令召为书画直长子聃颇以才望自负常谦不得为第一甲第一人正隆二年会试海陵示以第一人称文子聃少之问作赋对曰甚易因自矜人莫己若海陵不悦使与翰林修撰杨伯仁宣徽判官张汝霖应奉翰林文字李希颜同进士杂试亲览试卷中第者七十三人子聃果第一海陵奇之除翰林修撰改侍御史京畿旱诏子聃决囚遂澍雨人以比颜真卿世宗立 【从宏简录增】 迁待制累迁翰林直学士改吏部侍郎兼修国史时修海陵实录帝谓知其详无如子聃者专以委之大定二十年卒

△党怀英

党怀英字世杰冯翊人宋太尉进十一代孙文纯睦泰安军录事参军卒官怀英与母不能归因家焉大定十年进士累官翰林待制兼同修国史怀英能属文工篆籀当时称为第一与凤翔府治中郝保充辽史刊修官应奉翰林文字伊喇益赵涣等七人同为编修官凡辽时碑铭墓志及诸家文集记辽旧事悉上送官时章宗好文辞旁求文士以备侍从尝曰近日制诏惟党怀英最善明昌元年迁国子祭酒三年议开边防濠堑与同列十六人请罢其役诏从之迁翰林学士承安二年乞致仕改泰宁军节度使明年召为翰林学士承旨泰和元年增修辽史编修官三员诏为纪志列传刊修官有改除者以书自随久之致仕大安三年卒谥文献

钦定续通志卷五百六十五

●钦定续通志卷五百六十六 文苑传十三

文苑传

金【二】

○金二

赵沔 周昂 王元节 王庭筠【曼庆】 刘昂
李经 刘从益【祁】 吕中孚【张建】
 李纯甫 王郁 宋九嘉 李献能 王若虚 麻九畴
 元德明【好问】

赵沔

周昂

王元节

王庭筠【王曼庆】

刘昂

李经

刘从益【刘祁】

吕中孚【张建】

李纯甫

王郁

宋九嘉

李献能

王若虚

麻九畴

元德明【元好问】

△赵沔

赵沔字文孺东平人大定二十二年进士仕至礼部郎中性冲澹学道有所得尤工书自号黄山赵秉文言其正书体兼颜苏行草备诸家体其超放又似杨凝式党怀英小篆李阳冰以来鲜有及者时人以沔配之号党赵有黄山集行世

△周昂

周昂字德卿真定人父伯录字天锡大定进士仕至同知沁南军节度仗昂孝友喜名节学术醇正文笔高雅尝教其甥王若虚曰文章工于外而拙于内者可以惊四筵而不可以适独坐可以取口称而不可以得首肯又云文送以意为主言语为役今人往往骄其所役至反役其所主虽极辞语之工而岂文之正哉擢第调南和簿有异政入拜监察御史路铎以言事被斥昂送以诗为人所挤谪东海上十数年始入翰林言事愈切直大安兵兴权六部员外郎从宗室承裕军失利跳走上谷众欲径归昂独不

从城陷与其子嗣明同死于难

△王元节

王元节字子元弘州人祖山甫辽户部侍郎父诩海陵朝左司员外郎元节家世贵显而从学甚谨浑源刘撝爱其才俊以女妻之遂传其赋学登天德三年词赋进士雅尚气节不能随时俯仰久乃迁密州观察判官既罢即逍遥乡里以诗酒自娱号遯齐有诗集行世弟元德亦第进士有能名终南京路提刑使

△王庭筠 【王曼庆】

王庭筠字子端河东人大定十六年进士调恩州军事判官郡民邹四谋不轨事觉逮捕千余人独邹逸去庭筠以计获之分别诬误只坐预谋者十二人明昌元年召试馆职御史台言其尝犯赃罪不当以馆阁处之遂罢三年以参政守贞荐召为应奉翰林文字五年帝顾谓宰执曰应奉王庭筠朕欲以诏诰委之其人才岂易得近党怀英作长白山册文殊不工闻文士多妒庭筠不论其文顾以行止为訾大抵读书人多口颊昔东汉之士与宦官分明固无足怪如唐牛李宋司马光王安石均为儒者而互相排毁何邪遂迁庭筠为翰林修撰承安二年坐赵秉文上书事降郑州防御判官泰和元年复起为修撰扈从秋山应制赋诗三十余首帝甚嘉之明年卒庭筠仪观秀伟外若简贵而接人以和少有可取极口称道虽百负不恨从游如韩温甫路元亨张进卿李公度荐引如赵秉文冯璧李纯甫皆一时名士世以知人许之为文能道所欲言暮年诗律精严七言长篇尤工险韵有丛辨十卷文集四十卷书法学米元章善山水墨竹子曼庆亦能诗并书仕至行省右司郎中

△刘昂

刘昂字之昂兴州人大定十九年进士高曾而下七世登科昂天资警悟律赋自成一家作诗得晚唐体尤工绝世为尚书省掾调平凉路转运副使母忧去职连蹇十年有荐其才于章宗者自国子司业擢左司郎中会掌书大中与贾铉漏言除授事为言者所劾狱辞连昂帝怒一时间闻人如史肃李着王宇宗室从郁皆谴逐昂降上京留守判官道卒

△李经

李经字天英锦州人作诗极刻苦喜出奇语不蹈袭前人李纯甫见曰真今世太白也名大震再举不第拂衣去南渡后其乡帅有表至朝廷士大夫识之曰此天英笔也朝议以武功就命倅其州后不知所终

△刘从益 【刘祁】

刘从益字云卿浑源人高祖撝天会初词赋进士从益博学强记精于经学能文章

为诗尤工五言大定元年进士累官监察御史坐与当
路辨曲直得罪去久之起为叶县令修学励俗有古良吏风叶自兵兴户减三之一田多
不毛岁赋七万石如故从益请于大司农为减一万民
甚赖之流亡归者四千余家未几被召百姓乞留不许入援应奉翰林文字踰月疾卒叶
人立石颂德着有蓬门集子祁字京叔在太学有文名
值金末丧乱作归潜志以纪金事修史者多采用焉

△吕中孚 【张建】

吕中孚字信臣冀州南宫人张建字吉甫蒲城人皆有诗名中孚有清漳集建明昌
初授绛州教官召为应奉翰林文字以老请致仕章宗
爱其纯素不欲令去授同知华州防御使仍赐诗以宠之自号兰泉有集行世

△李纯甫

李纯甫字之甫弘州襄阴人祖安上尝魁西京进士父采卒于益都府治中纯甫幼
颖悟初业词赋爱左氏春秋更为经义学擢承安二年
进士喜谈兵慨然有经世志章宗南征两上疏胜负多如所料宰执荐入翰林元兵起上
疏论时事不报宣宗迁汴丞相高琪擅威福擢为左司
都事纯甫审其必败以母老辞去高琪诛复入翰林连知贡举正大末坐取人踰新格出
倅坊州未赴改京兆府判官卒于汴纯甫晚年喜佛力
探其奥义自类其文凡论性理及关佛老二家者号内稿其余应物文字为外稿

△王郁

王郁字飞伯大兴人仪状魁奇目光如鹞为文法柳宗元闳肆奇古动辄数千言歌
诗俊逸效李白尝任王子小传以自叙天兴初汴京被
围上书言事不报围稍解挺身突出为兵士所得其将遇之甚厚郁径行无机防为其下
所忌见杀

△宋九嘉

宋九嘉字飞卿夏津人为人刚直豪迈少游太学有能赋声长从李纯甫读书为文
有奇气与雷渊李经伯相仲至宁元年进士历蓝田高
陵扶风三水四县令咸以能称入为翰林应奉正大中以疾去没于癸巳之难 【按金史
此下有庞铸传无事迹可纪亦无著述今删谨识】

△李献能

李献能字钦叔河中人先世有为金吾卫上将军者号李金吾家迨献能以文学名
从兄献卿献诚从弟献甫相继擢第称四桂李家献能
苦学博览于文尤长四六贞佑三年词赋进士廷试第一宏词优等授应奉翰林文字应
机敏捷号为得体出为鄜州观察判官赵秉文李纯甫
荐之复入迁修撰正大末由镇南军节度副使充河中帅府经历官元兵破河中奔陕州

行省权左右司郎中值赵三三军变遇害献能家固饶
财尽于贞佑之乱在京师无以自资其母素豪奢厚于自奉小不如意则必诃谴献能处
之自若时以纯孝称之

△王若虚

王若虚字从之藁城人承安二年经义进士历管城门山二县令皆有惠政荐为国
史院编修迁应奉翰林文字奉使夏国还转著作佐郎
修章宣二朝实录成迁平凉府判官入为直学士天兴二年崔立变羣小翟奕辈请为建
功德碑召若虚为文时奕恃势作威人或少忤则谗构
立见屠灭若虚请元好问曰今召作碑不从则死作之则名节扫地不若死之为愈然我
姑以理论之乃谓奕辈曰丞相功德碑当指何事奕辈
怒曰但言以京城降活生灵百万非功德乎若虚曰学士代王言功德碑谓王言可乎且
丞相既以城降则朝官皆出其门自古岂有为主帅诵
功德而可信后世哉奕辈不能夺改召太学生刘祁麻革与好问张信之为之既成以示
若虚共刚定止直叙其事而已后兵入城不果立金亡
微服北归镇阳与浑源刘郁东游泰山至黄岷峰憩萃美亭顾谓同游曰汨没尘中一生
不意晚年乃造仙府诚得终老此山志愿毕矣乃令子
忠先归子恕同行因垂足坐大石上良久瞑目而逝所著文章有慵夫集滹南遗老集 【
按刘祁归潜志载若虚文贵议论有体致不喜出奇
下字尤以助词为首谓史记有失支堕节处退之原道好文字末云人其人火其书太下
字痕迹黄山谷诗太穿凿好异滹南遣老集四十五卷
辩论居十之九他诗文止数卷亦足见其好尚谨附识】

△麻九畴

麻九畴字知几易州人七岁能草书作大字一时目为神童章宗召见问汝入宫殿
中惧怯召对曰君臣犹父子也子宁惧父邪帝大奇之
南渡后入遂平西山以学古自力博通五经易春秋尤长兴定末试开封府词赋第二经
义第一再试南省复然及廷诗以误黜士论惜之正大
初门人王说王采苓俱中第帝怪其年幼问之知常师九畴平章侯摯荐之特赐虚亚榜
进士以病未拜官告归再授太常寺太祝权博士复谢
病去古鄆城天兴兵乱挈家走确山为元兵所得驱至广平病死九畴初精易学后喜邵
尧夫皇极书因学算数兼通卜筮射覆之术晚更喜医
尽传张子和学为润色其所著书为文精密奇健诗尤工致明昌以来称神童者五人太
原常添寿四岁能作诗刘滋刘微张汉臣后皆无称独
九畴能自树立耆旧如赵秉文以征君目之而不行 【按金史上下有李汾传无著述可
纪亦无事迹可称今删谨识】

△元德明 【元好问】

元德明太原秀容人自幼嗜书口不言鄙事乐易无畦畛布衣蔬食处之自若家人不敢以生理累之累举不第放浪山水闲卒有东崑集子好问字裕之七岁能诗年十四从陵川郝晋卿学不事举业淹贯经传百家六年而业成下太行渡大河为箕山琴台等诗赵秉文见之称为近代所无兴定五年登第累官左司都事转行省左司员外郎金亡不仕卒好问为文有绳尺备众体其诗奇崛而绝雕剝巧缛而谢绮丽兵后故老皆尽好问蔚为一代宗工四方碑版铭志尽趋其门所著文章诗若干卷杜诗学一卷东坡诗雅三卷锦机一卷诗文自警十卷以金源氏有天下典章法度几及汉唐史作已所当任时金国实录在顺天张万户家愿为撰述既为乐夔所沮而止乃构亭于家著述其上名曰野史凡君臣遗言往行采摭所闻有所得辄记录至百余万言今所传有中州集及壬辰杂编后纂金史多本其说云

钦定续通志卷五百六十六

●钦定续通志卷五百六十七 文苑传十四

文苑传

元

○元

胡长孺【之纲 之纯】 熊朋来 戴表元 牟应龙 郑滁

孙【陶孙】 陈孚 杨载【杨刚中 李桓
】 刘洗【龙仁夫 刘岳申】 吴师道 陆文圭【梁益】

陈旅【程文 陈绎曾】 李孝光

胡长孺 【胡之纲 胡之纯】

熊朋来

戴表元

牟应龙

郑滁孙 【郑陶孙】

陈孚

杨载 【杨刚中 李桓】

刘洗 【龙仁夫 刘岳申】

吴师道

陆文圭 【梁益】

陈旅 【程文 陈绎曾】

李孝光

△胡长孺 【胡之纲 胡之纯】

胡长孺字汲仲婺州永康人其先自天台来徙祖岩起宋嘉定进士知闽县事父居仁淳佑进士知台州军州事文辞政事皆绝出一时至长孺其学益大振咸淳中外舅徐道隆为四川宣抚参议官长孺从入蜀铨试第一与高彭李湜梅应春等号南中八士历任福宁州倅宋亡退栖永康山至元二十五年下诏求贤有司强起至京待诏集贤院既而召见内殿拜集贤修撰与宰相议不合改教授扬州寻移建昌至大元年转台州路宣海县主簿浙东大侵宣慰同知托欢彻尔议行劝贷法敛富民钱一百五十万以二十五万属长孺藏之长孺察其有干没意悉散之民既而果索钱长孺抱牍进曰钱在是矣托欢彻尔虽怒不敢问县有铜岩羣盗狙伺其闲恒出抄炙过客患长孺伪衣商人服令苍头负贷以从阴戒骑卒蹶其后比至岩中盗果突出皆城擒尽捕其赏寘之法羣姬聚浮屠庵诵佛书一姬失衣适长孺出姬讼之命以麦寘羣姬掌中绕诵佛书如初长孺闭目叩齿曰吾使神监之矣盗衣者行数周麦当芽一姬屡开掌窃视长孺指缚之还所失衣永嘉民有弟质珠步摇于兄者兄妻爱之给言亡于盗屡讼不获直往告长孺叱之去未几治他盗令盗诬兄受步摇为赃逮至辩甚力长孺曰尔家信有是何谓诬邪兄仓皇曰固有之乃弟所质者趣持至呼其弟示曰非尔家物乎遂还之延佑初转两浙长山场盐司丞未上以病辞隐杭之虎林山以终长孺初师青田余学古学古师邑人王梦松梦松受学龙泉叶味道味道则朱熹弟子也渊源既正长孺益行四方旁求旨趣始信涵食主敬为最切默存静观超然自得故为人光明宏伟专务明本心之学慨然以孟子自许唯恐斯道之失传诱引不倦一时学者宗之尝言人虽最灵与物同产初无二本听者皆跃然兴起至有太息者为辞章有精气非其人虽一金易一字毅然不与

【按辍耕录云赵孟俯尝为罗司徒奉钞百锭为乃父求墓铭长孺怒曰我岂为宦官作墓铭者是日长孺正绝粮其子以情白坐客咸劝受之长孺却愈坚其送蔡如愚归东阳诗有云薄糜不继袄不暖讴吟犹是钟珠鸣诵之曰此余秘密藏中休粮方也谨附识】 乡闾取士屡司文衡贯实践华文风为之一变晚寓武林病卒所著有瓦缶编南昌集宁海漫钞颜乐斋稿行于世其从兄之纲之纯皆以经术文章名之纲字仍仲尝被荐书其于声音字画之说自古独造其妙惜其书不传之纯字穆仲咸淳进士践履如古独行者文尤明洁可诵人称之为三胡云

△熊朋来

熊朋来字与可豫章人宋咸淳进士授宝庆府签书判官事未上世祖初得江南欲

尽求宋遗士而雅重进士以状元王龙泽为江南行台御史朋来与龙泽同榜声名不相下然不肯表襮苟进隐处州里闲生徒受学者常百数十人取朱子小学书提其要领以示之学者家传其书几遍天下与人谭经义日益不倦会朝廷遣治书侍御史王构铨外选于江西于是参政徐琰李世安列荐朋来连为福建庐陵教授晚以福清州判官致仕学者称为天慵先生延佑设科行省争请为考官朋来以应试者大半皆及门不赴其后江浙湖广率卑词致礼始往应之及对大廷其所选士居天下三之一焉初朋来以周礼首荐乡郡而元制周官不与设科治戴记者又鲜朋来屡以为言盖朋来之学诸经中三礼尤深是以当世言礼乐者咸推宗焉至治中英宗始亲祀太庙锐意制礼作乐学士元明善以朋来荐未及召而卒有家集三十卷 【按元史类编朋来尚有经说七卷传未载谨识】

△戴表元

戴表元字帅初庆元奉化州人七岁学古诗文多奇语稍长从里里习词赋辄弃不肯为咸淳中登进士乙科闵宋季文气萎薶而辞骯骯慨然以起衰为己任时四明王应麟天台舒岳祥并以文学师表一代表元皆从而受业故其学博而肆其文清深雅洁蓄而始发闲事摹画而隅角不露东南文章大家必推首焉大德八年除信州教授再调婺州时年六十余矣以疾辞其后翰林集贤复以修撰博士交荐不起寻卒有剡源集行世

△牟应龙

牟应龙字伯成其先蜀人后徙吴兴祖子才仕宋赠光禄大夫谥清忠 【按虞庆墓碑云子才以言事忤时宰郑清之去国抵吴兴寓第而应龙生子才喜字曰翁归谨附识】 父巘为大理少卿应龙幼警敏为文有浑厚气当以任子补京职尽让诸从弟而自业举子成咸淳进士时贾似道当国欲邀一见处以高弟应龙拒不往及廷对策具言上下情隔国势危急之状考官不敢真上第除光州定城尉应龙曰昔吾祖封策以直言忤史弥远得洪雅尉今固当尔无愧也沿海制置司辟为属以疾辞宋亡故相留梦炎事世祖为吏部尚书以书召之不答已而起家教授溧阳州晚以上元县主簿致仕初宋亡时巘已退不仕一门父子自为师友讨论经学于诸经皆有成说惟五经音考盛行于世应龙为文长于叙事时求其文者车辙满门人拟之眉山苏氏父子学者因其所自号称曰隆山先生泰定元年卒

△郑滁孙 【郑陶孙】

郑滁孙字景欧处州人宋景定闲进士为礼部郎官至元三十年有以滁孙名荐者世祖召见授集贤直学士寻迁侍讲学士乞致仕归弟陶孙字景潜亦宋进士监西岳祠先陶孙征至阙奏对称旨授翰林国史院编修官纂修宋史至德佑末年事陶孙曰臣尝事宋宋是年亡义不忍书世祖嘉之升应奉翰林文字后出为江西儒学提举滁孙兄弟在当时最号博洽士大夫翕然推重滁孙所著有《大易法象通赞》《周易记玩》等书陶孙有文集若干卷

△陈孚

陈孚字刚中台州临海人至元中以布衣上大一统赋江浙行省闻于朝署上蔡书院山长考满谒选京师世祖命尚书梁曾使安南选南士为介朝臣荐孚博学有气节授翰林国史院编修官为曾副至安南世子陈日燿以忧制不郊迎又不令由中门入曾致书诘责往复再三辞直气壮皆孚笔也其所赠孚悉却之详见梁曾传使还除翰林侍制帝方欲寘之要地而廷臣以孚南人且尚气颇嫉之调建德路治中再迁衢州所至多着善政秩满请典乡郡复授台州路治中大德七年奉使宣抚循行诸道时台州旱民饥道殍相望浙东元帅托欢彻尔以省檄赈济怙势立威孚愬其不法蠹民事宣抚使按实坐其罪亟命发仓赈救民赖全活者众而孚亦以此致疾卒于家孚天材过人性任侠不羁为诗文任意即成不事雕斲有文集行世【按台州府志云赠临海郡公谥文惠有大游观光玉堂交州桐江柯山等稿谨识】

△杨载【杨刚中 李桓】

杨载字仲弘其先居建之蒲城后徙于杭少孤博涉羣书年四十不仕户部贾国英数荐于朝以布衣召入为翰林国史院编修官与修武宗实录延佑初仁宗以科自取士载首应诏登进士第历仕宁国路推官初赵孟俯在翰林得载所为文极加推重由是名动京师其文章一以气为主博而敏直而不肆尤以诗名家尝语学者曰诗当取材汉魏而音节则以唐为宗自其诗出一洗宋季之陋同时有杨刚中字志行上元人为文奇奥简涩动法古人不屑为世俗平凡语元明善极叹异之仕至翰林待制有霜月集行世其甥李桓字晋仲同郡人由乡贡进士累迁江浙儒学副提举亦以文鸣江东载与刚中同辈行而桓则稍后云

△刘洗【龙仁夫 刘岳申】

刘洗字桂翁吉安庐陵人【按欧阳玄墓碑云其先自清江之翟斜徙居吉水之南岭谨附识】幼失父知自树立既冠重厚醇雅素以师道自居教学者有法警誉日隆江南行台累以遗逸荐不就为文根柢六经躡踪诸子

百家融液今古而不露其踔厉风发之状四方求诗文者日至于门所著有桂隐集至正十年卒同郡龙仁夫字观复刘岳申字高仲皆与洗齐名而仁夫之文尤奇逸洗丽所注周易多发前儒之所未发用荐者以岳申为辽阳儒学副提举仁夫为江浙儒学副提举皆不就

△吴师道

吴师道字正传婺州兰溪人自羈卯即善记览工词章才思涌溢弱冠读宋儒真德秀遗书幡然有志为己之学尝以持敬致知之说质于同郡许谦谦复之以理一分殊之旨由是造诣益深大旨在发挥义理而以辟异端为先务登至治元年进士第授高邮县丞调宁国路录事迁池州建德县尹所至有治声中书左丞吕思诚侍御史孔思立荐之朝召为国子助教寻迁博士其教一本朱子之旨而遵许衡之成法六馆诸生咸自以为得师以礼部郎中致仕终于家所著有易诗书杂说春秋胡传附辨战国策校注敬乡录及文集二十卷

△陆文圭 【梁益】

陆文圭字子方江阴人幼颖悟博通经史百家宋咸淳初以春秋中乡选宋亡隐居城东学者称曰墙东先生延佑设科有司强之就试凡一再中乡举为文融会经传纵横变化莫测其涯际东南学者皆宗师之朝廷数遣使驰聘以老疾不果行卒文圭性高迈以奇气自负于地理考核尤详凡天下郡县沿革人物土产悉能默记如指诸掌先属纟一日语门人曰以数考之吾州二十年后必被兵吾死当葬不食之地勿封勿树使人不知吾墓所在庶无暴骨之患其后江阴乱冢尽发人服其先知有墙东类稿二十卷同里梁益字友直博洽经史工文辞其教人以变化气质为先学徒不远千里从之自文圭既卒浙西称学术醇正者惟益而已所著书有三山稿诗绪余史传姓氏纂又有诗传旁通深得朱子之学后卒

△陈旅 【程文 陈绎曾】

陈旅字众仲兴化莆田人资禀颖异稍长至温陵从乡先生傅古直游声名日着以荐为闽海儒学官御史中丞马祖常使泉南一见奇之因勉游京师虞集见其文慨然曰此所谓我老将休付子斯文者矣即延至馆中朝夕相讲习自谓得友平章赵世延力荐之除国子助教居三年考满诸生不忍其去请再任焉元统二年出为江浙儒学副提举至元四年入为应奉翰林文字至正元年迁国子监丞又二年卒旅于文自先秦以来至唐宋诸大家无所不究故其文典雅峻洁必求合于古作者有文集十四卷【按书史会要云旅善古隶而行楷亦有法谨附识

】旅感集为知己其在浙江时集归田已数载岁且大比请于行省参政富珠哩翀亲奉书币请集主文乡闾欲为问候计衡冒炎暑千里至临川集感其来留旬日而别惓惓以斯文相勉既而闻旅卒深痛悼之同时有程文陈绎曾皆名士文字以文徽州人仕至礼部员外郎作文明洁而精深集亦多称之【按一统志云自号黟南主有文集三十八卷谨附识】绎曾字伯敷处州人为人虽口吃而精敏异常诸经注疏多能成诵文辞汪洋浩博其气淳如官国子助教【按书史会要云绎曾学识优博真草篆隶俱通习得法谨附识】论者谓二人皆与旅相伯仲云

△李孝光

李孝光字季和温州乐清人少博学笃志复古隐居雁荡山四方之士远来受学至正七年诏征隐士以秘书监著作郎召赴京师见帝于宣文阁进孝经图说顺帝大悦明年授秘书监丞卒于官孝光以文章负名当世其文一取法古人非先秦两汉语弗以措辞有文集二十卷雁山十记一卷

钦定续通志卷五百六十七

●钦定续通志卷五百六十八 隐逸传一

隐逸传

（臣）等谨案郑志云范史始立隐逸传谓之逸民自晋宋至后魏称名不同总曰隐逸考新旧唐书及宋金元史皆有隐逸传惟五代史辽史阙焉今于五代史一行传中采其人之合于隐逸者补之辽史则仍其阙云

唐

五代

○唐

王绩

朱桃椎

孙思邈

田游岩

王友贞

王希夷

李元恺

卫大经

武攸绪

白履

忠

卢鸿一

吴筠

潘师正

司马承祯

贺知章

秦系

张志和

陆羽

崔颢

陆龟

蒙

王绩

朱桃椎

孙思邈

田游岩

王友贞

王希夷
李元恺
卫大经
武攸绪
白履忠
卢鸿一
吴筠
潘师正
司马承祯
贺知章
秦系
张志和
陆羽
崔颢
陆龟蒙
△王绩

王绩字无功绛州龙门人性简放不喜拜揖兄通隋末大儒也聚徒河汾简仿古作元经【按新书本传云仿古作六经考旧书王勃传称勃祖通依春秋体例自获麟后至后魏着纪年之书谓之元经无作六经之说今据改】又为中说以拟论语通知续诞纵不娶以家事乡族庆吊冠昏不与也与李播吕才善大业中举孝悌廉洁授秘书省正字不乐在朝求为六合丞嗜酒不任事时天下已乱因劾遂解去叹曰网罗在天吾且安之乃还乡里有田十六顷在河渚闲仲长子光者【旧书作仲长子先】亦隐者也无妻子结庐北渚凡三十年非其力不食绩爱其贞徙与相近子光瘖未尝交语与对酌酒欢甚绩有奴婢数人种黍春秋酿酒养鳧雁蒔药草自供以周易老子庄子置床头他书罕读也欲见兄弟辄渡河还家游北山东皋著书自号东皋子乘牛经酒肆留或数日高祖武德初以前官待诏门下省故事官给酒日三升或问待诏何乐邪答曰良酝可恋耳侍中陈叔达闻之日给一斗时称斗酒学士贞观初以疾罢复调有司时大乐署史焦革家善酿绩求为丞吏部以非流不许绩固请曰有深意竟除之革死妻送酒不绝岁余又死绩曰天不使我酣美酒邪弃官去自是大乐丞为清职追述革酒法为经又采杜康仪秋以来善酒者为谱李淳风曰君酒家南董也所居东南有盘石立杜康祠祭之尊为师以革配着醉乡记以次刘伶酒德颂其饮至五斗

不乱人有以酒邀者无贵贱辄往着五斗先生传刺史崔喜悦之请相见答曰奈何坐召
严君平邪卒不诣杜之松故人也为刺史请续讲礼答
曰吾不能揖让邦君门谈糟粕弃醇醪也之松岁时赠以酒脯初兄凝为隋著作郎撰隋
书未成绩纒余功亦不能成贞观十八年豫知终日命
薄葬自志其墓而卒

△朱桃椎

朱桃椎益州成都人澹泊绝俗被裘曳索人莫测其所为长史宝轨见之遗以衣服
鹿帻鹿鞞逼署乡正委之地不肯服更结庐山中夏则
嬴冬缉木反叶自蔽赠遗无所受尝织十芒屨置道上见者曰居士屨也为鬻米茗易之
置其处辄取去终不与人接其为屨草柔细环结促密
人争蹶之高士廉为长史备礼以请降阶与之语不答瞪视而出士廉拜曰祭酒其使我
以无事治蜀邪乃简条目薄赋敛州大治屡遣人存问
见辄走林草自匿云

△孙思邈

孙思邈京兆华原人通百家说善言老庄周洛州总管独孤信见其少异之曰圣童
也顾器大难为用尔及长居太白山隋文帝辅政以国
子博士召不拜密语人曰后五十年有圣人出吾且助之太宗初召诣京师年已老而视
听聪瞭帝叹曰有道者欲官之不受显庆中复召见拜
谏议大夫固辞上元元年称疾还山高宗赐良马假鄱阳公主邑司以居之思邈于阴阳
推步医药无不善孟洗卢照邻等师事之照邻有恶疾
不可为感而问曰高医愈疾奈何答曰天有四时五行寒暑迭居和为雨怒为风凝为雪
霜张为虹霓天常数也人之四支五藏一觉一寐吐纳
往来流为荣卫章为气色发为音声人常数也阳用其形阴用其精天人所同也失则蒸
生热否生寒结为瘤赘陷为痈疽奔则喘乏竭则焦槁
发乎面动乎形天地亦然五纬缩羸孛彗飞流其危诊也寒暑不时其蒸石也石立土踊
是其瘤赘山崩土陷是其痈疽奔风暴风其喘乏川渌
竭涸其焦槁高医导以药石救以砭剂圣人和以至德辅以人事故体有司愈之疾大有
可振之灾照邻曰人事奈何曰心为之君君尚恭故欲
小诗曰如临深渊如履薄冰小之谓也胆为之将以果决为务故欲大诗曰赳赳武夫公
侯干城大之谓也仁者静地之象故欲方传曰不为利
回不为义疾方之谓也智者动天之象故欲圆易曰见几而作不俟终日圆之谓也复问
养生之要答曰天有盈虚人有屯危不自慎不能济也
故养性必先知自慎也慎以畏为本故士无畏则简仁义农无畏则惰稼穡工无畏则慢
规矩商无畏则货不殖子无畏则忘孝父无畏则废慈

臣无畏则动不立君无畏则乱不治是以太上畏道其次畏天其次畏物其次畏人其次畏身忧于身者不拘于人畏于己者不制于彼慎于小者不惧于大戒于近者不侮于远知此则人事毕矣初魏征等修齐梁周隋等五家史屡咨所遗其传最详永淳初卒年百余岁遗令薄葬不藏明器祭去牲牢孙处约常以诸子见思邈曰俊先显侑晚贵佗祸在执兵后皆验太子詹事卢齐卿之少也思邈曰后五十年位方伯吾孙为属吏愿自爱时思邈之孙溥尚未生及溥为萧丞而齐卿徐州刺史

△田游岩

田游岩京兆三原人永徽时补太学生罢归入太白山母及妻皆有方外志与共栖迟山水闲自蜀历荆楚爱夷陵青溪止庐其侧长史李安期表其才召赴京师辞疾入箕山居许由祠旁自称许由东邻频召不出高宗幸嵩山遣中书侍郎薛元超就问其母赐药物絮帛帝亲至其门游岩野服出拜仪止谨朴帝令左右扶止之谓曰先生比佳否答曰臣所谓泉石膏盲烟霞痼疾者帝曰朕得卿何异汉获四皓乎薛元超赞帝曰汉欲废嫡立庶故四人者为出岂如陛下亲降岩穴邪帝悦因敕游岩将家属乘传赴都拜崇文馆学士帝营奉天宫游岩旧宅直宫左诏不听毁天子自书榜其门曰隐士田游岩宅进太子洗马裴炎死坐素厚善放还山蚕衣耕食不交当世惟与韩法昭宋之问为方外友云 【按新书此下有史德义附传极天授初江南宣慰使周兴荐之召赴都擢朝散大夫兴死免官归素誉顿衰他无足录又有孟诜传载诜擢进士官凤阁舍人春官侍郎同州刺史神龙初始致仕尝语人曰养性者善言不可离口善药不可离手然本传称其居官颇刻敛不当入隐逸传今并删】

△王友贞

王友贞怀州河内人父知敬善书隶武后时仕为麟台少监友贞少为司经局正字母病医言得人肉啖良已友贞剔股以进母疾愈诏旌表其门素好学训诲子弟如严君口不语人过重然诺时以为君子历长水令罢归中宗在东宫召为司议郎不就神龙初以太子中舍人征固辞疾诏给全禄于身州县存问玄宗在东宫表请以蒲车召不至卒年九十九赠银青光禄大夫

△王希夷

王希夷徐州滕人家贫父母丧为人牧羊取佣以葬隐嵩山师黄颐学养生四十年颐卒更居兖州徂徕与刘玄博友善喜读周易老子饵松柏叶杂华年七十余筋力柔强刺史卢齐卿就谒问政答曰己所不欲勿施于人此言

足矣玄宗东巡狩诏州县敦劝见行在时九十六帝令

张说访以政事宦官扶入宫与语甚悦拜国子博士听还山敕州县春秋致东帛酒肉仍赠绢百衣一称

△李元恺

李元恺邢州人博学善天文律历性恭慎口不言人过宋璟尝师之既当国将荐之朝拒不答洺州刺史元行冲邀致之问经义毕赠衣服

辞曰吾躯不可服新丽惧不称以速咎也行冲垢齟复与之不获已而受及还乃以己之所蚕素丝五两酬行冲曰义不受无妄财也先是定州

崔元鉴善礼学用张易之力授朝散大夫家居给半禄元恺谓曰无功而禄灾也卒年八十

△卫大经

卫大经蒲州解人卓然高行口无二言武后时召之固辞疾素善魏夏侯干童闻其母卒盛暑步往吊或止之曰方夏涉远不如致书答曰

书能尽意邪比至干童以事行乃设席行吊礼不讯其家而还开元初毕构为刺史使县令孔慎言就谒辞不见大经邃于易人谓之易圣豫筮

死日凿墓自为志如言终

△武攸绪

武攸绪别天皇后兄惟良子也恬澹寡欲好易庄周书少变姓名卖卜长安市得钱辄委去后更授太子通事舍人累迁扬州大都督府长

史鸿胪少卿后革命封安平郡王从封中岳固辞官愿隐居后疑其诈许之以观所为攸绪庐岩下如素遁者后遗其兄攸宜敦谕卒不起后乃

异之盘桓龙门少室闲冬蔽茅椒夏居石室所赐金银铛鬲野服王公所遗鹿裘素障瘳栝尘皆流积不御也市田颍阳使家奴杂作自混于民

晚年瞳有紫光昼能见星中宗初降封巢国公遣国子司业杜慎盈赍书以安车召拜太子宾客苦祈还山诏可安乐公主出降又遣通事舍人

李邈以玺书迎之将至帝敕有司即两仪殿设位行问道礼召见日山帔葛巾不名不拜攸绪至更冠带杖入通事舍人赞就位攸绪趋就常班

再拜帝愕然礼不及行朝廷叹息赐子无所受亲贵来谒道寒温外默无所言及还中书门下学士朝官五品以上并祖城东俄而诸韦诛武氏

连祸唯攸绪不及睿宗恐其不自安下诏慰谕复召拜太子宾客不就讷王重福之乱攸绪以诬被系张说表置庐山中书令姚元崇奏攸绪在

武后时未尝辄出今州县逼遣士为惊嗟愿诏赐嵩山旧居令州县存问诏可开元十一年卒

△白履忠

白履忠汴州浚仪人贯知文史居古大梁城时号梁邱子景云中召为校书郎弃官去开元十年刑部尚书王志愔荐履忠博学守操可代褚无量马怀素入阁侍读十七年国子祭酒杨珣又表其贤召赴京师辞病老不任职诏拜朝散大夫乞还手诏许游京师徐返里闾履忠留数月乃去吴兢其里人也谓曰子素贫不沾斗米匹帛虽得五品亦何益履忠曰往契丹入侵家取排门夫吾以读书县为免今终身高卧宽徭役岂易得哉

△卢鸿一

卢鸿一【按新书作卢鸿脱一字今据旧书增】字浩然【按新书作显然今据旧书改】其先幽州范阳人徙洛阳博学善书籀庐嵩山当开元初备礼再征不至五年复诏有司赍束帛征之鸿一至东都谒见不拜宰相遣通事舍人问状答曰礼者忠信之薄臣敢以忠信见帝召升内殿置酒拜谏议大夫固辞复下制许还山岁给米百斛绢五十府县为致其家朝廷得失以其状闻将行赐隐居服官营草堂恩礼殊渥鸿一至山中广学庐聚徒至五百人所居室自号宁极云

△吴筠

吴筠字贞节华州华阴人通经义美文辞举进士不中性高鲠不耐沈浮于时去居南阳天宝初召至京师请隶道士籍乃入嵩山依潘师正究其术南游天台与有名士相娱乐文辞传京师玄宗遣使召见大同殿与语其悦敕待诏翰林献玄纲三篇帝尝问道对曰深于道者无如老子其余徒丧纸札耳复问神仙冶炼法对曰此野人事积岁月求之非人主所宜留意筠每开陈皆名教世务天子重之羣沙门嫉其见遇而高力士素事浮图共短筠于帝筠亦知天下将乱恳求还嵩山不许诏为立道馆安禄山欲称兵乃还茅山而两京陷江淮盗贼起因东入会稽剡中与李白孔巢父诗篇酬和大历十三年卒弟子私谥为宗元先生

△潘师正

潘师正贝州宗城人【旧书作赵州赞皇人】少丧母庐墓以孝闻事王远知为道士得其术居逍遥谷高宗幸东都召见问所须对曰茂林清泉臣所须也既不乏矣帝莫异之诏即其庐作崇唐观及营奉天宫又敕直逍遥谷作门曰仙游北曰寻真时太常献新乐帝更名祈仙望仙翹仙曲卒年九十八赠大中大夫谥体玄先生【按新书此下有刘道合附传载其祈晴作丹剂二事殊无足录今删】

△司马承祯

司马承祯字子微洛州温人少好学薄于为吏遂从潘师正学辟谷导引术无不通

师正异之曰我得陶隐居正一法逮而四世矣因辞去徧游名山庐天台不出武后尝召之未几去景云二年睿宗复命其兄承祜就起之既至引入掖廷问其术对曰为道日损损之又损以至于无为夫心目所知见每损之尚不能已况攻异端而增智虑哉帝曰治身则尔治国若何对曰国犹身也故游心于澹合气于漠与物自然而无私焉而天下治帝嗟味曰广成之言也锡宝琴霞纹帔还之开元中再初召至都玄宗诏于王屋山置坛室以居善篆隶帝命以三体写老子刊正文句又命玉真公主及光禄卿韦绛至所居按金策设祠厚赐焉卒年八十九赠银青光禄大夫谥贞一先生亲文其碑

△贺知章

贺知章字季真越州永兴人性旷夷善谈说与族姑子陆象先善象先尝谓人曰季真清谈风流吾一日不见则鄙吝生矣则天证圣初擢进士超拔羣类科累迁太常博士张说为丽正殿修书使表知章及徐坚赵冬曦入院撰六典等书开元十三年迁礼部侍郎兼集贤院学士一日并谢宰相源干曜语说曰学士侍郎孰为美说曰侍郎衣冠之选然要为具员吏学士怀先王之道经纬之文然后处之此其为闲也玄宗自为赞赐之迁太子右庶子充侍读申王薨诏选挽郎而知章取舍不平荫子喧诉不能止知章梯墙出首以决事人皆斩之坐徙工部肃宗为太子知章迁宾客授秘书监晚节尤诞放遨嬉里巷自号四明狂客及秘书外监每醉辄属辞笔不停书咸有可观未始刊饬善草隶好事者具笔研从之意有所愜不复拒然纸纔十数字世传以为宝天宝初病乃请为道士还乡里诏许之以宅为千秋观而居又求周宫湖数顷为放生池有诏赐镜湖剡川一曲既行帝赐诗皇太子百官餞送擢其子僧子为会稽郡司马赐绯鱼使侍养幼子亦听为道士卒年八十六肃宗干元初以雅旧赠礼部尚书

△秦系

秦系字公绪越州会稽人天宝末避乱剡溪北都留守薛兼训奏为右卫率府仓曹参军不就客泉州南安结庐九日山穴石为研注老子弥年不出刺史薛播数往见之岁时致羊酒而系未尝至城门姜公辅之谪见系辄穷日不能去筑室与相近忘流落之苦公辅卒妻子在远系为葬山下张建封闻系之不可致请就加校书郎与刘长卿善以诗相赠答权德与曰长卿自以为五言长城系用偏师攻之虽老益壮其后东度秣陵年八十余卒南安人思之号其山为高士峯云

△张志和

张志和字子同婺州金华人始名龟龄父游朝通庄列二子书为象罔白马证诸篇佐其说母梦枫生腹上而产志和十六擢明经以策干肃宗特见赏重命待诏翰林授左金吾卫录事参军因赐名后坐事贬南浦尉会赦还以亲既丧不复仕居江湖自称烟波钓徒着玄真子亦以自号有韦诣者为撰内解志和又着大易十五篇其卦三百六十五兄鹤龄恐其遯世不还为筑室越州东郭茨以生草椽梗不施斤斧豹席椽屨每垂钓不设饵志不在鱼也县令使浚渠执畚无忤色尝欲以大布制裘嫂为躬绩织及成衣之虽暑不解观察使陈少游往见为终日留表其居曰元真坊以门隘为买地大其闳号回轩巷先是门阻流水无梁少游为构之人号大夫桥帝尝赐奴婢各一志和配为夫妇号渔童樵青陆羽尝问孰为往来者对曰太虚为室明月为烛与四海诸公共处未尝少别也何有往来颜真卿为湖州刺史志和来谒真卿以舟敝漏请更之志和曰愿为浮家泛宅往来苕霅闲辩捷类如此善图山水酒酣或击鼓吹笛舐笔辄成尝撰渔歌宪宗图其真求之不能致李德裕称志和隐而有名显而无事不穷不达严光之比云 【按新书此下有孔述睿及子敏行传今改入孔氏后裔传此从删】

△陆羽

陆羽字鸿渐一名疾字季疵复州竟陵人不知所生或言有僧得诸水滨抚之既长以易自筮得蹇之渐曰鸿渐于陆其羽可用为仪乃以陆为氏名而字之幼时其师教以旁行书答曰终鲜兄弟而绝后嗣得为孝乎师怒使执粪除圻堦以苦之又使牧牛羽潜以竹画牛背为字得张衡南都赋不能读危坐效羣儿嗷嗷若成诵状师拘之令薙草莽当其记文字懵懵若有遗过日不作主者鞭苦因叹曰岁月往矣奈何不知书呜咽不自胜因亡去匿为优人作诙谐数千言天宝中州人酺吏署羽伶师太守李齐物见异之授以书遂庐火门山貌佻陋口吃而辩闻人善若在己见有过者规切至忤人朋友燕处意有所行辄去人疑其多嗔与人期雨雪虎狼不避也上元初更隐苕溪自称桑苎翁阖门著书或独行野中诵诗击木裴回不得意或恸器而归久之诏拜羽太子文学徒太常寺太祝不就职贞元末卒羽嗜茶着经三篇言茶之原之法之具尤备天下益知饮茶矣时鬻茶者至陶羽形置炆突闲祝为茶神有常伯熊者因羽论复广着茶之功御史大夫李季卿宣慰江南次临淮知伯熊善煮茶召之伯熊执器前季卿为再举杯至江南又有荐羽者召之羽衣野服挈具而入季卿不为礼羽愧之更着毁茶论其后尚茶成风时回纥入朝始驱马市茶

△崔覲

崔覲梁州城固人以儒自业身耕耨取给老无子乃以田宅财货分给奴婢而身与妻隐南山山南西道节度使郑余庆辟为参谋敦趣就职不晓吏事余庆称长者文宗时左补阙王直方其里中人也上书论事见便殿帝访遗逸直方荐覲高行诏以起居郎召辞疾不至

△陆龟蒙

陆龟蒙字鲁望元方七世孙也父宾虞以文历侍御史龟蒙少高放通六经大义尤明春秋举进士一不中往从湖州刺史张搏游搏历湖苏二州辟以自佐尝至饶州三日无所诣刺史蔡京率官属就见之龟蒙不乐拂衣去居松江甫里多所论撰虽幽忧疾痛费无十日计不少辍也文成箝藁篋中或历年不省为好事者盗去得书熟诵乃录讎比勤勤朱黄不去手所藏虽少其精皆可传借人书篇帙坏舛必为辑褫刊正乐闻人学讲论不倦有田数百亩屋三十楹田苦下雨潦则与江通故常苦饥身畚插莠刺无休时或讥其劳答曰尧舜霉瘠禹胼胝彼圣人也吾一褐衣敢不勤乎嗜茶置园顾渚山下岁取茶租自判品第张又新为水说七种其二惠山泉三虎邱井六松江人助其好者虽百里为致之初病酒再期乃已其后客至絜壶置杯不复饮不喜与流俗交虽造门不肯见不乘马升舟设蓬席赍束书茶灶笔床钓具往来时谓江湖散人或号天随子甫里先生后以高士召不至李蔚卢携素与善及当国召拜左拾遗诏方下卒光化中韦庄表龟蒙及孟郊等十人皆赠右补阙陆氏在姑苏其门有巨石远祖绩尝事吴为郁林太守罢归无装舟轻不可越海取石为重人称其廉号郁林石世保其居云

○五代

郑遨 张荐明

郑遨

张荐明

△郑遨

郑遨字云叟滑州白马人选后唐明宗祖庙讳以字行少好学敏于文辞唐昭宗时举进士不中见天下已乱欲携其妻子与俱隐其妻不从遨乃入少室山为道士其妻数以书劝遨还家辄投之于火后闻其妻子卒一恸而止遨与李振故善振后事梁贵显欲禄遨遨不顾后振得罪南窜遨徒步千里往视之由是闻者益高其行其后遨闻华山有五粒松脂沦入地千岁化为药能去三尸因徙居华阴欲求之与道士李道殷罗隐之方善世目为三高士遨种田隐之卖药以自给道殷有钓鱼术钓而不饵又能

化石为金邀尝验其信然而不之求也节度使刘遂凝
数以宝货遗之邀一不受唐明宗时以左拾遗晋高祖时以谏议大夫召之皆不起即赐
号为逍遥先生天福四年卒邀好饮酒奕棋时时为诗
章落人闲人闲多写以缣素相赠遗以为宝至或图写其形翫于屋壁

△张荐明

张荐明燕人少以儒学游河朔后去为道士通老子庄周之说晋高祖召见问道家
可以治国乎对曰道也者妙万物而为言得其极者尸
居衽席之闲可以治天下也高祖大其言延入内殿讲道德经拜以为师荐明闻宫中奏
时鼓曰陛下闻鼓乎其声一而已五音十二律鼓无一
焉然和之者鼓也夫一万事之本也能守一者可以治天下高祖善之赐号通玄先生后
不知其所终

钦定续通志卷五百六十八

●钦定续通志卷五百六十九 隐逸传二

隐逸传

宋【一】

○宋一

戚同文【杨恣 宋翼 张昉 滕知白】 陈抟 种放 万适【
田浩 杨璞】 李洙 魏野 邢
惇 林逋 高恠【韩退】 徐复 何羣

戚同文【杨恣 宋翼 张昉 滕知白】

陈抟

种放

万适【田浩 杨璞】

李洙

魏野

邢惇

林逋

高恠【韩退】

徐复

何羣

△戚同文【杨恣 宋翼 张昉 滕知白】

戚同文字同文宋之楚邱人世为儒幼孤祖母携育于外氏奉养以孝闻祖母卒昼
夜哀号不食数日乡里为之感动始闻邑人杨恣教授
生徒日过其学舍因授礼记随即成诵日讽一卷恣异而留之不终岁毕诵五经恣即妻

以女弟自是益勤励时晋未丧乱绝意禄仕且思见混
一遂以同文为名字恚尝勉之仕同文曰长者不仕同文亦不仕恚依将军赵直遇疾不
起以家事托同文即为葬三世直厚加礼待为筑室聚
徒请益之人不远千里而至登第者五六十人宗度许骧陈象舆高象先郭成范王砺滕
涉皆践台阁同文纯质尚信守义人有丧者力拯济之
宗族闾里贫乏者周给之冬月多解衣裘与寒者不积财不营居室或勉之辄曰人生以
义为贵焉用此为由是深为乡里推服有不循孝悌者
同文必谕以善道颇有知人鉴所与游皆一时名士乐闻人善未尝言人短与宗翼张昉
滕知白为友生平不至京师长子维任随州书记迎同
文就养卒于汉东好为诗有孟诸集二十卷杨徽之尝因使至郡一见相善多与酬唱徽
之尝云陶隐居号贞白先生先生纯粹质直以道义自
富遂与其门人追号贞素先生二子维纶维累官职方郎中致仕纶自有传杨恚者虞城
人力学勤志不求闻达宗翼者蔡州上蔡人父为虞城
主簿因家焉笃孝恭谨负米养母好学强记经籍一见即能默写书得欧阳虞柳楷法能
属文隐而不仕家无斗粟怡怡如也未尝以贫窶干人
市物不评价市人知而不欺同文谓翼曰子劳谦有古人风真吾友也以寿终其子度举
进士至侍御史京西转运使张昉有史材至殿中少监
致仕子信自有传滕知白善为诗至刑部员外郎河北转运使子涉为给事中高象先父
凝佑刑部员外以强干称象先至光禄少卿郭成范最
有文终司封员外郎致仕王砺事母甚谨太平兴国五年进士至屯田郎中子涣渎渊冲
泳涣子稷臣渎子尧臣并进士及第涣子梦臣进士出
身

△陈抟

陈抟字图南亳州真源人始四五岁戏涡水岸侧有青衣媪乳之自是聪悟日益及
长读经史百家之言一见成诵悉无遗忘颇以诗名后
唐长兴中举进士不第遂不求禄仕以水山为乐居武当山九室岩服气辟谷历二十余
年但日饮酒数杯移居华山云台观又止少华石室每
寝处多百余日不起周世宗好黄白术有以抟名闻者显德三年命华州送至阙下留止
禁中月余从容问其术抟对曰陛下为四海之主当以
致治为念奈何留意黄白之事乎世宗不之责命为谏议大夫固辞不受既知其无他术
放还诏本州岛司吏岁时存问五年成州刺史朱宪陛辞
赴任世宗令赍茶帛赐抟【按朱子名臣言行录云周世宗赐号白云先生宋史本传不
载】尝乘白驴欲入汴闻太祖即位大笑坠驴曰天
下于是定矣太平兴国初应召赴阙【按宋史本传作来朝不言被召考朱子名臣言行

录云太宗召赴阙赐诗云曾向前朝出白云后来消息杳无闻如今若肯随征召总把三峰乞与君则抟之赴阙实应召也东都事略亦称召至阙今据改又按太平兴国初本传作太平兴国中今据名臣言行录改】太宗待之甚厚太平兴国九年【按宋史太宗本纪太平兴国九年十月改元雍熙太平兴国九年即雍熙元年也】复至阙帝益加礼重谓宰相宋琪等曰抟独善其身不干势利所谓方外之士也因遣中使送至中书琪等从容问曰先生修养之道可以教人乎对曰抟不知吐纳养生之理假令白日冲天亦何益于治今天子博达古今深究治乱真有道仁圣之主也正是君臣协心同德与化致治之秋勤行修练无出于此琪等称善以其语闻帝益重之赐号希夷先生仍赐紫衣一袭留数月令有司增葺所止云台观放还山端拱初忽谓弟子贾德升曰汝可于张超谷凿石为室吾将憩焉二年秋石室成抟手书数百言为表称于七月二十二日化形于莲花峰下如期而卒抟好读易手不释卷常自号扶摇予着指玄篇八十一章言导养及还丹之事又有三峰寓言及高阳集钓潭集大中祥符四年真宗幸华阴至云台观阅抟画像除其观田租

△种放

种放字明远河南洛阳人父诩吏部令史调补长安主簿放沉默好学七岁能属文父尝令举进士放辞以业未成不可妄动每往来嵩华山慨然有山林意未几父卒数兄皆干进独放与母俱隐终南豹林谷结草为庐仅蔽风雨以讲习为业从学者众得吏修以养母母亦乐道薄滋味放得辟谷术嗜酒自号云溪醉侯【东都事略作云溪醉叟】又号退士所著蒙书十卷及嗣禹说表孟子上下篇太乙祠录人颇称之【按朱子名臣言行录云放闻陈抟之风往见之抟一日令洒埽庭除曰当有佳客至放作樵夫拜庭下抟挽而止之曰君岂樵者二十年后当得显官重名放曰放以道义来官禄非所闻抟曰君骨相当尔虽晦迹山林恐竟不能安又尝戒放曰子他日不假进取迹动天阙名驰寰海名者古今美器造物者深忌之天地闲无完名子名将起必有物败可戒之宋史本传不载】淳化三年陕西转运使宋惟干言其才行诏使召之其母恚曰尝劝汝勿聚徒讲学果为人知不得安处我将弃汝深入穷山矣放称疾不起其母尽取其笔砚焚之与放转居穷僻人迹罕至太宗嘉其节诏京兆赐以缗钱使养母不夺其志有司岁时存问咸平元年母卒水浆不入口三日庐于墓侧宋湜钱若水王禹偁言其贫不克葬诏赐钱帛及米四年兵部尚书张齐贤言放孝行纯至可厉风俗简朴亡静无谢古人复诏

本府遣官诣山以礼发遣赴阙放辞不起明年齐贤出
守京兆复条放操行请加旌贲召至阙对崇政殿命坐询以民政边事放曰明王之治爱民而已惟徐而化之余皆谦让不对即日授左司谏直
昭文馆御制五言诗宠之赐昭庆坊第一区自是屡得召对六年春再表谢暂归故山诏许其请将行又迁起居舍人命馆阁官宴饯于琼林苑
帝赐七言诗三章在席皆赋寻遣使就山抚问图其林泉居处以献优诏趣其入覲放以疾未平为请景德元年入朝二年擢为友谏议大夫表
乞嵩少养疾许之令河南府检校召对资政殿曲宴学士院表乞免都门置饯之礼屡遣中使劳问是冬复还朝三年以兄丧请告归终南复召
宴赐诗表求太宗御书及经史音疏悉给焉十月复至帝欲大用之遣内侍任文庆赍诏谕意放上表固辞帝曰放能守分恳让益可嘉也大中
祥符元年命判集贤院从封泰山拜给事中二年求归山宴饯于龙图阁命学士即席赋诗制序三年复召赴阙表乞赐告手诏优答作歌赐之
乃令京兆府每季遣幕职就山存问四年复入朝从祠汾阴拜工部侍郎放屡至阙下俄复还山人有诒书嘲其出处之迹且劝以弃位居岩谷
放不答放终身不娶尤恶器杂故京城赐第为择僻处然禄赐既优晚节颇饰舆服于长安广置良田岁利甚博亦有强市者遂至争讼门人族
属依倚恣横王嗣宗守京兆放尝乘醉慢骂之嗣宗屡遣人责放不法仍条上其事诏工部郎中施护推究会赦恩而止四月求归山又赐宴遣
之所居山林细民多纵樵采特诏禁止放遂表徙居嵩山天封观侧遣内侍就兴唐观基起第赐之假余百日续给其奉然犹往来终南按视田
亩每行必给驿乘在道或亲诟驿吏规算粮具之直时议浸薄之尝曲宴令羣臣赋诗杜镐以素不属辞诵北山移文以讥之帝尝语近臣曰放
为朕言事甚众但外廷无知者因出所上时议十三篇其目曰议道议德议刑议器议文武议制度议教化议赏罚议官司议军政议狱讼议征
赋议邪正八年十一月乙丑晨兴忽取前后章疏藁悉焚之服道士衣召诸生会饮酒数行而卒讣闻帝甚嗟悼亲制文遣内侍朱允中致祭赠
工部尚书录其侄世雍同学究出身

△万适 【田诰 杨璞】

万适字纵之陈州宛邱人六七岁即为诗及长喜学问精于道德经与高锡族子冕及韩伾交游不求仕进专以著述为务有狂简集雅书
志苑雍熙诗经籍擿科讨论淳化中任翰林学士因召对帝问曰卿早在嵩阳当时流辈颇有遗逸否伾以适及杨璞田诰为对帝悉召至阙
下诏书下而诰卒璞既至对于便殿不愿仕进帝赐以束帛与一子出身遣还故郡适最

后至特授慎县主簿适素康强无疾诏下日已病犹勉
强赴谢举止山野人皆笑之后数日卒田浩者历城人好著述聚徒数百人成进士至显
达者接踵以故闻于朝宋惟翰许袞皆其弟子也浩着
作百余篇传于世杨璞字契玄郑州新郑人喜歌诗士大夫多传诵与毕士安尤善每乘
牛往来郭店自称东野遗民既被召还作归耕赋以见
志真宗朝诸陵道出郑州遣使以茶帛赐之后以寿终

△李洙

李洙字长源河南洛阳人淳澹好古博览经史不求仕进家世多聚书画王佑典河
中深加礼待自是多闻于时往来中条山中不亲产业
所居木石幽胜谈唐以来人物历历可听罕着文前后州将皆厚遇之王旦李宗谔与之
世旧每劝其仕洙皆不答真宗祀汾阴孙冕陈尧叟荐
之命使召见辞足疾不起遣内侍劳问令长吏岁时存抚明年又遣使存问洙数嗜酒人
或勉之答曰扶羸养疾舍此莫可从吾所好以尽余年
不亦乐乎天禧三年卒特赠秘书省著作佐郎赐其家帛米命州县常加存恤二税外蠲
其羨役

△魏野

魏野字仲先陕州陕县人嗜吟咏不求闻达居州之东郊凿土袤丈曰乐天洞前为
草堂弹琴其中好事者多载酒肴从之游啸咏终日前
后郡守虽武臣旧相皆所礼遇或亲造诣赵昌言素僻傲特置宾次戒阁吏野至即报野
为诗有唐人风格多警策句着草堂集十卷大中祥符
初契丹使至尝言本国得上帙愿求全部诏与之祀汾阴岁与李洙并被荐遣陕令王
希招之野言麋鹿之性顿缨则狂岂可瞻对殿墀如奉
清燕望回过听许令愚守则畎亩之中永荷帝力诏州县长吏常加存抚又遣使图其所
居观之五年复遣内侍存问天禧三年无疾而卒特赠
秘书省著作郎赐其家米帛命州县常加存恤二税外免其差徭 【按东都事略云野之
子闲字云夫喜为诗不乐仕进仁宗嘉其清节赐号
清逸处士亦见朱子名臣言行录】

△邢惇

邢惇字君雅不知何许人家于雍邱与宋准赵昌言交游甚厚太平兴国初尝举进
士不第慨然有隐遯意性介僻不妄交友耽玩经史精
于术数工绘画颇嗜酒或游市廛过客询以休咎者多不之语里中号邢夫子大中祥符
七年真宗幸亳回邑人列上其事王曾为考制度使以
名闻诏授许州助教惇让而不受于兴元年无疾而卒

△林逋

林逋字君复杭州钱塘人少孤力学性恬澹好古弗趋荣利家贫衣食不足晏如也初放游江淮闲久之归杭州结庐西湖之孤山二十年足不及城市真宗闻其夕赐粟帛诏长吏岁时劳问薛映李及在杭州每造其庐清谈终日而去尝自为幕于其庐侧临终为诗有茂陵他日求遗藁犹喜曾无封禅书之句既卒州为上闻赐谥和靖先生赙粟帛逋善行书喜为诗其词澄澹峭特既就藁随弃之或谓何不录以示后世逋曰吾方晦迹林壑且不欲以诗名一心况后世乎然好事者往往窃记之所传尚三百余篇逋尝客临江时李谿方举进士未有知者逋谓人曰此公辅器也及逋卒谿适罢三司使为州守为服缌与其门人葬之刻遗句内圻中逋不娶无子教兄子宥登进士甲科

△高恠 【韩退】

高恠字文悦荆南高季兴四世孙十三岁能属文通经史百家之书闻种放隐终南山乃筑室豹林谷从放受业放奇之不敢处以弟子行与同时张尧许勃号南山三友会诏举沈沦草泽寇准荐之辞不起景佑中诏录国初侯王后恠推其弟忻得官范雍建京兆府学召恠讲授诸生杜衍尝请赐处士号乃命为大理评事恠固辞仁宗嘉其守号安素处士诏州县岁时礼遇之给良田五百亩文彦博表其经术该通有高世之行可以励风俗诏赐第一区嘉佑中就除光禄寺丞复固辞卒有韩退者稷山人亦师事种放母卒负土成坟徒跣终丧去隐嵩山吴遵路石延年论其高节诏赐粟帛号安逸处士以寿终

△徐复

徐复字复之建州人初游京师举进士不中退而学易通流衍卦气法自筮知无禄遂无进取意游学淮浙闲数年益通阴阳天文地理遁甲占射诸家之说偶听其乡人林鸿范说诗之所以用于乐者忽若有得因以声器求之遂悟大乐于七音十二律清浊次序及钟磬侈弇匏竹高下制度皆洞达会胡瑗作钟磬大变古法复笑曰圣人寓器以声今不先求其声而更其器其可用乎果如其言范仲淹过润州见复问曰今以衍卦占之边境无变异乎复占西方当用兵推其月日后无少差庆历初与布衣郭京俱召见帝问天时人事复对曰以京房易卦推之今年所配年月日时当小过也刚失位而不中宜在强君德帝又问明年主伺卦复曰干卦用事命为大理评事固以疾辞乃赐号冲晦处士补其子发试秘书省校书郎复性高洁而处士未尝自异后居杭州十数年卒郭京者少任侠不事家产好言兵范仲淹滕宗谅数荐之故与复同召焉

【按宋史此下有孔旼传今改入孔氏后裔传】

△何羣

何羣字通夫果州西充人嗜古学喜激扬论议虽业进士非其好也庆历中石介在太学四方诸生求学者数千人羣亦自蜀至方会讲介曰生等知何羣乎羣日思为仁义而已不知饥寒之切己也众皆注仰之介因馆羣于其家使弟子推为学长羣愈自克厉著书数十篇与人言未尝下意曲从同舍目羣为白衣御史羣尝上书言三代取士皆举于乡里而先行义后世专以文辞就文辞中害道者莫甚于赋请罢去介赞美其说会谏官御史亦言以赋取士无益治道下两制议皆以为进士科始隋历唐数百年将相多出此不为不得人且祖宗行之已久不可废也羣闻其说不可乃取平生所为赋八百余篇焚之讲官视羣赋既多且工以为不情摈出太学羣径归遂不复举进士嘉佑中龙图阁直学士何剡表其行义赐号安逸处士羣卒后赵抃守益州奏羣遗藁有益时政愿诏果州录上之寝不下

钦定续通志卷五百六十九

●钦定续通志卷五百七十 隐逸传三

隐逸传

宋 【二】

○宋二

王樵	张愈	黄晞	周启明	代渊	陈烈
孙侔	刘易	姜潜	连庶		
章惇	俞汝尚	阳孝本	邓孝甫	宇文之邵	吴瑛
张举	松江渔翁	杜庄	顺		
昌山人	南安翁				

王樵

张愈

黄晞

周启明

代渊

陈烈

孙侔

刘易

姜潜

连庶

章惇

俞汝尚
阳孝木
邓孝甫
字文之邵
吴瑛
张举
松江渔翁
杜生
顺昌山人
南安翁
△王樵

王樵字肩望淄州淄川人居梓桐山博通羣书不治章句尤善考易与贾同李冠齐名学者多从之咸平中辽骑渡河举家被掠樵即挺身入辽访父母累年不获还东山刻木招魂以葬立祠画像事之如生北望叹曰身世如此自比于人可乎遂与俗绝自称赞世翁唯以论兵击剑为事一驴负装徒步千里晚年屡游塞下画策干何承矩耿望求灭辽复讎不用乃于城东南隅累礴自环谓之茧室铭其门曰天生王樵薄命寡智材不济时道号赘世生而为室以备不虞死则藏形不虞乃备病革入室自掩户卒治平末职方郎中向宗道知淄州为作祠堂刻石以记之

△张愈

张愈【按东都事略作张俞】字少愚益州郾人屡举不第宝元初上书言边事诏除试秘书省校书郎愈请授其父显忠而隐于家文彦博治蜀为置青城山杜光庭故居以处之丁内艰盐酪不入口再暮植所持柳杖于墓忽生枝叶后合抱六召不应喜奕棋乐山水遇有兴虽数千里辄尽室往遂浮湘沅观浙江升罗浮入九疑买石载鹤以归杜门著书未就卒【按东都事略云有文集三十卷宋史不载】妻蒲氏名芝贤而有文为之诔

△黄晞

黄晞字景微建安人少通经聚书数千卷学者多从之游自号赘隅子着歔歔璫微论十卷以谓赘隅者柝物之名歔歔者叹声璫微者述辞也石介在太学遣诸生以礼聘召晞走匿邻家不出枢密使韩琦表荐之以为大学助教致仕卒

△周启明

周启明字昭回其先金陵人后占籍处州初以书谒翰林学士杨亿携以示同列大见欢赏自是知名四举进士皆第一景德中举贤良方正科既召会东封泰山言者谓此科本因灾异访直言非太平事遂报罢于是归教弟子百余人不复有仕进意转运使陈尧佐表其行义于朝赐粟帛仁宗即位除试助教就加廩给久之特迁秘书省秘书郎改太常丞卒启明笃学藏书数千卷多手自传写而能口诵之有诗赋笺启杂文千六百余篇

△代渊

代渊字蕴之【按东都事略作字仲颜】本代州人唐末避地导江【按东都事略作永康人】家世为吏有阴德渊性简洁事亲以孝闻受学于李旼张达年四十乡人更劝举进士甲科得清水主簿叹曰禄不及亲何所为耶还家教授坐席常满安抚使举凤州团练推官不就知益州杨日严又荐之除太子中允致仕迁太常丞着周易指要老佛杂说数十篇田况上其书优转祠部员外郎晚年自号虚一子长吏岁时致问澹然与对略不及私嘉佑二年卒

△陈烈

陈烈字季慈福州侯官人性介特笃于第友居亲丧勺饮不入口者五日举行端饬动遵古礼里人敬之从学者常数百贤父兄训子弟必举烈言行以示之尝以乡荐试京师不中即罢举仁宗屡诏之不起人问其故应曰吾学未成也公卿大夫交章称其贤嘉佑中以为本州岛教授欧阳修又言之召为国子直讲皆辞已而福建提刑王陶言其为妻林氏所讼因诋烈贪诈乞夺所受恩谏官司马光言臣等每患士无名检故举烈以励风俗烈平生操守出于诚实虽有迂阔不合中道犹为守节之士当保而全之愿委公正官吏通儒术识大体者覆实若止于夫妇不相谐则听之杂绝毋使节行之士为横肆所挫陶说遂不行元佑初部使者申荐之诏从其尚以宣德郎致仕明年复教授本州岛在职不受廩俸乡里问遗丝毫无所受家租有余则推以济贫乏以寿终

△孙侔

孙侔字少述早孤事母尽孝忠于禄养故屡举进士及母病革自誓终身不求仕客居江淮间士大夫敬畏之刘敞知扬州言其孝弟忠信足以扶世矫俗求之朝廷吕公着之流也诏以为扬州教授辞敞守永兴辟入幕府亦辞英宗时沈遘及王陶韩维运荐之授忠正军推官常州判官皆不赴卒初侔与王安石曾巩友善安石为相过真州与相见侔待之如布衣交云

△刘易

刘易忻州人性介烈博学好古喜谈兵韩琦知定州上其所著春秋论授太学助教并州学说书不能屈志仕进寓居于虢之卢氏习辟谷术赵抃复荐其行谊赐号退安处士易作诗琦每为书之石或不可其意辄涂去琦亦再书之尹洙帅渭延致尊礼狄青代洙遇之亦厚治平末卒琦作文祭之云刚介之性天下能合者有几渊源之学古人不到者甚多其敬之如此熙宁时定户役诏易家如七品恩得减半示优礼云

△姜潜

姜潜字至之兖州奉符人从孙复学春秋用田况举召试学士院为明州录事参军以母思乡求致仕敕过门下知封驳司吴奎封还之而与韩绛共上章以荐徙兖州录事参军从奎辟郓州教授奎荐为国子直讲韩王宫伴读谒宗正允弼吏引趋庭潜不答呼马欲去遂以客礼见熙宁初诏举选人淹滞者与京官凡三十七人潜在选中神宗闻其贤召对延和殿访以治道对曰有尧舜二典在顾陛下致之之道何如知陈留县至数月青苗令下潜出钱榜其令于县门已徒之乡落各三日无应者遂撤榜付吏曰民不愿矣钱以是独得不散司农开封凝潜沮格各使其属来验皆如令而条例司劾祥符住散青苗钱潜知且不免移疾去县人诣府请留之不得家居卒

△连庶

连庶字居锡安州应山人举进士调商水尉寿春令兴学尊礼秀民以劝其俗开濒淮田千顷县大治淮南王旧垒在山间会大水州守议取其甃为城庶曰弓矢舞衣传百世藏于王府非为必可用盖以古之物传于今尚有典刑也垒因是得存以母老乞监陈州税尝送客出北门见日暮风尘中冠盖往来不已慨然有感即日求分司归久之翰林学士欧阳修龙图阁直学士祖无择言庶文学行义宜在台阁以知昆山县辞不行累迁职方员外郎卒庶退居二十年守道好修非其人不交非其义秋毫不可污也弟庠亦登科敏于政事号良吏终都官郎中

△章警

章警字隐之成都双流人少孤鞠于兄嫂事之如父母博通经学尤长易太玄着发隐三篇蜀守蒋堂杨察张方平何郯赵抃咸以逸民荐赐粟帛累命为州助教不就嘉佑中赐号冲退处士警尊生养气忧喜是非不以挠其心里人范百禄从叩太玄警为解述大旨曰人之所好而不足者善也所丑而有余者恶也君子能强其所不足而拂其所有余太玄之道几矣此子云仁义之心子之于大玄也述斯而已若苦其思艰其言迂溺其所以为数而忘其仁义之大是恶足以语夫道哉熙宁元年卒子褱

△俞汝尚

俞汝尚字退翁湖州乌程人少时读书于鄞南之昆山为人温温有礼议论不苟澹于势利不以贫乏挠其怀闻人善言善行记之不忘时为人道之擢进士第涉历州县无求进之心尝知导江县新繁令卒使者使承其乏将资以公田辞不许至则悉以周旧令之家熙宁初签书剑南西川判官赵抃守蜀以简静为治每旦退坐便斋诸吏莫敢至唯汝尚来辄排阂径入相对清谈竟墓王安石当国患一时故老不同己或言汝尚清望可寘之御史使以次弹击驿召诣京师既知所以荐用意力辞章再上得免亲故有责以不能与子孙为地者汝尚笑曰是乃所以为其地也还家苦贫未能忘禄养又从赵抃于青州以屯田郎中致仕苏轼苏辙孙觉李常皆有诗文叹美之优游数年卒孙侔绍兴中敷文阁直学士

△阳孝本

阳孝本字行先虔州赣人学博行高隐干城西通天岩苏颂蒲宗孟皆荐之苏轼自海外归过而爱焉号之曰玉岩居士以其不娶戏以为元德秀之流孝本自言阳城之裔故轼诗有云众谓元德秀自称阳道州嘉之也隐遯二十年一时名士多从之游崇宁中举八行解褐为国子录再转博士以直秘阁归卒

△邓孝甫

邓孝甫字成之临川人第进士积官奉议郎提点开封府界河渠坐事去官遂闭户著书不复言仕元符末诏求直言时孝甫年八十余矣上书云乱天下者新法也未流之祸将不可胜言今宜以时更化纯法祖宗因论熙宁而下权臣迭起欺世悞国愿指其事而枚数其人蔡京嫉之谓为诋讪宗庙削籍羈筠州崇宁去党碑释逐臣五十三人其五十人得归惟孝甫与范柔中封觉民独否遂卒于筠所著有太平策要等凡二百五十余卷

△宇文之邵

宇文之邵字公南汉州绵竹人举进士为文州曲水令转运使以轻缣高其价使县鬻于氏之邵言县下江上山地狭人贫耕者无几方岁俭饥羸人数扰不可复困之以求利转运使怒会神宗即位求言乃上疏曰天下一家也祖宗创业守成之法具在陛下居谅阴谄谀奸佞之人屏伏未动正可念五圣之功德常若左右前后京师者四方之视效俗宜敦厚而浮侈是尚公卿大夫民之表也宜以名节自励而势利相先愿以节义廉耻风导之使人知自重千里之郡有利未必兴有害未必除者转运使提点

刑狱制之也百里之邑有利未必兴有害未必除者郡
制之也前日赦令应在公逋负一切蠲除而有司操之益急督之愈甚使上泽不下流而
细民益困如择贤才以为三司之官稍假郡县以权则
民瘼除矣然后兴坠典拔滞淹远夸毘来忠说凡所建置必与大臣共议以广其善号令
威福则专制之如此则太平可拱而俟也疏奏不报喟
然曰吾不可仕矣遂致仕以太子中允归时年未四十日与交友为经史琴酒之乐退居
十五年而卒司马光曰吾闻志不行顾禄位如銜銖道
不同视富贵如土芥今于之邵见之矣范镇亦称其学富而行笃云

△吴瑛

吴瑛字德仁蕲州蕲春人以父龙图阁学士遵路任补太庙斋郎累迁虞部员外郎
治平三年上书请致仕公卿大夫知之者相与挽留之
不听皆叹服以为不可及归蕲有田仅足自给临溪筑室种花酿酒家事一付子弟宾客
至必饮有臧否人物者不酬一语但益劝之饮人莫不
爱其乐易而敬其高视财物如粪土妹壻辄取家财贷人不能偿瑛哀之曰是人再母得
无重忧召而焚其券哲宗朝有荐之者召为吏部郎中
就知蕲州皆不起崇宁三年卒

△张举

张举字子厚常州人登进士甲科以无他兄弟独养其亲不忍斯须去左右亲友强
之仕乃调青溪主簿亦不之官闭户读书四十年手校
数万卷穷经著书至夜分不寐元丰中近臣荐其高行元佑时大臣复荐之起教授颍州
辞不就孙觉胡宗愈范祖禹交章论荐苏轼言之尤切
诏拜秘书省校书郎敕郡县致礼敦遣竟不出举孝弟修于家忠信行于友蹈中守常为
当时名流所慕崇宁四年卒明年诏以举隐德邱园声
闻显著赐谥曰正素先生

△松江渔翁

松江渔翁者不知其姓名每棹小舟游长桥往来波上扣舷饮酒酣歌自得绍圣中
闽人潘裕自京师调官回过吴江遇而异焉起揖之曰
予视先生气貌固非渔钓之流愿丐绪言以发蒙陋翁曰吾厌喧烦处闲旷遯迹于此三
十年矣幼喜诵经史百家之言后观释氏书今皆弃去
唯饱食以嬉尚何所事裕曰圣明在上盍出而仕乎笑曰君子之道或出或处吾虽不能
栖隐岩穴追园绮之纵窃慕老氏曲全之养且养志者
忘形形者忘利致道者忘心心形俱忘视轩冕如粪土耳与子出处异趣子勉之裕曰
敢问舍所在曰吾姓名且不欲人知况居室耶饮毕长
揖使裕返鼓枻而去

△杜生

杜生者颍昌人不知其名县人呼为杜五郎不出门者三十年黎阳尉孙轸往访之自陈村人无所能轸问何以不出门笑曰以告者过也指门外一桑曰忆十五年前亦曾纳凉其下何谓不出但无用于时无求于人偶自不出耳何足尚哉问所以为生曰昔时居邑之南有田五十亩与兄同耕迨兄子取妇度所耕不足赡乃尽以与兄而携妻子至此蒙乡人借屋遂居之唯与人择日又卖医药以给飡粥亦有时不继后子能耕荷长者见怜与田三十亩使之耕尚有余力又为人佣耕自此食足乡人贫以医术自业者多念已食既足不当更兼他利由是择日卖药一切不为问常日何所为曰端坐耳颇观书否曰二十年前曾有人遗一书策当时极爱其议论今忘之并书亦不知所在矣时盛寒布袍草屨室中枵然而气韵闲旷言词精简盖有道之士也问其子之为人曰村童也然性质甚淳厚不妄言不敢嬉唯间一至县买盐酪可数行迹以待其归径往径还未尝帝游一步也轸嗟叹留连久之乃去后至延安幕府为沈括言之

△顺昌山人

顺昌山人者不知姓名靖康末有避乱于顺昌山中者深入得茅舍主人风裁甚整即之语士君子也怪而问曰诸君何事挈妻孥至是耶因语之故主人曰乱何自而起耶众争为言主人嗟恻久之曰我父仁宗朝人也自嘉佑末卜居于此因不复出以我所闻但知有熙宁纪年亦不知于今几何年矣

△南安翁

南安翁者漳州陈元忠客居南海日尝赴省试过南安会日暮投宿野人家茅茨数椽竹树茂密可爱主翁虽麻衣草屨而举止谈对宛若士人几案间有文籍散乱视之皆经子也陈叩之曰翁训子读书乎曰种园为生耳亦入城市乎曰十五年不出矣问藏书何用曰偶有之耳少焉风雨暴作其二子归舍鉏揖客人物不类农家子翁进豆羹享客迟明别去陈以事留城中翌日见翁仓皇而行陈追诘之曰翁云十五年不出城何为到此曰吾以急事不容不出问之乃大儿于关外鬻果失税为关吏所拘陈为谒监征至则已捕送郡翁与小儿偕诣庭下长子当杖翁恳白郡守曰某老钝无能全藉此子赡给若渠不胜仗则翌日乏食矣愿以身代之小儿曰大人岂可受杖某愿代兄大儿大以罪在己甘心焉三人争不决小儿来父耳旁语若将有所请翁叱之儿必欲前郡守疑之呼问所以对曰大人原系带职正郎宣和闲累典州郡翁急拽其衣使退曰儿妄言守询诘敕在否儿曰见作一束寘瓮中埋于山下守立遣吏随儿发取果

得之即延翁上坐谢释其子次日枉驾访之室已虚矣

钦定续通志卷五百七十

●钦定续通志卷五百七十一 隐逸传四

隐逸传

宋 【三】

○宋三

徐中行【庭筠】 苏云卿 谯定 王忠民【苏庠】 刘勉之
之 故宪 郭雍 刘愚 魏
揆之 安世通

徐中行 【徐庭筠】

苏云卿

谯定

王忠民 【苏庠】

刘勉之

胡宪

郭雍

刘愚

魏揆之

安世通

△徐中行 【徐庭筠】

徐中行台州临海人始知学闻安定胡瑗讲明道学将往从焉至京师首谒范纯仁纯仁贤之荐于司马光光谓斯人神气清和可与进道会福唐刘彝赴阙得瑗所授经熟读精思攻苦食淡夏不扇冬不炉夜不安枕踰年乃归葺小室竟日危坐所造诣人莫测也父卒跣足庐墓躬耕养母推其余力葬内外亲及州里贫无后者晚年教授学者自洒扫致知达于治国平天下不失其性不越其序而后已其友罗适持节本路举以自代又率部使者以遗逸荐崇宁中郡守李谔又以八行荐时章蔡窃国柄窜逐善类且尽中行去之黄岩尽毁其所为文幅巾藜杖往来委羽山中客有诘以避举要名者中行曰人而无行与禽兽等使吾得以八行应科目则彼之不被举者非人类与吾正欲避此名非要名也客惭而退陈瓘谪台州闻名纳交暨其没录其行事谓与山阳徐积齐名子三人庭筠其季也幼有志行事父兄孝友居丧毁甚既免丧犹不忍娶者十余年秦桧当国科场尚谀佞试题问中兴歌颂庭筠叹曰今且岂歌颂时耶疏其未足为中兴者五见者尤之庭筠曰吾欲不妄语而取欺

君乎黄岩尉郑伯熊代去请益庭筠曰富贵易得名节难守愿安时处顺主张世道伯熊受其言迄为名臣有诏举人尝五上春官者子岳祠庭筠适应格所亲戚劝之庭筠辞曰吾尝草封事谓岳庙冗录无用既心非之可躬蹈耶学以诚敬为主居无惰容无戏言不事缘饰不苟臧否闻人片善记其姓名遇饥冻者推食解衣不靳僦屋以居未尝戚戚尤衰为守闻其名遣书礼之后以寿终乡人以其父子俱隐遂称之曰二徐先生淳熙闲常平使者朱熹行部拜墓下题有道学传千古东瓯说二徐之句且大书以表之曰有宋高士二徐先生之墓庭筠之兄庭槐庭兰皆有父风孙日升苦学有守

△苏云卿

苏云卿广汉人绍兴闲至豫章东湖结庐独居待邻里有恩礼无良贱老稚皆爱敬之称曰苏翁身長七尺美须髯寡言笑布褐草履终岁不易未尝疾病披荆畚砾为圃艺植芸芟灌溉培壅皆有法度虽隆暑极寒土焦草冻圃不绝蔬滋郁畅茂四时之品无阙者昧视他圃尤胜又不貳价市鬻者利倍而焦速先期输直夜纤履坚■〈革刀〉过革烏人争贸之以馈远以故薪米不乏有羨则以周急者溉园之隙闭门高卧或危坐终日莫测识也少与张浚为布衣交浚为相驰书函金币属豫章帅及漕曰余乡人苏云卿管乐流亚遁迹湖海有年矣近闻灌园东湖其高风伟节非折简能屈幸亲造其庐必为我致之帅漕密物色之人曰此独有灌园苏翁无云卿也帅漕乃屏骑从更服为游士入其圃翁运锄不顾进揖之翁曰二客何从来耶延入室土锉竹几地无纤尘案上有西汉书一册二客恍若自失默计此为苏云卿也既而汲泉煮茗意稍款浹遂扣其乡里徐曰广汉客曰张德远广汉人翁当识之曰然客又问德远何如人曰贤人也第长于知君子短于知小人德有余而才不足因问德远今何官二客曰今朝廷起张公欲了此事翁曰此恐渠未便了得二客起而言曰张公令某等致公共济大业因出书函金币寘几上云卿深自咎叹二客力请共载辞不可期以诘朝上谒旦遣使仰伺则书币不启家具如故而翁已遁矣帅漕复命浚拊几叹曰求之不早实怀窃位之羞作箴以识之曰云卿风节高于傅霖予期与之共济当今山潜水沓邈不可寻弗力弗早子罪曷针

△譙定

譙定字天受涪陵人少喜学佛析其理归于儒后学易于郭曩氏自见乃谓之象一语以入郭曩氏者家南平世传象数之学定一日至汴闻程颐讲道于洛往见之弃其学而学焉遂得闻精义造诣愈至浩然而归其后颐贬涪

实定之乡也北山有岩师友常游其中涪人名之曰读
易洞靖康初吕好问荐之钦宗召为崇政殿说书以论弗合辞不就高宗即位定犹在汴
右丞许翰又荐之诏宗泽津遣诣行在至维扬寓邸舍
窳甚一中贵人偶与邻馈之衣食不受委金而去定袖而归之其自立之操类此帝将用
之会金兵至复归蜀爱青城之胜栖遯其中蜀人指其
地曰樵岩定易学得之程颐授之胡宪刘勉之而冯时行张行成则得定之余意者也定
后不知所终樵夫牧童往往有见之者初程颐之父珦
尝守广汉颐与兄颢皆随侍游成都见治箴箍桶者挟册就视之则易也欲致诘而治箴
者先曰若尝学此乎因指未济男之穷以发问二程逊
而问之则曰三阳皆失位兄弟涣然有所省翌日再过之则去矣其后袁滋入洛问易于
颐颐曰易学在蜀耳盍往求之滋入蜀访问久无所遇
已而见卖酱薛翁于眉邛闲与语大有所得宪勉之滋皆闽人时行行成蜀人郭曩氏及
治箴叟卖酱翁皆蜀之隐君子也

△王忠民 【苏庠】

王忠民颍阳人世业医忠民幼通经史自靖康以来数言边方利害于朝累召弗至
高宗渡江忠民隐居不出诸镇翟兴等皆重之弗能致
张浚授以迪功郎不受避地南下遇商虢镇抚使董先留军中事以师礼时刘豫僭立忠
民作九思图及定乱四象达之金主又镂版印图散于
伪齐境以明天下之义绍兴三年翟宗荐其忠节于朝特授宣教郎诏董先津遣诣行在
既至宰相吕颐浩签书枢密院事徐俯见之皆拜舍于
政府忠民上疏辞官言臣三上金主书乞还二帝本心报国非冀名禄帝不许忠民以诰
寘牖中藏七宝山下力恳求去复依董先军中遂不出
时又有苏庠者丹阳人绅之后少能诗苏轼见其清江曲大爱之由是知名徐俯荐其贤
帝特召之固辞又命守臣以礼津遣庠辞疾不至以寿
终

△刘勉之

刘勉之字致中建州崇安人自幼强学日诵数千言以乡举诣太学时蔡京用事禁
止毋得挟元佑书自是伊洛之学不行勉之求得其书
每潜抄而默诵之樵定至京师勉之闻其从程颐游邃易学遂师事之已而厌科举业揖
诸生归见刘安世杨时皆请业焉及至家即邑近郊结
草为堂读书其中力耕自给澹然无求于世与胡宪刘子翬相往来日以讲论切磋为事
绍兴间中书舍人吕本中疏其行义志业以闻特召诣
阙秦桧方主和虑勉之见帝持正论乃不引见但令策试后省给札而已勉之知不与桧
合即谢病归杜门十余年学者踵至随其材品为说圣

贤教学之门及前言往行之懿所居有白水人号曰白水先生贤士大夫自赵鼎以下皆敬慕与交后秦桧益棋鼎窜死诸贤禁锢勉之竟不复出勉之一介不妄取妇家富无子谋尽以货归于女勉之不受以畀族之贤者命之奉祀其友朱松卒属以后事且戒其子熹受学勉之经理其家而诲熹如子侄熹之得道自勉之始绍兴十九年卒

△胡宪

胡宪字原仲居建之崇安生而静恣不妄笑语长从父胡安国学平居危坐植立时然后言虽仓卒无疾言遽色人犯之未尝校绍兴中以乡贡入太学会伊洛学有禁宪独阴与刘勉之诵习其说既而学易于谯定久未有得定曰心为物渍故不能有见唯学乃可明耳宪喟然叹曰所谓学者非克己工夫耶自是一意下学不求人知一旦揖诸生归故山力田卖药以奉其亲安国称其有隐君子之操从游者日众号籍溪先生【按宋名臣言行录云宪尝纂论语数十家复抄其要附以已说宋史本传不载】折彦质范汜朱震刘子羽吕社吕本中其以其行义闻于朝帝特召之宪辞母老及彦质入西府又言于帝趣召愈急宪力辞乃赐进士出身授左迪功郎添差建州教授宪犹不欲出太守魏矼遣诸生入里致诏且为手书陈大义宪不得已就职训诸生以为己之学闻者始笑之久而观其所以修身事亲接人者无一不如所言遂翕然悦服郡人程元以笃行称褒何以廉节着皆迎致俾参学政学者自是大化七年不徙官以母年高不乐居官舍求监南岳庙以归久之起为福建路安抚使司属官时帅张宗元榷盐急贩者铕两亦重坐宪告以为政大体宗元不悦宪复请祠而去秦桧方用事宪家居不出桧死以大理司直召未行改秘书正字既至次当奏事而病不能朝乃草疏言金人大治汴京宫室势必败盟今元臣宿将惟张浚刘锜在识者皆谓金果南侵非此两人莫能当愿亟起之臣死不恨时两人皆为积毁所伤未有敢显言其当用者宪独首言之疏入即求去帝嘉其忠诏改秩与祠归初宪与刘勉之俱隐后又与刘子翬朱松交松将没属其子熹受学于宪与勉之子翬方宪之以馆职召也适秦桧讳言之后宪与王十朋冯方查签李浩相继论事太学士为五贤诗以歌之绍兴三十二年卒

△郭雍

郭雍字子和其先洛阳人父忠孝自有传雍传其父易学通世务隐居峡州放浪长杨山谷间号白云先生干道中以峡守任清臣湖北帅张李祥荐于朝旌召不起赐号冲晦处士孝宗稔知其贤每对辅臣称道之命所在州郡岁时存问后更封颐正先生令部使者遣官就问雍所

欲言备录缴进于是雍年八十三矣淳熙初学者哀集程颢程颐张载游酢杨时及忠孝雍凡七家为大易粹言行于世其述雍之说曰伏羲氏之画得于天而明天文王之重得千人而明人羲画为天天君道也故五之在人为君文重为地地臣道也故二之在人为臣以上下二卦别而言之如此合六爻而言之则三四皆人道也故谓之中爻也干元亨利贞初曰四德后又曰干元始而亨者也利牝马贞利君子贞是以四德为二义亦可矣由干一卦论之则元与亨阳之类利与贞阴之类也是犹春夏秋冬虽为四时由阴阳观之则春夏为阳秋冬为阴也天之所谓元亨利贞者如立天之道阴与阳之类也地之所谓元亨利贞者如立地之道乃与刚之类也人之所谓元亨利贞者如立人之道仁与义之类也坤之六五以柔居尊善下之君也江海所以能为百谷王者以其善下也黄中色也色之至美也裳下服也是以至美之德而下人也其发明精到如此淳熙十四年卒

△刘愚

刘愚字必明衢州龙游人幼警敏力学弱冠入太学有声受业者甚众侍御史紫瑾祭酒颜师鲁博士林光朝深器重之瑾每奏对称旨则曰臣客刘愚为臣言师鲁尝奏愚行艺帝曰此向者柴瑾所荐也上舍释褐居第一调江陵府教授每为诸生讲说同僚相率以听愚益谦下与叶适项安世讲论不倦每以隐居学道为乐岁满帅王兰致书剡辟固辞贫不能归外移安乡县令邑逋赋万计愚核实数宽限期民不见吏而赋自足会岁歉出常平米赈货色佐持不可愚曰有罪不以相累出缗钱数千万召商余他郡而收元直米价顿平犹积廩数千石以备饥旱邑有范仲淹读书地为绘像立祠兴学士竞知劝诸司交荐改秩愚雅不乐仕进遂致仕丞相余端礼乡人也与愚有旧且召堂审舍去不顾结庐城南颓垣败壁蓬蒿萧然著书自适书礼语孟皆有解卒故友与其门人私谥曰谦靖先生妻徐氏在家时其母将以嫁姑子之富者徐泣曰为富人妻不愿也遂归于愚居破屋中一事机杼愚尝怀白金归徐怒曰我以子为贤而若是亟具归愚告以束修得也乃已子克凡

△魏揆之

魏揆之字子实建州建阳人师胡宪与朱熹游两乡举试礼部不第尝客衢守章杰所赵军以谪死其子汾将丧过衢杰素憾鼎又希秦桧意遣尉翁蒙之领卒掩取鼎平时与故旧来往简牒蒙之先遣人告汾焚之逮至一无所得杰怒治家之拘汾于兵家且以告桧揆之以书责杰长揖径归筑室读书榜以艮斋称闽帅汪应辰建守陈正同荐于朝时相尼之不果召干

道中诏与遗逸部刺史芮煜与帅守其表其行谊特诏
召之力辞时宰相陈俊卿闽人也雅知揆之招之甚力乃以布衣入见极陈当时之务大
要劝帝以修德业正人心义士气为恢复之本帝嘉纳
之赐同进士出身守太学录先是学官养望自高不与诸生接揆之既就职日进诸生教
诲之又增葺其舍人人感励将释菜揆之请废王安石
父子从祀追爵程颢程颐列于祀典不报复言太学之教宜以德行经术为先其次则通
习世务今乃专以空言取人又不报遂丐去会福州副
总管曾觌秩满还在道揆之累疏以谏移疾杜门遗书陈俊卿责其不能掇止语甚切遂
以迎亲请归罢为台州教授方揆之之未行也觌至国
门外已久伺揆之去乃敢入揆之在朝不能半岁既归喟然叹曰主恩深厚如此而吾学
不足以感悟圣意乃日条理旧闻以求其所未玉居家
重礼法从父有客于南者千里迎养死葬如礼而字其孤建俗生子多不举为爇以戒全
活者甚众又白于官讲督不葬其亲者富与期贫与财
而无后者掩之每遇岁饥为粥以食饿者后依古社仓法请官米以贷民至冬取之以纳
于仓部使者素敬揆之捐米千余斛假之民赖以济诸
乡社仓自揆之始与人交嘉其善而掇其失后进以礼来者有寸长必推挽成就至或訾
其近名则蹙然曰使夫人而避此嫌为善之路绝矣病
革以书召朱熹至委以后事而卒后帝思其直谅将召用之大臣言已死乃赠直秘阁熹
平日趣向与揆之同干道中熹被召将行闻揆之去国
乃止

△安世通

安世通者本西人其父有谋策为武官数以言于当路不用遂自沈于酒而终世通
隐居青城山中不出吴曦反乃献书于成都帅杨辅曰
世通在山中忽闻关外之变不觉大恟窃以为公初得曦檄即当还书诵其家世激以忠
孝因而散金发粟鼓集忠义闭剑门檄夔梓兴仗义之
师以顺讨逆谁不愿从而士大夫皆酒缸饭囊不明大义尚云少屈以保生灵何其不知
轻重如此夫君乃父也民乃子也岂有弃父而掇子之
理此非曦一人之叛乃举蜀士大夫之叛也闻古有叛民无叛官今曦叛而士大夫皆缩
手以听命是驱民而为叛也且曦虽叛逆犹有所忌未
敢建正朔杀士大夫尚以虚文见招亦以公之与否卜民之从违也今悠悠不决徒为妇
人女子之悲所谓停囚长智吾恐朝廷之失望也凡举
大事者成败死生皆当付之度外仆行年五十二矣古人言可以生而生福也可以死而
死亦福也决不忍汗面戴天同为叛民也辅有重名蜀
中士大夫多劝以举义者而世通之言尤切至辅不能决遂东如江陵请吴猎举兵以讨

曦未几曦败猎在蜀荐士以世通为首云

钦定续通志卷五百七十一

●钦定续通志卷五百七十二 隐逸传五

隐逸传

金

○金

褚承亮 王去非 赵质 杜时升 郝天挺 薛继先【

纯孝】 高仲振 张潜 王汝梅

宋可 辛愿 王子可

褚承亮

王去非

赵质

杜时升

郝天挺

薛继先 【薛纯孝】

高仲振

张潜

王汝梅

宋可

辛愿

王子可

△褚承亮

褚承亮字茂先真定人苏轼自定武谪官过真定见其文大为称赏宣和五年应乡试第一明年登第调易州户曹未赴会金兵南下天会

四年【按金史作天会六年斡里雅布破真定试境内进士考太宗本纪天会四年九月宗望取天威军克真定又考大金国志天会四年冬

十月斡里雅布克真定刘彦宗劝试士取七十二人九月十月虽不同俱在四年无疑也今据改】斡里雅布破真定按籍拘试境内进士承亮

匿不出严令押赴策问上皇无道少帝失信举人承风旨极口诋毁承亮诣主文刘侍中曰君父之罪岂臣子所得言长揖而出刘为动容余悉

放第凡七十二人状元许必仕为郎官出左掖门堕马首中阍石死余皆无显者刘多承亮谊荐之藁城县漫应之即弃去后卒

△王去非

王去非字广道平阴人家居教授督妻孥耕织以给伏腊束修有余辄分惠人弟子

班忱贫不能朝夕一女及笄为办资装嫁之北乡有丧
忌东出西与北皆人居南则去非家去非坏蚕室使丧南出遂得葬焉乡人化之大定二十四年卒

△赵质

赵质字景道辽相思温裔隐居燕城南章宗春搜过其地闻弘诵声幸斋舍见壁闲题诗讽咏久之召至行殿授官固辞曰臣僻性野逸志
在长林丰草况圣明在上可不容巢由为外臣乎帝益奇之赐田千亩复之终身泰和二年卒

△杜时升

杜时升字进之霸州信安人博学知天文不肯仕进承安泰和间宰相数荐时升可大用时升调所亲曰吾观正北赤气如血东西亘天天
下当大乱乱而南北当合为一乃南渡河隐居嵩洛山中从学者甚众以伊洛之学教人自时升始正大闲元兵攻潼关拒守甚坚众皆相贺时
升曰元兵皆在秦巩若假道于宋出襄汉入宛叶铁骑长驱无高山大川为之阻土崩之势也后果如所料寻卒

△郝天挺

郝天挺字晋卿泽州陵川人早衰多疾厌科举元好问尝从学进士业天挺曰今人赋学以速售为功六经百家分磔缉缀篇章句读或不
之知幸而得之不免为庸人读书不为艺文选官不为利养唯通人能之又曰今之仕多以贪败皆苦饥寒不能自持耳丈夫不耐饥寒一事不
可为子以语言求之科举在其中矣居河南往来淇卫闲为人有崖岸耿耿自信宁落魄困穷终不一至豪富之门后卒

△薛继先 【薛纯孝】

薛继先字曼卿南渡后隐居洛阳西山课童子书事母孝与人交谦逊和雅所居化之子纯孝字方叔有父风有诈为其父书就纯孝取物
者继先年已老状貌如少者客不知以为纯孝与之书即取付之监察御史石玠行部过继先不见亲邻皆劝之继先曰凡今时政未必皆善举
劾未必尽公一与往来将谓自我发之他日并邻里必有受祸者其畏慎类此

△高仲振

高仲振字正之辽东人其兄领开封镇兵仲振依以居后挈妻子入嵩山博极羣书尤深易与皇极经世学安贫自乐不入城市山野小人
亦知敬之或曰仲振尝遇异人教以养生术终日燕坐骨节戛戛有声所谈皆世外事有扣之者辄不复语云

△张潜

张潜字仲升武清人幼有志节慕荆轲聂政为人年三十折节读书时人高其行谊目为张古人后客崧山从仲振受易年五十始娶鲁山孙氏有贤行夫妇相敬如宾负薪拾穗行歌自得不知其贫也邻里有为潜种瓜者及熟让潜潜弗取道拾斧访其主还之里有兄弟分财者其弟曰独不畏张古人知耶天兴闲挈家避兵少室乃不食七日死孙氏亦投绝涧偕死

△王汝梅

王汝梅字大用大名人始由律学为伊阳簿秩满遂隐居不仕性嗜书动有礼法人以法律就学者兼授以经学诸生服其教无敢为非义也同业尝悯其贫时周之皆谢不受后不知所终

△宋可

宋可字子之武陟人其姑适大族稟氏贞佑兵乱夫及子皆死于难姑以白金五十笏遗可可受不辞其后姑得稟氏疏族立为后可乃置酒会乡邻语姑曰往时遗金以稟氏无子故暂受之今有子矣此金稟氏物非姑物也因鼻金归之未几元兵驻山阳闻可名质其子使人招之曰从我者生不然汝子死矣亲旧竞劝之往可谢不从曰吾有子无子与死生皆有命岂以一子故并平生所守者衣之后竟无子

△辛愿

辛愿字敬之福昌人年二十五始读书至书伊训诗河广若有所省由是博极书史作文有绳尺诗律精严有自得之趣性野逸不修威仪尝谓王郁曰王侯将相世所共嗜者圣人亦不避得之不以道与夫居之不能行己志是欲澡其身而伏于厕也难与他人道子宜保之其志趣如此雅负高气不能从俗俯仰正大未歿洛下

△王子可

王子可字南云河东吉州人父本军校予可尝隶籍大病忽发狂久之能把笔作诗文落魄嗜酒宿土室中夏月或尸秽在傍不恤也人与之纸落笔数百言散漫碎杂无句读无首尾多六经中语及韵学古文奇字字画峭劲或问以故事其应如飡所引书皆世所未见谈说之际稍若有条贯则又以诞幻语乱之麻九畴张■〈穀，去一〉与之游最狎壬辰兵乱为顺天将领所得议欲挈之北归馆于州之瑞云观子可见将领自言曰我不能住君家瑞云观也不数日卒

钦定续通志卷五百七十二

●钦定续通志卷五百七十三 隐逸传六

隐逸传

元

○元

杜瑛 危复之 杜本【张枢】 孙辙【吴定翁】 何

中 武恪

杜瑛

危复之

杜本【张枢】

孙辙【吴定翁】

何中

武恪

△杜瑛

杜瑛字文玉其先霸州信安人父时升金史有传瑛长七尺美须髯气貌魁伟金将亡避地河南缙氏山中时兵后文物凋丧瑛搜访诸书尽读之究其指趣古今得失如指诸掌间关转徙教授汾晋间中书纽赫珪开府于相瑛赴其聘遂家焉与良田千亩辞不受岁己未世祖南伐至相召见问计瑛从容对曰汉唐以还人君所恃以为国者法与兵食三事而已国无法不立人无食不生乱无兵不守今宋怙蔑之殆将亡矣兴之在圣主若控襄樊之师委戈下流以捣其背大业可定矣帝悦曰儒者中乃有此人乎命从行以疾弗果中统初诏征之时平章王文统方用事辞不就左丞张文谦宣抚河北奏为怀孟彰德大名等路提举学校官又辞遗执政书其略曰先王之道不明异端邪说害之也今天子神圣俊又辐辏言纳计用先王之礼乐教化兴明修复维其时矣今不能遡流求源明法正俗育材兴化以拯数百千年之祸仆恐后日之弊将有不可胜言者矣人或勉之仕则曰后世去古虽远而先王之所设施本末先后犹可考见为政者莫先于复古苟因习旧弊以求合乎先王之意不亦难乎吾不能随时俯仰以赴机会将焉用仕于是杜门著书优游道艺以终天厯中追封魏郡公谥文献所著春秋地理原委十卷语孟旁通皇极引用各八卷皇极疑事四卷极学十卷律吕星厯礼乐杂志三十卷文集十卷【按元史此下有张特立传考特立已见于金循吏传中通例不应复出今以隐居赐号等事附议于彼此从删】

△危复之

危复之字见心抚州人宋末为太学士师事汤汉博览羣书好读易尤工于诗至元初元帅郭昂屡荐为儒学官不就后朝廷累遣奉御察罕及翰林应奉詹玉以币征之皆弗起隐紫霞山中学者私谥曰贞白先生

△杜本【张枢】

杜本字伯原清江人博学善属文江浙行省丞相呼哩木得其所上救荒策奇之及入为御史大夫力荐于武宗尝被召至京师未几归隐武夷山中【按武夷山志云结思学斋怀友轩为终隐计】文宗在江南时闻其名及即位以敕征之不起至正三年友丞相托克托以隐士荐诏召为勉之待制兼国史院编修官使者趣之行至杭州称疾固辞致书于丞相曰以万事合为一理以万民合为一心以千载合为一日以四海合为一家则可言制礼作乐跻五帝三王之盛矣遂不行本湛静寡欲无疾言遽色与人交尤笃于义平居书册未尝释手工篆隶着四经表义六书通编十原等书学者称为清碧先生十年卒【按辍耕录云本有所编五声韵自大小篆分隶真草以至外蕃书及蒙古新字靡不收录题曰华夏同音浙省平章库时来访一日语及声律之学因问国字何以用噶喀字为首本曰正如婴儿初堕地时作此一声乃得天地之全气也平章甚悦服】时有张枢字长者婺之金华人亦屡征不起幼聪慧外家潘氏蓄书数万卷书读之肆笔成章顷刻数千言其为文务推明经史以扶翼世教尤长于纪事尝取三国时事撰汉本纪列传附以魏吴载记为续后汉书以正陈寿之失临川危素称其立义精密可备劝讲诏取其书寘宣文阁浙东部使者交荐之前后章凡九上至正三年命修辽金宋三史有丞相托克托辟枢本府长史力辞不拜七年申命史臣纂修本朝后妃功臣传复以翰林修撰召枢俾与讨论复避不就使者强之行至杭州固辞归尝着春秋三传归一义三十卷刊定三国志六十五卷林下窃议曲江张公年谱各一卷敝帚编若干卷【按台贤录云枢以宋末仗节诸人多史氏所不载乃询诸故老作宋季逸事一书谨附识】八年卒

△孙辙【吴定翁】

孙辙字履常临川人幼孤母蔡氏教之知自树立比长学行纯笃事母甚孝家居教授门庭萧然而考德问业者日盛与人言一以孝弟忠信为本辞气温和闻者莫不油然感悟宪司屡辟怕不就江西行省特以遗逸举辙一人辙善为文章吴澄尝叙其集以为仁义之人其言藹如也元统二年卒同郡吴定翁字仲容幼岁俨如成人清修文雅与辙齐名而尤善为诗揭傒斯称其幽茂疏澹可比卢摯【按书史会要云卢摯字处道涿郡人元初称能诗者以摯为首官翰林学士有疏斋集亦善书谨附识】辟荐相望终身不为动尝曰士无求用于世惟求无愧于世人以为名言

△何中

何中字太虚乐安人少以古学自任家有藏书万卷手自校讎其学闳深该博至顺二年江西平章金岳柱聘为龙兴郡学师明年卒所著有易类象二卷书传补遗十卷通鉴纲目测海三卷知非常藁十七卷【按何中自序藁尚有通书问叶韵补疑六书纲领各一卷】

△武恪

武恪字伯威宣德府人初以神童游学江南吴澄为江西儒学副昃举荐入国学明宗在潜邸选为说书秀才及出镇云南恪在行明宗欲起兵陕西恪谏曰太子此行于国为君命于家为叔父命何可违也此行未必非福若向京师发一矢史官必书太子反不可悔矣左右恶其言遣之归居陋巷教子弟文宗知其名除秘书监典簿秩满丁内艰再除中瑞司典簿改汾西县尹皆不起人或劝之仕恪曰向为亲屈今亲已死何以仕为至正闲朝廷重选守令台哈布哈举为平阳沁水县尹亦不赴近臣又荐为授经郎恪遂阳为瘖症不与人接生平好读周易每日坚坐或问先生之学以何为本恪曰以敬为本所著有水寒集钦定续通志卷五百七十三

●钦定续通志卷五百七十四 宦者传一

宦者传

（臣）等谨案宦寺之祸唐与东汉覆辙相踵至召外兵以诛锄之国随以亡唐末令天下悉诛宦者方镇往往藏匿给事后唐庄宗复令访求送京师得数百人谗譖反侧卒至阶祸宋初待宦者甚严掖庭给使不过五十人民闲有私阉童孺者论死然养子荫任与士大夫等且走马承宣铃辖都监等使参豫军政童贯梁师成之祸盖有所自来辽金阉人干政者少元初授李邦宁以尚书学士诸官诚为敝政至保布哈之用事与宰臣相为表里乱是用长其祸烈焉兹并依郑志体例统为宦者类传云

唐【一】

○唐一

杨思勳	高力士	李辅国	程元振【骆奉先】	鱼朝恩
	窦文场【霍仙鸣】	刘贞亮	吐突	
承璀	马存亮【严遵美】	仇士良	杨复光	
杨思勳				
高力士				
李辅国				
程元振	【骆奉先】			

鱼朝恩

窦文场 【霍仙鸣】

刘贞亮

吐突承璀

马存亮 【严遵美】

仇士良

杨复光

△杨思勳

杨思勳罗州石城人本苏氏冒所养姓少给事内侍省从玄宗讨内难擢左监门卫将军 【旧书作右监门卫将军】 帝倚为爪牙开元初安南蛮渠梅叔鸾叛 【旧书作安南首领梅元成】 号黑帝举三十二州之众外结林邑真腊金邻等国据海南众号四十万诏思勳讨之思勳至岭表募首领子弟十万与安南大都护光楚客繇马援故道出其不意贼遂大败斩叔鸾封尸为京观而还十二年五溪首领覃行章乱复诏思勳往讨执行章 【按唐书本传称执行章而不言杀玄宗本纪助书行章伏诛通鉴又云赦行章为洵水府别驾所载互异】 斩首三万级以功进辅国大将军从封泰山进骠骑大将军封虢国公十四年邕州封陆獠梁大海反破宾横等州思勳又平之擒大海等三千人斩支党皆尽十六年泷州蛮陈行范僭号与广州獠何游鲁冯璘 【按元宗本纪作是冯仁智与本传异】 据岭表陷四十余城诏思勳发永道连三州兵淮南弩手十万进讨斩游鲁璘于阵行范走盘辽诸洞思勳悉众穷追擒斩之坑其党六万获马金银巨万二十八年卒思勳性严酷将士白事者莫敢仰视以是能立功然残忍好杀所得俘必剥面髡脑褫发皮以示人蛮人惮之

△高力士

高力士冯盎曾孙也圣历初入宫武后以其强悟敕给事左右缘坐累逐出之中人高延福艰为子故冒其姓善武三思岁余复得入禁中既壮谨密善传诏令为宫闈丞玄宗在藩力士倾心附结已平韦氏乃启属内坊擢内给事先天中以预诛萧岑等功为右监门卫将军知内侍省事于是四方奏请皆先省后进小事即专决虽洗沐未尝出眠息殿帷中寺宇文融李林甫盖嘉运韦坚杨慎矜王鉷杨国忠安禄山安思顺高仙芝等皆厚结力士以取将相息余承风附会不可胜计肃宗在东宫兄事力士他王公主呼为翁咸里诸家尊曰奢帝或不名而呼将军力士幼与母麦氏相失后岭南节度使得之泷州迎还帝为封越国夫人而赠其父广州大

都督金吾大将军程伯献约力士为兄弟后麦亡伯献
纒经受吊河闲男子吕玄晤吏京师女有美色力士娶之玄晤擢至少卿子弟仕皆王傅
玄晤妻死中外赠赙送葬自第至墓车徒相望不绝累
加骠骑大将军封渤海郡公于来廷坊建佛祠兴宁坊立道士祠珍楼宝屋国所不逮从
幸成都进齐国公帝闻肃宗即位喜曰吾儿应天顺人
改元至德不忘孝乎尚何忧力士曰两京失守生人流亡河南汉北为战区天下痛心而
陛下以为何忧臣不敢闻从上皇还进开府仪同三司
宝封五百户上皇徙西内居十日为李辅国所诬除籍长流巫州宝应元年赦还至朗州
知上皇厌代北向号哭曰大行升遐不得攀梓宫死有
余恨呕血而卒代宗以护卫先帝劳还其官赠扬州大都督陪葬泰陵初太子瑛废武惠
妃方嬖李林甫等皆属寿王帝以肃宗长意未决力士
乘间言曰推长而立孰敢争帝是其言储位遂定天宝中边将争立功帝尝曰朕春秋高
朝廷细务付宰相蕃夷不恭付诸将宁不暇耶对曰臣
闲至合门见奏事者言云南数丧师又北兵悍且强陛下何以制之臣恐祸成不可禁其
指盖谓禄山也十三年秋大雨帝顾左右无人曰天方
灾卿宜言之对曰自陛下以权假宰相法令不行阴阳失度天下事庸可复安臣之钳口
其时也帝不答明年禄山反力士善揣事势虽亲昵当
覆败不肯为救故生平无大过而议者谓宇文融以来权利相贼阶天下之祸虽有补益
弗相除云

△李辅国

李辅国本名静忠以鬻奴为闲厩小儿貌儻陋略通书计事高力士年四十余使主
厩中簿籍王鉷为使以典禾豆能检撻耗叹马以故肥
荐入东宫陈玄礼等诛杨国忠辅国豫谋又劝太子分扈从军趋朔方以图兴复太子至
灵武愈亲信劝遂即位系天下心擢家令判元帥府行
军司马肃宗任以心腹更名护国又改今名凡四方章奏军符禁宝一委之辅国能随事
迎合人主外谨密而内深贼不啖荤为浮屠诡行人以
为柔良不忌也帝还京师拜殿中监闲厩五坊宫苑营田栽接总监使兼陇右羣牧京畿
铸钱长春宫等使少府殿中二监封成国公实封户五
百宰相羣臣欲不时奏事皆因辅国以请常止银台门决事置察事厅儿数十人吏秋毫
过无不伺知辄即推讯州县狱讼三司制劾有所捕逮
流降皆私判臆断因称制敕未始上闻也诏书下辅国署已乃施行羣臣无敢议出则介
士三百人为卫贵幸至不敢斥其官呼五郎李揆当国
以子姓事之号五父帝为娶元擢女为妻擢以故为梁州长史弟兄皆位台省李岷辅政
叩头言且乱国于是诏敕不繇中书者岷必审覆辅国

不悦辅国素微贱虽贵高力士等犹不为礼怨之欲立奇功自固时上元中剑南奏事吏
过长庆楼下因上谒太上皇赐之酒诏公主及如仙媛
主之又召郭英又王洗等饮辅国因妄言于帝曰太上皇居近市交通外人元礼力士等
将不利陛下六军功臣反侧不自安愿徙太上皇入禁
中帝不寤辅国矫诏裁兴庆宫马会帝属疾辅国即诈言请太上皇按行宫中至睿武门
射生官五百遮道太上皇惊问辅国以甲骑数十驰奏
曰陛下以兴庆宫湫陋奉迎还宫中力士叱使下马辅国失辔骂曰翁不解事斩一从者
力士呼曰太上皇问将士各好在否皆呼万岁再拜力
士复曰辅国可御太上皇马辅国鞞而走与力士对执辔还西内居甘露殿太上皇自是
怏怏至弃天下辅国以功迁尚书益骄讽裴冕表荐为
相帝密使萧华止冕帝寝疾张皇后召太子诛辅国不从更加越王兖王图之元振告乃
伏兵伺变捕二王及中人朱辉光马英俊等弑后代宗
立以立策功愈跋扈至谓帝曰大家第坐宫中外事听老奴处决帝欲翦除惮其握兵因
尊为尚父事无大小率咨之羣臣出入皆先诣辅国辅
国颂自安进司空兼中书令实封户八百未几以左武卫大将军彭体盈代为闲厩羣牧
苑内营田五坊等使以右武卫大将军药子昂代判元
帅行军司马赐辅国大第于外中外闻其失势举相贺辅国始惧表乞解官有诏进封博
陵郡王罢中书令许朝朔望入谢愤咽而言曰 【按
新旧书本传俱作辅国欲入谢而阍者不纳考通鉴作辅国入谢愤咽而言据下文老奴
死罪及帝优辞谕遣等司应是入对非告阍者语兹从
通鉴】 老奴死罪事郎君不了请地下事先帝矣帝优辞谕遣自辅国徙太上皇天下疾
之帝在东宫积不平既嗣位不欲显戮遣盗夜刺之抵
其首濶中殊右臂告泰陵然犹秘其事刻木代首以葬赠太傅谥曰丑

△程元振 【骆奉先】

程元振京兆三原人少以宦人直内侍省迁内射生使张皇后谋立越王元振见太
子发其奸与李辅国挟太子诛越王并其党代宗即位
拜右监门卫将军知内侍省事判元帅行军司马封保定县侯再迁骠骑大将军邠国公
尽总禁兵不踰岁权震天下在辅国右凶决又过之军
中呼十郎宰臣裴冕与元振忤乃摭其小吏韩颖等罪贬冕施州来瑱守襄汉有功元振
尝诱属不应因诬杀瑱同华节度使李怀让被构忧甚
自杀恶李光弼数媒蘖之瑒等上将冕光弼元勋既被诛斥方帅繇是携解广德初吐蕃
党项内侵诏集天下兵无一奔命者敌扣便桥帝苍黄
出居于陕贼陷京师府库荡尽于是太常博士柳伉上疏切谏请诛元振以谢天下疏闻
帝顾公议不与乃诏削元振官爵放归田里帝还元振

自三原衣妇人衣私入京师 【旧书作元振服縗麻于军中入京城】 舍司农卿陈景
詮家图不轨御史劾按长流溱州景詮贬新兴尉元振
行至江陵死时又有骆奉先者亦三原人历右骁卫大将军数帝讨伐尤见幸广德初监
仆固怀恩军奉先恃恩贪甚怀恩不平既而惧其譖遂
叛事平擢奉先军容使掌畿内兵权永泰初以吐蕃数惊乃城鄆以奉先为使悉毁县外
庐舍无尺椽累封江国公监凤翔军大历末卒

△鱼朝恩

鱼朝恩泸州人天宝末给事黄门内阴黠善宣纳诏令至德中常监军事九节度围
贼相州不立统帅以朝恩为观军容宣慰处置使 【
按师必立帅乃有所专禀而克有成功列镇咸在无所统摄败之道也郭李元勋势难相
制当令子仪光弼分道进取岂可不立元帅反以寺人
牵制其闲耶伏读通鉴辑览 御批谓肃宗专委宦者反居二人之上与尸失律理固
不爽诚千古正论也恭录识之】 以功加大监门卫将
军史思明攻洛阳朝恩常统神策兵屯陕洛阳陷思明长驱至硖石肃宗诏锐兵十万循
渭而东以济师朝恩按兵陕东使神策将卫伯玉与贼
战败之洛阳平徙屯汴加开府仪同三司封冯翊郡公宝应中还屯陕代宗避吐蕃东幸
卫兵离散朝恩悉军奉迎华阴乘輿六师乃振帝德之
更号天下观军容宣慰处置使专领神策军赏赐无算朝恩恃功益无所惮时郭子仪有
定天下功朝恩嫉之乘相州败丑为诋譖肃宗为罢子
仪兵留京师代宗立与程元振共毁子仪俄而吐蕃陷京师卒用其力王室再安故朝恩
内惭乃劝帝徙洛阳以避寇有近臣折之曰今屯兵足
以捍寇何遽胁天子弃宗庙为朝恩色沮而子仪亦谓不可乃止朝恩好引轻浮后生处
门下讲五经大义作文章自谓才兼文武永泰中诏判
国子监兼鸿胪礼宾内飞龙闲厩使封郑国公凡诏会羣臣计事朝恩估贵诞辞必折其
坐人虽元载强辩亦拱默唯礼部郎中相里造殿中侍
御史李衍酬诘往返未始降屈朝恩不怩黜衍以动造又谋易执政会释菜执易升坐百
官咸在言鼎覆餗象以侵宰相王缙怒元载怡然朝恩
曰怒者常情笑者不测载衔之未发朝恩有赐墅表为佛祠为章敬太后荐福即后谥以
名祠许之于是用度侈浩奏坏曲江诸馆华清宫楼谢
百司行署将相故第收其材佐兴作费无虑万亿既数毁郭子仪不见听乃遣盗发其先
冢久之徙封韩初神策都虞候刘希暹魁健能骑射最
为朝恩昵信以太仆卿封交河郡王兵马使王驾鹤独谨厚亦封徐国公希暹讽朝恩置
狱北军阴纵恶少年横捕富人付吏考讯因中以法录
贖产入之军皆诬服冤死故市人号入地牢朝廷裁决朝恩一不预辄怒曰天下事有不

由我乎帝闻不悦养息令徽者尚幼为内给使服绿与
同列争忿归白朝恩明日见帝乞金紫帝未答有司已奉紫服于前令徽称谢帝笑曰小
儿童服大称滋不悦元载乃用左散骑常侍崔昭尹京
兆厚以财结其党皇甫温周皓温方屯陕而皓射生将自是朝恩隐谋奥语悉为帝知希
暹觉帝指密白朝恩朝恩稍惧然见帝接遇未衰故自
安而潜计不轨帝遂倚载决除之郭子仪密白朝恩尝结周智光为外应久领内兵不早
图变且大载以温节镇凤翔未即遣约与皓其诛朝恩
谋定以闻方寒食宴禁中既罢将还营有诏留议事朝恩至帝责其异图朝恩自辩言颇
悖傲皓与左右禽缢之外无知者帝隐之下诏罢观军
容等使增实封户六百内侍监如故外咸言既奉诏乃投缢云还尸于家赐钱六百万以
葬 【按鱼朝恩凶悖自当明正典刑且以国家全力
何难诛一官豎乃代宗与元载密布方略俨加敌国而又还尸赐钱不敢显斥其罪法纪
何在伏读通鉴辑览 御批责代宗庸懦无能洵为
千古定论恭录识之】 帝惧军乱进刘希暹王驾鹤并兼御史中丞又下诏慰晓将士独
希暹自知同恶言不逊驾鹤白发之遂赐死

△窦文场 【霍仙鸣】

窦文场霍仙鸣者始并隶东宫事德宗未有名自鱼朝恩死宦人不复典兵帝以禁
卫尽委白志贞志贞多纳富人金补军士止收其庸而
身不在军及泾师乱帝召禁军无一人至者惟文场等率宦官及亲王左右从至奉天帝
逐志贞遂以文场主大右军帝自山南还两军复完而
帝忌宿将难制故诏文场仙鸣分总之贞元十二年置护军中尉中护军各二员诏文场
为左神策护军中尉仙鸣为右焦希望为左神策中护
军张尚进为右中尉护军自此始后仙鸣移病帝赐十马令诸祠祈解已而暴死帝疑左
右进寿捕诘小使问状诛数十人赠开府仪同三司以
内常侍第五守亮代之文场累擢骠骑大将军以年老致仕卒

△刘贞亮

刘贞亮本俱氏名文珍冒所养宦父故改焉性忠正识义理平凉之盟在浑瑊军中
会虜变被执俄而得归出监宣武军自置亲兵千人贞
元末宦人领兵附顺者益众会顺宗立风疾弗能视朝惟李忠言牛美人侍美人以帝旨
付忠言忠言授之王叔文叔文与朝士柳宗元刘禹锡
韩日华等裁定然后下中书施行故叔文权震天下遂欲夺神策兵以自强即用范希朝
为京西北禁军都将收宦者权而忠言素懦每与叔文
论事无敢异同唯贞亮力与之争因与中人刘光琦薛文珍尚衍解玉吕如全等同劝帝
立广陵王为太子监国帝纳其奏贞亮召学士卫次公

郑綱李程王涯至金蛮殿草定制诏太子已立尽逐叔父党委政大臣识者美其忠累迁右卫大将军知内侍省事元和八年卒赠开府仪同三司

△吐突承璀

吐突承璀字仁贞闽人也以黄门直东宫察察有才宪宗立累擢左监门将军左神策护军中尉左街功德使封蓟国公王承宗叛诏承璀为行营招讨处置使以左右神策及河中河南浙西宣歙兵从之内侍宋惟澄曹进玉为馆驿使自河南陕河阳惟澄主之京华河中至太原进玉主之又诏内常侍刘国珍马朝江【旧书作马江朝】分领易定幽沧等州粮料使于是谏官李墉许孟容李元素李夷简吕元膺穆质孟简独孤郁段平仲白居易等众对延英谓古无中人位大帅恐为四方笑帝乃更为招讨宣慰使【旧书作招抚处置使】为御通化门慰其行承璀无远略踰年无功闲遣人说承宗上书侍罪乃诏璿师还为中尉平仲劾承璀轻谋弊赋损国威请斩之以谢天下帝不获已罢为军器庄宅使寻拜左卫上将军知内侍省会刘希光纳羽林大将军孙璿钱二十万缗求方镇事发赐死迹絀承璀乃山监淮南军时帝与承璀殊厚以李绛在翰林苦谕其过故遣之帝后欲还承璀为罢绛宰相召为内弓箭库使复左神策中尉惠昭太子薨承璀请立澧王不从穆宗即位衔其不佑已诛禁中

△马存亮【严遵美】

马存亮字季明河中人元和时累擢左神策军副使左监门卫将军知内侍省事进左神策中尉敬宗初染坊供人张韶与卜者苏元明善元明曰我尝为子卜子当御食我今上昼夜猎出入无度可图也韶信之韶每输染材入官卫士不呵也乃阴结染工百余人匿兵紫草车中载入右银台门何夜为变有诘其重载者韶谓谋觉杀其人即挥兵大呼趋禁庭时帝击球清思殿闻变狼狈幸左神策军存亮出迎奉帝足泣负而入以五百骑往迎二太后比至贼已斩关入清思殿升御坐盗乘舆余膳揖元明偶食且曰如占悉以宝器赐其徒攻弓箭库仗士拒之不胜存亮遣左神策大将军康艺全将军何文哲宋叔夜孟文亮右神策大将军康志睦将军李泳尚国忠率骑兵讨贼日暮射韶及元明皆死迟明尽捕乱党左右军清宫车驾还羣臣诣延英门见天子然至者十不一二赐存亮实封户二百其它论功赏有差时存亮功最高乃推委权势求监淮南军代还为内飞龙使太和中以右领军卫上将军致仕封岐国公卒赠扬州大都督存亮逮事德宗更六朝唐世中人以忠谨称者唯存

亮西门季玄严遵美三人而已遵美父季实为掖廷局博士大中时有宫人谋弑宣宗是夜季实直咸宁门下闻变入射杀之明日帝劳曰非尔吾危不免擢北院副使终内枢密使遵美尝为左军容使叹曰北司供奉官以胯衫给事今执笏过矣枢密使无厅事唯三楹舍藏书而已今堂状帖黄决事此杨复恭夺宰相权之失也盖疾时中官肆横云后从昭宗迁凤翔求致仕隐青城山卒

△仇士良

仇士良字匡美循州兴宁人顺宗时得侍东宫宪宗嗣位再迁内给事出监平卢凤翔等军元和太和闲数任内外五坊使秋按鹰内畿所至要吏供饷暴甚寇盗文宗与李训欲杀王守澄以士良素与守澄隙擢为左神策军中尉兼左街功德使使相麋肉已而训谋悉逐中官士良悟其谋与右神策军中尉鱼宏志大盈库使宋守义挟帝还宫缚王涯舒元舆今自承反示牒于朝于时莫能辨其情士良因纵兵捕之无轻重悉毙两军公卿半空事平加特进右骁卫大将军宏志石卫上将军兼中尉守义右领军卫上将军李右辅政有风岸士良忌之使贼刺石于亲仁里马逸而免石惧辞位士良益无惮泽潞刘从谏本与训约诛郑注及训死愤士良得志乃上书言王涯等八人皆宿儒大臣愿保富贵何苦而反又言大臣如挟无将之谋自宜执付有司安有纵俘劫横尸阙下哉且宦人根党蔓延在内臣欲面陈恐横遭戮害谨修封疆缮甲兵誓以死清君侧书闻人人传观士良沮恐即进从谏检校司徒欲弭其言从谏知可动复言臣所陈系国大体可听则宜先宥涯等罪不可听则赏不宜妄出安有死冤不申而生者荷禄累上书暴指士良等罪帝虽不能去然倚其言差自强尝谓周墀曰周赧汉献受制强臣今朕受制家奴不及远矣因泣下始枢密使刘宏逸薛季棱宰相李瑀杨嗣复谋奉太子监国士良与宏志议更立瑀不从及矫诏立颍王为皇太弟士良以兵奉迎而太子迁为陈王初庄恪太子薨杨贵妃谋引安王不克武宗已立士良发其事劝帝除之以绝人言故王妃皆死士良迁骠骑大将军封楚国公宏志韩国公实封户三百俄而瑀嗣服罢宏逸季棱诛矣帝明断虽士良有援立功内实嫌之阳示尊宠李德裕得君士良愈恐屡请老诏可寻卒士良之老中人举送还第士良教之曰天子不可令闲暇必观书见儒臣则又纳谏智深远虑减玩好省游幸吾属恩且薄而权轻矣为诸君计莫若殖财货盛鹰马日以球猎声色蛊其心使悦不知息则必斥经术闇外事万机在我恩泽权力欲焉往哉众再拜士良杀二王妃四宰相贪酷二十余年死之明年有发其家藏兵数千物诏削官爵籍其家始士良宏

志愤文宗与李训谋屡欲废帝崔慎由为翰林学士直夜未半有中使召至秘殿见士良等坐堂上帷帐周密谓慎由曰上不豫已久皇太后有制更立嗣君学士当作诏慎由惊怖誓死不承命士良等默然良久乃启后户引至小殿帝在焉士良等历阶数帝过失帝俛首乃送慎由出戒毋泄慎由记其事将没以授其子胤恶中官终讨除之盖祸原于士良宏志云

△杨复光

杨复光闽人本乔氏有武力少养于内常侍杨玄价家颇以节谊自奋有谋略累监诸镇军干符初佐平卢节度使曾元裕击贼王仙芝败之招讨使宋威击仙芝于江西复光为排阵使遣判官吴彦宏约贼降仙芝遣将尚君长自缚如约威疾其功密请诛仙芝故仙芝怨复引兵叛后天子寤威阶祸罢之以兵与复光乃进禽贼将徐唐莒王铎代威为招讨以复光监忠武军屯邓州遏贼右冲京师陷忠武节度周岌受伪命尝夜宴召复光左右曰彼既附贼必不利公不如毋行复光固往酒所语时事复光泣曰丈夫所感独恩与义耳彼不顾恩义规利害何丈夫哉公奋匹夫封侯乃捐十八叶天子北面臣贼何恩义利害昧昧耶岌流涕曰吾力不足阳合而阴离之故召公计因持杯为盟复光即遣假子守亮斩贼使于传舍秦宗权据蔡州叛岌复光以忠武兵三千入见之宗权即遣其将王淑以兵万人从复光定荆襄师次邓淑逗遛复光斩之并其军为八以鹿宴弘晋晖张造李师泰王建韩建等为之将进攻南阳贼将朱温何勤逆战大败之遂收邓州追北蓝桥会母丧班师俄起为天
下兵马都监总诸军与东面招讨使王重荣并力定关中朱温守同州复光遣使鑿谕温以所部降方贼之强重荣不知所出谓复光曰臣贼邪且负国拒战邪则兵寡奈何复光曰李克用与我世共患难其为人奋不顾身比数召未即至者由太原道不通耳苦谕上意彼宜必来重荣曰善白王铎以诏使至太原克用兵乃出京师平以功加开府仪同三司同华制置使封宏农郡公赐号资忠辉武匡国平难功臣卒河中赠观军容使谥曰忠肃复光御下有恩军中闻其死皆恸哭其后平贼立功者多其麾下诸假子为将帅者数十人

钦定续通志卷五百七十四

●钦定续通志卷五百七十五 宦者传二

宦者传

唐 【二】

五代

○唐二

王守澄

刘克明

田令孜

杨复恭

刘季述

韩全海

【张彦宏】

张承业

王守澄

刘克明

田令孜

杨复恭

刘季述

韩全海 【张彦宏】

张承业

△王守澄

王守澄者史亡所来元和中监徐州军召还宪宗惑方士说饵金丹多躁怒左右踵得罪禁中累息十五年正月庚子夜守澄与内常侍陈宏志弑帝于中和殿 【按旧书本传正言陈宏庆弑逆而不及守澄宪宗本纪作帝暴崩或言陈宏志弑逆实录止云帝崩于中和殿新书本纪作宏志等反帝崩本传又作守澄与宏志弑逆所载互异】 以暴崩告天下乃与梁守谦韦元素等定册立穆宗俄知枢密事文宗嗣位守澄有助力进拜骠骑大将军帝疾元和逆罪久不讨故以宋申锡为宰相谋因事除事不克更因其赏郑注李训乘其罅于是流杨承和于驩州韦元素象州遣中人刘忠谅追杀元素于武昌承和次公安赐死训乃胁守澄以军容使就第使内养赍酖赐死

△刘克明

刘克明亦亡所来得幸敬宗敬宗善击球好手博独昵羣小游戏无度四方争以趨勇进尝御三殿阅角抵有碎首断臂者帝叹甚厚赐之夜分罢所亲近既皆凶不逞又小过必责辱自是怨望帝猎夜还与宦官克明田务澄许文端及击球将军石定宽苏佐明王嘉宪阎惟直等二十八人羣饮既酣帝更衣烛忽灭克明与佐明定宽弑帝更衣室矫诏召翰林学士路隋作诏书命绛王领军国事明日下遗诏绛王即位克明等恃功将易置左右自引支党颺兵柄于时枢密使王守澄杨承和中尉梁守谦魏从简与宰相裴度共迎江王发左右神策及六军飞龙兵讨之克明投并死出其尸戮之务澄等皆斩首以徇籍入家赀又杀其党数十人

△田令孜

田令孜字仲则蜀人也本陈氏咸通时厯小马坊使僖宗即位擢左神策军中尉始帝为王寺与令孜同卧起至是以其知书能处事又帝

资狂昏故政事一委之呼为阿父而荒酣无检赏赐伎子歌儿动巨万计国帑耗竭令孜劝帝籍京师两市商旅寔货举送内库有来诉者皆杖死令孜知帝不足惮则贩鬻官爵假赐绯紫皆不以闻所在盗起上下相掩帝不及知时贤人无在者惟佞鄙沓贪相与备员与己左拾遗侯昌蒙【通鉴作侯昌业与此异】不胜愤指言竖尹用权乱天下疏入赐死黄巢陷东都令孜奉帝西幸步出金光门以羽林白马载帝昼夜驰舍骆谷时陈敬瑄方节度西川令孜兄也【旧书作令孜弟】故请帝幸蜀有诏以令孜为十事十二卫观军容制置左右神策护驾使至成都进左金吾卫上将军兼判四卫事封晋国公帝见蜀陕陋稍郁郁北望流涕令孜伺闲开释因盛称郑畋王铎程宗楚李鋌敬瑄方并力贼不足虞帝曰善初成都募陈许兵三千服万帽名黄头军以捍蛮帝至大劳将士扈从者已赐而不及黄头军皆窃怨令孜黄头将郭琪因夜烧营剽城邑敬瑄讨败之奔广都遂走高骈所帝闻变与令孜保东城自守羣臣不得见左拾遗孟昭图上蔬极谏令孜匿不奏矫诏贬昭图嘉州司户参军使人沈于墓颺津贼平令孜欲归重北司以王铎无功故罢铎都统又以杨复光召沙陀破贼功第一忌其逼已故薄其赏会复光死大喜即罢其兄复恭枢密使中人曹知恣富家子颇沈鸩贼在长安知恣集壮士倚山为屯阴教士卒变衣服言语与贼类者夜入长安攻贼营贼大惧帝擢内赏侍闻帝将还因大言我且拥众大散关下阅羣臣可归者纳之令孜恶之密令王行瑜以邠州兵度嵯峨山袭杀其众由是益自肆禁制天子不得有所主断帝以其专语左右辄流涕复光部将王建率义勇四军迎帝西县令孜以复光故纔授诸卫将军养为已子别募新军以千人为都凡五十四都分左右为十军统之又遣亲信覘诸镇不附己者辄以罪陷之养子匡佑宣慰河中王重荣原为礼匡佑傲甚重荣因子令孜罪责其无礼监军和解乃去匡佑还诉令孜且劝图之令孜白以两盐池归盐铁使即自兼两池榷盐使重荣不奉诏奉暴令孜十罪令孜自将讨重荣率邠宁朱玟凤翔李昌符合郾延灵夏等兵凡三万壁沙苑重荣说太原李克用连和克用上书请诛令孜攻帝不从大战沙苑禁军败攻与昌符各还本镇皆耻为令孜用还与重荣合神策兵溃还略所过皆尽克用逼京师令孜计穷乃焚坊市劫帝夜启开远门出奔王建以义勇四军扈帝夜乱牢水遂次陈仓克用还河中攻与重荣连章请诛令孜令孜请帝幸兴元不从遂以兵入寝殿逼帝夜出羣臣无知者宰相萧遘等皆不及从孜劝兴元节度使石君涉焚阁道媿帝西意遘恶令孜劫质天子生方镇之难使孜进迎乘輿令孜奉帝发宝鸡惧人

图已蒙面以行使王建以长剑五百前驱囊传国玺授之次大散关道险涩帝危及难数矣攻长驱蹶帝阁道毁帝走他道至兴元攻重荣复表诛令孜安慰羣臣诏以令孜为剑南监军使留不去重荣请幸河中令孜沮而止宰相遣率羣臣在凤翔者表令孜颺国煽祸请诛之帝不省且诏重荣饷粮十五万斛给行在重荣以令孜未诛不奉命孜乃奉嗣襄王熈即伪位孜败帝乃得还京师帝病中外属寿王令孜奔成都表解官求医药诏可俄削官爵长流儋州 【按通鉴从实录作端州】 然犹依敬瑄不行寿王即位是为昭宗出王建为壁州刺史建取利州自署防御使因略定阆邛蜀黎雅等州诏即置永平军拜建节度使令孜谋与建连衡亢朝廷以书召之建喜将玉敬瑄以建难制复郟之建怒进围成都敬瑄窘迫遣令孜登城谢建曰老夫久相厚何见困愿为父子如初建然许令孜夜负印节授建明日入成都囚令孜碧鸡坊卒为建所杀

△杨复恭

杨复恭字子恪本林氏宦官杨玄翼养子复光从兄也复恭略涉学术监诸镇兵庞勋乱战有功自河阳监军入拜宣徽使擢枢密使令孜颺威福中外莫敢亢惟复恭屡与争得失令孜怒下迁飞龙使乃卧疾蓝田令孜失律僖宗出再幸山南复用复恭制置经略多更其手车驾还遂代令孜为左神策中尉六军十二卫观军容使封魏国公实户八百赐号忠贞启圣定国功臣帝崩定策立昭宗赐铁券加金吾上将军遂擅朝政于是宰相韦昭度张浚杜让能等为帝言大中故事请抑宦官帝亦稍厌复恭横恣王瓌者惠安太后弟求节度使帝问复恭对曰产禄倾汉三思危唐后族不可封拜陛下诚爱瓌任以他职可也不宜假节外藩恐负势颺地不可制帝乃止瓌闻怒甚至禁中见复恭诟辱之遂居中任事复恭不欲分已权白为黔南节度使道兴元而复光养子守亮 【按杨复光传载复光养子守亮本传既称复恭为复光从兄而又以守亮为复恭兄子误今改正】 方领节度阴勒利州刺史覆瓌舟于江宗属宾客皆死以舟自败闻帝知复恭谋深衔之复恭以诸子为州刺史号外宅郎君又养子六百人监诸道军天下威势举归其门守立为天威军使本胡宏立也勇武冠军人畏之帝欲斥复恭惧为乱乃好谓曰卿子守立安在吾欲令卫殿内复恭以守立见帝赐姓李名顺节使掌六书管钥光宠既其遂与复恭争权相中伤暴发其私大顺二年罢复恭兵出为凤翔监军不肯行因丐致仕诏可迁上将军赐几杖使者还遣腹心杀使者于道遁居商山俄入居昭化坊第第近玉山营而子守信为军使数省候出入或告父子且谋乱时顺节遥领镇海军节度使同中书门下平章事诏与神

策军使李守信率卫兵攻复恭治杀使者罪守信率兵拒战会日入复恭与守信举族出奔遂走兴元顺节已斥复恭遂横暴出入以兵从两军中尉刘景宣西门重遂察其意非常以状间有诏召顺节辄以甲士三百人入屋银台门呵止之景宣引顺节坐殿庑部将嗣光审出斩之从者大噪出延喜门剽永宁里尽夕止于是凤翔李茂贞邠州王行瑜华州韩建同州王行约秦州李茂庄同劾守亮纳叛臣请出兵讨罪宦尹惜伤其类执不可茂贞遂擅与行瑜出讨自号兴元节度使诒宰相书慢悖不臣帝为下诏令茂贞行瑜讨之景福元年破其城复恭守亮守信奔阆州茂贞以子继密守兴元诏吏部尚书徐彦若为凤翔节度使而以茂贞帅兴元不拜请继密为留后帝不得已授以节度使自是茂贞始强复恭与守亮等自阆州将北奔太原趋商山至干元为韩建逻士所禽即斩复恭守信槛车送守亮京师梟首长安市

△刘季述

刘季述者僖昭间擢累枢密使李茂贞得兴元愈跋扈不轨宰相杜让能与内枢密使李周■〈言童〉及右神策军中尉西门重遂谋诛之师兴为茂贞所败京师震恐帝为斩重逐周■〈言童〉以谢茂贞更以骆全瓘刘景宣代为两中尉干宁三年茂贞与王行瑜韩建以兵入朝杀宰相韦昭度李溪李克用率师讨茂贞次渭北同州节度使王行实奔告景宣等曰沙陀十万至矣请奉天子出幸避其锋景宣方与茂贞睦故全瓘与凤翔卫将阎圭共胁帝狩岐王行实及景宣子继晟纵火剽东市帝登承天门矢着楼阖帝惧暮出莎城士民从者数十万至谷口喝死者十之三夜为盗掠哭声震山谷徙驻石门茂贞恐乃杀全瓘景宣及圭自解帝还京师内官景务修宋道弼复专国政宰相崔胤恶之徐彦若王抟惧祸不解稍抑胤以和北军胤怒劾抟党宦竖罢去俄赐死流道弼驩州务修爱州并死灞桥逐彦若于南海乃以季述王仲先为左右中尉疾胤尤甚时帝嗜酒怒责左右季述等愈自危乃外约朱全忠为援谋废帝帝夜猎苑中醉杀侍女三人明日午漏上门不启季述见胤曰宫中殆不测与仲先率王彦范薛齐偓李师虔徐彦回总卫士三十人毁关入是夜宫监窃取太子以入因僖皇后令立太子黎明陈兵廷中召百官署奏胤畏死不敢违季述卫太子至紫廷院入思政殿遇者辄杀帝方坐乞巧楼见兵入惊堕于床将走季述仲先持帝坐以所持杖画地责帝曰某日某事尔不从我罪一也数至十未止皇后出徧拜请勿惊大家有事唯军容议季述出百官奏愿奉太子监国陛下自颐东宫后趣帝如军容语宫监掖帝出思政殿后以传国宝授季述就帝辇从者十余人入囚少阳

院季述液金以完鏐师虔以兵守之太子即位于武德
殿帝号太上皇皇后为太上皇后大赦季述等皆以诛戮立威凡有宠于帝悉榜杀之杀
帝弟睦王师虔尤苛察左右出入必搜索帝动静辄白
季述食自宝进纸笔铜铁皆不与方寒公主嫔御无衾纩哀闻外廷胤告难于朱全忠使
以兵除君侧全忠封胤书与季述季述以责胤胤曰奸
人伪书从古有之季述易之乃与盟胤谢全忠曰左军与胤盟不相害然仆归心于公全
忠得书恚曰季述使我为两面人自是始离天平节度
副使李振亦劝全忠讨季述乃遣振至京师与胤谋时都将孙德昭董从实为仲先所辱
常愤惋胤因密结德昭谋反正德昭邀别将周承诲期
十二月晦伏兵安福门待旦仲先乘肩舆造朝德昭等擒斩之叩少阳院呼曰逆贼斩矣
以贼首献宫人毁扉出帝御长乐门羣臣称贺承诲驰
入左军执季述彦范至楼前胤先戒京兆尹郑元规集万人持大挺帝诘季述未已万挺
皆进二人同死挺下遂尸之两军支党死者数十人中
官奉太子遁入左军收传国玺全忠槛送贼赏程岩京师斩于市季述等夷三族以德昭
检校太保静海军节度使从实检校司徒容管节度使
并同中书门下平章事赐氏李曰继昭曰彦弼承诲亦赐姓名曰李继诲并检校司徒邕
管节度使视宰相秩皆号扶倾济难忠烈功臣图形凌
烟阁留宿卫十日乃休竭内库珍宝赐之师虔与徐彦回寻诛

△韩全海 【张彦宏】

韩全海张彦宏者皆不知所来并监凤翔军全海入为内枢密使刘季述既诛崔胤
陆扈上言自中人典兵王室愈乱臣请主神策左军以
扈主右则四方藩臣不敢谋昭宗意不决李茂贞语人曰崔胤夺军权未及手志灭藩镇
矣帝闻召问李继昭等皆曰臣世世在军不闻书生主
卫兵且罪人已得持军还北司使帝乃以全海为左神策中尉彦宏为右皆拜骠骑大将
军袁易简周敬容为枢密使胤怒约京兆郑元规遣人
狙杀之不克全海等因讽茂贞留选士四千宿卫以李继筠继徽总之胤亦讽朱全忠内
兵三千居南司 【按通鉴止载茂贞留兵宿卫而不
言全忠内兵考旧书昭宗本纪薛史梁纪皆不载全忠遣兵宿卫事新书本传所载盖从
唐补纪之说】 以姿敬恩领之韩偓闻岐汴交戍数谏
止胤不听议者知京师不复安矣全海彦宏及彦弼合势盗暴中官倚以自骄帝不平有
斥逐者皆不肯行胤固请尽诛之全海彦宏见帝祈哀
帝知左右漏言始诏囊封奏事宦人更求丽妹知书者数十人侍帝为内调由是胤计多
露始张浚判度支杨复恭以军费乏奏假盐曲一岁之
入以济用遂不复还至胤乃白度支请如旧制全海摘李继筠诉军中匮甚请割三司隶

神策帝不能却诏罢胤领盐铁胤衔之全海等惧帝诛
已与继海彦弼继筠交通谋乱令狐涣请召胤及全海等宴内殿和解之韩偓谓不如显
斥一二柄臣许余人自新妄谋必息不然皆自疑祸且
速虽和解之凶焰益肆帝乃止胤时阴结全忠与茂贞为敌茂贞欲帝幸凤翔胤为急诏
令全忠入朝又诒书曰帝反正公之力而凤翔入朝引
功自归今若后至必见讨全忠得诏悉师讨全海帝以为忠又欲其与茂贞同功即诏并
力令胤诒二镇书示帝意全忠取同州汴兵凡七万威
震关中全海等泣奏曰全忠且至欲胁陛下幸关东将谋传禅愿至凤翔合义兵诗之帝
未许方在乞巧楼全海纵火其下逼帝降楼乃决西幸
帝出惟皇后诸王数百骑为卫天复元年十一月壬子全海等遂火宫城茂贞以帝居整
屋全忠取华州下令自释曰吾被诏入朝而逆臣全海
震惊天子胁乘輿出迁暴露草莽吾当入对言状胤使王溥见全忠请西迎天子全忠发
赤水胤率百官迎全忠灞桥入舍长安一昔而西茂贞
闻全忠至以帝入凤翔从臣纔三四人全忠遣杨达裴铸入凤翔奉表天子汴部将康怀
英袭破李继昭于武功禽馘六千级全海惧求救于李
克用克用诒全忠书劝执胤洗海内谤全忠不答进屯凤翔东偏帝遣人诏全忠班师使
者再往全忠听命引兵攻邠州李继徽婴城三日乃降
质其妻复使继徽守回壁三原胤与郑元规至三原邀说全忠时李克用部将李嗣昭救
凤翔战数不利遁还河东胤复说全忠乃定计迎天子
以精甲五万与茂贞决战岐兵败全忠军进攻东城焚桥麇战部将李继宠出降茂贞惧
密图诛中官以纾难先诒书全忠请奉乘輿还宫全忠
许之然军稍薄城岐军皆无鬪意诸镇见崔胤檄皆狐疑不出师唯青州节度使王师范
取兖州袭华州李克用攻晋州以为援全忠惧围益急
帝乃定计归全忠以纾近祸三年正月茂贞请诛全海等与全忠连和奉车驾还京帝喜
即遣内养四十人收全海彦宏等斩之易简敬容皆死
即诏第五可范为左军都尉继筠继海彦弼皆伏诛是夜并诛内诸司使韦处廷等二十
二人悉囊其首诏学士薛贻矩送全忠全忠大喜徧告
军中以姚洎为岐汴通和使全忠诒茂贞书曰宦者乘陴詈不已曰稟王旨信乎茂贞惧
复诛小使李继彝等十人于是开垒门全忠犹攻北垒
帝遣宫人宠颜赐御巾箱宝器使罢兵又补杀中官七十人全忠亦使京兆诛党与百余
人令朱友伦以兵卫帝还京师胤全忠议尽诛第五可
范等八百余人于内侍省哀号之声闻于路留单弱数十人备宫中洒扫于是追诸道监
军所在赐死财产籍入诏以中官胁迁状及全忠迎乘
輿本末告方镇罢监军院视国初故事以三十人为员衣黄衣不得养子内诸司皆归省

寺两军内外八镇兵悉属六军全忠还汴州初帝愆幽辱能励心庶政数召见羣臣有志中兴而胤以争权外召强臣劫朝廷以相吞噬君侧虽清而全忠势遂张唐室以亡投鼠败器良堪太息

△张承业

张承业字继元唐僖宗时宦者也本姓康幼为内侍张奉养子李克用兵击王行瑜承业数往来兵间晋王喜其为人及昭宗为李茂贞所迫将出奔太原乃先遣承业使晋以道意因以为河东监军其后崔胤诛宦官宦官在外者悉诏所在杀之克用怜承业匿之斛律寺昭宗崩乃出承业复为监军晋王病革以存勳属承业存勳兄事之存勳在魏与梁战河上十余年军国之事皆委承业承业亦尽心不懈凡蓄积金粟收市兵马劝课农桑而成存勳之业者承业之功为多自贞简太后韩德妃伊淑妃及诸公子在晋阳者承业一切以法绳之权贵皆敛手存勳岁时自魏归省亲须钱薄博赏赐伶人而承业主藏钱不可得存勳乃置酒库中酒酣使子继岌为承业起舞舞罢承业出宝带币马为赠存勳指钱积呼继岌小字以语承业曰和哥乏钱可与钱一积何用带马为承业谢曰国家钱非臣所得私存勳以语侵之怒对曰臣非为子孙计惜此库钱佐王成霸业尔若欲用之何必问臣财尽兵散岂独臣受祸也存勳顾元行钦曰取剑来承业起持存勳衣泣曰臣为王惜库物而死死不愧于先王矣阎宝从旁解承业手令去承业奋拳殴宝骂曰阎宝朱温之贼蒙晋厚恩不能有一言之忠而反谄谀自容耶存勳母曹氏闻之使召存勳存勳性至孝闻召甚惧酌两卮以谢承业不肯饮存勳入内其母使人谢承业曰小儿忤公已笞之矣明日其母与存勳俱过承业第慰劳之卢质嗜酒傲慢存勳深嫉之承业乘间请曰卢质嗜酒无礼臣请为王杀之存勳曰吾方招纳贤才以就功业公何言之过也承业起贺曰王能如此天下不足平也质因此获免天佑十八年存勳已诺诸将即皇帝位承业方卧病闻之自太原肩輿至魏谏曰大王父子与梁血战三十年本欲复唐社稷雪国家之讎今元凶未灭遽以尊名自居非王父子初心且失天下望不可存勳谢曰此诸将意也承业曰梁唐晋之仇贼天下所共恶也王诚能为天下去大恶复列圣之深讎然后求唐后而立之使唐之子孙在孰敢当之使唐无子孙天下之士谁可与王争者存勳不听承业知不可谏乃仰天大哭曰吾王自取之误老奴矣肩輿归太原不食而卒同光元年赠左武卫上将军谥曰正宪 【按朱子纲目于承业之卒书唐特进河东监军子承业之不忘唐也欧史以承业卒于后唐遂编入五代当晋王存勳称帝承业不食而死足征无臣事后唐

之心伏读通鉴辑览 御批承业大乃心唐室始终不渝洵为铮铮佼佼兹恪遵大圣人褒子之论将承业改归唐宦官谨识】

○五代

张居翰 【马绍宏 孟汉琼】

张居翰 【马绍宏 孟汉琼】

△张居翰 【马绍宏 孟汉琼】

张居翰字德卿故唐掖廷令张从玫之养子昭宗时为范阳军监军与节度使刘仁恭相善天复中大诛宦者仁恭匿居翰大安山之北溪以免其后梁兵攻仁恭仁恭遣居翰从晋王攻梁潞州以牵其兵晋遂取潞州以居翰为昭义监军庄宗即位与郭崇韬并为枢密使庄宗灭梁而骄宦者因以用事郭崇韬又专任政居翰默默苟免而已魏王破蜀王衍朝京师行至秦川而明宗军变于魏庄宗东征卢衍有变遣人驰诏魏王杀之诏书言诛衍一行已印画居翰发视以为杀降不祥乃以诏传柱揩去行字改为一家时蜀降人与衍俱东者千余人皆获免庄宗遇弑居翰见明宗于至德宫求归田里天成三年卒于长安年七十一居翰虽为枢密使而不用事有宣徽使马绍宏者尝赐姓李颇见信用然诬杀大臣黷货赂专威福以取怨于天下者左右独昵黄门内养之徒也是时明宗自镇州入覲奉朝请于京师庄宗颇疑其有异志阴遣绍宏伺其动静绍宏反以情告明宗明宗自魏而反天下皆知祸起于魏孰知其启明宗之二心者自绍宏始也郭崇韬已破蜀庄宗信宦者言而疑之然崇韬之死庄宗不知皆宦者为之也当此之时举唐之精兵皆在蜀使崇韬不死明宗入洛岂无西顾之患其能晏然取唐而代之耶及明宗入立又诏天下悉捕宦者而杀之宦者亡窜山谷多削发为浮屠甚亡至太原者七十余人悉捕而杀之都亭驿流血盈庭明宗晚而多病王淑妃专内以干政宦者孟汉琼因以用事秦王入视明宗疾已革既出而闻哭声以为帝崩矣乃谋以兵入宫者惧不得立也大臣朱弘昭等方图其议未决汉琼遽入见明宗言秦王反即以兵诛之陷秦王大恶而明宗以此饮恨而终后愍帝奔于卫州汉琼西迎废帝于潞废帝恶而杀之

钦定续通志卷五百七十五

●钦定续通志卷五百七十六 宦者传三

宦者传

宋 【一】

○宋一

窦神宝 王继恩 李神佑 刘承规 阎承翰 秦翰
周怀政 张崇贵 张继能 卫绍钦

窦神宝

王继恩

李神佑

刘承规

阎承翰

秦翰

周怀政

张崇贵

张继能

卫绍钦

△窦神宝

窦神宝初为黄门太平兴国中从军太原擐甲登城中流矢稍迁入内高品监并州戍兵屡出袭贼前后破砦三十六斩千余级因筑三砦诏褻之九年命与尹宪屯夏州时岌伽罗赋第十四族久叛神宝率兵大破之焚其庐帐斩千余级虏获甚众雍熙中遣使绥宥麟府募边部愿攻契丹者神宝上言由此或生边隙乃止俄转殿头高品淳化中使河东阅视堡栅兵骑慕容德丰自邢台徙延州未至诏神宝乘传权州事环州近边内扰与陈德玄讨之破牛家族二十八部且规度通远入灵武路就命环庆同驻泊牛家族复结众叛又破之获渠帅九人西戎寇鄜以兵援之用劳迁供奉官与田绍斌部送灵州刍粮即命驻泊李继迁入寇与慕容德丰袭破其堡砦焚帐幕获人畜数万计迁内殿崇班至道初继迁再寇灵武神宝遣人间道告急贼围之岁余城中粮竭潜遣人市余河外宵运以入间出兵击贼贼引去以功拜西京作坊副使迁西京左藏库副使出使灵武还授供备库使咸平中出为高阳关钤辖徙具冀巡检会原州野狸族三千余众徙帐于顺成谷与熟魏族接战诏神宝和治之至则定其强界令悉还旧地入为内侍右班副都知真宗朝陵与刘承珪同掌大内事大中祥符初累迁西京大藏库使兼掌往来国信神宝莅职精恪性吝嗇畜货巨万天禧初以皇城使罢内职三年卒录其养子守志为入内供奉官 【按宋史此下有王仁睿传无事迹可录今删其附载内侍赠官养子之制仍节录附神宝传后谨识】 宋制内侍都知押班不领他职淳化至道后皆内殿崇班以上兼充多至诸司使有领观察使者没皆赠官又内侍许养一子开宝四年以其争财起讼诏自今满三十无养

父者始听养子仍以其名上宣徽院违者准前诏抵死

△王继恩

王继恩陕州陕人初养于张氏名德钧开宝中求复本宗太祖许之赐今名累为内侍行首会讨江南与窦神兴等部禁兵及战船抵采石雍熙中率师屯易州为天雄军驻泊都监自岐沟关君子馆败后河朔诸路为契丹所扰城垒多圯与翟守素田仁朗郭延浚分路按行增筑之淳化五年君昭宣使勾当皇城司李顺乱成都命为剑南两川招安使率兵讨之许以便宜马步军都军头王杲崇仪使尹元分道讨贼并受继恩节度继恩由小剑门路入研石砦破贼斩首五百级逐北过青疆岭平剑州进破贼五千于柳池驿斩千六百终贼众望风奔走杀戮溺死者不可胜计又克绵阆二州至成都破贼十万余斩首三万获顺朝议赏功中书欲除宣徽使太宗不欲宦官预政事命学士张洎钱若水议别立宣政使序位昭宣使上以授以【按古来宦官之称忠良者自后汉吕强后唐张承业而外类不数见而愤军误国之徒史策相望是以人主用之止宜备掖庭洒扫之役委之战阵非其职矣宋初踵唐币使内侍典兵寢至童贯梁师成擅权酿祸未必非太宗贻谋之不善也伏读通鉴辑览御批谓太宗于王继恩虽不与宣徽之除而命之领兵已属乖舛诚千古定论恭录识之】进领顺州路防御使继恩握重兵久留成都转饷不给专以宴饮为务出入奏音乐令骑执博局棋枰自随威振郡县仆使恣横所部剽掠子女金帛无鬪心余贼迸伏山谷闲郡县有复陷者帝闻命入内押班卫绍钦同领其事又遣枢密直学士张鉴等乘传督其捕贼议分减师徒出蜀境以便粮运麾下高品王文寿领卒二千分遂州路追讨御下严急士卒皆怨一夕卧帐中指挥使张嶙遣卒杀之时嘉州贼帅张余有众万余嶙以所部合之贼势甚盛奏至帝令巡检程道符谕旨招抚亡卒斩嶙函首送继恩皆自拔来归因使为乡导击贼悉平之太宗崩加领桂州观察使继恩初事太祖特承恩顾及崩夕太宗在南府继恩中夜驰诣府邸谓太宗入太宗忠之自是宠遇莫比喜结党邀名誉或乘闲荐外朝臣由是轻薄好进者从之交每以多宝院僧舍为期真宗初继恩益豪横颇漏泄机事与参知政事李昌龄緘题往来多请托素与胡旦善时将加恩密委其为褒辞又士人诗颂盈门帝恶其朋党黜为友监门卫将军均州安置籍没赀产多得蜀士僭拟物咸平二年卒于贬所大中祥符三年特诏追复官爵【按宋史此下有李神福传无事迹可录今删谨识】

△李神佑

李神佑开封人初以养父继美任授殿头高品开宝二年从军太原时诏下缘边和市军储已五日车驾在潞州虑扰民令神佑驰驿止之一夕而及攻晋阳甲士既阵敌潜纵火焚梯冲亟命神佑部卫兵为援斩戮甚众余悉溃去士寇周琼等叛又副尹崇珂讨平之六年随曹彬南征克关城擒伪将朱令赟驰入献捷太宗即位迁南作坊副使钱俶归朝命往按府藏之积再驾太原领工徒千人备缮甲兵刘继元纳降款太宗陈仪卫城北台以受之继元移时未至神佑单骑入城引继元至燕蓟用师命与刘延翰统精骑为大阵之援又令率兵屯定州以备契丹太平兴国六年滑州治河防材苇未具命驰往垣曲伐薪蒸四百万以济其用累迁洛苑使真宗北巡为天雄军都监子城内巡检时北兵充斥道途阻塞命神佑单骑谕密旨于诸将敌骑数百忽至神佑周麾而呼若召伏兵敌惧而逃遂达其命景德初帝幸澶州领随驾壕砦三年迁入内都知从东封还迁南作坊使时内侍将迁秩命神佑第其勤状帝亲阅而叙迁之有范守逊皇甫文史崇贵张延训等皆尝有遣而互陈劳效且言神佑等品第非当泣诉于帝帝怒悉停其官神佑坐削职寻掌御厨大中祥符七年卒

△刘承规

刘承规字大方楚州山阳人建隆中补高班太宗即位超拜北作坊副使时泉帅陈洪进归朝遣承规疾置封具府库会士民啸聚为寇承规与知州乔维岳率兵讨定之太平兴国四年命率师屯定州以备契丹又护滑州决河至道中与周莹同签书提点枢密宣徽诸房公事仍加六宅使承规恳辞帝虽不许而嘉其退让咸平三年迁北作坊使时边境未宁议修天雄军城垒命承规乘传经画迁宫苑使帝调承规西事请益环州木波镇戍兵以为诸路之援从之大中祥符初议封泰山以掌发运使迁昭宣使祀汾阴复命督运议者以自京至河中由陆则山险具舟则湍悍承规决议水运凡百供应悉安流而达礼成进宣政使应州观察使五年以疾屡求致仕弗许诏特置景福殿使名以宠之班在客省使上仍改新州观察使承规以廉使月廩归于有司手诏褒美本名承珪以久疾羸瘵帝为取道家易名度厄之义改珪为规疾甚解务还私第寻卒赠左卫上将军镇江军节度谥忠肃后加赠侍中承规事三朝以精力闻堂内藏三十年检察精密制定权衡法性沈毅徇公帝深倚信尤好伺察人多畏之遇事亦或宽恕铸钱工常诉本监前后盗铜瘞地数千斤承规佯为不纳因密遣人发取还官不问其罪颇好儒学喜聚书闲接文士质访故实咸平中朱昂杜镐编次馆阁书籍钱若水修祖宗实录其后修册府元龟国史及编着雠校之事承规悉典领之自寝疾惟以

公家之务为念遣奏求免赠赙帝甚嗟惜之

△阎承翰

阎承翰真定人事太祖以谨愿称太宗时擢为殿头高品稍迁内侍供奉官内殿崇班先是八作司材木颇有隐弊承翰建议于都城西置场以给之雍熙中知广州徐林复奏转运使王廷范不轨状遣承翰驰往鞫之拷掠过若延范竟坐诛李顺乱蜀命为川峡招安都监贼平授西京作坊副使真宗即位改西京作坊使内侍左班副都知咸平三年河决郟州王陵埽遣承翰护塞时议徙郟州以避河患又诏承翰与工部郎中陈若拙乘传规度徙于旧治之东南五年帝以承翰莅事勒恪令代韩守英为镇定高阳关三路排阵都钤辖时中山屯兵甚众艰于飞挽承翰请凿渠引唐河水自嘉山至定州三十二里又至蒲阴东六十二里合沙河经边吴泊入界河以济馈运亦可旁为方田帝嘉而从之渠成人以为便优诏褒之景德初契丹谋侵顺安军诏承翰发雄霸精兵与荆嗣张延同筑垒御之俄又遣诸德清军提度重修城垒二年加领廉州刺史勾当羣牧司条上马政遂兼羣牧副使时契丹结好以承翰领国信司多所规置大中祥符四年迁内园使左班都知领奖州团练使坐擅用羣牧司钱赎六十斤六年帝制内侍箴赐之承翰表请刻石省中明年建应天府为南京作鸿庆宫设太祖太宗像遣承翰自京奉往授南作坊使入内都知未几卒

△秦翰

秦翰字仲文真定获鹿人十三为黄门开宝中迁高品太平兴国四年崔彦进领众击契丹翰为都监以善战闻太宗赏异谓可属任淳化四年补入内押班赵保忠叛命李继隆率师问罪翰监护其军次延州翰卢保忠遁逸即乘驿先往矫诏安抚师至翰又讽保忠郊迎因并驱而出保忠遂就擒【按宋史夏国传载赵保忠为赵光嗣闭之别室开门迎继隆继隆乃执保忠送汴并作奏翰讽使郊迎以致就擒也所载互异】以功加崇仪副使咸平中河朔用兵为镇定高阳关排阵都监败契丹于莫州追斩数万尽夺所掠老幼徙定州行营钤辖王均之乱为川峡招安巡检使时上官正与石普不协翰恐生事为和解之亲督众击贼中流矢不却五战五捷遂克益州至广都斩首千余级还迁内园使领恩州刺史出为镇定高阳关前阵钤辖徙后阵破契丹兵二万俘其大将等十五人又为邠宁泾原路钤辖兼安抚都监率所部按行山外召部帅谕以恩信凡三千余帐相率内附未几康奴族拒命翰与陈兴许均深入击之斩级数千焚其庐帐获牛马甚众复与陈兴曹玮破童埋族于

武延川诏书嘉奖景德初车驾北巡先遣翰乘传往澶魏裁制兵要充邢洛路钤辖与大
军会德清军张掎角之势又召为驾前西面排阵钤辖
管勾大阵翰即督众环城浚沟以拒契丹功毕契丹兵暴至翰不脱甲胄七十余日契丹
通好令率所部还京师加宫苑使入内都知出为泾原
仪渭钤辖先是西鄙无藩篱之蔽翰规度要害凿巨堑计工三十万数年而成役不烦民
就迁皇城使入内都知以宠异焉大中祥符初改昭宣
使又为羣牧副使祀汾阴时夏州属户有扰境上者即遣往睢上按巡边部翰至事宁复
还扈从凡行在诸司细务悉令裁决不须中覆礼毕加
领平州团练使八年营葺大内诏翰参领其事暴卒赠贝州观察使翰倜傥有武力以方
略自任前后战鬪身被四十九创李继迁之未宾也翰
因使常出入其帐中闲白太宗言臣一内官不足惜愿手刺此贼死无所恨太宗嘉其忠
翰性谦谨接人以诚信轻财好施与将士同休戚故众
乐为用其歿也禁旅有泣下者

△周怀政

周怀政并州人父绍忠从太宗征河东得怀政于乱尸闲养为子给事禁中果至入
内高品天禧二年累迁左藏库使仁宗为皇太子命为
任内副都知管勾左右春坊转左骥驥使三年领英州团练使加昭宣使怀政日侍内庭
权任尤盛于是附会者颇众往往言事获从同列位望
居右者心排抑之中外帑库皆得专取因多入其家性识凡近酷信妖妄有朱能者本单
州团练使田敏厮养【按东都事略作本永兴军民
家厮养与此异】性凶狡赂怀政亲信得见因与侍卒姚斌妄谈神怪以誅之怀政大惑
援能至御药使领阶州刺史俄于终南山修道观与刘
益辈造符命托神言国家休咎否臧大臣朝廷屡言其妄适帝得疾自疑不起尝枕怀政
股与之谋欲命太子监国【按东都事略载真宗以
疾因与周怀政谋欲令太子监国此怀政潜谋窃发传位太子之由来也宋史本传不载
今据增辑伏读通鉴辑览 御批谓真宗以国家大
事谋及宦官几至釀成祸乱为始事不臧诚千古之正论恭录识之】怀政东宫官也出
告寇准已而事泄准罢丁谓等因疏斥怀政使不得近
怀政惧获谴不自安四年七月潜与客省使杨崇勋内殿承制杨怀吉等谋以二十五日
窃发杀丁谓复相寇准奉帝为太上皇而传位太子崇
勋等密告丁谓谓即夜至曹利用第计议翼日利用入奏真宗怒令曹玮与崇勋鞫讯怀
政具服命斩于城西普安寺怀政既诛亟遣入内供奉
官卢守明邓文庆驰驿永兴捕朱能能侦知使者至衷甲出杀守明以叛诏遣内殿承制
江德明入内供奉官于德润发兵捕之能众溃入桑林

自缢死坐与怀政能交结相称荐者皆论罪降寇准太常卿再贬道州凡朝士官吏与淮厚善者悉降黜焉

△张崇贵

张崇贵真定人太祖时为内中高品迁殿头太平兴国中钱俶纳士命驰往阅城防储侍之数亲征太原从崔彦进李汉琼先路视水草淳化四年命乘传之延州招羌人之内附者转内班右班押班就命管句鄜延屯兵李继隆讨李继迁诏崇贵以延安兵犄角进讨及擒赵保忠留崇贵与石霸守绥州徙平夏民以实之继迁扼橐駝路驱胁内属羌人崇贵与田敏率熟仓族战于双口斩二千余级连诏褒谕继迁走漠中遣将赵光祚张浦求维款会于石堡砦崇贵椎牛酹酒犒谕之既而继迁贡橐駝名马待罪遣崇贵往赐器币茶药衣物至道元年进崇仪副使内侍右班副都知时继迁复叛围灵州急廷议弃之未决命崇贵与冯讷乘传往议其事乃益兵固守就命为灵环庆州清远军路监军又为排阵都监真宗立迁洛苑使右班都知管句并州军马继迁【按李继迁赐姓名赵保吉据宋史夏国传在淳化二年非真宗时事本传继迁名数见而于真宗立下忽称保吉殊未画一今并改为继迁谨识】复修贡诏以定难节度授之命崇贵持诏赐衣带器币还加六宅使咸平元年命管句鄜延屯兵泊延安改驻泊都监又为钤辖其后继迁复与熟户李继福为隙因缘内扰崇贵与张守恩共击之焚庐舍获货畜器甲生口甚众四年诏归领奖州刺史复莅鄜延仍制置沿边清白盐事与卫超领军入敌境焚庐舍帐幕获廩糗牛羊屡调契丹事传递以闻愿身当一队为前锋诏不允景德元年继迁死其子德明尚幼崇贵移书谕以朝廷恩信德明请俟释服禀命诏书慰抚自是边防事宜经制大小皆崇贵专主之二年春召赴阙面授方略三年以德明誓表来上崇贵因请入朝许之以功拜皇城使内侍左右班都知领博州团练使又持旌节诰命授德明四年使还会车驾上陵崇贵入对琼林苑即命为行宫使是秋复还延安大中祥符元年加昭宣使崇贵在边久识羌人情伪西边畏服二年上言久去乡里愿得告归葬父母许之锡与甚厚复命为都钤辖提举榷场四年卒赠丰州观察使

△张继能

张继能字守拙并州太原人以黄门事太祖太平兴国初从军河东命主城南洞屋以劳迁高品契丹入侵命为高阳镇定路先锋都监从崔彦进战长城口多所俘馘明年又与彦进败契丹于唐兴口转殿头高品雍熙中监李继隆军讨夏州俄徙护定州屯兵领骁捷卒三千屯五

回岭端拱初迁入内殿头从赵保忠讨李继迁保忠荐其有材命与保忠同经略其事代还掌内弓箭库淳化三年与白承睿护刍粟入灵武会继迁复寇边命继能承睿与知灵州侯延广领骁卒五千同主军务俄留为本州岛都监又与田绍斌同掌积石砦就迁内供奉官灵环庆清远军后阵都监与西人转鬪败走之累迁泾原仪渭都巡检使咸平三年王均之乱命为川峡两路招安巡检使成都平留为利州招安巡检寻召归复为邠宁驻泊都监夏人寇清远军营于积石河继能与杨琼冯守规在庆州逗遛不赴援致陷城堡又焚弃青冈砦特诏下御史府免死长流儋州景德二年会赦还为内侍省内常侍又为陕西捕贼巡检获千余人改内殿崇班四年宜州卒陈进为乱诏曹利用张煦为广南东西路安抚使张从古及继能副之发荆湖蕲黄兵致讨贼溃乃斩进并其党利用分兵捕余寇遣于德润驰奏授利用引进使煦如京使从古庄宅副使继能供备库使余俱进秩有差东封留继能为京旧城内巡检钤辖大中祥符二年擢入内内侍省副都知七年为泾原仪渭镇戎军两路钤辖未几徙鄜延都钤辖先是内属户杀汉口者止罚孳畜继能则丽于常法繇是西人畏而不敢犯德明虽受朝命而羌部寇边不绝继能日课卒截竹为签署字其上且言以备将士记杀获功状贼闻之甚惧归朝莅羣牧九年坐前护修庄穆皇后陵摧陷左授西染院使掌往来国信天禧初为西京左藏库使三年迁崇义使以衰老求解职转内园使掌琼林苑五年卒特赠汀州团练使继能性沈密知兵颇勇敢喜读书然好治生晚年急于聚蓄众以此少之

△卫绍钦

卫绍钦开封人以中黄门给事晋邸太宗即位补入内高品甚被亲倚从征太原命督诸将攻城刘继元降命领骁卒先入城烧其营栅迁殿头高品雍熙二年擢入内西头供奉官淳化五年加崇仪副使李顺之乱与王继恩同领招安捉贼事遇贼鬪学射山南又攻清水坝破双流砦招降数万众斩千余级顺死余党保险为寇又与杨琼扼要路邀之擒斩万余人遣别将曹习捕余贼于安国镇斩三百级时贼尚扰嘉眉又遣内殿崇班宿翰讨之两川平召还深被褒劳真定嗣位拜宫苑使景德二年改皇城使从幸河朔命为车驾前后行宫四面都巡检次澶渊命领扈驾兵守河桥厯掌三班院皇城仪鸾翰林司卒【按史此下有石知颀传无事迹可录今删】

钦定续通志卷五百七十六

●钦定续通志卷五百七十七 宦者传四

- 5523 -

宦者传

宋【二】

○宋二

杨守珍 韩守英 蓝继宗 雷允恭 阎文应 任守忠

张惟吉 石全彬 甘昭吉 李宪

 张茂则 李舜举 李继和 梁从吉

杨守珍

韩守英

蓝继宗

雷允恭

阎文应

任守忠

张惟吉

石全彬

甘昭吉

李宪

张茂则

李舜举

李继和

梁从吉

△杨守珍

杨守珍字仲宝祥符人为入内黄门习书史善射通兵略选为环庆路走马承受公事契丹谋入塞为镇定高阳关行营同押先锋事会许民周继宗为人证告与外裔交通于证者六十人辞服遣守珍覆问悉辨理出之徙真定保赵等州驻泊都监邕桂等十州安抚都监从曹克明降抚水州蛮筑二栅以扼其要天禧初擒盗于青灰山累迁西京作坊使进右班都知领端州刺史卒赠原州防御使

△韩守英

韩守英字德华祥符人为入内高品从驾河东奉诏至石岭关督战取隆州迁殿头再迁副都知随王继恩招安西州为先锋战于剑门有功迁西京作坊使剑门都监还句当三班院历定州镇定高阳关并代路兵马钤辖契丹围岢岚军守英与钤辖张志言知府州折惟昌帅所部渡河抵朔州以牵敌势遂破狼水砦俘数百人敌解去迁昭宣使复领三班出为鄜延路都钤辖徙并代路建言本路宿兵多百姓困于飞挽今

幸边鄙无事请留骑军千人余悉徙内地真宗嘉其能体朝廷恤民之意诏诸路视此行之历宣政宣庆二使领奖州团练使雅州防御使入内都知提举诸司库务卒赠定国军节度观察留后

△蓝继宗

蓝继宗字承祖广州南海人初事刘鋹年十二归朝为中黄门从驾太原传诏营陈闲多称旨雍熙中温仲舒谕西羌献大小洛门砮而徙羌众渭北言者以为生事太宗遣继宗按视还奏二砮据要害产良木不可弃帝悦复使继宗劳赐仲舒累迁西京作坊副使真宗谒诸陵近陵旧乏水继宗疏泉陵下从官皆取以济擢入内副都知为赵德明加恩使德明与继宗射继宗每发必中德明遗以所乘名马为内侍省右班都知迁入内都知仁宗即位迁左骐骥使历昭宣宣政宣庆使累上章求罢以景福殿使邕州观察使家居养疾卒赠安德军节度使谥僖靖

△雷允恭

雷允恭开封人初为黄门颇慧黠稍迁入内殿头给事东宫周怀政伪为天书允恭预发其事怀政死擢内殿崇班累迁入内内侍省押班章献后初临政丁谓潜给允恭凡机密事令传达禁中由是势棋中外以为山陵都监驰至陵下司天监邢中和为允恭言今山陵上百步法宜子孙类汝州秦王坟第恐下有石与水尔允恭曰上无他子若如秦王坟何不可中和曰山陵事重踏行覆按动经月曰恐不及七月之期耳允恭曰第移就上穴我走马入见太后言之即改穿上穴入白其事章献后曰此大事何轻易如此允恭曰使先帝宜子孙何惜不可章献后意不然曰出与山陵使议可否时丁谓为山陵使允恭具道所以谓唯唯而已允恭入奏曰山陵使亦无异议矣既而上穴果有石石尽水出允恭竟以是并坐盗金宝赐死籍其家 【按雷允恭阎文应任守忠三人速事真宗宋史叙于英神两朝诸宦官之后编载失次今依时事改列谨识

】

△阎文应

阎文应开封人给事掖庭积迁至入内副都知仁宗初亲政与宰相吕夷简谋以张耆夏竦陈尧佐范雍赵积晏殊钱惟演皆章献后所任用悉罢之退语郭后后曰夷简独不附太后邪但多机巧善应变耳由是并罢夷简夷简素与文应相结使诮之仍知事由郭后夷简遂怨后及再相杨尚二美人方宠尚美人于仁宗前语侵后后不胜忿批其颊仁宗自起救之误中帝颈仁宗大怒文应乘隙遂与夷简力谋废后竟废后为净妃以所居宫名瑶华郭后既废杨尚二美人益专宠杨太后亟以为言仁宗未能去

文应早暮入侍言之不已仁宗厌其烦强应曰诺文应即以既车载二美人出二美人涕泣不肯行文应驱使登车翌日以尚氏为女道士居洞真宫杨氏别宅安置既而仁宗有复郭后之意文应大惧会后有小疾挟太医诊视数日乃言后暴崩实文应为之也累至昭宣使恩州团练使时谏官劾其罪请并其养子士良出之以文应领嘉州防御使为秦州钤辖改郾州士良罢御药院为内殿崇班始杨尚二美人出宫左右引陈氏女入宫杨太后许以为后宋绶不可王曾吕夷简蔡齐相继论谏陈氏女将进御士良闻之遽见帝帝方披百叶择日士良曰陛下阅此岂非欲纳陈氏女为后邪帝曰然士良曰陈氏女父贱者也陛下纳以为后无乃不可乎帝遽命出之文应后徙相州钤辖卒

△任守忠

任守忠字稷臣为人内黄门累转西头供奉官领御药院坐事废久之复故官稍迁上御药供奉初章献后听政守忠与都知江德明等交通请谒仁宗亲政出为黄州都监西鄙用兵为秦凤泾原路驻泊都监以功再迁东染院使历为入内都知仁宗未有嗣属意英宗守忠居中建议欲援立昏弱以徼大利及英宗即位拜宣庆使安静军留后守忠又语言诞妄交乱两宫于是知谏院司马光论守忠离闲之罪乞斩于都市英宗犹未行宰相韩琦虑少缓则中变出空头敕一道参政欧阳修已签赵槩难之修曰第书之韩公必自有说琦遂坐政事堂立守忠陛下曰汝罪当死贬保信军节度副使蕲州安置取空头敕填与之即日押行守忠久被宠幸用事于中人不感言其过及贬中外快之久之起为左武卫将军致仕卒

△张惟吉

张惟吉字佑之开封人初补入内黄门迁殿头高阳关路走马承受公事护塞滑州天台埽役迁西头供奉官监在京榷货务为内殿崇班迁承制为赵元昊官告使还言元昊骄僭势必叛请预饬边备及元昊寇延州遣按视延鄜环庆两路器甲并访攻守利害敌既退夏竦韩琦谋自鄜延深入乘虚击之命惟吉募并汾骁勇副以士兵轻赍赴河外惟吉以为当持重伺变不宜驰赴不测以自困已而元昊果引去还奏称旨领皇城司累迁入内都知河决商湖为澶州修河都钤辖转运使施昌言请亟塞之崔峰以为岁灾民困役宜缓命惟吉按视言河可塞而民诚困财用不足宜少待之从其议迁如京使果州团练使复领皇城司卒赠保顺军节度使谥忠安

△石全彬

石全彬字长卿初补小黄门累迁西头供奉官仁宗使致香币于南海密诏察所过州县吏治民俗还具以对帝以为忠谨陝石羣盗杀凤州巡检遣往擒灭之元昊围延州全彬监鄜州兵救之解围去经略使用镐言其勇略善将得边人情除并代州都监进钤辖还为押班侂智高寇广南以为湖南江西路安抚副使出桂林请于宣抚使狄青愿独当一队以自效于是使将左方兵力战于邕州南方平领绵州防御使累转领信武军留后提点奉先院熙宁中卒赠太尉定武军节度使谥恭僖 【按宋史此下有邓守恩传无事迹可录今删】

△甘昭吉

甘昭吉字佑之开封人以内侍殿头为英韶州巡检捕盗有功再迁内殿崇班京东路都巡检齐州武卫小校冯坦率营卒二百突入州厅事欲为变昭吉驰往执首恶十余人立杀之余悉纵去州以无事迁供备库副使带御器械仁宗记前功特授内侍省押班迁入内副都知英宗即位之夕昭吉秦禁中翊卫有劳超迁供备库使康州刺史昭吉奏曰臣本孤微无左右之举先帝知臣朴直拔用至此分当从葬愿得洒扫陵寝足矣帝爱其忠特授永昭陵使加如京使还朝青辞职以左龙武军大将军致仕卒 【按宋史此下有卢守勲王守规二传皆无事迹可录今删】

△李宪

李宪字子范祥符人皇佑中通入内黄门迁供奉官神宗初历永兴太原府路走马承受数论边事合旨王韶请复河湟命宪往视师与韶进收河州复战牛精谷拔珂诺城为熙河经略安抚司干当公事按视鄜延军制行至蒲中会栋戩首领果庄攻破踏白城杀景思立 【按宋史夏国传及王韶景思立等传并载景思立之死于踏白城系为栋戩别将果庄所败栋戩始终效顺并未与谋穆整合虽屡犯边而此战实未合兵本传原文误作穆整合栋戩果庄之兵攻踏白城今改】 穆整合乘势寇河州诏宪趣赴之宪至军督诸将傍山焚旅帐即日通路至河州贼余众保踏白官军与战大破之进至余川又破贼堡十余穆整合率酋长八十余人诣军门降捷闻以功加昭宣使嘉州防御使还为入内内侍省押班干当皇城司令乘驿计议奏凤熙河边事诸将皆听节度于是御史中丞邓润甫御史周尹蔡承禧彭汝砺皆极论中人不可用为将帅弗听喇木占巴诱山后生羌扰边穆整合请自效众以为不可宪曰羌人畏服贵种听之往穆整合盛装以出众耸视皆无鬪志师乘之杀获万计斩喇木占巴栋戩惧遣使奉贽效顺加宣州观察使累迁宣庆使元丰四年五路出师讨夏宪领

熙奏军至西市新城复兰州城之请建为帅府帝又诏
宪领兵直趣兴灵栋戩亦称愿协力往扫巢穴宪乃总兵东上进至屈吴山营达啰城趋
天都烧南牟府库次葫芦河而还宪既不能至灵州栋
戩亦失期师无功宪欲以开兰会功赠罪同知枢密使孙固曰兵法后期者斩况诸路皆
至而宪独不行不可赦帝以宪有功但诘擅还之由宪
以馈饷不接为辞释勿诛五年宪复上再举之策兼陈进筑五利会李舜举入奏具陈师
老民困状乃罢兵趣宪赴阙改泾原经略安抚制置使
时永乐城告急宪赴援至延州而城已陷令复还熙河仍兼秦凤军马夏人入兰州破西
关宪以兰州乃西人必争地彼数至河外而相羊不进
意必大举乃增城守之备七年春 【按宋史神宗本纪载夏人大举寇兰州在元丰七年
正月本传上称五年此讹作明年冬今改】 夏人果
大入围兰州步骑号八十万十日不克粮尽引去又诏宪遣闲谕阿里古结等选骑渡河
与贼遇破之坐妄奏功状罢内省职事哲宗立改永兴
军路副都总管提举崇福宫御史中丞刘摯论宪贪功生事一出欺罔兴灵之役首违师
期顿兵以城兰州遣思至今永乐之围逗留不急赴援
降宣州观察使又贬右千牛卫将军分司南京居陈州卒绍圣元年赠武泰军节度使初
谥敏恪改忠敏宪为将虽拓地降敌而罔上害民终貽
患中国云

△张茂则

张茂则字平甫开封人初补小黄门五迁至西头供奉官干当仕东门盗入禁庭茂
则首登屋以入获之迁领御药院仁宗不豫中夜茂则
趋入扶卫或掩宫门茂则曰事无可虑何至使中外生疑耶累迁内侍副都知熙宁初同
司马光相视恩冀深瀛四州生堤及六塔二股河利害
进入内都知上元夜宫中火督众扑灭累乞退休诏褒之仍进其官哲宗即位迁宁国军
留后加两省都知卒茂则性俭素食不重味衣裘累十
数年不易绍圣中以茂则尝预元佑任使追贬左监门卫将军入党籍 【按宋史此下有
宋用臣王中正二传俱无事迹可录今删】

△李舜举

李舜举字公辅开封人少补黄门仁宗使督工冶金为器既成有羨数并上之帝嘉
其不欺出为秦凤路走马承受英宗立奏事京师会帝
不豫内谒者止之宫门舜举曰天子新即位使者从边方来不得一见而去何以慰远人
谒者以闻亟召对帝意良悦因言承受公事以察守将
不法为职而终更论最乃吏帅臣保任乞免之遂删旧制熙宁中累进内侍押班制置泾
原军马五路师出无功议再举李宪督馈粮言受密诏

自都转运使以下乏军兴者皆听斩民愆前日之败皆惮行出钱百缗不能雇一夫相聚立栅山泽不受调吏往逼呼辄殴击解州至械县令以督之不能集舜举入奏其事乃罢兵退诣中书王珪迎劳之曰朝廷以边事属押班及李留后无西顾之忧矣舜举曰四郊多垒卿大夫之辱也相公当国而以边事属二内臣可乎内臣止宜供禁庭洒扫之职岂可当将帅之任闻者耻之而珪无惭色转嘉州团练使沈括请城永乐遣舜举往鄜延议之及永乐被围急断衣襟作奏曰臣死无所恨愿朝廷勿轻此贼城陷为乱兵所杀赠昭信军节度使谥忠敏 【按神宗本纪作赐谥忠愍与本传异】 舜举资性安重与人言未尝及宫省事颇览书能文辞在御药院十四年神宗尝书李舜举公忠奉上恭勤检身始终惟一以安以荣十九字赐之 【按宋史此下有石得一传无事迹可录今删】

△李继和

李继和开封人为内侍黄门庆历中为河北西路承受保州兵叛塞城门距守官军围之不得入继和独上南关门密呼所结内应者谕以祸福众言挨李昭亮至即斩关自归已而果然贼平迁两秩王则反贝州为城下走马承受沙苑阙马诏秦州置场以券帝之继和领职不数月得马千数而人不援环州弓箭手岁时给酒州将不与众諠诉州将阖门不敢出继和步入众中譬晓之曰汝曹为一杯酒遂丧躯命乎众悟散去事闻擢带御器械累迁入内副都知卒养子从善援例求赠官神宗曰此弊事也继和无军功何必赠自是为定制云 【按李继和给事仁宗朝宋史叙于神哲时宦官之后编载失次今依时事改列谨识】

△梁从吉

梁从吉字君佑开封人补入内高班王则反奉命宣慰还言小寇无多诸将之兵足以翦除若得重臣统其事不崇朝可平矣于是仁宗以文彦博为安抚招讨使贼平又奏请分河北为路每路以一帅府统之遂建魏镇定瀛四帅熙宁初为邠宁环庆路驻泊兵马钤辖夏人寇大顺城围庆州七砦从吉率兵八百余人于战获其首领又讨平宁州叛卒以功升都钤辖累官皇城使从高遵裕至宁武督士卒攻城被创进入内押班迁永州团练使为副都知元佑中卒赠成德军节度使谥敏恪 【按宋史此下有刘惟简李祥二传俱无事迹可录今删】

钦定续通志卷五百七十七

●钦定续通志卷五百七十八 宦者传五

宦者传

宋 【三】

○宋三

陈衍 高居简 程昉 童贯 梁师成 杨戩【李彦】
邵成章 蓝珪【康履】 冯益 甘昇 阙礼 董宋臣

陈衍

高居简

程昉

童贯

梁师成

杨戩【李彦】

邵成章

蓝珪【康履】

冯益

甘昇

阙礼

董宋臣

△陈衍

陈衍开封人以内侍给事殿廷累官供备库使梁惟简荐诸宣仁皇后主管高韩王宅领御药院寻为按行宣仁山陵使进左藏库使为真定路都监御史来之邵方力诋元佑政事首言衍在垂帘日怙宠骄肆交结戚里进退大臣力引所私稗居耳目之地张商英亦论衍交通宰相结托词臣衍坐贬监郴州酒税务惟简以援引张士良梁知新以荐附皆得罪衍复徙配朱崖章惇起狱诬元佑诸臣云结衍辈以谋废王士良尝与衍同在宣仁后合自郴州召之使实其说士良至锻炼无所得但言宣仁弥留之际衍尝可否二府事及用御宝付外而已安惇蔡京乃奏衍疏隔雨宫斥随龙内侍十余人于外以翦除人主腹心羽翼意在动摇大逆不道遂诏处死【按宋史此下有冯世宁传无事迹可录今删】

△高居简

高居简字仲路番禺人为入内黄门护作温成原庙奉神物以精办称超转殿头领后苑事坐奉使梓夔路多占驿兵降高品历领内东门司干当御药院居简每闻外廷议论必以入告省中目为高直奏神宗即位御史张唐英言其资性儉巧善迎合取容中丞司马光亦言其久处近职罪恶已多顷在先朝依凭城社物论切齿及陛下继统复先自结纳愿明治其罪以

解天下之惑于是罢为供备库使稍迁带御器械进内侍押班以文思使领忠州刺史卒

△程昉

程昉开封人以小黄门积迁西京左藏库副使熙宁初为河北屯田都监河决枣强酺二股河导之使东为锯牙下以竹落塞决口加带御器械河决商湖北流与御河合为一及二股东流御河遂浅淀昉以开浚功迁宫苑副使塞漳河作浮梁于洺州兼外都水丞诏相度兴修水利河决大名第五埽昉议塞之因疏塘水溉深州田又道葫芦河自乐寿之东至沧州二百里塞孟家口开干宁军直河作桥于真定之中渡河自卫州王供埽导沙河入御河以广运路累迁达州防御使制置河北河防水利御史盛陶言昉挟第五埽之功假朝廷威福恐动州县所开共城河颇废人户水碓久无成功又议开沁河因察访官按行始知不便漳河滹沱之役水占邢洺赵深祁五州之田王广廉孔嗣宗钱勰赵子几皆论奏其奸欺多置捩口指决河所浸便为淤田举官废吏惟其所欲又悖慢豪横违拒圣旨者三提点刑狱司牒者十二愿遣官代还仍行究治神宗曰王安石以昉知河事故加任使令开漳河用工七百万滹沱八九百万已议体量矣始安石欲兴水利骤用昉昉挟安石势而慢韩琦后安石觉其虚诞亦疏之以忧死赠辉州观察使遂罢都大制置河防水利司 【按宋史此下有苏利涉传无事迹可录今删】

△童贯

童贯少出李宪之门性巧媚自给事宫掖即善策人主微指先事顺承徽宗立置明金局于杭贯以供奉官主之始与蔡京游京进贯力也京既相赞策取青塘因言贯尝十使陝石审五路事宜与诸将能否力荐之遂命王厚领兵十万以贯监其军至湟川适禁中火帝下手札驿止贯毋西贯发视遽纳鞞中厚问故实曰上趣成功耳师竟出复四州擢景福殿使襄州观察使内侍寄资转两使自兹始未几为熙河兰湟秦凤路经略安抚判置使累迁武康军节度使诗齐格藏征复积石军洮州加检校司空颇恃功骄恣选置将吏皆捷取中旨不复关朝廷寢拂京意帝欲除贯开府仪同三司京曰使相岂应援宦官不奉诏政和元年进检校太尉副郑允中使契丹或言以宦官为止介国无人乎帝曰契丹闻贯破羌故欲见之因使覘敌策之善者也使还益展奋庙谟兵柄皆属焉遂请进筑夏国横山为陝西河东河北宣抚使俄开府仪同三司签书枢密使不三岁领院事更武信武宁护国河东山南东道剑南东川等九镇进太傅封泾国公时人称蔡京为公相贯为媪相将秦晋锐师深入

河陇谓可制夏人死命遣大将刘法取朔方方法不可贯逼之法不得已出塞遇伏而死诸军恟惧贯隐其败以捷闻百官入贺皆切齿然莫敢言关右大困旧制熟羌不授汉官贯故引拔之有至节度使者弓箭手失其分地而使守新强禁卒逃亡不死而得改隶他籍军政尽坏初贯使辽得燕人马植归荐诸朝遂造平燕之谋选健将劲卒刻日发命会方腊起睦州势甚张改江浙淮南宣抚使即以所聚兵帅诸将讨平之方腊者睦州青溪人世居县塌村托左道惑众阴聚贫乏游手之徒于宣和二年十月作乱旬日聚众数万雨浙都监蔡遵颜坦击之皆败死于息坑十一月陷青溪遂陷睦歙二州南攻衢北掠新城桐庐富阳诸县进逼杭州郡守弃城走州陷杀制置使陈建廉访使赵约纵火六日死者不胜计警奏至京师王黼匿不以闻于是凶焰日炽东南大震发运使陈遘请调京畿兵及鼎澧枪牌手兼程以来使不至滋蔓徽宗始大惊亟遣童贯谭稹为宣抚制置使率禁旅及秦晋蕃汉兵十五万以东且谕贯使作诏罢应奉局三月正月腊陷衢州郡守彭汝方死之【按宋史本传误作二年十二月事今据徽宗本纪及宋史纪事本末改】二月腊将方七佛引众六万攻秀州统军王子武乘城固守已而大军至合击之斩首九千筑京观五贼还据杭贯稹前锋至青河堰水陆并进腊复焚官舍府库民居乃宵遁诸将刘廷庆王稟王涣杨惟忠辛兴宗王渊相继而尽复所失城四月王渊裨将韩世忠入贼巢擒腊以出并取腊妻子及伪相方肥等五十二人于梓桐石穴中杀贼七万四年三月余党悉平进贯太师徙国楚腊既平而北伐之役遂起后以复燕山功诏解节钺为真三公加封徐豫两国越两月命致仕而代以谭稹明年复起领枢密使宣抚河北燕山七月诏用神宗遗训能复全燕之境者胙土锡以王爵遂封广阳郡王是年尼堪南侵贯在太原遣马扩辛兴宗往聘以尝金金人以纳张觉为责且遣使告兴兵贯厚礼之使者劝贯速割两河以谢贯气褫不能应谋遁归太原守张孝纯诮之曰金人渝盟王当令天下兵悉力枝梧今委之而去是弃河东与敌也河东入敌手柰河北何贯怒叱之曰贯受命宣抚非守土也遂奔入都钦宗已受禅下诏亲征以贯为东京留守贯不受命而奉上皇南巡贯在西边募长大少年号胜捷军几万人以为亲军环列第舍至是拥之自随上皇过浮桥卫士攀望号恸贯恐行不速使亲军射之中矢而踣者百余人于是谏官御史议者蠡起初贬左卫上将军连谪昭化军节度副使窜之英州吉阳军行未至诏数其十大罪命监察御史张徽迹其所至莅斩之及于南雄既诛函首赴阙梟于都市贯握兵二十年权倾一时尝有论其过者诏方邵往察邵一

动一息贯悉侦得之先密以白且陷以他事邵反得罪逐死贯状魁梧伟观视颐下生须
十数皮骨劲如铁不类阉人后宫自妃嫔以下皆献饷
结纳左右妇寺誉言日闻宠煽翕赫庭户杂沓成帝岳牧辅弼多出其门厮养仆圉官诸
使者至数百万穷奸稔祸流毒四海虽菹醢不偿责也

△梁师成

梁师成慧黠习文法稍知书领睿思殿文字外库主出外传旨政和闲得君贵幸至
窜名进士籍中积迁晋州观察吏兴德军留后历护国
镇河东三节度至检校太傅遂拜太尉开府仪同三司换节淮南时徽宗留意礼文符
瑞之事师成善逢迎希恩宠命入处殿中凡御书号令
皆出其手多择书吏习仿帝书杂诏旨以出外廷莫能辨师成实不能文而高自标榜自
言苏轼出子时天下禁诵轼文师成诉于帝曰先臣何
罪自是轼之文稍出以翰墨为已任四方儒秀士必招致门下多真书画卷轴于外舍邀
宾客纵观得其题识合意者辄密加汲引王黼父事之
蔡京父子亦谄附焉都人目为隐相黼造伐燕议师成赞决又荐谭稹为宣抚燕山平策
勋进少保益通贿赂士人入钱数百万以献颂上书为
名令赴廷试唱第之日侍于帝前嗻嗻升降其小吏储宏亦豫科甲而执厮养之役如初
李彦括民田于京东西所至倨坐堂上监司郡守不敢
抗礼有言于帝师成适在旁抗声曰王人虽微序于诸侯之上岂足为过言者惧而止师
成貌若不能言然阴贼险鸷遇闲即发家居与黼邻帝
幸黼第见其交通状朱勔因乘隙攻之帝罢黼相师成由是益绌郗王楷宠盛有动摇东
宫意师成力保护钦宗立嬖臣多从上皇东巡师成以
旧恩留京师于是太学生陈东布衣张炳力疏其罪帝迫于公议诏暴其罪责为彰化军
节度副使开封吏护至贬所行次八角镇缢杀之以暴
死闻籍其家

△杨戩 【李彦】

杨戩少给事掖庭主掌后苑善伺人主意自崇宁后日有宠知入内内侍省政和四
年为彰化军节度使首建期门行幸事以固其权历镇
安清海镇东三镇由检校少保至太傅遂谋撼东宫有胥吏杜公才者献策于戩立法索
民田契自甲之乙乙之丙展转究寻至无可证则度地
所出增立赋租始于汝州浸淫于京东西淮西北括废堤弃堰荒山退滩及大河淤流之
处皆勒民主佃额一定后虽冲荡回复不可减号为西
城所又筑山冻古巨野泽绵亘数百里济郛数州赖其蒲鱼之利立租算船纳直一邑率
于常赋外增租钱至十余万缗水旱蠲税此不得免擢
公才为观察使宣和三年戩死赠太师吴国公李彦继其职彦天资狠愎密与王黼表里

置局汝州凡民闲美田使他人投牒告陈指为天荒虽
执印券皆不省鲁山闾县尽括为公田焚民故券使田主输租佃本业诉者辄加威刑致
死者千万公田既无二税转运使亦不为奏除悉均诸
别州京西提举官及京东州县吏刘寄任辉彦李士渔王泚毛孝立王随江惇吕坏钱械
宋宪皆助彦为虐如奴事主民不胜忿痛发物供奉大
抵类朱勔凡竹数竿用一大车牛驴数十头犖致龙鳞薜荔一本费踰巨万皆责办于民
经时阅月农不得耕财殫力竭或自缢轘轳闲颖昌兵
马铃辖范寥不为取竹诬以刊苏轼诗文于石为十恶竟令勒停靖康初诏追戮所赠官
爵彦削官赐死籍其家刘寄以下十人皆停废复范寥
官

△邵成章

邵成章钦宗朝内侍也帝入青城命成章卫皇太子赴宣德门称制行事太子北去
成章留汴康王将即位佑太后遣成章奉乘輿服御
至南京从幸扬州金人掠陕西京东诸郡羣盗起山东黄潜善汪伯彦匿不以闻及张遇
焚真州去行在六十里帝亦不之知也成章疏奏二人
罪恶曰必误国且申潜善等使闻之帝怒除名编管南雄州侍御史马伸言成章缘上书
得罪今是何时以言为讳久之帝思成章忠直召赴行
在其徒忌之谮于帝曰邵九伯来陛下无欢乐矣遂止之洪州金人入洪闻其名访求得
之谓之曰知公忠正能事吾主可坐享富贵成章不应
胁之以威亦不从金人曰忠臣也吾不忍杀遗之金帛而去

△蓝珪 【康履】

蓝珪康履初皆为康王府都监入内东头供奉官尝从康王使金营及开元帅府并
主管机宜文字既即位二人俱恃恩用事履尤妄作威
福刘光世等多曲意事之帝知之诏内侍不许与统兵官相见违者停官编隶履终无所
忌惮与内侍曾择凌忽诸将俄迁内侍省押班金州观
察使帝在扬州金兵卒至帝驰马出门百官不戒备从行者惟履等五六人自是履等益
自衒愈有轻外朝心及幸吴江其党竞以射鸭为乐临
浙观潮供帐遮道统制苗傅私切齿曰此辈使天子至此犹敢尔耶傅慕容王世修亦疾
中官恣横以告武功大夫刘正彦正彦曰会当共除之
王渊跻枢筦正彦以为由宦者所荐愈不平谋遂决伏兵斩渊遣兵围履家分捕中官皆
杀之履驰入白帝傅等至厉声曰陛下信任中官凡中
官所主者皆得美官王渊遇贼不战交康履得枢密中官在外者已诛更乞诛康履蓝珪
曾择等以谢三军帝不忍除傅等官以安之傅等不退
帝不得已遣人执履付之傅即腰斩履梟其首寻捕珪择等皆编置远州择行一程追还

斩之傅等诛赠履官谥荣节召珪等还中书舍人季陵言中官复召其赏与相贺气焰益张中外切齿不报珪至自武功大夫擢内侍省押班寻升内侍省都知珪初与履同进而骄横不及履故幸以寿终

△冯益

冯益康王邸旧人王即位自入内东头供奉官迁干办御药院兼皇城司恃旧恩骄恣帝幸浙东益与御前右军都统制长俊争渡以语侵俊且诉于帝事下御史台侍御史赵军言明受之变起于内侍覆辙不可不戒事乃已绍兴三年授武功大夫康州防御使带御器械时帝用侍御史常同言诏皇城司并隶台察益言非祖宗旧制帝为追寝前诏特迁宣政使益自言藩邸旧吏乞加恩遂升明州观察使内厩旧有骐驎院官益请别置御马院自领其事又擅穿皇城便门侍御史沈与求以为言赵军等皆患之会刘豫揭榜山东言益遣人收买飞鸽因有不逊语张浚请斩益以释谤帝不许鼎言事关国体当解职加罚乃与祠放归益自是家居廩祠者十四年先是伪柔福帝姬之来自称为王贵妃季女益自言尝在贵妃合遣之验视遂以真告及事觉益坐验视不实送昭州编管寻以与皇太后连婣得免卒于家 【按宋史此下有张去为陈源二传俱无事迹可录今删】

△甘昇

甘昇内侍省押班泽之养子泽死升累迁亦至押班干道中升颇用事临安尹胡与可为小官时丐贷于临安富民马氏不如欲衔之至是马以鬻官盐踰格系狱与可讽有司以私盐论御史陈升卿决狱平反之升之子妇与可女也乃阴为典可地潜升卿为豪民脱罪所得至万缗帝疑遂罢升卿马流严州时升为入内押班与曾觐王抃相盘结士大夫无耻者争附之既而觐死抃逐独升在朱熹力言之帝曰升乃德寿宫所荐谓有才耳熹曰奸人无才何以动人主升用事二十年招权市贿黄由对策亦颇及之后帝察其奸遂抵之罪籍其赀竟以废死 【按宋史此下有王德谦传无事迹可录今删】

△阙礼

阙礼高宗朝宦者淳熙末积官至保信军承宣使孝宗颇亲信之后命提举重华宫孝宗崩光宗疾不能执丧枢密赵汝愚等请建储以安人心光宗御批有念欲退闲语丞相留正惧纳禄去人心愈摇汝愚再遣戚里韩侂胄因内侍张宗尹以禅位之议奏太皇太后未获命而侂胄退与礼遇礼知其意问之侂胄不以告礼指天自誓不言侂胄白其事礼即入宫泣告太

后且曰留丞相已去所恃者赵知院耳今欲定大计而无太皇太后之命计无所出亦将去矣太后悟遂命礼传旨侂胄以谕汝愚约明日太后垂帘上其事又明日嘉王入行禫祭汝愚即帘前进呈御批太后遂命即皇帝位寻除礼入内内侍省都知又差兼重华慈福宫承受充提举皇城司迁中侍大夫礼不以功自居乞致仕不许乞免推恩又不许南渡后内侍可称者惟邵成章与礼云

△董宋臣

董宋臣理宗朝宦者淳佑中以睿思殿只候特转横行官宝佑三年兼干办佑圣观逢迎上意起梅堂芙蓉阁香兰亭强夺民田引倡优入宫招权纳贿无所不至奸人丁大全因缘以进人以董阎罗目之 【自逢迎上意至此据续通鉴及宋史纪事本末增辑】 侍御史洪天锡劾之不报天锡坐左迁大理少卿开庆初元兵驻江上京师大震宋臣赞帝迁幸宁海军签判文天祥上疏乞诛宋臣又不报景定四年自保康军承宣使除入内内侍省押班寻兼主管景献太子府事会天祥以著作佐郎兼景献府教授义不与宋臣联事上书求去天祥出知瑞州言者论宋臣不置帝曲为庇之秘书少监汤汉上封事言宋臣十余年来声焰熏灼其力能去台谏排大臣至结凶渠以致大祸中外惶惑切齿愿收还押班等除命不胜宗社之幸疏入帝亦不之省命主管御前马院及酒库既卒犹命特转节度使其见宠爱如此

钦定续通志卷五百七十八

●钦定续通志卷五百七十九 宦者传六

宦者传

辽

金

元

○辽

王继恩 赵安仁

王继恩

赵安仁

△王继恩

王继恩棣州人睿知皇后南征继恩被俘初皇后以公私所获十岁以下儿容貌可观者近百人载赴凉陞并使阉为竖继恩在焉聪慧通书及辽语擢内谒者内侍左厢押班圣宗亲政累迁尚衣库使左承宣监门卫大将军灵州观察使内库都提点继恩好清谈不喜权利每得赐

赉市书至万卷载以自随诵读不倦每宋使来聘继恩多充宣赐使后不知所终

△赵安仁

赵安仁字小喜深州乐寿人自幼被俘统和中为黄门令秦晋王府只候王薨授内侍省押班御院通进开泰八年与李胜可谋南奔为游兵所擒初仁德皇后与钦哀有隙钦哀密令安仁伺皇后动静无不知者仁德皇后威权既重安仁惧祸复谋亡归仁德欲诛之钦哀以言营救圣宗曰小喜言父母兄弟俱在南朝今为思亲冒死而亡亦孝子用心实可怜悯赦之重熙初钦哀摄政欲废帝立少子重元帝与安仁谋迁太后庆州守陵授安仁左承宣监门卫大将军充契丹汉人渤海内侍都知兼都提点会帝思太后亲驭奉迎太后责曰汝负万死我尝营救不差汝报何为离闲我母子耶安仁无答后不知所终

○金

梁琬 宋珪【潘守恒】

梁琬

宋珪【潘守恒】

△梁琬

梁琬本大■〈白上大下〉家奴随元妃入宫以阉宦事海陵性便佞善迎合特见宠信旧制宦者惟掌掖庭宫闱事天德三年始以王光道为内藏库使同领者卫愈梁安仁海陵谓曰人言宦者不可用朕以为不然后唐庄宗委张承业以军竟立大功此中岂无人帑藏之物皆出民力当纠察奸弊犯者必罚无赦宦者始与政事而琬委任尤甚累官近侍局使数使往视营建南京宫室工役时一殿之费不可胜计琬或言未善即尽撤去虽丞相张浩亦曲意事之知海陵欲伐宋因极言宋刘贵妃绝色倾国海陵大喜然琬与宋通谋劝海陵南伐征天下兵以疲敝之驾玉和州闻交通有状怒曰汝本奴隶朕拔擢至此乃敢尔邪又谓校书郎田与信曰尔面目亦可疑必与同谋皆命执于军中海陵遇弑并为乱军所杀

△宋珪【潘守恒】

宋珪本名乞奴燕人为内侍殿头宣宗尝以元夕欲观灯戏命乞奴坚作微闻谗语云社稷弃之中都南京作灯戏有何看邪杖二十既而悔之有旨宣谕哀宗放鹞后苑鹞逸去敕近侍追访一农民臂此鹞百方索之不与酬以直仅乃得事闻哀宗欲送有司乞奴谏曰贵畜贱人岂可宣示四方又被杖寻亦悔赐物慰遣之及富察官努之变哀宗恨为所制欲诛未能官努往亳州珪阴与奉御乌克逊爱新等谋诛之官努自

毫还入见珪等即从旁杀之蔡城破京宗自缢于幽兰轩珪从死有潘守恒者亦内侍素称知书南迁后规益甚多及哀宗走归德道次民家守恒进栲曰愿陛下还宫之日无忘此草庐中更加俭素以济大业帝闻其言凄惋咨嗟久之

○元

李邦宁 保布哈

李邦宁

保布哈

△李邦宁

李邦宁字叔固钱塘人初名保宁在宋为小黄门从瀛国公入都世祖命给事内庭警敏称上意令学国书及诸蕃语即通解遂见亲任授御带库提点升章佩少监累迁礼部尚书提点太医院使成宗即位进昭文馆太学士帝尝寝疾邦宁不离左右者十余月武宗立命为江浙行省平章辞曰臣以奄腐余命无望更生先朝幸赦而用之使得承乏中涓高爵厚禄荣宠过甚陛下欲置宰辅柰何辱以寺人陛下纵不臣惜如天下后世何帝大悦使大臣自其言于太后及皇太子以彰其善帝尝奉皇太后燕大安阁阁中有故篋问邦宁曰此何篋也对曰此世祖贮裘带者臣闻有圣训曰藏此以遗子孙使见吾俭帝命发篋视之叹曰非卿言朕安知之时有宗王在侧遽曰世祖虽神圣然嗇于财邦宁曰不然世祖一言无不为后世法一子夺无不当功罪且天下所入虽富苟用不节必至匮乏自先朝以来岁赋已不足用又数会宗藩资费无算万一不给必将横敛掊怨岂美事邪太后及帝深然其言俄加大司徒尚服院使遥授丞相行大司农领太医院事初太庙时祀尝遣官行礼至是复欲如故事邦宁谏曰先朝非不欲亲致响祀诚以疾废礼耳今陛下继成之初正宜彰孝道躬祀太室以成一代巨典循习故弊非臣所知也帝称善即日备法驾宿斋宫且命邦宁为大礼使礼成加恩三代各赠官赐谥仁宗嗣位以邦宁为旧臣国学将释奠帝遣邦宁致祭于文宣王点视毕就位殿户方辟忽大风起殿上及两庑烛尽灭烛台底铁罇入地尺许者无不拔邦宁及诸执事皆悚息伏地良久风定乃成礼邦宁惭悔累日初仁宗为皇太子丞相三宝努等用事畏帝英明邦宁揣知其意言于武宗曰陛下富于春秋皇子渐长父作子述古之道也未闻有子而立弟者武宗不悦曰朕志已定汝自往东宫言之邦宁惧而退及即位左右咸请诛之仁宗曰帝王历数自有天命其言何足介怀加邦宁开府仪同三司集贤院大学士寻以疾卒

△保布哈

保布哈高丽人其先本王氏顺帝二皇后奇氏居兴圣宫生太子阿裕尔实哩达喇于是保布哈以阉人入事二皇后甚爱幸之累官资政院使至正中京师大饥疫民死者相枕藉保布哈欲要誉请于帝市地收瘞之自南北两城抵卢沟桥掘深及泉男女异圻人以尸至者随给以钞舁负相踵既覆土就万安寿庆寺建无遮大会前后瘞者不下二十万又于大悲寺修水陆大会三昼夜凡居民病者予之药死不能敛者给以棺翰林学士张翥为文颂其事曰善惠碑时帝在位久太子春秋日盛军国事皆听其临决皇后欲谋内禅使保布哈喻意于丞相太平太平不答及太平罢独用绰斯戩为丞相帝益厌政布哈乘闲用事与绰斯戩相为表里四方警报将臣功状皆抑不上闻内外解体又与宣政院使托欢同恶相济气焰熏灼百官无不趣附者监察御史额森特穆尔孟额森布哈傅公让等劾其奸邪当屏黜御史大夫鲁达实以其疏闻太子执不下二皇后庇之尤固言者被左迁治书侍御史陈祖仁连上太子书切谏之台臣大小皆辞职太子不得已始为言于帝听其暂退而祖仁犹上书言不已会侍御史李国凤亦上书太子言保布哈骄恣无上招权纳赂状帝大怒国凤祖仁皆左迁时鲁达实执其事颇力太子恶之皇后又譖之于内帝以鲁达实母舅故封为雍王遣就国已而保布哈复倚奇氏势起为集贤大学士崇政院使鲁达实至大同留博啰特穆尔军中时绰斯戩保布哈方倚库特穆尔为外援怨博啰特穆尔匿鲁达实不遣遂诬博啰特穆尔与鲁达实谋不轨诏削其官爵使解兵柄归四川博啰特穆尔知非出帝意抗不奉诏宗王巴延特穆尔等力表其诬枉朝廷亦畏其强不可制复下诏数绰斯戩保布哈罪屏绰斯戩于岭北窜保布哈于甘肃以快众愤而复博啰特穆尔官爵然二人皆留京城实未尝行未几博啰特穆尔遣图沁特穆尔称兵向阙声言清君侧之恶驻于清河帝不得已执畀之遂为博啰特穆尔所杀【按郑樵通志宦者后次以游侠刺客滑稽货殖四门全录迁史原文汉以后皆阙兹考唐宋各史俱无此名目不复增辑谨识】

钦定续通志卷五百七十九

●钦定续通志卷五百八十 艺术传一

艺术传

唐

五代

○唐

（臣）等谨按艺术一门唐以后诸史多作技传今从郑志改归画一闲有擅长制器名著考工虽执艺甚微而匠心独造未容偏没亦依史例登之至释老之徒旧史或并归方技或别立门目今亦并从删并以省支赘焉

李淳风 甄权【许胤宗 张文仲】 袁天纲【客师 张憬藏 乙弗宏礼 金梁凤 王远知】 薛颐【叶法善】

李嗣真 明崇俨 严善思 张果【罗思远】 桑道茂

李淳风

甄权【许胤宗 张文仲】

袁天纲【袁客师 张憬藏 乙弗宏礼 金梁凤 王远知】

薛颐【叶法善】

李嗣真

明崇俨

严善思

张果【罗思远】

桑道茂

△李淳风

李淳风岐州雍人父播隋高唐尉弃官为道士号黄冠子以论撰自见淳风幼爽秀通羣书明步天历算贞观初与傅仁均争历法议者多

附淳风授将士郎直太史局制浑天仪考前世得失着法象书七篇上之擢承务郎迁太常博士改太史丞预撰晋书及五代史其天文律历五行志皆淳风作也又预撰文思博要【据旧书增辑】

迁太史令太宗得秘讖言唐中弱有女武代王以问淳风对曰其兆既成已在宫中踰

三十年当王夷唐子孙且尽帝曰甫而杀之如何对曰天之所命不可去也王者不死多恐枉及无辜且自今以往三十年其人已老庶几有慈

心为祸或浅若杀之复生壮者多杀而逞则陛下子孙无遗种矣帝采其言而止淳风占侯吉凶若符契当世意有神相终不能测也以劳封昌

乐县男奉诏与算博士梁述助教王真儒等刊注五曹孙子等书立于学官撰麟德厯代戊寅厯术者推为最密自秘阁郎中复为太史令卒所

撰典章文物志乙巳占【按旧书作乙巳占考新书艺文志亦作乙巳占本传误作己巳今改正】等书多传于世子该【旧书作予谚】

孙仙宗并擢太史令

△甄权【许胤宗 张文仲】

甄权许州扶沟人以母病与弟立言究习医书得其旨趣仕隋为秘书省正字称疾免鲁州刺史库狄崱风痺不得挽弓权使彀矢向墀立

针其肩隅一进曰可以射矣果如言贞观中权已百余岁太宗幸其舍访问其术擢朝散大夫赐几杖衣服寻卒所撰脉经针方明堂等图传于世立言仕为太常丞杜淹苦流肿帝遣视还奏曰去此十日午时必死如之有道人患心腹胀懣弥二岁诊曰腹有虫误食发而然令饵雄黄少选吐一蛇如小指无目烧之有发气乃愈后以医显者清漳宋侠义兴许胤宗洛阳张文仲李虔纵京兆韦慈藏胤宗仕陈为新蔡王外兵参军柳太后【按新传作王太后旧传作柳太后考陈书废帝王皇后降为妃无太后之称高宗柳皇后实生后主后主立尊为皇太后据此称太后当从旧传作柳为是】风病不能言脉沈而噤医家告术穷胤宗以黄耆防风煮汤数十斛置床下气如雾熏薄之是夕语擢义兴太守武德初进散骑侍郎关中多骨苏疾转相染得者皆死胤宗疗视必愈或劝其著书答曰医特意耳思虑精则得之脉候幽而难明吾意所解口莫能宣也古之上医要在视脉病乃可识病与药值直用一药攻之故力纯而愈速今人不善为脉以情度病多其物以幸有功术亦疏矣一药偶得而以它味相制弗能专力此难愈之验也脉之妙处不可传虚着方剂终无益于世此吾所以不著书也文仲仕武后时至尚药奉御特进苏良嗣方朝矢作仆庭中文仲诊曰忧愤而成若胁痛者殆未可救顷告胁痛又曰及心则殆俄心痛而死文仲论风与气尤精后集诸言方者与共著书诏王方庆监之文仲曰风状百二十四气状八十治不以时则死及之惟头风与上气足气药可常御病风之人春秋末月可使洞利乃不困剧自余须发则治乃着四时轻重诸方凡十八种上之

△袁天纲【袁客师 张憬藏 乙弗宏礼 金梁凤 王远知】

袁天纲益州成都人工相术仕隋为盐官令【旧书作大业中为资官令】在洛阳与杜淹王珪韦挺游天纲谓淹曰公兰台学堂全且博将以文章显谓珪法令成天地相临不十年官五品谓挺面如虎当为武职然三君久皆得谴吾且见之淹以待御史入为天策府学士珪太子中允挺善隐太子荐为左卫率武德中俱以事流儻州见天纲曰公等终且贵杜位三品难与言寿王韦亦三品后于杜而寿过之但晚节皆困见窦轨曰君伏犀贯玉枕辅角完起十年且显立功其在梁益闲轨后为益州行台仆射复见天纲曰赤脉千瞳方语而面浮赤如为将必多杀愿自戒轨果坐事被征天纲曰公毋忧右辅泽而动不久必还果还为都督武后之幼天纲见其母曰夫人当生贵子乃见二子元庆元爽曰官三品保家主也见韩国夫人曰此女贵而不利夫后最幼姆抱以见给以男天纲视其步与目惊曰龙瞳凤颈极贵验也若为女当作天子贞

观八年太宗召见令视岑文本曰学堂莹夷眉过目故文章振天下首生骨未成法三品肉不称骨非寿兆也张行成马周见曰马君伏犀贯脑背若有负贵验也近古君臣相遇未有及公者然面赤而耳无根后骨不隆寿不长也张晚得官终位宰相其术精类如此高士廉曰君终作何官谢曰仆及夏四月数尽矣如期以火山令卒子客师传其术为廩牺令常度江叩舟而还左右请故曰舟中人鼻下气皆墨不可以济俄有一男子跛而负直就舟客师曰贵人在吾可以济江中风忽起几覆而免跛男子乃娄师德也时有长社人张憬藏技与天纲埒太子少詹事蒋俨尝问禄命答曰公厄在三尺土下尽六年而贵六十位蒲州刺史无有禄矣俨使高丽为莫敌支所囚居土室六年还及为蒲州岁如期召掾史妻子告当死俄诏听致仕刘仁轨与乡人靖贤【旧书作靖思贤】请占憬藏答曰刘公当五品而谴终位冠人臣谓贤曰君法客死后仁轨为尚书仆射贤丧三子尽鬻田宅寄死友家魏元忠尚少往见憬藏问之久不答元忠怒拂衣去憬藏遽起曰相君怒时位必卿相姚崇李迥秀杜景佺从之游憬藏曰三人者皆宰相然姚最贵裴光廷当国憬藏以纸大署台字投之光廷曰吾既台司矣尚何事后三日贬台州刺史隋末又有高唐人乙弗宏礼当炀帝居藩召见宏礼贤曰大王为万乘主所戒在得而已及即位悉召术家置坊处之使宏礼总摄海内寢乱帝曰而皆言朕既验然终当柰何宏礼逡巡帝知之乃曰不言且死宏礼曰臣观相书凡人臣相与陛下类者不长然圣人不相故臣不能知由是敕有司监视毋得与外语薛大鼎坐事没为奴及贞观时有诸于宏礼答曰君奴也欲何事请解衣视之宏礼指腰而下口位方岳玄宗时有金梁凤者颇言人贵贱千寿裴冕为河西留后梁凤辄言不半岁兵起君当以御史中丞除宰相又言一日向雒一日向蜀一日向朔方此时公当国冕妖其言绝之俄而禄山反冕以御史中丞召肃宗即位而冕遂相荐梁凤于帝拜都水使者梁凤谓吕諲曰君且辅政须大怖乃得后諲责驿史榜之史突入射谭几中走而免明年知政事李揆卢允毁服给谒梁凤曰二公已至清望官矢乃语以情梁凤使二人行乃曰李自舍人阅岁而相卢不过郎官揆已相擢允吏部郎中王远知扬州人父昙选为陈扬州刺史远知少警敏通书博事陶弘景传其术为道士又从臧兢游陈后主闻其名召入重阳殿甚见咨挹隋炀帝为晋王镇扬州邀见少选白发俄复鬓帝惧遣之后幸涿郡诏远知见临朔宫帝执弟子礼咨质仙事作玉清玄坛处之及幸扬州远知谓帝不宜远京国不省高祖尚微远知密语天命武德中平王世充秦王与房玄龄微服过之远知未识迎语

曰中有圣人非王乎乃谗以实远知曰方为太平天子愿自爱太宗立欲官之苦辞贞观九年诏润州即茅山为观俾居之远知多怪言谓其弟

子潘师正曰吾今署少室伯将行即沐浴加衣冠若寝者遂卒或言寿盖百二十六岁云

△薛颐 【叶法善】

薛颐滑州人隋大业时为道士解天文武德初追直秦王府密语曰德星舍秦分王当帝天下王表为太史丞稍迁令贞观时太宗将封泰

山彗星见颐因言考之天象未可东封会大臣上议帝遂罢固丐为道士帝为筑观九嵎山号曰紫府拜颐太中大夫往居之即祠建清台候辰

次灾祥以闻所上与太史李淳风合数岁卒高宗时又有叶法善者括州括苍人世为道士传阴阳占繇符策之术能厌劾怪鬼显庆中帝闻之

召诣京师欲宠以官不受留内斋扬礼赐殊厚时帝悉召方士化黄金治丹法善上言丹不可遽就徒费财与曰请核真伪帝许之凡百余人皆

罢尝在东都凌空观为坛醮祭都人悉往观有数十人自奔火中众大惊救而免法善笑曰此为魅所凭吾以法摄之耳问而信病亦皆已历高

中二宗朝五十年往来山中数召入禁内雅不喜浮图法常力诋毁议者讥其好憎然以术高卒莫之测睿宗立或言有冥助力先天中拜鸿胪

卿封越国公舍景龙观追赠其父歙州刺史宠映当世开元八年卒赠越州都督

△李嗣真

李嗣真 【按唐书李嗣真入列传今改归艺术编于明崇俨之前】 字承胄赵州柏乡人多艺数举明经中之累调许州司功参军贺兰

敏之修撰东台表嗣真直弘文馆与学士刘献臣徐昭皆少有名号三少高宗东封还诏赠孔子太师命有司为祝文不称旨更命嗣真帝览称

善诏加两阶敏之倚恩骄溢嗣真策其必败乃求补义乌令敏之败学士多连坐嗣真独免调露中为始平令风化大行时章怀太子作宝庆曲

阅于太清观嗣真谓道人刘槃辅俨曰宫商不和君臣乖也角征失次父子疑也死声多且哀若国家无事太子任其咎俄而太子废槃等奏其

言擢太常丞知五礼仪注封常山县子嗣真常曰隋乐府有堂堂曲明堂再受命比曰有侧堂堂挠堂堂之谣侧不正也挠危也皇帝病日侵事

皆决中宫持权与人数之不易宗室虽众居中制外势且不敌诸王殆为后所蹂践吾见难作不久矣太常铸黄钟不能成嗣真居崇义里疑土

中有之弗得其所道逢一车有铎声甚厉嗣真曰宫声也市以归振于空地若有应者掘之得钟众乐遂和永昌初以右御史中丞知大夫事来

俊臣狱方炽嗣真上书谏以为昔陈平事汉祖谋疏楚君臣行反闲项羽遂亡今殆有如平者谋闲陛下君臣恐为社稷祸不纳出为潞州刺史

俊臣诬以反流藤州久得还自筮死日豫具棺敛如言卒桂阳有诏州县护丧还乡里赠济州刺史谥曰昭武后尝问嗣真储贰事对曰程婴杵臼存赵氏孤古人嘉之后悟中宗乃安神龙初赠御史大夫撰明堂新礼十卷孝经指要诗品书品各一卷

△明崇俨

明崇俨洛州偃师人少随父恪令安喜吏有能召鬼神者尽得其术干封初应岳牧举调黄安丞以奇技自名高宗召见甚悦擢冀王府文学盛夏帝思雪崇俨坐顷取以进自云往阴山取之四月帝忆瓜崇俨素百钱须臾以瓜献曰得之缙氏老人圃中帝召老人问故曰埋一瓜失之土中得百钱累迁正谏大夫帝令入阁供奉每谒见陈时政多托鬼神为言至为武后作厌胜事又言章怀太子不德仪凤四年为盗所刺好事者或言崇俨役鬼劳苦为鬼所杀【按唐书此下有尚献甫传无事迹可录今删】

△严善思

严善思名譔同州朝邑人以字行父延与河东裴玄证陇西李真蔡静皆通儒术该晓图讖善思传延业褚遂良上官仪等奇其能高宗封泰山举销声幽薮科及第调襄阳尉居亲丧庐墓因隐居十年武后时擢监察御史兼右拾遗内供奉数言天下事方酷吏构大狱以善思为详审使平活八百余人原千余家长寿中按囚司刑寺罢疑不实者百人来俊臣等疾之诬以罪谪交趾五岁得还时李淳风死候家皆不效乃诏善思以著作佐郎兼太史令圣历二年荧惑入舆鬼后问其占对曰商姓大臣当之是年王及善卒长安中荧惑入月镇犯天关善思曰法当乱臣伏罪且有下谋上之象岁余张柬之等起兵诛二张后崩将合葬干陵善思建言尊者先葬卑者不得入今启干陵是以卑动尊术家所忌且玄关石门冶金锢隙非攻凿不能开神道幽静多所惊黷若别攻隧以入其中即往昔葬时神位前定今更改作为害益深景营干陵国有大难易姓建国二十余年今又营之难且复生合葬非古也况事有不安岂可复循伏见汉世皇后别起陵墓魏晋始合葬汉积祀四百魏晋祚率不长亦其验也山川精气上为列星葬得其所则神安而后嗣昌失其宜则神危而后嗣损愿更择吉地附近干陵取从葬之义使社稷长久中宗不纳景龙中迁礼部侍郎求出为汝州刺史尝语姚崇曰韦氏祸且涂地相王所居有华盖紫气必位九五公善护之及睿宗立崇以语闻召拜右散骑常侍初为汝州谯王重福徙均州过汝及谋反伪除礼部尚书重福败坐关通论死给事中韩思复固请乃流静州始善思为御史中书舍人刘允济为酷吏所陷善思力讼其冤得免死户部尚书王本立曰祁奚之救叔向严

公有之后见允济语未尝及思复解善思亦不自德时

称长者之报后遇赦还开元十六年卒 【按唐书此下有杜生传无事迹可录今删】

△张果 【罗思远】

张果晦乡里世系以自神善息气能累日不食隐中条山往来汾晋闲白云数百岁武后召之佯死不赴后人复见居恒州山中开元二十一年刺史韦济以闻玄宗令通事舍人裴晤往迎果见晤辄气绝良久乃苏晤不敢逼还白帝更遣中书舍人徐峤赍玺书邀之乃至东都帝亲问治道神仙事语秘不传时有邢和璞者知人夭寿师夜光者善视鬼帝令和璞推果生死懵然莫知其端帝召果密坐使夜光视之不见果所在帝谓高力士曰吾闻饮堇无苦者奇士也时天寒因取以饮果三进颓然曰非佳酒也乃寝顷之齿焦顾左右取铁如意击堕之藏带中更出药傅其断良久齿生帝益神之欲以玉真公主降果未言也果忽谓秘书少监王迥质太常少卿萧莘 【旧书作萧华】 曰谚谓娶妇得公主可畏也二人怪其语不伦俄有使至传诏曰玉真公主欲降先生果笑固不奉诏有诏图形集贤院恳辞还山诏可擢银青光禄大夫号通玄先生至恒山蒲吾县未几卒或言尸解又罗思远能自隐帝学之不肯尽其术帝怒裹以幘压杀之数日有中使自蜀还逢思远驾而西笑曰上为戏何虐也 【按唐书此下有姜抚传无事迹可录今删】

△桑道茂

桑道茂者寒人失其系善太一遁甲术言无不中建中初上言国家不出三月有厄奉天有王气宜高垣堞为王者居使可容万乘德宗素验其数 【按旧书道茂请高垣墙德宗不省及幸奉天始思其言与此所载互异】 诏京兆尹严郢发众数千及神策兵城之及朱泚反帝蒙难奉天赖以济李晟为右金吾大将军道茂赍一缣见晟再拜曰公贵盛无比我命在公手求见赦晟惊其言道茂出怀中一书自具姓名署其右曰为贼逼胁固请晟判曰第言准状赦之晟勉从道茂果污朱泚伪官昨收长安与逆徒缚旗下将就刑出晟书以示晟为奏原其死时藩镇擅地无宁时道茂曰年号元和寇盗翦灭矣至宪宗乃验杜佑与杨炎善卢 ■ 〈木巳〉疾之佑惧以问道茂答曰君岁中补外则福寿叵涯矣俄拜饶州刺史后终司徒李鹏为盛唐令道茂曰君位止此而冢息位宰相次息亦大镇子孙百世鹏卒后石至宰相福厯七镇诸孙通显云

○五代

（臣）等谨按五代史无艺术传今取杂传中马重绩赵延义二人改入以符郑例
马重绩 赵延义

马重绩

赵延义

△马重绩

马重绩字洞微居太原少学数术明太乙五纪八象三统大历唐庄宗镇太原每用兵必以问言无不中拜大理司直明宗时废不用晋高祖据太原废帝遣兵围之势甚危急因命重绩筮之遇同人曰干健而离明健者君之德明者南面而治之象也同人者人所同也必有同我者焉易传曰战乎干干西北也又曰相见乎离离南方也其同我者自北而南乎干西北也战而胜其九月十月之交乎是岁九月契丹助晋击败唐军晋遂有天下拜重绩太子右赞善大夫迁司天监明年张从宾拒命重绩筮之遇随曰南瞻析木木不自续虚而动之动随其覆岁将秋矣无能为也七月而从宾败天福四年【按传文原作三年五代会要作四年考晋高祖天福元年系丙申岁据本传下文言明年庚子推之当从四年为是今改】重绩上言古今历象考审多差宣明之气朔虽正而星度不验崇玄之五星虽得而岁差一日以宣明气朔合崇玄五星二历相参然后符合自前世诸历皆起天正十一月为岁首用太古甲子为上元积岁愈多差阔愈甚臣辄合二历创为新法以唐天宝十四载乙未为上元雨水正月中气为气首诏下司天监赵仁琦张文皓等以新历与宣明崇玄考覆得失仁琦等言明年庚子正月朔用重绩历考之无舛诏班行之号调元历行之数岁辄差遂不用重绩又言漏刻之法以中星考昼夜为一百刻八刻六十分刻之二十为一时时以四刻十分为正此自古所用也今失其传以午正为时始下侵未四刻十分而为午由是昼夜昏晓皆失其正请依古改正从之寻卒

△赵延义

赵延义字子英秦州人曾祖省躬通数术避乱于蜀父温珪事蜀王建为司天监每为建占吉凶小不中辄加诘责临卒戒其子孙勿为也然延义少亦以此仕蜀为司天监蜀亡仕唐为星官延义兼通三式颇善相人契丹灭晋延义随至镇州李筠白再荣谋逐麻答归汉犹豫未决延义假述数术赞成之周太祖自魏以兵入京师召延义问汉祚短促者天数邪延义言王者抚天下当以仁恩德泽而汉法深酷刑法枉滥天下称冤此其所以亡也时太祖方以兵围苏逢吉刘铎第闻延义言遽命贷之【按宋史王处讷传载周太祖举兵入汴召处讷问刘氏祚短事对以汉祖报讎杀人结怨天下所以运祚不长时周祖方欲族诛苏逢吉刘铎等遽命止之与此所载语正相似而二史所系之人不同当属

传闻异辞谨识】 二族获全延义事周为太府卿判司天监以疾卒

钦定续通志卷五百八十

●钦定续通志卷五百八十一 艺术传二

艺术传

宋 【一】

○宋一

赵修己 王处讷 苗训【守信】 马韶 韩显符

周克明 刘翰 王怀隐 赵自化

苏澄隐

赵修己

王处讷

苗训 【苗守信】

马韶

韩显符

周克明

刘翰

王怀隐

赵自化

苏澄隐

△赵修己

赵修己开封浚仪人精天文推步之学晋天福中从李守贞于滑州每出征必从占候多中奏试大理评事汉干佑中守贞镇蒲津阴怀异志修己屡以祸福谕之不听遂辞归明年守贞叛幕吏多伏诛独修己得免由是知名召为翰林天文周祖镇邺奏参军谋会隐帝诛杨邠史弘肇等且将害周祖修己知天命所在密谓周祖曰主少信谗大臣受戮公位极将相居功高不赏之地虽欲杀身成仁何益于事不知引兵南渡诣阙自诉周祖然之遂决渡河之计即位以为殿中省尚食奉御改鸿臚少卿迁司天监显德中累加检校户部尚书尝副陶谷使吴越宋初迁太府卿判监事上章告老优诏不许建隆三年卒

△王处讷

王处讷河南洛阳人少聪悟留意星历占候之学深究其旨晋末避地太原汉祖时领节制辟置幕府即位擢为司天夏官正累官判司天监事周祖尝与处讷同事汉祖雅相厚善及自邺举兵入汴遽命访求得之甚喜因问以刘氏祚短事对曰汉氏据中士承正统以历数推之其

祀犹永第高祖得位之后多报讎杀人及夷人之族结怨天下所以运祚不长周祖蹶然太息适发兵围汉臣苏逢吉刘铎等家待旦将行孥戮遽命止之逢吉已自杀止诣刘铎余悉合活广顺中迁司天少监世宗以旧历差舛俾处讷详定历城未上会王朴作钦天历以献颇为精密处讷私谓朴曰此历不久即差因指以示朴朴深然之宋建隆初以钦天历谬误诏处讷别造新历经三年而成为六卷太祖自制序命为应天历处讷又以漏刻无准复位水称及候中星分五鼓时刻俄迁少府少监太平兴国初改司农少卿并判司天事六年又上新历二十卷拜司天监岁余卒 【按宋史有子熙元附传无事迹可录今删】

△苗训 【苗守信】

苗训河中人善天文占候之术仕周为殿前散指挥使显德末从宋太祖北征训视日上复有一日久相摩荡指谓楚昭辅曰此天命也既受禅擢为翰林天文寻加银青光禄大夫检校工部尚书卒子守信少习父业补司天历算授司天台主簿知算造太平兴国中以应天历小差诏与冬官正吴昭素主簿刘内真造新历及成颇为精密赐号干元历端拱初判司天监至道二年帝忧梁雍宿兵弥岁凶歉令宰相召守信问以天道咎证所在守信奏曰臣仰瞻玄象及推验太一经历官分其荆楚吴越交广并皆安宁自来五纬陵犯慧星见及水神太一临并鬼之闲属秦雍分及梁益之地民罹其灾水神太一异岁入燕分岁在房心正当京都之地自兹朝野有庆诏付史馆明年真授少监咸平三年卒

△马韶

马韶赵州平棘人习天文三式开宝中太宗以晋王尹京申严私习天文之禁韶素与太宗新吏程德玄善德玄每戒韶不令及门九年冬十月十九日既夕韶忽造德玄曰明日乃晋王利见之辰故以相告德玄惶骇止韶一室遽入白太宗太宗命防守之将闻于太祖及旦入谒果受遗践阼韶以赦获免踰月起家为司天监主簿历判司天监事迁太常刺史淳化五年坐事出为博兴令移长山令秩满归乡里卒于家 【按宋史此下有楚芝兰传无事迹司录今删】

△韩显符

韩显符不知何许人少习三式善察胝辰象补司天监生迁灵台郎累加司天冬官正淳化初表请造洞浑仪候仪诏给用度俾显符规度择匠铸之至道元年浑仪成于司天监筑台置之显符上其法要十卷其制有九事具天文志自是显符专测验浑仪累加奉官正转太子洗马大中祥符三年诏择监官或子孙可以浑授仪法者显符言长子监生承矩善察躔度次

子保章正承规见知算造又主簿杜贻范保章正杨惟德皆可传其学诏显符与贻范等参验之显符后改殿中丞兼翰林天文六年卒【按宋史此下有史序传无事迹可录今删】

△周克明

周克明字昭文曾祖德扶唐司农卿祖杰开成中进士历弘文馆校书郎中和中僖宗在蜀杰上书言治乱万余言擢水部员外郎三迁司农少卿精历算尝以大衍历数有差因敷衍其法着极衍二十四篇以究天地之数时天下方乱占岭南可以避地乃遣其弟鼎求为封州录事参军天复中杰亦弃官携家适岭表刘隐素闻其名每令占候杰耻以星历事僭伪谢病不出袭袭位强起之令知司天监事问国祚修短杰以周易筮之得比之复曰卦有二士士数生于五成于十二五相比以岁言之当五百五十袭太喜袭以梁贞明三年僭号至开宝四年国灭止五十五年盖杰举成数以避害耳卒父茂元世杰之学事袭至司天少监归宋授监丞而卒克明精于算术开宝中授司天六壬改台主簿转监丞五迁春官正颇修词藻喜藏书景德初尝献所著文十编召试中书赐同进士出身三年有大星出氐西众莫能辨或言国皇妖星为兵凶之兆克明时使岭表还请对语臣按天文录荆州占其星名曰周伯其色黄其光煌煌然所见之国大昌是德星也愿许文武称庆以安天下心帝嘉之即从其请拜太子洗马殿中丞兼翰林天文权判监事属修两朝国史命参天文律历事大中祥符九年坐本监择日差互例降为洗马天禧元年卒克明久居司天之职颇勤慎奏对必据经尽言初诸僭国皆有纂录独岭南关焉克明访耆旧采碑志孳孳着撰裁十数卷书未成而卒

△刘翰

刘翰沧州临津人世习医业周显德初诣阙献经用方书三十卷论候十卷今体治世集二十卷世宗嘉之命为翰林医官其书付史馆加卫尉主簿宋建隆初加朝散大夫鸿胪寺丞时太祖求治事皆核实故方技之士必精练于德初令太常寺考较翰林医官艺术以翰为优拙其业不精者二十六人开宝五年太宗在蕃邸有疾命翰与道士马志视之及愈转尚药奉御尝被诏与马志翟煦张素吴复珪王光佑陈昭遇同祥定唐本草凡神农本经三百六十种名医录一百八十二种唐本先附一百一十四种有名无用一百九十四种翰等又参定新附一百三十二种既成诏中书舍人李昉知制诰王佑扈蒙详覆毕上之定为印板以白字为神农所说墨字为名医所传唐附今附各加显注详其解释审其形性证谬误而办之者署为今注考文意而述之者又为今按新旧药合九百八十三

种并目录二十一卷广颁天下翰后加检校户部郎中
坐事责降再为翰林医官使卒

△王怀隐

王怀隐宋州睢阳人初为道士善医太宗尹京怀隐以汤剂只事太平兴国初诏归俗命为尚药奉御三迁至翰林医官使初太宗在藩邸留意医术藏名方千余首皆尝有验至是诏医官各具家传经验方以献又万余首命怀隐与副使王佑郑奇医官陈昭遇参对编类每部以隋太医令巢元方病源候论冠其首而方药次之成一百卷太宗御制序赐名曰太平圣惠方仍令镂板颁行天下诸州各置医博士掌之怀隐后数年卒

△赵自化

赵自化本德州平原人高祖尝为景州刺史后陷契丹父知崑脱身南归寓洛阳习知方药又以授二子自正自化周显德中偕来京师悉以医术称知崑卒自正试方技补翰林医学自化以诊候秦国长公主病愈加尚药奉御淳化五年授医官副使时召陈州隐士万适至馆于自化家会以适补慎县主簿适素强力无疾诏下日自化怪其色变为切脉曰君将死矣数日果卒咸平三年加正使景德初雍王元份泊晋国长公主并上言自化药饵有功请加使秩领遥郡帝不许雍王薨坐诊视无状降为副使二年复旧官是冬卒遗表以所撰四时养颐录为献真宗改名调膳摄生图仍为制序自化颇善为篇什又尝缵自古以方技至贵仕者为名医显秩传三卷【按宋史此下有冯文智沙门洪蕴传无事迹可传今删】

△苏澄隐

苏澄隐字栖真真定人为道士住龙兴观得养生之术年八十余不衰老后唐明宗尝下诏召之又令宰相冯道致书谕旨历晋清泰天福中继有聘命并辞疾不至开运末契丹主加以恩命不受周广顺显德中诏存问之宋太祖征太原还驻蹕镇阳召见行宫谓之曰京师作建隆观思得有道之士居之师累辞召命岂怀士耶对曰大梁帝宅浩穰繁会非林泉之士所可寄迹也帝亦不之强因问其术对曰臣之养生不过精思炼气耳帝王养生即异于是老子曰我无为而民自化我无欲而民自正无为无欲凝神太和黄帝唐尧享国永年得此道也帝大悦厚赐之年百岁卒【按宋史此下有丁少微赵自然传并附载郑荣赵抱一事迹皆无足录今删】

钦定续通志卷五百八十一

●钦定续通志卷五百八十二 艺术传三

艺术传

宋 【二】

○宋二

柴通玄	甄栖真	僧志言	僧怀丙	许希	庞安时
钱乙	僧智缘	郭天信	魏汉		
津道人	王老志	王仔昔	林灵素	皇甫坦	王克明 莎衣
	孙守荣				

柴通玄

甄栖真

僧志言

僧怀丙

许希

庞安时

钱乙

僧智缘

郭天信

魏汉津

王老志

王仔昔

林灵素

皇甫坦

王克明

莎衣道人

孙守荣

△柴通玄

柴通玄字又玄陕州阌乡人为道士住承天观年百余岁善辟谷长啸唯饮酒言唐末事历历可听太宗召至阙求归本观真宗即位屡来京师召对语无文饰多以修身慎行为说祀汾阴召至行在命坐问以无为之要所居观即唐轩游宫有明皇诗及所书道德经二碑帝作诗赐之诏为修道院蠲其田租度弟子二人明年春通玄作遗表自称罗山太一洞主遣弟子张守元李守一诣阙以龟鹤为献又召官僚士庶言生死之要夜分盥濯然香庭中望阙而坐迟明卒 【按宋史本传之前有贺兰栖真传无事迹可录今删】

△甄栖真

甄栖真字道渊单州单父人博涉经传长于诗赋举进士不第遂弃其业读道家书以自乐初访道于牢山华华先生久之游京师入建隆观为道士周历四方以药术济人不取其报大中祥符中寓居晋州性和静无所好恶晋人爱之以为紫极宫主年七十五还异人语之曰汝风神秀异有如李筌虽老尚可仙也因授炼形养元之诀行之二三年渐返童颜攀高摄危轻若飞举干兴元年秋谓其徒曰此岁之暮吾当逝矣即宫西北隅自斃殓室成不食一月与所知叙别以十二月二日衣纸衣卧砖榻卒岁久形如生众惊传以为尸解栖真自号神光子与隐人海蟾子者以诗往还论养生秘术目曰还金编凡两卷 【按宋史此下有楚衍传无事迹可录今删】

△僧志言

僧志言自言姓许寿春人相貌奇古直视不瞬落发东京景德寺事清璲为弟子然动止轩昂语笑无度时从屠酤游饮啖无所择众以为狂璲独曰此异人也人有钦为斋施辄先知王公士庶召即赴然莫与交一言者或阴卜休咎后多验仁宗春秋渐高嗣未立默遣内侍至志言书十三郎字以对莫测何谓后英宗以濮王第十三子入继众始悟大宗正守节请书志言书润州字未几守节薨赠丹阳郡王见寺童义怀抚其背曰德山临济怀既落发住天衣说法大为学者所宗其前知多类此有具斋荐鲙者并食之临流而吐化为小群羣泳而去海客遇风且没见僧操絙引舶而济客至都下遇志言记其貌即引舟者也与曹州士赵棠善后棠弃官隐居番禺人传棠与志言数以偈颂相寄万里间辄数日而达志言死亡宗遣内侍以真身塑像置寺中榜曰显化禅师后见其额上荧然有光就视之得舍利

△僧怀丙

僧怀丙真定人性多巧思真定构木为浮图十三级久而中级大柱坏欲西北倾他匠莫能为怀丙度短长别作柱命众工维而上已而欲众工以一介自从闭户良久易柱下不闻斧凿声赵州洹河凿石为桥镕铁贯其中自唐以来大水不能坏岁久乡民多盗凿铁桥欹倒怀丙不役众工以术正之使复故河中府浮梁用铁牛八维之一牛数万斤后水暴涨绝梁牵牛没于河募能出之者怀丙以二大舟实土夹牛维之用大木为权衡状钩牛徐去其土舟浮牛出转运使张焘以闻赐紫衣寻卒

△许希

许希开封人以医为业补翰林医学景佑元年仁宗不豫希诊曰针心下包络之闲

可亟愈左右争以为不可诸黄门祇以身试试之无所
害遂以针进而帝疾愈命为翰林医官希拜谢请建扁鹊庙帝为筑庙于城西隅因立太
医局于旁希至殿中省尚药奉御卒着神应针经要诀
行于世

△庞安时

庞安时字安常蕲州蕲水人幼读书过目辄记父世医也授以脉诀安时曰是不足
为也独取黄帝扁鹊脉书治之未久能通其说时出新
意辨诘不可屈已而病瞶乃益读灵枢太素母乙诸秘书凡经传百家之涉其道者靡不
通贯尝曰世所谓医书惟扁鹊之言精深其所谓难经
者子以之视浅深决死生若命符节又欲以术告后世着难经辨数万言主对集一卷补
仲景论及本草补遗为人治病率十愈八九踵门求诊
者为辟邸舍居之亲视飭粥药物必愈而后遣其不可为者必实告之不复为治活人无
数病家谢以金帛不尽取也尝诣舒之桐城有民家妇
将产七日而子不下安时任视之令其家人以汤温其腰腹自为上下拊摩孕者觉肠胃
微痛呻吟闲生一男子其家惊喜问故安时曰儿已出
胞一手误执母肠不能脱故非符药所能为吾隔腹扪儿手所在针其虎口既痛即缩手
所以遽生无他术也取儿视之右手虎口针痕存焉有
问以华佗之事者曰术若是非人所能为也其史之妄乎疾作门人请自视脉笑曰吾察
之审愚气已绝死矣遂屏药饵后数日与客坐语而卒

△钱乙

钱乙字仲阳本吴越王俶支属祖北迁为郓州人父颖善医嗜酒喜游东之海上不
返乙方三岁母前死姑嫁吕氏哀而收养之长海之医
告以家世即泣请往寻凡八九反积数岁迎父以归时已三十年矣其事吕如事父吕没
无嗣为收葬行服乙始以颅■〈囟页〉方著名至京
师视长公主女疾授翰林医学皇子病瘰癧乙进黄土汤而愈神宗召问黄土所以愈疾
状对曰以土胜水水得其平则风自止帝悦擢太医丞
由是公卿宗戚家延致无虚日广亲宗子病诊之曰此可毋药而愈有幼子在帝指之曰
是且暴疾后三日过午可无恙明日幼果发病甚急召
乙治之三日愈问其故曰火色直视心与肝俱受邪过午者所用时当更也王子病呕泄
他医与刚剂加喘焉乙曰是本中热脾且伤复燥之将
不复前后溲与之石膏汤王不信谢去信宿寢剧竟如言而效孕妇病医言胎且堕乙曰
娠者五藏传养率六旬乃更诚能候其月偏补之何必
堕已而母子皆全又乳妇因悸而病既愈目张不得瞑乙曰目系内连肝胆恐则气结胆
衡不下令煮郁李酒饮之郁李能去结随酒入胆结去

胆下则目能瞑矣饮之果验乙本有羸疾自以意治之益甚叹曰此所谓周痹入藏者死吾其已夫既而曰吾将移之使在末因自制药日夜饮之左手足忽挛不能用喜曰可矣所亲登东山得茯苓大踰斗以法噉之尽由是虽偏废而风骨悍坚如全人以病免归不复出乙为方不名一师于书无不窥不专守古法而卒与法会尤邃本草诸书辨正阙误云

△僧智缘

僧智缘随州人善医嘉佑末召至京师舍于相国寺每察脉知人贵贱祸福休咎诊父之脉而能道其子吉凶所言若神士大夫争造之王珪疑古无此王安石曰昔医和诊晋侯而知其良臣将死夫良臣之命乃见于其君之脉则视父知子亦何足怪熙宁中王韶谋取青唐上书蕃族重僧而僧结吴叱腊部帐甚众请智缘与俱至边神宗召见遣乘传而西遂称经略大师智缘有辩口径入蕃中说话吴叱腊归化他族俞龙珂禹藏讷令支等皆因以输款韶颇忌之言其挠边事召还以为右街首坐卒

△郭天信

郭天信字佑之开封人以技隶太史局徽宗为端王尝退朝天信密摭白曰王当有天下既而即帝位因得亲昵不数年至枢密都承旨节度观察留后政和初拜定武军节度使佑神观使颇与闻外里政事见蔡京乱国每托天文以撼之且云日中有黑子帝甚惧言之不已京由是黜张商英方有时望天信往往称于内朝商英亦欲借左右游谈之助阴与相结商英劝帝节俭稍裁抑僧寺帝始敬畏之而近侍积不乐闲言浸润眷日衰京党因是告商英与天信漏泄禁中语言商英遂罢御史中丞张克公复论之诏贬天信昭心军节度副使单州安置再贬行军司马窜新州数月死京已再相犹疑天信挟术多能死未必实令宋康年选吏发棺验视焉

△魏汉津

魏汉津本蜀黥卒尝从范镇窥见其制作而托言师事唐仙人李良授以鼎乐之法尝过三山龙门闻水声谓人曰其下有玉即投水抱石而出果玉也皇佑中与房庶俱以善乐荐时阮逸方定黍律不获用崇宁初犹在朝廷方协考锺律得召见献乐议言得黄帝夏禹声为律身为度之说谓人主禀赋与众异请以帝指三节三寸为度定黄锺之律师中指之径围则度量权衡所自出也【按魏汉津本以庸妄小人依托蔡京恣为异论假声律身度之文取帝指节寸裁定律管諄诞已甚伏读通鉴辑览御批人之身体长短不齐将易一帝遂易一律乎诚足破汉津之妄而九鼎大晟乐之荒谬不经不辨而明矣今录识于此】当时以为迂怪蔡京独神之于是请先铸九鼎次铸帝座大钟及二十四

气钟四年三月鼎成赐号冲显处士八月大晟乐成徽宗御大庆殿受羣臣朝贺加汉津
虚和冲显宝应先生颁其乐书天下汉津晓阴阳术数
多奇中尝语所知曰不三十年天下乱矣未几死后即铸鼎之所建宝成殿祀黄帝夏禹
成王周召而良汉津俱配食谥汉津为嘉晟侯

△王老志

王老志濮州临泉人事亲以孝闻为转运小吏不受赂遇异人于丐中自言锺离先
生予之丹服之而狂遂弃妻子结草庐田闲时为人言
林咎政和三年太仆卿王亶以其名闻召至京师馆于蔡京第尝缄书一封至帝所徽宗
启视乃昔岁秋中与乔刘二妃燕好之语也帝由是稍
信之封为洞微先生朝士多从求书初若不可解后卒应者十八九故其门如市尝献乾
坤鉴法命铸之既成谓帝与皇后他日皆有难请时坐
鉴下思所以傲惧消变者明年见其师责以擅处富贵乃丐归至濮而死赠正议大夫

△王仔昔

王仔昔洪州人始学儒自言遇许逊得大洞隐书豁落七元之法出游嵩山能道人
未来事政和中徽宗召见赐号冲隐处士帝默视为宫
妃疗赤目者遣小黄门持纸来仔昔篆符其上细书焚符汤沃而洗之一沃立愈进封通
妙先生居上清宝箓宫仔昔资倨傲又少戇帝常待以
客礼遇巨阉殆若童奴又欲羣道士皆宗已林灵素忌之与宦者冯浩陷以事下狱死未
死时书示其徒曰上蔡遇冤人其后浩南窜至上蔡被
诛

△林灵素

林灵素温州人少从浮屠学苦其师笞骂去为道士善妖幻往来淮泗闲丐食僧寺
政和末王仔昔等宠衰徽宗访方士于左道录徐知常
以灵素对既见大言曰天有九霄而神霄为最高其治曰府神霄玉清王者上帝之长子
主南方号长生大帝君陛下是也既下降于世其弟青
华帝君主东方摄领之已乃府仙卿褚慧下降佐帝君之治又谓蔡京为左元仙伯王黼
为文华使盛章王革为园苑宝华使郑居中童贯及诸
巨阉皆为之名贵妃刘氏方有宠曰九华玉真安妃帝心喜其事赐号通真达灵先生建
上清宝箓宫密连禁省天下皆建神霄万寿宫又造为
青华正昼临坛及火龙神剑夜降内宫之事假帝诰天书云篆务以欺世惑众其说妄诞
不可究质寔无所能闲祷雨有小验而已每设大斋辄
费缗钱数万谓之千道会帝设幄其侧而灵素升高正坐问者皆再拜以请所言无殊异
时杂嘲诋以资媒笑无复君臣礼其徒美衣玉食几二
万人遂用灵素言立道学自元士至志士凡十二品岁大比许褙幞就试 【按续通鉴及

宋史纪事本末林灵素以政和六年召见其置诸殿侍晨以挺待制修撰直阁之名系在四年于灵素无涉至六年闰月立道学自元士至志士凡十二品岁大比许襴幙就试乃系从灵素之言而为之宋史本传以置诸殿侍晨系于立道学之下宝为讹误今据删正】 寻加灵素元妙先生张虚白通元冲妙先生并视中大夫 【据续通鉴及宋史纪事本末增辑】 出入呵引至与诸王争道都人称曰道家两府本与道士王允诚共为怪神后忌其相轧毒之死宣和初都城暴雨遣灵素厌胜方率其徒步虚城上役天争举槌将击之走而免帝知众怨始不乐然灵素恣横不悛道遇皇太子弗敛避太子入诉帝怒以为太虚大夫斥还故里命江端本通判温州几察之端本廉得其居处过制罪诏徙置楚州而灵素已死遗奏至犹以待从礼葬焉

△皇甫坦

皇甫坦蜀之夹江人善医术显仁太后苦目疾坦应募召见高宗问何以治身坦曰心无为则身安人主无为则天下治引至慈宁殿治太后目疾立愈帝喜厚赐之无所受令持香祷青城山还复召问以长生久视之术坦曰先禁诸欲勿令放逸丹经万卷不如守一帝叹服书清静二字以名其庵且绘其像禁中坦又善相人尝相李道中女必为天下母后果为光宗后

△王克明

王克明字彦昭乐平人徙乌程县绍兴干道闲名医也生时母乏乳饵以粥遂得脾胃疾长益甚医以为不可治克明自读难经素问以求其法而自治之病遂愈因以术行江淮苏湖针灸尤精诊脉有难疗者必沈思得其要然后子药亦有不予药者期以某日自安有以为非药之过在某事当随其事治之言无不验士大夫皆屈与游庐州守王安道风禁不语克明令炽炭烧地洒药置安道于上须臾而苏金使黑鹿谷过姑苏病伤塞垂死克明治之明日愈及从徐度聘金黑鹿谷适为先排使待克明厚甚由是名闻北方后再从吕正己使金金接伴使忽被危疾克明立起之却其谢张子盖救海州战士大疫克明时在军中全活者几万人子盖上其功克明立辞之克明颇知书好侠尚义常数千里赴人之急初试礼部中选累任医官后迁至额内翰林医痊局绍熙五年卒 【按宋史本传称克明为绍兴干道闲名医考干道为李宗年号若克明以绍兴五年卒安得有名干道闲耶又考张子盖救海州据宋史高宗本纪系绍兴三十二年事于时克明尚在其非卒于绍兴五年可知兴字为熙字之讹今改】

△莎衣道人

莎衣道人姓何氏淮阳军胸山人避乱渡江尝举进士不中绍兴末来平江一日自外归倏若狂者衣白襴勺食于市夜止天庆观久之衣益敝以莎缉之尝游妙严寺临池见影豁然大悟人无贵贱问休咎罔不奇中会有瘵者乞医命持一草去旬日而愈由是远近异之孝宗时遣使召之不至帝尝默祝数事遣中官致贄不言所以道人俱对如旨赐号通神先生为筑庵观中赐衣数袭皆不受光宗即位召之又不至庆元六年卒

△孙守荣

孙守荣临安富阳人生七岁病瞽遇异人教以风角鸟占之术守荣既悟异人授以铁笛遂去不复见守荣因号富春子吹笛市中人初不识也宝庆闲游吴兴闻谯楼鼓角声惊曰旦夕且有变士人当有典郡者见王元春即贺之曰必君也越两月潘丙作乱元春以告变功果典郡自是淮南帅李曾伯荐诸朝既至谒丞相史嵩之阍者以昼寝辞守荣曰丞相方钓鱼园池何得云尔阍者惊异入白一见颇喜之嵩之得李金檄藏神中询其事守荣曰此李全诈假布囊二十万耳剥封果如其说士大夫咸询履厯守荣不尽答后为嵩之所忌诬以他罪贬死远郡

钦定续通志卷五百八十二

●钦定续通志卷五百八十三 艺术传四

艺术传

辽

○辽

珠勒呼 王白 魏璘 耶律达鲁 耶律伊伯格勒

珠勒呼

王白

魏璘

耶律达鲁

耶律伊伯格勒

△珠勒呼

珠勒呼吐谷浑人初太祖破吐谷浑一骑士弃橐反射不中而去开橐视之得一婴儿即珠勒呼也问所俘知射者乃婴儿父也世善医虽马上视疾亦知标本意不欲子为人所得欲杀之耳太祖收养之长亦能医专事针灸太宗时以太医给侍尝撰脉经谿针灸书行于世

△王白

王白冀州人明天文善卜筮晋司天少监太宗八汴得之应历十九年王子扎穆以

事下狱其母求卜白曰此人当王未能杀也毋过忧景

宗即位释其罪封宁王竟如其言凡决祸福也此类保宁中厯彰武兴国二军节度使撰百中歌行于世

△魏璘

魏璘不知何郡人以卜名世太宗得于汴天禄元年帝命驰马较迟疾以为胜负问王白及璘孰胜白奏曰赤者胜璘曰臣所见驄马当胜既驰竟如璘言帝异而问之白曰今日火王故知赤者胜璘曰不然火虽王而上有烟以烟察之青者必胜帝嘉之五年察克谋逆私卜于璘璘始卜谓曰大王之数得一日矣宜慎之及乱果败应厯中周兵及燕帝以胜败问璘璘曰周姓柴也燕分火也柴八火必焚其言果验璘尝为太平王雅斯哈卜僭立事免死流乌尔古部一日节度使召璘适有献双鲤者戏曰君卜此鱼何时得食璘良久答曰公与仆不出今日有不测祸矣暇食鱼急命烹之未及食寇至俱遇害

△耶律达鲁

耶律达鲁字伞布斡其先本五院之族始置宫分隶焉达鲁精于医察形色即知病原虽不诊候有十全功统和初为韩德让所荐官至节度使初枢密使耶律色珍妻有沉痾易数医不能治达鲁视之曰心有蓄热非药石所及当以意疗因其瞶聒之使狂用泄其毒则可于是令大击钲鼓于前翌日果狂叫呼怒骂力极而止遂愈治法多此类人莫能测后卒 【按辽史萧呼都克传载其曾祖达鲁明医以附韩德让得世预太医选与本传事迹相近疑是一人为萧为耶律必有一误】

△耶律伊伯格勒

耶律伊伯格勒字锡纳六院郎君尼古察之后幼好学尤长于卜筮不乐仕进尝为人择葬地曰后三日有牛乘人过者即启土至期果一人负乳犊引犊牛而过其人曰所谓牛乘人者此也遂启土既葬吉凶尽如其言又为失鹰者占曰鹰在汝家东北三十里冻西榆上往求之果得当时占候无不验

钦定续通志卷五百八十三

●钦定续通志卷五百八十四 艺术传五

艺术传

金

○金

刘完素

张从正

李庆嗣

纪天锡

张元素

马贵

中

武祜亢

李懋

胡德新

- 5558 -

刘完素

张从正

李庆嗣

纪天锡

张元素

马贵中

武祯 【武亢】

李懋

胡德新

△刘完素

刘完素字守真河闲人尝遇异人陈先生以酒饮之大醉及寤洞达医术乃撰运气要旨论精要宣明论又着完素玄机原病式特举二百

八十八字注二万余言然好用凉剂以降心火期肾水为主自号通元处士

△张从正

张从正字子和睢州考城人精医贯穿难素之学起疾救死多效世传黄帝岐伯书有汗下吐法亦有不当汗不当下不当吐者汗下吐之

则死各有经络脉理从正用之最精号张子和汗下吐法其所著有六门二法之目

△李庆嗣

李庆嗣洛人少举进士不第弃而学医读庆嗣诸书洞晓其义天德闲岁大疫广平尤甚贫者往往阖门卧病庆嗣携药与米分遣之全活

者众无疾而终所著伤寒纂类四卷改证活人书二卷伤寒论三卷针经一卷传于世

△纪天锡

纪天锡字齐卿泰安人早弃进上业学医遂名世集注难经五卷大定十五年上其书授医学博士

△张元素

张元素字洁古易州人八岁试童子举三十七试经义进士犯庙讳下第乃去学医夜梦有人用大斧长凿凿心开窍纳书数卷于中自是

洞彻其术河闲刘完素病伤寒八月头痛脉紧呕逆不食方困卧元素往候完素面壁不顾既为诊脉谓曰脉病云云曰然初服某药用某味乎

曰然元素曰子误矣某味性寒下降走太阴阳亡汗不能出今当服某药则效完素大服如其言遂愈自此显名元素治病不用古方自为家法

其说曰运气不齐古今异轨古方新病不相能也

△马贵中

马贵中天德中为司天提点与校书郎高守元奏天象灾异忤旨被杖黜为大同府

判官久之迁司天监正隆末海陵问欲自将伐宋天道何如对曰去年十月甲戌荧惑顺入太微至屏星留退西出十二月太白昼见经天占为兵丧为不臣为更主又主有兵兵罢无兵兵起又问镇戎军地震大风对曰伏阴逼阳所以震也又问曰当震大风何也对曰土失其性则地震风为号令人君命令严急则有烈风及物之灾问六年二月甲辰朔日有晕珥戴背何如对曰前年八月二十九日太白入太微右掖门九月二日至端门九日至左掖门出并历左右执法太微为天子南宫太白兵将之象其占兵入天子之廷海陵曰今将征伐而兵将出入太微正其事也贵中又曰当端门而出其占为受制历左右执法为受事此当有出使者或为兵或为贼海陵曰兵兴之际小盗固不能无也及被害扬州所言皆验大定八年世宗击球于常武殿贵中上疏谏曰陛下为天下主守宗庙社稷之重围猎击球皆危事也前日皇太子坠马可以为戒帝曰祖宗以武定天下岂以承平遽忘之耶皇统尝罢此事当时皆以为非朕所亲见故示天下以习武尔十年十一月皇太子生日宴百官于东宫帝饮欢甚贵中被酒前跪欲言事错乱失次帝不之罪但令扶出

△武祯 【武亢】

武祯宿州人深数学贞佑闲布萨安贞闻其名召至徐州礼以上客每出师其占如响正大初征至汴京其友王铉问曰朝廷若问国祚修短子何以对祯曰当以实告但更言周过其历秦不及期亦在修德尔时久旱祈祷不应祯毛谓铉曰足下今日早归恐为雨阻铉曰万里无云赤日如此安得有雨祯笑曰若是则天不诚也天何尝不诚既而东南有云气须臾蔽天平地雨注二尺众皆惊叹寻除司天台管勾子亢寡言笑不妄交尝与一学生终日相对握筹布画目炯炯若有所营见者莫测哀宗至蔡州完颜仲德荐其术除司天长行上书比者有星变于周楚之分彗星起于大角西扫軫之左轴盖除旧布新之象又言郑楚周三分野当赤地千里兵凶大起王者不可居又曰蔡城有兵丧之兆楚有亡国之征三军苦战于西垣前后有日矣城壁倾颓内无见粮外无应兵君臣数尽之年也天兴二年九月蔡州被围亢奏十二月三日必攻城及期果然因问解围当在何日对曰明年正月十三日城下无一人一骑矣帝不知其由密喜围解有日但计粮草毋使阙乏至期十日蔡州破十三日元兵退亢赴水死

△李懋

李懋有异术正大闲游京兆行省完颜哈达荐于哀宗遣近侍密问国运否泰言无

忌避居之繁台寺朝士日走问之懋能道隐事及吉凶
之变人以为神帝恶其言太泄遣使杀之使者持酒殽入寺懋出迎笑曰是矣使者曰何
谓也懋曰我数当尽今日遂索酒痛饮死

△胡德新

胡德新河北士族寓居南阳往来宛叶闲嗜酒落魄不羁言祸福有奇验正大七年
夏与燕人王铉邂逅于叶县初不相识坐中谬以兵官
对德新曰此公当登科甲何以谓之兵官与铉相得甚欢即命家人具鸡酒酒酣举大白
相属曰君此去事业甚远某有所见久不敢对人言今
欲告子遂邀至野田密谓曰某自去年来行宛叶道中见往来者十八九有死气今春至
陈许闲见其人亦有大半当死者若吾目可用则时事
可知矣铉惊问应验迟速曰不过岁月闲耳某亦不逃此厄请密志之明年元兵由金房
入取峭石滩渡汉所过庐舍萧然德新亦举家及难

钦定续通志卷五百八十四

●钦定续通志卷五百八十五 艺术传六

艺术传

元

○元

田忠良 靳德进 张康 李杲 孙威拱 阿喇卜
丹 伊斯玛音 阿尔尼格【刘元】 帕克
斯巴【丹巴 必噜匝纳实哩】 邱处机 张宗演【张留孙 吴全节 郦希诚
萧辅道 李居寿】

田忠良

靳德进

张康

李杲

孙威 【孙拱】

阿喇卜丹

伊斯玛音

阿尔尼格 【刘元】

帕克斯巴 【丹巴 必噜匝纳实哩】

邱处机

张宗演 【张留孙 吴全节 郦希诚 萧辅道 李居寿】

△田忠良

田忠良字正卿其先赵城中金亡徙中山好学通儒家杂家言尝识太保刘秉忠于

微时秉忠荐之世祖遣使召之帝视其状貌顾谓侍臣曰是虽以阴阳家进必将为国用俄指西序第二人谓忠良曰彼手中握何物曰鸡卵视之果然帝喜又曰朕有事萦心汝试占之曰当是一名僧病耳帝曰然国师也遣奉御送至司天台给乘札命秉忠试星历遁甲诸书司天诸生鲜有及者诏官之司天帝曰朕用兵襄樊累年不决奈何忠良对曰在酉年矣至元十一年阿尔哈雅奏请益兵十万渡江朝议难之帝密问曰汝试筮之济否曰济帝御幄殿侍臣甚众顾忠良曰今拜一大将取江南朕心已定果何人耶忠良环视左右目一人曰是伟丈夫可属大事帝笑曰此巴延也为西王锡里库使朕以其才留用之汝识朕心七月十五夜白气贯三台帝问何祥曰三公其亡乎未几太保刘秉忠卒帝问忠良南征将士能渡江否忠良奏曰明年正月当奏捷矣至期果取鄂州车驾清暑上都遣使来召曰叛者寢入山陵久而不去汝与和尔果斯率众往视之比至山陵如故俄叛兵大至围之三匝忠良引众夜归敌殊不觉海都犯边遣皇子北平生诺摩欢丞相安图征之忠良奏曰不吉将有叛者帝不悦及诸王锡里济劫皇子丞相以八海都帝召忠良曰诚如汝言汝可祀神致祷曰无事于神皇子未年当还后果然车驾驻隆兴北忠良奏曰锡里济之叛以安图之食不彼及也今宿卫士日食一瓜岂能充饥窃有怨言矣帝怒笞主膳二人俾均其食命为太常丞少府为诸王昌通建宅于太庙南忠良往仆其柱少府奏之帝以问忠良对曰太庙前岂诸王建宅所耶帝曰卿言是也又奏曰太庙前无驰道非礼也即敕中书辟道有事于太庙或请牲不用牛忠良奏曰梁武帝用面为牺牲后如何耶从之迁太常少卿将征日本命择日出师忠良奏曰僻陋海隅何足劳天戈不听请建大社于朝右建郊坛于国南迁太常卿大德元年升昭文馆大学士兼太常太卿成宗崩阿古台等怀异谋将奉皇后教祔成宗于庙忠良争曰嗣皇帝祔先帝于庙礼也皇后教非制也阿古台怒曰制自天降耶汝不畏死敢沮大事忠良竟不从既而仁宗以太弟奉皇太后至自怀州潜与密谋诛阿古台等武宗即位进大司徒延佑四年卒追封赵国公谥忠献

△靳德进

靳德进其先潞州人后徙大名父祥师事陵州郝温兼善星历金末兵乱与母相失母悲泣而盲祥访得之舐其目百日复明人称其孝初刘敏行省燕京辟祥寘幕下时藩帅得擅生杀无辜者多赖祥以免卒谥安靖德进材辨幼读书通大义父歿益自刻励尤精星历之学世祖命太保刘秉忠选太史官属德进以选授天文星历卜筮三科管勾凡交蚀躔次六气修诊

所言休咎辄应时因天象进规谏多所裨益累迁秘书
监掌司天事从征叛王纳颜揆日时率中机会诸将欲剿绝其党德进独陈天道好生请
缓师以待其降又奏言叛者多惑于妖言敢谋不轨宜
括天下术士设阴阳教官使训学者仍岁贡一人帝从之着为令成宗以皇孙抚军北边
遣德进从行凡攻战取胜皆豫克期日无不验者成宗
即位历陈世祖进贤讷谏咨询治乱之原帝嘉纳之授昭文馆大学士知太史院领司天
台事都城以获苦廩或请以瓦易之帝以问德进对曰
若是役骤兴物必踊贵民力几何臣愚未见其可议遂寝敕中书自今凡集议政事必使
德进预焉寻以病丐闲仁宗时在东宫特令中书加官
以留之会车驾自上京还召见白海行宫授中书右丞议通政院事仁宗即位命领太史
院事力辞不允以疾卒追封魏国公谥文穆

△张康

张康字汝安号明远潭州湘潭人早孤力学旁通术数宋亡隐衡山中至元十四年
世祖遣崔彧祀南岳就访隐逸彧兄湖南参政崔斌言
康学通天地理彧还具以闻遣使召康与斌偕诣上都见帝亲试所学皆验授著作郎
以内嫔松夫人妻之十八年康上奏岁壬午太一理艮
宫主大将客参将囚直符治事正属燕分来春京城当有盗兵事干将相明年三月盗果
起京师杀阿哈玛特等帝欲征日本命康推之奏曰南
国甫定民力未苏且今年太一无算举兵不利遂罢兵尝赐太史院钱分千贯以与康不
受众服其廉久之乞归田里优诏不许终秘书监丞

△李杲

李杲字明之镇人也世以货雄乡里幼岁好医易人张元素以医名燕赵闲捐千金
从之学不数年尽传其业其学于伤寒痼眼目病为
尤长北京人王善甫为京兆酒官病小便不利目睛凸出腹胀如鼓膝以上坚硬欲裂饮
食不下甘淡惨泄之药皆无效杲视之曰病深矣是气
不化也启玄子云无阳者阴无以生无阴者阳无以化甘淡渗泄皆阳药独阳无阴其欲
化得乎明日以羣阴之剂投之不再服而愈西台掾萧
君瑞二月中病伤寒发热医以白虎汤投之面黑如墨本证不复见杲诊之曰此立夏前
误用白虎汤之过白虎汤大寒非行经之药止能寒腑
藏不善用之则伤寒水病隐于经络之闲或更以大热药掇之以苦阴邪则他证必起有
温药之升阳行经者吾用之如其言而愈冯叔献之侄
栎年十五岁病伤寒目赤而顿渴脉七八至医欲以承气汤下之已煮药而杲适从外来
切脉大骇曰几杀此儿脉八九至是热极也脉之而从
按之不鼓诸阳皆然此传而为阴证矣令持姜附来吾当以热因寒用法处之药未就而

病者爪甲变顿服入两汗寻出而愈陕帅郭巨济病偏
枯二指着足底不能伸杲以长针刺骹内深至骨而不知痛出血一二升其色如墨且谬
刺之如此者六七服药三月病良已当时皆以神医目
之所著书今多传于世云 【按畿辅通志载杲所著有东垣十书】

△孙威 【孙拱】

孙威浑源人幼沈鸷有巧思授云中义军千户以骁勇称善为甲尝以意制蹄筋翎
根铠以献太祖亲射之不能彻大悦授顺天诸路甲匠
都总管从攻邠干等州突战不避矢石帝劳之曰汝纵不自爱独不为吾甲胄计乎威每
从战伐恐民有横被屠戮者辄以搜筒工匠为名多所
全活卒赠神川郡公谥忠惠子拱初为监察御史后袭父职巧思如其父尝别制造盾其
法张则为盾敛则合而易持世祖以为古所未有丞相
巴延南征以甲胄不足诏诸路集匠民分制拱董顺天河闲甲匠先期毕工具象狮虎豹
异兽之形各殊其制大德九年累官益都路总管卒赠
神川郡公谥文庄

△阿喇卜丹

阿喇卜丹回回氏西域穆萨里人至元八年世祖征炮匠于宗王额呼布格王以阿
喇卜丹伊斯玛音应诏二人驰驿至京师给官舍命首
造大炮竖于五门前试之大军渡江平章阿尔哈雅遣使求炮手命阿喇卜丹往破潭州
静江等郡悉赖其力授回回炮手军匠副万户皇庆元
年卒

△伊斯玛音

伊斯玛音回回氏西域实喇人与阿喇卜丹同征至京从攻襄阳未下伊斯玛音相
地势置炮于城东南隅重一百五十斤机发声震天地
所击无不摧陷入地深七尺许宋安抚吕文焕惧以城降以功授回回炮手总管未几卒
子布伯袭职 【按大学衍义补云此造炮之始世因
目曰襄阳炮考唐书李光弼作炮飞巨石一发辄毙二十余人疑即此制度】

△阿尔尼格 【刘元】

阿尔尼格尼博罗国人也其国人称之曰巴勒布幼敏悟异凡儿稍长诵习佛书期
年能晓其义长善画塑及铸金为像中统元年命帝师
帕克斯巴建黄金塔于吐蕃尼博罗国选匠百人往成之阿尔尼格年十七请行帝师奇
之命监其役明年塔成请归帝师勉以入朝乃祝发受
具为弟子从帝师入见帝视之久问曰汝来大国得无惧乎曰圣人子育万方子至父前
何惧之有又问汝来何为曰臣家西域奉命造塔吐蕃
二载而成见彼土兵难民不堪命愿陛下安辑之故不远万里为生灵来耳又问汝何所

能曰臣以心为师颇知画塑铸金之艺帝命取明堂针
灸铜像示之曰此安抚王楫使宋时所得岁久阙坏汝能新之乎曰臣虽未尝为此请试
之像成关鬲脉络皆备金工叹其天巧莫不愧服凡两
京寺观之像多出其手为七宝鍱铁法轮车驾行幸用以前导原庙列圣御容皆织锦为
之图画弗及也授人匠总管诏返初服领将作院事宠
遇无与为比卒赠开府仪同三司太师凉国公上柱国谥敏慧有刘元者字秉元苏州宝
坻人始为黄冠帅事青州把道录传其艺非一后从阿
尔尼格学西天梵相亦称绝技当世祖时凡两都名刹塑土范金转换为佛像出元手者
神思妙合天下称之其上都三皇尤古粹识者谓其造
意得三圣人之微仁宗两赐宫女为妻命以官长其属行幸必从尝敕元非有旨不许为
人造他神像后大都南城作东岳庙元为造仁圣帝像
巍然有帝王度其侍臣像乃若忧深思远者始元欲作侍臣像久之未措手适阅秘书图
画见唐魏征像矍然曰得之矣非若此莫称为相臣者
遽走庙中即日成之观者咸叹异焉其所为西番佛像多秘人罕得见者官至昭文馆大
学士博换者幔帛士偶上而髹之已而去其土髹帛俨
然成像云

△帕克斯巴 【丹巴 必噜匝纳实哩】

帕克斯巴者土番萨斯嘉人足克袞氏也 【按书史会要作帕克斯巴土波国人】
相传自其祖多尔济以其法佐国主霸西海者十余
世帕克斯巴生七岁诵经数十万言能约通大义或人号为圣童少长又称曰巴喇密特
年十五谒世祖于潜邸与语大悦日见亲礼及即位尊
为国师授玉印命制蒙古新字其字仅千余其母凡四十有一其相关纽而成字者则有
韵关之法其以二合三合四合而成字者则有语韵之
法而大要则以谐声为主至元六年新字成诏颁示天下加号大宝法王十一年请告西
还留之不可乃以其弟琳沁嗣建大护国仁王寺居焉
十六年帕克斯巴卒赐号皇天之下一人之上宣文辅治大圣至德普觉真智佑国如意
大宝法王西天佛子大元帝师命印造其新译戒本五
百部颁降诸路僧人十九年造帕克斯巴舍利塔延佑五年更建殿于大兴教寺给钞万
锭 【自命印造至此据世祖仁宗本纪】 至治初诏
郡县建庙通祀其制视文庙有加泰定元年颁绘像于各行省为之塑像琳沁嗣为帝师
凡六岁至元十九年卒达尔玛巴拉实哩嗣二十三年
卒伊特札实琳沁嗣三十一年卒策喇实巴鄂尔嘉勒嗣元贞元年赐玉印文曰大元帝
师统领诸国僧尼中兴释教之印大德七年卒明年以
年扎克喜勤灿嗣又明年卒多尔济巴勒嗣皇庆二年卒桑尔节扎实嗣延佑元年卒二

年以恭噶诺尔布喇实嘉勒灿巴勒藏布嗣玉治三年卒班珠尔戩藏嗣泰定二年卒恭噶伊实巴锤喇实嘉勒灿巴勒藏布嗣赐玉印降玺书谕天下其年卒天历二年以年扎克策喇实嗣帕克斯巴时又有国师丹巴者一名袞扎克喇实西番托果斯塔玛人幼从西天竺果达木实哩传习梵秘得其法中统闲帕克斯巴荐之时怀孟大旱世祖命祷雨立下又尝呪饭投龙湫顷之奇花异果上尊涌出波面取以上进世祖大悦至元末以不容于时相僧格力请西归既复召还谪置潮州时枢密副使页特密实镇潮州其妻得奇疾丹巴以所持数珠加其身即愈又尝为页特密实言异梦及已还朝期后皆验成宗疾祷之遄愈诏分御前校尉十人为之导从成宗北巡命丹巴以象舆前导过云州语诸弟子曰此地有灵怪恐惊乘舆当密持神呪以厌之未几风雨大至象咸震惧惟幄殿无虞大德七年卒【按辍耕录云大德闲德寿太子病癡薨卜鲁罕皇后遣人问之曰我夫妇崇信佛法以师事汝止有一子宁不能延其寿耶笑曰佛法犹如灯笼风雨至乃可蔽烛尽则无如之何矣】皇庆闲追号大觉普惠广照无上帝师其后又有必嚕匝纳实哩者初名嘉勒斡密迪哩北庭噶玛拉国人自幼熟辉和尔及西天书长能贯通三藏暨诸国语大德六年春旨从帝师受戒于广寒殿代帝出家更赐今名皇庆中命翻译诸梵经典授光禄大夫是时诸番朝贡表笺文字无能识者怕令必嚕匝纳实哩译进尝有以金刻字为表者帝遣视之必嚕匝纳实哩随取案上墨汁涂金叶审其字命左右执笔口授表中语及使人名字与贡物数上之明日有司阅其物色与所赉重译书无少差者众服其博识竟莫测其所从授授开府仪同三司仍赐三台银印兼领功德使司事厚其禀饷俾得以养母焉至治三年特授沙津阿古齐且命为诸国引进使至顺二年加号普觉圆明广照弘辩三藏国师三年与安西王子伊嚕特穆尔等谋为不轨坐诛其所译经汉字则有楞严经西天字则有大乘庄严宝度经干陀般若经大涅槃经称赞大乘功德经西番字则有不思议禅观经有司籍其家得人畜土田金银货贝钱敝邸舍书昼玩器以及妇人七宝装具价直巨万云元起朔方固已崇尚释教及得西域世祖以其地险远民犷悍难制思因其俗以柔服其人乃于郡县土番地设官分职尽领之于帝师初立宣政院正使而下必以僧为副使帝师所辟举而总其政于内外帅臣以下亦必僧俗并用军民皆属统理于是帝师之命与诏敕并行于西土百年之闲朝廷所以敬礼而尊信之者无所不用其至正衙朝会百官班列而帝师亦或专席于坐隅每帝即位之始降诏褒答必敕章佩监络珠为字【按辍耕录云累朝践

阡必布告天下惟诏西番者以粉书其字于青缯而
绣以白绒网以真珠其御宝则纯用珊瑚遣使张于帝师所居处所载较详】 其未至而
迎之则中书大臣驰驿累百骑以往所过供亿送迎比
至京师则敕大府假法驾半杖以为前导诏省台院官以及百司庶府并服银鼠济逊用
每岁二月八日迎佛威仪往迓且命礼部尚书郎中专
督迎接及其卒而归葬舍利又命百官出郭祭饯大德九年专遣平章政事特穆尔乘传
护送赙金五百两银千两币帛万疋钞三千锭皇庆二
年加至赙金五千两银一万五千两锦绮杂彩共一万七千匹其昆弟子姓往来有司供
亿无乏泰定闲以帝师弟恭噶尹实戡将至诏中书持
羊酒郊劳而其兄索诺木藏布遂尚公主封白兰王其弟子之号司空司徒国公者前后
相望为其徒者怙势恣睢气焰熏灼延于四方为害不
可胜言有嘉木扬喇勒智者世祖用为江南释教总统发掘故宋诸陵及其大臣冢墓凡
一百一所戕杀平民受献美女宝物无算且壤民田亩
盗取金银珠玉动以数万计他所藏匿未露者弗论也又至大元年上都开元寺西僧强
市民薪民诉诸留守李璧璧方询其由僧已率党持白
梃突入公府隔案引璧发摔诸地捶朴交下拽归闭诸空室久乃得脱奔诉于朝遇赦以
免二年复有僧龚柯等十八人与诸王哈喇巴尔妃争
道拉妃堕车殴之事闻诏释不问而宣政院臣方取旨凡殴西僧者截其手詈之者断其
舌赖仁宗居东宫亟奏寝其令泰定二年西台御史李
昌言尝经平凉府静会定西等州见西番僧佩金字圆符络绎道途驰骑累百传舍至不
能容则假馆民舍迫逐男子奸污妇女奉元一路自正
月至七月往返百八十五次用马至八百四十余匹较之诸王行省之使十多六七驿户
无所控诉台察莫得谁何且国家之制圆符本为边防
警报之虞僧人何事而辄佩之乞更正僧人给驿法且令台宪得以纠察不报延佑四年
宣徽使会每岁内廷佛事所供其费以斤数者用面四
十三万九千五百油七万九千酥二万一千八百七十密二万七千三百自至元三十年
闲醮祠佛事之目仅百有二大德七年再立功德司遂
增至五百有余又每岁必因好事奏释轻重囚徒以为福利虽大臣如阿里阡帅如必实
呼勒等莫不假是以道其诛宣政院参议李良弼受赇
鬻官直以帝师言纵之其余杀人之盗作奸之徒夤缘幸免者多至或取空名宣敕以为
布施而任其人可谓温矣虽岁举好事亦奚裨于享国
长久之道论者谓元之亡实亡于僧云若夫天下寺院之领于内外宣政院曰禅曰教曰
律则固各守其业惟所谓白云宗白莲宗者亦或通奸
利焉

△邱处机

邱处机登州栖霞人自号长春子 【按辍耕录云字通密祖父业农世称善门元史本传不载】 年十九为全真学于宁海之昆仑山与马钰谭处端刘处玄王处一郝大通孙不二同师重阳王真人重阳一见大器之金宋之季俱遣使来召不赴岁己卯太祖自奈曼命近臣彻伯尔刘仲禄持迺求之处机一日忽语其徒使促装曰天使来召我我当往翌日二人至处机乃与弟子十八人同往见焉明年宿留山北先驰表谢拳拳以止杀为劝又明年趣使再至时方西征日事攻战处机每言欲一天下者必不嗜杀人及问为治之方对以敬天爱民为本问长生久视之道告以清心寡欲为要太祖深契其言命左右书之且以训诸皇子于是锡之虎符副以玺书不斥其名惟曰神仙 【按辍耕录云爵大宗师掌管天下道教元史本传不载】 一日雷震太祖以问处机对曰雷天威也人之罪莫大于不孝不孝则不顺乎天故天威震动以警之陛下宜畏天威明孝道以导有众太祖善之时经丧乱民罹俘戮无所避处处机还燕使其徒持牒招求于大河南北由是被掠为奴者得复为良与滨死而得更生者毋虑二三万人中州人至今称道之岁乙酉荧惑犯尾其占在燕处机祷之果退舍丁亥又为旱祷期以三日雨当名瑞应已而亦验有旨改赐所居名长春宫六月浴于东溪越二日天大雷雨太液池水入东湖声闻数里鱼鳖尽去池遂涸而北口高岸亦崩处机汉曰山其摧乎池其涸乎吾将与之俱乎遂卒其徒尹志平等奉玺书袭掌其教四传至祈志诚居云州金阁山道誉甚着丞相安图尝过访之志诚告以修身治世之要安图感其言故自入相一以清静忠厚为主及罢还第退然若无与于世者后安图复被召再往决焉志诚曰昔与子同列者何人今同列者何人安图悟入见世祖辞曰臣昔为宰相人尚少幸不失陛下事者丞佐皆臣所师友今事臣者皆进与臣俱则臣之为政能有加于前乎世祖曰谁为卿言是对曰祈真人世祖叹异之其徒苗道一嗣全真教 【其徒何从续宏简录增】

△张宗演 【张留孙 吴全节 郦希诚 萧辅道 李居寿】

正一天师者始自汉张道陵其后四代曰盛来居信州龙虎山传至三十六代宗演当至元十三年世祖已平江南遣使召之至 【按世祖本纪至元十二年四月召四十代天师张宗演赴阙在未平宋以前传又作三十六代彼此互异】 命廷臣郊劳待以客礼及见语之曰昔岁己未朕次鄂渚尝令王一清往访卿父卿父报朕曰后二十年天下当混一神仙之言验于今矣因命坐赐宴特赐冠服命主领江南道教十八

年二十五年再八觐世祖尝命取其祖天师所传玉印宝剑观之二十九年卒子与棣嗣
三十一年入觐卒于京师元贞元年弟与材嗣时潮啮
盐官海盐两州为患特甚与材以术治之一夕大雨震电明日见有物鱼首龟形者砾于
水裔潮患遂息大德五年召见于上都幄殿八年授正
一教主主领三山符录武宗初入觐特授金紫光禄大夫封留国公延佑三年卒四年子
嗣成嗣时有张留孙者字师汉信州贵溪人少时入龙
虎山为道士至元十三年从宗演入朝世祖与语称旨遂留侍阙下世祖尝亲祠幄殿皇
太子侍忽风雨暴至众骇惧留孙祷之立止又尝次日
月山顺圣皇后得危疾亟召留孙请祷既而后梦有朱衣长髯从甲士导朱辇白兽行草
闲觉而异之以问留孙对曰甲士导辇兽者臣所佩法
箓中将吏也朱衣长髯者汉祖天师也行草闲者春时也中宫之疾其及春而瘳乎后命
取所事画像进观之果如梦中所见帝大悦号为上卿
命尚方铸宝剑以赐建崇真宫于两京俾居之专掌祠事十五年授玄教宗师特官其父
至江东道同知宣慰司事时天下大定世祖思与民休
息留孙待诏尚方因论黄老治道贵清净圣人在宥天下之旨深契帝意每岁 【此下至
祭斗皆据世祖本纪增】 于长春寿宁二官命作醮
事奏赤章于天或五七昼夜又尝命祀星祭斗大德中加号玄教大宗师同知集贤院道
教事武宗立升大真人知只贤院位大学士上寻加特
进进讲老子推明谦让之道及仁宗即位犹恒诵其言且谕近臣曰累朝旧德仅余张上
卿尔进开府仪同三司加号辅成赞化保运玄教大宗
师英宗初命修法事于崇真宫至治元年卒天历元年追赠道祖神应真君其徒吴全节
嗣全节字成季 【按书史会要云号闲闲】 饶州安
仁人年十三学道龙虎山后从留孙至京师成宗每幸上都命给庐帐车马衣服廩饩俾
侍行幄大德十一年授玄教嗣师既嗣职制授特进上
卿玄教大宗师崇文弘道玄德真人总摄江淮荆襄等处道教知集贤院道教事玉印一
银印二并授之全节尝代祀岳渎还成宗问曰卿所过
郡县有善治民者乎对曰臣过洛阳太守卢摯平易无为民以安靖成宗曰吾忆其人即
日召拜集贤学士成宗崩仁宗至自怀孟有狂士以危
言讦翰林学士阎复者事叵测全节力为言于李孟孟以闻仁宗意解复致仕去当时以
为朝廷得敬大臣体而不以口语伤贤者全节盖有力
焉泰定三年 【此下至诸山据泰定帝纪增】 命修醮事于龙虎三茅阁阜诸山生平
好与贤士大夫交其推轂善类振穷周急颇有侠气卒
其徒夏文泳嗣元时真大道教者金季道士刘德仁所立也其教以苦节危行为要不妄
取于人不苟侈于己五传至酆希诚居燕京天宝宫见

知宪宗始名其教曰真大道授希诚太玄真人领教事至元五年世祖命其徒孙德福统辖诸路真大道又三传至张志清其教益盛授演教大宗师凝神冲妙玄应真人志清事亲孝尤耐辛苦制行坚峻东海珠牢山旧多虎志清往结茅其上虎皆避徙然颇为人害志清曰是吾夺其所也遂去之后居临汾地大震城郭庐舍摧压死者不可胜计独志清所居裂为二无少损焉朝廷重其名给驿致之掌教事志清舍传徒步至京师深居简出时人罕识其面竟画为图以相传焉又有太一教者始金天眷中道士萧抱珍传太一三元法策之术因名其教曰太一四传至萧辅道世祖在潜邸闻其名召至和琳赐对称旨留居宫邸以老请授弟子李居寿掌其教事至元十一年建太一宫于两京命居寿居之领祠事且禋祀六丁以继太保刘秉忠之法十三年赐太一掌教宗师印十六年十月辛丑以月值元辰敕居寿作祠醮奏赤章于天凡五昼夜事毕敕自明年正日朔建醮长春宫凡七昼夜岁如例以居寿为主焉

钦定续通志卷五百八十五

●钦定续通志卷五百八十六 佞幸传一

佞幸传 【一】

（臣）等谨按佞幸之徒便辟侧媚巧窃事权阶厉召乱与女宠宦官同祸通志特立佞幸传盖沿史汉例为之考唐书无佞幸传今取张易之昌宗二传补八五代史辽史并有伶官而无佞幸今取敬新磨罗衣轻等改入以符郑志之例宋金二史采诸旧文元史则仍其阙焉

唐

五代

○唐

张易之 【昌宗】

张易之 【张昌宗】

△张易之 【张昌宗】

张易之尚书左仆射行成族子美姿容幼以门荫仕累迁尚乘奉御既冠通音技武后时太平公主荐其弟昌宗得侍昌宗白进易之即召见悦之兄弟皆幸出入禁中傅粉衣纨盛饰自喜即日拜昌宗云麾将军行左千牛中郎将易之司卫少卿赐甲第帛五百段给奴婢橐驼马牛充八之寻进拜昌宗银青光禄大夫追赠父雍州司户希臧为襄州刺史母韦母臧并封太夫人不旬日贵震天下诸武兄弟及宗楚客等争造门伺望颜色亲执轡捶号易之为五郎昌宗六郎又加昌宗右散骑常侍 【旧书作左散骑常侍】 后每燕集则二张诸武杂侍擗搏争道为

笑乐或嘲诋公卿淫蛊显行无复羞畏后思掩丑声乃诏昌宗即禁中论著引李峤张说宋之问富嘉谟徐彦伯等二十有六人误三教珠英累加昌宗司仆卿易之麟台监权势震赫皇太子相王请封昌宗为王后不听迁春官侍郎封邺国公易之恒国公实封各三百户后既春秋高易之兄弟颛政邵王重润与永泰郡主窃议皆得罪缢死御史大夫魏元忠劾奏二张曩反为所构诬元忠结太子为耐久明引凤阁舍人张说为证翌日庭辩皆不讎然元忠犹窜岭南说亦被逐其后易之等益自肆奸赃狼藉御史台劾之乃诏宗晋卿李承嘉桓彦范袁恕己参鞠彦范等奏昌宗兄弟赃四百万法当解职昌宗大言曰臣有功于国不应免官后问宰相内史令杨再思曰昌宗主炼丹剂陛下饵之而验功最大者也即诏释之归罪其兄昌仪同休皆贬官长安末后久疾居长生院昌宗恐后不讳祸且及日夜引支党谋为不轨道路皆知之至有榜其事于衢左者御史中丞宋璟亟请按治敕司刑卿崔神庆问状神庆妄奏昌宗应原璟执奏当斩后终不许神龙元年张柬之崔玄暉等率羽林兵迎皇太子入诛易之昌宗于迎仙院及其兄昌期同休从弟景雄皆梟首天津桥士庶欢踊齎取之一夕尽坐流贬者数十人

○五代

敬新磨 周匝 景进 史彦琼 郭从谦

敬新磨

周匝

景进

史彦琼

郭从谦

△敬新磨

敬新磨者以善俳事唐庄宗庄宗既好俳优能度曲为优名自目曰李天下伶人由此用事常猎于中牟践民田县令当马切谏庄宗怒将杀之新磨率诸伶擒县令至马前责之曰汝为县令独不知吾天子好猎邪奈何纵民稼穡以供税赋何不饥汝县民空此地以备吾天子驰骋汝罪当死因前请亟行刑诸伶共倡和之庄宗大笑县令乃得免新磨常奏事殿中一犬逐之新磨倚柱而呼曰陛下毋纵儿女嚙人庄宗大怒弯弓将射之新磨曰陛下无杀臣臣与陛下为一体杀之不祥庄宗问故对曰陛下开国改元同光天下皆谓陛下同光帝且同铜也若杀敬新磨则同无光矣乃释之时诸伶独新磨尤善俳其语最着

△周匝

周匝庄宗嬖伶也胡柳之战为梁人所得其后灭梁入汴周匝谒于马前庄宗得之喜甚周匝对曰身陷仇人而得不死者教坊使陈俊内园栽接使储德源之力也愿乞二州以报此两人庄宗皆许以为刺史郭崇韬谏曰陛下所与共取天下者皆英豪忠勇之士而封赏未及今以伶人为刺史恐失天下心因格其命踰年而伶人屡以为言庄宗谓崇韬曰吾已许周匝矣使吾惭见此二人公言虽正然当为我屈意行之卒以俊为景州刺史德源为宪州刺史

△景进

景进与史彦琼郭从谦庄宗时并见亲幸而进尤居中用事常出入宫掖侮弄搢绅军机国政皆与参决羣臣愤嫉莫攻言或反相附托四方藩镇货赂交行庄宗遣进等出访民闲事无大小皆以闻每进奏事殿中左右皆屏退三司使孔谦兄事之呼为八哥庄宗初入洛居唐故宫室嫔御未备遣进等采邺美女千人以充后宫进等缘以为奸军士妻女因而逃逸者数千人魏王继岌已破蜀刘皇后听官者谗者遣继岌贼杀郭崇韬崇韬素嫉伶人常裁抑之伶人由此皆乐其死皇弟存又崇韬之壻也进谗于庄宗曰存又且反为妇翁报仇乃因而杀之朱友谦先以梁河中降晋及庄宗入洛伶人皆求赂于友谦友谦不能给进乃谗友谦曰崇韬且诛友谦不自安心反宜并诛之于是及其将五六人皆族灭之天下不胜其免进官至银青光禄大夫检校左散骑常侍兼御史大夫上柱国

△史彦琼

史彦琼者为武德使居邺都魏博六州之政皆决彦琼自留守王正言而下俱俛首承事之时郭崇韬以无罪见杀天下未知其死也见京师杀其诸子因相传崇韬杀魏王继岌而自主于蜀矣以故族其家邺人闻之方疑已而朱友谦又见杀友谦子建徽为澶州刺史诏彦琼杀之彦琼夜半驰出城邺人因惊传曰刘皇后怒崇韬之杀继岌也已弑帝而自立急召彦琼计事邺都大恐贝州人有来邺者传此语以归戍卒皇甫晖闻之遂劫赵在礼作乱在礼至馆陶邺都巡检使孙铎见彦琼求兵御贼彦琼不肯与贼至彦琼以兵登北门闻贼呼声大恐弃兵遁归京师在礼之得入于邺以成其叛乱者由彦琼启而纵之也

△郭从谦

郭从谦优名门高以尝有军功为从马直指挥使拜崇韬为叔父又为皇弟存又养子崇韬死存又见囚从谦置酒军中愤然流涕称二人冤时从马直军士王温宿卫禁中夜谋乱事觉被诛庄宗戏从谦曰汝党存又崇韬负我又教王温反复欲何为从谦恐退而激其军士曰帝以

王温故俟破邳尽坑尔曹军士信之皆欲为乱李嗣源兵反向京师庄宗东幸汴州而嗣源先入庄宗至万胜不得进军士离散复东幸汜水谋扼关以拒四月丁亥从贺黄甲马军阵于宣仁门步军阵于五凤门以俟庄宗入食内殿从谦自营中露刃注矢驰攻兴教门与黄甲军相射庄宗闻乱率诸王卫士击之乱兵纵火焚门缘城而入庄宗击杀数十百人乱兵从楼上射帝帝伤重踏于绛霄殿廊下皇后诸王左右皆奔走至午时帝崩五坊人善友聚乐器而焚之嗣源入洛得其骨葬新安之雍陵以从谦为景州刺史已而杀之 【按明宗入洛兵力甚盛无难诛一从谦乃反宠以刺史既久而后杀之盖明宗方幸从谦先为举事是以加之宠秩及事已定而畏忌物议始祖晋惠杀里克之术以求解于众口非如胡寅畏其兵众难图之说也伏读通鉴辑览 御批责明宗于从谦初无杀人之心而审事度势知为清议所不容姑藉此塞谤诚为千古不易之论今录识之】

钦定续通志卷五百八十六

●钦定续通志卷五百八十七 佞幸传二

佞幸传 【二】

○宋

弭德超 侯莫陈利用 赵赞 【郑昌嗣】 王黼 朱勔

王继先 曾觌 【龙大渊】 张说

王抃 姜特立 【谯熙载】

弭德超

侯莫陈利用

赵赞 【郑昌嗣】

王黼

朱勔

王继先

曾觌 【龙大渊】

张说

王抃

姜特立 【谯熙载】

△弭德超

弭德超沧州清池人给事晋邸太宗即位补供奉官历镇州驻泊都监初太宗念边戍劳苦月赐士卒银谓之月头银德超乘闲言曰枢密使曹彬秉政岁久得士心臣从塞上来闻士卒言月头银曹公所致微曹公我辈馁死矣

又巧诬彬他事帝颇疑之出彬为天平军节度以德超为宣徽北院使与王显并秉枢密副使德超潜曹彬事成期得枢密使乃为副使又柴禹锡与德超官同先授班在其上居常怏怏一日诟显及禹锡曰我言国家大事有安社稷功止得钱许大官汝等何人反在我上又曰帝无守执为汝辈所眩惑显告之太宗怒命膳部郎中滕中正就鞫具伏诏夺官职配琼州死

△侯莫陈利用

侯莫陈利用益州成都人幼得变幼之术太平兴国初卖药京师言黄白事以惑人枢密承旨陈从信白于太宗即日召见试其术颇验授殿直迁崇仪副使雍熙中累迁郑州团练使前后赐与甚渥依附者颇获进用遂横恣无复畏惮其居处服玩皆僭乘輿人畏之不敢言会赵普再入中书廉知杀人及诸不法尽奏之太宗遣近臣案得奸状欲贷其死普固请曰陛下不诛是乱天下法法可惜此何可惜遂下诏除名配商州禁锢初籍其家俄诏还之赵普恐其复用因奏其不法事又语言不逊指斥乘輿太宗怒令中使禽杀之

△赵赞 【郑昌嗣】

赵赞并州人性险谲辩给好言利害初为军小吏与都校不协因诬营中谋叛刘继元屠之无遗类稍署赞右职太原平隶三司为走吏又许本司补殿直太宗颇任之迁供奉官合门祗候提举京西陕西数州钱帛发摘甚众又自乞捕盗至永兴得兵士盗钱二百欲磔诸市知府张齐贤夺而释之太宗命御史台按问停赞官数月复令专钩校三司簿令赞自选吏十数为耳目专伺中书枢密及三司事乘闲白之太宗以为忠中外益畏其口时又有郑昌嗣者宣州人亦起三司役吏稍迁侍禁奉使西川回奏在官不治者数十人太宗嘉其直会置杂买务使昌嗣监之昌嗣乞着籍便殿门许非时入奏与赞相表里累迁至西上合门副使盐铁都监二人既得联事益横恣不法太宗颇知之以问左右皆莫敢言至道元年上元节京城张灯太宗以上清宫成临幸赞与昌嗣邀其党数人携妓乐登宫中玉皇阁饮宴至夜分掌舍宦者不能止以其事闻太宗大怒诏夺赞官配隶房州即日遣之昌嗣黜唐州团练副使数日并赐死于路

△王黼

王黼字将明开封祥符人美风姿目睛如金寡学术多智善佞中崇宁进士第调相州司理参军编修九域图志何志同领局台其人言于父执中荐为校书郎迁左司谏张商英在相位寢失帝意遣使以玉环赐蔡京于杭黼觇知之数条奏京所行政事并击商英京复相德其助已

不两岁擢御史中丞黼因执中进酒欲去执中使京颛国遂疏其二十罪不听俄兼侍读
进翰林学士京与郑居中不合黼复内交居中京怒徙
为户部尚书时大农方乏将以邦用不给为之罪既而诸班禁旅賚犒不如期诣左藏鼓
噪黼闻之即诸军揭大榜期以某月某日众读榜皆散
京计不行还为学士进承旨遭父忧闋五月起复宣和殿学士赐第昭德坊故门下侍郎
许将宅在左黼父事梁师成称为恩府先生倚其声焰
逼许氏夺之拜尚书左丞中书侍郎宣和元年拜特进少宰由通议大夫超八阶宋朝命
相未有前比也别赐城西甲第徙居之日导以教坊乐
供张什器悉取于官宠倾一时蔡京致仕黼阳顺人心悉反其所为四方翕然称之既得
位肆为邪侈僭儼禁省诱夺徽猷阁待制邓之纲妾反
以罪窜之纲岭南加少保太宰请置应奉局自兼提领中外名钱皆许擅用竭天下财力
以供费官吏承望风旨凡金方水土珍异之物悉苛取
于民进帝所者不能什一余皆入其家御史陈过庭京西转运使张汝霖皆以论黼徙远
郡睦寇方腊起黼方文太平不以告蔓延弥月攻破六
郡及贼平犹以功转少傅进少师初帝遣童贯征腊全付以东南事谓之曰如有急即以
御笔行之贯至吴见民困花石之扰众言贼不亟平坐
此耳贯即命其僚董耘作罪己诏且有罢应奉局之令吴民大悦贯平贼归黼言于帝曰
腊之起由茶盐法而贯归过陛下帝怒贯谋起蔡京以
闲黼黼惧时朝廷已纳赵良嗣之计始女真共图燕大臣多不以为可黼曰南北虽通好
百年然自累朝以来彼之慢我多矣兼弱攻昧武之善
经也今弗取女真必强中原故地将不复为我有帝以其言遂复治兵然以兵屡贯黼复
折简通诚于贯曰太师若北行愿尽死力黼于三省置
经抚房专治边事不关之枢密括天下丁夫计口出算得钱六千二百万缗竟买空城五
六归而奏凯率百僚称贺优进太傅封楚国公许服紫
花袍骑从仪物几与亲王等始辽使至率迂其驿程燕犒不示华侈及黼务于欲速令女
真使以七日自燕至都每张宴辄陈尚方锦绣金玉理
宝以夸富盛由是女真益生心 【按王黼令金使速至且侈夸富盛虽未为得而金之生
心毕竟不系乎此盖是时会兵灭辽宋实自取唇亡
齿寒之祸金之生心于宋非特金玉锦绣而已也即待金使迂程示俭如待辽使亦岂能
消弭后患令金骑之不至哉伏读通鉴辑览御批谓史
家以使至之速张宴之侈为受病根由所见怯而且迂诚为千古至论今附识】 黼每陪
扈曲宴亲为俳优鄙贱之役以献笑取悦钦宗在东宫
恶之郢王楷有宠黼为阴画夺宗策皇孙谔为节度使崇国公黼谓但当得观察使召官
臣耿南仲使代草东宫辞谔官奏竟夺之欲以是撼摇

东宫也帝遇之日隆名其所居闾曰得贤治定为书宠光亭载赓堂凡七榜一日妄言有玉芝产堂柱乘輿临观之梁师成与连墙穿便门往来帝始悟其交结状由是黜眷顿息寻命致仕钦宗受禅黜惶骇入贺合门以帝旨不纳金兵入汴不俟命载其孥以东诏贬为崇信军节度副使籍其家吴敏李纲请诛黜事下开封尹聂山山方挟宿怨遣武士蹶及之戕于民家取其首以献弃尸道旁帝以初即位难于诛大臣托言为盗所杀议者以天讨不正为失刑

△朱勔

朱勔苏州人父冲狡狴有智数家本贱微佣于人梗悍不驯抵罪鞭背去之旁邑乞贷遇异人得金及方书归设肆卖药病人服之辄效远近辐凑家遂富因葺园圃结游客以致称誉始蔡京居钱塘过苏欲建僧寺阁计费巨万僧言必欲集此缘非朱冲不可京属郡守呼冲至冲愿独任居数日请京诣寺度地至则大木数千章积庭下京大惊阴器其能明年召还挟勔与俱以其父子姓名属童贯窜置军籍中皆得官徽宗颇垂意花石京讽勔语其父密取浙中珍异以进初致黄杨三本帝嘉之后岁岁增加至政和中始极盛舳舻相衔遍淮汴号花石纲置应奉局于苏指取内帑如囊中物每取以数十百万计延福宫艮岳成奇卉异植充牣其中勔擢至防御使东南部刺史郡守多出其门徐铸应安道【按东都事略作王安道与此异】王仲閔等济其恶豪夺于民土民家一石一木稍堪翫即领健卒直入其家用黄封表识未即取使护视之微不谨即被以大不恭罪及发行必彻屋抉墙以出民预是役者中家产悉破斲山辇石程督峭惨虽在江湖不测之渊必百计取之尝得太湖石高四丈载以巨舰役夫数千人所经州县有折水门桥梁凿城垣以过者既至赐名神运昭功石截诸道粮饷纲旁罗商船揭所贡暴其上篙工柁师倚势贪横陵辄州县道路以目广济卒四指挥尽充挽士犹不足京始患之从容言于帝乃抑其太甚者禁用粮纲船戒伐冢毁室凡十余事听勔与蔡攸等六人入贡余进奉悉罢自是勔小戢既而欲广所居直苏市中孙老桥称诏凡桥东西四至坏地室卢悉充赐子合数百家期五日尽徙郡史逼逐民嗟噓于路遂于私室建神霄殿奉青华帝君像其中监司都邑吏朔望皆拜庭下命士至辄朝谒然后通刺诣勔园池拟禁籞服饰器用上僭乘輿又托辄舟募兵数千人拥以自卫流毒州郡者二十年方腊起以诛勔为名童贯出师承帝旨尽罢去花木进奉帝又黜勔父子弟侄在职者民大悦然寇平勔复得志声焰熏灼袤人秽夫候门奴事不附者旋踵罢去时谓东南小朝廷帝末年益亲任之居中白

事传达帝旨略如内侍进见不避宫嫔历隐州观察使庆远军承宣使燕山奏功进拜宁远军节度使一门尽为显官驺仆亦至金紫天下扼腕靖康之难欲为自全计仓卒拥上皇南巡且欲邀至其第钦宗用御史言放归田里凡由勳得官者皆罢籍其货财田至三十万亩言者不已窜之衡州徒韶州循州遣使即所至斩之

△王继先

王继先开封人奸黠善佞建炎初以医得幸其后寢贵宠至开州团练使寻以覃恩改授武功大夫给事中富直柔再驳命乃寢既而特授荊州防御使太后有疾继先珍视有劳特补其子悦道为合门祇候寻命继先主管翰林医官局力辞时继先用事中外切齿乃阳乞致仕以避人言诏迁秩二等累迁奉宁军承宣使特封其妻郭氏为郡夫人继先遭遇冠绝人臣诸大帅承顺下风莫敢少忤秦桧使其妻特诣之叙拜兄弟表里引援迁昭庆军承宣使富埒王室子弟通朝籍总戎寄姻戚党与盘据要途数十年闲无能摇之者金兵将至刘锜请为战备继先乃言新进主兵官好作弗靖若斩一二人和好复固帝不恠曰是欲我斩刘锜乎侍御史杜莘老劾其十罪大略谓继先广造第宅占民居数百家夺良家妇女为侍妾镇江有娼妙于歌舞矫御前索之渊圣成丧举家燕饮令妓女舞而不歌谓之哑乐自金使来日辇重宝之吴兴为避走计阴养恶少私置兵甲受富民金荐为合州县大狱以赂解免诬姊奸淫加之黥隶又于诸处佛寺建立生祠此其大者其余擢发未足数也奏入诏继先福州居住其子及孙并勒停放还良家子为奴婢者百余人籍其货以千万计鬻其田园及金银并隶御前激赏库其海舟付李宝天下称快淳熙八年卒

△曾覲 【龙大渊】

曾覲字纯甫其先汴人用父任补官绍兴三十年以寄班祇候与龙大渊同为建王府知客孝宗受禅大渊自左武大夫除枢密副都承旨而覲自武翼郎除带御器械干办皇城司谏议大夫刘度入对首言二人潜邸旧人待之不可无节因以京房石显事为比而大渊除知合门事覲除权知合门事度言臣欲退之而陛下进之何面目尚为谏官乞赐贬黜中书舍人张震缴其命至再出知绍兴府殿中侍御史胡沂亦论二人市权既而给舍金安节周必大再封还录黄时张焘新拜参政亦欲以大渊覲决去就力言之帝不纳焘辞去遂以内祠兼侍读刘度夺言职而二人仍知合门事必大格除目不下寻典祠二人除命亦寢未几以大渊为宜州观察使知合门事覲文州刺史权知合门皆兼皇城司羣臣

既以言二人得罪去自是覬与大渊势益张士大夫之寡耻者潜附丽之帝尝令大渊抚慰两淮将士侍御史王十朋言大渊衔命抚师有轻国体时又有内侍押班梁珂者三人表里用事及珂以罪出右正言裘茂良入对首论二人害政甚珂百倍愿特出威断并行罢去先是江浙大水诏侍从台谏陈阙政著作郎刘夙上封事曰陛下与覬大渊辈觴咏唱酬字而不名请严法守裁侥幸自宫掖近侍始茂良时为监察御史亦言水至阴其占为女宠为嬖佞为小人帝谕以二人皆潜邸旧人非近习比且俱有文学敢谏净杜门不出不预外事茂良再上疏言其奸邪疏入不报茂良待罪出知建宁府一日右史洪迈过参政陈俊卿曰闻将除右史迈迁西掖信乎俊卿曰何自得之迈以二人告俊卿奏之且以迈语质之帝前帝怒于是迁大渊为江东总管覬为淮西副总管中外快之寻改大渊浙东覬福建干道四年大渊死覬尚在福建帝怜欲召之以枢密刘珙谏止命遂寝既而覬垂满俊卿恐其入预请以浙东总管处之时覬已至近郊会虞允文使蜀还与俊卿同奏覬不可留帝然之未几以墨诏进覬一官为浙东观察使中书舍人缴还会汪大猷为贺金正旦使俾覬副之比还迁一秩而竟申浙东之命且戒合门吏趣朝辞覬由是怏怏去六年俊卿罢政覬以京祠召淳熙元年除开府仪同三司四年覬欲以文资官其子孙帝遣中使至省中具使相奏补法茂良时以参政行丞相事遽以文武官各随本色荫补法缴进覬大怒遂荐户部员外郎谢廓然为侍御史首论茂良贬之英州覬前虽预事未敢肆至是责逐大臣士始侧目复位六年加覬少保醴泉观使时周必大草制有敬故在尊贤之上之语士论惜之覬用事二十年权倾中外始与龙大渊相朋大渊死与王抃甘升相蟠结文武要职多出其门叶衡自小官十年至宰相徐本中由小使臣积官至集英殿修撰奉内祠皆覬所进也陈俊卿守金陵过阙入见首言曾覬王抃招权纳赂荐进人才皆以中批行之士大夫公然趋附十已八九大非朝廷美事帝感悟遂稍疏覬覬忧恚七年疽发背死于是凡前论覬得罪者皆录赠之

△张说

张说开封人父公裕为和州防御使建炎初有军功说以父任为右职娶寿圣皇后女弟由是累迁知合门事干道初为都承旨加明州观察使七年除签书枢密使事命下朝论不平时起复刘珙同知枢密使耻与说同命力辞不拜左司员外郎张栻在经筵力言之中书舍人范成大不草词寻除说安远军节度使奉词归第不数月出知袁州八年复提举万寿观签书枢密使事侍御史李衡右正言王希吕交章论之起居

郎莫济不书录黄直院周必大不草答诏于是命权给事中姚宪书诏行下命翰林学士王曦草答诏未几曦宪并进秩而济必大等皆贬国子司业刘焯移书责宰相言说不当用即为言者所论出为江西转运判官于是说势赫然无敢撻之者九年说露章荐济必大二人皆予郡必大卒不出淳熙元年帝廉知说欺罔数事命侍御史范仲芑究之遂罢为太尉提举玉隆宫谏官汤邦彦又劾其奸赃乃降为明州观察使责居抚州七年卒于湖州帝犹念之诏复承宣使给事中陈岷缴之乃止

△王抃

王抃初为国信所小吏金人求海泗唐邓商秦地议久不决金兵至遣抃往使许以地易岁贡而还干道中积官至知合门事帝亲信之金使至议国书礼不合抃以宰执虞允文命给其使曰已牒知对境翌日金使乃进书帝以为可任遣诣荆襄点阅军马淳熙中兼枢密都承旨建议以殿步二司军多虚籍请各募三千人已而殿司辄捕市人充军号呼满道军士乘隙掠取民财帝专以罪殿前指挥使王友直而命抃权殿前司事时抃与曾觌甘升相结恃恩专恣其门如市著作郎胡晋臣尝论近习怙权帝令执政赵雄询其人雄惮抃等乃命晋臣舍抃指其位卑者数人以对晋臣竟外补校书郎郑鉴宗正丞袁枢因专对数为帝言帝犹未之觉也吏部侍郎赵汝愚亦力疏抃罪先是抃给金使取国书及使归金主诛之嗣岁金使至帝以德寿宫之命为离席受国书寻悔之淳熙八年金贺正旦使至复要帝起立如旧仪帝遽入内抃擅许金使用旧仪帝不恚汝愚因亟攻抃帝遂出抃外祠不复召【按张端仪贵耳集云孝庙在御每北使进国书必起御座三步中贵取进至是贺正使至去御座数十步必欲帝亲临取移时不决王抃忽起撤国书云驾兴北使失仪帝于是喜抃之机捷所载与此互异据传称赵汝愚因帝不恚攻抃出外则抃擅许金使之说似为得实】十一年以福州观察使卒

△姜特立【谯熙载】

姜特立字邦杰丽水人以父绶恩补丞信郎淳熙中累迁福建路兵马副都监海贼姜大獠寇泉南特立以一舟先进擒之帅臣赵汝愚荐于朝召见除合门舍人命充太子宫左右春坊兼皇孙平阳王伴读由是得幸于太子光宗即位除知合门事与谯熙载皆以旧人用事恃恩无忌惮留正为右相论其招权纳贿状遂夺职与外祠帝念之复除浙东马步军副总管诏赐钱二千缗为行装正言臣与特立势难两立帝答曰成命已班朕无反汗卿宜自处正待罪国门外帝不复召而特立亦不至宁宗受禅特立迁和州防御使再奉祠俄拜庆远军节度使卒熙载较

特立稍廉勤亦为平阳邸伴读累官至忠州防御使知合门事绍熙中卒

钦定续通志卷五百八十七

●钦定续通志卷五百八十八 佞幸传三

佞幸传 【三】

辽

金

○辽

罗衣轻

罗衣轻

△罗衣轻

罗衣轻不知其乡里滑稽通变一时谐谑多所规讽兴宗败于李元昊也单骑突出几不得脱先是元昊获辽人辄劓其鼻有奔北者惟恐追及故罗衣轻止之曰且观鼻在否帝沁以毳索系帐后将杀之太子笑曰打诨底不是黄幡绰罗衣轻应声曰行兵底亦不是唐太宗帝闻而释之帝尝与太弟重元狎昵宴酣许以千秋万岁后传位重元喜甚骄纵不法又因双陆赌以居民城邑帝屡不竞前后已偿数城重元既恃梁孝王之宠又多郑叔段之过朝臣无敢言者道路以目一日复博罗衣轻指其局曰双陆休痴和你都输去也帝始悟不复献清宁闲卒

○金

萧肄

张仲轲

李通

高怀贞

萧裕

萧玉

胥持国

萧肄

张仲轲

李通

高怀贞

萧裕

萧玉

胥持国

△萧肄

萧肄本奚人有宠于熙宗复谄事悼后累官参知政事皇统九年四月壬申夜大风雨电震坏寝殿鸱尾有火自外入烧内寝帟幔帝徙避别殿命翰林学士张钧草诏罪己有惟德弗类上干天威顾兹宾昧眇予小子等语肄译奏曰弗类是大无道寡者孤独无亲昧则人事弗晓眇则目无所见小子婴孩之称此汉人托文字以詈主上帝大怒命卫士榜钧数百不死

以手剑厘其口而醢之赐肆通天犀带凭恃恩幸与海陵有恶及篡立召诘之曰学士张钧何罪被诛尔何功受赏肆不能对海陵曰朕杀汝无难人或以我报私怨诏除名禁锢而死

△张仲轲

张仲轲幼名牛儿市井无赖说传奇小说俳優诙谐为业海陵引之左右以资戏笑即位为秘书郎宋余唐弼【按余唐弼宋史作尧弼金史交聘表作唐弼金睿宗名宗尧唐弼或因避讳而改传文讹作尧弼今改】贺登宝位且还海陵以玉带附赐宋帝曰此带卿父所常服今以为赐使卿如见而父使退仲轲曰希世宝可惜海陵曰江南地当为我有此置之外府耳由是知海陵有南伐意每先逢之累迁左谏议大夫修起居注海陵一日召仲轲及补阙马钦校书郎田与信直长实实入便殿侍坐谓曰汉之封疆不过七八千里今吾国幅员万里可谓大矣仲轲曰枉朝疆土虽大然有四主南则宋东则高丽西则夏能一之乃为大耳海陵曰以何罪伐之仲轲曰臣闻宋人买马修器械招纳山东叛亡岂得为无罪海陵喜曰梁琬尝为朕言宋有刘贵妃者蜀之华蘼吴之西施所不及今一举而两得之俗所谓因行掉手也江南闻我举兵必远窜耳钦与与信俱对曰海岛蛮越臣等皆知道路彼将安往正隆四年仲轲死马钦仕至国子司业从海陵南伐至和州富埒瑋言舟小不可济江召问钦钦曰臣得楫亦可渡也大定二年除名【按马钦事迹互见本传中金史又别为立传今删附于此】

△李通

李通以便辟侧媚得幸海陵累官至参知政事请谒贿赂辐辏其门海陵恃累世强盛欲大肆征伐以通为谋主遣使籍诸路明安部族及州县渤海丁壮充军凡年二十以上五十以下皆籍之虽亲老丁多不得一子留侍使益都尹京等三十一人押诸路军器于军行要会处安置俟军至分给之其分给之余与缮完不及者皆聚而焚之二月通进拜右丞括天下官民羸马在东者给西军在西者给东军昼夜络绎不绝死者狼籍官吏惧罪或自杀所过蹂践民田调发夫役诏河南州县贮粮以备大军不得他用羸马刍粟无可给即令就牧田中食禾稼又征发诸道工匠至京师疫死不可胜数海陵自至通州观造战船籍水手三万余人民不堪命盗贼蠭起白昼公行所过州县开劫府库太府监高彦福大理正耶律道翰林待制大颖出使还朝皆言盗贼事海陵恶闻怒杖之自是人不复敢言海陵自将分诸道兵为三十二军以太保瑄都为左领军大都督通为副大都督实使专其事正隆六年九月甲午海陵戎服启行十月丁亥

大军渡淮癸亥至和州命通督造战船坏民居为材木
煮死人膏为油筑台江上海陵被金甲登台杀黑马祭天以羊豕各一投江中明日遣总管阿林等率舟师先济两舟先逼南岸水浅不得进与
宋兵对射良久两舟中矢尽遂为所获亡一明安及军士百余人海陵遂还和州尚书省奏报世宗即位东京改元大定海陵叹曰朕本欲平江
南改元大定此岂非天乎乃出素所书示羣臣召诸将帅谋北归议定通复入奏曰陛下亲师深入无功而还若众散于前敌乘于后非万全计
若留兵渡江车驾北还诸将亦将解体今燕北诸军近辽阳者恐有异志宜先发渡江敛舟焚之绝其归望然后陛下北还南北皆指日而定矣
海陵然之明日遂趋扬州使符宝耶律摩多护神果军扼淮渡出内箭系帛书其上使人乘舟射之南岸言兴师问罪义在吊伐以招谕宋人宋
将王权亦纵所获车士赍书数海陵罪通奏大怒命焚之亟欲渡江下令军士亡者杀其富埒瑋富埒瑋亡者杀其穆昆穆昆亡者杀其明安明
安亡者杀其总管军士益危惧复令运鸦鹞船及粮于瓜州渡期以明日渡江敢后者死完颜元宜等以兵犯御营海陵遇弑都督府以南伐计
皆通等赞成并其姻戚图克坦永年等皆杀之

△高怀贞

高怀贞为尚书省令史素与海陵狎昵海陵久蓄不臣之心尝曰吾志有三国家大事皆自我出一也帅师伐国执其君长问罪二也得天下绝色而妻之三也由是小人皆知其志争进谀说大定县丞张忠辅言梦公与帝击球公乘马冲过之帝坠马下海陵大喜遂成逆谋篡立后
怀贞累迁礼部侍郎大定二年放归田里五年起复为定国军节度使

△萧裕

萧裕本名扬珠奚人初以明安居中京海陵为留守与相结裕揣海陵有覬覦心密言留守先太师太祖长子德望如此人心天意宜有所属诚有志举大事愿竭力以从海陵喜遂与谋议即篡立以为秘书监海陵心忌太宗诸子欲除之与裕密谋因构致太傅宗本秉德等反状并杀太宗子孙七十余人宗翰子孙三十余人宗本已死裕乃求宗本门客萧玉教以具款反状令作主名上变海陵既诏天下天下冤之海陵赏
诛宗本功累拜裕至平章政事进友丞相威福由己势倾朝廷海陵倚信之他相仰成而已裕与高药师善尝告以海陵密语为所奏谓有怨望心召戒谕之不以为罪有言裕擅权者海陵不之信以为人见裕势位生忌嫉乃出其弟左副点检祚为益都尹妹夫左卫将军耶律必勒哩为
宁昌军节度使以绝众疑裕不知以为疑已而海陵弟亮领三省事以裕多自用颇防闲

之裕疑使备己恐及祸遂与前真定尹萧冯嘉努博州同知约索女夫和勒博谋立亡辽豫王延禧孙使亲信萧托诺往结西北路招讨使萧怀忠怀忠谓托诺曰此大事汝归遣一重使来裕乃使其党前中丞萧珠展往怀忠问与谋复有何人答曰五院节度使耶律郎亦是怀忠旧与朗有隙又以珠展尝上达兰变事疑其反复因执珠展收朗系狱遣使上变会笔砚令史布达亦奏约索书使助裕取富贵海陵谓布达构诬命杀之执出宣华门点检图克坦贞得萧怀忠上变事入奏遇见因止不杀使宰相问裕即款伏海陵犹惊愕未信引见亲问不复隐讳海陵因问汝何怨于朕而作此事裕曰陛下凡事皆与臣议及除祚等乃不令臣知领省国王每事颇堤防臣恐不得死谋此幸苟免耳太宗子孙无罪皆死臣手今臣死亦晚矣海陵复曰自来与汝相好虽有此罪贷汝性命终身守坟墓裕曰既犯如此罪逆何面目见天下人海陵哭送出门杀之并诛约索及冯嘉努等

△萧玉

萧玉奚人既从萧裕诬宗本罪海陵喜甚自尚书省令史为礼部尚书加特进数月为参知政事丁母忧起复授明安子尚公主赐第一区分赐宗本家赀顷之代张浩为尚书右丞拜平章政事进拜右丞相封陈国公正隆三司拜司徒判大宗正事五年以司徒兼御史大夫继以司徒判大兴尹海陵至南京以为尚书左丞相进吴国公将伐宋赐羣臣宴即召玉至内阁问曰朕今欲伐江南卿以为如何玉谏止海陵怒叱之使出及张浩因周福儿附奏海陵杖浩并杖玉既发南京玉与浩留治省事世宗即位降奉国上将军放归田里夺所赐家产久之起为孟州防御使世宗戒之曰朕思海陵肆虐先杀宗本部人然后用汝质成其事岂得专罪汝等今复用汝当思改过转定海军节度使改太原尹与少尹乌库哩索赫互讼不公事各削一官解职寻卒子德用大定二十四年尚书省奏玉子德用当升除帝曰海陵假口于玉以快其毒玉子岂可升除耶 【按萧玉金史旧附宗本传后今移置佞幸】

△胥持国

胥持国字秉钧代州繁峙人经童出身累调博野县丞授太子司仓章宗即位除宫籍副监改同签宣徽院事工部侍郎迁尚书进尚书右丞为人柔佞有智术初李妃起微贱得幸于帝持国久在太子宫素知帝好色阴干以秘术又多赂遗妃左右妃亦自嫌门第薄欲藉重外廷乃数称誉持国能由是大为帝所信任与妃表里箝擅朝政诛郑王永蹈镐王永中罢黜完颜守贞等事皆起于李妃持国士之好利躁进者皆走

其门时语曰经童作相监婢为妃承安三年御史台劾奏右司谏张复亭等十人趋走权
门人谓胥门十哲俱宜黜罢奏可于是持国以通奉大
夫致仕复起为枢密副使佐枢密使襄治军于北京一日帝召翰林修撰路铎语及董师
中张万公优劣铎曰师中附胥持国进持国奸邪小人
不宜典军马若回日再相必乱天下帝曰朕岂以此人复为相耶第迁官使致仕耳寻卒
谥通敏子鼎别有传

钦定续通志卷五百八十八

●钦定续通志卷五百八十九 列女传一

列女传 【一】

（臣）等谨按列女传例凡孝女孝妇节妇及临难守死夫亡身殉者是宜彰微阐
幽然皆得登记闲有乱离之际能誓众登陴克全城邑
或闲关报讎万里负骨备历艰苦以伸其志皆为巾幗士之所难能录之足裨风化者也
兹采自唐至元各史依郑志体例统为之传焉

唐

五代

○唐

李德武妻裴淑英 杨庆妻王氏 房玄龄妻卢氏 独孤师仁姆王兰
英 杨三安妻李氏 樊会仁母敬氏 卫
孝女无忌 郑义宗妻卢氏 刘寂妻夏侯碎金 于敏直妻张氏 楚王
灵龟妃上官氏 杨绍宗妻王氏 贾孝女
李氏妻王阿足 樊彦琛妻魏氏 李畬母 汴女李氏
崔绘妻卢氏 贤贞节妇李氏 符凤妻玉英
高叡妻秦氏 王琳妻韦氏 卢惟清妻徐氏 饶娥 窦伯女
仲女 卢甫妻李氏【王泛妻裴氏】 邹
待征妻薄氏 金节妇 高愍女 杨烈妇【邹保英妻奚氏 古玄应妻高
氏 卫州侯氏 滑州唐氏 青州王氏】 贾直
言妻董氏 李孝女妙法 李湍妻 董昌龄母杨氏 崔管祖
母唐氏 王孝女和子 段居贞妻谢氏
杨含妻萧氏 韦雍妻萧氏 卫方厚妻程氏 郑孝女
李廷节妻崔氏 殷保晦妻封氏 窦烈妇
李拯妻卢氏 山阳女赵氏 周迪妻 朱延寿妻王氏
李德武妻裴淑英
杨庆妻王氏
房玄龄妻卢氏

独孤师仁姆王兰英

杨三安妻李氏

樊会仁母敬氏

卫孝女无忌

郑义宗妻卢氏

刘寂妻夏侯碎金

于敏直妻张氏

楚王灵龟妃上官氏

杨绍宗妻王氏

贾孝女

李氏妻王阿足

樊彦琛妻魏氏

李畬母

汴女李氏

崔绘妻卢氏

坚贞节妇李氏

符凤妻玉英

高叟妻秦氏

王琳妻韦氏

卢惟清妻徐氏

饶娥

窦伯女仲女

卢甫妻李氏 【王泛妻裴氏】

邹待征妻薄氏

金节妇

高愍女

杨烈妇 【邹保英妻奚氏 古玄应妻高氏 卫州侯氏 滑州唐氏 青州王氏

】

贾直言妻董氏

李孝女妙法

李湍妻

董昌龄母杨氏

崔管祖母唐氏

王孝女和子

段居贞妻谢氏

杨含妻萧氏

韦雍妻萧氏

卫方厚妻程氏

郑孝女

李廷节妻崔氏

殷保晦妻封氏

窦烈妇

李拯妻卢氏

山阳女赵氏

周迪妻

朱延寿妻王氏

△李德武妻裴淑英

李德武妻裴氏子淑英安邑公矩之女以孝闻适德武踰岁而德武在隋坐从父金才事徙岭南矩表离婚德武谓裴曰我远投瘴疠必无还理于此长诀矣答曰夫天也可背乎愿死无它欲割耳自誓保姆持之乃止夫姊妹在都者裴岁时致礼惟谨居不御熏泽读列女传见述不更嫁者谓所亲曰不践二廷妇人之常何异而载之书后十年德武未还矩决嫁之断发不食矩知不能夺听之德武更娶尔朱氏遇赦还至襄

州闻其完节乃遣后妻重与裴合生三男四女贞观中德武终于鹿城令裴后岁余乃卒

△杨庆妻王氏

杨庆妻王氏世充兄之女庆以河闲王子为郇王守荥阳降于世充故世充妻之用为管州刺史太宗攻洛阳庆谋归唐王曰郑以我奉箕箒者缀公之心今负恩背义可若何愿送还东都庆不听王谓左右曰唐胜则郑灭郑安则吾夫死进退维谷何以生为乃饮药死庆入朝官宜州刺史

△房玄龄妻卢氏

房玄龄妻卢氏失其世玄龄微时病几死诿曰吾病革君年少不可寡居卢泣入帷中剔一目示玄龄明无它会玄龄愈礼之终身

△独孤师仁姆王兰英

王兰英者独孤师仁之乳母师仁父武都谋归唐王世充杀之师仁始三岁免死禁锢兰英请髡钳得保养许之时丧乱饿死者籍籍王游丐道路以食师仁自啖土饮水后诈为采薪窃师仁归京师高祖嘉其义诏封英英永寿乡君 【旧书作封永寿郡君】

△杨三安妻李氏

杨三安妻李氏京兆高陵人【旧书作泾阳人】舅始亡三安又死家贫二子皆幼李画田夜续数年闲葬舅姑及夫兄弟凡七丧远近嗟叹太宗闻而异之赐帛三百段遣州县存问免其徭役

△樊会仁母敬氏

樊会仁母敬氏字像子蒲州河东人始笄适樊氏生会仁而夫死事舅姑谨顺母兄以其少讽令改嫁者数次辄泣涕自誓母兄乃潜约婚于里人至期阳称母病以召之敬至知见给乃伪为不知者伺隙遁归其兄追及半道敬誓以必死乃罢后会仁未冠卒时敬母又终既葬谓所亲曰吾孀处不死者以母老子幼今母死子亡何生为遂号恸不食数日而死

△卫孝女无忌

卫孝女绛州夏人字无忌父为乡人卫长则所杀无忌甫六岁无兄弟母改嫁逮长志报父仇会从父延客长则在坐无忌以髻击杀之诣吏称父冤已报请就刑巡察使褚遂良以闻太宗免其罪给驿徙雍州赐田宅令州县以礼嫁之

△郑义宗妻卢氏

郑义宗妻卢氏范阳士族卢彦衡之女涉书史事舅姑恭顺夜有盗持兵劫其家家人皆窜匿惟姑不能去卢冒刃立姑侧为贼摔捶几死贼去人问何为不惧答曰邻里急难尚相赴况姑可委弃邪若百有一危我不得独生姑曰岁寒然后知松柏后凋吾乃今见妇之心贞观中卒

△刘寂妻夏侯碎金

刘寂妻夏侯氏滑州胙城人字碎金父长云为盐城丞丧明时刘已生二女乃求离其夫归侍父疾兼事后母以孝称经五年【旧书作十五年】父亡毁不胜丧身负土作坟庐其左寒不绵日一食者三年诏赐粟帛表异门闾后其女居母丧亦如母行官又赐粟帛表其门

△于敏直妻张氏

于敏直妻张氏皖城公俭之女生三岁每父母病昼夜省视如成人及长愈恭顺适于氏闻俭病笃号泣几绝俭死一恸遂卒高宗懿其行赐物百段以状属史官

△楚王灵龟妃上官氏

楚王灵龟妃上官氏下邳人【旧书作上邳人】右金吾将军怀仁之女灵龟出继楚哀王后而本生舅姑具存妃朝夕侍奉谨甚凡珍美非经献不先尝灵龟卒将葬其前妃阎氏嫁不踰年而卒又无近族议者欲不举妃曰逝者有知魂可无托乎乃备礼合葬闻者嘉钦丧除兄

姊共以妃少无子讽使改醮泣曰丈夫以养妇人以节我未能殉沟壑尚可御妆泽祭他
胙乎将自劓取众遂不敢强

△杨绍宗妻王氏

杨绍宗妻王氏华州华阴人二岁母亡鞠于继母父征辽歿继母寻卒王年十五乃
举二母柩而立父象招魂以葬庐于墓左永徽中诏杨
氏妇在隋时父歿辽西能招魂克葬又葬祖父母亲服板筑哀感行路嘉尚良深因赐粟
帛表其门闾

△贾孝女

贾孝女濮州鄄城人年十五父为族人玄基所杀其弟强仁尚幼孝女不肯嫁躬抚
育之强仁能自树立教伺玄基杀之取其心肝以告父
墓强仁诣县言状有司论死孝女诣阙请代弟死高宗闵叹诏并免之内徙洛阳

△李氏妻王阿足

李氏妻王阿足深州鹿城人幼孤无兄弟惟一姊早寡阿足归李氏数岁夫死无子
以姊高年无供养乃誓不嫁昼耕夜织能辨生事余二
十年姊乃亡葬送如礼乡人服其节行争遣女妻往师寿终于家

△樊彦琛妻魏氏

樊彦琛妻魏氏扬州人【旧书作楚州淮阴人】彦琛病魏曰公病且笃不忍公
独死彦琛曰死生常道也幸养诸孤使成立相从而死
适足贻罪非吾取也彦琛卒值徐敬业难魏为贼所获闻其知音逼令鼓箏魏曰夫亡不
死今见逼祸由手发引刀斩其指贼党欲强妻之固拒
不从贼以刀拟颈魏厉声曰狗盗乃欲辱人速死吾志也乃见害闻者伤之

△李畬母

李畬母者失其氏有渊识畬为监察御史得廩米量之三斛而赢问于史曰御史米
不概也又问车庸有几曰御史不偿也母怒敕归余米
偿其庸因切责畬畬有孝行乃劾仓官自言状诸御史闻之有惭色

△汴女李氏

汴女李氏年八岁父亡殡于堂十年朝夕临及笄母欲嫁之断发丐终养居母丧哀
号过人自庀葬具庐于墓蓬头跣足自负土以完园莹
蒔松数百武后得按察使薛季昶以闻诏树阙门闾

△崔绘妻卢氏

崔绘妻卢氏范阳人鸾台侍郎献之女献有美名为来俊臣所陷左迁西乡令而卒
绘丧卢年少诸兄欲嫁之卢称疾不许亡姊之夫工部
侍郎李思冲方显重表求继室诏许之诸兄不敢拒将婚之夕方以告卢乃令人防其门
卢拒不可是夕出自窆粪秽蔑面还崔舍断发自誓思

冲以闻武后不夺也诏为浮屠尼以终 【按旧书本传称李思冲于神龙初为工部侍郎求续亲则非武后朝事矣而新书作武后诏卢氏为尼所载互异】

△坚贞节妇李氏

坚贞节妇李氏年十七嫁郑廉未踰年廉死常布衣蔬食夜忽梦男子求为妻初不许后数数梦之李自疑容貌未衰所召即截发垢面衣麻衣自是不复梦刺史白大威钦其操号坚贞节妇表旌门阙名所居曰节妇里

△符凤妻玉英

符凤妻某氏字玉英有美姿凤以罪徙儋州至南海为獠贼所杀胁玉英私之对曰一妇人不足事众男子请推一长者贼然之乃请更衣有顷盛服立于舟骂贼沈海而死

△高叡妻秦氏

高叡妻秦氏叡为赵州刺史为默啜所攻州陷叡仰药不死至默啜所诱之降叡视秦秦曰君受天子恩当以死报贼官安足荣自是皆瞑目不语默啜知不可屈乃杀之

△王琳妻韦氏

王琳妻韦氏士族也琳为眉州司功参军韦不施簪珥训二子有法后皆名闻琳卒时韦年二十五家欲强嫁之韦固拒至不听音乐处一室或终日不食卒着女训行于世

△卢惟清妻徐氏

卢惟清妻徐氏淄州人世客陈留惟清仕历校书郎徐女兄之夫李宜得以罪斥惟清坐僚姻贬播州尉徐还乡里粝食斥鋤膏采絺不御会大赦徐闲关迎惟清至荆州闻惟清死二髯奴将劫徐归下江徐知之数其罪奴不敢逼劫其赀去徐倍道行玉播川足茧流血得惟清尸以还阅岁至洛阳既葬以无子终服还陈留汴州刺史齐澣高其节以诗纪之

△饶娥

饶娥字琼真饶州乐平人勤织纴颇自修整父绩渔于江遇风涛舟覆尸不出娥年十四哭水上不食三日死俄大震电水虫多死父尸浮出乡人异之葬其父及娥鄱水之阴建中初黜陟使郑叔则表旌其闾河东柳宗元为立碑云

△窦伯女仲女

窦伯女仲女京兆奉天人永泰中草贼数千人劫其村二女逃匿山谷贼迹而得之曳之行临大谷伯曰我岂受污于贼乃自投下贼大骇仲亦跃而坠京兆尹第五琦表其列行诏旌门闾免其家徭役官为庀葬

△卢甫妻李氏 【王泛妻裴氏】

顺武县尉卢甫妻李氏秦州成纪人父澜永泰初为蕲令梁宋兵兴澜谕降剧贼数千人刺史曹升袭贼败之贼疑澜卖已执澜及其从弟渤兄弟争求代死李见父被执亦请代父遂皆遇害又有尉氏县尉王泛妻裴氏仪王傅巨卿之女亦俘贼中欲污之骂曰吾衣冠子岂爱生受污邪贼临以兵骂不止乃支解焉宣慰使李季卿并以状闻诏赠李孝昌县君裴河东县君仍编入史册澜渤并赠官

△邹待征妻薄氏

邹待征妻薄氏待征尉江阴袁晁乱薄为贼所凉将污之不从出怀中待征官诰付家媪使报待征曰我义不辱乃投江死贼去待征得其尸于江岸义声动江南闻人李华作哀节妇赋

△金节妇

金节妇者安南贼帅陶齐亮之母也常以忠义诲齐亮顽不受遂绝之自田而食纺而衣而州里矜法焉大历初诏赐两丁侍养本道使四时存问

△高愍女

高愍女名妹妹父彦昭事李正己及纳拒命质彦昭妻子使守濮阳建中二年彦昭挈城归河南都统刘玄佐纳屠其家时女七岁母李怜其幼请免死为婢许之女不肯曰母兄皆不免何赖而生因问父在所西向哭再拜就死事闻德宗嘉欢诏太常赐谥曰愍诸儒争为之谏彦昭从玄佐救宁陵复汴州累功授颍州刺史朝廷录其忠卒赠陕州都督

△杨烈妇 【邹保英妻奚氏 古玄应妻高氏 卫州侯氏 滑州唐氏 青州王氏】

杨烈妇者李侃妻也建中末侃为项城令李希烈陷汴分兵略定诸县侃以城小贼锐欲逃去妇曰寇至当守力不足则死将焉逃请重赏募死士尚可济侃乃召吏民入廷中曰令满岁则去非如吏民生此土也坟墓存焉宜相与死守忍失身奉贼乎众泣许诺乃徇曰以瓦石击贼者赏千钱以刀矢杀贼者万钱得数百人侃率以乘城妇身自衅以享众报贼曰项城父老义不下贼得吾城不足为威宜亟去徒失利无益也贼大笑侃中流矢还家妇责曰君不在人谁肯固守死于外犹愈于床也侃遽登城会贼将中矢死遂引去县卒完诏迁侃太平令先是万岁通天初契丹寇平州邹保英为刺史城且陷妻奚氏率家僮及城中女丁相助固守贼退诏封诚节夫人默啜攻飞狐县令古玄应妻高氏亦能固守城得不陷诏封徇忠县君史思明之叛卫州女子侯氏滑州女子唐氏青州女子王氏

相与歃血赴行营讨贼滑濮节度使许叔冀表其忠皆
补果毅

△贾直言妻董氏

贾直言妻董氏直言坐事贬岭南以妻少乃诀曰生死不可期言去可亟嫁董不答引绳束发封以帛曰非君手不解使直言署之直言贬二十年乃还署帛宛然及汤沐发堕无余

△李孝女妙法

李孝女者名妙法瀛州博野人安禄山乱被劫徙它州闻父亡欲闻道奔丧其一子不忍舍竟割一乳留以行既至父已葬号踊请开父墓以视宗族不许复持刀刺心乃为开之结庐墓左手植松柏有异鸟至后其母病或不饮食女亦不食及亡刺血书于母臂而葬庐墓终身

△李湍妻

李湍妻某氏湍籍吴元济军元和中自拔归乌重胤妻为贼缚齧而食之至死犹号湍曰善事乌仆射观者叹泣重胤请以其事属史官诏可

△董昌龄母杨氏

董昌龄母杨氏世居蔡昌龄累事吴少诚少阳至元济时为吴房令母常密戒曰逆顺成败儿可图之昌龄未决徙郾城杨复曰逆贼欺天神所不福当速降无以我累儿为忠臣吾死不恨会朝廷讨蔡逼郾城昌龄乃降并说贼将邓怀金归款宪宗喜即拜郾城令兼监察御史昌龄谢曰母之训也帝嗟叹元济囚杨欲杀者屡矣蔡平而母在陈许节度李逊表之封北平郡太君

△崔管祖母唐氏

崔管祖母唐氏【按唐书柳珙传附载崔管祖母唐夫人升堂乳姑事今为立传编次于此谨识】博陵人事姑以孝闻管曾祖母长孙氏年高无齿唐每旦栉緋笄拜阶下升堂乳姑长孙不粒食而康宁者数年一日姑病言无以报吾妇愿子孙皆如妇孝其后管为山南西道节度使昆弟子孙之盛士族罕比识者以为孝妇之报

△王孝女和子

王孝女徐州人字和子元和中父兄皆为防秋卒戍泾州吐蕃寇边并战死和子年十七单身被发徒跣缋裳抵泾屯丐护二丧归葬植松柏翦发坏容庐墓所节度使王智兴白状诏旌其门

△段居贞妻谢氏

段居贞妻谢氏字小娥洪州豫章人居贞本历阳侠少年娶岁余与谢父同贾江湖

上并为盗所杀小娥赴江流得救以免转侧丐食至上
元梦父及夫告所杀主名离析其文为十二言持问内外姻莫能晓陇西李公佐占得其
意曰杀若父者必申兰若夫必申春子娥乃诡服为男
子与佣保杂物色岁余得兰于江州春于独树浦兰与春从兄弟乃名盗也小娥托佣兰
家以谨信自效兰寢倚之小娥见所盗段谢服用故在
益知所梦不疑出入二期以伺其便它日兰尽集羣偷酺酒兰与春醉卧庐中小娥闭户
拔佩刀斩兰首因大呼邻里捕贼乡人共擒春得赃千
万其赏数十小娥悉疏其人上之官皆抵死乃始自言状刺史张锡嘉其烈白观察使使
不为请还豫章人争聘之不许祝发为尼垢衣粝饭终
身

△杨含妻萧氏

杨含妻萧氏父厯为抚州长史以官卒母亦亡萧年十六与婢皆毁貌载二丧还乡
里贫不能给舟庸次宣州战鸟山舟子委柩去萧结庐
水滨与婢穿圻纳棺成坟蒔松柏朝夕临有驯鸟缟兔菌芝之祥长老等为立舍岁时进
粟缣以亲未葬丧满不释縗人高其行或请昏女曰我
弱不能北还君诚为我致二柩葬故里请事君子于是含以高安尉罢归聘之既葬二亲
乃释服而归杨

△韦雍妻萧氏

韦雍妻萧氏雍字和叔擢进士第张弘靖镇幽州表授观察判官朱克融乱雍被劫
萧闻难执雍袂与俱出左右格之不退雍临刃萧呼曰
我义不苟生愿今日死君前刑者断其臂乃杀雍萧词气不挠观者哀叹是夕死太和中
节度使杨志诚表其烈诏赠兰陵县君

△卫方厚妻程氏

卫方厚妻程氏大和中方厚为邕州录事参军招讨使董昌龄治无状方厚数争事
昌龄怒将执付吏辞以疾不免即以死告卧棺中昌龄
知之使阖棺甚牢方厚闭久以绝程惧并死不敢哭昌龄恬不疑厚遣其丧程徒行诣阙
叩右银台门自刎陈冤下御史鞠治得实昌龄乃得罪
开成初诏封程武昌县君赐一子九品正员官

△郑孝女

郑孝女兖州瑕邱人父神佐为戍卒战死庆州时母已亡又无兄弟女时年二十四
即翦发毁形自往庆州护丧还乡里与母合葬庐墓下
手树松柏成林初许适牙兵李玄庆至是谢不嫁大中中兖州节度使萧俶状于朝诏旌
其闾

△李廷节妻崔氏

李廷节妻崔氏干符中廷节为郟城尉王仙芝攻汝州廷节被执贼见崔殊美将妻之诡曰我士人妻死亡有命岂受贼污贼怒剗其心食之

△殷保晦妻封氏

殷保晦妻封氏封敖孙也名绚字景文能文章草隶保晦历校书郎黄巢入长安保晦逃匿贼悦封色欲取之固拒不答贼怒胁以剑封骂曰我公卿子守正而死犹生也终不辱逆贼手遂遇害保晦归见封死号恸而绝

△窦烈妇

窦烈妇者河南人朝邑令毕某妻初同州军乱令匿望仙里不知所舍乃仇家也夜半盗入摔令首欲杀之窦泣蔽捍苦持贼袂中刃几死不解令得脱走贼亦去京兆闻之归酒帛医药而愈

△李拯妻卢氏

李拯妻卢氏美姿能属文拯字昌时咸通末擢进士累迁考功郎中黄巢乱避地平阳僖宗召为翰林学士帝出宝鸡陷于嗣襄王熿熿败拯死卢伏尸哭王行瑜兵逼之不从胁以刃断一臂死

△山阳女赵氏

山阳女赵氏父盗盐当论死女诣官诉曰迫今而盗杀死尔情有可原能原之邪否则请俱死有司义之许减父死女曰身今为官所赐愿依浮屠法以执即毁服截耳侍父疾终身不嫁

△周迪妻

周迪妻某氏迪善贾往来广陵会毕师铎乱人相掠卖以食迪饥将绝妻曰今欲归不两全亲在君不可并死愿见卖以济君行迪不忍妻固与诣肆售得数千钱以奉迪迪至肆见妻首已在枿矣迪裹余体归葬之

△朱延寿妻王氏

朱延寿妻王氏延寿事杨行密为寿州刺史恶行密不臣与宁国节度使田頔谋绝之以归唐事泄行密以计召延寿欲与扬州延寿信之将行王曰若得扬州成宿志矣然愿日一介为验许之及为行密所杀介不至王曰事败矣即部家仆授兵器方阖扉而捕骑至遂出私帑施民发百燎焚牙居呼天曰我誓不为讎人辱赴火死

○五代

王凝妻李氏

△王凝妻李氏

（臣）等谨按五代史无列女传兹于冯道传前节取王凝妻李氏事补入以符郑例

王凝妻李氏家青齐闲素贫凝为虢州司户参军以疾卒于官一子尚幼李携其子负其遗骸以归东过开封止旅舍旅舍主人见其妇人独携一子疑之不许其宿李顾天已暮不肯去主人牵其臂出之李仰天长恸曰我为妇人不能守节而此手为人执邪不可以一手并污吾身即引斧自断其臂路人见者环聚而嗟之或为之弹指或为之泣下开封尹闻之白其事于朝官为赐药封疮厚恤李氏而笞其主人

钦定续通志卷五百八十九

●钦定续通志卷五百九十 列女传二

列女传 【二】

宋

○宋

朱娥	江夏民妇张氏	彭列女	郝节娥
开封民妇朱氏	包纒妻崔氏	贝州赵	
氏女	张晋卿妻丁氏	孙氏妇项氏	王氏二妇 张弼妻
徐氏	马元颖妻荣氏	吴永年妻何氏	
【永年姊】	滕县董氏女	王宣妻曹氏	丁国兵妻 南剑州
民妇	吴琪妻谭氏【李科妻谢氏】	陈公	
绪妻刘氏	罗江张氏女	范孝纯妻师氏	陈堂前王女 欧阳
希文妻廖氏【李生妻梁氏】	王衮妻赵氏		
涂端友妻陈氏	芜湖詹氏女	刘生妻欧阳氏【朱云孙妻刘氏】	
刘当可母王氏【妇杜氏】	曾氏妇晏氏		
谢泌妻侯氏【乐氏二女】	谢枋得妻李氏	王贞妇	赵淮妾
谭氏妇赵氏	吴中孚妻		
吴仲洙女良子	永春林老女	童八娜	韩氏女希孟
王氏妇梁氏	刘仝祖妻林氏	毛惜	

惜

朱娥

江夏民妇张氏

彭列女

郝节娥

开封民妇朱氏

包纒妻崔氏

贝州赵氏女

张晋卿妻丁氏

孙氏妇项氏
王氏二妇
张弼妻徐氏
马元颖妻荣氏
吴永年妻何氏 【永年姊】
滕县董氏女
王宣妻曹氏
丁国兵妻
南剑州民妇
吴琪妻谭氏 【李科妻谢氏】
陈公绪妻刘氏
罗江张氏女
范孝纯妻师氏
陈堂前王氏
欧阳希文妻廖氏 【李生妻梁氏】
王袞妻赵氏
涂端友妻陈氏
芜湖詹氏女
刘生妻欧阳氏 【朱云孙妻刘氏】
刘当可母王氏 【妇杜氏】
曾氏妇晏氏
谢沁妻侯氏 【乐氏二女】
谢枋得妻李氏
王贞妇
赵淮妾
谭氏妇赵氏
吴中孚妻
吕仲洙女良子
永春林老女
童八娜
韩氏女希孟
王氏妇梁氏
刘仝祖妻林氏
毛惜惜

△朱娥

朱娥者越州上虞朱回女也母早亡养于祖媪里中朱颜与媪竞持刀欲杀媪一家惊溃娥时十岁独号呼突前拥蔽其媪手挽颜衣不释曰宁杀我母杀媪也连被数十刀犹力挽颜衣媪得脱颜忿娥断其喉以死事闻赐其家粟帛其后会稽令董为娥立像于曹娥庙岁时配享焉

△江夏民妇张氏

张氏鄂州江夏民妇里恶少谢师乞持刀至其家欲逼与乱张大骂不从至以刃断其喉犹能走擒师乞以告邻人既死朝廷闻之诏封旌德县君表其坟曰列女墓赐酒帛令郡县致奠

△彭列女

彭列女生洪州分宁农家从父泰入山伐薪父遇虎将不脱女拔刀斫虎夺其父而还事闻诏赐粟帛敕州县岁时存问

△郝节娥

郝节娥嘉州娼家女生五岁母娼苦贫卖于洪雅良家为养女始笄母夺归欲令世其娼娥不乐母日逼之娥曰少育良家习织作组训之事足以给母朝夕求终为良母益怒洪雅春时为蚕丛祠母与邑少年期因蚕丛具酒邀娥母与娥徐往娥见少年仓皇惊走母挽掙不使去不得已留坐中顾酒食辄唾强饮之则呕啜满地少年卒不得侵袭暮归过鸡鸣渡娥度他日必不可脱阳渴求饮投江死乡人谓之节娥云

△开封民妇朱氏

朱氏开封民妇也家贫卖巾屨簪珥以给其夫夫日与侠少饮博不以家为事犯法徙武昌父母欲夺嫁之朱曰何迫我如是耶夫将行一夕自经死且曰及吾夫未去使知我不为不义屈也开封府判官吴充作阿朱诗以道其事

△包繹妻崔氏

崔氏合淝包繹妻繹枢密副使拯之子早亡惟一稚儿拯夫妇意崔不能守也使左右尝其心崔蓬垢涕泣出堂下见拯自矢无它后稚儿亦卒母吕自荆州来诱崔欲嫁其族人因谓曰丧失守子子死熟守崔曰昔之留也非以子也舅姑故也今舅歿姑老矣将舍去乎吕怒诅骂曰我宁死此决不独归须尔同往也崔泣曰母远来义不当使母独还然到荆州傥以不义见迫必绝于尺组下愿以尸还包氏遂偕去母见其誓必死卒还包氏

△贝州赵氏女

赵氏贝州人王则反闻赵氏有殊色使人劫致之欲纳为妻赵日号器慢骂求死贼

爱其色不杀多使人守之赵知不脱乃给曰必欲妻我
宜择日以礼聘贼信之使归其家人惧其自殒得祸于贼益使人守视贼具聘来迎赵
与家人诀曰吾不复归此矣家人曰汝忍不为家族计
赵曰第亡患遂涕泣登舆去至州廡举帘视之已自缢舆中矣尚书屯田员外郎张寅有
赵女诗

△张晋卿妻丁氏

张晋卿妻丁氏新郑人参知政事度五世孙也靖康中与晋卿避金兵于大隗山为
金兵所得挟之鞍上丁自投于地大骂求死誓不受辱
复挟上马骂不已遂击杀之

△孙氏妇项氏

项氏吉州吉水人居永昌里适同里孙氏宣和七年为里胥所逮至中途欲侵袭之
项引刀自刺死郡以闻诏赠孺人旌表其闾

△王氏二妇

王氏二妇汝州人建炎初金人至汝州二妇为所掠拥置舟中遂投汉江死尸皆浮
出不坏人为收葬之城外江上为双冢表之

△张弼妻徐氏

徐氏和州人閤中女也适同郡张弼建炎三年金人攻维扬官军望风奔溃多肆掳
掠执徐欲污之徐瞋目大骂曰朝廷蓄汝辈以备缓急
既不能赴难又乘时为盗我恨一女子不能引剑断汝头以快众愤肯为汝辱以苟活耶
第速杀我贼惭恚刺杀之投之江中

△马元颖妻荣氏

荣氏蕤女弟也自幼如成人读论语孝经能通大义事父母孝归将作监主簿马元
颖建炎二年贼张遇寇仪真荣与其姑及二女走维扬
姑素羸荣扶掖不忍舍俄贼至胁之不从贼杀其女胁之益急荣厉声诟骂遂遇害

△吴永年妻何氏 【永年姊】

何氏吴人吴永年之妻也建炎四年金兵道三吴官兵遁去城中人死者五十余万
永年与其姊及妻奉母而逃母老待挟持而行卒为敌
兵所得将繫其姊及何何给曰诸君何不武也妇人东西惟命尔金兵信之行次水滨谓
其夫曰我不负君遂投于河其姊继之

△滕县董氏女

董氏沂州滕县人许适刘氏子建炎元年盗李昱攻剽滕县悦其色欲乱之诱谕再
三女终不屈遂断其首刘氏子闻女死状大恸曰列女
也葬之为立祠

△王宣妻曹氏

曹氏 【按王宣妻丁国兵妻南剑州民妇皆与董氏女事不相属死不同时宋史以三妇附载董氏传后于合传之例不符今为析出另列谨识】 临淮县人王宣妻建炎四年盗马进掠临淮宣要曹氏避之曹曰我闻妇人死不出闺房贼至宣走避曹坚卧不起贼劫之大骂不屈为所害

△丁国兵妻

丁国兵妻东安县人建炎四年盗祝友聚众于滁州袭家城掠人为粮国兵及其妻为所掠妻泣曰丁氏族流亡已尽乞存夫以续其祀贼遂释夫而害之

△南剑州民妇

南剑州小常村民妇失其姓为叛卒杨就所掠欲与乱妇毅然誓死不受污遂遇害弃尸道旁贼退人为收瘞尸所枕藉处迹宛然不灭每雨则干晴则湿或削去复见覆以他土其迹愈明

△吴琪妻谭氏 【李科妻谢氏】

谭氏英州浚阳县人田江村士人吴琪妻也绍兴五年英州饥观音山盗起攻剽乡落琪窜去谭不能俱与其女被执谭有姿色盗欲妻之谭怒骂曰尔辈贼也我良家女岂若偶耶贼遂害之同时有南雄李科妻谢氏保昌故林人虔州盗囚之数日欲犯之谢唾其面曰宁万段我不汝徇也盗怒剽之去

△陈公绪妻刘氏

刘氏海州朐山人适同里陈公绪绍兴末金人下山东公绪南奔偶刘归宁仓卒不得与偕惟挈其子庚以行宋授以八品官后累功至正使刘留北方音问不通或劝之改适刘守志益坚公绪亦不他娶子庚浸长倾家货结任侠奔走淮甸险阻备尝者十余年遂得迎母以归刘在北二十五年尝纬萧以自给

△罗江张氏女

张氏罗江士人女母杨氏寡居一日亲党有婚会母与女偕往其典库雍乙者从行既就坐乙先归会罢杨氏归则乙死于库莫知杀者主名成都提刑张文饶疑杨有私杀乙以灭口命石泉军劾治杨言与女同榻实无他遂逮其女考掠无实吏乃掘地为坑缚母于其内旁列炽火闲以水沃之绝而复苏者屡辞终不服一日女谓狱吏曰我不胜苦毒将死矣愿一见母吏怜而许之既见谓曰母以清洁闻奈何受此汗辱宁死捶楚不可自诬女今死将讼冤于天言终而绝于是石泉连三日地大震有声如雷天雨雪屋瓦皆落邦人震恐勘官李志宁疑其狱夕具衣

冠祷于天坐听事假寐恍有猿坠前惊寤呼吏索之不见志宁念梦兆非杀人者袁姓乎有门卒忽言张氏馈食之人曰袁大明日袁至执而诘之袁色动遽曰愿就死问之云适盗库金会雍归遂杀之杨乃得免时女死才数日也狱上郡榜所居曰孝感坊

△范孝纯妻师氏

师氏彭州永丰人父骥政和二年省试第一宣和中为右正言十余日凡七八疏论权幸及廉访使者之害而去女适范世雍子孝纯建炎初还蜀至唐州方城县会贼朱显终掠方城孝纯先被害贼执师欲强之师骂曰我中朝言官女岂可受贼辱吾夫已死宜速杀我贼知不可屈遂害之

△陈堂前王氏

陈堂前汉州雒县王氏女节操行义为乡人所敬呼曰堂前犹私家尊其母也堂前年十八归同郡陈安节岁余夫卒仅一子既葬其夫事舅姑如子在日治家有法舅姑安之子日新稍长延名儒训导既冠入太学二孙纲绂咸笃学有闻初堂前归夫之妹肖幼堂前教育之及笄以厚礼嫁遗舅姑亡妹求分财产堂前尽遗室中所有无靳色不五年妹所得财为夫所罄堂前复为买田置屋抚育诸甥无异己子亲属有贫窶不能自存者救养婚嫁至三四十人里有故家甘氏贫而质其孝女于酒家堂前出金赎之俾有所归子孙遵其遗训五世同居并以孝友儒业着闻干道九年诏旌其门闾

△欧阳希文妻廖氏 【李生妻梁氏】

廖氏临江军贡士欧阳希文妻也绍兴三年盗起建昌号白既笠过临江希文与妻共挟其母傅走山中为贼所追廖以身蔽姑使希文负之逃贼执廖氏廖正色叱之贼挥刃断其耳与臂廖氏骂贼而死乡人义而葬之是年盗彭友犯吉州龙泉李生妻梁氏义不受辱赴水死

△王袞妻赵氏

王袞妻赵氏饶州乐平人建炎中袞监上高酒税金兵攻筠袞解官归去赵从之行遇金人缚以去系袞夫妇于刘氏门而入憩息室中赵宛转解缚并解袞谓曰君速去俄而金人出问袞安往赵他指以误之金人追之不得怒赵欺已杀之袞方伏丛薄闲望之悲痛归刻赵像以葬

△涂端友妻陈氏

涂端友妻陈氏抚州临川人绍兴九年盗起被驱入黄山寺贼逼之不从以刃加其颈叱曰我万家子义岂尔辱纵杀我官兵即至尔其免乎贼知不可屈乃幽之屋壁居数日族党有得释者赍金帛赎之贼引陈氏令归陈曰吾

闻贞女不出闺合今吾被驱至此何面目登涂氏堂复
骂贼不绝竟死之

△芜湖詹氏女

詹氏女芜湖人绍兴初淮寇号一窠蜂破芜湖女年十七叹曰父子无俱生理我计
决矣顷之贼至欲杀其父兄女趋而前拜曰妾虽窳陋
愿执巾帚以赎父兄命贼释其父兄缚女摩手使亟去无顾我我得待将军何所憾哉遂
随贼行过市东桥跃身入水死贼相顾骇叹去

△刘生妻欧阳氏 【朱云孙妻刘氏】

刘生妻欧阳氏吉州安福人居新乐乡生以事出恶少来欲欺凌之欧阳不受辱死
邑人刘宽作诗以吊之时绍兴十年也同县有朱云孙
妻刘氏姑病云孙割股肉作糜以进而愈姑复病刘亦割股以进又愈尚书谢谔为赋孝
妇诗

△刘当可母王氏 【妇杜氏】

王氏利州路提举常平司干办公事刘当可之母也绍定三年就养兴元元兵破蜀
提刑庞授檄当可诣行司议事当可捧檄曰母王毅然
勉之曰汝仓君禄岂可辞难当可行元军屠兴元王义不辱大骂投江而死其妇杜氏及
婢仆五人咸及于难当可闻变奔赴江浒得母丧以归
诏赠和义郡太夫人

△曾氏妇晏氏

曾氏妇晏氏汀州宁化人夫死守幼子不嫁绍定闲寇破宁化令佐俱逃将乐县宰
黄埒令土豪王万全王伦结约诸砦以拒贼晏首助兵
粮多所杀获贼忿其败结集愈众诸砦不能御晏乃依黄牛山傍自为一砦一日贼遣数
十人来索妇女金帛晏召其田丁谕曰汝曹衣食我家
贼求妇女意实在我汝念主母各当用命不胜即杀我因解首饰悉与田丁田丁感激思
奋宴自搥鼓使诸婢鸣金以作其勇贼复败退邻乡知
其可依挈家依黄牛山避难者甚众有不能自给者晏悉以家粮助之于是聚众日广复
与伦万全共措置析黄牛山为五砦选少壮为义丁有
急则互相应援贼屡攻弗克所活老幼数万人知南剑州陈韡遣人遗以金帛晏悉散给
其下又遗楮币以劳五砦之义丁名其砦曰万安事闻
诏封晏恭人补其子承信郎

△谢沁妻侯氏 【乐氏二女】

谢沁妻侯氏南丰人家贫事姑孝谨盗起所在烧杀邻里皆逃避姑疾笃不能去侯
号泣姑侧盗逼之侯曰宁死不从盗刃之仆沟中贼退
渐苏见一篋在侧发之皆金珠族妇以为己物侯悉归之妇分其一以谢侯辞曰非我有

不愿也后姑与夫俱亡子幼父母欲更嫁之侯曰儿幸得归隐居贤者之日忍使谢氏无后宁贫以养子虽饿死命也同县有乐氏女父以鬻果为业绍定二年盗入境其父买舟挈家走建昌盗掠其舟将逼二女俱不从一赴水死一见杀

△谢枋得妻李氏

谢枋得妻李氏饶州安仁人美而慧通女训诸书嫁枋得事舅姑奉祭待宾皆有礼枋得起兵守安仁兵败逃入闽中元将购捕之根及其家人李氏携二子匿贵溪山荆棘中采草木而食至元十四年元兵踪迹至山中令曰苟不获李氏屠而墟李闻之曰岂可以我故累人吾出事塞矣遂就俘明年徙囚建康或指李言曰明当没入矣李闻之抚二子泣左右曰虽没入将不失为官人妻何泣也李顾谓二子曰若幸生还善事吾姑吾不得终养矣是夕解裙带自经狱中枋得母桂氏尤贤达自枋得播逃妇与孙幽远方处之泰然无一怨语人问之曰义所当然也人称为贤母云

△王贞妇

王贞妇夫家临海人德佑二年元兵入浙东与家被执其舅姑与夫皆死主将见妇美欲内之妇号恸欲自杀为夺挽不得死夜令俘囚妇人杂守之妇乃阳谓主将曰若以吾为妻妾者欲令终身善事主君也吾舅姑与夫死而我不为之哀是不天也不天之人将焉用之愿请为服期即惟命苟不听我终死耳主将恐其死许之然防守益严明年师还挈行至嵯青枫岭下临绝壑妇待守者少懈嚙指出血书字山石上南望恸哭自投崖下而死后其血皆渍入石闲尽化为石天阴雨即坟起如始书时元至治中旌之曰贞妇郡守立祠岭上刻石易名曰清风岭

△赵淮妾

赵淮妾长沙人逸其姓名德佑中从淮戍银树坝淮兵败俱执至瓜洲淮见杀弃尸江滨妾俘一军校帐中解衣中金遗其左右且告之曰妾夙事赵运使今其尸未葬妾诚不能忘情愿因公言使掩埋之当终身事相公无憾矣军校怜其言使数兵舆如江上妾聚薪焚淮骨置瓦缶中自抱持操小舟至急流仰天恸哭跃水死

△谭氏妇赵氏

谭氏妇赵氏吉州永新人至元十四年元兵破永新赵氏抱婴儿随其舅姑同匿邑校中为悍卒所获杀其舅姑执赵欲污之不可临之以刃赵骂曰吾舅死于汝吾姑又死于汝吾宁从吾舅姑死耳遂与婴儿同遇害血渍于礼殿两楹之闲入砖为妇人与婴儿状久而宛然如新或

磨以沙石不灭又煨以炽炭其状益显

△吴中孚妻

吴中孚妻隆兴进贤人少寡景定元年兵乱携孤女自沈于县之梁步曰义不辱吾夫

△吕仲洙女良子

吕仲洙女名良子泉州晋江人父得疾濒殆女焚香祝天请以身代刳股为粥以进时夜中羣鹊遶屋飞噪仰视空中大星光如月者三越翼日父瘳女弟细良亦相从拜祷良子却之细良恚曰岂姊能之我不能耶守真德秀嘉之表其居曰懿孝

△永春林老女

林老女永春人及笄未婚绍定三年寇犯其邑女避入出猝遇寇欲污之不从度不能脱给曰有金帛埋于家盍同取之甫入门大呼曰吾宁死于家决不辱吾身贼怒杀之越三日面如生

△童八娜

童八娜鄞之通远乡建奥人虎衔其大母女手拽虎尾祈以身代虎为释其大母衔女以去始林粟侍亲官其地尝目睹之已而为守以闻于朝祠祀之

△韩氏女希孟

韩氏女字希孟巴陵人或曰丞相琦之裔少明慧知读书开庆元年元兵至岳阳女年十八为卒所掠将挟以献其主将女知不免赴水死越三日得其尸于练裙带有诗曰我质本瑚琏宗庙供苹蘩一朝婴祸难失身戎马闲宁当血刃死不作衽席完汉上有王猛江南无谢安长号赴洪流激烈摧心肝

△王氏妇梁氏

王氏妇梁氏临川人归夫家才数月会元兵至一夕与夫约曰吾遇兵必死义不受污若后娶当告我顷之夫妇被掠有军千户强使从己妇给曰夫在伉俪之情有所不忍乞归之而后可千户以所得金帛与其夫归之并与一矢以却后兵约行十余里千户即之妇拒且骂因夺搏之遂被杀有同掠脱归者道其事越数年夫以无嗣谋更娶议辄不谐因告其故妻夜梦妻曰我死后生某氏家今十岁矣后七年当复为君妇明日遣人聘之一言而合询其生与妇死年月同云

△刘全祖妻林氏

刘全祖妻林氏福州永福人父同 【按宋史本传讹全祖为全子永福为福清同为遇今并据林空斋传改正】 官至监丞兄空斋与全

祖共起义兵事败空斋见杀全祖亡命自经死元人执其妻具反状林叱曰林刘二族世为宋臣欲以忠义报国事不成天也何为反乎汝知去岁有以血书壁而死者乎是吾兄林空斋也吾与兄忠义之心一也死且求治汝于地下伺用生为遂遇害

△毛惜惜

毛惜惜者高邮妓女也端平二年别将荣全据城畔制置使遣人以武翼郎招之全伪降欲杀使者方与同党王安等宴饮惜惜耻于供给安斥责之惜惜曰初谓太尉降为太尉更生贺今闭门不纳使者纵酒不法乃畔逆耳妾虽贱妓不能事畔臣全怒杀之越三日李虎破关斩全及其妻子并王安以下预畔者百有余人悉傅于法

钦定续通志卷五百九十

●钦定续通志卷五百九十一 列女传三

列女传 【三】

辽

○辽

邢简妻陈氏 耶律常格 耶律弼妻萧伊逊 耶律珠展妻萧额勒本
耶律中妻萧绥兰 韩庆民妻

邢简妻陈氏

耶律常格

耶律弼妻萧伊逊

耶律珠展妻萧额勒本

耶律中妻萧绥兰

韩庆民妻

△邢简妻陈氏

邢简妻陈氏营州人父陞五代时累官司徒陈氏甫笄涉通经义泛览诗赋辄能诵尤好吟咏时以女秀才名之年二十归简孝舅姑闺门和睦亲党推重有六子陈氏亲教以经抱朴抱质皆以贤位宰相统和十二年卒睿智皇后闻之嗟悼赠鲁国夫人刻石以表其行及迁祔遣使以祭

△耶律常格

耶律氏太师达鲁之妹小字常格幼爽秀有成人风及长操行修洁自誓不嫁能诗文不苟作见前人得失厯能品藻咸雍闲作文以述时政其略曰君以民为体民以君为心人主当任忠贤人臣当去比周则政化平阴阳顺欲怀远则崇恩尚德欲强国则轻徭薄赋四端五典为治

教之本六府三事实生民之命淫侈可以为戒勤俭可以为师错枉则人不敢诈显忠则人不敢欺勿泥空门崇饰土木勿事边鄙妄费金帛满当思溢安必虑危刑罚当罪则民劝善不宝远物则贤者至建万世盘石之业制诸部强横之心欲率下则先正身欲治远则始朝廷帝称善时枢密使耶律伊逊爱其才屡求诗常格遗以回文伊逊知其讽已衔之太康三年皇太子坐事伊逊诬以罪按无迹获免会兄达鲁谪镇州常格与俱常布衣蔬食人问曰何自苦如此对曰皇储无罪遭废我辈岂可美食安寝及太子被害不胜哀痛后卒于家

△耶律帑妻萧伊逊

耶律帑妻萧氏小字伊逊国舅驸马都尉托斯和之女母呼图克公主【按辽史有萧托斯和传不言其为驸马都尉又公主表亦无呼图克之名或托斯和偶同姓名本非一人而所尚亦皇族女也】伊逊美姿容年二十始适努事亲睦族以孝谨闻尝与娣姒会争言厌魅以取夫宠伊逊曰厌魅不若礼法众问其故伊逊曰修己以洁奉长以敬事夫以柔抚下以宽母使君子见其轻易此之谓礼法自然取重于夫以厌魅获宠独不愧于心乎闻者大惭初努与枢密使伊逊有隙及皇太子废被诬夺爵没入兴圣宫流乌尔古部帝以伊逊公主女欲使绝婚伊逊辞曰陛下以妾蔑孳之亲使免流窜实天地之恩然夫妇之义生死以之妾自笄年从努一旦临难顿尔乖离背纲常之道于禽兽何异幸陛下哀怜与努俱行妾即死无恨帝感其言从之伊逊久在贬所亲执役事虽劳无难色事夫礼敬有加于旧寿隆中上书乞子孙为着帐郎官帝嘉其节召举家还子国隐干统闲始仕保大中伊逊在临汉谓诸子曰吾度卢彦伦必叛汝辈速避我当死之贼至遇害

△耶律珠展妻萧额勒本

耶律珠展妻萧氏小字额勒本国舅贝勒之女性端恇有容色自幼与他女异年十八归珠展谨裕贞婉娣姒推尊之及居珠展丧极哀毁既葬谓所亲曰妾今不幸失所天生必有死理之自然天祸妾身罹此酷罚复何依恃儆死者可见则从不可见则当与俱侍婢慰勉竟无回意自刃而卒

△耶律中妻萧绥兰

耶律中妻萧氏小字绥兰韩国王惠之四世孙聪慧谨愿年二十归中事夫敬顺亲戚咸誉其德多涉古今天庆中为贼所执潜置勿于履誓曰人欲污我者即死之至夜贼遁而免久之帝召中为五院都监中谓妻曰吾本无宦情今不能免我当以死报国汝能从我乎绥兰对曰谨

奉教及金兵徇地岭西尽徙其民中守节死绥兰悲戚不形于外人怪之俄跃马突出至中死所自杀

△韩庆民妻

韩庆民妻不知其姓氏庆民事辽为宣州节度使金天会中攻破宜州庆民不屈死以其妻配将士誓死不从遂自杀 【按本传原列金

史考庆民夫妇均为辽死事死节自应列于辽代方为不忘其本今移正】

钦定续通志卷五百九十一

●钦定续通志卷五百九十二 列女传四

列女传 【四】

○金

阿林妻萨勒扎 李宝信妻王氏 雷妇师氏 康住住 李文妻史氏 李英妻张氏 相琪妻栾氏

瓜尔佳华善妻额勒锦 萨哈连妻通吉氏 许古奏刘氏【二女】 张慥妻冯妙真 完颜长乐妻富察明秀 图

们呼图克们妻乌库哩氏 完颜苏呼妻 完颜莽格妻温特赫氏 完颜珠尔妻尹氏 苏嗣之母白氏 聂孝女舜英

完颜仲德妻 宝符李氏【张凤奴】

阿林妻萨勒扎

李宝信妻王氏

雷妇师氏

康住住

李文妻史氏

李英妻张氏

相琪妻栾氏

瓜尔佳华善妻额勒锦

萨哈连妻通吉氏

许古妻刘氏 【二女】

张慥妻冯妙真

完颜长乐妻富察明秀

图们呼图克们乌库哩氏

完颜苏呼妻

完颜莽格妻温特赫氏

完颜珠尔妻尹氏

苏嗣之母白氏

聂孝女舜英

完颜仲德妻

宝符李氏 【张凤奴】

△阿林妻萨勒扎

阿林妻萨勒扎金源郡王尼楚赫妹天辅六年黄龙府叛卒攻钞旁近部族时阿林从军萨勒扎纠集附近居民得男女五百人树营栅为保守计贼千余来攻萨勒扎以既为甲以裳为旗男夫授甲妇女鼓噪仗剑督战凡三日贼去皇统二年论功封金源郡夫人大定闲以其孙药师为穆昆

△李宝信妻王氏

李宝信妻王氏宝信为义丰县令张觉以平州叛王氏陷贼贼欲逼室之王氏骂贼贼怒遂支解之大定十二年赠贞烈县君

△雷妇师氏

雷妇师氏夫亡孝养舅姑姑病刲臂肉饲之即愈舅姑既没兄师达与夫侄规其财产伪立媒证致之官欲必嫁之县官不能辨曲直师畏逼投县署并中死诏有司祭其墓赐谥曰节

△康住住

康住住鄜州人夫早亡服阙父取之归家许严沂为妻誓死弗听欲还夫家不可得乃投崖死诏有司致祭其墓

△李文妻史氏

李文妻史氏同州白水人夫亡服阙誓死弗嫁父强取之归许姚乙为妻史不听乙诉之官被逮遂自缢死诏有司致祭其墓

△李英妻张氏

李英妻张氏英初为监察御史在中都张居潍州贞佑元年元兵取潍州入其家张尽以财物与之冀不辱己既而逼令上马张曰我死则为李氏鬼顿坐不起遂见杀追封陇西郡夫人谥庄洁

△相琪妻栾氏

相琪妻栾氏琪为莱州掖县司吏贞佑三年红袄贼陷掖县琪与栾氏及子俱为所得贼杀琪及其子而诱栾栾奋起以头触贼而仆骂曰我岂为犬彘所污者哉贼怒杀之追封西河县君谥庄洁

△瓜尔佳华善妻额勒锦

额勒锦宗室承充女明安瓜尔佳华善妻夫亡寡居有众千余兴定元年承充为上京元帅行省太平执承充应布什万努额勒锦治废垒修器械积刍粮以自守万努使人招之不从乃射承充书入城额勒锦碎之曰此诈也兵

急攻额勒锦与子富德督众力战杀数百人生擒十余人乃解去复遣将击万努兵获其将十人诏封郡公夫人富德视功迁赏承充已被执乘闲谓其二子农古博斯约曰吾起身宿卫致身一品死无恨若辈皆通显未尝一日报国家当思自处以为后图二子乃冒险自拔南走是年四月至南京

△萨哈连妻通吉氏

通吉氏平章迁嘉努女护卫尼楚赫妹适内族萨哈连闺门肃如萨哈连为中京留守元兵围之疽发背不能军通吉氏度城必破谓曰公本无功能为外路第一等官受国家恩最厚不幸病不能战设若城破当率精锐尽死报国幸无以我为虚萨哈连出巡城通吉氏取货货悉散家人艳妆盛服过于平日戒女使曰我死则扶置榻上以衾覆面举火焚之无使兵见吾面言讫自经萨哈连从外至因命焚之城破萨哈连投壕水死

△许古妻刘氏 【二女】

许古妻刘氏定海军节度使仲洙女贞佑初古挈家桥居蒲城后仕于朝刘氏母子留焉既而兵围蒲刘谓二女曰汝父在朝而兵势如此若城破被驱一为所污奈何不若俱死以自全攻益急刘氏与二女相继自尽事闻追封刘氏为郡君谥贞洁其长女谥定姜次肃姜以其事付史馆

△张慥妻冯妙真

冯妙真刑部尚书延登女适进士张慥兴定五年慥为洛川主簿元兵入郾延守臣以西路输刍粟不至檄慥诣平凉督之时延登为平凉行省员外郎慥欲偕妙真往妙真辞曰舅姑老矣虽有叔姒妾能安乎子行妾留奉养洛川破妙真从舅姑匿窟室兵索得之妙真泣与舅姑诀曰妇生不辰不得终执箕帚义不辱即携三子赴井死县人从死者数十人

△完颜长乐妻富察明秀

完颜长乐妻富察氏字明秀京宗迁归德以长乐为总领将兵扈从将行富察氏曰君第致身事上无以妾为念妾必不辱长乐一子尚幼出妻柴氏生明秀抚育如己出崔立之变富察以幼子付婢仆与家人诀曰崔立不道强人妻女兵在城下吾何所逃惟一死不负吾夫耳汝等惟善养幼子遂自缢死

△图们呼图克们乌库哩氏

乌库哩氏伯祥妹临洮总管图们呼图克们妻伯祥朝贵中声誉籍甚呼图克们死王事崔立之变乌库哩氏谓家人曰吾夫不辱朝廷我

敢辱吾兄及吾夫乎即自缢一婢从死

△完颜苏呼妻

完颜苏呼妻亡其姓氏当崔立之变谓所亲曰吾夫有天下重名吾岂肯随众陷身以辱吾夫今日一死固当但不可离吾家而死即自缢于室

△完颜莽格妻温特赫氏

完颜莽格妻温特赫氏莽格五朵山宣差提控和勒博子系出萧王叔父伊都节度秦州为元兵所攻适病不能军莽格为提控独当一面兵退而伊都死莽格以城守功世袭穆昆收充奉御及崔立之变莽格义不受辱与其妻诀妻曰君能为国家死我不能为君死乎一婢曰主死婢将安归夫妇以一绳同缢婢从之

△完颜珠尔妻尹氏

尹氏完颜珠尔妻珠尔系出萧王天兴二年从哀宗为南面元帅战死黄陵冈妻金源郡夫人闻夫死聚家货焚之遂自缢珠尔赠官弟长住即诏补护卫

△苏嗣之母白氏

白氏苏嗣之之母许州人宋尚书右丞辙五世孙妇初轼辙过俱葬邾城之小峩嵒山故五世皆居许昌白氏年二十余即寡居服除外家迎归兄嫂窃议改醮白氏牵车径归曰我为苏学士家妇乃欲使我失身乎自是外家非大故不往于宅东北为室画两先生像秋火严洁躬自洒扫士大夫往往过奠之天兴元年许州被兵嗣之为汴京厢官白拜辞两先生前曰儿子往京师老妇死无恨敢以告即自缢室侧家人并屋焚之嗣之本名宗之避讳改

△聂孝女舜英

聂孝女字舜英尚书左右司员外郎天骥长女适进士张伯豪伯豪卒归父母家崔立之变天骥被创甚舜英谒医救疗至割股肉以进而天骥竟死时京城围久食尽有嫁妻易一饱者重以剽夺暴凌无复人理舜英葬父之明日绝脰而死

△完颜仲德妻

完颜仲德妻不知其族氏崔立之变自毁其容服携妾及二子自汴走蔡蔡被围丁男皆乘城拒守谓仲德曰事势若此丈夫能为国出力妇人独不能耶率诸命妇自作一军亲运矢石于城下城下妇女争出继之城破自尽

△宝符李氏 【张凤奴】

哀宗宝符李氏国亡从后妃北迁至宣德州居摩诃院日夕寝处佛殿中作旛旒会

当赴龙庭将发即于佛像前自缢死天兴元年元兵攻城矢石之际忽见一女子呼于城下曰我倡女张凤奴也许州破被俘至此彼军不日去矣诸君努力坚守无为所欺言竟投濠死朝廷遣使驰祭于西门

钦定续通志卷五百九十二

●钦定续通志卷五百九十三 列女传五

列女传 【五】

元

○元

周珠赫妻崔氏 李伯通妻周氏 郭三妻杨氏 刘平妻胡氏【建德王氏女】 阚文兴妻王氏 朱进士妻郎氏【东平郑氏 太宁杜氏 安西杨氏】 秦氏二女【河闲孙氏女 安丰许氏女 庐州张氏女】 袁天佑妻焦氏【张兴祖妻周氏】 赵孝妇 霍氏二妇尹氏杨氏【任氏三妇 田氏三妇】 王德政妻郭氏 呼图克妻济噜克沁【宋仲荣妻梁氏 怀孟何氏 大名赵氏】 霍荣妻段氏【兴和吴氏 谢思明妻赵氏 田济川妻武氏 曹子英妻尤氏】 朱虎妻茅氏 俞新之妻闻氏李五妻刘氏 马英【赵玉儿】 李如忠妻冯淑安 李君进妻王氏 呼图克布哈妻伊喇氏萧氏妻赵哇儿【朱克彬妻周氏 费岩妻王氏 迈格妻耶律氏 郑腊儿妻康氏 陈某妻别娥娥 宋坚童妻班氏 李安童妻胡氏 刘恕妻赵氏 王思忠妻张氏 刘楫妻赵氏 徐顺妻彭氏 赵■〈月雀〉儿妻安氏 陈恭妻张氏 武寿妻刘氏 宋敬先妻谢氏 萨里妻萧氏 魏贵妻周氏 郭灰儿妻赵氏 朱某妻丁氏 王保子妻赵氏 某氏妻魏氏 裴某妻董贵哥 张保童妻郝氏 高托卜嘉妻白氏 杨某妻卢氏 蒙古泰珠妻额卜齐桑乌逊妻托克托沁】 朱淑信 葛妙真 张迈努妻王氏【王义妻卢氏 刘泽妻解氏 杨三妻张氏】 李伍妻张氏 郑伯文妻丁氏【白氏】 赵美妻王氏【丁从信妻李冬儿】 哈喇布哈妻多托哩昂吉尔氏【李安妻王氏 赵彬妻朱锦哥 王安哥】 罗五十三妻贵格蒙古氏 台叔龄妻刘氏 李智贞 陈端才妻蔡三玉 武用妻苏氏 任仲文妻林氏 江文铸妻范妙元【赵野妻柳氏】 姚氏【方宁妻宫胜娘】 孟志刚妻衣氏【曹德妻侯氏 周经妻吴氏 郭惟辛妻郝氏 陈辉妻白氏 张顽住妻杜氏 程

二妻成氏 李贞妻武氏 温都尔妻张氏】 汤
辉妻张氏【汤嫡 嫡妹】 俞士渊妻童氏 张氏女【高氏妇】
惠士玄妻王氏 李景文妻徐彩鸾
周氏妇毛氏 丁尚贤妻李氏 李让女顺儿 吴守正妻禹淑靖
黄仲起妻朱氏【妾冯氏 女临安奴 弟妇蔡
氏 乳母汤氏】 焦士廉妻王氏【妾杜氏 平阳赵氏】 陈淑真【李宗颐
妻夏婉常】 秦闰夫妻柴氏 特穆尔布哈妻
额森呼图克【妾玉莲】 吕彦能姊【彦能妻刘氏 二女子妇王氏 二孙女】
刘公翼妻萧氏 袁氏孤女 徐允让
妻潘妙圆【王琪妻蔡氏】 赵洙妻许氏 张正蒙妻韩氏【女池奴 季锐
妻何氏 女回娘】 刘氏二女【婢郑奴】
于同祖妻曹氏【妾李氏】 李仲义妻刘翠哥 李宏益妻申氏安
氏 郑琪妻罗妙安 周如砥女 狄恒
妻徐氏 柯节妇陈氏 李马儿妻袁氏 王上明妻李赛儿
杜思綱妻陶宗缓【妹宗婉弟妇王淑】 博啰特
穆尔妻高丽氏 张讷妻刘氏【子妇孙氏姚氏 张思孝妻华氏 子妇刘氏】
观音努妻布延德济张栋母 栋妻王氏 安志
道妻刘氏 宋谦妻赵氏【子妇温氏高氏 孙妇高氏徐氏】 齐关妻刘氏
王宗仁妻宋氏 王履谦妻齐氏【子妇萧
氏吕氏二女 二孙女】 王时妻安正同【妾李氏】 徐獠头母王氏【
妻岳氏二女】 程徐妻金氏【一女】 汪琰
妻潘氏【燕山妻李氏 惟德妻俞氏 吴子恭妻蒋氏】
周珠赫妻崔氏
李伯通妻周氏
郭三妻杨氏
刘平妻胡氏【建德王氏女】
阚文兴妻王氏
朱进士妻郎氏【东平郑氏 太宁杜氏 安西杨氏】
秦氏二女【河闲孙氏女 安丰许氏女 庐州张氏女】
袁天佑妻焦氏【张兴祖妻周氏】
赵孝妇
霍氏二妇尹氏杨氏【任氏三妇 田氏三妇】
王德政妻郭氏
呼图克妻济噜克沁【宋仲荣妻梁氏 怀孟何氏 大名赵氏】

霍荣妻段氏 【兴和吴氏 谢思明妻赵氏 田济川妻武氏 曹子英妻尤氏】
朱虎妻茅氏
俞新之妻闻氏 【李五妻刘氏】
马英 【赵玉儿】
李如忠妻冯淑安
李君进妻王氏
呼图克布哈妻伊喇氏
萧氏妻赵哇儿 【朱克彬妻周氏 费岩妻王氏 迈格妻耶律氏 郑腊儿妻康氏 陈某妻别娥娥 宋坚童妻班氏 李安童妻胡氏 刘恕妻赵氏 王思忠妻张氏 刘楫妻赵氏 徐顺妻彭氏 赵■〈月雀〉儿妻安氏 陈恭妻张氏 武寿妻刘氏 宋敬先妻谢氏 萨里妻萧氏 魏贵妻周氏 郭灰儿妻赵氏 朱某妻丁氏 王保子妻赵氏 某氏妻魏氏 裴某妻董贵哥 张保童妻郝氏 高托卜嘉妻白氏 杨某妻卢氏 蒙古泰珠妻额卜齐桑乌逊妻托克托沁】
朱淑信
葛妙真
张迈努妻王氏 【王义妻卢氏 刘泽妻解氏 杨三妻张氏】
李伍妻张氏
郑伯文妻丁氏 【白氏】
赵美妻王氏 【丁从信妻李冬儿】
哈喇布哈妻多托哩昂吉尔氏 【李安妻王氏 赵彬妻朱锦哥王安哥】
罗五十三妻贵格蒙古氏
台叔龄妻刘氏
李智贞
陈端才妻蔡三玉
武用妻苏氏
任仲文妻林氏
江文铸妻范妙元 【赵野妻柳氏】
姚氏 【方宁妻宫胜娘】
孟志刚妻衣氏 【曹德妻侯氏 周经妻吴氏 郭惟辛妻郝氏 陈辉妻白氏 张顽住妻杜氏 程二妻成氏 李贞妻武氏 温都尔妻张氏】
汤辉妻张氏 【汤漪 漪妹】
愈士渊妻童氏

张氏女 【高氏妇】
惠士玄妻王氏
李景文妻徐彩鸾
周氏妇毛氏
丁尚贤妻李氏
李让女顺儿
吴守正妻禹淑靖
黄仲起妻朱氏 【妾冯氏 女临安奴 弟妇蔡氏 乳母汤氏】
焦士廉妻王氏 【妾杜氏 平阳赵氏】
陈淑真 【李宗颐妻夏婉常】
秦闰夫妻柴氏
特穆尔布哈妻额森呼图克 【妾玉莲】
吕彦能姊 【彦能妻刘氏 二女子妇王氏 二孙女】
刘公翼妻萧氏
袁氏孤女
徐允让妻潘妙圆 【王琪妻蔡氏】
赵洙妻许氏
张正蒙妻韩氏 【女池奴 季锐妻何氏 女回娘】
刘氏二女 【婢郑奴】
于同祖妻曹氏 【妾李氏】
李仲义妻刘翠哥
李宏益妻申氏安氏
郑琪妻罗妙安
周如砥女
狄恒妻徐氏
柯节妇陈氏
李马儿妻袁氏
王士明妻李赛儿
杜思綱妻陶宗媛 【妹宗婉 弟妇王淑】
博啰特穆尔妻高丽氏
张讷妻刘氏 【子妇孙氏姚氏 张思孝妻华氏 子妇刘氏】
观音努妻布延德济 【张栋母 栋妻王氏】
安志道妻刘氏
宋谦妻赵氏 【子妇温氏高氏 孙妇高氏徐氏】

齐关妻刘氏

王宗仁妻宋氏

王履谦妻齐氏 【子妇萧氏吕氏二女 二孙女】

王时妻安正同 【妾李氏】

徐猱头母王氏 【妻岳氏二女】

程徐妻金氏 【一女】

汪琰妻潘氏 【燕山妻李氏 惟德妻俞氏 吴子恭妻蒋氏】

△周珠赫妻崔氏

崔氏周珠赫妻也从夫官平阳金将来攻城克之下令官属妻子敢匿者死时珠赫以使事在上党崔急抱幼子祯以诡计自言于将将信之使军吏书其臂以出崔曰妇人臂使人执而书非礼也以金赂吏使书之纸吏曰吾知汝诚贤妇然今不敢违令崔自揜袖吏县笔而书焉既出有言其诈者将怒命追之崔与祯伏土窖三日得免既与夫会未几夫病亡崔大恸枕前放散婢仆躬自纺绩悉以资产遗亲旧有权贵使人讽求娶辄自爬毁其面四十年未尝妄言笑与吉会人比古烈妇云

△李伯通妻周氏

周氏滦平石城人年十六适李伯通生一子名易金末伯通监丰润县城破不知所终周与易被俘谓偕行者曰人苟爱其生万一受辱不如死也即自投于堑主者怒三刃其体而去得不死遂携易而逃闲关至汴绩纆以自给教易有成

△郭三妻杨氏

杨氏东平须城人夫郭三从军襄阳死戍所母欲夺嫁之杨号痛自誓乃已久之夫骨还舅曰新妇年少终必他适可令吾子鰥居地下耶将求里人亡女骨合瘞之杨闻之益悲不食五日自经死遂与共葬焉

△刘平妻胡氏 【建德王氏女】

胡烈妇渤海刘平妻也至元七年平戍枣阳挈家以行夜宿沙河傍有虎至衔平去胡觉起追及之持虎足顾呼车中儿取刀杀虎虎死扶平还至季阳城求医以伤卒县官言状命恤其母子仍旌异之至大闲建德王氏女父出耘舍旁遇豹为所噬曳之升山父大呼女识父声惊趋救以父所弃锄击豹脑杀之父乃得生

△阚文兴妻王氏

阚文兴妻王氏名丑丑建康人也文兴从军漳州为万户府知事王俱行至元十七年陈吊眼作乱攻漳州文兴率兵与战死之王被掠乃给贼曰俟吾葬夫即从汝也贼许之遂脱负尸还积薪焚之即自投火中死至顺三年事

闻赠文兴侯爵谥英烈王氏贞烈夫人有司立庙祀之

号双节云

△朱进士妻郎氏 【东平郑氏 太宁杜氏 安西杨氏】

郎氏湖州安吉人宋进士朱某妻也从夫仕浙东至元闲夫歿郎护丧还至玉山里留居避盗势家柳氏欲强聘之郎誓不从夜弃装奉柩遁柳邀之中道力拒得免家居养姑甚谨姑尝病郎祷于天割股肉进啖而愈大德十一年旌美之又有东平郑氏太宁杜氏安西杨氏并少寡守志割体肉疗姑病云

△秦氏二女 【河闲孙氏女 安丰许氏女 庐州张氏女】

秦氏二女河南宜阳人父有危疾姊闭户默祷啗已脑和药进之而愈后父复病欲绝妹割股肉置粥中小啜即苏又有河闲孙氏女父病癩十年女祷于天求以身代且吮其脓血旬月而愈许氏女安丰人父疾割股肉啖之乃痊张氏女庐州人嫁为高屋妻母病目丧明张归省以舌舐之目忽能视州县各以状闻褒表之

△袁天佑妻焦氏 【张兴祖妻周氏】

焦氏涇阳袁天佑妻也至元二十三年天佑从军死甘州焦年少宗族欲改嫁之焦哭曰袁氏不幸三世早寡自祖姑以来皆守节岂可至吾而遂废乎吾生为袁氏妇死则葬袁氏土尔终不能改容事他人也众不敢复言周氏泽州人嫁为安西张兴祖妻年二十四兴祖歿舅姑欲使再适周弗从曰妾家祖父皆早世妾祖母妾母并以贞操闻妾或中道易节是忘故夫而辱先人也忘故夫不义辱先人不孝不孝不义妾不为也居嫠三十年奉舅姑生事死葬无违礼有司以闻并赐旌异

△赵孝妇

赵孝妇德安应城人早寡家贫佣织于人得美食必持归奉姑自啖羸粉不厌尝念姑老无棺乃以次子鬻富家得钱买杉木治之棺成会南邻失火时南风烈甚势将及妇亟扶姑出避而棺重不可移乃抚膺大哭曰吾为姑卖儿得棺无能为我救之者言毕风转而北得不焚人以为孝感所致

△霍氏二妇尹氏杨氏 【任氏三妇 田氏三妇】

霍氏二妇尹氏杨氏郑州人至元闲尹氏夫耀卿歿姑命其改嫁尹曰妇之行一节而已再嫁而失节妾不忍为也姑曰世之妇皆然何耻之有尹曰人之志不同妾知守妾志尔姑不能强及杨氏夫显卿继歿虑姑欲其嫁即先白姑曰妾闻娣姒犹兄弟也姒既留妾可独去乎愿终事吾姑姑曰汝果能若是吾复何言同处二十余年以节孝闻又有邠州任氏干州田氏

皆一家三妇少寡誓不他适戮力蚕桑以养舅姑事闻

并命褒四 【按王圻续通考载永寿田大妻郝氏田二妻胥氏田三妻周氏兄弟俱死于兵诸妇年二十皆守节不嫁考元史地理志永寿县隶干州盖即此所云干州田氏三妇也】

△王德政妻郭氏

王德政妻郭氏大名人少孤事母张氏孝谨以女仪闻于乡及笄富贵家慕之争求聘母不许时德政训蒙里中年四十余貌甚陋母以贫不能教二子欲纳德政为婿使教之宗族皆不然郭氏慨然愿顺母志既婚嘱教二弟有成未几德政卒郭氏年方二十余励节自守太德闲表其家

△呼图克妻济噜克沁 【宋仲荣妻梁氏 怀孟何氏 大名赵氏】

济噜克沁蒙古氏年二十六夫呼图克病卒誓不再醮孝养舅姑逾一十五年舅姑歿应衣垢面庐墓终身又有翼城宋仲荣妻梁氏舅歿负土为坟怀孟何氏大名赵氏并以夫歿守志养舅姑以寿终亲负土筑其坟高三丈余

△霍荣妻段氏 【兴和吴氏 谢思明妻赵氏 田济川妻武氏 曹子英妻尤氏】

段氏隆兴霍荣妻也荣无子尝乞人为养子荣卒段氏年二十六养舅姑以孝称舅姑歿荣诸父仲汶贪其产谓曰汝子假子也可令归宗汝无子宜改适霍氏业汝无与焉段曰家资可不计但再醮非义尚容妾思之即退入寝室引针刺面墨清之誓死不贰又有兴和吴氏自刺其面成纪谢思明妻赵氏自髡其发冀宁田济川妻武氏溧水曹子英妻尤氏啮指滴血并誓不更嫁各以有司为请旌之

△朱虎妻茅氏

朱虎妻茅氏崇明人大德闲虎官都水监坐罪籍其家吏录送茅氏及二子赴京太医提点师某乞归家欲妻之茅氏誓死不从母子三人以裾相结连昼夜倚抱号哭形貌销毁师知不可夺释之托居永明尼寺忧愤不食卒

△俞新之妻闻氏 【李五妻刘氏】

闻氏绍兴俞新之妻也大德四年新之歿闻尚少父母虑不能守欲更嫁之闻哭曰一身二夫烈妇所耻妾可无生可无耻乎即断发自誓父知其志笃乃不忍强姑久病风且失明闻手涤溷秽时漱口上堂舐其两目目为复明及姑卒与子亲负土治葬朝夕悲号乡里为之语曰欲学孝妇当问俞母又有刘氏渤海李五妻也少寡父母使再醮不从舅患疽刘祷于天数日溃吮其血乃愈既而亲挽小车载舅诣岳祠以答神贶

△马英 【赵玉儿】

马英河内人性孝友父丧哀毁二兄继歿英独事母甚谨又奉二寡嫂与居使得保全罄节及丧母卜地葬诸丧亲负土为四坟手植松柏
庐墓侧终身赵氏女名玉儿冠州人尝许为李氏妇未婚夫死遂誓不嫁以养父母父母歿负土为坟乡里移孝焉

△李如忠妻冯淑安

冯氏名淑安字静君大名宦家女山阴县尹山东李如忠继室也如忠初娶蒙古氏生子任数岁而卒大德五年如忠病笃谓冯曰吾已矣
其奈汝何冯氏引刀断发自誓不他适如忠歿两月遗腹生一子名伏李氏及蒙古氏之族在北闻如忠歿于官多遗财相率来山阴冯氏方病
乘闲尽取其货及子任去以冯不与较一室萧然唯余如忠及蒙古氏之柩而已朝夕哭泣邻里不忍闻久之鬻衣权厝二柩馘山下携其子庐
墓侧时年二十二羸形苦节为女师以自给父母来视之怜其孤苦欲使更事人冯爪面流血不肯从居二十年始获归葬

△李君进妻王氏

李君进妻王氏辽阳人大德八年君进病卒卜葬将发引亲戚邻里咸会谓众曰夫妇死同穴义也君从夫逝不亦可乎因抚棺大恸呕血
升许即仆地死

△呼图克布哈妻伊喇氏

伊喇氏同知湖州路事耶律呼图克布哈妻也夫歿割耳自誓既葬庐墓侧悲号不食死

△萧氏妻赵哇儿 【朱克彬妻周氏 费岩妻王氏 迈格妻耶律氏 郑腊儿妻康氏 陈某妻别娥娥 宋坚童妻班氏 李安童妻胡氏 刘恕妻赵氏 王思忠妻张氏 刘楫妻赵氏 徐顺妻彭氏 赵■〈月雀〉儿妻安氏 陈恭妻张氏 武寿妻刘氏 宋敬先妻谢氏 萨里妻萧氏 魏贵妻周氏 郭灰儿妻赵氏 朱某妻丁氏 王保子妻赵氏 某氏妻魏氏 裴某妻董贵哥 张保童妻郝氏

高托卜嘉妻白氏 杨某妻卢氏 蒙古泰珠妻额卜齐桑乌逊妻托克托沁】

赵氏名哇儿大宁人年二十夫萧氏病剧谓哇儿曰我死汝年少若之何哇儿曰君幸自宽脱有不讳妾不独生遂命匠制巨棺夫歿即自经死家人同棺敛葬焉 【按王圻续通考作赵哇儿妻萧氏与元史异谨识】 又有雷州朱克彬妻周氏大都费岩妻王氏迈格妻耶律氏曹州郑腊儿妻康氏陕州陈某妻别娥娥大同宋坚童妻班氏李安童妻胡氏晋州刘恕妻赵氏冀宁王思忠妻张氏饶州刘楫妻赵氏东平徐顺

妻彭氏大宁赵■〈月雀〉儿妻安氏陈恭妻张氏武寿妻刘氏宋敬先妻谢氏萨里妻
萧氏古城魏贵妻周氏任城郭灰儿妻赵氏枣阳朱某
妻丁氏叶县王保子妻赵氏兴州某氏妻魏氏滦州裴某妻董贵哥成都张保童妻郝氏
利州高托卜嘉妻白氏河南杨某妻卢氏蒙古泰珠妻
额卜齐桑乌逊妻托克托沁并以早寡不忍独生以死从夫者事闻悉命褒表或赐钱赠
谥云

△朱淑信

朱淑信山阴人少寡誓不再嫁一女妙净幼器父双目失明及长择偶者不至家贫
号凶母子相依以苦节自厉士人王士贵重其孝乃求
娶焉

△葛妙真

葛妙真宣城民家女九岁闻日者言母年五十当死妙真悲忧祝天誓终身不嫁斋
素以延母寿母后年八十一乃卒辉和尔氏三女家钱
塘诸兄远仕不归母思之成疾三女欲慰母意其断发誓不嫁以养母同力持护四十余
年母以寿终事上并赐旌异

△张迈努妻王氏 【王义妻卢氏 刘泽妻解氏 杨三妻张氏】

王氏燕人张迈努妻也年十六迈努官钱塘病歿葬城四十里外王每旦被发步往
奠伏墓恸绝久而致病舅姑力止其行乃已服阕舅姑
欲使他适王固不从菴居三十年又有冯翊王义妻卢氏睢阳刘泽妻解氏东平杨三妻
张氏并守志有节命旌其门

△李伍妻张氏

张义妇济南邹平人年十八归里人李伍伍与从子零戍福宁未几死戍所张家居
养舅姑甚至父母舅姑病凡四刲股肉救不懈及死叹
曰妾夫死数千里外妾不能归骨以葬者以舅姑父母在无所仰故也今不幸俱死而夫
骨终暴弃远土妾敢爱死乎乃卧积冰上誓曰天若许
妾取夫骨虽寒甚当不死踰月竟无恙乡人异之相率赠钱大书其事于衣以行至福建
见零问夫葬地则榛莽四塞不可识张哀恸欲绝夫忽
降于童言劝无异生时告张死时事甚悉且指示骨所在处张如其言发得之官义之上
于大府使零护丧还给钱使葬仍旌门复其役

△郑伯文妻丁氏 【白氏】

丁氏新建郑伯文妻也大德闲伯父病将没丁与诀曰君脱有不讳妾当从但君父
母已老无他子妇侍养妾且忍死以奉其余年必不改
事他人也伯父卒丁年二十七居丧哀毁服既除父母屡议夺嫁之丁每闻必恸哭曰妾
所以不死者将以事舅姑耳今舅姑在堂妾可不信于

良人乎遂止舅姑病丁夙夜护持衣不解带及死丧葬尽礼事上表其门白氏太原人夫慕释氏教弃家为僧白氏年二十服勤绩纆以养姑夫偶还迫使他适白断发誓不从夫不能夺乃去姑卒竭力营葬画姑像祀之终身

△赵美妻王氏 【丁从信妻李冬儿】

赵美妻王氏内黄人至治元年美溺死王誓守志舅姑欲使更适王曰妇义无再醮且舅姑在妾可弃去耶舅姑欲以族侄与继婚王拒不从迫之力王知不免即引绳自经死李冬儿甄城丁从信妻也年二十三从信歿服阕父母呼妇问之曰汝年少无子何以自立吾为汝再择婿冬儿不从诣从信冢欲缢树上家人防之不果还家入室自经死李氏滨州惠高儿妻也年二十六高儿歿父欲嫁之不从自经死

△哈喇布哈妻多托哩昂吉尔氏 【李安妻王氏 赵彬妻朱锦哥王安哥】

多托哩昂吉尔氏有色善女工年二十六夫哈喇布哈卒前妻有二子皆壮无妇欲以本俗制收继之多托哩以死自誓乃析业而居三十年以贞操闻王氏成都李世安妻也年十九世安卒弟世显欲收继之王不从引刃断发复自割其耳创甚医疗百日乃愈状上并旌之赵彬妻朱氏名锦哥洛阳人也天历初西兵掠河南朱被执逼与乱拒曰我良家妇岂从贼耶兵怒提曳捶楚之朱度不能脱即给之曰汝幸释我舍后井傍有瘞金当发以遗汝兵信之乃随其行朱近井即抱三岁女踊身赴井中死是岁又有偃师王氏女名安哥从父避兵印山丁家洞兵入搜得之见其色美驱使欲污之不从投涧死有司言状并表其闻

△罗五十三妻贵格蒙古氏

贵格蒙古氏同知宣政院事罗五十三妻也天历初夫以罪贬岭南籍其家诏以贵格赐近侍茂罕茂罕亲至其家迎之贵格度不能免以饮食延茂肝于厅事如厩自经死

△台叔龄妻刘氏

台叔龄妻刘氏顺宁人也地震屋坏压叔龄不能起家复失火叔龄母前救不得欲就焚叔龄望见呼曰吾已火可得出当亟救吾母刘谓夫妹曰汝救汝母汝兄必死吾不用复生矣即自投火中死

△李智贞

李智贞建宁浦城人父子明无子智贞九岁母疾调护甚谨及卒哀恻欲绝不茹荤者三年治女工奉父甘旨无乏乡里移为孝女父尝许为郑全妻未嫁从父客邵武邵武豪陈良悦其慧强纳采求聘智贞断发拒之且数自求死良不能夺卒归全泰定闲全病歿智贞悲泣不食数日死

△陈端才妻蔡三玉

蔡三玉龙溪东端才妻也盗掠龙溪父广瑞与端才各窜去三玉偕夫妹出避邻祠中盗入斫夫妹见三玉美与里妇欧氏同驱纳舟中迫妻之三玉佯许诺因起更衣投水死【按续宏简录云后至元闲寇掠龙溪里媪集里中妇女同舟避难寇追及三玉亟以水渍衣冠视三玉有姿色欲污之三玉给曰衣湿求更衣矚寇取衣自投水死所载与此稍异】越三日尸流至广瑞舟侧广瑞识为女收敛之欧氏脱归言状有司高其操为请表之乃命旌门复役

△武用妻苏氏

武用妻苏氏真定人徙家京师用疾苏氏刲股为粥以进疾即愈生子德政四岁而寡夫兄利其赀欲嫁之不听夫兄死惟余三弱孙苏取育之德政长事苏至孝苏死时天大旱德政方掘地求水以供葬事忽二蛇跃出因默祷焉二蛇一东一北随其地掘之果得泉有司上其事旌复其家

△任仲文妻林氏

任仲文妻林氏宁海人家甚贫年二十八而寡姑患风疾不良于行林扶持惟谨抚育三子皆有成年一百三岁卒

△江文铸妻范妙元【赵野妻柳氏】

江文铸妻范氏名妙元奉化人年二十一归于江未合卺夫忽以痼疾卒范曰我既入江氏门即江氏妇也遂居其家抚诸侄如己子后卒有柳氏者蓟郡人为户部主事赵野妻未成婚而野卒其兄将夺其志柳曰业归赵氏夫妇之礼已成岂有他志哉后寝疾不肯服药曰我年二十六而寡今已逾半百得死此疾幸矣遂卒

△姚氏【方宁妻宫胜娘】

姚氏余杭人【按续宏简录作余姚人与此互异】居山谷闲夫出刈麦姚居家执爨母何氏往汲涧水久不至俄闻覆水声亟出视则虎衔其母以走姚仓卒往逐之以手殴其胁邻人竞执械以从虎乃置之而去姚负母归求药疗之奉养二十余年而卒又方宁妻宫胜娘者建宁人夫耨田胜娘馐之见一虎方攫其夫胜娘即弃馐奋挺连击之虎舍去胜娘负夫至中途而死有司以闻为旌复其家

△孟志刚妻衣氏【曹德妻侯氏 周经妻吴氏 郭惟辛妻郝氏 陈辉妻白氏

张顽住妻杜氏 程二妻成氏 李贞妻武氏
温都尔妻张氏】

衣氏汴梁儒士孟志刚妻贫而无子夫死有司给以棺木衣给匠者曰可宽大其棺

吾夫有遗衣服欲尽置其中匠者然之是夕衣具鸡黍祭其夫家之所有悉散之邻里及同居王媪遂自经有侯氏者钩州曹德妻德病死侯氏语人曰年少夫亡妇人之不幸也欲守吾志而乱离如此其能免乎遂缢死于墓又周经妻吴氏郭惟辛妻郝氏陈辉妻白氏张顽住妻杜氏程二妻成氏李贞妻武氏温都尔妻张氏并夫亡自缢死事闻咸旌异之

△汤辉妻张氏 【汤姁 姁妹】

汤辉妻张氏处州龙泉人会兵乱其家财先已移入山砦夫与姑共守之舅以疾未行张归任药膳具以舆自随既而贼至即命以舆载其舅而已遇贼贼以刃胁之曰从我则生否则死张请受刃贼未忍杀张惧污即夺其刃自刳死同邑有汤姁者美姿容贼杀其父母以刃胁之姁以头触刃贼怒厮杀之其妹亦不受辱而死

△愈士渊妻童氏

愈士渊妻童氏严州人姑性严待之寡恩童柔顺事之无少拂至正十三年贼陷威平纵兵剽掠至士渊家童以身蔽姑众欲污之童大骂不屈一卒以刀击其左臂愈不屈又一卒断其右臂骂犹不绝众乃披其面而去寻死

△张氏女 【高氏妇】

张氏女高邮人至正中张士诚据高邮贼知张女有姿艳叩其家索之将害其父母女不得已乃出贼挟之行女欣然从之过桥投水死同郡有高氏妇者携女从夫出避乱度不免入道旁空舍脱金缠臂与女且语夫令疾行夫挈女稍远即自经夫抵仪真夜梦妇来告曰我已缢死彼舍矣

△惠士玄妻王氏

惠士玄妻王氏大都人至正十四年士玄病革王曰吾闻病者粪苦则愈乃尝其粪颇甘王色愈忧士玄嘱曰我病必不起前妾所生子汝善保护之数日士玄卒比葬王居墓侧蓬首垢面哀毁逾礼常以妾子置左右岁余妾子亦死乃泣曰无复望矣屡引刀自杀家人惊救得免至终丧亲旧携酒祭奠祭毕众欲行酒王已经死于树矣又有王氏者良乡费隐妻也隐有疾王数尝其粪及疾笃嘱王善抚其妾子女遂没王居丧抚其子女既而子又死服除谓亲属曰夫亡子死妾何生为乃执女手曰汝今已长稍知人事管钥在此汝自司之遂相恸哭是夜缢死园中

△李景文妻徐彩鸾

李景文妻徐氏名彩鸾字淑和浦城徐嗣源之女略通经史每诵文天祥六歌必为之感泣至正十五年青田贼寇浦城徐从父逃旁近山

谷贼持刀欲害其父徐前曰此吾父也宁杀我贼舍父而止徐拘至桂林桥厉声骂贼投于水贼竟出之既而乘闲复投水死

△周氏妇毛氏

周妇毛氏松阳人至正十五年随夫避乱麻鹭山中为贼所得胁之曰从我多与若金否则杀汝毛曰宁剖我心不愿汝金贼以刀摩其身

毛大詈贼怒剗其肠而去

△丁尚贤妻李氏

丁尚贤妻李氏汴梁人至正十五年贼至欲虏之李怒曰我家六世义门岂能从贼以辱身乎阖门三百余口俱被害

△李让女顺儿

李顺儿许州儒士李让女性聪慧颇涉经传年十八未嫁至正十五年贼陷钧州密迓许昌父谓其母曰吾家以诗礼相传此女必累我女闻之注曰父母可自逃难勿以我为忧至后园自经死

△吴守正妻禹淑靖

吴守正妻禹氏名淑靖字素清绍兴人至正十六年徙家崇德之石门是年盗陷崇德淑靖仓皇携八岁女登舟以避有盗数辈奔入其舟将犯之抱幼水投水死

△黄仲起妻朱氏 【妾冯氏 女临安奴 弟妇蔡氏 乳母汤氏】

黄仲起妻朱氏杭州人至正十六年张士诚寇杭州其女临安奴仓皇言曰贼至矣我别母求一死也俄而贼驱诸妇至其家且指朱母子曰为我看守日暮我当至朱惧受辱遂与女俱缢死妾冯氏亦自经仲起弟妻蔡氏抱幼子玄童与乳母汤氏皆自缢及暮贼至见诸尸满室执仲起将杀之哀求得脱遂尽掠其家财而去

△焦士廉妻王氏 【妾杜氏 平阳赵氏】

焦士廉妻王氏博兴人养姑至孝至正十七年毛贵乱山东官军竟出掠王被执给曰我家墓田有藏金可共取也信之随王至墓所王哭曰我已得死所矣实无藏金汝可于此杀我乃与妾杜氏皆遇害又有赵氏女者平阳人年二十未嫁寇乱赵被驱迫以行度不能免给贼曰吾取所藏金以遗汝贼信之遂还投池而死

△陈淑真 【李宗颐妻夏婉常】

陈淑真富州陈壁之女壁故儒者避乱移家龙兴淑真七岁能诵诗鼓琴至正十八年陈友谅寇龙兴淑真见邻姬仓皇来告乃取琴坐牖下弹之曲终泫然流涕曰吾绝弦于斯乎父母怪问之曰城陷必遭辱不如早死明日贼至其居临东湖遂溺焉水浅不死贼抽矢胁上岸不从

射杀之时同郡李宗颐妻夏婉常亦儒家女与女匿后圃中贼至挟其女共投井死

△秦闰夫妻柴氏

秦闰夫妻柴氏晋宁人闰夫前妻遗一子尚幼柴鞠之如己出未几柴有子闰夫病且死嘱抚二幼子闰夫死柴辛勤纺绩遣二子就学至正十八年贼犯晋宁其长子为贼驱迫在围中既而得脱官军至怨家诉其为贼法当诛柴引次子诣官泣诉曰往从恶者吾次子非长子也次子曰我之罪可加于兄乎鞠之至死不易其言决狱者反疑次子非柴所出讯之他囚始得其情义柴之行并释之有司上其事旌其门而复其家

△特穆尔布哈妻额森呼图克 【妾玉莲】

额森呼图克蒙古钦察氏大宁路达噜噶齐特穆尔布哈之妻以夫贵封云中郡君夫坐事免官居大宁至正十八年红巾贼至额森呼图克与妾玉莲走尼寺中为贼所得令与众妇缝衣拒不肯贼胁以刃骂曰我达噜噶齐妻也汝曹贼耳我不能为针工以从贼遂遇害玉莲自缢者三贼并杀之先是其子谔勒哲年十四与父出城见执于贼谔勒哲拜哭请以身代父死贼爱甚姿秀遂挈以从久之脱归访母尸并玉莲而葬焉

△吕彦能姊 【彦能妻刘氏 二女子妇王氏 二孙女】

吕孀妇陵州吕彦能姊也久居彦能家至正十八年贼犯陵州彦能与家人谋所往姊曰我丧夫二十年又无后不死何为苟辱身则辱吾弟矣赴井死彦能妻刘氏曰妾为君家妇二十八年兹不幸逢乱离必不负君君可自往妾入井矣与二女及子妇王氏二孙女皆溺一门死者七人

△刘公翼妻萧氏

刘公翼妻萧氏济南人通书史至正十八年毛贵兵将至与夫谋曰妾诗书家女誓以冰雪自将傥城陷被执悔将何追妾以二子一女累君去作清白鬼耳夫曰事未至何急于此亡何城陷萧自缢死

△袁氏孤女

袁氏孤女建康路溧水州人年十五母严氏孀居贫病瘫痪卧床数年女事母至孝至正十二年兵火延其里邻妇强女出避火女泣曰我何忍舍母去乎入室抱母共焚死

△徐允让妻潘妙圆 【王琪妻蔡氏】

徐允让妻潘氏名妙圆山阴人至正十九年与夫从舅避兵山谷闲舅被执夫泣救得免贼遂杀其夫欲强辱潘潘给之曰我夫既死从汝

必矣若能焚吾夫可无憾也兵信之聚薪以焚潘遂投火死又诸暨蔡氏者王琪妻也至正二十二年张士诚陷诸暨蔡氏避长宁乡山中兵猝至有造纸镬方沸遂投其中而死

△赵洙妻许氏

赵洙妻许氏集贤大学士有壬之侄女也至正十九年红巾贼陷辽阳洙时为儒学提举夫妇共匿资善寺洙以叱贼见害许不知也贼甘言诱之令指示金银处许曰吾诗书冠冕故家不幸遇难但知其夫死他不知也贼以刀胁之色不变已而知其夫死因恸哭仆地骂声不绝曰吾母居武昌死于贼吾女兄弟亦死贼今吾夫又死焉使我得报汝当醢汝矣遂遇害贼退寺僧与洙合葬焉

△张正蒙妻韩氏 【女池奴 季锐妻何氏 女回娘】

张正蒙妻韩氏绍兴人正蒙尝为湖州德清税务提领至正十九年绍兴余变正蒙谓韩氏曰吾为元朝臣子义当死韩曰君果尽忠吾必死节遂俱缢其女池奴年十七泣曰父母既亡吾何独生亦投崖而死 【按浙江通志云次女越奴日匿山中夜守尸侧竟饿死传未载附识

】又何氏者龙泉季锐妻也避兵于邑之绳门岩贼至被执欲污之与子荣儿女回娘投崖而死

△刘氏二女 【婢郑奴】

刘氏二女长曰贞年十九次曰孙年十七龙兴人皆未许嫁陈友谅寇龙兴其母泣谓二女曰城且破置汝何所二女曰宁死不辱父母也城陷二女登楼自缢婢郑奴亦自缢

△于同祖妻曹氏 【妾李氏】

于同祖妻曹氏茶陵人父德夫教授湖湘闲同祖有声诸生中因以女妻焉至正二十年茶陵陷闻妇女多被驱迫谓其夫及子曰是尚可全生乎我义不辱身以累汝遂自刭死妾李氏抱持之不得亦引刀自刭绝而复苏曰得从小君地下足矣是夕死

△李仲义妻刘翠哥

李仲义妻刘氏名翠哥房山人至正二十年县大饥平章刘哈喇布哈乏食执仲义欲烹之刘奔救涕泣伏地告曰吾夫瘦小不足疗饥幸烹吾以代夫死兵遂释其夫而烹刘闻者哀之

△李宏益妻申氏安氏

李宏益妻申氏冀宁人至正二十年贼陷冀宁申语其夫曰君当速去勿以我为累若贼至必以妾故害及君矣言讫投井死宏益再嬖安氏居一岁而宏益卒安氏年二十泣谓诸亲曰女子一适人终身不改不幸夫死虽生何

益乃自缢于枢侧

△郑琪妻罗妙安

郑琪妻罗氏名妙安信州弋阳人幼聪慧能暗诵列女传年二十归琪琪同居百余口罗执妇道无闲言琪以军功擢铅山州判官至正二十年信州陷罗度不免辄取所佩刀淬砺令钅甚琪问何为对曰时事如此为自全计耳已而兵至自刎死

△周如砥女

周烈女年二十未适人父如砥为绍兴新昌典史至正二十年乡民作乱如砥与女避于邑西之客僧岭女为贼所执欲以为妻女曰我周典史女也死即死岂能从贼耶贼遂杀之

△狄恒妻徐氏

狄恒妻徐氏天台人恒早没徐守节不再醮至正二十年乡民为乱避难牛囤山为贼所驱徐给之曰吾渴甚欲求水一杯贼令自汲即投井死

△柯节妇陈氏

柯节妇陈氏者长乐石梁人至正二十二年海贼劫石梁其夫适在县郭陈出避贼道与贼遇被执以行陈且行且骂贼乱捶之夫以登舟骂不已忽振衣自投江中死

△李马儿妻袁氏

李马儿妻袁氏瑞州人至正二十二年马儿没袁年十九誓不再嫁有王成者闻袁美挟势欲妻之袁遂往夫墓痛哭缢死树下

△王士明妻李赛儿

王士明妻李氏名赛儿房山人至正二十五年叛将珠展军至县李及其女皆被执士明随至军军怒逐之李谓女曰吾与汝必不得脱与其受辱不若死女曰母先杀我李即以军所遗钅刀杀其女遂自杀珠展闻之为之葬祭仍书其门曰王士明妻李氏贞节之门有司上其事为树碑焉

△杜思綱妻陶宗媛 【妹宗婉 弟妇王淑】

陶宗媛台州人儒士杜思綱妻也归杜四载而夫亡矢志守节台州被兵宗媛方居姑丧忍死护柩为游军所执迫胁之宗媛曰我若畏死岂留此耶任汝杀我以从姑于地下尔遂遇害其妹宗婉弟妻王淑亦皆赴水死

△博啰特穆尔妻高丽氏

高丽氏宣慰副使博啰特穆尔妻也至正二十七年夫死于兵谓人曰夫既死矣吾安能复事人乎乃积薪塞户以火自焚死

△张讷妻刘氏 【子妇孙氏姚氏 张思孝妻华氏 子妇刘氏】

张讷妻刘氏蓝田人讷为监察御史早卒刘守志家居河东受兵刘二子衡衍俱以事外出度不能自脱遂与二妇孙氏姚氏同缢焉有华

氏者大同张思孝妻为守将摩该兵所执以不受辱见杀其妇刘氏僵压姑尸大骂不已兵并杀之后家人殓其尸妇姑手犹相持不舍

△观音努妻布延德济 【张栋母 栋妻王氏】

观音努妻布延德济蒙古氏宗王赫噜之女大都被兵谓其夫曰我乃国族且年少必不容于人岂惜一死以辱家国乎遂自缢时张栋妻

王氏语家人曰吾为状元妻义不可辱赴井死其姑哭之恸亦赴井死

△安志道妻刘氏

安志道妻刘氏顺州人志道及刘氏之弟明理并登进士第刘避兵岩穴中军至欲污之叱曰我弟与夫皆进士也我岂受汝辱乎军士以

兵磨其体刘大骂不辍乃钩断其舌而死

△宋谦妻赵氏 【子妇温氏高氏 孙妇高氏徐氏】

宋谦妻赵氏大都人子妇温氏高氏孙妇高氏徐氏皆有姿容明兵被大都合谋曰兵且至我等岂可苟全赵即自经死诸妇四人诸孙男

女六人众妾三人皆赴井死

△齐关妻刘氏

齐关妻刘氏河南彰德人关应募为河南千夫长战死泽潞闲刘贫无所依守志不夺有来强议婚者给之曰吾三月三日有心愿偿毕当

从汝是日径往天宁寺登浮图绝顶祝天曰妾本名家女适河南齐关今夫已死不敢失节遂投地而死

△王宗仁妻宋氏

王宗仁妻宋氏进士裴女也宗仁家永平遇兵乱偕宋避于铍子山为军所掠行至玉田县有窥宋色美欲害宗仁者宋谓夫曰我不幸至

此必不以身累君遂携一女投井死

△王履谦妻齐氏 【子妇萧氏吕氏二女 二孙女】

王履谦妻齐氏太原人治家严肃克守妇道至正十八人贼陷太原齐与二妇萧氏吕氏及二女避难于赵庄石岩贼且至度不免顾谓二

女曰汝家五世同居号为清白岂可亏节辱身以苟生哉长女曰吾夫已死今为未亡人得死为幸吕氏曰吾为中书左丞之孙义不受辱齐大

哭乃与二妇二女及二孙女同投崖死

△王时妻安正同 【妾李氏】

王时妻安氏名正同磁州人平章政事佑孙女也至正十九年时以参知政事分省

太原安从之任踰年贼陷太原安与其妾李氏同赴井
死事闻赠梁国夫人谥庄洁

△徐猯头母王氏 【妻岳氏二女】

徐猯头妻岳氏大都人明兵入都城岳告其夫曰我等恐被驱逐将奈何夫曰事急
矣惟有死耳遂火其所居夫妇赴火死其母王氏二女
一子皆抱持赴火死

△程徐妻金氏 【一女】

金氏详定使四明程徐 【按续宏简录作徐程与此异】 妻也京城破谓其女曰
汝金出捍城我三品命妇汝儒家女又进士妻不可受
辱抱二岁子及女赴井死

△汪琰妻潘氏 【燕山妻李氏 惟德妻俞氏 吴子恭妻蒋氏】

汪琰妻潘氏徽州婺源人年二十八而夫卒潘誓不他适以其夫从兄之子元圭为
后时始三岁鞠之如己出后卒元圭之子良厘有子燕
山燕山卒时妻李氏年二十四无子乃守志自誓父母欲夺嫁之不听燕山兄子惟德娶
俞氏惟德早死二子甚幼俞守节辛勤不坠家业人称
之曰三节同郡歙县吴子恭之妻蒋氏年二十八而夫亡孀居五十年卒至正十四年旌
表其闾

钦定续通志卷五百九十三

●钦定续通志卷五百九十四 载记一

载记 【一】

（臣）等谨按五代之际天下瓜分黥髡盗贩之徒乘时而起各挟智力擅固封疆
福泉之闲为闽江以下为吴为南唐剑以南及山南西
道为前后蜀湖南北为楚浙东西为吴越岭南北为南汉太原以北为东汉而荆归峡三
州为南平此十国者莫不自制位号争相雄长其行事
既不统于中朝故欧阳修五代史别为十国世家然考世家之名史迁以纪侯国业既建
国僭号帝制自为即不得与诸侯王比晋书以张轨李
嵩编于列传郑樵谓其目相悖戾因与刘渊石勒慕容廆等并列入载记厥体魁矣五代
如吴南唐前后蜀南汉东汉闽七国皆改元称号楚及
吴越南平虽受命中国阳奉正朔然割据偏方各君其王与僭伪相若不可不别其主名
今悉改为载记以符郑例至夏国世有西土历宋辽金
之际虽服事朝廷而徇乡不常考德明于祥符闲已追帝其父逮元昊乃始显称厥后因
之此当为僭国而不得为外臣也辽史列为外纪宋金
二史入之列传今并改入载记附十国后庶于通史体例为得云

吴

○吴

杨行密 渥 隆演 溥 【附】 田頴安【仁义 台蒙】朱延

寿

杨行密

杨渥

杨隆演

杨溥

附

△杨行密

杨行密字化源庐州合淝人为人长大有力能手举百斤唐干符中为盗江淮闲刺史郑棨【新唐书作棨】捕得奇其貌纵之后应募为州兵戍朔方迁队长【按新唐书作秦宗权寇庐寿闲刺史募杀贼行密以功补队长】岁满代还而都将恶之使复出戍将行过都将舍都将阳为好言问所欲行密奋然曰惟少公之头耳即斩之因起兵为乱自号八营都知兵马使刺史郎幼复弃城走遂据庐州【按通鉴作刺史郎幼复不能制荐淮南节度使高骈请以自代遂以行密知庐州与欧史异】淮南节度使高骈因表为庐州刺史乃以田頴为八营都将陶雅为左衡山将讨定乡盗骈将吕用之恐行密难制遣俞公楚以兵五千屯合淝名讨黄巢而阴图之行密击杀公楚时张敖据寿州许勅据滁州与行密击战又舒人陈儒攻刺史高渚渚来告难行密未能定贼吴迥李本逐渚据其城行密虏之取舒州寻为勅所夺光启二年张敖遣将魏虔攻庐州李神福田頴破之楮城【按行密击杀俞公楚及取舒州等事欧史俱失载今据新唐书行密传曾辑】骈为毕师铎秦彦所攻用之以骈命署行密行军司马趣其进援客袁袭说行密亟督兵往可得其地行密乃率兵而东行至天长而骈已为师铎所囚扬州陷行密不得入屯于蜀冈用之以兵属之彦以奇兵出击破行密一屯行密益甲出战初合阵行密阳败弃营走彦兵争入营收军实反兵击之师铎大败单骑走入城遂杀骈行密縋军向城哭三日攻其西门彦及师铎奔东塘行密遂入扬州时城中仓廩空虚饥民相食行密不能守欲走而蔡州秦宗权遣其弟宗衡掠地淮南彦及师铎与宗衡合行密闭城不敢出已而宗衡为偏将孙儒所杀儒攻高邮破之行密益惧袭曰吾以薪集之众守空城而淮南诸将多骈旧人未尝结以恩信今儒兵方盛所攻必克不若避之行密诱杀海陵镇使高霸得其兵数千已而孙儒杀彦及师铎并其众以攻行密行密欲走海陵袭曰海陵难守庐吾旧治也城廩完实可为后图

乃走庐州既欲又趋洪州袭曰锺傅新得江西势未可
图赵胤新得宣州其人非公敌此可取也行密乃引兵济糝潭与孙端赵晖等战于采石
败之疾趋曷山坚壁以待胤将苏瑋率兵二万对屯行
密分兵四出伐木开道瑋惊北道围宣州胤弃城走获之斩首送汴唐昭宗拜行密宣歙
观察使时庐州守蔡侔以城降儒儒进攻行密于宣州
行密复入扬州结时溥与梁太祖为助而兵数败乃退还宣州遣田頵等取苏常润州唐
以宣州为宁国军授行密节度使大顺二年儒屯广德
其将康旺取和州安景思取滁州李神福击破之得其二州 【按新唐书孙儒传行密取
常润皆在大顺元年昭宗本纪行密陷苏常润亦在
大顺元年取和滁二州则在大顺二年欧史作龙纪元年取苏常润州三年取和滁二州
考龙纪次年即改元大顺并无二年显系欧史之误今
从新唐书改正】 秋儒焚扬州庐舍驱其众渡江号五十万攻行密诸将田頵刘威等遇
之辄败行密欲走铜官客戴友规曰儒气锐兵多利速
战宜持久以敝之若避走是就擒也刘威亦以为言行密乃止久之儒兵食尽又大疫行
密悉兵击儒擒斩之收余兵数千以皂衣蒙甲号黑云
都以为亲军 【按新唐书及五国故事行密微时居常独处 见黑衣人侍侧后有五千
锐士遂悉以黑绘幕其首号黑云都载在攻取宣州
之前非破儒后始有是号】 唐拜行密淮南节度使干宁二年加检校太傅同平章事封
弘农郡王行密以田頵守宣州安仁义守润州升州刺
史冯弘铎来附分遣頵等攻下淮南江东诸州时苏州复为钱鏐所据进攻破之 【按唐
昭宗本纪行密于大顺元年攻陷苏州寻为孙儒所
夺至景福元年苏州复入于越故此又破苏州也欧史未晰今改辑】 四年兖州朱瑾来
奔江淮兵素轻弱得瑾劲骑而兵益振梁太祖遣葛从
周庞师古攻寿州行密击败之杀师古复追败从周于淝河光化元年 【按干宁四年其
明年改元光化欧史作五年者误今改正】 钱鏐攻
苏州及周本战于白方湖本败苏州复入越天复元年遣李神福攻越大败之于临安擒
其将顾全武以归二年冯弘铎叛袭宣州及田頵战于
曷山弘铎败将入海行密至东塘遣人慰留之弘铎感泣行密从十余骑驰入其军以弘
铎归为节度副使以李神福为升州刺史时唐昭宗在
岐拜行密东面诸道行营都统检校太师中书令封吴王且来告难诏与岐晋诸镇大举
讨梁乃以李神福为鄂岳招讨使刘存副之攻杜洪马
殷以分梁势梁韩勅将兵万人屯淝口而荆南成汭亦悉众救洪神福逆战败之汭溺死
勅走洪困甚会田頵安仁义俱叛行密召神福存还洪
复振天佑二年乃复遣神福刘存等攻鄂州焚其城执洪斩于广陈初行密遣冷业攻马

殷业屯平江为三壁楚将许德勋等袭破之业被擒至是复使聂彦章等率舟师攻岳州彦章又被执军士溺死者万余人 【按神福为鄂岳招讨使鄂州属杜洪岳州属马殷欧史全略攻岳之事今据新唐书补辑】 冬十一月行密卒谥武忠追尊为太祖武皇帝

△杨渥

渥字承天行密长子行密病出渥为宣州观察使右衙指挥使徐温私谓曰今王有疾而出嫡嗣必有奸臣之谋他日相召非温使者慎无应命渥泣谢而去行密病甚命判官周隐作符召渥隐卢渥幼弱不任事荐大将刘威代主军政行密未许会温与严可求入问疾行密以隐议告之温等大惊遽诣隐所隐未出见召符在案急取遣之渥见温使者乃行及嗣立遂杀周隐以王茂章为宣州观察使渥之入也命取宣州库物以归茂章不与渥怒命李简以兵五千围之茂章以宣歙二州叛附于越天佑三年刘存取岳州江西锺傅卒子匡时立傅养子延规以兵攻匡时渥遣秦裴率兵攻之克洪州执匡时以归赦之以秦裴为江西制置使梁太祖代唐改元开平渥仍称天佑鄂州刘存岳州陈知新以舟师伐楚败于浏阳楚人执存及知新以归不屈俱见杀岳州复入于楚初渥之入广陵也留帐下兵三千于宣州以其腹心陈璠范遇将之既入立恶徐温典牙兵召璠等为东院马军以自卫而温与左衙都指挥使张顥皆行密时旧将又以立渥功恶璠等侵其权及渥视事璠等侍侧温顥拥牙兵入拽璠等下斩之 【按通鉴及十国纪年载温顥忌朱思勍范遇陈璠等侵其权令从秦裴击江西诬以谋叛遣别将陈佑诛璠等于洪州温顥率牙兵入朝以铁挝击杀左右亲信十余人号曰兵谏据此则璠等乃死于洪州也与欧史异】 渥不能止由是失政而心愤甚温等益不自安遂遣盗入寝中弑渥渥见羣盗许以能反杀温等者为刺史羣盗皆诺惟纪祥不从执渥缢杀之谥曰景追尊为烈宗景皇帝

△杨隆演

隆演字鸿源行密次子初名瀛又名渭当温顥之弑渥也约分其地以臣于梁及渥死顥欲背约自立温患之问其客严可求可求曰顥刚愎而闇于成事此易为也明日顥列剑戟府中召诸将议事自大将朱瑾而下皆去卫从然后入顥问诸将谁当立者诸将莫敢对顥三问可求前密启曰方今四境多虞非公主之不可然在今日如刘威陶雅李简李遇辈未能降心事公不若立幼主辅之为便顥不能对可求因趋出书一教内袖中率诸将入贺出教宣之乃渥母史氏教言嗣王不幸隆演以次当立告诸将无负杨氏而善事之辞旨激切顥气色皆沮隆演遂得

立颢由此与温有隙讽隆演出温润州可求复以计留温行军副使李承嗣与颢善觉可求有附温意颢使客夜刺杀之不能中可求遂诣温谋先杀颢阴遣锺章选壮士三十人就衙堂斩颢因尽杀纪祥等以弑渥之罪归之温由是专政时抚州危全讽袁州彭彦章吉州彭玕信州危仔倡皆起兵叛可求荐周本使将兵七千败之于象牙潭执全讽彦章而玕奔楚仔倡奔钱塘全讽至广陵以攻宣州时曾有功释之天佑八年徐温领升州刺史治舟师于金陵宣州李遇自行密时为大将愤温用事尝曰徐温何人而骤至此温闻之怒遣柴再用以兵送王坛代遇且召之遇不受命再用围之隆演使客将何尧谕遇使自归遇本无反心乃随尧出温讽再用伺其出杀之族其家九年温率将吏进隆演位太师中书令吴王温为行军司马镇海军节度使同平章事陈章政楚取岳州执其刺史苑玫十年遣招讨使李涛攻越裨将曹筠奔于越涛战败被执越人攻常州徐温败之于无锡梁遣王茂章攻寿春温败之于霍邱十二年以升润宣常池黄六州为齐国封温齐国公两浙都招讨使始镇润州留其子知训为行军副使秉政而大事遥决于温十三年宿卫将李球马谦劫隆演登楼发库兵以讨知训知训与战频却诸道副都统朱瑾自润州至视其陈曰此不足为也返顾一麾外兵争进乱兵溃遂擒球谦斩之温徙治金陵十五年遣王祺会洪袁信三州兵攻虔韶久之不克祺病以刘信代之克虔州执谭全播以归副都统朱瑾杀徐知训瑾亦自杀润州徐知诰闻乱率兵入杀唐宣谕使李俨以止乱遂秉政徐氏之专政也隆演幼懦不能自持而知训尤凌侮之尝饮酒楼上命优人高贵卿侍酒知训为参军隆演鹑衣鬢髻为苍鹞知训尝使酒骂坐语侵隆演隆演惧而泣知训愈辱之左右扶隆演起去知训杀吏一人乃止吴人皆反目十六年春温率将吏请隆演即天子位不许夏四月温奉玉册宝绶尊隆演即吴王位建宗庙社稷设百官如天子制改天佑十六年为武义元年大赦境内追尊行密孝武王庙号太祖渥景王庙号烈祖拜温大丞相都督中外诸军事封东海郡王以徐知诰炙左仆射参知政事严可求为门下侍郎骆知祥为中书侍郎殷文圭沈颜为翰林学士虚择为吏部尚书李宗陈璋为左右雄武统军柴再用钱鏐为左右龙武统军王令谋为内枢密使江西刘信征南大将军鄂州李简镇西大将军抚州李德诚平南大将军庐州张崇安西大将军海州王绾镇东大将军文武以次进位封宗室皆郡公初温徙镇公陵以养子知诰守润州严可求尝说温去之温不再其言及知诰秉政前语颇泄知诰乃出可求于楚州可求惧因诣金陵说温宜及时先建固以自立温深然之因留

可求不遣方谋迫隆演僭号而隆演病卒隆演嗣位权在徐氏及建国称制非其本意常酣饮稀复进食遂卒谥曰宣追尊为高祖宣皇帝

△杨溥

溥行密第四隆演建国封丹阳郡公【五国故事作丹阳王】隆演卒弟庐江公蒙次当立而徐氏秉政不欲长君乃立溥改升州大都督府为金陵府拜徐温金陵尹明年二月改元顺义赦境内冬祀天于南郊御天与楼大赦拜徐温大师严可求右仆射三年唐庄宗灭梁遣司农卿虚莘使于唐四年溥至白沙阅舟师徐温来见以白沙为迎銮镇六年追爵大丞相徐温四代祖考立庙于金陵左仆射徐知诰为侍中右仆射严可求同平章事是岁庄宗崩诏为同光主辍朝七日七年大丞相徐温率吴文武上表劝溥即皇帝位溥未许而温卒十一月溥御文明殿即皇帝位改元曰干贞大赦境内追尊行密渥隆演皆为皇帝以知诰为太尉兼侍中拜温子知询辅国大将军金陵尹治温旧镇诸子皆封王二年荆南高季兴来附封秦王季兴败楚师于白田获其将吏三十四人来献三年金陵尹徐知询来朝知诰诬其有反状留不遣以为左统军以徐知谔为金陵尹是岁改元太和大赦以知诰为中书令二年册其子江都王璉为太子三年以知诰为金陵尹以其子景通为司徒及左仆射王令谋右仆射宋齐邱皆平章事四年封知诰东海王五年建都金陵六年金陵火罢建都废临川王蒙为历阳公拜王令谋司徒宋齐邱司空知诰召景通还金陵为镇海军节度副使以其子景迁为太保平章事与令谋等执政七年九月大赦改元天祥知诰进位太师天下兵马大元帅封齐王以升润宣池歙常江饶信海十州为齐国二年景迁病以次子景遂为门下侍郎参政事三年知诰建国以金陵为西都广陵为东都冬十月溥遣江夏王璘奉册禅位于齐王十二月溥卒于丹阳【按朱子纲目书故吴主杨溥卒通鉴云吴让王卒十国纪年乃云营室于茆山迁溥居之及将遇弑溥方诵佛书于楼上使者前趋溥以香炉掷之俄而见害纪年所云或不足据而薛史唐余录皆云溥禅位踰年幽卒李升载记亦云天祚三年十月受禅改元升元至升元二年始迁溥于丹阳宫十一月卒此云天祚三年十月受禅十二月溥卒前后互异未详孰是】谥曰睿升六年李升迁其子孙于海陵号永宁宫严兵守之绝不通人久而男女自为匹偶吴人多哀怜之周显德二年世宗征淮南下诏抚杨氏子孙李景闻之遣人尽杀其族杨氏遂绝【徐无党曰据吴录运历图九国志皆云行密以唐景福元年再入扬州至晋天福二年为李升所篡实四十六年而旧唐书旧五代史皆云大顺二年入扬州至被篡四十七

年吴录徐铉等撰运历图龚颖撰二人皆江南故臣所记宜得实而唐末丧乱中朝文字多差失故今以铉颖所记为定 按五代史吴世家此下有徐温附传温开南唐之先伪尊为帝其事迹已详载记今从删】

△附

田頵 【安仁义 台蒙】

朱延寿

田頵 【安仁义 台蒙】

田頵字德臣与杨行密同里约为兄弟初应州募屯边迁主将行密起事田頵与刘威陶雅之徒号三十六英雄文德元年攻宣州刺史赵犄出东溪乘暴流以逸頵以轻舸追之遂擒犄行密表頵为马步军都虞侯沙陀叛将安仁义奔淮南行密大喜属以骑兵使在頵右两人名冠军中共攻常州杀刺史杜棱孙儒略地南来頵等屯丹阳儒焚广陵壁广德頵破其屯与战頵走行密怒欲夺其兵或谏之乃止儒遗仁义书愿通好以闲行密行密待之益厚署为行军副使卒以二人功擒儒乃表頵为宁国军节度使屡迁检校太保同平章事仁义润州刺史加检校太保天复二年頵平冯弘铎至扬州谢行密左右多求赂而狱吏亦有请頵怒曰吏覬吾入狱邪又求池歛炙属州行密不许由是始怨将还指府门曰吾不复入此矣是时钱鏐部将许再思徐绾叛围钱鏐屯兵灵隐山迎頵攻杭州頵攻北门鏐登城与语射中麾下并筑垒绝往来道鏐患之乃出金币募能破壁者陈璋以死士三百免胄驰击夺其道頵围之益急先是行密常欲以女妻鏐子鏐乃遣元璪如淮求婚且告难行密使人召頵曰不还当使人代守宣州鏐又输钱二百万缗犒军出其子元瓘为质頵乃引兵还然以此益怨行密遂大募兵阴与梁通好李神福决其必反数请行密图之行密曰頵有大功而反状未明杀之恐诸将不为用时康儒在頵所及授儒庐州刺史以闲之頵怒族其家遂反与安仁义连和攻升州劫刺史李神福妻子时神福方攻鄂州行密亟召还攻頵頵遣李泉遗以书曰公家属在此苟从我当分地以王神福答曰吾以一卒从吴王任上将肯背德而顾妻子邪立斩皋以示绝頵将王坛以舟师蹙神福后欲掩袭之火济神福反兵顺流逆击大破之因纵火士多焚溺死明日复败之于皖日頵乃自将出战神福濒水而屯坚壁不动请行密以兵塞其走道仁义焚东塘战舰夜攻常州不克转战至夹冈植二帜解甲而食追兵疑其有伏莫敢迫仁义遂入润州行密遣王茂章围之仁义素以善射冠军中又其治军严而有恩善得士心以故茂章等

不敢与角行密遣使招谕使自归仁义欲降其子固沮之而止頽自为神福所困已还芜湖留精兵二万以属郭行琮至是行密复遣台汉击之蒙为营颇狭小覘者以为才容二千人頽轻之不复益兵与战黄池汉阳败走頽兵争逐之遇伏遂大败召芜湖兵不得入乃率败死士数百号爪牙都以薄蒙蒙殊死战頽军溃乃奔为乱兵所杀传首至淮南行密泣下葬以庶人礼而還元瓘于越时仁义欲降未决茂章乘其怠穴地道而入仁义父子俱就缚斩于扬州市頽为人宽厚善遇士当时若杨夔康骈夏侯淑殷文圭王希羽等皆为上客文圭有美名梁与吴越交辟不应頽置田宅迎其母事之甚恭故文圭为尽力夔知頽不足以亢行密着溺赋以规頽不能用遂及祸蒙字顶云亦合淝人頽破行密表为检校太保宣州观察使

朱延寿

朱延寿卢州舒城人行密妻朱夫人弟也少事行密颇立战功行密欲以宽厚结人心而延寿敢杀尝捕得盗行密辄赐所盗物遣之且戒曰勿使延寿知而阴许延寿诛之高彦温以寿州入梁行密袭其城不克延寿拔之梁兵解去遂取黄蘄光三州以功累迁寿州团练使唐昭宗在凤翔诏行密讨梁拜延寿奉国军节度使以围蔡梁兵每至延寿开门不设备而不敢逼其用军好以寡鬪众败还者尽斩之田頽私结好于梁延寿阴约曰公有所为我愿执鞭頽喜二人谋绝行密行密忧甚乃阳为目疾每接延寿使者必错乱其所见以示之尝行故触柱而仆朱夫人扶之良久乃苏泣曰吾业成而丧明诸子幼不足以任大事得舅代我无忧矣夫人喜急召延寿延寿至行密迎之寝门刺杀之朱夫人亦被

出 【按田頽朱延寿皆行密部将事迹多系行密应附入吴载记今据新唐书补辑】

钦定续通志卷五百九十四

●钦定续通志卷五百九十五 载记二

载记 【二】

南唐

○南唐

李升 景

煜 【附】 孙晟

刘仁贍

韩熙载

徐铉 周惟简

潘佑 李平

皇甫继

勋

李升

李景

李煜

附

△李升

李升【宋史作升】字正伦徐州人少孤流寓濠泗闲杨行密攻濠州得之奇其貌养以为子而杨氏诸子不能容行密以乞徐温乃冒姓徐氏名知诰为吴楼船军使以舟兵屯金陵柴再用攻宣州用其兵杀李遇以功拜升州刺史徐温以齐国公就镇润州升池等六州皆其属闻升有善政往视之见府库充实城壁修整乃徙治之而迁升于润升初不欲往屡求宣州温不与既而徐知训为朱瑾所杀升居润州近广陵得先闻即以州兵渡江定乱遂得政升事徐温甚孝谨温诸子皆忌之知训尤甚尝召饮伏剑士欲害之赖刁彦能护解以免后升贵以彦能为抚州节度使升秉政后欲数人心乃宽刑法推恩信延四方之士引宋齐邱骆知祥王令谋等为谋客民有婚丧匱乏往往赙给之以故温虽遥秉大政而吴人颇已归升武义元年拜左仆射参知政事温行军司马徐玠数劝温以己子代升温遣子知询入广陵谋代会温疾卒知询奔还金陵玠反为升谋诬知询以罪斩其容将周廷望以知询为左统军杨溥僭号拜升太尉中书令太和三年出镇金陵如温故事四年封东海郡王升照鉴见白须顾其吏周宗叹曰功业已就而吾老矣奈何宗知其意驰诣广陵见宋齐邱谋禅代齐邱不可请斩宗以谢吴人乃出宗为池州刺史吴临江王蒙以次当立怨徐氏舍己立溥心常不平及升将谋篡图先废蒙为历阳公使其亲信王宏以兵守之蒙杀守者奔庐州节度使周本吴旧将也闻蒙至遽自出迎其子祚闭门遮本不得出溥蒙至金陵遂见杀五年升封齐王已而闽越诸国皆遣使至劝进升谓人望已归天祚三年建齐国置宗庙社稷以宋齐邱徐玠为左右丞相十月溥遣摄太尉杨璘傅位于升国号齐【按通鉴以是年即号唐国马令陆游南唐书皆云先号齐与欧史同】改元升元册尊溥为高尚思玄弘古让皇帝追尊徐温为忠武皇帝封子景通为吴王【按景初名景通既立改名璟及奉表称臣于周始改名景盖以周太祖高祖讳璟故避之也则璟未立时应书景通保大十三年以前应书璟而各本俱作景称臣之后应书景而各本反作璟今谨据周本纪改正之后应仿此为是】封徐知证江王知谔饶王周本与诸将至金陵劝进归而叹曰吾不能诛篡国者以报杨氏今老矣岂能事二姓乎愤惋而死二年迁杨溥于润州丹阳宫以王舆为浙西节度使马思让为丹阳宫使以严兵守之徐氏诸子请升复姓升谦抑不敢忘徐氏恩下百官议百官皆请乃复姓李氏改名升自言唐宪宗子建王恪四世孙改国号曰唐立唐高祖太

宗庙追尊高祖恪为孝静皇帝庙号定宗曾祖超为孝平皇帝庙号成宗祖志孝安皇帝庙号惠宗考荣孝德皇帝庙号庆宗奉徐温为义祖徐氏子孙皆封王公女封郡县主以门下侍郎张居咏中书侍郎李建勋右仆射张延翰同平章事十一月杨溥卒溥子璉为吴太子时升以女妻之及篡国封其女为永兴公主女闻人呼公主必涕泣而辞宫中皆怜之溥卒以璉为康化军节度使未几亦卒三年四月升郊祀昊天上帝于圜丘羣臣请上尊号不许四年晋安州节度使李金全叛送款于升升遣鄂州屯营使李承裕迎之承裕与晋将马全节安审晖战安陆南三战皆败及裨将段处恭死之都监社光邺及其兵五百人被执六年吴越国火焚其宫室府库甲兵殆尽羣臣请乘其弊攻之升不许遣使吊问厚赙其乏钱氏自吴时素为敌国升见天下久乱常厌用兵志在守吴旧地及将篡国先与钱氏约和归所执将士钱氏亦归吴败将遂通好不绝吴人亦赖以休息七年升卒谥曰光文肃武孝高皇帝庙号烈祖

△李景

景初名景通升长子既立改名璟徐温死升乘政以为兵部尚书参知政事明年升镇金陵留璟辅政升将篡国召归为中外诸军副都统升受禅封齐王及嗣位改元保大尊母朱氏为皇太后册妃鍾氏为皇后封弟景遂为燕王景达为鄂王景逵为保宁王秋改封景遂齐王诸道兵马元帅太尉中书令景达为燕王副元帅盟于升枢前约兄弟世世继立封其子翼南昌王江都尹冬破虔州妖贼张遇贤遇贤自循州作乱自号中天八国王过岭取虔州遂袭南康节度使贾浩不能御遇贤据白云洞造宫室有众十余万连陷诸州县璟命洪州营屯虔侯严思通事舍人边镐率兵攻之羣盗执遇贤以降璟以冯延巳常梦锡为翰林学士冯延鲁为中书舍人陈觉为枢密使魏岑查文徽为副使梦锡直宣政殿专尚密命而延巳等皆以邪佞用事吴人谓之五鬼梦锡屡言延巳等不可用璟不纳下令中外庶政委齐王景遂参决惟陈觉查文徽得奏事羣臣非召见不得入给事中萧俨上疏切谏不报侍卫军都虞候贾崇入谏辞意激切璟为之动容遂寝所下令初升篡杨氏宋齐邱最有力及成事阳入九华山升屡招之乃出寻以病罢相出为洪州节度使璟立复召为相陈觉魏岑等皆齐邱所引用而岑与觉有隙潜觉于璟左迁少府监齐邱亦罢相为浙西节度使齐邱不得志愿复归九华山许之二年闽人连重遇朱文进弑其主王延曦文进自立时延曦弟延政亦自立于建州国号殷连兵累年璟因其乱遣查文徽等发兵攻建州延政闻唐兵且至遣人给福州曰唐兵助我讨贼矣福人信之杀文进等以降

延政遣从子继昌守福州文徽军屯建阳福州将李仁达杀继昌自称留后泉州将留从效亦杀其刺史黄绍颇皆送款文徽文徽克建汀泉漳四州璟分延平剑浦富沙三县置剑州迁王延政之族于金陵以延政为饶州节度使仁达为福州节度使从效为清源军节度使遂议罢兵而查文徽陈觉等皆言仁达等余孽犹在不若乘胜尽取之觉又自言可不用尺兵致仁达等乃以为宣谕使召仁达朝金陵仁达不从觉惭还至建州矫命发汀建信抚州兵攻仁达时魏岑安抚漳泉闻觉起兵亦擅发兵会觉璟大怒冯延己等为言兵业行不可止乃以王崇文为招讨使王建封为副使益兵会之冯延鲁魏岑陈觉皆为监军使仁达送款吴越吴越以兵三万应之觉等争功进退不相应延鲁与吴越兵战先败走诸军皆溃归璟怒遣使者销觉延鲁至金陵而冯延己方为宰相宋齐邱复自九华召为太傅为稍解之乃流觉蕲州延鲁舒州韩熙载上书请诛觉等齐邱恶之贬和州司马御史中丞江文蔚亦劾冯延己魏岑乱政与觉等同罪言甚切直璟大怒贬江州司士参军亦罢延己为少傅岑为太子洗马五年以景遂为太弟景达为元帅封齐王南昌王冀为副元帅封燕王契丹灭晋遣使者来聘以兵部尚书贾潭报聘 【按龙衮江南野史作命兵部尚书贾谈马令南唐书作兵部侍郎贾潭与欧史互异】 六年汉李守贞反河中遣其客将朱元来求援以润州节度使李金全为北面行营招抚使兵至沐阳闻守贞已败乃还时汉隐帝少中国衰弱淮北羣盗多送款于璟璟遣皇甫暉出海泗诸州招纳之八年福州诈言吴越戍兵乱杀李仁达而遽遣人请建州节度使查文徽文徽与建州刺史陈诲趋应之福州以兵出迎文徽进至西门伏兵发被擒诲与越人战大败之获其将马先进璟送先进还越越亦归文徽是岁楚马希萼弑其主希广自立楚人囚希萼立其弟希崇来附璟遣信州刺史边镐攻楚破之事具楚载记以镐为湖南节度使十年分洪州高安清江万载上高四县置筠州以冯延己孙忌为左右仆射同平章事广州刘晟乘楚乱取桂管遣将军张峦出兵争之不克楚地新定其府库空虚冯延己重敛其民以给军楚人皆叛其将刘言攻边镐镐不能守遽归十三年周世宗南征拜李谷为行营都部署攻淮南自寿州始时齐邱为洪州节度使召还金陵以刘彦贞为神武统军刘仁贍为清淮军节度使 【按马令陆游南唐书及唐余纪保大十三年四月以刘彦贞为神武统军以刘仁贍为清淮军节度使冬十一月周师南征乃以神武统军刘彦贞为北面行营都部署赴寿州奉化节度使皇甫暉常州团练使姚凤屯定远通鉴亦载以神武统军刘彦贞为北面行营招讨使均非周师

攻淮南时始以彦贞为神武统军仁贍为清淮节度使也与欧史互异】以拒周师李谷退屯正阳时世宗亲征至圉镇闻谷退军曰吾军却唐兵必追遣李重进趋击之刘彦贞等闻谷退追及正阳而重进已先至军未及食而战彦贞等遂败世宗营淝水之阳徙浮桥于下蔡璟遣林仁肇等争之不得皇甫暉姚凤以兵十五万守清流关周师破之取滁州暉凤被擒璟惧遣泗州牙将王知朗至徐州称唐皇帝奉书愿效贡赋陈兄事之礼世宗不答东都副留守冯延鲁光州刺史张绍舒州刺史周祚泰州刺史方讷皆弃城走延鲁为周兵所获蕲州裨将李福杀刺史王承隼降周璟益惧始改名景以避周庙讳遣翰林学士锺谔文理院学士李德明奉表称臣以牛酒金币犒军请割寿濠泗楚光海六州以求罢兵世宗不报分兵袭下扬泰光州刺史张承翰降周十四年又遣司空孙晟等奉表辞益卑服世宗犹不答前遣锺谔及晟等皆留行在乃请归取景表尽献江北地世宗许之赐景书仍存帝号德明等还盛称世宗英武景不悦宋齐邱等皆以割地无益德明卖国图利遂斩德明遣齐王景达与陈觉边镐许文缜率兵趋寿春景达将朱元等复得舒蕲泰三州夏大雨周师在扬滁和者皆却诸将请要击宋齐邱曰击之怨深不如纵之诚闭壁勿出故周师皆集寿州世宗班师以李重进攻卢寿向训守扬州训请弃扬州并力攻寿春乃封府库付主者城中秋毫无犯淮人大悦皆负糗粮以送周师十五年景达遣朱元等屯紫金山筑甬道饷寿州世宗复南征徙下蔡浮桥于涡口为镇淮军筑二城以夹淮连破紫金诸寨景达虽为元帅而兵事决于陈觉觉与朱元有隙因表元反复难言景以杨守忠代之且召元元愤怒叛降周诸军皆溃许文缜边镐皆被执景达奔还金陵刘仁贍病革副使孙羽等以寿州降周世宗班师至十月又亲征遂围濠州刺史郭廷谓降又取泗州周师步骑数万水陆齐进军士作檀来之歌声闻数十里屯楚州北门次年正月改元中兴大赦三月又改元交泰【按陆游南唐书十国春秋俱云正月先改元中兴三月改元交泰唐余纪亦云改元交泰在三月惟汤悦江南录作正月即改元交泰欧史盖沿其误今改正】周师攻楚州城破守将张彦卿郑昭业战死屠其城海泰扬三州复入于周世宗幸迎銮镇耀兵江口景惧其南渡乃遣陈觉奉表请传国于世子以听命【马令南唐书作遣锺谔等请传位】初周师南征无水战具已而屡败景兵获水战卒乃造战舰数百艘使降卒教之命王环将以下淮景水军多败长淮之舟皆为周师所得又造齐云船数百艘世宗至楚州北神堰舟大不能过乃开老鹄河以通之遂至大江觉奉使见舟师甚盛以为自天而下乃

请还国取景表尽献江北诸州世宗许之赐景书曰皇帝恭问江南国主时扬泰滁和寿濠泗楚光海等州已为周得景遂献庐舒蕲黄尽江为界五月景下令去帝号称国王奉周正朔称显德五年【按唐余纪云聘献于周用显德年号在本国则仍旧称通鉴云奉其正朔与欧史同】

初孙晟使于周留不遣世宗问以江南虚实不对杀之及周罢兵景乃赠刘仁贍太师封卫王追封晟鲁国公世宗遣锺谔冯延鲁归国景复遣谔等市京师手自书表称天地父母之恩不可报又请降诏书同藩镇遣谔面陈愿传位世子世宗遣还国优诏以劳安之景以谔为礼部侍郎延鲁户部侍郎谔素善李德明既归闻德明由宋齐邱等见杀欲报其冤未能发陈觉齐邱党也与严续素有隙觉尝使周还言世宗以江南不即听命者严续之谋劝景诛续以谢罪景疑之谔因请使于周验其事谔入朝察其妄还言觉奸诈景怒流觉饶州杀之宋齐邱坐觉党放还青阳赐死以景遂为洪州节度使燕王冀为太子显德六年冀卒次子从嘉封吴王旋立为太子宋建隆元年太祖即位以书谕景遣还周显德中江南降将周成等三十四人景亦遣使贺登极自是贡献不绝初景之袭父位也属中原多故跨据江淮三十余州擅鱼盐之利即山铸钱物力富盛及频年用兵国寔空乃铸用铁钱宋太祖既下扬州日习马舫战舰于京城南池景闻之惧其臣杜着薛良并归朝献平南策太祖命斩着而配良庐州景终不自安乃谋迁都于洪州羣臣皆不欲惟枢密使唐镐赞之遂升洪州为南昌建南都建隆二年留太子从嘉监国景迁于南而洪州迫隘宫府营廡皆不能容羣臣日夕思归景悔怒不已六月卒从嘉嗣立以丧归金陵遣使入朝愿复景帝号宋太祖许之谥曰明道崇德文宣孝皇帝庙号元宗

△李煜

煜字重先初名从嘉景第六子性仁孝一目重瞳子自太子冀已上五子皆早卒煜以次立为太子景卒嗣立于金陵尊母锺氏曰圣尊后

【以锺氏父名泰章故不称太后】立妃周氏为国后封弟从善韩王从益郑王从谦宜春王从度昭平郡公从信文阳郡公大赦境内遣中书侍郎冯延鲁泰表修贡建隆三年泉州留从效遣其子绍基来通好【宋史留从效传作从子绍琪】绍基未返而从效卒泉人因并送其族于金陵推立副使张汉思汉思老不任事州人陈洪进逐之自称留后煜拜为节度使干德二年始用铁钱民闲多藏匿旧钱钱益少商贾多以十铁钱易一铜钱出境官不能禁煜因下令以一当十九月封长子仲遇清源公次子仲仪宣城公拜韩熙载中书侍郎煜袭位之初命诸司

四品以下无执事者日二员待制于内殿五年令两省侍郎给事中中书舍人集贤勤政殿学士更直光政殿谈论文学掌故之事是岁熙载卒
加赠平章事开宝四年煜遣其弟韩王从善朝京朝留不遣煜手疏求从善还国宋太祖不许煜尝怏怏以蹙弱为忧会岭南平煜惧上表遂改
称江南国主请罢诏书不名许之國中贬损制度下书称教改中书门下省为左右内史府尚书省为司会府御史台为司宪府翰林为文馆枢
密使为光政院诸王皆为国公以尊朝廷 【按宋史载煜虽外示畏服守藩臣之礼而内实缮甲募兵潜为战备又云王师傅城募勇士五千
余人谋袭官军皆素不习战未免矛盾今仍从欧史】 煜骄侈好声色又性喜浮图日与羣臣酣宴赋诗不恤政事内史舍人潘佑上书极谏下
狱佑自缢死时宋太祖既下岭南方有志江表江都留守林仁肇密启煜曰淮南戍兵少愿假数万人自寿春径渡复江北旧境彼纵来援可据
淮以御之兵起日请以臣叛闻于北朝事成国享其利败则族臣家明陛下无二心煜不听太祖忌仁肇威名用闲杀之七年秋遣使召煜赴阙
煜称疾不奉诏乃以曹彬为西南路行营都部署潘美为都监讨之初太祖将伐江南进士樊若水诣关献策请造浮梁以济师太祖遣八作使
赦守浚等率丁匠营之先试于石牌口移置采石三日而成渡江若履平地煜初闻朝廷将作浮梁笑以为儿戏其时主兵者率多新进踊跃陈
利害郑彦华杜真督水陆二万人出御皆为潘美所败而煜方委兵柄于皇甫继勋委机事于陈桥张洎军书告急多不时通至八年春宋师傅
城下召朱令赆于上江令连巨筏载甲士数万人顺流而下以断浮梁未至为刘遇所破又募勇士谋为掩袭皆素不习战以暮夜秉炬攻北砦
宋师从其至歼焉煜率近臣迎拜于门彬等执之并其宰相汤悦等四十五人献俘阙下太祖御明德楼以煜尝奉正朔止令白衣纱帽待罪至
楼下诏并释之赐冠带鞍马器币有差封违命侯其弟侄各授官赐宅太宗即位始去违命侯封陇西郡公太平兴国三年七月卒追封吴王 【
徐无赏曰据汤悦所撰江南录云景以保大十五年改元交泰是岁尽献淮南十四州画江为界保大十五年乃周显德四年也按五代旧史及
世宗实录显德四年十月壬申世宗方复南征五年正月丙午始克楚州二月己亥景始尽献淮南诸州画江为界当是保大十六年也悦等南
唐故臣记其目见之事何其差谬而九国志纪年通谱之类但以悦书为正不复参较遂皆差一年至于景灭闽国是保大四年江南录书于三
年亦差一年已见闽世家注或疑景立逾年而改元则灭闽国当为三年周取淮南当为十五年不差但江南录误于景立之年改元保大所以

当差一年也今知不然者以诸昼参较闽人杀王延曦当晋开运元年周师始伐南唐当显德二年据景以初立之年即改元则开运元年为保大二年显德二年为保大十三年今江南录书延曦被杀于二年周师始伐于十三年则是景立之年改元不误而悦等书灭王氏割淮南自各差二年尔升自晋天福二年建国至开宝八年国灭凡三十九年 按宋史南唐世家止下有李从善从誦季操及舒元冯谧等附传舒元即朱元冯谧即冯延鲁已附见载记余无事迹足录俱从删】

△附

孙晟

刘仁贍

韩熙载

徐铉 【徐锴 周惟简】

潘佑 【李平】

皇甫继勋

孙晟

孙晟初名凤又名忌密州人初谒唐庄宗于镇州为著作佐郎天成中朱守殷辟为判官守殷反伏诛晟奔于吴时李升方篡杨氏招四方之士得晟喜其文辞使为教令引与计议多合意以为右仆射与冯延巳并为相晟事升父子二十余年官至司空家益骄侈食不设几案使众妓各执一器环侍号肉台盘时人多效之周世宗征淮李景奉表称臣世宗不答乃遣礼部尚书王崇质副晟奉表愿割寿濠六州地岁贡百万以佐军世宗欲尽取淮南留使者不遣而攻寿州益急前遣使锺谔等请还取景表尽献江北诸州世宗许之遂遣崇质等南还而谔与晟皆见留初晟之奉使也语崇质曰吾行必不免然吾终不负永陵一抔土及崇质还而晟与锺谔俱至京师待之甚厚已而周兵数败尽失所得诸州世宗召晟问江南事晟不对会李重进士景所遗蜡丸书劝重进反且多斥周过恶世宗怒收晟下狱杀之晟临死世宗犹遣近臣问之晟终不对正衣冠南望拜曰臣惟以死报国尔景闻晟死赠鲁国公

刘仁贍

刘仁贍字守惠彭城人父金事杨行密为濠滁二州刺史仁贍少通兵书事南唐为左监门卫将军黄袁二州刺史李景使掌亲军以为武昌军节度使周师征淮景命仁贍镇寿州时世宗攻围寿州自正月至四月不能下会大暑霖雨弥旬淮淝暴涨周兵多死世宗东趋濠梁以李重进为庐寿州都招讨使景亦遣齐王景达等列砦紫金山下而重进与张永德两军不

协仁贍屡请出战景达不许由是愤惋成疾明年正月
世宗复至淮上守将或走或降皆不能守仁贍独坚守不可下仁贍幼子崇谏幸其父病
谋与诸将出降仁贍立命斩之于是士卒皆感泣愿以
死守三月仁贍病甚已不知人其副将孙羽诈为仁贍书以城降世宗命畀仁贍至帐前
叹嗟久之复使入城养疾是日卒追封彭城郡王李景
闻仁贍卒亦赠太师 【按孙晟刘仁贍五代史列入死节传晟仕南唐为周世宗所留见
杀仁贍守寿州至死不降事系南唐应列为附传今
补辑】

韩熙载

韩熙载字叔言潍州北海人举后唐同光中进士父光嗣为平卢军节度副使 【按
徐铉作熙载墓铭云光嗣官秘书少监淄青观察支
使】 同光末青州军乱逐其师符习推光嗣为留后明宗诛光嗣熙载奔吴及升僭号为
秘书郎令事其子景于东宫景嗣位迁虞部员外郎大
馆修撰言事切直景深嘉纳之又改吉凶仪礼不如式者十数事为宋齐邱冯延巳所忌
升将葬景以熙载知礼令兼太常博士时江左草创典
礼多阙议者以升继唐昭宗后庙号合称宗熙载建议以为中兴之君当称祖请号烈祖
景由是益加恩礼寻为宋齐邱所中贬和州司马久之
复召为中书舍人世宗平淮甸景患国用不足熙载请铸铁钱及煜袭位卒行之而钱货
益轻不胜其弊熙载善为文性高简无所卑屈生平未
尝拜人虽被黜逐终不改节江左号为韩夫子显德中朝京师归景问中国大臣时宋太
祖方典禁民熙载对曰赵点检顾视非常不可测也及
太祖登极景益重之家畜妓妾甚众不加防范与宾客生徒杂处煜以其尽忠言事尝欲
相之以惟薄不修责授右庶子分司南都已而复位迁
中书侍郎开宝三年卒

徐铉 【徐锴 周惟简】

徐铉字鼎臣扬州广陵人十岁能属文与韩熙载齐名江东谓之韩徐初仕吴为校
书郎又事李升父子试知制诰与宋齐邱素不协时有
得军中书檄者铉及弟锴评其援引不当檄乃汤悦所作悦因与齐邱诬铉兄弟泄机事
铉坐贬泰州司户掾锴乌江尉俄复旧官时景遣内臣
车延规傅宏营屯田于楚州处事苛细人不堪命乃使铉乘传巡抚铉至楚奏罢屯田延
规等惧逃罪铉捕之急权近侧目及捕得贼首不俟报
即斩之坐专杀流舒州已而召还拜太子右谕德复知制诏迁中书舍人景卒事煜为礼
部侍郎历迁吏部尚书宋师围金陵煜遣铉求缓兵时
朱令赉将兵十余万自上江来援煜以方求和解而复决战恐不利于使者钦止令赉勿

东下铉不可曰要以社稷为计岂顾一介之使乎煜泣而遣之及至说虽不行而入见辞归礼还颇异后随煜归朝太祖责之声甚厉铉对曰臣为江南大臣国亡罪当死不当问其它太祖叹曰忠臣也命为太子率更令太平兴国初李昉独直翰林铉直学士院从征太原军中书诏填委铉援笔无滞辞理精当师还加给事中历左散骑常侍与汤悦同撰江南录至于亡国之际不言其过但归之历数识者黷之淳化二年以诬告奸私事贬静难行军司马至邠州卒分锱字楚金四岁而孤母方教铉未暇及锱能自知书稍长文辞与铉齐名授秘书省正字累官内史舍人凡四知贡举号得人以铉奉使入宋忧卒铉精篆隶锱亦工小学兄弟著述甚富颇传于世又有周惟简者曾以虞部郎中致仕张洎荐其有达略召为给事中副铉而行至京师宋太祖召见诘责之惟简惶恐反言曰臣本居山野无仕进意李煜强臣来耳事宁后愿得赐终南山栖隐及江南平宋以为国子周易博士判监事俄上书述前志求解官盖非其本心也太平兴国中上表自求用乃除水部员外郎卒 【按徐铉宋史列入文苑传铉在南唐官至吏部尚书事迹多系南唐应列为附传今补辑】

潘佑 【李平】

潘佑散骑常侍处常子工文辞韩熙载徐铉共荐于景为秘书省正字迁内史舍人有李平者本嵩山道士杨讷依河中帅李守贞守贞反遗讷与朱元乞师江南守贞败遂易姓名留江南历官户部侍郎平好神仙修炼之事动言妖妄潘佑与平相善尝建议复井田及依周礼置牛籍荐平判司农寺以督之事行百姓大扰未几罢佑又言国将亡非己为相不可救政事多在尚书省因荐平知省事并请诛宰相汤悦等数十人煜手诏戒之遂自杀

皇甫继勋

皇甫继勋江州节度使暉之子幼以荫补军校累迁神卫统军都指挥使时诸老将相次皆死继勋年虽少遂为大将及宋师至诸军多败衄继勋欲煜速降每众中流言颇道国中蹙弱且密陈天变以为灭亡之兆偏裨有欲募勇士以邀宋师者辄鞭向拘之以故士莫能用命会煜躬自巡城见宋师列栅城外知为左右所蔽乃数其惑众弃命之罪数付大理军士脔割其肉顷刻而尽

钦定续通志卷五百九十五

●钦定续通志卷五百九十六 载记三

载记 【三】

前蜀

○前蜀

王建 衍 【附】 王宗涤 王宗弼

王建

王衍

附

△王建

王建字光图许州舞阳人少无赖以屠牛盗驴贩私盐为事后为忠武军卒稍迁队将黄巢陷长安僖宗在蜀忠武军将鹿晏弘以兵八千属杨复光讨贼巢败走复光以其兵为八都建与晏弘皆为一都头复光死晏弘率兵西入蜀行至兴元逐节度使牛丛自称留后僖宗即拜为节度使晏弘以建等领属州刺史已而晏弘拥众东归陷陈许建与晋晖韩张建造李师泰等各率一都奔蜀僖宗得之大喜号随驾五都以属十军观军容使田令孜令孜以建等为养子僖宗还长安令孜与河中王重荣争盐池重荣召晋兵犯京师僖宗幸凤翔移幸兴元令孜惧得罪因求为西州监军杨复恭代为军容使复恭斥令孜党出建为璧州刺史【按通鉴作利州刺史下云建又攻利州刺史王珙弃城走则建非为利州刺史也今乃从欧史】建乃招集亡命及溪洞部落有众八千以攻阆州执刺史杨行迁又攻利州刺史王珙弃城走西川节度使陈敬瑄患之以问令孜令孜曰旺布吾儿也召之可置麾下乃使人招建建大喜选精兵二千驰之成都行至鹿头关敬瑄悔使人止之建大怒击破鹿头关取汉州东川顾彦朗与建有旧出兵助建军于学射敬瑄遣将句惟立逆建建击败之遂攻彭州敬瑄遣眉州刺史山行章将兵五万屯新繁建又击败之俘戮无算敬瑄发兵七万益行章与建相持蒙阳新都百余日昭宗遣左谏议大夫李珣为两川宣谕和协使诏彦朗等罢兵彦朗请以大臣镇蜀因为建求旌节文德元年以宰相韦昭度为西川节度使分邛蜀黎雅为永平军拜建节度使敬瑄不受代昭宗即命昭度将彦朗兵讨之以建为招讨牙内都指挥使【通鉴作以建充行营诸军都指挥使】久之不克建谓昭度曰公以数万众困两川之人师久无功且唐室多故东方诸镇兵接都畿公当归相天子静中原以固根本此蔓尔之区不足以留公昭度迟疑未决建遣军士擒昭度亲吏于军门齎而食之入白曰军士饥须此为食尔昭度大恐即留符节与建而东昭度去建即以兵扼剑门两川由是阻绝又击败山行章于广都行章以眉州降资简戎茂嘉邛诸州皆杀刺史降【按新唐书昭宗本纪眉州叛乃龙纪元年

事嘉简诸州俱于大顺元年降建尚有雅州将谢从木蜀州刺史李行周同时叛附】建攻成都急令孜危宦甚乃夜入建军以节度观察牌印授建明日敬瑄开门迎建建以张勅为都虞候戒军士无剽掠建入城迁敬瑄于雅州使人杀之复以令孜为监军寻亦杀之大顺二年十月唐以建为检校司徒成都尹剑南西川节度副大使知节度事管内观察处置云南八国招抚等使东川顾彦朗卒弟彦晖立唐遣宦者宗道弼赐彦晖东川旌节绵州刺史常厚执道弼以攻梓州自彦朗死建欲图并东川而未有以发乃遣李简王宗涤等讨厚戒之曰兵破厚彦晖必出犒师既与俱来无烦吾再举也简败厚于锺阳厚走还绵州以唐旌节还道弼而出之彦晖已得节辞疾不出犒军干宁二年建遣王宗涤攻之宗涤败彦晖于楸林斩其将罗璋遂围梓州三年昭宗遣宦者袁易简诏建罢兵乃还成都黔南节度使王肇【通鉴武泰军节度使王建肇】以其地降建四年宗涤复攻东川别遣王宗侃等取渝泸州五月建自将攻东川昭宗道谏议大夫李洵【按前云昭宗遣左谏议大夫李珣为两川宣谕使此云遣谏议大夫李洵恐系一人为珣与洵之讹但通鉴此处亦作李洵与欧史同今仍原文】判官韦庄宣谕两川诏建罢兵建不奉诏乃责授建南州刺史以李茂贞代建茂贞拒命乃复建官爵十月建攻破梓州彦晖自杀建以王宗涤为东川留后唐即拜为节度使于是并有两川地时凤翔李茂贞兼据梁洋秦陇数侵建天复元年宦者韩全海等劫天子幸凤翔梁兵围之茂贞求与梁和建闲遣人聘岐许出兵为援劝勿和令王宗涤将兵五万声言迎驾以攻兴元执节度使李继业【通鉴作李继密】武定节度使拓拔思敬遂以其地降建于是并有山南西道荆南成汭死襄州赵匡凝遣其弟匡明袭据之建乘闲攻下夔施忠万四州三年八月唐封建蜀王四年唐还都洛阳改元天佑建与唐隔绝不通故仍称天复天复六年进取归州于是并有三峡七年梁灭唐遣使谕建建不纳因驰檄四方会兵讨梁怕不应秋九月建即皇帝位以明年为武成元年国号蜀封其诸子为王以王宗佶为中书令韦庄为左散骑常侍判中书门下事唐袭为枢密使郑騫为御史中丞张格王锷为翰林学士周博雅为成都尹武成元年正月祀天南郊大赦以王宗佶为太师罢政事宗佶建养子后建子元懿等稍长宗佶心不自安与郑騫等谋作乱求为大司马总六军开元帅府凡军事便宜行而后闻建心疑之未许复为唐袭所谗建益疑其反宗佶入奏事请不已遂叱卫士扑杀之并赐騫死六月以遂王宗懿为皇太子武成二年颁永昌历三年十二月大赦改明年为永平元年李茂贞自山南入于

蜀地狭势孤乃与建和以其子娶建女因求山南故地
建怒不与以王宗侃为北路都统宗佑宗贺唐袭为三面招讨使以攻岐战于青泥宗侃
败绩退保西县为茂贞兵所围建自将击败之岐兵解
去建至兴元而还初田令孜之为监军也盗唐传国玺入蜀埋之二年尚食使欧阳柔治
令孜故第得之以献梁遣光禄卿卢玘来聘推建为兄
其印文曰大梁入蜀之印宰相张格曰唐故事奉使四夷其印文曰大唐入某国之印今
梁以兄事陛下奈何卑我建怒欲杀梁使者格曰此梁
有司之过尔不可以绝两国欢已而梁太祖崩建遣将作监李紘吊之遂刻其印文曰大
蜀入梁之印三年太子元膺 【初名宗懿更名宗坦
复更元膺】 杀太子少保唐袭膺猥喙龇齿多材艺年十七为皇太子判六军创天武神
机营开永和府置官属唐袭建之嬖也元膺易之屡谗
于朝建惧其交恶乃出袭为兴元节度使已而罢归元膺廷疏其恶建益不悦是月七夕
元膺召诸王大臣置酒而集王宗翰枢密使潘峭翰林
学士毛文锡不至元膺怒明日入白建言峭及文锡离闲诸王建怒将罪峭等元膺出而
袭入建问之袭曰太子将谋乱欲召诸王诸将以兵辄
之然后举事建疑之袭请召屯营军入卫元膺闻袭召兵以为诛已召大将徐瑶常谦率
兵拒袭战于神武门袭中流矢坠马死 【按通鉴载
元膺率徐瑶常谦攻袭于清风楼遂至城西斩之十国纪年云元膺遣天武将唐据帅亲
兵逐袭至城西斩之九国志云瑶谦等以所部兵挟元
膺以逐唐袭建急召宗侃等讨寇乃逐唐袭至城西斩之又自大安门登陴入攻瑶谦等
与欧史互异】 建遣王宗贺以兵讨之元膺兵溃乃匿
跃龙池舰中明日出丐食蜀人识之以告建遣宗翰招谕之已为卫兵所杀建乃立郑王
宗衍为太子四年荆南高季昌侵蜀巫山遣嘉王宗寿
败之于瞿唐杀黔南节度使王宗训南蛮攻掠界上遣夔王宗范败之于大渡河五年遣
王宗俦等攻岐取秦凤阶成四州至大散关梁叛将刘
知俊在岐以其族来奔十二月改明年元曰通正通正元年遣王宗綰等率兵十二万攻
岐取陇州八月起文思殿购羣书实之以内枢密使毛
文锡为文思殿大学士十二月改明年元曰天汉国号汉天汉元年杀刘知俊十二月大
赦改明年元曰光天国复号蜀光天元年六月建卒建
性诈妄好为讖纬诡怪之说自天复七年巨人见青城山凤凰见万岁县黄龙见嘉阳江
而诸州皆言甘露白鹿白雀龟龙之瑞于是遂僭号两
川希旨者乃争言符瑞麟凤驹虞合穗连理之属史不绝书晚多内宠贤妃徐氏与妹淑
妃用事交结宦者唐文宸等文宸判六军事无大小皆
取决及建疾以兵入宿卫谋尽去建故将大臣皆不得入见宗弼等排阍入言文宸却为

变乃杀之建因以老将大臣多许昌故人必不为太子

用乃以宦者宋光嗣为枢密使判六军建卒谥曰神武圣文孝德明惠皇帝庙号高祖

△王衍

衍字化源建第十一子旧名宗衍既立去宗名衍初封郑王其母徐贤妃也元膺死徐妃与宦者唐文扆教相士言衍相最贵又讽宰相张

格赞成之由是得立为太子及嗣立尊母贤妃为皇太后徐淑妃为皇太妃衍年少荒淫委政于宦者宋光嗣光葆景润澄王承休欧阳晃田鲁

侑等而以韩昭潘在迎顾在珣严旭等为狎客起宣华苑与诸狎客妇人日夜酣饮其中尝以九日宴宣华苑嘉王宗寿以社稷为言言发流涕

韩昭等曰嘉王酒悲尔诸狎客其以慢言谑嘲之衍不能省也尝与太后太妃游青城山宫人衣服皆画云霞望之飘然若仙衍自作甘州曲述

其状上下山谷闲尝自歌而使宫人和之明年改元干德干德元年正月祀天南郊大赦二年北巡至于西县旌旗戈甲连亘百余里不绝所在

供亿人不堪命三年正月还成都六年以王承休为天雄军节度使承休以宦者得幸妻严氏有绝色衍通之以故得镇时唐庄宗灭梁遣李严

聘蜀见其人物富盛而衍骄淫归乃献策伐蜀明年唐魏王继岌郭崇韬来伐是岁衍改元咸康衍游幸无度十月将幸秦州行至绵谷而唐师

入境衍惧遽还留王宗弼守绵谷遣王宗勋宗俨宗昱率兵以拒唐师宗勋等至三泉望风退走衍诏宗弼诛宗勋等宗弼反与宗勋等合谋送

款衍还至成都御文明殿与羣臣相对涕泣宗弼亦自绵谷驰归登太玄门严兵自卫衍往劳之宗弼骄慢无礼已而劫迁衍于天启宫 【通

鉴作西宫】 收玺绶衍即上表乞降继岌至成都衍君臣面缚輿榘出降于七里亭庄宗召衍入洛赐诏许以封爵誓不背约衍奉诏忻然就道

率其宗族及伪宰相王锳张格庾传素许寂翰林学士李昊等及诸将佐家属数千人以东行至秦川驿庄宗用伶人景进计遣宦者向延嗣族

之衍母徐氏临刑呼曰吾儿以一国迎降反以为戮信义俱弃吾知其祸不旋踵矣衍妾刘氏有色行刑者将免之刘氏曰国家丧亡义不受辱

遂就死当衍为涇乱嘉王宗寿常切谏之后为武信军节度使唐师伐蜀所在迎降继岌以书招之独宗寿不从闻衍降大恸从衍东迁至岐阳

赂守者得入见衍衍泣曰早从王言岂有今日衍死宗寿亡入熊耳山天成二年出诣京师上书求收藏衍宗族明宗嘉之封衍顺正公许以诸

侯礼葬宗寿得王氏十八丧葬之长安南三赵村 【徐无党曰据前蜀书运历图九国志皆云建以唐大顺二年入成都为西川节度使天复

七年九月建号明年正月改元武成今以为定惟旧五代史云龙纪元年入成都天佑五

年建号改元者谬也至后唐同光三年蜀灭则诸书皆同自大顺二年至同光三年凡三十五年】

△附

王宗涤

王宗弼

王宗涤

王宗涤本姓华名洪颖州人从建为威信都指挥使与李简等拒杨守厚于梓州功居多又攻破杨晟于彭州杨守亮于阆州已又败顾彦晖于楸林迁邛州刺史复将兵攻东川建嘉其功更姓名与诸子齿命为东川留后宗涤言东川封疆五千里文移往还动淹时日请分遂合泸渝昌五州列为一镇建表其说于朝置武信军于遂州未几唐授宗涤为东川节度使久之加同平章事破李继业于兴元唐即诏为山南东道节度使宗涤有勇略得将士心建甚忌之会成都作府门绘以朱丹国人谓之画红楼建以宗涤姓名应之而王宗佶等疾其功复构飞语建召宗涤诘责之宗涤曰三蜀略平大王听谗杀功臣可矣建令亲随指挥使唐袭饮以酒缢杀之成都为之罢市建称帝乃复其官爵

王宗弼

王宗弼本姓魏字弘夫建立为假子更令姓名杨守厚攻梓州建遣华洪等救顾彦晖谋因犒师执之宗弼乃以密语泄之彦晖建不为意待之如初已而从攻东川为东川兵所擒彦晖念旧恩畜为子及彦晖败复归于建累官兼中书令充北面行营招讨使建病且剧以宗弼沉静多谋召为马步军都指挥使同受遣诏衍立命宗弼守太师兼中书令判六军辅政封巨鹿王进封齐王时后主不亲政事内外迁除皆出自宗弼纳贿行私上下咨怨唐兵入境会王宗勋等师至三泉李绍琛逆战宗勋等败走衍遂令宗弼守利州且令诛宗勋等时郭崇韬遣宗弼等书为陈利害绍琛未到利州宗弼遽弃城引兵归宗勋等追及于白芳宗弼探怀中诏书示之曰宋光嗣令我杀尔曹因相持而泣遂合谋送款于唐宗弼归至城都严兵自卫已而劫迁于天启宫又使亲吏于义兴门邀取内库金帛收成都尹韩昭宦者宋光嗣景润澄欧阳晃等杀之函首送唐师自称权西川兵马留后使其子承班以衍后宫及珍玩赂继岌及崇韬求西川节度使继岌曰此我家物也奚以献为居数日宋光葆自梓州来诉宗弼诬杀光嗣等又崇韬征犒军钱数万缗于宗弼靳不与士卒怨怒夜纵火喧噪崇韬欲杀宗弼以自明曰继岌收宗弼及宗勋宗渥数其不忠之罪族诛之国人争食宗弼之肉顷刻而尽 【按五代史前蜀世家诸伪臣

俱无附传考王建开蜀王宗涤功居最其亡也王宗

弼实为祸首两人事迹显著应列为附传今并据十国春秋增补】

钦定续通志卷五百九十六

●钦定续通志卷五百九十七 载记四

载记 【四】

后蜀

○后蜀

孟知祥 昶 【附】 高彦俦 赵崇韬 王昭远 李昊

孟知祥

孟昶

附

△孟知祥

孟知祥字保胤邢州龙冈人其叔父迁当康末据荆洺磁三州为晋所虏晋使守泽潞梁兵攻晋迁以泽潞降梁知祥父道独留事晋及知祥壮晋王以其弟克让女妻之以为左教练使庄宗为晋王以为中门使前此为中门使者多以罪诛知祥惧罪求他职因荐郭崇韬自代庄宗以为马步军都虞侯同光元年以太原为北京授知祥太原尹北京留守魏王继岌伐蜀郭崇韬为招讨使崇韬临诀白庄宗曰即臣等平蜀陛下择帅守西川无如孟知祥者及破蜀庄宗遂以为成都尹剑南西川节度副大使四年正月知祥至成都而崇韬已死继岌引军东归先锋康延孝反知祥遣将会任圜等兵击破之得其将李肇侯弘实及兵数千以归会庄宗崩魏王继岌死明宗人立知祥乃训练兵甲阴有王蜀之志益置义胜定远骁锐义宁飞掉等军七万余人命李仁罕赵延隐张业等分将之初魏王继岌郭崇韬令蜀富民输犒军钱六百万缗其余者犹二百万任圜自蜀入相兼判三司素知蜀所余钱是冬明宗加知祥侍中 【按蜀捣杓作检校太傅李昊羊马城记作加太尉兼侍中通鉴作右侍中与欧史同】以太仆卿赵季良赍官告赐之因以为三川制置使督蜀犒军余钱送京师且制置两川征赋知祥拒命然与季良有旧因留之知祥初镇蜀庄宗以宦者焦彦实为监军明宗立悉诛宦者罢诸道监军彦宾已罢枢密使安重海复以客省使李严为监军以制知祥知祥怒曰诸道皆废监军独吾军置之是严欲以蜀再为功也天成二年严至成都知祥置酒召严时彦实独在蜀严于怀中出诏令知祥诛之知祥不听因责严曰今诸方镇已罢监军公何得来此目客将王彦铖执斩之明宗不能诘知祥之人蜀也遣人迎家属于太原行至凤翔节度使

李从曦闻严被杀以为知祥反矣遂留之明宗犹欲怀以恩信诏遣知祥家属归蜀复遣客省使李仁矩慰谕之知祥因请以赵季良为节度副使事无大小皆与参决三年唐徙季良为果州团练使以何瓚为节度副使知祥遣其将雷廷鲁至京师请留季良而以瓚为行军司马明宗不得已从之是岁唐伐荆南诏知祥以兵下峡知祥遣毛重威率兵三千戍夔州已而高季兴死其子从诲归命知祥请罢戍兵不许乃讽重威以兵溃归唐以诏书罪重威知祥不奉诏初魏王继岌东归留精兵五千戍蜀董璋镇东川与知祥未尝通问自重诲疑二人有异志乃以亲信分守两川管内诸州而以精兵为其牙队以夏鲁奇镇遂州李仁矩镇阆州又以武虔裕为绵州刺史仁矩与璋有隙而虔裕重海外兄由是璋与知祥皆惧璋始遣人求婚于知祥以自结知祥许之于是合从以拒唐请罢还唐所遣节度刺史等明宗优诏慰谕之长兴元年明宗郊加拜知祥中书令九月董璋反攻破阆州擒李仁矩杀之知祥亦遂举兵反是秋明宗改封琼华公主为福庆长公主遣秘书监刘岳为册使行至凤翔闻知祥反乃旋诏夺知祥官爵命天雄军节度使石敬瑭为都招讨使夏鲁奇为副知祥遣李仁罕张业赵廷隐将兵三万人会璋攻遂州别遣侯宏实将四千人助璋守东川又遣张武下峡取渝州【按通鉴董璋以长兴元年八月先反九月知祥约董璋同举兵璋引兵击阆州知祥即遣李仁罕等将兵三万攻遂州别遣侯弘实孟思恭会璋攻阆州是月削董璋官爵以石敬瑭为东川行营招讨使夏鲁奇为之副以知祥兼西南供馈使注云知祥已攻遂州朝廷岂不知之犹欲怀辑之以闲董璋耳至十一月唐师攻剑门克之乙亥始诏削知祥官爵欧史作董璋反在九月叙夺知祥官爵于命敬瑭讨蜀之前叙知祥遣李仁罕等于命敬瑭讨蜀之后会璋攻阆州亦作守东川与通鉴俱不合】唐师攻剑门杀璋守兵三千人遂入剑门璋来告急知祥大骇遣廷隐分兵以东已而闻唐军止剑州不进嘉日使唐军急趋东川则遂州围解吾势沮而两川摇矣今其不进易与也十二月敬瑭及廷隐战于剑门败绩时张武已取渝州病卒其副将袁彦超代将其兵取黔州二年李仁罕克遂州夏鲁奇死之知祥以仁罕为武信军留后遣人驰鲁奇首示敬瑭军敬瑭乃班师利州李彦珂闻唐军败归乃弃城走知祥以廷隐为昭武军留后仁罕进攻夔州刺史安崇阮弃城走以赵季良为留后时唐军涉险转馈为艰敬瑭军既旋所在守将皆弃城走明宗以为衅田重海及重海诛死乃遣西川进奏官苏愿进奉军将杜绍本招谕知祥具言家属在京师者皆无恙知祥闻重海死而唐厚待其家乃邀璋欲同谢章璋不听乃

遣观察判官李昊说璋璋益疑知祥责已语侵昊昊乃劝知祥攻之而璋先袭破汉州知祥遣赵廷隐率兵三万自将击之阵鸡距桥 【按薛史作知祥与廷隐等逆战于金雁桥通鉴作廷隐阵于鸡踪桥】 知祥得璋降卒衣以锦袍使持书招降璋曰事已及此不可悔也璋军士欲战乃麾军前进锋始交璋偏将张守进来降知祥乘之璋大败过金雁桥麾其子光嗣使降以保家族光嗣哭曰自古岂有杀父而求生者乎宁俱就死因与璋俱走至梓州璋见杀光嗣自缢死知祥遂并有东川然自璋死知祥卒不遣使谢唐唐枢密使范延光曰知祥虽已破璋必借朝廷以为两川重非屈意招之亦不能自归也明宗然之先是克宁妻孟氏知祥妹也庄宗杀克宁孟氏归于知祥其子瓌留事唐为供奉官明宗即遣瓌归省其母因赐知祥诏书招慰之知祥兼据两川以赵季良为武泰军留后李仁罕武信军留后赵廷隐保宁军留后张业宁江军留后李肇昭武军留后季良等因请知祥称王以墨制行事议未决而瓌至蜀知祥见瓌倨慢瓌自蜀还得知祥表请除季良等为五镇节度其余刺史以下得自除授请封蜀王且言福庆公主已卒明宗为之发哀遣合门使刘政恩为宣谕使政恩复命知祥始遣其将朱泚来朝四年二月以知祥检校太尉兼中书令行成都尹剑南东西两川节度使封蜀王季良等五人皆拜节度使十一月明宗崩明年闰正月知祥乃即皇帝位国号蜀以赵季良为司空同平章事中门使王处回为枢密使李昊为翰林学士三月唐潞王举兵反山南西道节度使张虔钊武定军节度使孙汉韶皆以其地来附四月改元曰明德六月知祥病知祥得风疾踰年至是遂剧以其子昶为皇太子监国知祥卒谥曰文武圣德英烈明孝皇帝庙号高祖

△孟昶

昶字保元初名仁赞知祥第三子知祥为两川节度使昶为行军司马及僭号以昶为东川节度使同平章事知祥卒秘不发丧王处回夜过赵季良相对涕泣季良正色曰今强侯握兵伺变立嗣君以绝非望泣无益也处回遂与季良立昶而后发丧昶立不改元仍称明德至五年始改元曰广政 【按宋史作四年改元广政十国春秋亦作四年十二月事】 明德二年尊母李氏为太后昶好打球走马多采良家子充后宫枢密副使韩保贞切谏昶悟即日出之有上书者言台省当择清流昶叹曰何不言择人而任之左右请诘上书者昶曰吾见唐太宗初即位狱吏孙伏伽上书言事皆见嘉纳奈何劝我拒谏耶然昶年少不亲政事将相大臣皆知祥故人骄蹇踰法多营田宅而李仁罕张业尤甚昶即

位数月执仁罕杀之族其家时李肇自镇来朝杖而入见称疾不拜及闻仁罕死遽释杖而拜广政九年赵季良卒张业益用事业仁罕甥也仁罕被诛时业方掌禁兵昶惧其反仄乃用以为相业兼判度支置狱于家以酷法厚敛蜀人大怨十一年昶与匡圣指挥使安思谦谋执而杀之王处回赵廷隐皆致仕由是故将旧臣殆尽昶始亲政事置匭以通下情时汉高祖起太原中国多故雄武军节度使何建以秦成阶三州来附昶因遣孙汉韶攻下凤州于是悉有王衍故地汉将赵思绾据永兴王景崇据凤翔反皆送款于昶乃遣张虔钊何建李廷珪分道出师应思绾以窥关中又遣安思谦益兵以东已而无功遂执思谦斩之十二年置吏部三铨礼部贡举十三年封子元喆秦王判六军事次子元珪襄王弟仁毅夔王仁贇雅王仁裕嘉王十八年周世宗伐蜀攻自秦州遣高彦俦李廷珪出堂仓以拒周师彦俦大败走青泥于是秦成阶凤复入于周昶惧遂聚刍粟于剑门募兵既多国用不足因铸铁钱榷境内铁器以端其利【按十国纪年蜀史云铸铁钱在广政二十五年考曾巩隆平集云昶闻周世宗下秦凤多积刍粟始以铁为钱十国春秋亦云初铁钱多于外郡至二十五年遂流入成都非二十五年始铸也铸铁钱事当在是时据隆平集改辑】又分遣使者聘南唐东汉以张形势二十年世宗归蜀俘昶亦归所获周将胡立等因寓书于世宗称大蜀皇帝世宗怒其无礼不答时周兵伐南唐取淮南十四州诸国皆惧荆南高保融以书招昶使归周昶以前尝致书世宗不答乃止二十五年立秦王元喆为皇太子宋兴已下荆潭昶益惧遣大程官孙遇及赵彦韬杨纆约东汉共出兵以挠中国遇为边吏所得彦韬潜取蜡丸帛书以告宋宋太祖遂诏伐蜀遣王全斌崔彦进等出凤州刘光又曹彬等出归州率兵五万人分路进攻并令遇等为乡导及兵至昶遣王昭远赵彦韬等拒之昶母李氏谓曰吾见庄宗及汝父时非有功者不使主兵故人皆畏服乐为之用昭远辈素不知兵一旦边警急何以御敌惟高彦俦汝父旧人可委任之昶不听又遣子元喆率精兵数万守剑门全斌至三泉遇昭远击败之昭远焚吉柏江浮桥退守剑门全斌遣偏将史延德分兵出来苏小道北击剑门而自由大路夹攻之昭远彦韬皆被擒元喆亦逃归刘光又攻夔州守将高彦俦战败闭牙城拒守寻自焚死而蜀兵所在奔溃昶益穷蹙问计于左右老将石琚【宋史作斌】以为东兵远来势不能久宜坚守以蔽之昶叹曰吾父子以温衣美食养士四十年一旦临敌不能为吾东向放一箭虽欲坚壁谁与为吾守者耶干德三年正月遣通奏使伊审微赍表诣全斌请降且乞保全家属又遣其弟仁贇诣关

上表诏慰劳之四月昶与母至京师素服待罪阙下宋太祖御崇元殿修礼见之先是诏有司于右掖门外临汴水起大第五百余间以待昶供帐悉备至是赐之拜昶检校太师兼中书令封秦国公七日而卒追赠楚王谥恭孝其母不哭以酒酹地曰汝不能死社稷苟生以取羞吾所以忍死者以汝在也今何用生为因不食卒太祖闻而伤之令鸿胪卿范禹偁护丧事与昶俱葬洛阳元喆归朝与昶同日宣制拜检校太尉泰宁军节度使后移镇贝定二州太平兴国中从平太原又从征幽州又破契丹于徐河以功封滕国公淳化初卒【徐无党曰知祥兴灭年数甚明诸书皆同盖自同光二年乙酉入蜀至干德三年乙丑国灭凡四十一年惟五代史云同光三年丙戌至干德三年乙丑四十年者谬也】

△附

高彦俦

赵崇韬

王昭远

李昊

高彦俦

高彦俦并州太原人从知祥入蜀为昭武军监押昶嗣位迁邛州刺史改马步军使汉兵入大散关克安都砦彦俦以所部先进汉兵遁去彦俦尽锐追之复其砦而还未几拜源州武定军节度周显德初向训攻凤州昶令彦俦出兵解围未至闻败军于唐仓溃归判官赵玘闭关不纳乃遁还成都昶不之罪寻授夔州宁江军都巡检制置招讨使宋师至彦俦为副使赵崇济监军武守谦曰北军涉远而来利速战不如坚壁待之守谦不从独领麾下以出遂败彦俦将以所部出战宋师已乘城入判官罗济劝令单骑归成都彦俦曰我昔已失秦川今夔州复不能守纵不我杀亦何面目见蜀人平济劝其降不可曰今日止有死耳遂望西北再拜登楼纵火自焚死【按九国志云宋师坏门入彦俦挺剑拒之杀十数人乃焚死】初昶母语昶惟彦俦可任及是果能死难

赵崇韬

赵崇韬并州太原人父廷隐随知祥入蜀董璋袭成都廷隐大破之知祥遂有其地及僭号累迁至太师中书令封宋王卒崇韬骁果有父风昶取将家及死事孤子置殿直四番以崇韬为都知领之周世宗克秦凤将入蜀境为崇韬拒退历洋州武定军节度山南武定缘边诸砦都指挥副使汉源之战独策马先登及军败犹手击杀十余人为宋师所擒

王昭远

王昭远益州成都人幼孤贫年十三依东郭僧智誥为童子知祥尝饭僧于府昭远持巾履从智誥入时昶方就学知祥见昭远慧黠留给事左右昶嗣位以为卷帘使枢密使王处回致仕【宋史作出知梓州】昶以枢密权重难制乃以昭远为通奏使知枢密使事机务一以委之府库财帛恣其取不问昭远以方略自许宋师入境昶令与赵崇韬率兵拒战发成都遣李昊饯郊外昭远酒酣攘臂曰是行也非止克敌当领此二三万雕面恶少儿取中原如反掌耳及行执铁如意指麾军事自方诸葛亮将至汉源闻剑门已破惶恐失次崇韬布阵将战昭远据胡床不能起俄崇韬败乃免胄弃甲走投东川匿仓舍下悲嗟流涕目尽肿为追骑所执送阙下宋太祖释之授左领军卫大将军开宝八年卒

李昊

李昊字穹佐自言唐相绅之后昊生于关中唐末昊父羔携家避乱至奉天奉天为岐军所破父及弟妹皆被杀独昊与母得免乃流寓新平刘知俊领岐军围州城昊踰城出为候骑所得知俊与言甚器之妻以女遂随知俊归蜀王衍袭位历中书舍人翰林学士乃遣人闲道迎其母蜀亡人洛明宗令昊入蜀诏孟知祥赵季良量授一职久之知祥辟为掌书记及称帝擢礼部侍郎翰林学士昶立累加尚书左丞拜门下侍郎同平章事俄加左仆射自知祥时章奏书檄皆出昊手集为百卷曰经纬略又修前蜀书四十卷并上之封赵国公加司空初宋之下荆湖也昊言于昶曰臣观宋氏启运不同汉周一统其在此乎若修职通贡亦保安三蜀之良策也为王昭远所沮而止蜀平随昶入朝宋太祖优待之拜工部尚书卒昊前后仕蜀五十年昶之世位兼将相乘利权资货岁入巨万奢侈尤甚初王衍降庄宗昊为草表昶之降也其表亦昊所为蜀人潜署其门曰世修隆表李家见者哂之【按宋史后蜀世家此下有孟仁贇仁裕仁操及伊审微龙景昭幸寅逊李廷珪毋守素欧阳回等附传俱无事迹足录今从删】

钦定续通志卷五百九十七

●钦定续通志卷五百九十八 载记五

载记【五】

南汉

○南汉

刘隐 龚 玠 晟 鋹 【附】 龚澄枢 李托 潘崇彻

刘隐

刘龚

刘玠

刘晟

刘鋹

附

△刘隐

刘隐蔡州上蔡人祖安仁商贾南海因家焉【按宋史作仁安仕唐为湖州刺史因家岭表】父谦【唐书作知谦】唐广州牙将唐干符五年黄巢破广州略湖湘闲谦据有封州诏即授为刺史贺江镇遏使御梧桂以西岁余有兵万人战舰百余艘谦卒清海军节度使刘崇龟表隐为封州刺史干宁中崇龟死薛王知柔代为帅未至广州将卢瑊单玘作乱知柔不敢进隐以兵攻杀瑊玘迎知柔知柔辟为行军司马其后徐彦若代知柔表隐节度副使委以军政彦若卒军中推隐为留后【按宋史云彦若遗表荐隐自代昭宗不从以崔远代之远至江陵迁延不进乃以隐为留后】时虔州卢光稠据州自为留后兼取潮韶二州隐与之争战不利乃悉师攻虔州伏发隐大败【按刘隐攻虔韶事欧史失载今据新唐书补辑】天佑二年拜隐为广州节度使梁开平三年累加检校太师兼中书令封南平王隐父子起封州数有功于岭南遂有南海隐复好贤士时中朝人士往往辟乱岭表名臣谪死南方者皆有子孙在焉仕宦遭乱不得还者亦多流寓王定保倪曙刘浚李衡周杰杨洞潜赵光胤之徒辟置幕府待以宾客干化元年封南海王【按通鉴及东都事略无封南海王事宋史但云开平初封隐南海王无初封南平王事五代会要又云开平四年四月进封南海王均与欧史异】

卒追尊曰襄皇帝庙号烈宗

△刘龚

龚初名岩又更名陟谦庶子也其母段氏生龚于外舍谦妻韦氏素妬拔剑而出将杀之及见而异之曰此非常儿也后三日卒杀其母自养为子袭长善骑射隐为行军司马辟薛王府咨议参军隐镇南海龚为副使隐卒龚代立干化二年除清海军节度使末帝即位龚封南海王初隐攻韶州龚曰韶州所赖者光稠击之虔人必应应则首尾受敌此不宜直攻而可以计取隐不听果败归因尽以兵事付龚卒出兵攻败卢氏取潮韶又取容邕二管自梁初隐受封爵及龚嗣立皆稟正朔贞明三年龚乃即皇帝位国号大越改元曰干亨追尊安仁谦隐皆为皇帝立三庙置百官以杨洞潜为兵部侍郎李衡礼部侍郎倪曙工部侍郎赵光胤兵部尚书皆平章事光胤自以唐甲族耻事伪国常怏怏思归龚乃

诈为光胤手书遣使闲道至洛阳召其二子损益并其家属皆至光胤惊喜为尽心焉龚性奇酷为刀锯支解剥剔之刑每视杀人则朵颐垂涎不胜其喜又好奢侈悉聚南海珍宝以为玉堂珠殿二年祀天南郊大赦改国号汉三年册越国夫人马氏为皇后四年置选部贡举放进士明经十余人如唐故事岁以为常七年唐庄宗入卞龚惧遣宫苑使何词入视中国虚实称大汉国主致书大唐皇帝词还言唐必乱不足忧龚大喜尝自言家本咸秦耻王蛮方呼唐天子为洛州刺史九年白龙见南宫三清殿改元白龙又更名龚以应龙见之祥有言讖书灭刘氏者龚也袭乃采周易飞龙在天之义为龚字以名焉四年楚以舟师攻封州封州兵败于贺江龚惧以周易筮之遇大有遂赦境内改元曰大有遣将苏章以神弩军三千往救章以两铁索沈贺江中为巨轮于岸上筑堤隐之因轻舟迎战阳败楚人逐之章举巨轮挽索锁楚舟以强弩夹江射之尽杀楚人三年遣将李守墉梁克贞攻交趾擒曲承美龚登仪凤楼受浮赦之 【按十国春秋云史纂左编载梁末交州土豪曲承美据有十二州之地南汉遣将攻承美执之置交趾节度使又考驭交记但言李守墉梁克贞取交州不言置交趾节度使未详孰是】 克贞又改古城掠其宝货而归四年爱州杨廷艺叛攻交州刺史李进遯归龚遣承旨程宝攻廷艺宝战死五年封子耀枢等十九人皆为王十年交州牙将皎公羨杀杨廷艺自立廷艺故将吴权攻交州公羨来乞师龚欲乘乱取之以子万王洪操为静海军节度使改封交王将兵攻之而自以兵驻海门为援权已杀公羨逆战海口植铁橛海中权兵乘潮而进洪操逐之潮退舟还辄橛者皆覆洪操战死龚收余众而还十五年龚卒谥曰天皇大帝庙号高祖

△刘玠

玠龚子初名洪度封秦王龚子耀枢龟图皆早死玠次当立袭病意欲立洪昌召右仆射王翻至寝中与语翻为谋出洪度邕州洪熙容州然后立洪昌为太子议已定崇文使萧益入问疾龚以告之益谏曰少者得立长者争之祸始此矣由是卒正洪度更名玠改元曰光天尊母赵昭仪为皇太妃以晋王洪熙辅政玠立不能任事龚在殡召伶人作乐饮酒宫中裸男女以为乐或衣墨缊与娼女夜行出入民家山海闲盗贼竞起推妖人张遇贤为帅陷循州玠遣越王洪昌循王洪杲攻之遇贤围洪昌等于钱帛馆裨将万景忻陈道庠力战挟二王溃围走玠莫能省岭东皆乱洪熙日益进贤妓诱玠为荒恣玠亦颇疑诸弟图已敕宦官守宫门入者皆露索洪熙洪杲洪昌隐遣陈道庠养勇士刘思潮谭令裡

等习为角抵以献玢玢宴长春宫以阅之醉起道庠与思潮等随至寝门拉杀之谥曰殇

△刘晟

晟初名洪熙封晋王既弑玢遂自立改元曰应干以洪昌为兵马元帅知政事洪杲副元帅刘思潮等封功臣晟以弑兄篡立惧众不服乃益峻刑法以威众已而洪杲屡请讨贼阴劝晟诛思潮等以止外议晟大怒夜召洪杲至杀之冬祀天南郊改元曰干和二年遣洪昌祠襄帝陵于海曲至昌华宫使盗刺杀之晟自杀洪杲由是与诸弟有隙而洪昌最贤龚素所欲立者晟尤忌之故先及害镇王洪泽居邕州有善政是岁凤凰见邕州晟怒使人酖杀之诸弟洪雅等终晟之世相次皆见杀三年杀刘思潮等五人思潮等死陈道庠惧不自安其友邓伸【五国故事作邓申】以苟悦汉纪遗之道庠莫能晓伸骂曰憨獠韩信诛而彭越醢皆在此书矣道庠悟益惧晟闻之大怒执道庠伸皆斩于市夷其族以右仆射王翻尝谋立越王洪昌出为英州刺史寻赐死于路六年遣工部郎中知制诰锺允章求婚于楚楚不许晟怒曰马公复能经略南土乎时马希广新立希萼起兵武陵湖南大乱允章具言楚可攻状乃遣巨象指挥使吴珣内侍吴怀恩攻贺州克之楚人来救珣凿大阱于城下覆箔而傅以土下施机轴自堑中穿穴通穿中楚兵逼城遣人自穴中发机楚人悉陷死者数千人珣等遂乘胜攻桂州及连宜严梧蒙五州皆克之掠全州而还【按通鉴吴怀恩等陷楚兵于贺州城下遂进陷昭州此云克桂连宜严梧蒙全等州而不及昭州欧史失载也】九年又遣内侍潘崇彻攻楚郴州与李景兵遇大败之遂取郴州晟益得志故时刘氏宫馆凡数百玉清太征诸名不可悉纪晟复遣巨舰指挥使暨彦贇以兵入海掠商人金帛作离宫日恣游猎宦者林延遇宫人卢琼仙内外用事专为杀戮晟不复省尝大醉以置伶人尚玉楼项试剑因并斩其首明日复召玉楼侍饮左右自己杀之晟叹息而已十年湖南王进逵以兵五万率溪洞蛮攻郴州潘崇彻与战于蚝石大败之十一年晟病甚封其子继兴等五人皆为王十二年交州吴昌浚遣使称臣求节钺昌浚者权子也权自龚时据交州洪操战死遂弃不复攻至是始称臣遣给事中李玙以旌节招之玙至白州海贼为乱不果行十四年是为周显德三年世宗平江北晟始惶恐遣使修贡为楚人所隔使者不得行晟忧形于色又尝自言知星十六年月食牛女闲出书占之叹曰吾当之矣因为长夜饮卜葬域于城北运甓为圻亲临视之是秋卒谥曰文武光圣明孝皇帝庙号中宗

△刘鋹

銀初名继兴晟卒以长子立改元曰大宝晟性刚忌不能任臣下而独任宦官宫婢等至銀尤愚懦以为羣臣皆自有家室顾子孙不能尽忠惟宦者亲近可任遂委政于龚澄枢陈延寿【宋史作陈延受】等澄枢等既专政銀乃与宫婢波斯女等淫戏后宫不复出省事延寿又引女巫樊胡子【宋史作樊胡】自言玉皇令其降身命銀为太子皇帝銀于内殿设帐幄陈珍玩胡子冠远游冠衣紫霞裾坐帐中宣祸福銀再拜听命由是国事皆决于胡子卢琼仙龚澄枢等争附之时宫中妇人皆具冠带领外事内官数至七千余人有为三师三公者但于其上加内字别之女官亦有师傅令仆之号羣臣有才略可备用者皆下蚕室令得出入宫闈又作烧煮剥割刀山剑树之刑或令罪人鬪虎抵象又赋敛烦重邕民入城者人输一钱琼州米斗税四五钱置媚川都定其课令入海五百尺采珠所居宫殿以珠玳瑁饰之陈延寿作诸淫巧日费数万金銀游幸离宫尝至月余或旬日以豪民为课户供宴犒之费尚书左丞鍾允章参政事深嫉之数请诛宦官宦官皆灰目二年銀祀天南郊前三日允章与礼官登坛四顾旨麾宦者许彦真望见之曰此谋反耳乃拔剑升坛允章迎叱之彦真驰走告允章反銀下允章狱并捕系其二子族诛之陈延寿谓銀曰先帝所以得传陛下者由尽杀羣弟也劝銀稍诛诸王乃杀其弟桂王旋兴是岁宋建隆元年也銀将邵廷珣言真主已出其势非一天下不能已请飭兵备不然悉珍宝奉中国遣使通好銀懵然莫以为虑恶其言直深恨之五年以宦者李托养女为贵妃专宠托为内太师居中专政许彦真既杀鍾允章恶澄枢等居己上谋杀之澄枢使人告彦真反族诛之七年宋师克郴州戍将暨彦贇刺史陆光图皆战死余众退保韶州銀始思廷珣言遣廷珣师舟兵出洗口以拒宋宋师退舍廷珣训士卒修战备岭人倚以为重有潜者诬以反寻赐死士卒冤之八年交州吴昌文卒其下争立交趾大乱驩州丁璉举兵击破之即授璉交州节度十三年是为宋开宝三年宋师来讨初宋太祖克郴州获銀内侍余延业太祖问銀为治之迹延业备言其奢酷及銀兵攻道州刺史王继勋请讨之太祖难其事令李煜谕銀使称臣归湖南地銀不从煜使三往书辞恳至銀怒囚其使者龚慎仪驿书答煜言甚不逊煜上之乃诏潭州防御使潘美等出师时銀旧将多以谗构诛死宗室翦灭殆尽掌兵者惟宦官数辈自晟以来城壁不修兵甲毁坏及闻宋师至内外震恐乃遣龚澄枢守贺州郭崇岳守桂州李托守韶州以备是岁秋潘美平贺州十月平韶州又平桂州十一月平连州【按宋史潘美等于十月次昭州破开建砦擒砦将靳晖昭州刺史田行周遁去城

遂陷桂州刺史李承进亦奔遂平昭桂二州至平连州在十一月平韶州在十二月与十国春秋并同欧史于十二月书平韶州于十月亦作平韶上下重出显系昭与韶音形相近而讹今改正】 銀喜曰昭桂连贺本属湖南今北师取之足矣其不复南也十二月平韶州明年平英雄二州宋师次泷头銀遣使请和求缓师二月宋师度马径銀遣其右仆射萧灌奉表降灌既行銀惶迫复令整兵拒命美等进师銀遣其弟祥王保兴率文武诣美军降不纳 【按宋史銀既遣右仆射萧灌奉表乞降又遣其弟保兴率百官奉迎为郭崇岳所遏崇岳无谋勇但祈求鬼神复为拒扞之备美等乃进攻是保兴本未出降非美等不纳也与欧史异】 师傅城龚澄枢李托薛崇誉等谋尽焚其府库宫殿銀以海舶十余载珍宝嫔御将入海宦官乐范窃其舟以逃师次白田銀素衣白马以降乃并其宗室文武部送阙下 【按宋史城既破銀尽焚其府库美擒銀及龚澄枢李托薛崇誉与宗室文武九十七人同糜于龙德宫是銀穷蹙被擒非自出降亦与欧史互异】 斩阉工五百余人有司以帛系銀献庙社宋太祖御明德门宣诏责銀銀委过于龚澄枢李托薛崇誉等伏地待罪释銀封恩赦侯其弟保兴及萧灌等并授官有差銀有口辩性绝巧尝以珠结鞍勒为戏龙之状以献极其精妙太祖诏示诸宫官皆骇伏因语左右曰銀儻能以习巧之勤移于治国岂至灭亡哉太平兴国五年卒追封南越王 【徐无党曰隐兴灭年世诸书皆同盖自唐天佑二年隐为广州节度使至宋开宝四年国灭凡六十七年旧五代史以梁贞明三年龚僭号为始故曰五十五年尔】

△附

龚澄枢

李托

潘崇彻

龚澄枢

龚澄枢广州南海人幼事龚为内供奉官累迁内给事晟龚位任阉人林延遇为甘泉宫使颇预政事延遇病将死言于晟曰臣死惟龚澄枢可用即日擢知承宣院銀嗣位累加特进开府仪同三司骠骑上将军左龙虎军观军容使内太师军国重务皆决于澄枢澄枢等与女巫樊胡子相倚为奸胡子乃为銀言澄枢等乃上天使来辅太子有罪不可问澄枢因与李托薛崇誉置酷法之具民甚苦之初岩改名龚有术者言不利名龚当败国事后銀用澄枢卒以其姓亡国澄枢亦执送汴京斩于千秋门外

李托

李托封州封川人少习骑射以谨愿事龚为内府局令晟龚位迁内侍省内侍銀立以托进纳二女政事皆访托而后行累加特进开府仪同三司兼六军观军容使行内中尉骠骑上将军内太师宋师既克韶州统军使李承渥战死节度副使辛延渥闲道遣人劝銀隆托坚沮其议及就擒宋太祖遣使问托时昨已约降复率众来拒战及军败又纵火焚府库谁为之谋托俛首不能对谏议大夫王珪谓曰昔在广州机务并尔辈所专火又自内起今复欲推过何人遂唾而批其颊托引伏后至京与薛崇誉同被戮【按宋史此下有薛崇誉传无事迹可录今从删】

潘崇彻

潘崇彻广州南海人事龚为内侍省局丞颇读兵书立战功晟遣大将吴怀恩平桂州怀恩为部下所杀命崇彻代之銀立加西北面都统岁余銀颇疑崇彻遣薛崇誉使其军察之崇誉还遂白崇彻日以伶人百余衣锦绣吹玉笛为长夜饮不恤军政銀怒召归夺其兵柄自是居常怏怏宋师入境复命崇彻领兵五万戍贺江崇彻不为效命拥众自保潘美克英雄二州崇彻遂降宋太祖特赦之授汝州别驾卒

钦定续通志卷五百九十八

●钦定续通志卷五百九十九 载记六

载记【六】

楚

○楚

马殷

希声

希范

希广

希萼

希崇

【附】刘言【

王进逵】

周行逢

马殷

马希声

马希范

马希广

马希萼【马希崇】

附

△马殷

马殷字霸图许州鄢陵人【按通鉴作扶沟人三楚新录作上蔡人】唐中和三年蔡州秦宗权遣孙儒刘建锋【按欧史作建峯新唐书作建锋考建锋字锐端当从新书改正】将兵万人属其弟宗衡略地淮南殷初为儒裨将儒败死殷无所归乃收散卒转寇江西有众

七千 【新唐书刘建锋传作略洪虔数州有众十余万】 推建锋为帅殷为先锋略虔吉有众数万干宁元年入潮南攻澧陵潭州刺史邓处讷遣邵州将蒋勋等以兵三千断龙回关勋以牛酒犒师殷说勋曰刘公勇智绝人精兵十万所向必克公集乡兵捍关殆矣不如下之富贵可得也勋然之又其下畏建锋虐夜弃甲走建锋至关取勋旌铠直趋潭州至东门守者以为勋兵内之遂杀处讷建锋自称留后僖宗授建锋湖南节度使 【按新唐书作检校尚书左仆射武安军节度使】 殷为马步军都指挥使蒋勋求为邵州刺史建锋不与勋怒率兵攻湘乡取邵州进攻定胜武安殷以奇兵出迪田踰润山据江为壁诱勋渡江分兵袭定胜麾濒江兵夹击勋大败之 【按马殷取潭州及攻邵州事迹最着欧史略之今据新唐书补辑】 建锋已得志即嗜酒不事事军卒陈贍妻有色建锋私之贍怒袖铁槌击杀建锋军中推行军司马张佶为帅佶将入府马忽蹠啮伤左髀佶语诸将曰吾非而主也马公英勇可共立之诸将乃共迎殷礲贍于市时干宁三年也唐拜殷潭州刺史判湖南军府事殷遣其将秦彦晖李琼等攻下连邵郴衡道永六州擒蒋勋杀之进攻桂管执其留后刘士政尽取其属州表琼为桂管观察使四年拜殷武安军节度使 【按通鉴及十国春秋作干宁四年二月张佶克郡州擒蒋勋杀之光化元年三月拜殷武安军留后未几进本军节度使其攻下连郴衡道永五州及攻桂管执刘士政皆光化三年以前事欧史作干宁四年殷拜武安节度又载攻连郴衡道永桂管等事于干宁四年之前与诸书不合】 初孙儒败于宣州殷弟竇为杨行密所执署为黑云都使从战数有功行密闻殷贵乃厚礼遣归殷大喜表为节度副使建锋遣刘存等攻杜洪围鄂州殷遣秦彦晖许德勋以舟兵救之已而洪败死存等遂攻殷殷遣彦晖拒于上流偏将黄璠以舟三百伏浏阳口存等屡战不胜来求和不许彦晖等急击之存等走黄璠以浏阳舟截江合击大败之刘存及陈知新战死彦晖遂取岳州 【按通鉴及编遗录十国春秋俱云彦晖与璠大破刘存擒存及陈知新以归殷释其缚不屈乃趋斩之欧史作战死又薛史梁纪马殷破淮寇在开平元年六月十国纪年吴纪刘存攻楚在开平元年五月败在六月梁太祖即位及封殷楚王乃四月也欧史载此事在梁祖未即位前与诸书异】 梁太祖即位殷遣使修贡拜殷侍中兼中书令封楚王杨行密袁州刺史吕师周来奔师周将家子颇通纬候兵书殷得之大喜曰吾方南图岭表得此人足矣以为马步军都指挥使率兵攻岭南取昭贺梧蒙龚富等州殷即表为昭州刺史遣秦彦晖攻朗州刺史雷彦恭奔吴执其弟彦雄等送

于梁于是澧州向瓌辰州宋邺溱州昌师益等率溪洞诸蛮皆附于殷殷请升朗州为永顺军表张佶为节度使复请依唐太宗故事开天策府置官属梁太祖拜殷天策上将军殷以其弟竇为左相存为右相廖光图等十八人为学士末帝时加殷武安武昌静江宁远等军节度使洪鄂四面行营都统唐庄宗灭梁殷遣其子希范入贡上梁所授都统印庄宗问洞庭广狭希范对曰车驾南巡纔堪饮马尔庄宗平蜀殷大惧表求致仕庄宗下玺书慰劳之殷初兵力尚寡与杨行密成汭刘龚等为敌国殷患之问策于其将高郁郁曰荆南阨弱焉能患我刘龚志在五管而已淮南我讎也固不吾援然尊王使顺霸者之业也今宜内奉朝廷以求封爵而外夸邻敌然后退修兵农畜力而有待尔于是殷始修贡京师然岁贡不过所产茶茗而已殷自京师至襄唐郢复等州置邸务卖茶其利十倍又铸铅铁钱以十当铜钱一又令民自造茶通商而收其算岁入万计由是地力完数邀封爵天成二年请建行台明宗遣尚书右丞李序以竹册封为楚国王殷以潭州为长沙府建国承制置官属以其弟竇为静江军节度使子希振武顺军节度使希声判内外诸军事姚彦章为左相许德勋为右相李铎为司徒崔颖为司空拓拔常为仆射马珙为尚书文武皆进位谥其曾祖筠曰文肃祖正曰庄穆父元丰曰景庄立三庙于长沙长兴元年殷卒诏谥武穆

△马希声

希声字若讷殷次子殷建国高郁数教以计策而楚以强荆南高季昌闻而患之尝使谍者行闲于殷殷不听希声用事谍者语希声曰季昌闻楚用高郁大喜以为亡马氏者必郁也希声遽夺其兵职矫殷令杀之殷老不复省事郁死之日大雾四塞殷恠之语左右曰吾尝从孙儒儒每杀不辜天必大雾岂马步狱有冤死乎明日吏以状白殷拊膺大哭曰吾荒耄如此亦不久于世矣明年殷卒希声立授武安静江等军节度使希声尝闻梁太祖好食鸡慕之乃日烹五十鸡以供膳葬殷上潢不入泣顿食鸡肉数器而起长兴三年卒追封衡阳王

△马希范

希范字宝规殷第四子殷子十余人嫡子希振长而贤次希声与希范同日生希声母袁夫人有美色以母宠得立希振弃官为道士故希声卒而希范以次立袭殷官爵封楚王晋天福四年加希范天策上将军开封承制如殷故事希范好学而性奢侈廖光图徐仲雅李皋拓拔常等十八人皆故学士光图等俱浮薄尝与希范饮博譁呼独常沈厚长者上书切谏光图等恶之溪州刺史彭士然率锦奖诸蛮攻澧州希范遣

刘勳刘全明等击败之遂攻溪州士然走遣其子师曷率诸蛮酋降于勳溪州西掠■〈牛羊〉牻两林南通桂林象郡希范乃立铜柱为表命
学士李皋铭之于是南宁州蛮莫彦殊都云蛮尹德昌■〈牛羊〉牻蛮张万浚皆率其部来附希范作会春园嘉宴堂其费巨万始加赋国中
拓拔常切谏又作九龙殿以沈香为八龙绕柱自言身一龙也时契丹方灭晋牙将丁思颢谏曰先生起卒伍以攻战而得此州倚朝廷以制邻
敌传国三世有地数千里养兵十万今中国无主真霸者立功之时诚能悉师倡义桓文之业也柰何耗国用而穷土木为儿女子之乐乎希范
谢之思颢嗔目视之曰孺子终不可教也乃扼喉而死开运四年希范卒谥曰文昭

△马希广

希广字德丕希范同母弟希范恶拓拔常数谏诤乃谢绝之及卧病始思其言为忠召之以托希广希范卒常劝希范让位于兄希萼希广
不从时希萼为朗州节度使闻希范卒来奔丧希广用刘彦瑫言遣都指挥使周廷诲将水军逆希萼于硃石令将士释甲而后入廷诲与张少
敌白希广曰王能与之则已不然宜早除之希广泣曰吾兄也焉忍杀之分国而治可也乃止之于碧湘宫厚赂遣归希萼愤去乃遣使诣京师
求封爵请置邸称藩汉隐帝不许隆玺书慰解之希萼怒送款于李景举兵攻长沙希广遣刘彦瑫许可琼等御之彦瑫败

△马希萼 【马希崇】

希萼于仆射洲希萼去诱溪洞诸蛮寇益阳希广遣崔洪璉以步卒七千屯湘乡玉潭以遏诸蛮刘彦瑫以舟兵趋武陵攻希萼彦瑫败于
湄洲希广大惧遣使请兵于京师不应希萼率舟兵沿江而上自号顺天将军 【通鉴作顺天王】 攻岳州刺史王贇拒之五日不克希萼引
兵去下湘乡至长沙与彦瑫可琼等军夹水而屯彭师曷登城望水西军入白希广请以步兵三千自巴溪渡江趋岳麓后与彦瑫等腹背夹击
之希广以为可而可琼已阴送款希萼遂沮其议明日师曷闻之急白希广请杀可琼不听希萼攻长乐门牙将吴宏杨涤战于门中希萼少衄
可琼等按兵不战已而举全军降于希萼宏涤等闻之皆溃希广率妻子匿于慈堂明日被擒希萼欲活之其下不可遂缢杀之先是左司马希
崇常为希萼诃希广语言动作悉以告之约为内应至是率将吏诣希萼劝进 【按通鉴希萼还朗州时希崇密与通约为内应希萼之攻潭
州希崇启之也至是又率将吏劝进希广之亡希崇实与有力欧史于希崇通希萼事失载今据通鉴增辑】 干佑三年希萼自立明年汉隐帝
崩京师大乱希萼遂臣于李景景册封希萼楚王希萼悉以军政委希崇希崇与楚旧将

徐威陆孟俊鲁绾等谋作乱希萼置酒端阳门希崇辞以疾威等纵恶马十余匹以壮士执槌随之突入其府劫库兵缚希萼遂迎希崇立之希崇遣彭师曷廖偃囚希萼于衡山师曷即奉为衡山王臣于李景希崇惧亦请命于景景遣边镐入楚尽迁马氏之族于金陵时周广顺元年也景复希萼楚王居洪州希崇领舒州节度使居扬州周世宗征淮下扬州诏抚马氏子孙已而扬州复入于景希崇率其弟希能等十七人归京师皆拜官有差【徐抚党曰殷自唐干宁二年入湖南至周广顺元年国灭凡五十七年希萼希崇之乱南唐尽迁马氏之族于金陵五代旧史云时广顺元年也而运历图云干佑二年马氏灭者繆矣初殷入湖南掘地得石讖云龙起头猪捍尾盖殷以干宁三年岁在丙辰自立于湖南至广顺元年辛亥而灭九国志以干佑三年为辛亥湖湖故事以显德元年为辛亥者皆繆也惟五代旧史得其实云】

△附

刘言【王进逵】

周行逢

刘言【王进逵】

刘言吉州庐陵人王进逵【通鉴作王逵】武陵人言初事刺史彭玕从玕奔楚事希范为辰州刺史进逵少为静江军卒事希萼为指挥使希萼攻希广以进逵为先锋陷长沙长沙遭乱残毁希萼使进逵以静江兵营缉之兵皆愁怨进逵遂拥兵斩关奔归武陵希萼方醉不能省明旦遣将唐翥追及之与战大败而还进逵乃遂留后马光惠迎言于辰州以为帅而自为副已而希萼被囚希崇立李景迁马氏族并召言语不从遣进逵与行军司马何景真等【通鉴及十国纪年作何敬真】攻边镐于长沙镐败走广顺三年言奉表京师以邀封爵又言长沙残破不可居请移治武陵周太祖从之乃升朗州为武平军在武安军上以言为节度使而以武安授进逵进逵以言已所迎立不为之下二人始有隙进逵谋曰言将可用者不过何景真朱全琇尔召杀之言可取也时刘晟取楚梧桂宜蒙等州进逵因白言令景真等会兵攻晟言信之遣二人往至皆见杀乃举兵袭武陵执言杀之奉表京师周太祖即以为武平军节度使世宗征淮南授为南面行营都统攻鄂州过岳州刺史潘叔嗣进逵旧同列也进逵左右求赂于叔嗣不得乃共谗其短进逵面骂之叔嗣惭恨进逵入鄂州方攻下长山叔嗣以兵袭武陵进逵闻之轻舟而归与叔嗣战城外进逵败见杀【按通鉴考异载广本进逵命行营副使毛立为袁州行营统军使潘叔嗣张文表为前锋次醴陵县

吏请具牛酒犒军立不许叔嗣等因士卒怒以兵叛进逵乘轻舟奔朗州叔嗣追至朗杀之又湖湘故事进逵攻袁州叔嗣叛闻进逵归朗州遂自潭州倍程至朗杀之马氏行年纪进逵三月至潭州四月叔嗣叛五月五日杀进逵于朗州诸说不足据惟十国纪年为得其实纪年所载与欧史同】

周行逢

周行逢武陵人少无赖犯法配隶镇兵与王进逵俱为挣江军卒事希萼为裨校进逵攻边镐行逢别破益阳杀李景兵二千余人擒其将李建期进逵为武安军节度使拜行逢潭州行军司马领集州刺史未几进逵袭杀刘言据武陵行逢遂据潭州显德元年拜行逢武清军节度使权知潭州军府事潘叔嗣既杀进逵还岳州遣客将李简迎行逢于潭州行逢入武陵召叔嗣为行军司马叔嗣称疾不至行逢乃阳以武安与之召使至府受命至则杀之以徇世宗遂授行逢朗州大都督武平军节度使尽有湖南之地宋初加兼中书令行逢在镇俭约自励辟署官属必取廉介士有女壻求补吏不许反给耒耜语之曰汝才不任职姑归垦田以自活其公正多类此然性猜忌果于杀戮大将十余人谋为乱行逢召宴酒半悉令壮士擒斩之民过无大小皆死妻严氏谏【按宋史及三楚新录作潘氏通鉴作邓氏惟九国志作严氏与欧史同】不听因不乐留府署给行逢曰家田佃户以公贵颇不力农多恃势侵民请往视之至则营居以老岁时衣青裙押佃户遂租入城行逢往劳且止之严氏曰公思作户长时乎租后时常苦鞭扑今贵矣宜先期以率众行逢强留之因曰公用法太严而失人心所不欲留者一旦祸起田野闲易逃死尔行逢为之少损建隆三年行逢病革召将吏以子保权属之曰与吾同起者十人皆诛死惟衡州刺史张文表独存吾死文表必叛当以杨师璠讨之如不能则婴城勿战自归朝廷行逢卒子保权立明年春文表果叛攻下潭州保权命杨师璠讨文表至平津亭文表出战大败之别遣使乞师于朝廷宋太祖遣慕容延钊等将步骑往未至而文表为师璠所杀延钊兵入朗州保权牙校张从富辈以为文表已平而王师继进不已惧其图己因相与拒守延钊遣使安抚复不内廷钊以闻太祖遣中使谕之曰尔乞师救援今反拒王师何也毋自取灭亡保权不听军澧州南未及交锋而溃退保朗州焚其庐舍府库略尽驱民亡窜山谷城郭一空宋师傅城其将汪端劫保权并家属奔匿山洞数月搜获之湖湘悉平时有李观象者行逢辟为掌书记颇加信任军府之政一以取决临终托以后事及宋师压境谓保权曰我所恃者北有荆渚以为唇

齿今高氏拱手听命朗州势不独全莫若幅巾归朝犹可不失富贵保权不能用卒及于败保权至京师优诏释之授右千卫上将军雍熙二年卒

钦定续通志卷五百九十九

●钦定续通志卷六百 载记七

载记 【七】

吴越

○吴越

钱镠 元瓘 佐 侗 俶 【附】 惟浚 惟治 孙承

佑 沈承礼

钱镠

钱元瓘

钱佐

钱侗

钱俶

附

△钱镠

钱镠字具美杭州临安人里中有大木镠幼时与羣儿戏木下镠坐大石指麾羣儿为队伍号令颇有法羣儿皆惮之及壮不事生业以贩

盐为盗县录事锺起有子数人与镠饮博起尝禁之豫章人有善术者望牛斗闲有王气乃之临安以相法隐市中阴求其人起与术者善一日

过起家镠适从外来见起反走术者望见之大惊曰此真贵人也召镠至熟视之乃慰曰子骨法非常愿自爱因与起诀去起始纵其诸子与镠

游时货其穷乏镠善射与槊稍通图纬诸书唐干符二年浙西镇遏使王郢作乱石镜镇将董昌募乡兵讨贼表镠为偏将击郢破之时黄巢攻

掠浙东至临安镠以劲卒二十人伏山谷中巢先锋度险皆单骑镠伏弩射杀其将巢兵乱镠引劲卒蹂之斩首数百级乃引兵趋八百里八百

里地名也告道旁媪曰后有兵至告曰临安兵屯八百里矣巢众至闻媪语不知其地名皆曰向十余卒不可敌况八百里乎遂急引去过都统

高骈闻而壮之召董昌与镠俱至广陵之久不见用辞还骈表昌杭州刺史镠都知兵马使 【按吴越备史及十国春秋广明二年九月诏授

镠都知兵马使与授董昌杭州刺史同时欧史失载今据补】 时天下已乱昌乃团诸县兵为八都以镠为都指挥使 【按新唐书周宝传宝

发杭州兵戍县镇判八都石镜都董昌主之清平都陈晟主之于潜都吴文举主之盐官

都徐及主之新登都杜棱主之唐山都饶京主之富春
都文禹主之龙泉都凌文举主之各聚千人保乡里吴越备史亦云广明元年僖宗人兴
元杭州始建八都临安县则董昌主之鏐为副非昌始
团诸县兵为八都也并不载鏐为都指挥使事】中和二年越州观察使刘汉宏与昌有
隙遣其弟汉宥都虞候辛约屯兵西陵以图浙西鏐率
兵渡江袭破之汉宏复遣耐黄珪何肃屯诸暨萧山鏐攻破之与汉宏遇战又大败之杀
何肃辛约汉宏遯四年僖宗遣中使焦居璠为杭越通
和使诏罢兵皆不奉诏汉宏遣其将朱褒韩公玫施坚实等以舟兵屯望海鏐出平水成
及夜率奇兵破褒等于曹娥埭进屯丰山坚实等降进
拔越州汉宏走台州刺史杜雄执送于鏐斩于会稽族其家鏐乃奏昌代汉宏而自居杭
州光启三年拜鏐左卫大将军杭州刺史时淮南大乱
六合镇将徐约攻取苏州润州牙将刘浩等逐其帅周宝宝奔常州浩推度支崔勣官薛
朗为帅鏐遣都将成及杜棱等攻常州取周宝以归鏐
具军礼郊迎馆于梓亭宝病卒【按新唐书僖宗本纪光启三年十月丁卯鏐杀周宝宝
传亦云鏐具囊鞬迎宝馆于梓亭未几杀之与欧史
异】以杜棱守常州进攻润州逐刘浩执朗剖心以祭宝以阮结守润州又遣其弟録攻
徐约约走入海追杀之昭宗拜鏐杭州防御使时杨行
密孙儒争淮南与鏐战苏常闲后儒为行密所杀行密据淮南取润州而鏐亦取苏常【
按唐本纪鏐陷常州在光启三年陷润州在文德元
年陷苏州在隆纪元年是冬常州入于吴刺史杜棱死之未几并润州俱为孙儒所得次
年苏州亦入于吴继又为孙儒所并至景福元年苏州
复归于鏐干宁三年行密又夺之光化元年复入于越此云行密取润州而鏐亦取苏常
当在大顺景福闲但本纪于是时不载鏐取常州事而
常州于何时复入越则史亦无明文】唐升越州威胜军以董昌为节度使杭州武威军
拜鏐都团练使以成及为副使景福二年拜鏐镇海军
节度使润州刺史干宁元年加同平章事二年董昌反鏐以反状闻昭宗诏削昌官爵封
鏐彭城郡王浙江东道招讨使鏐于董氏有旧恩乃以
兵三万屯迎恩门遣其客沈滂谕使改过昌以钱二百万犒军执妖人应智等送军中自
请待罪鏐乃还兵【按通鉴载干宁二年二月鏐移
书责昌昌不听乃将兵三万诣越州城下至迎恩门昌惧执首谋者吴瑶及巫覡数人送
于鏐请待罪鏐引兵还以状闻四月又表请以本道兵
讨昌五月诏削昌官爵委钱鏐讨之以鏐为浙东招讨使吴越备史所载略同据此则鏐
以兵诣越州在未以状闻之先诏削日官爵及以为招
讨使在表请讨昌之后与欧史异】昌复拒命遣其将陈郁崔温等屯香严石侯鏐遣顾

全武攻之斩崔温昌兄子真骁勇善战攻之逾年不能克后真为裨将刺羽所赞昌杀之兵败全武执昌还及西小江日投水死【按新唐书董昌传作全武执昌还斩之投尸于江吴越备史作全武使上武勇都监使吴璋执昌至斩之与欧史异】昭宗乃改威胜军为镇东军拜缪镇海镇东等军节度使加检校太尉中书令赐铁券缪如越州受命还治钱塘号越州为东府光化元年移镇海军于杭州加缪检校太师改缪所居营曰衣锦营婺州刺史王坛叛附淮南杨行密遣其将康儒应之攻睦州缪遣其弟録败儒于轩渚坛奔宣州衢州刺史陈岌来附诏缪图形凌烟阁升衣锦营为衣锦城天复二年封缪越王缪巡衣锦城武勇都指挥使徐绾许再思叛顾全武曰绾急必召淮兵淮兵至患不细矣请择诸公子可行者与俱往以难告杨公必能闵我缪尝欲以子元璩婚杨氏乃使随全武如广陵绾果召田頔于宣州全武等至广陵行密以女妻元璩丞召頔还頔取缪钱百万【通鉴作二十万缗吴越备史作一百亿】质缪子元瓘而归天佑元年封缪吴王缪建功臣堂立碑纪功列宾佐将校名氏于碑阴者五百年四年升衣锦城为安国衣锦军梁太师即位封缪吴越王兼淮南节度使客有劝钊拒命者缪笑曰吾岂失为孙仲谋邪遂受之缪好玉带名马太祖以玉带一匣打球御马十匹赐之开平二年加空中书令改临安县为安国县三年加守太保杨渥将周本陈章围苏州缪遣其弟锯鏖救之淮兵为水栅环城以铜铃系网沈水中断潜行者水军卒司马福多智而善水行先以巨竹触网淮人闻铃声举网福乃过入城中其出也亦然遂取其军号内外夹攻号令相应大败淮军本等走擒其将闾邱直何明等干化元年加守尚书令兼淮南宣润等道四面行营都统缪弟鏖居湖州擅杀戍将潘长惧罪奔淮南梁友珪篡立册尊缪尚父末帝贞明三年加缪天下兵马都元帅开府置官属四年杨隆演取虔州缪姑由海路入贡京师龙德元年赐缪诏书不名唐庄宗入洛缪遣使贡献求玉册庄宗下有司议羣臣皆谓非天子不得用玉册郭崇韬尤为不可既而许之乃赐以玉册金印缪因以镇海等军节度授其子元瓘自称吴越国王更名所居曰宫殿府曰朝官属皆称臣起玉册金券诏书三楼于衣锦军遣使册新罗渤海王海中诸国皆封拜其君长明宗初即位安重诲用事缪致书辞媢重诲怒会供奉官乌昭遇韩玫使吴越还玫诬昭遇称臣舞蹈重诲乃奏削缪王爵以太师致仕元瓘等遣人以绢表闲道自陈重诲死乃复缪官爵长兴三年卒谥武肃

△钱元瓘

元瓘字明宝鏐第七子初名传瓘既立更名元瓘少质于田頔頔叛吴杨行密会越兵攻之頔每战败归即欲杀元瓘頔母常蔽护之及頔战死元瓘乃得归鏐卧病召诸将告之曰吾子皆愚懦不足任后事惟公等自择之诸将泣下皆曰元瓘从王征伐最有功瓘子莫及请立之鏐之出笥钥数篋与之鏐卒元瓘立袭封吴越国王【按薛史清泰初封吴王二年封越王天福三年封吴越国王吴越备史则云应顺元年封吴越王清泰初复册封天福二年封为吴越国王】玉册金印皆如鏐故事王延政自立于建州闽中大乱元瓘遣其将仰佺薛万忠等攻之逾年大败而归元瓘善抚将士好儒学使其国相沈崧置择能院选吴中文士录用之然性奢侈好治宫室天福六年加天下兵马都元帅【按元瓘加天下兵马都元帅欧史失载今据薛史补】杭州大火烧宫室殆尽元瓘避之火辄随发因大惧病狂而卒谥文穆

△钱佐

佐【表忠观碑作仁佐】字佑立元瓘第六子时年十三【通鉴作时年十四】诸将皆少佐佐初优容之诸将稍不法佐乃黜其大将意德安于明州李文庆于睦州杀内都监杜昭达统军使闾璠由是国中皆畏恐王延羲延政兄弟相攻其将李仁达等自相篡杀连兵数年仁达附于李景巳而又叛景兵攻之仁达求救于佐佐召诸将计事皆不欲行佐遣其统军使张筠赵承泰等率兵三万水陆赴之大败景兵获其将杨业蔡遇等遂取福州而还佐立七年袭封吴越国王开运四年卒谥忠献【表忠观碑作忠显】

△钱侗

侗字隆道元瓘第七子初元瓘质于宣州以胡进思戴恇等自随后用进思等为大将佐年少以进思旧将甚见尊礼及侗立颇卑侮之进思不能平侗大阅兵于碧波亭方第赏进思谏以颁赏太厚侗怒掷笔水中曰以物与军士吾岂私之何见咎也进思大惧岁除画工献钟馗击鬼图侗以诗题图上进思见之悟侗将杀己是夕拥卫兵废侗囚于义和院迎其弟俶立之迁侗于东府居越州二十余年卒谥忠逊【按欧史不载侗谥今据吴越备史及十国春秋补】

△钱俶

俶字文德元瓘第九子历汉周袭封吴越国王显德元年授天下兵马都元帅世宗征淮南诏俶攻常宣二州以牵李景俶治兵以待景闻周师将大举乃遣使安抚境上皆戒严苏州侯吏陈满不知景使谓朝廷已克诸州遣使安抚亟言于俶请举兵以应俶相国吴程遽调兵出程

等攻常州果为景将柴克宏所败程裨将邵可迁力战程等仅以身免【按宋史显德三年世宗征淮南令俶以所部分路进讨俶遣偏将吴程围毗陵陷关城禽刺史赵仁泽路彦铤围宣城俄俶军战败复失常州十国春秋亦云显德三年三月程等先克常州至壬子始为柴克宏所败乙卯路彦铤攻宣州不克闻程败乃引还】周师渡淮俶乃尽括国中丁民益兵使邵可迁等以战船四百艘水军万七千人至通州会期世宗已平淮南遣使赐俶兵甲旗帜豪驼羊马宋太祖即位仍授为天下兵马大元帅钱氏兼有两浙几百年其人比诸国怯弱而俗喜淫巧自鏐世常重敛其民以事奢僭人不堪其苦又多掠得岭南商贾实货当五代时常贡奉中国不绝及宋兴俶益倾国以事贡献于德元年遣子惟浚入朝寻又遣幕吏黄夷简入贡太祖谕之曰归语而主常训练兵甲江南倔强不朝我将发师讨之元帅当助我又命有司造大第于熏风门外赐名礼贤宅供帐悉具召进奉使钱文贄示之曰以待李煜及而主先来朝者赐之令谕旨于俶开宝七年冬讨江南以俶为升州东面招抚制置使【吴越备史作东南面招讨制置使】时李煜贻书讽俶丞相沈虎子亦劝俶母攻江南皆不听以煜书上闻即亲率师拔常州加守太师诏归国乃遣大将沈承礼等随宋师平金陵九年二月俶与妻孙氏子惟浚入朝太祖先临礼贤宅按视及至诏俶居之太祖屡幸其第特赐剑履上殿书诏不名封其妻孙氏为吴越王妃先后赐予数十万以四月归国陛辞日赐一黄袱封识甚固戒以涂中密视及启之则皆羣臣乞留俶章疏也俶甚感惧既归尝视事功臣堂一曰命坐于东偏谓左右曰西北者神京在焉天威不违颜咫尺俶岂敢宁居乎太平兴国三年复来朝宴俶长春殿命刘鋹李煜预坐会陈洪进纳土俶上表乞罢所封吴越国王及元帅号并请诏命呼名不许俶又表恳献所管十三州于阙下诏可乃封为淮海国王以礼贤宅赐之子侄将校并授官有差其后刘继元降帝御连城台顾谓俶曰卿能保全一方以归于我兵不血刃深可嘉也俶顿首谢八年冬累章乞解元帅号允之雍熙元年改封汉南国王四年出为武胜军节度使改封南阳俶四上表让国王乃改封许王端拱元年徙封邓王卒追封秦国王谥忠懿命中使护其丧归葬洛阳【徐无党曰鏐世兴灭诸书皆同盖自唐干宁二年为镇海镇东军节度使兼有两浙至太平兴国三年国除凡八十四年】

△附

钱惟浚

钱惟治

孙承佑

沈承礼

钱惟浚

惟浚字禹川，倣子。表授镇海镇东两军节度副大使，检校太保。建隆初，领建武军节度使。自干德元年来朝，后数岁率一赴阙。开宝二年，授镇东等军节度使。太祖尝召宴苑中，令与诸王同席坐。从征金陵，攻下毗陵，以功加平章事。太宗即位，加兼侍中。比倣，尽献浙右地，徙镇淮南。加检校太师。后平太原，征幽蓟，皆在兵闲。又徙镇安州，封萧国公。加兼中书令。淳化初，杭州以钱氏家藏唐梁以来所赐玉册、行册各三副、铁券一，来上帝，悉以赐惟浚。明年春卒，追封邠王。【吴越备史作祁王】 谥安僖。

钱惟治

惟治字和世，废王侗长子。侗初迁于越，而惟治生倣，养为己子。授两浙牙内诸军指挥使，历迁检校太保、台州团练使。干德四年，制授宁远军节度，检校太傅。与惟浚节旌同日至，从征江南，攻下常州，以功改奉国军节度使。太宗即位，进检校太尉。倣两入京师，皆命惟治权国事。一夕，厩中火，惟治率兵临高下视，令亲信十数辈仗剑，申令敢后顾者斩。顷之火息，妻族有隶帐下者，恃亲犯法，惟治命扶背于府门。倣既维士朝廷，命考功郎中范旻知杭州。惟治奉兵民图籍，帑廩管钥授旻，与其弟惟演、惟灏归朝，改镇国军节度使。雍熙三年，征幽州，命知真定军府，兼兵马都部署，训兵，享士，设厨饌于城门，以待使传。初，惟浚虽倣嫡嗣，然倣以其放荡，无检故器，惟治俾再权国务。倣尝暴疾，孙妃悉敛符钥付之。惟浚知之甚，恚恨，洎入朝，惟浚止奉朝请，而委惟治藩任焉。咸平初，僮奴以奸私杀人，责授友监门卫上将军。晚年颇贫，景德中，月给奉钱十万。大中祥符七年卒。【按宋史吴越世宗此下有惟济、俨、昱三人附传，考惟浚、惟治在国时已秉旄节，事迹显著，仍附入载记，惟济等俱无事实，足录今删】

孙承佑

孙承佑，杭州钱塘人。倣纳其姊为妃，因擢处要职，累迁镇海镇东雨军节度副使，知静海军节度事。开宝初，随倣子惟浚入贡，诏授检校太保、镇海镇东等军行营司马。倣又私署中吴军节度使，后从倣克毗陵，功居多，诏改中吴军为平江军，真授承佑节度使。倣献地后，徙泰宁军。从幸大名，留知府事。雍熙二年，改知滑州。卒。承佑在浙右，日恣为奢侈，每一饮宴，凡杀物率千数，虽常膳必数十品。所居室中，爇龙龙，日不下数两。扈从北征，以橐驼负大斛贮水养鱼，自随其侈肆多类此。

沈承礼

沈承礼湖州乌程人。镠辟置幕府，署处州刺史。镠子元瓘以女妻之，出守台州。佐嗣立，掌亲兵，俶袭位，命知威武军节度使，充两浙都钤辖。使从征江南，俶遣承礼率水陆数万人助平毗陵。因攻润州，城中兵夜出焚外栅，诸将皆欲驰救，承礼曰：「古人有言：击东南而备西北者，此之谓也。」命士皆擐甲蓐食，坚壁不动。他垒不设备者，悉惊扰。独承礼所部，敌人不敢窥。丹阳平，遂率兵抵金陵。【按承礼助攻金陵事迹，宋史失载。今据十国春秋增辑】时冬至，军中皆聚饮，承礼谓将士曰：「城中以我节序宴享，必不备。我宜出不意图之。」乃召敢死士千人，爇火薄城下，陷其东门。士多攀垒而登，江南遂降。录其功，真授福州节制使。既献地，徙镇密州卒。

钦定续通志卷六百

●钦定续通志卷六百一 载记八

载记 【八】

闽

○闽

王审知 延翰 鳞 昶 曦 延政 【附】 留从效 陈

洪进

王审知

王延翰

王鳞

王昶

王曦

王延政

附

△王审知

王审知字信通，光州固始人。父恁，世为农。兄潮为县史。唐末，羣盗起，寿州人王绪攻陷固始，闻潮与弟审邽、审知俱材勇，召置军中。以潮为军校。时蔡州秦宗权以绪为光州刺史，令会击黄巢。绪迟留不行，宗权攻绪，绪率众南奔。自南康入临汀，陷漳浦，有众数万。绪军法，毋得携老弱。而潮与二弟奉母以行，绪怒，欲斩其母。三子同辞曰：「事母犹事将军也，杀其母焉用子？」为绪赦之。会母死，不敢哭，夜殡道左。时望气者言：「军中当有暴兴者。」【按绪军法，毋得携老弱，以下欧史不载。今据新唐书潮传增辑】绪性猜忌，视部将有材能者，多因事诛之。众惧，军次南安。潮说其前锋将刘行全曰：「今将吏有材能者，必死吾属，不自保朝夕。况欲图成事哉！行全大悟。」

乃选壮士数十人伏篁竹闲合绪至跃出擒之囚之军中
中绪后自杀行全曰生我者潮也推潮为主潮固辞不得乃除地植剑祝曰拜而剑三动
者立之至审知剑跃于地众以为神皆拜之审知让潮
而自为副潮令于军曰今天子蒙尘当出交广入巴蜀以干王室于是悉师将行 【按潮
固辞不得以下亦据潮传增入】 会泉州刺史廖彦
若为政贪暴泉人苦之闻潮治军有法耆老相率遮留潮即引兵围彦若逾年克之光启
二年福建观察使陈岩表潮泉州刺史景福元年岩卒
其婿范晖自称留后岩旧将多归潮言晖可取状潮遣审知攻晖久不克审知请班师潮
不许又请潮自临军且益兵潮报曰兵与将俱尽当自
往审知惧乃亲督士卒攻破之晖见杀是岁唐以潮为福建观察使潮以审知为副使审
知状貌雄伟常乘白马军中号白马三郎干宁四年潮
卒审知代立唐以福州为威武军拜审知节度使累迁同中书门下平章事封琅邪王 【
按王潮传载干宁中升福州为威武军即拜潮节度
使检校尚书左仆射潮病以审知权节度让审知不许诏审知检校刑部尚书节度观察
留后厚事朱全忠全忠荐为节度使通鉴载升福州为
威武军以潮为节度亦在干宁三年九月审知为节度在光化元年十月据此则威武之
升在潮卒之前潮已先秉节旄也与欧史异威武军额
职方考亦然新书及通鉴作威武者误】 梁太祖即位拜中书令封闽王升福州为大都
督府时杨行密据有江淮审知岁遣使泛海自登莱入
贡审知性俭约好礼下士中朝人士多依之又建学四门以教闽士之秀者招来海中蛮
夷商贾海上有黄崎波涛为阻一夕雷电震击开为港
闽人以为审知德政所致号为甘棠港同光三年卒谥忠懿追谥曰昭武孝皇帝庙号太
祖

△王延翰

延翰字子逸审知长子唐同光四年拜延翰节度使是岁庄宗遇弑中国多故延翰
乃取司马迁史记闽越王无诸传宗将吏曰闽自古王
国也不王何待于是军府将吏上书劝进十月建国称王而犹禀唐正朔延翰为人长大
美皙如玉其妻崔氏陋而淫审知丧未替延翰多选良
家子为妾崔氏辄幽之别室系以大械刻木为人手以击其颊又以铁锥刺之一岁中死
者八十四人审知养子建州刺史延禀本姓周氏自审
知时与延翰不协延翰立以其弟延钧为泉州刺史延钧怒二人因谋作乱十二月延禀
延钧皆以兵入执延翰弑之而延钧立

△王璘

璘 【通鉴作璘】 审知次子初名延钧既立更名璘唐拜为节度使累加检校太

师中书令封闽王初延稟与鳞之谋乱也延稟兵先至
已杀延翰而鳞兵始至延稟自以养子让鳞鳞既立延稟还建州鳞餼于郊临诀谓录曰
善继先志母烦老兄复来鳞衔之长兴二年延稟率兵
击鳞攻西门使其子继雄转海攻其南门鳞遣王仁达拒之仁达伏甲舟中伪立白帜请
降继雄信之登舟伏发刺杀之梟首西门兵溃执延稟
杀之延稟子继升守建州闻败奔钱唐长兴三年鳞上书言楚王马殷吴越王钱鏐皆为
尚书令今皆已薨请授臣尚书令唐不报鳞遂绝朝贡
鳞好鬼神道家之说道士陈守元以左道见信建宝皇宫以居之谓鳞曰宝皇命王少避
位后当为六十年天子鳞欣然逊位命其子继鹏权主
府事既而复位遣守元问宝皇六十年后将安归守元传宝皇语曰六十年后当为大罗
仙人鳞乃即皇帝位受册于宝皇以黄龙见真封宅改
元曰龙启国号闽追尊审知为皇帝立五庙置百官以福州为长乐府闽地狭国用不足
以中军使薛文杰为国计使文杰多察民闲阴事致富
人罪籍其貲以佐用闽人皆怨又荐妖巫徐彦曰陛下左右多奸臣不质诸鬼神将为乱
鳞使彦视鬼于宫中文杰与内枢密使吴英有隙英病
在告文杰使彦诬以谋反收英下狱杀之英尝主兵得军士心军士闻英死皆怒是岁吴
人攻建州鳞遣其将王延宗教之兵士不肯进曰得文
杰乃进鳞惜不与其子继鹏请与之以纾难乃以槛车送军中军士磔文杰于市明日鳞
赦至已不及龙启三年改元永和王仁达以杀延稟功
典亲兵鳞忌之尝问仁达曰赵高指鹿为马以愚二世果有之邪仁达曰秦二世愚故高
指鹿为马非高能愚二世也今陛下聪明朝廷官不满
百动静皆知之敢有作威福者族之而已鳞惭赐金帛慰安之退谓人曰仁达智勇在吾
世犹可用不可遗后世患卒诬以罪杀之鳞妻早卒继
室金氏贤而不见答审知婢金凤姓陈氏鳞嬖之立为后陈氏与嬖吏归守明百工院使
李可殷私通鳞婢春燕有色其子继鹏烝之鳞病风疾
继鹏因陈氏求春燕鳞怏怏与之次子继韬怒谋杀继鹏继鹏惧与皇城使李仿图之是
岁十月飡军于大酺殿鳞言见延稟来仿以为鳞病甚
令壮士先杀李可殷于家明日晨朝鳞无恙诘可殷死状仿惧而出与继鹏率皇城卫士
入卫士刺鳞不死宫人不忍其苦为绝之陈氏及继韬
归守明皆为仿所杀谥曰惠皇帝庙号太宗 【按通鉴作谥曰齐肃明孝皇帝庙号惠宗
与欧史异】

△王昶

昶鳞长子初名继鹏既立更名昶改元通文以李仿判六军诸卫事仿既弑鳞心疑
惧不自安多养死士为备昶患之因大享军伏甲执斩

之梟首于市仿部兵千人叛烧启圣门夺仿首奔钱唐晋天福二年昶遣使朝贡京师晋高祖遣散骑常侍卢损册封昶闽王拜其子继恭临海郡王损至闽昶称疾不见令继恭主之损还昶无所答继恭遣其佐郑元弼随损至京师贡方物致书晋大臣述昶意求以敌国礼往来高祖怒下诏暴其罪归其贡物不纳以元弼下狱寻赦之遣归昶亦好巫拜道士谭紫霄为正一先生又拜陈守元为天师而妖人林兴以巫见幸事无大小兴辄以宝皇语命之而后行四年夏【按十国春秋宫中虹见以下皆系通文四年三月以后事昶遇害在四年七月考昶称通文四年乃晋天福四年也通鉴载此数事亦在天福四年欧史于此作三年夏后又云是岁夏术者言宫中当有灾则并作三年事显系讹误今改正】宫中虹见林兴传神言此宗室将为乱之兆也乃命兴率壮士杀审知子延武延望及其子五人后兴事败亦被杀而昶愈惑乱立父婢春燕为皇后又遣医人陈究以空名堂牒卖官昶弟继严判六军诸卫事昶疑而罢之代以季弟继鏞【按通鉴作继镕】募勇士为宸卫都以自卫其赐子独厚于他军控鹤都将连重遇拱宸都将朱文进皆以此激怒其军是岁夏术者言宫中当有灾昶徙南宫避灾而宫中火昶疑重遇军士纵火内学士陈郟以便佞为昶所亲信昶语之郟反以告重遇重遇惧夜率卫士纵火焚南宫昶挟爱姬子弟黄门卫士斩关出宿于野次重遇迎延羲立之延羲令其子继业率兵袭昶继业弑之及其妻子皆死无遗类谥曰圣神英睿文明广武应道大宏孝皇帝【按欧史不载昶谥号今据通鉴补入】 庙号康宗

△王曦

曦审知少子初名延羲既立更名曦遣使朝贡于晋改元永隆铸大铁钱以一当十泉州刺史余廷英尝矫曦命掠取良家子曦怒召下御史劾之廷英进买宴钱十万又献皇后钱十万乃得不劾曦尝嫁女朝士有不贺者笞之御史中丞刘赞坐不纠举将加笞谏议大夫郑元弼切谏曦曰卿何如魏郑公乃敢强谏元弼曰陛下似唐太宗臣为魏郑公可矣曦喜乃释之曦弟延政为建州节度使封富沙王与曦有隙数举兵相攻曦由此尽戮宗室谏议大夫黄峻极谏贬漳州司户参军校书郎陈光逸上书疏曦过恶五十余事曦命卫士鞭数百不死悬颈于木久乃绝国计使陈匡范增算商之法以献曦曰匡范人中宝也已而岁入不登其数借于民以足之匡范以忧死曦后知之剖棺断尸弃水中曦性既淫虐妻李氏悍而酗酒贤妃尚氏有色而宠李仁遇曦甥也以色嬖之用以为相曦常为牛饮羣臣醉不胜有私弃酒者辄杀之连重遇弑昶惧

为国人所讨与朱文进连婣以自固曦心疑之常谓重遇等李氏妒尚妃之宠欲图曦而立其子亚澄乃使人谓重遇等曰上心不平于二公柰何重遇等惧六年三月曦出游醉归遣壮士拉于马上而弑之谥曰睿文广武明圣元德隆道大孝皇帝【按曦谥号欧史亦不载今据通鉴补入】 庙号景宗

△王延政

延政【册府元龟作延正】 审知子曦立肆为淫虐延政数贻书谏之曦怒遣杜建崇监其军延政逐之曦乃举兵攻延政为延政所败延政乃以建州建国称殷改元天德明年朱文进连重遇已弑曦文进自立为闽王以重遇判六军诸卫事王氏子弟在福州者无少长皆杀之以黄绍颇守泉州程赞守漳州许文缜守汀州称晋年号时开运元年也泉州军将留从效倡率州人共杀绍颇于是漳州闻之亦杀赞而文缜惧以汀州降延政延政已得三州重遇亦杀文进传首建州以自归福州裨将林仁翰又杀重遇谋迎延政都福州时南唐李景闻闽乱发兵攻之延政遣其从子继昌守福州而南唐兵方急攻延政福州将李仁达谓其徒曰唐兵攻建州富沙王不能自保其能有此土邪乃杀继昌欲自立惧众不附以僧卓伊明示众曰此非常人也被以袞冕率诸将吏北面事之已而杀伊明自立送款于李景景以仁达为武威军节度使吏其名曰宏义而景兵攻破建州延政出降迁其族于金陵封鄱阳王徙封光山王是岁得保大四年也【徐无党曰晋开运三年丙午南唐保大四年也是岁李景兵破建州王氏灭江南录云保大三年虜王氏之族迁于金陵谬也据王潮实以唐景福元年入福州拜观察使而后人纪录者乃用骑马来骑马去之讖以为据遂以王潮光启二年岁在丙午拜泉州刺史为始年至保大四年岁复在丙午而灭故为六十一年然其奄有闽国则当自景福元年为始实五十五年也今诸家记其国灭丙午是也其始年则牵于讖书谬矣惟江南录又差其末年也】

△附

留从效

陈洪进

留从效

留从效【宋史作从效今据欧史】 泉州永春人幼孤事母兄以孝悌闻朱文进弑延羲据其位以黄绍颇守泉州时从效方为泉州散指挥使与其党王忠顺等謀兴复王氏从效倡言吾等皆受王氏恩遇今闻建州士卒谋尽力击福州以复王氏苟一旦功先成我辈何面目见

之邪于是募敢死士得陈洪进等五十二人夜持自挺踰城而入劫库兵擒绍颇斩之立延政从子继勋为刺史从劾等自署为统帅洪进等皆为指挥使继勋令送绍颇首于建州奉延政为主延政遂送款于李景会景遣将围福州两浙钱氏发兵来援福州入于钱氏从劾以兵劫继勋送江南景即以泉州为清源军授从劾节度泉漳等州观察使闽中五州自此分矣后累封至晋江王从劾知人疾苦在郡专以勤俭养民为务民甚爱之王氏有二女嫁为郡人妻从劾奉之甚谨资给丰厚岁取进士明经谓之秋堂周世宗征淮南江北地尽入中朝从劾遣使闲道奉表修贡世宗嘉纳之又乞置邸京师世宗以其素附江南不许宋初上表称藩贡奉不绝太祖命使厚抚之使未至从劾疽发背卒从劾无嗣以兄从愿子绍鎡绍磁为子从劬寝疾时从愿守漳州绍鎡在金陵绍磁尚幼衙校张汉思陈洪进等率兵劫从劬迁东亭汉思自称留后洪进为副使时建隆三年也明年洪进废汉思自立

陈洪进

陈洪进泉州仙游人幼习兵法及长以材勇闻隶兵籍从攻汀州以功补副兵马使从留从劬杀黄绍颇将送首建州羣下以道阻贼盛皆惮行洪进独请往至尤溪贼数千人遮道不得前洪进给贼曰福泉二州已为义师所袭尔辈复为何人戍守即持绍颇首示之曰送此于建州迎嗣君以归国尔贼遂溃渠帅数人听命至建州延政大悦以为本州岛马步行军都校时晋开运元年也未几遣归泉州从劬劫王继勋降江南景以从劬为清源军节度洪进为统军使与副使张汉思同领兵柄从劬卒洪进推汉思为留后自为副使汉思年老军务皆决于洪进汉思诸子并为衙将颇不平汉思亦患其专因大享将吏伏甲将害洪进酒数行地忽大震同谋者以告洪进亟去众惊散自是更相为备一日洪进袖大锁安步入府中汉思方处内斋洪进鏊其门使人叩门谓汉思曰郡中军吏请洪进知留务众情不可违当以印见授汉思惶惧不知所为即自门闲出印与之洪进即以兵迁汉思别墅遣使请命于李煜煜即以为清源军节度泉南等州观察使时宋太祖平泽潞下扬州取荆湖洪进大惧遣衙将魏仁济闲道奉表听朝旨太祖赐诏安抚又以其素附江南再谕李煜不必以彼此为意煜亦听命自后屡遣使朝贡干德二年制改清源军为平海军仍授洪进节度使加检校太傅以其子文颢为节度副使文颢为漳州刺史洪进每岁以修贡朝廷多厚敛于民第民费百万以上者令差入钱以为试协律奉礼郎蠲其丁役及江南平吴越王来朝洪进不自安遣其子文颢入贡太祖因下诏召之遂入覲至南剑

州闻太祖崩归镇发哀太宗即位加检校太师明年来朝表献所管漳泉两郡优诏嘉纳之遂以为武宁军节度使同平章事留京师奉朝请诸子皆授近郡太平兴国四十年从平太原六年封杞国公雍熙元进封岐国公二年卒赠中书令谥忠顺 【按宋史闽世家此下有文显文顥文顥三人传俱无事迹足录今从删】

钦定续通志卷六百一

●钦定续通志卷六百二 载记九

载记 【九】

南平

○南平

高季兴 从海 保融 保勳 继冲 【附】 孙光宪 梁延

嗣

高季兴

高从海

高保融

高保勳

高继冲

附

△高季兴

高季兴字贻孙陕州硤石人本名季昌避后唐献祖庙讳更名季兴少为汴人李让家僮梁太祖养让为子赐姓名曰朱友让季兴因得进见太祖奇其材命友让以子畜之乃冒姓朱氏补制胜军使迁毅勇指挥使 【通鉴作亲从指挥使】 天复二年梁兵攻凤翔李茂贞坚壁不出太祖议欲还军季兴独进曰天下豪杰窥此举者一岁矣今岐人已剋破在旦夕而坚壁以老我师此可以诱致也太祖壮其言命季兴募敢死士得骑士马景季兴授以计引见太祖景曰此行无还理愿录其后太祖许之景乃以数骑驰叩城门告曰梁兵将东前锋去矢岐人以为然开门出追梁军梁兵随景进杀其九千余人景死之季兴由是知名明年拜宋州刺史从破青州徙颍州防御使复姓高氏天佑二年梁兵破襄州赵匡凝奔吴其弟荆南留后匡明奔蜀乃以季兴为荆南节度观察留后 【按曾巩隆平集及王偁东都事略云康末荆南司马张瓌逐其节度使陈儒自称留后瓌败而季兴守荆南考新唐书陈儒传瓌逐儒及秦宗权遣赵德諲攻败之在僖宗中和闲而德諲据襄州传子匡凝至天复三年匡凝始遣其弟匡明据荆南天佑二年奔蜀二书谓瓌败而季兴即守荆南似

不足据惟通鉴云天佑二年梁兵破襄州匡凝兄弟出奔九月以都将贺瓌为荆南留后会武贞节度使雷彦威屡寇芋南瓌不能守三年十月乃以颍州防御使高季兴代之与十国春秋所载同据此则季兴为荆南留后亦非匡明奔蜀后即授也均与欧史异】 开平元年拜节度使【按三楚新录作拜江陵尹兼管节度观察处置等使】二年加同平章事荆南节度十州唐末为诸道侵削所治惟江陵一城而已兵火之后季兴招缉绥抚人咸归之太祖崩季兴见梁日衰弱乃谋阻兵自固治城隍设楼橹以兵攻归峡俵襄州绝贡赋者累年末帝优容之封季兴渤海王赐以袞冕剑佩贞明三年始复修贡梁亡唐庄宗入洛下诏慰谕其客司空熏等劝季兴入朝独梁震不可曰梁唐世为仇敌大王梁室故臣擢强兵居重镇以身入朝行为虜尔季兴不听以骑士三百为卫朝于洛阳庄宗果欲留之郭崇韬谏乃止厚礼遣之庄宗尝问季兴曰吾已灭梁欲正吴蜀何者为先季兴曰宜先蜀臣请以本道兵先进庄宗大悦及已去庄宗心颇悔乃密诏襄州刘训图之季兴行至襄州心动夜斩关出已去而诏书始至季兴归谓梁震曰不听子言几不免因曰吾行有二失来朝一失放还一失且主上百战以取河南对功臣夸手钞春秋又曰我于手指上得天下其自矜伐如此而荒于游畋政事多废吾无虑矣同光三年封南平王【按陶岳五代史补作同光二年封季兴南平王并加兼中书令】魏王继岌已破蜀得蜀金帛四十余万自峡而下会庄宗难作季兴闻变乃悉邀留蜀物杀其使者韩珙等十余人初唐兵伐蜀季兴请以本道兵自取夔忠万余峡等州乃以季兴为峡路东南面招讨使而季兴未尝出兵魏王破蜀明宗入立季兴屡请以夔忠等州为属郡唐大臣皆以为不可明宗不得已与之而犹自除刺史季兴拒不纳明宗乃以襄州刘训为招讨使攻之不克而唐别将西方邺克其夔忠万三州季兴遂以荆归峡三州臣于吴【按五代史西方邺传云邺取夔忠万三州已而又取归州数败季兴兵是季兴以地归吴只有荆峡二州也】 吴册季兴秦王天成三年卒谥曰武信

△高从海

从海字遵圣季兴长子季兴时仕梁赐告归省遂留为马步军都指挥使行军司马季兴卒吴以从海为荆南节度使从海以父自绝于唐惧复见讨乃聘于楚楚王马殷为请命于唐而从海亦遣押衙刘知谦奉表自归明宗纳之长兴元年拜从海节度使追封季兴楚王封从海渤海王应顺元年封南平王从海明敏多权诈晋高祖遣翰林学士陶谷为从海生辰国信使从海宴谷望沙楼大陈战舰于楼下谓谷曰吴蜀不

宾久矣愿修武备习水战以待师期谷还具道其语晋高祖大喜复遣使赐甲马百匹襄州安从进反结从海为拔从海外为拒绝阴与之通晋帅致讨从海遣将季端以舟师为应从仕诛从海求郢州为属郡不许汉高祖起太原从海遣人闲道奉表劝进且言汉得天下愿乞郢州为属高祖阳诺之卒亦不与从海怒发兵攻郢州为刺史尹实所败汉遣国子祭酒田敏使楚假道荆南从海问敏中国虚实以为契丹之后兵食皆殫意欲以诮敏敏言杜重威悉以晋戈甲降契丹契丹置之镇州未尝以北故晋兵皆汉有也从海不悦敏以印本五经遣从海从海谢曰子之所识不过孝经十八章尔敏曰至德要道于此足矣为诵诸侯章制节谨度数言从海以为讥已以大卮罚敏荆南地狭兵弱介于吴越为小国自吴称帝而南汉闽楚犹奉梁正朔岁时贡奉皆假道荆南季兴从海常邀留使者掠取其物而诸道以书责诮或发兵加讨即复还之而无媿从海自求郢州不得遂自绝于朝廷逾年复通朝贡干佑元年卒谥曰文献

△高保融

保融【马令南唐书作保庸】字德长从海第三子从海时为节度副使兼峡州刺史从海卒拜节度使广顺元年封渤海郡王显德元年进封南平王世宗征淮保融遣指挥使魏璘率兵三千出夏口为应又遣客将刘扶奉笈南唐劝其内附李景称臣世宗得保融所与笈大喜赐绢百匹荆南自后唐以来数岁一贡京师及世宗时无岁不贡保融以器械金帛皆土地常产不足以効诚节乃遣其弟保绅来朝世宗益嘉之初季兴之镇有牙兵五千衣食皆仰给于梁至明宗时岁给盐万三千石后不复给及是命泰州复给之保融性迂缓无材能事无大小皆委其弟保勳其从叔从义谋为乱为其徒高知训所告徙松滋杀之宋兴保融惧一岁三入贡建隆元年卒谥曰贞懿

△高保勳

保勳字省躬从海第十子晋天福初领汉州刺史保融立令判内外诸军事周显德初从保融请累加检校太尉充行军司马领宁江军节度保融卒即拜荆南节度使建隆二年遣其弟保寅入贡归劝保勳奉土归朝不听保勳淫佚无度又好营造台榭穷极工巧军民咸怨政事一治及寝疾谓其将梁廷嗣曰我疾终不起兄弟孰可付后事者廷嗣曰公不念贞懿王乎先生寝疾以军府付公今先王子继冲长矣保勳即以继冲判内外兵马十一月保勳卒

△高继冲

继冲字成和【宋史及东都事略作字赞平】保融长子保勳卒拜节度使时湖

南张文表作乱周保权求救于朝廷建隆四年宋太祖命慕容延钊等讨之假道荆南约以兵过城外继冲大将李景威请严兵待之判官孙光宪叱之曰汝峡江一民尔安识成败且中国自周世宗时已有混一天下之志今真主受命王师岂易当也因劝继冲去斥堠封府库以待景威出而叹曰吾言不用大事去矣何用生为因扼吭而死廷钊军至继冲出逆于郊而前锋遽入城继冲亟归见旌旗甲马布列衢巷大惧即诣廷钊纳裨印太祖优诏仍命继冲为节度使【按宋史继冲归朝后始授武宁军节度使当奉表纳土时太祖下诏安抚止云授继冲马步都指挥使而不言复为节度与欧史异三楚新录又云继冲出迎王师且乞入朝太祖遂遣使就除继冲徐州节度使便道赴任考徐州属武宁军而纲目载慕容延钊入荆南继冲奉表纳土授荆南节度使如故至以为武宁军节度使则在干德元年十月所载与欧史并同新录未足为据】干德元年将郊祀继冲表求入觐可之九月率其将吏宗族五百余人朝京师拜武宁军节度使光宪等皆拜官有差保勳开宝六年卒【徐无党曰季兴兴灭年世甚明诸书皆同盖自梁开平元年镇荆南至宋干德元年国除凡五十七年按宋史荆南世家此下有保寅附传保寅劝保勳归朝事已附见载记余无足录今从删】

△附

孙光宪

梁延嗣

孙光宪

孙光宪字孟文陵州贵平人【北梦琐言作富春人】世业农光宪少好学游荆渚高从诲署为从事历保融及继冲三世皆在幕府累官检校秘书监兼御史大夫慕容延钊等假道荆南继冲开门纳延钊光宪劝献三州地宋太祖嘉之授黄州刺史在郡有治声干德中宰相有荐光宪为学士者未及召卒光宪博通经史尤勤学聚书数千卷或自钞写孜孜雠校老而不废好着撰自号葆光子所撰续通历纪事颇失实太平兴国初诏毁之

梁延嗣

梁延嗣京兆长安人【三楚新录作复州景陵人】少事高季兴颇见委任表授检校司空领绵州刺史充衙内马步军都指挥使【按三楚新录及十国春秋载延嗣唐同光中守复州监利季兴朝唐庄宗欲阴图之既疾趣归遂以兵攻监利星沙二县延嗣败为季兴所获从海立擢为太校授归州刺史进复州团练使乃掌亲军此作少事季兴颇见委任则与二

书所载不合未详孰是】 历事四世人称其忠慕继冲之纳土也延嗣亦尝劝之授复州防御使后因郊礼自复州入朝太祖慰抚之曰使高氏不失富贵尔之力也改濠州有善政开宝九年卒

钦定续通志卷六百二

●钦定续通志卷六百三 载记十

载记 【十】

东汉

○东汉

刘旻 钧 继恩 继元 【附】 卫融 郭无为

刘旻

刘钧

刘继恩

刘继元

附

△刘旻

刘旻汉高祖母弟初名崇美须髯少无赖嗜酒好博尝黥为卒高祖事晋为河东节度使以旻为都指挥使及即位以为太原尹北京留守同平章事隐帝时累加中书令周太祖为枢密使讨三叛立大功而与旻素有隙旻不自安与判官郑珙谋罢上供征赋收豪杰籍丁民益兵以自固三年隐帝遇弑旻乃谋举色已而周太祖遣宰相冯道迎旻子贇于徐州人皆知太祖之非实意旻独喜曰吾儿为帝矣何患乃罢兵遣人至京师太祖少贱黥其颈上为飞雀世谓之郭雀儿太祖见旻使者具道所以立贇之意因自指其颈示之曰自古岂有雕青天子幸公无以我为疑旻益信之太原少尹李骧度太祖必不为刘氏立后劝旻以兵下太行控孟津以俟变旻怒曰骧欲离闲我父子乎命牵出斩之并杀其妻以其事白汉以明无他已而周太祖果代汉降封贇湘阴公旻遣牙将李■〈巩上言下〉奉书求贇归太原而贇已死旻恸哭为骧立祠岁时祠之乃以周广顺元年正月即皇帝位于太原仍用干佑年号以子承钧为太原尹判官郑珙赵华为宰相都押衙陈光裕为宣徽使遣通事舍人李■〈巩上言下〉闲行使于契丹契丹永康王鄂约与旻约为父子之国旻乃遣宰相郑珙致书鄂约称侄皇帝以叔父事之鄂约遣政事令燕王舒翰枢密使高勋【按宋史作契丹主遣政事令燕王耶律舒翰上枢密使高勋辽史亦作枢密使高勋欧史于燕王上脱政事令作政事令高勋考辽史勋传勋未尝为政事令也显系讹误今改正】册尊旻为大汉神武

皇帝旻妻为皇后且以自爱黄骠九龙十二稻玉带报聘未几鄂约亦为舒翰所弑舒鲁代立旻遣枢密直学士王得中聘于舒鲁求兵以攻周舒鲁遣萧裕矩率兵五万助旻出阴地攻晋州为王峻所败明年又攻府州为折德宸所败德宸因取岢岚军周太祖崩旻遣使乞兵于契丹契丹遣杨衮【按辽史作政事令耶律敌契丹国志作武定军节度使杨衮】将万骑及奚诸部兵五六万人号称十万以助旻旻以张元徽为先锋自将骑兵三万攻潞州潞州李筠遣穆令钧以步骑三千拒元征于太平驿元徽击败之遂围潞州显德元年世宗亲征与旻战于高平列为三陈旻命张元徽军东偏杨衮军西偏自居中衮望周师谓旻曰勍敌也未可轻动旻奋髯曰时不可失无妄言衮怒而去旻令东偏先进王得中叩马谏曰南风甚急非北军利也宜少待之旻怒即麾元徽元徽击周右军兵始交周将樊爱能何徽退走其骑军乱步卒数千叛降元徽世宗大骇躬督战士士皆奋命争先而风势愈盛旻自麾赤帜收军军不可遏旻遂败日暮旻收余兵万人阻涧而止周后军刘词继至乘胜追击旻又大败輜重尽丧旻独乘契丹黄骠自雕窠岭闲道驰去夜失道误趋平阳得佗道以归张元徽战歿杨衮怒旻按兵西偏不战故独全军而返世宗进攻太原遗符彦卿史彦超北控忻口以断契丹援路太原城方四十里周师去城三百步围之匝自四月至六月攻之不克而彦卿等为契丹所败彦超战歿世宗遽班师初周师之围城也旻遣王得中送杨衮归因乞援于契丹契丹发数万骑助旻遣得中先还至代州代州将桑珪杀防御使郑处谦以城降周并送得中于周世宗召问得中契丹助兵多少得中言送衮归无所求也世宗信之已而契丹败符彦卿于忻口得中遂见杀旻自败于高平已而被围以忧得疾明年卒庙号世祖【按十国春秋不载旻谥止云葬神武皇帝于交城山北上庙号曰世祖今据补】

△刘钧

钧旻次子初名承钧既立改名钧旻卒钧遣人奉表契丹自称男舒鲁答诏呼为儿许其嗣位初旻常谓张元徽等曰吾以高祖之业赆之冤义不为郭父屈期与公等勉力以复家国讎至于称帝一方岂获已也顾我是何天子尔亦是何节度故不改元不立宗庙四时之祭用家人礼钧既立始赦境内改干佑十年曰天会元年立七庙于显圣宫以卫融为相段常为枢密使蔚进掌亲军子继恩为太原尹潜约江南西川为外援结契丹侵上党无所不得而还宋太祖即位昭义节度使李筠拒命遣其将刘继冲判官孙孚奉表称臣执监军周光逊李廷玉送于太原乞

兵为援钩即率兵自将出团柏谷仆射赵华曰李筠举事轻易陛下不图成败空国兴师臣实忧之钩至太平驿封筠陇西郡王筠见钩兵卫宾弱悔臣之因自陈受周氏恩不忍背德钩与周世仇也闻筠言亦不悦遣宣徽使卢赞监其军筠心益不平与赞多不协乃遣宰相卫融为和解又遣河阳枢密使范守图援之 【按宋史钩至太平驿与筠会遣宣徽使卢赞将骑数千随筠人寇又遣河阳节度使范守图援之而不言卫融和解之事欧史与宋史李筠传所载略同而世家详略互异之据两史参辑】 已而筠败死卫融被执宋太祖释之命融致书于钩求周光逊等约亦归融太原钩不报钩谓赵华曰不听公言几至于败然失卫融卢赞吾以为恨由此益重儒者钩自筠败后狼狈而归而宋师亦无岁不至钩数败衄建隆四年邢州王全赟攻下乐平诏建为平晋军干德二年昭义李继勋等攻下辽州其降兵率以效顺怀恩为名赐以钱帛由是降附者益众钩惧以赵文度为相招抱腹山人郭无为参议国政 【按宋史建隆元年太祖亲讨李筠前军石守信等杀钩兵数千自是以后李继勋等连岁加兵而欧史全削岂因宋太祖有笑谓谍者云云故不录欤今仍据宋史补辑】 无为为内枢密使段常所识荐其材遂以为相五年宿卫殿直行首王隐刘绍赵鸾等谋作乱事觉被诛词连段常乃罢常枢密为汾州刺史缢杀之自是世凡举事必请命契丹而钩多疏略契丹遣使责钩改元援李筠杀段常不以告钩惶恐谢罪使者至契丹辄见留钩奉之愈谨而契丹待钩益薄钩自是无复南侵意地狭产薄以岁输契丹国用日削乃拜五台山僧继禹为鸿胪卿继禹故燕王刘守光彘子为人多智善谋财利五台当契丹界上常得其马以献号添都马岁率数百匹又于柏谷置银冶募民凿山取矿烹银以输刘氏仰以足用即其治建宝兴军继禹累官太师中书令太祖尝因界上谍者谓钩曰君与周为世讎宜其不屈今我与尔无所闲何为困此一方人也若有志中国宜下太行以决胜负钩遣谍者复命曰河东土地兵甲不足当中国之十一然钩家世非叛者区区守此盖惧汉氏之不血食也太祖哀其言笑谓谍者为曰我语钩开尔一生路故终其世不加兵钩立十三年病卒谥曰孝和皇帝庙号睿宗 【按钩谥号庙号吹史俱不载今据十国春秋补】

△刘继恩

继恩本姓薛氏父钊娶旻女钊初为军卒汉高祖典禁兵以旻壻除籍置门下钊无材能高祖不见用其妻常居中钊罕得见因怏怏乘醉拔佩刀刺之不死钊即自裁继恩时尚幼旻女后适何氏生子继元未几何死旻女亦卒旻乃令钩俱养为子遂冒姓刘弑立以继恩为太原尹

钩尝谓郭无为曰继恩纯孝然非济世才恐不能了我家事无为不对钩病革召无为执手以后事付之钩卒继恩告哀于契丹而后立服缞裳
视事宋太祖诏李继勋等率师至潞州败继恩军于洞涡河继恩自行丧寝处独居勤政
阁钩故时亲信无得从者继恩置酒会诸大臣宗子令
罢卧阁中供奉官侯霸荣思得继恩首献宋以邀宠遂率十余人挺刃入阁闭户弑之郭
无为遣人梯屋入杀霸荣并其党无为乃迎继元立之

△刘继元

继元为人残忍斃子十余人皆无可称者当继元时有鎬锇锇于继元为诸父皆
杀之独铄以佯愚获免钩妻郭氏继元兄弟自少母之
继元妻段氏尝以小过为郭氏所责既而以宅疾卒继元疑为郭氏所杀及立遣嬖者范
超图弑郭氏郭氏方缞服哭钩柩前超执而缢杀之刘
氏子孙遂无遗类继元立改元曰广运 【按十国春秋继元于天会十二年袭位乃称天
会不改元至天会十七年十二月将改元遣使禀命
契丹明年改元广运宋太祖亲征太原系开宝二年事即东汉称天会十三年也欧史及
宋史乃云继元立即改元广运今仍原文而识之】 宋
太祖亲征太原继元闭城拒守太祖命壅汾水以灌城城中有积草飘出塞之得无害太
祖以诏书招继元出降郭无为捧诏色动而并入及继
元左右皆欲坚守时继元恃契丹为援守陴者扬言契丹兵旦夕且至会何继筠败契丹
于阳曲北太祖命以所获首级铠甲示之城中由是丧
气和岚州赵文度遂出降南城为汾水陷水注城中宦者卫德贵言郭无为有献地之谋
踪迹屡露继元遂杀无为俄而城兵自西长连城出将
焚其攻具反为宋师所败是夜壁外忽传呼继元降太祖令卫士擐甲将开壁门八作使
赵璘曰受降如受敌讐可中夜轻出太祖使伺之果谍
者也时宋师顿兵甘草地会暑雨军士多疾太常博士李光赞上言请班师太祖览奏甚
喜命宰相赵普抚谕诸将而禁军校赵翰等愿乘城急
击以尽死力太祖不许遂引兵还开宝九年太祖又遣尝进潘美等分路进师继元屡战
不利会太祖崩太宗即位召诸将还至太平兴国四年
太宗亲征先遣潘美等率诸将分兵围汾沁岚诸州以骁将郭进扼石岭关断契丹援路
契丹果至进击败之继元遣健步闲道赍蜡丸帛书求
救于契丹进又得之徇于城下继元外援不至饜道又绝潘美等兵数十万长围四合自
春徂夏矢石如雨昼夜不息城中大惧太宗奄至亲督
卫士急攻城无完堞乃下诏谕继元降诏至城下守陴者不纳太宗夜至长连城亲督诸
将攻之矢集城上如猬毛继元帐下亲信相次出降城
中危急太宗又自草诏谕之并人犹欲坚守其枢密副使马峰老疾居于家舁入见继元

流涕以兴亡谕之乃遣其客省使李勋奉表请降明日
继元率官属缟衣纱帽待罪诏释之援特进检校太师右卫上将军封彭城郡公其相李
恠等授官有差命中使康仁宝护其亲属赴京赐甲第
一区雍熙三年建房州为保康军以继元为节度淳化二年卒追封彭城郡王 【徐无党
曰旻年世兴灭诸书皆同自周广顺元年建号至宋
太平兴国四年国除凡二十九年】

△附

卫融

郭无为

卫融

卫融字明远青州博兴人晋天福初举进士辟忠武军掌书记汉初为太原观察支
使刘旻称帝授中书侍郎平章事宋太祖即位李筠以
上党降刘钧继又与监军卢赞不协钧遣融和解之会筠败融被擒太祖责之曰汝何故
劝刘钧助李筠反耶融曰犬吠非其主臣四十口受刘
氏丰衣美食不忍负之陛下纵不杀臣臣亦不为陛下用终掌闲道走河东尔太祖怒令
左右以铁挝击其首流血被面曳出将斩之融大呼曰
大丈夫死或重于泰山或轻于鸿毛今之死正得其所尔太祖闻之曰此忠臣也释之命
以良药傅其创既而欲放融归令融先为书谕钧钧久
无报乃授融太府卿干德初改司农卿出知陈舒黄三州开宝六年卒 【按宋史东汉世
家此下有赵文度李恠马峰三人附传文度事已附
见载记余无事迹足录今俱从删】

郭无为

郭无为青州千乘人 【十国春秋作棣州人】 少博学有辞辩为道士隐武当山
汉干佑中周太祖征河中无为谒于军门太祖询以当
世之务大奇之将留馆门下左右曰无为纵棋家流今公握重兵不宜亲之无为遂拂衣
去隐太原抱腹山刘钧既败于泽州日夕惧宋师至求
有智谋者与计事段常荐之钧召与语大悦与赵文度同秉政意不协钧出文度知汾州
遂以无为为左仆射平章事兼枢密使机务一以委之
钧尝与无为语及后事谓继恩不才无为亦以为然后继恩知其事欲诛之而未有以发
月余侯霸武弑继恩无为使人杀霸荣人疑无为初授
意于霸荣后杀之以灭口也继元立宋太祖讨之仍以诏书招降许继元以青州节度无
为邢州节度无为得诏色动一日继元宴羣臣契丹使
亦在无为恸哭于庭曰今日以空城抗大军计将安出引佩刀欲自刺继元遽降阶持其
手引之升坐盖无为欲以动众心也及太祖亲征长围

既合无为请将兵出击欲自拔以降值天阴晦而止闽人卫德贵告其事继元乃杀以徇

钦定续通志卷六百三

●钦定续通志卷六百四 载记十一

载记 【十一】

西夏 【上】

○西夏上

李彝兴 克睿 继筠 继捧 继迁 德明 元昊 谅祚

李彝兴

李克睿

李继筠

李继捧

李继迁

李德明

李元昊

李谅祚

△李彝兴

李彝兴夏州人本魏拓跋氏后唐贞观初有拓跋赤辞者归唐太宗赐姓李置静边等州以处之其后析居夏州者号平夏部唐末拓跋思

敬【按拓跋思敬新旧唐书俱作思恭系宋人避翼祖讳宋史仍其旧今改正】镇夏州统银夏绥宥静五州地诗黄巢有功复赐姓李思敬

卒弟思谏代为定难军节度使思谏卒思敬孙彝昌嗣梁开平三年彝昌为其将高宗益所杀将士立其族子蕃部指挥仁福梁太祖即拜仁福

检校司空定难军节度使终梁之世奉正朔而已累兼中书令封朔方王卒子彝超自立为留后自仁福时边将多言其北通契丹恐为边患唐

明宗乃以彝超为延州刺史彰武军节度使而徙彰武安从进代之死彝超不受代遣邠州药彦稠以兵五万送从进之镇彝超果不受代从进

与彦稠以兵围之不克彝超外招党项掠从进等粮道自陕以西运刍粟人不堪命明宗遂释不攻以彝超为定难军节度使【按梁太祖拜

仁福检校司空以下云云本五代史李仁福传仁福为夏国之先与其子彝超事迹应列入载记】彝兴彝超弟也初为行军司马清泰二年彝

超卒遂以为节度使周显德初累封西平王宋初加太尉北汉刘钧结代北诸部寇麟州彝兴遣部将李彝玉会诸镇兵御之钧众引去建隆初

献马三百匹太祖大喜遣使以玉带赐之干德五年卒赠太师追封夏王

△李克睿

克睿彝兴子彝兴卒自权知州事授检校太保定难军节度使开宝九年率兵破北汉吴堡砦俘砦主侯遇以献累加检校太尉太平兴国三年卒赠侍中

△李继筠

继筠克睿子初为衙内都指挥使检校工部尚书克睿卒自权知州事授检校司徒定难军节度观察留后太宗征北汉继筠遣银州刺史李光远绥州刺史李光宪率蕃汉兵渡河略太原境以张学势太平兴国五年卒

△李继捧

继捧继筠弟太平兴国七年率族入朝自其先世未尝亲覲继捧至太宗嘉之赐赉甚厚继捧陈其诸父昆弟多相怨愿留京师乃遣使夏州护继捧缙麻以上亲赴阙授继捧彰德军节度使并官其昆弟夏州蕃落指挥使克信等十二人有差初继捧之入也其弟继迁出奔乃是数为边患有言继迁悉知朝廷事盖继捧泄之乃出为崇信军节度使端拱初改镇感德军屡发兵讨继迁不克用宰相赵普计欲委继捧边事令图之因召赴阙赐姓赵氏更名保忠授夏州刺史充定难军节度使至镇数月上言继迁悔过归款乃授继迁官然实无降心也寻加保忠同平章事淳化初与继迁战于安庆泽继迁中流矢遁去保忠乞师御继迁朝廷遣商州团练使翟守素率兵援之五年继迁攻灵州诏遣侍卫马军都指挥使李继隆来讨保忠先挈其母与妻子避野外乃上言与继迁解怨献马五十匹乞罢兵太常立遣中使督继隆进军及兵压境保忠反为继迁所图欲并其众缚牙校赵光祚袭其营帐保忠方寝闻难作单骑走还城为大校赵光嗣闭别室旦开门迎继隆乃执保忠送阙下太宗诘责数四释之责授右千牛卫上将军封宥罪侯赐第京师咸平中迁金吾卫上将军判岳州寻移复州景德元年卒赠威塞军节度使

△李继迁

继迁继捧族弟开宝七年授定难军管内都知蕃落使继捧归宋继迁时年二十留居银州及使至召缙麻亲赴阙乃诈言乳母死出葬遂与其党数十人奔入地斤泽太平兴国八年宋知夏州尹宪与都巡检曹光实侦知夜袭破之继迁与其弟遁免获其母与妻继迁复连娶豪族渐以强大而西人以李氏世着恩德多归之继迁因语其豪右曰李氏世有西土今一旦绝之尔等不忘李氏能从我兴复乎众曰诺雍熙二年遂与弟继冲等起夏州诱杀曹光实于葭芦川遂袭银州据之复破会州叛附于辽三年辽以继迁为定难军节度使都督夏州诸军事复姓李以义成公主嫁之寻册为夏国王 【按辽圣宗本纪于统和四年十二月书以王子帐耶

律襄之女封义成公主下嫁继迁辽统和四年乃宋
雍熙三年与宋史正合而纪于七年三月又书以义成公主下嫁继迁或系许婚在四年
下嫁则在七年也】 知夏州安守中以三万众与继迁
战于王亭镇败绩端拱元年继捧节制夏台言继迁悔过归款即授洛苑使银州刺史淳
化初复与继捧战于安庆泽不利转攻夏州继捧乞师
及翟守素援兵至继迁乃归款授银州观察使赐名保吉子德明授管内蕃落使行军司
马淳化四年转运副使郑文宝议禁盐池用困继迁数
月边人四十二族万余骑寇环州屠小康堡太宗乃弛其禁因抚慰之五年继迁徙绥州
民于平夏部将高文岷等因众不乐反攻败之继迁复
围堡砦焚掠居民遂攻灵州诏遣李继隆等进讨继迁乃献马以谢至道初又遣左都押
衙张浦献橐駝及良马太宗遣合门副使冯讷等拜继
迁鄜州节度使不受继迁以千骑攻清远军守臣张延击退之二年命洛苑使白守荣等
护送刍粟四十万于灵州继迁邀击于浦洛河尽获之
太宗命李继隆为环庆等州都部署会四方馆使曹璨自河西至言继迁众万余围灵武
城中上表告急为继迁所得遂顿兵不去太宗命继隆
丁罕范廷召王超张守恩等五路进讨直抵平夏继隆以环州路迂乃自青冈峡遶灵武
径趋平夏与丁罕合行十余日无所见引还张守恩遇
之不战而遁王超范廷召接战于乌白池不利继迁复令军主史不■〈白匕〉驻屯橐
駝口以阻宋人归路 【按宋太宗本纪作延州行营
言破李继迁于乌白池获未幕军主吃啰指挥使等二十七人继迁遁与本传所载异又
太宗命继隆等五路进讨系至道二年事本传作三年
亦误】 三年辽封继迁为西平王咸平初继迁复表归顺真宗乃授夏州刺史定难军节
度使继迁遣弟继瑗来谢授继瑗亳州防御使继迁子
德明定难军节度行军司马未几复钞边宋麟府副都署曹璨率兵邀继迁辎重于柳拔
川杀获甚众继迁攻破定州怀远县及保静永州清远
军监军段义叛城遂陷五年继迁大集蕃部攻陷灵州以为西平府遂都灵州朝廷诏遣
张崇贵王涉议和割河西银夏等五州与之继迁复以
二万骑围麟州诏金明巡检李继周击之围未解麟州部署请济师真宗阅地图曰麟州
依险三面孤绝戮力可守但城中乏水可忧耳乃遣兵
走援继迁果据水砦薄城已五日知州卫居宝出奇兵突战继迁乃引去遂攻西蕃取西
凉府都首领巴喇济伪降继迁受之不疑巴喇济遽集
六谷蕃部及哲伯族合击之继迁大败中流矢景德元年卒德明立追上尊号曰应运法
天神智仁圣至道广德光孝皇帝庙号武宗元昊追谥
曰神武庙号太祖

△李德明

德明【辽史作德昭】继迁子小字额贡母曰顺成懿孝皇后雅哩克氏既袭位朝廷因降诏抚之德明屡表归顺复奉誓表请藏盟府真宗授为定难军节度使封西平王给奉如内地因责子弟入质德明谓非先世故事不遣乃献马及橐駝以谢嗣是屡遣使贡献中大祥符初境内旱诏榷场勿禁西人市粮以振其乏及东封又遣使入贡加兼中书令辽亦遣使册为大夏国王三年境内饥上表求粟百万宰相王旦请敕有司具粟百万于京师诏其来取德明得诏曰朝廷有人遂止九年因表边臣违约招纳逃亡朝廷诏鄜延泾原环庆麟府等路约束边部毋相攻劫五年德明追尊继迁为皇帝天禧四年辽圣宗亲将兵五十万以狩为言来攻凉州德明逆战败之五年辽复遣使册为尚书令大夏国王德明攻麟州柔远砦宋巡检杨承吉与战不利命曹玮为环庆秦州缘边巡检安抚使御备之德明城怀远镇为兴州以居仁宗即位加尚书令天圣六年德明遣子元昊攻甘州拔之八年瓜州王以千骑降于夏九年十月德明卒追谥曰光圣皇帝庙号太宗

△李元昊

曩霄本名元昊德明子小字乌哩克母曰惠慈敦爱皇后卫慕氏性雄毅多大略通蕃汉文字辽以兴平公主嫁之以为驸马都尉弱冠独引兵袭破回鹘伊埒格可汗王夺甘州遂立为皇太子数谏其父母臣宋父辄戒之曰吾人用兵疲矣吾族三十年衣锦绮此宋恩也不可负元昊曰英雄之生当王霸耳何锦绮为德明卒宋授为定难军节度使封西平王辽亦遣使册为夏国王既袭封明号令以兵法勒诸部始衣白窄衫毡冠红里冠顶后垂红结绶自号威明乌珠凡六日九日则见官属仿中国置文武班立蕃汉学自中书令宰相枢密使以下皆分命蕃汉人为之以衣冠采色别士庶贵贱每举兵必率部长与猎有获则下马环坐饮割鲜而食各问所见择取其长初宋改元明道元昊避父讳称显道于国中景佑元年攻环庆路杀掠居人是岁元昊改元开运或言石晋败亡之号乃改元广运【按前史僭伪诸国传中俱依年次书某年改元宋史夏国传自元昊称帝后于每传末并书改某某若干年传中则或书或不书与史例未符今据锺渊暎建元考合之宋辽金三史所载年月事实依其年次悉为补正而识其缘起于此】母卫慕氏族人善喜谋杀元昊事觉元昊酖其母杀之沈善喜之族于河【按元昊酖母事宋辽二史俱失载今据续通鉴增辑】庆州柔远砦蕃部巡检威通攻破后桥诸堡元昊称兵执仇缘边都巡检杨遵柔远砦监择卢训与战败

绩环庆路都监齐宗矩等援之次节义峰伏发执宗矩既而放還元昊寻遣令公苏木诺尔将兵攻置勒斯賚败死略尽苏木诺尔被执元昊自率众攻猫牛城大纵杀戮又攻青唐安二宗哥带星岭诸城置勒斯賚部将安子罗以兵绝归路元昊昼夜角战三百余日子罗败遂取瓜沙肃三州元昊既还欲南侵恐置勒斯賚制其后复举兵攻兰州诸羌侵至马衔山筑城凡川元昊既悉有夏银绥宥静灵盐会胜甘凉瓜沙肃而洪定威龙皆即堡镇号州仍居兴州阻河依贺兰山为固始大建官以威明守全张陟张绛杨廓徐敏宗张文显辈主谋议以锤鼎臣典文书以青布克青桑图鄂特戡儒克丹多丹马多木达玛勒寔惟吉主兵马雅哩克仁荣主蕃学置十二监军司委豪右分统其众以备边及镇守总五十余万又选豪族善弓马五千人选直号六班直铁骑三千分十部发兵以银牌召部长面受约束设十六司于兴州以总庶务元昊自制蕃书命雅哩克仁荣演绎之教国人纪事用蕃书而译孝经尔雅四言杂字为蕃语复改元大庆宋宝元元年【按宋史本传作宝庆元年考宝庆乃理宗年号仁宗景佑五年改天宝元本纪于宝元元年十二月书赵元昊反二年正月书元昊表请称帝改元与此相合则宝庆显系宝元之讹今改正】表遣使诣五台山供佛以窥河东道路与诸豪歃血约先攻鄜延欲自靖德塞门砦赤城路三道并入遂筑坛受册即皇帝位改元天授礼法延祚国号大夏明年遣使表闻市廷诏削元昊官爵绝互市元昊又遣贺永年賚嫚书纳旌节及所授敕告置神明匣留古纳克族而去宋环庆路钤辖高继隆知庆州张崇俊攻后桥而柔远砦主武英入自北门拔之未几元昊攻金明砦执都监李士彬父子破安远塞门永平诸砦围延州设伏三川口执刘平石元孙傅偃刘发石逊等又攻镇戎军败刘继宗李纬兵五千宋环庆部署任福入白豹城破四十一族焚积聚而還元昊寻攻渭州逼怀远城韩琦行边至高平尽发镇戎兵及募勇士得万人命行营总管任福等并击之【按宋史韩琦传元昊寇镇戎诏鄜延泾原同日出师据此则琦止发镇戎兵未尝及鄜延诸路也考名臣琬琰集亦云琦欲发鄜延泾原之师廷议持之事遂中止可订琦传同日出师之误】元昊自将精兵十万战于好水川宋师大败将校士卒死者万三百人元昊转攻河东及麟府不能下乃引兵攻丰州城孤无援遂据之又破宁远砦屯要害绝麟府饷道为宋管句麟府军马事张亢破于柏子又破于兔毛川元昊虽数胜然死亡创痍者相半人困于点集财力不给国中多怨之乃引兵归时宋庆历元年也塞门砦主高延德因乞和宋知延州范仲淹为书陈祸福喻之元昊使其亲信雅吐克旺

荣复书语犹嫚二年复大举攻定州宋师大败葛怀敏死之 【据仁宗本纪怀敏之死及元昊焚掠渭州在庆历二年九月宋史本传误作三年今据本纪改正】 乘胜直抵渭州大焚掠而去朝廷诏知延州庞籍招纳元昊遣使以其臣荣旺其弟旺凌威明固鄂特裕正三人书议和然犹不肯削僭号籍以其言未服令自请朝廷诏籍复书许之明年遣六宅使伊州刺史贺从勛等至延州上书更名曩霄称男邦尼鼎国乌珠上书父大宋皇帝而不解臣乌珠之称如可汗号朝议以为侮玩朝廷不许元昊乃上誓表言前日所掠将校民户各不复还自此有边人逃亡亦毋得袭逐臣近以本国城砦进纳朝廷其栲栳镰刀南安承平故地及他边境蕃汉所居乞画地为界于内听筑城堡凡岁赐银绮绢茶二十五万五千乞如常数朝廷皆如约赐元昊夏国主印约称臣奉正朔改所赐敕书为诏而不名许自置官属置榷场于保安军及高平砦第不通青盐然宋每遣使往馆于宥州终不复至兴灵而元昊帝其国中自若也是岁党项等部及夹山部落岱尔族八百户皆叛辽归元昊兴宗责還元昊不遣遂亲将骑兵十万来伐分三路济河长驱元昊与辽将萧惠战于贺兰山北败之见辽兵日益至乃请和退师十里元昊亲率叛党以待罪惠不从师凡三退将百余里每退必赍其地辽马无所食因许和元昊乃迁延以老其师度其士饥马病因急攻之兴宗大败从数骑走免元昊入枢密使萧孝友砦擒驸马萧呼都克以归己而遣使归其先所俘获辽亦遣所留夏使还之 【按辽史西夏外纪重熙十三年止云党项等部叛入西夏诏征诸道兵讨之元昊亲率党项三部来降而兴宗本纪则云十三年兴宗亲征元昊亲率叛党来降羣臣皆以大军既集宜加讨伐乃督数路兵掩袭杀数千人驸马萧呼都克为夏人所执俱不言兴宗败还事当系讳之也】 元昊五月五日生国人以其日相庆贺又以四孟朔为节元昊以庆历八年正月卒谥曰武烈皇帝庙号景宗

△李谅祚

谅祚元昊长子小字宁令格母曰宣穆惠文皇后密藏氏袭位时方期岁朝廷遣使册为夏国王改元延嗣宁国辽兴宗亲将兵来伐既渡河谅祚兵遁兴宗乃还韩国王萧惠率师尚进谅祚袭败之未几复来伐获谅祚母于贺兰以归时宋皇佑元年也明年谅祚改元天佑垂圣乃遣使上表于辽乞依旧称臣又乞代党项权进马駝牛羊等物又求唐隆镇仍乞罢所建城邑不许复改元福圣承道谅祚幼养于母族鄂特彭鄂特彭因专国政初麟州西城枕睥睨曰红楼下瞰楚页河其外距夏境尚七十里而田腴利厚多入鄂特彭岁东侵不已至耕获时辄屯兵河

西宋经略司遣使令还所侵田鄂特彭无归意嘉佑二年谅祚改元禪都鄂特彭遂团兵宿境上至数万人宋守将斂兵弗战知灵州武戡筑堡于河西以为保障役兴戡率将吏来按视与境上兵遇于沙尔硕克朗戡等进至呼喇堆两军相去数十步遂分兵四面合击宋师大溃宋安抚司遣李思道等来议疆事鄂特彭不听久之太原府代州兵马钤辖苏安静与垒宁伊朗罗垒等合议乃筑堠九更新边禁要以违约则罢和市疆事自此始定谅祚忌鄂特彭专或告其将叛乃杀鄂特彭夷其族已而请去蕃礼从汉仪嘉佑六年上书自言慕中国衣冠愿以此迎使者朝廷许之明年改西寿监军司为保泰军石州监军司为静塞军韦州监军司为祥佑军左厢监军司为神勇军遣使献方物称宣徽南院使朝廷诏谕非陪臣所宜称约遵誓诏谅祚复改元拱化治平初求复榷场不许寻出兵秦凤泾原抄熟户扰边塞杀掠人畜以万计复大举攻大顺城分兵围柔远砦为环庆经略使蔡挺及蕃官赵明等所败种鄂取绥州因发兵夜掩威明山帐胁降之谅祚乃诈为会议诱知保安军杨定都巡检侍其臻等杀之朝廷命韩琦知永兴军经略西方谅祚乃辄送杀定者六宅使李崇贵右侍禁韩道善及定子仲通以献谅祚以治平四年十二月卒谥曰昭英皇帝庙号毅宗

钦定续通志卷六百四

●钦定续通志卷六百五 载记十二

载记 【十二】

西夏 【下】

○西夏下

秉常 干顺 仁孝 纯佑 安全 遵頊 德旺 睨

李秉常

李干顺

李仁孝

李纯佑

李安全

李遵頊

李德旺

李睨

△李秉常

秉常谅祚长子母曰恭肃章宪皇后梁氏袭位时年七岁梁氏摄政改元干道辽为夏国王熙宁二年朝廷遣使用为夏国主秉常入攻

秦州陷刘沟堡杀守将范愿既而进誓表乞班誓诏及请以安远塞门二砦易绥州朝廷
赐誓诏约绥州待得二砦乃还秉常受册而二砦不归
朝廷遂城绥州秉常寻表请去汉仪复用蕃礼从之明年改元天赐礼盛国庆师众号十
万筑诺果堡宋知庆州李复圭合蕃汉兵纔三千偪遣
偏将李信刘甫种咏等出战宋师大败郭贵复出兵邛州堡夜入栏浪市掠老幼数百又
袭金汤无所得惟杀老幼一二百人以功告捷秉常遂
大举入环庆攻大顺城柔远砦荔原堡淮安镇东谷西谷二砦业乐镇兵多者号二十万
少者不下一二万屯榆林距庆州四十里游骑至城下
九日乃退宋钤辖郭庆高敏魏庆宗秦勃等俱战死种諤谋取横山领兵先城罗古进筑
永乐川桑布镇二砦分遣都监赵璞燕达筑抚宁故城
及分荒堆三泉口浑川开光岭葭芦川四砦与河东路修筑各相去四十余里秉常遂遣
将攻顺宁砦复围抚宁悉陷新筑诸堡将士没者千余
人朝廷遂弃罗古城秉常寻遣使入贡且以二砦易绥州乞如旧约不许复改元大安有
李清者本秦人说秉常以河南地归宋秉常母梁氏知
之遂诛清而夺秉常政宋鄜延总管种諤乃疏秉常遇弑国内乱宜兴师问罪朝廷诏熙
河经制李宪与种諤王中正高遵裕刘昌祚五路进师
又诏吐蕃首领董戩集兵会伐宪总七军及董戩兵三万至新市城 【通鉴作西市新城】
与战为宪所败又为昌祚败于磨脐隘又为諤败
于无定川諤遂克米脂进攻夏州兵乏食会大雪遂溃入塞者纔三万人 【按宋史沈括
传种諤师次五原会大雪粮饷不继殿直刘归仁率
众南奔士卒二万人皆溃入塞】 中正至宥州奈王井粮尽亦引还遵裕王清远军攻灵
州决黄河灌遵裕营复抄绝饷道遵裕兵溃追败之宪
营于天都山下焚南牟内殿并馆库袭败统军实都喇卜丹擒百人未至灵州而还初秉
常闻宋大举母梁氏问策于廷诸将少者尽请战一老
将独曰不须拒之但坚壁清野纵其深入聚劲兵于灵夏而遣轻骑抄绝馈运兵无食可
不战困也梁氏从之宋师卒无功时宋元丰四年也明
年沈括又请城古乌延城以包横山朝廷遣侍中徐禧内侍押班李舜举来议禧遂于银
夏宥之界筑永乐城秉常帅师号三十万与禧战大败
之遂围永乐城中乏水凿井不得泉渴死者大半括等援兵及馈运皆绝城遂陷将校死
者数百人士卒役夫二十余万乃耀兵米脂城下而还
宋自灵州永乐之役官军熟羌义保死者六十万人钱粟银绢以万数者不可胜计而秉
常国中亦困弊矣未几复大举围兰州为宋钤辖王文
郁所败又攻德顺军定西城静边清远葭芦等城砦亦多为宋诸路守将所败秉常复改
元天安礼定时哲宗初即位又遣阿尔班求所侵兰州

米脂等五砦朝廷许之秉常以元佑元年七月卒谥曰康靖皇帝庙号惠宗

△李干顺

干顺秉常长子母曰昭简文穆皇后梁氏袭位时年三岁以父丧遣使告哀于宋诏自元丰四年用兵所得城砦待归永乐陷执民当画以给還元佑二年干顺改元天仪治平朝廷遣使册为夏国主仍节度西平王辽亦遣使册为夏国王寻攻镇戎军诸堡及德靖龛谷等砦四年始稍归永乐所获人朝廷遂以葭芦米脂浮图安强四砦与之复改元天佑民安宋几围麟府三日大纵杀掠又屡攻绥德城以重兵压泾原境留五旬大掠筑垒没烟峡口以自固复遣使请以兰州一境易塞门二砦不许遂大举入鄜延西自顺宁招安砦东自黑水安定中自塞门龙安金明以南二百里闲相继不绝至延州北五里忽自长城一日驰至金明列营环城干顺母子亲督桴鼓纵骑四掠知麟州有备复还金明而后骑之精锐者留龙安宋边将悉兵掩击不退遂破金明守兵二千八百人惟五人得脱城中粮五万石草千万束皆尽将官皇城使张俞战没时宋绍圣三年也宋泾原都钤辖王文振卒诸将破没烟峡新砦干顺复以七万众攻绥德为鄜延守将所却又为泾原折可适袭获西寿统军威明阿密监军穆尔图卜【按宋史章榘传干顺奉其母合将兵数十万围平夏疾攻十余日不克一夕遁去其统军威明阿密监军穆尔图卜皆骁勇善战榘遣折可适郭成轻骑夜袭直入其帐执之尽俘其家史谓干顺自平夏之败不复能军遂属请命乞和宋史本传于平夏之战所载从略兹为附识】干顺复改元永安时兰会正钤辖格乌讷尔以部落降于宋环州种朴又徼赤羊川获桑多鄂特家属百五十余口擒监军鄂特巴拉及首领喇卜丹鄂特裕勒干顺因上表谢过己而复以二千骑出浮图岔来攻时宋熙河将王愍率兵掩击古邈川部族干顺率兵数万围之为愍等所败擒钤辖威明雅奇又与统制苗履战于青唐崕复大败遂遣凌囊威明节等进誓表朝廷诏答之岁赐仍旧干顺建国学设弟子员三百立养贤务以廩食之复改元贞观崇宁二年蔡京使熙河王厚招卓鲁克右厢监军日木多保忠干顺乃点兵延渭庆三路各数千骑出没声言假兵于辽辽亦以成安公主嫁干顺而朝廷用京计令陶节夫在延州大加招诱干顺遣使巽请皆不纳又多杀牧放者干顺遂攻镇戎略数万口执知廓州高永年以归又攻湟州自是兵连者三年大观初始遣使入贡环州定远大首领李额页以书遗统军梁多凌曰我居汉二十年每见春廩既虚秋庾未积士有饥色若径搗定远唾手可取定远既得则旁十余城不攻而下矣我储谷累岁阙地而蒞之兵来可坐饱

也多凌遂以万人迎之宋转运使任谅先知其谋募民尽发窖谷以凌围定边失所藏多阿克遂以其部万余众来归干顺筑臧底河城复改元
雍宁朝廷诏河东节度使童贯为陕西经略来讨熙河经略刘法将步骑十五万出湟州秦凤经略刘仲武将兵五万出会州贯以中军驻兰州
为两路声援仲武至清水河筑城屯守而还右厢军与法战于古骨龙兵败仲武王厚复合泾原鄜延环庆秦凤之师攻臧底河城与战仲武等大败干顺以数万骑略萧关而还法等复率师十万屠仁多泉城种师道亦以十万众克臧底河城干顺遂大举攻泾原靖夏城时久无雪先使数万骑绕城践尘涨天乃潜穿壕为地道入城中城陷遂屠之童贯复逼遣刘法取朔方至统安城干顺弟察克率步骑为三阵以当法前军别遣精骑登山出其后大战宋师败绩法乘夜遁追斩其首察克见法首恻然语其下曰刘将军失在恃胜轻出不可不戒遂乘胜围震武震武在山峡中熙秦两路不能饷诸将欲拔之察克曰勿破此城留作南朝病块乃引还宋诸路所筑城砦皆不毛人所不争之地而关辅为之萧条果如察克言干顺复改元元德金太祖破辽兵辽天祚帝走阴山 【辽史作夹山与金史异】 干顺使李良辅将兵三万救之为金将斡鲁等败于宜水辽册干顺为夏国皇帝金寻遣使议和干顺遂遣巴勒恭凌奉誓表以事辽之礼称藩于金请受割赐地宗翰承制割下寨以北阴山以南伊锡伊喇部图噜泺西之地与之时宋宣和六年也明年金灭辽尼堪遣使许割天德云内金肃河清四军及武州等八馆地约攻麟州以牵河东之势干顺遂由金肃河清渡河取天德云内武州河东八馆地陷震威城继而金将固新以数万骑阳为出猎掩至天德悉夺取其地干顺乃请和于金建炎元年干顺改元正德金帅乌珠回云中遣使约侵宋干顺许之宋通问使傅雱见金左监军希尹于云中希尹以国书授雱为干顺请熙宁以来侵地盖金既夺其地乃责偿于宋以报之宋以主客员外郎谢亮为陕西抚谕使兼宣谕使从事郎何洋为太学博士持诏书赐干顺留居几月始与约和罢兵亮归而干顺兵已蹶其后袭取定边军金帅洛索连陷长安凤翔陇右大震干顺谍知关陕无备遂檄延安府言大金割鄜延以隶本国须当理索敢违拒者发兵诛讨之宋师臣王庶因遣谍闲其用事臣李遇乃止宋开封尹宗泽及知枢密使事张浚谋北伐请通书干顺为援诏从之绍兴初川陕宣抚副使吴玠始遣使通书干顺亦屡遣使至宋复改元大德伪齐知同州李世辅谋执金帅萨里干归宋不克遂奔夏世辅父母亲族在延安者金杀之无遗类干顺以世辅为静难军承宣使鄜延岐雍等路经略安抚使世辅请兵将报延安

之役干顺俾先讨别种酋豪号青面夜叉者世辅擒之以报干顺乃为出兵遣文臣王枢武臣伊特恭等随之世辅军至延安萨里干走耀州世辅购得害其父母者杀之东城闻金归宋河南地乃说枢等降宋伊特恭不从世辅抽刀斫之不中遂命王晞韩执送枢【建炎以来朝野杂记王晞韩作晞颜】以其众三千人归宋干顺以绍兴九年六月卒谥曰圣文皇帝庙号崇宗

△李仁孝

仁孝干顺长子袭位时年十六尊其母曹氏为国母改元大庆枢密使慕洧弟慕浚谋反伏诛宋绍兴十三年仁孝改元人庆始建学校于国中立小学于禁中尊孔子为文宣帝复改元天盛策举人立唱名法又建内学立通济监铸钱封其相任得敬为楚王立翰林学士院以焦景颜王金等为学士移置中书枢密于内门外大禁者侈封制蕃字师雅哩克仁荣为广惠王俄闻金南侵以骑兵二千至蔡园川及马家嶮秃头岭将分道入攻宋宣抚使吴玠命镇戎军守将秦弼说谕及金兵败乃还仁孝复改元干佑任得敬以谋篡伏诛初仁孝之袭位也国内多乱得敬抗御有功遂为相专政二十余年阴蓄异志诬杀宗亲大臣其势渐逼仁孝不能制分西南路及灵州啰庞岭地与得敬自为国乃上表于金为得敬求封不许得敬始有惧心至是诛之仁孝以绍熙四年九月卒谥曰圣德皇帝庙号仁宗

△李纯佑

纯佑仁孝长子母曰章献钦慈皇后罗氏袭位时年十七改元天庆以开禧二年正月废遂卒谥曰昭简皇帝庙号桓宗

△李安全

安全干顺孙越王仁友子初封镇夷郡王废其主纯佑自立使纯佑母罗氏奉表于金金遣使册为夏国王改元应天复改天皇建为元兵所攻求救于金不许遂侵金葭州为金将庆善努所败【按金史本传侵葭州作崇庆元年事考金卫绍王本纪及续通鉴安全以金大安三年八月卒明年乃改元崇庆侵葭州在大安二年八月安全未卒之先金大安二年乃宋嘉定三年也今补辑于此】安全以嘉定四年八月卒谥曰敬穆皇帝庙号襄宗

△李遵頊

遵頊齐国宗武王彦宗子始以宗室策试进士及第为大都督府主既袭位改元光定金遣使册为夏国王遵頊取金泾州未几又攻环庆河兰积石等州既而深入临洮金总管图们和搏不能御陕西宣抚副使完颜呼达来援

大败之于渭源涂遂陷临洮后复屡为金兵所败先是左枢密使万庆义勇遣二僧赍蜡书至宋欲共图金复侵地宋四川制置使黄谊不报【续通鉴作董居谊】及金宣宗南迁议徙都长安遣元帅迟嘉以重兵宿巩州遵頊畏其侵迫乃遣枢密使都招讨宁子宁钟音赴蜀阍议夹攻秦巩制置使聂子述俾利西安抚丁焞答书饬将吏严兵以待时宋嘉定十二年三月也及子述罢焞持议不可轻动时安丙再开宣阍许之寻宁子宁率众二十万围巩州丙命诸将分道进兵利州副都统程信引兵会攻金元帅迟嘉等逆战一日十余战城不能下子宁威明公辅等乃率众引归未几取金来羌大通等城复屡为金兵所败十六年遵頊传位于其子德旺自号上皇以宝庆二年三月卒谥曰英文皇帝庙号神宗

△李德旺

德旺遵頊子袭位改元干定自干顺与金议和不交兵者八十余年至金贞佑初小有侵掠遂至构难十年不解一胜一负精锐俱尽至是遣吏部尚书李仲谔修好于金称弟而不称臣各用本国年号金亦遣礼部尚书鄂搏良弼报之【按金史本传载德旺与金议和事未晰今据金史交聘表补辑】德旺以宝庆二年七月卒庙号献宗

△李睨

睨清平郡王子初封南平王既袭位城邑俱为元兵所破其民穿凿土石以避锋镝免者百无一二白骨蔽野睨力屈出降时宋宝庆三年也国遂亡【按西夏自拓跋赤辞纳款于唐闕于代迄宋据有西土历年久远宋史载其历世二百五十八年止自彝兴入宋以后槩之鍾渊暎建元考断自元昊称帝为始自元昊以景佑元年甲戌改元鑿元戊寅称帝至宝庆三年丁亥国灭凡一百九十四年】

钦定续通志卷六百五

●钦定续通志卷六百六 贰臣传一

贰臣传【一】

（臣）等谨按春秋以正名分而其功在于惧乱贼史之为义所以植纲常示惩戒盖綦重也我皇上标人伦之规矩严大义之防维特命馆臣于国史册立贰臣传闲考列代草昧之初恢天纲鼓羣动以安反侧而备驱使自不得不借才前代于是诸史撰述列传之首人半前官事多胜国未有能夺笔削而彰缺钺者信乎万世一时敦人纪树臣鹄必俟夫圣人而为天子也臣等奉敕纂续通志谨循仿义例稽摭事实进退予夺上禀睿裁合七史为贰臣传盖自唐迄明之初身都两府而不能扶危定倾庙鼎已

移台铉再辱则有若李琪郑珏刘昫卢文纪姚顛和凝
范质王溥魏仁浦李涛吴延祚弁髦衰朝攀附国贼手持玺绶卖国子人则有若张文蔚
杨涉张策赵光逢薛贻矩苏循君亡别立国破不知城
下系累卒自贻祸则有若左企弓虞仲文曹勇义康公弼宗室帝甥后弟主婿谊连肺腑
弃亲即讎则有若杨恭仁师道李麟耶律怀义袁象先
萧仲恭仲宣张永德萧瑀李洪信洪义赵延寿手握重兵军降国灭且效奇计尽死力以
倾覆故朝至不以亲反噬愤惋身殉则有若段凝康延
孝张柔刘整佞幸害政乱贼同产漏网新朝反阶佐命则有若封伦字文士及往来两朝
再三委贖国同传舍君如奕碁则有若赵赞张中孚中
彦始亦奋激败犹倔强卒不能固一失莫赎则有若屈突通汪世显文人自命素谈忠孝
禅诏见薄国史托词则有若陶谷危素又其甚者七朝
宰执八姓奴仆固懵大伦且不知廉耻是人闲何事则有若侯益冯道若此者人各异
世材固殊等小善亦录大闲已踰汇为三卷以明圣朝
制作为万世立人极匪特班范以来所未有即郑氏断断黜陟前史其义例亦无能窥见
万一云

唐

○唐

封伦 屈突通 萧瑀 杨恭仁【师道】 字文士及

封伦

屈突通

萧瑀

杨恭仁

字文士及

△封伦

封伦字德彝以字显观州蓟人祖隆之【本传作隆今从北齐书】北齐太子太
保父子绣隋通州刺史伦少寺舅卢思道曰是儿当自
致卿相开皇末从杨素讨江南之乱为行军记室素以从妹妻之素营仁寿宫表为土工
监宫成文帝见其制度奢侈怨甚素大惧伦曰毋恐皇
后至自当免明日帝果召素劳之素退问何以知伦曰上节俭故始见必怒然雅听后言
后妇人惟侈丽是好后悦则帝安矣素以是益奇其才
每与论天下事抚其床曰封郎终当据此荐擢内史舍人大业中虞世基有宠然不悉吏
事伦阴为裁画谄承主意百官章奏忤旨则寝不闻峻
文法抑功赏由是世基宠日隆而隋政大坏宇文化及乱持帝出宫使伦数帝罪帝曰卿
士人何至是伦羞缩去化及署为内史令从至聊城知

化及必败乃结士及请于济北运粮化及死遂与士及来降高祖责其谄巧不忠罢就舍
【旧书云帝以其前代旧臣遣使迎劳通鉴诸书皆
不载按德彝本与士及偕来士及素结托高祖其妹又为昭仪在黎阳时曾手诏召之则
来时自当有遣使迎劳事然非为德彝也】 伦以秘策
干帝帝悦更拜内史舍人迁侍郎三年改官名以为中书令 【按新书迁侍郎下书兼内
史令考通鉴改内史令为中书令下书丙戌以内史
侍郎封德彝为中书令本传误今改】 秦王讨王世充命伦参谋军事时兵久不决帝欲
班师王遣伦入见曰世充地虽多皆羸縻其用命者惟
洛阳尔计穷力屈破在旦暮今解而西则贼势复振后必难图帝纳之贼平帝谓侍臣曰
始议东封多沮者唯秦王谓必克伦赞其行虽张华叶
策晋武亦何以加封平原县公判天策府司马顷之突厥寇太原且遣使和亲帝问羣臣
咸请许之可好战伦曰彼有轻中国心谓我不能战若
乘其怠击之势必胜胜而后和威德两全今虽不战后必复来臣以为击之便诏可寻检
校工部尚书进封赵国公徙封密太宗立拜尚书右仆
射始伦之归萧瑀数荐之及是瑀为佐仆射每议事既定伦至帝前辄变易由是有隙贞
观元年遘疾卧尚书省帝亲临视命尚辇送还第卒赠
司空谥曰明伦资险佞内狭数刺人主意阴导而阳合之外谨顺居处衣服陋素而交宫
府贿赠狼藉又善矫饰居之自如人莫能探其肺腑隐
刺之随机数进忠款太宗以为诚横赐累万又密言于高祖曰秦王恃功颀颀太子若不
蚤立则亟图之且谓太子曰为四海不顾亲分羹者谓何
及高祖议废立伦固谏止常时语秘无知者卒后事寢闻十七年治书侍御史唐临追劾
之帝下其议库俭等请还赠改谥诏夺司空削食封改
谥繆子言道尚淮南长公主官至宋州刺史

△屈突通

屈突通京兆长安人仕隋为虎贲郎将文帝命覆陇西羣牧簿得隐马二万匹帝怒
收太仆卿慕容悉达监牧官吏千五百人将悉诛死通
曰陛下以至仁育四海岂容以畜产一日而戮千五百士帝叱之通顿首曰臣愿身就戮
以延众死帝寤免悉达等擢左武卫将军有犯法者虽
亲无所回纵弟盖为长安令亦以方严显时为语曰宁食三斗艾不见屈突盖宁食三斗
葱不达屈突通炀帝即位遣持诏召汉王谅先是文帝
与谅约若玺书召验视敕字加点又与玉麟符合则就道及是书无验谅觉变诘通通占
对无屈竟时归长安大业中与宇文述共破杨元感以
功迁左骁卫大将军秦陇盗起授关内讨捕大使安定人刘迦论反众十余万据雕阴通
发关中兵击之次安定不战军中意其怯通阳言旋师

而潜入上郡贼未之觉引而南去通七十里舍分兵徇地通候其无备夜简精甲袭破之
斩迦论帝南幸使镇长安高祖起代王遣通守河东战
久不下高祖留兵围之遂济河破其将桑显和于饮马泉通大惧乃留鹰扬郎将尧君素
守蒲将自武关趋蓝田以援长安至潼关阻刘文静兵
不得进相持月余通令显和夜袭文静诘朝大战显和纵兵破二壁唯文静一壁独完然
数入壁短兵接文静中流矢军垂败显和以士疲传餐
文静因得分兵实二壁会游军数百骑自南山还击其背三壁兵大呼奋而出显和遂溃
尽得其众通势蹙或说之降曰吾蒙国厚恩安可逃难
每自摩其颈曰要当为国家受人一刀训勉士卒必流涕高祖遣其家僮往召通趣斩之
俄闻京师不守乃留显和保潼关率兵将如洛既行而
显和来降文静遣窦琮段志玄精骑追及于稠桑通结阵拒之琮纵其子寿往谕使降通
大呼曰昔与汝父子今则雠也命左右射之显和呼其
众曰京师谄诸君皆家关西何为复东众皆舍兵通知不免下马东南向再拜号哭曰臣
力屈兵败不负陛下遂被擒送长安帝劳曰何相见晚
邪泣曰通不能尽臣节故至此为本朝羞帝曰忠臣也释之授兵部尚书蒋国公为秦王
行军元帅长史从平薛仁杲时贼珍用山积诸将争得
之通独无所取帝闻特赉金银六百两彩千段判陕东道行台左仆射从讨王世充时通
二子在洛帝曰今以东略属公如二子何通曰臣蒙陛
下更生誓以死许国今得备先驱二见何足顾平帝太息曰烈士徇节吾今见之及窦建
德来援秦王分麾下半以属通俾与齐王围洛世充平
论功第一拜陕东道大行台右仆射镇东都数岁召为刑部尚书自以不习文固辞改工
部建成之变复检校行台仆射驰镇洛贞观初行台废
为洛州都督进左光禄大夫卒赠尚书左仆射谥曰忠后诏配飨太宗庙庭永徽中赠司
空二子寿詮寿袭爵太宗幸洛思通忠节故詮以少子
拜果毅都尉赐粟帛恤其家终瀛州刺史詮子仲翔神龙中复守瀛州初桂州都督李弘
节亦以清慎显既歿其家卖珠太宗疑弘节实贪欲追
坐举者魏征曰今号清白死不变者屈突通张道源通二子来调共一马道源子不能自
存审其清者不加恤疑其浊者罪所举亦好善不笃矣
帝曰朕未之思置不问

△萧瑀

萧瑀字时文后梁明帝子封新安王国除以女兄为隋晋王妃乃入长安好学善属
文晋王为太子授右千牛及即位妃为后瑀寢亲宠迁
尚文奉御检校左翊卫鹰扬郎将感末疾不呼医曰是可为遁阶矣后责之曰尔亡国后
不安小官而高为怪语罪不测乃复治疾良已拜内史

侍郎突厥围帝雁门瑀进谋曰蕃俗可贺敦与知兵事宜遣使论义成公主何不战而解
又众恐陛下平突厥复事辽东故怠不肯战愿下诏赦
高丽专讨突厥则人自奋矣帝从之果围解帝素意伐高丽衔瑀■〈才獸〉其机谓羣
臣曰突厥何能为萧瑀乃给恐我遂出为河池郡守部
有钞贼万人募勇敢士击降之又击走薛举众数万高祖入京师招之挈郡自归拜民部
尚书封宋国公太宗以右元帅攻洛阳署瑀府司马武
德元年迁内史令帝悉以枢筦内外百务悉关决或引升御榻呼曰萧郎瑀亦孜孜无所
惮上便宜数十事每见纳用手诏赐黄金一函秦王炙
雍州牧以瑀为州都督尝有敕下中书即即行帝责其稽瑀曰隋李内史诏敕多违舛百
司不知所承今朝廷初基安危系号令比承一敕必覆
审使前后不谬始得下是以稽留帝曰若尔朕何忧乎初瑀关内田宅悉赐勋家至是给
还之瑀尽分宗族独留庙室奉祠王世充平进尚书右
仆射太宗即位迁左仆射时封德彝为右仆射与瑀有隙而房玄龄杜如晦新用事又疏
瑀亲德彝瑀心不平遂上封事论之辞旨疏躁帝怒因
与陈叔达忿争帝前坐不敬免俄拜特进太子少师复为左仆射数月又免 【按唐太宗
本纪及通鉴太宗初即位瑀与陈叔达忿争坐不敬
皆罢在武德九年十月至贞观元年六月始以太子少师复为左仆射新唐书本传载忿
争事在复为左仆射后前后倒置今移改】 岁余起为
晋州都督入拜太常卿迁御史大夫参预朝政瑀论议明辩然不能容人短意或偏驳不
通房玄龄魏征温彦博颇裁正之其言多黜瑀益不平
会玄龄等小过瑀即痛劾不报由是自失罢为太子少傅不复与政六年授特进行太常
卿出为河南道巡省大使九年复参预政事帝尝曰武
德之季太上皇有废立议顾朕挟不赏之功弗容于昆弟瑀于尔时不可以利怵死胁真
社稷臣也又谓瑀曰公守耿介古无以过然善恶太明
或有时而失瑀顿首谢魏征进曰臣有逆众持法主恕之以公孤特守节主恕之以介使
瑀不遇陛下庸能自保邪晋王为皇太子拜太子太保
同中书门下三品因定太子见三师仪瑀素狭中与同僚多不合尝言玄龄辈朋党盗权
若胶固然特未反耳帝曰知臣莫若君朕虽不明宁顿
懵臧否因为瑀晓解瑀以帝有偏信帝积久亦不平瑀好浮屠法尝请舍家为桑门帝许
之复奏自度不能为又足疾不入谒帝曰瑀岂不得其
所邪乃诏夺爵贬商州刺史未几复其封加特进卒赠司空荆州都督陪葬昭陵太常谥
曰肃帝以其性忌改谥贞褊子锐尚襄城公主为太常
少卿

△杨恭仁

杨恭仁本名纶隋观王雄子仁寿中为甘州刺史大业初转吏部侍郎杨元感叛诏率兵经略败之破陵遂与屈突通追获贼炀帝召见嘉其勇决时苏威宇文述裴蕴裴矩参掌选事皆乱贼不法恶恭仁廉正出为河南道大使捕贼至谯郡为朱粲所败奔江都宇文文化及弑逆署吏部尚书为化及守魏县元宝藏遂送京师高祖素知之授黄门侍郎封观或公寻为凉州总管恭仁素习边事尽心绥慰葱岭以东皆奉贡贽就加纳言突厥颉和可汗率众数万奄至州境恭仁随方备御以疑兵惧之颉利遂走鄯州刺史贺拔行威叛【旧书作贺拔威】朝廷末即讨恭仁募骁勇倍道出其不意克二城悉纵其俘众感悦遂相与缚行威降武德六年召拜吏部尚书兼中书令迁左卫大将军太宗即位拜雍州牧扬州大都督府长史迁洛州都督恭仁性冲厚以礼自闲卫未尝与物忤时人方汉石庆后以老病乞骸骨诏以特进归第卒赠潭州都督陪葬昭陵谥曰孝子思训袭爵显庆中历右屯卫将军从高宗并州右卫大将军慕容宝节夜邀思训与谋乱思训不敢对宝节惧毒酒以进思训死妻诉之乃诛宝节诏以寘毒人者重其法思训孙睿交尚长宁公主豫诛张易之神龙中为秘书监贬絳州别驾

杨师道

杨师道

师道字景猷恭仁弟隋末自洛阳归高祖授上仪同尚桂杨公主除吏部侍郎改太常卿封安德郡公贞观十年拜侍中参预朝政性周谨未尝语禁省事尝曰吾读孔光传想其余风或庶几焉十三年迁中书令太子承干得罪诏与长孙无忌等治其狱师道因妻前夫子赵节与谋乃微风帝欲活之帝怒罢为吏部尚书师道起贵胄深抑势贵亲党以远嫌而四海人物非所练悉署用多非其才时论讥之从征高丽摄中书令颇不称职改工部尚书复为大常卿卒赠吏部尚书并州都督陪葬昭陵谥曰懿子豫之尚巢刺王女寿春县主居母丧与永嘉公主乱炙主壻窦奉节所杀

△宇文士及

宇文士及字仁人京兆长安人述子化及弟也开皇末以述勋封新城县公文帝奇之诏尚炀帝女南阳公主大业中为尚辇奉御从幸江都以父丧免起为鸿胪少卿化及谋弑逆以主壻忌之弗告【按通鉴考异引蒲山公传言司马德戡弑炀帝之谋出于士及又引革命记言帝酖毒酒将杀百官南阳公主恐其夫死阴告之始谋害帝是炀帝之弑士及其祸始也然隋书帝纪及诸人传中并言谋出智及士及传又载

智及遣庄桃树就第杀士及之事南阳公主传又有谋逆之日察君不预知之语则二书固未可尽信今并从本传而二书所云则从通鉴分注之】已弑帝署为内史令櫓位封为蜀王初士及为奉御高祖任殿中少监雅自款结及从化及至黎阳帝手书召之士及亦遣家僮问道走长安通殷勤且献金环帝悦曰是将来矣化及兵日蹙士及劝归命不从乃与封伦诡求督饟济北俄而化及败遂与伦等来降帝阳责之士及谢备陈往款时士及女弟为昭仪有宠乃赦之日见亲礼授上仪同从秦王平宋金刚录功复隋旧封妻以寿光县主迁秦王府骠骑将军从讨王世充等进郢国公迁中书侍郎太宗即位拜中书令寻以本官检校凉州都督时突厥数入寇士及欲立威以镇边鄙每出入盛陈兵卫又喜折节下士或告其反讯无状召为殿中监以疾改蒲州刺史政尚宽简人皆宜之入为右卫大将军帝与语或至夜分遇休沐辄驰召然士及益自谨帝尝玩禁中树曰此嘉木也士及从旁美叹帝正色曰魏征常劝我远佞人不识佞人为谁乃今信然谢曰南衙羣臣面拆廷争陛下不得举手今臣卅在左右不少将顺虽贵为天子亦何聊帝意解又尝割肉以饼拭手帝屡目阳若不省徐啖之其机悟率类此别封一子新城县公久之复为殿中监卒赠左卫大将军凉州都督陪葬昭陵士及抚幼弟孤兄子以友睦称好周恤亲故然过自奉养服食必极丰侈有司谥曰恭黄门侍郎刘洎曰士及居家侈肆不可谓恭乃改曰纵

钦定续通志卷六百六

●钦定续通志卷六百七 贰臣传二

贰臣传 【二】

五代

○五代

张文蔚	杨涉	张策	赵光逢	薛贻矩	苏循【杜
晓】 段凝	康延孝	冯道	李		
琪	郑珏	袁象先	刘昫	卢文纪	姚顛 李鱓

和凝

张文蔚

杨涉

张策

赵光逢

薛贻矩

苏循 【杜晓】

段凝

康延孝

冯道

李琪

郑珏

袁象先

刘昫

卢文纪

姚顛

李璘

和凝

△张文蔚

张文蔚字石华河闲人唐干符中举进士及第昭宗时为翰林学士承旨时天子微弱制度已隳文蔚制诏四方独守大体昭宗迁洛拜中书侍郎同中书门下平章事柳璨杀裴枢等蔓引朝士辄加诛杀缙绅皆不自保文蔚力讲解之多赖以全活太祖受禅文蔚为册礼使及即位乃以为相梁初制度皆文蔚所裁定文蔚居家亦孝悌开平二年卒赠右仆射

△杨涉

杨涉祖收唐懿宗时宰相父严官至兵部侍郎涉举进士昭宗时为吏部尚书哀帝即位拜中书侍郎同中书门下平章事涉唐名家世守礼法而性特谨厚不幸遭末世拜相日与家人相对泣下谓其子凝式曰吾不能脱此网罗祸将至矣必累尔等太祖受禅为押传国宝使拜门下侍郎同中书门下平章事在位三年无所施为罢为左仆射卒子凝式有文词善笔札历事梁唐晋汉周常以心疾致仕【按通鉴凝式谓父曰大人为唐宰相国家至此不可谓无过况手持玺绶与人虽保富贵奈千载何涉大骇为不宁者数日五代史补谓凝式恐事泄即日佯狂时谓之疯子而考异又载周世宗实录凝式事梁未尝有疾同光初始以心疾罢天福初致仕在洛然则凝式之疾陶岳以为梁兴之初实录以为梁亡之后时事既殊乃心迥异考凝式既因后唐复兴惧而托疾则石晋革命之后更何所嫌善善从长故通鉴独取史补之说】居洛阳官至太子太保

△张策

张策字少逸河西炖煌人父同为唐容管经略使策少聪悟好学居洛阳敦化里浚井得古鼎铭曰魏黄初元年春二月匠吉千同以为奇

策时年十三启曰汉建安二十五年曹公薨改元延康是岁十月文帝受禅又改黄初是黄初元年无二月也铭何谬邪同大惊异之策少好浮屠之说落发为僧居长安慈恩寺黄巢犯阙乃返初服奉父母避乱召拜广文馆博士邠州王行瑜辟观察支使梁太祖兼西镇辟郑滑支使以母丧解职服除入唐为膳部员外郎天复中为韩建华州判官许州掌书记建遣策聘于太祖太祖喜曰张夫子至矣遂留以为掌书记荐于朝累拜中书舍人翰林学士太祖受禅为押传国宝副使拜刑部侍郎同中书门下平章事迁中书侍郎以风恙罢为刑部尚书致仕卒

△赵光逢

赵光逢字延吉父隐唐左仆射光逢以文行知名时人称其方直温润谓之玉界尺昭宗时为翰林学士承旨御史中丞以世乱弃官居洛阳柳璨为相与光逢有旧恩起为吏部侍郎太常卿太祖受禅为押金宝副使拜中书侍郎同中书门下平章事迁左仆射以太子太保致仕末帝即位起司空同中书门下平章事以司徒致仕唐天成中即其家拜太保封齐国公卒赠太傅

△薛贻矩

薛贻矩字熙用河东闻喜人唐干符中举进士第历兵部侍郎翰林学士承旨昭宗自岐还长安大诛宦者贻矩坐为中尉韩全诲等作画像赞左迁乃自结于梁太祖太祖言于朝拜吏部尚书迁御史大夫天佑三年太祖自长芦还军哀帝遣贻矩来劳贻矩以臣礼见太祖揖之升阶贻矩曰殿下功德及人三灵改卜皇帝方行舜禹之事臣安敢违乃称臣拜舞还遂趣哀帝逊位为押金宝使太祖即位拜中书侍郎同中书门下平章事累拜司空为相五年卒赠侍中

△苏循 【杜晓】

苏循不知何许人为人巧佞阿谀寡廉耻事唐为礼部尚书时梁太祖已弑昭宗立哀帝唐旧臣多愤惋切齿循特传会梁以希进用梁太祖急于禅代欲邀九锡羣臣莫敢当其议独循倡言梁王功德天命所归宜即受禅明年太祖即位循为册礼副使循有子楷干宁中举进士及第昭宗遣学士陵宸覆落之楷常惭愧及昭宗遇弑唐政出于梁楷为起居郎与柳璨张廷范等相结因曰夫谥者所以易名而贵信也前有司谥先帝曰昭名实不称乃上疏驳议改谥昭宗皇帝曰恭灵庄闵皇帝庙号襄宗梁太祖已即位置酒玄德殿顾羣臣自陈德薄不足当天命皆诸公推戴之力唐旧臣杨涉张文蔚等皆惭愧俯伏不能对独循与张祜薛贻矩盛称梁王功德所以顺天应人者循父子自以附会梁得所托

旦夕引首进用敬翔尤恶之谓太祖曰梁室新造宜得端士以厚风俗循父子皆无行不可立于新朝于是父子皆勒归田里依朱友谦于河中友谦叛梁降晋晋王将即位求唐故臣以备百官友谦遣循至魏州时梁未灭晋诸将相多不欲晋王即帝位晋王意虽锐大臣未有赞成其议者循始至望听事即拜谓之拜殿入谒舞蹈呼万岁称臣晋王大悦因以循为节度副使已而病卒即位赠左仆射楷同光中为尚书员外郎明宗即位大臣欲理其驳谥之罪以忧死当唐之亡也又有杜晓者字明远祖审权父让能皆为唐相王行瑜李茂贞犯京师昭宗杀让能以自解晓以父死无罪自废十余年屡辟不起或谓之曰吾子忍命杜氏岁时铺席祭其先人同匹庶乎晓乃为之起厯膳部郎中翰林学士太祖即位累拜中书侍郎同中书门下平章事友珪立迁礼部尚书集贤殿大学士袁象先等讨贼晓为乱兵所杀赠右仆射【按张文蔚杨涉张策赵光逢薛贻矩苏循六人欧阳修五代史旧立唐六臣传五五代中独曰唐见六人者之心无唐也亦史家特笔也】

△段凝

段凝开封人初名明远后更名康末为澠池主簿弃官事梁太祖为军巡使性儉巧善窥迎人意又以其妹内太祖故亲信之常使监诸军为怀州刺史太祖北征过怀州凝献馈甚丰太祖大悦迁郑州刺史使监兵河上李振亟请罢之太祖曰凝未有罪振曰待其有罪则社稷亡矣终不罢【按通鉴考异晋人取魏博然后与梁以河为境故常以大兵守之欧史以为太祖时事非也就使当时曾屯军河上亦未系社稷之安危况太祖时振言听计从均王时始疏斥此必均王时事云云但史既无年月确据通鉴亦止于梁代王彦章为招讨使时附见之今仍从欧史原文】庄宗已下魏博与梁相拒河上梁以王彦章为招讨使凝为副时赵岩张汉杰等用事凝依附为奸彦章用奇计破唐德胜南城岩等匿彦章状悉归功于凝凝因纳金求代彦章末帝惑岩等言遂以凝为招讨使军于王村是时唐已下郢州凝乃自酸枣河河东注郢以隔绝唐军号护驾水庄宗自郢趋汴汴兵悉属凝京师无备乃遣张汉伦驰召凝于河上汉伦坠马不能进已而梁亡凝率精兵五万降唐庄宗赐以锦袍御马明日凝奏故梁奸人赵岩张汉杰等十余人侮弄权柄残害生灵请皆族之凝出入唐朝无媿色见唐将相若倡优因伶人景进纳赂刘皇后以求恩宠庄宗甚亲爱之赐姓名曰李绍钦以为泰宁军节度使居月余用库钱数十万有司请责其偿庄宗释之郭崇韬固请庄宗终释之庄宗遣李绍宏监诸将备契丹凝军瓦桥关谄事绍宏数荐凝可大用迁武胜军节度

使赵在礼反绍宏请以凝招讨庄宗使条奏方略凝所谓偏裨皆其故党庄宗疑之乃止明宗即位勒归田里明年流辽州赐死

△康延孝

康延孝代北人为太原军卒有罪亡命于梁末帝遣段凝军河上以延孝为左右先锋指挥使延孝见末帝任用羣小知其必亡乃以百骑奔唐拜博州刺史南面招讨指挥使庄宗问延孝梁事延孝具言末帝懦弱赵岩张汉杰用事段凝奸邪以入金多为大将王彦章骁将也遣汉杰监其军而制之小人进任而忠臣勇士皆见疏斥此必亡之势也庄宗又问梁计如何曰臣在梁时窃闻议以仲冬大举遣董璋以陕虢泽潞之众出石会以攻太原霍彦威以关西汝洛之兵掠邢洺以趋镇定王彦章以京师禁卫击郓州段凝以河上之军当陛下庄宗初闻延孝言梁必亡喜及闻其大举也惧曰其将何以御之延孝曰梁兵虽众分则无余臣请待其既分以铁骑五千自郓趋汴出不意捣其空虚不旬日天下定矣庄宗甚壮其言卒用延孝策自郓入汴凡八日而灭梁以功拜郑州防御使赐姓名曰李绍琛二年迁保义军节度使三年征蜀以延孝为先锋排阵斩斫使破凤州取固镇降兴州与王衍战三泉衍败走断吉柏江浮桥造舟以渡进取绵州衍复断绵江浮桥延孝与招抚使李岩乘马浮江军士随之济者千余人遂入鹿头关下汉州居三日后军始至衍弟宗弼以蜀降延孝屯汉州以俟魏王继岌蜀平延孝功为多左厢马步军都指挥使董璋位在延孝下然特见重于郭崇韬崇韬有军事独召璋与计议而不问延孝延孝大怒责璋曰吾有平蜀之功公等仆邀相从反俛首郭公之门吾为都将独不能以军法斩公邪璋诉于崇韬崇韬解璋军职表为东川节度使延孝愈怒见崇韬言其不可崇韬曰绍琛反邪敢违吾节度延孝惧而退明年崇韬死继岌班师命延孝以万二千人殿至武连闻朱友谦无罪见杀友谦有子令德在遂州庄宗诏继岌即诛之继岌不遣延孝而遣董璋延孝已自疑及璋过延孝军又不谒延孝大怒谓其下曰南平梁西取蜀其谋尽出郭公而汗马之劳攻城破敌者我也今郭公已死我岂得存友谦与我俱背梁以归唐者祸次及我矣延孝部下皆友谦旧将知友谦被族皆号泣诉于军门延孝遂拥其众自剑州反入蜀自称西川节度三州制置等使驰檄蜀人数日闲众至五万继岌遣任圜以七千骑追之及于汉州会孟知祥夹攻之延孝战败被擒槛至凤翔庄宗遣宦者杀之

△冯道

冯道字可道瀛州景城人事刘守光为参军守光败去事宦者张承业承业监河东

军以为巡官以文学荐之晋王为河东节度掌书记庄宗即位拜户部侍郎充翰林学士为人能刻苦俭约居军中为一茅庵不设床席与仆厮同器饮食诸将有掠得美女以遣道者道真之别室访其主还之父丧解学士服除复召为翰林学士行至汴州遇赵在礼作乱明宗自魏拥兵还孔循劝道少留待道曰吾奉诏赴阙岂可自留乃疾趋京师庄宗遇弑明宗即位问安重海曰先帝时冯道何在重海曰为学士明宗曰吾素知之此真吾宰相也拜端明殿学士迁兵部侍郎寻拜中书侍郎同中书门下平章事天成长兴闲岁屡丰熟中国无事道尝戒明宗曰臣为河东掌书记时奉使中山过井陘之险惧马蹙失不敢怠于衔辔及至平地谓无足虑遽跌而伤凡蹈危者虑深而获全居安者患生于所忽此人情之常也明宗问曰天下虽丰百姓济否道曰谷贵饿农谷贱伤农因诵文士聂夷中田家诗明宗顾左右录之常以自诵时水运军将于临河县得一玉杯有文曰传国宝万岁杯明宗爱之以示道道曰此前世有形之宝尔王者固有无形之宝也明宗问之道曰仁义者帝王之宝也故曰大宝曰仁何以守位曰仁明宗不晓其言道已去召侍臣讲说其义嘉纳之明宗崩相愍帝潞王反于凤翔愍帝出奔卫州道率百官迎潞王以入是为废帝遂相之后三日愍帝始遇弑已而废帝出道为同州节度使踰年拜司空晋灭唐道又事晋拜守司空同中书门下平章事加司徒兼侍中封鲁国公高祖崩相出帝加太尉封燕国公罢为匡国军节度使徙镇威胜契丹灭晋道又事契丹朝耶律德光于京师德光责道事晋无状道不能对又问曰何以来朝对曰无城无兵安敢不来德光诮之曰尔是何等老子对曰无才无德痴顽老子德光喜以道为太傅德光北归从至常山汉高祖立乃归汉以太师奉朝请周灭汉道又事周拜太师兼中书令道少矫行取名及为大臣务持重锡物事四姓十君益以旧德自处当世之士无贤愚皆仰道为元老而喜为之称誉德光尝问道曰天下百姓如何救得道为俳语以对曰此时佛出救不得惟皇帝救得人皆以为契丹不屠灭中国之人者赖道一言也周太祖入京师谓汉大臣必行推戴及见道道殊无意受太祖拜如平时遂阳立湘阴公议者谓道能沮太祖之谋而缓之终不以晋汉之亡责道也然道视丧君亡国未尝屑意方自号长乐老著书数百言陈己更事四姓及契丹所得阶勋官爵以为荣自谓孝于家忠于国为子为弟为人臣为司长为夫为父有子有孙时开一卷时饮一杯食味别声被色老安于当代老而自乐何乐如之盖其自述如此道前事九君未尝谏诤世宗初即位刘旻攻上党世宗欲自将击之道切谏以为不可世宗曰吾见唐太宗平定天

下敌无大小皆亲征道曰陛下未可比唐太宗世宗曰
刘旻乌合之众若遇我师如山压卵道曰陛下作得山定否世宗怒起去卒自将击败旻
于高平其后攻淮南定三关威武之振自高平始其击
旻也鄙道不以从行以为太祖山陵使葬毕而道卒年七十二谥曰文懿 【五代通录作
谥文愍】 追封瀛王道既卒时人皆共称叹以为与
孔子同寿其喜为之称誉盖如此子吉字惟一晋天福初以父任秘书省校书郎迁膳部
金部职方员外郎屯田户部司勋郎中累阶金紫周显
德中迁太常少卿宋初受诏撰述明宪皇太后谥议见称于时建隆四年卒 【按贰臣中
冯道侯益为尤甚道阅唐晋契丹汉周益更中入蜀
而终于宋然道文士饰好言以欺世至自述为忠臣而人亦疑于孔子不特道罪滋甚且
以见当时廉耻道丧人心昏昧至举一世而无复知有
君臣大义者为可哀也欧阳修举管子四维之说以斥道之无耻传中于其情罪抉摘无
遗至尹起莘乃谓道迎降卖国贩易人主仕进之滥未
有如道者谅哉斯言诚有合乎孔子所谓小人之穷者特表以为道之定论云】

△李琪

李琪字台秀河西炖煌人兄珽唐末举进士及第为监察御史丁内艰贫无以葬乞
食而后葬服除还拜御史荆南成汭辟掌书记吴兵围
杜洪梁太祖遣汭与马殷等救洪汭以大舟载兵数万珽为汭谋曰今一舟容甲士千人
糗粮倍之缓急不可动若敌人縻之则武陵武安必为
后患不若以劲兵屯巴陵不与战吴兵粮尽则围解矣汭不听果败溺死赵匡凝辟掌书
记太祖破匡凝得之即位以为考功员外郎知制诰珽
度太祖不欲先用故吏固辞不拜出知曹州以治闻迁兵部郎中崇政院直学士许州冯
行袭病有牙兵二千皆故蔡卒太祖惧为变遣珽代为
留后珽至许止传舍慰其将吏行袭病甚欲使人代受诏珽曰东首加朝服礼也乃即卧
内见行袭道太祖语行袭感泣解印授珽行袭为人严
酷其从事魏峻尝切谏行袭怒诬以赃下狱珽受事乃理峻冤立出之还报太祖太祖喜
曰珽果办吾事会岁饥盗劫汴宋闲曹州尤其太祖复
遣珽治之珽至索贼得大校张彦珂珽甥李郊等及牙兵百余人悉诛之召拜左谏议大
夫友珪立除右散骑常侍侍讲袁象先讨贼珽为乱兵
所杀琪少举进士博学宏辞累迁殿中侍御史与珽皆以文章名唐亡事梁太祖为翰林
学士梁兵征伐四方书诏皆琪所为辄得太祖意末帝
时为御史中丞尚书左丞拜同中书门下平章事与萧顷同为宰相顷性畏慎周密琪倜
傥负气不拘小节二人多所异同而琪内结赵岩张汉
杰等为助以故顷言多沮顷尝掩其过琪所私吏当得试官琪改试为守为顷所发末

帝大怒欲窜逐之赖岩等救解罢为太子少保唐庄宗
灭梁欲以为相梁旧臣多嫉之乃以为太常卿迁吏部尚书同光三年秋天下大水京师
饥庄宗诏百寮上封事琪上书数千言其说无足取庄
宗独称重之遂以为国计使方欲以为相而庄宗崩明宗入洛羣臣劝进有司俱仪用枢
前即位故事霍彦威孔循等请改国号绝土德明宗疑
之下其事羣臣皆依违不决琪议曰殿下宗室之贤立功三世今兴兵向阙以赴难为名
而欲更易统号使先帝便为路人则戟然梓宫何所依
往明宗以为然乃发丧成服而后即位以琪为御史中丞请罢五日起居而复朔望入合
然不能复唐旧仪也安重海擅杀殿直马延琪不敢弹
纠又惧谏官论列乃托宰相任圜先白重海而后纠犹依违不敢正言其事豆卢革等罢
相任圜议欲以琪为相孔循郑珣沮之乃止迁尚书右
仆射琪为人少持重不知进退故数为当时所沮以太子少傅致仕卒

△郑珣

郑珣唐宰相縈之诸孙父徽为河南尹张全义判官珣少依全义举进士数不中全
义以属有司乃及第昭宗时为监察御史梁太祖即位
拜左补阙梁诸大臣以全义故数荐之累拜中书舍人翰林学士奉旨末帝时拜中书侍
郎同中书门下平章事唐庄宗自郢州入汴末帝闻唐
兵且至惶恐不知所为召珣问计安出珣曰愿得陛下传国宝驰入唐军以缓其行而待
救兵之至末帝曰事急矣宝固不足惜顾卿之行能了
事否珣俛首徐思曰但恐不易了于是左右皆大笑庄宗入汴珣率百官迎谒道左贬莱
州司户参军张全义言于郭崇韬复召为太子宾客明
宗即位欲用任圜为相而安重海不欲以问枢密使孔循循尝事梁兴珣善因言珣故梁
相性谨慎长者乃拜珣平章事明宗卅汴州六军家属
自洛迁汴又欲幸邺都军士愁怨大臣颇以为言独珣赞以为尝行赵凤极言于安重海
重海惊惧入切谏乃诏罢其行而珣又赞以为宜罢珣
在相位碌碌无所为又病袭孔循罢枢密使珣不自安亟以疾求去明宗数留之章四上
乃拜左仆射致仕卒赠司空

△袁象先

袁象先宋州下邑人唐南阳王恕已之后父敬初尚梁太祖妹是为万安大长公主
象先以甥为宣武军内外马步军都指挥使历宿洛陈
三州刺史太祖即位累迁左龙左统军在京马步军都指挥使友珪弑立末帝留守东都
以大事谋于赵岩岩曰但得招讨杨令公一言谕禁军
则事可成末帝即遣人以谋告杨师厚师厚遣裨将王舜贤至洛阳与象先谋象先许诺
末帝既激变龙骧军在东都者象先闻之即引禁军千

人入宫攻友珪友珪死末帝即位拜象先镇南军节度使同中书门下平章事开封尹判在京马步军诸军事贞明四年为平卢军节度使徙镇宣武象先为梁将未尝有战功徒以甥故掌亲军及诛友珪有功于末帝在宋州十余年诛敛其民积货千万庄宗灭梁象先来朝洛阳辇资数十万赂唐将相伶宦官者及刘皇后等由是内外翕然称之庄宗待之甚厚赐姓名李绍安改宣武军为归德曰此名为卿设也遣还镇是岁卒赠太师象先二子正辞官至刺史焘周世宗时为横海军节度使象先平生所积财产数十万邸舍四千闲不以分诸子而悉与正辞正辞积钱盈室室中尝有声如牛人以为妖劝其散积以禳之正辞曰吾闻物之有声求其同类尔宜益以钱声必止闻者传以为笑

△刘昫

刘昫字耀远【从薛史增】涿州归义人与兄暉弟晔皆以好学知名后为定州王处直观察推官处直为其子都所囚昫兄暉亦为怨家所杀昫乃避之沧州唐庄宗即位拜太常博士以为翰林学士明宗时累迁兵部侍郎端明殿学士长兴三年拜中书侍郎兼刑部尚书同中书门下平章事废帝入立迁吏部尚书门下侍郎监修国史兼判三司昫性察而嫉三司蠹敝尤甚乃句计文簿核其虚实残租积息悉蠲除之往时吏幸积年之负盖而不发因以把持州县求贿赂及昫一切蠲除民德之而三司吏皆沮怨冯道与昫姻家同为相道罢李愚代之愚素恶道凡事有稽失者必以谗昫曰此公亲家翁所为昫性少容恕而愚特刚介遂相诋诟相府史吏恶此二人刚直因共扬言事闻废帝并罢之以昫为右仆射昫在相位不习典故明宗崩太常卿崔居俭当为礼仪使以其祖讳蠡辞冯道改居俭秘书盛中书舍人李详为诰词有闻名心惧之语昫辄易曰有耻且格居俭诉曰名讳有令式子何罪也闻者皆传以为笑晋高祖时张从宾反杀皇子重又于洛阳乃以昫为东都留守判盐铁开运中拜司空同中书门下平章事复判三司契丹入京师昫以目疾罢为太保卒【按通鉴及辽史载晋高祖上尊号于辽以左仆射

刘昫为册礼使又昫删纂唐三百年闲国史凡二百卷皆其平生大事欧史俱失载纪】

△卢文纪

卢文纪字子持祖简求唐太原节度使父嗣业右补阙文纪举进士事梁为刑部侍郎集贤殿学士唐明宗时为御史中丞请悉复中外官校考法将相天子自书之诏虽施行而官卒不考岁余迁工部尚书文纪素与宰相崔协有隙协除工部郎中于邺文纪以邺与其父名同意大怒邺赴省参上文纪不见因请连假已而邺奉使未行文纪即出视事邺因醉忿自经死

文纪坐贬石州司马久之为秘书监太常卿奉使于蜀
过凤翔时废帝镇凤翔见文纪奇之及入立欲择宰相左右皆言文纪及姚顛有人望因
悉书清望官名姓内琉璃瓶中夜焚香祝天以筋挟之
首得文纪欣然相之拜中书侍郎同中书门下平章事晋高祖起太原废帝北征过拜徽
陵休仗舍顾文纪曰吾自凤翔识卿不以常人待自卿
为相询于輿议皆云可致太平今日使吾至此卿宜如何文纪惶恐谢罪废帝至河阳文
纪劝帝扼桥自守不听晋高祖入立罢为吏部尚书累
迁太子少保致仕周太祖入立即家拜司空卒赠司徒

△姚顛

姚顛字百真京兆长安人 【按薛史作字伯真京兆万年人通鉴亦作万年人】
举进士事梁为翰林学士中书舍人唐庄宗灭梁贬复
州司马己而以为左散骑常侍兼吏部侍郎尚书左丞废帝立拜中书侍郎同中书门下
平章事顛在相位龊龊无所为唐制吏部分为三铨天
成中冯道为相始奏请三铨合为一至顛与卢文纪为相复奏分为三选人多不便之往
往邀遮宰相喧诉不逊顛等无如之何废帝为下诏禁
止晋高祖立罢为户部尚书卒家无余赀官为赠赠乃能敛闻者哀之

△李鱗

李鱗唐宗室子少举进士累不中客河朔闲自称清海军掌书记谒定州王处直处
直不为礼乃易其绿衣为绯衣谒常山李弘规弘规进
之赵王王镕镕留为从事张文礼弑镕自立遣鱗聘唐庄宗于太原阴为庄宗画文礼可
破之策文礼败庄宗以为支使及即位拜鱗宗正卿以
李琼为少卿献祖懿祖墓在赵州昭庆县唐国初建鱗琼上言二祖陵请置台令县中无
赖子自称宗子者百余人宗正无谱牒莫能考按有民
诣寺自言世为丹阳竟陵台令厚赂宗正吏鱗琼不复详考遂补为令民即持绛幡招置
部曲侵夺民田百余顷以为陵园墺地民诉于官不能
决以闻庄宗下公卿博士问故唐诸帝陵寝所在具言丹阳在今润州而竟陵非唐事鱗
不学无知不足备九卿坐贬司农少卿出为河中节度
副使明宗即位以鱗故人召还累迁户部尚书鱗意颇希大用尝谓冯道赵凤曰唐家故
事宗室皆为宰相今天祚中兴宜按旧典鱗虽不才尝
事庄宗霸府识今天子于藩邸论才较业何后众人而久置班行于诸君安乎道等恶其
言后杨溥谋者见鱗言事鱗谓安重海曰杨溥欲归国
久矣可遣使招谕重海乃以玉带与溥者使为信久而无效由是贬鱗兖州行军司马愍
帝时为兵部尚书奉使湖南鱗与潞王有旧闻入立喜
以为必用己为相还过荆南谓高从海曰士固有否泰吾不为时用久矣今新天子即位

我将用矣从诲为鱗置酒问其副使马承翰今朝廷孰有公辅之望承翰曰尚书崔居俭左丞姚顓其次太常卢文纪从诲笑顾左右取进奏官报状示鱗顓文纪皆拜平章事矣鱗惭失色还废帝终不用初李愚自太常卿作相而卢文纪代之文纪作相鱗乃求为太常卿及拜命中谢曰臣叨入相之资朝士传以为笑后事晋累迁太子太保汉高祖即位拜司徒卒赠太傅

△和凝

和凝字成绩郢州须昌人举进士为梁义成军节度使贺瓌从事胡柳之战瓌败走独凝随之不去瓌麾之凝曰大丈夫当为知己死吾恨未得死所尔岂可去也已而一骑追及凝引弓射杀之瓌由此得免归戒其诸子曰和生志义之士也后必富贵尔其谨事之因妻以女天成中拜殿中侍御史累迁主客员外郎知制诰翰林学士知贡举时进士多浮薄喜为誼哗以动主司每发榜则围之以棘闭省门绝人出入以为常凝撤棘开门而士皆肃然所取称为得人晋初拜端明殿学士兼判度支为翰林学士承旨晋高祖数召问时事奏对皆称旨天祐五年拜中书侍郎同中书门下平章事高祖将幸邺郑王留守东京而襄州安从进反迹已见凝请为宣敕十余通授郑王有急则命将击之高祖至邺从进果反郑王即以宣敕命骑将李建崇焦继勋等讨之从进遂败出帝即位加右仆射岁余罢平章事迁左仆射汉高祖时拜太子太傅封鲁国公显德二年卒赠侍中

钦定续通志卷六百七

●钦定续通志卷六百八 贰臣传三

贰臣传 【三】

宋

○宋

范质 王溥 魏仁浦 吴延祚 李洪信 李洪义

李涛 张永德 侯益 陶谷

范质

王溥

魏仁浦

吴延祚

李洪信

李洪义

李涛

张永德

侯益

陶谷

△范质

范质字文素大名宗城人后唐长兴中举进士为忠武军节度推官迁封邱令晋天福中以文章干宰相桑维翰深器之奏为盛察御史迁主客员外郎直史馆岁余召入为翰林学士加比部郎中知制诰契丹侵边少帝命汉祖等十五将出征是夜质入直少帝令召诸学士分草制质曰宫城已闭恐泄机事独具草以进辞理优贍汉初加中书舍人户部侍郎周祖征叛每朝廷诏处分军事皆合机宜问谁为此辞使者以质对叹曰宰相器也周祖自邺起兵向阙京城扰乱质匿民闲物色得之喜甚令草太后诰及议迎湘阴公仪注称旨以为兵部侍郎枢密副使广顺初拜中书侍郎平章事集贤殿大学士兼参知枢密使事进左仆射兼门下侍郎平章事质建议以律条繁冗轻重无据吏得因缘为奸特命详定是为刑统世宗不豫受顾命恭帝嗣位封萧国公太祖北征为六师推戴自陈桥还府署质方就食阁中率王溥魏仁浦就府谒见太祖对之流涕具言拥逼状质等未及对军校罗彦瓌举刃拟质曰我辈无主今日须得天子太祖叱彦瓌不退质不知所措乃与溥等降阶受命加兼侍中罢参知枢密奏封皇弟泰宁军节度使光义嘉州防御使光美又言端明殿学士吕余庆枢密副使赵普当授台司帝嘉纳之先是宰相见天子议大政事必命坐面议之从容赐茶而退唐及五代犹遵此制及质等惮帝英睿每事辄具札子进呈由是始废坐论之礼干德初帝将有事圜丘以质为大礼使质与鹵簿使张昭仪仗使刘温叟讨论旧典定南郊行礼图斗之进封鲁国公二年罢为太子太傅卒赠中书令质每下制敕未尝破律命刺史县令必以户口版籍为急朝廷遣使视民田按狱讼皆延见为述天子忧勤意然后遣之世宗初征淮南驻寿濠锐意攻取且议行幸扬州质以师老与王溥泣谏乃止及再驾扬州因事怒窦仪罪不测质入谒免冠叩头泣下愿宽仪罪世宗即赦仪质性卞急好面折人以廉介自持身没家无余费太祖因论辅相谓侍臣曰朕闻范质止有居第不事生产真宰相也太宗亦尝称之曰宰辅中能循规矩慎名器持廉节无出质右者但欠世宗一死为可惜尔子旻字贵参以父任累迁著作佐郎宋初为度支员外郎知开封县太宗时领京尹数召与语颇器之迁知邕州兼水陆转运使俗轻医药重鬼神旻下令禁淫祝割奉市药给病者以方书刻石置厅壁氏感化之会南汉知广州官邓存忠

劫土人二万众攻州城七十余日旻屡出亲战矢集于胸犹激励将卒殊死战及围解创甚诏有司以肩輿载归阙下开宝九年知淮南转运事岁运米百余万石给京师钱俶献地以旻为考功郎中权知两浙诸州军事旻上言俶在国日徭赋繁苛凡薪粒蔬果箕帚之属悉收自欲尽蠲其弊从之车驾征晋阳上书求从召为右谏议大夫三司副使判行在三司坐受人请求擅市竹木入官贬房州司户卒

△王溥

王溥字齐物并州祁人父祚为郡小吏从晋祖入洛掌盐铁案以母老解职归汉祖即位擢为三司副使历周为随州刺史汉法诸州送牛革京师遇暑雨多腐坏祚请班铠甲式令裁以输民甚便之移商华颍三州皆有善政历郑州围练使宋初为宿州防御使拜左领军卫上将军致仕溥汉干佑中举进士甲科为秘书郎周祖将兵讨三叛辟溥为从事河中平得贼中文书多朝贵及藩镇相交结语周祖籍其名将按之溥请一切焚之以安反侧从之师还迁太常丞从周祖镇邺广顺初累迁翰林学士三年加户部侍郎改端明殿学士周祖疾革以溥为中书侍郎平章事宣制毕曰吾无忧矣世宗将亲征泽潞溥赞成之凯还加兼礼部尚书世宗尝从容问溥曰汉相李崧以蜡书与契丹犹有记其词者信有之耶溥曰崧为大臣设有此谋肯轻示外人盖苏逢吉诬之耳世宗始悟诏赠其官世宗将讨秦凤溥荐向拱为帅事平世宗因宴酌酒赐溥曰为吾择帅成边功者卿也显德六年参知枢密使事恭帝嗣位加右仆射宋初进位司空罢参知枢密干德二年罢为太子太保太平兴国初封祁国公七年卒赠侍中谥文献溥在相位祚家居每公卿至必首谒祚置酒上寿溥朝服趋侍左右坐客不安席辄引避祚曰此豚犬尔勿烦诸君起子贻孙贻正贻庆贻序贻正字克明尚太宗女郑国长公主改名贻永令与其父同行见外戚传贻孙字象贤官右司郎中溥好聚书至万余卷贻孙遍览之太祖尝问赵普拜礼何以男子跪而妇人否普问礼官不能对贻孙曰古诗云长跪问故夫是妇人亦跪也唐太后朝妇人始拜而不跪普问所出对云太和中幽州从事张建章着渤海国记备言其事普大称赏之

△魏仁浦

魏仁浦字道济卫州汲人幼孤贫母为假黄縑制暑服仁浦年十三叹曰为人子不克供养乃使慈母求货以衣我我能安乎因慷慨泣下辞母诣洛阳济河沈衣中流誓曰不贵达不复渡晋末隶枢密使为小史随契丹北迁得脱归杜重威欲留补牙职仁浦以重威降将不愿事之

遂遁去汉祖起太原次巩县仁浦迎谒道左即补旧职时周祖掌枢密迁兵房主事从镇邺隐帝密诏郭崇害周祖李洪义以告周祖惧召仁浦入计仁浦曰今诏始下外无知者莫若易诏以尽诛将士为名激其怒心 【按通鉴载周太祖召魏仁浦问计仁浦谓公握重兵据重镇一旦为羣小所构祸出非意此非辞说之所能解云云不载更易诏书激怒诸将等语胡三省注谓通鉴所书必本周实录周臣为其君讳并为仁浦缘饰故隐约其词未足为据本传所载与欧史周祖本纪同谨附识于此】 非徒自免亦可为杨史雪冤周祖纳其言倒用留守印易诏书以示诸将众惧且怒遂长驱渡河及即位以仁浦为枢密承旨周祖尝问仁浦诸州屯兵之数及将校名氏令检簿视之仁浦曰臣能记之遂手疏于纸校簿无差广顺末刘崇寇晋州仁浦居母丧宅迓宫城周祖步登宽仁门密遣小黄门召仁浦计事明日起复旧职周祖大渐谓世宗曰魏仁浦无遣违禁密世宗即位授枢密副使从正高平周师不利东偏已溃仁浦劝世宗出阵西殊死战遂克之师还拜枢密使迁中书侍郎平章事集贤殿大学士兼枢密使世宗欲命仁浦为相议者以其不由科第世宗决意用之恭帝嗣位加刑部尚书宋初进右仆射以疾再上表乞骸骨不许干德初罢守本官开宝二年春宴太祖笑谓仁浦曰何不劝我一杯酒仁浦奉觞上寿帝密谓之曰朕欲亲征太原如何仁浦曰欲速不达惟陛下慎之从征太原遇疾道卒赠侍中谥宣懿仁浦性宽厚接士大夫有礼务以德报怨汉干佑中开封人郑元昭 【通鉴作郭元昭】 为安邑解县两池榷盐使迁解州刺史仁浦妇翁李温玉代之元昭不得专两池利会李守贞以河中叛温玉子在城中元昭即系温玉以变闻事连仁浦仁浦方为枢密院主事周祖总枢务置不问显德中仁浦为枢密使元昭不自安代归至京师仁浦曾不介意白周祖授元昭庆州刺史汉隐帝宠作坊使贾延徽与仁浦并居欲并其第屡譖仁浦几不测及周祖入汴有擒延徽授仁浦者仁浦曰因兵戈以报怨不忍为也力保全之淮南之役获贼兵数千人仁浦从容上言俾隶诸军军中无滥杀者子咸美咸熙咸信咸信尚永信公主授右卫将军累迁忠武军节度使加同平章事赠中书令

△吴延祚

吴延祚字庆之并州太原人少颇读书事周祖为亲校广顺初授庄宅副知使怀州入为皇城使又权知郢州即位迁内客省使寻拜宣徽北院使征刘崇为北面都巡检使师还权州判澶州归阙迁宣徽南院使判河南府知西京留守事汴河决命延祚塞之因增筑堤防自京城至

临淮数旬讫工世宗北征权东京留守塞郑州原武县决河师还拜充枢密使 【按周世宗本纪延祚权东京留守在显德六年三月是月即拜枢密使世宗三月北征至五月师还传云师还始拜枢密与纪互异】 恭帝即位加检校太尉宋初加同中书门下三品以其父名璋故避之李筠之变延祚自太祖曰潞城险且阻太行未易破也筠素勇而轻若速击之必离上党来邀战犹鱼脱于渊因可擒矣太祖遂亲征以延祚留守东京兼判开封府筠果领兵来战泽州南大败之讨李重进又为东京留守建隆二年以为雄武军节度改镇京兆开宝四年长春节来朝俄遇疾车驾临问命爇艾炙其腹遣中使王继恩监视之卒赠侍中子元辅元载元范元宸元吉元庆元宸自有传

△李洪信

李洪信并州晋阳人汉昭圣太后弟少善骑射隶后唐明宗帐下后为奉圣军小校潞王举兵少帝东奔捧圣军从行洪信预焉次卫州少帝与晋高祖遇因疑贰谋害晋祖时汉祖方护晋祖洪信以兵应之获免晋初为兴顺左厢都指挥使汉祖镇太原奏隶麾下从汉祖降邺授侍卫马军都指挥使领武信军节度干佑中以羣小用事心怀忧惧曰太后求解军职出为镇宁军节度使寻徙保义初杨邠以元从功臣为方镇者不谙政务令三司择军将分补诸镇都押牙孔目官或恃为朝选藩帅难制洪信闻内难即召马步军都校聂召等十余人诬以谋逆悉杀之周广顺初加同平章事洪信常以妄杀内不自安周祖犹以汉太后故移镇京兆本城兵不满千王峻西征至陕州以援晋州为辞取数百人去及刘崇北遁遣禁兵千余屯京兆洪信益惧即请入朝恳辞藩镇拜左武卫上将军宋干德五年改左骁卫上将军开宝五年以本官致仕八年卒弟洪义

△李洪义

洪义本名洪威避周祖名改焉汉祖镇太原补亲校开国授护圣左厢都校迁侍卫马军都指挥使隐帝诛杨邠史宏肇等时侍卫步军都指挥使王殷屯澶州遣供奉官孟业赍密诏令洪义杀之又命护圣都指挥使部崇等害周祖于邺洪义素怯懦虑殷觉迁延不敢发遽引业见殷殷乃辄业送密诏于周祖周祖起兵少帝又诏洪义扼河桥兵至洪义就降汉室之亡由洪义也广顺初拜归德军节度使加同平章事权知许州寻改安州世宗即位加兼侍中徙青州六年迁京兆尹永兴军节度使宋初加兼中书令移鄜州干德五年代归卒赠太师

△李涛

李涛字信臣京兆万年人唐敬宗子郇王玮十世孙祖镇临濮令父元将作监梁太祖之篡也元以宗室惧祸挈涛避地湖南依马殷署涛衡阳令涛从父兄郁仕梁为合门使上言涛父旅湖湘诏诏殷遣归京师补河阳令后唐天成初举进士甲科累迁起居舍人晋天福初改考功员外郎史馆修撰晋祖幸大梁张从赏以盟津叛张全义子继祚实党之晋祖将族其家涛上疏言全义当巢蔡之后手披荆棘再造都邑垂五十年洛民赖之乞止罪继祚妻子从之尝奉诏为宋州括田使前雄州刺史袁正辞赉束帛遣涛以田园为托涛表其事晋祖喜之历刑部郎中伏阙争张彦泽杀张式事语在彦泽传【按宋史叙涛争张彦泽事与五代史略同今从通史例不复载】汉高祖入汴以为翰林学士杜重威据邺叛高祖命高行周慕容彦超讨之二帅不协涛密疏请亲征高祖览奏以涛堪任宰辅即拜中书侍郎兼户部尚书平章事隐帝即位杨邠周祖共掌机密史宏肇握兵柄与武德使李邺等中外争权涛疏请出邠等藩镇以清朝政隐帝不能决白于太后太后召邠等论之反为所构免归及周祖举兵太后泣曰不用李涛之言宜其亡也周初起为太子宾客历刑部户部二尚书恭帝即位封万国公宋初拜兵部尚书建隆二年涛被病有军校尹勋董浚五丈河陈留丁壮夜溃勋擅斩队长陈珙等十人杖丁夫七十人皆刖其左耳涛闻之力疾草奏请斩勋以谢百姓家人谓涛曰公久病宜自爱养朝廷事且置之涛愤言曰人孰无死但我为兵部尚书坐视军校无辜杀人乌得不奏太祖览奏嘉之诏削夺勋官爵配隶许州涛卒赠右仆射

△张永德

张永德字抱一并州阳曲人父颖晋安州防御使永德生四岁母马氏被出事继母刘氏以孝闻周祖初为侍卫吏与颖善乃以女妻永德即晋国公主也【按苏辙龙川别志载周太祖将兵征淮南过宋州宋州使人劳之于葛驿葛驿先有一男子一女子不知其所从来转客于市佣力以食父老怜之醪酒肉衣服相配为夫妇及太祖至市人聚观女子于众中呼曰此吾父也太祖闻之使前问之信其女也相持而泣将携之以行女曰我已嫁人矣复呼其夫视之曰此亦贵人也俱携之军中奏补供奉官即永德也云云语近说家故事家勿取也】周祖镇邺被谗族其家永德在潞州闻有密诏授潞帅常遇永德探知其意谓遇曰得非莅杀永德耶永德即死无怨恐累君侯家愿且以永德属吏事成足以为德不成死未晚遇以为灸故免周祖即位授永德左卫将军累迁殿前都指挥使从世宗征刘崇战于高平大将樊爱能何徽方战退衄时

太祖与永德各领牙兵二千厉兵分进大捷及驻上党世宗画卧帐中召永德语曰前日之战主将不用命吾欲尽案军法永德曰陛下欲固守封强则已必欲开拓疆宇威加四海宜痛惩其失世宗掷枕于地大呼称善翌日诛二将以徇军威大振进攻太原永德与符彦卿史彦超北控忻口断契丹援契丹兵至彦超战没永德继败其众二千余众遁去 【按通鉴符彦卿等与契丹战于忻口史彦超为前锋李筠等引兵继之杀契丹二千人彦超恃勇轻进戢没筠等仅以身免周兵死伤甚众遂退保忻州是败契丹兵于彦超未没之前传书于彦超既没之后与通鉴互异】 领武信军节度使徙领义成永德父颖为隶人曹澄等所害奔南唐会议南征永德请自效许之大败刘仁贍于寿春世宗至寿州城下仁贍执澄等三人槛送行在求缓师诏赐永德俾甘心焉太祖与永德领前军至紫金山吴人列十八砦颇严整垒西有高陇永德选劲弓强弩伏其旁太祖麾兵直攻第一砦阳不胜淮人空砦出鬪永德亟登陇发伏驰据之翌日又攻第二砦鼓噪而进始攻北门淮人开南门而遁时韩令坤在扬州为吴人所逼欲退师遣永德率师援之败泗州军于曲溪堰俄屯下蔡永德败吴楼船师又败其众于淮北岸擢殿前都点检四年从克寿州领镇宁军节度使五年契丹扰边命永德率步骑二万拒之从世宗北伐还驻澶渊解兵柄检校太尉同中书门下平章事恭帝嗣位移镇忠武太祖即位加兼侍中永德入朝授武胜军节度使时并汾未下太祖密访其策永德曰太原兵少而悍加以契丹为援未易取也请每岁多设游兵扰其农事乃发闲使以谍契丹绝其援然后可下帝然之会出师讨金陵永德以已资造战船数十艘运粮万斛自顺阳沿汉水而下富民高进者豪横莫能禁永德发其奸寘于法进诣阙诬永德图不轨太祖命曹翰察之无他翰以进授永德永德解缚就市笞而释之时称其长者太平兴国二年来朝拜左卫上将军六年封邓国公端拱元年为河北两路排阵使屯定州尝与契丹战斩获甚众淳化二年徙泰宁军节度使兼侍中出判并州兼并代都部署永德明天文术尝与僚佐会食报辽兵寇州境永德用太白万胜诀占之语坐客曰彼虽以年月便利乘金而来反值岁星对逆兵家大忌必败未几折御卿捷报至众始叹伏坐令亲吏贩茶规利阑出徼外市羊罢为左卫上将军真宗即位进卫国公三年卒赠中书令永德出母后适安邑刘祚永德镇南阳祚已卒迎母归州廨起二堂与继母刘并居初永德寓睢阳有书生邻居卧疾永德疗之获愈一日告适淮上语永德曰后当相遇于彼及永德屯下蔡方射淮民环观有一僧睥睨遽召之乃睢阳书生也夜宿帐中曰始语君

贵今不谬矣终能谨节当保五十年睢阳书生常言太祖受命之兆以故永德潜意拱向太祖将聘孝明皇后永德出缙钱金帛数千助之故尽太祖朝恩渥不替

△侯益

侯益汾州平遥人以拳勇为太原卒从庄宗攻大名先登擢马前直副兵马使以功累迁马前直指挥使庄宗入汴为本直副都校从明宗讨赵在礼于邺诸军推戴明宗益脱身归洛庄宗抚其背出涕明宗立面缚请罪明宗曰尔尽忠节有何罪改本直左厢都校契丹来援王都益击破之唐河北授宁州刺史入为羽林军五十指挥都校时夏帅李仁福卒子彝超擅命自立命益帅师讨之明宗不豫遽追还应顺初潞王举兵凤翔以益为西面行营都虞候益知军情必变称疾不奉诏执政怒出为商州刺史蜀军寇全州益率镇兵击破之晋初召为奉国都校范延光反大名张从宾据河阳为声援以益为西面行营副都部署率禁兵数千人次虎牢从宾军万余人夹汜水而阵益大败其众从宾乘马溺水死拜河阳三城节度使充邺都行营都虞候会延光以城降移镇潞州天福四年晋祖追念虎牢功迁武宁军节度使同平章事仍赐门戟改乡里为将相乡勋贤里明年徙镇泰州充西面都部署阶州义军校王君怀叛投蜀请为先锋下秦成诸州益惧请援于朝又潜遗书蜀将以达诚意少帝闻而疑之徙为河中尹护国军节度契丹入汴益率僚属归京师自陈不预北伐之谋契丹授以凤翔节度使汉祖即位加兼侍中益自以常受契丹命闻汉兵入洛忧之浚城隍为备孟昶遣益所亲掌枢密王回赍书招益复遣益故吏绵州刺史吴崇恇厚遗之益遂与其子归蜀昶以川兵收万出大散关应之汉祖知其事遣客省使王景崇率禁军数千倍道趋岐下召益入朝并授旨以便宜从事景崇至京兆合岐雍邠泾师破蜀军益惧即谋入朝会闻汉祖崩景崇欲诛益虑隐帝不知先朝密旨未决益即率数十骑奔入朝隐帝遣侍臣问益结连蜀军之由益对曰臣欲诱之出关掩杀之耳隐帝笑之益厚赂史宏肇辈言景崇横恣诸权贵深庇护之乃授开封尹兼中书令封鲁国公景崇闻之遂据城叛益亲属七十口在城中悉为景崇所害周祖起兵隐帝遣益与慕容彦超及张彦超阎进卿吴虞裕守澶州至赤冈周师奄至战留于陂 【五代史隐帝纪作刘子陂】 军不利益见士卒无鬪志又古候不祥乃与焦继勋等夜谒周祖周祖慰劳遣还广顺初封楚国公改太子太师显德元年以本官致仕归洛太祖即位遣赐器币岁一来朝以耆旧厚待之干德初郊祀诏缀中书门下班三年卒赠中书令子仁愿仁矩仁宝仁

遇仁兴

△陶谷

陶谷字秀实邠州新平人本姓唐避晋祖讳改焉父涣夷州刺史为邠帅杨崇本所害谷幼随母柳氏育崇本家十余岁能属文起家校书郎单州军事判官常以书干宰相李崧崧甚重其文时和凝亦为相同奏为著作佐郎集贤校理改监察御史分司西京迁虞部员外郎知制诰晋祖废翰林学士谷兼掌内外制词目繁委言多委愜天福九年加仓部郎中谷性急率与兖帅安审信杯酒相失为审信所劾责授太常少卿尝上言西台断狱淹滞吏因缘为奸望申条约以革其弊从之拜中门舍人契丹主北归胁令从行谷衣褐为行者匿僧舍中以免遂归汉为给事中干佑中奏罢常参官转对李崧为苏逢吉所恶惧移病不出谷每于稠人中诬之崧闻叹曰吾何负于陶氏子哉及崧遇祸族子昉尝诣谷谷问昉识李侍中否昉曰远从叔耳谷曰李氏之祸谷出力焉昉闻之汗出【按李崧为苏逢吉所陷事在后汉中非石晋时也宋史原文在与兖帅安审信相失句上前后倒置今移改】入周为右散骑常侍世宗即位迁户部侍郎从征太原时鱼崇谅迎母后至谷乘闲言曰崇谅宿留不来有顾望意世宗颇疑之崇谅又表陈母病诏许归陕州就养以谷为翰林学士迁兵部侍郎加承旨进吏部侍郎宋初转礼部尚书依前翰林承旨谷在翰林与窦仪不协仪有公望虑其轧已尝附宰相赵普与赵逢高锡辈共排仪仪终不至相位谷再为南郊礼仪使法物制度多所定尝属其子戡于考官奚屿鄙书不通以合格闻事发夺奉两月后累加刑部户部尚书开宝三年卒赠右仆射初太祖将受禅未有禅文谷在旁出诸怀中而进之曰已成矣太祖甚薄之尝自言头骨当戴貂蝉盖有意大用也人多笑之【按陶谷仕周位虽不显其袖出禅诏希图大用蓄志实不可问今并列于宋贰臣传末春秋之法义无可逃云尔】

钦定续通志卷六百八

●钦定续通志卷六百九 贰臣传四

贰臣传【四】

辽

○辽

赵延寿【子赞】

赵延寿

△赵延寿

赵延寿本姓刘恒山人父邠令蓀梁开平初沧州节度使刘守文陷蓀其裨将赵德

钩护延寿养为子德钧为唐卢龙节度使封北平王明宗以女妻延寿及即位封女为兴平公主拜延寿驸马都尉枢密使出为宣武军节度使清泰初加鲁国公复为枢密使镇许州石敬瑭发兵太原唐遣张敬达往讨败保晋安寨延寿从德钧往救屯围柏谷口按兵不战德钧累表为延寿求成德军节度使不从延寿乃诈云德钧遣使致书北国为唐结好说令引兵归国实别为密书厚以金帛赂太宗云若立己为帝请约为兄弟之国即以兵南平洛阳时太宗以己许晋却之及晋安已破兵至团柏谷德钧父子先遁太宗追及延寿与其父俱降【按赵延寿冀图自立其外降谋篡情事通鉴及契丹国志纪载甚详辽史本传失载今据二书参辑】明年德钧卒以延寿为幽州节度使封燕王及改幽州为南京迁留守总山南事天显末以延寿妻在晋诏取之以归由是益竭力图报会同初加政事令晋人之背盟也延寿觐代晋屡说太宗击之太宗曰得之当立汝为帝太宗亲征延寿为先锋下贝州授魏博等州节度使封魏王【按辽太宗本纪载下贝州事在会同七年延寿为魏博节度使亦在是时契丹国志又作八年事与传互异】败晋军于南乐次元城晋将李守贞高行周率兵逆战又破之至顿邱会大霖雨帝欲班师延寿谏曰晋军屯河演不敢出战若径入澶州夺其桥则晋不足平帝然之适晋军先归澶州高行周至析城延寿将轻兵逆战帝亲督骑士突其阵敌遂溃师还留延寿徇贝冀深三州八年再伐晋晋主遣延寿族人赵行实以书来招时晋人坚壁不出延寿给曰我陷虜久宁忘父母之邦若以军逆我即归晋人以为然遣杜重威率兵迎之延寿至滹沱河据中渡桥与晋军力战两军相拒太宗潜由他渡济留延寿与耶律双宽据桥敌不能夺屡败之杜重威遂以众降帝喜曰汉兵皆尔所有尔宜亲往抚慰太宗克汴殊无意立延寿延寿怏怏因李崧求为皇太子上曰吾于魏王虽割肌肉亦不惜但皇太子须天子子魏王崇得为也诏迁延寿秩翰林学士承旨张砺进拟中京留守大丞相录尚书事都督中外诸军事帝涂录尚书事都督中外诸军事太宗道崩延寿憾帝负约谓人曰我不复入龙沙矣伪称受太宗遗诏权知南朝军国事世宗镞之后二年卒【按世宗执延寿本传亦失载今据通鉴及契丹国志增辑】

赵子赞

赵子赞

子赞字符辅幼聪慧应神童举明宗特赐童子及第延寿出镇宣武军奏署牙内都校及延寿降契丹赞独与母公主留西洛契丹来取晋

祖命赞奉母归蓟门契丹既灭晋以赞为河中节度使延寿从契丹北归赞得留镇汉祖起晋阳赞奉表劝进加来校太尉仍镇河中改京兆尹徙镇晋昌赞惧汉疑已潜遣亲吏赵仙奉表归蜀判官李恕者本延寿宾佐深所委赖赞出镇从为上介至是语赞曰汉方建国必务怀柔公若泥首归朝必保富贵狼狽入蜀理难万全傥复不容后悔无及公能德纳请入朝为公申理赞即遣恕诣阙汉祖见恕问赞何以附蜀恕曰赞家在燕蓟身受契丹之命自怀忧恐谓陛下终不能容招引西军盖图苟免臣意国家甫定务安臣民所以令臣乞哀求覲汉祖曰赞之父子亦吾人也事契丹出于不幸今闻延寿落于陷穽吾忍不容赞耶恕未还赞已离镇入朝授左骁卫上将军周太祖即位为左右羽林左龙武三统军世宗南征初遣赞率师巡惊寿州城外俄命为淮南道行营左厢排阵使世宗归京师留赞与诸将分兵围寿春赞独当东面诸将战多不利赞独持重未尝挫衄又独以所部袭破吴骁将鲁公绾军世宗再征寿春命造桥涡口以通濠泗濠人谋焚其桥赞觇知设伏桥下号弩乱发杀获甚众世宗移兵趣濠赞亲攻城矢集于胄犹力战遂拔其羊马城又以所部兵巡抚滁和闲破吴人于石潭桥淮南平以功授保信军节度使恭帝即位加开府阶宋初加检校太师累镇忠正军建雄军为邠州路部署开宝二年太祖将讨晋阳又以为河东道行营前军马步军都虞候车驾薄城下赞扼其西偏并人乘晦日突门潜犯赞垒赞率众击退之矢贯足太祖劳问数四赐良药传之四年改镇鄜州太宗即位封卫国公太平兴国二年卒赠侍中【按赵赞为延寿子延寿终于辽赞终于宋两史各自列传故临文多异辞延寿以唐外戚官枢密身事二朝赞厯事五姓父既包藏祸心子实不能干蛊今依史例附入延寿传后盖迹虽异而其为贰则一也】

钦定续通志卷六百九

●钦定续通志卷六百十 贰臣传五

贰臣传【五】

金

○金

左企弓【泌】

虞仲文

曹勇义

康公弼

耶律怀义

萧仲恭

萧仲宣

张中孚

张中彦

左企弓【左泌】

虞仲文

曹勇义

康公弼

耶律怀义

萧仲恭

萧仲宣

张中孚

张中彦

△左企弓 【左泌】

左企弓字君财蓟人第进士为莱州观察判官萧英弼贼昭怀太子穷治党与多连引企弓辨析其冤免者甚众自御史知杂事出为中京副留守按刑辽阳有狱本轻而入之重者已奏待报企弓释之以闻累迁知三司使事天庆末拜广陵军节度使同中书门下平章事知枢密院事金兵已拔上京北枢密院恐忤旨不以时奏辽故事军政皆关决北枢密院然后奏御企弓以闻辽主曰兵事无乃非卿职邪对曰国势如此岂敢循例为自容计因陈守备策拜中书侍郎平章事辽主闻金巴克中京将西幸避之企弓谏不听乃自鸳鸯泺亡保阴山秦晋国王耶律曷唃自立于燕废辽主为湘阴王改元德兴企弓守司徒封燕国公虞仲文参知政事领西京留守同中书门下平章事内外诸军都统曹勇义中书侍郎平章事枢密使燕国公康公弼参知政事签枢密院事萧德妃摄政企弓加侍中太祖至居庸关萧妃自古北口遯去都监高六等送款太祖径至城下高六等开门待之太祖入城受降企弓等犹不知太祖驻蹕燕京城南企弓等奉表降太祖俾复旧职企弓守太傅中书令仲文枢密使侍中秦国公勇义以旧官守司空公弼同中书门下平章事枢密副使权知院事签中书省封陈国公辽致仕宰相张琳年高不能入见止令其子弟来上降表 【按琳既笃老家居降表不可以已乎是贰臣之尤可鄙者史于企弓传附见深为得之】 太祖既定燕从初约以与宋人企弓献诗略曰君王莫听捐燕议一寸山河一寸金太祖不听是时置枢密院于广宁府企弓等将赴广宁张觉在平州有异志太祖欲以兵送之企弓等辞曰如此是促之乱也及过平州舍于栗林下张觉使人俱杀之企弓谥恭烈天会七年赠太师济国公子泌瀛渊泌字长源仕辽官至棣州刺史太祖平燕泌从企弓归朝既而东迁至平州企弓为张觉所害泌复还燕时以燕与宋宣抚司遣至汴泌以仇人在平州乃闲道奔还朝廷嘉之擢西上合门使从宋王宗望南伐破真定有功知祁州厯刺泽隰等州贞元初累迁陕西路转运使封戴国公卒

△虞仲文

虞仲文字质夫武州宁远人第进士累仕州县以廉能称举贤良方正对策优等擢起居郎史馆修撰累迁太常少卿宰相有左降者仲文独出钱之或指以为党乃求养亲久之召复前职除中书舍人讨平白霫拜枢密直学士权翰林学士为翰林侍讲学士卒谥文正天会七年赠兼中书令

△曹勇义

曹勇义广宁人第进士除长春令枢府辟令史上书陈时政累迁枢密副都承旨权燕京三司使加给事中召为枢密副使加太子少保复出为三司使加宣政殿大学士卒谥文庄天会七年赠太保

△康公弼

康公弼子伯迪其先应州人家于燕之宛平第进士除著作郎武州军事判官辟枢府令史出为宁远令县中陨霜杀禾稼漕司督赋急系之狱公弼上书朝廷释之因免县中租赋县人为立生祠监平州钱帛库调役粮于川州大盗侯既陷川州使护送公弼出境曰良吏也权干州节度使卒谥忠肃天会七年赠侍中

△耶律怀义

耶律怀义辽宗室子以战功累迁同知点检司事宗翰已取西京辽主谋奔夏怀义谏不听乃窃取辽主厩马来降太祖自燕还师留宗翰翰鲁经略西方怀义领穆昆从军天会初为西南路招讨使易置新降诸部乃择冲要之地建城市通商贾诸部兵革之余人多匮乏自是衣食岁滋畜牧蕃息从宗翰伐宋进攻太原河东陕西路兵来救刘光世折可求栅于文水西山怀义分兵袭败之明年再伐宋从洛索取汾州及其属邑所至皆降及大军围汴怀义屯京西城既下宋兵之出奔者邀击尽之从攻郑邓濮大名东平徐兖诸州府皆有功七年还镇十年加尚书左仆射改西北路招讨仗怀义在西陲几十年抚御有恩及去老幼遮道攀恋数日不得发天眷初为太原尹改中京留守从宗弼过乌纳水还中京以老乞致仕不许改大名尹命不赴治所以以俸廉给之明年再诸老得谢给俸廉之半海陵即位封漆水郡王进封莘王又进萧王正隆例封景国公卒

△萧仲恭

萧仲恭祖托卜嘉仕辽为枢密使封兰陵郡王父特默为中书令尚主仲恭能被甲超橐驼辽故事宗戚子弟别为一班号孩儿班仲恭尝为班使辽帝西奔仲恭为护卫太保兼领军事至和洛达巴大军奄至仓卒走仲恭母马乏不能进谓仲恭兄弟曰汝等尽节国家无以我为也

仲恭母辽道宗季女也辽主伤之命弟仲宣留侍其母仲恭从而西时大雪寒甚辽主乏食仲恭进衣并干糒辽主困仲恭伏冰雪中辽主藉以稍憩凡六日乃至天德后与辽主俱获太宗以仲恭忠于其主特加礼待天会四年仲恭使宋且还宋人意仲恭耶律伊都皆有亡国之戚而伊都为监军有兵权可诱而用之乃以蜡丸书令仲恭致伊都使为内应仲恭素无反复志但恐宋人留不遣遂阳许还见宗望即以蜡丸书献之于是再举伐宋执二帝以归累迁右宣徽使改都点检宗盘以反罪诛仲恭卫禁有备以功加银青光禄大夫迁尚书右丞皇统初封兰陵郡王拜平章政事封济王诏葬辽豫王于广宁仲恭请往会葬熙宗义而许之改行台左丞相入为尚书右丞相拜太傅领三省事封曹王天德二年封越国王除燕京留守薨谥贞简正隆例隆王爵改郑国公

△萧仲宣

仲宣仲恭弟五岁遥授郡刺史累加太子少师辽主西奔为护卫太保辽主命留侍其母遂与其母皆见获太宗嘉之且谓仲宣能知辽国故事命权宣徽使从睿宗南伐皇统二年授镇国上将军历顺义永定昭义武宁四镇节度使为政平易吏不敢为奸贿赂禁绝奴婢入郡人莫识其面民皆德之正隆二年卒

△张中孚

张中孚字信甫其先自安定徙居张义堡父达仕宋至太师封庆国公中孚以父任补承节郎宗翰围太原达战歿中孚独率步卒十余人入大军中得其尸还累官知镇戎军兼安抚使累从吴玠张浚以兵拒大军浚走巴蜀中孚权帅事天会九年睿宗以左副元帅次涇州中孚降睿宗以为镇洮军节度使知渭州兼涇原路经略安抚使齐国建以什一法括民田籍丁壮为乡军中孚以为涇原地瘠无良田且保甲之法行之已习若遽纷更人必逃徙竟执不行天眷初为陕西诸路节制使知京兆府朝廷赐地江南中孚遂入宋宗弼再定河南诏尚书省移文宋人使归中孚至汴就除行台兵部尚书迁参知行台尚书省事明年拜参知政事贞元元年迁尚书左丞封南阳郡王三年以疾苦老为济南尹封宿王移南京留守又进封崇王卒加赠邓王正隆例降封崇公进原国公

△张中彦

中彦字才甫中孚弟以父任仕宋为涇原副将知顺德军事睿宗经略陕西中彦降累除彰武军承宣使本路兵马都总管秦凤平领兴元尹抚辑新附为经略使改涇原路经略使知平凉府朝廷以河南陕西地赐宋与兄中孚俱至临安被留以为龙神卫四厢都指挥使清远军承

宣使提举佑神观靖海军节度使皇统初恢复河南诏征中彦兄弟北归为静难军节度使累改彰德军节度使正隆营汴京新宫中彦采运关中材木青峰山巨木最多且阻绝不能致中彦使构崖驾壑起长桥十数里以车运木若行平地开六盘山水洛之路遂通汴梁明年作河上浮梁复领其役海陵将伐宋召赴阙授西蜀道行营副都统制使先取散关俟后命世宗即位赦书至凤翔诸将惶惑不能决去就中彦晓譬之诸将感悟受诏寻召入朝封宗国公进吏部尚书上疏曰古者关市讥而不征今使掌关市者征而不讥苛留行旅至披剔囊笥甚于剽掠有伤国体乞禁止从之踰年除南京留守时淮楚用兵士民与戍兵杂居讼谍纠纷所司皆依违不决中彦得么兵为盗者悉论如法帅府怒其专决劾奏之朝廷置不问秩满转真定尹兼河北西路兵马都总管未几致仕西归起为临洮尹兼熙秦路兵马都总管华州刘海构乱既败籍民之从乱者数千人中彦惟论者首者戮之西羌吹济雅密臧隆普滂巴四族恃险不服诏中彦方略中彦曰此羌服叛不常非中彦自行不可即至积石达南寺酋长四人来与之约降事定赏而遣之后加仪同三司卒

钦定续通志卷六百十

●钦定续通志卷六百十一 贰臣传六

贰臣传 【六】

元

元

明

○元

汪世显

张柔

刘整

汪世显

张柔

刘整

△汪世显

汪世显字仲明巩昌盐州人系出翁观族仕金屡立战功官至镇远军节度使巩昌便宜总帅【按虞集勋德录云巩昌汪氏统郡县数十胜兵数万号便宜总都统】金亡郡县望风款附世显独城守及皇子库腾驻兵城下始率众降皇子曰吾征四方所至皆下汝独固守何也对曰臣不敢背主失节耳又问金亡已久汝不降果谁为耶对曰大军迭至莫知适从惟殿下仁武不杀窃意必能保全阖城军民是以降承制仍旧官即从南征断嘉陵捣大安田杨诸蛮结阵迎敌宋将亦潜兵相为掎角世显单骑

突入杀数十人黎明大军四合杀其主将克武信进逼
资普军葭萌宋将依山为栅世显以数骑往夺之乘为定资州略嘉定峨眉进次开州时
方泥潦由闲道攀缘以达宋军屯万州南岸世显即水
北造船为疑兵夜从上游鼓革舟径渡袭破之宋师大扰追奔至夔峡过巫山与宋援军
遇斩获无算师还攻重庆会大暑乃引归覲太宗易其
名曰中山且历数其功世显谢曰此皆圣明福德所致臣何预焉辛丑蜀帅陈隆之贻书
请战声言有众百万皇子集诸将议之咸谓隆之可生
擒也世显曰顾临敌何如无庸夸辞为军薄户都隆之战屡却坚壁不出其部曲田显约
夜降【宋史陈隆之传作田世显】隆之觉之世显
曰事急矣亟梯城入救显与从者七十余人俱出遂斩隆之世显复简精锐五百人拔汉
州【按宋史隆之传世显械送隆之至汉州命谕守
臣降隆之呼语守臣毋降乃见杀元史本传斩隆之后始捣汉州与宋史异】累功拜便
宜都总帅秦巩等二十余州事皆听裁决未几卒中统
三年追封陇西公谥义勇武延佑七年加封陇右王子七人忠臣德臣直臣良臣翰臣佐臣
清臣佐臣歿于王事德臣良臣自有传

△张柔

张柔字德刚易州定兴人少尚气节善骑射以豪侠称金贞佑闲河忠盗起柔聚族
党保西山东流寨以自卫盗不敢犯中都经略使苗道
润承制授柔定兴令累迁青州防御使加昭毅大将军兼雄州管内观察使权元帅左都
监行元帅府事继而道润为其副贾瑀所杀瑀遣使修
好柔拒之卒为复讎适道润麾下何伯祥得道润所佩金虎符以献因推柔行经略使事
事闻诏为中都留守兼大兴府尹本路经略使行元帅
事【按金宣宗本纪及靖安民张甫传载苗道润死行省承制以李奇噜权中都路经略
使张甫与柔为副未几道润部下请以安民代领其
众乃以雄霸以东付奇噜易州以西付安民治之兴定四年安民方为其下所杀据此则
道润死后其众乃奇噜安民分领柔时未为经略且道
润死在兴定二年安民被害在四年亦非事闻即授也与传不合】太祖出兵紫荆口柔
率所部逆战于狼牙岭马蹶被执遂降太祖命为河北
都元帅柔招集部曲下雄易安保诸州次满城金真定帅武仙会兵数万来攻柔出奇兵
大破之乘胜下完州于是祈阳曲阳诸城寨皆降既而
中山叛柔引兵围之战于新乐流矢中颌折二齿柔拔矢以战遂拔中山仙复会兵攻满
城柔登城拒战复为流矢所中不为动开门突击仙败
走略地至鼓城单骑入城喻以祸福遂降之进克深泽宁晋安平棘藁城无极栾城诸
县辟地千余里由是深冀以北镇定以东诸城寨相继

降附一月闲凡与仙战捷十有七以功授河北东西等路都元帅号巴图尔燕帅展齐台
数凌柔柔不为下乃潜于中都行台言柔握兵柄威震
河朔后必难制行台遂幽柔土室展齐台施帐寝其上环以甲骑明日将杀之展齐台一
夕暴死柔乃得免金经略使固安王子昌善战柔出其
不意生擒之遣将分略郡邑玺书授柔行军千户保州等处都元帅丙戌遣将降李全于
益都丁亥移镇保州保数被兵火柔为经画尽善民赖
以安壬辰从睿宗伐金语其众曰吾用兵杀人多矣宁无冤者自今以往非与敌战誓不
杀也围汴柔军于城西北金兵屡出拒战柔单骑陷阵
金人莫能支金主自黄陵冈渡河欲取卫州柔以兵合击金主败走睢阳汴京下柔独入
史馆取金实录并秘府图书访求耆德及燕赵故族十
余家卫送北归围睢阳金主走汝南汝南恃柴潭为阻会宋孟珙以兵粮来会珙决其南
潭水涸抵其外郭金人惧启南门死战柔以步卒二千
余突其阵遣张信据其内隍诸军齐进金主自杀入朝太宗历数其功班诸帅上赐金虎
符升军民万户乙未从皇子克楚伐宋诏屯兵曹武道
出九里关柔欲率所部径往或言关甚险宋必设伏不若与大军俱进不听与二十骑直
前据关方解甲食宋兵出两山闲围数重骑皆失色柔
单骑驰突溃围大军继至遂达曹武悉下缘山诸堡已会诸军取光州进趣黄州破三山
寨攻其东门矢石雨注军少却柔率死士千余奋戈大
呼所向仆踏执俘而还宋师惧请和乃还大帅察罕攻滁州柔以二百骑往时庐泗沔
安丰闲宋屯戍相望柔且战且前至滁察罕以城久不
拔欲解去柔请决战既阵宋骁将出挑战柔佯却宋将骄柔驰及之槌击堕地宋将执柔
辔曳入其阵飞石中柔鼻两军哄柔得还裹疮复战夜
焚城东南隅柔先登拔之诏以本官节制河南诸翼兵马征行事庚子诏柔会八万户兵
伐宋柔率师自五河口济淮略和州诸城师还分遣部
将千人屯田襄城察罕奏柔总诸军镇■〈木巳〉初河决于汴西南入陈留分而为三
■〈木巳〉居其中潭宋兵恃舟楫之利驻亳泗犯汴
洛以扰河南柔即■〈木巳〉之东西中三山夹河顺杀水势筑连城结浮梁为进战退
耕计敌不敢至会诸军攻破寿州又败宋师于泗州帝
帐下吏瓜尔佳显祖得罪亡走上变诬柔执柔以北大臣多以阖门保柔者卒辨其诬得
释宪宗即位移镇亳州甃城壁为桥梁属汴堤以通商
贾复建孔子庙寻从世祖攻鄂州世祖出大胜关柔由虎头关会兵攻其城连旬不下柔
令何伯祥作鹅车洞掘其城别遣勇士先登攻其西南
隅屡破之会宪宗凶问至世祖北还命柔统领蒙古汉军以俟后命城白鹿矶为久驻计
世祖即位诏班师阿里克布克反世祖北征诏分其兵

三千五百卫京师以子弘庆入质柔献金实录于朝且请致仕封安肃公命第八子弘略袭职至元三年复命判行工部事城大都进封蔡国公卒赠太师开府仪同三司上柱国谥武康延佑五年加封汝南王谥忠武子十一人弘范自有传

△刘整

刘整字武仲邓州穰城人沈毅有智略金乱入宋隶荆湖制置使孟珙麾下珙攻金信阳整为前锋夜纵骁勇十二人渡堑登城袭擒其守累迁潼川十五军州安抚使知泸州军州事整以北方人扞西边有功南方诸将皆出其下吕文德忌之以俞兴与整有隙使制置四川以图整兴以军事召整不行遂诬构之整遣使诉临安不得达乃谋款附中统二年整籍泸州十五郡户三十万入附世祖嘉其来援夔府行省兼安抚使俞兴攻泸州整出宝器分士卒激使战败之复遣使请益屯兵厚储积为图宋计三年入朝授行中书省于成都潼川两路仍兼都元帅同列嫉整功将谋陷之整惧请分帅潼川乃改潼川都元帅宣课茶盐以饷军至元三年迁昭武大将军南京路宣抚使四年入朝进言宋主弱臣悖立国一隅今天启混一之机臣愿效犬马劳先攻襄阳撤其扞蔽廷议沮之整又曰自古帝王非四海一家不为正统圣朝有天下十七八何置一隅不问而自弃正统邪世祖曰朕意决矣迁镇国上将军都元帅偕都元帅阿珠督诸军围襄阳城鹿门堡及白河口为攻取计率兵五万钞略沿河诸郡筑实心台于汉水中流上置弩炮下为石囤五以扼敌船且与阿珠计曰我精兵突骑所当者破惟水战不如宋耳乃造船五千艘日练水军虽雨不能出亦画地为船而习之得练卒七万复筑外围以遏敌援宋都统张顺张贵驾轮船馈襄阳衣甲邀击斩顺进参知河南行中书省事加诸翼汉军都元帅襄阳帅吕文焕登城观敌整跃马前曰君昧于天命害及生灵非仁者而又齷齪不能战为勇者羞谓与君决胜负文焕不答伏弩中整九年破樊城外郭谍知文焕将遣张贵出城援乃分部战舰缚草如牛状傍汉水绵亘参错众莫测所用九月贵果夜出乘轮船顺流下走觚知之傍岸爇草牛如昼整与阿珠麾战舰转战五十里擒贵于柜门关尽歼其众宋授整为卢龙军节度使封燕王使永宁僧持告身金印牙符送整所期以闲整永宁令得之闻于朝敕张易姚枢杂问适整至自军言宋怒臣画策攻襄阳故设此以杀臣臣实不知诏令整复书谓宋若果以生灵为念当重遣信使请命朝廷顾为此小数何益时围襄阳已五年整计樊襄唇齿宜先攻樊城宋以械蔽城斩木列置江中贯以铁索整令善水者断木沈索督战舰趋城下以回鹘炮击之焚其栅遂攻樊

城屠之遣人入襄阳谕文焕乃以城降整入朝奏曰襄
阳破则临安摇矣若将所练水军乘胜长驱长江必非宋有遂改行淮西枢密院事驻正
阳夹淮而城南逼江断其东西冲进骠骑卫上将军行
中书左丞宋夏贵悉水军来攻破之于大人洲诏整别将兵出淮南整锐欲渡江丞相巴
延止之及闻巴延入鄂捷至整失声曰首帅止我顾使
我成功后人善作者不必善成果然一夕愤死赠龙虎卫上将军中书右丞谥武敏子垣
埏均垓垓官至都元帅 【按张柔以金都帅降元佐
元灭金刘整以宋宣抚使降元屡立战功至以不与灭宋发愤死委身二朝甘心反噬必
欲覆其国以为快是何心哉既失臣节复为祸首乃武
臣中之尤甚者也】

○明

危素

危素

△危素

危素字太朴金溪人少通五经游吴澄范梈门至正元年用大臣荐授经筵检讨修
宋辽金三史迁翰林编修累官工部侍郎转大司农丞
礼部尚书时乱将亟素每抗论得失十八年参中书省事请专任平章鼎珠总西方兵毋
迎帝师悞军事用布延布哈为参政经略江南立司农
宣抚使司以安畿内任贤守令以抚流窜之民且曰今日之事宜卧薪尝胆力图中兴寻
进御史台治书侍御史二十年拜参知政事俄除翰林
学士承旨出为岭北行省左丞言事不报弃官居房山素为人侃直数有建白上都宫殿
火敕重建大安睿思二阁素谏止之请亲祀南郊筑北
郊以斥合祭之失因进讲陈民闲疾苦诏为发钱粟振河南永平民淮南兵乱素往廉问
假便宜发楮币振维扬京口饥明师将抵燕淮王特穆
尔布哈监国复起为承旨素甫至明师入乃趋所居报恩寺入井寺僧挽起之曰国史非
公莫知公死是死国史也素遂止洪武二年授翰林侍
讲学士数访以元兴亡之故且诏譔皇陵碑文皆称旨顷之坐失朝被劾罢岁余复故官
兼弘文馆学士素居弘文馆一日帝御东阁闻履声帝
问为谁对曰老臣危素帝曰是尔耶朕将谓文天祥耳素惶惧顿首 【按明太祖云云素
在是时太祖已轻之矣明史本传不载此语今据明
史记事补辑】 会御史王着等论素亡国之臣不宜列侍从诏谪居和州守余阙庙岁余
卒

钦定续通志卷六百十一

●钦定续通志卷六百十二 奸臣传一

- 5731 -

奸臣传

（臣）等谨案唐以前各史于权奸之臣统归列传通志因之自新唐书始分许敬宗诸人别为奸臣传凡蠹国窃权僨轅阶乱之迹并以次胪叙厥后宋辽元史各有奸臣传使人晓然于奸慝之徒不独身罹祸谪败不旋踵即千秋万世不免斧钺之诛允足以儆官邪而垂炯戒揆诸史裁厘然有当今并仍各史与逆臣叛臣各为类传至五代史金史无奸臣传其一二大憝已列入叛逆此从其阙焉

唐【一】

○唐一

许敬宗 李义府 傅游艺 李林甫 陈希烈

许敬宗

李义府

傅游艺

李林甫

陈希烈

△许敬宗

许敬宗字延族杭州新城人父善心仕隋为给事中【旧书作礼部侍郎】敬宗幼善属文大业中举秀才调淮阳书佐俄直遏者台奏通事舍人事善心为宇文化及所杀敬宗哀请得不死去依李密为记室武德初补涟州别驾太宗闻其名召署文学馆学士贞观中除著作郎兼修国史喜谓所亲曰仕宦不为著作无以成门户俄改中书舍人文德皇后丧羣臣哀服率更令欧阳询貌丑敬宗见而大笑被劾贬洪州司马累转给事中复修国史以劳封高阳县男检校黄门侍郎高宗在东宫迁太子右庶子高丽之役太子监国定州敬宗与高士廉典机要岑文本卒帝驿召敬宗以本官检校中书侍郎驻蹕山破贼命草诏马前以词藻见赏由是专掌诰令初太子承干废官属皆除名敬宗表言张元素令狐德棻赵宏智裴宣机萧钧等并砥节励操有雅望今一槩被罪疑洗宥有所未至帝悟多所甄复高宗即位迁礼部尚书敬宗饗沓以女嫁蛮酋冯盎之子多纳金宝初劾下除郑州刺史俄复官为弘文馆学士帝将立武昭仪大臣切谏敬宗与李义府阴揣帝旨赞成之王后废敬宗皆削后家官爵废太子忠而立代王遂兼太子宾客顷拜侍中监修国史爵郡公进中书令敬宗以立后有助力欲倚后以固宠乃阴连后谋逐韩瑗来齐褚遂良杀梁王长孙无忌上官仪威宠炽灼当时莫与亢改右相辞疾拜太子少师同东西台三品年老不任趋步特诏与司空李绩

朝朔日听乘小马至内省初高祖太宗实录敬播所撰信而详及敬宗掌国史窜改不平
专出己私始虞世基与善心同遭贼害封德彝常曰昔
吾见世基死世南匍匐请代善心死敬宗蹈舞求生世为口实敬宗衔愤至立德彝传盛
诬以恶敬宗子娶尉迟敬德女孙 【旧书大唐新语
并作敬德字宝琳孙女】 而女嫁钱九陇子九陇本高祖隶奴也为虚立门阀功状至与
刘文静等同传太宗赐长孙无忌威凤赋敬宗猥称赐
敬德蛮酋庞孝泰从讨高丽贼袭破之敬宗受其金乃称屡破贼其虚美隐恶类如此敬
宗贪淫僭侈至造连楼置诸奴走马其上纵酒奏乐自
娱嬖其婢以为继室假姓虞子昂烝之敬宗怒黜虞奏斥昂岭外久乃表还咸亨初以特
进致仕卒帝为举哀赠开府仪同三司扬州大都督陪
葬昭陵太常议谥博士袁思古曰敬宗弃子荒徼嫁女蛮落当谥曰繆其孙彦伯诉思古
有嫌诏更议太常博士王福峙曰何曾忠而孝以日食
万钱谥丑繆况敬宗忠孝两弃饮食男女之累又过之乎执不改有诏尚书省杂议更谥
曰恭彦伯昂子也颇有文敬宗末年文笔多彦伯为之
又纳婢譖奏流岭表遇赦还累官太子舍人

△李义府

李义府瀛州饶阳人其祖为射洪丞因家永泰贞观中李大亮巡察剑南表义府才
对策中第补门下省典仪刘洎马周更荐之太宗召见
转监察御史诏侍晋王王为太子除舍人崇贤馆直学士与司议郎来济俱以文显尝献
承华箴末云佞谀有类邪巧多方其萌不绝其害必彰
义府方谄事太子而文若说直者太子表之优诏赐帛高宗立迁中书舍人兼修国史进
弘文馆学士为长孙无忌所恶奏斥壁州司马诏未下
义府用许敬宗甥舍人王德俭计夜叩阁上表请废后立武昭仪帝悦召见与语赐珠一
斗停司马诏书武后已立义府与敬宗德俭及御史大
夫崔义元中丞袁公瑜大理正侯善业相推毂济其奸诛弃骨鲠大臣故后得肆志攘取
威柄天子敛衽矣义府貌柔恭而阴贼褊忌忤意者皆
中伤之时号笑中刃又以柔而害物号曰李猫永徽六年拜中书侍郎同中书门下三品
【按新书纪表皆作参知政事与本传异】 封广平
县男又兼太子右庶子爵为侯洛州女子淳于氏以奸系大理义府闻其美属寺丞毕正
义出之纳以为妾大理卿段宝元以状闻诏给事中刘
仁轨等鞠治义府且穷逼正义缢狱中以绝始谋侍御史王义方极陈其恶帝阴德义府
贷不问贬义方莱州司户未几进义府中书令检校御
史大夫加太子宾客更封河闲郡公诏造私第诸子虽裸负皆补清官初杜正伦为黄门
侍郎义府纒典仪及是同辅政正伦恃先进不相下密

与中书侍郎李友益图去义府反为所诬帝两黜之正伦为横州刺史义府普州刺史流友益峰州明年召为吏部尚书同中书门下三品母丧免夺丧为司列太常伯同东西台三品更葬其先永康陵侧役三原牛车输土筑坟助役者凡七县高陵令不胜劳而死公卿争赙遗其羽仪导从輶輶器服并穷极僭侈而会葬车骑祖奠供帐自濡桥属三原七十里不绝殷王出阁又兼府长史稍迁右相义府已贵乃言系出赵郡与诸李叙昭穆嗜进者往往尊为父兄行给事中李崇德引与同谱既谪普州亟削去义府衔之及复当国傅致其罪使自杀于狱初贞观中高士廉等修氏族志天下允其议于是州藏副本以为长式时许敬宗以不载武后本望义府亦耻先世不见叙更奏删正委孔志约等定其书以仕唐官至五品皆升士流于是兵卒以军功进者悉入书限更号姓氏录奏悉收前志烧绝之既主选无品鉴才惟贿是利人多怨讪又母妻诸子卖官市狱门如沸汤帝颇知其罪尝从容戒义府曰闻卿儿子女婿挠法多过失可少勸之义府勃然变色徐曰谁为陛下道此帝曰何用问我所从得邪义府警然不谢徐引去帝由是不悦会术者杜元纪为义府望气云所居第有狱气发积钱二千万可以厌胜义府信之哀索殊急居母丧朔望给告辄微服与元纪出野凭高窥覘灾眚众疑其有异谋又遣子津召长孙延索钱七十万为授司津监右金吾仓曹参军杨行颖白其赃诏司刑太常伯刘祥道与三司噪声李绩监按有状诏除名流儻州子津流振州洽洋及婿柳元贞并流延州朝野相贺干封元年大赦独流人不许还义府愤恚死自其斥天下忧且复用比死内外乃安

△傅游艺

傅游艺卫州汲人载初初由合宫主簿再迁左补阙帅关中百姓九百余人诣阙上表请后改国号曰周赐皇帝姓武氏【据通鉴增辑】后说擢给事中于是百官宗室百姓合释道六万余人俱上表如游艺所请后乃黜唐称周废唐宗庙自称皇帝赐游艺姓武氏阅三月进同凤阁鸾台平章事即拜鸾台侍郎期年中历衣青绿朱紫人号四时仕宦游艺尝梦登滋露殿既寤以语所亲为其所告下狱自杀初游艺采后皆诬杀宗室复请发六道使后卒用其言而万国俊等出天下被其酷矣

△李林甫

李林甫小字哥奴长平肃王叔良曾孙初为千牛直长舅姜皎爱之开元初迁太子中允源干曜执政与皎为姻家而干曜子絜为林甫求司门郎中干曜素薄之曰郎官应得才望哥奴岂郎中材耶授以谕德累擢国子司业宇文融为御史中丞引与同列稍历刑吏二部侍郎时武

惠妃宠倾后宫子寿王盛王尤爱林甫因中人白妃愿护寿王为万岁计妃德之侍中裴光庭卒林甫觐代为相而帝因萧嵩言自用韩休林甫闻便为休请【按旧书作方草诏时力士漏言于裴光廷妻武氏武氏与林甫私乃令林甫白休休既相甚德林甫云云所载与此互异】休既相重德林甫而与嵩有隙乃荐林甫有宰相才妃阴助之既拜黄门侍郎寻为礼部尚书同中书门下三品再进兵部尚书初帝之在藩也赵丽妃生太子瑛皇甫德仪生鄂王瑶刘才人生光王琚及即位幸武惠妃丽妃等爱皆弛太子与瑶琚各以母失职有怨望语驸马都尉杨洄尚惠妃女咸宜公主常伺三子过失以告惠妃惠妃泣诉于帝曰太子阴结党与将害妾母子亦指斥至尊帝大怒欲皆废之张九龄曰陛下享国长久子孙蕃昌天下方为庆幸今三子不闻大过柰何一旦以无根之语尽废之乎且太子天下本不可轻摇陛下必欲为此臣不敢奉诏帝不悦林甫初无所言退而私谓宦官之贵幸者曰此主上家事何必问外人帝犹豫未决惠妃密使宫奴牛贵儿谓九龄曰有废必有兴公为之援宰相可长处九龄叱之以其语入奏帝为之动容故讫九龄罢相太子得无动而林甫阿附惠妃日夜短九龄于帝帝浸疏之【据通鉴增辑】始九龄繇文学进守正持重而林甫特以便佞得大任帝欲进朔方节度使牛仙客实封九龄要林甫固争林甫然许及进见九龄极论而林甫抑嘿退又漏其言仙客明日仙客见帝泣且辞帝滋欲常之九龄持不可林甫为人言天子用人何不可者帝闻善林甫不专也由是益疏薄九龄俄与裴耀卿俱罢政事专任林甫相仙客矣于是林甫进兼中书令帝卒用其言杀三子天下冤之大理卿徐峤妄言刑部断死岁纔五十八乌鹊巢狱户几至刑措羣臣贺帝推功大臣封林甫晋国公仙客豳国公及帝将立太子林甫探帝意数称道寿王语秘不传而帝意自属忠王寿王不得立太子既定林甫恨谋不行且畏祸乃阳善韦坚坚太子妃兄也使任要职将覆其家以摇东宫及构坚狱而太子绝妃自明林甫计黜杜良娣之父有邻与壻柳绩不协绩浮险欲助林甫乃上有邻变事捕送诏狱赐死逮引裴敦复李邕等皆林甫素忌恶者株连杀之太子亦出良娣为庶人未几曠济阳别驾魏林使诬河西节度使王忠嗣欲拥兵佐太子帝不信然忠嗣犹斥去林甫数白太子宜知谋帝曰吾儿在内安得与外人通此妄耳林甫数危太子未得志一日从容曰古者立储君必先贤德非有大勋力于宗社则莫若元子帝久之曰庆王往年猎为豹伤面甚答曰破面不愈于破国乎帝颇惑之然太子自以谨孝闻内外无悞言故飞语不得入时帝春秋高听断稍怠厌绳检重接对大臣

及得林甫任之不疑林甫善养君欲自是帝深居燕适沈湎衽席主德衰矣林甫每奏请必先饷遗左右审伺微旨故天子动静必得性阴密忍
诛杀面柔若可亲而崖竅深阻卒不可得也公卿不由其门必被罪附离者虽厮役且为引重同时相若九龄李适之皆遭逐至杨慎矜张瑄卢
幼临柳升等缘坐数百人并相继诛以王錡吉温罗希奭为爪牙数兴大狱衣冠累息适之子霁尝召宾客皆畏林甫无一人往者林甫有堂如
偃月号月堂每欲排构大臣即居之思所以中伤者喜而出即其家碎矣时帝诏天下士有一艺者得诣阙就选林甫恐士对诏或斥已即建言
士皆草茅未知禁忌徒以狂言乱圣听请悉委尚书省长官试问使御史中丞监总而无一中程者林甫因贺以为野无留才俄兼陇右河西节
度使改右相罢节度累加开府仪同三司实封户三百咸宁太守赵奉璋得林甫隐恶二十条将言之林甫讽御史捕系奉璋劾妖言抵死于时
有以材誉闻者林甫皆能得于天子抑远之故独专恩宠凡御府所贡远方珍鲜使者传赐相望尝诏百僚阅岁贡于尚书省既而举贡物悉赐
林甫辇致其家从幸华清宫给御马武士百人女乐二部薛王别墅胜丽甲京师以赐林甫他邸第田园水碓皆便好上腴车马衣服侈靡尤好
声伎侍姬盈房自以结怨者众忧刺客窃发其出入广驺骑金吾为清道公卿辟易所居重关复壁一夕再徙家人亦莫知也或帝不朝羣司要
官悉走其门台省为空久之又兼安西大都护朔方节度使俄兼单于副大都护以朔方副使李献忠反让还节度举安思顺以自代初杨国忠
登朝林甫薄其才不之忌之以贵妃故善之及是权益盛贵震天下始交恶若仇敌然国忠方兼剑南节度使而南蛮入寇林甫因建言遣之镇
欲离闲之国忠入辞帝曰处置且讫亟还指日待卿林甫闻之忧懣是时已属疾会帝辛温汤诏以为鬻从病益剧俄而国忠至自蜀谒林甫床
下垂涕托后事因不食卒诸子护柩还京赠太尉扬州大都督林甫居相位十九年固宠市权蔽欺天子谏官皆持禄养资无敢正言者补阙杜
璿再上书言政事斥为下邳令因以语动其余曰明主在上羣臣将顺不暇亦何所论君等独不见立使马乎终日无声而饫三品刍豆一鸣则
黜之矣后虽欲不鸣得乎由是谏争路绝贞观以来任蕃将者如阿史那杜尔契苾何力皆以忠力奋然犹不为上将皆大臣总制之故上有余
权以制于下先天开元中大臣若薛讷郭元振张嘉贞王峻张说萧嵩杜暹李适之等皆自节度使入相林甫疾儒臣以方略积边劳且大任欲
杜其本以久已权即说帝曰文吏为将怯当矢石不如用蕃将彼生长行阵天性然也帝然之因以安思顺代林甫领节度而擢安禄山高仙芝

哥舒翰等专为大将林甫利其不识文字无入相之资故禄山得专三道劲兵处十四年不徙卒称兵荡覆天下唐室遂微国忠素衔林甫及未葬阴讽禄山使阿布思降将告林甫与阿布思约为父子同构逆谋事下有司其壻杨齐宣惧妄言林甫厌呪上国忠劾其奸帝怒诏悉夺官爵斲棺剔取含珠金紫更以小槽用庶人礼葬之诸子■〈山上罍下〉岫岫等悉徙岭南黔中籍其家至德中两京平大赦唯禄山支党及林甫杨国忠王鋁子孙不原

△陈希烈

陈希烈者宋州人博学尤深黄老工文章开元中帝留思经义自褚无量元行冲卒而希烈与康子元冯朝隐常进讲禁中累迁中书舍人十九年为集贤院学士进工部侍郎知院事帝有所譔述希烈必助成之选门下侍郎俄兼崇玄馆大学士封临颖侯李林甫颺朝以希烈柔易且帝眷之厚乃引与甘政进同中书门下平章事迁左丞相兼兵部尚书许国公又兼秘书省图书使宠与林甫侔林甫居位久甚阴诡虽足自固亦希烈左右焉杨国忠执政素忌之即荐韦见素代相罢希烈为太子太师希烈失职颇怏怏及禄山盗京师遂与达奚珣等皆相贼后论罪当斩肃宗以上皇素遇赐死于家

钦定续通志卷六百十二

●钦定续通志卷六百十三 奸臣传二

奸臣传

唐【二】

○唐二

卢■〈木巳〉 崔昭纬 崔胤 柳璨【庄玄晖 张廷范 氏叔琮 朱友恭】

卢■〈木巳〉

崔昭纬

崔胤

柳璨【庄玄晖 张廷范 氏叔琮 朱友恭】

△卢■〈木巳〉

卢■〈木巳〉字子良宰相怀慎之孙父奕见忠义传■〈木巳〉有口才面蓝色陋甚不耻恶衣菲食人未识其心谓有祖风以荫为清道率府兵曹参军仆固怀恩辟首方府掌书记病免补鸿胪丞出为忠州刺史谒荆南节度卫伯玉伯玉不悦移病归京师稍迁吏部郎中为虢州刺史奏言虢有官家三千为民患德宗曰徙之沙苑■〈木巳〉曰同州亦陛下百姓

臣谓食之便帝曰守虢而忧宅州宰相材也诏以豕赐
贫民遂有意柄任矣俄召为御史中丞论奏无不合踰年迁大夫不阅旬擢门下侍郎同
中书门下平章事既得志险贼寢露妬贤嫉能小忤己
辄傅死地杨炎与■〈木巳〉俱辅政炎鄙■〈木巳〉才下不悦未半岁■〈木巳〉
谮罢炎大理卿严郾与炎有隙即擢郾御史大夫以自
助炎卒逐死心又恶郾宰相张镒忠正有才帝所倚信■〈木巳〉忌之会陇右用兵
■〈木巳〉伪请行帝不可即荐镒守凤翔时幽州朱滔
与泚有违言诬其军司马蔡廷玉离闲请杀之俄滔反帝欲斥之以悦滔下御史郑詹按
状贬柳州司户参军敕吏护送廷玉疑送滔所因自沈
于河■〈木巳〉奏恐泚疑为诏所杀愿下詹三司杂治并劾大夫郾有诏詹杖死流郾
费州【旧书作贬郾驩州】杜佑判度支帝尤宠礼
■〈木巳〉短毁百绪贬苏州刺史【旧书作贬饶州】李希烈反■〈木巳〉素恶
颜真卿挺正敢言即令宣慰其军卒为贼害故相李揆
有雅望畏复用遣为吐蕃会盟使卒于行其阴险贼害如此时兵屯河南北财用日急度
支条军所仰给月费缗百余万而藏钱纔支三月■〈
木巳〉乃以户部侍郎赵赞判度支其党韦都宾等建言商贾储钱千万听自业过千万
者贷其赢以济军军罢约取偿于官帝许之京兆督责
颇峻大搜廛里疑其不实则笞掠之人不胜冤自缢死者相望京师嚣然如被盗贼然悉
富户田宅奴婢之直缗止八十万又僦质舍居贸粟
者四贷其一仅至二百万而长安为之罢肆民皆邀宰相祈诉■〈木巳〉无以论驱而
去帝知民愁忿而所得不足给师罢之赞术穷于是闲
架除陌之暴纵矣其法屋二架为闲差税之上者二千中千下五百吏执筹入第舍计之
隐者抵罪告者以钱五万畀之凡公私贸易旧法率千
钱算二十请加五十主佞注所售人其算有司其私相市者验其私籍其有隐率千钱没
二万告者以万钱畀之由是主佞得操其私以为奸公
上所入常不得半而怨声满天下及泾师乱呼于帝曰不夺而商人僦质矣不税而闲架
除陌矣其倡和造作以召怨挺乱皆■〈木巳〉为之
帝出奉天■〈木巳〉与关播从后数日崔宁自贼中来以播迁事指■〈木巳〉■〈
木巳〉即诬宁反帝杀之灵武杜希全率盐夏二州士
来赴帝议所从道■〈木巳〉请道漠谷浑瑊曰彼多险且为贼乘不如道干陵北踰鸡
子堆而屯与为掎角贼可破矣帝从■〈木巳〉议贼
果拒益兵不得入奔还邠州李怀光自河北还数破贼泚解去或谓王翊赵赞曰闻怀光
尝斥宰相谋议乖方度支赋敛烦重京兆刻损军粮乘
輿播迁三人之罪也今怀光方有功上必听用其言公等殆矣二人以白■〈木巳〉

■ 〈木巳〉 惧即奏曰怀光勋在宗社贼徒破胆若许来

朝则犒赐留连贼得为完守计图之实难不如乘胜使收京师破竹之势不可失也帝然之诏怀光无朝怀光自以千里勤难有大功为奸且沮

闲不一见天子内怏怏遂谋反因暴言杞等罪恶士议哗涕皆相目杞帝始寤贬为新州司马始帝即位以崔佑甫为相专以道德导主意故建

中初政赫然有贞观风及杞相乃讽帝以刑名绳天下乱政踵及国屯主辱犹警然肆为之后虽斥然帝念之不衰遇赦徙吉州长史贞元元年

诏拜饶州刺史给事中袁高不肯草诏宰相不悦乃召它舍人作制高固执不得下于是谏臣赵需裴佶宇文炫卢景亮张荐等众对极言杞罪

其言恳到乃诏为澧州别驾死于贬所初尚文郭子仪病甚百官造省不屏姬侍及杞至则屏之隐几而待家人怪问其故子仪曰彼外陋内险

左右见必笑使后得权吾族无类矣

△崔昭纬

崔昭纬字蕴曜清和人及进士第昭宗时以户部侍郎同中书门下平章事居位八年累进尚书右仆射性险刻密结中人外连强诸侯内

制天子以固其权令族人铤事王行瑜邠宁幕府每朝廷建议有不便于己必使铤密告行瑜使上书訾讦而已阴助之始帝委杜让能调兵食

以讨凤翔昭纬方倚李茂贞行瑜为重阴得其计则走告之激使称兵向阙遂杀让能后又导三镇兵杀韦昭度等帝不能堪会诛行瑜乃罢昭

纬为右仆射复请朱全忠荐己又厚赂诸王为所奏贬梧州司马下诏条其五罪赐死行次江陵使者至斩之铤亦诛

△崔胤

崔胤字昌遐 【原作字垂休按通鉴及旧书俱作字昌遐今据改】 宰相慎由子也擢进士第累迁中书舍人御史中丞喜阴计附离权

强外若简重而中险谲可畏崔昭纬屡荐之由户部侍郎同中书门下平章事及昭纬以罪诛罢为武安节度使陆扆当国时唐室不竞南北司

各树党结藩镇内相陵胁胤素厚朱全忠委心结之全忠为言胤有功不宜处外故还相而逐扆北化初召宗至自华务安反侧而胤阴为全忠

地俾擅兵四讨帝丑其行罢为吏部尚书复倚扆以相会清海无帅因拜胤清海节度使初王抟等发昭纬罪胤坐罢内衔之既与抟同相胤议

悉去中官抟不为助及是不欲外除即漏其语于全忠令露劾抟交敕使共危国罪当诛胤次湖南召还守司空门下侍郎平章事兼领度支盐

铁户部使而赐抟死并诛中尉宋道弼景务修繇是权震天下刘季述幽帝东内奉德王监国畏全忠强虽深怨胤不敢杀胤趣全忠以师西问

季述罪全忠乃使张存敬攻河中掠晋绛神策军大将孙德昭常忿阉尹废辱天子胤令判官石戡与游乘闲伺察德昭饮酣必泣胤揣得其情乃使戡说曰自季述仲先废天子武夫义臣莫不愤惋君乘此诛二竖复天子以立功名今其时也即不早计将有先之者德昭感悟乃告以胤谋德昭许诺胤割带为誓及季述仲先诛以功进司徒【旧书作司空】不就复辅政并还使领帝德之延见或以字呼之宠遇无比时中尉韩全海等颛横胤请尽诛之不得乃诒书全忠趣令入朝天复元年全忠悉师而西进逼同华全海以胤交结全忠白罢政事因挟帝幸凤翔胤怨帝见废不肯从召全忠以兵迎天子令太子太师卢渥【旧书作卢知猷】率羣臣迎全忠始全忠至华遣幕府裴铸奏事帝不得已听来朝至是胤为之谋乃以兵迫行在帝下诏趣还镇因诏遣渥等俱西全忠上表具言向书诏皆出宰相乃今知非陛下意为所诿误师业入关请得与李茂贞约释憾以迎乘輿帝见全忠表亦大恚因下诏显责之以工部尚书罢知政事胤出居华州为全忠数画丑计二年全忠引兵还屯河中胤迎谒渭桥奉觞为全忠寿自歌以酹酒三年茂贞杀全海等与全忠约和帝急召之墨诏者四朱札三皆辞疾及帝出凤翔幸全忠军乃迎谒于道复拜平章事进位司徒兼判六军诸卫事胤遂奏高祖太宗无内侍典军天宝后宦人寢盛德宗分羽林卫为左右神策军令宦者主之以二千人为率其后参掌机密至内务百司悉归中人共相弥缝为不法朝廷微弱祸浆于此请罢左右神策内诸司使诸道监军于是中外宦官悉诛帝在凤翔以卢光启苏检为相胤皆逐杀之分斥从幸近臣陆扆等三十余人惟裴贽孤立可制留与秉攻帝动静一决于胤无敢言者胤议以皇子为元帅全忠副之示褒崇其功全忠内利辉王冲幼故胤藉以请帝曰濮王长若何还禁中召翰林学士韩偓以谋偓阴佐胤卒不能却全忠东还至长乐羣臣班辞胤独至霸桥置酒乙夜乃还进侍中魏国公自凤翔还揣全忠将篡夺恐祸及己欲握兵自固谬谓全忠曰京师迫茂贞不可无备须募兵以守今左右龙武羽林神策播迁之余无见兵请军置四部将将二百五十人一骑将将百人使番休递侍以京兆尹郑元规为六军诸卫副使陈班为威远军使募卒于市全忠知其意阳相然许胤乃毁浮图取铜铁为兵使全忠阴令汴人数百应募以其子友伦入宿卫会为球戏坠马死全忠疑胤阴计大怒时傅胤将挟帝幸荆襄而全忠方谋胁乘輿都洛惧其异议密表胤专权乱国请诛之即罢为太子少傅全忠令其子友谅以兵围开化坊第杀胤元规班等皆死实天复四年正月也胤罢凡三日死死十日全忠胁帝迁洛发长安居

人悉东彻屋木自渭循河下老幼系路啼号不绝皆大骂曰国贼崔胤导全忠卖社稷使我及此先是全忠虽据河南顾强诸侯相持未敢移国及胤开内隙与相结得梯其祸取朝权以成强大与盗合从覆仁宗社身屠族灭固其宜也【谨按通鉴辑览 御批司马光苏轼皆以汉唐之亡后先同辙亦就其大诛宦官一节而言耳然袁崔二人心迹则有不可同日语者绍很悛好胜其才尚足有为其召卓也未尝不思用其力而后除之迨鸣鼓洛阳尾大不掉则非其所逆料止快一朝之忿而不计他日之患诚所谓恶垢焚衣因愤决痲者若朱温逆节久着即不招之使来且有岌岌之势昌遐复从而足之彼既素党逆温知其为贼而曲意相徇第欲藉其声援以夺北寺重权遂置朝廷颠覆于不问非惟引寇之罪实用卖国之心是春秋大义所必诛者岂得与本初鹵莽仅致失算相提并论哉】

△柳璨【庄玄晖 张廷范 氏叔琮 朱友恭】

柳璨字照之公绰族孙为人鄙野其家不以诸宗齿少孤贫好学昼采薪给费夜然叶昭书强记多所通涉讥词刘子玄史通着析微时或称之光化中登进士颜尧判史馆引为直学士由是益知名迁左拾遗昭宗好文或荐璨才召见试以诗帝称善擢翰林学士崔胤死之夕昭宗密许璨宰相外无知者明日遂以谏议大夫同中书门下平章事任用之速古所未有张枢烛孤慎崔远皆宿望旧臣与同位颇轻之璨内以为怨朱全忠图篡宿卫士皆汴人璨厚相结又与蒋玄晖张廷范相得故朝权皆归之建中书侍郎判户部封河东县男天佑二年长皇出太微文昌闲占者曰君臣皆不利宜刑杀以应天变玄晖廷范乃与璨谋杀大臣有宿望者璨手疏所仇娼若独孤损等二十余人皆诛死天下称冤全忠亦恶之其后议加全忠九银宣徽北院使王殷构璨玄晖等欲延唐祚故逗遛其事全忠大怒璨惧胁哀帝曰人望归元帅矣陛下宜揖让以授终遂拜璨司空为册礼使即日进道柔玄晖死而全忠恚璨背已贬登州刺史俄除名流崖州寻斩之临刑悔咤曰负国贼柳璨死宜犬弟瑊瑒皆榜死玄晖者少贱不得甚系事朱全忠为腹心全忠胁帝东迁玄晖为枢密使帝度全忠必篡命卫官高瓌持帛诏告王建令与茂贞克用行密同盟传檄襄魏幽镇以图匡复又诏全忠后方娠须十月乃东全忠知帝有谋遣寇彦卿趣迫帝不得已遂行抵谷水全忠尽杀左右黄门内园小儿五百人悉以汴兵为卫帝自出关畏不测常默坐流涕玄晖与张廷范内词必以告全忠全忠恨帝无传禅意乃谋弑之以绝人望因令其属李振谕玄晖玄晖与龙武统军朱友恭氏叔琮夜选勇士百人叩行在言有急奏

请见帝宫门开门留十士以守至椒兰院中夫人裴贞一启关杀之玄晖问上安在昭仪季渐荣曰院使毋伤宅家宁杀我士持剑入帝闻遽起单衣环柱走遂弑之渐荣以身蔽帝亦死复执后后求哀玄晖以全忠所欲杀者帝也乃释后明日玄晖矫遗诏言帝为贞一渐荣所弑出二人首全忠自河中来朝振曰晋文帝弑高贵乡公归罪成济今宜诛友恭等解天下谤全忠趋西内临对嗣天子自言弑逆非本谋皆友恭等罪因泣下请讨罪人执友恭叔琮斩之全忠邀九锡怒玄晖沮其事矫诏收付有司斩之贬为凶逆百姓焚尸都门外廷范者以优人为全忠所爱扈东迁为御营使进金吾卫将军河南尹全忠欲以为太常卿宰相裴枢持不可繇是枢罢去柳璨希旨下诏责中外不得妄言流品清浊卒用廷范太常卿会天子将郊以为修乐县使又与苏楷等驳昭宗谥全忠怒九锡稽缓王殷譖其与璨等祀天祈延唐祚及玄晖死璨诛即贬廷范莱州司户参军轘于河南市叔琮亦汴州人中和末隶感化军以骑士畜性沈壮有胆力从全忠击黄巢陈许闲名右诸将以功累表检校尚书右仆射为宿州刺史攻赵匡凝于襄阳不克又与李克用战洹水迁曹州刺史天复初拔泽潞击太原授晋慈观察使全忠屯凤翔克用袭绛州攻临汾叔琮选二壮士类沙陀者牧马于原与克用军偕行伺隙各禽一人还克用大惊疑有伏遂退屯蒲会朱友宁以兵三万【五代叔琮传作友宁兵万人】来援友宁欲休兵叔琮曰敌闻救至必走何以立功乃潜师夜击进破其垒俘斩万杀收马三千遂长驱取汾州转战薄太原而还迁检校司空再进为保大军节度使全忠欲迁帝于洛表为右龙武统军与朱友恭等弑帝全忠归罪叔琮等以自解贬为白州司户参军寻赐死友恭者本李彦威也寿州人客汴州殖财任侠全忠爱之畜为子积功表为检校尚书左仆射干宁中援汝州刺史检校司空杨行密侵鄂州友恭将兵万余援杜洪至江州还攻黄州入之获行密将俘斩万计又袭安州杀守将迁颍州刺史感化军节度留后帝东迁为左龙武统军与弑帝贬崖州司户参军临刑大呼曰朱温卖我以塞谤【按通鉴及五代史载临刑呼朱温卖我者李彦威也本传误为氏叔琮事今据改】当亦灭族又语张廷范曰公行及此云

钦定续通志卷六百十三

●钦定续通志卷六百十四 奸臣传三

奸臣传

宋【一】

○宋一

蔡确【吴处厚】

邢恕

吕惠卿

章惇

曾布

安惇

蔡确【吴处厚】

邢恕

吕惠卿

章惇

曾布

安惇

△蔡确【吴处厚】

蔡确字持正泉州晋江人有智数尚气不谨细行第进士调邠州司理参军以贿闻转运使薛向行部欲按治见其仪观秀伟与语奇之更加延誉韩绛宣抚陕西见所制乐语以为材荐于弟开封尹维辟管干右厢公事维去而确至后尹刘庠责令庭参确曰唐藩镇自置掾属故有是礼今鞶毂下比肩事王虽故事不可用遂乞解职王安石悦其强荐为三班主簿调监察御史里行王韶开熙河多贷公钱秦帅郭逵劾其罪诏使杜纯鞫治得实安石却其牒更遣确确帝意直韶逵纯获谴确善观入主意与时上下知神宗已厌安石即论安石乘马入宣德门与卫士竞以贾直加直集贤院迁御史知杂事范子渊浚河之役知制诰熊本按行以为非是为子渊所讼确劾本黜之代为知制诰开封鞫相州民讼事连判官陈安民安民令其甥文及甫求援于吴充之子安持及甫充壻也确言事关大臣非开封可了遂移御史台时皇城司奏狱事以中丞邓润甫御史上官均按之王珪奏遣确诣台参治确煅炼为狱润甫均不能制密奏确惨掠诸囚确伺知之即劾二人庇有罪润甫均皆罢而确得中丞太学生虞蕃讼学官确深探其狱连引朝士自翰林学士许将以下皆逮捕械系令狱卒与同寝处饮食旋溷共为一室设大盘于前凡羹饭饼馘举投其中以杓混搅分饭之如犬豕久系不问幸而得问无一字不承遂劾参知政事元绛出知亳州确代其位确自知制诰为御史中丞参知政事皆以起狱夺人位而居之士大夫交口唾骂而确自为得计也吴充数为帝言新法不便欲稍去其甚者确曰萧何与曹参有隙至代为相遵何约束今陛下所自建立岂容一人挟怨而坏之法遂不变元丰五年拜尚书右仆射兼中书侍郎确既相屡兴罗织之狱缙绅士大夫重足而立矣富弼在西京上言确小人不宜大用帝不听初议官制盖仿唐六典事无大小并中书取旨门下审覆尚书受而行之三省分班奏事柄归中书确说王珪曰公久在相位必得中书令珪信之确乃言于帝曰三省长

官位高不须置令但令左右仆射分兼两省侍郎足矣
帝以为然故确名为次相实颞大政珪以左仆射兼门下拱手而已哲宗立转左仆射韩
缜入相中书用其两侄为列卿确风御史中丞黄履劾
缜始诏三省凡取旨事及台谏官章疏并执政同进拟不专属中书盖确畏失权又复改
制也为永裕山陵使灵驾发引之夕不宿千次在道不
扈从还又不丐去御史刘摯王岩叟连击之言确在熙宁元丰时冤狱苛政首尾预其闲
及至今日稍语于人曰当时确岂敢言此其意欲图窃
名位反归曲于先帝也司马光吕公着进用蠲除烦苛确言皆己所建白公论益不容元
佑元年罢为观文殿学士知陈州明年弟硕坐赃抵罪
确坐故纵夺职徙安州又徙邓初神宗疾革王珪议立延安及太子既立确反谓珪实怀
异志赖己拥护故不得逞确奉使陆下韩缜白发其端
事寢籍籍确既失势愈怨望在安州尝游车盖亭赋诗十章知汉阳军吴处厚与确有隙
遂上之以为皆涉讥讪且论其用郝处俊上元闲谏高
宗欲传位天后事以斥东朝语尤切害于是梁焘 【按宋史本传作张焘而东都事略则
作梁焘考宋史有二张焘一为张奎子终于元佑前
一为张根子见于宣和后皆与蔡确仕不同时据梁焘传戴焘与刘安世交攻蔡确则此
处应是梁焘之讹今据改正】 范祖禹吴安诗王岩叟
刘安世连上章乞正确罪遂贬光禄卿分司南京再责英州别驾新州安置后卒于贬所
绍圣元年诏复正议大夫二年赠太师谥忠怀崇宁初
配享哲宗庙廷蔡京请徽宗书元丰受遣定策殊勋宰相蔡确之墓赐其家追封确清源
郡王御制文立石墓前擢确子懋同知枢密院事高宗
即位下诏暴羣奸之罪贬确武泰军节度副使窜懋英州凡所与滥恩一切削夺天下快
之吴处厚者邵武人登进士弟仁宗屡丧皇嗣处厚上
言臣尝读史记考赵氏废兴本末当屠岸贾之难程婴公孙杵臼尽死以全赵孤宋有天下
二人忠义未见褒美宜访其墓域建为其祠帝览其
疏矍然即以处厚为将作丞访得两墓域于绛封侯立庙始蔡确尝从处厚学赋及作相
处厚通笺乞怜确无汲引意王珪用为大理丞王安礼
舒亶相攻事下大理处厚知安礼与珪善论亶用官烛为自盗确密遣达意救亶处厚不
从确怒欲逐之未果珪请除处厚馆职确又沮之珪为
永裕山陵使辟掌笺奏确代使出知通利军又徙知汉阳元佑中确知安州郡有静江卒
当戍汉阳确不遣处厚怒曰尔在庙堂时数陷我今比
郡作守犹尔邪会得确车盖亭诗乃笺释上之确遂南窜擢处厚知卫州然士大夫由此
畏恶之未几卒绍圣闲追贬歙州别驾

△邢恕

邢恕字和叔郑州原武人【按宋史本传讹作阳武今据东都事略改正】博贯经籍能文章喜功名论古今成败事有战国纵横气习从程颢学因出入司马光吕公着门登进士第补永安主簿公着荐于朝得崇文院校书王安石亦爱之因言新法不便安石怒出知延陵县【按东都事略作出知崇德县与此异】县废不复调浮沈陕洛闲者七年复为校书吴充用为馆阁校勘历史馆检讨著作佐郎蔡确代充相尽逐充所用人恕深居惧及神宗见其送文彦博诗称于确乃进职方员外郎帝有复用光公着意确以恕出两人门亟结纳之恕亦深自附托乃为确画策收召名士自是如素交帝不豫恕与确成谋密邀宣仁后之侄公绘公纪之家执其手曰蔡丞相令市腹心上疾不可讳延安冲幼而雍王颢曹王颢皆贤宜早定议公绘惊曰此何言君欲祸吾家邪急趋出恕计不行则反宣言太后属意雍王与王珪表远导确约珪入问疾阳钩致珪语使开封府蔡京伏剑士子外须珪小持异则执而诛之既而珪言帝自有子定议立延安恕无所施犹自谓有定策功传播其语哲宗立迁右司员外郎起居舍人又为公绘具奏乞尊崇朱太妃为高氏异日计后诘之曰汝素不识字谁为之者公绘不得隐以恕对且上其藁遂黜恕知随州绍圣初擢宝文阁制侍制青州章惇蔡卞得政将甘心元佑诸人引恕自助召为刑部侍郎再迁吏部尚书兼侍读改御史中丞恕既处风宪遂诬宣仁后有废立谋愿诋梁焘刘摯云阴谋不轨且加公着公凶悖名惇使蔡京置狱于同文馆组织万端将悉陷诸人于族罪既而无所恃乃已恕内怀猜猾而外持正论数登对帝嘉纳之惇忌其大用恕亦揣帝稍簿惇屡白其短竟为惇所陷出知汝州未几徙应天府惇复摭其曩过移知南安军徽宗初言者论其矫诬责为少府少监分司西京居均州蔡京经营湟鄯欲使恕立边功起为鄜延经略安抚使旋即泾原擢至龙图阁学士恕乞筑萧关采其里人许彦圭车战法又欲使熙河造船直抵兴灵其谋皆迂诞转运使李复言恕所为类儿戏不可用帝亦烛其妄京力主之已而夏人寇镇戎奏至京师京惧始徙恕太原连徙永兴颖昌真定寻夺职久之复显谟阁待制卒恕天资反复行险冒进为司马光客即陷光附章惇复背惇惟与三蔡为腹心之死弗替建炎元年追贬常德军节度副使子居实惊居实少有异材黄庭坚苏轼晁补之张耒奏观陈师道皆称之早卒惊及恕在时为司农丞靖康初至少卿奉诏馆金国使时肃王使金军为所质朝廷亦留其使以相当踰月不遣金副使赵伦燕人也惧不得归及给惊曰金国有耶律伊都者领契丹精锐甚众贰于金人愿归结之以图二帅惊以闻大臣信之为赐伊

都蜡书纳伦衣领中厚与伦金帛伦归献其书金主怒令分道入攻遂致汴京失守惊时出知岳州诏责其始祸削籍停官

△吕惠卿

吕惠卿字吉甫泉州晋江人父璩习吏事为漳浦令县多山林民病瘴雾蛇虎之害璩救民焚燎而耕害为衰止通判宜州侂智高入寇璩以兵二千人蹶贼后得首虏多迁开封司录鞫中人史志聪役卫卒事志聪以谪去璩终光禄卿惠卿起进士为真州推官秩满入都见王安石论经义意多合遂定交熙宁初安石设制置三司条例司以为检详文字事无大小必谋之凡所建请章奏皆出其手擢太子中允崇政殿说书集贤校理判司农寺司马光谏帝曰惠卿儉巧非佳士使安石负谤于中外者皆其所为近者进擢不次大不厌众心帝曰惠卿进对明辨亦似美才光曰惠卿诚文学辨慧然用心不正愿陛下徐察之江充李训若无才何以能动人主帝默然光又贻书安石曰谄谀之士于公今日诚有顺适之快一旦失势将必卖公自售矣安石不悦惠卿以父丧去服除召为天章阁侍读进知制诰与王雱同修三经新义又知谏院为翰林学士安石求去惠卿使其赏变姓名曰投匭上书留之安石力荐惠卿为参知政事惠卿惧安石去新法必摇作书徧遣监司郡守使陈利害又从容白帝下诏终不以吏违法之故为之废法故安石之政守之益坚议罢制科冯京争之不得又用弟和卿计制五等丁产簿使民自供首实尺椽寸土检括无遣隐匿者许告而以赀三之一充实民不胜困又因保甲正长给散青苗使结甲赴官不遗一人上下骚动郑侠疏惠卿朋奸壅蔽惠卿怒又恶京异已而安石弟安国恶惠卿奸谄面辱之于是乘势并陷三人皆获罪惠卿既叛安石凡可以害王氏者无不为及安石复用犹与共事御史蔡承禧论其恶邓綰又言其兄弟强借秀州富民钱买田出知陈州久之以资政殿学士知延州始陕西缘边汉蕃兵各自为军每战则以蕃部为先锋而汉兵城守伺便乃出惠卿始合之为一先搜补守兵而出其选以战随屯置将具条约上之边人及议者多言不可都监高永亨老将也争之力奏斥之元丰六年知太原府哲宗即位敕疆吏勿侵扰外界惠卿遣步骑二万袭夏人于聚星泊斩首六百级夏人遂寇鄜延惠卿见正人汇进知不容于时恳求散地于是右司谏苏辙条奏其奸请投四裔以御魑魅中丞刘摯数其五大恶乃贬为光禄卿分司南京再责建宁军节度副使建州安置中书舍人苏轼当制备载其罪千训词天下传诵称快焉绍圣中复资政殿学士知大名府加观文殿学士知延州以筑威戎威羌城加银青光禄大夫去拜保宁武胜两军节度使徽宗立徙杭州

范纯粹帅延治其上功罔冒事夺节度寻复武昌节度使知大名又以上表引喻失当令致仕崇宁五年起为观文殿学士知杭州坐其子渊闻妖人张怀素言不告渊配沙门岛惠卿责祁州团练副使安置宣州复观文殿学士为醴泉观使致仕卒始惠卿逢合安石骤起执政安石去位遂极力排之至发其私书于帝安石退处金陵往往写福建子三字盖深悔为惠卿所误也虽章惇曾布蔡京当国咸畏恶其人不敢引入朝以是转徙外服讫于死去

△章惇

章惇字子厚建州浦城人父俞徙苏州官至职方郎中惇讷隽博学善文进士登名耻出侄衡下委敕出再举甲科调商洛令与苏轼游南山抵仙游潭潭下临绝壁万仞横木其上惇平步过之垂索挽树摄衣而下濡笔大书石壁曰苏轼章惇来既还神彩不动轼拊其背曰能自判命者他日必能杀人惇大笑召试馆职王陶劾罢之熙宁初王安石秉政悦其才用为编修三司条例官时提点刑狱赵鼎言峡州羣蛮苦其酋剥刻谋内附遂以惇为湖南北察访使经制羣蛮惇募流人李资张竑等往招之资竑淫于夷妇为酋所杀遂致攻讨由是两江扇动蛮时方据梅山乘势而南转运副使蔡煜言是役不可亟成帝以委之安石主惇议进兵争之不巳既而煜得蛮地安石恨煜沮惇及薄其赏进惇修起居注以是兵久不决召惇还累擢三司使吕惠卿去位邓綰论惇同恶出知湖南徙杭州入为翰林学士元丰三年拜参知政事朱服为御史惇密使客达意于服为服所白惇父冒占民沈立田立遮诉惇惇系之开封仕二罪罢知蔡州历陈定二州五年召拜门下侍郎丰稷奏曰官府肇新而惇首用非稽古建官意稷坐左迁谏官赵彦若疏惇无行不报哲宗即位知枢密院事宣仁后听政惇与蔡确矫唱定策功确罢惇不自安乃驳司马光所更役法累数千言光议既行惇忿争帘前其语甚悖宣仁后怒刘摯苏辙王覲朱光庭王岩叟孙升交章击之出知汝州七八年闲数为言者弹治哲宗亲攻有复熙宁元丰之意首起惇为尚书左仆射兼门下侍郎于是专主绍述凡元佑所革一切复之引蔡卞林希黄履来之邵张商英周秩翟思上官均居要地任言责协谋朋奸报复仇怨大小之臣无一得免甚至诋宣仁后谓元佑之初老奸擅国又请发司马光吕公着冢斲其棺哲宗不听惇意不愜请编类元佑诸臣章疏遂治刘安世范祖禹谏禁中偏乳媪事又诬刘摯梁焘有逆谋起同文馆狱命蔡京安惇蹇序辰穷治欲覆诸人家又议遣吕升卿董必察访岭南将尽杀流人哲宗曰朕遵祖宗遣制未尝杀戮大臣其释勿治然重得罪者千

余人或至三四谪徙天下冤之惇用刑恕为御史中丞恕诬宣仁后有废立意惇遂追贬司马光王珪至欲废宣仁后自皇太后太妃皆力争哲宗感悟焚其奏惇与蔡卞再言哲宗怒曰卿等不欲朕入英宗庙乎惇卞乃已惇又以皇后孟氏宣仁后所立劝哲宗起掖庭秘狱托以左道废居瑶华宫初神宗以永乐之败当宁恸哭循致不豫故元佑宰辅推本其意专务怀柔外国西夏请故地以非要害城砦还之惇以为蹙国弃地罪其帅臣遂用浅攻挠耕之说肆开边隙绝夏人岁赐进筑乌哲等城陕西诸道兴役五十余所败军覆将复弃青唐死伤不可计知天下怨已欲塞其议请诏中外察民妄语者论如律优立赏格告讦之风浸盛哲宗崩皇太后议所立惇厉声曰以礼律言之母弟简王当立皇太后曰老身无子诸王皆是神宗庶子惇复曰以长则由王当立皇太后曰申王病不可立惇尚欲言知枢密院事曾布叱之曰章惇听太后处分皇太后决策立端王是为徽宗迁惇特进封申国公为山陵使灵輿陷泽中踰宿而行言者劾其不恭罢知越州寻贬武昌军节度副使潭州安置右正言任伯雨论其欲追废宣仁后又贬雷州司户参军徙睦州卒绍兴五年高宗阅任伯雨章疏诏贬惇昭化军节度副使子孙不得仕于朝诏下海内称快独其家犹为辨诬论见者哂之

△曾布

曾布字子宣南丰人年十三而孤学于兄巩同登第调宣州司户参军怀仁令熙宁二年徙开封以韩维王安石荐上书言为政之本有二曰厉风俗择人才其要有八曰劝农桑理财赋兴学校审选举责吏课叙宗室修武备制远人大率皆安石指也召对合意授太子中允崇政殿说书加集贤校理判司农寺检正中书五房凡三日五受敕诰与吕惠卿共创青苗助役保甲农田法一时朝臣多争之布遂上疏其大旨欲坚神宗意专任安石以威胁众使毋敢言于是骤见拔用遂修起居注知制诰为翰林学士兼三司使韩琦上疏极论新法之害神宗颇悟布条析而驳之持之愈固七年大旱诏求直言布论判官吕嘉问市易掊克之虐谓市易之设以禁兼并今嘉问差官四方买物贷禁客旅无得先交易以息多寡为诛赏殿最故官吏牙骹惟恐衰之不尽而息之不伙则是官自为兼并非市易本意事下两制议惠卿以为沮新法安石怒黜布知饶州再徙广州元丰初进龙图阁待制历知桂秦陈蔡庆州元丰末复翰林学士迁户部尚书司马光为攻论令增损役法布辞曰复役一事法令纤悉皆出己手若令遽自改易义不可为元佑初以龙图阁学士知太原府历真定河阳及青瀛二州绍圣初知枢密院使初章惇为相布草

制极其称美冀惇引同执政惇忌之止荐居枢府故稍不相能布赞惇绍述甚力请甄赏元佑臣庶论更役法不便者以劝敢言助惇兴犬狱悉

陷正人又赞成掖庭诏狱论死者三人惇以士心不附诡情饰过荐引名士彭汝砺陈瓘张庭坚等【按东都事略作是事章惇为相斥逐元

佑臣僚士心不附布诡情辟致名士陈瓘张庭坚等此传并作章惇之事所戴互异】乞正所夺司马光吕公着赠谥勿毁墓仆碑布以为无益

之事又奏人主操柄不可倒持今自丞弼以至言官知畏宰相不知畏陛下臣如不言孰敢言者其意盖欲倾惇也会哲宗崩皇太后召宰执问

谁可立惇有异议布叱惇使从太后命徽宗立惇得罪罢拜韩从彦左仆射布右仆射忠彦虽居上然柔懦事多决于布布犹不能容明年忠彦

罢布独当国渐进绍述之说崇宁元年【本纪崇宁元年夏五月罢韩忠彦闰六月罢曾在是忠彦与布免相同一年事宰辅表亦与本传同

】召蔡京为左丞京与布异会布拟其壻之父陈佑甫为户部侍郎京奏布私其所亲布忿然争辨声色稍厉温益叱布曰曾布上前安得失礼

徽宗不悦御史遂攻之罢为观文殿大学士知润州京积憾未已加布以赃贿令开封吕嘉问逮捕其诸子诱左证使自诬而贷其罪布落职提

举太清宫太平居住又降司农卿分司南京又以尝荐学官赵谗而谗叛责散官衡州安置又以弃湟州责贺州别驾又责廉州司户凡四年乃

徙舒州复大中大夫提举崇福宫大观元年卒于润州

△安惇

安惇字处厚广安军人上舍及第调成都府教授上书论学制召对擢监察御史哲宗初罢为利州路转运判官历夔州湖北江东三路绍

圣初召为国子司业三迁谏议大夫章惇蔡卞造同文诱狱使蔡京与惇杂治二人肆其伎心上言司马光刘挚梁焘吕大防等交通陈衍变先

帝成法疏隔两官斥随龙内侍以去陛下之腹心废顾命大臣以翦陛下之羽翼大逆不道死有余辜帝为诛衍鞫挚焘子孙迁御史中丞鞫邹

浩事檄广东使者锺正甫摄治之于新州士大夫或千里会逮踵蹇序辰初议阅诉理书牒被祸者七八百人天下怨疾为二蔡二惇之谣徽宗

雅恶之乃以宝文阁待制知润州【东都事略作知潭州】寻放归田里蔡京为相复拜工部侍郎迁兵部尚书崇宁初同知枢密院卒长子

郊后坐指斥诛流其次子邦于涪而追贬惇单州团练副使其祝遂绝

钦定续通志卷六百十四

●钦定续通志卷六百十五 奸臣传四

奸臣传

宋【二】

○宋二

蔡京【卞 攸 脩 赵良嗣】

蔡京

赵良嗣

△蔡京

蔡京字符长兴化军仙游人登熙宁三年进士第调钱塘尉舒州推官累迁起居郎使辽还拜中书舍人改龙图阁待制知开封府元丰末大臣议所立京附蔡确将害王珪以贪定策之功不克司马光秉政复差役法为期五日同列病太迫京独如约光喜曰使人人奉法如君何不可行之有已而台谏言京挟邪坏法出知成德军改瀛州徙成都谏官范祖禹论京不可用乃改江淮荆浙发运使又改知扬州历郓永兴军迁龙图阁直学士复知成都绍圣初入权户部尚书章惇复变役法置司讲议久不决京谓惇曰取熙宁成法施行之耳何以讲为惇然之雇役遂定差雇两法光惇不同十年闲京再莅其事成于反掌两人相倚以济识者有以见其奸文及甫狱起命京穷治京捕内侍张士良令述陈衍事状衍以大逆不道论诛并劾刘摯梁焘二人亦贬死当锢其子孙王岩叟范祖禹刘安世复远窜时京弟卞为右丞京为翰林学士兼修国史京觐执政曾布知枢密院忌之密言卞备位丞辖京不可以同升但进承旨徽宗即位罢为端明龙图两学士知太原皇太后命帝留京毕史事数月谏官陈瓘论其交通近侍瓘坐斥京亦出知江宁颇怏怏迁延不之官御史陈次升袭夬陈师锡交论其恶夺职提举洞霄宫居杭州童贯以供奉官诣三吴京与游累月凡所画屏幛扇带之属贯日以达禁中且附语言论奏至帝所由是帝属意京左街道录徐知常以符水出入元符后殿屡言非相京不足以有为已而宫妾宦官合词称誉遂起京知定州崇宁元年徙大名府韩忠彦与曾布交恶谋引京自助复用为学士承旨徽宗有意修熙丰政事起居舍人邓洵武党京撰爱莫助之图以献徽宗遂决意用京忠彦罢拜尚书左丞俄代曾布为右仆射制下之日赐坐延和殿命之曰朕欲上述父兄之志卿何以教之京顿首谢愿尽死二年正月进左仆射京起逐臣一旦得志阴托诏述之柄箝制天下用条例故事即都省置讲议司自为提举以其赏吴居厚王汉之十余人为僚属取政事之大者如宗室冗官国用商旅盐泽赋调尹牧每一事以三人主之凡所设施皆由是出用冯懈钱遹之议复废元佑皇后罢科举法令州县悉仿太学三舍考选建辟雍外学于城南以待四方之士推方

田于天下權江淮七路茶官自为市尽更盐钞法凡旧钞皆弗用富商巨贾尝赍持数十万缗一旦化为流丐甚者至赴水及缢死提点淮东刑狱章絳奏京改法误民京怒夺其官因铸当十大钱尽陷絳诸弟御史沈畸等用治狱失意羈削者六人陈瓘子汇以上书黥置海岛南开黔中筑靖州辰溪獠叛杀淑浦令京重为赏格杀一首领者赐绢三百荆南守马城言有生獠有省地獠今未知叛者为何种族若计级行赏惧不能无滥京罢城命舒亶代之以剿绝羣獠为期西收湟川鄯廓取■〈牛羊〉牻夜郎地擢童贯领节度使其后杨戩蓝从熙谭稹梁师成踵之凡寄资一切转行祖宗之法荡然无余矣又欲兵柄士心皆归己建澶郑曹拱州为西辅各屯兵二万而用其姻昵宋乔年胡师文为郡守禁卒扞擄月给钱五百骤增十倍以固结之威福在手中外莫敢议累转司空封嘉国公京既贵而贪益甚已受仆射奉复创取司空寄禄钱帝不知也时元佑羣臣贬窜死徙略尽京犹未惬意命等其罪状首以司马光目曰奸党刻石文德殿门又自书为大碑徧班郡国又籍元符上书人范柔中以下为邪等凡名在两籍者三百九人皆锢其子孙不得官京师及近甸改封魏国时承平既久帑庾盈溢京倡为丰京豫大之说视官爵财物如粪土累朝所储扫地矣帝尝大宴出玉璫王卮示辅臣曰欲用此恐人以为太华京曰用之上寿于礼无嫌事苟当于理多言不足畏也五年正月彗出西方其长竟天帝以言者毁党碑凡京建置一切罢之免为开府仪同三司安远军节度使中太乙宫使其党阴援于上大观元年复拜左仆射以南丹纳士躡拜太尉受八宝拜太师三年台谏交论其恶遂致仕犹提举修哲宗实录改封楚国朝朔望太学生陈朝老追疏京恶十四事曰渎上帝罔君父结奥援轻爵禄广费用变法度妄制作喜导谀箝台谏炽亲党长奔竞崇释老穷土木矜远略乞投畀远方以御魑魅四年五月彗复出奎娄闲御史张克公论京辅政八年权震海内轻锡予以蠹国用托爵禄以市私恩役将作以葺居第用漕船以运花石名为祝圣而修塔以壮临平之山托言灌田而决水以符兴化之讖方田扰安乐之民圜土聚徙郡之恶不轨不忠凡数十事贬太子少保居杭州政和二年召还辅政徙封鲁国三日一至都堂治事国制凡诏令皆中书门下共议而后命学士为之至熙宁闲有内降手诏不由中书门下共议盖大臣从中为之者至京又患言者议己故作御笔密进而丐徽宗亲书以降谓之御笔手诏违者以违制坐之事无巨细皆托而行至有不类帝札者皆莫敢言由是贵戚近臣争相请求京复病之而亦不能止矣既又更定官名以仆射为太少宰自称公相总治三省追封王安石蔡

确皆为王省吏不复立额至五品阶以百数有身兼十余奉者侍御史王葆光论之立窜昭州拔故吏魏伯刍领榷货造料次钱券百万缗以进徽宗大喜持以示左右曰此太师与我奉料也擢伯刍至徽猷阁待制京每为帝言今泉币所积赢五千万和足以广乐富足以备礼于是铸九鼎建明堂修方泽立道观作大晟乐制定命宝任孟昌龄为都水使者凿大伾三山创天成圣功二桥大兴工役无虑四十万两河之民愁困不聊而京僦然自以为稷契周召也又欲广宫室以求媚召童贯辈五人风以禁中偏侧之状贯俱听命而延福宫景龙江之役起浸淫及于艮岳矣子攸儵儵攸子行皆至大学士尚茂德帝姬帝七幸其第胥子无算命坐传觞略用家人礼厮养居大官媵妾封人夫然公论不与帝亦厌薄之宣和二年令致仕六年再起领三省京至是四当国目昏眊不能视事悉决于季子绦凡京所判皆绦为之且代京入奏每造朝侍从以下皆迎揖由是恣为奸利窃弄威柄骤引其妇兄韩杞为户部侍郎媒孽密谋斥逐朝士创宣和库式贡司四方金帛与府藏所储尽拘括以实之为天子私财宰臣白时中李邦彦皆不能堪白罢绦兄攸亦发其事乃安置韩杞黄州而褫绦侍读毁赐出身敕京时殊无去意帝使童贯诣京令上章谢事京不得已以章授贯帝命词臣代为作三表请去乃降制从之钦宗即位边遽日急京尽室南下为自全计天下罪京为六贼之首侍御史孙覿等始极疏其奸恶乃以秘书监分司西京运贬崇信庆远军节度副使衡州安置又徙韶儋二州行至潭州死京天资凶譎舞智御人在人主前颡狙伺为固位计帝亦知其奸屡罢屡起京每闻退免辄入见祈哀蒲伏叩头无复廉耻燕山之役京送攸以诗阳寓不可之意冀事不成得以自解见利氏义至兄弟为参商父子如秦越患失之心无所不至卒致宗社之祸虽谴死道路天下犹以不正典刑为恨子八人儵先死攸儵伏诛绦流白州死儵以尚帝姬免窜余子及诸孙皆分徙远恶郡

蔡卞

蔡攸

蔡儵

蔡卞

卞字符度与京同年登科调江阴主簿王安石妻以女因从之学元丰中张璪荐为国子直讲累拜中书舍人进给事中哲宗立迁礼部侍郎使辽还以龙图阁待制知宣州徙江宁府历扬广越润陈五州广州宝贝丛凑一无所取夷人以为廉绍圣元年复为中书舍人上疏请重订先帝实录诏从之以卞兼国史修撰初安石且死悔其所作日录命从子防焚之防诡以

他书代至是卞即防家取以上因芟落事实文饰奸伪
尽次所修实录正史于是吕大防范祖禹赵彥若黄庭坚皆获深谴迁翰林学士四年拜
尚书左丞专托绍述之说上欺天子下胁同列凡中伤
善类皆密疏建白然后请帝亲札付外行之章惇虽巨奸犹在其术中徽宗即位谏官陈
瓘任伯雨御史裘夬疏其兄弟奸恶伯雨又言其大罪
有六曰诬罔宣仁圣烈保佑之功欲行追废一也凡绍圣以来窜逐臣僚皆卞启而后行
二也宫中厌胜事作哲宗方疑惇欲召礼法官通议卞
云既犯法矣何用议皇后以是得罪三也编排元佑章牒被罪者数千人四也邹浩以言
忤旨卞激怒哲宗致之远谪又请治其亲故送别之罪
五也蹇序辰建看详诉理之议章惇迟疑未应卞迫之即日置局士大夫得罪者八百三
十家六也愿亟正典刑以谢天下诏以资政殿学士知
江宁府连贬少府少监分司池州纔踰岁起知大名府徙扬州召为中太乙宫使擢知枢
密院帝谋复湟鄯问于卞卞以王厚高永年对兴京合
谋竭府藏以事边募商人运粮不复问其直贵贱秦中骚困及取二州进金紫光禄大夫
追讎任伯雨所言曲自辨理诸人坐贬卞居心倾邪意
以安石所行为至当兄晚达而住在上致己不得相故二府政事时有不合京以中旨用
童贯为陕西制置使卞言不宜用宦者右丞张康国引
李宪故事以对卞曰用宪已非美事宪犹稍习兵贯略无所长异时必误边计帝令中书
行之京于帝前诋卞卞求去以天章阁学士知河南妖
人张怀素败卞素与之游坐降职旋加观文殿学士拜昭庆军节度使入为侍读进检校
少保开府仪同三司易节镇东政和未谒归道死高宗
即位追责为宁国军节度副使绍兴五年又贬单州团练副使

蔡攸

攸字居安京长子元符中监在京裁造院徽宗时为端王每退朝攸遇诸涂必下马
拱立王问左右知为蔡承旨子心善之及即位遂有宠
崇宁三年自鸿臆丞赐进士出身除秘书郎二年闲至枢密直学士京再入相为宣和殿
大学士改淮康军节度使帝将去京攸通籍禁庭闻其
事亟请闲百拜以息帝意遂解其后与京权势日相轧浮薄者复闲之父子各立门户遂
为讎敌攸别居赐第尝诣京京正与客语使避之攸甫
入遽起握父手为眴视状曰火人脉势舒缓体中得无有不合乎京曰无之攸曰禁中方
有公事即辞去客窃窥见以问京京曰此儿欲以为吾
疾而罢我也阅数日京果致仕以季弟修钟爱于京数请杀之帝不许攸历开府仪同三
司进少保益用事进见无时与王黼得预宫中秘戏或
侍曲宴则短衫窄袴涂抹青红杂倡优侏儒多道市井淫媠谑浪语以蛊帝心妻宋氏出

入禁掖子行领殿中监宠信倾其父帝留意遂家者说
攸因倡为异闻谓有珠星璧月跨凤乘龙天章云篆之符与方士林灵素之徒争证神变
事于是神霄玉清之祠徧天下矣童贯巡边以攸副宣
抚攸駮稚不习事谓功业可唾手致入辞之日指二侍姬曰臣成功归乞以是赏帝笑而
弗责辽郭药师举涿易二州降进攸少傅师入燕进少
师封英国公还领枢密院进太保徙封燕帝欲内禅亲书传位东宫字授李邦彦邦彦却
不敢奉遂以付攸攸退属其客给事中吴敏议遂定靖
康元年从上皇南下及还都始责为太中大夫继而安置永州连徙浔雷京死御史言攸
罪不减乃父燕山之役祸及宗社骄奢淫泆载籍所无
当窜诸海岛诏置万安军寻遣使者随所至诛之

蔡脩

脩初以恩泽为亲卫郎秘书丞至保和殿学士宣和中拜礼部尚书兼侍讲时脩弟
兄亦知事势日异密与攸议稍持正论故与京异遂引
吴敏李纲李光杨时等用之以挽物情寻加大学士提举醴泉观钦宗立脩上募兵陕西
策自请行又劝西幸帝颇采纳俾知京兆府计垂就攸
忌其功成会金破浚州徽宗南幸攸假徽宗旨请脩守镇江改资政殿大学士脩幸得去
不复辞流言至京师谓将复辟于镇江帝趣迎上皇还
而责脩昭信军节度副使攸之诛也御史陈述且行帝取诏批其尾曰脩亦然于是并诛
【按此下旧附蔡密传今从删】

△赵良嗣

赵良嗣本燕人马植世为辽国大族仕至光禄卿行污而内乱不齿于人政和初童
贯出使道卢沟植夜见自言有灭燕之策贯大奇之库
与归易姓名曰李良嗣荐诸朝即献策曰女真恨辽人切骨而天祚荒淫失道本朝若遣
使自登莱涉海结好女真与之相约攻辽其国可图也
召对帝嘉纳之赐姓赵氏以为秘书丞图燕之议自此始迁直龙图阁提点万寿观加右
文殿修撰宣和二年二月使于金国见金太祖议取燕
云使还进徽猷阁待制自是将命至六七颇与金争议进龙图阁直学士既得燕山又加
延康殿学士旻举上清宫官至光禄大夫良嗣言顷在
北国与燕中豪士谋结义归朝沥酒于北极祠下祈天为约俟他日功成即挂冠谢事以
表本心今赖陛下威灵幸而集事愿许臣致仕以践前
约凡三上章不许既而朝廷纳张觉良嗣争之云国家新与金国盟如此必失其欢后不
可悔不听坐夺职削五阶靖康元年四月御史胡舜陟
论其结成边患败契丹百年之好使金兵侵陵祸及中国乞戮之于帝时已窜柳州诏广
西转运副使李升之即所至梟其首徙妻子于万安军

【按宋史此下有张觉郭药师二传今改归叛臣传】

钦定续通志卷六百十五

●钦定续通志卷六百十六 奸臣传五

奸臣传

宋 【三】

○宋三

黄潜善 王伯彦 秦桧

黄潜善

汪伯彦

秦桧

△黄潜善

黄潜善字茂和邵武人擢进士第宣和初为左司郎陕西河东地大震陵谷易处徽宗命潜善往视归不以实闻擢户部侍郎坐事谪亳州以徽猷阁待制知河闲府靖康初金人入攻康王开大元帅府檄潜善将兵入援张邦日潜位潜善趋白于帅府王承制拜潜善为副元帅高宗即位拜中书侍郎时帝从人望擢李纲为右相潜善及汪伯彦自谓有扳附之劳拟必为相及召李纲于外二人不悦因与纲忤未几潜善拜右仆射兼中书侍郎纲遂罢御史张所言潜善奸邪恐害新政贬所江州太学生陈东论李纲不可去潜善伯彦不可任潜善恚会欧阳澈上书诋时事潜善激怒帝言若不亟诛将复鼓众乃杀澈及东明年金人攻陕西京东山东盗起潜善伯彦匿不以闻张遇焚真州距行在六十里内侍邵成章疏二人误国坐除名御史马伸亦以劾二人谪死潜善进左仆射兼门下侍郎郗澗相继陷没宿泗屡警右丞许景衡以扈卫单弱请帝避其锋潜善以为不足虑俄泗州奏金人且至帝大惊即被甲乘骑驰至瓜洲步得小舟渡江潜善伯彦率同列听浮屠说法方罢会食堂吏大呼曰驾行矣乃相视苍黄鞭马南驰都人争门而出死者相枕籍无不怨愤会司农卿黄钶至江上军士闻其姓以为潜善也争数其罪挥刃而前钶方辨其非是而首已断矣中丞张澄劾其罪乃罢潜善为观文殿大学士知江宁府落职居衡州郑恂王廷秀相继以为言责置英州寻卒于梅州潜善猥持国柄嫉害忠良李纲既逐张恂宗泽许景衡辈相继贬死台谏一言随陷其祸中外为之切齿高宗末年诏以潜善尝任副元帅特复元官录一子谏官凌哲争之不听

△汪伯彦

汪伯彦字廷俊祁门人登进士第积官虞部郎中靖康元年召见献河北边防十策

进直龙图阁知相州金人陷真定诏徙真定帅司于相
俾伯彦领之高宗以康王使金至磁时金骑充斥常有甲马数百至城下踪迹王所在伯
彦亟以帛书请王还相躬服橐鞬部兵逆王于河上王
劳之曰他日见上当首以京兆荐公其受知自此始矣康王开帅府以伯彦为副元帅金
兵薄京城钦宗诏金人见议通和康王将兵毋得轻动
伯彦以为然宗泽曰此女欲款我师尔士亟进兵伯彦等难之劝王遣泽先行泽自是
不得预帅府事明年王承制除伯彦显谟阁待制升元
帅进直学士高宗即位擢知枢密院事未几拜右仆射方高宗初政天下望治伯彦潜善
在相位专权自恣不能有所经画御史谏官下至韦布
内侍皆劾奏之罢伯彦为观文殿大学士知洪州改提举崇福宫寻落职居永州绍兴初
复职知池州言者弗置乃诏以旧职奉祠寻知广州四
年帝追赠陈东欧阳澈舍人王居正论伯彦潜善不已复褫前职七年帝以伯彦元帅旧
僚欲与牵复始伯彦未第馆于王氏秦桧尝从之学而
张浚亦伯彦所引因共赞焉九年知宣州过阙上所著中兴日历五卷拜检校少傅保信
军节度使十年请祠从之明年卒赠少师谥忠定初伯
彦既去相州其子军器监丞似为金人拘之而北久之乃还或云似之得归伯彦实使人
赎之

△秦桧

秦桧字会之江宁人政和五年登第补密州教授继中词学兼茂科历太学学正靖
康元年金兵攻汴议割三镇以弭兵命桧借礼部侍郎
与程瑀为割地使奉肃王以往金师退桧瑀至燕而还御史中丞李回翰林承旨吴开共
荐桧拜殿中侍御史迁左司谏御史中丞汴京失守二
帝幸金营明年金帅分莫侂吴开入城推立异姓留守王时雍等召百官议立张邦昌皆
不敢答监察御史马伸言于众曰吾曹职为争臣岂容
坐视当共入议状乞存赵氏桧闻伸言以为然即进状愿复嗣君以安四方金人怒执桧
去与孙傅张叔夜何■〈鹵上木下，欠代义〉司马
朴从二帝至燕山又徙韩州上皇闻康王即位作书贻尼堪与约和议俾桧润色之桧以
厚赂达尼堪会金太宗以桧赐其弟达兰达兰信任之
及南侵以桧为参谋军事又为随军转运使 【据宋通鉴及宋史纪事本末增辑】 建
炎四年达兰攻楚州纵桧南归桧与妻王氏及婢仆自
军中趋涟水航海归行在自言杀金人监已者夺舟而来朝士多谓桧与■〈鹵上木下，
欠代义〉傅朴同拘而桧独归又自燕至楚二千八
百里踰河越海岂无讥诃之者安得杀尽而南就令从军达兰金人纵之必质妻属安得
与王氏偕惟宰相范宗尹同知枢密院李回与桧善尽

破羣疑力荐其忠帝命先见宰执桧言欲天下无事须南自南北自北及入对首奏所草与达兰求和书帝曰桧朴忠过人朕得之喜而不寐盖闻二帝母后消息又得一佳士也拜礼部尚书从行王安道冯由义水砮丁禩及参议官并改京秩舟人孙靖亦补承信郎始朝廷虽数遣使但且守且和而专与金人解仇议和实自桧始绍兴元年除参知政事首挤范宗尹宗尹既去相位久虚桧场言曰我有二策可耸动天下或问何以不言桧曰今无相不可行也拜右仆射同中书门下平章事兼知枢密院事吕颐浩再相桧同秉政谋夺其柄风其党建言周宣王内修外攘故能中兴今二相宜分任内外颐浩遂建都督府于镇江帝曰颐浩专治军旅桧专理庶务如种蠡分职可也二年桧奏置修政局自为提举参知政事翟汝文同领之未几桧面劾汝文擅治当吏汝文求去谏官方孟卿再论之汝文竟罢颐浩自江上还谋逐桧有教以引朱胜非为助者诏以胜非同都督给事中胡安国言胜非不可用胜非遂以醴泉观使兼侍读颐浩寻以黄龟年为殿中侍御史刘裴为右司谏将逐桧于是江跻吴表臣程瑀张焘胡世将刘一止林待聘楼照并落职予祠台省一空皆桧党也桧初欲倾颐浩引一时名贤如安国焘瑀辈布列清要颐浩问去桧之术于席益益曰目为党可也今党魁胡安国在琐闼宜先去之盖安国常问人材于游酢酢比桧于荀文若故安国力言桧贤桧亦力引安国至是安国等罢桧亦求去及桧再相误国而安国已死矣黄龟年劾桧专主和议沮止恢复乃罢桧为观文殿学士提举江州太平观初桧陈二策欲以河北人还金中原人还刘豫帝曰桧言南人归南北人归北朕北人将安归桧语乃塞桧又言为相数月可耸动天下及相而设施无闻至是帝召直学士院綦密礼语以是事密礼即以帝意载训辞播告中外人始知桧之奸龟年等论桧不已诏落职榜朝堂示不复用三年韩肖胄使还偕金使来求尽还北俘与桧前议脗合识者益知桧与金人共谋矣五年与金议和复桧观文殿学士知温州六年用张浚荐除醴泉观使兼侍读充行宫留守参决尚书枢密院事召赴行在七年何苏使金还得徽宗及宁德后讣帝发丧即日授桧枢密使恩数视宰臣命王伦使金国迎奉梓宫浚求去赵鼎复相台谏交章论浚安置岭表鼎约同列解救及面秦桧无一语浚遂谪永州始浚鼎相得浚先进力引鼎常共论人才浚剧谈桧善鼎曰此人得志吾辈无所措足矣浚不以为然及引桧共政方知其闇不复荐桧因衔浚反谓鼎曰上欲召公而张相迟留盖怒鼎使挤浚也桧在枢府惟听鼎鼎素恶桧由是反深信之卒为所顷鼎与浚晚遇于闽言及此始知皆为桧所卖也八年拜右仆射同

中书门下平章事兼枢密使吏部侍郎晏敦复有忧色曰奸人相矣王伦偕金使乌浚阿思谋等来议和议以吏部侍郎魏矼馆伴矼辞曰顷任御史尝言和议之非今不可专对桧问故矼备言敌情不可信桧曰公以智料敌桧以诚待敌矼曰第恐敌不以诚待相公尔桧乃改命吴表臣宰执入见桧独留身言臣僚多持两端不足与断大事若陛下决欲讲和乞颙与臣议勿许羣臣预帝曰朕独委卿桧曰臣亦恐未便望陛下更思三日容臣别奏又三日桧复留身奏事帝意欲和甚坚桧犹以为未也复请更思又三日桧复留身奏事如初知帝意确不移乃出文字乞决和议会赵鼎罢桧独专国决意和于是中朝贤士以议论不合相继而去中书舍人吕本中礼部侍郎张九成皆不附和议殿中侍御史张戒上疏乞留赵鼎又陈十三事论和议之非桧并憾之王庶自淮西入枢庭始终言和议非是疏凡七上且谓桧曰而忘东都欲存赵氏时耶桧方挟金人自重尤恨庶言枢密院编修官胡铨上疏愿斩桧与王伦以谢天下械铨贬昭州陈刚中以启贺铨桧怒刚中以谴死既而校书郎许忻枢密院编修官赵雍同日上疏犹祖铨意力排和议司勋员外郎朱松馆职胡程张扩凌景夏常明范如圭同上一疏言金人以诏谕江南为名要陛下以稽首之礼百官军民莫不扼腕天下将有仗大义问奸桧 【宋史原作相公今依宏简录改】 之罪者后数日直学士院曾开权吏部尚书张焘吏部侍郎晏敦复魏矼户部侍郎李弥逊梁汝嘉给事中楼照中书舍人苏符工部侍郎萧振起居舍人薛徽言同班入奏极言屈己之礼非是新除礼部侍郎尹焞独上一疏且移书切责桧桧始大怒焞于是固辞新命不拜奉礼部冯时行召对言和议不可信谪知万州寻亦抵罪桧党句龙如渊抗言于桧曰邪说横起胡不择台官击去之桧大喜遂奏如渊为御史中丞劾异议者卒成桧志金使张通古萧哲以诏谕江南为名至泗州要所过州县迎以臣礼韩世忠累疏力谏愿效死决战若其不克委曲从之未晚皆不许哲等既入境接伴使范同再拜问金主起居军民见者往往流涕过平江守臣向子諲不拜乞致仕哲等至淮安言先归河南地且册为帝徐议余事桧至是欲帝行屈己礼帝曰朕嗣守太祖太宗基业岂可受金人封册会三衙帅杨沂中解潜韩世良相率见桧曰军民汹汹若之何退又白之台谏于是句龙如渊李谊谓桧曰但取金书纳禁中则礼不行而事定给事中楼照亦与谅阴三年不言事以告桧于是定议以桧摄冢宰即馆受书金使欲百官僦礼桧使省吏朝服导从以书纳禁中九年金人归河南陕西故地以王伦签书枢密院事充迎奉梓宫奉还两宫交割地界使蓝公佐副之判太宗正事

士褒兵部侍郎张焘朝八陵时张浚在永州驰奏力言以石晋刘豫为戒他如秘书省正字汪应辰樊光远澧州推官韩絢临安府司户参军毛叔庆皆言金人叵测迪功郎张行成献询薨书二十篇条具豫备之策桧悉加黜责金乌珠果有他谋拘王伦于中山府伦密奏于朝桧不之备韩世忠有乘懈掩击之请桧言春秋不伐丧与帝意合遂已十年金人败盟分四道入侵河南诸郡相继陷没帝始大怪下诏罪状乌珠御史中丞王次翁惧桧得罪奏曰前日国是初无主议事有小变则更用他相后来者未必贤而排黜异党纷纷累月不能定愿陛下以为至戒帝深然之于是桧位复安公论不能撼摇矣时张俊克亳州岳飞克郾城几获乌珠韩世忠胜于洺口镇诸将所向皆捷而桧力主班师诏飞还行在沂中还镇江刘光世还池州刘锜还太平于是淮宁蔡郑复为金人有一十年乌珠再举取寿春入庐州邵隆王德关师古等连战皆捷杨沂中战柘皋又破之桧忽谕沂中及张俊遽班师韩世忠闻之止濠州不进刘锜闻之弃寿春而归自是不复出兵桧欲尽收诸将兵权给事中范同献策桧纳之密奏召三大将论功行赏世忠俊并为枢密使飞为副使以宣抚司军隶枢密院桧拜左仆射同中书门下平章事并枢密使历封莘庆冀国公先是莫将韩恕使金拘于涿州至是乌珠有求和意纵之归桧复奏遣刘光远曹勋使金又以魏良臣为通问使未几良臣偕金使来议以淮水为界求割唐邓二州寻遣何铸报聘许之桧以岳飞沮和议方谋杀之使谏官万俟卨论其罪张俊又诬飞旧将张宪谋反于是飞及子云俱送大理寺命御史中丞何铸大理卿周三畏鞫之久不伏卨入台狱遂诬飞指斥乘輿受诏不救淮西赐死狱中子云及宪杀于都市天下冤之十二年徽宗及显肃懿节二梓宫至行在太后还慈宁宫加桧太师进封奏魏两国公桧以封两国与蔡京同辞不拜幸和议成益咎前日之异己者先是赵鼎贬潮州王庶贬道州胡铨再贬新州至是皆遇赦永不检举曾开李弥逊并落职张俊本助和议居位岁余无去意桧讽江邈论罢之十三年贺瑞雪贺日食不见是后日食多书不见彗星常见选人康倬上书言彗星不足畏桧大喜特改京秩知虔州薛弼言木内有文曰天下太平年诏付史馆于是为苟安余杭之计自此不复巡幸江上而祥瑞之奏日闻矣洪皓归自金名节独着以致金实讷语不一月逐去实讷者尼堪左右也初尼堪行军至淮上桧常为之草檄为实讷所见故因皓归寄声桧意士大夫莫有知者闻皓语深以为憾遂令李文会论之胡舜陟以非笑朝政下狱死张九成以鼓唱浮言贬张邵亦坐与桧言金人有归钦宗及诸王后妃意斥为外祠十四年贬黄龟年以前

常论桧也闽浙大水右武大夫白锷有燮理乖谬语刺配万安军太学生张伯麟常题壁曰夫差尔忘越王杀而父乎杖春刺配吉阳军故将解潜罢官闲居辛永宗总戎外郡亦坐不附和议潜窜南安死永宗编置肇庆死李光前贬藤州以唱和有刺桧者为守臣所告桧又言赵鼎欲立皇太子是待陛下终无子也宜俟亲子乃立遂嗾御史中丞詹大方言鼎邪谋密计深不可测于是光及鼎皆再窜台州曾惇献桧诗称圣相凡投献者必曰元圣桧乞禁野史又命子熺以秘书少监领国史进建炎元年至绍兴十二年日历五百九十卷熺因太后北还自颂桧功德凡二千余言自桧再相凡前罢相以来诏书章疏稍及桧者率更易焚弃日历时政亡失已多是后记录皆熺笔无复有公是非矣十五年熺除翰林学士兼侍读赐桧甲第桧妻妇子孙皆加恩帝亲书一德格天扁其阁十六年桧立家庙赐祭器将相赐祭器自桧始帝以彗见求言张浚疏言今事势如养大疽于头目心腹之闲不决不止愿谋为豫备桧久憾浚至是大怒即落浚节钺贬连州寻移永州十七年改封桧益国公赵鼎在吉阳军桧令月申存亡鼎遂不食卒又窜吕颐浩子摭于藤州进士施锜上中兴颂行都赋及绍兴雅十篇自此导谏愈多十八年熺除知枢密院事李显忠上恢复策落军职与祠迪功郎王廷珪以作诗送胡铨编管辰州胡铨又以作颂讪谤自新州移贬吉阳二十日桧一日趋朝殿司小校施全刺桧不中磔于市【谨按通鉴辑览御批秦桧有可杀之罪施全非当杀桧之人其事固不必深论独是桧奸邪误国海内切齿所欲剗刃甘心者非止一全而高宗始终信之而不忍去之后且畏之而不敢去之岂非天夺之魄乎】自是每出列五十兵持长挺自卫曹泳告李光子孟坚私作国史狱成孟坚编置峡州朝士连坐者八人胡寅窜新州泳由是骤用秘书少监汤思退奏以桧存赵氏本末付史馆进熺少保郑璋告其乡人福建安抚司机宜吴元美家有潜光亭商隐堂以亭号潜光有心于党李堂名商隐无意于事秦桧尤恶之又编管右迪功郎安诚布衣汪大圭斩有荫人惠俊进义副尉刘允中黥径山僧清言皆以讪谤也时桧疾愈朝参许肩舆二孙扶掖乃免拜二十一年朝散郎王扬英上书荐熺为相桧奏扬英知泰州二十二年又兴王庶二子之奇之荀叶三省杨炜索敏求四大狱皆坐谤讪炜又以常登李光萧表之门言时事于是光永不检举振贬池州二十三年桧请下台州于谢伋家取綦密礼所受御笔缴进是岁进士黄友龙坐谤讪黥配岭南内侍裴永坐指斥编管琼州二十四年何兑讼其师马伸发端上金人书乞存赵氏以为分桧功编管英州桧孙敷文阁待制坝试进士举省殿试皆

第一桧从子炜焞姻党周夤沈兴杰皆登上第士论不平帝阅策皆桧熺语于是擢张孝祥为第一降坝第三未几坝修撰实录院宰相子孙同领史职前所无也王循友以前知建康尝罪桧族党安置藤州王趯为李光求内徙编管辰州郑玘贾子展以会中有嘲谑讲和语玘窜容州子展窜德庆府方畴以与胡铨通书编置永州魏安行洪兴祖以广传程瑀论语解编置安行钦州兴祖昭州帝尝谕桧曰近轮对者多谒告避免百官轮对正欲闻所未闻可令检举约束桧擅政以来屏塞人言蔽帝耳目凡一时献言者非桶桧功德则必中伤其欲有言者恐触忌讳仅论销金铺翠之类以塞责而已故帝及之盖亦防桧之壅蔽也 【谨按通鉴辑览 御批轮对固欲闻所未闻然闻之而不行虽闻何益史谓高宗避免之禁为防桧之壅蔽不知桧之敢为壅蔽实高宗有以致之果自知之则去桧亦在高宗耳若其不能去则是大阿倒授纲纽懈弛既不能除巨憝以清政纪而徒为是令正所谓不揣本而齐末庸河益乎】 衢州有盗起桧遣殿前司将官幸立将千中捕之不以闻晋安郡王因入侍言之帝大惊召问桧桧曰不足上烦圣虑故不敢闻盗平即奏矣退而知言由晋安遂奏晋安居秀王丧不当给俸月损二百缗帝为出内帑给之二十五年以沈长卿旧与李光启讥和议又与芮煜其赋牡丹诗有宁令汉社稷变作莽乾坤之句为邻人所告长卿编置化州煜武冈军静江有驿名秦城知府吕愿中率宾僚共赋秦城王气诗以媚桧愿中由此得召又张扶请桧乘金根车又有乞置益国官属及议九锡者桧闻之安然赵令衿观桧家庙记口诵君子之泽五世而斩为汪召锡所告徐史徐嘉又论赵鼎子汾与令衿饮别厚赆必有奸谋诏送大理拘令衿南外宗正司桧书赵鼎李光胡铨姓名必欲杀之鼎已死欲孥戮汾尤忌张浚令衿之狱张宗元之罢皆波及之浚在永州桧又使其党张柄知潭州与郡丞汪召锡共伺察之至是使汾自诬与浚及李光胡寅谋大逆凡一时贤士五十三人皆与焉狱成而桧病不能书帝幸桧第问疾桧无一语惟流涕而已熺奏请代居相位者帝曰此事卿不当与帝遂命直学士院沈虚中草桧父子致仕制熺犹遣其子坝等夜见台谏徐嘉张扶谋奏请已为相诏加封桧建康郡王熺少师皆致仕坝堪并提举江州太平兴国宫是夜桧卒后赠申王谥忠献桧两据相位凡十九年劫制君父包藏祸心倡和误国忘讎戮伦一时忠臣良将诛锄略尽其顽钝无耻者率为桧用争以诬陷善类为功其矫诬也无罪可状不过曰谤讪曰指斥曰怨望曰立党沽名甚则曰有无君心凡论人章疏皆桧自操以授言者识之者曰此老秦笔也察事之卒布满京城小涉讥议即

捕治中以深文又阴结内侍及医师王继先伺帝动静郡国事惟申省无一至帝前者桧立久任之说士淹滞失职有十年不解者附己者立与擢用自其独相至死易执政三十八人皆无时誉柔佞易制者如孙近韩肖胄楼照王次翁范同万俟卨程克俊李文会杨愿李若谷何若段拂汪勃詹大方余尧弼巫伋章夏宋朴史才魏师逊施巨郑仲熊之徒率拔之宥散遽跻政地其自言官听桧弹击辄升政府者凡十有二人开门受赂富敌于国外国珍宝死犹及门阴险如崖穿深阻叵渊同列论事帝前未常力辨但以一二语倾挤之李光尝与桧争论颇侵桧桧不答及光言毕桧徐曰李光无人臣礼帝始怒之凡陷忠良率用此术晚年残忍尤甚数兴大狱桧死燔废其赏祖述余说力持和议以窃据相位者尚数人至孝宗始荡涤无余开禧二年追夺王爵改谥缪丑

钦定续通志卷六百十六

●钦定续通志卷六百十七 奸臣传六

奸臣传

宋 【四】

○宋四

万俟卨 韩侂胄 丁大全 贾似道

万俟卨

韩侂胄

丁大全

贾似道

△万俟卨

万俟卨字符忠开封阳武县人登政和二年上舍第调颍昌府教授历尚书比部员外郎绍兴初盗曹成掠荆湖闲卨时避乱沅湘帅臣程昌寓以便宜檄卨权沅州事成奄至城下卨召土豪集丁壮以守成食尽乃退除湖北转运判官改提点刑狱岳飞宣抚荆湖遇卨不以礼卨憾之卨入覲希秦桧意谮飞于朝为留监察御史擢右正言时桧谋收诸将兵权卨力助之张俊归自楚州与桧合谋挤飞命中丞何铸治飞狱铸明其无辜桧怒以卨代治遂诬飞与其子云致书张宪令虚申惊报以动朝廷及令宪措置使还飞军狱不成又诬以淮西逗遛事飞父子与宪俱死大理卿薛仁辅寺丞李若朴何彦猷言飞无罪卨劾之知宗正寺士■〈亻 裹〉请以百口保飞卨又劾之士■〈亻 裹〉窜死建州刘洪道与飞有旧卨劾其媚飞闻飞罢宣抚抵掌流涕于是洪道抵罪终身不复参政范同为桧所引或自奏事桧忌之卨劾罢再论同罪谪居筠州

又为桧劾李光鼓倡孙近朋比二人皆被窜谪和议成高请诏户部会计用兵之时与通和之后所费各几何若减于前日乞以羨财别贮御前激赏库不许他用梓宫还以高为攒宫按行使内侍省副都知宋唐卿副之高请与唐卿同班上殿奏事其无耻如此张浚寓居长沙高妄劾浚卜宅踰制吴秉信自长沙还为浚辨浚乃得免除参知政事充金国报谢使使还桧假金人誉已数千言囑高以闻高难之他日奏事退桧坐殿庐中批旨除所厚者官吏钤纸尾进高曰不闻圣语却不视桧大怒自是不交一语李文会詹大方交章劾高高遂求去帝命与郡桧愈怒遂罢高寻谪居归州遇赦量移沅州二十五年召还徐参知政事寻拜尚书右仆射同中书门下平章事纂次太后回銮事实上之张浚以高与沈该居相位不厌天下望上书言其专欲受命于金高见书大怒以为金人未有衅而浚所奏乃若祸在年岁闲浚坐窜谪高后致仕卒谥忠靖高始附桧为言官所言多出桧意及登政府不能受钳制遂忤桧去桧死帝亲政将反桧所为首召高还高主和固位无异于桧士论益薄之

△韩侂胄

韩侂胄字节夫琦曾孙父诚娶宪圣皇后女弟仕至宝宁军承宣使侂胄以父任厯合门只候宣赞舍人带御器械淳熙末以汝州防御使知合门事孝宗崩光宗以疾不能执丧赵汝愚议定策立皇子嘉王侂胄有微劳宁宗既立侂胄欲推定策恩汝愚曰吾宗臣也汝外戚也何可以言功但迁侂胄宜州观察使兼枢密都承旨始大觖望然以传道诏旨浸见亲幸时时乘闲窃弄威福朱熹白汝愚当月厚赏酬其赏而疏远之汝愚不听右正言黄度欲劾侂胄谋泄斥去朱熹奏其奸侂胄怒使优人峩冠阔袖象大儒戏于帝前熹遂去彭龟年请留熹而逐侂胄未几龟年与郡侂胄进保宁军承宣使提举佑神观自是益用事而以抑赏故怒汝愚日深刘■〈弜攵〉者曩与侂胄同知合门事方汝愚议内禅寺■〈弜攵〉弗与闻内怀不平至是谓侂胄曰赵相欲专大功君岂惟不得节度将恐不免岭海之行矣侂胄愕然问计■〈弜攵〉因教之以御笔用台谏斥逐正人侂胄悟即以内批除所知刘德秀为监察御史杨大法为殿中侍御史罢吴猎监察御史而用刘三杰代之于是言路皆侂胄之党汝愚始危侂胄欲逐汝愚而难其名谋于京镗镗曰彼宗姓诬以谋危社稷可也庆元元年侂胄引李沐为右正言沐尝有求于汝愚不获即奏汝愚以同姓居相位将不利于社稷汝愚罢相始侂胄见汝愚徐谊实荐之汝愚既斥并逐谊朱熹彭龟年黄度李祥杨简吕祖俭等以攻侂胄得罪太学生杨宏中张榘徐范蒋傅林仲麟周端朝等又以上书论侂胄编

置已而侂胄拜保宁军节度使又设伪学之目以网括
汝愚朱熹门下知名之士用何澹胡纆为言官澹言伪学宜加风厉纆条奏汝愚有十不
逊且及徐谊汝愚谪永州谊谪南安军虑他日汝万复
用密谕衡守钱鞏图之汝愚抵衡暴卒留正旧在都堂众辱侂胄至是刘德秀论正引用
伪党坐罢斥时台谏迎合侂胄意以攻伪学然惮清议
不欲显斥熹侂胄意未快以陈贾尝攻熹召除兵部侍郎未至亟保沈继祖台察继祖诬
熹十罪落职罢祠三年刘三杰入对言前日伪党今变
为逆党侂胄大喜即除为右正言而坐伪学逆党得罪者五十有九人王沆献言今省部
籍记伪学姓名姚愈请降诏严伪学之禁二人皆得迁
官施康年陈谏邓友龙林采皆以攻伪学久居言路而张釜张岩程松率由此秉政四年
侂胄拜少保封豫国公五年加少师 【原传说作太
保今据太纪改】 封平原郡王六年进太傅婺州布衣吕祖泰上书言道学不可禁请诛
侂胄以周必大为相侂胄大怒决杖流钦州言者希侂
胄意劾必大首植伪党降为少保一时善类悉罹党祸虽本侂胄意而谋实始京镗镗死
张孝伯以为不弛党禁后恐不免报复之祸侂胄以为
然追复汝愚朱熹职名留正周必大亦复秩还政徐谊等皆先后复官伪党之禁解嘉泰
二年 【原传说作三年今据本纪改】 拜太师监惠
民局侂胄以势利蛊士大夫心薛叔似辛弃疾陈谦皆以废退起用当时因有损晚节以
规进者矣而陈自强则以侂胄童子师自选人不数年
致位宰相苏师旦周筠又侂胄厮役亦皆超取显仕羣小阿附势焰熏灼侂胄凡所欲为
辛执惕息不敢为异自强至印空名敕札授之惟所欲
用三省不预知也或劝侂胄立功以自固者于是恢复之议兴以殿前都指挥使吴曦兴
夔州都统论者多言曦必叛侂胄不省安丰守厉仲方
言淮北流民愿归附会弃疾入见言敌国必乱愿属元老大臣预为应变计郑挺邓友龙
等又附和其言开禧改元进士毛自知廷对言当乘机
以定中原侂胄大悦诏中外诸将密为行军计先是杨辅傅伯成言兵不可动抵罪至是
武学生华岳叩阍乞斩侂胄苏师旦周筠以谢天下谏
议大夫李大异亦论止开边岳下大理编置建宁大异斥去侂胄除平章军国事三日一
朝至都堂序班丞相上三省印并纳其第侂胄昵苏师
旦为腹心除为安远军节度使自置机速房于私第甚者假作御笔升黜将帅事关机要
未尝奏禀人莫敢言二年 【原传说作四年按宁宗
纪侂胄吴曦并于开禧三年已诛而开禧亦无四年其用薛叔以笔为宣抚俱系二年事
今据改正】 以薛叔以为京湖宣谕使邓友龙为两淮
宣谕使程松为四川宣抚使吴曦副之徐邦宪自处州召见以弭兵为言忤侂胄意削二

秩于是左司谏易祓大理少卿陈景俊太学博士钱廷玉皆起言恢复矣诏侂胄日一朝友龙叔似并升宣抚使吴曦兼陕西河东招抚使皇甫斌副之时诸将克复州县捷书闻侂胄议降诏超进兵未几皇甫斌等皆败绩乃罢邓文龙以邱密代为宣抚使侂胄既丧师始觉为师旦所误李璧悉数其罪赞侂胄斥去之师旦谪韶州已而金人渡淮攻庐和真扬取安丰濠又攻襄阳至枣阳乃以邱密签书枢密院事督视江淮军马侂胄输家财二十万以助军而谕邱密募人持书币赴敌营谓用兵乃苏师旦等所为非朝廷意金人答书辞甚倨且多所要素谓侂胄无意用兵师旦等安得专密又遣书许还河北流民及今年岁币金人乃有许意会吴曦叛降金状闻举朝震惊侂胄亟遣曦书许以茅土之封书未达而安丙杨巨源已率义士诛曦矣侂胄连遣方信孺使北请和金人欲责正隆以前礼赂以侵疆为界且索犒军银凡数千万而缚送首议用兵之臣信孺还奏侂胄大怒和议遂辍以殿前都指挥使赵淳为江淮制置使复锐意用兵自兵兴以来蜀口汉淮之民死于兵戈者不可胜计公私之力大屈而侂胄意犹未已中外忧惧礼部侍郎史弥远时兼资善堂翊善谋诛侂胄议甚秘皇子荣王入奏杨皇后亦从中力请乃得密旨罢侂胄平章军国事与在外宫观陈自强罢右丞相仍令权主管殿前司公事夏震以兵三百防护翌日侂胄入朝震呵止于涂拥至玉津园侧杀之嘉定元年与金人议和金以侂胄倡议用兵求函侂胄首许还淮南陕西地乃命临安府斲侂胄棺取其首遗之 【谨按通鉴辑览 御批金人必欲得侂胄师旦之首特恶其倡议用兵也在宋人则不当以此恶侂胄夫侂胄之奸罪素着乃宋之罪人非金之罪人也恢复况非其罪即云用兵之议倡自侂胄宁宗既从其谋岂可复委咎于下只冀和议之成不顾事理之非宜胡寅讥之也】 侂胄用事十四年威行宫省权震宇内常凿山为园下瞰宗庙出入宫闱无度孝宗畴昔思政之所偃然居之颜械草制言其得圣之清易祓撰答诏褒为元圣有司籍其家多乘舆服御之饰其僭紊极矣侂胄娶宪圣皇后侄女无子以鲁■〈宜宜〉子为后名■〈工乡〉侂胄既诛■〈工乡〉削籍流沙门岛

△丁大全

丁大全字子万镇江人面蓝色嘉熙二年举进士调萧山尉大全为威里婢婿夤缘以取宠位事内侍卢允升董宋臣累官殿中侍御史升侍御史兼侍读劾奏丞相董槐章未下大全夜半调隅兵百余人灵刃围槐第以台牒令舆槐至大理寺欲以此恐之须臾出北阙弃槐跽呼而散槐徐步入接待寺罢相之命始下自是志气骄傲道路以目寻为右谏议大夫进端

明殿学士签书枢密院事封丹阳郡侯宝佑六年拜参
知政事进右丞相兼枢密使封公太学陈宗刘黻黄镛曾唯 【原本作黄唯今据宋史纪
事本末改】 陈宜中林则祖等六人伏阙上书讼大
全台臣翁应弼吴衍为大全鹰犬钤制学校贬逐宗等开庆元年罢相以观文殿大学士
判镇江府中书舍人洪芹缴言大全鬼蜮之资穿窬之
行引用凶恶陷害忠良遏塞言路浊乱朝纲乞追官远窜以伸国法以谢天下侍御史沈
炎右正言曹永年监察御史朱貔孙相继论大全奸回
监察御史饶虎臣又论大全绝言路坏人才竭民力误边防四罪景定元年诏致仕喜臣
论之不已诏送南康军居住移送南安二年移窜贵州
与州守游翁明失色杯酒翁明愬大全阴造弓矢将通蛮为不轨广西经略朱禔孙闻于
朝诏移置新州太常少卿刘震孙缴奏乞移徙海岛页
似道复讽禔孙杀之四年正月 【本纪作二月】 禔孙遣将军毕迁护送舟过滕州挤
之于水而死

△贾似道

贾似道字师宪台州人制置使涉之子少落魄游博不事操行以父荫补嘉兴司仓
会其姊为理宗贵妃有宠遂诏赴廷对妃于内中奉汤
药以给之擢太常丞军器监益恃宠不检日纵游诸妓家至夜即燕游湖上不反理宗常
夜凭高望西湖中灯火异常时语左右曰此必似道也
明日询之果然使京尹史岩之戒敕之岩之曰似道虽有少年气习然其材可大用 【谨
按通鉴辑览 御批贾似道燕游湖上不返灯火
盛陈理宗既凭高望见即当切责俾改其过过而不改罪之可也乃徒令京尹传言示戒
岩之复曲意阿谀转谓其才可大用驯至柄政擅权败
坏国事皆理宗之始息酿成之耳】 淳佑中累迁京湖制置使兼知江陵府调度赏罚得
以便宜施行加宝文阁学士京湖安抚制置大使又以
端明殿学士移镇两淮年始三十余宝佑二年加同知枢密院事临海郡开国公威权日
盛台谏常论其二部将即毅然求去孙子秀新除淮东
总领外人忽传似道已密奏不可矣丞相董槐惧即以似道所善陆壑代之其见惮如此
四年加参知政事五年加知枢密院事六年改两淮宣
抚大使自端平初孟珙会元兵灭金约以陈蔡为界师未还而用赵范谋发兵据穀函绝
河津取中原地元兵击败之范遁归自是兵端大启开
庆初元宪宗自将征蜀世祖以皇弟攻鄂州元帅乌兰哈达由云南入交址自邕州蹂广
西破湖南理宗大惧乃以赵葵军信州御广兵以似道
军濮阳援鄂即军中拜右丞相鄂东南隩破再筑元兵再破之似道密遣宋京诣军中请
称臣输岁币会元宪宗崩于钓鱼山遂许之元兵拔砦

而北似道用刘整计追杀其余兵遂上表以肃清闻帝以其有再造功加少傅入朝百官郊劳帝欲立荣王子孟启为太子宰相吴潜不可帝积怨潜似道欲倾潜遂陈建储之策令沈炎劾潜措置无方致全衡永桂皆破大称旨乃议立孟启贬潜循州尽逐其赏人高达在围中恃其武勇殊易似道曹世雄向士璧在军中事皆不关白似道似道皆恨之以核诸兵费世雄士璧皆坐侵盗官钱贬远州每言于帝欲诛达帝知其有功不从吕文德谄似道论功第一而达居其次明年元遣郝经等持书申好息兵且征岁币似道方使廖莹中辈撰福华编称颂鄂功通国皆不知所谓和也似道乃密令淮东制置司拘经等于真州时理宗在位久怠于朝政由是似道进用羣小取先朝旧法率意纷更增吏部七司法买公田以罢和余浙西田亩有值千缗者似道均以四十缗买之数稍多予银绢又多予度牒告身吏又恣为操切浙中大扰是秋彗出柳光烛天长数十丈自四更见日高始灭台谏布韦皆上书言公田不便民闲愁怨所致似道上书力辨之且乞罢政帝勉留之太学生萧规叶李等上书言似道专政命京尹刘良贵摺摭其罪悉黥配之后又行推排法江南之地尺寸皆有税而民力弊矣理宗崩度宗又其所立每朝必答拜称之曰师臣而不名朝臣怕称为周公甫葬理宗即弃官去密使吕文德诈报元兵攻下沱急朝中大骇帝与太后手诏起之似道至以经筵拜太师咸淳三年又乞归养大臣侍从传旨留之者日四五至中使加赠赉者日十数至除平章军国重事一月三赴经筵三日一朝赴中书堂治事赐第葛岭使迎养其中吏抱文书就第署大小朝政一切决于馆客廖莹中堂吏翁应龙宰执充位署纸尾而已似道虽深居凡台谏弹劾诸司荐辟及京尹畿漕一切事不关白不敢行李芾文天祥陈文龙陆达杜渊张仲微谢章辈小忤意辄斥重则屏之远方终身不录一时正人端士为似道破坏殆尽官吏争纳赂求美职贪风大肆五年复称疾求去帝泣留不从令六日一朝一月两赴经筵六年命入朝不拜朝退帝必起避席目送之出殿廷始坐继又令十日一入朝时襄阳围急似道日于葛岭起楼阁亭榭取宫人娼尼有美色者为妾肆为淫乐惟故博徙日至纵博人无敢窥其第者其妾兄来立府门若将入者似道见之缚投火中尝与羣妾踞地鬪蟋蟀所狎客戏之曰此军国重事邪自是或累月不朝帝如景灵宫亦不从驾八年明堂礼成祀景灵宫天大雨似道期帝雨止升辂胡贵嫔之父【宋史纪事本本及续通志作贵嫔之兄】显祖为带御器械请如开禧故事却辂乘逍遥辇还宫帝曰平章得无不可显祖给曰平章已允帝遂归似道大怒曰臣为大礼使陛下举动不得预闻乞

罢政即日出嘉会门帝留之不得乃罢显祖涕泣出贵嫔为尼似道始还专恣益甚畏人议已务以权术驾馭不爱官爵牢宠一时名士又加太学餐钱宽科场恩例以小利陷之由是言路断绝威福肆行自围襄阳以来每上书请行边而阴使台谏上章留己吕文焕以急告似道复申请之事下公卿杂议监察御史陈坚等以为师臣出顾襄阳未必能及淮顾淮未必能及襄阳不若居中以运天下为得乃就中书置机速房以调边事襄阳降元似道曰臣始屡请行边先帝皆不许使早听臣出当不至此母胡氏卒诏以天子卤簿葬之起坟拟山陵百官奉襄事立大雨中终日无敢易位寻起复入朝度宗崩元兵破鄂羣臣言非师臣亲出不可 【谨按通鉴辑览 御批似道素不知兵前此鄂州之役掩败为功尤众人所共见及鄂破而元师乘胜东下席卷之势已成虽名将尚恐不足抵御似道即出岂能纾敌患而安众心廷臣疏请似道亲出盖嫉其权奸误国藉以视其致败耳非果望其有济于事然轻国计而快私愤廷臣之心亦不可问此宋之所以亡也】 似道不得已始开都督府临安然惮刘整不行明年整死乃上表出师抽诸路精兵以行金帛輜重之舟舳舻相衔百余里至芜湖遣还军中所俘曾安抚以荔子黄柑遗元相巴延俾宋京如军中请输岁币称臣如开庆约元人不从时一军七万余人尽属孙虎臣军丁家洲似道与夏贵以少军军鲁港虎臣失利似道仓皇召贵计事贵曰诸军胆落吾何以战公惟入扬州招溃兵迎驾海上吾以死守淮西尔遂解舟去似道与虎臣以单舸奔扬州明日败兵蔽江而下似道使人登岸扬旗招之皆不至乃檄列郡如海上迎驾上书请迁都列郡守皆遁陈宜中请诛似道乃罢平章都督子祠官除诸不恤民之政放还诸窜谪人复吴潜向士璧等官诛其幕官翁应龙廖莹中王庭皆自杀高斯得乞诛似道不从止削三官然尚居扬不归王爚入见太后曰本朝权臣稔祸未有如似道之烈者缙绅草茅不知几疏陛下皆抑而不行非惟付人言于不恤何以谢天下始徙似道婺州婺人闻似道将至率众为露布逐之监察御史孙嵘曳等皆以为罚轻言之不已谪高州团练使循州安置籍其家福王与芮素恨似道募有能杀似道者使送之贬所在县尉郑虎臣欣然请行嵘曳应麟奏似道家畜乘輿服御物有反状乞斩之诏遣鞫问未至八月似道至漳州木绵庵虎臣屡讽之自杀不听虎臣曰吾为天下杀似道虽死何憾拉杀之

钦定续通志卷六百十七

●钦定续通志卷六百一十八 奸臣传七

奸臣传

辽

○辽

耶律伊逊 张孝杰 耶律雅克 萧实沙 萧额哩页 耶律赫噜 萧德勒岱 萧额图琿 萧达噜噶

耶律托卜嘉 萧特古斯

耶律伊逊

张孝杰

耶律雅克

萧实沙

萧额哩页

耶律赫噜

萧德勒岱

萧额图琿

萧达噜噶

耶律托卜嘉

萧特古斯

△耶律伊逊

耶律伊逊字呼都克琨五院部人父达喇家贫服用不给部人号穷达喇伊逊美风仪外和内狡重熙中为文班吏掌太保印陪从入宫皇后见伊逊详雅如素宦命补笔砚吏帝亦爱之累迁护卫太保道宗即位以伊逊先朝任使赐汉人户四十同知点检司事常召决疑议升北院同知历枢密副使清宁五年为南院枢密使改知北院封赵王九年耶律仁先为南院枢密使时驸马都尉萧呼都克与重元党恶仁先在朝奏曰仁先可任西北路招讨使帝将从之伊逊奏曰臣新参国政未知治体仁先先帝旧臣不可遽离朝廷帝然之重元乱平加太子太傅【按原传作拜北院枢密使而不载加太子太傅兹据本纪增改】进王魏咸雍五年加守太师诏四方有军旅许以便宜从事帝数幸其第【据游幸表增】势震中外门下馈赂不绝凡阿顺者蒙荐握忠直者被斥甯太康元年皇太子始预朝政法度修明伊逊不得逞谋以事诬皇后后既死彘欲害太子乘闲入奏曰帝与后如天地并位中宫岂可旷盛称其党驸马都尉萧锡默之妹美而贤帝信之纳于宫寻册为皇后护卫萧和克谋杀伊逊不遂林牙萧岩寿密奏伊逊有异图语详岩寿传出为中京留守伊逊泣谓人曰伊逊无过因谗见出萧锡默辈以其言闻于帝帝悔之无何出萧岩寿为顺义军节度使诏近臣议召伊逊事北面官属无敢言者耶律

萨喇曰初以萧岩寿奏出伊逊若所言不当宜坐以罪
若当则不可复召累谏不从乃复召为北院枢密使伊逊因与萧实沙萧德勒岱等诬构
耶律萨喇等同谋立皇太子迫令具状帝怒诛萨喇及
苏色等伊逊恐帝疑自变量人庭诘各令荷重校绳系其颈不能出气人人不堪甚酷惟
求速死反奏曰别无异辞乃囚皇太子于上京噶萨巴害
之五年帝将出猎伊逊奏留皇孙帝欲从之同知点检萧乌纳谏乃止语详乌纳传由是
帝始疑伊逊颇知其奸会北幸将次黑山之平定帝适
见扈从官属多随伊逊后恶之出知南院大王事及例削一字王爵改王混同意稍自安
及赴阙入谢帝即日遣还改知中府事七年坐以禁物
鬻入外国下有司议法当死其党耶律雅克奏当入八议得减死论击以铁骨朵幽于来
州后谋奔宋及私藏兵甲事觉缢杀之干统二年发冢
戮其尸

△张孝杰

张孝杰建州永霸县人家贫好学重熙二十四年擢进士第一清宁闲累迁枢密直
学士咸雍初坐误奏事出为惠州刺史俄召复旧职兼
知户部司事三年参知政事同知枢密院事加工部侍郎八年封陈国公帝以孝杰勤于
数问以事为北府宰相汉人贵幸无比太康元年赐国
姓明年秋猎帝一日射鹿三十燕从官酒酣诏孝杰坐御榻旁帝诵黍离诗知我者谓我
心忧不知我者谓我何求孝杰奏曰今天下太平陛下
何忧富有四海陛下何求帝大悦三年羣臣侍燕帝曰先帝用仁先华格以贤智也朕有
孝杰伊逊不在仁先华格下诚为得人欢饮至夜乃罢
是年伊逊潜皇太子孝杰用力相济及伊逊受诏按皇太子党人诬害忠良孝杰之谋居
多伊逊荐孝杰忠于社稷帝谓孝杰可比狄仁杰赐名
仁杰乃许放海东青鹞以获头鹅加侍中 【据道宗纪增】 六年既出伊逊帝亦悟孝
杰奸佞出为武定军节度使坐私贩广济湖盐及擅改
诏旨削爵贬安肃州数年乃归大安中死于乡干统初剖棺戮尸以族产分赐臣下孝杰
久在相位贪货无厌时与亲戚会饮尝曰无百万两黄
金不足为宰相家初孝杰及第诣佛寺忽迅风吹孝杰幞头与浮图齐坠地而碎有老僧
曰此人必骤贵然亦不得其死竟如其言

△耶律雅克

耶律雅克字善宁季父房之后四世祖托音太祖异母弟父曰呼噜苏官至太师雅
克狡佞而敏清宁闲为左护卫太保太康初转北面林
牙耶律伊逊为枢密使以雅克为耳目凡闻见必以告伊逊爱而荐之帝亦以为贤拜左
伊勒希巴及皇太子被诬帝遣雅克往讯之太子谓雅

克曰公与我为昆弟行当念无辜达意于帝祷之甚恳雅克卒易太子言为伏状以奏及太子被逐伊逊杀害忠良多雅克之谋为契丹行官都部署五年拜南府宰相迁特哩袞大安三年为西京留守致仕寿隆初以疾卒

△萧实沙

萧实沙摩和纳部人父都勒斡历官节度使实沙辩黠善揣摩人意清宁闲以年劳迁护卫太保太康初耶律伊逊复入枢府益横恣时实沙出入伊逊家以朝臣不附者辄使出之由宿卫迁殿前副点检三年护卫萧和克等谋杀伊逊事觉下狱实沙与伊逊谋召萧德勒岱商所以构太子事计既行迁殿前都点检兼同知枢密院事及耶律实沙奉诏讯太子太子具陈其诬实沙闻之谓雅克曰如此奏则大事去矣当易其辞为伏款雅克从之帝大怒逐太子实沙叱令登车遣卫卒阖车门是年迁北院枢密副使复陈阴害太子计伊逊从之及伊逊出知南院大王事亦出实沙为保州统军使卒干统闲剖棺戮尸二子达勒达年结皆伏诛

△萧额哩页

萧额哩页字额图琿国舅阿拉次子便佞滑稽善女工重熙闲以外戚进清宁初补只侯郎君尚郑国公主拜驸马都尉累迁南面林牙以父为萧格所潜出为春先军节度使十年召为北面林牙咸雍中会有告额哩页与族人珠展谋害耶律伊逊按无状出为宁远军节度使自后揣伊逊意倾心事之荐为国舅详袞太子初封迁西郡王时伊逊擅恣凡不附己者出之乃引额哩页为北府宰相兼知契丹行宫都部署事及伊逊谋构皇太子额哩页多助成之遂知北院枢密事以女侄妻伊逊子苏页恃势横恣至有无君之语朝野侧目帝出伊逊额哩页坐与伊逊党以天平军节度使归第寻拜西北路招讨使以母忧去官卒

△耶律赫噜

耶律赫噜字和尔沁六院锡哩尼古察之后柔佞喜苟合清宁初伊逊引用羣小赫噜附之遂见委任擢南面林牙伊逊潜皇太子杀忠直赫噜多预其谋弟乌页亦党伊逊时号二贼伊逊荐为北院大王卒乌页亦至南院大王

△萧德勒岱

萧德勒岱约尼温汗宫分人善阿意顺色清宁初伊逊用事甚见引用累迁北面林牙同知北院宣徽使事及皇太子废遣德勒岱监送上京德勒岱促其行不令下车起居饮食数加陵侮至则筑圜堵囚之太康中迁西南招讨使历顺义军节度使转国舅详袞寿隆五年坐怨望以老免死阖门籍兴圣宫贬西北统军司卒二子特点额呼干统闲以父与伊逊谋伏诛

△萧额图琿

萧额图琿国舅少父房之后咸雍中补牌印郎君太康三年伊逊令护卫太保耶律扎拉诬告耶律萨喇等废立事案无状额图琿希伊逊意欲实其事与耶律托卜嘉等入阙诬奏萨喇等谋害伊逊欲立皇太子事臣亦预谋今不自言恐事泄连坐帝果怒徙皇太子于上京额图琿尚皇女赵国公主为驸马都尉【按公主表道宗第二女封赵国公主下嫁萧托卜嘉坐昭怀太子事被害其弟额图琿欲逼尚公主公主以其党伊逊恶之未几额图琿以事伏诛未明言其改适额图琿也谨附识】后与伊逊议不合衔之复以车服僭拟人主被诛额图琿临刑语人曰前告耶律萨喇事皆伊逊教我恐事彰杀我以灭口耳

△萧达噜噶

萧达噜噶约尼纒古汗宫分人性奸险清宁闲伊逊窃权用事阴怀逆谋达噜噶比附之遂见奖拔稍迁至旗鼓伊喇详卫伊逊欲害太子以达噜噶凶果可使遣与近侍直长萨巴诣上京同留守萧塔坦夜引力士至囚室给以有赦召太子出杀之函其首以归诈云疾薨以达噜噶为男舅详卫达噜噶恐杀太子事白出入常佩刀有急召即欲自杀干统闲诏枢密使耶律阿苏大索伊逊党人达噜噶以赂获免后以疾卒

△耶律托卜嘉

耶律托卜嘉仲父房之后以善击鞠幸于帝凡驰骋鞠不离杖咸雍初补祗候郎君与耶律伊逊善故内外畏之及太子被谮按无迹托卜嘉附伊逊与额图琿等实其诬帝信之废太子改延庆宫副使寿隆元年为行宫都部署天祚嗣位出为特们部节度使及枢密使耶律阿苏大索伊逊旧党以赂获免徙德呼勒部节度使复为敦睦宫使天庆元年出为西北路招讨使以疾卒

△萧特古斯

萧特古斯字和宁卓特部人仕重熙中以能称累迁左中丞清宁初历北面林牙改北院枢密副使辨敏善伺颜色应对合帝意皇太后尝曰有大事非耶律华格萧特古斯不能决眷遇日隆知北院枢密使事六年出知黄龙府八年拜南府宰相顷之为北院枢密使【按道宗纪清宁八年特古斯自知枢密使事为枢密使咸雍三年乃自知黄龙府事往贺宋主即位与此纪年互异】诏许便宜从事为人奸佞有余好聚敛专悞变法度为枢密数月所荐引多为重元党与由是免为庶人后没入兴圣宫卒

钦定续通志卷六百一十八

●钦定续通志卷六百十九 奸臣传八

奸臣传

元

○元

阿哈玛特 卢世荣 僧格 特们德尔 哈玛尔 吹斯戩

阿哈玛特

卢世荣

僧格

特们德尔

哈玛尔

吹斯戩

△阿哈玛特

阿哈玛特回纥人不知其所由进世祖中统三年命领中书左右部兼诸路都转运使专以财赋之任委之阿哈玛特奏降条画宣谕各路运司明年以河南钧徐等州俱有铁冶请给授宣牌以兴鼓铸之利更括户三千兴煽铁冶岁输铁一百三万七十斤就铸农器二十万事令易粟输官得四万石至元元年正月阿哈玛特言太原民煮小盐越境私贩民贪其价廉竞相买食以故解盐不售岁入课银止七千五百两请自今岁增五千两无论僧道军匠计户均输自是盐铁之利始起是年秋八月罢领中书左右部并入中书省超拜阿哈玛特为中书平章政事三年立制国用使司命兼领使职因奏真定顺天金银不中程者宜改铸布格齐山出石绒织为布火不能然应遣官采取又言国家费用浩繁今岁自车驾至都已支钞四千锭恐来岁度支不足宜量节经用桓州峪所得银矿已十六万斤每百斤可淘银三两锡二十五斤开采所需鬻锡以给悉从其请七年正月立尚书省罢制国用使司仍命平章尚书省事阿哈玛特多智巧言以功利成效自负众称其能世祖锐意富国试以事颇有成绩又见其与丞相锡津史天泽等争辩屡有以诘之由是奇其才授以政柄言无从不初尚书省之立也诏凡铨选各官吏部按资品呈尚书省由尚书咨中书省闻奏至是阿哈玛特擢用私人不由部拟不关白中书丞相安图以为言帝问之对曰事无大小既委之臣所用之人须臣自择虽嫌怨不敢避之九年并尚书省入中书 【按世祖纪至元八年十二月诏尚书省迁入中书省九年正月并尚书省入中书省盖事起于八年冬至九年始定其制也宰相表及百官志并作八年所载有互异】 复命为中书平章政事明年又以其子呼逊为大都路总管兼大兴府尹安图见其专恣日甚乃奏大都路总管以下多不称职乞选人早代寻又奏阿哈玛特张惠挟宰相权为商贾以网罗天下大利民

困无所诉阿哈玛特曰谁为此言臣等当与廷辩安图进曰左司都事周祥中木取利罪状明着帝曰俟征毕当显黜之既而枢密院请以呼逊同佥院事帝不允曰彼贾胡事犹不知况可责以机务乎十二年丞相巴延伐宋既渡江捷报日至帝命阿哈玛特与姚枢图克坦公履张文谦陈汉归杨诚等议行盐钞法于江南及贸易药材事阿哈玛特条上众议曰枢云江南交会不行必致小民失所公履云巴延已尝榜谕交会不
换今行之恐失信于民文谦谓可否当询巴延汉归及诚皆言以中统钞易交会何难之有帝曰枢与公履不识事机朕尝问左丞陈严亦言宋
交会速宜更换今当依汝议又奏北盐药材枢与公履皆言可使百姓从便贩鬻臣谓若听民自售势必紊乱不一拟于南京卫辉等路籍括药材蔡州发盐十二万斤官自贸易帝从之十二年阿哈玛特又言比因军兴之后既免编民征税又罢转运司官令各路总管府兼领课程以故
国用不足莫若验户数多寡酌远就近立都转运司选廉干官分理其事广行鼓铸官为局卖并禁民闲私造铜器则民力不屈而国用充矣乃
复立诸路转运司悉以其私人为使十五年正月阿哈玛特奏自今御史台非白省毋擅召仓库吏亦毋钩索钱谷数及集议中书不至者罪之
并报可四月湖南左丞 【本作中书左丞今据崔斌传改】 崔斌入覲奏曰先以江南官冗委任非人命阿里等澄汰之今蔽不以闻是罔上也杭州地大委寄非轻阿哈玛特以不肖子玛苏库充达噜噶齐岂量才授任之道且阿哈玛特先自陈乞免任其子弟今身为平章而子若侄
或为行省参政或为礼部尚书将作院达噜噶齐领会同馆一门悉处要津无以示天下公有旨并赐罢黜然不以是为阿哈玛特罪帝尝谓淮
西宣慰使昂吉尔曰夫宰相者明天道察地理尽人事兼此三者乃为称职阿尔哈雅敏珠尔丹等亦未可为相回回人中阿哈玛特真宰相才也其为帝所称道如此十六年四月奏立江西榷茶运司以卢世荣为使又以都转运司官多俸重改诸路宣课提举司都省行省各委一人监
理明年中书奏行省安塔阿哈里等言自立宣课提举司官吏至五百余员左丞陈岩范文虎等谓其扰民且侵盗官钱罢之便阿哈玛特言立
提举司未及三月而请罢此必行省有奸弊故先发制人乃诏御史台遣能臣往按其事具以实闻未几崔斌迁江淮左丞阿哈玛特虑其害己
乃奏理算江淮钱谷诬构斌与平章阿里布右丞雅克特穆尔盗官粮四十万擅易命官八百员及铸造铜印等事三人竟坐诛时阿哈玛特在
位久益监贪横援引奸党郝祯耿仁骤升同列罔上剥下众庶流移民有美田辄取为己有内通货贿外示威刑 【按元典章元阿哈玛特专

用酷吏以王仪为刑部侍郎能以一绳缚囚令其徧身痛楚稍重则四肢断裂人号王侍郎绳索法】在廷相视莫敢发有宿卫士秦长卿者慨然上书摘其奸竟为所害毙于狱十九年三月【按宰相表至元十九年阿哈玛特为左丞相附识】帝幸上都太子珍戡从有益都千户王着素疾恶因人心愤怨密铸大铜锤自誓击阿哈玛特首与妖僧高和尚合谋以戊寅日诈称皇太子还都作佛事纠党八十余人夜入京城旦遣二僧诣中书省令市斋物省中疑而讯之不伏及午又矫令旨俾枢密副使张易发兵夜会东宫前易不察遽以兵往着白驰见阿哈玛特谎言太子将至令省官悉候于官前阿哈玛特素惮太子先遣使出关北迎悉为伪太子所杀夺其马南入健德门至东宫前其徒皆下马伪太子立马呼省官至前责阿哈玛特数语着即牵去以所袖铜锤碎其脑立毙继呼左丞郝禎至杀之囚左丞张惠时变起仓猝且昏夜众遥望莫知其故尚书张九思自宫中大呼以为诈留守司达噜噶齐布敦遂持挺击立马者坠地弓矢乱发众奔溃多就擒高和尚等逃去着挺身请囚帝闻之震怒即命枢密副使博啰司徒和尔果斯参政阿里等驰诣大都讨乱者获高和尚于高粱河与王着并醢于市并杀张易着临刑大呼曰王着为天下除害今死矣异日必有为我书其事者初阿哈玛特死帝犹未察其奸徐询博啰始尽得其罪状怒曰王着杀之诚是也命发墓剖棺戮尸于通玄门外纵犬啖其肉子侄皆伏诛籍其家得橐藏二人皮两耳俱存问之其妾引住云每诅咒时置神座于上其应甚速又以帛二幅画甲骑围守幄殿兵皆挺刃内向如击刺状画者陈姓又有曹震圭者尝推算其年命王台判者妄引图讖皆言涉不轨事闻刺剥四人皮以徇

△卢世荣

卢世荣大名人当阿哈玛特专政世荣以贿进为江西榷茶运使坐罪废阿哈玛特死廷臣讳言利无以副帝意有僧格者荐世荣能救钞法增课额上可裕国下不损民世祖召见奏对称旨至元二十一年召中书省官与世荣议所当行右丞相和尔果斯与右丞敏珠尔丹参政张雄飞温德亨皆以议不合同日罢去复起安图右丞相以世荣为右丞而左丞史枢参政博啰默色哈雅萨题勒密实参议贝降皆世荣所荐也世荣既骤被显用即日坐中书专理钞法通行中外官吏奉法不虔者加以罪因奏言窃见老幼疾病之民衣食不给行乞于市非盛世所宜有宜委各路正官给衣粮又请弛民闲买卖金银江湖鱼利禁罢怀孟诸路竹监优恤驿户困乏大率先反阿哈玛特所为巧于沽名既而言南北

食盐每引十五两国家未尝多取今官豪拥货射利每引价至八十贯贫者多不得食宜以二百万引给商一百万引散诸路立常平盐局或贩者增价官平其直售之又京师富户酿酒价高味薄课不以时输宜一切禁罢官自酤卖庶民用给而国计亦得帝并从之世荣居中书未十日御史中丞崔彧言其不可为相大忤旨下彧吏按问罢职明年正月世荣奏言天下岁课钞止九十余万锭以臣经画不取于民裁抑权势所侵可增三百万锭事未行而中外已非议臣请与台院面议上前帝曰卿但言之世荣言自王文统诛后钞法虚弊今莫若依汉唐故事括铜铸钱并制绫券与钞参行更立市舶都转运司于泉杭二州官自具船给本募人入番官取其利七商有其三禁私贩航海者拘其先贮货物纳诸官匿者许告没其财半给告者各路虽建常平仓实无所蓄宜尽禁权势所擅产铁之所官立炉鼓铸为器鬻之以所得利合常平盐课占谷于仓待贵时出糶必能均物价而获厚利国家虽立平准库然无晓规运者以致钞法虚弊诸物踊贵宜于各路立平准周急库轻其月息以贷贫民则贷者众而本且不失今随朝官吏增俸独州郡未增可于各都立市易司领诸牙侖计商人物货四十分取一以十为率四给牙侖六为官吏俸国家以兵得天下不藉粮馈惟资辛马宜于上都隆兴等路以官钱置币帛易羊马于北方选蒙古人牧之收其皮毛筋角酥酪以十之二与牧者而马以备军兴羊以充赐予帝每事称善世荣因奏曰臣所行怨之府也后必有阴中臣者臣实惧焉帝曰疾足之犬狐不爱焉主人岂不爱之汝之所行朕自爱焉未几奏罢行御史台其所隶按察司隶内台又请随行省所在立行枢密院帝曰行院之事前日已议由阿哈玛特任智自私欲其子呼逊行省兼兵柄而止汝今行之于事为宜明日奉升六部为二品又奏令按察司总各钱谷择干济者用之其刑名事上御史台钱谷由部申省帝曰汝与老臣共议然后行之可也二月御史台奏初置行台时朝廷老臣集议以为有益今无所损不可辄罢且按察司兼转运则纠弹之职废帝曰其依世荣言又奏立规措所所司官吏以善贾者为之且曰天下能规运钱谷者向皆在阿哈玛特之门今籍录以为污滥此岂可尽废臣欲择其通才可用者然惧有言臣用罪人帝曰可用则用之何惧为遂以前河闲转运使张弘纲斯多卜丹博啰哈雅孙桓并为河闲山东等路都转运盐使其它擢用者其众世荣既以利自任知敛怨日甚乃以九事说世祖诏天下一免民闲包银三年二官吏俸毋合民户带纳三蠲大都地税四江淮民失业鬻妻子者官为收赎五逃移复业者免其差税六乡民造醋者免收课七江南佃户租课减免一分

八添支内外官吏俸五分九定百官考课升擢法意在释怨要誉世祖悉从之已又奏定真定济南江淮等处宣慰司兼都转运使专治课程仍立条例禁诸司不能追摄管课官吏及遣人辄至辨课处沮援按察司不得检察文卷三月世荣奏以宣德王好礼并为濶西道宣慰使帝曰宣德人多指其奸世荣言彼自陈能岁办钞七十五万锭是以令往世荣居中书甫数月恃委任之专视丞相犹虚位左司郎中周戴议事稍不合坐以沮格诏旨奏而杀之朝中震慑无敢言者监察御史陈天祥独上章论其奸邪不法状时帝在上都御史大夫伊苏特穆尔以闻帝悟即遣索等多还大都命丞相安图集诸司官吏老成儒士及知民情者同世荣听读天祥弹文仍令世荣天祥同赴上都廷办安图言世荣昔言能不取于民岁办钞三百万锭令钞复实诸物悉贱民得休息数月即有成效今已四阅月所行不符所言所出多于所入引用儉人紊乱选法翰林院学士赵孟传等亦言世荣初以财赋自任当时人情不敢预料将谓别有奇术可以增益国用及今观之不过如御史所言若复恣其所行为害非细天祥与世荣面质帝前皆款伏传旨命安图与诸老臣议世荣所行当罢者罢之更者更之所用非人立皆奏斥遂下世荣于狱十一月帝问近侍呼喇珠曰汝与卢世荣有何言对曰近闻人言世荣狱已竟犹日养之徒费廩食诏诛之剖其肉以食禽獭

△僧格

僧格西域人丹巴国师弟子也能通诸国语尝为西蕃译史性狡黠好言财利事世祖深喜之及后贵幸乃讳言师事丹巴背之至元中擢为总制院使掌浮图氏教兼治吐蕃事御史台尝欲以章律为按察使世祖曰此人僧格尝言之及卢世荣见用亦由僧格之荐中书省尝令李留判市油僧格请以官钱往市司徒和尔果斯谓非汝所宜为僧格不服至相殴且谓曰与其使汉人侵盗曷若与僧寺及官府营利乎乃出油万斤与之后以所营息钱进和尔果斯曰我初不悟此也一日僧格在帝前论和雇和买事因语及帝益喜始有大任意尝令僧格具省臣姓名以进内廷有所建置人才进退咸得与闻二十四年二月复置尚书省以僧格与特穆尔为平章政事会更定钞法颁行至元宝钞于天下中统钞通行如故僧格尝奉旨检核中书省校出亏欠钞四千七百七十锭昏钞一千三百四十五锭平章敏珠尔丹即自伏参政杨居宽谓职掌铨选钱谷非所专僧格令左右拳其面问曰既典选事果无黜陟失当者乎寻亦引服奏闻帝命与丞相安图共讯且曰此曹狡狴毋使他日得以胁问诬伏为辞数日僧格又奏中书参政郭佑多所逋负尸位不言每以疾为托臣见中

书庶务隳惰如此故殴辱之今已款服帝命穷诘之佑
与居宽皆弃市人咸冤焉台吏王良弼及江宁县达噜噶齐吴德尝与人非议时政僧格
闻之曰若辈谤毁不诛无以惩后并杀之僧格尝奏以
沙市鼎摇授江淮行省左丞乌玛喇为参政领泉府市舶两司又以贝降为福建行省平
章既得旨乃言于世祖曰臣前言凡授省臣及行省官
并与丞相安图议适丞相还大都不及通议臣恐有以前奏为言者帝曰朕若主也朕已
允行有言者其令朕前言之十月乙酉帝闻翰林集贤
诸臣曰以丞相领尚书省汉唐有此制否咸对曰有之翊日左丞叶李言前省官不能行
者平章僧格能之宜为右丞相制曰可遂以为尚书右
丞相兼统制院使领功德使司事于是僧格奏以平章特穆尔代其位明年正月以甘肃
参政特默格不任事奏济雅岱往代又以江西平章呼
图克特穆尔不职奏罢之兵部尚书呼图克化尔不勤于政殴罢之而后奏帝曰若辈不
罢汝事何由得行也 【按辍耕录载华亭彭玮云僧
格与江南释教总统嘉木扬喇勒智相表里请发宋诸帝陵僧格矫制可其奏史传未载
谨附识】 自立尚书省摘委六部钩考百司尚以为不
专更置征理司以治财谷之当追者僧格以理算为事毫分缕析入仓库者无不破产及
当更代皆弃家而避十月僧格奏湖广行省钱谷已责
平章约苏穆尔自首偿矣他省欺盗必多乞以参政实都户部尚书王巨济等十二人理
算江淮江西福建四川甘肃安西六省耗失之数每省
各二人特给印章与之并给兵为卫帝皆从之当是时天下骚然江淮尤甚而谀者方且
讽都民为之立石颂德帝闻之曰民愿立者听于是翰
林制文题曰王公辅政碑既成树于省前楼覆其上而丹雘之又以总制院所统西蕃诸
宣慰司军民财谷事体甚重宜有以崇异之奏改为宣
政院秩从一品用三台银印帝问宜用何人对曰臣与托音于是命僧格以开府仪同三
司尚书右丞相兼宣政院使领功德使司事托音同为
使二十六年帝将幸上都僧格言去岁陛下北幸臣日视内帑诸库无虚日今岁欲乘小
舆以行人必窃议帝曰汝但乘之毋畏人言又奏近委
省臣检责左右司文簿凡经监察御史稽照者遗逸尚多自今当令御史就省部稽照书
姓名于卷末苟有遗逸易于归罪仍命侍御史坚通监
视失则连坐世祖从之乃答监察御史四人自后御史赴省部者掾令史与之抗礼但遣
小吏持文簿置案而去听御史自行检阅而台纲废矣
僧格言国家经费既广岁入恒不偿所出今盐课每引直中统钞三十贯宜增为一锭茶
税每引直五贯宜增为十贯酒醋税课江南宜增额十
万锭内地五万锭协济户十八万自入籍至今止输半赋闻其力已完宜增为全赋如此

则国用可支诏皆从之僧格既专政凡铨调内外官皆任已出而宣敕尚由中书乃请今后宣敕并付尚书省由是以官为市货赂珍宝日夜辇输其门纲纪大坏人心骇愕二十八年帝畋于灊北伊埒萨巴及额森特穆尔彻尔等劾奏僧格专权黷货时博果密出使遣人超召之至覲于行殿帝问之对曰僧格壅蔽圣聪紊乱朝政有言者即诬以他罪今百姓失业盗贼蠭起召乱在旦夕非亟诛之恐为陛下忧留守贺巴延亦陈其奸欺久而言者益众帝始决意诛之三月谕大夫阿尔屡曰屡闻僧格沮抑台纲杜言者之口又尝捶撻御史其所罪者何事当与辨之僧格持御史李渠等已刷文卷至令御史杜思敬等勘验论复数四僧格辞屈明日帝驻驂土口复召御史台暨中书尚书两省官辩论尚书省裂卷为两缝执奏曰前浙西按察使济璜监烧钞受赃至千锭尝檄台征之三年不报思敬曰文之次第尽在卷中今尚书省拆卷持对其弊可见舒库尔齐舍哩抱卷至前奏曰用朱印以封纸缝者防欺也若辈为宰相乃拆卷破印与人辩是教吏为奸帝怒下僧格狱仆辅政碑至七月伏诛平章约苏穆尔者僧格妻党也在湖广时正月朔日百官会行省朝服以俟约苏穆尔召至其家受贺毕方诣省望阙贺如常仪文阴召卜者有不轨言至是中书列其罪以闻世祖命械湖广即其省戮之

△特们德尔

特们德尔者穆尔齐之子也尝逮事世祖大德闲同知宣徽院事兼通政院使至大元年拜云南行省左丞相居二载以擅离职赴阙为尚书省所劾诏诘问寻以太后旨得贷罪还职仁宗将即位以丞相三宝努等变乱旧章诛之用谩勒哲李孟为平章政事锐欲更张庶务而太后在兴圣宫已有旨召特们德尔为右丞相帝不得已相之及幸上都命留守十都未几以病去延佑改元丞相哈克伞自言非世勋族姓不可居右相因举特们德尔自代帝令曰太后与之印大事必使预闻遂拜开府仪同三司监修国史录军国重事居数月复拜中书右丞相哈克伞为左丞相奏言内侍隔越奏旨者众自今中书政务毋辄干预以富民往诸蕃商贩率获厚利商者益众中国物轻蕃货及重请以江浙右丞曹立领其事发舟十纲给牒以往归则征税如制私往者没其货又以经用不给预买山田河闲运使来岁盐引及各冶铁货并核江南田粮令田主手实顷亩状入官诸王驸马学校寺观亦如之禁贵戚势家毋得私匿寻遣使者分行各省括田增税苛急烦扰江右为甚致赣民蔡五九作乱南方骚动事乃罢明年又奏天下庶务虽统于中书而旧制省臣亦分领之请以钱帛钞

法刑名委平章李孟左丞鄂博哈雅参政赵世延其粮
储选法造作驿传委平章章律右丞萧拜珠参政曹从革各分治帝从之七月命总宣政
院事寻进位太师凡议重刑必听裁决特们德尔既再
入中书居首相怙势贪虐凶秽滋甚惟萧拜珠稍牵制之而杨多尔济既拜中丞慨然以
纠正其罪为己任有上都富人张弼杀人系狱特们德
尔受其赂使家奴胁留守贺巴延出之巴延持不可多尔济廉得其状乃与拜珠及巴延
入奏内外监察御史凡四十余人共劾特们德尔桀黠
奸贪阴贼险狠蒙上罔下蠹政害民市置爪牙威誓朝野凡可以诬人要功利己者靡所
不至取晋王田千余亩与教寺后墻园地三十亩卫兵
地二十余亩窃食郊庙供祀马受诸王哈喇班第馈钞十四万贯宝珠玉带■〈毛瞿〉
■〈毛俞〉币帛又计钞十万贯受杭州永兴寺僧章
自福赂金一百五十两取杀人囚张弼钞五万贯且既已位极人臣又领宣政院事以其
子巴尔济苏为之使诸子无功尽居贵显纵家奴凌虐
官府为害百端以致阴阳不和山移地震灾异数见百姓流亡己乃恬然略无省悔私家
之富又在阿哈玛特僧格之上四海疾怨已久乞早加
显戮以示天下奏上帝震怒有诏逮问特们德尔匿兴圣近侍家有司不得捕帝恐重伤
太后意仅罢其相位家居未逾年复起为太子太师中
外骇愕时赵世延为御史中丞论其不法数十事及内外台论其不可辅导东宫者又四
十余人帝终以太后故弗问明年正月仁宗崩越四日
即传皇太后旨仍为右丞相又逾月特们德尔宣太后旨召萧拜珠杨多尔济至徽政院
与院使实勒们御史大夫图图尔哈杂问责以前违太
后旨令伏罪即起入奏遽称旨执二人杀之英宗将即位特们德尔方病足中书省启祖
制皇帝登极中书率百官称贺班首惟帝所命仍命特
们德尔居首既即位奏委平章王役右丞高昉等征理在京仓库所贮粮亏耗七十八万
石及诸路所贡币帛稍纰缪者俱责偿所司程督严急
违者杖之帝幸上都特们德尔嫉留守贺巴延素不附己奏其便服迎诏为不敬下五府
杂治竟杀之赵世延时为四川平章特们德尔怒其昔
尝论己方入相即密启遣人逮至坐以违诏不敬令法司穷治请寘极刑帝以事在赦前
释之特们德尔又奏世延昔与省台诸人谋害老臣请
究其姓名帝不问久之帝觉其所譖毁者皆先朝旧人滋不悦其所为乃任拜珠为左丞
相委以心腹特们德尔渐见疏外称疾不出悒悒死御
史盖继元宋翼言其上负国恩下失民望生逃显戮死有余辜命追夺官爵籍其家子巴
勒丹知枢密院事寻以赃败索诺木尝为治书侍御史
其后特克实弑英宗索诺木以逆尝伏诛

△哈玛尔

哈玛尔字士廉喀喇人母为宁宗乳母哈玛尔与其弟舒苏早备宿卫顺帝深眷宠之哈玛尔有口才尤见亲信累迁殿中侍御史舒苏累官集贤学士哈玛尔声势日盛自藩王戚里皆赂遗之后以谋害托克托出贬南安俄召入为礼部尚书迁同知枢密院事至正初托克托为丞相其弟额森特穆尔为御史大夫哈玛尔日趋其门会托克托去位而伯勒齐尔布哈为相与托克托有旧怨欲中伤之哈玛尔每于帝前力加调护以故得免未几伯勒齐尔布哈罢特命太平为左丞相韩嘉讷为御史大夫初太平韩嘉讷及中书左丞图们岱尔与伯勒齐尔布哈等十人结为兄弟情好甚密至是共谋黜哈玛尔讽监察御史沃呼海寿劾其罪恶【按两浙寓贤录云沃呼海寿字允常河南人徙家山阴拜监察御史命下之日慨然曰昔张纲埋轮而先击当道之豺狼知所重也台谏许风闻言事况目击乎遂疏哈玛尔罪对使弹之官至浙东廉访使附识】其小罪则受宣让王等駝马诸物其大者则设帐御幄后无君臣礼又时以提调宁徽寺为名出入托果斯皇后宫闱犯分之罪尤大托果斯皇后帝庶母也哈玛尔知御史有言先已于帝前析其非罪事皆太平韩嘉讷所摭拾及嘉讷以御史所言奏帝大怒斥弗纳明日章再上帝不得已仅夺哈玛尔舒苏官居之草地而出沃呼海寿为陕西廉访副使于是太平罢为翰林学士承旨嘉讷出为江浙平章有顷托果斯皇后泣诉帝以御史所劾哈玛尔事为侵己帝益怒诏夺海寿官屏归田里己而托克托复入相额森特穆尔复为御史大夫遂谪太平居陕西诬韩嘉讷以赃罪杖流尼嚕罕以死伯勒齐尔布哈既罢犹谪居般阳出图门岱尔为四川右丞亦诬以罪追至中道杀之己而哈玛尔复见召用托克托兄弟尤德之十二年哈玛尔拜中书添设右丞明年正除右丞时托克托方信任汝中柏由郎中升参议中书省事自平章以下见其议事皆唯唯独哈玛尔性刚决与之论数不合汝中柏力谮之乃改为宣政院使哈玛尔由是深衔托克托初哈玛尔尝阴进西天僧以运气术媚帝帝习为之号延彻尔法哈玛尔之妹婿集贤学士图噜特穆尔故有宠与噜达实巴朗等十人俱号伊纳克图噜特穆尔性奸狡帝尤爱之亦荐西蕃僧且琳沁于帝其僧善秘密法亦名双修法曰延彻尔曰秘密皆房中术也帝乃诏以西天僧为司徒西蕃僧为大元国师其徒皆取良家女三四人奉之谓之供养于是帝日从事于其法广取女妇惟淫戏是乐又选采女为十六天魔舞【按少室山房笔丛云天庆舞唐时乐王建宫词云十六天魔舞袖长不始元末也谨识】巴朗者帝诸弟也与其所谓伊纳克

者每在帝前相与褻狎甚至男女裸处号所处室曰色
济克乌格依君臣宣淫而羣僧出入禁中无所禁止丑声秽行者闻于外虽市井亦恶闻
之皇太子年日以长尤深疾图噜特穆尔等所为欲去
之未能也十四年秋托克托出师高邮哈玛尔乘闲复入中书平章政事方托克托之将
行也以汝中柏为治书御史俾辅额森特穆尔汝中柏
累言哈玛尔必当屏斥不然必为后患额森特穆尔不从哈玛尔知终不自保因诉于皇
后奇氏曰皇太子既立而册宝及郊庙之礼不行者托
克托兄弟之意也皇后颇信之哈玛尔复与旺嘉努之子僧格实哩额森特穆尔之客明
呼明古譖诸皇太子会额森特穆尔移疾家居于是监
察御史袁赛音布哈等即希旨奏劾额森特穆尔兄弟罪恶章凡三上帝始允诏收御史
台印令额森特穆尔出都门听旨遂以旺嘉努为御史
大夫寻降诏数托克托老师费财之罪即军中夺其兵柄安置淮安既而托克托额森特
穆尔皆就贬逐以死十五年四月以舒苏为御史大夫
五月哈玛尔拜左丞相明年二月哈玛尔以前所进蕃僧为耻告其父图噜曰我兄弟位
居宰辅宜导人主以正今图噜特穆尔专媚上以淫褻
天下士大夫必讥笑将何面目见人我将除之且帝日趋于昏暗何以治天下今皇太子
年长聪明过人不若立以为帝而奉上为太上皇其妹
闻之归告其夫图噜特穆尔度将不利于己即以告帝帝大惊锐意谋去之明日传旨令
毋入朝御史大夫吹斯戡因历数其罪状帝曰彼兄弟
虽有罪然侍朕久与朕弟同乳可姑缓其罪令出征自效已而右丞相鼎珠平章僧格实
哩复执奏不已遂诏安置哈玛尔于惠州舒苏于肇州
比行俱杖死初额森特穆尔就贬籍其家以赐哈玛尔及是籍哈玛尔家而所得库藏封
识尚未尝启见者快之

△吹斯戡

吹斯戡奇■〈口末〉氏额森布哈之孙琳沁之子也泰定初袭长宿卫早有才望
文宗时除内八府宰相顺帝元统初出为福建宣慰使
重纪至元三年拜江南行省参政时国用所倚海运为重是岁吹斯戡被命督其役所漕
米三百余万石悉达京师无耗折者至正四年拜中书
右丞十二年以中书平章从丞相托克托平徐州有功十四年奉命率师讨贼淮南身先
士卒面中流矢不为动十六年四月遂拜中书左丞相
明年三月【宰相表作五月】进右丞相十八年加太保是时天下多故而帝方溺于
娱乐不恤政务吹斯戡居相位久无所匡救且公受贿
赂贪声着闻监察御史扬珠布哈劾其任用私人都呼及妾弟崔谔勒哲特穆尔印造伪
钞事将败令都呼自杀以灭口吹斯戡惧自请解机务

诏止收其印绶既而御史达尔玛实哩王彝复劾其奸贪误国帝终不问会辽阳贼势张甚起为辽阳行省左丞相未行复拜中书右丞相时帝益厌政宦者保布哈乘闲用事为奸利吹斯戡因与结构相表里四方警报及将臣功状皆壅不上闻博啰特穆尔库库特穆尔各拥强兵以权势相轧衅隙遂成吹斯戡与保布哈赏库库而诬博啰以罪诏削博啰官爵且命库库以兵讨之宗王布延特穆尔知院图沁特穆尔等皆称兵与博啰合表言其无罪于是帝始降诏屏吹斯戡于岭北保布哈于甘州诏书虽下二人潜留京师及博啰举兵犯阙以必得吹斯戡保布哈为辞帝不得已缚二人畀之遂皆为博啰所杀已而监察御史复奏吹斯戡矫杀丞相太平盗用钞版私家草诏鬻狱卖官费耗库藏居庙堂前后十数年使天下八省之地悉致沦陷乃误国之奸臣诏剖棺戮尸窜其子宣徽使观音努于远方

钦定续通志卷六百十九

●钦定续通志卷六百二十 叛臣传一

叛臣传

（臣）等谨按叛臣传仿自新唐书宋以后各史因之取诸背叛之臣汇而列之各着其祸变之由覆败之迹较之旧史体例尤为严密五代史统归列传兹案事实补编辽史无叛臣传而于奸逆二门所载已详兹不更为析置焉

叛臣传一

唐 【一】

○唐一

仆固怀恩

周智光

梁崇义

李怀光

陈少游

李

锜

仆固怀恩

周智光

梁崇义

李怀光

陈少游

李锜

△仆固怀恩

仆固怀恩铁勒部人贞观二十年铁勒九姓大首领率众降分置瀚海燕然金微幽陵等九都督府别为藩州以仆骨歌滥拔延为右武卫

大将军金微都督讹为仆固氏生乙李啜乙李啜生怀恩世袭都督怀恩善战晓识戎情

部分谨严安禄山反为左武锋使从朔方节度郭子仪
讨贼云中破之败薛忠义于背度山杀七千骑禽忠义子下马邑进会李光弼战常山赵
郡沙河嘉山走史思明肃宗即位与子仪赴灵武时同
罗部落叛禄山北掠朔方子仪率怀恩迎击怀恩子玢战败降虜已而自拔归怀恩怒叱
斩之将士股栗皆殊死战遂破同罗收器械驼马甚众
帝又诏与炖煌王承寀使回纥请师回纥听命至德二载从子仪下冯翊河东走贼将崔
干佑袭潼关破之贼将安守忠李归仁苦战二日官军
败绩怀恩至渭水无舟抱马鬣以逸收散卒还河东子仪赴凤翔李归仁以劲兵邀战于
三原子仪使怀恩与王升陈回光浑释之李国贞五将
军伏白渠下贼至遇伏败而走又战清渠不利引还时回纥使叶护帝得以四千骑济师
南蛮大食等兵亦踵至帝乃诏广平王为元帅子仪为
副使怀恩统回纥兵从王战香积寺北贼以一军伏营左怀恩驰掩之馘斩无遗贼气沮
既合战以回纥夹攻战酣脱甲援矛直捣贼阵众惊靡
会李嗣业亦麤鬪贼遂大溃日暮怀恩见王曰贼必弃城走愿假二百骑缚安守忠李归
仁等致麾下王不从又固请通夕四五反迟明谍至守
忠等果遁去又从王破贼于新店以复两京有殊功诏加开封仪同三司鸿胪卿封丰国
公赐封二百户从郭子仪破安太清下怀卫二州攻相
州战愁思冈常为先锋勇冠军中干元二年拜朔方行营节度使进封太宁郡王怀恩为
人刚决犯上始居偏裨意有不合虽主将必折诟其靡
下皆蕃汉劲卒恃功多不法子仪政宽能优容之及李光弼代子仪怀恩又副之从光弼
守河阳攻怀州降安太清皆摧锋陷阵其子瑒亦善鬪
以仪同三司将兵每深入贼惮其勇光弼持法严少假贷初会军汜水朔方将张用济后
至斩纛下怀恩心惮光弼自用济诛常邑邑不乐及光
弼与史思明战邙山不用令以覆官军帝思其功召入为工部尚书宠以殊礼代宗立拜
陇右节度使未行改朔方行营节度以副子仪初肃宗
以宁国公主下嫁毗伽阙可汗又为少子请昏故以怀恩女妻之少子立号登里可汗而
怀恩女为可敦宝应元年帝召兵于回纥而登里可汗
已为史朝义所诱引众犯边关中大震帝遣殿中监药子昂 【旧书作乐子昂】 劳之
可汗因请见怀恩及其母有诏报可怀恩避嫌不往帝
赐铁券手诏固遣乃行与可汗会太原可汗大悦遂请和助讨朝义即引兵屯陕州待师
期于是雍王以元帅为中军拜怀恩同中书门下平章
事为之副时诸节度皆以兵会次黄水贼坚壁自固怀恩阵西原多张旗旛使突骑与回
纥稍南出繚贼左举旗为应破贼壁死者数万朝义拥
精骑十万来援短兵接杀获相当鱼朝恩令射生五百攒矢注射贼多死而阵坚不可犯

马璘奴单骑援旗直进夺两盾贼辟易大军乘以入众
器不止朝义败斩首万六千级禽四千余人降者三万转战石榴园老君庙贼再败自相
犇蹂死朝义轻骑走怀恩进收东都河阳封府库无所
私释贼所署许叔冀王佑等众皆按堵留回纥屯河阳使瑒及北廷兵马将高辅成以万
骑逐北怀恩常压贼而次至郑州再战再捷贼帅张献
诚以卞州降下滑州朝义至卫州与其赏田承嗣李进超李达卢【旧书作李卢达】
合有众四万据河以战瑒济师登岸薄之贼赏奔溃进
次昌乐朝义逸为帅达卢降薛嵩李宝臣举相卫深定等九州岛献款朝义至贝州得其
赏薛忠义引众三万拒瑒于临清贼锐甚瑒令高彦崇浑
日进李光逸设三伏以待贼半渡伏发击之朝义走会回纥以轻骑至瑒卷甲驰之大战
于下博贼背水而阵官军冲击贼大奔积尸蔽流而下
朝义退守莫州于是都知兵马使薛兼训郝廷玉兖郓节度使辛云京会师城下朝义与
田承嗣数挑战不胜朝义惧率残众奔幽州官军追蹶
朝义走平州自经死田承嗣等皆降河北平怀恩与诸将罢兵以功迁尚书左仆射兼中
书令河北副元帅朔方节度使加封户四百怀恩自见
功高且贼平则势轻不能固宠乃请悉裂河北地分大镇以授薛嵩等潜结其心为助而
嵩等卒据以为患云未几加太子少师增户五百第一
区与一子五品官诏护回纥归国道太原辛云京以怀恩与回纥亲疑其召戎且惧可汗
见袭闭关不敢犒军怀恩既父子新立功而为云京所
拒大怒表上其状顿军汾州会监军骆奉先使于云京云京厚结其欢因言怀恩与可汗
约反状甚明奉先还过怀恩怀恩以次日端午欲留之
奉先固辞怀恩即遣左右匿其马奉先疑图己乘夜遁归怀恩惊追与其马奉先还具奏
怀恩反状怀恩亦请诛云京奉先诏两解之广德初进
拜太保与一子三品一子四品官增封户五百瑒与一子五品官封户百仍赐铁券以名
藏太庙画像凌烟阁又以瑒检校兵部尚书朔方行营
节度使然怀恩怏怏又性强戾遭谗无以自解乃上书自陈其功伐词甚慢恨帝一不为
嫌且欲其悔过故推心待之诏宰相裴遵庆使汾州喻
旨因察其去就遵庆至怀恩抱其足泣且诉遵庆因道帝意不疑劝令入朝怀恩许诺副
将范志诚谏以为嫌隙成矣奈何入不测之朝独不见
来瑒李光弼乎二臣功高不赏瑒已及诛怀恩乃止欲使一子入宿卫志访固止御史大
夫王翊使回纥还怀恩虑泄其交通状因留不遣即使
瑒攻云京云京败进攻榆次尚书右丞颜真卿言于帝曰怀恩将士皆郭子仪旧部曲陛
下若以子仪代之喻以逆顺必相率而归从之子仪至
河中瑒攻榆次未拔其偏将焦晖白玉等斩其首献阙下怀恩闻之以告母母曰我告汝

勿反今众变祸且及我奈何怀恩再拜出母提刀逐之
曰吾为国杀此贼取其心以谢军中怀恩走乃与部曲三百北渡河走灵武稍稍引亡命
余众闻子仪至东甲来归者数万帝念怀恩旧勋不加
罪诏辇其母归京师厚恤之以寿终 【谨按通鉴辑览 御批仆固怀恩之反虽骆奉
先辛云京激成然皆由代宗不从颜真卿李抱真之
言用郭子仪为代抚以致披诘若此及乎怀恩拒命逆子伏诛乃云信不及人勋臣颠越
益形昏愤可笑耳】 又下诏拜怀恩太保兼中书令太
宁郡王罢余官怀恩怙恶不能改遂诱吐蕃十万入塞丰州守将战死进掠泾邠祭来瑱
墓渡泾水邠宁节度使白孝德御之覆其阵怀恩入侵
奉天子仪拒退之永泰元年帝集天下兵防秋怀恩诱合诸蕃号二十万入寇吐蕃自北
道逼醴泉以摇奉天任敷郑廷郝德自东道寇奉先以
窥同州羌浑奴刺自西道略盩厔趣凤翔京师震骇诏子仪屯泾阳浑日进白元光屯奉
天李光进屯云阳马璘郝廷玉屯便桥董秦屯东渭桥
骆奉先李日越屯盩厔李抱玉屯凤翔周智光屯同州杜冕屯坊州帝御六军屯苑中下
诏亲征怀恩至鸣沙县病甚还死灵武部曲焚其尸以
葬部将张韶徐璜玉不能定其军皆前死范志诚统众寇泾阳时诸屯坚壁贼不得进吐
蕃既持久又与回纥争长更相疑莫敢先进因焚庐舍
驱男女数万去周智光邀战澄城破之收马牛军资万计回纥乃诣子仪降请击吐蕃自
效子仪分兵随之破吐蕃于泾州任敷败走羌浑诣李
抱玉降始怀恩立功门内死王事者四十六人及拒命士不弛甲凡三年帝隐忍数下诏
未尝声其反及死为之恻然曰怀恩不反为左右所误
耳俄而从子名臣以千骑降大历四年册怀恩幼女为崇徽公主嫁回纥云 【谨通鉴辑
览 御批怀恩反叛即引回纥入寇为助因怜其
功乃养逆女为公主仍嫁回纥代宗之措施如此安望其恢复而唐室不日以陵夷驯至
于亡哉】

△周智光

周智光少贱失其先系以骑射从军为裨将鱼朝恩镇陕州与相昵数称荐之累迁
同华二州节度使永泰元年被吐蕃回纥赏项羌浑奴
刺等众于澄城逐北至邠州素仇杜冕时色屯坊州家在邠智光入杀刺史张麟坑冕家
属八十人火民舍三千而去朝廷召惧不赴更诏冕使
梁州避难冀其来偃然不听命聚不逞数万恣剽掠杀陕州监军张志斌及前虢州刺史
庞充初志斌自陕入秦智光慢不为礼志斌责之怒曰
仆固怀恩岂反者邪皆鼠辈弄威福趣之祸也我本不反今为汝反遂叱斩志斌时崔圆
自淮南纳方物百万智光强留其半又劫诸节镇贡奉

物及转运米二万士沿调当西者惧拘诘闲道走同州智光遣部将邀捕斩之代宗未暴其罪命中使余元仙持诏拜尚书左仆射智光恚曰吾有大功上不与平章事因言诸子皆万人敌挟天子令诸侯非智光谁可即历诋大臣元仙震汗徐遣百缣遣之大历二年诏郭子仪密图之子仪得诏声言讨之未行其众大携部将李汉惠自同州降子仪乃贬智光泮州刺史贷将吏不问寻为帐下斩首并斩子元耀元干来献诏梟首皇城南街判官邵贲别将蒋罗汉并伏诛

△梁崇义

梁崇义京兆长安人以槩量业于市有膂力后为羽林射生事来瑱沉默寡言累迁为偏裨瑒自襄阳朝京师分诸将戍福昌南阳瑒诛戍者溃崇义自南阳勒众还襄州与李昭薛南阳相让为长众推崇义遂总其军杀昭及南阳以胁众心代宗即拜节度使奄有襄汉七州地带甲二万与田承嗣李正己薛嵩李宝臣相辅车根牙盘结独以地褊兵少于是明法令折节遇士以自振所亲数讽入朝答曰来公有大功遭谗见族吾衅盈矣若何见上建中元年李希烈请讨之崇义惧整饬军旅男子郭昔上变德宗欲示以信流昔远方诏金部员外郎李舟谕旨初刘文喜之难舟奉诏入泾州俄帐下斩文喜四方传舟能覆军杀将反侧者皆恶之舟至劝崇义入朝崇义不悦明年遣使慰抚诸道舟复如崇义所遂不内请易宅使由是益不安朝廷欲示以不疑乃加同中书门下平章事妻及子悉封赏赐铁券擢其将藺杲为邓州刺史遣御史张着以手诏召崇义崇义使卒持满以待不受命帝命李希烈率兵进讨崇义先攻江陵欲通黔岭败于四望而还屠临汉屯兵千余希烈怒引兵循汉而上破其将翟崇晖【旧书作翟晖】杜少诚于蛮水至涑口又大败之二将降希烈使部本兵循襄阳安抚王姓崇义闭壁守者斩关出不可止乃与妻赴井死传首京师希烈诛其亲族及军从临汉役者二千人悉斩之

△李怀光

李怀光渤海靺鞨人本姓茹父常徙幽州为朔方部将以战多赐姓李更名家庆怀光在军积劳至开府仪同三司为都虞候勇鸷敢诛杀虽亲属无所贷节度使郭子仪委任之母丧起邠宁庆都将德宗立罢子仪副元帅以所部兵分诸将故怀光检校刑部尚书为邠宁庆晋绛慈隰等州节度使引众城长武据原首临泾水以扼吐蕃自是不敢南侵建中初杨炎欲城原州使怀光兼帅泾原原州宿将史抗温儒雅等故子仪麾下尝在怀光右及处其下意郁郁怀光因罪诛之泾军悚畏刘文喜者因众惧遂叛诏与朱泚讨平之加检校太子少师明年徙朔方节度

使实封户四百仍领颍宁时马燧李抱真讨田悦未克而朱滔王武俊皆反连兵救悦诏怀光以朔方兵万五千并力怀光至魏未阵与朱滔等战连篋山【旧书作愜山】为贼所败悦因决水灌军燧等退屯魏县寻进同中书门下平章事益户二百与滔等相持不战帝狩奉天怀光率所部奔命方雨淖奋厉军士倍道进自蒲津绝河败泚军于醴泉将抵奉天先遣张韶以蜡韬表随贼攻城逾堑呼城上人曰我朔方使也缒而上比登身被数十矢时帝被围急闻之喜即持诏大号城上人心乃安又劫贼于鲁店泚解围去进加副元帅中书令怀光为人疏而愎诵言欲见帝请诛宰相卢■〈木巳〉惧即说帝令怀光席胜灭贼帝不得其情因敕怀光无朝督诸将进讨怀光自以径千里赴难为奸臣阻隔不得朝颇恚恨屯咸阳数暴■〈木巳〉等罪帝为贬■〈木巳〉与赵赞白志贞又劾奏中人翟文秀亦杀之以慰怀光然益自疑坚壁八旬不出屡诏使进军以伺衅为解阴连朱泚初崔汉衡使吐蕃求助兵蕃相尚结赞曰吾法进军以本兵大臣为信今制书不署怀光未敢前帝乃命翰林学士陆贽诣怀光议事怀光执言不可者三卒不肯署又嫚骂贽曰尔何能兴元元年诏加太尉赐铁券怀光赫然怒曰凡疑人臣反则赐券今授怀光是使反也抵于地时部将韩游瓌将兵卫奉天怀光约令为变游瓌以闻数日又密书趣之门者捕送又遣将赵升鸾课于奉天升鸾告浑瑊曰怀光遣达奚承后火干陵使我为内应以胁乘舆瑊白发其奸请帝决幸梁州帝自西门出诏戴休颜守奉天时李晟已移军渭桥怀光乃夺李建徽杨惠元等军屯好畤然其下稍稍携贰泚初惮之至是欲遂臣怀光怀光恕告绝益不自安乃引兵掠泾阳三原富平遂如河中留张昕守咸阳而孟涉段威勇拥兵降李晟韩游瓌杀昕以邠州归诏以怀光为太子太保许其麾下择功高者一人统其兵不奉诏怀光至河中取同绛二州按兵观望李晟收京师遣给事中孔巢父中人啖守盈君之皆为怀光帐下所害于是缮兵严守帝乃遣浑瑊讨之瑊破同州屯军不得进数为怀光所衄帝以河东节度使马燧威名素着乃拜副元帅与瑊及镇国骆元光邠宁韩游瓌鄜坊唐朝臣会兵进讨燧拔绛州诸军遂围河中贞元元年朔方部将牛名俊斩怀光传首以献帝念其功诏许一子嗣赐庄第各一区昕以礼葬妻王徙澧州初怀光死其子瑋尽杀其弟乃死故怀光无后五年诏以外孙燕为后赐姓李名曰承绪

△陈少游

陈少游博州博平人幼习老子庄周书为崇玄馆学生诸儒推引讲经援据淹该问穷而对有余大学士陈希烈赏之擢第补南平令治有

声累迁侍御史回纥粮料使加检校职方员外郎仆固怀恩表署河北副元帅判官迁晋
郑二州刺史少游长权变以干济称而贿谢权幸以是
数迁李抱玉表泽潞副使为陈郑留后永泰中复奏为陇右行军司马擢桂管观察使少
游规徙近镇时宦官董秀掌枢密用事少游乃宿其里
候归沐入谒厚贿之秀大喜时少游已纳赂元载子仲武于是内外交荐改宣歙池观察
使大历五年徙浙东封颖川县子迁淮南节度使喜譎
数行小惠羣吏任职三总大藩皆天下富饶处以是敛求贸易无虚日积财宝巨万初赂
元载岁无虑十万缗又事宦官骆奉先刘清潭吴承倩
及秀故能久其任后载以过见疑少游即疏之载子伯和谪扬州少游阳与善而阴奏其
罪代宗以为忠李纳拒命少游出师收徐海等州俄弃
之退屯盱眙累进检校尚书左仆射赐封户三百加同中书门下平章事时宰相关播卢
■〈木巳〉与少游有雅故故骤兼台司德宗幸奉天
度支汴东两税使包佶寓扬州所储财赋八百万缗将输京师少游意朱泚势盛不遽平
欲胁取其财使判官崔■〈弁页〉就佶索文簿贷二
百万缗佶以非敕命拒之■〈弁页〉大怒去佶谒少游欲谏止不得于是财用悉为少
游所掠佶奔白沙少游又遣判官房孺复召之佶惊走
渡江伏妻子案牒中以免佶有御遏兵三千令高越元甫将焉少游夺之能随佶者至上
元复为韩滉所留佶但领诸史如江鄂等州以表内蜡
丸以闻会少游使至帝诘其事辞以不知时祸难煽结帝未能制乃曰少游国之守臣取
佶财以防它盗庸何伤少游闻之果自安不疑李希烈
陷汴声言袭江淮少游惧遣参谋温述送款又使巡官赵诜如郢州厚结李纳希烈僭号
遣将杨丰赍伪赦令送少游寿州刺史张建封逻得之
斩丰以伪赦送行在会佶入朝具言少游胁财赋状少游惧上表言所取以贍军兴请偿
之而州府破残不能偿乃与腹心吏设法重税民皆苦
之刘洽取汴州得希烈伪起居注书某月日陈少游上表归顺少游闻羞悸发病死

△李锜

李锜淄川王孝同五世孙以父国贞荫调凤翔府参军贞元中累迁宗正少卿历杭
湖二州刺史李齐运用事锜以赂结其欢居三岁迁润
州刺史浙西观察诸道盐铁转运使多积奇宝岁时奉献德宗宠之锜恃恩鹜横得专榷
酒漕运多干没国计日耗浙西布衣崔善贞上书阙下
暴其罪帝械以赐锜锜坑杀之乃益募兵选善射者为一屯号挽硬随身以胡奚杂类虬
须者为一将号蕃落健儿怙锜腹心养为假子禀给十
倍故乐为用帝于是复镇海军以锜为节度使罢领盐铁转运锜喜得节暴倨日甚属吏
多不以罪死又逼污良家寮佐力谏不能得遽遁去宪

宗即位方镇稍稍入朝锜不自安亦请覲有诏拜尚书左仆射以御史大夫李元素代之
中使驰驿劳问兼抚慰其军锜署判官王澹为留后锜
无入朝意称疾迁延不行澹及中使数趣之锜不悦乘澹视事有所变更者讽亲兵图澹
以给冬服日澹与中使入谒众持刃杀澹食之监军使
遣牙将赵琦慰谕又齎食之以兵注中使颈锜惊阳解救囚之别馆蕃落兵薛颀主之挽
硬兵李钧主之又以公孙玠韩运分总余军室五剑授
管内镇将令杀五州刺史属别将庾伯良兵三千筑石头城谋据江左常州刺史颜防用
其客李云谋矫诏称招讨副使杀镇将李深传檄苏湖
杭陆四州同讨锜湖州辛秘亦杀镇将赵惟忠而苏州李素为镇将姚志安所执献于锜
锜败而免宪宗以淮南节度使王锒为诸道行营兵马
招讨处置使中官薛尚衍为都监招讨宣慰使发宣武武宁武昌淮南宣歙江西浙东兵
自宣杭州三州进讨时锜以宣州富饶遣兵马使张子
良李奉仙田少卿领兵三千分下宣歙池锜甥裴行立虽预谋而欲效顺故相约还兵执
锜子良等谕军中曰仆射反矣精兵四面皆至势蹙且
败吾辈当转祸希福部众大悦遂回戈趣城行立举火内外合噪行立攻牙门李钧引兵
出鬪行立兵贯出其中斩钧传首城下锜闻之举族恸
哭子良以监军命晓谕城中且呼锜束身还朝左右以幕缁锜而出之送至京师与子师
回并腰斩于城西南擢子良检校工部尚书左金吾将
军封南阳郡王赐名奉国田少卿检校左散骑常侍左羽林将军代国公李奉仙检校右
常侍右羽林将军邠国公裴行立沁州刺史赠王澹给
事中赵琦和州刺史崔善贞睦州司马削锜属籍从弟宋州刺史铈通事舍人铈从子师
偃流岭南

钦定续通志卷六百二十

●钦定续通志卷六百二十一 叛臣传二

叛臣传

唐【二】

○唐二

李忠臣 乔琳【蒋镇】 刘辟 高骈【吕用之 秦彦毕师铎】

朱玫 王行瑜 陈敬瑄

李忠臣

乔琳【蒋镇】

刘辟

高骈【吕用之 秦彦 毕师铎】

朱玫

王行瑜

陈敬瑄

李巨川

△李忠臣

李忠臣本董秦也幽州蓟人少籍军以材力夺事节度使薛楚玉张守珪安禄山等甄劳至折冲郎将平卢军先锋使禄山反刘正臣杀伪

节度吕知晦【按晦字旧书作晦小异谨识】擢秦兵马使攻长杨战独山袭榆关北平杀贼将申子贡荣先钦执周钊送京师又从正臣败

李归仁李咸白秀芝等潼关失守秦整军北还奚王阿笃孤初引众与正臣合诈约俱攻范阳至后城乘夜袭秦秦接战败之追至温泉山禽首

领阿布离斩以衅鼓正臣卒众推王玄志为节度玄志使秦率兵三千自雍奴桴苇绝海击贼将石帝廷乌承洽转战累日拔鲁城河间景城收

粮资以实军又与田神功下平原乐安禽伪刺史以献于是防河招讨使李铢承制假秦德州刺史史思明自归河南节度使张镐督秦军平河

南州县又与裨将阳惠元破安庆绪将王福德于舒舍肃宗下诏褒谕令屯濮州又徙韦城从郭子仪围相州车溃秦至荥阳破贼将敬缸获粮

二百艘以饷汴军未几授濮州刺史屯杏园渡许叔冀以汴下史思明秦力屈亦隆与俱寇河阳秦夜挈五百人冒围归李光弼诏加殿中监封

户二百召至京师赐今氏名给良马甲第时陕西神策两节度使郭英又卫伯玉屯陕以忠臣为两军兵马使战永宁莎栅与贼将李感义【

旧书作李咸义】数十遇皆破之淮西节度使王仲升为贼执以忠臣为汝蔡十六州节度使【原传作汝仙蔡六州节度使旧书作淮十一

州节度使按方镇表淮南西道节度于上元二年增领陈郑等九州岛治安州号淮西十六州节度使无所谓六州与十一州节度也新书六字上

当脱十字而旧书十一州一字当系六字之讹又仙州于大历元年始增入淮西至五年复省此时淮西不应有仙州之地名今并改而正之焉

】兼安州合诸军平东都进御史大夫回纥可汗既归留其下安恪石帝廷居河阳守资廩因是招亡命为盗道路畏涩诏忠臣讨定之仆固怀

恩引吐蕃犯京师天子征兵使者至淮西忠臣即日进发诸将白须良日忠臣怒曰君父在难何暇择日时召兵无先忠臣至者代宗嘉之加本

道观察使赉与倍等周智光反忠臣讨之会智光败忠臣以收华州为名所过大掠自赤水距潼关二百里无居人大历五年加蔡州刺史陕虢

李国清为下所逐掠府库国清徧拜诸将乃免会忠臣入朝次陕诏讯众众惧忠臣不敢

摇即围棘约士投所掠物围中一日尽获讨李灵耀也
战西梁固败之复与马燧军合败贼于汴州田悦以援兵三万屯汴郭忠臣遣将袭败之
悦军遁去以忠臣为汴州刺史加检校司空同中书门下平章事封西平郡王忠臣焚沓嗜色逼将士妇女与乱所至人苦之又以妹壻张惠光
为牙将恃势残刻惠光子居牙下亦横肆十四年大将
李希烈因众怒与少将丁暄贾子华等共斩惠光父子以兵胁逐忠臣单骑奔京师帝素
宠之不责也复授检校司空同中书门下平章事奉朝
请忠臣既失兵常怫郁朱泚反伪署司空兼侍中泚攻奉天以忠臣居守及泚败忠臣走
樊川李晟将士擒之系有司与其子俱诛

△乔琳 【蒋镇】

乔琳并州太原人少孤贫志学擢进士第性诞荡无礼检郭子仪表为朔方府掌书
记寻拜监察御史与同舍毕曜相掉讪贬巴州司户参
军厯果绵遂怀四州刺史治宽简不亲事琳素善蒲人张涉涉以侍读德宗东宫及即位
召访政事荐琳堪大用乃拜刺史大夫同中书门下平
章事琳年高且瞶每进对失次所言不灰帝旨在位阅八旬以工部尚书罢帝由是亦疏
涉琳从幸奉天再迁太子少师再幸梁州次盩厔言
马殆不进帝素以旧老礼之给乘舆马辞病帝怅然赐所执策曰勉为良图与卿别矣不
数日祝发舍仙游寺朱泚闻遣数十骑取之署吏部尚
书及收京师李晟悯其老表贯死帝曰琳故宰相失节背义不可赦命斩之又有蒋镇者
洌之子与兄炼俱以文辞显擢贤良方正科累转谏议
大夫进工部可汗妹壻源溥者休弟也故镇与休交泚叛窜于鄆伤足不能进泚先得炼
而镇左右逃归语所在源休弭白泚以二百骑求得之
署伪宰相复谋出奔懦不能决中朝臣遁伏者休多所诛杀赖镇救原十之五及收京师
与兄炼并斩于东市西北街初洌与弟涣在安史时皆
污伪官炼兄弟复屈于贼云

△刘辟

刘辟字太初擢进士宏词科佐韦皋府累迁御史中丞度支副使皋卒辟自为留后
讽诸将上表请旄节宪宗不许以给事中召之不奉诏
时帝新即位欲静镇四方即拜检校工部尚书剑南西川节度使辟意帝可动益鹜蹇吐
不臣语求统三川欲以所善卢文苦节度东川即以兵
取梓州宰相杜黄裳言辟妄书生可一鼓而俘也荐高崇文李元奕等将神策行营兵皆
西使严砺李康犄角之诏许自新辟不听崇文取东川
帝乃下诏夺其官进破鹿头关遂下成都辟都从十骑走至羊灌田自投水不能死骑将
郾定进禽之文若先杀其族乃自沈于江檻车送辟京

师尚冀不死食饮自若将至都神策以兵迎之系其首曳而入帝御兴安楼受俘献庙社
徇于市斩于城西南独柳下子超郎等九人与部将崔
纲皆伏诛 【按关传新书原附韦皋传后今改入叛臣】

△高骈 【吕用之 秦彦 毕师铎】

高骈字千里南平郡王崇文孙也家世禁卫幼颇修饬折节为文学与诸儒交喜言
治道两军中人人更称誉之历右神策军都虞候党项叛
率禁兵万人戍长武时诸将无功唯骈数用奇杀获甚多懿宗嘉之徙屯秦州即拜刺史
兼防御使取河渭二州略定凤林关降敌万余人咸通
中獠人叛拜安南都护于是容管经略使张茵不讨贼更以茵兵授骈骈过江约监军利
瓦伊周继进维周拥众壁海门骈次峯州大破南诏蛮收
所获贍军维周忌之匿捷书不奏劾骈玩敌不进更命右武卫将军王宴权往代俄而骈
拔安南斩蛮帅段酋迁降附诸洞二万计晏权方挟维
周檄骈北归而骈遣王惠赞传酋迁首京师帝览书御宣政殿羣臣皆贺大赦天下进骈
检校刑部尚书仍镇安南以都护府为静海军授屏节
度兼诸道行营招讨使始筑安南城由安南至广州江漕梗险多巨石骈募工斲治由是
舟济安行储饷毕给加检校工部尚书右仆射徙节天
平其从孙浚从战常先登荐自代诏拜交州节度使僖宗立即其军加同中书门下平章
事南诏寇嵩州掠成都徙骈剑南西川节度乘传诣军
及剑门下令开城纵民出入时蛮攻雅州壁卢山间闻骈至亟解去骈即移檄驃信勒兵
从之驃信大惧送质子入朝约不敢寇蜀之士恶成都
城岁坏骈易以砖甃堞完新负城邱陵悉垦平之以便农桑进检校司徒封燕国公徙
荆南节度王仙芝败残党过江帝以骈治郢威化大行
且仙芝赏皆郢人故授骈镇海节度使骈遣将张湍梁纘分兵穷讨降其骁帅毕师铎数
十人贼走岭表帝美其功加诸道行营都统盐铁转运
等使贼更推黄巢南陷广州徙骈淮南节度副大使骈缮完城垒募军及士客得锐士七
万传檄天下召兵讨贼威震一时天子倚以为重广明
初巢党自岭表北趋江淮湍破贼大云仓贼却保上饶众亡几多疫死湍进击之媿大惧
以金啖湍胜书于骈勾归命骈信之许为求节度当此
时昭义武宁义武兵数万赴淮南骈欲专己功即奏贼已破不须大兵有诏班师巢知兵
罢即绝骈请战击杀湍乘胜渡江攻天长始巢在广州
求节度宰相卢携善骈以有讨贼功不肯赦巢与郑畋争于朝故巢怨不得节度而骈闻
议不一亦不平至是欲纵贼以耸朝廷然后立功毕师
铎谏曰朝廷所恃唯公今不据淮南扼贼要害使得北渡必乱中原骈矍然下令将出师
嬖将吕用之畏师铎有功谏曰公勋业极矣贼未殄朝

廷且有口语况贼平挟震主之威安所税驾不如观衅求福骈入其计托疾不出严兵保境巢据滁和去广陵纔数百里乃求援陈许巢逼扬州众十五万骈将曹全戛以兵五千战不利壁泗州以待援贼北趋河洛使者促骈讨贼冠盖相望骈终无行意俄而两京陷天子犹冀骈立功眷寄未衰进检校太尉东西都统京西京北神策军诸道兵马等使骈悉兵营东塘日简阅如将赴难仍托故还广陵帝知骈无出兵意天下益殆乃以王铎代为都统以崔安潜副之诏韦昭度领诸道盐铁都运使加骈侍中增实户一百封渤海郡王骈失兵柄利权攘袂大诟即上书谩言不恭帝怒下诏切责骈都统三年无尺寸功幸国镇沛阴图割据一旦失势故肆为丑悖胁邀天子冀复故权会诸道平贼骈闻缩气部下多叛去郁郁无聊乃笃意求神仙以军事属用之用之者鄱阳人世为商侏既孤依舅家盗私其室亡命九华山事方士牛弘徽得役鬼术卖药广陵市因骈亲将俞公楚得见骈署幕府稍补右职用之既少贱具知闾里利病吏得失颇言政事骈愈器之乃日为诞妄以动骈又荐狂人诸葛殷张守一为长年方并署牙将骈造迎仙等楼皆高八十尺饰以珠玉侍女衣羽衣新声度曲以儼钧天熏斋其上祈与仙接用之自谓与仙真通而语言俚近惧有摘其奸者乃曰仙人当下但患学者真气亏沮耳骈始弃人间事绝妾媵虽将吏不见客至先遣熏濯诣方士祓除谓之解秽少选即引去自是内外无敢言者惟梁纘屡为骈言骈不听纘惧解所领兵用之既自兵淫刑重赋人人思乱乃擢废吏百余号察子伺察氏间道路箝口诛所恶者数百族又募卒二万为左右镞邪军与守一分总置官属如骈府用之每出入驺御至千人建百尺楼托云占星实窥伺城中之有变丈姬侍百余月二十宴费不足至苛留度支运物诱人上变许入资产赎罪俞公楚数规戒其失不听姚归礼谋杀之弗克二人皆以谗死骈从子灏密疏用之罪请骈除之骈怒杀灏嗣襄王熿之乱骈上书劝进伪假骈中书令诸道兵马都统江淮盐铁转运使以用之为岭南节度使骈久觖望至是大喜贡赋不绝用之始开府置官属礼与骈均矣以郑■（木巳）董仅吴迈为腹心骈之亲信皆逼使附已政事未尝关决骈始悔欲收其权不能也光启三年蔡贼孙儒兵略定远声言步淮寿州刺史张翱奔告骈命毕师铎率骑三百戍高邮师铎者曹州冤句人故仙芝党以善骑射称骈败巢于浙西用其力故宠待绝等用之厚啖以利不肯附师铎有美姜用之请见不可狙其出观焉怒而弃之内忿惧为子结婚于高邮将张神剑阴以为援朱全忠方攻秦宗权骈卢其奔突使师铎率兵踰都梁山不见贼还师铎见骈府宿将多以谗死忧甚

用之益加礼师铎愈恐谋于神剑神剑不然其言用之亦虑其变欲除之亟请罢屯而骈子怒用之专恣覬师铎与诸将发其奸遣使谓师铎曰用之欲因此行图君既授书神剑矣君其备之师铎以郑汉璋常愤用之率精兵在淮口乃往谗以计汉璋大喜帅兵及亡命数千至高邮见神剑诘其变神剑取酒割臂血而盟推师铎为大丞相作誓告神乃移檄州县以诛吕用之张守一诸葛殷为名得胜兵三千将发神剑中悔繆曰公兵虽精然城壁旬日不下则粮乏众心摇矣神剑请按军高邮为公声援而督粮道汉璋内忌神剑劝师铎许其计其四月兵傅城城中骇乱用之分兵守且自督战骈闻大惊召责用之用之屡出战师铎见城未下求救于宣州秦彦约事平迎以代骈彦遣秦稠率兵与师铎合攻益急守陴者夜焚南栅以应于外师铎入守将张全乃战死用之距三桥杀伤相当骈从子杰率牙兵将执用之以畀师铎左镞邪复断其后用之惧乃出奔骈召梁纘谢曰初不用子计以及此庸何追授以兵使保子城迟明师铎纵火大掠骈乃命撤备改服须其入师铎见延和阁骈待之如宾即署师铎节度副使汉璋神剑以次授署秦稠封府库以待师铎去丞相号诛用之支党数十使孙约迎秦彦彦者徐州人本名立隶伍籍干符中以盗系狱且死破械亡去改名彦聚徒百人杀下邳令取其资入黄巢党中既败与许勅降骈累表和州刺史中和初宣歙观察吏窦漪病彦袭而代之师铎之召彦也或谓曰足下诛妖人羣下乐从今军府已安宜还政高公足下身典兵权在掌握若令彦为帅兵非足下有也足下如厚德彦宜以金玉子女报之勿听渡江师铎以告汉璋汉璋曰善师铎出骈囚南第秦稠麾下求无厌烧贡奉楼数十楹取珍宝始骈自干符以来贡献不入天子资货山积至是为乱兵所剽略尽师铎徙骈东第禽诸葛殷缢杀之骈出金遗守者师铎知之加兵苛督复入囚署中子弟十余人同幽之用之既出以兵攻淮口未下郑汉璋击之遂奔天长初用之诈为骈书召兵于庐寿城陷而杨行密兵万人次天长用之归之张神剑求赂于师铎辞以彦未至神剑怒与别将高霸将攻师铎彦自将入扬州称节度使以师铎为行军司马时杨行密与神剑等连和自江北至槐家桥栅垒相联彦登城望之色沮乃授郑汉璋唐宏等兵屯门稠及师铎以劲卒八千出战大败稠死之彦出金求救于苏州刺史张雄雄引兵至东塘得金不战去彦使师铎率兵三万阵城下汉璋为前锋宏次之骆元真樊约又次之师铎王朗以骑为左右翼既成列行密乃出委辎重于壁以羸兵守之伏精兵数千其旁行密先犯元真短兵接伪北师铎诸军奔其壁争取金玉资粮伏噪而出行密引轻兵蹶其尾师铎等

奔還元真战死师铎雅倚元真骁敢能拒敌既死惋沮弥日不复议出战矣骈久囚拘供
亿窘狭羣奴撤延和阁阑循为薪煮革带以食师铎既
败虑骈内应命陈赏等往杀之左右奴客遁归行密行密举军缟素大临独用之縗服哭
三日彦屡败军气摧丧与师铎抱膝相视无它略彦遣
汉璋击神剑破之神剑奔高邮汉璋欲穷追会大雨还行密以城尚坚师且老议解去用
之裨将晨伏兵西濠伺守者休代引而登数数十人于
门以招外兵守军亦厌苦怕委兵溃师铎与其家及彦奔东塘人争出相腾藉死王朗踏
而殒行密既入杀梁纘于牙门以不死高氏难韩问闻
之赴井死彦师铎与唐宏倪详焚白砂将渡江会秦宗权使孙儒引兵三万袭扬州次天
长彦等与之合还攻行密取行密辎重牛羊数千计儒
以食乏乃屠高邮据之张神剑奔还而高邮戍兵七百溃而来行密疑有谋悉击杀之因
杀神剑用之始诈行密曰庖下有瘞金五千斤事平愿
备一日乏行密掘地无埋金但得铜人三尺身桎梏钉刺其口刻骈名于背盖用蛊厌骈
也行密责其罪与张守一并斩于三桥妻子皆死儒攻
城未得志卢彦师铎有异谋稍并其兵唐宏度不免告儒曰师铎密遣人至汴儒恐明日
召彦师铎汉璋会军中彦师铎先至壮士摔之至儒所
儒质以反骈罪皆斩之汉璋至奋臂击杀数人乃死身首糜散儒使宏主骑兵厚赐之文
德元年儒谍知行密粮乏自高邮袭之行密拔其众还
庐州儒遂据扬州骈之死止裹以故既与子弟七人一坎而瘞行密擢骈孙愈为副使令
主丧事未克葬愈暴死至是故吏邝师虔收葬之扬州
雄富冠天下自师铎行密儒迭攻迭守焚市落剽民人兵饥相仍其地遂空

△朱玫

朱玫邠州人少以材为武州戍将黄巢盗长安伪节度使王玫方调兵玫阳事之乘
间斩王玫以留后让李重古约合兵讨巢广明二年玫
袭贼战开远门枪洞咽不死以功擢晋州刺史进邠宁节度使贼平授同中书门下平章
事封吴兴侯田令孜议讨王重荣以兵属玫玫耻为令
孜用战辄北因从军还掠僖宗苍黄幸凤翔避其锋玫反与重荣李克用连和请诛令孜
宰相萧遘密召玫迎帝玫趋凤翔令孜劫乘兴走陈仓
遂至兴元玫追不及劫嗣襄王熈奉为帝玫自号大丞相专决万几始与李昌符共谋挟
熈至是反为讎日符乃自归天子人心寢离及王行瑜
败于大唐峯惧归见杀又闻购得玫者即畀以邠宁节度行瑜即勒兵倍道趋长安玫居
孔纬第方据几署事行瑜遽入斩之杀其徒数百诸军
遂大乱烧京师时盛寒吏民被剽斂僵尸相藉即传首兴元宦者为枢密使王能着等皆
坐诛

△王行瑜

王行瑜邠州人少隶军从朱玫为列校讨黄巢数有功熿即伪位授行瑜天平节度使令率兵守大散关为李鋌所破即奉款行在还敢攻首以献擢邠宁节度使景福元年与李茂贞韩建及弟同州节度使行实请假茂贞招讨使讨杨守亮于山南宦官难之昭宗亦惧茂贞难制不许行瑜等因擅兴军击败之后茂贞拒贾王杀宰相行瑜与有力得赐铁券遂跋扈求为尚书令宰相韦昭度执不可但加号尚父行瑜望甚会河中王重荣死其子珂李克用壻也故克用请以珂嗣节度而行瑜及建茂贞请授王拱因以兵陈阙下欲废帝立吉王不克即杀昭度李溪留弟行约宿卫克用悉兵渡河问行瑜等罪行实弃同州趋长安与行约谋劫乘輿又不克皆奔邠州行瑜筑梨园砦克用与战破行实等军俘其母及行瑜子诏削行瑜官爵行瑜以锐卒五千营龙泉镇茂贞壁其西克用夜发精骑援饒道岐军走行瑜归邠州婴城守厚赂克用求自归克用军环其城行瑜穷悉族奔庆州为麾下斩于路传首京师克用并俘其属二百人献于朝

△陈敬瑄

陈敬瑄田令孜兄也少贱隶左神策军令孜为护军中尉敬瑄缘藉擢左金吾卫将军检校尚书右仆射西川节度使性畏慎善抚士黄巢乱僖宗幸奉天敬瑄夜召监军梁处厚号恟奉表迎帝缮治行宫令孜亦倡西幸敬瑄以兵三千护乘輿尤从内苑小儿先至敬瑄嫉其暴横遣逻士捕系五十人尸诸衢由是道路不哗进检校左仆射同中书门下平章事奉行在百官诸吏无敢乏帝欲命判度支固让再加检校司徒兼侍中封梁国公以弟敬珣为阆州刺史讨定邛州首望阡能涪州叛校韩秀升再进兼中书令封颍川郡王实封四百户赐铁券恕十死巢平进颍川王增实户二百车驾东敬瑄供亿甚丰又进检校太师俄令孜得罪敬瑄流端州昭宗立召为左龙武统军以宰相韦昭度代领节度使者至敬瑄拒诏令孜劝敬瑄募黄头军为自守计时王建盗据阆利故令孜召建建至绵州敬瑄复以其难制发兵拒之激建攻诸州以限朝廷建入汉州成都严守建走城下遥谢令孜曰父召我及门而拒我尚谁容今作贼矣因请兵于顾彦朗攻成都残掠州县彦朗畏建表请大臣代敬瑄建亦自请讨敬瑄赎罪诏立永平军授建节度使以昭度为行营招讨使山南西道节度使杨守亮副之彦朗为行军司马有诏暴敬瑄杀孟昭图罪削官爵昭度使建屯学射山敬瑄迎战不克又战蚕厓大败建昭度傅城而垒简州刺史张造攻笮桥大败死之大顺元年建稍击降诸

州敬瑄战浣花不胜明日复战将士皆为建俘明年三月诏还敬瑄官爵召昭度还谕建
罢兵建不奉诏帝更以建为西川行营招讨制置使建
知敬瑄可禽欲遂有蜀地即胁昭度还京师而烧绝栈梯东道不通因急击敬瑄分亲骑
为十团所当辄披靡烽堠相望纵谍入城以摇众心围
凡三岁城中粮尽敬瑄出家资给民募士出剽麦收其半民亦夜至建垒市盐不可禁敬
瑄自将出犀浦列二营邀建建军伪遁遇伏敬瑄败建
破斜桥咎街二屯明日战又破一壁降其将敬瑄诸将或死或降且尽凡五十战敬瑄皆
北乃上表以病乞还京师令孜素服至建军约和建入
自西门囚敬瑄令孜而自称留后表于朝诏以建为西川节度副大使知节度事累青请
诛敬瑄不报景福二年阴令左右告敬瑄令孜养死士
约杨晟等反于是斩敬瑄于家同日缢杀令孜自是建尽有两川黔中地

△李巨川

李巨川字下巳逢吉从曾孙干符中举进士河中王重荣辟为掌书记重荣讨黄巢
书檄奏请日纷沓皆属巨川文思敏速言辄中理会贼
走重荣收京师巨川有助力重荣死于乱贬为兴元参军节度使杨守亮喜其至复管记
室守亮为韩建所擒巨川械以从题木叶遗建祈哀建
动容因释缚署幕府昭宗幸华建患一州供亿不能济使巨川传檄天下请助转饷初建
悉诸王典兵不利已与巨川谋即上变告八王欲胁帝
幸河中因请令归十六宅选严师傅督教尽散麾下兵惧帝不从以兵围行宫表疏再上
帝不得已诏可又忌行营将李筠扈从有功奏诛之 【

据通鉴增辑】 又请召诸王将命四方者悉赴行在巨川日夜导建不臣既幽诸王别第
知帝不悦 【据通鉴增辑】 乃请立德王为皇太
子文掩其恶帝还京拜谏议大夫光化初朱全忠陷河中攻潼关建惧使巨川维款至
河中因言当世利害全忠属官敬翔以文翰见知疑巨
川用则全忠待己或衰乃诡说曰巨川诚奇才顾不利主人者何是日全忠杀之

钦定续通志卷六百二十一

●钦定续通志卷六百二十二 叛臣传三

叛臣传

五代

○五代

赵在礼

朱守殷

董璋

范延光

安重荣

安从进

杨光远

李守贞

王景崇

赵思绾

皇甫晖

杜重威

赵在礼

朱守殷

董璋

范延光

安重荣

安从进

杨光远

李守贞

王景崇

赵思绾

皇甫暉

杜重威

△赵在礼

赵在礼字干臣涿州人少事刘仁恭为军校仁恭遣佐其子守文袭取沧州后守文为其弟守光所杀【按薛史守文死事其子延祚为守光所杀与此互异】在礼奔太原唐庄宗时为效节指挥使将魏兵戍瓦桥关还至贝州军士皇甫暉作乱劫在礼反在礼自贝州还攻魏纵军大掠逐兴唐尹王正言在礼自称兵习留后庄宗遣元行钦讨之不克乃遣明宗代行钦明宗至邺军变因入城与在礼合明宗兵反向京師在礼留于魏明宗即位拜邺都留守兴唐尹久之皇甫暉等皆去在礼患魏军之骄惧及祸及求徙镇横海厯镇泰宁匡国天平忠武武宁归德晋昌所至邸店罗列积资巨万晋出帝时以在礼为北面行营马步军都虞候以击契丹未尝有战功在礼在宋州人尤苦之已而罢去宋人喜而相谓曰眼中拔钉岂不乐哉既而复受诏居职乃籍管内口率钱一千自号拔钉钱晋亡【按薛史在礼在宋州时少帝为子延煦娶在礼女进封秦国公谨识】契丹入汴在礼自宋驰至洛阳遇契丹伊喇等拜于马首伊喇等兵共侵辱之诛责货财在礼不胜其愤行至郑州闻晋大臣多为契丹所镇中夜惶惑解衣带就马枥自经死汉高祖立赠中书令

△朱守殷

朱守殷少事唐庄宗为奴名会儿庄宗即位以其厮养为长直军以守殷为军使好言人阴私长短以自结庄宗以为忠迁蕃汉马步军都虞候同光二年领振武军节度使是时庄宗初入洛守殷巡检京師恃恩骄恣凌侮勋旧与伶人景进相表里魏王继岌已杀郭崇韬进诬朱友谦与崇韬谋反庄宗遣守殷以兵围其第而杀之是时明宗自镇州来朝居于私第庄宗力惑羣小疑忌大臣遣守殷伺察明宗动静守殷阴使

人趣明宗归藩无与祸会明宗曰吾洛阳一匹夫尔何能为也既而明宗卒反于魏庄宗东讨守殷将骑军阵宣仁门外以俟驾郭从谦作乱犯兴教门以入庄宗急召守殷不至闻庄宗已崩即驰入宫中选戴嫔御宝货以归纵军士劫掠遣人趣明宗入洛明宗即位拜守殷同中书门下平章事河南尹判六军诸卫事明年迁宣武军节度使明宗诏幸汴州或以为东诸侯有倔强者将置制之守殷不自安乃杀都指挥使马彦超闭城反明宗行至京水闻守殷反遣范延光驰兵傅其城汴人开门纳延光守殷自杀其族乃引颈命左右斩之明宗至汴州命鞭其尸梟首于市七日传徇洛阳守殷之将反也召都指挥使马彦超与计事彦超不从守殷杀之明宗怜彦超之死以其子承祚为洺州长史

△董璋

董璋不知其家世少与高季兴孔徇俱为汴州富人李让家僮梁太祖镇宣武养让为子是为朱友谦其僮奴以友让故皆得事太祖璋以军功为指挥使末帝遣璋攻下泽州即以为刺史梁亡事唐为邠宁节度使与郭崇韬相善崇韬伐蜀以璋为行营右厢马步军都虞候军事大小皆与参决蜀平以为剑南东川节度使孟知祥镇西川其后二人有异志大成四年明宗祀天南郊使李仁矩赉诏谕两川贡助南郊物五十万安重海亦驰书于璋【原作使仁矩赉安重海书往谕璋考薛史是时遣仁矩赉诏又遣重海驰书于璋以征贡是重海书特附诏以往也谨识改】璋诉不肯出祇出十万而已又因事欲杀仁矩仁矩泣涕而免归言璋必反其后使者至东川璋益倨慢使者还多言璋欲反状重海患之乃稍择将吏为两川刺史以精兵为其牙卫分布诸州又分阆州置保宁军以仁矩为节度使遣姚洪将兵千人从仁矩戍阆州璋及知祥觉唐疑己且削其地遂连谋以反璋因为其子娶知祥女以相结又遣其将李彦钊扼剑门关为七砦于关北增置关号永定凡唐戍兵东归者皆遮留之获其逃者覆以铁笼火炙之或剖肉钉面割心而啖长兴元年九月知祥攻陷遂州璋攻陷阆州执仁矩洪皆杀之初璋等反唐独诛璋家属知祥妻子皆在成都其疏属留京师者皆不诛石敬瑭讨璋等兵久无功而自关以西馈运不给敬瑭亦还明宗乃遣西川进奏官苏愿东川将军刘澄西归谕璋等使改过知祥遣人告璋欲与俱谢过自归璋曰唐不杀孟公家族于西川恩厚矣我子孙何在何谢之有璋由此疑知祥卖己三年四月以兵万人攻知祥战于弥牟璋大败还走梓州初唐陵州刺史王晖代还过璋璋邀留之至是晖执璋杀之传其首于知祥

△范延光

范延光字子瓌相州临漳人唐明宗破郢州梁兵方扼杨刘其先锋将康延孝阴送款于明宗明宗求可以通延孝款于庄宗者延光辄自请行乃怀延孝蜡丸书西见庄宗致之且曰今延孝虽有降意而梁兵扼杨刘者甚盛未可图也不如筑垒马家口以通汶阳庄宗以为然垒成梁遣王彦章急攻新垒明宗使延光间行求兵夜至河上为梁兵所得送京师下延光犹撈掠数百胁以白刃延光终不肯言晋事系之数月稍为狱吏所护庄宗入汴见延光喜拜检校工部尚书明宗时为宣徽南院使明宗行幸汴州至荥阳朱守殷反延光曰守殷反迹始见若缓之使得为计则城坚而难近臣请骑兵五百驰至城下以神速骇之乃以骑兵五百自暮疾驰至半夜行二百里战于城下迟明明宗亦驰至汴兵望见天子乘舆乃开门而延光先入犹巷战杀伤甚众守殷死汴州平明年迁枢密使出为成德军节度使安重诲死复召延光与赵延寿并为枢密使明宗有疾不能视朝京师之人汹汹异议藏窜山谷或寄匿于军营有司不能禁或劝延光以严法制之延光曰制动当以静宜少待之已而明宗疾少间京师乃定是时秦王握兵骄甚宋王弱而且在外议者多属意于潞王延光惧祸之及也及求罢去延寿亦遽求罢延光复镇成德而用朱宏昭冯贇为枢密使已而秦王举兵见诛明宗崩潞王反弑愍帝唐室大乱宏昭贇皆及祸以死末帝复召延光为枢密使拜宣武军节度使天雄军乱逐节度使刘延皓遣延光讨平之即以为天雄军节度使当晋高祖起太原末帝遣延光以兵二万屯辽州与赵延寿犄角既而延寿先降延光独不降高祖即位延光贺表最后至又其女为末帝子重美妃以此遂怀反侧高祖封延光临清王以慰其心成德军节度使董温其为契丹所虏其衙内指挥使秘琼悉杀温其家族而取其家资巨万计高祖以琼为齐州防御使橐其资装道出于魏延光阴选精兵伏境上伺琼过杀之夏津悉取其资以戍逻者悞杀闻由是高祖疑其必为乱乃幸汴州天福二年六月延光遂反遣其牙将孙锐澶州刺史冯晖以兵二万距黎阳掠滑卫高祖以杨光远为招讨使引兵自滑州渡胡梁攻之锐轻脱无谋兵行以媚女十余自随张盖操扇军士苦热皆不用光远谗知诱锐等渡河半济击之兵多溺死锐晖退走入魏坚壁不复出延光遣牙将王知新赍表自归高祖不见以知新属武德司延光又附杨光远表请降不报延光遂坚守攻之逾年不克师老粮匱高祖亦悔三年九月使谒者入魏赦延光延光乃降册封东平郡王天平军节度使赐铁券居数月来朝因惭请老以太子太师致仕居京师岁时宴见高祖待之与羣臣无间岁余使宣徽使刘处让载酒夜过延光谓曰上遣

处让来时适有契丹使至北朝皇帝问晋魏博叛臣何在恐晋不能制当锁以来免为中国后患延光闻之泣下莫知所为处让曰当且之洛阳以避契丹使者延光曰杨光远留守河南吾之仇也吾有田宅在河阳可以往乎处让曰可也乃挈其帑归河阳其行辎重盈路光远利其资因奏延光反复请图之光远兼镇河阳其子承勋知州事乃遣承勋以兵胁延光驱至浮桥推堕水死以延光自投水死闻因尽取其资高祖不问水运军使曹千获其流尸于繆家滩诏许归葬相州已葬墓辄崩破其棺椁头颅皆碎初秘琼杀董温其取其资延光又杀琼而取之而终以资为光远所杀而光远亦不能免也

△安重荣

安重荣小字铁胡朔州人祖从义利州刺史父全胜州刺史振武马步军都指挥使重荣有力善骑射为唐振武巡边指挥使晋高祖起太原使张颖阴招重荣重荣以巡边千骑叛入太原高祖即位拜成德军节度使重荣虽武夫而晓吏事其下不能欺起于军卒暴至富贵而见唐废帝晋高祖皆自藩侯得国尝谓人曰天子宁有种邪兵强马壮者为之尔时高祖与契丹约为父子契丹骄甚高祖奉之愈谨重荣愤然以谓困已弊之民而充无厌之欲数以此非谓高祖契丹使者往来过镇州重荣箕踞慢骂不为礼或执杀之是时吐浑白氏役属契丹苦其暴虐重荣诱之入塞契丹数遣使责高祖并求使者高祖对使者鞠躬俯首受责愈谨多为好辞以自解而姑息重荣不能诘乃遣供奉官张澄以兵二千搜索并镇忻代山谷中吐浑悉驱出塞吐浑去而复来重荣卒纳之因招集亡命课民种稗食马万匹所为益骄因怒杀指挥使贾章诬之以反章女尚幼欲舍之女曰吾家三十口皆死于兵存者特吾与父尔今父死吾何忍独生愿就死遂杀之镇人于是高贾女之烈而知重荣之必败也重荣既僭侈以为金鱼袋不足贵刻玉为鱼佩之娶二妻高祖因之并加封爵天福六年夏契丹使者拽刺轻骑掠幽州南境民处之博野乃上表曰臣执拽刺以拽刺过镇重荣侵辱之拽刺言不逊重荣怒昨据熟吐浑白承福赫连功德等领本族三万余帐目应州来奔又据生吐浑契苾两突厥三部南北将沙陀安庆九府等各领其族牛羊车帐甲马七八路来奔具言契丹残虐掠取生口牛马自今年二月已后号令诸蕃点阅强壮办具军装期以上秋南向诸蕃部诚恐上天不佑败灭家族愿先自归其诸部胜兵众可十万又据沿河党项山前后逸越利诸族首领皆遣人送契丹所授告身职牒旗帜来归款皆号泣告劳愿治兵甲以报怨又据朔州节度副使赵崇杀节度使刘山以城来降窃以诸

蕃不招呼而自至朔州不攻伐而自归虽系人情尽由天意又念陷蕃诸将等本自勋劳
久居富贵丧身边塞酷虐不胜企足朝廷思归可谅苟
闻传檄必尽倒戈其表数千言又为书以遗朝廷大臣四方藩镇皆以契丹可取为言高
祖患之为之幸邺报重荣曰前世和亲皆所以为天下
计今吾以天下臣之尔以一镇抗之大小不等无自辱焉重荣谓晋无如我何反意乃决
重荣虽以契丹为言反阴遣人与幽州节度使刘晞相
结契丹亦利晋多事幸重荣乱期两敝之欲因以窥中国故不加怒于重荣其冬安从进
反襄阳重荣闻之乃亦举兵是岁镇州大旱蝗重荣聚
饥民数万驱以向邺声言入觐行至宗城破家堤高祖遣杜重威逆之兵已交其将赵彦
之与重荣有隙临阵卷旗以奔晋军重荣闻彦之降晋
大惧退入于辚重中其兵二万皆溃去是冬大寒溃兵饥冻及见杀无孑遗重荣独与十
余骑奔还以牛马革为甲驱州人守城以待重威兵至
城下重荣裨将自城东水碾门引官军以入杀守城二万余人重荣以吐浑数百骑守牙
城重威使人擒之斩首以献高祖御楼受馘命漆其首
送于契丹改成德军为顺德镇州曰恒州常山曰恒山云

△安从进

安从进振武索葛部人也祖父皆事唐为骑将从进初从庄宗于兵间为护驾马军
都指挥使领贵州刺史明宗时炙保义彰武军节度使
未尝将兵征伐尝一征夏州李彝超卒亦无功愍帝即位徙领顺化为侍卫马军都指挥
使潞王反凤翔从进巡检京城杀枢密使冯赉送款于
潞王愍帝出奔潞王将至京师从进率百官班迎于郊清泰中徙镇山南东道晋高祖即
位加同中书门下平章事高祖取天下不顺常以此惭
藩镇多务过为姑息而藩镇之臣或不自安或心慕高祖所为谓举可成事故在位七年
而反者六起从进最后反然皆不免也自范延光反邺
从进畜异志恃江为险招集亡命益置军兵南方贡输多擅留之邀遮商旅皆黥以充军
与安重荣阴相结托期为表里高祖忠之谋徙从进使
人谓曰东平王建立来朝愿还乡里已徙上党朕虚青州以待卿卿诚乐行朕即降制从
进报曰移青州在汉江南臣即赴任高祖亦优容之其
子弘超为宫苑副使居京师从进请赐告归遂不遣王令谦潘知麟者皆从进牙将也常
从从进最久知其必败切谏之从进遣子弘超与令谦
游南山酒酣推堕崖死天福六年安重荣执杀契丹使者反迹见高祖为之幸邺郑王重
贵留守京师宰相和凝曰陛下且北从进必反何以制
之高祖曰卿意奈何凝曰臣闻兵法先人者夺人愿为空名宣敕十数通授郑王有急则
命将以往从进闻高祖北遂杀知麟以反郑王以空名

敕授李建崇郭金海等讨之从进引兵攻邓州不克进至胡阳遇建崇等大骇以为神速复为野火所烧遂大败以数十骑奔还襄阳高祖遣高行周围之踰年粮尽从进自焚死执其子弘受及其将佐四十三人送京师高祖御楼受俘徇于市斩之降襄阳为防御赠令谦忠州刺史知麟顺州刺史

△杨光远

杨光远字德明其父曰阿瞪啜沙陀部人光远初名阿檀为唐庄宗骑将从周德威战契丹于新州折其一臂遂废不用久之以为幽州马步军都指挥使戍瓦桥关光远为人病秃折臂不通文字然有辩智长于吏事明宗时为妫瀛冀易四州刺史以治称初唐兵破王都于中山得契丹大将蔚刺等十余人已而契丹与中国通和遣使者求之明宗与大臣议皆欲归之独光远不可以为后悔不及明宗嘉其说卒不遣光远自易州刺史拜振武军节度使清泰二年徙镇中山兼北面行营都虞候御契丹于云应之间晋高祖起太原末帝以光远佐张敬达为太原四面招讨副使为契丹所败退守晋安寨契丹围之数月人马食尽杀马而食马尽乃杀敬达出降契丹主见之靳曰尔辈大是恶汉儿光远与诸将初不知其谄已契丹主曰不用盐酪食一万匹战马岂非恶汉儿邪光远等大惭伏契丹主问曰惧否皆曰甚惧曰何惧曰惧皇帝将入蕃契丹主曰吾国无土地官爵以居汝汝等勉事晋晋高祖以光远为宣武军节度使侍卫马步军都指挥使初进见佯为悒悒之色常如有所恨者高祖疑其有所不足使人问之对曰臣于富贵无不足也惟不及张生铁死得其所所以常为愧尔高祖以为忠颇亲信之范延光反以为魏府都招讨使久之不能下高祖卒用他计隆延光而光远自以握重兵在外谓高祖畏己始为恣横高祖每优容之为选其子承祚尚长安公主其次子承信等皆超拜官爵恩宠无比枢密使桑维翰恶之数以为言光远自魏来朝屡指维翰擅权难制高祖不得已罢出维翰于相州亦徙光远西京留守兼镇河阳光远始大怨望阴以宝货奉契丹诉己为晋疏斥所养部曲千人挠法犯禁河洛以间甚于寇盗天福五年徙镇平卢封东平王光远请其子以行乃拜承祚单州刺史承勋莱州防御使父子还东车骑连属数十里出帝即位拜太师封寿王时马少括天下马以佐军景延广请取光远前所借官马三百匹光远怒曰此马先帝赐我安得复取是疑我反也遂谋为乱而承祚自单州逃归出帝即以承祚为淄州刺史遣使者赐以玉带御马以慰安之光远益骄乃反召契丹入侵陷贝州博州刺史周儒亦叛降契丹是时出帝与契丹军相距澶魏间用竇

仪言遣李守贞皇庸遇以兵万人沿河而下儒引契丹自马家渡济河方筑垒守贞等急击之契丹大败遂与光远隔绝帝复遣守贞符彦卿东讨光远婴城固守自夏至冬城中人相食几尽其子承勋等劝光远出降光远曰我在代北时尝以纸钱祭天地投之辄没入言我当作天子宜且待时毋轻议也承勋知不可乃杀节度判官邱涛亲将杜延寿杨瞻白延祚等劫光远幽之遣人奉表待罪承信承祚皆诣阙自归而光远亦上章请死出帝敕李守贞便宜处置守贞遣客省副使何延祚往延祚至其第光远方阅马于厩延祚使一都将入谓之曰天使在门欲归报天子未有以藉手光远曰何谓也曰须得大王头尔遂见杀以病卒闻承勋事晋为郑州防御使契丹灭晋使人召承勋至京师责其劫父裔而食之以承信为平卢节度使汉高祖赠光远尚书令封齐王命中书舍人张正撰光远碑铭文既立石天大雷电击折之阿噉啜初非姓氏其后改名瑊而姓杨氏光远初名檀清泰二年有司言明宗庙讳犯偏傍者皆易之乃赐名光远云

△李守贞

李守贞河阳人晋高祖镇河阳以为客将其后尝从高祖高祖即位拜客省使监马全节军破李金全于安州以功拜宣徽使出帝即位杨光远反召契丹入侵守贞领义成军节度使为侍卫亲军都虞候从出帝幸澶州麻答以奇兵入郛州渡马家口栅于河东守贞驰往破之契丹兵多溺死获马数百匹裨将七十余人徙领泰宁军节度使以兵二万讨杨光远光远降守贞以功拜同平章事赐以光远旧第守贞取旁官民舍大治之为京师之甲出帝临幸燕锡恩礼出于诸将契丹入侵出帝再幸澶州杜重威为北面招讨使守贞为都监晋兵素骄而守贞重威为将皆无节制行营所至居民豢圉一空至于草木皆尽其始发军也有赐赆曰挂甲钱及班师又加赏劳曰卸甲钱出入之费常不下三十万由此公私重困守贞与重威等攻下秦州破满城杀二千余人还为侍卫亲军都指挥使领天平军节度使又领归德是时出帝遣人以书招赵延寿使归国延寿诈言思归愿得晋兵为应而契丹高牟翰亦诈以瀛州降出帝以为然命杜重威为招讨使守贞为都监屯于武强契丹侵镇定守贞等军于中渡遂与重威降于契丹契丹以守贞为司徒契丹入京师拜守贞天平军节度使汉高祖立守贞来朝拜太保河中节度使高祖崩杜重威死守贞惧不自安以谓汉室新造隐帝初立天下易以图而门下僧总伦言守贞有非常之相高祖乃决计反先是赵思绾以京兆反王景崇又以凤翔反并遣人推守贞为秦王守贞拜景崇等官爵又遣人间以蜡丸书遗

吴蜀契丹使出兵以牵汉汉遣白文珂等攻景崇思綰
久无功乃遣枢密使郭威率禁兵督攻之诸将皆请先击思綰景崇威计未知所向行至
华州节度使扈彦珂谓威曰三叛连衡以守贞为主守
贞先败则思綰景崇可传声而破矣威以为然遂先击守贞与诸将分为三栅栅其城三
面而阙其南发五县丁夫筑长城以连三栅守贞出兵
坏长城威辄补其所坏如此逾年守贞兵少食尽威督兵攻破之守贞与妻子自焚汉军
入城于烟烬中斩其首传送京师梟于南市余党皆磔
之

△王景崇

王景崇邢州人也为人明敏巧辩善事人唐明宗镇邢州以为牙将及即位拜通事
舍人历引进合门使驰召方镇监军征伐必用景崇后
事晋拜左金吾卫大将军晋亡萧翰据京师景崇厚赂其将高牟翰以求用已而翰北归
许王从益居京师用景崇为宣徽使监左藏库汉高祖
起太原景崇取库金奔迎高祖拜右卫大将军高祖攻邺景崇求留守起居表诣见高祖
愿留军中效用为画攻战之策甚有辩高祖乃奇其材
是时汉方新造凤翔侯益永兴赵赞皆尝受命契丹高祖立益等内顾自疑乃阴召蜀人
为助高祖患之及已破邺益等惧皆请入朝会回鹘入
贡言为党项所隔不得通愿得汉兵为援高祖遣景崇以兵迎回鹘景崇将行高祖已疾
召入卧内戒之曰益等已来善矣若犹迟疑则以便宜
图之景崇行至陕赵赞已东入朝而蜀兵方寇南山景崇击破蜀兵追至大散关而还高
祖乃诏景崇兼凤翔巡检使景崇至凤翔侯益未有行
意而高祖崩或劝景崇可速诛益景崇念独受命先帝而少主莫知犹豫未决益乃亡去
景崇大悔失不杀之益至京师隐帝新立史宏肇杨邠
等用事益乃厚赂邠等阴以事中景崇已而益拜开封尹景崇心不自安讽凤翔将吏求
已领府事朝廷患之拜景崇邠州留后以赵晖为凤翔
节度使景崇乃叛尽杀侯益家属与赵思綰兵推李守贞为秦王隐帝即以赵晖讨之景
崇西招蜀人为助蜀兵至宝鸡为晖将药元福李彦从
所败晖攻凤翔堑而围之数以精兵挑战景崇不出晖乃令千人潜之城南一舍伪为蜀
兵旗帜循南山而下声言蜀救兵至矣须臾尘起景崇
以为然乃令数千人溃围而出以为应晖设伏待之景崇兵大败由是不敢复出明年高
祖思綰相次皆败景崇使公孙鞏等烧城东门伪降欲
以牙兵击城北兵出走迟明鞏烧东门将降而府中火起景崇自焚死鞏乃降晖

△赵思綰

赵思綰魏州人为河中节度使赵赞牙将汉高祖即位徙赞镇永兴赞入朝京师留

思綰兵数百人于永兴高祖遣王景崇至永兴与齐藏珍以兵迎回鹘阴以西事属之景崇至永兴赞虽入朝而其所召蜀兵已据子午谷景崇用思綰兵击走之遂与思綰俱西高祖遣使者召思綰等是时侯益来朝思綰以兵从益东归谓其下常彦卿曰赵公已入人手吾属至并死矣奈何彦卿曰事至而变勿预言也益行至永兴永兴副使安友规出迎益饮于郊亭思綰前曰兵馆城东然将士家属皆居城中愿纵兵入城掣其家属益信之以为然思綰与部下入城斩州校于城门并门者十余人遂闭门劫库兵以叛高祖遣郭从义王峻讨之经年莫能下而王景崇亦叛与思綰俱送款于李守贞守贞以思綰为晋昌军节度使隐帝遣郭威西督诸将兵先围守贞于河中居数月思綰城中食尽杀人而食计穷募人为地道将走蜀其判官程让能曰公比于国无嫌但惧死而为此今国家用兵三方劳弊不已诚能翻然效顺率先自归以功补过庶几有生若坐守穷城待死而已思綰然之乃遣教练使刘珪诣从义乞降而遣其将刘筠奉表朝廷拜思綰镇国军留后趣使就镇思綰留不行蜀阴遣人招思綰思綰将奔蜀而从义亦疑之乃遣人白郭威威命从义图之从义因入城召思綰趣之上道至则擒之父子俱斩于市

△皇甫暉

皇甫暉魏州人为魏军卒戍瓦桥关岁满当代归命留屯贝州是时唐庄宗已失政天下离心暉为人骁勇无赖夜博军中不胜乃与其徒谋为乱劫其部将杨仁晟曰唐能破梁而得天下者以先得魏而尽有河北之兵也魏军甲不去体马不解鞍着十余年今天下已定而天子不念魏军久戍之劳去家咫尺不得相见今将士思归不可遏公当与我俱行不幸天子怒吾军则坐据一州足以起事仁晟不从遂斩之推一小校为主不从又斩之乃携二首以诣裨将赵在礼在礼从之夜焚贝州以入于魏在礼以暉为马步军都指挥使暉拥甲士数百骑大掠城中及明宗入魏遂与在礼合谋庄宗之祸自暉始明宗即位暉自军卒擢拜陈州刺史终唐世常为刺史晋天福中以卫将军居京师久之为密州刺史契丹入侵暉率其州人奔于江南李景以为歙州刺史奉化军节度使镇江州周师征淮景以暉为北面行营应援使屯清流关为周师所败并其都监姚凤皆被擒世宗召见暉金创被体哀之赐以金带鞍马后数日卒

△杜重威

杜重威朔州人妻石氏晋高祖之女弟高祖即位封公主拜重威舒州刺史典禁兵从侯益攻破张从宾于泛水拜潞州节度使范延光反于邺重威从高祖攻降延光徙领忠武加同平章事又徙天平迁侍卫亲军都指挥使安

重荣反重威逆战于宗城重荣为偃月阵重威击之不动乃分兵为三重威先以左右队击其两翼战酣遂以精兵击其中军重荣将赵彦之来奔重荣遂大败走还镇州闭壁不敢出重威攻破之以功拜成德军节度使重威出于武卒无行而不知将略破镇州悉取府库之积及重荣之资皆没之家高祖知而不问及出帝与契丹绝好契丹连岁入侵重威闭城自守属州城邑多陷契丹驱人民千万过城下重威登城望之未尝出救开运元年加重威北面行营招讨使明年引兵攻秦州破满城遂城契丹已去至古北还兵击之重威等南走至阳城为所围困赖符彦卿张彦泽等因大风奋击契丹大溃诸将欲追之重威为俚语曰逢贼得命更望复子乎乃收兵驰归重威居镇州重敛其民户口雕弊又惧契丹之至乃连表乞还京师未报亟上道朝廷莫能止即拜重威邺都留守三年秋契丹高牟翰诈以瀛州降复以重威为北面行营招讨使重威至瀛州牟翰已弃城去重威退屯武强契丹侵镇定重威西趋中渡桥与敌来滹沱河而军偏将宋彦筠王清渡水力战而重威按军不动彦筠遂败清战死转运使李谷教重威以三脚木为桥募敢死士过河击贼诸将皆以为然独重威不许契丹遣骑兵夜并西山击栾城断重威军后是时重威已有异志而粮道隔绝乃阴遣人诣契丹请降契丹大悦许以中国与重威为帝重威信以为然乃伏甲士召诸将告以降诸将愕然听命重威出降表使诸将书名乃令军士阵于栅外军士犹喜跃以为决战重威告以粮尽出降军士解甲大哭声震原野契丹赐重威赭袍使衣以示诸军拜重威太傅契丹入京师重威以晋兵屯陈桥士卒饥冻不胜其苦重威出入道中市人随而诮之重威俛首不敢仰顾契丹寻遣重威还邺都明年契丹北归重威与其妻石氏诣别汉高祖定京师拜重威太尉归德军节度使重威惧不受命遣高行周攻之不克高祖乃自将攻之汉兵数败围之百余手初契丹留燕兵千五百人在京师高祖自太原入悉诛之于繁台其亡者奔邺燕将张珽先以兵二千在邺闻燕兵见杀乃劝重威固守高祖已杀燕兵悔之数遣人招珽等珽登城呼曰繁台之诛燕兵何罪既无生理请以死守重威食尽屑曲而食民多逾城出降皆无人色重威乃遣判官王敏及其妻子相次请降高祖许之重威素服出见高祖赦重威拜检校太师守太傅兼中书令悉诛珽及重威将吏而录其私帑以重威归京师高祖病甚顾大臣曰善防重威高祖崩秘不发丧大臣乃共诛之及其三子尸于市市人蹴而诟之吏不能禁支裂蹈践斯须而尽

钦定续通志卷六百二十二

●钦定续通志卷六百二十三 叛臣传四

叛臣传

宋【一】

○宋一

郭药师 杜充 吴曦

郭药师

杜充

吴曦

△郭药师

郭药师渤海铁州人辽之将亡燕王淳募兵辽东使报怨女真目曰怨军药师为之渠首淳建号于燕改怨军为常胜军擢药师至诸卫上将军涿州留守淳死其妻萧后称制宣和四年药师拥所部八千人奉涿易二州来归诏为恩州观察使从刘延庆伐燕与萧干军遇于卢沟药师曰干以全师抗我燕城必虚选劲骑袭之可得也延庆遣药师与诸将率兵六千夜渡河倍道而进质明甄五臣领五千骑夺迎春门以入大军继至药师遣人谕萧后使降后令闭城门密召萧干还战于三市药师大败失马步走踰城以免还犹厚赏之累拜武泰军节度使五年加检校少保同知燕山府诏入朝徽宗礼遇甚厚赐以甲第姬妾张水嬉于金明池使观之命贵戚大臣更互设宴又召对于后苑延春殿委以守燕对曰愿效死又令取天祚以绝燕人之望变色而言曰天祚臣故主也国破出走臣是以降陛下使臣毕命他所不敢辞若使反故主非所以事陛下愿以付他人因涕泣如雨帝以为忠加检校少傅归镇萧干入塞药师破其众于峯山生擒阿鲁大师策勋加检校太傅初王安中知燕山府詹度与药师同知药师自以节钺欲居度上度称御笔所书有序药师不从加以常胜军肆横药师右之度不能制朝廷虑其交恶以蔡靖易度会金人索张觉安中函觉首送之金药师曰若察药师肯亦当送之耶由是解体而无自固之志矣【据金史药师传出增辑】药师多遣部曲持良械精甲贸易他道为奇巧之物以奉权贵宦侍致誉言日闻专制一路增募兵号三十万朝论颇以为虑亟拜太尉召入朝辞不至帝令童贯行边阴察其去就贯至燕药师迎于易州再拜帐下贯遂释然邀贯视师至于迥野略无人迹药师下马当贯前掉旗一挥俄顷四山铁骑耀日莫测其数贯众怕失色归为帝言药师必能抗敌蔡攸亦从中力主之金使贺天宁节归送伴使见药师兵遇之于道金使为之敛马引避奏迺药师威声远振攸益谓其可倚故内地不复防制屡有告变乃得其通金国书辄

不省七年十二月詹度言药师瞻视不常蜂目乌喙怙
宠恃功逆节已萌今闻与金人交结背负朝廷兴祸不远愿早为之虑始诏遣官究实而
金兵已南下破檀蓟至玉田蔡靖遣药师张令徽刘舜
仁帅师出御其夕令徽遁归靖与部使者诣药师计事药师欲降靖曰靖誓死报国此何
言邪引佩刀将自刭药师抱持之并诸使者悉锁于家
金帅宗望及郊药师率官军迎降金太宗以药师为燕京留守赐姓完颜遂从宗望伐宋
至庆源闻徽宗内禅欲回军药师尽知宋虚实谓宗望
曰南朝未有备不如姑行宗望遂县军深入驻兵汴城诘索宫省与邀耶宝器服玩皆药
师导之也其后复为金破宋顺安军杀三千余人子安
国仕金为刑部尚书从海陵南伐领武捷军都总管为众所恶金世宗杀之 【据金史药
师传增辑 按药师传宋金两史并见今考其事迹
宜入宋叛臣金史列传从删谨识】

△杜充

杜充字公美相人也喜功名性残忍好杀而短于谋略绍圣间登进士第累迁考功
郎光禄少卿出知沧州靖康初加集英殿修撰复知沧
州时金人南侵郡中侨寓皆燕人来归者充虑其为敌内应悉杀之建炎二年宗泽卒以
充代为留守兼开封尹节制京东西路寻知宣武军节
度使召拜尚书右仆射同平章事御营使初宗泽要结豪杰图迎二帝泽卒充短于抚御
人心疑阻两河忠义之士往往引去留守判官宗颖尝
疏其失朝廷谓充有威望可属大事吕颐浩张浚亦荐之时诸路各拥重兵率骄蹇不用
命张浚方白事谒未入浚遽前充怒戮其使诸耐稍稍
慑服高宗将幸西浙命韩世忠屯太平王■〈王燮〉屯常州以充为江淮宣抚使留建
康使尽护诸将光世世忠惮充严急不乐属充诏移光
世江州世忠常州时江浙倚充为重而充日事诛杀无制敌之方识者寒心金人窥江充
遣裨将王民张超分兵守渡乘高据岸以神臂弓射却
之金人复逼硃砂时以轻舟薄南岸官军奋击或沈其舟一日当昼金人对江列阵而佯
退众信之敌谍知无备乃夜乘数十舟横江直济众不
能御敌遂登岸充亟命统制官陈淬尽领岳飞诸裨校舍二万人邀击于马家渡约王
■〈王燮〉俱进■〈王燮〉引兵先遁淬独与战死之
充军溃金人陷建康充渡江保真州诸将衔怨充深刻伺其败将害之充不敢归乃北约
泗州刘位徐州赵立欲合兵邀敌归路诏遣内侍任源
赐亲札激厉俾为后图源至常州道阻未得进募健士先达帝意充诡词报源充居真州
长芦寺守臣向子恣劝充由通泰入浙充畜异志不听
所善凌唐佐先降金以书招充完颜宗弼复遣人说充曰若降当封以中原如张邦昌故

事充遂叛降金事闻下制削充爵徙其子嵩岩昆壻韩汝惟于广州是冬充至云中尼堪薄之久之命知相州充猜狙肆威同列多不协绍兴二年其孙自徙所间走归充其副胡景山诬充阴与宋通尼堪下充吏炮掠备至不服释之寻命充为燕京三司使迁行台右丞相而死

△吴曦

吴曦信王璘之孙节度挺之中子以祖任补右承奉郎淳熙五年换武德郎累迁高州刺史绍熙四年挺卒【原传作绍兴元年今据吴挺传改】起复濠州团练使庆元四年宪圣园陵成以劳迁武宁军承宣使六年光宗攒陵成迁太尉嘉泰元年【原传载吴曦为都统制于庆元六年今据宁宗纪改】韩侂胄谋开边曦潜蓄异志因附侂胄求迁蜀枢密何澹力沮之陈自强纳曦厚赂阴赞侂胄遂命曦兴州驻扎御前诸军都统制兼知兴州利州西路安抚使从政郎朱不弁上侂胄尽谓曦不可主西师侂胄不听曦至镇潜副都统制王大节罢之更不除副帅而兵权悉归于曦开禧二年朝廷议出师昭曦为四川宣抚副使以兵六万属之听便宜行事复得节制财赋按劾计司而利权又归于曦未几兼陕西河东招抚使曦与从弟晁及徐景望赵富米修之董镇共为反谋阴遣客姚淮源【金史完颜纲传作姚圆】献关外阶成和风四州于金求封蜀王侂胄日夜望曦进兵曦阳为持重按兵河池不进潜为金人地以困官军侂胄不之觉会正使程松至曦不庭参松不敢诘曦复多摘取松卫兵松亦不悟金人侵西和王喜鲁翼拒之战方急曦传令退保黑谷军遂溃乃焚河池退壁青野原曦时已布腹心于金将士犹力战敌人窃笑之曦退壁鱼关招集忠义厚赐以收众心兴元都统制毋思以重兵守大散关曦因撤募关之戍敌由版阑谷遶出思后思不能支金遂陷大散关曦退屯置口举人陈国饬投匭上书言曦必叛侂胄不省金得曦族人端遣持诏书金印间行至置口封曦蜀王曦密受之李好义败金人于七方关曦不上其捷还兴州是夜天赤如血光烛地如昼翌日曦召幕属谕意谓东南失守车驾幸四明今宜从权济事王翼杨揆之抗言曰如此则相公八十年忠者门户一朝扫地矣曦日吾意已决即遣任辛献蜀地图及吴氏谱牒于金遣徐景望为四川转运使褚青为左右军统制趋益昌斂总领所仓库程松闻变弃兴元去三年曦遣将利吉引金兵入凤州以四郡付之表铁山为界曦乘黄屋左纛僭王位于兴州即治所为行宫称正月为元年使人告其伯母赵氏赵怒绝之叔母刘日夜号泣骂不绝口曦扶出之曦既僭位遣董镇至成都治宫殿将徙居之曦所统军七万并程松军三万分隶十统帅遣禄祁房大勋戍万州泛舟下嘉

陵江声言约金人夹攻襄阳祁寻至夔遣兵扼巫山得
胜罗护等砦以遏官军侂胄闻曦反不知所为或劝不如因而封之侂胄纳其说吴玠为
曦谋宜收用蜀名士以系民心于是陈咸自髡其发史
次秦自瞽其目杨震仲饮药卒王翊家拱辰皆不受伪命杨修年詹久中家大酉李道传
邓性善杨泰之悉弃官去薛九龄谋举义兵兴州合江
仓官杨巨源倡议讨逆未有以发遂与随军转运安丙共谋诛曦又与李好义及兄好古
李贵等交相结纳二月甲戌夜漏尽巨源好义首率勇
敢七十人斧门以入李贵即曦室斩其首裂其尸丙分遣将士数其二子及叔父柄弟焯
从弟睨贼赏姚淮源李珪郭仲米修之郭澄等皆诛之
函曦首献于朝诏曦妻子处死亲昆弟除名勒停吴璘子孙并徙出蜀玠子孙免连坐通
主璘祀

钦定续通志卷六百二十三

●钦定续通志卷六百二十四 叛臣传五

叛臣传

宋 【二】

○宋二

李全

李全

△李全

李全者潍州北海农家子同产兄弟三人全锐头蠡目权譎善下人弓马趯捷能运
铁枪时号李铁枪初元兵破中都金主迁汴赋敛益横
遗民保岩阻思乱于是刘二祖起泰安掠淄沂金布萨安贞遣将破之斩二祖 【据金史
布萨安贞传增辑】 余党推霍仪为帅彭义斌等附
之杨安儿起掠莒密展徽王敏为谋主母舅刘全为帅汲君立等附之余寇蠡起兵至山
东全母及其兄死焉全与仲兄福聚众数千刘庆福国
安用郑衍德田四于洋于潭等咸附之元兵退金遣完颜霆洪果将花帽军三千讨安儿
于阑头滴水断其南路安儿败乘舟入海舟人曲成等
击之安儿坠水死 【原传作舟人斩安儿以献今据金史布萨安贞传改】 安儿无子
其妹四娘子狡悍善骑射刘全收溃卒奉之众尚万余
掠食至磨旗山全以其众附杨氏通焉遂嫁之全合军与霆战又败霆骁将张惠望见全
跃马赴之枪及全若有繫其马足而止者全因得收余
众保东海刘全分军驻嵎上霍仪攻沂州不下霆自清河出徐州斩仪其党彭义斌归李
全全等出没乌嵎 【原传作洪果完颜霆张惠等数
人出没岛嵎今据续通鉴及宋史纪事本末改】 宝货山委而不得食相率食人有镇江

武锋卒沈铎亡命山阳诱致米商辄利数十倍知楚州
应纯之偿以玉货北人至者辄舍之因说纯之以归铜钱为名弛渡淮之禁来者莫可遏
安儿之未攻也有意归宋定远民季先者安儿处以军
职安儿死先至山阳夤缘铎得见纯之道豪杰愿附之意纯之命先谕意羣豪以铎为武
锋军副将辟楚州都监与高忠皎各集忠义民兵分二
道攻金先遂以李全五千人附忠皎合兵攻克海州全分兵袭破莒州禽金守富察理嘉
别将于洋克密州兄福克青州始授全武翼大夫京东
副总管纯之见北军屡捷密闻于朝谓中原可复时频岁小稔朝野无事丞相史弥远鉴
开禧之事不明招纳密敕纯之慰接之号忠义军就听
节制给忠义粮于是东海马良高林宋德珍等万人辐凑涟水铎纳之全与刘全俱起羨
心焉嘉定十一年正月全率众来归诏以全为京东路
总管 【据绩通鉴及宋史纪事本末增辑】 六月全围海城不胜退守石秋分兵袭密
州禽洪果械至楚城十二年山东来归者日众权楚州
梁丙无以贍季先请预备两月然后率所部并良等往密州就食不许请速遣全代领其
众又不许丙以石珪权军务珪乃夺运粮之舟率军二
万渡淮大掠丙乃遣全出谕之时金人围淮西急马司都统李庆宗戍濠出战丧骑三千
帅司调全与先珪军援盱眙全往东海点军赴之与金
人战于嘉山小捷全至涡口值金将赫舍哩约赫德名卢鼓槌者将济全与其将鹿仙掩
之金兵溺淮者数千俘获甚众又与阿海战于化陂湖
大捷杀金数将得其金牌追至曹家庄而还丘进达州刺史六月金元帅张林以青吕密
发莱淄淄演棣宁海济南十二州来归始林心欲归宋
而未能达会全还潍州上冢揣知林意乃薄兵青州城下陈说国家威德劝林早附林恐
全诱已犹豫未纳全从数人挺身入城林乃开门纳之
相见甚欢谓得所托置酒结为兄弟全既得林要领附表奉十二州版籍以归授林武翼
大夫京东安抚兼总管其余授官有差进全广州观察
使京东总管刘庆福彭义斌皆为统制增放二万人钱粮徙屯楚州十二月大雨雪淮水
冰合全于于制府贾涉欲袭泗州许之夜半渡淮潜向
泗之东城踏濠冰傅城下掩金人一备俄城上获炬数百齐举全知有备引去十三年赵
拱以朝命论京东金长清县令严实因拱以求内附拱
与定约还白贾涉涉再遣拱往谕配兵二千全亦请往涉不能止乃帅楚州及盱眙忠义
万余人以行合林军得数万遂袭东平金参政蒙古刚
帅众固守全与林夹汶水而砦金人堰汶水而决之诘旦金骑三百奄至全帅众赴之杀
数人逐北抵山谷遇金将斡尔达盛兵突出全几不免
会诸将至拔以出乃退保长清县精锐丧失大半统制陈孝忠死焉林兵还青州全所携

镇江军五百人多怨愤全乃分隶拱使元归而以余众首沧州假盐利以慰贍之寻还楚州全自涡口之捷有轻诸将心以季先威望出己上乃阴结贾涉所任吏莫凯【按通鉴作莫凯宋史纪事本末作吴凯互异】潜先杀之涉遣统制陈选往涟水总其军先党裴渊宋德珍孙武正王义深张山张友拒而不受潜迎石珪于盱眙奉为统帅全乃见涉请讨珪涉以全军布南度门移淮阴战舰陈于淮岸以示珪有备然后命一将招珪军来者增钱粮不至罢支众心遂散珪技穷遂杀渊而挟武正德珍降元涟水军未有所属全求并将之涉遂以付全十四年正月金人将南来全请于涉欲与刘瑄共图泗州以伐其谋涉许之全兵至盱眙度淮攻克泗州之西城入城布守瑄徒盱眙刍粟以实以防城之具彻以往未几卢鼓槌来取西城金盛兵出战败统制赖兴死明日复战不胜全遁归资粮器械悉以委敌金人既陷蕲州扈再兴赵范及其弟葵邀击于天长全随行袭金人后亦以是进承宣使十五年二月瑄再取西城卢鼓槌背城力战张惠奔全军请降全请于制置司官之令自总一军张林叛降元全请讨之乃提师驻海州以追林林败走全遂入青州以全为保宁军节度使京东路镇抚副使【据续通舰及宋史纪事本末增辑】十六年贾涉以全骄暴力请还朝五月被召在道卒初涉以翟朝宗统镇江副司八千人屯楚州城中分帐前忠义万人屯五千城西赵邦永高友统之屯五千淮阴王晖于潭统之以制北军全轻镇江兵惟忌帐前忠义乃数称高友等勇遇出军必请以自随涉不许全每燕戏下并召涉帐前将校帐前亦愿隶焉然未能合也及涉卒邱寿迈摄帅事全请曰忠义乌合尺籍卤莽莫若别置新籍一纳诸朝一申制阍一留全所庶功过有考请给无弊寿迈善而诺之全乃合帐前忠义悉籍之尽统其军寿迈不悟十一月以许国为淮东安抚制置使先是国数言全奸谋甚深反状已着非有豪杰不能消弥盖自鬻也至是乔行简为吏部侍郎上疏论国望轻不宜帅淮不报淮东参幕徐晞稷雅意开阍及闻国用晞稷舐望乃眷国奏注释以寄全全得报不乐十七年正月国之镇全妻杨氏郊迎国辞不见杨氏惭以归国既视事痛抑北军犒贖十裁七八全自山东致书于国国大喜全固留青州国不能制数致厚馈邀全议事全集将校曰我不参制阍则曲在我今必往八月至楚州上谒及庭趋国端坐纳全拜不为止全退而大怒国继设盛会宴全遗劳加厚全终不乐既而全欲往清州惧国苛留自计曰彼所争者拜也拜而得志吾何爱焉更折节为礼因会席闲出札白事国见其细故判从之全即席再拜谢自定动息必请得请必拜国愈喜全遂往青州十一月国集两淮马

步军十三万大阅楚城之外以挫北人之心杨氏及军校留者恐其图己内自为备宝庆元年湖州人潘甫与其从弟丙壬起兵密告全党全党欲坐致成败阳许以兵接应而实无意助之及潘甫等事败全党益不安全遣刘庆福还楚为乱计议官苟梦玉知之以告国国曰但使反反即杀我岂文儒不知兵耶梦玉惧祸及己复告庆福曰制帅欲图汝乙卯国晨起莅事忽露刃充庭国厉声曰不得无礼矢已及颡流血蔽面国走乱兵悉害其家大纵火焚官寺两司积蓄尽为贼有亲兵数十人翼国登城楼縋城走伏道堂中明日缢于途贼拥通判姚翀入城犒南北军使归营事闻史弥远惧激他变欲姑事涵忍以徐晞稷尝倅楚州守海州得全欢心乃授晞稷淮东制置使令屈意抚全时庆福以事济报全全又牒义斌等曰许国谋反已伏诛矣尔军并听我节制义斌得牒大骂曰逆贼背国厚恩擅杀制使我必报此讎乃斩赍牒人南向告天誓众见者愤激全自青州至楚城佯责庆福不能弹压致忠义之哄斩数人请待罪朝廷不问赵范时知扬州得制置印于溃卒中以授晞稷全遣骑逆晞稷晞稷入楚城全及门下马拜庭下晞稷降等止之贼众乃悦晞稷初至楚全尚知畏屡令至还战马军器于制司全唯唯退招姚翀及将校饮酒酣全曰制司追我战马军器若何忽一人抵掌愤然使全反全阳骂之翀以告晞稷翼日全见晞稷求纳官晞稷抚之而去自是不复谁何其后至是恩府称全恩堂称杨氏而手足倒置矣初楚城将乱有吏窃许国书篋二以献庆福皆机事全发缄使家僮读之有庙堂遗国书令图全者全大怒全往青州五月攻东平不克引兵攻恩州义斌出兵与战全败义斌以千五百骑追之获马二千匹庆福往杀又败全退保山固抽山阳忠义以北遣人求晞稷书与义斌连和义斌纳全降兵兵势大振进攻真定降金将武山众至数十万致书沿江制置使赵善湘曰不诛逆全恢复不成但能遣兵扼淮进据涟海以蹙之断其南路如此贼必成禽贼平之后收复一京三府然后义斌战河北盱眙诸将襄阳骑士战河南神州可复也全贻书制置司诬义斌叛晞稷缴达之未几义斌与元兵战于内黄之五马山兵溃遂死之立下王义深等复归全二年元兵攻青州全大小百战终不刊婴城自守元筑长围夜布狗砮全粮援绝绝与兄福谋福曰二人俱死无益也我当死守孤城汝间道南归提兵赴援可寻生路全曰敌未易支不如兄所于是全止而福行朝廷闻全被围稍欲图之以晞稷畏懦谋易帅刘瑄久在盱眙雅意建阩使镇江副都统彭

■ 〈卜 乇〉 延誉京师自谓讨贼有余力朝廷信之九

月以瑄知楚州兼淮东制置使■ 〈卜 乇〉 代知盱眙晞稷改知袁州瑄至楚州人知不

能制驭四总管惟以镇江兵自随夏全请从瑋素畏全
狡亦卒留盱眙■〈卜 毛〉自揣资浅尤惮夏全乃激夏全曰刘制使图贼收功在旦夕
太尉曷不往赴事会何端坐为夏全欣然领兵径入楚
城瑋势不能却复就谋焉时传全已死福欲分兵赴援以兵少不往甲子瑋令夏全盛陈
兵楚城贼党震恐三年二月全妻杨氏使人行成于夏
全曰将军非山东归附耶狐死兔泣李氏灭夏氏宁独存愿将军垂盼全诺杨氏盛饰出
迎与按行营垒曰人传三哥死吾一妇人安能自立便
当事太尉为夫子女玉帛干戈仓廩皆太尉有望即领此夏全心动乃置酒欢甚饮酣就
寝如归转仇为好更与福谋逐瑋矣全令贼党围州治
焚官民舍杀守藏吏取货物时瑋精兵尚万余窘束不能发一令太息而已夜半缒城仅
以身免镇江军与贼战死者大半将校多死器甲钱粟
悉为贼有全既逐瑋暮归杨氏拒之意杨氏反目图己明日大掠趋盱眙张惠范成进出
兵欲剿之全狼狈降金报至中外大恐刘瑋自劾未几
死三月以姚翀尝与李全交欢命翀为军器少监知楚州兼淮东制置使翀至城东舣舟
以治事间入城见杨氏用晞稷故事而礼过之杨许翀
入城乃入寄治僧寺极意娱之时全在围一年食牛马及人且尽欲北归惧众异议乃焚
香南向再拜欲自经而使郑衍德田四救之乃约降元
元兵入青州承制授全山东行省庆福在山阳自知己为广阶怀不自安欲图李福以自
赎福知之亦谋去庆福福伪病旬余庆福往候之福乃
跃起拔刀伤庆福庆福走左右羣起杀之福以庆福头纳翀翀大喜时楚州自瑋败储积
扫地纲运不续贼党籍籍福乘众怒与杨氏谋召翀饮
翀至杨氏不出福兵欲害翀郑衍德救之得免去须鬢缒城西夜走徒步归明州未几死
朝廷以淮乱相仍遣师必毙始欲轻淮而重江楚州不
复建阍就以帅杨绍云兼制置改楚州为淮安军命通判张国明权守视之若羈縻州然
贼党以钱粮不继屡有怨言贼将国安用阎通及张林
刑德王义深相谓曰朝廷不降钱粮为有反者未除耳乃共议杀福及杨氏以献于是帅
兵趋杨氏家福出德手刃之相屠者数百人有郭统制
者杀全次子通及全妾钱氏妾以为杨氏函其首并福首驰献于绍云绍云驿送京师倾
朝甚喜檄彭■〈卜 毛〉张惠范成进时青并兵往楚
州便宜尽戮余赏■〈卜 毛〉轻儇每供四总管弄戏得檄不敢自决请制府及朝廷处
之庙议谓青望重惟听青区画青恐祸及密遣人报全
于青州惠成进以朝檄不及己乃归盱眙密约降金设宴邀■〈卜 毛〉乘其醉缚之渡
淮【按按通鉴辑览 御批彭■〈卜 毛〉轻儇
无决坐失事机其过固不待言若时青不过红袄贼魁降金复叛归宋始终一进退无据

之人耳有何重望而朝议忽而檄■〈卜 毛〉忽而檄
青致使诸将离心酿成事故青之畏首畏尾密报李全迁延不出适以自杀其躯无足深
责而宋之君臣瞽昧无知欲弭乱而转以速乱果何所
见而成此大错耶】以盱眙附卢鼓棹于泗州金官惠有如俾专制河南以拒元全得青
报恸哭力告元将求南归许之授全山东淮南行省得
专制山东十月全与元张宣差并通事数人至楚州义深走金安用杀林德自赎全邀青
及张国明于淮阴国明辞疾青父子同至全诱杀青遂
并其军绍定元年春全厚募人为兵宋军多亡走就募全知东南利舟师谋习水战大治
舩■〈舟达〉船自淮及海相望七月全及杨氏大阅
战舰于海洋八月越青州为严实及石小哥邀击败走九月全归海州治舟益急全外恭
顺于宋以就钱粮往往贸货输元宋得少宽北顾之忧
馈饷不辍二年四月全以粮少为词遣海舟自苏州洋入平江嘉兴告余实欲习海道觐
几甸也全密遣军掠高邮宝应天长之间知高邮军叶
秀发遣宗雄武领民兵捍御为贼所败三年全欲销宋兵备使军士穆椿潜入京城焚御
前军器库于是先朝兵甲尽丧全欲先据扬州以渡江
分兵徇通泰以趋海诸将皆曰通泰盐场在焉莫若先取为家计且使朝廷失盐利全欲
朝廷不为备且虽反而难遽绝其粮乃挟元李宋二宣
差恫疑卢喝使国明达诸朝而元实未尝资全兵其李宣差则青州卖药人也朝廷姑事
苟安亦不之诘会全余麦舟过盐城知扬州翟朝宗嗾
尉兵夺之全怒以捕盗为名水陆数万径捣盐城戍将陈益楼强知县陈遇皆遁全入城
据之朝宗仓皇遣干官王节入盐城恳全退师全不许
留郑祥芋友守盐城自提兵往楚以状白于朝称遣兵捕盗过盐城令自弃城遁去虑军
民惊扰入城安众乃加全两镇节令释兵命制置司干
官耶律均往论之全不受朝廷为罢朝宗命通判扬州赵璈夫暂摄事全造舟益急招沿
海亡命为水手又给璈夫以元为词邀增五千人钱粮
求誓书铁券朝廷犹遣饷不绝全得米即自转输淮海入盐以贍其众他军士见者皆怨
曰朝廷惟恐贼不饱我曹何力杀贼全又遣人以金牌
诱胁周安民等造浮梁于喻口以便盐城来往又开马■〈木罢〉港寿河引淮船入湖
为攻挠水砦计时弥远多在告执政无可否独参知政
事郑清之深忧之密与枢密袁韶尚书范楷议二人所见合清之乃约韶见帝力赞讨之
赵范赵葵亦请进兵乃以赵善湘为焕章阁学士江淮
制置大使范直徽猷阁知扬州淮东安抚副使葵直宝章阁淮东提点刑狱兼知滁州俱
节制军马全子才军器监簿制置司参议官下诏讨全
促荆襄淮西诸军赴援全兵突至湾头副都统丁胜拒之全攻城南门都统赵胜自保砦

提劲努赴大城注射全稍退全遣刘全奄至侏砦西城
下欲夺之以瞰大城先是赵胜屯西城见濠浅盛暑中督军浚濠决新塘水注之及是刘
全不能进胜又浚市河全至胜开水门纳贾舟十余艘
活者数千人是日璪夫得弥远书许增万五千人粮劝全归楚州亟遣刘易即全垒示之
全笑曰丞相劝我归丁都统与我战非相给耶掷书不
受璪夫恐亟发牌印迓范全攻泰州知州宋济迎降全入坐郡治尽收子女货币全闻范
葵既入遂配兵守泰而悉众攻扬州自是屡战全兵多
败襄兵万人至真州上坝统制张达监军张大连不设备为田四所败达大连死之全凶
焰益振余玠等距淮安十里焚全砦栅全将刘全出战
玠军不利退屯宝应全志吞三城而兵每不得傅城下或言城中素无薪且储蓄支借殆
尽若筑长围三城自困全乃一意长围以持久困官军
不复薄城范葵等出兵屡击之不退四年正月范葵挥步骑来浮桥吊桥并出为三迭陈
以待自己至未与贼大战别遣李虎等以马步五百出
贼背而葵帅轻兵横冲之三道夹击贼败走全既败始大悔忽忽不乐时正月望城中放
灯张乐姑示整暇全见之亦往海陵载妓女张灯平山
堂矫情自肆范葵夜议诘朝所向葵曰东向利范曰西出尝不利贼必见易因其所易而
图之必胜不如出堡塞西门壬寅全置酒高会有堡塞
候卒识其枪垂双拂为号以报范喜谓葵曰此贼勇而轻若果出必成擒矣乃悉精锐数
千而西取官军素为贼所易者张其旗帜全望见喜谓
元宣差曰看我扫南军范麾军并进葵亲搏战诸军争奋贼始疑非前日军欲走入土城
李虎军已塞其瓮门全窘从数十骑北走葵率诸将以
制勇宁淮军蹙之贼走新塘新塘自决水后淖深数尺会久晴浮战尘如燥壤全骑陷淖
不能拔制勇军奋长枪三十余乱刺之全曰无杀我我
乃项目先是令军士获头自无得争以为献故羣卒碎其尸分其鞍马器甲并杀三十余
人贼赏周海请降报全已杀余当议溃去国安用议推
一人为首莫肯相下欲还淮安奉杨氏主之范夜上捷书制置司议追贼明日安用引五
百骑径南门趋湾头范伏弩射之呼之降不应诸将欲
追范惧有伏分兵烧围城楼櫓命东南诸门皆出兵范葵继提精兵进四鼓贼大溃葵追
及贼于湾头又破之俘斩及夺回粮畜蔽野别将追至
大仪不及扬州平善湘以露布上帝惊喜朝中皆拟随表入贺弥远以小宝就平谢止之
二月命胡颖部所获贼酋二十人献俘于朝定功行赏
复命赵范赵葵帅步骑十万攻盐城别遣全子才率王晏等将万五千人全玠角范
葵遣诸军薄淮安城下贼大败死者万余子才自他道
进攻败贼将董友舟师达淮安五月朔天大雾官兵攻上城贼守者尚卧仓皇起鬪官军

毕登自丑至未五城俱破斩首数千级生擒数百人烧
砦栅万余家淮北贼归援舟师又剿击焚其水栅夷五城余址子才率赵必胜王旻军移
砦西门道遇贼大战至夜不解子才为锐阵左右救乃
破之翼日杨氏绝淮而去贼赏即遣冯垺等送款军门范等密闻于朝朝论不可范曰若
明谕朝旨是坚贼志不如阳许以误之我自为必讨之
计乃遣范用吉八城谕贼曰朝廷已许纳降但令安抚交过北军郑衍德等自知降亦不
免始送款于金淮阴遂为金有六月大战于河西三砦
贼大败复大战破之遂复淮安杨氏窜归山东又数年而后毙全之寇泰州官属十有九
人皆迎降独教授高梦月不污诏赠三官

钦定续通志卷六百二十四

●钦定续通志卷六百二十五 叛臣传六

叛臣传

金

○金

张觉【仅言】 耶律伊都 伊喇斡罕 国用安 时青

张觉【张仅言】

耶律伊都

伊喇斡罕

国用安

时青

△张觉【张仅言】

张觉亦作毅平州义丰人辽进士仕至辽兴军节度副使太祖定燕京时立爱以平
州降改南京以觉为留守既而闻觉有异志遣刘彦宗
及萨布谕之太祖每收城邑徙民实京师民心多怨及以燕京与宋而迁其人道出平州
觉因之以作乱天辅七年五月杀左企弓虞仲文曹勇
义康公弼等遂据南京叛纳款于宋觉兵五万屯润州近郊欲胁迁来润隰四州栋摩自
锦州往讨之再败觉兵复战于兔耳山栋摩大败觉报
捷于宋宋建平州为泰宁军以觉为节度使宗望军至南京城东觉兵大败奔宋入燕京
宗望以纳叛责宋索张觉宣抚王安中匿之于甲仗库
给曰无之宗望索愈急安中乃斩貌类觉者一人当之金人议之曰非觉也安中不得已
引觉出数以罪觉骂宋人不容口遂杀觉函其首以献
子仅言在襁褓里人刘承宣得之养于家其邻韩夫人甚爱之年数岁随见贞懿皇后留
之藩邸稍长侍世宗读书使主家事绳检部曲一府惮
之世宗即位除内藏库副使谨言能心计世宗倚任之尝曰一经仅言无不惬朕意者迁

少府监护作太宁宫引宫左流泉溉田岁获稻万斛迁
劝农使仅言虽旧臣出入左右然世宗终不假以权任尚书省奏克苑司直长黎伦在职
十六年请与迁叙帝曰此朕之家臣质直人也今已老
矣如劝农使张仅言亦朕旧臣纯实颇解事凡朝廷议论内外除授未尝得干预朕观自
古人君为谗谄蒙蔽者多矣朕虽不及古人然近习儉
言未尝入耳宰臣曰此国家之福也仅言得疾犹扶杖视事及卒帝深惜之赠辅国上将
军

△耶律伊都

耶律伊都辽宗室子初太祖起兵辽人来拒伊都请自效以功累迁金吾卫大将军
为东路都统天辅元年与耶律玛格军于浑河尼楚赫
希尹拒之伊都等不敢战遁去二年龙化州人张应古等来降伊都复取之四年 【按金
史本纪天辅四年上自将伐辽至上京留守托卜嘉
以城降诏论辽副统伊都降五年伊都诣咸州降又考辽史天庆十年金攻上京留守托
卜嘉率众降保大元年伊都叛入金本传统叙于天辅
二年之下今据增】 太祖已取临潢府赐诏伊都曰汝前后战未尝不败今闻收合散亡
以拒我师朕已克上京今将往取辽主矣汝若治兵决
胜负可指地期日相报五年伊都以所部来降帝抚慰之遂赐坐班同宰相自伊都降益
知辽虚实都统杲取中京伊都为乡导与希尹等招抚
奚部奉圣州降辽太常少卿久之耶律玛占告伊都乌舍道拉结赏谋叛 【按太祖纪告
耶律玛占伊都等谋叛者为都统杲与此叙玛占事
顺逆迥异未知孰误】 帝召伊都谓曰今闻汝谋叛诚然邪其各无隐若果去必须鞍马
甲冑器械之属当悉付汝吾不食言若再被擒无祈免
死欲留事我则无怀异志吾不汝疑伊都等战栗不能对乃杖道拉七十余皆不问天会
三年大举伐宋伊都为元帅右都监宋兵四万救太原
与沃哩赫逆击于汾河北擒其帅郝仲连张关索统制马忠杀万余人宗翰伐宋伊都留
西京十年谋反亡去边部斩伊都及其诸子函其首以
献

△伊喇斡罕

伊喇斡罕西北路契丹部族先从萨巴为乱萨巴者初为招讨司译史海陵伐宋使
牌印素赫杨格尽征西北路丁壮契丹人曰西北路接
近邻国世世征伐为讎若男丁尽从军彼兵来老弱必尽系累矣幸使者言之素赫畏罪
不敢言杨格惧后有事得罪忧死素赫督起兵于是萨
巴杀招讨使乌色及素赫而反山后山前诸羣牧皆应之迪斡羣牧使图克坦赛哩伊啰
斡羣牧使鹤寿等皆遇害咸平府穆昆瓜里自山后逃

归少尹完颜额哩页欲收捕其家属瓜里与其赏招诱富家奴隶得众二千遂攻陷韩州及柳河县据咸平自济州趋京至长安县闻空中击鼓声如数千鼓者又见旌旗蔽野时世宗为东京留守以兵四百人拒之传言以十万兵至即引还合于萨巴海陵使枢密使布萨呼图西京留守萧怀忠将兵与右卫将军萧图喇讨之连战皆无功粮饷不继图喇退归临潢萨巴度大军继至谋归达车乃率众沿龙驹河西出布萨呼图等坐逗遛不即追贼皆诛死萨巴既西行而旧居山前者皆不欲往斡罕遂与辰嘉杀萨巴自为都元帅拥众东还至临潢府新罗寨世宗使伊喇扎巴等招之斡罕已约降把巴见斡罕兵众强车帐满野因反说曰我之始来以汝辈不能有为今观兵势强盛如此若果有大志吾亦不复还矣贼将绰哈言昔古绅丞相尝说他日西北部族当有事今正合此语恐不可降也斡罕意遂决扎巴亦留乃引兵攻临潢府众至五万正隆六年十二月己亥遂称帝改元天正是时世宗即位使元帅左都监乌哲库同知北京留守事完颜果济救临潢昼夜兼行比至贼已解围去攻泰州押军明安乌克逊阿里布力战击贼贼乃退走城赖以完大定二年正月右副元帅完颜默音率诸军北征斡罕自泰州往攻济州钦邀粮运默音与右监军完颜福寿左都监乌哲库合兵图克坦克宁等为左翼赫舍哩志宁等为右翼至珠格崖尽委辎重赍数日粮轻骑袭之契丹吉勒扎来降知贼辎重相去仅八十里用其计乘夜亟发迟明与贼近整兵少憩斡罕知之即还救遇于长泆贼骑突出左翼间图克坦克宁设伏射却之万户襄别与贼战贼阵动麾军乘之突出其后贼不能支遂却襄与大军合整阵力战忽反风扬砂石贼阵乱官军驰击大破之斡罕率众西走追及于霭■〈雨上松下〉河贼已济毁其津口赫舍哩志宁军先至不克渡乃对岸为疑兵于下流渡河值支港两岸斗绝且泞淖命军士束柳填港而过贼众奄至志宁整阵力战流矢中左臂大军毕至贼据上风纵火乘烟击官军官军并力合战会天降雨风止奋击大败之图克坦克宁追奔十五里渡溪涧贼反旆来攻大军至贼遂引去默音不复追讨驻军白泆斡罕攻懿州不克遂残破川州将遯于山西诏发骁骑等军四万元帅左都监高忠建总兵乌库哩芬彻乌凌阿萨喇宗宁等皆为万户宗亨为北京路都统完颜连吉为副统会元帅府讨击之以赫舍哩志宁为元帅右监军尚书右丞布萨忠义愿效死力除边患拜平章政事兼右副元帅宗叙为兵部尚书宗尹为河南路统军使富察世杰为西北路副统从忠义征行罢默音为同判大宗正事又以完颜思敬为都统将兵五千会燕子城时斡罕西走和托众尚八万忠义高忠建

军与贼遇万户扎拉芬彻为左翼宗亨统之宗宁萨喇为右翼宗叙统之夹河为阵贼渡河以兵四万余先犯左翼军扎拉奋击败之以四万众与右翼军战宗亨世杰指画失宜阵乱宗叙以右翼军来救贼乃去忠义志宁以大军追及于诺尔岭西陷泉先据南冈左翼军自冈为阵迤邐而北步军继之右翼军继步军北引而东作偃月阵步军居中骑兵据其两端使贼不见首尾贼击右翼军乌雅扎拉力战贼稍却志宁与瓜尔佳清臣乌凌阿萨喇道拉合战贼大败大军逐北人马相蹂践死陷泉皆平俘斩万计生擒其弟大王诺尔斡罕仅与数骑脱去复收合散卒遂入奚部时时出寇苏勒库淀古北口兴化之间诏完颜默音富察乌哩页富察富埒瑋御之完颜思敬以所部兵会讨高忠建破奚于栲栳山及招降旁近六营【按诸将平斡功俱见本传独高忠建未载兹据本纪补】时贼将降者甚众余多疫死无复鬪志斡罕势穷谋自羊城道西奔夏国追益急众多亡去乃北走沙陀志宁获贼朔和卓释弗杀纵还贼中与锡勒塔千执斡罕诣思敬降并获其母苏尼及其妻子追余党悉获之献俘京师斡罕梟首于市磔手足分悬诸京府其母及妻子皆戮瓜里扎巴率众南走宗亨追及之扎巴诈称降宗亨信其言不与戢扎巴给曰瓜里惊走愿追之纵去遂奔于宋后宋李世辅用之颇为边忠

△国用安

国用安先名安用本名鼈儿淄州人红袄贼党也归元为都元帅天兴元年徐州埽兵总领王佑义胜军都统丰绅总领张兴作乱安用率兵入徐斩张兴以丰绅主徐州既而徐邳海三州皆归安用元将何勒楚尔闻之大怒遣张进等率兵入徐欲图安用安用惧劫杀张进乃会山东诸将及徐宿邳主帅刑马结盟誓归金既盟诸将皆散去安用遂同王德全刘安国托从宜众僧努自通于朝廷众僧努奏安用以数州反正功甚大且其兵强盛国家果欲倚用非极品重权不足以坚其心未报安用率兵攻海州未至众稍散去安国因劝赤心归国而安用亦自知反复失计于是复金朝衣冠未几朝廷遣近侍局直长因世英都事高天佑持诏至邳以安用平章政事兼都元帅京东山东等路行尚书省事封兖王锡姓完颜改名用安用安始闻使者至犹豫未决出见使者跪揖如等夷坐定语曰子向随元兵攻汴尝于开阳门下与侯摯议内外夹击朝廷无一人敢决者若从吾计出军中兴久矣今日悔将何及言竟而起既而选人取锡物遍观之喜见颜色设宴拜授如朝仪遣主事常谨奉表入谢帝复遣世英天佑赐以铁券虎符龙文衣玉鱼带弓矢封赠其父母妻诰命及郡王宣世袭宣信牌玉兔鹞带各十听同盟可赐者赐之

用安迎受始有入援意闻帝将迁蔡州遣人以蜡书言六不可莫如权幸山东山东富庶甲天下东连沂海西接徐邳南扼盱楚北控淄齐若釜
輿少停臣仰赖威灵河朔可传檄而定帝以示宰臣奏用安反复本无匡辅志议遂寝初世英等过徐王德全刘安国说留郡王宣世袭宣玉带
各二由是与用安有隙又惧为所图皆不听其节制用安必欲取山东累征徐宿兵不应
用安怒令杜政丰绅以取粮为名袭徐宿德全觉之就
留不遣会诏征兵东方故用安假朝命声言入援檄刘安国为前锋亲率兵驻徐州城下招德全德全终不出安国既至宿州用安复召还安国
不从独与众僧泐赴援用安使人劫杀之遂攻徐州不下退归涟水因世英以用安终不赴援乃还朝至宿州遇元兵不屈而死事闻赠汝州防
御使既而用安军乏食乞粮于宋宋阳许之即改从宋衣元东平万户扎拉至涟水遂降复叛归宋元兵围沛用安往救之败走徐州会移兵攻
徐用安投水死

△时青

时青滕阳人与叔父全俱为红袄贼承赦来降兴定初青为济州义军万户全为行枢密院经历二年全驰驿过东平青来见告将叛入宋
全秘之宋人置之淮南屯龟山有众数万四年泗州行元帅府赫舍哩约赫德遣人招之青以书来乞赦罪假邳州屯兵当袭取盱眙尽定淮南
以赎昔过约赫德为奏其事诏封滕阳公本处兵马总领元帅兼宣抚使青潜表陈谢复请邳州不得仍为宋守五年青夜袭破泗州西域提控
王禄遇害是时时全为同签枢密院事朝廷不知止称宋人诏全往督兵取之全至获红袄贼诘问知青所为遂杀其人以灭口约赫德昼夜力
战提控鄂尔多斯设伏掩击青兵大败流矢中其目夜拔众走遂复西城元光元年全与元帅左监军额尔克伐宋由颍寿渡淮败宋人于高塘市
攻固始县破宋庐州将焦思忠兵时青受宋诏与相拒全匿其事兵还距淮二十里诸军将渡全矫称密诏留收淮南麦众惑之额尔克谓全曰
今淮水浅狭可以速济若暑雨暴涨宋乘其后不得归矣全力拒之夜大雨明日淮水暴涨乃为桥渡军宋兵袭之桥坏全以轻舟先济士卒皆
覆没宣宗乃下诏诛之

钦定续通志卷六百二十五

●钦定续通志卷六百二十六 叛臣传七

叛臣传

元

○元

李璿 天文统 阿勒呼木特穆尔

李璿

王文统

阿勒呼木特穆尔

△李璿

李璿小字松寿潍州人李全子也或曰璿本衢州徐氏子父尝为扬州司理参军全养之为子完颜十六年全叛宋举山东州郡附元太师
国王博啰承制拜全山东淮南楚州行省而以其兄福为副元帅太宗三年全攻宋扬州败死璿袭益都行省得专制其地朝廷数征兵辄诡辞
不至宪宗七年调其兵赴行在璿亲诣帝言益都乃宋航海要津分军非便帝然之命归取涟海数州璿遂发兵攻拔涟水相连四城大张克捷
之功世祖即位加江淮大都督璿言近获生口知宋调兵将攻涟水且谍见许浦射阳湖舟舰相望势欲出胶西向益都请缮城堑为备诏出金符十银符五授之赏将士凡蒙古汉军之在边者咸听制制璿复扬言宋吕文德合淮南兵七万五千来攻涟水且规筑堡以临我及得贾似道
吕文德书辞甚悖傲知朝廷近有内顾之忧必将肆志于我乞选将益兵臣当帅先渡淮以雪慢书之辱执政得奏论以朝廷方通和议边将惟当
固守封圉且南人用间其诈非一彼既不至毋或妄动璿因上将校冯泰等功状诏出益都官银分赏之中统二年正月璿言于行省谓宋人聚
兵粮数十万列舰万三千艘于许浦以侵内郡而宣抚司转输不继恐一日水陵道绝缓急莫报请选精骑倍道来援表里协攻乘机深入江淮
可图也既而来献涟水捷诏复加奖谕仍给金符十七银符二十九增赐将士璿辄发兵修益都城堑且报宋人来攻涟水诏遣阿实克布哈等
悉兵赴援璿遂请节制诸道所集兵马且请益军器诏给矢十万三年四月又以贾似道诱总管张元进等书来上 【按李璿获书事元世祖
纪作三年正月与此异】 盖璿专制山东者三十余年前后所奏数十事皆恫疑虚喝挟敌国以要朝廷而自为完缮益兵计初遣其子彦简内
质用私驿逃归璿遂反以涟海三城献宋歼蒙古戍兵引麾下具舟舰攻益都入之发府库以犒其党寻寇蒲台民间璿反皆入保城郭或奔窜
山谷自益都至临淄数百里寂无人声下诏暴其罪命诸军讨之璿盗据济南复命史枢阿珠帅师前往璿帅众出掠輜重将及城官军邀击大
败之璿退保济南五月筑环城围之璿自是不得出犹日夜拒守取城中子女赏将士以悦其心且分军就食民家尽发其盖藏不足则家予之
盐令杀人为食于是人情溃散各什伯相结缢城出降璿知城且破乃手刃爱妾乘舟入

大明湖自投水中水浅不得死为官军所获缚至诸王
哈必齐帐前丞相史天泽请速诛之以安反侧遂与蒙古军官囊嘉特并诛焉

△王文统

王文统字以道益都人少时读权谋书好以大言撼人遍千诸侯无所遇乃往见李
璿璿与语大悦留置幕府命其子彦简师事之文统即
以女妻璿由是军旅之事咸与谄快岁上边功虚张敌势以固其位用官物树私恩取宋
涟海二郡皆文统谋也世祖即位有荐其才智者亟召
用之命为平章政事委以更张庶务建元为中统立十路宣抚司示以条格欲差发办而
民不扰盐课不失常额交钞无致阻滞更造中统元宝
交钞立互市于颍州涟水光化军 【按大方通鉴云文统初造通行交钞以丝为本以革
诸路行用钞法之弊其法以银五十两易丝钞千两
继造中统通行元宝每一贯同交钞一两两贯同白银一两未及行而罢本传未载谨附
识】 明年二月世祖在开平召行中书省事玛穆特与
文统亲率各路宣抚使赴阙世祖自去秋亲征叛正额埒布格于北方凡民闲差发宣课
盐铁等事一委文统裁处及振旅还宫未知可否改召
文统等至责以成效复颁所议条格于各路申严私盐酒醋麪货等禁信任倍专文统为
人忌刻初立中书省张文谦为左丞文谦素以安国利
民自负凡议论建白辄相可否文统积不能平思有以陷之文谦竟以本职行大名宣抚
事去姚枢窦默许衡皆世祖所敬信者文统讽世祖授
三人为太子师傅官外佯尊之实不欲使朝夕备顾问也默尝与王鶚及枢衡同侍世祖
面诋文统曰此人学术不正必祸天下不可处以相位
世祖曰若是则谁可为者默以许衡对世祖不怩而罢文统内不自安潜蓄异谋及李璿
反人言文统尝遣子堯与璿通音耗世祖召问曰汝教
璿为逆积有岁年举朝皆知之朕今问汝所谋云何文统曰容臣悉书以上书毕命读之
有曰蝼蚁之命苟获存全保为陛下取江南世祖曰汝
今日犹欲缓颊于朕耶会得文统与璿书帝示之始错愕骇汗命左右斥出就缚立召窦
默姚枢王鶚僧子聪及张柔等至示以前书曰汝等谓
文统当得何罪文臣皆言人臣无将将则必诛柔独疾声大言曰宜剐世祖曰汝等同辞
言之诸臣皆曰当死世祖曰渠亦自服朕前矣文统乃
伏诛子堯并就戮文统虽以反诛而元之立国规模法度世谓多出其手云

△阿勒呼木特穆尔

阿勒呼木特穆尔太宗八世孙也袭封阳翟王顺帝初立阿勒呼木特穆尔进曰天
下事重宜委宰相决之庶可责其成功若躬自听断必
负恶名帝信其言由是深居宫中每事无所与至正二十年 【自阳翟王至此一段据顺

帝本纪增谨识】 汝颍盗猖獗天下震动帝屡诏宗

王以北方兵南讨阿勒呼木特穆尔乘间拥众数万屯穆尔古珠之地胁宗王以叛将犯京畿遣使来言于帝曰祖宗以天下付汝汝何故失其

大半盍以国玺授我我当自为之帝曰天命有在汝欲为则为之降诏开谕俾其悔罪不听乃命知枢密院事图沁特穆尔等讨之行至清海起

哈喇齐万人为军其人素不习战既阵兵未交皆解甲奔敌中图沁特穆尔军败单骑还上都明年更命少保知枢密院事娄章以兵十万击之

且命阿勒呼木特穆尔之弟呼图克特穆尔从征大败其众阿勒呼木特穆尔谋东遁为部将托欢所擒送阙下帝命诛之仍以呼图克特穆尔

袭封阳翟王加娄章和宁王岭北行省丞相俾镇北藩

钦定续通志卷六百二十六

●钦定续通志卷六百二十七 逆臣传一

逆臣传

唐 【一】

○唐一

（臣）等谨案逆臣分类亦仿自新唐书宋辽金元各史因之考郑志列传如莽卓辈皆列诸臣之末盖依史书旧文然梟鸾并战终觉混淆此等覆载不容之人允宜别而出之以着斧钺綦严之义今并以类为次五代史无逆臣传兹详考事实并为补编焉

安禄山【高尚 孙孝哲】

史思明

安禄山

史思明

△安禄山

安禄山山营州柳城人也本姓康【旧书云本无姓氏】母阿史德为覲居突厥中祷于于轧犂山突厥所谓鬪战神者既而妊及生有

光照穹庐野兽尽鸣望气者言其祥范阳节度使张仁愿遣搜庐帐欲尽杀之匿而免母以神所命遂字轧犂山少孤随母嫁突厥将安延偃因

冒其姓开元初延偃携其归国与将军安道买亡子偕来故道买子安节【旧书作安贞节】厚德延偃约两家子为兄弟乃更名禄山及长

忤忍多智善测人情通六蕃语与史思明俱为捉生尝以五骑擒契丹数十人幽州节度使张守珪异之拔为偏将讨奚契丹叛者轻进而败守

珪奏斩之禄山临刑呼曰公不欲灭两蕃邪何杀我守珪惜其勇执送京师张九龄奏禄山面有反相请因罪诛之帝曰卿勿以王夷识石勒枉

害忠良竟赦之【按新旧书并载禄山以通蕃语为互市郎盗羊事发守珪欲诛之通鉴

胡三省注历引玄宗实录张九龄传及九龄集力辨

其误今据改正】后以平卢兵马使擢特进幽州节度副使于是御史中丞张利贞采访河北禄山百计谀媚贿结左右利贞入朝盛言禄山能

乃授营州都督平卢军使顺化州刺史押两蕃渤海黑水四府经略使【按通鉴禄山兼四府经略在开元二十九年原传作天宝元年事今

改】使者往来皆中以赂交口荐誉玄宗始才之天宝元年分平庐为节度以禄山为之使兼柳城太守明年入朝奏对称旨进骠骑大将军三

载代裴宽为范阳节度河北采访使乃领平卢军禄山北还诏中书门下尚书三省正员长官御史中丞钱鸿胪亭四载奚契丹杀公主以叛禄

山幸邀功肆侵掠于是两蕃贰禄山起军击契丹还奏梦李靖李绩求食于臣遂命立庙又奏庙梁产芝其诡诞如此时宰相李林甫嫌儒臣以

战功进尊宠闲已乃请颺用蕃将故帝宠禄山益牢羣议不能轧杨贵妃有宠禄山请为妃养儿帝许之其拜必先妃后帝帝怪之答曰蕃人先

母后父帝大悦命与杨钁及三夫人约为兄弟繇是禄山有乱天下意令麾下刘骆谷居京师伺朝廷隙六载进御史大夫封妻段为夫人晚益

肥腹缓及膝奋两肩若挽牵者乃能行作胡旋舞帝前乃疾如风帝视其腹曰胡腹中何有而大答曰唯赤心耳帝为起第京师以中人督役备

极华侈时太平久人忘战帝春秋高嬖艳钳固李林甫杨国忠更持权纲纪大乱禄山计天下可取逆谋日炽每遇朝堂龙尾道南北睥睨久乃

去更筑垒范阳北号雄武城峙兵积谷养同罗奚契丹降者八千人为假子教家奴善弓矢者数百畜单于护真大马三万牛羊五万引张通儒

李廷坚平泐李史鱼独孤问俗署幕府以高尚典书记严庄掌簿最阿史那承庆安太清安守忠李归仁孙孝哲蔡希德牛廷玠向润客高邈李

钦凑李立节崔干佑尹子奇何千年武令珣能元皓田承嗣田干真皆拔行伍署大将潜遣贾胡行诸道岁输财百万阴令羣贾市绵彩朱紫服

数万为叛资月进牛橐驼鹰狗奇禽异物以蛊帝心自以无功而贵见天子盛开边乃给契丹诸酋大置酒醉而杀之先后数千人献馘阙下帝

不知赐铁券封柳城郡公又赠延偃范阳大都督进禄山东平郡王九载兼河北道采访处置使赐永宁园为邸入朝诏上谷郡置五炉许铸钱

又求兼河东遂拜云中太守河东节度使既兼制三道意益侈男子凡十一帝以庆宗为太仆卿庆绪鸿胪卿庆长秘书监十载【按元宗本

纪禄山败于契丹系天宝十载事原传为十一载今改】率河东兵六万讨契丹以奚兵二千为乡逆至土护真河禄山计曰道虽远我疾趋贼

乘其不备破之固矣乃敕人持一绳欲尽缚契丹昼夜行三百里次天门岭会雨甚弓弩

皆弛不可用禄山督战急大将何思德曰士方疲宜少
息禄山怒欲斩之乃请战思德貌类禄山及战契丹从矛注矢邀取之传言禄山获犬奚
闻亦叛夹攻禄山士略尽禄山中流矢引奚儿数十弃
众夜走平卢部将史定方以兵鏖战乃解围去十一载禄山忿前败乃悉兵号二十万讨
契丹以报帝闻诏朔方节度使阿布思以师会阿布思
者九姓首领也伟貌多权略开元初为默啜所困内属帝宠之禄山忌其才不相下欲袭
取之故表请自助阿布思惧而叛转入漠北禄山不进
辄班师会阿布思为回纥所掠奔葛逻禄禄山厚募其部落降之葛逻禄惧执阿布思送
北廷献之京师禄山已得阿布思众则兵雄天下愈偃
肆皇太子及宰相屡言禄山反帝不信是时国忠疑隙已深建言追还朝以验厥状禄山
揣得其谋乃驰入谒帝意遂安凡国忠所陈无入者十
三载来谒华清宫对帝泣曰臣蕃人不识文字陛下擢以不次国忠必欲杀臣以甘心帝
慰解之拜尚书左仆射赐实封千户奴婢第产称是诏
还镇又请为闲厩陇右羣牧等使表吉温自副其军中有功位将军者五百人中郎将二
千人禄山之还帝御望春亭以饒斥御服赐之禄山惊
喜惧国忠奏留 【据通鉴改辑】 疾驱出关至淇门轻舳循流而下令挽夫十五里一
更昼夜兼行日三百里既总闲牧因择良马纳范阳又
夺张文俨马牧反状明白人告言者帝必缚与之明年国忠谋授禄山同中书门下平章
事召还朝制未下帝使中官辅璆琳赐大柑因察非常
禄山厚赂之还言无宅帝遂不召然禄山亦惧朝廷图已每使者至称疾不出严卫然后
见黜陟使裴士淹行部至范阳再旬始见无复臣礼士
淹还不敢言帝赐庆宗娶宗室女子诏禄山观礼辞疾甚献马三千匹执控夫倍之车三
百乘乘三士因欲袭京师河南尹达奚珣疑有变极请
毋纳帝始疑之诏如珣策冬十一月诡言奏密诏讨杨国忠腾榜郡县以高尚严庄为谋
主孙孝哲高邈张通儒通晤为腹心发所部及同罗奚
契丹室韦氏凡十五万号二十万反于范阳先三日命大将置酒观绘图起燕至洛山川
险易攻守悉具人人赐金帛并授图约曰违者斩禄山
从牙门部曲百余骑次城北祭先冢而行使贾循主留务吕知诲守平卢高秀岩守大同
下令有沮军者夷三族凡七日反书闻帝方在华清宫
中外失色车驾还京师斩庆宗赐其妻康死荣义郡主亦死下诏切责禄山许自归禄山
答书慢甚遣高邈臧均以射生骑二十匹入太原劫取
尹杨光翊杀之以张献诚守定州禄山谋逆十余年凡降蕃夷皆接以恩不服者胁以兵
禄山通夷语躬自慰抚皆释俘因为战士故其下乐输
死所战无前时兵暴起官发铠仗皆穿朽钝折禁卫多市井徒弗能抗敌吏皆弃城匿或

自杀或开门迎降不则擒戮乃发左藏库缿帛大募兵以封常清为范阳平卢节度使郭子仪为朔方节度关内支度副大使右羽林大将军王承业为太原尹卫尉卿张介然河南节度使金吾将军程千里为潞州长史以荣王为元帅高仙芝副之驰驿讨贼禄山以长绳维舟集草木以结冰一夕合遂济河陷灵昌郡至陈留张介然死之郭纳以城降遂陷荥阳次罍子谷将军荔非守瑜邀之杀数百人流矢及禄山輿乃不敢前更出谷南守瑜矢尽投河死败封常清取东都常清奔陕杀留守李愷御史中丞卢奕河南尹达奚珣臣于贼时高仙芝屯陕闻常清败弃甲保潼关太守窦廷芝奔河东常山太守颜杲卿杀贼将李钦凑擒高邈何千年于是赵郡巨鹿广平清河河间景城六郡皆为国守禄山所有纔卢龙密云渔阳汲邺陈留荥阳陕郡临汝而已贼之据东京见宫阙尊雄锐情僭号故兵久不西而诸道兵得稍集尹子奇屯陈留欲东略会济南太守李随单父尉贾贲濮阳人尚衡东平太守嗣吴王只真源令张巡相继起兵旬日众数万子奇至襄邑而还明年正月僭称雄武皇帝国号燕建元圣武子庆绪王晋庆和王郑达奚珣为左相张通儒为右相严庄为御史大夫署拜百官复攻常山援绝城陷杲卿被害安思义屯真定会李光弼出土门救常山思义降博陵亦拔唯橐城九门二县为贼守史思明李立节蔡希德围饶阳不京引军攻石邑张奉璋固守朔方节度使郭子仪自云中引兵与光弼合败思明于九门城南浑瑊射李立节杀之希德奔巨庆思明奔赵郡自鼓城袭博陵复据之光弼拔赵郡还围博陵军恒阳希德请济师于贼贼以二万骑涉滹沱入博陵牛廷玠发妨檀等兵万人来助思明益强与光弼战败于嘉山光弼收郡十三河南诸郡皆严兵守潼关不开禄山惧欲还范阳召责严庄高尚田干真解之乃遣孙孝哲安神威西攻长安会高仙芝等死哥舒翰守潼关为崔干佑所败帐下执送于贼关门不守帝遂幸蜀贼不谓天子能遽去驻兵潼关十日乃西时行在已至扶风于是汧陇以东皆没于贼禄山以张通儒守京西【旧书作西京留守】田干真为京兆尹使安守忠屯苑中禄山未至长安士人皆逃入山谷宫嫔散匿将相家委宝货不费羣不逞争取之累日不能尽又剽左藏大盈库百司帑藏竭乃火其余禄山至怒乃大索三日民间财货尽掠之旬剥苛急百姓愈骚禄山怨庆宗死乃取帝近属自霍国长公主诸王妃妾子孙媼壻等百余人害之以祭庆宗羣臣从天子者诛灭其宗肆为残虐人益不附诸将欲有咨决皆因严庄以见御下少恩虽腹心雅故皆为仇敌郡县相与杀守将迎官军前后反复十数城邑墟矣肃宗治兵灵武长安相传太子西来辄东走闾

里至空都畿豪杰杀贼吏自归者无虚日贼斩刈惩之不能止又贼将类慄勇无远谋日纵酒嗜声色财利车驾因得入蜀无追蹶之患禄山既叛常恚惧至是目复盲俄又病疽益卞躁左右给侍无罪辄死所信阉人李猪儿及严庄皆遭笞辱故二人深怨禄山初庆绪善骑射未冠为鸿胪节度使僭号嬖段夫人爱其子庆恩欲立之庆绪惧不立庄亦疑难作不利己私语庆绪曰君闻大义灭亲乎自古固有不得已而为者庆绪曰唯唯又语猪儿曰汝数得罪不行大事死无日遂与定谋至德二载正月朔禄山朝羣臣创甚罢是夜庄庆绪持刀扈门猪儿入帐下以大刀斫其腹禄山盲扈佩刃不得振帷柱呼曰是家贼俄而肠溃遂死包以既罽埋床下因传疾甚矫称伪诏传位庆绪伪尊禄山太上皇庆绪既袭伪位改元载初即纵乐饮酒委政于庄而兄事之以张通儒安守忠等屯长安史思明领范阳兼恒阳军牛廷玠屯安阳张志忠戍井陘各募兵于是广平王俶率师东讨李嗣业将前军郭子仪将中军王思礼将后军回纥叶护以兵从通儒等裒兵十万阵长安中贼皆奚人素畏回纥既合惊且器王分精兵与嗣业合击之守忠等大败引而东通儒弃妻子奔陕王收西京思明清宫仆固怀恩以回纥南蛮大食兵前驱王悉师追贼庄自将兵十万与通儒合钲鼓震百余里尹子奇已杀张巡悉众十万来并力营陕西次曲沃先是回纥傍南山设伏按军北崦以待庄大战新店六遇辄北官军逐之入贼垒贼张两翼攻之追兵败汲官军大乱嗣业肉袒奋击官军复振回纥自南山繚击其背贼惊遂乱官军夹攻之杀掠不胜算贼大败追奔五十余里庄奔还与庆绪守忠通儒等劫残军走邳郡王入洛阳大陈兵天津桥伪侍中陈希烈等三百人素服叩头待罪王劳曰公等胁汗非反也天子有诏赦罪皆复而官众大喜于是陈留杀贼将尹子奇以降严庄亦降肃宗引见释其死授司农卿阿史那承庆以其众三万奔恒赵或趋范阳其从庆绪者彘卒纒千余会蔡希德自上党田承嗣自颍川武令珣自南阳各以众来又募兵河北众至六万贼复振以相州为成安府太守为尹改元天和 【按通鉴作改元天成】 以高尚平泺为宰相崔干佑孙孝哲牛廷玠为将以阿史那承庆为献城郡王安守忠左威卫大将军阿史那从礼左羽林大将军然部党益携由是能元皓以伪淄青节度使高秀岩以河东节度使纳款德州刺史王陈贝勒刺史宇文宽皆背贼自归河北诸军各婴城守贼使蔡希德安雄俊安太清等以兵攻陷之戮于市庆绪惧人之贰已设坛加载书拌血与羣臣盟然承庆等十余人送密款自裨校等数为国间贼而庆绪治宫室观榭塘沼泛楼船为水嬉长夜饮通儒等争权凡有建白众

共沮之希德兵最锐素得士通儒以它事斩之麾下怨
痛皆亡去庆绪以干佑为天下兵马使权震中外悛悍少恩士不附干元元年秋九月帝
诏郭子仪率九节度兵凡二十万讨庆绪攻卫州遂渡
河师背水壁而待庆绪拒战子仪伪欲庆绪逐之遇伏而溃庆绪走获其弟庆和斩于京
师子仪引军蹶贼战愁思冈贼复败自是锐兵尽矣因
婴邺自固使薛嵩以厚币求救于史思明思明遣李归仁将兵万三千壁滏阳未进而官
军围已固筑城浚隍三周决安阳水灌城城中栈而处
粮尽易口以食米斗钱七万余贼更以太清代干佑将于是思明有众十三万三分其军
趋邺明年三月营安阳庆绪急乃遣太清奉皇帝玺绶
让思明思明约庆绪为兄弟庆绪大悦官军不利九节度奔还子仪断河阳桥戍谷水思
明进屯邺南庆绪收官军余饷尚十余万石召孝哲等
谋拒思明诸将皆曰不可思明请庆绪歃血盟不得已以五百骑诣思明军思明先令军
士擐甲以待庆绪至思明数之曰为人子杀父求位非
大逆邪吾乃为太上皇讨贼顾左右牵出并其四弟及高尚孙孝哲崔干佑皆缢杀之思
明改葬禄山以王礼伪谥燕刺王禄山父子僭位凡三
年而灭

高尚

孙孝哲

高尚

高尚者雍奴人母老丐食自给尚客河朔不肯归笃学善文辞李齐物为新平太守
荐诸朝赉钱三万介之见高力士力士以为才置门下
家事一咨之讽近臣表其能擢左领军仓曹参军力士语禄山表为平卢掌书记因出入
卧内禄山喜睡尚书执笔侍通宵不寝繇是亲爱遂与
严庄语图讖导禄山反陷东都伪拜中书侍郎大抵贼所下赦令皆尚为之严庄降后尚
独典政事至伪侍中

孙孝哲

孙孝哲契丹部人母冶色禄山通之故孝哲得狎近长七尺伉健有谋禄山对侧门
俟召衣带绝不知所为孝哲箴缕素具徐为枒■〈衤
定〉禄山大悦天宝末官大将军贼僭位伪拜殿中监闲厩使爵为王性残忍果于杀戮
贼令监张通儒等守长安杀妃王宗室子百余人穷诛
杨国忠高士力党与及与贼忤者不胜计剔首析肢流离道衢与严庄争宠不平禄山死
庄夺其使以与邓季阳庆绪之奔庄惧为所图因降

△史思明

史思明宁夷州突厥种初名宰干元宗赐其名姿癯露鸢肩伛背廡目侧鼻寡须发

躁健狡与安禄山共乡里生先禄山一日故长相善
少事特进乌知义以轻骑觜贼多所擒馘通六蕃译为互市郎负官钱亡走奚中为奚逻
骑所困欲杀之给曰我唐使人也若杀使者祸且及汝
请以我见王逻以为然送至王所不拜曰天子使见小国君不拜礼也王怒然疑真使者
卒授馆待以礼将还令百人从入朝奚有部将琐高者
名闻国中思明欲擒以赎罪誅王曰从我者虽多无足与见天子惟高材可与至中国王
悦命高将帐下三百与俱既至平卢遣谓戍主曰奚兵
数百声言入朝实欲为盗请备之主潜师迎犒杀其众执高送幽州节度使张守珪奇其
功表折冲与禄山俱为捉生天宝初累功至将军知平
卢军事入奏帝赐坐与语奇之迁大将军北平太守从禄山讨契丹禄山败单骑走师州
杀其下左贤哥解鱼承仙自解思明逃山中再阅旬哀
散卒得七百出见禄山平卢禄山喜握手曰得汝可何忧思明退语亲密曰向蚤出随哥
起地下矣契丹取师州禄山使思明击走之迁平卢兵
马使禄山反使思明略定河北会贾循死留思明守范阳而常山颜杲卿等传檄拒贼禄
山遣思明攻常山九日执杲卿进薄饶阳卢全诚拒守
河闲景城平原乐安清河博平六郡稍募兵自固河闲李奂以兵七千救饶阳景城李暉
持兵八千助河闲平原颜真卿以兵六千助清河悉为
思明所败暉子杞死之饶阳被围久不下会李光弼收常山思明遽解围迎战昼夜行二
百里相持不决郭子仪取赵郡合兵攻贼再战皆大败
之贼走博陵光弼围博陵城几拔属潼关溃肃宗召朔方河东兵光弼引还使王甫守常
山贼尾追光弼于井陘败归攻平卢刘正臣轻之不设
备败保北平兵费二千乘皆没思明得其锐卒张甚谋攻常山甫欲降诸将杀之遣使至
信都迎刺史乌承恩镇守不听思明攻土门城中伏甲
诡降贼登城伏起贼歼思明中戟扶以免复攻陷之引兵东围藁城守将白嘉佑走赵郡
思明围之五日城陷嘉佑奔太原思明再陷常山贼别
帅尹子奇围河间颜真卿遣和琳将兵万余往救于是北风劲烈鼓声不相闻贼纵击大
败执琳引众攻城擒李奂又拔景城李暉赴河死招乐
安降之遂攻平原未至真卿以力不敌弃郡去进破清河执太守王怀忠入博平遂围信
都初贼先获承恩母妻及子故承恩降而兵尚五万骑
三千贼并力围饶阳援绝城陷太守李系自燔死思明兵得向纵其下椎剽淫夺人妻女
以是士最奋禄山伪署范阳节度使始麾下骑纔二千
同罗步曳落河止三千既数胜兵最强猖然有噬江汉心以精兵五万畏尹子奇渡河劫
北海以震淮徐会回纥袭范阳子奇乃还救遂不克至
德二载与蔡希德高秀岩合兵十万攻太原光弼回守数月不能拔而安庆绪袭位赐姓

安名荣国爵妫川郡王贼之陷两京禁府珍宝悉输范
阳如邱阜思明见富强憫然欲自取之已而庆绪败走相州残士三万北归无所属思明
击杀数千人降之庆绪知其贰使阿史那承庆安守忠
诣思明征兵【按唐书本作使阿史那承庆李立节等诣思明考通鉴及安禄山传李立
节已死于九门之败今据旧书从删】因密图之判
官耿仁智欲以大谊动贼因说之曰方禄山强谁敢不服大夫事之固无罪今天子聪明
勇智有少康宣王风公诚发使输诚无不纳此转祸入
福之秋也思明曰善承庆等未知以五千骑来思明悉众介而逆之前谓曰公等至士不
胜喜然边兵素惮使者威请弛弓以入从之思明从承
庆等饮即拘之收其甲仗郡兵给赆遣之斩守忠以徇李光弼闻其绝庆绪使人招之思
明使其将窦子昂奉十三郡及兵八万归于朝于是高
秀岩以河东自归有诏思明为归义郡王范阳长史河北节度使诸子并列卿以秀岩为
云中太守亦官其诸子时乌承恩已归国遣与中人李
思敬慰抚趣讨残贼思明乃遣张忠志守幽州假薛■〈山上罇下〉以恒州刺史招赵
州刺史陆济使降授其子朝义兵五千守冀州假令狐
彰博州刺史戍滑州然思明外顺命内实通贼益募兵帝知之以其常事承恩父知义冀
其无嫌即擢承恩为河北节度副大使使图思明承恩
至范阳羸服夜过诸将阴谗以谋诸将反以告思明思明乃执承恩探衣囊得赐阿史那
承庆铁券及光弼牒又得薄纸书数番皆当诛将士姓
名贼大诟曰我何负于尔而至是耶答曰此太尉光弼谋上不知也思明召官吏于廷西
向哭曰臣赤心不负国何至杀臣因擄杀承恩父子及
支党二百余人囚思敬以闻帝遣使谕曰事出承恩非朕与光弼意又闻三司议陈希烈
等死思明惧诸将皆劝贼表天子诛光弼思明使耿仁
智张不矜上疏请斩光弼不然且攻太原疏入于函仁智辄易去左右密白思明执二人
曰若负我耶命斩之既又欲贷死仁智怒曰人固有死
大夫纳邪说图反我虽生不如死思明怒捶杀之九节度围相州急庆绪间道求救禄山
惧官军未敢进俄而萧华举魏州归天子崔光远代守
思明乃引兵击魏拔之杀数万人干元二年正月朔筑坛僭称大圣周王建元应天以周
赧为司马救相州却官军杀庆绪并其众欲遂西略虞
根本未固即留朝义守相州自引还夏四月改国号大燕建元顺天自称应天皇帝妻卒
为皇后以朝义为怀王周赧为相李归仁为将号范阳
为燕京洛阳周京长安秦京更以州为郡铸顺天得一钱欲郊及藉田聘儒生讲制度留
子朝清守幽州使阿史那玉向贡张通儒高如震高久
仁王东武等辅之兵四出寇河南身出濮阳使令狐彰绝黎阳朝义出白高周万志自胡

良渡河围汴州于是节度使许叔冀濮州刺史董秦梁
浦田神功皆弼贼贼势益振乘胜鼓行西陷洛阳破汝郑滑三州围李光弼河阳不能拔
使安太清取怀州以守光弼攻之太清降思明又遣田
承嗣击申光等州王同芝击陈许敬釭击兖郛薛■〈山上罅下〉击曹上元二年二月
思明以计败光弼兵于北邙官军弃河阳怀州京师震
恐益兵屯陕州思明遂西使朝义为先锋身自宜赐继进朝义攻陕败于姜子坂【通鉴
作疆子岭】退臂永宁思明大怒召责朝义及骆悦
蔡文景许季常欲诛之又敕朝义筑三角城居粮终日毕未堙而思明至怒不如约据鞍
毕堙乃去顾曰朝下陕夕斩是贼朝义忧惧不知所为
思明居传舍令所爱曹将军击刁斗阿卫骆悦等被让即其说朝义曰悦与王死无日不
如召曹将军同计大事朝议不应悦曰王诚不忍吾等
且归唐不得事王矣朝义许之令季常以言动曹将军曹将军畏诸将不敢拒思明爱优
诨寝食常在侧优者以其忍恨之是夜思明如厕悦以
兵入问所在共指厕思明知有乱踰垣出至厩下将乘马走悦麾下周子俊射其臂坠问
难所起曰怀王也思明曰旦日失言宜有此然杀我太
早使我不得至长安大呼怀王者三曰囚我可也无取杀父名左右反接缚之送柳泉传
舍悦还报朝义时周贄许叔冀以后军屯福昌季常叔
冀子也朝义令告之贄闻惊仆地贼领兵还贄等出迎悦恶其贰乃杀贄次柳泉悦畏众
不厌缢杀思明以既裹尸橐驼负还东京朝义乃即位
建元显圣阴令向贡阿史那玉图朝清朝清与母辛俱死张通儒不知引兵战城中数日
亦死其党自相攻杀数月范阳乃定朝义以李怀仙为
幽州节度使朝义虚怀礼下事皆决大臣然无经略才当此时洛阳诸郡人相食城邑榛
墟又诸将皆禄山旧臣与思明故辈行耻为朝义屈召
兵辄不至欲还幽州会雍王以河东朔方回纥兵十余万仆固怀思与回纥左杀为先锋
鱼朝恩郭英又殿入自龟池李抱玉薄河阳李光弼径
陈留合兵讨贼师次各阳驰兵下怀州官军部伍静严贼有惧色朝义以兵十万距横水
官军与战大败之俘馘六万委牛马器甲不可计朝义
烧明堂东奔汴州伪节度张献诚不纳自濮北趣幽州朝义复败至漳水无舟诸将劝降
朝义不听遂走莫州瑒追围之阅四旬贼八战八奔明
年正月阅精兵欲决死田承嗣谓朝义不如身将饶锐还幽州令怀仙悉兵还战臣请坚
守朝义然纳以骑五千夜犯围出握承嗣手以家属为
托承嗣听命朝义既去承嗣即以城降送朝义母及妻孥诣瑒于是诸军率轻兵追之
朝义至范阳怀仙部将李抱忠闭壁不受东走广阳复
不受谋奔两蕃怀仙招之自渔阳回止幽州缢死医巫闾祠下【按旧书作李怀仙生擒

朝义送款来降梟首阙下通鉴作怀仙遣兵追及之

朝义穷蹙缢于林中并与本传互异】怀仙斩其首传长安召故将收其尸怀仙改服出次哭之伪恒州刺史张忠志赵州刺史卢倣定州刺史

程元胜徐州刺史刘如伶相州节度使薛嵩及怀仙承嗣等皆举其地以归思明父子僭号凡四年而灭

钦定续通志卷六百二十七

●钦定续通志卷六百二十八 逆臣传二

逆臣传

唐【二】

○唐二

李希烈 朱泚【源休 姚令言 田希鉴】

李希烈

朱泚【源休 姚令言 田希鉴】

△李希烈

李希烈燕州辽西人少籍平卢军从李忠臣浮海战河北有劳及忠臣在淮西因署偏裨试光禄卿军中称其才大历十四年忠臣荒纵不事希烈因众怒逐之诏以希烈为蔡州刺史淮西留后又诏滑亳节度使李勉兼领汴州德宗立加御史大夫即拜节度使名淮西军曰淮宁以宠之梁崇义之反敕诸道进讨诏进希烈南平郡王汉南北招讨处置使又拜诸军都统平崇义功多拥兵欲有其地会山南节度使李承至希烈乃大掠而去以功检校尚书右仆射同中书门下平章事李纳叛以检校司空兼淄青节度使讨之希烈拥众三万次许州不进遣李芑约纳为唇齿阴计取卞州纳遣游兵导希烈绝汴饷路希烈遣使者约河北朱滔田悦王武俊等连和凶焰炽然俄而滔等自相王遣使者来奉笺希烈亦自号建兴王天下都元帅五贼株连半天下建中四年正月贼陷汝州执李元平兵四出抄掠东都大震帝听卢杞计诏太子太师颜真卿谕贼已行又遣左龙武大将军哥舒曜讨之希烈见真卿傲桀不臣敕大右訾侮朝政即北侵汴州南路鄂州有诏江西节度使嗣曹王皋击之拔蕲黄雨州击贼将李良韩霜露于白岩二将走希烈遣周曾吕从贲康琳拒曜次襄城与王玠姚憺韦清合谋回袭希烈不克皆死清奔刘洽希烈惧还蔡州上疏归罪曾等帝不赦遣神策将刘德信将节度观察团练子弟兵屯阳翟并力以李勉为淮西招讨使曜副之荆南节度使张伯仪为淮西应援招讨使山南节度使贾耽与皋副之德信去阳翟壁汝贼取阳翟覆伯仪军曜战不利屯襄城希烈举众三万围曜城陷曜奔

东都贼进陷汴州勉奔宋州希烈已据汴僭即皇帝位国号楚建元武成以张鸾子李绶李元平为宰相郑贲侍中孙广为中书令披其地建四节度以汴州为大梁府因窥江淮盛兵攻襄邑守将高翼死之于是汴滑副都统刘洽率曲环李克信军十余万战白塔不利洽引还夜入宋州贼骤胜径薄宁陵舟乘衔踵进恒七十里时洽将高彦昭刘昌共婴垒以守彦昭击家牛犒军士死战斩首三千级请援于洽洽选兵八百夜艾而入贼不知诘旦傅城士奋出希烈大败斩首万计追北至襄邑收贼货粮而还希烈既沮却还汴州遣翟崇晖以精兵袭陈复为洽败俘众三万执翟宗晖进拔汴州禽郑贲刘敬宗张伯元吕子岩李达千希烈遁归蔡贼戍耐孙液挈郑州降帝即拜液为刺史贞元二年遣杜文朝寇襄州为樊泽所破获文朝会李皋张建封曲环及李澄四略其地势日蹙希烈缩气不敢摇啖牛肉而病亲将陈仙奇阴令医毒之以死始希烈入汴闻户曹参军窦良女美强取之女顾其父曰愤无戚我能灭贼后有宠尝称仙奇忠勇可用而妻亦窦姓愿如娼媚者以固其夫希烈许诺乘间往谓仙奇妻曰贼虽强终必败奈何窦久而寤及希烈死子不发丧欲悉诛诸将乃自立未决有献含桃者窦请分遣仙奇妻听之因蜡帛丸杂果中出所谋仙奇大惊与薛育率兵噪而入斩希烈子函希烈并妻子七首以献尸希烈于市帝以仙奇忠即拜淮西节度使百姓给复二年俄为吴少诚所杀诏赠太子太保窦亦死

△朱泚 【源休 姚令言 田希鉴】

朱泚幽州昌平人父怀珪事安史二贼伪署柳城使 【案旧书怀珪为柳城使乃李怀仙归顺后所奏非安史时事与此互异】 宽和中实狠刻少以父荫籍军中与弟滔并为李怀仙部将凡战所得必分麾下以结士心故得济其凶谋朱希彩既杀李怀仙自为节度使颇委信之大历七年希彩为下所杀众未有属泚方屯城北而滔主牙兵尤狡譎乃潜使数十人大呼军门曰帅非朱公莫可众愕眙因共诣泚推知留后遣使至京师听命有诏检校左散骑常侍即拜卢龙节度留后俄迁节度使封怀宁郡王实封户二百泚上书谢遣滔将兵赴京西防秋代宗悦手诏褒美居三年求入朝自幽州首乱怀仙以来虽外臣顺然不朝谒而泚倡诸镇以骑三千入覲诏起甲第待之既至见内殿赐乘舆马二战马十金彩甚厚士校皆有赐宴赉隆渥泚之来滔摄后务稍稍翦落泚牙角泚自知失权乃请留京师帝因授滔节度留后及令泚与郭子仪李抱玉马璘分统防秋兵而此主汴宋淄青进同中书门下平章事出屯奉天迁检校司空代李抱玉为陇右节度副大使仍知河西泽潞行营兵

马事明年徙王遂宁德宗立改镇凤翔进封二百户建中初以李怀光伐段秀实兼节度
泾原徙屯原州怀光前督作泚与崔宁领兵继进泾士
素闻怀光暴皆惧刘文喜因劫众以乱请留秀实又求属泚诏泚代怀光文喜合兵二万
乘城诏泚怀光攻之文喜闭壁求救于吐蕃吐蕃方睦
于唐不为发兵 【原作吐蕃兴师案通鉴注是时吐蕃无入援文喜事考证甚明今据改
正】 文喜将刘海宾与其徒杀文喜入泚军泚一无
所戮由是泾人德之诏加中书令还屯进拜太尉滔合田悦叛阴遣人与泚相闻河东马
燧获其书帝召泚示之泚惶惧请死帝勉曰千里不同
谋卿何谢更以张镒节度凤翔留泚京师加实封千户不朝请以中人监其第李希烈围
哥舒曜于襄城诏泾原节度使姚令言督镇兵五千救
之师次浚水京兆尹王翊使吏供军粝饭菜肴众怒尽擐甲张旗鼓噪趋京城时令言入
辞尚在禁中闻变驰至长乐坂遇乱兵劫以西行帝再
遣使开谕贼已薄丹凤门诏集六军无至者乘輿仓卒出幸奉天令言与乱兵谋曰今众
无属不能持久朱太尉方囚镒若迎之事可济乃遣百
余骑见泚泚伪让不答留使者饮以观众心及数百骑复往泚知不伪乃拥徒向关下列
炬传呼入宫居含元殿自称权知六军明日徙居白华
殿或说泚迎天子泚顾望愕然光禄卿源休至请间教以不臣诡称符命泚悦张光晟李
忠臣皆新失职怨望亦劝成之会凤翔大将张廷芝泾
原将段诚谏引溃兵三千自襄城来泚自谓得人助逆志遂决因署休京兆尹判度支忠
臣皇城使又以段秀实失军疑有怨起之委以谋秀实
与刘海宾愤发秀实以笏击贼破面忠臣护泚得脱走秀实遂遇害泚僭即皇帝位于宣
政殿号大秦建元应天侍卫皆卒伍诸臣在位者纔十
余逼太常节樊系为册文 【旧书作伪署樊系为礼部侍郎】 册成仰药死拜令言侍
中阙内副元帅忠臣司空兼侍中休中书侍郎蒋镇门
下侍郎并同中书门下平章事以蒋炼为御史中丞敬缸御史大夫许秀常京兆尹洪经
给太常少卿彭偃中书舍人裴揆崔幼真给事中廷芝
光晟诚谏崔宣张宝何望之杜如江等并伪署节度使以兄子遂为太子以滔为冀王太
尉尚书令号皇太弟帝使高重杰屯梁山御贼贼将李
日月杀之日月锐甚自谓无前乃烧陵庙卤御物帝患之浑瑊伏兵漠谷自变量千骑跳
攻长安城引却日月尾追遇伏射日月杀之泚自将逼奉
天以令言为上将光晟副之忠臣留守以蒋练李子平为宰相于是瑊率韩游瓌御泚泚
大败死者万计退三里而舍修攻具毁庐室为楼车百
尺下觐城中会杜希全以兵败漠谷贼益张急攻城驱民填堑造云梁令壮士居上将傅
堞守者震骇浑瑊乃使侯仲庄韩澄穴地道梁陷纵火

焚之众乱而器械城中兵出皇太子督战贼大败然贼负其众围城益急凡三旬有六日而李怀光以兵五万至败贼于鲁店遂战城下自辰至昏贼溃是夜泚引去兴元元年泚以本封遂宁汉地也更号汉改元天皇奉天所下赦令凡受贼伪官者破贼日悉贷不问官军密榜诸道泚方宿未央泾原士谋杀泚泚知之辄徙它处众謀亦止官军坏龙首番积二堰以决其流城中水绝泚役数百人治之东出灞水与官军战大奔还阖都门士皆甲以待久乃罢李子平请修攻具袭怀光取苑中六街大木为冲车人不堪苦又禁居人夜行三人以上不得聚饮食上下惴恐贼所用唯卢龙神策团练兵而泾原军骄不可制但完守所获不出战故泚数北忧甚欲出走会李怀光贰于帝不欲泚平按军观望帝欲幸咸阳趣诸将捕贼怀光出丑言乃诏戴休颜守奉天尚可孤守灞上骆元光守渭桥进狩梁州怀光遂与泚连和京师知帝益西二叛胶固谓乱且成出受贼官者十八始泚多出金兄事怀光约平关中割地为邻国故怀光决反因并阳惠元李建徽军泚既知怀光反即赐诏待以臣礼督其兵入卫怀光惭见欺引军东保河中泚诱泾原将田希鉴希鉴杀冯河清降贼泚即使代河清为节度李晟等兵寢强土益附而浑瑊又击破贼将韩旻宋归朝于武亭川斩计万级晟率浑瑊骆元光尚可孤悉师攻贼晟薄光泰门败贼将张廷芝李希倩贼弃门哭保白华晟引军还居三日复战大败之乃分道入泚将段诚伏莽中为王伉所禽姚令言张廷芝与晟遇十鬪皆北遂至白华始张光晟以精兵壁九曲距东渭桥十里密约降于晟晟之入光晟劝泚等出奔故泚挟令言廷芝休子平朱遂引残军西走光晟卫出之因诣晟降泚奔泾州田希鉴拒之泚更舍逆旅遣梁廷芬入见希鉴曰公杀一节度唐天子必不容何不纳朱公成大事希鉴阴可廷芬出报泚悦廷芬请宰相不得乃不复入泚犹余范阳率三千北走驿马关宁州刺史夏侯英开门阵而待泚不敢入因保彭原西城廷芬与泚腹心朱惟孝夜射泚坠窖中韩旻薛纶高幽岩武震朱进节董看之共斩泚使宋膺传首以献泾卒杀令言降希鉴源休李子平走凤翔李楚琳斩之传首行在泚壻金吾将军马悦走党项得入幽州李希倩等皆以次夷灭源休相州人初为京兆尹使回纥还次太原卢杞畏其辩能结主恩奏为光禄卿休怨望故导泚僭号为调兵食署拜百官事皆咨之时论其逆甚于泚胁辱大臣多杀宗室子孙几于尽每官军不利喜见眉宇与姚令言劝泚围奉天昼夜为贼谋二人争自比萧曹休即收图籍贮府库以效何令言者河中人始应募泾原节度使马璘府孟皞为留后表其谨肃任将帅及皞归朝令言遂为节度使既挟泚乱颇尽力

彭偃锐于进自谓为宰相所抑郁郁不嫌泚乱匿田家既得用辞令一出其手故辞尤諄慢李晟爱张光晟才表丐原死置军中骆元光怒曰吾不能与反虏同坐拂衣去晟乃疫之晟恶田希鉴之逆欲因事诛之会吐蕃寇泾州晟行边田希鉴来谒晟置酒召诸将希鉴等诣营晟责以杀节度使受贼节罪缢之幕中以李观代为节度使

钦定续通志卷六百二十八

●钦定续通志卷六百二十九 逆臣传三

逆臣传

唐 【三】

○唐三

黄巢 【王仙芝】 秦宗权 董昌

黄巢 【王仙芝】

秦宗权

董昌

△黄巢 【王仙芝】

黄巢曹州冤句人少与王仙芝以贩私盐为事 【据通鉴改辑】 善击剑骑射稍通书辩给喜养亡命咸通末岁荐饥盗兴河南干符二年仙芝聚众三千残曹濮二州众至数万势遂张妄号大将军其党尚君长柴存毕师铎曹师雄柳彦璋刘汉宏李重霸等十余辈所在肆京而巢屡举进士不第遂为盗聚众数千人以应仙芝转寇河南十五州帝使平卢节度使宋威为诸道行营招讨使诏河南诸镇皆受节度以左散骑常侍曾元裕副焉威击仙芝于沂州城下破之仙芝亡去威因奏大渠死擅纵麾下兵还青州羣臣皆入贺居三日州县奏贼故在时兵始休有诏复遣士皆忿思乱贼闻之趣郟城不十日破八县帝忧迫近东都督诸道兵检讨于是凤翔邠宁泾原兵守陕州潼关元裕守东都义成昭义以兵卫宫仙芝去攻汝州杀其将刺史走东都大震百官脱身出奔贼破阳武围郑州不克蚁聚邓汝闻关以东州县大抵皆畏贼婴城守故贼放兵四略残郢复二州所过焚剽生人几尽官军急追则遗赀布路土争取之率逗桡不前贼转入申光残隋州执刺史据安州分奇兵围舒击庐寿光等州时威老且闇阴与元裕谋养贼以自固帝知之更以陈许节度使崔安潜为行营都统以前鸿胪卿李琢代威右威卫上将军张自勉代元裕贼出入蕲黄蕲州刺史裴渥为贼求官约罢兵仙芝与巢等诣渥饮未几诏拜仙芝左神策军押衙遣中人慰抚仙芝喜巢恨赏不及己大怒曰君独得官五千众且安归因击仙芝伤首仙芝惮众怒即不受命渥中人亡

去贼分其众尚君长入陈蔡巢北掠齐鲁入郢州杀节度使薛崇进陷沂州遂至数万繇颖蔡保嶂岬山引兵复与仙芝合围宋州会自勉救兵至斩贼二千级仙芝解而南度汉攻荆南于是节度使杨知温婴城守贼纵火焚楼堞知温不出有诏以高骈代之骈以蜀兵至而城已陷巢攻和州未克仙芝自围洪州取之进破朗岳遂围潭州观察使崔瑾拒却之乃向浙西扰宣润不能得所欲身留江西趣别部还入河南帝诏崔安潜归忠武复起宋威曾元裕为招讨使而杨复光监军复光遣其属吴彦宏以诏谕贼仙芝乃遣蔡温球楚彦威尚君长来降欲诣阙请罪又遣威书求节度使阳许之上言与君长战禽之复光固言其降命侍御史举中人驰驿即讯不能明卒斩君长等于狗脊岭仙芝怒还攻洪州入其郛威自将往救 【按旧书作宋威为贼所贼朝廷以王铎代为招讨收复亳州斩仙芝通鉴从实录作曾元裕斩仙芝并与新书互异】 败仙芝于黄梅斩贼五万级获仙芝传首京师当此时巢方围亳州未下君长弟让率仙芝溃党归巢推巢为王号冲天大将军署拜官属驱河南山南之民十余万掠淮南建元王霸曾元裕败贼于申州死者万人帝以威杀尚君长非是且讨贼无功诏还青州以元裕为招讨使张自勉为副巢破考城取濮州元裕军荆襄授兵阻更拜自勉东北面行营招讨使督诸军急捕巢方掠让邑雍邱诏滑州节度使李峰壁原武巢寇叶阳翟欲窥东都会左神武大将军刘景仁以兵五千援东都河阳节度使郑延休兵三千壁河阴巢兵在江西者为镇海节度使高骈所破寇新郑郟襄城阳翟者为崔安潜逐走在浙西者为节度使裴璩斩逐巢大沮畏乃诣天平军乞降诏授巢右卫将军巢度藩镇不一未足制己即叛去转寇浙东执观察使崔璆于是高骈遣将张漉梁纘攻贼破之贼收众踰江西破虔吉饶信等州因刊山开道七百里直趋建州福州观察使韦岫战不胜弃城遁贼入之闽地诸州皆没诏高骈为诸道行营都统以拒贼巢陷桂管进寇广州诒节度使李迢书求表为天平节度又胁崔璆言于朝宰相郑畋欲许之卢携田令孜执不可巢又丐安南都护广州节度使书闻右仆射于琮议南海市舶利不赀贼得益富而国用屈乃拜巢率府率巢见诏大诟急攻广州执李迢杀之 【按通鉴黄媠杀李迢在破江陵前新书误载后今改】 自号义军都统露表告将入关僖宗既罢宋威而宰相王铎请自行乃拜铎荆南节度使南面行营招讨都统率诸道兵进讨铎屯江陵表泰宁节度使李系为招讨副使兼湖南观察使以先锋屯潭州两屯锋驿相望会贼中大疫众死什四遂引北还自桂编大桴沿湘下冲永破潭州李系走朗州兵十余万殄焉进逼江陵

号五十万铎民寡弃城走襄阳留刘宏守江陵铎去汉
宏乘乱纵掠 【按通鉴王铎已去汉宏始大掠江陵新书作铎未去时事今改正】 会
雨雪人多死沟壑贼欲进蹶铎会江西招讨使曹全晟
与山南东道节度使刘巨容壁荆门使沙陀以五百骑逆战佯不胜而走贼以为怯急追
之伏发大败执贼渠十二辈媠惧度江东走师促之俘
什七八或劝巨容穷追答曰国家多负人危难不吝赏事平则得罪不如留贼冀后福止
不追故巢得复整陷鄂州全晟将度江会有诏以段彦
蕃代其使乃止巢畏袭转掠江西再入饶信杭州众至二十万攻临安戍将董昌兵寡不
敢战伏数十骑莽中贼至伏弩射杀贼将贼还残宣歙
等十五州广明元年淮南高骈遣将张漉度江败李重霸降之巢数却乃保饶州众多疫
别部常宏以众数万降漉急击之媠以金啖漉且致书
请降于骈骈恐诸将分功乃奏贼不日当平请遣诸道兵巢诃知遂请战 【按原传作诸
军屡奏破贼朝廷信之巢得计破杀张漉今据通鉴
改】 破杀张漉陷睦婺二州又取宣州而汉宏残众复奋寇宋州掠申光来与巢合济采
石侵扬州高骈按兵不出诏兖海节度使齐克让屯汝
州拜全晟天平节度使兼东面副都统贼方守滁和全晟以天平兵败于淮上巢悉众度
淮妄称率士大将军整众不剽掠所过惟取丁壮益兵
李罕之犯申光颍宋徐兖等州吏皆亡巢自将攻汝州欲薄东都宰相共建言悉神策命
关内诸节度兵十五万守潼关田令孜请自将而东于
是擢左军骑将张承范为先锋右军部将王师会督粮道以飞龙使杨复恭副令孜募兵
京师纔得数千人而巢已陷东都留守刘允章以百官
迎降贼复取陕虢进攻潼关齐克让以其军战关外贼少却俄而巢至师大噪川谷皆震
士饥甚烧营而溃克让走入关承范出金谕军中日诸
君勉报国救且至士感泣拒战贼见师不继急攻关官军矢尽飞石以射始关左有大谷
尚让引众趋合承范惶遽使师会以劲弩八百邀之比
至而贼已入明日夹攻关官军溃师会欲自杀承范止之乃羸服逃见帝具言不守状帝
黜宰相卢携方朝而传言贼至百官奔令孜以神策兵
五百奉帝趋咸阳惟福穆潭寿四王 【通鉴作福穆泽寿四王】 与妃御一二从中人
西门匡范统右军以殿巢以尚让为平唐大将军盖洪
费合古副之金吾大将军张直方与羣臣迎贼灞上巢乘黄金舆卫者皆绣袍华帟其党
乘铜舆以从骑士凡数十万先后之陷京师入自春明
门升太极殿宫女数千迎拜称黄王巢舍田令孜第贼见穷民抵金帛与之甫数日因大
掠缚捶居人贼酋阅甲第以处乱人妻女捕得官吏悉
斩之火庐舍不可计杀宗室侯王无遗类巢斋太清宫卜日舍含元殿僭即位号大齐绘

戈绋为袞衣击战鼓以代金石之乐列长剑大刀为卫
大赦建元为金统唐官三品以上停四品以下还之因自陈符命取广明字判其文曰唐
去丑口而着黄门黄当代唐又黄为土金所生盖天启
云其徒上巢号承天广运启圣睿文宣武皇帝以妻曹为皇后以尚让赵璋崔璆杨希古
为宰相郑汉璋御史中丞李侗黄谔尚儒为尚书方特
谏大夫皮日休沈云翔裴渥翰林学士孟楷盖洪尚书左右仆射兼军容使费传古枢
密使张直方检校左仆射马祥右散骑常侍王璠京兆
尹许建米实刘瑋朱温张全 【按米实旧书作朱实张全旧书作张言并互异】 彭攢
季逵等为诸将军游奕使其余以次封拜取赭伟五百
人号功臣下令军中禁妄杀人悉输兵于官然其下本盗贼皆不从召唐时旧官无至者
乃大索里阁豆卢瑑崔沆等匿永宁里张直方家直方
者素豪杰故士多依之或告直方纳亡命者巢攻之夷其家瑑沆及大臣刘邺裴讷赵蒙
李溥李汤死者百余人将作监郑綦郎官郑系举族缢
是时乘輿次兴元诏促诸道兵收京师遂至成都巢使朱温攻邓州陷之以扰荆襄遣林
言尚让寇凤翔为郑畋将宋文通所破不得前畋乃传
檄召天下兵于是诏泾原节度使程宗楚为诸军行营副都统前朔方节度使唐宏夫为
行营司马数攻贼斩万纸邠将朱玫阳为贼将王玫裒
兵俄而杀王玫引兵入于官军宏夫进屯渭北河中王重荣营沙苑易定王处存次渭桥
邠延李孝昌夏州拓拔思恭壁武功宏夫拔咸阳破尚
让军乘胜入京师巢窃出至石井宗楚入自延秋门处存遣锐卒五千以自■〈髟上巾
下〉自志夜入杀贼都人传言巢已走邠泾军争入京
师诸军亦解甲休竞掠货财子女巢伏野使覘城中弛备则遣孟楷率贼数百掩邠泾军
都人犹谓官军讙迎之军士重负不能走是以甚败贼
执宏夫害之处存走始王璠破奉天引众数千随宏夫及诸将败独一军战尤力巢复入
京师怒民迎官军纵击杀八万人血流于路可涉也谓
之洗城诸军退保武功于是中和元年四月也 【按通鉴中和元年改元在七月而程宗
楚等入长安杀贼并在是年四月原传作中和二年
二月今据改】 其五路昭义高浚攻华州王重荣与并力克之朱攻以泾岐麟夏兵八万
营兴平巢亦遣王播营黑水玫战未能胜郑畋将窦玫
夜率士燔都门杀逻卒贼震惧于时畿民栅山谷自保不得耕斗米钱三十千屑树皮以
食士人或卖饼自业举奔河中李孝日拓拔思恭徙壁
东渭桥贼帅朱温尚让步渭败孝昌等军高涛击败李详不胜贼复取华州巢即授详华
州刺史以温为同州刺史贼又袭孝昌二军引去贼破
陈敬瑄兵走南山迟克俭营兴平为贼所围决河灌之不克二年僖宗更以王铎为诸道

行营都统崔安潜副之周岌王重荣为左右司马诸葛爽康实为左右先锋平师儒为后军时溥督漕赋王处存李孝章拓拔思恭为京畿都统处存道左孝章在北思恭直右西门思恭为都监杨复光监行营中书舍人卢胤征为克复制置副使于是铎以山南剑南军营灵感祠朱玫以岐夏军营兴平重荣处存营渭北复光以寿沧荆南军合岌营武功孝章合拓拔思恭营渭桥程宗楚营京右朱温以兵三千掠丹延南鄙趋同州刺史米逢【通鉴作米诚】出奔温据州以守六月尚让寇河中使朱温攻四关败诸葛爽破重荣数千骑于河上爽闭关不出让遂拔合阳七月攻宜君寨大雨雪盈尺贼死什二三贼攻凤翔败节度李昌言于涝水又遣强武攻武攻槐里泾邠兵却独凤翔兵固壁拓拔思恭以锐士万八千赴难逗留不进河中粮艘三十道夏阳朱温使兵夺艘重荣以甲士三万救之温惧凿沈其舟兵遂围温温数困又度巢势■（足威）且败而孟楷方专宠温乞师楷沮不报即斩贼大将马恭隆重荣帝进拓拔思恭为京四面都统敕朱玫军马嵬温既隆重荣遇之厚故李详亦献款贼觉斩之更以黄思邈为刺史华卒逐黄思邈推王遇为主遇降于重荣明年正月王铎使鴈门节度使李克用破贼于渭南承制拜东北行营都统会铎与安潜皆罢克用独引军自岚石出夏阳屯沙苑破黄揆军遂营干坑二月合河中易定忠武等兵击巢巢命王播林言军居左赵璋尚让军居右众凡十万与官军大战梁田陂贼败执俘数万僵尸三十里敛为京观播与黄揆袭华州据之遇亡去克用掘堑环州分骑屯渭北命薛志勤康若立【旧书作君立】夜袭京师火廡聚孚贼而还巢战数不利军食竭下不用命阴有遁谋即发兵三万搤蓝田道使尚让援华州克用重荣迎战零口破之遂拔其地揆引众走四月克用遣步将杨守宗率河中将白志迁忠武将庞从等先进击贼渭桥三战皆捷于是诸节度兵继至贼众大奔克用入自光泰门身决战呼声动天贼遗逐北至望春入升阳殿巢夜走众犹十五万出蓝田入商山委辎重珍货于道诸军争取之不复追故贼得整军去杨复光献捷行在帝诏陈许延州凤翔博野军合田西神策二万人屯京师命大明宫留守王徽卫诸门抚定居人诏尚书右仆射裴璩修复宫省购犖辂使卫旧章秘籍豫败巢者神策将横冲军使杨守亮蹶云都将高周彝忠顺都将胡真天德将顾彦朗七十人巢已东使孟楷攻蔡州节度使秦宗权迎战大败即臣贼与连和楷移兵击陈州刺史赵犍击斩之巢自围陈纵兵略邓许孟洛东入徐兖数十州时大饥贼俘人以食朱全忠为宣武节度使与周岌时溥帅师救陈赵犍亦乞兵太原巢遣宗权攻许州未克于是粮

竭木皮草根皆尽四年二月李克用率山西兵由陕济河而东会关东诸镇壁汝州全忠击贼瓦子寨斩万余级诸军破尚让于太康亦万级获械铠马羊万计又败黄思邨于西华思邨夜遁巢大恐退营故阳里五月大雨震电川溪皆暴溢贼垒尽坏众溃始解围而去全忠进戍尉氏李克用追巢全忠还汴州巢取尉氏攻中牟兵半度克用支之贼多溺死巢引残众走封邱克用追败之还营郑州巢度河攻汴全忠拒守克用救之斩贼骁将李周杨景彪等【旧书作李周杨景】巢夜走胙城入冤句克用悉军穷蹙贼将李谔杨霍存【旧书作杨霍】葛从周张归霸张归厚往降全忠而尚让以万人归时溥巢愈猜忿屡杀大将引众奔兖州克用追至曹获男女牛马万余及乘舆器服禽巢爱子克用军昼夜驰粮尽乃还巢众仅千人走保泰山六月时溥遣将陈景瑜与尚让追战狼虎谷巢计蹙谓其甥林言曰取吾首献天子可得富贵毋为佗人利言不忍巢乃自刎不殊言因斩之及兄存弟邨揆欽秉万通思厚并杀其妻子悉函首将诣溥而太原博野君杀言与巢首俱上溥献于行在诏以首献于庙巢从子浩众七千为盗江湖间自号浪荡军天复初欲据湖南陷浏阳杀略甚众湘阴强家邓进思率壮士伏山中击杀之

△秦宗权

秦宗权蔡州上蔡人【旧书作许州人】为许牙将巢涉淮节度使薛能遣宗权调兵淮西而许军乱杀能宗权外示赴难因逐蔡州刺史据其城周岌代能领节度即授以蔡州有兵万人乃遣将从诸军败贼于汝州杨复光言之朝擢防御使宠其军曰奉国即为本军节度使进检校司空媿走出关宗权逆战不利遂与连和围陈州扰敎梁宋间巢死宗权复炽分兵四掠遣弟宗言寇荆南秦诰出山南陷襄州进破东都围陕州使秦彦【通鉴作陈彦】寇淮肥秦贤略江南宗衡乱兵鄂所至屠灭自关中薄青齐南繚荆郢北亘卫滑千里无舍烟惟赵犇保陈朱全忠保汴仅自完而已然宗权无霸王计惟乱是恃兵出未始转粮车载盐尸以从僖宗假朱全忠都统节以讨贼秦贤略宋及曹全忠好书约和贤遣张调请分地自汴以南归之蔡全忠阴许而贤引兵济汴肆燔劫全忠大怒斩调进与贼战杀获甚众宗权急攻许节度使鹿晏宏乞师于全忠师未及出已破晏宏进取郑州击河桥遂守河阳放兵侵汴西鄙北鄙全忠壁酸枣战不克宗权屯边村使秦贤营双邱侵板桥卢瑋引兵进屯万胜夹汴而栅全忠惧求救于兖郓而朱瑾朱宣皆身自将同拒贼全忠闭城大会鼓闻于郊阴启北门击贼垒士哗趋中营兖郓整兵合击大败之宗权忿过郑焚郛舍驱民入淮西全忠遂有郑许河阳东都于是合诸镇

兵会上蔡分为五军拔其壁遂围蔡州傅城而垒以羸
兵诱贼出战全忠尽斩之宗权退守中州未能下全忠使大将胡元琮围之身还汴宗权
闻许无备袭取其州执元琮引兵复数许宗权还为爱
将申丛所囚折一足以待命全忠署丛节度使留后丛中悔蔡将郭璠杀申丛送宗权至
汴【据通鉴增辑】全忠以槛车送京师与妻赵俱
斩独柳下宗权以中和三年叛六年而诛

△董昌

董昌杭州临安人始籍士团军以功擢石镜镇将中和元年【按通鉴董昌拒路审
中自领州事事在中和元年新书原作三年今改】
刺史路审中之官昌率兵拒之不得入即自领州事镇海节度使周宝不能制因表为刺
史昌已破刘汉宏兵益强进义胜军节度使检校尚书
右仆射僖宗始还京师昌取越民裴氏藏书献之补秘书之亡授兼诸道采访图籍使为
治廉平人颇安之当是时天下贡输不入独昌赋外献
常参倍朝廷赖其入故累拜检校太尉同中书门下平章事爵陇西郡王而小人意足寢
自侈大托神以诡众立生祠刳香木为躯内金玉纨素
为肺腑冕而坐妻媵侍别帐百倡鼓吹于前属兵列护门所属州为士马献祠下列牲牢
祈请昌自言有飡者我必醉寢用峭法笞至千百或小
过辄夷族凡民讼不视狱但与掷博齿不胜者死用人亦取胜者昌得郡王咤曰朝廷负
我吾奉金帛不费何惜越王不吾与吾当自取之下厌
其虐乃劝为帝近县举狂噪諄请昌令曰时至我当应天顺人其属吴繇秦日裕卢勒朱
瓚董庠李畅薛辽与妖人应智王温巫韩媪皆赞之吏
民争言符瑞昌大喜干宁二年即伪位国号大越罗平建元曰天册【通鉴作改元顺天
】自称圣人铸银印方四寸文曰顺天治国之印榜
南门曰天册楼先是州寝有赤光长十余丈虺长尺余金色见思道亭日署寝曰明光殿
亭曰黄龙殿以自神以次拜置百官初官属不徇日旨
者节度副使黄碣会稽令吴镣【据通鉴增辑】山阴令张逊皆诛死镇海节度使钱
镠书让昌曰闭城作天子取灭族祸岂若开门作节度
终身富贵耶愿王改图昌不听镠悉兵三万攻之望城再拜曰大王位将相奈何舍安就
危能改过请谕还诸军昌惧致犒军钱二百万缗执应
智王温韩媪吴繇秦昌裕送于镠且请待罪天子镠乃还表于朝以为倡不可赦复讨之
傅城而垒昌又执朱思远王守真卢勒送镠军求解昭
宗遣中人李重密劳师削昌官爵授镠浙东道招讨使昌乃求援于淮南杨行密行密遣
将台蒙围苏州安仁义田頔攻杭州以救昌镠将顾全
武许再思等数败昌军昌将多降遂进围越州侯人言外师强辄斩以徇给告镠兵老皆

赏全武等益奋昌军大溃遽还去伪号全武四面攻未克会台蒙取苏州缪召全武还全武曰贼根本在瓯越今失一州而缓贼不可攻益急城中以口率钱虽簪珥皆输军昌从子真得士心昌信谗杀之众始不用命又减战粮欲犒外军下愈怨反攻昌昌保子城缪遣昌故将骆团入见给言奉诏迎公居临安昌信之全武执昌还及西江斩之投尸于江传首京师夷其族斩伪相李邈蒋瓌等百余人发昌先墓火之昌败犹积粮三百万斛金币大抵五百余帑而兵不及万人缪遂为镇海镇东两军节度云

钦定续通志卷六百二十九

●钦定续通志卷六百三十 逆臣传四

逆臣传

五代

○五代

李振

孔循

蒋殷

王宏贇

张彦泽

王峻

王殷

李振

孔循

蒋殷

王宏贇

张彦泽

王峻

王殷

△李振

李振字兴绪其祖抱真【按薛史以振为抱真曾孙与此异】唐潞州节度使振为唐金吾卫将军拜台州刺史盗起浙东不果行乃西归过梁以策于太祖太祖留之太祖兼领郢州表振节度副使振奏事长安舍梁邸宦官刘季述谋废昭宗遣其侄希正达意振骇然曰百岁奴事三岁主而敢尔邪今梁王百万之师方使大义尊天子君等无为此不祥也【按五代史考异疑振拒希正为误谓振若已立异岂敢复入长安谋反正今考梁纪亦云李振自长安使回是时季述惧汴梁兵力固不能阻振之往来欧薛二史所书皆同掌不误也谨附识】振还季述卒与岩等废昭宗幽之东宫号太上皇立皇太子裕为天子是时太祖用兵在邢洺间季述诈为太上皇诰告太祖太祖犹豫未知所为振赞其因此立功太祖大悟乃囚季述使者遣振诣京师见崔胤谋出昭宗昭宗反正太祖大喜

执振手曰卿谋得之矣王师范以青州降梁遣振往代
师范昭宗迁洛振往来京师朝臣皆侧目振视之若无人有所小怒必加遣谪故振一至
京师朝廷必有贬降时人目振为鸱梟太祖之弑昭宗
也遣振至京师与朱友恭氏叔琮谋之昭示崩太祖问振所以待友恭等宜如何振曰昔
晋司马氏杀魏君而诛成济不然何以塞天下口太祖
乃归罪友恭等而杀之振尝举进士咸通干符中连不中尤愤唐公卿及裴枢等七人赐
死白马驿振谓太祖曰此辈尝自言清流可投之河使
为浊流也太祖笑而从之太祖即位累迁户部尚书友珪时以振代敬翔为崇政院使庄
宗灭梁入汴振谒见郭崇韬崇韬曰人言李振一代奇
才吾今见之乃常人尔已而伏诛

△孔循

孔循不知其家世少孤流落汴富人李让闾得之养以为子梁太祖镇宣武以李让
为养子循乃冒姓朱氏稍长给事太祖帐下太祖诸儿
肘母有爱之者养循为子循又冒乳母之夫姓赵氏名殷衡昭宗东迁洛阳太祖尽去天
子左右悉以梁人代之以王殷为宣徽使循为副使循
与蒋元晖张廷范等共与杀昭宗之谋其后循与元晖有隙哀帝即位将有事于南郊循
因与王殷谗于太祖曰元晖私侍何太后与廷范等奉
天子郊天冀延唐祥太祖大怒遣循与王殷弑何太后因杀宰相柳璨及元晖廷范等以
循为枢密副使唐亡事梁为汝州防御使左卫大将军
租庸使始改姓孔名循后唐庄宗时权知汴州明宗自魏兵反而南庄宗东出泛水循持
两端遣迎明宗于北门迎庄宗于西门供帐牲饩其礼
如一而戒其人曰先至者入之明宗先至遂纳之明宗即位以为枢密使明宗幸汴州循
留守东都民有犯曲者循族杀其家明宗知其冤因诏
天下除曲禁许民得造曲循为人柔佞而险猾安重诲尤亲信之凡循所言无不听用明
宗尝欲以皇子娶重诲女重诲以问循循曰公为机密
臣不宜与皇子婚重诲信之乃止而循阴使人白明宗求以女妻皇子明宗即以宋王从
厚娶循女重诲始恶其为人出循为忠武军节度使徙
镇横海卒

△蒋殷

蒋殷幼为王重盈养子冒姓王氏梁太祖取河中以王氏旧恩录其子孙尤爱殷表
为牙将唐迁洛阳殷为宣徽北院使太祖已下襄阳转
攻淮南还屯正阳哀帝遣殷劳军是时哀帝方卜郊殷与枢密使蒋元晖等有隙因譖之
太祖言元晖等教天子卜郊祈天且待诸侯助祭者以
谋兴复太祖大怒哀帝为改卜郊是时太祖将有篡弑之谋何太后尝泣涕叩头为元晖

等言梁王禅位后愿全唐家子母殷乃诬元晖尝私侍太后太祖斩元晖及张廷范柳璨等遣殷弑太后于积善宫哀帝下诏惭愧自言以母后故无以奉天乃卒不郊庶人友珪与殷善友珪弑太祖自立拜殷武宁军节度使末帝即位以福王友璋代殷殷不受代王瓚亦王氏子惧为殷所累乃言殷非王氏子其本姓蒋末帝诏削殷官爵还其姓遣牛存节讨之殷举族自燔死

△王宏贄

王宏贄不知其家世后唐明宗时为合阶二州刺史右千牛卫将军迁卫州刺史潞王从珂反于凤翔拥兵东至陕愍帝夜以百余骑出奔卫州遇晋高祖于道恸哭语之故高祖以宏贄宿将且多知时事驰骑就图之宏贄曰天子避狄自古有之然将相大臣从乎曰无也国宝乘舆法物从乎曰无也宏贄曰万乘之主以百骑出奔将相大臣无一从者则人心去就可知虽欲兴复得乎即从高祖上謁于驿舍高祖具以宏贄语白愍帝弓箭库使沙宏荣奔宏进前谓高祖曰主上明宗爱子公爱壻也公于此时不能报国而反问大臣国宝何在公亦助贼反邪乃抽佩刀刺高祖高祖亲将陈晖扞之守荣与晖战死宏进亦自刎高祖因尽杀帝从兵独留帝于驿而去宏贄奉帝居于州廡宏贄有子峦为殿直废帝入立遣峦持鸩与宏贄初愍帝在卫州宏贄令市中酒家献酒愍帝见之大惊遽殒于地久而苏宏贄曰此酒家也愿献酒以慰无繆愍帝受之由是日献一觞及峦持鸩至因使酒家献之愍帝饮而不疑遂崩宏贄后事晋为凤翔行军司马以光禄卿致仕卒

△张彦泽

张彦泽其先突厥部人后徙太原彦泽为人骁悍残忍目精黄而夜有光顾视如猛兽以善射为骑将数从唐庄宗明宗战伐与晋高祖连姻高祖时已为护圣后厢都指挥使曹州刺史与讨范延光拜镇国军节度使岁中徙镇彰义为政暴虐常怒其掌书记张式式出奔彦泽遣骑追之不得邠州节度使李周留式驰骑以闻诏流式商州彦泽遣司马郑元昭诣阙论请高祖不得已与之彦泽得式剖心决口断手足而斩之高祖遣王周代彦泽以为右武卫大将军周奏彦泽所为不法者十六条并述涇人残弊之状式父铎诣阙诉冤谏议大夫郑受益等并论彦泽杀式之冤皆不省会言者不已高祖乃召式父铎弟守贞子希范等皆拜以官为蠲涇州民税免其杂役一年下诏罪已彦泽止削阶降爵而已出帝时彦泽迁右神武统军自契丹与晋战河北彦泽常在兵闲数立战功拜彰国军节度使与契丹战阳城为所围军中无水凿井辄坏又天

大风契丹顺风扬尘奋击甚锐彦泽用偏将药元福语拔拒马力战契丹遁去开运三年秋以杜重威为都招讨使李守贞兵马都监彦泽马军都排阵使重威守贞攻瀛州不克退及武强闻契丹空国入侵惶惑不知所之彦泽至乃与重威等西趋镇州彦泽为前锋至中渡桥已为契丹所据彦泽犹力战争桥烧其半契丹小败却及夹河而寨十二月重威守贞叛降契丹彦泽亦降契丹遣彦泽与傅住儿以二千骑先入京师彦泽倍道疾驰至河衔枚夜渡夜五鼓自封邱门斩关入有顷宫中火发出帝以剑拥后宫十余人将赴火为小吏薛超所持彦泽自宽仁门傅契丹主与皇太后书入乃灭火大内都点检康福全宿卫宽仁门登楼觐贼彦泽呼下之诸门皆启彦泽顿兵明德楼前遣傅住儿入传契丹主语帝脱黄袍素服再拜受命使人召彦泽不应明日迁帝于开封府帝与太后皇后肩舆宫嫔宦者十余人皆步从彦泽遣控鹤指挥使李筠以兵监守内外不通帝与太后所上契丹表章皆先示彦泽乃敢遣帝始乌氏公主私贩守门者得入与帝诀归第自经死彦泽自以有功于契丹昼夜酣饮自娱出入骑从常数百人迫迁出帝遂辇内库输之私第因纵军上大掠京师皇子延煦母楚国夫人丁氏有色彦泽使人求于太后太后迟疑未与即劫取之彦泽与合门使高勋有隙乘醉入其家杀数人而去契丹主至京师闻彦泽劫掠怒锁之又以高勋诉状示百官及都人问彦泽当诛石百官皆请不赦而都人争投状疏其恶乃命高勋监杀之彦泽前所杀士大夫子孙皆縗经杖哭随而诟詈以杖扑之彦泽俯首无一言行至北市断腕出锁然后用刑勋剖其心祭死者市人争破其脑取其髓齑其肉食之

△王峻

王峻字秀峰相州安阳人少以善歌事梁节度使张筠唐庄宗下魏博筠弃相州走归京师租庸使赵岩过筠家筠命峻歌佐酒岩见而悦之是时岩方用事筠因以峻遣岩梁亡岩族诛峻流落民闲久之事三司使张延朗延朗不甚爱之清泰末延朗诛汉高祖尽得延朗之赀产仆从峻在籍中【据薛史本传改辑】因得事高祖高祖镇河东峻为客将及即位拜峻客省使汉遣郭从义讨赵思绾以峻监其军累迁宣徽北院使周太祖镇天雄军峻为监军汉隐帝已杀大臣史宏肇等文遣人杀周太祖及峻等峻等遂与太祖兴兵犯京师太祖监国以汉太后命拜峻枢密使太祖将兵北出至澶州返军向京师峻与王殷谋遣侍卫马军指挥使郭崇率兵之宋州幽湘阴公赞前申州刺史马铎之许州杀蔡王信太祖入立拜峻右仆射门下侍郎同中书门下平章事监修国史刘旻攻晋州峻

为行营都部署得以便宜从事别遣陈思让康延沼白
乌岭出降州与峻会峻至陕州留不进太祖遣使者翟守素驰至陕州论峻欲亲征峻屏
左右谓守素曰晋州城坚不可近而刘昉兵锐亦未可
敌臣所以留此者非怯也盖有待尔且陛下新即位四方藩镇未有威德以加之岂宜轻
举而兖州慕容彦超反迹已露若陛下出泛水则彦超
入京师陛下何以待之守素驰还具道峻言是时太祖已下诏西幸闻峻语遽自提其耳
曰几败吾事乃止不行峻军出自绛州前锋报过蒙坑
峻喜谓其属曰蒙坑晋绛之险也旻不分兵扼之使吾过此可知其必败也峻军去晋州
一舍旻闻周兵大至即解去诸将皆欲追之峻犹豫未
决明日遣骑兵追旻不及而还从讨慕容彦超为随驾都部署率众先登峻与太祖俱起
于魏自谓佐命功以天下为己任凡所论请事无大小
期于必得或小不加志言色辄不逊太祖每优容之峻年长太祖二岁往往呼峻为兄或
称其字峻由是益横郑仁海李重进向训等皆太祖故
时裨将太祖初即位谦抑未欲进用而峻心忌之自破慕容彦超还即求解枢密以探帝
意太祖慰劳之峻多发书诸镇求为保荐居数日诸镇
皆驰骑上峻书太祖大骇峻连章求解因不视事太祖声言严驾自往候之峻遂驰入谒
峻为枢密使兼宰相又求兼领平卢已受命者之镇又
请借左藏库绫万匹太祖皆勉从之又请用颜衍陈同代李谷范质为相太祖曰进退宰
相岂可仓卒当徐思之峻论请不已语渐不逊曰亭午
太祖未食峻争不已是时寒食假太祖曰俟假开当为卿行峻乃退太祖遂不能忍明日
御便殿召百官皆入即幽峻于于所太祖见冯道泣曰
峻凌朕不能忍 【按薛史太祖谓道等曰朕子在外峻专意阻隔暂令倒阙即怀怨望又
言世宗自澶州入觐峻惮其英明时方受诏检校河
堤土功即日自河次归朝欧史未载谨附识】 即贬商州司马卒于贬所峻已被黜太祖
以峻监修国史意其所书不实因召史官取日历读之
史官以禁中事非外所知惧以漏落得罪峻贬后李谷监修因请命近臣录禁中书付史
馆乃命枢密直学士就枢密院录之录送史馆自此始

△王殷

王殷大名人 【薛史作瀛州人与此异】 少为军卒以军功累迁灵武马步军都
指挥使唐废帝时从范延光讨张令昭于魏拜祁州刺
史晋天福中徙原州出帝时为奉国右厢都指挥使后从汉高祖讨杜重威先登力战矢
中其脑镞自口出高祖嘉之以为侍卫步军都指挥使
领宁江军节度使契丹入边汉遣殷以兵屯澶州隐帝已杀杨邠等诏镇宁军节度使李
宏义杀殷于澶州又诏郭崇杀周太祖于魏诏书至澶

州宏义恐事不果反以告殷殷遣人驰至魏告周太祖遂起兵太祖自澶州返军向阙殷
预王峻谋遣人幽湘阴公赞杀蔡王信太祖入立拜侍
卫亲军都指挥使出为天雄军节度使同中书门下平章事仍领亲军自河以北皆受殷
节度殷颇务聚敛太祖恶之殷与王峻俱从太祖起自
魏后峻得罪殷不自安广顺二年太祖有事于南郊是冬殷来朝殷握兵柄职当警卫出
入多以兵从又求兵甲以备非常是时太祖卧疾疑殷
有异志乃力疾御滋德殿殷入起居即命执之削夺在身官爵长流登州已而杀之徙其
家属于登州

钦定续通志卷六百三十

●钦定续通志卷六百三十一 逆臣传五

逆臣传

宋

○宋

（臣）等谨案张邦昌刘豫苗傅宋史并入叛臣金史复系邦昌刘豫于列传考靖
康之变邦昌豫并僭大号逆迹显然苗傅等劫君废立
罪无可逭今并编为宋逆臣其金史张刘二传则并从删削云

张邦昌 刘豫 苗傅【刘正彦】

张邦昌

刘豫

苗傅【刘正彦】

△张邦昌

张邦昌字子能永静军东光人举进士累官大司成以训导失职贬提举崇福宫知
光汝洪三州政和末改礼部侍郎宣和元年除尚书右
丞转左丞迁中书侍郎钦宗即位拜少宰金人攻汴朝廷议割三镇俾康王及邦昌为质
于金以求成既而以肃王为质邦昌从康王还进太宰
兼门下侍郎为河北路割地使初邦昌力主和议不意身自为质及行乃要钦宗署御批
无变割地议不许时金兵再至上书者攻邦昌私敌社
稷之贼也遂黜为观文殿大学士中太一宫使罢割地议其冬金人陷京师明年春吴开
莫俦自金营来以金帅令推立异姓召百官杂议众莫
敢出声适尚书员外郎宋齐愈至自外众问金人意所主齐愈书张邦昌三字示之遂定
议以邦昌治国事孙傅张权夜不署状金人执之置军
中王时雍时为留守再集百官诣秘书省至即闭省门以兵环之俾范琼谕众以立邦昌
众意唯唯开俦持状赴军前邦昌入居尚书省金人趋
劝进遣人奉册宝至邦昌北向拜舞受册即伪位僭号大楚拟都金陵遂升文德殿设位

御床西受贺遣合门传令勿拜时雍率百官遽拜邦昌
但东面拱立外统制官宣赞舍人吴革耻屈节异姓首率内亲事官数百人皆先杀妻孥
焚所居谋举义金水门外范琼诈与合谋令悉弃兵杖
乃从后袭杀百余人捕革并其子皆杀之是日风霾日晕无光百官惨沮邦昌亦变色惟
时雍开侑琼等欣然鼓舞以为有佐命功即以时雍权
知枢密院事领尚书省开权同知枢密院事侑权金书枢密院事吕好问权领门下省徐
秉哲权领中书省邦昌见百官称子手诏曰手书独时
雍每言事邦昌前称臣启陛下劝邦昌坐紫宸垂拱殿吕好问争之乃止邦昌以嗣位之
初宜推恩四方以道阻先赦京城选郎官为四方密谕
使金人将退邦昌诣金营祖别服柘袍张红盖所过设香案时雍秉哲开侑皆从行士庶
观者无不感怆金师即还邦昌降手书赦天下吕好问
谓邦昌曰人情归公者劫于金人之威耳金人既去能保如今日乎康王居外众所归心
为今计者当迎元佑皇后请康王早正大位庶获保全
监察御史马伸贻书邦昌称为相公请奉迎康王书入邦昌气沮王时雍曰骑虎者势不
得下所宜熟虑他日噬脐无及徐秉哲从旁赞之邦昌
知人心不顺乃弗听时雍等而册元佑皇后曰宋太后入御延福宫遣蒋师愈赍书于康
王自陈所以勉循金人推立者欲权宜一时以纾国难
也敢有他乎王报书邦昌邦昌寻遣谢克家献大宋受命宝复降手书请元佑皇后垂帘
听政以俟复辟邦昌以太宰退处内东门资善堂寻遣
使奉乘舆服御物至东京既而邦昌亦至伏地恸哭请死王抚慰之王即皇帝位相李纲
徙邦昌太保奉国军节度使封同安郡王纲上书极论
邦昌僭逆宜肆诸市朝以为乱臣贼子之戒时黄潜善犹左右之纲复力争高宗乃降御
批曰邦昌僭逆理合诛夷原其初心出于迫胁可特与
免贷责授招化军节度副使 【按史传原作节度使今据东都事略改】 潭州安置初
邦昌僭居内庭华国靖恭夫人李氏数以果宝奉邦昌
邦昌亦厚答之一夕邦昌被酒李氏拥之曰大家事已至此尚何言因以赭色半臂加邦
昌身掖入福宁殿衣饰养女陈氏以进及邦昌还东府
李氏私送之语斥乘舆帝闻下李氏狱词服诏数邦昌罪赐死潭州李氏杖脊配车营务
时雍秉哲开侑等先已远窜至是并诛时雍

△刘豫

刘豫字彦游景州阜城人世业农至豫始举进士元符中登第少无行常盗同舍生
白金孟纱衣政和二年召拜殿中侍御史为言者所击
帝不欲发其宿丑诏勿问未几累章言礼制局事帝曰种田叟安知礼制黜为两浙察访
宣和六年判国子监除河北提刑金人南侵豫弃官避

乱仪真建炎二年用张悫荐除知济南府时盗起山东豫不愿行请易东南一郡执政恶之不许豫忿而去是冬金人攻济南遣人啖豫以利豫
愆前忿遂杀其将关胜缢城纳款三年金人以豫知东平府充京东西淮南等路安抚使节制大名开德濮滨博棣德沧等州以其子麟知济南
府四年金人册豫为齐帝都大名府先是豫遣麟持重宝赂金左监军达兰求僭号达兰许之遣使即豫所部咨军民所宜立众未及对豫乡人
张浹越次请立豫议遂决乃命高庆裔韩昉备玺绶宝册以立之九月戊申豫即伪位赦境内奉金正朔称天会八年以张孝纯为丞相李孝扬
为左丞张柬为右丞李侔为监察御史郑亿年为工部侍郎王琼为汴京留守子麟为大中大夫提领诸路兵马兼知济南府豫还东平升为东
京改东京为汴京降南京为归德府以弟益为北京留守寻改汴京留守复降淮宁永昌顺昌兴仁府悉为州自以生景州守济南节制东平僭
位大名乃起四郡丁壮数千人号云从子弟册其母翟氏为皇太后妾钱氏为皇后钱氏宣和内人也习宫掖事豫欲有所取则故立之改明年
为阜昌元年初豫遣人说东京副留守上官悟降金悟斩之又招知楚州赵立立不发书斩其使博州判官刘长孺以书劝豫反正豫囚之豫大
索宋宗室承务郎阎琦匿之豫杖琦死召迪功郎王宠不至文林郎李喆尉氏令姚邦基皆弃官去朝奉郎赵俊书甲子不书僭年豫亦无如之
何国信副使宋汝为以吕颐浩书勉豫忠义豫曰独不见张邦昌乎业已然尚何言哉沧州进士邢希载上豫书乞通宋朝豫杀希载绍兴元年
张浚讨李成败之成逃归豫豫以麟为兵马大总管尚书左丞相置招受司于宿州诱宋逋逃十月豫入寇遣其将王世冲以蕃汉兵攻庐州守
臣王亨诱斩世冲大败其众叶梦得招降豫将王才伪秦凤帅郭振入寇王彦关帅古败之伪知海州薛安靖及通判李汇以州来归二年知商
州董先以商虢二州叛附于豫襄阳镇抚使桑仲上疏请正豫罪朝廷命仲兼节制应援京城军马量度事势复豫所陷郡仍命河南翟兴荆南
解潜金房王彦德安陈规蕲黄孔彦舟庐寿王亨相为应援仲寻为其将霍明所杀霍兴进屯尹阳山豫患之使人招兴许以王爵兴戮其使豫
乃阴结兴麾下杨伟图之伟杀兴持兴首降豫豫迁都汴因奉祖考于宋太庙尊其祖曰徽祖毅文皇帝父衍祖睿仁皇帝亲巡郊祖是日暴风
卷旗屋瓦皆震士民大恐豫曲教汴人时河淮陕西山东皆驻北军麟籍乡兵十余万为皇子府十三军分置河南汴京淘沙官两京冢墓发掘
殆尽赋敛烦苛民不聊生孔彦舟叛降豫其将陈彦时率众千余来归直徽猷阁凌唐佐尚书郎李亘与宋汝为留伪庭久谋以蜡书疏豫虚实

事泄唐佐亘皆遇害豫以知东平府李邴为尚书右丞董先为大总府先锋将襄阳镇抚使李横败豫兵于扬石乘胜趋汝州伪守彭玘以城降豫遣刘夔与金帅萨里罕侵蜀执进士薛筜送豫筜勉豫早图反正豫怒欲兵之赖张孝纯获免三年李横破颍顺军伪守兰和降又败豫兵于长葛引兵至颍昌府伪安抚赵弼固守急攻下之弼遁复颍昌河南镇抚司统制官李吉败豫将梁进于伊阳台殪之豫求援于金金遣乌珠赴之豫亦遣李成率师二万逆战于牟駝冈横败绩复陷颍日虢州镇抚司统制官谢皋指腹示贼曰此吾赤心也自剖心以死明州守将徐文以所部海舟六十艘官军四千余人【金史刘豫传作军兵七百余人】浮海抵盐城输款于豫文言沿海无备二浙可袭取豫大喜以文知莱州益海舰二十俾寇通泰间朝廷遣韩肖胄胡松年使伪齐豫欲以臣礼见肖胄无以应松年曰均为宋臣遂长揖不拜豫不能屈因问帝意向松年曰必欲复故疆耳豫有惭色杨政遣川陕将官吴胜破豫兵于莲花城贼将李成陷邓州襄阳李横奔荆南知随州李道弃城走成据襄阳陷郢州守臣李简遁贼将王彦先自亳引兵至寿春将窥江南刘光世驻军建康扼马家渡遣酈琼领所部驻无为军为濠寿声援贼乃还金人遣李永寿王翊来报聘永寿等骄倨请还豫俘及西北士民之流寓者复要画江以益豫监广州盐税吴伸上书请讨豫谓敌使在廷宜阳许而阴图之乘其不疑可一战擒也四年翰林学士綦崇礼言豫父子倚重金人且永寿等从豫所来画江之请必出于豫观其奸谋在窥吾境土恐既通使人情必解弛宜戒将帅益置守备既而熙河路马步军总管关师古与豫兵战于左要岭败绩遂降贼洮岷之地尽归豫矣知寿春府罗兴叛降豫舒蕲等州制置使岳飞复襄阳李成遁寻复唐州随州礫伪守王嵩复邓州豫闻夺民舟五百载战具以徐文为前军声言攻定海遣子麟侄猊分道南侵复遣使请师于金金以宗辅权左副元帅达兰为右副元帅调渤海汉军五万应豫以乌珠尝渡江习知险易俾将前军与豫兵渡淮楚州守臣樊序弃城走淮东宣抚使韩世忠自承州退保镇江诏张浚援世忠刘光世移军建康世忠复还扬州与解元连战皆捷帝发临安下诏讨豫始暴豫罪恶士气大振淮西将王师晟张琦合兵复寿春执伪知州王靖岳飞遣将败金人于庐州金人退师遣使告麟麟弃辎重宵遁五年淮西将酈琼复光州伪守许约降豫将商元攻信阳军知军事舒继明死之豫废明堂为讲武殿暴风连日陷光州六年豫聚兵淮阳韩世忠引兵急围之贼守将连举六烽乌珠与刘猊合兵来援皆败筑刘龙城以窥淮西王师晟败之执华知刚俘其众而还豫闻帝亲

征告急于金领三省事宗盘曰先帝立豫者欲豫辟疆保境我得按兵息民也今豫进不能取退不能守兵连祸结休息无期从之则豫收其利而我实受弊奈何许之金主报豫自行始遣乌珠提兵黎阳以观衅豫于是以麟领东南道行台尚书令李邺行台右丞冯长宁行喜户部许清臣兵马大总管李成孔彦舟关师古为将籍民兵三十万分三道入寇麟总十路兵由寿春犯庐州猯率东路兵取紫荆山出涡口以犯定远西兵趋光州寇六安彦舟统之麟兵从淮西济众号十万次濠寿间江东安抚使张俊拒战诏并以淮西属俊命殿帅杨沂中至泗州与俊合刘光世亦还庐州与沂中相应统制王德邠琼出安丰遇贼三将军皆败之猯兵为世忠所阻乃率众犯定远欲趋宣化以寇建康沂中遇猯兵于越家坊破之又遇于藕塘大破之猯遁麟闻拔砦走金人闻麟等败诘豫罪状始有废豫意矣豫觉请立麟为太子以覘其意金人答豫曰徐当遣人咨访河南百姓七年豫遣谍纵火淮甸燔刘光世帑藏又焚镇江豫自麟败意沮气夺中原遗民日望官军三月帝驻建康而统制邠琼执吕祉杀之以兵三万叛降豫【按金史邠琼传作率步骑十余万降于齐而续通鉴亦作帅全军四万降刘豫并与此互异】豫授琼静难军节度使知拱州琼劝豫入寇豫复乞师于金金人恐豫兵众难制欲以计除之乃佯言琼降恐诈命散其兵遂以女真万户苏布为元帅府左都监屯太原渤海万户大托卜嘉为右都监屯河间令达兰乌珠伪称南侵至汴给麟出至武城麾骑擒之因驰入城豫方射讲武殿乌珠从三骑突进东华门下马执其手偕至宣德门强乘以羸马露刃夹之囚于金明池翼日集百官宣诏责豫废为蜀王以铁骑数千围宫门遣小校巡闾巷间扬言曰自今不佞汝为军不取汝免行钱为汝敲杀貌事人请汝旧主少帝来此由是人心稍安置行台尚书省于汴以张孝纯权行台左丞相伪丞相张昂知淄州李邺知代州李成孔彦舟邠琼关师古各予一郡以女真呼沙呼为汴京留守李侗副之诸军悉令归农听宫人出嫁豫求哀达兰曰昔赵氏少帝出京百姓然顶炼臂号立之声闻于远迩今汝废无一人怜汝者何不自责也豫语塞迫之行愿居相州韩琦宅许之后并其子麟徙于临潢封豫为曹王赐田以居之豫僭大号凡八年绍兴十三年卒

△苗傅【刘正彦】

苗傅上党人康王建元帅府信德守臣梁扬祖以兵万人至傅与张浚杨沂中田师中皆隶麾下隆佑太后南渡傅为统制官以所部八千人扈卫驻杭州刘正彦者不知何许人父法政和间为熙河路经略使死王事正彦由合门祇候易文资至朝奉大夫后以事责降会法部曲王

渊为御营都统制正彦归之渊荐于朝复知濠州擢御营右军副都统制渊分精兵三千与之以平丁进功进威州刺史赏薄缺望寻被命从六宫皇子至杭州建炎三年二月高宗从王渊议由镇江幸杭州时诸大将皆分守要害独苗傅扈从内侍省押班康履颇用事肆为暴横傅等恨之曰天子颠沛至此犹敢尔邪三月拜王渊同签书枢密院事众谓荐由内侍傅自负宿将疾渊骤贵正彦虽由渊进渊檄取所予兵亦怨之于是与王世修张逵王钧甫马柔吉等谋作乱钧甫等皆燕人所将号赤心军傅部分既定乃给渊以临安县有盗意欲吏渊出兵于外康履微知其谋以告渊渊伏兵天竺明日刘光世进殿前都指挥使百官入听宣制贼党伏兵城北桥下俟渊退朝诬以结宦官谋反正彦手杀渊以兵围履第分捕内官凡无须者尽杀之揭渊首引兵犯阙中军统制吴湛守宫门潜与傅通导其赏入奏曰苗傅不负国止为天子除害知杭州康允之见事急请帝御楼谕之傅见黄屋犹山呼而拜帝凭阑呼二贼问故傅厉声曰陛下信任中官军士有功者不赏私内侍者即得美官黄潜善汪伯彦误国犹未远窜王渊遇敌不战因交康履得除枢密臣立功多止作郡团练已斩渊首更乞斩康履蓝珪曾择以谢三军帝谕以当流海岛可与军士归营且曰已除傅承宣使御营都统制正彦观察使御营副都统制贼不退遂命吴湛捕履傅即楼下腰斩之傅犹肆恶言谓帝不当即大位渊圣来归可以处也帝使朱胜非绋楼下曲谕之傅请隆佑太后同听政及遣使与金议和帝许诺即下诏请太后垂帘贼闻诏不拜曰自有皇太子可立颜岐曰得太后亲谕之则无词矣时寒甚门无帘纬帝坐一竹椅既请太后即起立楹侧太后御肩舆出立楼前二贼请立皇子太后曰今强敌在外使吾一妇人抱三岁儿何以令天下正彦等号泣固请曰事久不决恐三军生变太后顾谓胜非曰相公何无一言胜非不能答傅等语益不逊太后还入门帝遣人奏禅位是日帝幸显宁寺 【按史传说作显忠去今据本纪及续通鉴改】 太后垂帘降赦号帝为睿圣仁孝皇帝以显宁寺为睿圣宫留内侍十五人余悉编置改元明受赦至平江府张浚知有变不拜江宁制置吕颐浩遗浚书痛述事变浚乃举兵御营前军统置张俊至平江浚谕以起兵俊泣奉命张浚遗书二凶奖其忠义以慰安之遣进士冯轡 【续通鉴及宋史纪事本末俱作布衣冯轡】 赴行在请帝亲总要务复抵书马柔吉王钧甫宜早反正以解天下之惑浚既遣轡即檄诸路约吕颐浩刘光世会平江傅以堂帖趋张浚赴秦州命赵哲领浚军哲不从改命陈思恭思恭亦不从以谏议大夫郑恂为御史中丞以武功大夫王彦为御营司统制恂面

折二凶彦佯狂致仕辛道宗谓张浚曰贼万一邀驾入海何以为计浚乃声言防遏海寇奏道宗为节制司参议官措置海船甲午贬曾择蓝珪于岭南傅追斩择贼欲以所部代禁卫守睿圣宫又欲邀帝幸徽越张征胜非曲谕止之韩世忠兵至浚分张俊兵二千益之发平江冯轡还平江浚复遣人责贼以大义谕以祸福傅等得浚书始悟见讨奏请诛浚诏责浚黄州团练使郴州安置郑恣上疏谓浚不当责密遣所亲谢向变姓名告浚宜持重缓进贼当自遁浚然之是日贼遣苗瑀马柔吉将兵驻临平以拒勤王之师浚得谪命恐将士解体给曰趋召之命也吕颐浩率兵至平江与浚传檄四方声傅正彦之罪丙午浚颐浩总中军发平江以韩世忠为前军张俊翼之刘光世分兵殿后贼亦遣兵三千屯湘州小林胜非召二凶至都堂议复辟率百官三上表以请夏四月帝还宫都人大悦帝御前殿诏尊太后曰隆佑皇太后立嗣君为皇太子徙传淮西制置使正彦副之复建炎号颐浩浚军次临平苗翊马柔吉以兵阻河韩世忠率先锋力战俊光世乘之翊败走勤王兵进北关二凶诣都堂取所赐铁券引精兵二千夜开涌金门遁颐浩浚引兵入城世忠手执王世修以属吏苗傅犯富阳统制官乔仲福追击之苗傅等又犯桐庐蔓延至白沙渡所过燔桥以阻官军犯寿昌县黥民充军犯衢州守臣胡唐老拒却之犯常山世忠请任讨贼为江浙制置使白衢信追击贼犯玉山县屯沙溪镇统制关师古自江东讨贼还与乔仲福王德会信州贼闻之还屯衢信间五月世忠发杭州贼党张翼斩钧甫及柔吉父子首以降江浙制置使周望受之以闻贼寇浦城县夹溪而屯据险设伏以邀官军统制官马彦博死之贼乘胜犯中军世忠瞋目大呼挥兵直前生擒正彦贼将江池擒苗翊降众悉解甲张逵收余兵入崇安乔仲福追杀之傅弃军变姓名夜遁建阳土豪詹标执送世忠槛车赴行在诏班师俘傅正彦以献磔于建康市张逵苗瑀及傅二子俱前死诏释余党

钦定续通志卷六百三十一

●钦定续通志卷六百三十二 逆臣传六

逆臣传

辽

○辽

耶律希达【德勒台】

耶律华格

萧翰

耶律瑠格【瑣都】

耶律察克

耶律德呼

耶律朗

耶

律隆科

耶律哈里

耶律迪里

萧孝先

耶律重元【尼嚕固】

萧格

萧呼图克

萧德勒岱

库

德 耶律撒喇苏 奚和勒博 萧塔拉

耶律希达 【德勒台】

耶律华格

萧翰

耶律瑠格 【瑣都】

耶律察克

耶律德呼

耶律朗

耶律隆科

耶律哈里

耶律迪里

萧孝先

耶律重元 【尼嚕固】

萧格

萧呼图克

萧德勒岱

库德

耶律撒喇苏

奚和勒博

萧塔拉

△耶律希达 【德勒台】

耶律希达字尼嚕袞 【原文涅烈袞按太祖纪诸弟谋乱时无希达有涅里袞盖以字称而字小异耳】 肃祖孙额尔奇木塔喇之子幼

黠而辩时险佞者多附之约尼哈陶津汗时异母兄阿古齐为德呼勒部额尔奇木故事为额尔奇木者得行再生礼阿古齐方就帐易服希达

遂取红袍貂蝉冠乘白马而出乃令党人大呼曰额尔奇木出矣众皆罗拜因行柴册礼自立为额尔奇木与裕悦耶律实鲁同知国政及实鲁

遇害希达惧人图己挈其二子德勒台朔格奔渤海伪为失明后因球马之会与二子夺良马奔归国益为奸恶常以巧辞获免太祖将即位让

希达希达曰皇帝圣人由天所命臣岂敢当太祖命为裕悦及自将代西南诸部希达诱埒克等乱不从者杀之车驾还至赤水城希达惧与埒

克俱北走至榆河为追兵所获太祖问曰朕初即位尝以国让叔父辞之今反欲立吾弟何也希达对曰始臣不知天子之贵及陛下即位卫从

甚严与凡庶不同臣尝奏事心动始有窥觊之意度陛下英武必不可取诸弟懦弱得则

易图也事若成岂容诸弟乎太祖谓诸弟曰汝辈乃从斯人之言也德呼勒曰谋大事者须用如此人事成亦必去之希达不复对囚数月缢杀之将刑太祖谓曰叔父罪当死朕不敢赦事有便国者宜悉言之希达曰德呼勒部人众势强故多为乱宜分为二以弱其势子德勒台字海兰有膂力善驰射马蹏不仆尤神于医视人疾若隔纱覩物莫不悉见太祖在潜己加眷遇及即位拜德呼勒部额尔奇木太祖尝思鹿醢解醒以山林所有问能取者德勒台曰臣能得之乘内厩马逐鹿射其一欲复射马跌而毙德勒台跃而前弓犹不弛复获其一帝甚欢曰吾弟万人敌会帝患心痛召德勒台视之德勒台曰膏盲有瘀血如弹丸然药不能及必针而后愈帝从之呕出瘀血痛止帝以其亲每加赐赉然知其为人未尝任以职以从埒克乱与其父希达俱缢杀之

△耶律华格

耶律华格字萨兰隋国王实鲁之子性阴险初烝其父妾惧事彰与克萧特顺等共害其父归咎特顺华格获免太祖即位务广恩施虽知华格凶逆姑示念忍授以特里袞六年华格预诸弟之乱事平羣臣议其罪皆谓华格不可释于是与其子罕扎俱凌迟而死

△萧翰

萧翰一名迪里字哈准宰相达鲁之子天赞初唐兵围镇州节度使张文礼遣使告急翰受诏与康末怛往救支之杀其将李嗣昭拔石城会同初领汉军侍卫八年伐晋败晋将杜重威追至望都翰奏曰可令军下马而射帝从其言军士步进敌人持短兵猝至军失利帝悔之曰此吾用言之过及从驾入汴为宣武军节度使帝崩栾城世宗即位翰闻之委事于李从敏

【通鉴作唐明宗子许王李从益】 径趋行在是年

秋世宗与皇太后相拒于潢河横渡和议未定太后问翰曰汝何怨而叛对曰臣母无罪太后杀之以此不能无憾初耶律乌珍以附太后救囚翰闻而快之即囚所谓曰汝尝言我辈不及今在狴犴何也对曰第愿公不至如此翰默然天祿二年尚帝妹额伯哩后与天德谋反下狱复结特哩袞瑠格及其弟瑣都乱耶律实喇告乌珍乌珍遽入奏之翰等不伏帝不欲发其事乌珍固诤以为不可乃诏乌珍鞫案翰伏辜帝竟释之复与公主以书结安图反乌珍得其书以奏伏诛

△耶律瑠格 【瑣都】

耶律瑠格字明隐太祖兄伊德实之子幼骄很好陵侮人长益凶狡太宗恶之使守边徼累迁西南边大详袞会同十年叔父安图从帝伐晋以病先归与瑠格邻居世宗立于军中安图议所往瑠格首建附世宗之策以本部兵

助之时太后命皇太弟鲁呼率兵而南瑠格安图遇于泰德泉既接战安图坠马王子大德驰至欲以枪刺之瑠格以身卫安图射天德贯甲不及卢安图得马复战太弟兵败瑠格与安图朝于行在及和议成太后问瑠格曰汝何怨而叛对曰臣父无罪太后杀之以此怨耳事平以功为特哩袞天禄中与其弟瑊都王子天德侍卫萧翰谋反耶律实喇发其事瑠格以饰辞免后请帝博欲因进酒弑逆帝觉之不果被囚一曰召瑠格锁项以博帝问汝实反耶律瑠格誓曰臣若有反心必生千顶疽死遂贯之耶律乌珍固诤以为罪在不赦帝命乌珍按之具服诏免死流乌尔固部果以千顶疽死弟瑊都残忍多力卢若蛇皮天禄初以族属为皮室详袞二年与兄瑠格谋反免死使于哈噶斯国既还复预察克之乱凌迟而死异母弟二人浩里锡勒戡应历初无职任以族子甚见优礼三年或告浩里锡勒戡与卫王完谋逆下狱饰辞获免四年春复反伏诛

△耶律察克

耶律察克字乌辛明王安图之子善骑射貌恭而心狡人以为懦太祖曰此凶顽非懦也其父安图尝使奏事太祖谓近侍曰此子目若风驼面有反相朕若独居无令入门世宗即位于镇阳安图闻之欲持两端察克曰太弟忌刻若果立岂容我辈永康王宽厚且与瑠格相善宜往与计安图即与瑠格谋归世宗及和议成以功封泰宁王会安图为西南面大详袞察克佯为父恶阴遣人白于帝即召之既至帝前泣诉不胜哀帝悯之使领钮祜禄军出入禁中数被恩遇帝每出猎察克托手疾不操弓矢但执炼锤驰走屡以家之细事闻于帝以为诚察克以诸族属杂处不克逞渐徙庐帐迫于行宫右皮室详袞耶律乌珍察其奸邪表列其状帝不信以表示察克察克称乌珍疾已哽咽流涕他日乌珍又请于帝帝曰察克舍父事我可保无他乌珍曰察克于父既不孝于君安能忠帝不纳天禄五年七月帝幸太液谷留饮三日察克谋乱不果帝伐周至尚和山太后与帝祭文献皇帝于行宫羣臣皆醉察克归见寿安王邀与语王弗从察克以谋告耶律瑊都瑊都从之是夕同率兵入弑太后及帝因僭位号百官不从者执其家属至夜阅内府物见码碯盃曰此希世宝今为我有诧于其妻妻曰寿安王乌珍在吾属无噍类此物何益察克曰寿安年幼乌珍不过自变量奴诘旦来朝固不足忧其党珊尼森报寿安乌珍以兵围于外察克遣人弑皇后于枢前仓惶出阵寿安遣人谕曰汝等既行弑逆复将若何有额尔奇木和卓委兵归寿安王余众望之徐徐而往察克知其不济乃系羣官家属执弓矢胁曰无过杀此曹尔叱令速出时林牙耶律迪里亦在系中进曰不有所废寿安王何以兴藉此为辞犹

可以免察克曰诚如公言谁当使者迪里请与雅斯哈同往说之察克从其计寿安王复令迪里诱察克杀之诸子皆伏诛

△耶律德呼

耶律德呼字苏兰六院额尔奇木巴固齐之后天显中为中台省右相会同二年与赵思温持节册晋帝及伐晋至滹沱河降晋将杜重威德呼功居多大同元年平相州之叛斩首数万级世宗即位遣使驰报仍命德呼执偏将珠展以来其使误入珠展营珠展得诏反诱德呼执送太后德呼亡归世宗和约既成封燕王为南京留守天禄五年察克弑逆德呼方醉其妻扶入察克之幕因从之明旦寿安王讨乱凡胁从者皆弃兵降德呼不降凌迟而死妻子皆诛

△耶律朗

耶律朗字乌逊季父房阿古齐之孙性轻佻多力人呼为霍斯天显闲以材勇进每战辄克由是得名会同九年太宗入汴命知澶渊控扼河渡天禄元年燕赵以南皆应刘知远朗与汴守萧翰弃城归关先是朗祖阿古齐为其弟希达诈取额尔奇木自是族中无任六院职事者世宗不悉其事以朗为六院大王及察克作乱遣人报朗曰事成矣朗遣详袞萧呼哩以所部军往命曰当持两端助其胜者穆宗即位伏诛籍其家属

△耶律隆科

耶律隆科字密逊文献皇帝之子天禄五年遥授武定军节度使及察克作乱穆宗与乌珍从林牙迪里计诱而出之隆科手刃察克改南京留守【按穆宗纪隆科谋逆时为政事令】穆宗沈湎不恤政事隆科有覬觐之心诱迪里及羣不逞谋逆事觉按问不服帝曰朕为寿安王时卿数以此事说我今日岂有虚乎隆科不能对及余党皆服遂缢于可汗州西谷诏有司择绝后之地以葬

△耶律哈里

耶律哈里字铎袞隋国王宝鲁之庶子机警口辩会同五年诏求直言时哈里年十八衣羊裘乘牛诣阙有司问曰汝何故来对曰应诏言事苟不以贫稚见遗亦可备直言之选有司以闻会帝将出猎使谓曰俟吾还则见之哈里曰臣以陛下急于求贤是以来耳今反缓于猎请从此归帝闻即召见赐坐问以治道命明王安图与耶律伯特试之数曰安图等奏曰哈里之材臣等所不及帝召哈里问曰与汝言者何如人也对曰安图言无收检若空车走峻坂伯特如着靴行旷野射搗帝大笑擢宣徽使屡任以事帝知其贫以金器赐之哈里即散于亲友后从帝伐

晋有功世宗即位于军中皇太后以兵逆于潢河横渡太后遣耶律乌珍责世宗自立乌珍至帝前谕旨不屈世宗遣哈里对亦不逊且命之曰汝见乌珍勿惧哈里见太后还不称旨既和领太后诸局事穆宗即位与冀王迪里谋反死狱中

△耶律迪里

耶律迪里字乌纳六院额尔奇木卓巴勒之子少多诈世宗即位为羣牧都林牙察克谋乱官僚多被囚系及事败诣囚所持弓矢胁曰悉杀此曹迪里曰杀何益于事窃科乌珍将立寿安王故为此举且寿安未必知若遣人藉此为辞庶可免察克曰如公言谁可使者迪里曰大王若不疑迪里请与雅斯哈同往说之察克遣之寿安王用迪里计诱杀察克凡被胁之人无一被害者皆迪里之力乱既平帝嘉当然未显用迪里失望居常怏怏结羣不逞阴怀不轨应历二年与其党谋立隆科事觉凌迟死

△萧孝先

萧孝先字延宁小字哈里北院枢密使孝穆之弟统和十八年补祗候郎君尚南阳公主拜驸马都尉开泰五年为国舅详袞南京统军使太平三年为汉人行宫都部署寻加太子太傅五年迁上京留守以母老求侍复为国舅详袞改东京留守会大延琳反被围数月穴地而出延琳平留守上京十一年帝不豫钦哀召孝先总禁卫事兴宗谅阴钦哀弑仁德皇后孝先与萧珠卜萧必塔等谋居多及钦哀摄政遥授天平军节度使加守司徒兼政事令重熙初封楚王为北院枢密使孝先以椒房亲为太后所重在枢府好恶自恣权倾人主朝多侧目二年【兴宗纪及钦哀皇后传俱作三年】太后与孝先谋废立帝知之勒卫兵出宫召孝先至谕以废太后意孝先震慑不能对迁太后于庆州孝先恒郁郁不乐四年徙晋王后为南京留守卒【按孝先原入列传今移入逆臣】

△耶律重元【尼嚕固】

耶律重元【契丹国志作宗元】小字布济吉尔圣宗次子材勇绝人眉目秀朗寡言笑人望而畏太平三年封秦国王圣宗崩钦哀皇后称制密谋立重元重元以所谋白于帝帝益重之封皇太弟历北院枢密使为南京留守知元帅府事重元处戎职未尝离辇下先是契丹人犯法例须汉人禁勘受枉者多重元奏请五京各置契丹警巡使诏从之赐以金券誓书道宗即位册为皇太叔免拜不名炙天下兵马大元帅复赐金券四顶帽二色袍尊宠所未有清宁九年车驾猎滦水与其子尼嚕固【契丹国志作洪孝】及同党诱胁弩手军为乱阵于帷宫外将战其党多悔过效顺各自奔溃重元知夫计北走大漠叹曰尼嚕固使我至此遂自杀

先是重元将起兵帐前雨赤如血识者谓败亡之兆子

尼嚕固小字伊嚕斡性阴狠兴宗一见谓曰此子目有反相重熙十一年封安定郡王十七年进王楚为特哩袞清宁二年 【道宗纪作三年

】 出为武定军节度使七年知南院枢密使事说其父重元诈病俟事驾临问因行弑逆九年秋猎帝用耶律良之计遣人急召尼嚕固尼嚕固知事泄遽拥兵犯行宫南院枢密使许王仁先等率宿卫士讨之尼嚕固跃马突出为近侍详袞渤海阿苏护卫苏射杀之

△萧格

萧格小字华格字和多沁国舅房林牙华善之子警悟多智数太平初累迁官职游近习闲以谀悦相比昵为流辈所称由是名达于帝重熙初拜北面林牙十二年为北院枢密副使明年拜北府宰相十五年改同知北院枢密事格怙宠专权同僚具位而已时伊勒希巴耶律义先知格奸佞因侍燕言格所短用之将败事帝不听一日帝令义先对格巡擲义先不肯至詈之为贼帝怒格反为解之语详义先传帝以格犯而不校眷遇益厚其矫情媚上多此类拜南院枢密使诏班诸王上封吴王改知北院进王郑兼中书令帝大渐诏格曰大位不可一日旷朕若弗寤宜即令燕赵国王嗣位清宁元年复为南院枢密使更王楚复徙北院与国舅萧阿拉同掌朝政格多私挠阿拉每裁正之由是有隙出阿拉为东京留守会南郊阿拉以例赴阙帝访羣臣以时务阿拉陈利害言甚激切格伺帝意不悦因譖曰阿拉特宠有慢上心非臣子礼帝不怒缢阿拉于殿下后帝知格奸计宠遇渐衰八年致仕封郑国王九月秋格以其子为重元壻格预其谋凌迟杀之

△萧呼图克

萧呼图克字伊逊口吃视斜发鬢伯父孝穆见之曰是儿状貌族中未尝有及壮魁倍桀敖多扬人恶重熙中为祇候郎君俄迁兴圣宫使尚秦国长公主授驸马都尉以不谐离婚复尚齐国公主为北面林牙清宁中历北南院枢密副使伐族兄珠展为西北路招讨使时萧格与萧阿拉俱为枢密使不协格以珠展为阿拉所爱嫉之珠展受代赴阙先尝借官粟留直而去呼图克希格意发其事珠展因得罪呼图克岁时献遣珍玩畜产于格二人相爱过于兄弟呼图克族弟迪里为北克荐国舅详袞萧呼敦于呼图克呼图克见其辩给壮勇倾心交结每遇休沐言论终日人皆怪之会呼图克同知北院枢密事奏呼敦及迪里可用帝以迪里为旗鼓伊喇详袞呼敦为宿直官及格构陷其兄阿拉呼敦阴为之助时人丑之耶律伊逊知北院枢密事呼图克位在伊逊下意怏怏不平呼图克遂与

重元尼嚕图谋逆尼嚕固既毙其党谓呼图克等曰我军甚众乘其无备中夜决战事冀有成若至明曰其谁从我呼图克曰仓卒中黑白不辨若内外军相应则吾事去矣黎明而发何迟之有是夜重元僭位号呼图克自为枢密使明日战败呼图克被创单骑遁走至十七滦投水死五子同日伏诛

△萧德勒岱

萧德勒岱字和多沁国舅少父房之后父双库尚图努公主仕至国舅详卫勒德勒岱幼警敏不羈好射猎太平中以外戚补祗候郎君历延昌宫使殿前副点检重熙十三年伐夏德勒岱将偏师首入敌境多所俘掠迁都点检改乌尔古德呼勒部都详袞十八年再举西伐德勒岱奏军马器械之事务在选将夏人岂为难制但严设斥堠不用掩袭计何虑不胜帝曰卿其速行无后军斯既而德勒岱失利还复为都点检十九年夏人来侵金肃军帝遣德勒岱率轻兵督战至河南三角川斩候者八人擒观察使以功命知汉人行宫都部署事出为西南面招讨使族弟呼喇巴家奴告其主私议官掖事德勒岱寝之事觉决大杖削爵为民清宁中帝以所坐事非德勒岱所犯起为南京统军使至是从重元子尼嚕固等乱败走被擒伏诛

△库德

库德本宫分人不知姓氏好戏狎不喜绳检膂力过人善击鞠重熙初为护卫厯宿直官十三年西征为先锋夏人伏兵掩之库德力战麾下士多歿乃单骑突出遇夏王李元昊来围势甚急库德驰射应弦辄仆跃马直击中坚夏兵不能当晡乃还营改兴圣宫太保清宁九年从重元尼嚕固乱与扈从兵战败而遁追擒之凌迟而死

△耶律撒喇苏

耶律撒喇苏孟父房迪里之孙性凶暴清宁中累迁宣徽使改殿前都点检首与重元谋乱会帝猎滦河重元恐事泄与扈从军仓卒而战撒喇苏适在畋所闻乱劫猎夫以援既至知尼嚕固已死大悔恨之谓曰我辈惟有死战胡为若儿戏自取殒灭今行宫无备乘夜劫之大事可济若俟明旦彼将有备安知我众不携贰一失机会悔将奚及重元不从迟明投杖而走撒喇苏战死

△奚和勒博

奚和勒博一名斡【原文作翰按天祚纪及宋史纲目诸书俱作斡今改】字绥兰奚王特哩之后善骑射趯捷而勇与其兄必埒哩齐名大安中车驾幸中京补护卫稍迁铁鹞军详袞天庆闲徙北女真详袞兼知咸州路兵

马事改东京统军既而诸蕃入寇悉破之迁奚六部大王兼总知东路兵马事保大二年金兵至天祚播迁知勒博率吏民立秦晋国王淳为帝

【按金史和勒博传初以所部降金后遯归辽本传

未载谨附识】 伪署知北院枢密事兼诸军都统屡败宋兵淳死其妻普贤女摄事金兵由居庸关入明年 【辽史原作是年今据本纪及续

通鉴改】 和勒博郎箭笥山自立号奚国皇帝改元天复设奚汉渤海三枢密院改东西节度使为二王分司建官时奚人巴斋韩嘉努等引兵

击附近契丹部落劫掠人畜羣情大骇会和勒博为郭药师所败一军离心其党耶律阿固齐与其甥伊寔巴沁等杀之伪立凡八月

△萧塔拉

萧塔拉字额都温约尼文汗宫分人干统中入宿卫出为顺义军节度使天庆四年同知咸州路兵马事五年以兵败夺节度使保大元年

迁威部节度使及天祚在山西集羣牧兵特烈为副统军闻金兵将至塔拉谕士卒以君臣之义死战于实纳图金兵不战塔拉伺闲欲攻之天

祚喜甚召嫔御诸子登高同观将谔之金兵望日月旗知天祚在其下以劲兵直趋奋击无敢当者天祚遁走塔拉所至招集散亡寻为中军都

统复败于梯巳山天祚决意渡河奔夏从臣切谏不听人情惶惧不知所为塔拉阴谓耶律乌哲曰事势如此亿兆离心不早为计奈社稷何遂

共劫梁王雅里奔西北诸部伪立为帝塔拉自为枢密使雅里卒欲择可立者会耶律乌哲言珠拉才德纯备兼兴宗之孙众皆曰可遂僭立焉

塔拉伪职如故未三旬与珠拉俱为乱兵所杀

钦定续通志卷六百三十二

●钦定续通志卷六百三十三 逆臣传七

逆臣传

金

○金

秉德

唐古辩

乌达

大兴国

图克坦额呼楚克

布萨思恭

图克坦贞

李老僧

完颜元宜

赫舍哩执中

崔立

秉德

唐古辩

乌达

大兴国

图克坦额呼楚克

布萨思恭
图克坦贞
李老僧
完颜元宜
赫舍哩执中
崔立
△秉德

秉德本名伊逊秦王宗翰孙也累拜参知政事皇统八年拜平章政事与左司郎中萨哈主议徙辽阳渤海人屯燕南近侍高寿星在徙中诉于悼后后白帝帝怒杖秉德而杀萨哈时悼后干政继嗣未立帝无聊屡杀宗室捶辱大臣秉德怀忿谋废立九年十二月九月遂与唐古辩乌达乌尔图额呼楚克大兴国李老僧塔斯弑熙宗于寝殿秉德初意不在海陵已弑熙宗未有所属乌尔图奉海陵坐秉德等皆拜称万岁海陵以是衔之既立进左丞相兼侍中左副元帅封萧王赐铁券久之为乌达所潜出领行台尚书省事海陵欲除太宗诸子并除秉德乌达因言秉德与宗本谋反状海陵遣使杀秉德以家财尽赐乌达

△唐古辩

唐古辩本名翁鄂罗尚熙宗女代国公主累官参知政事尚书左丞与右丞相秉德谋废立十二月九月代国公主为其母悼后作佛事居寺中故海陵秉德等俱会于辩家至夜辩等以刀藏衣下相随入宫门者以辩驸马不疑皆内之至殿门直宿护卫觉之辩举刀呵之使无动既弑熙宗立海陵辩为尚书右丞相兼中书令封王赐铁券进拜左丞相初辩与海陵谋逆辩尝言其家奴多可用者海陵固已怀之及行弑之夕会于辩家设饌众皆恇惧不能食辩独饱食自若海陵由此畏忌之及即位尝与辩观太祖画像海陵指示辩曰此眼与尔相似辩色动海陵亦色动由是疑忌益深及与萧裕谋致宗本罪并致辩即杀之

△乌达

乌达阿里布子秉德唐古辩谋废立乌达即诣海陵启之遂与俱弑熙宗海陵即位拜平章政事封许国王赐铁券并如其党妻唐古氏旧与海陵通秉德尝对熙宗斥其事乌达衔之未发也时海陵多忌会有疾少闲乌达遂诬奏秉德有指斥语杀之以秉德世袭明安穆昆授乌达乌达与宗本有亲海陵以乌达告秉德事故宗本之祸乌达独免进司空左丞相兼侍中居数月乌达早朝以曰阴晦将雨意海陵不视朝先趋出朝百官皆随之去已而海陵慕唐古氏容色因侍婢来候问起居许立为后使杀乌达

纳唐古氏于宫中封贵妃

△大兴国

大兴国事熙宗为寝殿实达尔最见亲信每逮夜就寝兴国时从主者取符钥归家主者即付之听其出入以为常皇统九年海陵生日熙宗使兴国以宋司马光画像及他珍翫赐海陵悼后亦以物附赐熙宗不悦杖兴国一百海陵谋弑意先得兴国乃可伺闲入宫因李老僧结兴国召至卧内动以危言兴国兴约定至期取符钥开门矫诏召海陵入遂行弑海陵既立以为广宁尹赐铁券进金紫光禄大夫改崇义军节度使赐名邦基再授绛赐武宁节度使改河闲尹世宗即位废于家后磔于思陵之侧

△图克坦额呼楚克

图克坦额呼楚克会宁人徙懿州与布萨呼图俱为护卫十人长海陵将弑用宗欲得二人为内应许以女妻额呼楚克子而告以遂谋额呼楚克喜甚曰阿家此言何晚也主上不能保天下人望所属惟在阿家今日之谋乃我素志遂与呼图俱以十二月九日直禁中熙宗之弑额呼楚克先进刃呼图次之海陵既立以为右副点检子珠苏尔尚荣国公主天德二年为河闲尹世袭明安改太原尹封王自谓有佐立功受铁券凶很益甚奴视僚属尝问休咎于卜者高鼎遂以鼎所占问张王乞王乞谓当有天命复以王乞语告鼎鼎上变额呼楚克伏诛使珠苏尔焚其尸投骨水中

△布萨思恭

布萨思恭本名呼图上京人本微贱宗干尝周恤之擢宿卫十人长海陵谋逆谓之曰我有一言欲告君久矣恐泄于人未敢也呼图曰肌肉之外皆先太师所赐苟有补于国王死不敢辞海陵曰主上失道吾将行废立事必得君为助乃可呼图许之十二月九日夜直宿海陵因之入宫至寝殿熙宗闻步履声咄之众皆却立不敢动呼图曰事至此不进得乎乃相与排闥入既弑熙宗秉德等尚未有所属呼图曰始者议立平章今复何疑乃奉海陵坐众称万岁遂召曹国王宗敏至即使呼图杀之既即位赐铁券转都点检改名思恭封正拜枢密使进右丞相太尉赐汴京第一区邻宁德宫时时入见图克坦太后契丹萨巴反命与萧怀忠北伐入辞太后语久之海陵疑与太后有异谋是时萨巴闻大军且至乃谋归大石沿龙驹河西去思恭至临潢追之不及海陵使枢密副使白彦敬等讨萨巴召思恭还至则戮于市遂族灭之

△图克坦贞

图克坦贞本名塔斯娶海陵女弟与海陵俱弑熙宗海陵既立封贞妻平阳长公主

贞为驸马都尉殿前都点检兼太子少保封王改大兴
尹正隆二年迁枢密副使海陵将伐宋诏朝官除三国人使宴饮其余饮酒者死六年正月立春节益都尹京安武节度使爽金吾上将军阿苏
饮于贞第海陵召贞责之杖七十贬安武军节度使京等三人各杖一百皆贬降无何拜贞御史大夫为左监军从伐宋海陵死北还见世宗于
中都诏以贞女为皇太子妃除贞威平尹贪污不法累赃巨万使大理卿李国图鞫之贞即引伏降博州防御使顷之迁震武节度使徙临潢尹
初与弑熙宗凡九人至是贞与大兴国尚在世宗虑久远终不以私恩曲庇久之诏诛贞及妻与二子而宥其诸孙俄而兴国亦诛皇统逆党尽
矣章宗即位尊母皇太子妃为皇太后赠贞太师广平郡王谥庄简贞妻进封梁国公主
△李老僧

李老僧与大兴国有亲海陵秉政以为省令史使结兴国终成弑逆海陵既立以为同知广宁尹事海陵欲杀韩王亨求其罪不可得以亨
为广宁尹使老僧伺察之亨常与老僧博待之甚厚老僧不忍致亨死海陵促老僧老僧乃与亨家奴禄锦诬亨杀之海陵以老僧于亨有迟回
意降易州刺史久之迁同知大兴尹赐名惟忠改延安府同知大定二年与兵部尚书克实谋反诛

△完颜元宜

完颜元宜本名阿里姓耶律氏便骑射善击球皇统元年充护卫累迁符宝郎海陵篡立为兵部尚书正隆六年代宋领神武军都总管前
锋渡淮拔昭关至和州宋兵十万来拒元宜麾军力战宋人乘夜袭营元宜击走之黎明追及宋兵斩首数万迁银青光禄大夫领浙西路都统
制督诸军渡江时世宗已即位于辽阳海陵军令惨急众欲亡归决计于元宜明安唐古乌页曰前阻淮渡皆成擒矣比闻新天子即位不若共
行大事然后举军北还 【按大金国志载总管万载首倡逆谋与此异】 元宜曰待王祥至谋之王祥者元宜子为骁骑副都指挥使在别军
密召之至约诘旦卫军番代即行事元宜先欺其众曰有令尔辈皆去马诘旦渡江众皆惧乃以举事告之皆许诺十月乙未黎明元宜王祥与
武胜军都总管图克旦守素明安唐古乌页穆昆干喇布罗索温都长寿等率众犯御营海陵闻乱以为宋兵奄至揽衣遽起箭入帐中取视之
愕然曰乃我兵也大庆善曰事急矣当出避之海陵曰走将安往方取弓中箭仆地延安少尹纳哈塔干喇布先刃之手足犹动遂缢杀之焚其
尸收李通大庆善等皆杀之元宜行左领军副大都督事使使杀皇太子光英于南京大军北还大定二年春入见拜御史大夫进平章政事封

冀国公往泰州路规措讨契丹事元宜使忠勇校尉李荣招干罕干罕杀荣诏追赠荣官契丹平元宜还朝久之罢为东京留守致仕卒

△赫舍哩执中

赫舍哩执中本名呼沙呼阿万裔孙明昌中为右副点检肆傲不奉职降肇州防御使累迁开远军节度使俄知大名府事承安二年召为签枢密院事从左丞相襄征伐不欲行奏曰臣与襄大隙且杀臣矣帝怒其言不逊下有司赦为永定军节度使坐夺部军马解职泰和元年起知大兴府事御史中丞孟铸奏弹执中贪残专恣不奉法令释罪之后累过不悛既蒙恩贷转生跋扈改武卫军都指挥使六年伐宋执中为山东两路兵马都统驻金城胸山宋兵犯金城遣巡检周奴穆昆萨哈合击大破之执中率兵二万出清口宋以步骑万余列南岸战舰百艘拒上流相持累日执中以舟兵二千搏战遗副统伊喇固尼率精骑四千自下流径渡宋兵望骑兵登南岸水陵俱溃遂克淮阴进围楚州迁元帅左监军宋人请和诏罢兵除西京留守大安元年授世袭穆昆出知太平府复守西京与元兵战于安定北薄暮先以麾下遯去众遂溃行次蔚州擅取官库银币夺官民马与从行私人入紫荆关杖杀涑水令至中都朝廷皆不问迁右副元帅权尚书左丞执中益无忌惮自请步骑二万屯宣德州与三千令驻妨川崇庆元年乞移屯南口移文尚书省言元兵来必不能支十二关建春万宁宫且不保朝廷恶其言下有司按问诏数其十五罪罢归田里明年复召至谏议张行信丞相图克坦镒参政■〈王堂〉奏其奸恶不可用执中善结近幸交口称誉诏给留守半俸预议军事行信复谏帝终以执中为右副元帅【本传原作权右副元帅按本纪云复起为右副元帅今据改】将武卫军五千人屯中都城北执中乃与其党谋作乱时元兵在近执中止务驰猎不恤军事帝使奉职即军中责问方饲鹞怒掷杀之遂遣人召城北别将福海至执之八月二十五日未五更分军由彰义门入自将一军由通元门入【通元二字原文倒误今据地理志改正】召知大兴府图克坦南平及其子刑部侍郎默呼杀之符宝祗候珊延护卫十人长完颜实古纳【本纪作都统实古纳】闻乱率众与战皆死之执中至东华门呼门者许以官不应命聚薪焚东华门护卫实呼奇尔亲军春山拱掎鏊开门执中入宫尽以其党易宿卫自称监国都元帅居大兴府陈兵自卫急召都转运使孙椿年取银币赏将士以兵逼帝出居卫邸杀左丞完颜纲图克坦镒劝立宣宗不得已许之召符宝郎图克坦福寿取符宝陈于大兴府露阶上盗用御宝出制除其党完颜酬努乌库哩道拉富察禄锦图克坦金寿等官数十人

虽除外官皆留之左右遣奉御完颜和色哩迎宣宗于彰德使宦者李思忠杀帝于卫邸尽撤沿边诸军赴中都平州骑兵屯蓟州以自重边戍皆不守矣九月甲辰宣宗即位执中自为太师封泽王

【谨按通鉴辑览 御批金史载宣宗即位拜执中太师封泽王考执中跋扈专恣念出惟己晋爵增秩岂由上命泽王之封固所自为宣宗亦从其志耳故书曰呼沙呼自为太师封泽王今谨遵改正】授中都路世袭明安弟特默子准并进官余党升授有差执中侍朝赐之坐不辞奏请降卫绍王为庶人奏再上诏百官议于朝堂太子少傅鄂屯忠孝侍读学士富察思忠附执中议众相视莫敢言独文学田延芳奋然曰先朝素无失德尊号在礼不当削于是从之者礼部张敬甫谏议张信甫户部武文伯庞才卿舒穆鲁晋卿等二十四人宣宗曰朕徐思之数日诏降为东海郡侯元游骑至高桥宰臣以闻宣宗使人问执中执中曰计划已定提点近侍局庆善努副使惟弼奉御惟康请除执中宣宗不许珠格高琪以战败惧执中诛已颇闻庆善努诸人谋遂率所将乱军入中都围执中第斩之持首诣阙待罪赦以为右副元帅既以谏议张行信言下诏暴执中过恶削其官爵

△崔立

崔立将陵人少贫无行尝为寺僧负钹鼓乘兵乱从上党公开为都统提控天兴元年冬十二月帝亲出师授西面元帅性淫妓常思乱以快其欲二年正月遂与其党富珠哩长格韩铎药安国等为变帅甲卒撞省门入杀副枢纳绅参政阿巴驰往东华门道遇点检温都阿里见其衷甲亦杀之即谕百姓曰吾为二相闭门无谋今杀之为汝一城生灵请命众皆称快是日御史大夫费摩阿古岱谏议大夫左右司郎中乌克逊纳绅左副点检完颜阿萨尔奉御莽格讲议富察琦户部尚书完颜珠赫皆死立还省集百官议以太后命召梁王监国遂遣送二相所佩虎符诣元帅苏布特纳款自称太师军马都元帅尚书令郑王出入御乘舆称其妻为王妃弟倚为平章政事侃为殿前都点检其党富珠哩长格等授官有差苏布特至青城立服御衣仪卫往见之既还托以军前索随驾官吏家属聚省中乱之迁梁王及宗室近族置宫中限其出入以荆王府为私第取内府珍玩实之又括在城金银搜索讯掠惨酷备至郕国夫人死杖下博索夫人右丞李蹊妻子皆被掠死人人窃相谓曰攻城之后七八日诸门出葬者计百余万人恨不早预其数而值此不幸也立时与其妻入宫因讽太后作书陈天时人事遣皇乳母招归德冒进之徒争援刘齐故事以冀非分三月以两宫梁王荆王及诸宗室皆赴青城北行元兵入城

立时在城外兵先入家取其妻妾宝玉以出立归大恸
无如之何宝坻人李伯渊本安平都尉司千户深沈有谋每愤立不道欲使义杀之与都
尉李琦等合谋三年六月甲午传近境有宋军伯渊等
阳与立谋备御之策翌日晚烧外封邱门以警动立一夕百卧起比明伯渊等约视火
立从数骑往还及梳行街伯渊就马上抱立即出匕首
横刺之坠马死伯渊系立尸马尾至内前号于众曰立杀害劫夺烝淫暴虐大逆不道古
今无有当杀之不万口齐应曰寸斩之未称也乃梟首
望承天门祭哀宗军民皆恸或剖其心生噉之遂籍其家以其妻王花儿赐丞相镇海帐
下士 【按崔立原归列傅今改入逆臣】

钦定续通志卷六百三十三

●钦定续通志卷六百三十四 逆臣传八

逆臣传

元

○元

特克实 博罗特穆尔

特克实

博罗特穆尔

△特克实

特克实故丞相特们德尔义子也当英宗初即位由翰林学士丞旨为宣徽太医二
院使至治元年特授御史大夫佩金虎符领忠翊侍卫
亲军都指挥使依前太医院使如故既又命领左右阿苏卫军治书侍御史索诺木者特
们德尔子也先以罪罢特克实请复其官帝不许巴尔
济苏亦特们德尔子曾受司徒刘夔赂夔以罪诛而巴尔济苏亦弃市时特们德尔既死
罪恶日彰帝任拜珠为右相思欲振立纪纲以建贤退
不肖为急务特克实以奸党不自安潜蓄异图三年秋八月帝自上都还驻蹕南坡是夕
特克实与知枢密院事额森特穆尔诸王额特布哈等
以特克实所领阿苏卫兵为外应杀右丞相拜珠特克实直犯行幄手弑帝于卧所九月
四日晋王即位特克实及其赏皆伏诛

△博罗特穆尔

博罗特穆尔河南行省丞相达实巴图尔子也从父讨贼屡立战功语具父传父歿
博罗特穆尔引兵退驻井陘口顺帝至正十八年命为
河南行省平章事总其父军击走刘福通于卫辉进克濮州复曹州诏移镇大同为京师
捍蔽置大都督兵农司分十道专理屯田命博罗特穆
尔领之二十年除中书平章事先是有察罕特穆尔者奋义起兵沈邛踰太行复关陕以

功拜河南行省平章与达实巴图尔名位不相下 【

先是以下据察罕特穆尔传增】 至是朝命博啰特穆尔守石岭关以北察罕特穆尔守石岭关以南时山西晋冀地皆察罕特穆尔故所平定

博啰特穆尔既驻大同欲涎吞晋冀遣兵围冀宁三日复退屯交城察罕特穆尔以兵来争博啰特穆尔败之帝遣平章达实特穆尔往谕令和

解始罢兵各守分地二十二年博啰特穆尔募兵五万增戍大同帝嘉其忠拜太尉中书平章位第一是岁察罕特穆尔为叛将田丰王士诚刺

死义子库库特穆尔代领其众明年博啰特穆尔复遣兵南侵库库特穆尔分地进据真定初朝廷既黜御史大夫鲁达实安置东胜州帝别遣

宦官密谕博啰特穆尔令留军中而皇太子累遣官索之博啰特穆尔匿不发二十四年博啰特穆尔阴使人杀其叔父左丞伊德尔布哈佯为

不知往吊又不哭朝廷知其跋扈初立卫屯田尝命中书右丞额森布哈提督与图沁特穆尔分院之地相近因扰及其亲里构成嫌隙额森布

哈乃谮图沁特穆尔诋毁朝政博啰特穆尔与图沁特穆尔相友善且知其诬遣人白其非罪皇太子以博啰特穆尔握兵骄悍今乃与图沁特

穆尔交通又匿不轨之臣遂与丞相吹斯戡宦者保布哈议请诏削其官爵叹解兵权安置四川 【宦者云云据保布哈传增改】 博啰特穆

尔知非出意意乃杀使者拒命图沁特穆尔亦与之合声言欲除君侧之恶竟举兵入居庸至清河列营将犯阙帝遣使问故以必得吹斯戡保

布哈为辞帝不得已执畀之二人皆被杀图沁特穆尔自健德门入见帝延春阁恸哭请罪帝赐宴慰勉诏复博啰特穆尔官依前守大同以图

沁特穆尔为中书平章博啰特穆尔既还大同太子恚怒不已请帝诏库库特穆尔总诸道军讨之库库特穆尔闻命将藉是以释私憾乃大发

兵调麾下白索珠 【原脱白字据明史库库特穆尔传增谨识】 守护京师青军杨同金守居庸而自将至太原调督诸军博啰特穆尔恶其

轧己也复勒兵与图沁特穆尔鲁达实等犯阙京师大震时太子亲统兵迎于清河丞相伊苏詹事布呼齐军于昌平伊苏军无鬪志杨同金被

杀布呼齐战败遁走太子急驰还都遂与白索珠胁本官官属出奔太原博啰特穆尔驻兵健德门外欲追袭太子鲁达实力止之入见帝于宣

文阁泣拜诉冤帝亦泣乃赐宴就命博啰特穆尔为太保左丞相鲁达实为中书平章图沁特穆尔为御史大夫部属将士布列台省总揽国柄

寻加博啰特穆尔开府仪同三司上柱国录军国重事太保友丞相节制天下军马数月闲诛狎臣图噜特穆尔布达干尔密等罢三宫不急造

作汰宦官减浮费禁四番僧人作佛事数遣使请太子还朝使至太原拘留不报二十五

年太子在外日夜谋靖内难密下令调岭北甘肃辽阳
陕西及库库特穆尔等军进讨博啰特穆尔博啰特穆尔怒出皇后奇氏于外幽置百日
遣图沁特穆尔率军攻上都之附太子者调伊苏南御
库库特穆尔军伊苏谓博啰特穆尔悖逆中外同愤遂提兵归永平遣人西结太原东连
辽阳诸王共讨军声大振博啰特穆尔患之遣骁将姚
巴延布哈统兵出御至通州河溢伊苏出不意袭破之擒姚巴延杀之博啰特穆尔大怒
自将出通州大雨三日而还意抑郁不乐乃日与鲁达
实纵饮荒淫无度酗酒杀人喜怒不测人情携贰帝亦积不平威顺王子和尚受密旨与
儒士徐士本谋结勇士上都玛勒金诺海拜达勒特古
斯布哈哈喇哈达洪巴拜为阴图刺之会图沁特穆尔遣人来献上都之捷博啰特穆尔
入奏行至延春阁下拜达勒自众中跃出刃中其脑上
都玛勒及金诺海等竞前斫死之鲁达实伤额趋出得马走其家拥博啰特穆尔母妻及
其子添宝努北遁诏尽杀其部党遣使函博啰特穆尔
首往太原丞召太子还宫寻获图沁特穆尔达实皆伏诛

钦定续通志卷六百三十四

●钦定续通志卷六百三十五 四夷传一

四夷传 【一】

（臣）等谨案历代史例有外国各传寻考质实舛误恒多良由史臣纪载失真边
陲外境荒远辽邈得诸传闻未能亲历省记自来外志
如释法显佛国记释元奘大唐西域记赵汝适西蕃志之类彼此不同唐书载骨利鞞部
所居之北昼长夜短日入烹羊胛熟东方已明今考之
极北诸部北极出地度最多之处日出入匀有晷刻并无昼长夜短之事又古今地名土
音年久互异汉之大月氏至唐而名嚧哒后讹为挹怛
元魏时之钵和至唐而为护密又唐之吐蕃至宋而为嘉勒斯賚青唐使非详晰证明不
能定其是一是二汉书匈奴西域传所载山川各名相
去道里证以唐书宋史亦不相侔唐宋史所载诸国证以元之圣武亲征记复多不合至
若大小头痛之山赤土身热之阪此复阙焉无闻可知
传述之误矣唐初务勤远略徧置都护纪载较详自安史构乱吐蕃陷河陇回纥饮渭川
荒外诸庭寢以失考五季中土俶扰无能及远宋则幅
员较狭仅识职贡所通者北陲远隔契丹无怪外纪之阙辽金史惟西夏高丽有传元初
底定朔陲又亲征西域诸国南及大理并易置君长以
亲王驸马镇守王略不为不广顾藩封世袭俱入列传外国自高丽外仅载东南濒海诸
夷兹依郑志辑四夷传并以正史为据史所略者无缘
更详若夫荒诞无稽者槩从芟削闲有史文互见名目稍岐遽为归并恐致淆误亦并存

之以附阙疑之义仍各为之详考附订焉

高丽 百济 新罗 耽罗 渤海 安定 日本
流求【毗舍邪】

高丽

百济

新罗

耽罗

渤海

安定

日本

流求【毗舍邪】

○高丽

高丽本曰高句骊汉时扶余别种常居之其地田至新罗南至百济皆跨大海西北渡辽水接营州而靺鞨在其北其都平壤城即汉乐浪郡依鸭绿江为险唐武德三年遣使者封其王高建武为辽东郡王太宗时其东部大人盖苏文作乱杀建武立其弟之子藏为王道遣使拜藏为高丽王会新罗上书言高丽侵扰遣使谕止之不从于是帝自将伐之攻围安市城不克而还干封元年盖苏文死九月以李绩为行军大总管率师讨之三年二月师围平壤以九月克之执藏等献俘阙下赦藏为司平太常伯即其地置安东都护府仪凤二年复藏朝鲜郡王还镇藏谋叛未及发召还放邳州死圣历初以藏子德武为安东都督后乃稍自立国元和末尝遣使来献乐工后唐长兴中王建代高氏遂并新罗百济高句丽为一徙居松岳号东京平壤为西京遣使朝贡累封高丽国王晋开运二年建死传子武汉干佑末武死传子昭宋建隆三年昭遣使朝贡四年以昭为开府仪同三司检校太师玄菟州都督大义军使高丽国王开宝中昭卒其子佑权领国事遣使贡授佑检校太保玄菟州都督大义军使封高丽国王太宗即位加检校太傅改其军为大顺军太平兴国二年遣子元辅来贡三年加佑检校太师七年佑卒其弟治权知国事遣使求袭位授检校太保玄菟州都督大顺军使高丽国王雍熙元年又遣使贡二年加治检校太傅三年用兵于契丹以其国接契丹常为所侵遣监察御史韩国华赍诏谕令发兵西会十月遣使朝贡端拱元年加治检校太尉二年遣使来贡淳化元年三月加治仓邑遣户部郎中柴成务等往二年遣使来贡三年辽使萧恒德伐之四年正月治遣使贡方物二月加治检校太师是年治遣吏诣辽请罪辽取女真近鸭绿

江地益之遂与辽通好五年六月遣使元郁来愬辽人侵境乞师朝廷以北鄙甫宁不可轻动干戈赐诏慰抚厚礼其使遣之自是受制于辽朝

贡中绝 【按辽史统和十三年治遣使人贡进鹰十一月册治为王即是时事也】 至道三年 【宋史不载今据辽史年月补入】 治卒

弟 【辽史作侄】 诵立咸平三年其臣朱仁绍至登州候朝命召见因赐诵诏六年通遣使李宣古来谢恩且言自晋割燕蓟属契丹遂有路趣玄菟屡来攻伐求取不已乞王师屯备诏优答之 【按辽史统和十六年遣使册诵为王二十年七月来贡本国地图二十三年遣使来贺与宋联和二十八年遣使来祭承天皇太后复来会葬】 诵卒弟询权知国事 【按辽史统和二十八年高丽西京留守康肇杀其主诵立其从兄询与此互异】 筑六城曰兴州铁路通州龙州龟州郭州于境上辽以为贰己遣使求诚询不许遂举兵至城下焚劫居人询徙升罗州避之兵退遣使请和而辽坚以六城为辞乃调兵戍守大中祥符三年辽大举伐之询与女真设奇击杀辽军殆尽 【按辽史是年大军渡鸭绿江康肇拒战于铜州败之肇复出耶律达鲁擒之追奔数十里铜霍贵宁等州皆降询表请朝许之与宋史所载殊异】 又于鸭绿江东筑城与来远城相望跨江为桥潜兵以固新城七年遣使来贡八年诏登州置馆以待使者其年遣使郭元来贡天禧元年遣使奉表献方物 【按辽史统和二十八年遣排押博诺攻开京询弃城遁遂焚开京二十九年班师所降诸城复叛开泰元年询乞称臣诏询亲朝奉诏称病诏复取六州之地五年至八年数出师伐高丽九年收询降表释其罪】 五年询卒 【按询之卒宋史载在天圣八年辽史载在圣宗太平八年系宋真宗天禧五年二史互异兹据辽史改正】 子钦袭位会辽使册钦为王遣使来言与辽修好天圣八年复遣使入贡钦卒 【按辽史兴宗重熙闲王钦凡四遣使入贡】 子徽袭位先是使人至汴往反皆自登州熙宁七年遣使来言欲远辽乞改由明州诣阙从之元丰元年遣陈睦往聘六年徽卒 【按辽史重熙二十三年王徽请官其子诏加检校太尉清宁元年使来会葬兴宗四年使来会葬太皇太后太康四年徽乞赐鸭绿江以东地不许】 子勋权知国事百日卒弟运立 【辽史作勋子运】 八年遣其弟僧统来朝哲宗即位遣使来贺元佑五年复通使七年遣使来献黄帝针经请市书甚众礼部尚书苏轼言高丽入贡无丝发利而有五害今请诸书与收买金箔宜勿许诏许买金箔然卒市册府元龟以归运立四年卒 【按辽史运立于太康十年卒于大安一年凡在位十一年与宋史异】 子尧嗣未阅岁以病不能国叔熙摄未几

尧卒熙立凡数岁贡使不至【按辽史运卒子昱立昱病命其子禹权知国事禹即熙避辽天祚帝嫌名而改则昱即尧也辽史以禹为昱子此以为昱叔父亦互异】徽宗立遣使吊贺崇宁二年诏户部侍郎刘逵等往使熙卒【按辽史寿隆元年王昱病命禹权知国事三年昱卒封禹为三韩公干统五年禹卒熙在位凡九年】子侯【辽史作侯】嗣贡使接踵宣和四年侯卒【按辽史干统五年封侯为三韩国公十年乞兵于高丽以御金金人责之辽亡】子柁嗣诏遣使奠慰初侯求医于朝诏使二医往留二年归钦宗立贺使至诏馆留明州纳其贄币高宗即位虑金人通高丽命胡蠡使其国以闲之建炎二年浙东路马步军都总管杨应诚上言由高丽至女真路甚径请身使三韩结鸡林以图迎二圣乃以应诚充高丽国信使六月抵其国谕柁以所欲为柁不奉诏十一月柁遣其臣尹彦颐奉表谢罪是时金使至其国责以遣使往来当尽循辽旧仍取保州路及边地人口在彼界者柁附表谢请依事辽旧制并请免索亡人户口金主从之先是高丽虽与宋通使不绝然受辽封册奉其王朔及金灭辽以事辽之礼事金绍兴二年闰四月柁遣使入贡柁卒子睨嗣立三十二年三月其纲首徐德荣诣明州言本国欲遣贺使守臣韩仲通以闻殿中侍御史吴芾奏高丽与金接壤惧其为闲诏止之自是终宋之世不至其后睨弟皓废睨自立以让国至金奏告金主疑之以诏书详问其国士民使至高丽皓称睨避位如前奏使还皓又遣使请封大定十二年三月赐封册十五年其西京留守赵位宠贰于皓遣徐彦宁等至金上表称皓弑睨状且请以慈悲岭西至鸭绿江四十余城内属不许顷之皓定位宠之乱遣使谢承安三年皓表自陈衰病让其弟暉权知国事是岁皓卒暉嗣立泰和四年暉卒子諲嗣立至宣统元年八月諲卒明年宣宗迁汴辽东道路不通元太宗三年高丽王

■〈日育文〉遣其弟佺至元请和太宗许之自后叛服不常定宗宪宗俱尝遣兵讨之世祖中统元年三月■〈日育文〉卒子禛袭位【禛初名典】屡遣使贡又亲入朝至元三年二月立浑州以处高丽降民帝欲通好日本以高丽与之邻可为乡导八月遣黑的等使日本先至高丽谕旨黑的未至日本而还五年正月诏谕禛以伐宋使助士卒舟舰粮储九月禛遣其臣同使者往日本亦不能达六年八月禛世子愷来朝奏本国权臣林衍废禛立弟滄事诏授愷特进上柱国遣孟克图伐之十月复遣使往谕禛滄衍等同诣阙下面陈是非禛受诏复位遣使表谢十二月亲朝京师七年正月以其西京内属诏改东宁府画慈悲岭为界孟克图为安抚使率兵戍之并谕其国僚属军民讨林衍衍寻死余

党窜珍岛讨败之八年正月禎遣使奉表请婚十一年三月遣使谕高丽助征日本五月皇女和塔拉都哩默色下嫁甚世子愷七月禎卒诏愷袭爵十二年十一月遣使谕愷改官职名号愷遣其带方侯王澄入侍十三年七月遣使来贺平宋十一月愷遣使奏改名晷十四年正月金方庆等为乱命晷治之十五年遣兵戍忠清全罗诸处七月改铸驸马高丽王印赐晷十七年五月国饥乞贷粮万石从之十月进晷开府仪同三司中书左丞相行中书省事十八年二月晷言本国笔且齐不谙行移文字请除郎中员外各一员为参佐又请易宣命职衔增驸马字从之十一月置镇边万户府于金州等处以控日本十九年正月晷以日本寇其边请发蒙古军五百人戍金州又从之二十年五月立征东行中书省二十八年五月以晷子諲为世子授特进上柱国赐银印十月以其国饥给米振之三十年二月晷遣使入奏复更名距及乞功臣号诏赐号推忠宣力定远功臣十一月距入朝大德元年封距为逸寿王以世子諲为高丽王亦尚公主二年七月中书省臣奏諲有罪复以其父为王距复位八年卒諲复袭王位 【諲后更名章】 生子焘焘受逊位以仁宗皇庆二年四月袭封后传其弟暲暲传子颙高丽自建至颙凡二十九王历四百余年中更宋辽金元未尝易姓云

○百济

百济扶余别种也滨海之阳南倭北高丽皆逾海乃至东新罗也俗与高丽同唐武德四年其王扶余璋始遣使献果下马自是数朝贡高祖敕为带方郡王百济王后数与高丽新罗相仇杀来告太宗诏使者平其怨贞观十五年璋卒册其子义慈绍王后与高丽连和伐新罗取四十余城又取七城久之又夺十余城屡诏谕解不从显庆元年诏左卫大将军苏定方率军合新罗兵讨之俘义慈及其太子隆送京师诏释不诛析其地置五都督府命刘仁愿守百济城璋从子福信据周留城反立故王子扶余豊为王西部皆应引兵围仁愿龙朔二年诏右威卫将军孙仁师为能津道行军总管与仁愿及新罗王伐之丰走遁诸城皆复仁愿勒军还留刘仁轨代守帝以扶余隆为熊津都督俾归国平新罗故憾刘仁轨为之盟辞后萨众携散归京师仪凤时进带方郡王遣归藩畏新罗强盛寄治高丽死武后以其孙敬袭王而其地已为新罗渤海诸国所分百济遂绝

○新罗

新罗弁韩苗裔也地横千里纵三千里东距长人东南日本西百济南濒海北高丽朝服尚白其王姓金贵人姓朴民无氏唐武德四年王

真平遣使者来朝诏遣使答赉后三年封乐浪郡王新罗王贞观五年献女乐二八太宗
诏还之是岁真平死无子其女善德嗣王大臣乙祭柄
国诏册善德袭父封二十一年善德死妹真德袭王高宗永徽元年攻百济破之遣使入
朝真德织锦为颂以献五年真德死其弟子春秋袭王
明年同苏定方平百济龙朔元年死其子法敏袭王咸亨元年纳高丽叛众略百济地守
之诏削官爵以其弟仁问为新罗王自京师归国诏刘
仁轨发兵穷讨上元二年法敏遣使谢罪贡筐相望仁问乃还辞王诏复法敏封然多取
百济地遂抵高丽南境矣法敏死子政明袭死子理洪
袭死弟兴光袭开元中数朝贡又献二女帝厚赐遣还又遣子弟入太学二十五人死子
承庆袭死弟宪英袭死子干运袭建中四年死无子国
人共立宰相金良相嗣王是年死其从父弟敬信袭十四年死无子立嫡孙俊邕死子重
兴袭永贞七年死其宰相金彦贞嗣王死子景徽立会
昌后朝贡不复至后唐同光元年新罗王金朴英遣使来朝贡长兴四年权知国事金溥
复遣使来自晋以后不复至其卒立世次史皆失详宋
以后入于高丽以其地为东州乐浪府号东京而以百济地为金州金马郡号南京云

○耽罗

耽罗高丽与国也宋以前无考【按唐书载有儋罗国居新罗武州南岛上龙朔麟
德闲尝来朝儋耽音近疑即其地】元世祖臣服高
丽以耽罗为南宋日本冲要亦注意焉至元六年七月遣都统领脱脱儿等往视道路诏
高丽国王王禛选官导送时高丽叛贼林衍余党金通
精遁入耽罗廷议先平耽罗然后观日本从否十年正月命经略实都史枢及洪茶邱等
率兵船往讨六月平之于其地立耽罗国招讨司后改
为军民安抚司三十一年高丽王上言耽罗自来臣属其国乞仍旧帝许之自是遂复隶
高丽

○渤海

渤海本粟末靺鞨附高丽者姓大氏唐平高丽率众保挹娄之东牟山地直营州东
二千里南以泥河为境东穷海西接契丹筑城以居高
丽逋残稍归之万岁通天中契丹攻陷营府有舍利乞乞仲象者与靺鞨酋乞四比羽及
高丽余种东走度辽水保太白山之东北阻奥娄河树
壁自固武后封乞四比羽为许国公乞乞仲象为震国公比羽不受命诏李楷固等击斩
之仲象死其子祚荣引残彘拒楷固楷固败还祚荣即
并比羽之众建国自号震国王与突厥交通尽得扶余沃沮弁韩朝鲜海扎诸国中宗时
使侍御史张行岌招慰祚荣遣子入侍睿宗先天中遣
使拜祚荣为左骁卫大将军渤海郡王以所统为忽汗州领忽汗都督【按渤海自唐初

至此皆称靺鞨睿宗以其州为忽汗州始去靺鞨之

号】开元七年死私谥高王子武艺立改年仁安帝赐典册袭王未几黑木靺鞨使者入朝帝以其地建黑水州置长史武艺议遣其弟门艺及舅任雅相发兵击黑水门艺固谏不听遣从兄壹夏代将门艺惧诛来归诏拜左骁卫将军后十年武艺遣将张文休率海贼攻登州帝即遣门艺发幽州兵击之武艺死私谥武王子钦茂立改年大兴仍赐册袭王天宝末钦茂徙上京直旧国三百里忽汗州之东钦茂讫帝世朝献者二十九宝应元年始诏以渤海为其国号钦茂进检校太尉大历中二十五来钦茂死私谥文王子宏临早死族弟元义立一岁国人杀之推宏临子华玙为王改年中兴死谥成钦茂少子嵩邻立改年正历诏授右骁卫大将军嗣王建中贞元闲凡四来死谥康子元瑜立改年永德死谥定弟言义立改年朱雀并袭王如故事死谥僖弟明忠立改年太始死谥简从父仁秀立改年建兴仁秀颇能讨伐海北诸部诏检校司空袭王元和中凡十六朝献长庆四宝历凡再太和四年仁秀死谥宣孙彝震立改年咸和诏袭王终文宗世来朝十二会昌四彝震死弟虔晃立死子元锡立咸通时三朝献其国有五京十五府六十二州以肃慎故地为上京曰龙泉府其南为中京曰显德府■〈豸岁〉貊故地为东京曰龙原府亦曰栅城府沃沮故地为南京曰南海府高丽故地为西京曰鸭绿府长岭府扶余故地为扶余府常屯劲兵扞契丹又有郑颉府挹娄故地为定理府安边府率宾故地为率宾府拂涅故地为东平府铁利故地为铁利府越喜故地为怀远府安远府设官分职多仿中国制度幽州节度府与相聘问此后朝贡与否史家失传梁开平中王大誾譔遣使者来后唐天成初契丹攻扶余城下之改扶余为东丹府其国在五代时常来朝贡宋太平兴国四年太宗平晋阳移兵幽州其师大鸾河率其部族来降诏以鸾河为渤海都指挥使六年将用师契丹降诏谕旨后其国并入高丽契丹云

○定安

定安国本马韩之种为契丹所破其酋帅纠余众保于西鄙自称定安国宋开宝三年其国王烈万华因女真使附表贡方物太平兴国中太宗方经营远略因降诏其国令张犄角之势六年冬其王乌元明又附女真使上表有高丽旧壤渤海遗黎语诏答之端拱淳化中尝两附女真使上表其后不复屋

○日本

日本者本倭国直新罗东南在海中岛而居小島五十余皆自名国而臣附之其境

东西行五月南北行三月西南至海东北隅隔以大山
山外即毛人国其俗多女少男有文字尚浮屠法隋开皇末始与中国通唐贞观五年遣
使者入朝帝矜其远诏有司毋拘岁贡永徽初遣使来
献虎魄玛瑙赐之玺书咸亨元年遣使贺平高丽后乃更号日本自言国近日所出以为
名长安元年遣使贡方物其使日粟田好学能属文进
止有容开元初粟田复来朝请从诸儒授经诏四门助教赵元默为之师悉赏物贸书以
归其副仲满慕华不肯去易名曰朝衡历左补阙仪王
友多所该识久乃还天宝十二载复来朝建中元年遣使献方物贞元末遣使来朝其学
子橘免势浮屠空海愿留肄业历二十余年乃还开成
四年复入贡宋雍熙元年日本僧裔然与其徒五六人浮海至献铜器十余事并其国职
员及年代纪各一卷裔然善隶书问其风土但书以对
云国中有五经书及佛经白居易集并得自中国土宜五谷而少麦交易用铜钱文曰干
元大宝畜有水牛驴羊多犀象产丝蚕多织绢四时寒
暑大类中国国之东境接海岛东奥州产黄金西别岛出白银以为贡赋有五畿七道三
岛国王以王为姓传袭已六十四世文武僚吏皆世官
王先以尊为号其后乃以天皇为号太宗召见裔然存抚之赐紫衣馆于太平兴国寺裔
然求诣五台许之令所过给食又求印本大藏经诏亦
给之二年归国后数年裔然遣其弟子喜因奉表来谢咸平五年建州海贾周世昌遭风
至日本凡七年得还与其国人滕木吉至皆召见之景
德元年其国僧寂照等八人来朝天圣四年十二月明州言日本国太宰府遣人贡方物
而不持本国表诏却之熙宁五年有僧诚寻玉台州止
天台国清寺愿留诏使赴阙以其远人而有戒业处之开宝寺后连贡方物其来者皆僧
也干道九年附明州纲首以方物入贡元世祖至元元
年以高丽人赵彝等言日本国可通三年八月命兵部侍郎赫德充国信使由高丽使其
国赫德等不至而还四年六月帝以高丽国王禘托辞
为解复遣赫德等谕禘禘以为海道险阻不可辱天使遣其起居舍人潘阜等持书往
日本亦不得要领而归五年九月命赫德等持书往至对
马岛日本人拒不纳六年十二月命秘书监赵良弼充国信使持书至高丽通好日本八
年九月良弼至其国太宰府而还九年二月高丽王禘
致书日本五月又以书往皆不报十年六月赵良弼复使日本十一年七月命凤州经略
使实都高丽军民总管洪茶邱帅舟师往征十月入其
国十二年二月遣礼部侍郎杜世忠等往使十七年二月杜世忠等为其国所杀十八年
正月命日本行省右丞相阿喇罕右丞范文虎及征东
元帅实都洪茶邱等十万人往征六月阿喇罕病不能行命安塔哈代总军事八月诸将

未见敌丧师而还二十年命安塔哈为日本行省丞相
募兵造舟将复征之淮西宣慰使昂吉见上言民劳乃寝兵二十一年又以其俗尚佛遣
王积翁与普陀僧如智往使积翁等为其下所杀不果
至大德三年又遣僧使其国亦不报终元之世不通

○流求 【毗舍邪】

流求国亦曰瑠求在南海之东与漳泉诸州相对西南北岸皆水至澎湖渐低近其
国谓之落漈漈者水趋下而不回也国小而险堑栅三
重环以流水植棘为藩以刀稍弓矢剑鼓为兵器沃壤无赋敛视月盈亏以纪时无他奇
货故商贾不通宋淳熙闲其酋豪尝率数百人猝至泉
之水■〈彡 粵〉围头等村肆掠喜铁器人闲户则刊其门圈而去缚竹为筏急则羣舁
之泅以遁元世祖至元二十八年以海船副万户杨祥
充宣抚使持诏往谕竟不能达其旁有毗舍邪国亦语言不通又有三屿国亦近流求居
民不及二百户时有至泉州为商贾者

钦定续通志卷六百三十五

●钦定续通志卷六百三十六 四夷传二

四夷传 【二】

突厥 回鹘【厖特勒】 薛延陀【拔野古 仆固 同罗 契
苾 多览葛 ■〈隹 夹〉跌 葛逻禄 拔悉蜜】

黠戛斯【伊州 都播 骨利干 白霫 斛薛】 奚 室韦诸部落

突厥

回鹘 【厖特勒】

薛延陀 【拔野古 仆固 同罗 契苾 多览葛 ■〈隹 夹〉跌 葛逻禄
拔悉蜜】

黠戛斯 【伊州 都播 骨利干 白霫 斛薛】

奚

室韦诸部落

○突厥

突厥阿史那氏古匈奴北部也居金山之阳臣于蠕蠕种裔繁衍至吐门遂强大更
号可汗其别部典兵者二十八等皆世官控弦之士百
万隋大业之乱始毕可汗咄吉嗣立人争附之契丹室韦吐谷浑高昌皆役属焉高祖起
太原遣府司马刘文静往聘与连和始毕使特勒康稍
利献兵马武德元年骨咄禄特勒来朝赐宴太极殿二年始毕自将渡河至夏州以兵佐
刘武周将侵太原道死其弟俟利弗设立是为处罗可
汗处罗尚隋义成公主又通王世充又于窦建德所迎隋萧皇后及齐王暕之子正道立

正道为隋王秦王之讨武周也处罗方谋取并州安置
正道会病发死不行其弟咄苾嗣立是为颉利可汗颉利又妻义成义成杨谐女也其弟
义经与王世充使者王文素共说颉利立正道以报隋
颉利然之由是频岁入寇四年寇雁门代州犯原州又寇并州六年寇定匡原朔等州七
年攻原朔代陇等州秦王与齐王帅兵会击之颉利与
其兄子突利连兵起原州秦王纵反闲突利不欲战颉利乃遣突利请和八年颉利复攻
灵朔及广武转掠绥州九年攻原灵又围凉州犯泾原
其七月颉利自将十万骑袭武功京师戒严进攻高陵为尉迟敬德所败时颉利遣人请
和且覘虚实太宗囚其使与高士廉房元龄等骑出元
武门至渭上面责颉利负约贼大骇颉利固请和乃与之盟贞观元年薛延陀回纥拔野
古诸属部皆叛颉利使突利讨之不胜颉利怒囚之突
利由是怨望明年突利自陈为颉利所攻求救颉利亦拥兵窥边时突厥岁饥灾异数见
诸部皆贰薛延陀自称可汗以使来拔野古仆骨同罗
诸部霫奚渠长皆来朝于是诏李靖等六总管讨之四年正月靖进屯恶阳岭夜袭颉利
其酋康苏密等以隋萧后杨正道降颉利奔沙钵罗为
行军总管张宝相所擒献俘太庙八年颉利死赠归义王谥曰荒诏朔方地自幽州至灵
州建顺佑化长四州都督都府剖颉利故地左置定襄
都督右置云中都督二府统之以突利可汗为顺州都督令率其下就部突利初为颉利
所攻避难入朝帝厚之拜右卫大将军封北平郡王至
是为都督顿首听命后入朝道死并州子贺逻鹘嗣突利弟结社率谋劫贺逻鹘北还谋
泄投贺逻鹘岭外乃立阿史那思摩为乙弥泥孰俟利
苾可汗赐氏李悉还故地令思摩归国思摩颉利族人也十五年思摩率众十余万胜兵
四万马九万匹渡河建牙于故定襄城居三年不能得
其众请入朝留宿卫卒京师赠兵部尚书夏州都督思摩之归国也立阿史那忠为左贤
王 【按新唐书思摩传云以阿史那忠为左贤王阿
史那泥孰为右贤王本传则云右贤王阿史那泥孰赐名忠以忠与泥孰为一人与前传
互异今据阿史那社尔传及思摩传改正】 常思慕中
国思摩既不能率下民多分处胜夏二州族人车鼻可汗盗其地拥兵出掠部属皆患之
二十一年遣子沙钵罗特勒献方物且请入朝帝遣安
调遮韩华迎之车鼻实无入朝意华与调遮死帝怒遣高傒发回纥仆骨兵击之酋长以
次降车鼻走傒追获之献京师初其子羯漫陀泣谏车
鼻请归国不听乃遣子庵钵入朝后来降以其地建新黎州使领其众于是突厥地皆置
都护府领都督及州凡三十年北方无警自调露后诸
部稍叛去遗萧嗣业讨之不胜流嗣业桂州拜裴行俭为行军大总管讨败之永隆中温

传部又迎颉利族子伏念于夏州立为可汗遂寇原庆
二州复诏行俭进兵纵反闲温傅与伏念贰伏念北走行俭虜送京师斩之永淳元年骨
咄禄又反骨咄禄者亦颉利族人伏念败亡命入总材
山柅是自立为可汗寇单于府北鄙攻并岚二州掠定州又攻妫州蔚州嗣圣垂拱闲连
宛朔代二州明年入昌平复入朔州天授初骨咄禄死
其弟默啜代为可汗复攻灵州武后遣薛怀义等十八将讨之不见敌而还寻诏王孝杰
为行军总管备边契丹李尽忠等反默啜请击贼自效
诏授为左卫大将军归国公拜迁善可汗默啜引兵击契丹尽忠死进颉利施大单于
立功报国可汗未及命寇灵胜二州默啜又请以女妻
诸王诏淮阳王武延秀往纳其女默啜怒曰我世附唐以女与天子子乃与后家子乎因
延秀自将十万骑南向击静难平狄青夷等军诏武重
规等击之默啜破蔚州飞狐进残定州围赵州又攻相州睿宗立请和亲开元初绝之默
啜遣子杨我支特勒入宿卫固求婚以蜀王女南河县
主妻之明年攻北廷都护后默啜为拔野古所杀传首京师默棘连袭位是为毗伽可汗
八年默棘连请和帝以非诚命王峻统兵伐之败还九
年又请和许之帝东巡泰山遣使召其大臣入卫自是比年遣使入朝吐蕃以书约连结
钞边默棘连不从封上其书帝嘉之后为梅录啜所毒
死国人立其子伊然可汗八年卒凡遣使三入朝其弟嗣立为苾伽骨咄禄可汗册为登
利可汗从父判阙特勒杀之国内乱国人奉其子为乌
苏米施可汗其大部回纥葛逻禄自分左右叶护乌苏为其下拔悉蜜等三部所杀其弟
白眉可汗立国人亦推拔悉密酋长为可汗未几回纥
葛逻禄杀拔悉密可汗奏回纥骨力裴罗定其国为骨咄禄毗伽阙可汗明年杀白眉可
汗自是其地尽入回纥始其族分国于西者曰西突厥
当东突厥启民可汗立西突厥达头可汗岁以兵相加而隋常助启民达头遂奔吐谷浑
后有统叶护可汗者并国数十能复达头之业西突厥
遂强其诸父莫贺咄杀之自立是为屈利俟毗可汗是时统叶护子啞力特勒亡在唐居
立为乙毗钵罗肆叶护可汗与俟毗分王其国争战不
已各遣使朝献弩矢毕部益兵助肆叶护杀俟毗奉肆叶护为大可汗寻逐之弩矢毕酋
泥孰乃自立为咄陆可汗传弟啞利失可汗国人逐啞
利失立欲谷设为乙毗咄陆可汗啞利失与之交战于是西突厥又分为二啞利失主其
东咄陆主其西啞利失死其子乙屈利失乙毗可汗立
踰年死乙毗沙钵罗叶护可汗继之是时咄陆兵强攻叶护杀之并其国入寇伊州为安
西都护郭孝恪所败后国乱其下不欲咄陆为可汗遣
使请所立帝择突厥可汗子孙贤者授之乃立乙毗射匮可汗咄陆奔吐火罗时阿史那

贺鲁反吞可汗诸部落自号沙钵罗可汗入寇为苏定方等所杀朝廷立阿史那弥射为兴昔亡可汗阿史那步真为继往绝可汗二人各领五部贺鲁故地立安西都护府弥射后为苏海政所杀步真寻亦死仪凤中西突厥部帅阿史那都支自号十姓可汗与吐蕃寇安西裴行俭讨禽之二部人益离散五代时后唐同光三年天成二年长兴二年晋天福六年俱尝遣使朝贡后寢微不显

○回鹘 【厖特勒】

回纥 【即回鹘】 其先匈奴隋曰韦纥臣于突厥大业中突厥攻之叛去改称回纥姓药罗葛氏居薛延陀北娑陵水侧有时健俟斤者众推为君长子曰菩萨与薛延陀共破突厥自号活颉利发贞观三年来朝菩萨死其酋胡禄俟利发吐迷度与诸部攻薛延陀并其地来献功以回纥部为瀚海即拜吐迷度为怀化将军瀚海都督时吐迷度已自称可汗二十二年吐迷度为兄子乌纥所杀燕然都护元礼臣给乌纥斩之诏吐迷度子婆闰为左骁卫大将军袭父所领婆闰死子比栗嗣 【旧唐书作妹比栗毒】 比栗死子独解支嗣独解支死子伏帝匐立时突厥默啜方强伏帝匐助唐攻杀之伏帝匐死子承宗立凉州都督王君奭诬以流罪死族子瀚海府司马护翰乘众怨杀君奭断安西诸国贡道久之奔突厥死子骨力裴罗立会突厥乱裴罗与葛逻禄自称左右叶护袭破拔悉密自称骨咄禄毗伽阙可汗诏拜为怀仁可汗尽得古匈奴地裴罗死子磨延啜立肃宗即位请和亲遣太子叶护助讨安禄山以女妻炖煌郡王承寀诏册其女为毗伽公主香积之战陈澧上贼伏骑大营东回纥攻之尽殪子仪因进收长安大破贼众安庆绪弃东京走回纥大掠还京师帝遣使劳力进叶护司空爵忠义王干元元年请昏诏宁国公主下嫁册磨延啜为英武威远毗伽可汗复使其王子骨啜等助讨明年骨啜与九节度使溃于相州奔京师帝厚赐慰其意乃还磨延啜死子移地健立号牟羽可汗使大臣入朝代宗即位遣中人刘清潭往结好且发其兵助讨史朝义朝义方给回纥唐已亡使入收府库移地健引兵南见诏始知广平王即天子位时雍王为天下兵马元帅会其兵进收东都河北平回纥见城邑榛莽有轻唐之色至是留屯东都放兵剽掠日益横肆帝加可汗可敦及寮属封号永泰初仆固怀恩反诱回纥吐蕃入寇怀恩死争长回纥诣郭子仪请降与朔方兵马使白元光共击吐蕃大败之大历十三年回纥袭振武入宝太原代州都督张光晟与战破之德宗立遣使告丧且修好九姓胡劝可汗入寇宰相顿莫贺谏不听顿莫贺因击杀之自立建中元年诏册顿莫贺武义成功可汗后三年使献方物请

和亲诏咸安公主降之可汗上书请易回纥为回鹘拜
可汗为汨咄禄长寿天亲毗伽可汗贞元五年顿莫贺死子多逻斯立拜爱登里逻汨没
密施俱禄毗伽忠贞可汗为少可敦叶公主毒死幼子
阿啜嗣册为奉诚可汗是岁回鹘击吐蕃葛禄于北庭胜之明年遣使来朝十一年阿啜
死无子其相骨咄禄自立诏拜爱滕里逻羽录没密施
合胡禄毗伽怀信可汗永贞元年死册所嗣为滕里野合俱禄毗伽可汗元和初再朝献
未几又死册拜爱登里啰汨密施合毗伽保义可汗阅
三岁使者再朝穆宗立固求昏许之俄可汗死册所嗣为登啰羽录没密施句主毗伽崇
德可汗诏以太和公主降之是时裴度方伐幽镇回鹘
使将以兵三千佐平河北议者惩前患辞使者去敬宗即位可汗死其弟曷萨特勒立册
为爱登里啰汨没密施合毗伽昭礼可汗太和六年其
下杀之从子胡特勒立明年册为爱登里啰汨没密施合句禄毗伽彰信可汗开成四年
其相掘罗勿作难引沙陀共攻可汗可汗自杀国人立
廬馱特勒为可汗俄为渠长句录莫贺与黠戛斯所杀其牙部立乌介特勒为可汗时太
和公主为黠戛斯所得遣使奉主来归乌介击杀其使
劫公主度磧进攻天德城振武节度使刘沔拒却之公主遣使言乌介已立因请命诏使
慰抚其众明年回鹘奉主至漠南入云朔剽掠因室韦
黑沙南窥幽州节度使张仲武破之其属降将弘顺与刘沔等穷追杀乌介奉公主南还
诏勒石幽州纪功国人立其弟遏捻特勒为可汗收残
部五千仰食于奚大中初仲武讨奚回鹘寢微转依室韦仲武谕令羈致可汗等遏捻委
部西走是时厖特勒居甘州自称可汗有磧西诸城遣
人来京师宣宗拜啜禄登里逻汨没密施合俱录毗伽怀建可汗尝一再进献后唐同光
中册其国王仁美为英义可汗仁美卒弟仁裕立遣使
来朝册为顺化可汗晋天福中改为奉化可汗仁裕卒子景琼立建隆以后常遣使朝献
景琼以下系属无稽咸平以后族种散处甘州西州新
复州天圣初甘州夜落隔通顺来贡方物封归忠保顺可汗宣和中因入贡留陕西诸州
贸易不归其往来皆经夏国廷议立法禁止之

○薛廷陀 【拔野古 仆固 同罗 契苾 多览葛 ■ 〈屈夹〉 跌 葛逻禄 拔悉蜜】

薛廷陀先与薛种杂居灭有廷陀部遂号薛廷陀姓一利啞氏铁勒诸部中最强风
俗与突厥同西突厥处罗可汗之杀铁勒诸酋也其下
相率叛去推契苾哥楞为易勿真莫贺可汗据贪汗山奉薛廷陀乙失钵为野啞可汗保
燕末山而突厥射匮可汗复强二部黜可汗号往臣之
回纥拔野古阿跌同罗仆骨白霫在郁督军山者东附始毕可汗乙失钵在金山者西役

叶护可汗贞观二年叶护死国乱乙失钵之孙夷男率部附颉利可汗突厥衰诸姓多叛归夷男太宗方图颉利册拜夷尹男为真珠毗伽可汗颉利可汗灭塞隧荒芜夷男率其部东保都尉健山独遯水之阴浸强大太宗恐后为患诏许其二子皆为可汗十五年帝以李思摩为可汗渡河建牙于漠南夷男恶之攻思摩走诏张俭李绩等讨败之廷陀遣使谢罪因请昏不许明年又来献马时李思摩侵掠其境廷陀遣将寇定襄诏李绩追却之俄请助伐高丽会病死子拔灼立以唐师在辽寇边诏江夏王道宗等御之拔灼众溃遁去依阿史那时健为回纥所杀众立真珠毗伽可汗昂弟子咄摩支号伊特勿失可汗遗使言愿保郁督军山诏崔敦礼李绩抚定之因觐其顺逆绩至咄摩支欲拒战阳乞降绩知之纵兵灭其国咄摩支奔回纥因萧嗣业以降与廷陀国比属有拔野古居康干河风俗与铁勒相似贞观三年与仆骨同罗奚霫同入朝二十一年大俟利发屈利失举部内属置幽陵都督府拜屈利失都督右武卫大将军显庆时与思结仆固同罗叛天宝闲来朝仆固在多览葛之东始臣突厥后附薛廷陀廷陀灭其酋娑匄俟利发歌滥拔延内属以其地为金微州拜歌滥拔延为都督右武卫大将军开元初为首领所杀其子即仆固怀恩也同罗在薛廷陀北多览葛之东贞观二年遣使入朝久之请内属置龟林都督府拜酋俟利发时健啜为都督左领军大将军契苾在焉耆西北多览葛之南其酋曰易勿真莫贺可汗贞观六年可汗死其弟莫贺咄之子何力尚钮率部来归以其地为榆溪州永徽四年以其部为贺兰都督府隶燕然都护多览葛在薛廷陀东廷陀灭其酋俟斤多滥葛末与回纥皆入朝以其地为燕然都督府授右武卫大将军即为府都督死以多滥葛塞匄为大俟利发继为都督

《正史》跌始与拔野古等来朝以其地为鸡田州开元初《正史》跌思泰自突厥默啜所来降其后光进光颜皆以战功赐姓李氏附属籍葛逻禄本突厥诸族永徽初高傒伐车鼻内属显庆二年以其地置阴山大漠元池三都督府即用其酋长为都督然限回纥故朝会不能自达至德后葛逻禄寢盛徙十姓可汗故地尽有碎叶怛逻斯诸城拔悉蜜贞观二十三年始来朝天宝初与回纥叶护击杀突厥可汗立拔悉蜜大酋阿史那施为贺腊毗可汗遣使者入谢为葛逻禄回纥所破奔北庭后朝京师地归回纥

○黠戛斯 【伊州 都播 骨利幹 白霫 斛薛】

黠戛斯在焉耆之北本坚昆国语讹为黠戛斯贞观二十二年因铁勒部入朝遣使者献方物其酋俟利发入朝太宗劳享之以其地为坚

昆府拜俟利发都督左屯卫大将军隶燕然都护高宗时再来朝景龙中献方物玄宗世四朝干元中为回纥所破后其酋阿熟破杀回鹘可汗会昌中遣使上书大中朝册为英武诚明可汗咸通闲三来朝又有伊州都播骨利鞞白霫斛薛皆唐时尝通

○奚

奚与契丹别种尝为匈奴所破保乌丸山元魏时自号库真奚居鲜卑故地东北接契丹西突厥南白狼河北霫俗与突厥同逐水草畜牧居既庐环车为营其君长常以五百人卫牙中余部散山谷闲无赋入以射猎为赏喜战鬪兵有五部部一俟斤主之盛夏必徙保冷陁山山直妨州西北至隋始去库真但曰奚唐武德中高开道借其兵再寇幽州长史王洗击破之贞观三年始来朝阅十七岁凡四朝贡帝伐高丽大酋苏支从战有功不数年其长可度者内附帝为置饶乐都督府拜可度者使持节六州诸军事饶乐都督封楼烦县公赐姓李以阿会部为弱水州处和部为祁黎州奥失部为落瓌州度稽部为大鲁州元俟折部为渴野州各以酋领辱纥主为刺史隶饶乐府复置东夷都护府于营州兼统松模饶乐显庆闲可度者死奚叛六年诏崔余庆等总护三都督讨之斩其王万岁通天中契丹反奚亦叛与突厥相表里号两蕃延番元年遣孙佺李楷洛周以悌帅兵袭其部为所败杀伤数万佺以悌皆禽送默啜朝廷方多故不暇讨开元二年【旧书作三年】使奥苏悔落丐降封饶乐郡王左金吾卫大将军饶乐都督诏宗室出女辛为固安公主妻其酋李大酺明年入朝成昏始复营州都督府大酺后与契丹可突于鬪死弟鲁苏领其部袭王诏兼保塞军经略大使牙官塞默羯谋叛公主诱杀之帝嘉其功赐累万会与其母告讐得罪更以盛安公主女韦为东光公主妻之后三年封鲁苏奉诚郡王右林卫将军久之契丹可突于反胁奚众并附突厥鲁苏不能制奔榆关公主奔平卢幽州长史赵含章发军讨破之众稍自归明年信安王祗降其酋李讨锁高等以其地为归义州因以王诗拜左羽林大将军本州岛都督置其部幽州之偏诗死子延宠嗣与契丹又叛为幽州张守珪所困延宠降复拜饶乐都督怀信王以宗室出女杨为宜芳公主妻之延宠杀公主复叛诏立它酋婆固为昭信王饶乐都督安禄山节度范阳诡边功数与麀鬪擒其酋李日越科所俘骁壮戍云南终帝世凡八朝献至德大历闲十二贞元四年与室韦攻振武后七年幽州残其众六万德宗时两朝献元和元年君梅落入朝拜检校司空归诚郡王以部酋索氏为左威卫将军檀蓟州游奕兵马使没辱孤平州游奕兵马使皆赐姓李尝阴结回鹘室韦兵犯西城振武宪宗世

四朝献太和四年复盗边卢龙李载义破之执大将二百余人缚其姑茹羯以献文帝赐冠带授右骁卫将军后五年大首领匿舍朗来朝大中元年北部诸山奚悉叛卢龙张仲武禽酋渠烧帐落二十万取其刺史以下面耳及羊牛辘贮献京师咸通九年其王突董苏使大都督萨葛入朝是后契丹方强奚不敢抗举部役属之苦其政稍引别部内附保妫州北山遂为东西奚西奚王去诸之子萨嘉后唐庄宗时赐姓名李绍威石晋时绍威子伊喇降于契丹东奚亦为契丹所供不复能自见云

○室韦诸部落

室韦契丹别种盖丁零苗裔地据黄龙北傍猺越河东接黑水靺鞨西突厥南契丹其地无君长惟大酋皆号莫贺咄摄其部而附于突厥小或千户大数千户滨散州谷逐水草而处不税敛每戈猎即啸聚事毕去不相臣制故虽强悍喜战而卒不能为强国酋帅死以子弟继无则推豪杰立之乘牛车渡水则束薪为浮或以板舟所居或皮蒙室或屈木以蘧蔭覆可载而行其畜无羊少马有牛不用有巨豕食之语言近靺鞨分部二十余日岭西部山北部黄头部大如者部小如者部婆芮部讷北部骆丹部悉处柳城东北近者三十远六千里而羸最西有乌素固部与回纥接当俱伦泊之西南自泊而东有移塞没部稍东有塞曷支部最强居啜水之阴亦曰燕支河益东有和解部乌罗护部那礼部岭西部直北曰讷北支部北有大山山外曰大室韦濒于室建河河出俱伦迤而东河南有蒙瓦部其北落坦部水东合那河忽汗河又东贯黑水靺鞨故靺鞨跨水有南北部而东注于海猺越河东南亦与那河合其北有东室韦贞观五年【旧书作贞观三年】来贡后再入朝长寿二年叛李多祚击定之景龙初复朝献请助讨突厥开元天宝闲凡十朝献大历中十一贞元四年与奚共宝振武节度使唐朝臣方郊劳天子使者惊走室韦执诏使大杀掠而去明年使者来谢罪太和中三朝献大中中一来咸通时大酋怛烈与奚皆遣使至京师后史官失传

钦定续通志卷六百三十六

●钦定续通志卷六百三十七 四夷传三

四夷传 【三】

吐蕃【嘉勒斯賚 苏昆 多弥 泥婆罗】 党项 于阗
天竺【师子】 拂菻 高昌 焉耆
耆 龟兹【疏勒】 拔汗那 罽宾 康居九姓 大勃律【小勃律 失蜜 识匿 似 役盘】 吐火罗【挹

怛 俱兰 劫 谢■〈风日〉 帆延 石汗那 俱蜜 护蜜 骨咄】 波斯

大食 层檀

吐蕃 【嘉勒斯賚 苏昆 多弥 泥婆罗】

吐谷浑

党项

于阗

天竺 【狮子】

拂菻

高昌

焉耆

龟兹 【疏勒】

拔汗那

罽宾

康居九姓

大勃律 【小勃律 失蜜 识匿 似 役盘】

吐火罗 【挹怛 俱兰 劫 谢■〈风日〉 帆延 石汗那 俱蜜 护蜜 骨咄】

波斯

大食

层檀

○吐蕃 【嘉勒斯賚 苏昆 多弥 泥婆罗】

吐蕃本西羌属种落莫知所出唐以前未尝通中国居析支水西其祖曰鹞提勃悉野稍并诸羌据其地俗谓强雄曰赞丈夫曰普故其王号赞普贞观八年赞普弄赞始遣使来朝因求昏不许遂入寇诏侯君集等讨之弄赞引去遣使谢罪又请昏许之十五年妻以宗女文成公主高宗即位擢弄赞驸马都尉西海郡王进封骠王永徽初死无子立其孙赞普国事皆委其相禄东赞时吐谷浑内附禄东赞怨忿击破之朝廷遣使定日禄东赞明毅善用兵吐蕃依之遂为强国禄东赞死其子钦陵赞婆悉多干【按新唐书作悉多干今从旧书】勃论并当国尽破诸羌咸亨初入残羈縻十八州诏薛仁贵讨之为钦陵所败遂陷吐谷浑复诏姜恪出讨会恪卒班师赞普旋遣大臣入朝上元二年又遣使请与吐谷浑修好帝不许明年攻鄯廓河芳四州诏周王显相王轮会讨不克行又攻迭扶二州进攻安西命李敬元等击之为所败仪凤四年赞普死子哭弩悉弄立命赞婆率兵宝河源屯良非川左武卫将军黑齿常之击走之武后

时屡诏诸将进讨皆中道罢如意元年大首领曷苏谋率所属降后遣将军张元遇率兵迎之次大度水国人禽曷苏去而他酋咎插又以羌蛮八千人降即其部置叶州擢咎插刺史是岁将军王孝杰大破吐蕃之众西镇尽复置兵戍守证圣元年攻临洮凉州遣使请罢戍兵求分十姓地武后诏郭元振往使从其请吐蕃南境属国泥婆罗门等叛赞普自讨死于军诸子争立国人立弃隶缩赞为赞普景龙三年遣使请昏帝以雍王守礼女为金城公主妻之吐蕃外虽和而阴衔怒即请河北九曲为公主汤沐邑与之势益张开元二年其相盆达延将兵十万寇临洮诏令薛讷王晙等击败之自后边将捍御益力然吐蕃寇盗无闲岁十年攻子勃律等国张孝嵩遣兵击败之十五年王君奭大破其众于青海西后君奭为回纥所杀帝以萧嵩张守珪代领其众明年寇瓜州守珪击走之都督张志亮又破其军于青海西时忠王友皇甫惟明等以约和为言帝敕惟明以书赐金城公主乃遣使纳贡二十六年以节度使崔希逸背约大入河西希逸死萧灵率军击破之金城公主卒吐蕃悉众四十万来攻入振武军天宝元年陇右节度使皇甫惟明破之自是频岁入寇惟明及哥舒翰高仙芝相继战禽馘巨酋十三载赞普乞黎苏笼腊赞瓦子孛悉笼腊赞嗣遣使修好安禄山随机数遣使请和帝虽审其谲姑务纾患诏宰相郭子仪与盟宝应元年陷临洮取秦成渭等州明年破西山合水城明年入大震关取兰河鄯洮等州陇右地尽没进攻泾州破邠州东略武功代宗幸陕吐蕃入长安留十五日乃走帝还京退围凤翔仆固怀恩反合其兵攻邠州郭晞夜击之引去陷凉州永泰元年请和怀恩又导吐蕃与回纥党项等至醴泉京师戒严诏子仪等屯兵分道夹击帝自率六军击之累战辄胜会怀恩死吐蕃无谋主与回纥争长回纥怒诣子仪请击吐蕃自效子仪许之遂大破之诏班师大历二年又寇灵州子仪兵屯泾阳破之三年八月引众十万入灵邠二州为马璘白元光所败八年又寇泾邠浑瑊马璘相继掩袭射杀其酋将子仪复追破之吐蕃每岁议和中朝频许之然无信常以兵骑寇盗德宗即位欲以德绥远方诏还其所俘时乞立赞为赞普遣使入朝由是为盟好朱泚乱浑瑊以吐蕃兵破泚将韩旻于武亭川泚平来求地帝薄其劳赐帛万匹吐蕃以为怨贞元二年复犯泾陇邠宁四州为李晟所败时其相尚结赞攻据盐夏乞和于马燧燧入见奏请与盟诏浑瑊为盟会使崔汉衡副之将盟其众鼓噪瑊单骑走汉衡等被执结赞以羌浑众屯青石岭分道趋陇汧阳剽掠州县诸将兵不敢出初吐蕃盗塞畏春夏疾疫常以秋及是得唐俘给产质其孥因亦以盛夏入边是时宁灵受患最甚唐地

没入者多安西道绝诏浑瑊杜希全邢君牙等合兵三
万筑城灵武是时韦皋连破其众后尚结赞及赞普死足之煎嗣为赞普请修好帝以其
无信不受又入寇二十年足之煎死其弟嗣立宪宗即
位遣使修好元和十二年赞普又死可黎可足立十四年分兵十五万围盐州刺史李文
悦合朔方将史敬奉击破之长庆元年来乞盟诏使刘
元鼎等会守将与盟是后比年遣使朝聘赞普死弟达磨嗣会昌二年达磨死无子以妃
緜兄尚延力子乞离胡为赞普羣下以非故王后皆叛
自相攻杀诸将乘乱收复亡失等州自是其国浸弱然种部繁多自宋以后屡来贡献无
复统一其稍大者有嘉勒斯賚初居页恭城欲于河州
立文法部属尊事之徙宗噶尔城又徙邈川与赵德明抗希望朝廷恩命泾原钤辖曹玮
言宜厚嘉勒斯賚以扼德明大中祥符八年遣使来贡
其年聚众数十万请讨夏以自效明道初授嘉勒斯賚宁远大将军爱州团练使徙居青
唐景佑中以嘉勒斯賚为保顺军节度观察留后嘉勒
斯賚阴闲元昊得其虚实数以奇计破元昊潘罗支旧部回纥种人往往归之嘉勒斯賚
由是富强累兼保顺西河节度使洮凉两州刺史治平
二年死第三子栋戡嗣熙宁三年夏人寇环庆栋戡乘虚入其境大克获王韶定熙河其
首领青伊结果庄寇河州帝命边臣招来之元丰四年
宋师讨夏栋戡分兵入援以功由常乐郡公进封武威郡王元佑元年死养子阿里库本
于阗人少从其母事栋戡元丰闲兰州之战有功由肃
州团练使进防御使栋戡无子立之既嗣遣使修贡元佑元年以起复为河西军节度使
封宁塞郡公常使果庄拒洮州果庄遣其子入寇其下
不从阿里库奉表谢罪诏许贡如故绍圣三年卒子辖整嗣四年授河西军节度使宁塞
郡公为其下所逐内徙邓州崇宁元年卒嘉勒斯賚嫡
孙穆占者少依青唐族为部酋所立居洮州后徙河州熙宁七年以二州来降拜荣州团
练使迁合州防御使卒穆占降时诏赐姓名曰赵思忠
其弟栋古曰赵继忠苏毗者西羌族役属吐蕃号孙波在诸部最大唐天宝中王没陵赞
欲举国内附为吐蕃所杀子悉诰率首领奔陇右节度
使哥舒翰护送阙下厚礼之多弥亦西羌族役属吐蕃贞观六年遣使朝贡又有泥婆罗
者在吐蕃之西乐陵州初王那陵提婆之父为其叔所
杀提婆走依吐蕃贞观中遣使至天竺道其国提婆乃遣使入献永徽时王尸利那连陀
罗又遣使贡

○吐谷浑

吐谷浑居甘松山之阳洮水之西南抵白兰地数千里隋时其王慕容伏允号步萨
钵尝寇边炀帝遣铁勒败之复命观王雄破其众伏允

亡入泥岭部众降置郡县镇戍以长子顺为质囚王之俄追还隋乱伏允还国唐高祖受命约伏允击李轨自效伏允大喜引兵与轨战遣使请顺顺至号为大宁王太宗时寇鄯州又掠岷州都督李道彦击走之连岁寇凉州诏段志元梁格仁等率契苾党项兵击之时伏允耄其相天柱王用事拘行人赵德楷帝遣使晓敕不悛贞观九年诏李靖侯君集等进讨连破之顺之质隋伏允立其弟为太子顺归常怏怏欲以功自结于唐乃斩天柱王举国降伏允引千余骑遁碛中寻自经死国人立顺内附诏封西平郡王号赳胡吕乌甘豆可汗顺久质华国人不附卒为下所杀立其子燕王诺曷钵诺曷钵功臣下争权帝诏侯君集经纪之诏封诺曷钵河源郡王号乌地也拔勒豆可汗诺曷钵入谢请昏以宗室女为弘化公主妻之高宗立拜尉马都尉诺曷钵入朝帝又以宗室女金城县主妻其长子苏度摸末摸末死主与次子左武卫大将军梁汉王阖庐摸末来请昏帝以宗室女金明县主妻之既而为吐蕃所攻诺曷钵走凉州吐蕃遂有其地诺曷钵请内徙干封初更封青海国王咸亨元年命薛仁贵讨吐蕃且纳诺曷钵于故廷官军败于大非川举吐谷浑地皆陷三年徙亶水南又徙灵州帝为置安乐州拜刺史诺曷钵死子忠立忠死子宣超立圣历三年拜左豹韬员外大将军袭故可汗号宣超死子曦皓立曦皓死子兆立吐蕃复取安乐州退徙朔方河东语讹为退浑贞元十四年以朔方节度副使左金吾卫大将军慕容复为长乐都督青海国王袭可汗号复死停袭吐谷浑自晋永嘉时有国至龙朔三年吐蕃取其地凡三百五十年五代时但名吐浑部族益微后唐庄宗朝有首领白承福依中山北石门为栅赐姓名李绍鲁终唐时尝遣使朝贡石晋时为将军役属畏其苛暴出帝时曾入朝又以其兵助御契丹后为刘智远所灭遂微不复见

○党项

党项汉西羌别种古析支地也东界松州西叶护南春桑迷桑等羌北吐谷浑山谷崎岖三千里而羸以姓别为部一姓又分为卜部落大者万骑小数千不能相统故有细封【宋史作细风】氏费听氏往利氏颇超氏野辞氏房当氏米禽氏【宋史作来禽亦作来离】拓拔氏而拓拔最强唐贞观三年其酋细封步赖内附以其地为轨州授步赖为刺史其后诸酋长多内附以其地为岷奉严远四州即拜刺史有拓拔赤辞来归以其地为懿嵯麟可三十二州以松州为都督府赤辞擢西戎州都督赐姓李自是贡职不绝自河首积石山而东皆为中国地后吐蕃寔盛拓拔畏逼内徙庆州地皆入吐蕃其处者为吐蕃役属更号弭药又有黑党

项者居赤水西其长号敦善王吐谷浑款附后亦纳款
居雪山者曰破丑氏又有白兰羌俗与党项同武德六年入朝七年以其地为维恭二州
天授中内附户凡十万以其地为朝吴浮归十州散居
灵夏闲上元时其部属皆入朝元和以后颇相率为盗寇边宣宗诏宰相白敏中及李业
李栻等合兵讨之其种类残破不敢内掠其拓拔氏有
名思恭者咸通中据宥州自称刺史黄巢入长安与鄜州李孝昌誓讨贼僖宗以为左武
卫将军权知夏绥银节度事中和二年诏为京城西面
都统检校司空同中书门下平章事俄进四面都统权知京兆尹贼平兼太子太傅封夏
国公赐姓李寻卒以其弟思谏代为定难节度使思孝
为保大节度使鄜坊丹翟等州观察使并检校司徒同中书门下平章事后思孝因乱取
鄜州遂为节度使累兼侍中以老荐弟思敬为保大军
兵马留后俄为节度使宋太祖初其大姓有密玛者世居河石颇为边捍授代州刺史雍
熙初诸族渠帅附李继迁为寇诏田仁期王诜讨之破
其众自是羌族多内附者即命为本州岛刺史淳化五年授其长苏拉伞哈雅乌下桑三
人为怀化将军页里威明密曲卓尼三人为归德郎将后
以乜遇为检校司空自后多赐将军及检校者至道元年埽克拉等族首领玛圭率属附
诏以玛圭为归德大将军领恩州刺史余赐郎将咸平
二年玛圭又领本州岛团练使五年密布族尼玛遣子入贡尼玛数与继迁战鬪诏授为
锦州团练使其子弟首领以下授官有差帝闻驾兰山盛
族曰小凉大凉与继迁互相攻掠乃因密布特赐诏抚辑之六年页实勒族罗斡等率属
来以罗斡为本族指挥使是时诸族为继迁所署者多
来归帝以其有志内附皆激奖之景德元年尼族巴黄率三百余帐内属巴黄本大族素
附契丹犯边境契丹署为太尉至是亦来诏府州厚赐
茶彩计口赋粟其后诸族多纳质归化悉授官至天禧闲有仕至三班借职充差部巡检
者党项自是皆内附矣

○于阆

于阆或曰涣那亦曰屈丹曰于遁其居曰西山城俗机巧事袄神浮屠法喜歌舞工
纺绩自汉武帝以来朝廷诏书符节其王世守之唐初
其王尉迟屋密尝臣突厥贞观六年遣使入献后三年遣子入侍阿史那社尔之平龟兹
也长史薛万备至其国陈唐威灵其王伏阁信惧随使
者来会高宗立授右卫大将军子叶护玷为右骁卫将军上元初身率子弟酋领七十人
来朝击吐蕃有功帝以其地为毗沙都督府析十州授
伏阁雄都督死子璿嗣璿死立尉迟伏师战为王死伏阁达嗣达死尉迟珪嗣珪死子胜
嗣胜自有传自安史之乱不复至晋天福中其王李圣

天自称唐宗属遣使来贡高祖命供奉官张匡邺持节册圣天为大宝于阗国王宋建隆二年遣使贡干德中沙门道圆自西域还经于阗与其朝贡使至开宝二年遣使贡四年其国王僧吉祥以其国王书来言破疏勒国得舞象欲以为贡诏许之大中祥符二年其国王遣回鹘罗斯温等贡召对请遣使安抚远俗帝以路远命使劳费赐诏书遣还自是迄于宣和朝贡不绝

○天竺 【狮子】

天竺古身毒国后汉时求佛法于其国始通焉或曰摩伽陀曰婆罗门居葱岭南分东西南北中五天竺与大秦扶南交趾贸易人富乐有文字善推步曰梵天法书用贝多叶不饮酒杀生俗信盟誓传禁咒随时复不通炆帝遣裴矩通西域独天竺拂菻不至中天竺王姓乞利啞氏武德时王尸罗逸多讨四天竺悉臣之会僧元奘至其国言太宗神武四夷宾服状贞观十五年乃遣使上书自称摩伽陀王帝命云骑尉梁怀璈持节慰抚之复遣使者随入朝二十二年遣右卫率府长史王元策使其国未至王死国大乱其臣那伏帝阿罗那顺自立发兵拒元策从骑数十皆战没元策奔吐蕃檄邻国兵合讨之禽阿罗那顺以献干封二年五天竺皆来朝开元时中天竺遣使者三北天竺一南天竺亦来朝丐名其军诏赐怀德军周广顺三年西天竺僧萨满多等十六族来宋开宝后天竺僧持梵夹来献者不绝八年冬东天竺王子囊嘉特舒噜来朝贡天竺法国王死太子袭位余子皆为僧不复居本国有满珠锡哩者王子也随中国僧至太祖令馆于相国寺善持律都人倾向焉财施盈室众僧嫉之以其不解唐语伪为奏求还许之诏下满珠锡哩大惊不得已迟留数月而去太平兴国七年益州僧光远至自天竺其王玛特巴附表贺雍熙中卫州僧辞瀚自西域还与胡僧密当罗奉北印度王书来天圣二年九月西印度僧爱贤智信护等来献梵经各赐紫方袍束帛五年二月僧吉祥等五人以梵书来献赐紫方袍景佑三年正月僧善称等九人贡梵经佛骨及铜牙菩萨像赐以束帛师子者亦天竺旁国居西南海中多奇宝能驯养师子因以名唐总章三年遣使来朝天宝初王尸罗迷迦再遣使贡

○拂菻

拂菻古大秦国也亦曰海西国东南按波斯唐贞观十七年王波多力遣使来献下诏答赉时大食稍强伐之遂臣属焉干封及大足再朝献开元七年四吐火罗大酋献师子羚羊宋元丰四年其王默埒伊楞噶萨纳始遣使来献元佑六年使两至诏亦优赐之

○高昌

高昌汉车师前王之地南距于阗西南距大食波斯后魏初有阚爽及沮渠无讳皆尝自署大守其后蠕蠕始立阚伯周为王高昌有王始于此阚氏灭历张孟明马儒至曲嘉而始大嘉之孙伯雅尝朝贡于隋妻以戚属宇文氏女华容公主唐武德初伯雅死子文泰立来告命使临吊贞观四年文泰来朝礼赐甚厚后与西突厥通塞梗西域朝贡道破伊吾焉耆等国焉耆王来诉遣使责让不听又欲攻夺薛延陀延陀可汗请为军导乃遣使侯君集等率突厥契苾骑讨之文泰初以唐师远出粮必不逮及闻师至碛口悸骇发病死子智盛立君集攻战甚力智盛遗书君集求见赦君集责以悔祸当面缚军门智盛不答军薄其城乃降敕所得高昌地为州县号西昌州改曰西州置安西都护府拜智盛为左武卫将军金城郡公弟智湛为右武卫中郎将天山郡公高昌既为西州至安史乱遂复立为国宋时亦称回鹘 【按唐书称高昌曲氏传国九年而亡其国为州县宋史称安史之乱地陷没乃复为国其立国之初国王之姓俱无所考】 干德三年西州回鹘可汗遣僧来献太平兴国六年其王称西州外生师子王阿尔斯兰汗遣都督玛实衮来献太宗遣供奉官王延德殿前承昌白勋使其国八年使温古嚕来贡景德元年又遣金延福来贡

○焉耆

焉耆国与高昌龟兹尉犁乌孙诸国为邻唐贞观六年其王龙突骑支遣使来朝寻为高昌所陷侯君集讨高昌突骑支引兵佐之侯君集归其所俘及城后与西突厥为婚不朝贡诏郭孝恪为西州道总管讨之囚突骑支及妻子送洛阳以其弟栗婆准摄国事为从兄薛婆阿那支所杀阿史那社尔禽阿那支斩之立突骑支弟婆伽利为王以其地为焉耆都督府婆伽利死国人请还突骑古高宗许之归国死龙懒突立开元七年龙懒突死焉吐拂延立迄天宝常朝贡自天庆以后莫可考

○龟兹 【疏勒】

龟兹亦曰屈兹其国王自称师子王与宰相九人同治事土宜麻麦稔稻葡萄出黄金书旁行事浮屠法王姓白氏居伊逻卢城北阿羯田山自汉建武时通其后叛服不常唐高祖受禅王苏伐勃馱遣使入朝子苏伐迭嗣立号时建莫贺俟利发贞观四年献马赐玺书抚慰后臣西突厥郭孝恪伐焉耆乃与焉耆影援自是不朝贡苏伐迭死弟诃黎布失毕立二十一年帝怒其佐焉耆叛命昆邱道行军大总管阿史那社尔等进讨大破之追禽其王于拨换城其相那利夜逸以西突厥并国人万余来战那利为韩威等所执国遂定社尔立王弟叶护主其国献俘帝

赦诃黎布失毕拜左武卫中郎将高宗复封为龟兹王后国乱死以其地为龟兹都督府王其子素稽徙安西都护府于其国故安西为西州都督府即拜素稽为左骁卫大将军兼安西都护上元中献名马天授三年王延田跌来朝始仪凤时吐蕃攻焉耆以西四镇皆没长寿元年武威道总管王孝杰破吐蕃乃复四镇及安西都护府以兵三万镇守议者以沙碛荒绝民苦输挽请弃之武后不听时都护以政绩称者田扬名郭元振张孝嵩杜暹云开元十年王莫苾死子多市立改名孝节十八年遣弟孝义来朝自后屡朝贡宋自天圣至景佑五入贡熙宁四年使李延庆曹福来五年又使卢大明都督来绍圣三年又使大首领阿尔萨里三人奉表至并贡方物诏优答遣还其后绝不闻疏勒亦汉时通唐初其王姓裴氏自号阿摩支居伽师城与突厥为婚贞观九年遣使者来献又四年复来贡仪凤时吐蕃破其国开元十六年始遣乔梦松册其君安定为疏勒王天宝十二载遣使朝

○拔汗那

拔汗那元魏时谓之破洛那居西犍城在真珠河北唐贞观中王契苾为西突厥瞰莫贺咄所杀阿瑟那鼠匿夺其城鼠匿死子遏波之立与契苾兄子阿了参分治其众显庆时遏波之遣使朝贡高宗以其所居渴塞城为休循州授都督阿了参为刺史自是岁朝贡开元二十七年王阿悉烂达干助平吐火仙册拜奉化王天宝三载改其国号宁远帝以外家姓赐其王曰窈又封宗室女为和义公主降之十三载王忠节遣子薛裕朝留宿卫授左武卫将军

○罽宾

罽宾隋时为漕国在葱岭西南王居修鲜城常役属大月氏俗治浮屠法唐武德二年遣使贡贞观中献名马遣果毅何处罗拔等厚赉赐其国国人共传王始祖曰馨孽至曷撻支传十二世显庆三年以其地为修鲜都督府神龙初拜其王修鲜等十一州诸军事修鲜都督开元七年册其王为葛逻达支特勒后乌散特勒洒年年请以子拂赫罽婆嗣听之天宝四年册其子勃匄准为袭罽宾及乌苾国王干元初遣使朝贡至宋事迹不可考

○康居九姓

康居王姓温本月氏人始居祁连北昭武城为突厥所破稍南依葱岭枝庶分王曰安曰曹曰石曰米曰何曰火寻曰戊地曰史世谓之九姓皆氏昭武隋时其王屈木支娶西突厥女遂臣突厥唐武德十年始遣使来献贞观五年遂请臣岁入贡永徽时以其地为唐居都督府即授

其王拂呼纒都督万岁通天中以大首领笃娑钵提为王死子泥涅师立死国人立突昏为王开元初来贡其王乌勒伽与大食亟战不胜来乞师不许久之请封其子咄曷为曹王默啜为米王许之乌勒伽死遣使封咄曷为钦化王大安者西濒乌浒河武德时遣使入朝贞观初献方物厚礼其使后其王诃陵迦又来献自言一姓相承二十二世云又有东安国显庆时以其地为安息木鹿二州即授其王昭武杀昭武闭息为刺史开元十四年其王笃萨波提遣弟阿悉烂达拂毗发黎来朝后八年来献东曹者武德中与唐居同遣使朝天宝十一载其王设阿忽与安王请击黑衣大食帝慰抚之西曹者隋曰曹武德中亦入朝天宝元年王哥逻仆逻遣使献方物诏封怀德王中曹者居迦底真城石国王治柘枝城隋大业初西突厥杀其王以特勒匐职统其国武德贞观闲数献方物显庆三年以其瞰羯城为大宛都督府授其王瞰土屯摄舍提于屈昭穆都督开元初封其君莫贺咄吐屯有功为石国王二十八年册顺义王明年王伊捺吐屯屈勒上言请讨大食不许天宝初封王子那俱车鼻施为怀化王安西节度高仙芝劾其无藩臣礼请讨之王约降仙芝遣使者护送至开远门俘以献斩阙下自是西域皆走大食为之臣至宝应时遣使朝贡米者永徽时为大食所破显庆三年以其地为南谥州授其君昭武开拙为刺史自是朝贡不绝开元十八年大首领末野门来朝天宝初封其君为恭顺王何者贞观十五年遣使入朝永徽时以其地为贵霜州授其君昭武婆达地刺史火寻天宝十载其君稍施芬遣使朝献宝应时复入朝史者隋大业中通其君狄遮号最强贞观十六年君沙瑟毕献方物显庆时以其地为佉沙州授其君昭武失阿喝刺史开元十五年君忽必多来献天宝中诏改史为来威国

○大勃律 【小勃律 失蜜 识匿 似 役盘】

大勃律直吐蕃西与北天竺邻万岁通天及开元时尝遣使朝贡册其君苏弗舍利支敌泥为王死又册苏麟陀逸之嗣王凡再遣使贡方物小勃律开元初王没谨忙来朝以其地置绥远军迫于吐蕃没谨忙求救北廷节度使张孝嵩遣疏勒副使张思礼率锐兵倍道往没谨忙亦出兵大破之诏册为小勃律王没谨忙死子难泥立死兄麻来兮立死苏失利之立复臣吐蕃贡献不入天宝六载诏高仙芝伐之以苏失利之归平其国诏改曰归仁置归仁军个失蜜北距勃律五百里开元初遣使朝八年册其王真陀罗秘利为王死弟木多笔立复遣使朝求册立自是职贡有常识匿在葱岭西五百里贞观二十年与似没役盘二国使者皆来朝开元十二年授其王布遮波资金吾卫大将军天宝六载王跌

失伽延从讨勃律战死擢其子都督左武卫将军似没者其土俗与康居同役盘亦与唐居邻出良马

○吐火罗 【挹怛 俱兰 劫 谢■〈风日〉 帆延 石汗那 俱蜜 护蜜 骨咄】

吐火罗居葱岭西乌浒河之南古大夏地与挹怛杂处其王号叶护唐武德贞观时再遣使贡显庆中以其阿暖城为月氏都督府析小城为二十四州授王阿史那都督后二年遣子来朝神龙元年王那都泥利遣弟仆罗入朝留宿卫天宝闲册其君骨咄禄顿达度为吐火罗叶护挹怛王其后吐蕃将攻吐火罗于是叶护失里忙伽罗丐安西兵助讨帝为出师破之干元初与西域九国发兵为天子讨贼肃宗诏隶朔方行营挹怛者汉大月氏种本名嚙哒其王姓也后裔以姓为国复讹为挹怛天宝中遣使朝贡俱兰与吐火罗接贞观二十年其王忽提婆遣使来献书劫者居葱岭中西北与挹怛接武德二年遣使来献谢■〈风日〉居吐火罗西南显庆时本名诃达罗支武后改曰谢■〈风日〉景云初遣使朝贡后臣罽宾开元八年始册葛达罗支颉利发誓屈尔为王至天宝中数朝献其东北四百里为帆延居斯毕莫运山之旁贞观中遣使朝显庆三年以其罗烂城置写凤都督府缚时城置悉万州授王匐写凤州都督管内五州诸军事自是朝贡不绝石汗那在帆延北开元天宝中再朝献俱蜜在吐火罗东北其王突厥延陀种贞观十六年遣使朝开元中其王那罗延来献自陈为大食暴赋帝慰逾遣之天宝时王伊悉烂俟斤又献马护蜜元魏所谓钵和者亦吐火罗故也显庆时以地为鸟飞州王沙钵罗颉利发为刺史役属吐蕃开元八年册其王罗旅伊陀骨咄禄多毗勒莫贺达摩萨尔为王十六年来献明年复遣使来献王死册其从弟护真檀嗣王二十九年入朝拜左金吾卫将军天宝八载复来朝干元元年王纥设伊俱鼻施来市赐氏李又有骨咄开元十七年王俟斤遣子来朝二十一年王颉利发献女乐又遣大首领来朝天宝十一载册其王罗金节为叶护

○波斯

波斯居达遏水西东与吐火罗康居接北邻突厥可萨部西南皆滨海隋末西突厥叶护可汗残其国杀王库萨和其子施利立叶护使部帅监统施利死遂不肯臣立库萨和女为王突厥又杀之施利之子单羯方奔拂菻国人迎立之为是伊怛支死兄子伊嗣俟立唐贞观十二年遣使者没似半来朝伊嗣俟不君为大酋所逐奔吐火罗半道大食击杀之子卑路斯入吐火罗以免会大食解而去吐火罗以兵纳之龙朔初

又诉为大食所侵是时天子方遣使西域分置州县以疾陵城为波斯都督府即拜卑路斯为都督其地多为大食所并咸亨中入朝授右武卫将军死先是其子泥涅师为质调灵元年诏裴行俭护送泥涅师不敢入其国客吐火罗二十年部落益离散景龙初复来朝授左威卫将军病死西部独存开元天宝闲遣使来献大历时复来又有陀拔斯单者世为波斯东大将波斯灭不肯臣大食天宝五载王忽鲁汗遣使来朝封归信王后八年遣子来朝寻为黑衣大食所灭

○大食

大食国本波斯别种隋大业中波斯有桀黠者探穴得文石以为瑞乃纠众剽掠资货浸盛遂自立为王据有波斯西境国人讨之者皆败破拂林南侵婆罗门并诸国胜兵至四十万唐永徽二年大食王馼密莫末腻始遣使朝贡自言王大食氏有国三十年传二世开元初复遣使贡十四年遣苏黎满献方物拜果毅赐袍带其王盆泥末换之前谓之白衣大食阿蒲罗拔之后谓之黑衣大食阿蒲罗拔死子阿蒲恭拂立至德初遣使朝贡代宗取其兵平两京阿蒲恭拂死子迷地立传弟诃论贞元时与吐蕃相攻无闲岁故吐蕃鲜盗边十四人遣使者含羞乌鸡沙北三人朝皆拜中郎将遣还其后绝不闻宋干德四年僧行勤游西域因赐其国王书招来之开宝元年来贡四年又贡命其使为怀化将军六年七年九年皆来贡太平兴国中再遣使来贡淳化四年遣其副酋长李亚勿来贡其国舶主蒲希密至海南以病不能诣阙附表来献赐敕书锦袍银器等答之至道元年其子蒲押陀黎又奉蒲希密表来贡并谢前赐太宗问其国云与大秦国邻为其统属今本国所管民纔数千其山泽所出惟犀象香药留数月遣回降诏答赐希密黄金准其贡直自后历世朝贡不绝建炎三年遣使贡宝玉珠贝帝谓侍臣曰捐数十万缗以易无用之珠玉曷若惜财以养战士诏张浚却之优赐以答其意绍兴元年复遣使贡

○层檀

层檀国在南海傍宋熙宁四年始入贡海道使风行百六十日经勿巡古林三佛齐国乃至广州其王名亚美罗亚眉兰传国五百年十世矣人语音如大食元丰六年使人层伽尼再至神宗念其绝运颁赉有加焉

钦定续通志卷六百三十七

●钦定续通志卷六百三十八 四夷传四

四夷传 【四】

占城 真腊 【投和 婆利 赤土 丹丹 罗刹 婆罗 殊禁 甘棠 僧高 武令 迦乍 鳩密 盘盘 哥罗

拘萎密 扶南 瞻博 婆岸 干支 跋若 摩腊 哥罗舍分 修罗分 甘毕
多摩莪】 三佛齐 阁婆【蒲甘 邈黎】

渤泥 注犂【丹眉流】 安南【林靛符部落】 暹 瓜哇

马八儿【俱蓝】

占城

真腊【投和 婆利 赤土 丹丹 罗刹 婆罗 殊禁 甘棠 僧高 武令
迦乍 鳩密 盘盘 哥罗 拘萎密 扶南

瞻博 婆岸 干支 跋若 摩腊 哥罗舍分 修罗分 甘毕 多摩莪】

三佛齐

阁婆【蒲甘 邈黎】

渤泥

注犂【丹眉流】

安南【林靛符部落】

暹

瓜哇

马八儿【俱蓝】

○占城

占城在中国西南即周时越裳地秦为林邑汉为象林县后汉至隋复称林邑唐时称占不劳或称占婆其王所居曰古城至德后改其国号曰环周以后仍称占城东至海西至云南南至真腊国北至驩州界统大小州三十八有县镇无城郭人口希少人多乘象或于交州市马风俗衣服与大食相类其王或以兄为副王或以弟为次王设高官八员东西南北各二胜兵万余人唐武德中再遣使献方物【此下采自唐书璟王传考传云所居曰占城而其国自五代以后俱称占城故删附于此】贞观时其王范头黎遣使贡献头黎死子镇龙立亦入献十九年其下摩诃漫多伽独弑镇龙灭其宗范姓绝立头黎婿婆罗门为王大臣共废之更立头黎女不能定其下乃迎头黎之姑子诸葛地为王妻之永徽至天宝凡三入献元和初不朝献安南都护张舟执其都统虜王子五十九人周显德中其王释利因德漫始遣使贡方物宋建隆二年王释利因阉盘遣使者入朝以后屡遣使来贡政和中始授其王杨卜麻迭金紫光禄大夫领廉白州刺史宣和元年进检校司空兼御史大夫怀远军节度琳州管内观察处置使封占城国王自是每遇恩辄降制加封邑建炎三年遣使入贡遇郊恩授检校太傅加食邑绝兴二十五年其子邹时阑巴嗣立遣使贡求封爵以其父初封之爵授之干道三年子邹亚娜嗣掠大食

国方物遣使贡以求封爵为其国人所诉诏却之遂不
议封七年闽人有浮海之吉阳军者风泊抵占城其国方与真腊战皆乘象胜负不能决
闽人教以骑射与战大捷淳熙四年又以舟师袭真腊
传其国都真腊大举伐占城俘其主以归元世祖至元十五年以宋平遣人至其国还言
其王失里咱牙信合八刺哈迭瓦有内附意诏授荣禄
大夫封占城郡王十七年又遣使贡十九年以占城国主称臣内属即其地立省抚安之
既而其子补的专国负固弗服命占城行省官自广州
航海伐之迁延至二十一年卒不能定再命往征不果行其国亦不复朝贡

○真腊【投和 婆利 赤土 丹丹 罗刹 婆罗 殊禁 甘棠 僧高 武
令 迦乍 鸠密 盘盘 哥罗 拘婆密 扶南

瞻博 婆岸 千支 跋若 摩腊 哥罗舍分 修罗分 甘毕 多摩苳】

真腊国亦名占腊在占城之南东际海西接蒲甘南抵加罗希风俗同占城唐自武
德至圣历凡四来朝以后亦频有贡献宋政和六年遣
使贡宣和二年又来封其王与占城等建炎二年以郊恩授其王金哀宾深检校司徒加
食邑遂定为制其南又有投和自广州西南海行百日
乃至王姓投和罗名脯邪迄遥贞观中书遣使表献方物婆利者直占城东南自交州泛
海历赤土丹丹诸国乃至地大多马亦号马礼袞长数
千里其东即罗刹与婆利同俗隋炀帝遣常骏使赤土遂通中国赤土西南入海得婆罗
总章二年其王旃达钵遣使者与环王使者偕朝占城
南有殊禁者泛交趾海三月乃至与婆罗同俗贞观二年使者上方物九年甘棠使者入
朝国居海南十二年僧高武令迦乍鸠密四国使者朝
贡僧高直水真腊西北与占城同俗其后鸠密王尸利鸠摩又与富那王尸利提婆跋摩
等遣使来贡永徽以后僧高等国悉为真腊所并盘盘
在南海曲北距占城限少海与狼牙修接自交州汀行四十日乃至贞观中再遣使朝其
东南有哥罗统州二十四又东南有拘婆密海行一月
至南距婆利东距不述西北距文单俗与赤土随和罗同永徽中入献扶南在日南之南
七千里地卑洼与占城同俗有城郭宫室治特牧城为
真腊所逼南徙那弗那城武德贞观时再入朝又献白头人二白头者直扶南西人皆素
首肤理如脂居山穴四面峭绝人莫得至又有瞻博或
曰瞻婆北距兢伽河多野象显庆中与婆岸千支跋若摩腊四国并遣使入朝千支在西
南海中本南天竺属国亦曰半支跋若北距多摩苳又
有哥罗舍分修罗分甘毕三国贡方物甘毕在南海上东距占城哥罗舍分在南海南修
罗分在海北东距真腊风俗略相类又有多摩苳东距
婆风西多隆南千支北诃陵其国经萨卢都诃卢君那卢占城诸国乃得至交州显庆中

贡方物

○三佛齐

三佛齐古名千陀利国与占城为邻居真腊阇婆之闲管十五州四时多热少寒其地无麦有米文字用梵书以王指环为印亦有中国文字上章表用之累甃为城数十里用椰叶覆屋人氏散居不输租赋有征伐随时调发称王曰詹卑国人多蒲姓宋建隆以后其王屡遣使来贡咸平六年遣使奏本国建佛寺以祝圣寿愿赐名及钟诏寺为承天万寿铸钟以赐加其使为将军大中祥符元年又来贡诏其使赴泰山陪位朝觐坛天禧元年天圣六年遣使贡后贡使数至南渡后绍兴淳熙两来贡凡贡者皆馆于泉州以后频有贡献元绝不通

○阇婆 【蒲甘 邈黎】

阇婆国在南海中唐曰诃陵又曰社婆社与阇土音同故亦名阇婆地平坦宜种植煮海为盐其它物产制度略与占城同唐贞观中与墮和罗墮婆登皆遣使者入贡至上元闲国人推女子为王号悉莫威令整肃道不举遗大历中使者尝三至元和八年来献太和再朝贡咸通中遣使献女乐宋淳化三年王遣使贡云中国有真主乃修朝贡其后不至又蒲甘国崇宁五年遣使入贡邈黎国元佑四年来上表有司请视于阗条式待之

○渤泥

渤泥国在西南大海中其国以版为城统十四州为王左右者为大人战甲以铜铸其地无麦有麻稻无蚕用吉贝织成布以十二月七日为岁节宋太平兴国二年其王始遣使贡诏馆其使礼宾院优赐遣之元丰五年复遣使贡其使乞从泉州乘海舶归国从之元绝不通

○注犂 【丹眉流】

注犂国水行至广州一万一千四百里其国有城七重每城相去百步四城用砖二用土最中以木即国王所居所统三十一部落有四侍郎分理之刑禁略与占城同俗衣布兵阵象居前宋大中祥符八年遣使来贡宴赐恩例同龟兹使明年使回赐予甚厚景佑元年以其使为金紫光禄大夫怀化将军熙宁十年封其使如初礼又有丹眉流国 【宋赵汝诸蕃志作登流眉】 在广州西南俗以版为屋四时炎热宋咸平四年尝遣使贡赐诏书奖谕之

○安南 【林覩符部落】

安南即交址国唐以前内隶设都护府治交州其地东距海西接老挝南渡海即占城五代时为土人曲承美所据梁末帝授以节钺时刘

隐擅命岭表遣将李知顺伐之并其地统十二州后有杨延艺绍洪皆受广南署继为交址节度使绍洪卒州将吴昌岌居其位昌岌死其弟昌文袭宋干德初昌文死州大乱先是杨延艺以牙将丁公着摄驩州刺史兼御蕃都督公着死子部领继之至是部领与其子璉击平乱贼交民因推为州帅号大号王署璉为节度使寻逊于璉闻岭表平遂遣使贡方物上表内附诏以璉为节度使安南都护封部领交趾郡王璉死弟璇幼大将黎桓迁璇别第总其众太平兴国五年诏诸路兵讨之不克而还七年恒以丁璇名上表入贡自署权交州三使留后诏令其成立丁璇不听命雍熙三年复遣使贡方物乃以桓为检校太保使持节都督交州诸军事安南都护充静海军节度交州管内观察处置等使封京兆郡侯端拱元年加检校太尉淳化元年加特进四年进封交趾郡王桓犹恃险为寇害至道元年寇钦州邕州诸边地太宗思以德绥之不欲问罪桓亦惭悔愿守职约真宗即位进封南平王自是屡入贡景德三年桓卒诸子争立诏使安抚之其子尼廷袭位自称权安南静海军留后遣使贡诏封为交趾郡王赐名至忠至忠苛虐不法其大校李公蕴素用事阴谋之大中祥符三年逐至忠自称留后遣使贡帝以蛮俗不足责遂用桓故事以公蕴为交趾郡王自是或闲岁或仍岁以方物入贡天禧元年进封南平王天圣中卒封其子德政为交趾郡王宝元元年进封南平王至和二年卒封其子日尊为交址郡王神宗即位进南平王熙宁二年日尊奏讨占城虜其王遂僭帝号国号大越改元宝象又改神武五年日尊卒子干德立仍诏为交趾郡王元佑二年进南平王绍兴二年卒子阳焕嗣授郡王如故事八年阳焕卒子天祚嗣授官如其父二十五年进南平王淳熙元年进封安南国王二年赐印明年天祚卒子龙翰嗣位即授安南国王嘉定五年龙翰卒其子昊岳袭封昊岳卒无子女昭圣主国事遂为其壻陈日熨所有李氏有国自公蕴后凡入传百二十年而国亡淳佑二年诏以陈日熨为安南国王景定三年进日熨安南国大王以其子威晃为安南国王其后日熨为元世祖所攻破传国于长子光昺改元绍隆光昺求修好纳款中统元年遣使谕之二年封光昺为安南国王至元十四年卒国人立其子日烜遣使来贡诏以日烜不请命而自立谕令入朝日烜遣其叔遗爰来十八年诏以遗爰为安南国王未几日烜杀之会兴兵讨占城遣使持书令其国助饷日烜恐见袭调兵保境官兵因攻之日烜弃城遁弟昭国王陈益稷率属降二十三年又议大举南伐诏谕安南吏民数日烜罪恶因封益稷为安南国王遣兵送入其境拒不纳二十七年日烜卒子日燿立二十九年诏谕日燿来朝不

至次年廷议征之会世祖崩遂罢成宗即位日燿遣使上表献方物诏抚绥之延佑以后贡献不绝日燿死子日爨袭位日爨卒子日燧袭位安

南所属有生蛮林覩符部落唐大历中置德化州又以潘归国部落置龙武州诏安南节度使绥定之贞元七年始以驩峯二州为都督府驩在

安南限重海与文单占婆接峯统羁縻州十八与蜀岷蛮接

○暹

暹国元成宗朝遣使上金字表朝廷亦遣使至其国以暹与麻里子见旧相讎杀并谕解之大德中来求马帝以金缕衣赐之

○瓜哇

瓜哇在海外视占城益远海行者先至占城而后至其国元初通使至元二十九年以其刺诏使孟右丞之面诏除史弼等平章政事会福

建江西湖广三行省兵征瓜哇十二月自泉州后渚启行三十年至瓜哇之杜并足水陆进军瓜哇主婿上罕必阁耶举国纳降三月一日会军

八节渊会葛郎王来侵瓜哇土罕必阁耶求援分兵屡败其众遂伐葛郎受其王哈只葛当之降上罕必阁耶旋叛去留军拒战伤万户鼐智密

鼎等数人师还得哈只葛当妻子官属百余人及地图户籍所上金字表以进

○马八儿 【俱蓝】

马八儿与俱蓝国为海外诸蕃国纲领元世祖至元闲行中都省索多奉玺书招谕马八儿奉表称藩十六年复遣广东招讨使达鲁噶齐

杨廷璧往招俱蓝得其降表十九年三月俱蓝遣使入贡是时因廷璧招谕遣使来贡者凡十国云

钦定续通志卷六百三十八

●钦定续通志卷六百三十九 四夷传五

四夷传 【五】

两岷蛮【徒莫祇蛮等】 黎州十二蛮 昆明蛮【牂柯蛮等】 东谢

蛮【南谢蛮等】 西南者夷 泸州徼外蛮

黔涪徼外蛮 松外蛮西洱河蛮等 雅州蛮 嵩州六姓蛮 叙州三路

蛮 威州蛮 茂州诸部落 南平獠 永昌

蛮

两岷蛮 【徒莫祇蛮等】

黎州十二蛮

昆明蛮 【牂柯蛮等】

东谢蛮 【南谢蛮等】

西南诸夷

泸州徼外蛮

黔涪徼外蛮

松外蛮 【西洱河蛮】

雅州蛮

嵩州六姓蛮

叙州三路蛮

威州蛮

茂州诸部落

南平獠

永昌蛮

○两岷蛮 【徒莫祇蛮等】

两岷蛮自曲州靖州西南昆川曲轭晋宁喻献安宁距龙和城通谓之西岷皆白蛮自弥鹿升麻二川南至步头则谓之东岷皆乌蛮西岷自云本安邑人七世祖晋南宁太守遭乱王蛮中梁元帝时南宁州刺史徐文盛召诣荆州有岷瓚者据其地延袤二千余里既死子震翫分统其众隋开皇初遣使朝贡命韦世冲以兵戍之置恭州协州昆州未几叛史万岁击之至西洱河滇池震翫惧而入朝文帝诛之诸子没为奴唐高祖即位以其子宏达为昆州刺史奉父丧归而益州刺史段纶遣俞大施诱诸部皆纳款贡方物太宗遣将击西岷开青蛤弄栋为县岷蛮之西有徒莫只蛮俭望蛮贞观二十三年内属以其地为傍望览邱求五州隶郎州都督府白水蛮地与青蛤弄栋接郎州亦隶弄栋西有大勃弄小勃弄二川蛮与黄瓜叶榆西洱河接其众完富无酋长喜相讎怨永徽初大勃弄杨承颠私署将帅冠麻州高宗命左领军将军赵孝祖等破之孝祖上言小勃弄大勃弄常诱弄栋叛请遂西讨诏可孝祖军入斩小勃弄酋长歿盛执大勃弄杨承颠余皆破降之西南夷遂定罢郎州都督更置戎州都督岷宏达既死以岷归王为南宁州都督居石城袭杀东岷首领盖聘及子盖启徙共范川有两岷大鬼主崇道者与弟日进日用居安宁城左闻章仇兼琼开步头路筑安宁城羣蛮震骚共杀筑城使者元宗诏蒙归义讨之归王及崇道兄弟谢罪赦之俄而崇道杀日进及归王归王妻阿妩遣使诣归义求救夫者书闻诏以其子守隅为南宁州都督归义以女妻之又以一女妻崇道子辅朝然崇道守隅相攻讨不置阿妩诉归义为兴师杀崇道及辅朝诸岷稍离弱合罗凤立召守隅并妻归河睽不通中国阿妩自主其部落岁入朝日进等子孙居永昌城乌蛮种复振徙居西岷故地与峯州为邻贞元中置都督府领羁縻州十八乌蛮与南

诏世婚姻其种分七部落曰阿芋路居曲州靖州故地
曰阿猛曰夔山曰暴蛮曰卢鹿蛮二部茗分保竹子岭曰磨弥敛曰勿邓士多牛马无布帛语四译乃通大部落有大鬼主百家则置小鬼主勿
邓地方千里有邛部六姓一白蛮五为乌蛮又有初裹五姓皆乌蛮居邛部台登之闲又有东钦蛮三姓皆白蛮居北谷又有粟蛮二姓雷蛮二
姓梦蛮三姓散处黎嵩戎数州之鄙皆隶勿邓勿邓南七十里有两林部落有十低三姓阿屯三姓亏望三姓隶焉其南有丰琶部落阿诺三姓
隶焉两林地虽陋而诸部推为长号都大鬼主勿邓丰琶两林皆谓之东蛮 【按丰琶宋史作风琶两林邛部风琶皆谓之东蛮别载黎州十
二蛮中所述羁縻州属与此互异今两孝之仍列黎州十二蛮于后】 天宝中皆受封爵
及南诏陷嵩州遂羁属吐蕃贞元中复通款以勿邓大
鬼主苴嵩兼邛部团练使封长川郡公死子苴骠离幼以苴梦衡为大鬼主数为吐蕃侵
猎两林都大鬼主苴那时遣韦皋书乞共攻吐蕃分兵
大破其青海腊城二节度军于北谷诏封苴那时顺政郡王苴梦冲怀化郡王丰琶部落
大鬼主骠傍和义郡王三王皆入朝宴赉加等后苴梦
冲附吐蕃断南诏使路皋以兵声其罪斩之披其族为六部以样弃王之及苴骠离长乃
命为大鬼主

○黎州十二蛮

黎州诸蛮凡十二种曰山后两林蛮邛部蛮风琶蛮保塞蛮部落蛮西箐蛮净浪蛮
白鸞乌蒙蛮阿宗蛮凡风琶两林邛部皆谓之东蛮其
余小蛮分隶焉其酋长皆号都鬼主唐时黎州领羁縻奉上等州二十六开元十七年又
领羁縻夏梁卜贵等州三十一其后酋长复不通后唐
天成闲始来贡宋开宝二年山后两林蛮勿儿来朝三年七月又朝贡八年怀化将军勿
尼等来贡以勿尼为归德将军又以两林蛮大鬼主苏
吠为怀化将军太平兴国二年遣使来贡乞颁正朔诏授勿尼归德大将军勿儿怀化大
将军是冬又遣使贡且贺登极四年勿儿与都鬼主又
遣王子祚遇来贡八年蛮主弟牟昂及王子牟盖副使牟计等来贡诏以牟昂为怀化大
将军牟盖等为归德郎将牟计等并为怀化司戈雍熙
三年勿尼等及其王子李奉恩复来贡淳化元年王子离鱼副使卑都卑谕等来贡诏授
离鱼归德将军卑都保顺郎将卑谕归德司戈卑热等
怀化司戈天禧二年山后两林百蛮都鬼主李阿善遣使贡邛部州蛮亦曰大路蛮亦曰
勿邓居汉越嵩郡会无县地酋长自称百蛮都鬼主开
宝四年黎州定远兵构叛聚鹿角溪都鬼主阿伏令弟卑吠等平之诏以阿伏为归德武
德太平兴国四年首领牟昂诸族鬼主副使离祿等各

以方物来贡雍熙二年都鬼主诺驱来贡诏以诺驱为怀化将军端拱二年遣弟少盖等来贡诏以少盖为归德郎将淳化元年诺驱求互市诏增其直二年复遣子牟昂叔离袜来贡授诺驱怀化大将军少盖怀化将军牟昂归德将军离袜怀化司戈至道三年遣王子阿醉来朝真宗咸平二年遣王子部的来贡五年又遣王子离归等入贡六年诺驱卒子阿遁立景德二年阿遁遣王子将军来贡诏授阿遁安远将军阿遁叔怀化将军阿育为归德将军离归为怀化将军大中祥符元年遣将军赵勿婆等来献会于泰山天圣八年十月邛部州都蛮王黎在遣卑郎离灭等来贡九年三月命黎在为保义将军宝元元年百蛮都王忙海遣将军卑盖等来贡庆历四年邛部州山前山后百蛮都鬼主牟黑遣使贡未几其王咩墨扰边知黎州孙固使其首领苴克杀之熙宁三年苴克遣使来贺登极是年苴克死以其子韦则为怀化校尉大渡河南邛部州都鬼主九年遣使入贡干道元年诏以崖鞮袭兄蒙备怀化校尉都鬼主淳熙元年吐蕃寇西边崖鞮率众掩击诏嘉其功二年两林蛮王弟龙畏及酋长攻邛部州之笼瓮城不克八年崖鞮死其侄墨崖袭职嘉定九年邛部州逼于云南遂服属之风琶蛮咸平初其王曩■〈廿姿〉遣使贡景德三年又遣使贡诏授曩■〈廿姿〉归德将军保塞蛮开宝闲由大渡河来归时时来货其善马绍兴二十七年川秦都大司言汉地民劫杀市马蛮客崖遇等诏慰谕并偿其直部落蛮亦曰三王蛮有刘杨郝三姓世为长袭封王岁禀节度府帛三千匹以诃南诏而南诏亦密赂之觐成都虚实都押衙常倚三王部落求姑息至唐末益甚淳熙七年十月黎州五部落蛮贡马求内附诏许通互市却其所献干道九年十月黎州吐蕃寇边攻虎尚砦诏戍黎州以御之青羌奴儿结为边害者十余年其后制置使留正以计擒之歼其党淳熙十二年赵汝愚代为制置使明年奴儿结弟三开入寇边备完固不能攻走归时虚恨蛮族最强破小路蛮并其地与黎州接壤请通互市不许嘉定元年有弥羌蕃卜者由恶水渡河寇黎州二年复寇黎州八年蕃卜降唐时黎州南路又有廓清道部落主三人婆咸鬼主十人又有阿逼蛮分十四部落曰大龙池曰小龙池曰控曰苴质曰乌披曰苴赁曰鬻策水曰戎列曰婆狄曰石地曰罗公曰洗曰离旻曰里汉黎邛二州东又有凌蛮唐后无闻

○昆明蛮 【牂柯蛮等】

牂蛮西有昆明蛮一曰昆弥以西洱河为境土畝湿宜秔稻俗与突厥同唐武德中朝贡求内属岁与牂柯使偕来龙朔三年比楼等七千户内附总章三年置禄州汤望州咸亨三年昆明十四姓内附析其地为殷州总州敦州

以安辑之其后又置盘麻等四十一州皆以首领为刺史
史昆明东九百里为牂柯国地数千里元和八年上表请尽归牂柯故地开成元年鬼主
阿佩内属会昌中封其别帅为罗殿王世袭爵其后又
封别帅为滇王皆牂柯蛮东距辰州二千四百里南至交州千五百里无城郭土热多雾
两稻粟再熟俗与东谢同首领亦姓谢氏武德三年龙
羽遣使者朝以其地为牂柯拜龙羽刺史封夜郎郡公其北百五十里有别部曰兖州蛮
亦来朝贡以地为兖州开元中牂柯酋长元齐死孙嘉
艺袭官封其后乃以赵氏为酋长二十五年赵君道来朝其裔有赵国珍天宝中有战功
授黔中都督屡败南诏护五溪十余年终工部尚书贞
元中官其酋长至十八年五遣使朝元和初数遣使来或朝正讫开成不绝

○东谢蛮 【南谢蛮等】

西岬之南有东谢蛮居黔州西三百里南距守宫獠西连夷子地方千里宜五谷为
畚田岁一易之众处山巢居汲流以饮有谢氏世为酋
长部落尊畏之唐贞观三年其酋元深入朝以地为应州即拜元深刺史隶黔州都督府
又有南谢首领谢强亦来朝以其地为庄州授强刺史
建中三年大酋长检校蛮州长史资阳郡公宋鼎与诸谢朝贺德宗以其国小不许黔中
观察使王础奏请许三年一朝诏从之元和中辰涂蛮
酋张伯靖叛侵播费二州诏荆南节度使严绶压以大兵招之伯靖率家属诣江陵降授
右威卫翊府中郎将东谢南有西赵蛮东距夷子西属
昆明南西洱河山穴阻深莫知道里户万余俗与东谢同赵氏世为酋长夷子渠帅姓李
氏与西赵皆南蛮别种贞观中皆遣使入朝西赵酋长
赵酋摩内附以其地为明州授酋摩刺史

○西南诸夷

西南诸夷汉牂柯郡地唐末王建据西川遂不通后唐天威二年牂柯清州刺史宋
朝化等来朝其后孟知祥据西川复不朝贡宋干德三
年平孟昶五年知西南夷南宁州蕃落使龙彦韬等来贡诏授彦韬归德将军南宁州刺
史蕃落使又以顺化王武才为怀化将军武才弟若启
为归德司阶武龙州东山罗波源训州鸡平战洞罗母殊石人诸部落王子并为归德司
戈开元二年武才等又来贡以武才为归德将军四年
龙彦韬卒以其子汉瑋袭使八年三十九部顺化王子若发等来贡太平兴国五年夷王
龙琮琚遣其子罗若从并诸州蛮贡方物六年保州刺
史董奇死以其子绍重继之雍熙二年奉化王子以慈等贡方物夷王龙汉璇遣牂柯诸
州酋长来献方物授汉璇归德将军南宁州刺史淳化
元年汉璇遣弟汉兴来朝三年夷王龙汉兴及都统龙汉■（王尧）刺史龙光显龙光

盈及顺化王雨滞等各来贡至道元年龙汉■〈王尧
〉使龙光进率西南牂柯诸蛮来贡诏授汉■〈王尧〉宁远大将军封归化王又以罗
以植为安远大将军龙光盈龙光显并为安化大将军
光进等二十四人并授将军郎将司阶司戈咸平元年龙汉■〈王尧〉遣使龙光腆又
率牂柯诸蛮来贡三年都部署张文黔来贡五年汉■

〈王尧〉又遣牙校率部蛮来贡景德四年西南蛮罗瓮井都指挥使颜士龙等来贡大
中祥符元年江安县夷人为乱诏遣合门祗候侍其旭
招抚旭至蛮人首罪杀牲为誓未几复叛二年诏文思副使孙正辞等为都巡检使入其
境示以兵威皆震伏正辞言夷人安集赦其罪五年晏
州多刚县夷人斗望行牌率众劫掠六年九月诏王怀信为嘉眉戎泸等州水陆都巡检
使合门祗候康训符承训为都同巡检使与转运使寇
瑊合击破之七年正月其酋斗望三路分众来鬪又败乃诣军首服诏抚谕之天圣四年
至皇佑二年龙氏凡四来贡献是年以龙光辨为宁远
军大将军龙光凝龙异岂并为安远大将军龙异鲁为武宁大将军至和中龙以烈龙异
静首领等皆入贡命其首领下九十三人为大将军及
郎将有差嘉佑中以烈复至又有张玉石自品者嘉佑中来贡而鹧州亦遣人来贡命保
州董仲元为本州岛刺史鹧州保州皆西南边也

○泸州徼外蛮

泸州西南徼外古羌夷之地所部十州曰巩曰定曰高曰奉曰涪曰宋曰纳曰晏曰
投附曰长宁皆依山为险善寇掠朝廷置吏领其地之
涪井监以拊御之宋庆历四年四月夷人攻三江砦诏选官捕击既降复入寇三江砦指
使王用等击走之皇佑元年二月夷众复围涪井监诏
知益州田况发旁郡士卒命梓夔路兵马钤辖宋定往援数月乃平嘉佑二年三里村夷
斗还等复谋内寇有黄土坎夷斗盖来告涪井监捕斩
之明年补斗盖长宁州刺史泸州部有涪水夷者羈縻州五圉蛮也实姚州故地庆历初
乌蛮王子得盖居其地请名州以长其部落乃复建姚
州以得盖为刺史得盖死其子窃号罗氏鬼主鬼主死子仆夜袭其号浸弱不能令诸族
乌蛮有二酋领曰晏子曰斧望个恕皆仆夜诸部也浸
强擅劫晏州山外六姓及纳溪二十四姓生夷熙宁七年六姓夷自涪井谋入寇命熊本
经制之山前后长宁等部及武都夷皆内附于是晏子
斧望个恕及仆夜皆愿入贡受王命晏子未及命死以个恕知归来州仆夜知姚州个恕
子乞弟晏子子沙取禄路并为把截将西南夷部巡检
十年罗苟夷犯纳溪砦诏泾原副总管韩存宝击之存宝召乞弟等犄角讨荡五十六村
十三圉蛮乞降愿纳土承赋租元丰元年乞弟率晏州

夷至江安城下责平罗苟之赏以乞弟袭归来州刺史蛮以为畏已益悖慢遂以众围罗个牟放梓夔都监王宣往救之一军皆没四年诏以环庆副总管林广代存宝讨贼乞弟引众遁五年正月次归来州以其地赐罗氏鬼主乞弟寻死于是罗始党斗然斗更等诸酋请依十九姓围结新取生界八姓两江夷族请依七姓团结皆为义军从之其后泸夷不复为患沙取禄路死子鳖弊袭政和五年晏州夷卜漏叛砦将高公老遁招讨使赵适讨平之授鳖弊西南夷界都大巡检

○黔涪徼外蛮

黔州涪州徼外其西南部蛮有龙蕃方蕃张蕃石蕃罗蕃者号五姓蕃宋初常奉职贡受爵命治平四年十二月知静蛮军蕃落使龙异阁等入见诏以异阁为武宁将军熙宁元年有方异■〈王兄〉三年有张汉兴各以方物来献授异■〈王兄〉静蛮军汉兴捍蛮军并节度使六年龙蕃罗蕃方蕃石蕃等朝贡其后比岁来元丰七年西南程蕃乞贡方物依五姓例从之元佑二年西南石蕃石以定等赍表入贡五年八年绍圣四年龙蕃皆贡方物龙于诸姓最大其贡奉尤数元符二年又有牟韦蕃入贡诸蕃部族数十独五姓最着程氏韦氏皆比附五姓故号西南七蕃云

○松外蛮 【西洱河蛮】

松外蛮诸部大者五六百户小者二三百凡数十姓赵杨李董为贵族皆擅山川不能相君长有城郭文字颇知阴阳历数自夜郎滇池以西皆庄蹻之裔以十二月为岁首唐贞观中太宗以右武侯将军梁建方发蜀十二州兵进讨谕降者七十余部署首领蒙和为县令余众感悦西洱河蛮亦曰河蛮道繇郎州走三千里亦遣首领纳款军门二十二年西洱河大首领杨同外东洱河大首领杨敛松外首领蒙羽皆入朝授官秩显庆元年西洱河蛮及显和蛮酋郎昆黎盘四州大首领并入朝贡方物其后茂州西南筑安戎城绝吐蕃通蛮之道先羌为吐蕃乡导攻拔之增兵以守西洱河诸蛮皆臣吐蕃开元中首领始入朝授刺史会南诏蒙归义拔大和城乃北徙更羁制于浪穹诏浪穹诏已破又徙云南柘城

○雅州蛮

雅州山野川路蛮者亦西南夷别种有通吐蕃道三曰夏阳曰夔松曰始阳皆诸蛮错居凡部落四十六距州三百余里之外有百坡当品严城中川钳矣昌逼钳井七部落四百余里之外有罗岩当马三井束锋名耶钳恭画重罗林笼羊林波林烧龙逢索古敢川惊川祸眉不烛

十七部落五百余里之外有诺祚三恭布岚欠马论川让川远南卑卢夔龙曜川金川东嘉梁西嘉梁十三部落六百余里之外有椎梅作重祸林金林逻蓬五部落唐以来皆羁縻州也以首领袭刺史宋太平兴国三年首领马令膜等来贡悉授官遣之绍圣二年以碉门砦蛮畿王元寿怀化司戈

○嵩州六姓蛮

嵩州新安城傍有六姓蛮曰蒙蛮夷蛮讹蛮狼蛮勿邓白蛮戎州管内有驯骋浪三州大鬼主董嘉庆累世内附以忠谨称封归义郡王唐贞元中狼蛮亦请内附补首领狼沙为刺史西川节度使韦皋檄嘉庆兼押狼蛮又有鲁望等部落徙居戎州马鞍山其北又有浪稽蛮罗哥谷蛮东有婆狄蛮乌皮蛮南有离东蛮锅铨蛮西有磨些蛮与南诏越析相姻娅自浪稽以下古滇王哀牢杂种其地与吐蕃接亦有姐羌古白马氏之裔剑山当吐蕃大路属石门柳强二镇置戍守捉以招讨使领五部落曰弥羌曰钵羌曰胡丛其余东钦磨些也又有夷望鼓路西望安乐汤谷佛蛮亏野阿酰阿鸮柳蛮林井阿异十二鬼主皆隶嵩州又有奉国直伽十一部落春秋吊赏于嵩州然挟吐蕃为轻重又有显养东鲁诸蛮永徽三年与胡丛皆叛高宗以右骑卫将军曹继叔为嵩州道行军总管攻拔之

○叙州三路蛮

叙州三路蛮西北曰董蛮正西曰石门郭东南曰南广蛮董蛮酋董氏宋初有董春惜者贡马自称马湖路三十七部落都王子其地北近犍为之沐川赖因砦砦阨蛮除熙宁绍圣中蛮数寇抄尝徙赖因监押驻荣丁砦而以县吏控截政和五年始改差监押充知砦事蛮寇如故南广蛮大观三年以地内属诏建滋纯祥三州后皆废石门部与临洮土羌接马湖南广皆畏之盖即浪稽鲁望诸部也

○威州蛮

威州保霸蛮者唐保霸二州也天宝中所置后陷没酋董氏世有其地保州有董仲元霸州有董永锡者宋嘉佑及熙宁中皆尝请命于朝政和三年开拓置官吏以董舜咨保州地为祺州董彦博霸州地为亨州授舜咨刺史彦博团练使舜咨寻迁观察使彦博留后遂为节度使后改为砦

○茂州诸部落

茂州诸部落盖涂静当直时飞宕恭等九州岛蛮也蛮推一人为州将而常诣茂州受约束茂州宋初无城隍蛮乘夜入寇熙宁八年筑城蛮以为侵其地率众奄至知州事范白常击走之政和五年直州将王永寿汤延俊董承有

等各以地内属诏以永寿地建寿宁军延俊承有地置
延宁军未几皆废七年涂静时飞等州蛮复反茂州诏以孙羲叟节制绵茂军及中军将
种友直等破之其酋旺烈等降宣和五年宕恭直诸部
落入寇六年涂静蛮复犯茂州

○南平獠

南平獠东距智州南属渝州西接南州北涪州多瘴疠山有毒草沙虱蝮蛇其王姓
朱氏号剑荔王唐贞观三年遣使内款以其地隶渝州
有宁氏世为南平渠帅武德初宁长真以宁越郁林之地降高祖授长真钦州都督其族
人合浦太守宁宣亦遣使来降未报而卒以其子纯为
廉州刺史族人道明为南越州刺史六年长真来贡献昆州刺史沈逊融州刺史欧阳世
普像州刺史秦元览亦来献高祖以道远劳人皆不受
道明与高州首领冯暄谈殿据南越州反攻姜州宁纯以兵援之八年长真陷封山县昌
州刺史庞孝恭掎击暄等走之明年道明为州人所杀
未几长真死子据袭刺史冯暄谈殿阻兵相掠太宗遣散骑常侍韦叔谐等持节宣谕暄
等与溪洞首领皆降南方遂定巴州山獠王多馨叛梁
州都督庞玉梟其首又破余党符阳白石二县獠其后眉州獠反益州行台郭行方大破
之未几又破洪雅二州獠是岁益州獠亦反贞观七年
东西玉铜獠反以右屯卫大将军张士贵为龚州道行军总管平之十二年巫州獠叛夔
州都督齐善行击破之钧州獠叛桂州都督张宝德讨
平之明州山獠又叛交州都督李道年击走之是岁巴洋集壁四州山獠叛攻巴州遣右
武侯将军上官怀仁破之十四年罗窦诸獠叛以广州
都督党仁宏为窦州道行军总管击之太宗再伐高丽雅邛眉三州獠相率叛诏发陇右
峡兵二万以茂州都督张士贵为雅州道行军总管与
右卫将军梁建方平之高宗初琰州獠叛梓州都督谢万岁等讨之万岁与谢法兴入洞
招慰遇害显庆三年罗窦生獠酋领多胡桑率众内附
上元未纳州獠叛寇故茂都掌二县诏黔州都督发兵击之大历二年桂州山獠叛贞元
中嘉州绥山县婆笼川生獠首领甫积兄弟诱生蛮为
乱西州节度使韦皋斩之招其酋领勇于等出降獠自是不扰境戎泸闲有葛獠大中末
叛立酋长始艾为王刺史刘成师诱降其党斩首领七
十余人余众遁至东川节度使柳仲郢谕降之宋治平中熟夷李光吉梁秀等三族据渝
州南平旧地数以其徒伪为生獠劫边民官军追捕辄
遁去熙宁三年转运使孙固等谕以祸福因进兵平荡三族以其地赋民以宾化砦为隆
化县隶涪州建荣懿扶欢两砦其外铜佛坝者隶渝州
南川县朝廷因补其士人王才进充巡检委之控扼才进死部族无所统数出盗边命熊

本讨平之建为南平军以渝州南川涪州隆化隶焉

○永昌蛮

姚州境有永昌蛮古永昌郡地唐咸亨五年叛诏梁积寿为姚州道行军总管讨之武后长寿中大首领董期内属其西有扑子蛮望蛮及黑齿金齿银齿绣而绣脚雕题穿鼻长鬃栋锋羣蛮种类多不可记

钦定续通志卷六百三十九

●钦定续通志卷六百四十 四夷传六

四夷传 【六】

南诏 骠【迦罗婆提等】 缅甸 西南溪峒诸蛮

南丹州蛮 抚水州蛮 西原蛮

广源州蛮【甲峒蛮】 黎峒 环州蛮 室利佛逝 名蔑【单单罗越】 乌斯藏

南诏

骠【迦罗婆提等】

缅甸

西南溪峒诸蛮

南丹州蛮

抚水州蛮

西原蛮

广源州蛮【甲峒蛮】

黎峒

环州蛮

室利佛逝

名蔑【单单 罗越】

乌斯藏

○南诏

南诏或曰鹤拓曰龙尾曰苴咩曰阳剑本哀牢夷后乌蛮别种也称王为诏其先有六诏曰蒙嵩诏越析诏浪穹诏遼睢诏施浪诏蒙舍诏兵埒不能相君诸葛亮讨定之蒙舍称南诏取永昌姚州闲铁桥之南东距岷东南属交趾西摩伽陀西北与吐蕃接南女王西南骠北抵益州东北际黔巫都羊苴咩城别都曰善阐府其地祁鲜山之西多瘴地平草冬不枯自曲靖州至滇池人水耕食蚕以柘大和祁鲜而西人不蚕剖波罗树实状若絮纽缕而幅之昆明城诸并皆产盐长川诸山往往有金丽水多金麸越睢西产善马俗无贵贱皆耕不繇役王蒙氏父子以名

相属自舍厖以来始有谱久可考舍厖生独遯亦曰细奴遯 【按旧唐书独遯作伽独庞以细水遯为伽独庞子未详孰是】 唐高宗时遣使朝武后时细奴遯子遯盛炎入朝传子炎合及弟盛遯皮生皮遯合开元时授特进封台登郡王诏赐皮遯合名归义时五诏微归义独强乃厚利啖剑南节度使王昱求合六诏为一制可归义已并羣蛮遂破吐蕃寢骄大又以破洱蛮功册云南王徙治大和城天宝七载归义死合罗凤袭初炎合未有子以合罗凤为嗣及生子还其宗而名承合遂不改鲜于仲通领剑南节度使卞胤少方略故事南诏尝与妻子谒都督过云南太守张虔陀私之多所求巧合罗凤不应虔陀诟靳之且阴表其罪由是反攻虔陀杀之取姚州及小夷州凡三十二明年仲通自将出戎嵩州分二道进次曲靖合罗凤遣使谢罪辞不逊仲通怒囚使者进薄白崖城大败引还合罗凤遂北臣吐蕃吐蕃以为弟其俗谓弟钟故称赞普钟号东帝杨国忠以剑南节度当国乃调天下兵使侍御史李宓讨之宓败于大和城死者十八会安禄山反合罗凤因之取嵩州会同军据清溪关以破越析梟于赠西而降寻传骠诸国寻传蛮者俗无丝纊跣履榛棘射豪猪生食之其西有裸蛮亦曰野蛮漫散山中大历十四年合罗凤立其孙异牟寻以嗣异牟寻有智数善抚众略知书既立悉众入寇与吐蕃并进陷城聚诏发禁卫及幽州军以援东川与山南兵合大败之异牟寻惧徙苴咩城更受吐蕃封为日东王然颇苦其征索贞元四年节度使韦皋遣谍遗书异牟寻吐蕃疑之因责其质子异牟寻愈怒后五年乃遣使诣成都愿竭诚归款天子皋护送使者京师德宗赐以诏书皋令其属崔佐时至羊苴咩城宣天子意异牟寻使其子合劝与佐时盟点苍山乃发兵攻吐蕃使者杀之刻金契以献遣曹长随佐时入朝异牟寻自将数万破吐蕃于神川俘其五王遣弟凑罗栋清平官尹仇宽等入献地图方物请复号南诏赐赉有加拜仇宽左散骑常侍封高溪郡王明年夏六月册毕牟寻为南诏王使还复遣清平官尹辅酋等来谢献方物异牟寻攻吐蕃复取昆明城以实盐池又破施蛮顺蛮并虏其王置白崖城因定磨些蛮隶昆山西畔故地破茫蛮掠弄栋蛮汉裳蛮以实云南十五年异牟寻谋击吐蕃吐蕃亦谋袭之异牟寻与皋相闻皋命将引弩士三千往助又以别将率数万人屯黎州及嵩州为犄角吐蕃守城将多降会天寒遂引去十七年春又破吐蕃于是康黑衣大食等兵及吐蕃大酋皆降又合鬼主破吐蕃于泸西吐蕃君长乃欲悉师出西山剑山收嵩州以绝南诏皋上言京右诸屯宜明斥候蚤敛田邠陇焚莱以待之异牟寻谓其声取嵩州实窥云南请皋将督军进苴咩时吐蕃兵三

万攻盐州诏皋深钞敌鄙分其势俄闻破麟州皋督诸将分道出与南诏会于是回鹘太原邠宁泾原军猎其北剑南东川山南兵震其东风翔军当其西而蜀南诏兵深入克城七焚堡百五十所斩首万级获铠械十五万围昆明维州不能克乃班师是役也南诏攻其腹心俘获最多遣中人奖慰异牟寻比年献方物优礼之元和三年异牟寻死子寻合劝【旧书作苴蒙阁】立改赐元和印章明年死子劝龙晟【旧书作龙蒙盛】立十一年为弄栋节度王嵯巛所杀立其弟劝利长庆三年始赐印是岁死弟丰佑立【按唐书蒙氏父子以名相属至丰佑慕中国不肯连父名】穆宗使京兆少尹韦宙规持节临册丰佑差使入谢太和三年嵯巛悉众掩邛戎嵩三州陷之入成都掠子女工技数万引而南南诏自是工文织与中国埒明年上表请罪七年使者来朝开成会昌闲再至宣宗崩使者告哀时丰佑亦死坦绰酋龙自立恚朝廷不吊恤以草具进使者而遣遂僭称帝建元建极自号大礼国懿宗以其名近玄宗嫌讳绝朝贡乃陷播州咸通元年攻安南武州明年攻邕管杜惊当国请遣使示恩信并诏驃信以名嫌册命未可举必易名乃得封乃命左司郎中孟穆持节往会嵩州陷穆不行自是频年入寇攻交州破安南陷犍为嘉州黎州围邛州击雅州进攻成都先是经略使李琢蔡京等前后奏罢戍兵李师望又请析邛蜀嘉眉黎雅嵩七州为定边军建节度治邛州去成都才五舍嵩州去邛乃千里缓急不相副又杀其使杨酋庆等而窦滂卢耽等继为帅皆非将才以故蜀罹害最酷讫懿宗世无宁岁十四年复寇蜀陷黎州遂攻雅州击定边军成都大震坦绰遣使者遗书节度使牛丛欲假道入朝请憩蜀王故殿丛还书责之坦绰至新津而还寇黔中会僖宗立遣金吾将军韩重持节往使俄攻黎州刺史黄景复击走之干符元年劫略嵩雅闲破黎州入邛峡关掠成都诏高骈领西川节度使逐蛮至大度河斩酋长五十收邛峡关复取黎州南诏遁还遣使诣骈结好而踵出兵寇边骈斩其使宣言将百万众至龙尾城问罪先是天子数遣使至其境酋龙不拜骈以其俗尚浮屠法遣浮屠景仙摄使往酋龙与其下迎谒且拜乃盟而还遣官质子入朝乞盟骈结吐蕃为闲筑戎州马湖沐源川大度河三城列屯拒险科壮卒为平夷军南诏气夺酋龙恚发疽死伪谥景庄皇帝子法嗣改元贞明承智大同自号大封人法年少好畋猎国事颡决大臣干符四年遣使诣邕州节度使辛说请修好诏使答报未几寇西川骈奏请与和亲右谏议大夫柳韬等谏遂寝蛮使再入朝议和亲而骈徙荆南持前请不置帝久未决南诏袭安南陷之都护曾袞奔邕府戍兵溃会西川节度使陈敬瑄申和亲

议时卢携辅政与豆卢瑑皆厚骈乃谲说帝以宗室女为安化长公主许婚法遣宰相赵隆眉杨奇混段义宗来迎高骈上言三人皆南诏心腹宜止而鸩之蛮可图也帝从之隆眉等皆死中和元年复遣使来迎后二年又遣使来会黄巢平帝东还乃归其使法死伪谥圣明文武皇帝子舜化立建元中兴遣使款黎州修好昭宗不答后中国乱不复通先是有时傍矣川罗识二族通号入诏时傍为合罗凤徙置白崖城后与矣川罗识谋诣神川都督求自立为诏为合罗所杀矣川罗识奔神川都督送之罗些城此外五诏皆为南诏所灭唯千旁罗颠及矣川罗识子孙在吐蕃晋天福闲南诏段思平自立号大理国宋干德三年王全斌平蜀欲遂取滇进滇池图太祖鉴唐之祸以斧画大度河曰此外非吾有也由是不通中国熙宁九年大理国遣使入贡自后不常来亦不领于鸿臚政和五年广州观察使黄璘奏南诏大理国欲求入贡七年遣使来贡诏以其王段和誉为光禄大夫检校司空云南节度使上柱国大理国王朝廷以为璘功已知桂州周穉劾璘诈冒得罪自是大理复不通中国闲一至黎州互市绍兴三年十月广西奏大理国求入贡及售马诏却之元宪宗二年命世祖征大理破之以刘时中为宣抚使与段氏同安辑大理诸蛮悉平

○骠 【迦罗婆提等】

骠古朱波地自号突罗朱阁婆国人曰徒里拙在永昌南二千里东距真腊西接田天竺西南堕和罗南属海北南诏地长三千里广五千里东北袤长属羊苴咩城凡属国十八曰迦罗婆提曰摩礼乌特曰迦黎迦曰半地曰弥臣曰坤朗曰偈奴曰罗聿曰佛代曰渠论曰婆黎曰偈陀曰多归曰摩曳余即舍卫瞻婆阁婆也凡镇城九部落二百九十八繇弥臣至坤朗又有小昆仑部俗与弥臣同又有大昆仑国川原大于弥臣繇昆仑小王所居半日行至磨地勃柵海行五月至佛代国有江支流三百六十有川名思利毗离芮土多异香北有市诸国估舶所凑越海即阁婆也十五日行踰二大山一曰正迷一曰射鞞有国俗与佛代同经多茸补逻川至阁婆八日行至婆贿伽卢国皆服属于骠骠王姓困没长名摩罗惹其相名摩诃思那青甓为圆城有十二门四隅作浮图其俗明天文喜佛法有百寺民七岁祝发止寺至二十不达其法复为民唐时南诏兵强与骠地接常羁制之贞元中骠王雍羌闻南诏归唐有内附心异牟寻遣使诣剑南西川节度使韦皋请献夷中歌曲且令骠国进乐人于是皋作南诏奉圣乐雍羌亦遗弟舒难陀献其国乐上古八音皆以本漆代之用金为簧无匏音惟骠得古制其乐五译而至德宗授舒

难陀太仆卿遣还太和六年南诏掠其民三千徙之柘东

○缅甸

缅甸亦古朱波地与骠异种而同类宋宁宗时尝进白象元世祖即位屡遣使招谕不降至元二十年诏宗王桑阿克达尔等往征之破其江头城以兵守其地遣使持地图奏上二十四年缅平成宗大德元年诏封的立普哇拿阿迪提牙为缅王赐银印其子合八的为缅世子赐虎符以其奉表入朝也四年缅王为其弟阿散哥也等所杀其子窟麻刺哥撒八逃诣京师即封为王命将率师往讨八月缅国阿散吉牙等赴阙自言杀主之罪乃罢兵

○西南溪峒诸蛮

西南溪峒诸蛮皆盘瓠种唐季酋长皆自署刺史马希范据湖南蛮獠保聚依山阻江殆十余万至周行逢时数出寇边宋太祖下荆湖思通其地有辰州獠秦再雄者武健多谋蛮党服之召至阙下即擢为其州刺史再雄誓死报练士兵三千人选亲校二十人分使诸蛮传朝廷意各得降表以闻太祖大喜改辰州团练使其后溪锦奖珍懿敛晃富元费福古施各州蛮酋皆遣使入贡或来朝并以为其州刺史闲亦扰边初北江蛮酋最大者彭氏世有溪州溪有三曰上中下溪又有龙赐天赐忠顺保静感化永顺及懿安远新给富来宁南顺高等州总二十州皆置刺史而以下溪州刺史为连率十九州岛隶焉州将承袭下溪州刺史率羣酋议当立者具州名移辰州为保证申钤辖司以闻乃赐敕告印符彭氏自允殊文勇儒猛相继为下溪州刺史天圣三年儒猛攻杀知中彭州彭文馆五年儒猛死其子仕端袭明道初仕端死复命其弟仕羲为刺史仕羲子师宝景佑中知忠顺州庆历四年以罪绝其奉贡皇佑二年始以师宝知上溪州朝贡如故既而师宝妻为仕羲取去至和二年师宝举族趋辰州告其父之恶知辰州宋守信等率兵讨之仕羲遁入他峒自是蛮獠寇边吏不能制嘉佑二年仕羲就降岁奉职贡然黠鹜数盗边熙宁三年为其子师彩所弑其兄师晏攻杀之纳誓表于朝乃命师晏袭州事五年复以马皮白峒地来献进为下溪州刺史章惇经制南北江湖北提点刑狱李平招纳师晏所属州峒蛮各以地归版籍师晏遂降诏修筑下溪州城并置砦于茶滩南岸城名会溪砦名黔安戍以兵隶辰州出租赋如汉民遣师晏诣阙授礼宾副使京东州都督元佑三年知保顺州彭儒武等各来进奉初熙宁中以章惇察访湖北经制蛮事而南江舒氏北江彭氏梅山苏氏诚州杨氏相继纳土勦立城砦使比内地为王民北江彭氏已见前南江诸蛮自辰州达长沙邵阳各有溪峒曰叙

曰峽曰中勝曰元舒氏居之曰獎曰錦曰懿曰晃田氏居之曰富曰鶴曰保順曰天賜曰古何氏居之舒氏則德郭德言君強光銀田氏則處達
漢琮漢希漢能漢棹保金向氏則通漢光普行猛永豐永晤皆受朝命南江諸蠻十六州之地惟富峽叙僅有千戶余不滿百熙寧六年富州向晤來歸順光銀光秀等亦降獨田氏有元猛者頗桀驁章惇進兵討之南江州峒悉平置沅州尋又置誠州元佑初廢誠州為渠陽軍時諸蠻復叛朝廷方務休息并免追討諸路所開道路剗置堡砦并廢五溪郡縣棄而不問崇寧后復議開邊于是安化上三州及思廣諸峒蠻願納土輸貢賦又令廣西招納左右江四百五十餘峒宣和中悉廢所置初郡其餘諸蠻獠干興以來或叛或服其類不十慶曆三年桂陽監蠻獠內寇詔發兵擊之蠻獠居山谷閑其山自衡州常寧縣屬桂陽郴連賀韶四州環千餘里不事賦役謂之獠人時蠻勢方熾降敕書委知潭州劉沆招諭沆發兵臨之以敕書從事降二千餘人錄其首領鄧文志黃文晟黃士元皆為三班奉職時四年冬也五年二月余黨唐和等復內寇沆檄楊畋等八路入討覆其巢穴然唐和等猶未平是冬蠻復入寇詔以劉夔代沆為安撫使大發兵討之其眾遁入郴州黃莽山由趙峒轉寇英韶州依山自保七年唐和遣其子執要領詣官自言愿貸糧米居所保峒中詔補唐和等五人峒主并授階官至冬其眾悉降嘉佑二年羅城峒蠻寇澧州發兵擊走之三年以施州蠻向永勝所領州為安定州五年以邵州蠻楊光倩知徽州紹興四年歸明保靜南渭永順三州彭儒武等遣人持表及方物赴行在九年宜章峒民駱科作亂寇郴道連桂陽諸州縣詔發兵討之獲駱科余賞據藍山寇平陽縣江西兵馬都監程師回討平之十年承信郎琴州溪峒楊進禹等率旅歸疆土來獻后屢入貢十二年詔以施州南砦路夷人向再健襲父思迂知懿州事干道元年宜章峒賊李全陷郴州焚桂陽軍世忠峒李昂霄率壯丁御賊民恃以安湖南提舉常平鄭丙討平之昂霄以功補承節郎管轄衡州常寧縣溪峒三年靖州界獠人姚明教等作亂詔荆鄂駐札明椿會屯戍兵合擊之四年田彥古死子忠佐襲知溪峒安化州六年盧陽西據獠楊溪朝寇邊詔知沅州叶行招隆之嘉定元年郴州黑風峒獠人羅世傳寇邊知隆興趙希擇知潭州史彌堅共招降之二年李元砺羅孟二寇江西攻破龍泉縣命工部侍郎王居安知豫章擒獲之溪峒略平

○南丹州蠻

南丹州蠻亦溪峒別種與宜州及西南夷接壤朱開寶七年酋帥莫洪■〈燕上日下〉遣使奉表求內附后屢來貢雍熙四年洪■〈燕

上日下〉族人知宝隆镇莫淮诱羣蛮为寇诏发诸州兵进讨兵未至悉遁归淳化元年洪■〈燕上日下〉卒弟洪皓袭称刺史遣其子淮通来贡景德二年洪皓死其子淮勅袭父任俄为弟淮迪所攻帅属来奔诏宜州赐闲田资给之景佑三年有淮戟者举族来归命为湖南州团练副使后淮迪老自言愿传其子世渐至和元年命世渐权发遣州事世渐死嘉佑末命其子公帐袭之淮迪子世忍攻杀公帐夺其地自首请于朝治干三年遂命为刺史熙宁二年猺贼杀人世忍执以献授检校礼部尚书元丰三年入贡六年迁检校户部尚书世忍死子公佞袭大观元年广西经略使王祖道言公佞就擒以其地为观州延德军绍兴三年公佞弟公晟攻围观州用刘彦适言以公晟知南丹州兼溪峒都巡检使提举盗贼公事二十四年公晟始入贡率诸蛮来归以延沈袭公晟职使持节南丹州诸军事南丹州刺史二十五年延沈进补团练防御二使三十二年为诸蛮所逐归死省地众推延廩袭职隆兴二年延廩复为诸蛮所图携家归朝经略司瘿以延甚袭职淳熙元年为永乐州所攻广西帅臣遣将领谕和之十四年经略司奏以延荫袭职嘉泰五年延荫子光熙袭职知南丹州事

○抚水州蛮

抚水州在宜州南有县四曰抚水京水多逢古劳唐隶黔南其酋皆蒙姓有上中下三房及北遐一镇宋雍熙中数寇边诏书招安补其酋蒙令地殿直蒙令札奉职咸平中又数为寇止令边臣驱逐出境其党狡猾者凡三十余人宜州守将擒送阙下诏释其罪勛遣之逾年酋长蒙顶等诣阙累遣使来贡大中祥符六年首领指挥使蒙但挈族来归徙桂州九年寇宜融州界会曹克明为宜融等州都巡检击破之焚其庐室积聚窜入山谷乃晓谕恩信许以改过酋帅蒙承贵等诣军自首闻诏旨赦皆感悦歃血誓诏以抚水州为安化州抚水县为归仁县京水县为长宁县自是闲岁朝贡宝元元年复寇融宜州发郡澧潭三州戍兵往击踰年乃平庆历中甫入贡至和二年复至诏以知州蒙全会为三班奉职又以监州姚全料为借职嘉佑六年又贡熙宁初土人罗世念等为乱五年攻德谨砦袭将官费万杀之诏发在京骁骑及江南福建兵以听师朝明年世念等与诸蛮峒首领降以世念为内殿承制崇宁二年其酋蒙光有复为寇经略司遣将击却之大观二年遂以三州一镇来上至和后又有融州属蛮大邱峒首领杨光朝内附又有杨克端等来归皆纳之绍兴三年安化蛮蒙全剑等劫普议砦广西帅臣遣县砦将佐讨平之四年广南东西路宣谕明橐请废平观二州从之干道六年诏补蒙泽进武副尉以其

父蒙明为宜州蛮莫才都所害也淳熙十年冬安化蛮突入内地为乱十一年安化蛮蒙光渐率众抄掠广西路铃辖沙世坚平之十二年诏以杨世俊袭父进通职补承信郎庆元四年宜州蛮蒙峒袁康等寇内地斂官盐为乱广西帅司调官兵招降之

○西原蛮

西原蛮居广容之南邕桂之西有宁氏者相承为豪又有黄氏居黄橙洞其隶也其地西接南诏唐天宝初黄氏强与韦氏周氏依氏相唇齿为寇害据十余州韦氏周氏取下黄氏攻之逐于海演至德初首领黄干曜真崇郁与陆州武阳朱兰洞蛮皆叛推武承斐韦敬简为帅僭号中越王干元初遣中使慰晓诸首领赐诏书赦其罪约降于是西原环古等州首领五百余人请出兵讨承斐等斩黄干曜真崇郁等七人承斐等以余众降尽释之其种落张侯夏永与夷獠梁崇率覃问及西原酋长吴功曹复合兵内寇陷道州桂管经略使邢济击平之执吴功曹等余众复围道州进攻永昌陷邵州湖南团练使辛京杲贪暴武冈戍将王国良叛建中元年城溱州以断西原国良乃降贞元十年黄洞首领黄少卿攻邕管陷钦横浔贵四州少卿子昌沔趨勇前后陷十三州诏唐州刺史隐旻为容管招讨经略使皆破之侵地悉复元和初邕州擒其别帅黄承庆明年少卿等归款拜归顺州刺史弟少高为有州刺史未几复叛又有黄少度黄昌驩二部陷宝峦二州据之十一年攻钦横二州邕管经略使韦悦破足之取宾峦二州是岁复屠岩州自是邕容两道杀伤疾疫死者十八穆宗时黄贼更攻邕州陷江江镇攻钦州陷千金镇邕州刺史崔结击破之明年又寇钦州是岁黄昌瓘遣其党陈少奇等请降敬宗纳之太和中经略使董昌龄遣子兰讨平峒穴夷其种党诸蛮畏服十八州岁输贡赋其后依洞最强结南诏为助懿宗与南诏约和二洞数构败之邕管节度使辛说以从事徐云虔使南诏结和賫美贷啖二洞首领仅得罢兵

○广源州蛮 【甲峒蛮】

广源州蛮在邕州西南郁江之源地峭绝深阻其先韦氏黄氏周氏依氏为首领互相劫掠唐邕管经略使徐申厚抚之黄氏纳质而十三部二十九州岛之蛮皆定自交址据有安南而广源虽号邕管羁縻州实服役交址宋时有依全福者知儂犹州为交址所执甚妻阿依嫁商人生子智高智高杀其父因冒依姓与其母据儂犹州建国号大历交址攻拔儂犹州执智高释其罪使知广源州又以雷火频婆四洞及思浪州附益之居四年内怨交址袭据安德州僭称南天国皇佑元年寇邕州明年交址讨之不克

遂求内属廷议拒之智高既不得请又与交址为仇且擅山泽之利招纳亡命谋入寇四年四月攻破横山砦遂破邕州僭号仁惠皇帝破横贵龚浔藤梧封康端九州岛进围广州五十七日解去又攻贺州不克九月破昭州十月破宾州复据邕州十二月败陈曙于金城驿仁宗命狄青为宣抚使五年正月讨败之智高趋邕州夜焚城遁智高母阿侬收残众复欲入寇至和初余靖督部吏掩袭之获阿侬及智高弟智光子继宗继封檻至京师悉弃市侬氏又有宗旦者知雷火洞嘉佑二年尝入寇知桂州萧固招之内属以为忠武将军七年以宗旦知顺安州治平中宗旦与交址李日尊刘纪有隙畏偪知桂州陆诜因使人说之弃其州内徙命为右千牛卫将军又有甲峒蛮者役属交址闲出寇邕州景佑三年尝掠思陵州嘉佑五年合交址门州等蛮复为寇诏知桂州萧固等追讨又诏安抚使余靖击之苏茂州蛮亦近邕州至和嘉佑中皆尝扰边

○黎峒

黎峒唐故琼管之地在大海南距雷州泛海一旦而至其地有黎母山俗呼山岭为黎居其闲者号黎人儋崖万安皆与黎为境其服属州县者为熟黎居山峒者为生黎时出与郡人互市宋至和初有黎人符护者尝犯边执琼崖州巡检慕容允则后以军士五十六人与允则来归允则道死诏贷军士罪干道六年黎人王用休为乱权万安军事同主管本路巡检孙滋等招降之九年八月乐昌县黎贼为乱黎人王日存等招降之以功借补承节郎淳熙元年诏日存子孙许袭职四年冬万安军王利学寇省地八年六月诏三十六峒都统领王氏女袭封宜人初王氏居化外累世立功边陲皆受封爵绍兴闲琼山民许益为乱王母黄抚谕诸峒无敢从乱者以功封宜人至是以其女袭封十二年乐会县白沙峒黎人王邦佐等为寇保义郎陈升之抚降之十六年诏以大宁砦黄弼补承信郎弹压本界黎峒弼宜人黄侄也嘉定九年五月诏王氏女吴袭封领三十六峒

○环州蛮

环州蛮区氏州隶宜州羁縻领思恩都毫二县有区希范者思恩人也宋景佑五年与其叔区正辞应募从官军讨安化州蛮自以有功不录皆觖望寻遁归率其族人推白崖山酋蒙赶为帝及荔波峒蛮为乱康历四年正月破环州又破带溪砦下镇宁州及普义砦明年转运使杜杞大引兵至环州擒之余党悉平镇宁州亦隶宜州景佑三年蛮酋莫陵等内寇遣西京作坊使郭志高等往讨未至陵等诣桂宜州巡检李仲政请降是岁高宝州状獠陈友明等亦寇海上本路会兵击之溃去

○室利佛逝

室利佛逝一曰尸利佛誓遇军徒弄山二千里地东西千里南北四千里而远有城十四以二国分总西曰郎婆露斯咸亨至开元闲数遣使朝为边吏侵掠有诏广州慰抚又献侏儒僧只女歌舞官以其国王为左威卫大将军后遣子入献诏封宾义王授右金吾卫大将军遣还

○名蔑 【单单 罗越】

名蔑东接真陀桓西但游南属海北波刺有州三十以十二月为岁首王号斯多题龙朔初来贡单单在振州东南多罗磨之西亦有州县干封总章时献方物罗越北距海五千里西南哥谷罗商贾往来所凑集俗与堕和罗钵底同岁乘舶至广州州必以闻

○乌斯藏

乌斯藏在云南西徼外其地多僧无城郭羣君大土台上不食肉娶妻无刑罚亦无兵革鲜疾病佛书甚多其土台外僧有食肉娶妻者元世祖尊帕克斯巴为大宝法王既没锡号大元帝师自是其徒嗣者咸称帝师
钦定续通志卷六百四十